

परमप्रभु यावे आ लोव्र

**Sunwar Bible**

2011



परमप्रभु यावे आ लोव  
**Sunwar Bible**

This Bible is copyrighted by Wycliffe Bible Translators (Wycliffe.org) and is printed with permission by the Digital Bible Society (dbs.org) for non-commercial use.

This Bible is available for free download in a variety of digital formats at [dbs.org/bibles](http://dbs.org/bibles).

उत्पत्ती.....	4	नहुम .....	537
प्रस्थान .....	36	हबकुक.....	539
लेवी.....	65	सेफन्याह.....	541
गन्ती.....	85	हागौ .....	543
ब्यवस्था .....	112	जकरिया .....	545
यहोसु.....	136	मलाकी .....	551
न्यायाधीस .....	152	मत्ती.....	553
रूथ .....	168	मर्कूस.....	577
१ सामुएल.....	171	लूका .....	592
२ सामुएल.....	192	यूहन्ना .....	618
१ राजा .....	209	प्रेरित.....	637
२ राजा .....	230	रोमी .....	662
१ इतिहास.....	251	१ कोरिन्थी.....	673
२ इतिहास.....	272	२ कोरिन्थी.....	684
एज्रा .....	296	गलाती.....	691
नेहेम्याह.....	303	एफिसी .....	695
एस्तर .....	313	फिलिप्पी .....	699
अय्युब .....	318	कलस्सी .....	702
भजन संग्रह .....	335	१ थिस्सलोनिकी.....	705
हितोपदेस.....	380	२ थिस्सलोनिकी.....	708
उपदेसक.....	394	१ तिमोथी.....	710
ठेयब कुम्सो .....	399	२ तिमोथी.....	714
यसैया.....	402	तीतस.....	717
येरमीया .....	434	फिलेमोन.....	719
बिलाप.....	470	हिब्रू.....	720
इजीकीएल .....	474	याकूब .....	728
दानीएल.....	506	१ पत्रुस.....	731
होसे.....	516	२ पत्रुस.....	735
योएल.....	522	१ यूहन्ना .....	737
आमोस.....	525	२ यूहन्ना .....	741
ओबदिया .....	530	३ यूहन्ना .....	742
योना .....	531	यहूदा.....	743
मीका .....	533	प्रकाश .....	745

# उत्पत्ती

यहूदी आन ब्रेक्ब मुर नु थमा सुइक्ब आन गुम्तीकेमी मेको किताब ब्रेक्ब मोसा बाक्ब, देंनीम। येसु ख्रीस्तमी यो मोसा आ ब्रेक्बो आ पर्बम लोत्र पशो बाक्त्।

एको किताब परमप्रभु यावेम नेल्ल सेला रे योसेफ आ बेक्ची ना सम्म डा लोत्र बाक्ब।

उत्पत्ती किताब आ शँशो

१. परमप्रभु यावे रागी सेल्ब बाक्ब  
परमप्रभु यावे मुर कली सेल्ब बाक्ब
२. डोंइती सेल्शो मुर आस पशो ब्रेक्बो बाक्ब  
मुरुम परमप्रभु यावे आ देंशो मटितीके  
काइन नु हाबील  
हाबील रे नोआह सम्म  
रागी नेल्ल कली ब्वाक्कुम सुम्शो  
बेबीलोन सहरम लाइश्शो खि सेल्शो  
किकी पिपी आन नें
३. यहूदा आ किकी पिपी  
अब्राहाम  
इसहाक  
याक्ब  
योसेफ

डोंइती डा लोत्र

उत्पत्ती २:४-२५; भजन संग्रह १०४

१ नेल्ल क्येडा डोंइती परमप्रभुमी सरीड नु रागी दुम्पदा बाक्त्।<sup>२</sup> मिनू खप, फश, ब्वाक्कु नेल्ल खाल्सीशा, मारेइ मवाशो बाक्माक्त्। मिनू मेको तारी छिडछिड बाक्माक्त्। परमप्रभु आ सोक्त् ब्वाक्कु तारी फिल फिल पा हिम्सीशा बाक्बाक्माक्त्।

परमप्रभुमी मारेइ मारेइ सेल्शो

उत्पत्ती ४-२५; भजन संग्रह १०४

३ मिनू परमप्रभुमी “छेडछेड दुमो” देंमेनु, छेडछेड दुम्माक्त्। भजन संग्रह ३३:९; हिब्रू ११:३; यसैया ४५:७<sup>४</sup> मेको तशा “रिम्शो दुम्त्” देंमाक्त्। मिनू छेडछेड नु छिडछिड फ्रादीम्सी बाक्त्।<sup>५</sup> मिनू परमप्रभुमी छेडछेड कली नाक्ती नु छिडछिड कली नाक्दो, दे नें वोदा बाक्त्। मिनू नां रिक्शा, नां सोवशा, मेको डोंइती डा नाक्ती दुम्माक्त्।

६ मिनू परमप्रभुमी “ब्वाक्कु आ दातेमी फ्रातीक दुमो। ब्वाक्कु ब्राशा बाक्मल” देंमाक्त्।<sup>७</sup> मोपा परमप्रभुमी सरीड आगा डा ब्वाक्कु नु सरीड तारी डा ब्वाक्कु फ्रादीम्सी बाक्त्। मिनू ब्वाक्कु बुक्शा बाक्मा बाक्त्। भजन संग्रह १९:२; भजन संग्रह १३६:६; भजन संग्रह १४८:४<sup>८</sup> परमप्रभुमी मेको फ्रातीके कली सरीड, दे नें वोदा बाक्त्। मिनू नां रिक्शा, नां सोवशा, मेको निक्शी नाक्त् दुम्माक्त्।

९ मिनू परमप्रभुमी “सरीड आगा डा ब्वाक्कु काथा दुमीन। सोवशो रू गूडो” देंमाक्त्। मेको यो दुम्माक्त्। अय्युब ३८:८-११; भजन संग्रह २४:२; २पत्रुस ३:५<sup>१०</sup> मिनू परमप्रभुमी सोवशो रू कली रागी नु ब्वाक्कु देशा लीशो कली समुन्द्र, दे नें वोदा बाक्त्। मिनू मेको आ सेल्शो तशा “रिम्शो दुम्त्” देंमाक्त्।

११ मिनू परमप्रभुमी रागी डा खप कली “घांस, फू नु रवापुकी दुम्मल। घांस नु फूपुकीम वांचेर बाक्मल। फल फुल सिप्ब रवापुकी वाशा, आंम आंम फल सिम्मल। मेको आन वांचेर चहिं आन फलपुकीम बाक्मल” देंमाक्त्।

मिनू मोदेंशो दुम्माक्त्।<sup>१२</sup> रागीम घांस नु फूपुकी वाशा, आन वांचेर यो वामा बाक्त्। फल फुल रवापुकी वाशा, आन वांचेर यो वामा बाक्त्। मिनू परमप्रभुमी आ सेल्शो तशा “रिम्शो दुम्त्” देंमाक्त्।<sup>१३</sup> मिनू नां रिक्शा, नां सोवशा, मेको सां नाक्ती दुम्माक्त्।

१४ मिनू परमप्रभुमी “नाक्ती नु नाक्दो फ्राचा कली सरीडमी छेडछेड पा ब्राइबपुकी दुमीन। मेको ब्राइबपुकीम हिंउद नु बर्खा, नाक्ती नु बर्स कली फ्रातीक गेय पामेक्ल। ब्यवस्था ४:१९; भजन संग्रह ७४:१६; यसैया ४७:१३<sup>१५</sup> मिनू मेको सरीड डा ब्राइबपुकीम रागी कली छेडछेड गेचा माल्नीम” देंमाक्त्। मिनू मेको दुम्माक्त्।<sup>१६</sup> मोपा परमप्रभुमी ठेयब बत्ती निक्शी सेला बाक्त्। शुश छेडछेड पा ब्राइब नाक्त् कली नु इच्का छेडछेड पा ब्राइब बत्ती नाक्दो कली वोदा बाक्त्। सोरुल यो सेल्मी बाक्त्। भजन संग्रह १३६:७-९<sup>१७</sup> परमप्रभुमी रागी छेडछेड बाक्ल, दे मेको नेल्ल आन कली सरीडमी वोइक्मी बाक्त्।<sup>१८</sup> नाक्त् नु नाक्दो कली फ्राचा नु छेडछेड छिडछिड रे फ्राचा कली सरीडम वोदा बाक्त्। परमप्रभुमी मेको तशा “रिम्शो दुम्त्” देंमाक्त्।<sup>१९</sup> मिनू नां रिक्शा, नां सोवशा, मेको ४ नाक्ती दुम्माक्त्।

२० मिनू परमप्रभुमी “ब्वाक्कुमी मारेइ मारेइ ब्रोंइशा बाक्बपुकीम ब्रीमल। रागी तारी मारेइ मारेइ चिक्ब सरीडम बेरमल” देंमाक्त्।<sup>२१</sup> मोपा परमप्रभुमी ब्वाक्कुम बाक्ब ठेयब हिंचा डा जन्तु नु मारेइ मारेइ ब्रोंइशा बाक्ब सेल्मी बाक्त्। मेको शुश दुम्शा, समुन्द्र ब्रीशा बाक्मा बाक्त्। चिक्ब यो शुश दुम्मा बाक्त्। मिनू परमप्रभुमी मेको तशा “रिम्शो दुम्त्” देंमाक्त्। भजन संग्रह ७४:१३-१४; १४८:७<sup>२२</sup> परमप्रभुमी मेको नेल्ल आन कली आसीक गेशा “सोशा बोशा, शुश दुमीन, समुन्द्र डा ब्वाक्कु ब्रीडीने” देंमाक्त्। चिक्ब आन कली यो “सोशा बोशा, रागीमी शुश दुमीन” देंमाक्त्।<sup>२३</sup> मिनू नां रिक्शा, नां सोवशा, मेको ५ नाक्ती दुम्माक्त्।

२४ मिनू परमप्रभुमी “रागीम मारेइ मारेइ ब्रोंइशा बाक्ब गूचा माल्नीम। मार गूचा माल्नीम देंशा हना बी ब्यफ, खपीम गेशा गाक्ब आइक्च जन्तु नु मार मार ब्वाकी डा जन्तु दुमीन” देंमाक्त्। मिनू मेको दुम्माक्त्।<sup>२५</sup> मोपा परमप्रभुमी मारेइ मारेइ ब्वाकी डा जन्तु, मारेइ मारेइ बी ब्यफ, खपीम गेशा

गाकब नु मारेइ मारेइ आइक्च जन्तु सेल्मी बाक्त। मिनु परमप्रभुमी आ सेल्शो तशा “रिम्शो दुम्त” देंमाक्त।

26 मिनु नोले परमप्रभुमी “इं खोदेशो पा मुर का सेल्य। मिनु समुन्द्र डा डांइ, सरीडम बेरब चिक्ब, बी ब्यफ, ब्वाकी डा जन्तु नु खपीम ग्रेशा गाकब आइक्च जन्तु नेल्ल आन कली हुकुम पाइब दुम्ल” देंमाक्त। *भजन संग्रह ८:६-९; एफिसी ४:२४; कलस्सी १:१५; याकूब ३:९* 27 मिनु परमप्रभुमी आ खोदेशो तांडसीशो का सेला बाक्त। मेकोमी वोंइश मुर का नु मीश मुर का सेला बाक्त। *उत्पत्ती ९:६; मत्ती १९:४* 28 मिनु परमप्रभुमी मुर आस कली आसीक गेशा “सोशा बोशा, तमी तौ थिशा, रागी प्रिंशा, रिम्शो पा हुकुम पस। समुन्द्र डा डांइ, सरीडम बेरब चिक्ब, रागीम बाक्ब जन्तु नेल्ल नु खपीम ग्रेशा गाकब आइक्च जन्तु नेल्ल आन कली रिम्शो पा हुकुम पसे” देंमाक्त।

29 मिनु परमप्रभुमी “नेनीस, गो इस कली वांचेर सिब्ब, गिग खाइ, फल सिब्ब नु वांचेर सेल्ब रवा गेतन्सी। मेको इस कली जचा ब्वचा दुम्ब। *मत्ती ६:२५-३४* 30 मिनु गो रागीम बाक्ब जन्तु, बी ब्यफ, रागी डा चिक्ब, खपीम ग्रेशा गाकब आइक्च जन्तु नु मारेइ मारेइ ब्रोंइशा बाक्ब आन कली घांस, सुवा ब्वचा गेतामी” देंमाक्त। मिनु मोदेशो दुम्माक्त। *भजन संग्रह १४५:१६* 31 मिनु परमप्रभुमी आ सेल्शो नेल्ल तशा “शुश रिम्शो दुम्त” देंमाक्त। मिनु नां रिक्शा, नां सोइशा, मेको ६ नाक्त दुम्माक्त। *मत्ती १९:१७; १तिमोथी ४:४*

#### डोंइती डा नाइक्तीक नाक्त

2 मिनु मोपा परमप्रभुमी सरीड, रागी नु मार मार बाक्मा, मेको नेल्ल सेल्ने थुमा बाक्त। 2 मिनु ६ नाक्तीम आ गेय नेल्ल थुम्शा डा मिन ७ नाक्तीम नांइसे बाक्त। *हिब्रू ४:४* 3 मिनु परमप्रभुमी नाइक्तीक नाक्त कली आसीक गेवा बाक्त। मिनु मेको नाक्त आंम कली नाइक्चा, दे वोदा बाक्त। मारदे हना मेको नेल्ल सेल्तीक गेय थुम्शा नांइसे बाक्त। *प्रस्थान २०:११; भजन संग्रह ९५:११; इजीकीएल २०:१२; हिब्रू ४:९-१९*

#### परमप्रभुमी मुर सेल्शो

4 एको परमप्रभुमी सरीड नु रागी सेल्ची ना डा लोत्र बाक्ब। परमप्रभु यावेमी रागी नु सरीड सेलानु, 5 मारेइ मारेइ घांस खपीम मवाशो बाक्मा बाक्त। कोवकेली यो मदाप्शो बाक्मा बाक्त। मारदे हना परमप्रभु यावेमी रागीम रेउ मयिपाइशो बाक्माक्त। मिनु रूम गेय पाइब मुर यो मबाक्मा बाक्त। 6 मेना रागी रे खोला गूशा, रागी नेल्ल डा खप जिप्पाइक्बाक्माक्त। 7 मिनु नोले परमप्रभु यावेमी रू डा खप के मुर का सेला बाक्त। मिनु मुर आ नेंमी ब्रोंइतीक सोक्त मुइक्ता बाक्त। मिनु मुर सोक्त पाइशो दुम्माक्त। *उत्पत्ती ३:१९; अय्युब १०:९; अय्युब ३३:४; भजन संग्रह १०४:२९-३०; १कोरिन्थी १५:४५,४७*

#### परमप्रभुमी आ रू सेल्शो

8 मिनु नोले परमप्रभु यावेमी पूर्वम एदेन माइशो रू का सेला बाक्त। मेकेर आ सेल्शो मुर कली वोदा बाक्त। 9 मिनु परमप्रभु यावेमी मेकेर मार मार दारशो तांडसीब रवा नु जचा ब्वचा फल सिब्ब रवा वापदा बाक्त। ब्रोंइपाइक्ब का नु रिम्शो नु मरिम्शो तुइक्पाइक्ब रवा का यो रू आ दातेमी वापदा बाक्त। *उत्पत्ती ३:२२; प्रकाश २:७; प्रकाश २२:२*

10 मिनु रू कली जिप्पाइक्चा, दे एदेन रे खोला का गूमाक्त। मेको खोला नोले ब्राशा, ४ ओटा खोला दुशो बाक्मा बाक्त। *इजीकीएल ४७:१-१२* 11 डोंइती डा खोला आ नें पीशोन बाक्ब। मेको खोला हवीलाह रागी आ एर ऑथ रे लशो बाक्ब। मेको रागीमी सुन बाक्बाक्माक्त। 12 मेको रागी डा सुन रिम्शो बाक्बाक्माक्त। मेकेर गोकुल धूप नु ओनीक्स माइशो हीरा यो बाक्बाक्माक्त। 13 मेको आ नोले डा खोला आ नें गिहोन बाक्ब। मेको कूश माइशो रागी आ एर ऑथ हिरशो बाक्ब। 14 मिनु मेको आ नोले डा खोला आ नें टाइग्रीस बाक्ब। मेको खोला अस्सुर रागी आ पूर्व गे लशो बाक्ब। मिनु नेल्ल क्येडा नोले डा खोला आ नें युफ्रेटीस बाक्ब।

15 मिनु परमप्रभु यावेमी मुर कली लाइशा, एदेन रू दोचा नु कोवचा कली वोदा बाक्त। 16 मिनु परमप्रभु यावेमी मेको मुर कली “नेल्ल रवा डा फल जने ब्वने चाप्नेवे। 17 तन्न रिम्शो नु मरिम्शो तुइक्पाइक्ब रवा रे ब्वचा मद्दुम्ब। तेको नाक्त ब्वाइनेवे, मेको नाक्तीन बेक्नेवे” दे अरेवा बाक्त। *रोमी ६:२३*

#### मुर आ गेय

18 मिनु परमप्रभु यावेमी “मुर का ला बाक्चा मरिम्शो दुम्ब। गो मेको नु बाक्चा कली वारच पाइब का सेल्नुड” देंमाक्त। *उपदेसक ४:३०*

19 मिनु परमप्रभु यावेमी आ खप के सेल्शो मार मार जन्तु नु सरीडम बेरब चिक्ब आन कली मुरम मार मार नें वोइक्बाक्मे, दे मुर आ बाक्तीके चाक्मी बाक्त। मिनु मुरमी ब्रोंइशा बाक्ब नेल्ल आन कली नें वोदा बाक्त। मार नें वोदा, मेको नें लीमा बाक्त। 20 मुरमी बी ब्यफ, सरीडम बेरब चिक्ब नु ब्वाकी डा जन्तु नेल्ल आन कली नें वोदा बाक्त। तन्न मुर कली मेको नु बाक्चा कली वारच पाइब मबाक्शो बाक्माक्त।

#### परमप्रभुमी मुर आ वारच सेल्शो

21 मिनु परमप्रभु यावेमी आदम कली मारेइ मतुइक्चा डा पा निन्द्रा पपदा बाक्त। मिनु मेको के जेरी का शोला बाक्त। मिनु मेको पोवला कली श्येमी सुवा बाक्त। 22 मिनु परमप्रभु यावेमी मेको शोल्शो जेरी के मीश मुर का सेल्शा, मुर आ बाक्तीकेमी चाक्मा बाक्त। 23 मिनु आदममी “ओहो, एको रुश, आं रां डा रुश बाक्त। एको श्ये आं रां डा श्ये बाक्त” दे तुइक्ता बाक्त। मिनु मेकोमी “मेको आ नें मीश मुर वोइक्चा माल्ब। मारदे हना वोंइश मुर आ रां रे शोल्शो बाक्ब” देंमाक्त।

24 मोपतीके वोंइश मुरमी आ आंम आफ आस कली प्रोंइशा, आ मीश नु काथा बाक्ब। मेको निक्शी रां का दुम्नीस। *मत्ती १९:५-६; १कोरिन्थी ६:१६; एफिसी ५:३१* 25 मेना आदम नु आ मीश निम्फा शिश्रा बाक्सा बाक्त। मुने चहिं मतुइक्बाक्सा बाक्त।

#### मुरम परमप्रभु आ देशो मटिशो

3 मिनु परमप्रभु यावे आ सेल्शो जन्तु आन दातेमी नेल्ल क्येडा निप्प पाइशो बुस्स दुम्माक्त। मिनु बुस्सुमी मीश मुर कली “परमप्रभुमी इस कली ‘एको रू डा रवा आन फल मारेइ मब्वसे’ देंमे?” दे हिल्लो पवा बाक्त। *प्रकाश १२:९; प्रकाश २०:२* 2 मिनु मीश मुरमी बुस्स कली “गो एको रू डा रवा आन फल ब्वचा दुम्नस्कु। *उत्पत्ती २:१६* 3 तन्न रू आ दातेमी बाक्शो रवा आ फल आ पर्वम परमप्रभुमी ‘मब्वचा, मथिचा यो। ब्वाइतीसी हना, गे बेक्नीसी’ देंत” देंमाक्त। *उत्पत्ती २:१७* 4 तन्न बुस्सुमी “गे बेक्सीन मबेक्नीसी। *यूहन्ना ८:४४* 5 ब्वाइतीसी हना, इस कली रिम्शो नु मरिम्शो मार बाक्बा तुइक्पाइक्ब। मिनु गे परमप्रभु खोदेशो दुम्नीसी। मेकोन परमप्रभुमी तुइक्ताक्व” देंमाक्त। 6 मिनु मीश मुरम मेको रवा तशा ब्वशोन, ब्रोंवचा डा कोवशोन, दारशो, रुपतीक थुं गेचा डा तवा बाक्त। मोपतीके फल सेक्शा, ब्ववा बाक्त। मेको आ नेक्था बाक्ब आ वोंइश कली यो गेवा बाक्त। मेकोमी यो ब्ववा बाक्त। *याकूब १:१४-१५; १तिमोथी २:१४* 7 मिनु नोले निम्फा शिश्रा बाक्शो तुइक्त्से बाक्त। मिनु फोवशी रवा आ सफा सेक्शा फेक्तीक सेल्से बाक्त। *उत्पत्ती २:२५*

8 मिनु नाक्नाक्दो मेको निक्शीमी परमप्रभु यावे रूमी हिरशो नेन्से बाक्त। मिनु “परमप्रभु यावेम मतचा डा पा खूइक्चा” दे रवा आन दातेमी लशा, खूइक्सा बाक्त। *भजन संग्रह १३९:७-१०; येरमीया २३:२४* 9 मिनु परमप्रभु यावेमी आदम कली “ते बाक्डे?” दे ब्रेत्ता बाक्त। 10 मेकोमी “गो इन गाक्शो नेंता। मिनु गो शिश्रा बाक्तीके, हिंशा खूइक्साक्यी” देंमाक्त। 11 मिनु “गे शिश्रा बाक्नेवे, दे दोपा तुइक्नेवे? मब्वचा देशो रवा आ फल ब्ववी?” दे हिल्लो पवा बाक्त। 12 मिनु मुरमी “इन गेशो मीश मुरमी आं कली मेको रवा आ फल गेती। मिनु गो ब्वाता” देंमाक्त। *२कोरिन्थी ११:३*

13 मिनू परमप्रभु यावेमी मेको मीश मुर कली “मार पवी?” दे हिल्लो पवा बाक्त। मीश मुरुमी “बुस्सुमी आं कली जोल पा ब्वपाइक्ती। मिनू गो ब्वाता” देंमाक्त। २कोरिन्थी ११:३

14 मिनू परमप्रभु यावेमी बुस्स कली “बी ब्यफ नु ब्वाकी डा जन्तु नेल्ल आन दातेम गे सराप राइनेवे। मारदे हना मोदेशो मरिश्शो पाप्तीवी। इ रंमी ग्रेशा गाक्चा माल्नेवे। इ ब्रोंइतीक नाक्त सम्म खप जशा, बाक्चा माल्नेवे। 15 गे नु मेको मीश मुर जिशा, बाक्चा मलीसे। मेको आ युइ नु इ युइ जिशा बाक्नीमी। मीश मुर आ युइ कामी इ पिया दिम्शा प्रोल्ब। गे चहिं मेको आ गेंग्रेम कोक्नेवे” दे सराप पदा बाक्त। प्रकाश १२:४-५, १५-१७

16 मिनू मेकोमी मेको मीश मुर कली “कोव्रज कुरशा, आल थिवेनु, इ कली ठेयब श्येत गेनुड। आल थिचा रोइ पाइनेवे। मो हना यो इ वोंइश कली माल्नेवे। मिनू मेकोमी इ कली हुकुम पाइब” देंमाक्त। एफिसी ५:२२-२३; १तिमोथी २:१२

17 मिनू आदम कली “मारदे हना गे इ मीश आ लोव्र नेंशा, मब्वचा देंशो रवा आ फल ब्वाप्तीवी, इ पतीके आ पर्वम इ रू नेल्लेमी सराप ताइनीम। इ जचा थोव्रक श्येत पा ख्रुम्चा माल्नेवे। उत्पत्ती ८:२१-२२; अय्युब ३१:३८-३९ 18 इ रूमी चू नु चोंक वानीम। मिनू गे गिगी खाइ ब्वचा माल्नेवे। 19 इ कुप्फी रे गाल यिपाइश्शा शोब्ले जचा माल्नेवे। गे खप मदुमे सम्म मोदेशो पचा माल्नेवे। मारदे हना गो इ कली खप रे सेल्शो नड” दे परमप्रभु यावेमी आदम कली देंमाक्त। उत्पत्ती २:७; भजन संग्रह ९०:१०; भजन संग्रह १०४:२९; उपदेसक १२:७; २थिस्सलोनिकी ३:१०

20 मिनू आदममी आ मीश कली हव्वा नें वोदा बाक्त। मारदे हना मेको ब्रोंइब मुर नेल्ल आन ममा दुम्माक्त। 21 मिनू परमप्रभु यावेमी आदम नु आ मीश आस कली कुशुल के फेक्तीक सेल्शा, फेक्तीम्सी बाक्त।

22 मिनू परमप्रभु यावेमी “मुर इं खोदेशो दुम्त। रिम्शो नु मरिश्शो तुइक्ब दुम्त। मेको ब्रोंइपाइक्ब रवा आ फल यो सेक्शा, ब्वाप्तु हना, गेना हना यो ब्रोंइब, गेनायो मबेक्ब दुम्ब” देंमाक्त।

23 मोपतीके परमप्रभु यावेमी खप रे सेल्शो मुर कली एदेन माइश्शो रू रे गुंइशा, अरु रूम गेय पथ सोइक्ता बाक्त। उत्पत्ती २:१५ 24 परमप्रभुमी मेको आस कली खेरसी बाक्त। मेको आस कली खेरशा, एदेन रू डा पूर्वमी आ स्वर्ग डा करूब माइश्शो गेय पाइब वोदा बाक्त। मेकेर मी ब्रशो एर ओंथ हिरब तरवार का यो वोदा बाक्त। मेको ब्रोंइपाइक्ब रवा आ फल ब्वचा मताम्सेक्ल, दे कोव्रब वोदा बाक्त।

#### परमप्रभु रे डोन बाक्शो

4 मिनू नोले आदम आ मीश हव्वा नु इम्माक्त। मिनू हव्वाम कोव्रज कुरशा, तौ का थिमाक्त। हव्वामी “परमप्रभु यावेमी आं कली वारच पा आल का गेती” देंमाक्त। मिनू आ नें काइन वोदा बाक्त। 2 मिनू मेको आ नोले लेंशा अर्को तौ का यो थिमाक्त। मेको कली हाबील नें वोदा बाक्त। हाबील काइन आ लोक्ब बाक्माक्त। मेको आल निक्शी कोल्शा, हाबील भेडा गोठला दुम्माक्त। काइन चहिं रू डा गेय पाइब दुम्माक्त।

3 काबु काइनमी आ रू डा सिश्शो मारेइ मारेइ थोव्रक परमप्रभु यावे कली चढेवा बाक्त। प्रस्थान २३:१९ 4 हाबीलमी आ डोंइती गिक्शो पाठा आ श्ये नु बोंसो परमप्रभु यावे कली चढेवा बाक्त। मिनू परमप्रभु यावेमी हाबील आ चढेशो ब्रवा बाक्त। प्रस्थान ३४:१९; लेवी ३:१६ 5 तन्न काइन आ चढेशो मब्रवा बाक्त। मिनू काइन आ कुल राव किक्पा चुरमाक्त। प्रस्थान ३३:१९; हिब्रू ११:४ 6 मिनू परमप्रभु यावेमी काइन कली “मारदे चुरे? मारदे राव किक्डे? 7 गे रिम्शो पाप्तीवी हना, गो इ कली मब्राइनुडा डा? ब्राइनुड। गे मरिश्शो पाप्तीवी हना, मुर साइक्ब जन्तु खोदेशो पा, पाप इ लाप्चोमी बाक्ब। मिनू इ कली माल्ब। गे इ मरिश्शो थुं कली ग्राडो” देंमाक्त। गलाती ५:१७; रोमी ६:१२

8 मिनू काइनमी आ लोक्ब हाबील कली “रूमी लस” देंमाक्त। मिनू रूमी बाक्सानु, काइनमी हाबील कली सदा बाक्त। १यूहन्ना ३:१२, १५ 9 मिनू परमप्रभु यावेमी काइन कली “इ लोक्ब ते बाक्म?” दे हिल्लो पवा बाक्त। मिनू काइनमी “डाद, गो आं लोक्ब आ गोठला नडा डा?” देंमाक्त। उत्पत्ती

३:९ 10 मिनू मेकोमी “नेनो, मार पवी? इ लोक्ब आ हुशेमी आं कली खप रे ब्रेश्शो नेंता। भजन संग्रह ९:१३; मत्ती २३:३५; हिब्रू १२:२४ 11 मुल गे सराप रशा, इ रू रे खेरचा पुंइसीनेवे। मारदे हना इ लोक्ब आ हुश मेकेर जारशो बाक्ब। गन्ती ३५:३३ 12 मुल रे गे रू डा गेय पवीनु, मारेइ मग्रेल्ब। रागी प्रोंइशा, गाक्ब मुर दुम्चा माल्नेवे” दे परमप्रभु यावेमी देंमाक्त।

13 मिनू काइनम परमप्रभु यावे कली “इन गेशो सजाइ ठेयब बाक्ब। मोमो श्येत गेतीनी हना, फाल्ने मचाप्नुड। 14 मुलाक्ती आं कली आं रू रे गुंइताक्पीनी। मिनू इन नेक्था बाक्चा मताइनुड। गो मुल रागी प्रोंइशा, गाक्ब मुर दुम्नुड। आं कली सुम थित्तेक्म हना यो, साइक्नीम” देंमाक्त। अय्युब १५:२०-२४ 15 मिनू परमप्रभु यावेमी “ममाइ, सुइमी इ कली साइक्तेमी हना, इ तथो सराप मेको कली ७ खेयप रचा माल्ब” देंमाक्त। मिनू परमप्रभु यावेमी “काइन कली सुइमी मसदमेक्त्” दे आ रंम चिनु वोदा बाक्त। इजीकीएल ९:६; प्रकाश ७:३-४ 16 मिनू नोले काइन परमप्रभु यावे आ डोंइती रे लमाक्त। मिनू एदेन आ पूर्व गे, नोद माइश्शो रागीम जाक्दीश्शा बाक्माक्त।

#### मुर आन ठेयब लेश्शो

17 मिनू काइन आ मीश नु इम्माक्त। मिनू मेकोमी कोव्रज कुरशा, हनोक थिमाक्त। मिनू काइनम सहर का सेला बाक्त। मेको सहर कली आ तौ हनोक आ नें खोदेशो पा हनोक नें वोदा बाक्त। 18 हनोकमी इराद थिमाक्त। इरादमी मेहुयाएल थिमाक्त। मेहुयाएल मेथुशाएल आ आफ दुम्माक्त। मेथुशाएल लमेक आ आफ दुम्माक्त।

#### लमेकमी यो मुर साइश्शो

19 मिनू लमेकमी मीश निक्शी चाक्गा बाक्त। का आ नें आदाह नु अर्को आ नें चिल्लाह बाक्माक्त। 20 मिनू आदाहमी याबाल थिमाक्त। मेको ताम्बुम बाक्ब नु गोठम बाक्ब बस्तु योव्रब आन किक्की पिपी बाक्माक्त। 21 मेको आ लोक्ब आ नें यूबाल बाक्माक्त। मेको बीना नु मुइक्तीके ताप्ब आन किक्की पिपी बाक्माक्त। 22 मिनू चिल्लाहमी तूबल-काइन थिमाक्त। मेकोमी कांसा नु फलाम के मार मार सेल्तीक गेय पवा बाक्त। तूबल-काइन आ समी नामा बाक्माक्त। 23 मिनू लमेकमी आ मीश निक्शी आस कली “आदाह नु चिल्लाह, आं लोव्र नेनीस, गे लमेक आ मीश निक्शी, आं सेंदा नेंशा, होस पसे। गो मुर का साइक्ता। मारदे हना मेको ठिटामी आं कली तुप्ती। 24 काइन साइक्ब ७ खेयप क्येक्क लेत्चा पुंइसीब हना, लमेक साइक्ब ७७ खेयप क्येक्क लेत्चा पुंइसीब” देंमाक्त। उत्पत्ती ४:१५; लेवी १९:१८; ब्यक्स्था ३२:३५; मत्ती १८:२२

#### आदम नु हव्वा आस अर्को तौ

25 मिनू आदम लेंशा आ मीश नु इप्शा, तौ का थिमाक्त। मेको कली सेथ नें वोदा बाक्त। हव्वामी “परमप्रभुमी हाबील आ पा डा अर्को तौ का गेती। मारदे हना काइनमी हाबील कली साइक्त्” देंमाक्त। 26 मिनू सेथमी यो तौ का थिमाक्त। मिनू मेको कली एनोश नें वोदा बाक्त। मिनू मेना रे मुरपुकीमी परमप्रभु यावे कली पुंइचा नु ठेयब सेल्चा गोव्रमे बाक्त। उत्पत्ती १२:८

#### आदम आ चच युइ

१इतिहास १:१-४

5 एको आदम आ चच, युइ बाक्नीम। परमप्रभुमी मुर सेलानु, आ खोदेशो पा सेला बाक्त। लूका ३:३७-३८; उत्पत्ती १:२७ 2 वोंइश मुर का नु मीश मुर का सेला बाक्त। मिनू मेको आस कली आसीक गेशा, आस नें मुर वोंइसी बाक्त। 3 मिनू आदम सहे का ३० बर्स दुम्मेनु, आ खोदेशो तौ का थिमाक्त। मिनू मेको कली सेथ नें वोदा बाक्त। भजन संग्रह ५१:७; १कोरिन्थी १५:४५ 4 सेथ थिशा नोले आदम ८ सहे बर्स ब्रोंइमाक्त। अरु तमी तौ यो थिमाक्त। 5 मिनू आदम नेल्ल पा ९ सहे ३० बर्स ब्रोंइशा बेक्माक्त।

6 मिनू सेथ सहे का ५ बर्स दुम्मेनु, तौ का थिमाक्त। मेको कली एनोश नें वोदा बाक्त। 7 एनोश थिशा नोले ८ सहे ७ बर्स ब्रॉइमाक्त। अरु तमी तौ यो थिमाक्त। 8 मिनू सेथ नेल्ल पा ९ सहे १२ बर्स ब्रॉइशा बेक्माक्त।

9 मिनू एनोश ९० बर्स दुम्मेनु, तौ का थिमाक्त। मेको कली केनान नें वोदा बाक्त। 10 केनान थिशा नोले ८ सहे १५ बर्स ब्रॉइमाक्त। अरु तमी तौ यो थिमाक्त। 11 मिनू एनोश नेल्ल पा ९ सहे ५ बर्स ब्रॉइशा बेक्माक्त।

12 मिनू केनान ७० बर्स दुम्मेनु, तौ का थिमाक्त। मेको कली मा-हालालेल नें वोदा बाक्त। 13 केनान मा-हालालेल थिशा नोले ८ सहे ४० बर्स ब्रॉइमाक्त। अरु तमी तौ यो थिमाक्त। 14 मिनू केनान नेल्ल पा ९ सहे १० बर्स ब्रॉइशा बेक्माक्त।

15 मिनू मा-हालालेल ६५ बर्स दुम्मेनु, तौ का थिमाक्त। मेको कली यरेद नें वोदा बाक्त। 16 यरेद थिशा नोले ८ सहे ३० बर्स ब्रॉइमाक्त। अरु तमी तौ यो थिमाक्त। 17 मिनू मा-हालालेल नेल्ल पा ८ सहे ९५ बर्स ब्रॉइशा बेक्माक्त।

18 मिनू यरेद सहे का ६२ बर्स दुम्मेनु, तौ का थिमाक्त। मेको कली हनोक नें वोदा बाक्त। 19 यरेद हनोक थिशा नोले ८ सहे बर्स ब्रॉइमाक्त। अरु तमी तौ यो थिमाक्त। 20 मिनू यरेद नेल्ल पा ९ सहे ६२ बर्स ब्रॉइशा बेक्माक्त।

21 मिनू हनोक ६५ बर्स दुम्मेनु, तौ का थिमाक्त। मेको कली मेथुसेलाह नें वोदा बाक्त। हनोक कली हिब्रू लोव्रमी एनोक देंनीम। 22 हनोक आ थुमी परमप्रभु आ नेक्था बाक्शो बाक्माक्त। हनोक मेथुसेलाह थिशा नोले सहे सां बर्स ब्रॉइमाक्त। अरु तमी तौ यो थिमाक्त। उत्पत्ती ६:९ 23 मिनू हनोक नेल्ल पा सहे सां ६५ बर्स दुम्माक्त। 24 हनोक परमप्रभु नु गाक्बाक्माक्त। मिनू परमप्रभुमी हनोक कली आ बाक्तीक लदा बाक्त। मुरपुकीम हनोक कली माल्शा, मथिदमे बाक्त। २२राजा २:११; हिब्रू ११:५

25 मिनू मेथुसेलाह सहे का ८७ बर्स दुम्मेनु, तौ का थिमाक्त। मेको कली लमेक नें वोदा बाक्त। 26 मेथुसेलाह लमेक थिशा नोले ७ सहे ८२ बर्स ब्रॉइमाक्त। अरु तमी तौ यो थिमाक्त। 27 मिनू मेथुसेलाह नेल्ल पा ९ सहे ६९ बर्स ब्रॉइशा बेक्माक्त।

28 मिनू लमेक सहे का ८२ बर्स दुम्मेनु, तौ का थिमाक्त। 29 मेको कली नोआह नें वोदा बाक्त। मेको नें आ अर्थ थुं बारपाइक्तीक बाक्ब। मिनू लमेकमी “परमप्रभु यावेमी खप कली सराप पाप्तु। आं तौ रूम गेय पपाइक्तीके श्येत रे प्रॉइब बाक्ब” देंमाक्त। उत्पत्ती ३:१७-१९ 30 लमेक नोआह थिशा नोले ५ सहे ९५ बर्स ब्रॉइमाक्त। अरु तमी तौ यो थिमाक्त। 31 मिनू लमेक नेल्ल पा ७ सहे ७७ बर्स ब्रॉइशा बेक्माक्त।

32 मिनू नोआह ५ सहे बर्स दुम्मेनु, शेम हाम नु यफेथ थीमी बाक्त।

रागी ब्वाक्कुम सुम्शो

6 मिनू नोले रागीमी मुर शुश दुम्मा बाक्त। मेकोपुकीमी शुश तमी थीमा बाक्त। 2 मिनू परमप्रभु आ तौपुकीमी मुर आन तमी आन कली तशा “दारशो बाक्नीम” दे मिम्तमे बाक्त। मिनू मेको आन दाते रे योव्रशा चाक्मे बाक्त। अय्युब १:६; २पत्रुस २:४; यहूदा ६ 3 मिनू परमप्रभु यावेमी “आं सोक्त मुर आन कली शुश बर्स बाक्चा मगेनुड। मुर बेक्चा माल्नीम। आन ब्रॉइतीक सहे का २० बर्स ला दुम्ब” देंमाक्त।

परमप्रभु आ थुं मनुशो

4 मेना रागीमी नेफीलीम माइश्शो थम लाइश्शो मुरपुकी बाक्शो बाक्मा बाक्त। मिनू नोले परमप्रभु आ तौपुकीमी रागी डा तमी आन कली चाक्शा, आल थीमे बाक्त। मेको बोल्यो नु ठेयब लडाइ पाइब मुर दुम्मा बाक्त। इजीकीएल ३२:२७

5 मिनू परमप्रभु यावेमी “रागीम बाक्शो मुर आं अरेशो मटीब नु मरिश्शो पाइब ला बाक्नीम। मार मिम्ताक्म हना यो, मरिश्शो बाक्त” दे मिम्ता बाक्त। उत्पत्ती ८:२१ 6 मिनू परमप्रभु यावेमी आंम सेल्शो मुर आन कली तशा, शुश आ थुं मनुथु बाक्शो बाक्माक्त। १सामुएल १५:११-३५; येरमीया १८:७-१० 7 मिनू परमप्रभु यावेमी “आं सेल्शो मुर आन कली रागी रे क्याम्नुड। मुर नु जन्तु नेल्ल क्याम्नुड। खपीम ग्रेशा गाक्ब आइक्च जन्तु नु सरीडम बेरब चिक्ब यो क्याम्नुड। मारदे हना गो मेको आन कली सेल्शा यो, आं थुं मनुड”

दे मिम्ता बाक्त। गन्ती २३:१९; रोमी ३:३-४; रतिमोथी २:१३ 8 मिनू परमप्रभु यावेमी नोआह तवानु, मेको कली दाक्ता बाक्त। हिब्रू ११:७

नोआह नु आ तौ

9 नोआह आ तौ सां बाक्मा बाक्त। नोआह शुश रिम्शो मुर बाक्माक्त। मुर नेल्लेमी “ठीक पाइब दोस मताइब मुर बाक्ब” दे तुइक्तमे बाक्त। नोआह परमप्रभु नु गाक्बाक्माक्त। उत्पत्ती ५:२२ 10 मिनू नोआह आ तौ सां आन नें शेम, हाम नु यफेथ बाक्मा बाक्त।

11 परमप्रभुमी मुर आन कली कोव्रडानु, नेल्ल मरिश्शो बाक्मा बाक्त। रागी नेल्ल हुश खाक्श पोक्तीकेमी ब्रीमाक्त। अर्को मरिश्शो पाइब यो बाक्मा बाक्त। 12 मिनू परमप्रभुमी रागीम बाक्ब मुर आन कली कोव्रडानु, शुश मरिश्शो बाक्मा बाक्त। मुर नेल्लेमी आन दला दाक्स पामे बाक्त। भजन संग्रह १४:२-३ 13 मिनू परमप्रभुमी नोआह कली “गो मुर नेल्ल आन कली क्याम्नुडमी। मारदे हना मेको आन पबर्म रागी हुश खाक्श पोक्तीकेमी ब्रीत। मुर नु रागी नेल्ल आन कली क्याम्नुड। आमोस ८:२ 14 मे चहिं खिं खोदेशो पा शी के ठेयब डोंगा का सेलो। मिनू आगामी कोठापुकी सेलो। ब्वाक्कु मओव्रचा डा पा आगा नु लाडगा अल्कत्राम सिल्दो” दे नोआह कली देंमाक्त।

नोआहमी परमप्रभु कली टिशा

15 मिनू परमप्रभुमी “डोंगा दोपा सेल्चा माल्नेवे देंशा हना, मेको आ लाइश्शो सहे सां कुबीत दुम्चा माल्ब। आ ब्रेम्शो ५० कुबीत दुम्चा माल्ब। आ ग्येत्थ लाइश्शो ३० कुबीत दुम्चा माल्ब। कुबीत का ०.५ मिटर खोदेशो बाक्ब। 16 मिनू छाना रे हात का प्रॉइशा, फश गूतीक बोखा का सेल्चा माल्नेवे। मिनू का पटटीम लाप्चो का वोइक्चा माल्नेवे। आगामी खप तला का, दाते तला का नु तला तारी बाक्तीक का सेल्चा माल्नेवे। 17 आं देंशो रिम्शो पावो। मारदे हना गो मारेइ मारेइ साइक्चा कली रागी ब्वाक्कुम प्रिनुड। रागीम मार मार सेस बाक्मा, मेको नेल्ल बेक्चा माल्नीम। 18 तन्न गो इन कली कोव्रनुड, गे नु आं कबल पाइनुड। मिनू गे, इ तौपुकी, इ मीश, नु इ चाइमीपुकी मेको डोंगामी ओव्रचा माल्नीनी। मेको नेल्ल गे नु ब्रॉइचा माल्नीम। मेको पोथी भाले, बी ब्यफ नेल्ल निक्निक्शी बाक्चा माल्नीम। उत्पत्ती ९:९ 19 गेपुकी नु मारेइ मारेइ सेस जन्तु निक्निक्शी ओव्रचा माल्नीम। 20 मारेइ मारेइ चिक्ब, मारेइ मारेइ जन्तु नु मारेइ मारेइ खपीम ग्रेशा गाक्ब आइक्च जन्तु निक्निक्शी ब्रॉइचा, दे गे नु डोंगामी ओव्रशा, बाक्चा माल्नीम। 21 मिनू इन कली, मार मार जचा ब्बचा ओइशा, उप्शा वोतो। मेको इन कली नु मेको आन कली जचा थोव्रक दुम्ब” दे परमप्रभुमी नोआह कली अरेवा बाक्त। 22 मिनू परमप्रभुमी मार मार मदा, नोआहमी नेल्ल टिशा, पवा बाक्त। हिब्रू ११:७

नोआह ठेयब डोंगाम ओव्रशो

7 मिनू परमप्रभु यावेमी नोआह कली “गे नु इ खिं डा मुर नेल्ल शी के ठेयब डोंगामी ओव्रडीन। मारदे हना एको पाला डा मुर आन दातेमी गे का ला ठीक पाइब बाक्नेवे। उत्पत्ती ६:८ 2 गे चढेचा दुम्ब बी ब्यफ, क्यारश बोका, भेडा सांड रे ७ जोड लतो। उत्पत्ती ८:२०; लेवी ११:- 3 मिनू चढेचा दुम्ब सरीडम बेरब चिक्ब यो ७ जोड लतो। भाले नु पोथी लतो। मारदे हना मेकोपुकी रागीमी ब्रॉइचा माल्नीम। 4 गो ७ नाक्त नोले ४० नाक्त नु ४० नाक्दो सम्म रेउ पिपाइक्नुड। मिनू आं सेल्शो रागीम मार मार ब्रॉइशा बाक्मा, मेको नेल्ल आन कली साइक्नुडमी” देंमाक्त। 5 मिनू परमप्रभु यावेमी मार मार अरेवा, नोआहमी नेल्ल टिशा पवा बाक्त।

6 रागीमी रेउ यिचा गोवानु, नोआह ६ सहे बर्स दुम्शो बाक्माक्त। 7 मिनू नोआहम मार पवा बाक्त देंशा हना, डोंइती आ तौपुकी, आ मीश, आ चाइमीपुकी ब्वाक्कु रे प्रॉइचा कली ठेयब डोंगामी ओव्रपाइक्मी बाक्त। १ पत्रुस ३:२० 8 मिनू चढेचा दुम्ब बस्तु, चढेचा मदुम्ब बस्तु नु चिक्ब नु मारेइ मारेइ खपीम ग्रेशा गाक्ब आइक्च जन्तु, 9 निक्निक्शी बी ब्यफ, जोड जोड भाले पोथी नोआह नु ठेयब डोंगामी ओव्रमा बाक्त। परमप्रभुमी दोपा नोआह

कली अरेवा, मोपा पवा बाक्त। उत्पत्ती ६:१९-२० 10 मिनु ७ नाक्त नोले रागीम ब्वाक्कु ब्रीचा गोवा बाक्त।

11 मिनु रेउ यिमेनु, उइ रे यो ब्वाक्कु बारशा कुचा गोवा बाक्त। मेना नोआह ६ सहे बर्स, महिना निक्शी १७ नाक्त दुम नाक्त मोदेशो दुम्माक्त। प्रकाश ९:१ 12 मिनु ४० नाक्त नु ४० नाक्तो शुश रेउ यिमाक्त।

13 मेको रेउ यिचा आ डोंइती नाक्ती नोआह नु आ तौ शेम, हाम, नु यफेथ सांफा, नोआह आ मीश नु आ चाइमी सांफा मेको डोंगामी ओव्रमा बाक्त।

14 मिनु मारेइ मारेइ जन्तु, मारेइ मारेइ बी ब्यफ, क्यारश भेडा, मारेइ मारेइ खपीम ग्रेशा गाक्ब आइक्च जन्तु नु मारेइ मारेइ फ्रां पाइश्शो, ब्रोंइशा बाक्ब जन्तु 15 जोड जोड पा नोआह नु ठेयब डोंगामी ओव्रमा बाक्त। 16 मिनु ब्रोंइशा बाक्ब नेल्ल जोड जोड पा, भाले पोथी नेल्ल ओव्रमा बाक्त।

परमप्रभुमी नोआह कली दोपा अरेवा, मोपा नेल्ल टिशा पवा बाक्त। मेको नेल्ल ओव्रमा नोले परमप्रभु यावेमी लाप्चो चोकगा बाक्त। उत्पत्ती ६:१९

17 मिनु ब्वाक्कु ४० नाक्त सम्म रागीम ब्रीना ब्रीन बाक्माक्त। ब्वाक्कु शुश बारशा, ब्वाक्कुमी ठेयब डोंगा कली कुरा बाक्त। ब्वाक्कु रागीम शुश बारमाक्त। 18 मिनु रेउ यिना यिन, ब्वाक्कु बारना बारन लमेनु, मेको डोंगा ब्वाक्कु तारी गाक्चा गोवा बाक्त। 19 रागी नेल्लेम ब्वाक्कु शुश दुम्शा, ठेयब डांडा यो सुमा बाक्त। 20 डांडा क्येडा यो १५ कुबीत सम्म ग्येथ सुमा बाक्त। कुबीत का ०.५ मिटर खोंदेशो बाक्ब।

21 मिनु रागीम मार मार ब्रोंइशो बाक्मा, बी ब्यफ, क्यारश भेडा, ब्वाकी डा जन्तु, रागीम फोंइब, खपीम ग्रेशा गाक्ब आइक्च जन्तु नु मुर नेल्ल बेक्मा बाक्त। २५:५-६ 22 रागीम ब्रोंइशा बाक्ब नेल्ल बेक्मा बाक्त।

23 मोपा मेकोमी रागीम ब्रोंइशा बाक्ब मार मार बाक्मा, मुर, जन्तु खपीम ग्रेशा गाक्ब आइक्च जन्तु नु सरीडम बेरब चिक्ब नेल्ल क्याम्दा बाक्त। नोआह नु आ खिं डा मुर ला प्रोंइमी बाक्त। 24 मिनु मेको ब्वाक्कु सहे का ५० नाक्त सम्म रागीम बारना बारन बाक्माक्त।

#### परमप्रभुम ब्वाक्कु सोव्रपाइश्शो

8 मिनु परमप्रभुमी नोआह नु ठेयब डोंगामी बाक्ब नेल्ल ब्वाकी डा जन्तु नु बी ब्यफ क्यारश भेडा आन कली मर्पेदीमी बाक्त। मिनु परमप्रभुमी रागीम फश पपदा बाक्त। मिनु ब्वाक्कु सोव्रमाक्त। 2 मिनु ब्वाक्कु बुक्तीके नेल्ल सोव्रना सोव्रन लमा बाक्त। रेउ यो देक्माक्त। 3 मिनु मेको ब्वाक्कु सोव्रना सोव्रन लशा, सहे का ५० नाक्त नोले शुश सोव्रमाक्त।

4 मिनु मेको बर्स डा ७ महिना डा १७ नाक्त मेको ठेयब डोंगा आरारात माइश्शो डांडामी जाक्दीश्शा दिक्माक्त। उत्पत्ती ७:११ 5 मिनु मेको बर्स डा १० महिना सम्म ब्वाक्कु सोव्रना सोव्रन लमाक्त। १० महिना डा डोंइती नाक्ती अर्को पहाड डा डांडा तांडिसमा बाक्त।

6 मिनु ४० नाक्त नोले नोआहम आ सेल्शो डोंगा डा झेल रोक्गा बाक्त। उत्पत्ती ७:१२, १७ 7 मिनु मेकेर रे खद का सोइक्ता बाक्त। मेको रागी डा ब्वाक्कु मसोव्रम सम्म एर ओथ बेरशा बाक्माक्त।

8 मिनु नोआहमी “ब्वाक्कु नेल्ल सोव्रमा को” दे तुइक्चा कली ढुकुर का यो सोइक्ता बाक्त। 9 मेको ढुकुर चहिं जुक्तीक मथित्थु लेश्शा, नोआह आ बाक्तीके जाक्माक्त। मारदे हना आ लतीकेमी ब्वाक्कुम सुम्शो बाक्माक्त। मिनु नोआहम गुइ दिंशा ताक्शा, मेको कली ओइंदा बाक्त। 10 मिनु अर्को ७ नाक्ती रिम्शा, मेको ढुकुर कली लेंशा डोंगा रे सोइक्ता बाक्त। 11 मिनु नाक्नाक्दो ढुकुरमी आ ठुंडमी नक वाशो तेल रवा आ सफा का कुरशा जाक्माक्त। मिनु नोआहमी “ब्वाक्कु नेल्ल सोव्रमाक्त” दे तुइक्ता बाक्त। 12 मिनु नोले यो ७ नाक्त रिम्शा, ढुकुर कली सोइक्ता बाक्त। मिनु मेको ढुकुर मलेम्माक्त।

#### ब्वाक्कु सोव्रशो

13 मेको नोआह ६ सहे बर्स का दुम्मे आ डोंइती डा महिना डा डोंइती डा नाक्तीम रागीमी ब्वाक्कु सोव्रमाक्त। नोआहमी ठेयब डोंगा आ छाना थूशा, कोव्रशा “लो, ब्वाक्कु नेल्ल सोव्रमाक्त” देंमाक्त। उत्पत्ती ७:११ 14 मिनु महिना का नु २७ नाक्त नोले खप नेल्ल सोव्रमाक्त।

15 मिनु परमप्रभुमी नोआह कली 16 “गे, इ मीश, इ तौपुकी नु इ चाइमीपुकी डोंगा रे गूडीन” देंमाक्त। 17 मिनु “मारेइ मारेइ ब्रोंइशा बाक्ब, चिक्ब, जन्तु नु खपीम ग्रेशा गाक्ब आइक्च जन्तु नेल्ल आन कली यो गुंडो। मेकोपुकी सोशा बोशा रागीम शुश दुम्चा माल्नीम” देंमाक्त। 18 मिनु नोआह, आ तौपुकी, आ मीश नु आ चाइमीपुकी गूमा बाक्त। २ पत्रुस २:५ 19 मिनु जन्तु नेल्ल, खपीम ग्रेशा गाक्ब आइक्च जन्तु नेल्ल, चिक्ब नेल्ल नु रागीम ब्रोंइशा बाक्ब मार मार नेल्ल डोंगा रे गूमा बाक्त।

#### परमप्रभु यावेमी गेशो लोव

20 मिनु नोले नोआहम परमप्रभु यावे कली चढेतीक का सेला बाक्त। मिनु चढेचा दुम्ब बस्तु नु चढेचा दुम्ब चिक्ब नेल्ल लाइश्शा चोशा चढेतीक चढेवा बाक्त। उत्पत्ती ७:२ 21 मिनु परमप्रभु यावेमी मेको ब्रोंइशो रिना नाम्शा, ग्येरसे बाक्त। आ थुंमी “मुरुम मरिम्शो पतीकेम खप कली मुल सराप गेनायो मपाइनुड। मुर आ थुं मरिम्शो बाक्त हना यो, गेनायो सराप मपाइनुड। गो ब्रोंइशा बाक्ब नेल्ल आन कली साइश्शा क्याम्ताकड। मोदेशो गेनायो लेंशा मपाइनुड। उत्पत्ती ६:५; अय्युब १४:४; भजन संग्रह १४:३; मत्ती १५:१९; रोमी ३:२३ 22 रागी बाक्म सम्म शोक्चा, ख्बुम्चा नु रिक्चा तांडिसीब। ग्यू पाइब, हुप्ब, हिंउद नु बर्खा दुम्ब। नाक्दो नाक्त दुम्ब” दे लोव पवा बाक्त। येरमीया ३३:२०, २५

#### परमप्रभुमी आसीक गेशो

9 मिनु परमप्रभुमी नोआह नु आ तौ आन कली आसीक गेमी बाक्त। मेकोमी “तमी तौ थिशा, सोशा बोशा शुश दुमीन। रागी प्रिंदीने। उत्पत्ती १:२८ 2 रागी डा जन्तु नेल्ल, सरीडम बेरब चिक्ब, खपीम ग्रेशा गाक्ब आइक्च जन्तु नु समुन्द्र डा डांड नेल्ल, इन कली तशा, हिंचा माल्नीम। मेको आन कली इन गुइमी गेता। 3 डोंइती इन कली गिगी खाइ ब्वचा गेता। मुल गो ब्रोंइशा बाक्ब जन्तु नेल्ल इन कली ब्वचा गेतन्नी। उत्पत्ती १:२९; कलस्सी २:१६ 4 क्योरशा हुश मचुइक्थु चहिं मब्वने। मारदे हना हुशेमी ब्रोंइतीक सोक्त बाक्ब। 5 मुरुमी मुर कली साइक्तु हना, जन्तुमी मुर कली साइक्तु हना, मेको यो साइक्चा पुंडसीब। मुरुमी आ लोक्ब साइक्तु हना, मेको यो साइक्चा पुंडसीब। लेवी ३:१७; लेवी १७:१०-१४; ब्यवस्था १२:२३ 6 सु सुमी मुर साइश्शा हुश जारबा, मेको यो मोपान साइश्शा, हुश जारचा पुंडसीब। मारदे हना गो मुर कली आं खोंदेशो पा सेल्ला। प्रस्थान २१:१२; लेवी २४:१७; गन्ती ३५:३३; मत्ती २६:५२; रोमी १३:४; प्रकाश १३:१० 7 गे रागीम सोशा बोशा शुश दुमीने” दे परमप्रभुमी नोआह कली देंमाक्त।

#### परमप्रभुमी कबल पशो

8 मिनु नोले परमप्रभुमी नोआह नु आ तौ आन कली 9 “नेनीन, गे नु इन नोले डा चच युइ नु आं कबल पाइनुड। उत्पत्ती ६:१८ 10 डोंगामी ब्रोंइशा बाक्ब चिक्ब, बी ब्यफ, रागी डा जन्तु गे नु डोंगा रे गूशो नेल्ल नु आं कबल पाइनुड। होसे २:२० 11 गो मार कबल पाइनुड देंशा हना, ब्रोंइशा बाक्ब नेल्ल आन कली ब्वाक्कुम मसाइक्नुड। रागी बिग्रेचा कली गेनायो ब्वाक्कु मबारपाइक्नुड” देंमाक्त। 12 मिनु परमप्रभुमी “गे नु गे नु ब्रोंइशा बाक्ब नेल्ल इन कली आं कबल पतीके चिनु का गेनुड। मेको इन नोले डा पाला नेल्ल आन कली यो बाक्ब। 13 गो गोस्सुमी आं वाक्श वोइक्नुड। मेको गो रागी नु कबल पशो आ चिनु बाक्ब। 14 मिनु गो रागी तारी गोस्स सोइक्तुनु, मेको गोस्सुमी आं वाक्श तांडिसीब। 15 मिनु गो गे नु मारेइ मारेइ ब्रोंइशा बाक्ब नु कबल पाता, दे मिम्नुड। गो गेनायो ब्रोंइशा बाक्ब नेल्ल आन कली ब्वाक्कुमी मसाइक्नुडमी। यसैया ५४:७-१० 16 मेको वाक्श गोस्सुम बाक्मेनु, गो मेको कली ताइनुड। मिनु गो रागीम बाक्ब मुर नु ब्रोंइशा बाक्ब नेल्ल नु गेना हना यो लीब कबल पाता, दे मिम्नुड” देंमाक्त। 17 मिनु परमप्रभुमी नोआह कली “मेको वाक्श कबल आ चिनु बाक्ब। गो गे नु रागीम ब्रोंइशा बाक्ब नेल्ल नु कबल पाता” देंमाक्त।



18 डोंगा रे गूशो नोआह आ तौपुकी शेम, हाम नु यफेथ बाक्मा बाक्त। हाम चहिं कनान आ आफ बाक्मावक्त। उत्पत्ती ५:३२<sup>19</sup> मेको सांफा नोआह आ तौ बाक्मा बाक्त। मेको रे रागी नेल्ल ब्रीमा बाक्त।

नोआहम अडगुर रू सेल्शो

20 मिनु नोआह रूमी गेय पाइब दुम्शा, अडगुर रू सेला बाक्त। मेको नेल्ल क्येडा डोंइती अडगुर खुम्ब मुर दुम्मावक्त।<sup>21</sup> मिनु अडगुर शांबु तूशा दुक्शा, आ ताम्बुमी शिश्रा इम्मावक्त।<sup>22</sup> मिनु कनान आ आफ हाममी आ आफ शिश्रा तशा, लाडगामी बाक्शो आ लोकब आस कली देंमावक्त। प्रस्थान २०:१२; हितोपदेस ३०:१७<sup>23</sup> मेको नेंशा, शेम नु यफेथम वा का सुर सुरम ग्याइशा लाष्ठा, नोले रे ग्रेना ग्रेन लशा, आस आफ आ ताम्बु ओवसा बाक्त। मिनु आस आफ आ भेत्रे रां सुम्से बाक्त। नोले रे ग्रेशा, आस आफ आ शिश्रा रां मताम्से बाक्त।<sup>24</sup> मिनु नोले नोआह आ दुक्शो रे सेंसे बाक्त। आ चचमी आ कली मार पवा, नेल्ल तुइक्ता बाक्त।

25 मिनु नोआहमी “कनान सराप रल। आ लोकब आस नेल्ल क्येडा आइक्च वाइल दुम्ल” दे सराप पवा बाक्त।<sup>26</sup> मिनु मेकोमी लेंशा “परमप्रभु, शेम आ परमप्रभु यावे ठेयब बाक्ब। कनान मेको आ नेल्ल क्येडा आइक्च वाइल दुम्ल” दे शेम कली आसीक गेवा बाक्त।<sup>27</sup> मिनु लेंशा “परमप्रभुमी यफेथ कली ‘सोशा बोशा शुश दुम्पदल। मेको शेम आ ताम्बुम बाक्चा तवल। कनान चहिं मेको आ वाइल दुम्ल’ ” दे लोत्र पवा बाक्त।

28 मिनु ठेयब ब्वाक्कु बारशा नोले, नोआह सहे सां ५० बर्स ब्रोंइमावक्त।<sup>29</sup> मिनु नोआह नेल्ल पा ९ सहे ५० बर्स ब्रोंइशा बेक्मावक्त।

रागी नेल्ल डा मुर  
१इतिहास १:५-२३

10 ब्वाक्कु बारम नोले नोआह आ तौपुकी शेम, हाम नु यफेथमी तौपुकी थीमा बाक्त। नोआह आ तौ आन चच युइ सु सु बाक्मा बाक्त देंशा हना,

यफेथ आ चच युइ

2 यफेथ आ तौ गोमेर, मागोग, मादै, यावान, तूबल, मेशेक नु तिरास बाक्मा बाक्त। इजीकीएल २७:१३-२२; इजीकीएल ३८:२; इजीकीएल ३९:१,६<sup>3</sup> गोमेर आ तौपुकी अश्केनज, रीफत नु तोगारमाह बाक्मा बाक्त।<sup>4</sup> यावान आ तौपुकी एलीशाह, कितीम, टारशीश नु दोदानीम बाक्मा बाक्त।<sup>5</sup> मेको मुरपुकी रे समुन्द्र आ नेक्था बाक्ब जरमेशो बाक्मा बाक्त। मेकोपुकी यफेथ आ चच युइ बाक्मा बाक्त। मेकोपुकी आंम रागीम बाक्शो बाक्मा बाक्त। मिनु आंम रागी रागीमी, आंम खिं खिं डा मुरुमी आंम लोत्र ब्वाक्मा बाक्त।

हाम आ चच युइ

6 हाम आ तौपुकी कूश, इजीप्त, पूत नु कनान बाक्मा बाक्त।<sup>7</sup> कूश आ तौपुकी शेबा, हवीलाह, साब्ताह, रामाह नु साब्तेका बाक्मा बाक्त। रामाह आ तौ निक्शी शेबा नु देदान बाक्सा बाक्त।

निम्रोद सक्ति पाइश्शो दुम्शो

8 मिनु कूशमी निम्रोद यो थिमावक्त। मेको बोल्यो नु सक्ति पाइश्शो मुर दुम्मावक्त।<sup>9</sup> मेको परमप्रभु यावे आ डोंइती सक्ति पाइश्शो सिखारी बाक्मावक्त। मोपतीके मुरुमी बोल्यो मुर का तशा “परमप्रभु यावे आ डोंइती निम्रोद खोदेंशो सक्ति पाइश्शो सिखारी बाक्बावक्त” दे देंतीके देंमा बाक्त। मत्ती ५:५<sup>10</sup> मिनु आ डोंइती डा राज्य बेबीलोन बाक्मावक्त। अरु एरेक नु अक्कद सहर बाक्मा बाक्त। मेको नेल्ल शिनार रागीम बाक्बाक्मा बाक्त।<sup>11</sup> निम्रोद मेको रागी रे अस्सुर जाक्शा, निनवे, रेहोबोथ-इर नु कालाह सहर सेला बाक्त।<sup>12</sup> निनवे नु कालाह सहर आस दातेमी रेसेन सहर सेला बाक्त। मेको ठेयब सहर बाक्मावक्त।

13 इजीप्त, लूदीम, अनामीम, लेहाबीम, नफ्तुहीम,<sup>14</sup> पथ्रुसीम, कस्तुहीम नु काफ्तोरीम आन आफ दुम्मावक्त। मेकोपुकी रे पलिस्ती यूमा बाक्त।

15 मिनु कनानमी आ डोंइती डा तौ सीदोन नु नोले हेथ थिमावक्त।<sup>16</sup> मिनु नोले यबुसी, एमोरी, गिरगाशी,<sup>17</sup> हिक्वी, अरकी, सिनी,<sup>18</sup> अरवादी, सेमारी नु हमामी थिमावक्त। नोले कनान रागी डा मुर शुश दुम्मा बाक्त।<sup>19</sup> कनान डा मुर आन रागी सीदोन रे गेरार गे नु गाजा सम्म दुम्मावक्त। सोदोम नु गोमोररा गे अदमाह, सेबोयीम नु लाशा सहर सम्म दुम्मावक्त।<sup>20</sup> मिनु हाम आ चच युइ आन खिं खिं डा मुर आन लोत्र, आन रू नु आन रागी बाक्मा बाक्त।

शेम आ चच युइ

21 शेम यफेथ आ लोकबमी यो तौपुकी थिमावक्त। शेम एबेर आ आल आन किकी पिपी बाक्मावक्त। उत्पत्ती ११:१०<sup>22</sup> शेम आ तौ चच युइ सु सु बाक्मा बाक्त देंशा हना, एलाम, अश्शुर, अरपक्शाद, लूद नु अराम बाक्मा बाक्त।<sup>23</sup> अराम आ तौपुकी ऊज, हुल, गेथेर नु माश बाक्मा बाक्त। उत्पत्ती २२:२१<sup>24</sup> मिनु अरपक्शाद शेलाह आ आफ दुम्मावक्त। शेलाह एबेर आ आफ दुम्मावक्त।<sup>25</sup> एबेरमी तौ निक्शी थिमावक्त। का आ नें पेलेग बाक्मावक्त। मारदे हना मेना रागी योक्शो बाक्मावक्त। पेलेग नें आ अर्थ भाग का बाक्मावक्त। अर्को आ नें योक्तन बाक्मावक्त। उत्पत्ती ११:८-९; ब्यक्स्था ३२:८<sup>26</sup> मिनु योक्तनमी अल्मोदाद, शेलेफ, हासार-मावेथ येराह<sup>27</sup> हदोराम, उजाल, दिकलाह,<sup>28</sup> ओबाल, अबीमा-एल, शेबा,<sup>29</sup> ओफीर, हवीलाह नु योबाब आन आफ दुम्मावक्त। मेको नेल्ल योक्तन आ तौ बाक्मा बाक्त।<sup>30</sup> मिनु आन बाक्तीक मेशा रे पूर्व डा सेफार माइश्शो पहाड सम्म दुम्मावक्त।<sup>31</sup> मिनु शेम आ चच युइ आन खिं खिं डा मुर आन लोत्र, आन रू नु आन रागी बाक्मा बाक्त।<sup>32</sup> मिनु मेको नोआह आ तौ नेल्ल आन खिं खिं डा मुर, आन चच युइ, आन आन रागी बाक्मा बाक्त। ब्वाक्कु बारशा नोले मेकोपुकी रे रागी नेल्ल ब्रीमा बाक्त।

बाबेल सहर डा लाइश्शो खिं

11 डोंइती रागी नेल्ल डा मुर लोत्र का ब्वाक्बाक्मा बाक्त।<sup>2</sup> मुरपुकी पूर्व गे लना लन बाक्मानु, शिनार नें पाइश्शो रागीम ठेयब दिम का थित्मे बाक्त। मिनु मेकेर खिं सेल्शा बाक्मा बाक्त।<sup>3</sup> मिनु मुरपुकीमी “लो, इंटा सेल्य। मिनु मीमी रिश्शो पा चोय” देंमा बाक्त। मिनु फुल्लु आ पा डा इंटा नु हिलो आ पा डा अल्कत्रा गुंडदमे बाक्त।

4 मिनु नोले मेकोपुकीमी “गोपुकी इं कली सहर का सेल्सीय, ठेयब लाइश्शो सरीड थिचा डा खिं का सेल्य। इं नें ठेयब सेल्सीशा, इं मुरपुकी रागी नेल्लेमी मब्राथु बाक्च” देंमुमा बाक्त।

5 मिनु परमप्रभु यावे मेको मुरपुकीमी सेल्शो सहर नु सरीड थिचशो ठेयब लाइश्शो खिं कोवथ थिमावक्त। उत्पत्ती १८:२१; भजन संग्रह १४:२<sup>6</sup> मिनु परमप्रभु यावेमी “लो, मेको नेल्ल थुं का डा मुर नमी। मेको नेल्ल लोत्र का ब्वाक्नीम। मेको आन नक गोशो गेय ला बाक्ब। मार मार मिम्त्मे, मेको नेल्ल पने चाप्नीम। प्रेरित २:१-११<sup>7</sup> मुल उइ लय। मेको आन पशो लोत्र खाल्शा पपाइय्य। मिनु कामी अर्को आ लोत्र मरुबल” देंमावक्त।<sup>8</sup> मोपा परमप्रभु यावेमी मुर आन कली नेल्ल रागीम फ्रादीमी बाक्त। मिनु मेकोपुकीमी सहर सेल्चा प्रोन्मे बाक्त। ब्यक्स्था ३२:८; लूका १:५१<sup>9</sup> मोपतीके मेको सहर आ नें बाबेल वोदमे बाक्त। मारदे हना मेकेर रे परमप्रभु यावेमी रागी नेल्ल डा मुर आन लोत्र खाल्दा बाक्त। मिनु परमप्रभु यावेमी मोपा मुर नेल्ल आन कली फ्रादीमी बाक्त।

शेम आ चच युइ

10 शेम आ आ चच युइ सु सु बाक्मा बाक्त देंशा हना, शेम सहे का बर्स दुम्मेनु, अरपक्शाद आ आफ दुम्मावक्त। मेना ब्वाक्कु बारशा सोवशो बर्स निक्शी दुम्शो बाक्मावक्त। १इतिहास १:२४-२७; लूका ३:३४-३६; उत्पत्ती

१०:२१-२२<sup>11</sup> मिनु शेम अरपक्शाद थिशा नोले ५ सहे बर्स ब्रॉइमाक्त। अरु तमी तौ यो थिमाक्त।

१२ मिनु अरपक्शाद ३५ बर्स दुम्मेनु, शेलाह आ आफ दुम्माक्त।<sup>13</sup> मिनु शेलाह थिशा नोले ४ सहे बर्स सां ब्रॉइमाक्त। अरु तमी तौ यो थिमाक्त।

१४ मिनु शेलाह ३० बर्स दुम्मेनु, एबेर थिमाक्त।<sup>15</sup> मिनु शेलाह एबेर थिशा नोले ४ सहे बर्स सां ब्रॉइमाक्त। अरु तमी तौ यो थिमाक्त।

१६ मिनु एबेर ३४ बर्स दुम्मेनु, पेलेग आ आफ दुम्माक्त।<sup>17</sup> मिनु एबेर पेलेग थिशा नोले ४ सहे ३० बर्स ब्रॉइमाक्त। अरु तमी तौ यो थिमाक्त।

१८ मिनु पेलेग ३० बर्स दुम्मेनु, रेऊ आ आफ दुम्माक्त।<sup>19</sup> मिनु पेलेग रेऊ थिशा नोले सहे निक्शी ९ बर्स ब्रॉइमाक्त। अरु तमी तौ यो थिमाक्त।

२० मिनु रेऊ ३२ बर्स दुम्मेनु, सेरूग आ आफ दुम्माक्त।<sup>21</sup> मिनु रेऊ सेरूग थिशा नोले, सहे निक्शी ७ बर्स ब्रॉइमाक्त। अरु तमी तौ यो थिमाक्त।

२२ मिनु सेरूग ३० बर्स दुम्मेनु, नाहोर आ आफ दुम्माक्त।<sup>23</sup> मिनु सेरूग नाहोर थिशा नोले सहे निक्शी बर्स ब्रॉइमाक्त। अरु तमी तौ यो थिमाक्त।

२४ मिनु नाहोर २९ बर्स दुम्मेनु, तेराह आ आफ दुम्माक्त।<sup>25</sup> मिनु नाहोर तेराह थिशा नोले सहे का १९ बर्स ब्रॉइमाक्त। अरु तमी तौ यो थिमाक्त।

२६ मिनु तेराह ७० बर्स दुम्मेनु, अब्राम, नाहोर नु हारान आन आफ दुम्माक्त।

तेराह आ चच युइ

२७ तेराह आ चच युइ सु सु बाक्मा बाक्त देंशा हना, तेराह अब्राम, नाहोर नु हारान आन आफ दुम्माक्त। हारानमी लोत थिमाक्त।<sup>28</sup> हारान चहिं आ आफ तेराह क्येडा डोंइती आ जरमेशो कल्दी डा ऊर सहरमी बेक्माक्त।

२९ मिनु अब्राम नु नाहोर निम्फामी ग्युंवे पाम्से बाक्त। अब्राम आ मीश आ नें साराइ बाक्माक्त। नाहोर आ मीश आ नें मिल्का बाक्माक्त। मिल्का हारान आ तमी बाक्माक्त। हारान मिल्का नु थिस्का आस आफ बाक्माक्त। उत्पत्ती २२:२०<sup>30</sup> साराइ आल मथीब बाक्माक्त।

३१ मिनु तेराहमी आ तौ अब्राम, आ चच लोत, हारान आ तौ, नु आ चाइमी, अब्राम आ मीश साराइ आन कली लाइश्शा, कल्दी रागी डा ऊर रे कनान रागी लचा गोव्रमे बाक्त। मिनु हारान माइश्शो सहर जाक्दीश्शा बाक्मा बाक्त। यहोसु २४:२; नेहेम्याह ९:७<sup>32</sup> तेराह सहे निक्शी ५ बर्स दुश्शा, हारान सहरम बेक्माक्त।

परमप्रभुमी अब्राम नु लोत्र पशो

१२ मिनु परमप्रभु यावेमी अब्राम कली “इ रागी, इ खिं खिं डा मुर नु इ आफ आ खिं रे लावो। तेको रागी लचा माल्नेवे, गो इ कली कौइनन। गन्ती २३:९; प्रेरित ७:३; हिब्रू ११:८<sup>2</sup> गो इ रे पा ठेयब जात डा मुर सेल्लुडमी। गो इ कली आसीक गेनन। इ नें ठेयब सेल्लुड। गे अर्को आन कली आसीक दुम्नेवे। उत्पत्ती २४:१, ३५; भजन संग्रह ७२:१७<sup>3</sup> सुमी इ कली आसीक गोवा, गो मेको कली आसीक गेनुड। सुम इ कली सराप पाइबा, गो मेको कली सराप पाइनुड। इ पर्वम रागी डा मुर नेल्ल आसीक ताइनीम” देंमाक्त। उत्पत्ती १८:१८; उत्पत्ती २२:१८; उत्पत्ती २६:४; उत्पत्ती २८:१४; प्रस्थान २३:२२; प्रेरित ३:२५; गलाती ३:८

अब्राममी परमप्रभु कली टिशो

४ मिनु अब्राम परमप्रभु यावे आ लोत्र नेंशा, हारान सहर रे गाक्माक्त। लोत यो अब्राम नु गाक्माक्त। हारान सहर रे गाक्मेनु, अब्राम ७५ बर्स, दुश्शो बाक्माक्त।<sup>5</sup> अब्राममी आ मीश साराइ, आ लोकब आ तौ, लोत, आन मारेइ मारेइ, हारान सहरमी ग्याथो वाइलीम वाइल आन कली यो लदा बाक्त। मिनु मेको नेल्ल कनान रागी लचा गोव्रमे बाक्त। मिनु लशा कनान रागी जाक्दीम्मा बाक्त।

परमप्रभुमी अब्राम कली रागी कौइशो

६ मिनु अब्राम कनान रागी जाक्दीश्शा, शेकेम सहर आ नेक्था मोरेह माइश्शो मुर आ रवा आ नेक्था जाक्दीम्माक्त। मेना कनान डा मुरपुकी रागीम बाक्शो बाक्मा बाक्त। उत्पत्ती ३५:४; यहोसु २४:२५-२६<sup>7</sup> मेकेर

जाक्दीम्मेनु, परमप्रभु यावे अब्राम आ डोंइती यूशा, मेको कली “एको रागी इ चच युइ आन कली गेनुड” दे लोत्र गेवा बाक्त। मिनु अब्राममी “गो परमप्रभु यावे कली ताता” दे चढेतीक का सेला बाक्त। उत्पत्ती १३:१५; उत्पत्ती १५:१८; उत्पत्ती १७:८; उत्पत्ती ३५:१२; प्रस्थान ६:४, ८; प्रस्थान ३२:१३; यहोसु २१:४३; प्रेरित ७:५<sup>8</sup> मेकेर रे लशा, बेथेल सहर आ पूर्व गे डा डांडामी आ ताम्बु याक्शा कीडा बाक्त। बेथेल सहर पच्छिम गे नु ए सहर पूर्व गे बाक्शा, मेकेर यो परमप्रभु यावे कली चढेतीक का सेल्शा, परमप्रभु यावे कली लोत्र पा ठेयब सेला बाक्त। उत्पत्ती ४:२६

अब्राम इजीप्त रागीम लशो

उत्पत्ती २०:१-१८; उत्पत्ती २६:७-११

९ मेकेर रे लशा, नेगेब माइश्शो रागी आ दक्खिन गे लमाक्त।<sup>10</sup> मिनु मेको रागीम अन्काल बाक्माक्त। मोपतीके मेकेर रे लशा, इजीप्त रागीम बाक्थ, लमाक्त। मारदे हना ठेयब अन्काल बाक्माक्त।<sup>11</sup> मिनु इजीप्त ओव्रचा क्येडा डोंइती अब्राममी आ मीश साराइ कली “नेनो, गे दारशो मीश मुर बाक्नेवे।<sup>12</sup> मिनु इजीप्त डा मुरुम इ कली तशा ‘मेको आ मीश बाक्ब’ दे आं कली साइक्नीम। इ कली चहिं ब्रॉइचा गेनीम।<sup>13</sup> मोपतीके ‘आ समी नड’ देनो। मिनु इ मो देंशो आ पर्वम गो साइक्चा मपुंइसीनुड, ब्रॉइचा ताइनुड” दे आ मीश कली मदा बाक्त।

साराइ कली लाइश्शो

१४ मिनु अब्राम इजीप्त रागीम जाक्दीम्मेनु, इजीप्त डा मुरपुकीमी साराइ आ पर्वम “मेरे मीश मुर थम दारशो बाक्ब” देंमुमा बाक्त।<sup>15</sup> मिनु फाराओ माइश्शो पिप आ मुरपुकीमी साराइ कली तशा “थम दारशो मीश मुर का ताइतक” दे मदमे बाक्त। मिनु साराइ कली फाराओ आ खिं लदमे बाक्त।<sup>16</sup> मिनु साराइ आ पर्वम अब्राम भेडा, ब्यफ, गधा, वाइलीम वाइल नु दलओठ मारेइ मारेइ गेचा पुंइसे बाक्त।

१७ तन्न परमप्रभु यावेमी फाराओ नु आ खिं डा मुर आन कली अब्राम आ मीश साराइ आ पर्वम ठेयब श्येत गेवा बाक्त।<sup>18</sup> मिनु फाराओमी अब्राम कली ब्रेशशा “गे आं कली मार पवी? मारदे ‘इ मीश बाक्ब’ मदेने? <sup>19</sup> मारदे ‘आं समी बाक्ब’ देंने? गो हेरा आं मीश सेल्ला। मुल इ मीश लतो। एकेर रे लावो” दे मदा बाक्त।<sup>20</sup> फाराओमी मेको लोत्र आ मुर आन कली माइश्शा, अब्राम, आ मीश नु आ नु बाक्ब नेल्ल आन कली मेकेर रे सोइक्त्तमे बाक्त।

अब्राम नु लोत ब्राशो

१३ मिनु अब्राम, आ मीश, आ मारेइ मारेइ नेल्ल नु लोत यो लाइश्शा इजीप्त रे नेगेब रागी लमाक्त।<sup>2</sup> अब्राम शुश बी ब्यफ क्यारश भेडा नु सुन चांदी पाइश्शो मुर बाक्माक्त।<sup>3</sup> मिनु दक्खिन डा नेगेब रे लशा, बेथेल सहर जाक्दीम्माक्त। मेकेर बेथेल सहर नु ए सहर आस दातेमी डोंइती आ ताम्बु कीतीकेम जाक्दीम्माक्त।<sup>4</sup> मिनु इजीप्त लचा क्येडा डोंइती मेकेर सेल्शो चढेतीकेमी लेश्शा जाक्दीश्शा, परमप्रभु यावे कली लोत्र पा, ठेयब सेला बाक्त। उत्पत्ती १२:८

<sup>5</sup> मिनु लोत के यो क्यारश भेडा, बी ब्यफ नु ताम्बु शुश बाक्माक्त।<sup>6</sup> मिनु अब्राम नु लोत आस मारेइ मारेइ शुश दुम्तीके मेको निक्शी काथा बाक्ने मचाप्से बाक्त।

<sup>7</sup> मिनु अब्राम आ गोठलापुकी लोत आ गोठलापुकी नु जीमे बाक्त। मेना मेको रागीम कनानी नु परिज्जीपुकी बाक्मा बाक्त।<sup>8</sup> मिनु अब्राममी लोत कली “गो पोबु नस। जिचा मदुम्ब। इ गोठलापुकी नु आं गोठलापुकी यो जिचा मदुम।<sup>9</sup> गे नु गो ब्राचा रिश्शो दुम्ब। एको रागी नेल्ल इ डोंइती बाक्ब। गे पेरा गे लते हना, गो ग्युरा गे लाइनुड। गे ग्युरा गे लते हना, गो पेरा गे लाइनुड” देंमाक्त।

<sup>10</sup> मिनु लोतमी यर्दन खोला आ नेक्था ब्वाक्कु बाक्शो रिश्शो दिंम तवा बाक्त। मेको परमप्रभु यावे आ रू नु इजीप्त रागी खोर्देशो दारशो तांइसे बाक्त। सोआर सहर सम्म मोर्देशो दारशो तांइसे बाक्त। परमप्रभु यावेम सोदोम नु गोमोररा सहर मीम जेप्पाइक्चा क्येडा डोंइती मेकेर थाम्पा दारशो

बाक्मावक्त। उत्पत्ती २:८-१०<sup>11</sup> मिनु लोत यर्दन खोला डा दिंम योव्रशा, पूर्ब गे लमावक्त। मोपा लोत नु अब्राम ब्रासा बावक्त।

12 मिनु अब्राम कनान रागीम बाक्शो बाक्मावक्त। लोत चहिं यर्दन खोला डा दिंम बाक्शो सहर आन नेक्था बाक्शा, आ ताम्बु याक्ना याक्न सोदोम सहर सम्म जाक्दीम्मावक्त।<sup>13</sup> सोदोम सहर डा मुरपुकी थम मरिश्शो बाक्मा बावक्त। मेकोपुकीमी परमप्रभु यावे आ डोंइती शुश मरिश्शो पामे बावक्त।  
उत्पत्ती १८:२०; उत्पत्ती १९:४-९

#### परमप्रभुम अब्राम कली लोत्र गेशो

14 लोत नु अब्राम ब्रासा नोले परमप्रभु यावेमी अब्राम कली “इ बाक्तीके रे पूर्ब, पच्छिम, उत्तर, दक्खिन गे कोव्रडो।<sup>15</sup> गे तेको तेको रागी ताइनेवे, मेकोन इ कली नु इ चच युइ आन कली गेना हना यो कली गेनुड। उत्पत्ती १२:७<sup>16</sup> गो इ चच युइ खप डा फुरक खोदेशो पा शुश सेल्लुड। मुरुम फुरक हिकने चाप्तेक्म हना ला, इ चच युइ आन कली यो हिकने चाप्नीम। तन्न मचाप्नीम। उत्पत्ती २८:१४; गन्ती २३:१०; १राजा ४:२०<sup>17</sup> बोक्को, रागी नेल्ल हिरशा लावो। मेको नेल्ल इ कली गेनन” दे परमप्रभु यावेमी लोत्र गेवा बावक्त।

18 मिनु अब्राममी आ ताम्बु याक्शा, हेब्रोन रागी डा माप्ने माइश्शो ब्वाकीम कीडा बावक्त। मिनु मेकेर परमप्रभु यावे कली चढ़ेतीक का सेला बावक्त। उत्पत्ती १४:१३-२४

#### अब्राममी लोत कली प्रोंइशो

14 मिनु शिनार डा पिप अम्राफेल, एल्लासार डा पिप अरयोक्, एलाम डा पिप केदोर-लाओमेर नु गोयीम रागी डा पिप तिदालम सासन पामे ना, यहोसु १२:२३<sup>2</sup> सोदोम डा पिप बेरा, गोमोररा डा पिप बिरशा, अदमाह डा पिप शिनाब नु सेबोयीम डा पिप शेमेबेर, बेला सहर डा पिप नु लडाइ पामे बावक्त। बेला सहर कली सोआर यो देंनीम। उत्पत्ती १९:२४<sup>3</sup> मेको नेल्ल सिददीम दिंममी लडाइ पथ खुम्सीशो बाक्मा बावक्त। 4 मारदे हना मेकोपुकीमी लडाइ का ब्रुशा नोले, १२ बर्स सम्म श्येत जशा, पिप केदोर-लाओमेर कली मार मार गेचा माल्मा बावक्त। मोपतीके मेकोपुकीम १३ बर्समी “मगेय, लडाइ पय” दे सल्ला पामे बावक्त। 5 मिनु १४ बर्समी पिप केदोर-लाओमेर नु मेको आ वारच पिपपुकी अशतारोथ-कारनाइमम बाक्ब रेफाइमपुकी, हामम बाक्ब जूजीमपुकी, शावेह-किरयथ-थाइम बाक्ब एमीमपुकी, उत्पत्ती ३६:२०-३०<sup>6</sup> सेडर पहाडम बाक्ब होरी आ मुर नेल्ल आन कली एल-पारान मुर बाक्तीक आ नेक्था सम्म फ्रूमे बावक्त। 7 मेको ग्राब पिप आन लां लेशशा, एन-मिश्पात जाक्शा, हासासोन-तामारम बाक्ब अमालेकी नु एमोरी आन कली फ्रूमे बावक्त। एन-मिश्पात कली कादेश यो देंनीम।

8 मेना सोदोम डा पिप, गोमोररा डा पिप, अदमाह डा पिप, सेबोयीम डा पिप नु बेला डा पिप सल्ला पशा, बेला सहर कली सोआर यो देंनीम 9 सिददीम दिंममी एलाम डा पिप केदोर-लाओमेर गोयीम रागी डा पिप तिदाल, शिनार डा पिप अम्राफेल नु एल्लासार डा पिप अरयोक् नु लडाइ पथ जाक्मा बावक्त। ४ जना पिपपुकीम ५ जना पिप नु लडाइ पशो बाक्मा बावक्त। 10 मिनु सिददीम डा दिंममी अल्कत्रा खाल्टा शुश बाक्मा बावक्त। मिनु सोदोम नु गोमोररा डा पिप प्रोक्शा, खाल्टा आगा दोक्सा बावक्त। लीशो मुरपुकी चहिं पहाड गे प्रोक्मा बावक्त। 11 मिनु केदोर-लाओमेर नु आ हुलमी सोदोम नु गोमोररा सहर डा मुर नु आन मार मार नेल्ल रोइश्शा लदमे बावक्त। 12 मिनु मेकोपुकीमी सोदोम सहरम बाक्शो अब्राम आ लोकब आ तौ लोत नु आ मारेइ मारेइ नेल्ल यो लाइश्शा लमा बावक्त। उत्पत्ती १३:१०-१२

13 मिनु पहाडम प्रोक्शो मुर कामी हिब्रू अब्राम कली मेको लोत्र शेंदा बावक्त। अब्राम चहिं एमोरी माप्ने आ ब्वाकीम बाक्शो बाक्मावक्त। माप्ने एश्कोल नु आनेर वोबु बाक्सा बावक्त। मेको अब्राम कली वारच पाइब बाक्मा बावक्त। 14 मिनु अब्राममी आ लोकब आ तौ ग्याइश्शो नेंशा, आ खिंमी जरमेशो सहे सां १८ जना लडाइ पचा कली शेंसीशो मुर कली या गेशा, ठीक पवा बावक्त। मिनु मेकोपुकीमी रोइक्ब आन कली दान सहर सम्म खेदा पामे

बावक्त। यहोसु १९:४७; न्यायाधीस १८:२९<sup>15</sup> नाक्दोमी अब्राममी आ मुर आन कली हुल निक्शी पशा, रोइक्बपुकी नु लडाइ पशा ग्राशा, होबाह सम्म खेदा पामे बावक्त। होबाह दमस्कस सहर आ उत्तर गे बाक्ब।<sup>16</sup> मोदेशो पा अब्राममी सोदोम नु गोमोररा रे रोइश्शा मारेइ मारेइ नु आ लोकब आ तौ लोत आ मारेइ मारेइ नेल्ल, मीश मुर नेल्ल नु मेको निक्शी सहर डा मुर नेल्ल लेप्पदा बावक्त।

#### मेल्कीसेदेक नु अब्राम

17 मोपा अब्राम केदोर-लाओमेर नु आ वारच पिपपुकी नु लडाइ पशा ग्राशा, लेशशा नोले सोदोम डा पिप शावेह माइश्शो दिंमम जाक्शा, अब्राम कली गुथ जाक्मावक्त। शावेह माइश्शो दिंम कली पिप आन दिंम यो देंनीम। हिब्रू ७:१-४<sup>18</sup> मिनु सालेम डा पिप मेल्कीसेदेकम अब्राम नु आ मुर आन कली शोब्ले नु अडगुर शांबु चाक्गा बावक्त। मेको नेल्ल क्येडा ठेयब परमप्रभु कली चढ़ेब बाक्मावक्त। भजन संग्रह ११०:४; भजन संग्रह ७६:३<sup>19</sup> मिनु मेकोमी अब्राम कली आसीक गेशा “सरीड नु रागी सेल्ल नेल्ल क्येडा ठेयब परमप्रभु आ आसीक इ कली रल।<sup>20</sup> मिनु नेल्ल क्येडा ठेयब परमप्रभु मान ताइब बाक्ब। मारदे हना इ जोरी सत्रु इ गुइमी गेशा, इ कली ग्रापाइक्नु” दे ठेयब सेला बावक्त। मिनु अब्राममी नेल्ल योव्रक १० भाग डा भाग का मेल्कीसेदेक कली गेवा बावक्त। उत्पत्ती २८:२२; लेवी २७:३०-३२<sup>21</sup> मिनु सोदोम डा पिपमी अब्राम कली “मुर ला गेयी। अरु मार मार इन कली दुम्स्त” देंमावक्त।<sup>22</sup> मिनु अब्राममी सोदोम डा पिप कली “गो आं गुइ परमप्रभु यावे, नेल्ल क्येडा ठेयब सरीड नु रागी सेल्ल परमप्रभु गे पोक्शा कसम जाता।<sup>23</sup> गो इन के मारेइ मलाइक्नुड। श्येले का, जुत्ता आ डोरी का यो मलाइक्नुड। मिनु गेमी ‘गो अब्राम कली शुश शॉप पाइश्शो सेल्ला’ दे गेनायो देंने मचाप्नीनी।<sup>24</sup> आं गेय पाइब आन जशो चहिं लाइक्नुड। गो नु गाक्ब आनेर, एश्कोल नु माप्ने आन भाग चहिं लाइक्का गेन” देंमावक्त।

अब्राम आ आल  
उत्पत्ती १७:-

15 मिनु नोले परमप्रभु यावेमी अब्राम कली डोमु खोदेशो पा कोंइतीक कोंइदा बावक्त। मिनु मेकोमी अब्राम आ नें थिशा “अब्राम महिनो। गो इ कली कोव्रनन। शुश आसीक गेनन” देंमावक्त। गन्ती २४:४, १६; भजन संग्रह ३:४<sup>2</sup> तन्न अब्राममी “आं कली मार गेनीनी डा? आं के आल मबाक्नीम। आ अडस ताइब दमस्कस डा एलीएजर दुम्ब।<sup>3</sup> गे आं कली तमी तौ मगेयीनी। मुल आं खिंम जरमेशो वाइलम आं अडस ताइब दुम्स्त” देंमावक्त। 4 मिनु परमप्रभु यावेमी लेंशा “मेको मुरुम इ अडस मताइब। इ आंम रं डा इ तौमी इ अडस ताइब” देंमावक्त।

5 मिनु मेकोमी अब्राम कली ताम्बु रे गुंइशा “सरीड गे कोव्रडो, सोरुल आन कली हिकको। मेको हिकने चाप्नेवे? गिश बाक्मा, इ चच युइ यो मिश दुम्नीम” देंमावक्त। उत्पत्ती २२:१७; प्रस्थान ३२:१३; ब्यक्स्था १:१०; हिब्रू ११:१२<sup>6</sup> मिनु अब्राममी परमप्रभु यावे आ लोत्र थमा सुदा बावक्त। मिनु परमप्रभु यावेमी अब्राममी थमा सुइश्शो तशा “ठीक पाइब मुर का बावक्त” दे तुइक्ता बावक्त। रोमी ४:३-५; याक्ब २:२३

7 मिनु लेंशा अब्राम कली “गो परमप्रभु यावे नड। गो एको रागी इ कली गेचा कली कल्दी डा ऊर सहर रे गुंइताक्न” देंमावक्त। उत्पत्ती ११:३१; प्रस्थान ३:१४; यसैया ४५:५; यूहन्ना ८:२४-२९<sup>8</sup> मिनु अब्राममी “परमप्रभु, परमप्रभु यावे, आं के रागी दुम्ब, दे दोपा तुइक्नुडा डा?” दे हिल्लो पवा बावक्त। 9 मिनु मेकोमी “आं कली बर्स सां डा बी का, बर्स सां डा क्यारश का, बर्स सां डा सांड का, ढुकुर का परवा आ चाइक्ब का चाक्ती” देंमावक्त। 10 मिनु अब्राममी मेको नेल्ल चाक्शा क्योरशा, फेके पा रिक्शा, फेके का एर गे, फेके का ओथ गे पा वोदा बावक्त। ढुकुर नु परवा चहिं फेके मसेला बावक्त, येरमीया ३४:१८-१९<sup>11</sup> मिनु ठेयब चिक्बपुकी मेको श्ये तशा, जुक्तमे बावक्त। तन्न अब्राममी “हाइ हाइ” दे ग्रीशा खेरमी बावक्त।

## परमप्रभुमी कबल पशो

12 मिनु नां रिक्वावानु, अब्राम मारेड मतुडक्वा डा पा निन्द्रा पवा बाक्त। मिनु शुश हिंचा माल्शो आ एर ऑथ नेल्ल छिडछिड दुम्माक्त। उत्पत्ती २:२१; १सामुएल २६:१२; यसैया २९:१०<sup>13</sup> मिनु मेकोमी अब्राम कली “इ तौ चच युड अर्को रागीमी अर्को रागी डा मुर दुम्नीम। मेकेर बाक्मानु, वाइलीम वाइल यो दुम्नीम। मेकेर ४ सहे बर्स सम्म श्येत जाइनीम। प्रस्थान १:१३; प्रस्थान १२:४०; प्रेरित ७:६<sup>14</sup> गो चहिं मेको आन बाक्शो रागी डा मुर आन कली निसाफ पा सजाइ गेनुड। मारदे हना इ मुर आन कली वाइलीम वाइल सेल्नीम। मिनु नोले इ मुरपुकीम मेको आन मारेड मारेड लाइशा, मेको रागी रे गूशा लाइनीम। प्रस्थान ३:२१-२२; प्रेरित ७:७<sup>15</sup> गे चहिं थुं नाइशा इ किकी पिपी आन बाक्तीक लाइनेवे। शुश बर्स दुम्शा बेक्नेवे। उत्पत्ती २५:७-८<sup>16</sup> इ मुरपुकी ४ पाला नोले ला एकेर लेश्शा जाक्नीम। मारदे हना एमोरी आन मरिश्शो पशो मनुश्शो बाक्त” दे परमप्रभु यावेमी देंमाक्त। प्रेरित ७:७<sup>17</sup> मिनु नां रिक्शा, छिडछिड दुम्शा नोले मी ब्रशो चुप्नु का गूमाक्त। मिनु ब्रशो तोव्रशी का मेको श्ये आ एर ऑथ गाक्माक्त। प्रस्थान १९:१८<sup>18</sup> मेको नाक्ती परमप्रभु यावेमी अब्राम नु कबल पशा “मेको रागी इ चच युड आन कली गेनुड। मेको इजीप्त डा ठेयब खोला रे युफ्रेटीस सम्म बाक्ब। उत्पत्ती १२:७; १राजा ८:६५; १राजा ५:१<sup>19</sup> मेकेर बाक्बपुकी केनी, केनीज्जी, कादमोनी,<sup>20</sup> हिती, परिज्जी, फाइम,<sup>21</sup> एमोरी, कनानी, गिरगाशी नु यबुसी आन रागी नेल्ल इ कली गेनुड” दे अब्राम कली लोव्र गेशा, कबल पवा बाक्त।

हागार नु इश्माएल  
उत्पत्ती २१:९-२१

16 अब्राम आ मीश साराइ आल मथीब बाक्माक्त। मिनु साराइ नु इजीप्त डा वाइलीम का बाक्माक्त। मेको आ नें हागार बाक्माक्त।<sup>2</sup> मिनु साराइमी अब्राम कली “नेनीन, परमप्रभु यावेमी आं कली आल मगेयी। मोपतीके आं वाइलीम नु बाक्कीन। मोपा गो आल ताइनुडा, कों?” देंमाक्त। मिनु अब्राममी आ मीशमी मार देंमे, मेको पवा बाक्त। उत्पत्ती ३०:३,९<sup>3</sup> मिनु अब्राम कनान रागीम १० बर्स बाक्म नोले, आ मीश साराइमी आ इजीप्त डा वाइलीम हागार लाइशा, आ वोंइश कली गेवा बाक्त।<sup>4</sup> मिनु अब्राम हागार नु इम्माक्त। मिनु हागार कोव्रज कुरशो दुम्माक्त। मेको तुइशा, ठेयब लेश्शो दुम्शा, आ होव्रपोक्म कली मटिवा बाक्त।<sup>5</sup> मिनु साराइमी अब्राम कली “आं कली मरिश्शो दुम्तीके इन कली दुम्ला। गो आं वाइलीम इन कली गेता। मुल आंम कली कोव्रज कुरशो तशा, आं कली आइक्व सेल्ती। परमप्रभु यावेमी गे नु गो, इस दातेम निसाफ पवल” देंमाक्त।<sup>6</sup> मिनु अब्राममी “नेनो, इ वाइलीम इ गुइमी बाक्ब। मेको कली इ दाक्शो पावो” दे साराइ कली देंमाक्त। मिनु साराइमी हागार कली हुइक्तानु, मेको प्रोक्माक्त।

## हागार प्रोक्शो

<sup>7</sup> मिनु परमप्रभु यावे आ स्वर्ग डा गेय पाइबमी हागार कली गोरशो रागी शुर लतीक लां डा ब्वाक्कु बुक्तीके आ नेक्था थिदा बाक्त। प्रस्थान १४:१९; प्रस्थान २३:२०; गन्ती २२:२२; १राजा १९:७; १राजा १९:७; २राजा १९:३५<sup>8</sup> मिनु मेकोमी “हागार, साराइ आ वाइलीम, ते लशा पिनी?” दे हिल्लो पवा बाक्त। मिनु हागारमी “आं होव्रपोक्म साराइ आ डोंइती रे प्रोक्ती” दे लोव्र लेत्ता बाक्त।<sup>9</sup> मिनु परमप्रभु यावे आ स्वर्ग डा गेय पाइबमी मेको कली “इ होव्रपोक्म आ खिं लेतो। मिनु मेको आ अरेशो टिशा बाक्को” देंमाक्त।<sup>10</sup> मिनु परमप्रभु यावे आ स्वर्ग डा गेय पाइबमी लेंशा “इ चच युड आन कली शुश दुम्पाइक्नुड। इ मुरपुकी सुइमी हिक्ने मचाप्पा डा पा शुश दुम्नीम” देंमाक्त। उत्पत्ती १७:२०<sup>11</sup> मिनु परमप्रभु यावे आ स्वर्ग डा गेय पाइबमी लेंशा “नेनो, गे कोव्रज कुरशो बाक्नेवे। तौ का थीनेवे। मेको कली इश्माएल नें वोइक्वा माल्नेवे। मारदे हना परमप्रभु यावेमी इ श्येत तात्तु। प्रस्थान २:२३; अय्युब ३४:२८; भजन संग्रह ९:१३; यसैया ४१:१७; याकूब

५:४<sup>12</sup> इ तौ जीब दुम्ब। मुर नेल्ल नु जीब। मुरपुकी यो मेको नु जीनीम। मेको आ लोक्बपुकी नु यो जीब दुम्ब” देंमाक्त। उत्पत्ती २५:१८<sup>13</sup> मिनु हागारमी आ नु लोव्र पाइब परमप्रभु यावे कली “गे आं कली ताइब परमप्रभु ननी। गो थमा पा आं कली ताइब कली ताता” देंमाक्त। उत्पत्ती २२:१४; प्रस्थान ३:७; २राजा १३:४<sup>14</sup> मोपतीके मेको ब्वाक्कु बुक्तीक आ नें बेयर-लहाइ-रोइ वोदमे बाक्त। मेको कादेश नु बरेद आस दातेम बाक्ब। उत्पत्ती २४:६२; उत्पत्ती २५:११

<sup>15</sup> मिनु हागारम अब्राम के तौ का थिमाक्त। अब्रामम मेको कली इश्माएल नें वोदा बाक्त।<sup>16</sup> हागारम इश्माएल थिमेनु, अब्राम ८६ बर्स दुम्शो बाक्माक्त।

## परमप्रभुमी अब्राम नु कबल पशो

17 मिनु अब्राम ९९ बर्स दुम्मेनु, परमप्रभु यावे अब्राम आ डोंइती गूशा, मेको कली “गो नेल्ल क्येडा सक्ति पाइश्शो परमप्रभु नड। गे, गो नु बाक्शा, ठीक पाइब दुमो। उत्पत्ती ३५:११; प्रस्थान ६:३; ब्यक्स्था १०:१२<sup>2</sup> मिनु गो गे नु आं कबल पाइनुड। गो इ मुर हिक्ने मचाप्पा डा पा शुश सेल्नुडमी” देंमाक्त।<sup>3</sup> मिनु अब्राम खुम्की पा बाक्माक्त। परमप्रभुमी मेको कली<sup>4</sup> “नेनो, मेको गो, गे नु आं कबल पतीके बाक्ब। गे शुश रागी डा मुर आन किकी पिपी दुम्नेवे।<sup>5</sup> मुल रे इ नें अब्राम देंचा मदुम्ब। इ नें अब्रामहाम दुम्वा माल्ब। मारदे हना गो इ कली शुश रागी डा मुर आन किकी पिपी सेल्तन। रोमी ४:११, १७<sup>6</sup> गो इ रे शुश मुर सेल्नुडमी, रागी रागी डा मुर सेल्नुड। इ रे पिपपुकी यो दुम्नीम।<sup>7</sup> मिनु गो गे नु लोव्र पा आं कबल पाइनुड। गो इ चच युड नु यो आं कबल पाइनुड। मेको गेना हना यो लीब कबल बाक्ब। गो इ परमप्रभु नु इ चच युड आन परमप्रभु नड।<sup>8</sup> मुल गे इ बाक्तीक रागीमी अर्को रागी डा मुर बाक्नेवे। नोले गो एको कनान रागी गेना हना यो इन कली नु इ चच युड आन कली गेनन्नी। गो चहिं मेको आन परमप्रभु दुम्नुड” दे अब्रामहाम कली देंमाक्त। उत्पत्ती ३५:२७; हिब्रू ११:९-१०; प्रेरित ७:५

<sup>9</sup> मिनु परमप्रभुमी अब्रामहाम कली “आं कबल पशो डा लोव्र नेल्ल टिवो। मिनु इ नोले इ चच युडपुकीमी नेल्ल पालामी यो आं कली मिम्शा, टिचा माल्नीम।<sup>10</sup> गे नु इ नोले डा तौ चच युड आन पचा माल्शो कबल मार बाक्त देंशा हना, इ चारतीक डा कुशुल कुल पा खोइक्वा माल्नेवे। गे नु इ चच युड, वोंइश मुर नेल्ल कली कुशुल खोइक्तीक चिनु खोइक्वा माल्नीम। लेवी १२:३; यूहन्ना ७:२२<sup>11</sup> मेको गे नु गो इस कबल पशो आ चिनु बाक्ब। इजीकीएल २०:१२; ब्यक्स्था ३०:६; रोमी ४:११<sup>12</sup> मुल रे इ पाला डा मुरुम आन तौ कली ८ नाक्ती दुम्मानु, खोइक्तीक चिनु खोइक्वा माल्नीम। इ खिंम जरमेशो वोंइश आल, तेको तेको रागी रे ग्याप्शो इ वाइल नु आन तौ नेल्ल आन कली यो खोइक्तीक चिनु खोइक्वा माल्नीम।<sup>13</sup> इ खिंम जरमेशो, इ चांदीम ग्याप्शो मुरपुकी कली यो खोइक्तीक चिनु खोइक्वा माल्नीम। मिनु आं कबल पशो डा चिनु इ रांम बाक्वा माल्ब। मेको गेना हना यो लीब कबल बाक्ब।<sup>14</sup> खोइक्तीक चिनु मखोइश्शो वोंइश मुर नु वोंइश आल आन मुर आन दाते रे तिल्चा पुंइसीनीम। मारदे हना मेकोपुकीमी आं कबल पशो प्रोंइशो बाक्नीम” देंमाक्त।

<sup>15</sup> मिनु परमप्रभुमी अब्रामहाम कली “गे इ मीश कली ‘साराइ’ मदेचा, मुल रे मेको कली ‘सारा’ नें वोइक्वा माल्नेवे।<sup>16</sup> गो मेको कली आसीक गेनुड। गो इ कली मेको रे तौ का गेनुड। मिनु सारा रागी रागी डा मुर नु जात जात डा मुर आन पिप आन ममा दुम्ब” दे परमप्रभुमी देंमाक्त। उत्पत्ती १२:२-३<sup>17</sup> मिनु अब्रामहाममी खुम्की पा बाप्शा, रिश्शा “सहे का बर्स डा मुरुम आल थीबा? सारा ९० बर्स दुम्शा, आल थिने चाप्पा?” दे आंम कली देंमाक्त। उत्पत्ती १८:१२; उत्पत्ती २१:६; लूका १:१८; रोमी ४:१९-२१<sup>18</sup> मिनु अब्रामहाममी परमप्रभु कली “इश्माएल इन डोंइती बाक्ल” देंमाक्त।<sup>19</sup> मिनु परमप्रभुमी “ममाइ, इ मीश सारामी थमा पा तौ का थीब। मेको आ नें इसहाक वोइक्वा माल्नेवे। मेको नु आं कबल पतीक गेना हना यो दुम्ब। मेको आ नोले डा आ तौ चच युड नु यो लीब।<sup>20</sup> इश्माएल आ पर्बम मार देंने, गो मेको नेल्ल नेंता। नेनो, गो मेको कली आसीक गेनुड। मेको सोशा

बोशा, शुश दुम्ब। गो मेको कली १२ जना पिप आन आफ सेल्लुड। गो मेको कली ठेयब जात दुम्पाइक्नुड। उत्पत्ती १६:१०; उत्पत्ती २१:१३, १८; उत्पत्ती २५:१६<sup>21</sup> तन्न आं कबल इसहाक नु पाइनुड। सारामी बर्स का नोले इसहाक थीब” देमाक्त।<sup>22</sup> मिनु परमप्रभु अब्राहाम नु लोत्र पने थुम्शा लमाक्त।

### खोइक्तीक चिनु आ पबर्म शेंशो

<sup>23</sup> मिनु परमप्रभुमी लोत्र पवा नाक्ती अब्राहाममी आ तौ इश्माएल, आ खिमी जरमेशो नु ग्याप्शो वाइल नु आ खिं डा वोंइश मुर नेल्ल आन कली खोइक्तीक चिनु खोइक्पाइक्मी बाक्त।<sup>24</sup> अब्राहाममी खोइक्तीक चिनु खोदा नाक्ती ९९ बर्स दुम्शो बाक्माक्त।<sup>25</sup> आ तौ इश्माएल खोइक्तीक चिनु खोइक्तीक नाक्ती १३ बर्स दुम्शो बाक्माक्त।<sup>26</sup> मिनु अब्राहाम नु इश्माएल नाक्त कामी खोइक्तीक चिनु ताम्से बाक्त।<sup>27</sup> आ खिं डा वोंइश मुर नेल्ल, आ खिं जरमेशो नु रागी रे ग्याप्शो वाइल नेल्लेम यो मेको नाक्ती खोइक्तीक चिनु तामे बाक्त।

### परमप्रभु माम्रे आ ब्वाकीमी गूशो

**18** मिनु काबु नाक्ती अब्राहाम माम्रे आ ब्वाकीमी बाक्माक्त। आ ताम्बु आ लाप्चोमी निस्से बाक्त। मारदे हना शुश हुप्ता बाक्त। मेना परमप्रभु यावे मेको कली गुम्थ जाक्माक्त।<sup>2</sup> मिनु मुर सां गूशा, आ डोंइती राप्शो तवा बाक्त। मेको आन कली तशा, छुल बोक्शा बाप्शा, सेउ पवा बाक्त। हिब्रू १३:२<sup>3</sup> मिनु अब्राहाममी “आं परमप्रभु, आं कली दाक्ताक्नी हना, इन गेय पाइब रे मो मलने।<sup>4</sup> इन खोइल चिक्चा कली ब्वाक्कु गेनन्नी। मिनु चिक्शा, रवा आगाम नांइसीन।<sup>5</sup> गो इन कली इक्का शोब्ले ब्रथ लाइनुड। लाम्ज जचा माल्नीनी। मारदे हना गेपुकी इन गेय पाइब कली गुम्थ जाक्शो बाक्नीनी” देमाक्त। मिनु मेकोपुकीमी “इ देंशो खोदेंशो पावो” देमा बाक्त।

<sup>6</sup> मिनु अब्राहाम दोरशा, ताम्बुम लशा, सारा कली “गे रीब पा सेआह सां रिम्शो फस के शोब्ले चोवो” देमाक्त। *सेआह का ७ लिटर पुक्तीके बाक्ब।*

<sup>7</sup> अब्राहाम चहिं गोठमी दोरशा लशा, दोम्शो रिम्शो बाछा का चाक्शा क्योरपाइश्शा, गेय पाइब कली क्येपदा बाक्त।<sup>8</sup> मिनु दहिं, दूध नु श्ये चाक्शा, मेको आन कली खेत्तीमी बाक्त। मिनु मेकोपुकीमी जामेनु, अब्राहाम मेको आन नेक्था रवा आ पुंम राप्शा बाक्माक्त।

<sup>9</sup> मिनु मेकोपुकीमी “इ मीश सारा ते बाक्मे?” दे हिल्लो पामे बाक्त। मिनु अब्राहाममी “ताम्बुम बाक्ब” देमाक्त।<sup>10</sup> मिनु कामी “गो एकेर लेंशा माइक्थ जाक्नुड। मेना इ मीशेमी तौ का थिशो बाक्ब” देमाक्त। मिनु सारा ताम्बु आ लाप्चोम मेको लोत्र पाइब आ नोले खुइश्शा बाक्शा, मेको लोत्र नेना बाक्त। उत्पत्ती १७:१९; रोमी ९:९<sup>11</sup> अब्राहाम नु सारा खाल्पा खाल्पी दुम्शो बाक्सा बाक्त। सारा आ रां ब्रोल्चा यो नुप्शो बाक्माक्त।<sup>12</sup> मोपतीके सारामी मेको लोत्र नेंशा “गो खाल्पी दुम्ती। आं वोंइश यो खाल्पा दुम्त। मिनु आल थीनुडा डा?” दे रिस्से बाक्त। उत्पत्ती १७:१७; १पत्रुस ३:६<sup>13</sup> मिनु परमप्रभु यावेमी अब्राहाम कली “सारा मारदे ‘गो खाल्पी दुम्शा, आल थीनुडा डा?’ दे रिस्से?”<sup>14</sup> गो परमप्रभु यावे नड। गो नेल्ल पने चाप्नुड। गो माइक्थ लेशशा जाक्डानु, सारामी तौ थिशो बाक्ब” देमाक्त। मत्ती १९:२६; लूका १:३७<sup>15</sup> सारामी चहिं “गो मरिस्सीड” दे जोल पवा बाक्त। मारदे हना हिमाक्त। तन्न मेकोमी “गे थमा पा रिस्साक्वे” देमाक्त।

<sup>16</sup> मिनु मेको मुर सां बोक्शा, सोदोम सहर गे लमा बाक्त। अब्राहाममी मेको आन कली आइक्वी सम्म चोव्रथ लमाक्त।<sup>17</sup> मिनु परमप्रभु यावेमी “गो मार पचा चिक्त्तु, मेको मखुइक्थु अब्राहाम कली शेंनुड। *आमोस ३:७*  
<sup>18</sup> अब्राहाम ठेयब नु बोल्यो रागी डा मुर आन आफ दुम्ब। मिनु रागी नेल्ल डा मुरपुकीमी मेको आ पबर्म आसीक ताइनीम। उत्पत्ती १२:३<sup>19</sup> गो अब्राहाम कली तुइक्नुड, आ आल नु आ चच युइ आन कली परमप्रभु यावे आ लां गाक्पाइक्चा कली अरेब। मिनु मेकोपुकी परमप्रभु यावे आ लां खोइक्ब दुम्शा, ठीक नु रिम्शो पचा शेंसीशा पाइनीम। परमप्रभु यावेमी

अब्राहाम कली मार लोत्र देंमे, मेको नेल्ल दुम्त” देमाक्त। *ब्यक्स्था ६:७; ब्यक्स्था ३२:४६*

### अब्राहाममी परमप्रभु नु लोत्र पशो

<sup>20</sup> मिनु परमप्रभु यावेमी “गो सोदोम नु गोमोररा सहर निक्शी आस पबर्म शुश मरिम्शो लोत्र नेता। मारदे हना मेकेर डा मुर आन मरिम्शो पशो शुश हिंचा डा बाक्त। उत्पत्ती १९:१३<sup>21</sup> मुल गो कोव्रथ यीनुड। एको नेंशो लोत्र थमा बाक्म कों, जोल बाक्म, गो तुइक्नुड” देमाक्त।

<sup>22</sup> मिनु परमप्रभु यावे आ स्वर्ग डा गेय पाइब निक्शी सोदोम गे लसा बाक्त। अब्राहाम परमप्रभु यावे आ डोंइती राप्शा बाक्माक्त।<sup>23</sup> मिनु अब्राहाम मेको आ नेक्था लशा “गे ठीक पाइब आन कली नु मरिम्शो पाइब आन कली खाल का डा पा क्यामीनी? *गन्ती १६:२२*<sup>24</sup> मेको सहरमी ५० जना ठीक पाइब मुर बाक्तेक्म हना, सहर कली क्यामीनी? मेको ५० जना ठीक पाइब मुर आन पबर्म मेको सहर मप्रोंइनीनी? <sup>25</sup> ममाइ, गे मोदेंशो पा मक्याम्नीनी। गे ठीक पाइब नु मरिम्शो पाइब आन कली खाल का डा पा मसाइक्नीनी। थमान, ठीक पाइब नु मरिम्शो मुर आन कली खाल का डा मपाइनीनी। गे रागी रागी डा निसाफ पाइब बाक्शा, ठीक निसाफ पाइनीनी” देमाक्त। *भजन संग्रह ८२:१; भजन संग्रह ९४:२*<sup>26</sup> मिनु परमप्रभु यावेमी “सोदोम सहरम ५० जना ठीक पाइब मुर बाक्तेक्म हना, गो मेको आन पबर्म सहर मक्याम्नुड” देमाक्त। *यसैया ६५:८; मत्ती २४:२२*<sup>27</sup> मिनु अब्राहाममी “गो फुरक नु पुलु रे दुम्शो मुरुमी परमप्रभु नु लोत्र पाता।<sup>28</sup> मेको सहरम ४५ जना मुर ला ठीक पाइब बाक्तेक्म हना, गे मेको ४५ जना मुर, ५ जना मजाक्दीतीके सहर क्यामीनीनी?” दे हिल्लो पवा बाक्त। मिनु मेकोमी “गो मेकेर ४५ जना ठीक पाइब मुर थिल्तामी हना, गो सहर मक्याम्नुड” देमाक्त।<sup>29</sup> मिनु अब्राहाममी लेंशा “४० जना ठीक पाइब बाक्तेक्म हना?” देंमेनु, मेकोमी “गो मेको ४० जना आन पबर्म यो सहर मक्याम्नुड” देमाक्त।<sup>30</sup> मिनु अब्राहाममी “परमप्रभु, मगाइक्तीने, गो चिनु लोत्र पाइनुड। ३० जना ठीक पाइब मुर बाक्तेक्म हना?” देमाक्त। मिनु परमप्रभुमी “३० जना बाक्तेक्म हना, मेको आन पबर्म यो मक्याम्नुड” देमाक्त।<sup>31</sup> मिनु अब्राहाममी लेंशा “गो परमप्रभु इन कली लेंशा लोत्र पाइनुड, सहरमी २० जना ला ठीक पाइब मुर बाक्तेक्म हना?” देमाक्त। मिनु मेकोमी “२० जना ठीक पाइब मुर बाक्तेक्म हना यो, मेको आन पबर्म यो सहर मक्याम्नुड” देमाक्त।<sup>32</sup> मिनु अब्राहाममी “परमप्रभु, मगाइक्तीने। गो चिनु लोत्र हिल्लो पाइनुड। १० जना ला ठीक पाइब मुर बाक्तेक्म हना?” देमाक्त। मिनु मेकोमी “गो मेको १० जना ठीक पाइब आन पबर्म यो सहर मक्याम्नुड” देमाक्त। *न्यायाधीस ६:३९*<sup>33</sup> मिनु अब्राहाम नु लोत्र पने थुम्शा, परमप्रभु यावे आ लां लमाक्त। अब्राहाम आ बाक्तीके लेम्माक्त।

### सोदोम नु गोमोररा क्याम्शो

**19** मेको परमप्रभु यावे आ स्वर्ग डा गेय पाइब निक्शी सोदोम सहरम नाक्नाक्दो जाक्दीस्सा बाक्त। मेना लोत सहर आ गारो डा ठेयब लाप्चो आ नेक्था निश्शा बाक्मेनु, गुम्से बाक्त। मिनु लोतमी मेको आस कली तशा बोक्शा, खुम्की पा बाम्माक्त। उत्पत्ती १८:२२<sup>2</sup> मिनु लोतमी “आं प्रभु निक्शी, नेनीसे, मुलाक्दो आं खिंम बाक्कीसे। इस खोइल चिक्सीसे। सुनी बोक्शा, इस लां लने चाप्नीसी” देमाक्त। मेको निक्शीमी “ममाइ, गो मेरे लाडगाम इज्ज्कु” देसा बाक्त।<sup>3</sup> मिनु लोतमी शुश लोत्र पवा नोले आ खिमी बास बाक्सा बाक्त। लोतमी मेको आस कली ब्रोवब्रोवशो क्येशा, बोरब ओख्ती मसुप्शो शोब्ले सेला बाक्त। मिनु जाम्से बाक्त।<sup>4</sup> मिनु इक्का क्येडा डोंइती सोदोम सहर डा वोंइश मुरपुकी खिं आ एर आंथ खुम्सीशा बाक्सा बाक्त। खाल्पा, ठिटा सहर डा वोंइश मुर नेल्ल खुम्सीशा बाक्सा बाक्त।<sup>5</sup> मेकोपुकीमी लोत कली “नाक्नाक्दो इ खिंम जाक्शो वोंइश मुर ते बाक्सा। आंइ दाक्शो पचा कली लाडगाम सोइक्तो” देमा बाक्त। *लेवी १८:२२-२५; न्यायाधीस १९:२२-२४; रोमी १:२७*<sup>6</sup> मिनु लोत लाप्चो रे लाडगा गूशा, आ नोले लाप्चो चोक्शा वोदा बाक्त।<sup>7</sup> मिनु मेकोमी “आं लोकबपुकी, मोपा मरिम्शो मपने।<sup>8</sup> नेनीन, आं के कन्ने तमी

निक्शी बाक्नीसी। मेको इन कली लाडगा सोइक्नुड। मार मार पचा दाक्नीनी, मेको निक्शी नु पने। आं खिमी जाक्शो वोंइश मुर आस कली मारेइ मपने। मारदे हना बास बाक्चा कली आं खिम जाक्ताक्से” देमाक्त। 9 मेकोपुकीमी चहिं “गे लावो। गे ला एको सहरमी अर्को रागी डा मुर बाक्नेवे, आंइ कली हुकुम पचा माल्नेवे? लो, मेको निक्शी आस क्येडा इ कली श्येत गेनीकी” देमा बाक्त। लोत कली शुश लोत्र पशा, लाप्चो रोक्चा माल्मे बाक्त। 2 पत्रुस २:७-८ 10 तन्न आगा डा वोंइश मुर निक्शीमी आस गुड लाडगा गुंडशा, लोत कली ग्याइश्शा आगा कीशा, लाप्चो चोक्गासे बाक्त। 11 मिनु मेको निक्शीमी लाडगाम बाक्शो मुर आन कली मिक्च मताइब सेल्से बाक्त। मिनु मेकोपुकीमी लाप्चो मथित्थु, माल्चा प्रोन्मे बाक्त। २राजा ६:१८

12 मिनु मेको निक्शीमी लोत कली “गे इ के सु सु बाक्नीमी? चांइवा, तमी तौ नु सहरम इ मुर सु सु बाक्नीमी? एको सहर रे गुंडदो। 13 मारदे हना गो एको सहर कली क्याम्नस्कु। परमप्रभु यावे आ डॉइती एको आन ग्रांरा दिचा डा गेय आ पबर्म शुश रेयके बाक्ब। परमप्रभु यावेमी आंस कली एको सहर क्याम्चा, दे सोइश्शो बाक्ब” देसा बाक्त। उत्पत्ती १८:२० 14 मिनु लोतमी आ तमी आस कली ग्युंवे पचशो वोंइश आल आस कली गुम्शा “बोक्कीस, सहर रे लसे। मारदे हना परमप्रभु यावेमी सहर क्याम्ब” दे माइक्सी बाक्त। मेको निक्शीमी चहिं “रित्चा डा लोत्र बाक्त” दे मिन्तसे बाक्त। गन्ती १६:२१

15 मिनु भाले ग्रीमेनु, परमप्रभु यावे आ स्वर्ग डा गेय पाइब निक्शीमी लोत कली “बोक्को, इ मीश नु इ तमी निक्शी आस कली लाइश्शा, एको सहर रे प्रोक्कीन। मप्रोक्तीनी हना, एको सहर डा मुर खोदेंशो पा क्याम्चा पुंडसीनीनी” देसा बाक्त। 16 मिनु लोत कली ओंखां बोक्शो तशा, मेको कली आ तमी निक्शी नु आ मीशे आन कली गुड रे कीशा, सहर रे गुंडदसे बाक्त। मोपा परमप्रभु यावेमी लोत नु आ खिं डा मुर आन कली दाक्शा प्रोंइमी बाक्त।

17 सहर रे गुंडशा, परमप्रभु यावे आ स्वर्ग डा गेय पाइब कामी “ब्रोंइचा दाक्नीनी हना, नोले मकोव्रथु प्रोक्कीन। दिंमम मबाक्कीन। पहाड गे प्रोक्कीन। मो मपाइतीनी हना, गे सहर डा मुर नु क्याम्चा पुंडसीनीनी” देमाक्त। मत्ती २४:१६ 18 मिनु लोतमी “आं प्रभु, गो मचबु। 19 नेनीन, गो इन शिशी ताता। गो आंइ कली दाक्शा, बेक्चा रे प्रोंइतीनी। गो पहाड प्रोक्ने मचबु। पहाडमी अर्को श्येतमी आं कली साइक्बा, कों। 20 नेनीन, हयु उइ डा सहर प्रोक्चा कली आं नेक्था बाक्ब। आइक्च यो बाक्ब। मेकेर प्रोक्चा गेयीनी। मेको सहर आइक्च बाक्ब। मेकेर ब्रोंइने चाप्नुड” देमाक्त। 21 मिनु मेकोमी “लो, गो इ पुंडशो गेनुड। इ देशो सहर मक्याम्नुड। 22 रीब पा प्रोक्कीन। गे मजाक्दीनी सम्म मारेइ पने मचाप्नुड” देमाक्त। मेको सहर कली सोआर नें वोदा बाक्त। आइक्च कली सोआर देसीब।

23 मिनु लोत सोआर सहर ओत्रची ना रागीमी नां दाप्ने थुम्शो बाक्माक्त। 24 मिनु नोले परमप्रभु यावेमी सोदोम नु गोमोररा सहर आस तारी सरीड रे गन्धक नु मी रेउ यिशो खोदेंशो पा यिपदा बाक्त। ब्यवस्था २९:२२; भजन संग्रह ११:६; यसैया १:९-१०; यसैया १३:१९; आमोस ४:११; लूका १७:२९; २पत्रुस २:६; प्रकाश १४:१० 25 मिनु परमप्रभु यावेमी मेको सहर निक्शी, दिंम नेल्ल, सहर डा मुर नेल्ल नु रूम मार मार वाशो बाक्मे, मेको नेल्ल क्याम्दा बाक्त। 26 लोत नु आ मुर प्रोक्मानु, लोत आ मीशेमी नोले बिर लेशशा कोत्रडा बाक्त। मिनु मेको हिक्सी के थाम दुम्माक्त।

27 मिनु अब्राहाम नाक्त का डॉइती परमप्रभु यावे आ डॉइती राप्शा बाक्तीकेम लमाक्त। 28 मिनु सोदोम नु गोमोररा सहर डा दिंम डा रू नेल्ल कोत्रडा बाक्त। मिनु मेको सहर निक्शी नु रू नेल्ल रे ठेयब चुप्नु डा मी खोदेंशो पा कुन गूशो तवा बाक्त।

29 मोपा परमप्रभुमी मेको दिंम, सहर निक्शी क्याम्दा बाक्त। मेना परमप्रभुमी अब्राहाम आ पुंडशो लोत्र मिम्शा, लोत कली मेको सहर रे गुंडशा प्रोना बाक्त। नोले मेकोमी मेको सहर नेल्ल खतम पोक्गा बाक्त।

## लोत आ तमी निक्शी

30 मिनु लोत नु आ तमी निक्शी सोआर रे लशा, पहाड मेर लमा बाक्त। मारदे हना सोआर सहरम बाक्चा हिंमा बाक्त। मेको नु आ तमी निक्शी पहाड डा पुक्खीम बाक्शो बाक्मा बाक्त। 31 मिनु लोत आ डॉइती जरमेशो तमीमी “इस आफ खाल्पा दुम्त। नेल्ल रागीमी इस कली वोंइश मुर मबाक्म। 32 लो, इस आफ कली अडगुर शांबुमी दुक्पाइश्शा, इस आफ नु बाक्स। मोपा इस आफ कली चच युइ दुम्नीम” दे आ लोक्ब कली देमाक्त। लेवी १८:७ 33 मेको नाक्दो आस आफ कली अडगुर शांबुम दुक्पदसे बाक्त। मिनु आ ठेयब तमी आ आफ नु इम्माक्त। लोतमी आ तमी आं नु इप्शो, बोक्शो मारेइ मतुइक्ता बाक्त। 34 मिनु आ दीसा ठेयब तमीमी आ लोक्ब कली “नेनो, गो सिनाक्दो आफ नु बाक्ती। गो लेंशा आफ कली अडगुर शांबुमी दुक्पाइक्स। मुलाक्दो गे इपो। मोपा इस आफ रे चच युइ दुम्नीम” देमाक्त। 35 मिनु मेको निक्शीमी आस आफ कली मेको नाक्दो यो दुक्पदसे बाक्त। मिनु कान्छी आ आफ नु इप्थ लमाक्त। मिनु लोतमी आ तमी आं नु इप्शो, बोक्शो मारेइ मतुइक्ता बाक्त। 36 मिनु लोत आ तमी निक्शीमी आस आफ के कोत्रज कुरसे बाक्त। 37 मिनु ठेयब तमीम तौ का थिमाक्त। मेको आ नें मोआब वोदा बाक्त। मेको मोआबी आन किकी पिपी बाक्माक्त। ब्यवस्था २:९ 38 कान्छीमी यो तौ का थिमाक्त। मेको आ नें बेन-अम्मी वोदा बाक्त। मेको अम्मोनी आन किकी पिपी बाक्माक्त। ब्यवस्था २:१९; ब्यवस्था २३:४

## अब्राहाम नु अबीमेलेक

उत्पत्ती १२:१०-२०; उत्पत्ती २६:१-११

20 मेकेर रे अब्राहाम दक्खिनम बाक्ब नेगेब गे लमाक्त। मिनु कादेश नु शुर आस दाते गेरार सहरमी अर्को रागी डा मुर दुष्शा बाक्माक्त। उत्पत्ती १२:९; उत्पत्ती २६:१ 2 मेकोमी मुर आन कली आ मीश, सारा आ पबर्म “आं समी बाक्ब” देमाक्त। मिनु गेरार डा पिप अबीमेलेकमी मेको कली ब्रथ सोइक्ता बाक्त। 3 मिनु अबीमेलेकम आ डोमुमी परमप्रभु आ डॉइती गूशो तवा बाक्त। मिनु “गे मीश चाक्शो आ पबर्म बेक्चा माल्नेवे। मारदे हना मेको ग्युंवे पशो मीश मुर बाक्ब” देमाक्त। 4 मिनु अबीमेलेकम मेको नु मडप्तीके “परमप्रभु, गे दोस मताइब मुर आन कली यो साइक्नीनी? 5 मेकोमी आं कली ‘आं समी बाक्ब’ मदेम डा? आ मीशेमी यो ‘आं लोक्ब बाक्ब’ देंत। गो रिम्शो थुं नु थमा पा मतुइक्तीकेमी चाक्ता” देमाक्त। 6 मिनु परमप्रभुमी मेको आ डोमुमी “गे रिम्शो थुंमी पाप्तीवी। गो तुइक्नुड। मोपतीके गो इ कली मेको कली थिचा मगेथु, आं डॉइती मरिम्शो पचा मगेड। 7 मुल मेको मुर आ मीश लेत्तो। मारदे हना मेको आं लोत्र पाइब का बाक्ब। मेकोमी इ पबर्म पुंडब। मिनु गे ब्रोंइनेवे। गे आ मीश कली मलेत्ताक्वी हना, गे थमा पा बेक्चा माल्नेवे। इ मुर नेल्ल यो बेक्चा माल्नीमी, दे तुइक्तो” देमाक्त। १राजा १३:६

8 मोपतीके अबीमेलेक सुनी कना बोक्शा, आ गेय पाइब नेल्ल आन कली ब्रेशशा, आ डोमु नेल्ल शोत्रडा बाक्त। मिनु मुर नेल्ल शुश हिंमा बाक्त। 9 मिनु अबीमेलेकम अब्राहाम कली यो ब्रेत्ता बाक्त। मिनु मेको कली “मारदे आंइ कली ओदेंशो पवी? गो नु आं रागी कली ओदेंशो मरिम्शो पपाइक्चा कली गो इ कली मार मरिम्शो पाइक्ना? गे मपचा डा गेय पाप्तीवी। 10 गे मारदे ओदेंशो पचा मिम्ती?” देमाक्त। 11 मिनु अब्राहाममी “थमा पा, एको रागी डा मुरपुकी परमप्रभु कली मान पा महिनीमी। मिनु आं मीश आ पबर्म आं कली साइक्नीम, दे मिम्ताक्ड। 12 मेको थमा आं समी यो बाक्ब। आं आफ आ तमी बाक्ब। तन्न आं ममा आ तमी ममाइ। गो मेको कली चाक्ता। लेवी १८:९ 13 मिनु परमप्रभुमी आं कली आं आफ आ खिं रे गाक्पाइय्थीनु, गो आं मीश कली ‘आं कली दाक्नेवे हना, गो ते ते जाक्दीस्सा, मेक मेक एको आं लोक्ब बाक्ब, देनो’ दे माइक्ता” देमाक्त। 14 मिनु अबीमेलेकमी भेडापुकी, बी ब्यफ नु वाइलीम वाइल आन कली लाइश्शा, अब्राहाम कली गेवा बाक्त। आ मीश सारा यो लेत्ता बाक्त। 15 मिनु “नेनीन, आं रागीमी ते ते बाक्चा दाक्नेवे, मेक मेक बाक्ने चाप्नेवे” देमाक्त। 16 मिनु सारा कली

“नेनो, इ लोकब कली हजार का चांदी टुक्रा नेता। मेको इन कली इ मुर आन डोंइती इ कली रिंशो पचा कली नेता। मोपा नेल्ल आन डोंइती इ कली ठीक पाता” देमाक्त। 17 मिनू अब्राहामम अबीमेलेक आ परबम परमप्रभु कली पुना बाक्त। मिनू परमप्रभुमी अबीमेलेक, आ मीश नु आ गेय पाइब नेल्ल आन परबम आल मथितीक रोइ रे सापदा बाक्त। 18 मारदे हना परमप्रभु यावेमी अब्राहाम आ मीश सारा आ परबम अबीमेलेक आ खिं डा मुर नेल्ल आन कली आल मथीब सेल्शो बाक्माक्त।

### इसहाक जरमेशो

21 मिनू परमप्रभु यावेमी सारा कली मार देमे, मेकोन दुम्पदा बाक्त। उत्पत्ती १८:१०<sup>2</sup> मिनू सारामी खाल्पी दुम्शा, अब्राहाम के कोव्रज कुरशा, तौ का थिमाक्त। परमप्रभुमी गेना थीब देमे, मेना थिमाक्त। हिब्रू ११:११<sup>3</sup> मिनू अब्राहाममी सारा आ थिशो तौ कली इसहाक नें वोदा बाक्त। उत्पत्ती १७:१९<sup>4</sup> मिनू अब्राहाममी आ तौ इसहाक कली ८ नाक्ती दुम्मेनु, खोइक्तीक चिनु खोदा बाक्त। परमप्रभुमी डोंइती दोपा अरेवा, मोपा पवा बाक्त। उत्पत्ती १७:११-१२; प्रेरित ७:८<sup>5</sup> अब्राहाम आ तौ इसहाक थिमेनु, सहे का बर्स दुम्शो बाक्माक्त। उत्पत्ती १७:१७

6 मिनू सारामी “परमप्रभुमी आं कली रिप्पाइक्ती। सु सुम एको नेंनीमी, मेको यो गो नु रिन्नीम। उत्पत्ती १८:१२<sup>7</sup> सु सुमी अब्राहाम कली ‘इ मीशेमी आल कली दूध तुंडब’ देंनीमी? गो खाल्पा दुम्शो अब्राहाम के तौ का थिती” देमाक्त।

### हागार नु आ तौ खेरशो

8 मिनू आल कोल्शा, दूध तूचा प्रोना बाक्त। मिनू दूध तूचा प्रोना नाक्ती अब्राहाममी ठेयब भोज सेल्शा, मुर आन कली थुल्मी बाक्त। 9 मिनू सारामी इजीप्त डा हागार नु अब्राहाम आस थिशो तौ इश्माएलमी इसहाक कली शुक्शी पशो तवा बाक्त। 10 मिनू मेकोमी अब्राहाम कली “वाइलीम नु आ तौ आस कली खेरो। मेको वाइलीम आ तौ कली, आं तौ इसहाक नु अडस योक्शा गेचा मदुम्ब” देमाक्त। गलाती ४:३०<sup>11</sup> अब्राहामम आ लोव्र नेंशा, थुं मनुमाक्त। मारदे हना इश्माएल यो आ तौ बाक्माक्त।

12 तन्न परमप्रभुमी अब्राहाम कली “वोंइश आल नु इ वाइलीम आ परबम सुर्ता मपावो। सारामी मार मार देमे, मेको नेल्ल पावो। मारदे हना इसहाक आ चच युइ इ जात दुम्नीम। उत्पत्ती १७:२१; रोमी ९:७-८; हिब्रू ११:१८<sup>13</sup> मिनू इ वाइलीम आ तौ इश्माएल आ चच युइ रे यो ठेयब जात का सेल्नुड। मारदे हना मेको यो इ तौ बाक्ब” देमाक्त। उत्पत्ती १७:२०<sup>14</sup> मिनू अब्राहाम सुनी कना बोक्शा, हागार कली शोब्ले नु ब्वाक्कु कुरपाइश्शा, आ तौ नु सोइक्ता बाक्त। मिनू हागार नु आ तौ लसा बाक्त। मिनू लशा, लां जाम्शा, बेयर-शेबा माइश्शो गोरशो रागीम हिरससा बाक्त। 15 मिनू ब्वाक्कु नुष्शा, आ आल कली बुटा आगाम वोदा बाक्त। 16 मिनू हागार चहिं आइदी लशा, निस्से बाक्त। मारदे हना मेकोमी “आं आल बेक्शो मतडल” दे मिम्ता बाक्त। मिनू ठेयब सेंदा पा डाक्माक्त। यसैया ४९:१५<sup>17</sup> मिनू परमप्रभुमी आल आ डाक्शो सेंदा नेना बाक्त। मिनू परमप्रभु आ स्वर्ग डा गेय पाइबमी सरीड रे “हागार, मार दुमे? महिनो। मारदे हना परमप्रभुमी उइ बाक्शो इ तौ आ ब्रेश्शो नेंतु। 18 बोक्को, इ तौ लाइश्शा गाक्को। गो मेको रे ठेयब जात का सेल्नुड” देमाक्त। 19 मिनू परमप्रभुमी हागार आ मिक्च तपदानु, ब्वाक्कु बुक्तीके का तवा बाक्त। मिनू आ ब्वाक्कु कुरतीके प्रिंशा, आ तौ कली तूपदा बाक्त। २२राजा ६:१७, २०<sup>20</sup> मिनू परमप्रभु मेको वोंइश आल नु बाक्मेनु, मेको कोल्शा, गोरशो रागीमी बाक्शा, लिब्रा आप्स शुश जोक्ब दुम्माक्त। 21 मेको गोरशो रागी आ नें पारान बाक्माक्त। मिनू आ ममामी आ तौ कली इजीप्त रागी डा तमी चाक्शा गेवा बाक्त। उत्पत्ती १६:३

### अबीमेलेक नु अब्राहाम सल्ला पशो

उत्पत्ती २६:१५-३३

22 मिनू काबु अबीमेलेक नु आ फौज डा ठेयब कप्तान फीकोल अब्राहाम आ बाक्तीक जाक्शा, अब्राहाम कली “गे मार मार पाइनीनी, परमप्रभु गे नु

बाक्ब। 23 मोपतीके गो इन कली मार पुंइनुड देंशा हना, आं कली, आं तमी तौ नु आं चच युइ आंइ कली श्येत मगेकी। गो इन कली रिंशो पशो खोदेंशो पा, आं कली यो रिंशो पने। इन बाक्शो रागी कली यो रिंशो पने। ‘रिंशो पाइनुड’ दे परमप्रभु आ नें थिशा, कसम जने” दे पुना बाक्त। उत्पत्ती २०:१५<sup>24</sup> मिनू अब्राहाममी “गो कसम जाइनुड” देमाक्त।

25 मिनू अब्राहाममी अबीमेलेक कली हुइक्ता बाक्त। मारदे हना अबीमेलेक आ गेय पाइबपुकीमी अब्राहाम आ इनार आ परबम जिशा, रोइक्तामे बाक्त। 26 मिनू अबीमेलेकमी “गो मेको मतुइक्तु, सुम पवा? गे यो मशेंदीनी। मुलाक्त ला नेंता” देमाक्त। 27 मिनू अब्राहाममी भेडापुकी नु ब्यफपुकी अबीमेलेक कली गेवा बाक्त। मोपा मेको निक्शी सल्ला पास्से बाक्त। 28 अब्राहामम ७ ओटा पाठी चहिं बगाल रे गुंइशा, वोदा बाक्त। 29 मिनू अबीमेलेकम “मेको ७ ओटा पाठी मारदे वोइक्नी?” दे हिल्लो पवा बाक्त। 30 मिनू “मेको ७ ओटा पाठी आं गुइ रे लाइक्चा माल्नीनी। गो आं दोशो इनार आ सांक्छी दुम्नीनी” देमाक्त। 31 मिनू मेको बाक्तीके कली बेयर-शेबा, दे नें वोदसे बाक्त। मारदे हना मेको निक्शी मेकेर कसम जाम्से बाक्त। 32 मिनू बेयर-शेबामी मेको सल्ला पने थुम्शा, अबीमेलेक नु फीकोल आ ठेयब कप्तान पलिस्ती आन रागी लेस्सा बाक्त। 33 अब्राहाममी चहिं बेयर-शेबाम रवा का खुमा बाक्त। मिनू मेकेर परमप्रभु यावे, गेना हना यो बाक्ब परमप्रभु आ नें थिशा, मेको नु लोव्र पवा बाक्त। उत्पत्ती १२:८; रोमी १६:२६<sup>34</sup> मिनू पलिस्ती आन रागीमी अब्राहाम अर्को रागी डा मुर दुम्शा, शुश नाक्त बाक्माक्त।

### परमप्रभुमी अब्राहाम आ थुं नाक्शो

22 मिनू नोले परमप्रभुमी “अब्राहामम आं कली टीबाक्म कों, मटीबाक्म” दे मिम्शा “अब्राहाम” दे ब्रेत्ता बाक्त। अब्राहाममी “गो एक बाक्ती” दे परमप्रभु कली मदा बाक्त। प्रस्थान १५:२५; प्रस्थान १६:४; प्रस्थान २०:२०; ब्यक्शा ८:२; ब्यक्शा १३:४; न्यायाधीस २:२२; हिब्रू ११:१७; याकूब १:१३<sup>2</sup> मिनू मेकोमी “इ तौ लतो। का ला बाक्शो दाक्शो इ तौ इसहाक लतो। मिनू मोरीयाह रागी लावो। मेकेर लशा, इ तौ कली चोशा चढ़ेयी। तेको डांडाम चढ़ेचा माल्नेवे, गो इ कली कोंइनन” देमाक्त।

3 मिनू अब्राहाम सुनी कना बोक्शा, चढ़ेतीकेम चोचा कली शी चेश्शा, आ गथा ठीक पवा बाक्त। मिनू ठिटा निक्शी नु आ तौ इसहाक कली लाइश्शा, परमप्रभुमी देंशो पहाड लमा बाक्त। 4 लमा लमा नाक्त सां नोले परमप्रभु आ देंशो बाक्तीके डोन रे तवा बाक्त। 5 मिनू अब्राहाममी आ गेय पाइब निक्शी आस कली “एकेर गथा नु बाक्कीसे। गो आं तौ नु मिरी आइक्था लशा, चढ़ेशा, इस बाक्तीक लेल्स्कु” देमाक्त। 6 मिनू अब्राहाममी चोशा चढ़ेतीक शी इसहाक कली कुरपदा बाक्त। मिनू मी नु चुक्ब आंमा कुरा बाक्त। मोपा निम्फा लसा बाक्त। 7 मिनू इसहाकम आ आफ कली “आं आफ” देमाक्त। मिनू अब्राहाममी “गो नेंता” देमाक्त। मिनू इसहाकमी “गो मी नु शी ला कुरशा गाक्तस, चोशा चढ़ेतीक पाठा चहिं ते बाक्म?” दे हिल्लो पवा बाक्त। 8 मिनू अब्राहाममी “चोशा चढ़ेतीक पाठा परमप्रभुमी गेब” देमाक्त। मोपा निम्फा लसा बाक्त।

9 मिनू परमप्रभुमी देंशो रागी जाक्दीस्सानु, अब्राहाममी फुल्लु चाक्शा, चढ़ेतीक सेला बाक्त। मिनू चढ़ेतीक तारी शी प्रोव्रडा बाक्त। मिनू आ तौ इसहाक कली गुइ खोइल फ्रेंशा, शी तारी वोदा बाक्त। 10 मिनू अब्राहाममी आ तौ क्योरचा कली चुक्ब शोइश्शा तरेवा बाक्त। मत्ती २६:३९; याकूब २:२१<sup>11</sup> मिनू परमप्रभु यावे आ स्वर्ग डा गेय पाइबमी सरीड रे “अब्राहाम, अब्राहाम” दे ब्रेत्ता बाक्त। मिनू अब्राहाममी “गो नेंता” देमाक्त। 12 मेकोमी “इ तौ कली मक्पोरो। मेको कली मारेइ मपतो। मारदे हना गे परमप्रभु कली मान पा हिंबाक्ते। गो मुल तुइक्ताक्ड। गे इ का ला बाक्शो तौ आं कली गेचा ठीक पाप्तीवी। इ का ला तौ यो आं कली गेचा टीबाक्ते” देमाक्त। रोमी ८:३२; हिब्रू ११:१७<sup>13</sup> मिनू अब्राहाममी एर गे कोव्रडानु, सांड का आ प्रोव्र चू लहाराम रेश्शा, बाक्शो तवा बाक्त। मिनू लशा सांड चाक्शा, आ तौ आ पा डा मेको सांड क्योरशा, चोशा चढ़ेतीक चढ़ेवा बाक्त। 14 मिनू

अब्राहाममी मेको डांडा कली परमप्रभु यावे यीरेह, दे नें वोदा बाक्त। मोपतीके मुल सम्म मुरपुकीम “परमप्रभु यावे आ डांडाम परमप्रभु यावेमी माल्शो गेब” देंनीम। “परमप्रभु यावे यीरेह” आ अर्थ “परमप्रभु यावेमी आ माल्शो गेब” देंशो बाक्ब। उत्पत्ती १६:१३

15 मिनू परमप्रभु यावे आ स्वर्ग डा गेय पाइबमी लेंशा सरीड रे अब्राहाम कली 16 “परमप्रभु यावेमी ‘गो आं नेंमी कसम जाता। मारदे हना गे इ तौ आं कली गेचा ठीक पाप्तीवी। प्रस्थान ३२:१३; यसैया ४५:२३; आमोस ६:८; मीका ७:२०; लुका १:७३; हिब्रू ६:१३ 17 मार कसम जाता देंशा हना, गो इ कली आसीक गेनुड। इ चच युड आन कली सोरुल नु समुन्द्र आ नेक्था डा बाल्वा खोदेंशो पा शुश सेल्लुडमी। मिनू मेकोपुकीमी आन जोरी सत्रु आन सहर आंम के सेल्लनीम। उत्पत्ती १३:१६; हिब्रू ११:१२ 18 इ चच युड आन पर्वम रागी रागी डा मुर नेल्ल आसीक राइनीम। मारदे हना गे आं देंशो टीब बाक्ते’ दे परमप्रभु यावेमी देंत” दे आ स्वर्ग डा गेय पाइबम अब्राहाम कली लोव्र पवा बाक्त। उत्पत्ती १२:३; गलाती ३:१६

19 मिनू अब्राहाम मेकेर रे लशा, आ गेय पाइब निक्शी आस रिम्तीके लेस्सा बाक्त। मिनू गुम्शा, बेयर-शेबा माइक्तीकेम लमा बाक्त। मिनू अब्राहाम मेक उड बाक्माक्त।

नाहोर आ चच युड

20 मिनू मेको नोले मुरुमी अब्राहाम कली “मिल्कामी यो इन लोकब नाहोर रे पा आल थिप्टु। उत्पत्ती ११:२९ 21 आ डोंइती जरमेशो तौ ऊज, आ लोकब बूज, अराम आ आफ केमुएल, 22 केसेद, हाजो, पिल्दाश, यिदलाफ नु आ कान्छा बेथुएल बाक्नीम। 23 बेथुएल चहिं रेबेका आ आफ बाक्त। मिल्कामी अब्राहाम आ लोकब नाहोर के ८ जना तौ थिप्टु। उत्पत्ती २४:१५ 24 नाहोर आ कान्छी मीश आ नें रूमा बाक्माक्त। मेकोमी तेबाह, गाहाम, ताहाश नु माकाह थिमाक्त” देंमाक्त।

सारा बेक्शो

23 मिनू सारा सहे का २७ बर्स दुम्शो बाक्माक्त। आ ब्रोंइतीक नाक्त नेल्ल मोशोन बाक्माक्त। 2 सारा कनान रागी डा किरयथ-अरबाम बेक्माक्त। मेको कली हेब्रोन यो देंनीम। मिनू अब्राहाम सारा आ पर्वम हिंशेक पा डाक्थ लमाक्त। 3 अब्राहाम सारा आ बेक्शो रं बाक्तीके रे लशा, हिती आ मुर आन कली 4 “गो इन दातेमी अर्को रागी डा मुर बाक्नुड। गो थिम्तीक का ग्याप्चा दाक्नुड। मारदे हना आं बेक्शो मुर कली थिम्चा माल्लुड” देंमाक्त। उत्पत्ती १७:८ 5 मिनू हिती आ मुरपुकीमी अब्राहाम कली 6 “प्रभु, आंइ लोव्र नेनीन, गे आंइ दातेमी परमप्रभुमी सेल्लो ठेयब मुर बाक्नीनी। आंइ के बेक्शो मुर आन कली वोइक्तीक पुक्खी शुश बाक्नीम। तेको दाक्नीनी, मेकोमी इन बेक्शो मुर थिमीन। इन बेक्शो मुर थिम्चा सुडमी मतेक्ब” देंमा बाक्त। 7 मिनू अब्राहाम बोक्शा, हिती आ मुर आन डोंइती सेउ पवा बाक्त। 8 मेको आन कली “आं बेक्शो मुर थिम्चा गेतीनी हना, आं पर्वम सोहार आ तौ एफ्रोन नु लोव्र पने। 9 मेको आ रू आ नोले बाक्ब माक-पेला पुक्खी आं कली लेयड, दे पुंइदीन। गिश थाप्चा माल्लुडा, थाप्नुड। इन दातेमी आं बेक्शो मुर थिम्तीके दुम्ल” देंमाक्त।

10 मेना एफ्रोन हिती आन दातेमी निश्शो बाक्माक्त। मेको आन सहर डा गारो डा ठेयब लाप्चो आ नेक्था बाक्शा, अब्राहाम आ लोव्र नेन्मेनु, मेको हिती एफ्रोनमी अब्राहाम कली 11 “प्रभु, ममाइ, आं लोव्र नेनीन, गो इन कली मेको रू नु पुक्खी गेनुड। आं मुरपुकी सांकछी बाक्नीम। गो इन कली गेनुड। इन बेक्शो मुर थिमीन” देंमाक्त। 12 मिनू अब्राहाममी मेको मुर आन डोंइती सेउ पवा बाक्त। 13 मिनू मुर नेल्ल आन डोंइती अब्राहाममी एफ्रोन कली “आं लोव्र नेनीन। गो मेको रू डा क्येट थाप्नुड। मेको ताक्कीन। गो आं मीश मेक थिम्नुड” देंमाक्त। 14 मिनू एफ्रोनमी अब्राहाम कली 15 “प्रभु, आं लोव्र नेनीन, मेको रू ४ सहे शेकेल चांदी डा बाक्ब। मेको इस दातेमी मारेड ममाइ। मोपतीके थिमीन” देंमाक्त। शेकेल का ११.५ ग्राम बाक्ब। 16 मिनू अब्राहाममी एफ्रोन आ लोव्र बिस्से बाक्त। मेकोमी एफ्रोनमी हिती आ मुर आन डोंइती देंशो खोदेंशो पा ४ सहे शेकेल चांदी नाक्शा, गेमी

बाक्त। मेको ४ सहे शेकेल चहिं ग्याप्ब लेयब आन दातेमी मोदेंशो रू कली ठीक बाक्माक्त। शेकेल का ११.५ ग्राम चांदी बाक्त।

17 माक-पेलामी बाक्शो एफ्रोन आ रू माप्त्रे आ पूर्व गे बाक्शो बाक्माक्त। मोपा रू नु पुक्खी, रूमी बाक्शो रवा नेल्ल नु एर आंथ सुरम खुम्शो रवा यो 18 हिती नेल्ल नु ठेयब लाप्चोम बाक्ब आन डोंइती अब्राहाम के दुम्माक्त। 19 मिनू नोले अब्राहाम आ मीश सारा कली माप्त्रे आ नेक्था माक-पेलामी बाक्शो पुक्खीमी थिमा बाक्त। माप्त्रे चहिं कनान रागी डा हेब्रोन सहर बाक्माक्त। 20 मिनू मेको रू नु मेक बाक्शो पुक्खी हिती आ मुरपुकी रे अब्राहाम आ मुर थिम्तीक रू दुम्माक्त। उत्पत्ती २५:९-१०; उत्पत्ती ४७:३०; उत्पत्ती ४९:२९-३२; उत्पत्ती ५०:१३

रेबेका इसहाक आ मीश दुम्शो

24 मिनू अब्राहाम शुश बर्स दुम्शा, खुशो दुम्माक्त। परमप्रभु यावेमी अब्राहाम कली आ पतीक नेल्लेमी आसीक गेवा बाक्त। उत्पत्ती १२:२ 2 मिनू अब्राहाममी आ रू खिं नेल्ल कोव्र नु वाइल आन कली अरेब ठेयब वाइल कली “इ गुड आं फिला तारी वोतो। 3 गो इ कली परमप्रभु यावे, सरीड नु रागी डा परमप्रभु आ नेंमी कसम जपाइक्नुड। मार कसम जपाइक्नुड देंशा हना, आं तौ कली आं बाक्शो कनान रागी डा मीश आल मचाक्को। उत्पत्ती २८:१; प्रस्थान ३४:१६ 4 आं रागी नु आं जात डा मीश आल का चाक्को” दे अब्राहाममी वाइल कली मदा बाक्त। 5 मिनू वाइलमी “मेको मीश आल एको रागी जाक्चा मबिस्साक्व हना, इन तौ इन जरमेशो रागीम लाइक्चा माल्लुडा?” दे हिल्लो पवा बाक्त। 6 मिनू अब्राहाममी “मोदेंशो गेनायो मपावो। आं तौ कली मेक मलतो। 7 डोंइती परमप्रभु यावे, सरीड नु रागी डा परमप्रभु आं कली आं आफ आ खिं नु आं जात डा रागी रे गुंइशा, एक सोइक्ताक्पी। मेकोमी कसम जशा, आं कली लोव्र पाप्नु ‘कनान रागी इ चच युड आन कली गेनुडमी’ दे माइक्ती। मेकोमी आ स्वर्ग डा गेय पाइब इ डोंइती सोइक्ब। आं तौ कली आं जात रे मीश आल का चाक्को। २इतिहास ३६:२३; नेहेम्याह २:२० 8 मेको मीश आल गे नु जाक्चा मबिस्साक्व हना, गे कसम मजशो खोदेंशो दुम्नेवे। आं तौ कली चहिं मलतो” दे अब्राहाममी आ वाइल कली अरेवा बाक्त। 9 मिनू मेको वाइलमी आ होव्रप अब्राहाम आ फिला तारी गुड वोइइशा, आ देंशो आ पर्वम कसम जवा बाक्त।

10 मिनू नोले मेको वाइलम आ होव्रप आ दलओंठ १० ओटा लाइइशा, आ होव्रप के मारेड मारेड रिम्शो कोसेली कुरशा लमाक्त। मेकेर रे लशा, मेसोपोटामीया रागीमी नाहोर आ बाक्तीक सहर, अराम-नहराइम मेर जाक्दीम्माक्त। उत्पत्ती ११:२२-३१ 11 मिनू मेकेर जाक्दीइशा, नाक्नाक्दो मीश मुरपुकी ब्वाक्कु दिथ जाक्ची ना, सहर मओव्रथ, दलओंठपुकी इनार आ नेक्था नाइक्पदा बाक्त। 12 मिनू मेकोमी “परमप्रभु यावे, आं होव्रप अब्राहाम आ परमप्रभु, मुलाक्ती आं कली वारच पने। आं होव्रप कली इन गेना हना यो दाक्तीके कोइदीने। मेकोन पुंइनुड। 13 गो इनार आ नेक्था बाक्नुड। मिनू सहर डा मुर आन तमी ब्वाक्कु दिथ जाक्नीम। 14 गो मीश आल कली ‘इ गाग्री डा ब्वाक्कु इक्का तूचा गेयी’ देंनुड। मेको मीश आलमी ‘तूडो। गो इ दलओंठ आन कली यो ब्वाक्कु तुंइनुड’ देंत हना, मेको मीश आल इन गेय पाइब इसहाक कली योव्रशो बाक्ल। मोदेंशो दुम्त हना, गे आं होव्रप कली इन गेना हना यो दाक्तीके कोइताक्नी, दे गो तुइक्नुड” दे परमप्रभु कली लोव्र पवा बाक्त।

15 मोपा लोव्र पन पना, रेबेका माइइशो मीश आल का गाग्री कुरशा जाक्माक्त। मेको रेबेका बेथुएल आ तमी बाक्माक्त। बेथुएल चहिं अब्राहाम आ लोकब नाहोर नु आ मीश मिल्का आस तौ बाक्माक्त। उत्पत्ती २२:२३ 16 रेबेका थम दारशो मीश आल बाक्माक्त। मिनू ग्युंवे मपथ, कन्ने बाक्शो बाक्माक्त। मिनू इनारम तोइइशा, आ गाग्री प्रिंशा बेप मुप्था डोंइसे बाक्त। 17 मिनू मेको वाइल रेबेका कली गुम्थ दोरमाक्त। मिनू “इ गाग्री डा ब्वाक्कु इक्का तूचा गेयी” दे पुना बाक्त। 18 मिनू रेबेकामी आ गाग्री रीब पा नाइइशा, तूचा गेवा बाक्त। 19 मिनू तूचा गेने थुम्शा “गो इन दलओंठ आन कली यो ब्वाक्कु चाक्शा, मरूमा सम्म तुंइनुड” देंमाक्त। 20 मिनू आ गाग्री



डा ब्वाक्कु मेकेर बाक्शो शुंगुमी मोइश्शा, दोरशा ब्वाक्कु ब्रथ लमाक्त। दलओँठ नेल्ल आन कली मरूमा सम्म ब्वाक्कु तुंडदा बाक्त।<sup>21</sup> मिनु मेको वाइल छक लाक्शा, मेको कली कोव्रशा, परमप्रभु यावे आ योव्रशो मीश आल बाक्म को मबाक्म, दे ब्वालेइ पा बाक्माक्त।

<sup>22</sup> मिनु दलओँठ रूथ्री ब्वाक्कु नूडमे नोले वाइलम आधी शेकेल सुन के मुन्द्री नु १० शेकेल सुन के चुरा निक्शी शोल्शा, रेबेका कली गेवा बाक्त। शेकेल का ११.५ ग्राम बाक्ब।<sup>23</sup> मिनु वाइलमी “गे सु का आ तमी नवे? आं कली देनो। इ आफ आ खिंम आंइ कली बास बाक्वा गेनीमी को?” दे हिल्लो पवा बाक्त।<sup>24</sup> मिनु रेबेकामी “गो बेथुएल आ तमी नड। बेथुएल चहिं नाहोर नु मिल्का आस तौ बाक्ब।<sup>25</sup> आंइ खिंम नल नु जचा थोव्रक शुश बाक्ब। बास बाक्तीक यो बाक्ब” दे मदा बाक्त।<sup>26</sup> मिनु वाइलमी खुम्की पा बाप्शा, परमप्रभु यावे आ डोंइती गु बाप्शा बाक्माक्त।<sup>27</sup> मिनु मेकोमी “परमप्रभु यावे, आं होव्रप अब्राहाम आ परमप्रभु, गे ठेयब बाक्नीनी। गे इन शिशो नु इन रिश्शो पशो मप्रॉइथु, आं होव्रप कली कोइताक्वीनी। गे आं कली आं होव्रप आ लोक्ब आ खिं कोइताक्वीनी” दे परमप्रभु यावे कली ठेयब सेला बाक्त।

<sup>28</sup> मिनु रेबेका दोरशा खिं लेश्शा, आ ममा आ खिं डा मुर आन कली मार मार दुम्मे, मेको नेल्ल देंमाक्त।<sup>29</sup> मिनु लाबान माइश्शो, रेबेका आ लोक्ब का बाक्माक्त। मेको दोरशा, इनारम मेको मुर कली गुथ लमाक्त।<sup>30</sup> मारदे हना मेकोमी आ समी आ मुन्द्री नु चुरा तशा “मेको मुरुम आं कली मोदेशो लोव्र पाप्तु” देशो नेंशा, लाबान मेको मुर कली गुथ लमाक्त। मेको मुर आ दलओँठ नु इनारम बाक्शो बाक्माक्त।<sup>31</sup> मिनु लाबानम मेको कली “परमप्रभु यावे आ आसीक राइब, गे मारदे मेकेर बाक्नीनी? आंइ खिं पिने। गे नु इन दलओँठ आन कली मारेइ मारेइ ठीक पाता” देंमाक्त।<sup>32</sup> मिनु वाइल खिं ओव्रमाक्त। लाबानमी दलओँठ तार वोइश्शो नेल्ल शोल्शा, थुल्का कली नल लाप्ता बाक्त। मिनु मेको मुर नु आ गेय पाइब आन कली खोइल चिक्वा कली ब्वाक्कु यो गेवा बाक्त।<sup>33</sup> नोले मेको आ डोंइती जचा थोव्रक ख्रेत्मे बाक्त। मेकोमी चहिं “गो मारदे पिडा, इन कली मदेडा सम्म मजाइनुड, मब्वाइनुड” देंमाक्त। मिनु लाबानमी “इन के मार लोव्र बाक्मे? लो देनीन” देंमाक्त।

<sup>34</sup> मिनु वाइलमी “गो अब्राहाम आ वाइल नड।<sup>35</sup> मिनु परमप्रभु यावेमी आं होव्रप कली शुश आसीक गेप्तु। मिनु शुश शोप पाइश्शो दुम्त। मेकोमी मेको कली क्यारश भेडा, सुन चांदी, वाइलीम वाइल, दलओँठ नु गधा शुश गेप्तु।<sup>36</sup> मिनु आं होव्रप आ मीश सारामी खाल्पी दुम्शा, अब्राहाम के तौ का थिप्तु। मिनु अब्राहामम आ तौ कली आ मारेइ मारेइ नेल्ल गेप्तु।<sup>37</sup> मिनु आं होव्रपमी आं कली ‘आं तौ कली आं बाक्शो कनान रागी डा मुर आन तमी मचाक्को।<sup>38</sup> गे आं आफ आं खिं नु आं मुर आन खिं रे मीश आल का चाक्को’ दे कसम जपाइक्ती।<sup>39</sup> मिनु गो आं होव्रप कली ‘मीश आल एको रागी जाक्ने मबिप्वा, कोर में’ देंती।<sup>40</sup> मेकोमी चहिं ‘गो परमप्रभु यावे आ डोंइती गाक्नुड। मेकोमी आ स्वर्ग डा गेय पाइब गे नु सोइक्ब। मेकोमी इ कली वारच पाइब। मिनु आं तौ कली आं मुर आन खिं नु आं आफ आं खिं रे मीश आल का चाक्को।<sup>41</sup> आं खिं डा मुर आन बाक्तीके जाक्दीश्शा, मीश आल का मगेतेमी हना, गे कसम मजशो खोदेशो दुम्नेवे’ दे आं होव्रपमी आं कली माइक्ती।

<sup>42</sup> मिनु मुलाक्ती इनारम जाक्शा, गो ‘परमप्रभु यावे, आं होव्रप, अब्राहाम आ परमप्रभु, गे आं कली वारच पने।<sup>43</sup> गो इनार आ नेक्था बाक्नुड। मिनु मीश आल ब्वाक्कु दिथ जाक्मानु, मीश आल कली इ गाग्री डा ब्वाक्कु इक्का तूचा गेयी, देनुड।<sup>44</sup> मिनु मेको मीश आलमी तूडीन, गो इन दलओँठ आन कली यो ब्वाक्कु तुंडनुड, देत हना, मेको मीश आल आं होव्रप आ तौ कली परमप्रभु यावेमी योव्रशो बाक्ल’ देंती।

<sup>45</sup> मिनु गो आं थुमी लोव्र पने मथुम्थु, रेबेका आ गाग्री मुष्शा पित। मिनु इनारम ब्वाक्कु कीथ तोंइसाक्व। मिनु गो ‘आं कली इक्का तूचा गेयी’ दे माइक्ता।<sup>46</sup> मिनु मेकोमी आ गाग्री रीब पा नाइश्शा ‘तूडो। गो इन दलओँठ आन कली यो तुंडनुड’ देंत। मिनु गो तूता। मेकोमी आं दलओँठ आन कली ब्वाक्कु तुंडताक्व।<sup>47</sup> मिनु गो ‘गे सु का आ तमी नवे?’ दे हिल्लो पडानु ‘गो बेथुएल आ तमी नड। बेथुएल नाहोर नु मिल्का आस तौ बाक्ब’ दे माइक्ती।

मिनु गो आ नेंमी मुन्द्री पाइक्ताक्ड, आ गुइमी चुरा लिक्ताक्ड।<sup>48</sup> मिनु गो परमप्रभु यावे आ डोंइती गु बाप्शा ‘परमप्रभु यावे, आं होव्रप अब्राहाम आ परमप्रभु, गे रिश्शो पाइब बाक्नीनी’ दे ठेयब सेल्ला। मारदे हना आं होव्रप आ लोक्ब आ खिं डा मुर रे आ तौ कली तमी चाक्वा कली रिश्शो लां कोइताक्वीनी।<sup>49</sup> मिनु ‘गे आं होव्रप कली शिशो नु रिश्शो पचा मप्रॉइतीनी हना, आं कली देनीन। मेको पचा मदाक्वीनी हना यो देनीन। मारदे हना गो ग्युरा पेरा गे लचा माल्लुड’ ” दे लोव्र पवा बाक्त।

<sup>50</sup> मिनु लाबान नु बेथुएलमी “मेको नेल्ल परमप्रभु यावे आ पशो बाक्ब। मार पाइनस्कु मार देंनस्कु डा।<sup>51</sup> लो, रेबेका कली लतो। मिनु लावो। इन होव्रप आ तौ आ मीश दुम्ल। दोपा परमप्रभु यावेमी लोव्र पवा, मोपा दुम्ल” देंसा बाक्त।

<sup>52</sup> मिनु अब्राहाम आ वाइलम मेको लोव्र नेंशा, परमप्रभु यावे आ डोंइती खुम्की पा बाप्शा, मेको कली ठेयब सेला बाक्त।<sup>53</sup> मिनु आ गेय पाइबमी सुन नु चांदी के गहना नु दारशो वासी रेबेका कली गेमे बाक्त। आ लोक्ब नु आ ममा आस कली यो मार मार गेमे बाक्त।<sup>54</sup> मिनु जशा तूशा, आ गेय पाइबपुकी नु नाक्दो बाक्मा बाक्त। मिनु सुनी कना बोक्मानु, वाइलमी “आं होव्रप आ बाक्तीक लेत्वा गेयीनी” देंमाक्त।<sup>55</sup> मिनु रेबेका आ लोक्ब नु आ ममामी “रेबेका १० नाक्त सम्म बाक्ल, कोर में। मिनु नोले लन” देंसा बाक्त।<sup>56</sup> मिनु वाइलमी “परमप्रभु यावेमी आं कली आसीक गेशा, रिश्शो पा वारच पाइक्ती। मोपतीके आं कली मक्योल्पीनी। आं होव्रप आ बाक्तीक लेत्वा गेयीनी” देंमाक्त।<sup>57</sup> मिनु मेको निक्शीम “रेबेकामी मार देंबा, मेको नेंय” देंसा बाक्त।<sup>58</sup> मिनु रेबेका कली ब्रेश्शा “एको मुर नु लाइनेवे?” दे हिल्लो पाम्सेनु “गो लाइनुड” देंमाक्त।<sup>59</sup> मिनु नोले आ समी रेबेका नु आ कली वारच पाइब, अब्राहाम आ वाइल नु आ गेय पाइब आन कली सोइक्तमे बाक्त।<sup>60</sup> लचा डोंइती रेबेका कली आसीक गेशा “गे आं समी बाक्नेवे। सोशा बोशा, शुश दुमीने। इ चच युइ आन कली आन जोरी सत्रु आन कली ग्राडीन” दे आसीक गेमे बाक्त। उत्पत्ती २२:१७<sup>61</sup> मिनु नोले रेबेका नु आ वारच पाइब बोक्शा, दलओँठ डोइश्शा, मेको मुर नु लसा बाक्त। मोपा वाइलमी रेबेका कली लाइश्शा, आ होव्रप आ खिं लेम्माक्त।

<sup>62</sup> मिनु इसहाक बेयर-लहाइ-रोइ माइश्शो ब्वाक्कु बुक्तीके रे पिमाक्त। मारदे हना दक्खिन रागी नेगेबम बाक्शो बाक्माक्त। उत्पत्ती १६:१४; उत्पत्ती २५:११<sup>63</sup> मिनु नाक्नाक्दो रूमी हिरथ लमाक्त। मिनु कोव्रडानु, डोन रे दलओँठपुकी पिशो तवा बाक्त।<sup>64</sup> मिनु रेबेकामी इसहाक कली तशा, दलओँठ रे फ्रु तोंइसे बाक्त।<sup>65</sup> मिनु अब्राहाम आ वाइल कली “मेरे इं कली गुथ पीब मुर सु में?” दे हिल्लो पवा बाक्त। मिनु वाइलमी “आं होव्रप बाक्ब” देंमाक्त। मेको नेंशा, रेबेकामी आ कुप्जीम कुल सुम्से बाक्त।

<sup>66</sup> मिनु वाइलमी इसहाक कली मार मार दुम्मे, मार मार पवा, नेल्ल शेंदा बाक्त।<sup>67</sup> मिनु इसहाकम रेबेका कली आ ममा सारा आ ताम्बुम ओंइदा बाक्त। मिनु नोले ग्युंवे पाम्से बाक्त। मिनु इसहाकम आ मीश कली दाक्ता बाक्त। मोपा इसहाक आ ममा बेक्शो प्रेंदा बाक्त। उत्पत्ती २३:१-२

#### अब्राहाम आ चच युइ

**25** मिनु अब्राहामम अको मीश चाक्वा बाक्त। मेको आ नें केतुराह बाक्माक्त।<sup>2</sup> मिनु मेकोमी अब्राहाम रे जिम्नान, योकशान, मेदान, मिदयान, इश्बाक नु शुआह थिमाक्त।<sup>3</sup> मिनु योकशानमी शेबा नु देदान थिम्सी बाक्त। देदान आ तौपुकी अश्शुरीम, लेतुशीम नु ले-उम्मीम बाक्मा बाक्त।<sup>4</sup> मिनु मिदयान आ तौ एफाह, एफेर, हनोक, अबीदा नु एल्दाह बाक्मा बाक्त। मेको नेल्ल केतुराह आ चच युइ बाक्मा बाक्त।<sup>5</sup> मिनु अब्राहामम आ मार मार नेल्ल इसहाक कली गेवा बाक्त।<sup>6</sup> अब्राहाममी आ मबेक्थुन अको मीश आन तौ आन कली मार मार कोसेली गेमी बाक्त। मिनु आ तौ इसहाक रे फ्राशा, पूर्ब डा रागीम बाक्मल, दे पूर्ब गे सोइक्तीमी बाक्त।

## अब्राहाम बेक्शो

7 मिनू अब्राहाम नेल्ल पा सहे का ७५ बर्स ब्रॉइमाक्त। उत्पत्ती १२:४  
8 मिनू नोले शुश बर्स डा खाल्पा दुश्शा बेक्शा, आ किकी पिपी नु लमाक्त। उत्पत्ती १५:१५ 9 मिनू इसहाक नु इश्माएल आ तौ निक्शीमी आ बेक्शो रां माक-पेला माइश्शो रू डा पुक्खीमी लाइश्शा, वोदसे बाक्त। डॉइती मेको रू सोहार आ तौ एफ्रोन आ रू बाक्माक्त। एफ्रोन हिंती का बाक्माक्त। मेको रू माप्पे आ पूर्व गे बाक्माक्त। उत्पत्ती २३:१३-२० 10 अब्राहाममी मेको रू हिंती आ मुर रे ग्याप्शो बाक्माक्त। मेकेर डॉइती आ मीश सारा कली नोले अब्राहाम कली वोदमे बाक्त।

11 मिनू अब्राहाम बेक्म नोले परमप्रभुमी इसहाक कली आसीक गेवा बाक्त। मेना इसहाक बेयर-लहाइ-रोइ माइश्शोमी बाक्शो बाक्माक्त। उत्पत्ती १७:१९; उत्पत्ती २४:६२

## इश्माएल आ चच युइ

12 सारा आ वाइलीम इजीप्त डा हागार रे जरमेशो अब्राहाम आ तौ इश्माएल बाक्माक्त। उत्पत्ती २१:१३ 13 इश्माएल आ तौ सु सु बाक्मा बाक्त दैशा हना, आ डॉइती जरमेशो तौ नेबायोथ बाक्माक्त। मिनू नोले थिशो आन नें केदार, अदबेल, मिब्सा, 14 मिश्मा, दुमा, मस्सा, 15 हादाद, तेमा, येतुर, नाफीश नु केदमा बाक्मा बाक्त। 16 एको इश्माएल आ तौ आन नें, आन बाक्तीके आन नें बाक्मा बाक्त। मेको नेल्ल आन थर डा ठेयब मुर बाक्शो बाक्मा बाक्त। उत्पत्ती १७:२०; गन्ती १:४४ 17 इश्माएल नेल्ल पा सहे का ३७ बर्स ब्रॉइमाक्त। मिनू बेक्शा, आ किकी पिपी नु लमाक्त। 18 आ तौपुकी हवीलाह रे इजीप्त लतीक लां शुर सम्म बाक्शो बाक्मा बाक्त। शुर रागी इजीप्त आ डॉइती अस्सुर गे बाक्ब। इश्माएल चहिं आ लोकब नेल्ल आन दातेमी बाक्माक्त। उत्पत्ती १६:१२

## इसहाक आ तौ निक्शी

19 इसहाक अब्राहाम आ तौ बाक्माक्त। 20 इसहाक ४० बर्स दुम्मेनु, रेबेका चाक्गा बाक्त। रेबेका चहिं अरामी पदान-अराममी बाक्ब बेथुएल आ तमी, लाबान आ समी बाक्माक्त। 21 मिनू इसहाकमी परमप्रभु यावे कली आ मीश आ पर्बम पुना बाक्त। मारदे हना आल मथीब बाक्माक्त। परमप्रभु यावेमी आ पुंइशो गेवा बाक्त। मिनू रेबेकामी कोव्रज कुरा बाक्त।

22 मिनू आल निक्शी आ कोव्रजम राश्शी पाम्से बाक्त। मिनू रेबेकामी “मुल ओदैंशो दुम्ती हना, मार दुम डा? दोपा ब्रॉइनुडा डा?” दे मिस्ता बाक्त। मिनू परमप्रभु यावे कली “मार दुम्नुडा?” दे हिल्लो पवा बाक्त। 23 मिनू परमप्रभु यावेमी मेको कली “इ कोव्रजम जात निक्शी डा मुर बाक्नीसी। मेको जात निक्शी फ्राचा पुंइसीनीस। का अर्को क्येडा बोल्यो बाक्ब। डॉइती जरमेशो चहिं कान्छा आ गेय पाइब दुम्ब” दे शेंदा बाक्त। उत्पत्ती २७:२९; मलाकी १:२; रोमी ९:१०-१२

24 मिनू रेबेकामी आल थिमेनु, जौले बाक्सा बाक्त। 25 मिनू डॉइती डा आ रांम वा फेक्शो खोदैंशो पा लल चां पाइश्शो वॉइश आल का थिमाक्त। मिनू मेको कली एसाव नें वोदा बाक्त। 26 मिनू नोले आ लोकबमी आ लोकब आ गेंप्रे ग्याइश्शा गूमाक्त। मोपतीके आ नें याकूब वोदा बाक्त। रेबेका आल थिची ना इसहाक ६० बर्स दुम्शो बाक्माक्त। होसे १२:४ 27 मिनू मेको तौ निक्शी कोल्सानु, एसाव जोक्ब सिखारी दुम्माक्त। नेल्ल नाक्त ब्वाकीम बाक्चा दाक्ता बाक्त। याकूब चहिं ताम्बुम बाक्ब नु रू डा गेय पा, सिक्सी पा बाक्ब दुम्माक्त। 28 इसहाकम एसाव कली दाक्ता बाक्त। मारदे हना आ चाक्शो सिखार ब्ववा बाक्त। रेबेकामी चहिं याकूब कली दाक्ता बाक्त।

## डॉइती जरमेशो तौ आ अधिकार

29 मिनू काबु याकूबमी खोले क्येवानु, एसाव ब्वाकी रे शोव्रलु बेक्शा जाक्माक्त। 30 मिनू एसावमी याकूब कली “इ क्येशो लल दाल खोले इक्का गेयी। गो शोव्रलु बेक्ती” देंमाक्त। मोपतीके एसाव कली एदोम माइश्शो याइनी नें वोइश्शो बाक्माक्त। 31 मिनू याकूबमी “मुलाक्ती डॉइती जरमेशो

तौ इ आसीक आं कली गेयी” देंमाक्त। 32 मिनू एसावमी “मुल गो बेक्चता डॉइती जरमेशो तौ आ तचा डा आसीकम मार दुम्बा डा?” देंमाक्त। 33 मिनू याकूबमी “गो मुलाक्ती गेतन, दे कसम जावो” दे मदा बाक्त। मिनू एसावमी याकूब कली “डॉइती जरमेशो तौ आं आसीक इ केन दुम्ल” दे कसम जवा बाक्त। उत्पत्ती २७:३६; हिब्रू १२:१६ 34 मिनू नोले याकूबमी एसाव कली शोब्ले नु दाल खोले खेत्ता बाक्त। मिनू मेको जशा तूशा बोक्शा लमाक्त। मोपा एसावमी “डॉइती जरमेशो तौ आ ततीक आसीक ममाल्नुड” दे प्रोना बाक्त।

## इसहाक गेरार सहर लशो

26 मिनू नोले रागीमी अन्काल दुम्माक्त। डॉइती अब्राहाम बाक्मेनु यो, अन्काल दुम्शो बाक्माक्त। मिनू इसहाक पलिस्ती आन पिप अबीमेलेक आ रागी डा गेरार सहर लमाक्त। 2 मिनू परमप्रभु यावेमी इसहाक आ डॉइती गूमाक्त। मिनू इसहाक कली “इजीप्त रागी मलावो। आं दैशो रागीम बाक्थ लावो। 3 मेको रागीमी अर्को रागी डा मुर दुम्शा बाक्को। गो गे नु बाक्शा, इ कली आसीक गेनुड। गो इ कली नु इ चच युइ आन कली एको रागी नेल्ल गेनुड। गो इ आफ अब्राहाम नु कबल पा, कसम जाता। मुल आं कबल खाप्नुड। उत्पत्ती १७:१९; उत्पत्ती २२:१६-१७ 4 इ चच युइ आन कली सरीड डा सोरुल खोदैंशो पा शुश सेल्लुड। मेको आन कली एको रागी नेल्ल गेनुड। मिनू इ चच युइ आन पर्बम रागी रागी डा मुर नेल्ल आसीक ताइनीम। 5 मारदे हना अब्राहामम आं दैशो टिशा, आ पचा माल्शो पाप्नु। आं शेंशो, आं फुल्लुम मुशा ब्रेक्शो लोव्र नु आं अरेशो नेल्ल पाप्नु” दे मदा बाक्त। उत्पत्ती १५:५

6 मिनू इसहाक गेरार सहर उइ बाक्माक्त। 7 मिनू अबीमेलेक आ मुरपुकीमी इसहाक कली आ मीश आ पर्बम लोव्र पामे बाक्त। मेकोमी चहिं “आं समी बाक्ब” दे लोव्र लेत्ता बाक्त। मारदे हना रेबेका शुश दारशो मीश मुर दुम्तीके “आं मीश बाक्ब” देंचा हिंमाक्त। मारदे हना “मेको कली तशा, लाइक्चा कली आ कली साइक्नीम” दे हिंशो बाक्माक्त। 8 मिनू इसहाक मेको रागीमी शुश बाक्शा, काबु पलिस्ती आन पिप अबीमेलेकमी झेल रे इसहाक नु आ मीश रेबेका चाल्शो तवा बाक्त। 9 मोपतीके अबीमेलेकमी इसहाक कली ब्रेश्शा “नेनो, एको थमा पा इ मीश बाक्ब। दोपा ‘आं समी बाक्ब’ देंने?” दे हुइक्ता बाक्त। मिनू इसहाकमी “एको आ पर्बम आं कली साइक्नीमी, कों, दे हिंती” देंमाक्त। 10 मिनू अबीमेलेकमी “आंइ कली मार पवी? आं मुर का मेको नु इप्शो हना, गे आंइ कली शुश मरिश्शो मपपदी वा?” दे मदा बाक्त। 11 मिनू अबीमेलेकमी आ मुर नेल्ल आन कली “सुम मेको नु आ मीश आस कली मरिश्शो पाइबा, मेको थमा पा साइक्चा पुंइसीब” दे माइक्मी बाक्त।

12 मिनू इसहाकमी मेको रागीमी मार मार शोक्शा, मेको बर्सम गेडा का के सहे का गेडा सम्म सिप्पाइश्शा खेला बाक्त। मारदे हना परमप्रभु यावेमी इसहाक कली आसीक गेवा बाक्त। हितोपदेस १०:२२ 13 मिनू शुश शोप पाइश्शो दुम्शा, दारना दारन शुश क्येट थीब दुम्माक्त। 14 मेको आ क्यारश भेडा नु बी ब्यफ शुश दुम्मा बाक्त। मिनू वाइलीम वाइलपुकी यो शुश दुम्मा बाक्त। मोपतीके पलिस्तीपुकीमी गेहे पामे बाक्त। 15 मिनू पलिस्तीपुकीमी अब्राहाम आ गेय पाइब आन दोशो इनार खपीम प्रिंशा, ब्वाक्कु तेक्गमे बाक्त। उत्पत्ती २१:२२-३४ 16 मिनू अबीमेलेकम इसहाक कली “आंइ क्येडा गे बोल्यो बाक्नीनी, मोपतीके एकेर रे लने” दे मदा बाक्त।

17 मिनू इसहाक नु आ मुरपुकी मेकेर रे लशा, गेरार डा दिंममी जाक्दीश्शा, आन ताम्बु कीशा बाक्मा बाक्त। 18 मिनू इसहाकमी डॉइती अब्राहाम आ दोशो इनारपुकी, लेंशा दोपाइश्शा, ब्वाक्कु गूपदा बाक्त। मारदे हना अब्राहाम बेक्म नोले पलिस्तीपुकीमी मेको इनार आन कली खपीम प्रिंशो बाक्मा बाक्त। मिनू मेको इनार आन कली आ आफ आ वोइश्शो नें लेंशा वोदा बाक्त। 19 मिनू इसहाक आ गेय पाइबपुकीमी मेको दिंममी दोशा, ब्वाक्कु बुक्तीके थित्मे बाक्त। 20 मिनू गेरार डा गोठलापुकीमी इसहाक आ गोठला आन कली “एको ब्वाक्कु आंइ के बाक्ब” दे जीमे बाक्त। मोपतीके इसहाकम मेको इनार कली एसेक नें वोदा बाक्त। मारदे

हना मेकोपुकी आ मुर नु जीमे बाव्त। 21 मिनु लेंशा अर्को इनार का दोव्रमे बाव्त। मेको आ पर्वम यो जीमे बाव्त। मेको कली सिल्ना नें वोदा बाव्त। 22 नोले मेकेर रे लशा, अर्को इनार का दोव्रमे बाव्त। मेको आ पर्वम सुइमी जिचा मपोवगमे बाव्त। मिनु मेको आ नें रेहोबोध वोदा बाव्त। मिनु “मुल परमप्रभु यावेमी आंइ कली बावतीक गेवा बाव्त। गोपुकी एको रागीमी शुश दुम्कल” देंमाव्त।

23 मिनु मेकेर रे लशा, बेयर-शेबा जाव्दीम्मा बाव्त। 24 मिनु मेको नाव्दो परमप्रभु यावे गूशा “गो इ आफ अब्राहाम आ परमप्रभु नड। महिनो। गो गे नु बाव्नुड, इ कली आसीक गेनन। आं गेय पाइब अब्राहाम आ पर्वम गो इ चच युइ आन कली शुश सेल्नुड” दे लोत्र पवा बाव्त। 25 मिनु इसहाकम मेकेर चढेतीक सेल्शा, परमप्रभु यावे आ नें थिशा ब्रेश्शा, मेको नु लोत्र पवा बाव्त। मिनु आ ताम्बु मेक उइ कीडा बाव्त। आ गेय पाइबपुकीमी मेकेर इनार का दोव्रमे बाव्त। उत्पत्ती १२:८

### इसहाक नु अबीमेलेक सल्ला पशो

26 काबु अबीमेलेक, आ अर्ती गेब अहुज्जाथ नु आ फौज डा ठेयब कप्तान फीकोल नु गेरार सहर रे जाव्शा, इसहाक कली गुम्मे बाव्त। 27 मिनु इसहाकमी “गेपुकी आं कली मदाव्थु, इन बावतीके रे सोइक्ताक्पीनी। मुल मारदे आं कली गुम्थ जाव्नी?” दे हिल्लो पवा बाव्त। 28 मिनु मेकोपुकीमी “परमप्रभु यावे गे नु बाव्ब, गो तुइक्नीकी। मोपतीके गोपुकीमी ‘गे नु कसम जशा, कबल पचा’ रिम्शो दुम्ब। व्यवस्था २९:३; मत्ती १३:१३ 29 गे आंइ कली श्येत मगेने। गोपुकीमी यो इन कली श्येत मगेथु, रिम्शो पा लडाइ मपथु सोइक्ताक्क। गे परमप्रभु यावे आ आसीक राइब बाव्नीनी” दे इसहाक कली देंमा बाव्त। 30 मिनु इसहाकम मेको आन कली भोज सेला बाव्त। मिनु मेकोपुकीम जामे, तूडमे बाव्त। 31 मिनु मेकोपुकी आ दीसा सुनी कना बोक्शा, कसम जामे बाव्त। मिनु नोले इसहाकमी मेको आन कली लचा गेवा बाव्त। मिनु आन थुं नाइश्शा लमा बाव्त। 32 मेको नाव्ती इसहाक आ गेय पाइबपुकी जाव्शा, इसहाक कली “आंइ दोतीकेमी ब्वाक्कु गूत” दे शेंदमे बाव्त। 33 मिनु मेको इनार कली शिबा नें वोदा बाव्त। मोपतीके मेको सहर आ नें मुल सम्म बेयर-शेबा बाव्त।

### एसाव आ मीश निक्शी

34 एसाव ४० बर्स दुम्मेनु, हिन्ती आ मुर बेयरी आ तमी युदीथ नु हिन्ती आ मुर एलोन आ तमी बासेमाथ चाक्सी बाव्त। उत्पत्ती ३६:२-३ 35 मिनु मेको निक्शी आस पर्वम इसहाक नु रेबेका थुं मनुथु, शुश सुर्ता पाम्से बाव्त।

### इसहाकमी आसीक गेशो

27 मिनु इसहाक खाल्पा दुम्शा, ब्राब्रा पा मिक्च मताइब दुम्माव्त। मिनु मेकोमी आ डॉइती जरमेशो तौ एसाव कली “आं तौ” दे ब्रेत्ता बाव्त। मिनु एसावमी “मार देंनी?” दे लोत्र लेत्ता बाव्त। 2 मिनु इसहाकमी “नेनो, गो खाल्पा दुम्ती, आं बेक्ची ना मतुइक्नुड। 3 इ लिब्रा लाइश्शा, सिखार ग्यारथ लावो। मिनु आं कली सिखार चाक्को। 4 मिनु नोले आं दाक्शो ब्रोव्रब्रोव्रशो क्येशा, गेयी। गो आं बेक्चा क्येडा डॉइती जशा ब्वशा, इ कली आसीक गेनुड” देंमाव्त।

5 मिनु रेबेकामी इसहाक नु एसाव लोत्र पशो नेंशो बाक्माव्त। मिनु एसाव ब्वाकी सिखार ग्यारथ लमेनु, 6 रेबेकामी आ तौ याक्ब कली “आं तौ नेनो, गो इ आफोमी एसाव कली लोत्र पशो नेंता। 7 मेकोमी एसाव कली ‘आं कली सिखार चाक्को। ब्रोव्रशो क्येवो। गो जशा ब्वशा नोले परमप्रभु यावे आ डॉइती आं बेक्चा क्येडा डॉइती इ कली आसीक गेनुड” देंत। 8 मोपतीके आं तौ, आं देंशो टिवो। दोपा अरेना, मोपा पावो। 9 मुल गोठ लावो। क्यारश आन दाते रे रिम्शो पाठा निक्शी चाक्को। मिनु गो इ आफ कली आ दाक्शो ब्रोव्रशो क्येनुड। 10 मिनु गे चहिं लाइश्शा, इ आफ कली खेत्तो। मेकोमी जशा ब्वशा, आ बेक्चा क्येडा डॉइती इ कली आसीक गेवल” देंमाव्त। 11 मिनु याक्बम आ ममा कली “नेनीन, आं लोक्ब एसाव शुश चां पाइश्शो बाक्ब। गो मोदेंशो मनड। उत्पत्ती २५:२५ 12 मिनु आं आफोम आं कली

थिशा, तुइक्ब। मिनु गो जोल पाइब दुम्शा, आसीक मतथु, सराप राइनुड” देंमाव्त। 13 मिनु आ ममामी “इ कली पशो सराप गो रडल, आं तौ। गे आं देंशो पावो। पाठा निक्शी ब्रथ लावो” देंमाव्त। 14 मिनु याक्बम गोठ लशा, पाठा निक्शी चाक्शा, आ ममा कली गेवा बाव्त। मिनु आ ममामी आ आफ कली आ दाक्शो ब्रोव्रशो श्ये क्येवा बाव्त। 15 मिनु रेबेकामी आ खिमी वोइश्शो आ डॉइती जरमेशो तौ एसाव आ नक वा लाइश्शा, आ कान्छा याक्ब कली फेक्पदा बाव्त। 16 मिनु मेको पाठा आस कुशुल याक्ब आ गुइ तारी नु आ शुर तारी क्येप्ता बाव्त। 17 मिनु आ क्येशो ब्रोव्रशो श्ये नु शोब्ले याक्ब कली गेवा बाव्त।

18 मिनु याक्बम आ आफ बाव्तीके लशा, मेको कली “आं आफ” देंमाव्त। मिनु “गो बाव्ती। आं तौ, गे सु नवे” दे हिल्लो पवा बाव्त। 19 याक्बम आ आफ कली “गो इन डॉइती जरमेशो तौ, एसाव, नड। इन पुंइशो गो पाता। बोक्शा निश्शा, आं सिखार ब्वने। मिनु आं कली आसीक गेयीनी” देंमाव्त। लेवी १९:१४ 20 मिनु इसहाकमी “गिश रीब पा पवी, आं तौ?” दे हिल्लो पवा बाव्त। मिनु “परमप्रभु यावे, इन परमप्रभुमी सिखार आं नेक्था चाक्तु” देंमाव्त। 21 मिनु इसहाकम याक्ब कली “आं नेक्था पिवो। इ कली धीनन, आं तौ। गे थमा पा, आं तौ एसाव नवे कौ, मनवे” दे मदा बाव्त। 22 मिनु याक्ब आ आफ आ नेक्था लमाव्त। इसहाकम मेको कली सुल्शा “आ सेंदा याक्ब के बाव्त, आ गुइ चहिं एसाव के बाव्त” देंमाव्त। 23 मिनु मेको कली मतुइक्ता बाव्त। मारदे हना आ गुइ एसाव खोदेंशो पा चां पाइश्शो बाक्माव्त। मोपतीके आसीक गेवा बाव्त। 24 मिनु “गे थमा पा आं तौ एसाव नवे?” दे हिल्लो पवानु “गो नड” देंमाव्त। 25 मिनु इसहाकम “लो, इ सेल्शो जचा ब्वचा थोव्रक चाक्को। इ कली आसीक गेनन” देंमाव्त। मिनु याक्बमी चाक्गा बाव्त। मिनु आ आफोम ब्ववा बाव्त। मिनु याक्बमी अडगुर शांबु यो चाक्शा, गेवा बाव्त। मिनु मेको यो तूडा बाव्त। 26 मिनु आ आफ इसहाकम “आं नेक्था पिवो, आं कली पुक्पु पावो, आं तौ” देंमाव्त। 27 मिनु आ नेक्था लशा, पुक्पु पवा बाव्त। इसहाकमी आ वा आ रिना नाम्शा, आसीक गेवा बाव्त। मिनु मेकोमी “आं तौ आ रिना परमप्रभु यावेमी आसीक गेशो रू आ रिना खोदेंशो बाक्ब। 28 परमप्रभुमी इ कली सरीड डा सीत रे नु रिम्शो खप रे शुश चेरब नु अडगुर शांबु गेवल। 29 मुरपुकीम इ कली गेय पामेक्ल। रागी रागी डा मुरपुकी इ डॉइती खुम्की पा बाम्मल। इ लोक्ब आन दातेमी गे ठेयब दुमो। इ ममा आ तौपुकी इ डॉइती बाम्मल। सु सुम इ कली सराप पामे, मेको आंमान रमल। सु सुम इ कली आसीक गेमे, मेको आसीक रमल” दे आसीक गेवा बाव्त। उत्पत्ती २३:२५; उत्पत्ती १२:३

30 मिनु इसहाकमी आसीक गेवा नोले, याक्ब आ आफ आ बाव्तीक रे लमेनु, आ लोक्ब एसाव आ सिखार ग्यारतीक रे जाक्माव्त। 31 मेकोमी ब्रोव्रशो श्ये क्येशा, आ आफ आ बाव्तीके जाक्शा, आ आफ कली “आं आफ बोक्कीन। आं सिखार ब्वशा, आं कली आसीक गेयीनी” देंमाव्त। 32 मिनु आ आफ, इसहाकमी मेको कली “गे सु नवे?” दे हिल्लो पवानु “गो इन डॉइती जरमेशो तौ, एसाव नड” देंमाव्त। 33 मिनु इसहाक शुश खिंखि पा “सुमी आं कली सिखार चाक्गा? इ जाक्चा क्येडा डॉइती गो जाता। मिनु आसीक गेता। आं आसीक लीब” देंमाव्त। 34 मिनु एसाव आ आफ आ लोत्र नेंशा, ठेयब सेंदा पा डाक्माव्त। मिनु आ आफ कली “आं आफ, आं कली यो आसीक गेयीनी” देंमाव्त। हिब्रू १२:१७ 35 मिनु “इ लोक्ब जाक्शा, जोल पशा, इ आसीक रोइक्ताक्व” देंमाव्त। 36 मिनु एसावमी “आ नें याक्ब दुम्शो, ठीक बाक्ब। मुल आं कली निक्शी खेयप ठगेती। आं डॉइती जरमेशो तौ आ अधिकार रोइक्ताक्पी। मुल आं आसीक यो लाइक्तु। गे आं कली आसीक महेंदीनी?” दे डाक्शा, देंमाव्त। उत्पत्ती २५:२६; उत्पत्ती २५:३३ 37 मिनु इसहाकम एसाव कली “नेनो, गो मेको कली इ प्रभु सेल्ता। आ लोक्ब नेल्ल आन कली मेको आ गेय पाइब सेल्ता। चेरब नु अडगुर शांबु शुश ग्रेल्मल, दे लोत्र पाता। मिनु इ कली मार गेनना डा, आं तौ?” दे लोत्र पवा बाव्त। 38 मिनु एसावमी आ आफ कली “इन के आसीक का ला बाक्बा डा, आं आफ? आं कली यो आसीक गेयीनी” दे शुश डाक्माव्त।

39 मिनू आ आफ इसहाकम “नेनो, मलिलो खप नु सरीड डा सीत इ बाक्तीक रे डोन बाक्ब। 40 इ तरवारम इ गेय पाइनेवे। इ लोकब कली गेय पाइनेवे। २२राजा ८:२०,२२ गे बोल्यो दुम्ते हना, आ जुवा इ शुर रे ताइक्नेवे” दे एसाव कली यो आसीक गेवा बाक्त।

41 मिनू एसावमी आ आफोम याकूब कली गेशो आसीक लोव आ पर्बम, याकूब कली काइ मदाक्ता बाक्त। आ थुंमी “आं आफ बेक्शा रोंका पने थुंशो नोले, आं लोकब याकूब कली साइक्नुड” दे मिम्ता बाक्त। 42 मिनू रेबेकामी आ तौ आ लोव नेना बाक्त। मिनू मेकोमी याकूब कली ब्रेश्शा “नेनो, इ लोकबमी इ कली साइक्वा कली मिम्ब। 43 मोपतीके आं तौ, गे आं देंशो पावो। बोक्को, आं लोकब लाबान आ बाक्तीके, हारान सहर प्रोक्को। उत्पत्ती २४:२९ 44 इ लोकब आ गाइश्शो मनांइसे सम्म मेक उइ बाक्को। 45 मिनू इ लोकबमी इ पशो प्रेंशा, मचुरत हना, गो इ कली ब्रथ सोइक्नुड। गो दोपा नाक्त कामी आं मुर निक्शी जांशो तने चाप्नुड डा?” दे आ तौ कली देंमाक्त।

46 मिनू रेबेकामी इसहाक कली “गो हिंती आ तमी आस पर्बम बेक्वा डा दुम्ती। याकूबमी यो एको खोदेंशो पा एको रागी डा हिंती आ तमी का चाक्तु हना, गो ब्रॉइचा मदाक्नुड” दे मदा बाक्त। उत्पत्ती २६:३४-३५

### याकूब कली सोइश्शो

28 मिनू नोले इसहाकमी याकूब कली अरेशा “गे कनान रागी डा मीश आल मचाक्को। उत्पत्ती २४:३ २ साशा, पदान-अराम इम्मा आ आफ बेथुएल आ खिं लावो। मिनू इम्मा आ लोकब लाबान आ तमी का चाक्को। उत्पत्ती २२:२३; उत्पत्ती २४:२९ ३ मिनू नेल्ल क्येडा सक्ति पाइश्शो परमप्रभुमी इ कली आसीक गेवल। मिनू इ कली सोशा बोशा, शुश सेलल। हिक्ने मचाप्पा डा पा शुश दुम्पदल। 4 अब्राहाम कली गेशो आसीक मुल इ कली नु इ चच युइ आन कली गेवल। इ मुल बाक्शो रागीम अर्को रागी डा मुर बाक्ते, तन्न परमप्रभुमी अब्राहाम कली गेप्नु। मेको इ कली दुम्ल” दे आसीक गेवा बाक्त। 5 मोदेंशो पा इसहाकमी याकूब कली पदान-अराम डा मुर बेथुएल आ तौ आ खिं सोइक्ता बाक्त। मेको याकूब नु एसाव आस ममा आ लोकब लाबान बाक्माक्त।

6 मिनू एसावमी, इसहाकम याकूब कली आसीक गेशा, मीश चाक्वा कली पदान-अराम गे सोइश्शो तुइश्शा, आ आफ आ अरेशो “कनान रागी डा तमी मचाक्को” दे माइश्शो तुइक्ता बाक्त। 7 याकूबमी आम आफ आस कली टिशा, पदान-अराम गे लशो तवा बाक्त। 8 मिनू एसावम कनान रागी डा तमीपुकी आ आफ इसहाकम मदाक्शो तुइश्शा, 9 इश्माएल आ बाक्तीके लमाक्त। मिनू मीश निक्शी बाक्शा यो, अब्राहाम आ तौ इश्माएल आ तमी नेबायोथ आ समी महलाथ चाक्गा बाक्त। उत्पत्ती १६:१६; उत्पत्ती २६:३४; उत्पत्ती २५:१३

### याकूबमी डोमु तशो

10 मिनू याकूब बेयर-शेबा रे गाक्शा, हारान सहर गे लमाक्त। 11 मिनू बाक्तीके का जाक्दीश्शा, नाक्दो मेकेर बाक्माक्त। मारदे हना नां रिक्माक्त। मिनू फुल्लु तार आ पिया वोइश्शा इम्माक्त। 12 मिनू इम्मेनु, डोमुम खप रे सरीड थिंशो क्रेसी का तवा बाक्त। मेको क्रेसीमी परमप्रभु आ स्वर्ग डा गेय पाइबपुकी तोइश्शो, डोइश्शो तवा बाक्त। यूहन्ना १:५१ 13 मिनू क्रेसी आ डरम परमप्रभु यावे राप्शा, याकूब कली “गो परमप्रभु यावे, इ बाजे अब्राहाम नु इ आफ इसहाक आस परमप्रभु नड। मुल इ इप्शा बाक्तीक रागी इ कली नु इ चच युइ आन कली गेनन्नी। 14 इ चच युइ खप डा फुरक खोदेंशो पा शुश दुम्नीम। सोशा बोशा, शुश दुम्शा, पूर्ब, पच्छिम, उत्तर, दक्खिनम ब्रशा बाक्नीमी। गे नु इ चच युइ आन पर्बम रागी नेल्ल डा मुर आसीक ताइनीम। उत्पत्ती १३:१४-१५ 15 गो गे नु बाक्शा, ते लाइनेवे, गो इ कली कोव्रनन। गो इ कली एको रागी लेप्पाइक्नन। मारदे हना गो इ कली मप्रॉइनन। इ कली मार मार देंडा, गो मेको नेल्ल पाइनुड” देंमाक्त।

16 मिनू याकूब आ निन्द्रा रे सेंसीशा “परमप्रभु यावे थमा पा एकेर बाक्ब। गो मतुइक्तु” देंमाक्त। 17 मिनू हिंशा “एको हिंशा डा बाक्तीके बाक्ब।

परमप्रभु आ बाक्तीक खिं बाक्शा, सरीड डा लाप्चो बाक्ब” देंमाक्त।

प्रस्थान ३:५

18 मिनू याकूब सुनी कना बोक्शा, आ पिया आगा डा वोइश्शो फुल्लु राप्पाइश्शा तेल लुक्ता बाक्त। उत्पत्ती ३५:१४-१५ 19 मिनू मेको बाक्तीके कली बेथेल नें वोदा बाक्त। डोंइती मेको सहर आ नें लूज बाक्माक्त। 20 मिनू याकूबमी “परमप्रभु गो नु बाक्त हना, लां कोइशा कोव्रती हना, जचा नु फेक्वा यो गेती हना, 21 थुं नाइश्शा, आं आफ आ खिं लेत्वा गेती हना, परमप्रभु यावे आं परमप्रभु बाक्ब” दे कसम जवा बाक्त। 22 मिनू परमप्रभु कली “आं राप्पाइश्शा वोइश्शो फुल्लु परमप्रभु आ खिं दुम्ल। आं कली मार मार गेनी, मेको के १० भागमी भाग का थमा पा इन कली गेनन्नी” देंमाक्त। उत्पत्ती ३५:९

### याकूब लाबान आ खिं जाक्दीश्शो

29 मिनू याकूब लमे लमे, पूर्ब डा मुर आन रागी जाक्दीम्माक्त। 2 मिनू कोव्रडानु, दिंम कामी इनार का तवा बाक्त। हुल सां भेडा मेकेर बाक्शो बाक्मा बाक्त। मारदे हना मेको आन कली मेको इनार डा ब्वाक्कु तुंइबाक्मा बाक्त। मेको इनार चहिं ठेयब फुल्लुमी सुम्शो बाक्माक्त। 3 मिनू भेडा आन हुल नेल्ल मेकेर खुम्सीशा, गोठलापुकीमी मेको इनार डा फुल्लु क्युक्शा, भेडा आन कली ब्वाक्कु तुंइशा, नोले लेंशा इनार सुम्शा वोइक्बाक्मा बाक्त।

4 मिनू याकूबमी मेको भेडा गोठला आन कली “आं लोकबपुकी गे ते डा बाक्नीनी?” दे हिल्लो पवा बाक्त। मिनू मेकोपुकीमी “हारान डा बाक्नीकी” देंमा बाक्त। 5 मिनू याकूबमी “गे नाहोर आ तौ लाबान तुइक्नीनी?” दे हिल्लो पवा बाक्त। मिनू “गो तुइक्नीकी” दे लोव लेत्मे बाक्त। उत्पत्ती २४:१०,२४ 6 याकूबमी “रिंशो बाक्मे?” दे हिल्लो पवानु, मेकोपुकीमी “रिंशो बाक्ब। ह्यु आ तमी राहेल आ भेडा नु जाक्त” देंमा बाक्त। 7 मिनू याकूबमी “चोक्वी मजाक्शो, भेडा आन कली ब्वाक्कु तुंइशा, जोपाइक्थ लतीन” देंमाक्त। 8 मिनू मेकोपुकीमी “हुल नेल्ल मखुम्सीथु, इनार डा फुल्लु मयाक्थु, भेडा आन कली ब्वाक्कु तुंइने मचाप्नीकी” दे लोव लेत्मे बाक्त।

9 मिनू याकूब मेकोपुकी नु लोव पवा सम्म, राहेल आ आफ आ भेडा नु जाक्माक्त। मेको गोठाल्नी बाक्माक्त। 10 मिनू याकूबमी आ मामा, लाबान आ तमी राहेल तवा बाक्त। मिनू मेको कली गुम्थ लशा, इनार डा फुल्लु याक्ता बाक्त। मिनू आ मामा आ भेडा आन कली ब्वाक्कु तुंइडा बाक्त। 11 मिनू राहेल कली चुप पाइश्शा डाक्माक्त। 12 राहेल कली “गो इ आफ आ बहिनी रेबेका आ तौ नड” देंमाक्त। मिनू राहेल दोरशा लशा, आ आफ कली मेको लोव शेंदा बाक्त। 13 मिनू लाबानमी आ भानीच याकूब जाक्शो लोव नेंशा, दोरशा मेको कली गुम्थ जाक्माक्त। मिनू मुष्शा, पुक्पु पा, आ खिं लदा बाक्त। मिनू याकूबमी लाबान कली शुश लोव शोवडा बाक्त। 14 मिनू लाबानमी “गे थमा पा आं खिं डा मुर बाक्नेवे” देंमाक्त। मिनू याकूब महिना का खोदेंशो मेकेर बाक्माक्त।

15 मिनू लाबानमी याकूब कली “गे आं खिं डा मुर बाक्ते हना यो, आं कली मो गेय पचा ममाल्नेवे। मार पुंइनेवे, देनो” दे हिल्लो पवा बाक्त। 16 लाबान आ तमी निक्शी बाक्सा बाक्त। आ डोंइती जरमेशो आ नें लेआ नु कान्छी आ नें राहेल बाक्माक्त। 17 लेआ मदारशो बाक्माक्त। राहेल चहिं शुश दारशो बाक्माक्त। 18 याकूबम राहेल कली दाक्ता बाक्त। मिनू लाबान कली “इन कान्छी तमी राहेल आ पर्बम गो इन कली ७ बर्स गेय पाइनुड” देंमाक्त। 19 मिनू लाबानमी “अर्को मुर कली गेचा क्येडा इ कली गेचा रिंशो बाक्ब। गो नु गेय पा बाक्को” देंमाक्त। 20 मिनू याकूबम राहेल आ पर्बम ७ बर्स गेय पवा बाक्त। मेको ७ बर्स याकूब कली नाक्त का निक्शी खोदेंशो पा लमाक्त। मारदे हना राहेल कली शुश दाक्ता बाक्त।

21 मिनू याकूबमी लाबान कली “आं मीश गेयीनी। ७ बर्स दुम्माक्त। मेको नु ग्युबे पाइनुड” दे मदा बाक्त। 22 मिनू लाबानमी सहर डा मुर नेल्ल ब्रेश्शा, भोज गेमी बाक्त। 23 मिनू नाक्नाक्दो लाबानमी आ तमी लेआ लाइश्शा, याकूब कली गेवा बाक्त। मिनू याकूब मेको नु इम्माक्त। 24 लाबानमी आ तमी लेआ कली आ गेय पाइब वाइलीम जिल्या गेवा बाक्त। 25 मिनू याकूब

सुनी कना बोक्शा, आ मीश कोव्रडानु, लेआ बाक्माक्त। मिनु गाइश्शा लाबान कली “गे आं कली मार पनी? गो इन कली राहेल आ पर्बम गेय मपडा डा? मारदे आं कली ठगेनी?” दे मदा बाक्त।<sup>26</sup> मिनु लाबानमी “आंइ रागीमी जेठी क्येडा डोंइती कान्छी मगेनीकी।<sup>27</sup> हप्ता का मेको नु बाक्को। नोले गो इ कली अर्को यो गेनन। गे अर्को ७ बर्स गेय पचा माल्नेवे” दे मदा बाक्त।<sup>28</sup> मिनु याकूब मेको बिश्शा, लेआ नु हप्ता का बाक्माक्त। मिनु नोले लाबानमी राहेल कली यो गेवा बाक्त।<sup>29</sup> लाबानमी आ तमी राहेल कली आ गेय पाइब वाइलीम बिल्हाह गेवा बाक्त।<sup>30</sup> मिनु याकूबम राहेल कली यो चाक्का बाक्त। मिनु लेआ क्येडा राहेल कली शुश दाक्ता बाक्त। मिनु लाबान कली अर्को ७ बर्स गेय पवा बाक्त। *लेवी १८:१८*

परमप्रभुमी लेआ आ श्येत तशो

<sup>31</sup> मिनु परमप्रभु यावेमी याकूबमी लेआ कली मदाक्शो तशा “आल थीब दुम्त” दे आसीक गेवा बाक्त। तन्न राहेल आल मथीब बाक्माक्त।<sup>32</sup> मिनु लेआ कोव्रज कुरशा, तौ का थिमाक्त। मेको आ नें रुबेन वोदा बाक्त। मारदे हना “परमप्रभु यावेमी आं श्येत ताप्तु। मुल रे आं वोंइशेम आं कली दाक्ब” देंमाक्त।<sup>33</sup> मिनु लेंशा कोव्रज कुरशा, तौ का नु थिमाक्त। मिनु “परमप्रभु यावेमी आं कली मदाक्शो तशा, अर्को तौ का यो गेती” देंशा, मेको आ नें सिमियोन वोदा बाक्त।<sup>34</sup> मिनु लेंशा कोव्रज कुरशा, अर्को तौ का थिमाक्त। मिनु “मुल रे आं वोंइश गो नु बाक्ब। मारदे हना गो तौ सां थीतामी” देंमाक्त। मोपतीके आ नें लेवी वोदा बाक्त।<sup>35</sup> मिनु लेंशा कोव्रज कुरशा, तौ का नु थिमाक्त। मिनु “गो परमप्रभु यावे कली ठेयब सेल्लुड” दे मेको कली यहूदा नें वोदा बाक्त। मिनु आल थिचा नाइसे बाक्त।

याकूब आ अर्को आल

<sup>30</sup> मिनु राहेलमी “आल मथीब बाक्डा बाक्त” दे तुइश्शा, आ लोकब कली गेहे पवा बाक्त। मिनु याकूब कली “गे आं कली आल मगेतीनी हना, गो बेक्नुड” देंमाक्त।<sup>2</sup> मिनु याकूबमी राहेल आ लोव्र आ पर्बम गाइश्शा “परमप्रभुमी इ कली आल मथीब सेल्लु। गो मेको क्येडा ठेयब नडा डा?” देंमाक्त। *भजन संग्रह १२७:३*<sup>3</sup> मिनु राहेलमी “गो इन कली आं गेय पाइब बिल्हाह गेनुड। मेकोमी आं कली आल थिचा माल्ब। मिनु आं के आल दुम्मल” देंमाक्त। *उत्पत्ती १६:२*<sup>4</sup> मिनु मेकोमी याकूब कली आ गेय पाइब बिल्हाह गेवा बाक्त। मिनु याकूब मेको नु इम्माक्त।<sup>5</sup> मिनु बिल्हाह कोव्रज कुरशा, तौ का थिमाक्त।<sup>6</sup> मिनु राहेलमी “परमप्रभुमी आं कली नाक्शा, आं पुंइशो नेंतु। मिनु आं कली तौ का गेती” देंमाक्त। मोपतीके आ नें दान वोदा बाक्त।<sup>7</sup> मिनु राहेल आ गेय पाइब बिल्हाहमी लेंशा कोव्रज कुरशा, अर्को तौ का थिमाक्त।<sup>8</sup> मिनु राहेलमी “गो आं लोकब नु परमप्रभु खोदेंशो पा जिशा ग्राती” देंमाक्त। मोपतीके मेको आ नें नाप्ताली वोदा बाक्त।

<sup>9</sup> मिनु लेआमी “लेंशा आल मथीनुड” दे मिम्शा, याकूब कली आ गेय पाइब जिल्पा गेवा बाक्त।<sup>10</sup> मिनु लेआ आ गेय पाइब जिल्पामी तौ का थिमाक्त।<sup>11</sup> मिनु लेआमी “रिम्शो दुम्त” दे आ नें गाद वोदा बाक्त।<sup>12</sup> मिनु लेआ आ गेय पाइब जिल्पामी अर्को तौ का नु थिमाक्त।<sup>13</sup> मिनु लेआमी “गो ग्येरसाक्वी। मारदे हना मीश मुरपुकीमी आं पर्बम ‘आसीक राइब बाक्ब’ देंनीम” देंमाक्त। मिनु आ तौ कली आशेर नें वोदा बाक्त।

<sup>14</sup> मिनु काबु रुबेनमी चेरब रिक्वी ना आल थिपाइक्ब फल थिदा बाक्त। मिनु आ ममा लेआ कली गेवा बाक्त। मिनु राहेलमी लेआ कली “इ तौ आ चाक्शो फल आं कली का निक्शी गेयी” देंमाक्त।<sup>15</sup> मिनु मेकोमी “गे आं वोंइश आ थुं रोइक्चा ला ममाइ, आं तौमी चाक्शो फल यो रोइक्चेवे?” देंमाक्त। मिनु राहेलमी “इ तौ आ फल आ पर्बम मुलाक्दो याकूब इ खिम बाक्ल” देंमाक्त।<sup>16</sup> मिनु नाक्नाक्दो याकूब रू रे जाक्मेनु, लेआम गुम्थ लशा “गे आं खिम बाक्चा माल्नीनी। गो आं तौ आ चाक्शो फल इन पर्बम थाप्ताक्ड” देंमाक्त। मिनु मेको नाक्दो याकूब लेआ नु इम्माक्त।<sup>17</sup> मिनु परमप्रभुमी लेआ आ पुंइशो गेवा बाक्त। मिनु याकूब के ४ जना तौ थिशा नोले अर्को तौ का नु थिमाक्त।<sup>18</sup> मिनु लेआमी “परमप्रभुमी आं कली

रिम्शो पाप्तु। मारदे हना गो आं गेय पाइब आं वोंइश कली गेता” देंमाक्त। मिनु आ नें इस्साकार वोदा बाक्त।<sup>19</sup> मिनु लेंशा कोव्रज कुरा बाक्त। मिनु ५ जना तौ थिशा यो, अर्को तौ का नु थिमाक्त।<sup>20</sup> मिनु “परमप्रभुमी आं कली रिम्शो पाप्तु। मुल आं वोंइश गो नु बाक्ब। मारदे हना गो ६ जना तौ थीतामी” देंमाक्त। मिनु मेको कली जबूलून नें वोदा बाक्त।<sup>21</sup> मिनु नोले तमी का यो थिमाक्त। मेको कली दीना नें वोदा बाक्त।

<sup>22</sup> नोले परमप्रभुमी राहेल कली मिम्ता बाक्त। मिनु आ पुंइशो गेशा, आल थीब दुम्माक्त। *१सामुएल १:१९*<sup>23</sup> मिनु कोव्रज कुरशा, तौ का थिमाक्त। मिनु “परमप्रभुमी श्येत रे प्रोंइती” देंमाक्त। *यसैया ४:१; लूका १:२५*<sup>24</sup> मोपतीके आ नें योसेफ वोदा बाक्त। मिनु “परमप्रभु यावेमी आं कली अर्को तौ का नु गेयील” दे पुना बाक्त। *उत्पत्ती ३५:१७-१९*

याकूब शोंप पाइश्शो दुम्शो

<sup>25</sup> मिनु राहेलमी योसेफ थिशा नोले याकूबमी लाबान कली “आं कली लचा गेयीनी। गो आं रागी, आं खिं लचा दाक्नुड।<sup>26</sup> आं मीशपुकी, आं आलपुकी नु आं कली लचा गेकी। गो एको तचा कली इन गेय पाता। गो इन कली दोदेंशो रिम्शो गेय पडा, मेको गे तुइक्नीनी” देंमाक्त। *उत्पत्ती २९:२०,३०; उत्पत्ती ३१:४३*<sup>27</sup> मिनु लाबानमी “गे आं कली दाक्नेवे हना, इक्का नु बाक्को। मारदे हना गे एक बाक्शा, परमप्रभु यावेमी इ गेय पतीके आं कली आसीक गेती, दे तुइक्नुड। *उत्पत्ती ३९:५*<sup>28</sup> गे मार माल्नेवे, मेको इ कली गेनुड” दे मदा बाक्त।<sup>29</sup> मिनु याकूबमी “गो दोदेंशो गेय पडा, इन बी ब्यफ गिश दुम्मा, गे तुइक्नीनी।<sup>30</sup> आं जाक्वी ना का निक्शी बाक्तेक्मे, मुल शुश दुम्तेक्म। मिनु गो जाक्डा रे परमप्रभु यावेमी इन कली आसीक गेप्तु। मिनु आं खिं गेना कोव्रनुडा?” दे मदा बाक्त।<sup>31</sup> मिनु लाबानमी “गो मार गेचा माल्नुडा?” देंमेनु, याकूबमी “आं कली मारेइ गेचा ममाल्नीनी। आं देंशो पाइतीनी हना, गो लेंशा इन गोठला दुम्नुड।<sup>32</sup> गो मुलाक्ती इन क्यारश भेडा नेल्ल कोव्रथ लाइनुड। मिनु पुल्ले पाडग्रे नेल्ल गुंइनुड। क्यारश भेडा रे यो क्येर नु पुल्ले पाडग्रे गुंइनुड। मेको आं गाल्च दुम्नीम।<sup>33</sup> मोदेंशो दुम्मेनु, आं ठीक पतीके तुइक्नीनी। तेको क्यारश आन दातेमी पुल्ले पाडग्रे मपाइश्शो नु पाठा आन दातेमी क्येर मबाक्मा, मेको आं खुइ पशो, दे तुइक्नीनी” दे मदा बाक्त।<sup>34</sup> मिनु लाबानमी “इ देंशो खोदेंशो दुम्ल” देंमाक्त।<sup>35</sup> मिनु मेको नाक्ती लाबानमी गोठ नेल्ल रे टाटे पाडग्रे क्यारश बोका नेल्ल नु पुल्ले पाडग्रे भेडा सांड गुंइदा बाक्त। तेक तेको इक्का बुश नु क्येर बाक्मा, मेको योव्रशा, आ तौ आन गुइमी गेवा बाक्त।<sup>36</sup> मिनु आ तौ आन गोठ नु याकूब आ गोठ नाक्त सां गाक्तीक लां डोन वोदा बाक्त। याकूबम चहिं लाबान आ अरु क्यारश भेडा कोव्रडा बाक्त।

<sup>37</sup> मिनु याकूबमी ब्वाकीम पिपल, कटुस नु अर्को रवा आन क्येख राशी जिक्शा, बुश रेखा गुंइशा खेवा बाक्त।<sup>38</sup> मिनु मेको कोक्केपुकी क्यारश नु भेडा आन ब्वाक्कु तूतीकेमी वोदा बाक्त। मिनु ब्वाक्कु तूशा डा मिन ब्वांइसीमानु,<sup>39</sup> मेको आ टाटे पाडग्रे कोक्के तशा, टाटे पाडग्रे पाठापुकी जरमेसीमा बाक्त।<sup>40</sup> याकूबमी मेको पाठा आन कली गुंइशा फ्राशा आंम बगाल डा गोठ सेला बाक्त। आंम क्यारश भेडा लाबान आ गोठम मवोदा बाक्त।<sup>41</sup> मिनु गेना बोल्यो नु रिम्शो बोकापुकी माल्ची ना बाक्मा नु ब्वाक्कु तूथ जाक्मा, मेना मेको कोक्केपुकी तूतीकेमी आन डोंइती वोदा बाक्त। मिनु “कोक्के आन डोंइती ब्वांइसीमल” देंमाक्त।<sup>42</sup> बगाल डा मरिम्शो क्यारश भेडा जाक्तेक्म हना, कोक्के मवोदा बाक्त। मोदेंशो पा मरिम्शो क्यारश भेडा लाबान कली, रिम्शो बोल्यो चहिं याकूब के दुम्मा बाक्त।<sup>43</sup> मिनु याकूब शुश शोंप पाइश्शो दुम्शा, क्यारश भेडा, वाइलीम वाइल, दलओंठपुकी नु गथा शुश पाइश्शो दुम्माक्त।

याकूबम लाबान कली प्रोंइशो

<sup>31</sup> मिनु लाबान आ तौपुकीमी “याकूबमी आंइ आफ आ मारेइ मारेइ नेल्ल रोइक्ताक्व। आंइ आफ आ शोंप रे शोंप पाइश्शो दुम्त” देंशो, याकूबमी नेना बाक्त। *उत्पत्ती ३०:३५*<sup>2</sup> मिनु याकूबमी “लाबानम आं कली मदाक्ब दुम्त” दे तुइक्ता बाक्त।<sup>3</sup> मिनु परमप्रभु यावेमी याकूब कली

“इ आफ आ रागी इ मुर आन बाक्तीक लेशशा लावो। गो गे नु बाक्नुड”  
 देमाक्त। उत्पत्ती २८:१५<sup>4</sup> मिनु याकूबमी राहेल नु लेआ आस कली गोठीम  
 ब्रेत्तीम्सी बाक्त।<sup>5</sup> मिनु मेको आस कली “इस आफोम डोंइती आं कली  
 दाक्शो खोदेंशो पा मुल मदाक्ब, दे तुइक्ताक्ड। आं आफ आ परमप्रभु गो नु  
 बाक्शो बाक्त।<sup>6</sup> गो इस आफ कली दोदेंशो पा आं बोल नेल्लेमी गेय पडा,  
 मेको गे निक्शीम तुइक्नीसी।<sup>7</sup> इस आफोमी आं कली ठगेपु। आं गेय डा  
 तचा माल्शो थोवक १० खेयप फाइक्तु। तन्न परमप्रभुमी मेको कली आं  
 कली श्येत गेचा, मगेवा बाक्त।<sup>8</sup> इस आफोमी ‘पुल्ले पाडग्रे नेल्ल इ के  
 दुम्ल’ देंमेनु, क्यारश भेडा नेल्लेमी पुल्ले पाडग्रे गिक्तेक्म। मेकोमी ‘रेखा  
 पाइश्शो नेल्ल इ के दुम्ल’ देंमेनु, नेल्ल रेखा पाइश्शो गिक्तेक्म।<sup>9</sup> मोदेंशो पा  
 परमप्रभुमी इस आफ आ क्यारश भेडा बी ब्यफ रोइश्शा, आं कली गेती।

<sup>10</sup> क्यारश भेडा आन ब्वाइसीची ना गो डोमुमी बोका नेल्ल पुल्ले पाडग्रे,  
 रेखा पाइश्शो नु खाल्शो रड डा तातामी।<sup>11</sup> मिनु परमप्रभु आ स्वर्ग डा गेय  
 पाइबमी आं कली डोमुमी ‘याकूब’ दे ब्रेत्ताक्यी। ‘मिनु गो बाक्ती’ दे लोव  
 लेत्ताक्ड।<sup>12</sup> मिनु मेकोमी आं कली ‘कोव्रडो, ब्वाइसीब बोका नेल्ल पुल्ले  
 पाडग्रे, रेखा पाइश्शो नु खाल्शो रड डा बाक्नीम। मारदे हना लाबानमी इ  
 कली मार पशो बाक्बा, गो नेल्ल ताता।<sup>13</sup> गो इ कली नड। गो इ कली  
 बेथेलम गुम्ता। गे मेकेर फुल्लु का कली तेल लुक्ताक्वी। मिनु आं कली  
 कसम जाप्तीवी। मुल बोक्को, मेको रागी रे गूडो। इ जरमेशो रागी लेतो’ दे  
 माइक्ती” दे आ मीश निक्शी आस कली देंमाक्त। उत्पत्ती २८:१८-२२  
<sup>14</sup> मिनु राहेल नु लेआमी “आंस आफ आ खिंमी आस थेरशो रू नु शोंप  
 बाक्मा डा? <sup>15</sup> आंस कली अर्को रागी डा मुर खोदेंशो सेल्शा, लेयशा  
 ताक्शो नेल्ल जापु। उत्पत्ती २९:१८, २७ <sup>16</sup> परमप्रभुमी आंस आफ रे  
 लाइश्शो शोंप, आंस कली नु आंस आल के दुम्त। परमप्रभुमी इन कली मार  
 देंबा, मेकोन पने” देंसा बाक्त।

<sup>17</sup> मिनु याकूब सुनी कना बोक्शा, आ आलपुकी नु आ मीशपुकी  
 दलओठ तारी डोइक्पदा बाक्त। <sup>18</sup> मिनु मारेइ मारेइ पदान-अराम रे आ गेय  
 पा सेल्शो बस्तु भाव नेल्ल खुल्शा, आ शोंप लाइश्शा, आ आफ इसहाक आ  
 खिं कनान रागी लचा गोवा बाक्त।

<sup>19</sup> लाबान आ भेडा आन ऊन खोइक्थ लशो बाक्माक्त। मेना राहेलमी  
 आ आफ आ खिं डा मूर्तिपुकी खुइ पा कुरा बाक्त। न्यायाधीस १७:५;  
 न्यायाधीस १८:१७; १सामुएल १९:१३; २राजा २३:२४; जकरिया १०:२  
<sup>20</sup> याकूबमी अरामी लाबान कली “गो लशो” दे मर्देंथु, गाक्मा बाक्त।  
<sup>21</sup> मोदेंशो पा याकूब आ मारेइ मारेइ कुरशा, प्रोक्माक्त। मिनु सुनी बोक्शा,  
 युफ्रेटीस खोला शोक्समा बाक्त। मिनु गिलाद डांडा गे लमा बाक्त।

<sup>22</sup> मिनु लमा आ नाक्त सां नोले मुक्की “याकूब प्रोक्त” दे लाबान कली  
 शेंदमे बाक्त। <sup>23</sup> मिनु लाबानमी आ लोक्ब आन कली ब्रेश्शा, मेकोपुकी नु ७  
 नाक्ती सम्म याकूब कली माल्शा, गिलाद डांडाम गुमा बाक्त। उत्पत्ती  
 ३१:४७ <sup>24</sup> मिनु परमप्रभुमी अरामी लाबान कली डोमुमी “गे होस पावो।  
 याकूब कली मारेइ मपावो” देंमाक्त।

<sup>25</sup> मिनु लाबानमी याकूब कली गुमानु, आ ताम्बु गिलाद डा पहाडम  
 कीडा बाक्त। याकूबम चहिं आ ताम्बु आइक्था डा डांडाम कीशा, वोदा  
 बाक्त। <sup>26</sup> मिनु लाबानमी याकूब कली “गे मार पवी? मारदे आं मतुइक्थु  
 प्रोक्नी? आं तमीपुकी लडाइमी ग्याइश्शो खोदेंशो पा लाइक्तीवी। <sup>27</sup> गे  
 मारदे खुइश्शा गाक्नी? मारदे आं कली मारेइ मर्देंनी? गो इन कली ग्येरशा,  
 कुम्सो पशा, खैजडी नु बीना ताप्था, लां सम्म चोव्रदीशा सोइक्तन्नी वा।  
<sup>28</sup> गे आं कली आं चचपुकी नु आं तमीपुकी नु पुक्पु पाइक्मुचा मगेवी।  
 मरिश्शो पाइब बाक्ते। <sup>29</sup> इ कली श्येत गेचा आं गुइमी बाक्ब। तन्न  
 सिनाक्दो इ आफ आ परमप्रभुमी आं कली ‘गे होस पावो। याकूब कली  
 मारेइ मरिश्शो मपावो’ दे लोव पापु। <sup>30</sup> मिनु गे इ आफ गुम्चा शुश  
 दाक्ताक्वी हना यो, मारदे आं खिं डा मूर्ति खुइ पा लदी?” दे हिल्लो पवा  
 बाक्त। <sup>31</sup> मिनु याकूबमी लाबान कली “गे इन तमी निक्शी आं गुइ रे  
 रोइक्नीनी, दे हिंती। उत्पत्ती ३१:१९ <sup>32</sup> इन मूर्तिपुकी चहिं सुका आ ताम्बुम  
 थित्नीनी, मेको मब्रोंइल। इन लोक्ब आन डोंइती आं बाक्तीकेम इन के मार  
 बाक्मे, कोव्रशा लतीन” देंमाक्त। मारदे हना याकूबमी राहेलम मेको  
 मूर्तिपुकी खुइ पशो, दे मतुइक्ता बाक्त।

<sup>33</sup> मिनु लाबानमी याकूब आ ताम्बु, लेआ आ ताम्बु, गेय पाइब निक्शी  
 आस ताम्बु ओव्रशा, माल्शा मथिदा बाक्त। लेआ आ ताम्बु रे गूशा, राहेल  
 आ ताम्बु ओव्रमाक्त। <sup>34</sup> मिनु राहेलम मेको खिं डा मूर्ति आन कली  
 दलओठ आ तारी डा नित्तीकेमी खुइश्शा, मेको आ तारी निस्से बाक्त। मिनु  
 लाबानमी ताम्बु नेल्लेमी माल्शा मथिदा बाक्त। <sup>35</sup> मिनु राहेलमी “आं प्रभु,  
 मगाइक्तीने, गो इन डोंइती बोक्ने मचापुड, मारदे हना गो मथिचा दुम्ती”  
 देंमाक्त। मोपतीके माल्शा मथिदा बाक्त। लेवी १५:१९-२०

<sup>36</sup> मिनु याकूब चुरशा, लाबान कली “मार दूली पडा। आं कली मार  
 मरिश्शो पशो आ पर्वम खेदा पनी? <sup>37</sup> आं मारेइ मारेइम माल्तीनी, इन  
 थोव्रकी मार थिन्नी? इन लोक्ब नु आं लोक्ब आन डोंइती देनीन।  
 एकोपुकीमी इस दातेमी निसाफ पामेक्ल। <sup>38</sup> गो गे नु २० बर्स बाक्ती। इन  
 क्यारश भेडाम पाठा मशाम्देम। इन बगाल डा बोका का यो मब्वड।  
<sup>39</sup> जन्तुमी साइश्शो यो इन कली मचाक्गु। गो आंमा थाप्ताक्ड। नाक्दो,  
 नाक्ती जन्तुमी साइक्तेक्म हना यो, गे आं कली थाप्पाइक्तीनी। प्रस्थान  
 २२:११-१२ <sup>40</sup> नाक्ती हुप्थोम बाक्ती, नाक्दो ग्यू बेक्शा, यो मइप्थु, नां  
 सोइताक्ड। <sup>41</sup> मोदेंशो पा गो इन खिंमी २० बर्स गेय पाता। इन तमी निक्शी  
 आस पर्वम गो १४ बर्स गेय पाता। ६ बर्स इन क्यारश भेडा आन पर्वम गेय  
 पाता। गे आं गेय डा तचा माल्शो थोव्रक १० खेयप फाइक्तीनी। उत्पत्ती  
 २९:२०, ३०; उत्पत्ती ३०:३१-३६ <sup>42</sup> आं आफ आ परमप्रभु, अब्राहाम आ  
 परमप्रभु नु इसहाक आ मान पा हिंशो परमप्रभु गो नु मबाक्शो हना, गे आं  
 कली मुल श्येत्थ सोइक्तीनी वा। परमप्रभुमी आं श्येत नु आं गेय तशा,  
 सिनाक्दो इन कली हुइक्ताक्व” देंमाक्त। उत्पत्ती ३१:२४, ५१

<sup>43</sup> मिनु लाबानमी याकूब कली “एको तमी निक्शी आं तमी बाक्नीस।  
 एको आल आं आल बाक्नीम। एको क्यारश भेडा आं के बाक्नीम। इ तशो  
 नेल्ल आं के बाक्ब। आं तमी आस कली मुलाक्ती गो मार पने चापुडा डा?  
 एको आस तौ आन कली गो मार पने चापुडा डा? <sup>44</sup> मोपतीके गे नु गो  
 कबल पस, इस डोंइती सांकछी बाक्मल” दे मदा बाक्त। <sup>45</sup> मिनु याकूबम  
 फुल्लु का चाक्शा राप्पाइश्शा, <sup>46</sup> आ मुर आन कली यो “फुल्लु खुप्तीन”  
 देंमाक्त। मिनु मेकोपुकीमी यो फुल्लु खुप्तमे बाक्त। मिनु मेकेर जामे बाक्त।  
<sup>47</sup> मिनु लाबानमी मेको कली येगार-सहादुता, दे नें वोदा बाक्त। याकूबम  
 चहिं मेको कली गलेद, दे नें वोदा बाक्त। उत्पत्ती ३१:२३ <sup>48</sup> मिनु लाबानमी  
 “एको फुल्लु खुप्तीके मुलाक्ती इस पशो कबल आ सांकछी बाक्ब”  
 देंमाक्त। मोपतीके मेको कली गलेद देंनीम। गलेद आ अर्थ सांकछी डा  
 फुल्लु खुप्तीके बाक्ब। यहोसु २४:२७ <sup>49</sup> मिनु मेको राप्पाइश्शो फुल्लु कली  
 मिस्पा नें वोदा बाक्त। मारदे हना लाबानमी “परमप्रभु यावे गे नु गो इस  
 ब्राची ना इस कली कोव्रब बाक्ल। न्यायाधीस ११:११ <sup>50</sup> गे आं तमी आस  
 कली श्येत गेप्तीवी हना, अर्को मीश चाक्तीवी हना, गो इस दातेमी मुर  
 सांकछी मबाक्तेक्म हना यो, परमप्रभु इस सांकछी बाक्ब” देंमाक्त।

<sup>51</sup> मिनु लाबानमी लेंशा, याकूब कली “कोव्रडो, एको खुप्थो फुल्लु नु  
 मेको लाइश्शो राप्पाइश्शो फुल्लु गो इस दातेमी बाक्ब। <sup>52</sup> एको खुप्थो  
 फुल्लु गो रे इ बाक्तीके, गे रे आं बाक्तीके श्येत गेथ मलमल। <sup>53</sup> अब्राहाम  
 आ परमप्रभु, नाहोर आ परमप्रभु नु आन किकी पिपी आन परमप्रभुम इस  
 दातेमी निसाफ पवल” देंमाक्त। मिनु याकूबमी इसहाक आ मान पा हिंशो  
 परमप्रभु आ नें थिशा, कसम जवा बाक्त। <sup>54</sup> मिनु मेको डांडामी याकूबमी  
 चढेतीके चढेवा बाक्त। मिनु आ खिं डा मुर आन कली “शोव्ले जने” दे गेवा  
 बाक्त। मिनु जशा, मेको नाक्दो मेक उइ बाक्मा बाक्त। उत्पत्ती ३१:४२  
<sup>55</sup> मिनु लाबान सुनी कना बोक्शा, आ तमी नु आ चच आन कली पुक्पु  
 पाइश्शा, आसीक गेशा, आ खिं लेम्माक्त।

याकूबम एसाव कली गुम्चा चिक्शो

**32** मिनु याकूब लांमी लना लन बाक्मेनु, परमप्रभु आ स्वर्ग डा गेय  
 पाइबपुकी याकूब कली गुम्थ जाक्मा बाक्त। <sup>2</sup> मिनु याकूबमी  
 मेको आन कली तशा “एकेर परमप्रभु आ लडाइ पाइब आन बाक्तीके  
 बाक्ब” देंमाक्त। मोपतीके मेको गुम्तीक रागी आ नें महा-नाइम वोदा बाक्त।  
 महा-नाइम आ अर्थ चहिं “बाक्तीक निक्शी” बाक्ब। <sup>3</sup> मिनु याकूबमी आ

लोकब एसाव गुम्चा कली आ डोंइती मुरपुकी एदोम डा सेडर रागी सोइक्ता बाक्त। उत्पत्ती ३६:८<sup>4</sup> मेको आन कली “गे आं प्रभु एसाव कली ‘इन गेय पाइब याकूबमी इन कली लोव्र सोइक्ताक्व। गो मुल सम्म लाबान नु आ रागीमी अर्को रागी डा मुर दुम्शा बाक्ती।<sup>5</sup> गो नु शुश ब्यफ, गधा, क्यारश भेडा, वाइलीम वाइल बाक्नीम। गो आं प्रभु, इन डोंइती शिशी तडल, दे मुर आन कली सोइक्ताक्व’ देंत, देंचा माल्नीनी” दे अरेशा सोइक्तीमी बाक्त।

<sup>6</sup> मिनु आ सोइश्शो मुरपुकी लेशा जाक्शा, याकूब कली “गोपुकी इन लोकब एसाव आ बाक्तीक जाक्दीत्तक। मेकोमी ४ सहे मुर नु कुशा, इन कली गुम्थ जाक्व” दे शेंदमे बाक्त।<sup>7</sup> मिनु याकूब शुश हिंशा, सुर्ता पवा बाक्त। मेको नु बाक्ब मुर क्यारश भेडा, बी ब्यफ नु दलओठ आन कली हुल निक्शी पा योक्गा बाक्त।<sup>8</sup> मेकोमी “एसावमी डोंइती डा हुल साइक्तु हना, अर्को प्रोक्ने चाप्नीम” दे मिम्ता बाक्त।

<sup>9</sup> मिनु याकूबम “आं बाजे अब्राहाम आ परमप्रभु, आं आफ इसहाक आ परमप्रभु, आं कली लोव्र पाइब परमप्रभु यावे, गे आं कली ‘इ खिं डा मुर आन बाक्तीक, इ रागी लेतो। गो इ कली रिम्शो पाइनुड’ दे लोव्र पाइतीनी। उत्पत्ती ३१:३,१३<sup>10</sup> गो, इन गेय पाइब आं कली पशो गेना हना यो दाक्तीक नु इन रिम्शो पचा मप्रोंइतीके मशिरनुड। गो कोक्के का ला कुरशा, यर्दन खोला शोक्शा लशो नड। मुल आं के हुल निक्शी दुम्शो बाक्नीम।  
२सामुएल ७:१८<sup>11</sup> गो आं कली आं लोकब एसाव आ गुड रे प्रोनीने। मारदे हना आं कली, आं मीश आन कली नु आल नेल्ल आन कली साइक्व, दे हिंती।<sup>12</sup> गे आं कली ‘गो इ कली थमा पा रिम्शो पाइनुड। इ चच युइ आन कली समुन्द्र डा बाल्वा खोदेशो पा, हिक्ने मचाप्पा डा सेल्लुड’ देंतीनी” दे याकूबमी परमप्रभु कली लोव्र पवा बाक्त। उत्पत्ती २८:१३-१४

<sup>13</sup> मिनु मेको नाक्दो मेकेर बाक्शा, आ मारेइ मारेइ रे एसाव कली कोसेली योव्रडा बाक्त।<sup>14</sup> मेकोमी सहे निक्शी ओटा क्यारश, २० ओटा बोका, सहे निक्शी ओटा भेडा नु २० ओटा सांड, <sup>15</sup> मिनु ३० ओटा दूध तूब चाइक्व पाइश्शो दलओठ, ४० ओटा बी नु १० ओटा ब्यफ, २० ओटा गधैनी नु १० ओटा गधा एसाव कली योव्रशा, ठीक पवा बाक्त।<sup>16</sup> मिनु आ गेय पाइब आन कली का का पा हुल हुल पा गेवा बाक्त। आ गेय पाइब आन कली “गे आं डोंइती हुल हुल पना पन गाक्कीन। हुल नेल्ल कालेमी मखुलीन। का अर्को क्येडा डोन खुल्चा माल्नीनी” दे माइक्मी बाक्त।<sup>17</sup> मिनु नेल्ल क्येडा ठेयब अरेतीके लोव्र “आं लोकब एसाव इन कली गुम्थ जाक्त हना, मेकोमी इन कली ‘गे सुका आ मुर ननी? ते लाइनीनी? इन डोंइती गाक्ब बगाल सु के नमी?’ दे हिल्लो पाप्तु हना, <sup>18</sup> गेमी ‘एको इन गेय पाइब याकूब के नम। आ प्रभु एसाव कली कोसेली बाक्ब। आं यो खोइश्शा पिना पिन बाक्ब’ देंचा माल्नीनी” दे गेय पाइब आन कली माइक्मी बाक्त।<sup>19</sup> मोदेशो पा डोंइती गाक्ब, नोले गाक्ब नु नेल्ल क्येडा नोले गाक्ब नेल्ल आन कली अरेमी बाक्त। मिनु “मोदेशो पा एसाव नु गुम्ची ना लोव्र पचा माल्नीनी।<sup>20</sup> मिनु ‘इन गेय पाइब आं नोले पिना पिन बाक्ब’ देंचा मप्रेंदीन” दे माइक्मी बाक्त। मारदे हना याकूबमी “गो आं डोंइती सोइश्शो कोसेलीमी गो मेको कली लेम्नुड। मिनु नोले मेको कली गुम्नुड, आं कली ब्राइबा कों” दे मिम्ता बाक्त।<sup>21</sup> मिनु आ कोसेली आ डोंइती लदमे बाक्त। आं चहिं मेको नाक्दो आ मुर बाक्तीकेमी बाक्माक्त।

याकूब यब्बोक खोलाम बाक्शो

<sup>22</sup> मिनु मेको नाक्दो बोक्शा, आ मीश निक्शी, आ गेय पाइब मीश निक्शी नु आ ११ जना तौ आन कली लाइश्शा, यब्बोक खोला शोक्पाइक्मी बाक्त।<sup>23</sup> मिनु मेको आन कली शोक्पाइश्शा, आ मारेइ मारेइ यो सोइक्ता बाक्त।<sup>24</sup> मिनु आइक्वी हांबुम याकूब का ला बाक्माक्त। मिनु नां रिक्शा, नां मसोव्रम सम्म मुर का नु राग्शी पवा बाक्त। होसे १२:४-५<sup>25</sup> मेको मुरुम याकूब नु राग्शी पा आं ब्रुचशो तशा, याकूब आ फिला डा बोंइसे थिवा बाक्त। मिनु आ फिला डा बोंइसे याक्ता बाक्त।<sup>26</sup> मिनु मेको मुरुमी “नां दाप्चावानु, मुल लचा गेयी” देंमाक्त। मिनु याकूबमी “आं कली आसीक मगेवी सम्म मप्रोंइनन” दे मदा बाक्त मत्ती १५:२२-२८<sup>27</sup> मिनु मेकोम “इ नें मार में?” दे हिल्लो पवानु, याकूबमी “याकूब” देंमाक्त।<sup>28</sup> मिनु मेकोमी

“मुल डा मेरे इ नें याकूब ममाइ, इ नें इस्राएल देंचा माल्नीम। मारदे हना गे परमप्रभु नु राग्शी पा ग्राते, मुर नु राग्शी पा यो ग्राते” देंमाक्त। उत्पत्ती ३५:१०; येरमीया २०:७<sup>29</sup> मिनु याकूबम “इन नें मार में?” दे हिल्लो पवा बाक्त। मिनु मेकोमी “आं नें मारदे माल्दे?” देंशा, मेको कली आसीक गेवा बाक्त। न्यायाधीस १३:१७-१८<sup>30</sup> मिनु याकूबमी “गो परमप्रभु आ कुल तशा यो मबेक्ड” दे मेको बाक्तीके आ नें पेनीएल वोदा बाक्त। प्रस्थान ३३:२०<sup>31</sup> मिनु नां दाप्मेनु, याकूब पेनुएल रे खोड चेड पा गाक्माक्त।<sup>32</sup> मोपतीके इस्राएलीपुकीमी मुल सम्म मेको बोंइसे ग्याइक्व नारी नु मेकेर डा श्ये मब्बाइनीमी। मारदे हना मेकोमी याकूब आ फिला डा बोंइसे याक्ता बाक्त।

याकूब नु एसाव गुम्शो

**33** मिनु याकूबम लां गे कोव्रडानु, एसाव नु ४ सहे मुर पिन पिन पशो तवा बाक्त। मिनु आ आलपुकी लेआ, राहेल नु आस गेय पाइब मीश निक्शी नु गाक्पाइक्मी बाक्त। उत्पत्ती ३२:७<sup>2</sup> मेको गेय पाइब मीश नु आस आल आन कली नेल्ल क्येडा डोंइती गाक्पदा बाक्त। मिनु मेको आन नोले लेआ नु आ आलपुकी, नेल्ल क्येडा नोले राहेल नु योसेफ गाक्पदा बाक्त।<sup>3</sup> मिनु मेको नेल्ल आन डोंइती आंमा गाक्माक्त। मिनु मेको आ लोकब गुम्चा क्येडा डोंइती ७ खेयप खुम्की पा बाक्माक्त।

<sup>4</sup> मिनु एसावमी मेको कली तशा, दोरशा गुम्थ जाक्माक्त। मिनु आ लोकब कली मुष्ठा पुक्पु पदा बाक्त। मिनु निम्फा डाक्सा बाक्त।<sup>5</sup> मिनु एसावमी कोव्रशा, आलपुकी नु मीश मुर आन कली तशा “गे नु बाक्ब सु नमी?” दे हिल्लो पवा बाक्त। मिनु याकूबमी “परमप्रभुमी इन गेय पाइब कली शिशी पशा, गेशो आलपुकी नम” दे मदा बाक्त। भजन संग्रह १२७:३<sup>6</sup> मिनु नोले मेको गेय पाइब मीश निक्शी नु आस आलपुकी जाक्शा, एसाव आ डोंइती खुम्की पा बाक्मा बाक्त।<sup>7</sup> मिनु लेआ नु आ आलपुकी जाक्शा, खुम्की पा बाक्मा बाक्त। मिनु नोले योसेफ नु राहेल जाक्शा, खुम्की पा बाप्सा बाक्त।

<sup>8</sup> मिनु एसावमी “इ डोंइती गाक्शो मार मार मारदे सोइक्ती?” दे हिल्लो पवा बाक्त। मिनु “आं प्रभु, इन डोंइती शिशी तडल, दे सोइक्ताक्व” दे लोव्र लेत्ता बाक्त। उत्पत्ती ३२:१४-२१<sup>9</sup> मिनु एसावमी “आं लोकब, आं कली मारेइ मारेइ गाप्शो बाक्ब। इ कली वोंइसो” देंमाक्त।<sup>10</sup> मिनु याकूबमी “मदुम्ब। गो इन डोंइती शिशी ताता हना, आं कोसेली ताक्कीन। मारदे हना गो इन कुल तशा, परमप्रभु आ कुल तशो खोदेशो पा ग्येरसाक्पी। गे आं कली दाक्शा ब्राइतीनी। उत्पत्ती ३२:३१<sup>11</sup> इन कली गेशो आसीक लतीन। मारदे हना परमप्रभुमी आं कली शुश शिशी पाप्तु। आं के मारेइ मारेइ यो गाप्शो बाक्ब” दे एसाव कली मदा बाक्त। मिनु याकूबमी शुश लोव्र पा एसावमी मेको नेल्ल ताक्गा बाक्त।

<sup>12</sup> मिनु एसावमी “लो, पिन। गो गे नु लाइनुड” देंमाक्त।<sup>13</sup> मिनु याकूबमी “आं प्रभु, आं आलपुकी आइक्व बाक्नीम। क्यारश भेडा, बी ब्यफ आन चाइक्व बाक्नीम। मेको आन कली नाक्ती का ला शुश गाक्पाइश्शा, श्येत गेता हना, नेल्ल बेक्नीम।<sup>14</sup> आं प्रभु, गे इन गेय पाइब क्येडा डोंइती गाक्कीन। गो बी ब्यफ नु आलपुकी चाप्पा डा पा गाक्नीकी। नोले आं प्रभु आ बाक्तीक सेडर सहर जाक्नीक” देंमाक्त।

<sup>15</sup> मिनु एसावमी “आं मुर का निक्शी गे नु गाक्मल” दे मदा बाक्त। मिनु याकूबम “ममाल्नुड। मारदे आं प्रभुम आं कली मोदेशो रिम्शो पचा मिम्बा?” देंमाक्त।<sup>16</sup> मिनु मेको नाक्ती एसाव सेडर गे लेम्माक्त।<sup>17</sup> याकूब चहिं सुक्कोथ गे लमाक्त। मेकेर खिं का सेल्शा, आ बी ब्यफ आन कली गोठपुकी सेला बाक्त। मोपतीके आ बाक्तीके आं नें सुक्कोथ वोदा बाक्त।<sup>18</sup> मोपा याकूब पदान-अराम रागी रे मारेइ मदुम्शु रिम्शो पा लेशा, कनान रागी डा शेकेम सहर जाक्दीम्माक्त। सहर आ नेक्था आ बाक्तीक सेला बाक्त।<sup>19</sup> मिनु आ ताम्बु कीतीके रू हमोर आ तौ आन दाते शेकेम आ आफ रे सहे का केसीता थाप्शा, ग्यबा बाक्त। केसीता मेकेर डा क्येट बाक्त। सुन के बाक्बा कों, चांदी के बाक्बा कों, गिश हेल्शो बाक्ब मतुंडसीब। यहोसु २४:३२<sup>20</sup> मिनु मेकेर चढेतीक का सेला बाक्त। मेको आ नें “एल-एलोहे-

इसाएल" दे वोदा बाक्त। मेको आ अर्थ परमप्रभु, इसाएल आ परमप्रभु बाक्ब। उत्पत्ती १२:७-८

दीना शेकेम सहर कोव्रथ लशो

34 मिनु लेआ आ तमी, दीना मेको रागी डा मीश आल आन कली गुम्थ लमाक्ता।<sup>2</sup> हिच्वी डा हमोर आ तौ शेकेम, मेको रागी डा पिप आ तौमी दीना कली तशा, ग्याइश्शा मेको नु इप्शा, बिथोलो पवा बाक्त। न्यायाधीस ९:२८<sup>3</sup> मिनु याकूब आ तमी दीना कली शुश दाक्शा, रिश्शो लोव्र पवा बाक्त।<sup>4</sup> मिनु शेकेममी आ आफ कली "मेको मीश आल आं कली चाक्कीन" दे मदा बाक्त।<sup>5</sup> मिनु याकूबमी "शेकेममी इन तमी दीना कली बिथोलो पाप्नु" देंशो नेना बाक्त। आ तौपुकी चहिं रू डा गोठीम बाक्मा बाक्त। याकूब आ तौपुकी मजाक्मा सम्म सिक्सी पा बाक्माक्ता।<sup>6</sup> मिनु शेकेम आ आफ हमोर याकूब नु लोव्र पचा कली जाक्माक्ता।<sup>7</sup> मिनु मेको नेंशा, याकूब आ तौपुकी यो रू रे जाक्मा बाक्त। आन थुं मनुथु, शुश चुरमा बाक्त। मारदे हना शेकेमम इसाएल आ तमी नु इप्शा, बिथोलो पशो बाक्माक्ता। मो पचा मदुश्शो बाक्माक्ता।<sup>8</sup> मिनु हमोरमी इसाएल कली "आं तौ शेकेममी इन तमी कली शुश दाक्ब, चाक्चा गेने।<sup>9</sup> मिनु आंइ तमीपुकी इन तौपुकीमी चाक्मेक्ल। इन तमीपुकी आंइ कली चाक्चा गेने।<sup>10</sup> मे गोपुकी नु बाक्कीन। आंइ रागी इन कली ग्याप्चा लेयचा, बाक्चा कली गेनीकी" देंमाक्ता।<sup>11</sup> मिनु शेकेममी मीश आल आ आफ याकूब नु आ लोक्ब आन कली "इन डोंइती शिशी तडल। मे मार देंनीनी इन कली गेनुड।<sup>12</sup> मेको मीश आल चाक्चा गेतीनी हना, गो इन माल्शो मारेइ मारेइ गेनुड" देंमाक्ता। प्रस्थान २२:१५<sup>13</sup> याकूब आ तौपुकीमी आन समी कली बिथोलो पाइब, शेकेम नु आ आफ हमोर आस कली जोल पा<sup>14</sup> "गो आंइ समी खोइक्तीक चिनु मख्बोइश्शो मुर आन कली गेने मचाप्नीकी। मेको आंइ कली मशिरब।<sup>15</sup> मे आंइ खोदेंशो पा वोंइश आल वोंइश मुर नेल्लेमी खोइक्तीक चिनु खोइक्तीनी हना, उत्पत्ती १७:१०-१४<sup>16</sup> आंइ तमीपुकी इन कली लाइक्चा गेनीकी। मिनु इन तमीपुकी गो चाक्नीकी। मिनु गो गेपुकी नु बाक्शा, मुर का खोदेंशो दुम्नीकी।<sup>17</sup> गेपुकी आंइ देंशो मबिस्साक्नी हना, आंइ तमी लाइश्शा, गाक्नीकी" दे लोव्र पामे बाक्त।<sup>18</sup> मिनु हमोर नु आ तौ शेकेम मेको आस देंशो नेंशा, ग्येरससा बाक्त।<sup>19</sup> मिनु मेको ठिटा मेको पचा बिस्से बाक्त। मारदे हना याकूब आ तमी कली शुश दाक्ता बाक्त। मेको आ आफ आ खिं डा नेल्ल क्येडा मान ताइब बाक्माक्ता।

लेआ आ तौ निक्शी गाइश्शो

20 मिनु हमोर नु आ तौ शेकेम आस सहर डा लाप्चो ओव्रशा, मेको निक्शीमी मुर आन कली<sup>21</sup> "एको मुरपुकी गो नु दुशा बाक्चा दाक्नीम। मोपतीके एक बाक्चा गेने। मारदे हना इं रागी ठेयब बाक्ब। मेको आन कली यो गारब। गोपुकी मेको आन तमी चाक्चा। इं तमी मेको आन कली गेय।<sup>22</sup> गो वोंइश मुर नेल्ल खोइक्तीक चिनु खोइक्साक्च हना ला, मेकोपुकी गो नु बाक्ने बिन्तीम।<sup>23</sup> मार, मेको आन बी ब्यफ, क्यारश भेडा नु आन शॉप नेल्ल इं के मदुम्बा डा? गो मेको आन लोव्र बिश्शा हना, इं दातेमी बाक्नीम" देंसा बाक्त।<sup>24</sup> मिनु सहर डा मुर नेल्ल हमोर नु शेकेम आस लोव्र टिशा, खोइक्तीक चिनु खोइक्चा गेमे बाक्त। सहर नेल्ल डा वोंइश मुरुम मोदेंशो पामे बाक्त।

25 मिनु नाक्ता सां नोले आन खोइक्तीके नेल्ल क्येडा खाइक्मानु, याकूब आ तौ निक्शी, दीना आ लोक्ब, सिमियोन नु लेवी, आस तरवार लाइश्शा, सुइ आन मतुइक्थु, सहर ओव्रशा, सहर डा वोंइश मुर नेल्ल सदसे बाक्त। उत्पत्ती ४९:५-७<sup>26</sup> मिनु मेको निक्शीमी हमोर नु शेकेम आस कली यो साइश्शा, दीना शेकेम आ खिं रे गुंइशा, लदसे बाक्त।<sup>27</sup> मिनु याकूब आ अर्को तौपुकी यो सहर ओव्रमा बाक्त। मेकोपुकीमी सहर डा मारेइ मारेइ लदमे बाक्त। मारदे हना शेकेममी आन समी कली बिथोलो पवा बाक्त।<sup>28</sup> मिनु आन क्यारश भेडा, बी ब्यफ, गधा नु मार मार सहर नु आन रूमी बाक्मा, मेको नेल्ल लदमे बाक्त।<sup>29</sup> आन शॉप नेल्ल, आन आलपुकी, आन मीश नु आन खिं डा मारेइ मारेइ नेल्ल लदमे बाक्त।<sup>30</sup> मिनु याकूबमी

सिमियोन नु लेवी आस कली "गे आं कली श्येत गेतीसी। मुल एको रागी डा मुरुमी आं कली मदाक्नीम। कनानी नु परिज्जी आन दातेम आं कली मरिश्शो रिना पाइश्शो खोदेंशो सेल्लेसी। गोपुकी नु शुश मुर मबाक्नीम। इं कली लडाइ तोशा, इं खिं डा मुर नेल्ल साइक्नीम" दे मेको आस कली हुइक्तीम्सी बाक्त।<sup>31</sup> मिनु मेको निक्शीमी "मार, मेकोमी आंस समी कली तेल्लेम खोदेंशो सेल्चा दुम्बा?" देंसा बाक्त।

याकूबमी आसीक तशो

35 मिनु परमप्रभुमी याकूब कली "बोक्शा सासो। बेथेल सहर लावो। मिनु मेकेर बाक्को। इ लोक्ब एसाव रे प्रोक्डेनु, इ डोंइती गूशो परमप्रभु, आं कली, चढ़ेतीक का सेलो" दे मदा बाक्त। उत्पत्ती २८:११-२२; उत्पत्ती ३१:१३<sup>2</sup> मिनु याकूब आ खिं डा मुर नु आ बाक्शो मुर नेल्ल आन कली "इन गुइमी बाक्शो मूर्ति ताइक्तीन। इन फेक्शो वा फुइश्शा, चिक्शा, अर्को फेक्सीन। उत्पत्ती ३१:१९; ब्यक्स्था २७:१५; यहोसु २४:२३<sup>3</sup> मिनु बोक्च, बेथेल लय। गो मेकेर जाक्दीश्शा, परमप्रभु कली चढ़ेतीक का सेल्लुड। गो श्येत जडानु, आं पुंइशो गेप्नु। गो ते गाक्ती हना यो, मेको गो नु बाक्त" दे माइक्मी बाक्त।<sup>4</sup> मिनु मेकोपुकीमी याकूब कली आन मूर्ति नु आन पांइशो मारवाडी नेल्ल गेमे बाक्त। याकूबमी मेको नेल्ल शेकेम आ नेक्था बाक्शो रवा आगाम थिमा बाक्त। यहोसु २४:२६; न्यायाधीस ९:६<sup>5</sup> मिनु मेकोपुकी लचा गोव्रमे बाक्त। परमप्रभुमी एर ऑथ डा सहर डा मुर आन कली हिब सेल्मी बाक्त। मोपतीके मेकोपुकीमी मेको आन कली खेदा मपामे बाक्त। प्रस्थान २३:२७; यहोसु १०:१०

6 मिनु लशा, याकूब नु मेको नु बाक्ब मुर नेल्ल कनान रागी डा लूज सहर जाक्दीम्मा बाक्त। लूज सहर कली बेथेल नें वोइश्शो बाक्माक्ता।<sup>7</sup> याकूबम मेकेर चढ़ेतीक का सेला बाक्त। मेको आ नें एल-बेथेल वोदा बाक्त। मारदे हना आ लोक्ब एसाव रे प्रोक्मेनु, मेकेर परमप्रभुम तपांइसीशो बाक्माक्ता।<sup>8</sup> मेना रेबेका कली कोव्रब देबोरा बेक्माक्ता। मिनु मेको कली बेथेल आ नेक्था, रवा आगामी थिम्मे बाक्त। मेको कली याकूबम अल्लोन-बकुथ नें वोदा बाक्त। मेको आ अर्थ डाक्चा डा रवा बाक्ब। उत्पत्ती २४:५९

परमप्रभुमी याकूब कली गुम्शो

9 पदान-अराम रे लेम्मेनु, परमप्रभुमी याकूब कली लेंशा गुम्शा, मेको कली आसीक गेशा<sup>10</sup> "इ नें याकूब बाक्ब। तन्न मुल रे याकूब मदेंचा, इ नें इसाएल दुम्चा माल्ब" देंमाक्ता। मोपतीके इसाएल नें वोइश्शो बाक्माक्ता। उत्पत्ती ३२:२९<sup>11</sup> मिनु परमप्रभुमी मेको कली "गो नेल्ल क्येडा सक्ति पाइश्शो परमप्रभु नड। मे गोशा बोशा, शुश दुमीने। गे रे रागी का डा शुश मुर नु रागी रागी डा मुर यो दुम्नीम। गे रे पिपपुकी दुम्नीमी। उत्पत्ती १७:१; उत्पत्ती २८:३-४; उत्पत्ती १७:६<sup>12</sup> अब्राहाम नु इसहाक कली गेशो रागी गो इ कली नु इ चच युइ आन कली गेनुड" देंमाक्ता।<sup>13</sup> मिनु परमप्रभुमी लोव्र पने थुम्शा, मेको आ बाक्तीक रे लमाक्ता।<sup>14</sup> मिनु याकूबमी परमप्रभु नु लोव्र पशो मिम्बा कली मेकेर फुल्लु का राप्पदा बाक्त। मिनु मेको आ तारी तूचा थोव्रक चढ़ेतीक नु तेल लुक्ता बाक्त। उत्पत्ती २८:१८-१९<sup>15</sup> याकूबमी परमप्रभु नु लोव्र पतीक सहर कली बेथेल नें वोदा बाक्त।

बेन्यामीन जरमेसेनु राहेल बेक्शो

16 मिनु बेथेल रे एफ्राथ जाक्दीत्वा कली गाक्शो बाक्मा बाक्त। मेना राहेल आल थिचा चिक्शो बाक्माक्ता।<sup>17</sup> सुक्तेरी रोइम शुश श्येत जवानु, आ वारच पाइब मीश मुरुमी "महिनी, गे अर्को तौ का नु धीनेवे" दे लोव्र पवा बाक्त। उत्पत्ती ३०:२४<sup>18</sup> मिनु मेको मबेक्थु, आ सोक्ता लची ना आ तौ आ नें बेन-ओनी वोदा बाक्त। आ आफोम चहिं आ नें बेन्यामीन वोदा बाक्त। मेको आ अर्थ आं श्येत डा तौ बाक्ब।<sup>19</sup> मिनु राहेल बेक्माक्ता। मिनु एफ्राथ लतीक लांमी थिम्मे बाक्त। एफ्राथ बेथलेहेम सहरम बाक्ब। उत्पत्ती ४८:७; १सामुएल १०:२; येरमीया ३१:१५; मत्ती २:१८<sup>20</sup> मिनु याकूबमी आ थिम्तीक तारी फुल्लु के थाम का राप्पदा बाक्त। मुल सम्म राहेल आ थिम्तीके तारी मेको ठेयब फुल्लु के थाम बाक्ब।



## इसाएल आ तौपुकी

21 मिनु इसाएल लना लन, आ ताम्बु एदेर माइश्शो लाइश्शो खिं आ नेक्था कीडा बाक्त। 22 मिनु इसाएल मेको रागीमी बाक्मेनु, आ तौ रूबेन आ आफ आ मीश बिल्हाह नु इम्माक्त। मिनु इसाएलमी मेको नेना बाक्त।  
उत्पत्ती ४९:४

याकूब आ १२ जना तौ

इतिहास २:१-२

23 लेआ आ तौ रूबेन, याकूब आ डोंइती जरमेशो तौ बाक्माक्त। सिमियोन, लेवी, यहूदा, इसाकार नु जबूलन नेल्ल लेआ आ तौ बाक्मा बाक्त। 24 राहेल आ तौ योसेफ नु बेन्यामीन बाक्सा बाक्त। 25 राहेल आ गेय पाइब बिल्हाह आ तौ दान नु नाप्टाली बाक्सा बाक्त। 26 लेआ आ गेय पाइब जिल्पा आ तौ गाद नु आशेर बाक्सा बाक्त। मेको नेल्ल पदान-अराममी जरमेशो याकूब आ तौ बाक्मा बाक्त।

इसहाक बेक्शो

27 मिनु याकूब, आ आफ इसहाक आ खिं माप्रे जाक्दीम्माक्त। मेको कली किरयथ-अरबा सहर नु हेब्रोन यो देंनीम। मेको अब्राहाम नु इसहाक आस बाक्तीक रागी बाक्माक्त। 28 मिनु इसहाक सहे का ८० बर्स दुम्माक्त। 29 मिनु इसहाक शुश बर्स डा खाल्पा दुम्शा बेक्माक्त। आ क्येडा डोंइती बेक्शो किकी पिपी आन बाक्तीक लमाक्त। मिनु आ तौ एसाव नु याकूबम मेको कली थिम्से बाक्त।

एसाव आ तौ चच युइ

इतिहास १:३५-५४

36 एको एसाव आ चच युइ बाक्नीम। एसाव कली एदोम यो देंनीम।  
उत्पत्ती २५:३०; ब्यवस्था २३:८ 2 एसावमी कनान रागी डा मीश निक्शी चाक्गा बाक्त। का हिंती डा एलोन आ तमी आदाह, अर्को होर डा हिंवी सिबोन आ तौ अनाह आ तमी ओहोली-बामा बाक्माक्त। उत्पत्ती २६:३४ 3 मिनु इश्माएल आ तमी बासेमाथ, नेबायोथ आ समी यो चाक्गा बाक्त। उत्पत्ती २८:९

4 मिनु आदाहमी एसाव के एलीफाज थिमाक्त। बासेमाथमी रूएल थिमाक्त। 5 ओहोली-बामामी येऊश, यालाम नु कोराह थिमाक्त। मेकोपुकी कनान रागीम जरमेशो एसाव आ तौ बाक्मा बाक्त।

6 मिनु एसावमी आ मीशपुकी, आ तौपुकी, आ तमीपुकी, आ खिं डा मुर नेल्ल, आ बी ब्यफ नु बस्तु भाव नेल्ल कनान रागीम चेम्शो शॉप नेल्ल लाइश्शा, याकूब रे डोन अर्को रागी लमाक्त। 7 मारदे हना शुश शॉप दुम्तीके, बस्तु भाव शुश दुम्तीके, काथा बाक्ने मचाप्से बाक्त। मिनु आस बाक्शो रागीम शुश बस्तु भाव दुम्तीके थुल्ले मचाप्से बाक्त। उत्पत्ती १३:६ 8 मिनु मेको एदोम माइश्शो एसाव सेइर डा पहाड लशा बाक्माक्त।

9 एसाव आ चच युइ सेइर पहाड डा एदोमी माइश्शो सु सु बाक्मा बाक्त देंशा हना, 10 एसाव आ मीश आदाह आ तौ एलीफाज, आ मीश बासेमाथ आ तौ रूएल बाक्माक्त।

11 मिनु एलीफाज आ तौपुकी तेमान, ओमार, सेफो, गाताम नु केनाज बाक्मा बाक्त। 12 एसाव आ तौ एलीफाज आ कान्छी मीश तिम्ना बाक्माक्त। मेकोमी अमालेक थिमाक्त। मेकोपुकी एसाव आ मीश आदाह आ तौपुकी बाक्मा बाक्त।

13 मिनु रूएल आ तौपुकी नाहाथ, जेराह, शम्माह नु मिज्जा बाक्मा बाक्त। मेको एसाव आ मीश बासेमाथ आ तौपुकी बाक्मा बाक्त।

14 मिनु सिबोन आ तौ अनाह आ तमी, एसाव आ मीश ओहोली-बामा आ तौपुकी येऊश, यालाम नु कोराह बाक्मा बाक्त।

## हुकुम पाइब एसाव आ तौपुकी

15 मिनु एसाव आ तौ आन दाते डा ठेयब मुर सु सु बाक्मा बाक्त देंशा हना, आ डोंइती जरमेशो तौ एलीफाज आ तौ तेमान, ओमार, सेफो नु केनाज, 16 कोराह, गाताम नु अमालेक, एलीफाजमी एदोम रागीमी थिंशो आदाह आ तौ बाक्मा बाक्त।

17 मिनु एसाव आ तौ रूएल आ तौ आन दाते डा ठेयब मुर नाहाथ, जेराह, शम्माह नु मिज्जा बाक्मा बाक्त। मेकोपुकी रूएलमी एदोम रागीमी थिंशो, एसाव आ मीश बासेमाथ आ तौ बाक्मा बाक्त। 18 मिनु एसाव आ मीश ओहोली-बामा आ तौ आन दाते डा ठेयब मुर येऊश, यालाम नु कोराह बाक्मा बाक्त। मेकोपुकी अनाह आ तमी, एसाव आ मीश ओहोली-बामाम, जरमेशो बाक्मा बाक्त। 19 मेकोपुकी एदोम माइश्शो एसाव आ तौ आन दाते डा ठेयब मुर बाक्मा बाक्त।

सेइर आ चच युइ

20 मिनु डोंइती मेको रागीम बाक्ब सेइर आ तौ होरीपुकी सु सु बाक्मा बाक्त देंशा हना, लोतान, शोबाल, सिबोन, अनाह उत्पत्ती १४:६; ब्यवस्था २:१२, २२ 21 दीशोन, एजेर नु दीशान बाक्मा बाक्त। मेकोपुकी एदोम रागी डा सेइर आ तौ होरी आन दाते डा ठेयब मुर बाक्मा बाक्त। 22 लोतान आ तौ होरी नु हेमान बाक्सा बाक्त। लोतान आ समी तिम्ना बाक्माक्त। 23 शोबाल आ तौपुकी अल्वान, मानाहाथ, एबाल, शेफो नु ओनाम बाक्मा बाक्त। 24 सिबोन आ तौ आइयाह नु अनाह बाक्सा बाक्त। मिनु अनाहमी आ आफ सिबोन आ गधा योवदीमेनु, गोरशो रागीमी होश ब्वाक्कु बुक्तीके थिदा बाक्त। 25 अनह आ आल दीशोन नु आ तमी ओहोली-बामा बाक्सा बाक्त। 26 मिनु दीशोन आ तौपुकी हेम्दान, एश्वान, इध्रान नु केरान बाक्मा बाक्त। 27 एजेर आ तौपुकी बिल्हान, जावान नु अकान बाक्मा बाक्त। 28 दीशान आ तौ ऊज नु अरान बाक्सा बाक्त। 29 होरी आन दाते डा ठेयब मुरपुकी लोतान, शोबाल, सिबोन, अनाह, 30 दीशोन, एजेर नु दीशान बाक्मा बाक्त। मेको सेइर रागी डा होरी आन ठेयब मुर बाक्मा बाक्त।

एदोम रागी डा पिपपुकी

31 डोंइती इसाएल डा मुर आन पिप मबाक्शो बाक्माक्त। एदोम रागीमी चहिं सासन पाइब पिपपुकी बाक्मा बाक्त। 32 मिनु बेओर आ तौ बेलामी एदोम रागीमी सासन पवा बाक्त। मिनु मेको आ सहर आ नें दिनहाबा बाक्माक्त। 33 मिनु बेला बेक्शा नोले बोञ्जा डा जेराह आ तौ योबाब मेकेर डा पिप दुम्माक्त। 34 मिनु योबाब बेक्शा नोले तेमान आ मुर आन रागी डा हुशाम पिप दुम्माक्त। 35 मिनु हुशाम बेक्म नोले बेदाद आ तौ हादाद पिप दुम्माक्त। मेकोमी मोआब रागीमी मिदयानी नु लडाइ पशा ग्रामाक्त। आ सहर आ नें अवीथ बाक्माक्त। 36 मिनु हादाद बेक्म नोले मासेकाह डा सम्ला पिप दुम्माक्त। 37 मिनु सम्ला बेक्म नोले युफ्रेटीस खोला आ नेक्था बाक्शो रेहोबोथ डा शावल पिप दुम्माक्त। 38 मिनु शावल बेक्म नोले आकबोर आ तौ बाल-हनान पिप दुम्माक्त। 39 मिनु आकबोर आ तौ बाल-हनान बेक्म नोले हादार पिप दुम्माक्त। आ सहर आ नें पाहु बाक्माक्त। आ मीश मेहेताबेल बाक्माक्त। मेको मात्रेद आ तमी बाक्माक्त। मात्रेद चहिं मे-जाहाब आ तमी बाक्माक्त।

एसाव रे पिशो थर

40 एसाव रे पिशो थर आन खिं नु आन बाक्तीके तेको बाक्मा बाक्त देंशा हना, तिम्ना, अल्वह, येथेथ, 41 ओहोली-बामा, एलाह, पिनोन, 42 केनाज, तेमान, मिब्सार, 43 मग्दीएल नु यिराम बाक्मा बाक्त। मेको एदोम आ थर आन बाक्तीक बाक्मा बाक्त। एसाव एदोमी आन किकी पिपी बाक्माक्त।

याकूब आ तौ योसेफ आ कथा

37 याकूब आ आफ अर्को रागीम बाक्शो खोदेंशो पा याकूब यो कनान रागीम बाक्शो बाक्मावत। 2 एको याकूब आ खिं डा मुर आन कथा बाक्ब। योसेफ १७ बर्स दुश्शा आ लोकब आन क्यारश भेडा गोठ डा गोठला बाक्मावत। आ आफ आ मीश बिल्हाह नु जिल्पा आस तौ कली वारच पाइब बाक्मावत। मिनु योसेफमी मेको आन मरिश्शो पशो आ आफ कली शोत्रबाक्मावत। 3 इस्राएलमी नेल्ल क्येडा योसेफ कली दाक्शो बाक्मावत। मारदे हना मेकोमी खाल्पा दुश्शा थिमावत। मिनु योसेफ कली दारशो फेक्तीके का फेरपदा बाक्त। 4 मिनु आ लोकबपुकीमी “आफोम नेल्ल क्येडा योसेफ कली दाक्ताव” दे तुइश्शा, योसेफ कली मदावतमे बाक्त। मिनु योसेफ नु रिश्शो लोत्र यो मपामे बाक्त।

योसेफ आ डोंइती डा डोमु

5 काबु नाक्दो योसेफमी डोमु का तवा बाक्त। मिनु योसेफमी आ लोकब आन कली शेंदीमी बाक्त। मिनु मेकोपुकीमी डोंइती क्येडा मदावतमे बाक्त। 6 योसेफमी मेको आन कली “गो सिनाक्दो डोमु का ताता। 7 गो नेल्ल रूमी चेरब मुठा फ्रेंशा बाक्तय। मिनु आं मुठा बोक्शा राप्त। मिनु इन मुठापुकी एर ओंथ बाक्शा, आं मुठा कली सेउ पाप्तेक्मे” देंमावत। 8 आ लोकबपुकीमी “गे आंइ कली अरेब दुम्नेवे? आंइ कली हुकुम पाइब दुम्नेवे?” दे गाइश्शा देंमा बाक्त। मिनु योसेफ कली आ डोमु नु आ देंशो आ पर्बम डोंइती क्येडा मदावतमे बाक्त।

योसेफ आ नोले डा डोमु

9 मिनु नोले योसेफम लेंशा अर्को डोमु तवा बाक्त। मिनु आ लोकब आन कली “नेनीन, गो अर्को डोमु का यो ताता। नां, तास्ला नु ११ ओटा सोरुलपुकीमी आं कली सेउ पाइक्तीमी” देंमावत। 10 मेको डोमु आ आफ नु आ लोकब आन कली शेंदीमीनु, आ आफोमी “मार डोमु तवी? गो, इ ममा नु इ लोकबपुकी इ डोंइती थमा पा खुम्की पा बाप्चा माल्नीकी?” दे हुइक्ता बाक्त। 11 मिनु आ लोकबपुकीमी योसेफ कली मदावतमे बाक्त। आ आफोम चहिं योसेफ आ देंशो मिश्शा आ थुंमी वोदा बाक्मावत।

योसेफ कली लेयशो

12 मिनु योसेफ आ लोकबपुकी क्यारश भेडा योत्रचा कली शेकेम माइश्शो रागीमी बाक्शो बाक्मा बाक्त। उत्पत्ती ३३:१८-१९ 13 इस्राएलमी योसेफ कली “इ लोकबपुकी शेकेम नेक्थान क्यारश भेडा योत्रनीम। गो इ कली शेकेम सोइक्नन” देंमावत। मिनु योसेफम “लो, गो लाइनुड” देंमावत। 14 मिनु “लावो, इ लोकब नु क्यारश भेडा नेल्ल रिश्शो बाक्मा कों, दोदेंशो पा बाक्मा, कोत्रथ लावो। मिनु कोत्रशा, शेंदी” देंमावत। मिनु योसेफ कली हेब्रोन बेंसी रे सोइक्तानु, शेकेम गे लमावत। उत्पत्ती ३५:२७ 15 मिनु योसेफमी लेखमी मुर का गुमावत। मिनु मेकोमी “गे मार मली?” दे हिल्लो पवा बाक्त। 16 मिनु योसेफमी “आं लोकब आन कली माल्थ गाक्ती। क्यारश भेडा ते योत्रशो बाक्मा, तुइक्ती?” दे हिल्लो पवा बाक्त। 17 मिनु मेको मुरुमी “मेकोपुकी एकेर रे लाप्तेक्मे। ‘दोथान लचा’ देंशो नेंता” देंमावत। मिनु योसेफम आ लोकब आन कली दोथानम थिम्मी बाक्त।

18 मिनु आ लोकबपुकीमी योसेफ कली डोन रे पिशो तशा, आन नेक्था जाक्वा क्येडा डोंइती “मेको कली साइक्वा” दे सल्ला पामे बाक्त। 19 मिनु मेकोपुकीमी “कोत्रडीन, डोमु ताइब जाक्त। 20 मुल मेको कली साइय्य। मिनु ढोडोडगा कामी पिक्वा। मिनु ‘जन्तुम साइश्शा ब्वाप्तु’ देंया। आ डोमु तशो गाप्बाक्म कों, मगाप्बाक्म तुइक्नय” देंमुमा बाक्त। 21 मिनु रूबेनमी मेको आन लोत्र नेंशा, मेको कली “मसाइय्य” देंमावत। मेकोमी “आ लोकबपुकी रे प्रॉइनुड” दे मिम्ता बाक्त। उत्पत्ती ४२:२२ 22 रूबेनमी मेको आन कली “मसतीने। लेख डा ढोडोडगा कामी ताइक्वा” दे माइक्मी बाक्त। मारदे हना योसेफ कली आन गुइ रे प्रॉइशा, आफ आ खिं सोइक्नुड, दे मिम्ता बाक्त। 23 मिनु योसेफ आ लोकब आन बाक्तीके जाक्मेनु,

मेकोपुकीमी आ नक फेरशो रिश्शो फेक्तीक वा प्रुइक्तमे बाक्त। 24 मिनु लेख डा ढोडोडगा कामी पिक्वामे बाक्त। मेको ढोडोडगाम ब्वाक्कु मबाक्शो बाक्मावत।

25 मिनु शोब्ले जथ निस्सीमा बाक्त। मिनु कोत्रडमेनु, गिलाद सहर रे इश्माएल जात डा ग्याप्ब लेयब मुर नु आन दलओठपुकी पिशो तामे बाक्त। मेको आन दलओठपुकीमी मस्लापुकी, खेक्तीकपुकी नु धूप इजीप्तीमी लेयचा कली लाइक्बाक्मा बाक्त। 26 मिनु यहूदामी आ लोकब आन कली “इं लोकब साइश्शा, जोल पचा, मार रिश्शो दुम्बा डा? 27 नेनीन, इश्माएल आ मुर आन कली लेयशा सोइक्तय, मसाइय्य। मारदे हना इं लोकब, इं आंम मुर बाक्ब” देंमावत। मिनु आ लोकबपुकी बिस्समा बाक्त। 28 मिदयान डा इश्माएली ग्याप्ब लेयब मुर पिना पिन बाक्मा बाक्त। मिनु योसेफ कली ढोडोडगा रे फेशा, इश्माएली आन कली चांदी के २० शेकेलम लेयडमे बाक्त। मिनु मेकोपुकीमी योसेफ कली इजीप्त लदमे बाक्त। शेकेल का ११.५ ग्राम, तोला खोदेंशो बाक्ब। उत्पत्ती २५:२; लेवी २७:१-८

29 मिनु रूबेनमी योसेफ प्रॉइचा कली मेको ढोडोडगा लशा कोत्रडानु, योसेफ कली मथित्थु, सुर्ता पा, आ वा खाक्मा बाक्त। 30 मिनु आ लोकब आन कली “मेको आल मबा। दोपा आ आफ आ डोंइती जाक्दीत्नुडा?” दे लोत्र पवा बाक्त। 31 मिनु मेकोपुकीमी योसेफ आ फेक्शो वा लाइश्शा, पाठा का क्योरशा, आ फेक्शो वा हुशेम खूम्मे बाक्त। 32 मिनु मेको फेरशो फेक्शो वा आन आफ कली लाइश्शा गेमे बाक्त। मेकोपुकीमी आन आफ कली “कोत्रडीन, एको वा थित्तक। इन तौ आ फेक्शो वा कों?” दे हिल्लो पामे बाक्त। 33 मिनु मेको वा तशा “आं तौ आ फेक्शो वा बाक्त, दे तुइक्ता बाक्त। मिनु ब्वाकी डा जन्तुमी मेको कली साइश्शा, नेक्मे बाक्त” दे डाक्मावत। उत्पत्ती ३७:२० 34 मिनु याकूबम आ फेक्शो वा खाक्शा, अरन्डी फेक्शा, शुश नाक्ती रेंका पवा बाक्त। 35 आ तमी तौ आन आफ कली लेम्थ जाक्मा बाक्त। मिनु याकूबमी “गो आं बेक्वी ना सम्म आं तौ कली रेंका पाइनुड” दे लेम्चा मगेमी बाक्त। मोपा आ आफ योसेफ आ पर्बम डाक्मावत।

36 मिनु मेको मिदयान डा मुरपुकीमी योसेफ कली इजीप्त रागी डा फाराओ आ नेल्ल क्येडा ठेयब गेय पाइब पोतीफर कली लेयडमे बाक्त।

यहूदा नु तामार

38 मिनु नोले यहूदा आ लोकबपुकी रे लशा, अदुल्लाम सहर डा हीरा माइश्शो मुर आ बाक्तीक लमावत। 2 मेकेर बाक्शा, यहूदामी कनानी शुआ नें पाइश्शो मुर आ तमी तवा बाक्त। मिनु मेको चाक्शा, मेको नु बाक्मावत। 3 मिनु मेकोमी कोत्रज कुरशा, तौ का थिमावत। मेको आ नें एर वोदा बाक्त। 4 मिनु लेंशा कोत्रज कुरशा, अर्को तौ का नु थिमावत। मेको आ नें ओनान वोदा बाक्त। 5 मेकोमी लेंशा कोत्रज कुरशा, अर्को तौ का नु थिमावत। मेको आ नें शेलाह वोदा बाक्त। मेको आल थिची ना यहूदा केसीब माइक्तीकेमी बाक्शो बाक्मावत। 6 मिनु यहूदामी आ डोंइती जरमेशो तौ एर कली मीश आल का चाक्मा बाक्त। मेको आ नें तामार बाक्मावत। 7 यहूदा आ डोंइती जरमेशो तौ एरमी परमप्रभु यावे आ डोंइती मरिश्शो पना पन बाक्मावत। मिनु परमप्रभु यावेमी मेको कली सदा बाक्त। 8 मिनु यहूदामी ओनान कली “रिउम पतीक गेय पा इ लोकब आ मीश नु बाक्को। इ लोकब कली आल सेलो” दे मदा बाक्त। ब्यक्स्था २५:५-१० 9 मिनु ओनानमी आ आल मदुम्ब, दे तुइश्शा, आ लोकब आ मीश नु बाक्की ना आ लोकब आ आल मसेल्चा, दे आ वांचेर खपीम ताइक्बाक्मावत। 10 मिनु मेको कली मो पशो तशा, परमप्रभु यावेमी मेको कली मदाक्शो बाक्मावत। मोपतीके मेको कली यो सदा बाक्त। 11 मिनु यहूदामी आ चाइमी तामार कली “इ आफ आ खिंम बाक्शा, शेलाह मकोल्म सम्म रिम्दो” दे लेम्दा बाक्त। मारदे हना यहूदामी “मेको नु बाक्शा, आ लोकब निक्शी खोदेंशो पा, अर्को यो बेक्बा कों” दे मिम्ता बाक्त। मिनु तामार आ आफ आ खिं लमावत।

12 मिनु नोले शुआ आ तमी, यहूदा आ मीश बेक्मावत। मिनु आ रेंका पतीक नुम नोले यहूदा आ भेडा आन कली ऊन खोइक्बपुकी गुम्चा कली

आ वारच अदुल्लामा सहर डा मुर हीरा नु तिम्नाह लमावत। 13 मिनु मुर कामी तामार कली “इ शिउ आ भेडा ऊन खोइक्थ तिम्नाह कुइब” दे मदा बावत। यहोसु १५:५७ 14 मिनु आ वोंइश बेक्शो वा पुइश्शा, आ कुल तेल्लेम खोदेशो पा सुम्से बावत। मिनु मोदेशो पा तिम्नाह एनाइम लतीक लांमी निश्शा बाक्मावत। मारदे हना शेलाह कोल्शा यो, यहूदामी मेको नु ग्युंवे मपाइक्ता बावत। 15 मिनु यहूदाम मेको कली लांम तशा “तेल्लेम का बाक्ब” दे मिम्ता बावत। मारदे हना आ कुल सुमा बावत। 16 मिनु मेको कली “आं कली ओव्रचा गेयी” देंमावत। मारदे हना आ चाइमी बाक्ब, दे मतुइक्ता बावत। मिनु तामारमी “गे गो नु बाक्शो डा आं कली मार गेनीनी?” दे हिल्लो पवा बावत। लेवी १८:१५ 17 मिनु “गो आं गोठ डा पाठा का सोइक्वनन” देंमावत। मिनु तामारमी “मेको मसोइक्तीनी सम्म मार गेनीनी?” दे हिल्लो पवा बावत। 18 मिनु यहूदामी “मार पुंइनेवे?” दे हिल्लो पवा बावत। मिनु मेकोमी “इन छाप, इन डोरी नु इन गुइ डा कोक्के गेचा नड” दे मदा बावत। मिनु मेको नेल्ल गेशा नोले मेको नु बाक्मावत। मिनु कोव्रज कुरा बावत। 19 मिनु तामार बोक्शा लशा, आ वोंइश बेक्शो डा वा लेशा फेक्से बावत।

20 मिनु यहूदामी मेको पाठा गेचा नु आ छाप, डोरी नु कोक्के लेत्वा कली आ अदुल्लामा डा आ वारच कली सोइक्ता बावत। मेकोमी मेको मीश मुर कली मथिदा बावत। 21 मिनु मेकोमी मेकेर डा मुर आन कली “एकेर एनाइम डा लांम बाक्ब तेल्लेम ते लमे?” दे हिल्लो पामी बावत। मिनु मेकोपुकीमी “एकेर तेल्लेम मबाक्ब” देंमा बावत। 22 मिनु मेको यहूदा आ बाक्तीक लेशा “मेको कली थिन्ने मचबु। मेकेर डा मुरपुकीमी ‘एकेर तेल्लेम मबाक्ब’ देंतेक्म” दे यहूदा कली शेंदा बावत। 23 मिनु यहूदामी “मेकोन बाक्ब। गो मुने मदोक्डल। गो पाठा का सोइक्तावड। गे मेको कली मथिदी, मार पचा डा?” देंमावत।

24 मिनु महिना सां नोले मुर कामी यहूदा कली “इ चाइमी तामारम तेल्लेम पाप्नु। तेल्लेम पा कोव्रज कुरशो बावत” देंमावत। मिनु यहूदामी “मेको चोचा कली चाक्कीन” दे लोव्र लेत्ता बावत। 25 मिनु तामार कली चाक्वामेनु, मेकोमी आ शिउ कली “एको छाप, डोरी नु कोक्के सु के बाक्मे मेको रे पा कोव्रज कुरशो नड। एको छाप, डोरी नु कोक्के सु के बाक्मे, कोव्रडीन” दे लोव्र कुरब सोइक्ता बावत। 26 मिनु यहूदा मेको छाप, डोरी नु कोक्के तुइश्शा, मेकोमी “आं क्येडा मेको ठीक पाइब बावत। मारदे हना गो मेको कली आं तौ शेलाह मगेड” देंमावत। तन्न तामार कली मचाक्गा बावत।

27 मिनु आल थिचा रोइ पची ना, आ कोव्रजम जौले आल बाक्सा बावत। 28 मिनु आल थिचावानु, आल कामी आ गुइ गुंइदा बावत। मिनु आ वारच पाइब मीश मुरुमी लल श्येले पाइश्शा “एको डोंइती डा बाक्ब” देंमावत। 29 मिनु मेको आ गुइ ओंइशा, आ लोक्ब जरमेसे बावत। मिनु मेको वारच पाइबमी “इ गूची ना गिश थैयब गार सेली” दे मदा बावत। मोपतीके आ नें पेरिस वोदा बावत। पेरिस आ अर्थ खाक्शो गार बाक्ब। रूथ ४:१८; मत्ती १:३ 30 मिनु नोले लल श्येले पाइश्शो आल जरमेसे बावत। मिनु मेको आ नें जेराह वोदा बावत।

### योसेफ पोतीफर आ खिंम बाक्शो

39 मेको इश्माएल जात डा ग्याब्ब लेयबपुकीमी योसेफ कली इजीप्त रागी चाक्दीत्मे बावत। मिनु इजीप्त रागी डा पिप आ नेल्ल क्येडा थैयब गेय पाइब पोतीफरमी योसेफ कली ग्यबा बावत। उत्पत्ती ३७:२८, ३६ 2 मिनु परमप्रभु यावे योसेफ नु बाक्शो बाक्मावत। योसेफ इजीप्त डा होव्रप आ खिंम बाक्मेनु, मार मार पवा, मेको नेल्ल रिश्शो दुश्शा लमावत। उत्पत्ती २६:२४ 3 मिनु आ होव्रपमी “परमप्रभु यावे योसेफ नु बाक्मावत। मिनु योसेफमी मार मार पवा, मेको नेल्ल परमप्रभु यावेमी रिश्शो दुम्पदा बावत।” दे तुइक्ता बावत। 4 मिनु योसेफ पोतीफर आ डोंइती शिशी तवा बावत। मिनु आ खिंमी गेय पवानु, आ थैयब गेय पाइब सेला बावत। मिनु अर्को गेय पाइबपुकी कली अरेब यो सेला बावत। आ मारेइ मारेइ योसेफ कली कोव्रपदा बावत।

5 मिनु पोतीफरमी योसेफ कली आ खिंम डा नेल्ल कोव्रब मुर सेलानु, परमप्रभु यावेमी योसेफ आ पर्बम मेको कली शुश आसीक गेवा बावत। पोतीफर आ खिंम मार मार बाक्मा, आ रूम मार मार ब्वारा, मेको नेल्ल कली परमप्रभु यावेमी आसीक गेवा बावत। उत्पत्ती ३०:२७ 6 मोपा पोतीफरमी आ मार मार नेल्ल योसेफ आ गुइमी जिम्मा गेवा बावत। आ जचा ब्वचा ला आंमा कोव्रडा बावत। योसेफ आ रां नु कुल थम दारशो बाक्मावत। उत्पत्ती ४३:३२

7 मिनु पोतीफर आ खिंमी बाक्मेनु, आ होव्रपोक्ममी योसेफ कली दाक्शा, मेको नु बाक्चा मला बावत। मेको मीश मुरुम योसेफ कली “पिवो, गो नु बाक्को” दे मदा बावत। 8 योसेफमी “गो गे नु मबाक्नुड। आं होव्रपमी आ मार मार नेल्ल आं कली ‘कोव्रडो’ दे जिम्मा गेती। 9 आं कली आ खिंम डा नेल्ल क्येडा थैयब सेलती। मार मार बाक्मा, नेल्ल जिम्मा गेती। इन कली चहिं आं कली मगेयी। मारदे हना गे आ मीश ननी। गो दोपा परमप्रभु आ डोंइती मोदेशो मरिश्शो पाप पने चाप्नुडा? गो मपाइनुड?” दे मदा बावत। प्रस्थान २०:१४; लेवी १८:२० 10 मिनु मेको मीश मुरुमी नाक्त किंत किंत योसेफ कली लोव्र पशा “पिवो, गो नु बाक्को” दे मदा बावत। योसेफम चहिं मेको आ लोव्र मटिवा बावत।

11 मिनु काबु योसेफ आ गेय पचा कली पोतीफर आ खिंम बाक्मावत। खिंम गेय पाइब मुर सुइ मबाक्मा बावत। 12 मिनु मेको मीश मुरुमी योसेफ आ फेक्शो वा ग्याइश्शा कीशा “गो नु बाक्को” देंमावत। मिनु योसेफ आ फेक्शो वा प्रोंइशा, खिं रे दोरशा लाडगा गूमावत। 13 पोतीफर आ मीशेमी योसेफ आ फेक्शो वा आंम गुइमी प्रोंइशा वोइश्शा, खिं रे प्रोक्शो तशा, 14 खिं डा मुर आन कली ब्रेश्शा “कोव्रडीन, पोतीफरमी एको हिब्रू मरिश्शो पपाइक्चा कली चाक्तु। एकोमी आं कली ग्याइक्ताक्यी ‘गो नु बाक्को’ दे माइक्ती। गो चहिं थैयब सेंदामी वाइ ब्रेत्ती। 15 मिनु आं कली वाइ ब्रेश्शो तशा, आ वा प्रोंइशा प्रोक्त” दे माइक्मी बावत। 16 मिनु मेकोमी योसेफ आ फेक्शो वा आ नेक्था वोइश्शा, आ वोंइश मजाक्म सम्म रिम्दा बावत।

17 पोतीफर जाक्मेनु, आ मीशेमी “एको इन चाक्शो गेय पाइब हिब्रूमी आं कोठा ओव्रशा ‘गो नु बाक्को’ देंत। 18 गो चहिं वाइ ब्रेत्ती। मिनु आ फेक्शो वा प्रोंइशा, खिं रे गूशा प्रोक्त” दे मदा बावत। 19 मिनु आ होव्रपमी आ मीश आ लोव्र नैशा, चुरमावत। 20 योसेफ कली लाइश्शा, जेल्खानम चोक्पदा बावत। मेकेर पिप आ चोक्शो मुरपुकी यो बाक्मा बावत। मिनु योसेफ मेकोपुकी नु बाक्मावत। 21 मिनु परमप्रभु यावेमी योसेफ कली वारच पशा, जेल्खान डा कोव्रब कली “योसेफ रिश्शो मुर बाक्ब” दे तुइक्पदा बावत।

22 मिनु मेको कोव्रब मुरुमी योसेफ कली जेल्खानम चोक्शो मुर आन कली कोव्रब सेला बावत। मिनु मेकेर बाक्शो गेय नेल्ल योसेफमी पवा बावत। 23 मेको जेल्खान डा कोव्रब मुरुमी योसेफ आ पशो यो मकोव्रडा बावत। मारदे हना परमप्रभु यावे मेको नु बाक्शो तुइक्ता बावत। मेको नेल्ल रिश्शो पाइब, दे थमा सुदा बावत। मिनु परमप्रभु यावे मेको नु बाक्मेनु, आ गेय नेल्ल रिश्शो दुम्मावत।

### योसेफमी डोमु आ अर्थ शेंशो

40 मिनु नोले मार दुम्मावत देंशा हना, इजीप्त डा पिप फाराओ आ खिंमी पिप कली तूचा गेब आन थैयब मुर नु पिप कली शोब्ले चोइब आन थैयब मुरुमी आस प्रभु इजीप्त डा पिप कली मरिश्शो पाम्से बावत। 2 मिनु फाराओमी मेको तूचा गेब आन थैयब मुर नु शोब्ले चोइब आन थैयब मुर आस पर्बम गाइक्ता बावत। 3 मिनु मेको निम्फा आस कली नेल्ल क्येडा थैयब गेय पाइब आ जेल्खानमी चोक्सी बावत। मेकेर योसेफ यो बाक्शो बाक्मावत। 4 मिनु जेल्खान डा कोव्रब मुरुम योसेफ कली “मेको निम्फा आस कली वारच पावो” दे अरेवा बावत। मिनु वारच पवा बावत। 5 मिनु इजीप्त डा पिप आ गेय पाइब थैयब मुर निक्शी जेल्खानमी बाक्सानु, काबु नाक्दो निम्फामी डोमु ताम्से बावत। मेको आस डोमु आस अर्थ निक्शी बाक्मावत। 6 मिनु सुनी कना योसेफ मेको निक्शी आस कली वारच पथ, आस कोठा ओव्रमेनु, निम्फा सुर्ता पा बाक्शो ताम्सी बावत। 7 मिनु योसेफमी जेल्खानम बाक्शो फाराओ आ गेय पाइब आ थैयब मुर

निक्शी आस कली “मारदे सुर्ता पनी?” दे हिल्लो पाम्सी बाक्त। 8 मिनू मेको निक्शीमी “गो डोमु ताइतस्कु। मिनू मेको डोमु आ अर्थ मरुप्कु। शेंब मुर मबा” देसा बाक्त। मिनू योसेफमी “परमप्रभुमी मेको डोमु मार बाक्बा दे शेंबा ममाइ डा? लो, आं कली देनीन” दे माइक्सी बाक्त। उत्पत्ती ४१:१५-१६; दानीएल २:२७-२८ 9 मिनू फाराओ कली तूचा गेब आन ठेयब मुरुमी “गो आं डोमुमी आं डोंइती अडगुर बोट का ताता। 10 मिनू मेको अडगुर बोटमी राशी सां बाक्तेक्म। मिनू मेको कोच्चा दाप्शा, फू यो बोइक्तेक्मे। बोइश्शा डा मिन अडगुर गेडा सिश्शा मीतेक्म। 11 मिनू आं गुडमी फाराओ आ कचौरा बाक्त। मिनू गो अडगुर आ गेडा आ रस फाराओ आ कचौरामी चिम्ता। मिनू कचौरा पिप कली गेता” दे लोत्र पवा बाक्त।

12 मिनू योसेफमी “इन तशो डोमु आ अर्थ मार बाक्ब देसा हना, मेको राशी सां नाक्ती सां बाक्नीम। 13 मिनू सांबु नाक्ती फाराओम इन कली जेल्खान रे प्रोंइशा डा मिन इन डोंइती पशो गेय लेंशा गेब। मिनू गे डोंइती डा खोदेंशो पा फाराओ कली तूचा गेनीनी। लेंशा फाराओ कली कचौरा गेनीनी। इन तशो डोमु आ अर्थ एको बाक्ब। 14 इन कली रिश्शो दुम्मेनु, आं कली यो मर्पेदीन। आं कली शिशी पने। फाराओ कली आं कली मेको जेल्खान रे गुंड्या, दे लोत्र पने। 15 डोंइती आं कली हिब्रू रागी रे खुइ पा चाक्तीमी। मुल जेल्खानम चोक्तीमी। गो मारेइ मरिश्शो मपड” देमाक्त। उत्पत्ती ३७:२८

16 मिनू फाराओ कली शोब्ले चोइब आन ठेयब मुरुम मेको डोमु आ अर्थ रिश्शो बाक्त, देसा, योसेफ कली “गो यो डोमु का ताता। मेको डोमुम पिरीडगा सां बुश शोब्ले पियाम कुरशो बाक्ती। 17 नेल्ल क्येडा आ तार डा पिरीडगामी फाराओ कली शुश खाल डा चोशो शोब्ले बाक्तेक्मे। मेको पिरीडगा डा शोब्ले चिक्बीम खुइ पा जाक्तेक्म” दे मदा बाक्त। 18 मिनू योसेफमी “इन तशो डोमु आ अर्थ मार बाक्ब देसा हना, मेको पिरीडगा सां, नाक्त सां बाक्नीम। 19 सांबु नाक्ती फाराओमी इन कली जेल्खान रे गुंड्याइश्शा, रवाम क्येडाइक्व। मिनू चिक्बीम इन श्ये ब्वाइनीम। इन तशो डोमु आ अर्थ एको बाक्ब” दे शेंदा बाक्त।

20 मिनू आ सांबु नाक्ती फाराओ आ जरमेशो नाक्त बाक्माक्त। मिनू फाराओमी आ गेय पाइब नेल्ल आन कली भोज सेला बाक्त। मिनू आ कली तूचा गेब आन ठेयब मुर नु शोब्ले चोइब आन ठेयब मुर आस कली जेल्खान रे गुंड्याइश्शी बाक्त। 21 मिनू आ कली तूचा गेब आन ठेयब मुर कली लेंशा डोंइती डा गेय पचा गेवा बाक्त। मिनू मेकोमी लेंशा फाराओ कली तूचा गेब दुम्माक्त। 22 शोब्ले चोइब आन ठेयब मुर कली चहिं क्येडाइश्शा साइक्पदा बाक्त। योसेफमी दोदेंशो देमे, मोदेंशो दुम्माक्त। 23 तन्न फाराओ कली तूचा गेब आन ठेयब मुरुमी योसेफ कली यु प्रेंदा बाक्त।

फाराओ आ डोमु आ अर्थ

41 मिनू बर्स निक्शी नोले फाराओमी डोमु निक्शी तवा बाक्त। मिनू डोमुमी मार तवा बाक्त देसा हना, आंम कली नील खोला आ नेक्थान राप्शा बाक्शो तवा बाक्त। 2 मिनू नील खोला रे ७ ओटा दारशो दोम्शो बी गूशो तवा बाक्त। मेको बीपुकीमी बुदी मीलु घांस ब्वामे बाक्त। 3 मिनू नोले नील खोला रे ७ ओटा अर्को काइ मदारशो ग्येंशो बी गूशो तवा बाक्त। मिनू मेकोपुकी अर्को बी नु नील खोला आ नेक्था राप्शा बाक्मा बाक्त। 4 मिनू काइ मदारशो ग्येंशो बीपुकीमी दारशो दोम्शो बी आन कली ब्वामे बाक्त। नोले फाराओ सेंसे बाक्त। 5 मिनू फाराओ लेंशा निन्द्रा पवानु, लेंशा अर्को डोमु तवा बाक्त। मार तवा बाक्त देसा हना, चेरब बोट कामी शुश आख पाइश्शो ७ ओटा ग्रेल्शो बाला सिश्शो तवा बाक्त। 6 मिनू नोले पूर्ब डा फशेम बुश सेल्शो ७ ओटा सोप्पीक्च आइक्च बाला तवा बाक्त। 7 मिनू मेको आइक्च बालामी मेको शुश आख पाइश्शो ७ ओटा बाला आन कली दाक्मे बाक्त। नोले फाराओ संशा, आ डोमु तशो तुइक्ता बाक्त। 8 मिनू आ थुं मनुथु सुनी कना इजीप्त डा जादू पाइब नु जोक्ब तुइक्ब नेल्ल आन कली ब्रेथ सोइक्तीमी बाक्त। मेको जाक्मानु, आ डोमु मेको आन कली शेंदीमी बाक्त। तन्न सुइमी फाराओ कली मेको डोमु आस अर्थ देने मचाप्मे बाक्त। दानीएल २:३

9 मिनू फाराओ कली तूचा गेब आन ठेयब मुरुमी आ पिप कली “मुलाक्ती आं मरिश्शो पशो मिम्ताक्ड। 10 फाराओमी आ गेय पाइब आस पबंम चुरमेनु, गो नु शोब्ले चोइब आन ठेयब मुर नेल्ल क्येडा ठेयब गेय पाइब आ जेल्खानम चोक्सीशा बाक्कुनु, 11 गो निक्शीम काबु नाक्दो डोमु ताइतस्कु। मेको डोमु निक्शी के अर्थ निक्शी बाक्सा बाक्त। 12 मेना हिब्रू रागी डा ठिटा का यो जेल्खानम बाक्त। मेको इन नेल्ल क्येडा ठेयब गेय पाइब आ गेय पाइब बाक्त। गो निक्शीमी तशो डोमु मेको कली माइक्कुनु, योसेफमी डोमु आ अर्थ नेल्ल आंस कली शेंताक्की। आं तशो डोमु आ अर्थ शेंताक्की। मिनू अर्को मुर आ तशो डोमु आ अर्थ यो शेंताक्क। 13 दोदेंशो पा शेंदा, मोदेंशोनु दुम्त। आं गेय आं कली लेंशा गेतीनी। अर्को कली चहिं क्येडाइश्शा साइक्तेक्म” देमाक्त।

14 मिनू फाराओमी योसेफ कली ब्रथ सोइक्ता बाक्त। मेकोपुकीमी योसेफ कली रीब पा जेल्खान रे गुंड्यापदमे बाक्त। योसेफ कली चां प्रेक्शा, नक वा फेक्पा, फाराओ आ बाक्तीके चाक्मे बाक्त। 15 मिनू फाराओमी योसेफ कली “गो डोमु निक्शी ताता। सुइमी मेको आस अर्थ शेंने मचबेम। मिनू गो इ पबंम लोत्र नेंता। गे मुर आन तशो डोमु आ अर्थ शेंने चाप्नेवे ने” देमाक्त। 16 मिनू योसेफमी फाराओ कली “गो डोमु डा लोत्र मतुइक्नुड। परमप्रभुमी फाराओ कली थमा पा थुं नाइक्वा डा लोत्र तुइक्पाइक्ब” देमाक्त। उत्पत्ती ४०:८ 17 मिनू फाराओमी “गो आं डोमुमी नील खोला आ नेक्था बाक्ती। 18 मिनू नील खोला रे ७ ओटा दारशो दोम्शो बी गूतेक्म। मिनू बुदी मीलु घांस ब्वाक्तेक्म। 19 मिनू नोले ७ ओटा मदारशो ग्येंशो बी गूतेक्म। गो इजीप्त रागी नेल्लेमी मोदेंशो मदारशो बी गेनायो मतडमी। 20 मिनू मदारशो गेयशो बीपुकीमी डोंइती गूशो दोम्शो बी आन कली ब्वाक्तेक्म। 21 मिनू मेको आन कली ब्वशा यो, गेयशो बी मदोम्म। डोंइती डा खोदेंशो पा गेयस डा गेयस बाक्तेक्म। बी ब्वाक्तेक्म, दे सुइमी थमा मसुदेम। मिनू नोले गो सेंसाक्की। 22 मिनू लेंशा इप्ती। मिनू डोमु तडानु, चेरब बोट का रे ७ ओटा ठेयब रिश्शो बाला पाइश्शो तातामी। 23 मिनू नोले अर्को बोट रे ७ ओटा पूर्ब डा फशेम सोइश्शो इम्चीली सोप्पीक्च बाला ताता। 24 मिनू इम्चीली सोप्पीक्च बालापुकीमी मेको ७ ओटा रिश्शो बाला आन कली दाक्तेक्म। गो एको आं डोमु जादू पाइब आन कली माइक्तामी। मेकोपुकीम एको डोमुमी मार दुम्बा, दे देने मचबेम” दे योसेफ कली देमाक्त। 25 मिनू योसेफमी फाराओ कली “इन डोमु निम्फा कांइचीक खोदेंशो बाक्ब। परमप्रभुमी मार पचशो बाक्मे, मेको इन कली डोमुमी कोंइताक्क। 26 मेको ७ ओटा रिश्शो बी ७ ओटा बर्स बाक्नीम। मिनू मेको ७ ओटा रिश्शो बाला यो ७ बर्स बाक्नीम। डोमु निक्शी कांइचीक खोदेंशो बाक्नीस। 27 मिनू मेको आ नोले गूशो ७ ओटा ग्येंशो बीपुकी ७ ओटा बर्स बाक्नीम। मिनू मेको ७ ओटा गेडा मसिश्शो, पूर्ब डा फशेम सोइश्शो सोप्पीक्च बाला यो ७ ओटा बर्स बाक्नीम। मेको ७ बर्स डा अन्काल बाक्नीम। 28 आं देंशो मार बाक्ब देसा हना, परमप्रभुमी मार पचा चिक्शो बाक्मे, मेको इन कली कोंइताक्क। मोदेंशो बाक्ब। 29 नेनीन, इजीप्त रागी नेल्लेमी ७ बर्स सम्म शुश बाली नाली ग्रेल्शा, रिश्शो बर्स दुम्वा चिक्शो बाक्नीम। 30 मिनू आ नोले ७ बर्स सम्म अन्काल दुम्ब। मिनू मेको मरिश्शो ७ बर्सम इजीप्त रागीमी अन्न ग्रेल्शो नेल्ल प्रेंनीम। मिनू मेको अन्कालमी रागी कली थुम्पाइक्ब। 31 मिनू मेको ठेयब अन्काल दुम्शा, डोंइती अन्न ग्रेल्शो बर्स नेल्लेमी प्रेंनीम। मारदे हना मेको अन्काल शुश श्येत डा बाक्ब। 32 मिनू इन डोमु निक्शी खेयप ताइतीनी, मेको आ अर्थ मार बाक्ब देसा हना, परमप्रभुमी मेको थमा पा पाइब नु पचा चिक्शो बाक्ब। 33 मोपतीके फाराओमी निप्स पाइश्शो मुर का इजीप्त रागी डा ठेयब मुर सेलीन। 34 मिनू आं देंशो पशा, कोत्रब मुरपुकी यो वोइक्वा माल्नीनी। मेकोपुकीमी फाराओ आ सासनमी रिश्शो ७ बर्सम इन रागी नेल्ल रे अन्न ५ भाग तिरो पोक्वा माल्नीम। 35 मेको रिश्शो बर्स डा अन्न खुप्शा, अन्काल डा बर्सम सहर डा मुर आन कली थुल्वा कली उप्शा वोइक्वा माल्नीम। 36 मेको उप्शा वोइश्शो अन्न इजीप्त रागीमी अन्काल मदुम सम्म उप्चा माल्ब। मोपा वोइश्शोनु, अन्कालमी मबेक्नीम” दे योसेफमी फाराओ कली मदा बाक्त।

## योसेफ ठेयब मुर दुश्शो

37 मिनू फाराओ नु आ गेय पाइब नेल्लेमी “योसेफ आ दॅशो लोव्र रिम्शो बाक्ब” दे मिम्तमे बाक्त। *हितोपदेस १४:३५* 38 मिनू फाराओम आ गेय पाइब आन कली “गो योसेफ खोदॅशो मुर अर्को सु थिन्ने चाप्या डा? परमप्रभु आ सोक्तीम ब्रीशो मुर का थिन्ने चाप्या डा?” दे हिल्लो पामी बाक्त। *प्रस्थान ३१:३; हितोपदेस २:६* 39 मिनू फाराओमी योसेफ कली “परमप्रभुमी मेको नेल्ल इ कली तुइक्पाइक्तु। इ खोदॅशो जोक्ब तुइक्ब मुर सुइ मथिंसीब। 40 इ कली आं रागी डा मुर आन कली हुकुम पाइब सेल्लन। इ दॅशो लोव्र मुर नेल्लेमी टिचा माल्नीम। गे आं सरकार डा गेय पाइब नेल्ल आन क्येडा ठेयब मुर दुम्नीनी। गो सिरपेचम पतीके ला इ क्येडा ठेयब बाक्नुड। *भजन संग्रह ११३:७* 41 नेनीन, गो इ कली इजीप्त रागी नेल्ल डा ठेयब मुर सेल्लन्नी” दॅमाक्त। *प्रेरित ७:१०*

42 मिनू फाराओम आ छाप क्येप्टीक औंठी आ ब्रेचो रे प्रुइशा, योसेफ आ ब्रेचोम लिक्ता बाक्त। मिनू योसेफ कली दारशो बुश वा फेक्पाइशा, सुन के माला रेल्ला बाक्त। *एस्तर ३:३०; दानीएल ५:२९* 43 मिनू फाराओमी योसेफ कली आ नोले डा बग्गीमी डोइक्पदा बाक्त। मिनू योसेफ आ डोंइती बाक्बपुकीमी “योसेफ आ डोंइती पोक्च थेक्शा, सेउ पने” दे ब्रेम्मा बाक्त। मोपा इजीप्त रागी डा हुकुम पाइब सेला बाक्त। *एस्तर १०:३* 44 मिनू फाराओमी “गो फाराओ नड। इजीप्त रागीमी गे मार पचा दॅनी, मेको ला पचा माल्नीम” दे योसेफ कली दॅमाक्त। 45 मिनू फाराओमी योसेफ कली साफेनाथ-पानेआह, दे नक नें वोदा बाक्त। मिनू योसेफ कली पोतीफेरा माइशो ओन सहर डा नाक्सो आ तमी आसेनाथ नु ग्युबे पाइक्ता बाक्त। मिनू योसेफ इजीप्त रागी नेल्ल कोव्रथ हिरचा गोवा बाक्त। 46 योसेफ फाराओ पिप आ डोंइती लोव्र पवानु, ३० बर्स दुश्शो बाक्माक्त। मिनू फाराओ आ डोंइती रे लशा, इजीप्त रागी नेल्ल हिरथ लमाक्त। *उत्पत्ती ३७:२*

## योसेफम इजीप्त कली गेय पशो

47 मिनू मेको रिम्शो बाली ग्रेल्लेक ७ बर्समी इजीप्त नेल्ल डा रूमी थाम्पा अन्न ग्रेल्लेक्ता। 48 मिनू योसेफमी मेको बाली ग्रेल्लेको ७ बर्स डा अन्न सहर सहरम उप्शा, वोदा बाक्त। मेको सहरम एर ओंथ सु सु आन रू बाक्मे, मेकेर डा अन्न मेको सहरम उप्शा वोदा बाक्त। 49 मिनू योसेफमी समुन्द्र डा बाल्वा खोदॅशो पा अन्न उप्शा, शुश दुम्तीके पुक्वा यो प्रोना बाक्त। मारदे हना पुक्ने मचाप्चा डा पा शुश बाक्माक्त।

## योसेफ आ तौ निक्शी

50 मिनू अन्काल दुम्चा डोंइती योसेफ आ मीश ओन सहर डा नाक्सो पोतीफेरा आ तमी आसेनाथमी तौ निक्शी थिमाक्त। 51 मिनू योसेफमी “डोंइती श्येत जडानु, परमप्रभुमी आं आफ आ खिं डा मुर आन कली प्रेंपाइक्ती” दे मिम्शा, आ डोंइती जरमेशो तौ कली मनस्से नें वोदा बाक्त। 52 अर्को कली एफ्राइम नें वोदा बाक्त। मारदे हना “परमप्रभुमी आं कली रागीमी श्येत जडानु, शुश दुम्पाइक्ती” दे मिम्ता बाक्त। 53 मिनू इजीप्त रागीमी मेको रिम्शो अन्न ग्रेल्लेको ७ बर्स नुम्माक्त। 54 मिनू योसेफ आ दॅशो ७ बर्स डा अन्काल दुम्चा गोवा बाक्त। मेको अन्काल रागी रागी नेल्लेमी दुम्माक्त। इजीप्त रागीमी चहिं अन्न थिंसे बाक्त। 55 मिनू इजीप्त रागीमी ठेयब अन्काल दुम्शा, मुरपुकीमी फाराओ कली “अन्न गेकी” दे पुन्मे बाक्त। मिनू फाराओम इजीप्त डा मुर आन कली “योसेफ नु पुंइथ लने। मेकोमी मार दॅबा, मेको पने” दे माइक्मी बाक्त। 56 मिनू मेको अन्काल रागी रागी नेल्लेमी दुम्माक्त। मेना योसेफमी अन्न वोइक्तीक नेल्ल रोक्चा गोवा बाक्त। इजीप्त डा मुर आन कली अन्न लेयपदा बाक्त। रागी नेल्लेमी ठेयब अन्काल दुम्माक्त। 57 मिनू अर्को रागी डा मुरपुकी यो इजीप्त रागीमी अन्न ग्याथ, योसेफ आ डोंइती जाक्मा बाक्त। मारदे हना मेको अन्कालम रागी नेल्ल प्रोइक्माक्त।

## याक्ब आ तौपुकी इजीप्त लशो

42 मिनू याक्बमी इजीप्त रागीमी अन्न बाक्ब दे तुइशा, आ तौ आन कली “गे मारदे कोव्रमुशा बाक्नीनी? मारेइ मपाइनीनी? 2 नेनीन, इजीप्त रागीमी अन्न बाक्ब। मिनू गोपुकी अन्कालमी मबेक्च, ब्रोंइय अन्न ग्याथ लने” दॅमाक्त। 3 मिनू योसेफ आ १० जना लोक्बपुकी इजीप्त अन्न ग्याथ लमा बाक्त।

4 याक्बमी योसेफ आ लोक्ब बेन्यामीन कली चहिं श्येत दुम्बा कों, दे हिंशा, आ लोक्बपुकी नु मसोइक्ता बाक्त। 5 मोपा याक्ब आ तौपुकी अर्को मुर नु इजीप्त अन्न ग्याथ जाक्दीम्मा बाक्त। मारदे हना कनान रागीमी यो अन्काल दुम्माक्त।

6 मिनू योसेफ सरकार डा ठेयब मुर दुम्शा, रागी नेल्ल डा मुर आन कली अन्न लेयपदा बाक्त। योसेफ आ लोक्बपुकी जाक्शा, योसेफ आ डोंइती खुम्की पा बाप्शा, सेउ पामे बाक्त। 7 मिनू योसेफमी आ लोक्ब आन कली तशा, तुइक्ता बाक्त। तन्न मतुइशो खोदॅशो पा ठेयब सॅदामी “ते रे जाक्नी?” दे हिल्लो पामी बाक्त। मिनू मेकोपुकीमी “गो कनान रागी रे अन्न ग्याथ जाक्तक” दॅमा बाक्त। 8 योसेफम आ लोक्ब आन कली तुइक्ता बाक्त। मेकोपुकीमी चहिं योसेफ कली मतुइक्ते बाक्त। 9 मिनू योसेफम आ लोक्ब आन पर्वम आ डोमु मिम्ता बाक्त। मिनू मेको आन कली “गे क्यारी पाइब बाक्नीनी। एको रागीम ते रे ओव्रचा, दे कोव्रथ जाक्तीनी” दे आ लोक्ब आन कली माइक्मी बाक्त। *उत्पत्ती ३७:५-९* 10 मिनू मेकोपुकीमी “ममाइ प्रभु, इन गेय पाइब अन्न ग्याथ जाक्तक। 11 गो नेल्ल मुर का आ तौ नकी। गोपुकी ठीक पाइब बाक्नीकी। इन गेय पाइब, गो क्यारी पाइब मनकी” दॅमा बाक्त। 12 मिनू योसेफमी “ममाइ, गे एको रागी ‘दोपा ओव्रचा’ दे कोव्रथ जाक्तीनी” दॅमाक्त। 13 मिनू मेकोपुकीमी “गो इन गेय पाइब १२ जना लोक्ब बाक्नीकी। कनान रागी डा मुर का आ तौ नकी। नेनीन, कान्छा मुल आ आफ नु बाक्ब। का चहिं मबाक्ब” दे योसेफ कली मदमे बाक्त। 14 मिनू योसेफमी “आं दॅशो खोदॅशो पा, गे क्यारी पाइब बाक्नीनी। 15 गो इन कली कोव्रनुड, फाराओ आ नॅमी इन लोक्ब कान्छा मजाक्म सम्म गे एकेर रे लचा मताइनीनी। 16 इन दाते डा का कली इन लोक्ब कान्छा ब्रथ सोइक्तीन। मेना सम्म गे एक जेल्खानम बाक्नीनी। इन लोव्र थमा बाक्म कों, जोल बाक्म कों, नोले तुंइसीब। गे इन लोक्ब कान्छा मचाक्तीनी हना, फाराओ आ नॅमी गे क्यारी पाइब बाक्नीनी” दॅमाक्त। 17 मेको नेल्ल आन कली नाक्त सां सम्म जेल्खानम चोक्मी बाक्त। *उत्पत्ती ३७:२४*

18 मिनू नाक्त सां नोले योसेफमी “गो परमप्रभु कली मान पा हिंनुड। मोपतीके गेपुकी ब्रोंइचा कली आं दॅशो पने। 19 गे ठीक पाइब मुर बाक्तीनी हना, इन दाते डा का चहिं जेल्खानम बाक्तीने। अर्को अन्न कुरशा, इन खिं लने। 20 इन लोक्ब कान्छा कली एक चाक्कीन। मिनू इन लोव्र थमा बाक्ब, दे तुंइसीब। मिनू गे बेक्वा ममाल्नीनी” दे आ लोक्ब आन कली माइक्मी बाक्त। मिनू आ दॅशो पामे बाक्त।

21 मेकोपुकीमी “गो थमा पा इ लोक्ब आ पर्वम ठेयब पाप पाइतय। मेकोमी इ कली तशा, शुश हिंशा, पुनानु यो, मेको आ लोव्र मनंय। मोपतीके इ कली एको श्येत दुम्त” दॅमुमा बाक्त। *भजन संग्रह ५०:२१* 22 मिनू रूबेनमी “मेको आल कली मारेइ पाप मपने, दे गो इन कली मर्दंडा डा? तन्न गे आं लोव्र मनंनी। मेको कली श्येत गेशो हुश आ क्येक्क लेत्चा पुंइसाक्च” दे आ लोक्ब आन कली दॅमाक्त। *उत्पत्ती ३७:२१-२२* 23 मिनू योसेफमी मेको आन लोव्र नेल्ल रुत्तु, दे मतुइक्तेम बाक्त। मारदे हना योसेफमी मेकोपुकी नु लोव्र पवानु, आन लोव्र रुक्ब नु आ कली आ अर्थ दॅब मुर का वोदा बाक्त। 24 मिनू योसेफ आ लोक्बपुकी रे लशा डाक्माक्त। मिनू लेशा जाक्शा, मेकोपुकी नु लोव्र पशा, मेको आन डोंइती सिमियोन कली पाइक्ता बाक्त। 25 मिनू नोले योसेफमी आन धोक्रोम अन्न प्रिपाइशा, आन गेशो क्येट यो लॅशा, आन धोक्रोम कुर पपाइशा, लां कली जचा थोव्रक यो गेपाइक्मी बाक्त। आ लोक्ब आन कली मोदॅशो पाइक्मी बाक्त।

26 मिनु मेकोपुकी अन्न आन गधा तारी वोइश्शा लमा बाक्त। 27 मिनु लांमी बास बाक्मानु, आन दाते डा कामी आ गधा कली थुल्चा, दे आ धोक्रो रोक्गा बाक्त। मिनु आ धोक्रो आ शोत्रमी आ थाप्शो क्येट थिदा बाक्त। 28 मिनु मेकोमी आ लोकब आन कली “आं क्येट लेत्मे देय मार में? आं धोक्रो आ शोत्रम बाक्त, शां” दे लोत्र पवा बाक्त। मिनु नेल्लेमी सुर्ता पशा “परमप्रभुमी इं कली मार पवा” दे हिंमा बाक्त।

29 मेकोपुकीमी आन आफ याकूब आ खिं कनान रागी जाक्दीश्शा, मार मार दुम्मे, नेल्ल शोत्रडमे बाक्त। 30 मेकोपुकीमी “मेको रागी डा ठेयब मुरुम आंइ कली ठेयब सेंदामी लोत्र पशा, आंइ कली आन रागी क्यारी पाइब सुइक्त्तु। 31 गोपुकीमी ‘गो ठीक पाइब बाक्नीकी, गो क्यारी पाइब मनकी। 32 गो १२ लोकब, आफ का आ तौ नकी। का मुल मबाक्ब, कान्छा कनान रागीम आफ नु बाक्ब’ दे माइक्त्तक। 33 मिनु मेको रागी डा ठेयब मुरुम आंइ कली ‘गो दोपा तुइक्नुडा, गे ठीक मुर बाक्नीनी, दे इन लोकब का गो नु बाक्चा माल्ब। अरु चहिं अन्कालम जचा कली अन्न कुरशा, खिं लेशशा लने। उत्पत्ती ४२:२४ 34 मिनु इन लोकब कान्छा कली एक चाक्कीन। मेको नोले ला गेपुकी क्यारी पाइब मननी, दे तुइक्नुडा। मेना इन लोकब कली प्रोइशा, लचा गेनुड’ दे माइक्तीकी” दे आन आफ कली देंमा बाक्त।

35 मिनु नोले आन धोक्रो रोक्शा, नेल्लेमी आन थाप्शो क्येट आन धोक्रोमी थित्मे बाक्त। मिनु मेकोपुकी नु आन आफ मेको क्येट तशा, हिंमा बाक्त। 36 मिनु आन आफ याकूबमी “गे आं आल कली रोइक्ब बाक्नीनी। योसेफ लत। सिमियोन लत। मुल बेन्यामीन लाइक्चा माल्नीनी। एको नेल्ल आं कली श्येत गेचा कली बाक्ब” दे आ तौ आन कली देंमाक्त्त। 37 मिनु रूबेनमी “गो बेन्यामीन ठीक पा मलेत्ताक्ड हना, आं तौ निक्शी आस कली सतीन” दे आ आफ कली मदा बाक्त। 38 मेकोमी “आं तौ गे नु लचा मगेनुड। आ लोकब बेक्त, आ का ला बाक्ब। मेको कली लांमी मार मार दुम्मे चाप्ब। बेक्त हना, गेपुकीमी चां बोइश्शो आं कली ठेयब श्येत जपाइश्शा तुरसुम वोइक्चा माल्नीनी” दे याकूबम आ तौ आन कली माइक्मी बाक्त।

याकूब आ तौपुकी लेंशा इजीप्त लशो

43 मिनु मेको रागीमी अन्काल बारना बारन लमाक्त्त। 2 मिनु आन इजीप्त रे चाक्शो अन्न नेल्ल नुष्शा, आन आफोमी मेको आन कली “लेंशा इक्का जचा थोत्रक ग्याप्थ लने” दे माइक्मी बाक्त। 3 मिनु यहूदामी “मेको ठेयब मुरुमी ‘गे इन लोकब कान्छा मचाक्तीनी हना, आं कली गुथ्थ मजाक्कीन’ दे आंइ कली हुइक्ताक्व। उत्पत्ती ४२:१५-३४ 4 गे आंइ लोकब कान्छा कली गोपुकी नु सोइक्ताक्नी हना, ला लाइनीकी। 5 गे मेको कली गो नु मसोइक्ताक्नी हना, मलाइनीकी। मारदे हना मेको ठेयब मुरुमी ‘गे इन लोकब कान्छा मचाक्तीनी हना, आं कली गुथ्थ मजाक्कीन’ दे आंइ कली हुइक्ताक्व” दे आ आफ कली देंमाक्त्त। 6 मिनु इस्राएलमी “मारदे मेको मुर कली ‘आंइ लोकब कान्छा बाक्ब’ दे शेंदीनी? मिनु आं कली ओदेशो मरिश्शो पाइय्थीनी” दे माइक्मी बाक्त। 7 मिनु मेकोपुकीमी “मेको ठेयब मुरुमी ‘इन आफ मुल सम्म ब्रोंइशो बाक्बा? अर्को लोकब यो बाक्बा?’ दे आंइ कली खिं डा मुर आन पर्बम शुश हिल्लो पाप्तु। मिनु गोपुकीमी मेकोन देंतक। ‘इन लोकब कान्छा चाक्कीन’ देंब, दे गो दोपा तुइक्नीकी?” दे आन आफ कली देंमा बाक्त। उत्पत्ती ४२:७-१३ 8 मिनु यहूदामी “कान्छा गो नु सोइक्तीन। गे गो नु इं आइक्च आल यो मबेक्मल, दे गो लाइनीकी। 9 गो एको आ जमानी दुम्नुड। गो लेशशा जाक्डानु, गो एको कली चाक्शा, इन डॉइती मवोइक्ता हना, गेना हना यो आं पाप लील। 10 गो एको कली रिश्शा मबाक्शो नकी हना, गो खेयप निक्शी लने पिने थुम्क वा” दे आ आफ कली देंमाक्त्त।

11 मिनु आन आफ इस्राएलमी “मुल मो दुम्चा माल्शो बाक्त हना, गे मेको ठेयब मुर कली इं रागी डा नेल्ल क्येडा रिश्शो फल, इक्का खेक्तीक तेल, इक्का खुदो, मस्लापुकी, ब्रोत्रशो रिना पाइब थोत्रक, फोरो नु देसी बदाम कोसेली लतीन। हिलोपदेस १८:१६ 12 मिनु इन क्येट नु डॉइती डा इन धोक्रोम बाक्शो क्येट यो लतीन। प्रेंशा मो दुम, को? मार दुम्मे? उत्पत्ती ४२:२७, ३५ 13 इन लोकब कान्छा लाइश्शा, मेको ठेयब मुर कली लेंशा गुथ्थ

लने। 14 नेल्ल क्येडा सक्ति पाइश्शो परमप्रभुमी मेको मुर आ डॉइती इन कली शिशी गेवल। मिनु इन अर्को लोकब नु बेन्यामीन यो सोइक्त्तल। गो श्येत जचान माल्शो बाक्ती हना यो, श्येत जडल” दे आ तौ आन कली माइक्मी बाक्त। 15 मिनु आ तौपुकीमी मेको कोसेली, डॉइती डा क्येट, अर्को क्येट नु बेन्यामीन लाइश्शा, इजीप्त रागी लशा, योसेफ आ डॉइती जाक्दीम्मा बाक्त।

16 मिनु योसेफमी मेकोपुकी नु बेन्यामीन कली तशा, आ खिं डा ठेयब गेय पाइब मुर कली “मेको मुर आन कली आं खिं लाइक्मी। बस्तु का क्योरशा, भोज ठीक पावो। मारदे हना मुलाक्ती मेकोपुकी गो नु जाइनीम” देंमाक्त्त। 17 मिनु मेको मुरुम योसेफ आ देंशो पशा, नेल्ल आन कली योसेफ आ खिं ऑइदीमी बाक्त। 18 मेकोपुकी चहिं हिंमा बाक्त, मारदे हना योसेफ आ खिं आगा ऑइदीमी बाक्त। मिनु मेकोपुकीमी “मारदे हना इं डॉइती डा क्येट इं धोक्रोम थित्तय। मिनु इं कली वाइल सेल्चा नु इं गधा रोइक्चा कली इं कली एके ऑइताक्मे” देंमुमा बाक्त। उत्पत्ती ४२:२८ 19 मिनु योसेफ आ खिं डा ठेयब गेय पाइब आ नेक्था लशा, लाप्चो रे मेको नु लोत्र पामे बाक्त। 20 मिनु “हजुर, गोपुकी डॉइती खेयप का जचा थोत्रक ग्याप्थ जाक्त्तक। 21 मिनु गोपुकी बास बाक्तीके जाक्दीश्शा, आंइ धोक्रो रोक्शा, कोत्रकानु, आंइ क्येट नेल्ल आंइ धोक्रो धोक्रोम थित्तक। 22 मुल गो लेंशा चाक्त्तक। अर्को जचा थोत्रक ग्याप्चा कली यो क्येट चाक्त्तक। सुम आंइ क्येट आंइ धोक्रोम कुर पवा, गो मत्तुइक्नीकी” दे ठेयब गेय पाइब कली देंमा बाक्त। 23 मिनु मेकोमी “इन थुं नाइक्तीने, महिनीने। इन परमप्रभु, इन आफ आ परमप्रभुमी इन क्येट इन धोक्रोम कुर पवा माइ। गो इन क्येट ताक्ता” देंमाक्त्त। मिनु मेकोमी सिमियोन कली चाक्गा बाक्त। उत्पत्ती ४२:२४ 24 मिनु मेको मुरुम मेको आन कली योसेफ आ खिं ऑइशा, खोइल चिक्चा कली ब्वाक्कु गेवा बाक्त। आन गधा आन कली थुला बाक्त। 25 मिनु नाक्ती दुम्चा चिक्त्तानु, मेको नु काथा जचा माल्ब देंशो नेंशा, आन कोसेली गेचा कली ठीक पामे बाक्त।

26 मिनु योसेफ जाक्मेनु, मेकोपुकीमी आन कोसेली लाडगा रे ऑइशा, मेको आ डॉइती वोइश्शा, खुम्की पा बाप्शा खेत्मे बाक्त। 27 मिनु योसेफमी मेको आन कली “दोपा बाक्नी? इन आफ, इन देंशो खाल्पा, रिश्शो बाक्मे? मुल सम्म ब्रोंइमे?” दे हिल्लो पामी बाक्त। 28 मिनु मेकोपुकीमी “इन गेय पाइब आंइ आफ मुल सम्म ब्रोंइशो नु रिश्शो बाक्ब” देंशा, आन पिया खुक्शा, सेउ पामे बाक्त। उत्पत्ती ३७:७, ९ 29 मिनु योसेफमी आ लोकब बेन्यामीन, आ ममा आ तौ तशा “इन देंशो इन लोकब कान्छा एकोन बाक्बा?” देंशा, बेन्यामीन कली “परमप्रभुमी इ कली शिशी पवल, आं तौ” देंमाक्त्त। 30 मिनु योसेफमी आ लोकब तशा, ग्येरसीशा डाक्चा कली ते लड, दे आ कोठा लशा डाक्माक्त्त। 31 मिनु आ कुल चिक्शा, लेम्माक्त्त। मिनु गेय पाइब आन कली “शोब्ले खेत्तीन” देंमाक्त्त। 32 मिनु योसेफ, आ लोकब नु मेको नु जाइब इजीप्त डा मुर नेल्ल आन कली आन पेवा पेवा जचा थोत्रक खेत्मे बाक्त। मारदे हना इजीप्त डा मुर हिब्रू नु जचा मद्मुम्बाक्माक्त्त। इजीप्त डा मुरपुकी ग्रॉग्रा दीबाक्मा बाक्त। उत्पत्ती ३९:६; उत्पत्ती ४६:३४; प्रस्थान ८:२२ 33 मिनु योसेफमी आ लोकब आन कली डॉइती जरमेशो, माइला, साइला पा कान्छा सम्म गार पा निप्पदा बाक्त। मिनु मेकोपुकी छक लाक्मा बाक्त। 34 मिनु योसेफ आ डॉइती रे जचा ब्बचा थोत्रक लाइश्शा, मेको आन कली खेप्पदा बाक्त। बेन्यामीन आ भाग अरु आन क्येडा ५ भाग खोइ शुश बाक्माक्त्त। मिनु मेकोपुकी योसेफ नु जशा तूशा, ग्येरशा बाक्मा बाक्त।

योसेफ नु आ लोकबपुकी

44 मिनु योसेफमी आ खिं डा ठेयब गेय पाइब कली “मेको मुर आन धोक्रो प्रिंपतो। गिश कुरने चाप्नीमी, मिश प्रिंपतो। मिनु आन क्येट अन्न आ शोत्रम वोतो। 2 मिनु आं चांदी के कचौरा, आ क्येट नु मेको नेल्ल क्येडा ठिटा आ धोक्रो आ शोत्रम वोतो” दे मदा बाक्त। मिनु मेकोमी योसेफ आ देंशो खोदेशो पा पवा बाक्त। 3 मिनु सुनी कना रिश्शो पा नां मसोत्रथु, मेको मुर नु आन गधा आन कली लचा गेमे बाक्त। 4 मिनु सहर रे लमानु, योसेफम आ ठेयब गेय पाइब कली “बोक्को, मेको आन नोले खोतो। मिनु

मेको आन कली थिश्शा 'मारदे गे रिश्शो पाइब कली मरिश्शो पनी? 5 मारदे आं प्रभु आ मार मार तूतीक नु लिक्यु कोव्रतीक चांदी के कचौरा खुइ पनी? गे मरिश्शो पाइतीनी' दे माइक्मी" दे मदा बाक्त। 6 मिनु मेको आन कली थिश्शा, मोर्देशो लोव्र पवा बाक्त। 7 मिनु मेकोपुकीमी "आंइ प्रभुम मारदे मोर्देशो लोव्र पाइबा? गो मो मपक। 8 नेनीन, आंइ धोक्रोमी थिश्शो क्येट कनान रागी रे लेंशा चाक्तक। गो दोपा इन प्रभु आ खिं रे सुन चांदी खुइ पाइनीकी? उत्पत्ती ४३:२१ 9 गो इन गेय पाइब सु नु मेको कचौरा बाक्मे, मेको बेक्ल। मिनु गोपुकी यो इन वाइल दुम्कल" दे मदमे बाक्त। 10 मिनु मेकोमी "इन देंशो खोर्देशो दुम्कल। सु आ धोक्रोम थिंसीबा, मेको आं वाइल दुम्ब। अरु मो लाइनीनी" देंमाक्त। 11 मिनु नोले मेकोपुकीमी रीब रीब पा आन धोक्रो गधा रे शोल्शा, रोकशा कोव्रडमे बाक्त। 12 मिनु मेकोमी डोंइती जरमेशो आ धोक्रोमी, नोले नेल्ल आन धोक्रोमी का का पा माल्शा, कान्छा ला लीमाक्त। मिनु कचौरा बेन्यामीन आ धोक्रोमी थिदा बाक्त। 13 मिनु मेकोपुकीमी आन वा खाक्शा, आन अन्न लेंशा गधा तार वोइश्शा, सहर लेम्मा बाक्त।

14 मिनु यहूदा नु आ लोक्बपुकी योसेफ आ खिं जाक्मानु, योसेफ मेक उइ बाक्माक्त। मेको आ डोंइती खुम्की पा बाम्मा बाक्त। 15 योसेफम मेको आन कली "गे मार पनी? आं खोर्देशो मुरुम नेल्ल तुइक्ब, दे मतुइक्तीनी?" दे मेको आन कली हुइक्ता बाक्त। 16 मिनु यहूदामी "आंइ प्रभु कली मार देंनीकी? मार लोव्र पाइनीकी? गोपुकी 'ठीक मुर बाक्नीकी' दे दोपा देंने चाप्नीकी? परमप्रभुमी इन गेय पाइब आन मरिश्शो कोंइताक्व। नेनीन, गोपुकी नु कचौरा धोक्रोम बाक्ब, गो नेल्ल आंइ प्रभु इन वाइल दुम्कल" देंमाक्त। उत्पत्ती ४२:२१-२२ 17 मिनु योसेफमी "ममाइ, मेको मपाइनुड। तन्न सु मुर नु आं कचौरा बाक्मे, मेको ला आं वाइल दुम्चा माल्ब। गोपुकी चहिं थुं नाइश्शा, इन आफ आ बाक्तीक लने" देंमाक्त।

18 मिनु यहूदा मेको आ नेक्था लशा "आं प्रभु, लोव्र का पचा गेयीनी। इन गेय पाइब आ परबम मगाइक्तीने। गे फाराओ खोर्देशो बाक्नीनी। 19 आं प्रभुमी डोंइती आ गेय पाइब आन कली 'इन के आफ बाक्बा? अर्को लोक्ब यो बाक्बा?' दे हिल्लो पाइतीनी। उत्पत्ती ४२:७,१३; उत्पत्ती ४३:७ 20 मिनु गोपुकीमी आंइ प्रभु कली 'आंइ के आफ खाल्पा दुम्शो बाक्ब। मिनु खाल्पाम थिश्शो तौ का यो बाक्ब। मेको आ लोक्ब चहिं बेक्त। मेको लीशो आ ममा आ का ला तौ बाक्ब। मिनु आ आफोमी मेको कली शुश दाक्ब' दे इन कली देंतक। 21 मिनु गेमी 'आं कली कोंइचा कली मेको एक चाक्कीन' देंतीनी। 22 गोपुकीमी आंइ प्रभु कली 'मेको वोंइश आलमी आ आफ कली प्रोंइने मचाप्ब। प्रोंइतु हना, आ आफ बेक्ब' देंतक। 23 मिनु गेमी इन गेय पाइब आन कली 'इन लोक्ब कान्छा मचाक्तीनी हना, गे आं कली गुम्थ मपिने' देंतीनी। उत्पत्ती ४२:१५; उत्पत्ती ४३:३-५ 24 गोपुकी आंइ आफ इन गेय पाइब आ बाक्तीके जाक्दीश्शा, इन लोव्र नेल्ल माइक्तक। 25 आंइ आफोमी 'लेंशा जचा थोव्रक ग्याप्थ लने' देंत। 26 मिनु गोपुकीमी 'आंइ लोक्ब कान्छा मलाइक्तक हना, गो लने मचाप्नीकी। मारदे हना आंइ कान्छा भाइ गोपुकी नु मलत हना, गुम्चा मटुम्ब' देंतक। 27 मिनु इन गेय पाइब आंइ आफोम आंइ कली 'आं मीशेम तौ निक्शी थिप्तु, गे तुइक्तीनी। 28 का आं बाक्तीक रे लत। जन्तुमी मेको कली ब्वाक्मे। गो मेको कली लेंशा मतड। उत्पत्ती ३७:३२-३३ 29 मिनु गे एको कली यो लाइक्तीनी हना, लांम बेक्बा कों, बेक्त हना, गे आं बोइश्शो चां श्येतम प्रिशा, तुरसुम वोइक्चा माल्नीनी' दे लोव्र पाप्तु। उत्पत्ती ४२:३८ 30 मिनु गो इन गेय पाइब आंइ आफ आ बाक्तीक जाक्दीकानु, एको वोंइश आल, आ आफ आ थुं नेल्लेमी दाक्ब। मोपतीके गोपुकी नु मबाक्त हना, 31 मेको तशा, आ आफ बेक्ब। मिनु गोपुकीमी आंइ आफ, चां बोइश्शो इन गेय पाइब कली सुर्ता पपाइश्शा, श्येत जपाइश्शा तुरसुम वोइक्चा माल्नीकी। 32 गो मेको आ जमानी बाक्शो बाक्नुड। गो आफ कली 'मेको आल मचाक्ता हना, आं मरिश्शो पशो गेना हना यो आं तारी लील' देंती। उत्पत्ती ४३:९ 33 मोपतीके एको वोंइश आल ममाइ, आं प्रभु, आं कली इन वाइल वोतीन। एको वोंइश आल आ लोक्बपुकी नु लचा गेने। 34 गो आं आफ आ डोंइती एको वोंइश आल मलाइक्थु, दोपा लने चाप्नुडा? आं आफ आ श्येत तशा, गो यो फाल्ने मचाप्नुड" दे यहूदामी योसेफ कली देंमाक्त।

### योसेफमी तुइक्पाइसीशो

45 मिनु नोले योसेफमी आ मुर नेल्ल आन डोंइती फाल्ने मचबा बाक्त। मिनु "आं गेय पाइब नेल्ल एकेर रे लने" दे सोइक्पदा बाक्त। मिनु योसेफमी आंम कली आ लोक्ब आन कली तुइक्पदानु, कोठामी सुइ मबाक्शो बाक्मा बाक्त। 2 मिनु ठेयब सेंदामी डाक्मेनु, फाराओ आ खिंम बाक्ब इजीप्त डा मुर नेल्लेम नेन्मे बाक्त। 3 मिनु योसेफमी आ लोक्ब आन कली "गो योसेफ नड। आं आफ मुल सम्म ब्रोंइमे?" देंमाक्त। आ लोक्बपुकीमी लोव्र लेन्ने मचाप्मे बाक्त। मारदे हना शुश हिंमा बाक्त। 4 मिनु योसेफमी आ लोक्ब आन कली "आं नेक्था पिने" देंमाक्त। मिनु मेकोपुकी आ नेक्था जाक्मा बाक्त। मिनु योसेफमी "गो इन इजीप्त रागीम लेयशो लोक्ब योसेफ नड। 5 गे आं कली लेयशो आ परबम सुर्ता मपने। आंम कली दोस मगेने। मारदे हना परमप्रभुमी आं कली नेल्ल ब्रोंइमल, दे इन डोंइती सोइश्शो बाक्त। उत्पत्ती ५०:२० 6 एको अन्काल मुल बर्स निक्शी दुम्त। मिनु मुल ५ बर्स सम्म तेइ वाक्शो नु रिक्शो मताइसीब। 7 परमप्रभुमी आं कली गोपुकी ब्रोंइनील। रागीम जात का लीनील। इन परबम शुश ब्रोंइमल, दे इन क्येडा डोंइती एक सोइक्ताक्यी। एको ठेयब श्येत रे प्रोंइतीके बाक्ब। 8 मोपतीके गोपुकीमी आं कली एक सोइश्शो ममाइ, परमप्रभुमी सोइश्शो बाक्त। मेकोमी आं कली फाराओ आ आफ खोर्देशो सेल्शा, आ खिं डा होव्रप नु इजीप्त रागी नेल्ल डा हुकुम पाइब सेल्ती। 9 गोपुकी मुल रीब पा इं आफ आ बाक्तीके लने। मिनु मेको कली 'परमप्रभुमी इन तौ योसेफ कली इजीप्त रागी नेल्ल डा ठेयब मुर सेला बाक्त। एक यिचा मरिम्दीन। 10 आं नेक्था बाक्चा कली गे, इन आल, इन चच, इन क्यारश भेडा, बी ब्यफ नु मारेइ मारेइ नेल्ल चाक्शा, गोशेन माइक्तीकेमी जाक्चा माल्नीनी। 11 आं नेक्था बाक्कीन। गो इन कली थुल्लुड। मारदे हना अन्काल मुल ५ बर्स सम्म दुम्ब। गे मयीतीनी हना, गे, इन खिं डा मुर नु गोपुकी नु बाक्ब नेल्ल शुश प्रुडग दुम्नीनी" देंत, दे इं आफ कली माइक्चा माल्नीनी। 12 मिनु गोपुकी नु आं लोक्ब बेन्यामीनम तशो 'गो योसेफ नड। गो इन कली लोव्र पाता' दे तुइक्तीनी। 13 गो इजीप्त रागीमी गिश् रिश्शो बाक्डा, इन तशो नेल्ल, गोपुकीमी इं आफ कली देंचा माल्नीनी। रीब पा इं आफ कली एक चाक्कीन" दे आ लोक्ब आन कली माइक्मी बाक्त। 14 मिनु आ लोक्ब बेन्यामीन कली मुप्शा डाक्माक्त। मिनु बेन्यामीन यो डाक्माक्त। 15 मिनु नोले आ लोक्ब नेल्ल आन कली मुप्शा, पुक्पु पाइश्शा डाक्माक्त। मिनु नोले आ लोक्बपुकीमी लोव्र पचा गोव्रमे बाक्त।

16 मिनु "योसेफ आ लोक्बपुकी जाक्तेक्म" देंशो लोव्र फाराओ आ खिंम यो जाक्दीम्माक्त। मिनु फाराओ नु आ गेय पाइब नेल्ल ग्येरसमा बाक्त। 17 मिनु फाराओमी योसेफ कली "गेमी इन लोक्ब आन कली 'इन गधापुकीमी अन्न कुरपाइश्शा, कनान रागी लने। 18 मिनु इन आफ नु इन खिं डा मुर नेल्ल आं नेक्था जाक्कीन। गो इजीप्त रागी डा नेल्ल क्येडा रिश्शो रू इन कली गेनुड। मिनु गे रागी डा नेल्ल क्येडा ब्रोंइशो जचा ताइनीनी" दे माइक्चा माल्नीनी। 19 इन कली अरेशो एकोन बाक्ब। इन आइक्च आल नु इन मीश आन कली डोइक्चा कली इजीप्त रागी रे बगीपुकी लतीन। इन आफ चाक्कीन। 20 'इन मारेइ मारेइ ममिम्तीन। मारदे हना इजीप्त डा रिश्शो नेल्ल इन के बाक्ब' दे माइक्मी" दे योसेफ कली मदा बाक्त।

21 मिनु इस्राएल आ तौपुकीमी योसेफ आ देंशो पामे बाक्त। मिनु फाराओम मार देंमे मेको पा, योसेफमी मेको आन कली बगी नु लां कली लाम्जी गेवा बाक्त। 22 मेको आन कली जोड का का फेक्तीक नक वा गेवा बाक्त। बेन्यामीन कली चहिं सहे सां चांदी के शेकेल नु ५ जोड फेक्तीक वा गेवा बाक्त। 23 मिनु आ आफ कली १० ओटा गधैनीमी इजीप्त रागी डा नेल्ल क्येडा ब्रोंइशो जचा थोव्रक नु लांम जचा कली १० ओटा गधाम अन्न, शोब्ले नु श्ये कुर पा सोइक्ता बाक्त। 24 मिनु लचा डोंइती मेको आन कली "लांमी मजिने" दे अरेवा बाक्त। उत्पत्ती ४२:२२

25 मिनु मेकोपुकी इजीप्त रागी रे पा कनान रागी आन आफ याक्ब आ बाक्तीके जाक्दीम्मा बाक्त। 26 मिनु आन आफ कली "योसेफ मुल यो

ब्रॉइशो बाक्त। इजीप्त रागीम हुकुम पाइब मेको बाक्माक्त" दे लोव्र पामे बाक्त। याकूबम चहिं आन दॅशो थमा मसुदा बाक्त। 27 मिनू मेकोपुकीमी योसेफ आ लोव्र नेल्ल शोव्रडमे बाक्त। मिनू याकूबम आ कली डोइक्चा, दे योसेफमी सोइश्शो बग्गी तशा, आ थुं लेत्ता बाक्त। 28 मिनू इस्राएलमी "आं तौ योसेफ ब्रॉइशो थमा बाक्ब। आं बेक्चा क्येडा डोंइती मेको आ कुल कोव्रनुड" देंमाक्त। उत्पत्ती ४६:३०

याकूब इजीप्त लशो

46 मिनू इस्राएल नु आ खिं डा मुर नेल्ल इजीप्त गे लमा बाक्त। मिनू बेयर-शेबा जाक्दीश्शा, आ आफ इसहाक आ परमप्रभु कली चढेवा बाक्त। उत्पत्ती २६:२३-२५ 2 मिनू मेको नाक्दो परमप्रभुमी इस्राएल कली "याकूब, याकूब" देंमाक्त। मिनू इस्राएलमी "गो नेंता" दे लोव्र लेत्ता बाक्त। 3 मिनू परमप्रभुमी "गो परमप्रभु, इ आफ आ परमप्रभु नड। इजीप्त लचा महिनो। मारदे हना गे उड बाक्डेनु, इ रे पा ठेयब जात सेल्लनुड। उत्पत्ती ४७:२७; प्रस्थान १:७ 4 गो गे नु इजीप्त रागी लाइनुड। मिनू इ कली थमा पा लेप्पाइक्नुड। बेक्शा नोले योसेफमी इ मिक्च खेक्च" दे परमप्रभुमी देंमाक्त। 5 मिनू याकूब बेयर-शेबा रे लमाक्त। मिनू इस्राएल आ तौपुकीमी आन आफ, आन आइक्च आल नु आन मीश फाराओमी सोइश्शो बग्गीम डोइक्पदमे बाक्त। 6 मिनू आन बस्तु भाव, कनान रागीम आन चाक्शो मारेड मारेड नु याकूब नु आ मुर नेल्ल इजीप्त रागी जाक्दीम्मा बाक्त। 7 याकूबमी आ तौपुकी नु मेको आन तौपुकी, आ तमीपुकी नु आ तौ आन तमीपुकी नु चच युइ नेल्ल इजीप्त रागी चाक्दीम्मी बाक्त।

याकूब आ तौ नु चच युइ

8 मिनू इजीप्त रागीम जाक्दीश्शो इस्राएल आ आल आन नें एको बाक्नीमी। आ डोंइती जरमेशो तौ रूबेन बाक्माक्त। प्रस्थान ६:१४-१६ 9 रूबेन आ तौपुकी हनोक, फल्लु, हेस्रोन नु कारमी बाक्मा बाक्त। 10 सिमियोन आ तौपुकी येमुएल, यामीन, ओहद, याकीन नु सोहार, कनान डा मीश रे जरमेशो शावल, नेल्ल सिमियोन आ तौ बाक्मा बाक्त। 11 लेवी आ तौपुकी गेरशोन, कोहाथ नु मेरारी बाक्मा बाक्त। 12 यहूदा आ तौपुकी एर, ओनान, शेलाह, पेरेस नु जेराह बाक्मा बाक्त। एर नु ओनान चहिं कनान रागीम बेक्सा बाक्त। पेरेस आ तौ हेस्रोन नु हामुल बाक्सा बाक्त। उत्पत्ती ३८:३,४,२९,३० 13 इस्राएल आ तौपुकी तोला, पुवा याशुब नु शिम्रोन बाक्मा बाक्त। 14 जबूलून आ तौपुकी सेरेद, एलोन नु याहलेल बाक्मा बाक्त। 15 मेको नेल्ल लेआमी याकूब के पदान-अराममी थिशो तौ बाक्मा बाक्त। आ तमी दीना यो बाक्माक्त। याकूब नु आ तमी तौ नेल्ल पा ३३ जना बाक्मा बाक्त।

16 मिनू गाद आ तौपुकी सिफ्योन, हाग्गी, शुनी, एस्बोन, एरी, अरोदी नु अरेली बाक्मा बाक्त। 17 आशेर आ तौपुकी इम्नाह, इश्वाह, इश्वी, बेरीआ नु आ तमी सेराह बाक्मा बाक्त। मिनू बेरीआ आ तौ निकशी हेबेर नु माल्कीएल बाक्सा बाक्त। 18 मिनू लाबान आ तमी लेआ कली गेशो गेय पाइब जिल्पाम याकूब के थिशो तौपुकी बाक्मा बाक्त। मेको १६ जना बाक्मा बाक्त। उत्पत्ती २९:२४

19 मिनू याकूब आ मीश राहेल आ तौ योसेफ नु बेन्यामीन बाक्सा बाक्त। 20 योसेफमी इजीप्त रागीमी मनस्से नु एफ्राइम थिमाक्त। आ मीश ओन सहर डा नाक्सो पोतीफेरा आ तमी आसेनाथ बाक्माक्त। 21 बेन्यामीन आ तौपुकी बेला, बेकेर, अशबेल, गेरा, नामान, एही, रोश, मुप्पीम, हुप्पीम नु आरद बाक्मा बाक्त। 22 मेको नेल्ल राहेल आ थिशो तौ बाक्मा बाक्त। मेको नेल्ल पा १४ जना बाक्मा बाक्त।

23 दान आ तौ हुशीम बाक्माक्त। 24 नाप्ताली आ तौपुकी याहसेल, गुनी, येसेर नु शिल्लेम बाक्मा बाक्त। 25 मेको लाबानमी आ तमी राहेल कली गेशो गेय पाइब बिल्हाहम याकूब के थिशो तौ बाक्मा बाक्त। मेको नेल्ल ७ जना बाक्मा बाक्त। उत्पत्ती २९:२९

26 मिनू याकूब आ चाइमीपुकी महिक्थु, याकूब नु इजीप्त रागी जाक्शो मुर नेल्ल पा ६६ जना बाक्मा बाक्त। 27 इजीप्त रागीमी योसेफमी तौ

निकशी थिमाक्त। मोपा इजीप्त रागीमी जाक्शो याकूब आ खिं डा मुर ७० जना बाक्मा बाक्त। याकूब नु योसेफ नु आ तौ निकशी यो हिकशो बाक्मा बाक्त।

याकूब नु योसेफ गुम्शो

28 मिनू याकूबमी यहूदा कली गोशेन लां शेंसीचा नु योसेफ गुम्चा, दे आन डोंइती गुम्थ सोइक्ता बाक्त। मिनू मेकोपुकी गोशेन माइक्तीके जाक्दीम्मानु, उत्पत्ती ४५:१० 29 योसेफ आंम बग्गी ठीक पा आ आफ इस्राएल कली गोशेनम गुम्थ जाक्माक्त। मिनू मेको कली गुम्शा, मुप्शा शुश डाक्सा बाक्त। 30 मिनू इस्राएलमी योसेफ कली "मुल गो बेक्ने चाप्नुड। मारदे हना गे ब्रॉइशो बाक्ते, गो इ कुल कोव्रचा ताता" दे आ तौ कली देंमाक्त। उत्पत्ती ४५:२८ 31 मिनू योसेफम आ लोक्ब नु आ आफ आ खिं डा मुर आन कली "गो फाराओ आ बाक्तीके लाइनुड। मिनू मेको कली 'कनान रागीम बाक्शो आं आफ, आं लोक्बपुकी नु आं आफ आ खिं डा मुर नेल्ल जाक्तेक्म। 32 मेकोपुकी भेडा गोठला नु बस्तु भाव थुल्ब बाक्नीम। मेको आन क्यारश भेडा, बी ब्यफ नु आन मारेड मारेड चाक्शो बाक्तेक्मे' देंनुड। 33 मिनू फाराओम इन कली ब्रेत्ताक्व हना, मिनू इन कली इन गेय आ पर्वम हिल्लो पाप्नु हना, 34 गेपुकीमी 'इन गेय पाइब आन आल रेन मुल सम्म बस्तु भाव थुल्ब बाक्नीम। आंइ किकी पिपी यो मोदेंशो गेय पशो बाक्मा बाक्त' देंचा माल्नीनी। नोले मेकोमी इन कली गोशेनमी बाक्तीके गेब। मारदे हना इजीप्त डा मुर गोठला आन कली तशा ग्रांरा दीनीम" दे योसेफमी आ लोक्ब आन कली देंमाक्त। उत्पत्ती ४३:३२

याकूब फाराओ आ डोंइती

47 मिनू नोले योसेफमी फाराओ कली "आं आफ, आं लोक्बपुकी, आन क्यारश भेडा, बी ब्यफ, आन मारेड मारेड नेल्ल कनान रागी रे चाक्शा, गोशेनमी जाक्शो बाक्नीमी" दे शेंदा बाक्त। 2 मिनू आ लोक्ब आन दाते रे ५ जना योव्रशा, फाराओ आ डोंइती राप्पदा बाक्त। 3 मिनू फाराओमी मेको आन कली "इन गेय मार बाक्बा?" दे हिल्लो पवा बाक्त। मिनू मेकोपुकीमी "गो, इन गेय पाइबपुकी, भेडा गोठला बाक्नीकी। गो आंइ किकी पिपी रे गोठला बाक्तेक्" दे फाराओ कली देंमा बाक्त। उत्पत्ती ४६:३३-३४ 4 मिनू लेंशा "कनान रागीमी ठेयब अन्काल दुम्तीके, गो अर्को रागी डा मुर दुम्शा, एक बाक्थ जाक्तेक्। मारदे हना आंइ क्यारश भेडा आन कली जोतीके मबा। मोपतीके आंइ कली गोशेन माइक्तीकेमी बाक्चा गेने, दे पुंडनीकी" दे पुंडदमे बाक्त। 5 मिनू फाराओम योसेफ कली "इ आफ नु इ लोक्बपुकी इ बाक्तीक रागी जाक्तेक्मे। 6 इजीप्त रागी इ रागी खोदेंशो मिम्तो। नेल्ल क्येडा रिम्शो जोतीके गोशेनमी मेको आन कली बाक्पतो। मिनू मेको इ मुर आन दातेमी रिम्शो गेय पाइब बाक्तेक्म हना, आं बस्तु भाव आन कली यो कोव्रपतो" दे मदा बाक्त।

7 मिनू नोले योसेफमी आ आफ कली फाराओ आ डोंइती राप्पदा बाक्त। मिनू याकूबमी फाराओ कली आसीक गेवा बाक्त। 8 मिनू फाराओमी "गिश बर्स दुम्नी?" दे हिल्लो पवा बाक्त। 9 मिनू याकूबमी "गो मुल सम्म रागीम बाक्शो, सहे का ३० बर्स दुम्ती। आं किकी पिपी खोदेंशो पा शुश बर्स मदुम्ड। गो मरिम्शो नाक्त यो ताता" देंमाक्त। हिब्रू ११:१३ 10 मिनू आसीक गेशा, फाराओ रे लमाक्त। 11 मिनू योसेफमी फाराओ आ देंशो खोदेंशो पा आ आफ नु आ लोक्ब आन कली इजीप्त रागीमी रू गेवा बाक्त। रागी डा नेल्ल क्येडा रिम्शो बाक्तीके रामेसेस आ रागी गोशेनमी बाक्पाइक्मी बाक्त। 12 मिनू योसेफम आ आफ, आ लोक्ब नु आ आफ आ खिं डा मुर नेल्ल आन कली आन खिं खिं कली गाप्चा डा पा जचा थोव्रक गेशा थुल्मी बाक्त। उत्पत्ती ४५:११

इजीप्त डा मुरपुकी प्रुडग दुम्शो

13 रागी नेल्लेमी जचा थोव्रक मधिदमे बाक्त। मारदे हना मेको अन्काल बारना बारन लमाक्त। मिनू इजीप्त नु कनान रागी डा मुर शुश श्येत जामे बाक्त। 14 मिनू योसेफमी इजीप्त नु कनान रागी डा अन्न ग्याथ जाक्ब



आन गुड रे क्येट ताक्शा, फाराओ आ खिमी वोदा बाक्त। 15 मिनु इजीप्त नु कनान डा मुर आन क्येट नुशा, योसेफ आ बाक्तीकेमी जाक्शा, मेकोपुकीमी “जचा थोवक गेकी। आंइ के क्येट नुप्त। गे जचा थोवक मगेतीनी हना, गो इन डॉइती बेक्चा माल्नीकी” दे मदमे बाक्त। 16 मिनु योसेफमी “इन के क्येट मबाक्त हना, इन बस्तु भाव चाक्कीन। मेको रे पा जचा थोवक ताइनीनी” देंमाक्त। 17 मिनु आन बस्तु भाव योसेफ आ बाक्तीके चाक्मे बाक्त। मिनु योसेफमी शारापुकी, क्यारश भेडा, बी ब्यफ, गधा ताक्शा, जचा थोवक गेमी बाक्त। मेको बर्समी मेको आन कली आन बस्तु भाव आन पा डा अन्न गेवा बाक्त। 18 मिनु मेको बर्स नुशा डा मिन, अर्को बर्स लेंशा जाक्शा योसेफ कली मेकोपुकीमी “गो आंइ प्रभु आ डॉइती आंइ क्येट नुप्त, आंइ क्यारश भेडा, बी ब्यफ नेल्ल आंइ प्रभु केन दुम्तेक्म। मुल आंइ के रूपुकी नु आंम रां ला लीब। 19 मारदे गो इन डॉइती बेक्नीकी? आंइ कली नु आंइ रू कली यो अन्न गेशा ग्यापीन। गोपुकी फाराओ आ वाइलीम वाइल दुम्नीकी। गोपुकी ब्रॉइचा नु आंइ रागीम मुरपुकी लीचा कली वांचेर गेने” देंमा बाक्त।

20 मिनु योसेफमी इजीप्त रागी नेल्ल फाराओ कली ग्यबा बाक्त। मारदे हना ठेयब अन्काल आ पर्वम इजीप्त डा मुरपुकीमी आन रू नेल्ल लेयडमे बाक्त। मिनु रू नेल्ल फाराओ के दुम्माक्त। 21 मुर नेल्ल आन कली वाइलीम वाइल सेल्शा, आन बाक्तीक रे याक्शा वोदा बाक्त। 22 नाक्सो आ रू चहिं मग्यबा बाक्त। मारदे हना आन जचा फाराओ आ गुड रे तामे बाक्त। मोपतीके आन रू यो लेयचा ममाल्मा बाक्त। गन्ती १८:२०; यहोसु १३:१४; इजीकीएल ४४:२८; इजीकीएल ४५:१-५ 23 मिनु योसेफम मुर आन कली “नेनीन, मुलाक्ती रे गोपुकी नु इन रू नेल्ल फाराओ के दुम्त। गो ग्याप्ता। एको वांचेर लाइशा, शोक्कीन। 24 मिनु रिक्वी ना ५ भाग डा भाग १ फाराओ कली गेचा माल्नीनी। अर्को ४ भाग वांचेर कली नु इन कली, इन खिं डा मुर नु आइक्च आल नेल्ल आन कली थुल्चा कली लीब” दे माइक्मी बाक्त। एफाह का २२ लिटर खोदेंशो बाक्ब। 25 मिनु मेकोपुकीमी “गे आंइ कली बेक्चा रे प्रॉइतीनी। गे आंइ कली थम रिम्शो पाइतीनी। गो फाराओ आ वाइल बाक्नीकी” देंमा बाक्त। 26 मिनु योसेफमी इजीप्त रागी डा ऐन कानुनमी “फाराओ कली ५ भाग डा भाग का गेचा माल्नीम। नाक्सोपुकीमी चहिं गेचा ममाल्नीम। मारदे हना आन रू फाराओ के मदुम” दे ब्रेक्पदा बाक्त। मेको मुल सम्म मोदेंशो बाक्ब।

27 मिनु इस्राएल इजीप्त रागी डा गोशेनमी बाक्मेनु, आन मारेइ मारेइ नु मुरपुकी सोशा बोशा, शुश दुम्मा बाक्त। उत्पत्ती ४६:३; प्रस्थान १:७, १२ 28 याकूब इजीप्त रागीमी १७ बर्स ब्रॉइमाक्त। मेको आ ब्रॉइतीक नेल्ल पा सहे का ४७ बर्स बाक्माक्त। 29 मिनु आ बेक्वी जाक्माक्त। मिनु आ तौ योसेफ कली ब्रेशा “गे आं कली शिशी पाप्तीवी हना, इ गुड आं फिला तार वोइशा, जोल मपथु, आं कली रिम्शो पावो। आं कली इजीप्त रागीम मथिम्पी, दे पुंडुड। उत्पत्ती ५०:५ 30 गो बेक्शा, आं कली इजीप्त रगी रे कुरशा, आं कली आं किकी पिपी आन तुरसुम थिम्पी” दे पुंडुडा बाक्त। मिनु योसेफमी “इन देंशो पाइनुड” देंमाक्त। उत्पत्ती २३:२० 31 मिनु मेकोमी “कसम जावो” दे मदा बाक्त। मिनु योसेफमी कसम जवा बाक्त। मिनु इस्राएल ब्राख्येम बाक्शा, खुम्की पांडसे बाक्त। हिब्रू ११:२१

याकूब, एफ्राइम नु मनस्से

48 मिनु नोले मुर कामी योसेफ कली “इन आफ रोइ पाप्तु” दे शेंदा बाक्त। मिनु योसेफमी मनस्से नु एफ्राइम आ तौ निक्शी लाइशा, गुम्थ लमाक्त। 2 मिनु मुर कामी याकूब कली “नेनीन, इन तौ योसेफ इन कली गुम्थ जाक्त” दे नैपदा बाक्त। मिनु इस्राएल बोल पा बोक्शा, आ ब्राख्येम निस्से बाक्त। 3 मिनु याकूबमी योसेफ कली “नेल्ल सक्ति पाइश्शो परमप्रभुमी कनान रागी डा लूज सहरम गूशा, आं कली आसीक गेती। उत्पत्ती २८:१७-१९ 4 मेकोमी आं कली ‘नेनीन, गो इन कली सोशा बोशा, शुश सेल्लुड। गो इ रे शुश थर डा मुर सेल्लुड। इ कली नु इ चच युइ आन कली मेको रागी गेना हना यो इन केन बाक्ब, दे गेनुड’ देंत। उत्पत्ती ३५:११-१२ 5 आं जाक्चा डॉइती, इजीप्त रागीम जरमेशो एफ्राइम नु मनस्से, इ तौ

निक्शी आं मुर दुम्चा माल्नीस। रूबेन नु सिमियोन खोदेंशो पा आं केन दुम्चा माल्नीस। उत्पत्ती ४१:५०-५२ 6 इ नोले थिशो आल चहिं इ के दुम्मल। मिनु आन लोकब आन जात डा नें वोइश्शो, इजीप्त रागीम अडस ताइब दुम्मल। 7 गो पदान रे गाक्डानु, कनान रागी डा एफ्राथ आ डॉइती राहेल बेक्त। मिनु गो मेको कली एफ्राथ माइश्शो बेथलेहेम सहर लतीक लांमी थिम्ता” देंमाक्त। उत्पत्ती ३५:१९ 8 मिनु इस्राएलमी योसेफ आ तौ निक्शी आस कली तशा “मेको निक्शी सु नसी?” दे हिल्लो पवा बाक्त। 9 मिनु योसेफमी आ आफ कली “परमप्रभुमी आं कली गेशो तौ बाक्नीसी” देंमाक्त। मिनु याकूबमी “मेको आस कली एक चाक्सी। मिनु गो मेको आस कली आसीक गेनुड” दे मदा बाक्त। 10 इस्राएल खाल्पा दुम्शा, आ मिक्च रिम्शो मताइब दुम्शो बाक्माक्त। मोपतीके मेको आस कली मतुइक्ता बाक्त। मिनु योसेफमी मेको आस नेक्था चाक्दीस्सी बाक्त। मिनु इस्राएलमी मेको आस कली पुक्पु पाइश्शा, मुबा बाक्त। 11 मिनु योसेफ कली “गो इ कुल ताइनुड दे ममिम्शो नड। तन्न परमप्रभुमी आं कली इ आल आन कली यो कोइताक्वी” देंमाक्त। उत्पत्ती ३७:३३-३५; उत्पत्ती ४५:२६; भजन संग्रह १२८:६ 12 मिनु योसेफम मेको आस कली आ आफ आ थुकु रे याक्शा, खुम्की पा सेउ पवा बाक्त। 13 मिनु योसेफमी आ तौ निम्फा आस कली लाइशा, एफ्राइम आ ग्युरा गुड नु मनस्से आ पेरा गुड ग्याइशा लाइशा आ आफ आ डॉइती वोदा बाक्त। मोपा मनस्से याकूब आ ग्युरा गुड नु एफ्राइम याकूब आ पेरा गुड आ नेक्था वोदा बाक्त। उत्पत्ती ४१:५१-५२ 14 तन्न इस्राएलमी आ गुड खाक्शा आ ग्युरा गुड एफ्राइम आ पिया तारी नु आ पेरा गुड मनस्से आ पिया तारी वोदा बाक्त। मनस्से चहिं योसेफ आ डॉइती जरमेशो तौ बाक्माक्त। 15 मिनु याकूबमी योसेफ कली आसीक गेशा “आं किकी पिपी अब्राहाम नु इसहाक परमप्रभु आ डॉइती गाक्शो बाक्ताक्से। मेको परमप्रभुमी आं कली आं ब्रॉइतीक नाक्त नेल्ल मुल सम्म कोव्रती। उत्पत्ती ३२:१०; भजन संग्रह २३:१ 16 आं कली श्येत रे प्रॉइब परमप्रभु यावे आ स्वर्ग डा गेय पाइबम एको वॉइश आल आस कली आसीक गेवल। मिनु एको आस पतीके आं नें नु आं किकी पिपी अब्राहाम नु इसहाक आस नें मप्रेंसेक्ल। एको निक्शी रे पा रागीमी शुश दुम्मल” दे आसीक गेम्सी बाक्त। उत्पत्ती ३२:२५-३०; यसैया ४१:१४ 17 मिनु योसेफमी आ आफ आ ग्युरा गुड एफ्राइम आ पिया तारी वोइश्शो तशा, आ थुं मनुमाक्त। मिनु आ आफ आ गुड एफ्राइम आ पिया रे शोल्शा, मनस्से आ पियाम वोइक्नुड, दे मिम्ता बाक्त। 18 मिनु योसेफम आ आफ कली “ममाइ आं आफ, मेको आं डॉइती जरमेशो बाक्ब। इन ग्युरा गुड एको आ पिया तारी वोतीन” देंमाक्त। 19 तन्न आ आफ मबित्थु “गो तुइक्नुड, आं तौ, गो तुइक्नुड। एको यो थर का दुम्ब, एको यो ठेयब दुम्ब। तन्न एको क्येडा आ लोकब एफ्राइम ठेयब दुम्ब। मिनु आ चच युइ शुश ठेयब जात दुम्नीम” दे आसीक गेम्सी बाक्त। गन्ती १:३३, ३५; ब्यक्स्था ३३:१७ 20 मिनु मेको नाक्ती मेको आस कली आसीक गेशा “इस नें थिशा इस्राएलीमी आसीक गेनीम। मेकोपुकीमी ‘परमप्रभुमी इ कली एफ्राइम नु मनस्से खोदेंशो सेलल’ दे आसीक गेनीम” देंमाक्त। मोपा याकूबमी मनस्से क्येडा एफ्राइम डॉइती वोदा बाक्त। हिब्रू ११:२१ 21 मिनु इस्राएलमी योसेफ कली “नेनो, गो बेक्नुड। मिनु परमप्रभु गे नु बाक्शा, इ कली लेंशा इ किकी पिपी आ रागी लाइक्ब। 22 गो इ कली इ लोकब आन क्येडा निक्शी अडस गेतन। आं तरवार नु लिब्रामी एमोरी आन गुड रे रोइश्शो रू इ कली गेतन” दे याकूबमी योसेफ कली मदा बाक्त। यूहन्ना ४:५

याकूब आ तौ आन आसीक  
ब्यक्स्था ३३:-

49 मिनु याकूबमी आ तौ आन कली ब्रेशा मेको आन कली “नोले इन कली मार मार दुम्बा, नेंचा कली एकेर बुक्कीन। 2 याकूब आ तौपुकी बुक्शा, इन आफ इस्राएल, आं लोव्र नेनीन।

## रूबेन

3 रूबेन, गे आं डोंइती जरमेशो तौ नवे। डोंइती डा आं बोल नु सक्ति बाकनेवे। नेल्ल क्येडा शिरशो नु सक्ति पाइश्शो डोंइती डा बाक्ते। उत्पत्ती २९:३२; ब्यवस्था २१:१७<sup>4</sup> समुन्द्र डा छाल खोदेंशो पा गे हिम्सीशो थुं पाइश्शो मुर दुम्नेवे। मारदे हना गे इ आफ आ खाट डोइश्शा, बिथोलो पाप्तीवी। आं इप्तीकेम बाक्ते। गे मान मताइब दुम्नेवे। उत्पत्ती ३५:२२

## सिमियोन नु लेवी

5 सिमियोन नु लेवी वोबु बाक्नीसी। गे हुश खाक्श पोक्ब बाक्नीसी। उत्पत्ती ३४:२५<sup>6</sup> आं थुं इस खुइश्शा अरेशोम गेनायो मबिस्सेक्ल, आं नें इस गुम्तीकेमी गेनायो मर्देमल। थुं का मदुमीसे। मारदे हना इस चुरतीकेमी मुर साइक्तीसी। महिंब दुम्शा, ब्यफ कली गावने मचाप्ब सेल्लतीसी।<sup>7</sup> इस गाइश्शोम सराप राइब। मारदे हना मेको ठेयब बाक्ब। इस चुरचाम सराप राइब। मारदे हना मेको शिशी मपाइश्शो मरिम्शो बाक्ब। थुं का मदुमीस। इस्राएल रागीमी ब्राशा बाक्तीस। यहोसु १९:१-९; २१:१-४२

## यहूदा

8 यहूदा, इ लोकबपुकीमी इ कली ठेयब सेल्मेक्ल। इ गुडमी इ जोरी सत्रु आन क्रोक्को निप्नेवे। इ आफ आ आल इ डोंइती खुम्की पा बाप्नीम। गन्ती १०:१४; न्यायाधीस १:१-२<sup>9</sup> यहूदा गुप्स आ चाइक्ब खोदेंशो बाक्ब। सिखार ब्वशा ठेयब दुम्ते। ठेयब गुप्स खोदेंशो पा खुम बाप्ब। गुप्सनी खोदेंशो पा इप्ब। सुम मेको कली बोक्पाइक्ने चाप्बा? गन्ती २३:२४; इजीकीएल १९:२; प्रकाश ५:५<sup>10</sup> ठेयब श्येत रे प्रोंइब मजाक्म सम्म आ राज दन्द आ सासन पतीके आ गुडमी लीब। जात जात डा मुर मेको आ नोले खोइक्नीम। गन्ती २४:१७; इतिहास ५:२; हिब्रू ७:१४; इजीकीएल २१:३२<sup>11</sup> मेकोमी आ गधा अडगुर आ बोटम पाइक्ब, आ गधा आ चाइक्ब नेल्ल क्येडा रिम्शो अडगुर बोटम पाइक्ब। आ फेक्तीक वा अडगुर शांबुम मुरब। आ वा अडगुर आ रसम खुम्ब। योएल ४:१८<sup>12</sup> आ मिक्च अडगुर क्येडा रिम्शो रड डा बाक्ब। आ खुइ दूध क्येडा बुश बाक्नीम।

## जबूलून

13 जबूलून समुन्द्र नु डोंगा वोइक्तीकेमी बाक्ल। सीदोन सहर सम्म आ बाक्तीके दुम्ल। यहोसु १९:१०-१६

## इस्साकार

14 इस्साकार बोल्यो गधा दुम्शा, भारी आस दातेमी इप्ब।<sup>15</sup> मेकोमी नाइक्तीके रिम्शो नु रागी दारशो बाक्ब, दे ताप्तु। मेकेर कुरब दुम्शा, अर्को आन गेय पाइब दुम्त।

## दान

16 दान इस्राएल आ जात डा ठेयब मुर दुम्शा, अरु आन कली निसाफ पाइब दुम्ल। न्यायाधीस १३:२, २४, २५<sup>17</sup> दान लांमी बाक्शो बुस्स खोदेंशो दुम्शा, मेको बीस पाइश्शो बुस्स खोदेंशो दुम्शा, आइक्च लांम बाक्ब। शारा डोइक्ब मुर तोक्चा कली शारा आ गेंग्रेम कोक्ब। मिनु शारा डोइक्ब मुर नोले गे दोक्ब।<sup>18</sup> परमप्रभु यावे, गे आं मरिम्शो पशो रे प्रोंइनीनी, दे रिम्शा बाक्ती। भजन संग्रह ११९:१६६; हबकुक् २:३

## गाद

19 रोइक्ब मुरपुकी गाद कली रोइक्चा कली जाक्नीम। गादमी मेको आन कली खेदा पा मेको आन के रोइक्ब।

## आशेर

20 आशेर आ जचा थोक्क शुश ब्रोवशो बाक्ब। पिपम खोदेंशो पा ब्रोवशो जचा गेब। यहोसु १९:२४-३१

## नाप्ताली

21 नाप्ताली प्रोंइशो रोकोश बाक्ब। मेकोमी दारदारशो चाइक्ब पाइब। न्यायाधीस ४:६-१०

## योसेफ

22 योसेफ फल सिप्ब रवा का बाक्ब। आ राशी गारो तारी बाक्शा, ब्वाक्कु बुक्तीकेमी खुम्शो रवा का बाक्ब।<sup>23</sup> ब्रा आप्बपुकीमी मेको कली ब्रा आप्बेक्म। मेको कली आप्शा, खेदा पशा, काइ मदाक्तेम।<sup>24</sup> तन्न आ लिब्रा बोल्यो बाक्ब, आ गुड बोल्यो बाक्नीम। सक्ति पाइश्शो याक्ब आ परमप्रभु, इस्राएल आ गोठला नु सेरथे फुल्लुम, मेको कली वारच पाप्तु। ब्यवस्था ३२:१८<sup>25</sup> इ आफ आ परमप्रभुमी इ कली वारच पाइब। नेल्ल क्येडा सक्ति पाइश्शो परमप्रभुमी इ कली सरीड रे नु खप रे आसीक गेब। शुश आल थिचा डा आसीक यो गेवल। ब्यवस्था २८:३-६; ब्यवस्था ३३:१३<sup>26</sup> गेना हना यो बाक्ब डांडा डा आसीक क्येडा इ आफ आ गेशो आसीक ठेयब बाक्ब। योसेफ आ लोकब खोदेंशो मदुम्थु, एको आसीक आ पिया तारी दुम्ल।

## बेन्यामीन

27 बेन्यामीन ब्रुप्शा ग्याइक्ब फर खोदेंशो बाक्ब। मिनु सुनी आ सिखार व्वाइब, नाक्दो आ रोइश्शो योक्ब" दे याक्बम आ तौ नेल्ल आन कली आसीक गेमी बाक्त। न्यायाधीस २०:२५; इसामुएल ९:१-२

## इस्राएल बेक्शो

28 एको इस्राएल आ १२ थर बाक्नीम। आन आफोम मेको आन कली आसीक गेशा पशो लोत्र एकोन बाक्ब। मेकोमी मेको आन कली का का पा आसीक गेवा बाक्त।<sup>29</sup> मिनु मेको आन कली "गे आं किकी पिपी आन बाक्तीके लाइनुड। हिती डा एफ्रोन आ रूमी बाक्शो पुक्खी, आं किकी पिपी आन कली थिम्तीकेमी आं कली वोतीन। उत्पत्ती २३:१३-२०<sup>30</sup> मेको पुक्खी कनान रागीमी माग्ने आ पूर्ब डा माक-पेलामी बाक्ब। अब्राहाममी मेको थिम्तीक हिती डा एफ्रोन रे ग्यबा बाक्त।<sup>31</sup> अब्राहाम नु आ मीश सारा मेक थिम्शो बाक्नीस। इसहाक नु आ मीश रेबेका यो मेक थिम्शो बाक्नीस। मेकेर लेआ यो थिम्ता। उत्पत्ती २५:९; उत्पत्ती ३५:२९<sup>32</sup> मिनु मेको रू नु पुक्खी हिती मुर रे ग्याप्शो बाक्त" देमाक्त।<sup>33</sup> याक्बमी आ तौ आन कली मोदें लोत्र पशा नोले, खाटमी आ खोइल दिंशा, बेक्माक्त। मिनु आ किकी पिपी आन बाक्तीक लमाक्त।

## याक्ब कली थिम्शो

50 मिनु योसेफ आ आफ आ कुल तार गुर ब्वेशा, पुक्पु पाइश्शा, डाक्माक्त।<sup>2</sup> मिनु आ गेय पाइब नु डाक्टर आन कली "आं आफ आ रां कली खेक्तीन" दे माइक्मी बाक्त। मिनु मेकोपुकीमी बेक्शो मुर आ रां खेक्तमे बाक्त।<sup>3</sup> मिनु ४० नाक्त खेक्तमे बाक्त। मारदे हना खेक्चा कली ४० नाक्ती माल्बाक्माक्त। इजीप्त डा मुरपुकी यो ७० नाक्ती रोंका पामे बाक्त।<sup>4</sup> मिनु रोंका पतीक नाक्ती नुम्मेनु, योसेफमी फाराओ आ खिं डा मुर आन कली "गे इन डोंइती शिशी ताइनुड हना, गे फाराओ कली आं पर्वम लोत्र पने।<sup>5</sup> आं आफोम आं कली 'गे बेक्डानु, कनान रागीम आं कली थिम्तीके ठीक पाता, मेकेर थिम्चा माल्नेवे" दे कसम जपाइक्ती। मोपतीके आं आफ थिम्चा कली मेकेर लचा गेयीनी। मिनु गो थिम्शा लेत्नुड। एको लोत्र फाराओ कली देनीन" दे मेको आन कली मदा बाक्त। उत्पत्ती ४७:२९-३०<sup>6</sup> मिनु फाराओमी "इ कसम जशो खोदेंशो पा इ आफ कली थिमो" दे

योसेफ कली देंमावत। <sup>7</sup> मिनु योसेफ, फाराओ आ गेय पाइबपुकी, मेको आन ठेयब मुरपुकी, इजीप्त रागी डा ठेयब मुरपुकी, <sup>8</sup> योसेफ आ खिं डा मुर नेल्ल, आ लोकबपुकी नु आ आफ आ खिं डा मुर नेल्ल आ आफ थिम्थ लमा बावत। आन आइक्व आलपुकी नु आन क्यारश भेडा, बी ब्यफ ला गोशेनमी बाक्मा बावत। <sup>9</sup> मिनु योसेफ नु बग्गी नु शारा डोइक्वपुकी लमा बावत। मिनु शुश मुर दुम्मा बावत। <sup>10</sup> मिनु मेकोपुकी आताद आ चेरब तुप्तीके यर्दन खोला आइक्वी हांबु जाक्दीशा, ठेयब रोंका पामे बावत। मिनु योसेफमी आ आफ कली ७ नाक्त सम्म रोंका पवा बावत। <sup>11</sup> मिनु मेकेर बाक्ब कनान रागी डा मुरपुकीम आताद आ चेरब तुप्तीक खलाम मेको रोंका पाइब आन कली तशा “एको इजीप्त डा मुर आन ठेयब रोंका का बाक्ब” देंमा बावत। मोपतीके मेको यर्दन आइक्वी हांब डा बाक्तीके कली आबेल-मिस्रैम नें वोदमे बावत। *आबेल-मिस्रैम आ अर्थ “ठेयब रोंका पतीके” बाक्ब।* <sup>12</sup> मोपा याकूब आ तौपुकीमी आन आफ आ अरेशो खोदेंशो पामे बावत। *उत्पत्ती ४९:२९* <sup>13</sup> मिनु आ तौपुकीम आन आफ आ रां कनान रागी चाक्दीशा, अब्राहाममी मुर थिम्चा कली हिती डा एफ्रोन रे ग्याप्शो माग्ने आ नेक्था माक-पेला डा रूमी थिम्मे बावत। *उत्पत्ती २३:१३-२०* <sup>14</sup> मिनु आ आफ थिम्शा नोले, योसेफ नु आ नु गाक्ब नेल्ल इजीप्त रागी लेम्मा बावत। <sup>15</sup> मिनु आन आफ बेक्म नोले योसेफ आ लोकबपुकीम “मुल योसेफमी इं कली क्येक्क लेप्बा को। मारदे हना गोपुकीमी मेको कली मरिम्शो पाइतय” दे लोव्र पमुमा बावत। *उत्पत्ती २७:४१* <sup>16</sup> मिनु आ लोकबपुकीमी लोव्र पचा कली मुर का योसेफ आ बाक्तीके सोइक्तमे बावत। मेकोमी “इन आफ आ बेक्चा क्येडा डोंइती मार अरेवा बावत देंशा हना,

<sup>17</sup> गे योसेफ कली ‘इन लोकब आन मरिम्शो पशो आ पर्बम माफ गेने। मारदे हना इन कली मरिम्शो पाम्तेक्मे। मिनु इन आफ आ परमप्रभु आ गेय पाइब आन कली आन पाप माफ गेने’ दे माइक्चा” दे सोइश्शो मुरुमी योसेफ कली देंमावत। मिनु योसेफमी मेको आ लोव्र नेंशा डाक्मावत। <sup>18</sup> मिनु आ लोकबपुकी यो जाक्मा बावत। मिनु आ डोंइती खुम्की पा बाप्शा “इन वाइल नकी” दे सेउ पामे बावत। <sup>19</sup> मिनु योसेफमी “महिनीन, गो परमप्रभु मनड। <sup>20</sup> गोपुकीमी आं कली मरिम्शो पाइतीनी। परमप्रभुमी चहिं रिम्शो सेल्लती। मो दुम्शा परमप्रभुमी शुश मुर आन कली ब्रोंइचा गेपु। *उत्पत्ती ४५:५,७* <sup>21</sup> मोपतीके महिनीन, गो इन कली नु इन आल आन कली कोव्रनुड” दे आ लोकब आन कली लेम्शा, रिम्शो लोव्र पवा बावत।

<sup>22</sup> योसेफ नु आ खिं डा मुर नेल्ल इजीप्त रागीमी बाक्मा बावत। मिनु योसेफ सहे का १० बर्स ब्रोंइमावत। <sup>23</sup> मिनु आ तौ एफ्राइम आ चच युइ यो तवा बावत। आ डोंइती जरमेशो, मनस्से आ तौ माकीर आ तौ आ थुकुम वोदा बावत। <sup>24</sup> मिनु योसेफमी आ लोकब आन कली “गो बेक्नुड। परमप्रभुमी इन कली कोव्रब। परमप्रभुमी अब्राहाम, इसहाक नु याकूब कली ‘इन कली कनान रागी लेप्पाइक्नुड’ दे कसम जशा, लोव्र पशो बाक्ब” देंमावत। <sup>25</sup> मिनु योसेफमी आ लोकब आन कली “परमप्रभुमी इन कली थमा पा एकेर रे लेप्पाइक्ब। मेना आं रुश यो लतीने” दे कसम जपाइक्मी बावत। *प्रस्थान १३:१९; यहोसु २४:३२* <sup>26</sup> मिनु योसेफ सहे का १० बर्स दुम्शा बेक्मावत। मिनु आ रां कली मराक्चा डा पा ओख्ती खेक्शा, इजीप्त रागीमी बाकसम कुर पा वोदमे बावत।

## प्रस्थान

एको किताब ब्रेक्ब मोसा बाक्ब, दे सां खेयप ब्रेक्बो बाक्ब।

एको किताब योसेफ बेक्म नोले रे परमप्रभु यावे आ ताम्बु सेल्ची ना सम्म इस्राएलीपुकीम इजीप्त रागीम श्येत जशो आ पबर्म बाक्ब। इस्राएलीपुकी ४३० बर्स सम्म इजीप्तम बाक्बो बाक्तेक्म। परमप्रभुम मेको आन श्येत जशो तशा, आ ठेयब सक्ति इजीप्त डा मुर आन कली कौंइशा, आ मुर इस्राएली आन कली श्येत रे प्रोना बाक्त। एको लोत्र गेना दुम्शो बाक्बा मेको मतुंडसीब। एको किताब मोसामी आ गेय पची ना ब्रेक्बो बाक्त।

१. इस्राएलीपुकी इजीप्त रागीम बाक्शा श्येत जशो
२. इजीप्त रे गुंडशा, आन श्येत रे प्रौंइशो
३. परमप्रभु यावेमी मेकोपुकी नु कबल पशो

### इस्राएलीपुकीमी श्येत जशो

१ आन खिं खिं डा मुर लाइशा, याकूब नु इजीप्त लाइब इस्राएल आ तौ सु सु बाक्मा बाक्त देंशा हना, उत्पत्ती ४६:८-२७<sup>२</sup> रूबेन, सिमियोन, लेवी, यहूदा,<sup>३</sup> इस्साकार, जबूलून, बेन्यामीन,<sup>४</sup> दान, नाप्ताली, गाद नु आशेर बाक्मा बाक्त।<sup>५</sup> मिनु याकूब आ तौ आन खिं खिं डा मुर नेल्ल पा ७० जना बाक्मा बाक्त। योसेफ चहिं इजीप्त रागीमी बाक्शो बाक्माक्त।

६ मिनु नोले योसेफ नु मेको आ लोक्ब आन पाला डा मुर नेल्ल बेक्मा बाक्त। उत्पत्ती ५०:२६<sup>७</sup> मिनु इस्राएल आ चच युड सोशा बोशा शुश दुम्मा बाक्त। शुश दुम्मा डा मिन, बोल्यो दुम्मा बाक्त। मिनु इस्राएल आ मुरपुकीमी रागी नेल्ल ब्रीमा बाक्त। प्रेरित ७:१७-१९

८ मिनु नोले योसेफ कली मतुडक्ब पिप काम इजीप्त रागी कली सासन पवा बाक्त।<sup>९</sup> मेकोमी आ मुर आन कली “नेनीन, इं रागीमी बाक्शो इस्राएल डा मुरपुकी इं क्येडा शुश नु बोल्यो दुम्तेक्म।<sup>१०</sup> मेको आन पबर्ममी शुश मिम्शा, सल्ला पय। मो मपाइतय हना, मेको शुश दुम्शा, नोले लडाइ दुम्मेनु, इं जोरी सत्रु आन कली वारच पाइशा, एक रे प्रोक्नीमी, कोर में” दे आ मुर आन कली माइक्मी बाक्त।<sup>११</sup> मोपतीके मेकोपुकीमी इस्राएली आन कली श्येत गेशा, गेय पपाइक्वा कली कोत्रब ठेयब मुरपुकी वोदमे बाक्त। मिनु इस्राएलीपुकीमी फाराओ माइश्शो पिप आ मार मार वोइक्वा कली पिथोम नु रामेसेस सहर निक्शी सेल्मे बाक्त। उत्पत्ती १५:१३; उत्पत्ती ४७:११

१२ तन्न इस्राएली गिश श्येत जामे, मिश बारना बारन शुश दुम्शा, इजीप्त रागी ब्रीमा बाक्त। मिनु मेको आन कली तशा, इजीप्त डा मुर शुश हिंमा बाक्त।<sup>१३</sup> मोपतीके इस्राएली आन कली डौंइती क्येडा यो शुश गेय पपदमे बाक्त। उत्पत्ती १५:१३<sup>१४</sup> शुश श्येत गेशा, शुश गेय पपदमे बाक्त। मार गेय पपदमे बाक्त देंशा हना, हिलो निपदमे बाक्त, इंटा सेल्पदमे बाक्त, रू डा गेय यो पपदमे बाक्त। तेको गेय गेमे, मेको शुश श्येत डा गेय बाक्माक्त।

### परमप्रभु कली मान पाइब मीश मुर

१५ मिनु इजीप्त डा पिपमी हिब्रू मीश मुर आन आल थिची ना वारच पाइब आन ठेयब मीश मुर आस कली लोत्र पवा बाक्त। मेको आन दाते डा का आ नें शिप्रा नु अर्को आ नें पुआ बाक्माक्त।<sup>१६</sup> मिनु फाराओमी “गे निक्शी हिब्रू मीश मुर आन कली आल थिची ना वारच पाइनीसी। तौ थिम्तेक्म हना, सतीसे। तमी बाक्त हना, मसतीसे” दे माइक्सी बाक्त।<sup>१७</sup> तन्न मेको मीश मुर आन कली वारच पाइब नेल्लेमी परमप्रभु कली मान पा हिंशा, इजीप्त डा पिपमी देंशो मपथु, वौंइश आल आन कली यो मसदमे बाक्त।<sup>१८</sup> मिनु इजीप्त डा पिपम मेको वारच पाइब मीश मुर आस कली ब्रेश्शा “गे मारदे वौंइश आल आन कली यो ब्रौंइचा गेसी? मारदे मोदेंशो पसी?” दे लोत्र पवा बाक्त।<sup>१९</sup> मिनु मेको मीश मुरुमी “हिब्रू मीश मुरपुकी इजीप्त डा मीश मुर

आन क्येडा बोल्यो बाक्नीम। मोपतीके गो जाक्दीत्वा क्येडा डौंइती आल थिने थुम्शो बाक्नीमी” देंसा बाक्त।<sup>२०</sup> मोपतीके परमप्रभुमी मेको आल थिचा वारच पाइब मीश मुर आन कली आसीक गेवा बाक्त। मिनु इस्राएली शुश दुम्शा, बोल्यो दुम्मा बाक्त।<sup>२१</sup> वारच पाइब मीश मुरपुकी परमप्रभु कली मान पा हिंतीके परमप्रभुमी मेको आन खिं कली यो आसीक गेवा बाक्त।<sup>२२</sup> मिनु पिप फाराओमी आ मुर आन कली “हिब्रूपुकीमी दोशो तौ थीमे, मेको नेल्ल नील खोलाम लाइशा ताइक्तीन। आन तमी आन कली चहिं ब्रौंइचा गेने” दे हुकुम पवा बाक्त।

### मोसा जरमेशो

२ लेवी आ थर डा मुर का बाक्माक्त। मिनु मेकोमी लेवी आ थर डा मीश आल का ग्युंवे पवा बाक्त। प्रस्थान ६:२०<sup>२</sup> मिनु मेको मीश मुरुमी तमी का नु तौ का थिमाक्त। नोले लेंशा आल कुरशा, तौ का थिमाक्त। आ थिशो तौ कली तशा “शुश दारशो आल बाक्ब” दे महिना सां सम्म खूइश्शा वोदा बाक्त। प्रेरित ७:२०; हिब्रू ११:२३<sup>३</sup> मिनु नोले आल आ ममामी महिना सां डा आल कली खूइक्ने मचबा बाक्त। मिनु आल कली सुम्तीके पाइश्शो ग्युर सेल्शा, ब्वाक्कु मओत्रचा डा पा अल्कत्राम सिल्दा बाक्त। मिनु मेको आ तौ कली ग्युरम कुर पा खोला आ नेक्था डा बुदी मीलु घांस आगा, ब्वाक्कुम वोदा बाक्त।<sup>४</sup> मिनु मेको आल आ दिदी “आं लोक्ब कली मार दुम्मे” दे डोन रे कोत्रदीम्माक्त। गन्ती २६:५९

५ मेना पिप आ तमी खोलाम चिक्वा कली जाक्दीम्माक्त। आ गेय पाइबपुकी यो खोला आ नेक्था लमा बाक्त। मिनु पिप आ तमीमी बुदी मीलु घांस आगा, ब्वाक्कुमी मेको ग्युर तशा, आ गेय पाइब का कली “मेको ग्युर ब्रथ लावो” दे सोइक्ता बाक्त।<sup>६</sup> मिनु पिप आ तमीमी मेको सुम्तीक पाइश्शो ग्युर रोक्शा कोत्रडानु “ए, आल का बाक्त” देंमाक्त। मिनु आल डाक्माक्त। मेको आल तशा, शिशी पवा बाक्त। मिनु पिप आ तमीमी “एको हिब्रू डा मुर आ तौ का बाक्ब” देंमाक्त।

७ मिनु आल आ दिदीमी “गो इन कली हिब्रू दूध तुंडब मीश मुर का चाक्कु? आल कली दूध तुंडबा को” दे हिल्लो पवा बाक्त।<sup>८</sup> मिनु फाराओ आ तमीमी “लो, चाक्को” दे मीश आल कली देंमाक्त। मिनु मेको मीश आलम आ ममा ब्रथ लमाक्त।<sup>९</sup> मिनु फाराओ आ तमीमी मेको मीश मुर कली “एको आल आं कली थुलो। एको आल थुल्शो डा, इ कली क्येट गेनुड” दे लोत्र पवा बाक्त। मिनु मीश मुरुमी आल लाइशा, थुला बाक्त।<sup>१०</sup> मेको नोले आल कोल्माक्त। मिनु काबु मेकोमी मेको आल फाराओ आ तमी कली लाइशा, गेवा बाक्त। मिनु आ तौ खोदेंशो दुम्माक्त। मिनु पिप आ तमीमी मेको आ नें मोसा वोदा बाक्त। मारदे हना “गो मेको कली ब्वाक्कु रे गुंडताक्ड” देंमाक्त। मोसा आ अर्थ हिब्रू लोत्रमी “ब्वाक्कु रे गुंडशो” देंशो बाक्ब।

### मोसामी इजीप्त डा मुर साइश्शो

11 मिनु नोले मोसा ठेयब दुम्शा, आ लोकब आन कली गुम्थ लशा, आन श्येत जशो तापु। मेकोमी इजीप्त रागी डा मुरुमी आ हिब्रू लोकब का कली तुषो तापु। प्रेरित ७:२३-२९; हिब्रू ११:२४-२७ 12 मिनु मोसामी एर ऑथ कोव्रशा, सुइ मबाक्शो तशा, इजीप्त डा तुषब मुर कली साइव्तु। मिनु बाल्वामी थिम्तु। 13 आ दीसा मोसा लेंशा हिरथ लमेनु, हिब्रू निक्शी जिशा तुम्मुशो तापु। मिनु मोसामी मरिम्शो पाइब कली “मारदे आंम लोकब कली तुबी?” दे हिल्लो पापु। 14 मिनु मेकोमी “सुमी इ कली आंस होव्रप नु निसाफ पाइब सेला? इजीप्त डा मुर कली साइश्शो खोदेशो पा आं कली यो सदु, देंने?” दंत। मिनु मोसामी “मुल एको लोव्र, मुर नेल्लेमी तुइक्नीमी” दे मिम्शा हित। प्रेरित ७:३५ 15 मिनु फाराओमी “मोसाम इजीप्त डा मुर का साइव्तु” देशो नेंशा, मोसा कली साइक्वा माल्तु। मोसा चहिं फाराओ आ बाक्तीक रे प्रोक्शा, मिदयान रागी जाक्दीश्शा, इनार तारी निश्शा बाक्त।

### मोसा मिदयान रागी प्रोक्शो

16 मिनु मिदयान रागीमी ७ जना तमी बाक्शो नाक्सो का बाक्माक्त। मेको मीश आलपुकीमी आन आफ आ क्यारश भेडा आन कली ब्वाक्कु तुंडचा, दे शुंगु ब्वाक्कुम प्रिंचा कली, ब्वाक्कु कीतेक्म। प्रस्थान ३:१ 17 तन्न अरु गोठलापुकी जाक्शा, मेको आन कली श्येत गेम्तेक्म। मोसामी चहिं मेको मीश आल आन कली वारच पा, आन भेडा आन कली ब्वाक्कु तुंडताक्व। 18 मिनु मेको आन आफ रूएल आ खिं जाक्दीम्मानु, मेकोमी आ तमी आन कली “मुलाक्ती गे दोपा रीब पा जाक्नी?” दे हिल्लो पवा बाक्त। 19 मिनु मेको आ तमीपुकीमी “इजीप्त रागी डा वॉइश मुर कामी आंड कली गोठला आन गुइ रे प्रॉइनुड। मिनु शुश ब्वाक्कु कुर पा आंड क्यारश भेडा आन कली तुंडताक्व” दे आन आफ कली मदमे बाक्त। 20 मेकोमी आ तमी आन कली “मेको मुर ते बाक्मे? एक मारदे मचाक्नी? मुल गो नु जथ ब्रेत्तीने” दे माइक्मी बाक्त।

21 मिनु मोसा मेकोपुकी नु बाक्चा बिस्साक्व। रूएलमी मोसा कली आ तमी सिप्पोरा ग्युबे पा गेपु। गन्ती १२:१ 22 मिनु नोले तौ का थिपु। मिनु मोसामी मेको आल आ नें गेरशोम वोइव्तु। मारदे हना “गो मतुइश्शो रागीमी अर्को रागी डा मुर दुम्ती” दंत। प्रस्थान १८:४

### परमप्रभुमी इस्राएली आन लोव्र नेंशो

23 मिनु शुश बर्स नोले इजीप्त रागी डा पिप बेक्माक्त। इस्राएल जात डा मुर इजीप्त रागीम वाइलीम वाइल खोदेशो दुम्शा, शुश श्येत जशा, परमप्रभु कली “वारच पाइय्की” दे पुंडशा डाक्मा बाक्त। मिनु परमप्रभुमी मेको आन डाक्शो नेना बाक्त। 24 मिनु परमप्रभुमी अब्राहाम, इसहाक नु याकूब नु कबल पशो मिम्ता बाक्त। उत्पत्ती १५:१८; उत्पत्ती २६:३; उत्पत्ती २८:१३-१४ 25 मिनु परमप्रभुमी आन श्येत जशो तशा शिशी पवा बाक्त।

### परमप्रभुमी लोव्र पशो

3 मेना मोसा आ शिउ आ क्यारश भेडा योव्रथ लत। आ शिउ रूएल आ नें यित्री यो बाक्माक्त। यित्री चहिं मिदयान रागी डा नाक्सो का बाक्माक्त। मोसामी क्यारश भेडा आन कली गोरशो रागी डा नां पेरतीके गे योव्रतु। मोपा योव्रना योव्रन, होरेब माइश्शो परमप्रभु आ डांडा आ नेक्था जाक्दीत्त। प्रेरित ७:३०-३४ 2 मेकेर परमप्रभु यावे आ स्वर्ग डा गेय पाइब मी ब्रशो बुटा रे गूत। डॉइती दोदेशो बाक्त देशा हना, मोसामी डोन रे कोव्रडानु, ब्रशो बुटा का कली मीम काइ मनेक्शो तापु। ब्यवस्था ३३:१६ 3 मिनु मोसामी “गो मेकेर लशा कोव्रचा माल्नुड। छक लाक्चा डा बाक्त। मारदे मीम मेरे बुटा कली मनेक्वा?” दे आंमा लोव्र पापु।

4 मिनु परमप्रभु यावेमी मोसा कली ब्रशो बुटा कोव्रथ पिशो तशा, परमप्रभुमी बुटा रे “मोसा, मोसा” दे ब्रेत्ताक्व। मिनु मोसामी “गो एक बाक्ती” दे लोव्र लेत्ताक्व। 5 मिनु लेंशा “एक मपिवो। इ जुत्ता प्रुतो। मारदे हना इ राप्शा बाक्तीके आं बाक्तीके बाक्ब। उत्पत्ती २८:१७; यहोसु ५:१५

6 गो इ आफ आ परमप्रभु इ किकी पिपी अब्राहाम, इसहाक नु याकूब आन परमप्रभु नड” दे मोसा कली लोव्र पापु। मिनु मोसामी परमप्रभु कली तशा हिंशा, आ कुल सुम्साक्व। उत्पत्ती १७:१; उत्पत्ती २८:१-४; उत्पत्ती ३५:९-११; मत्ती २२:३२

7 मिनु परमप्रभु यावेमी “गो इजीप्त रागीमी बाक्शो आं मुर आन श्येत ताता। मेको आन कली गेय पपाइक्व आन पर्वम डाक्नीमी। गो आन डाक्शो नेंता, ताता। गो आन श्येत जशो तुइक्ताक्व। प्रस्थान २:२३ 8 मिनु मेको आन कली इजीप्त रागी डा मुरपुकीम गेशो श्येत रे प्रॉइनुडमी। गो आं मुर आन कली रिम्शो नु ठेयब रागी लाइक्नुडमी। मेको रागीम दूध नु खुदो शुश बाक्ब। मारेइ मारेइ यो शुश ग्रेल्ब। मेको रागी कनानी, हिती, एमोरी, परिज्जी, हिक्वी नु यबुसी आन बाक्तीक रागी बाक्ब। 9 नेनो, गो इस्राएल जात डा मुर आन डाक्शो नेंता। इजीप्त रागी डा मुरुमी मेको आन कली दिप्शा श्येत गेम्तेक्म। गो मेको यो ताता। 10 गो इ कली फाराओ आ बाक्तीके सोइक्नुड। गे इस्राएल जात डा मुर आन कली इजीप्त रागी रे गुंडदो” दे परमप्रभुमी मोसा कली माइक्तु। प्रस्थान ७:१६; न्यायाधीस ६:१४ 11 मिनु मोसामी परमप्रभु यावे कली “गो दोपा मो पने चापुडा? फाराओ आ बाक्तीकेमी लशा, इस्राएल जात डा मुर आन कली इजीप्त रागी रे दोपा गुंडने चापुडा?” दे परमप्रभु कली दंत। प्रस्थान ४:१०; उत्पत्ती ३२:११; रसामुएल ७:१८; यसैया ६:५,८; येरमीया १:६ 12 मिनु परमप्रभुमी “गो थमा पा, गे नु बाक्नुड। इ कली सोइक्व गो नड, दे चिन्ड का कोइन्न। मेको चिन्ड मार बाक्त देशा हना, गे इस्राएल जात डा मुर आन कली इजीप्त रागी रे गुंडशा नोले एको परमप्रभु आ डांडामी आं कली ठेयब सेल्नीनी” दे माइक्तु। येरमीया १:८

### परमप्रभुमी आ नें तुइक्पाइश्शो

13 मिनु मोसामी परमप्रभु कली “गो इस्राएल जात डा मुर आन बाक्तीके जाक्दीश्शा, मेको आन कली ‘इन किकी पिपी आन परमप्रभुमी आं कली इन बाक्तीके सोइक्ताक्वी’ देडानु, मेकोपुकीमी चहिं ‘मेको आ नें मार में?’ दे हिल्लो पाइनीम। मेना गो मार देनुडा?” दे हिल्लो पापु।

14 मिनु परमप्रभुमी मोसा कली “आं नें ‘गो नड’ बाक्ब। इस्राएल जात डा मुर आन कली ‘गो नड’ देंबमी आं कली इन बाक्तीकेमी सोइक्ताक्वी, देंचा माल्नेवे” दंत। प्रस्थान ६:२; मलाकी ३:६; प्रकाश १:४,८ 15 मिनु लेंशा परमप्रभुमी मोसा कली “इस्राएल डा मुर आन कली मार देंचा माल्नेवे देशा हना ‘परमप्रभु यावे, इन किकी पिपी अब्राहाम, इसहाक नु याकूब आन परमप्रभुमी इन कली गुम्थ सोइक्ताक्वी। आं नें गेना हना यो लीब। नेल्ल पाला डा मुरुम आं नें आन थुमी मिम्शा वोइक्चा माल्नीम’ देंचा माल्नेवे। प्रस्थान ६:२-३; यसैया ४२:८

16 गे इस्राएल जात डा मुर आन खाल्पा आन कली खुप्य लावो। मिनु मेको आन कली ‘परमप्रभु यावे इन किकी पिपी आन परमप्रभु आं डॉइती गूत। अब्राहाम, इसहाक नु याकूब आन परमप्रभुमी आं कली गुम्शा, लोव्र पापु’। मेकोमी आं कली ‘गो थमा पा इन कली गुम्थ यिती, इजीप्त रागीम इन कली गिश श्येत गेमे, मेको ताता। 17 गो इन कली इजीप्त रागी डा मुर आन गेशो श्येत रे प्रॉइनुड। गो इन कली कनानी, हिती, एमोरी, परिज्जी, हिक्वी नु यबुसी आन बाक्शो रागी गेनुड। मेको रागीम दूध नु खुदो शुश बाक्ब, आन्न यो शुश ग्रेल्ब। गो आं देशो लोव्र खापुड’ दंत, देंचा माल्नेवे।

18 इ देशो लोव्र नेंशा, टिम्तेक्म हना, गे नु इस्राएल डा मुर आन खाल्पापुकी इजीप्त रागी डा पिप आ बाक्तीक लशा, मेको कली लोव्र पचा माल्नीनी। गेमी इजीप्त रागी डा पिप कली ‘परमप्रभु यावे हिब्रू आन परमप्रभुमी आं कली गुम्तीकी। आं कली नाक्त्त सां गोरशो रागीम लचा गेकी। मेकेर परमप्रभु यावे आंइ परमप्रभु कली चढ़थ लाइनीकी’ दे पिप कली देनीन। प्रस्थान ५:१,३

19 मेको पिपमी चहिं इन कली लचा मगेब, गो तुइक्नुड। गो थम ठेयब सक्तिमी इन कली वारच पाता हना ला, लचा गेब। 20 मिनु गोमी इजीप्त रागी डा मुर आन दातेमी थम छक लाक्चा डा गेय कोइशा, मेको आन कली श्येत गेनुड। मिनु नोले मेकोमी इन कली लचा गेब।

21 इजीप्त रागी डा मुरपुकीमी इन कली दाक्ब सेल्लुडमी। इजीप्त रे गूनीनु, श्येथ गूचा ममाल्लीनी। प्रस्थान ११:२-३; प्रस्थान १२:३५-३६  
22 मीश मुर नेल्लेमी आन नेक्था डा इजीप्त रागी डा वारच रे सुन, चांदी नु वासी पुंडचा माल्लीम। आन तमी तौ आन कली पांडपाइक्वा माल्लीम। मोदेशो पा इजीप्त डा मुर आन शॉप रोइक्वा माल्लीनी” दे परमप्रभु यावेमी मोसा कली देंत।

परमप्रभुमी मोसा कली चिन्ड कौंइशो

4 मिनू मोसामी परमप्रभु कली “मेकोपुकीमी आं देंशो थमा मसुइक्थु, मटीनीमी कौं? ‘परमप्रभु यावेमी इ कली मगुम’ देंनीमी कौं” देंत।  
2 मिनू परमप्रभु यावेमी “इ गुइमी मार कुरी?” दे हिल्लो पापु। मिनू मोसामी “कोक्के कुरता” देंत। 3 मिनू “खपीम ब्वारदो” देंत। मिनू मोसामी आ कोक्के ब्वारदानु, बुस्स दुम्त। मिनू मोसा मेको तशा प्रोक्त। प्रस्थान ७:१०  
4 मिनू परमप्रभु यावेमी “आ मीलुम ग्याइक्तो” देंत। मिनू मोसामी आ गुइ दिंशा, बुस्स कली ग्याइक्दीमेनु, आ गुइमी लेंशा कोक्के दुम्त। 5 मिनू मेको तशा, मेकोपुकीमी “परमप्रभु यावे, आन किकी पिपी अन्नहाम, इसहाक नु याकूब आन परमप्रभुमी इ डौंइती गूशा, इ कली गुम्तु, दे थमा सुइक्नीम” देंत।

6 मिनू परमप्रभु यावेमी लेंशा “इ गुइ इ फेक्शो वा आगाम वोतो” देंत। मिनू मोसामी मो पापु। मिनू नोले आ गुइ गुंइशा कोव्रडानु, कोव्र मुशा बुश दुम्शो तापु। 7 मिनू मेकोमी “लेंशा, इ गुइ इ फेक्शो वा आगाम वोतो” देंत। मिनू वोइश्शा गुंइदानु, आ गुइ डौंइती डा खोदेशो पा सेस दुम्शो तापु। 8 “इ डौंइती डा चिन्ड तशा, इ लोव्र थमा मसुइक्थु, मटिम्तेक्म हना, नोले डा चिन्ड तशा, थमा सुइक्नीमी कौं? 9 तन्न मेकोपुकीमी चिन्ड निक्शी तशा यो, थमा मसुइक्थु, इ कली मटिम्तेक्म हना, गे नील खोला डा ब्वाक्कु लाइश्शा, सोव्रशो खप तारी मोतो। खोला रे लाइश्शो ब्वाक्कु सोव्रशो खप तारी मोदीनु, मेको हुश दुम्ब” दे परमप्रभु यावेमी देंत। प्रस्थान ७:१७-२१

10 मिनू मोसामी परमप्रभु यावे कली “आं परमप्रभु, गो लोव्र पस मजोक्नुड। गे, मुल इन गेय पाइब नु लोव्र पनीनु यो, आं कली लोव्र पचा मपी। गो थांइशो लें पाइश्शो मुर बाक्नुड” देंत। प्रस्थान ३:११; प्रस्थान ६:१२-३० 11 मिनू परमप्रभु यावेमी “सुमी मुर आ शोव्र सेला? सुम लोव्र पपाइक्ब, नोफा नेंब नु मनेंब, मिक्च ताइब नु मताइब सेला? गो, परमप्रभु यावे मनडा डा? भजन संग्रह ९४:९ 12 मुल लावो। गो इ कली लोव्र पपाइक्नुड, मार देंचा माल्बा, मेको इ कली शेंनुड” देंत। ब्यवस्था १८:१८; मत्ती १०:१९ 13 मोसाम चहिं “आं परमप्रभु, आं पा डा अरु कली सोइक्ने चाप्नीनी कौं? तन्न आं कली मसोइक्तीनी” देंत। 14 मिनू परमप्रभु यावे मोसा आ पर्बम गाइश्शा “लेवी थर डा इ लोक्ब हारून रिम्शो लोव्र पस जोक्ब बाक्ब, गो मतुइक्नुडा डा? मिनू मुल इ कली गुम्थ जाक्ब। इ कली तशा शुश ग्येरब। 15 गो इ पचा माल्शो लोव्र नेल्ल शेंनुड। मिनू गे मेको हारून कली देंचा माल्नेवे। मिनू मेकोमी इ पा डा मुर आन कली लोव्र पचा माल्ब। मेको इ शोव्र खोदेशो दुम्ब। गो इ कली लोव्र पाइब परमप्रभु खोदेशो पा, गे हारून कली लोव्र पाइब बाक्नीनी। 16 दोपा गो, परमप्रभुम इ कली लोव्र पाइनुडा, मोपा गे हारून कली लोव्र पचा माल्नेवे। मिनू मेकोमी मुर आन कली लोव्र पचा माल्ब। प्रस्थान ७:१-२ 17 मेको कोक्के लाइश्शा, आं देंशो चिन्ड कौंइदो” दे परमप्रभु यावेमी मोसा कली माइक्तु।

मोसा इजीप्त रागी लेश्शो

18 मिनू मोसा आ शिउ, यित्रो आ खिं लशा, मेको कली “इजीप्त रागीम बाक्शो आं लोक्ब आन कली गुम्थ लचा गेयीनी। बेक्मा कौं, ब्रौडमा, गो तुइक्वा दाक्ती” दे पुंडतु। मिनू यित्रोमी “इ थुं नाइश्शा, लावो” देंत। प्रस्थान ३:३ 19 मिनू मोसा मिदयान रागीम बाक्मेनु, परमप्रभु यावेमी “लेंशा इजीप्त रागी लावो। मारदे हना इ कली साइक्वा माल्बपुकी बेक्तेक्मे” दे लोव्र पापु। 20 मिनू मोसा आ मीश नु आ तौ निक्शी नु गधा डोइश्शा, इजीप्त रागी लेत्त। परमप्रभु आ गेशो कोक्के यो कुरतु। प्रस्थान १८:३-४

21 मिनू परमप्रभु यावेमी मोसा कली “इ नोफा दाइश्शा नेनो। गे इजीप्त रागी जाक्दीश्शा, गो इ कली पपाइश्शो छक लाक्वा डा गेय नेल्ल फाराओ आ डौंइती पावो। गो चहिं मुर आन कली लचा मगेचा डा पा फाराओ कली काइ मटीब सेल्लुड। प्रस्थान ७:३, १३; ब्यवस्था २९:३; यसैया ६:१०; रोमी ९:१८ 22 मिनू गे मेको कली ‘परमप्रभु यावेमी इन कली मार लोव्र पापु देंशा हना, इस्राएल आं डौंइती जरमेशो तौ बाक्ब। ब्यवस्था ३२:६ 23 आं तौ कली आं कली चढेतीक चढेथ लचा गेवो। गे मटिप्तीवी हना, गो इ डौंइती जरमेशो तौ कली साइक्नुड’ देंत, देनो” दे परमप्रभु यावेमी मोसा कली माइक्तु। प्रस्थान ११:५; प्रस्थान १२:२९

मोसा आ तौ कली चिनु खोइश्शो

24 मिनू लांम बास बाक्मानु, परमप्रभु यावेमी मोसा आ नेक्था जाक्शा, मेको कली साइक्वा माल्तु। उत्पत्ती १७:१४; उत्पत्ती ३२:२५ 25 मिनू सिप्पोरामी चहिं हेश्शो फुल्लु का गुप्शा, आ तौ कली खोइक्तीक चिन्ड खोदा बाक्त। मोपा मेकोमी आ तौ आ चारतीक डा कुशुल खोइश्शा, आ तौ आ कुशुलम मोसा आ रां थिशा “गे हुश के ग्युम्ले नवे” देंमाक्त। यहोसु ५:२ 26 मोदेशो पतीके, परमप्रभुमी मोसा कली मसाइक्थु, प्रोना बाक्त। सिप्पोरामी मारदे “हुश के ग्युम्ले” देंत देंशा हना, खोइक्तीक चिन्ड रे हुश यिमाक्त।

मोसा नु हारून

27 डौंइती परमप्रभु यावेमी हारून कली “मोसा गोरशो रागीम जाक्वा चिक्शो बाक्ब। मेको कली गुम्थ लावो” दे माइक्तु। मिनू लशा, परमप्रभु आ डांडाम मोसा कली गुम्था, पुक्पु पाइक्तु। 28 मोसामी आ कली सोइक्ब परमप्रभु यावे आ लोव्र नेल्ल नु आ पचा माल्शो चिन्ड यो हारून कली शेंताक्व।

29 मिनू मेको निक्शीमी इस्राएली आन खाल्पा नेल्ल आन कली खुप्ताक्से। 30 हारूनमी परमप्रभु यावेमी मोसा नु पशो लोव्र नेल्ल मेको आन कली शेंताक्व। मोसा कली कौंइशो चिन्ड, हारूनमी मुर आन डौंइती कौंइताक्व। 31 मिनू मुरपुकीमी थमा सुइक्तेक्म। मिनू परमप्रभु यावेमी इस्राएली आन कली गुम्था, आन श्येत तशा, वारच पचा चिक्शो तुइश्शा, मेकोपुकी बाप्शा, परमप्रभु कली ठेयब सेल्लेक्म। प्रस्थान ३:१६

मोसा नु हारून आस लोव्र

5 मिनू नोले मोसा नु आ लोक्ब हारून फाराओ गुम्थ लाम्ताक्स। मिनू मेको कली “परमप्रभु यावे, इस्राएली आन परमप्रभुमी आंस कली लोव्र पापु। मेकोमी ‘आं मुर आन कली गोरशो रागीमी आं पर्बम चाड मानेचा कली लचा गेवो’ दे परमप्रभु यावेमी इन कली देंशो बाक्ब” देंताक्स। प्रस्थान ३:१८; प्रस्थान ७:१६, २६; प्रस्थान ९:१, १३ 2 मिनू फाराओमी “परमप्रभु यावे सु बाक्म, गो मतुइक्नुड। मार, आ देंशो लोव्र टिचा माल्नुडा? गो इस्राएली आन कली मारदे लचा गेनुडा? गो परमप्रभु यावे कली मतुइक्नुड। मोपतीके इस्राएल डा मुर, इन कली लचा मगेननी” देंत। 3 मिनू मेको निक्शीमी “हिब्रू मुर आन परमप्रभुमी आंस कली गुम्तु। आंइ कली लचा गेने, दे पुंडनस्कु। गोपुकी रोइमी, लडाइमी मबेक्कल, दे परमप्रभु यावे, आंइ परमप्रभु कली चढेथ नाक्त सां सम्म गोरशो रागीम लचा गेने” दे माइक्ताक्स। 4 मिनू इजीप्त डा पिपम मेको आस कली “मोसा नु हारून, गे मारदे मुर आन कली आन गेय क्योल्चा माल्लीसी? इस गेय पथ लस” देंत।

इस्राएली आन कली श्येत गेशो

5 मिनू फाराओमी लेंशा “नेनीस, इस जात डा मुर शुश दुम्तेक्म। गे मेको आन कली आन गेय रे नाइक्वा गेचा माल्सी?” दे मोसा नु हारून आस कली हुइक्ताक्व। प्रस्थान १:७, १२ 6 मोपतीके मेको नाक्ती रे फाराओमी गेय पपाइक्ब ठेयब मुर नु कोव्रब मुर आन कली 7 “मुल रे इस्राएली आन कली इंटा सेल्चा कली पराल मगेचा, आंमा गुम्थ लचा माल्लीम। 8 तन्न इंटा चहिं डौंइती दोशो सेल्मे, मुल यो मोशोन सेल्चा माल्लीमी। मिनू आन गेय डौंइती

पशो खोदेंशो पा पचा माल्नीम। मारदे हना आन गेय मबाकमेनु, मेकोपुकीमी 'गोपुकी गोरशो रागीम आंइ परमप्रभु कली चढेचा दाक्नीकी' दे लोत्र पशा ग्रीनीम।<sup>9</sup> मेको मुर आन कली शुश गेय पपाइश्शा श्येत गेचा माल्नीनी। मेकोपुकीम गेय पा बाकमानु, दूली लोत्र मनैनीम" दे आ मुर आन कली देंमाक्त।

<sup>10</sup> मिनु इस्राएली आन कली गेय पपाइक्बपुकी नु कोव्रबपुकीमी मुर आन कली "फाराओमी 'इन कली पराल मगेनुड' देशो बाक्ब।<sup>11</sup> मोपतीके ते खुप्ने चाप्नीनी, मेक डा खुप्तीन। इंटा चहिं डोंइती दोशो सेल्नी, मुल यो मोशोन सेल्चा माल्नीनी" दे मदमे बाक्त।<sup>12</sup> मोपा मेकोपुकी इजीप्त रागीमी पराल मथित्तीके पराल के ठुटा गुप्थ ब्रशा गाक्मा बाक्त।<sup>13</sup> गेय पपाइक्बपुकीमी "पराल गेशो नाक्त दोशो इंटा सेल्नी, मुल यो मोशोन सेल्चा माल्नीनी" दे शुश गेय पपदमे बाक्त।<sup>14</sup> फाराओ आ गेय पपाइक्ब इस्राएली कोव्रबपुकी यो वोइश्शो बाक्मा बाक्त। मेको आन कली तुप्शा "डोंइती डा खोदेंशो पा सिनाक्ती मुलाक्ती इंटा मारदे मसेल्नी?" दे इस्राएली कोव्रब आन कली हुइक्तमे बाक्त।

<sup>15</sup> मिनु इस्राएली कोव्रबपुकीमी फाराओ कली "मारदे इन वाइल आन कली ओदेंशो मरिश्शो पाइनीनी?"<sup>16</sup> इन वाइल आन कली पराल मगेथु 'इंटा सेलीने' दे हुइक्नीनी। मेको ला ममाइ, इन मुरपुकीमी आंइ कली तुप्जीम। गे इन रागी डा मुर आन कली मरिश्शो पपाइक्नीनी" देंमा बाक्त।<sup>17</sup> मिनु फाराओमी "गे अल्सेपुकी, थम अल्से दुप्तीनी। मोपतीके गे 'आंइ कली परमप्रभु यावे कली चढेथ लचा गेने' देंतीनी।<sup>18</sup> मुल गेय पथ लने। पराल मगेंसीब, इंटा चहिं डोंइती दोशो सेल्नी, मोशोन सेल्चा माल्नीनी" देंमाक्त।<sup>19</sup> मिनु इस्राएली कोव्रबपुकीमी "इं कली मरिश्शो पशा, शुश श्येत गेनीम" दे तुइक्तमे बाक्त। मारदे हना "डोंइती नाक्त किंत किंत दोशो इंटा सेल्नी, मुल यो मोशोन सेल्चा माल्नीनी" देशो बाक्मा बाक्त।

<sup>20</sup> मिनु फाराओ आ बाक्तीके रे लमानु, मेकोपुकीमी लांमी रिम्शा बाक्शो मोसा नु हारून आस कली गुम्तेक्म।<sup>21</sup> मिनु मेको कोव्रबपुकीमी "परमप्रभु यावेमी इस कली सजाइ गेवल। मारदे हना गे निक्शीमी फाराओ नु आ मुर आन डोंइती आंइ कली मरिश्शो सेल्तीसी। आंइ कली साइक्चा, दे तरवार आन गुइमी गेतीसी" दे गाइश्शा हुइक्ताक्म।

<sup>22</sup> मिनु मोसा परमप्रभु यावे आ नेक्था लशा "परमप्रभु, मारदे गे इन मुर आन कली मरिश्शो पाइनीनी? आं कली मारदे एक सोइक्तीनी?"<sup>23</sup> गो इन नेंमी फाराओ नु लोत्र पडा नोले, मेकोमी इन मुर आन कली डोंइती क्येडा शुश श्येत गेपु। गे चहिं इन मुर आन कली मप्रॉइनी" देंत।

परमप्रभुमी मोसा नु लोत्र पशो

**6** मिनु नोले परमप्रभु यावेमी मोसा कली "गो फाराओ कली मार पाइनुडा, गे मुल ताइनेवे। फाराओम मेको आन कली लचा गेचा ला ममाइ, ठेयब सक्तिमी फाराओ कली आं मुर आन कली आ रागी रे खेरपाइक्नुड" देंत। प्रस्थान ११:१; प्रस्थान १२:३३<sup>2</sup> मिनु लेंशा परमप्रभुमी मोसा कली "गो यावे नड। प्रस्थान ३:१४-१५; उत्पत्ती १७:१<sup>3</sup> गो अब्राहाम, इसहाक नु याकूब आन डोंइती गूशो 'नेल्ल क्येडा सक्ति पाइश्शो परमप्रभु नड' दे मेको आन कली तुइक्पाइक्ताक्मी। तन्न 'आं नें यावे बाक्ब' दे मतुइक्पदुमी।<sup>4</sup> गो मेको आन कली 'गे मुल अर्को रागी डा मुर दुश्शा, हिरना हिरन बाक्शो कनानी आन रागी इन कली गेनुड' दे अब्राहाम, इसहाक नु याकूब नु कबल पने थुम्शो नड। उत्पत्ती १७:८<sup>5</sup> मिनु गो इजीप्त डा मुरपुकीमी इन कली गेय पाइब सेल्मेनु, श्येत जशो इस्राएली आन डाक्शो ताता। मिनु गो आं कबल पशो मिम्ताक्ड।<sup>6</sup> मोपतीके गो इस्राएली आन कली 'गो परमप्रभु यावे नड। गो इजीप्त डा मुर आन गेशो श्येत नु इन वाइल दुश्शो गेय रे प्रॉइन्नी। गो इजीप्त डा मुर आन कली ठेयब सजाइ गेशा, आं ठेयब सक्तिमी इन कली गुंइनुड।<sup>7</sup> मिनु गो इन कली आं मुर सेल्नुड। गो इन परमप्रभु दुम्नुड। मिनु गो इन कली इजीप्त डा मुर आन गेशो श्येत रे गुंइब, परमप्रभु यावे, इन परमप्रभु नड, दे तुइक्चा माल्नीनी।<sup>8</sup> मिनु गो अब्राहाम, इसहाक नु याकूब आन कली गेनुड, दे कसम जशो रागीम इन कली

चाक्दीत्नुड। मिनु मेको रागी इन के दुम्ब। गो परमप्रभु यावे नड' दे गे इस्राएली आन कली देंचा माल्नेवे" देंत। उत्पत्ती २२:१६

<sup>9</sup> मिनु मोसामी मेको लोत्र इस्राएली आन कली नेंपदानु, वाइल दुप्तीके नु आन थुं लुक्च लतीके मोसा आ लोत्र मननेम।<sup>10</sup> मिनु परमप्रभु यावेमी मोसा कली<sup>11</sup> "गे इजीप्त डा पिप फाराओ कली 'इस्राएली आन कली इन रागी रे लचा गेने' दे मतो" देंत।<sup>12</sup> मिनु मोसामी परमप्रभु यावे कली "इस्राएलीपुकीमी ला यो आं लोत्र मननेम हना, गो ब्वाक्स मजोक्ब मुर आं लोत्र फाराओम दोपा नेंबा?" दे लोत्र लेत्ताक्व। प्रस्थान ६:३०; प्रस्थान ४:१०<sup>13</sup> मोपा परमप्रभु यावेमी मोसा नु हारून आस कली इस्राएली आन पर्वम लोत्र पापु। मिनु "गेमी इजीप्त डा पिप फाराओ कली 'इस्राएली आन कली इन रागी रे लचा गेचा माल्नीनी' दे रुप्पतीस" देंत।

मोसा नु हारून आस किकी पिपी

<sup>14</sup> इस्राएली आन किकी पिपी आन दातेमी ठेयब दुश्शो, सु सु बाक्मा बाक्त देंशा हना, इस्राएल आ डोंइती जरमेशो तौ रूबेन मेको आ तौपुकी हनोक, पल्लु, हेस्रोन नु कारमी बाक्मा बाक्त। मेको रूबेन आ खिं खिं डा मुर बाक्मा बाक्त। उत्पत्ती ४६:९-११

<sup>15</sup> सिमियोन आ तौपुकी येमुएल, यामीन, ओहद, याकीन नु सोहार बाक्मा बाक्त। मिनु का कनानी मीश रे जरमेशो शावल बाक्माक्त। मेको सिमियोन आ खिं डा मुर बाक्मा बाक्त।

<sup>16</sup> मिनु लेवी आ तौ आन खिं खिं डा मुर सु सु बाक्मा बाक्त देंशा हना, गेरशोन, कोहाथ नु मेरारी बाक्मा बाक्त। मिनु लेवी सहे का ३७ बर्स ब्रॉइमाक्त। इतिहास ५:२७-३०; इतिहास ६:१-४<sup>17</sup> गेरशोन आ तौ लिब्नी नु शिमेइ बाक्सा बाक्त।<sup>18</sup> कोहाथ आ तौपुकी अग्राम, इच्हार, हेब्रोन नु उज्जीएल बाक्मा बाक्त। मिनु कोहाथ सहे का ३३ बर्स ब्रॉइमाक्त।<sup>19</sup> मिनु मेरारी आ तौ माहली नु मुशी बाक्सा बाक्त। मेको लेवी आ खिं खिं डा मुर बाक्मा बाक्त।

<sup>20</sup> मिनु अग्राममी आ आफ आ समी चाक्गा बाक्त। मेको आ नें योकेबेद बाक्माक्त। मेकोमी हारून नु मोसा थिमाक्त। अग्राम सहे का ३७ बर्स ब्रॉइमाक्त। प्रस्थान २:१; लेवी १८:१२

<sup>21</sup> इच्हार आ तौपुकी कोराह, नेफेग नु जिक्की बाक्मा बाक्त। गन्ती १६:१<sup>22</sup> उज्जीएल आ तौपुकी मीशाएल, एल-साफान नु सिथ्री बाक्मा बाक्त। लेवी १०:४<sup>23</sup> मिनु हारूनम नहशोन आ समी अम्मीनादाब आ तमी एली-शेबा चाक्गा बाक्त। मेकोमी नादाब, अबीहु, एलाजर नु इथामार थिमाक्त। प्रस्थान २८:१<sup>24</sup> कोराह आ तौपुकी अस्सीर, एल्काना नु अबी-आसाफ बाक्मा बाक्त। मेको कोराह आ खिं डा मुर बाक्मा बाक्त।<sup>25</sup> मिनु हारून आ तौ एलाजरम पुतीएल आ तमी चाक्गा बाक्त। मेकोमी फिनेहास थिमाक्त। मेकोपुकी लेवी आ खिं डा ठेयब मुर बाक्मा बाक्त। गन्ती २५:७<sup>26</sup> मिनु परमप्रभु यावेमी हारून नु मोसा कली "गे इस्राएल डा मुरपुकी हुल हुल पा इजीप्त रागी रे गुंइदीस" देंत। प्रस्थान ६:१३<sup>27</sup> मिनु मेको निक्शीमी इजीप्त डा पिप फाराओ कली "इस्राएल डा मुर आन कली लचा गेने" दे लोत्र पाम्ताक्से।

<sup>28</sup> मिनु परमप्रभु यावेमी इजीप्त रागीमी मोसा कली<sup>29</sup> "गो परमप्रभु यावे नड। गे इजीप्त डा पिप फाराओ कली आं देंशो लोत्र नेल्ल माइक्चा माल्नेवे" देंत।<sup>30</sup> मिनु मोसामी परमप्रभु यावे कली "गो ब्वाक्स मजोक्ब मुर नड। दोपा फाराओमी आं लोत्र नेंबा डा?" देंत। प्रस्थान ६:१२

मोसामी चिन्ड कोंइशो

**7** परमप्रभु यावेमी मोसा कली "नेनो, गो इ कली फाराओ आ डोंइती परमप्रभु खोदेंशो पा चिन्ड कोंइने चाक्ब सेल्लतन। इ लोक्ब हारून चहिं इ लोत्र पाइब दुम्ब। प्रस्थान ४:१६<sup>2</sup> गो इ कली मार मार माइक्ना, गे मेको देंचा माल्नेवे। मिनु इ लोक्ब हारूनमी 'इस्राएली आन कली इन रागी रे लचा गेने' दे फाराओ कली देंचा माल्ब।<sup>3</sup> तन्न गो फाराओ कली काइ मटीब सेल्नुड। मिनु गो इजीप्त रागीमी शुश चिन्ड नु छक लाक्चा डा गेय कोंइनुड। प्रस्थान ४:२१<sup>4</sup> मिनु फाराओमी इस कली मटीब। मिनु गो इजीप्त डा मुर

आन कली थाम्पान सजाइ गेशा, आं शुश मुर आन कली इजीप्ट रागी रे गुंडनुड।<sup>5</sup> गो इजीप्ट डा मुर आन कली थाम्पान सजाइ गेशा, इस्राएली आन कली आन दाते रे गुंडनुड 'गो परमप्रभु यावे नड' दे इजीप्ट डा मुर आन कली तुइक्पाइक्नुड" देंत। प्रस्थान ७:१७; प्रस्थान ८:१८; प्रस्थान ९:२९; १सामुएल १७:४६; १राजा २०:२८; २राजा १९:१९; इजीकीएल २९:६  
<sup>6</sup> मिनु मोसा नु हारूनमी परमप्रभु यावे आ देशो पाम्ताक्से।<sup>7</sup> मोपा फाराओ नु लोत्र पची ना, मोसा ८० बर्स दुश्शो बाक्त। हारून ८३ बर्स दुश्शो बाक्त।

### कोक्के ब्वारशा बुस्स दुम्पाइश्शो

<sup>8</sup> मिनु परमप्रभु यावेमी मोसा नु हारून आस कली<sup>9</sup> "फाराओमी इस कली 'छक लाक्वा डा चिन्ड कोइदीसे' देंमेनु, गेमी हारून कली 'इ कोक्के बुस्स दुम्पाइक्वा कली फाराओ आ डोंइती ब्वारदो' देंचा माल्नेवे। मिनु मेको कोक्के बुस्स दुम्ब" देंत। प्रस्थान ४:३<sup>10</sup> मोपा मोसा नु हारूनमी परमप्रभु यावे आ देशो पशा, फाराओ आ बाक्तीकेमी लाम्ताक्स। मिनु हारूनमी आ कोक्के फाराओ नु आ गेय पाइब मुर आन डोंइती ब्वारताक्व। मिनु मेको कोक्के बुस्स दुम्ब।<sup>11</sup> मिनु फाराओमी इजीप्ट रागी डा जादू नु टुना मुना पाइब आन कली ब्रेत्ताक्मी। मेकोपुकीमी यो आन टुना मुनामी हारून खोदेशो पा आन कोक्के ब्वारशा, बुस्सपुकी सेल्तेक्म। प्रस्थान ७:२२; प्रस्थान ८:३; उत्पत्ती ४१:८; २तिमोथी ३:८<sup>12</sup> तन्न हारून आ कोक्के रे दुश्शो बुस्सुमी मेको आन कोक्के रे दुश्शो बुस्स नेल्ल आन कली दाक्तीमी।<sup>13</sup> मिनु परमप्रभु यावेमी देशो खोदेशो पा फाराओ काइ मटीब दुम्शा, मोसा नु हारून आस देशो लोत्र मबिस्से। प्रस्थान ४:२१

### ब्वाक्कु नेल्ल हुश सेल्शो

<sup>14</sup> मिनु परमप्रभु यावेमी मोसा कली "फाराओ काइ मटीब दुम्ब। आं मुर आन कली लचा मगेब।<sup>15</sup> गे दीसा सुनी फाराओ गुम्थ लचा माल्नीसी। फाराओ ब्वाक्कु आ नेक्था लमेनु, गे मेको आ क्येडा डोंइती खोला आ नेक्था जाक्दीश्शा, रिश्शा बाक्वा माल्नीसी। बुस्स दुम्ब कोक्के यो लाइक्वा माल्नीसी।<sup>16</sup> मिनु गे मेको कली 'परमप्रभु यावे, हिब्रू मुर आन परमप्रभुमी इन कली, आं मुर आन कली आं कली चढेतीक चढेथ गोरशो रागी लचा गेवो, देंती। तन्न गे मुल सम्म आं लोत्र मटिवी' देंत" देनीस। प्रस्थान ५:१<sup>17</sup> मोपतीके परमप्रभु यावेमी "गो परमप्रभु यावे नड। गे आं पतीकेमी तुइक्नेवे। गो आं कोक्केमी नील खोला डा ब्वाक्कु तुप्नुड। मिनु मेको हुश दुम्ब। प्रस्थान ४:९<sup>18</sup> मिनु खोला डा डाइ नेल्ल बेक्नीम। खोला शुश राक्शो रिना पाइब। मिनु इजीप्ट डा मुरपुकी मेको ब्वाक्कु तूचा ग्रांगा दीनीम" दे मोसा कली देंत।

<sup>19</sup> मिनु परमप्रभु यावेमी मोसा कली "गेमी हारून कली 'इ कोक्के इजीप्ट रागी डा ब्वाक्कु हुश दुम्पाइक्वा कली ब्वाक्कु तारी दिंदो। नादी, खोला, कुवा नु इनार आन तारी दिंदो। मुर आन चाक्शो ठेका नु गरम बाक्शो ब्वाक्कु यो हुश दुम्ब' दे हारून कली देनो" देंत। प्रकाश ११:६

<sup>20</sup> मिनु परमप्रभु यावेमी मोसा नु हारून कली दोदेशो देंमे, मोदेशो पाम्ताक्स। मोसामी फाराओ नु आ गेय पाइब आन डोंइती आ कोक्के खोला डा ब्वाक्कु तार दिंशा तुबानु, हुश दुम्ब।<sup>21</sup> मोपा नील खोला डा डाइ नेल्ल बेक्तेक्म। मिनु ब्वाक्कु राक्शो रिना पाइश्शो दुम्ब। इजीप्ट रागी डा मुर नेल्लेमी नील खोला डा ब्वाक्कु तूने मचबेम। इजीप्ट रागी नेल्ल हुशेइ हुश दुम्ब।<sup>22</sup> इजीप्ट रागी डा ठेयब टुना मुना पाइबपुकीमी यो आन मन्तरमी आस पशो खोदेशो पांमेक्म। फाराओ आ थुं चहिं डोंइती डा खोदेशो पा काइ मटीब दुम्माक्त। मिनु मोसा नु हारून आस देशो मटिवो। परमप्रभु यावेमी डोंइती दोदेशो देंमे, मोदेशो दुम्ब। प्रस्थान ७:११<sup>23</sup> मिनु फाराओ आ खिं लेम्माक्त। मार दुम्मे, मारेइ ममिम्ता बाक्त।<sup>24</sup> इजीप्ट रागी डा मुरपुकीमी नील खोला आ नेक्था शुश कुवा दोम्तेक्म। मारदे हना नील खोला डा ब्वाक्कु काइ तूचा मदुम।<sup>25</sup> मोपा परमप्रभु यावेमी नील खोला डा ब्वाक्कु तुप्शा, हुश दुश्शो ७ नाक्ती दुम्ब।

### क्वक्कु गूपाइश्शो

<sup>8</sup> मिनु नोले परमप्रभु यावेमी मोसा कली "गे फाराओ आ बाक्तीक लावो। परमप्रभु यावेमी आ मुर आन कली लचा गेमी। प्रस्थान ५:१<sup>2</sup> गे लचा मगेतीनी हना, क्वक्कुपुकीमी इ रागी डा मुर नेल्ल आन कली श्येत गेपाइक्नुडमी।<sup>3</sup> नील खोलाम शुश क्वक्कु गूपाइक्नुड। मेकोपुकी इन खिम बाक्थ जाक्नीम। इन इप्तीक कोठामी यो ओवनीम। इन खाट तार डोंइक्नीम। मिनु इन दरवार डा गेय पाइब आन खिंमी यो ओवनीम। मुर आन तार नु आन चुप्लुमी यो बाक्नीमी। आन फस नित्तीके बोस आगाम ओवनीम।<sup>4</sup> मेको क्वक्कुपुकी इन तारी, इन मुर आन तारी नु इन दरवार डा गेय पाइब आन तारी जाक्नीम, दे परमप्रभु यावे आ देशो लोत्र बाक्ब, दे मतो" दे मोसा कली देंत।

<sup>5</sup> मिनु नोले परमप्रभु यावेमी मोसा कली "गेमी हारून कली 'इ कोक्के खोला नेल्ल आन तार दिंदो। मोपा गे इजीप्ट रागीम क्वक्कु गूपाइक्नेवे' दे हारून कली देनो" देंत।<sup>6</sup> मिनु हारूनमी आ गुइ इजीप्ट डा ब्वाक्कु तारी दिंताक्व। मिनु क्वक्कुपुकी गूशा, इजीप्ट रागी नेल्ल ब्रीतेक्म।<sup>7</sup> इजीप्ट रागी डा जादू टुना मुना पाइबपुकीमी यो आन मन्तरमी हारून खोदेशो पा क्वक्कु गूपाइक्तेक्म। प्रस्थान ७:११

<sup>8</sup> मिनु फाराओमी मोसा नु हारून आस कली ब्रेप्पाइश्शा "आं पर्वम नु आं मुर आन पर्वम परमप्रभु यावे कली पुनीस। क्वक्कु लमल, दे पुनीस। गोमी इस्राएल जात डा मुर आन कली परमप्रभु यावे कली चढेथ लचा गेनुड" दे मोसा नु हारून आस कली देंत। प्रस्थान ८:२४; प्रस्थान ९:२८; प्रस्थान १०:१७<sup>9</sup> मिनु मोसामी फाराओ कली "हजुर, इन कली नु इन गेय पाइब आन कली, इन मुर आन खिं नु इन खिं रे क्वक्कु लमल, नील खोलाम ला बाक्मल, दे गेना पुंइचा माल्न्स्कु?" दे हिल्लो पाप्तु।<sup>10</sup> मिनु "दीसा कली पुनीस" दे लोत्र लेत्ताक्व। मोसामी "परमप्रभु यावे आंइ परमप्रभु खोदेशो सुइ मबा, दे तुइक्पाइक्वा कली इन देशो दीसा दुम्ब। प्रस्थान ९:१४; प्रस्थान १५:११; ब्यवस्था ३३:२६; २सामुएल ७:२२; येरमीया १०:६<sup>11</sup> दीसा क्वक्कुपुकी इन बाक्तीक, इन गेय पाइब नु इन मुर इन खिं नेल्ल रे गाक्नीमी। नील खोलाम ला बाक्नीम" देंत।

<sup>12</sup> मोपा मोसा नु हारून फाराओ आ खिं रे लाम्ताक्स। मिनु मोसामी मेको परमप्रभु यावे आ सोइश्शो क्वक्कु आ पर्वम पुंइतु।<sup>13</sup> मिनु परमप्रभु यावेमी मोसामी पुंइशो नेंशा पाप्तु। खिम, लाडगाम नु रूम बाक्शो क्वक्कु नेल्ल बेक्तेक्म।<sup>14</sup> मुरुमी बेक्शो क्वक्कु नेल्ल खुत्ताक्म। मिनु रागी नेल्ल थाम्पा रिना पाइक्तु।<sup>15</sup> इजीप्ट रागी डा फाराओ चहिं मेको क्वक्कु रे ब्रोंइशो तशा, आ थुं डोंइती डा खोदेशो पा काइ मटीब दुम्माक्त। मिनु मोसा नु हारूनम देशो लोत्र मपव। डोंइती परमप्रभु यावेमी मो देशो बाक्माक्त। प्रस्थान ४:२१

### भुस्ना गूपाइश्शो

<sup>16</sup> मिनु नोले परमप्रभु यावेमी मोसा कली "गेमी हारून कली 'इ कोक्के दिंशा, फुरक तुपो' दे मतो। मिनु मो पवानु, इजीप्ट रागीमी फुरक नेल्ल भुस्ना दुम्शा फोंइनीम" दे मोसा कली माइक्तु। प्रस्थान<sup>17</sup> मिनु हारूनमी फुरक तुबानु, इजीप्ट रागी नेल्लेमी मुर नु बस्तु भाव आन तारी भुस्ना शुश फोंइतेक्म।<sup>18</sup> इजीप्ट रागी डा जादू टुना मुना पाइबपुकीम यो हारून खोदेशो पा भुस्ना गूपाइक्वा माल्तेक्म। तन्न मचबेम। मुर नु बस्तु भाव आन तारी भुस्ना शुश जुक्ताक्म। प्रस्थान ७:११<sup>19</sup> मिनु जादू टुना मुना पाइबपुकीमी फाराओ कली "एको परमप्रभुमी पाप्तु" देंमा बाक्त। फाराओ चहिं काइ मटीब दुम्माक्त। मिनु मोसा नु हारून आस देशो लोत्र मटिव। परमप्रभु यावेम डोंइती देशो खोदेशो दुम्ब। भजन संग्रह ६४:१०; भजन संग्रह ७२:१८; लूका ११:२०

### डांस गूपाइश्शो

<sup>20</sup> मिनु परमप्रभु यावेमी मोसा कली "सुनी कना बोक्को। फाराओ खोला लमेनु, मेको कली गुम्थ लावो। मिनु फाराओ कली 'परमप्रभु यावेमी, आं मुर आन कली आं कली चढेथ लचा गेवो। प्रस्थान ५:१<sup>21</sup> नेनो, गे आं मुर आन



कली लचा मगेप्तीवी हना, गो इ कली, इ गेय पाइब आन कली नु इ मुर नेल्ल आन कली श्येत जपाइक्वा कली इ खिमी, इ रागी डा मुर आन खिमी डांसम ब्रीपाइक्नुड। रू नेल्ल डांसम ब्रीपाइक्नुड। 22 मेको मो दुम नाक्ती आं मुर आन बाक्तीक गोशेनमी चहिं डांस मगूपाइक्नुड। अरु इजीप्त रागीमी गूपाइक्नुड। आं पर्वम तुइक्वाइक्वा कली मो पाइनुड। मिनु गे आं पर्वम परमप्रभु यावे मेको रागीम बाक्ब, दे तुइक्वा माल्नेवे। प्रस्थान ७:५

23 मोदेशो पा गो आं मुर आन बाक्तीकेमी डांस मगूपाइक्नुड। इ मुर आन बाक्तीकेमी ला डांस गूपाइक्नुड। दीसा गे तुइक्नेवे, देनो' दैत" दे परमप्रभु यावेमी मोसा कली दैत। 24 मिनु परमप्रभु यावेमी आ देशो पाप्तु। डांस शुश फोंडशा फाराओ आ खिं, आ दरवारम गेय पाइब आन खिं, इजीप्त रागी नेल्लेमी शुश डांस फोंडशा ब्रीतेक्म। मिनु डांसमी मेको रागी नेल्ल खतम सेल्लेक्म।

25 मिनु नोले फाराओमी मोसा नु हारून आस कली ब्रेप्पाइश्शा "लने, इन परमप्रभु कली आं रागी उइ चढ़ेने" दैत। 26 मोसामी चहिं "मो पचा मदुम्ब। मारदे हना परमप्रभु यावे, आंइ परमप्रभु कली चढ़ेशो तशा, इजीप्त डा मुर ग्रांग्रा दीनीम। मोपा इजीप्त डा मुर आन डांइती आन मदाक्शो गेय पकानु, मेकोपुकीमी आंइ कली फुल्लु आप्शा, साइक्नीम। उत्पत्ती ४३:३२; उत्पत्ती ४६:३४ 27 गोपुकी नाक्त सां डा लां गाक्शा, गोरशो रागीम लशा, परमप्रभु यावेम देशो खोदेशो पा चढ़ेचा माल्नीकी" दैत। प्रस्थान ३:१८ 28 मिनु फाराओमी "गो इन कली गोरशो रागीम परमप्रभु यावे, इन परमप्रभु कली चढ़ेथ लचा गेनुड। शुश डोन चहिं मलने। आं पर्वम यो पुनीस" दैत। 29 मिनु मोसामी "मुल गो एकरे रे लशा, परमप्रभु यावे कली पुंइनुड। मार पुंइनुड देशा हना 'दीसा फाराओ, आ गेय पाइब नु रागी डा मुर नेल्ल आन बाक्तीक रे डांस प्रोक्पतीने' दे पुंइनुड। तन्न लोव का पाइनुड। गे आंइ कली परमप्रभु यावे कली चढ़ेचा दुम्ब, दे नोले 'लचा मगेनुड' देशा, जोल मपने" दे मोसामी फाराओ कली दैत। 30 मो देशा मोसा फाराओ आ खिं रे लशा, परमप्रभु यावे कली पुंइतु। प्रस्थान ८:८ 31 मिनु परमप्रभु यावेमी मोसा आ पुंइशो लोव नैशा पाप्तु। मिनु डांस फाराओ आ खिं, आ गेय पाइब नु मुर नेल्ल रे तिल्लु। काइ मलीम। 32 तन्न फाराओ लैशा काइ मटीब दुम्शा, इस्राएली आन कली लचा मगेव। प्रस्थान ४:२१

### बस्तु भाव बेक्पाइश्शो

9 मिनु परमप्रभु यावेमी मोसा कली "फाराओ आ बाक्तीके लावो। मिनु गे परमप्रभु यावे, हिब्रू मुर आन परमप्रभुमी इन कली 'आं मुर आं कली चढ़ेथ लचा गेवो। प्रस्थान ५:१ 2 नेनो, गे मेको आन कली लचा मगेथु, तेक्तीवी हना, यसैया १:२० 3 परमप्रभु यावेमी इन गोठम बाक्शो बस्तु भाव आन कली ठेयब रोइ पपाइक्ब। इन शारा, गधा, दलओठ, बी ब्यफ नु क्यारश भेडा नेल्ल आन कली बेक्तीक रोइ पपाइक्ब। प्रस्थान ३:२० 4 तन्न इस्राएली आन बस्तु भाव आन कली रोइ मपपाइक्ब। इजीप्त डा मुर आन बस्तु भाव आन कली चहिं रोइ पपाइक्ब। इस्राएली आन बस्तु भाव मबेक्नीम' दे फाराओ कली माइक्वा माल्नेवे" दे परमप्रभु यावेमी मोसा कली दैत। प्रस्थान ८:१८ 5 मिनु परमप्रभु यावेमी "गो दीसा इजीप्त रागीम मो पाइनुड" दैत। 6 मिनु आ दीसा परमप्रभु यावेमी आ देशो पाप्तु। इजीप्त रागी डा मुर आन बस्तु भाव बेक्मा बाक्त। तन्न इस्राएली आन बस्तु भाव चहिं मबेक्म। 7 मिनु फाराओमी इस्राएल डा मुर आन बस्तु भाव यो बेक्मा कों, दे कोव्रथ मुर सोइक्ताक्व। तन्न का यो मबेक्शो बाक्तेक्म, दे तुइक्वाइक्तेक्म। मोपा यो फाराओ काइ मटीब दुम्शा, इस्राएली आन कली लचा मगेव। प्रस्थान ४:२१

### परमप्रभुमी गार मुपाइश्शो

8 मिनु नोले परमप्रभु यावेमी मोसा नु हारून आस कली "गे चुप्पु डा पुलु हुइश्शा कुरशा लस। मिनु मोसामी फाराओ आ डांइती मेको पुलु सरीड गे फ्रचा माल्ब। 9 मेको पुलु फुरक दुम्शा, मुर नु बस्तु भाव आन कली मरिश्शो गार मुपाइक्ब। इजीप्त रागी नेल्लेमी मोदेशो दुम्ब" दैत। ब्यवस्था २८:२७ 10 मिनु मोसा नु हारूनमी चुप्पु डा पुलु हुइश्शा कुरशा, फाराओ आ डांइती

राप्ताक्स। मिनु मोसामी मेको पुलु सरीड गे फ्राप्तु। मिनु मुर नु बस्तु भाव नेल्ल शुश गार मुतेक्म। प्रकाश १६:२ 11 मिनु इजीप्त रागी डा जादू पाइबपुकी यो शुश गार मुशा, रोइ पशा, मोसा आ नेक्था बाक्ने मचबेम। 12 परमप्रभु यावेमी फाराओ कली काइ मटीब दुम्पदा बाक्त। मिनु मोसा नु हारून आस लोव मटिव। परमप्रभु यावेमी मोसा कली डांइती दोदेशो देमे मोदेशो दुम्त। प्रस्थान ४:२१

### ठेयब मुप्स यिपाइश्शो

13 मिनु परमप्रभु यावेमी मोसा कली "सुनी कना बोक्शा, फाराओ कली गुथ लशा, परमप्रभु यावे, हिब्रू मुर आन परमप्रभुमी इन कली 'आं मुर आन कली आं कली चढ़ेथ लचा गेवो। प्रस्थान ५:१ 14 मारदे हना मुल रे गेचशो श्येतम इ कली, इ गेय पाइब आन कली नु इ मुर नेल्ल आन कली सोइक्नुड। रागी रागीमी आं खोदेशो सुइ मबाक्ब, दे इ कली तुइक्वाइक्नुड। प्रस्थान ८:६ 15 मुल गो इ कली नु इ मुर आन कली बेक्तीक रोइ पपटु वा। 16 तन्न गो आं सक्ति रागी नेल्लेम तुइक्वाइक्वा कली इ कली मुल सम्म ब्रोंइचा गेता। आ नें रागी नेल्ल डा मुर आन कली तुइक्वाइक्वा, दे इ कली ब्रोंइचा गेता। प्रस्थान १४:४; रोमी ९:१७ 17 गे आं मुर आन कली लचा मगेतीके, इ ठेयब लेशो तुइक्ताक्ड। 18 नेनो, दीसा गो शुश मरिश्शो मुप्स यिपाइक्नुड। मुल सम्म इजीप्त रागीमी मुर बाक्वा गोव्रमे रे मोदेशो ठेयब मुप्स गेनायो मयिश्शो बाक्ब। 19 मोपतीके इ बस्तु भाव आन कली खिं आगा ओइदो। मारदे हना मुर नु बस्तु भाव, सु सु लाडगाम बाक्नीमी, मेको मुप्सीम तुप्शा बेक्नीम' देनो दैत" दे परमप्रभु यावेमी मोसा कली दैपाइक्तु।

20 फाराओ आ गेय पाइब आन दातेमी सु सु परमप्रभु यावे क्येडा हिंमा, मेकोपुकीमी आन गेय पाइब नु आन बी ब्यफ, क्यारश भेडा आन कली खिं आगा ओइताक्म। 21 सु सु परमप्रभु यावे आ देशो लोव क्येडा महिंमा, मेकोपुकीमी चहिं आन गेय पाइब नु आन बस्तु भाव आन कली खिं आगा मओइदेम।

22 मिनु नोले परमप्रभु यावेमी मोसा कली "इ गुइ सरीड गे दिंदो। मो पवीनु, इजीप्त रागी नेल्लेमी मुप्स यीब। मुप्स यिशा, मुर बी ब्यफ, क्यारश भेडा नु रू आन तारी देल्ल" दे परमप्रभु यावेमी मोसा कली दैत। 23 मिनु मोसामी आ कोक्के सरीड गे दिंदानु, बुंबु चिला पा, मुप्स यित। मोपा परमप्रभु यावेमी इजीप्त रागीमी मुप्स यिपाइक्तु। मिनु परमप्रभु यावेमी चिला दाप्पाइश्शा, मुप्स यिपाइक्तु। प्रकाश १६:२१ 24 चिला पना पन मुप्स यित। मेको मुप्स थम कोल्कोल्शो बाक्तेक्म। इजीप्त रागीम मुर बाक्वा गोव्रमे रे मोमो कोल्शो मुप्स गेनायो मतशो बाक्तेक्म। 25 मिनु इजीप्त रागी डा रूम वाशो मारेइ मारेइ मुप्सीमी श्येत्थ पोक्तु। मुर नु बी ब्यफ, क्यारश भेडा आन कली साइक्तु। रूम मार मार ख्रुम्शो बाक्मे, मेको नेल्ल साइश्शा, रवा आन कली यो जिक्तु। 26 इस्राएली आन बाक्तीके गोशेनमी ला मुप्स मयी। प्रस्थान ९:४; प्रस्थान ८:१८

27 मिनु फाराओमी मोसा नु हारून आस कली ब्रेत्ताक्मसी। मिनु मेको आस कली "मुल गो पाप पाता। परमप्रभु यावे ठीक पाइब बाक्ब। गो नु आं मुरपुकीम मरिश्शो पाइतक। 28 आंइ पर्वम परमप्रभु यावे कली पुनीस। एको बुंबु नु मुप्स मयिपदल। गो इन कली लचा गेनुड। मुल गे एकर बाक्वा ममाल्नीनी" दैत। प्रस्थान ८:४ 29 मिनु मोसामी "गो सहर रे लशा, इन पर्वम आं गुइ पोक्शा, परमप्रभु यावे कली पुंइनुड। नोले बुंबु पचा नु मुप्स यिचा नाइक्ब। मिनु गे रागी नेल्ल परमप्रभु यावे केन बाक्ब, दे तुइक्नीनी। प्रस्थान ७:५ 30 तन्न गे नु इन दरवार डा गेय पाइबपुकी मुल सम्म परमप्रभु, परमप्रभु यावे कली महिंशो बाक्नीनी, दे तुइक्ताक्ड" दे फाराओ कली दैत। 31 मेको मुप्सीमी मार पाप्तु देशा हना, सनपाट नु क्योव्रज नेल्ल खतम सेल्लु। मारदे हना क्योव्रज बाला दुम्ने थुम्शो नु सनपाट बोइक्ने थुम्शो बाक्त। 32 तन्न चेरब नु अर्को अन्न चहिं नोले ला मीबाक्तेक्म। मोपतीके मसद। 33 मोदेशो दुम्शा मोसामी फाराओ आ बाक्तीके रे लशा, आ गुइ परमप्रभु यावे गे पोक्शा, फाराओ आ पर्वम पुंइतु। मिनु बुंबु पा, मुप्स नु रेउ यिचा नाइक्ताक्व। 34 मिनु फाराओ नु आ गेय पाइबपुकीमी रेउ, मुप्स यिचा नु बुंबु पचा नाइश्शो तशा, लैशा पाप पान्तेक्म। मोपा मटीम। 35 फाराओ काइ

मटीब दुम्शा, इस्राएली आन कली लचा मगेव। परमप्रभु यावेमी मोसा कली देशो खोदेशो दुम्त। प्रस्थान ४:२१

सल्हा माले गूपाइश्शो

10 मिनु परमप्रभु यावेमी मोसा कली “गे फाराओ कली आं चिन्डपुकी कौइचा कली गुम्थ लसे। मारदे हना गो मेको नु आ गेय पाइब आन कली काइ मटीब दुम्पाइक्ता।<sup>2</sup> मिनु गे इ चच युइ आन कली ‘गो इजीप्त डा मुर आन कली मार मार पडा’ मेको शेंदो। गो मोदेशो चिन्ड कौइब बाक्नुड। ‘गो परमप्रभु यावे नड’ दे नेल्लेमी तुइक्तामेक्ल” देंत।

प्रस्थान ६:२-८<sup>3</sup> मिनु मोसा नु हारून फाराओ आ बाक्तीके जाक्दीश्शा, मेको कली “हिब्रू आंइ परमप्रभु यावे, हिब्रू मुर आन परमप्रभुमी इन कली ‘गेना सम्म गे आं डोंइती ठेयब लेशशा बाक्नेवे? आं मुर आन कली आं कली चढेथ लचा गेवो। प्रस्थान ५:३<sup>4</sup> नेनो, गे आं मुर आन कली लचा मगेनेवे हना, दीसा इ रागीम शुश सल्हा माले जाक्पाइक्नुड।<sup>5</sup> मेकोपुकीमी रागी मतचा डा पा सुन्नीम। मिनु मुप्स रे पा गिग खाइ मार मार लीशो बाक्मा, मेको नेल्ल नेक्नीम। रवा आन सफा यो नेल्ल नेक्नीम।<sup>6</sup> मिनु मेकोपुकी इ खिं, इ दरवार डा गेय पाइब आन खिं नु नेल्ल इजीप्त डा मुर आन खिं खिंम ओव्रशा ब्रीनीम। इ किकी पिपीम मोदेशो गेनायो मतामे” दे परमप्रभुमी इन कली देंत” दे मोसामी देंत। मिनु मोसा फो गूशा गाक्त।<sup>7</sup> मिनु फाराओ आ दरवार डा गेय पाइबपुकीमी फाराओ कली “मेको मुरम आंइ कली गेना सम्म श्येत गेबा? मेको मुर आन कली परमप्रभु यावे, आन परमप्रभु कली चढेचा गेने। इजीप्त रागी मुल थुम्साक्व, दे मतुइक्नीनी?” देंमा बाक्त।<sup>8</sup> मिनु मेकोपुकीमी मोसा नु हारून आस कली फाराओ आ बाक्तीके लेशशा चाक्तेक्म। मिनु फाराओमी मेको आस कली “गे लने। परमप्रभु यावे, इन परमप्रभु कली गेय पने। सु सु लाइक्नीनी?” दे हिल्लो पाप्तु।

<sup>9</sup> मिनु मोसामी “परमप्रभु यावे आ चाड मानेचा कली गो तमी तौ, खाल्पी खाल्पा, बी ब्यफ नु क्यारश भेडा नेल्ल लाइश्शा, लचा माल्नीकी” देंत। प्रस्थान ५:१<sup>10</sup> मिनु फाराओमी मेको आस कली “इन परमप्रभु यावे गे नु बाक्शो खोदेशो पा गो इन कली नु इन आल नु लचा मगेनुड। गे मरिम्शो पचा माल्नीनी, दे आंमा तुइक्नीसी।<sup>11</sup> मोदेशो मदुम्ब। वोंइश मुरपुकी ला परमप्रभु यावे कली चढेथ लने। मारदे हना एकोन इन माल्शो बाक्ब” दे हुइक्ताक्व। मिनु फाराओ आ डोंइती रे खेरतु।

<sup>12</sup> मिनु परमप्रभु यावेमी मोसा कली “सल्हा माले गूपाइक्वा कली इ गुइ इजीप्त रागी तार दिंदो। मेकोपुकीमी रागीमी मार मार गिग खाइपुकी मुप्सीम हेंशो बाक्मा, मेको ब्वाइनीमी” देंत। प्रस्थान ९:३२<sup>13</sup> मिनु मोसामी आ कोक्के इजीप्त रागी तार दिंताक्व। मेको नाक्त रे आ दीसा सुनी सम्म परमप्रभु यावेमी पूर्व रे फश पपाइक्तु। मिनु सुनी नां सोव्रमेनु, पूर्व रे पिशो फशेमी सल्हापुकी चाक्तु। योएल १:२-१२; योएल २:१-११<sup>14</sup> मिनु सल्हा मालेमी इजीप्त रागी नेल्ल सुम्तेक्म। डोंइती रे मोदेशो शुश सल्हा माले गेनायो मबाक्शो बाक्मा बाक्त। मिनु नोले यो मोदेशो गेनायो मदुम्माक्त।<sup>15</sup> मेको शुश सल्हा माले बेरमानु, नाक्ती यो नाक्दो खोदेशो पा छिडछिड दुम्त। मेको सल्हा मालेमी मुप्स रे लीशो रू डा वाशो नु रवा डा फल नेल्ल नेक्तेक्म। मार मार गिग बाक्मा, मारेइ महेंदेम। इजीप्त रागी डा रवा नु गिग खाइ नेल्ल नेक्तेक्म।

<sup>16</sup> मिनु फाराओमी रीब पा मोसा नु हारून आस कली ब्रेप्पाइक्तु। मिनु मेकोमी “गो परमप्रभु यावे, इन परमप्रभु आ डोंइती पाप पाता। मिनु इस कली यो मरिम्शो पाता। प्रस्थान ९:२७<sup>17</sup> मुल खेयप का ला आं कली माफ गेयीसी, दे पुंइनुड। मिनु आं पर्वम परमप्रभु यावे, इन परमप्रभु कली पुनीस। सल्हा माले खेरशा, अन्काल रे मबेक्पाइक्वा नम, दे पुनीस” दे मोसा नु हारून आस कली माइक्तीम्सी। प्रस्थान ८:४<sup>18</sup> मो देम नोले मोसा फाराओ आ डोंइती रे लशा, परमप्रभु यावे कली पुंइतु।<sup>19</sup> मिनु परमप्रभु यावेमी नां पेरतीक रागी रे ठेयब फश गिवार सोइक्ताक्व। मेको फश गिवारमी सल्हा माले आन कली हुरशा, लल समुन्द्रम ताइक्ताक्व। मिनु मोपा इजीप्त रागीम सल्हा माले काइ मलीम।<sup>20</sup> तन्न परमप्रभु यावेमी फाराओ कली

मबिप्पाइक्वा कली काइ मटीब दुम्पाइक्तु। मोपतीके मेकोमी इस्राएली आन कली लचा मगेव। प्रस्थान ४:२१

छिडछिड दुम्पाइश्शो

<sup>21</sup> मिनु परमप्रभु यावेमी मोसा कली “इ गुइ सरीड गे पोक्को। मो पवीनु, इजीप्त रागीम हिंचा डा पा छिडछिड दुम्ब” दे माइक्तु।<sup>22</sup> मिनु मोसामी आ गुइ सरीड गे पोक्तु। मिनु इजीप्त रागीमी नाक्त सां सम्म शुश छिडछिड दुम्त। मारेइ मतांइस।<sup>23</sup> मिनु मेकोपुकी मतमुथु, आन बाक्तीक रे बोक्ने मचबेम। तन्न इस्राएली आन बाक्तीकेमी चहिं छेडछेड बाक्त।

<sup>24</sup> मिनु फाराओमी मोसा कली ब्रेश्शा “लने, परमप्रभु यावे कली गेय पने। इन आल नु मीश आन कली यो लाइक्ने चाप्नीनी। इन बी ब्यफ नु क्यारश भेडा चहिं मेकेरेन बाक्मल” देंत। प्रस्थान १०:१०<sup>25</sup> मोसामी चहिं “आंइ चढेतीक नु चोशा चढेतीक बस्तु भाव नेल्ल लाइक्वा माल्नीकी। मेको ला परमप्रभु यावे, आंइ परमप्रभु कली चढेने चाप्नीकी।<sup>26</sup> गोपुकी आंइ बी ब्यफ, क्यारश भेडा नेल्ल लाइश्शा, लचा माल्नीकी। का यो मप्रोंइथु लाइक्वा माल्नीकी। परमप्रभु यावे, आंइ परमप्रभु कली मार चढेचा माल्नीकी मुल मजाक्दीश्शो सम्म मतुइक्नीकी” दे फाराओ कली माइक्तु।

<sup>27</sup> परमप्रभु यावेमी चहिं फाराओ कली काइ मटीब दुम्पाइक्तु। मोपतीके फाराओमी इस्राएली आन कली लचा मगेव। प्रस्थान ४:२१<sup>28</sup> मिनु फाराओमी मोसा कली “मुल एकेर रे लावो। आं कली गुम्थ मपिवो। गे लेंशा आं कली गुम्थ पिते हना, गो इ कली साइक्वनन” देंत।<sup>29</sup> मिनु मोसामी “दुम्ब, गो इन कली लेंशा गुम्थ मपीनुड” देंत।

डोंइती जरमेशो तौ नेल्ल बेक्शो

11 मिनु परमप्रभु यावेमी मोसा कली “फाराओ नु इजीप्त रागी डा मुर आन कली नेल्ल क्येडा नोले डा बेक्वा डा श्येत का गेनुड। मिनु इन कली लचा गेब। लचा गेवानु, नेल्ल इन कली ब्रा ब्रु खेरब।<sup>2</sup> गे मुल इ मुर आन कली ‘वोंइश मुर नु मीश मुरपुकीमी आन नेक्था बाक्ब इजीप्ती आन के सुन नु चांदी के पाइतीक शोंप पुंइचा माल्नीम’ दे शेंचा माल्नेवे” देंत। प्रस्थान ३:२१-२२<sup>3</sup> मिनु परमप्रभु यावेमी इजीप्त डा मुर आन कली इस्राएली आन कली दाक्ब सेल्लु। मिनु मोसा फाराओ आ गेय पाइब नु इजीप्त डा मुर नेल्ल आन डोंइती शुश ठेयब मुर दुम्त।

<sup>4</sup> मिनु मोसामी फाराओ नु आ मुर आन कली “परमप्रभु यावे आ देशो लोव्र मार बाक्त देशा हना नाक्दो उइक्थ दुम्मेनु, इजीप्ती आन दातेम लाइनुड।<sup>5</sup> इजीप्त रागीमी सु सु डोंइती जरमेशो बाक्मा, मेको बेक्वा माल्नीम। फाराओ आ नोले सासन पाइब डोंइती जरमेशो तौ रे नेल्ल क्येडा आइक्व यात हिल्लब मीश मुर आन डोंइती जरमेशो तौ सम्म नेल्ल बेक्वा माल्नीम। बस्तु भाव आन के यो डोंइती जरमेशो बेक्वा माल्नीम। प्रस्थान ४:२३<sup>6</sup> मिनु इजीप्त रागी नेल्लेमी ठेयब रोंका पा डाक्नीम। डोंइती मोदेशो गेनायो मदुम्शो बाक्त। मिनु नोले यो लेंशा मदुम्ब।<sup>7</sup> इस्राएली आन दातेमी चहिं मुर नु बस्तु भाव आन चां का यो महेंम्ब। परमप्रभु यावेमी इजीप्त डा मुर आन कली नु इस्राएल डा मुर आन कली खाल का डा मपाइब, दे तुइक्तामेक्ल। प्रस्थान ९:४<sup>8</sup> मिनु नोले इन गेय पाइब नेल्लेमी आं डोंइती खुम्की पा बाप्शा, आं कली ‘गे नु इन नोले खोइक्व मुरपुकी एक रे लने’ देंनीम। मिनु गो लाइनुड” दे मोसामी फाराओ कली देंत। मिनु मोसा फाराओ आ बाक्तीके रे शुश गाइश्शा चुरशा गाक्त।

<sup>9</sup> मिनु परमप्रभु यावेमी मोसा कली “इजीप्त रागीम आं छक लाक्वा डा शुश चिन्ड दुम्ल, दे फाराओम इ कली मटिपदु” देंत।<sup>10</sup> मोसा नु हारूनमी फाराओ आ डोंइती मेको छक लाक्वा डा चिन्ड मार मार नेल्ल पाम्ताक्स। इस्राएल डा मुर आन कली लचा मगेव, दे परमप्रभु यावेमी फाराओ कली काइ मटीब दुम्पाइक्तु। प्रस्थान ४:२१

डोंइती डा पास्सा चाड  
गन्ती १:१-१४; ब्यवस्था १६:१-८

पास्सा डा पाठा आ हुश

12 मिनु मोसा नु हारून इजीप्त रागीम बाक्सानु, परमप्रभु यावेमी मेको आस कली 2 "मुल जाक्शो महिना बर्स डा डोंइती डा महिना दुम्चा माल्ब। प्रस्थान १३:४

3 मिनु गे इस्राएली नेल्ल आन कली 'मेको महिना डा १० नाक्ती खिं का डा ठेयब मुरुमी पाठा का चाक्चा माल्नीम। 4 खिं का कली पाठा का आ श्ये शुश दुम्त हना, आ नेक्था बाक्शो मुर आन कली हिक्शा, दोशो ब्वाइनीमी योक्शा, ब्वचा कली ब्रेत्वा माल्नीम। 5 मेको पाठा मारेड मदुम्शो थम रिम्शो नु बर्स का डा बोका बाक्चा माल्ब। भेडा के हना यो, क्यारश के हना यो दुम्ब। लेवी २२:२० 6 मिनु मेको महिना डा १४ नाक्ती सम्म मेको बोका कली ठीक पा वोइक्चा माल्नीनी। मिनु नां रिक्चवानु, इस्राएली नेल्लेमी मेको बोका क्योरचा माल्नीनी। 7 तेको खिंमी ब्वाइनीनी, मेको खिं डा मुरुमी बोका आ हुश इक्का लाइश्शा, आ खिं डा थाम निक्शी नु लाच्यो आ पियाम खेक्चा माल्नीनी। प्रस्थान १३:२२ 8 मेको नाक्दो मेको बोका आ श्ये ब्वचा माल्नीनी। दोपा ब्वचा माल्नीनी देशा हना, मीम चोशा, बोरब ओख्ती मसुप्शो शोब्ले, कशो खाइ नु ब्वचा माल्नीनी। 9 मेको श्ये क्येख ब्वचा मदुम्ब, लोप्शा ब्वचा यो मदुम्ब। आ पिया, खोइली क्यी नेल्ल मी तारी चोचा माल्नीनी। ब्यवस्था १६:७ 10 सुनी सम्म मारेड हेंत हना, मीम चोशा थुम्चा माल्नीनी।

11 मेको श्ये किप्शुर किप्शा, जुत्ता लिक्शा, गुडमी कोक्के ग्याइश्शा, रीब पा ब्वचा माल्नीनी। मारदे हना मेको परमप्रभु यावे आ पास्सा चाड बाक्ब। ब्यवस्था १६:३; यसैया ५२:१२ 12 मेको नाक्दो गोमी इजीप्त रागी हिरशा, इजीप्त डा मुर आन डोंइती जरमेशो तौ नेल्ल साइक्नुडमी। बस्तु भाव आन के यो डोंइती जरमेशो नेल्ल साइक्नुडमी। इजीप्त डा देवी देवता नेल्ल आन कली सजाइ गेनुडमी। गो, परमप्रभु यावे मेकोन पाइनुड। गन्ती ३३:४ 13 मेको खेक्शो हुश इन खिं डा चिन्ड दुम्ब। तेको खिंम हुश खेक्शो तडा, मेको खिं कली हेरशा लाक्नुड। गो इजीप्त रागी डा मुर आन कली बेक्चा डा श्येत गेनुडमी। इन कली चहिं मेको श्येत मगेनुड। हिब्रू ११:२८; प्रस्थान ३०:१२ 14 मेको नाक्ती इन कली मिम्तीक नाक्ती दुम्चा माल्ब। मोपतीके आं नैम भोज जचा माल्नीनी। गे बर्स बर्सम मेको चाड परमप्रभु यावे कली मानेचा माल्नीनी। इन पाला नेल्ल आन कली गेना हना यो अरेशो लोत्र बाक्ब।

बोरब ओख्ती मसुप्शो शोब्ले

15 गे ७ नाक्त सम्म बोरब ओख्ती मसुप्शो शोब्ले जचा माल्नीनी। ७ नाक्त डा डोंइती नाक्ती गे इन खिंम बाक्शो बोरब ओख्ती ताइक्चा माल्नीनी। सुम मेको ७ नाक्तीम बोरब ओख्ती सुप्शो शोब्ले जाइबा, मेको इस्राएली आन दाते रे तिल्चा पुंइसीब। प्रस्थान १३:७; प्रस्थान २३:१५

16 मिनु ७ नाक्त डा डोंइती नाक्ती नु नोले डा नाक्ती परमप्रभु आ नैमी गुम्चा माल्नीनी। मिनु जचा थोत्रक सेल्चा क्येडा लाक्शा, अरु गेय काइ मपने। 17 बोरब ओख्ती मसुप्शो शोब्ले डा चाड मानेचा माल्नीनी। मारदे हना मेको नाक्ती गो इन हुल आन कली इजीप्त रागी रे गुंइताकड। मोपतीके इन पाला मुर नेल्ल आन कली गेना हना यो अरेशो लोत्र बाक्ब।

18 डोंइती डा महिना डा १४ नाक्ती डा नाक्दो रे २१ नाक्त डा नाक्दो सम्म गे बोरब ओख्ती मसुप्शो शोब्ले ला जचा माल्नीनी। 19 मेको ७ नाक्ती इन खिंमी बोरब ओख्ती काइ मवोइक्चा। सुमी बोरब ओख्ती सुप्शो शोब्ले जाइबा, मेको अर्को रागी डा मुर बाक्त हना यो, इस्राएली बाक्त हना यो इस्राएली आन दाते रे तिल्चा पुंइसीब। 20 इन बाक्तीक नेल्लेमी बोरब ओख्ती मसुप्शो शोब्ले ला जने, बोरब ओख्ती सुप्शो शोब्ले मजने' दे माइक्मी" दे परमप्रभुमी दैत।

21 मिनु नोले मोसामी इस्राएल डा खाल्पा नेल्ल आन कली ब्रेश्शा "इन खिं डा ठेयब मुर आन कली पाठा का का चाक्कीन। मिनु मेको पाठा पास्सा चाड मानेचा कली क्योरीन। 22 मिनु गे हिस्सोप के ब्राक्स लाइश्शा, हुश दाइक्तीक बोसुम ख्रुम्शा, लाच्यो आ पिया नु थाम निक्शी कली खेक्तीन। मेको नाक्दो सुनी सम्म सुइ लाडगा मगूडीने। प्रस्थान १२:१३ 23 परमप्रभु यावे इजीप्त डा मुर साइक्चा कली हिरब। परमप्रभु यावेमी लाच्यो आ पिया नु थाममी हुश खेक्शो तशा, इं खिं हेरशा लाक्ब। मिनु साइक्ब कली इं खिंम ओत्रचा मगेब। 24 मुल रे इन तौ, चच युइ नेल्लेमी एको पास्सा चाड बर्स बर्सम मानेचा माल्नीम। मेको गेना हना यो लीशो अरेशो लोत्र बाल्ब। 25 मिनु गे परमप्रभु यावेमी देशो खोदेशो पा इन कली गेशो रागी जाक्दीश्शा, यो एको चाड मानेचा माल्नीनी। 26 इन आलपुकीम इन कली 'एको चाड आ अर्थ मार बाक्मे?' दे हिल्लो पाम्तेक्म हना, 27 गे मेको आन कली 'इस्राएल डा मुरपुकी इजीप्त रागीम बाक्मानु, परमप्रभु यावेमी इजीप्त डा मुर आन कली साइक्ची ना इस्राएली आन खिं चहिं हेरशा लत। एको हेरतीक आ पर्बम चदेशो बाक्ब' दैचा माल्नीनी" दे मोसामी दैत। मिनु मुरपुकीमी खुम्की पा बाप्शा, परमप्रभु यावे कली ठेयब सेल्तेक्म। 28 मिनु इस्राएलीपुकीमी लशा, परमप्रभु यावेमी मोसा नु हारून आस कली दोदेशो दैमे, मोदेशो पाम्तेक्म।

डोंइती डा जरमेशो नेल्ल बेक्शो

29 मिनु नाक्दो उइक्थ दुम्मेनु, परमप्रभु यावेमी इजीप्त रागी डा मुर आन डोंइती जरमेशो तौ आन कली साइक्तीमी। फाराओ आ नोले सासन पाइब तौ रे जेल्खानम बाक्ब मुर आन डोंइती जरमेशो तौ नेल्ल आन कली साइक्तीमी। बस्तु भाव आन डोंइती जरमेशो यो साइक्तु। प्रस्थान ४:२३ 30 मिनु मेको नाक्दो फाराओ, आ गेय पाइबपुकी नु इजीप्त रागी डा मुर नेल्ल बोक्तेक्म। इजीप्त रागीमी ठेयब रोंका पा डाक्तेक्म। मारदे हना खिं खिं नेल्लेमी मुर बेक्तेक्म। प्रस्थान ११:६-७

इस्राएलीपुकी इजीप्त रे गूशो

31 मिनु मेको नाक्दो फाराओमी मोसा नु हारून आस कली ब्रेश्शा "छुल छाल बोक्कीस। गे नु इस्राएल डा मुर नेल्ल आं रागी डा मुर आन दाते रे गूडीन। इस देशो खोदेशो पा परमप्रभु यावे कली चढ़ेथ लने। 32 इन बी ब्यफ नु क्यारश भेडा आन कली लाइश्शा, फो फु गूडीने। आं कली आसीक गेयीसी" दैत। प्रस्थान १०:२६; एज्रा ६:१० 33 मिनु इजीप्त डा मुरपुकीमी मेको आन कली आन रागी रे ब्रा ब्रु खेरशा सोइक्ताक्म। मारदे हना "गो नेल्ल बेक्नय" दे हितेक्म। प्रस्थान ६:१ 34 मिनु मुरपुकीमी बोरब ओख्ती मसुप्शो, निशो फस आन बोस वाम गिल्शा, बलाम लाप्शा कुरतेक्म। 35 मिनु इस्राएलीपुकीम मोसा आ देशो खोदेशो पा इजीप्ती आन सुन चांदी नु वासी पुंइतेक्म। प्रस्थान ११:२ 36 मिनु परमप्रभु यावेमी इजीप्त डा मुर आन कली इस्राएली आन कली दाक्पाइक्तीके, आन पुंइशो नेल्ल गेम्तेक्म। मोपा इजीप्त डा मुर आन शोंप लाइश्शा गाक्तेक्म। प्रस्थान ३:२१

37 मिनु इस्राएल डा मुरपुकी रामेसेस सहर रे गाक्शा, सुक्कोथ सहर जाक्दीत्तेक्म। मेको आन मीश नु तमी तौ नेल्ल महिक्थु, वोंइश मुर ला ६ लाख बाक्तेक्म। 38 मिनु हिक्ने मचाप्चा डा पा इस्राएली खोदेशो पा परमप्रभु यावे कली टीबपुकी यो, आन बी ब्यफ, क्यारश भेडा, शुश बस्तु भाव खुल्शा गाक्तेक्म। 39 मिनु इजीप्त रे कुरशो बोरब ओख्ती मसुप्शो निशो फस रे शोब्ले चोम्तेक्म। मारदे हना इजीप्त रागी रे खेरचा पुंइसीतीके मेकेर लाम्जी सेल्ने मचाप्शो बाक्तेक्म।

40 इस्राएलीपुकी ४ सहे ३० बर्स इजीप्त रागीमी बाक्शो बाक्मा बाक्त। उत्पत्ती १५:१३ 41 मिनु ४ सहे ३० बर्स गाम नाक्ती, परमप्रभु यावे आ योत्रशो इस्राएली नेल्ल इजीप्त रागी रे गाक्मा बाक्त। 42 मेको नाक्दो इस्राएलीपुकीमी परमप्रभु यावे आ डोंइती शुश मिम्तीक नाक्दो दुम्माक्त। मारदे हना मेको आन कली इजीप्त रागी रे गुंइदा बाक्त। मेको परमप्रभु यावे

आ नाकदो बाकब। इस्राएल डा मुर आन पाला नेल्लेमी मेको मिम्तीक नाकदो बाकब। यस्सैया ३०:२९

### पास्सा चाड दोपा मानेचा

43 मिनु परमप्रभु यावेमी मोसा नु हारून आस कली "पास्सा दोपा पचा आं अरेशो लोव्र मार बाक्त देंशा हना, अर्को रागी डा मुरुम मेको जचा ब्वचा मदुम्ब। 44 खोइक्तीक चिनु खोइश्शो इन वाइलपुकीम चहिं जचा ब्वचा दुम्नीम। उत्पत्ती १७:१२-१३ 45 तन्न अर्को रागी डा मुर इन दातेमी बाक्त हना यो, गेय पाइब हना यो जचा ब्वचा मदुम्ब। 46 मेको पास्सा डा पाठा आन खिंमी ब्वचा माल्नीम। आ श्ये लाडगा गुंइचा मदुम्ब। आ रुश का यो जिक्वा मदुम्ब। यूहन्ना १९:३६ 47 इस्राएली नेल्लेमी मोदेशो पचा माल्नीम। प्रस्थान 48 इन दातेमी अर्को रागी डा मुर काम परमप्रभु यावे कली पास्सा चाड मानेचा दाक्ताक्व हना, आ खिं डा गेय पाइब वोंइश मुर नु आ तौ आन कली खोइक्तीक चिनु खोइश्शा ला, इस्राएली आन नेक्था जाक्शा, पास्सा चाड मानेने चाप्ब। मोपा ला इन खोदेशो दुम्ब। मारदे हना खोइक्तीक चिनु मखोइश्शो मुरुम जने ब्वने मचाप्नीम। 49 मेको इन कली नु इन दातेम बाकब अर्को रागी डा मुर आन कली अरेशो लोव्र का बाकब" दे परमप्रभुमी देंत। लेवी १९:३४; लेवी २४:२२ 50 मिनु परमप्रभु यावेमी मोसा नु हारून आस कली दोदेशो देंमे, मोदेशो इस्राएली नेल्लेमी पाम्तेक्म। 51 मिनु मेको नाक्ती परमप्रभु यावेमी इस्राएली थर आन कली हुल हुल पा इजीप्त रागी रे गुंइताक्व।

### डोंइती डा तौ परमप्रभु के बाकब

13 मिनु परमप्रभु यावेमी मोसा कली 2 "इस्राएलीपुकी, इन डोंइती जरमेशो तौ नु इन बी ब्यफ, क्यारश भेडा आन डोंइती जरमेशो बोहोर बोका योव्रशा गेयीनी। मारदे हना मेको आं के बाक्नीम, दे मुर आन कली देंचा माल्ब" देंत। प्रस्थान १३:१२,१३; प्रस्थान २२:२८

3 मिनु मोसामी मुर आन कली "गेपुकी इजीप्त रागीम वाइलीम वाइल दुश्शा, ब्रोंइशा, एक जाक्शा नाक्त मप्रदेदीन। परमप्रभु यावेमी इन कली आ सक्तिमी गुंइताक्व। मोपतीके मेको नाक्त गे बोरब ओख्ती मसुप्शो शोब्ले ला जचा माल्नीनी। प्रस्थान १२:३३-३४ 4 गे मुलाक्ती आबीब महिनामी गूतीनी। प्रस्थान १२:२

5 मिनु परमप्रभु यावेमी इन किकी पिपी आन कली 'कनानी, हिन्ती, एमोरी, हिन्वी नु यबुसी आन रागी इन कली गेनुड' दे कसम जशो बाक्माक्त। मेको रागीमी जाक्दीश्शा, आबीब महिनामी पास्सा चाड मानेचा माल्नीनी। मेको रागीम दूध नु खुदो शुश बाक्ब, मारेड मारेड यो शुश ग्रेल्ब। उत्पत्ती १५:१८ 6 ७ नाक्त सम्म बोरब ओख्ती मसुप्शो शोब्ले जचा माल्नीनी। मेको आ नोले डा नाक्ती परमप्रभु यावे आ नेंमी चाड का मानेचा माल्नीनी। प्रस्थान १२:१५-१६ 7 मिनु बोरब ओख्ती मसुप्शो शोब्ले ७ नाक्त सम्म जचा माल्नीनी। इन बाक्तीके नेल्लेमी बोरब ओख्ती सुप्शो शोब्ले काइ वोइक्वा मदुम्ब। मिनु बोरब ओख्ती यो वोइक्वा मदुम्ब। १कोरिन्थी ५:८

8 मेको नाक्ती इन आल आन कली 'परमप्रभु यावेमी इं कली इजीप्त रागी रे गुंइशो कोइचा, दे ओदेशो पाइनय' दे शेंचा माल्नीनी। 9 मेको पास्सा चाड इन गुइमी नु इन कुप्फीम मिम्तीके चिन्ड खोदेशो पा बाक्वा माल्ब। मोपा परमप्रभु यावे आ अरेशो लोव्र गे नु बाक्ब। मारदे हना परमप्रभु यावेमी आ ठेयब सक्तिमी इन कली इजीप्त रागी रे गुंइताक्व। ब्यवस्था ६:८; ब्यवस्था ११:१८ 10 मोपा गेपुकी बर्स बर्समी मेको चाड ठीक नाक्तीम मानेशा आ अरेशो लोव्र पचा माल्नीनी।

11 मिनु परमप्रभु यावेमी इन कली नु इन किकी पिपी आन कली 'गो मेको रागी इन कली गेनुड' दे कसम जशो, कनानी आन रागीम चोव्रदीब। 12 गे इन डोंइती जरमेशो तौ नु इन बी ब्यफ, क्यारश भेडा आन डोंइती जरमेशो परमप्रभु यावे कली गेचा माल्नीनी। डोंइती जरमेशो बोहोर बोका परमप्रभु यावे केन नम। 13 तन्न इन गधैनी आ डोंइती जरमेशो बोहोर प्रोंइचा कली मेको आ पा डा पाठा का गेचा माल्नीनी। पाठा गेचा

मादाक्ताक्नी हना, आ शुर जिक्वा माल्नीनी। इन डोंइती जरमेशो तौ आ पा डा क्येट गेचा माल्नीनी।

14 मिनु काबु इन आलपुकीमी 'गे मारदे ओदेशो पाइनीनी?' दे हिल्लो पाइनीम। मेना गेपुकीमी 'परमप्रभु यावेमी इं कली आ ठेयब सक्तिमी इजीप्त रागी रे गुंइताक्व। वाइलीम वाइल दुश्शो रे यो प्रोंइतु' दे इन आल आन कली शेंचा माल्नीनी। प्रस्थान १२:२६,२९ 15 'फाराओम इं कली काइ लचा मगेतीके, परमप्रभु यावेमी इजीप्त रागी डा मुर आन डोंइती जरमेशो तौ नु बस्तु भाव आन दाते डा डोंइती जरमेशो नेल्ल साइक्तु। मोपतीके डोंइती जरमेशो बोहोर बोका परमप्रभु यावे कली चढ़ेनीकी। तन्न डोंइती जरमेशो तौ आ पा डा क्येट गेशा प्रोंइनीकी। 16 एको पतीके इन गुइमी नु इन कुप्फीम मिम्तीके चिन्ड खोदेशो पा बाक्वा माल्ब। मारदे हना परमप्रभु यावेमी इं कली आ ठेयब सक्तिमी इजीप्त रागी रे गुंइताक्व' दे इन आल आन कली शेंचा माल्नीनी" देंत।

### गोस्स के थाम नु मी के थाम

17 मिनु फाराओमी इस्राएली आन कली लचा गेवानु, परमप्रभुमी इस्राएली आन कली आन नेक्था डा लां पलिस्ती आन रागी डा लां मर्कोइद। मारदे हना मुरपुकीमी "लडाइ पचा माल्तेक्म हना, हिंशा इजीप्त रागी लेत्नीमी, कौ" दे लाइश्शो लां कोइताक्व। 18 मोपा परमप्रभुमी इस्राएली आन कली गोरशो रागी रे लल समुन्द्र गे डा लां कोइताक्व। मिनु इस्राएली इजीप्त रागी रे गाक्मानु, लडाइ पचा कली यो ठीक दुश्शो बाक्तेक्म।

19 मोसामी योसेफ आ रुश यो कुरतु। मारदे हना योसेफमी इस्राएली आन कली "परमप्रभुम इन कली थमा पा एको रागी रे गुंइशा लाइब। मेना आं रुश यो लाइक्वा माल्नीनी" दे कसम जपाइश्शो बाक्माक्त। उत्पत्ती ५०:२५; यहोसु २४:३२ 20 मेकोपुकी सुक्कोथ सहर रे लशा, एथाम सहर डा गोरशो रागी आ नेक्थामी बास बाक्तेक्म। 21 मिनु परमप्रभु यावेमी मेकोपुकी नाकदो नाक्ती गाक्ने चाप्मेक्ल, दे मेको आन कली लां कोइचा कली नाक्ती गोस्स के थाम नु नाकदो मी के थाम दुश्शा, मेको आन डोंइडोंइती गाक्त। प्रस्थान ४०:३६-३८; गन्ती ९:१५-२३; भजन संग्रह ७८:१४; १कोरिन्थी १०:१ 22 नाक्ती गोस्स के थाम नु नाकदो मी के थाम आन डोंइडोंइती गाक्वा मप्रोन।

### लल समुन्द्र शोक्शो

14 मिनु परमप्रभु यावेमी मोसा कली 2 "इस्राएली आन कली 'गेपुकी इक्का लेत्वा माल्नीनी। मिगदोल नु लल समुन्द्र आस दातेम बाक्शो पी-हहीरोथ, बाल-सेफोन आ डोंइती इन बास बाक्तीके सेल्चा माल्नीनी। मेको लल समुन्द्र आ नेक्था बाक्ब' देंचा माल्नेवे। 3 मिनु फाराओमी 'गोरशो रागीमी आन लां जाम्शा, हेंथे गाक्नीम' देंब। 4 मिनु गो फाराओ आ थुं काइ मटीब दुम्पाइक्नुड। मिनु फाराओमी इन कली खेदा पाइब। गो फाराओ नु आ फौज आन कली आं सक्ति कोइनुड। मिनु इजीप्त रागी डा मुर नेल्लेमी 'परमप्रभु यावे बाक्ब' दे तुइक्नीम" देंत। मिनु मोदेशो पाम्तेक्म। प्रस्थान ४:२१; इजीकीएल २८:२२

5 मिनु इजीप्त रागी डा मुरपुकीम आन पिप कली "इस्राएली प्रोक्ने थुम्तेक्म। गो मार पया? मारदे गो इस्राएली आन कली गेय प्रोंइपाइश्शा, लचा गेया?" दे थुं फाइश्शा, लोव्र पमुमा बाक्त। 6 मिनु पिपमी आ बग्गी ठीक पशा, आ लडाइ पाइबपुकी ठीक पवा बाक्त। 7 मिनु ६ सहे रिम्शो पा लडाइ पने चाप्ब बग्गी नु इजीप्त रागी डा अरु बग्गी नु चलेब आन ठेयब मुर आन कली लाइश्शा, लमाक्त। 8 मिनु परमप्रभु यावेमी इजीप्त रागी डा फाराओ कली काइ मटीब दुम्पाइक्तीके इस्राएली आन कली खेदा पामे बाक्त। इस्राएली चहिं ठेयब सक्तिमी गूशा गाक्तेक्म। प्रस्थान ३:१९-२० 9 इजीप्त डा फाराओ आ शारापुकी, शारा डोइक्बपुकी, बग्गी नु लडाइ पाइब नेल्ल लल समुन्द्र आ नेक्था इस्राएली आन बास बाक्तीक पी-हहीरोथ सहर आ नेक्था बाल-सेफोन आ डोंइती जाक्तेक्म।

10 मिनु इस्राएलीपुकी फाराओ नु आ लडाइ पाइबम आंम कली खेदा पशो तशा, हिंशा खिंखि पाम्तेक्म। मिनु परमप्रभु यावे कली "वारच

पाइय्यीकी" दे पुंडतेक्म। 11 मिनु मेकोपुकीम मोसा कली "गे आंइ कली मारदे इजीप्ट रे गुंडदीकी? इजीप्ट रागीम मुर थिम्तीके मबाक्वा डा? मारदे गोरशो रागीम साइक्थ चाक्की? 12 गोपुकी इजीप्ट रागीम बाक्कानु, इन कली 'आंइ कली श्येत मगेकी। इजीप्ट डा मुर आन गेय पचा गेकी, मर्देका डा? गोरशो रागीम बेक्वा क्येडा इजीप्ट रागी डा मुर आन गेय पक वा' " दे मोसा कली ग्रीतेक्म।

13 मिनु मोसामी मुर आन कली "महिनीन। मुलाक्ती परमप्रभु यावेमी दोपा इन कली इजीप्ट डा मुर रे प्रॉइबा, कोव्रशा बाक्कीन। मुलाक्ती तशो इजीप्ट डा मुर आन कली गे लेंशा गेनायो मताइनीनी। 14 इन पचा डा लडाइ परमप्रभु यावेमी पाइब। गे थुं नाइश्शा बाक्कीन" दे माइक्तीमी। *ब्यवस्था १:३०; २इतिहास २०:१५,२९; यसैया ५१:९*

15 परमप्रभु यावेमी मोसा कली "मारदे आं कली ठेयब सेंदा पा पुंडनेवे? इस्राएली आन कली 'गाक्कीन' दे मतो। 16 इ कोक्के लल समुन्द्र तार दिंदो। मो पवीनु, समुन्द्र ब्राशा, गाक्तीक लां दुम्ब। इस्राएलीपुकी हिलो मबाक्वो लांम गाक्ने चाप्नीम। 17 मिनु गोमी इजीप्ट डा मुर आन कली काइ मटीब दुम्पाइक्नुड। मो दुम्मेनु, इस्राएली आन नोले खोइश्शा, लल समुन्द्र ओव्रशा, खेदा पाइनीम। मिनु गो फाराओ आ मुरपुकी, आ बग्गी नु आ शारा डोइक्ब नु लडाइ पा आं सक्ति कौइशा ग्रानुड। 18 गो फाराओ, आ बग्गी नु आ शारा डोइक्ब आन कली आं सक्ति कौइनुड। मिनु इजीप्ट डा मुरपुकीमी 'परमप्रभु यावेमी पाप्नु' दे तुइक्नीम" देंत।

19 मिनु इस्राएली आन डौंइती गाक्वो परमप्रभु आ स्वर्ग डा गेय पाइब नोले गे लेश्शा लशा, इस्राएली आन नोले खोइक्नु। मेको आन डौंइती गाक्वो गोस्स के थाम यो लेश्शा, आन नोले गाक्त। *उत्पत्ती १६:७; प्रस्थान १३:२१* 20 मेको गोस्स इजीप्ट डा फौज आन कली छिडछिड दुम्माक्त। इस्राएली आन लडाइ पाइब आन कली चहिं छेडछेड दुम्त। मोपा मेको नाक्वो इजीप्ट डा फौज इस्राएली आन नेक्था जाक्ने मचबेम। *भजन संग्रह १०५:३९*

21 मिनु मोसामी आ गुइ लल समुन्द्र तारी दिंदानु, परमप्रभु यावेमी नाक्वो नां दाप्तीके रे फश गिवार पपाइश्शा, समुन्द्र फ्राशा सोव्रशो गाक्तीक लां सेल्लु। 22 मिनु इस्राएलीपुकी समुन्द्र डा सोव्रशो लां लांमतेक्म। समुन्द्र डा ब्वाक्कु चहिं आन ग्युरा नु पेरा गे गारो खोदेंशो पा बाक्त। *यहोसु ४:२३; २राजा २:८; यसैया ११:१५-१६; १कोरिन्थी १०:१; हिब्रू ११:२९*

23 मिनु इजीप्ट रागी डा लडाइ पाइब इस्राएली आन कली खेदा पा, मेको आन नोले लल समुन्द्र ओव्रतेक्म। पिप आ शारापुकी, आ बग्गीपुकी नु आ शारा डोइक्ब नेल्ल ओव्रतेक्म। 24 मिनु सुनी कना परमप्रभु यावे गोस्स के थाम नु मी के थामम बाक्शा, इजीप्ट डा लडाइ पाइब आन कली कोव्रशा हिंपाइक्नु। 25 आन बग्गी डा गुगील पुइश्शा गेतीके, गाक्ने मचबेम। मिनु इजीप्ट डा मुरपुकीमी "इस्राएली रे प्रोक्य, परमप्रभु यावेमी मेको आन कली वारच पशा, इजीप्ट डा मुरपुकी नु लडाइ पाइब" देंमा बाक्त।

26 मिनु परमप्रभु यावेमी मोसा कली "इजीप्ट रागी डा मुर, आन बग्गी नु आन शारा डोइक्ब आन कली ब्वाक्कुम सुम्पाइक्वा कली इ गुइ लेंशा समुन्द्र तार दिंदो" देंत। 27 मिनु मोसामी आ गुइ समुन्द्र तार दिंदानु, नां सोव्रची ना समुन्द्र डौंइती डा खोदेंशो दुम्त। मिनु इजीप्ट डा लडाइ पाइब लेश्शा प्रोक्ने मचबेम। मोपा परमप्रभु यावेमी इजीप्ट डा लडाइ पाइब आन कली समुन्द्रमी खुम्तु। 28 मिनु ब्वाक्कु लेंशा डौंइती डा खोदेंशो दुम्मेनु, इजीप्ट डा बग्गी, शारा डोइक्बपुकी नु फाराओ आ लडाइ पाइब आन कली सुम्शा, समुन्द्रमी योल्ताक्व। सुइ यो मब्रौइम। 29 तन्न इस्राएली चहिं सोव्रशो लां लशा, समुन्द्र शोक्साक्म। ब्वाक्कु गारो खोदेंशो पा, आन ग्युरा नु पेरा गे बाक्त।

30 मोपा परमप्रभु यावेमी मेको नाक्ती इस्राएली आन कली इजीप्ट रागी डा लडाइ पाइब रे प्रौइतीमी। मिनु इस्राएलीपुकीमी इजीप्ट डा मुर आन कली दिल दिल थिश्शा, समुन्द्र आ नेक्था बेक्वो ताम्तेक्म। 31 मिनु मुरपुकीमी "परमप्रभु यावेमी इजीप्ट डा मुर आन कली साइक्तीमी" दे तुइश्शा, परमप्रभु यावे क्येडा हिंतेक्म। मिनु "परमप्रभु यावेमी नेल्ल पने चाप्ब। मोसा आ गेय पाइब बाक्ब" दे थमा सुइक्तेक्म। *प्रस्थान १९:९; २इतिहास २०:२०*

## मोसा आ कुम्सो

15 मिनु नोले मोसा नु इस्राएलीपुकीमी परमप्रभु यावे कली कुम्सो पाम्तेक्म। "गो परमप्रभु यावे कली कुम्सो पाइनुड। मारदे हना मेकोमी आ ठेयब सक्ति कौइशा, ग्रात। शारा नु शारा डोइक्ब आन कली समुन्द्रमी ताइक्ताक्व। *प्रकाश १५:३*

2 यावे आं सक्ति बाक्ब। आं कली कुम्सो पपाइक्ब। मारदे हना आं कली आ जोरी सत्रु रे प्रौइती। मेको आं परमप्रभु बाक्ब। मिनु गो मेको कली ठेयब सेल्लुड। परमप्रभु आं आफ आ परमप्रभु बाक्ब। मिनु गो मेको कली मान पाइनुड। *भजन संग्रह ११८:१४; यसैया १२:२* 3 परमप्रभु यावे लडाइ पाइब बाक्ब। मेको आ नें परमप्रभु यावे बाक्ब। *प्रस्थान १४:१४; भजन संग्रह ४६:१०; प्रस्थान ३:१५*

4 मेकोमी इजीप्ट डा फाराओ आ बग्गीपुकी नु आ लडाइ पाइब आन कली लल समुन्द्रमी योल्पाइक्नु। ठेयब कप्तान नेल्ल आन कली ब्वाक्कुम गुम्पाइक्नु। 5 समुन्द्र डा ब्वाक्कुमी मेको आन कली सुम्तु। मेकोपुकी फुल्लु खोदेंशो पा आगा गुम्तेक्म। 6 परमप्रभु यावे, इन सक्ति ठेयब बाक्ब। इन सक्तिमी इन जोरी सत्रु आन कली थुम्पाइक्तीनी। 7 इन जोरी सत्रुमी गे नु लडाइ पामेनु, गे इन ठेयब दुम्तीकेमी मेको आन कली ग्रातीनी। मिनु गाइश्शा मेको आन कली मीम भूस चोशो खोदेंशो पा थुम्पाइक्तीनी। 8 इन नेंमी मुइश्शा, समुन्द्र डा ब्वाक्कु कली ग्येत्थ गे पोक्तीनी। समुन्द्र गारो बुदी सोजो पा ग्येत्थ गे बोक्शा, आ पुं चहिं सोव्रशो लां दुम्त। *यसैया ५१:१०* 9 आंइ जोरी सत्रुमी 'मेको आन कली खेदा पा, ब्रो ब्रु थित्न्य। गो ग्येरशा, इं ग्राशो थोव्रक योक्मुइनय। इं तरवार शोइश्शा, नेल्ल आन कली साइक्नय' देंतेक्म। 10 गे चहिं फश पपाइक्तीनी। मिनु समुन्द्रमी मेको आन कली सुम्तीमी। मेकोपुकी फलाम खोदेंशो पा ठेयब समुन्द्रम गुम्तेक्म।

11 परमप्रभु यावे, देवी देवता आन दातेमी इन खोदेंशो ठेयब सुइ मबाक्नीम। इन खोदेंशो सक्ति पाइश्शो, ठेयब मान ताइब सुइ मबाक्नीम। इन ठेयब गेय हिंचा डा बाक्ब। गे छक लाक्वा डा गेय पाइब बाक्नीनी। *प्रस्थान ८:६; प्रस्थान १८:११; भजन संग्रह ८६:८*

12 इन ग्युरा गुइ दिंदीनु, रागीम मेको आन कली दाक्नु।

13 गे इन गुंडशो मुर आन कली गेना हना यो शिशी पा, लां कौइताक्नी। मेको आन कली इन सक्तिमी इन आंम बाक्तीकेम खुल्लतीनी।

14 जात जात डा मुरपुकी इन लोव्र नेंशा शुश हिंतेक्म। पलिस्ती रागी डा मुरपुकी हिंशा, खिंखिं पाम्तेक्म। *यहोसु २:९-११*

15 मुल एदोम रागी डा ठेयब मुरपुकी हिंतेक्म। मोआब रागी डा ठेयब मुरपुकी हिंशा खिंखिं पाम्तेक्म। कनान रागीम बाक्बपुकीम आन सक्ति साम्तेक्म।

16 परमप्रभु यावे, इजीप्ट रागी रे इन गुंडशो मुरपुकी मजाक्दीम्मा सम्म मेको आन जोरी सत्रु इन सक्ति डा गेय तशा, हिंशा फुल्लु खोदेंशो पा सिक्सी पा बाक्तेक्म। मोपा हिंशा मेको आन थुं लुक्च लत। 17 गे इन मुर आन कली आन रागी ओइनीनी। मिनु इन आंम बाक्तीक डांडाम बाक्पाइक्नीनी। परमप्रभु यावे, मेको इन बाक्तीके आंमा सेल्लतीनी। इन आंम बाक्तीक खिं गे आंमा सेल्लतीनी। *भजन संग्रह ७८:५४* 18 परमप्रभु यावे गेना हना यो पिप बाक्ब" दे कुम्सो पाम्तेक्म। *भजन संग्रह ९३:१*

19 फाराओ आ बग्गी नु शारा डोइक्बपुकी समुन्द्र डा लां लांमतेक्म। परमप्रभु यावेमी समुन्द्र डा ब्वाक्कु लेंशा लेप्पाइश्शा, मेको नेल्ल आन कली योल्पाइक्नु। इस्राएली चहिं समुन्द्र डा सोव्रशो लां रे पा गाक्तेक्म। *प्रस्थान १४:२२-२९*

## मिरयामम यो कुम्सो पशो

20 हारून आ समी मिरयाम परमप्रभु आ लोव्र पाइब यो बाक्त। मेकोमी खैजडी ताप्शा, कुम्सो पथ लमेनु, अरु मीश मुरपुकी यो खैजडी ताप्शा, सिल पना पन मेको आ नोले खोइक्तेक्म। *भजन संग्रह ६८:२६*

21 मिरयामम मेको आन कली कुम्सो पा लोव्र लेशशा “परमप्रभु यावे कली कुम्सो पने। मारदे हना मेकोम ठेयब लडाइ पा ग्रात। शारा नु शारा डोइक्व आन कली समुन्द्रम ताइक्ताक्व” दे कुम्सो पाप्नु।

मारा डा कशो ब्वाक्कु

22 मिनु मोसामी इस्राएली आन कली लल समुन्द्र रे शुर माइश्शो गोरशो रागी कौइताक्व। मिनु मेको गोरशो रागीमी नाक्त सां सम्म गाक्मानु, ब्वाक्कु मथिदेम। उत्पत्ती २०:१<sup>23</sup> माराह माइश्शोमी जाक्दीश्शा, मेक डा ब्वाक्कु तूने मचबेम। मारदे हना मेको ब्वाक्कु कशो बाक्त। मोपतीके मेको कली माराह नें वोइक्तेक्म। *हिब्रू लोव्रमी मारा दैशो कशो रुम्सीब।*<sup>24</sup> मिनु मुरपुकीमी मोसा कली “मुल मार तूचा?” दे गन गन पाप्तेक्म। प्रस्थान १६:२<sup>25</sup> मोसामी चहिं परमप्रभु यावे कली पुंइस डा पुंइस बाक्त। मिनु परमप्रभु यावेमी मोसा कली रवा आ शी का कौइताक्व। मिनु मोसामी मेको शी ब्वाक्कुम ब्वारताक्व। मिनु मेको ब्वाक्कु मकशो ब्रोव्रशो दुम्त। मेकेर इस्राएली आन कली आ फुल्लुम मुशा ब्रेक्शो नु आन पतीक लोव्र गेशो बाक्त। मोपा मेको आन कली नाक्ताक्व। उत्पत्ती २२:१<sup>26</sup> मिनु मेकोमी “गे परमप्रभु यावे, इन परमप्रभु आं लोव्र नैशा, आं डौइती ठीक पाइतीनी हना, आं शैशो लोव्र नैशा, टिशा, आं अरेशो लोव्र टीतीनी हना, गो इजीप्त रागी डा मुर आन कली पपाइश्शो रोइ इन कली मपाइक्नुड। मारदे हना गो इन कली सापाइक्व परमप्रभु यावे नड” देंत। *ब्यवस्था ७:१५; उत्पत्ती २०:१७; ब्यवस्था ३२:३९; भजन संग्रह ३०:३; यसैया ५७:१८*

एलीम रागीमी जाक्दीश्शो

27 मिनु इस्राएली मेकेर रे लशा, एलीममी जाक्दीत्तेक्म। मेकेर १२ ओटा धारा नु ७० ओटा रवा बाक्तेक्म। मेकोपुकी मेको ब्वाक्कु आ नेक्था बाक्तेक्म।

इस्राएलीपुकीम गन गन पशो

16 मिनु इस्राएली नेल्ल एलीम रे लशा, सीन माइश्शो गोरशो रागी जाक्दीत्तेक्म। सीन माइश्शो गोरशो रागी एलीम नु सीनै डांडा आस दातेमी बाक्व। इजीप्त रागी रे गाक्शा नोले मेकेर आबीब आ नोले डा महिना डा १५ नाक्तीम जाक्दीत्तेक्म।<sup>2</sup> मिनु इस्राएली नेल्ल मोसा नु हारून आस कली तशा गाइश्शा, प्रस्थान १७:२-३<sup>3</sup> “इजीप्त रागी उइ परमप्रभु यावेमी आंइ कली सद हना, रिम्शो दुम वा। मेकेर श्ये नु शोब्ले शुश बाक्त। गे आंइ कली जचा मंगेथु, साइक्वा कली एको गोरशो रागीमी चाक्तीसी” दे गन गन पाप्तेक्म। प्रस्थान १४:११

4 मिनु परमप्रभु यावेमी मोसा कली “नेनो, गो इन कली रेउ यिश्शो खोदेंशो पा सरीड रे शोब्ले यिपाइक्नुड। मिनु मुरपुकीम नाक्त कित कित गुप्चा माल्नीम। खेयप का गुप्पेनु, नाक्त का कली ला गुप्चा माल्नीमी। आं अरेशो लोव्र पाइबाक्मा कौं, मपाइबाक्मा, गो मेको आन कली नाक्नुड। प्रस्थान १६:१५; उत्पत्ती २२:१<sup>5</sup> मुरुमी सुक्रबार आन गुप्शो शोब्ले नाक्त का कली ठीक पाप्तेक्म हना, नाक्त का कली गुप्शो यो, नाक्त निक्शी कली ठीक दुम्ब” देंत।<sup>6</sup> मिनु मोसा नु हारूनम इस्राएली आन कली “परमप्रभु यावेमी इन कली इजीप्त रागी रे प्रौइता, दे आपो नाक्दो लेंशा मिम्पाइक्व।<sup>7</sup> सुनी कना गे परमप्रभु यावे आ छेडछेड गूशो ताइनीनी। मारदे हना मेकोमी इन परमप्रभु यावे कली गन गन पशो तुइक्ताक्व। गो निक्शी सु नस्कु डा? गे आंस पबंम गाइक्नीनी?” देंताक्स।<sup>8</sup> मिनु मोसामी इस्राएली आन कली “परमप्रभु यावेमी आपो नाक्दो इन कली श्ये गेब, सुनी कना रूथ्री शोब्ले गेब, इन गन गन पशो लोव्र नैतु, दे तुइक्तीन। गो निक्शी सु नस्कु डा? इन गन गन पशो आंस कली ममाइ, परमप्रभु यावे नु कका गाइक्ताक्वी दे तुइक्तीन” देंत।<sup>9</sup> मिनु मोसामी हारून कली “गे मुर नेल्ल आन कली ‘परमप्रभु यावे आ डौइती जाक्कीन। मारदे हना मेकोमी इन गन गन पशो नैतु’ देंचा माल्नेवे” देंत।<sup>10</sup> मिनु हारूनमी इस्राएली नेल्ल आन कली लोव्र पवानु, मेकोपुकी गोरशो रागी गे कौव्रतेक्म। मिनु मेकेर गोस्सुमी परमप्रभु यावे आ छेडछेड गूशो ताप्तेक्म। गन्ती १२:५; गन्ती १४:१०; गन्ती १६:१९

11 मिनु परमप्रभु यावेमी मोसा कली<sup>12</sup> “गो इस्राएली आन गन गन पा पशो लोव्र नैता। गे मेको आन कली ‘आपो नाक्दो श्ये ब्वाइनीनी। मिनु सुनी कना रूथ्री शोब्ले जाइनीनी। गो परमप्रभु यावे, इन परमप्रभु नड, दे गे तुइक्नीनी” दे माइक्मी” देंत।

बटाइ चिक्व नु मन्ना शोब्ले गेशो

13 मिनु नाक्दो बटाइ गूमा बाक्त। मिनु इस्राएली आन बाक्तीक नेल्ल सुम्मे बाक्त। मिनु सुनी कना आन बाक्तीकेमी शुश सीत यिश्शो बाक्माक्त। गन्ती ११:३१<sup>14</sup> मिनु सुनी कना सीत मजाम्म सम्म गोरशो रागी डा खपीम फुरश खोदेंशो पा आइक्व गेडा बाक्त।<sup>15</sup> इस्राएलीपुकीमी मेको तशा “मार में?” देंमुप्तेक्म। मारदे हना मार बाक्मे, मतुइक्तम। मिनु मोसामी मेको आन कली “परमप्रभु यावेमी इन कली गेशो मन्ना शोब्ले एकोन बाक्व। प्रस्थान १६:४; ब्यवस्था ८:३; यूहन्ना ६:३१; १कोरिन्थी १०:३<sup>16</sup> परमप्रभु यावे आ अरेशो लोव्र मार बाक्व दैशा हना, इन मुर नेल्लेमी गिश जने चाप्नीमी, मिश गुपीन। इन ताम्बुमी गिश जना मुर बाक्नीमी, मिश गोमेर गुप्चा माल्नीनी” दे इस्राएली आन कली देंत। *गोमेर का २ लिटर कि ४ माना खोदेंशो बाक्व।*

17 मोसामी इस्राएली आन कली दोदेंशो देंमे, मोदेंशो पाप्तेक्म। का निक्शीमी शुश, का निक्शीमी इक्कका ला गुप्तेक्म।<sup>18</sup> तन्न पुक्गामेनु, मेको शुश गुप्ब नु इक्कका ला गुप्ब नेल्ल आन के उइक्थ उइक्थ दुम्माक्त। नेल्लेमी गिश जचा दाक्तमे, मिश गुप्तेक्म। *२कोरिन्थी ८:१५*

19 मिनु मोसामी मेको आन कली “दीसा सुनी सम्म सुइमी मारेइ हेंचा मदुम्ब” दे माइक्तीमी। प्रस्थान १६:४; मत्ती ६:३४; लूका ११:३<sup>20</sup> तन्न मेकोपुकीमी मोसा आ दैशो मटीम। मिनु का निक्शीमी मेको मन्ना सुनी सम्म हेंदमे बाक्त। मिनु लुस्यु जोल्शा, शुश रिना पाइक्तु। मिनु मोसा शुश गाइक्ताक्व।<sup>21</sup> मिनु गिश माल्दमे, सुनी सुनी गुप्तेक्म। नां चोक्तानु, मेको यत।

नाइक्तीक नाक्त कली मन्ना गुप्शो

22 मिनु सुक्रबार नाक्ती मुरपुकीम मुर का कली गोमेर निक्निक्शी मन्ना गुप्तेक्म। इस्राएली आन कली कौव्र मुरपुकीमी मो पाप्तेक्म दे मोसा कली देंतेक्म। *गोमेर का २ लिटर कि ४ माना खोदेंशो बाक्व।*<sup>23</sup> मिनु मेकोमी “परमप्रभु यावेमी इन कली गे मार पचा माल्नीनी, मेको शैशो बाक्व। मारदे हना दीसा परमप्रभु यावे कली मिम्शा नाइक्तीक नाक्ती बाक्व। मोपतीके मुलाक्त माल्शो जचा थोव्रक क्येने चोने। लीशो चहिं दीसा सुनी सम्म हेंचा दुम्ब” देंत। उत्पत्ती २:२-३<sup>24</sup> मिनु मोसा आ दैशो खोदेंशो पा आ दीसा सम्म हेंताक्म। मिनु मेको रिना मपाइक्थु, लुस्यु यो मजोल।

25 मिनु मोसामी “गे मुलाक्ती जने। मारदे हना परमप्रभु यावे आ नाइक्तीक नाक्ती बाक्व। मुलाक्ती लाडगाम मारेइ मथिंसीब।<sup>26</sup> गे ६ नाक्त गुप्चा माल्नीनी। ६ नाक्त आ दीसा डा नाक्त मारेइ मथिंसीब। मारदे हना नाइक्तीक नाक्त बाक्व” देंत।<sup>27</sup> मिनु सन्चरबार नाइक्तीक नाक्त का निक्शी मुर मन्ना गुप्थ लाडगा गूमानु, मारेइ मथिदेम।<sup>28</sup> मिनु परमप्रभु यावेमी मोसा कली “गेपुकी आं शैशो नु आं अरेशो गेना सम्म मटीनीनी?<sup>29</sup> नोफा दाइश्शा नेनीन ‘परमप्रभु यावेमी इन कली सन्चरबार नाइक्तीक नाक्ती गेप्तु। मोपतीके सुक्रबार इन कली नाक्त निक्शी कली जचा थोव्रक गेब। मिनु नाइक्तीक नाक्ती इन बाक्तीक बाक्तीकेमी बाक्कीन। इन खिं रे लाडगा मलने’ दे मुर आन कली देनो” देंत।<sup>30</sup> मिनु मुरपुकी सन्चरबार नाक्ती नांइसाक्म।<sup>31</sup> मिनु इस्राएलीपुकीम मेको गेडा कली मन्ना दे नें वोइक्तेक्म। मेको बुश धन्या वांचेर खोदेंशो बाक्त। मेको खुदोमी सेल्शो शोब्ले खोदेंशो पा ब्रोव्रमाक्त।

मन्ना हेंशो

32 मिनु मोसामी “परमप्रभु यावे आ अरेशो लोव्र मार बाक्त दैशा हना, मेकोमी ‘मेको जचा थोव्रक गोमेर का हेंचा माल्नीनी। इन कली इजीप्त रागी रे प्रौइशा, चाक्मानु, गोरशो रागीमी गेशो जचा थोव्रक मेको बाक्व दे शुश पाला डा मुर आन कली कौइचा कली हेंदो। गो इन कली इजीप्त रे गोरशो

रागीमी चाक्शा, दोपा थुलु, मेको नेल्लेमी तामेक्ल' देंत' देंत। गोमेर का इस्राएली आन अन्न पुक्तीके का बाक्ता। मेको २ लिटर रिक्ब बाक्ता। मिनु ओमेर का ४ माना खोदेशो बाक्ता।<sup>33</sup> मिनु मोसामी हारून कली "बोस का लतो। मिनु ओमेर का मन्ना मेकेर कुर पावो। मेको नेल्ल पाला डा मुरपुकीम तचा डा पा परमप्रभु यावे आ डोंइती वोतो" देंत। हिब्रू ९:४<sup>34</sup> परमप्रभु यावेमी मोसा कली दोपा देंमे, मोपा हारूनमी कबल पशो सन्दोस आ डोंइती वोइक्त्तु।<sup>35</sup> मिनु इस्राएलीपुकीमी ४० बर्स सम्म मन्ना जाप्तेक्म। मुर बाक्तीक कनान रागी डा सांद मजाक्मा सम्म मेको जाप्तेक्म। यहोसु ५:१२<sup>36</sup> गोमेर का एफाह डा १० भाग बाक्ता। एफाह का ठेयब पुक्तीके बाक्ता।

इस्राएली मस्साह नु मेरीबा जाक्शो

17 मिनु इस्राएली नेल्ल सीन माइश्शो गोरशो रागी रे गाक्शा, परमप्रभु यावे आ देंशो बिश्शा, रेफीदीम माइश्शोमी बाक्तेक्म। मेकेर चहिं तूचा ब्वाक्कु मथिदम। गन्ती ३३:१२-१४<sup>2</sup> मोपतीके "मोसामी आंड कली मरिश्शो लां कोंइब" दे गाइश्शा, मोसा कली "आंड कली तूचा ब्वाक्कु गेकी" दे जिचा पोक्तेक्म। मिनु मोसामी मेको आन कली "गे आं कली मारदे जिचा तोइनीनी? मारदे परमप्रभु यावे सक्ति पाइश्शो बाक्ता, दे थमा मसुइक्नीनी?" देंत। ब्यवस्था ६:१६<sup>3</sup> मिनु मुरपुकी ब्वाक्कु तूतू दाक्शा, गाइक्ताक्म। मेकोपुकीमी मोसा कली "गे मारदे आंड कली इजीप्ट रागी प्रॉइपाइय्कीकी? आंड कली, आंड आल आन कली, आंड बस्तु भाव आन कली तूचा ब्वाक्कु मबा, आंड कली बेक्पाइक्चा कली इजीप्ट प्रॉइपाइय्कीकी?" देंतेक्म। प्रस्थान १५:२४; प्रस्थान १६:२; गन्ती १४:-; गन्ती १७:६-२८<sup>4</sup> मो देंमानु, मोसामी परमप्रभु यावे कली "गो एको मुर आन कली मार पाइनुडा? आं कली फुल्लु आप्शा, साइक्चा चिक्तायीमी। मुल मार पड?" देंत। गन्ती १४:१०<sup>5</sup> मिनु परमप्रभु यावेमी मोसा कली "इस्राएल डा खाल्पा आन कली लाइश्शा, इस्राएली आन डोंइती गाक्को। नील खोला तुष्को कोक्के यो लाइश्शा लावो। प्रस्थान ७:२०<sup>6</sup> गो होरेब माइश्शो डांडा आ नेक्था सेरथे फुल्लु तार इ डोंइती बाक्नुड। मिनु गे मेको सेरथे फुल्लु तुष्का माल्नेवे। मिनु, सेरथे फुल्लु रे ब्वाक्कु यीब। मिनु मुरपुकीम तूने चाप्नीम" देंत। मिनु इस्राएली आन खाल्पा आन डोंइती मोसाम मो पाप्तु। गन्ती २०:११; १कोरिन्थी १०:४<sup>7</sup> मिनु मोसामी मेको सेरथे फुल्लु बाक्तीक कली मास्साह नु मेरीबा नें वोइक्त्तु। मारदे हना इस्राएलीपुकीमी परमप्रभु यावे कली नाक्शा गाइश्शा "परमप्रभु यावे आंड दातेमी बाक्ता" दे थमा मसुदम। भजन संग्रह ९५:८-९; मीका ३:११

अमालेकी नु लडाइ पा ग्राशो

8 मिनु अमालेकी रेफीदीमम जाक्शा, इस्राएली नु लडाइ पाप्तेक्म। उत्पत्ती ३६:१२-१६<sup>9</sup> मिनु मोसामी यहोसु कली "इं मुरपुकी रे योव्रशा, अमालेकी नु लडाइ पथ लावो। गो परमप्रभु आ कोक्के शेशा, दीसा मेको डांडा तार राप्शा बाक्नुड" देंत। गन्ती १३:८, १६<sup>10</sup> मिनु यहोसुमी मोसाम देंशो खोदेशो पा अमालेकी नु लडाइ पाप्तु। मोसा, हारून नु हुर चहिं मेको डांडा डोंइसाक्म। प्रस्थान २४:१४<sup>11</sup> मोसामी आ गुइ पोक्गानु, इस्राएलीपुकी ग्रातेक्म। आ गुइ तोक्गानु, अमालेकीपुकी ग्रातेक्म।<sup>12</sup> मिनु मोसा आ गुइ योक्तीके हारून नु हुरमी फुल्लु का थांइशा, मेको तारी निप्पाइक्ताक्सा। मिनु मोसा आ गुइ तिक्शा, वोइक्ताक्सा। मोदेशो पा का युरा गे, का पेरा गे बाक्शा, नां मपेरदा सम्म गुइ पोक्सा डा पोक्सा बाक्ताक्सा।<sup>13</sup> मिनु यहोसु नु आ मुरुमी अमालेक नु आ मुर आन कली ग्राशा, तरवारम साइक्तेक्म।

14 मिनु परमप्रभु यावेमी मोसा कली "एको लडाइ गेना हना यो मिम्चा कली किताबम ब्रेक्तो। गो अमालेकी आन कली रागी रागी रे क्याम्नुडमी, दे यहोसु कली मिम्पतो" देंत। ब्यवस्था २५:१७-१९; १सामुएल १५:२-३<sup>15</sup> मिनु मोसामी चढेतीक का सेल्शा "परमप्रभु यावे आं छेदर बाक्ता" दे नें वोइक्त्तु।<sup>16</sup> मिनु मेकोमी "यावे आ नित्तीक गे इन गुइ पोक्कीन! मारदे हना परमप्रभु यावेमी 'अमालेकी नेल्ल आन पालामी मेकोपुकी नु लडाइ पाइनुड' दे डोंइती देंशो बाक्ता" देंत। येरमीया ३:१७

यित्रो मोसा कली गुम्थ जाक्शो

18 मिनु मिदयान रागी डा नाक्सो मोसा आ शिउ यित्रोमी परमप्रभुमी मेको आन कली इजीप्ट रागी रे दोपा गुंडा, मेको नेल्ल नेना बाक्ता। प्रस्थान ३:१<sup>2</sup> डोंइती मोसामी आ मीश नु आ तौ निक्शी आस कली आ माइत सोइश्शो बाक्ताक्ता। मुल यित्रोम मेको आन कली मोसा आ बाक्तीक चाक्तीमी। प्रस्थान ४:२०<sup>3</sup> मोसामी आ तौ का आ नें गेरशोम वोइश्शो बाक्ता। मारदे हना मेकोमी "गो मतुइश्शो रागी डा मुर आन दातेमी अर्को रागी डा मुर दुम्ती" देंत। प्रस्थान २:२२<sup>4</sup> मिनु अर्को कली एलीएजर नें वोइक्त्तु। मारदे हना मेकोमी "आं आफ आ परमप्रभुमी आं कली फाराओ आ तरवार रे प्रॉइशा, वारच पाइक्ती" देंशो बाक्ता। इतिहास २३:१५-१७<sup>5</sup> मिनु मोसा आ शिउ यित्रो, मोसा आ मीश नु आ तौ निक्शी गोरशो रागीमी मोसा कली गुम्थ जाक्तेक्म। मेना मोसामी आ ताम्बु परमप्रभु आ डांडा आ पुंमी कीतु।<sup>6</sup> मिनु यित्रोमी मोसा कली "इ शिउ यित्रो, इ मीश नु इ तौ निक्शी इ कली गुम्थ जाक्ताक्ता" दे लोव्र सोइक्ताक्ता।<sup>7</sup> मिनु मोसा आ शिउ गुम्थ जाक्शा, सेउ पशा, पुक्पु पशा "दोपा बाक्नी" दे ताम्बुम ओइताक्ता।<sup>8</sup> मिनु मोसामी परमप्रभु यावेमी इजीप्ट डा फाराओ कली नु आ मुर आन कली मार मार पवा, लाम्मी मार मार श्येत जामे, दोपा परमप्रभु यावेमी मेको नेल्ल रे प्रोना, मेको नेल्ल आ शिउ कली शेंताक्ता।

यित्रो थमा सुइक्ब दुम्शो

9 मिनु यित्रोमी परमप्रभु यावेमी इस्राएली आन कली गिश रिश्शो पवा नु इजीप्ट डा मुर आन गुइ रे दोपा प्रोना मेको नेल्ल नेंशा, शुश ग्येरसाक्ता।<sup>10</sup> मिनु मेकोमी "इन कली इजीप्ट डा मुरपुकी नु फाराओ आ गुइ रे प्रॉइब परमप्रभु यावे कली ठेयब सेल्य।<sup>11</sup> देवी देवता आन क्येडा परमप्रभु यावे ला ठेयब बाक्ता, दे गो मुल तुइक्ताक्ता। आ मुर आन कली इजीप्ट डा मुर आन गुइ रे प्रॉइतु। मारदे हना इजीप्टीपुकीमी मेको आन कली ठेयब लेश्शा दिष्को बाक्तेक्म" देंत। नेहेम्याह ९:१०; येरमीया ५०:२९<sup>12</sup> मिनु मोसा आ शिउमी परमप्रभु कली चोशा चढेतीक नु अरु चढेतीक यो चढेत्तु। मिनु हारून नु इस्राएल डा मुर आन खाल्पा नेल्ल मोसा आ शिउ नु परमप्रभु कली मान पा ठेयब सेल्शा जाप्तेक्म। उत्पत्ती ३१:५४

यित्रोम मोसा कली अर्ती गेशो

13 मिनु मोसा सुनी कना बोक्शा, मुर आन कली निसाफ पचा कली निस्साक्ता। मुरपुकी सुनी रे जाक्शा, नाक्दो सम्म मोसा आ डोंइती बाक्तेक्म।<sup>14</sup> मिनु मोसा आ शिउ मी मोसा कली मोदेशो पा मुर आन कली निसाफ पशो तशा "गे मुर आन कली मार पाइनेवे? गे मारदे इ का ला गेय पना पन बाक्नेवे? मुरपुकी सुनी रे नाक्दो सम्म जाक्शा, बाक्शो बाक्नीमी" देंत।<sup>15</sup> मिनु मोसामी आ शिउ कली "मुरपुकीमी परमप्रभु आ देंशो तुइक्चा दाक्नीम, मोपतीके जाक्नीम।<sup>16</sup> मेको आन दातेमी मार मार निसाफ पाचा माल्शो बाक्मे, मेको गो गारपाइक्नुड। मोपा गो निसाफ पचा माल्नुड। मिनु मेको आन कली परमप्रभु आ फुल्लुम मुशा ब्रेक्शो लोव्र नु आ अरेशो लोव्र तुइक्पाइक्नुड" देंत।<sup>17</sup> मिनु आ शिउमी "इ पशो मरिश्शो बाक्ता।<sup>18</sup> गे शेम्सीनेवे। गे नु बाक्ता मुरपुकी यो शेम्सीनीम। एको गेय इ मचाप्चा डा बाक्ता। गे ला पने मचाप्चेवे। गन्ती ११:१४; ब्यवस्था १:९<sup>19</sup> आं लोव्र नेनो, गो इ कली अर्ती गेनुड। परमप्रभु गे नु बाक्ता। गे मुर आन पर्वम परमप्रभु कली पुंडो।<sup>20</sup> परमप्रभु आ फुल्लुम मुशा ब्रेक्शो लोव्र नु आ अरेशो लोव्र मेको आन कली तुइक्पतो। मोपा गे मेको आन गाक्तीक लां नु आन पचा माल्शो गेय मेको आन कली शेंदो।<sup>21</sup> गे मुर नेल्ल आन दाते रे रिश्शो गेय पने चाप्ब परमप्रभु कली मान पा हिंभ, थमा सुइक्चा पुंडसीब नु खूइश्शा मार मार ताक्शा मजाइब मुरपुकी योव्रचा माल्नेवे। नोले मेको मुर आन कली कोव्रब ठेयब मुर वोतो। मेको आन कली १० जना मुर आन कली कोव्रब, ३० जना मुर आन कली कोव्रब, सहे सहे जना मुर आन कली कोव्रब नु हजार हजार जना मुर आन कली कोव्रब ठेयब मुर आन कली योव्रडो।<sup>22</sup> मेको

कोव्रब मुरपुकीमी नाक्त किंत किंत डा निसाफ पामेक्ल। ठेयब मुददा चहिं इ डोंइती चाक्गामेक्ल। आइक्च मुददा आंमा गारपदमेक्ल। मो पाप्तीवी हना, इ कली रिंशो दुम्ब। मिनु मेको कोव्रबपुकीमी इ गेय नु श्येत योक्शा पाइनीम। 23 गे आं दॅशो पाप्तीवी हना, परमप्रभुमी यो इ कली मोदॅशो पचा गेब। गे मेको गेय फाल्ने चाप्नेवे। मिनु इ मुर नेल्ल दुशा गारशा, आंम आन बाक्तीके लाइनीम” दे यित्रीमी मोसा कली अर्ती गेप्तु।

24 मिनु मोसामी आ शिउ आ अर्ती नॅशा, आ दॅशो नेल्ल पाप्तु। 25 मिनु इस्राएली आन दाते रे रिंशो गेय पाइब आन कली योव्रशा, मुर आन कली कोव्रब वोइक्तु। १०, १०, ३०, ३०, सहे सहे नु हजार हजार जना मुर आन कली कोव्रब वोतो। 26 मेको मुरपुकीमी मुर आन कली निसाफ पची ना, निसाफ पाइनीम। मिनु ठेयब मुददा बाक्त हना, मोसा कली ब्रेत्ताक्म। आइक्च मुददा चहिं आंमा निसाफ पाप्तेक्म। 27 मिनु मोसामी आ शिउ कली लचा गेप्तु। मिनु मेको आ रागी लेत्त।

सीनै डांडा जाक्दीशो

19 मिनु इस्राएलीपुकी इजीप्त रागी रे गूशा महिना सां नोले सीनै माइशो गोरशो रागीमी जाक्तेक्म। 2 डोंइती रेफीदीम माइशो रे लशा, सीनै माइशो डांडा आ डोंइती आन ताम्बु कीतेक्म। मेको डांडा आ डोंइती बाक्शो बाक्तेक्म। 3 मिनु मोसा परमप्रभु नु लोव्र पचा कली डांडा डोंइसाक्व। मिनु डांडा रे परमप्रभु यावेमी मोसा कली “इ किकी पिपी याक्ब आ खिं डा मुर, इस्राएली आन कली 4 ‘गे इजीप्त डा मुर आन कली मार मार पडा, मेको ताइतीनी। ककाकुली आ फ्रां तार कुरशो खोदॅशो पा इन कली आं नेक्था वोइक्तन्नी। ब्यवस्था ३२:११ 5 गे आं दॅशो लोव्र पाइतीनी नु आं कबल पशो टीतीनी हना, गे नेल्ल जात जात डा मुर आन दातेमी आं योव्रशो मुर दुम्नीनी। मारदे हना रागी नेल्ल आं केन बाक्ब। ब्यवस्था ५:२; ब्यवस्था ७:६ 6 गे आं कली चढेब आन राज्य नु आं योव्रशो जात डा मुर दुम्चा माल्नीनी” दे मेको लोव्र इस्राएली आन कली दॅचा माल्नेवे” दे माइक्तु। यसैया ६१:६; १ पत्रुस २:९; प्रकाश १:६; लेवी १९:२

7 मिनु मोसामी इस्राएल आ थर डा मुर आन खाल्पा आन कली ब्रेशशा, परमप्रभु यावेमी दॅशो लोव्र मेको आन कली माइक्तीमी। 8 मिनु मुर नेल्ल का दुश्शा “परमप्रभु यावे आ दॅशो नेल्ल पाइनीकी” दॅतेक्म। मिनु मोसामी मेको मुर आन दॅशो लोव्र परमप्रभु यावे कली दॅत। प्रस्थान २४:३-८ 9 परमप्रभु यावेमी मोसा कली “लो, गो मारेड मताइसीचा डा गोस्सुमी इ कली गुम्थ जाक्नुड। मोपा गो मुर आन कली, गे नु लोव्र पशा नॅपाइक्नुडमी। मिनु इ कली गेना हना यो थमा सुइक्नीम” दॅत। मोसामी मुर नेल्ल आन दॅशो यो परमप्रभु यावे कली दॅत। प्रस्थान १६:१०; प्रस्थान ३४:५; भजन संग्रह १८:१२; प्रस्थान १४:३१

10 मिनु परमप्रभु यावेमी मोसा कली “मुलाक्ती नु दीसा इस्राएली आन कली गो नु गुम्पाइक्चा ठीक पावो। आन फेक्शो वा मुरपतो। लेवी ११:४४; यहोसु ३:५; अय्युब १:५ 11 नित्थ नाक्त आं कली गुम्चा कली ठीक दुम्चा माल्नीमी। मारदे हना नित्थ नाक्ती गो सीनै डांडाम मुर नेल्ल आन डोंइती जाक्नुड। 12 मिनु गे डांडा आ एर ओंथ थरपु हिरचा माल्नेवे। गेमी मुर आन कली ‘डांडा मडोइक्चा, मथिचा डा पा थरपु हिरचा माल्नेवे। होस पा बाक्कीन! सुम डांडा आ पुं थीबा, मेको थमा पा साइक्चा पुंइसीब। प्रस्थान ३४:३ 13 मुर आन गुडमी थरपु थिचा मदुम्ब। मेको थरपु थीबा बस्तु भाव बाक्तेक्म हना यो, मुर बाक्तेक्म हना यो, मेको कली फुल्लु आप्शा हना यो ब्रा आप्शा हना यो साइक्चा माल्नीनी” दे इस्राएली आन कली शॅचा माल्नेवे। तुराही आ ठेयब सॅदा नॅशा नोले ला, मेकोपुकी डांडा डोइक्चा माल्नीमी” दॅत। हिब्रू १२:१८-२०

14 मिनु मोसा डांडा रे मुर आन बाक्तीके तोइश्शा, मेको आन कली परमप्रभु नु गुम्पाइक्चा कली ठीक पाप्तु। मिनु मेकोपुकीमी आन फेक्शो वा मुरतेक्म। 15 मिनु मोसामी वोंइश मुर आन कली “नित्थ नाक्त ठीक दुश्शा बाक्कीने। मीश मुर नु मबाक्कीन” दॅत। १सामुएल २१:४-५; १कोरिन्थी ७:५

परमप्रभु यावे गूशो

16 मिनु मेको आ नित्थ नाक्ती डांडा तार बुंबु पा, चिला पा, ठेयब गोस्स का गूत। मिनु तुराही का थम ठेयब सॅदा पा ग्रीत। मेको नॅशा, इस्राएलीपुकी हिंशा, डोन लशा, बाक्तेक्म। 17 मिनु मोसामी इस्राएली आन कली परमप्रभु कली गुम्थ जाक्कीन, दे आन बाक्तीक रे गुंइताक्व। मेकोपुकी डांडा आ पुंमी राष्ठा बाक्शो बाक्तेक्म। 18 मिनु सीनै डांडा कुनै कुन दुम्त। मारदे हना परमप्रभु यावे मेकेर मीम तोंइसाक्व। मेको मार मार चोशो खोदॅशो पा ठेयब कुन गूत। मिनु डांडामी ठेयब खिनु कुत। उत्पत्ती १५:१७ 19 तुराही आ सॅदा शुश ठेयब दुम्मेनु, मोसामी परमप्रभु नु लोव्र पाप्तु। मिनु परमप्रभु बुंबु पशो खोदॅशो पा मोसा कली लोव्र लेत्ताक्व। प्रस्थान ३३:११; प्रेरित ७:३८ 20 मिनु परमप्रभु यावे सीनै डांडा तारी जाक्त। मिनु परमप्रभु यावेमी मोसा कली “डांडा तार डोंइसो” दे ब्रेत्त। मिनु मोसा डोंइसाक्व। 21 मिनु परमप्रभु यावेमी मोसा कली “तोंइसो। मुर आन कली ‘होस पा मेकेर बाक्कीने। परमप्रभु यावे गे मलने’ दे अरेवो। आं कली कोव्रथ कुम्तेक्म हना, शुश मुर बेक्नीम। 22 आं कली गुम्थ कुइब चढेबपुकी यो आंम कली चिक्शा ठीक दुम्चा माल्नीम। मो मपाम्तेक्म हना, गो मेको आन कली यो साइक्नुडमी” दॅत। 23 मिनु मोसामी परमप्रभु यावे कली “मुरपुकी सीनै डांडा डोइक्ने मचाप्नीम, मारदे हना गे आं कली ‘एर ओंथ थरपु हिरशा, इन के सेल्चा’ दे अरेतीनी” दॅत। 24 मिनु परमप्रभु यावेमी मोसा कली “लावो, हारून कली डोइक्पतो। तन्न चढेबपुकी नु मुर आन कली चहिं मचाक्को। परमप्रभु यावे आ बाक्तीके कुम्तेक्म हना, गो मेको आन कली साइक्नुडमी” दॅत। प्रस्थान २४:९-११ 25 मिनु मोसा मुर आन बाक्तीके तोइश्शा, मेको लोव्र नेल्ल मुर आन कली माइक्तीमी।

परमप्रभु आ अरेशो १० ओटा लोव्र

ब्यवस्था ५:६-१८

20 मिनु परमप्रभुमी मार लोव्र पाप्तु दॅशा हना मत्ती ५:१७-२८ 2 “गो परमप्रभु यावे, इन परमप्रभु नड। गो इन कली वाइलीम वाइल दुम्शो इजीप्त रागी रे गुंइताक्न्नी। न्यायाधीस ६:८; येरमीया ३४:१३ 3 गे आं कली ला बाप्शा सेउ पने, देवी देवता आन कली बाप्शा सेउ मपने। ब्यवस्था ६:४-५; यसैया ४५:५-६; १कोरिन्थी ८:५-६ 4 मूर्ति मसेलीन। सरीडम बाक्ब, रागीम बाक्ब नु ब्वाक्कु गाम बाक्ब तेकोइ जन्तु आन मूर्ति मसेलीने। ब्यवस्था ४:१५-१९; ब्यवस्था २७:१५; यसैया ४०:१८-२६; रोमी १:२३ 5 मेको आन कली बाप्शा सेउ मपने। मेको आन कली ठेयब मसेलीने। मारदे हना गो परमप्रभु यावे, इन परमप्रभु नड। गो रुश पाइब परमप्रभु नड। आं कली काइ मदाक्ब नु आ अरेशो मटीब मुर आन आल, चच, युइ नु युइ आन युइ आन पाला सम्म यो सजाइ गेब परमप्रभु नड। प्रस्थान ३४:१४; ब्यवस्था ४:२४; ब्यवस्था ५:९; ब्यवस्था ६:१५; अय्युब २१:१९; येरमीया ३१:२९-३१; इजीकीएल १८:२५ 6 तन्न सु सुमी आं कली दाक्नीमी, आं शॅशो लोव्र टीनीमी, मेको आन आल, चच युइ नु युइ आन युइ आन पाला सम्म कली ला ममाइ, हजार हजार पाला सम्म गेना हना यो शिशी पाइक्नुडमी। प्रस्थान ३४:७; ब्यवस्था ७:९

7 गे परमप्रभु यावे, इन परमप्रभु आं नॅ, मो मथिने। मारदे हना सुम परमप्रभु यावे आं नॅ मो थीबा, मेको कली सजाइ मगेथु, मप्रोंइब। लेवी १९:१२; लेवी २४:१६

8 सन्चरबार नाइक्तीक नाक्ती आं नाक्त बाक्ब। मानेचा माल्नीनी। प्रस्थान १६:२५-२९ 9 गे ६ नाक्त इन गेय नेल्ल पचा माल्नीनी। 10 तन्न मेको आ नोले डा नाक्त परमप्रभु यावे, इन परमप्रभु आ नाइक्तीक नाक्त बाक्ब। मेको नाक्ती गेपुकी काइ गेय मपने। इन तमी तौ, इन वाइलीम वाइल, इन बस्तु भाव, इन रागीम बाक्शो अर्को रागी डा मुर आन कली यो काइ गेय मपपतीन। प्रस्थान ३१:१३-१७; इजीकीएल २०:१२; मर्कूस २:२७-२८; कलस्सी २:१६-१७ 11 मारदे हना परमप्रभु यावेमी ६ नाक्तीमी सरीड नु रागी, ठेयब समुन्द्र नु ठेयब समुन्द्रमी बाक्शो नेल्ल आन कली



सेल्लु। मिनु नोले डा नाक्त नाइसाक्व। मोपतीके परमप्रभु यावेमी 'मेको आं नाक्त बाक्व' दे मेको नाक्त कली आसीक गेशो बाक्व। *उत्पत्ती २:२-३*

12 इन आम आफ आन कली मान पने। मो पाइतीनी हना, परमप्रभु यावेमी, इन परमप्रभु इन कली गेशो रागीम शुश ब्रोंइचा गेब। *प्रस्थान २१:१७; ब्यवस्था २७:१६; मत्ती १५:४-६; एफिसी ६:२-३*

13 मुर मसतीन। *प्रस्थान २१:१२; उत्पत्ती ९:५-६; याकूब २:१०-११*

14 मुर आन मीश वोंइश नु मइपीन। *लेवी २०:१०; मत्ती १५:१९*

15 खुइ मपने। *प्रस्थान २१:१६; लेवी १९:११; एफिसी ४:२८*

16 जोल पा सांक्छी मबाक्कीन। *प्रस्थान २३:१; ब्यवस्था १९:१८-१९; एफिसी ४:२५*

17 इन नेक्था बाक्व मुर आ खिं, आ मीश आ वाइलीम वाइल, आ बी ब्यफ नु आ गधा, मेको के मार बाक्त हना यो, मेको तशा मबाल्दीन। एको परमप्रभु यावे आ अरेशो लोव बाक्व" दे मोसामी इस्राएली आन कली देंत। *रोमी ७:७; रोमी १३:९*

### परमप्रभु कली मान पा हिंशो

18 मिनु मुरपुकी डोन बाक्मानु, बुंबु पशो नेंशा नु चिला पशो तशा, तुराही ताप्शो नेंशा, डांडा रे कुशो कुन तशा, डोन लशा हिंशा खिंखि पा, कोवशा बाक्तेक्म। 19 मिनु मेकोपुकीमी मोसा कली "गे आंइ कली लोव पाइतीनी हना, गो नेंनीकी। तन्न परमप्रभुमी आंइ कली लोव पात्तु हना, बेक्नीकी" देंतेक्म। 20 मिनु मोसामी "महिनीन। परमप्रभु इन कली नाक्थ जाक्त। गे परमप्रभु कली मान पा हिंचा डा बाक्व, दे मिन्ताक्नी हना, पाप मपाइनीनी" देंत। *उत्पत्ती २२:१* 21 मुरपुकी डोन बाक्वशो बाक्तेक्म। मोसा चहिं परमप्रभु आ नेक्था क्येर गोस्सुम लत। *१राजा ८:१२*

22 मिनु परमप्रभु यावेमी मोसा कली "गे इस्राएली आन कली 'आं कली सरीड रे लोव पशो नेंतीनी।

23 गे गो नु देवी देवता मसेलीन। गे आंम कली सुन नु चांदी के देवी देवता मसेलीने।

24 गे आं कली खप के चढेतीके सेल्चा माल्नीनी। मेको तारी चोशा चढेतीक चढेचा माल्नीनी। इन दुशा बाक्चा आ परबम चढेतीक चढेन। भेडा, ब्यफ चढेचा माल्नीनी। गो ते ते इन कली आं नें मिम्पाइक्नुडा, मेक मेक इन कली आसीक गेनुड। *प्रस्थान १७:१५; प्रस्थान २७:१-८; ब्यवस्था १२:५*

25 गे आं कली फुल्लु के चढेतीके सेल्चा दाक्ताक्नी हना, मप्रोल्लो फुल्लु के सेल्चा माल्नीनी। मेको फुल्लु फलामम प्रोल्लीनी हना, मेको आं कली मदुम्ब। *ब्यवस्था २७:५; यहोसु ८:३१* 26 आं कली चढेतीकेम थेंका मडांइसीने। इन मुने दोक्तीक मतांइसेक्ल" दे माइक्मी" देंमाक्त।

### हिब्रू वाइलीम वाइल

21 मिनु परमप्रभुमी लेंशा "मेको निसाफ पतीक लोव मुर आन कली शेंचा माल्नेवे। 2 'गेपुकीमी हिब्रू वाइल ग्याप्तीनी हना, ६ बर्स इन गेय पपाइश्शा, नोले डा बर्स मो लचा गेचा माल्नीनी। *लेवी २५:३९-४१; ब्यवस्था १५:१२-१७; येरमीया ३४:१४* 3 मेको वाइल आ का जाक्त हना, आ का लचा माल्ब। ग्युबे पा जाक्त हना, आ मीश लाइश्शा लचा माल्ब। 4 आ होवपम आ वाइल कली ग्युबे पपाइक्तु हना, मेकोमी तमी तौ थित हना, मेको मीश मुर नु आलपुकी मेको होवप केन दुम्नीम। मेको वाइल आ का ला लचा माल्ब। 5 तन्न मेको वाइलम "आं होवप, मीश नु आं आल आन कली दाक्नुड, गो प्रोंइशा मलाइनुड" देंत हना, 6 आ होवपम आ वाइली कली परमप्रभु आ डोंइती लाइक्चा माल्ब। मिनु लाप्चो डा शीम आ नोफा खिन्त्वा कली राप्पाइक्चा माल्ब। मिनु आ होवपम लूजेमी आ वाइली आ नोफा खिन्त्वा माल्ब। मिनु मेको गेना हना यो वाइल दुम्शा बाक्व। *ब्यवस्था १:१७; भजन संग्रह ८२:१*

7 सुइमी आ तमी कली वाइलीमी सेल्शा, लेयतु हना, मेको प्रोंइचा मपुंडसीब। 8 मेको होवपमी आंम कली चाक्गा नोले मेको कली मदाक्ताक्व हना, मेको कली क्येट ताक्शा प्रोंइचा माल्ब। आ होवपमी मेको वाइलीम कली अर्को रागी डा मुर आन कली लेयने मचाप्ब। मारदे हना मेको मीश मुर

मरिम्शो पचा पुंडसीशो बाक्व। 9 मिनु मेको होवपमी मेको ग्याप्शो मीश आल आ तौ कली गेपु हना, आ तमी खोदेशो पचा माल्ब। 10 मेकोमी अर्को मीश यो चाक्तु हना, डोंइती डा कली जचा, फेक्चा नु ग्युबे पशो मीश मुर आन माल्शो नेल्ल गेचा माल्ब। 11 तन्न मेको आ माल्शो नेल्ल मगेपु हना, मो लचा गेचा माल्ब" देंनो" देंत।

### साइक्चा नु तुम्मुचा आ परबम लोव

12 मिनु "सुमी मुर कली मबेक्म सम्म तुप्बा, मेको मुर थमा पा साइक्चा पुंडसीब। *प्रस्थान २०:१३; उत्पत्ती ९:६; मत्ती ५:२१-२२* 13 मुरुमी अरु कली खेदा मपथु, साइक्चा ममाल्शो बाक्त, तन्न परमप्रभुमी मेको मोदेशो दुम्पाइक्तु, गो इन कली मोदेशो मुर कली प्रोक्शा बाक्तीक का कोइनुड। *गन्ती ३५:६-२९; ब्यवस्था १९:४-१३* 14 तन्न मुर कामी अरु कली 'गो साइक्नुड' दे मेको कली साइक्तु हना, मेको मुर कली आं चढेतीक रे लाइश्शा, साइक्चा माल्ब। *१राजा २:२९-३०* 15 सुम आ आम आफ आस कली तुप्बा, मेको थमा पा साइक्चा पुंडसीब। 16 सुमी मुर कली लेयचा कली खुइ पाइबा, मिनु मेको आ खुइ पशो मुर कली आ खिंम थित्तेक्म हना, मेको मुर थमा पा साइक्चा पुंडसीब। *ब्यवस्था २४:७; १तिमोथी १:१०* 17 सुमी आ आम आफ आस कली सराप पाइबा, मेको थमा पा साइक्चा पुंडसीब।

18 मिनु मुरपुकी जिशा कामी अर्को कली फुल्लु आप्तु हना, आ गुइमी तुपु हना, तन्न मेको मुर मबेक्थु, आ बाक्तीकेम इप्शा, 19 बोक्मेनु, कोक्के तिव्शा, गाक्ने चाप्ब दुम्त हना, मेको तुप्बमी मेको तुप्चा पुंडसीब नु गारचा माल्ब। तुप्चा पुंडसीब आ गेय मपशो डा ला थाप्चा ममाइ, मेको कली ठीक पा मसाम सम्म थाप्चा माल्ब। 20 मिनु सुइमी आ वाइलीम वाइल कली कोक्केमी तुपु हना, तुबानु बेक्त हना, मेको मुर थमा पा सजाइ ताइब।

21 तन्न मेको तुप्चा पुंडसीशो मुर का निक्शी नाक्त सम्म ब्रोंइत हना, मेको तुप्ब मुर सजाइ गेचा मपुंडसीब। मारदे हना आंम आ क्येटीम ग्याप्शो बाक्व।

22 मिनु वोंइश मुर जिशा, राम्शी पा आन नेक्था बाक्वशो कोवज कुरशो मीश मुर कली चुशा चिप्शा, मेको मीश मुरुम आ कोवज डा आल शाप्ताक्व हना, तन्न आ चिं मारेइ मरिम्शो मदुम्त हना, आ वोंइशेमी देंशो खोदेशो पा मेको डी डा चुशा चिप्ब मुरुम सजाइ ताइब। निसाफ पाइबमी गिश थाप्चा माल्ब देंबा, मिश थाप्चा माल्ब। 23 तन्न मेको मीश मुर नोले बेक्त हना, चुशा चिप्ब मुर साइक्चा पुंडसीब। *लेवी २४:१९-२०; ब्यवस्था १९:२१; मत्ती ५:३८*

24 सुइमी अरु आ मिक्ची का पुक्ताक्व हना, मेको यो आ मिक्च पुक्चा पुंडसीब। सुइमी अरु आ खुइ का जिक्ताक्व हना, मेको यो आ खुइ जिक्चा पुंडसीब। सुइमी अरु आ गुइ जिक्ताक्व हना, मेको यो आ गुइ जिक्चा पुंडसीब। सुइमी अरु आ खोइली का जिक्ताक्व हना, मेको यो आ खोइली जिक्चा पुंडसीब।

25 सुइमी अरु कली मीम चोशा, गार सेल्लु हना, मेको कली यो मीम चोशा गार सेल्चा माल्ब। सुइमी अरु कली तुपु हना, मेको तुप्ब यो तुप्चा पुंडसीब। सुइमी अरु कली क्योरशा गार सेल्लु हना, मेको यो क्योरशा गार सेल्चा पुंडसीब।

26 मिनु होवप कामी आ वाइलीम वाइल आन मिक्चीम तुपु हना, मेको मिक्च बुक्त हना, मेको होवपमी मेको मिक्च आ परबम मेको कली मोशा प्रोंइचा माल्ब।

27 आ वाइलीम वाइल कली तुप्शा, आ खुइ जिक्ताक्व हना, मेको होवपमी मेको खुइ आ परबम मोशा प्रोंइचा माल्ब।

28 मिनु ब्यफ कामी वोंइश मुर, मीश मुर, सुइ कली खुशा साइक्तु हना, मेको ब्यफ कली थमा पा फुल्लु आप्शा साइक्चा माल्नीनी। आ श्ये ब्यचा मदुम्ब। मेको ब्यफ आ होवप चिं सजाइ मताइब। *उत्पत्ती ९:५; गन्ती ३५:३३* 29 तन्न मेको ब्यफ डोंइती रे खुइब बाक्त हना, मिनु आ होवपमी तुइश्शा यो, आ ब्यफ कली रिम्शो पा मवोइक्तु हना, मेको ब्यफोमी वोंइश मुर, मीश मुर, सुइ कली साइक्तु हना, मेको ब्यफ कली फुल्लु आप्शा, साइक्चा माल्ब। मिनु आ होवप कली यो साइक्चा माल्ब। 30 मसाइक्चा, दे क्येट पुंडतेक्म हना, दोशो पुन्मे मोशो गेचा माल्ब। 31 ब्यफोमी तमी तौ खुपु हना, मेको मोदेशोन पचा माल्ब। 32 ब्यफोम सुइ आन वाइलीम वाइल आन

कली खुप्तु हना, मेको ब्यफ आ होवपमी वाइलीम वाइल आन होवप कली ३० शेकेल चांदी गेचा माल्ब। मिनु ब्यफ कली चहिं फुल्लु आष्ठा साइक्वा माल्ब” देनो। शेकेल का ११.५ ग्राम, तोला खोदेशो बाक्ब। ३० शेकेल चांदी ३४५ ग्राम बाक्ब।

बस्तु भाव आन पर्वम अरेशो

33 मिनु “सुइमी लाइशो इनार रोक्तु हना, इनार दोप्तु हना, मिनु मेको मसुम्थु लत हना, नु ब्यफ हना यो गधा हना यो बिक्त हना, लेवी ७:२४; लेवी १७:१५ 34 मेको इनार आ होवपमी मेको गारपाइक्वा माल्ब। मेकोमी बस्तु भाव आ होवप कली क्येट गेचा माल्ब। मेको बेक्शो बस्तु चहिं इनार आ होवप के दुम्ब।

35 मिनु मुर का आ ब्यफोमी अरु मुर आन ब्यफ कली खूशा साइक्वतु हना, मेको सेस ब्यफ कली लेयचा माल्ब। मेको ताक्शो क्येट मेको आस दातेमी योक्शा, बेक्शो ब्यफ यो आस दातेमी योक्वा माल्नीस। 36 तन्न मेको ब्यफ डॉइती रे खुडब बाक्ब, दे तुइशा यो, आ होवपमी मेको ब्यफ कली रिम्शो पा मवोइक्वतु हना, मेको बेक्शो ब्यफ कली थमा पा थाप्चा माल्ब। मिनु बेक्शो ब्यफ मेको के दुम्ब” देनो।

खुड आ पर्वम अरेशो

22 सुइमी ब्यफ, भेडा खुड पशा, क्योरशा ब्वाप्तु हना यो, लेयतु हना यो, मेको मुरुमी ब्यफ का के ५ ओटा ब्यफ थाप्चा माल्ब। भेडा का के ४ ओटा भेडा थाप्चा माल्ब। २सामुएल १२:६; हितोपदेस ६:३१; लूका १९:८ 2 मिनु खुड कली खुड पना पन थित्तेक्म हना, मेको कली तुष्ठा साइक्तेक्म हना, साइक्ब साइक्वा डा सजाइ गेचा मपुंडसीनीम। 3 तन्न नां दाष्ठा नोले सम्म तुष्ठा साइक्वतु हना, मेको साइक्ब साइक्वा डा सजाइ ताइब। खुड पाइब आ खुड पशो नेल्ल लेत्वा माल्ब। थाप्ने मचाप्तु हना, वाइल सेल्वा पुंडसीब। 4 मेको खुड आ खुड पशो ब्यफ, गधा, भेडा आ बाक्तीकेम सेल थित्तेक्म हना, मार बाक्त हना यो का के निक्शी थाप्पाइक्वा माल्ब।

रू आ पर्वम अरेशो

5 मिनु “सुइमी आ बी ब्यफ, क्यारश भेडामी अरु मुर आन शोक्शो रू नेक्पाइक्वतु हना, अडगुर रू डा अडगुर नेक्पाइक्वतु हना, मेकोमी आ आंम रू डा नेल्ल क्येडा रिम्शो फल थाप्चा माल्ब। 6 सुइमी मी मुइक्वानु, मेको मीम चू नु रूमी बाक्शो मारेइ नेक्वतु हना, मेको मी मुइक्बमी मीम नेक्शो नेल्ल थाप्चा माल्ब” देनो।

वोइक्वा गेशो आ पर्वम अरेशो

7 मिनु “सुइमी आ नेक्था डा मुर कली आ क्येट, अरु मारेइ वोइक्वा कली गेप्तु हना, वोइक्ब मुर आ खिं रे खुड दुम्त हना, नु खुड कली थित्तेक्म हना, मेको खुइमी का के निक्शी थाप्चा माल्ब। 8 खुइ मथित्तेक्म हना, मेको खिं डा ठेयब मुरुमी आंम नेक्था डा मुर आ मार मार खुइ पवा कों, दे परमप्रभु आ डॉइती राप्पाइक्वा माल्ब। 9 मिनु बी ब्यफ, गधा, भेडा नु वासी मार मार वोइक्बमी नु वोइक्वा गेब, निम्फामी ‘आं के बाक्ब’ देंताक्स हना, मेको निक्शी परमप्रभु आ डॉइती जाक्वा माल्नीस। परमप्रभुमी सुम खुइ सुइक्वा, मेकोमी का डा निक्शी थाप्चा माल्ब। 10 मिनु सुइमी आ नेक्था डा मुर कली गधा, ब्यफ, भेडा नु अरु बस्तु भाव वोइक्वा कली गेप्तु हना, मेको बस्तु भाव बेक्तेक्म हना, तुष्ठा बिग्रेप्तेक्म हना, सुइम मतचा डा पा मुरुम खुइ पा लाइशो बाक्तेक्म हना, १राजा ८:३१-३२ 11 मेको वोइक्बम आ नेक्था डा मुर आ बस्तु भाव ‘खुइ मपड’ दे परमप्रभु यावे आ डॉइती कसम जचा माल्ब। मिनु बस्तु भाव आ होवपम मेको थमा सुदानु, वोइक्ब मुरुमी मारेइ थाप्चा ममाल्ब। 12 तन्न आ खिं रे खुइ पशो बाक्त हना, मेको वोइक्बमी मेको थाप्चा माल्ब। 13 ब्वाकी डा जन्तुम मेको बस्तु कली ग्याइशा साइशो बाक्त हना, मेको वोइक्बम मेको साइशो बस्तु दसी चाक्वा माल्ब। मेको ब्वाकी डा जन्तुमी साइशो कली थाप्चा ममाल्ब।

उत्पत्ती ३१:३९ 14 मिनु सुइमी आ नेक्था डा मुर रे ब्यफ का परमा पचा कली पुंडतु हना, बस्तु आ होवप मबाक्थु, मेको ब्यफ खजा दुम्त हना, बेक्त हना, मेको थमा पा थाप्चा माल्ब। 15 तन्न आ होवप यो बाक्त हना, मेको मारेइ थाप्चा ममाल्ब। मारदे हना गेय पचा कली क्येट गेशो बाक्ब” देनो।

मीश आल आ पर्वम अरेशो

16 मिनु “वोंइश मुर कामी कन्ने मीश आल नु मिलो शिलो पा, मेको नु इप्त हना, मेको कली थमा पा ग्युंबे पा आ आफ कली मार मार थाप्चा माल्ब। ब्यवस्था २२:२८-२९ 17 तन्न मीश आल आ आफोमी आ तमी मगेप्तु हना, मेको वोंइश मुरुम कन्ने ग्युंबे पशो खोदेशो पा, क्येट थाप्चा माल्ब।

थमा पा साइक्वा पुंडसीब मुर

18 टुना मुना पाइब कली ब्रोंइचा मगेचा। लेवी २०:६, २७; लेवी १९:३१; ब्यवस्था १८:१०; १सामुएल २९:९; मलाकी ३:५

19 सु बस्तु नु इप्बा, मेको कली थमा पा साइक्वा माल्नीनी। लेवी १८:२३; ब्यवस्था २७:२१

20 सुमी देवी देवता कली पूजा पाइबा, मेको मुर थमा पा साइक्वा पुंडसीब। परमप्रभु यावे कली ला चढेचा माल्ब। प्रस्थान २०:३-५; ब्यवस्था १३:७-१९; ब्यवस्था १७:२-७

महिवसीशो मुर आन पर्वम अरेशो

21 अर्को रागी डा मुर आन कली श्येत मगेचा, मदिप्चा। मारदे हना गे यो इजीप्त रागीमी अर्को रागी डा मुर दुम्शा बाक्तीनी। लेवी १९:३३-३४; ब्यवस्था १०:१८, १९ 22 आ वोंइश बेक्शो मीश मुर नु रोम रोइक्व आन कली श्येत मगेचा। ब्यवस्था २७:१९; यसैया १:१७; जकरिया ७:१० 23 गेपुकीमी श्येत गेतीनी हना, मेकोपुकीमी आं कली लोव्र पास्तेक्म हना, गो थमा पा आन पुंडशो गेनुड। 24 मिनु गो गाइशा, इन कली तरवारमी साइक्वन्नी। मिनु इन मीश वोंइश बेक्शो मीश दुम्ब। इन आलपुकी आफ बेक्शो आल दुम्नीम।

25 गेपुकीमी आं मुर आन दाते डा प्रुडग आन कली क्येट जेर गेतीनी हना, गे क्येट चेम्चा कली चाइक्ब ताक्ब मुर खोदेशो मदुमीन। लेवी २५:३६; ब्यवस्था २३:२०; हितोपदेस २८:८ 26 मिनु गेपुकीमी मेको आन सुम्तीक वासी क्येट आ पा डा लाइक्तीनी हना, नां पेरची ना मेको लेत्वा माल्नीनी। ब्यवस्था २४:१०-१३ 27 मारदे हना मेको आन रं डा सुम्तीक का ला बाक्ब। इप्ची ना दोपा सुम्तीनीमी? आं कली ब्रेत्तेक्म हना, गो आन पुंडशो गेनुड। मारदे हना गो शिशी पाइब नड।

परमप्रभु कली मान पा हिंचा

28 परमप्रभु आ पर्वम मरिम्शो लोव्र मपचा। इन कली सासन पाइब कली सराप मपचा। लेवी २४:१४-१६; प्रेरित २३:५ 29 गे इन रू डा डॉइती मीशो मारेइ मारेइ नु अडगुर रस चढेचा मरिम्दीन। मिनु इन डॉइती जरमेशो तौपुकी आं कली गेचा माल्नीनी। प्रस्थान २३:१९; ब्यवस्था १८:४; हितोपदेस ३:९-१०; प्रेरित १३:२, १३ 30 इन बी ब्यफ नु इन भेडा रे यो मोदेशो पचा माल्नीनी। ७ नाक्त आन ममा नु बाक्वा माल्नीमी। मेको नोले डा नाक्ती आं कली गेचा माल्नीनी। 31 गेपुकी आं मुर ला दुम्चा माल्नीनी। गे ब्वाकी डा जन्तुपुकीमी साइशो मब्वने। मेको कुचुम कली ब्वचा गेन” देनो। लेवी १९:२; १पत्रुस १:१५; लेवी ७:२४; ब्यवस्था १४:२१; इजीकीएल ४:१४; इजीकीएल ४४:३१

ठीक पतीके आ पर्वम अरेशो

23 “गेपुकी जोल लोव्र मब्रपतीने। मरिम्शो पाइब कली वारच मपने। जोल पा सांकछी मबाक्कीन। प्रस्थान २०:१६; लेवी १९:१६; भजन संग्रह १५:३; हितोपदेस १९:९ 2 मिनु ठेयब हुल का मरिम्शो पाइब

बाक्तेकम हना, मेको आन नोले मखोतीन। निसाफ पाइब आ डोंइती 'ठेयब हुल डा मुर ठीक बाक्नीम' मदेनीन। मोपा आं ठीक पतीके रे डोन मलने।<sup>3</sup> दूली पाइब मुर प्रुडग बाक्त हना यो मेको कली वारच मपतीन। लेवी १९:१५

<sup>4</sup> मिनु गे इन जोरी सत्रु आन ब्यफ, गधा लां जाम्शा, हिरशो ताइतीनी हना, मेको कली वारच पा, लेशशा आ खिं चोवदीत्वा माल्नीनी। अय्युब ३१:२९; हितोपदेस २५:२१-२२; लूका ६:२७<sup>5</sup> गे नु मदुइब मुर आ गधा आ भारीम चिप्शो थित्तीनी हना, गे मेको पोक्ने मचाप्शो मुर ताइतीनी हना, मेको कली महेरदीन। मेको कली वारच पा मेको कली पोक्कीन।<sup>6</sup> मिनु प्रुडग मुर का पित हना, मेको कली प्रुडग बाक्त हना यो, ठीक निसाफ पने। ब्यवस्था २५:१९; भजन संग्रह ८२:२-४; उपदेसक ५:७; यसैया १:१७  
<sup>7</sup> जोल पा सांकछी माल्ब आन क्येडा डोन बाक्कीन। दोस मताइब नु ठीक पाइब कली मसतीन। मारदे हना गो मरिश्शो पाइब आ पबर्म ठीक पाइब बाक्ब मदेनुड।<sup>8</sup> गेपुकी खूइश्शा मारेड मताक्कीन। मारदे हना मेकोमी मिक्च सिल्ब। मिनु खूइश्शा ताक्शोमी ठीक पाइब आ मुददा लोकब। ब्यवस्था २७:२५; १सामुएल ८:३; हितोपदेस १७:२३<sup>9</sup> मिनु अर्को रागी डा मुर आन कली मदिपीन। मारदे हना गेपुकी यो इजीप्त रागीम अर्को रागी डा मुर दुश्शा, अर्को रागी डा मुर आन थुं तुइक्नीनी। प्रस्थान २२:२०

#### नाइक्तीक नाक्त नु बर्स

<sup>10</sup> मिनु ६ बर्स सम्म इन रूमी खूश्शा, सेक्शा खुप्तीन। लेवी २५:१-१७, १८-२४<sup>11</sup> मिनु मेको आ नोले डा बर्स चहिं मारेड मशोक्थु, मो वोतीन। इन रागी डा प्रुडगपुकीमी मेको आंमा वाशो जामेक्ल। लीत हना, जन्तुपुकीम जामेक्ल। इन अडगुर रू नु इन तेल रवापुकी यो मेको खोदेंशोन पने।

<sup>12</sup> गेपुकी ६ नाक्त गेय पचा माल्नीनी। मेको आ नोले डा नाक्ती चहिं नाइसीन। मोपा इन ब्यफ नु गधा यो नाइक्ने चाप्नीम। मिनु इन वाइलीम आ तौ नु इन खिंम बाक्शो अर्को रागी डा मुर यो नाइक्वा ताइनीम। प्रस्थान २०:८-११<sup>13</sup> आं अरेशो नेल्ल पने। देवी देवता आन कली मारेड मपुंडचा आन नें यो मथिचा। यहोसु २३:७; जकरिया १३:२

#### बर्स डा चाड सां

<sup>14</sup> बर्सम आं पबर्म खेयप सां चाड मानेचा माल्नीनी। प्रस्थान ३४:१८-२६; लेवी २३:४-४४; ब्यवस्था १६:१-१७<sup>15</sup> गो इन कली देंशो खोदेंशो पा, बोरब ओख्ती मसुप्शो शोब्ले डा चाड मानेचा माल्नीनी। गेपुकी ७ नाक्त सम्म बोरब ओख्ती मसुप्शो शोब्ले जचा माल्नीनी। मेको आबीब महिनामी पचा माल्नीनी। मारदे हना गेपुकी आबीब महिनामी इजीप्त रागी रे रूतीनी। आं डोंइती श्येथ गुड मजाक्कीन। प्रस्थान १२:१५-२०<sup>16</sup> मिनु इन रूम खूश्शो डोंइती डा मीशो मारेड मारेड डा चाड मानेचा माल्नीनी। बर्स नुप्ची ना नेल्ल रिक्शा, खुप्शा, ओंइने थुशो डा चाड मानेचा माल्नीनी। प्रस्थान ३४:२२  
<sup>17</sup> वोंइश मुर नेल्ल परमप्रभु, परमप्रभु यावे आ डोंइती बर्समी खेयप सां जाक्वा माल्नीनी।<sup>18</sup> गेपुकीमी चढेनीनु, चढेशो आ हुश नु बोरब ओख्ती सुप्शो मारेड मारेड कालेमी मचढेन। मेको चढेशो श्ये आ बोसो सुनी सम्म महेंचा। प्रस्थान १२:७-१०; प्रस्थान ३४:२५

<sup>19</sup> मिनु इन रू डा डोंइती मीशो नेल्ल क्येडा रिश्शो फल फुल नु अन्न परमप्रभु यावे, इन परमप्रभु आ बाक्तीकेम चाक्वा माल्नीनी। गेपुकीमी पाठा कली आ ममा आ दूधम लोप्शा मक्वेने, देनो" दे परमप्रभु मोसा कली देंत। उत्पत्ती ४:४; ब्यवस्था २६:१-११; नेहेन्याह १०:३६; ब्यवस्था १४:२१

#### परमप्रभु आ अरेशो नु गेशो लोव

<sup>20</sup> मिनु परमप्रभुमी "नेनीन, गो इन डोंइती आं स्वर्ग डा गेय पाइब का सोइक्नुड। मेकोमी लांमी इन कली कोव्रशा नु आं देंशो बाक्तीकेम चोवदीब। प्रस्थान १४:१९<sup>21</sup> गेपुकी होस पा बाक्शा, आं देंशो टिने। गेपुकी मेको कली मगाइक्पतीन। मारदे हना आं नें मेको नु बाक्ब। मिनु मेकोमी इन हेंथे पतीक मक्वाम्ब। यसैया ६३:१०<sup>22</sup> गेपुकी आ देंशो नेनीन। आं देंशो नेल्ल पाइतीनी हना, गो इन जोरी सत्रु आन जोरी सत्रु दुम्नुड। इन कली खेदा

पाइब आन कली खेदा पाइब दुम्नुड।<sup>23</sup> आं स्वर्ग डा गेय पाइब थमा पा इन डोंइती लाइब। मिनु इन कली एमोरी, हिती परिज्जी, नानी, हिक्वी नु यबुसी कनानी आन रागी चोवदीब। मिनु गो मेको नेल्ल आन कली क्याम्नुड।<sup>24</sup> गेपुकी मेको आन खोदेंशो मपने। मेको आन देवी देवता आन डोंइती बाप्शा सेउ मपने। मेको आन कली गेय मपने। तन्न मेको आन मूर्ति जिक्शा प्रोल्शा ताइक्तीन। प्रस्थान २०:५; ब्यवस्था १२:३०; लेवी १८:३<sup>25</sup> गे परमप्रभु यावे, इन परमप्रभु कली गेय पाइतीनी हना, गो इन जचा तूचा थोव्रक कली आसीक गेनुड। मिनु इन कली रोड नेल्ल रे प्रॉइनुड। प्रस्थान १५:२६<sup>26</sup> इन रागीमी मीश मुरपुकी आल शाम्ब नु आल मथीब मदुम्नीम। मिनु गेपुकी खाल्पी खाल्पा दुम्चा सम्म ब्रॉइनीनी।<sup>27</sup> गो इन डोंइडोंइती हिंक् कोइनुडमी। मिनु गे ते ते जाक्दीत्नीनी, गो मेक डा जात जात डा मुर आन थुं लुक्च लपाइक्नुड। मिनु इन जोरी सत्रु इन कली तशा प्रोक्नीम। उत्पत्ती ३५:५; यहोसु २:९-११; १सामुएल १४:१५<sup>28</sup> गो इन डोंइडोंइती हिक्वा सोइश्शो खोदेंशो पा हितीक सोइक्नुड। मिनु हिक्वी, कनानी नु हिती इन डोंइती रे प्रोक्पाइक्नुड। ब्यवस्था ७:२०; यहोसु २४:१२<sup>29</sup> तन्न बर्स कामी मेको आन कली मप्रोक्पाइक्नुडमी। मोपा प्रोक्पाइक्तामी हना, गोरशो रागी दुश्शा, इन क्येडा ब्वाकी डा जन्तु शुश दुम्नीम।<sup>30</sup> गे शुश दुश्शा, मेको रागी मब्रीनी सम्म, गो मेको आन कली इन डोंइती रे का का पा गुंडनुडमी। ब्यवस्था ७:२२<sup>31</sup> गो इन रागी लल समुन्द्र रे पलिस्ती आन ठेयब समुन्द्र सम्म नु गोरशो रागी रे युफ्रेटीस खोला सम्म दुम्पाइक्नुड। मिनु गो मेको रागी डा मुर इन कली जिम्मा गेनुड। मिनु गे मेको आन कली खेरनीनी। उत्पत्ती १५:१८<sup>32</sup> गे मेकोपुकी नु मेको आन देवी देवता नु कबल मपमुने। प्रस्थान ३४:१२<sup>33</sup> मेकोपुकीम इन कली पाप पपाइक्नीम। मोपतीके मेको आन कली इन रागीमी बाक्वा मगेने। गे मेको आन देवी देवता आन कली गेय पाइतीनी हना, आन ग्याइलीम रेत्चा पुंडसीनीनी" दे परमप्रभु यावेमी इस्राएली आन कली अरेवा बाक्त।

#### सीनै डांडाम कबल पशो

**24** मिनु परमप्रभु यावेमी मोसा कली "गे, हारून, नादाब, अबीहु नु इस्राएली आन खाल्पा रे ७० जना मुर कुने। मिनु डोन रे आं कली सेउ पचा माल्नीनी। प्रस्थान २८:१; लेवी १०:१; गन्ती ११:१६<sup>2</sup> गे ला आं नेक्था जाक्ने चाप्नेवे। अरु चहिं नेक्था मजाक्थु, बाक्वा माल्नीमी। मिनु मुरपुकी गे नु डांडा डोइक्वा मदुम्नीम" दे परमप्रभु यावेमी देंत।

<sup>3</sup> मिनु मोसा डांडा रे तोइश्शा, मुर आन कली परमप्रभु यावेमी देंशो नु अरेशो लोव नेल्ल नेंपाइक्तीमी। मिनु मुर नेल्लेमी मुर का खोदेंशो पा "परमप्रभु यावेमी देंशो लोव नेल्ल गो पाइनीकी" देंतेक्म। प्रस्थान १९:८  
<sup>4</sup> मिनु मोसामी परमप्रभु यावे आ देंशो लोव नेल्ल ब्रेक्ताक्व। मिनु सुनी कना बोक्शा, डांडा आ पुंमी चढेतीक का नु इस्राएल आ १२ थर मिम्वा कली १२ ओटा फुल्लु खूक्तु। प्रस्थान ३४:२७; यहोसु ४:२०<sup>5</sup> मिनु मोसामी इस्राएली ठिटा आन कली बोहोर क्योरशा, चोशा चढेतीक नु परमप्रभु यावे नु दुशा बाक्वा आ पबर्म चढेतीक चढेपपाइक्तु। न्यायाधीस १७:७<sup>6</sup> मिनु चढेशो बस्तु आन हुश आधा लाइश्शा, बोसपुकीम कुर पाप्तु। मिनु लीशो हुश चढेतीकेम ब्रुइक्ताक्व।<sup>7</sup> नोले कबल डा लोव ब्रेक्शो किताब मुर आन कली नेंपाइक्वा कली पढेप्तु। मिनु मेकोपुकीमी "परमप्रभु यावे आ देंशो नेल्ल पाइनीकी। आ लोव टीनीकी" देंतेक्म।<sup>8</sup> मिनु मोसामी बोस डा हुश लाइश्शा, मुर आन कली ब्रुइश्शा "नेनीन, परमप्रभु यावेमी गेपुकी नु कबल पाप्तु। मेको हुश परमप्रभु यावे आ कबल डा देंशो लोव आ छाप बाक्ब" देंत। हिब्रू ९:१९-२७; मर्कूस १४:२४

<sup>9</sup> मिनु मोसा, हारून, नादाब, अबीहु नु इस्राएली आन खाल्पा रे ७० जना मुर डांडा डोंइसाक्म।<sup>10</sup> मिनु मेकोपुकीमी इस्राएली आन परमप्रभु कली ताम्तेक्म। आ बाक्तीक बास साफीर माइश्शो हीरा खोदेंशो दिंम का बाक्शो बाक्त। मेको हाक्शो सरीड खोदेंशो नीलो बाक्त। इजीकीएल १:२६<sup>11</sup> मिनु परमप्रभुमी इस्राएली आन खाल्पा आन कली मारेड मपव। मिनु मेकोपुकीमी परमप्रभु कली तशा, जशा तूशा बाक्तेक्म। प्रस्थान १९:२१-२२; प्रस्थान ३३:२०-२३

## मोसामी परमप्रभु आ अरेशो टिशो

12 मिनु परमप्रभु यावेमी मोसा कली "गे डांडा डोइश्शा, आं नेक्था जाक्शा रिम्शा बाक्को। गो आं अरेशो लोव्र नु आं शेंशो लोव्र इस्राएली आन कली शेंचा कली फुल्लु निक्शीम मुशा ब्रेक्ताक्क। गो मेको फुल्लु इ कली गेनन्न" देंत। प्रस्थान ३१:१८; २कोरिन्थी ३:६ 13 मिनु मोसा आ गेय पाइब यहोसु लाइश्शा, परमप्रभु आ डांडा डोइसाक्क। प्रस्थान ३३:११ 14 तन्न डोइती मोसामी इस्राएली आन खाल्पा आन कली "गो मलेस्कु सम्म, एकेर रिम्दीन। नेनीन, हारून नु हुर गेपुकी नु बाक्नीस। मार निसाफ पचा माल्नीनी, मेको निक्शीमी गारपाइक्नीस" देंत। प्रस्थान १७:१२ 15 मिनु मोसा डांडा डोइसाक्क। मिनु गोस्सुम मेको डांडा सुम्नु। 16 मिनु परमप्रभु यावे आ छेडछेड सीनै डांडाम बाक्शो बाक्त। मेको गोस्सुम डांडा कली ६ नाक्त सम्म सुम्नु। मिनु नाक्त का नोले गोस्स आ दाते रे परमप्रभु यावेमी मोसा कली ब्रेक्ताक्क। प्रस्थान १६:१० 17 मिनु परमप्रभु यावे आ छेडछेड इस्राएली आन कली डांडा तारी थम ठेयब ब्रशो मी खोदेंशो पा तांडसाक्क। ब्यवस्था ४:२४; ब्यवस्था ९:३; हिब्रू १२:२९ 18 मिनु मोसा गोस्स आगा ओव्रशा, डांडा डोइश्शा, ४० नाक्दो नु ४० नाक्ती बाक्त। प्रस्थान ३४:२८

## ताम्बु सेल्चा कली शुश गेशो

25 मिनु परमप्रभु यावेमी मोसा कली 2 "इस्राएली आन कली 'आं कली मार मार गेचा मिम्नीनी, मेको गेने' दे मतो। आन थुमी गेचा दाक्शो, नेल्ल आन चाक्शो गे नु इ कली वारच पाइबपुकीमी ताक्कीन। प्रस्थान ३५:४-७; १इतिहास २९:५; एज्रा २:६८, ६९ 3 आं कली मार मार ताक्चा माल्नीनी देंशा हना, सुन चांदी नु कांसा, 4 नीलो, प्याजी नु लल रड डा श्येले, रिम्शो पा किरशो सुती श्येले के प्रोव्रशो वा, क्यारश आ चां, 5 लल रड नुष्शो सांड आ कुशुल, नेल्ल क्येडा रिम्शो सेल्शो कुशुल, बोल्यो शी, 6 बत्ती दातीक तेल, लुक्तीक तेल नु धूप कली ब्रोव्रशो रिना पपाइक्क थोव्रक, 7 निसाफ पतीके ऊरीम नु थुम्मीम वोइक्तीक झीला नु कुचु तार वोइक्तीक सेल्चा कली ओनीक्स माइश्शो हीरा नु अरु हीरा ताक्चा माल्नीनी। 8 मिनु गो मेको आन दातेमी बाक्चा कली आं बाक्तीक सेल्पतो। इजीकीएल ३७:२६-२८ 9 गो इ कली कौडिशो खोदेंशो पा ताम्बु सेल्पाइक्चा माल्नेवे। आगाम मार मार वोइक्चा माल्नेवे, मेको आं कौडिशो खोदेंशो पा सेल्पतो। प्रस्थान २५:४०; प्रस्थान २६:३०; प्रस्थान २७:८

## कबल पशो सन्दोस

प्रस्थान ३७:१-९

10 मेकोपुकीमी बोल्यो शी के सन्दोस का सेल्चा माल्नीम। मेको आ पित्थ लाइश्शो कुबीत निक्शी नु आधा, आ ब्रेम्शो कुबीत का नु आधा नु आ ग्येत्थ लाइश्शो कुबीत का नु आधा डा सेल्चा माल्नीम। कुबीत का ०.५ मिटर खोदेंशो बाक्क। 11 मिनु गे मेको सन्दोस आ खिंडगा नु आ लाडगा नेल्ल क्येख सुनमी गिल्पाइक्चा माल्नेवे। मिनु एर ओथ सुन के सुर सेल्पाइक्चा माल्नेवे। 12 मिनु सुन के ४ ओटा मुन्द्रा सेल्पाइक्चा माल्नेवे। का पटटी निक्शी नु अर्को पटटी निक्शी पा सन्दोस आ ४ सुरमी क्येच्चा माल्नीम। 13 मिनु बोल्यो शी के कुरतीक कोक्के निक्शी सेल्पाइश्शा, सुनमी गिल्पाइक्चा माल्नेवे। १राजा ८:८ 14 मिनु मेको कुरतीक कोक्के निक्शी मेको मुन्द्राम शुइक्चा माल्नेवे। मो पा मेको सन्दोस कली कुरने चाप्नीम। 15 मेको कोक्के निक्शी सन्दोसम बाक्शो मुन्द्राम शुइक्चा माल्नीस। मेको आस कली मशोल्ला। 16 मिनु गो इ कली गेचा चिक्शो कबल पा अरेशो लोव्र मेको सन्दोसमी कुर पा वोइक्चा माल्नेवे।

## सन्दोस सुम्तीके

17 मिनु सन्दोस सुम्तीके क्येख सुन के चेम्शा सेल्चा माल्नेवे। मेकेर परमप्रभु आ शिशी बाक्क। आ पित्थ लाइश्शो कुबीत निक्शी नु आधा नु आ ब्रेम्शो कुबीत का नु आधा बाक्चा माल्ब। कुबीत का ०.५ मिटर, कुबीत का खोदेंशो बाक्क। लेवी १६:१२-१५; हिब्रू ४:१६; हिब्रू ९:५ 18 मिनु गे आं स्वर्ग

डा गेय पाइब खोदेंशो सुन के करूब निक्शी चेम्शा सेल्पाइक्चा माल्नेवे। मेको सुम्तीकेम आ निम्फा पटटी का का करूब चेम्शा सेल्चा माल्नेवे। 19 का पटटी करूब का, अर्को पटटी करूब का चेम्शा सेल्चा माल्नेवे। मेको सुम्तीके नु करूब निम्फा मखौइसीशो सुन का केन चेम्शा सेल्चा माल्नेवे। 20 मेको करूबम आस फ्रां हाम्शा, सुम्तीके फारचा माल्नीस। आस कुल कोव्रमुशा, सन्दोस सुम्तीके गे कोव्रचा माल्नीसी। 21 मेको सुम्तीके मेको कबल पशो सन्दोस तार वोइक्चा माल्नेवे। मिनु गो इ कली गेचा चिक्शो कबल पा अरेशो लोव्र मेको कबल पशो सन्दोसम कुर पा वोइक्चा माल्नेवे। प्रस्थान ३४:२९; १राजा ८:९

22 मिनु गो मेको सन्दोस सुम्तीके शिशी बाक्तीकेम गे नु ग्रुम्शा, लोव्र पाइनुड। मेको सुम्तीके आ तारी मेको करूब निक्शी आस दाते रे गो इस्राएली आन कली मार मार अरेचा माल्नुडा, मेको गो इ कली देंनुड। गन्ती ७:८९; २सामुएल ६:२

## शोब्ले वोइक्तीके टेबल

प्रस्थान ३७:१०-१६

23 गे बोल्यो शी के टेबल का सेल्पाइक्चा माल्नेवे। मेको आ पित्थ लाइश्शो कुबीत निक्शी नु आ ब्रेम्शो कुबीत का नु आ ग्येत्थ लाइश्शो कुबीत का नु आधा दुम्चा माल्ब। कुबीत का ०.५ मिटर, खोदेंशो बाक्क। 24 मिनु मेको कली क्येख सुनमी गिल्पाइक्चा माल्नेवे। सिरपेच खोदेंशो पा एर ओथ नेल्ल सुन के सुर सेल्पाइक्चा माल्नेवे। 25 मेको एर ओथ डा सुर नेल्ल ४ आंइची ब्रेम्शो दुम्चा माल्ब। मेको कली सिरपेच खोदेंशो पा बुटा आप्पाइक्चा माल्नेवे। 26 मिनु ४ ओटा सुन के मुन्द्रा चेम्शा, मेको आ ४ ओटा खोइलीम टेबल आगाम क्येप्पाइक्चा माल्नेवे। 27 टेबल कुरचा कली मुन्द्रापुकी टेबल आ सुर आ नेक्था क्येप्पाइक्चा माल्नेवे। 28 मिनु बोल्यो शी के कोक्के निक्शी सेल्शा, सुनमी गिल्पाइक्चा माल्नेवे। मेको टेबलम बाक्शो मुन्द्राम शुइश्शा कुरने चाप्नीम।

29 मिनु टेबलम वोइक्चा माल्शो थाल, लोटा नु बोस नेल्ल नु तूचा थोव्रक चढेतीक लुक्चा कली लोटा नेल्ल क्येख सुन के सेल्पाइक्चा माल्नेवे। 30 मिनु मेकेर गेना हना यो आं डोइती कौडतीक शोब्ले वोइक्चा माल्नेवे। लेवी २४:५-६

## सुन के बत्ती दातीक

प्रस्थान ३७:१७-२४

31 गे क्येख सुन के बत्ती दातीक का चेम्शा सेल्पाइक्चा माल्नेवे। आ थाम, आ राशी, आ दियारी, आ डल्ला नु फूपुकी ठेयब सुन का केन दुम्चा माल्नीम। 32 मिनु मेको बत्ती दातीक आ थाम रे ६ ओटा राशी गूचा माल्नीम। का पटटी रे सां नु अर्को पटटी रे सां गूचा माल्नीम। 33 मिनु मेको राशी कामी देसी बदाम आ फू खोदेंशो बुटा पाइश्शो फू सां गूचा माल्नीम। अर्को राशीपुकी यो नेल्ल मोदेंशोन दुम्चा माल्नीम। 34 मेको बत्ती दातीक आ थामम चिहं ४ ओटा देसी बदाम आ फू खोदेंशो बुटा पाइश्शो गूचा माल्नीम। 35 थाम आ डोइती डा डल्ला, आ दाते डा डल्ला नु नोले डा डल्ला रे निम्फा पटटी गे राशी निक्निक्शी गूचा माल्नीम। 36 मेको आ राशी नु डल्ला नेल्ल ठेयब क्येख सुन का केन चेम्शो दुम्चा माल्नीम। 37 गे क्येख सुन के ७ ओटा दियारी सेल्पाइक्चा माल्नेवे। मिनु सल्दो वोइश्शा, नेल्ल तांडसीचा डा पा दाचा माल्नेवे। मेको ब्रशा, छेडछेड दुम्ल। 38 मिनु आ कांइची नु आइक्क बोस क्येख सुन के दुम्चा माल्नीम। 39 गे मेको नेल्ल टलेन्ट का क्येख सुन के सेल्पाइक्चा माल्नेवे। 40 गे मेको नेल्ल गो इ कली डांडाम कौडिशो खोदेंशो पा सेल्पाइक्चा माल्नेवे। प्रस्थान २५:९; प्रस्थान २६:३०; प्रेरित ७:४४; हिब्रू ८:५

## ताम्बु कली साप्तीके

प्रस्थान ३६:८-३८

26 आं बाक्तीके सेल्चा कली रिम्शो पा किरशो सुती श्येले के १० ओटा ताम्बु साप्तीके प्रोव्रपाइक्चा माल्नेवे। मेको सुती श्येले

नीलो, प्याजी नु लल रडम नुषो बाक्चा माल्ब। मिनु मेको वामी करूब बुटा आप्शा, थाम्पा रिम्शो प्रोवस जोक्ब मुर आन कली प्रोवपाइक्चा माल्नेवे।<sup>2</sup> वा का आ लाइश्शो २८ कुबीत नु आ ब्रेम्शो ४ कुबीत दुम्चा माल्ब। मेको १० ओटा वा नेल्ल मोर्देशो दुम्चा माल्नीम। कुबीत का ०.५ मिटर, खोर्देशो बाक्ब।<sup>3</sup> मिनु ५ ओटा वा बोइश्शा, का सेल्पाइक्चा माल्नेवे। मिनु अर्को ५ ओटा वा यो बोइश्शा, का सेल्पाइक्चा माल्नेवे।<sup>4</sup> मिनु वा आ सुर कली नीलो रड डा श्येले के बोइक्तीके यो सेल्पाइक्चा माल्नेवे। मोपा वा निक्शी बोइश्शा का सेल्पाइक्चा माल्ब।<sup>5</sup> मिनु गे का का पा ताम्बु साप्तीके ५० ओटा सेल्पाइक्चा माल्नेवे। मेकोपुकी गारपाइक्चा कली सेल्पाइक्चा माल्नेवे।<sup>6</sup> मिनु ५० ओटा सुन के ग्याइक्पाइक्तीके सेल्पतो। मोपा मेको वापुकी बोइश्शा, आं बाक्तीक ताम्बु आगा साप्तीक कान दुम्ब।

<sup>7</sup> मिनु आं बाक्तीक ताम्बु साप्चा कली क्यारश आ चां के ११ ओटा टुक्रा सेल्पाइक्चा माल्नेवे।<sup>8</sup> का आ लाइश्शो ३० कुबीत नु आ ब्रेम्शो ४ कुबीत दुम्चा माल्ब। मिनु मेको ११ ओटा टुक्रा नेल्ल खाल का डा दुम्चा माल्नीम। कुबीत का ०.५ मिटर खोर्देशो बाक्ब।<sup>9</sup> गे ५ ओटा टुक्रा बोइश्शा का नु ६ ओटा बोइश्शा, अर्को का सेल्पाइक्चा माल्नेवे। ६ ओटा बोइश्शा टुक्रा ताम्बु आ डोईती आ सुर तोक्तीके फेके का मुक्शा तोक्चा माल्ब।<sup>10</sup> मेको टुक्रा का आ सुरमी ५० ओटा बोइक्तीक सेल्पाइक्चा माल्नेवे। मिनु अर्को टुक्रा आ सुरमी यो ५० ओटा बोइक्तीक सेल्पाइक्चा माल्नेवे।

<sup>11</sup> मिनु गे कांसा के ५० ओटा ग्याइक्पाइक्तीके सेल्पतो। मेको ग्याइक्पाइक्तीक बोइक्तीकेमी वोइश्शा, टुक्रा निक्शी के का दुम्चा माल्ब। मोपा टुक्रापुकी बोइश्शा, ताम्बु साप्तीक का दुम्ब।<sup>12</sup> ताम्बु आ साप्तीके आ दी गे आइदी सम्म तोक्चा डा पा साप्पाइक्चा माल्नेवे।<sup>13</sup> निम्फा पट्टी साप्पाइक्चा कली कुबीत का का आइदी सम्म तोक्चा डा पा साप्पाइक्चा माल्नेवे। कुबीत का ०.५ मिटर खोर्देशो बाक्ब।<sup>14</sup> ताम्बु आ साप्तीके निक्शी आस तारी लल रडम नुषो बोका आ कुशुल के सेल्पाइक्चा माल्नेवे। मिनु मेको आ तार अर्को साप्तीके नेल्ल क्येडा रिम्शो कुशुल के सेल्पाइक्चा माल्नेवे।

### ताम्बु कली फलेक सेल्शो

<sup>15</sup> गे आं बाक्तीक ताम्बु आ एर ओंथ थारचा कली फलेक सेल्पाइक्चा माल्नेवे। मेको फलेकपुकी बोल्यो शी के सेल्पाइक्चा माल्नेवे।<sup>16</sup> फलेक नेल्ल १० कुबीत ग्येत्थ लाइश्शो नु कुबीत का नु आधा ब्रेम्शो दुम्चा माल्नीम। कुबीत का ०.५ मिटर खोर्देशो बाक्ब।<sup>17</sup> फलेक नेल्लेमी युक्तीक निक्निक्शी आ पुं गे एर ओंथ पा सेल्पतो। आं बाक्तीक डा फलेक नेल्ल मोर्देशो पा सेल्पाइक्चा माल्नेवे।<sup>18</sup> आं बाक्तीक कली मोर्देशो फलेक सेल्पाइक्चा माल्नेवे। २० ओटा फलेक दक्खिन गे थारचा कली सेल्पाइक्चा माल्नेवे।<sup>19</sup> मिनु गे २० ओटा फलेक आन कली ४० ओटा चांदी के राप्पाइक्तीके सेल्पाइक्चा माल्नेवे। फलेक का कली युक्तीक निक्शी गारचा डा पा ग्याइक्पाइक्तीक निक्शी माल्ब। अर्को फलेक आन कली यो गारचा डा पा युक्तीक नु राप्पाइक्तीके निक्निक्शी सेल्पाइक्चा माल्नेवे।<sup>20</sup> मोर्देशो पा उत्तर गे यो २० ओटा फलेक बाक्चा माल्नीम।<sup>21</sup> मिनु ४० ओटा राप्पाइक्तीक सेल्शा, फलेक कामी राप्पाइक्तीक निक्शी युक्पाइक्चा माल्नेवे। फलेक नेल्ल मोर्देशो पा सेल्चा माल्नेवे।<sup>22</sup> मिनु आं बाक्तीक ताम्बु आ नोले पट्टी, पच्छिम गे ६ ओटा फलेक सेल्पाइक्चा माल्नेवे।<sup>23</sup> नोले पट्टी डा सुर निक्शी कली फलेक निक्शी सेल्पाइक्चा माल्नेवे।<sup>24</sup> मेको सुर डा फलेक आइक्था नु उइ अर्को फलेक नु गारचा डा दुम्चा माल्नीस।<sup>25</sup> नोले पट्टी डा फलेक नु सुर डा फलेक नेल्ल पा ८ ओटा दुम्नीम। मेको फलेक नेल्ल आन कली १६ ओटा चांदी के राप्पाइक्तीके सेल्पाइक्चा माल्नेवे। फलेक का कली निक्शी माल्ब। फलेक नेल्ल मोर्देशो पा सेल्चा माल्नेवे।

<sup>26</sup> मिनु का पट्टी डा फलेक आन कली बोल्यो शी के ५ ओटा लाइश्शो कोक्के,<sup>27</sup> अर्को पट्टी कली यो ५ ओटा लाइश्शो कोक्के सेल्पाइक्चा माल्नेवे। मिनु पच्छिम गे नोले पट्टी कली ५ ओटा लाइश्शो कोक्के सेल्पाइक्चा माल्नेवे।<sup>28</sup> मिनु फलेक ग्येत्थ आ दातेमी सुर का रे अर्को सुर

सम्म लाइश्शो कोक्के बाक्चा माल्नीम।<sup>29</sup> मिनु गे मेको फलेकपुकी सुनम गिल्पाइक्चा माल्नेवे। मेको कोक्के शुइक्तीक मुन्द्रा सुन के सेल्पाइक्चा माल्नेवे। मेको लाइश्शो कोक्केपुकी यो सुनमी गिल्पाइक्चा माल्नेवे।<sup>30</sup> गो इ कली डांडामी कौइशो खोर्देशो पा आं बाक्तीक ताम्बु सेल्पाइक्चा माल्नेवे। प्रस्थान २५:९

### ताम्बु कली फारतीक

<sup>31</sup> मिनु गे फारतीक सेल्चा कली नीलो प्याजी नु लल रड डा श्येले नु रिम्शो पा किरशो सुती श्येले के वा प्रोवपाइक्चा माल्नेवे। मेको वा करूब बुटा आप्शा थाम्पा रिम्शो प्रोवस जोक्ब मुर आन कली प्रोवपाइक्चा माल्नेवे।<sup>२इतिहास ३:१४</sup><sup>32</sup> मेको फारतीके बोल्यो शी के सेल्शो सुनम गिल्शो सुन के हेक्तीक पाइश्शो नु चांदी के राप्पाइक्तीक पाइश्शो ४ ओटा थामम क्युक्पाइक्चा माल्नेवे।<sup>33</sup> मिनु मेको फारतीके हेक्तीकेम हेक्पाइक्चा माल्नेवे। मिनु गे मेको आं अरेशो लोव आगाम वोइश्शो सन्दोस मेको फारतीके आगा गे वोइक्पाइक्चा माल्नेवे। मोपा मेको फारतीके चोवखो नु नेल्ल क्येडा चोवखो बाक्तीक कली फारब दुम्ब। मत्ती २७:५१; हिब्रू ९:३; प्रस्थान २६:६,११<sup>34</sup> मिनु गे मेको सुम्तीक अरेशो लोव आगाम वोइश्शो सन्दोस तारी वोइश्शा, मेको फारतीक आ आगा गे नेल्ल क्येडा चोवखो बाक्तीकेमी वोइक्पाइक्चा माल्नेवे। प्रस्थान २५:२१<sup>35</sup> कौइतीक शोब्ले वोइक्तीक टेबल चोवखो बाक्तीके उत्तर गे वोइक्पाइक्चा माल्नेवे। बत्ती दातीक चहिं दक्खिन गे वोइक्पाइक्चा माल्नेवे। प्रस्थान २५:२३-३०; प्रस्थान ४०:४२

<sup>36</sup> मिनु ताम्बु ओवतीक कली नीलो प्याजी नु लल रड डा श्येले नु रिम्शो पा किरशो सुती श्येले के प्रोवशो वा, बुटा आप्शा ठेयब फारतीक सेल्पाइक्चा माल्नेवे।<sup>37</sup> मेको फारतीके हेक्चा कली ५ ओटा बोल्यो शी के थाम सेल्पाइक्चा माल्नेवे। मेको थाम सुनम गिल्पाइक्चा माल्नेवे। मेको थामम सुन के हेक्तीके यो सेल्पाइक्चा माल्नेवे। मेको थाम राप्पाइक्तीके ५ ओटा कांसा के सेल्पाइक्चा माल्नेवे।

### चढ़ेतीक सेल्शो

प्रस्थान ३८:१-७

<sup>27</sup> मिनु बोल्यो शी के चढ़ेतीक का सेल्चा माल्नेवे। मेको ५ कुबीत लाइश्शो नु ५ कुबीत ब्रेम्शो दुम्चा माल्ब। ४ पाटे नु कुबीत सां ग्येत्थ लाइश्शो दुम्चा माल्ब। कुबीत का ०.५ मिटर दॅशो बाक्ब।<sup>2</sup> आ ४ सुरमी ४ ओटा ग्रोव गूपाइक्चा माल्नेवे। ग्रोव नु चढ़ेतीक सेल्चा कली फलेक का केन दुम्चा माल्ब। मेको नेल्ल कांसाम गिल्पाइक्चा माल्नेवे। लेवी १६:१८; १राजा १:५; भजन संग्रह ११८:२७<sup>3</sup> चढ़ेतीके कली माल्शो मारेइ मारेइ कांसा के सेल्पाइक्चा माल्नेवे। पुलु वोइक्तीक बोसपुकी, पुलु ताप्तीकपुकी, ब्रुइक्तीक बोसपुकी, श्ये गुंइतीक कांटापुकी नु मी कोइला कुर पतीकपुकी सेल्पाइक्चा माल्नेवे।<sup>4</sup> मिनु गे मी तिक्तीक कांसा के जाली सेल्पाइक्चा माल्नेवे। मिनु जाली आ ४ सुरमी ४ ओटा मुन्द्रा सेल्पाइक्चा माल्नेवे।<sup>5</sup> मेको जाली चढ़ेतीक उइ गे नु इर गे आ दातेम वोइक्पाइक्चा माल्नेवे।<sup>6</sup> मिनु चढ़ेतीक कली यो बोल्यो शी के कांसाम गिल्शो कुरतीक कोक्के निक्शी सेल्पाइक्चा माल्नेवे।<sup>7</sup> मेको चढ़ेतीक आ निम्फा पट्टी डा मुन्द्रामी कोक्के शुइश्शा, कुरने चाप्नीम।<sup>8</sup> मेको चढ़ेतीक फलेक के सेल्पाइक्चा माल्नेवे। पुं नु सुम्तीके मपाइश्शो सन्दोस खोर्देशो पा सेल्पाइक्चा माल्नेवे। डांडामी इ कली कौइशो खोर्देशो पा सेल्पाइक्चा माल्नेवे। प्रस्थान २६:३०;

### ताम्बु आ लाडगा

प्रस्थान ३८:९-२०

<sup>9</sup> मिनु ताम्बु आ लाडगा थरपु हिरचा कली रिम्शो पा किरशो सुती श्येले के फारतीके प्रोवपाइक्चा माल्नेवे। मेको फारतीके दक्खिन गे सहे का कुबीत लाइश्शो दुम्चा माल्ब। कुबीत का ०.५ मिटर खोर्देशो बाक्ब।<sup>10</sup> मेको फारतीक ग्याइक्पाइक्चा कली खाल का डा थाम, खाल का डा कांसा के

राप्पाइक्तीके, मुन्द्रापुकी नु कोक्केपुकी चहिं चांदी के सेल्पाइक्चा माल्नेवे। 11 मिनु मोदेशो पा उत्तर गे यो सहे का कुबीत लाइश्शो फारतीक प्रोवपाइक्चा माल्नेवे। मेको कली २० ओटा थाम, २० ओटा कांसा के राप्पाइक्तीके, मेको मुन्द्रापुकी नु कोक्केपुकी चहिं चांदी के सेल्पाइक्चा माल्नेवे।

12 लाडगा डा पच्छिम गे ब्रेमशो कली ५० कुबीत लाइश्शो फारतीक माल्ब। आ थाम नु आ राप्पाइक्तीक १०, १० ओटा दुम्चा माल्नीम। कुबीत का ०.५ मिटर खोदेशो बाक्ब। 13 लाडगा आ पूर्व, नां दाप्तीके गे फारचा कली यो ५० कुबीत ब्रेमशो दुम्चा माल्ब। 14 मिनु ओव्रतीक डा पटटी का कली १५ कुबीत डा फारतीक दुम्चा माल्ब। थाम नु आ राप्पाइक्तीके सां सां दुम्चा माल्नीम। 15 मिनु अर्को पटटी यो मोदेशो पा १५ कुबीत डा फारतीक, थाम नु राप्पाइक्तीके सां सां दुम्चा माल्नीम।

16 मिनु लाडगा ओव्रतीके कली २० कुबीत डा नीलो, प्याजी, श्येले नु रिमशो पा किरशो सुती श्येले के प्रोवशो फारतीक माल्ब। मेको फारतीक कली लूजेम बुटा आप्पाइक्चा माल्नेवे। ओव्रतीके कली थाम नु राप्पाइक्तीके ४, ४ ओटा दुम्चा माल्नीम। 17 लाडगा एर ओंथ डा थाम नेल्ल चांदीमी गिल्शो कोक्केमी ग्याइक्पाइश्शो दुम्चा माल्नीम। मुन्द्रा चांदी के नु आन राप्पाइक्तीक कांसा के दुम्चा माल्नीम।

18 मेको लाडगा आ पित्थ लाइश्शो सहे का कुबीत, आ ब्रेमशो ५० कुबीत नु आ फारतीके ग्येत्थ ५ कुबीत दुम्चा माल्ब। मिनु फारतीक वा नेल्ल रिमशो पा किरशो सुती श्येले के प्रोवशो वा के दुम्चा माल्ब। थाम आन राप्पाइक्तीके कांसा के दुम्चा माल्नीम। 19 मिनु ताम्बु डा नाक्त्त किंत किंत गेय पचा कली माल्शो मारेइ मारेइ कांसा के दुम्चा माल्नीम। किलापुकी नु लाडगा डा किला नेल्ल यो कांसा के दुम्चा माल्नीम।

#### बत्ती कली तेल

20 मिनु गे इस्राएली आन कली 'गे नेल्ल क्येडा रिमशो तेल रवा आ फल के खाक्शो तेल चाक्कीन। मेको बत्ती गेना हना यो ब्रशा बाक्ल' दे माइक्मी। लेवी २४:२-४ 21 मिनु ग्युत्तीक ताम्बु आगामी, कबल डा सन्दोस बाक्शो नेल्ल क्येडा चोवखो कोठा फारतीक आ डोंइती हारून नु आ तौपुकीमी नाक्दो रे सुनी सम्म मेको बत्ती दातीक परमप्रभु यावे आ डोंइती ब्रशा बाक्ल, दे ठीक सेल्चा माल्नीम। मेको इस्राएली आन चच युइ आन कली गेना हना यो पतीके लीचा माल्ब। मेको गेना हना यो पचा माल्नीम।

#### चढ़ेब आन वासी

प्रस्थान ३९:१-३१

28 मिनु इस्राएली आन दाते रे योव्रशा, इ लोक्ब हारून नु आ तौपुकी इ डोंइती राप्पाइक्चा माल्नेवे। मारदे हना हारून नु आ तौ नादाब, अबीहु, एलाजर नु इथामार आं कली चढ़ेब दुम्चा माल्नीमी। 1 इतिहास २३:१३; प्रस्थान ६:२३ 2 मिनु गे इ लोक्ब हारून कली आं गेय पची ना ला फेक्चा कली फेक्तीक वा फेरपाइक्चा माल्नेवे। मेको हारून कली ग्योमशा दारपाइक्चा कली बाक्ब। 3 मिनु सु सुमी फेरस जोक्नीमी, मेको नु लोव्र पावो। मारदे हना गो मेको आन कली जोक्ब नु तुइक्ब सोक्तीम प्रिंताक्डमी। मेकोपुकीमी हारूनमी आं कली चढ़ेतीक गेय पचा कली वासी फेरचा माल्नीम। प्रस्थान ३९:५

4 मेकोपुकीमी मार वासी फेरचा माल्नीम देशा हना, कुचु तार वोइक्तीके, निसाफ पतीके ऊरीम नु थुम्मीम वोइक्तीक झोला, आ तार फेक्तीके नु आगा फेक्तीक वा फेरचा माल्नीम। पियाम गुप्तीक नु किप्थुर यो सेल्चा माल्नीम। मेको आं कली गेय पची ना फेक्तीक बाक्ब। इ लोक्ब हारून नु आ तौपुकीमी आं कली गेय पामेनु, मेको वा फेक्चा माल्नीम। 5 फेरबपुकीमी सुन, नीलो, प्याजी नु लल रड डा श्येले नु रिमशो पा किरशो सुती श्येले के प्रोवशो वा के सेल्चा माल्नीमी। प्रस्थान २६:१

#### चढ़ेब आ कुचु तार वोइक्तीके

6 कुचु तार वोइक्तीके सुन के, नीलो, प्याजी नु लल रड डा श्येले नु रिमशो पा किरशो सुती श्येले के प्रोवशो नु बुटा आप्थो वा के सेल्पाइक्चा माल्नेवे। 7 मेको आ बला सुम्तीके निक्शी निम्फा पटटी बोइश्शो दुम्चा माल्ब। 8 मिनु आ पाइक्तीके मेको कुचु तार वोइक्तीके का रेन दुम्चा माल्ब। मिनु खाल का डा रिमशो गेयम सेल्शो दुम्चा माल्ब। मेको पाइक्तीके सुन, नीलो, प्याजी नु लल रड डा श्येले नु रिमशो पा किरशो सुती श्येले के प्रोवशो वा दुम्चा माल्ब। 9 मिनु गे ओनीक्स हीरा निक्शी चाक्शा, इस्राएल आ १२ जना तौ आन नें मेको आस तारी मुशा ब्रेक्पाइक्चा माल्नेवे। प्रस्थान २५:७ 10 गे आन जरमेशो खोदेशो पा हीरा का तारी ६ जना आन नें नु अर्को हीरा तारी ६ जना आन नें मुशा ब्रेक्पाइक्चा माल्नेवे। 11 छाप सेल्बपुकीमी दोदेशो पा मुशा छाप सेल्नीमी, मोदेशो पा मुशा इस्राएल आ तौ आन नें ब्रेक्पाइक्चा माल्नेवे। मिनु मेको हीरा निक्शी सुनमी क्येप्पाइक्चा माल्नेवे। 12 मेको कुचु तार वोइक्तीक आ बला डा टुक्रा तारी क्येप्शा फेरपाइक्चा माल्नेवे। मिनु मेको हीरा कोव्रशा इस्राएली इन कली मिम्नुड, दे कोंइतीक बाक्ब। हारूनम आं डोंइती मेको आन नें बलाम कुरानु, गो मेको आन कली मिम्नुड।

13 मिनु हीरा वोइक्चा कली गे सुन के क्येप्तीक सेल्पाइक्चा माल्नेवे। 14 मिनु गे क्येख सुन के डोरी खोदेशो पा सिक्की निक्शी चेम्पाइश्शा, हीरा क्येप्पाइश्शोमी बोइक्पाइक्चा माल्नेवे।

#### निसाफ पतीक झोला

15 गे निसाफ पतीक झोला सेल्पाइक्चा माल्नेवे। मेको कुचु तार वोइक्तीके खोदेशो पा, सेल्पाइक्चा माल्नेवे। सुन, नीलो, प्याजी, लल श्येले नु रिमशो पा किरशो सुती श्येले के प्रोवपाइक्चा माल्नेवे। 16 मेको खेयप का मुक्शोनु, स्पान का लाइश्शो नु स्पान का ब्रेमशो ४ पाटे दुम्चा माल्ब। स्पान का २३ सेन्ती मिटर खोदेशो बाक्ब। बिता खोदेशो बाक्ब कों? 17 मिनु ४ लस्कर हीरा सुनम का का पा क्येप्पाइक्चा माल्नेवे। डोंइती डा लस्कर लल मानीक माइश्शो हीरा, हाव पुशपराज माइश्शो हीरा नु गिगी बेरूज माइश्शो हीरा वोइक्पाइक्चा माल्नेवे। 18 मेको आ नोले डा लस्कर लल फिरोजा माइश्शो हीरा, बुश नीर माइश्शो हीरा नु बुश नु नीलो पन्ना माइश्शो हीरा वोइक्पाइक्चा माल्नेवे। 19 मेको आ नोले डा लस्कर गिगी नु नीलो रड ब्वाइश्शो रिमशो टल्केशो नीलमनी माइश्शो हीरा, गिगी हाकीक माइश्शो हीरा नु प्याजी रड डा कटेला माइश्शो हीरा वोइक्पाइक्चा माल्नेवे। 20 मिनु नेल्ल क्येडा नोले डा लस्कर पीतमनी माइश्शो हीरा, लल रड डा ओनीक्स नु नीलो बिलौरा माइश्शो हीरा वोइक्पाइक्चा माल्नेवे। मोपा हीरा नेल्ल आन कली सुनम क्येप्पाइक्चा माल्नेवे। 21 मेको हीरा १२ ओटा दुम्चा माल्नीम। मिनु इस्राएल आ तौ आन नें का का पा मेको आन तार छाप थोक्शो खोदेशो पा मुशा ब्रेक्पाइक्चा माल्नेवे। हीरा का आ तारी थर का आ नें दुम्चा माल्ब।

22 गे मेको निसाफ पतीक झोला कली क्येख सुन के डोरी किरशो खोदेशो पा सिक्की निक्शी चेम्पाइक्चा माल्नेवे। 23 मिनु गे मेको निसाफ पतीक झोला कली सुन के मुन्द्रा निक्शी चेम्पाइक्चा माल्नेवे। मिनु मेको मुन्द्रा निसाफ पतीक झोला आ सुर निक्शीमी वोइक्पाइक्चा माल्नेवे। 24 मेको सुन के सिक्की निक्शी निसाफ पतीक झोला आ सुरम वोइश्शो मुन्द्रा निक्शीमी लिक्पाइक्चा माल्नेवे। 25 मेको सिक्की चढ़ेब आ कुचु तार वोइश्शो वा आ बला डा हीरा क्येप्थो सुनम हेक्पाइक्चा माल्नेवे। 26 मिनु गे लेंशा सुन के मुन्द्रा निक्शी सेल्पाइक्चा माल्नेवे। मेको निक्शी निसाफ पतीक ऊरीम नु थुम्मीम वोइक्तीक झोला आ उइ आगा गे पाइक्चा माल्नेवे। मोपा कुचु तार वोइक्तीक वा आ तार बाक्ब। 27 मिनु गे लेंशा सुन के मुन्द्रा निक्शी सेल्पाइक्चा माल्नेवे। मेको कुचु तार वोइक्तीक आ बाला सुम्तीके उइ डा सुरम वोइक्चा माल्नेवे। मिनु दारपाइश्शो पाइक्तीके आ तारी क्येप्पाइक्चा माल्नेवे। 28 मिनु मेको निसाफ पतीक ऊरीम नु थुम्मीम वोइक्तीक झोला आ मुन्द्रामी नीलो डोरीम लिक्शा, कुचु तार वोइक्तीक वामी पाइक्पाइक्चा माल्नेवे। मोपा मेको निसाफ पतीक झोला दारपाइश्शो पाइक्तीक तार बाक्शा कुचु वोइक्तीक वा रे एर ओंथ मयाक्सीब। 29 मिनु

मोर्देशो पा हारून परमप्रभु यावे आ बाक्तीक ओव्रमेनु, इस्राएल आ तौ आन नें ब्रेक्शो निसाफ पतीक झोला आ कुचु तारी कुरचा माल्ब। मेको परमप्रभु यावेमी गेना हना यो मिम्चा कली बाक्ब।<sup>30</sup> मेको निसाफ पतीके झोलामी मेको ऊरीम नु थुम्मीम निक्शी कुर पचा माल्नेवे। हारून परमप्रभु यावे आ डॉइती लमेनु, इस्राएली आन निसाफ पतीके गेना हना यो आ कुचु तारी बाक्चा माल्ब। *लेवी ८:८; गन्ती २७:२१; ब्यवस्था ३३:८*

#### आगा डा फेक्तीक वा

31 मिनु मेको कुचु तार वोइक्तीके आगा फेक्तीके नेल्ल नीलो प्याजी रड डा वा के फेरपाइक्चा माल्नेवे।<sup>32</sup> मिनु पिया ख्रीतीक पोव्रला वोइक्पाइक्चा माल्नेवे। मेको एर ओंथ मगाक्चा डा पा आ सुर थम बोल्यो पा प्रोव्रपाइक्चा माल्नेवे।<sup>33</sup> मेको फेक्तीके आ उड डा सुर एर ओंथ गे नीलो, लल नु प्याजी रड डा श्येले के सेल्शो दारीम सेल्पाइक्चा माल्नेवे। मेको आन दातेम सुन के आइक्च आइक्च किडगो क्युक्पाइक्चा माल्नेवे।<sup>34</sup> किडगो का, दारीम का, किडगो का दारीम का पा मेको फेक्तीक नेल्ल आ एर ओंथ क्युक्चा माल्नीम।<sup>35</sup> मिनु हारूनमी मेको वा गेय पची ना फेक्चा माल्ब। मोपा परमप्रभु यावे आ नेल्ल क्येडा चोव्रखो बाक्तीके ओव्रमेनु, किडगो आ रेयके नेंपाइक्चा माल्ब। हारून मबेक्ल, दे मोर्देशो दुम्चा माल्ब। *प्रस्थान ३०:२१; लेवी १६:२, १३*

#### कुप्फीम पांडतीके नु फेक्तीके वा

36 गे कुप्फीम पांडतीके क्येख सुन के फू खोर्देशो पा चेम्पाइक्चा माल्नेवे। मेकेर छाप थोक्शो खोर्देशो पा 'परमप्रभु यावे कली ला' दे मुशा ब्रेक्पाइक्चा माल्नेवे। *जकरिया १४:२०; प्रस्थान ३९:३०*<sup>37</sup> पियाम गुक्तीकेम आ डॉइती गे वोइक्चा कली नीलो प्याजी डोरीम फ्रेंपाइक्चा माल्नेवे।<sup>38</sup> मोपा मेको हारून आ कुप्फीम बाक्चा माल्ब। आ कुप्फीम पाइश्शा, इस्राएली आन मरिश्शो पशो कुरब। मिनु परमप्रभु कली चढेशो रिश्शो दुम्नीम। परमप्रभु यावेमी आन चढेशो ब्रवल, दे गेना हना यो आ कुप्फीम बाक्चा माल्ब।

39 नेल्ल क्येडा आगा फेक्तीके रिश्शो पा किरशो सुती श्येले के बुटा आष्ठा प्रोव्रशो वा के सेल्पाइक्चा माल्नेवे। पियाम गुक्तीके रिश्शो पा किरशो सुती श्येले के प्रोव्रशो वा के सेल्पाइक्चा माल्नेवे। किप्तीके रड रड डा सेल्पाइक्चा माल्नेवे।

#### हारून आ तौ आन फेक्तीके

40 गे हारून आ तौ आन कली फेक्तीके किप्तीक नु आइक्च गुक्तीके सेल्पाइक्चा माल्नेवे। मेको हारून आ तौ आन कली ग्योम्शा दारपाइक्चा कली बाक्नीम। *प्रस्थान २८:२*<sup>41</sup> गे मेको इ लोकब हारून नु आ तौ आन कली फेक्तीमी। मिनु तेल लुक्शा, आं कली ला गेय पचा कली योव्रशा वोइक्मी। मोपा आं कली चढेब दुम्नीम। *प्रस्थान २९:९, २९-३६; प्रस्थान २९:२४; लेवी ८:१२, २२-३१*<sup>42</sup> गे मेको आन शिश्रा रां सुम्पाइक्चा कली सुती वा के कटटु फेरपाइक्चा माल्नेवे। मेको कम्बर रे पोक्च सम्म दुम्चा माल्ब।<sup>43</sup> मिनु हारून नु आ तौपुकी गुम्तीक ताम्बु ओव्रशा, चढेतीक आ नेक्था लमानु, मेको वा फेक्सीशो बाक्चा माल्नीम। मफेक्साकम हना, दोस तशा बेक्नीम। हारून नु आ चच युइ आन पाला नेल्लेमी गेना हना यो मोर्देशो पचा माल्नीम।

#### चढेब आन डॉइती डा पतीके लेवी ८:-

29 गे हारून नु आ तौपुकी आं कली चढेब सेल्चा कली मार पचा माल्नेवे देंशा हना, बोहोर का, मारेइ मदुम्शो थम रिश्शो सांड निक्शी चाक्को।<sup>2</sup> मिनु रिश्शो चेरब फस के बोरब ओखती मसुष्थो शोब्ले, तेल ब्वाइश्शो जिज शोब्ले नु तेल खेक्शो बोरब ओखती मसुष्थो शोब्ले सेल्पाइक्चा माल्नेवे।<sup>3</sup> मेको शोब्ले नेल्ल तोव्रलो कामी कुर पा, बोहोर नु सांड चाक्चा माल्नेवे।<sup>4</sup> मिनु हारून नु आ तौ आन कली गुम्तीक ताम्बु आ ओव्रतीकेमी चाक्चा नम। मिनु गे मेको आन कली चिक्चा माल्नेवे।<sup>5</sup> वासी

चाक्शा, हारून कली आगा फेक्तीक वा, मेको आ तार डा फेक्तीके वा फेक्पाइश्शा, कुचु तार वोइक्तीक फेक्शा निसाफ पतीके ऊरीम नु थुम्मीम बाक्शो झोला रेल्या माल्नेवे। मिनु मेको तारी बुटा आष्ठा किप्तीके किप्पाइक्चा माल्नेवे।<sup>6</sup> आ पिया तारी गुक्तीके गुष्ठा, मेको तारी 'परमप्रभु यावे कली ला' दे ब्रेक्शो कुप्फीम पांडतीके पांडपाइक्चा माल्नेवे। *प्रस्थान २८:३६; प्रस्थान ३९:३०*<sup>7</sup> मिनु लुक्तीक तेल लाइश्शा आ पियामी तेल लुक्तो। *प्रस्थान ३०:२५*<sup>8</sup> मिनु हारून आ तौ आन कली यो चाक्शा, वा फेक्चा माल्नेवे।<sup>9</sup> मिनु आ तौ आन कली किप्तीके किप्चा माल्नेवे। मिनु आन पियाम गुक्तीके गुष्ठा माल्नेवे। मिनु मेकोपुकी गेना हना यो आं कली चढेब गेय पाइब दुम्नीम। मोपा हारून नु आ तौ आन कली आं कली चढेब सेल्मी। *प्रस्थान २८:४१*

10 मिनु मेको बोहोर गुम्तीक ताम्बु आ डॉइती चाक्शा, हारून नु आ तौ आन कली आन गुइ मेको बोहोर आ पिया तारी वोइक्पाइक्चा माल्नेवे।<sup>11</sup> मिनु मेको बोहोर कली परमप्रभु यावे आ डॉइती, गुम्तीक ताम्बु आ ओव्रतीकेम राप्पाइश्शा क्योरचा माल्नेवे। *लेवी १:४*<sup>12</sup> मिनु बोहोर आ हुश इक्का खोइ लाइश्शा इ ब्रेप्चोमी चढेतीक आ गोव्रपुकीमी खेक्चा माल्नेवे। मिनु लीशो हुश नेल्ल चढेतीके आ पुंमी मोइक्चा माल्नेवे।<sup>13</sup> मिनु गे क्यी गिल्शो बोंसो नेल्ल, आइदी तारी डा जाला, आ चिच निम्फा नु आ तार डा बोंसो नेल्ल चढेतीकेम चोचा माल्नेवे। *लेवी ३:१६-१७*<sup>14</sup> आ श्ये, आ कुशुल नु आ गोबर चहिं ताम्बु आ लाडगा रे गुंइशा, चोचा माल्नेवे। मेको पाप पशो आ पर्बम चढेशो बाक्ब। *लेवी ४:११-१२*

15 मिनु मेको सांड का चाक्शा, हारून नु आ तौ आन गुइ मेको आ पिया तार वोइक्पाइक्चा माल्नेवे।<sup>16</sup> मेको कली क्योरशा, मेको आ हुश चढेतीक नेल्ल ब्रुइक्चा माल्नेवे।<sup>17</sup> मिनु मेको सांड आ श्ये कली टुक्रा टुक्रा पा चेक्शा, पिया नु वोइक्चा माल्नेवे। मिनु मेको आ क्यी नु आ खोइली नेल्ल मुरशा, मेको श्ये नु पियामी वोइक्चा माल्नेवे।<sup>18</sup> मोर्देशो पा सांड नेल्ल चढेतीक तारी चोचा माल्नेवे। मेको परमप्रभु यावे कली चोशा चढेतीक बाक्ब। परमप्रभु यावे कली ब्रोव्रशो रिना पाइश्शो मीम चोशा चढेतीके बाक्ब। *१सामुएल २:२८*

19 मिनु मेको लीशो सांड चाक्चा माल्नेवे। मिनु हारून नु आ तौ आन गुइ मेको सांड आ पिया तार वोइक्पाइक्चा माल्नेवे।<sup>20</sup> मिनु मेको सांड क्योरशा, आ हुशेम हारून आ ग्युरा नोफा डा लोव्रतीम नु आ तौ आन ग्युरा नोफा डा लोव्रतीम खेक्चा माल्नेवे। मिनु मेको आन ग्युरा गुइ डा ठेयब ब्रेप्चोम नु आन ग्युरा खोइली डा ठेयब ब्रेप्चोम खेक्चा माल्नेवे। मिनु लीशो हुश चढेतीक तार नु आ एर ओंथ ब्रुइक्चा माल्नेवे।<sup>21</sup> मिनु चढेतीकेम बाक्शो हुश नु लुक्तीक तेल लाइश्शा, हारून नु आ वा नु आ तौ आन वा तारी ब्रुइक्चा माल्नेवे। मोपा हारून नु आ वा, आ तौ नु मेको आन वा नेल्ल परमप्रभु यावे कली ला गेय पचा कली दुम्नीम।

22 मिनु सांड आ बोंसो, आ बोंसो पाइश्शो मीलु, आ क्यी गिल्शो बोंसो, आइदी तार डा जाला, आ चिच निम्फा, मेको तार डा बोंसो नु आ ग्युरा फिला लाइक्चा माल्नेवे। मारदे हना मेको चढेब सेल्तीके सांड बाक्ब। *लेवी ३:३-४*<sup>23</sup> मिनु परमप्रभु यावे आ डॉइती वोइश्शो बोरब ओखती मसुष्थो शोब्ले, तोव्रलो डा शोब्ले का, तेलम ब्वाइश्शो जिज शोब्ले का नु तेल खेक्शो शोब्ले का लाइश्शा,<sup>24</sup> मेको नेल्ल हारून नु आ तौ आन दाइश्शो गुइ गुइमी गेचा माल्नेवे। मेको परमप्रभु यावे आ डॉइती ग्येत्थ लुक्च पा हिम्शा चढेतीक चढेचा माल्नीम।<sup>25</sup> मिनु गे मेको आन गुइ रे ताक्शा, परमप्रभु यावे आ डॉइती ब्रोव्रशो रिना पाइब चढेतीके तारी चोशा चढेचा माल्नेवे। मेको परमप्रभु यावे कली मीम चोशा चढेतीक बाक्ब।

26 मिनु हारून कली चढेब सेल्तीके सांड आ कुशु चाक्शा, परमप्रभु यावे आ डॉइती ग्येत्थ लुक्च पा हिम्शा चढेचा माल्नेवे। मेको चहिं इ के दुम्ब।<sup>27</sup> मिनु मेको हारून नु आ तौ आन कली चढेब सेल्शो सांड आ ग्येत्थ लुक्च पा हिम्शा चढेशो कुशु नु क्युक्शा चढेशो फिला मेको आन कली गेचा माल्नीम। *गन्ती १८:१८*<sup>28</sup> मारदे हना इस्राएलीपुकीमी मेको हारून नु आ तौ आन कली गेना हना यो गेचा माल्शो भाग बाक्ब। मेको गेचा माल्शो चढेतीके बाक्ब। इस्राएलीपुकीमी आन परमप्रभु यावे नु दुशा बाक्चा आ पर्बम चढेतीके रे गेचा माल्शो मेकोन बाक्ब।

29 हारून आ चढ़ेची ना फेक्तीक मेको आ नोले चढ़ेब दुम्ब आ तौ के दुम्ब। मेको वा फेक्शा, तेल लुक्शा, चढ़ेब दुम्ब। प्रस्थान २८:४०-४१

30 हारून आ पा डा चढ़ेब दुम्ब आ तौ गुम्तीक ताम्बु आगा परमप्रभु यावे आ बाक्तीकम गेय पथ ओव्रमेनु, ७ नाक्त सम्म मेको वा फेक्वा माल्ब।

31 मिनु मेको चढ़ेब सेल्तीके सांड आ श्ये गुम्तीक ताम्बु आ लाडगाम क्येचा माल्नेवे। 32 मिनु नोले हारून नु आ तौपुकीमी मेको सांड आ श्ये नु तोव्रलो डा शोब्ले गुम्तीक ताम्बु आ ओव्रतीकेमी बाक्शा जचा माल्नीम। 33 मेको डोंइती आन पाप क्याम्चा कली चढ़ेशो थोव्रक आंम कली परमप्रभु यावे कली ला गेय पाइब दुम्बा, दे जचा माल्नीम। तन्न अरुमी मेको जचा मद्दुनीम। मारदे हना मेको परमप्रभु यावे के बाक्ब। लेवी १०:१७ 34 चढ़ेब सेल्ची ना डा श्ये नु शोब्ले सुनी सम्म हेंत हना, मेको हेंशो नेल्ल चोचा माल्नेवे। मेको मजचा मब्वचा। मारदे हना मेको चढ़ेब सेल्ची ना डा बाक्ब।

35 गोम इ कली अरेशो खोदेंशो पा हारून नु आ तौ आन कली पाइक्मी। मेको आन कली ७ नाक्त सम्म मोदेंशो चढ़ेब सेल्तीक गेय पचा माल्नेवे। 36 मिनु गे नाक्त किंत किंत बोहोर का पाप पशो आ पर्वम चढ़ेचा माल्नेवे। मेको पाप क्याम्तीक गेय पचा कली चढ़ेशो बाक्ब। मिनु चढ़ेतीक परमप्रभु के दुम्ब, दे हुश ब्रुइश्शा, तेल लुक्वा माल्नेवे। 37 गे ७ नाक्त सम्म चढ़ेतीकेमी मो पशा पाप क्याम्तीक गेय पचा माल्नेवे। मिनु मेको चढ़ेतीके परमप्रभु कली ला दुम्ब। मेको चढ़ेतीक कली मार मारम थीनीमी, मेको यो परमप्रभु केन दुम्नीम। प्रस्थान ३०:२९

नाक्त किंत किंत डा चढ़ेतीक  
गन्ती २८:३-८

38 मिनु गे चढ़ेतीकेमी मार चढ़ेचा माल्नेवे देंशा हना, नाक्त किंत किंत बर्स का दुम्बो सांड निक्शी चढ़ेचा माल्नेवे। 39 मेको का सुनी का चहिं नाक्दो चढ़ेचा माल्नेवे। २राजा १६:१५; भजन संग्रह १४१:२ 40 डोंइती डा सांड नु रिम्शो चेरब फस १० भाग डा भाग का, ४ भाग डा हिन भाग का रिम्शो तेल मेको नु बुल्शा, ४ भाग डा हिन अडगुर शांबु भाग का तूचा थोव्रक चढ़ेचा माल्नेवे। चेरब फस एफाह का २२ लिटर खोदेंशो बाक्ब। मेको के १० भाग का २ लिटर खोदेंशो बाक्ब। हिन का ४ लिटर, ४ भाग डा भाग का लिटर का बाक्ब। प्रस्थान २७:२० 41 मिनु अर्को सांड नाक्दो चढ़ेचा माल्नेवे। मिनु मेको नु अन्न चढ़ेतीक नु आ तूचा थोव्रक चढ़ेतीक सुनी डा खोदेंशो पा नाक्दो यो चढ़ेचा माल्नेवे। परमप्रभु यावे कली ब्रोव्रशो रिना पाइब मीम चोशा चढ़ेतीके मेकोन बाक्ब। 42 गे इ चच युइ आन पाला नेल्लेमी गेना हना यो परमप्रभु यावे आ डोंइती गुम्तीक ताम्बु आ ओव्रतीक आ नेक्वा चोशा चढ़ेतीक चढ़ेचा माल्नीम। मेकेर गो गे नु लोव्र पचा कली गुम्नन। प्रस्थान ३३:७; प्रस्थान २५:२ 43 मिनु गो इस्राएली आन कली मेकेर गुम्नुड। मिनु मेको ताम्बु आं छेडछेडम ब्रीशा आं के दुम्ब। प्रस्थान ३३:१०; प्रस्थान ४०:३४ 44 गो गुम्तीक ताम्बु नु चढ़ेतीक आं के सेल्लुड। हारून नु आ तौ आन कली यो आं कली चढ़ेब दुम्बा, आं गेय पपाइक्वा कली आं के सेल्लुडमी। 45 गो इस्राएली आन दातेमी बाक्नुड। मिनु मेको आन परमप्रभु दुम्ती। प्रस्थान २५:८; जकरिया २:१४; लेवी २६:१२ 46 गो मेको आन दातेमी बाक्वा कली मेको आन कली इजीप्त रे गुंडब मेको परमप्रभु यावे, आन परमप्रभु नड। गो मेको आन परमप्रभु यावे नड, दे मेकोपुकीम तुइक्वा माल्नीम। प्रस्थान २०:२

धूप चोशा चढ़ेतीके  
प्रस्थान ३७:२५-२८

30 मिनु गे धूप चोचा कली बोल्यो शी के चढ़ेतीक का सेल्चा माल्नेवे। 2 मेको आ पिल्ल लाइश्शो कुबीत का नु आ ब्रेम्शो कुबीत का डा ४ पाटे दुम्बा माल्ब। मिनु आ ग्येत्थ लाइश्शो कुबीत निक्शी दुम्बा माल्ब। मेको ग्राव्र पाइश्शो दुम्बा माल्ब। ग्राव्र नेल्ल मखोंइसीशो शी का केन दुम्बा माल्नीम। कुबीत का ०.५ मिटर बाक्ब। 3 मेको नेल्ल क्येख सुनमी गिल्ला माल्ब। मिनु मेको कली सिरपेच के खोदेंशो पा सुन के सुर सेल्पाइक्वा माल्नेवे। 4 मिनु सुन के मुन्द्रा निक्निक्शी सेल्पाइक्वा माल्नेवे। मेको मुन्द्रा धूप चोतीके आ सिरपेच खोदेंशो सुर आ दी निम्फा पटटी गे

क्येप्पाइक्वा माल्नेवे। मेको कुरतीक कोक्के आन कली शुइक्तीक दुम्ब। 5 मिनु मेको कुरचा कली बोल्यो शी के कोक्के निक्शी सेल्शा, सुनमी गिल्पाइक्वा माल्नेवे। 6 मिनु मेको परमप्रभु यावे आ अरेशो लोव्र वोइश्शो कबल पशो सन्दोस नु सुम्तीके फारतीक वा आ डोंइती वोइक्वा माल्नेवे। गो मेकेर इ कली गुम्नुड। प्रस्थान २५:२१-२२

7 मिनु हारूनमी सुनी कुस कुस बत्ती दाचा कली सादानु, ब्रोव्रशो रिना पाइब धूप चोचा माल्ब। भजन संग्रह १४१:२ 8 नाक्दो हारूनमी बत्ती दाडानु यो धूप चोचा माल्ब। मेको परमप्रभु यावे आ डोंइती धूप चोतीक मेको आन चच युइ आन पालामी गेना हना यो पचा माल्नीम। 9 मेको धूप चोतीकेमी अरु धूप चोचा मद्दुम्ब। चोशा चढ़ेतीके नु जचा थोव्रक चढ़ेतीके मेकेर चढ़ेचा मद्दुम्ब। तूचा थोव्रक चढ़ेतीके यो मेकेर मोइक्वा मद्दुम्ब। लेवी १०:१-२ 10 बर्सम खेयप का हारूनमी चढ़ेतीक आ ग्राव्रम हुश खेक्वा पाप क्याम्तीक गेय पचा माल्ब। मेको हुश पाप आ पर्वम चढ़ेशो बस्तु आ हुश बाक्वा माल्ब। मेको गेना हना यो बर्समी खेयप का इन चच युइ आन पाला सम्म मेको पाप क्याम्तीक गेय चढ़ेतीके आ हुशेमी पचा माल्ब। मेको परमप्रभु यावे आ डोंइती नेल्ल क्येडा चोव्रखो सेल्तीके बाक्ब” दे परमप्रभु यावेमी मोसा कली देंत। लेवी १६:१८

क्येट पोक्वा शेंशो

11 परमप्रभु यावेमी मोसा कली 12 “गे इस्राएली वोंइश मुर आन कली हिक्वीनु, मेको आन कली मुर बेक्तीक रोइ मपामेक्ल, दे ब्रोंइचा कली नेल्लेमी परमप्रभु यावे कली क्येट गेचा माल्नीम। मिनु मेको आन कली हिक्वीनु, मारेइ मरिम्शो मद्दुम्ब। गन्ती १:३; २सामुएल २४:२-३ 13 गिश जना वोंइश मुर हिक्वीनीमी, मिश जना ताम्बु डा नाक्तीके डा आधा शेकेल गेचा माल्नीमी। शेकेल का २० गेराह चांदी बाक्नीम। मोपा परमप्रभु यावे कली गेशो क्येट आधा शेकेल गेचा माल्शो बाक्ब। शेकेल का ११.५ ग्राम खोदेंशो बाक्ब। गेरा का ०.६ ग्राम बाक्ब। मत्ती १७:२७ 14 वोंइश मुर गिश जना २० बर्स गाप्शो नु मेको क्येडा लाक्शो बाक्मा, मिश जनाम परमप्रभु यावे कली गेचा माल्शो चढ़ेचा माल्नीम। 15 इन पाप क्याम्तीक गेय पचा कली थीबमी आधा शेकेल, मथीबमी यो आधा शेकेल परमप्रभु यावे कली गेचा माल्नीमी। 16 इस्राएली वोंइश मुरुमी आन गेशो प्रोंइतीक क्येट ताक्शा, गुम्तीक ताम्बु डा गेय पचा कली गेचा माल्नेवे। मिनु मेको क्येट परमप्रभु यावे आ डोंइती इस्राएली आन कली प्रोंइशो मिम्तीक चिन्ड दुम्ब” देंत।

चिक्तीक ठेयब बोस

17 मिनु लेंशा परमप्रभु यावेमी मोसा कली 18 “गे चिक्वा कली कांसा के ठेयब बोस का सेल्पतो। मेको आ निप्पाइक्तीके यो कांसा केन दुम्बा माल्ब। मेको गुम्तीक ताम्बु नु चढ़ेतीक आस दातेमी वोइश्शा, ब्वाक्कु कुर पपाइक्वा माल्नेवे। प्रस्थान ३८:८ 19 मेको ब्वाक्कुमी हारून नु आ तौपुकीमी आन गुइ खोइली चिक्सीचा माल्नीम। 20 मेकोपुकी मबेक्कल, दे गुम्तीक ताम्बुम ओव्रचा क्येडा डोंइती चिक्सीचा माल्नीम। मिनु चढ़ेतीकेमी गेय पचा, दे परमप्रभु यावे आ डोंइती मीम चोशा चढ़ेतीक चढ़ेचा कली लमानु, मेको ब्वाक्कुम चिक्सीचा माल्नीम। ब्वाक्कुम चिक्सीमानु, मेको मबेक्कीम। 21 मेकोपुकी नु आन चच युइ आन पाला नेल्लेमी गेना हना यो पतीके लोव्र बाक्ब” देंत।

ताम्बु डा लुक्तीक तेल

22 मिनु लेंशा परमप्रभु यावेमी मोसा कली 23 “गेमी शुश क्येट लाइब ब्रोव्रशो रिना पाइब थोव्रक चाक्वा माल्नेवे। मार चाक्वा माल्नेवे देंशा हना, मूरे आ रस ५ सहै शेकेल, दाल चिनी सहै निक्शी ५० शेकेल नु ब्रोव्रशो रिना पाइब बीच सहै निक्शी ५० शेकेल चाक्वा माल्नेवे। शेकेल का ११.५ ग्राम चांदी के क्येट बाक्ब। ताम्बु डा शेकेल चहिं १२ ग्राम बाक्ब। 24 नु कस्सीया माइश्शो ब्रोव्रशो रिना पाइब फू ५ सहै शेकेल, ताम्बु डा नाक्तीकेमी नाक्शा, चाक्वा माल्नेवे। रिम्शो तेल हिन का यो चाक्वा माल्नेवे। हिन का ४ लिटर खोदेंशो बाक्ब। 25 मेको नेल्ल ब्वाइश्शा थम रिम्शो लुक्तीक तेल



सेल्पाइक्वा माल्नेवे। मेको परमप्रभु यावे कली ला बाक्ब। मेको ब्रोवशो रिना पाइब सेल्स जोक्ब मुर कली सेल्पाइक्वा माल्नेवे। मेको थम रिम्शो लुक्तीक तेल ताम्बु कली ला सेल्पा माल्ब। प्रस्थान ३७:२९<sup>26</sup> मिनु गे गुम्तीक ताम्बु नु कबल पशो सन्दोस, <sup>27</sup> टेबल नु मेकेर डा मार मार नेल्ल, बत्ती दातीके नु मेको आ मार मार नेल्ल नु धूप चोशा चढेतीके, <sup>28</sup> चोशा चढेतीके नु मेको आ मार मार नेल्ल नु चिक्तीके ठेयब बोस नु आ निप्पाइक्तीके नेल्ल खेक्पाइक्वा माल्नेवे। प्रस्थान ३०:१०<sup>29</sup> मोपा मेको मारेड मारेड नेल्ल खेक्तीनु, मेको ताम्बु डा गेय कली ला दुम्नीम। मेको कली मार मारम थीनीमी, मेको यो परमप्रभु कली दुम्नीम। <sup>30</sup> आं कली चढेब दुम्ब हारून नु आ तौ आन कली यो तेल खेक्शा, आं गेय पाइब सेल्पा माल्नेवे। प्रस्थान २९:७<sup>31</sup> इस्राएली आन कली 'मेको गेना हना यो इन चच युड आन पाला सम्म लुक्तीक तेल दुम्बा माल्ब। मेको तेल परमप्रभु यावे के ला बाक्ब। <sup>32</sup> मेको अरु मुर आन कली खेक्वा मदुम्ब। मेको खोदेंशो पा ब्वाइश्शा तेल सेल्पा मदुम्ब। मेको परमप्रभु आ तेल ला बाक्ब' दे मिम्चा माल्नीनी। <sup>33</sup> सुमी मेको खोदेंशो पा ब्वाइश्शा तेल सेल्पा नु अरु मुर आन कली खेक्बा, मेको मुर आ थर रे तिल्वा पुंडसीब" दे परमप्रभु यावेमी मोसा कली देंत।

### धूप सेल्पा शेंशो

<sup>34</sup> मिनु परमप्रभु यावेमी मोसा कली "ब्रोवशो रिना पाइब थोव्रक मार ब्वाइक्पाइक्वा माल्नेवे देंशा हना, चोव्रक, कुन्दापुरी, ब्रोवशो रिना पाइब रवा आ दूध नु मारेड म्बवाइश्शो मूरे, उडक्थ उडक्थ पा नाक्शा ब्वाइक्पाइक्वा माल्नेवे। <sup>35</sup> जोक्ब मुरुम मेको नेल्ल ब्वाइश्शा, ब्रोवशो रिना पाइब धूप, हिक्सी सुप्शा, अरु म्बवाइश्शो परमप्रभु कली ला चढेतीक धूप सेल्पाइक्वा माल्नेवे। <sup>36</sup> मेको रे इक्का खोड तुप्शा, फस सेलो। मिनु मेको फस गुम्तीक ताम्बु डा नेल्ल क्येडा चोव्रखो कोठा कबल पशो सन्दोस आ डोंडती वोइश्शा, मेको फस चोचा माल्नेवे। मेको इन कली नेल्ल क्येडा चोव्रखो दुम्ब। मेकेर गो इ कली गुम्नुड। प्रस्थान ३०:६<sup>37</sup> इन कली धूप सेल्पीनु, आं धूप खोदेंशो पा मसेलीन। 'मेको धूप परमप्रभु यावे आं धूप ला बाक्ब' दे मिम्चा माल्नीनी। <sup>38</sup> सुडमी मेको नाम्चा कली सेल्तेक्म हना, मेको आन थर रे तिल्वा पुंडसीनीम" दे परमप्रभु यावेमी मोसा कली माइक्तु।

### रिम्शो पाइब आन कली योव्रशो

प्रस्थान ३५:३०-३५

<sup>31</sup> मिनु परमप्रभु यावेमी मोसा कली प्रस्थान ३५:३०-३५<sup>2</sup> "नेनो, गो यहूदा आ थर डा हर आ चच ऊरी आ तौ बेचालेल आ नें थिशा आं गेय पचा कली योव्रता। <sup>3</sup> गो मेको कली आं सोक्तीमी प्रिंशा, मार मार सेल्पा कली जोक्ब तुइक्ब सेल्ता। मिनु पने चाप्तीक सक्ति यो गेता। <sup>4</sup> मेकोमी नेल्ल मिम्शा, सुन, चांदी नु कांसा के मारेड मारेड चेम्ने चाप्ब। <sup>5</sup> हीरा खोइक्तीक नु सुनम क्येप्तीके, शी मुतीके नु मारेड मारेड सेल्स जोक्ब दुम्पाइक्ता। <sup>6</sup> गो दान आ थर डा अहीसामाक आ तौ ओहोली-आब कली बेचालेल नु गेय पचा कली योव्रता। गो इस्राएल डा जोक्ब रिम्शो गेय पाइब मेको आस कली वारच पाइब यो योव्रतामी। गो इ कली मार मार देंडा, मेको नेल्ल आन कली सेल्ने चाप्तीक सक्ति गेतामी। <sup>7</sup> गुम्तीक ताम्बु, कबल पशो सन्दोस, मेको आ तार डा सुम्तीके नु ताम्बु आ गा डा माल्शो मारेड मारेड, प्रस्थान ३५:११-१९<sup>8</sup> टेबल नु मेको आ मारेड मारेड, बत्ती दातीके नु आ मारेड मारेड, धूप चोशा चढेतीके, <sup>9</sup> चोशा चढेतीके नु आ मारेड मारेड, ठेयब चिक्तीक बोस नु आ राप्पाइक्तीके, <sup>10</sup> आं कली चढेब दुम्तीके रिम्शो प्रोव्रशो वा नेल्ल, चढेब हारून आ चढेची ना फेक्तीक वा नु आ तौ आन फेक्तीक वा, <sup>11</sup> लुक्तीक तेल नु ब्रोवशो रिना पाइब धूप गोम इ कली देंशो खोदेंशो पा मेकोपुकीमी आं बाक्तीक कली सेल्पा माल्नीम" देंत।

### नाइक्तीक नाक्त आ पर्वम अरेशो

प्रस्थान ३५:१-३

<sup>12</sup> मिनु परमप्रभु यावेमी मोसा कली <sup>13</sup> "गे इस्राएली आन कली मार माइक्वा माल्नेवे देंशा हना 'गेपुकीमी थमा पा आं नाइक्तीक नाक्ती मानेचा माल्नीनी। मारदे हना मेको गेपुकी नु इन चच युड सम्म कली चिन्ड लीब। गो, परमप्रभु यावेमी, इन कली आं मुर सेल्ता, दे गे तुइक्नीनी। प्रस्थान २०:८; इजीकीएल २०:१२<sup>14</sup> मोपतीके गेपुकीमी नाइक्तीक नाक्त मानेचा माल्नीनी। मारदे हना मेको परमप्रभु आ नाक्त बाक्ब। सु सुमी मेको नाक्ती ममानेथु, गेय पाइनीमी, मेको मुर आ जात डा मुर रे तिल्शा, साइक्वा पुंडसीनीम। गन्ती १५:३२-३५; येरमीया १७:२१-२३<sup>15</sup> मोपा ६ नाक्त सम्म गेय पामेक्ल, तन्न ७ नाक्त चहिं नाइक्तीक नाक्ती बाक्ब। मेको परमप्रभु यावे आ नाक्त बाक्ब। सु सुम मेको नाक्ती गेय पाइनीमी मेको थमा पा साइक्वा पुंडसीनीम। <sup>16</sup> मोपतीके इस्राएलीपुकीमी नाइक्तीक नाक्ती मानेचा माल्नीम। मेको नाक्ती गेना हना यो आन चच युड सम्म कबल पतीके बाक्ब। मर्कूस २:२७-२८<sup>17</sup> गो नु इस्राएली इन दातेमी मेको गेना हना यो लीब चिन्ड बाक्ब। परमप्रभु यावेमी ६ नाक्तीमी सरीड नु रागी सेल्ने थुम्तु। ७ नाक्ती चहिं नाइसीशा, आ दशो सात' दे इस्राएली आन कली माइक्वा माल्नेवे" देंत। प्रस्थान १६:२३,२५; उत्पत्ती २:२

<sup>18</sup> मिनु परमप्रभुमी मोसा नु सीनै डांडाम लोव्र पने थुम्शा, आ देंशो फुल्लु निक्शीमी मुशा आंम ब्रेक्शो लोव्र मोसा कली गेत्तु। प्रस्थान २४:१२; प्रस्थान ३२:१५-१६; प्रस्थान ३४:२८; ब्यवस्था ४:१३; ब्यवस्था ५:२२; ब्यवस्था ९:१०; ब्यवस्था १०:१-५

### इस्राएलीमी सुन के मूर्ति सेल्शो

<sup>32</sup> मिनु इस्राएल डा मुरपुकीमी मोसा कली डांडा रे मयिंशो तशा, हारून आ बाक्तीक जाक्शा, मेको कली "लो, इं डोंडोंडती गाक्शा लां कोंडब देवता सेलो। आंइ कली इजीप्त रागी रे गुंडशा, एक चाक्ब मोसा मार दुम्मे? मतुइक्तक" दे हारून कली देंमा बाक्त। ब्यवस्था ९:८-२१<sup>2</sup> मिनु हारूनमी मेको आन कली "इन मीश, इन तमी तौ आन पांडशो सुन प्रुइश्शा, आं बाक्तीके चाक्कीन" देंमाक्त। <sup>3</sup> मिनु मुर नेल्लेमी आन नोफामी पांडशो सुन प्रुइश्शा, हारून आ बाक्तीके चाक्गमे बाक्त। <sup>4</sup> मिनु हारूनमी मेको सुन आन गुड रे ताक्शा, यपाइश्शा, बाछा का सेला बाक्त। मिनु इस्राएलीपुकीमी "इस्राएल डा मुरपुकी, एकोन इं देवता बाक्ब। एकोमी इं कली इजीप्त रागी रे गुंडताक्व" दे मुमा बाक्त। १राजा १२:२८; भजन संग्रह १०६:१९-२०; प्रेरित ७:४१<sup>5</sup> मिनु हारूनमी मेको आन कली तशा, बाछा आ डोंडती चढेतीक का सेला बाक्त। मिनु ठेयब सेंदा पा "दीसा परमप्रभु यावे कली चाड का मानेचा माल्ब" देंमाक्त। <sup>6</sup> मिनु आ दीसा मेकोपुकी सुनी कना बोक्शा चोशा चढेतीक नु दुशा बाक्वा आ पर्वम चढेतीक चढेमे बाक्त। मिनु मुरपुकी जचा तूचा कली निस्समा बाक्त। मिनु नोले जशा तूशा बोक्शा, आन दला दाक्स पामे बाक्त। १कोरिन्थी १०:७

<sup>7</sup> मिनु परमप्रभु यावेमी मोसा कली "डांडा रे तोंइसो। इजीप्त रे गुंडशा चाक्शो इ मुरपुकीमी आन दला दाक्स पा पाप पाम्तेक्म। <sup>8</sup> मेकोपुकीमी आं शेंशो लोव्र थु था प्रोंइतेक्म। आंम कली सुन के बाछा का सेल्शा, मेको कली पूजा पशा 'इस्राएल डा मुरपुकी, एकोन इं कली इजीप्त रागी रे गुंडब परमप्रभु बाक्ब' देंतेक्म" दे परमप्रभु यावेमी मोसा कली देंत। प्रस्थान २०:४,२३<sup>9</sup> मिनु लेंशा परमप्रभु यावेमी मोसा कली "गो मेको मुर आन कली ताता। काइ मटीब बाक्नीम, दे तुइक्ताक्ड। ब्यवस्था ९:६; यसैया ४८:४; प्रेरित ७:५१<sup>10</sup> मोपतीके आं कली मतेक्यी। मेको आन कली तशा गाइक्ताक्यी। गो मेको आन कली साइक्नुडमी। मिनु गो इ लां पा ठेयब जात का सेल्नुडमी" देंत। गन्ती १४:११-२०<sup>11</sup> मिनु मोसामी परमप्रभु यावे कली "परमप्रभु यावे, आं परमप्रभु, इन मुर आन पर्वम मारदे गाइक्तीनी? गेमी इन ठेयब सक्तिमी मेको आन कली इजीप्त रागी रे गुंडताक्नी। <sup>12</sup> मो पाइतीनी हना इजीप्त रागी डा मुरपुकीमी 'परमप्रभुमी मेको आन कली पहाडमी साइश्शा, रागी रे क्याम्चा कली एक रे गुंडताक्व' देंनीम। मोपतीके इन ठेयब

गाइक्तीक प्रोनीन। इन मुर आन कली मसतीन। *ब्यवस्था ९:२८; यहोसु ७:९* 13 इन गेय पाइब अब्राहाम, इसहाक नु याकूब मिम्तीने। मेको आन पर्वम इन नैमी 'गो इन कली सरीड डा सोरुल खोदेशो पा शुश सेल्लुड। आं देशो रागी इन चच युइ आन कली गेनुडमी। मिनु एको रागी गेना हना यो मेको आन के दुम्ब' दे कसम जाइतीनी" देंत। *उत्पत्ती १५:५; उत्पत्ती २२:१६-१७; उत्पत्ती २६:४* 14 मिनु परमप्रभु यावेमी आ थुं लेशशा, आ मुर आन कली मसाइक्मी। *भजन संग्रह ८५:-*

### परमप्रभु आ ब्रेक्शो फुल्लु प्रोल्शो

15 मिनु मोसा परमप्रभु यावे आ देशो लोव्र ब्रेक्शो फुल्लु निक्शी कुरशा, डांडा रे ब्रुप्त। मेको फुल्लु निक्शी निम्फा पटटीम मुशा ब्रेक्शो बाक्त। 16 परमप्रभुमी मेको फुल्लु आंमा चेशशा सेल्शो बाक्माक्त। मिनु मुशा ब्रेक्शो बाक्त। *प्रस्थान ३१:१८* 17 मिनु यहोसुमी मुर आन कली रेयके पशो नैशा, मोसा कली "इसाएल डा मुर आन बाक्तीकेमी लडाइ पशो रेयके खोदेशो नैसाक्व" देंत। 18 तन्न मोसामी "एको रेयके लडाइ ग्राब आन रेयके ममाइ, ब्रुइब आन रेयके यो ममाइ। गो कुम्सो पशो नैता" देंत। 19 मिनु मोसा इसाएली आन बाक्तीके आ नेक्था जाक्मेनु, बाछा नु बाछा आ एर ओंथ मुरपुकी सिल पशो तथा, शुश गाइश्शा, फुल्लु निम्फा ताइश्शा, डांडा आ पुंम प्रोल्तु। 20 मिनु मोसामी इसाएली आन सेल्शो बाछा लाइश्शा, मीम हुश्शा, तुप्था फस सेल्शा, ब्वाक्कुम फुइश्शा, इसाएली आन कली तूपाइक्तीमी। 21 मिनु नोले मोसामी हारून कली "एको मुरपुकीमी इ कली मार पामे डा? मारदे मेको आन कली ओदेशो ठेयब पाप पपाइक्मी?" दे हिल्लो पाप्तु। 22 मिनु हारूनमी "आं पर्वम मगाइक्तीन। गे एको मुर आन कली तुइक्नीनी। एकोपुकी दूली पाइब ला बाक्नीम। 23 आं कली 'आंइ डोंडोंइती गाक्शा लां कोंइब देवता सेलो। मारदे हना आंइ कली इजीप्त रे गुंइशा, एक चाक्ब मोसा कली मार दुम्मे, मतुइक्तक' देंतेक्म। 24 मिनु गो मेको आन कली 'सु सु इन के सुन बाक्मे, मेको प्रुइश्शा, एक चाक्कीन' दे माइक्तामी। मिनु मेकोपुकीमी चाक्तेक्म। मिनु गो मेको सुन मीम हुम्ताकड। मिनु एको बाछा दुम्त" देंत।

### इसाएली आन कली सजाइ

25 मोसामी मुर आन कली आन दला दाक्स पशो ताप्तु। मारदे हना हारूनमी आन दला दाक्स पचा गेवा बाक्त। मिनु आन जोरी सत्रु नेल्ल ग्येरसमा बाक्त। 26 मिनु मोसामी इसाएली आन बाक्तीक ओव्रतीकेम राष्ठा "सु सु परमप्रभु यावे गे बाक्नी, मेकोपुकी आं गे पिने" देंत। मिनु लेवी आ थर डा मुर नेल्ल मोसा गे लशा, आ एर ओंथ राप्तेक्म। 27 मिनु मोसामी मेको आन कली "परमप्रभु यावे, इसाएली आन परमप्रभुमी 'गे नेल्लेमी इन तरवार पिष्ठा, मुर आन बाक्तीके लशा, इन लोक्ब, इन खिं डा मुर, इन वारच नु सु बाक्तेक्म हना यो, सतीन" देंत" देंत। 28 मिनु लेवी आ थर डा मुरपुकीमी मोसा आ देशो खोदेशो पा पाप्तेक्म। मेको नाक्ती हजार सां मुर साइक्चा पुंइसाक्म। 29 मिनु मोसामी लेवी आ थर डा मुर आन कली "गेपुकीमी मुलाक्ती परमप्रभु यावे आ गेय पा, आंम आंम इन तौ नु आंम आंम इन लोक्ब आन कली मप्रोइथु साइक्तीनी। मिनु मुलाक्ती गे आसीक राइनीनी" देंत। *प्रस्थान २६:४१; गन्ती ३:६-१०; ब्यवस्था ३३:८-११*

### मोसामी परमप्रभु नु लोव्र पशो

30 आ दीसा मोसामी मुर आन कली "गेपुकीमी ठेयब पाप पाइतीनी। मिनु गो परमप्रभु यावे आ बाक्तीक डोइश्शा, लाइनुड। गो इन पशो पाप क्याम्तीक गेय पने चानुडा, कौ?" देंत। 31 मिनु मोसा परमप्रभु यावे आ बाक्तीक लशा मेको कली "मुरपुकीमी थमा पा ठेयब पाप पाप्तेक्म। आंम कली सुन के देवता सेल्लेक्म। 32 मो हना यो गे मेको आन पाप क्याम्दीन, दे पुंइनुड। मक्याम्ताक्नी हना, इन ब्रेक्शो किताब रे आं नें क्याम्दीने" देंत। *भजन संग्रह ६९:२९; लूका १०:२०; रोमी ९:३* 33 मिनु परमप्रभु यावेमी मोसा कली "सुमी आं देशो मटिथु पाप पाइबा, मेको आ नें आं ब्रेक्शो किताब रे क्याम्नुड। 34 तन्न मुल लावो। मेको मुर आन कली आं देशो रागी

लाइक्मी। नेनो, आं स्वर्ग डा गेय पाइब इ डोंडोंइती सोइक्नुड। तन्न काबु मेको आन कली पाप पशो आ पर्वम सजाइ गेनुड" देंत। *प्रस्थान ३३:२, १४; गन्ती १४:२७-३०* 35 मिनु परमप्रभु यावेमी इसाएल डा मुर आन कली बेक्तीक रोइ पपाइक्नु। मारदे हना मेकोपुकीमी हारून कली मेको सुन के बाछा सेल्पाइश्शो बाक्तेक्म।

### परमप्रभु आ शिशी पुंइशो

33 मिनु परमप्रभु यावेमी मोसा कली "इजीप्त रे गुंइशा, एक चाक्शो मुरपुकी नु आं देशो रागी लावो। मेको रागी आ पर्वम गो 'इ चच युइ आन कली गेनुड' दे अब्राहाम, इसहाक नु याकूब नु कसम जाता। *उत्पत्ती १२:७* 2 आं स्वर्ग डा गेय पाइब इन डोंडोंइती सोइक्नुड। मिनु गो कनानी, एमोरी, हिती, परिज्जी, हिक्वी नु यबुसी आन कली खेरनुडमी। *प्रस्थान २३:२०* 3 मेको रागीम दूध नु खुदो शुश बाक्ब। मारेइ मारेइ यो शुश ग्रेल्ब। गेपुकी काइ मटीब मुर बाक्नीनी। मोपतीके गो गेपुकी नु मगाक्नुड। गो गाक्ती हना, इन कली लांमीन साइक्नन्नी" देंत। *प्रस्थान ३२:९-१०* 4 मिनु मुरपुकीमी मेको मरिश्शो लोव्र नैशा, सुर्ता पाप्तेक्म। सुइमी आन सुन चांदी मारेइ मपांइसम। 5 मारदे हना परमप्रभु यावेमी मोसा कली "इसाएली आन कली 'गेपुकी काइ मटीब मुर बाक्नीनी। गो याम का गे नु गाक्ती हना, नेल्ल इन कली साइक्नन्नी। मुल इन सुन चांदी नेल्ल प्रुतीन। मिनु इन कली मार पचा माल्लनुडा, दे मिम्नुड" " देशो बाक्त। *योएल २:१३* 6 मोपतीके होरेब डांडाम बाक्मा रे इसाएलीपुकीमी सुन चांदी मपांइसम। *योना ३:६*

### परमप्रभु नु लोव्र पतीक ताम्बु

7 मिनु मोसामी अरु आन बाक्तीक क्येडा डोन ताम्बु का कीशा वोइक्नु। मेको ताम्बु कली परमप्रभु नु लोव्र पतीक ताम्बु देंत। सु सु परमप्रभु यावे कली गुम्बा दाक्तेमे, मेको मुर आन बाक्तीक रे गूशा, मेको परमप्रभु नु लोव्र पतीक ताम्बु लाइबाक्तेक्म। *प्रस्थान २९:४२* 8 मिनु मोसा मेको परमप्रभु नु लोव्र पतीक ताम्बु लमेनु, मुर नेल्ल बोक्शा, आन ताम्बु आ ओव्रतीकेम राष्ठा, मोसा मेको ताम्बु मओव्रम सम्म, कोव्रशा बाक्तेक्म। 9 मिनु मोसा मेको ताम्बु आगा ओव्रमेनु, गोस्स के थाम यिशा, ताम्बु आ ओव्रतीकेम राष्ठा ताम्तेक्म। मिनु परमप्रभु यावेमी मोसा नु लोव्र पाप्तु। *गन्ती ११:२५; ब्यवस्था ३१:१५* 10 मुर नेल्लेमी मेको गोस्स के थाम, ताम्बु आ ओव्रतीकेम राष्ठा ताम्तेक्म। मिनु मुर नेल्ल बोक्शा आंम आंम ताम्बु आ ओव्रतीकेमी बाष्ठा, परमप्रभु कली मान पा ठेयब सेल्लेक्म। 11 मिनु परमप्रभु यावे नु मोसा कोव्रमुशा, लोव्र पाप्ताक्स। दोदेशो पा मुर आन वारच नु बाक्शा, लोव्र पाइनीमी, मोदेशो पा लोव्र पाप्ताक्स। मिनु मोसा लेशशा, आ ताम्बुम लत। आ गेय पाइब ठिटा, नून आ तौ यहोसु चहिं ताम्बु उइ बाक्त। *प्रस्थान ३३:२०; गन्ती १२:८; ब्यवस्था ३४:१०*

### मोसाम परमप्रभु कली पुंइशो

12 मिनु मोसामी परमप्रभु यावे कली "कोव्रडीन, गे आं कली 'एको मुर आन कली लतो' देंतीनी, तन्न गो नु सु सु सोइक्नीनी, गे आं कली मतुइक्पाइय्थीनी। मो हना यो, गे आं कली 'इ नें कली तुइक्नुड। मिनु इ कली दाक्नुड' देंतीनी। *प्रस्थान ३३:२, ३, १७* 13 मोपतीके गे आं कली दाक्ताक्नी हना, आं कली इन लां कोंइदीने। गो इन कली तुइक्ने चबुल। गो इन डोंइती शिशी तडल। एको जात डा मुरपुकी इन मुर नम, दे मिम्तीने" देंत। *भजन संग्रह १०३:७* 14 मिनु परमप्रभुमी "गो गे नु लाइनुड। मिनु इ थुं नाइक्चा गेनुड" देंत। *यसैया ६३:९; यहोसु २१:४४; हिब्रू ४:९* 15 मिनु मोसामी "गे गो नु मलाइतीनी हना, आंइ कली एक रे मसोइक्तीन। 16 गो नु इन मुरपुकीमी इन डोंइती शिशी तशो बाक्नीकी, दे गो दोपा तुइक्नीकी? गे गो नु लाइतीनी हना ला, तुइक्नीकी। मोपा ला गो नु इन मुरपुकी रागी डा मुरपुकी नु खाल का डा मदुम्नीकी" देंत। *ब्यवस्था ४:६-८* 17 मिनु परमप्रभु यावेमी मोसा कली "गो इ देशो पाइनुड। मारदे हना गो इ कली दाक्नुड। मिनु इ नें यो तुइक्नुड" देंत। *प्रस्थान ३३:१२; यसैया ४३:१; रतिमोथी २:१९*

## मोसामी परमप्रभु कली तचा दाक्शो

18 मिनु मोसामी “गे आं कली इन छेडछेड तपाइप्यीनी” दे पुंडतु। *यूहन्ना १:१४; २कोरिन्थी ३:१८* 19 मिनु मेकोमी “गो इ डोंइती रे लाइनुड, आं गेना हना यो दाक्तीक कौंइनन। इ डोंइती आं नें ‘यावे, देंना देंन गाक्नुड’ सु सु आन कली शिशी पचा दाक्डा, मेको आन कली शिशी पाइनुड। सु सु आन कली दाक्चा दाक्डा, मेको आन कली दाक्नुड” देंत। *रोमी ९:१५* 20 मिनु मोसा कली “गे आं कुल कोवने मचाप्नेवे। मारदे हना आं कुल तामेनु, मुर बेक्नीमी” देंत। *प्रस्थान २४:११; उत्पत्ती ३२:३१; न्यायाधीस ६:२२-२३; न्यायाधीस १३:२२-२३; यसैया ६:५; यसैया ३३:१४; श्तिमोथी ६:१६* 21 मिनु लेंशा परमप्रभु यावेमी मोसा कली “कोवडो, आं बाक्तीकेम सेरथे फुल्लु का बाक्ब, गे मेको तार रपो। *१राजा १९:८-१३* 22 आं छेडछेड मेकेर रे लमेनु, गो इ कली मेको सेरथे फुल्लु आ काक्पेमी खूइश्शा वोइक्नन। गो मलाक्गु सम्म इ कली आं गुइमी सुश्शा वोइक्नन। *प्रस्थान ३४:५-६; प्रस्थान २४:११; 23* नोले आं गुइ क्युक्नुड। मिनु गे आं ची ताइनेवे। आं कुल चहिं मताइनेवे” देंत।

## परमप्रभु आ अरेशो लेंशा ब्रेक्शो

34 मिनु परमप्रभु यावेमी मोसा कली “डोंइती डा खोदेशो पा फुल्लु निक्शी खोतो। गो मेको फुल्लुमी इ डोंइती प्रोल्शो फुल्लु डा लोव ब्रेक्नुड। *प्रस्थान ३२:१९* 2 सुनी कना बोक्शा, सीनै डांडा डोइश्शा, आं डोंइती जाक्को। 3 गे नु सुइ डांडा डोइक्चा मदुम्नीम। बी ब्यफ, क्यारश भेडा यो डांडा गे जोचा मदुम्नीम” दे माइक्तु। *प्रस्थान १९:१२-१३* 4 मिनु मोसामी परमप्रभु यावेमी देंशो खोदेशो पा डोंइती डा खोदेशो फुल्लु निक्शी खोइक्नु। मिनु सुनी कना बोक्शा, फुल्लु कुरशा सीनै डांडा डोंइसाक्व। 5 मिनु परमप्रभु यावे गोस्स आगाम बाक्शा, तोंइसाक्व। मिनु मोसा नु राप्शा आ नें देंना देंन गाक्त। 6 मिनु परमप्रभु यावे मोसा आ नेक्था गाक्ना गाक्न “यावे, यावे, शिशी पाइब नु दाक्ब परमप्रभु बाक्ब। रीब पा मगाइक्ब। गेना हना यो शिशी पाइब नु आ दाक्चा मप्रोंइब बाक्ब। *प्रस्थान ३३:१८-२६; गन्ती १४:१८; भजन संग्रह १०३:८; नहुम १:३; १यूहन्ना ४:१६* 7 मिनु हजार हजार आन पाला सम्म गेना हना यो दाक्ब। मुर आन ठीक मपशो, आन हेंथे पशो नु पाप पशो क्याम्ब। तन्न सजाइ मगेंथु मप्रोंइब। आम आफ आन मरिश्शो पशो आन तमी तौ, चच, युइ नु युइ आन युइ सम्म सजाइ ताइनीम” देंत। *प्रस्थान २०:५-६; ब्यवस्था ३२:९; भजन संग्रह २८:९* 8 मिनु मोसामी गु बाप्शा सेउ पा ठेयब सेल्लु। 9 मिनु “आं परमप्रभु, इन डोंइती शिशी तशो बाक्ती हना, गे परमप्रभु, गो नु गाक्कीन, दे पुंडनुड। एको काइ मटीब मुर बाक्तेक्म हना यो, आंइ ठीक मपशो नु पाप क्याम्दीन। आंइ कली आंम इन मुर सेल्शा ब्रकी” देंत।

10 मिनु मेकोमी “नेनो, गो कबल का पाइनुड। इ मुर नेल्ल आन डोंइती छक लाक्चा डा गेय पाइनुड। गो मोदेशो गेय रागी रागी आन दातेमी गेनायो मपड। मिनु गे नु बाक्ब मुर नेल्लेमी परमप्रभु यावे आ गेय बाक्ब, दे तुइक्नीम। आं पचशो गेय हिंचा डा नु छक लाक्चा डा बाक्ब। *प्रस्थान १९:५*

11 गो मुलाक्ती मार देंनुडा, मेको लोव टिचा माल्नेवे। नेनो, गो इ डोंइती रे एमोरी, कनानी, हिंती, परिज्जी, हिंवी नु यबुसी आन कली खेरनुडमी।

12 गो इन कली गेनुड देंशो रागी जाक्दीलीनु, मेको रागी डा मुरपुकी नु काइ कबल मपावो। होस पा बाक्को। कबल पाप्तीवी हना, मेकोपुकीमी इन कली दूली पाइब सेल्लनीम। *प्रस्थान २३:३२-३३* 13 मेको आन चढेतीकपुकी प्रेशशा, आन पूजा पचा कली खूक्शो फुल्लु प्रोल्शा, मूर्ति पाइश्शो थाम कली क्योरशा, तिम्चा माल्नीनी। *प्रस्थान २३:२४* 14 गे मेको आन देवी देवता आन डोंइती बाप्शा सेउ मपने। मारदे हना आं नें रुश पाइब बाक्ब। मिनु गो रुश पाइब परमप्रभु बाक्नुड। 15 मेको रागी डा मुर नु काइ कबल मपने। मारदे हना मेको रागी डा मुरुमी आन देवी देवता आन कली पूजा पा क्योरशा चढेनीमी। मिनु इन कली ब्रेम्मानु, गे मेको आन देवी देवता आन कली चढेशो जाइनीनी। 16 मिनु गे आन तमी इन तौ आन कली चाक्नीनी। मिनु मेको आन तमीम आन देवी देवता आन कली पूजा पा चढेनीम। इन तौ

आन कली यो आन देवी देवता आन कली पूजा पा चढेपाइक्नीम। *ब्यवस्था ७:३; न्यायाधीस ३:६; १राजा ११:२*

17 गेपुकीमी आंम कली मूर्ति मचेम्सीन। *प्रस्थान २०:४*

18 बोरब ओख्ती मसुप्शो शोब्ले डा चाड मानेचा माल्नीनी। आं देंशो खोदेशो पा आबीब महिनाम ७ नाक्त सम्म बोरब ओख्ती मसुप्शो शोब्ले जचा माल्नीनी। मारदे हना गे आबीब महिनाम इजीप्तर रे गूशो ननी। *प्रस्थान २३:१४-१९* 19 इन बस्तु भाव आन डोंइती जरमेशो बाछा, पाठा, नेल्ल आं के नम। *उत्पत्ती ४:४* 20 डोंइती जरमेशो गधा आ बोहोर आ पा डा पाठा का गेशा प्रोंइचा माल्नीनी। मो मपाइनीनी हना, आ शुर जिक्शा, साइक्चा माल्नीनी। इन डोंइती जरमेशो तौ आ पा डा क्येट गेशा प्रोंइचा माल्नीनी। आं डोंइती सुइ श्येत्थ गुइ मजाक्कीन। *प्रस्थान १३:१२-१६*

21 मिनु ६ नाक्त इन गेय नेल्ल पचा माल्नीनी। ७ नाक्त चहिं नाइक्चा माल्नीनी। ब्यफ वाक्ची नु बाली नाली रुप्ची ना यो नाइक्चा माल्नीनी। 22 गेपुकीमी हप्ता डा चाड मानेचा माल्नीनी। मेको डोंइती मीशो चेरब आ चाड बाक्ब। बाली नाली रुप्शा ओंइतीक डा चाड यो मानेचा माल्नीनी। मेको बर्स नुप्ची ना डा चाड बाक्ब। *लेवी २३:१५-१६; ब्यवस्था १६:९-१०*

23 इस्राएल डा वोंइश मुर नु वोंइश आल नेल्ल बर्सम खेयप सां परमप्रभु आ डोंइती, परमप्रभु यावे, इस्राएली आन परमप्रभु आ डोंइती जाक्चा माल्नीम। 24 गो रागी रागी डा मुर आन कली इन डोंइती रे खेरशा, इन बाक्तीक रागी बारपाइक्नुड। बर्सम खेयप सां परमप्रभु यावे इन परमप्रभु आ डोंइती जाक्कीन। मिनु सुइम इन रागी तशा मवाल्नीम।

25 आं कली चढेतीक हुश बोरब ओख्ती सुप्शो शोब्ले नु मचढेन। पास्सा चाड डा चढेशो श्ये सुनी सम्म मारेइ महेंचा। 26 इन रू डा डोंइती मीशो नेल्ल क्येडा रिश्शो थोव्रक परमप्रभु यावे, इन परमप्रभु आ खिंम चाक्चा माल्नीनी। क्यारश आ पाठा आ ममा आ दूधमी लोप्शा क्येचा मदुम्ब” दे मोसा कली देंत। *प्रस्थान २३:१९*

27 मिनु परमप्रभु यावेमी मोसा कली “गो, गे नु इस्राएली नेल्ल नु एको अरेशो लोव पा कबल पाता, मोपतीके ब्रेक्तो” देंत। *प्रस्थान २४:४* 28 मिनु मोसा परमप्रभु यावे नु ४० नाक्दो नाक्ती बाक्त। मारेइ मजवो। ब्वाक्कु यो मतूडा। मिनु कबल डा १० ओटा अरेशो लोव फुल्लुम ब्रेक्ताक्व। *प्रस्थान २४:१८; मत्ती ४:२; प्रस्थान ३१:१८*

## मोसा आ कुल छेडछेड दुश्शो

29 मिनु नोले मोसा मेको परमप्रभु यावे आ कबल डा लोव ब्रेक्शो फुल्लु निक्शी कुरशा, सीनै डांडा रे तोंइसाक्व। मोसा परमप्रभु यावे नु लोव पतीके आ कुल परमप्रभु आ छेडछेडम छेडछेड दुश्शो बाक्ब, दे मतुइक्त। 30 मिनु हारून नु इस्राएली नेल्लेमी मोसा कली तामेनु, आ कुल छेडछेड दुश्शो तास्तेक्म। मिनु आ नेक्था लचा हिंतेक्म। *२कोरिन्थी ३:७-१८* 31 मिनु मोसामी मेको आन कली ब्रेत्तीमीनु, हारून नु ठेयब मुर नेल्ल आ नेक्था जाक्तेक्म। मिनु मेकोपुकी नु लोव पाप्तु। 32 मिनु नोले इस्राएलीपुकी यो मोसा आ नेक्था जाक्तेक्म। सीनै डांडाम परमप्रभु यावेमी आ कली मार मार मदा, मेको नेल्ल आन कली अरेम्तीमी। 33 मोसामी मेकोपुकी नु लोव पने थुश्शा, आ कुल वामी सुम्साक्व। 34 मोसा परमप्रभु यावे नु लोव पथ आ डोंइती लमेनु, लाडगा मग्रूम सम्म आ कुल हुक्साक्व। मिनु नोले गूशा, आ कुल सुम्सीशा मेको लोव इस्राएली आन कली नेंपाइक्तीमी। *प्रस्थान ३३:८-९* 35 इस्राएलीमी मोसा आ कुल छेडछेड दुश्शो ततीके, मोसामी परमप्रभु यावे नु लोव पथ, आगा मओव्रम सम्म आ कुल सुम्साक्व।

## नाइक्तीक नाक्त आ पर्बम अरेशो

*प्रस्थान ३१:१२-१७*

35 मोसामी इस्राएली नेल्ल आन कली ब्रेश्शा “परमप्रभु यावेमी शेंशो इन पचा माल्शो गेय, मार मार बाक्ब देंशा हना, 2 गे ६ नाक्त सम्म गेय पने। ७ नाक्ती चहिं परमप्रभु यावे आ नाक्त दुम्तीके, मेको नाक्ती नाइक्तीक नाक्त बाक्ब। सु सुमी मेको नाक्ती गेय पाइनीमी, मेको साइक्चा

पुंडसीनीम। प्रस्थान २०:८-११; प्रस्थान ३४:२१<sup>३</sup> नाइक्तीक नाक्ती इन खिं नेल्लेमी मी मुइक्चा यो मदुम्ब" दे माइक्तीमी।

ताम्बु सेल्चा कली मार मार पोक्शो  
प्रस्थान २५:३-९; प्रस्थान ३१:७-११

4 मिनु नोले मोसामी इस्राएली आन कली "परमप्रभु यावे आ शेंशो लोव्र मार बाक्ब, देंशा हना<sup>५</sup> 'परमप्रभु यावे कली गुम्तीक ताम्बु सेल्चा कली चढेतीक मार मार पोक्चा माल्नीनी। सु सुम ग्येरशा गेनीनी, मेकोमी परमप्रभु यावे कली मार चाक्चा माल्नीनी देंशा हना, सुन, चांदी, कांसा, प्रस्थान २५:२ 6 नीलो, प्याजी नु लल श्येले नु रिम्शो पा किरशो सुती श्येले के प्रोव्रशो वा नु क्यारश आ चां,<sup>७</sup> लल रड नुष्पो बोका आ कुशुल, नेल्ल क्येडा रिम्शो कुशुल नु बोल्यो शी,<sup>८</sup> बत्ती दाचा कली तेल, लुक्तीक तेल कली ब्वाइक्तीक नु धूप कली ब्वाइक्तीक,<sup>९</sup> निसाफ पतीके ऊरीम नु थुम्मीम वोइक्तीक झोला नु कुचु तार वोइक्तीक सेल्चा कली ओनीक्स माइश्शो हीरा नु अरु हीरा चाक्चा माल्नीनी' " देंत।

10 मिनु मोसामी "इन दातेम सु सु जोक्ब बाक्नी, मेको नेल्ल जाक्शा, परमप्रभु यावे आ देंशो थोव्रक नेल्ल सेल्चा माल्नीनी।<sup>११</sup> गुम्तीक ताम्बु नु ताम्बु कली सुम्तीक, ग्याइक्पाइक्तीकपुकी, फलेक नु लाइश्शो कोक्केपुकी, थामपुकी नु राप्पाइक्तीकपुकी,<sup>१२</sup> कबल पशो सन्दोस नु आ कुरतीक कोक्के निक्शी, सन्दोस आ सुम्तीके, फारतीके,<sup>१३</sup> टेबल नु आ कुरतीक कोक्के, ग्योब नेल्ल नु कोइतीक शोब्ले,<sup>१४</sup> बत्ती दातीक नु मेको आ दियारीपुकी, बत्ती कली ठीक सेल्तीक थोव्रक नु बत्ती कली तेल,<sup>१५</sup> धूप चोशा चढेतीके नु मेको आ कुरतीक कोक्के, लुक्चा कली तेल नु ब्रोव्रशो रिना पाइश्शो धूप, ताम्बु ओव्रतीक डा फारतीक वा,<sup>१६</sup> चोशा चढेतीके नु आ एर ओंथ डा कांसा के थरपु, कुरतीक कोक्के नु आ मार मार, चिकतीक ठेयब बोस नु मेको आ निप्पाइक्तीके,<sup>१७</sup> ताम्बु आ लाडगा डा फारतीक वा, आ थामपुकी नु मेको आन राप्पाइक्तीकपुकी, ओव्रतीक डा फारतीक वा,<sup>१८</sup> ताम्बु आ किला नु लाडगा थरपु डा किलापुकी नु डोरीपुकी,<sup>१९</sup> नु हारून नु आ तौ परमप्रभु कली चढेब दुम्चा कली फेक्तीक वासी सेल्चा माल्नीनी" दे मुर आन कली माइक्तीमी।

ताम्बु कली मार मार चाक्शो

20 मिनु नोले इस्राएली नेल्ल मोसा आ डोंइती रे लाम्तेक्म।<sup>२१</sup> सु सु आन थुंमी "गो चाक्नुड" देमा, मेकोपुकीमी गुम्तीक ताम्बु सेल्चा कली नु मेकर डा गेय पचा कली मार मार थोव्रक नु फेक्तीक वा कली मार मार माल्दा, मेको परमप्रभु यावे कली गेचा, दे चाक्तेक्म। *१इतिहास २९:५-९; २कोरिन्थी ९:७*<sup>२२</sup> मीश मुर, वोंइश मुर नेल्लेमी मार मार चाक्तेक्म देंशा हना, मुन्द्री, मारवाडी, औंठी, सुन के चुरा नु अरु सुन के थोव्रकपुकी परमप्रभु यावे कली चाक्तेक्म।<sup>२३</sup> सु सु नु नीलो, प्याजी नु लल श्येले नु रिम्शो पा किरशो सुती श्येले के प्रोव्रशो वा, क्यारश आ चां, लल रड नुष्पो सांड आन कुशुल, नेल्ल क्येडा रिम्शो सेल्शो कुशुल बाक्मे, मेको चाक्तेक्म।<sup>२४</sup> सु सु आन के चांदी नु कांसा बाक्मे, मेकोमी परमप्रभु यावे कली चाक्तेक्म। सु सु नु गेय पचा कली ठीक पशो बोल्यो शी बाक्मे, मेको चाक्तेक्म।<sup>२५</sup> मिनु मीश मुर आन दातेमी सु सु जोक्ब बाक्मा, मेकोपुकीमी आन पांइशो नीलो, प्याजी, लल श्येले नु रिम्शो पा किरशो सुती श्येले के प्रोव्रशो वा चाक्तेक्म।<sup>२६</sup> सु सु जोक्ब बाक्मा, मेकोपुकीमी क्यारश आ चां पांइतेक्म।<sup>२७</sup> मिनु ठेयब मुरपुकीमी ओनीक्स माइश्शो नु अरु हीरा कुचु तार वोइक्तीक नु निसाफ पतीक ऊरीम नु थुम्मीम वोइक्चा कली झोलाम क्येप्पाइक्चा कली चाक्तेक्म।<sup>२८</sup> बत्ती कली तेल, लुक्चा कली तेल नु धूप कली ब्रोव्रशो रिना पाइब ब्वाइक्तीक थोव्रक चाक्तेक्म।<sup>२९</sup> मोपा इस्राएली नेल्लेमी ग्येरशा, परमप्रभु यावे कली गेचा कली मारेइ मारेइ चाक्तेक्म। मीश मुर नु वोंइश मुरुमी मार मार माल्बा मेको नेल्ल चाक्तेक्म। परमप्रभु यावेमी मोसा कली अरेशो खोदेंशो पा ताम्बु सेल्तीक गेय पचा कली मार मार चाक्तेक्म।

बेचालेल नु ओहोली-आब  
प्रस्थान ३१:१-६

30 मिनु मोसामी इस्राएली आन कली "नेनीन, परमप्रभु यावेमी यहूदा आ थर डा हुर आ चच, ऊरी आ तौ बेचालेल कली आ नें थिशा, आ गेय पचा कली योव्रतु।<sup>३१</sup> मेकोमी मेको कली परमप्रभुमी आ सोक्तीम प्रिंशा, मार मार सेल्चा कली जोक्ब तुइक्ब सेल्लु। मिनु पने चाप्तीक सक्ति यो गेप्टु।<sup>३२</sup> मेकोमी नेल्ल मिम्शा, सुन, चांदी नु कांसा के मारेइ मारेइ चेम्ने चाक्ब।<sup>३३</sup> हीरा खोइक्तीक नु सुनम क्येप्तीके, शी मुतीके नु मारेइ मारेइ सेल्चा जोक्ब दुम्पाइक्तु।<sup>३४</sup> परमप्रभुमी बेचालेल नु दान आ थर डा अहीसामाक आ तौ ओहोली-आब आस कली अरु आन कली शेंतीक सक्ति गेशो बाक्ब।<sup>३५</sup> मिनु मेको आस कली जोक्ब तुइक्ब थुं गेशा, गेय पतीक सक्ति नेल्ल गेशो बाक्ब। मार गेय पचा कली जोक्ब तुइक्ब सेल्शो बाक्ब देंशा हना, दारशो मार मार गेय पाइब, मिम्शा ब्रेक्स ब्रेक्शा, नीलो प्याजी नु लल श्येले बुटा प्रोव्रचा नु रिम्शो पा किरशो सुती श्येले के प्रोव्रशो वामी बुटा आप्चा कली जोक्ब तुइक्ब सेल्शो बाक्ब।

परमप्रभु आ बाक्तीक सेल्चशो  
प्रस्थान २६:-

36 मिनु परमप्रभु यावेमी बेचालेल, ओहोली-आब नु अरु आन कली आ बाक्तीक सेल्चा, दे जोक्ब तुइक्ब नु रुप्तीक थुं गेशो मुर नेल्लेमी, परमप्रभु यावेमी देंशो खोदेंशो पा गेय पचा माल्नीम" दे मोसामी इस्राएली आन कली देंत।

2 मिनु मोसामी, बेचालेल, ओहोली-आब नु परमप्रभुमी जोक्ब तुइक्ब सेल्शो मुर नेल्ल आन कली ब्रेत्ताक्नमी। सु सु आन थुंमी "गो यो मेको गेय पाइनुड" दे मिम्शो बाक्मा, मेको आन कली यो ब्रेत्ताक्नमी।<sup>३</sup> इस्राएलीपुकीमी परमप्रभु यावे आ बाक्तीक सेल्चा कली मार मार चाक्शो बाक्मा, आन थुंमी ग्येरशा गेशो नेल्ल मोसा आ गुइ रे ताक्तेक्म। मेना सम्म मुरपुकीमी सुनी कुस कुस मार मार चाक्स डा चाक्स बाक्तेक्म।<sup>४</sup> मिनु परमप्रभु यावे आ बाक्तीक सेल्ब जोक्ब तुइक्बपुकीमी आन गेय प्रोंइशा, मोसा आ बाक्तीक जाक्तेक्म।<sup>५</sup> मिनु मेकोपुकीमी मोसा कली "परमप्रभु यावेमी अरेशो सेल्चा कली माल्शो क्येडा यो शुश चाक्ना चाक्न बाक्नीम" देंतेक्म।<sup>६</sup> मिनु मोसामी "मुल रे परमप्रभु यावे आ बाक्तीक डा गेय कली सुइम मारेइ मचाक्कीन" दे मुर आन बाक्तीक बाक्तीकेमी नेंपाइक्थ मुर सोइक्ताक्मी। मोपा मारेइ मचाक्कीन, दे आन चाक्चा नाइक्पाइक्तेक्म।<sup>७</sup> मारदे हना आन चाक्शो मारेइ मारेइ गाप्था, शुश दुम्शो बाक्त।

ताम्बु सेल्तीक गेय

8 मिनु जोक्ब गेय पाइब नेल्लेमी परमप्रभु यावे आ बाक्तीक कली १० ओटा सुम्तीक वा सेल्तेक्म। रिम्शो पा किरशो सुती श्येले के प्रोव्रशो वा के नु नीलो, प्याजी नु लल रड डा श्येलेमी शुश रिम्शो करूबपुकी बुटा आप्था सेल्तेक्म।<sup>९</sup> मेको सुम्तीक वा का का पा २८ कुबीत दुइश्शो नु ४ कुबीत ब्रेम्शो, खाल का डा पा सेल्तेक्म। *कुबीत का ०.५ मिटर खोदेंशो बाक्ब।*<sup>१०</sup> मेकोपुकीमी ५ ओटा सुम्तीक वा बोइश्शा, का सेल्तेक्म। मिनु अर्को ५ ओटा बोइश्शा, अर्को का सेल्तेक्म।<sup>११</sup> सुम्तीक वा का आ एर सुर गे नीलो रड डा ५० ओटा बोइक्तीके सेल्तेक्म। अर्को सुम्तीक वा के यो ओंथ सुर गे ५० ओटा नीलो बोइक्तीक सेल्तेक्म।<sup>१२</sup> सुम्तीक वा कामी ५० ओटा बोइक्तीके नु अर्को सुम्तीक वा कली यो ५० ओटा बोइक्तीके सेल्शा, निक्शी कली का सेल्चा कली ठीक पा वोइक्तेक्म।<sup>१३</sup> मिनु मेकोपुकीमी ५० ओटा सुन के ग्याइक्पाइक्तीके सेल्शा, डोंइती डा नु नोले डा सुम्तीक वा आस कली बोइश्शा, का सेल्तेक्म।

14 परमप्रभु यावे आ बाक्तीक साप्चा कली यो क्यारश आ चां के ११ ओटा सुम्तीके सेल्तेक्म।<sup>१५</sup> मेको सुम्तीके का का पा ३० कुबीत लाइश्शो नु ४ कुबीत ब्रेम्शो खाल का डा पा सेल्तेक्म। *कुबीत का ०.५ मिटर खोदेंशो बाक्ब।*<sup>१६</sup> मेकोपुकीमी का सेल्चा कली ५ ओटा सुम्तीके बोइश्शा का नु ६

ओटा सुम्तीके बोइशा अर्को का सेल्लेक्म। 17 डोंइती डा सुम्तीके आ एर सुर गे ५० ओटा बोइक्तीक सेल्लेक्म। मिनु अर्को सुम्तीके आ ओंथ सुर गे ५० ओटा बोइक्तीक सेल्लेक्म। 18 मिनु ताम्बु सुम्तीके का सेल्ला कली कांसा के ५० ओटा ग्याइक्पाइक्तीक सेल्लेक्म। 19 मेकोपुकीमी ताम्बु सुम्चा कली लल रड नुषो सांड आ कुशुल के सुम्तीक का सेल्लेक्म। मेको आ तारी नेल्ल क्येडा रिम्शो सेल्लो कुशुल के अर्को सुम्तीक का सेल्लेक्म।

20 मिनु नोले मेकोपुकीमी परमप्रभु यावे आ बाक्तीक सेल्ला कली बोल्यो शी के फलेक सेल्ला, थारतेक्म। 21 फलेक का का पा १० कुबीत लाइशो नु कुबीत का आधा ब्रेम्शो सेल्लेक्म। *कुबीत का ०.५ मिटर, हात का खोदेशो बाक्ब।* 22 फलेक का कामी, राप्पाइक्चा कली किला निक्शी गारपाइशा, सेल्लेक्म। परमप्रभु यावे आ बाक्तीक सेल्ला कली फलेक नेल्ल मोदेशो पा सेल्लेक्म। 23 मिनु बाक्तीके आ दक्खिन गे कली २० ओटा फलेक सेल्लेक्म। 24 मिनु मेको २० ओटा फलेक आन पुं गे, ४० ओटा चांदी के राप्पाइक्तीके, फलेक का कली राप्पाइक्तीके निक्शी सेल्लेक्म। 25 उत्तर गे कली २० ओटा फलेक सेल्लेक्म। 26 मेको आन कली ४० ओटा चांदी के राप्पाइक्तीके, फलेक का कली राप्पाइक्तीके निक्शी सेल्लेक्म। 27 बाक्तीके आ पच्छिम गे कली ६ ओटा फलेक सेल्लेक्म। 28 पच्छिम डा सुर निक्शी कली, फलेक निक्शी सेल्लेक्म। 29 मेकोपुकीम उइ रे ममाइ, इर गे मुन्द्रामी ग्याइक्पाइक्तेक्म। 30 मोपा मेको नेल्ल ८ ओटा फलेक दुम्तेक्म। मिनु १६ ओटा चांदी के राप्पाइक्तीके, फलेक का कली राप्पाइक्तीक निक्शी दुम्त।  
प्रस्थान २६:-

31 बोल्यो शी के लाइशो कोक्के सेल्लेक्म। परमप्रभु यावे आ बाक्तीक का पटटी कली फलेक ग्याइक्पाइक्चा कली ५ ओटा लाइशो कोक्के सेल्लेक्म। 32 अर्को पटटी कली यो फलेक ग्याइक्पाइक्चा कली ५ ओटा लाइशो कोक्के सेल्लेक्म। आ नोले पच्छिम गे कली ५ ओटा लाइशो कोक्के सेल्लेक्म। 33 मिनु फलेक ग्येत्थ आ दातेमी सुर का रे अर्को सुर सम्म कली लाइशो कोक्के सेल्लेक्म। 34 मिनु फलेक नु लाइशो कोक्के आन कली सुनम गिल्लेक्म। मिनु लाइशो कोक्के शुइक्चा कली सुन के मुन्द्रापुकी सेल्लेक्म।

35 मिनु नीलो, प्याजी नु लल श्येले नु रिम्शो पा किरशो सुती श्येले के प्रोव्रशो वा के नेल्ल क्येडा चोव्रखो कोठा फारतीक का सेल्ला, रिम्शो पा करूब बुटा आप्तेक्म। 36 मेकोमी मेको फारतीक कली बोल्यो शी के ४ ओटा थाम सेल्ला, सुनम गिल्लेक्म। मेको आन ग्याइक्तीके सुन के सेल्लेक्म। मेको आन कली ४ ओटा चांदी के राप्पाइक्तीके सेल्लेक्म।

37 मिनु नीलो, प्याजी नु लल श्येले नु रिम्शो पा किरशो सुती श्येले के प्रोव्रशो वा दारशो बुटा आप्शो ताम्बु आ ओव्रतीके कली फारतीक का सेल्लेक्म। 38 मेको फारतीक ब्वेक्चा कली ५ ओटा थाम सेल्लेक्म। मेको आन पिया, ब्वेक्तीक नु हाम्तीक कोक्के सुनम गिल्लेक्म। मेको ५ ओटा थाम आन राप्पाइक्तीके चहिं कांसा के सेल्लेक्म।

कबल पशो सन्दोस सेल्लो

प्रस्थान २५:१०-२२

37 मिनु बेचालेलमी बोल्यो शी के सन्दोस का सेल्लु। मेको आ लाइशो कुबीत निक्शी नु आधा, आ ब्रेम्शो कुबीत का नु आधा नु आ ग्येत्थ लाइशो कुबीत का नु आधा डा पा सेल्लु। *कुबीत का ०.५ मिटर, हात का खोदेशो बाक्ब।* 2 मिनु मेको आ खिंडगा नु आ लाडगा नेल्ल क्येख सुनमी गिल्लु। मिनु एर ओंथ नेल्ल सुन के सुर सेल्लु। 3 मिनु सुन के ४ ओटा मुन्द्रा सेल्लु। का पटटी निक्शी नु अर्को पटटी निक्शी पा सन्दोस आ ४ सुरमी क्येप्ताक्व। 4 मिनु बोल्यो शी के कुरतीक कोक्के निक्शी सेल्ला, सुनमी गिल्लु। 5 मिनु मेको कुरतीक कोक्के निक्शी मुन्द्रामी शुइशा, सन्दोस कुरने चाप्तेक्म।

सन्दोस सुम्तीक सेल्लो

6 मिनु मेकोमी क्येख सुन के चेम्शा, सन्दोस सुम्तीके सेल्लु। मेको आ पित्थ लाइशो कुबीत निक्शी नु आधा नु आ ब्रेम्शो कुबीत का नु आधा

सेल्लु। *कुबीत का ०.५ मिटर, हात का खोदेशो बाक्ब।* 7 मिनु परमप्रभु यावे आ स्वर्ग डा गेय पाइब खोदेशो सुन के करूब निक्शी चेम्शा सेल्लु। मेको सुम्तीके आ निम्फा पटटी डा का का चेम्शा सेल्लु। 8 का पटटी करूब का, अर्को पटटी करूब का चेम्शा सेला बाक्त। मेको सुम्तीके नु करूब निम्फा मख्रोंइसीशो सुन का रेन चेम्शा सेल्लु। 9 करूब आस प्रां हाम्शा, सुम्तीके फारपाइशा, खाल का डा पा सन्दोस सुम्तीके गे कोवपाइशा चेम्शा सेल्लु।

शोब्ले वोइक्तीक टेबल सेल्लो

प्रस्थान २५:२३-३०

10 बोल्यो शी के टेबल का सेल्लु। मेको आ पित्थ लाइशो कुबीत निक्शी नु आ ब्रेम्शो कुबीत का नु आ ग्येत्थ लाइशो कुबीत का नु आधा डा पा सेल्लु। *कुबीत का ०.५ मिटर खोदेशो बाक्ब।* 11 मिनु मेको कली क्येख सुनमी गिल्ला, आ एर ओंथ नेल्ल सिरपेच खोदेशो पा सुन के सुर सेल्लु। 12 मेको आ एर ओंथ डा सुर नेल्ल ४ गुइ ब्रेम्शो सेल्ला, सिरपेच खोदेशो पा बुटा आप्शा सेल्लु। *गुइ का ८ सेन्ती मिटर कि ३ आइची खोदेशो बाक्ब।* 13 मिनु ४ ओटा सुन के मुन्द्रा चेम्शा, मेको आ ४ ओटा खोइलीम टेबल आगाम क्येप्ताक्व। 14 टेबल कुरचा कली मुन्द्रापुकी टेबल आ सुर आ नेक्था क्येप्ताक्व। 15 मिनु टेबल कुरचा कली बोल्यो शी के कुरतीक कोक्के सेल्ला, सुनमी गिल्लु। 16 मिनु टेबलम वोइक्चा माल्लो थाल, लोटा नु बोस नेल्ल नु तूचा थोव्रक चढ़ेतीक लुक्चा कली लोटा नेल्ल क्येख सुन के सेल्लु।

सुन के बत्ती दातीक सेल्लो

प्रस्थान २५:३१-४०

17 मेकोमी क्येख सुन के बत्ती दातीक का चेम्शा सेल्लु। आ थाम, आ राशी, आ दियारी, आ डल्ला नु फूपुकी ठेयब सुन का केन सेल्लु। 18 मिनु मेको बत्ती दातीक आ थाम रे ६ ओटा राशी गुंइशा, का पटटी रे सां नु अर्को पटटी रे सां राशी चेम्शा सेल्लु। 19 मिनु मेको राशी कामी देसी बदाम आ फू खोदेशो फू सां नु डल्ला सां रे गुंइशो सेल्लु। अर्को राशीपुकी यो नेल्ल मोदेशो पा सेल्लु। 20 मेको बत्ती दातीक आ थामम चहिं ४ ओटा देसी बदाम आ फू खोदेशो आन डल्ला रे गूशो सेल्लु। 21 थाम आ डोंइती डा डल्ला रे, आ दाते डा डल्ला रे नु नोले डा डल्ला रे निम्फा पटटी गे राशी निक्निक्शी गूशो सेल्लु। 22 मेको आ राशी नु डल्ला नेल्ल ठेयब क्येख सुन का केन चेम्शा सेल्लु। 23 बत्ती दातीक ७ ओटा दियारी, आ कांडची नु आइक्च बोस नेल्ल क्येख सुन के चेम्शा सेल्लु। 24 मेको नेल्ल टलेन्ट का क्येख सुन के चेम्शा सेल्लु।

धूप चोशा चढ़ेतीक सेल्लो

प्रस्थान ३०:१-५, २२-३८

25 धूप चोशा चढ़ेतीके बोल्यो शी के कुबीत का लाइशो नु कुबीत का ब्रेम्शो ४ पाटे पा सेल्लु। आ ग्येत्थ लाइशो कुबीत निक्शी डा सेल्लु। मेको नु मेको आ ग्रोव नेल्ल मख्रोंइसीशो शी का केन सेल्लु। *कुबीत का ०.५ मिटर, हात का खोदेशो बाक्ब।* 26 मिनु मेको नेल्ल क्येख सुनमी गिल्ला, सिरपेच के खोदेशो पा सुन के सुर सेल्लु। 27 मेको आ सुर आगा निम्फा पटटी कली सुन के मुन्द्रा निक्निक्शी सेल्ला, आ सिरपेच खोदेशो सुर आ दी निम्फा पटटी गे क्येप्ताक्व। मिनु मेको कुरतीक कोक्के शुइक्तीक दुम्त 28 मिनु मेको कुरचा कली बोल्यो शी के कुरतीक कोक्के निक्शी सेल्ला, सुनम गिल्लु।

29 मिनु मेकोमी ताम्बु डा लुक्तीक तेल नु ब्रोव्रशो रिना पाइब धूप जोक्ब मुरुम सेल्लो खोदेशो पा सेल्लु।

चोशा चढ़ेतीके सेल्लो

प्रस्थान २७:१-८; प्रस्थान ३०:१८-२१

38 मिनु बेचालेलमी बोल्यो शी के चोशा चढ़ेतीके सेल्लु। मेको ५ कुबीत लाइशो नु ५ कुबीत ब्रेम्शो, ४ पाटे नु कुबीत सां ग्येत्थ लाइशो पा सेल्लु। 2 आ ४ सुरमी ग्रोव सेल्लु। मेको ग्रोवपुकी मेको चढ़ेतीक

फलेक का केन सेल्शा, कांसामी गिल्लु।<sup>3</sup> चढ़ेतीके कली माल्शो मारेइ मारेइ कांसा के सेल्लु। पुलु वोइक्तीक बोसपुकी, पुलु ताप्तीकपुकी, बुइक्तीक बोसपुकी, श्ये गुंडतीक कांटापुकी नु मी कोइला कुर पतीकपुकी सेल्लु।<sup>4</sup> चोशा चढ़ेतीक कली कुबीत का नु आधा डा पा ग्येत्थ पा मी तिकतीक कांसा के जाली सेल्लु। *कुबीत का ०.५ मिटर, हात का खोदेंशो बाक्ब।*<sup>5</sup> कुरतीक कोक्के शुइक्चा कली, ४ ओटा मुन्द्रा सेल्शा, आ ४ सुरमी क्येप्ताक्व।<sup>6</sup> बोल्यो शी के कुरतीक कोक्के निक्शी सेल्शा, कांसामी गिल्लु।<sup>7</sup> चढ़ेतीक कुरचा कली मेको कोक्के मुन्द्राम शुइक्ताक्व। फलेक के सेल्शो चोशा चढ़ेतीके आगाम श्येत्थ बाक्शो बाक्त।

### चिकतीके ठेयब बोस सेल्शो

<sup>8</sup> बेचालेलमी कांसा के चिकतीक ठेयब बोस नु आ निप्पाइक्तीके सेल्लु। मेको गुम्तीक ताम्बु ओव्रतीकेम गेय पाइब मीश मुर आन कांसा के ऐना के सेल्लु।

ताम्बु आ लाडगा  
प्रस्थान २७:९-१९

<sup>9</sup> मिनु बेचालेलमी ताम्बु आ लाडगा थरपु हिरचा कली रिम्शो पा किरशो सुती श्येले के वा प्रोवपाइक्तु। मेको फारतीक दक्खिन गे सहे का कुबीत लाइश्शो पा सेल्लु। *कुबीत का ०.५ मिटर खोदेंशो बाक्ब।*<sup>10</sup> मेको फारतीक ग्याइक्पाइक्चा कली खाल का डा थाम नु खाल का डा कांसा के राप्पाइक्तीके के सेल्लु। मुन्द्रापुकी नु कोक्केपुकी चहिं चांदी के सेल्लु।<sup>11</sup> मिनु मोदेंशो पा उत्तर गे यो सहे का कुबीत लाइश्शो फारतीक प्रोवपाइक्तु। मेको कली २० ओटा थाम, २० ओटा कांसा के राप्पाइक्तीके सेल्लु। मुन्द्रापुकी नु कोक्केपुकी चहिं चांदी के सेल्लु। *सहे का कुबीत ५० मिटर बाक्ब।*<sup>12</sup> पच्छिम गे ५० कुबीत डा फारतीक सेल्लु। मेको कली १० ओटा थाम नु १० ओटा राप्पाइक्तीके सेल्लु। आन मुन्द्रा नु कोक्केपुकी चहिं चांदी के सेल्लु।<sup>13</sup> मिनु लाडगा आ डोंइती पूर्व गे कली ५० कुबीत डा फारतीक वा सेल्लु।<sup>14</sup> ओव्रतीके पटटी का कली १५ कुबीत डा फारतीक वा सेल्लु। थाम नु राप्पाइक्तीके सां सां सेल्लु।<sup>15</sup> मिनु ओव्रतीके डा अर्को पटटी कली यो १५ कुबीत डा फारतीक वा सेल्लु। थाम नु राप्पाइक्तीके सां सां सेल्लु।<sup>16</sup> लाडगा डा एर ओंथ नेल्ल डा फारतीक रिम्शो पा किरशो सुती श्येले के प्रोवशो वा के सेल्लु।<sup>17</sup> मेको थाम आन राप्पाइक्तीक कांसा के बाक्तेक्म। थाम आन मुन्द्रा नु कोक्केपुकी चहिं चांदी के बाक्तेक्म। थाम आन पिया चांदीम गिल्लो बाक्तेक्म। थाम आन फ्रेंतीके नेल्ल चांदी के बाक्तेक्म।

<sup>18</sup> मेको लाडगा डा ओव्रतीके डा फारतीक नीलो, प्याजी नु लल श्येले नु रिम्शो पा किरशो सुती श्येले के प्रोवशो वाम दारशो बुटा आप्शा सेल्लु। मेको आ लाइश्शो २० कुबीत नु आ ग्येत्थ ५ कुबीत डा पा अर्को फारतीक नु उइक्थ उइक्थ पा सेल्लु। *कुबीत का ०.५ मिटर, हात का खोदेंशो बाक्ब।*<sup>19</sup> मिनु ओव्रतीक डा ४ ओटा थाम नु आन ४ ओटा राप्पाइक्तीके कांसा के बाक्तेक्म। मेको फारतीक कली ब्वेक्तीक, थाम आन पिया नु फ्रेंतीके चांदी के बाक्तेक्म।<sup>20</sup> मिनु परमप्रभु यावे आ बाक्तीके नु लाडगा डा किला नेल्ल कांसा के बाक्तेक्म।

### सुन चांदी नु कांसा नाक्शो

<sup>21</sup> परमप्रभु यावे आ बाक्तीक सेल्चा कली मार मार माल्दा, मेको ब्रेक्शो बाक्त। मेको बाक्तीके कबल पशो सन्दोस वोइक्तीके बाक्त। मोसामी "मेको नेल्ल ब्रेक्चा माल्ब" दे अरेशो बाक्त। चढ़ेब हारून आ तौ इथामार लेवी आन कली गेय पपाइक्ब बाक्त। *गन्ती ४:२८*<sup>22</sup> परमप्रभु यावेमी मोसा कली शेंशो खोदेंशो पा, यहूदा आ थर डा हुर आ चच, ऊरी आ तौ बेचालेलमी मारेइ मारेइ सेल्लु। *प्रस्थान ३१:१-११*<sup>23</sup> मेको नु दान आ थर डा अहीसामाक आ तौ ओहोली-आब यो बाक्त। मेको मार मार मुशा सेल्लीक गेय जोक्ब, ब्रेक्स ब्रेक्शा सेल्चा जोक्ब नु नीलो, प्याजी नु लल रड डा रिम्शो पा किरशो सुती श्येलेम दारशो बुटा आप्तीक गेय यो जोक्ब बाक्त।

<sup>24</sup> परमप्रभु यावे आ बाक्तीक नु मेकेर माल्शो मारेइ मारेइ सेल्चा कली मुर आन गेशो सुन गिश दुम्माक्त देंशा हना, २९ टलेन्ट नु ७ सहे ३० शेकेल दुम्त। नेल्ल नाक्शा, हजार का किलो खोदेंशो दुम्त। *टलेन्ट का ३४ किलो बाक्ब। शेकेल का ११.५ ग्राम, तोला का खोदेंशो बाक्ब।*<sup>25</sup> डोंइती हिक्शो वोंइश मुर आन रे पोक्शो चांदी सहे का टलेन्ट नु हजार का ७ सहे ७५ शेकेल दुम्त।<sup>26</sup> मिनु २० बर्स गाप्शो नु मेको क्येडा लाक्शो वोंइश मुर ६ लाख हजार सां ५ सहे ५० जना बाक्तेक्म। मेको आन के का का पा आधा आधा शेकेल पोक्तेक्म। *प्रस्थान ३०:१२-१६; गन्ती १:४६*<sup>27</sup> ताम्बु आन फलेक राप्पाइक्तीक नु नेल्ल क्येडा चोव्रखो कोठा कली फारतीक डा थाम आन राप्पाइक्तीक कली सहे का टलेन्ट माल्ताक्व। सहे का राप्पाइक्तीके कली सहे का टलेन्ट माल्ताक्व। का कली टलेन्ट का माल्ताक्व।<sup>28</sup> मेको हजार का ७ सहे ७५ शेकेल चांदीमी ब्वेक्तीक सेल्शा, थाम आन पिया गिल्लीक नु आन फ्रेंतीकपुकी सेल्लेक्म।<sup>29</sup> मुर आन चाक्शो कांसा ७० टलेन्ट नु हजार निक्शी ४ सहे शेकेल दुम्शो बाक्त।<sup>30</sup> मेको के गुम्तीक ताम्बु डा ओव्रतीके डा थाम आन राप्पाइक्तीके, कांसा के चोशा चढ़ेतीके, आ मी तिकतीक जाली नु चढ़ेतीक आ मारेइ मारेइ सेल्पाइक्तु।<sup>31</sup> मिनु लाडगा डा थाम आन राप्पाइक्तीकपुकी, ठेयब ओव्रतीके डा थाम आन राप्पाइक्तीकपुकी, ताम्बु नु लाडगा डा किला नेल्ल सेल्पाइक्तु।

चढ़ेब आन वा सेल्शो  
प्रस्थान २८:-

**39** परमप्रभु यावेमी मोसा कली दोपा अरेवा, मोपा बेचालेल नु आ मुरपुकीमी हारून कली परमप्रभु यावे आ बाक्तीकेमी गेय पचा कली नीलो प्याजी नु लल रड डा श्येले के प्रोवशो फेक्तीक वा सेल्लेक्म।

### चढ़ेब आ कुचु तार वोइक्तीके

<sup>2</sup> मेकोमी कुचु तार वोइक्तीके सुन के, नीलो, प्याजी नु लल रड डा श्येले नु रिम्शो पा किरशो सुती श्येले के प्रोवशो वा के सेल्लेक्म।<sup>3</sup> मिनु सुन तुप्शा, पात्तो सेल्शा, आइक्च पा खोइश्शा, श्येले खोदेंशो सेल्लेक्म। मिनु नीलो, प्याजी नु लल श्येलेमी रिम्शो पा किरशो सुती श्येले के प्रोवशो वा दारशो बुटा आप्शा सेल्लेक्म।<sup>4</sup> मेको कुचु तार वोइक्तीकेमी बलाम सुम्तीके निक्शी सेल्शा, निम्फा पटटी बोइक्ताक्म।<sup>5</sup> मिनु आ पाइक्तीके मेको कुचु तार वोइक्तीके का रेन सेल्लेक्म। मेको खाल का डा पा रिम्शो पा सेल्लेक्म। मेको पाइक्तीके सुन, नीलो, प्याजी नु लल रड डा श्येले नु रिम्शो पा किरशो सुती श्येले के प्रोवशो वा के सेल्लेक्म। परमप्रभु यावेमी मोसा कली दोपा अरेवा, मोपा सेल्लेक्म।

<sup>6</sup> मिनु मेकोमी ओनीक्स हीरा निक्शी चाक्शा, इस्राएल आ तौ आन नें छाप खोदेंशो पा हीराम मुशा ब्रेक्शा सुनम क्येप्ताक्म।<sup>7</sup> मेको हीरा निक्शी कुचु तार वोइक्तीक आ बला डा टुक्रा तारी फेरतेक्म। मिनु मेको हीरा इस्राएल आ तौ आन कली मिम्चा कली बाक्ब। परमप्रभु यावेमी मोसा कली दोपा अरेवा, मोपा सेल्लेक्म। *प्रस्थान २८:१२*

### निसाफ पतीक झोला

<sup>8</sup> मेकोमी निसाफ पतीके ऊरीम नु थुम्मीम वोइक्तीक झोला सेल्पाइक्तु। कुचु तार वोइक्तीके खोदेंशो पा सुन, नीलो, प्याजी नु लल श्येले नु रिम्शो पा किरशो सुती के प्रोवशो वा के दारशो पा सेल्लेक्म।<sup>9</sup> मेको खेयप का मुखशोनु, बिक्ता का लाइश्शो नु बिक्ता का ब्रेम्शो ४ पाटे पा सेल्लेक्म।<sup>10</sup> मिनु ४ लस्कर हीरा सुनम का का पा क्येप्ताक्म। डोंइती डा लस्कर लल मानीक माइश्शो हीरा, हाव पुशपराज माइश्शो हीरा नु गिगी बेरूज माइश्शो हीरा क्येप्ताक्म।<sup>11</sup> मेको आ नोले डा लस्कर लल फिरोजा माइश्शो हीरा, बुश नीर माइश्शो हीरा नु बुश नु नीलो पन्ना माइश्शो हीरा क्येप्ताक्म।<sup>12</sup> मेको आ नोले डा लस्कर गिगी नु नीलो रड ब्वाइश्शो रिम्शो टल्केशो नीलमनी माइश्शो हीरा, गिगी हाकीक माइश्शो हीरा नु प्याजी रड डा कटेला माइश्शो हीरा क्येप्ताक्म।<sup>13</sup> मिनु नेल्ल क्येडा नोले डा लस्कर पीतमनी माइश्शो हीरा, लल रड डा ओनीक्स नु नीलो बिलौरा माइश्शो हीरा

व्येप्ताकम्। मोपा हीरा नेल्ल कली सुनम व्येप्ताकम्। 14 मेको हीरा १२ ओटा बाक्तेकम्। मिनु इस्राएल आ तौ आन नें का का पा मेको आन तार छाप थोक्शो खोदेशो पा मुशा ब्रेक्शो बाक्तेकम्। हीरा का आ तारी थर का आ नें ब्रेक्शो बाक्त्। 15 मेको निसाफ पतीक झोला कली व्येख सुन के डोरी किरशो खोदेशो पा सिक्री सेल्लेकम्। 16 मेकोपुकीमी निसाफ पतीक झोला कली सुन के ग्याइक्तीक निक्शी नु मुन्द्रा निक्शी चेम्तेकम्। मिनु मेको मुन्द्रा निसाफ पतीक झोला आ सुर निक्शीमी वोइक्तेकम्। 17 मेकोपुकीमी सुन के सिक्री निक्शी निसाफ पतीक झोला आ सुरम वोइश्शो मुन्द्रा निक्शीमी लिक्ताकम्। 18 मेको सिक्री निक्शी चढेब आ कुचु तार वोइश्शो वा आ बला डा हीरा व्येष्शो सुनम हेक्ताकम्। 19 मेकोपुकीमी सुन के मुन्द्रा निक्शी सेल्लेकम्। मेको निक्शी निसाफ पतीके ऊरीम नु थुम्मीम वोइक्तीक झोला आ उड आगा गे पाइक्ताकम्। मोपा मेको झोला कुचु तार वोइक्तीके वा आ तार बाक्त्। 20 मेकोपुकीमी लेंशा सुन के मुन्द्रा निक्शी सेल्लेकम्। कुचु तार वोइक्तीके आ बला सुम्तीके उड डा सुरम वोइक्तेकम्। दारपाइश्शो पाइक्तीके आ तारी व्येप्ताकम्। 21 मिनु मेको निसाफ पतीके ऊरीम नु थुम्मीम वोइक्तीक झोला आ मुन्द्रामी नीलो डोरीम लिक्शा, कुचु तार वोइक्तीक वामी पाइक्ताकम्। मोपा मेको निसाफ पतीके झोला दारपाइश्शो पाइक्तीक तार बाक्शो कुचुम वोइक्तीक वा रे एर ओंथ मयाक्सेक्ल, दे पाइक्ताकम्। परमप्रभु यावेमी मोसा कली दोपा अरेवा, मोपा सेल्लेकम्।

कुचु तार वोइक्तीके आगा डा वा

22 मिनु मेको कुचु तार वोइक्तीके आगा फेक्तीक नेल्ल नीलो प्याजी रड डा वा के फेरतेकम्। 23 मिनु पिया ख्रीतीक पोवला सेल्लेकम्। मेको पोवला आ एर ओंथ मगाक्चा डा पा आ सुर थम बोल्यो पा प्रोवतेकम्। 24 मेको फेक्तीके आ उड डा सुर एर ओंथ गे नीलो, लल नु प्याजी रड नु रिम्शो किरशो सुती श्येले के प्रोवशो वा के सेल्लो दारीम व्युक्शा सेल्लेकम्। 25 मिनु मेकोपुकीमी व्येख सुन के आइक्च किडगो सेल्लेकम्। फेक्तीक उड गे किडगो का दारीम का खाक्शा व्युक्तेकम्। 26 किडगो का दारीम का नु किडगो का दारीम का पा खाक्शा, बिर हिरशा व्युक्तेकम्। मेको परमप्रभु यावे आ डोंइती गेय पची ना फेक्तीक वा दुम्त्। परमप्रभु यावेम मोसा कली दोपा अरेवा मोपा सेल्लेकम्।

आगा डा फेक्तीके सेल्लो

27 हारून नु आ तौ आन कली रिम्शो पा किरशो सुती श्येले के प्रोवशो वा के फेक्तीक यो सेल्लेकम्। 28 रिम्शो पा किरशो सुती श्येले के प्रोवशो वा के पियाम रुक्तीक नु गुक्तीक ताकी नु सुरुवाल सेल्लेकम्। 29 रिम्शो पा किरशो सुती श्येले के प्रोवशो वा के नीलो, प्याजी नु लल रड डा श्येलेमी दारशो बुटा आष्शो किप्तीकपुकी सेल्लेकम्। परमप्रभु यावेमी मोसा कली दोपा अरेवा, मोपा सेल्लेकम्।

कुप्फीम पांइतीके सेल्लो

30 मेकोपुकीमी व्येख सुन के फू खोदेशो पा कुप्फीम पांइतीके चेम्तेकम्। मेकेर छाप मुशो खोदेशो पा “परमप्रभु यावे कली ला” दे मुशा ब्रेक्ताकम्। प्रस्थान २९:६; प्रस्थान २७:३६; लेवी ८:९; जकरिया १४:२०; 31 कुप्फीम पांइतीके कली पियाम गुक्तीकेमी नीलो श्येलेमी फ्रेंताकम्। परमप्रभु यावेमी मोसा कली दोपा अरेवा, मोपा सेल्लेकम्।

मोसामी ताम्बु डा गेय कोव्रशो

32 मिनु परमप्रभु यावे आ बाक्तीक गुम्तीक ताम्बु डा गेय नेल्ल नुम्त्। परमप्रभु यावेमी मोसा कली दोपा अरेवा, मोपा इस्राएल डा मुरपुकीमी नेल्ल सेल्लेकम्।

33 मिनु मेकोपुकीमी परमप्रभु यावे आ बाक्तीक नु आ मारेड मारेड मोसा आ बाक्तीकेमी चाक्तेकम्। मार मार चाक्गमे बाक्त् देशा हना, ताम्बु नु आ ग्योब नेल्ल, ब्वेक्तीक, फलेक, लाइश्शो कोक्के, थाम नु राप्पाइक्तीकपुकी, 34 लल रडम नुष्शो सांड आ कुशुल के सुम्तीके, नेल्ल व्येडा रिम्शो कुशुल

के सुम्तीके, फारतीके, 35 कबल पशो सन्दोस, मेको आ कुरतीक कोक्के नु सुम्तीके, 36 टेबलम वोइक्चा माल्शो मारेड मारेड नु कोंइतीक शोब्ले, 37 व्येख सुन के बत्ती दातीके नु आ दियारी आन कली ठीक सेल्लेके थोव्रक नु बत्ती कली तेल, 38 सुन के चढेतीक, लुक्चा कली तेल, ब्रोव्रशो रिना पाइब धूप, ताम्बु ओव्रतीके डा फारतीक वा, 39 कांसा के चढेतीक, मेको आ कांसा के मी तिक्तीक जाली, कुरतीक कोक्के नु चढेतीक आ मारेड मारेड, चिक्तीक ठेयब बोस नु मेको निप्पाइक्तीके, 40 ताम्बु आ लाडगा डा फारतीक नु थामपुकी, आन राप्पाइक्तीकपुकी, लाडगा ओव्रतीक डा फारतीक वा, आ फ्रेंतीकपुकी नु किलापुकी, मिनु परमप्रभु यावे आ बाक्तीक गुम्तीक ताम्बु डा गेय पचा कली मारेड मारेड नेल्ले, 41 परमप्रभु यावे आ बाक्तीक डा गेय पचा कली हारून कली फेक्तीक वा नु आ तौ आन कली परमप्रभु यावे कली चढेब दुम्चा कली आन फेक्शा गेय पतीके वा नेल्ल चाक्तेकम्। 42 परमप्रभु यावेमी मोसा कली दोपा अरेवा, मोपा इस्राएल डा मुरपुकीमी सेल्लेकम्। 43 मिनु मोसामी मेको नेल्ल कोव्रतु। मिनु परमप्रभु यावेमी दोपा अरेवा, मोपा ठीक सेल्लो तशा, मोसामी मेको नेल्ल आन कली आसीक गेप्त्।

गुम्तीक ताम्बु कीचा शेंशो

40 मिनु परमप्रभु यावेमी मोसा कली 2 “डोंइती डा महिना डा डोंइती नाक्ती, आं बाक्तीके गुम्तीक ताम्बु कीडो। प्रस्थान ४०:१७; प्रस्थान १२:२; प्रस्थान १९:१ 3 गे कबल पशो सन्दोस आगाम वोइश्शा, फारतीक वाम फारदो। 4 टेबल ओइशा, मेको तारी मार मार वोइक्चा माल्बा, ठीक पा वोतो। मिनु बत्ती दातीके ओइशा आ दियारी दाडो। 5 सुन के धूप चोशा चढेतीके कबल पशो सन्दोस आ डोंइती वोतो। आं बाक्तीक आ ओव्रतीक डा फारतीक वा व्युक्को। 6 गुम्तीक ताम्बु आ ओव्रतीक आ डोंइती चोशा चढेतीके वोतो। 7 गुम्तीक ताम्बु नु चढेतीक आस दातेम चिक्तीक ठेयब बोस वोइश्शा, ब्वाक्कुम प्रिंदो। 8 लाडगा डा थाम वोइश्शा, एर ओंथ हिरशा फारतीक वा नु ओव्रतीक डा फारतीक वा व्युक्को। 9 मिनु गे लुक्चा कली तेल चाक्शा, आं बाक्तीक नु मेकेर डा मारेड मारेड आन कली ‘परमप्रभु यावे केन बाक्ब’ दे तेल लुक्त्। मोपा मेको नेल्ल आं के दुम्मीम। 10 चोशा चढेतीक नु मेको आ मारेड मारेड आन कली यो ‘परमप्रभु यावे केन बाक्ब’ दे तेल लुक्त्। मोपा मेको नेल्ल यो आं के दुम्मीम। 11 चिक्तीक ठेयब बोस नु मेको आ निप्पाइक्तीके कली यो तेल लुक्त्। मिनु मोपा मेको आं के दुम्ब।

12 मिनु हारून नु आ तौ आन कली, गुम्तीक ताम्बु डा ओव्रतीकेम चाक्शा चिक्त्। 13 आं कली चढेब दुम्पाइक्चा कली हारून कली चढेतीक वा फेक्पा, तेल लुक्शा आं कली जिम्मा गेयी। 14 आ तौ आन कली यो चाक्शा, वा फेक्त्। 15 आन आफ कली खोदेशो पा मेको आन कली यो तेल लुक्त्। मेकोपुकी यो चढेब दुम्शा, आं गेय पचा माल्नीम। मेको तेल लुक्तीके आन चच युड आन पाला नेल्लेमी गेना हना यो आं कली चढेब दुम्मीम” देत। 16 मिनु परमप्रभु यावेमी मोसा कली दोपा अरेवा, मोपा पाप्त्।

गुम्तीक ताम्बु कीशो

17 इजीप्त् रे गाक्मा आ नोले जाक्शो बर्स आ डोंइती डा महिना, डोंइती डा नाक्ती परमप्रभु यावे आ बाक्तीक ताम्बु कीतेकम्। 18 मोसामी परमप्रभु यावे आ बाक्तीक ताम्बु कीशा, राप्पाइक्तीकपुकी वोइक्त्। मिनु फलेक थारशा, लाइश्शो कोक्के शुइश्शा, थाम राप्पाइक्त्। 19 परमप्रभु यावे आ बाक्तीक तारी सुम्तीके यो कोप्ताकम्। परमप्रभु यावेमी मोसा कली दोपा अरेवा, मोपा पाप्त्।

20 मिनु मोसामी परमप्रभु यावे आ अरेशो लोव्र मुशा ब्रेक्शो फुल्लु कबल पशो सन्दोसम कुर पाप्त्। मिनु कबल पशो सन्दोसम कुरतीक कोक्के शुइक्ताकम्। मिनु मेको आ तार सुम्तीकेम सुम्त्। 21 मेको कबल पशो सन्दोस परमप्रभु यावे आ बाक्तीके ओइशा, फारतीक वामी फारताकम्। परमप्रभु यावेमी मोसा कली दोपा अरेवा, मोपा पाप्त्।

22 मोसामी टेबल कली गुम्तीक ताम्बुम ओइशा, फारतीक वा आ डोंइती उत्तर गे वोइवत्तु। 23 टेबल तारी परमप्रभु यावे आ डोंइती कोंइतीक शोब्ले वोइवत्तु। परमप्रभु यावेमी मोसा कली दोपा अरेवा, मोपा पाप्तु।

24 टेबल नु एर ओंथ पा दक्खिन गे बत्ती दातीक कली गुम्तीक ताम्बुम वोइवत्तु। 25 परमप्रभु यावे आ डोंइती दियारी दात्तु। मिनु परमप्रभु यावेमी मोसा कली दोपा अरेवा, मोपा पाप्तु।

26 मिनु मोसामी सुन के सेल्शो धूप चोशा चढ़ेतीके कली गुम्तीक ताम्बुम डा फारतीक वा आ डोंइती वोइवत्तु। 27 मिनु मेकेर ब्रोव्रशो रिना पाइब धूप चोप्तु। परमप्रभु यावेमी मोसा कली दोपा अरेवा, मोपा पाप्तु।

28 नोले ताम्बुम डा ओव्रतीकेम फारतीक वा क्युवत्तु। 29 मिनु चोशा चढ़ेतीके परमप्रभु यावे आ बाक्तीके गुम्तीक ताम्बुम आ ओव्रतीकेमी वोइवत्तु। मिनु मेकेर चोशा चढ़ेतीक नु अन्न चढ़ेतीके चढ़ेप्तु। परमप्रभु यावेमी मोसा कली दोपा अरेवा, मोपा पाप्तु।

30 मोसामी गुम्तीक ताम्बुम नु चढ़ेतीक आस दातेमी चिक्तीक ठेयब बोस वोइशा, चिक्चा कली ब्वाक्कुम प्रिंताक्व। 31 मिनु मोसा, हारून नु हारून आ तौपुकीमी आन गुइ खोइली चिक्साक्म। 32 गुम्तीक ताम्बुमी ओव्रशा चढ़ेतीकेम लमानु, आन गुइ खोइली चिक्चा माल्तेक्म। परमप्रभु यावेमी मोसा कली दोपा अरेवा, मोपा पाप्तु।

33 मोसामी गुम्तीक ताम्बुम नु चढ़ेतीक आ लाडगा एर ओंथ नेल्ल थरपु हिरशा, आ ओव्रतीके डा फारतीक वा क्युवत्तु। मोपा मोसामी गुम्तीक ताम्बुम डा गेय नेल्ल थुम्तु।

परमप्रभु आ बाक्तीकेम जाक्शो

34 मिनु गोस्सुमी गुम्तीक ताम्बुम सुम्तु। परमप्रभु यावे आ सक्ति नु छेडछेडमी मेको आ बाक्तीक ब्रीत। इजीकीएल ४३:१-९ 35 मिनु मोसा गुम्तीक ताम्बुमी ओव्रने मचब। मारदे हना मेको गोस्स मेको तारी बाक्शा, परमप्रभु यावे आ सक्ति नु छेडछेडमी आ बाक्तीक ब्रीत। गन्ती ७:८९ 36 मेको गोस्स परमप्रभु यावे आ बाक्तीक तारी रे ग्येथ बोक्मेनु, इस्राएलीपुकी गाक्चा गोम्तेक्म। प्रस्थान १३:२१; गन्ती ९:१५-२३; गन्ती १०:३४-३६; १राजा ८:१०-११; यसैया ४:५ 37 मेको गोस्स ग्येथ मबोक्म सम्म इस्राएली मेक उइ बाक्तेक्म। 38 नाक्ती परमप्रभु यावे आ गोस्स आ बाक्तीक तारी बाक्त। नाक्दो चहिं मेको गोस्स आगाम मी दुम्त। इस्राएली गोरशो रागीम गाक्मा सम्म मोदेंशो दुम्स डा दुम्स पा नेल्लेमी ताम्तेक्म।



# लेवी

साइ परमप्रभु यावे आ मुर नु ख्रीस्त सेंसे नोले डा थमा सुइक्वपुकीमी एको किताब मोसामी ब्रेक्शो बाक्ब, देंनीम। मोसामी परमप्रभु यावे आ देंशो नेल्ल ब्रेक्शो बाक्ब।

एको किताब ५० नाक्त् गोरशो रागीम गाक्तीक डा लोत्र ला बाक्ब। इस्राएली इजीप्त रे गूशो बर्स निक्शी नोले, सीनै डांडा आ नेक्था बाक्तेक्म। मोसामी डांडाम बाक्शा, परमप्रभु यावे आ अरेशो नेल्ल ब्रेक्शो बाक्ब।

मुर दोपा परमप्रभु यावे नु गारचा डा दुम्नीम एको किताबमी ब्रेक्शो बाक्ब।

१. दोपा नु मार चढ़ेचा,
२. चढ़ेब आन गेय,
३. ग्रांग्रा दिचा नु ग्रांग्रा मदिचा आ पर्बम शेंशो,
४. परमप्रभु यावे का बाक्ब। मेको आ नोले ला खोइक्चा, दे ब्रेक्शो बाक्ब।

चोशा चढ़ेतीक  
लेवी २६:१-६

१ मिनू परमप्रभु यावेमी गुम्तीक ताम्बु रे ब्रेक्शा मोसा कली २ गे  
“इस्राएली आन कली ‘इन दाते डा सुइम परमप्रभु यावे कली इन बी  
ब्यफ, क्यारश भेडा चढ़ेनीनु, आंम इन बगाल रे चढ़ेने।

३ मेको चढ़ेशो बी ब्यफ चोशा चढ़ेतीक बाक्त् हना, मेकोमी मारेइ मद्रुशो थमा रिम्शो बाछा चढ़ेचा माल्ब। मेकोमी मेको गुम्तीक ताम्बु आ ओव्रतीकेम चाक्चा माल्ब। मिनू मेको इन पर्बम परमप्रभु आ डोंइती ब्रतीके दुम्ब। *लेवी १७:४* ४ मेकोमी आ गुइ चोशा चढ़ेतीक बस्तु आ पिया तारी वोइक्चा माल्ब। मिनू मेको परमप्रभु यावे आ डोंइती ब्रशा मेको मुर आ पर्बम पाप क्याम्तीक गेय बाक्ब। ५ मेकोमी मेको बाछा कली परमप्रभु यावे आ डोंइती क्योरशा साइक्चा माल्ब। मिनू चढ़ेब हारून आ तौपुकीमी मेको हुश चढ़ेतीक आ एर ओंथ ब्रुइक्चा माल्नीम। मेको चढ़ेतीक गुम्तीक ताम्बु आ ओव्रतीकेम बाक्ब। ६ मिनू मेको नोले मेकोमी मेको चोशा चढ़ेतीक आ कुशुल उक्शा टुक्रा टुक्रा पा चेक्चा माल्ब। *लेवी ७:८* ७ चढ़ेब हारून आ तौपुकीमी चढ़ेतीक तार मी सुइश्शा मेको तार शी गारपाइश्शा वोइक्चा माल्नीम। ८ मिनू चढ़ेब हारून आ तौपुकीमी चढ़ेतीके तारी वोइश्शो शी आ तार मेको चेक्शो श्ये पिया नु बोंसो गार पा वोइक्चा माल्नीम। ९ मेकोमी मेको आ गा क्यी नु खोइली चहिं ब्वाक्कुम मुरचा माल्नीम। मिनू चढ़ेबपुकीमी मेको नेल्ल कली चढ़ेतीकेमी चोचा माल्नीम। मेको परमप्रभु यावे कली आ दाक्शो ब्रोव्रशो रिना पाइश्शो मीम चोशा चढ़ेतीके बाक्ब। *उत्पत्ती ८:२१; प्रस्थान २९:१८*

१० मेको आ चोशा चढ़ेतीक आ बगाल डा क्यारश भेडा बाक्तेक्म हना, मेकोमी मारेइ मद्रुशो थम रिम्शो बोका, सांड चढ़ेचा माल्नीम। ११ मेकोमी परमप्रभु यावे आ डोंइती चढ़ेतीक आ उत्तर गे मेको क्योरशा साइक्चा माल्ब। मिनू चढ़ेब हारून आ तौपुकीमी मेको आ हुश चढ़ेतीक आ एर ओंथ ब्रुइक्चा माल्नीम। १२ मेको चढ़ेबमी मेको चढ़ेशो कली टुक्रा टुक्रा पचा माल्नीम। आ पिया बोंसो सुन्दा चेक्चा, श्ये नु काथा शी तारी गारपाइश्शा, चढ़ेतीक डा मी तारी वोइक्चा माल्ब। १३ मेकोमी मेको आ गा क्यी नु खोइली चहिं ब्वाक्कुम मुरचा माल्नीम। मिनू चढ़ेबपुकीमी मेको नेल्ल कली चढ़ेतीकेमी चोचा माल्नीम। मेको परमप्रभु यावे कली आ दाक्शो ब्रोव्रशो रिना पाइश्शो मीम चोशा चढ़ेतीके बाक्ब।

१४ मिनू परमप्रभु यावे कली चोशा चढ़ेतीके चिक्ब बाक्तेक्म हना, ढुकुर कि परवा चढ़ेचा माल्नीम। १५ चढ़ेबमी मेको चढ़ेतीक आ नेक्था मेको आ पिया प्रोइश्शा साइक्चा माल्ब। मिनू मेको कली चढ़ेतीकेमी चोचा माल्ब। मिनू आ हुश चहिं चढ़ेतीक आ नेक्था चिरचा माल्ब। १६ मेकोमी मेको आ सोके फेशा चढ़ेतीक आ पूर्व गे डा पुलु ताइक्तीकेम ताइक्चा माल्नीम।

१७ मेकोमी मेको कली मचेक्थु, फ्रां आस दाते रे चेत्चा माल्ब। मिनू चढ़ेबमी चढ़ेतीक डा मी तार डा शीम मेको चोचा माल्ब। मेको परमप्रभु यावे कली आ दाक्शो ब्रोव्रशो रिना पाइश्शो मीम चोशा चढ़ेतीके बाक्ब।

अन्न चढ़ेतीक  
लेवी ६:७-११

२ मिनू सुइ मुरुमी परमप्रभु यावे कली अन्न चढ़ेचा थुं पाप्तु हना, मेको अन्न चढ़ेतीक थम रिम्शो फस बाक्चा माल्ब। मिनू मेकोमी मेकेर तेल लुक्शा, धूप सुप्चा माल्नीम। *लेवी ७:१०; गन्ती १५:४* २ मिनू मेकोमी मेको चढ़ेब हारून आ तौ आन बाक्तीके चाक्चा माल्ब। मिनू चढ़ेबमी मेको तेल नु धूप ब्वाइश्शो रिम्शो फस मुठी का हुइश्शा, मीम चोचा माल्ब। मिनू मेको परमप्रभु यावे कली आ दाक्शो ब्रोव्रशो रिना पाइश्शो मीम चोशा चढ़ेतीके बाक्ब। ३ मेको अन्न चढ़ेशो रे लीशो चहिं हारून नु आ तौ आन के दुम्ब। मेको परमप्रभु यावे कली मीम चोशा चढ़ेतीक डा नेल्ल क्येडा चोव्रखो चोशा चढ़ेतीक बाक्ब। *लेवी ६:२२*

४ अन्न चढ़ेतीक चाक्चा थुं पाम्तेक्म हना, चोशा शोब्ले चाक्चा माल्नीम। मेको शोब्ले रिम्शो फस के, तेलमी निशा बोरब ओख्ती मसुप्थु चोचा माल्नीम। बटुक तेलमी निशा बोरब ओख्ती मसुप्थो दुम्चा माल्नीम। तेलम मनिशो बाक्त् हना, शोब्ले कली तेल खेक्शो बाक्चा माल्ब। *लेवी ७:९* ५ मिनू इन चढ़ेतीक अन्न बाक्त् हना, तेल ब्वाइश्शो बोरब ओख्ती मसुप्थो रिम्शो फस बाक्चा माल्ब। ६ मेको आइक्च आइक्च सेल्शा, तेल लुक्चा माल्ब। मेको अन्न चढ़ेतीक बाक्ब। ७ इन चढ़ेतीक दिउरेम क्येशो अन्न चढ़ेतीक बाक्त् हना, मेको तेलम क्येशो रिम्शो फस के दुम्चा माल्ब। ८ मोपा चोशा क्येशो अन्न चढ़ेतीक परमप्रभु यावे आ बाक्तीक लाइक्चा माल्नीम। मिनू मेको चढ़ेब आन बाक्तीक चाक्मे नोले चढ़ेबमी मेको चढ़ेतीक आ नेक्था चाक्चा माल्ब। ९ मिनू चढ़ेबमी मेको अन्न चढ़ेतीक रे मुठी का हुइश्शा, मेको चढ़ेतीक डा मीम चोचा माल्ब। मेको परमप्रभु यावे कली आ दाक्शो ब्रोव्रशो रिना पाइश्शो मीम चोशा चढ़ेतीके बाक्ब। १० मेको अन्न चढ़ेतीके आ लीशो चहिं हारून नु आ तौ आन के दुम्ब। मेको परमप्रभु यावे कली मीम चोशा चढ़ेतीक डा नेल्ल क्येडा चोव्रखो चोशा चढ़ेतीक बाक्ब।

११ गेपुकीमी परमप्रभु यावे कली अन्न चढ़ेतीकेमी गेनायो बोरब ओख्ती सुप्चा मद्रुम्ब। परमप्रभु यावे कली मीम चोशा चढ़ेतीकेमी बोरब ओख्ती नु खुदो गेनायो चोचा मद्रुम्ब। १२ खुदो नु बोरब ओख्ती सुप्थो चढ़ेतीक लाइश्शा परमप्रभु यावे कली चढ़ेने चाप्नीनी। तन्न मेको कली चढ़ेतीक मीम हुम्चा मद्रुम्ब। *गन्ती १८:१२-१३; २इतिहास ३१:५* १३ गेपुकीमी इन अन्न चढ़ेतीक नेल्ल हिक्सी सुप्शा, हिक्सी डाम्शो सेलीन। इन परमप्रभु आ कबल डा अन्न

चढेतीकेमी हिक्सी मडांशो मदुम्ब। इन चढेतीक नेल्लेमी हिक्सी सुष्पो चढेचा माल्नीनी। *गन्ती १८:१९; २इतिहास १३:५*

14 परमप्रभु यावे कली डोंइती मीशो अन्न चढेचा थुं पाइतीनी हना, इन डोंइती मीशो नक बाला आन अन्न मीम क्रोइश्शा चढेन। *ब्यवस्था २६:२-११*  
15 मेको तारी तेल लुक्शा, धूप वोइक्वा माल्ब। मेको अन्न चढेतीक बाक्ब।  
16 मिनु चढेबमी मेको तेल लुक्शा, धूप वोइश्शो रे मुठी का हुइश्शा, मीम चोचा माल्ब। मेको परमप्रभु यावे कली मीम चोशा चढेतीक बाक्ब।

दुशा बाक्वा आ पर्वम चढेतीक  
लेवी ७:११-२१, २८-३४

3 सुइ आन चढेतीके दुशा बाक्वा आ पर्वम बाक्त हना, मेकोमी बी ब्यफ रे का चढेब हना, परमप्रभु यावे आ डोंइती मारेइ मदुम्बो थम रिम्शो बी कि ब्यफ चढेचा माल्ब। 2 मेकोमी आ गुइ आ चढेतीक बस्तु आ पिया तार वोइक्वा माल्ब। मिनु गुम्तीक ताम्बु आ ओव्रतीक आ डोंइती मेको कली क्योरशा साइक्वा माल्ब। मिनु चढेब हारून आ तौपुकीमी मेको आ हुश लाइश्शा चढेतीक आ एर ओंथ ब्रुइक्वा माल्नीम। 3 मेकोमी दुशा बाक्वा आ पर्वम परमप्रभु यावे कली मीम चोशा चढेतीक चढेचा माल्ब। गा क्यी आ तार डा नु मेको कली गिल्शो बोंसो नेल्ल चढेचा माल्ब। 4 आ चिच निम्फा नु मेको आ तार नु आ क्रातोम बाक्शो बोंसो, नु आइदीम क्येष्पो बोंसो नेल्ल गुंइचा माल्नीम। 5 मिनु हारून आ तौपुकीमी मेको नेल्ल कली चढेतीके डा मी तार डा शीम वोइश्शा, चोचा माल्नीम। मेको परमप्रभु यावे कली आ दाक्शो ब्रोव्रशो रिना पाइश्शो मीम चोशा चढेतीक बाक्ब।

6 मेकोमी आ दुशा बाक्वा आ पर्वम परमप्रभु यावे कली चढेतीके क्यारश भेडा रे का चढेब हना, मेकोमी मारेइ मदुम्बो थम रिम्शो क्यारश भेडा बाक्त हना यो, बोका सांड बाक्त हना यो, चढेचा माल्ब। 7 मेको आ चढेतीक भेडा का बाक्त हना, मेको परमप्रभु यावे आ डोंइती चाक्वा माल्ब। 8 मेकोमी आ गुइ आ चढेतीक भेडा आ पिया तार वोइक्वा माल्ब। मिनु गुम्तीक ताम्बु आ ओव्रतीक आ डोंइती मेको कली क्योरशा साइक्वा माल्ब। मिनु चढेब हारून आ तौपुकीमी मेको आ हुश लाइश्शा चढेतीक आ एर ओंथ ब्रुइक्वा माल्नीम। 9 मेकोमी दुशा बाक्तीक आ पर्वम चढेतीक भेडा आ बोंसो परमप्रभु यावे कली मीम चोशा चढेचा माल्ब। मेको बोंसो पाइश्शो मीलु नु क्रातो आ नेक्था रे नेल्ल गुंइचा माल्नीम। गा क्यी आ तार डा नु मेको कली गिल्शो बोंसो नेल्ल चढेचा माल्नीम। 10 आ चिच निम्फा, मेको आ तार डा क्रातो डा बोंसो नेल्ल नु आ आइदीम क्येष्पो बोंसो नेल्ल गुंइचा माल्नीम। 11 मिनु चढेबमी मेको परमप्रभु यावे कली मीम चोशा जचा थोव्रक चढेतीक चढेचा माल्नीम।

12 मिनु दुशा बाक्वा आ पर्वम परमप्रभु यावे कली चढेतीक क्यारश का बाक्त हना, मेकोमी मेको परमप्रभु यावे आ डोंइती चाक्वा माल्ब।

13 मेकोमी आ गुइ मेको क्यारश आ पिया तारी वोइक्वा माल्ब। मिनु मेको कली गुम्तीक ताम्बु आ डोंइती क्योरशा साइक्वा माल्ब। मिनु हारून आ तौपुकीमी मेको आ हुश चढेतीक आ एर ओंथ ब्रुइक्वा माल्नीम। 14 मिनु मेकोमी मेको आ चढेतीके परमप्रभु यावे कली मीम चोशा चढेचा माल्ब। गा क्यी सुम्शो नु गिल्शो बोंसो नेल्ले, 15 आ चिच निम्फा, मेको आ तार डा क्रातो डा बोंसो नेल्ले नु आ आइदीम क्येष्पो बोंसो नेल्ल गुंइचा माल्नीम। 16 मिनु चढेबमी ब्रोव्रशो रिना पाइश्शो जचा थोव्रक मेको मीम चोशा चढेतीकेमी चढेचा माल्ब। बोंसो नेल्ले परमप्रभु यावे के बाक्ब। 17 मिनु गेपुकीमी बोंसो नु हुश मब्बने। इन नोले डा पाला नेल्ल आन कली गेपुकी ते बाक्तीनी हना यो, गेना हना यो लीब अरेतीक बाक्ब' दे इस्राएली आन कली देनो" दे परमप्रभु यावेमी मोसा कली देंत। *लेवी ७:२३, २७; लेवी १७:१०-१४; उत्पत्ती ९:४; ब्यवस्था १२:१६, २३; प्रेरित १५:२०-२९*

पाप पशो आ पर्वम चढेतीक

4 मिनु परमप्रभु यावेमी मोसा कली 2 "गे इस्राएली आन कली 'परमप्रभु यावेमी मपचा, दे शेंशो सुइ मुरुमी मतुइक्थु पाप पाप्तु हना, 3 मिनु तेल लुक्शो चढेबमी पाप पा, मुर आन कली दोस ताइब सेल्लु

हना, मेकोमी आ पशो पाप आ पर्वम मारेइ मदुम्बो थम रिम्शो ब्यफ का परमप्रभु यावे आ डोंइती पाप पशो आ पर्वम चढेचा माल्ब। 4 मेकोमी मेको ब्यफ कली गुम्तीक ताम्बु आ ओव्रतीक आ नेक्था परमप्रभु यावे आ डोंइती चाक्वा माल्ब। मेकोमी आ गुइ मेको ब्यफ आ पिया तारी वोइक्वा माल्ब। मिनु मेको ब्यफ कली परमप्रभु यावे आ डोंइती साइक्वा माल्ब। 5 मिनु मेको तेल लुक्शो चढेबमी ब्यफ आ हुश इक्का हुइश्शा गुम्तीक ताम्बुमी चाक्वा माल्नीम। 6 मिनु चढेबमी आ ब्रेचो हुशेम खुम्शा, मेको हुश परमप्रभु यावे आ ताम्बु आ आगा डा चोव्रखो कोठा आ बारेशो वाम आ नेक्था परमप्रभु यावे आ डोंइती ७ खेयप ब्रुइक्वा माल्ब। *लेवी ९:९* 7 मिनु नोले चढेबमी मेको हुश गुम्तीक ताम्बु आ आगामी बाक्शो धूप चढेतीके आ ग्रोव्रपुकीमी खेक्वा माल्ब। मेको ब्रोव्रशो रिना पाइश्शो धूप परमप्रभु यावे आ डोंइती चढेतीके बाक्ब। मिनु लीशो हुश नेल्ले गुम्तीक ताम्बु आ ओव्रतीक डा चोशा चढेतीक आ पुंम मोइक्वा माल्ब। *प्रस्थान ३०:१, ६; प्रस्थान ४०:६* 8 मेकोमी पाप आ पर्वम चढेशो ब्यफ आ बोंसो नेल्ल शोल्चा माल्ब। गा क्यी आ तार डा नु मेको कली गिल्शो बोंसो, 9 आ चिच निम्फा, मेको आ क्रातो तार डा बोंसो नेल्ले नु आ आइदीम क्येष्पो बोंसो नेल्ल गुंइचा माल्नीम। 10 दुशा बाक्वा आ पर्वम चढेशो ब्यफ आ बोंसो गुंइशो खोदेंशो पा शोल्चा माल्ब। मिनु चढेबमी मेको मीम चोशा चढेतीकेमी चढेचा माल्ब। *लेवी ८:१७* 11 तन्न ब्यफ आ कुशुल, मेको आ श्ये नेल्ल, मेको आ पिया, खोइली नु मेको आ गा क्यी गोबर सुन्दा, 12 ब्यफ आ लीशो नेल्ले मुर बाक्तीके रे डोन चोव्रखो पुलु ताइक्तीकेमी लाइश्शा, शी तार वोइश्शा चोचा माल्नीम। *लेवी ६:४*

13 इस्राएल डा मुर नेल्लेमी मतुइक्थु पाप पशो बाक्तेक्म हना, परमप्रभु यावेमी मपचा दे शेंशो मारेइ पशो बाक्तेक्म हना, मेको पाप मेको मुर आन दातेमी खुइश्शो बाक्त हना यो, मेकोपुकी दोस ताइब दुम्नीम। *गन्ती १५:२२-२६* 14 मिनु मेको आन पशो पाप गूमेनु, मेको इस्राएली नेल्लेमी पाप आ पर्वम चढेतीके ब्यफ चाक्वा गुम्तीक ताम्बु आ डोंइती जाक्वा माल्नीम। 15 मिनु इस्राएल डा खाल्पा नेल्लेमी परमप्रभु यावे आ डोंइती मेको आन गुइ ब्यफ आ पिया तारी वोइक्वा माल्नीम। मिनु मेको ब्यफ परमप्रभु यावे आ डोंइती साइक्वा माल्नीम। 16 मिनु नोले तेल लुक्शो चढेबमी मेको ब्यफ आ हुश इक्का गुम्तीक ताम्बु आगा चाक्वा माल्नीम। 17 मिनु चढेबमी मेको आ ब्रेचो हुशेमी खुम्शा, परमप्रभु यावे आ डोंइती बारेशो वा आ पुंमी ७ खेयप ब्रुइक्वा माल्ब। 18 मिनु नोले मेकोमी गुम्तीक ताम्बु आगाम बाक्शो धूप चढेतीक आ ग्रोव्रपुकीम परमप्रभु यावे आ डोंइती खेक्वा माल्ब। मिनु लीशो हुश नेल्ले गुम्तीक ताम्बु आ ओव्रतीके आ डोंइती बाक्शो चोशा चढेतीक आ पुंम मोइक्वा माल्ब। 19 मेकोमी मेको आ बोंसो नेल्ल शोल्शा, चढेतीकेम चोचा माल्ब। 20 मेकोमी पाप आ पर्वम चढेशो ब्यफ कली दोदेंशो पामे, मेको ब्यफ कली यो मोदेंशोन पचा माल्ब। मोपा चढेबमी मेको आन पर्वम पाप क्याम्तीक गेय पाइब। मिनु मेकोपुकीम माफ ताइनीम। 21 मेकोमी मेको ब्यफ कली मुर बाक्तीके रे डोन गुंइशा लाइक्वा माल्ब। डोंइती डा ब्यफ चोशो खोदेंशो पा चोचा माल्ब। मेको इस्राएली आन पाप आ पर्वम चढेशो बाक्ब। *लेवी ४:११-१२*

22 मिनु सासन पाइब कामी मतुइक्थु, परमप्रभु यावेमी मपचा, दे शेंशो पाप पाप्तु हना, मेको दोस ताइब दुम्ब। 23 मिनु मेको आ पशो पाप तुइक्तमे नोले, मेकोमी मारेइ मदुम्बो थम रिम्शो बोका का चाक्वा माल्ब। 24 मिनु मेकोमी आ गुइ मेको बोका आ पिया तार वोइक्वा माल्ब। मिनु तेकेर परमप्रभु यावे आ डोंइती चोशा चढेतीक साइक्नीमी, मेकेर रेन मेको साइक्वा माल्ब। मेको पाप आ पर्वम चढेतीके बाक्ब। 25 मिनु चढेबमी आ ब्रेचो हुशेमी खुम्शा, चोशा चढेतीक आ ग्रोव्रपुकीम खेक्वा माल्ब। मेको लीशो हुश चोशा चढेतीक आ पुंम मोइक्वा माल्ब। 26 मेको आ बोंसो नेल्ले चढेतीक आ तार चोचा माल्ब। मेको दुशा बाक्तीक आ पर्वम चढेशो बोंसो खोदेंशो पा चढेतीकेमी चोचा माल्ब। मोपा चढेबमी मेको आ पाप आ पर्वम पाप क्याम्तीक गेय पाइब। मिनु मेको माफ ताइब।

27 मिनु मुर आन दाते डा कामी मतुइक्थु पाप पाप्तु हना, परमप्रभु यावेमी मपचा, दे शेंशो पाप्तु हना, मेको दोस ताइब दुम्ब। 28 मिनु मेको आ पशो पाप तुइक्तमे नोले, मेकोमी आ पशो पाप आ पर्वम चढेचा कली मारेइ मदुम्बो थम रिम्शो क्यारश का चढेचा कली चाक्वा माल्ब। *गन्ती १५:२७-*

२८<sup>29</sup> मिनू मेकोमी आ गुड मेको पाप आ पर्बम चढेतीक तार वोडक्चा माल्ब। मिनू मेको पाप आ पर्बम चढेतीके कली मेको चोशा चढेतीक आ नेक्था साइक्चा माल्ब।<sup>30</sup> मिनू चढेबमी आ ब्रेज्चो हुशमी खुम्शा, चोशा चढेतीक आ ग्रोत्रपुकीम खेक्चा माल्ब। मेको लीशो हुश चोशा चढेतीक आ पुंम मोडक्चा माल्ब।<sup>31</sup> मेकोमी आ बोंसो नेल्ल दुशा बाक्चा आ पर्बम चढेशो आ बोंसो खोदेंशो पा शोल्चा माल्ब। मिनू चढेबमी मेको चढेतीकेमी चोशा परमप्रभु यावे आ दाक्शो ब्रोत्रशो रिना पाइक्चा कली चोचा माल्ब। मोपा चढेबमी मेको आ पाप आ पर्बम पाप क्याम्तीक गेय पाइब। मिनू मेको माफ ताइब। *लेवी ३:१४-१५*

<sup>32</sup> मेकोमी आ पाप आ पर्बम चढेचा कली भेडा चाक्चु हना, मारेड मद्रुम्शो थम रिम्शो भेडा चाक्चा माल्नीम।<sup>33</sup> मिनू मेकोमी आ गुड मेको पाप आ पर्बम चढेतीक तार वोडक्चा माल्ब। मिनू तेकर चोशा चढेतीक साइक्नीमी, मेकेर मेको पाप आ पर्बम चढेतीके साइक्चा माल्ब।<sup>34</sup> मिनू चढेबमी आ ब्रेज्चो हुशमी खुम्शा, चोशा चढेतीक आ ग्रोत्रपुकीम खेक्चा माल्ब। मेको लीशो हुश चोशा चढेतीक आ पुंम मोडक्चा माल्ब।<sup>35</sup> मेकोमी आ बोंसो नेल्ल दुशा बाक्चा आ पर्बम चढेशो आ बोंसो खोदेंशो पा शोल्चा माल्ब। मिनू चढेबमी मेको चढेतीकेमी अरु चोशा चढेतीक नु परमप्रभु यावे कली चोचा माल्ब। मोपा चढेबमी मेको आ पशो पाप आ पर्बम पाप क्याम्तीक गेय पाइब। मिनू मेको माफ ताइब।

### पाप आ पर्बम चढेतीक

**5** मिनू मुर कामी मार मार तशा तुड्शशा यो, सांकळी दुम्चा कली ब्रेत्मेनु, सांकळी दुम्चा कली मजाक्चा, मेकोमी आ तशो तुड्शशो मदेंत हना, मेको आ पर्बम दोस ताइब दुम्ब। *न्यायाधीस १७:२; हितोपदेस २९:२४*<sup>2</sup> मिनू सुडमी ग्रांग्रा दिशो थोत्रक, बेक्शो ब्वाकी डा जन्तु, बेक्शो बस्तु भाव, बेक्शो ग्रांग्रा दिशो आइक्च ग्रेक्शा गाक्ब जन्तु थिप्टु हना, मेकोमी मतुडक्ताक्च हना यो, मेको ग्रांग्रा दिशो दुम्शो बाक्ब। मिनू दोस ताइब दुम्शो बाक्ब।<sup>3</sup> मिनू मेकोमी मुर आन ग्रांग्रा दिशो थोत्रक थिप्टु हना, तेकोड मुर आन ग्रांग्रा दिशो सेल्शो थोत्रक थिप्टु हना, मेकोम मेको मतुडक्ताक्च हना यो, मेको दोस ताइब दुम्ब। *गन्ती १९:१३, २०*<sup>4</sup> मिनू सुमी मारेड रिम्शो मरिम्शो ममिम्शु कसम जाप्टु हना, मारेड मतुडक्च कसम जाप्टु हना, मिनू मेको रे मेको लोत्र खुड्शशो बाक्त हना यो, मेकोमी तुडक्ता नोले मेको दोस ताइब दुम्ब।<sup>5</sup> मिनू मेको मुर आ पशो पाप तुडक्ता नोले, मेकोमी आ पशो पाप शोत्रचा माल्ब। *लेवी १६:२१; गन्ती ५:७; यहोसु ७:२०*<sup>6</sup> मेकोमी परमप्रभु यावे आ डोंइती आ पशो पाप आ पर्बम चढेचा कली आ बगाल रे भेडा बाक्त हना यो, क्यारश बाक्त हना यो, का चाक्चा माल्ब। मिनू चढेबमी मेको आ पशो पाप आ पर्बम पाप क्याम्तीक गेय पचा माल्ब।<sup>7</sup> तन्न मेकोमी भेडा चाक्चे मचाप्टु हना, मेको आ पशो पाप क्याम्तीक गेय पचा कली ढुकुर निक्शी कि परवा निक्शी परमप्रभु यावे आ डोंइती चाक्चा माल्ब। मेको का पाप आ पर्बम चढेचा कली नु का चोशा चढेचा कली चाक्चा माल्ब।<sup>8</sup> मेकोमी मेको चढेब आन बाक्तीक चाक्चा माल्नीम। मिनू चढेबमी का कली पाप आ पर्बम डोंइती चढेचा माल्ब। मिनू मेको कली आ शुर रोप्या माल्ब। तन्न मेको कली प्रोडक्चा मद्रुम्ब।<sup>9</sup> मिनू मेको चढेबमी चढेशो परवा आ हुश चढेतीक आ एर ओंथ ब्रुडक्चा माल्ब। मिनू लीशो हुश चढेतीक आ पुंम चिरचा माल्ब।<sup>10</sup> मिनू चढेबमी अर्को परवा चहिं परमप्रभु यावेमी डोंइती देंशो खोदेंशो पा चोशा चढेतीक चढेचा माल्ब। मोपा मेको चढेबमी मेको आ पाप आ पर्बम पाप क्याम्तीक गेय पचा माल्ब। मिनू मेकोम माफ ताइब।

<sup>11</sup> तन्न ढुकुर निक्शी नु परवा निक्शी यो चाक्चे मचाप्टु हना, मेकोमी मार पाप पशो बाक्चे, मेको पाप आ पर्बम एफाह का डा १० भाग थम रिम्शो फस चाक्चा माल्ब। मेकोमी मेको फस तार तेल लुक्चा नु धूप वोडक्चा मद्रुम्ब। मारेदे हना मेको पाप आ पर्बम चढेतीके बाक्ब। *एफाह पुक्तीके का बाक्ब। एफाह का २२ लिटर रिक्ब। मेको डा १० भाग २ लिटर नु इक्का खोड खोदेंशो बाक्ब।*<sup>12</sup> मेकोमी मेको चढेब आन बाक्तीक चाक्चा माल्ब। मिनू चढेबमी मेको मिम्चा कली मुठी का हुड्शशा, परमप्रभु यावे कली

मीम चोशा चढेतीकेम अरु नु चोचा माल्ब। मेको पाप आ पर्बम चढेतीक बाक्ब।<sup>13</sup> मोपा मेको चढेबमी मेको आ पाप आ पर्बम पाप क्याम्तीक गेय पाइब। मिनू मेकोमी माफ ताइब। मेको रे लीशो चहिं अन्न चढेशो खोदेंशो पा चढेब आन के दुम्ब' दे इस्राएली आन कली देनो" दे परमप्रभु यावेमी देंत। *लेवी २:३*

### गारचा आ पर्बम चढेतीक लेवी ७:१-१०

<sup>14</sup> मिनू लेंशा परमप्रभु यावेमी मोसा कली<sup>15</sup> "सुड मुरुमी प्रेंशा, परमप्रभु यावे आ देंशो मटिथु, पाप पाप्टु हना, मेको आ बगाल रे मारेड मद्रुम्शो थम रिम्शो ताम्बु डा चांदी के शेकेलम फाइक्चा कली सांड का मेको पाप आ पर्बम चढेचा कली परमप्रभु यावे आ डोंइती चाक्चा माल्ब। मेको गारचा आ पर्बम चढेतीक बाक्ब। *शेकेल का ११.५ ग्राम बाक्ब। चांदी नु सुन के क्येट बाक्त।*<sup>16</sup> मेकोमी गारचा कली प्रेंशो बाक्त हना, परमप्रभु यावे कली गेतीकेम ५ भाग तेम्चा माल्ब। मिनू मेको चढेब कली गेचा माल्ब। मिनू चढेबम मेको पाप गारचा आ पर्बम चढेशो सांड लाइशशा पाप क्याम्तीक गेय पचा माल्ब। मिनू मेको माफ ताइब दुम्ब। *लेवी ५:२३-२४; लेवी २२:१४; लेवी २७:१३;*

<sup>17</sup> सुड मुरुमी परमप्रभु यावेमी मपचा, दे शेंशो पाप्टु हना, मेकोमी मेको मतुडक्ताक्च हना यो, मेको दोस ताइब दुम्शो बाक्ब। मिनू मेको सजाड ताइब दुम्ब।<sup>18</sup> मेकोमी चढेब आन बाक्तीकेम मारेड मद्रुम्शो थम रिम्शो ठीक क्येट लाइब सांड का आ बगाल रे गारचा आ पर्बम चढेतीक चढेचा कली चाक्चा माल्ब। मिनू चढेबमी मेको आ मतुडक्चु पशो पाप आ पर्बम पाप क्याम्तीक गेय पचा माल्ब। मिनू मेकोम माफ ताइब।<sup>19</sup> मेको गारतीक आ पर्बम चढेतीक बाक्ब। मेको परमप्रभु यावे आ डोंइती थमा पा दोस ताइब दुम्शो बाक्ब" दे मोसामी मुर आन कली देंत।

### चढेब आन पचा माल्शो

**6** मिनू लेंशा परमप्रभु यावेमी मोसा कली<sup>2</sup> "सुड मुरुमी परमप्रभु यावे कली मटिथु, मेको आ डोंइती आ नेक्था डा मुर नु जाकटी वोड्शशो थोत्रक आ पर्बम जोल पाप्टु हना, सुडम गेनुड, दे कबल पा यो मगेप्टु हना, कि मेको थोत्रक रोडक्ताक्च हना, कि जोल पा आ नेक्था डा मुर आ मारेड थोत्रक आंम के सेल्लु हना, *गन्ती ५:६-८*<sup>3</sup> आ नेक्था डा मुर आन मार मार रोडक्ताक्च हना, जाम्शो थोत्रक थिश्शा यो, मथिदु, दे जोल पाप्टु हना, जोल पा कसम जाप्टु हना, मेकोमी पाप पशो बाक्ब।<sup>4</sup> मेको मोपा पाप पा दोस ताइब दुम्ब। मिनू मेकोमी आ रोड्शशो, आ खुड पशो, आ ताक्शो थोत्रक मलेत्ताक्च हना, आ थिश्शो आ पर्बम जोल पाप्टु हना, *इजीकीएल ३३:१५*<sup>5</sup> तेको थोत्रक आ पर्बम जोल पा कसम जशो बाक्चे, मेकोमी मेको थोत्रक नेल्लेमी ५ भाग तेम्शा, आ होत्रप कली लेशशा गेचा माल्ब। मेकोमी दोस आ पर्बम चढेतीक नाक्ती मेको सु के बाक्चे मेको आ नेक्था डा मुर कली लेशशा गेचा माल्ब।<sup>6</sup> मिनू मेकोमी परमप्रभु यावे आ डोंइती ठीक पा हिक्शो क्येट कि आ बगाल रे मारेड मद्रुम्शो थम रिम्शो सांड का आ मरिम्शो पशो आ पर्बम चढेब आ नेक्था परमप्रभु यावे आ बाक्तीकेमी चढेचा कली चाक्चा माल्ब।<sup>7</sup> मिनू मेको चढेबमी मेको आ पर्बम परमप्रभु यावे आ डोंइती पाप क्याम्तीक गेय पचा माल्ब। मिनू मेकोमी मार आ पर्बम दोस तशो बाक्चे, मेकोम माफ ताइब" देंत।

### चोशा चढेतीक आ पर्बम अरेशो

<sup>8</sup> मिनू परमप्रभु यावेमी मोसा कली<sup>9</sup> "गे हारून नु आ तौ आन कली चोशा चढेचा आ पर्बम अरेमी। मेको चोशा चढेतीक नाक्दो रे सुनी सम्म चढेतीके शी तार बाक्चा माल्ब। मिनू चढेतीक डा मी यो ब्रस डा ब्रस बाक्चा माल्ब।<sup>10</sup> मिनू चढेबमी आ सुती के आगा फेक्तीक वा नु सुती के फेक्तीके फेक्चा माल्ब। मिनू मेकोमी मीम दाक्शो चोशा चढेशो आ पुलु हुड्शशा चढेतीक आ नेक्था वोडक्चा माल्ब। *प्रस्थान २८:४२*<sup>11</sup> मिनू नोले मेकोमी आ फेक्शो वा पुड्शशा, अर्को वा फेक्शा, मेको पुलु ताम्बु रे गुंडशा चोत्रखो

पुलु ताइक्तीकेमी लाइश्शा ताइक्चा माल्ब। <sup>12</sup> चढेतीक डा मी चहिं ब्रस डा ब्रस बाक्चा माल्ब। मेको काप्चा मदुम्ब। मिनु सुनी कुस कुस चढेबमी मेकेर शी तेम्चा माल्ब। मिनु चोशा चढेतीके मीम दुशा बाक्तीक आ पर्वम चढेशो आ बॉसो चोचा माल्ब। <sup>13</sup> चढेतीक डा मी ब्रस डा ब्रस बाक्चा माल्ब। मेको गेनायो काप्चा मदुम्ब।

### अन्न चढेशो आ पर्वम अरेशो

<sup>14</sup> एको अन्न चढेतीक आ पर्वम अरेशो लोव्र बाक्ब। हारून आ तौपुकीमी परमप्रभु यावे आ डोंइती चढेतीक आ नेक्था चाक्चा माल्नीम। <sup>15</sup> मिनु मेकोपुकीम अन्न चढेतीके, तेल नु धूप आ तार वोइश्शो रिम्शो फस रे मुठी का लाइश्शा, मिम्चा कली परमप्रभु यावे कली आ दाक्शो ब्रोव्रशो रिना पाइश्शो चढेतीकेमी चोचा माल्नीम। <sup>16</sup> मिनु लीशो हारून नु आ तौपुकीम जचा माल्नीम। तन्न मेको चोव्रखो बाक्तीकेमी बोरब ओख्ती मसुप्धु, चोशा जचा माल्नीम। मेकोपुकीमी गुम्तीक ताम्बु आ लाडगाम बाक्शा, जचा माल्नीम। <sup>17</sup> मेकेर बोरब ओख्ती सुप्शा शोब्ले चोचा मदुम्ब। आं कली मीम चोशा चढेशो रे मेको आन कली आं गेशो भाग बाक्ब। मेको पाप आ पर्वम चढेतीके नु गारपाइक्चा आ पर्वम चढेतीके खोदेंशो मेको थम चोव्रखो बाक्ब। <sup>18</sup> हारून आ खिं डा वोंइश मुर नेल्लेमी गेना हना यो परमप्रभु यावे कली मीम चोशा चढेशो रे जचा माल्नीम। परमप्रभु यावे कली मीम चोशा चढेशो रे मेको आ खिं डा मुर नेल्ल आन कली गेशो आन भाग बाक्ब। मेको थीब नेल्ल चोव्रखो दुम्नीम” देंत।

<sup>19</sup> मिनु परमप्रभु यावेमी लेंशा मोसा कली <sup>20</sup> “हारून नु आ तौपुकीम तेल लुक्चा पुंइसे नाक्ती परमप्रभु यावे कली मार नु दोपा चढेचा माल्नीम देंशा हना, एफाह का डा १० भाग थम रिम्शो फस नाक्दो आधा नु सुनी आधा गेना हना यो चढेचा माल्नीम। एफाह पुक्तीके का बाक्ब। एफाह का २२ लिटर रिक्ब। मेको डा १० भाग २ लिटर नु इच्का खोइ ४ माना खोदेंशो बाक्ब। लेवी ७:३७; प्रस्थान २९:- <sup>21</sup> मेको शोब्ले तेलम चोचा माल्ब। गे मेको कली शुश तेलम चोशा, अन्न चढेतीके टुक्रा टुक्रा पा परमप्रभु यावे कली आ दाक्शो ब्रोव्रशो रिना पाइश्शो चढेतीके चढेचा माल्नीम। <sup>22</sup> मोपा हारून आ नोले आ तेल लुक्शो तौमी मोदेंशो पचा माल्ब। मेको गेना हना यो परमप्रभु यावे केन बाक्ब। मिनु मेको नेल्ल चोचा माल्ब। <sup>23</sup> मिनु चढेब आन अन्न चढेतीक नेल्ल चोचा माल्नीम। मेको जचा मदुम्ब” देंत।

### पाप क्याम्चा कली चढेतीके

<sup>24</sup> मिनु परमप्रभु यावेमी मोसा कली <sup>25</sup> “गे हारून नु आ तौ आन कली मार देंचा माल्नेवे देंशा हना ‘पाप क्याम्चा कली चढेतीक आ पर्वम अरेशो बाक्ब। पाप क्याम्चा कली चढेतीक परमप्रभु यावे आ डोंइती चोशा चढेतीक कली साइक्तीकेमी साइक्चा माल्ब। मेको थम चोव्रखो बाक्ब। लेवी ४:- <sup>26</sup> मेको पाप क्याम्चा कली चढेशो चढेबमी मेको रे ब्वचा माल्ब। मेकोपुकीमी गुम्तीक ताम्बु डा लाडगाम बाक्शा, ब्वचा माल्नीम। <sup>27</sup> मेको श्ये मारम थीबा, मेको यो चोव्रखो दुम्ब। मेको आ हुश वाम प्रेक्ताक्व हना, गेपुकीम मेको वा चोव्रखो बाक्तीकेमी मुरचा माल्नीनी। <sup>28</sup> मेको श्ये तेको खप के ग्योबुम लोप्नीमी, मेको ग्योब प्रोल्शा ताइक्चा माल्नीम। मेको कांसा के ग्योबुम लोप्शो बाक्त हना, मेको सिक्स ब्वाक्कुम शेक्चा माल्नीम। <sup>29</sup> मेको चढेब आन दाते डा वोंइश मुर नेल्लेमी मेको ब्वचा माल्नीम। मेको थम चोव्रखो बाक्ब। <sup>30</sup> तन्न तेको पाप क्याम्चा कली चढेतीके आ हुश पाप क्याम्तीक गेय पचा कली गुम्तीक ताम्बु आ आगाम चाक्नीमी, मेको ब्वचा मदुम्ब। मेको चोचा माल्नीम।

### गारचा आ पर्वम चढेशो

<sup>7</sup> गारचा आ पर्वम चढेतीक थम चोव्रखो बाक्ब। एको दोपा पचा माल्ब देंशा हना, लेवी ५:१४-२६ <sup>2</sup> चोशा चढेतीक तेकेर साइक्नीमी, मेकेरेन गारचा आ पर्वम चढेतीक साइक्चा माल्ब। मेको आ हुश, चढेतीक आ एर ऑथ ब्रुइक्चा माल्ब। <sup>3</sup> मेको आ बॉसो नेल्ले, बॉसो पाइश्शो मीलु, गा क्यी सुम्शो बॉसो, लेवी ३:९-१० <sup>4</sup> चिच निम्फा, मेको आ तार डा नु क्रातो

डा बॉसो, चिच सुन्दा आइदीम क्येप्शो बॉसो नेल्ल शोल्शा, चढेचा माल्ब। <sup>5</sup> चढेबमी परमप्रभु यावे कली मीम चोशा चढेचा माल्ब। मेको गारचा आ पर्वम चढेतीके बाक्ब। <sup>6</sup> मेको चढेब आन खिं डा वोंइश मुर नेल्लेमी मेको ब्वचा माल्नीम। मेको चोव्रखो बाक्तीके ब्वचा माल्नीम। मेको थम चोव्रखो बाक्ब।

<sup>7</sup> गारचा आ पर्वम चढेतीके पाप आ पर्वम चढेतीक खोदेंशो बाक्ब। पतीक गेय यो कान बाक्ब। मिनु तेको चढेबम मेको पाप क्याम्तीक गेय पवा, मेको मेको केन दुम्ब। <sup>8</sup> मिनु तेको चढेबमी मुर आन चाक्शो चोशा चढेतीक चढेबा, मेको चोशा चढेशो आ कुशुल यो मेको केन दुम्ब। लेवी १:६ <sup>9</sup> मिनु चुप्नुम चोशो, दिउरेमी क्येपशो नु तांवाम चोशो चढेशो नेल्ले मेको चढेब केन दुम्ब। लेवी २:४,५,७ <sup>10</sup> तन्न अरु अन्न चढेतीके तेलम ब्वाइश्शो नु म्ब्वाइश्शो नेल्ल हारून नु आ तौ आन कली योक्चा कली बाक्ब। लेवी २:१-३

### दुशा बाक्चा आ पर्वम चढेशो

<sup>11</sup> मिनु परमप्रभु यावे कली दुशा बाक्चा आ पर्वम चढेतीके दोपा चढेचा माल्ब, दे अरेशो बाक्ब देंशा हना, लेवी ३:- <sup>12</sup> सुइमी परमप्रभु यावे कली “गे रिम्शो पाइब बाक्नीनी” दे ठेयब सेल्शा चढेत्तु हना, मेकोमी तेलम निशो बोरब ओख्ती मसुप्धो बटुक, बोरब ओख्ती मसुप्धो तेल खेक्शो शोब्ले नु थम रिम्शो फस के सेल्शो तेल वोइश्शो शोब्ले चढेचा माल्नीम। लेवी १९:५-८; लेवी २२:२९-३० <sup>13</sup> मेकोमी “गे रिम्शो पाइब बाक्नीनी” दे ठेयब सेल्शा नु दुशा बाक्चा आ पर्वम चढेशो नु बोरब ओख्ती सुप्शो शोब्ले यो चढेचा माल्ब। <sup>14</sup> मेकोमी चढेशो शोब्ले नेल्ल रे का का पा परमप्रभु यावे कली क्युक्शा चढेचा माल्ब। दुशा बाक्चा आ पर्वम चढेतीके आ हुश तेको चढेबम ब्रुइक्बा, मेको केन दुम्ब। <sup>15</sup> “गे रिम्शो पाइब बाक्नीनी” दे ठेयब सेल्शा नु दुशा बाक्चा आ पर्वम चढेशो श्ये मेको चढेशो नाक्तीन नेक्चा माल्नीम। सुनी सम्म मारेइ हेंचा मदुम्ब। <sup>16</sup> मेको चढेशो कसम जशो आ पर्वम नु ग्येरशा चढेशो बाक्त हना, मेको चढेशो नाक्ती ब्वचा माल्नीम। आ लीशो आ दीसा ब्वचा दुम्ब। <sup>17</sup> आ नित्थ नाक्त सम्म लीशो चढेशो श्ये चहिं मीम चोचा माल्ब। <sup>18</sup> मेको दुशा बाक्तीक आ पर्वम चढेशो आ श्ये आ नित्थ नाक्त सम्म सुइम ब्वाप्तु हना, मेको काइ मदुम्ब। मेको मुरुमी यो मचढेशो खोदेंशो दुम्ब। मेको श्ये ब्वचा ग्रॉग्रा दिक्चा डा बाक्ब। मेको ब्वाइब मुर दोस ताइब।

<sup>19</sup> मारेइ ग्रॉग्रा दिशो थोव्रकम थिशो श्ये ब्वचा मदुम्ब। मेको चोचा माल्ब। तन्न सुइ चोव्रखो दुम्शो बाक्तेक्म हना, अरु श्ये ब्वने चाप्नीम। <sup>20</sup> तन्न सुइ ग्रॉग्रा दिशो दुम्शा, परमप्रभु यावे कली दुशा बाक्चा आ पर्वम चढेशो श्ये ब्वाप्तु हना, मेको आ खिं डा मुर रे तिल्चा पुंइसीब। <sup>21</sup> मिनु इन दातेमी सुमी मारेइ मारेइ ग्रॉग्रा दिशो थोव्रक थिशा, मुर आन ग्रॉग्रा दिशो, ग्रॉग्रा दिशो जन्तु कि मारेइ ग्रॉग्रा दिशो थिप्तु हना, नोले परमप्रभु यावे कली दुशा बाक्चा आ पर्वम चढेशो श्ये ब्वाप्तु हना, मेको आ खिं डा मुर रे तिल्चा पुंइसीब’ दे माइक्मी” दे परमप्रभु यावेमी मोसा कली देंत।

### बॉसो नु हुश ब्वचा मदुम्ब

<sup>22</sup> मिनु लेंशा परमप्रभु यावेमी मोसा कली <sup>23</sup> “गे इस्राएली आन कली ‘गेपुकीम ब्यफ, भेडा नु क्यारश आन बॉसो काइ मब्वने। लेवी ३:१७ <sup>24</sup> आंमा बेक्शो, मारेइमी साइश्शो बस्तु भाव आन बॉसो अर्को मारेइ गेयम चलने चाप्नीनी। तन्न गेपुकीमी मेको ब्वचा मदुम्ब। प्रस्थान २२:३० <sup>25</sup> मिनु इन दातेमी सुमी परमप्रभु यावे कली मीम चोशा चढेतीके आ बॉसो ब्वाइबा, मेको आ खिं डा मुर रे तिल्चा पुंइसीब। <sup>26</sup> गेपुकी ते बाक्तीनी हना यो, तेकोइ चिक्ब नु बी ब्यफ, क्यारश भेडा आन हुश ब्वचा मदुम्ब। <sup>27</sup> मिनु सुमी हुश ब्वाइबा, मेको आ खिं डा मुर रे तिल्चा पुंइसीब” माइक्मी” देंत।

### चढेब आन भाग

<sup>28</sup> मिनु परमप्रभु यावेमी मोसा कली <sup>29</sup> “गे इस्राएली आन कली ‘सुमी परमप्रभु यावे कली गे रिम्शो पाइब बाक्नीनी, दे ठेयब सेल्शा चढेतीक चाड सेल्बा, मेकोमी आ चढेशो रे परमप्रभु यावे आ बाक्तीकेम आंमान चाक्चा

माल्ब। 30 मेकोमी परमप्रभु यावे कली मीम चोशा चढेचा कली बॉसो नु कुथु चाक्वा माल्ब। मिनु मेको कुथु परमप्रभु यावे कली क्युक्शा चढेतीक चढेचा माल्ब। प्रस्थान २९:२४ 31 मिनु चढेबमी मेको बॉसो कली मीम चोचा माल्ब। तन्न मेको कुथु हारून नु आ तौ आन के दुम्ब। 32 मिनु इन दुशा बाक्वा आ पर्वम चढेतीके रे आ ग्युरा फिला चढेब कली क्युक्शा चढेचा कली गेचा माल्नीनी। लेवी ९:२१ 33 हारून आ तौ तेकोम दुशा बाक्वा आ पर्वम चढेतीक चढेबा नु हुश ब्रुइक्वा, ग्युरा फिला मेको के दुम्ब। 34 मारदे हना गो इस्राएली आन “गे रिम्शो पाइब बाक्नीनी” दे ठेयब सेल्शा चढेशो कुथु नु ग्युरा फिला गेपुकी रे ताक्शा चढेब हारून नु मेको आ तौ आन कली गेना हना यो कली गेतामी’ दे माइक्मी।

35 हारून नु आ तौपुकी तेको नाक्तर रे परमप्रभु यावे कली चढेब दुम्मा, मेको नाक्ती रेन परमप्रभु यावे कली मीम चोशा चढेशो चढेतीक रे मेको आन भाग गेतामी। 36 तेको नाक्ती रे मेकोमी मेको आन कली तेल लुक्ता, मेको नाक्तर रेन मेको आन कली इस्राएलीपुकी रे ततीक भाग परमप्रभु यावेमी ‘मेको आन के बाक्ब’ देंशो बाक्ब। मेको आन कली गेना हना यो नेल्ल आन पाला सम्म आन भाग बाक्ब, देनो” देंत।

37 “मेको चोशा चढेतीके, अन्न चढेतीके, पाप आ पर्वम चढेतीके, गारचा आ पर्वम चढेतीके, नक गेय पचा आ पर्वम चढेतीके नु परमप्रभु यावे कली ‘गे रिम्शो पाइब बाक्नीनी’ दे ठेयब सेल्शा चढेतीक आ पर्वम पतीके बाक्ब। 38 मिनु परमप्रभु यावेमी मेको लोव मोसा कली सीनै डांडाम अरेशो बाक्त। मेको नाक्ती परमप्रभु यावेमी सीनै डा गोरशो रागीम इस्राएली आन कली आन चढेतीक आ बाक्तीक चाक्कीन” दे अरेशो बाक्ब।

हारून नु आ तौ चढेब दुम्शो

प्रस्थान २९:-

8 मिनु परमप्रभु यावेमी मोसा कली 2 “गे हारून नु आ तौ आन कली, चढेब आन फेक्तीक वा, आन कली लुक्वा कली तेल, पाप आ पर्वम चढेतीक ब्यफ, सांड निक्शी नु बोरब ओख्ती मसुधो शोब्ले चाक्को। प्रस्थान २८:३९-४३ 3 मुर नेल्ल आन कली गुम्तीक ताम्बु आ ओव्रतीकेम पुक्मी” देंत। 4 मिनु मोसामी परमप्रभु यावेमी दोदेशो पा अरेवा, मोदेशो पा पाप्तु। मिनु मुरपुकी गुम्तीक ताम्बु आ ओव्रतीकेम बुक्तेक्म। 5 मिनु मोसाम बुक्शो मुर आन कली “परमप्रभु यावेमी ‘पावो’ दे अरेशो लोव एकोन बाक्ब” देंत। 6 मिनु मोसामी हारून नु आ तौ आन कली चाक्शा चिक्ताक्मी। 7 मिनु मेकोमी हारून कली आगा वा फेक्ताक्व। मिनु किप्शुर किप्ताक्व। मिनु मेकोमी आ तार डा फेक्तीक फेक्ताक्व। मेकोमी क्रातो आ डोंइती क्युक्तीक वा क्युक्ताक्व। मिनु रिम्शो पा प्रोव्रशो बुटा आप्शो किप्शुर नु क्रातो डोंइती क्युक्तीक झोला मेको आ तार किप्ताक्व। 8 मिनु नोले मेकोमी हारून कली कुचुम रेल्तीक झोला रेल्ताक्व, मिनु मेको आगा “ऊरीम नु थुम्मीम” कुर पाप्तु। ऊरीम नु थुम्मीम कली छेडछेड नु निसाफ पतीके देंसीब। परमप्रभु यावे आ देंशो कोंइब बाक्ब। प्रस्थान २८:३० 9 मिनु मेको आ पियाम गुप्तीके गुप्ताक्व। मिनु सुन के मुशो कुप्फीम पांडतीके “परमप्रभु यावे कली ला” दे मेको आ डोंइती गे पांडताक्व। परमप्रभु यावेमी मोसा कली दोदेशो पा अरेवा, मोदेशो पा पाप्तु। प्रस्थान २८:३६-३८; लेवी ३९:३०

10 मेको नोले मोसामी लुक्तीक तेल चाक्शा परमप्रभु यावे आ बाक्तीके नु मेकेर बाक्शो मारेड मारेड आन कली ब्रुइश्शा, “परमप्रभु यावे केन बाक्ब” दे चोव्रखो सेल्लु। 11 मिनु मेकोमी तेल इक्का चढेतीकेम ७ खेयप ब्रुइक्ताक्व। मोपा चढेतीके, मेकेर बाक्शो चढेचा कली माल्तीक नेल्ले नु चिक्तीक ठेयब ग्योब नु आ नाइक्तीके, नेल्ल आन कली परमप्रभु यावे के सेल्चा कली तेल ब्रुइक्ताक्मी। 12 मिनु मेकोमी हारून आ पियाम लुक्तीक तेल लुक्शा, मेको कली परमप्रभु यावे कली ला गेय पाइब सेल्लु। 13 मिनु मोसामी हारून आ तौ आन कली चाक्पाइश्शा, आगा वा फेक्ताक्मी। मिनु किप्शुर किप्शा पियाम गुप्तीके गुप्ताक्मी। परमप्रभु यावेमी मोसा कली दोदेशो पा अरेवा, मोदेशो पा पाप्तु।

14 मिनु नोले मोसामी पाप आ पर्वम चढेतीक ब्यफ चाक्व। मिनु हारून नु आ तौपुकीम मेको पाप आ पर्वम चढेतीक ब्यफ आ पिया तारी आन गुड

वोइक्तेक्म। लेवी ४:१-१२ 15 मिनु मोसामी मेको ब्यफ कली साइक्व। मिनु मेकोमी मेको इक्का हुश लाइश्शा आ ब्रेचोमी चढेतीक एर ओंथ डा ग्रोव्रम खेक्शा, चढेतीक कली परमप्रभु यावे कली ला, चोव्रखो सेल्लु। मिनु लीशो हुश चहिं चढेतीक आ पुंम मोइक्व। मोपा मेको चढेतीक कली पाप क्याम्तीक गेय पचा, दे चोव्रखो सेल्लु। 16 मिनु मोसामी गा क्यी गिल्शो बॉसो नेल्ल, आइदी क्येप्शो बॉसो नु चिच निम्फा नु आ बॉसो चढेतीकेम चोप्तु। 17 मिनु ब्यफ, मेको आ कुशुल, आ श्ये नु गोबर मुर आ बाक्तीक क्येडा डोन मीम चोप्तु। परमप्रभु यावेमी मोसा कली दोदेशो पा अरेवा, मोदेशो पा पाप्तु।

18 मिनु नोले मोसामी चोशा चढेतीक सांड चाक्व। मिनु हारून नु आ तौपुकीमी आन गुड मेको सांड आ पिया तार वोइक्तेक्म। लेवी १:१०-१३ 19 मिनु मोसामी मेको सांड कली क्योरतु। मिनु मेकोमी आ हुश चढेतीक एर ओंथ ब्रुइक्ताक्व। 20 मिनु मोसामी मेको सांड कली टुक्रा टुक्रा पा चक्व। मेको आ पिया, चेक्शो श्ये नु बॉसो नेल्ल चोप्तु। 21 मेकोमी गा क्यी नु फिला मुरतु। मोपा मोसामी मेको सांड नेल्ल चढेतीकेमी चोप्तु। मेको परमप्रभु यावे कली ब्रोव्रशो रिना पाइश्शो मीम चोशा चढेशो बाक्त। मिनु परमप्रभु यावेमी मोसा कली दोदेशो पा अरेवा, मोदेशो पा पाप्तु।

22 मिनु नोले मोसामी अर्को चढेतीक सांड चाक्व। मेको गेय गोचा कली चढेतीक डा सांड बाक्त। मिनु हारून नु आ तौपुकीम आन गुड मेको सांड आ पिया तार वोइक्तेक्म। 23 मिनु मोसामी मेको सांड कली क्योरतु। मिनु मेकोमी मेको आ हुश हारून आ ग्युरा नोफा आ फेनेम, आ ग्युरा गुड डा बोंगे नु आ ग्युरा खोइल डा बोंगेमी खेक्ताक्व। 24 मिनु मोसामी हारून आ तौ आन कली चाक्पाइक्व। मिनु मेकोमी मेको आन ग्युरा नोफा आन फेनेम, आन ग्युरा गुड डा बोंगे नु आन ग्युरा खोइल डा बोंगेमी खेक्ताक्व। मिनु मोसामी मेको हुश कली चढेतीके आ एर ओंथ ब्रुइक्ताक्व। लेवी १७:११ 25 मिनु मेकोमी मेको सांड आ बॉसो, मेको बॉसो पाइश्शो मीलु, गा क्यीम गिल्शो बॉसो, आइदीम क्येप्शो बॉसो, चिच निम्फा नु मेक डा बॉसो नु ग्युरा फिला लाइक्व। 26 मिनु परमप्रभु यावे आ डोंइती बाक्शो बोरब ओख्ती मसुधो मार मार आ डालो रे बोरब ओख्ती मसुधो हिश्शो शोब्ले का, तेलम ख्रुम्शो शोब्ले का नु बाबर का गुंइशा, मेको बॉसो नु ग्युरा फिला तार वोइक्व। 27 मिनु मेको नेल्ल लाइश्शा हारून नु आ तौ आन गुडमी वोइक्व। मिनु परमप्रभु यावे आ डोंइती हिम्शा चढेतीके चढेप्तु। 28 मिनु मोसामी मेको आन गुड रे लाइश्शा, चोशा चढेशो आ तारी चोप्तु। मेको गेय गोचा कली चढेतीके परमप्रभु यावे कली ब्रोव्रशो रिना पाइश्शो मीम चोशा चढेतीक बाक्त।

29 मिनु मोसामी मेको सांड आ कुथु लाइश्शा, परमप्रभु यावे आ डोंइती हिम्शा चढेतीके चढेप्तु। मेको गेय गोचा कली चढेशो सांड आ श्ये मोसा आ भाग दुम्त। परमप्रभु यावेमी मोसा कली दोदेशो पा अरेवा, मोदेशो पा पाप्तु।

30 मिनु मोसामी लुक्तीक तेल नु चढेतीकेम वोइश्शो हुश लाइश्शा, हारून नु आ तौ आन फेक्शो वाम ब्रुइक्ताक्व। मोपा मोसामी हारून नु मेको आ फेक्शो वा, आ तौपुकी नु मेको आन फेक्शो वा नेल्ल परमप्रभु यावे कली ला गेय पाइब, दे चोव्रखो सेल्लु।

31 मिनु मोसाम हारून नु आ तौ आन कली “गे मेको श्ये कली गुम्तीक ताम्बु आ ओव्रतीकेम लोपीन। मिनु गेय गोचा कली चढेशो डालो डा शोब्ले नु मेक उइ जने ब्वने। आं देंशो खोदेशो पा जचा ब्वचा माल्नीनी। 32 हेंशो श्ये नु शोब्ले गे मीम चोचा माल्नीनी। 33 मिनु नोले गे ७ नाक्तर सम्म, इन कली गेय गोचा कली चढेशो ७ नाक्तर मगाम सम्म गुम्तीक ताम्बु आ ओव्रतीक रे लाडगा मलने। मारदे हना ७ नाक्तर मजाक्दीम सम्म इन गेय गोचा कली चढेतीक गेय ला थुम्सीब। 34 मुलाक्तर मार पडा, मेको परमप्रभु यावेमी अरेशो इन कली पाप क्याम्तीक गेय बाक्त। 35 गेपुकी ७ नाक्तर सम्म नाक्दो नाक्ती गुम्तीक ताम्बु आ ओव्रतीकेमी बाक्वा माल्नीनी। गे परमप्रभु यावेमी अरेशो पने। मो मपाइतीनी हना, गे बेक्नीनी। मारदे हना आं कली मोदें अरेशो बाक्ब” दे माइक्तीमी। 36 मिनु परमप्रभु यावेमी मोसा रे पा अरेशो नेल्ल हारून नु आ तौपुकीम पाप्तेक्म।

हारून नु आ तौ आन गेय

9 मिनू ८ नाक्ती मोसामी हारून, आ तौ नु इस्राएल डा खाल्पा आन कली ब्रेत्ताक्मी। लेवी ८:३३<sup>२</sup> मिनू मेकोमी हारून कली “गे पाप आ पर्वम चढ़ेचा कली मारेइ मदुश्शो थम रिश्शो बाछा का नु चोशा चढ़ेचा कली मारेइ मदुश्शो थम रिश्शो सांड का चाक्शा परमप्रभु यावे आ डोंइती चढ़ेवो।<sup>३</sup> मिनू इस्राएली आन कली ‘गेपुकीमी पाप आ पर्वम चढ़ेचा कली बोका का नु चोशा चढ़ेचा कली बर्स का दुश्शा, मारेइ मदुश्शो थम रिश्शो बाछा का नु मारेइ मदुश्शो थम रिश्शो पाठा का चाक्कीन।<sup>४</sup> मिनू परमप्रभु यावे आ डोंइती दुशा बाक्वा आ पर्वम चढ़ेचा कली ब्यफ का, सांड का नु तेलम निशो अन्न चढ़ेतीक यो चाक्कीन। मारदे हना मुलाक्ती परमप्रभु यावेमी इन कली तपांडसीब’ माइक्मी” देंत।

हारूनम आंम आ पर्वम चढ़ेशो

5 मिनू मोसामी अरेशो खोदेंशो पा मेकोपुकीमी मारेइ मारेइ गुम्तीक ताम्बु आ डोंइती चाक्तेक्म। मिनू मुर नेल्ले परमप्रभु यावे आ डोंइती जाक्शा राप्तेक्म।<sup>६</sup> मिनू मोसामी “गेपुकीमी परमप्रभु यावेमी अरेशो पचा माल्शो गेय एकोन बाक्ब। मिनू परमप्रभु यावे आ छेडछेडम इन कली तपांडसीब” देंत।

7 मिनू मोसाम हारून कली “चढ़ेतीक आ नेक्था जाक्शा, इ पाप आ पर्वम चढ़ेतीक नु इ चोशा चढ़ेतीक चढ़ेवो। मिनू आंम इ पर्वम नु मुर आन पर्वम पाप क्याम्तीक गेय पावो। परमप्रभु यावेमी अरेशो खोदेंशो पा मुर आन चाक्शा चढ़ेतीक चढ़ेशा, मुर आन पर्वम पाप क्याम्तीक गेय पावो” देंत। लेवी १६:६, ११, १५; हिब्रू ५:३; हिब्रू ७:२७

8 मिनू हारून चढ़ेतीक आ नेक्था जाक्शा, आ पाप आ पर्वम चढ़ेतीक बाछा क्योरतु।<sup>९</sup> मिनू हारून आ तौपुकीमी मेको आ हुश चाक्तेक्म। मिनू मेकोमी आ ब्रेचो हुशेम ख्रुम्शा चढ़ेतीक आ गेव्रपुकीम ख्रेक्ताक्व। मिनू लीशो हुश कली चढ़ेतीक आ पुंम मोइक्तु।<sup>१०</sup> मिनू मेकोमी पाप आ पर्वम चढ़ेशो आ बॉसो, चिच नु आइदीम क्येप्शो बॉसो चढ़ेतीकेम चोप्तु। परमप्रभु यावेमी मोसा कली दोदेंशो पा अरेवा, मोदेंशो पा हारूनमी पाप्तु। लेवी ४:८-१२; लेवी ८:१४-१७<sup>११</sup> तन्न श्ये नु कुशुल चहिं मुर आन बाक्तीके क्येडा डोन चोप्तु।

12 मिनू नोले हारूनमी चोशा चढ़ेतीक क्योरतु। मिनू मेको आ तौपुकीमी मेको आ हुश चाक्शा गेम्तेक्म। मिनू मेकोमी मेको चढ़ेतीक आ एर ओंथ ब्रुइक्ताक्व। लेवी १:१०-१३<sup>१३</sup> मिनू मेकोपुकीमी मेको चोशा चढ़ेतीके टुक्रा टुक्रा पा चक्शा, पिया सुन्दा चाक्शा, मेको कली गेम्तेक्म। मिनू हारूनमी मेको चढ़ेतीकेमी चोप्तु।<sup>१४</sup> मिनू मेकोमी गा क्यी नु खोइल मुरशा, चोशा चढ़ेतीके नु चोप्तु।

हारूनम अरु आन पर्वम चढ़ेशो

15 मिनू नोले हारूनमी मुर आन पर्वम चढ़ेतीक चाक्शा, मेको आन पाप आ पर्वम चढ़ेशो बोका क्योरतु। मिनू डोंइती डा खोदेंशो पा पाप आ पर्वम चढ़ेतीके चढ़ेप्तु।

16 मेको नोले चोशा चढ़ेतीक चाक्शा, अरेशो खोदेंशो पा चढ़ेप्तु।<sup>१७</sup> मिनू अन्न चढ़ेतीक चाक्शा, मुठी का हुइशा, सुनी डा चोशा चढ़ेतीक नु चढ़ेप्तु।

18 मिनू हारूनमी मुर आन कली दुशा बाक्वा आ पर्वम चढ़ेतीके ब्यफ नु सांड क्योरतु। मिनू हारून आ तौपुकीम हुश चाक्शा, मेको कली गेम्तेक्म। मिनू मेकोमी चढ़ेतीक आ एर ओंथ ब्रुइक्ताक्व।<sup>१९</sup> मिनू ब्यफ नु सांड आस बॉसो, बॉसो पाइश्शो मीलु, गा क्यी गिल्शो बॉसो, चिच निम्फा नु आइदीम क्येप्शो बॉसो लाइक्तेक्म।<sup>२०</sup> मिनू डोंइती कुशु तार वोइक्तेक्म। नोले बॉसो चढ़ेतीकेम चोम्तेक्म।<sup>२१</sup> मिनू मोसाम अरेशो खोदेंशो पा हारूनमी कुशु नु ग्युरा फिला चहिं परमप्रभु यावे आ डोंइती क्युक्शा हिम्शा चढ़ेतीके चढ़ेप्तु। लेवी ७:३०-३४;

22 मिनू हारूनमी आ गुइ मुर आन गे पोक्शा, आसीक गेम्तीमी। मोपा पाप आ पर्वम चढ़ेतीके, चोशा चढ़ेतीके नु दुशा बाक्वा आ पर्वम चढ़ेतीके चढ़ेशा, मेको उइ तोंइसाक्व।

23 मिनू मोसा नु हारून गुम्तीक ताम्बु आगा ओव्रताक्स। मिनू गूशा मुर आन कली आसीक गेम्ताक्स। मिनू परमप्रभु यावे आ छेडछेड मुर नेल्लेमी ताम्तेक्म। प्रस्थान १६:१०; प्रस्थान ४०:३४<sup>२४</sup> मिनू परमप्रभु यावे आ डोंइती रे मी गूशा, चढ़ेतीकेम बाक्शो चोशा चढ़ेतीक नु मेक बाक्शो बॉसो नेक्तु। मिनू मुरपुकीमी मेको तशा, ठेयब सेंदा पा ग्येरसीशा, खुम्की पा बाप्तेक्म। न्यायाधीस ६:२१; १राजा १८:३८; इइतिहास २१:२६; २इतिहास ७:१

नादाब नु अबीहुम मटिशो

10 मिनू हारून आ तौ नादाब नु अबीहुम आस थनौरो लाइशा, मी कुर पाप्ताक्स। मिनू मी आ तारी धूप वोइक्ताक्स। मोपा मेको निक्शी परमप्रभु यावेमी “अरु मी मलाइक्वा” दे अरेशो लोव्र मटिम्स, मेको परमप्रभु यावे आ डोंइती चढ़ेम्ताक्स। प्रस्थान ६:२३; प्रस्थान २८:१; प्रस्थान ३०:९<sup>२</sup> मिनू परमप्रभु यावे आ डोंइती रे मी गूशा, मेको आस कली गु दाक्तु। मोपा मेको निक्शी परमप्रभु यावे आ डोंइती बेक्ताक्स।<sup>३</sup> मिनू मोसामी हारून कली “परमप्रभु यावेमी देंशो ‘आं नेक्था बाक्ब आन कली गो नेल्ल क्येडा ठेयब बाक्नुड’ दे कोंइनुड। मिनू नेल्ल मुर आन डोंइती गो ठेयब सेल्चा पुंडसीनुड” देंत। मिनू हारून सिक्सी पा बाक्त।

4 मोसामी हारून आ बकान्छा उज्जीएल आ तौ एल-साफान नु मीशाएल आस कली ब्रेश्शा “इस लोक्ब आस कली ताम्बु रे कुरशा गुंडदीस” देंत। प्रस्थान ६:२२<sup>५</sup> मिनू मेको निक्शी जाक्शा, आस फेक्शो वा रे क्युक्शा मोसा आ देंशो खोदेंशो पा कुरशा गुंडताक्स।

6 मिनू मोसाम हारून नु आ तौ एलाजर नु इथामार आन कली “रोंका पा इन पिया डा चां मप्रेक्कीन। इन वा मखाक्कीन। मो पाइतीनी हना, गेपुकी बेक्नीनी। मिनू परमप्रभु यावे आ गाइक्तीक नेल्ल मुर आन तारी जुक्ब। तन्न परमप्रभु यावे आ सोइश्शो मीम दुशा बेक्ब आस पर्वम इन खिं डा मुर नु इस्राएली डा मुर नेल्ल रोंका पचा दुम्ब। लेवी २१:१०<sup>७</sup> गेपुकी चहिं गुम्तीक ताम्बु रे लाडगा मलने। मो पाइतीनी हना, बेक्नीनी। मारदे हना परमप्रभु यावे आ लुक्शो तेल गे इन तार बाक्ब” देंत। मिनू मेकोपुकीमी मोसा आ देंशो खोदेंशो पाप्तेक्म।

चढ़ेब आन कली लेंशा अरेशो

8 मिनू नोले परमप्रभु यावेमी हारून कली<sup>९</sup> “गे नु इ तौपुकी गुम्तीक ताम्बुम ओव्रनीनु, अडगुर शांबु नु अरु दुक्तीक थोव्रक मत्तुडीन। तूतीनी हना, गेपुकी बेक्नीनी। मेको गेना हना यो इन पतीक दुम्ब। इजीकीएल ४४:२१; होसे ४:११; आमोस २:८<sup>१०</sup> आं थोव्रक नु मुर आ थोव्रक तिल्चा माल्नीनी। ग्रांग्रा दिशो थोव्रक नु चोव्रखो थोव्रक यो तिल्चा माल्नीनी। इजीकीएल २२:२६; इजीकीएल ४४:२३<sup>११</sup> मिनू गो मोसा कली अरेशो नेल्ल, गे इस्राएली आन कली शेंचा माल्नीनी” देंत।

12 मिनू मोसामी हारून नु आ लीशो तौ एलाजर नु इथामार आन कली “परमप्रभु यावे कली मीम चोशा अन्न चढ़ेशो रे लीशो बोरब ओख्ती मसुप्थु चढ़ेतीके आ नेक्था बाक्शा जने। मारदे हना मेको थम चोव्रखो बाक्ब। लेवी ९:१७, १८<sup>१३</sup> गेपुकीम मेको कली चोव्रखो बाक्तीकेमी जने। मारदे हना परमप्रभु यावे कली मीम चोशा चढ़ेशो चढ़ेतीके रे मेको गे नु इ तौ इन भाग बाक्ब। आं कली मोदें अरेशो बाक्ब। लेवी २:३<sup>१४</sup> तन्न क्युक्शा चढ़ेशो कुशु नु हिम्शा चढ़ेशो फिला चहिं गे इन तौ नु इन तमीम चोव्रखो बाक्तीकेमी बाक्शा ब्वने। मारदे हना मेको इस्राएली आन दुशा बाक्वा आ पर्वम चढ़ेशो रे गे नु इ तमी तौ इन भाग बाक्ब। लेवी ७:३४<sup>१५</sup> मिनू हिम्शो फिला, क्युक्शो कुशु नु मीम चोशा चढ़ेशो मार मार आन बॉसो परमप्रभु यावे आ डोंइती हिम्शा चढ़ेचा कली चाक्वा माल्नीनी। मिनू परमप्रभु यावेमी अरेशो खोदेंशो पा गेना हना यो, गे नु इ तमी तौ इन भाग दुम्ब” देंत। लेवी ९:२०-२१

16 मिनु मोसामी पाप आ पर्वम चढ़ेशो बोका माल्तु। तन्न मेको चोने थुशो बाक्मावत। मिनु मेकोमी हारून आ लीशो तौ एलाजर नु इथामार आस कली गाइश्शा, लेवी ९:१५ 17 "गेपुकीमी मारदे पाप आ पर्वम चढ़ेशो कली चोव्रखो बाक्तीकेम मब्बनी? मारदे हना मेको थम चोव्रखो बाक्ब। मिनु परमप्रभु यावेमी मुर आन पर्वम पाप क्याम्तीक गेय पचा, दे मेको इन कली गेशो बाक्ब। 18 मेको आ हुश ताम्बु आ आगामी मलाइश्शो बाक्त। गेपुकीम थमा पा आं दैशो खोदैशो पा चोव्रखो बाक्तीकेम मेको श्ये ब्वचा माल्शो ननी" दैत। लेवी ६:१९,२२

19 मिनु हारूनमी मोसा कली "नेनीन, मुलाक्ती मेकोपुकीमी आन पाप आ पर्वम चढ़ेतीक नु आन चोशा चढ़ेतीक परमप्रभु यावे आ डोंइती चढ़ेतेक्म। मिनु मुलाक्त गो गिश श्येत जशो बाक्नुड। गो मुलाक्ती मेको पाप आ पर्वम चढ़ेशो ब्वशो नड हना, मार, मेको परमप्रभु यावे आ डोंइती रिम्शो दुम वा डा?" दैत। 20 मिनु मेको लोव्र नैशा मोसा सिक्सी पाप्नु।

### ग्रांरा दिशो नु मदिशो

ब्वक्था १४:३-२०

11 मिनु परमप्रभु यावेमी मोसा नु हारून आस कली 2 "गे इस्राएली आन कली 'रागीम बाक्शो जन्तु, बस्तु भाव, चिक्ब तेक तेको ब्वचा दुम्बा, तेक तेको ब्वचा मदुम्बा, मेको शेंदीस। मिनु जन्तु नु बस्तु भाव तेको ब्वने चाप्नीनी दैशा हना, प्रेरित १०:१२-१५; कलस्सी २:१६; १तिमोथी ४:३-४ 3 गेपुकीमी आन गेंच जेशो नु शोंया हेक्बपुकी ब्वने चाप्नीनी।

4 मो हना यो गेंच जेशो ला कि शोंया हेक्ब दुम्शो ला ब्वचा मदुम्ब। दलओँठ मेको शोंया हेक्ब, तन्न आ गेंच मजेशो बाक्ब। मेको इन कली ग्रांरा बाक्ब। 5 मिनु शापन मब्बने। मारदे हना मेकोमी शोंया हेक्ब, तन्न आ गेंच मजेशो बाक्ब। मेको इन कली ग्रांरा बाक्ब। 6 मिनु खरायो मब्बने। मारदे हना मेकोमी शोंया हेक्ब, तन्न आ गेंच मजेशो बाक्ब। मेको इन कली ग्रांरा बाक्ब। 7 मिनु पोव्र मब्बने। मारदे हना मेको आ गेंच जेशो बाक्ब, तन्न शोंया महेक्ब। मेको इन कली ग्रांरा बाक्ब। यसैया ६५:४; यसैया ६६:१७ 8 गेपुकीमी मेको आन श्ये मब्बने। आन सिनु यो मथिने। मेको इन कली ग्रांरा बाक्ब।

9 ब्वाक्कु, खोला नु समुन्द्रम बाक्बपुकीमी फ्रां नु कल्ला पाइश्शो ब्वने चाप्नीनी। 10 तन्न समुन्द्र नु खोलाम बाक्ब फ्रां नु कल्ला मपाइश्शो ब्वचा मदुम्ब। मेको आइक्च ब्वाक्कुम बाक्ब जन्तु नु अरु नेल्ल सेल जन्तु इन कली ग्रांरा बाक्नीम। 11 मेको इन कली ग्रांरा बाक्तीके, मेको आन श्ये मब्बने। मिनु मेको आन सिनु इन कली ग्रांरा बाक्नीम। 12 मिनु ब्वाक्कुम बाक्ब नेल्ले फ्रां नु कल्ला मपाइश्शो जन्तु, इन कली ग्रांरा बाक्नीम।

13 मिनु चिक्ब आन दातेमी इन कली तेको तेको ग्रांरा दिशो नु ब्वचा मदुशो बाक्नीम दैशा हना, ककाकुली, गिद, क्येर गिद, 14 लल ब्वारदे नु नेल्ल खाल डा क्येर ब्वारदे, लेवी ५:२ 15 खद नेल्ले, 16 ठेयब हुहुचील, ग्रीब बुक्स, ब्वाक्कुम बाक्ब चिक्ब, मिनु बाज नेल्ले, 17 आइक्च हुहुचील, ब्वाक्कु डा खदी, भुल्का, 18 बुश हुहुचील, गोरशो रागी डा हुहुचीलपुकी, डांइ ब्वाइब ब्वारदे, 19 सारस, बोकुला नेल्ल, फाप्रे चिक्ब नु पकातिक्ती मब्बने। यसैया ६६:१७

20 फ्रां पाइश्शो, ४ ओटा खोइलीम गेशा गाक्ब जन्तु नेल्ल इन कली ग्रांरा बाक्नीम। 21 मिनु ४ ओटा खोइलीम गेशा गाक्ब, फ्रां पाइश्शो खपीम प्रेक्वा कली खोइल बोइश्शो नेल्ल मालेपुकी ब्वने चाप्नीनी। 22 गे सल्ला माले, खुइले माले, किथ्रो माले नु फटेडग्रापुकी ब्वने चाप्नीनी। 23 ४ ओटा खोइल पाइश्शो नु फ्रां पाइश्शो नेल्ल इन कली ग्रांरा बाक्नीम।

24 मेकोपुकी रे गेपुकी ग्रांरा दिशो दुम्नीनी। सुमी मेको आन सिनु थीबा, मेको नां मरिक्म सम्म ग्रांरा दिशो दुम्ब। 25 मिनु सुमी मेको सिनु रे इक्का कुरबा, मेकोमी आ वा मुरचा माल्ब। मिनु नां मरिक्म सम्म ग्रांरा दिशो दुम्ब।

26 मिनु तेको जन्तु आन गेंच जेशो बाक्बा, तन्न मब्राक्शो बाक्बा, मेको शोंया महेक्बा, मेको इन कली ग्रांरा बाक्ब। मेको थीब नेल्ल ग्रांरा दिशो दुम्नीम। 27 मिनु ब्रेप्चोम थेक्वा ४ ओटा खोइलीम गाक्ब जन्तु नेल्ल इन कली ग्रांरा बाक्नीम। मेको आन सिनु थीब नेल्ल नां मरिक्म सम्म ग्रांरा दिशो दुम्नीम। 28 मेको सुमी आन सिनु कुरब मेकोमी आ वा मुरचा माल्ब। मिनु

मेको नां मरिक्म सम्म ग्रांरा दिशो दुम्ब। मेको इन कली ग्रांरा दिशो बाक्नीम।

29 मिनु खपीम गेशा गाक्ब आइक्च जन्तु तेको ग्रांरा दिशो बाक्नीम दैशा हना, कोचोम्बो, यिच, ठेयब नु आइक्च खोते नेल्ले, 30 माउसुली, घोरी, भाले मुडग्रो, बाल्चाम बाक्ब खोते नु रड फाइक्ब खोतेपुकी, 31 मेको गेशा गाक्ब नेल्ल इन कली ग्रांरा बाक्नीम। सुमी मेको आन सिनु थीबा, मेको नां मरिक्म सम्म ग्रांरा दिशो दुम्ब। 32 मोदैशो जन्तु बेक्शा, मार तारी दोक्बा, मेको थोव्रक ग्रांरा दिशो दुम्ब। शी के सेल्शो, वा, कुशुल, भाडग्रा नु मारेड के बाक्ल, मेको थोव्रक ब्वाक्कुम नुप्चा माल्ब। मिनु मेको नां मरिक्म सम्म ग्रांरा दिशो दुम्ब। मिनु नोले ठीक दुम्ब। 33 मिनु मेको मार मार खप के बोसुम दोक्त हना, मेको बोस नेल्ल ग्रांरा दिशो दुम्ब। गेपुकीमी मेको बोस प्रोल्चा माल्नीनी। 34 मेको आगाम ब्वाक्कु बाक्त हना, मिनु मेको ब्वाक्कुम थिशो मारेड मारेड जचा थोव्रक ग्रांरा दिशो दुम्ब। मिनु मेको बोसुम बाक्शो तूचा थोव्रक नेल्ल ग्रांरा दिशो दुम्नीम। 35 मेको आन सिनु मारेड थोव्रकम दोक्त हना, चुप्नुम बाक्त हना यो, मेको प्रेशा ताइक्चा माल्ब। मेको ग्रांरा दिशो बाक्ब। मेको गेना हना यो इन कली ग्रांरा बाक्ब। 36 मो हना यो ब्वाक्कु बुक्तीके, कुवा नु ब्वाक्कु वोइक्तीके चोव्रखो बाक्नीम। तन्न मेको आन सिनु थीब चहिं ग्रांरा दिशो बाक्ब। 37 मेको आन श्ये शोक्तीक वांचेरम दोक्त हना, मेको चहिं चोव्रखो लीब। 38 तन्न मेको आ सिनु शोक्चा कली ब्वाक्कुम वोइश्शो वांचेर तारी दोक्त हना, मेको इन कली ग्रांरा दिशो दुम्ब।

39 इन बस्तु भाव बेक्त हना, सुमी मेको कली थीब, मेको नां मरिक्म सम्म ग्रांरा दिशो दुम्ब। 40 मेको सुम ब्वाइबा, मेकोमी आ वा मुरचा माल्ब नु नां मरिक्म सम्म ग्रांरा दिशो दुम्ब। मेको सिनु कुरबमी यो आ वा मुरचा माल्ब। मिनु मेको नां मरिक्म सम्म ग्रांरा दिशो दुम्ब। प्रस्थान २२:३०

41 खपीम गेशा गाक्ब जन्तु नेल्ल ग्रांरा दिशो बाक्नीम। मेको ब्वचा मदुम्ब। 42 कोव्रजीम गेशा गाक्ब, ४ ओटा खोइलीम गाक्ब नु शुश खोइल पाइश्शो खपीम गाक्ब जन्तुपुकी ब्वचा मदुम्ब। मारदे हना मेकोपुकी ग्रांरा दिशो बाक्नीम। 43 मिनु गेपुकी तेकोइ गेशा गाक्ब जन्तु रे ग्रांरा दिशो मदुमीन। मेकोपुकी रे इन कली ग्रांरा दिशो मसेलीन। 44 मिनु गो परमप्रभु यावे, इन परमप्रभु नड। मोपतीके गेपुकी ग्रांरा दिशो मदुम्बु मेको रे डोन बाक्कीन। मारदे हना गो ग्रांरा दिशो रे डोन बाक्नुड। गेपुकी खपीम गेशा गाक्ब जन्तु रे ग्रांरा दिशो मदुमीन। लेवी १९:२ 45 गो परमप्रभु यावे, इन कली इजीप्त रागी रे गुंइशा एक चाक्ब, इन परमप्रभु नड। मोपतीके गेपुकी ग्रांरा दिशो रे डोन बाक्कीन। मारदे हना गो ग्रांरा दिशो रे डोन बाक्नुड' दैतो" दैत।

46 एको रागी डा जन्तु, चिक्ब नु ब्वाक्कुम गाक्ब नु खपीम गेशा गाक्ब जन्तु आन पर्वम अरेतीक बाक्ब। 47 मिनु ग्रांरा दिशो नु ग्रांरा मदिशो, ब्वचा दुम्ब नु मदुम्ब जन्तु आन पर्वम तिलीन।

### सुत्केरी दोपा चोव्रखेचा, दे अरेशो

12 मिनु परमप्रभु यावेमी मोसा कली 2 "इस्राएली आन कली 'कोव्रज कुरशा तौ थीब मीश मुर ७ नाक्त सम्म ग्रांरा दिशो बाक्ब। मेको आ रां ब्रोल्म नाक्त डा खोदैशो पा ग्रांरा बाक्ब। लेवी १५:१९ 3 मिनु ८ नाक्ती मेको आ तौ कली खोइक्तीक चिनु खोइक्चा माल्ब। उत्पत्ती १७:१०-१२; लूका २:२१; यूहन्ना ७:२२ 4 मिनु मेको मीश मुर आ हुश चोव्रखेचा कली ३३ नाक्त सम्म दुम्चा माल्ब। मिनु मेकोमी चोव्रखो दुम्तीक नाक्ती मगाम सम्म मारेड चोव्रखो थोव्रक थिचा मदुम्ब। मिनु ग्रुम्तीक ताम्बु यो ओव्रचा मदुम्ब। 5 तन्न मेकोमी तमी थिप्तु हना, आ रां ब्रोल्म नाक्त डा खोदैशो पा १४ नाक्त सम्म ग्रांरा दिशो बाक्ब। मिनु आ हुश चोव्रखेचा कली ६६ नाक्त दुम्चा माल्ब।

6 मिनु मेको आ चोव्रखेतीक गाम नाक्ती, तौ आ पर्वम बाक्त हना यो, तमी आ पर्वम बाक्त हना यो, मेकोमी चोशा चढ़ेचा कली बर्स का गाप्शो भेडा का नु पाप आ पर्वम चढ़ेचा कली दुक्कुर का कि परवा का गुम्तीक ताम्बु आ ओव्रतीकेम बाक्शो चढ़ेब कली चाक्चा माल्ब। 7 मिनु चढ़ेबमी परमप्रभु यावे आ डोंइती मेको चढ़ेशा, मेको आ पर्वम पाप क्याम्तीक गेय पचा माल्ब। मिनु मेको आ हुश यिशो रे चोव्रखो दुम्ब। मेको मीश मुरुमी तौ कि

तमी थिवा नोले, एको पचा माल्शो अरेतीक लोत्र बाक्ब। 8 मिनु मेकोमी भेडा चाक्ने मचाप्बाक्त हना, दुकुर निक्शी कि परवा निक्शी चाक्चा माल्ब। मेको का चोशा चढेतीक नु का पाप आ पर्बम चढेतीक बाक्ब। मिनु चढेबमी मेको चढेशा मेको आ पर्बम पाप क्याम्तीक गेय पचा माल्ब। मिनु मेको ग्रांग्रा मदिशो दुम्ब' माइक्मी" देंत। लेवी ५:७; लूका २:२४

कोत्रर पाइब आन कली पचा माल्शो

13 परमप्रभु यावेमी मोसा नु हारून आस कली गन्ती १२:१०-१२; ब्यवस्था २४:८-९; अय्युब १८:१३ 2 "सुइ मुर आन रां डा कुशुल बोरत हना, गार दुम्त हना, बुश दुम्त हना, मेको कोत्रर खोदेशो दुम्त हना, मेको कली चढेब हारून कि आ तौ का आ बाक्तीके चाक्चा माल्ब। 3 मिनु मेको चढेबमी आ रांम दुम्शो गार कोत्रचा माल्ब। मिनु मेको आ गारम बाक्शो चां बुश बाक्त नु मेको आ गार इक्का लुक्च लशो बाक्त हना, मेको याक्सीब रोइ बाक्ब। मिनु चढेबमी मेको कली कोत्रडा नोले 'एको ग्रांग्रा बाक्ब' देंचा माल्ब। 4 तन्न मेको कुशुल डा बुश गार कुशुल लुक्च मलशो बाक्त हना, मिनु मेकेर वाशो चां यो बुश मदुम्शो बाक्त हना, चढेबमी मेको रोइ पाइब मुर कली ७ नाक्त सम्म तिल्शा वोइक्चा माल्ब। 5 मिनु चढेबमी ७ नाक्त नोले मेको गार लेंशा कोत्रचा माल्ब। मिनु मेको कुशुल डा गार एर ओंथ मबारशो बाक्त हना, चढेबम मेको कली अर्को ७ नाक्त सम्म तिल्शा वोइक्चा माल्ब। 6 मिनु लेंशा ७ नाक्त नोले चढेबमी कोत्रडानु, आ गार बारचा नांइसाक्व हना, आ कुशुलम मब्रशो बाक्त हना, चढेबम मेको कली ग्रांग्रा मदिशो बाक्ब, मेको गार ला बाक्ब, देंचा माल्ब। मेको मुर आ वा मुरचा माल्ब। मिनु मेको चोत्रखो दुम्ब। 7 तन्न चढेबमी 'चोत्रखो दुम्त' देंम नोले यो गार बारत हना, मेको लेंशा चढेब आ बाक्तीक जाक्शा, आ गार कौंइचा माल्ब। 8 मिनु चढेबमी लेंशा कोत्रचा माल्ब। आ गार कुशुलम बारशा लशो बाक्त हना, चढेबमी 'मेको कली ग्रांग्रा दिशो बाक्ब' देंचा माल्ब। मेको कोत्रर खोदेशो याक्सीब रोइ बाक्ब।

9 मिनु सुइ मुर कली कोत्रर खोदेशो याक्सीब रोइ दुम्शो बाक्त हना, चढेब आन बाक्तीकेम चाक्चा माल्ब। 10 मिनु चढेबमी मेको कली कोत्रचा माल्ब। मिनु आ कुशुल बुश दुम्शा बोरशो बाक्त हना, नु मेको आ गार डा चां बुश दुम्शा, बोरशो कुशुल डा गारम श्ये तांइसाक्व हना, 11 मेको शुश नाक्ती सम्म बाक्ब कुशुल डा रोइ कोत्रर बाक्ब। मिनु चढेबमी मेको कली 'ग्रांग्रा दिशो बाक्ब' देंचा माल्ब। मेकोमी मेको कली तिल्शा वोइक्चा ममाल्ब। मारदे हना मेको ग्रांग्रा दिशो बाक्ब।

12 मिनु मेको आ रोइ कुशुलम बारना बारन लशा, चढेबमी कोत्रडानु, आ गार पिया रे खोइल सम्म बाक्त हना, 13 चढेबमी मेको कली रिम्शो पा कोत्रचा माल्ब। मिनु मेको कुशुल डा रोइम आ रां नेल्ल कली सुम्शो बाक्त हना, चढेबमी मेको कली 'ग्रांग्रा मदिशो बाक्ब' देंचा माल्ब। मारदे हना मेको आ रां नेल्ल बुश दुम्तीके, मेको मुर ग्रांग्रा मदिशो बाक्ब। 14 तन्न मेको मुर आ रांम श्ये तांइसाक्व हना, मेको ग्रांग्रा दिशो बाक्ब। 15 मिनु चढेबमी मेको तांइसीशो श्ये कोत्रशा, मेको कली 'ग्रांग्रा दिशो बाक्ब' देंचा माल्ब। मेको तांइसीशो श्ये ग्रांग्रा बाक्ब। मारदे हना मेको कोत्रर बाक्ब। 16 तन्न मेको तांइसीशो श्ये लेंशा बुश दुम्त हना, मेको मुर लेंशा चढेब आ बाक्तीक लचा माल्ब। 17 मिनु मेको गार बुश दुम्शो बाक्त हना, मेको चढेबमी ग्रांग्रा मदिशो बाक्ब देंचा माल्ब। मिनु मेको मुर चोत्रखो बाक्ब।

18 सुइ मुर आ रांमी कान गूशा, सात हना, 19 मिनु मेको कान गूशा साशो गारम बुश दुम्शा, बोरत हना, कि लल दुम्शा बुश पा बोरत हना, मेको मुरुमी मेको आ गार चढेब कली कौंइचा माल्ब। 20 मिनु चढेबमी रिम्शो पा कोत्रडानु, मेको गार लुक्च लशो बाक्त नु चां यो बुश दुम्शो बाक्त हना, मेको कली 'ग्रांग्रा दिशो बाक्ब' देंचा माल्ब। मेको कोत्रर खोदेशो रोइ कान रे गूशो बाक्ब। 21 तन्न चढेबमी रिम्शो पा कोत्रडानु, मेकेर बुश चां मगूशो बाक्त नु मेको कुशुल क्येडा लुक्च मलशो बाक्त हना, तन्न सोत्रना सोत्रन, जाम्ना जाम्ना लशो बाक्त हना, चढेबमी मेको कली ७ नाक्त सम्म तिल्शा वोइक्चा माल्ब। 22 मेको गार कुशुलम बारना बारन लत हना, चढेबमी मेको कली 'ग्रांग्रा दिशो बाक्ब' देंचा माल्ब। मारदे हना मेको याक्सीब रोइ बाक्ब।

23 तन्न मेको गार एर ओंथ मबारथु, मेक उइ ला बाक्त हना, मेको कान आ खत बाक्ब। चढेबमी मेको कली 'ग्रांग्रा मदिशो बाक्ब' देंचा माल्ब।

24 सुइ मुर आन रांमी दुम्शा गार दुम्त नु मेको दुम्शो गारम नक श्ये गूशा, लल दुम्त हना यो, बुश दुम्त हना यो, 25 चढेबमी मेको गार रिम्शो पा कोत्रचा माल्ब। मिनु मेको गार डा चां बुश दुम्शा, कुशुल क्येडा लुक्च लशो बाक्त हना, मेको याक्सीब रोइ बाक्ब। मेको दुम्शो गार रे गूशो बाक्ब। मिनु चढेबमी मेको कली 'ग्रांग्रा दिशो बाक्ब' देंचा माल्ब। मेको कुशुल डा याक्सीब रोइ बाक्ब। 26 तन्न चढेबमी रिम्शो पा कोत्रडानु, मेको गार डा चां बुश मबाक्थु नु कुशुल क्येडा लुक्च मलथु, सोत्रना सोत्रन बाक्त हना, चढेबमी मेको मुर कली ७ नाक्त सम्म तिल्शा वोइक्चा माल्ब। 27 मिनु चढेबमी मेको कली ७ नाक्त नोले रिम्शो पा कोत्रचा माल्ब। मिनु मेको कुशुलम एर ओंथ बारशो बाक्त हना, चढेबमी मेको कली 'ग्रांग्रा दिशो बाक्ब' देंचा माल्ब। मेको याक्सीब कुशुल डा रोइ बाक्ब। 28 तन्न मेको गार एर ओंथ मबारथु, सोत्रना सोत्रन लशो बाक्त हना, मेको दुम्शो रे होम्शो ला बाक्ब। मिनु चढेबमी मेको कली 'ग्रांग्रा मदिशो बाक्ब' देंचा माल्ब। मारदे हना, मेको दुम्शो गार आ खत ला बाक्ब।

29 सुइ मीश मुर, वौंइश मुर आन पियाम, गाल शोक्नेम मारेइ गार का बाक्त हना, 30 चढेबमी मेको गार रिम्शो पा कोत्रचा माल्ब। मिनु मेको कुशुल क्येडा लुक्च लशो बाक्त हना, नु मेको गार डा चां हाव जिशो नु आइक्च बाक्त हना, चढेबमी मेको कली 'ग्रांग्रा दिशो बाक्ब' देंचा माल्ब। मेको रक सुइब आ पिया डा नु गाल शोक्ने डा याक्सीब रोइ बाक्ब। 31 मिनु चढेबमी मेको रक सुइब रोइ रिम्शो पा कोत्रडानु, मेको कुशुल क्येडा लुक्च मलशो नु मेकेर क्येरे चां यो मबाक्तेक्म हना, चढेबम मेको कली ७ नाक्त सम्म तिल्शा वोइक्चा माल्ब। 32 मिनु ७ नाक्त नोले चढेबमी मेको कली रिम्शो पा कोत्रचा माल्ब। मिनु मेको रक सुइब रोइ मबारशो बाक्त हना, मेक डा चां हाव मजिशो बाक्त नु गार यो कुशुल क्येडा लुक्च मलशो बाक्त हना, 33 मेकोमी गार प्रौंइशा आ चां प्रेक्चा माल्ब। मिनु चढेबम मेको रोइ पाइब कली अर्को ७ नाक्त सम्म तिल्शा वोइक्चा माल्ब। 34 मिनु ७ नाक्त नोले चढेबमी मेको रक सुइब गार रिम्शो पा कोत्रचा माल्ब। मिनु मेको मबारथु, कुशुल क्येडा लुक्च मलशो बाक्त हना, चढेबमी मेको कली 'ग्रांग्रा मदिशो बाक्ब' देंचा माल्ब। मिनु मेको मुर आ वा मुरशा, चोत्रखो दुम्ब। 35 तन्न मेको चोत्रखो दुम नोले यो मेको रक सुइब रोइ बारशा लत हना, 36 चढेबमी मेको गार रिम्शो पा कोत्रचा माल्ब। मेको कुशुलम बारशा लशो बाक्त हना, चढेबमी मेकेर डा चां हाव बाक्म कौं मबाक्म, दे कोत्रचा ममाल्ब। मेको मुर ग्रांग्रा दिशो बाक्ब। 37 तन्न चढेबमी मेको रक सुइब रोइ रिम्शो पा कोत्रडानु, मेकेर क्येरे चां वाशो बाक्त हना, मेको साशो बाक्ब। मेको ग्रांग्रा मदिशो बाक्ब। मिनु चढेबम मेको कली 'ग्रांग्रा मदिशो बाक्ब' देंचा माल्ब।

38 सुइ मीश मुर, वौंइश मुर आन रांम बुश गारपुकी बाक्तेक्म हना, 39 चढेबमी मेको रिम्शो पा कोत्रचा माल्ब। मिनु मेको आन रां डा गारपुकी बुश बाक्तेक्म हना, मेको कुशुल डा रोइ ला बाक्ब। मेको कुशुल रे ला गूशो बाक्ब। मेको मुर ग्रांग्रा मदिशो बाक्ब।

40 सुइ मुर आन पिया डा चां दुल्शो बाक्त हना, मेको ग्रांग्रा मदिशो बाक्तीम। 41 मेको आ चां कुप्फी रे दुल्शो बाक्त हना, मेको ग्रांग्रा मदिशो बाक्ब। 42 तन्न मेको आन कुप्फीमी लल बुश गार गूत हना, मेको कुप्फीम गूशो याक्सीब रोइ बाक्ब 43 मिनु चढेबमी मेको कली रिम्शो पा कोत्रडानु, आ कुप्फीम होम्शो गार लल बुश नु कोत्रर खोदेशो तांइसाक्व हना, 44 मेको मुर कोत्रर पशो नु ग्रांग्रा दिशो बाक्ब। मिनु चढेबमी मेको कली 'ग्रांग्रा दिशो बाक्ब' देंचा माल्ब। मेको रोइ आ पियाम बाक्ब।

कोत्रर पाइबमी मार पचा माल्शो

45 कोत्रर पशो मुरुम गाक्शो वा फेक्शा, आ पियाम मारेइ गुप्चा मदुम्ब। मेकोमी आ गाल शोक्ने कली सुम्शा 'ग्रांग्रा दिशो, ग्रांग्रा दिशो' दे ग्रीचा माल्ब। 46 मेको आ रोइ गेना सम्म लीबा, मेना सम्म मेको ग्रांग्रा दिशो दुम्ब। मेको आ कांइचीक बाक्चा माल्ब। मिनु मेको मुर आन बाक्तीक क्येडा डोन बाक्चा माल्ब। गन्ती ५:२-३; २राजा १५:५



## बुंखी डाइश्शो थोव्रक

47 मिनु वाम बुंखी डाइक्ताक्व हना, ऊन के वासी बाक्त हना यो, सुती के वासी बाक्त हना यो, 48 फेक्तीक नेल्ल, कुशुल के सेल्शो मारेइ मारेइमी 49 बुंखी डाइश्शा गिगी लल लुम्सीशो बाक्त हना, वासी नेल्ल नु मारेइ मारेइ चढेब कली कौइचा माल्ब। 50 मिनु चढेबमी मेको रिम्शो पा कोव्रचा माल्ब। मिनु मेको बुंखी डाइश्शो थोव्रक आन कली ७ नाक्त सम्म तिल्शा वोइक्वा माल्ब। 51 मिनु चढेबमी ७ नाक्त नोले लेंशा रिम्शो पा कोव्रचा माल्ब। मिनु मेको वासी, कुशुल के सेल्शो मारेइ थोव्रकीम बुंखी बारशा लशो बाक्त हना, मेको बिग्रेब बुंखी डाइश्शो बाक्ब। मेको थोव्रक ग्रांग्रा दिशो बाक्ब। 52 मिनु मेकोमी बुंखी डाइश्शो वासी कि कुशुल के सेल्शो मारेइ थोव्रक चोचा माल्ब। मारदे हना मेको राक्ब बुंखी बाक्ब। मेको मीम चोचा माल्ब।

53 तन्न चढेबमी रिम्शो पा कोव्रडानु, मेको वासी, कि कुशुल के सेल्शो मारेइ थोव्रकमे मेको बुंखी मबारशो बाक्त हना, 54 मिनु चढेबमी मेको मुर कली 'मेको बुंखी डाइश्शो थोव्रक मुरचा माल्ब' दे अरेचा माल्ब। मिनु मेकोमी चिनु ७ नाक्त सम्म मेको वासी कली तिल्शा वोइक्वा माल्ब। 55 मेको मुरशो नोले चढेबमे मेको कली रिम्शो पा कोव्रचा माल्ब। मिनु मेको बुंखी आ लुम्सीशो रड मफांइसीशो बाक्त हना यो, मेको ग्रांग्रा दिशो बाक्ब। मेको बुंखी आ तार गे बाक्त हना यो, आगा गे बाक्त हना यो, मेको कली मीम चोचा माल्ब। 56 तन्न चढेबमी मेको मुरशो नोले कोव्रडानु, बुंखी जाम्ना जाम्ना लशो बाक्त हना, मेको वासी कि मारेइ मारेइ कुशुल के सेल्शो मेको लुम्सीशो ला खाक्शा ताइक्वा माल्ब। 57 तन्न मेको बुंखी, वासी, कुशुल के सेल्शो मारेइ मारेइमी लेंशा ताइसाक्व हना, मेको बारना बारन लशो बाक्ब। मेको बुंखी डाइश्शो थोव्रक मीम चोचा माल्ब। 58 मिनु मेको वासी, कुशुल के सेल्शो मारेइ मारेइ थोव्रक मुरशोनु, मेको रे बुंखी लत हना, मेको लेंशा मुरचा माल्ब। मेको ग्रांग्रा मदिशो बाक्ब।

59 ऊन के सेल्शो वासीम, सुती के वासी नु कुशुल के सेल्शो मारेइ थोव्रकमे बुंखी डाइश्शो आ परबम ग्रांग्रा दिशो नु मदिशो आन परबम पचा माल्शो गेय एकोन बाक्नीम, दे शेंचा" दे मोसा नु हारून आस कली देंत।

## कोव्रर साम नोले पचा माल्शो

14 मिनु परमप्रभु यावेमी मोसा कली 2 "कोव्रर खोदेंशो पा रोइ पशो मुर कली आ रोइ साम नोले मार पचा माल्ब देंशा हना, मुरुमी मेको कली चढेब आन बाक्तीक चाक्वा माल्नीम। मत्ती ८:४<sup>3</sup> मिनु चढेबमी मुर आन बाक्तीके रे लाडगा गूशा, मेको मुर कली रिम्शो पा कोव्रचा माल्ब। मिनु मेको कुशुल डा याक्सीब रोइ साशो बाक्त हना, 4 मेको चढेबमी मेको चोव्रखो सेल्चा पुंइसीशो मुर आ परबम 'सेस नु चोव्रखो चिक्ब निक्शी, लेबानोन डा लाइश्शो रवा आ शी, लल रडम नुप्शो ऊन नु हिस्सोप चाक्को' दे अरेचा माल्ब। लेवी ११:३-२०; गन्ती १९:६<sup>5</sup> मिनु चढेबमी 'मेको चिक्ब निक्शीमी का खप के सिक्स ब्वाक्कुम ब्रीशो बोस तारी सतो' दे अरेचा माल्ब। 6 मिनु चढेबमी मेको सेस चिक्ब, मेको लेबानोन डा लाइश्शो रवा आ शी, मेको लल रडम नुप्शो ऊन नु हिस्सोप मेको सिक्स ब्वाक्कु तारी साइश्शो चिक्ब आ हुशेमी ख्व्शा गुंइचा माल्ब। 7 मिनु मेकोमी रोइ रे साशो चोव्रखो सेल्चा पुंइसीब मुर कली ७ खेयप ब्रुइश्शा 'चोव्रखो बाक्ब' देंचा माल्ब। मिनु मेकोमी मेको सेस चिक्ब कली प्रौइशा बेरपाइक्वा माल्ब। लेवी १६:२२

8 मिनु मेको चोव्रखो सेल्चा पुंइसीशो मुरुम आ वा मुरचा माल्ब। आ चां नेल्ल प्रेक्शा, चिक्वा माल्ब। मिनु मेको ग्रांग्रा मदिशो चोव्रखो दुम्ब। मिनु नोले मुर आन बाक्तीके लचा दुम्ब। तन्न ७ नाक्त सम्म आ ताम्बु आ लाडगाम बाक्वा माल्ब। गन्ती ८:७<sup>9</sup> मिनु ७ नाक्त नोले मेकोमी आ चां, गाल शोके, मुकुक्स नेल्ल प्रेक्वा माल्ब। मिनु नोले आ वा मुरशा, चिक्वा माल्ब। मिनु मेको मुर चोव्रखो दुम्ब।

10 मिनु ८ नाक्त नोले मेकोमी मारेइ मदुम्शो थम रिम्शो सांड निक्शी नु बर्स का दुम्शो मारेइ मदुम्शो थम रिम्शो पाठी का, अन्न चढेचा कली तेलम निशो थम रिम्शो फस एफाह का के ३० भाग नु लोग का तेल चाक्वा माल्ब।

एफाह पुक्तीके का बाक्ब। एफाह का २२ लिटर रिक्ब। मेको डा ३० भाग ६.५ लिटर खोदेंशो बाक्ब। नेल्ल १२ माना खोदेंशो बाक्ब। लोग का पुक्तीके का बाक्ब। मेको ०.३ लिटर रिक्ब। 11 मिनु चढेबमी मेको चोव्रखो सेल्चा पुंइसीशो मुर नु मेको आ चाक्शो नेल्ल परमप्रभु यावे आ डोंइती गुम्तीक ताम्बु आ ओव्रतीकेम वोइक्वा माल्ब।

12 मिनु चढेबमी सांड का नु मेको लोग का तेल गारचा आ परबम चढेचा माल्ब। मिनु क्युक्शा हिम्शा चढेतीक परमप्रभु यावे आ डोंइती चढेचा माल्ब। लोग आइक्च पुक्तीके बाक्ब। मेको ०.३ लिटर रिक्ब। 13 मिनु मेकोमी पाप आ परबम चढेतीक नु चोशा चढेतीक साइक्तीके मेको चोव्रखो बाक्तीकेम साइक्वा माल्ब। मारदे हना गारचा आ परबम चढेशो नु पाप आ परबम चढेशो चढेब के दुम्ब। मेको थम चोव्रखो बाक्ब। लेवी ७:७ 14 मिनु चढेबमी मेको गारचा आ परबम चढेशो आ हुश लाइश्शा, मेको चोव्रखो सेल्चा पुंइसीशो मुर आ ग्युरा नोफा आ फेनेम, आ ग्युरा गुइ डा बोंगे नु आ ग्युरा खोइल डा बोंगेमी खेक्वा माल्ब। लेवी ८:२३; प्रस्थान २९:२० 15 मिनु चढेबमी मेको तेल रे इक्का लाइश्शा, आ पेरा गुइ डा ताप्लाम लुक्वा माल्ब। 16 मिनु चढेबमी आ ग्युरा गुइ डा ब्रेचोम आ पेरा गुइम बाक्शो तेलम ख्व्शा, परमप्रभु यावे आ डोंइती ७ खेयप ब्रुइक्वा माल्ब। लेवी ४:६, १७ 17 मिनु चढेबमी आ गुइम लीशो तेल चोव्रखो सेल्चा पुंइसीशो मुर आ ग्युरा नोफा डा फेनेम, मेको आ ग्युरा गुइ डा बोंगेमी नु आ ग्युरा खोइल डा बोंगेम नु गारचा आ परबम चढेशो आ हुश तारी खेक्वा माल्ब। 18 मिनु चढेबमी आ गुइम लीशो तेल मेको चोव्रखो सेल्चा पुंइसीशो मुर आ पियाम खेक्वा माल्ब। मिनु चढेबमी परमप्रभु यावे आ डोंइती मेको मुर आ परबम पाप क्याम्तीक गेय पचा माल्ब।

19 मिनु चढेबमी मेको आ पाप आ परबम चढेचा माल्ब। मोपा मेको चोव्रखो सेल्चा पुंइसीशो मुरुम पाप क्याम्तीक गेय पशो बाक्ब। मिनु नोले मेकोमी चोशा चढेतीक क्योरचा माल्ब। 20 मिनु चढेबमी मेको चोशा चढेतीक नु अन्न चढेतीक चढेतीकेम चढेचा माल्ब। मोपा मेको चढेबमी मेको आ परबम पाप क्याम्तीक गेय पचा माल्ब। मिनु मेको मुर ग्रांग्रा मदिशो चोव्रखो दुम्ब।

21 मिनु मेको मुर प्रुडग बाक्त हना, मोशो यो चाक्ने मचाप्बाक्त हना, मेकोमी आ पाप क्याम्तीक गेय आ परबम क्युक्शा हिम्शा चढेचा कली सांड का नु अन्न चढेचा कली तेलम निशो एफाह का के १० भाग थम रिम्शो फस नु लोग का तेल चाक्वा माल्ब। एफाह पुक्तीके का बाक्ब। एफाह का २२ लिटर रिक्ब। मेको के १० भाग २ लिटर नु इक्का खोइ बाक्ब। लोग आइक्च पुक्तीके का बाक्ब। मेको ०.३ लिटर रिक्ब। 22 मिनु आ चाप्शो खोदेंशो पा परवा निक्शी कि दुक्कुर निक्शी, का पाप आ परबम चढेचा कली नु का चोशा चढेचा कली चाक्वा माल्ब। लेवी ५:७

23 मिनु मेकोमी ८ नाक्ती आंम कली चोव्रखो सेल्पाइक्वा कली मेको निक्शी गुम्तीक ताम्बु आ ओव्रतीक परमप्रभु यावे आ डोंइती चढेब आ बाक्तीकेमी चाक्वा माल्ब। 24 मिनु चढेबमी गारचा आ परबम चढेचा कली मेको सांड नु लोग का तेल चाक्शा, क्युक्शा, हिम्शा, चढेतीके परमप्रभु यावे आ डोंइती क्युक्शा हिम्शा चढेचा माल्ब। लोग का इस्राएली आन आइक्च पुक्तीक का बाक्ब। मेको ०.३ लिटर रिक्ब। मेको माना का नु इक्का खोइ खोदेंशो बाक्ब। 25 मिनु चढेबमी मेको गारचा आ परबम चढेतीक सांड क्योरशा, मेको आ हुश इक्का लाइश्शा, चोव्रखो सेल्चा पुंइसीब मुर आ ग्युरा नोफा डा फेनेम, आ ग्युरा गुइ डा बोंगे नु आ ग्युरा खोइल डा बोंगेमी खेक्वा माल्ब। 26 मिनु चढेबमी मेको तेल इक्का आ पेरा गुइ डा ताप्लाम लुक्वा माल्ब। 27 मिनु आ ग्युरा गुइ डा ब्रेचोम पेरा गुइम बाक्शो तेल परमप्रभु यावे आ डोंइती ७ खेयप ब्रुइक्वा माल्ब। 28 मिनु चढेबमी आ गुइम बाक्शो तेल मेको चोव्रखो सेल्चा पुंइसीब मुर आ ग्युरा नोफा आ फेनेम, आ ग्युरा गुइ डा बोंगे नु आ ग्युरा खोइल डा बोंगेम गारचा आ परबम चढेशो आ हुश खेक्शो तार खेक्वा माल्ब। 29 मिनु चढेबमी आ गुइम लीशो तेल मेको चोव्रखो सेल्चा पुंइसीब मुर आ पियाम खेक्वा माल्ब। मोपा मेकोमी चोव्रखो सेल्चा पुंइसीब मुर कली परमप्रभु यावे आ डोंइती पाप क्याम्तीक गेय पाइब। 30 मिनु मेकोमी दुक्कुर कि परवा आ चाप्शो खोदेंशो पा चढेचा माल्ब। 31 मिनु का पाप आ परबम, का चोशा चढेचा कली अन्न चढेतीक नु चढेचा

माल्ब। मोपा चढेबमी चोव्रखो सेल्चा पुंडसीब मुर आ पर्वम परमप्रभु यावे आ डोंइती पाप क्याम्तीक गेय पचा माल्ब।

<sup>32</sup> कुशुल डा याक्सीब रोइ पशा, चोव्रखो दुम्तीक आ पर्वम पुडग आन पचा माल्शो गेय एको बाक्ब” देंत। लेवी १३:४७-५९

### बुंखी डाइश्शो खिं

<sup>33</sup> परमप्रभु यावेमी मोसा नु हारून आस कली <sup>34</sup> “मुल गो इन कली गेशो कनान रागीम जावदीश्शा बाक्नीनु, इन आंम के सेल्नी नोले, गो मेको रागी डा तेकोइ खिंम बुंखी डाइक्पाइक्ता हना, <sup>35</sup> मेको खिं डा मुर जाक्शा चढेब कली ‘आं खिंम बुंखी डाइश्शो खोदेंशो तांडसाक्ब’ देंचा माल्ब। लेवी १३:२ <sup>36</sup> मिनू चढेबमी ‘आं जाक्शा रिंशो पा कोव्रचा क्येडा डोंइती इ खिं कली श्येत्थ पावो। मो मपाइतीनी हना खिंम बाक्शो मारेइ मारेइ ग्रांघ्रा दिशो दुम्ब’ दे अरेचा माल्ब। मिनू नोले मेको चढेब मेको खिं कोव्रथ लचा माल्ब।

<sup>37</sup> मिनू मेकोमी मेको बुंखी डाइश्शो रिंशो पा कोव्रचा माल्ब। मेको खिं डा गारो गिगी, लल दुम्शा, गारो क्येडा लुकच लशो बाक्त हना, लेवी १३:३

<sup>38</sup> चढेब खिं रे लाडगा गूशा, ७ नाक्त सम्म लाप्यो चोक्शा वोइक्चा माल्ब।

<sup>39</sup> मिनू मेको चढेब ७ नाक्त नोले जाक्शा, मेको बुंखी गारोम बारशो बाक्म कों मबाक्म रिंशो पा कोव्रचा माल्ब। मिनू मेको गारोम बारशो बाक्त हना,

<sup>40</sup> चढेबमी मेको बुंखी डाइश्शो फुल्लु गुंडपाइश्शा, सहर क्येडा डोन ग्रांघ्रा दिशो ताइक्तीकेमी ताइक्पाइक्चा माल्ब। <sup>41</sup> मेको खिं आगा तेइ तेइ खोतेर पपाइक्चा माल्ब। मिनू खोतेर पाइश्शो खप सहर क्येडा डोन ग्रांघ्रा दिशो ताइक्तीकेमी ताइक्पाइक्चा माल्ब। <sup>42</sup> मिनू नोले मेकोपुकीमी ताइश्शो फुल्लु आ पा डा अर्को फुल्लु चाक्शा, मेको फुल्लु बाक्तीकेम प्रोव्रचा माल्नीम। मिनू नक खप चाक्शा, खिं सिल्चा माल्नीम।

<sup>43</sup> मिनू फुल्लु गुंडशा, अर्को फुल्लु प्रोव्रशा, खप खोतेर पा गुंडशा, अर्को खप सिल्शा यो, मेको बुंखी लेंशा गूत हना, <sup>44</sup> चढेबमी लेंशा जाक्शा, रिंशो पा कोव्रचा माल्ब। मिनू मेको बुंखी खिंम बारना बारन लशो बाक्त हना, मेको बारतीक बुंखी डाइश्शो बाक्ब। मेको खिं ग्रांघ्रा बाक्ब। <sup>45</sup> मिनू मेको खिं कली प्रेत्वा माल्ब। मेको आ फुल्लु, शी नु सिल्शो खप सहर क्येडा डोन ग्रांघ्रा दिशो ताइक्तीकेमी ताइक्चा माल्ब।

<sup>46</sup> मिनू सुइ मेको खिं चोक्शो नोले ओव्रत हना, मेको नां मरिक्म सम्म ग्रांघ्रा दिशो दुम्ब। लेवी ११:२४ <sup>47</sup> मिनू सुइ मेको खिंमी इप्ट हना यो, जाप्टु हना यो, मेकोमी आ वा मुरचा माल्ब।

<sup>48</sup> तन्न चढेबमी मेको खिं रिंशो पा कोव्रडानु, सिल्शा फिक्शा नोले मेको बुंखी डाइश्शो मबारत हना, चढेबमी मेको खिं कली ‘ग्रांघ्रा मदिशो चोव्रखो बाक्ब’ देंचा माल्ब। मारदे हना मेको बुंखी जाम्शा लत। <sup>49</sup> मिनू मेको खिं डा मुरुमी खिं कली चोव्रखो सेल्चा कली चिक्ब निक्शी, लेबानोन डा लाइश्शो रवा आ शी, हिस्सोप नु लल श्येले चाक्चा माल्ब। <sup>50</sup> मिनू चढेबमी ‘मेको चिक्ब निक्शीमी का खप के सिक्स ब्वाक्कुम ब्रीशो बोस तारी सतो’ दे अरेचा माल्ब। लेवी १४:४-७ <sup>51</sup> मिनू चढेबमी मेको लेबानोन डा लाइश्शो रवा आ शी, हिस्सोप नु लल रडम नुप्यो श्येले नु मेको सेस चिक्ब लाइश्शा, मेको नेल्ल कली मेको सिक्स ब्वाक्कु तारी साइश्शो चिक्ब आ हुशेमी खूम्शा गुंडचा माल्ब। मिनू मेकोमी मेको खिं कली ७ खेयप ब्रुडक्चा माल्ब। <sup>52</sup> मोपा मेकोम चिक्ब आ हुश, सिक्स ब्वाक्कु, सेस चिक्ब, लेबानोन डा लाइश्शो रवा आ शी, हिस्सोप नु लल रडम नुप्यो श्येलेमी मेको खिं ग्रांघ्रा मदिशो चोव्रखो सेल्चा माल्ब। <sup>53</sup> मिनू मेकोमी मेको सेस चिक्ब कली सहर रे लाडगा प्रोंइशा बेरपाइक्चा माल्ब। मोपा मेकोमी मेको खिं डा बुंखी क्याम्तीक गेय पचा माल्ब। मिनू मेको खिं ग्रांघ्रा मदिशो चोव्रखो दुम्ब।

<sup>54</sup> मिनू कुशुल डा याक्सीब रोइ नेल्ल, रक सुइब रोइ, <sup>55</sup> वासी नु खिं डा बुंखी डाइक्तीके, <sup>56</sup> होम्शो नु आइक्व गार नु बुश लुम्सीशो गारपुकी चोव्रखो सेल्तीक गेय एकोन बाक्नीम।

<sup>57</sup> ग्रांघ्रा दिशो नु मदिशो तुइक्तीक एको बाक्ब। मेको कोव्रर नु कोव्रर खोदेंशो रोइ नु बुंखी डाइश्शो आन पर्वम पतीक गेय एकोन बाक्नीम” दे परमप्रभु यावेमी मोसा नु हारून आस कली माइक्तीम्पी।

### वोंइश मुर आ रां डा ग्रांघ्रा दिशो

<sup>15</sup> परमप्रभु यावेमी मोसा नु हारून आस कली <sup>2</sup> “इसाएली आन कली ‘सुइ वोंइश मुर आन के मार मार यित हना यो, मेको यितीके मेको मुर ग्रांघ्रा दिशो बाक्ब। गन्ती ५:२ <sup>3</sup> मेको आ रां रे यितीके मार बाक्ब देंशा हना, रां रे यित हना यो, देक्त हना यो, मेको मुर ग्रांघ्रा दिशो बाक्ब। <sup>4</sup> मेको मुर इप्यो ब्राख्ये नेल्ल नु आ निश्शो नित्तीके नेल्ल ग्रांघ्रा दिशो बाक्नीम। <sup>5</sup> सुमी मेको आ ब्राख्ये थीबा, मेकोमी आ वा मुरशा, चिक्सीचा माल्ब। मिनू मेको नां मरिक्म सम्म ग्रांघ्रा दिशो दुम्ब। <sup>6</sup> मिनू सु मेको आ नित्तीकेमी निप्या, मेकोमी आ वा मुरशा, चिक्सीचा माल्ब। मिनू मेको नां मरिक्म सम्म ग्रांघ्रा दिशो दुम्ब। <sup>7</sup> सुमी मेको मुर कली थीबा, मेकोमी आ वा मुरशा, चिक्सीचा माल्ब। मिनू मेको नां मरिक्म सम्म ग्रांघ्रा दिशो दुम्ब। <sup>8</sup> मेको मुरुमी चोव्रखो मुर कली तोक्ताक्व हना, मेको चोव्रखो मुर चिक्सीचा माल्ब। मेकोमी आ वा मुरचा माल्ब। मिनू मेको नां मरिक्म सम्म ग्रांघ्रा दिशो दुम्ब। <sup>9</sup> मेको मुर तेको शारा तार ब्रतीके थेंकाम निप्या, मेको ग्रांघ्रा दिशो दुम्ब। <sup>10</sup> सुमी मेको आ नित्तीके थीबा, मेको नां मरिक्म सम्म ग्रांघ्रा दुम्ब। सुमी मेको थोव्रक कुरबा, मेकोमी आ वा मुरशा, चिक्सीचा माल्ब। मेको नां मरिक्म सम्म ग्रांघ्रा दुम्ब। <sup>11</sup> मेको मुरुमी आ गुइ मचिक्थु, सुइ कली थिप्टु हना, मेको थिचा पुंडसीब मुरुम आ वा मुरशा, चिक्सीचा माल्ब। मिनू मेको नां मरिक्म सम्म ग्रांघ्रा दुम्ब। <sup>12</sup> मेको मुरुम तेकोइ खप के बोस थिप्टु हना, मेको प्रोल्चा माल्ब। तन्न शी के बाक्त हना, ब्वाक्कुम शेक्चा माल्ब। लेवी ११:३३

<sup>13</sup> मेको मुरुमी आ ग्रांघ्रा दिशो देक्म नोले, चोव्रखो दुम्चा कली ७ नाक्त रिम्चा माल्ब। मिनू आ वा मुरशा, आ रां नेल्ल ब्वाक्कुम चिक्सीचा माल्ब। मिनू मेको चोव्रखो दुम्ब। <sup>14</sup> मिनू मेकोमी ८ नाक्ती परवा निक्शी कि ढुकुर निक्शी कुरशा, परमप्रभु यावे आ डोंइती गुम्तीक ताम्बु आ ओव्रतीक जाक्शा, मेको चढेब कली गेचा माल्ब। लेवी ५:७ <sup>15</sup> मिनू चढेबमी मेको का पाप आ पर्वम नु का चोशा चढेतीक चढेचा माल्ब। मोपा चढेबमी मेको ग्रांघ्रा दिशो यिशो मुर आ पर्वम परमप्रभु यावे आ डोंइती पाप क्याम्तीक गेय पचा माल्ब।

<sup>16</sup> मिनू सुइ वोंइश मुर आ बिउ मोशा यित हना, मेकोमी आ रां नेल्ल ब्वाक्कुम चिक्सीचा माल्ब। मिनू मेको नां मरिक्म सम्म ग्रांघ्रा दुम्ब। लेवी २२:४ <sup>17</sup> मिनू आ बिउ तेको वा नु कुशुल के सेल्शो मारेइमी दोक्त हना, मेको मुरचा माल्ब। मिनू मेको नां मरिक्म सम्म ग्रांघ्रा दुम्ब। <sup>18</sup> सुइ वोंइश मुर मीश मुर नु इम्मेनु, बिउ दोक्त हना, मेको निम्फा चिक्सीचा माल्नीस। मिनू नां मरिक्म सम्म ग्रांघ्रा दुम्नीस।

### मीश मुर आ रां डा ग्रांघ्रा दिशो

<sup>19</sup> सुइ मीश मुर मथिचा दुम्त हना, मेको आ रां डा दुम्तीक बाक्ब। मेको ७ नाक्त सम्म ग्रांघ्रा दिशो दुम्ब। सुम मेको कली थीबा, मेको नां मरिक्म सम्म ग्रांघ्रा दिशो बाक्ब। लेवी १८:१९ <sup>20</sup> मेको मीश मुर ग्रांघ्रा दिशो दुम्मेनु, आ इप्टीके नु नित्तीके नेल्ल ग्रांघ्रा दिशो दुम्नीम। <sup>21</sup> सुम मेको आ ब्राख्ये थीबा, मेकोमी आ वा मुरशा, चिक्सीचा माल्ब। मिनू मेको नां मरिक्म सम्म ग्रांघ्रा दिशो दुम्ब। <sup>22</sup> सुम मेको आ निश्शो थोव्रक थीबा, मेकोमी आ वा मुरचा माल्ब। मिनू चिक्सीचा माल्ब। मिनू मेको नां मरिक्म सम्म ग्रांघ्रा दिशो दुम्ब। <sup>23</sup> सुइ मुरुमी आ ब्राख्ये कि आ निश्शो पीरा थिप्टु हना, मेको नां मरिक्म सम्म ग्रांघ्रा दिशो दुम्ब। <sup>24</sup> मिनू वोंइश मुर मेको नु इप्ट नु मेको आ ग्रांघ्रा दिशो लुम्साक्व हना, मेको ७ नाक्त सम्म ग्रांघ्रा दिशो दुम्ब। मिनू मेको आ इप्यो ब्राख्ये यो ग्रांघ्रा दिशो दुम्ब।

<sup>25</sup> मिनू सुइ मीश मुर आ रां ब्रोल्लो प्रोंइशा मेको क्येडा शूश नाक्त सम्म हुश यिस डा यिस बाक्त हना, आ मथिचा दुम्शो नडा खोदेंशो पा ग्रांघ्रा दिशो दुम्ब। मेको आ मथिचा नाक्त खोदेंशो पा मेको ग्रांघ्रा दिशो दुम्ब। <sup>26</sup> मेको आ हुश यिशो नाक्त, आ इप्यो ब्राख्ये आ मथिचा दुम्शो नडा खोदेंशो पा ग्रांघ्रा दिशो दुम्ब। आ निश्शो पीरा आ मथिची नडा खोदेंशो पा ग्रांघ्रा दिशो

दुम्ब। 27 मेको थोव्रक थीब ग्रांग्रा दिशो दुम्ब। मेकोमी आ वा मुश्या, चिक्सीचा माल्ब। मिनु मेको नां मरिक्म सम्म ग्रांग्रा दिशो दुम्ब।

28 मेकोमी आ हुश यिचा देक्म नोले ७ नाक्ती रिम्चा माल्ब। मिनु मेको नोले मेको ग्रांग्रा मदिशो दुम्ब। 29 मिनु ८ नाक्ती मेकोमी दुकुर निक्शी कि परवा निक्शी चाक्शा, गुम्तीक ताम्बु आ ओव्रतीक चढेब आ डोंइती जाक्चा माल्ब। 30 मिनु चढेबमी का पाप आ परबम नु का चोशा चढेतीके चढेचा माल्ब। मोपा चढेबमी मेको आ हुश यिशी आ परबम परमप्रभु यावे आ डोंइती मेको आ परबम चोव्रखो दुम्तीक गेय पचा माल्ब।

31 मोपा गे निक्शीमी इस्त्राएल डा मुर आन कली ग्रांग्रा दितीक रे डोन वोतीस। मो मपाइतीसी हना, मेकोपुकीम आं बाक्तीक ताम्बु ग्रांग्रा दिशो सेल्नीम। मिनु मेको आन ग्रांग्रा आ परबम बेक्नीम।

32 एको ग्रांग्रा दिशो यितीक कि बिउ दोक्शो ग्रांग्रा दिशो दुम्शो वोंइश मुर आ परबम चोव्रखो सेल्तीके गेय बाक्ब। 33 मिनु मथिचा दुम्शो, ग्रांग्रा यिशी वोंइश मुर कि मीश मुर नु ग्रांग्रा दिशो दुम्शो मीश मुर नु इप्ब वोंइश मुर आन कली ग्रांग्रा मदिशो सेल्तीक गेय एकोन बाक्नीम" देंचा माल्नीसी" देंत।

#### पाप क्याम्तीक नाक्त

लेवी २३:२६-३२; गन्ती २९:७-११; हिब्रू ९:७-१४

16 हारून आ तौ निक्शी परमप्रभु यावे आ डोंइती बेक्सा नोले परमप्रभु यावेमी मोसा नु लोव्र पाप्तु। लेवी १०:१-२; 2 मिनु परमप्रभु यावेमी मोसा कली "इ लोक्ब हारून कली 'इ दाक्शो खोदेंशो पा, गेना हना यो फारशो वा आ आगा बाक्शो चोव्रखो कोठामी कबल पशो सन्दोस तार बाक्शो शिशी पतीके आ डोंइती मजाक्को। मटीतीनी हना, गे बेक्नेवे। मारदे हना गो शिशी बाक्तीकेम गोस्स आगाम बाक्शा जाक्नुडं। प्रस्थान २६:३३-३४

3 हारून दोपा ओव्रने चाप्ब देंशा हना, पाप आ परबम चढेचा कली ब्यफ का नु चोशा चढेचा कली सांड का चाक्शा ला ओव्रने चाप्ब। लेवी ४:३; लेवी १:१० 4 सुती के आं गेय पचा कली ला आगा फेक्तीक वा फेक्शा, सुती के आ तार फेक्तीक फेक्शा, सुती के किष्पूर किष्वा नु सुती वा के पियाम गुप्तीक गुक्शा ओव्रचा माल्ब। मेको वा आ गेय पचा कली ला बाक्त। मेकोमी चिक्सीशा ला मेको वा फेक्सीचा माल्ब। प्रस्थान २८:३९,४२; प्रस्थान २९:४; प्रस्थान ३०:१९-२० 5 मेकोमी इस्त्राएल डा मुर आन गुड रे पाप आ परबम चढेचा कली बोका निक्शी नु चोशा चढेचा कली सांड का ताक्चा माल्ब। लेवी ३:९,१५,१६

6 मिनु हारूनमी आंम पाप आ परबम चढेतीक ब्यफ चढेचा माल्ब। मिनु आ नु आ खिं डा मुर आन परबम पाप क्याम्तीक गेय पचा माल्ब। लेवी ९:२, ८-११; हिब्रू ७:२७ 7 मिनु मेकोमी मेको बोका निक्शी लाइश्शा, गुम्तीक ताम्बु आ ओव्रतीक परमप्रभु यावे आ डोंइती वोइक्चा माल्ब। 8 मिनु हारूनमी मेको बोका निक्शी आ परबम फेन्टे आप्चा माल्ब। मेकोमी परमप्रभु यावे कली का नु मो प्रोंइचा कली का फेन्टे आप्चा माल्ब। 9 मिनु हारूनमी परमप्रभु यावे कली दुम्शो बोका कली आ नेक्था चाक्शा पाप आ परबम चढेचा माल्ब। 10 फेन्टे आप्चा मो प्रोंइतीक बोका कली सेसीन परमप्रभु यावे आ डोंइती चाक्चा माल्ब। मिनु मेको आ तारी पाप क्याम्तीक गेय पा, मेको बोका कली गोरशो रागीम प्रोंइशा सोइक्चा माल्ब।

11 मिनु हारूनमी आ आंम पाप आ परबम चढेतीके ब्यफ चाक्चा माल्ब। मिनु आ आंम कली नु आ खिं डा मुर आन परबम पाप क्याम्तीक गेय पचा माल्ब। मिनु मेकोमी आ पाप आ परबम चढेतीक ब्यफ क्योरचा माल्ब। रोमी ३:२५ 12 मिनु मेकोमी परमप्रभु यावे आ डोंइती चढेतीके रे ब्रशो कोइला धूप चोतीकेम कुर पा मुठी निक्शी चुशो ब्रोवशो रिना पाइश्शो धूप कुरशा फारतीक वा चोव्रखो कोठा ओव्रचा माल्ब। 13 मिनु मेकोमी परमप्रभु यावे आ डोंइती बाक्शा, धूप चोचा माल्ब। मिनु धूप आ कुनम कबल पशो सन्दोस आ तार बाक्शो शिशी बाक्तीक कली सुम्चा माल्ब। मोदेंशो मपाप्तु हना, मेको बेक्ब। प्रस्थान २५:१७-२२ 14 मेको नोले मेकोम ब्यफ आ हुश इक्का ब्रेक्शा पिश्शा, परमप्रभु यावे आ बाक्तीक तारी पूर्व गे ब्रुइक्चा माल्ब। मेकेर मेकोमी आ ब्रेप्चोमी मेको हुश कली ७ खेयप ब्रुइक्चा माल्ब।

15 मिनु मेकोमी मुर आन पाप आ परबम चढेतीक बोका क्योरचा माल्ब। मिनु मेको आ हुश फारशो वा आ आगा डा कोठा चाक्शा, ब्यफ आ हुश खोदेंशो पा, शिशी बाक्तीक तार नु आ डोंइती ब्रुइक्चा माल्ब। हिब्रू ४:१६; हिब्रू ९:५ 16 मोपा मेकोमी मेको कोठा चोव्रखो दुम्ब। मिनु इस्त्राएल डा मुर आन ग्रांग्रा दिशो नु मरिम्शो पशो नु मेको आन पाप आन परबम पाप क्याम्तीक गेय बाक्ब। मिनु मेकोमी गुम्तीक ताम्बु कली यो पचा माल्ब। 17 मिनु हारूनमी चोव्रखो कोठामी पाप क्याम्तीक गेय पवानु, सुइ मुर गुम्तीक ताम्बु ओव्रचा मदुम्ब। मेकोमी आंम आ परबम, आ खिं डा मुर आन परबम नु इस्त्राएल डा मुर नेल्ल आन परबम पाप क्याम्तीक गेय मथुमा सम्म, सुइमी गुम्तीक ताम्बु ओव्रचा मदुम्ब।

18 मिनु नोले मेको लाडगा गूशा, परमप्रभु यावे आ डोंइती बाक्शो चढेतीकेम लशा, मेको आ परबम पाप क्याम्तीक गेय पचा माल्ब। मिनु मेकोमी ब्यफ आ हुश नु बोका आ हुश इक्का लाइश्शा, चढेतीक आ एर ओंथ डा ग्राव नेल्लेम खेक्चा माल्ब। प्रस्थान ३०:१० 19 मिनु इक्का हुश लाइश्शा, आ ब्रेप्चोम ७ खेयप मेको चढेतीक तार ब्रुइक्चा माल्ब। मोपा मेको चढेतीके इस्त्राएली आन ग्रांग्रा दिशो रे चोव्रखो सेल्चा माल्ब।

20 मिनु हारूनमी चोव्रखो कोठा, गुम्तीक ताम्बु नु चढेतीके आ परबम पाप क्याम्तीक गेय पवा नोले, मेको सेस बोका चाक्चा माल्ब। 21 मिनु नोले हारूनम आ गुड निम्फा मेको सेस बोका आ पिया तार वोइक्चा माल्ब। मिनु इस्त्राएली आन मरिम्शो पशो नेल्ल नु आन पशो पाप नेल्ल शोव्रशा, मोपा नेल्ल पाप बोका आ पियाम वोइक्चा माल्ब। मिनु नोले मुर काम मेको बोका कली गोरशो रागीम चोक्चा माल्ब। 22 मोपा मेको बोकांम मेको आन मरिम्शो पशो कुरशा, सुइ मबाक्शो गोरशो रागीम लाइक्चा माल्ब। मेको मुरुम मेको बोका कली गोरशो रागीम प्रोंइचा माल्ब।

23 मेको नोले हारून गुम्तीक ताम्बुम ओव्रशा, मेको आ डोंइती चोव्रखो कोठा ओव्रशा, फेक्शो सुती वा प्रुइश्शा, मेक उड वोइक्चा माल्ब। 24 मिनु मेकोमी चोव्रखो बाक्तीके लशा, चिक्सीचा माल्ब। मिनु आ वा फेक्शा लेत्चा माल्ब। मिनु आंम आ परबम नु मुर आन परबम चोशा चढेतीक चढेशा, आंम कली नु मुर आन कली पाप क्याम्तीक गेय पचा माल्ब। 25 मिनु मेकोमी पाप आ परबम चढेशो आ बाँसो चढेतीकेमी चोचा माल्ब।

26 मिनु प्रोंइचा पुंइसीब बोका कली चोव्रथ लाइब मुर आ वा मुरशा, चिक्सीचा माल्ब। मिनु मेको नोले मुर आन बाक्तीक जाक्ने चाप्ब। 27 मिनु पाप आ परबम चढेशो ब्यफ नु बोका आस हुशेमी मेको चोव्रखो कोठा कली पाप क्याम्तीक गेय पशा नोले मेको मुर आन बाक्तीक रे गुंइशा, मेको आस कुशुल, शे नु गोबर नेल्ल चोचा माल्ब। लेवी ४:१२; लेवी ६:२३; हिब्रू १३:११ 28 मिनु मेको चोइबमी आ वा मुरशा, चिक्सीचा माल्ब। मिनु मेको नोले मुर आन बाक्तीके लेन्ने चाप्ब।

29 एको नेल्ले इन कली गेना हना यो पतीके बाक्ब। ७ महिना डा १० नाक्ती परमप्रभु यावे आ नेक्था जाक्चा माल्नीनी। मेको नाक्ती गे, इस्त्राएली नु अर्को रागी डा मुर नेल्लेमी काइ गेय मपने। लेवी २३:२७-३२; गन्ती २९:७ 30 मारदे हना मेको नाक्ती इन परबम पाप क्याम्तीक गेय पाइनीम। मिनु परमप्रभु यावे आ डोंइती इन पाप क्याम्शो बाक्ब। 31 एको इन ठेयब नाइक्तीक नाक्ती बाक्ब। मोपतीके काइ गेय मपने। एको गेना हना यो कली पतीक बाक्ब।

32 तेल लुक्शो नु आ आफ आ पा डा चढेब दुम्चा कली सु योव्रसीशो बाक्मे, मेकोमी पाप क्याम्तीक गेय पचा माल्ब। मिनु मेकोमी मेको गेय कली ला वोइश्शो सुती के फेक्तीके फेक्चा माल्ब। प्रस्थान २८:४१-४२ 33 मेकोमी चोव्रखो कोठा कली, गुम्तीक ताम्बु नु चढेतीक कली पाप क्याम्तीक गेय पचा माल्ब। मिनु मेकोमी चढेबपुकी नु मुर नेल्ल आन परबम पाप क्याम्तीक गेय पचा माल्ब।

34 मिनु बर्सम खेयप का इस्त्राएली नेल्ल आन कली पाप क्याम्तीक गेय पचा माल्ब। मेको इन कली गेना हना यो पतीक बाक्त। बर्सम खेयप का इस्त्राएली नेल्ल आन पाप आ परबम माफ पुंइचा माल्ब' दे हारून कली देनो" देंत। मिनु परमप्रभु यावेमी मोसा कली दोदेंशो पा अरेवा, मोदेंशो पा पाप्तु। प्रस्थान ३०:१०; हिब्रू १०:३

## क्योरशा चढेतीके

17 मिनु परमप्रभु यावेमी मोसा कली 2 "गे हारून, मेको आ तौपुकी नु इस्राएली नेल्ल आन कली 'परमप्रभु यावेमी अरेशो मार बाक्ब दॅशा हना, 3 सुमी इस्राएली आन बाक्तीकेमी ब्यफ, भेडा नु क्यारश क्योरबा, 4 मिनु परमप्रभु यावे आ डोंइती चढेचा कली गुम्तीक ताम्बु आ ओव्रतीकेम मचाक्बा, मेको मुर साइशो आ पर्वम दोस ताइब। मेकोमी साइक्तीके आ मुर रे तिल्वा पुंडसीब। उत्पत्ती ९:६ 5 मोपतीके इस्राएलीपुकीमी आन क्योरशा चढेतीके आन बाक्तीके रे गुंडशा, परमप्रभु यावे आ डोंइती चाक्चा माल्नीम। मेकोपुकीमी आन क्योरतीक बस्तु भाव चढेब आ बाक्तीकेम, गुम्तीक ताम्बु आ ओव्रतीके आ डोंइती चाक्चा, दुशा बाक्तीक आ पर्वम चढेचा माल्नीम। 6 मिनु चढेबमी मेको आ हुश गुम्तीक ताम्बु आ ओव्रतीके आ डोंइती बाक्शो परमप्रभु यावे कली चढेतीकेम ब्रुइक्चा माल्ब। मिनु बोंसो परमप्रभु यावे कली आ दाक्शो ब्रोंवशो रिना पपाइशो सेल्वा कली चोचा माल्ब। 7 मेकोपुकीमी मोपा वोल कली चढेशा, आंम कली तेल्लेम खोदेंशो सेल्ने मचाप्नीम। एकोम परमप्रभु यावे आ अरेशो लोव्र नेल्ल आन पाला सम्म गेना हना यो कली अरेतीके बाक्ब' देनो" देंत। ब्यवस्था १७:१७ 8 मिनु परमप्रभुमी "मेको आन कली 'इस्राएली नु मेको नु बाक्ब अर्को रागी डा मुर चोशा चढेतीके चढेचा दाक्ताक्म हना, ब्यवस्था १२:१४ 9 मिनु मेको गुम्तीक ताम्बु आ ओव्रतीके मचाक्थु, परमप्रभु यावे कली मचढेप्नु हना, मेको मुर कली आ मुर आन दाते रे तिल्वा माल्नीम' दे माइक्मी।

## हुश मब्वचा, दे अरेशो

10 इस्राएली नु मेको आन दातेम बाक्ब अर्को रागी डा मुर सुइमी हुश ब्वाप्तेक्म हना, गो मेको हुश ब्वाइब कली मरिश्शो पाइनुड। मिनु मेको मुर कली आ मुर आन दाते रे क्याम्नुड। लेवी ३:१७ 11 मारदे हना मेको बस्तु भाव आन हुशेम ब्रोंइतीक सोक्त बाक्ब। मिनु गो मेको हुश इन कली चढेतीकेमी इन पाप क्याम्तीक गेय पचा कली गेता। मारदे हना हुशेम पाप क्याम्तीके बाक्ब। हिब्रू ९:२२ 12 मोपतीके गेपुकी नु गेपुकी नु बाक्ब अर्को रागी डा मुर सुइमी हुश ब्वचा मदुम्ब, दे गो इस्राएली आन कली दॅशो बाक्नुड। 13 मिनु सुइ इस्राएलीपुकी नु गेपुकी नु बाक्ब अर्को रागी डा मुर सिखार ग्यारशा, ग्याइशशा मारेइ साइक्तीनी हना, मेको आ हुश नेल्ल जारशा, खपीम सुम्चा माल्ब।

14 मारदे हना मारेइ मारेइ के ब्रोंइतीक सोक्त हुशेमी बाक्ब। मोपतीके गो इस्राएली नेल्ल आन कली 'गे तेकोइ जन्तु, बस्तु भाव आन हुश ब्वचा मदुम्ब। मारदे हना नेल्ल जन्तु आन ब्रोंइतीके हुशेम बाक्ब। मेको सुमी ब्वाइबा, मेको क्याम्चा पुंडसीब। उत्पत्ती ९:४

15 मिनु इस्राएली नु अर्को रागी डा मुर नेल्लेमी, सुम आंमा बेक्शो मारेइ मारेइ नु ब्वाकी डा जन्तुम साइशो मार मार ब्वाप्तेक्म हना, मेको आन वा मुरशा, चिक्सीचा माल्नीम। मिनु नां मरिक्म सम्म ग्रांघ्रा बाक्चा माल्नीम। मिनु नोले मेको ग्रांघ्रा मदिशो दुम्नीम। लेवी ११:४०; लेवी २२:८; प्रस्थान २१:३३-३६; प्रस्थान २२:३०; प्रेरित १५:२० 16 तन्न मेकोपुकीमी आन वा ममुरथु, मचिक्साक्म हना, मेको आन पशो आ पर्वम मेको दोस ताइब दुम्नीम' दे हारून नु आ तौ आन कली देनो" दे परमप्रभु यावेमी देंत।

## ग्रांघ्रा दितीक गेय मपने

18 मिनु परमप्रभु यावेमी मोसा कली 2 "गे इस्राएली आन कली 'गो परमप्रभु यावे, इन परमप्रभु नड। 3 गेपुकी इजीप्त रागीम पशो खोदेंशो मपने। मिनु गो इन कली कनान रागी लाइक्नन्नी। गेपुकीमी मेक डा मुर आन पशो खोदेंशो मपने। प्रस्थान २३:२४ 4 गेपुकीमी आं पावो, दे अरेशो लोव्र नु आं फुल्लुम मुशा ब्रेक्शो लोव्र पचा माल्नीनी। मारदे हना गो परमप्रभु यावे, इन परमप्रभु नड। 5 सुमी आं फुल्लुम मुशा ब्रेक्शो लोव्र नु आं पावो, दे अरेशो लोव्र पाइबा, मेको ब्रोंइचा ताइब। मारदे हना गो परमप्रभु यावे नड। नेहेम्याह ९:२९; इजीकीएल २०:११; रोमी ७:१०; रोमी १०:५; गलाती ३:१२

6 गेपुकी सुइ आंम नेक्था डा नाता नु मइपीन। मारदे हना गो परमप्रभु यावे नड। 7 इन ममा नु इप्शा इन आफ कली मुने मतोक्कीन। इन ममा नु इप्चा मदुम्ब। 8 गे इ आफ आ अरु मीश नु मइपो। मो पाइतीनी हना, गेपुकीमी इन आफ कली मुने तोक्नीनी। उत्पत्ती ३५:२२; ब्यवस्था २७:२०; २सामुएल १६:२२; १कोरिन्थी ५:१ 9 गे इ दिदी, बहिनी नु मइपो। इ आफ आ तमी बाक्त हना यो, इ ममा आ तमी बाक्त हना यो नु आंम खिंम जरमेशो बाक्त हना यो अर्को रागीम जरमेशो बाक्त हना यो, मेको नु इप्चा मदुम्ब। 10 मिनु तौ आ तमी बाक्त हना यो, इ तमी आ तमी बाक्त हना यो, इ चच बाक्त हना यो मेको नु मइपो। मो पाप्तीवी हना, गे आंमा मुने दोक्नेवे। 11 गे इ आफ आ अरु मीश आ तमी नु मइपो। मेको इन समी बाक्ब। 12 गे इन फुपु नु मइपो। मेको इन आफ आ समी बाक्ब। प्रस्थान ६:२० 13 गे इ ममा आ लोकब नु मइपो। मेको इन ममा आ नाता बाक्नीम। 14 इन बोडमा नु आमा कान्छी नु मइपो। मेको इन बोडमा नु आमा कान्छी बाक्नीम। 15 गे इ चाइमी नु मइपो। मेको इ तौ आ मीश बाक्ब। गे मेको नु इप्चा मदुम्ब। 16 गे इ भोग्यु, बोहारी नु मइपो। मोपा इ लोकब कली मुने मतोक्को। लेवी २०:२१; मर्कूस ६:१८ 17 गे मीश मुर का नु आ तमी निम्फा नु मइपो। मिनु मेको आ तौ आ तमी नु आ तमी आ तमी, चच नु मइपो। मेकोपुकी नेक्था डा नाता बाक्नीम। मो पचा मरिश्शो बाक्ब। 18 गे इ मीश बाक्ना बाक्न, मेको आ लोकब मचाक्को। मेको नु मइपो।

19 गे रां ब्रोल्ला ग्रांघ्रा दिशो दुम्शो मीश मुर नु मइपो। 20 गे अर्को मुर आ मीश नु इप्शा आंम कली ग्रांघ्रा मसेलो। २सामुएल ११:४ 21 गे मोलेक कली आंम तमी तौपुकी चढेशा, आंम परमप्रभु यावे, इन परमप्रभु आ नें ग्रांघ्रा मसेलीन। गो परमप्रभु यावे नड। 22 मीश मुर नु इप्शो खोदेंशो पा वोंइश मुर नु मइपो। मेको थम ग्रांघ्रा बाक्ब। 23 गे बस्तु भाव नु इप्शा, आंम कली ग्रांघ्रा मसेलो। मीश मुर यो बस्तु भाव नु इप्चा मदुम्ब। मेको थम मरिश्शो दूली गेय बाक्ब। प्रस्थान २२:१८; लेवी २०:१६

24 गेपुकीमी मोदेंशो पाप पा आंम कली ग्रांघ्रा मसेलीन। मारदे हना गो मोदेंशो पाप आ पर्वम जात जात डा मुर इन डोंइती रे गुंडनुडमी। मेको नेल्लेम मोदेंशो पाप पा ग्रांघ्रा दिशो दुम्शो बाक्तेक्म। 25 मोपान मेको रागी ग्रांघ्रा दिशो दुम्त। मिनु गो मेको आन पाप आ पर्वम सजाइ गेता। मिनु रागीम मेक डा मुर आन कली उक्बे पा ताइक्ताक्व। 26 तन्न गे आं फुल्लुम मुशा ब्रेक्शो लोव्र नु आं पावो, दे अरेशो लोव्र टिने। मिनु गे इस्राएली नु इन दातेमी बाक्ब अर्को रागी डा मुर मोदेंशो ग्रांघ्रा दिशो गेय मपने। 27 मारदे हना इन डोंइती मेकेर बाक्ब मुरपुकीमी मोदेंशो ग्रांघ्रा नेल्ल पाप्तेक्म। मिनु रागी ग्रांघ्रा दिशो दुम्त। 28 मिनु आं अरेशो मपथु, मेको रागी ग्रांघ्रा दिशो सेल्तीनी हना, मेको डोंइती बाक्ब मुर आन कली खोदेंशो पा मेको रागीमी इन कली यो उक्बे पा ताइक्ब।

29 सुइमी मेको मरिश्शो का ला पाप्तु हना, मेको मुर आ मुर रे तिल्वा पुंडसीब। 30 मोपतीके गे डोंइती डा मुरपुकीमी पशो खोदेंशो पा मेको दूली ग्रांघ्रा दिशो पाप मपने। मिनु आंम कली ग्रांघ्रा दिशो मसेलीन। मारदे हना गो परमप्रभु यावे, इन परमप्रभु नड' देनो" देंत।

## अरु पतीक गेय

19 मिनु परमप्रभु यावेमी मोसा कली 2 "इस्राएली आन गुम्तीक डा मुर नेल्ल आन कली 'गेपुकी आं कली ला ठेयब सेलीन। मारदे हना गो परमप्रभु यावे, इन परमप्रभु का ला नड। लेवी ११:४४-४५; मत्ती ५:४८; १ पत्रुस १:१५-१६ 3 गे नेल्लेमी इन आंम आफ आस कली मान पने। मिनु आं नाइक्तीक नाक्ती नांइसीन। गो परमप्रभु यावे, इन परमप्रभु नड। प्रस्थान २०:१२; प्रस्थान २०:८ 4 गे मूर्ति कली पूजा मपने। मिनु गे आंम कली मूर्ति मसेलीन। गो परमप्रभु यावे, इन परमप्रभु नड। प्रस्थान २०:३; प्रस्थान ३४:१७

5 गे दुशा बाक्चा आ पर्वम परमप्रभु यावे आ डोंइती चढेनीनु, परमप्रभु यावेमी ब्रंचा डा पा चढेने। लेवी ७:१२-१८; 6 गे चढेनीनु, मेको चढेशो नाक्त नु आ दीसा सम्म नेल्ल ब्वशा नेंचा माल्नीनी आ नित्थ नाक्त सम्म मारेइ लीत हना, मेको चोचा माल्नीनी। 7 आ नित्थ नाक्त मेको ब्वाइताक्नी हना,

थम ग्रांरा दुम्ब। मिनु मेको चढेशो मब्राइब।<sup>8</sup> मेको ब्वाइब नेल्लेमी सजाइ ताइनीम। मारदे हना मेकोमी परमप्रभु यावे कली चढेशो ग्रांरा दिशो सेल्शा, मेको कली मटीम। मिनु मोदेंशो मुर आन मुर रे तिल्ला पुंडसीनीम।

<sup>9</sup> मिनु गे इन बाली नाली रिक्नीनु, रू आ सुर सुर सम्म मरिक्कीन। सिला बाला मगुपीन। *लेवी २३:२२; ब्यवस्था २४:१९; रूथ २:२, १५, १६*

<sup>10</sup> गेपुकीमी इन अडगुर रू डा फल काइ मलीपाइक्थु, मसेक्कीन। मिनु रूम दोक्शो अडगुर यो मगुपीन। मेको प्रुडग नु अर्को रागी डा मुर आन कली बाक्ल। गो परमप्रभु यावे, इन परमप्रभु नड।

<sup>11</sup> गे खुड मपने। मठगेने। गे जोल मपमुने। *प्रस्थान २०:१५-१६; १ थिस्सलोनिकी ४:६* <sup>12</sup> गेपुकीमी आं नें थिशा, जोल पा कसम मजने। मो पाइतीनी हना, गे इन परमप्रभु आ नें आइक्च सेल्नीनी। गो परमप्रभु यावे नड। *प्रस्थान २०:७; मत्ती ५:३३*

<sup>13</sup> गे आंम नेक्था डा मुर आन कली श्येत गेशा, मदिपीन। मिनु मेको आन मार मार मरोइक्तीन। गाल्च ताक्शा गेय पाइब आन क्येट काब नाक्दो यो इन खिम वोइक्वा मदुम्ब। *ब्यवस्था २४:१४-१५; येरमीया २२:१३; याकूब ५:४*

<sup>14</sup> नोफा मनेंब मुर कली मरिम्शो लोव्र मपने। मिक्च मताइब आ डोंइती दाइल पाइक्तीक थोव्रक मवोतीन। इन परमप्रभु क्येडा हिनीन। गो परमप्रभु यावे नड। *उत्पत्ती २७:१९; ब्यवस्था २७:१८*

<sup>15</sup> गे जोल पाइब सांकछी मदुमीन। ठेयब मुर बाक्त हना यो, आइक्च मुर बाक्त हना यो, मुर आन कुल मकोव्रथु, ठीक निसाफ पने। *प्रस्थान २३:३, ६; ब्यवस्था १६:१९, २०*

<sup>16</sup> गेपुकी मुर आन पबर्म जोल पा लोव्र मपमुने। गे इन नेक्था डा मुर कली साइक्वा ममालीन। गो परमप्रभु यावे नड। *प्रस्थान २३:७*

<sup>17</sup> गे इन लोक्ब कली काइ मदाक्ब मदुमीन। इन नेक्था डा मुर कली रिम्शो पा मोदेंशो दूली गेय मपने' दे लोव्र पने। मो मपाइतीनी हना, गे पाप राइनीनी। *भजन संग्रह १४१:५; मत्ती १८:१५*

<sup>18</sup> गे इन मुर आन कली क्येक्क मलेल्तीन। ईख मकुरीन। तन्न इन नेक्था डा मुर कली आंम कली खोदेंशो पा दाक्तीन। गो परमप्रभु यावे नड। *२राजा ६:२२; २इतिहास २९:९-१५; मत्ती ५:४३-४८; मत्ती २२:३९; लूका १०:२५-३७; यूहन्ना १३:३४; रोमी १३:९; गलाती ५:१४; याकूब २:८*

<sup>19</sup> गे आं फुल्लु मुशा ब्रेक्शो लोव्र पने। निक्शी खाल डा जन्तु, बस्तु भाव आन कली मब्वाइक्तीन। इन रूमी निक्शी खाल डा वांचेर मशोक्कीन। गेपुकीमी निक्शी खाल डा श्येले ब्वाइश्शा प्रोव्रशो वा मफेक्सीन। *ब्यवस्था २२:९-११*

<sup>20</sup> मिनु वोंइश मुर कामी वाइलीम दुम्शो मीश आल नु इप्त हना, मेको मीश आल चहिं अरु वोंइश मुर कली गेचा चिक्शो बाक्त हना, तन्न मग्याप्यु, मप्रोंइथु बाक्त हना, मेको वोंइश मुर कली खोदील निदील पचा माल्नीम। मेको आस कली साइक्वा मदुम्ब। मारदे हना मेको मीश आल मप्रोंइशो बाक्त। *प्रस्थान २१:७-११* <sup>21</sup> तन्न मेको वोंइश मुरुमी परमप्रभु यावे आ डोंइती गुम्तीक ताम्बु आ ओव्रतीकेम आ दोस आ पबर्म सांड का चढेचा माल्ब। <sup>22</sup> मिनु चढेबमी मेको आ दोस आ पबर्म सांड चढेशा परमप्रभु यावे आ डोंइती पाप क्याम्तीक गेय पचा माल्ब। मोपा मेको आ पाप क्याम्तीशा माफ ताइब दुम्ब। *लेवी ५:१७-१८*

<sup>23</sup> मिनु गेपुकी मेको रागी जाक्दीश्शा, तेकोइ जचा दुम्ब फल फुल रवा ख्रुम्नीनु, बर्स सां सम्म मेको आन फल मजने। <sup>24</sup> मिनु ४ बर्सम चहिं फल फुल नेल्ले परमप्रभु यावे कली ग्येरशो गेचा माल्नीनी। परमप्रभु यावे कली ठेयब मान पचा कली बाक्ब। <sup>25</sup> तन्न ५ बर्सम गेपुकीम मेको फल फुल जने चाप्नीनी। मिनु मेको रवा इन कली शुश सिब्ब दुम्नीम। गो परमप्रभु यावे, इन परमप्रभु नड।

<sup>26</sup> गेपुकीमी तेकोइ चिक्ब, जन्तु, बी बयफ, क्यारश भडा आन श्ये हुश सुन्दा मब्वने। मिनु गेपुकी लिंक्वु मकोव्रडीन। मिनु गे टुना मुना काइ मपने। *लेवी ३:१७; ब्यवस्था १८:१०*

<sup>27</sup> गेपुकीमी इन चां एर ओंथ मख्रोतीन। मिनु इन गाल शोक्रे आ सुर मख्रोतीन। *लेवी २१:५; ब्यवस्था १४:१*

<sup>28</sup> गेपुकी बेक्शो मुर आन पबर्म आंम रां क्योरशा गार मसेलीन। मिनु इन रांमी चिनु मखोपेन। गो परमप्रभु यावे नड।

<sup>29</sup> गेपुकीमी इन तमी आन कली तेल्लेम सेल्शा, ग्रांरा दिशो मसेलीन। मो पाइतीनी हना, रागी तेल्लेम बाक्तीक खोदेंशो दुम्शा, ग्रांरा दिशोमी ब्रीब। *ब्यवस्था २३:१८; २राजा २३:७*

<sup>30</sup> गे आं नाइक्तीक नाक्तीम नांडसीन। मिनु आं बाक्तीक ताम्बु कली मान पने। गो परमप्रभु यावे नड। *लेवी २६:२*

<sup>31</sup> गेपुकी बेक्शो मुर रे लोव्र पाइब नु लिंक्वु कोव्रब कली 'वारच पाइक्की' दे आन बाक्तीके मलने। मेकोपुकी नु सल्ला पा, गे आंम कली ग्रांरा दिशो मसेल्सीन। गो परमप्रभु यावे, इन परमप्रभु नड। *लेवी २०:६; ब्यवस्था १८:१०-११; १सामुएल २८:७*

<sup>32</sup> गे खूशो आ डोंइती बोक्कीन। खाल्पी खाल्पा आन कली मान पने। मिनु इन परमप्रभु कली मान पा हिनीन। गो परमप्रभु यावे नड।

<sup>33</sup> गेपुकी नु बाक्ब अर्को रागी डा मुर आन कली मदिपीन। *प्रस्थान २२:२०* <sup>34</sup> गे मेको आन कली इन रागीम जरमेशो मुर खोदेंशो मिम्तीन। मेको आन कली आंम कली खोदेंशो पा दाक्तीन। मारदे हना गेपुकी यो इजीप्तीमी अर्को रागी डा मुर दुम्शा बाक्शो बाक्तीनी। गो परमप्रभु यावे, इन परमप्रभु नड।

<sup>35</sup> गेपुकीमी पुक्नीनु, नाक्तीनीनु नु थाप्तीनीनु जोल मपने। <sup>36</sup> इन नाक्तीकेम तुला ठीक दुम्चा माल्ब। इन ढक ठीक दुम्चा माल्नीमी। मिनु इन पुक्तीके ठीक दुम्चा माल्नीमी। गो इन कली इजीप्ते रे गुंडब परमप्रभु यावे, इन परमप्रभु नड। *ब्यवस्था २५:१३-१६; हितोपदेस ११:१*

<sup>37</sup> गे आं फुल्लुमुशा ब्रेक्शो लोव्र नु आं पावो, दे अरेशो लोव्र नेल्ल थुंम वोइश्शा, पचा माल्नीनी। मारदे हना गो परमप्रभु यावे नड" दे परमप्रभु यावेमी मोसा कली देंत।

काइ मरिम्शो पशो कली सजाइ

**20** मिनु परमप्रभु यावेमी मोसा कली <sup>2</sup> "गे लेंशा इस्राएली आन कली 'इस्राएलीपुकी, मेको नु बाक्ब अर्को रागी डा मुरपुकी सुम आन आल मोलेक कली चढेनीमी, मेको आन कली साइक्वा माल्नीम। गुम्तीक डा मुरपुकीम मेको कली फुल्लु आप्शा साइक्वा माल्नीम। <sup>3</sup> मेकोपुकीमी आन आल मोलेक कली चढेमेनु, आं बाक्तीक ताम्बु नु आं ठेयब नें ग्रांरा दिशो सेल्लेक्म। मोपतीके गो आंमा मेको आन कली ब्रोंइचा मगेथु, आ मुर आन दाते रे क्याम्नुडमी। <sup>4</sup> मिनु मेको रागी डा मुरपुकीम आ आल मोलेक कली चढेब मुर कली तुइश्शा यो मसाइक्तेक्म हना, <sup>5</sup> गो आंमा मेको नु आ खिं डा मुर आन कली ब्रोंइचा मगेथु, मेको आन मुर आन दाते रे क्याम्नुडमी। मेको नु मेको आन नोले खोइक्ब मोलेक कली चढेब नेल्ल आन कली क्याम्नुडमी।

<sup>6</sup> सु मुर बेक्शो मुर रे लोव्र पाइब नु लिंक्वु कोव्रब आन कली "वारच पयी" दे आन बाक्तीके लाइबा, गो मेको कली ब्रोंइचा मगेथु, आ मुर आन दाते रे क्याम्नुड। *लेवी १९:३१*

<sup>7</sup> मोपतीके आं कली जिम्मा गेंसीशा आं के दुमीन। मारदे हना गो परमप्रभु यावे, इन परमप्रभु नड। *लेवी १९:२* <sup>8</sup> आं फुल्लुमुशा ब्रेक्शो लोव्र इन थुंम वोइश्शा टिने। गो परमप्रभु यावे नड। गो इन कली आं खोदेंशो सेल्लुनड।

<sup>9</sup> सुमी आ आंम आफ आस कली सराप पाइक्बा, मेको मुर कली साइक्वा माल्ब। आ आंम आफ आस कली सराप पाइक्तीके साइक्वा पुंडसीब। *प्रस्थान २१:१७*

<sup>10</sup> सुइ मुर अरु आन मीश नु इप्त हना, मेको पाइब निम्फा आस कली साइक्वा माल्ब। *प्रस्थान २०:१४; २सामुएल ११:४; यूहन्ना ८:५*

<sup>11</sup> सु आ आफ आ मीश नु इप्बा, मेकोम आ आफ कली मुने तोक्ब। मेको निम्फा आस कली साइक्वा माल्ब। मेको साइक्वा पुंडसीनीस। *लेवी १८:६-२३*

<sup>12</sup> सु आ चाइमी नु इप्बा, मेको निम्फा आस कली साइक्वा माल्ब। मेको दूली पा मेको थम मरिम्शो बाक्ब। मेको साइक्वा पुंडसीनीस।

13 सुइ मुर मीश मुर नु इप्शो खोदेंशो पा वोंइश मुर नु इप्त हना, मेको थम ग्रांग्रा दितीक बाक्ब। मेको आस कली साइक्वा माल्ब। मेको थमा पा साइक्वा पुंडसीनीस।

14 सु मुर ममा नु आ तमी निम्फा नु इप्बा, मेको काइ मरिश्शो बाक्ब। मेको सां आन कली चोचा माल्ब। इन दातेमी मोदेंशो मरिश्शो मदुम्ब।

15 सुइ वोंइश मुर बस्तु भाव नु इप्त हना, मेको कली साइक्वा माल्ब। मिनु मेको बस्तु कली यो साइक्वा माल्ब।

16 सुइ मीश मुर बस्तु भाव नु इप्त हना, मेको मीश मुर नु बस्तु निम्फा आस कली साइक्वा माल्ब। मेको साइक्वा पुंडसीनीस।

17 सु मुर आ दिदी बहिनी, आ आंम आ तमी कि आ आफ आ तमी नु इप्त हना, मेको थम मुने बाक्ब। मेको निम्फा आस कली आस मुर आन दाते रे नेल्लेम तचा डा पा साइश्शा क्याम्बा माल्ब। मेकोमी आंम आ समी नु इप्तीके सजाइ गेचा पुंडसीब।

18 सुइ मुर रां ब्रोल्शो मीश मुर नु इप्त हना, मेको निम्फा आस कली आस मुर आन दाते रे साइश्शा क्याम्बा माल्ब। मारदे हना मेको वोंइश मुरुमी मीश मुर आ हुश यितीक ताप्तु। मिनु मीश मुरुमी चहिं आ हुश यितीके कोंइताक्व। लेवी १५:२४

19 इन ममा आ लोकब नु इन आफ आ समी नु मइपीन। मारदे हना मो पाइतीनी हना, आंम खिं डा मुर कली मुने तोक्नीनी। मेको सजाइ ताइनीस।

20 सुइ मुरुमी आ बोडो, बकान्छा कि मामा आ मीश नु इप्त हना, मेकोमी आ बोडो, बकान्छा कि मामा कली मुने तोक्ब। मेको सजाइ जचा पुंडसीनीस। मिनु आल मथिथु बेक्नीस।

21 सुमी मुरुमी आ भोग्यु कि बोहारी चाक्बा, मेको ग्रांग्रा दिशो बाक्ब। मेकोमी आंम लोकब कली मुने तोक्ब। मिनु आल मथिथु बेक्नीस।

22 गेपुकीमी आं फुल्लुम मुशा ब्रेक्शो लोत्र नु आं पाबो, दे अरेशो लोत्र नेल्ल तुइश्शा पचा माल्नीनी। मो मपाइतीनी हना, गो इन कली चाक्शो रागीमी इन कली उक्बे पा ताइक्ब। 23 गे इन डोंइती खेरशो रागी रागी डा मुर आन पशो मपने। मेकोपुकीमी मोदेंशो नेल्ल पांमतेक्म। मोपतीके गो मेको आन कली तशा थम ग्रांग्रा दीती। 24 तन्न गो इन कली मेको आन रागी इन के दुम्ब। गो इन कली गेनुड, देंती। मिनु मेको रागीम दूध नु खुदो शुश बाक्ब। गो परमप्रभु यावे, इन परमप्रभु नड। मिनु गो इन कली रागी रागी डा मुर रे तिल्शा योवतन्नी। प्रस्थान १९:५-६

25 मोपतीके गेपुकीमी ग्रांग्रा मदिशो नु ग्रांग्रा दिशो जन्तु नु ग्रांग्रा मदिशो नु ग्रांग्रा दिशो चिक्ब तुइश्शा तिल्शा माल्नीनी। गेपुकीमी ग्रांग्रा दिशो जन्तु, चिक्ब नु खपीम ग्रेशा गाक्ब जन्तु रे आंम कली ग्रांग्रा दिशो मसेल्सीन। मारदे हना मेको ग्रांग्रा दिशो बाक्नीम, दे शेंताक्ड। लेवी ११:- 26 गेपुकी ग्रांग्रा दिशो क्येडा डोन बाक्शो दुमीन। मारदे हना गो ग्रांग्रा दिशो क्येडा डोन बाक्शो परमप्रभु यावे नड। मिनु गो इन कली आं मुर दुम्बा कली अरु मुर रे तिल्शा योवतन्नी।

27 सु इन दातेमी वोंइश मुर कि मीश मुर बेक्शो मुर रे लोत्र पाइबा कि लिंक्वु कोवनीम, मेको आन कली साइक्वा माल्ब। मेको आन कली फुल्लु आप्शा साइक्वा माल्ब। मेको साइक्वा पुंडसीनीम' दे इस्राएली आन कली शेंदो" दे परमप्रभु यावेमी मोसा कली देंत। प्रस्थान २२:१७

चढ़ेब आन कली अरेशो लोत्र

21 मिनु परमप्रभु यावेमी मोसा कली "हारून आ तौ, चढ़ेब आन कली 'इन मुर बेक्तेक्म हना, गेपुकी मेको बेक्शो मुर कली थिशा आंम कली ग्रांग्रा दिशो मसेलीन। इजीकीएल ४४:२५-२७ 2 तन्न इन आम आफ, तमी तौ नु लोकब, 3 कन्ने दिदी बहिनी आन पर्वम ला आंम इन कली ग्रांग्रा दिशो सेल्ने चाप्नीनी। 4 मिनु गेपुकीमी ग्युबे पा नक नाता डा मुर आन पर्वम आंम कली ग्रांग्रा दिशो सेल्चा मदुम्ब।

5 गे चढ़ेबपुकीमी रोंका पा, इन चां प्रेक्वा, इन गाल शोक्ने आ सुर खोइक्वा नु इन रां क्योरशा गार सेल्चा मदुम्नीनी। लेवी १९:२७-२८ 6 इन परमप्रभु कली ला गेय पाइब दुमीन। इन परमप्रभु आ नें ग्रांग्रा दिशो सेल्ब

मदुम्नीम। मारदे हना गेपुकीमी परमप्रभु यावे कली मीम चोशा चढ़ेतीके चढ़ेनीनी। मोपतीके गेपुकी परमप्रभु कली ला गेय पाइब बाक्नीनी।

7 गे चढ़ेबपुकीमी तेल्लेम मीश मुर, ग्रांग्रा दिशो मीश मुर नु आ वोंइशेमी प्रोंइशो मीश मुर चाक्वा मदुम्ब। मारदे हना गेपुकी परमप्रभु आ मुर बाक्नीनी। 8 मिनु गे इस्राएलीपुकीमी चढ़ेब आन कली परमप्रभु आ गेय पाइब मिम्तीन। मारदे हना मेकोपुकी इन परमप्रभु आ जचा चढ़ेनीम। मेकोपुकी इन पर्वम परमप्रभु आ गेय पाइब दुम्शो बाक्नीम, दे मिम्तीन। मारदे हना इन कली ग्रांग्रा रे डोन बाक्ब सेल्ब, गो ग्रांग्रा रे डोन बाक्ब परमप्रभु यावेमी इन कली आं खोदेंशो सेल्नुड।

9 मिनु चढ़ेब आ तमीमी तेल्लेम पा आंम कली ग्रांग्रा दिशो सेल्तु हना, मेकोमी आ आफ कली ग्रांग्रा दिशो सेल्ब। मेको कली मीम चोशा साइक्वा माल्ब।

10 मिनु सु आंम लोकब आन दातेम ठेयब चढ़ेब दुम्शो बाक्मे, मिनु आ पियाम तेल लुक्शो बाक्मे नु ठेयब चढ़ेब आ वा फेक्वा कली तिल्शो बाक्मे, मेकोमी रोंका पशा, आ पिया डा चां प्रेक्वा मदुम्ब नु आ वा खाक्वा मदुम्ब। लेवी ८:१२; प्रस्थान २८:४१; प्रस्थान २९:७; लेवी १०:६; लेवी २१:२

11 मेकोमी बेक्शो मुर बाक्तीके लशा, आंम कली ग्रांग्रा दिशो सेल्चा मदुम्ब। मेको आ आम आफ आ बेक्शो रां यो कोवथ लचा मदुम्ब। 12 मेको परमप्रभु यावे आ बाक्तीके ताम्बु रे गूचा मदुम्ब। मोदेंशो पाप्तु हना, मेकोमी आंम परमप्रभु आ बाक्तीके ग्रांग्रा दिशो सेल्ब। मारदे हना मेको परमप्रभु आ तेल लुक्शो मुर बाक्ब। गो परमप्रभु यावे नड।

13 मेकोमी कन्ने मीश आल कली ला ग्युबे पने चाप्ब। 14 आ वोंइश बेक्शो मीश मुर, आ वोंइश प्रोंइशो मीश मुर, ग्रांग्रा दिशो कि तेल्लेम मीश मुर चाक्ने मचाप्ब। मिनु मेकोमी आ जात डा कन्ने मीश आल ग्युबे पचा माल्ब। 15 मगारचा डा मीश मुर नु ग्युबे पा, आंम जात नु आंम तमी तौ आन कली ग्रांग्रा दिशो सेल्चा मदुम्ब। मारदे हना गो परमप्रभु यावे नड। गो मेको कली आंम मुर सेल्ता' दे शेंदो" दे परमप्रभु यावेमी मोसा कली देंत।

16 मिनु परमप्रभु यावेमी मोसा कली 17 "गे हारून कली 'इ तमी तौ, चच युइ आन दातेमी गुइ खोइल कुंजे नु दूली मुर आंम परमप्रभु कली चढ़ेब दुम्ने मचाप्ब। 18 मारदे हना सुइ दूली मुर, मिक्व मताइब, खोइल मदुक्ब, आ कुल कि रां बिग्रेशो कि खोइल का लाइश्शो मुर परमप्रभु आ डोंइती जाक्वा मदुम्ब। 19 गुइ जिव्शो, खोइल जिव्शो, 20 कुप्रे, बामन्ने, मिक्व रोइ पशो, रक सुतीक रोइ पशो, लुतो पशो कि आ गेडा ठीक मदुम्शो मुर आं परमप्रभु आ डोंइती जाक्ने मचाप्ब। 21 चढ़ेब हारून आ तमी तौ चच युइ सु दूली दुम्शो बाक्मे, मेको परमप्रभु यावे कली चोशो चढ़ेतीक चढ़ेने मचाप्ब। मारदे हना मेको दूली बाक्ब। मेकोम आंम परमप्रभु कली जचा थोवक चढ़ेचा मदुम्ब। 22 मेकोमी आंम परमप्रभु कली चढ़ेशो नु चोवखो नु थम चोवखो जचा थोवक चहिं जने ब्वने चाप्ब। 23 तन्न मेको फारशो वा नु चढ़ेतीक आ नेक्था जाक्वा मदुम्ब। मारदे हना मेको दूली मुर जाक्शा, आं बाक्तीक ताम्बु ग्रांग्रा दिशो मसेलल। गो परमप्रभु यावे नड। गो मेको आन कली मेको आं के सेल्नुड' दे शेंदो" दे परमप्रभु यावेमी मोसा कली देंत।

24 मिनु मोसामी हारून, मेको आ तौपुकी नु इस्राएली नेल्ल आन कली एको लोत्र नेंपाइक्तीमी।

सुमी चढ़ेतीक रे जने ब्वने चाप्ब

22 परमप्रभु यावेमी मोसा कली 2 "गे हारून नु आ तौ आन कली मार शेंचा माल्नेवे देंशा हना, 'इस्राएलीपुकीमी आं कली चढ़ेशो थोवक आन पर्वम होस पा बाक्कीन। मिनु आं नें कली ग्रांग्रा दिशो मसेलीन। गो परमप्रभु यावे नड' दे शेंचा माल्नेवे" दे परमप्रभु यावेमी मोसा कली देंत।

3 मिनु मोसा कली "गो परमप्रभु यावे नड। गे मेको आन कली 'इन तौ, चच युइ आन पाला डा तेकोइ मुर ग्रांग्रा दिशो दुम्शा, इस्राएलीपुकीमी परमप्रभु यावे कली चढ़ेशो थोवक आन नेक्था जाक्तेक्म हना, मेको मुर आं डोंइती रे तिल्चा पुंडसीब। गो परमप्रभु यावे नड।

4 मिनु हारून आ तौ, चच युइ आन दातेमी सुइ कुशुल डा रोइ नु ग्रांग्रा यितीक पशो बाक्तेक्म हना, मेको ग्रांग्रा मदिशो सम्म आं कली चढ़ेशो मारेइ

थोवक जचा ब्वचा मदुम्ब। सुइमी बेक्शो मुर के कि बिउ यिशो मुर रे ग्रांघा दिशो दुश्शो मुर कली थीबा, लेवी १३:-१५:-<sup>5</sup> कि खपीम ग्रेशा गाक्ब जन्तु कली थिशो ग्रांघा दिशो दुश्शो मुर थीबा, कि मार मार आ पर्वम ग्रांघा दिशो बाक्त हना, <sup>6</sup> मेको मुर नां मरिक्म सम्म ग्रांघा दिशो बाक्ब। मेकोमी मचिक्से सम्म ला आं कली चढ़ेशो जचा ब्वचा मदुम्ब। लेवी ११:-<sup>7</sup> मोदेंशो मुर नां रिक्म नोले ला ग्रांघा मदिशो दुम्ब। मिनु नोले मेकोमी आं कली चढ़ेशो थोवक जने ब्वने चाण्ब। मारदे हना मेको आं कली चढ़ेशो आ जचा ब्वचा थोवक बाक्ब। <sup>8</sup> मिनु बेक्शो, ब्वाकी डा जन्तुपुकीम क्राइश्शा साइश्शो जन्तु, बस्तु भाव कली ब्वचा मदुम्ब। मोदेंशो पापु हना, मेको मुर ग्रांघा दिशो सेल्सीब। गो परमप्रभु यावे नड। लेवी ७:२४

<sup>9</sup> चढ़ेबपुकीमी आं देंशो टिचा माल्नीम। मो मपाम्तेक्म हना, मेकोपुकीमी आं देंशो मटितेक्म हना, मेकोपुकी दोस तथा आं बाक्तीक ताम्बुमी बेक्नीम। मिनु गो मेको आन कली आंम आं मुर सेल्ब परमप्रभु यावे नड।

<sup>10</sup> मिनु अर्को रागी डा मुर नु चढ़ेब आ खिंम पौना बाक्शो कि गाल्च ताइब मुर आं कली चढ़ेशो थोवक जचा ब्वचा मदुम्ब। <sup>11</sup> तन्न चढ़ेबमी क्येट थाप्शा ग्याप्शो मुर नु मेको आ खिंम जरमेशो मुर चढ़ेब आ भाग रे जचा ब्वचा दुम्ब। <sup>12</sup> मिनु चढ़ेब आ तमी अर्को खिं डा मुर नु ग्युंवे पशो बाक्त हना, परमप्रभु कली चढ़ेशो जचा ब्वचा मदुम्ब। <sup>13</sup> तन्न चढ़ेब आ तमी आ वोंइश बेक्शो कि प्रोंइचा पुंइसीशो बाक्त हना, आ तमी तौ मदुम्बु, आ आफ आ खिं लेत्त हना, आ आल ना डा खोदेंशो पा आन आफ आ भाग डा चढ़ेशो रे जने ब्वने चाण्ब। तन्न अर्को खिं डा मुर मेको जचा ब्वचा मदुम्ब।

<sup>14</sup> मिनु मरुम मतुइक्थु परमप्रभु कली चढ़ेशो रे जापु हना, मेकोमी चढ़ेब कली मेको आ जशो क्येडा ५ भाग तेम्शा, परमप्रभु कली चढ़ेशो खोदेंशो पा चढ़ेब कली लेत्ता माल्ब। लेवी ५:१६ <sup>15</sup> मोपा सुइमी इस्राएली आन परमप्रभु यावे कली चढ़ेशो थोवक ग्रांघा सेल्चा मदुम्ब। <sup>16</sup> मोदेंशो परमप्रभु कली चढ़ेशो जशो मुर दोस ताइनीम। मिनु मेकोमी गारशा आ पर्वम चढ़ेतीक चाक्चा माल्ब। मारदे हना मेकोमी परमप्रभु यावे कली चढ़ेशो जापु ब्वापु। गो परमप्रभु यावे नड। मिनु गो मेको कली आंम आं मुर सेल्ता' दे शेंदो" देंत।

<sup>17</sup> मिनु परमप्रभु यावेमी मोसा कली <sup>18</sup> "गे हारून, आ तौपुकी नु इस्राएली नेल्ल आन कली 'इस्राएली आन दातेमी मुर का कि इस्राएलम बाक्ब अर्को रागी डा मुरुमी ग्येरशा परमप्रभु यावे कली चढ़ेतीके चोशा चढ़ेशो खोदेंशो परमप्रभु यावे कली चढ़ेचा दाक्ताक्व हना, <sup>19</sup> मिनु परमप्रभु आ डोंइती ब्रचा डा पा मेकोमी मारेइ मदुम्बो थम रिम्शो ब्यफ, सांड कि बोका चढ़ेचा माल्ब। <sup>20</sup> गार पाइश्शो बस्तु चढ़ेचा मदुम्ब। मारदे हना मेको मब्रचा डा बाक्नीम। ब्यवस्था १५:२१; ब्यवस्था १७:१; मलाकी १:८

<sup>21</sup> मिनु मुर कामी दुशा बाक्चा आ पर्वम चढ़ेतीके परमप्रभु यावे कली चढ़ेशा, आ पशो कसम खबानु, ग्येरशा परमप्रभु यावे कली चढ़ेतीके, खोदेंशो पा, मेको ब्रचा डा दुम्पाइक्चा कली आ हुल रे मारेइ मदुम्बो थम रिम्शो बस्तु चढ़ेचा माल्ब। <sup>22</sup> मिनु गेपुकीम परमप्रभु यावे कली मिक्च मताइब, गार दुश्शो, आन रां बिग्रेशो, ग्रांघा यितीके पाइब, कुशुल रोइ पाइब कि लुतो पाइब बस्तु भाव चढ़ेचा मदुम्ब। मोदेंशो मीम चोशा चढ़ेचा कली परमप्रभु यावे कली चढ़ेतीकेमी वोइक्चा मदुम्ब। <sup>23</sup> मिनु गेपुकीमी लाइश्शा खोइल पाइश्शो ब्यफ कि भेडा चहिं ग्येरशा चढ़ेतीके चढ़ेतीनी हना दुम्ब। तन्न कसम जशोनु, इन चढ़ेतीके मब्राइब दुम्ब। <sup>24</sup> तेको ब्यफ, क्यारश भेडा खसी पशो गार सेल्शो नु चेशो बाक्बा, मेको परमप्रभु यावे कली चढ़ेचा मदुम्ब। इन रागीम मो पचा मदुम्ब। <sup>25</sup> गेपुकीमी मोदेंशो बस्तु भाव अर्को रागी डा मुर रे ग्याप्शा ताक्शा इन परमप्रभु कली जचा थोवक चढ़ेचा मदुम्ब। मेको आन रां बिग्रेशो नु गारम पतीके इन पर्वम मब्रतीक दुम्ब' दे शेंदो" दे परमप्रभु यावेमी मोसा कली देंत।

<sup>26</sup> मिनु परमप्रभु यावेमी मोसा कली <sup>27</sup> "बाछा, भेडा पाठा कि क्यारश पाठा जरमेशा, मेको ७ नाक्त सम्म आ ममा नु बाक्चा माल्ब। मिनु मेको कली ८ नाक्त रे चोशा चढ़ेशोनु, परमप्रभु यावेमी ब्राइब। प्रस्थान २७:२९ <sup>28</sup> तन्न गेपुकी बी नु आ चाइक्ब कि भेडा नु आ पाठा काबुमी क्योरचा मदुम्ब। ब्यवस्था २२:६-७

<sup>29</sup> गेपुकीमी परमप्रभु यावे कली 'गे रिम्शो पाइब बाक्नीनी' दे चढ़ेशो चढ़ेनीनु, मेको इन पर्वम ब्रचा डा पा चढ़ेने। लेवी ७:१५ <sup>30</sup> मेको चढ़ेशो नाक्ती मेको कली ब्वने। आ दीसा सुनी सम्म मारेइ महेंचा। गो परमप्रभु यावे नड।

<sup>31</sup> मिनु गेपुकीमी आं शेंतीके तुइश्शा टिने। गो परमप्रभु यावे नड। <sup>32</sup> गे आं ग्रांघा रे डोन बाक्शो नें ग्रांघा दिशो मसेलीन। मोपतीके गो इस्राएली आन दातेमी का ला ठेयब दुम्ती। गो परमप्रभु यावे नड। मिनु गो इन कली आंम आं मुर सेल्ता। लेवी २२:९, १६ <sup>33</sup> मिनु इन परमप्रभु दुम्चा कली गो इन कली इजीप्त रागी रे गुंइताक्ड। गो परमप्रभु यावे नड, दे शेंदो" देंत।

सन्चरबार नाइक्तीक नाक्ती

**23** मिनु परमप्रभु यावेमी मोसा कली <sup>2</sup> "गे इस्राएली आन कली 'परमप्रभु यावे आ देंशो पचा माल्शो चाड परमप्रभु यावे के बाक्नीम। मिनु गे मेको पचा माल्नीनी।

<sup>3</sup> गे ६ नाक्ती सम्म गेय पचा माल्नीनी। तन्न ७ नाक्त चहिं थमा पा नाइक्तीक नाक्ती बाक्शा, परमप्रभु यावे केन बाक्ब। गे मारेइ गेय मपने। इन बाक्तीक नेल्लेमी परमप्रभु यावे आ नाइक्तीक नाक्ती बाक्ब" देंत। प्रस्थान २०:८-११

पास्सा चाड आ पर्वम अरेशो

<sup>4</sup> मिनु परमप्रभु यावेमी लेंशा, मुर आन कली शेंचा, दे मोसा कली "परमप्रभु यावे आ देंशो पचा माल्शो चाड आ चाड बाक्नीम। आ देंशो नाक्ती मानेचा माल्नीनी। परमप्रभु यावे आ चाडपुकी मार बाक्नीम देंशा हना, प्रस्थान २३:१४-१९ <sup>5</sup> डोंइती डा महिना डा १४ नाक्ती नाक्नाक्दो पास्सा चाड डा परमप्रभु यावे कली चढ़ेतीक गेय पचा माल्नीम। प्रस्थान १२:-<sup>6</sup> मेको महिना डा १५ नाक्ती परमप्रभु यावे कली बोरब ओख्ती मसुप्शो शोब्ले जतीक चाड बाक्ब। गेपुकीमी ७ नाक्त सम्म बोरब ओख्ती मसुप्शो शोब्ले जचा माल्नीनी। <sup>7</sup> डोंइती डा नाक्ती आं पर्वम गुम्तीक नाक्ती दुम्चा माल्ब। मेको नाक्ती मारेइ गेय मपने। <sup>8</sup> मिनु ७ नाक्त सम्म गेपुकीमी परमप्रभु यावे कली मी चोशो चढ़ेतीके चढ़ेचा माल्नीनी। मेको आ ७ नाक्ती लेंशा परमप्रभु यावे आ पर्वम गुम्तीक दुम्चा माल्ब। मेको नाक्ती गेपुकीमी मारेइ गेय मपने" देंत। प्रस्थान १३:६

डोंइती मीशो बाली नाली

<sup>9</sup> मिनु परमप्रभु यावेमी मोसा कली <sup>10</sup> "गे इस्राएली आन कली 'इन कली गेशो रागीम जाक्दीश्शा, मेकेर डा बाली नाली खुप्तीनीनु, गेपुकीमी डोंइती डा रिक्शो बाली मुठा का चढ़ेब आन कली चाक्कीन। <sup>11</sup> मेकोमी अन्न मुठा परमप्रभु यावे आ डोंइती क्युक्शा हिम्चा माल्ब। मो पाइतीनी हना परमप्रभु यावेमी इन कली ब्राइब। नाइक्तीक नाक्ती आ दीसा चढ़ेबमी मेको क्युक्शा हिम्चा माल्ब। <sup>12</sup> मेको क्युक्शा हिम्शो नाक्ती गेपुकीमी परमप्रभु यावे कली बर्स का दुश्शो मारेइ मदुम्बो थम रिम्शो सांड चोशा चढ़ेचा माल्नीनी। <sup>13</sup> मेको नु अन्न चढ़ेतीक चढ़ेचा माल्नीनी। मेको अन्न चढ़ेतीक चहिं तेलम निशो एफाह के २० भाग थम रिम्शो फस दुम्चा माल्ब। मेको परमप्रभु यावे कली आ दाक्शो ब्रोवशो रिना पाइश्शो मीम चोशा चढ़ेतीके बाक्ब। मेको नु तूचा थोवक चढ़ेतीके हिन का डा ४ भाग सेल्शो रे भाग का अडगुर शांबु चढ़ेचा माल्नीनी। एफाह पुक्तीके का बाक्ब। एफाह का २२ लिटर रिक्ब। मेको के २० भाग ४.४ लिटर बाक्ब। लोग आइक्च पुक्तीके का बाक्ब। मेको ०.३ लिटर रिक्ब। हिन अर्को पुक्तीक का बाक्ब। हिन का ४ लिटर खोदेंशो रिक्ब। हिन का ४ भाग सेल्शो रे भाग का लिटर का खोदेंशो बाक्ब। <sup>14</sup> मेको नेल्ल परमप्रभु कली चढ़ेशो नोले ला शोब्ले, कारशो अन्न नु गिगी बाला मारेइ जने चाप्नीनी। मेको गेपुकी ते बाक्तीनी हना यो, एको गेना हना यो नेल्ल पाला सम्म पतीक बाक्ब।

## ७ हप्ता नोले डा चाड

15 मिनु नाइक्तीक नाक्ती आ दीसा, गे अन्न आ मुठा क्युक्शा हिम्शा चढेतीक नाक्त रे गेपुकीमी ७ हप्ता हिक्चा माल्नीनी। गन्ती २८:२६-३१; ब्यवस्था १६:९-१२ 16 मिनु गेपुकीमी ७ हप्ता आ दीसा, ५० नाक्त सम्म हिक्चा माल्नीनी। मेको नाक्ती गेपुकीम परमप्रभु यावे कली नक अन्न चढेचा माल्नीनी। 17 गेपुकीमी आंम इन खिं रे शोब्ले निक्शी क्युक्शा हिम्शा चढेचा कली माल्नीनी। मेको शोब्ले का एफाह का के २० भाग थम रिम्शो फस रे बोरब ओख्ती सुधु चोशा सेल्शो दुम्चा माल्ब। मेको डोंइती मीशो अन्न के परमप्रभु यावे कली चढेतीक बाक्ब। एफाह पुक्तीके का बाक्ब। एफाह का २२ लिटर रिक्ब। मेको के २० भाग ४.४ लिटर खोदेंशो बाक्ब। 18 मेको शोब्ले नु बर्स का गाप्शो ७ ओटा मारेड मडुम्शो थम रिम्शो पाठा नु ब्यफ का नु सांड निक्शी चढेचा माल्नीनी। मेको अन्न चढेतीक नु तूचा थोव्रक चढेतीके परमप्रभु यावे कली आ दाक्शो ब्रोव्रशो रिना पाइश्शो मीम चोशो चढेतीक बाक्ब। 19 मिनु गेपुकीमी पाप आ पर्वम चढेचा कली बोका का नु दुशा बाक्चा आ पर्वम चढेचा कली बर्स का गाप्शो सांड निक्शी यो चढेचा माल्नीनी। 20 मिनु चढेबमी परमप्रभु यावे कली डोंइती नक मीशो अन्न के शोब्ले नु सांड निक्शी क्युक्शा हिम्शा चढेचा माल्ब। मेको चढेब आ भाग दुम्चा कली परमप्रभु यावे कली गेशो बाक्नीम। 21 मेको नाक्त इन कली ठेयब गुम्तीक नाक्त बाक्ब, दे गेपुकीमी नेल्ल आन कली नेंपाइक्चा माल्नीनी। गेपुकीमी मारेड गेय मपने। मेको गेपुकी ते बाक्तीनी हना यो, एको गेना हना यो नेल्ल पाला सम्म पतीक बाक्ब।

22 मिनु गेपुकीमी इन बाली नाली रिक्नीनु, रू आ कुना कुना सम्म मरिक्कीन। गेपुकीमी इन रू डा सिला बाला यो मगुपीन। गेपुकीमी इन दाते डा प्रुडग नु अर्को रागी डा मुर आन पर्वम प्रोनीन। गो परमप्रभु यावे, इन परमप्रभु नड' दे शेंचा माल्नेवे" देंत। लेवी १९:९-१०

## नाइक्तीक डा चाड

23 मिनु परमप्रभु यावेमी मोसा कली 24 "इसाएली आन कली '७ महिना डा डोंइती डा नाक्ती गे नाइक्चा माल्नीनी। गे परमप्रभु यावे आ पर्वम गुम्शा, मेको नाक्त मिम्चा कली तुराही ताप्चा माल्नीनी। गन्ती २९:१-६; गन्ती १०:१० 25 गेपुकीमी मेको नाक्त मारेड गेय मपने। मिनु परमप्रभु यावे कली मीम चोशो चढेतीके चढेन' दे शेंचा माल्नेवे" देंत।

## पाप क्याम्तीक नाक्ती डा चाड

26 मिनु परमप्रभु यावेमी मोसा कली 27 "मेको ७ महिना डा १० नाक्त पाप क्याम्तीक नाक्त बाक्ब। मेको नाक्ती गेपुकीमी परमप्रभु यावे आ पर्वम गुम्चा माल्नीनी। गेपुकी मेको नाक्त माइजा बाक्चा माल्नीनी। मिनु गेपुकीमी परमप्रभु यावे कली मीम चोशा चढेतीक चढेचा माल्नीनी। लेवी १६:- 28 मेको नाक्त मारेड गेय मपने। मारदे हना मेको पाप क्याम्तीक नाक्त बाक्ब। मेको नाक्ती परमप्रभु यावे, इन परमप्रभु आ डोंइती इन पर्वम पाप क्याम्तीक गेय पतीक नाक्ती बाक्ब। 29 मिनु सु मेको नेल्ल नाक्ती माइजा मबाक्बा, मेको आ मुर आन दाते रे साइक्चा पुंडसीब। 30 मिनु सुइमी मेको नाक्त मारेड गेय पाप्तेक्म हना, गो मेको आन कली साइक्नुड। 31 गेपुकीमी मेको नाक्त मारेड गेय मपने। गेपुकी ते बाक्तीनी हना यो, मेको गेना हना यो इन पतीक बाक्ब। 32 मेको नाक्त इन कली थमा पा नाइक्तीक नाक्त बाक्ब। मिनु मेको नाक्त गेपुकी माइजा बाक्चा माल्नीनी। मेको महिना डा ९ नाक्त डा नां रिक्म रे आ दीसा नां रिक्म सम्म गेपुकी माइजा बाक्चा नाइक्चा माल्नीनी, दे शेंचा माल्नेवे" देंत।

## गोठ सेल्शा बाक्तीक चाड

33 मिनु परमप्रभु यावेमी मोसा कली 34 "गे इसाएली आन कली '७ महिना डा १५ नाक्त रे ७ नाक्न सम्म परमप्रभु यावे आ डोंइती गोठ सेल्शा बाक्तीक चाड मानेचा माल्नीनी। 35 मेको आ डोंइती डा नाक्ती परमप्रभु यावे आ पर्वम गुम्चा माल्नीनी। गेपुकी मेको नाक्त इन गेय मपने। 36 मिनु

गेपुकीमी ७ नाक्त सम्म परमप्रभु यावे कली मीम चोशा चढेतीक चढेन। मिनु गेपुकीमी आ दीसा परमप्रभु यावे आ पर्वम गुम्तीक नाक्ती मानेन। मिनु परमप्रभु यावे कली मीम चोशा चढेन। मेको ठेयब गुम्तीक नाक्ती बाक्ब। मिनु गेपुकीम मेको नाक्त इन गेय काइ मपने। यूहन्ना ७:३७

37 मिनु परमप्रभु यावे आ देशो ठेयब गुम्तीक डा मानेचा माल्शो चाड तेको बाक्नीम देशा हना, मेको नाक्ती गेपुकीमी परमप्रभु यावे कली मीम चोशा चढेतीके, अन्न चढेतीके, क्योरशा चढेतीके नु तूचा थोव्रक चढेतीके ठीक नाक्ती चढेचा माल्नीनी। 38 मेको क्येडा परमप्रभु यावे आ नाइक्तीक नाक्ती डा, इन दाक्शा गेतीक थोव्रक, इन कबल पशो गेतीक थोव्रक नु इन ग्येरशा गेशो थोव्रक परमप्रभु यावे कली चढेचा माल्नीनी। 39 मिनु ७ महिना डा १५ नाक्ती आंम रू डा अन्न खुप्शो नोले गेपुकीमी ७ नाक्त सम्म परमप्रभु यावे आ चाड मानेचा माल्नीनी। डोंइती डा नाक्त नु ८ नाक्ती थमा पा नाइक्चा माल्नीनी। 40 डोंइती डा नाक्ती गेपुकीमी रवा आन रिम्शो फल फुल, खजूर रवा आन राशी, शुश सफा पाइश्शो रवा आन राशी नु अरू खोलामी बाक्शो रवा आन राशी चाक्शा, गे परमप्रभु यावे, इन परमप्रभु आ डोंइती ७ नाक्त सम्म ग्येरसीन। नेहम्याह ८:१४-१६ 41 गेपुकीमी बर्सम ७ नाक्त सम्म एको चाड मानेशा, परमप्रभु यावे कली ठेयब सेल्चा माल्नीनी। गेपुकी ७ महिनामी एको चाड मानेचा माल्नीनी। एको इन कली गेना हना यो पतीक बाक्ब। 42 गे ७ नाक्त सम्म गोठीमी बाक्कीन। इस्राएल डा मुर नेल्ल गोठीम बाक्चा माल्नीमी। 43 गो इन कली इजीप्त रे गुंडशा चाक्नीनु, गोठीम बाक्पाइश्शो नड, दे इन चच युडपुकीम तुइक्चा माल्नीमी। गो परमप्रभु यावे, इन परमप्रभु नड' दे शेंदो" देंत।

44 मिनु मोसामी परमप्रभु यावे कली मानेचा माल्शो चाड मुर नेल्ल आन कली नेंपाइक्तीमी।

## बत्ती नु शोब्ले

24 मिनु परमप्रभु यावेमी मोसा कली 2 "गे इसाएली आन कली 'बत्ती गेना हना यो ब्रपाइश्शा वोइक्चा कली गेपुकीमी तेल रवा आ फल रे तुप्शा सेल्शो तेल चाक्कीन। प्रस्थान २७:२

3 मिनु हारूनमी बत्ती कली गुम्तीक ताम्बु आगा, फारशो वा आ डोंइती वोइक्चा माल्ब। मेको परमप्रभु यावे आ डोंइती नाक्दो रे सुनी सम्म गेना हना यो ब्रचा माल्ब। मेको इन कली गेना हना यो पतीके बाक्ब। 4 मेकोमी परमप्रभु यावे आ डोंइती क्येख सुन के सेल्शो बत्ती दातीक तारी गेना हना यो वोइक्चा माल्ब।

5 गे रिम्शो फस चाक्शा, बार ओटा शोब्ले चोवो। शोब्ले का एफाह का के २० भाग थम रिम्शो फस के दुम्चा माल्ब। एफाह पुक्तीके का बाक्ब। एफाह का २२ लिटर रिक्ब। मेको के २० भाग ४.४ लिटर खोदेंशो बाक्ब। प्रस्थान २५:३० 6 मेको शोब्ले परमप्रभु यावे आ डोंइती क्येख सुन के टेबल आ तार ६, ६ ओटा खोप्शा वोइक्चा माल्ब। 7 मेको निक्शी खोप्तीकेमी का का पा रिम्शो धूप वोइक्चा माल्ब। मिनु मेको शोब्ले आ पा डा मेको धूप मीम चोशा परमप्रभु यावे कली चढेचा माल्ब। 8 मोपा हारूनमी नेल्ल नाइक्तीक नाक्ती मेको शोब्ले कली परमप्रभु यावे आ डोंइती वोइक्चा माल्ब। मेको इसाएली आन कली मेको गेना हना यो पतीक नु लीब कबल बाक्ब। 9 मेको शोब्ले हारून नु आ तौ चच आन कली बाक्नीम। मेकोपुकीमी मेको शोब्ले चोव्रखो बाक्तीकेमी बाक्शा जचा माल्नीम। मारदे हना मेको शोब्ले परमप्रभु यावे कली मीम चोशा चढेशो रे नेल्ल क्येडा चोव्रखो हारून नु आ तौ चच आन भाग बाक्ब' दे अरेवो" देंत।

## परमप्रभु कली शुक्शी पाइब

10 मिनु इजीप्ती आफ नु इसाएली ममा पाइश्शो मुर का बाक्माक्त। मेको मुर इसाएली आन दातेमी जाक्शा, इसाएली का नु तुम्मुसा बाक्त। 11 मिनु मेको इसाएली ममा आ तौमी परमप्रभु यावे आ नें थिशा, सराप पवा बाक्त। मिनु मुरपुकीमी मेको कली मोसा आ बाक्तीकेम चाक्गमे बाक्त। मेको आ ममा आ नें शेलोमीथ बाक्माक्त। मिनु मेको दान आ थर डा दिब्री आ तमी



बाकमाक्त।<sup>12</sup> मिनु मेको मुर कली चाकशा, परमप्रभु यावे आ मिम्शो मतुइक्तामे सम्म चोक्शा वोदमे बाक्त। *गन्ती १५:३४*

<sup>13</sup> मिनु नोले परमप्रभु यावेमी मोसा कली <sup>14</sup> “मेको सराप पाइब कली मुर आन बाक्तीक रे लाडगा गुंडदीन। मिनु मेको आ नेक्था बाक्ब मुर नेल्लेमी मेको आन गुड आ पिया तारी वोइक्वा माल्नीम। मिनु मेको नोले नेल्लेमी मेको कली फुल्लु आप्शा साइक्वा माल्नीम। *गन्ती १५:३६; ब्यवस्था १५:५; प्रेरित ७:५६* <sup>15</sup> मिनु गे इस्राएली आन कली ‘सुम आ परमप्रभु कली सराप पाइबा, मेको आ पाप राइब। <sup>16</sup> परमप्रभु यावे आ नें आ पर्बम मरिम्शो लोत्र पाइब साइक्वा पुंडसीब। इस्राएल डा मुर बाक्त हना यो, अर्को रागी डा मुर बाक्त हना यो, सुम परमप्रभु यावे आ नें आ पर्बम मरिम्शो लोत्र पाइबा, मेको साइक्वा पुंडसीब। *प्रस्थान २०:७; मत्ती २६:६५-६६*

<sup>17</sup> सुमी मुर का कली साइक्वा, मेको साइक्वा पुंडसीब। *प्रस्थान २१:१२*  
<sup>18</sup> सुइमी बस्तु भाव कली तुप्शा साइक्वु हना, मेको आ पा डा अरु गेचा माल्ब। ब्रोंइशो बस्तु आ पा डा ब्रोंइशो बस्तु गेचा माल्ब। *प्रस्थान २१:३३-३७*  
<sup>19</sup> सुइमी आ नेक्था डा मुर कली आ खोइल जिक्ताक्व हना, मेको यो आ खोइल जिक्वा पुंडसीब। <sup>20</sup> जिक्तीके आ पा डा जिक्तीके, मिक्च आ पा डा मिक्च, खूइ आ पा डा खूइ, सुमी सु कली मार पाइबा, मेको यो मो पाइक्वा पुंडसीब। मेको कली यो मो पाइक्वा माल्ब। *प्रस्थान २१:२३-२५*  
<sup>21</sup> सुइमी बी ब्यफ, क्यारश भेडा आन कली तुप्शा साइक्वु हना, मेको आ पा डा अर्को गेचा माल्ब। तन्न मुर साइक्ब कली चहिं, साइक्वान माल्ब।  
<sup>22</sup> आंम रागी डा मुर नु अर्को रागी डा मुर आन पर्बम खाल का डा ऐन कानून दुम्चा माल्ब। मारदे हना गो परमप्रभु यावे, इन परमप्रभु नड’ दे शेंचा माल्नेवे” देता। *लेवी १९:३४; प्रस्थान १२:४९*

<sup>23</sup> मिनु मोसामी इस्राएली आन कली मेको लोत्र शेंदीमी नोले मेकोपुकीमी मेको सराप पाइब कली मुर आन बाक्तीक रे गुंडशा, फुल्लु आप्शा साइक्तेक्म। मिनु परमप्रभु यावेमी मोसा कली अरेशो खोदेंशो पा इस्राएली नेल्लेमी पास्तेक्म।

#### नाइक्तीक बर्स

**25** मिनु परमप्रभु यावेमी सीनै डांडामी मोसा कली <sup>2</sup> “गे इस्राएली आन कली ‘गेपुकी गो इन कली गेशो रागीमी जाक्दीन्नी नोले मेको रागी यो परमप्रभु यावे आ नेंमी नांडसीचा माल्ब। <sup>3</sup> गे ६ बर्स सम्म आंम रूम मार मार शोक्वा खूम्चा माल्नीनी। ६ बर्स सम्म इन अडगुर रू डा बोट आन मसिश्शो राशी खोइश्शा ताइक्वा माल्नीनी। मिनु मेको आ अडगुर खुप्चा माल्नीनी। *प्रस्थान २३:१०-११* <sup>4</sup> तन्न ७ बर्सम रू नेल्ले परमप्रभु यावे आ बर्सम नाइक्वा माल्ब। गेपुकीमी ७ बर्सम इन रूम मारेइ मशोक्वा मखूम्चा। मिनु अडगुर बोट आ फल मसिख्व राशी यो मखोतीन। <sup>5</sup> इन रूमी आंमा वाशो मारेइ मारेइ खुप्चा मदुम्ब। मखोइश्शो अडगुर बोट आ फल खुप्चा मदुम्ब। मेको रू कली थम नांडसीतीक बर्स दुम्चा माल्ब। <sup>6</sup> मेको रू नांडसे ना आंमा सिश्शो मारेइ मारेइ जने चाप्नीनी। मिनु इन वाइलीम वाइल नु गे नु बाक्ब इन थाप्शो गेय पाइबपुकीमी जने चाप्नीमी। <sup>7</sup> मेको रूमी वाशो, इन बस्तु भाव नु ब्वाकी डा जन्तु आन कली ब्वतीक दुम्ब।

#### डोंइती डा खोदेंशो सेल्लेतीक बर्स

<sup>8</sup> मिनु गेपुकीमी ७ नाइक्तीक बर्स मानेनी नोले, मिनु ४९ बर्स दुम्बा, <sup>9</sup> मिनु ७ महिना डा १० नाक्ती पाप क्याम्तीक नाक्त बाक्ब। मेको नाक्ती इन रागी नेल्लेमी तुराही ताप्पाइक्वा माल्नीनी। *लेवी २३:२७* <sup>10</sup> मिनु ५० डा बर्स परमप्रभु यावे आ बर्स बाक्ब। मिनु गे रागी डा मुर नेल्ल आन कली आन डोंइती डा अधिकार लेंशा ताइनीम, दे नेंपाइक्वा माल्नीनी। मेको इन कली प्रॉइतीक बर्स बाक्ब। मिनु मुर नेल्ल आन आन खिं नु आन आन बाक्तीक लेन्ने चाप्नीम। *यसैया ६१:२; लूका ४:१९* <sup>11</sup> मेको ५० बर्स इन कली डोंइती डा खोदेंशो पा लेंशा सेल्लेतीक बर्स बाक्ब। मेको बर्स गेपुकीमी मारेइ मशोक्कीन, मखूमीन। आंमा वाशो बाली नाली मरुप्चा। अडगुर बोट आन ममुंइशो राशीम सिश्शो अडगुर मखूप्चा। <sup>12</sup> मारदे हना मेको प्रॉइतीक

बर्स बाक्ब। मेको परमप्रभु यावे आ बर्स दुम्ब। गेपुकीमी रूम आंमा वाशो, आंमा सिश्शो ला जने।

<sup>13</sup> मेको प्रॉइतीक बर्समी मुर नेल्ल आन आन रू नु खिं लेत्वा माल्नीम।

<sup>14</sup> मिनु आंम नेक्था डा मुर नु ग्याप्तीक लेयतीक गेय पनीनु, मठगेपामुने। *१ थिस्सलोनिकी ४:६* <sup>15</sup> गे इन नेक्था डा मुर रे रू का ग्याप्तीवी हना, मेको प्रॉइतीक बर्स जाक्वा गिश बर्स लीनीम, दे हिक्शा ला ग्यापीन। <sup>16</sup> गिश बर्स लीनीमी मेको कोवशा गेपुकीमी आ क्येट बारपाइक्वा माल्नीनी। मिनु इक्का बर्स ला लीतेक्म हना, क्येट तोक्वा माल्नीनी। मारदे हना अन्न खुप्तीक बर्स कोवशा, मेको रू लेयशो बाक्ब। <sup>17</sup> गेपुकी आंम आंमा मठगेपामुने। तन्न परमप्रभु क्येडा हिनीन। मारदे हना गो परमप्रभु यावे, इन परमप्रभु नड।

<sup>18</sup> गेपुकीमी आं फुल्लुम मुशा ब्रेक्शो लोत्र तुइश्शा पचा माल्नीनी। आ पावो, दे अरेशो लोत्र टिने। मोपा ला गे मेको रागीमी रिम्शो पा बाक्ने चाप्नीनी। *लेवी २६:५; १राजा ५:५* <sup>19</sup> मिनु रागीमी अन्न ग्रेल्ब। गेपुकी जचा तूचाम श्येत मजाइनीनी। मिनु मेको रागीमी महिंधु थुं नाइश्शा बाक्वा ताइनीनी। <sup>20</sup> गेपुकीमी अन्न मशोक्थु मखूप्थु ७ बर्सम चहिं गो मार जाइनीकी, दे देंतीनी हना, <sup>21</sup> गो ६ बर्सम इन कली आं आसीक गेनन्नी। मिनु रागीम बर्स सां सम्म शुश अन्न ग्रेल्पाइक्नुड। *ब्यवस्था २८:८*  
<sup>22</sup> गेपुकीमी ८ बर्सम खूम्नीनु, गे माइत अन्न रे जाइनीनी। ९ बर्सम नक बाली नाली ममीम सम्म गे माइतन जाइनीनी।

#### रागी रू नेल्ल परमप्रभु के बाक्ब

<sup>23</sup> मिनु इन गे रू गेना हना यो कली लेयने मचाप्नीनी। मारदे हना मेको रागी आं के बाक्ब। गेपुकी गे आं के वाइल नु बुम्था पाइब खोदेंशो बाक्नीनी। *भजन संग्रह ३९:१३* <sup>24</sup> इन ग्याप्शो अधिकारम पिशो रू लेंशा लेत्वा माल्नीनी। <sup>25</sup> सुइ इन मुर पुडग दुम्तीके आन रू लेयचा माल्लेक्म हना, मेको आ नेक्था डा मुर जाक्शा, मेको लेश्शा ग्याप्पाइक्वा माल्ब। *रूथ ४:३-४* <sup>26</sup> तन्न मो पाइब सुइ मबाक्तेक्म हना, नोले मेको आंमान क्येट थीब दुम्शा, लेश्शा आंमा ग्याप्चा माल्ब। <sup>27</sup> मेकोमी मेको लेयशो गिश बर्स दुम्मे, मेको हिक्वा माल्ब। मिनु सु कली लेयशो बाक्मे, मेको लीशो बर्स डा खुप्तीक अन्न डा क्येट गेचा माल्ब। मिनु मेको मुर आ रू लेंशा मेको केन दुम्ब। <sup>28</sup> तन्न आंमा लेन्ने मचाप्तु हना, मेको रू ग्याप्ब मुर नु बाक्ब। मिनु रू ग्याप्बमी प्रॉइतीक बर्सम लेत्वा माल्ब।

<sup>29</sup> मिनु सुइमी गारो हिरशो सहर आगा डा खिं लेयतु हना, लेयशो बर्स का सम्म मेकोमी मेको आ खिं लेन्ने चाप्ब। मेको कली मेको अधिकार बर्स का सम्म बाक्ब। <sup>30</sup> तन्न बर्स काम यो मेको लेन्ने मचाप्तु हना, ग्याप्ब नु आ खिं डा मुर आन कली मेको खिं आन शोंप दुम्ब। प्रॉइतीक बर्सम यो मेको लेश्शा गेचा ममाल्ब। <sup>31</sup> तन्न गारो महिरशो बाक्तीके डा खिंपुकी चहिं रूपुकी खोदेंशो पा पचा माल्ब। मेको लेन्ने चाप्नीम। मिनु प्रॉइतीक बर्सम लेश्शा गेचा माल्नीम।

<sup>32</sup> मिनु लेवी आन सहरमी बाक्शो खिं चहिं मेकोपुकीमी आंम खिं गेना हना यो लेन्ने चाप्नीम। *गन्ती ३५:२-५* <sup>33</sup> लेवी आन सहरम बाक्शो लेयशो खिं अरु लेवीम लेन्ने मचाप्तेक्म हना, प्रॉइतीक बर्समी मेको खिं लेश्शा, मेको कली गेचा माल्ब। मारदे हना लेवी आन सहरम बाक्शो खिं इस्राएली आन दातेमी लेवी आन शोंप बाक्नीम। <sup>34</sup> मेको आन सहर क्येडा लाडगाम बाक्शो रूपुकी लेयचा मताइनीम। मारदे हना मेको आन गेना हना यो लीब शोंप बाक्नीम।

#### क्येट आ चाइक्ब मताक्को

<sup>35</sup> मिनु इन इस्राएली लोक्ब का शुश पुडग दुम्शा, पने जने मचाप्तु हना, गेपुकीमी मेको कली अर्को रागी डा मुर खोदेंशो पा वारच पचा माल्नीनी। मिनु मेको गेपुकी नु बाक्ने चबल। <sup>36</sup> मिनु गे मेको कली जेर गेनीनु, आ चाइक्ब मताक्कीन। गे इन परमप्रभु क्येडा हिनीन। मिनु इन लोक्ब कली गे नु बाक्वा गेन। *प्रस्थान २२:२४; ब्यवस्था २३:२०* <sup>37</sup> गेपुकीमी मेको कली क्येट गेतीकेमी चाइक्ब मताक्कीन। मिनु मेको कली जचा थोव्रक गेशा, मेको आ क्येडा शुश मलेप्पाइक्तीन। <sup>38</sup> गो इन परमप्रभु दुम्चा नु इन कली कनान

रागी गेचा, दे इन कली इजीप्त रागी रे गुंडशा, एक चाक्ब, गो परमप्रभु यावे, इन परमप्रभु नड।

39 मिनु गो इन इस्राएली लोकब शुश पुडग दुश्शा, आंमा इन कली लेयसाक्म हना, मेको आन कली वाइल खोदेशो पा गेय मपपतीन। प्रस्थान २१:२ 40 मिनु गेपुकीमी मेको कली थाप्शो गेय पाइब कि अर्को रागी डा गेय पाइब खोदेशो पा बाक्वा गेने। मिनु मेको प्रॉइतीक बर्स सम्म गेपुकी नु बाक्वा इन गेय पाइब दुम्ब। 41 मिनु नोले मेकोपुकी नु आन तमी तौ गे इन बाक्तीक रे लशा, आन खिं डा मुर नु आन बाक्तीक लेम्मल। 42 मारदे हना मेकोपुकी गो इजीप्त रे गुंडशा चाक्शो आं गेय पाइबपुकी बाक्नीम। मेको आन कली वाइलीम वाइल खोदेशो पा लेयचा मदुम्ब। 43 मिनु गेपुकीमी मेको आन कली शुश अरेशा श्येत मगेन। इन परमप्रभु कली तशा हिनीन। प्रस्थान २१:२०-२१

44 मिनु गेपुकीमी इन वाइलीम वाइल चहिं एर ऑथ डा अर्को रागी डा मुर रे ग्याप्चा माल्नीनी। 45 गेपुकी नु बाक्ब अर्को रागी डा मुरपुकी नु इन रागीम जरमेशो मेको आन खिं डा मुर रे ग्याप्चा, इन के सेल्ने चाप्नीनी। 46 गे मेको आन कली आंम तौ चच आंम वाइलीम वाइल दुम्चा कली ग्याप्चा वोइक्ने चाप्नीनी। गे मेको आन कली वाइलीम वाइल खोदेशो पा दिष्शा गेय पपाइक्ने चाप्नीनी। तन्न आंम लोकब इस्राएली आन कली मोपा श्येत गेशा दिप्ने मचाप्नीनी।

47 मिनु इन दातेमी बाक्ब अर्को रागी डा मुर क्येट थीब दुम्त हना नु सुइ इन लोकब श्येत जशा, पुडग दुश्शा, मेको आंम कली कि आ खिं डा मुर कली लेयसाक्व हना, 48 मेको लेयसे नोले आ लोकबपुकीमी मेको कली लेन्ने चाप्नीम। मेको आ लोकब कामी मेको कली लेन्ने चाप्ब। 49 मेको आ आफ आ लोकब, आं लोकब नु सुइ आ नेक्था डा मुरुमी मेको कली लेन्ने चाप्ब। मेको नोले शुश क्येट थीब दुम्त हना, आंमा थाप्शा गूने चाप्ब।

50 मेको मुरुमी आ अर्को रागी डा ठेयब मुर कली लेयसीशो बर्स रे प्रॉइतीक बर्स सम्म हिक्शा, आ गेय पतीक लीशो बर्स कली जेला तशो खोदेशो पा हिक्चा माल्ब। मिनु लीशो बर्सम ततीके जेला डा क्येट हिक्शा थाप्चा माल्ब।

51 मिनु शुश बर्स लीमेनु, आंमा लेयसीशो मुरुमी मेको गेय मपशो नेल्ल बर्स हिक्शा, मेको कली गारचा डा पा थाप्चा माल्ब। 52 मिनु मेको प्रॉइतीक बर्स सम्म का निक्शी बर्स ला लीतेक्म हना, मेकोमी जेला तशो खोदेशो पा का निक्शी बर्स डा गारचा डा पा प्रॉइतीक बर्स सम्म क्येट थाप्चा माल्ब।

53 मिनु मेको अर्को रागी डा ठेयब मुरुमी आंमा लेयसीशो इस्राएली कली बर्स का कली जेला ताक्शा गेय पाइब खोदेशो पा रिम्शो पचा माल्ब। मेको कली वाइलीम वाइल कली खोदेशो पचा मदुम्ब। लेवी २५:४३

54 मोपा यो मेको मुर प्रॉइचा मपुंडसाक्व हना, रिम्शा। मेको नु आ खिं डा मुर प्रॉइतीक बर्सम ला लचा ताइनीम। 55 मारदे हना इस्राएलीपुकी आं गेय पाइब बाक्नीम। गो मेको आन कली इजीप्त रागी रे गुंडशा चाक्ताक्मी। गो परमप्रभु यावे, इन परमप्रभु नड" दे शेंदो" दे परमप्रभु यावेमी देंत।

लोट्ट टीब आन कली आसीक

प्रस्थान २३:२०-३३; ब्यक्स्था २८:-

26 मिनु लेंशा परमप्रभु यावेमी मोसा कली "गेपुकीमी इन कली मूर्तिपुकी मसेलीन। मिनु आंम कली मुशा मूर्ति नु पूजा पचा कली थाम मवोतीन। मिनु इन रागीमी मुशो फुल्लु मवोतीन। मेको कली पूजा पा आन डॉइती मबपीन। मारदे हना गो परमप्रभु यावे, इन परमप्रभु नड। प्रस्थान २०:४-५ 2 गेपुकीमी आं नाइक्तीक नाक्ती मानेन। मिनु आं बाक्तीक कली मान पने। गो परमप्रभु यावे नड। लेवी १९:३०

3 गेपुकीमी आं फुल्लुम मुशा ब्रेक्शो लोट्ट टिशा पाइतीनी हना, 4 गो रेउ यिची ना रेउ यिपाइक्नुड। मिनु इन रूम शुश अन्न ग्रेल्लीम। मिनु रवाम शुश फल फुल सिल्लीम। 5 मिनु अडगुर सेक्वी ना सम्म इन अन्न तुप्नीनी। मिनु अडगुर सेक्ने मथुम्थु शोक्वी ना दुम्ब। मोपा गेपुकी नु शुश जचा तूचा बाक्ब। मिनु इन रागीम थुं नाइश्शा बाक्चा ताइनीनी। आमोस ९:१३

6 मिनु गो रागी डा मुर आन कली थुं नाइश्शा बाक्चा गेनुड। मिनु गेपुकी गोल्शा निन्द्रा पाइनीनी। सुइमी इन कली हिं च मकोइब। गो इन रागी रे हिं चा डा जन्तु आन कली खेरनुडमी। इन रागीमी लडाइ मदुम्ब। इजीकीएल

३४:२५ 7 मिनु गेपुकीमी इन जोरी सत्रु आन कली खेदा पा तरवारम साइक्नीनी। 8 इन मुर ५ जनामी सहे का मुर आन कली नु सहे का मुरुमी १० हजार मुर आन कली खेदा पाइनीम। इन जोरी सत्रु इन तरवारम शोल्मी पा बेक्नीम। ब्यक्स्था ३२:३०; यहोसु २३:१०

9 मिनु गो इन कली शिशी पा कोव्रनन्नी। मिनु गो इन कली सोशा बोशा शुश दुम्पाइक्नुड। मिनु आं पशो कबल गेपुकी नु गेना हना यो लीपाइक्नुड। इजीकीएल ३६:११ 10 गेपुकीम इन खेक्शा वोइश्शो माइत अन्न जना जन, नक अन्न वोइक्चा कली माइत अन्न तिल्चा माल्नीनी। 11 गो इन कली ग्रांघ्रा मदित्थु, इन दातेमीन आ बाक्तीकेम बाक्नुड। येरमीया ७:२३; २कोरिन्थी ६:१६ 12 मिनु गो इन दातेमी बाक्शा, गो परमप्रभु दुम्नुड। मिनु गेपुकी आं मुर बाक्नीनी। गो परमप्रभु यावे, इन परमप्रभु बाक्नुड। 13 गो परमप्रभु यावे, इन परमप्रभु नड। गेपुकी इन कली इजीप्ती आन वाइलीम वाइल मदुम्पाइक्थु, एक चाक्तन्नी। गो इन शुर डा जवा जिक्शा, इन पिया पोक्शा गाक्ब सेल्लन्नी। इजीकीएल ३४:२७-२८

लोट्ट मटीब आन कली सजाइ

14 तन्न गेपुकीमी आं लोट्ट मटीतीनी नु आं अरेशो मपाइतीनी, 15 नु आं फुल्लुम मुशा ब्रेक्शो लोट्ट मकोवतीनी, आं अरेशो मपाइतीनी नु आं कबल प्रॉइतीनी हना, 16 गो इन कली मार पाइनुड डेंशा हना, गो इन दातेमी शुश हिंतीके सेल्लुड। मिनु इन रां सोव्रना सोव्रन बाक्नीम। मिनु जरो पा इन मिक्च ततीके जाम्ना जाम्म लाइब। मिनु गे ओंखां पा बेक्नीनी। इन शोक्शो अन्न मोशा दुम्नीम। मारदे हना इन जोरी सत्रुम नेक्नीम। 17 गो इन कली मरिम्शो पाइक्नुड। गे इन जोरी सत्रु रे बुइनीनी। इन जोरी सत्रु इन कली हुकुम पाइब दुम्नीम। मिनु सुइमी इन कली खेदा मपाम्तेक्म हना यो, गेपुकी प्रोक्नीनी।

18 मेको नेल्ल तुइश्शा यो, आं कली मटीतीनी हना, गो इन पाप ७ खेयप तेम्शा सजाइ गेनन्नी। 19 गो इन ठेयब लेशो खतम सेल्लुड। मिनु गो इन सरीड फलाम खोदेशो नु इन रू तांबा खोदेशो सेल्लुड। ब्यक्स्था ११:११-१७ 20 मिनु इन सक्ति मोशा दुम्शा मारदे पने मचाप्नीनी। इन रूम मारदे मवाब। मिनु इन रागी डा रवापुकीम फल मसिल्लीम।

21 गेपुकी दूली लांम गाक्स डा गाक्स पा, आं कली मटीतीनी हना, गो इन पाप ७ खेयप तेम्शा इन कली श्येत गेनन्नी 22 गो इन दातेमी ब्वाकी डा जन्तुपुकी सोइक्नुडमी। मेकोमी इन आल आन कली ब्वाइनीम। मिनु इन बस्तु भाव साइक्नीम। मिनु गे का निक्शी ला दुम्तीके इन लां नेल्ल श्येत्य दुम्नीम। इजीकीएल ५:१७

23 मोपा सजाइ तशा यो, गेपुकी आं गे मलेत्तीनी हना, नु दूली लां गाक्स डा गाक्स पाइतीनी हना, २सामुएल २२:२७ 24 गो इन कली यो मरिम्शो पस डा पस पाइनुड। मिनु गो इन पाप ७ खेयप तेम्शा, इन कली श्येत गेनुड। 25 गो इन कली लडाइ तोपाइक्नुड। मिनु आं कबल प्रॉइशो आ पर्वम क्येक्क लेल्लुड। गेपुकी आंम आंमा सहरम बुक्तीनी हना, गो मेकेर यो इन दातेम बेक्पाइक्ब रोइ सोइक्नुड। मिनु इन जोरी सत्रु आन गुइम दुम्नीनी। यसैया १:२०, २४ 26 मिनु गो इन अन्न थमा पा साम्पाइक्नुड। १० ओटा खिं डा मीश मुरुमी चुप्लु कामी क्येनीम। क्येशा पुक्शा तेम्मेनु, सुइ मरूनीम। यसैया ३:१; इजीकीएल ४:१६

27 मिनु मेको मो दुम्शा यो, गे आं कली मटिथु, दूली लां गाक्स डा गाक्स पाइतीनी हना, 28 गो इन कली मरिम्शो पस डा पस ग्युनुड। मिनु इन पाप ७ खेयप तेम्शा, सजाइ गेनन्नी। ब्यक्स्था २८:५३; येरमीया १९:९ 29 गेपुकीमी इन तमी तौ आन श्ये ब्वचा माल्नीनी। 30 गो इन डांडा डा पूजा पतीक थामपुकी प्रेल्लुड। इन धूप चोतीक नेल्ल प्रेल्लुड। मिनु इन बेक्शो रां मेको ब्रोल्शो मूर्ति आन तार ताइक्नुड। मिनु गो इन कली तशा ग्रांघ्रा दिशा तिल्लुड। इजीकीएल ६:४, ६ 31 गो इन सहर गोरशो रागी खोदेशो सेल्लुड। मिनु इन पूजा पतीके थान श्येत्य सेल्लुड। गो इन ब्रोवशो धूप आन रिना मनाम्नुड। 32 मिनु गो रागी कली खतम पोक्नुड। मिनु मेकेर जाक्शा बाक्ब इन जोरी सत्रुमी मेको तशा छक लाक्नीम। 33 गो इन कली रागी रागी डा मुर आन दातेमी ब्रपाइक्नुड। मिनु लडाइ तोपाइश्शा, इन कली खेदा पपाइक्नुड। मिनु इन रागी श्येत्य नु इन सहरपुकी गोरशो सेल्लुड।

34 मिनु रागी श्येत्थ दुम्मेनु, मेको आ नाइक्तीक बर्स ग्येरशा मानेब। मिनु गेपुकी इन जोरी सत्रु आन रागीम बाक्नीनु, इन रागी चहिं ग्येरशा नाइसीब। लेवी २५:२; २इतिहास २६:२१ 35 मेको रागी गिश नाक्त सम्म श्येत्थ लीबा, मिश नाक्त नाइक्चा ताइब। गेपुकी मेक बाक्नीनु, नाइक्तीक बर्स नाइक्चा मतशो, नाइक्तीक बर्स मानेशो बाक्ब।

36 मिनु गो इन जोरी सत्रु आन रागीम बाक्शो लीशो मुर आन थुं लुकच लपाइक्नुड। मिनु सफा दोक्शो रेयके नेशा यो, आन जोरी सत्रुम खेदा पशो खोदेंशो पा प्रोक्नीम। मिनु मोशा दाइल पा थिल्लीम। 37 सुइमी खेदा मपथु यो, मेकोपुकी तरवार तथा प्रोक्शो खोदेंशो पा, प्रोक्नीम। मिनु थोक्मुशा गोल्लीम। मोपतीके आन जोरी सत्रु आन डॉइती राप्ने मचाप्नीम। 38 गेपुकी अर्को रागी डा मुर आन दातेमी जाग्शा लाइनीनी। मिनु इन जोरी सत्रु आन रागीमी इन कली दाक्ब। 39 मिनु लीशोपुकी चहिं जोरी सत्रु आन रागीमी आन पाप नु आन किकी पिपी आन पाप पतीके बेक्ना बेक्न लाइनीम। इजीकीएल २४:२३; इजीकीएल ३३:१०

40 तन्न मेकोपुकीमी आंम पाप नु आन किकी पिपी आन पाप आ पर्वम 'मरिश्शो पाइतक नु दूली लां गाक्स डा गाक्स पाइतक' देंतेक्म हना, ब्यवस्था ४:३० 41 मिनु गो मेको आन कली मरिश्शो पस डा पस बाक्शा, आन जोरी सत्रु आन रागीम सोइक्ताक्डमी। मिनु मेको आन खकटा थुं ब्रेश्शो दुग्शा, आन पाप आ पर्वम पाप क्याम्तीक गेय पान्तेक्म हना, ब्यवस्था १०:१६; येरमीया ९:२५ 42 गो याकूब, इसहाक नु अब्राहाम नु पशो आं कबल नु मेको रागी कली मिम्नुड। प्रस्थान २:२४; २राजा १३:२३ 43 मारदे हना मेको रागी श्येत्थ दुग्शा, आ नाइक्तीक बर्सपुकी मुर मबाक्तीके मानेना मानेन बाक्ब। मिनु मेकोपुकीमी आन मरिश्शो पशो आ पर्वम सजाइ ताइनीम। मारदे हना मेकोपुकीमी आं पावो, दे अरेतीक लोत्र नु आं फुल्लुम मुशा ब्रेक्शो लोत्र काइ मपाप। 44 मिनु मोदेंशो पास्तेक्म हना यो, गो मेको आन कली आन जोरी सत्रु आन रागीमी कोव्रशा, ग्रांग्रा दिशा खतम मसेल्नुडमी। मिनु मेकोपुकी नु पशो आं कबल मप्रॉइनुड। मारदे हना गो परमप्रभु यावे, मेको आन परमप्रभु नड। होसे ११:९ 45 तन्न गो मेको आन कली मिम्शा, आन किकी पिपी नु पशो आं कबल मिम्नुड। गो नेल्ल रागी डा मुरपुकीम तचा डा पा मेको आन परमप्रभु दुम्तीके, मेको आन कली इजीप्ट रागी रे गुंइशा चाक्ताक्मी। गो परमप्रभु यावे नड" दे परमप्रभु यावेमी देंत। उत्पत्ती १२:७

46 एको परमप्रभु यावेमी सीनै डांडाम मोसा कली गेशो आं नु इस्राएली आन दातेमी फुल्लुम मुशा ब्रेक्शो लोत्र नु "पावो" दे अरेशो लोत्र बाक्नीम।

मुर आ पर्वम कसम जशो

27 मिनु परमप्रभु यावेमी मोसा कली 2 "गे इस्राएली आन कली 'सुइमी परमप्रभु यावे कली मुर आ पा डा क्येट गेनुड' दे कसम जाप्टु हना, 3 मेकोमी २० बर्स रे ६० बर्स सम्म डा वॉइश मुर आन पर्वम आं ताम्बु डा चांदी के ५० शेकेल परमप्रभु यावे कली गेचा माल्नीम। शेकेल इस्राएली आन क्येट बाक्ब। शेकेल का ११.५ ग्राम चांदी बाक्ब। ताम्बु डा शेकेल चहिं १२ ग्राम बाक्ब। न्यायाधीस ११:३१; १सामुएल १:११ 4 मीश मुर आ पर्वम बाक्त हना, मेकोम ३० शेकेल गेचा माल्ब। ३० शेकेल ३६० ग्राम चांदी बाक्ब। 5 मिनु ५ बर्स रे २० बर्स सम्म डा वॉइश आल आन पर्वम २० शेकेल गेचा माल्ब। मीश आल बाक्त हना, १० शेकेल गेचा माल्ब। 6 मिनु महिना का रे ५ बर्स सम्म डा वॉइश आल आन पर्वम चांदी के ५ शेकेल नु मीश आल आन पर्वम चांदी के शेकेल सां गेचा माल्नीम। 7 मिनु ६० बर्स क्येडा ग्येत्थ डा वॉइश मुर आ पर्वम १५ शेकेल नु मीश मुर आ पर्वम १० शेकेल गेचा माल्ब। ताम्बु डा शेकेल का १२ ग्राम बाक्ब। 8 मिनु मेको मुर प्रुडगा दुग्शा, गेने मचाप्ब बाक्त हना, मेको कली चढेब आ डॉइती चाक्चा माल्नीम। मिनु चढेबमी मेको कसम जाइब आ चाप्शो खोदेंशो पा मेको आ क्येट देंचा माल्ब।

9 मिनु परमप्रभु यावे कली चढेचा डा बी ब्यफ, क्यारश भेडा बाक्तेक्म हना, मेको मारेइ मद्दुश्शो थम रिश्शो नु ग्रांग्रा मदिशो बाक्चा माल्नीम। 10 मेको आ पा डा अरु फाइक्चा मद्दुम्ब। रिश्शो बस्तु आ पा डा मरिश्शो नु

मरिश्शो आ पा डा रिश्शो फाइक्चा मद्दुम्ब। चढेचा डा बस्तु फाइक्तेक्म हना, मेको बस्तु निम्फा मारेइ मद्दुश्शो थम रिश्शो ग्रांग्रा मदिशो बाक्चा माल्नीस।

11 मिनु परमप्रभु यावे आ डॉइती चढेचा मद्दुश्शो ग्रांग्रा दिशो बस्तु भाव बाक्तेक्म हना, मेको आन कली चढेब कली कौंइचा माल्नीम। 12 मिनु चढेबम मेको बस्तु रिश्शो बाक्त हना यो, मरिश्शो बाक्त हना यो, मेको गिश क्येट लाइक्चा, दे चढेबमी देंचा माल्ब। मिनु चढेबमी दोशो देंबा मेको ठीक दुम्ब। 13 मेको मुरम क्येट थाप्शा, मेको बस्तु कली प्रॉइचा दाक्ब हना, चढेब आ देंशो क्येडा यो ५ भाग डा भाग का क्येट तेम्शा गेचा माल्ब। लेवी ५:१६

14 मिनु सुइ मुरमी परमप्रभु यावे कली खिं का चढेप्टु हना, चढेबमी मेको खिं कोव्रशा रिश्शो बाक्म कौं मरिश्शो बाक्मे 'ओशो क्येट लाइक्ब' देंचा माल्ब। मिनु चढेबमी दोशो देंबा मेको ठीक दुम्ब। 15 मिनु मेको मुरमी क्येट थाप्शा लेत्वा थुं पाप्टु हना, चढेबमी देंशो क्येडा यो ५ भाग डा भाग का क्येट तेम्शा गेचा माल्ब। मिनु मेको खिं मेको केन दुम्ब।

16 मिनु सुइ मुरमी तेकोइ आंम रू परमप्रभु यावे कली चढेप्टु हना, चढेबमी मेको रूम दोशो वांचेर लाइबा कोव्रशा, मेको आ क्येट देंचा माल्ब। होमेर का क्योव्रज वांचेर लाइब रू कली ५० चांदी के शेकेल दुग्चा माल्ब। होमेर का २२० लिटर रिक्ब पुक्तीक का बाक्ब। ताम्बु डा शेकेल का १२ ग्राम चांदी बाक्ब। २सामुएल २४:२४ 17 मेको मुरमी आ रू कली लेंशा प्रॉइतीक बर्स आ नोले डा बर्स रे चढेप्टु हना, मेको आ क्येट चढेबमी देंशो खोदेंशो दुम्ब। लेवी २५:८-५५ 18 तन्न मेकोमी आ रू लेंशा प्रॉइतीक बर्स इक्का बर्स नोले चढेप्टु हना, लेंशा प्रॉइतीक बर्स जाक्चा दोशो लीशो बाक्मे, चढेबमी मेको हिक्चा माल्ब। मिनु आ देंशो क्येट रे तोक्चा माल्ब। 19 मेको मुरमी मेको रू लेंशा फेत्वा दाक्ब हना, चढेबमी देंशो क्येट क्येडा ५ भाग डा भाग का क्येट तेम्शा गेचा माल्ब। मिनु मेको रू मेको केन दुम्ब। 20 तन्न मेकोमी मेको रू मलेप्ब हना, मेकोमी मेको रू अर्को मुर कली लेयशो बाक्त हना, मेकोमी मेको रू गेनायो लेत्वा मताइब। 21 मेको रू लेंशा प्रॉइतीक बर्सम प्रॉइशो बाक्त हना, मेको परमप्रभु यावे कली जिम्मा गेशो रू दुग्शा, चढेबमी मेको रूम शोक्ब।

22 मिनु सुइ मुरमी आंम के ममाइ, तन्न आ ग्याप्शो रू परमप्रभु यावे कली चढेप्टु हना, 23 चढेबमी लेंशा प्रॉइतीक बर्स सम्म हिक्शा, मेको आ क्येट दोशो बाक्मे, मोशो गेचा माल्ब। मेको नाक्तीन परमप्रभु यावे कली गेचा माल्ब। 24 मिनु लेंशा प्रॉइतीक बर्सम मेको रू सु रे ग्याप्शो बाक्मे, मेको लेंशा ताइब। 25 मिनु गिश क्येट लाइबा, मेको नेल्ल परमप्रभु यावे आ ताम्बु डा चांदी के शेकेलम थाप्चा माल्ब। शेकेल काम २० गेरा बाक्नीम। गेरा का ०.६ ग्राम बाक्ब।

26 मिनु बी ब्यफ, क्यारश भेडा आन डॉइती जरमेशो ब्यफ बाक्त हना यो, सांड बाक्त हना यो, बोका बाक्त हना यो, मेको डॉइती रे परमप्रभु यावे केन बाक्ब। सुइमी परमप्रभु यावे कली गेने मचाप्नीमी। प्रस्थान १३:२, १२, १३; गन्ती १८:१५ 27 मेको ग्रांग्रा दिशो बस्तु भाव बाक्त हना, आ देंशो क्येट क्येडा ५ भाग डा भाग का तेम्शा, लेत्वा माल्ब। तन्न मलेत्ताक्म हना, आ देंशो क्येटीम लेयचा माल्ब।

28 मिनु परमप्रभु यावे कली साइक्चा कली जिम्मा गेशो मारेइ मारेइ मुर बाक्त हना यो, बस्तु भाव बाक्त हना यो, आंम रू बाक्त हना यो, मेको लेयने नु लेन्ने मचाप्नीम। मेको साइक्चा कली जिम्मा गेशो मारेइ मारेइ थमा पा परमप्रभु यावे केन बाक्नीम। गन्ती १८:१४; गन्ती २१:२; यहोसु ६:१८, २६; इजीकीएल ४४:२९

29 मिनु सु मुर साइक्चा कली जिम्मा गेचा पुंडुसीशो बाक्बा, मेको कली क्येट थाप्शा मलेत्थु, साइक्चा माल्ब। यहोसु ६:१७-१८; १सामुएल १५:३-९

30 मिनु रू नेल्ल डा, अन्न कि रवा आ फल फुल १० भाग परमप्रभु यावे केन बाक्ब। मेको परमप्रभु यावे केन बाक्ब। गन्ती १८:२१; ब्यवस्था १४:२२-२९; नेहेम्याह १३:१२ 31 मुरमी आंमा आ गेशो १० भाग लेत्वा दाक्ताक्ब हना, ५ भाग तेम्शा, लेन्ने चाप्ब। 32 नेल्ल गोठ डा बी ब्यफ, क्यारश भेडा, मारेइ मारेइ गोठलाम हिक्तु हना यो, १० ओटा डा का परमप्रभु यावे केन बाक्ब। २इतिहास ३१:६ 33 मेकोमी रिश्शो नु मरिश्शो तिल्शा फाइक्चा मद्दुम्ब। मुरमी मेको बस्तु फाइक्चा थुं पाप्टु हना, निम्फा

परमप्रभु यावे कली गेचा माल्ब। मिनु क्येट थाप्शा, लेत्वा मदुम्ब, दे अरेवो”  
दे परमप्रभु यावेमी मोसा कली देंत।

<sup>34</sup> मिनु सीनै डांडामी परमप्रभु यावेमी इस्राएली आन कली मोसा रे पा  
शेंशो लोव्र एको बाक्नीम। लेवी ७:३८; लेवी २५:१; २६:४६

# गन्ती

एको किताब ब्रेक्ब यो मेको गोरशो रागी हिरब आन दातेमी बाक्शो बाक्त। मारदे हना दोपा मेकोमी मुर आन कली हिक्तीके नु अरु मार मार आइक्च गेय पशो नेल्ल ब्रेक्ने चाप्पा डा? मोपतीके मोसामी एको किताब ब्रेक्शो बाक्ब, दे मिन्नीम।

प्रस्थान ब्रेक्शो नोले, एको किताब सीनै डांडाम मार मार दुम्शो बाक्मे, मेको आ पबर्म ब्रेक्शो बाक्त। एको किताब मोसा आ ब्रॉइची ना ब्रेक्शो बाक्ब।

१. सीनै डांडा रे गाक्चा साशो
२. सीनै डांडा रे कादेश सम्म जाक्शो
३. मोआब रागी यर्दन खोला आ पूर्व सम्म जाक्शो

सीनै डांडाम मुर हिक्शो  
गन्ती २६:२-५१

१ इस्राएलीपुकी इजिप्त रे जाक्मा आ बर्स निक्शी, महिना निक्शी डा डोंइती डा नाक्त परमप्रभु यावेमी सीनै डा रागीमी बाक्शो गुप्तीक ताम्बुमी मोसा कली लोव पाप्नु। प्रस्थान ४०:१७<sup>२</sup> मिनु मेकोमी “गे इस्राएली वॉइश मुर आन थर थर नु आन खिं खिं पा नेल्ल आन नें ब्रेक्चा माल्नेवे। उत्पत्ती ३५:२३-३६; प्रस्थान ३०:१२<sup>३</sup> इस्राएलमी २० बर्स गाप्शो नु मेको क्येडा लाक्शो लडाइम लने चाप्ब मुर नेल्ल आन कली गे नु हारूनमी लडाइ पचा कली खुप्शो वोइक्चा माल्नीसी।<sup>४</sup> मेको नेल्ल आन थर रे मुर का कामी इस कली वारच पचा माल्नीम। मेको मुर आन खिं डा ठेयब मुर बाक्चा माल्नीम।<sup>५</sup> मिनु सु सुम इन कली वारच पचा माल्नीम दॅशा हना, रूबेन आ थर रे शेदेउर आ तौ एली-सुर,<sup>६</sup> सिमियोन आ थर रे सुरी-शदै आ तौ शेलुमीएल,<sup>७</sup> यहूदा आ थर रे अम्मीनादाब आ तौ नहशोन, प्रस्थान ६:२३<sup>८</sup> इस्राकार आ थर रे सुआर आ तौ नेथनेल,<sup>९</sup> जबूलून आ थर रे हेलोन आ तौ एलीआब,<sup>१०</sup> योसेफ आ तौ एफ्राइम आ थर रे अम्मीहुद आ तौ एली-शामा, योसेफ आ तौ मनस्से आ थर रे पेदा-सुर आ तौ गमलीएल, १इतिहास ७:२६; उत्पत्ती ४८:५<sup>११</sup> बेन्यामीन आ थर रे गिदेओनी आ तौ आबी-दान,<sup>१२</sup> दान आ थर रे अम्मी-शदै आ तौ अही-एजेर,<sup>१३</sup> आशेर थर रे ओक्रान आ तौ पगीएल,<sup>१४</sup> गाद आ थर रे दूलएल आ तौ एली-आसाफ,<sup>१५</sup> नाप्ताली आ थर रे एनान आ तौ अहीरा बाक्नीम” दे परमप्रभु यावेमी मोसा कली देंत।<sup>१६</sup> एकोपुकी इस्राएली आन दाते रे योवशो आन थर डा ठेयब मुर बाक्नीम।

<sup>१७</sup> मोसा नु हारूनमी योवशो मुर आन कली ब्रेक्ताक्स।<sup>१८</sup> मिनु मेको निक्शीमी महिना निक्शी डा डोंइती डा नाक्ती इस्राएली नेल्ल आन कली पुक्ताक्स। मिनु मुर नेल्लेमी आन थर नु आन खिं दॅशा, ब्रेक्पाइक्तेक्म। मिनु २० बर्स गाप्शो नु मेको क्येडा लाक्शो आन नें नेल्ल ब्रेक्पाइक्तेक्म।<sup>१९</sup> मिनु परमप्रभु यावेमी अरेशो खोदॅशो पा, मोसामी सीनै डा गोरशो रागीमी मेको आन कली खुप्शा वोइक्तीमी।

<sup>२०</sup> इस्राएल आ डोंइती जरमेशो तौ रूबेन आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्ब वॉइश मुर नेल्ल आन नें ब्रेक्ताक्म।<sup>२१</sup> मिनु मेको लडाइ पचा कली खुप्शो रूबेन आ थर डा मुर ४६ हजार ५ सहे बाक्तेक्म।

<sup>२२</sup> सिमियोन आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्ब वॉइश मुर नेल्ल आन नें ब्रेक्ताक्म।<sup>२३</sup> मिनु मेको लडाइ पचा कली खुप्शो सिमियोन आ थर डा मुर ५९ हजार सहे सां बाक्तेक्म।

<sup>२४</sup> गाद आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्ब वॉइश मुर नेल्ल आन नें ब्रेक्ताक्म।<sup>२५</sup> मिनु मेको लडाइ पचा कली खुप्शो गाद आ थर डा मुर ४५ हजार ६ सहे ५० बाक्तेक्म।

<sup>२६</sup> यहूदा आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्ब वॉइश मुर नेल्ल आन नें ब्रेक्ताक्म।<sup>२७</sup> मिनु मेको लडाइ पचा कली खुप्शो यहूदा आ थर डा मुर ७४ हजार ६ सहे बाक्तेक्म।

<sup>२८</sup> इस्राकार आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्ब वॉइश मुर नेल्ल आन नें ब्रेक्ताक्म।<sup>२९</sup> मिनु मेको लडाइ पचा कली खुप्शो इस्राकार आ थर डा मुर ५४ हजार ४ सहे बाक्तेक्म।

<sup>३०</sup> जबूलून आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्ब वॉइश मुर नेल्ल आन नें ब्रेक्ताक्म।<sup>३१</sup> मिनु मेको लडाइ पचा कली खुप्शो जबूलून आ थर डा मुर ५७ हजार ४ सहे बाक्तेक्म।

<sup>३२</sup> योसेफ आ तौ एफ्राइम आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्ब वॉइश मुर नेल्ल आन नें ब्रेक्ताक्म।<sup>३३</sup> मिनु मेको लडाइ पचा कली खुप्शो योसेफ आ तौ एफ्राइम आ थर डा मुर ४० हजार ५ सहे बाक्तेक्म।

<sup>३४</sup> योसेफ आ तौ मनस्से आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्ब वॉइश मुर नेल्ल आन नें ब्रेक्ताक्म।<sup>३५</sup> मिनु मेको लडाइ पचा कली खुप्शो योसेफ आ तौ मनस्से आ थर डा मुर ३२ हजार सहे निक्शी बाक्तेक्म।

<sup>३६</sup> बेन्यामीन आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्ब वॉइश मुर नेल्ल आन नें ब्रेक्ताक्म।<sup>३७</sup> मिनु मेको लडाइ पचा कली खुप्शो बेन्यामीन आ थर डा मुर ३५ हजार ४ सहे बाक्तेक्म।

<sup>३८</sup> दान आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्ब वॉइश मुर नेल्ल आन नें ब्रेक्ताक्म।<sup>३९</sup> मिनु मेको लडाइ पचा कली खुप्शो दान आ थर डा मुर ६२ हजार ७ सहे बाक्तेक्म।

<sup>४०</sup> आशेर आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्ब वॉइश मुर नेल्ल आन नें ब्रेक्ताक्म।<sup>४१</sup> मिनु मेको लडाइ पचा कली खुप्शो आशेर आ थर डा मुर ४९ हजार ५ सहे बाक्तेक्म।

<sup>४२</sup> नाप्ताली आ थर डा आन खिं खिं डा २० बर्स गाप्शो नु मेको क्येडा लाक्शो लडाइम लने चाप्ब वॉइश मुर नेल्ल आन नें ब्रेक्ताक्म।<sup>४३</sup> मिनु मेको लडाइ पचा कली खुप्शो नाप्ताली आ थर डा मुर ५३ हजार ४ सहे बाक्तेक्म।

<sup>४४</sup> मिनु मेको मुर नेल्ले लडाइ पचा कली खुप्ताक्म। मोसा, हारून नु मेको आस कली वारच पाइब इस्राएल आ १२ थर डा ठेयब मुरपुकीमी मेको आन कली लडाइ पचा कली खुप्ताक्म। उत्पत्ती १७:२०; उत्पत्ती २५:१६<sup>४५</sup> मिनु गिश मुर २० बर्स गाप्शो नु मेको क्येडा लाक्शो लडाइम लने चाप्ब वॉइश मुर बाक्शो बाक्तेक्म दॅशा हना, गन्ती २:३२; प्रस्थान १२:३७<sup>४६</sup> मेको नेल्ल पा ६ लाख ३ हजार ५ सहे ५० जना बाक्तेक्म।<sup>४७</sup> लेवी आ खिं डा मुरपुकी चहिं अरु आन खोदॅशो पा महिक्सम।

## लेवी आ थर डा मुर मखुप्शो

48 मिनु डोंइती परमप्रभु यावेमी मोसा कली 49 "लेवी आ थर डा मुर आन कली चहिं लडाइ पचा कली मखुप्तीमी। मिनु इस्राएली आन कली खोदेशो पा महिकमी। गन्ती २:२३; गन्ती ३:१५-३९ 50 तन्न गे लेवी आन कली आं कबल पशो सन्दोस वोइश्शो ताम्बु नु आ मारेइ मारेइ थोव्रक कोव्रचा कली वोइक्मी। मेकोपुकीमी गुम्तीक ताम्बु नु आ मारेइ मारेइ थोव्रक कुरचा माल्नीम। मेकोपुकीमी मेको कोव्रचा माल्नीम। मिनु आन ताम्बु गुम्तीक ताम्बु आ एर ओंथ कीचा माल्नीम। 51 मिनु गुम्तीक ताम्बु याक्तमेनु, लेवीपुकीमी मेको प्राक्चा माल्नीम। मिनु गुम्तीक ताम्बु कीडमेनु, मेकोपुकीमी सेल्चा माल्नीम। आन नेक्था जाक्ब अरु मुर साइक्चा पुंइसीनीम। गन्ती ३:१०,३८; गन्ती १७:५ 52 अरु इस्राएली आन आन हुल आन दातेमी नु आन छेदर आ खूक्तीके डा बाक्तीकेम बाक्चा माल्नीम। 53 लेवी आ मुर चहिं परमप्रभु यावे आ कबल पशो सन्दोस वोइश्शो ताम्बु आ एर ओंथ आन ताम्बु कीचा माल्नीम। इस्राएलीपुकी गुम्तीके ताम्बु आ नेक्था लचा मदुम्नीम। मिनु मेको आन पर्वम परमप्रभु यावे मगाइक्ब। मिनु लेवीपुकीमी परमप्रभु यावे आ कबल पशो सन्दोस वोइश्शो ताम्बु खाल पचा माल्नीम" दे परमप्रभु यावेमी देंत। गन्ती १७:११; गन्ती १८:५; २सामुएल २४:१; २इतिहास १९:२; यसैया ५७:१७; यसैया ६४:४-६

54 मिनु इस्राएलीपुकीमी परमप्रभु यावेमी मोसा कली अरेशो खोदेशो पा नेल्ल पाम्तेक्म।

## मुर आन बाक्तीक ताम्बु

2 मिनु परमप्रभु यावेमी मोसा नु हारून आस कली 2 "इस्राएलीपुकीमी आन थर डा छेदर बाक्तीकेम आन ताम्बु कीचा माल्नीम। मेकोपुकी गुम्तीक ताम्बु क्येडा डोन एर ओंथ बाक्चा माल्नीम। 3 पूर्व, नां दाप्तीक गे यहूदा आ हुल आन बाक्तीके बाक्ब। मेको आन छेदर आ नेक्था आन ताम्बु कीचा माल्नीम। यहूदा आ थर डा मुर आन ठेयब मुर अम्मीनादाब आ तौ नहशोन बाक्त। 4 मेको आन कली खुप्शा हिकशोनो ७४ हजार ६ सहे लडाइ पाइब वोंइश मुर बाक्नीम। 5 मेको आन नेक्था इसाकार आ हुल आन बाक्तीके बाक्ब। इसाकार आ थर डा मुर आन ठेयब मुर सुआर आ तौ नेथनेल बाक्ब। 6 मेको आन कली खुप्शा हिकशोनो ५४ हजार लडाइ पाइब वोंइश मुर बाक्नीम। 7 मिनु नोले जबूलून आ थर डा मुर आन बाक्तीके बाक्ब। जबूलून आ थर डा मुर आन ठेयब मुर हेलोन आ तौ एलीआब बाक्ब। 8 मेको आन कली खुप्शा हिकशोनो ५७ हजार ४ सहे लडाइ पाइब वोंइश मुर बाक्नीम। 9 यहूदा आ नेक्था खुप्शा हिकशो मुर आन हुल नेल्ल पा लाख का ८६ हजार ४ सहे लडाइ पाइब वोंइश मुर बाक्नीम। मेको नेल्ल मुर आन डोंइती गाक्चा माल्नीम।

10 मिनु दक्खिन गे रूबेन आ हुल आन बाक्तीके बाक्ब। मेको आन छेदर आ नेक्था आन ताम्बु कीचा माल्नीम। रूबेन आ थर डा मुर आन ठेयब मुर शेदेउर आ तौ एली-सुर बाक्ब। 11 मेको आन कली खुप्शा हिकशोनो ४६ हजार ५ सहे लडाइ पाइब वोंइश मुर बाक्नीम।

12 मेको आन नेक्था सिमियोन आ हुल आन बाक्तीके बाक्ब। सिमियोन आ थर डा मुर आन ठेयब मुर सुरी-शदै आ तौ शेलुमीएल बाक्ब। 13 मेको आन कली खुप्शा हिकशोनो ५९ हजार सहे सां लडाइ पाइब वोंइश मुर बाक्नीम।

14 मिनु नोले गाद आ थर डा मुर आन बाक्तीके बाक्ब। गाद आ थर डा मुर आन ठेयब मुर रूएल आ तौ एली-आसाफ बाक्ब। 15 मेको आन कली खुप्शा हिकशोनो ४५ हजार ६ सहे ५० जना लडाइ पाइब वोंइश मुर बाक्नीम।

16 रूबेन आ नेक्था खुप्शा हिकशो मुर आन हुल नेल्ल पा लाख का ५२ हजार ४ सहे ५० जना लडाइ पाइब वोंइश मुर बाक्नीम। मेकोपुकी यहूदा आ हुल आन नोले गाक्चा माल्नीम।

17 मिनु गुम्तीक ताम्बु नु लेवी आन बाक्तीक ताम्बु कुरशा गाक्चा माल्नीम। दोदेशो पा आन ताम्बु कीशो बाक्मे, मोदेशो पा आन छेदर आ नेक्था गाक्चा माल्नीम। गन्ती १०:१७,२१

18 पच्छिम गे एफ्राइम आ हुल आन बाक्तीके बाक्ब। मेको आन छेदर आ नेक्था आन ताम्बु कीचा माल्नीम। एफ्राइम आ थर डा मुर आन ठेयब मुर अम्मीहुद आ तौ एली-शामा बाक्ब। 19 मेको आन कली खुप्शा हिकशोनो ४० हजार ५ सहे लडाइ पाइब वोंइश मुर बाक्नीम।

20 मेको आन नेक्था मनस्से आ हुल आन बाक्तीके बाक्ब। मनस्से आ थर डा मुर आन ठेयब मुर पेदा-सुर आ तौ गमालीएल बाक्ब। 21 मेको आन कली खुप्शा हिकशोनो ३२ हजार सहे निक्शी लडाइ पाइब वोंइश मुर बाक्नीम।

22 मिनु नोले बेन्यामीन आ थर डा मुर आन बाक्तीके बाक्ब। बेन्यामीन आ थर डा मुर आन ठेयब मुर गिदेओनी आ तौ आबी-दान बाक्ब। 23 मिनु मेको आन कली खुप्शा हिकशोनो ३५ हजार ४ सहे लडाइ पाइब वोंइश मुर बाक्नीम।

24 एफ्राइम आ नेक्था खुप्शा हिकशो मुर आन हुल नेल्ल पा लाख का ८ हजार सहे का लडाइ पाइब वोंइश मुर बाक्नीम। मेकोपुकी लेवी आन नोले गाक्चा माल्नीम।

25 उत्तर गे दान आ हुल आन बाक्तीके बाक्ब। मेको आन छेदर आ नेक्था आन ताम्बु कीचा माल्नीम। दान आ थर डा मुर आन ठेयब मुर अम्मी-शदै आ तौ अही-एजेर बाक्ब। 26 मेको आन कली खुप्शा हिकशोनो ६३ हजार ७ सहे लडाइ पाइब वोंइश मुर बाक्नीम।

27 मेको आन नेक्था आशेर आ हुल आन बाक्तीके बाक्ब। आशेर आ थर डा मुर आन ठेयब मुर ओक्रान आ तौ पगीएल बाक्ब। 28 मेको आन कली खुप्शा हिकशोनो ४१ हजार ५ सहे लडाइ पाइब वोंइश मुर बाक्नीम।

29 मिनु नोले नाप्ताली आ थर डा मुर आन बाक्तीके बाक्ब। नाप्ताली आ थर डा मुर आन ठेयब मुर एनान आ तौ अहीरा बाक्ब। 30 मेको आन कली खुप्शा हिकशोनो ५३ हजार ४ सहे लडाइ पाइब वोंइश मुर बाक्नीम।

31 दान आ नेक्था खुप्शा हिकशो मुर आन हुल नेल्ल पा लाख का ५७ हजार ६ सहे लडाइ पाइब वोंइश मुर बाक्नीम। मेकोपुकी मुर नेल्ल आन क्येडा नोले गाक्चा माल्नीम।

32 एको इस्राएली आन थर थर डा लडाइ पने चाप्ब खुप्शा हिकशो मुर बाक्नीम। आन हुल हुल डा मुर नेल्ल पा ६ लाख हजार सां ५ सहे ५० जना लडाइ पाइब वोंइश मुर बाक्नीम" देंत गन्ती १:४६ 33 मिनु परमप्रभु यावेमी मोसा कली अरेशो खोदेशो पा लेवी आ थर डा मुर अरु इस्राएलीपुकी खोदेशो पा मखुप्शो महिकशो बाक्तेक्म। गन्ती १:४८-४९

34 इस्राएलीपुकीमी परमप्रभु यावेमी मोसा कली अरेशो खोदेशो पा पाम्तेक्म। आन थर डा बाक्तीकेमी आन छेदर आ नेक्था बाक्शा, आन थर थर पा गाक्तेक्म।

## हारून आ तौपुकी

3 परमप्रभु यावेमी मोसा नु सीनै डांडाम लोव्र पची ना मोसा नु हारून आस खिं डा मुर सु सु बाक्तेक्म देंशा हना, प्रस्थान ६:२३

2 हारून आ तौ आन नें, आ डोंइती जरमेशो तौ नादाब नु अबीहु, एलाजर नु इथामार बाक्तेक्म। 3 मेको नेल्ल तेल लुक्शो चढ़ेब बाक्तेक्म। हारूनमी मेको आन कली चढ़ेतीक गेय पचा, दे तेल लुक्ताक्व। प्रस्थान ४०:१५

4 नादाब नु अबीहु सीनै डा गोरशो रागीम बेक्ताक्स। मारदे हना, मेको निक्शीमी परमप्रभु यावेमी मदुम्ब देंशो अर्को मी धूप चोतीकेम कुर पा, परमप्रभु यावे आ डोंइती चढ़ेम्ताक्स। मिनु परमप्रभु यावे आ डोंइती बेक्ताक्स। मिनु मेको आस के आल मबाक्म। मोपतीके आ तौ एलाजर नु इथामार निक्शीमी ला आस आफ आ डोंइती चढ़ेतीक गेय पाम्ताक्स। लेवी १०:१-२

## लेवीपुकी आन गेय

5 परमप्रभु यावेमी मोसा कली 6 "लेवी आ थर डा मुर आन कली ब्रेशा, मेको आन कली चढेब हारून आ डोंइती राप्पाइक्मी। मिनु मेकोपुकीमी मेको कली वारच पचा माल्नीम। प्रस्थान ३२:२९ 7 मिनु मेकोपुकीमी हारून कली वारच पा इस्राएली नेल्ल आन पर्वम गुम्तीक ताम्बु आ डोंइती गेय पचा माल्नीम। गन्ती १८:३; गन्ती १६:९ 8 मेकोपुकीमी गुम्तीक ताम्बु डा मारेइ मारेइ कोव्रचा माल्नीम। मिनु मेकोपुकीमी गुम्तीक ताम्बु डा इस्राएली आन पचा माल्शो गेय पचा माल्नीम। गन्ती ४:- 9 गे मेको लेवी आ मुर आन कली हारून नु आ तौ आन कली गेचा माल्नेवे। मेको इस्राएली आन दाते रे योव्रशा हारून कली गेशो बाक्नीम। 10 मिनु गे हारून नु आ तौ आस कली चढेबम पचा माल्शो गेय पचाइक्मी। मेकोपुकी डा लाक्शा अर्को सुइ मुरुम मो पाम्तेक्म हना, मेको आन कली साइक्वा माल्नीम" दंत। गन्ती १:१५

11 मिनु लेंशा परमप्रभु यावेमी मोसा कली 12 "गो इस्राएली आन डोंइती जरमेशो तौ आन पा डा लेवी आ थर डा मुर आन कली इस्राएली आन दाते रे योव्रतामी। मोपतीके लेवी आ मुर आं केन बाक्नीम। गन्ती ८:१६; प्रस्थान १३:२ 13 डोंइती जरमेशो नेल्ल आं के बाक्नीम। इजीप्तमी डोंइती जरमेशो नेल्ल सदुमी नाक्ती, गो इस्राएली आन डोंइती जरमेशो आं कली वोंइसाक्पी। मिनु गो मुर नु बी ब्यफ, क्यारश भेडा नेल्ल आं कली वोंइसाक्पी। मेको आं के बाक्नीम। गो परमप्रभु यावे नड" दंत।

14 मिनु परमप्रभु यावेमी सीने डा गोरशो रागीमी मोसा कली 15 "गे लेवी आ थर डा मुर आन कली आन खिं खिं डा हिक्मी। महिना का गाप्शो नु मेको क्येडा लाक्शो वोंइश मुर नेल्ल आन कली हिक्मी" दंत। 16 मिनु मोसामी परमप्रभु यावेमी अरेशो खोदेंशो पा मेको आन कली हिक्तीमी।

17 मिनु लेवी आ तौ सु सु बाक्तेक्म देंशा हना, गेरशोन, कोहाथ नु मेरारी बाक्तेक्म। प्रस्थान ६:१६-१९; गन्ती २६:५७-६४ 18 गेरशोन आ तौ लिब्नी नु आ खिं डा मुर नु शिमेइ नु आ खिं डा मुर बाक्तेक्म। 19 कोहाथ आ तौ अग्राम नु आ खिं डा मुर नु इच्चार नु आ खिं डा मुर, हेब्रोन नु आ खिं डा मुर नु उज्जीएल नु आ खिं डा मुर बाक्तेक्म। 20 मेरारी आ तौ माहली नु आ खिं डा मुर नु मुशी नु आ खिं डा मुर बाक्तेक्म। एको लेवी आ थर डा मुर आन खिं खिं डा मुर बाक्तेक्म।

21 गेरशोन रे पा लिब्नी नु शिमेइ आस खिं खिं डा मुर दुम्तेक्म। मेकोन गेरशोन आ खिं खिं डा मुर बाक्नीम। 22 मेकोपुकी महिना का गाप्शो नु मेको क्येडा लाक्शो वोंइश मुर हिक्शोनु ७ हजार ५ सहे बाक्तेक्म।

23 गेरशोन आ खिं डा मुर आन बाक्तीके गुम्तीक ताम्बु आ नोले, पच्छिम गे दुम्चा माल्ब। 24 गेरशोनी आन खिं डा ठेयब मुर, लाएल आ तौ एली-आसाफ बाक्त। 25 गेरशोन आ मुरपुकीमी गुम्तीक ताम्बु कली सुम्तीके, गुम्तीक ताम्बु आ आगा ओव्रतीक डा फारशो वा, 26 लाडगा डा फारशो वा, ताम्बु नु चढेतीक आ एर ओंथ डा लाडगा आ आगा ओव्रतीक डा फारशो वा नु ताम्बु डा डोरीपुकी कोव्रचा माल्बाक्तेक्म।

27 कोहाथ रे पा अग्राम आ खिं डा मुर, इच्चार आ खिं डा मुर, हेब्रोन आ खिं डा मुर नु उज्जीएल आ खिं डा मुरपुकी दुम्तेक्म। मेको कोहाथ आ खिं खिं डा मुर बाक्नीम। 28 मेकोपुकी महिना का गाप्शो नु मेको क्येडा लाक्शो वोंइश मुर हिक्शोनु ८ हजार ६ सहे बाक्तेक्म। मिनु मेकोपुकी गुम्तीक ताम्बु डा गेय पाइब आन कली वारच पाइब बाक्तेक्म। 29 कोहाथ आ खिं डा मुर आन बाक्तीके गुम्तीक ताम्बु आ दक्खिन गे दुम्चा माल्ब। 30 कोहाथी आन खिं डा ठेयब मुर उज्जीएल आ तौ, एली-जाफान बाक्ब। लेवी १०:४

31 कोहाथीपुकीमी कबल पशो सन्दोस, शोब्ले वोइक्तीक टेबल, बत्ती दातीके, चढेतीक निक्शी नु चढेब आन माल्शो मारेइ मारेइ नु नेल्ल क्येडा चोव्रखो कोठा डा फारशो वा कोव्रचा माल्बाक्तेक्म। गन्ती ७:९ 32 मिनु चढेब हारून आ तौ एलाजर चहिं लेवी आन थर डा ठेयब मुर आन नेल्ल क्येडा ठेयब मुर बाक्त। मिनु मेको गुम्तीक ताम्बु डा गेय पाइब नेल्ल आन कली कोव्रब मुर बाक्त।

33 मेरारी रे पा माहली आ खिं डा मुर नु मुशी आ खिं डा मुर बाक्तेक्म। एको मेरारी आ खिं खिं डा मुर बाक्नीम। 34 मेकोपुकी महिना का गाप्शो नु

मेको क्येडा लाक्शो वोंइश मुर नेल्ल हिक्शोनु ६ हजार सहे निक्शी बाक्तेक्म। 35 मेरारी आ खिं डा ठेयब मुर अबीहेल आ तौ सुरीएल बाक्ब। मेरारी आ खिं डा मुर आन बाक्तीके गुम्तीक ताम्बु आ उत्तर गे दुम्चा माल्ब। 36 मेरारी आ तौपुकीमी गुम्तीक ताम्बु डा फलेकपुकी, थामपुकी नु आन राप्पाइक्तीकपुकी नु आन मारेइ मारेइ कोव्रचा माल्नीम। 37 मेकोपुकीमी लाडगा एर ओंथ डा थामपुकी नु आन राप्पाइक्तीकपुकी, किलापुकी नु डोरीपुकी कोव्रचा माल्नीम।

38 मोसा, हारून नु आस तौ आन बाक्तीके गुम्तीक ताम्बु आ डोंइती पूर्व गे, नां दाप्तीके गे दुम्चा माल्बाक्त। मेकोपुकीमी गुम्तीक ताम्बु इस्राएली आन पर्वम मार मार पचा माल्शो बाक्मे, मेको पचा माल्बाक्तेक्म। मेकोपुकी डा लाक्शा अर्को सुइ मुरुम मो पाम्तेक्म हना, मेको आन कली साइक्वा माल्नीम।

39 मोसा नु हारूनमी परमप्रभु यावे आ देंशो खोदेंशो पा हिक्शो लेवी आ थर डा खिं खिं डा मुर महिना का गाप्शो नु मेको क्येडा लाक्शो नेल्ल २२ हजार जना बाक्तेक्म।

40 मिनु परमप्रभु यावेमी मोसा कली "महिना का गाप्शो नु मेको क्येडा लाक्शो इस्राएली आन डोंइती जरमेशो तौ नेल्ल आन कली हिक्शा आन नें ब्रेक्तो। 41 मिनु गे इस्राएली आन डोंइती जरमेशो तौ आन पा डा लेवी आ मुर आन कली आं के सेल्मी। मोपा इस्राएली आन डोंइती जरमेशो बी ब्यफ क्यारश भेडा आन पा डा लेवी आन बी ब्यफ क्यारश भेडा आं के सेल्मी। गो परमप्रभु यावे नड" दंत। गन्ती १८:१५

42 मिनु मोसामी परमप्रभु यावेमी अरेशो खोदेंशो पा इस्राएली आन डोंइती जरमेशो तौ आन कली हिक्तीमी। 43 मिनु मेकोपुकी महिना का गाप्शो नु मेको क्येडा लाक्शो डोंइती जरमेशो आन नें ब्रेक्शा, हिक्शोनु नेल्ल २२ हजार सहे निक्शी ७३ जना बाक्तेक्म।

44 मिनु लेंशा परमप्रभु यावेमी मोसा कली 45 "इस्राएली आन डोंइती जरमेशो तौ आन पा डा लेवी आ मुर आं के सेल्मी। मिनु मेको आन बी ब्यफ, क्यारश भेडा आन पा डा लेवी आ मुर आन बी ब्यफ, क्यारश भेडा आं के सेल्मी। लेवी आ मुर आं के बाक्नीम। गो परमप्रभु यावे नड। 46 मिनु लेवी आन क्येडा शुश दुम्शो इस्राएली आन डोंइती जरमेशो तौ सहे निक्शी ७३ जना बाक्तेक्म। मेको आन कली प्रोंइचा माल्बाक्त। 47 मेको आन कली प्रोंइचा कली का के ५ शेकेल ताक्को। गुम्तीक ताम्बु डा शेकेल का २० गेराह डा बाक्ब। गेराह का ०.६ ग्राम बाक्ब। गुम्तीके ताम्बु डा शेकेल १२ ग्राम बाक्ब। 48 मिनु गे इस्राएली आन कली प्रोंइचा कली गेशो शेकेल हारून नु आ तौ आन कली गेचा माल्नेवे" दंत। शेकेल इस्राएली आन क्येड बाक्ब। बजार डा शेकेल ११.५ ग्राम बाक्ब। ताम्बु कली गेतीक शेकेल चहिं १२ ग्राम बाक्ब। मेको सुन के नु चांदी के शेकेल बाक्नीम।

49 मिनु मोसामी लेवी आन क्येडा शुश दुम्शो, प्रोंइचा माल्शो मुर रे प्रोंइतीक क्येड ताक्तु। 50 मिनु मेकोमी इस्राएली आन डोंइती जरमेशो तौ रे प्रोंइतीक क्येड ताक्शा, मेको हजार का सहे सां ६५ ताम्बु डा शेकेल बाक्तेक्म। 51 मिनु मोसामी परमप्रभु यावेमी अरेशो खोदेंशो पा, मेको प्रोंइतीक क्येड हारून नु आ तौ आन कली गेम्तीमी।

## कोहाथ आ मुर आन कली हिक्शो

4 परमप्रभु यावेमी मोसा नु हारून आस कली 2 "लेवी आ मुर आन दाते डा कोहाथी आन कली आन खिं खिं डा मुर पा हिक्कीस। 3 गे ३० बर्स रे ५० बर्स सम्म डा वोंइश मुर आन कली हिक्कीस। मेकोपुकी ला गुम्तीक ताम्बु डा गेय पने चाप्नीम। गन्ती ८:२४-२५; इतिहास २३:२४ 4 मेको कोहाथी आन पचा माल्शो गेय गुम्तीक ताम्बु डा नेल्ल क्येडा चोव्रखो थोव्रक नु बाक्ब।

5 मिनु गुम्तीक ताम्बु याक्तेमेनु, हारून नु आ तौ गुम्तीक ताम्बु ओव्रशा, फारशो वा शोल्शा, मेको वामी कबल पशो सन्दोस सुम्चा माल्नीम। 6 मिनु नोले मेकोपुकीमी मेको आ तार रिम्शो कोक्तेमी सुम्चा माल्नीम। मेको आ तारी नीलो रड डा वामी सुम्चा माल्नीम। मिनु मेको आ कुरतीक कोक्के शुइक्वा माल्नीम।

7 मिनू मेकोपुकीमी कौडतीक शोब्ले वोइक्तीक टेबल तार नीलो वा का ब्रशा, मेको आ तारी थालपुकी, थनौरोपुकी, बोसपुकी नु तूचा थोवक चढेचा कली कचौरा वोइक्चा माल्नीम। मिनू नाक्त किंत किंत डा कौडतीक शोब्ले यो मेको तार बाक्चा माल्ब। 8 मिनू नोले मेको आ तार लल रड डा वा ब्रशा, मेको आ तार रिश्शो कोक्तेम सुम्चा माल्नीम। मिनू मेको आ कुरतीक कोक्के शुइक्चा माल्नीम।

9 मेकोपुकीमी बत्ती दातीके नीलो वाम सुम्चा माल्नीम। मेको आ बत्ती, आ थनारो, आ थाल नु तेल वोइक्तीके नेल्ल सुम्चा माल्नीम। प्रस्थान २५:३१ 10 मिनू मेको नेल्ल कली रिश्शो कोक्तेमी वोइश्शा, कुरतीक तारी वोइक्चा माल्नीम।

11 मेकोपुकीमी सुन के चढेतीक तारी नीलो वा ब्रशा, रिश्शो कोक्तेम सुम्चा माल्नीम। मिनू मेको आ कुरतीक कोक्के शुइक्चा माल्नीम। प्रस्थान ४०:२६-२७

12 मिनू गुम्तीक ताम्बुम माल्शो मारेइ मारेइ खुप्शा, नीलो वाम कुम्लो पचा माल्नीम। मिनू मेको कली रिश्शो कोक्तेम सुम्चा माल्नीम। मिनू कुरतीक तारी वोइक्चा माल्नीम।

13 मेकोपुकीमी चढेतीक रे पुलु शोल्शा, मेको आ तार प्याजी रड डा वा ब्रचा माल्नीम। 14 मिनू मेकोपुकीमी चढेतीकेम माल्शो मारेइ मारेइ थोवकी मेको आ तारी वोइक्चा माल्नीम। मी वोइक्तीके, शे गुंडतीके, बेल्चापुकी, ब्वाक्कु वोइक्तीक ग्योबपुकी नु चढेतीक डा मारेइ मारेइ वोइश्शा, मेको तार रिश्शो कोक्तेम सुम्चा माल्नीम। मेको आ कुरतीक कोक्के शुइक्चा माल्नीम।

15 मिनू हारून नु आ तौपुकीमी मेको गुम्तीक ताम्बु डा मारेइ मारेइ सुम्ने थुम्मे नोले कोहाथीपुकी मेको कुरथ जाक्चा माल्नीम। तन्न मेकोपुकीमी परमप्रभु यावे आ मार मार थोवक थिचा मदुम्नीम। मेकोपुकीम थिम्तेक्म हना, बेक्नीम। कोहाथीपुकीमी गुम्तीक ताम्बु डा कुरचा माल्शो थोवक मेकोन बाक्नीम। गन्ती ७:९; २सामुएल ६:६-७

16 चढेब हारून आ तौ एलाजर बत्ती दाशो तेल, ब्रोवशो रिना पाइक्ब धूप, नाक्त किंत किंत डा चढेतीक अन्न नु लुक्तीक तेल कली कोव्रब बाक्ब। मेको गुम्तीक ताम्बु नु मेकेर डा मारेइ मारेइ कोव्रब बाक्ब" देंत।

17 मिनू नोले परमप्रभु यावेमी मोसा नु हारून आस कली 18 "गे लेवी आन दाते डा कोहाथी आन खिं खिं डा मुर आन कली खतम दुम्चा मगेस। 19 गे, कोहाथी मबेक्थु, ब्रॉइमल दे नेल्ल क्येडा चोव्रखो थोवक आ नेक्था जाक्मानु, मार पचा माल्नीनी देंशा हना, हारून नु आ तौपुकी आगा ओव्रशा, मेको आन कली आन आन गेय नु मार मार कुरचा माल्नीनी, मेको योक्शा गेचा माल्नीमी। 20 तन्न कोहाथीपुकीम मेको नेल्ल क्येडा चोव्रखो थोवक आन कली कोव्रचा मदुम्ब। कोव्रतेक्म हना, बेक्नीम" देंत। १सामुएल ६:१९

गेरशोन आ मुर आन कली हिक्शो

21 मिनू परमप्रभु यावेमी मोसा कली 22 "गेरशोनी आन कली यो आन खिं खिं पा हिक्मी। 23 गे ३० बर्स रे ५० बर्स सम्म डा वॉइश मुर आन कली हिक्को। मेकोपुकी ला गुम्तीक ताम्बु डा गेय पने चाप्नीम।

24 मिनू गेरशोन आ मुर आन पतीके मार बाक्त देंशा हना, गेय पचा नु मार मार कुरचा माल्नीम। 25 गुम्तीक ताम्बु डा फारशो वा, गुम्तीक ताम्बु आ सुम्तीके नु मेको तार बाक्शो रिश्शो कोक्ते नु गुम्तीक ताम्बु आ ओव्रतीक डा फारशो वा कुरचा माल्नीम। 26 मिनू लाडगा डा एर ओंथ फारशो वा, ओव्रतीक डा फारशो वा, गुम्तीक ताम्बु नु चढेतीक आ एर ओंथ डा वा नु आ डोरी नु मेको आ गेय कली माल्शो नेल्ल पचा माल्नीम। 27 गेरशोन आ मुरपुकीमी हारून नु आ तौपुकीमी अरेशो खोदेंशो पा ला आन कुरतीक नु अरु गेय पने चाप्नीम। हारून नु आ तौपुकीमी मेको आन कुरचा माल्शो नु पतीक गेय नेल्ल अरेचा माल्नीम। प्रस्थान ३८:२१ 28 मिनू गेरशोनीमी गुम्तीक ताम्बुम पचा माल्शो गेय एकोन बाक्ब। मिनू हारून आ तौ इथामार मेको आन कली अरेब बाक्ब।

मेरारी आ मुर आन कली हिक्शो

29 गे मेरारी आ मुर आन कली आन खिं खिं डा मुर पा हिक्शा, ब्रेक्तो। 30 गे ३० बर्स रे ५० बर्स सम्म डा वॉइश मुर आन कली हिक्को। मेकोपुकी ला गुम्तीक ताम्बु डा गेय पने चाप्नीम। 31 मिनू मेकोपुकीमी गुम्तीक ताम्बु डा मार कुरचा माल्नीम देंशा हना, गुम्तीक ताम्बु डा फलेकपुकी, मेको आन ग्याइक्तीक कोक्केपुकी, थामपुकी नु राप्पाइक्तीकपुकी कुरचा माल्नीम। 32 मिनू लाडगा डा थाम नेल्ले, आन राप्पाइक्तीकपुकी, किलापुकी, डोरीपुकी नु मार मार अरु बाक्मा मेको कोव्रचा नु कुरचा माल्नीम। 33 मेको मेरारी आ मुरपुकीम आन गुम्तीक ताम्बु कली पचा माल्शो गेय बाक्ब। मिनू चढेब हारून आ तौ इथामार मेको आन कली अरेब बाक्ब" देंत।

लेवी आ मुर आन कली हिक्शो

34 मोसा, हारून नु थर थर डा मुर आन ठेयब मुरपुकीमी कोहाथी आन खिं खिं डा मुर आन कली हिक्शा ब्रेक्ताक्म। 35 मिनू ३० बर्स रे ५० बर्स सम्म डा मुर ला गुम्तीक ताम्बुमी गेय पने चाप्पाक्तेक्म। 36 मिनू मेको आन खिं खिं डा मुर हिक्शोनु, हजार निक्शी ७ सहे ५० जना बाक्तेक्म। 37 मेको गुम्तीक ताम्बु डा गेय पाइब कोहाथीपुकी बाक्नीम। मिनू मोसा नु हारूनमी परमप्रभु यावेमी अरेशो खोदेंशो पा मेको आन कली हिक्शा ब्रेक्शो बाक्ताक्स।

38 मिनू गेरशोनी आन खिं खिं डा मुर आन कली हिक्शा ब्रेक्ताक्म। 39 मिनू ३० बर्स रे ५० बर्स सम्म डा मुर ला गुम्तीक ताम्बुमी गेय पने चाप्पाक्तेक्म। 40 मिनू मेको आन खिं खिं डा मुर हिक्शोनु, हजार निक्शी ६ सहे ३० जना बाक्तेक्म। 41 मेको गुम्तीक ताम्बु डा गेय पाइब गेरशोनी बाक्नीम। मिनू मोसा नु हारूनमी परमप्रभु यावेमी अरेशो खोदेंशो पा मेको आन कली हिक्शा ब्रेक्ताक्स।

42 मिनू मेरारी आ मुर आन खिं खिं डा मुर आन कली हिक्तेक्म। 43 मेको ३० बर्स रे ५० बर्स सम्म डा मुर ला गुम्तीक ताम्बुमी गेय पने चाप्पाक्तेक्म। 44 मिनू मेको आन खिं खिं डा मुर हिक्शोनु, हजार सां सहे निक्शी बाक्तेक्म। 45 मेको गुम्तीक ताम्बु डा गेय पाइब मेरारी आ मुर बाक्नीम। मिनू मोसा नु हारूनमी परमप्रभु यावेमी अरेशो खोदेंशो पा मेको आन कली हिक्शा ब्रेक्ताक्स।

46 मिनू मोसा, हारून नु इस्राएल आ थर डा मुर आन ठेयब मुरपुकीमी लेवी आ मुर नेल्ल आन खिं खिं डा मुर हिक्शा ब्रेक्ताक्म। 47 मिनू ३० बर्स रे ५० बर्स सम्म डा मुर ला गुम्तीक ताम्बुमी गेय पने नु मार मार कुरने चाप्पाक्तेक्म। 48 मिनू मेको आन खिं खिं डा मुर हिक्शोनु ८ हजार ५ सहे ८० जना बाक्तेक्म। 49 मिनू परमप्रभु यावेमी अरेशो खोदेंशो पा मोसामी मेको आन कली हिक्शा, मार गेय पचा माल्नीमी, मार कुरचा माल्नीमी, मेको अरेम्तीमी। मिनू परमप्रभु यावेमी मोसा कली अरेशो खोदेंशो पा मेको आन कली हिक्शो बाक्त।

मुर बाक्तीक ग्रांरा मसेल्चा

5 परमप्रभु यावेमी मोसा कली 2 "गे इस्राएली आन कली गेपुकीमी कोव्र खोदेंशो रोइ पाइब, आन रां रे ग्रांरा दिशो यिशो नु बेक्शो मुर थिशा ग्रांरा दुश्शो मुर आन कली इन बाक्तीक क्येडा डोन वोइक्चा माल्नीनी। लेवी १३:४६; लेवी १५:२; गन्ती ९:६-७ 3 मोदेंशो वॉइश मुर नु मीश मुर नेल्ल आन कली मुर आन बाक्तीके क्येडा डोन वोइक्चा माल्नीनी। मेकोपुकीमी मुर आन बाक्तीके ग्रांरा दिशो सेल्चा मदुम्नीम। मारदे हना गो इन दातेमी बाक्शो बाक्नुड" देंत। गन्ती १२:१४-१५; प्रस्थान २५:८ 4 मिनू इस्राएलीपुकीमी मो पाम्तेक्म। मोदेंशो मुर आन कली मुर आन बाक्तीके क्येडा डोन वोइक्तेक्म। परमप्रभु यावेमी मोसा कली अरेशो खोदेंशो पा इस्राएलीपुकीमी पाम्तेक्म।



## खुड पशो आ पर्वम शेंशो

5 मिनू लेंशा परमप्रभु यावेमी मोसा कली 6 “गे इस्राएली आन कली ‘मीश मुर, वॉइश मुर सु बाक्त हना यो, परमप्रभु यावे आ डॉइती पाप पा अरु मुर आन कली मारेड मरिश्शो पापु हना, मेको मुर दोस ताइब दुम्ब। *लेवी ५:२१-२६* 7 मिनू मेकोमी आ मरिश्शो पशो शोत्रचा माल्ब। मिनू मेको मुरुमी आ खुड पशो नेल्ल लेश्शा गेशा, मेको क्येडा यो ५ भाग तेम्शा गेचा माल्ब। 8 तन्न मेको खुड पचा पुंडसीशो मुर बेक्शा, मेको के सुड मबाक्तेक्म हना, मेको पाप आ पर्वम थाप्शो परमप्रभु यावे के दुम्शा, चढेब आन के दुम्ब। मिनू आ पाप क्याम्तीक गेय पचा कली सांड का गेचा माल्ब। 9 मिनू इस्राएलीपुकीमी आन परमप्रभु यावे कली गेशो क्युक्शा चढेतीक नेल्ले चढेब कली गेचा माल्नीम। मिनू मेको चढेब केन दुम्ब। *गन्ती १८:८* 10 मिनू मुर नेल्ल आन परमप्रभु यावे कली गेशो, मेको केन दुम्ब। मार गेम्तेक्म हना यो, मेको चढेब केन दुम्ब’ दे अरेमी” देंत।

## मीश मुर कली नाक्शो

11 मिनू परमप्रभु यावेमी मोसा कली 12 “गे इस्राएली आन कली ‘सुड आन मीश हेंथे गाक्शा, आ वॉइश कली मरिश्शो पापु हना, 13 अरु वॉइश मुर नु इप्त हना, मेको आ वॉइश रे खुडशो बाक्त हना, मेकोमी सुडम मतुडक्थु, ग्रांग्रा दिशो सेल्सीशो बाक्त हना यो, मेको सुडम थित्वा मपुंडसीशो बाक्त हना यो, 14 मेको वॉइश मुरुमी आ ग्रांग्रा दिशो सेल्सीशो मीश आ पर्वम रुश पा, आ थुंम मरिश्शो मिश्शो बाक्त हना, मेको आ मीश आंम कली ग्रांग्रा दिशो मसेल्सीशो बाक्त हना यो, 15 मेको वॉइश मुरुमी आ मीश कली चढेब आ बाक्तीके चाक्चा माल्ब। मिनू मेको आ मीश आ पर्वम एफाह का डा १० भाग डा भाग का क्योव्रज फस चाक्चा माल्ब। मेको आ तारी तेल लुक्वा नु धूप वोडक्वा मडुम्ब। मारदे हना मेको रुश पशो आ पर्वम अन्न चढेतीक बाक्ब। मेको अन्न चढेतीक मरिश्शो पशो मिन्चा कली बाक्ब। *एफाह का २२ लिटर डा पुक्तीक बाक्ब।*

16 मिनू चढेबमी मेको मीश मुर कली आ नेक्था चाक्शा, परमप्रभु यावे आ डॉइती राप्पाइक्वा माल्ब। 17 मिनू चढेबमी खप के ग्योबुम नक ब्वाक्कु चाक्चा माल्ब। मिनू मेकोमी गुम्तीक ताम्बु डा खप डा फुरक इक्का हुडश्या, मेको ब्वाक्कुम कुर पचा माल्ब। 18 मिनू चढेबमी मेको मीश मुर कली परमप्रभु यावे आ डॉइती राप्पा, मेको आ चां पुडक्वा माल्ब। मिनू मेकोमी मेको मिन्चा कली अन्न चढेतीक आ गुडमी वोडक्वा माल्ब। मेको रुश पशो आ पर्वम अन्न चढेतीक बाक्ब। मिनू मेको चढेबमी मेको सराप चीले रशो कशो ब्वाक्कु आ गुडमी ग्याइक्वा माल्ब। 19 मिनू चढेबमी मेको मीश मुर कली कसम जपाइश्शा “थमा पा गे सुड वॉइश मुर नु मडुशो बाक्ते हना, इ वॉइश नु बाक्शा, हेंथे मगाक्थु, इ कली ग्रांग्रा दिशो मसेल्सीशो बाक्ते हना, एको कशो ब्वाक्कु तूडीनु, गे सराप चीले मराइनेवे। 20 तन्न गे इ वॉइश नु बाक्शा यो, हेंथे गाक्शा, ग्रांग्रा दिशो सेल्सीशो बाक्ते हना, गे अरु वॉइश मुर नु इप्शो बाक्ते” हना, देंशा, 21 चढेबमी मेको मीश मुर कली सराप चीले रतीक कसम जपाइक्वा माल्ब। मिनू मेकोमी मीश मुर कली “परमप्रभु यावेमी इ कोव्रज होम्पाइक्तीक नु देल्लो सोव्रपाइक्तीक रोड पपाइश्शो तशा, गे इ मुर आन दातेमी हिंचा डा कौडतीक दुम्नेवे। 22 एको सराप चीले रतीक ब्वाक्कु इ कोव्रजम ओव्रशा इ कोव्रज होम्तीक नु इ देल्लो सोव्रतीक रोड पपाइक्ब” देंचा माल्ब। मिनू मेको मीश मुरुमी “आमेन, मोदेंशोन दुम्ल” देंचा माल्ब।

23 मिनू नोले चढेबमी मेको सराप चीले कागजम ब्रेक्शा मेको कशो ब्वाक्कुम मेको कागज कली मुरचा माल्ब। 24 मिनू नोले मेकोमी मेको मीश मुर कली मेको सराप चीले बाक्शो कशो ब्वाक्कु तूपाइक्वा माल्ब। मिनू मेको सराप चीले बाक्शो ब्वाक्कु मेको मीश मुर आ कोव्रजम ओव्रशा मेको कली शुश खाइक्वाइक्ब। *भजन संग्रह १०९:१८* 25 मिनू चढेबमी मेको रुश पतीक आ पर्वम चढेशो अन्न मेको मीश मुर आ गुड रे लाइश्शा, परमप्रभु यावे आ डॉइती क्युक्शा, चढेतीकेम चाक्चा माल्ब। 26 मिनू चढेबमी मेको अन्न चढेतीक रे मिन्चा कली योल का हुडश्या चढेतीकेमी चोचा माल्ब। मिनू

नोले मेको कली मेको ब्वाक्कु तूपाइक्वा माल्ब। 27 मिनू मेकोमी मेको मीश मुर कली मेको ब्वाक्कु तूपदानु, मेको ग्रांग्रा दिशो दुम्शो बाक्त हना, नु आ वॉइश कली मरिश्शो पशो बाक्त हना, मेको सराप चीले बाक्शो कशो ब्वाक्कु मेको आ आगा ओव्रशा, शुश खाइक्वाइक्ब। मेको आ कोव्रज होम्ब। मिनू मेको आ देल्लो सोव्रब। मिनू मेको मीश मुर आ मुर आन दातेमी हिंचा डा कौडतीक दुम्ब। 28 तन्न मेको मीश मुरुम आंम कली ग्रांग्रा दिशो मसेल्सीशो नु मरिश्शो मपशो बाक्त हना, मेको ब्वाक्कु मखाइक्थु, आल थीब दुम्ब।

29 आ वॉइश नु बाक्शा यो, हेंथे गाक्शा ग्रांग्रा दिशो सेल्सीशो मीश मुर आ पर्वम रुश पाइब वॉइश कली अरेशो लोव्र बाक्ब। 30 मिनू वॉइश मुर रुश पाइब दुम्शा, आ मीश आ पर्वम रुश पापु हना, मेकोमी आ मीश परमप्रभु यावे आ डॉइती राप्पाइक्वा माल्ब। मिनू चढेबमी मेको अरेशो लोव्र नेल्ले मेको मीश मुर आ पर्वम पचा माल्ब। 31 मिनू मेको वॉइश मुर दोस मताइब दुम्ब। मिनू आ मीशेमी चहिं आ मरिश्शो पशो राइब’ दे इस्राएली आन कली शेंदो” दे परमप्रभु यावेमी मोसा कली देंत।

## परमप्रभु कली नाजिरी दिल्लो

6 परमप्रभु यावेमी मोसा कली 2 “गे इस्राएली आन कली ‘सुड मीश मुर, वॉइश मुरुमी परमप्रभु यावे कली दिल्ला बाक्चा, दे नाजिरी कबल पापु हना, *१सामुएल १:११* 3 मेकोमी शांबु राकसी तूचा काइ मडुम्ब। मेकोम ग्युरशो अडगुर शांबु नु अडगुर आ रस तूचा मडुम्ब। क्येख नु सोव्रपाइश्शो अडगुर यो ब्वचा मडुम्ब। *आमोस १:११-१२; लूका १:१५* 4 गिश नाक्त सम्म मेको नाजिरी दुम्शा दिल्ला बाक्बा, मिश नाक्त सम्म मेको अडगुर आ वांचेर रे आ खोश्ले सम्म यो ब्वचा मडुम्ब।

5 मेको गिश नाक्त सम्म नाजिरी दुम्शा दिल्ला बाक्बा, मिश नाक्त सम्म आ पिया डा चां प्रेक्चा मडुम्ब। मेको आ नाजिरी दुम्शा दिल्लो नाक्ती मनुम्म सम्म मेकोमी परमप्रभु यावे कली ला दिल्लो बाक्ब। मेकोमी आ चां बारचा गेचा माल्ब। *न्यायाधीस १३:५*

6 गिश नाक्त सम्म मेको परमप्रभु यावे आ पर्वम दिल्ला बाक्बा, मिश नाक्त सम्म मेको बेक्शो मुर आन नेक्था लचा मडुम्ब। 7 मेको आ आम आफ, आ लोकबपुकी सु बेक्तेक्म हना यो, मेको आन पर्वम मेकोमी आंम कली ग्रांग्रा दिशो सेल्चा मडुम्ब। मारदे हना मेको आ पियाम आ परमप्रभु आ पर्वम दिल्लो चिन्ड बाक्ब। *लेवी २१:११* 8 आ दिल्ला बाक्शो नाक्त नेल्ले मेको परमप्रभु यावे कली ला दुम्शो बाक्ब।

9 मिनू दोक का का पा सुड मुर मेको आ नेक्था बेक्शा, आ चां ग्रांग्रा सेल्लु हना, ग्रांग्रा मदिशो दुम्चा कली ७ नाक्तीम आ चां प्रेक्चा माल्ब। *गन्ती १९:११, १४, १६* 10 मिनू मेकोमी ८ नाक्ती परवा हना यो, ढुकुर हना यो निक्शी गुम्तीक ताम्बु डा ओव्रतीक चढेब आ डॉइती चाक्चा माल्ब। *लेवी ५:७* 11 मिनू चढेबमी मेको का पाप आ पर्वम चढेतीके नु का चोशा चढेतीके चढेचा माल्ब। मिनू मेको मुर आ पर्वम पाप क्याम्तीक गेय पचा माल्ब। मारदे हना मेको बेक्शो मुर आ नेक्था बाक्शा पाप दुम्शा, ग्रांग्रा दिशो दुम्शो बाक्ब। मिनू मेको नाक्त रे मेकोम आ पिया परमप्रभु यावे कली तिल्ला माल्ब। 12 मिनू मेको मुरुमी आ नाजिरी बाक्तीक नाक्ती नक गोशा परमप्रभु यावे कली दिल्ला माल्ब। मिनू मेकोमी गारचा आ पर्वम चढेचा कली बर्स का गाप्शो सांड का चाक्चा माल्ब। मेको मुर दिल्ला बाक्मेनु, ग्रांग्रा दिशो दुम्तीके आ डॉइती डा नाक्त महिक्सीब।

13 मिनू नाजिरी आन कली अरेशो लोव्र मार बाक्ब देंशा हना, आंम दिल्ला बाक्शो नाक्त गाक्म नोले, मेको मुर आ पतीके मार बाक्ब देंशा हना, मेको कली गुम्तीक ताम्बु आ ओव्रतीक आ डॉइती चाक्चा माल्ब। 14 मिनू मेकोमी परमप्रभु यावे कली मारेड मडुम्शो थम रिश्शो सांड का चोशा चढेतीक चढेचा माल्ब। मिनू मेकोमी बर्स का गाप्शो मारेड मडुम्शो थम रिश्शो पाठी का पाप आ पर्वम चढेचा माल्ब। मिनू मारेड मडुम्शो थम रिश्शो बर्स का गाप्शो सांड का दुशा बाक्चा आ पर्वम चढेचा माल्ब। 15 मिनू मेकोमी डालो का बोरब ओख्ती मसुप्शो शोब्ले, थम रिश्शो तेलम निशो फस के बटुकपुकी नु तेल खेक्शो बोरब ओख्ती मसुप्शो बाबरपुकी चढेचा माल्ब।

16 मिनु चढ़ेबमी मेको नेल्ल परमप्रभु यावे आ डोंइती वोइक्चा माल्ब। मिनु मेको पाप आ परबम चढ़ेतीके नु चोशा चढ़ेतीके चढ़ेचा माल्ब। 17 मिनु मेकोमी मेको सांड दुशा बाक्चा आ परबम परमप्रभु यावे कली चढ़ेचा माल्ब। मेको नु डालोम बाक्चो बोरब ओख्ती मसुप्शो शोब्ले चढ़ेचा माल्ब। मिनु मेको चढ़ेबमी मेको नु अन्न चढ़ेतीके नु तूचा थोव्रक चढ़ेतीक चढ़ेचा माल्ब।

18 मिनु नोले मेको नाजिरीमी गुम्तीक ताम्बु ओव्रतीक आ डोंइती आ तिल्लो पिया डा चां प्रेक्चा माल्ब। मिनु मेको चां दुशा बाक्चा आ परबम चढ़ेतीक आ आगाम चोचा माल्ब। प्रेरित १८:१८

19 मिनु आ पिया प्रेक्गा नोले मेको चढ़ेबमी मेको सांड आ लोप्शो बला नु डालो डा बोरब ओख्ती मसुप्शो बटुक का नु बोरब ओख्ती मसुप्शो बाबर का मेको नाजिरी आ गुडम वोइक्चा माल्ब। 20 मिनु चढ़ेबमी मेको कली क्युक्शा परमप्रभु यावे आ डोंइती क्युक्शा चढ़ेतीक चढ़ेचा माल्ब। मिनु क्युक्शा चढ़ेशो, कुथु नु फिला चढ़ेब आ भाग दुम्ब। मेको नोले मेको नाजिरीमी अडगुर शांबु तूतु हना दुम्ब। प्रस्थान २९:२३,२४,२७

21 मिनु कसम जशो नाजिरी कली अरेशो लोव्र मार बाक्ब दॅशा हना, आ परमप्रभु यावे कली चढ़ेशो नाजिरी आ कसम जशो खोदॅशो बाक्चा माल्ब। आ चाप्शो तेम्ने चाप्ब। आ कसम जशो गारचा माल्ब। मिनु आ जिम्मा डा अरेशो लोव्र नेल्ल गारचा माल्ब' देनो" दॅत।

### हारूनमी गेचा माल्शो आसीक

22 मिनु परमप्रभु यावेमी मोसा कली 23 "गे हारून नु आ तौ आन कली 'गे इस्राएली आन कली आसीक गेनीनु, मार दॅचा माल्नीनी दॅशा हना, लेवी ९:२२-२३; व्यवस्था १०:८ 24 परमप्रभु यावेमी इन कली आसीक गेवल। इन कली गेना हना यो कोव्रडल। उत्पत्ती २४:१,३५; भजन संग्रह १२१:- 25 परमप्रभु यावे इन कली तशा ग्येरसेक्ल। मिनु इन कली शिशी पवल। भजन संग्रह ८०:४; प्रस्थान ३४:६-७ 26 परमप्रभु यावेमी इन कली कोव्रशा, इन थुं नाइश्शा बाक्चा गेवल' दॅचा माल्नीनी। भजन संग्रह ६९:१७-१८; भजन संग्रह ८५:९; यसेया ५७:१९ 27 मेकोपुकीमी मोदॅशो लोव्र पा, आं नें इस्राएली आन तार वोइक्चा माल्नीम। मिनु गो मेको आन कली आसीक गेनुडमी" दे मोसा कली दॅत।

### इसाएली आन थर डा ठेयब मुर

7 मोसामी गुम्तीक ताम्बु सेल्ने थुम्शा, मेको नु आ मारेड मारेड आन कली तेल ब्रुइक्ताक्मी। मिनु परमप्रभु यावे आ गेय पचा कली वोइक्तु। मिनु मेकोमी चढ़ेतीक नु आ मारेड मारेड तेल ब्रुइश्शा परमप्रभु यावे आ गेय पचा कली वोइक्तीमी। प्रस्थान ४०:९,१०,१७ 2 मिनु इस्राएल डा थर थर नु खिं खिं डा खुप्शा हिक्शो मुर आन ठेयब मुरपुकीमी चढ़ेक्तेक्म। 3 मेकोपुकीमी आन चढ़ेतीके परमप्रभु यावे आ डोंइती चाक्तेक्म। मार चाक्तेक्म दॅशा हना, ६ ओटा बग्गी, १२ ओटा ब्यफ, निक्शी थर डा मुर आन ठेयब मुर आस कली बग्गी का बाक्त। मिनु ठेयब मुर का का पा ब्यफ का का चढ़ेचा कली चाक्तेक्म। मिनु मेकोपुकीमी गुम्तीक ताम्बु आ डोंइती वोइक्तेक्म।

4 मिनु नोले परमप्रभु यावेमी मोसा कली 5 "मेको आन चाक्शो ताक्को। मिनु मेकोमी गुम्तीक ताम्बु डा गेय पने चाप्नीम। लेवी आन कली आन आन गेय गारचा डा पा गेमी" दॅत।

6 मिनु मोसामी मेको बग्गी नु ब्यफपुकी ताक्शा, लेवी आन कली गेम्तीमी। 7 मिनु मेकोमी बग्गी निक्शी नु ४ ओटा ब्यफ गेरशोन आ तौ आन गेय कोव्रशा, मेको आन कली गेम्तीमी। 8 मिनु ४ ओटा बग्गी नु ८ ओटा ब्यफ मेरारी आ मुर आन गेय कोव्रशा, मेको आन कली गेम्तीमी। चढ़ेब हारून आ तौ इथामार मेको आन कली अरेब बाक्त। गन्ती ४:२८,३३ 9 तन्न मेकोमी कोहाथी आन कली मारेड मगेमी। मारेड हना मेकोपुकीमी परमप्रभु यावे आ मार मार थोव्रक कोव्रचा नु आन बलाम कुरचा माल्बाक्तेक्म। गन्ती ४:१५

10 मिनु चढ़ेतीक कली तेल ब्रुइक्तीक नु परमप्रभु यावे आ गेय पचा कली वोइक्तीक नाक्त मेको इस्राएल आ थर डा मुर आन ठेयब मुरुमी यो चढ़ेचा कली मार मार चाक्शा, चढ़ेतीक आ डोंइती वोइक्तेक्म। 11 मिनु परमप्रभु

यावेमी मोसा कली "मेकोपुकीमी चढ़ेचा कली मार मार चाक्चा माल्नीम। मेको चढ़ेतीके आं गेय पचा कली वोइक्तीक नाक्ती इस्राएल आ थर डा मुर आन ठेयब मुर का कामी नाक्त का कली चढ़ेतीक चाक्चा माल्नीम" दॅत। गन्ती १:४-१६; गन्ती २:३-२९

12 मिनु डोंइती डा नाक्ती यहूदा आ थर डा मुर आन ठेयब मुर अम्मीनादाब आ तौ नहशोनमी आ चढ़ेतीक चाक्तु। 13 मिनु मार चाक्तु दॅशा हना, सहे का ३० शेकेल डा चांदी के थाल का ७० शेकेल डा चांदी के बोस का चाक्तु। मेको शेकेल गुम्तीक ताम्बु डा शेकेल खोदॅशो बाक्तेक्म। मेको थाल नु बोस निम्फामी तेलम निशो रिम्शो फसीम प्रिंशो बाक्ताक्स। मेको अन्न चढ़ेतीके बाक्त। ताम्बु डा शेकेल का १२ ग्राम डा क्येट बाक्ब। बजार डा शेकेल चहिं ११.५ ग्राम बाक्ब। 14 मिनु १० शेकेल डा धूपम ब्रीशो सुन के आइक्च बोस का, 15 चोशा चढ़ेचा कली ब्यफ का, सांड का नु बर्स का गाप्शो पाठा का चाक्तु। 16 पाप आ परबम चढ़ेचा कली बोका का, 17 दुशा बाक्चा आ परबम चढ़ेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको अम्मीनादाब आ तौ नहशोन आ चढ़ेतीक बाक्त।

18 मिनु आ दीसा इस्साकार आ थर डा मुर आन ठेयब मुर सुआर आ तौ नेथनेलम आ चढ़ेतीक चाक्तु। 19 मिनु मार चाक्तु दॅशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल गुम्तीक ताम्बु डा शेकेल खोदॅशो बाक्तेक्म। मेको थाल नु बोस निम्फामी तेलम निशो रिम्शो फसीम प्रिंशो बाक्ताक्स। मेको अन्न चढ़ेतीके बाक्त। 20 मिनु १० शेकेल डा धूपम ब्रीशो सुन के आइक्च बोस का, 21 चोशा चढ़ेचा कली ब्यफ का, सांड का नु बर्स का गाप्शो पाठा का चाक्तु। 22 पाप आ परबम चढ़ेचा कली बोका का, 23 दुशा बाक्चा आ परबम चढ़ेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको सुआर आ तौ नेथनेल आ चढ़ेतीक बाक्त।

24 मिनु मेको आ नित्थ नाक्ती जबूलून आ थर डा मुर आन ठेयब मुर हेलोन आ तौ एलीआबमी आ चढ़ेतीक चाक्तु। 25 मिनु मार चाक्तु दॅशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल गुम्तीक ताम्बु डा शेकेल खोदॅशो बाक्तेक्म। मेको थाल नु बोस निम्फामी तेलम निशो रिम्शो फसम प्रिंशो बाक्ताक्स। मेको अन्न चढ़ेतीके बाक्त। 26 मिनु १० शेकेल डा धूपम ब्रीशो सुन के आइक्च बोस का, 27 चोशा चढ़ेचा कली ब्यफ का, सांड का नु बर्स का गाप्शो पाठा का चाक्तु। 28 पाप आ परबम चढ़ेचा कली बोका का, 29 दुशा बाक्चा आ परबम चढ़ेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको हेलोन आ तौ एलीआब आ चढ़ेतीक बाक्त।

30 मिनु मेको आ सांबु नाक्ती रूबेन आ थर डा मुर आन ठेयब मुर शेदेउर आ तौ एली-सुरमी आ चढ़ेतीक चाक्तु। 31 मिनु मार चाक्तु दॅशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल गुम्तीक ताम्बु डा शेकेल खोदॅशो बाक्तेक्म। मेको थाल नु बोस निम्फामी तेलम निशो रिम्शो फसीम प्रिंशो बाक्ताक्स। मेको अन्न चढ़ेतीके बाक्त। ताम्बु डा शेकेल का १२ ग्राम चांदी बाक्ब। 32 मिनु १० शेकेल डा धूपम ब्रीशो सुन के आइक्च बोस का, 33 चोशा चढ़ेचा कली ब्यफ का, सांड का नु बर्स का गाप्शो पाठा का चाक्तु। 34 पाप आ परबम चढ़ेचा कली बोका का, 35 दुशा बाक्चा आ परबम चढ़ेचा कली ब्यफ निक्शी, ५ ओटा सांड, ५ ओटा बोका नु ५ ओटा बर्स का गाप्शो पाठा चाक्तु। मेको शेदेउर आ तौ एली-सुर आ चढ़ेतीक बाक्त।

36 मिनु मेको आ नोले डा नाक्ती सिमियोन आ थर डा मुर आन ठेयब मुर सुरी-शदै आ तौ शेलुमीएलमी आ चढ़ेतीक चाक्तु। 37 मिनु मार चाक्तु दॅशा हना, सहे का ३० शेकेल डा चांदी के थाल का नु ७० शेकेल डा चांदी के बोस का चाक्तु। मेको शेकेल गुम्तीक ताम्बु डा शेकेल खोदॅशो बाक्तेक्म। मेको थाल नु बोस निम्फामी तेलम निशो रिम्शो फसीम प्रिंशो बाक्ताक्स। मेको अन्न चढ़ेतीके बाक्त। 38 मिनु १० शेकेल डा धूपम ब्रीशो सुन के आइक्च बोस का, 39 चोशा चढ़ेचा कली ब्यफ का, सांड का नु बर्स का गाप्शो पाठा का चाक्तु। 40 पाप आ परबम चढ़ेचा कली बोका का, 41 दुशा



## लेवी आ मुर परमप्रभु के दुश्शो

## पास्सा चाड

प्रस्थान १२:-; लेवी २५:५-८

5 परमप्रभु यावेमी मोसा कली 6 "इसाएली आन दाते रे लेवी आन कली चाक्शा, मेको आन कली चोवखो सेल्मी। 7 मेको आन कली मार पचा माल्नेवे देंशा हना, मेको आन तारी चोवखो सेल्तीक ब्वाक्कु बुइक्तीमी। मिनु मेकोपुकीमी आन रां डा चां नेल्ल प्रेक्शा, आन वा मुरशा, चिक्सीशा ग्रांग्रा मदिशो सेल्सीचा माल्नीम। गन्ती १९:९, १७; लेवी १४:८ 8 मिनु नोले मेकोपुकीमी ब्यफ का नु तेलम निशो रिंशो फस अन्न चढेतीके चाक्चा माल्नीम। गे चहिं पाप आ परबम चढेचा कली ब्यफ का चाक्को। 9 मिनु गे लेवी आन कली गुम्तीक ताम्बु आ डोंइती चाक्शा, इसाएली नेल्ल आन कली गुम्पाइक्मी। 10 मिनु गे लेवी आन कली परमप्रभु यावे आ डोंइती चाक्गीनु, इसाएली नेल्लेमी आन गुइ लेवी आन तार वोइक्चा माल्नीम। 11 मिनु हारूनमी लेवी आ मुर आन कली परमप्रभु यावे आ गेय पचा कली मेको आ डोंइती क्युक्शा चढेशो खोदेंशो पा वोइक्चा माल्ब। प्रस्थान २९:२४ 12 मिनु लेवी आ मुरपुकीमी आन गुइ मेको ब्यफ आस पिया तार वोइक्चा माल्नीम। मिनु हारूनमी लेवी आ मुर आन परबम पाप क्याम्तीक गेय पचा कली ब्यफ का पाप आ परबम चढेतीके नु अर्को चोशा चढेतीके परमप्रभु यावे कली चढेचा माल्ब। 13 मिनु मेको नोले गे लेवी आ मुर आन कली हारून नु आ तौ आन डोंइती राप्पा, परमप्रभु यावे कली क्युक्शा चढेतीक खोदेंशो पा वोइक्चा माल्नेवे।

14 मोपा गे लेवी आ मुर आन कली अरु इसाएली रे तिल्वा माल्नेवे। मिनु लेवी आ मुर आं के दुम्नीम। गन्ती ३:४५

15 मिनु गे लेवी आ मुर आन कली ग्रांग्रा मदिशो सेल्शा, मेको आन कली क्युक्शा चढेतीक खोदेंशो पा वोइक्मी नोले मेकोपुकीमी गुम्तीक ताम्बुमी गेय पने चाप्नीम। 16 मिनु मेकोपुकी इसाएली आन दाते रे थमा पा आं कली तिल्शो बाक्नीम। गो मेको आन कली इसाएली आन नेल्ल क्येडा डोंइती जरमेशो तौ आन पा डा आं कली वोइक्तामी। गन्ती ३:१२-१३ 17 मिनु इसाएली आन दातेम मुर बाक्तेक्म हना यो, बी ब्यफ, क्यारश भेडा बाक्तेक्म हना यो, डोंइती जरमेशो नेल्ल आं के बाक्नीम। इजीप्ती आन नेल्ल क्येडा डोंइती जरमेशो तौ नेल्ल आन कली सदुमी नाक्त्त रे गो मेको आन कली आं कली तिल्शा वोंइसाक्यी। प्रस्थान १३:२ 18 मिनु इसाएली आन डोंइती जरमेशो आन पा डा गो लेवी आ मुर तिल्शा वोंइसाक्यी। 19 मिनु गो इसाएली आन दाते रे लेवी आ मुर आन कली हारून नु आ तौ आन कली गेतामी। मार कली गेतामी देंशा हना, इसाएली आन परबम गुम्तीक ताम्बुमी गेय पचा कली इसाएली आन परबम पाप क्याम्तीक गेय पचा कली नु इसाएलीपुकी गुम्तीक ताम्बु आ नेक्था मजाक्मल नु मुर बेक्तीक रोइम मबेक्म, दे गेतामी" दे परमप्रभु यावेमी मोसा कली देंत। गन्ती ३:९; गन्ती १:५३

20 मिनु मोसा, हारून नु इसाएल डा मुर नेल्लेमी लेवी आ मुर आन परबम परमप्रभु यावेमी मोसा कली अरेशो खोदेंशो पा पाक्तेक्म। 21 मिनु लेवी आ मुरपुकीमी आंम आन पाप रे ग्रांग्रा मदिशो सेल्सीशा आन वा मुरतेक्म। मिनु नोले हारूनमी मेको आन कली क्युक्शा चढेतीक खोदेंशो पा परमप्रभु यावे आ डोंइती वोइक्तीमी। मिनु हारूनमी मेको आन कली पाप क्याम्तीक गेय पा ग्रांग्रा मदिशो सेल्तीमी। 22 मिनु मेको नोले लेवी आ मुरपुकीमी हारून नु आ तौ आन कली वारच पा गुम्तीक ताम्बु डा गेय पाक्तेक्म। मिनु परमप्रभु यावेमी मोसा कली लेवी आ मुर आन परबम अरेशो खोदेंशो पा मेकोपुकीमी पाक्तेक्म। 23 मिनु परमप्रभु यावेमी मोसा कली 24 "एको लोव २५ बर्स गाप्शो नु मेको क्येडा लाक्शो लेवी आ मुर आन परबम बाक्ब। मिनु मेकोपुकी गुम्तीक ताम्बुमी गेय पचा गोचा माल्नीम। गन्ती ४:३, २३, ३०, ४७; इतिहास २३:३, २४ 25 मिनु मेकोपुकी ५० बर्स लाक्गामेनु, गेय पचा प्रोन्मेक्ल। 26 मिनु मेकोपुकी गुम्तीक ताम्बुमी गेय पाइब आन लोक्ब आन कली वारच पदमेक्ल। तन्न आंमा चहिं गेय मपामेक्ल। गे लेवी आ मुर आन कली मोदेंशो पा गेय पपाइक्चा माल्नेवे" देंत।

9 मिनु परमप्रभु यावेमी इसाएलीपुकी इजीप्त्त रे जाक्मा आ बर्स निक्शी नोले डोंइती डा महिनाम सीनै डा गोरशो रागीमी मोसा कली 2 "गे इसाएलीपुकीमी आं देंशो नाक्ती पास्सा चाड मानेचा माल्नीनी। 3 मेको महिना डा १४ नाक्त्त डा नाक्नाक्दो मेको चाड मानेचा माल्नीनी। गोपुकीमी मेको आ परबम फुल्लुम मुशा ब्रेक्शो लोव नु शेंशो पतीके नेल्लेमी मानेचा माल्नीनी" देंत।

4 मिनु मोसामी इसाएली आन कली "पास्सा चाड मानेचा माल्नीनी" दे अरेप्तु। 5 मिनु मेकोपुकीम डोंइती डा महिना डा १४ नाक्ती डा नाक्नाक्दो सीनै डा गोरशो रागीमी पास्सा चाड मानेक्तेक्म। परमप्रभु यावेमी मोसा कली अरेशो खोदेंशो पा इसाएलीपुकीमी पाक्तेक्म।

6 मिनु मेकेर मुर का निक्शी बेक्शो मुर थिशा, ग्रांग्रा दिशो दुश्शो बाक्तेक्म। मोपा मेकोपुकीमी मेको नाक्ती मेको पास्सा चाड मानेचा मतामे। मेकोपुकी मेको नाक्ती मोसा नु हारून आस डोंइती जाक्तेक्म। गन्ती १९:११ 7 मिनु मेको मुरपुकीमी "गो बेक्शो मुर थिशा ग्रांग्रा दिशो दुश्शो बाक्त्तक हना यो, मारदे मेको देंशो नाक्ती गोपुकीमी इसाएली आन दातेमी आंइ परमप्रभु यावे कली चढेतीके चढेचा मताइनीकी?" देंतेक्म।

8 मिनु मोसाम मेको आन कली "रिम्दीन, परमप्रभु यावेमी इन परबम मार देंबा, गो मेको नेंचा माल्नुड" देंत।

9 मिनु परमप्रभु यावेमी मोसा कली 10 "गे इसाएली आन कली 'सुइ इन दातेमी नु इन चच युइ आन दातेमी बेक्शो मुर थिशा ग्रांग्रा दिशो दुश्शो बाक्त्त हना यो, डोन लत हना यो, मेकोमी परमप्रभु यावे कली पास्सा चाड मानेचा माल्ब। 11 मेकोपुकीमी महिना निक्शी डा १४ नाक्ती नाक्नाक्दो मेको मानेचा माल्नीम। मिनु मेकोपुकीमी मेको पाठा कली बोर्ब ओख्ती मसुप्शो शोब्ले, कशो खाइ नु ब्वचा माल्नीम। 12 मिनु मेको आ दीसा सुनी सम्म मारेइ हेंचा मदुम्ब। मिनु मेको आ रुश का यो जिक्चा मदुम्ब। मिनु पास्सा चाड आ परबम फुल्लुम मुशा, मार ब्रेक्शो बाक्मे, मेको पचा माल्नीम। 13 तन्न तेको मुर ग्रांग्रा दिशो मदुम्शो बाक्बा, डोन यो मलशो बाक्बा, मेकोमी पास्सा चाड ममानेप्तु हना, मेको मुर आ मुर आन दाते रे तिल्वा पुंडसीब। मारदे हना मेकोमी आ देंशो नाक्ती परमप्रभु यावे कली चढेतीक मचढेवो। मेको मुर आ पाप राइब।

14 मिनु इन दातेमी बाक्शो अर्को रागी डा मुरुमी परमप्रभु यावे कली पास्सा चाड मानेचा दाक्ताक्व हना, मेकोमी मेको आ परबम ब्रेक्शो नेल्ल शेंशो पतीक खोदेंशो पा पचा माल्ब। मिनु अर्को रागी डा मुर नु इन मुर नेल्ल आन कली पास्सा चाड आ परबम ब्रेक्शो लोव का दुम्चा माल्ब" देनो" देंत।

## ताम्बु आ तार बाक्शो गोस्स

15 मिनु गुम्तीक ताम्बु वोइक्ने थुश्शो नाक्ती गोस्सुमी मेको कबल पशो सन्दोस वोइश्शो ताम्बु सुम्तु। मेको नाक्नाक्दो रे सुनी सम्म ताम्बु तारी बाक्त्त। मेको गोस्स मी खोदेंशो तांइसीशो बाक्त्त। प्रस्थान ४०:३४-३५ 16 मेको मोदेंशो गेना हना यो दुश्शो बाक्त्त। गोस्सुमी मेको ताम्बु कली नाक्ती सुम्बाक्त्त। मिनु नाक्दो मी खोदेंशो दुम्बाक्त्त। 17 मिनु मेको गोस्स ताम्बु आ तार रे इर गे लमेनु, इसाएलीपुकी गाक्चा गोम्तेक्म। मिनु तेकेर मेको गोस्स जुक्ता, मेकेर इसाएलीपुकीमी आन बाक्तीक सेल्तेक्म। प्रस्थान ४०: ३६-३८ 18 मिनु इसाएलीपुकी परमप्रभु यावे आ अरेशोमी गाक्बाक्तेक्म। मिनु परमप्रभु यावे आ अरेशोमी मेकोपुकीमी आन बाक्तीक सेल्बाक्तेक्म। मिनु मेकोपुकी मेको गोस्स गुम्तीक ताम्बु तार बाक्म सम्म मेकेर बाक्बाक्तेक्म। 19 मेको गोस्स शुश नाक्त्त सम्म गुम्तीक ताम्बु तार बाक्त्त हना यो, इसाएलीपुकी परमप्रभु यावे आ देंशो टिशा मगाक्बाक्तेक्म। 20 कोइ नाक्ती मेको गोस्स गुम्तीक ताम्बु आ तार का निक्शी नाक्त्त सम्म ला बाक्बाक्त्त। मिनु मेकोपुकी परमप्रभु यावे आ अरेशो टिशा, बास बाक्बाक्तेक्म। मिनु परमप्रभु यावे आ अरेशो खोदेंशो पा गाक्बाक्तेक्म। 21 कोइ नाक्ती मेको गोस्स नाक्दो रे सुनी सम्म ला बाक्बाक्त्त। मिनु सुनी गोस्स इर लमेनु,

मेकोपुकी गाक्बाक्तेक्म। नाक्ती बाक्त हना यो, नाक्दो बाक्त हना यो, मेको गोस्स इर लत हना, मेकोपुकी गाक्बाक्तेक्म।<sup>22</sup> मिनु मेको गोस्स नाक्त निक्शी, महिना का नु मेको क्येडा शुश नाक्त सम्म यो गुम्तीक ताम्बु तार बाक्त हना, इस्राएली आन बाक्तीकेमी बाक्बाक्तेक्म। तन्न गोस्स इर गे लत हना, मेकोपुकी गाक्बाक्तेक्म।<sup>23</sup> मिनु मेकोपुकी परमप्रभु यावेमी अरेशो खोदेशो पा आन बाक्तीक सेल्बाक्तेक्म। मिनु परमप्रभु यावे आ अरेशो खोदेशो पा गाक्बाक्तेक्म। मेकोपुकीमी परमप्रभु यावेमी मोसा कली अरेशो खोदेशो पा पाइबाक्तेक्म।

चांदी के तुराही

10 परमप्रभु यावेमी मोसा कली<sup>2</sup> “गे चांदी के तुराही निक्शी सेलो। मेको तुप्शा, सेल्चा माल्नेवे। मिनु गे मेको ताप्शा, इस्राएली आन कली गुम्पाइक्चा माल्नेवे। मिनु गाक्ची ना दुम्मेनु, गे मेको ताप्चा माल्नेवे। गन्ती ३१:६<sup>3</sup> मेको निक्शी कालेम ताप्शोनु, इस्राएली नेल्ल इ डोंइती गुम्तीक ताम्बु आ ओव्रतीकेमी जाक्शा बुक्चा माल्नीम।<sup>4</sup> तन्न का ला ताप्शोनु, इस्राएली आन थर थर डा मुर आन ठेयब मुरपुकी इ डोंइती जाक्शा बुक्चा माल्नीम।<sup>5</sup> मिनु ठेयब सेंदामी ताप्शोनु, पूर्ब गे बाक्शो मुरपुकी गाक्चा माल्नीम।<sup>6</sup> मिनु निक्शी खेयप ताप्शोनु, दक्खिन गे बाक्शो मुरपुकी गाक्चा माल्नीम। गाक्ची ना दुम्मेनु, गेना हना यो तुराही ताप्चा माल्नीम।<sup>7</sup> गे मुर आन कली गुम्पाइक्ची ना मेको ताप्चा माल्नेवे। तन्न मेको गाक्ची ना डा खोदेशो पा ताप्चा मदुम्ब।

<sup>8</sup> मिनु हारून आ तौ चढेब निक्शीमी मेको तुराही ताप्चा माल्नीस। मेको इन कली नु इन चच युइ आन कली गेना हना यो पतीके बाक्ब।<sup>9</sup> मिनु गे इन रागीमी इन कली दिख्व जोरी सत्रुपुकी नु लडाइ पथ लनीनु, ठेयब सेंदामी तुराही ताप्चा माल्नीस। मो पाइतीनी हना, परमप्रभु यावे, इन परमप्रभुमी इन कली मिम्शा, इन जोरी सत्रु रे प्रोंइब। न्यायाधीस ६:३४<sup>10</sup> मिनु गेपुकी ग्येरशा बाक्नीनु, गे इन पचा माल्शो चाड मानेनीनु, औसी डा चाड मानेनीनु, इन चोशा चढेतीके नु इन दुशा बाक्चा आ परबम चढेतीके चढेनीनु, गेपुकीमी तुराही ताप्चा माल्नीनी। मिनु मेको ताप्चीनु, इन परमप्रभुमी इन कली मिम्ब। गो परमप्रभु यावे, इन परमप्रभु नड” दंत। लेवी २३:२४; २राजा ११:१४; २इतिहास ७:६

इस्राएली सीनै डांडा रे गाक्शो

11 मिनु बर्स निक्शी, महिना निक्शी डा २० नाक्ती मेको गोस्स परमप्रभु यावे आ कबल पशो सन्दोस बाक्शो ताम्बु रे इर लत। गन्ती १:१<sup>12</sup> मिनु नोले इस्राएलीपुकी सीनै डा गोरशो रागी रे हुल हुल पा गाक्तेक्म। मिनु मेको गोस्स पारान डा गोरशो रागीम नाइसाक्व।<sup>13</sup> मिनु परमप्रभु यावेमी मोसा कली अरेशो खोदेशो पा टिशा, मेकोपुकी गाक्तेक्म। गन्ती २:-

<sup>14</sup> नेल्ल क्येडा डोंइती यहूदा आ बाक्तीक डा मुर हुल हुल पा आन छेदर कुरशा गाक्तेक्म। मेको आन ठेयब मुर अम्मीनादाब आ तौ नहशोन बाक्त।<sup>15</sup> मिनु इस्साकार आ बाक्तीक डा मुर आन ठेयब मुर सुआर आ तौ नेथनेल बाक्त।<sup>16</sup> मिनु जबूलून आ बाक्तीक डा मुर आन ठेयब मुर हेलोन आ तौ एलीआब बाक्त।<sup>17</sup> मिनु नोले गुम्तीक ताम्बु पोक्शा, गेरशोन आ मुरपुकी नु मेरारी आ मुरपुकीमी मेको कुरशा, गाक्तेक्म।

<sup>18</sup> मिनु मेको आन नोले रूबेन आ बाक्तीक डा मुरपुकी हुल हुल पा आन छेदर कुरशा गाक्तेक्म। मेको आन ठेयब मुर शेदेउर आ तौ एली-सुर बाक्त।<sup>19</sup> मिनु सिमियोन आ बाक्तीक डा मुर आन ठेयब मुर सुरी-शदै आ तौ शेलुमीएल बाक्त।<sup>20</sup> मिनु गाद आ बाक्तीक डा मुर आन ठेयब मुर दूएल आ तौ एली-आसाफ बाक्त।

<sup>21</sup> मिनु कोहाथीपुकी परमप्रभु यावे आ ताम्बु डा मार मार कुरशा, गाक्तेक्म। मेको आन जाक्चा क्येडा डोंइती मेको गुम्तीक ताम्बु सेल्ने थुम्शो बाक्चा माल्बाक्त।

<sup>22</sup> मेको नोले एफ्राइम आ बाक्तीक डा मुरपुकी हुल हुल पा आन छेदर कुरशा गाक्तेक्म। मेको आन ठेयब मुर अम्मीहुद आ तौ एली-शामा बाक्त।<sup>23</sup> मिनु मनस्से आ बाक्तीक डा मुर आन ठेयब मुर पेदा-सुर आ तौ

गामालीएल बाक्त।<sup>24</sup> मिनु बेन्यामीन आ बाक्तीक डा मुर आन ठेयब मुर गिदेओनी आ तौ आबी-दान बाक्त।

<sup>25</sup> मिनु नेल्ल आन क्येडा नोले दान आ बाक्तीक डा मुर हुल हुल पा आन छेदर कुरशा, गाक्तेक्म। मेको आन ठेयब मुर अम्मी-शदै आ तौ अही-एजेर बाक्त।<sup>26</sup> मिनु आशेर आ बाक्तीक डा मुर आन ठेयब मुर ओक्रान आ तौ पगीएल बाक्त।<sup>27</sup> मिनु नाप्ताली आ बाक्तीक डा मुर आन ठेयब मुर एनान आ तौ अहीरा बाक्त।<sup>28</sup> मोपा इस्राएली आन हुल हुल पा गाक्चा माल्शो बाक्तेक्म।

मोसामी आ शिउ आ तौ कली गुम्शो

<sup>29</sup> मिनु मोसामी मिदयान डा रूपल आ तौ होबाब, आ रिउ कली “परमप्रभु यावेमी आंइ कली गेशो रागी लना लन बाक्नीकी। गे यो गोपुकी नु पिने। गो इन कली रिम्शो पाइक्नीकी। मारदे हना परमप्रभु यावेमी ‘इस्राएली आन कली रिम्शो पाइनुड’ दंत” दे मोसामी दंत। प्रस्थान २:१८; प्रस्थान १८:१; न्यायाधीस १:१६; न्यायाधीस ४:११

<sup>30</sup> होबाबमी “गो मलाइक्नुड। गो आं रागी नु आं मुर आन बाक्तीके लेल्लुड” दंत।<sup>31</sup> मिनु मोसामी “आंइ कली मप्रोनीन। मारदे हना मेको गोरशो रागीमी ते ताम्बु कीचा मेको तुइक्नीनी। मिनु गे आंइ कली लां कोंइब दुम्नीनी।<sup>32</sup> गे गोपुकी नु गाक्तीनी हना, परमप्रभु यावेमी आंइ कली मार मार रिम्शो पाइबा, गो मेको खोदेशो पा इन कली पाइनीकी” दंत।

<sup>33</sup> मिनु मेकोपुकी परमप्रभु यावे आ डांडा रे नाक्त सां सम्म गाक्तेक्म। परमप्रभु यावे आ कबल पशो सन्दोस कुरबपुकी मेको आन कली बास बाक्तीक माल्चा, दे मेको आन डोंइडोंइती गाक्तेक्म।<sup>34</sup> मिनु परमप्रभु यावे आ गोस्स मेको आन गाक्ची ना मेको आन तार बाक्त। प्रस्थान १३:२१; गन्ती ९:१५-२३

<sup>35</sup> मिनु कुरबपुकीमी मेको कबल पशो सन्दोस कुरशा गाक्मानु, गेना हना यो मोसामी “परमप्रभु यावे, बोक्कीन। इन जोरी सत्रु एर ऑथ ब्रामल। मिनु इन जोरी सत्रु इन क्येडा प्रोक्मल” देंबाक्त। २इतिहास ६:४१; भजन संग्रह ३:८; भजन संग्रह ९:२०; भजन संग्रह १०:१२; भजन संग्रह १७:१३; भजन संग्रह ६८:२; भजन संग्रह १३२:८<sup>36</sup> मिनु मेको कबल पशो सन्दोस नाइक्तेक्म, मेकोमी “परमप्रभु यावे, गे हजार, हजार इस्राएली आन दातेमी लेशशा, जाक्कीन” देंबाक्त।

इस्राएलीपुकीमी गन गन पशो

11 मिनु परमप्रभु यावेमी मुर आन श्येत जशो आ परबम गन गन पशो नेंतु। परमप्रभु यावेमी मेको नेंशा, शुश गाइक्ताक्व। मिनु परमप्रभु यावे गाइश्शा, मुर आन बाक्तीके गे मी सोइश्शा, एर सुर मीम नेक्पाइक्तु। लेवी १०:२<sup>2</sup> मिनु मुरपुकीमी मोसा कली “वारच पने” दे ग्रीतेक्म। मिनु मोसामी परमप्रभु यावे कली पुंडतु। मिनु मेको मी काप्त।<sup>3</sup> मिनु परमप्रभु यावेमी मेको आन दातेमी मी सोइक्तीके, मेको बाक्तीके आ नें तबेरा वोइक्तेक्म।

<sup>4</sup> मिनु मेको आन दातेमी बाक्शो अर्को रागी डा मुरपुकीमी मार मार जचा थोव्रक जचा ब्वचा दाक्तेक्म। मिनु इस्राएली यो लेंशा डाक्शा “गोपुकीमी श्ये ब्वचा तक हना, दुम वा। प्रस्थान १२:३८; प्रस्थान १६:३; १कोरिन्थी १०:६<sup>5</sup> गो इजीप्तीमी मो ब्वशो डांइ श्ये मिम्नीकी। मिनु वोबीस, खाइपुकी, प्याज नु लसुन यो मिम्नीकी।<sup>6</sup> तन्न गो मुल ओले पेते दुम्शा, एको मन्ना डा लाक्शा मारदे मथिल्नीकी” देंतेक्म।

<sup>7</sup> मन्ना चहिं धन्या वांचेर खोदेशो बाक्त। मेको कोव्रशोनु, खोटो खोदेशो तांइसीबाक्त। प्रस्थान १६:१४-३१<sup>8</sup> मिनु मुरपुकी लशा, मेको खुप्शा, कोइमी हिल्ला, कोइमी चुशा, कोइमी नेल्शा, कोइम बटुक सेल्शा जाक्तेक्म। मिनु मेको तेलम चोशो शोब्ले खोदेशो पा ब्रोंवबाक्त।<sup>9</sup> मिनु नाक्दो आन बाक्तीकेमी सीत यिमेनु, मन्ना यो यीबाक्त।

<sup>10</sup> मिनु मोसामी मुर नेल्ल आन आन ताम्बु डा ओव्रतीकेमी राप्शा डाक्शो ताप्तु। मिनु मुरपुकीमी परमप्रभु यावे कली शुश गाइक्पाइक्तीके, मोसामी मेको आन पशो काइ मदाक्शो बाक्त।

11 मिनु मोसामी परमप्रभु यावे कली "गे मारदे आं कली श्येत गेयीनी? मारदे गो इन डोंडती शिशी मतडा? मारदे आं कली इश डा मुर आन कली कोल्लब सेल्पीनी? 12 मार, एको इश डा मुर आं आल नमी डा? मार, गो मेको आन कली थिडमी डा? गे आं कली 'दूध तूब आल कली आ आममी कुरशा लाइशो खोदेंशो पा, आंइ किकी पिपी आन कली इन गेशो रागीमी कुरशा लावो' देंनीनी। 13 गो इश डा मुर आन ब्वतीक श्ये ते थिनुड डा? मिनु मेकोपुकीमी आं कली 'श्ये ब्वचा गेकी' दे जाक्शा डाक्तेक्म। 14 गो इश डा मुर आन कली खुल्ले मचापुण्ड। एको आं मचाप्पा डा गेय बाक्ब। 15 मिनु गे आं कली ओदेंशो पाइक्तीनी। मिनु गो इन शिशी ताता हना, साइय्पीनी। मिनु गो आं खतम दुम्तीके तचा ममाल्लुड" देंत। प्रस्थान ३२:३२

16 मिनु परमप्रभु यावेमी मोसा कली "गे इस्राएली आन दाते रे ७० जना खाल्पा आन कली खुप्तीमी। मेको आन मुर आन दाते डा ठेयब मुर नु मेको आन कली सासन पाइब मुर दुम्चा माल्लीम। मिनु गे मेको आन कली तुइक्चा माल्लेवे। मिनु मेको आन कली गुम्तीक ताम्बुमी चाक्मी। मिनु मेकोपुकी गे नु बाक्चा माल्लीम। प्रस्थान १८:२१-२६; प्रस्थान २४:९-११

17 मिनु गो यिशा, गे नु लोत्र पाइनुड। मिनु गो इ आगामी बाक्शो सोक्त रे लाइश्या, मेको आन तारी वोइक्नुड। मिनु मेकोपुकीमी गे नु गारशा, मेको मुर आन श्येत कुरनीम। मिनु गे का ला कुरचा ममाल्लेवे।

18 मिनु गे मुर आन कली 'गे दीसा कली ग्रांरा मदिशो दुम्शा, ठीक दुमीन। गेपुकीमी श्ये ब्वचा ताइनीनी। मारदे हना गेपुकीमी परमप्रभु यावे आ डोंडती श्ये ब्वचा तक हना, रिम्शो दुम वा, दे डाक्शो बाक्तीनी। आंइ कली एको रागी क्येडा इजीप्तीमी रिम्शो बाक्त् देंतीनी। मोपतीके परमप्रभु यावेमी इन कली श्ये ब्वचा गेब। मिनु गे मेको ब्वाइनीनी। प्रस्थान १९:१० 19 मिनु नाक्त् का, नाक्त् निक्शी ५ नाक्ती, १० नाक्ती नु २० नाक्त् ला ममाइ, 20 गेपुकीमी ब्रीचा डा पा महिना का सम्म श्ये ब्वचा ताइनीनी। मारदे हना गेपुकीमी आंम इन दातेम बाक्शो परमप्रभु यावे कली मटिनी। मिनु गे मेको आ डोंडती 'गो मारदे इजीप्ते रे गूशा गाक्का?' दे डाक्तीनी" देंत।

21 मिनु मोसामी "गो नु लां गाक्ब मुर ६ लाख बाक्नीम। मो हना यो, गे 'मेको आन कली महिना का सम्म श्ये ब्वचा गेनुडमी' देंतीनी। 22 मार, बी ब्यफ, क्यारश भेडा नेल्ल क्योरशा हना यो, एको इश डा मुर आन कली गाप्पा डा? समुन्द्र डा डांइ नेल्ल रेशशा हना यो, नेल्ल आन कली गाप्पा डा?" देंत।

23 मिनु परमप्रभु यावेमी मोसा कली "मार, आं सक्ति ग्युम्शो बाक्बा डा? आं देंशो लोत्र गाप्पाक्म को मगाप्पाक्मे, तुइक्नेवे" देंत। यसैया ५०:२; यसैया ५९:१

24 मोपतीके मोसा लाइगा गूशा, मुर नेल्ल आन कली परमप्रभु यावे आ देंशो लोत्र नैपाइक्तीमी। मिनु मेको मुर आन दाते डा ७० जना खाल्पा आन कली ताम्बु आ एर ओंथ राप्पाइक्मी। 25 मिनु नोले परमप्रभु यावे गोस्सुमी उइ आगा तोइश्या, मोसा नु लोत्र पाप्तु। मिनु मेकोमी मोसा आ आगा बाक्शो सोक्त् इक्का लाइश्या, मेको ७० जना खाल्पा आन तार वोइक्तु। मिनु मेको सोक्त् मेको आन तार नांइसेनु, मेकोपुकीमी परमप्रभु यावे आ लोत्र पाप्तेक्म। तन्न नोनोले मो मपाम।

26 मिनु ७० जना खाल्पा आन दातेमी एल्दाद नु मेदाद माइशो मुर निक्शी बाक्ताक्म। मेको आस नें यो ब्रेक्शो बाक्त्। तन्न मेको निक्शी गुम्तीक ताम्बुम मलसा बाक्त्। मिनु परमप्रभु यावे आ सोक्त् मेको आस तार यो नांइसे बाक्त्। मिनु मेको निक्शीमी मुर आन बाक्तीकेमी परमप्रभु यावे आ लोत्र पाप्से बाक्त्। 27 मिनु वोंइश मुर का दोरशा जाक्शा, मोसा कली "एल्दाद नु मेदादमी मुर आन बाक्तीकेमी परमप्रभु यावे आ लोत्र पाप्ताक्म" देंत।

28 मिनु नून आ तौ यहोसु मोसा कली वारच पाइब बाक्त्। मेको मोसा आ योव्रशो मुरुमी मोसा कली "हजुर, आं होव्रप मेको आस कली तेक्कीन" देंत। गन्ती १३:१६; प्रस्थान २४:१३

29 तन्न मोसामी मेको कली "मार, आं पर्वम गे ईख पाइब दुमे? परमप्रभु यावेमी आ सोक्त् आ मुर नेल्ल आन तार वोइश्या, मेको नेल्ल परमप्रभु यावे आ लोत्र पाइब दुम हना, गिश रिम्शो दुम वा" देंत। योएल ३:१; मर्कुस ९:३८-३९ 30 मिनु मोसा नु इस्राएली खाल्पा मुर आन बाक्तीके लेक्तेक्म।

## इस्राएलीपुकीमी बटटाइ ब्वशो

31 मिनु नोले परमप्रभु यावेमी फश पपाइक्तु। मिनु मेको फशेमी समुन्द्र रे बटटाइपुकी चाक्त्। मिनु मुर आन बाक्तीक आ एर ओंथ नेल्ल नाइक्पाइक्त्। काबु डा नाक्त् डा लां सम्म कुबीत निक्निक्शी थांइशो पा नांइसाक्म। कुबीत का ०.५ मिटर खोदेंशो बाक्ब। प्रस्थान १६:१३ 32 मिनु मुरपुकीमी मेको नाक्त् रे, नाक्दो रे नु आ दीसा नाक्त् सम्म मेको ग्याइक्ताक्म। नेल्ल क्येडा इक्का खोइ ग्याइक्बमी यो १० होमेर ग्याइक्ताक्मे। मिनु मेकोपुकीमी आन बाक्तीक एर ओंथ नेल्ल सोत्रपाइक्तेक्म। होमेर का २२० लिटर रिक्ब पुक्तीके का बाक्ब। 33 तन्न मेकोपुकीमी श्ये ब्वना ब्वन परमप्रभु यावे मेको आन पर्वम शुश गाइक्ताक्व। मिनु परमप्रभु यावेमी मेको आन कली थम ठेयब बेक्तीक रोइ पपाइक्तीमी। 34 मोपतीके मेको बाक्तीके आ नें किब्रोथ-हत्तावा वोइक्तेक्म। मारदे हना मेकेर शुश वाल्ब मुर आन कली थिम्तेक्म।

35 मिनु मुरपुकी किब्रोथ-हत्तावा रे पा गाक्शा, हसेरोथ गे लाम्तेक्म।

## हारून नु मिरयाम गाइशो

12 मिनु हसेरोथमी बाक्मानु, मोसामी कूश रागी डा मीश चाक्तीके मिरयाम नु हारूनमी मोसा कली मरिम्शो लोत्र पाप्ताक्म। मारदे हना मेकोमी कूश रागी डा मीश ग्युंभे पशो बाक्त्। प्रस्थान २:२१ 2 मिनु मेको निक्शीमी "मार, परमप्रभु यावेमी मोसा नु ला लोत्र पशो बाक्बा डा? मार, मेकोमी गोपुकी नु यो लोत्र मपशो बाक्बा डा?" देंताक्म। मिनु परमप्रभु यावेमी मेको लोत्र नेंतु। 3 मोसा चहिं रागी डा मुर नेल्ले आन क्येडा ब्रेम्शो मुर बाक्त्।

4 मिनु परमप्रभु यावेमी रीब पा मोसा, हारून नु मिरयाम आन कली "गे सांफा, गुम्तीक ताम्बुम रे गूडीन" देंत। मिनु मेको सांफा गूतेक्म। 5 मिनु नोले परमप्रभु यावे गोस्स के थामम यिशा गुम्तीक ताम्बु आ ओव्रतीक राप्शा, हारून नु मिरयाम आस कली ब्रेत्ताक्मसी। मिनु मेको निम्फा जाक्ताक्म। प्रस्थान १६:१० 6 मिनु मेकोमी "आं लोत्र नेनीन। गेपुकी इन दातेमी परमप्रभु यावे आ लोत्र पाइब बाक्त् हना, गो मेको कली कोंइतीकेम तपांइसीनुड। गो मेको नु आ डोमुमी लोत्र पाइनुड। 7 तन्न आं गेय पाइब मोसा नु मोदेंशो मपाइनुड। मेको आ गेय नेल्लेमी थमा सुइक्का पुंइसीशो बाक्ब। हिब्रू ३:२ 8 गो मेको नु कोव्रमुशा लोत्र पाइनुड। मिनु मेको नु रुप्चा डा लोत्र पा खुइशो लोत्र मपाइनुड। मिनु मेको आं नेक्था जाक्ने चाप्ब। मारदे गे आं गेय पाइब मोसा आ पर्वम मरिम्शो लोत्र पचा काइ महिंसी?" देंत। प्रस्थान ३३:११; ब्यवस्था ३४:१० 9 मिनु परमप्रभु यावेमी मेको आस पर्वम शुश गाइक्ताक्व। मिनु मेको गाक्त्।

10 मिनु मेको गोस्स ताम्बु आ तार रे लमेनु, मिरयाम कोव्रर मुशा पुं खोदेंशो बुश दुम्त्। मिनु हारूनमी मिरयाम कली कोव्रडानु, मेको कोव्ररी दुम्ने थुम्शो बाक्त्। ब्यवस्था २४:९ 11 मिनु हारूनमी मोसा कली "आं प्रभु, गो मूर्ख दुम्शा, पाप पशो आ पर्वम आंस कली सजाइ मगेने। 12 एको कली आ आम आ कोव्रज रे गूमेनु, आ रां फेके का राक्शो शाम्शो आल खोदेंशो दुम्चा मगेने" देंत। 13 मिनु मोसामी परमप्रभु यावे कली "परमप्रभु, एको कली सापतीन" दे पुंइतु। प्रस्थान १५:२६ 14 मिनु परमप्रभु यावेमी मोसा कली "मार, मेको आ आफोमी आ कुलुम तोक्शो हना, मेको ७ नाक्त् सम्म मुने मदोक्बा डा? मेको कली ७ नाक्त् सम्म मुर आन बाक्तीक क्येडा लाइगाम तिल्शा वोतो। मेको नोले ला लेशशा जाक्का गेवो" देंत। गन्ती १३:४६

15 मिनु मिरयाम ७ नाक्त् सम्म मुर आन बाक्तीक क्येडा लाइगाम तिल्शा वोइक्का पुंइसाक्व। मिनु मिरयाम कली लेशशा मचाक्गमे सम्म मुरपुकी यो मगाक्म। 16 मिनु मेको आ नोले मेकोपुकी हसेरोथ रे गाक्शा, पारान डा गोरशो रागीम आन बाक्तीक सेल्लेक्म।

कनान रागी कली क्यारी पशो  
ब्यवस्था १:१९-२५

13 मिनू परमप्रभु यावेमी मोसा कली 2 “गे कनान रागी क्यारी पाइब मुरपुकी सोइक्तो। गो मेको रागी इस्राएली आन कली गेनुड। मेको आन थर थर रे पा मुर का का सोइक्तो। मेको आन मुर आन दाते डा ठेयब मुर दुम्चा माल्नीम” देंत।

3 मिनू परमप्रभु यावे आ देंशो खोदेंशो पा, मोसामी मेको क्यारी पाइब आन कली पारान डा गोरशो रागी रे सोइक्ताक्मी। मेको नेल्ले इस्राएली आन दाते डा ठेयब मुर बाक्तेक्म। 4 मिनू सु सु बाक्तेक्म देंशा हना, रूबेन आ थर रे जाक्कुर आ तौ शम्मुआ, 5 सिमियोन आ थर रे होरी आ तौ शाफात, 6 यहूदा आ थर रे यपुन्ने आ तौ कालेब, यहोसु १४:७ 7 इस्साकार आ थर रे योसेफ आ तौ इगाल, 8 एफ्राइम आ थर रे नून आ तौ होशेआ, गन्ती १३:१६ 9 बेन्यामीन आ थर रे रफु आ तौ पाल्ती, 10 जबूलून आ थर रे सोदी आ तौ गददीएल, 11 योसेफ आ तौ मनस्से आ थर रे सूसी आ तौ गाददी, 12 दान आ थर रे गेमल्ली आ तौ अम्मीएल, 13 आशेर आ थर रे मिकाएल आ तौ सेथुर, 14 नाप्ताली आ थर रे वोपसी आ तौ नाहबी, 15 गाद आ थर रे माकी आ तौ गूएल बाक्तेक्म।

16 मिनू मोसामी मेको रागी कली क्यारी पथ सोइश्शो मुर आन नें एकोन बाक्नीम। मोसामी नून आ तौ होशेआ आ नें यहोसु वोइक्तु। गन्ती ११:२८; १इतिहास ७:२७

17 मोसामी मेको आन कली कनान रागी कली क्यारी पथ सोइक्ताक्मी। मिनू मोसामी मेको आन कली “गे एक रे लशा, नेगेब माइश्शो दक्खिन डा रागी रे पहाड गे लने। 18 मेको रागी दोदेंशो बाक्मे, मेकेर डा मुरपुकी बोल्यो बाक्मा कों, मबाक्मा, शुश बाक्मा कों, इच्का खोइ ला बाक्मा? मेको नेल्ल कोवडीन। 19 मिनू मेको आन रागी रिश्शो बाक्म कों, मरिश्शो बाक्म? मिनू मेको आन सहर गारो हिरशो बाक्म कों महिरशो बाक्म? 20 मिनू मेको रागी डा खप दोदेंशो बाक्मे, मलिलो बाक्म कों, पाडकोक्च बाक्म? मेकेर रवापुकी बाक्मा कों, मबाक्मा? महिब दुमीन। मिनू मेको रागी डा फल फुल चाक्कीन” दे माइक्तीमी। मेना डॉइती डा अडगुर मीची जाक्शो बाक्त।

21 मिनू मेकोपुकी ग्येत्थ लशा, जीन डा गोरशो रागी रे रेहोब सम्म मेको रागी क्यारी पाक्तेक्म। रेहोब लेबो-हमाथ आ नेक्था बाक्माक्त। 22 मिनू मेकोपुकी नेगेब गे ग्येत्थ लशा, हेब्रोन सहर जाक्दीम्मा बाक्त। मेकेर अनाक आ मुर अहीमान, शेशे नु तल्मै बाक्बाक्तेक्म। हेब्रोन चहिं इजीप्त डा सोआन सहर क्येडा ७ बर्स डॉइती सेल्शो बाक्त। 23 मिनू नोले एश्कोल डा दिममी जाक्दीत्तेक्म। मिनू मेकेर अडगुर सिश्शो राशी क्योरशा, मेको कोक्के कामी शुइश्शा मुर निक्शीमी कुरशा चाक्तेक्स। मेकोपुकीमी अनार नु फोवशी गोडा यो चाक्तेक्म। 24 मिनू मेको ठेयब अडगुर खोइक्तीके नोले मेको बेंसी आ नें एश्कोल डा बेंसी वोइक्तेक्म।

क्यारी पथ लाइब आन लोव

25 मिनू ४० नाक्ती नोले मेकोपुकीमी मेको रागी क्यारी पशा, लेत्तेक्म। 26 मिनू लेशशा, मोसा, हारून नु इस्राएली नेल्ल आन बाक्तीके, पारान डा गोरशो रागी कादेशमी जाक्तेक्म। मिनू मेको क्यारी पाइबपुकीमी मोसा, हारून नु मुर नेल्ल आन कली आन तशो शेंताक्मे। मिनू मेको रागी डा फल फुल कोइताक्मे। गन्ती २०:१; उत्पत्ती १६:१४; उत्पत्ती २०:१; ब्यवस्था १:१९,४६; यहोसु १४:६-७ 27 मिनू मोसा कली “गोपुकी इन सोइश्शो रागीमी जाक्दीत्तक। मेको रागीम थमा पा दूध नु खुदो शुश बाक्ब। मिनू मेको रागी डा फल फुल एकोन बाक्नीम। प्रस्थान ३:८,१७ 28 तन्न मेकेर बाक्ब मुरपुकी बोल्यो बाक्नीम। मिनू मेको आन सहरपुकी गारोम हिरशो नु थम ठेयब बाक्नीम। मिनू गोपुकीमी मेकेर अनाक आ मुर आन कली यो ताइतक। 29 मिनू अमालेक आ मुर नेगेब रागीम बाक्बाक्तेक्म। मिनू हिन्ती, यबुसी नु एमोरी पहाडम बाक्बाक्तेक्म। मिनू कनानी ठेयब समुन्द्र आ नेक्था नु यर्दन खोला आ नेक्था बाक्बाक्तेक्म” देंतेक्म।

30 मिनू कालेबमी मोसा आ डॉइती बाक्शो मुर आन थुं नाइक्पाइक्चा, दे मोसा कली “गोपुकी रीब पा लशा, मेको रागी इं के सेल्य। मारदे हना गो मेको थमा पा ग्राने चाज्य” देंत। गन्ती १४:६

31 मिनू नोले मेको नु लाइब मुरपुकीमी “गोपुकी मेको मुरपुकी नु लडाइ पथ लने मचाज्य। मारदे हना मेकोपुकी गो इं क्येडा शुश बोल्यो बाक्नीम” देंतेक्म। 32 मोपा मेकोपुकीमी क्यारी पथ लतीक रागी आ पबर्म मरिश्शो लोव नेंपाइश्शा “गोपुकीमी क्यारी पथ लशो रागीमी आ मुर आन कली साइक्ब ताइतक। मिनू आंइ तशो मुरपुकी थम ठेयब बाक्नीम। 33 गोपुकीमी मेकेर नेफीलीमपुकी यो ताइतक। अनाक आ मुर नेफीलीम रे दुश्शो बाक्नीम। मिनू गो मेको आन कली तशा, गो आंमा माले खोदेंशो तांइसाक्क। मिनू गो मेको आन डॉइती यो मोदेंशोन तांइसीनय” देंतेक्म। ब्यवस्था १:२८; ब्यवस्था ९:२

इस्राएलीपुकीमी थमा मसुइश्शो

14 मिनू मेको नाक्दो मेको मुर नेल्ले वाइ ब्रेश्शा डाक्तेक्म। ब्यवस्था १:२६-४४ 2 मिनू इस्राएली नेल्ल मोसा नु हारून आस पबर्म गन गन पाक्तेक्म। मिनू नेल्लेमी मेको आस कली “गोपुकी इजीप्त उइ बेक्शो नकी हना, रिश्शो दुम वा। एको गोरशो रागीम बेक्शो नकी हना यो, दुम वा। गन्ती ११:१; प्रस्थान १६:२-३; प्रस्थान १७:२-३ 3 मारदे परमप्रभु यावेमी आंइ कली तरवारम साइक्पाइक्चा कली एको रागी चाक्मा? गो आंइ मीशपुकी नु आंइ आलपुकी रोइश्शा लाइक्नीम। गोपुकी इजीप्त रागी लेत्वा रिश्शो ममाइ डा?” देंतेक्म। भजन संग्रह १०६:२४-२६ 4 मिनू मेकोपुकी “मुल गो लां कोइब मुर का योवशा, इजीप्त रागीम लेय्य” देंमुक्तेक्म।

5 मिनू मोसा नु हारून मेकेर बुक्शो इस्राएली नेल्ल आन डॉइती खुम्की पा बाप्ताक्स। गन्ती १६:४ 6 मिनू मेको रागीम क्यारी पथ लाइब नून आ तौ यहोसु नु यपुन्ने आ तौ कालेबमी सुर्ता पा आस आस वा खाक्ताक्स। गन्ती १३:६,८,१६,३० 7 मिनू मेको निक्शीमी इस्राएली नेल्ल आन कली “गोपुकी आंइ क्यारी पथ लशो रागी थम रिश्शो बाक्ब। 8 परमप्रभु यावे गोपुकी इं कली तशा ग्येरसाक्व हना, मेकोमी इं कली मेको रागीम चाक्दीक्ब। मिनू मेको रागी दूध नु खुदो शुश बाक्शो रागी बाक्ब। मेको रागी इं कली गेब। गन्ती १३:२७ 9 गोपुकी परमप्रभु यावे कली गन गन मपने। मिनू मेको रागी डा मुर आन क्येडा महिनीन। मारदे हना गो मेको आन कली शोब्ले खोदेंशो पा नेक्नय। मेको आन कली प्रॉइब सुइ मबाक्नीम। परमप्रभु यावे गोपुकी नु बाक्ब। मेको आन क्येडा महिनीन” देंताक्स। गन्ती १३:३२ 10 तन्न मुर नेल्लेमी मेको आस कली “फुल्लु आप्नीकी” दे हिंच कोइताक्म। मेना परमप्रभु यावे आ छेडछेड इस्राएली नेल्ल आन कली गुम्तीक ताम्बुम तपांइसाक्व। प्रस्थान १७:४; प्रस्थान १६:१० 11 मिनू परमप्रभु यावेमी मोसा कली “एको मुरपुकीम गेना सम्म आं कली मटीनीमी? एको आन दातेम आं कोइशो चिन्ड तशा यो, गेना सम्म आं कली थमा मसुइक्नीमी? 12 गो मेको आन कली बेक्तीक रोइमी साइक्नुडमी। मेको आं मुर खोदेंशो मबाक्नीम। मिनू गो इ रे मेको आन क्येडा शुश नु बोल्यो जात का सेल्लुडमी” देंत। प्रस्थान ३२:१०-१४

13 मिनू मोसामी परमप्रभु यावे कली “मोदेंशो पाइतीनी हना, इजीप्त डा मुरपुकीमी एको लोव नेंनीम। मारदे हना गे मेको आन कली इन सक्तीमी मेकेर रे गुंइताक्नी। 14 एको रागी डा मुरपुकीम मेको आन कली नेंपाइक्नीम। परमप्रभु यावे, गे इन मुर आन दातेम बाक्शो बाक्नीनी, दे मेकोपुकीमी देंशो लोव नेंने थुश्शो बाक्नीम। परमप्रभु यावे, गे मेको आन डॉइतीन तपांइसीशो बाक्नीनी। मिनू इन गोस्स मेको आन तार बाक्शो बाक्ब। मिनू गे नाक्ती गोस्स के थामम नु नाक्दो मी के थामम बाक्शा, मेको आन डॉइती गाक्नीनी। प्रस्थान १३:२१-२२; गन्ती ९:१५-२३ 15 मिनू मुल गे एको मुर आन कली कालेमी साइक्तीनी हना, इन पशो नेंब रागी रागी डा मुरपुकीमी 16 ‘परमप्रभु यावेमी मेको आन कली गेनुड, दे कसम जशो रागीम चाक्दीन्ने मचब। मोपतीके मेको आन कली गोरशो रागीम साइक्तु’ देंनीम। ब्यवस्था ९:२८; यहोसु ७:८-९

17 मोपतीके, परमप्रभु, इन ठेयब सक्ति कौंडीदीन। गे इन थोक्शो पशो लोव्र खाप्पीन। 18 'परमप्रभु यावे रीब पा मगाइक्व नु गेना हना यो दाक्व, प्रस्थान ३४:६-७ मेकोमी मरिश्शो पशो नु दूली पशो क्याम्ब, तन्न दोस ताइब कली दोस मताइब मदेब। आन आम आफ आन पशो पाप मेको आन आल, चच, युइ नु युइ आन आल सम्म रपाइक्व' दे थोक्शा लोव्र पशो बाक्तीनी। 19 मिनु गे मेको मुर आन मरिश्शो पशो इन ठेयब नु गेना हना यो दाक्तीकेमी क्याम्दीन। गे इन मुर आन कली इजीप्ट रे एक सम्म आन मरिश्शो पशो क्याम्शो खोदेंशो पने" दे पुंडतु। प्रस्थान ३४:१०

20 मिनु परमप्रभु यावेमी "गे इ पुंडशो खोदेंशो पा एको मुर आन मरिश्शो पशो क्याम्नुड। 21 मो हना यो गो थमा पा, रागी नेल्ले आं सक्तिमी प्रिनुड। प्रस्थान ९:१६ 22 मेकोपुकीमी इजीप्टमी नु गोरशो रागीमी आं ठेयब सक्ति नु छक लाक्वा डा गेय तशा यो, आं कली १० खेयप नाक्शा, मटीब दुम्शा, मेको नेल्लेमी 23 मेको आन किकी पिपी आन कली कसम जशा 'गेनुड' देंशो रागी ओव्रचा मताइनीम। मिनु आं कली काइ मदाक्वपुकीम मेको रागी मताइनीम। भजन संग्रह ९५:११; हिब्रू ३:११, १७-१९ 24 तन्न आं गेय पाइब कालेब आ थुमी अर्को सोक्ती बाक्व। मिनु मेकोमी आ थुं नेल्लेमी आं कली टिशो बाक्व। गो मेको कली आ क्यारी पथ लशो रागी चाक्दील्लुड। मिनु मेको आ तौ चच युइ आन रागी दुम्ब। यहोसु १४:६-९ 25 मिनु अमालेक आ मुर नु कनानीपुकी बेसीम बाक्तीके, गेपुकी दीसा लने। मिनु लल समुन्द्र गे पा गोरशो रागी लने" देंत।

26 मिनु परमप्रभु यावेमी मोसा नु हारून आस कली 27 "गेना सम्म एको मरिश्शो मुरपुकीम आं पर्वम गन गन पाइनीमी? गो इस्राएली आन आं कली गन गन पशो नेंता। मेकोपुकीम आं कली गन गन पाइनीम। प्रस्थान ३२:३४-३५ 28 गे मेको आन कली 'परमप्रभु यावेमी थमा पा इन देंशो खोदेंशो पा इन कली पाइनुड। 29 गे नेल्ल गोरशो रागीमी बेक्वा माल्नीनी। नें ब्रेक्शो नेल्ले, २० बर्स गाप्शो नु मेको क्येडा लाक्शो आं कली गन गन पाइब बेक्वा माल्नीनी। १कोरिन्थी १०:१० 30 आं कसम जशा, इन कली गेनुड देंशो रागीमी सुइ ओव्रचा मताइनीम। यपुन्ने आ तौ कालेब नु नून आ तौ यहोसु ला ओव्रचा ताइनीस। 31 मिनु रोइक्वा पुंडसीनीम, देंशो इन आल आन कली चहिं गो मेक चाक्दील्लुडमी। मिनु मेकोपुकीमी इन मदाक्शो रागीम बाक्शा, तुइक्नीम। 32 गेपुकी चहिं एको गोरशो रागीमी बेक्नीनी। 33 मिनु इन आल मेको गोरशो रागीमी ४० बर्स सम्म गोठला दुम्शा हिरचा माल्नीनीम। मोपा इन मटिशो आ पर्वम श्येत जाइनीम। गे नेल्ल इन नेल्ल क्येडा नोले डा मुर मबेक्नी सम्म मोदेंशो पा हिरचा माल्नीनीम। प्रस्थान १६:३५; ब्यक्वा २:७; ब्यक्वा ८:४ 34 गेपुकीमी मेको रागी क्यारी पचा कली ४० नाक्व सम्म माल्शो बाक्तीनी। मोपतीके नाक्व का डा बर्स का पा ४० बर्स सम्म गेपुकीम इन मरिश्शो पशो आ पर्वम श्येत जचा माल्नीनी। मिनु गो इन पर्वम गाइक्ताक्व, दे तुइक्नीनी' दे येरमीया २:१९; गन्ती ३२:१३ 35 गो, परमप्रभु यावेमी, लोव्र पाता। मिनु गो एको आं कली गन गन पा बुक्शो मरिश्शो मुर आन कली थमा पा मो पाइनुड। मेको नेल्ल एको गोरशो रागीमीन बेक्शा नुप्नीम" देंत।

36 मिनु मोसाम क्यारी पथ सोइश्शो मुरपुकी लेश्शा जाक्शा मेको रागी आ पर्वम मरिश्शो लोव्र पा मुर नेल्ल आन कली परमप्रभु यावे कली गन गन पपाइक्तेक्म। १कोरिन्थी १०:५, १०; यहूदा:५ 37 मेको रागी आ पर्वम मरिश्शो लोव्र चाक्व मुर नेल्ल परमप्रभु यावे आ डोंइती बेक्वा माल्नीनीम। 38 मिनु मेको रागी क्यारी पथ लाइब आन दाते डा नून आ तौ यहोसु नु यपुन्ने आ तौ कालेब ला ब्रौइनीस।

39 मिनु मोसाम मुर नेल्ल आन कली एको लोव्र नेंपदानु, मुर नेल्ल शुश रौका पाम्तेक्म। 40 मेकोपुकीमी सुनी कना बोक्शा इर पहाड गे डोइश्शा "गेपुकी मुल एक रे परमप्रभु यावे आ कबल पशो रागी लाइनीकी। मारदे हना, गेपुकीम पाप पशो बाक्नीकी" देंतेक्म। ब्यक्वा १:४१ 41 तन्न मोसामी मेको आन कली "मारदे गेपुकीमी परमप्रभु यावे आ लोव्र लाक्नीनी? गे मग्रानीनी। 42 गे इर मडोंइसीन। मारदे हना परमप्रभु यावे गेपुकी नु मबाक्व। मो पाइतीनी हना, इन जोरी सत्रुपुकीमी इन कली साइक्नीम। 43 मिनु अमालेक आ मुर नु कनानीपुकीमी इन कली लडाइ तोइनीम। मिनु गेपुकी तरवारम साइक्वा पुंडसीनीनी। मारदे हना गेपुकी

परमप्रभु यावे कली टिचा प्रोंइतीनी। मोपतीके परमप्रभु यावे इन दातेमी मबाक्व" देंत। 44 मो हना यो मेकोपुकीम लोव्र मनेंथु, इर पहाड गे डोंइसाक्म। तन्न परमप्रभु यावे आ कबल पशो सन्दोस गुम्तीक ताम्बुम बाक्त। मिनु मोसा मुर आन बाक्तीक उइ बाक्त। 45 मिनु मेको पहाडम बाक्व अमालेक आ मुर नु कनानीपुकी उइ तोइश्शा, मेको आन कली साइक्ना साइक्न होरमा सम्म खेदा पाम्तेक्म। गन्ती २१:३; ब्यक्वा १:४४

दोपा चढ़ेचा, दे अरेशो

15 परमप्रभु यावेमी मोसा कली 2 "गे इस्राएली आन कली 'गे इन कली गेशो बाक्तीक रागीम जाक्दीन्नीनु, 3 गे कसम जशो खाप्चा कली मीम चोशा चढ़ेतीक चढ़ेचा दाक्ताक्नी हना, यो, चोशा चढ़ेतीके चढ़ेचा दाक्तीनी हना यो, क्योरशा चढ़ेचा दाक्ताक्नी हना यो, इन कली देंशो चाडमी ग्येरशा परमप्रभु यावे कली चढ़ेचा दाक्ताक्नी हना यो, गे इन गोठ नु बगाल रे परमप्रभु यावे कली आ दाक्शो ब्रौवशो रिना पाइश्शो चढ़ेचा माल्नीनी। 4 मिनु सुमी परमप्रभु यावे कली चढ़ेबा, मेकोमी अन्न चढ़ेतीके यो चढ़ेचा माल्ब। मेको अन्न चढ़ेतीक एफाह का डा १० भाग डा भाग का रिश्शो फस, हिन का डा ४ भाग डा भाग का तेल ब्वाइश्शा, चढ़ेचा माल्नीनी। एफाह का २२ लिटर पुक्तीके बाक्व। हिन का ४ लिटर खोदेंशो बाक्व। लेवी २:५; गन्ती २८:५ 5 गे चोशा चढ़ेतीक पाठा का का नु तूचा थोव्रक चढ़ेतीक हिन का डा भाग सां डा भाग का अडगुर शांबु यो चढ़ेचा माल्नीनी। गन्ती २८:७; प्रस्थान २९:४०; लेवी २३:१३ 6 सांड का चढ़ेचा दाक्तीनी हना, मेको नु अन्न चढ़ेतीक यो चढ़ेचा माल्नीनी। मेको अन्न चढ़ेतीक एफाह का डा १० भाग डा भाग निक्शी रिश्शो फस नु हिन का डा भाग सां डा भाग का तेल ब्वाइश्शा, चढ़ेचा माल्नीनी। 7 तूचा थोव्रक चढ़ेतीक कली हिन का डा भाग सां डा भाग का अडगुर शांबु चढ़ेचा माल्नीनी। मेको परमप्रभु यावे कली आ दाक्शो ब्रौवशो रिना पाइश्शो चढ़ेतीक बाक्व।

8 मिनु कसम जशो खाप्चा कली कि दुशा बाक्वा आ पर्वम परमप्रभु यावे कली चोशा चढ़ेचा कली कि क्योरशा चढ़ेचा कली ब्यफ का चढ़ेतीनी हना, 9 मेको नु अन्न चढ़ेतीके यो चढ़ेचा माल्नीनी। गे एफाह का डा १० भाग डा भाग सां रिश्शो फस नु आधा हिन तेल ब्वाइश्शा, चढ़ेचा माल्नीनी। एफाह का २२ लिटर पुक्तीक बाक्व। हिन का ४ लिटर पुक्तीके बाक्व। 10 मिनु तूचा थोव्रक चढ़ेतीक कली आधा हिन अडगुर शांबु यो मेको चोशा चढ़ेतीक नु चढ़ेचा माल्नीनी। मेको परमप्रभु यावे कली आ दाक्शो ब्रौवशो रिना पाइश्शो मीम चोशा चढ़ेतीके बाक्व।

11 मिनु मेको ब्यफ, सांड, बोका, पाठा नु आइक्व पाठा चढ़ेशोनु, मो पचा माल्नीनी। 12 गेपुकीम दोशो चढ़ेनीनी, मेको नेल्ल आन कली का का पा मो पचा माल्नीनी। 13 मिनु इस्राएली सु सुमी परमप्रभु यावे कली ब्रौवशो रिना पाइश्शो मीम चोशा चढ़ेतीके चढ़ेनीमी, मेकोपुकीमी मोदेंशो पचा माल्नीनी। 14 मिनु अर्को रागी डा मुर, गेपुकी नु इक्का नाक्व बाक्त हना यो, गेना हना यो बाक्त हना यो, मेकोमी परमप्रभु यावे कली आ दाक्शो ब्रौवशो रिना पाइश्शो मीम चोशा चढ़ेतीक चढ़ेचा दाक्ताक्व हना, इन खोदेंशो पा पचा माल्ब। 15 मिनु इन गुम्तीकेमी गेपुकी नु बाक्शो अर्को रागी डा मुर आन कली नेल्ल पाला सम्म एको पचा माल्शो कान बाक्व। गेपुकी नु अर्को रागी डा मुर परमप्रभु यावे आ डोंइती खाल का डा बाक्नीनी। प्रस्थान १२:४८-४९ 16 गेपुकी नु गे नु बाक्शो अर्को रागी डा मुर आन कली अरेशो लोव्र नु ठीक पतीक लोव्र खाल डा बाक्वा माल्ब' देंचा माल्नेवे" दे परमप्रभु यावेमी मोसा कली देंत।

डोंइती डा शोब्ले

17 परमप्रभु यावेमी मोसा कली 18 "गे इस्राएली आन कली परमप्रभु यावेमी इन कली लाइश्शो, रागीम जाक्दीन्नीनु, 19 गेपुकीमी मेको रागी डा अन्न जनीनु, परमप्रभु यावे कली कोसेली का गेचा माल्नीनी। 20 मिनु इन डोंइती निशो फस रे सल्लो शोब्ले का परमप्रभु यावे कली गेचा माल्नीनी। खला रे क्युक्शा चढ़ेशो खोदेंशो पा चढ़ेचा माल्नीनी। नेहेम्याह १०:३८; इजीकीएल ४४:३० 21 मिनु गेपुकीमी नेल्ल इन पाला सम्म इन डोंइती डा



निशो फस रे शोब्ले का परमप्रभु यावे कली क्युक्शा चढ़ेतीके कली चढ़ेचा माल्नीनी।

### मतुइक्थु पशो पाप

22 मिनू गेपुकीमी मतुइक्थु परमप्रभु यावेमी मोसा कली शेंशो लोव्र नेल्लेमी का मपाइतीनी हना, *लेवी ४:१३-२१* 23 परमप्रभु यावेमी मोसा रे पा इन कली नु इन नोले डा मुर आन कली शेंशो लोव्र मपाइतीनी हना, 24 गे नु गुम्तीक डा मुरुमी मतुइक्थु पशो पाप आ परबम मेको गुम्तीक डा मुर नेल्लेमी ब्यफ का चोशा चढ़ेचा माल्नीम। मेको परमप्रभु यावे कली आ दाक्शो ब्रोव्रशो रिना पाइश्शो बाक्ब। मेको आ शेंशो खोर्देशो पा अन चढ़ेतीक नु तूचा थोव्रक चढ़ेतीक यो चढ़ेचा माल्नीम। मिनू पाप आ परबम बोका का यो चढ़ेचा माल्नीम। 25 मिनू चढ़ेबमी इस्राएली नेल्ल आन परबम पाप क्याम्तीक गेय पचा माल्ब। मिनू मेकोपुकी आन पाप क्याम्चा ताइनीम। मारदे हना मेकोम मतुइक्थु पाप पशो बाक्नीम। मिनू मेकोपुकीमी परमप्रभु यावे कली मीम चोशा चढ़ेतीक चढ़ेचा माल्नीम। मेको आन मतुइश्शो पाप आ परबम परमप्रभु यावे कली चढ़ेचा माल्नीम। 26 मिनू गुम्तीक डा इस्राएली नु मेको नु बाक्शो अर्को रागी डा मुर नेल्ल माफ ताइनीम। मारदे हना मेको मुर नेल्लेम मतुइक्थु पाप पशो बाक्नीम।

27 मिनू सुइमी मतुइक्थु पाप पाप्नु हना, मेकोमी आ पाप आ परबम बर्स का गाप्शो क्यारश आ पाठी का चढ़ेचा माल्ब। *लेवी ४:२७-२८* 28 मिनू चढ़ेबमी मेको मुर आ पशो पाप मतुइक्तीके, परमप्रभु यावे आ डोंइती पाप क्याम्तीक गेय पचा माल्ब। मिनू नोले मेको मुरुम माफ ताइब। 29 मतुइक्थु पाप पाइब इस्राएलीपुकी नु मेको नु बाक्ब अर्को रागी डा मुर नेल्ल आन कली मतुइक्थु पाप पशो आ परबम पचा माल्शो गेय खाल का डा बाक्ब।

30 तन्न इस्राएली बाक्त्त हना यो, अर्को रागी डा मुर बाक्त्त हना यो, तुइश्शा यो, मटिथु पाप पाप्नु हना, मेको परमप्रभु यावे कली पाप पाइब बाक्ब। मेको मुर कली गुम्तीके रे तिल्चा माल्ब। *प्रेरित १३:३८; हिब्रू १०:२६-२९* 31 मिनू मेको मुरुमी परमप्रभु यावे आ लोव्र लाक्शा, आ अरेशो काइ मटितीके, मेको मुर तिल्चा पुंडसीशा, आ पाप राइब” देंत।

### मुरुम नाइक्तीक नाक्त्त गेय पशो

32 मिनू इस्राएलीपुकी गोरशो रागीम बाक्मानु, मेकोपुकीमी नाइक्तीक नाक्ती मुर का कली शी खुप्शो थित्तेक्म। *प्रस्थान २०:८-१०* 33 मिनू मुरपुकीमी मेको शी खुप्ब कली मोसा, हारून नु मुर नेल्ल आन डोंइतीमी चाक्तेक्म। 34 मिनू मेको कली मार पाइक्चा माल्बा मतुइक्तीके चोक्शा वोइक्तेक्म। *लेवी २४:१२* 35 मिनू परमप्रभु यावेमी मोसा कली “मेको मुर कली साइक्चा माल्ब। गुम्तीक डा मुर नेल्लेमी मेको कली मुर आन बाक्तीके रे गुंडशा, फुल्लु आप्शा साइक्चा माल्नीम” देंत। *प्रस्थान ३१:१४-१५; प्रस्थान ३५:२-३* 36 मिनू गुम्तीक डा मुर नेल्लेमी मेको कली मुर आन बाक्तीके रे गुंडशा, फुल्लु आप्शा साइक्तेक्म। परमप्रभु यावेमी मोसा कली दोर्देशो पा अरेवा, मोर्देशो पा मुरपुकीमी पाप्तेक्म।

### परमप्रभु आ शेंतीके मिम्चा कली

37 मिनू लेंशा परमप्रभु यावेमी मोसा कली 38 “गे इस्राएली आन कली ‘गेपुकीमी इन फेक्तीक वा आन सुरमी नीलो श्येले के फेने सेलीन। मोर्देशो नेल्ल इन पाला सम्म पचा माल्नीनी। *ब्यक्स्था २२:१२; मत्ती २३:५; प्रस्थान ३९:१* 39 मारदे मोर्देशो पचा माल्तीनी देंशा हना, गे मेको फेने तशा, परमप्रभु यावे आ शेंतीके नेल्ल मिम्शा, टिचा कली मोर्देशो पचा माल्नीनी। इन थुं डा दला दाक्स मपचा कली नु इन मिक्च कली पाप मपपाइक्चा कली मोर्देशो पचा माल्नीनी। 40 गे परमप्रभु यावे आ शेंतीक नेल्ल मिम्शा पचा माल्नीनी। मिनू गे इन परमप्रभु आ डोंइती ग्रांग्रा मदिशो दुम्चा माल्नीनी। 41 गो, परमप्रभु यावे, इन परमप्रभु नड। गो इन परमप्रभु दुम्चा कली इन कली इजीप्त्त रागी रे गुंडताक्नी। गो परमप्रभु यावे, इन परमप्रभु नड” देंचा माल्नेवे” देंत।

### कोराह, दाथान नु अबीराम

16 मिनू लेवी आ तौ कोहाथ, आ चच इच्चार, आ युड कोराह, नु रूबेन आ थर डा एलीआब आ तौ निक्शी दाथान नु अबीराम नु पेलेथ आ तौ ओन सल्ला पाप्तेक्म। *प्रस्थान ६:१६, १८, २१; गन्ती २६:७-९; यहूदा १:११* 2 मिनू मेकोपुकीम सहे निक्शी ५० जना इस्राएली ब्रेत्ताक्म। मेकोपुकी गुम्तीकेमी योव्रचा पुंडसीशो ठेयब मुर बाक्तेक्म। मेको आन कली मुर नेल्लेमी तुइश्शो बाक्तेक्म। मेकोपुकीम मोसा कली दोस गेप्तेक्म। *गन्ती १२:१-२* 3 मिनू मेकोपुकी बुक्शा, मोसा नु हारून आस कली “गे निक्शीमी थम मरिम्शो पाइतीसी। गुम्तीक डा मुर नेल्ले का का पा, ग्रांग्रा मदिशो बाक्नीम। मिनू परमप्रभु यावे मेको आन दातेमी बाक्ब। गे मारदे इस कली परमप्रभु यावे आ मुर आन क्येडा ठेयब सेल्सीनीसी?” देंतेक्म। 4 मिनू मोसा मेको लोव्र नेंशा, खुम्की पा बाप्त्त। *गन्ती १४:५* 5 मिनू मेकोमी कोराह नु मेको आ मुर नेल्ल आन कली “दीसा सुनी परमप्रभु यावेमी सु मेको आ मुर बाक्बा, सु ग्रांग्रा मदिशो बाक्बा नु सु आ नेक्था जाक्दीत्वा गेबा, मेको तुइक्पाइक्ब। *२तिमोथी २:१९* 6 कोराह, गे नु बाक्ब मुर नेल्लेमी थनौरो चाक्शा जाक्कीन। 7 मिनू गे दीसा मेकेर मी कुर पा परमप्रभु यावे आ डोंइती धूप चोने। मिनू परमप्रभु यावेमी सु कली योव्रबा, मेको ग्रांग्रा मदिशो बाक्ब। लेवीपुकी, गे थम मरिम्शो पाइतीनी” देंत। 8 मिनू मोसामी कोराह कली “गे लेवीपुकी नेनीन। 9 इस्राएली आन परमप्रभु यावेमी इन कली आ नेक्था जाक्चा गेशा, आ ताम्बु डा गेय पचा कली मुर आन दाते रे योव्रशो बाक्ब। गे गुम्तीक आ डोंइती राप्शा, मेको मुर आन गेय पचा, आइक्च मिम्नीनी? *गन्ती ३:६-१३; गन्ती ४:४-२०* 10 मेकोमी गे नु इ लोक्ब, लेवी नेल्ल आन कली आ नेक्था जाक्चा गेप्त्त। मार, गेपुकीम चढ़ेब आन गेय यो माल्नीनी? 11 गे नु इ मुर नेल्ले परमप्रभु यावे कली दोस गेशा बुक्तीनी। हारून सु बाक्बा डा? गे मेको कली गन गन पनी?” दे माइक्तीमी।

12 मिनू मोसामी एलीआब आ तौ दाथान नु अबीराम आस कली ब्रेत्थ सोइक्ताक्व। तन्न मेको निक्शीमी “गो मजाक्नस्कु। 13 गे आंइ कली दूध नु खुदो शुश बाक्शो रागी रे एको गोरशो रागीम साइक्च चाक्शा यो, मार, इन कली मजाक्दीम्मे? मिनू गे आंइ कली हुकुम यो पचा माल्नीसी? 14 गे आंइ कली दूध नु खुदो शुश बाक्शो रागीम चाक्दीनी? रू नु अडगुर रू गेनी? मार, गे एको मुर आन मिक्च फेत्वा दाक्नीनी? गोपुकी थमा पा मजाक्नीकी” देंताक्स। *प्रस्थान ३:८*

15 मिनू मोसा शुश गाइश्शा, परमप्रभु यावे कली “मेको आन चढ़ेशो मताक्कीन। गो मेको आन गधा का यो मताक्नु। गो मेको आन कली मरिम्शो यो मपड” देंत। 16 मिनू मोसामी कोराह कली “गे नु इ मुरपुकी नु हारून यो दीसा परमप्रभु यावे आ डोंइती जाक्कीन। 17 गे नेल्लेमी आंम आंम थनौरो चाक्शा, मेकेर धूप कुर पने। मिनू गे का का पा आंम थनौरो परमप्रभु यावे आ डोंइती चाक्कीन। गे नु हारूनम यो इस थनौरो चाक्कीस। मेको सहे निक्शी ५० ओटा थनौरो बाक्नीम” देंत। 18 मिनू मेको का का पा आन थनौरोम मी कुर पा धूप वोइक्तेक्म। मिनू मेकोपुकी मोसा नु हारून गुम्तीक ताम्बु आ ओव्रतीकेमी राप्तेक्म। 19 मिनू कोराहमी गुम्तीक डा मुर नेल्ल आन कली मोसा नु हारून आस परबम गन गन पचा, दे गुम्तीक ताम्बु आ ओव्रतीकेमी पुक्तीमी। मेना परमप्रभु यावे आ छेडछेड मेको नेल्ल आन डोंइती यूत्त। *गन्ती १६:१०*

20 मिनू परमप्रभु यावेमी मोसा नु हारून आस कली 21 “गे निक्शी मेको मुर आन रे दिलीस। मिनू गो याम कामी एको नेल्ल आन कली रोवल चिवल पोक्नुडमी” देंत। *उत्पत्ती १९:१४* 22 मिनू मोसा नु हारूनमी खुम्की पा “परमप्रभु मुर नेल्ल आन कली ब्रोंइचा गेब परमप्रभु, मुर कामी पाप पतीके गे मुर नेल्ल नु गाइक्नीनी?” देंताक्स। *अय्युब १०:१२; अय्युब १२:१०; २सामुएल २४:१७; गन्ती २७:१६*

23 मिनू परमप्रभु यावेमी मोसा कली 24 “एको मुर आन कली ‘कोराह, दाथान नु अबीराम आन बाक्तीक रे दिलीन’ दे माइक्मी” देंत। 25 मिनू मोसा बोक्शा दाथान नु अबीराम आस बाक्तीक लत। मिनू इस्राएली आन खाल्पापुकी यो लाप्तेक्म। 26 मिनू मेकोम नेल्ल मुर आन कली “मेको

मरिश्शो मुर आन ताम्बु रे दिलशा बाक्कीन। मेको आन के मारेइ मथिने। मो मपाइतीनी हना, मेको आन पापमी पतीके गोपुकी यो साइक्वा पुंडसीनीनी” दे माइक्तीमी। 27 मोपतीके मेकोपुकी कोराह, दाथान नु अबीराम आन ताम्बु रे दिल्लेक्म। मिनू दाथान नु अबीराम आस ताम्बु रे गूशा, मेको आस ताम्बु आ ओव्रतीकेम आस मीश नु आस आलपुकी नु राप्ताक्स। 28 मिनू मोसामी मेको नेल्ल आन कली “परमप्रभु यावेमी आं कली एको गेय पचा कली सोइश्शो बाक्ब, दे गे तुइक्नीनी। एको गेय नेल्ल गो आंमा पशो मनड। 29 मेको मुरपुकी अरु मुरपुकी खोदेशो पा बेक्तेक्म हना, गो परमप्रभु यावे आ सोइश्शो मनड। 30 तन्न परमप्रभु यावेमी नक गेय का पा, रागीम आ शोव पाक्शा, दाक्तु हना, एको आन मारेइ मारेइ सुन्दा सेसीन बेक्शो मुर आन बाक्तीके दोक्तेक्म हना, एकोपुकीमी परमप्रभु यावे आ लोव लाक्शो बाक्मा बाक्त, दे गोपुकीमी तुइक्नीनी” देंत।

31 मिनू मेको लोव पने थुमा नोले मेको आन बाक्शो रागी ब्रोल्त। *व्यवस्था* ११:६ 32 मिनू रागीम आ शोव पाक्शा, मेको नु मेको आस खिं डा मुर नेल्ल, कोराह आ खिं डा मुर नेल्ले नु मेको आन मारेइ मारेइ नेल्ल दाक्तु। 33 मिनू मेकोपुकी नु आन मारेइ मारेइ सेसीन बेक्शो मुर आन बाक्तीके लाम्तेक्म। मिनू रागीम मेको आन तार आ शोव खेप्ताक्व। मिनू मेकोपुकी गुम्तीक डा मुर आन दाते रे जाम्तेक्म। 34 मिनू आन नेक्था बाक्ब इस्राएली नेल्लेमी मेको आन वाइ ब्रेश्शो नेंशा “गोपुकी इं कली यो मुल रागीम दाक्ब” देंना देंन प्रोक्तेक्म। 35 मिनू परमप्रभु यावे रे मी गूशा, मेको सहे निक्शी ५० जना धूप चोइब आन कली दाक्तु। *लेवी* १०:१-२; *भजन संग्रह* १०६:१७-१८ 36 मिनू परमप्रभु यावेमी मोसा कली 37 “चढ़ेब हारून आ तौ एलाजर कली थनौरुपुकी ब्रशो मी रे गुंइचा कली नु मी आ फिलीडगो शुश डोन लाइश्शा फ्रचा कली अरेवो। *गन्ती* ३:४; *प्रस्थान* ६:२५ 38 मारदे हना मेको पाप पाइबपुकी बेक्तीके आन थनौरुपुकी ग्रांया मदिशो बाक्नीम। मेको थनौरु तुप्शा, चढ़ेतीके गिल्लीक पाता सेल्चा माल्ब। मारदे हना मेको मुर आन थनौरु परमप्रभु यावे आ डोंइती चढ़ेतीके ग्रांया मदिशो दुम्तेक्म। मिनू मेको इस्राएली आन कली मिम्तीक चिन्ड दुम्चा माल्नीम” देंत। 39 मिनू चढ़ेब एलाजरमी मेको बेक्शो मुरपुकीम धूप चोशो तांबा के थनौरु गुप्तु। मिनू मेको कली तुप्शा चढ़ेतीक गिल्ला कली पाता सेल्तु। 40 मेको इस्राएली आन कली मिम्तीके बाक्ब। मार मिम्तीके बाक्ब देंशा हना, हारून आ मुर डा लाक्शा, अरु मुरपुकी परमप्रभु यावे आ डोंइती धूप चोचा कली आ नेक्था लने मचाप्नीम। मिनू कोराह नु आ मुरपुकी खोदेशो पा साइक्वा मपुंडसीनीम, दे मिम्पाइक्तीक बाक्ब। मिनू परमप्रभु यावे मोसा रे पा एलाजर कली दोदेशो पा लोव पवा, मोदेशो पा पाप्तु। *गन्ती* ३:१०

41 मिनू आ दीसा सुनी इस्राएली नेल्लेमी मोसा नु हारून आस पबर्म गन गन पा “गे निक्शीमी परमप्रभु यावे आ मुर आन कली साइक्तीसी” देंतेक्म। *प्रस्थान* १७:३ 42 मिनू मुरपुकीम मोसा नु हारून आस कली गन गन पा बुक्शा, गुम्तीक ताम्बु गे कोवडमेनु, गोस्सुमी मेको ताम्बु कली सुम्शो ताम्तेक्म। मिनू परमप्रभु यावे आ छेडछेड गूत। 43 मेना मोसा नु हारून गुम्तीक ताम्बु आ डोंइती लाम्ताक्स। 44 मिनू परमप्रभु यावेमी मोसा कली 45 “गे मेको मुर आन दाते रे दिलीस। गो मेको आन कली याम कामी रोवल चिवल पोक्नुडमी” देंत। मिनू मेको खुम्की बाप्ताक्से। 46 मिनू मोसामी हारून कली “मेको थनौरु लाइश्शा, मेको चढ़ेतीक डा मी कुर पा धूप चोवो। मिनू रीब पा मेको मुर आन दातेमी लाइश्शा, मेको आन पाप क्याम्तीक गेय पावो। मारदे हना परमप्रभु यावे गाइक्ताक्व। मिनू मुर बेक्तीक रोइ बोक्चा गोप्तु” देंत। *लेवी* १६:१२, १३, १७; *गन्ती* १:५३ 47 मिनू मोसामी देंशो खोदेशो पा हारून थनौरु लाइश्शा मुर आन दातेमी दोरशा लत। मेना मुर आन दातेमी मुर साइक्ब रोइ जाक्ने थुम्शो बाक्त। मिनू मेकोमी धूप चोशा मुर आन पबर्म पाप क्याम्तीक गेय पाप्तु। 48 मिनू हारून बेक्शो नु सेस मुर आन दातेमी राप्त। मिनू मेको मुर बेक्तीक रोइ देक्त। 49 कोराह बेक्तीकेम बेक्शो प्रोंइशा, मेको मुर बेक्तीक रोइम बेक्शो मुर १४ हजार ७ सहे बाक्तेक्म। 50 मिनू मेको मुर बेक्तीक रोइ देक्म नोले हारून मोसा आ बाक्तीक, गुम्तीक ताम्बु आ ओव्रतीकेम लेत्त।

हारून आ कोक्के

17 मिनू परमप्रभु यावेमी मोसा कली 2 “गे इस्राएली नेल्ल आन कली “गे इन किकी पिपी आन थर थर रे पा का का पा १२ ओटा कोक्के चाक्कीन” दे माइक्तीमी। मेको मुर आन नें मेको आन आन कोक्केमी ब्रेक्तो। 3 मिनू हारून आ नें लेवी आ थर डा मुर आन कोक्केम ब्रेक्तो। मारदे हना नेल्ल थर डा ठेयब मुर आन नेंम कोक्के का का दुम्चा माल्ब। 4 मिनू गे मेको कोक्के आन कली गुम्तीक ताम्बुमी सल्ला पशो सन्दोस आ डोंइती वोतो। गो मेकेर रे इन कली लोव पाइनुड। *प्रस्थान* २५:२२ 5 मिनू आं योव्रशो मुर आ कोक्केम कोच्चा दाप्ब। मोपा गो इस्राएलीपुकीम इस पशो गन गन नाइक्पाइक्नुडमी” देंत। *गन्ती* १६:५-७

6 मिनू मोसाम इस्राएली आन कली मेको लोव नेंपाइक्तीमी। मिनू मेको आन ठेयब मुर नेल्लेमी मेको कली कोक्के का का चाक्शा, गेम्तेक्म। मिनू मेको आन किकी पिपी आन थर थर पा १२ ओटा कोक्के गेम्तेक्म। मिनू हारून आ कोक्के यो मेको आन कोक्के आन दातेम बाक्त। 7 मिनू मोसामी मेको कोक्के नेल्ल परमप्रभु यावे आ सल्ला पशो सन्दोस बाक्शो ताम्बुमी परमप्रभु यावे आ डोंइती वोइक्तु।

8 मिनू मोसा आ दीसा सल्ला पशो सन्दोस बाक्शो ताम्बुम लत। मिनू लेवी आ थर डा मुर, हारून आ कोक्केम कोच्चा दाप्शा, फू बोइश्शा देसी बदाम सिश्शो मीशो ताप्तु। 9 मिनू नोले मोसामी कोक्के नेल्ल खुप्शा, परमप्रभु यावे आ डोंइती रे लाइश्शा, इस्राएली आन कली गेम्तीमी। मिनू मेकोपुकीमी कोव्रशा, आन आन कोक्के लांइसाक्म।

10 मिनू परमप्रभु यावेमी मोसा कली “मरिश्शो पाइब मुर आन कली मिम्तीके दुम्पाइक्चा कली हारून आ कोक्के लेंशा सल्ला पशो सन्दोस आ डोंइती लाइश्शा वोतो। मिनू मेकोपुकीमी आं पबर्म गन गन पचा मप्रोंइतेक्म हना, बेक्नीम” देंत। *हिब्रू* ९:४ 11 मिनू मोसामी परमप्रभु यावे आ देंशो खोदेशो पा पाप्तु।

12 मिनू इस्राएलीपुकीमी मोसा कली “कोवडीन, गोपुकी खतम दुम्शा जाम्शा लाइनीकी। 13 सु परमप्रभु यावे आ ताम्बु आ नेक्था लाइबा, मेको बेक्ब। मार, गो नेल्ल यो बेक्नीकी?” देंतेक्म। *भजन संग्रह* १३०:३-४

लेवी नु चढ़ेब आन गेय

18 मिनू परमप्रभु यावेमी हारून कली “गे इ तौपुकी नु इ आफ आ खिं डा मुरम परमप्रभु यावे आ बाक्तीक कली मरिश्शो पशो कुरचा माल्नीनी। मिनू गे नु इ तौपुकीमी चढ़ेतीक गेय पाइब आन मरिश्शो पशो कुरचा माल्नीनी। *प्रस्थान* २८:३८; *लेवी* १६:३२-३३ 2 मोपतीके गे इ लोक्ब लेवी आ थर डा मुर आन कली यो इ कली वारच पचा कली चाक्मी। गे नु इ तौपुकीम ताम्बु आ डोंइती गेय पना पन बाक्नीनु, मेकोपुकीम इन कली वारच पामेक्ल। *गन्ती* ३:६-१० 3 मेकोपुकी इ कली वारच पशा, ताम्बु डा गेय पचा माल्नीम। तन्न मेकोपुकीम ताम्बु डा मार मार थिचा मदुम्नीम। मिनू चढ़ेतीक आ नेक्था जाक्चा मदुम्नीम। मो पाम्तेक्म हना, मेकोपुकी नु गे यो बेक्नीनी। 4 मेकोपुकीम इन अरेशो टिशा, गुम्तीक ताम्बु डा मारेइ मारेइ गेय पचा माल्नीम। गे इन डा लाक्शा अरु सुइम मेको गेय पचा मताइनीम। 5 मिनू गे इस्राएली आन दातेमी लेंशा गाइक्तीक गेनायो मजाक्ल, दे परमप्रभु यावे आ बाक्तीक नु चढ़ेतीक डा गेय आंमा पचा माल्नेवे। *गन्ती* १७:११ 6 मिनू गो मुल इस्राएली आन दाते रे इ लोक्ब लेवी आन कली योव्रनुड। गो मेको इ कली गेनुड। मेकोपुकी गुम्तीक ताम्बु डा गेय पचा कली आं कली जिम्मा गेशो बाक्नीम। *गन्ती* ३:१२, ४५ 7 तन्न गे नु इ तौपुकीम चढ़ेतीक नु फारशो वा आगा डा कोठा डा गेय थम रिश्शो पा पने। चढ़ेतीक गेय इन कली गेतन्नी। अरु सुइ मेकेर जाक्तेक्म हना, मेको साइक्चा पुंडसीनीम” देंत। *गन्ती* १:५१

चढ़ेब आन भाग

8 मिनू परमप्रभु यावेमी हारून कली “गो आं कली चढ़ेशो इ कली गेतन। इस्राएलीपुकीमी आं कली चढ़ेशो नेल्ल गेतन। मेको इ कली नु इ तौ आन

कली चढेतीक गेय पशो डा गेना हना यो इन भाग बाक्ब। लेवी ३:२, १०; लेवी ६:९-११, १९-२२; लेवी ७:६-१०<sup>9</sup> मिनु मी रे पा प्रॉइशा आं कली चढेशो इन कली मार बाक्ब देशा हना, मेको आं कली नेल्ल क्येडा चोवखो चढेशो अन्न चढेशो बाक्त हना यो, पाप आ पबर्म चढेशो बाक्त हना यो नु गारचा आ पबर्म चढेशो नेल्ल इ कली नु इ तौ आन कली बाक्ब।<sup>10</sup> मिनु मेको इन कली नेल्ल क्येडा चोवखो जचा थोवक बाक्ब। मेको इन दाते डा वॉइश मुर नेल्लेमी जने चाप्नीम। मेको इन कली चोवखो बाक्ब। लेवी ६:९; लेवी १०:१२, १४

<sup>11</sup> मिनु इस्राएलीपुकीमी क्युकशा चढेतीक चढेम्तेक्म हना, मेको तिल्लशो नेल्ल इ कली नु इ तमी तौ आन कली गेना हना यो इन भाग बाक्ब, दे गेतन्नी। इ खिंम ग्रांरा मदिशो बाक्शो सुइ सुइमी मेको जने चाप्नीम।<sup>12</sup> मिनु मेकोपुकीमी परमप्रभु यावे कली गेशो नेल्ल क्येडा रिंशो तेल, नेल्ल क्येडा रिंशो अडगुर शांबु, अन्न नु रिंशो मारेइ मारेइ गो इ कली गेतन।<sup>13</sup> मेकोपुकीमी परमप्रभु यावे कली चढेश चक्शो आन डोंइती मीशो फल फुल नेल्ल इ केन दुम्ब। इ खिंमी ग्रांरा मदिशो बाक्शो मुर नेल्लेमी मेको जने चाप्नीम। प्रस्थान २३:१९; ब्यवस्था १८:३-४<sup>14</sup> इस्राएलम आं कली चढेशो मारेइ मारेइ इ केन बाक्ब। लेवी २७:२८<sup>15</sup> मिनु परमप्रभु यावे कली चढेशो, मुर आन डोंइती जरमेशो, बी ब्यफ क्यारश भेडा आन डोंइती जरमेशो नेल्ल इ केन बाक्नीम। मो दुस्त हना यो, गे मुर आ डोंइती जरमेशो कली प्रॉइचा माल्नेवे। ग्रांरा दिशो बस्तु भाव आन डोंइती जरमेशो यो प्रॉइचा माल्नेवे। प्रस्थान १३:२; प्रस्थान ३४:१९-२०<sup>16</sup> मेको आन कली प्रॉइतीक क्येट महिना का गाप्शो कली चांदी के ५ शेकेल ताक्वा माल्नेवे। मेको ताम्बु डा शेकेल बाक्वा माल्नीम। मेको ताम्बु डा शेकेल का २० गेराह डा बाक्ब। गेराह का ०.६ ग्राम बाक्ब। ताम्बु डा शेकेल का १२ ग्राम डा क्येट बाक्ब। लेवी २७:६, २७

<sup>17</sup> मिनु बी, भेडा क्यारश आन डोंइती जरमेशो आन कली प्रॉइने मचाप्नीम। मेको आं केन बाक्नीम। गे मेको आन हुश चढेतीकेमी ब्रुइक्वा माल्नेवे। मिनु मेको आन बॉसो चोचा माल्नेवे। मेको परमप्रभु यावे कली आ दाक्वा ब्रोवशो रिना पाइश्शो मीम चोशा चढेतीक बाक्ब।<sup>18</sup> तन्न आन श्ये इ केन बाक्ब। मेको क्युकशा चढेशो कुशु नु ग्युरा फिला खोदेंशो पा इ केन बाक्ब।<sup>19</sup> मिनु इस्राएलीपुकीमी आं कली चढेशो नेल्ल इ कली नु इ तमी तौ आन कली गेना हना यो कली गेतन्नी। मेको इ कली नु इ चच युइ आन कली परमप्रभु यावे आ डोंइती गेना हना यो लीशो हिक्सी आ कबल पशो बाक्ब” दैत। लेवी २:१३; २इतिहास १३:५<sup>20</sup> मिनु नोले परमप्रभु यावेमी हारून कली “गे मेको रागीम मुर आन दातेमी रू मताइनीनी। गो इस्राएली आन दातेमी इन भाग नु इन शॉप नड। गन्ती ३५:९; ब्यवस्था १०:९; ब्यवस्था १२:१२; यहोसु १३:१४, ३३; भजन संग्रह १६:५; भजन संग्रह ७३:२६; इजीकीएल ४४:२८<sup>21</sup> गो लेवी आ मुर आन कली गुम्तीक ताम्बुमी गेय पचा कली इस्राएली नेल्ल आन १० भाग डा भाग का गेतामी। लेवी २७:३०<sup>22</sup> मुल रे इस्राएलीपुकी गुम्तीक ताम्बु आ नेक्था जाक्ने मचाप्नीम। जाक्तेक्म हना, पापम पतीकेमी बेक्नीम।<sup>23</sup> तन्न लेवीपुकीमी गुम्तीक ताम्बु डा गेय पचा माल्नीम। मेकोपुकीमी पाप पाक्तेक्म हना, मेको आंमा कुरचा माल्नीम। मेको इन कली गेना हना यो लीब शेंतीके बाक्ब। तन्न मेकोपुकीमी इस्राएली आन दातेमी रू मताइनीम।<sup>24</sup> मारदे हना गो लेवी आन कली इस्राएली आन परमप्रभु यावे कली चढेशो १० भाग डा भाग का गेतामी। मोपतीके गो मेको आन कली ‘गे इस्राएली आन दातेमी रू मताइनीनी’ दैती” दैत।

<sup>25</sup> मिनु परमप्रभु यावेमी मोसा कली<sup>26</sup> “गे लेवी आन कली ‘परमप्रभु यावेमी इन कली मुर आन गुइ रे इन भाग दुम्बा कली गेशो, इस्राएली आ १० भाग डा भाग का ताक्नीनु, गेपुकीम मेको रे यो परमप्रभु यावे कली १० भाग डा भाग का तिल्ला, गेचा माल्नीनी।<sup>27</sup> मिनु मेको अन्न नु अडगुर शांबु मुर आन रे चाक्शो भाग खोदेंशो मिम्सीब।<sup>28</sup> मोपा गे इस्राएली आन रे ताक्शो १० भाग डा भाग का नेल्ल रे तिल्ला परमप्रभु यावे कली १० भाग डा भाग का गेचा माल्नीनी। मेको चढेब हारून कली गेचा माल्नीनी।<sup>29</sup> मिनु गे मार मार ताक्नी, मेको नेल्ल रे परमप्रभु यावे आ भाग तिल्ला माल्नीनी’ दे माइक्मी।<sup>30</sup> मिनु गे मेको आन कली ‘गेपुकीमी नेल्ल क्येडा रिंशो भाग

तिल्ली नोले, मेको लीशो इन रू रे रुप्शो अन्न नु इन अडगुर रू डा शांबु खोदेंशो बाक्ब।<sup>31</sup> मिनु गे नु इन खिं डा मुर नेल्ले ते ते जचा दाक्नीनी, मेक मेक जने चाप्नीनी। मारदे हना मेको इन गुम्तीक ताम्बुमी गेय पशो डा गाल्च बाक्ब। मत्ती १०:१०<sup>32</sup> मिनु गे मेको आन नेल्ल क्येडा रिंशो भाग गेतीके इन कली मारेइ दोस मदुम्ब। तन्न इस्राएलीपुकीम आन परमप्रभु यावे कली गेशो थोवक दूली पा मचलेने। मो पाइतीनी हना गे बेक्नीनी’ दे माइक्वा माल्नेवे” दे परमप्रभु यावेमी मोसा कली दैत।

### चोवखेतीक आ पबर्म चढेशो

**19** परमप्रभु यावेमी मोसा नु हारून आस कली<sup>2</sup> “गे इस्राएली आन कली ‘परमप्रभु यावेमी ब्रेक्शा अरेशो पचा माल्शो लोव का एको बाक्ब। गेपुकी थम रिंशो मारेइ मदुम्शो गेनायो जवा मलाप्शो लल बी का आंस बाक्तीक चाक्कीन’ देनीस। हिब्रू ९:१३; लेवी २२:२०; ब्यवस्था २१:३<sup>3</sup> मिनु गे मेको बी कली चढेब एलाजर कली गेसे। मिनु मेकोमी मेको बी कली मुर आन बाक्तीक रे डोन लाइश्शा, आ डोंइती मेको कली क्योरपाइक्वा माल्ब।<sup>4</sup> मिनु चढेब एलाजरमी आ ब्रेप्चोमी आ हुश खुम्शा, गुम्तीक ताम्बु आ डोंइती ७ खेयप ब्रुइक्वा माल्ब। लेवी ४:६, १७<sup>5</sup> मिनु नोले मेको बी चढेब आ डोंइती चोचा माल्ब। आ कुशुल, आ श्ये, आ हुश नु गोबर सुन्दा चोचा माल्ब। लेवी ७:८; लेवी ४:११-१२<sup>6</sup> मिनु चढेबमी लेबानोन डा लाइश्शो रवा आ शी, हिस्सोप के ब्राक्स, लल रड डा ऊन चाक्शा, मेको बी कली जेन्ना जेन्न पशो मीम हुम्बा माल्ब। लेवी १४:६<sup>7</sup> मेको नोले चढेबमी आ वा मुरशा, चिक्सीचा माल्ब। नोले मेको मुर आन बाक्तीके लेन्ने चाप्ब। तन्न मेको चढेब नां मलाक्गा सम्म ग्रांरा दिशो बाक्ब। लेवी १६:२८<sup>8</sup> मिनु नोले मेको बी चोइबमी आ वा मुरशा, चिक्सीचा माल्ब। मेको नां मलाक्गा सम्म ग्रांरा दिशो बाक्ब।<sup>9</sup> मिनु ग्रांरा मदिशो मुर कामी मेको बी कली चोशो पुलु खुप्शा, मुर आन बाक्तीके रे डोन ग्रांरा मदिशो बाक्तीकेम वोइक्वा माल्ब। मेको इस्राएली आन कली चोवखेतीक ब्वाक्कु सेल्चा कली बाक्ब। मेको चोवखेतीक कली चढेतीक बाक्ब।<sup>10</sup> मिनु मेको बी चोशो पुलु हुइक्बमी यो आ वा मुरचा माल्ब। मिनु नां मलाक्गा सम्म मेको ग्रांरा दिशा बाक्ब। मेको इस्राएलीपुकी नु मेकोपुकी नु बाक्ब अर्को रागी डा मुर नेल्ल आन कली पचा माल्शो गेय बाक्ब।

<sup>11</sup> मिनु सुमी बेक्शो मुर कली थीबा, मेको ७ नाक्त सम्म ग्रांरा दिशोन बाक्ब।<sup>12</sup> मिनु मेकोम मेको सां नाक्तीम ब्वाक्कु चोवखेतीक माल्ब। मिनु ७ नाक्तीम लेंशा चोवखेतीक माल्ब। मिनु मेको ग्रांरा मदिशो दुम्ब। तन्न मेकोमी सां नाक्त नु ७ नाक्त मचोवखेतीक हना, मेको ग्रांरा दिशा बाक्ब।<sup>13</sup> मिनु सुमी बेक्शो मुर थिशा, मचोवखेतीक, मेकोमी परमप्रभु यावे आ ताम्बु ग्रांरा दिशो सेल्ब। मेको मुर इस्राएली आन दाते रे तिल्ला पुंडसीब। मारदे हना चोवखेतीक ब्वाक्कु मेको आ तार मब्रुइश्शो बाक्ब। मोपतीके मेको ग्रांरा दिशो बाक्ब। मिनु मेको आ ग्रांरा दितीके मेको नु लीब। लेवी १५:३१

<sup>14</sup> मिनु मुर आ ताम्बुम बेक्त हना, मेको आ पबर्म पचा माल्शो गेय मार बाक्ब देशा हना, सु मेको ताम्बुम बाक्बा, सु मेको ताम्बुम जाक्बा, मेको ७ नाक्त सम्म ग्रांरा दिशो बाक्नीम।<sup>15</sup> मिनु मसुम्शो ग्योब नेल्ल ग्रांरा दिशो बाक्नीम।<sup>16</sup> मिनु सुमी लांम तरवारम साइक्वा पुंडसीशो मुर बाक्त हना यो, आंमा बेक्शो मुर बाक्त हना यो, मुर आ रुश बाक्त हना यो, मेको थीब मुर ७ नाक्त सम्म ग्रांरा दिशो दुम्ब।<sup>17</sup> मिनु मुरुमी मेको ग्रांरा दिशो मुर कली चोवखेचा कली चढेतीक पुलु ग्योबुम कुर पा नक ब्वाक्कु लुक्वा माल्ब।<sup>18</sup> मिनु नोले ग्रांरा मदिशो मुर कामी हिस्सोप के ब्राक्स मेको चोवखेतीक ब्वाक्कुम नुप्शा, मेको बेक्शो मुर आ ताम्बु, मेकेर बाक्शो मारेइ मारेइ, मेक बाक्ब मुर आन कली, रुश थीब मुर आन कली, साइक्वा पुंडसीशो मुर थीब, बेक्शो मुर नु तुरस थीब मुर आन कली मेको ब्वाक्कु ब्रुइक्वा माल्ब।<sup>19</sup> मिनु ग्रांरा मदिशो मुरुमी सां नाक्तीम नु ७ नाक्तीम ग्रांरा दिशो मुर आन कली मेको चोवखेतीक ब्वाक्कु ब्रुइक्वा माल्ब। मिनु ७ नाक्तीम मेको आन कली चोवखेतीके नुप्ब। मिनु नोले मेकोपुकीम आन वा मुरशा, आन रां चिक्सीचा माल्नीम। मिनु मेकोपुकी नां लाक्गा नोले ग्रांरा मदिशो दुम्नीम। गन्ती

१९:१२-१३<sup>20</sup> मिनु सु ग्रांघा दिशो दुम्शा यो, मचोवखेसीबा, मेकोमी परमप्रभु यावे आ ताम्बु ग्रांघा दिशो सेल्ब। मेको मुर इस्राएली आन दाते रे तिल्ला पुंडसीबा। मारदे हना चोवखेतीक ब्वाक्कुम मेको कली मबुइशो बाक्ब। मोपतीके मेको ग्रांघा दिशोन बाक्ब।<sup>21</sup> मिनु मेको, मेको कली गेना हना यो आ पतीक दुम्ब। मिनु मेको ब्वाक्कु ब्रुइक्ब मुरुम आ वा मुरचा माल्ब। मिनु सुमी चोवखेतीक ब्वाक्कु थीबा, मेको नां मलाकगा सम्म ग्रांघा दिशो दुम्शो बाक्ब।<sup>22</sup> ग्रांघा दिशो दुम्शो मुरुमी मार थिवा, मेको नेल्ल ग्रांघा दिशो दुम्नीम। मिनु सुमी मेको ग्रांघा दिशो थोवक थीबा, मेको यो नां मलाकगा सम्म ग्रांघा दिशो दुम्ब” देंत।

सेरथे फुल्लु रे ब्वाक्कु बुक्शो

**20** मिनु डोंइती डा महिनाम इस्राएली नेल्ले जीन डा गोरशो रागीम जाक्तेक्म। मिनु कादेशमी बाक्तीक सेल्शा बाक्तेक्म। मिनु मिरयाम मेक उइ बेक्त्। मिनु मेक उइ थिम्तेक्म। गन्ती १३:२१; गन्ती १२:१५

<sup>2</sup> मिनु मेकेर मुर आन कली ब्वाक्कु मबा। मिनु मुरपुकी मोसा नु हारून आस पबर्म मरिश्शो पा बुक्तेक्म। प्रस्थान १७:१-७<sup>3</sup> मिनु मेकोपुकीमी मोसा कली जिचा तोशा मेको कली “गो आंइ लोक्बपुकी परमप्रभु यावे आ डोंइती बेक्मानु, गोपुकी यो बेक्शो नकी हना, रिश्शो दुम वा।<sup>4</sup> गे मारदे परमप्रभु यावे आ मुर, आंइ कली एको गोरशो रागीम चाक्नी? मुल गोपुकी नु आंइ बी ब्यफ, क्यारश भेडा नेल्ल एक बेक्ब दुम्तक।<sup>5</sup> गे मारदे आंइ कली इजीप्त रे एको मरिश्शो रागीम चाक्नी। एको रागीम अन्न, फोवशी, अडगुर नु अनार मारेइ मथिंसीबा। एकोक्के तूचा कली ब्वाक्कु यो मबा” देंतेक्म।<sup>6</sup> मिनु नोले मोसा नु हारून मुर आन बाक्तीक रे लशा, गुम्तीक ताम्बु आ ओवतीकेमी खुम्की पा बाप्ताक्स। मिनु परमप्रभु यावे आ छेडछेड मेको आस डोंइती गूत।<sup>7</sup> मिनु परमप्रभु यावेमी मोसा कली<sup>8</sup> “एको कोक्के लतो। मिनु गे नु इ लोक्ब हारून लशा, मुर आन कली पुक्कीस। मिनु मेको आन डोंइतीन एको फुल्लु कली हुकुम पावो। मिनु फुल्लु रे ब्वाक्कु थीबा। मिनु गे मुर आन डोंइती एको सेरथे फुल्लु कली ‘ब्वाक्कु बुक्को’ दे मतो। मोपा गे मुर आन कली मेको सेरथे फुल्लु रे ब्वाक्कु यिपाइक्नेवे। गे मोपा मुर नु मेको आन बी ब्यफ क्यारश भेडा आन कली तूचा गेनेवे” देंत।

<sup>9</sup> मिनु मोसामी मेको कोक्के परमप्रभु यावेम देंशो खोदेंशो पा ताक्त्। गन्ती १७:२५<sup>10</sup> मिनु मोसा नु हारूनमी मुर नेल्ल आन कली सेरथे फुल्लु आ डोंइती पुक्ताक्स। मिनु मोसाम मेको आन कली “गे गन गन पाइबपुकी नेनीन। मार, गो एको सेरथे फुल्लु रे इन कली ब्वाक्कु बुक्पाइश्शा गेनी?” दे माइक्तीमी। भजन संग्रह १०६:३२-३३<sup>11</sup> मिनु मोसामी आ गुइ क्युक्शा आ कोक्केमी निक्शी खेयप मेको सेरथे फुल्लु कली तुप्त्। मिनु मेकेर शुश ब्वाक्कु बुक्शा गूत। मिनु मुरपुकी नु आन बी ब्यफ, क्यारश भेडामी तूतेक्म।

<sup>12</sup> तन्न परमप्रभु यावेमी मोसा नु हारून आस कली “गे आं कली थमा मसुइक्तीके नु आं ठेयब सक्ति इस्राएली आन डोंइती मकोइतीके, गे एको मुर आन कली गो इन कली गेशो रागीम चाक्दीत्वा मताइनीसी” देंत। गन्ती २७:१४; ब्यवस्था १:३७; ब्यवस्था ४:२१; ब्यवस्था ५०:५१<sup>13</sup> मोपतीके मेको ब्वाक्कु कली मेरीबा डा ब्वाक्कु देंसीबा। मेकेर इस्राएलीपुकीमी परमप्रभु यावे कली जिचा तोम्तेक्म। मिनु मेकोमी आ सक्ति कोंइताक्व। भजन संग्रह ८१:८

इस्राएली आन कली लचा मगेशो

<sup>14</sup> मिनु मोसामी कादेश रे एदोम डा पिप कली “इन लोक्ब इस्राएलमी इन कली ‘गो आंइ कली दुम्शो श्येत गे तुइक्नीनी। उत्पत्ती ३६:१,३१; ब्यवस्था २:१-८; ब्यवस्था २३:८<sup>15</sup> आंइ किकी पिपी इजीप्त लशा, मेकेर शुश बाक्शो बाक्तेक्म। मिनु इजीप्तीपुकीमी आंइ किकी पिपी नु आंइ कली दिष्शा, मरिश्शो पाम्तेक्म।<sup>16</sup> मिनु गोपुकीमी परमप्रभु यावे कली पुंडतक। मिनु मेकोमी आंइ पुंडशो नेंशा, आ स्वर्ग डा गेय पाइब का सोइश्शा, गो आंइ कली इजीप्त रे गुंडशा एक चाक्त्। मुल गो इन रागी डा सांद कादेश देंशो सहरम बाक्शो बाक्नीकी। प्रस्थान २३:२०<sup>17</sup> मिनु गो आंइ रागी रे पा लचा

गेने। गोपुकी रू नु अडगुर रू रे पा मलाइनीकी। गोपुकीम इन तेकोइ इनार डा ब्वाक्कु मतूनीकी। गो पिप आ ठेयब लां रे पा लाइनीकी। इन रागी मलाक्का सम्म गो ग्युरा पेरा मपाइनीकी’ देंशो बाक्ब, देनीन” दे मुर सोइक्ताक्मी। गन्ती २१:२२; ब्यवस्था २:१-८; न्यायाधीस ११:१७

<sup>18</sup> तन्न एदोममी मेको कली “गोपुकी एको रागी रे पा लचा मताइनीनी। मो पाइतीनी हना, गोपुकीमी गोपुकी इन कली लडाइ तोइनीकी” देंत।<sup>19</sup> मिनु इस्राएलीपुकीमी मेको कली “गोपुकी ठेयब लां रे पा लाइनीकी। मिनु गो नु आंइ बी ब्यफ क्यारश भेडामी इन ब्वाक्कु तूतक हना, मेको डा क्येट थाप्तीकी। आंइ कली इन रागी रे पा ला लचा गेने” देंतेक्म।<sup>20</sup> तन्न मेकोपुकीमी “गोपुकी लचा मताइनीनी” देंतेक्म। मिनु एदोममी मेको आन कली लडाइ तोचा कली शुश या कुरशा, ठेयब हुल लडाइ पाइब चाक्शा जाक्त्।<sup>21</sup> मोपा एदोममी इस्राएली आन कली आ रागी रे पा लचा मगेमी। मोपतीके इस्राएलीपुकी मेकेर रे लेत्तेक्म।

हारून बेक्शो

<sup>22</sup> मिनु इस्राएली कादेश रे गाक्शा, होर डांडामी जाक्तेक्म।<sup>23</sup> मिनु नोले परमप्रभु यावेमी एदोम रागी डा सांद डा होर डांडामी मोसा नु हारून आस कली<sup>24</sup> “हारून आ किकी पिपी नु बाक्थ लाइब। गे निम्फा मेरीबा डा ब्वाक्कुम आं देंशो मटितीके, गोम इस्राएली आन कली गेशो रागीम हारून ओवचा मताइब।<sup>25</sup> हारून नु मेको आ तौ एलाजर आस कली होर डांडा लाइश्शा लावो।<sup>26</sup> मिनु हारून आ वा पुइश्शा, मेको आ तौ एलाजर कली फेक्त्तो। मेको नोले हारून आ किकी पिपी नु बाक्थ लचा कली बेक्ब” देंत। प्रस्थान २९:४-७<sup>27</sup> मिनु मोसामी परमप्रभु यावे आ देंशो खोदेंशो पा पाप्त्। मिनु मुर नेल्ल आन डोंइती रे मेकोपुकी होर डांडा लाम्तेक्म।<sup>28</sup> मिनु मोसामी हारून आ वा पुइश्शा, आ तौ एलाजर कली फेक्ताक्व। मिनु हारून मेको डांडा तार बेक्त्। मिनु मोसा नु एलाजर मेको डांडा रे बुप्ताक्स। गन्ती ३३:३८-३९; ब्यवस्था १०:६<sup>29</sup> मिनु इस्राएली नेल्लेमी हारून बेक्शो तुइश्शा, ३० नाक्त् सम्म रोंका पाम्तेक्म। ब्यवस्था ३४:८

कनानी आन रागी ग्राशो

**21** मिनु नेगेबम बाक्ब कनानी आराद डा पिपम इस्राएली अथारीम डा लां रे पा पिना पिन बाक्नीम, देंशो लोव्र नेंत्। मिनु मेकोमी इस्राएली नु लडाइ पा, इस्राएली का निक्शी आन कली ग्याइक्ताक्व। गन्ती १४:४४,४५; न्यायाधीस १:११-१५<sup>2</sup> मिनु इस्राएलीपुकीमी परमप्रभु यावे कली “गे एको मुर आन कली थमा पा आंइ गुइमी गेतीनी हना, गोपुकीमी मेको आन सहर नेल्ल रोवल चिवल पोक्नीकी” दे कसम जाम्तेक्म। ब्यवस्था १३:१६; ब्यवस्था २०:१४,१६,१७; यहोसु ६:१७; न्यायाधीस १:१७; १सामुएल १५:३<sup>3</sup> मिनु परमप्रभु यावेमी इस्राएली आन पुंडशो लोव्र नेंशा, मेको कनानी आन कली मेको आन गुइमी गोप्त्। मिनु इस्राएलीपुकीम मेकोपुकी नु मेको आन सहर नेल्ल खतम पोक्तेक्म। मोपतीके मेको रागी आ नें होरमा वोइक्तेक्म। होरमा हिब्रू लोव्रमी खतम दुम्तीके देंसीबा। गन्ती १४:१४,४५; ब्यवस्था १:४४

कांसा के बुस्स

<sup>4</sup> मिनु मेकोपुकी एदोम रागी कली हेरशा लचा, दे होर डांडा रे लल समुन्द्र गे लाम्तेक्म। तन्न मुरपुकी शुश गाक्वा माल्तीके दाम्तेक्म। गन्ती ११:४-६<sup>5</sup> मिनु मेकोपुकीम परमप्रभु नु मोसा आस पबर्म गन गन पा “मारदे गे आंइ कली एको गोरशो रागीम बेक्पाइक्वा कली इजीप्त रागी रे गुंडशा एक चाक्सी? एकेर जचा थोवक मबा। ब्वाक्कु यो मबा। गो एको मब्रोवशो जचा थोवक क्येडा ब्रीताक्क” देंतेक्म।

<sup>6</sup> मिनु नोले परमप्रभु यावेमी बीस पाइश्शो बुस्स मेको मुर आन दातेमी सोइक्ताक्व। मिनु बुस्सपुकीमी मुर आन कली कोक्तेक्म। मिनु शुश इस्राएली बेक्तेक्म। १कोरिन्थी १०:९<sup>7</sup> मिनु मुरपुकी मोसा आ बाक्तीक जाक्शा “गोपुकीम परमप्रभु यावे नु इन पबर्म मरिश्शो लोव्र पा पाप

पाइतक। मेको बुस्सपुकी खेरचा, दे परमप्रभु यावे कली आंइ पर्वम पुनीन" देंतेकम। मिनु मोसामी मेको मुर आन पर्वम पुंइतु। *प्रस्थान ३२:३०-३४*

8 मिनु परमप्रभु यावेमी मोसा कली "गे मेको बीस पाइश्शो बुस्स खोर्देशो पा बुस्स का सेल्शा, खांबा काम क्युकुको। मिनु सु बुस्सुम कोक्शो बाकमे, मेकोमी मेको बुस्स कोक्शा, ब्रॉइब" देंत। *२राजा १८:४; यूहन्ना ३:१४*

9 मिनु मोसाम कांसा के बुस्स का सेल्लु। मिनु मेको कली खांबा काम क्युकु। मिनु सु बुस्सुमी कोक्शो बाकमा, मेकोपुकीम कांसा के बुस्स कोक्शमेनु, ब्रॉइतेकम।

### इसाएलीपुकी मोआब रागी लशो

10 मिनु इस्राएलीपुकी गाक्शा, ओबोथम बाक्तीक सेल्लेकम। 11 मिनु ओबोथ रे गाक्शा, मोआब आ पूर्व गे डा सांद इये-अबारीम डा गोरशो रागीम बाक्तीक सेल्लेकम। 12 मिनु मेकोपुकी मेकेर रे गाक्शा, जेरेद डा बेसीम बाक्तीक सेल्लेकम। 13 मिनु मेकोपुकी मेकेर रे गाक्शा, एमोरी आन सांदम यूतीक गोरशो रागीम बाक्शो अरनोन खोला आ आइक्वी हांबुम आन बाक्तीक सेल्लेकम। मेको अरनोन खोला मोआब आ सांद बाक्ब। मेको एमोरी नु मोआबी आन दातेम बाक्ब। 14 मोपतीके परमप्रभु यावे आ लडाइ डा किताबमी दोपा ब्रेक्शो बाक्ब देंशा हना "वाहेब सहर सुफाह नु अरनोन खोला आ दिंम, *यहोसु १०:१३; २सामुएल १:१८* 15 नु आर माइश्शो बाक्तीके सम्म लाइब लुकच लतीक लां। मेको मोआब आ सांद सम्म लशो बाक्ब" देंशो बाक्ब।

16 मिनु मेकेर रे मेकोपुकी बेयर लाम्तेकम। मिनु परमप्रभु यावेमी मोसा कली "मुर आन कली पुक्मी। मिनु गो ब्वाक्कु गेनुडमी" देंशो कुवा मेकेर बाक्ब। 17 मिनु नोले इस्राएलीपुकीम एको कुम्सो पाम्तेकम। "कुवा, ब्वाक्कु बुक्शा गूडो। मिनु मेको आ पर्वम कुम्सो पावो। 18 मेको कुवा मेको ठेयब मुरपुकीम दोशो बाक्तेकम। मिनु मुरपुकीमी मेको कुवा पिप आ सुन के कोक्केम दोशो बाक्तेकम" दे कुम्सो पाम्तेकम। मिनु मेकोपुकी गोरशो रागी रे गूशा मत्ताना लाम्तेकम। 19 मिनु नोले मत्ताना रे नाहालीएल, नाहालीएल रे बामोथ सम्म 20 बामोथ रे मोआब डा दिंम बाक्शो बेसी सम्म, गोरशो रागी रे तांइसीतीक इर पिप्सा डांडा सम्म लाम्तेकम।

### सीहोन नु ओग ब्रुशो

21 मिनु नोले इस्राएलीपुकीमी एमोरी आन पिप सीहोन आ बाक्तीकेम मुर आन कली सोइश्शा *ब्यवस्था २:२६-३७* 22 "गो आंइ कली इन रागी रे पा लचा गेने। गो रू नु अडगुर रू रे पा मलाइनीकी। गोपुकीम इन तेकोइ कुवा डा ब्वाक्कु मत्तनीकी। इन रागी मलाक्का सम्म गो पिप आ ठेयब लां रे पा लाइनीकी" देंपाइक्तेकम। 23 तन्न सीहोनमी इस्राएली आन कली आ रागी लाक्शा लचा मगेवो। मेकोम आ लडाइ पाइबपुकी खुप्शा, गोरशो रागीम इस्राएली आन कली लडाइ तोपु। मेकोमी याहास सम्म जाक्शा, इस्राएली नु लडाइ पापु। 24 मिनु इस्राएलीपुकीम मेको कली तरवारम क्योरशा साइक्तेकम। मिनु अरनोन खोला रे यब्बोक खोला सम्म मेको आ रागी आन के सेल्लेकम। मिनु अम्मोनी आन सांद सम्म मेकोपुकीम आन रागी सेल्लेकम। मारदे हना, अम्मोनी आन सांद बोल्यो बाक्त। 25 इस्राएलीपुकीम मेको सहर नेल्ल आन के सेल्लेकम। मिनु मेकोपुकीम एमोरी आन सहर नेल्ल नु हेश्बोन नु मेको आ एर ओंथ डा गाउं नेल्लेम बाक्तेकम। 26 हेश्बोन सहर एमोरी आन पिप सीहोन आ सहर बाक्त। पिप सीहोनमी मोआबी आन डॉइती डा पिप नु लडाइ पा मेको आ रागी अरनोन खोला सम्म आ के सेल्शो बाक्त। 27 मोपतीके कुम्सो पाइबपुकीम "गेपुकी हेश्बोन सहरम जाक्कीन। मिनु मेको लेंशा सेल्सीन। सीहोन आ सहर लेंशा सेलीन। 28 हेश्बोन रे मी गूत। सीहोन आ सहर रे ब्रशो मी गूत। मिनु मेको मीम मोआब डा आर सहर नु अरनोन डा डांडा दाक्तु। 29 आबी आबी, मोआब, केमोश आ मुरपुकी बेक्तेकम। एमोरी आन पिप सीहोनमी मेको आ तौ आन कली प्रोक्ब सेल्लेकीमी। आ तमी आन कली ग्याइक्वा पुंइसीब सेल्लेकीमी। *न्यायाधीस ११:३४; १राजा ११:१७*

30 मोपा मेको आन थेरशो रू हेश्बोन रे दीबोन सम्म खतम दुम्त। मिनु मेदेबा मीम नेक्वा क्येडा डॉइती गो मेको खतम पोक्तका" दे कुम्सो पाम्तेकम। 31 मोपा इस्राएलीपुकी एमोरी आन रागीम आन खि सेल्लेकम। 32 मिनु मोसामी याजेर रागी कली क्यारी पथ मुर सोइक्ताक्व। मिनु मेकोपुकीमी मेको आन एर ओंथ डा गाउं आन के सेल्लेकम। मेकेर डा एमोरी आन कली खेरतेकम।

33 मेको नोले मेकोपुकी हिरशा बाशान डा लां रे पा डोइश्शा लाम्तेकम। मिनु बाशान डा पिप ओग नु आ मुरपुकी इस्राएली नु लडाइ पचा कली गूशा एद्रेइमी जाक्तेकम। *ब्यवस्था ३:१-११*

34 मिनु परमप्रभु यावेमी मोसा कली "मेको नु महिंनो। मारदे हना गो मेको कली आ मुर नेल्ल नु मेको आ रागी यो यो इ कली गेतन। गे हेश्बोन डा एमोरी आन पिप सीहोन कली पाइश्शो खोर्देशो पा मेको कली यो पतो" दे माइक्तु। *भजन संग्रह १३६:१७-२२*

35 मोपतीके मेको कली, मेको आ तौपुकी नु मेको आ मुर नेल्ल आन कली का यो मप्रॉइथु साइश्शा, मेको आन रागी आन के सेल्लेकम।

### बालाक नु बालाम

22 मिनु इस्राएलीपुकी गाक्शा, यरीको यर्दन खोला आ आइक्वी हांबुम बाक्शो मोआब डा दिंममी बाक्तीक सेल्लेकम। 2 मिनु सिप्पोर आ तौ बालाकमी इस्राएलीपुकीम एमोरी आन कली मार पाइश्शो बाक्मा, मेको नेल्ल तुइश्शो बाक्त। 3 मिनु मोआब डा मुर इस्राएली आन कली तशा साप्पा हितेकम। मारदे हना मेको शुश बाक्तेकम। मोपतीके मेको आन थुं ग्येथ लुकच दुम्त। 4 मिनु मोआबीपुकीमी मिदयान डा खाल्पा आन कली "दोपा ब्यफोम घांस बाक्तीक दिंम चाइश्शा घांस नेल्ल ब्वाइबा, मोपा एको हुलपुकीमी इं कली एर ओंथ नेल्ल रे ब्वाइनीम" देंतेकम। मेना सिप्पोर आ तौ बालाक मोआब डा पिप बाक्त। 5 मेकोमी आमाव रागी युफ्रेटीस माइश्शो ठेयब खोला आ नेक्था, पेथोर सहरम बाक्शो बेओर आ तौ बालाम कली मुरपुकी ब्रथ सोइक्ताक्व। मेकोपुकीमी "इजीप्ट रे जाक्शो मुरुम रागी नेल्ल ब्रीतेकम। मेकोपुकी आं नेक्था जाक्शा बाक्शो बाक्नीम। *गन्ती ३१:८; यहोसु २४:९; मीका ६:५* 6 मुल गे जाक्को। आं कली वारच पा, मेको मुर आन कली सराप चीले पाइक्की। मारदे हना मेकोपुकी आं क्येडा शुश नु बोल्यो बाक्नीम। मो पाइतीनी हना, गो मेको आन कली ग्राशा, आं रागी रे गुंडने चबु वा। मारदे हना गे सु कली आसीक गेनीनी, मेको आसीक राइनीम। मिनु सु कली सराप चीले पाइनीनी, मेको सराप चीले राइनीम, दे गो तुइक्नुड" दे सोइक्ताक्व। *२पत्रुस २:१५*

7 मिनु मोआब नु मिदयान डा खाल्पापुकीम मेको गेय पचा कली क्येट कुरशा, बालाम आ बाक्तीक जाक्शा, बालाक आ लोत्र शोवतेकम। 8 मिनु बालाममी मेको आन कली "मुलाक्दो एकेन बाक्कीन। मिनु परमप्रभु यावेमी आं कली मार देंबा, गो मेकोन इन कली देंनुड" देंत। मोपतीके मेको मोआब डा ठेयब गेय पाइब मुरपुकी मेको नाक्दो बालाम आ खिं उइ बाक्तेकम। 9 मिनु परमप्रभु बालाम आ बाक्तीक जाक्शा, मेको कली "गे नु बाक्ब मुरपुकी सु नमी?" देंत। 10 मिनु बालाममी परमप्रभु कली "मोआब डा पिप, सिप्पोर आ तौ बालाकमी आं कली 11 'इजीप्ट रे गूशा जाक्शो मुरपुकीम रागी नेल्ल ब्रीशो बाक्नीम। मुल जाक्शा आं कली वारच पा मेको आन कली सराप चीले पाइक्की। मो दुम्त हना, गो मेको आन कली लडाइ पा ग्राशा, खेरने चापुण्ड डा कों?' दे लोत्र कुर पा सोइश्शो मुर बाक्ब" देंत। 12 मिनु परमप्रभुमी बालाम कली "गे एकोपुकी नु मलावो। गे मेको मुर आन कली सराप चीले मपाइक्की। मारदे हना मेकोपुकी आसीक रशो बाक्नीम" देंत। 13 मिनु बालाम सुनी कना बोक्शा, मेको बालाक आ सोइश्शो मुर आन कली "गेपुकी इन रागी लने। मारदे हना, परमप्रभु यावेमी आं कली गेपुकी नु लचा मगेयी" दे माइक्तीमी। 14 मिनु मोआब डा ठेयब मुरपुकी बालाक आ बाक्तीक जाक्शा "बालाम गोपुकी नु जाक्ने मबिस्से" देंतेकम। 15 मिनु बालाकमी लेंशा, मेको आन क्येडा ठेयब नु शुश मुरपुकी सोइक्ताक्की। 16 मिनु मेकोपुकी बालाम आ बाक्तीक जाक्दीश्शा "सिप्पोर आ तौ बालाकमी इन कली 'आं बाक्तीक जाक्वा मारेइम मतेक्वाल। 17 गो थमा पा

इ कली मान पशा, ठेयब सेल्लुड। गे मार देंनीनी, गो मेकोन पाइनुड। मिनु जाक्शा, मेको मुर आन कली सराप चीले पाइक्मी' देंत" देंतेक्म।<sup>18</sup> तन्न बालाममी बालाक आ गेय पाइब मुर आन कली "बालाकमी सुन नु चांदीम ब्रीशो आ दरवार गेती हना यो, गो परमप्रभु यावे, आं परमप्रभु आ लोत्र आइक्च बाक्त हना यो, ठेयब बाक्त हना यो, मेको लोत्र लाक्ने मचाप्नुड। १३:८<sup>19</sup> मिनु अरु आन खोदेंशो पा गेपुकी यो, मुलाक्दो एक उइ बाक्कीन। मिनु परमप्रभु यावेमी आं कली लेंशा मार मार देंबा गो तुइक्नुड" देंत।<sup>20</sup> मिनु मेको नाक्दो परमप्रभु बालाम आ बाक्तीक जाक्शा, मेको कली "एको मुरपुकी इ कली ब्रेथ जाक्शो बाक्तेक्म हना, बोक्को, मिनु मेकोपुकी नु लावो। तन्न गो इ कली मार देंडा, मेको ला पावो" देंत।<sup>21</sup> मिनु बालाम सुनी कना बोक्शा, आ गधा छादेशा मोआब डा ठेयब मुरपुकी नु लत।

### बालाम आ गधा

<sup>22</sup> मिनु मेको मोपा लतीके परमप्रभु गाइक्ताक्व। मिनु परमप्रभु यावे आ स्वर्ग डा गेय पाइब कामी मेको कली तेक्चा, दे लांम राष्ठा बाक्त। मिनु बालाम आ गधाम डोइश्शा लना लन बाक्त। मेको आ गेय पाइब निक्शी यो मेको नु गाक्शो बाक्ताक्व। उत्पत्ती १६:७<sup>23</sup> मिनु मेको गधामी परमप्रभु यावे आ स्वर्ग डा गेय पाइब शोइश्शो तरवार शेशा, लांम बाक्शो ताप्तु। मिनु मेको गधा हिंशा, लां रे रूम लत। मिनु बालाम गधा कली लां गे सोइक्चा कली तुप्तु। यहाँसु ५:१३

<sup>24</sup> मिनु परमप्रभु यावे आ स्वर्ग डा गेय पाइब आइक्च लांम राष्ठा बाक्त। मेको लां निम्फा पटटी गारो प्रोव्रशो अडगुर रू आस दातेमी बाक्त।<sup>25</sup> मिनु मेको गधामी परमप्रभु यावे आ स्वर्ग डा गेय पाइब कली तशा, गारो गे ढेंसेसीशा गाक्त। मिनु बालाम आ खोइली मेको गारोम खोरताक्व। मिनु मेकोमी मेको कली लेंशा तुप्तु।<sup>26</sup> मिनु लेंशा परमप्रभु यावे आ स्वर्ग डा गेय पाइब इक्का ग्येत्थ लशा, ग्युरा पेरा तेइ रे मलाक्चा डा पा आइक्च लांमी राप्त।<sup>27</sup> मिनु बालाम आ गधाम परमप्रभु यावे आ स्वर्ग डा गेय पाइब कली तशा, गु ब्रेशा बाक्त। मिनु बालाम थाम्पा गाइश्शा, आ गधा कली कोक्केमी तुबा बाक्त।<sup>28</sup> मिनु नोले परमप्रभु यावेमी मेको गधा कली ब्वाक्ब सेल्लु। मिनु मेकोमी बालाम कली "गो इन कली मार पडा? मारदे गे आं कली सां खेयप तुप्पीनी?" देंत।<sup>29</sup> मिनु बालाममी मेको गधा कली "गे आं कली शाक्ती। गो आं गुइम तरवार बाक्शो हना, गो इ कली मुलन साइक्न वा" दे माइक्तु।<sup>30</sup> तन्न गधाम बालाम कली "गो डोंइती रे मुल सम्म इन डोइश्शो गधा मनडा डा? गो डोंइती इन कली गेनायो ओदेंशो मपड" देंत। मिनु मेकोमी "मपवी" देंत।

<sup>31</sup> मिनु परमप्रभु यावेमी बालाम कली मिक्च ताइब सेल्लु। मिनु मेकोमी तरवार शोइश्शो परमप्रभु यावे आ स्वर्ग डा गेय पाइब का लांम राष्ठा ताप्तु। मिनु बालाम खुम्की पा बाप्त।<sup>32</sup> मिनु मेको परमप्रभु यावे आ स्वर्ग डा गेय पाइबमी मेको कली "मारदे इ गधा कली खेयप सां तुबी? कोत्रडो, गो इ लां तेक्चा कली जाक्शो बाक्नुड। मारदे हना गे आं डोंइती इ दला दाक्स पाप्तीवी।<sup>33</sup> इ गधामी आं कली तशा, खेयप सां सम्म आं बाक्तीक रे प्रोक्त। मेकोम आं कली तशा, मप्रोक्शो हना, गो इ कली मुल साइक्ने थुमु वा। तन्न मेको कली चहिं सेसीन सोइक्तु वा" दे माइक्तु।<sup>34</sup> मिनु बालाममी परमप्रभु यावे आ स्वर्ग डा गेय पाइब कली "गो पाप पाता। आं लां तेक्शा इन राष्ठा गो मतुइक्तु। मिनु इन डोंइती एको मरिश्शो बाक्त हना, गो लेशशा लाइनुड" देंत।<sup>35</sup> मिनु परमप्रभु यावे आ स्वर्ग डा गेय पाइबमी बालाम कली "एको मुरपुकी नु लावो। तन्न गो इ कली मार लोत्र पाइनुडा, गे मेको ला देनो" दे माइक्तु। मोपतीके बालाम बालाक आ सोइश्शो ठेयब मुरपुकी नु लत।

<sup>36</sup> मिनु बालाकमी बालाम जाक्शो नेंशा, मेकोमी आ रागी आ सुर अरनोन खोला डा सांद डा सहर इर-मोआब सम्म मेको कली गुम्थ लत।<sup>37</sup> मिनु बालाकमी बालाम कली "गो इन कली ब्रेथ मुर सोइक्ताक्डमी। तन्न गे मारदे आं बाक्तीक मजाक्नी? गो इ कली मान पने मचाप्नुडा डा?" देंत।<sup>38</sup> मिनु बालाममी बालाक कली "मुल गो इन बाक्तीके जाक्ती। मार

देंचा माल्लुडा, दे मतुइक्नुड। परमप्रभुम मार देंबा, गो मेको ला देने चाप्नुड" देंत।<sup>39</sup> मिनु बालाम बालाक नु लत। मिनु मेको नेल्ल किरयथ-हुसोथमी जाक्तेक्म।<sup>40</sup> मिनु बालाकमी ब्यफ नु क्यारश भेडा क्योरशा चढ़ेशा, बालाम नु मेको नु बाक्ब ठेयब मुर आन कली यो थुल्लीमी।

<sup>41</sup> आ दीसा सुनी बालाकमी बालाम कली लाइश्शा, बामोथ-बालमी डोइश्शा लत। मिनु मेकेर रे बालाममी इक्का मुर आन कली ताप्तु। यहाँसु १३:१७

### बालाममी आसीक गेशो

**23** मिनु बालाममी बालाक कली "आं कली ७ ओटा चढ़ेतीक सेलीन। मिनु ७ ओटा ब्यफ नु ७ ओटा सांड ठीक सेलीन" देंत।

<sup>2</sup> मिनु बालाकमी बालाममी देंशो खोदेंशो पाप्तु। मिनु बालाक नु बालाममी ब्यफ का नु सांड का चढ़ेतीक का काम चढ़ेम्ताक्से।

<sup>3</sup> मिनु नोले बालाममी बालाक कली "गे इन चोशा चढ़ेतीके आ नेक्था राष्ठा बाक्कीन। गो चहिं एर गे लाइनुड। परमप्रभु यावे आं कली गुम्थ जाक्बा, को। मिनु मेकोमी आं कली मार कोइबा, मेको इन कली देंनुड" देंत। मिनु मेको गोरशो डांडा डोंइसाक्व।

<sup>4</sup> मिनु परमप्रभुमी बालाम कली गुमानु, बालाममी मेको कली "गो ७ ओटा चढ़ेतीके सेल्पाइश्शा, मेकेर ब्यफ का का नु सांड का का चढ़ेता" देंत।<sup>5</sup> मिनु परमप्रभु यावेमी बालाम कली लोत्र पशा "गे बालाक आ बाक्तीके लेतो। इ कली देंशो लोत्र मेको कली मतो" देंत।<sup>6</sup> मिनु मेको बालाक आ बाक्तीके लेशशा जाक्त। मेना बालाक नु मोआब डा ठेयब मुरपुकी चोशा चढ़ेतीके आ नेक्था राष्ठा बाक्तेक्म।<sup>7</sup> मिनु बालाममी परमप्रभु आ देंशो लोत्र पा बालाकमी आं कली अराम रागी रे चाक्तु। नां दाप्तीके डा पहाडम बाक्ब मोआबी आन पिपमी आं कली "जाक्कीन, मिनु आं पा डा याक्ब कली सराप चीले पने। इसाएली आन कली हिंच कोइदीमी" देंत।<sup>8</sup> मिनु "परमप्रभुमी सराप चीले मपाइश्शो आन कली, गो दोपा सराप चीले पाइक्नुडमी? परमप्रभु यावेमी हिंच मकोइशो आन कली, गो दोपा हिंच कोइनुडमी?"<sup>9</sup> गो सेरथे फुल्लु तार बाक्शा, मेको आन कली ताइनुड। गो डांडाम बाक्शा, मेको आन कली कोत्रनुड। मेको आन का ला बाक्ब जात डा मुर बाक्नीम। मिनु रागी रागी डा मुर नु मखाल्सीनीम।<sup>10</sup> याक्ब आ मुर फुरक खोदेंशो पा शुश दुश्शो बाक्नीम। इसाएल डा मुर आन ४ भाग डा भाग का यो, सुम हिक्ने चाप्नीमी डा? उत्पत्ती १३:१६ गे आं कली ठीक पाइब मुर आन कली खोदेंशो पा बेक्चा गेयीनी। मिनु आं बेक्तीके मेको आन केन खोदेंशो दुम्ल" देंत।

<sup>11</sup> मिनु बालाकमी बालाम कली "गे आं कली मार पनी? गो इन कली आं जोरी सत्रु आन कली सराप चीले पाइक्चा कली ब्रेशशा चाक्तन्नी। तन्न गे दूली पा मेको आन कली आसीक कका गेतीनी" देंत।<sup>12</sup> मिनु मेकोमी "गो परमप्रभु यावेम आं थुंम वोइश्शो देंशो लोत्र ब्वाक्चा माल्लुड" देंत। गन्ती २२:३८

### बालाममी लेंशा आसीक गेशो

<sup>13</sup> मिनु बालाकमी मेको कली "गो नु अर्को बाक्तीके पिने। गे एकेर रे मेको आन कली ताइनीनी। मेकेर रे मेको आन कली इक्का ला ताइतीनी। नेल्ल आन कली तने मचाप्नीनी। मेको आन कली मेकेर रे सराप चीले पतीन" देंत।<sup>14</sup> मिनु मेकोमी मेको कली चोफीम डा रू पिप्सा डांडाम लाइक्तु। मिनु ७ ओटा चढ़ेतीक सेल्शा, मेको तारी ब्यफ का का नु सांड का का चढ़ेप्तु।<sup>15</sup> मिनु बालाममी बालाक कली "गो परमप्रभु यावे कली गुम्थ एर लाइनुड। गे चहिं एको इन चोशा चढ़ेशो आ नेक्था राष्ठा बाक्कीन" देंत।<sup>16</sup> मिनु परमप्रभु यावेमी बालाम कली गुम्शा, आ थुंमी लोत्र वोइश्शा, मेको कली "गे बालाक आ बाक्तीके लेतो। इ कली देंशो लोत्र मेको कली मतो" देंत।<sup>17</sup> मिनु मेको बालाक आ बाक्तीके लेशशा जाक्त। मेना बालाक नु मोआब डा ठेयब मुरपुकी चोशा चढ़ेतीके आ नेक्था राष्ठा बाक्तेक्म। मिनु बालाकमी मेको कली "परमप्रभु यावेम मार देंम?" दे हिल्लो पाप्तु।<sup>18</sup> मिनु बालाममी परमप्रभु आ देंशो लोत्र पा "बालाक बोक्शा, आं लोत्र नेनो।

सिप्पोर आ तौ इ नोफा दाइक्त्वो।<sup>19</sup> परमप्रभु मुर ममाइ। मेकोमी जोल मपाइब। मेको बेक्शा लाइब मुर खोदेशो पा आ थुं मफाइक्ब। मेकोमी लोव्र थोक्शा देंम डा मेरे पाइब। मेकोम पाइक्नुड देंम डा मेरे मेको मपाइक्बा डा? *१सामुएल १५:२९*<sup>20</sup> नेनीन, गो मेको आन कली आसीक गेतीक लोव्र तशो बाक्नुड। मेकोमी मेको आन कली आसीक गेशो बाक्ब। मिनु गो मेको फाइक्ने चाप्नुडा डा? <sup>21</sup> याकूब कली मरिश्शो मदुम्ब, देंशो बाक्ब। मिनु इस्राएली आन कली श्येत मदुम्ब। मेको परमप्रभु यावे, आन परमप्रभु मेकोपुकी नु बाक्ब। मिनु मेको आन दातेमी पिप बाक्ब। <sup>22</sup> परमप्रभुमी मेको आन कली इजीप्त रे गुंडशा, आ सक्तिम मेको आन कली ब्वाकी डा ब्यफ खोदेशो सेल्शो बाक्ब। <sup>23</sup> थमा पा, याकूब कली राइब मारेइ मन्तर तन्तर मबाक्ब। इस्राएली आन कली राइब मारेइ लिंक्यु कोव्रतीके मबाक्नीम। मुल याकूब नु इस्राएल आ पर्वम परमप्रभु आ पशो कोव्रडीन। <sup>24</sup> कोव्रडीन, मेको जात डा मुर गुप्सनी खोदेशो पा बोक्नीम। प्रेक्शा ग्राम्चा चिक्शा गुप्स खोदेशो पा मेको छुल बोक्ब। मेकोमी सिखार मब्बा सम्म नु सिखार आ हुश मतूडा सम्म मनाइक्ब” देंत। *गन्ती २४:९; इजीकीएल १९:२*

<sup>25</sup> मिनु बालाकमी बालाम कली “मेको आन कली सराप चीले मगेने, आसीक यो मगेने” देंत।

<sup>26</sup> तन्न बालाममी बालाक कली “परमप्रभु यावेमी मार देंबा, गो मेको पचा माल्नुड, दे गो इन कली ना कना मर्देडा डा?” देंत।

<sup>27</sup> मिनु बालाकमी बालाम कली “मुल पिने, गो इन कली अर्को बाक्तीकेमी लाइक्नन्नी। मेकेर रे गे आं पा डा मेको आन कली सराप चीले पचा कली परमप्रभुमी दाक्बा कों?” देंत। <sup>28</sup> मिनु बालाकमी बालाम कली पेओर डांडाम लाइक्त्वो। मेकेर रे गोरशो रागी नेल्ल तांडसाक्व। *गन्ती २२:४१; गन्ती २५:३*

<sup>29</sup> मिनु बालाममी बालाक कली “एकेर आं कली ७ ओटा चढेतीक सेलीन। मिनु ७ ओटा ब्यफ ७ ओटा सांड ठीक पने” देंत। <sup>30</sup> मिनु बालाकमी बालाममी देंशो खोदेशो पा पाप्नु। मिनु चढेतीक नेल्लेमी ब्यफ का का नु सांड का का चढेप्नु।

बालाममी सां खेयप लोव्र पशो

**24** मिनु बालाममी परमप्रभु यावेमी इस्राएली आन कली आसीक गेचा थुं पशो बाक्त, दे तुइक्ताक्व। मिनु मेको डोंइती डा खोदेशो पा परमप्रभु कली हिल्लो पथ मला। तन्न मेकोमी आ कुल गोरशो रागी गे हिरशा कोव्रतु। <sup>2</sup> मिनु बालाममी कोव्रना कोव्रन, इस्राएली आन कली थर थर पा बाक्शो ताम्तीमी। मिनु परमप्रभु आ सोक्तीम मेको कली सुम्नु। <sup>3</sup> मिनु मेकोमी परमप्रभु आ पपाइश्शो लोव्र पा “गो बेओर आ तौ बालाम, मिक्च ताइब नड, आ देंशो लोव्र मार बाक्त देंशा हना, *१सामुएल ९:९*<sup>4</sup> गो, परमप्रभु आ लोव्र नैबमी, एको लोव्र पाइनुड। गो नेल्ल क्येडा सक्ति पाइश्शो आ कोंइती ताइनुड। मिनु गो आ डोंइती बाप्शा, मेको कली ताइनुड। <sup>5</sup> याकूब आ मुर इन ताम्बु गिश रिश्शो बाक्नीमी। गे इस्राएली इन बाक्तीके दारशो बाक्नीमी। <sup>6</sup> मेको खजूर रवा खुम्शो ठेयब दिंम खोदेशो बाक्ब। मेको खोला आ नेक्था खुम्शो फू रू खोदेशो बाक्ब। मेको परमप्रभु यावेमी खुम्शो ठेयब घू कुमारी खोदेशो बाक्ब। ब्वाक्कु आ नेक्था वाशो लेबानोन डा लाइश्शो रवा खोदेशो बाक्ब। <sup>7</sup> मेको आन गरपुकीम ब्वाक्कु ब्रीशा क्युप्ब। मिनु मेको आन रू शुश ब्वाक्कु ताइनीम। मेको आन पिप अगाग क्येडा यो ठेयब बाक्ब। मिनु मेको आ राज्य ठेयब सेल्चा पुंडसीब। <sup>8</sup> परमप्रभुमी मेको आन कली इजीप्त रे गुंडशा चाक्शो बाक्ब। आ सक्ति इस्राएली आन कली ब्वाकी डा ब्यफ आ ग्रोव्र खोदेशो बाक्ब। रागी रागी डा जोरी सत्रु आन कली क्याम्ब। मेको आन रुश जिक्ब। मेको आन लिब्रामी मेको आन कली ख्रिश्शा साइक्ब। <sup>9</sup> मेको गुप्स खोदेशो पा बाप्शा बाक्ब। गुप्सनी खोदेशो पा बाप्शा बाक्ब। सुम मेको कली पोक्बा डा? इस्राएली, सुमी इन कली आसीक गेनीमी, मेको आसीक राइनीम। सुमी इन कली सराप चीले पाइक्नीमी, मेको सराप चीले राइनीम” देंत। *गन्ती २३:२४; उत्पत्ती ४९:९; उत्पत्ती १२:३; उत्पत्ती २७:२९*

<sup>10</sup> मिनु बालाक बालाम कली तशा, शुश गाइक्ताक्व। मिनु मेकोमी आ गुइ क्युक्शा, बालाम कली “गो इ कली आं जोरी सत्रु आन कली सराप चीले पाइक्वा कली कका ब्रेत्ताक्न। तन्न गे मेको आन कली सां खेयप आसीक कका गेप्तीवी। <sup>11</sup> मोपतीके मुल गे दोरोर पा इ खिं लेतो। गो इ कली ठेयब सेल्नुड, दे मिश्शो नड। तन्न परमप्रभु यावेमी इ कली मान ततीक रे तेक्तु” देंत।

<sup>12</sup> मिनु बालाममी बालाक कली “गे आं कली ब्रेत्थ सोइश्शो मुर आन कली गो <sup>13</sup> ‘बालाकमी आं कली सुन नु चांदीम ब्रीशो आ दरवार गेती हना यो, परमप्रभु यावे आ लोव्र लाक्शा आं मिश्शोमी मारेइ रिश्शो नु मरिश्शो पने मचाप्नुड। परमप्रभु यावेमी आं कली मार देंबा, गो मेकोन देंनुड” मर्देशो नडा डा? *गन्ती २२:१८*<sup>14</sup> मुल गो आं मुर आन बाक्तीके लाइनुड। तन्न इस्राएलीपुकीम इन मुर आन कली नोले मार पाइक्नीमी, मेको इन कली शेंनुड” देंत।

बालाममी परमप्रभु आ लोव्र पशो

<sup>15</sup> मिनु बालाममी परमप्रभु आ पपाइश्शो लोव्र पा “गो बेओर आ तौ बालाम, मिक्च ताइब नड, आ देंशो लोव्र मार बाक्त देंशा हना, <sup>16</sup> गो, परमप्रभु आ लोव्र नैबमी, एको लोव्र पाइनुड। गो नेल्ल क्येडा ठेयब तुइश्शा, नेल्ल क्येडा सक्ति पाइश्शो आ कोंइती ताइनुड। मिनु गो आं मिक्च मसुम्शो आ डोंइती बाप्शा, <sup>17</sup> गो मेको कली ताइनुड, तन्न मुल ममाइ। गो मेको कली कोव्रनुड। तन्न आ नेक्था रे ममाइ। याकूब रे पा सौरुल का दाप्ब। मिनु इस्राएली रे पा पिप का गूब। मिनु मेकोमी मोआब रागी आ सांद रे पा खतम सेल्ब। मिनु शेष आ थर डा मुर आन कली खतम पोक्ब। *मत्ती २:२; लूका १:७८; उत्पत्ती ४९:१०; २सामुएल ८:२*<sup>18</sup> एदोम रागी आ केन सेल्ब। मिनु सेइर रागी ग्राब। मिनु इस्राएल बोल्यो दुम्ब। *२सामुएल ८:१४; येरमीया ४९:७-२२*<sup>19</sup> याकूब रे पा हुकुम पाइब का गूब। मिनु इर सहर डा लीशो आन कली साइक्ब” देंत। *मीका ५:१, ७, ८*<sup>20</sup> मिनु बालाममी अमालेक आ मुर आन कली कोव्रशा “अमालेक आ मुरपुकी रागी रागी नेल्ल क्येडा डोंइती डा बाक्तेक्म। तन्न मेकोपुकी गेना हना यो जाम्शा लाइनीमी” देंत। *प्रस्थान १७:१४; १सामुएल १५:२-३, ७*<sup>21</sup> मिनु नोले मेकोमी केनी डा मुर आन कली कोव्रशा “इन बाक्तीक रागी बोल्यो बाक्ब। इन बाक्तीक सेरथे फुल्लुमी सेल्शो ग्योव्र खोदेशो बाक्ब। *१सामुएल १५:६*<sup>22</sup> तन्न गे काइन सहर डा मुरपुकी मीम चोचा पुंडसीनीनी। गिश सम्म अश्शुरीमी इन कली फ्रेंशा लाइक्नीम” देंत।

<sup>23</sup> मिनु लेंशा मेकोमी लोव्र पा “आबी, परमप्रभुम मोदेशो पवानु, सु ब्रोंइने चाप्बा डा? <sup>24</sup> किक्तीम रे जहाजपुकी जाक्नीम। मिनु मेकोपुकीम अश्शुर नु एबेर कली श्येत गेनीम। मिनु मेकोपुकी यो खतम दुम्नीम” देंत। *उत्पत्ती १०:-४; उत्पत्ती १०:२१-२२*

<sup>25</sup> मिनु बालाम बोक्शा, आ खिं लेत्त। मिनु बालाक यो आ लां लत। *गन्ती ३१:८, १६*

शित्तीममी मूर्ति पूजा पशो

**25** इस्राएलीपुकी शित्तीममी बाक्मानु, मुरपुकी मोआबी आन तमीपुकी नु इप्शा, मरिश्शो पचा गोम्तेक्म। *गन्ती ३३:४९; १कोरिन्थी १०:८*<sup>2</sup> मिनु मेकोपुकीम इस्राएली आन कली आन देवी देवता आन कली चढेतीकेम ब्रेत्ताक्म। मिनु मेकोपुकीम मेको आन भोज जशा, मेको आन देवी देवता आन डोंइती बाप्तेक्म। <sup>3</sup> मोपा इस्राएलीपुकीम पेओर डांडा डा बाल देवता कली पूजा पचा गोम्तेक्म। मिनु परमप्रभु यावे इस्राएली आन पर्वम गाइक्ताक्व। *ब्यक्स्था ४:३; भजन संग्रह १०६:२८*<sup>4</sup> मिनु परमप्रभु यावेमी मोसा कली “एको मुर आन ठेयब मुर नेल्ल आन कली चाक्शा क्युक्शा साइश्शा, परमप्रभु यावे आ डोंइती नाप्शो नांम वोइक्मी। मिनु परमप्रभु यावे इस्राएली आन पर्वम आ थाम्पा गाइश्शो नांइसीब” देंत। *ब्यक्स्था २१:२२-२३; २सामुएल २१:६-९*<sup>5</sup> मिनु मोसाम इस्राएली आन निसाफ पाइब आन कली “गे नेल्लेमी पेओर डांडा डा बाल देवता कली पूजा

पाइब इन मुर नेल्ल आन कली साइक्वा माल्नीनी" दे माइक्तीमी। प्रस्थान ३२:२७

6 मिनू इस्राएलीपुकी गुम्तीक ताम्बु आ ओव्रतीकेम डाक्शा बाक्मानु, मेना इस्राएली काम मोसा नु इस्राएली नेल्ल आन डोंइती आ खिंम मिदयानी मीश का चाक्तु। गन्ती ३१:१६ 7 मिनू चढेब हारून आ चच, एलाजर आ तौ फिनेहासमी मेको तशा, मेको बोक्शा, आ गुडमी तूतीक का शेशा, प्रस्थान ६:२५ 8 मेको इस्राएली आ नोनोले लशा, आ बाक्तीक ओव्रशा, मेको इस्राएली नु मेको मीश मुर निम्फा आस कली एर ओंथ खिप्पाइश्शा थोक्तीम्सी। मिनू इस्राएली आन दाते रे मेको मुर बेक्तीक रोइ जाम्त। 9 तन्न मेको मुर बेक्तीक रोइम बेक्बपुकी २४ हजार बाक्तेक्म। भजन संग्रह १०६:२९-३१

10 मिनू परमप्रभु यावेमी मोसा कली 11 "चढेब हारून आ चच, एलाजर आ तौ, फिनेहासमी इस्राएली आन पर्वमी आं गाइश्शो नाइक्पाइक्तु। फिनेहासमी आं रुश पशो तुइश्शा, आ जोंब बोक्शा, आं गाइश्शो नाइक्पाइक्तु। मिनू मेको आन कली मसदुमी। 12 मोपतीके गे मेको कली 'परमप्रभुमी इ कली आं थुं नाइक्तीक कबल पाइब। इइतिहास ९:२०; यसैया ५४:१०; मलाकी २:५ 13 मिनू मेको कबल इ कली नु इ चच युइ आन कली बाक्ब। मेको गेना हना यो चढेब दुम्तीक कबल बाक्ब। मारदे हना गे इ परमप्रभु आ पर्वम जोंब बोक्शा, गेय पाप्तीवी। मिनू गेमी इस्राएली आन पर्वम पाप क्याम्तीक गेय पाप्तीवी' देनो" देंत। 14 मेको मिदयानी मीश मुर नु साइक्वा पुंइसीब इस्राएली आ नें जिम्मी बाक्त। मेको सालु आ तौ सिमियोन आ थर डा खिं का डा ठेयब मुर बाक्त। 15 मेको साइक्वा पुंइसीब मिदयानी मीश मुर आ नें कोज्बी बाक्त। मेको सुर आ तमी बाक्त। मेको मिदयान डा ठेयब मुर बाक्त।

16 मिनू परमप्रभु यावेमी मोसा कली 17 "मिदयानी आन कली श्येत गेशा, साइक्मी। गन्ती ३१:२-१० 18 मारदे हना, मेकोपुकीमी इन कली यो श्येत गेचा गोम्तेक्म। मिनू इन कली बाल-पेओर कली पूजा पपाइक्तेक्म। मेना मिदयान डा ठेयब मुर आ तमी कोज्बीमी इन कली श्येत गेपाइक्तु। मेको चहिं मुर साइक्वा रोइ बोक्म नाक्त साइक्वा पुंइसाक्व। पेओर कली पूजा पतीके मो दुम्शो बाक्त" देंत।

### इस्राएली आन कली हिक्शो

26 मेको मुर बेक्तीक रोइ दुम नोले परमप्रभु यावेमी मोसा नु चढेब हारून आ तौ एलाजर आस कली 2 "इस्राएली नेल्ल आन दातेमी २० बर्स गाप्शो नु मेको क्येडा लाक्शो लडाइम लने चाप्ब आन कली थर थर पा हिक्कीस" देंत। गन्ती १:२-४७; 3 मिनू मोसा नु चढेब एलाजरमी यरीको आ आइक्वी हांबु यर्दन खोला आ शुंइच मोआब डा दिंमम इस्राएली आन कली गुम्पाइश्शा 4 "परमप्रभु यावेमी मोसा कली अरेशो खोंदेशो पा २० बर्स गाप्शो नु मेको क्येडा लाक्शो मुर आन कली हिक्कीन" दे माइक्तीमी। मिनू इजीप्त रे गूशा जाक्शो इस्राएलीपुकी एकोन बाक्तेक्म।

5 इस्राएल आ डोंइती जरमेशो तौ रूबेन आ थर, हनोक आ खिं खिं डा मुरपुकी, पल्लु आ खिं खिं डा मुरपुकी, उत्पत्ती ३५:२३-२६; उत्पत्ती ४६:८-२७; इइतिहास ४:-८:- 6 हेस्रोन आ खिं खिं डा मुरपुकी नु कारमी आ खिं खिं डा मुरपुकी बाक्तेक्म। 7 एको रूबेन आ थर डा खिं खिं डा मुरपुकी बाक्तेक्म। मेको नेल्ल आन कली हिक्शो, ४३ हजार ७ सहे ५० जना बाक्तेक्म।

8 पल्लु आ तौ आन दातेमी का एलीआब बाक्त। 9 एलीआब आ तौपुकी, नेमुएल, दाथान नु अबीराम बाक्तेक्म। एकोपुकी मेको दाथान नु अबीराम आन दाते डा ठेयब मुरपुकी बाक्तेक्म। मेकोपुकी कोराह आ हुलम ब्वांइसीशा मोसा नु हारून नु जिचा पोक्शा, परमप्रभु यावे आ पर्वम दूली पा बोक्शो बाक्तेक्म। गन्ती १६:१, १२ 10 मिनू रागीम आ शोत्र पाक्शा मेको आन कली कोराह नुन दाक्शो बाक्त। मेना सहे निक्शी ५० जना आन कली मीम खतम पोक्शो बाक्त। मेकोपुकी मरिम्शो पाइब दुम्शो बाक्तेक्म।

11 तन्न कोराह आ तौपुकी चहिं मबेक्शो बाक्तेक्म।

12 सिमियोन आ थर डा मुर आन खिं खिं डा मुरपुकी का का पा हिक्शो, नेमुएल आ खिं खिं डा मुरपुकी, यामीन आ खिं खिं डा मुरपुकी, याकीन आ खिं खिं डा मुरपुकी, 13 जेराह आ खिं खिं डा मुरपुकी नु शावल आ खिं खिं डा मुरपुकी बाक्तेक्म। उत्पत्ती ३६:१३ 14 एको सिमियोन आ थर डा खिं खिं डा मुरपुकी बाक्तीम। मेको नेल्ल आन कली हिक्शो, २२ हजार सहे निक्शी बाक्तेक्म।

15 गाद आ थर डा मुर आन खिं खिं डा मुरपुकी का का पा हिक्शो, सेफोन आ खिं खिं डा मुरपुकी, हाग्गी आ खिं खिं डा मुरपुकी, शुनी आ खिं खिं डा मुरपुकी, 16 ओज्नी आ खिं खिं डा मुरपुकी, एरी आ खिं खिं डा मुरपुकी, 17 अरोद आ खिं खिं डा मुरपुकी नु अरेली आ खिं खिं डा मुरपुकी बाक्तेक्म। 18 एको गाद आ थर डा खिं खिं डा मुरपुकी बाक्तेक्म। मेको नेल्ल आन कली हिक्शो ४० हजार ५ सहे जना बाक्तेक्म।

19 मिनू यहूदा आ तौ एर नु ओनान बाक्ताक्स। तन्न मेको कनान रागीम बेक्ताक्स। उत्पत्ती ३८:७-१० 20 यहूदा आ थर डा मुर आन खिं खिं डा मुरपुकी का का पा हिक्शो, शेलाह आ खिं खिं डा मुरपुकी, पेरेस आ खिं खिं डा मुरपुकी, जेराह आ खिं खिं डा मुरपुकी बाक्तेक्म। 21 मिनू पेरेस आ चच युइ डा मुर चहिं, हेस्रोन आ खिं खिं डा मुरपुकी नु हामुल आ खिं खिं डा मुरपुकी बाक्तेक्म। रूथ ४:१८ 22 एको यहूदा आ थर डा खिं खिं डा मुरपुकी बाक्तेक्म। मेको नेल्ल आन कली हिक्शो, ७६ हजार ५ सहे जना बाक्तेक्म।

23 इस्साकार आ थर डा मुर आन खिं खिं डा मुरपुकी का का पा हिक्शो, तोला आ खिं खिं डा मुरपुकी, पुवा आ खिं खिं डा मुरपुकी, 24 याशुब आ खिं खिं डा मुरपुकी नु शिम्रोन आ खिं खिं डा मुरपुकी बाक्तेक्म। 25 एको इस्साकार आ थर डा खिं खिं डा मुरपुकी बाक्तेक्म। मेको नेल्ल आन कली हिक्शो, ६४ हजार सहे सां बाक्तेक्म।

26 जबूलून आ थर डा मुर आन खिं खिं डा मुरपुकी का का पा हिक्शो, सेरेद आ खिं खिं डा मुरपुकी, एलोन आ खिं खिं डा मुरपुकी नु याहलेल आ खिं खिं डा मुरपुकी बाक्तेक्म। 27 एको जबूलून आ थर डा खिं खिं डा मुरपुकी बाक्तेक्म। मेको नेल्ल आन कली हिक्शो, ६० हजार ५ सहे जना बाक्तेक्म।

28 मिनू योसेफ आ तौ मनस्से नु एफ्राइम आस थर डा मुर आन खिं खिं डा मुर आन कली का का पा हिक्शो, 29 मनस्से आ चच युइ डा माकीर आ खिं खिं डा मुरपुकी बाक्तेक्म। माकीर गिलाद आ आफ बाक्त। यहोसु १७:१-६ 30 गिलाद आ चच युइपुकी इएजेर आ खिं खिं डा मुर रे इएजेर, हेलेक आ खिं खिं डा मुरपुकी, 31 असीएल आ खिं खिं डा मुरपुकी, शेकेम आ खिं खिं डा मुरपुकी, 32 शेमीदा आ खिं खिं डा मुरपुकी नु हेफेर आ खिं खिं डा मुरपुकी बाक्तेक्म। हेफेर आ तौ सेलोफेहाद के चहिं तौ मबाक्थु, तमीपुकी ला बाक्तेक्म। 33 हेफेर आ तौ सेलोफेहाद आ तमी आन नें महलाह, नोआह, होग्ला, मिल्का नु तिरचा बाक्तेक्म। गन्ती २७:१ 34 एको मनस्से आ थर डा खिं खिं डा मुरपुकी बाक्तेक्म। मेको नेल्ल आन कली हिक्शो, ५२ हजार ७ सहे बाक्तेक्म।

35 एफ्राइम आ थर डा मुर आन खिं खिं डा मुरपुकी का का पा हिक्शो, शुथेलाह आ खिं खिं डा मुरपुकी, बेकेर आ खिं खिं डा मुरपुकी नु तहन आ खिं खिं डा मुरपुकी बाक्तेक्म। 36 मिनू शुथेलाह आ खिं खिं डा मुरपुकी चहिं एरान आ खिं खिं डा मुर बाक्तेक्म। 37 एको एफ्राइम आ थर डा खिं खिं डा मुरपुकी बाक्तेक्म। मेको नेल्ल आन कली हिक्शो, ३२ हजार ५ सहे बाक्तेक्म। मेको योसेफ आ चच युइ आन खिं खिं डा मुरपुकी बाक्तेक्म।

38 बेन्यामीन आ थर डा मुर आन खिं खिं डा मुरपुकी का का पा हिक्शो, बेला आ खिं खिं डा मुरपुकी, अश्वेल आ खिं खिं डा मुरपुकी, अहीराम आ खिं खिं डा मुरपुकी, 39 शुफाम आ खिं खिं डा मुरपुकी नु हुफाम आ खिं खिं डा मुरपुकी बाक्तेक्म। 40 मिनू बेला आ तौ आरद नु नामान बाक्ताक्स। आरद आ खिं खिं डा मुरपुकी नु नामान आ खिं खिं डा मुरपुकी बाक्तेक्म। 41 एको बेन्यामीन आ थर डा खिं खिं डा मुरपुकी बाक्तेक्म। मेको नेल्ल आन कली हिक्शो, ४५ हजार ६ सहे बाक्तेक्म।



42 दान आ थर डा मुर आन खिं खिं डा मुरपुकी का का पा हिक्शोनु, शुहाम आ खिं खिं डा मुरपुकी बाक्तेक्म। मेको दान आ थर डा खिं खिं डा मुरपुकी बाक्तेक्म। 43 एको शुहाम आ खिं खिं डा मुर नेल्ल आन कली हिक्शोनु, ६४ हजार ४ सहे बाक्तेक्म।

44 आशेर आ थर डा मुर आन खिं खिं डा मुरपुकी का का पा हिक्शोनु, इम्नाह आ खिं खिं डा मुरपुकी, इश्वी आ खिं खिं डा मुरपुकी, बेरीआ आ खिं खिं डा मुरपुकी, 45 हेबेर आ खिं खिं डा मुरपुकी नु माल्कीएल आ खिं खिं डा मुरपुकी बाक्तेक्म। 46 आशेर आ तमी आ नें सेराह बाक्त। 47 एको आशेर आ थर डा खिं खिं डा मुरपुकी बाक्तेक्म। मेको नेल्ल आन कली हिक्शोनु ५३ हजार ४ सहे बाक्तेक्म।

48 नाप्ताली आ थर डा मुर आन खिं खिं डा मुरपुकी का का पा हिक्शोनु, याहसेल आ खिं खिं डा मुरपुकी, गुनी आ खिं खिं डा मुरपुकी, 49 येसेर आ खिं खिं डा मुरपुकी नु शिल्लेम आ खिं खिं डा मुरपुकी बाक्तेक्म। 50 एको नाप्ताली आ थर डा खिं खिं डा मुरपुकी बाक्तेक्म। मेको नेल्ल आन कली हिक्शोनु, ४५ हजार ४ सहे बाक्तेक्म।

51 इस्राएली वॉइश मुर नेल्ल आन कली हिक्शोनु, ६ लाख हजार का ७ सहे ३० जना बाक्तेक्म।

52 मिनू परमप्रभु यावेमी मोसा कली 53 “मेको आन खिं खिं डा मुर गिश बाक्नीमी, दे मिम्शा, रागी आंम के सेल्चा कली योक्शा गेमी। 54 गे मेको आन कली ठेयब थर आन कली ठेयब रागी नु आइक्च थर आन कली आइक्च रागी पा योक्शा गेमी। थर का का आन कली मेको आ मुर आन कली कोव्रशा हुकुम पचा गेमी। 55 मो हना यो मेको रागी चिठठा आप्शा योक्चा माल्ब। मेकोपुकीमी आन किकी पिपी आन नें नें खोदेशो पा अधिकार पामेक्ल। गन्ती ३३:५४; यहोसु १४:२ 56 ठेयब नु आइक्च आन दातेमी आन अधिकार पतीके चिठठा आप्शा योक्चा माल्ब” दैत।

57 मिनू लेवी आ थर डा मुर का का पा हिक्शोनु, सु सु बाक्तेक्म देशा हना, गेरशोन आ खिं खिं डा मुर, कोहाथ आ खिं खिं डा मुर, मेरारी आ खिं खिं डा मुर बाक्तेक्म। गन्ती ३:१७-२०; प्रस्थान ६:१६-२५ 58 मिनू लेवी आ थर डा खिं खिं डा मुर अरु सु सु अरु बाक्तेक्म देशा हना, लिब्नी आ खिं खिं डा मुर, हेब्रोन आ खिं खिं डा मुर, माहली आ खिं खिं डा मुर, मुशी आ खिं खिं डा मुर, कोराह आ खिं खिं डा मुर बाक्तेक्म। कोहाथ चहिं अग्राम आ किकी बाक्त। गन्ती ३३:२०; गन्ती १३:२२ 59 अग्राम आ मीश आ नें योकेबेद बाक्त। मेको चहिं लेवी आ थर डा इजीप्त रागीमी थिशो तमी बाक्त। मेकोमी अग्राम रे हारून नु मोसा नु आस समी मिरयाम आन कली थिम्तीमी। 60 मिनू हारूनमी नादाब, अबीहु, एलाजर नु इथामार थिम्तीमी। 61 तन्न नादाब नु अबीहु चहिं परमप्रभु यावे आ डोंइती अरु मी रे पा चोशा चढ़ेतीके, बेक्ताक्स। लेवी १०:१-२ 62 मेको वॉइश आल नेल्ले महिना का नु मेको क्येडा लाक्शो हिक्शोनु २३ हजार बाक्तेक्म। मेकोपुकी अरु इस्राएली आन खोदेशो पा लडाइ पचा कली महिक्शो बाक्तेक्म। मारदे हना मेकोपुकी इस्राएली आन दातेमी आंम आन रागी कली मगेशो बाक्त।

63 मिनू मोसा नु एलाजर चढ़ेबमी मेको नेल्ल आन कली हिक्ताक्स। मेना मेकोपुकी मोआब डा दिंम यर्दन आ शुंडच, यरीको आ नेक्था बाक्तेक्म।

64 तन्न मोसा नु हारूनमी सौने डा गोरशो रागीम हिक्शो इस्राएली का यो मबाक्म। गन्ती १:- 65 मारदे हना, परमप्रभु यावेमी मेको आन पर्वम “मेकोपुकी थमा पा गोरशो रागीमीन बेक्चा माल्नीम” दैशो बाक्त। यपुन्ने आ तौ कालेब नु नून आ तौ यहोसु डा लाक्शा, मेको आन दाते डा का यो सेस मलीम। गन्ती १४:२२-३८

सेलोफेहाद आ तमीपुकी

गन्ती ३६:-

27 योसेफ आ तौ मनस्से, मनस्से आ तौ माकीर, माकीर आ तौ गिलाद, गिलाद आ तौ हेफेर, हेफेर आ तौ सेलोफेहाद आ तमीपुकी महलाह, नोआह, होग्ला, मिल्का नु तिरचा बाक्तेक्म। गन्ती २६:३३; यहोसु १७:३-६ 2 मेकोपुकी मोसा, चढ़ेब एलाजर, ठेयब मुरपुकी नु मेकेर बाक्ब मुर नेल्ले आन डोंइती गुम्तीक ताम्बु आ लाप्चो आ डोंइती बाक्तेक्म। 3 मिनू सेलोफेहाद आ तमीपुकीमी “आंइ आफ गोरशो रागीम

बेक्त। तन्न मेको परमप्रभु यावे आ पर्वम मरिम्शो पा बोक्ब कोराह आ हुलम मबाक्शो बाक्त। तन्न मेको आ आंम पाप पतीके बेक्त। मिनू मेको के तौ मबाक्म। गन्ती १६:७; उत्पत्ती ३:१९ 4 मिनू तौ मबाक्तीके आंइ आफ आ नें आ थर आ मुर आन दाते रे मारदे क्याम्सीबा? आंइ आफ आ लोक्बपुकी नु आंइ कली यो अडस गेने” दैतेक्म।

5 मिनू मोसामी मेको आन पोक्शो लोत्र परमप्रभु यावे आ डोंइती चाक्नु। 6 मिनू परमप्रभु यावेमी मोसा कली 7 “सेलोफेहाद आ तमीपुकीम पोक्शो लोत्र ठीक बाक्ब। गे थमा पा मेको आन कली आन आफ आ लोक्ब आन दातेमी अडस गेचा माल्नेवे। मिनू गे मेको आन आफ आ अडस मेको आन कली गेमी।

8 मिनू गे इस्राएली आन कली ‘सुइ मुर तौ मथिथु, बेक्त हना, मेको आ तमी आन कली आ अडस गेचा माल्नीनी। 9 मेको के तमी यो मबाक्त हना, मेको आ अडस आ लोक्ब आन कली गेचा माल्नीनी। 10 मेको के आ लोक्ब यो मबाक्त हना, मेको आ अडस आ आफ आ लोक्ब कली गेचा माल्नीनी। 11 मिनू मेको आ आफ आ लोक्ब यो मबाक्त हना, मेको आ अडस आ थर डा नेल्ल क्येडा आ नेक्था डा मुर कली गेचा माल्नीनी। मिनू मेको अडस मेको केन दुम्ब’ दे माइक्मी” दैत। मेको लोत्र परमप्रभु यावेमी मोसा कली दैशो, इस्राएली आन कली फुल्लुम मुशा ब्रेक्शो नु अरेशो लोत्र बाक्ब।

यहोसु लां कोंइब दुम्शो

12 मिनू परमप्रभु यावेमी मोसा कली “गे एको अबारीम पहाड डा डांडा डोंइसो। मिनू इस्राएली आन कली गेशो रागी कोव्रडो। गन्ती २१:११; ब्यवस्था ३२:४८-५२ 13 मिनू गे मेको रागी तवी नोले, गे इ लोक्ब हारून खोदेशो पा इ किकी पिपी नु बाक्थ लाइनेवे। गन्ती २०:२४-२८ 14 मारदे हना जीन डा गोरशो रागीमी मुरपुकी गो नु जिचा पोक्मनेनु, गे यो मटिसी। मेरीबाथ-कादेश डा ब्वाक्कुम मुर आन डोंइती गे आं कली ठेयब मसेल्पीसी” दैत। गन्ती २०:१२-१३

15 मिनू मोसामी परमप्रभु यावे कली 16 “परमप्रभु यावे, मुर नेल्ल आन ब्रोंइचा गेब परमप्रभु, एको मुर आन कली लां कोंइब मुर का वोतीन। गन्ती १६:२२ 17 मिनू मेको मुर आन डोंइती गाक्ल। मिनू मेको आन कली लतीक नु जाक्तीक लां कोंइदल। मोपा परमप्रभु यावे आ मुर गोठला मबाक्शो भेडा खोदेशो मदुम्मल” दैत। मीका ५:३; मत्ती ९:३६

18 मिनू परमप्रभु यावेमी मोसा कली “गे आं सोक्त पाइश्शो नून आ तौ यहोसु कली चाक्शा, इ गुइ मेको आ तार वोतो। प्रस्थान ३३:११; ब्यवस्था ३४:९ 19 मिनू मेको कली चढ़ेब एलाजर नु मुर नेल्ल आन डोंइती राप्पतो। मिनू मेको मुर नेल्लेम तचा डा पा मेको कली एको गेय जिम्मा गेवो। 20 मोपा गे मेको कली इ अधिकार गेवो। मिनू इस्राएली नेल्लेमी मेको आ दैशो टीमेक्ल। प्रस्थान ३४:२९-३०; २राजा २:९, १५ 21 मिनू यहोसु चढ़ेब एलाजर आ डोंइती राप्चा माल्ब। मिनू एलाजरमी ऊरीम यहोसु आ पर्वम मार देबा, दे परमप्रभु यावे आ डोंइती हिल्लो पचा माल्ब। यहोसु आ दैशोमी इस्राएली नेल्ले मेको नु लडाइ पथ लचा नु लेत्चा माल्नीम” दैत। प्रस्थान २८:३०; ब्यवस्था ३३:८ 22 मिनू मोसामी परमप्रभु यावेमी अरेशो खोदेशो पा पाप्नु। मेकोमी यहोसु कली चाक्शा चढ़ेब एलाजर नु इस्राएली नेल्ल आन डोंइती राप्पाइक्नु। 23 मिनू मोसामी परमप्रभु यावेमी दैशो खोदेशो पा आ गुइ यहोसु आ तार वोइश्शा, आ गेय पचा कली जिम्मा गेप्नु।

नाक्त किंत किंत डा चढ़ेतीके

28 परमप्रभु यावेमी मोसा कली 2 “गे इस्राएली आन कली मीम चोशा चढ़ेतीके आं जचा थोवक, आं दाक्शो ब्रोंवशो रिना पाइश्शो चढ़ेतीके गे आं दैशो नाक्त चढ़ेचा माल्नीम, दे शेंचा माल्नेवे। लेवी २१:६ 3 मिनू गे मेको आन कली ‘गे परमप्रभु यावे कली मीम चोशा चढ़ेतीके मार चढ़ेचा माल्नीनी दैशा हना, मारदे मदुम्शो थम रिम्शो बर्स का गाप्शो पाठा निक्शी नाक्त किंत किंत चढ़ेचा माल्नीनी। प्रस्थान २९:३८-४२ 4 मिनू का सुनी नु का नाक्दो चढ़ेचा माल्नीनी। 5 मेको नु अन्न चढ़ेतीके कली एफाह

का डा १० भाग डा भाग का रिम्शो फस नु हिन का डा ४ भाग डा भाग का खाक्शो तेल ब्वाइश्शो चढ़ेचा माल्नीनी। एफाह का २२ लिटर पुक्तीक बाक्ब। हिन का ४ लिटर बाक्ब। ४ भाग डा भाग का लिटर का बाक्ब। ६ एको परमप्रभु यावे कली गेना हना यो मीम चोशा चढ़ेतीके बाक्ब। मेको आ दाक्शो ब्रोवशो रिना पाइश्शो सीनै डांडाम देंशो खोदेंशो पा चढ़ेतीके बाक्ब। ७ मेको नु तूचा थोवक चढ़ेतीके पाठा का कली हिन का डा ४ भाग डा भाग का अडगुर शांबु चढ़ेचा माल्नीनी। मेको परमप्रभु यावे आ बाक्तीकेम परमप्रभु यावे आ डोंइती मोइक्का माल्नीनी। ८ मेको अर्को पाठा नां रिक्चावानु, चढ़ेचा माल्नीनी। मेको नु सुनी डा खोदेंशो पा अन्न चढ़ेतीके नु तूचा थोवक चढ़ेतीके चढ़ेचा माल्नीनी। एको परमप्रभु यावे कली मीम चोशा चढ़ेचो आ दाक्शो ब्रोवशो रिना पाइश्शो चढ़ेतीके बाक्ब।

#### नाइक्तीक नाक्त डा चढ़ेतीके

९ मिनु नाइक्तीक नाक्तीम मारेइ मद्दुश्शो थम रिम्शो बर्स का गाप्शो पाठा निक्शी चढ़ेचा माल्नीनी। मेको नु अन्न चढ़ेतीके तेल ब्वाइश्शो रिम्शो फस एफाह का डा १० भाग डा भाग निक्शी चढ़ेचा माल्नीनी। मिनु मेको नु तूचा थोवक चढ़ेतीके यो चढ़ेचा माल्नीनी। एफाह का २२ लिटर पुक्तीक बाक्ब। मत्ती १२:५ १० मेको नाइक्तीक नाक्ती डा चोशा चढ़ेतीके बाक्ब। मेको नाक्त किंत किंत डा चोशा चढ़ेतीके नु तूचा थोवक चढ़ेतीके चढ़ेचा यो मेको चढ़ेचा माल्नीनी।

#### औंसी डा चढ़ेतीके

११ मिनु गे नेल्ल महिना डा डोंइती डा नाक्त परमप्रभु यावे कली चोशा चढ़ेतीके चढ़ेचा माल्नीनी। मेको ब्यफ निक्शी, सांड का नु ७ ओटा मारेइ मद्दुश्शो थम रिम्शो बर्स का का गाप्शो पाठा चढ़ेचा माल्नीनी। गन्ती १०:१०; इजीकीएल ४६:१,३,६; यसैया १:१३ १२ मिनु मेको ब्यफ का का पा नु अन्न चढ़ेतीके तेलम निशो रिम्शो फस एफाह डा १० भाग डा भाग सां चढ़ेचा माल्नीनी। मेको सांड का नु अन्न चढ़ेतीके तेलम निशो रिम्शो फस एफाह का डा १० भाग डा भाग निक्शी चढ़ेचा माल्नीनी। एफाह का २२ लिटर पुक्तीके बाक्ब। गन्ती १५:२-१२ १३ मिनु मेको ७ ओटा पाठा नु का का पा एफाह डा १० भाग डा भाग का तेलम निशो रिम्शो फस चढ़ेचा माल्नीनी। एको परमप्रभु यावे कली आ दाक्शो ब्रोवशो रिना पाइश्शो मीम चोशा चढ़ेतीके बाक्ब। १४ मेको नु तूचा थोवक चढ़ेतीके ब्यफ का का नु आधा हिन अडगुर शांबु बाक्का माल्ब। सांड नु हिन का डा भाग सां डा भाग का अडगुर शांबु बाक्का माल्ब। मिनु पाठा नेल्ल नु हिन का डा ४ भाग डा भाग का अडगुर शांबु चढ़ेचा माल्नीनी। मेको बर्स डा महिना नेल्ल डा औंसीम चोशा चढ़ेतीके बाक्नीम। १५ मिनु पाप पशो आ पर्वम बोका का परमप्रभु यावे कली चढ़ेचा माल्नीम। मेको नाक्त किंत किंत डा चोशा चढ़ेतीक नु तूचा थोवक चढ़ेतीके चढ़ेचा यो मेको चढ़ेचा माल्नीनी।

#### पास्सा नाक्त डा चढ़ेतीक

१६ मिनु डोंइती डा महिना डा १४ नाक्ती परमप्रभु यावे कली पास्सा चाड डा चढ़ेतीके चढ़ेचा माल्नीनी। लेवी २३:५-१४ १७ मिनु मेको महिना डा १५ नाक्ती ठेयब चाड का मानेचा माल्नीम। मेको चाडम ७ नाक्त सम्म बोरब ओख्ती मसुप्शो शोब्ले जचा माल्नीनी। १८ डोंइती डा नाक्तीम परमप्रभु यावे नु गुम्तीके का दुम्चा माल्ब। मेको नाक्ती गे काइ गेय मपने। १९ गे परमप्रभु यावे कली मीम चोशा चढ़ेतीके चढ़ेचा माल्नीनी। मार चढ़ेचा माल्नीनी देंशा हना, ब्यफ निक्शी, सांड का नु बर्स का का गाप्शो ७ ओटा पाठा चढ़ेचा माल्नीनी। मेको नेल्ल मारेइ मद्दुश्शो थम रिम्शो बाक्का माल्नीम। २० मेको नु अन्न चढ़ेतीके तेल ब्वाइश्शो रिम्शो फस दुम्चा माल्ब। मेको ब्यफ का नु एफाह का डा १० भाग डा भाग सां चढ़ेचा माल्नीनी। मेको सांड का नु एफाह का डा १० भाग डा भाग निक्शी चढ़ेचा माल्नीनी। एफाह का २२ लिटर खोदेंशो बाक्ब। २१ मिनु मेको ७ ओटा पाठा नु एफाह डा १० भाग डा भाग का का पा रिम्शो फस चढ़ेचा माल्नीनी। २२ मिनु इन पाप आ पर्वम पाप क्याम्तीक गेय पचा कली बोका का चढ़ेचा माल्नीनी। २३ मिनु सुनी डा

चोशा चढ़ेतीके, मेको गेना हना यो पचा माल्शो चोशा चढ़ेतीक बाक्ब, मेको चढ़ेचा माल्नीनी। २४ गे मोदेंशो चढ़ेतीके ७ नाक्त सम्म नाक्त किंत किंत जचा थोवक कली चढ़ेचा माल्नीनी। मेको परमप्रभु यावे कली आ दाक्शो ब्रोवशो रिना पाइश्शो मीम चोशा चढ़ेतीक बाक्ब। मेको नाक्त किंत किंत डा चोशा चढ़ेतीके नु तूचा थोवक चढ़ेतीके चढ़ेचा यो मेको चढ़ेचा माल्नीनी। २५ मिनु ७ नाक्तीम परमप्रभु यावे नु गुम्तीके का दुम्चा माल्ब। मेको नाक्ती गे काइ गेय मपने।

#### डोंइती मीशो अन्न डा चाड

२६ डोंइती मीशो अन्न नु फल फुल डा चाड नाक्त गे परमप्रभु यावे कली नक अन्न रे अन्न चढ़ेतीक चढ़ेनीनी। मेको हप्ता डा चाड बाक्ब। मेना परमप्रभु यावे नु गुम्तीके का दुम्चा माल्ब। मेको नाक्ती गे काइ गेय मपने। लेवी २३:१५-२१; ब्यवस्था १६:१० २७ गे परमप्रभु यावे कली चोशा चढ़ेतीके चढ़ेचा माल्नीनी। मेको परमप्रभु यावे कली आ दाक्शो ब्रोवशो रिना पाइश्शो चढ़ेतीके बाक्ब। गेपुकीमी ब्यफ निक्शी, सांड का नु बर्स का का गाप्शो ७ ओटा पाठा चढ़ेचा माल्नीनी। २८ मेको नु अन्न चढ़ेतीके तेल ब्वाइश्शो रिम्शो फस दुम्चा माल्ब। मेको ब्यफ का नु एफाह का डा १० भाग डा भाग सां चढ़ेचा माल्नीनी। मेको सांड का नु एफाह का डा १० भाग डा भाग निक्शी चढ़ेचा माल्नीनी। एफाह का २२ लिटर खोदेंशो बाक्ब। २९ मिनु मेको ७ ओटा पाठा नु भाग का रिम्शो फस चढ़ेचा माल्नीनी। ३० मिनु इन पाप आ पर्वम पाप क्याम्तीक गेय पचा कली बोका का चढ़ेचा माल्नीनी। ३१ मिनु नाक्त किंत किंत डा चोशा चढ़ेतीक नु मेको अन्न चढ़ेतीक गेपुकीम मेको नु आ तूचा थोवक चढ़ेतीक चढ़ेचा माल्नीनी। मेको ब्यफ, सांड, पाठा नेल्ल मारेइ मद्दुश्शो थम रिम्शो बाक्का माल्नीम।

#### नक बर्स डा चाड

२९ गेपुकी ७ महिना डा डोंइती डा नाक्ती गुम्तीके का सेल्चा माल्नीनी। मेको नाक्ती गे काइ गेय मपने। मेको नाक्ती गे तुराही ताप्चा माल्नीनी। गन्ती १०:१०; लेवी २३:२४-२५ २ गे परमप्रभु यावे कली चोशा चढ़ेतीके चढ़ेचा माल्नीनी। मेको परमप्रभु यावे कली आ दाक्शो ब्रोवशो रिना पाइश्शो चढ़ेतीके बाक्ब। गेपुकीमी ब्यफ का, सांड का नु बर्स का का गाप्शो ७ ओटा पाठा चढ़ेचा माल्नीनी। मेको मारेइ मद्दुश्शो थम रिम्शो दुम्चा माल्नीम। ३ मिनु मेको ब्यफ नु अन्न चढ़ेतीके, तेल ब्वाइश्शो रिम्शो फस एफाह का १० भाग डा भाग सां नु सांड नु १० भाग डा भाग निक्शी चढ़ेचा माल्नीनी। एफाह का २२ लिटर पुक्तीके का बाक्ब। भाग सां ६ नु आधा लिटर खोदेंशो बाक्ब। भाग निक्शी ४ नु आधा लिटर खोदेंशो बाक्ब। ४ मिनु मेको ७ ओटा पाठा नु का का पा भाग का चढ़ेचा माल्नीनी। ५ मिनु इन पाप आ पर्वम पाप क्याम्तीक गेय पचा कली बोका का चढ़ेचा माल्नीनी। ६ मेको नेल्ले औंसी नाक्त डा चोशा चढ़ेतीक नु मेको नु अन्न चढ़ेतीके, नाक्त किंत किंत डा चोशा चढ़ेतीक नु मेको नु अन्न चढ़ेतीके, मेको नेल्ल नु तूचा थोवक चढ़ेतीके यो चढ़ेचा माल्नीनी। मेको नेल्ले परमप्रभु यावेमी देंशो खोदेंशो पा आ दाक्शो ब्रोवशो रिना पाइश्शो मीम चोशा चढ़ेतीक बाक्नीम।

#### पाप क्याम्तीक नाक्त डा चाड

७ मेको ७ महिना डा १० नाक्त परमप्रभु यावे नु गुम्तीके का दुम्चा माल्ब। मेको नाक्ती गे माइजा बाक्शा, काइ गेय मपने। लेवी २३:२७-३२ ८ गे परमप्रभु यावे कली चोशा चढ़ेतीके चढ़ेचा माल्नीनी। मेको आ दाक्शो ब्रोवशो रिना पाइश्शो चढ़ेतीके बाक्ब। मिनु गे ब्यफ का, सांड का नु बर्स का का गाप्शो ७ ओटा पाठा चढ़ेचा माल्नीनी। मेको थम रिम्शो मारेइ मद्दुश्शो दुम्चा माल्नीम। ९ मिनु मेको ब्यफ नु अन्न चढ़ेतीके, तेल ब्वाइश्शो रिम्शो फस एफाह का डा १० भाग डा भाग सां नु सांड नु १० भाग डा भाग निक्शी चढ़ेचा माल्नीनी। एफाह का २२ लिटर खोदेंशो बाक्ब १० मिनु मेको ७ ओटा पाठा नु का का पा भाग का का पा चढ़ेचा माल्नीनी। ११ मिनु मेको नु पाप पशो आ पर्वम बोका का चढ़ेचा माल्नीनी। मेको पाप पशो क्याम्तीक गेय



गेने नु क्याम्ने चाख्ब। 14 तन्न मेको आ वोंइशमी मेको नेंशा यो नाक्त किंत किंत सिक्सी पा बाक्त हना, मेकोमी आ कसम जशो नु आ गेशो लोत्र पचा गेशो बाक्ब। 15 तन्न मेकोमी नेंना आ नाक्त का निक्शी नोले 'मेको मडुम्ब' दैत हना, मेकोमी आ मीश आ तशो दोस कुरचा माल्ब" दैत।

16 एको वोंइश मीश नु आ आम आफ आस खिंम बाक्शो मीश आल आ पर्बम फुल्लुम मुशा ब्रेक्शो लोत्र एको बाक्ब। एको लोत्र परमप्रभु यावेमी मोसा कली अरेशो बाक्ब।

मिदयान डा मुर आन कली ग्राशो

31 मिनु परमप्रभु यावेमी मोसा कली 2 "इसाएली आन पर्बम गे मिदयान डा मुर आन कली क्येक्क लेत्तीमी। मेको आ नोले गे बेक्नेवे" दैत। 3 मिनु मोसामी मुर आन कली "इन लडाइ पाइब आन दाते डा मिदयान नु लडाइ पचा कली नु परमप्रभु यावेमी मेको आन कली क्येक्क लेत्वा कली इन मुर आन कली ठीक पने। 4 गे इसाएली आन थर थर नेल्ल रे हजार का का मुर लडाइ पचा कली सोइक्तीने" दैत। 5 मोपतीके इसाएली आन शुश मुर रे थर थर रे हजार का का पा, १२ हजार लडाइ पाइब मुर या कुरशा ठीक दुम्तेक्म। 6 मिनु मोसामी थर नेल्ल रे हजार का का मुर आन कली लडाइम सोइक्ताक्मी। मिनु मेकोपुकी नु चढेब एलाजर आ तौ फिनेहास यो सोइक्ताक्व। मेकोमी परमप्रभु यावे आ ताम्बु डा माल्शो नु लडाइ डा तुराही ताप्तीक कुरशो बाक्त। गन्ती १०:२ 7 परमप्रभु यावेमी मोसा कली अरेशो खोदेंशो पा मेकोपुकीम मिदयान डा मुर नु लडाइ पाम्तेक्म। मिनु मेको आन वोंइश मुर नेल्ल आन कली साइक्तेक्म। ब्यवस्था २०:१३ 8 मेकोपुकीमी मिदयान डा ५ जना पिप एवी, रेकेम, सुर, हुर नु रेबा आन कली साइक्तेक्म। मिनु मेको नु बाक्ब अरु मुर यो साइक्तेक्म। मिनु बेओर आ तौ बालाम कली यो तरवारमी साइक्तेक्म। यहोसु १३:२१-२२; गन्ती २२:५ 9 मिनु इसाएलीपुकीम मिदयान डा मीश मुरपुकी नु आल ब्रेच ग्याइक्तेक्म। मेको आन बी ब्यफ, क्यारश भेडा नु आन शॉप नेल्ल लाइक्तेक्म। 10 मिनु मेको आन बाक्शो सहर नेल्ल नु मेको आन ताम्बु नेल्ल क्रोइक्तेक्म। 11 मेको आन ग्राशो मुर, बी ब्यफ, क्यारश भेडा, नु शॉप नेल्ल लाइक्ता गाक्तेक्म। 12 मिनु यरीको आ आइक्वी हांबु यर्दन खोला आ शुंडीम मोआब डा दिंममी बाक्शो ताम्बुम मोसा, चढेब एलाजर नु इसाएली नेल्ल आन डोंइती चाक्तेक्म।

13 मिनु मोसा, चढेब एलाजर नु मेको आन दाते डा ठेयब मुर नेल्ल मेको आन कली गुम्थ, लाडगा गूतेक्म। 14 मिनु मोसामी लडाइ रे ग्राशा, लेशशा जाक्शो हजार का नु सहे का डा कप्तान आन कली तशा गाइक्ताक्व। 15 मिनु मोसाम मेको आन कली "मार गे मीश मुर नेल्ल आन कली सेसीन प्रोंइनी? 16 एको मीश मुरपुकीमी बालाम आ देंशो पशा, इसाएली आन कली पेओरम परमप्रभु यावे कली मरिश्शो पपाइश्शो बाक्तेक्म। मोपतीके परमप्रभु यावे आ मुर आन दातेमी मुर साइक्ब रोइ गूत। गन्ती २५:१-३; प्रकाश २:१४ 17 मोपतीके वोंइश आल नेल्ल वोंइश मुर नु बाक्शो मीश मुर नेल्ल आन कली सतीन। न्यायाधीस २१:११-१२ 18 तन्न वोंइश मुर नु मबाक्शो मीश आल नेल्ल चहिं इन कली वोंइसीन।

19 गेपुकी सु सुम मुर साइश्शो बाक्नी नु बेक्शो मुर आन कली थिशो बाक्नी मेको नेल्ल ७ नाक्त सम्म इन बाक्तीक आ लाडगाम बाक्कीन। मिनु सां नाक्त नु ७ नाक्ती गेपुकीमी इन कली ग्रांरा मदिशो सेल्सीशा, इन ग्याइश्शो आन कली यो ग्रांरा मदिशो सेलीन। गन्ती १९:११-२० 20 गेपुकीम वा नेल्ले, कुशुल के मार मार, क्यारश आ चां के सेल्शो नु शी के मार मार नेल्ल ग्रांरा मदिशो सेलीन" दैत।

21 मिनु चढेब एलाजरमी लडाइम लाइब मुर नेल्ल आन कली "परमप्रभु यावेमी मोसा कली फुल्लुम मुशा ब्रेक्शो आ अरेशो लोत्र मार बाक्त देंशा हना, 22 'सुन, चांदी, कांसा, फलाम, टीन नु सिसा, 23 मीम मनेक्ब मारेइ मारेइ थोत्रक मीम क्रोइश्शा, ग्रांरा मदिशो दुम्ब। मीम नेक्वा डा थोत्रक चहिं ग्रांरा मदिशो दुम्तीक ब्वाक्कुमी ग्रांरा मदिशा सेल्ने चाप्नीमी। 24 मिनु ७ नाक्ती गेपुकीमी इन वा मुरचा माल्नीनी। मिनु गेपुकी ग्रांरा मदिशो दुम्नीनी। मेको नोले गे इन बाक्तीके ओवने चाप्नीनी' " दैत।

लडाइम रोइश्शो मार मार

25 मिनु परमप्रभु यावेमी मोसा कली 26 "गे, चढेब एलाजर नु मुर आन थर डा ठेयब मुरपुकीम 'ग्याइश्शो मुर नु बी ब्यफ, क्यारश भेडा आन कली हिक्शा ब्रेक्वा माल्नीनी। 27 मेको नेल्ल के भाग निक्शी सेलीन। भाग का लडाइम लाइब आन कली नु भाग का अर्को मुर नेल्ल आन कली बाक्ब। यहोसु २२:८; १सामुएल ३०:२४-२५ 28 लडाइम लाइब मुर आन भाग रे मुर, बी ब्यफ, गधा नु क्यारश भेडा ५ सहे रे का परमप्रभु यावे कली गेचा माल्नीनी। 29 मेको लडाइ पाइब आन भाग रे ताक्शा, चढेब एलाजरमी परमप्रभु यावे कली चढेचा माल्ब। 30 मिनु इसाएली आन भाग रे मुर, बी ब्यफ, गधा नु क्यारश भेडा ५० रे का ताक्शा, परमप्रभु यावे आ ताम्बुम गेय पाइब लेवी आ थर डा मुर आन कली गेचा माल्नीनी' देनी" दैत।

31 मिनु परमप्रभु यावेमी मोसा कली अरेशो खोदेंशो पा मोसा नु चढेब एलाजरमी पाम्ताक्स। 32 मेको लडाइ पाइबपुकीमी रोइश्शो गिश बाक्तेक्म देंशा हना, क्यारश भेडा ६ लाख ७५ हजार 33 बी ब्यफ ७२ हजार 34 गधा ६१ हजार 35 वोंइश मुर नु मबाक्शो मीश आलपुकी ३२ हजार जना बाक्तेक्म। 36 मेको लडाइम लाइब आन भाग गिश बाक्तेक्म देंशा हना, क्यारश भेडा ३ लाख ३७ हजार ५ सहे, 37 मेको रे पा ६ सहे ७५ ओटा परमप्रभु यावे कली गेशो बाक्तेक्म। 38 बी ब्यफ ३६ हजार बाक्तेक्म। मेको रे पा ७२ ओटा बी ब्यफ परमप्रभु यावे कली गेशो बाक्तेक्म। 39 गधा ३० हजार ५ सहे बाक्तेक्म। मेको रे पा ६१ ओटा गधा परमप्रभु यावे कली गेशो बाक्तेक्म। 40 मिनु मीश आल १६ हजार जना बाक्तेक्म। मेको रे पा ३२ जना परमप्रभु यावे कली गेशो बाक्तेक्म। 41 परमप्रभु यावेमी मोसा कली देंशो खोदेंशो पा मोसामी परमप्रभु यावे कली गेशो भाग चढेब एलाजर कली गेप्तु।

42 मोसामी लडाइम लाइब मुर रे योक्शा अर्को इसाएली आन कली गेशो, 43 क्यारश भेडा लाख सां ३७ हजार ५ सहे बाक्तेक्म, 44 बी ब्यफ ३६ हजार बाक्तेक्म, 45 गधा ३० हजार ५ सहे बाक्तेक्म, 46 नु मीश आल १६ हजार जना बाक्तेक्म। 47 परमप्रभु यावेमी अरेशो खोदेंशो पा मोसामी इसाएली आन भाग रे मुर नु बी ब्यफ, क्यारश भेडा हिक्शा, ५०, ५० रे का का गुंडशा परमप्रभु यावे आ बाक्तीकेमी गेय पाइब लेवी आ थर डा मुर आन कली गेप्तु।

48 मिनु लडाइ पाइब आन हजार का नु सहे का डा कप्तान मोसा आ बाक्तीके जाक्तेक्म। 49 मिनु मेकोपुकीमी मोसा कली "इन गेय पाइब, गोपुकीमी आंइ लडाइ पाइब आन कली हिक्ताक। मिनु आंइ के मुर का यो मजाम्शो बाक्नीम। 50 मिनु गो नेल्ल आंइ थिश्शो सुन के गहाना, बाला, छाप थोक्तीक आँठी, नचे नु साडलीपुकी परमप्रभु यावे कली चढेशा, आंइ पर्बम पाप क्याम्तीक गेय पचा, दे चाक्शा जाक्ताक्क" दैतेक्म। न्यायाधीस ८:२४-२६

51 मिनु मोसा नु चढेब एलाजरमी मेको आन चाक्शो सुन के गहाना नेल्ल ताक्ताक्से। 52 मिनु हजार, हजार डा कप्तान नु सहे, सहे डा कप्तान आन चाक्शो परमप्रभु यावे कली चढेशो सुन १६ हजार ७ सहे ५० शेकेल बाक्तेक्म। शेकेल का ११.५ ग्राम बाक्ब। 53 लडाइम लाइब आन रोइश्शो मार मार आंम आंमा लांइसीशो बाक्तेक्म। 54 मिनु मोसा नु चढेब एलाजरमी हजार का, हजार का, नु सहे का, सहे का मुर आन कप्तानपुकीमी चाक्शो सुन ताक्शा, परमप्रभु यावे आ गुम्तीक ताम्बुम वोइक्ताक्स। मेको परमप्रभु यावे आ डोंइती इसाएली आन कली मिम्पाइक्वा कली वोइक्ताक्स। प्रस्थान ३०:१२-१६

रूबेन नु गाद आस खिं खिं डा मुर

ब्यवस्था ३:१२-२२

32 मिनु रूबेन आ थर डा मुर नु गाद आ थर डा मुर आन के शुश बी ब्यफ बाक्तेक्म। मिनु मेकोपुकीम याजेर नु गिलादमी रिश्शो योवतीक ताम्तेक्म। 2 मिनु गाद आ थर डा मुर नु रूबेन आ थर डा मुरुमी मोसा, चढेब एलाजर नु गुम्तीक डा ठेयब मुर आन बाक्तीक जाक्शा

3 “अतारोथ, दीबोन, याजेर, निम्ना, हेशबोन, एलेआले, सेबाम, नेबो नु बेओन, 4 परमप्रभु यावेमी मेको रागी इस्राएली आन डोंइती खतम पोक्शो बाक्त। मेको रागी बी ब्यफ योत्रचा कली रिम्शो बाक्ब। मिनु इन गेय पाइब, गोपुकी नु बी ब्यफ यो बाक्नीम। 5 गे आंइ कली दाक्ताक्नी हना, एको रागी आंइ कली गेकी। आंइ कली यर्दन आइक्वी हांबु मलाइक्वी” दैतेक्म।

6 मिनु मोसामी गाद आ थर डा मुर नु रूबेन आ थर डा मुर आन कली “इन लोक्बपुकी एर लडाइम लमानु, गोपुकी चहिं एक बाक्नीनी? 7 मारदे गे परमप्रभु यावे आ गेशो आइक्वी हांबु डा रागीम लचा कली इस्राएली आन थुं क्याल्नीनी? 8 गो इन आफ आन कली कादेश-बारनेआ रे एको रागी क्यारी पथ सोइक्तुनु, मेकोपुकीमी यो इन खोदेंशो पशो बाक्तेक्म। गन्ती १३:-

9 मिनु मेकोपुकी एक्कोल डा खोला लशा, एको रागी ताम्तेक्म। मिनु परमप्रभु यावेमी गेशो रागीम मलचा, दे इस्राएली आन थुं क्याल्शो बाक्तेक्म।

10 मिनु मेको नाक्ती परमप्रभु यावे गाइक्ताक्व। मिनु मेकोमी कसम जशा

11 ‘इजीप्ट रे जाक्शो २० बर्स गाप्शो नु मेको क्येडा लाक्शो सुइ मेको अब्राहाम, इसहाक नु याकूब नु कसम जशो रागी ओत्रचा मताइनीम। मारदे हना आं कली मटीयीमी। गन्ती १४:२२-३८; गन्ती २६:६५ 12 केनीज्जी

यपुन्ने आ तौ कालेब नु नून आ तौ यहोसु ला ओत्रचा ताइनीस। मारदे हना मेको निक्शीमी थमा पा आं नोले खोइक्तीस्सी’ दे कसम जाप्टु” दे मोसामी दैत। गन्ती १४:७-९; यहोसु १४:६-१५ 13 मिनु मोसामी “परमप्रभु यावे

इस्राएली आन पर्बम गाइक्ताक्व। मिनु मेकोमी मेको आन कली ४० बर्स सम्म गोरशो रागीम हिरपाइक्तीमी। परमप्रभु यावे आ डोंइती मरिम्शो पाइब मबेक्म सम्म मोदेंशो पाप्टु। 14 मिनु मुल गे, पाप पाइबपुकी, परमप्रभु

यावेमी इस्राएल आ पर्बम गाइक्शो बाक्त। मिनु गोपुकीमी चिनु तेम्शो बाक्नीनी। 15 गोपुकीमी मेको आ नोले खोइक्ने मबिस्साक्नी हना, मेकोमी

एको मुर नेल्ल आन कली एको गोरशो रागीमीन प्रॉइब। मिनु गे मेको मुर नेल्ल आन कली खतम सेल्ब दुम्नीनी” दे माइक्तीमी।

16 मिनु मेकोपुकी मोसा आ नेक्था जाक्शा “गो आंइ भेडा आन कली गोठ नु आंइ आल आन कली सहर सेल्चा दाक्नीकी। 17 तन्न गोपुकी चहिं

इस्राएली आन कली मेको आन बाक्तीकेमी मचाक्दीश्शो सम्म मेको आन डोंइडोंइती लडाइ पा लाइनीकी। मेना आंइ मीशपुकी नु आंइ आलपुकी चहिं

एको रागी डा मुर आन रे मारेइ पाइक्वा मपुंडसीथु, मेको सहर डा गारो आगाम बाक्नीम। 18 इस्राएल डा मुर नेल्लेमी आन योत्रशो रागी मतामे सम्म

गो आंइ खिं मलेल्नीकी। 19 गोपुकीमी यर्दन खोला आ आइक्वी हांबु नु मेको क्येडा एर गे रागी मताक्नीकी। मारदे हना, आंइ भाग यर्दन ओंथ हांबु

पूर्ब गे दुम्शो बाक्ब” दैतेक्म। यहोसु १३:८ 20 मिनु मोसामी मेको आन कली “दुम्ब। गोपुकी परमप्रभु यावे आ डोंइती लडाइम लाइनीनी हना, यहोसु १:१२-१५ 21 नु परमप्रभु यावेमी आ जोरी

सनु आन कली खेरशा मेको रागी मफुवा सम्म गोपुकी परमप्रभु यावे आ डोंइती लडाइ पा यर्दन आइक्वी हांबु लाइतीनी हना, 22 मिनु मेको रागी

परमप्रभु यावे आ डोंइती ग्रानी नोले, गे लेन्ने चाप्नीनी। मिनु इन पुंडशो रागी परमप्रभु यावे आ डोंइती इन के दुम्ब।

23 तन्न गोपुकीमी मो मपाइतीनी हना, परमप्रभु यावे आ डोंइती पाप पाइनीनी। मिनु इन पाप थमा पा राइनीनी। 24 गोपुकी इन मीश नु आल आन

कली सहर नु इन बी ब्यफ, क्यारश भेडा आन कली गोठ सेलीन। तन्न इन गेशो लोत्र खाप्चा माल्नीनी” दैत।

25 मिनु गाद नु रूबेन आस थर डा मुरपुकीमी मोसा कली “इन गेय पाइब, गोपुकी इन अरेशो पाइनीकी। 26 आंइ आलपुकी, आंइ मीशपुकी, आंइ बी ब्यफ, क्यारश भेडा नेल्ल एको गिलाद सहरमी बाक्नीम। 27 तन्न

इन गेय पाइब, गोपुकी इन अरेशो खोदेंशो पा परमप्रभु यावे आ डोंइती लडाइ पचा कली या कुरशा लाइनीकी” दैतेक्म।

28 मिनु मोसामी मेको आन पर्बम चढेब एलाजर, नून आ तौ यहोसु नु इस्राएली आन थर थर डा ठेयब मुर आन कली अरेम्तीमी। 29 मिनु मोसाम

मेको आन कली “गाद नु रूबेन आस थर डा मुर गोपुकी नु या कुरशा, परमप्रभु यावे आ डोंइती लडाइ पा यर्दन आइक्वी हांबु लाक्तेक्म हना, नु

मेको रागी इन गुइम दुम नोले, गोपुकीमी गिलाद रागी मेको आन कली गेचा माल्नीनी। 30 तन्न मेकोपुकी या कुरशा लडाइ पा गोपुकी नु यर्दन आइक्वी

हांबु लने मबिस्साक्म हना, मेकोपुकी इन दातेमी कनान रागीमीन आन रागी तचा माल्नीम” दे माइक्तीमी।

31 मिनु गाद नु रूबेन आस थर डा मुरपुकीमी “परमप्रभु यावेमी इन गेय पाइब, आंइ कली मार दैमे मेको पाइनीकी। 32 गोपुकी या कुरशा परमप्रभु यावे आ डोंइती आइक्वी हांबु कनान रागी लाइनीकी। तन्न आंइ योत्रशो रागी यर्दन ओंथ हांबुमी बाक्ल” दैतेक्म।

33 मिनु मोसामी गाद आ थर, रूबेन आ थर नु योसेफ आ तौ मनस्से आ उइक्थ थर डा मुर आन कली एमोरी आन पिप सीहोन आ राज्य नु बाशान डा पिप ओग आ राज्य, मेको रागी नु आ एर ओंथ डा सहर नेल्ल गेम्तीमी। यहोसु १३:१५-३२ 34 मिनु गाद आ थर डा मुरपुकीमी दीबोन, अतारोथ, आरोएर, 35 अत्रोथ-शोफान, याजेर, योग-बेहा, 36 बेथ-निम्ना, बेथ-हारान नेल्ल गारोम हिरशो सहर सेल्लेक्म। मिनु भेडा आन कली गोठ यो सेल्लेक्म। 37 मिनु रूबेन आ थर डा मुरपुकीमी हेशबोन, एलेआले नु किरयथ-थाइम, 38 नेबो, बाल-मेओन नु सिब्मा लेंशा सेल्लेक्म। मिनु मेकोपुकीमी आन लेंशा सेल्लेक्म सहर कली नक नें वोइक्तेक्म।

39 मनस्से आ तौ माकीर आ चच युइ गिलादम लशा, मेको आन के सेल्शा, मेकेर बाक्ब एमोरी आन कली खेरतेक्म। 40 मोपतीके मोसामी मनस्से आ तौ माकीर आ चच युइ आन कली गिलाद गेप्टु। मिनु मेकोपुकी मेकेर बाक्तेक्म। ब्यवस्था ३:१४; न्यायाधीस १०:३-४ 41 मनस्से आ तौ याइर लशा, मेकेर डा गाउं आंम के सेल्लु। मिनु मेको नेल्ल आन नें हक्वोथ-याइर वोइक्तु। 42 मिनु नोबाह लशा केनाथ नु मेको आ गाउंपुकी आंम के सेल्लु। मिनु मेको नेल्ल आन नें आ नें रे पा नोबाह वोइक्तु।

इस्राएली आन गाक्शो लां

33 मिनु इस्राएली लडाइ पाइब खोदेंशो पा इजीप्ट रे हुल हुल पा गाक्तेक्म। मोसा नु हारून मेको आन लां कोंइब बाक्ताक्स।

2 मिनु मोसामी परमप्रभु यावेमी देशो खोदेंशो पा ते ते लचा माल्बा, नेल्ल ब्रेक्ताक्व। मिनु आन गाक्शो लां डा रागी नु सहर तेको तेको बाक्तेक्म देशा हना, 3 मेकोपुकी डोंइती डा महिना डा १५ नाक्ती रामेसेस रे गाक्चा गोम्तेक्म। मिनु इजीप्ती नेल्ल आन डोंइती काइ महिंथु पास्सा चाड आ दीसा नाक्ती गाक्चा गोम्तेक्म। प्रस्थान १:११; प्रस्थान १२:२, ६; प्रस्थान ३:१९ 4 मेना इजीप्तीपुकीमी परमप्रभु यावेमी साइश्शो आन डोंइती जरमेशो तौ आन कली थिम्शो बाक्तेक्म। मिनु परमप्रभु यावेमी मेको आन देवी देवता आन कली यो निसाफ पशो बाक्त।

5 मिनु इस्राएलीपुकी रामेसेस रे गाक्शा, सुक्कोथ सहर जाक्दीश्शा बाक्तीके सेल्शा बाक्तेक्म। प्रस्थान १२:३७ 6 मिनु सुक्कोथ सहर रे गाक्शा, गोरशो रागी आ सुर डा एथाम सहरम बाक्तीके सेल्शा बाक्तेक्म। प्रस्थान १३:२० 7 मिनु एथाम रे गाक्शा, बाल-सेफोन गे बाक्शो पी-हहीरोथ

लेल्लेक्म। मिनु मिग्दोल आ नेक्था बाक्तीके सेल्शा बाक्तेक्म। प्रस्थान १४:२ 8 मिनु पी-हहीरोथ रे गाक्शा, समुन्द्र आ दाते रे पा गाक्शा, गोरशो रागीम

जाक्तेक्म। मेकोपुकी नाक्त् सां डा लां एथाम डा गोरशो रागीम गाक्शा, माराह माइक्तीकेमी बाक्तीके सेल्शा बाक्तेक्म। प्रस्थान १४:२२; प्रस्थान १५:२३

9 मिनु माराह रे गाक्शा, एलीम जाक्तेक्म। एलीमम १२ ओटा ब्वाक्कु बुक्तीके नु ७० ओटा खजूर रवा बाक्तेक्म। मिनु मेकेर बाक्तीके सेल्शा

बाक्तेक्म। प्रस्थान १५:२७ 10 मिनु मेकोपुकी एलीम रे गाक्शा, लल समुन्द्र आ नेक्था बाक्तीके सेल्शा बाक्तेक्म। 11 मिनु मेकोपुकी लल समुन्द्र रे

गाक्शा, सीन माइश्शो गोरशो रागीम बाक्तीके सेल्शा बाक्तेक्म। प्रस्थान १६:१ 12 मिनु सीन माइश्शो गोरशो रागी रे गाक्शा, दोफकामी बाक्तीके

सेल्शा बाक्तेक्म। 13 मिनु दोफका रे गाक्शा, आलुशामी बाक्तीके सेल्शा बाक्तेक्म। 14 मिनु आलुश रे गाक्शा, रेफीदीममी बाक्तीके सेल्शा

बाक्तेक्म। मेकेर मुर आन कली तूतीक ब्वाक्कु मबा। प्रस्थान १७:१ 15 मिनु रेफीदीम रे गाक्शा, सीनै डा गोरशो रागीम बाक्तीके सेल्शा बाक्तेक्म।

16 मिनु सीनै डा गोरशो रागी रे गाक्शा, किब्रोथ-हत्तावामी बाक्तीके सेल्शा बाक्तेक्म। गन्ती ११:३४ 17 मिनु किब्रोथ-हत्तावा रे गाक्शा, हसेरोथमी

बाक्तीक सेल्शा बाक्तेक्म। 18 मिनु हसेरोथ रे गाक्शा, रिथ्नाहमी बाक्तीके सेल्शा बाक्तेक्म। गन्ती १२:१६ 19 मिनु रिथ्नाह रे गाक्शा, रिम्मोन-पेरेसमी बाक्तीके सेल्शा बाक्तेक्म। 20 मिनु रिम्मोन-पेरेस रे गाक्शा, लिब्नामी बाक्तीके सेल्शा बाक्तेक्म। 21 मिनु लिब्ना रे गाक्शा, रिस्साहमी बाक्तीके सेल्शा बाक्तेक्म। 22 मिनु रिस्साह रे गाक्शा, केहेलाथामी बाक्तीके सेल्शा बाक्तेक्म। 23 मिनु केहेलाथा रे गाक्शा, शेफेर डांडा आ नेक्था बाक्तीके सेल्शा बाक्तेक्म। 24 मिनु शेफेर डांडा रे गाक्शा, हरादामी बाक्तीके सेल्शा बाक्तेक्म। 25 मिनु हरादा रे गाक्शा, मखेलोथमी बाक्तीके सेल्शा बाक्तेक्म। 26 मिनु मखेलोथ रे गाक्शा, तथाथमी बाक्तीके सेल्शा बाक्तेक्म। 27 मिनु तथाथ रे गाक्शा, तेराहमी बाक्तीक सेल्शा बाक्तेक्म। 28 मिनु तेराह रे गाक्शा, मिथ्कामी बाक्तीक सेल्शा बाक्तेक्म। 29 मिनु मिथ्का रे गाक्शा, हश्मोनाहमी बाक्तीक सेल्शा बाक्तेक्म। 30 मिनु हश्मोनाह रे गाक्शा, मोसेरोथमी बाक्तीक सेल्शा बाक्तेक्म। 31 मिनु मोसेरोथ रे गाक्शा, बेने-याकानमी बाक्तीक सेल्शा बाक्तेक्म। ब्यवस्था १०:६-७ 32 मिनु बेने-याकान रे गाक्शा, होर-हगीद-गादमी बाक्तीक सेल्शा बाक्तेक्म। 33 मिनु होर-हगीद-गाद रे गाक्शा, योत्बाथाहमी बाक्तीक सेल्शा बाक्तेक्म। 34 मिनु योत्बाथाह रे गाक्शा, अब्रोनाहमी बाक्तीक सेल्शा बाक्तेक्म। 35 मिनु अब्रोनाह रे गाक्शा, एस्प्योन-गेबेरमी बाक्तीक सेल्शा बाक्तेक्म। १राजा ९:२६; १राजा २२:४९ 36 मिनु एस्प्योन-गेबेर रे गाक्शा, जीन डा गोरशो रागीम बाक्शा, कादेशमी बाक्तीक सेल्शा बाक्तेक्म। गन्ती २०:१ 37 मिनु कादेश रे गाक्शा, एदोम रागी आ सांदमी बाक्शो होर डांडा आ नेक्था बाक्तीक सेल्शा बाक्तेक्म। गन्ती २०:२२-२९; ब्यवस्था ३४:१-१२

38 मिनु परमप्रभु यावे आ देशो खोदेशो पा, चढेब हारून होर डांडा डोइश्शा लत। मिनु मेकेर बेक्त। मेना इस्राएली इजीप्त रागी रे गृशो ४० बर्स ५ महिना डा डोइती डा नाक्ती बाक्त। 39 हारून होर डांडा तार बेक्मेनु, हारून सहे का २३ बर्स दुश्शो बाक्त।

40 कनान डा नेगेब देशो रागीम हुकुम पाइब पिप आरादमी इस्राएली पिप पिन पाइश्शो बाक्नीम, देशो लोव नैतु। गन्ती २१:१

41 मिनु मेकोपुकी होर डांडा रे गाक्शा, सल्मोनामी बाक्तीक सेल्शा बाक्तेक्म। 42 मिनु सल्मोना रे गाक्शा, पुनोनमी बाक्तीक सेल्शा बाक्तेक्म। 43 मिनु पुनोन रे गाक्शा, ओबोथमी बाक्तीक सेल्शा बाक्तेक्म। गन्ती २१:१०-११ 44 मिनु ओबोथ रे गाक्शा, मोआब डा सांदमी बाक्शो इये-अबारीममी बाक्तीक सेल्शा बाक्तेक्म। 45 मिनु इयीम रे गाक्शा, दीबोन-गादमी बाक्तीक सेल्शा बाक्तेक्म। गन्ती ३२:३४ 46 मिनु दीबोन-गाद रे गाक्शा, अल्मोन-दिब्लाथाइममी बाक्तीक सेल्शा बाक्तेक्म। 47 मिनु अल्मोन-दिब्लाथाइम रे गाक्शा, नेबो सहर आ डोइती अबारीम डा पहाडम बाक्तीक सेल्शा बाक्तेक्म। 48 मिनु अबारीम डा पहाड रे गाक्शा, यर्दन आ शुंडचीमी बाक्शो यरीको रे आइक्वी हांबु मोआब डा दिममी बाक्तीक सेल्शा बाक्तेक्म। गन्ती २२:१; ब्यवस्था ३२:४९ 49 मिनु यर्दन खोला आ शुंडच डा मोआब डा दिममी बेथ-येशीमोथ रे पा आबेल-शिक्तीम सम्म बाक्तीक सेल्शा बाक्तेक्म। गन्ती २५:१

कनानी आन कली गुंड्या, दे अरेशो

50 मिनु यरीको आ आइक्वी हांबु यर्दन खोला आ नेक्था मोआब डा दिममी परमप्रभु यावेमी मोसा कली 51 “गे इस्राएली आन कली ‘गे यर्दन खोला शोक्शा, कनान रागीमी जाक्दीन्नीनु, प्रस्थान २३:२३-२४; प्रस्थान ३४:१२-१४ 52 मेको रागी डा मुर नेल्ल आन कली मेको रागी रे खेरचा माल्नीनी। मिनु मेको आन मुशा सेल्शो नु कांसा के सेल्शो मूर्ति नेल्ल कली खतम पोक्कीन। मेको आन डांडा डा थानपुकी प्रेश्शा खतम पोक्का माल्नीनी। 53 गे मेको रागी इन के सेल्शा, मेक उड बाक्कीन। मारदे हना गो मेको रागी इन कली गेता। 54 मिनु गे थर थर आन खिं खिं डा मुर आन कली हिक्शा, रागी योव्रशा, मेको रागी योक्सीन। शुश खिं पाइश्शो थर आन कली ठेयब रागी गेचा, शुश खिं मपाइश्शो थर आन कली आइक्व रागी गेचा माल्नीनी। सुका आ नें बाजीम कौडबा, मेको मेको थर केन दुम्ब। इन किक्की पिपी आन थर थर पा मेको रागी योक्कीन। गन्ती २६:५४-५५

55 तन्न गे मेको रागीम बाक्ब मुर आन कली इन डोइती रे मखेरतीनी हना, मेको लीशो मुर इन मिक्चीम कसीडगर नु इन कोव्रखाम थोक्शो चू खोदेशो दुम्नीम। मिनु गे ते बाक्तीनी हना यो, मेकोपुकीमी इन कली श्येत गेनीम। प्रस्थान २३:३१-३३; यहोसु २३:१२-१३ 56 मिनु गो मेको आन कली मार पदुमी, दे मिश्शा बाक्डा, मेको इन कली पाइनुड’ दे माइक्मी” दैत।

कनान रागी डा सांद

34 मिनु परमप्रभु यावेमी मोसा कली 2 “इस्राएली आन कली ‘गे कनान रागी ओव्रनीनु, इन कली योक्शा गेशो रागी आ सांद तेको बाक्नीम देशा हना, इजीकीएल ४७:१३-२०; ब्यवस्था ३२:८ 3 इन दक्खिन डा रागी जीन डा गोरशो रागी रे एदोम सम्म बाक्ब। इन दक्खिन डा सांद हिक्सी समुन्द्र आ पूर्व रे गोचा माल्ब। यहोसु १५:२-४ 4 मिनु अक्रब्बीम डा ग्येत्थ लतीक लां डा दक्खिन गे जीन गे लाइब। कादेश-बारनेआ आ दक्खिन सम्म जाक्दीत्वा माल्ब। मिनु नोले हासार-अददार रे पा अज्मोन जाक्दीत्वा माल्ब। 5 मिनु नोले मेको सांद अज्मोन रे पा हिरशा, इजीप्त डा खोला सम्म जाक्दीत्वा ठेयब समुन्द्र नुब्ब।

6 मिनु पच्छिम डा सांद ठेयब समुन्द्र बाक्ब। मेको ठेयब समुन्द्र आ शुंडच इन पच्छिम गे डा सांद बाक्ब।

7 मिनु इन उत्तर गे डा सांद ठेयब समुन्द्र रे होर डांडा सम्म फ्रेंचा माल्नीनी।

8 मिनु होर डांडा रे लेबो-हमाथ सम्म फ्रेंदीन। मिनु मेको सेदाद सम्म जाक्दीत्वा माल्ब। 9 मिनु नोले सिप्रोन सम्म जाक्दीत्वा माल्ब। मिनु हासार-एनानमी नुब्ब। मेको इन उत्तर गे डा सांद बाक्ब।

10 मिनु इन पूर्व डा सांद हासार-एनान रे शेफाम सम्म फ्रेंदीन। 11 मिनु शेफाम रे उड बुष्शा ऐन डा पूर्व गे डा रिब्ला सम्म जाक्दीत्वा माल्ब। मिनु नोले मेको सांद बुष्शा, किन्नेरेथ समुन्द्र आ पूर्व डा शुंडच सम्म जाक्दीत्वा माल्ब। 12 मिनु मेको सांद यर्दन खोला रे पा हिक्सी समुन्द्र सम्म जाक्दीत्वा नुब्ब। इन रागी आ एर ओंथ डा सांद एको बाक्नीम’ दे माइक्मी” दैत।

13 मिनु मोसामी इस्राएली आन कली “परमप्रभु यावे आ अरेशो खोदेशो पा फेन्टे आष्शा ९ थर नु आधा थर आन कली गेशो रागी बाक्ब। 14 मारदे हना रूबेन आ थर डा खिं खिं डा मुर, गाद आ थर डा खिं खिं डा मुर नु मनस्से आ उडक्थ थर डा खिं खिं डा मुर आन भाग तने थुश्शो बाक्तेक्म। गन्ती ३२:२९-३३ 15 मेको निक्शी नु उडक्थ थर डा मुरपुकीमी यरीको ओंथ हांबु, यर्दन खोला आ पूर्व गे आन आन रागी तशो बाक्नीम” दैत।

16 मिनु परमप्रभु यावेमी मोसा कली 17 “इन कली रागी योक्शा गेब मुर आन नें मार बाक्नीस देशा हना, डोइती मेको चढेब एलाजर नु नून आ तौ यहोसु बाक्नीस। यहोसु १४:१; ब्यवस्था १:३८ 18 मिनु गे थर थर डा मुर आन ठेयब मुर का का योव्रचा माल्नेवे। 19 मेको थर थर डा ठेयब मुर सु सु बाक्नीम देशा हना, यहूदा आ थर डा यपुन्ने आ तौ कालेब, गन्ती १३:६,३०

20 सिमियोन आ थर डा अम्मीहुद आ तौ शेमुएल, 21 बेन्यामीन आ थर डा किस्लोन आ तौ एलीदाद, 22 दान आ थर डा योग्ली आ तौ बुक्की, 23 योसेफ आ तौ मनस्से आ थर डा एफोद आ तौ हन्नीएल, 24 योसेफ आ तौ एफ्राइम आ थर डा शिफ्तान आ तौ केमुएल, 25 जबूलून आ थर डा पारनाक आ तौ एली-जाफान, 26 इसाकार आ थर डा अज्जान आ तौ पाल्तीएल, 27 आशेर आ थर डा शेलोमी आ तौ अहीहुद, 28 नाप्ताली आ थर डा अम्मीहुद आ तौ पेदाहेल बाक्नीम। 29 मिनु मेको परमप्रभु यावेमी अरेशो इस्राएली आन कली कनान रागी योक्ब थर थर डा योव्रशो ठेयब मुर एको बाक्नीम” दैत।

लेवी थर डा मुर आन सहर

35 परमप्रभु यावेमी यरीको आ आइक्वी हांबु यर्दन खोला आ शुंडच मोआब डा दिमम मोसा कली यहोसु २१:१-३ 2 “गे इस्राएल आन कली ‘गे इन आंम सेल्शो रागी रे लेवी आ थर डा मुर आन कली सहरपुकी गेचा माल्नीनी। मिनु मेको आन कली मेको सहर आन एर ओंथ बी ब्यफ, क्यारश भेडा योव्रतीके गेचा माल्नीनी। गन्ती १८:२०; लेवी २५:३२-३४

3 मेको सहरपुकी मेको आन कली बाक्तीक दुम्नीम। बी ब्यफ, क्यारश भेडा योव्रतीक मेको आन बी ब्यफ, क्यारश भेडा आन कली दुम्ब।

4 मिनु गे लेवी आ थर डा मुर आन कली गेशो सहर मेर डा योव्रतीक मेको सहर आ गारो आ एर ओंथ रे हजार का कुबीत बाक्चा माल्ब। कुबीत का ०.५ मिटर बाक्ब। 5 गे सहर आ लाडगा पूर्व गे हजार निक्शी कुबीत, दक्खिन गे हजार निक्शी कुबीत, पच्छिम गे हजार निक्शी कुबीत नु उत्तर गे हजार निक्शी कुबीत पुक्चा माल्नीनी। मिनु सहर मेको आ दातेम बाक्चा माल्ब। मेको आन सहर डा योव्रतीके मेकोन बाक्नीम' देनो" देंत।

#### ब्रॉइशा बाक्तीक सहर

6 मिनु "गे लेवी आ थर डा मुर आन कली गेशो सहर रे ६ ओटा सहर चहिं ब्रॉइशा बाक्तीक सहर दुम्चा माल्नीम। गे मेकेर मुर साइक्ब मुर कली प्रोक्चा गेचा माल्नीनी। मेको नु तेम्शा ४२ ओटा सहर दुम्चा माल्नीम। प्रस्थान २१:१३ 7 गे लेवी थर डा मुर आन कली नेल्लेमी ४८ ओटा सहर नु मेको आन एर ओंथ डा योव्रतीक रू गेचा माल्नीनी। 8 मिनु ठेयब रागी तशो इस्राएली आन थर रे शुश सहर गेचा नु आइक्च रागी तशो इस्राएली आन थर रे का निक्शी सहर गेचा माल्नीनी। मेको थर थर डा मुरुमी आ योक्शा गेशो रागी गारचा डा पा लेवी थर डा मुर आन कली सहरपुकी गेचा माल्नीम, देंचा माल्नेवे" दे परमप्रभु यावेमी मोसा कली देंत। गन्ती २६:५४

9 मिनु परमप्रभु यावेमी लेंशा मोसा कली 10 "गे इस्राएली आन कली 'गेपुकी यर्दन खोला शोक्शा कनान रागी जाक्दीन्नी नोले, 11 गे ब्रॉइशा बाक्तीक सहर योव्रचा माल्नीनी। मिनु मतुइक्थु, मुर साइक्बु हना, मेको मुर साइक्ब मुर मेकेर प्रोक्ने चाप्ब। 12 मेको सहरपुकी क्येक्क लेप्ब आन क्येडा ब्रॉइशा बाक्तीक सहर दुम्ब। मिनु मेको मुर साइक्ब मेको सहर डा मुर आन दातेमी निसाफ पचा पुंडसीचा डोंइती साइक्चा मपुंडसेक्ल।

13 मिनु इन योव्रशो ब्रॉइशा बाक्तीक सहर ६ ओटा दुम्चा माल्नीम। 14 गे यर्दन खोला आ ओंथ हांबुमी सां नु कनान रागीमी सां सहर ब्रॉइशा बाक्चा कली तिल्चा माल्नीनी। 15 मेको ६ ओटा सहर इस्राएली, आन दातेम बाक्ब अर्को रागी डा मुर नु लां गाक्ब मुर आन कली ब्रॉइशा बाक्तीक सहर दुम्ब। मोपा मतुइक्थु मुर साइक्ब मुर मेकेर प्रोक्शा लशा बाक्ने चाप्नीम।

#### मुर साइक्चा आ पर्वम ब्यवस्था १९:४-१३

16 सुइमी फलाम के मारेइमी आप्शा, मुर साइक्बु हना, मेको मुर साइक्ब बाक्ब। मेको मुर साइक्ब कली साइक्चान माल्ब। 17 सुइ मुरुमी मुर आन कली फुल्लु आप्शा साइक्बु हना, मेको मुर साइक्ब बाक्ब। मेको मुर साइक्ब कली साइक्चान माल्ब। 18 सुइमी मुर कली शीम तुप्शा साइक्बु हना, मेको मुर साइक्ब बाक्ब। मेको मुर साइक्ब कली साइक्चान माल्ब। 19 मेको क्येक्क लेप्बमी मेको मुर साइक्ब कली साइक्चा माल्ब। मेको कली गुमानुन, मेको कली साइक्चा माल्ब। 20 मिनु सुइमी मुर कली काइ मदाक्थु नेप्शा, मार मार आप्शा कि लांम बाप्शा साइक्बु हना, 21 गुइम तुप्शा साइक्बु हना, मेको मुर कली साइक्चा माल्ब। मेको मुर साइक्ब बाक्ब। मेको क्येक्क लेप्बमी मेको मुर साइक्ब कली गुमानु, मेको कली साइक्चा माल्ब।

22 तन्न सुइमी मुर कली मगाइक्थु, मतुइक्थु, चुशा तोक्तु हना, कि मारेइ थोव्रक आबानु मेको कली ख्रशा बेक्त हना, 23 मेको आ वारचमी ठेयब फुल्लु ग्याइक्तानु, आ गुइ रे दोक्शा ख्रशा बेक्त हना, 24 मेको सहर डा मुरपुकीम मेको मुर साइक्ब नु क्येक्क लेप्ब आस दातेमी निसाफ पचा माल्नीम। 25 मिनु मेको सहर डा मुरपुकीम मेको मुर साइक्ब कली क्येक्क लेप्ब आ गुइ रे प्रॉइचा माल्नीम। मिनु नोले सहर डा मुरपुकीमी मेको मुर साइक्ब ब्रॉइशा बाक्तीक सहर सोइक्चा माल्नीम। मिनु मेको मुर साइक्ब तेल लुक्शो ठेयब चढेब मबेक्म सम्म मेकेर बाक्चा माल्ब। लेवी २१:१० 26 तन्न मेको मुर साइक्ब मेको आ ब्रॉइशा बाक्तीक सहर रे गूत हना, 27 मिनु क्येक्क लेत्चा माल्ब मुरुमी मेको कली गुम्शा साइक्बु हना, मेको

कली साइक्ब दोस मताइब। 28 मारदे हना मेको साइक्ब ठेयब चढेब मबेक्म सम्म मेको ब्रॉइशा बाक्तीक सहरम बाक्चा माल्ब। तन्न ठेयब चढेब बेक्म नोले ला मेको आ रू खिम लेत्ने चाप्ब।

29 मिनु मेको गेना हना यो परमप्रभु यावेमी इन कली फुल्लुम मुशा ब्रेक्शो नु आ शेंशो लोव्र बाक्ब। मिनु गेपुकी ते बाक्तीनी हना यो, इन तौ चच युइ नेल्ल पाला डा मुरुमी पचा माल्नीम।

30 सुइम सुइ आन कली साइक्बु हना, मेको मुर साइक्ब कली सांक्छी आन लोव्र नेंशा ला साइक्चा माल्ब। तन्न सांक्छी का आ लोव्र नेंशा ला मेको कली मसाइक्चा। ब्यवस्था १७:६; ब्यवस्था १९:५ 31 गेपुकी साइक्चा पुंडसीब मुर प्रॉइचा कली मेको आ पा डा क्येट मताक्कीन। मेको मुर साइक्ब कली साइक्चा माल्ब। भजन संग्रह ४९:८-९ 32 ब्रॉइशा बाक्तीक सहरम प्रोक्शो मुर, ठेयब चढेब मबेक्म, आ खिं रू लेत्चा गेचा कली गे क्येट मताक्कीन। ठेयब चढेब मबेक्म सम्म मेको आ खिं रूमी लेत्चा मताइब।

33 मिनु गेपुकीमी इन बाक्तीक रागी ग्रांघा दिशो मसेलीन। मारदे हना रागी हुशेम ग्रांघा दिशो सेल्ब। मिनु मेको ग्रांघा मदिशो सेल्ने मचाप्नीम। हुश ख्राक्श पोक्ब कली साइक्शा ला मेको रागी ग्रांघा मदिशो सेल्ने चाम्सीब। 34 गे इन बाक्शो रागी ग्रांघा दिशो मसेलीन। गो यो मेकेर बाक्नुड। मारदे हना गो परमप्रभु यावे इस्राएली आन दातेमी बाक्नुड' दे इस्राएली आन कली देनो" देंत। लेवी १८:२४-२८; प्रस्थान २९:४५

#### सेलोफेहाद आ तमी आन थेरशो रू तशो

गन्ती २७:१-१९

36 योसेफ आ युइ, मनस्से आ चच माकीर आ तौ गिलाद आ खिं खिं डा योसेफ आ थर का डा ठेयब मुरपुकी, मोसा नु इस्राएली आन थर थर डा ठेयब मुर आन डोंइती जाक्तेक्म। 2 मिनु मेकोपुकीमी "परमप्रभु यावेमी आंइ होवप, इन कली इस्राएली आन कली रागी योक्शा गेचा, दे अरेशो बाक्त। मिनु आंइ लोक्ब सेलोफेहाद आ शॉप चहिं मेको आ तमी आन कली गेचा माल्ब, दे परमप्रभु यावेमी अरेशो बाक्त। गन्ती २६:५५ 3 तन्न मेको मीश आलपुकीम इस्राएली आन अरु थर डा मुर नु ग्युंवे पाप्तेक्म हना, मेको आन शॉप वॉइश मुर आन शॉपम तेम्सीब। मोपा मेको आन भाग आंइ किकी पिपी आन रागी रे जाम्शा लाइब। 4 मिनु प्रॉइतीक बर्स जाक्मेनु, मेको मीश मुर आन रू यो ग्युंवे पा लाइब मुर आन रूम तेम्सीब। मोपा गो आंइ थर रागी रे जाम्शा लाइब" देंतेक्म। लेवी २५:१०-१३

5 मिनु परमप्रभु यावेमी मोसा कली अरेशो खोदेंशो पा मोसामी इस्राएली आन कली "योसेफ आ तौ आन थर डा मुर आन देंशो लोव्र थमा बाक्ब। 6 परमप्रभु यावेमी सेलोफेहाद आ तमी आन पर्वम अरेशो मार बाक्त देंशा हना, मेकोपुकीमी आन दाक्शो वॉइश आल ग्युंवे पने चाप्नीम। तन्न आन आफ आ खिं खिं डा मुर नु ला ग्युंवे पने चाप्नीम। 7 दो दुम्मेनु इस्राएली आन रागी थर का रे अर्को थरम मयाक्सीब। मारदे हना इस्राएली नेल्ल आन किकी पिपी आन रागीम बाक्चा माल्नीम। 8 सुइ मीश आल आ आफ आ शॉप तशो बाक्त हना, मेकोमी आ आफ आ खिं खिं डा मुर का ग्युंवे पचा माल्ब। मोपा इस्राएली नेल्ले आन किकी पिपी आन थर डा रागी लीब। 9 मिनु इस्राएली आन रागी थर का रे अर्को थरम याक्चा मदुम्ब। मोपा इस्राएली नेल्ल आन आंम रागीम बाक्चा ताइनीम" देंत।

10 सेलोफेहाद आ तमीपुकीमी परमप्रभु यावेमी मोसा कली अरेशो खोदेंशो पा पाप्तेक्म। 11 सेलोफेहाद आ तमीपुकी महलाह, तिरचा, होगला, मिल्का नु नोआहमी आन आफ आ लोक्ब आन तौपुकी नु ग्युंवे पाप्तेक्म। गन्ती २६:२९-३४ 12 मेकोपुकीमी योसेफ आ तौ मनस्से आ थर डा मुरपुकी नु ग्युंवे पाप्तेक्म। मोपा मेको आन शॉप आन थर नु आन आफ आ खिं खिं डा मुर नु लीत।

13 एको परमप्रभु यावेमी मोसा कली शेंतीके नु ठीक पतीके लोव्र बाक्ब। मिनु मोसामी इस्राएली आन कली नेल्ल अरेशो बाक्ब। मेना मेकोपुकी यर्दन खोला आ शुंडच, मोआब डा दिंममी यरीको आ नेक्था बाक्तेक्म।

## ब्यवस्था

एको किताब यो मोसा आ ब्रेक्शो बाक्ब। मोसा परमप्रभु आ अरेशो लोव ब्रेक्ब नु कुम्सो सेल्ब बाक्त। मोसा बेक्म नोले अरु मुरपुकीम ब्रेक्शो बाक्तेक्म। का निक्शीम “यहोसुम ब्रेक्शो बाक्ब” देंनीम। मोसामी डांडा डोइक्चा क्येडा डोइती आंमा ब्रेक्शो बाक्ब, दे यो मिन्नीम। एको किताब इस्राएलीपुकी गोरशो रागीम हिरशा ४० बर्स ११ महिना डा डोइती नाक्त रे ३० नाक्त सम्म डा ब्रेक्स बाक्ब। मोसामी आ बेक्चा क्येडा डोइती ब्रेक्शो कि ब्रेक्पाइश्शो बाक्त। एको किताब परमप्रभु आ अरेशो लोव लेंशा शेंतीक ला ममाइ, परमप्रभु आ देंशो नेल्ल टिचा आ पर्बम लोव बाक्ब। एको नेल्ल मोसा आ पशो लोव बाक्ब।

### होरेब रे कादेश सम्म गाक्शो

1 मोसामी एको ब्रेक्शो लोव इस्राएली नेल्ल आन कली शेंशो बाक्ब। मिनु मेना मेकोपुकी सुफ माइश्शो दिंम आ ओंथ हांबुम बाक्तेक्म। मेको बाक्तीके अराबाहम, पारान, तोफेल, लाबान, हसेरोथ नु दी-साहाब आन दातेमी यर्दन खोला आइक्ची हांबु डा रागीम बाक्ब। 2 होरेब रे पा कादेश-बारनेआ सम्म, सेडर डा लां रे लचा कली ११ नाक्त माल्ब। 3 मिनु परमप्रभु यावेमी मोसा कली मार मार शेंदा, मेको मोसामी ४० बर्स नु ११ महिना डा डोइती डा नाक्तीमी मेको इस्राएली नेल्ल आन कली शेंताक्व। गन्ती ३३:३८ 4 डोइती मेकोपुकीमी हेशबोन डा एमोरी आन पिप सीहोन नु अशतारोथ नु एद्रेइ सहरम बाक्ब बाशान डा पिप ओग नु लडाइ पा ग्रातेक्म। गन्ती २१:२१-३५ 5 मिनु यर्दन खोला आइक्ची हांबुम, मोआब रागीम बाक्शा, मोसामी परमप्रभु यावे आ अरेशो लोव शेंचा गोप्तु। 6 मिनु मोसामी “होरेब डांडाम बाक्शो परमप्रभु यावे, इं परमप्रभुमी ‘गोपुकी एको पहाडम शुश नाक्त बाक्तीनी। गन्ती १०:११-१२ 7 मुल गे गाक्चा गोने। कनानी आन रागी लने। एमोरी आन पहाड नु दिंम लने। मेको आ नेक्था डा अराबाह माइक्तीके यो लने। मेको पहाड बाक्ब। मेको शेफेलाह, नेगेब नु समुन्द्र आ नेक्था डा कनानी आन रागी बाक्ब। गे लेबानोन नु युफ्रेटीस माइश्शो ठेयब खोला सम्म लने’ देंत। 8 मिनु लेंशा परमप्रभु यावेमी ‘कोवडीन, मेको रागी इन डोइती बाक्ब। मेकेर ओव्रशा, मेको रागी आंम के सेलीन। मारदे हना गो मेको रागी इन किकी पिपी अब्राहाम, इसहाक, याकूब नु आन चच युइ आन कली गेनुड’ दे कसम जाता” देंत। उत्पत्ती १२:७; गन्ती ११:१४

### मोसामी निसाफ पाइब वोइश्शो

9 मिनु गो इन कली “गो आं का ला इन कली कोवने मचाप्नुड। प्रस्थान १८:१८ 10 मिनु परमप्रभु यावे, इन परमप्रभुमी इन कली शुश सेल्शा, गे मुल सरीड डा सोरुल खोदेंशो पा शुश दुश्शो बाक्तीनी। ब्यवस्था १०:२२; उत्पत्ती १५:५ 11 परमप्रभु यावे, इन किकी पिपी आन परमप्रभुमी इन कली का का पा हजार क्येडा शुश सेलल। आ देंशो खोदेंशो पा इन कली आसीक गेवल। 12 दोपा गो का ला इन श्येत तशा, इन जिशो खेशो नेल्ल गारपाइक्ने चाप्नुडा डा? 13 मिनु गो इन थर थर रे निप्स पाइश्शो, लोव रुब्ब नु मारेइ मारेइ तुइक्ब मुर योवडीन। मिनु गो मेको आन कली इन कली कोवब सेल्नुड। 14 मिनु गोपुकीमी आं कली ‘इन देंशो लोव रिश्शो बाक्ब’ देंतीनी। 15 मोपतीके गो इन थर डा निप्स पाइश्शो, तुइक्ब नु ठेयब मुरपुकी योव्रशा, इन कली कोवब सेल्ता। मिनु इन थर थर डा हजार का, सहे का, ५० नु १० जना मुर आन कली का का पा कोवब ठेयब मुरपुकी सेल्ताक्मी। आंम इन थर थर डा मुरपुकी यो योव्रताक्मी। प्रस्थान १८:२५ 16 मेना गो इन कली निसाफ पाइब आन कली ‘इन लोक्ब आन दातेमी जिशो खेशो रिश्शो पा नेंशा, ठीक पा निसाफ पने। इस्राएली नु रागी डा मुर जिशो यो नेल्ल आन कली ठीक पा निसाफ पने। लेवी १९:१५ 17 निसाफ पनीनु, मुर आन कुल

मकोवडीन। गोपुकीमी आइक्च नु ठेयब मुर, नेल्ल आन लोव नेनीन। सुइ कली महिनीन। मारदे हना निसाफ परमप्रभु आ गुइमी बाक्ब। इन मचाप्शो निसाफ चहिं गो नेंनुड। मेको कली आं बाक्तीक चाक्कीन’ दे माइक्ताक्मी। ब्यवस्था १६:१९; २इतिहास १९:६-७; प्रस्थान २१:६ 18 मेना गो इन पचा माल्शो गेय नेल्ल अरेतन्नी।

### मोसामी क्यारी पाइब सोइश्शो

19 मिनु नोले परमप्रभु यावे, इं परमप्रभुमी देंशो खोदेंशो पा गोपुकी होरेब डांडा रे पा एमोरी आन बाक्तीक पहाड लाइतक। गोपुकी एको हिंचा डा ठेयब गोरशो रागी लकानु, गे मेको नेल्ल तुइक्नीनी। मोपा गो कादेश-बारनेआम जाक्तक। गन्ती २०:१ 20 मिनु गो इन कली ‘परमप्रभु यावे, इं परमप्रभुमी इं कली गेशो एमोरी आन पहाड रागीमी जाक्तीनी। 21 कोवडीन, परमप्रभु यावे, इन परमप्रभुमी एको रागी इन कली गेशो बाक्त। मिनु परमप्रभु यावे, इन किकी पिपी आन परमप्रभुमी देंशो खोदेंशो पा मेकेर इर लशा, आंम के सेलीन। गोपुकी महिनीन। सुर्ता मपने’ देंती। 22 मिनु गे नेल्लेमी आं कली ‘मेको रागी डा मारेइ मारेइ तुइक्चा कली आंइ डोइती क्यारी पाइबपुकी सोइक्तीन। मेकोपुकीम तेको लां गाक्चा नु तेको सहर जाक्तीनीकी, दे शेंने चाप्नीमी’ देंतीनी। गन्ती १३:२ 23 मिनु गो मेको लोव ठीक लाक्ती। गो इन थर थर डा का का पा १२ जना मुर योव्रताक्मी। 24 मिनु मेकोपुकी पहाड गे लशा, एक्कोल डा दिंम जाक्तीशा, क्यारी पथ लास्तेक्म। 25 मिनु मेकोपुकीमी मेको रागी डा फल फुल कुरशा चाक्शा, आंइ कली ‘परमप्रभु यावे, इं परमप्रभुमी गेशो रागी शुश रिश्शो बाक्ब’ देंतेक्म।

### इस्राएलीपुकीमी मटिशो

26 तन्न गोपुकी परमप्रभु यावे, इन परमप्रभुमी देंशो मटिथु, मेको रागी लचा मबिस्सीनी। 27 मिनु गे इन बाक्तीक ताम्बुमी गन गन पा ‘परमप्रभु यावेमी आंइ कली मदाक्तीके नु एमोरी आन गुइ रे पा साइक्पाइक्चा कली आंइ कली इजीप्त रे गुंइशा, एक चाक्शो बाक्ब। गन्ती १४:- 28 मारदे मेकेर लचा? मेको क्यारी पाइबपुकीमी आंइ कली मेकेर डा मुरपुकी आंइ क्येडा लाइश्शो नु बोल्यो बाक्तीनीम। मेको आन सहर आन गारो सरीड थिचा डा पा लाइश्शो बाक्तीनीम। मिनु मेकेर गोपुकीमी अनाकीम डा मुर यो ताइतक, दे हिंच कोइताक्म’ दे गन गन पाइतीनी। ब्यवस्था ९:१-२; गन्ती १३:३३ 29 मिनु गो इन कली हिंशा, खिंखि मपने। मेको आन कली तशा महिनीन। प्रस्थान १४:१४-२५; यहोसु १०:१४ 30 इन डोइती गाक्ब, परमप्रभु यावे, इन परमप्रभुमी इन पा डा लडाइ पाइब। दोपा इजीप्त रागीमी इन डोइती मार मार पवा, मोपा पाइब। 31 मिनु गोरशो रागीम गोपुकी गाक्तीनु, आफोम आ तौ कली कुरशो खोदेंशो पा, परमप्रभु यावे, इन परमप्रभुमी इन कली एक जाक्ची सम्म कुरशो बाक्त। गे आंमा तुइक्तीनी। ब्यवस्था ८:५; प्रस्थान १९:४ 32 मोदेंशो दुम्त हना यो गे परमप्रभु यावे, इन परमप्रभुमी कली थमा मसुइक्तीनी। 33 मेको इन डोइती इन कली बाक्तीके कोइथ गाक्त हना यो, गे



थमा मसुइक्नी। मिनु लां कौइचा कली नाक्दोम मी नु नाक्तीम गोस्स दुश्शा इन कली लां कौइताक्व। प्रस्थान १३:२१

थमा मसुइक्ब सजाइ तशो

34 मिनु परमप्रभु यावेमी इन रेयके पा लोत्र पशो नेंशा गाइश्शा 35 'एको मरिश्शो मुर आन दातेमी मुर का ला मेको आन किकी पिपी आन कली गेशो रिश्शो रागी लचा ताइब। गन्ती १४:२३-२४ 36 मेको यपुन्ने आ तौ कालेब बाक्ब। मेको नु आ तौ चचम मेको आ थेक्शो रागी ताइनीम। मारदे हना मेकोमी आं कली, परमप्रभु यावे कली थमा पा नोले खोइश्शो बाक्त्' दे कसम जशा देंत। 37 मिनु परमप्रभु यावेमी इन पशो तशा, आं पर्वम यो गाइक्ताक्व। मिनु मेकोमी आं कली 'गे यो मेको रागी ओत्रचा मताइनेवे। गन्ती २०:१२ 38 इ के गेय पाइब नून आ तौ यहोसु चहिं ओत्रचा ताइब। गे मेको आ थुं बारपाइक्वा माल्नेवे। मारदे हना यहोसुमी इस्राएली आन कली मेको रागी योक्शा गेचा माल्ब' दे परमप्रभुमी कसम जशा देंत। गन्ती ३४:१७ 39 मिनु गेपुकीमी इन आल ब्रेच आन पर्वम 'मेको गोरशो रागीमी बेक्नीम' देंतीनी। तन्न मेकोपुकी ओत्रचा ताइनीम। इन आइक्च तौपुकी ओत्रचा ताइनीम। मेको रागी मेको आन कली गेनुड। मिनु मेकोपुकीमी मेको रागी आंम के सेल्नीम। 40 मिनु गेपुकी चहिं लेश्शा गोरशो रागी लल समुन्द्र गे लने। गन्ती १४:२५

41 मिनु गेपुकीमी आं कली 'गे परमप्रभु यावे कली पाप पाइतक। परमप्रभु यावे, इं परमप्रभुमी शेंशो खोदेंशो पा गो लडाइ पथ लाइनीकी' देंतीनी। मिनु गे नेल्ले इन या पिम्साक्नी। मिनु गो ग्रानीक, दे मिम्शा, पहाडी रागी कली लडाइ तोचा, दे ग्येत्थ लाइतीनी। गन्ती १४:४० 42 मिनु परमप्रभु यावेमी आं कली 'गेपुकी इन जोरी सत्रु रे ब्रुइनीनी, गे मेको डांडा डोइश्शा मलने। लडाइ मपने। मारदे हना गो इन दातेमी मबाक्शो बाक्नुड, दे मेको आन कली माइक्मी' देंत। 43 मिनु गो इन कली मेको लोत्र पाता। तन्न गेपुकीमी नेंसीन मनेनी। ठेयब लेश्शा, परमप्रभु यावे आ लोत्र मबित्थु मटिथु, गे डांडा डोइसाक्नी। 44 मिनु मेको डांडाम बाक्ब एमोरीपुकीमी गेपुकी नु लडाइ पास्तेक्म। मिनु मेकोपुकीमी सुरब आन हुल खोदेंशो पा इन कली खेदा पास्तेक्म। मिनु सेइर नु होरमा सम्म खेदा पा इन कली फ्रुस्तेक्म। गन्ती १४:४५ 45 मिनु गेपुकी लेश्शा जाक्शा, परमप्रभु यावे आ डौइती डाक्तीनी। तन्न मेकोमी इन डाक्शो मनेन। इन पुंइशो लोत्र यो मगेवो। 46 मिनु नोले गे शुश नाक्त् कादेशम बाक्तीनी। ब्यवस्था २:१४

इस्राएलीपुकी गाक्शो

2 मिनु परमप्रभु यावेमी आं कली देंशो खोदेंशो पा गोपुकी गोरशो रागी लल समुन्द्र गे लाइतक। मिनु शुश नाक्त् सम्म सेइर डांडा हिरना हिरन बाक्त्क। गन्ती २१:४

2 मिनु परमप्रभु यावेमी आं कली 3 'गेपुकी शुश नाक्ती एको डांडा कली हिरना हिरन बाक्तीनी। मुल उत्तर गे लने। 4 गे मुर आन कली मुल गे सेइरम बाक्ब, इन लोक्बपुकी एसाव आ चच युइ आन रागी लाइनीनी। मेकोपुकी इन कली तशा हिंनीम। मिनु गेपुकी होस पचा माल्नीनी। गन्ती २०:१४ 5 मेकोपुकी नु काइ मजिने। मारदे हना गो मेको आन रागी रे इन कली खोइल थेक्तीक खोमो रू यो मगेनुड। गो सेइर पहाड एसाव कली गेशो बाक्नुड। उत्पत्ती ३६:८ 6 मिनु इन माल्शो जचा थोत्रक मेको आन के ग्याप्शा ला जने। ब्वाक्कु यो मेको आन के ग्याप्शा तूडीन।

7 मारदे हना परमप्रभु यावे, इन परमप्रभुमी इन पशो नेल्लेमी इन कली आसीक गेशो बाक्ब। गेपुकी मेको ठेयब गोरशो रागीम गाक्नीनु, इन कली कोत्रतु। मिनु परमप्रभु यावे, इन परमप्रभु ४० बर्स सम्म गेपुकी नु बाक्त्। इन माल्शो नेल्ल ताइतीनी' दे परमप्रभुमी देंत। गन्ती १४:३३

8 मिनु गो, सेइरम बाक्ब एसाव आ चच युइ, आंइ लोक्ब आन बाक्तीक दिंम डा अराबाह डा लां रे पा एलाथ नु एस्योन-गेबेर रे मगाक्थु, गो मोआब डा गोरशो रागी गे लाइतक। 9 मिनु परमप्रभु यावेमी आं कली 'मोआब नु लडाइ मपने। मेकोपुकी नु काइ मजिने। मेको रागी इ कली मगेनन। मारदे हना गो आर सहर लोत नु आ चच युइ आन कली गेता। उत्पत्ती १९:३६-३७

10 मिनु डौइती मेकेर एमीमपुकी बाक्तेक्म। मेको शुश नु लाइश्शो मुर बाक्तेक्म। अनाकीम डा मुर खोदेंशो शुश लाइश्शो कोल्शो मुर बाक्तेक्म। ब्यवस्था १:२८ 11 मिनु अनाकीम डा मुर आन कली खोदेंशो पा रेफाइम माइश्शो मुरपुकी शुश कोल्शो मुर देंनीम। मिनु मोआबीम मेको आन कली एमीम देंनीम। 12 डौइती होरीपुकी यो सेइरम बाक्शो बाक्तेक्म। मिनु नोले एसाव आ मुरपुकीम मेको आन कली साइश्शा, मेको आन रागीम बाक्तेक्म। परमप्रभु यावेमी इस्राएली आन कली गेशो रागी मेकोपुकीम आंम के सेल्शो खोदेंशो पा, मोआब डा मुरपुकीमी मेको रागी आंम के सेल्शो बाक्तेक्म' देंत। उत्पत्ती १४:६ 13 मिनु नोले परमप्रभुमी 'गेपुकी जेरेद खोल्सा शोक्सीन' देंत। मिनु गो जेरेद खोल्सा शोक्साक्क। गन्ती २१:१२ 14 मिनु डौइती परमप्रभु यावेमी कसम जशो खोदेंशो पा कादेश-बारनेआ रे जेरेद खोल्सा आइक्ची हांबु सम्म जाक्वा नु लडाइ पाइब नेल्ल मनुम्मा सम्म आंइ कली ३८ बर्स माल्ताक्व। गन्ती १४:३४ 15 थमा पा परमप्रभु यावेमी मेको लडाइ पाइब आन कली आंमान क्याम्ताक्व। गन्ती १६:३१-३२; गन्ती २१:६; गन्ती २५:३-५

16 मिनु मुर आन दाते डा लडाइ पाइब नेल्ल बेक्ने थुम्मे नोले 17 परमप्रभु यावेमी आं कली 18 'गे मुलाक्त् मोआब डा सांद आर सहर लाक्शा, लचा माल्नीनी। गन्ती २१:१३,१५ 19 मिनु गे अम्मोनी आन रागी जाक्दीत्नीनी। मेको नु लडाइ मपने। काइ मजिने। मारदे हना अम्मोनी आन रागी इन कली मगेनुड। मेको लोत नु आ चच युइ आन कली गेतामी। उत्पत्ती १९:३८

20 मेको रागी यो लाइश्शो कोल्शो मुर आन रागी बाक्त्। डौइती मेकेर रेफाइम माइश्शो मुर बाक्तेक्म। तन्न अम्मोनीपुकीमी मेको आन कली जाम्जुम्मीम देंनीम। 21 मेको शुश दुश्शो नु लाइश्शो अनाकीम डा मुर खोदेंशो बाक्तेक्म। मिनु परमप्रभु यावेमी मेको आन कली अम्मोनी आन डौइती खतम सेल्लु। मिनु मेको नेल्ल आन कली खेरशा, अम्मोनी मेको आन बाक्तीकेम बाक्तेक्म। 22 परमप्रभुम सेइरम बाक्ब एसाव आ खिं खिं डा मुर आन पर्वम यो मोदेंशोन पाप्तु। मेको आन डौइती होरी आन कली खतम सेल्लु। मिनु होरी नेल्ल आन कली खेरशा, मुल सम्म एसाव आ खिं खिं डा मुर मेकेर बाक्नीम। 23 मिनु मेको मोदेंशो पा गाजा डा काफ्तोर सहर रे जाक्शो काफ्तोरीपुकीमी आव्वीम सहर डा मुर आन कली साइक्तेक्म। मिनु मेको आन बाक्तीकेमी बाक्तेक्म' देंत। उत्पत्ती १०:१४; यहोसु १३:३

पिप सीहोन नु लडाइ पा ग्राशो

24 मिनु परमप्रभुमी 'बोक्कीन। गाक्वा गोने। मिनु अरनोन खोल्सा शोक्सीन। मारदे हना गो हेश्बोनम बाक्शो एमोरी आन पिप सीहोन नु आ रागी इन कली गेता। मेको इन के सेल्ना सेल्ल लडाइ पने। 25 मुलाक्त् रे गो जात जात डा मुर नेल्ल आन कली इन लोत्र नेंशा, इन क्येडा हिंशा, खिंखिं पाइब सेल्लुडमी' देंत। प्रस्थान २३:२७ 26 मिनु गो केदेमोथ माइश्शो गोरशो रागी रे हेश्बोन डा पिप सीहोन नु दुचा गारचा आ पर्वम मुरपुकी लोत्र पथ सोइक्ताक्डमी। गन्ती २१:२१-२६ 27 मार लोत्र सोइक्ताक्डमी देंशा हना 'आंइ कली इन रागी रे लचा गेकी। गो एर ओंथ मपथु, ठेयब लां खोइश्शा गाक्नीकी। 28 गे जचा थोत्रक क्येट ताक्शा आंइ कली लेयडीन। ब्वाक्कु यो क्येट ताक्शा गेकी। आंइ कली गाक्तीक लां ला गेकी। 29 मोपा सेइरम बाक्ब एसाव आ खिं खिं डा मुरपुकीमी नु आर सहरम बाक्ब मोआबी डा मुरपुकीमी गाक्वा गेम्तेक्म। परमप्रभु यावे, इं परमप्रभुमी गेशो यर्दन खोला आइक्ची हांबु डा रागी जाक्दीचा सम्म लां गेने' देंथ, मुरपुकी सोइक्ताक्डमी। 30 तन्न हेश्बोन डा पिप सीहोनमी आंइ कली गाक्तीक लां मगेव। मारदे हना परमप्रभु यावे, इन परमप्रभुमी इन पा डा लडाइ पा ग्राचा कली मेको आ थुं खकटा नु मटीब सेला बाक्त्। मिनु मोदेंशो दुम्त। प्रस्थान ४:२१

31 मिनु परमप्रभु यावेमी आं कली 'गो सीहोन नु आ रागी इन कली जिम्मा गेचा गोत्रता। मेको आ रागी लडाइ पा आंम के के सेलीन' देंत। यहोसु १०:१२; येरमीया २४:८; रोमी १:२४; रोमी ४:२५; ८:३२ 32 मिनु सीहोन नु आ मुर नेल्ल गोपुकी नु लडाइ पथ याहास माइक्तीकेमी जाक्तेक्म। 33 मिनु परमप्रभु यावे, इं परमप्रभुमी मेको कली साइक्च, दे इं कली जिम्मा गेप्तु।

मिनु गोपुकीमी मेको कली, मेको आ तौ नु मेको आ मुर नेल्ल आन कली साइवक्तक।<sup>34</sup> मेना गो मेको आन सहर नेल्ल आंइ के सेल्लतक। आन मुर नेल्ल कली साइवक्तक। वोंइश मुर, मीश मुर नु आल नेल्ल साइवक्तक। का कली यो मप्रोंइथु, नेल्ल आन कली साइवक्तक।<sup>35</sup> गो आंइ ग्राशो सहर डा मारेइ मारेइ आम के सेल्ला, बी ब्यफ, क्यारश भेडा यो आंइ कली वोंइसावक।<sup>36</sup> अरनोन खोल्ला डा दिंम बाक्ब आरोएर सहर रे गिलाद सम्म आंइ ग्राने मचाप्पा डा सहर कान मबाक्म। परमप्रभु यावे, इं परमप्रभुमी मेको नेल्ल आंइ कली ग्राचा गेप्टु। *यहोसु १३:९; २सामुएल २४:५*<sup>37</sup> यब्बोक खोल्ला आ नेक्था बाक्ब अम्मोनी आन रागी, पहाड डा सहरपुकी नु परमप्रभु यावे, इं परमप्रभुमी इं कली मलचा देंशो रागी ला मलक।

### पिप ओग कली ग्राशो

3 मिनु नोले गो बाशान ग्येथ लाइतक। मिनु बाशान डा पिप ओग नु आ मुर नेल्ले गोपुकी नु लडाइ पथ एद्रेडम जाक्तेक्म। *गन्ती २१:३३-३५*<sup>2</sup> मिनु परमप्रभु यावेमी आं कली 'मेको आन कली तशा महिनो। मारदे हना गो मेको नु आ मुर नेल्ल आन कली इन गुडमी गेता। मेको आ रागी नु आ मुरपुकी इन के दुस्त। मिनु गे हेश्बोनम बाक्शो एमोरी आन पिप सीहोन कली खोंदेशो पा मेको कली यो पने' देंत।

<sup>3</sup> मिनु परमप्रभु यावे, इं परमप्रभुमी बाशान डा पिप ओग कली यो नु आ मुर नेल्ल आन कली इं गुडमी गेप्टु। मेकेर यो का कली यो मप्रोंइथु, नेल्ल आन कली साइवक्तक।<sup>4</sup> मेना गो मेको आ सहर नेल्ल ग्रातक। का यो मली। बाशान डा ओग आ राज्यम अरगोब माइश्शो रागी नेल्ल पा ६० ओटा सहर ग्रातक।<sup>5</sup> मेको सहर नेल्ले लाइश्शो गारो हिरशो बाक्तेक्म। मेको गारो डा ठेयब लाप्चो आग्लो पाइश्शो बाक्तेक्म। मेको प्रोंइशा, अरु गारो महिरशो शुश गाउं यो ग्रातक।<sup>6</sup> मिनु हेश्बोन डा पिप सीहोन कली खोंदेशो पा मेको सहर डा वोंइश मुर, मीश मुर नु आल नेल्ल साइवक्तक।<sup>7</sup> मिनु बी ब्यफ, क्यारश भेडा नु सहर डा मारेइ मारेइ आंइ कली वोंइसावक। *ब्यवस्था २०:१३-१८*<sup>8</sup> मोपा गो यर्दन ओथ हांबु डा एमोरी पिप निक्शी आस रागी ग्रातक। अरनोन खोल्ला रे हेरमोन डांडा सम्म डा रागी ग्रातक। *ब्यवस्था ४:४८; १इतिहास ५:२३; भजन संग्रह २९:६*<sup>9</sup> सीदोनीपुकीमी हेरमोन डांडा कली सिरीयोन नु एमोरीपुकीमी सेनीर देंनीम।<sup>10</sup> गोपुकी दिंम डा सहर नेल्ले, गिलाद रागी नेल्ल, बाशान, साल्का नु एद्रेड सम्म, बाशानम बाक्शो ओग आ राज्य नेल्ल ग्रातक।<sup>11</sup> मिनु बाशान डा पिप ओग चहिं मेको लाइश्शो मुर, रेफाइम आन दातेमी नेल्ल क्येडा नोले साइक्वा पुंइसावक। मिनु मेको आ फलाम के खाट मुल सम्म अम्मोनी आन सहर रब्बाहम बाक्ब। मेको खाट ९ कुबीत लाइश्शो नु ४ कुबीत ब्रेम्शो बाक्ब। *कुबीत का आधा मिटर कि हात का खोंदेशो बाक्ब।*

### यर्दन आ पूर्ब डा रागी योक्शो

*गन्ती ३२:-*

12 मिनु मेना तेको तेको रागी आंइ के सेल्लतक देंशा हना, अरनोन खोल्ला आ नेक्था दिंम बाक्शो आरोएर रे गिलाद पहाड आधा नु मेकेर डा सहरपुकी सम्म गो रूबेन आ थर नु गाद आ थर डा मुर आन कली गेतामी।<sup>13</sup> गिलाद डा लीशो, ओग आ राज्य, बाशान रागी नेल्ल, मनस्से आ उडक्थ थर डा मुर आन कली गेतामी। बाशान नु अरगोब रागी नेल्ल रेफाइम माइश्शो, लाइश्शो मुर आन रागी देंनीम।<sup>14</sup> मनस्से आ युड याडरमी अरगोब डा रागी नेल्ल, गेशुरी नु माकाथी आन सांद सम्म लाइक्वु। मेको बाशान कली आ नें हव्थोथ-याइर वोइक्वु। मेको मुल सम्म बाक्ब।<sup>15</sup> मिनु गो माकीर कली गिलाद गेता।<sup>16</sup> मिनु गो रूबेन आ थर नु गाद आ थर डा मुर आन कली मार गेतामी देंशा हना, गिलाद रे अरनोन खोल्ला आ दाते सम्म नु आ नेक्था डा दिंम यब्बोक खोल्ला सम्म गेतामी। मेको अम्मोनी आन सांद बाक्ब।<sup>17</sup> मिनु मेको अराबाह दिंम, यर्दन नु आ नेक्था डा किन्नेरेथ रे अराबाह समुन्द्र, मेको हिक्सी समुन्द्र यो देंनीम, सम्म नां दाप्तीके डा पिस्सा

डांडा रूबेन आ थर नु गाद आ थर डा मुर आन कली गेतामी। *यहोसु ११:२; यहोसु १९:३५; मर्कूस ६:५३*

### रूबेन नु गाद आस कली लोत्र पशो

18 मेना गो इन कली 'परमप्रभु यावे, इन परमप्रभुमी एको रागी इन के दुम्चा कली गेशो बाक्ब। मो हना यो इन दाते डा लडाइ पाइब वोंइश मुरपुकी इन या पिम्सीशा, इन लोकब इस्त्राएली आन डॉइती यर्दन खोला शोक्वा माल्नीनी।<sup>19</sup> मिनु इन मीश, इन आलपुकी नु इन बी ब्यफ, क्यारश भेडा गो इन कली गेशो सहरम ला बाक्वा ताइनीम। इन के बी ब्यफ, क्यारश भेडा शुश बाक्नीम, दे तुइक्नुड।<sup>20</sup> परमप्रभु यावेमी इन कली खोंदेशो पा इन लोकब आन कली मनाइक्पदा सम्म मोदेशो दुम्चा माल्ब। मिनु परमप्रभु यावे, इन परमप्रभुमी यर्दन आइक्वी हांबु मेको आन कली गेशो रागी आम के मसेल्मे सम्म गोपुकीमी मो पचा माल्नीनी। मिनु नोले गोम इन कली गेशो रागी लेशशा, जाक्ने चाप्नीनी' दे माइक्मी" देंत।

### मोसाम यहोसु कली लोत्र पशो

21 मिनु मेना गो यहोसु कली "परमप्रभु यावे, इन परमप्रभुमी एको पिप निक्शी आस कली मार मार पवा, गे मेको नेल्ल ताप्तीवी। मुल गे आइक्वी हांबु शोक्सेनु, परमप्रभु यावेमी मेकेर डा राज्य नेल्ल आन कली यो मोदेशोन पाइब। *गन्ती २७:१८-२२*<sup>22</sup> मेको आन क्येडा महिनीन। मारदे हना परमप्रभु यावे, इन परमप्रभुमी इन पा डा लडाइ पाइब" दे माइक्ता। *ब्यवस्था १:२९-३०*

### मोसामी परमप्रभु नु लोत्र पशो

23 मिनु मेना गो परमप्रभु यावे कली<sup>24</sup> "परमप्रभु, परमप्रभु यावे, गे इन गेय पाइब कली इन ठेयब पतीके नु सक्ति कोंइचा गोइतीनी। मिनु स्वर्ग नु रागीम बाक्ब तेको प्रभु इन खोंदेशो पा ठेयब पतीके नु सक्ति पाइश्शो गेय पने चाप्पा डा? <sup>25</sup> मेको यर्दन आइक्वी हांबु डा रिम्शो रागी, ठेयब पहाड नु लेबानोन तडल, दे आं कली यर्दन खोला आइक्वी हांबु शोक्वा गेयीनी" दे पुंइता।

<sup>26</sup> तन्न इन पतीके परमप्रभु यावे गो नु गाइश्शो बाक्त। मिनु मेकोमी आं पुंइशो मनेन। मिनु परमप्रभु यावेमी आं कली "मुल रे एको आ पबर्म लोत्र मपावो। *गन्ती २०:१२*<sup>27</sup> गे पिस्सा डांडा डोइश्शा, पच्छिम, उत्तर दक्खिन नु पूर्ब गे कोवडो। मारदे हना गे यर्दन आइक्वी हांबु शोक्वा मताइनेवे।<sup>28</sup> मिनु गे यहोसु कली अरेशा, लोत्र पा ठेयब थुं पाइश्शो सेलो। मारदे हना मेकोमी मुर आन डॉइती शोक्शा, इ तशो रागी मेको आन के दुम्चा कली योत्रब" दे परमप्रभुम आं कली देंत। *ब्यवस्था ३१:३,७;*<sup>29</sup> मिनु गोपुकी बेथ-पेओर आ डॉइती डा दिंम बाक्तक।

### लेंशा परमप्रभु आ लोत्र शेंशो

4 मिनु मोसामी "मिनु गे इस्त्राएली नेल्ले, गो इन कली परमप्रभु यावे आ फुल्लुम मुशा ब्रेक्शो लोत्र नु आ निसाफ पतीक लोत्र शेंनुड। इन नोफा दाइक्तीन। मिनु आ शेंशो पने। मेको पाइतीनी हना, गे ब्रोंइचा ताइनीनी। मिनु गे परमप्रभु यावे, इन किकी पिपी आन परमप्रभुमी इन कली गेशो रागी ओव्रचा नु इन के सेल्ला ताइनीनी।<sup>2</sup> मिनु गो इन कली परमप्रभु यावे, इन परमप्रभु आ लोत्र शेंशा 'परमप्रभु आ शेंशो पचा माल्ब' दे अरेनुड। गोपुकीमी आं शेंशो लोत्र कली का यो मतेम्दीन। का यो मशोलीने। *ब्यवस्था १३:१; हितोपदेस ३०:६; प्रकाश २२:१८-१९*<sup>3</sup> मिनु परमप्रभु यावेमी बाल-पेओर मूर्ति आ नोले खोइक्ब आन कली मार पवा, गे आंमा ताइतीनी। मिनु परमप्रभु यावे, इन परमप्रभुमी बाल-पेओर आ नोले खोइक्ब वोंइश मुर नेल्ल साइक्वु। *गन्ती २५:३-९*<sup>4</sup> गे परमप्रभु यावे, इन परमप्रभु कली आ नोले खोइक्बपुकी चहिं नेल्ल ब्रोंइशो बाक्नीनी।

<sup>5</sup> मिनु परमप्रभु यावे, आं परमप्रभुमी आं कली अरेशो खोंदेशो पा, गो इन कली आ फुल्लुम मुशा ब्रेक्शो लोत्र नु आ निसाफ पतीक लोत्र शेंतान्नी। मारदे शेंतान्नी देंशा हना, गे जाक्शा इन के सेल्ला चिक्शो रागीमी मेको

नेल्ल पचा, दे शेंतान्नी।<sup>6</sup> मोपतीके गेपुकीमी एको लोव्र होस पा, टिने। मेकोमी इन कली तुडक्ब नु रुख मुर सेल्ब। मिनु जात जात डा मुरपुकी मेको फुल्लुम मुशा ब्रेक्शो लोव्र नेल्ल नेंशा, मेकोपुकीमी 'मेको ठेयब जात डा मुर थमा पा तुडक्ब नु रुख मुर बाक्नीम' देंनीम। *यसैया २:३*<sup>7</sup> मिनु परमप्रभु यावे इं परमप्रभुमी आंइ नेक्था बाक्शो नु आंइ पुंइशो लोव्र नेंब खोदेंशो पा तेको अर्को ठेयब जात डा देवी देवताम मोदेंशो पाइनीमी? *२सामुएल ७:२३*<sup>8</sup> मुलाक्त गो इन कली परमप्रभु यावे आ अरेशो लोव्र नेल्ले नेंपाइक्नुड। मिनु तेको ठेयब जात डा मुर इं खोदेंशो रिंशो पचा कली फुल्लुम मुशा ब्रेक्शो लोव्र नु निसाफ पतीक लोव्र नेंचा ताइनीमी। *येरमीया ८:८*

#### परमप्रभु आ अरेशो लोव्र

<sup>9</sup> इन आंम तशो इन थुंम वोइश्शा, मप्रेंथु, होस पा बाक्कीन। गे ब्रोंइनी सम्म इन थुंम वोतीन। इन आल नु चच युइ आन आन कली शेंदीन। *भजन संग्रह १०३:२*

<sup>10</sup> मिनु गेपुकी काबु परमप्रभु यावे, इन परमप्रभु आ डोंइती होरेब डांडा तार राप्शो बाक्तीनी, मेको मिम्तीन। मिनु परमप्रभु यावेमी आं कली मुर आन कली आं डोंइती पुक्मी। गो मेको आन कली आं लोव्र नेंपाइक्नुडमी। मिनु मेकोपुकी रागीम मबेक्मा सम्म आं कली मान पा हिंचा शेंसामल। मिनु मेकोपुकीमी एको लोव्र आन तमी तौ आन कली शेंचा माल्नीम" देंत। *प्रस्थान १९:१७; ब्यवस्था ६:७*<sup>11</sup> मिनु गे आ नेक्था जाक्शा, डांडा आ पुंम राप्तीनी। मेको डांडाम सरीड सम्म मी ब्रत। मिनु छिडछिड, ठेयब गोस्स नु नाक्दो खोदेंशो बाक्त।<sup>12</sup> मिनु परमप्रभु यावेमी मी आ दाते रे गेपुकी नु लोव्र पाप्तु। गे मेको आ लोव्र नेंतीनी, तन्न मारेइ मतनी। *ब्यवस्था ५:४, २४*<sup>13</sup> मिनु मेकोमी गे नु कबल पाप्तु। आ अरेशो १० ओटा लोव्र गे टिशा पने, दे गेप्तु। मिनु मेकोमी मेको लोव्र फुल्लु निक्शी तार मुशा गेप्तु। *प्रस्थान ३१:१८*<sup>14</sup> मिनु मेना परमप्रभु यावेमी आं कली "मेको आन कली आं फुल्लुम मुशा ब्रेक्शो लोव्र नु निसाफ पतीक लोव्र शेंदो। नोले आन गाक्शो आंम के सेल्शो रागीमी मेको लोव्र टिशा पचा, दे मेको लोव्र शेंदो" दे माइक्ती।

<sup>15</sup> मिनु परमप्रभु यावेमी इन कली होरेब डांडाम मी रे लोव्र पवानु, गे मारेइ मतनी।<sup>16</sup> मिनु गे इन कली मूर्ति सेल्शा, खतम मसेल्सीन। गे होस पा बाक्कीन। तेकोइ वोंइश मुर, मीश मुर, *प्रस्थान २०:४*<sup>17</sup> रागी डा बी ब्यफ, क्यारश भेडा, जन्तु सरीडम बेरब चिक्ब, <sup>18</sup> खपीम गाक्ब, ब्वाक्कुम बाक्ब डांड के मूर्ति काइ मसेलीन।<sup>19</sup> मिनु गे सरीड इर कोव्रशा, परमप्रभु यावे, इन परमप्रभुमी जात जात डा मुर नेल्ल आन कली गेशो नां, तास्ला, सौरुल नेल्ल तशा, मेको आन डोंइती सेउ पा पूजा मपने। होस पा बाक्कीन। *ब्यवस्था १७:३; रोमी १:२३*<sup>20</sup> परमप्रभु यावेमी इन कली आंम मुर सेल्चा, दे फलम चोतीके खोदेंशो इजीप्त रागी रे गुंइताक्व। मोदेंशो पा मुलाक्त बाक्ब, दे तुइक्नीनी। *१राजा ८:५१; यसैया ४८:१०; येरमीया ११:४; प्रस्थान १९:५-६; यसैया १९:२५*

<sup>21</sup> मिनु परमप्रभु यावे इन पतीके, आं पर्वम गाइक्ताक्व। मेकोमी आं कली "गे यर्दन खोला मशोक्थु, इस्राएली आन कली गेशो रिंशो रागी लचा मताइनेवे" दे कसम जाप्तु। *ब्यवस्था ३:२६*<sup>22</sup> मिनु गो यर्दन खोला मशोक्थु, मुल बाक्शो रागीमी बेक्वा माल्नुड। तन्न गेपुकी यर्दन शोक्शा, मेको रिंशो रागी इन के सेल्नीनी।<sup>23</sup> मिनु परमप्रभु यावे, इन परमप्रभुमी गे नु पशो कबल मप्रेक्थु, होस पा बाक्कीन। गे मप्रेंथु परमप्रभु यावे, इन परमप्रभुमी देंशो टिशा मारेइ के मूर्ति मसेलीन।<sup>24</sup> मारेइ हना परमप्रभु यावे, इन परमप्रभु ठेयब मी खोदेंशो नु रुश पाइब परमप्रभु बाक्ब। *ब्यवस्था ९:३; प्रस्थान २४:१७; यसैया १०:१७; हिब्रू १२:२९; प्रस्थान २०:५*

#### दूली पाइब परमप्रभु गे लेश्शो

<sup>25</sup> मिनु गेपुकी मेको रागीमी शुश बर्स बाक्शा, तमी तौ, चच युइ थिशा बाक्नीनी। तन्न परमप्रभु यावे, इन परमप्रभुमी मदाक्वा डा पा मारेइ के मूर्ति सेल्शा, परमप्रभु यावे कली गाइक्पाइक्तीनी हना,<sup>26</sup> गो मुलाक्ती सरीड नु रागी कली इन दूली पशो आ पर्वम सांक्छी वोइक्नुड। गे यर्दन आइक्वी हांबु डा इन के सेल्चा चिक्शो रागीम रीब पा खतम दुम्नीनी। गे शुश नाक्त

मेकेर बाक्वा मताइनीनी। गे क्याम्चा पुंइसीनीनी। *ब्यवस्था ३०:१९; ब्यवस्था ३१:२८; ब्यवस्था ३२:१; २७* मिनु परमप्रभु यावेमी इन कली जात जात डा मुर आन दातेमी ब्रपाइक्ब। मिनु परमप्रभु यावेमी इन कली कोंइशो रागी रागी आन दातेमी इक्का ला लीनीनी।<sup>28</sup> मिनु गेपुकीमी मेकेर डा मुर आन सेल्शो शी के, फुल्लु के मताइब, मनेंब, मजाइब नु मनाम्ब मूर्ति आन कली पूजा पाइनीनी। *ब्यवस्था २८:३६; भजन संग्रह ११५:४-७*

<sup>29</sup> तन्न गे मेकेर बाक्शा, परमप्रभु यावे, इन परमप्रभु कली माल्नीनी। मिनु गे थमा पा इन थुं नेल्ले माल्तीनी हना, गे मेको कली थिन्तीनी। *भजन संग्रह २७:८; येरमीया २९:१३-१४*<sup>30</sup> आं देंशो लोव्र मोदेंशो पा दुश्शा, श्येत जनीनु, गे नोले डा नाक्तीम परमप्रभु यावे, इन परमप्रभु गे लेत्नीनी। आं देंशो लोव्र टीनीनी। *ब्यवस्था ३०:२*<sup>31</sup> मारेइ हना परमप्रभु यावे, इन परमप्रभु, शिशी पाइब परमप्रभु बाक्ब। इन किकी पिपी नु कसम जशा पशो कबल मप्रेंब। मेकोमी इन कली मप्रोंइथु, खतम मसेल्ब।

<sup>32</sup> मिनु गे इन क्येडा डोंइती डा नाक्त मिम्तीन। परमप्रभुमी मुर नु रागी सेल्शो रे मुल सम्म ओदेंशो ठेयब गेय पशो आ पर्वम लोव्र नेंनी? तनी?<sup>33</sup> अरु सुइ मुरुम गे इन खोदेंशो पा परमप्रभुमी मी रे लोव्र पशो नेंनेमे?। मिनु गे नेंशा यो ब्रोंइशो बाक्नीनी। *प्रस्थान २०:१, १९*<sup>34</sup> मिनु तेको देवी देवतामी इन कली खोदेंशो पा शुश रागी आन दाते रे आंम मुर सेल्चा कली योव्रशो बाक्बा? मुर आन कली नाक्शा, चिनु कोंइशा, छक लाक्वा डा गेय पा, मेको आन पर्वम लडाइ पा, शुश हिंचा डा सक्तीमी, परमप्रभु यावे, इन परमप्रभुमी इन कली इजीप्त रागी रे गुंइशो गे ताइतीनी। *ब्यवस्था ७:१९; ब्यवस्था २९:२*<sup>35</sup> गे मारेइ मेको ताइतीनी देंशा हना, परमप्रभु यावे, का ला परमप्रभु बाक्ब। मेको क्येडा लाक्शा अर्को परमप्रभु मबाक्ब, दे तुइक्पाइक्वा कली इन कली कोंइताक्व।<sup>36</sup> मिनु मेकोमी सरीड रे इन कली शेंचा, दे आ सेंदा नेंपाइक्तु। मिनु खपीम इन कली आ ठेयब मी कोंइताक्व। गे मी आ दाते रे आ लोव्र पशो नेंतीनी। *प्रस्थान २०:१, १८, २०*<sup>37</sup> मिनु इन किकी पिपी आन कली दाक्तीके, आन चच युइ आन कली योव्रशा, मेकोमी आंमान आ ठेयब सक्तीमी इन कली इजीप्त रे गुंइताक्व। *प्रस्थान ३३:१४*<sup>38</sup> इन कली रागी गेचा, दे इन डोंइती इन क्येडा सक्ति पाइश्शो नु शुश मुर आन कली आन रागी रागी रे गुंइताक्व। मिनु गे रागी इन के सेल्चा कली ठीक दुश्शो बाक्नीनी। मोदेंशो मुलाक्ती बाक्ब, दे तुइक्नीनी।<sup>39</sup> मिनु गे मुलाक्ती परमप्रभु यावे, का ला सरीड नु रागी डा परमप्रभु बाक्ब। मेको डा लाक्शा अर्को सुइ परमप्रभु मबाक्ब। एको लोव्र गे मुलाक्ती थमा पा तुइक्तीन। मिनु इन थुंम लील।<sup>40</sup> मुलाक्त गो इन कली माइश्शो परमप्रभु यावे आ फुल्लुम मुशा ब्रेक्शो लोव्र नु आ शेंशो टिने। मो पाइतीनी हना, इन आल नु चच आन कली रिंशो दुम्ब। मिनु परमप्रभु यावे, इन परमप्रभुमी इन कली गेना हना यो बाक्वा कली गेशो रागीम गे शुश नाक्ती बाक्वा ताइनीनी।

#### मुर साइश्शा प्रोक्तीक सहर

<sup>41</sup> मिनु मोसामी यर्दन खोला नां दाप्तीक गे सहर सां योव्रतु। *ब्यवस्था १९:२-१३; गन्ती ३५:६-२९*<sup>42</sup> डोंइती मगाइक्मुशो, मतुइक्थु मुर का कली साइक्ब मुर मेकेर प्रोक्शा लने चाप्ब। मोदेंशो मुर मेको सहरम प्रोक्शा, ब्रोंइचा ताइब।<sup>43</sup> मोसामी रूबेन आ थर डा मुर आन कली गोरशो रागी डा दिंमम बेसेर सहर योव्रतु। गाद आ थर डा मुर आन कली गिलाद डा रामोथ सहर योव्रतु। मनस्से आ थर डा मुर आन कली बाशान डा गोलान सहर योव्रतु।

#### परमप्रभु आ अरेशो मिम्पाइश्शो

<sup>44</sup> मोसामी इस्राएली आन कली परमप्रभु यावे आ अरेशो लोव्र शेंताक्व।<sup>45</sup> मिनु मेको परमप्रभु यावे आ आ देंशो, आ फुल्लुम मुशा ब्रेक्शो लोव्र नु आ निसाफ पतीक लोव्र बाक्नीम। मोसामी मेको नेल्ल इस्राएली आन कली इजीप्त रे गुंइची ना शेंताक्व।<sup>46</sup> मिनु मेना मेकोपुकी यर्दन ओथ हांबु, बेथ-पेओर आ डोंइती बाक्शो बेंसीम बाक्तेक्म। मेको डोंइती हेश्बोनम बाक्शो सीहोन, एमोरी आन पिप आ रागी बाक्त। मेको रागी मोसा नु इस्राएलीपुकीमी इजीप्त रे गाक्मा नोले लडाइ पा ग्राशो बाक्तेक्म। *गन्ती*

२१:२४<sup>47</sup> मेको रागी आंम के सेल्शा, बाशान डा पिप ओग आ रागी यो आंम के सेल्शो बाक्तेक्म। मेको निक्शी एमीरी आन पिप बाक्ताक्स। मेको रागी यर्दन ओंथ हांबु नां दाप्तीके गे बाक्त।<sup>48</sup> मेको रागी अरनोन खोल्ला आ नेक्था बाक्ब आरोएर सहर रे सिरीयोन माइश्शो, हेरमोन पहाड, ब्यवस्था ३:८-९<sup>49</sup> मिनु यर्दन आ ओंथ हांबु नां दाप्तीके गे अराबाह नेल्ल पिस्गा डांडा नु आ दिंमम अराबाह समुन्द्र माइश्शो, हिक्सी समुन्द्र सम्म इस्राएलीपुकीमी आंम रागी सेल्ने थुम्शो बाक्तेक्म।

१० ओटा अरेशो लोव  
प्रस्थान २०:-

5 मिनु मोसामी इस्राएली नेल्ल आन कली ब्रेश्शा, मेको आन कली “इस्राएली नेनीन। परमप्रभु यावे आ फुल्लुम मुशा ब्रेक्शो लोव नु आ निसाफ पतीक लोव नेनीन। मुलाक्ती गो मेको इन कली शेंनुड। गे मेको लोव शेंसीशा, होस पने।<sup>2</sup> मिनु परमप्रभु यावे, इं परमप्रभुमी होरेब डांडाम गोपुकी नु कबल का पाप्तु। प्रस्थान १९:५<sup>3</sup> परमप्रभु यावेमी इं किकी पिपी नु एको कबल मपथु, मुलाक्त एकेर बाक्शो गोपुकी नु पशो बाक्त। ब्यवस्था २९:१४<sup>4</sup> परमप्रभु यावेमी गो आंइ नेक्था डांडाम बाक्शो, मी आ दाते रे लोव पाप्तु। ब्यवस्था ५:२४<sup>5</sup> मारदे हना गे मी तशा हिंतीनी, डांडा मडौंइसीनी। गो परमप्रभु यावे आ लोव इन कली शेंचा, दे परमप्रभु यावे नु इन दातेम, राप्शो बाक्ती” देत।

6 मिनु परमप्रभुमी इन कली “वाइलीम वाइल दुम्शा बाक्शो इजीप्त रे गुंइशा एक चाक्ब, गो परमप्रभु यावे, इन परमप्रभु नड।

7 आं क्येडा लाक्शा सुइ देवी देवता आन कली ठेयब सेल्शा ममानेचा। ब्यवस्था ११:१६,२८<sup>8</sup> सरीडमी, रागीमी, रागी आ आगामी ब्वाक्कुम बाक्ब मारेइ जन्तु के गोपुकीमी आंम कली मूर्ति मसेल्सीन। ब्यवस्था २७:१५<sup>9</sup> मेको आन डौंइती मबपीन। मेको आन कली पूजा मपने। मारदे हना गो परमप्रभु यावे, इन परमप्रभु रुश पाइब परमप्रभु नड। आ कली मटीब आम आफ बाक्ताक्स हना, मेको आ आल, चच, युइ नु युइ आन युइ सम्म सजाइ ताइनीम। ब्यवस्था ४:२४<sup>10</sup> मिनु सुम आं कली दाक्बा नु आं शेंशो लोव टीबा, मेको आन चच युइ आन हजार हजार पाला सम्म गेना हना यो दाक्नुडमी।

11 गे परमप्रभु यावे, इन परमप्रभु आ नें मो मथिने। मारदे हना सुमी परमप्रभु यावे आ नें मोशा थिक्ब, मेकोम पाप पाइब” देत।

12 परमप्रभु यावे, इन परमप्रभुमी अरेशो खोदेंशो पा नाइक्तीक नाक्ती परमप्रभु आ नाक्ती बाक्ब, दे नाइक्सीन।<sup>13</sup> ६ नाक्त गे इन गेय पने।

14 मिनु मेको आ नोले डा ७ नाक्ती चहिं परमप्रभु यावे, इन परमप्रभु आ नाइक्तीक नाक्त बाक्ब। मेको नाक्ती मारेइ गेय मपने। गे इन तमी तौ, वाइलीम वाइल, ब्यफ, गधा, क्यारश भेडा नेल्ल नु इन सहरम बाक्शो अर्को रागी डा मुर नेल्ल आन कली इन खोदेंशो पा गेय मपपतीन।<sup>15</sup> मिनु गोपुकी इजीप्तमी वाइल दुम्तीके मप्रेंदीन। परमप्रभु यावे, इन परमप्रभुमी शुश सक्ति पाइश्शो नु आ ठेयब बोल पतीकेमी इन कली गुंइशा, एक चाक्तु। मोपतीके परमप्रभु यावे, इन परमप्रभुमी इन कली नाइक्तीक नाक्ती नाइक्वा माल्ब, दे अरेशो बाक्ब। ब्यवस्था १५:१५; ब्यवस्था १६:१२; ब्यवस्था २४:१६,२२

16 परमप्रभु यावे, इन परमप्रभुमी अरेशो खोदेंशो पा इन आंम आफ कली मान पने। मो पाइतीनी हना, परमप्रभु यावे, इन परमप्रभुमी इन कली गेशो रागीम रोइ मपथु, शुश नाक्त ब्रौंइशा बाक्नीनी।

17 मुर मसाइक्चा।

18 आंम मीश क्येडा अरु नु मइप्चा।

19 खुइ मपचा।

20 आंम नेक्था डा मुर आन पर्बम जोल पा सांकछी मबाक्चा।

21 आंम नेक्था डा मुर आ खिं, आ मीश, आ रू, आ वाइलीम वाइल, आ बी ब्यफ, गधा मेको के मार बाक्त हना यो, मेको तशा मवाल्चा। मीका २:२

परमप्रभु आ लोव मिम्पाइश्शो

22 परमप्रभु यावेमी डांडाम नेल्ल इन कली एको लोव नेंपाइक्तु। मेकोमी मी, गोस्स नु हिंचा डा छिडछिड खोदेंशो पा आ दाते रे ठेयब सेंदामी इन कली लोव पाप्तु। मिनु मेकोमी मारेइ मतेमद। मिनु नोले मेकोमी मेको अरेशो लोव फुल्लु निक्शीम ब्रेक्शा, गेती। प्रस्थान ३१:१८

23 मिनु गोपुकीमी डांडाम मी ब्रशो तशा, छिडछिड रे सेंदा नेंनीनु, गे इन थर थर डा ठेयब मुरपुकी नु खाल्पापुकी आं नेक्था जाक्तेक्म।<sup>24</sup> मिनु गोपुकीमी “परमप्रभु यावे, इं परमप्रभुमी इं कली आ ठेयब पतीके नु आ छेडछेड कोइताक्व। मिनु गोपुकीमी मेको आ सेंदा मी आ दाते रे नेंतक। मुलाक्त मार ताइतक देशा हना, परमप्रभुमी मुर नु लोव पाइब। मो हना यो मुर मबेक्म, दे ताइतक। ब्यवस्था ४:१२-१३,३३<sup>25</sup> मुल गोपुकी एको ठेयब मीमी मारदे बेक्चा? गोपुकी मुल यो परमप्रभु यावे, इं परमप्रभु आ सेंदा नेंना नेंन बाक्तय हना, बेक्नय।<sup>26</sup> मिनु सु मुरुम इं खोदेंशो पा ब्रौंइशा बाक्ब परमप्रभु आ सेंदा मी आ दाते रे पा नेंशा यो ब्रौंइशो बाक्बा? <sup>27</sup> गे आ नेक्था लने। मिनु परमप्रभु यावे, इं परमप्रभु आ देंशो लोव नेंशा, आंइ कली नेल्ल शेंदीन। मिनु मेको नेंशा पाइनीकी” देंतीनी।

28 मिनु परमप्रभु यावेमी इन पशो लोव नेंतु। मिनु आं कली “मुरपुकीम इ कली देंशो लोव नेंता। आन देंशो नेल्ल रिम्शो बाक्ब।<sup>29</sup> आं कली मान पा हिंतेक्म हना, आं शेंशो गेना हना यो टिम्तेक्म हना, मेको नु आन आल आन कली गेना हना यो रिम्शो दुम्ब। ब्यवस्था २९:३<sup>30</sup> मेकेर लावो। मिनु मेको आन कली ‘इन ताम्बुम लेत्तीन’ दे माइक्मी।<sup>31</sup> तन्न गे आं नेक्था बाक्को। मिनु गेमी आं शेंशो नेल्ल, आं फुल्लुम मुशा ब्रेक्शो लोव नु आं निसाफ पतीक लोव इ कली देंनन। मिनु मेकोपुकीमी मेको आन कली गेशो रागीम मेको पचा माल्नीम” दे परमप्रभुम देत।

32 मोपतीके इन परमप्रभु यावेमी इन कली शेंशो होस पा तिने। गोपुकी ग्युरा पेरा गे मलथु, आ लां खोतीन। ब्यवस्था ४:२; ब्यवस्था २८:१४; यहोसु १:७; हितोपदेस ४:२७<sup>33</sup> परमप्रभु यावे, इन परमप्रभुमी इन कली कोइशो लां ठीक पा गाक्कीन। मो पाइतीनी हना, गे ब्रौंइनीनी, इन कली रिम्शो दुम्ब नु इन के सेल्चा चिक्शो रागीम शुश नाक्ती ब्रौंइनीनी।

नेल्ल क्येडा ठेयब अरेशो लोव

6 मिनु मोसामी “परमप्रभु यावेमी इन कली माइश्शो फुल्लुम मुशा ब्रेक्शो लोव नु निसाफ पतीक लोव बाक्ब। मिनु गो इन कली शेंचा माल्नुड, दे आं कली माइक्ती। गोपुकी मुल इन लशा, इन के सेल्चा चिक्शो रागीम बाक्नीनु, मेको पचा माल्नीनी।<sup>2</sup> गोपुकी मबेक्नी सम्म परमप्रभु यावे, इन परमप्रभु कली मान पा हिंचा माल्नीनी। गो इन कली माइश्शो परमप्रभु आ फुल्लुम मुशा ब्रेक्शो लोव नु आ शेंशो नेल्ले थुंम वोइक्वा माल्नीनी। गे, इन तौ नु इन चच युइ नेल्लेमी होस पा टिचा माल्नीनी। मो पाइतीनी हना, शुश नाक्त ब्रौंइनीनी।<sup>3</sup> मोपतीके इस्राएलीपुकी, इन नोफा दाइश्शा, एको पचा कली होस पा बाक्कीन। गे शुश सोशो बोशो दुम्शा इन कली रिम्शो दुम्स। डौंइती परमप्रभु यावे, इन किकी पिपी आन परमप्रभुमी मेको आन कली मोदेंशो पा लोव पाप्तु। मेको दूध नु खुदो शुश बाक्शो रागी इन के दुम्ब। लूका ११:२८

4 इस्राएलीपुकी, नोफा दाइश्शा, नेनीन। परमप्रभु यावे, का ला इं परमप्रभु बाक्ब। मर्कूस १२:२९; १कोरिन्थी ८:४-६<sup>5</sup> मिनु गोपुकी परमप्रभु यावे, इन परमप्रभु कली इन थुं नेल्लेमी, इन सोक्त नेल्लेमी नु इन बोल नेल्लेमी दाक्वा माल्नीनी। ब्यवस्था १०:१२; २राजा २२:२५; मत्ती २२:३७<sup>6</sup> मिनु गो इन कली मुलाक्ती अरेशो लोव इन थुंम वोइक्वा माल्नीनी। ब्यवस्था ११:१८-२०<sup>7</sup> मिनु गोपुकीम मेको लोव इन आल आन कली शेंचा माल्नीनी। मिनु खिंम बाक्नीनु, लांम गाक्नीनु, इप्शा बाक्नीनु, बोक्नीनु, मेको अरेशो लोव आन पर्बम लोव पने। उत्पत्ती १८:१९<sup>8</sup> मिनु मेको मिम्चा कली इन गुइम फ्रेंशा वोतीन। मेको इन कुप्फीम फ्रेंचा माल्नीनी। प्रस्थान १३:९; मत्ती २३:५<sup>9</sup> मिनु मेको इन खिं डा थाम नु इन लाप्चोपुकीम ब्रेक्शा वोतीन।

10 मिनु डोंइती परमप्रभु यावे, इन परमप्रभुमी इन किकी पिप अब्राहाम, इसहाक नु याकूब आन कली 'मेको रागी इन चच युइ आन कली गेनुड' दे कसम जाप्टु। मुल मेकेर गे इन मसेल्शो ठेयब रिम्शो सहर, 11 इन मसेल्शो रिम्शो थोत्रकीम ब्रीशो खिं, इन मदोशो इनारपुकी, इन मखुम्शो अडगुर रू नु तेल रवा रू ताइनीनी। मिनु गे शुश जचा तूचा तशा, ब्यवस्था ८:३०  
12 परमप्रभु यावे कली मप्रैचा, दे होस पा बाक्कीन। मेकोमी इन कली इन वाइलीम वाइल दुम्शो इजीप्ट रे गुंडताक्व।

13 गेपुकी परमप्रभु यावे, इन परमप्रभु कली मान पा हिनीन। मेको कली गेय पने। मिनु मेको आ नैम ला कसम जने। ब्यवस्था १०:२०; मत्ती ४:१०  
14 गे इन एर ओंथ डा रागीम बाक्शो जात जात डा मुर आन देवी देवता आन नोले मखोतीन। 15 मारदे हना परमप्रभु यावे, इन परमप्रभु, रुश पाइब परमप्रभु इन दातेमी बाक्ब। मो पाइतीनी हना, परमप्रभु यावे, इन परमप्रभु इन पबर्म शुश गाइक्ब। मिनु मेकोमी इन कली रागी रे क्याम्ब। प्रस्थान २०:५

16 गेपुकीमी मास्साहमी परमप्रभु यावे, इन परमप्रभु कली नाक्शो खोदेंशो पा, मेको कली मनाक्तीन। मत्ती ४:७; प्रस्थान १७:२-७ 17 गेपुकीमी परमप्रभु यावे, इन परमप्रभुमी इन कली माइश्शो आ शेंशो लोत्र, आ देंशो नेल्ल नु आ फुल्लुम मुशा ब्रेक्शो लोत्र शुश होस पा पने। 18 मिनु परमप्रभु यावे आ डोंइती तेको ठीक नु रिम्शो बाक्बा, मेको पने। मोपा इन कली रिम्शो दुम्ब। मिनु परमप्रभु यावेमी इन किकी पिप नु कसम जशो, रिम्शो रागी इन के सेलीन। 19 मेको नोले परमप्रभु यावेमी देंशो खोदेंशो पा इन जोरी सत्रु नेल्ल आन कली इन डोंइती रे खेरब। प्रस्थान २३:२७-२८

#### परमप्रभु आ ठेयब पतीके

20 मिनु नोले इन तौपुकीमी इन कली 'परमप्रभु यावे, इं परमप्रभुमी आ देंशो लोत्र, आ फुल्लुम मुशा ब्रेक्शो लोत्र नु आ निसाफ पतीक लोत्र आन अर्थ मार में?' दे हिल्लो पाम्तेक्म हना, प्रस्थान १३:१४ 21 गे मेको आन कली 'गो इजीप्ट डा पिप फाराओ आ वाइलीम वाइल बाक्तय। मिनु शुश सक्ति पाइश्शो परमप्रभु यावेमी मेक रे गुंडताक्व। भजन संग्रह ४४:२ 22 मिनु परमप्रभु यावेम गोपुकीम तचा डा पा इजीप्टी डा पिप फाराओ नु आ खिं डा मुर नेल्ल कली खतम सेल्चा, दे ठेयब नु हिंचा डा चिन्ड नु छक लाक्वा डा गेय पाप्टु। 23 मिनु आंइ किकी पिपी आन कली गेनुड देंशा कसम जशो रागीम इं कली चाक्वा कली मेकेर रे गुंडताक्व। 24 मिनु परमप्रभु यावेमी एको फुल्लुम मुशा ब्रेक्शो लोत्र नेल्ल पचा माल्ब, दे माइश्शो बाक्त। गोपुकी परमप्रभु यावे, इं परमप्रभु कली मान पा हिंतय हना, आंइ कली नेल्ल नाक्त रिम्शो दुम्ब। मिनु आंइ कली ब्रोंइचा गेब। मुलाक्त मोदेंशो बाक्ब। 25 मिनु गोपुकी मेको आ शेंशो नेल्ल परमप्रभु यावे, इं परमप्रभु आ डोंइती पाइतय हना, मेकोमी रिम्शो दुम्ब' दे इन तौ आन कली देंचा माल्नीनी" देंत। ब्यवस्था ९:५-६; रोमी २:१३, १९-२४

#### कनानी नु मखाल्सीचा

7 मिनु मोसामी "परमप्रभु यावे, इन परमप्रभुमी इन कली गेशो रागीम चाक्दीत्वी ना, इन ओत्रचा क्येडा डोंइती हिती, गिरगाशी, एमोरी, कनानी, परिजी, हिंवी नु यबुसी आन कली खेरब। मेको नेल्ल इन क्येडा बोल्यो नु शुश मुर पाइश्शो ७ रागी डा मुर बाक्नीम। ब्यवस्था ३१:३ 2 मिनु परमप्रभु यावे, इन परमप्रभुमी मेको आन कली इन गुइमी जिम्मा गेप्टु हना, गे मेको नेल्ल आन कली साइक्वा माल्नीनी। मेकोपुकी नु कबल मपने। मिनु शिशी यो मपने। 3 मेकोपुकी नु ग्युंबे मपचा। इन तमी मेको आन तौ कली ग्युंबे पा मगेन। इन तौ कली आन तमी मचाक्वा। प्रस्थान ३४:१५-१६  
4 मारदे हना मेकोपुकीमी इन तौ आन कली आंम देवी देवता गे कीनीम। परमप्रभु यावे कली गेय मपथु, देवी देवता आन नोले खोइक्पाइक्नीम। मो दुम्मेनु, परमप्रभु यावे शुश गाइश्शा, इन कली रीब पा साइक्ब। 5 मेको आन कली मार पचा माल्नीनी देंशा हना, मेको आन चढेतीक प्रेत्या माल्नीनी। मेको आन लाइश्शो मूर्ति जिक्वा माल्नीनी। मेको आन अशेराह देवी आ मूर्ति खोइक्वा माल्नीनी। मेको आन शी मुशा सेल्शो मूर्तिपुकी मीम हुम्चा माल्नीनी। ब्यवस्था १२:२-३ 6 मारदे हना गे परमप्रभु यावे, इन परमप्रभु आ

आंम मुर बाक्नीनी। परमप्रभु यावेमी नेल्ल जात जात डा मुर आन दाते रे इन कली आंम मुर सेल्चा, दे योवतु। प्रस्थान १९:५-६

7 मिनु परमप्रभु यावेमी जात जात आन क्येडा गे शुश मुर बाक्तीके इन कली दाक्शा योत्रशो ममाइ। थमा पा, गे जात जात डा मुर आन क्येडा आइक्च जात बाक्नीनी। ब्यवस्था १०:१५ 8 तन्न परमप्रभु यावेमी इन कली दाक्ब। मिनु मेकोमी 'इन किकी पिपी नु पशो कबल खाप्नुड' देंत। मोपतीके परमप्रभु यावेमी शुश सक्ति पाइश्शोमी इन कली वाइलीम वाइल सेल्शो इजीप्ट डा पिप फाराओ रे प्रोंइशा, गुंडताक्व। होसे ११:१

9 परमप्रभु यावे, इन परमप्रभुमी आ कबल काइ मप्रोंइब आ देंशो पाइब परमप्रभु बाक्ब। मिनु परमप्रभु कली दाक्ब नु आ शेंशो टीब आन कली हजार पाला सम्म आ पशो कबल खाप्ब नु आ शिशी कोंइना कोंइन बाक्ब। प्रस्थान २०:६ 10 मेकोमी आ कली मदाक्ब आन कली चहिं क्येक्क लेशशा, साइक्ब। आ कली मदाक्ब आन कली शुश मफाल्थु, मेको आन कली शोल्मो पा साइक्ब। नहुम १:२ 11 मोपतीके गो मुलाक्त इन कली माइश्शो आ शेंशो, आ फुल्लुम मुशा ब्रेक्शो लोत्र नु आ निसाफ पतीके लोत्र होस पा पने। 12 मिनु गेपुकीमी एको ठीक पतीके लोत्र होस पा नेशा टिशा, पाइतीनी हना, इन परमप्रभुमी इन किकी पिपी नु कसम जशा, पशो कबल खाप्शा इन कली मप्रोंइब। प्रस्थान २३:२२-३१ 13 मेकोमी इन कली दाक्शा, आसीक गेशा, शुश सेल्ब। मेकोमी इन आल आन कली आसीक गेब। इन किकी पिपी आन कली कसम जशा गेशो रागीमी इन रू डा फल फुल, इन अन्न, इन अडगुर शांबु नु तेल, इन बी ब्यफ आन बाछा नु इन क्यारश भेडा आन चाइक्ब नेल्ल आन कली आसीक गेब। होसे २:७-१२ 14 गे नेल्ल जात जात डा मुर आन क्येडा आसीक राइब दुम्नीनी। इन दातेमी सुइ वोंइश मुर नु मीश मुर आल मथीब मबाक्नीम। इन बी ब्यफ, क्यारश भेडा थारा मदुम्नीम। 15 मिनु परमप्रभु यावेमी रोइ नेल्ल इन क्येडा डोन वोइक्ब। गे इन तशो इजीप्ट डा हिंचा डा रोइ इन कली मपपाइक्ब। तन्न इन कली मदाक्ब आन कली मेको रोइ कोप्ब। प्रस्थान ९:१-१२ 16 मिनु गे परमप्रभु यावे, इन परमप्रभुमी इन कली जिम्मा गेशो जात जात डा मुर नेल्ल कली रीब पा साइक्नीनी। मिनु गे मेको आन कली शिशी मपने। मेको आन देवी देवता आन कली सेउ मपने। मारदे हना मो पाइतीनी हना, गे खतम दुम्नीनी। प्रस्थान २३:३३; प्रस्थान ३४:१२; यहोसु २३:१३

17 मिनु गे इन थुंमी 'एको रागी रागी डा मुर आंइ क्येडा शुश बाक्नीम। गो मेको आन कली दोपा गुंइशा, खेरने चाप्नीकी डा?' मदेनीन। गन्ती १३:३१; गन्ती १४:१-४ 18 मेको आन क्येडा महिनीन। परमप्रभु यावे, इन परमप्रभुमी फाराओ नु इजीप्ट रागी डा मुर नेल्ल कली मार मार पवा, मेको मिम्तीन। 19 गेपुकीमी परमप्रभु यावे, इन परमप्रभुमी आ ठेयब नाक्तीक, आ पशो चिन्ड नु छक लाक्वा डा गेय, आ शुश सक्ति पाइश्शो नु ठेयब बोल पतीकेमी इन कली गुंडताक्व। गे आंमा तशो बाक्नीनी। मिनु परमप्रभु यावे, इन परमप्रभुमी इन हिंशो जात जात डा मुर नेल्ल आन कली इजीप्टी आन कली खोदेंशो पाइब। ब्यवस्था ४:३४; ब्यवस्था २९:२ 20 मिनु परमप्रभु यावे, इन परमप्रभुमी मेको आन के लीशो नु इन कली तशा हिंशा खूइश्शा बाक्शो मुरपुकी यो मुर साइक्ब रोइ सोइश्शा साइक्ब। 21 गेपुकी चहिं मेको आन क्येडा महिनीन। मारदे हना परमप्रभु यावे, इन परमप्रभु इन दातेमी बाक्ब। मेको ठेयब नु मान पा हिंचा डा परमप्रभु बाक्ब। 22 मिनु परमप्रभु यावे, इन परमप्रभुमी मेको रागी रागी डा मुर आन कली इन डोंइती रे का का पा गुंडब। गेपुकीमी मेकेर डा मुर आन कली कालेम साइक्वा मताइनीनी। मो पाइतीनी हना, इन एर ओंथ डा ब्वाकी डा जन्तु शुश दुम्नीम। 23 मिनु परमप्रभु यावे, इन परमप्रभुमी मेको जात जात डा मुर आन कली शुश वाम ग्याम सेल्शा, का का पा साइक्वा सम्म, इन कली जिम्मा गेब। 24 मिनु मेकोमी मेको आन पिप यो इन कली जिम्मा गेब। मिनु गे मेको आन नें रागी रे क्याम्नीनी। इन डोंइती सुइ मबाक्नीम। 25 गेपुकीमी मेको आन शी मुशा सेल्शो मूर्तिपुकी मीम हुम्चा माल्नीनी। मूर्तिम बाक्शो सुन चांदी बाक्त हना, वाल्शा आंम कली मवोंइसीन। मारदे हना मोदेंशो पाइतीनी हना, इन कली मरिम्शो दुम्ब। मेको परमप्रभु यावे, इन परमप्रभु कली ग्रान्रा बाक्ब। 26 मिनु गेपुकीमी मारेइ ग्रान्रा दिचा डा थोत्रक इन खिंम मचाक्कीन। मो पाइतीनी हना गेपुकी

यो मेको आन खोदेंशो पा सराप राइब दुम्नीनी। गेपुकीमी मेको नेल्ल कली प्रांरा दिशो दुस्तीके, तिल्चा माल्नीनी” दैत। यहोसु ७:११-१२

परमप्रभु आ अरेशो नेंशा टिचा

8 मिनु मोसामी “गो मुलाक्त इन कली परमप्रभु आ शेंशो नेल्ल माइक्तन्नी। गेपुकीमी मेको होस पा पचा माल्नीनी। मो पाइतीनी हना, गेपुकी ब्रॉइचा ताइनीनी, सोशा बोशा शुश दुम्नीनी नु परमप्रभु यावेमी इन किकी पिपी आन कली ‘मेको गेनुड’ दे कसम जशो रागी ओव्रशा इन के सेल्शा बाक्चा ताइनीनी।<sup>2</sup> मिनु परमप्रभु यावे, इन परमप्रभुमी इन कली ४० बर्स सम्म गोरशो रागीमी बाक्पाइक्तु। इन कली मारदे मोदेंशो पाप्तु देंशा हना, इन कली ब्रेम्पाइक्चा, इन थुं नाक्चा नु गे इन नेल्ल थुंमी आ शेंशो पाइनीनी देय मपाइनीनी, दे तुइक्चा कली इन कली मेको ४० बर्स सम्म मेकेर गाक्पाइक्तु। ब्यवस्था १३:४; उत्पत्ती २२:१; प्रस्थान १६:४; प्रस्थान २०:२०; न्यायाधीस २:२२<sup>3</sup> मिनु मेकोमी इन कली ब्रेम्पाइक्चा, दे शोव्रलु बेक्पाइक्तु। मिनु मेकोमी इन किकी पिपी कली इन मतुइशो मन्ना जपाइक्तु। मारदे इन कली मन्ना जपाइक्तु देंशा हना, मुरुम जचा थोव्रक जशा ला मब्रॉइनीम, तन्न परमप्रभु यावे आ लोव्र रे ब्रॉइनीम, दे तुइक्पाइक्चा कली मन्ना जपाइक्तु। प्रस्थान १६:१३-१५; मत्ती ४:४<sup>4</sup> मेको ४० बर्स सम्म इन फेक्शो वा मजे। इन खोइल महोम्म। ब्यवस्था २९:४<sup>5</sup> मिनु मुरपुकीमी दोदेंशो पा आन तौ आन कली शेंचा, दे सजाइ गेनीमी, मोदेंशो पा परमप्रभु यावे, इन परमप्रभुमी इन कली शेंचा, दे सजाइ गेप्तु। मेको तुइक्चा माल्नीनी। यसैया २८:२६; येरमीया ३०:११; येरमीया ४६:२८<sup>6</sup> मिनु गेपुकीमी परमप्रभु यावे, इन परमप्रभु आ शेंशो पना पन बाक्कीन। परमप्रभु आ लां गाक्शा, मेको कली मान पा हिनीन।<sup>7</sup> परमप्रभु यावे, इन परमप्रभुमी इन कली रिम्शो रागी लाइक्ब। मेकेर खोला, दिंम नु पहाड रे बुक्शो ब्वाक्कु नु दोम्ली बाक्नीम।<sup>8</sup> मेको रागीम चेरब, क्योव्रज, अडगुर बोट, फोव्रशी रवा, दारीम बोट, तेल रवा नु खुदो बाक्ब।<sup>9</sup> मेको रागीम गे काइ श्येत मजथु, मारेइमी खांचो मद्दुम्नीनी। मेको रागी डा फुल्लुमी फलाम बाक्ब। मेको आ पहाड रे गे तांबा गुंइनीनी।<sup>10</sup> मिनु गेपुकीमी मरूनी सम्म जशा तूशा, इन कली गेशो रिम्शो रागी आ पर्वम परमप्रभु यावे, इन परमप्रभु कली ठेयब सेल्चा माल्नीनी।

<sup>11</sup> मिनु गे परमप्रभु यावे, इन परमप्रभु कली मप्रेंदीन। मिनु मुलाक्त गो इन कली देंशो आ शेंशो, आ निसाप पतीके लोव्र नु आ फुल्लुम मुशा ब्रेक्शो लोव्र यो मप्रेंचा, दे होस पा बाक्कीन।<sup>12</sup> मिनु गेपुकी जशा तूशा, रूशा, रिम्शो खिं सेल्शा बाक्नीनी,<sup>13</sup> मिनु इन बी ब्यफ नु क्यारश भेडा शुश दुम्शा, इन सुन चांदी नु इन मारेइ मारेइ शुश दुम्मेनु,<sup>14</sup> गेपुकी ठेयब लेश्शा, वाइलीम वाइल दुम्तीक इजीप्ट रे गुंडब परमप्रभु यावे, इन परमप्रभु कली मप्रेंचा, दे होस पा बाक्कीन।<sup>15</sup> मेकोमी इन कली ठेयब हिंचा डा गोरशो रागीम बाक्पाइक्तु। मेकेर बीस पाइश्शो बुस्स नु बिच्छी बाक्तेक्म। मेकोमी इन कली सोव्रशो रागीम हिरताक्व। मिनु इन पर्वम ठेयब फुल्लु रे ब्वाक्कु बुक्पाइक्तु। गन्ती २१:६; प्रस्थान १७:६<sup>16</sup> मिनु मेकोमी इन कली गोरशो रागीम मन्ना जचा गेप्तु। मेको इन किकी पिपी आन मतुइशो जचा थोव्रक बाक्त। मारदे मोदेंशो पाप्तु देंशा हना, मेको नेल्ल इन कली ब्रेम्पाइक्चा, नाक्चा नु नोले रिम्शो पचा कली पाप्तु।<sup>17</sup> मिनु गे नोले इन थुंमी ‘गो आंम आंइ सक्तिम एको शोंप चेम्तक’ दे मदेनीन।<sup>18</sup> तन्न परमप्रभु यावे, इन परमप्रभुमी आंइ कली शोंप चेम्तीक सक्ति गेप्तु, दे मिम्तीन। मेकोमी इन किकी पिपी नु कसम जशा पशो कबल गेना हना यो लीपाइक्ब। मोदेंशो पा मुलाक्त बाक्ब, दे तुइक्नीनी। ब्यवस्था ४:३१<sup>19</sup> मिनु गे परमप्रभु यावे, इन परमप्रभु कली प्रेंशा, देवी देवता आन नोले खोइक्तीनी, मेको आन कली पूजा पाइतीनी नु मेको आन डॉइती बाप्तीनी हना, गो इन कली ‘गेपुकी थमा पा साइक्चा पुंडसीनीनी’ दे मुलाक्ती लोव्र का पाइनुड।<sup>20</sup> मिनु परमप्रभु यावेमी इन डॉइती रागी रागी डा मुर आन कली खतम सेल्शो खोदेंशो पा, गेपुकीमी आ लोव्र मनेथु, मटीतीनी हना, परमप्रभु यावे, इन परमप्रभुमी इन कली यो खतम सेल्ब” दैत।

परमप्रभुमी लडाइ पशो

9 मिनु मोसामी “गे इसाएलीपुकी, नोफा दाइश्शा, नेनीन! मुल गे मेको रागी ओव्रचा कली यर्दन खोला शोक्नीनी। इन क्येडा ठेयब नु सक्ति पाइश्शो रागी रागी, सरीड थिचा चिक्शो गारो हिरशो सहरपुकी इन के सेल्नीनी। ब्यवस्था १:२८<sup>2</sup> मेकेर अनाक आ चच युड बाक्नीमी। मेकोपुकी ठेयब नु लाइश्शो मुर बाक्नीम, दे तुइक्नीनी। गे डॉइती ‘अनाकीम डा मुर आन डॉइती सु राप्ने चाप्बा डा’ दे लोव्र पशो नेंतीनी।<sup>3</sup> परमप्रभु यावे, इन परमप्रभु इन डॉइडॉइती शोक्शा लाइब, दे तुइक्चा माल्नीनी। मेको नेल्ल गु दाक्ब मी खोदेंशो बाक्ब। मिनु मेको आन कली मी खोदेंशो पा दाक्ब। मेकोमी इन कली जिम्मा गेब। मिनु परमप्रभु यावेमी देंशो खोदेंशो पा, गे मेको आन कली खेरशा रीब पा साइक्नीनी। ब्यवस्था ४२४

<sup>4</sup> मिनु परमप्रभु यावे, इन परमप्रभुमी मेको आन कली इन डॉइती रे खेरानु, गे इन थुंमी ‘परमप्रभु यावेमी आंइ ठीक पतीके एको रागीम चाक्तु’ दे ममिम्तीन। मेको रागी रागी डा मुर आन मरिम्शो पतीके परमप्रभु यावेमी मेको आन कली इन डॉइती रे खेरब। ब्यवस्था ८:१७; उत्पत्ती १५:१६<sup>5</sup> गेपुकी इन ठीक पतीक नु इन ठीक थुं दुम्तीके मेको आन रागी इन के सेल्चा तशो मननी। तन्न मेको रागी रागी डा मुर आन मरिम्शो पतीके परमप्रभु यावे, इन परमप्रभुमी मेको आन कली खेरब। मिनु इन किकी पिप अब्राहाम, इसहाक नु याकूब नु जशो कसम खाप्चा कली मो पाइब। ब्यवस्था ६:२५

<sup>6</sup> परमप्रभु यावे, इन परमप्रभुमी इन ठीक पतीक आ पर्वम इन कली मेको रिम्शो रागी इन के सेल्चा कली मगेवो। मारदे हना गे शुश मटीब मुर बाक्नीनी। प्रस्थान ३२:९<sup>7</sup> मिनु गेपुकी गोरशो रागीम परमप्रभु यावे, इन परमप्रभु कली दोपा गाइक्पाइक्नी, मेको मप्रेंदीन। इजीप्ट रागी रे गे एक जाक्नी सम्म गे परमप्रभु यावे आ देंशो मटिशो बाक्तीनी।

<sup>8</sup> मिनु होरेब डांडामी यो गे परमप्रभु यावे कली गाइक्पाइक्तीनी। मिनु परमप्रभु यावेमी इन कली क्याम्चा डा पा शुश गाइक्ताक्व। प्रस्थान ३२:१-२४<sup>9</sup> मिनु गो परमप्रभु यावेमी गेपुकी नु पशो कबल डा लोव्र ब्रेक्शो फुल्लु ब्रथ डांडा डॉइसाक्थी। मिनु गो ४० नाक्त नु ४० नाक्दो मेकेर बाक्ती। शोब्ले मजड, ब्वाक्कु यो मतूड। प्रस्थान ३४:२८<sup>10</sup> मिनु परमप्रभु यावेमी, आंम गुडम ब्रेक्शो फुल्लु निक्शी गेती। मिनु मेको फुल्लु तार मार ब्रेक्शो बाक्त देंशा हना, परमप्रभु यावेमी डांडामी इन कली पशो लोव्र नेल्ल ब्रेक्शो बाक्त। परमप्रभुमी मेको गुम्ची नाक्त डांडाम ब्रशो मी आ दाते रे इन कली लोव्र पशो बाक्त।<sup>11</sup> मिनु मेको ४० नाक्ती नाक्दो थुम्ची ना परमप्रभु यावेमी मेको कबल डा लोव्र ब्रेक्शो फुल्लु निक्शी आं कली गेती।<sup>12</sup> मिनु परमप्रभु यावेमी आं कली ‘बोक्को, रीब पा एकर रे ब्रुपो। मारदे हना इ इजीप्ट रे गुंडशो मुरपुकीमी आं देंशो लां रीब पा प्रॉइतेक्म। आंम आन कली खतम सेल्तेक्म। गोम मेको आन कली मपचा देंशो पाम्तेक्म नु आंम कली सुन के मूर्ति सेल्तेक्म’ दैत।<sup>13</sup> मिनु परमप्रभु यावेमी आं कली ‘गो एको मुर आन कली कोव्रता। मिनु एकोपुकी काइ मटीब बाक्नीम।<sup>14</sup> मुल आं कली पुंड्या प्रॉइयी। मिनु गो मेको आन कली खतम सेल्नुड। मिनु मेको आन नें रागी रे क्याम्नुड। मिनु गे रे पा मेको आन क्येडा ठेयब नु सक्ति पाइश्शो जात का सेल्नुड’ दैत।

<sup>15</sup> मिनु गो डांडा रे ब्रुप्ती। मेको डांडाम मी ब्रस डा ब्रस बाक्त। मिनु गो मेको कबल डा लोव्र ब्रेक्शो फुल्लु निक्शी कुरता।<sup>16</sup> मिनु गेपुकीमी परमप्रभु यावे, इन परमप्रभु कली पाप पा, आंम कली बाछा आ मूर्ति सेल्सीशो बाक्तीनी। परमप्रभु यावेमी इन कली अरेशो लां रीब पा प्रॉइशा दूली लां खोइक्नी बाक्त।<sup>17</sup> मिनु गो मेको फुल्लु निम्फा ताइश्शा, इन डॉइती प्रोल्ता।

<sup>18</sup> मिनु डॉइती खोदेंशो पा, गो परमप्रभु यावे आ डॉइती बाप्शा, ४० नाक्ती ४० नाक्दो शोब्ले मजड, ब्वाक्कु यो मतूड। इन पशो पाप आ पर्वम मोदेंशो पा बाक्ती। गे परमप्रभु यावे कली काइ मरिम्शो पा गाइक्पाइक्तीनी।<sup>19</sup> मारदे हना गो परमप्रभु यावेमी इन पर्वम गाइश्शा, चुरशा पशो तशा, साप्पा हिंती। मेकोमी इन कली थमा पा साइक्च, दे मिम्शो बाक्त। मिनु

परमप्रभु यावेमी मेना यो आं पुंड्रशो लोत्र नैतु। हिब्रू १२:२१<sup>20</sup> परमप्रभु यावे हारून आ पर्वम यो शुश गाइश्शा 'मेको कली साइक्नुड' दे मिश्शो बाक्त। गो हारून आ पर्वमी यो पुंड्रता।<sup>21</sup> मिनु इन पशो पाप, मेको बाछा लाइश्शा, मीम हुम्ताकड। मेको कली तुप्शा, फस सेल्ला। मिनु मेको फस पहाड रे यिंशो खोलाम ताइक्ताकड।

<sup>22</sup> मिनु गेपुकीमी तबेरा, मास्साह नु किब्रोथ-हत्तावामी यो परमप्रभु यावे कली गाइक्पाइक्तीनी। गन्ती ११:३; प्रस्थान १७:७; गन्ती ११:३४<sup>23</sup> मिनु परमप्रभु यावेमी गे कादेश-बारनेआ रे लशा, इन कली 'मेकेर लने। मिनु इन कली गेशो रागी इन के सेलीन' दे सोइक्ताकव। मिनु गेपुकीमी परमप्रभु यावे, इन परमप्रभु आ अरेशो मबिल्थु, गन गन पा मेको कली थमा मसुइक्नी। मेको आ लोत्र यो मटिनी। गन्ती १३:२,३१; गन्ती १४:१-४<sup>24</sup> गो इन कली तुइक्तु रेन गे परमप्रभु यावे आ लोत्र मटिथु गन गन पाइतीनी।

मोसामी इस्राएली आन पर्वम पुंड्रशो

<sup>25</sup> मोपतीके परमप्रभु यावे आ डोंइती गो ४० नाक्ती ४० नाक्दो सम्म बाप्शा बाक्ती। मारदे हना परमप्रभु यावेमी 'गे इन कली क्याम्नुड' देशो बाक्त। ब्यवस्था ९:१८<sup>26</sup> मिनु गो परमप्रभु यावे कली 'परमप्रभु, इन मुर आन कली मक्याम्दीन। गे मेको आन कली प्रोंइशा इन शुश सक्ति पाइश्शोमी इजीप्त रागी रे गुंड्रताक्नी।<sup>27</sup> इन वाइल अब्राहाम, इसहाक नु याकूब आन कली मिस्तीन। एको मुर आन खकटा थुं, इन अरेशो मटितीके नु आन मरिश्शो पतीके मकोवडीन।<sup>28</sup> गे मेको आन कली क्याम्ताक्नी हना, आंइ कली गुंड्रशो रागी डा मुरपुकीमी "परमप्रभु यावेमी मेको आन कली देशो रागी चावदीन्ने मचाप्तीके, मेको आन कली मदाक्तीके गोरशो रागीम साइक्वा कली एक रे गुंड्रशा लाइक्तु" देंनीम। गन्ती १४:१६<sup>29</sup> मेको इन मुर बाक्नीम। मिनु गे शुश सक्ति नु ठेयब बोलमी गुंड्रशा चाक्तीनी" दे परमप्रभु कली पुंड्रशा, लोत्र पाता" देंत।

लेंशा फुल्लुम मुशा ब्रेक्शो लोत्र

**10** मेना परमप्रभु यावेमी आं कली "डोंइती डा खोदेशो पा फुल्लु निक्शी चेतो। मिनु आं कली गुम्थ, डांडा डोंइसो। मिनु शी के सन्दोस का यो सेलो। प्रस्थान ३४:१; प्रस्थान २५:१०<sup>2</sup> मिनु गो डोंइती डा इ प्रोल्थो फुल्लुम ब्रेक्शो लोत्र खोदेशो पा, नक फुल्लुम लेंशा ब्रेक्नुड। मिनु गे मेको कली सन्दोसम कुर पा वोतो" माइक्ती। प्रस्थान ३२:१९<sup>3</sup> मिनु गो बोल्यो शी के सन्दोस का सेल्ला। मिनु डोंइती डा खोदेशो पा फुल्लु निक्शी चेतता। मिनु मेको चेशो फुल्लु निक्शी कुरशा, डांडा डोंइसाक्पी।<sup>4</sup> मिनु परमप्रभु यावेमी डोंइती डांडाम लोत्र पशो खोदेशो पा मेको १० ओटा लोत्र लेंशा ब्रेक्ताकव। मेको लोत्र, गेपुकीम डांडा डा मी आ दाते रे नेंशो ननी। मिनु परमप्रभु यावेमी मेको ब्रेक्स पाइश्शो चेशो फुल्लु निक्शी गेती।<sup>5</sup> मिनु मेको कुरशा गो डांडा रे ब्रुप्ती। मिनु गो मेको चेशो फुल्लु निक्शी कली आं सेल्थो सन्दोस आगाम कुर पा वोइक्ता। मिनु परमप्रभु यावेमी आं कली अरेशो खोदेशो पा मेको फुल्लु सन्दोस आगाम बाक्नीस। प्रस्थान २५:२१

हारून बेक्शो

<sup>6</sup> मिनु इस्राएलीपुकी बेयरोथ-बेने-याकान रे गाक्शा, मोसेराह माइक्तीके जाक्तेक्म। मेकेर हारून बेक्त। मिनु मेको कली मेकेर थिम्तेक्म। मिनु आ तौ एलाजरमी आ पा डा चढ्दीक गेय पचा गोप्तु। गन्ती ३३:३१-३३; गन्ती २०:२८; गन्ती ३३:३७-३९<sup>7</sup> मिनु इस्राएलीपुकी मेकेर रे गाक्शा, गुदगोदा गे लाम्तेक्म। मिनु गुदगोदा रे गाक्शा, शुश ब्वाक्कु बाक्तीके योत्बाथाह जाक्तेक्म।

<sup>8</sup> मेना परमप्रभु यावेमी लेवी आ थर डा मुर आन कली योव्रतीमी। मार कली योव्रतीमी देशा हना, परमप्रभु यावे आ कबल डा लोत्र कुरपाइश्शो सन्दोस कुरचा, परमप्रभु यावे कली गेय पचा कली आ डोंइती राप्चा नु आ नेंम मुर आन कली आसीक गेचा कली योव्रतीमी। मुल सम्म मोदेशो बाक्ब। ब्यवस्था १८:५; गन्ती ६:२३-२७<sup>9</sup> मोपतीके लेवीपुकीम आन लोकब

खोदेशो पा रागी डा रू मतामे। परमप्रभु यावे मेको आन शॉप बाक्ब। परमप्रभु यावे, इन परमप्रभुमी दोदेशो देंमे, मोदेशो दुस्त। गन्ती १८:२०

परमप्रभुमी मोसा आ पुंड्रशो गेशो

<sup>10</sup> मिनु गो डोंइती डा खोदेशो पा ४० नाक्ती ४० नाक्दो डांडाम बाप्शा बाक्ती। मेना यो परमप्रभु यावेमी आं लोत्र नैतु। मिनु इन कली मसद।<sup>11</sup> मिनु परमप्रभु यावेमी आं कली "मुल बोक्शा लावो। मुर आन डोंइती गाक्वा कली लावो। मिनु गो मेको आन किकी पिपी आन कली कसम जशा गेशो रागी मेकोपुकी ओव्रशा, आंम के सेल्था माल्नीम" दे माइक्ती।

परमप्रभु आ दाक्शो

<sup>12</sup> मिनु गे इस्राएलीपुकी, परमप्रभु यावे, इन परमप्रभुमी इन कली मार पशो दाक्ब देशा हना, गेपुकी परमप्रभु यावे, इन परमप्रभु कली मान पा हिंचा माल्नीनी। गेपुकी मेको आ लां गाक्शा, मेको कली दाक्वा नु इन थुं नु सोक्त नेल्लेमी परमप्रभु यावे, इन परमप्रभु कली गेय पचा माल्नीनी। मीका ६:८<sup>13</sup> दोपा दाक्वा नु गेय पचा देशा हना, गो मुलाक्ती इन कली देशो परमप्रभु यावे आ शेंशो नु आ फुल्लुम मुशा ब्रेक्शो लोत्र पचा माल्नीनी। मेको इन कली थम रिश्शो दुम्ब।<sup>14</sup> मिनु नेनीन, स्वर्ग नु सरीड नु रागी नु मेकेर बाक्ब मारेइ मारेइ नेल्ल परमप्रभु यावे, इन परमप्रभु केन बाक्ब।<sup>15</sup> मो हना यो परमप्रभु यावेमी इन किकी पिपी आन कली तशा, दाक्ताकव। मिनु मेको आन चच युइ, इन कली जात जात डा मुर नेल्ल आन दाते रे योव्रतु। मोदेशो पा मुलाक्ती बाक्ब, दे तुइक्नीनी। ब्यवस्था ७६<sup>16</sup> मोपतीके इन थुं कली खोइक्तीक चिनु खोतीन। मिनु मटीब मटुमीन।<sup>17</sup> मारदे हना परमप्रभु यावे, इन परमप्रभु देवी देवता आन परमप्रभु बाक्ब। मेको प्रभु आन प्रभु बाक्ब। मेको नेल्ल क्येडा ठेयब, सक्ति पाइश्शो नु हिंचा डा परमप्रभु बाक्ब। मेकोमी सुइ आन कुल मकोव्रब। मेकोमी घूस मताक्ब।<sup>18</sup> मेकोमी रोम रोइक्च नु वोंइश बेक्शो मीश मुर आन कली ठीक निसाफ पाइब। मेकोमी अर्को रागी डा मुर आन कली दाक्ब। मिनु मेको आन कली जचा फेक्वा गेब।<sup>19</sup> मिनु गेपुकी यो अर्को रागी डा मुर आन कली दाक्तीन। मारदे हना गे यो इजीप्तमी अर्को रागी डा मुर बाक्तीनी। प्रस्थान २२:२०-२३<sup>20</sup> गेपुकीमी परमप्रभु यावे, इन परमप्रभु कली मान पा हिंचा माल्नीनी। मेको आ गेय पचा माल्नीनी। मेको आ नोले खोइश्शा, आ नेंमी कसम जचा माल्नीनी।<sup>21</sup> मेकोन इन कली ठेयब सेल्लिके बाक्ब। मिनु इन परमप्रभु दुश्शा, इन पर्वम हिंचा डा ठेयब गेय पाइब मेकोन बाक्ब। गे मेको नेल्ल आंमा तशो बाक्नीनी।<sup>22</sup> इन किकी पिपी इजीप्त रागी लमानु, ७० जना मुर ला लशो बाक्तेक्म। मिनु मुल परमप्रभु यावे, इन परमप्रभुमी इन कली सरीड डा सोरुल खोदेशो पा शुश सेल्लु। उत्पत्ती ४६:२७; ब्यवस्था १:१०

परमप्रभु यावे आ ठेयब गेय

**11** मिनु मोसामी "गे परमप्रभु यावे, इन परमप्रभु कली दाक्वा माल्नीनी। गे नाक्त किंत किंत मेको आ ब्रेक्शा अरेशो लोत्र, आ फुल्लुम मुशा ब्रेक्शो लोत्र, आ निसाफ पतीक लोत्र नु आ शेंशो नेल्ल टिने।<sup>2</sup> मिनु परमप्रभु यावे, इन परमप्रभुमी इन आल आन डोंइती मारेइ यो छक लाक्वा डा गेय नु सजाइ मकोइद। तन्न मेकोमी दोपा आ ठेयब पतीकेमी शुश सक्ति पाइश्शो नु ठेयब बोल पतीकेमी इन कली इजीप्त रागी रे गुंड्रशो, गे नेल्लेम तशा तुइश्शा मिम्बा माल्नीनी। ब्यवस्था ४:३६<sup>3</sup> मिनु इजीप्त रागी नु आ पिप फाराओ नु मेको आ मुर नेल्ल आन कली कोंइशो चिन्ड नु आ पशो गे नेल्ले तशो तुइश्शो बाक्नीनी।<sup>4</sup> मिनु मेकोमी इजीप्त डा लडाइ पाइक्ब, शारा नु बग्गी आन कली पशो नेल्ल तुइक्नीनी। इन कली खेदा पामेनु, मेकोमी मेको आन कली लल समुद्र डा ब्वाक्कुम साइक्वा कली खूम्तु, मेको यो तशो बाक्नीनी। मुल सम्म मेको लडाइ पाइब आन हुल खतम दुश्शो बाक्नीम। प्रस्थान १४:२५, २७<sup>5</sup> मिनु एको रागी मजाक्शो सम्म गोरशो रागीम मेकोमी इन कली मार मार पवा, मेको गे तुइश्शो बाक्नीनी।<sup>6</sup> मिनु मेकोमी रूबेन आ चच निक्शी, एलीआब आ तौ दाथान नु अबीराम आस कली पशो तुइक्नीनी। दोपा खपीम आ शोत्र पाक्शा इस्राएली आन दातेमी

मेको आस कली दाक्का। मिनु आस खिं डा मुर नु आस ताम्बु नु मेको आस मारेड मारेड दाक्को गेपुकीम तुइश्शो बाक्नीनी। *गन्ती १६:२५-३४* 7 गेपुकी परमप्रभु यावेमी पशो ठेयब गेय नेल्ले तशो बाक्नीनी।

8 मोपतीके गो मुलाक्ती इन कली दैशो परमप्रभु यावे आ शेंशो नेल्ल टिशा पने। मेको पाइतीनी हना, गेपुकी बोल्यो दुम्नीनी। मिनु खोला शोक्शा इन के सेल्चा चिक्को रागीम ओव्रशा, थमा पा इन के सेल्ने चाप्नीनी। 9 मोपा गे परमप्रभु यावेमी इन किकी पिपी नु आन चच युइ, इन कली, गेशो रागीम शुश ब्रॉइशा बाक्का ताइनीनी। मेको रागीम शुश दूध नु खुदो बाक्क। *प्रस्थान ३:१७* 10 मारदे हना मेको इन के सेल्चा चिक्को रागी, इन गूशा पिशो इजीप्त रागी खोदेंशो ममाइ, मेकेर वांचेर शोक्शा, गिग खाइ रू कली ब्वाक्कु कुर पचा माल्ताक्नी। 11 मेको गे शोक्का, इन के सेल्चा चिक्को रागी, डांडा नु बेंसी डा रागी बाक्क। मेकेर रेउ यिशा, रागी जिप्पाइक्क। 12 परमप्रभु यावे, इन परमप्रभुमी मेको रागी कली कोव्रब। मेकोमी बर्स डा डॉइती डा नाक्तर रे नोले डा नाक्तर सम्म, गेना हना यो कोव्रब।

13 मिनु मुलाक्ती गो इन कली दैशो आं शेंशो नेंतीनी, गे परमप्रभु यावे, इन परमप्रभु कली इन थुं सोक्तर नेल्लेमी दाक्का नु मेको कली गेय पाइतीनी हना, *लेवी २६:३-५; येरमीया ५:२४* 14 मेना परमप्रभु यावेमी इन कली 'गो इन रू कली गारचा डा रेउ गेनुड। डॉइती नु नोले डा रेउ ठीक पा गेनुड। मोपा इन अन्न, इन अडगुर नु तेल रवा आन फल खुप्ने चाप्नीनी। 15 मिनु गो इन बी ब्यफ, क्यारशा भेडा आन कली योव्रतीकेम घांस वापाइक्नुड। मिनु गे जशा तूशा रूनीनी' दे परमप्रभुमी इन कली देंत। 16 मोपतीके सुइम इन कली हेंथे गाक्पाइक्का मगने, होस पा बाक्कीन। गेपुकी परमप्रभु क्येडा डोन लाइतीनी नु देवी देवता आन कली सेउ पाइतीनी हना, 17 परमप्रभु यावेमी गाइश्शा रागीम रेउ मयिपाइक्क। मिनु मारेड खुक्का मताइनीनी। मिनु परमप्रभु यावेमी इन कली गेशो रिश्शो रागी रे क्याम्ब। *ब्यवस्था २८:२३-२४; लेवी २६:१९-२०*

#### आसीक नु सराप

18 मिनु गेपुकीमी आं दैशो लोव्र इन थुंम वोतीन। मेको मिम्चा कली इन गुइमी चिन्ड फ्रेंदीन। मिनु कुप्फीम फ्रेंतीके खोदेंशो पा फ्रेंचा माल्नीम। *ब्यवस्था ६:६-९* 19 आंम खिंम बाक्नीनु, लां गाक्नीनु, इप्थ लनीनु नु बोक्नीनु इन तमी तौ आन कली मेको अरेशो आ पबंम लोव्र पा शेंदीन। 20 इन खिं डा थाम तारी नु लाप्चो तारी ब्रेक्तीन। 21 मिनु गे नु इन आलपुकी परमप्रभु यावेमी इन किकी पिपी आन कली 'गेनुड' दे कसम जशो रागीमी शुश ब्रॉइनीनी। रागी तार सरीड बाक्क सम्म शुश ब्रॉइनीनी। 22 गेपुकीमी गो इन कली दैशो अरेशो लोव्र नेल्ल होस पा पाइतीनी नु परमप्रभु यावे, इन परमप्रभु कली दाक्ताक्नी हना, मेको आ लां नेल्ल गाक्का, मेको कली मप्रॉइतीनी हना, 23 परमप्रभु यावेमी मेकेर डा रागी रागी डा मुर नेल्ल कली इन डॉइती रे खेरब। मिनु गे इन क्येडा शुश नु सक्ति पाइश्शो रागी रागी डा मुर आन रागी इन के सेल्नीनी। *ब्यवस्था ७:१-२* 24 गे इन खोइलीम थेक्को रागी नेल्ल गे इन के दुम्ब। गोरशो रागी रे लेबानोन सम्म नु ठेयब खोला युफ्रेटीस रे पच्छिम डा समुन्द्र सम्म इन के सांद दुम्ब। 25 गे नु लडाइ पा सुइ मग्रानीम। परमप्रभु यावे, इन परमप्रभुमी आ दैशो खोदेंशो पा तेको रागी थेक्नीनी, मेकेर डा मुर आन कली इन कली तशा हिंतीक थुं गेब। *प्रस्थान २३:२७*

26 नेनीन, मुलाक्तर गो आसीक नु सराप इन डॉइती वोइक्नुड। *ब्यवस्था ३०:१, १५, १९* 27 गे परमप्रभु यावे, इन परमप्रभु आ शेंशो टीतीनी हना, आसीक राइनीनी। *ब्यवस्था २८:२, १५* 28 परमप्रभु यावे, इन परमप्रभु आ शेंशो मटिथु, गो मुलाक्ती इन कली दैशो लचा माल्शो लां रे हेंथे गाक्तीनी नु इन मतुइश्शो देवी देवता आन नोले खोइक्तीनी हना, सराप राइनीनी।

29 मिनु परमप्रभु यावे, इन परमप्रभुमी इन कली इन के सेल्चा चिक्को रागीम ऑइचानीनु, गेरीजीम डांडा रे आसीक गेचा नु एबाल डांडा रे सराप पचा माल्नीनी। *ब्यवस्था २७:१२-१३; यहोसु ८:३३-३४* 30 मेको डांडापुकी यर्दन आइक्की हांबु, नां रिक्तीक गे यर्दन बेंसी डा लां आ नोले, अराबाहमी

बाक्को कनानी आन रागीम बाक्नीस। मेको गिल्गाल आ डॉइती मोरेह माइश्शो ब्वाकी आ नेक्का बाक्नीस। *उत्पत्ती १२:६*

31 मिनु गेपुकी यर्दन शोक्का, परमप्रभु यावे, इन परमप्रभुमी इन कली गेशो रागी ओव्रनीनी। मिनु गे मेको इन के सेल्शा, मेकेर बाक्नीनी।

32 मुलाक्तर गो इन कली शेंशो फुल्लुम मुशा ब्रेक्को लोव्र नु ठीक पतीक लोव्र नेल्ल पशा, होस पा बाक्कीन" देंत।

#### परमप्रभु यावे आ बाक्तीके

12 मिनु मोसामी "मेको परमप्रभु यावे आ फुल्लुम मुशा ब्रेक्को लोव्र नु आ ठीक पतीक लोव्र बाक्नीम। गे मेको नेल्ल परमप्रभु यावे, इन किकी पिपी आन परमप्रभुमी इन के सेल्चा कली गेशो रागीम मबेक्नी सम्म टिचा माल्नीनी।

2 मिनु गे तेको रागी डा मुर आन कली खेरनीनी, मेको आन देवी देवता आन थान नेल्ल प्रेत्चा माल्नीनी। मेको लाइश्शो डांडाम, पहाडीम नु नेल्ल रवा आन पुंम बाक्को बाक्नीम। *ब्यवस्था ७५, २५; प्रस्थान ३४:१३* 3 गे मेको आन चढेतीक प्रेत्चा माल्नीनी। मेको आन लाइश्शो मूर्तिपुकी जिक्का माल्नीनी नु मेको आन मूर्ति मीम हुम्चा माल्नीनी। मिनु मेको शी के सेल्शो मूर्तिपुकी खोल्शा बिग्रेचा माल्नीनी। मिनु आन नें क्याम्चा माल्नीनी। 4 मिनु गेपुकीमी मेको आन देवी देवता आन कली ठेयब सेल्शो खोदेंशो पा परमप्रभु यावे, इन परमप्रभु कली ठेयब मसेलीन। 5 परमप्रभु यावे, इन परमप्रभुमी इन थर थर आन बाक्तीक रागीमी ते बाक्का दाक्का, मेको माल्शा मेकेर लचा माल्नीनी। 6 मिनु इन चोशा चढेशो, क्योरशा चढेशो, इन १० भाग डा भाग का, इन गेचा डा चढेशो, इन दैशो चढेशो नु इन आंम दाक्को चढेशो, इन बी ब्यफ आन डॉइती जरमेशो नु इन क्यारशा भेडा आन डॉइती जरमेशो मेकेर लाइक्का माल्नीनी। 7 मिनु गे नु इन खिं डा मुर नेल्लेमी परमप्रभु यावे, इन परमप्रभुमी इन कली आसीक गेशो गेय मिम्चा, दे मेकेर परमप्रभु यावे, इन परमप्रभु आ डॉइती जशा तूशा, ग्येरसीचा माल्नीनी।

8 गेपुकीम मुल सम्म 'आंम पशो ठीक बाक्क' दे पशो खोदेंशो पा मुल मपने। 9 मारदे हना गेपुकी मुल सम्म परमप्रभु यावे, इन परमप्रभुमी गेशो नाइक्तीके नु रागी मजाक्दीश्शो बाक्नीनी। 10 तन्न यर्दन शोक्का, परमप्रभु यावे, इन परमप्रभुमी इन कली गेशो रागीमी बाक्नीनी, मिनु इन एर औंथ बाक्को इन जोरी सत्रु रे ब्रॉइशा, श्येत मजथु बाक्नीनी। *यहोसु १:१३; यहोसु २१:४४; १राजा ५:५; भजन संग्रह ९५:११; होसे २:२०; हिब्रू ४:११* 11 मेना परमप्रभु यावे, इन परमप्रभुम आ बाक्तीके का योव्रब। गो इन कली अरेशो इन चोशा चढेशो, इन क्योरशा चढेशो, इन १० भाग डा भाग का, इन गेचा डा चढेशो नु इन मार मार परमप्रभु यावे कली दैशो चढेशो मेकेर चाक्का माल्नीनी। 12 मिनु गेपुकी, इन तमी तौ, वाइलीम वाइल, इन सहरम बाक्को आंम कली शॉप मतशो लेवी नेल्ल परमप्रभु यावे, इन परमप्रभु आ डॉइती ग्येरसीचा माल्नीनी। *ब्यवस्था १०:९*

13 इन चोशा चढेतीक ते ते थिन्नी मेक मेक मचढेन, गे होस पा बाक्कीन। 14 तन्न परमप्रभु यावेमी इन थर थर आन दातेमी योव्रशो आ बाक्तीकेम ला चढेने चाप्नीनी। मेकेर ला इन चोशा चढेतीके चाक्का माल्नीनी। गो आं अरेशो गेय नेल्ल मेकेर पचा माल्नीनी।

15 तन्न गेपुकी श्ये ब्बचा दाक्तीनी हना, परमप्रभु यावे, इन परमप्रभुमी इन कली आसीक गेशो खोदेंशो पा इन सहर सहरमी क्योरशा, ब्वने चाप्नीनी। ग्रांरा दिशो नु ग्रांरा मदिशो मुर नेल्लेमी ब्वने चाप्नीम। गेपुकीम किश्श नु रोकेश खोदेंशो पा ब्वने चाप्नीनी। *ब्यवस्था १२:२२; ब्यवस्था १४:५* 16 तन्न हुश चहिं मब्वने। मेको ब्वाक्कु खोदेंशो पा खपीम ताइक्तीन। *लेवी ३:१७; लेवी १७:११* 17 इन अन्न, अडगुर शांबु नु तेल आन १० भाग डा भाग का चढेशो, बी ब्यफ नु क्यारशा भेडा आन डॉइती जरमेशो, इन दैशो चढेशो, इन आंम दाक्का गेशो नु इन गेचा माल्शो चढेशो चहिं आंम सहरम मजने मब्वने। 18 तन्न परमप्रभु यावे, इन परमप्रभु आ डॉइती, आ योव्रशो बाक्तीकेमी मेको गेपुकी नु इन तमी तौ, वाइलीम वाइल नु इन सहरम बाक्को लेवीपुकी नु जने ब्वने। गेपुकी इन पशो नेल्लेमी परमप्रभु यावे, इन परमप्रभु आ डॉइती ग्येरसीने। *ब्यवस्था १४:२३* 19 इन रागीम गेना सम्म



बावनीनी, मेना सम्म लेवी आ थर डा मुर आन कली रिम्शो कोवडीन।

ब्यवस्था १२:१२; ब्यवस्था १४:२७

20 मिनू परमप्रभु यावे, इन परमप्रभु आ कबल पशो खोदेंशो पा इन रागी बारपाइक्व। गेपुकी श्ये ब्वचा दावतीनी हना, रूचा डा पा ब्वने। 21 परमप्रभु यावे, इन परमप्रभु आ योव्रशो बावतीके इन क्येडा डोन बावत हना, परमप्रभु यावेमी इन कली गेशो बी ब्यफ नु क्यारश भेडा आ अरेशो खोदेंशो पा इन सहरम क्योरशा ब्वने चाप्नीनी। 22 मिनू किश्श नु रोकोश ब्वशो खोदेंशो पा परमप्रभु आ डोंइती ग्रांरा दिशो नु ग्रांरा मदिशो नेल्लेमी ब्वने चाप्नीम। ब्यवस्था १२:१५ 23 होस पा हुश गेनायो ब्वचा मदुम्ब। मारदे हना हुशेमी ब्रोंइतीक सोक्त बाक्व। श्ये नु ब्रोंइतीक सोक्त ब्वचा मदुम्ब। ब्यवस्था १२:१६ 24 मेको ब्वचा मदुम्ब। मेको कली ब्वाक्कु खोदेंशो पा खपीम ताइक्वा माल्नीनी। 25 गेपुकीम मेको मब्वचा। मिनू गे परमप्रभु यावे आ डोंइती मार ठीक बाक्मे, मेको पतीके, गेपुकी नु इन नोले डा इन आल आन कली रिम्शो दुम्ब। 26 तन्न गेपुकी इन परमप्रभु कली गेशो थोव्रकपुकी नु इन गेचा माल्शो, इन दाक्वा गेशो कुरशा परमप्रभु यावे आ योव्रशो बावतीकेम लचा माल्नीनी। 27 मिनू इन चोशा चढेशो श्ये नु मेको आ हुश परमप्रभु यावे, इन परमप्रभु कली चढेतीकेम चढेचा माल्नीनी। इन क्योरशा चढेशो आ हुश परमप्रभु यावे, इन परमप्रभु कली चढेतीके आ पुंम जारचा माल्नीनी। मेको आ श्ये गे ब्वने चाप्नीनी। ब्यवस्था १२:६ 28 गेपुकीमी होस पा आं अरेशो लोव्र नेल्ल नेनीन। मिनू टिशा पाइतीनी हना, इन कली नु इन नोले डा इन तमी तौ आन कली गेना हना यो रिम्शो दुम्ब। परमप्रभु यावे, इन परमप्रभु आ डोंइती रिम्शो नु ठीक पाइबपुकी रिम्शो दुम्नीम।

29 परमप्रभु यावे, इन परमप्रभुमी मेको रागी रागी डा मुर आन कली इन डोंइती क्याम्ब। गे मेको आन कली खेरचा कली जावनीनी। मिनू थमा पा खेरशा, मेको आन बावतीकेम बावनीनी। 30 इन डोंइती क्याम्शो मुर आन देवी देवता आन परबम मेको रागी रागी डा मुरपुकीमी आन देवी देवता कली दोपा ठेयब सेल्मे? गो यो मोदेंशो पाइनीकी, दे हिल्लो पा लोव्र मपने। होस पा बाक्कीन। गे यो मेको आन खोदेंशो पा हेंथे गावतीनी हना, मेको आन खोदेंशो पा साइक्वा पुंडसीनीनी। प्रस्थान २३:२४; इजीकीएल २०:३२ 31 गेपुकीमी परमप्रभु यावे, इन परमप्रभु कली मोदेंशो मपने। मारदे हना मार मार परमप्रभु यावे आ डोंइती ग्रांरा दित्वा डा बाक्मे, मेकोपुकीमी आन देवी देवता आन कली नेल्ल पास्तेक्म। मेकोपुकीमी आंम तमी तौ आन कली मेको आन देवी देवता आन परबम मीम चोशा चढेम्तेक्म। 32 गो इन कली दोशो अरेडा, मेको नेल्ल होस पा पने। गेपुकीमी मारेड मतेम्दीन, मारेड मशोलीने" दैत।

मूर्ति पूजा मपने

13 मिनू मोसामी "इन दातेमी परमप्रभु यावे आ लोव्र पाइब, डोमु शेंब 'चिन्ड नु छक लाक्वा डा गेय दुम्ब' दैब। 2 मिनू आन देंशो खोदेंशो पा दुम्शा मेकोपुकीमी 'गेपुकी आंइ डोंइती मतुइश्शो देवी देवता आन नोले खोइय्या। मेको आन कली ठेयब सेल्य' दे लोव्र पास्तेक्म हना, 3 गेपुकीमी मेको परमप्रभु यावे आ लोव्र पाइब, डोमु शेंब, आन लोव्र काड मनेनीन, मटिने। मारदे हना परमप्रभु यावे, इन परमप्रभुमी गे इन थुं नु सोक्त नेल्लेमी परमप्रभु यावे, इन परमप्रभु कली दावनीनी देय मदावनीनी, दे इन थुं नाक्शो बाक्व। 4 गेपुकी परमप्रभु यावे, इन परमप्रभु कली ला खोतीन। मिनू मेको कली ला मान पा हिनीन। मिनू मेको आ शेंशो पचा माल्नीनी। मेको आ देंशो टिशा, मेको कली गेय पशा, मप्रोंइथु बाक्कीन। ब्यवस्था ८:२ 5 मिनू गेपुकीमी परमप्रभु यावे आ लोव्र पाइब मेको डोमु डा लोव्र शेंब कली साइक्वा माल्नीनी। मारदे हना मेकोमी परमप्रभु यावे, इन परमप्रभु कली प्रोंइपाइक्वा, दे इन कली दूली शेंताक्व। मिनू इन कली वाइलीम वाइल दुम्तीके रे इजीप्त रे गुंडशा एक चाक्व परमप्रभु यावे, इन परमप्रभु बाक्व। मोदेंशो मुरपुकीमी इन कली परमप्रभु यावे आ कोंइशो लां रे हेंथे गाक्पाइक्वा दावनीम। 6 मिनू सुइमी इ कली खूइश्शोमी हेंथे गाक्वा कली लेम्ब, मेको इ लोक्व बाक्व हना, इ आफ आ तौ बाक्व हना, इ आंम आ तौ बाक्व हना, इ आंम आ तमी बाक्व हना, इ दाक्वो मीश बाक्व हना, इ शुश

दाक्वो वारच बाक्व हना, नु मेकोमी 'गे नु इ किकी पिपीमी मतुइश्शो देवी देवता आन कली सेउ पय' दैतेक्म हना, ब्यवस्था १८:२०; १कोरिन्थी ५:९, १३ 7 इन एर ओंथ बाक्वो जात जात डा इन नेक्वा रागी डा बाक्व कि डोन रागी डा बाक्व आन देवी देवता बाक्तेक्म हना यो, 8 मेको लेम्ब आ लोव्र मनेंचा, आ देंशो मटिचा। गे मेको कली शिशी मपथु, मेको कली मखूइक्थु, 9 मेको कली थमा पा साइक्वा माल्नीनी। मिनू गे नेल्ल क्येडा डोंइती मेको कली साइक्व, दे आप्चा माल्नेवे। नोले ला इ मुर नेल्लेम आप्चा साइक्वा माल्नीनी। 10 मिनू नेल्लेमी मेको कली मबेक्म सम्म फुल्लु आप्चा माल्नीम। मारदे हना इन वाइलीम वाइल दुम्तीके इजीप्त रे गुंडब परमप्रभु यावे, इन परमप्रभु रे हेंथे गाक्व सेल्चा माल्शो बाक्व। ब्यवस्था १७:७ 11 मिनू इस्राएली नेल्ल मेको नेंशा, हिंचा माल्नीम। मिनू इन दातेमी मोदेंशो मरिम्शो गेनायो मपमेक्व।

12 मिनू परमप्रभु यावे, परमप्रभुमी इन कली बाक्वा कली गेशो सहर काम 13 इन दाते रे मरिम्शो वोंइश मुरपुकी बोक्शा, सहर डा मुर आन कली दूली पपाइश्शा, मेकोपुकीमी 'लय, देवी देवता आन कली पूजा पय' दैतेक्म हना, गेपुकी मेको देवी देवता गेनायो मतुइश्शो बावतीनी हना, 14 गेपुकीम रिम्शो पा खोदील निदील पा हिल्लो पचा माल्नीनी। मिनू मेको मरिम्शो थमा पा इन दातेमी पशो बाक्व हना, 15 गेपुकीमी मेको सहर डा मुर आन कली थमा पा क्योरशा साइक्वा माल्नीनी। मेको सहर नेल्ल कली खतम सेल्चा माल्नीनी। मिनू मेकेर बाक्वो बी ब्यफ, क्यारश भेडा नेल्ल यो साइक्वा माल्नीनी। 16 मेकेर बाक्वो मारेड मारेड, मेको सहर आ दातेम खुष्चा माल्नीनी। मिनू मेको खुष्चो नु सहरम मी सुइक्तीन। मेको परमप्रभु यावे, इन परमप्रभु कली चोशा चढेशो खोदेंशो दुम्ब। मेको सहर गेना हना यो फोहोर ताइक्तीके दुम्ब। मिनू मेको सहर कली लेंशा मसेलीन। ब्यवस्था २०:१६-१८ 17 मिनू गेपुकीमी मथिचा देंशो थोव्रक मारेड मलतीन। मिनू परमप्रभु यावे आ गाइश्शो नाइक्व कों, इन कली शिशी पा दाक्व। इन किकी पिपी नु कसम जशो खोदेंशो पा इन कली शुश सेल्ब। 18 गेपुकी परमप्रभु यावे, इन परमप्रभु आ देंशो टीतीनी, मुलाक्ती गो इन कली देंशो आं शेंशो नेल्ल पाइतीनी हना, गेपुकी परमप्रभु यावे, इन परमप्रभु आ डोंइती ठीक पाइब दुम्नीनी" दैत। यहोसु ७:-

ब्वचा नु मब्वचा डा श्ये  
लेवी ११:-

14 मिनू मोसामी "गेपुकी परमप्रभु यावे, इन परमप्रभु आ तमी तौ ननी। बेक्शो मुर आ परबम इन कुशुल प्रेक्वा मदुम्ब। इन चां प्रेक्वा मदुम्ब। लेवी १९:२७-२८; येरमीया ४७:५; इजीकीएल ७:१८ 2 मारदे हना गेपुकी परमप्रभु यावे, इन परमप्रभु आ आंम मुर बावनीनी। मिनू परमप्रभु यावेमी जात जात डा मुर नेल्ल आन दाते रे इन कली आ मुर सेल्चा कली योव्रतु।

3 गेपुकीमी मारेड ग्रांरा दिचा डा थोव्रक मजने मब्वने। 4 गेपुकीमी ब्वचा दुम्ब जन्तु तेको बाक्नीम देंशा हना, ब्यफ, क्यारश, भेडा, 5 रोकोश, किश्श, बरांट, कौरो किश्श, साबर, चितल नु थार बाक्नीम। 6 मिनू गेपुकीमी जन्तु आन दातेमी तेको नेल्ल गेंच चेशो नु शोकोल हेक्व बाक्नीमी, मेको आन कली ब्वचा दुम्ब। 7 तन्न शोकोल हेक्व नु गेंच जेशो आन दातेमी तेको मब्वचा देंशा हना, दलओंठ, खरायो, रोंगु डा खरायो मब्वचा। मारदे हना मेकोपुकी शोकोल हेक्नीम हना यो, आन गेंच मजेश्शो बाक्नीम। मेको इन कली ग्रांरा बाक्व। 8 मिनू पोव्र आन गेंच जेशो बाक्नीम हना यो, शोकोल महेक्नीम। मेको इन कली ग्रांरा बाक्व। मेको आन श्ये मब्वचा, आन सिनु यो थिचा मदुम्ब।

9 ब्वाक्कुम बाक्वपुकीमी फ्रां नु कल्ला पाइश्शो ब्वचा दुम्ब। 10 तन्न फ्रां नु कल्ला मपाइश्शो मब्वने। मेको इन कली ग्रांरा बाक्व। 11 गेपुकीमी ग्रांरा मदिचा डा चिक्व नेल्ल ब्वने चाप्नीनी। 12 तन्न गेपुकीमी ब्वचा मदुम्शोपुकी चहिं ककाकुली, ब्वारदे, गिद, कुही, 13 नेल्ल खाल डा ब्वारदे, 14 खद, 15 सुतुमुर्ग, हुहुचील, हांस, नेल्ल खाल डा बेसारा, 16 हुहुचील, कोइरालो नु बुक्स, 17 धनेस, सिनु ब्वाइब गिद हांडगील, 18 सारस, नेल्ल खाल डा बोकुला, फाप्रै चिक्बी नु पकातिक्ती चहिं मब्वने। 19 फ्रां पाइश्शो माले

फटेडग्रा नेल्ल इन कली ग्रांग्रा बाक्ब। मेकोपुकी मब्वचा।<sup>20</sup> तन्न ग्रांग्रा मदिचा डा फ्रां पाइश्शो नेल्ल ब्वने चाप्नीनी।

<sup>21</sup> गेपुकीमी परमप्रभु यावे, इन परमप्रभुम आ कली योव्रशो मुर बाक्नीनी। मोपतीके आंमा बेक्शो जन्नुपुकी ब्वचा मदुम्नीनी। गे नु बाक्शो अर्को रागी डा मुर आन कली मेको गेने चाप्नीनी। मेकोपुकीमी मेको ब्वाक्तेक्म हना यो, लेयतेक्म हना यो, ठीक दुम्ब। क्यारश आ पाठा आ ममा आ दूधम मक्वेने। *प्रस्थान २२:३०; प्रस्थान २३:१९*

१० भाग डा भाग का चढ़ेचा

<sup>22</sup> गेपुकीमी गेनायो मप्रॉइचा डा पा बर्स बर्स डा इन रूम नु खेतम वाशा सिश्शो नेल्ल रे १० भागम भाग का तिल्शा वोइश्शा, गेचा माल्नीनी। *लेवी २७:३०*<sup>23</sup> मिनू परमप्रभु यावे, इन परमप्रभु आ योव्रशो बाक्तीकेमी मेको आ डोंइती जचा माल्नीनी। मार जचा ब्वचा माल्नीनी दैशा हना, इन १० भाग डा भाग का अन्न, इन अडगुर शांबु, इन तेल, इन कली डोंइती जरमेशो ब्यफ नु क्यारश भेडा जचा ब्वचा तूचा माल्नीनी। मो पाइतीनी हना, गे मबेक्नी सम्म परमप्रभु यावे, इन परमप्रभु कली मान पा हिंचा शेंसीनीनी। *ब्यवस्था १२:१७-१८; ब्यवस्था १९:२३*<sup>24</sup> मिनू परमप्रभु यावे, इन परमप्रभु आ योव्रशो बाक्तीक इन बाक्तीके रे शुश डोन बाक्त हना, नु परमप्रभु यावे, इन परमप्रभुमी इन कली आसीक गेप्नु नु इन १० भागम भाग का मेकेर लाइक्ने मचाप्तीनी हना,<sup>25</sup> मेको इन तिल्शा वोइश्शो १० भागम भाग का लेयडीन। मेको रे ताक्शो क्येट लाइश्शा, परमप्रभु यावे, इन परमप्रभु आ योव्रशो बाक्तीके लने।<sup>26</sup> मिनू इन दाक्शो खोदेंशो पा बी ब्यफ, क्यारश भेडा, अडगुर शांबु, रकसी मेको क्येटीमी ग्यापीन। मिनू गे नु इन खिं डा मुर परमप्रभु यावे, इन परमप्रभु आ डोंइती जशा ब्वशा ग्येरसीने।<sup>27</sup> इन सहरम बाक्ब लेवी आ थर डा मुर आन कली रिश्शो पा कोव्रडीन। मारदे हना मेकोपुकी इन खोदेंशो पा शोंप मतामे। *ब्यवस्था १२:१२, १९;*

<sup>28</sup> मिनू बर्स सां नोले गे इन रुष्शो डा १० भागमी भाग का इन सहर डा वोइक्तीकेम वोइक्चा माल्नीनी। *ब्यवस्था २६:१२-१५; लेवी २७:३२-३३*<sup>29</sup> मिनू इन खोदेंशो पा शोंप मताइब लेवी आ थर डा मुरपुकी, अर्को रागी डा मुर, रोम रोइक्च नु वॉइश बेक्शो मीश मुरपुकी मेकेर जाक्शा, रूथ्री जचा ब्वचा तामेक्ल। मो पाइतीनी हना, परमप्रभु यावे, इन परमप्रभुमी इन कली इन पतीक नेल्लेमी आसीक गेब" देंत।

७ बर्स नु जेर

**15** मिनू मोसामी "गे इन कली ७ बर्स नोले जेर क्याम्तीक बर्स बाक्ब। *प्रस्थान २३:१०-११*<sup>2</sup> मेको मथाप्तीक माफ गेतीक बर्स दोपा पचा माल्नीनी दैशा हना, सु सुमी आ वारच, दे लोकब आन कली जेर गेन्तेक्म हना, मेको गेबपुकीमी जेर ताक्ब आन कली गेशो जेर मथाप्पाइक्थु प्रोन्मेक्ल। मेकोमी आ वारच नु आ लोकब आन कली जेर आ पबर्म गेन कि गेन, दे पुंइचा मडुम्ब। मारदे हना परमप्रभु यावे रे पा जेर क्याम्तीक डा बर्स बाक्ब। *नेहेम्याह ५:१०; नेहेम्याह १०:३२*<sup>3</sup> अर्को रागी डा मुर आन कली चहिं गेन कि गेन, दे पुंइने चाप्नीनी। तन्न इन लोकब आन कली चहिं दोशो जेर बाक्मे मेको प्रॉइचा माल्नीनी।<sup>4</sup> इन दातेमी सुइ पुडग मबाक्म कों? मारदे हना परमप्रभु यावेमी योव्रशा गेशो इन के सेल्शो रागीम इन कली शुश आसीक गेब।<sup>5</sup> गेपुकीमी परमप्रभु यावे, इन परमप्रभु आ देंशो होस पा टीतीनी हना, इन कली अरेशो नेल्ल पाइतीनी हना, सुइ पुडग मदुम्नीनी।<sup>6</sup> मारदे हना परमप्रभु यावे, इन परमप्रभुमी इन कली देंशो खोदेंशो पा इन कली आसीक गेब। मिनू गे शुश रागी रागी डा मुर आन कली जेर गेब दुम्नीनी। गेपुकीम चहिं जेर पुंइचा ममाल्नीनी। मिनू गेपुकीमी शुश रागी रागी डा मुर आन कली हुकुम पाइनीनी। तन्न मेकोपुकीमी इन कली हुकुम मपाइनीम। *ब्यवस्था २८:१२*

<sup>7</sup> मिनू परमप्रभु यावे, इन परमप्रभुमी इन कली गेशो रागीम, सहर कामी बाक्शो इन लोकब का पुडग बाक्त हना, इन थुं खकटा पा मबाक्कीन। 'काइ मगेनुड' दे मदेनीन। *१यूहन्ना ३:१७*<sup>8</sup> तन्न गे शिशी पा मेको कली आ माल्शो नेल्ल जेर गेने। *लूका ६:३४-३५*<sup>9</sup> मिनू इन थुंमी "जेर क्याम्तीक बर्स

जाक्चा चिक्ताक्व' दे इन पुडग लोकब आ पबर्म गन गन पा, मेको कली वारच पा जेर गेचा मदाक्नीनी हना, होस पने। मेको पुडगुमी इन पबर्म परमप्रभु यावे कली पुंइब। मिनू गे पापी दुम्नीनी।<sup>10</sup> गेपुकीमी मेको कली हाइश्शो थुं पा गन गन मपथु गेने। मारदे हना ओं पतीकेन परमप्रभु यावे, इन परमप्रभुमी इन कली इन पशो नेल्लेमी आसीक गेब। *२कोरिन्थी ९:६-७*<sup>11</sup> मारदे हना रागीम श्येत जशो पुडगपुकी गेना हना यो बाक्नीम। मोपतीके गो इन कली इन रागीम बाक्शो श्येत जाइब इन लोकब नु पुडग आन कली तशा, हाइश्शो मुर दुश्शा गेन। *मत्ती २६:११; यसैया ५८:७; याकूब २:१५-१६*

७ बर्स डा वाइलीम वाइल

प्रस्थान २१:१-६

<sup>12</sup> मिनू इन हिब्रू आन दाते डा लोकब, मीश मुर वॉइश मुर, आंम कली इन गुडमी लेयसीनीम हना, मेकोमी इन कली ६ बर्स गेय पचा माल्नीम। मेको ७ बर्समी मेको आन कली प्रॉइशा लचा गेचा माल्नीनी। *येरमीया ३४:१४*

<sup>13</sup> मिनू गे मेको प्रॉइनीनु, श्येत्थ गुइ मसोइक्तीन।<sup>14</sup> परमप्रभु यावे, इन परमप्रभुमी इन कली आसीक गेशो रे इन क्यारश भेडा इन अन्न नु अडगुर शांबु रे मेको कली शुश गेशा सोइक्तीन।<sup>15</sup> गेपुकी इजीप्त रागीमी वाइलीम वाइल दुश्शा बाक्तीनी। मिनू परमप्रभु यावे, इन परमप्रभुमी इन कली प्रॉइतु, मेको मिम्तीन। मोपतीके गो मुलाक्ती दोपा पचा, दे गो इन कली शेंनुड। *ब्यवस्था ५:१५*<sup>16</sup> मिनू मेकोमी इन कली नु इन मुर आन कली दाक्शा, मेकोमी 'गो इन कली मप्रॉइथु, एकेन गेय पाइनुड' देंत हना,<sup>17</sup> गे मेको मुर कली लाप्चोमी राप्पाइश्शा लूजे का लाइश्शा, मेको आ नोफा लाप्चो डा शी तारी खित्वा माल्नीनी। मिनू मेको मबेक्म सम्म इन वाइल दुम्ब। वाइलीम कली यो मोदेंशो पचा माल्नीनी।<sup>18</sup> गेपुकीमी मेको आन कली प्रॉइशा सोइक्चा श्येत मलाक्कीन। मारदे हना गाल्च ताक्शा गेय पाइब आन क्येडा निक्शी खेयप हिक्शो खोदेंशो पा मेकोमी ६ बर्सम गेय पने थुम्शो बाक्ब। गेपुकीमी इन प्रॉइशो वाइलीम वाइल कली रिश्शो पा गेतीनी हना, परमप्रभु यावे, इन परमप्रभुमी इन कली इन पशो नेल्लेमी आसीक गेब।

डोंइती जरमेशो ब्यफ नु सांड

<sup>19</sup> इन बी ब्यफ आ डोंइती जरमेशो बाछा नु इन क्यारश भेडा आ डोंइती जरमेशो पाठा परमप्रभु यावे, इन परमप्रभु कली गेचा माल्नीनी। इन डोंइती जरमेशो ब्यफ लाइश्शा गेय मपचा। डोंइती जरमेशो सांड आन कली ऊन मप्रेक्वा। *प्रस्थान १३:२, १३-१६*<sup>20</sup> मिनू बर्स बर्सम गेपुकी नु इन खिं डा मुर नेल्लेमी परमप्रभु यावे आ बाक्तीकेमी परमप्रभु यावे, इन परमप्रभु आ डोंइती ब्वचा माल्नीनी। *ब्यवस्था १४:२३*<sup>21</sup> तन्न मेको ब्यफ, सांड कली मारेइ दुश्शो बाक्त हना, कोडटे बोडटे बाक्त हना, नु मिक्च मताइब मारेइ दुश्शो बाक्त हना, गेपुकीमी मेको कली परमप्रभु यावे, इन परमप्रभु कली चढ़ेचा मडुम्ब। *लेवी २२:२०*<sup>22</sup> गेपुकीमी इन सहरमी किश्श नु रोकोश ब्वशो खोदेंशो पा परमप्रभु आ डोंइती ग्रांग्रा दिशो नु मदिशो नेल्लेमी ब्वने चाप्नीम। *ब्यवस्था १२:१५, २२*<sup>23</sup> मेको आ हुश ला मब्वचा। मेको ब्वाक्कु खोदेंशो पा खपीम ताइक्चा माल्नीनी" देंत। *ब्यवस्था १२:१६*

पास्सा चाड मानेतीके

प्रस्थान २३:१४-१७; प्रस्थान ३४:१८-२४

**16** मिनू मोसामी "गेपुकीमी आबीब महिनाम परमप्रभु यावे, इन परमप्रभु आ पास्सा चाड मानेचा माल्नीनी। मारदे हना परमप्रभु यावे, इन परमप्रभुमी आबीब महिना डा नाक्दो इन कली इजीप्त रे गुंइताक्व। *प्रस्थान १२:-*<sup>2</sup> मिनू गेपुकीमी परमप्रभु यावे आ नें वोइक्चा कली आ योव्रशो बाक्तीकेमी परमप्रभु यावे, इन परमप्रभु कली बोका नु ब्यफपुकी क्योरशा पास्सा चाड मानेचा माल्नीनी।<sup>3</sup> गेपुकीमी ग्युरशो बोरब ओख्ती सुष्शो शोब्ले मेको श्ये नु मजने। गेपुकी ७ नाक्त सम्म ग्युरशो बोरब ओख्ती मसुष्शो शोब्ले जचा माल्नीनी। मेको इन श्येत डा शोब्ले बाक्ब। मारदे हना गे इजीप्त रे चुइश्शा यूतीनी। मिनू गेपुकीमी मबेक्नी सम्म इजीप्त रे यूशो नाक्ती मिम्चा कली मेको पास्सा चाड मानेचा माल्नीनी। *प्रस्थान १२:११*

4 मिनू ७ नाक्त सम्म इन रागी नेल्लेमी ग्युरशो बोरब ओख्ती बाक्वा मदुम्ब। मिनू गेपुकी डोंइती डा नाक्दो क्योरशो श्ये सुनी सम्म मारेइ हेंचा मदुम्ब।  
5 परमप्रभु यावे, इन परमप्रभुमी इन कली गेशो सहरमी मेको पास्सा चाड डा मार मार क्योरने मचाजनीनी। 6 परमप्रभु यावे, इन परमप्रभुमी आ नें वोइक्वा कली नोले योव्रशो बाक्तीकेमी मेको पास्सा चाड डा मार मार क्योरचा माल्नीनी। गे मेको इजीप्त रे गुंडशा, नां रिक्वी ना पचा माल्नीनी।  
7 मिनू गे मेको श्ये कली वाल्शा, परमप्रभु यावे, इन परमप्रभुमी नोले योव्रशो बाक्तीकेम चोचा माल्नीनी। मिनू सुनी लेशशा, आंम आंम ताम्बु लने। 8 गे ६ नाक्त सम्म ग्युरशो बोरब ओख्ती मसुप्शो शोब्ले जचा माल्नीनी। मिनू ७ नाक्तीम परमप्रभु यावे, इन परमप्रभु आ पर्वम बुक्तीक नाक्त बाक्ब। मेको नाक्ती मारेइ गेय मपने।

पास्सा आ ७ हप्ता नोले डा चाड

9 मिनू मीशो बाली रिक्वा गेशो नाक्त रे गेपुकीमी ७ हप्ता हिक्वा माल्नीनी। 10 मिनू गेपुकी हप्तापुकी डा चाड परमप्रभु यावे, इन परमप्रभु कली मानेचा माल्नीनी। परमप्रभु यावे, इन परमप्रभुमी इन कली आसीक गेशो खोदेशो पा इन ग्येरसीशो थुमी चढेशा चाड मानेचा माल्नीनी। प्रस्थान ३४:२२ 11 मिनू गेपुकी, इन तमी तौपुकी, वाइलीम वाइल, इन सहरम बाक्शो लेवी आ थर डा मुरपुकी, इन दातेमी बाक्शो अर्को रागी डा मुरपुकी, रोम रोइक्च नु आन वोंइश बेक्शो मीश मुर नेल्ल परमप्रभु यावे, इन परमप्रभु आ नें वोइक्वा कली नोले योव्रशो बाक्तीकेमी मेको आ डोंइती ग्येरसीचा माल्नीनी। 12 गेपुकी इजीप्त रागीम वाइलीम वाइल दुश्शो मिन्वा माल्नीनी। गे मेको फुल्लुम मुशा ब्रेक्शो लोव्र होस पा टिचा माल्नीनी। ब्यवस्था ५:१५

बाली नाली ओइतीक चाड

13 मिनू इन रू डा अन्न अडगुर मारेइ मारेइ खुम्ने थुम्शा, गेपुकीमी बाली नाली ओइतीक चाड ७ नाक्त सम्म मानेचा माल्नीनी। 14 मिनू गेपुकी, इन तमी तौ, इन वाइलीम वाइल, इन सहरम बाक्शो लेवीपुकी, अर्को रागी डा मुरपुकी, रोम रोइक्च नु आन वोंइश बेक्शो मीश मुरपुकी, नेल्लेमी ग्येरसीशा मेको चाड मानेचा माल्नीम। ब्यवस्था २६:११; यसैया ३०:२९ 15 मिनू गेपुकीमी परमप्रभु यावे, इन परमप्रभु आ योव्रशो बाक्तीकेमी ७ नाक्त सम्म मेको चाड मानेचा माल्नीनी। मारदे हना परमप्रभु यावे, इन परमप्रभुमी इन कली बाली नाली शुश गेब नु इन मारेइ मारेइ पशोमी इन कली आसीक गेब। मोपतीके गेपुकी शुश ग्येरसीचा माल्नीनी।

16 मिनू परमप्रभु यावे, इन परमप्रभुमी आ नोले योव्रशो बाक्तीकेमी इन दाते डा वोंइश मुर नेल्ले सां खेयप परमप्रभु यावे आ डोंइती जाक्दीत्वा माल्नीम। ग्युरशो बोरब ओख्ती मसुप्शो शोब्ले डा पास्सा माइश्शो चाड, ७ हप्ता नोले डा हप्ता डा चाड नु बाली नाली ओइतीक गोठ सेल्ल्तीक चाडम जाक्दीत्वा माल्नीम। मिनू परमप्रभु यावे आ डोंइती श्येत्थ गुड जाक्वा मदुम्ब। 17 परमप्रभु यावे, इन परमप्रभुमी आसीक गेशो खोदेशो पा नेल्लेमी आन चाप्शो गेचा माल्नीम।

निसाफ पतीके

18 मिनू मुर आन कली ठीक निसाफ पचा कली गेपुकीमी इन थर थर डा नु परमप्रभु यावे, इन परमप्रभुमी इन कली गेशो सहर सहरम निसाफ पाइब नु ठेयब मुर योव्रशा वोइक्वा माल्नीनी। ब्यवस्था १:१६-१८; गन्ती ११:१६ 19 निसाफ हेंथे मपने। कुल मकोव्रडीन। घूस मजने। मारदे हना घूसमी जोक्ब तुइक्ब मुर आन मिक्च सिल्लब। मिनू ठीक पाइबमी घूस जशा दूली लोव्र पाइब। १सामुएल ८:३ 20 मिनू परमप्रभु यावे, इन परमप्रभुमी गेशो रागीम ब्रोंइचा नु इन के सेल्चा, दे ठीक पतीक लां खोतीन।

चढेतीके परमप्रभु कली ला बाक्ब

21 गेपुकीमी अशेराह देवी आ लाइश्शो मूर्ति परमप्रभु यावे, इन परमप्रभु कली चढेतीक आ नेक्था खुक्वा मदुम्ब। ब्यवस्था ७:५; २राजा २३:४ 22 गेपुकीमी तेकोइ अर्को मूर्ति वोइक्वा मदुम्ब। मारदे हना मेको नेल्ल

परमप्रभु यावे, इन परमप्रभुमी कली ग्रांरा दीब" देंत। लेवी २६:१; येरमीया २:२७

17 मोसामी "गेपुकीमी परमप्रभु यावे, इन परमप्रभु कली कोडटे बोडटे गाक्ब मिक्च मताइब, मारेइ दुश्शो ब्यफ भेडा चढेचा मदुम्ब। मोदेशो परमप्रभु यावे, इन परमप्रभु कली ग्रांरा बाक्ब। लेवी २२:२०; मलाकी १:६-९

मूर्ति पूजा आ पर्वम

2 मिनू परमप्रभु यावे, इन परमप्रभुमी इन कली गेशो सहरमी सुइ वोंइश मुर मीश मुरुमी परमप्रभु यावे, इन परमप्रभु आ डोंइती मरिश्शो पा आ कबल कली प्रोंइशा, ब्यवस्था १३:७-१२ 3 मेकोपुकीमी देवी देवता खोइश्शा, मेको आन कली ठेयब सेल्शा, नां, तास्ला, सोरुल आन डोंइती बाप्शा गोम 'मपन देंशो' पास्तेक्म हना, ब्यवस्था ४:१९ 4 मिनू मुरपुकीम मेको आन पर्वम इन कली शेंताक्म हना, गेपुकीम रिश्शो पा खोदील निदील पा हिल्लो पचा माल्नीनी। मिनू मेको थमा पा इन इस्राएलमी मोदेशो ग्रांरा दिचा डा गेय पशो बाक्त हना, 5 मेको मोदेशो ग्रांरा पाइब वोंइश मुर हना यो, मीश मुर हना यो इन सहर रे गुंडशा, फुल्लु आप्शा साइक्वा माल्नीनी। लेवी २४:१४ 6 साइक्वा पुंडसीब आन पर्वम मुर निक्शी नु सांमी 'गो ताता, सांकछी दुस्ती' देंतेक्म हना, ला साइक्वा दुम्ब। का ला सांकछी बाक्त हना साइक्वा मदुम्ब। ब्यवस्था १९:१५; १राजा २१:१०; हिब्रू १०:२८ 7 मेको आन पशो ताइब सांकछीपुकीमी नेल्ल क्येडा डोंइती मेको आन कली साइक्वा, दे फुल्लु आप्चा माल्ब। मेको नोले ला नेल्ल अरुम पचा माल्नीम। मिनू मोपा गेपुकीमी मरिश्शो नेल्ल इन दाते रे गुंडचा माल्नीनी।

नेल्ल क्येडा ठेयब निसाफ

8 मिनू इन सहरम मुर साइक्तीके, रू योक्तीके, तुम्मुतीके नु मारेइ मारेइ मचाप्चा डा निसाफ बाक्त हना, इन सहर रे परमप्रभु यावे, इन परमप्रभु आ योव्रशो बाक्तीकेम लचा माल्नीनी। 9 मिनू गेपुकी चढेब, लेवी आ थर डा मुर नु मेना गेय पाइब निसाफ पाइब कली 'मार पचा' दे हिल्लो पचा कली गुथ लचा माल्नीनी। मेकोमी इन कली दोपा निसाफ पचा शेंनीम। २इतिहास १९:८, ११ 10 मिनू परमप्रभु यावे आ योव्रशो बाक्तीकेमी मेकोपुकीमी इन कली मार देंनीम, मेको मोदेशो पा ठीक पा निसाफ पचा माल्नीनी। मिनू इन कली दोपा शेंदमे, मोपा होस पा पचा माल्नीनी। 11 मेको इन कली शेंशा अरेशो लोव्र नु निसाफ पतीके गे पचा माल्नीनी। मेको लोव्र नेंशा, ग्युरा नु पेरा गे मलने। 12 सुइम ठेयब लेशशा, परमप्रभु यावे, इन परमप्रभु आ गेय पचा कली वोइश्शो चढेब, निसाफ पाइब आन लोव्र मटिप्तु हना, मेको साइक्वा पुंडसीब। मिनू मोपा गेपुकीमी इस्राएली, इन दाते रे मरिश्शो नेल्ल गुंडचा माल्नीनी। 13 मिनू मुर नेल्लेमी मेको नेंशा हिंशा मोदेशो मपाइक्नीम।

पिप योव्रतीके आ पर्वम

14 मिनू गेपुकी परमप्रभु यावे, इन परमप्रभुमी इन कली गेशो रागी जाक्दीश्शा, इन के सेल्शा बाक्नीनु, गेपुकीमी 'एर ओंथ डा रागी रागी खोदेशो पा आंइ कली यो पिप का वोइक्वा माल्नीक' देंतीनी हना, १सामुएल ८:५-९ 15 परमप्रभु यावे, इन परमप्रभुमी योव्रशो मुर कली ला वोइक्वा दुम्ब। इन लोक्ब आन दाते रे योव्रशा पिप वोइक्वा माल्नीनी। अर्को जात डा मुर पिप सेल्चा मदुम्ब, इन लोक्ब कली ला सेल्चा माल्ब। 16 मेकोमी शुश शारा आंम कली मवोदल। मिनू मेकोमी शारा ग्याप्चा कली मुर आन कली इजीप्त मसोइक्तल। मारदे हना परमप्रभु यावेमी 'मेको लां गेनायो लेशशा मलने' देंत। १राजा १०:२६-२९ 17 मिनू परमप्रभु यावे रे डोन मलल, दे मीश मुर शुश चाक्वा मदुम्ब। मिनू मेकोम आंम कली शुश सुन चांदी मखुप्तल। १राजा ११:१-८; १राजा १०:१४ 18 मिनू मेको पिपमी सासन पवानु, चढेब, लेवी आ थर डा मुर आन किताब रे परमप्रभु यावे आ अरेशा लोव्र किताब काम ब्रेक्वा माल्ब। 19 मेको लोव्र मेको नु बाक्वा माल्ब। मिनू मेकोमी परमप्रभु यावे, आ परमप्रभु कली मान पा हिंचा कली शेंसीचा कली मबेक्म सम्म नाक्त किंत किंत पढेचा माल्ब। मेको अरेशो लोव्र

नेल्ल नु फुल्लुम मुशा ब्रेक्शो लोत्र होस पा पचा माल्ब। 20 मेकोमी आंम लोक्ब आन दातेमी आंम कली ठेयब मसुदल। परमप्रभु यावे आ शेंशो लोत्र रे डोन मलल। ग्युरा पेरा गे मलल। मिनु आं तौ चचपुकीमी इस्राएल डा राज्य कली शुश नाक्ती सम्म सासन पामेक्ल" देंत। ब्यवस्था 4:२९

लेवी आ थर डा चढेब आन गेय

18 मोसामी "लेवी आ थर डा चढेब, नु लेवी आ थर डा मुर नेल्लेमी रू मथेरनीम। परमप्रभु यावे कली चोशा चढेशो नु मेको कली गेशो मेकोपुकीम जामेक्ल। ब्यवस्था १०:९; गन्ती १८:८-२०; १सामुएल २:२८; १कोरिन्थी ९:१३ 2 मेको आन लोक्ब आन दातेमी मारेड शॉप मताइनीम। आं देंशो खोदेंशो पा परमप्रभु यावे मेको आन शॉप बाक्ब।

3 मिनु मुरपुकीमी ब्यफ, भेडा, क्यारश क्योरशा चढेमेनु, चढेब कली मार गेचा माल्नीम देंशा हना, आ बला रे खोइल सम्म, शांपे निक्शी नु कोत्रज गेचा माल्नीम। 4 मिनु इन डोंइती रिक्शो अन्न, डोंइती डा अङ्गुर शांबु, डोंइती डा खाक्शो तेल नु भेडा आन डोंइती प्रेक्शो ऊन गेचा माल्नीम। प्रस्थान २३:१९ 5 मारेदे हना परमप्रभु यावे, इन परमप्रभुमी नेल्ल इन थर रे लेवी आ थर योत्रशो बाक्त। मारेदे योत्रशो बाक्त देंशा हना, मेको नु आ तौपुकी गेना हना यो परमप्रभु यावे आ डोंइती राप्शा, आ गेय पचा कली योत्रशो बाक्त।

6 मिनु इस्राएलम बाक्ब लेवी आ थर डा मुर तेको तेको सहर रे परमप्रभु यावे आ योत्रशो बाक्तीके जाक्शा, न्यायाधीस १७:७; न्यायाधीस १९:१ 7 परमप्रभु यावे आ डोंइती राप्ब आ लोक्ब नेल्ल खोदेंशो पा परमप्रभु यावे, आ परमप्रभु कली गेय पने चाक्ब। 8 मेको नु आ मार मार लेयशो क्येट बाक्त हना यो, अरु चढेब खोदेंशो पा उडक्थ उडक्थ जचा ताइब।

मपचा डा ग्रांरा दिशो गेय

9 परमप्रभु यावे, इन परमप्रभुमी इन कली गेशो रागी जाक्दीन्नी नोले मेकेर डा रागी रागी डा मुर आन पशो ग्रांरा दिशो गेय शेंसीशा काइ मपने। 10 मेको ग्रांरा दिशो गेय मार बाक्ब देंशा हना, आंम तमी तौ आन कली मीम चोशा चढेशा, लिंक्यु कोत्रचा, टुना मुना पचा, मन्तर तन्तर पचा, लेवी १८:२१; लेवी १९:२६, ३१ 11 ठेयब मिक्च पचा, बेक्शो मुर रे लोत्र पचा नु बेक्शो मुर आ अर्ती नेंथ माल्चा मेको नेल्ल ग्रांरा दिचा डा गेय बाक्ब। मोदेंशो पाइब इन दातेमी काइ मदुम्ब। लेवी २०:२७; १सामुएल २८:३-२० 12 मोदेंशो पाइब मुर परमप्रभु यावे आ डोंइती ग्रांरा दिचा डा बाक्नीम। मेको ग्रांरा दिचा डा गेय आ पर्बम परमप्रभु यावे, इन परमप्रभुमी मेको मुर आन कली इन डोंइती रे गुंडब। 13 परमप्रभु यावे, इन परमप्रभु आ डोंइती गेपुकी थमा सुइक्चा पुंडसीब रिम्शो पाइब दुमीन। उत्पत्ती ६:९; उत्पत्ती १७:१ 14 मारेदे हना गे खेरचा चिक्शो रागी रागी डा मुरुम टुना मुना पाइनीम नु लिंक्यु कोत्रनीम। परमप्रभु यावे, इन परमप्रभुमी इन कली मोदेंशो पचा मगेब।

परमप्रभु आ लोत्र पाइब

15 परमप्रभु यावे, इन परमप्रभुमी इन दाते रे आं खोदेंशो पा आ लोत्र पाइब का योत्रब। गेपुकीमी मेको आ लोत्र नेंचा माल्नीनी। गन्ती १२:६-८; यूहन्ना १:४५; यूहन्ना ६:१४; यूहन्ना ७:४०; प्रेरित ३:२२; प्रेरित ७:३७ 16 मिनु होरेब डांडाम गुम्पा नाक्त परमप्रभु यावे, इन परमप्रभु कली मार पुंडतीनी देंशा हना 'गो परमप्रभु यावे, आंइ परमप्रभु आ सेंदा लेंशा नेंचा मदाक्नीक। मिनु मेको ठेयब मी लेंशा तचा मदाक्नीकी। लेंशा, ताइताक हना, बेक्नीकी, कों' दे हिंशा पुंडतीनी। प्रस्थान २०:१९; हिब्रू १२:१९ 17 मिनु परमप्रभु यावेम आं कली 'मेकोपुकीमी रिम्शो लोत्र पाम्तेक्म' देंत। ब्यवस्था ५:२५ 18 मिनु परमप्रभु यावेमी आं कली 'इ खोदेंशो पा आं लोत्र पाइब, आन लोक्ब आन दाते रे का योत्रनुड। आं देंचा माल्शो लोत्र गो मेको कली देंपाइक्नुड। मिनु आं अरेशो लोत्र मेकोमी नेल्ले मुर आन कली देंब। प्रस्थान ४:१२; यसैया ६:८; येरमीया १:९; मत्ती १०:१९ 19 मिनु सुमी मेको आं नेंम, देंशो लोत्र मटीबा, मेको कली गो सजाइ गेनुडमी। 20 तन्न तेको आं

लोत्र पाइबमी आं मदेशो लोत्र देंशा नु अरु देवी देवता आन देंशो लोत्र पाप्तु हना, मेको आं लोत्र पाइब कली साइक्चा माल्नीनी। ब्यवस्था १३:२-६; येरमीया १४:१३-१५ 21 मिनु गे इन थुंमी "परमप्रभु यावे आ लोत्र बाक्बा देय मबाक्बा मेको दोपा तुइक्नय?" दे मिम्ताक्नी हना, 22 मेको परमप्रभु यावे आ लोत्र पाइबमी परमप्रभु यावे आ नेंमी लोत्र पाइब, तन्न मेको लोत्र मगाप्त नु मदुम्त हना, मेको आं देंशो ममाइ। मेको आं लोत्र पाइबमी आंमा थुं डा लोत्र पाप्तु। गेपुकी मेको कली तशा महिनीन' दे परमप्रभुमी देंत" दे मोसामी इस्राएली आन कली लोत्र पाप्तु। येरमीया २३:१४; येरमीया २८:-; इजीकीएल १३:३-१६

मुर साइश्शा प्रोक्तीक सहर

19 मिनु परमप्रभु यावे, इन परमप्रभुमी रागी रागी डा मुर आन कली खेरशा इन कली गेशो रागीमी आन सहर नु खिपुकी इन के दुम्मेनु, 2 मेना परमप्रभु यावे, इन परमप्रभुमी इन कली गेशो रागीम गे सहर सां तिल्चा माल्नीनी। ब्यवस्था ४:४१-४३ 3 मिनु परमप्रभु यावे, इन परमप्रभुम इन कली गेशो रागी कली का का पा प्रोक्तीक सहर योत्रचा, दे भाग सां सेल्चा माल्नीनी। मेको का का पा सहर सांम मुर साइक्ब मुर प्रोक्शा, लशा बाक्तीक सहर सेल्चा माल्नीनी।

4 मिनु सुइमी गेहे मपथु, साइक्चा ममिम्थु मुर का कली साइक्तु हना, मेकेर प्रोक्शा लशा ब्रॉइल। 5 मोदेंशो दुम्ने चाप्ब देंशा हना, आन वारच नु शी खोइक्थ ब्वाकी लमानु, रवा तिम्मेनु, मेको खा डा फलम बुइश्शा, लशा, ख्रशा आ वारच बेक्त हना, मोदेंशो पा मुर साइक्ब मुर मेको सहरम प्रोक्शा लने चाप्नीम। 6 मेको सहर डोन बाक्त हना बेक्ब मुर आ मुरपुकीम मेको कली क्येक्क लेल्चा कली लांमी खेदा पा साइक्ब। तन्न मेको मुर साइक्चा मपुंडसीब बाक्ब। मारेदे हना मेको आ वारच बाक्त। 7 मोपतीके गो इन कली "सहर सां तिल्चा माल्नीनी" दे माइक्तन्नी।

8 मिनु परमप्रभु यावे, इन परमप्रभुमी इन किकी पिपी नु कसम जशो खोदेंशो पा इन रागी बारपाइक्तु हना, 9 मिनु गे मुलाक्ती शेंशो परमप्रभु यावे आ अरेशो नेल्ल होस पा पाइतीनी हना, मिनु गे परमप्रभु यावे, इन परमप्रभु कली दाक्ताक्नी हना, गे नेल्ल नाक्ती मेको आ लांम गाक्तीनी हना, मेको सहर सां कली अर्को सहर सां तेम्चा माल्नीनी। 10 मोपा परमप्रभु यावे, इन परमप्रभुमी इन कली गेशो रागीम दोस मताइब कली मसदमेक्ल। दोस मताइब कली साइक्नीम हना, इन दातेमी साइक्चा डा पाप राइब।

11 तन्न मुरुम डोंइती रे ईख कुरशा, गेहे पशा, बाप्शा मुर कली तुप्शा साइक्तु हना, प्रोक्तीक सहर काम प्रोक्त हना, 12 मेको मुर आ सहर डा खाल्पापुकीमी मेको कली चाक्पाइश्शा, क्येक्क लेप्ब आन गुइमी साइक्पाइक्चा कली जिम्मा गेमेक्ल। 13 मेको कली शिशो मपन। मिनु इस्राएलम सुम मारेड दोस मतशो मुर कली हुश खाक्श पोक्शो पाप मोदेंशो पा क्याम्चा माल्ब। ब्यवस्था २१:८-९

सांद याक्चा मदुम्ब

14 मिनु गे परमप्रभु यावे, इन परमप्रभुमी इन कली इन के सेल्चा कली गेशो रागीम बाक्तीनी हना, इन किकी पिपीमी वोइश्शो इन नेक्था डा मुर आन सांद याक्चा मदुम्ब। ब्यवस्था २७:१७

सांकछी आन लोत्र गारचा माल्ब

15 मुर कामी दोस ताइब दुम्शो बाक्त देंतेक्म हना, सांकछी का आ लोत्र ला नेंशा मदुम्ब। सांकछी निक्शी, सां आन लोत्र गारत हना ला मेको कली दोस गेचा। ब्यवस्था १७:६; गन्ती ३५:३०; यूहन्ना ८:१७; २कोरिन्थी १३:१; हिब्रू १०:२८ 16 मिनु जोल पा सांकछी बाक्शा, मुर का कली दोस गेचा कली बोक्त हना, 17 दोस गेब नु दोस ताइब निम्फा, परमप्रभु यावे आ डोंइती, चढेब नु निसाफ पाइब आ नेक्था जाक्चा माल्नीस। 18 मेको निसाफ पाइबमी मेको निक्शी आस कली खोदील निदील पा हिल्लो पचा माल्ब। दोस गेब आ लोत्र जोल बाक्त हना, दूली पा आ लोक्ब कली दोस गेशो बाक्त हना, 19 मेकोम आंम लोक्ब कली मार पचा मिम्शो बाक्मे, मेको

कली मोन पचा माल्ब। मोपा गो इन दाते रे मरिम्शो पतीके क्याम्चा माल्नीनी।<sup>20</sup> मिनु अरु मुरपुकीमी मेको नेंशा हिंचा माल्नीम। मिनु नोले इन दातेमी मोदेशो मरिम्शो मपाइनीम।<sup>21</sup> मिनु गोपुकीमी शिशी मपने। साइक्ब कली साइक्चा माल्ब। मिक्च पुक्ब कली आ मिक्च पुक्चा माल्ब। ख्रुइ जिक्ब कली आ ख्रुइ जिक्चा माल्ब। गुइ खोइल जिक्ब कली आ गुइ खोइल जिक्चा प्रस्थान २१:२३-२५

### लडाइ आ पर्वम लोत्र

20 मिनु मोसामी “गोपुकी लडाइ पथ लनीनु, शारा नु बग्गीपुकी तशा, इन जोरी सत्रु इन क्येडा शुश बाक्तेक्म हना, महिनीन। मारदे हना परमप्रभु यावे, इन कली इजीप्ट रे गुंडब इन परमप्रभु गोपुकी नु बाक्ब।<sup>2</sup> मिनु लडाइम लचा क्येडा डोंइती चढेबमी लडाइ पथ लाइब आन डोंइती लशा<sup>3</sup> ‘इसाएलीपुकी नेनीन, गोपुकी मुल लडाइ पथ लचा चिक्शो बाक्नीनी। मोपतीके आइक्च थुं मपने। महिनीन। मेको आन कली तशा, ग्रीचोक पा इन थुं ग्येत्थ लुक्च मदुमीने।<sup>4</sup> मारदे हना परमप्रभु यावे, इन परमप्रभु इन जोरी सत्रु नु लडाइ पा इन कली ग्रापाइक्चा कली गोपुकी नु लाइब’ देंचा माल्ब।<sup>5</sup> मिनु आन ठेयब मुरपुकीमी मुर आन कली ‘सु इन दातेमी नक खिं का सेल्शा, ओव्रतीक चाड ममानेशो बाक्त हना, मेको आ खिं लेश्शा, लचा माल्ब। मेको लडाइम बेक्त्त हना, आ खिंम अर्को मुर चाड सेल्शा ओव्रब, मेको मदुम्ब। ब्यवस्था १:१५; ब्यवस्था १६:१८<sup>6</sup> सुइ इन दातेमी अडगुर रू ख्रुम्शा, जचा मतशो बाक्तीनी हना, इन खिं लेश्शा लने। मेको लडाइम बेक्त्त हना, आ अडगुर रू अर्कोम जाइब, मेको मदुम्ब। ब्यवस्था २८:३०; लेवी १९:२४-२५<sup>7</sup> सुइ इन दातेमी मीश आल का पुंडशा ग्युंवे पचा चिक्शो बाक्तीनी हना, मेको खिं लेश्शा लचा माल्ब। मेको लडाइम बेक्त्त हना, मेको मीश आल अर्कोम लाइक्ब। मेको मदुम्ब’ देंचा माल्नीम। ब्यवस्था २४:५<sup>8</sup> मिनु मेको ठेयब मुरपुकीमी लेंशा मुर आन कली ‘इन दातेमी सुइम हिंब नु आ थुं लुक्च लाइब बाक्त्त हना, मेको आ खिं लेश्शा लचा माल्ब। मेकेर बाक्त्त हना, आ लोक्ब आन थुं यो ग्येत्थ लुक्च लपाइक्ब’ देंचा माल्नीम। न्यायाधीस ७:३<sup>9</sup> मिनु ठेयब मुरपुकीमी मो देंने थुम्मे नोले, मेकोपुकीमी लडाइ पाइब आन डोंइती गाक्चा कली, ठेयब मुरपुकी योव्रचा माल्नीमी।

### लडाइ दोपा पचा, दे शेंशो

10 मिनु गोपुकी सहर का कली लडाइ पथ, आ नेक्था जाक्दीन्नी नोले मेको आन कली ‘लडाइ मपय, गुइ पोक्कीन’ देंचा माल्नीनी।<sup>11</sup> मिनु मेकोपुकीमी ‘दुम्ब’ दे गुइ पोक्तेक्म हना, मेकेर डा मुर नेल्ले आन कली वाइलीम वाइल खोदेशो पा गेय पाइब सेल्चा माल्नीनी।<sup>12</sup> तन्न मेको सहर डा मुरपुकीमी इन देंशो मबित्थु लडाइ पचा दाक्ताक्म हना, मेको सहर कली पुम्दीन।<sup>13</sup> मिनु परमप्रभु यावे, इन परमप्रभुमी मेको सहर इन कली गोपु हना, गोपुकीमी मेकेर डा वोंइश मुर नेल्ल आन कली तरवारम साइक्चा माल्नीनी। ब्यवस्था ३:६-७; गन्ती ३१:७, १४-१८<sup>14</sup> तन्न मीश मुर, आलपुकी, बी ब्यफ, क्यारश भेडा नु सहरम बाक्शो मारेइ मारेइ इन के दुम्ब। मोपा परमप्रभु यावे, इन परमप्रभुमी गेशो ग्राशो थोव्रक तशा ग्येरसीन।<sup>15</sup> आंम नेक्था डा रागी रागी कली ममाइ, तन्न डोन डा सहर कली मोदेशो पचा माल्नीनी।<sup>16</sup> तन्न परमप्रभु यावे, इन परमप्रभुमी मेको जात जात डा मुर आन सहर इन कली गेशो सहरम मार मार सेस बाक्मे, मेको साइक्चा माल्नीनी। गन्ती २१:१-३; यहोसु १०:४०<sup>17</sup> परमप्रभु यावे, इन परमप्रभुमी अरेशो खोदेशो पा, हिंती, एमोरी, कनानी, परिज्जी, हिंवी नु यबुसी नेल्ल आन कली साइशा क्याम्चा माल्नीनी।<sup>18</sup> मो मपाइतीनी हना, मेको आन देवी देवता आन कली ग्रांरा दिचा डा पतीके शेंसीनीनी। मोपा परमप्रभु यावे, इन परमप्रभु कली मरिम्शो पा पाप पाइनीनी।

<sup>19</sup> मिनु गोपुकीमी सहर का कली लडाइ पा शुश नाक्त्त सम्म पुम्शा बाक्नीनु, मेको सहर डा रवापुकी मतिम्चा। मारदे हना गोपुकीमी नोले मेको आन फल जने चाप्नीनी। मार, मेको एर ओंथ डा रवापुकी मुर खोदेशो

बाक्नीमी डा? <sup>20</sup> तन्न इन तुइश्शो जचा फल मसिप्ब रवा तिम्ने चाप्नीनी। मिनु मग्रानी सम्म मेको रे सहर डा गारो डोइक्तीके सेल्ने चाप्नीनी” देंत।

### मतुइक्थु साइश्शो

21 मिनु परमप्रभु यावे, इन परमप्रभुमी इन कली गेशो इन के सेल्चा चिक्शो रागी डा दिंम मेर बेक्शो मुर का थिंत्तीनी नु मेको साइक्ब मुर मतुइसाक्व हना,<sup>2</sup> इन खाल्पा नु निसाफ पाइबपुकी लशा, मेको साइश्शो मुर तेको एर ओंथ डा सहर क्येडा नेक्था बाक्बा, पुक्चा माल्नीम।<sup>3</sup> मिनु मेको आ नेल्ल क्येडा नेक्था डा सहर आ खाल्पापुकीमी गेय मपपाइश्शो नु हलो मवाक्शो बी बाछा का चाक्चा माल्नीम।<sup>4</sup> मिनु मेको खाल्पापुकीमी मवाक्शो नु वांचेर मशोक्शो रू नु गेना हना यो ब्वाक्कु बाक्शो खोला आ नेक्था लाइश्शा, मेको बाछा आ शुर रोप्चा माल्नीम।<sup>5</sup> मिनु चढेब, लेवी आ तौपुकी मेको आ नेक्था जाक्चा माल्नीम। मारदे हना परमप्रभु यावे, इन परमप्रभु आ गेय पचा नु आ नेंमी आसीक गेचा कली योव्रतु। मिनु जिशो खेशो बाक्त्त हना, मेको आन देंशो पचा माल्नीम। ब्यवस्था १७:८-९<sup>6</sup> मिनु मेको साइश्शो मुर आ सहर नेक्था डा खाल्पापुकी मेको शुर रोप्शा साइश्शो खोला डा बी तार आन गुइ चिक्सीमल। मत्ती २७:२४<sup>7</sup> मिनु मेकोपुकीमी “गोपुकी आंइ गुइमी हुश ख्राक्श मपोक्शो। सुम पवा मेको यो मतुइश्शो।<sup>8</sup> मोपतीके परमप्रभु यावे इन श्येत रे प्रोंइशो इन मुर इस्राएली आंइ पाप क्याम्दीन। इन मुर इस्राएली आन दातेमी एको दोस मतशो मुर कली पोक्शो हुश ख्राक्श आ पाप गो आंइ दातेमी मलील” दे पुंडचा माल्नीम। मिनु मेको हुश ख्राक्श पोक्तीके पाप क्याम्सीब।<sup>9</sup> मोपा गोपुकीमी दोस मतशो मुर कली साइक्चा पुंडसीतीके इन दाते रे गुंडचा माल्नीनी। मारदे हना गोपुकीमी परमप्रभु यावे आ डोंइती ठीक पचा माल्नीनी। गन्ती ३५:३३

### लडाइम तशो मीश आल

10 मिनु गोपुकीमी लडाइम लनीनु, परमप्रभु यावे, इन परमप्रभुमी इन जोरी सत्रु आन कली इन गुइमी गेवानु,<sup>11</sup> मिनु फ्रेंशा लाइश्शो आन दातेमी दारशो मीश आल का ताइतीनी नु मेको नु ग्युंवे पचा दाक्ताक्नी हना,<sup>12</sup> मेको कली इन खिंम लतीन। मिनु मेको मीश आलम आ चां फ्रेंचा नु आ ग्ये खोइक्चा माल्ब।<sup>13</sup> मिनु नोले मेकोमी आ माइत वा पुइश्शा नक वा फेक्चा माल्ब। मेको इन खिंम बाक्शा, महिना का सम्म आ आंम आफ आन पर्वम रोंका पचा माल्ब। मिनु नोले मेको कली ग्युंवे पा मेको निक्शी मीश वोंइश दुम्ने चाप्नीम।<sup>14</sup> मिनु गे मेको कली तशा ब्रीताक्नी हना, मेको कली तिल्चा दाक्ताक्नी हना, मेको कली प्रोंइशा लचा गेन। गे मेको कली लेयचा मताइनीनी। मिनु वाइलीम कली खोदेशो पचा मताइनीनी। मारदे हना मेको इन मीश बाक्त्त।

### डोंइती जरमेशो तौ

15 मिनु वोंइश मुर का के मीश निक्शी बाक्शा, का आ दाक्शो नु का आ मदाक्शो मीश बाक्त्त हना, मेको निक्शीमी तौ का थिशा, आ मदाक्शो मीशेम चहिं डोंइती तौ थिशो बाक्त्त हना, उत्पत्ती २९:३०-३२<sup>16</sup> अडस पशोनु, आ दाक्शो मीश आ तौ, मदाक्शो आ तौ प्रोंइशा, डोंइती जरमेशो तौ सेल्ने मचाप्ब।<sup>17</sup> मेकोमी आ मदाक्शो मीश आ तौ “डोंइती जरमेशो तौ बाक्ब” दे आ शोंप डा भाग निक्शी गेचा माल्ब। मारदे हना मेको आ डोंइती डा सक्त्तम थिशो बाक्ब। डोंइती जरमेशो तौ आ अधिकार मेको केन बाक्ब। उत्पत्ती ४९:३

### हेंथे गाक्ब तौ कली सजाइ

18 मिनु मुर का हेंथे गाक्ब मटीब तौ का बाक्त्त हना, मेको आ आम आफ आस देंशो काइ मटीब बाक्त्त हना, तुप्शा, शेंशा यो मेको आस देंशो मटिप्टु हना, ब्यवस्था २७:१६; प्रस्थान २०:१२<sup>19</sup> मेको आ आंम आफोम मेको कली ग्याइश्शा, सहर डा खाल्पा आन डोंइती सहर डा लाप्चो आ नेक्था चाक्चा माल्नीम।<sup>20</sup> मिनु नोले मेको निक्शीमी सहर डा खाल्पा आन कली

“एको आंस तौ हेंथे गाक्ब नु मटीब बाक्ब। एकोमी आंस अरेशो मटीब। एको शुश जाइब नु रकसी शांबु तूब बाक्ब” देसल। <sup>21</sup> मिनु मेको सहर डा मुर नेल्लेमी मेको कली फुल्लु आप्शा साइक्वा माल्नीम। मिनु गेपुकीमी इन दाते डा मरिश्शो क्याम्चा माल्नीनी। मिनु इस्राएली नेल्लेमी मेको नेंशा, हिंचा माल्नीम।

मरिश्शो पाइब कली सजाइ

<sup>22</sup> मिनु मुर कामी बेक्वा माल्शो सजाइ तशा, गेपुकीमी मेको कली रवाम क्युक्तीनी हना, *गन्ती २५:४; यहोसु ८:२९; यहोसु १०:२६-२७; १सामुएल ३१:१०; २सामुएल ४:१२; २सामुएल २१:६, ९* <sup>23</sup> मेको आ लास आ दीसा सुनी सम्म रवाम क्युक्शा, वोइक्वा मदुम्ब। मेको नाक्तीन मेको कली थिम्चा माल्नीनी। मारदे हना क्युक्शा साइश्शो मुर परमप्रभुम पशो सराप चीले बाक्ब। परमप्रभु यावे, इन परमप्रभुमी गेशो रागी कली ग्रांग्रा दिशो मसेलीन। *यहोसु ८:१९; यहोसु १०:२७; यूहन्ना १९:३१; गलाती ३:१३*

वारच पतीके आ पर्वम अरेशो

**22** गे इन लोक्ब आन ब्यफ, भेडा हेंथे गाक्शो ताइक्तीनी हना, गे मेको कली इन लोक्ब आ बाक्तीकेम चाक्दीतीन। *प्रस्थान २३:४* <sup>2</sup> इन लोक्ब इन नेक्था मबाक्त हना, मेको आ होवप मतुइक्ताक्नी हना, गे मेको आन कली इन खिंचा चक्शा वोतीन। मिनु ममाल्मे सम्म इन खिंचा थुलीन। मिनु मेको मुर ब्रथ जाक्त हना, लेलीन। <sup>3</sup> मिनु जाम्शो गधा, वासी नु मारेइ मारेइ जाम्शो थित्तीनी हना, मेको मोदेंशो पचा माल्नीनी। वारच पचा मप्रोनीन।

<sup>4</sup> मिनु इन नेक्था डा मुर आ गधा, ब्यफ लांम थिश्शो ताइतीनी हना, मतशो खोदेंशो मपने। मेको कली पोक्वा कली वारच पतीन।

<sup>5</sup> मीश मुरुमी वॉइश मुर आन फेक्तीक वा मफेक्सीन। वॉइश मुरुमी मीश मुर आन फेक्तीक वा मफेक्सीन। सु सुमी मेको पाइबा, मेको परमप्रभु यावे, इन परमप्रभु कली ग्रांग्रा बाक्ब।

<sup>6</sup> मिनु गे, रवाम खपीम चिक्ब आ ग्योव्र का थित्तीनी हना, मेको ग्योव्रम ब्योफु कि चाइक्ब बाक्तेक्म हना, गे मेको चिक्बी नु आ चाइक्ब आन कली लाइक्वा मदुम्ब। <sup>7</sup> मेको चिक्ब कली बेरचा गेचा माल्नीनी। आ चाइक्ब आन कली लाइक्वने चाप्नीनी। मो पाइतीनी हना, गे रिश्शो पा बाक्चा ताइतीनी। मिनु इन ब्रॉइतीक नाक्त शुश दुम्नीम।

<sup>8</sup> गे नक खिंचे सेल्लिनी हना, खिंचे तार एर ओंथ नेल्ल थरपु हिरचा माल्नीनी। मारदे हना मुर का दोक्त हना, गे इन खिंचे तार दोस मतशो मुर कली साइक्तीक पाप राइब।

<sup>9</sup> गेपुकीमी इन अडगुर रूमी अरु वांचेर तेम्शा मशोक्कीन। मो पाइतीनी हना, इन शोक्शो निम्फा परमप्रभु कली मगारचा डा दुम्ब। *लेवी १९:१९*

<sup>10</sup> गे ब्यफ नु गधा कालेम वाक्चा मदुम्ब। <sup>11</sup> गे ऊन नु सुती ब्याइश्शा प्रोव्रशो फेक्वा मदुम्ब।

<sup>12</sup> गे इन फेक्तीक वा आ कुनामी झुम्का क्युक्शा सेलीन। *गन्ती १५:३८*

मीश मुर आन पर्वम अरेशो

<sup>13</sup> मिनु मुर कामी ग्युंभे पा आ मीश नु बाक्शा, नोले मदाक्ताक्व हना, <sup>14</sup> आ मीश प्रॉइचा कली आ मीश आ पर्वम “आं ग्युंभे पशो मीश आल नु बाक्डानु, कन्ने मबा” देत हना, <sup>15</sup> मेना मेको मीश आल आ आम आफोम आस तमी कन्ने दुम्तीक चिनु लाइश्शा, सहर डा ठेयब लाप्चोम बाक्ब खाल्पा आन बाक्तीके लचा माल्नीस। <sup>16</sup> मिनु मीश मुर आ आफोम मेको खाल्पा आन कली “गे आं तमी मेको मुर कली ग्युंभे पा गेता। मिनु मेकोमी मुल आं तमी कली मदाक्ब। <sup>17</sup> मिनु मेकोमी आं तमी नु ब्राचा कली ‘इ तमी कन्ने मबाक्शो बाक्त’ देत” देंशा, मेको इप्शो वा मेको खाल्पा आन डोंइती ब्रचा माल्ब। <sup>18</sup> मिनु सहर डा खाल्पापुकीमी मेको वॉइश मुर कली सजाइ गेचा माल्नीम। <sup>19</sup> मिनु मेको वॉइश मुरुम मेको मीश मुर आ आफ कली सहे का चांदी के शेकेल थाप्चा माल्ब। मारदे हना इस्राएल डा कन्ने मीश आल आ नें मरिश्शो सेल्चा माल्शो बाक्त। मिनु मेको आ मीश कली मबेक्म सम्म

प्रॉइने मचाप्ब। *शेकेल का ११.५ ग्राम चांदी के क्येट बाक्ब। ब्यवस्था २२:२९*

<sup>20</sup> तन्न मेको वॉइश मुर आ देंशो थमा बाक्त हना, मिनु कन्ने आ चिनु मेको मीश आल नु मबाक्शो बाक्त हना, <sup>21</sup> मेको मीश मुर कली आ आफ आ खिंचे डा लाप्चोम चाक्चा माल्नीम। मिनु मेको आ सहर डा वॉइश मुर नेल्लेमी मेको कली फुल्लु आप्शा साइक्वा माल्नीम। मारदे हना मेकोमी आ आफ आ खिंचे तेल्लेम पा इस्राएलम काइ मरिश्शो पाप्नु। मिनु मोपा गेपुकीमी इन दातेमी पशो मरिश्शो क्याम्चा माल्नीनी। *उत्पत्ती ३४:७*

वॉइश मुर आ पर्वम अरेशो

<sup>22</sup> मिनु वॉइश मुर का अरु आन मीश नु इप्शो थितेक्म हना, मेको निम्फा आस कली साइक्वा माल्नीम। मेको मीश मुर नु बाक्शो वॉइश मुर यो साइक्वा माल्नीम। मिनु मोपा गेपुकीमी इन इस्राएलम पशो मरिश्शो क्याम्चा माल्नीनी। *लेवी २०:१०; २सामुएल ११:४*

<sup>23</sup> मिनु ग्युंभे पचा कली पुंइशो मीश आल का कली सहरम अरु वॉइश मुर काम ग्युंभु हना, मेको नु इप्त हना, <sup>24</sup> मेको निम्फा आस कली सहर डा ठेयब लाप्चो रे ग्युंइशा, फुल्लु आप्शा साइक्वा माल्नीम। मेको मीश आल वारच पन, दे मग्रीतीके नु मेको वॉइश मुर आ इस्राएली लोक्ब आ मीश आल नु बाक्तीके, निम्फा आस कली साइक्वा माल्नीम। मिनु मोपा गेपुकीमी इन दातेमी पशो मरिश्शो क्याम्चा माल्नीनी।

<sup>25</sup> तन्न मेको वॉइश मुरुम मेको ग्युंभे पचा कली पुंइशो मीश आल कली रूम थित्तु हना, मेको कली ग्याइश्शा बिथोलो पाप्नु हना, मेको वॉइश मुर कली ला साइक्वा माल्ब। <sup>26</sup> मेको मीश आल कली मारेइ मपचा। मारदे हना मेकोमी साइक्वा पुंइसीचा डा पाप मपशो बाक्ब। मेको पाप कली साइश्शो खोदेंशो बाक्ब। <sup>27</sup> मेको पुंइशो मीश आल रूमी वाइ ब्रेश्शा ग्रीम माइ, तन्न सुइमी वारच मपामे माइ।

<sup>28</sup> मिनु वॉइश मुर काम ग्युंभे पचा कली मपुंइशो कन्ने मीश आल कली ग्याइश्शा, मेको नु बाक्शो, थित्तेक्म हना, *प्रस्थान २२:१५* <sup>29</sup> मेको नु बाक्शो वॉइश मुरुम मेको मीश आल आ आफ कली ५० शेकेल चांदी थाप्चा माल्ब। मिनु मेको वॉइश मुरुम मेको मीश आल नु बाक्तीके, आ मीश दुम्चा माल्ब। मेकोमी मेको कली मबेक्म सम्म प्रॉइने मचाप्ब। मारदे हना मेको मेको नु इप्त।

<sup>30</sup> मुरुमी आ आफ आ मीश कली चाक्ने मचाप्ब। आ आफ नु इप्शो मीश मुर नु आ तौ इप्चा मदुम्ब। *लेवी १८:८; २सामुएल १६:२२*

परमप्रभु आ अरेशो लीशो लोव्र

**23** मिनु वॉइश मुर कली आल मथीब सेल्चा कली आ चारतीक खोइश्शो बाक्त हना, परमप्रभु यावे आ गुम्तीकेमी ओव्रने मचाप्ब। *यसैया ५६:३-४; प्रेरित ८:२७* <sup>2</sup> तेल्लेम पा थिश्शो आल परमप्रभु यावे आ गुम्तीकेमी ओव्रने मचाप्ब। मेको आ १० पाला सम्म परमप्रभु यावे आ गुम्तीकेमी ओव्रचा मताइनीम। *एज्रा ९:-; एज्रा १०:-* <sup>3</sup> अम्मोनी नु मोआबी परमप्रभु यावे आ गुम्तीकेमी ओव्रने मचाप्नीम। मेको आ १० पाला सम्म परमप्रभु यावे आ गुम्तीकेमी ओव्रचा मताइनीम। *उत्पत्ती १९:३७-३८* <sup>4</sup> मारदे हना गे इजीप्तर रे ग्युंनीनु, मेकोपुकीमी जचा थोव्रक नु ब्वाक्कु कुरशा इन कली गुम्थ मपीम। मिनु मेकोपुकीमी यो इन कली सराप पचा, दे बेओर आ तौ बालाम मेसोपोटामीया आ नेक्था डा अराम-नाहाराइम डा पेथोर सहर रे क्येट गेशा ब्रेत्ताक्म। *गन्ती २२:५-६* <sup>5</sup> मो हना यो परमप्रभु यावे, इन परमप्रभुमी बालाम आ लोव्र मनेन। मेकोमी मेको सराप के आसीक सेल्लु। मारदे हना परमप्रभु यावे, इन परमप्रभुमी इन कली दाक्ताक्व। <sup>6</sup> मोपतीके गेपुकीमी गेनायो मोआबी नु अम्मोनी नु मगरीन, वारच मदुमीन। *एज्रा ९:१२* <sup>7</sup> मिनु गेपुकीमी एदोमी आन कली ग्रांग्रा मदित्वा। मारदे हना मेकोपुकी इन लोक्ब बाक्नीम। गेपुकीमी इजीप्ती आन कली ग्रांग्रा मदित्वा। मारदे हना गेपुकी मेको आन रागीम बाक्शो बाक्तीनी। <sup>8</sup> मेको आन युइ आन पाला रे परमप्रभु यावे आ गुम्तीकेमी ओव्रचा गेने चाप्नीनी।

## लडाइ पाइब आन बाक्तीके

9 मिनु गेपुकी लडाइ पथ लनीनु, इन ताम्बुम नेल्ल मरिश्शो रे डोन बाक्कीन। 10 मिनु इन दाते डा वॉइश मुर का नाक्दोम ग्रांघ्रा दितीके दुम्त हना, मेको बाक्तीके रे डोन लचा माल्ब। मिनु लडाइ पाइब आन बाक्तीके मओव्रचा। *लेवी १५:१६-१८* 11 मिनु मेको मुर नाक्नाक्दो चिक्सीशा, नां रिक्ची ना लेंशा आ बाक्तीके ओव्रचा ताइब।

12 मिनु गेपुकी लडाइ पाइब आन बाक्तीके मेर डाइक्तीके का सेल्चा माल्ब। 13 गेपुकी इन थोव्रक नु दोतीक का यो बाक्चा माल्ब। डाइक्चा कली लनीनु, पोव्रला दोशा, आगा डाइश्शा नोले ख्री सुश्शा वोतीन। 14 मारदे हना इन कली प्रॉइचा नु इन जोरी सत्रु आन कली इन कली जिम्मा गेचा कली परमप्रभु यावे, इन परमप्रभु इन लडाइ पाइब आन बाक्तीकेम बाक्ब। मेकोमी इन कली इन जोरी सत्रु रे प्रॉइचा नु मेको आन कली इन गुडम गेब। मोपतीके इन बाक्तीके रिश्शो, आ खोदेशो दुम्चा माल्ब। मिनु इन दातेमी ग्रांघ्रा दित्चा डा ताप्तु हना, इन बाक्तीक रे गाक्ब। *लेवी २६:१२*

## प्रोक्शो मुर आन पर्बम शेंशो

15 मिनु वाइल का आ होव्रप रे प्रोक्शा, इन बाक्तीकेम जाक्त हना, गेपुकीमी मेको कली लेंशा आ होव्रप कली गेचा मद्दुम्ब। 16 मेको इन दातेमी आ दाक्शो सहरमी बाक्चा गेने। गेपुकीमी मेको कली श्येत मगेने। *फिलेमोन १२-१६*

17 मिनु इस्राएली आन तमी कि तौ मन्दीर डा तेल्लेम पाइब दुम्चा मद्दुम्ब। *होसे ४:१४; १राजा १४:२४; २राजा २३:७* 18 वॉइश मुर, मीश मुर तेल्लेम पशो क्येत परमप्रभु यावे, इन परमप्रभु आ खिंम कबल खाप्चा कली चाक्चा मद्दुम्ब। मारदे हना मेको परमप्रभु यावे, इन परमप्रभु कली ग्रांघ्रा बाक्ब। *प्रकाश २२:१५*

19 मिनु गेपुकीमी क्येट, जचा थोव्रक नु मारेइ मारेइ जेर गेशो इन आंम लोक्ब रे मेको आ चाइक्ब मताक्चा। *प्रस्थान २२:२४; लेवी २५:३६* 20 अर्को रागी डा मुर आन कली चाइक्ब गेपाइक्ने चाप्नीनी। तन्न इन लोक्ब आन कली जेर गेशा आ चाइक्ब मथाप्पाइक्चा। मिनु मेको टीतीनी हना, परमप्रभु यावे, इन परमप्रभुमी गे लचा चिक्शो इन के सेल्चा चिक्शो रागीमी इन कली आसीक गेब।

21 मिनु गेपुकीमी परमप्रभु यावे, इन परमप्रभु नु कसम जनीनु, मेको खाप्चा, थाप्चा कली मरिम्दीन। मारदे हना परमप्रभु यावे, इन परमप्रभुमी कसम खाप्शो कोव्रचा दाक्ब। मो मपाइतीनी हना, गे पाप राइनीनी। *गन्ती ३०:३* 22 तन्न गेपुकी कसम मजाइतीनी हना, गे पाप मराइनीनी।

23 गेपुकीमी मार देंनी, मेको खाप्शा, पचा माल्नीनी। मारदे हना गे परमप्रभु यावे, इन परमप्रभु नु आंमान कसम जाइतीनी। 24 मिनु गेपुकी इन लोक्ब आ अडगुर रूमी ओव्रतीनी हना, मरूनी सम्म सेक्शा ब्वने चाप्नीनी। तन्न कुरशा लाइक्चा मताइनीनी। *मत्ती १२:१* 25 मिनु गेपुकी इन लोक्ब आ बाली मीशो रूमी ओव्रतीनी हना, जचा कली बाली सेक्चा ताइनीनी। तन्न रिक्चा चहिं मताइनीनी।

## ग्युंवे पा प्रॉइतीक आ पर्बम

24 मिनु मुर कामी ग्युंवे पा आ मीश नु बाक्शा, नोले ला मेको मरिश्शो बाक्त, दे तुइश्शा, मेको कली प्रॉइचा कली ब्राचा आ पर्बम ब्रेक्स गेशा, आ खिं रे सोइक्ताक्व हना, 2 मेको लशा, अर्को आ मीश दुम्मेनु, 3 मिनु मेको अर्को वॉइशेम यो मरिश्शो बाक्त, दे तुइश्शा, मेको कली मदाक्थु प्रॉइचा कली ब्राचा आ पर्बम ब्रेक्स गेशा, आ खिं रे सोइक्ताक्व हना, कि मेको मुर आंमा बेक्त हना, 4 मेको आ डोंइती प्रॉइशो वॉइशेम मेको मीश मुर अरु वॉइश नु बाक्शा ग्रांघ्रा दुश्शो नोले लेंशा चाक्ने मचाप्ब। मारदे हना मोदेशो पशो परमप्रभु यावे आ डोंइती ग्रांघ्रा बाक्ब। परमप्रभु यावे, इन परमप्रभुमी इन कली गेशो रागीमी पाप मचाक्कीन।

## रिश्शो दुम्चा कली अरेशो

5 वॉइश मुर कामी नक ग्युंवे पशो बाक्त हना, मेको लडाइम लचा मद्दुम्ब। अरु गेय यो "मेको कली पावो" दे अरेचा मद्दुम्ब। बर्स का सम्म मेको आ खिंम बाक्शा आ नक चाक्शो मीश नु ग्येरसीचा माल्ब। *ब्यवस्था २०:७*

6 सुइमी सुइ आन यात जाकटी मवोइक्चा। मारदे हना मेको मबाक्त हना दोपा शोब्ले सेल्ने चाप्नीमी?

7 सुइ मुरुमी इस्राएली लोक्ब कली ग्याइश्शा खुइ पा आ वाइल सेल्तु हना, लेयतु हना, मेको खुइ कली साइक्चा माल्नीम। मोपा गेपुकीमी इन दाते रे मरिश्शो नेल्ले गुंइचा माल्नीनी। *प्रस्थान २१:१६*

8 कोव्र मुतीक तशा होस पा बाक्कीन। चढेब, लेवीपुकीमी मेको आ पर्बम इन कली शेंशो खोदेशो पा नेल्ल पचा माल्नीनी। गो मेको आन कली अरेशो खोदेशो पा होस पा बाक्कीन। 9 गेपुकी इजीप्त रे गूशा पिनीनु, परमप्रभु यावे, इन परमप्रभुमी लांम मिरयाम कली पशो गेय मप्रेंदीन। *गन्ती १२:१०-१५*

10 मिनु गेपुकीमी इन वारच कली जेर गेनीनु, मेको के मार मार जाकटी पुंइथ आ खिं मओव्रडीन। 11 लाडगामीन रिम्दीन। मिनु जेर लाइबमी मेको जाकटी लाडगा गुंइशा गेब। 12 मेको मुर प्रुडग बाक्त हना, मेको आ जाकटी इन खिंम वॉइश्शा ब्रशा मडपीन। 13 नां रिक्ची ना मेको जाकटी लेश्शा गेने। मिनु मेकोमी मेको आ फेक्तीक फेक्शा इप्य लने चाप्ब। मिनु मेकोम इन कली आसीक गेब। मेको परमप्रभु यावे, इन परमप्रभु आ डोंइती ठीक पतीक बाक्ब। *प्रस्थान २२:२५; अय्युब २२:६; आमोस २:८; ब्यवस्था ६:२५*

14 गेपुकीमी इस्राएल डा कि इन सहरम बाक्शो अर्को रागी डा प्रुडग नु श्येत जाइब खेल्लाम इन कली गेय पाप्तु हना, आ ततीक ठीक पा गेने।

15 गेय पची नाक्ती नां मरिक्थु, आ तचा डा गाल्च गेचा माल्नीनी। मेको प्रुडग मुर आ गाल्च माल्ब बाक्ब। ठीक पा मगेतीनी हना, मेकोमी इन मरिश्शो पशो आ पर्बम परमप्रभु यावे नु लोव्र पाइब। मिनु गे पाप राइनीनी।

16 मुर आ तमी तौम साइक्चा डा पाप पाप्तु हना, आफ कली मसाइक्चा। मिनु आफोमी साइक्चा डा पाप पाप्तु हना, आ तमी तौ आन कली मसाइक्चा। सुमी पाप पाइबा, मेको ला साइक्चा पुंइसीब। *२राजा १४:६*

17 मिनु अर्को रागी डा मुर नु रोम रोइक्च आन कली निसाफ दूली मपने। मिनु वॉइश बेक्शो मीश मुर आन फेक्तीक वा जाकटी मवोतीन। 18 गेपुकी इजीप्त रागीम वाइलीम वाइल दुश्शो मिम्तीन। मिनु परमप्रभु यावे, इन परमप्रभुमी इन कली मेक रे प्रॉइशो मप्रेंदीन। मोपतीके गो इन कली मोदेशो पचा, दे अरेता। *ब्यवस्था ५:१५*

19 गेपुकीमी खेतम बाली नाली रिक्शा, मुठा का खेतम प्रेंताक्नी हना, लेश्शा ब्रथ मलने। मेको मुठा अर्को रागी डा मुर, रोम रोइक्च नु वॉइश बेक्शो मीश मुर आन कली बाक्ब। मो पाइतीनी हना, परमप्रभु यावे, इन परमप्रभुमी इन गेय नेल्लेमी इन कली आसीक गेब। *लेवी १९:९-१०*

20 गेपुकीमी तेल रवा आ फल थेप्तीनी हना, लेंशा लीशो फल मथेपीन। मेको लीशो फल अर्को रागी डा मुर, रोम रोइक्च नु वॉइश बेक्शो मीश मुर आन कली बाक्नीम। 21 गेपुकीमी इन अडगुर रू डा अडगुर सेक्तीनी हना, लेंशा लीशो फल मसेक्कीन। मेको लीशो फल अर्को रागी डा मुर, रोम रोइक्च नु वॉइश बेक्शो मीश मुर आन कली बाक्नीम। 22 गेपुकी इजीप्त रागीम वाइलीम वाइल दुश्शो, मिम्तीन। मोपतीके गो इन कली मोदेशो पचा, दे अरेता।

## तुप्तीक सजाइ

25 मिनु मोसामी "वॉइश मुर निक्शी जिम्ताक्स हना, मुददा कोम्मुइनीस। मिनु निसाफ पाइबमी का कली रिश्शो नु का कली मरिश्शो देंब। *प्रस्थान २३:७* 2 मिनु मरिश्शो पाइब का तुप्चा सजाइ पुंइसाक्व हना, मेको निसाफ पाइब आ डोंइतीन मेको कली खोल्ला, मेको आ पाप गिश खेयप तुप्चा डा बाक्मे, मिश खेयप मेको कली तुप्चा माल्नीम। 3 मेकोमी ४० खेयप सम्म तुप्चा दुम्ब। मेको क्येडा शुश तुप्पाइक्तु हना, इन लोक्ब इन डोंइती मुने दोक्ब। *२कोरिन्थी ११:२४*

बी ब्यफ आ पबर्म अरेशो

4 दांड पशो ब्यफ कली फुडला पाइक्वा मदुम्ब। *१कोरिन्थी ९:९; १तिमोथी ५:१८*

खिं डा शॉप आ पबर्म अरेशो

5 मिनु लोकब निक्शी काथा बाक्ताक्स हना, का तौ मथिथु, बेक्ट हना, मेको आ मीशम अर्को खिं डा मुर नु ग्युंवे पचा मदुम्ब। बेक्शो मुर आ लोकबमी मेको मीश मुर कली ग्युंवे पचा माल्ब। 6 मिनु मेको आ डॉइती जरमेशो तौ कली मेको बेक्शो आ नें वोइक्वा माल्नीम। मिनु मोपा आ नें इस्राएल रे मक्याम्सीब। 7 तन्न आ रिउम आ भोग्यु वोइक्वा मबिस्साक्व हना, मेको मीश मुरुमी सहर डा ठेयब लाप्चोम बाक्ब खाल्या आन नेक्था लशा 'आं रिउम आ लोकब आ नें इस्राएलम वोइक्ने मबिस्से। मेकोमी आ पचा माल्शो गेय मपावो' देंचा माल्ब। 8 मिनु मेको सहर डा खाल्यापुकीमी मेको कली ब्रेश्शा, मेको नु लोव्र पचा माल्नीम। मिनु मेकोमी 'गो एको कली मचाक्नुड' दे आ थुं मलेत्ताक्व हना, 9 आ भोग्युम सहर डा खाल्या आन डॉइती मेको आ जुत्ता प्रुइश्शा आ कुलम तोक्चा माल्ब। मिनु मेको मीश मुरुम 'सुम आ लोकब आ खिं डा मुर सेल्चा मदाक्वा, मेको कली ओं पाइक्वा माल्ब' दे लोव्र पचा माल्ब। 10 मिनु इस्राएलमी मेको आ खिं डा मुर आन कली 'जुत्ता प्रुइसीशो मुर' दे नें वोइक्वा माल्नीम।

जीब आस कली हेंथे वारच पशो

11 मिनु वॉइश मुर निक्शी राम्शी पाम्सेनु, का आ मीश जाक्शा, आ वॉइश कली प्रॉइचा, दे अर्को आ खुइश्शो थोव्रक ग्याइक्ताक्व हना, 12 गोपुकीमी मेको कली शिशो मपाइक्व, आ गुइ खोइक्वा माल्ब।

पुक्तीक नु नाक्तीकेम जोल मपने

13 मिनु इन पुक्तीक नाक्तीक ठेयब नु आइक्व बाक्चा मदुम्ब। *लेवी १९:३५-३६; इजीकीएल ४५:१०; आमोस ८:५; मीका ६:११* 14 इन खिंमी यो निक्शी खाल डा पुक्तीके एफाह मदुम्ब। *एफाह का २२ लिटर रिक्ब पुक्तीके बाक्ब।* 15 तन्न इन खिंमी ठीक नाक्तीक नु ठीक पुक्तीक बाक्चा माल्नीम। मो पाइतीनी हना, परमप्रभु यावे, इन परमप्रभुमी गेशो रागीम शुश नाक्त ब्रॉइनीनी। 16 मारदे हना मरिश्शो पुक्बपुकी, परमप्रभु यावे, इन परमप्रभु आ डॉइती ग्रांया दित्वा डा बाक्नीम।

अमालेकी आन नें क्याम्दीन

17 मिनु गोपुकी इजीप्तर रे पिनीनु, अमालेक डा मुरपुकीमी इन कली लांम मार पामे मेको मप्रेंदीन। *प्रस्थान १७:८-१६* 18 मेकोपुकीमी इन कली लडाइ तोशा, गोपुकी लांम गाक्शो रे दनीनु नोले गाक्ब नेल्ल आन कली साइश्शो बाक्तेक्म। मेकोपुकी परमप्रभु क्येडा महिंम। 19 मोपतीके परमप्रभु यावे, इन परमप्रभुमी इन कली योव्रशा गेशो इन के सेल्चा चिक्शो रागीम इन जोरी सत्रु नु लडाइ पशा, नाइक्साक्नी हना, अमालेकी आन नें रागी रे क्याम्चा माल्नीनी। मेको मप्रेंदीन" देंत। *१सामुएल १५:२-३*

डॉइती मीशो अन्न चढेतीक

26 मिनु मोसामी "परमप्रभु यावे, इन परमप्रभुमी इन कली गेशो रागी जाक्दीश्शा, इन के सेल्शा, मेक बाक्नीनु, 2 परमप्रभु यावे, इन परमप्रभुमी इन कली गेशो रागी डा डॉइती मीशो मारेइ मारेइ डालो काम कुर पा परमप्रभु यावे, इन परमप्रभु आ योव्रशो बाक्तीकेम लतीन। *प्रस्थान २३:१९; लेवी २:१४* 3 मिनु गे मेना गेय पाइब चढेब आन बाक्तीक लचा माल्नीनी। मिनु मेको कली गो परमप्रभु यावे, इन परमप्रभु आ डॉइती 'परमप्रभु यावेमी आंइ किकी पिपी नु कसम जशा गेनुड, देंशो रागीम गो मुलाक्ती जाक्ती' देंचा माल्नीनी। 4 मिनु मेको चढेबमी मेको डालो इन गुइ रे ताक्शा, परमप्रभु यावे, इन परमप्रभु कली चढेतीक आ डॉइती वोइक्वा

माल्ब। 5 मिनु गोपुकीमी परमप्रभु यावे, इन परमप्रभु आ डॉइती 'आं किकी पिपी हिरब अरामी बाक्तेक्म। मेको इजीप्तर रागीम अर्को रागी डा मुर दुश्शा बाक्शो बाक्त। डॉइती मेको शुश मुर मबाक्म। नोले शोशा बोशा शुश नु बोल्पो ठेयब रागी डा मुर दुम्तेक्म। *ब्यवस्था ६:२०-२५; यहोसु २४:२-१३; भजन संग्रह ७८:-; भजन संग्रह १०५:-; भजन संग्रह १३६:-* 6 मिनु इजीप्तीपुकीम आंइ कली मरिश्शो पा दिष्शा, आंइ कली शुश गेय पपाइक्तेक्म। 7 मिनु गोपुकीमी परमप्रभु यावे, इं किकी पिप आन परमप्रभु कली पुंइतक। मिनु मेकोमी आंइ पुंइशो नेंशा, आंइ श्येत तशा नु दोपा आंइ कली दिष्शो बाक्मा, मेको ताप्तु। 8 मिनु परमप्रभु यावेमी शुश सक्ति पाइश्शो ठेयब बोल पतीकेमी हिंचा डा चिन्ड नु छक लाक्वा डा गेय कौइशा, आंइ कली इजीप्तर रे गुंइशा एक चाक्तु। 9 मेकोमी एकेर चाक्शा, एको रागी आंइ कली गेप्तु। मिनु एको रागीम दूध नु खुदो शुश बाक्त। 10 मिनु परमप्रभु यावे, आं कली गेशो रागी डा डॉइती डा मीशो मारेइ मारेइ इन बाक्तीक चाक्ता' देंचा माल्नीनी। मिनु मेको नेल्ल परमप्रभु यावे, इन परमप्रभु आ डॉइती वोइश्शा, मेको परमप्रभु यावे, इन परमप्रभु आ डॉइती बाप्शा ठेयब सेल्चा माल्नीनी। 11 मिनु गे परमप्रभु यावे, इन परमप्रभुमी इन कली नु इन खिं डा मुर आन कली शुश गेशो तशा, लेवीपुकी नु गोपुकी नु बाक्ब अर्को रागी डा मुरपुकी ग्येरसीचा माल्नीमी। *ब्यवस्था १६:११-१४*

प्रुडग आन कली गेतीक

12 मिनु गोपुकीमी बर्स सां सांमी इन बाली नाली डा मारेइ मारेइ रे इन सहरम १० भाग डा भाग का तिल्शा वोइक्वा माल्नीनी। मेको इन सहर डा लेवी आ थर डा मुर, अर्को रागी डा मुर, रोम रोइक्व नु वॉइश बेक्शो मीश मुर आन कली गारचा डा जचा थोव्रक बाक्ब। *ब्यवस्था १४:२७-२९* 13 मिनु गोपुकीमी परमप्रभु यावे, इन परमप्रभु आ डॉइती 'गो इन भाग आं खिं रे तिल्शा, इन शेंशो खोदेंशो पा लेवी आ थर डा मुर, अर्को रागी डा मुर, रोम रोइक्व नु वॉइश बेक्शो मीश मुर आन कली गेता। गो इन शेंशो नेल्ल पाता। गो मेको काइ मप्रेंदु' देंचा माल्नीनी। 14 रोंका पडानु, मेको रे मारेइ मजड। गो ग्रांया दिशो बाक्डानु, मेको रे मारेइ मगुंइडु। मिनु बेक्शो मुर आन कली यो मेकेर रे मारेइ मगेशो बाक्ती। गो परमप्रभु यावे, आं परमप्रभु आ देंशो टिशा, इन अरेशो नेल्ल खाप्शो बाक्ती। *गन्ती १९:१४-१५; इजीकीएल २४:१७, २२; होसे ९:४* 15 इन स्वर्ग डा बाक्तीके रे कोव्रशा, इन मुर, इस्राएली, आंइ कली आसीक गेने। मिनु आंइ किकी पिपी नु कसम जशा गेशो शुश दूध नु खुदो बाक्शो रागी कली यो आसीक गेने" दे परमप्रभु कली लोव्र पचा माल्ब।

परमप्रभु आ कबल डा लोव्र

16 मिनु मोसामी "मुलाक्त परमप्रभु यावे, इन परमप्रभुमी इन कली मेको फुल्लुम मुशा ब्रेक्शो लोव्र नु निसाफ पतीक लोव्र पचा माल्नीनी। गोपुकीमी मेको कली इन थुंम वोइश्शा, इन थुं नु सोक्त नेल्लेमी टिने। 17 गोपुकीमी मुलाक्ती परमप्रभु यावे कली 'गे आंइ परमप्रभु बाक्नीनी। गो इन लां खोइक्नीकी। मिनु इन फुल्लुम मुशा ब्रेक्शो लोव्र, इन शेंशो नु इन निसाफ पतीके लोव्र पाइनीकी नु इन देंशो टीनीकी' दे परमप्रभु कली लोव्र पाइतीनी। 18 मिनु मुलाक्ती परमप्रभु यावेमी इन कली 'गो इन कली आं दाक्शो मुर सेल्ता। आं शेंशो नेल्ल टिचा माल्नीनी। 19 गो आं सेल्शो रागी रागी आन दातेमी इन कली नेल्ल क्येडा ठेयब सेल्नुड। मान पाइक्वा पुंइसीशा, इन नें ठेयब सेल्चा नु शुश दारशो सेल्नुड। मिनु परमप्रभु यावे, इन परमप्रभु आ मुरपुकी दुम्चा माल्नीनी' दे परमप्रभु यावेमी इन कली देंशो बाक्त" देंत। *ब्यवस्था १८:१*

मिम्तीक फुल्लु थारशो

27 मिनु मोसा नु इस्राएल डा खाल्यापुकीमी मुर आन कली "मुलाक्ती इन कली देंशो शेंशो लोव्र नेल्ल टिशा पने। 2 परमप्रभु यावे, इन परमप्रभुमी इन कली गेशो यर्दन आइक्वी हांबु डा रागीमी शोक्सीनी नोले डा नाक्तीमी ठेयब फुल्लु थारशा, बुलु ब्रुइक्तीन। 3 मिनु



शोक्सीनी नोले गेपुकीमी मेको अरेशो लोव्र नेल्ले मेको फुल्लु तार ब्रेक्चा माल्नीनी। मो पाइतीनी हना, परमप्रभु यावे, इन परमप्रभुमी इन कली गेशो रागी ओव्रचा ताइतीनी। परमप्रभु यावे, इन किकी पिपी आन परमप्रभुमी इन कली दैशो खोदैशो पा इन कली दूध नु खुदो शुश बाक्शो रागी गेब। 4 यर्दन आइक्ची हांबु जाक्दीन्नी नोले गो इन कली अरेशो, मेको फुल्लुपुकी एबाल डांडाम थारशा बुलु ब्रुइक्तीनी। 5 मिनु मेकेर रे गेपुकीमी परमप्रभु यावे, इन परमप्रभु कली फुल्लु के चढेतीक का सेलीन। मेको सेल्नीनु, मेको फुल्लु आन कली फलम के यामी काइ मथिचा। प्रस्थान २०:२५ 6 गेपुकीमी परमप्रभु यावे, इन परमप्रभु कली चढेतीक सेल्नीनु, मप्रोल्शो फुल्लु के सेलीन। मिनु मेको तारी परमप्रभु यावे, इन परमप्रभु कली चोशा चढेतीक मेकेर चढेचा माल्नीनी। 7 मिनु गेपुकीमी दुशा बाक्चा आ पर्वम चढेतीक चढेचा माल्नीनी। मिनु गेपुकीमी परमप्रभु यावे, इन परमप्रभु आ डांडीती मेको जशा ब्वशा ग्येरसीने। ब्यवस्था १२:७ 8 मिनु मेको फुल्लु आन तारी एको अरेशो लोव्र नेल्ल मुशा, रिम्शो पा ब्रेक्चा माल्नीनी” दैत।

परमप्रभुम मुर नु पशो कबल

9 मिनु मोसा नु चढेब, लेवीपुकीमी इस्त्राएली नेल्ल आन कली “इस्त्राएलीपुकी ब्यालेइ पा, नेनीने। मुलाक्ती गेपुकी परमप्रभु यावे, इन परमप्रभु आ मुर दुम्नीनी। ब्यवस्था २६:१८-१९ 10 मोपतीके परमप्रभु यावे, इन परमप्रभु आ दैशो टिने। मुलाक्ती गो इन कली माइश्शो आ शेंशो लोव्र नु आ फुल्लुम मुशा ब्रेक्शो लोव्र नेल्ल टिने” दैतेक्म।

सराप नु आसीक राइब

11 मिनु मेको नाक्तीम मोसामी मुर आन कली 12 “गेपुकी यर्दन आइक्ची हांबु शोक्सीने धुम्नी नोले, सु सुमी मुर आन कली आसीक गेचा कली गेरीजीम माइश्शो डांडाम राप्शा बाक्चा माल्नीम दैशा हना, सिमियोन, लेवी, यहूदा, इस्साकार, योसेफ नु बेन्यामीन राप्शा बाक्चा माल्नीम। ब्यवस्था ११:२९ 13 मिनु सु सुमी मुर आन कली सराप पचा कली एबाल माइश्शो डांडाम राप्शा बाक्चा माल्नीम दैशा हना, रूबेन, गाद, आशेर, जबूलून, दान नु नाफ्ताली राप्शा बाक्चा माल्नीम। 14 मिनु लेवीपुकीमी नेल्ल इस्त्राएल डा मुर आन कली ठेयब सेंदामी लोव्र पचा माल्नीम” दैत।

सराप रचा आ पर्वम शेंशो

15 मिनु मेकोपुकीमी “सु मुरुमी मुशा, यपाइश्शा मूर्ति सेल्ब, मेको परमप्रभु यावे कली ग्रांरा दित्चा डा बाक्ब। मिनु मेको जोक्ब मुरुमी आ सेल्शो मूर्ति कली ख्रुइश्शोमी वोइक्ब, मेको मुर सराप राइब” दैतेक्म। मिनु मुर नेल्लेमी “आमेन, मोदैशो दुम्ल” दैचा माल्नीम। प्रस्थान २०:४,२३ 16 मिनु “सु मुरुमी आंम आम आफ कली मान मपाइब, मेको मुर सराप राइब” दैतेक्म। मिनु मुर नेल्लेमी “आमेन, मोदैशो दुम्ल” दैचा माल्नीम। प्रस्थान २१:१७ 17 मिनु “सु मुरुमी आ नेक्था डा मुर आ रू डा सांद याक्ब, मेको मुर सराप राइब” दैतेक्म। मिनु मुर नेल्लेमी “आमेन, मोदैशो दुम्ल” दैचा माल्नीम। ब्यवस्था १९:१४ 18 मिनु “सु मुरुमी मिक्च मताइब कली हेंथे लां कोंइब, मेको मुर सराप राइब” दैतेक्म। मिनु मुर नेल्लेमी “आमेन, मोदैशो दुम्ल” दैचा माल्नीम। लेवी १९:१४ 19 मिनु “सु मुरुमी अर्को रागी डा मुर, रोम रोइक्च नु वॉइश बेक्शो मीश मुर आन कली ठीक निसाफ मपाइबा, मेको मुर सराप राइब” दैतेक्म। मिनु मुर नेल्लेमी “आमेन, मोदैशो दुम्ल” दैचा माल्नीम। प्रस्थान २२:२०-२१ 20 मिनु “सु मुर आ आफ आ मीश नु इप्बा, मेको मुर सराप राइब। मारदे हना मेकोमी आ आफ कली मुने तोक्ब” दैतेक्म। मिनु मुर नेल्लेमी “आमेन, मोदैशो दुम्ल” दैचा माल्नीम। लेवी १८:८ 21 मिनु “सु मुरुमी बी ब्यफ, क्यारश भेडा नु इब, मेको मुर सराप राइब” दैतेक्म। मिनु मुर नेल्लेमी “आमेन, मोदैशो दुम्ल” दैचा माल्नीम। लेवी २२:१८ 22 मिनु “सु मुर आ समी नु इब, मेको आ आफ आ तमी बाक्त हना यो आ आम आ तमी बाक्त हना यो, सराप राइब” दैतेक्म। मिनु मुर नेल्लेमी “आमेन, मोदैशो दुम्ल” दैचा माल्नीम। लेवी १८:९,११ 23 मिनु “सु मुर आ शिमी नु इब, मेको मुर सराप राइब” दैतेक्म। मिनु मुर

नेल्लेमी “आमेन, मोदैशो दुम्ल” दैचा माल्नीम। लेवी १८:१७ 24 मिनु “सु मुरुमी बाप्शा, मुर कली साइक्ब, मेको मुर सराप राइब” दैतेक्म। मिनु मुर नेल्लेमी “आमेन, मोदैशो दुम्ल” दैचा माल्नीम। प्रस्थान २१:१२; गन्ती ३५:२० 25 मिनु “सु मुरुमी क्येट ताक्शा, दोस मतशो मुर कली साइक्ब, मेको मुर सराप राइब” दैतेक्म। मिनु मुर नेल्लेमी “आमेन, मोदैशो दुम्ल” दैचा माल्नीम। प्रस्थान २३:८ 26 मिनु “सु मुरुमी एको अरेशो लोव्र नेल्ल खाप्शा मपाइब, मेको मुर सराप राइब” दैतेक्म। मिनु मुर नेल्लेमी “आमेन, मोदैशो दुम्ल” दैचा माल्नीम। गलाती ३:१०

टीबपुकी आसीक राइनीम

28 मिनु मोसामी “मुलाक्त गो इन कली माइश्शो परमप्रभु यावे, इन परमप्रभु आ दैशो नेल्ल होस पा टिशा, आ शेंशो पाइतीनी हना, परमप्रभु यावे, इन परमप्रभुमी इन कली नेल्ल रागी रागी डा मुर आन क्येडा ठेयब सेल्ब। ब्यवस्था २६:१९ 2 गे परमप्रभु यावे, इन परमप्रभु आ दैशो टिशा पाइतीनी हना, गेपुकी एको आसीक नेल्ल राइनीनी। 3 गेपुकी सहरम बाक्शा, आसीक राइनीनी। मिनु रूम बाक्शा, आसीक राइनीनी। उत्पत्ती ४९:२५-२६

4 इन आलपुकी, इन बाली नाली, इन बी ब्यफ नु इन क्यारश भेडा नु गोठ नेल्ल आसीक राइनीमी सोशा बोशा लाइनीमी। 5 इन फस वोइक्तीक डालो नु फस नित्तीक बोस आसीक राइनीमी। 6 गेपुकी खिंडगा ओव्रनीनु, आसीक राइनीनी। मिनु लाडगा गूनीनु, आसीक राइनीनी। भजन संग्रह १२१:८ 7 मिनु परमप्रभु यावेमी इन कली लडाइ पाइब इन जोरी सत्रु आन कली इन डांडीती ब्रुपाइक्ब। मेको लां कामी इन कली लडाइ पथ जाक्नीम। मिनु ब्रुशा, शाउ शिउ ब्रशा ७ ओटा लां रे प्रोक्नीम। 8 मिनु परमप्रभु यावेमी इन भकारीमी आसीक गेब। मिनु गे मार मार पाइनीनी रिम्शो दुम्चा कली आसीक गेब। मिनु परमप्रभु यावे, इन परमप्रभुमी इन कली गेशो रागीमी इन कली आसीक गेब। लेवी २५:२१ 9 मिनु गेपुकीमी परमप्रभु यावे, इन परमप्रभु आ शेंशो लोव्र टिशा पाइतीनी हना नु आ लांमी गाक्तीनी हना, आ कसम जशो खोदैशो पा इन कली आंम मुर सेल्शा वोइक्ब। प्रस्थान १९:५-६ 10 मिनु ‘गेपुकी परमप्रभु यावे आ नें पाइश्शो मुर बाक्नीनी’ दे जात जात डा मुर नेल्लेम तुइश्शा, इन कली तशा, शुश हिंनीम। 11 मिनु परमप्रभु यावेमी इन किकी पिपी आन कली गेनुडमी दैशो रागीमी गेपुकी शुश आल थीब दुम्नीनी। इन बी ब्यफ, क्यारश भेडा आन चाइक्ब शुश दुम्नीम, इन बाली नाली नेल्ल सोशा बोशा लाइनीनी। इन रागी रिम्शो दुम्ब।

12 मिनु परमप्रभु यावेमी नेल्ल सरीड डा शॉप वोइक्तीक रोक्शा, इन रू कली माल्ची ना रेउ यिपाइक्ब। मिनु गे मार मार पाइनीनी, मेको कली आसीक गेब। मिनु गेपुकीमी शुश रागी रागी डा मुर आन कली जेर गेनीनी, गे चहिं सुइ आन जेर मताक्नीनी। ब्यवस्था १५:६ 13 मिनु मुलाक्ती इन कली माइश्शो परमप्रभु यावे, इन परमप्रभु आ शेंशो होस पा टिशा पाइतीनी हना, परमप्रभु यावेमी इन कली पिया खोदैशो पा, मुर आन कली अरेब सेल्ब। मीलु खोदैशो पा अरु आन कली खोइक्ब ममाइ। मिनु गे शुश ठेयब दुम्शा लाइक्नीनी। 14 मिनु आं दैशो लोव्र नेल्ल पाइतीनी हना, आइदी आइक्था पा अरु देवी देवता आन हेंथे लां मलाइतीनी हना, मोदैशो आसीक राइब दुम्नीनी। ब्यवस्था ५:२९-३२

मटीबपुकी सराप राइनीम

15 मिनु गे परमप्रभु यावे, इन परमप्रभु आ दैशो मटीब दुम्नीनी हना, मुलाक्ती गो इन कली माइश्शो आ शेंशो नु आ फुल्लुम मुशा ब्रेक्शो लोव्र नेल्ल होस पा मपाइतीनी हना, एको सराप चीले नेल्ल राइनीनी। मिनु गेपुकी सराप रशो मुर दुम्नीनी। दानीएल ९:११ 16 गेपुकी सहरम बाक्शा, सराप राइनीनी। मिनु रूम बाक्शा, सराप राइनीनी। 17 इन फस वोइक्तीस डालो नु इन फस नित्तीक बोस सराप राइनीम। 18 इन आल, इन बाली नाली, इन बी ब्यफ, इन क्यारश भेडा गोठ सराप राइनीम। 19 गेपुकी खिंडगा ओव्रनीनु, सराप राइनीनी, मिनु लाडगा गूनीनु, सराप राइनीनी।

20 मिनु परमप्रभु यावे कली टिचा प्रौडशा बाक्तीनी हना, इन मार मार पतीकेमी इन थुं ग्यशा सराप राइनीनी। इन मरिश्शो पतीके गे रीब पा क्याम्चा पुंडसीनीनी। 21 मिनु परमप्रभु यावेमी इन कली गेशो नु इन के सेल्शो रागी रे गुंडचा सम्म इन कली मुर बेक्तीक रोइ पपाइक्व। 22 मिनु परमप्रभु यावेमी इन कली लां सोक्तीक रोइ, जोरो, शुश गार मुइक्तीके, रेउ मयितिके, नेल्ल बाली नाली सोवतीके बुंखी डाइक्तीके रोइ सोइक्व। 23 मिनु इन तारी बाक्शो सरीड कांसा खोदेंशो दुम्ब। मिनु इन रू डा खप फलम खोदेंशो दुम्ब। *ब्यवस्था ११:१७* 24 मिनु परमप्रभु यावेमी इन रागीम रेउ कली फुरक सेल्ब। मिनु गेपुकी खतम मदुम्नी सम्म सरीड रे मोदेंशो पा फुरक इन तारी यिना यिन बाक्ब। 25 मिनु परमप्रभु यावेमी इन कली इन जोरी सत्रु आन डॉइती ब्रुपाइक्व। गेपुकी मेकोपुकी नु लडाइ पथ लां कामी लाइनीनी, मिनु ब्रुशा शाउ शिउ ब्रशा ७ ओटा लां रे प्रोक्चा माल्नीनी। मिनु राज्य राज्य डा मुर नेल्ल आन डॉइती ग्रांरा दिशो दुम्नीनी। 26 मिनु गेपुकी बेक्नीनु, चिक्बपुकी नु ब्वाकी डा जन्तुपुकीमी इन श्ये ब्वाइनीम। मिनु मेको आन कली खेरब 'हा हाइ' दे ग्रीब सुइ मबाक्नीम। 27 मिनु परमप्रभु यावेमी इन कली इजीप्ट रागी डा कान मुपाइक्व, साने मचाप्चा डा पा गार नु लुतो पपाइक्व। *प्रस्थान ९:९*

28 मिनु परमप्रभु यावेमी इन थुं ग्यपाइक्व, मिक्च मतपाइक्व नु निप्स ग्यशो दुम्पाइक्व। 29 मिनु मिक्च मताइबमी एर ओथ सुल्ना सुल्न गाक्शो खोदेंशो पा गेपुकी नाक्तीन सुल्शा गाक्नीनी। मिनु गेपुकीमी मार पाइतीनी हना यो, रिश्शो मदुम्नीनी। मिनु गेपुकी नाक्त् कित कित तुप्चा नु रोइक्चा पुंडसीशा बाक्नीनी। सुइमी इन कली वारच मपाइब। *यसैया ५९:१०* 30 गेपुकी मीश आल का कली पुंडनीनी, तन्न अरु वोंडश मुरुम मेको नु इप्ब। मिनु खिं का सेल्नीनी, तन्न आंमान बाक्चा मताइनीनी। मिनु गेपुकीम अडगुर रू का खुम्नीनी, तन्न आंमान ब्बचा मताइनीनी। 31 मिनु इन डॉइती इन बी ब्यफ क्योरनीम, तन्न आ श्ये ब्बचा मताइनीनी। इन गधा इन कली तचा डा पा रोइक्नीम, मलेल्नीम। इन क्यारश भेडा इन जोरी सत्रु आन कली गेनीम। मिनु इन कली वारच पाइब सुइ मबाक्नीम।

32 इन तमी तौपुकी अर्को रागी डा मुर आन कली गेनीम। मिनु गे मेको तशा, नाक्त् कित कित मेको आन लां कोवशा बाक्नीनी, तन्न मारेइ पने मचाप्नीनी। 33 इन मतुइश्शो मुरपुकीमी इन रू डा खुम्शो जाइनीम। मिनु गेपुकी गेना हना यो श्येत जचा नु दिप्चा पुंडसीनीनी। *न्यायाधीस ६:३* 34 मिनु इन मिक्चीम तशोपुकीम इन निप्स ग्यपाइक्व। 35 मिनु परमप्रभु यावेमी इन पोक्च नु खोइलीम गेनायो मसाब गार मुपाइक्व। मिनु मोदेंशो गारम इन पिया रे दिम्ला सम्म रं नेल्ल सुम्पाइक्व। मिनु सुइम इन कली सापाइक्वने मचाप्ब।

36 मिनु परमप्रभु यावेमी इन कली नु इन योवशो पिप कली, गेपुकी नु इन किकी पिपी यो मतुइश्शो जात डा मुर आन रागी कोंइब। मिनु गेपुकीमी मेकेर रे शी नु फुल्लु के देवी देवता आन कली गेय पाइनीनी। *ब्यवस्था ४:२८* 37 मिनु परमप्रभु यावेमी इन कली खेरशा जात जात डा मुर आन दातेमी इन पर्बम शुक्शी पा, देंतीके सेल्शा, शुक्शी पचा पुंडसीनीनी। *१राजा ९:७; येरमीया २४:९*

38 गेपुकीमी शुश वांचेर शोक्नीनी, तन्न इक्का ला रुप्नीनी। मारदे हना मालेपुकीमी मेको नेल्ल नेक्नीम। *मीका ६:१५* 39 गेपुकीमी अडगुर रू खुम्नीनी, तन्न बुस्स जोल्शा अडगुर खुप्चा नु अडगुर शांबु तूचा मताइनीनी। 40 गे इन बाक्तीक तेइ तेइ तेल रवा बाक्नीम, तन्न खेक्चा कली तेल मताइनीनी। मारदे हना मेको फल हेम्शा दोक्नीम। 41 गे तमी तौ थीनीनी, तन्न मेकोपुकी इन के मदुम्नीम। मेकोपुकी ग्याइश्शा अर्को रागी लाइक्चा पुंडसीनीम। 42 इन रवा नु बाली नाली नेल्ले मालेपुकीमी खतम सेल्नीम। 43 मिनु गेपुकी नु बाक्ब अर्को रागी डा मुर क्येट थीब दुम्शा, डॉइती क्येडा ठेयब दुम्नीम, तन्न गेपुकी दोक्ना दोक्न लाइनीनी। 44 मेकोपुकीमी इन कली जेर गेनीम। तन्न गेपुकीमी मेको आन कली जेर गेने मचाप्नीनी। मेकोपुकी पिया खोदेंशो दुम्नीम, गेपुकी चहिं मीलु खोदेंशो दुम्नीनी। *ब्यवस्था २८:१२-१३*

45 मिनु मेको सराप चीले नेल्ल गे मबेक्नी सम्म राइनीनी। मारदे हना गेपुकीमी परमप्रभु यावे, इन परमप्रभु आ शेंशो लोव नु आ फुल्लुम मुशा

ब्रेक्शो लोव नेल्ल होस पा मटिनी। 46 मिनु मेको सराप इन कली नु इन चच युइ आन कली छक लाक्चा डा नु हिंचा डा बाक्नीमी।

47 मारदे हना गेपुकी मारेइ मारेइमी गाप्शो बाक्नीनु, गे परमप्रभु यावे, इन परमप्रभु कली ग्येरसीशा नेल्ल थुंम टिशा गेय मपनी। 48 मोपतीके परमप्रभु यावेमी इन कली जोरी सत्रु सोइक्व। गेपुकी शोव्रलु बेक्शा नु तूतू दाक्ना दाक्न, फेक्चा मतथु नु मारेइ मगाप्शो दुम्शा, मेको आन गेय पचा माल्नीनी। मिनु मेकोमी इन कली मक्याम्दमे सम्म फलम के हलो इन तारी वोइक्नीम। *येरमीया २८:१३-१४* 49 मिनु परमप्रभु यावेमी नेल्ल क्येडा डोन बाक्शो रागी रे मरुप्शो लोव पाइब मुरपुकी बेरशो ककाकुली खोदेंशो पा इन तारी जुक्पाइक्व। *हबकुक १:८; यसैया ३३:१९; येरमीया ५:१५* 50 मेको मुरपुकी काइ शिशी मपाइश्शो बाक्नीम। मेकोपुकीमी खाल्पा आन कली मान मपाइनीम। मिनु आल आन कली यो काइ शिशी मर्कोइनीम। 51 मिनु गेपुकी खतम मदुम्नी सम्म मेकोपुकीमी इन थुल्शो बी ब्यफ, क्यारश भेडा नु बाली नाली जाइनीम। मिनु मेकोपुकीमी इन अन्न, अडगुर शांबु, तेल, बी ब्यफ आन चाइक्व, क्यारश भेडा आन पाठा का यो मगेनीम। 52 मिनु मेकोपुकीमी इन सहर नेल्ल आन कली पुम्नीम। मिनु गेपुकीमी 'सुइम आंइ कली मफ्रुइब' दे इन बोल्पो नु ग्येत्थ लाइश्शो ठेयब गारो कली थमा सुइक्तीनी, तन्न मेकोपुकीमी परमप्रभु यावे, इन परमप्रभुमी इन कली गेशो रागी डा सहर नेल्ल पुम्शा, गारो प्रेल्लीम। 53 मिनु मोदेंशो पा इन जोरी सत्रुपुकीमी इन कली पुम्दमेनु, गे श्येत जशा, परमप्रभु यावे, इन परमप्रभुमी इन कली गेशो तमी तौ आन श्ये ब्वाइनीनी। *लेवी २६:२९; २राजा ६:२८-२९; येरमीया १९:९; बिलाप २:२०; बिलाप ४:१०; इजीकीएल ५:१०* 54 मिनु गेपुकी इन दाते डा नेल्ल क्येडा रिश्शो थुं पाइश्शो नु ठीक पाइब वोंडश मुरुमी यो आ लोक्ब, आ दाक्शो मीश नु आ लीशो आ तमी तौ आन कली शिशी मपथु, जचा थोव्रक रोइक्व। 55 मिनु मेकोमी मेको आन कली आ ब्बचा माल्शो आ आल आ श्ये सुइ आन कली मगेब। मारदे हना जोरी सत्रुपुकीमी सहर पुम्शा जचा थोव्रक मारेइ मबाक्ब। 56 मिनु इन दाते डा नेल्ल आन क्येडा शकल मकल पाइश्शो नु नेल्ल क्येडा सुख जशो, आ खोइलीमी खप यो थेक्ने मबिप्ब मीश मुरुम आ दाक्शो वोंडश नु आ तमी तौ कली गेहे पा कोव्रब। 57 मारदे गेहे पा कोव्रब देंशा हना, आ नक थिशो आल नु आल आ उम्पो आ पर्बम गेहे पा कोव्रब। मिनु जोरी सत्रुम सहर पुम्तीके श्येत जशा, मेको मीश मुरुम खूइश्शोमी आ उम्पो 'आंमा ब्वाइनुड' दे मिम्ब। 58 मिनु गेपुकीमी एको किताबमी ब्रेक्शो अरेशो लोव नेल्ले टिशा मपाइतीनी हना, मेको ठेयब नु हिंचा डा परमप्रभु यावे, इन परमप्रभु आ नें कली मान पा महिंतीनी हना, 59 परमप्रभु यावेमी इन कली नु इन चच युइ आन कली गेचा डा श्येत डॉइती मतशो खोदेंशो पा ठेयब फाल्ने मचाप्चा श्येत गेब। मेको ठेयब श्येत नु ठेयब नु मसाचा डा रोइ पपाइक्व। 60 मिनु परमप्रभु यावेमी हिंचा डा इजीप्ट रागी डा मुर बेक्तीक रोइ इन कली पपाइक्व। मिनु मेको बेक्तीक डा रोइ इन दातेमी याक्सीब। *ब्यवस्था २८:२७* 61 मिनु मेको अरेशो लोव डा किताबम मब्रेक्शो रोइ नु बेक्तीक रोइ यो इन कली पपाइक्व। परमप्रभु यावेमी गेपुकी खतम मदुम्नी सम्म मोदेंशो पपाइक्व।

62 मिनु गेपुकी डॉइती सरीड डा सोरुल खोदेंशो पा शुश बाक्तीनी। मिनु नोले इक्का ला लीनीनी। मारदे हना गेपुकीमी परमप्रभु यावे, इन परमप्रभु आ देंशो मटिनी। 63 मिनु परमप्रभु यावेमी दोपा इन कली रिश्शो पचा नु शुश सेल्चा कली ग्येरसीशो बाक्मे, मोपा परमप्रभु यावेमी इन कली खतम सेल्चा नु क्याम्चा कली ग्येरसीशो बाक्ब। मिनु मेकोमी गे ओव्रचा नु इन के सेल्चा चिक्शो रागी रे इन कली तुल्ब। *हितोपदेस १:२६* 64 मिनु परमप्रभु यावेमी इन कली जात जात डा मुर आन दातेमी फ्राइब। मिनु गेपुकीमी मेकेर डा इन किकी पिपी नु इन मतुइश्शो शी नु फुल्लु के देवी देवता आन कली गेय पाइनीनी। 65 मेको रागी रागी डा मुर आन दातेमी गे नाइक्चा मताइनीनी। इन कली गेना हना यो खेरनीमी। मिनु परमप्रभु यावेमी मेकेर इन कली हिंभ थुं गेब। मिनु फाल्ने मचाप्ब नु थुं लुक्च लाइब मुर दुम्नीनी। 66 मिनु गेपुकी दीसा मार दुम्बा 'ब्रोंइनुडा, मब्रोंइनुडा' दे मारेइ मतुइक्थु, नाक्दो नाक्ती हिंशा बाक्चा माल्नीनी। 67 मिनु सुनी कना गेपुकीमी 'नां रिक्शो हना, रिश्शो दुम वा' देंनीनी। मिनु नां रिक्ची ना 'नां सोवशो हना, गिश रिश्शो दुम वा'

देंनीनी। मारदे हना मार मार ताइनीनी, गे शुश हिंनीनी। 68 परमप्रभु यावेमी इन कली जहाजम इजीप्त रागीम लेशशा सोइक्व। गो मेको लां आ पर्वमी 'गेपुकीमी एको लां गेनायो लेंशा लचा मडुम्ब' दे गो इन कली देंती। मेकेर जाक्शा इन कली इन जोरी सत्रु आन कली वाइलीम वाइल सेल्चा कली लेयचा दाक्नीम, तन्न सुइम इन कली मग्याप्नीम" देंत। ब्यवस्था १७:१६; होसे ८:१३

अर्ती गेशो नु हिंच कोंइशो

29 मिनु होरेब डांडामी परमप्रभु यावेमी इस्राएली नु पशो कबल नु तेम्शा, मोआब रागीम मोसा कली इस्राएली आन कली तेम्चा डा लोत्र मार बाक्नीम देंशा हना, ब्यवस्था ५:२

2 मोसामी इस्राएली नेल्ल आन कली ब्रेशशा "परमप्रभु यावेमी इजीप्तमी फाराओ नु मेको आ गेय पाइब नेल्ल नु आ रागी कली पशो गेपुकीमी नेल्ल तशो बाक्नीनी। प्रस्थान १९:४ 3 गेपुकी मेको ठेयब नाक्तीके ताइतीनी। मिनु मेको ठेयब चिन्ड नु छक लाक्वा डा गेय यो ताइतीनी। ब्यवस्था ४:३४; ब्यवस्था ७:१९ 4 तन्न मुल सम्म परमप्रभु यावेमी इन कली रुप्तीक थुं, कोवतीक मिक्च नु नेंतीक नोफा मगेशो बाक्व। ब्यवस्था ५:२६ 5 मिनु गो इन कली ४० बर्स सम्म गोरशो रागीम लां कोंइताक्नीनी। इन फेक्तीक मजे, जुत्ता यो मजे। ब्यवस्था ८:४ 6 गेपुकीमी शोब्ले मजनी, अडगुर शांबु नु रकसी यो तूचा मतनी, तन्न ब्रोंइतीनी। मिनु गो परमप्रभु यावे, इन परमप्रभु नड, दे गेपुकीमी रुप्तीनी। 7 मिनु गेपुकी एको रागीम जाक्नीनु, हेशबोन डा पिप सीहोन नु बाशान डा पिप ओग गोपुकी नु लडाइ पचा कली ग्रुम्शा जाक्ताक्स। मिनु गो मेको आन कली फ्रुइतय। गन्ती २१:२१-३५ 8 मिनु गोपुकीमी मेको आन रागी ग्राशा, रूबेन आ थर, गाद आ थर नु मनस्से आ थर डा आधा मुर आन कली आन के सेल्चा कली रू गेशो। गन्ती ३२:- 9 मोपतीके एको कबल पशो लोत्र होस पा पने। मिनु मो पाइतीनी हना, गे मार मार पनी, मेको रिम्शो दुम्ब।

10 मिनु गे नेल्ल परमप्रभु यावे, इन परमप्रभु आ डोंइती राप्शो बाक्नीनी। इन थर थर डा ठेयब मुरपुकी, इन खाल्पापुकी, ससान पाइबपुकी नु इस्राएली नेल्ल, 11 इन आलपुकी नु इन मीशपुकी, अर्को रागी डा इन दातेमी बाक्शो मुरपुकी, शी चाक्ब नु ब्वाक्कु कुरब नेल्ल बाक्नीम। यहोसु ९:२७ 12 मारदे नेल्ल बाक्शो बाक्तीनी देंशा हना, परमप्रभु यावे, इन परमप्रभुमी गे नु कसम जशो कबल मुलाक्त परमप्रभु यावे, इन परमप्रभुमी गे नु पाइब। 13 दोपा परमप्रभु यावेमी इन किकी पिपी अब्राहाम, इसहाक नु याकूब नु कसम जशो बाक्मे, मोपान मुलाक्ती इन परमप्रभुमी इन कली आंम के मुर सेल्चा कली कबल पाप्नु। 14 मिनु गो मेको कसम जशो कबल परमप्रभु यावे, इं परमप्रभु आ डोंइती राप्शा बाक्ब इन कली ला ममाइ, ब्यवस्था ५:३; उत्पत्ती १७:७ 15 तन्न सु सु मुलाक्त मबाक्तेक्म हना, यो मेको कबल पाइनुड। 16 गो दोपा इजीप्त रागीम बाक्वा, तुइक्नीनी। गोपुकी रागी रागीम गाक्शा, दोपा जाक्वा, दे यो तुइक्नीनी। 17 मिनु गे आन ग्रांरा दित्वा डा शी, फुल्लु, सुन नु चांदी के देवी देवता आन कली यो तशो बाक्नीनी। 18 मिनु इन दाते रे सुइ वोंइश मुर, मीश मुर, खिं डा मुर नु थर डा सुइ आन थुं परमप्रभु यावे, इं परमप्रभु रे नोले शोंइसीशा, मेको रागी रागी डा देवी देवता आन कली पूजा पचा दाक्ब बाक्नीम कों? इन दातेमी मोर्देशो ओश्वेर पाइश्शो शाक्श का बाक्वा कों? ब्यवस्था ३२:३२; होसे १०:४; आमोस ६:१२; हिल्लू १२:१५ 19 मिनु मोर्देशो पाइब मुर मेको कसम डा लोत्र नेंशा, आ थुंमी 'गो आंम मिम्तीके पशा बाक्ती हना यो, गो सराप मराइनुड। गो आसीक ताइब बाक्ती' दे मिम्ब। मोर्देशो मिम्तीके नेल्ल आन कली खतम सेल्ब। 20 मिनु परमप्रभु यावेमी मोर्देशो मुर आ पाप मक्याम्ब। परमप्रभु यावे मेको कली तशा, आ गाइक्वा नु आ गेहे पतीके मी खोंइशो पा ब्राइब। मिनु मेको अरेशो लोत्र डा किताबम ब्रेक्शो सराप नेल्ल मेको मुर कली राइब। मिनु परमप्रभु यावेमी मेको आ नें रागी रे क्याम्ब। ब्यवस्था २८:१५-६८ 21 मिनु परमप्रभु यावेमी मेको कली इस्राएली आन थर रे तिल्ला, मेको अरेशो किताबम ब्रेक्शो कबल डा सराप नेल्ल रपाइक्व। 22 इन नोले जरमेशो पाला, इन नोले जाक्शो तमी तौ नु डोन रागी डा मुरपुकीमी मेको

रागी डा श्वेत नु परमप्रभु यावेमी मेको आन कली गेशो बेक्तीक डा रोइ तशा 23 मेको रागी नेल्लेम मी ब्रशा गन्धक नु हिक्सी बाक्ब। मारेइ मशोक्शो, काइ गिग मगूशो मारेइ मवाशो बाक्ब। मेको परमप्रभु यावेमी चुरशा गाइश्शो सोदोम नु गोमोररा, अदमाह नु सेबोयीम खतम सेल्शो रागी खोंइशो बाक्ब। उत्पत्ती १९:२४ 24 मिनु रागी रागी डा मुर नेल्लेमी 'परमप्रभु यावेमी एको रागी कली मारदे ओर्देशो सेला? एको आ पर्वम मारदे मोर्देशो शुश चुरशा गाइक्ता?' दे हिल्लो पाइनीम। 25 मिनु मेकोपुकीमी 'मेको परमप्रभु यावे, आन किकी पिपी आन परमप्रभुमी मेको कली इजीप्त रे थुंइची ना पशो कबल प्रॉइने थुम्शो बाक्तेक्म। 26 मिनु मेकोपुकीमी आन मतुइश्शो नु परमप्रभुम मपचा देंशो देवी देवता आन डोंइती बाप्शो बाक्तेक्म। 27 मोपतीके परमप्रभु यावे एको रागी आ पर्वम शुश गाइक्ताक्व। मिनु मेकोमी एको किताबम ब्रेक्शो सराप नेल्ल मेको रागी कली रपाइक्व। 28 मिनु परमप्रभु यावेमी चुरशा, गाइश्शा, आ ठेयब गाइश्शोम मेको आन कली आन रागी रे खेरशा, अर्को रागीम ताइक्ताक्व। मेको मोर्देशो मुलाक्त दुम्शो बाक्ब' देंनीम। 29 मिनु मारेइ मारेइ खुइश्शो परमप्रभु यावे, इं परमप्रभु के बाक्ब। तन्न मेको अरेशो लोत्र नेल्ल टिचा नु मेको तुइक्तीके आंइ के नु आंइ तमी तौ के बाक्ब" देंत। ब्यवस्था ३२:३४

परमप्रभु यावे गे लेत्वा

30 मिनु गो इन कली देंशो लोत्र, दोपा आसीक राइनीनी नु दोपा सराप राइनीनी, गे मेको नोले आंमा तशो, परमप्रभु यावे, इन परमप्रभुमी इन कली रागी रागी डा मुर आन दाते रे खेरा नु ला तुइक्नीनी। ब्यवस्था २८:- 2 मिनु गो मुलाक्ती इन कली अरेशो खोंइशो पा गे नु इन तमी तौ इन थुं नु सोक्त नेल्लेमी परमप्रभु यावे, इन परमप्रभु गे लेशशा टिचा दाक्तीनी हना, ब्यवस्था ४:३०; लेवी २६:४० 3 मेना परमप्रभु यावे, इन परमप्रभुमी इन रिम्शो नाक्ती लेप्पाइक्व। मिनु परमप्रभु यावे, इन परमप्रभुमी इन कली शिशी पाइश्शा, जात जात डा मुर आन दातेमी ब्रपाइक्तीके रे खुप्शा चाक्ब। इजीकीएल १६:५३; येरमीया २९:१४; आमोस ९:१४; येरमीया ३२:३७ 4 मिनु गे शुश डोन रागी सम्म खेरचा पुंइसाक्नी हना यो परमप्रभु यावे, इन परमप्रभुमी इन कली खुप्शा एक चाक्ब। ब्यवस्था २८:६४; नेहेम्याह १:९ 5 मिनु परमप्रभु यावे, इन परमप्रभुमी इन कली इन किकी पिपी आन रागीमी चाक्ब। मेको रागी इन के बाक्ब। मिनु मेकोमी इन कली इन किकी पिपी क्येडा शुश नु रिम्शो सेल्ब।

6 मिनु परमप्रभु यावे, इन परमप्रभुमी इन थुं नु इन तमी तौ आन थुं खोंइक्तीक चिनु खोंइशो पा खोंइक्ब। मोपा ला गे परमप्रभु यावे, इन परमप्रभु कली इन थुं नु सोक्त नेल्लेमी दाक्शा, ब्रॉइने चाप्नीनी। ब्यवस्था १०:१६; येरमीया ४:४; इजीकीएल ११:१९; रोमी २:२९ 7 मिनु परमप्रभु यावे, इन परमप्रभुमी मेको सराप नेल्ल इन कली खेदा पाइब, इन कली गेहे पाइब जोरी सत्रु आन कली रपाइक्व। 8 मुलाक्ती गो इन कली माइश्शो गे लेशशा परमप्रभु यावे आ शेंशो नेल्ल टीनीनी। 9 मिनु परमप्रभु यावे, इन परमप्रभुमी इन पतीके नेल्लेमी इन कली आसीक गेब। मेकोमी इन कली शुश तमी तौ, बी ब्यफ, क्यारश भेडा नु इन रू डा अन्न शुश सेल्ब। मारदे हना परमप्रभु यावेमी इन किकी पिपी आन कली रिम्शो पशो खोंइशो पा इन कली यो रिम्शो पचा दाक्ब। 10 गेपुकीम परमप्रभु यावे, इन परमप्रभु आ देंशो टीतीनी हना, आ शेंशो, आ फुल्लुम मुशा ब्रेक्शो लोत्र नु मेको अरेशो लोत्र डा किताबम ब्रेक्शो लोत्र पाइतीनी हना, गे इन थुं नु सोक्त नेल्लेमी परमप्रभु यावे, इन परमप्रभु गे लेत्तीनी हना, गे लेंशा आसीक राइनीनी।

परमप्रभु आ लोत्र इन नेक्था बाक्शो

11 मिनु गो मुलाक्त इन कली माइश्शो परमप्रभु यावे आ शेंशो मरुप्चा डा नु इन पने मचाप्चा डा मबाक्ब। मेको इन नेक्था बाक्ब। 12 मेको लोत्र इर सरीडमी मबाक्ब। मिनु गेपुकीमी "सु सरीड लशा मेको लोत्र आंइ कली चाक्बा? मिनु मेको नेंशा, पाइनीकी" देंचा ममाल्नीनी। रोमी १०:६-८ 13 मिनु मेको समुन्द्र आ आइक्ची हांबु यो मबाक्ब। गेपुकीमी "सुम आंइ कली समुन्द्र आइक्ची हांबु मेको ब्रथ लाइबा? मिनु मेको नेंशा, पाइनीकी"

देंचा ममाल्नीनी। 14 मेको अरेशो लोत्र इन नेक्था बाक्ब। गे मेको आ पर्वम लोत्र पाइनीनी। मिनु मेको पचा कली इन थुंमी बाक्ब।

### ब्रॉइचा नु बेक्चा

15 मिनु मुलाक्ती गो ब्रॉइतीक नु रिम्शो दुम्तीक, बेक्तीक नु मरिम्शो दुम्तीक इन कली कौंइशो बाक्नुड। ब्यवस्था ११:२६ 16 मिनु गोम मुलाक्त इन कली माइश्शो परमप्रभु यावे आ शेंशो, आ फुल्लुम मुशा ब्रेक्शो लोत्र नु आ निसाफ पतीक लोत्र टीतीनी हना, परमप्रभु यावे, इन परमप्रभु कली दाक्ताक्नी हना, मेको आ लां गाक्तीनी हना, गे ब्रॉइशा, सोशा बोशा, शुश दुश्शा बाक्नीनी। मिनु परमप्रभु यावे, इन परमप्रभुमी इन ओव्रचा चिक्शो रागीमी आसीक गेब। 17 तन्न गे इन थुं हिरशा मटीब दुम्तीनी हना, नु देवी देवता आन डौंइती बाप्शा, गेय पाइतीनी हना, 18 गो इन कली मुलाक्ती “गेपुकी थमा पा बेक्नीनी। मिनु यर्दन आइक्वी हांबु इन के सेल्शो रागीमी गे शुश नाक्ती मब्रॉइनीनी” देनुड। ब्यवस्था ८:१९ 19 गो मुलाक्ती सरीड नु रागी कली इन डौंइती सांकछी वोइक्नुड। गो इन कली ब्रॉइचा नु बेक्चा, आसीक नु सराप इन कली कौंइताक्ड। गे नु इन चच युड ब्रॉइतीक योव्रडीन। ब्यवस्था ४:२६ 20 परमप्रभु यावे, इन परमप्रभु कली दाक्तीन। आ देंशो टिने। मेको कली मप्रॉइथु बाक्कीन। मारदे हना मेकोम इन कली ब्रॉइचा नु शुश नाक्ती बाक्चा गेब। मिनु गेपुकी परमप्रभु यावेमी इन किकी पिपी अब्राहाम, इसहाक नु याकूब आन कली कसम जशा गेशो रागीम बाक्ने चाप्नीनी।

### मोसामी यहोसु कली अरेशो

31 मिनु मोसामी इस्राएली नेल्ल आन कली एको लोत्र नेंपाइक्तु। 2 मिनु मेकोमी “मुलाक्ती गो सहे का २१ बर्स गाप्ती। गो मुल रे इन कली लां कौंइने मचाप्नुड। मिनु परमप्रभु यावेमी आं कली “गे मेको यर्दन मशोक्नेवे” दे माइक्ती। प्रस्थान ७:७; गन्ती २०:१२ 3 परमप्रभु यावे, इन परमप्रभु इन डौंइती यर्दन शोक्शा, आइक्वी हांबु लाइब। मेकोमी इन डौंइती मेको रागी रागी डा मुर आन कली क्याम्ब। मिनु गेपुकीमी मेको आन कली खेरने चाप्नीनी। मिनु परमप्रभु यावेमी देंशो खोदेंशो पा यहोसु इन डौंइती शोक्ब। ब्यवस्था ३:२२ 4 मिनु परमप्रभु यावेमी मेको एमोरी आन पिप सीहोन नु ओग नु आन रागी खतम पोक्शो खोदेंशो पा, मेको आन कली यो खतम पोक्ब। गन्ती २१:२१-३५ 5 मिनु परमप्रभु यावेमी मेको आन कली इन जिम्मा गेब। गो इन कली माइश्शो परमप्रभु यावे आ शेंशो खोदेंशो पा नेल्ल गेपुकीमी मेको आन कली पचा माल्नीनी। प्रस्थान २३:३२-३३ 6 बोल्यो नु महिंब दुमीन। मेको आन कली तशा महिनीन मारदे हना परमप्रभु यावे, इन परमप्रभु गेपुकी नु लाइब। मेकोम इन कली कोव्रशा, मप्रॉइब” दे मोसामी देंत। ब्यवस्था १:२९-३० 7 मिनु मोसामी यहोसु कली ब्रेक्शा, इस्राएली नेल्ल आन डौंइती “बोल्यो नु महिंब दुमो। मारदे हना परमप्रभु यावेमी मेको इन किकी पिपी आन कली कसम जशा ‘मेको रागी इन कली गेनुड’ देंशो बाक्त। मिनु गे मेको रागी मेको आन कली योक्शा गेनीनी। ब्यवस्था ३:२८; यहोसु १:६ 8 मिनु परमप्रभु यावे इ डौंइती लाइब। मेको गे नु बाक्ब। मेकोम इन कली कोव्रशा, मप्रॉइब। महिनीन नु मेको आन कली तशा इन थुं लुक्च मलने” दे मोसामी यहोसु कली देंत।

### चढेब आन कली अरेशो लोत्र गेशो

9 मिनु मोसामी परमप्रभु आ अरेशो लोत्र ब्रेक्शा, चढेब, लेवी आ थर डा मुर नु इस्राएली आन खाल्पा आन कली गेम्तीमी। मिनु लेवी आ थर डा मुरपुकीमी चहिं परमप्रभु यावे आ सल्ला पतीक सन्दोस कुरशो बाक्तेक्म। 10 मिनु मोसाम मेको आन कली “७ बर्स डा प्रॉइतीक बर्समी गौठ सेल्तीक चाडमी ब्यवस्था १५:१; ब्यवस्था १६:१३ 11 नेल्ल इस्राएली परमप्रभु यावे, इन परमप्रभु आ योव्रशो बाक्तीकेमी मेको अरेशो लोत्र इस्राएली नेल्ल आन डौंइती पढेचा माल्नीनी। 12 गेपुकीमी वौंइश मुर, मीश मुर, आलपुकी नु इन सहरम बाक्शो अर्को रागी डा मुर नेल्ल आन कली खुप्चा माल्नीनी। मिनु

मेकोपुकीमी मेको अरेशो लोत्र नेंशा, शेंशा, परमप्रभु यावे, इन परमप्रभु कली मान पा हिं ब दुम्चा माल्नीम। मिनु एको अरेशो लोत्र नेल्ल तुइश्शा पचा माल्नीम। 13 मिनु एको अरेशो लोत्र मतुइक्ब, आन आलपुकीमी यो नेंशा रुप्शा, परमप्रभु यावे, इन परमप्रभु कली मान पा हिंचा शेंचा माल्नीम। गेपुकीमी यर्दन खोला आ आइक्वी हांबु इन के सेल्शो रागीम बाक्वी ना मोदेंशो पचा माल्नीनी” दे माइक्तीमी।

### यहोसु नु मोसा कली शेंशो लोत्र

14 मिनु परमप्रभु यावेमी मोसा कली “मुल इ बेक्वी नाक्ती जाक्शो बाक्ब। मोपतीके यहोसु कली ब्रेक्शा, मेको कली इ गेय जिम्मा गेनुड। मोपतीके गुम्तीक ताम्बुम जाक्शा, राप्शा बाक्कीस” देंत। मिनु मोसा नु यहोसु लशा गुम्तीक ताम्बुम राप्शा बाक्ताक्स। 15 मिनु परमप्रभु यावे गुम्तीक ताम्बुम गोस्स के थामम गूत। मिनु गोस्स के थाम ताम्बु आ ओव्रतीकेमी बाक्त। प्रस्थान ३२:९

16 मिनु परमप्रभु यावेमी मोसा कली “गे इ किकी पिपी नु बाक्चा चिक्शो बाक्नेवे। गे बेक्डे नोले मेको मुर आन लशो रागीम जाक्दीश्शा, मेको रागी डा आन मतुइश्शो देवी देवता आन कली खोइक्नीम। आं कली प्रॉइशा, गो नु पशो कबल क्याम्नीम। 17 मिनु गो मेको नाक्त मेको आन पर्वम शुश गाइक्नुड। मिनु गो मेको आन कली प्रॉइशा, मेको आन कली वारच मपाइनुड। मेकोपुकी रोइक्चा पुंइसीनीम। मिनु मेकोपुकीमी शुश मरिम्शो दुश्शा, ठेयब श्येत जाइनीम। मिनु मेको नाक्त मेकोपुकीमी ‘इ परमप्रभु गोपुकी नु मबाक्तीके इ कली मोदेंशो दुश्शो बाक्ब’ देंनीम। 18 मिनु मेकोपुकी शुश मरिम्शो पा, देवी देवता आन नोले खोइक्ब दुम्नीम। मोपतीके गो मेको आन कली वारच मपाइनुड।

### मोसा कली ब्रेक्पाइश्शो कुम्सो

19 एको कुम्सो ब्रेक्तो। मिनु इस्राएली आन कली शेंदो। मेको रिम्शो तुइक्पतो। मारदे हना मेको कुम्सो इस्राएली आन पर्वम आं सांकछी दुम्चा माल्ब। ब्यवस्था ३२:१-४३ 20 गो मेको आन किकी पिपी आन कली गेनुड, दे कसम जशो दूध नु खुदो शुश बाक्शो रागी मेको आन कली गेनुड। मिनु मेकोपुकी जशा ब्वशा, रूशा दोम्नीम। मिनु मेकोपुकीमी देवी देवता खोइश्शा, मेको आन गेय पाइनीम। आं कली चहिं आइक्च सेल्नीम गो नु आं कबल क्याम्नीम। 21 मिनु मेको मरिम्शो दुश्शा, शुश श्येत जाम्तेक्म हना, मेको कुम्सो मेको आन पशो आ पर्वम आं सांकछी दुम्ब। मारदे हना आन चच युड मेको कुम्सो शेंसीशा, तुइश्शो बाक्नीम। ‘मेको आन कली गेनुड’ दे कसम जशो रागीम चाक्चा क्येडा डौंइती आन मिम्तीके दूली बाक्ब, दे तुइक्नुड” दे परमप्रभु यावेमी मोसा कली देंत। भजन संग्रह १३९:२

22 मिनु मेको नाक्ती मोसामी एको कुम्सो ब्रेक्शा, इस्राएली आन कली शेंताक्मी। 23 मिनु परमप्रभु यावेमी नून आ तौ यहोसु कली अरेशा “बोल्यो नु महिंब दुमो। मारदे हना ‘मेको आन कली गेनुड’ देंशो रागीम गे इस्राएली आन कली चाक्दीत्वा माल्नेवे। मिनु गो गे नु बाक्नुड” देंत।

### अरेशो किताब नु कुम्सो

24 मिनु मोसामी मेको अरेशो लोत्र किताबम ब्रेक्ने थुम्शा नोले 25 मेकोमी परमप्रभु यावे आ सल्ला पतीक सन्दोस कुरब लेवी आ थर डा मुर आन कली 26 “एको अरेशो लोत्र डा किताब लाइश्शा, परमप्रभु यावे, इन परमप्रभु आ सल्ला पतीक सन्दोस आ नेक्था वोतीन। मोदेंशो पा मेको आन पर्वम सांकछी दुम्चा बाक्ब। यूहन्ना ५:४५ 27 मारदे हना गो इन मरिम्शो पतीक नु इन मटितीके तुइक्नुड। गो मुल सम्म गेपुकी नु बाक्शा यो, गेपुकी परमप्रभु यावे कली गन गन पा मटीब बाक्तीनी। गो बेक्डा नोले दोशो मरिम्शो पाइनीनी? 28 मिनु गे इन थर थर डा खाल्पा नु ठेयब मुर नेल्ल आं बाक्तीकेम ब्रेक्शा खुम्सीन। मिनु गो मेको आन कली एको लोत्र नेंपाइक्नुडमी। मिनु मेको गो सरीड नु रागी आन पर्वम सांकछी वोइक्नुड। ब्यवस्था ३२:१ 29 मारदे हना गो बेक्डा नोले गेपुकी थमा पा दूली पाइब दुम्नीनी। मेको गो तुइक्नुड। मिनु गेपुकी आं अरेशो लां रे डोन लाइनीनी।

मिनु गेपुकीमी परमप्रभु यावे आ डोंइती मरिश्शो पाइनीनी। मिनु मेको इन पतीकेमी मेको कली गाइक्पाइक्नीनी। नोले डा नाक्तीमी इन कली शुश श्येत दुम्ब" दंत।<sup>30</sup> मिनु मोसामी इस्राएली नेल्ल आन डोंइती एको कुम्सो थुम्चा सम्म नेंपाइक्तीमी।

मोसा आ ब्रेक्पाइश्शो कुम्सो

मिनु मोसामी

32

"सरीड, गो मार देंनुडा, नोफा दाइश्शा नेनो। रागीम, आं लोव्र नेनल। *यसैया १:२*<sup>२</sup> आं अरेशो लोव्र रेउ खोदेंशो पा यीब। आं अरेशो लोव्र सीत खोदेंशो पा दोक्ब। कल्लो घांस तार भूस भुसे रेउ खोदेंशो पा नु सुवा आन तार ठेयब रेउ खोदेंशो पा यीब। *यसैया ५५:१०-११*<sup>३</sup> मारदे हना गो परमप्रभु यावे आ नें ठेयब सेल्लनुड। इं परमप्रभु ठेयब बाक्ब।

<sup>४</sup> मेको सेरथे फुल्लु बाक्ब। मेको आ गेय नेल्ल क्येडा रिश्शो बाक्ब। आ लां नेल्ले ठीक बाक्नीम। मारदे हना मेको आ देंशो पाइब परमप्रभु बाक्ब। जोल मपाइब, कुल मकोव्रब नु ठीक पाइब बाक्ब।<sup>५</sup> तन्न मेको पाला डा मरिश्शो दुम्सो मुरपुकीमी मेको कली मरिश्शो पांम्तेक्म। मेको दूली पाइब नु हेंथे गाक्ब ला डा बाक्नीम। *यसैया १:२-४; मत्ती १७:१७*<sup>६</sup> मूर्ख नु निप्स मपाइश्शो मुरपुकी, मार, गे परमप्रभु यावे कली क्येक्क लेत्तीनी? मार, इन कली सेल्ब इन आफ मेको ममाइ डा? मेको इन कली सेल्ब नु वोइक्ब बाक्ब।<sup>७</sup> साइ डोंइती डा नाक्त् मिम्तीन। साइ डा बर्स कली मिम्तीन। इन आफ कली हिल्लो पने। मिनु मेकोमी इन कली शेंनीम। इन खाल्या आन कली हिल्लो पने। मेकोमी इन कली देंनीम।<sup>८</sup> नेल्ल क्येडा ठेयबमी रागी रागी डा मुर आन कली आन रागी गेप्तु। मेकोमी मुर नेल्ल आन कली शुश खाल डा सेल्लु। मेना इस्राएली आन थर डा खिं खिं डा मुर कोव्रशा, आन सांद योक्शा गेप्तु। *उत्पत्ती ११:८; प्रेरित १७:२६*<sup>९</sup> मिनु परमप्रभु यावे आ भाग आ मुरपुकी बाक्तेक्म। याक्ब आ मुर आन भाग आ योव्रशो रागी बाक्त।

<sup>१०</sup> मेकोमी याक्ब कली सुइ मबाक्शो रागीम थुल्लु। गोरशो रागीमी कोव्रशा थुल्लु। मिनु मेकोमी मेको कली आ एर ओंथ नेल्ल रे कोव्रतु। मिनु मेको कली आ मिक्च कली खोदेंशो पा होस पा कोव्रतु। *भजन संग्रह १७:८; इजीकीएल १६:१०-१४; जकारिया २:१२*<sup>११</sup> आंम चाइक्ब कली रिश्शो कोव्रशा जचा गेब, फ्रां प्राक्शा चाइक्ब कली पुब्ब नु आ फ्रांम इर कुरब ककाकुली खोदेंशो पा, *प्रस्थान १९:४*<sup>१२</sup> परमप्रभु यावेमी मेको कली लां कोंइताक्व। मेको नु अर्को तेकोइ देवता मबाक्म।<sup>१३</sup> मेकोमी मेको कली नेल्ल क्येडा रिश्शो रागीम वोइक्तु। मेकोमी रूम शोक्शो थोव्रकीम थुल्लु। मिनु मेको कली रोंगु डा खुदो नु फुल्लु रे तेल जचा गेप्तु। *भजन संग्रह ८१:१७*<sup>१४</sup> मिनु बी आन दूध के दहिं, भेडा आन दूध नु पाठा नु सांड आन बोंसो ब्वचा गेप्तु। बाशान डा ब्यफ नु क्यारश आन श्ये ब्वचा गेप्तु। नेल्ल क्येडा रिश्शो चेरब फस जशा, अडगुर शांबु तूशा बाक्ते।<sup>१५</sup> मिनु येशुरुनमी दोम्शा ताइक्तु। गे दोम्ते। गे दोम्शा, ठेयब लेश्शो दुम्ते। मेकोमी आ कली सेल्ब परमप्रभु कली प्रोंइतु। मिनु आ श्येत रे प्रोंइब सेरथे फुल्लु, कली प्रोंइतु। *येशुरुन याक्ब-इस्राएल कली मान पतीक नें बाक्ब। ब्यवस्था ३३:५, २६; यसैया ४४:२; ब्यवस्था ३१:२०; नेहेम्याह ९:२५*<sup>१६</sup> मिनु मेकोपुकीमी अर्को देवी देवता आन कली ठेयब सेल्शा, मेको कली गेहे पपाइक्तेक्म। मेकोपुकीमी ग्रांरा दिचा डा थोव्रकीम पतीके मेको कली गाइक्पाइक्तेक्म।<sup>१७</sup> मेकोपुकीमी परमप्रभु कली ममाइ, वोल आन कली चढेम्तेक्म। आन डोंइती मतुइश्शो देवी देवता आन कली चढेम्तेक्म। आन किकी पिपीमी महिंशो नक सेल्शो देवी देवता आन कली चढेम्तेक्म।<sup>१८</sup> मिनु गे इन कली सेल्ब सेरथे फुल्लु कली ममिम्तीनी। इन कली थीब परमप्रभु यावे कली प्रेंताक्नी। *उत्पत्ती ४९:२४; भजन संग्रह १८:३२; भजन संग्रह ७८:१५-१६*

<sup>१९</sup> मिनु परमप्रभु यावे मेको तशा रुश पाप्तु। मारदे हना आ तमी तौपुकीम मेको कली आइक्च सेल्लेक्म।<sup>२०</sup> मिनु मेकोमी 'गो मेको आन कली वारच मपाइनुड। मेको दोपा बेक्नीमी, मेको कोव्रनुड। मारदे हना मेको दूली पाइब पाला डा मुर बाक्नीम। मेको थमा मसुइक्चा डा बाक्नीम।<sup>२१</sup> देवी देवता

आन पर्वमी आं कली रुश पपाइक्नीम। मूर्ति पूजा पा आं कली गाइक्ब सेल्लेमी। मोपतीके गो डोन डा मुर आन कली आंम के सेल्शा, एको आन कली रुश पपाइक्नुड। रागी डा मतुइक्ब मुर आन कली गुष्ठा, मेको आन कली गाइक्पाइक्नुड। *भजन संग्रह ७८:५८; येरमीया २:११; रोमी १०:१९*<sup>२२</sup> मारदे हना आं गाइक्चा मी खोदेंशो पा ब्रशो बाक्ब। रागी आगा सम्म ब्राइब। रागी नु मेकेर बाक्शो नेल्ले नेक्ब। मेकोमी डांडा आन जग नेल्ल नेक्ब।<sup>२३</sup> गो मेको आन कली शुश श्येत गेनुड। गो मेको आन कली ब्रा आप्नुड। दोपा आप्नुड देंशा हना,<sup>२४</sup> बेक्चा डा शोव्रलु, शुश नाप्शो जोरो, मुर कली साइक्ब रोइ नु मेको आन कली ब्रुष्ठा ब्वाइब जन्तुपुकी नु खपीम ग्रेशा गाक्ब बीस पाइश्शो बुस्सपुकी सोइक्नुड।<sup>२५</sup> लां लांमी तरवारम मेको आन कली रोम रोइक्च सेल्लुड। खिं खिंम राग्शी पोक्नुड। ठिटा ठिटी, दूध तूब आल, चां बोइश्शो नेल्ल आन कली खाल का डा पाइनुड। *इजीकीएल ५:१७; इजीकीएल १४:२१*<sup>२६</sup> गो मेको आन कली डोन डोन सम्म ब्रापाइक्नुड। गो मेको आन कली मुर आन दातेम ममिम्पाइक्नुड।<sup>२७</sup> तन्न आन जोरी सत्रुपुकीमी दूली मिम्शा "गोपुकीमी इं सक्तिम ग्रातय। एको परमप्रभु यावे आ पशो ममाइ" देंनीम। मिनु आं कली गाइक्पाइक्नीम।

<sup>२८</sup> मारदे हना मेकोपुकी रागी डा निप्स मपाइश्शो मुर नम। मेकोपुकी नु मारेइ रुप्तीक थुं मबाक्ब। *यसैया २७:११; येरमीया ४:२२*<sup>२९</sup> मेकोपुकी निप्स पाइश्शो नम हना, एको लोव्र रुबेम वा। मेको आन बेक्तीक तुइक्तेम वा।<sup>३०</sup> मेको आन सेरथे फुल्लुम मेको आन कली लेयने थुम्शो बाक्ब। परमप्रभु यावेमी मेको आन कली प्रोंइने थुम्शो बाक्ब। मोपतीके मुर कामी हजार का आन कली खेदा पाप्तु। मुर निक्शीमी १० हजार आन कली खेदा पने चाप्नीसी। *लेवी २६:३६-३७; यसैया ३०:१७*<sup>३१</sup> इं जोरी सत्रुमी "मेको आन सेरथे फुल्लु आंइ सेरथे फुल्लु खोदेंशो ममाइ" दे लोव्र पांम्तेक्म। *ब्यवस्था ३२:४, ३७*<sup>३२</sup> मारदे हना मेको आन अडगुर सोदोम डा अडगुर बाक्नीम। मेको गोमोररा डा अडगुर रू रे दुम्सो बाक्नीम। मेको आन अडगुर बीखम ब्रीशो बाक्नीम। मेको आ गेडा कशो बाक्नीम।<sup>३३</sup> मेको आन अडगुर बुस्स आ बीस नु साइक्चा डा बीख बाक्ब।

<sup>३४</sup> गो एको मिम्शा वोइश्शो बाक्नुड। आं वोइक्तीकेमी छाप थोक्शा वोइश्शो बाक्नुड। *ब्यवस्था २९:२८*<sup>३५</sup> सजाइ नु क्येक्क लेत्तीक आं के बाक्ब। मिनु ग्रेक्शा थित्तीक नाक्त् नु आन बेक्तीक नाक्त् जाक्चा चिक्शो बाक्ब। मेको आन खतम दुम्तीक नाक्त् जाक्चा चिक्शो बाक्ब। *भजन संग्रह ९४:१; रोमी १२:१९; हिब्रू १०:३०*

<sup>३६</sup> परमप्रभु यावेमी आ मुर आन कली थमा पा वारच पाइब। आ मुर आन कली शिशी पाइब। मेको आन सक्ति लत हना, मुर नु वाइलीम वाइल यो खतम दुम्नीम।<sup>३७</sup> मेको आन देवी देवता ते बाक्नीमी? मेको आन खुइक्तीक सेरथे फुल्लु ते बाक्बा डा? *ब्यवस्था ३२:३१*<sup>३८</sup> आन क्योरशा चढेतीके डा बोंसो सुमी ब्वचा? मिनु तूचा थोव्रक चढेतीके रे सुम तूडा? मेकोपुकी बोक्शा इन कली वारच पांमेक्ल। मिनु इन कली प्रोन्मेक्ल। *न्यायाधीस १०:१४; येरमीया २:२८*

<sup>३९</sup> मुल कोव्रडीन, गो ला परमप्रभु नड। आं क्येडा लाक्शा सुइ परमप्रभु मबाक्ब। गो साइक्ब नु ब्रोंइपाइक्ब नड। गो गार सेल्ब नु सापाइक्ब नड। आं गुइ रे ब्रोंइब सुइ मबाक्ब। *ब्यवस्था ४:३५; यसैया ४५:५; १सामुएल २:६; प्रस्थान १५:२६; अय्युब ५:१८; होसे ६:१-२*<sup>४०</sup> मिनु गो आं गुइ सरीड गे पोक्शा, गो गेना हना यो ब्रोंइशा बाक्शो खोदेंशो पा कसम जाइनुड।<sup>४१</sup> गो आं टल्केशो या शेप्ता हना, आं गुइमी निसाफ पचा कली ग्याइक्ताक्ड हना, आं जोरी सत्रु आन कली क्येक्क लेल्लुड। आं कली काइ मदाक्ब आन कली क्येक्क लेल्लुड। *येरमीया ४६:१०*<sup>४२</sup> आं ब्रा आन कली ग्याइश्शा साइश्शो मुर आन हुशेमी गिल्लुड। आं या लाइश्शो चां पाइश्शो आं जोरी सत्रु आन श्ये ब्वाइब खोदेंशो सेल्लुड' दे परमप्रभुमी देंत।

<sup>४३</sup> गे रागी रागी डा मुरपुकी, ग्येरसीशो मेको आ मुर बाक्नीनी। मिनु नेल्लेमी परमप्रभु कली मान पने। मारदे हना मेकोमी आ गेय पाइब आन हुश आ क्येक्क लेक्ब। आ मुर आन कली मरिश्शो पाइब आन कली क्येक्क लेक्ब। मिनु मेको आन कली काइ मदाक्ब आन कली क्येक्क लेक्ब। मिनु मेकोमी आ मुर आन रागी कली लेंशा रिश्शो सेल्ब" दे मोसामी कुम्सो पाप्तु। *रोमी १५:१०; ब्यवस्था २१:८; गन्ती ३५:३३-३४*

## मोसा आ नोले डा अरेशो लोव

44 मिनु मोसा नु नून आ तौ यहोसु मुर आन डोंइती एको कुम्सो डा लोव नेंपाइक्ताक्स। 45 मिनु मोसामी इस्राएली नेल्ल आन कली एको लोव नेंपाइक्ने थुम्शा, 46 मेको आन कली “मुलाक्त गे इन कली आं देंशो लोव नेल्ल इन थुंम वोतीन। इन तमी तौ आन कली देनीन। गे मेको आन कली ‘मेको अरेशो लोव नेल्ल होस पा पचा माल्नीनी’ दे मतीन। ब्यवस्था ६:७ 47 मारदे हना एको इन कली आइक्च लोव ममाइ। एको इन ब्रॉइतीक बाक्ब। एको पशा, गेपुकी यर्दन शोकशा इन के सेल्शो रागीम शुश नाक्त ब्रॉइनीनी” दे माइक्तीमी। लेवी १८:५

## परमप्रभुमी मोसा कली लोव पशो

48 मिनु मेको नाक्ती परमप्रभु यावेमी मोसा कली 49 “गे अबारीम डांडा डोंइसो। यरीको आ नेक्था मोआब रागीम बाक्शो नेबो डांडा डोंइसो। मिनु गो इस्राएली आन कली गेशो कनान रागी नेल्ल कोवडो। गन्ती २७:१२; गन्ती ३३:४८ 50 मिनु दोपा इ लोकब हारून होर डांडाम बेक्मे नु आ किकी पिपी आ मुर आन बाक्तीक लमे, मोपा गे मेको इ डोइशो डांडाम बेक्नेवे। मिनु बेक्शा इ किकी पिपी आन बाक्तीक लाइनेवे। गन्ती २०:२३-२९ 51 मारदे हना गे निक्शीमी जीन डा गोरशो रागी मेरीबाथ-कादेशमी आं ब्वाक्कु आ नेक्था इस्राएली आन दातेमी आं कली थमा मसुइक्पीसी। आं कली टिचा माल्नीम, दे इस्राएली आन डोंइती मकोइथु, आं कली ठेयब मसेल्सी। गन्ती २०:१२-१३ 52 गे आं इस्राएली आन कली गेशो रागी डोन रे ताप्तीवी हना यो, गे मेकेर लचा मताइनेवे” दे परमप्रभु यावेमी मोसा कली देंत।

## मोसामी आसीक गेशो

उत्पत्ती ४९:-

33 परमप्रभु आ मुर, मोसामी आ बेक्चा क्येडा डोंइती इस्राएली आन कली मार आसीक गेत्तु देंशा हना 2 “परमप्रभु यावे सीनै रे जाक्शो बाक्ब। मेको सेइर रे पा आंइ डोंइती गूत। मेको पारान डांडा रे पा टल्केसाक्व। मेको नु लाख लाख आ मुर बाक्तेक्म। आ ग्युरा गे आंम मुर डा ठेयब हुल बाक्तेक्म। न्यायाधीस ५:४ 3 थमा पा, मुर आन दातेमी आ मुर शुश दाक्शो मुर बाक्नीम। गे इन मुर नेल्ल आन कली कोवब बाक्तीनी। मेकोपुकी इन खोइल आ नेक्था गाक्शो बाक्तेक्म। इन देंशो नेल्ल पाक्तेक्म। 4 मोसामी आंइ कली इन अरेशो लोव ‘पचा माल्नीनी’ दे माइक्तु। मेको अरेशो लोव याक्ब आ जात डा मुर नेल्ल आन के दुम्त। 5 मिनु येशुरुन पिप का दुम्त। मुर आन ठेयब मुरपुकी बुक्तेक्म। मिनु इस्राएल आन थर थर नेल्ल गुम्तेक्म। येशुरुन याक्ब-इस्राएल कली मान पतीक नें बाक्ब। प्रस्थान १५:१८; ब्यवस्था ३२:१५; प्रस्थान १९:७

6 रूबेन आ मुर शुश मदुम्तेक्म हना यो, ब्रॉइशा बाक्ल, मबेक्ल” देंत।

7 मिनु यहूदा आ परबम मार देंशो बाक्त, देंशा हना “परमप्रभु यावे, यहूदा आ लोव नेनीन। मेको कली आ मुर आन बाक्तीक चाक्कीन। मेको कली सक्ति गेने। मेको आ जोरी सत्रु आन परबम मेको कली वारच पतीन” देंत। 8 मिनु लेवी आ परबम मार देंशो बाक्त, देंशा हना “गे लेवी कली इन थुम्मीम गेने। इन ऊरीम इन थमा सुइक्चा डा गेय पाइब कली गेने। गे मेको कली मास्साहम नाक्ताक्नी। गे मेरीबा डा ब्वाक्कुम मेको नु जीतीनी” देंत। प्रस्थान २८:३०; १सामुएल १४:४१; प्रस्थान १७:२,७; भजन संग्रह ९५:८ 9 मेकोमी आ आम आफ आस परबम “गे मेको आस कली ममिन्नुड। मेकोमी आं खिं डा मुर आन कली प्रॉइतु। आ तौ आन कली मतुइक्त। मारदे हना मेकोमी इन लोव टिप्तु। मिनु गे नु कबल पशो बाक्त। प्रस्थान ३२:२७-२९; मत्ती १०:३७ 10 मेकोपुकीमी याक्ब कली इन पतीके लोव नु इस्राएली आन कली इन अरेशो लोव शेंनीम। मेकोपुकीमी इन डोंइती धूप चोइनीम। इन कली इन चढ़ेतीके तार नेल्ल चोशा चढ़ेतीके चढ़ेनीम। 11 परमप्रभु यावे, गे मेको कली आसीक गेने। मेको आन गेय ताक्कीन। मेको कली काइ मदाक्ब

आन कली नु आ जोरी सत्रु आन कली लेंशा मबोक्चा डा पा खतम सेलीन” देंत।

12 मिनु बेन्यामीन आ परबम मार देंशो बाक्त, देंशा हना “परमप्रभु यावे आ दाक्शो महिंचा डा पा नाइक्ब। नेल्ल क्येडा ठेयबमी मेको कली नाक्त रे कोवब। मेको आ दाक्शो मुर आ बला आस दातेम नाइक्ब” देंत। 13 मिनु योसेफ आ परबमी मार देंशो बाक्त, देंशा हना “परमप्रभु यावे आ रू आन कली आसीक गेवल। मेकोमी इर सरीड नु उइ रागी डा नेल्ल क्येडा रिम्शो तवल। उत्पत्ती ४९:२५ 14 नांम सिश्शो फल फुल तवल। महिना महिना डा रिम्शो फल फुल तवल। 15 माइत पहाड डा नेल्ल क्येडा रिम्शो अन्न नु गेना हना यो लीब डांडा डा शुश बाली नाली तवल। 16 मेको रू डा नेल्ल क्येडा रिम्शो सिश्शो शुश तवल। मिनु सीनै डांडाम बाक्ब आ दाक्शो तवल। मिनु मेको आसीक योसेफ आ पिया तार दुम्त। प्रस्थान ३:२-४; उत्पत्ती ४९:२६ 17 मेको आ लोकब आन दाते डा नेल्ल क्येडा ठेयब मुर, योसेफ आ पिया तार दुम्त। मेको डोंइती जरमेशो बाछा खोदेंशो बाक्ब। मेको ताइब बाक्ब। मेको आ गेव्र ब्वाकी डा ब्यफ आ गेव्र खोदेंशो बाक्ब। मेकोमी जात जात डा मुर आन कली खेरशा, रागी आ सुर सम्म नेक्ब। मेकोपुकी एफ्राइम आ लाख लाख डा मुर नु मनस्से आ हजार हजार डा मुर बाक्नीम” देंत। उत्पत्ती ४६:२०

18 मिनु जबूलून आ परबम मार देंशो बाक्त, देंशा हना “जबूलून, लाडगा लशा ग्येरसो। मिनु इस्साकार इ ताम्बुम बाक्शा ग्येरसो। 19 मेकोपुकीमी जात जात डा मुर आन कली डांडाम ब्रेलीम। मेकेर ठीक दुम्शो चढ़ेतीक चढ़ेनीम। मारदे हना मेकोपुकीमी समुन्द्र डा शॉप नु बाल्वाम खुइशो शॉप जाइनीम” देंत।

20 मिनु गाद आ परबम मार देंशो बाक्त, देंशा हना “गाद कली सोशो बोशो दुम्शा ग्येरसो। गाद गुप्स खोदेंशो पा बाप्शा बाक्ब। मेकोमी गुड नु पिया रेक्ब।

21 मेकोमी आंम कली नेल्ल क्येडा रिम्शो रागी योवतु। मारदे हना मेको कली कप्तान आ भाग वोइशो बाक्त। मेको नेल्ल इस्राएली आन डोंइती गाक्त। परमप्रभु यावेमी देंशो ठीक पतीके पाप्तु” देंत। गन्ती ३२:२९-३२

22 दान आ परबम मार देंशो बाक्त, देंशा हना “दान बाशान रे प्रेक्शा, जाक्ब, गुप्स आ चाइक्ब बाक्ब” देंत।

23 मिनु नाप्ताली आ परबम मार देंशो बाक्त, देंशा हना “नाप्ताली, गे परमप्रभु यावे आ दाक्शो, आसीक ताइब बाक्नेवे। गे पच्छिम नु दक्खिन इ के सेलो” देंत।

24 मिनु आशेर आ परबम मार देंशो बाक्त, देंशा हना “मुर आन दातेमी नेल्ल क्येडा आसीक राइब आशेर बाक्ब। मेको आ लोकबपुकीमी मेको कली दाक्तमेक्ल। मेको आ खोइल तेलम चिक्सेक्ल। 25 इ आग्लोपुकी फलाम नु कांसा के बाक्नीम। इ नाक्त दोदेंशो बाक्मे इ सक्ति यो मोदेंशोन बाक्ल” देंत।

26 मिनु “येशुरुन आ परमप्रभु खोदेंशो सुइ मबाक्ब। मेको इ कली वारच पाइक्चा कली स्वर्ग रे पीब। मेको सरीड मेर रे मान पचा पुंइसीशा पीब। येशुरुन याक्ब-इस्राएल कली मान पतीक नें बाक्ब। आ अर्थ ठीक पाइब बाक्ब। ब्यवस्था ३२:१५ 27 साइ नेसी डा परमप्रभु खुइशो बाक्तीक बाक्ब। इन डोंइती इन जोरी सत्रु आन हुल कली खेरतु। मिनु मेको आन परबम खतम सेलीन, देंत। 28 मोपतीके इस्राएली मारेइ मदुम्थु, रिम्शो पा बाक्ब। याक्ब आ बाक्तीकेमी श्येत मजाइनीम। मेको अन्न नु अडगुर आ रागीमी सीत यीब। लेवी २५:१८; १राजा ५:५; भजन संग्रह ६८:२७-२८; यस्वैया ५१:१-२; उत्पत्ती २७:२८ 29 गे इस्राएली, ग्येरसीने। परमप्रभु यावेमी प्रॉइचा पुंइसीशो इन खोदेंशो जात सु बाक्बा? परमप्रभु यावे इन कली वारच पाइब नु तेक्तीक बाक्ब। मेको इन ग्रातीक तरवार बाक्ब। इन जोरी सत्रु इन डोंइती बाप्नीम। मिनु गे मेको आन चीमी थेक्शा गाक्नीनी” दे आसीक गेशा, देंत। ब्यवस्था ४:७-८; भजन संग्रह ३३:१२; भजन संग्रह १४४:१५

## मोसा बेक्शो

34 मिनु नोले मोसा मोआब रे यरीको आ नेक्था बाक्शो नेबो डांडा रे पिसा डांडा डोंइसाक्व। मेको यरीको एर बाक्ब। परमप्रभु यावेमी

मेको कली गिलाद रागी नेल्ल दान सम्म कौंइताक्व। *ब्यवस्था ३:२७*  
 2 नाप्टाली आ रागी नेल्ल, एफ्राइम नु मनस्से, यहूदा आ रागी नेल्ल पच्छिम  
 गे डा समुन्द्र सम्म, 3 नेगेब नु दिंम, मेको यरीको डा दिंम बाक्ब। खजूर रवा  
 आ सहर यरीको रे सोआर सम्म कौंइताक्व। *इतिहास २८:१५* 4 मिनु  
 परमप्रभु यावेमी मेको कली “इन चच युइ आन कली गेनुड, दे अब्राहाम  
 इसहाक नु याकूब नु कसम जशो रागी एकोन बाक्ब। गो एको इ कली  
 कौंइतन। तन्न गे मेकेर लचा मताइनेवे” देंत। *उत्पत्ती १२:७* 5 मिनु परमप्रभु  
 यावेमी आ देंशो खोदेंशो पा परमप्रभु यावे आ गेय पाइब मोसा मोआब  
 रागीम बेक्त। *ब्यवस्था ३२:५०* 6 मिनु परमप्रभुमी मोसा कली मोआब रागी  
 बेथ-पेओर आ डौंइती दिंम कामी थिम्तु। तन्न मुल सम्म मोसा आ तुरस  
 सुइमी मतुइक्नीम। 7 मोसा बेक्मेनु, मेको सहे का २१ बर्स दुम्शो बाक्त।  
 मेको आ मिक्च ब्राभा मदुम्शो बाक्त। आ बोल यो मग्युम्शो बाक्त। *ब्यवस्था*

३१:२ 8 मोआब डा दिंमम इस्राएलीपुकीमी ३० नाक्त सम्म मोसा आ पर्बम  
 रौंका पाम्तेक्म। नोले मोसा आ पर्बम रौंका पतीक नाक्त नुप्त।  
 9 मिनु नून आ तौ यहोसु रुप्तीक तुइक्तीक सोक्तीम ब्रीशो बाक्त। मारदे  
 हना मोसामी आ गुइ मेको आ तार वोइश्शो बाक्त। मिनु परमप्रभु यावेमी  
 मोसा कली माइश्शो खोदेंशो पा इस्राएलीपुकीमी यहोसु कली टिम्तेक्म।  
*गन्ती २७:१८-२३; १तिमोथी ४:१४; २तिमोथी १:६*  
 10 मेना रे मुल सम्म इस्राएली आन दातेमी मोसा खोदेंशो परमप्रभु यावे  
 आ लोव्र पाइब सुइ मगूम। परमप्रभु यावेमी मेको कली थमा पा तुइक्बाक्त।  
*प्रस्थान ३३:११; गन्ती १२६-८; १कोरिन्थी १३:१२* 11 मिनु परमप्रभु यावेमी  
 मेको कली इजीप्त रागीमी चिन्ड नु छक लाक्चा डा गेय पथ सोइक्ताक्व।  
 मोदेंशो मुल सम्म सुइम मपावो मोसामी फाराओ, आ गेय पाइब नु रागी डा  
 मुर नेल्ल आन डौंइती कौंइताक्व। 12 मिनु मेकोमी इस्राएली आन दातेमी  
 सक्तिम पाइश्शो गेय नु हिंचा डा गेय कौंइशो बाक्त।

## यहोसु

एको किताब ब्रेक्ब मुर आ नें तेइ मब्रेक्शो बाक्ब। तन्न “यहोसुमी मेको नेल्ल परमप्रभु आ अरेशो लोव ब्रेक्तीक किताबमी ब्रेक्ताक्व” दे ब्रेक्शो बाक्ब। टाल्मुत माइश्शो यहूदी आन माइत किताबमी “ब्रेक्ब मुर यहोसु बाक्ब। मिनु यहोसु बेक्म नोले डा लोव फिनेहासम तेम्शो बाक्त्” दे ब्रेक्शो बाक्ब। एको किताब ब्रेक्ची ना यबुसीपुकी रागीम बाक्शो बाक्तेक्म। पिप दाऊदमी आ सासन पची ना मेको आन कली खेरशो बाक्त्। एको किताब ब्यवस्था आ नोले डा दुम्शा, मोसा आ बेक्शो रे यहोसु आ बेक्शो सम्म इस्राएली आन इतिहासम बाक्ब। एको किताबम इस्राएली आन १२ थर का का पा आन थेरशो रू योक्तीके ला ममाइ, मेको रागी कली ग्राशा, आंम के सेल्चा कली परमप्रभु यावे आ देंशो टितीकेम ला दुम्ब, दे शेंशो बाक्ब। मेको आ कौंइतीके आकान आ मटितीके बाक्त्।

१. कनान रागी आंम के सेल्चा कली ठीक दुम्तीके
२. कनान रागी कली ग्राशो
३. इस्राएली आन थेरशो रू योक्शो

### इस्राएली रागी ओवचा सासीशो

१ परमप्रभु यावे आ गेय पाइब मोसा बेक्म नोले परमप्रभु यावेमी मोसा आ गेय पाइब नून आ तौ, यहोसु कली लोव पात्तु। २ परमप्रभु यावेमी मार लोव पात्तु देंशा हना “आं गेय पाइब मोसा बेक्त्। मोपतीके गे मुर नेल्ल आन कली लाइक्चा सासो। मिनु गो इस्राएली आन कली गेचा चिक्शो रागी यर्दन खोला आ आइक्ची हांबु लावो। ब्यवस्था ३४:५ ३ गोमी मोसा कली देंशो खोदेंशो पा, इन खोइलीम थेक्शो रागी नेल्ल इन कली गेता। ब्यवस्था ११:२४ ४ गोरशो रागी नु लेबानोन रे ठेयब युफ्रेटीस खोला सम्म, हिन्ती आन रागी नेल्ल, पच्छिम गे डा ठेयब समुन्द्र सम्म इन रागी दुम्ब। ५ गे मबेक्डे सम्म इ कली सुइमी यो फुने मचाप्नीम। गो दोपा मोसा नु बाक्डा, मोपा गे नु यो बाक्नुड। गो इ कली गेना हना यो कोव्रनुड। मिनु गेनायो मप्रौंनुड। ब्यवस्था ३१:७,८; हिब्रू १३:५

६ गे बोल्यो नु महिंब दुमो। मिनु गो डौंइती ‘इ किकी पिपी आन कली गेनुड’ दे कसम जशो रागी, गे इस्राएली आन कली आंम के सेल्पाइक्चा माल्नेवे। ब्यवस्था ३:२८; ७ गे थम बोल्यो नु महिंब दुमो। आं गेय पाइब मोसामी इ कली अरेशो लोव नेल्ल होस पा टिवो। मेको रे ग्युरा पेरा गे मलावो। मिनु गे ते लते हना यो ग्रानेवे। ब्यवस्था ५:२९; ब्यवस्था २९:८; १राजा २:३ ८ एको आं अरेशो लोव डा किताब इ थुं रे डोन मवोतो। मेको कली नाक्दो नाक्ती मिन्तो। मेकेर ब्रेक्सीशो नेल्ल होस पा टिवो। मो पाप्तीवी हना, गे ग्राना ग्रान गाक्नेवे। मिनु इ पतीक नेल्ल थम रिम्शो दुम्ब। भजन संग्रह १:२-३ ९ गो इ कली ‘बोल्यो नु महिंब दुमो’ देंती। इ थुं लुक्च मलल। गे गेनायो हिंशा खिंखि मपावो। मारदे हना गे ते लते हना यो, गो, परमप्रभु यावे, इ परमप्रभु, गे नु बाक्नुड” दे परमप्रभु यावेमी यहोसु कली देंत।

### यर्दन खोला शोक्सीचा गोशो

१० मिनु यहोसुमी मेकेर डा ठेयब मुर आन कली “गे नेल्ल मुर आन बाक्तीकेमी लने। मिनु मेको आन कली ११ ‘बुत लाम्ज कुरशा सासीन। मारदे हना सांबु नाक्ती परमप्रभु यावे, इन परमप्रभुमी गेशो रागी आंम के सेल्चा कली यर्दन खोला शोक्सीचा माल्नय’ देनीन” दे अरेप्टु। १२ मिनु यहोसुमी रूबेन आ थर, गाद आ थर नु मनस्से आ उइक्थ थर कली ब्यवस्था ३:१२-२०; गन्ती ३२:२०-२९ १३ “परमप्रभु यावे आ गेय पाइब मोसामी इन कली अरेशो लोव मिन्तीन। मिनु मेकोमी इन कली ‘परमप्रभु यावे, इन परमप्रभुमी इन कली नाइक्पाइक्तीक गेशा, मेको रागी गेनुड’ देंशो लोव मप्रेंदीन। १४ इन मीश नु आलपुकी, बी ब्यफ, क्यारश भेडा नेल्ल मोसामी इन कली गेशो रागी यर्दन ओंथ हांबुम बाक्चा माल्नीम। तन्न गे लडाइ पाइब वौंइश मुरपुकी या कुरशा इन लोक्ब आन कली वारच पचा कली मेको आन

क्येडा डौंइती आइक्ची हांबु लचा माल्नीनी। १५ मिनु परमप्रभु यावेमी इन लोक्ब आन कली, इन कली खोदेंशो पा नाइक्चा मगेवा सम्म, मेको रागी आंम के मसेल्मे सम्म नु परमप्रभु यावे, इन परमप्रभुमी मेको आन कली गेचा चिक्शो रागी मग्रामा सम्म मेको आन कली वारच पचा माल्नीनी। मिनु नोले परमप्रभु यावे आ गेय पाइब मोसामी यर्दन आ पूर्व गे इन कली गेशो रागीमी लेशशा, बाक्ने चाप्नीनी” देंत।

१६ मिनु मेकोपुकीमी यहोसु कली “गे आंइ कली मार मार अरेनी, गो मेको नेल्ल पाइनीकी। मिनु गे आंइ कली ते ते सोइक्नीनी, गो मेक मेक लाइनीकी। १७ दोपा मोसा आ लोव नेल्ल टिशो नया, मोपान इन लोव यो टीनीकी। दोपा परमप्रभु यावे, इन परमप्रभु मोसा नु बाक्मे, मोपान गे नु यो बाक्ल। १८ सुमी इन अरेशो लोव ‘मपाइनुड’ दे इन लोव मनेंबा, मेको साइक्चा पुंइसीब। मोपतीके गे बोल्यो नु महिंब दुमीन” देंतेक्म। यहोसु १:६

### यरीकोम क्यारी पथ सोइश्शो

२ मिनु नून आ तौ यहोसुमी, सुइम मतुइक्चा डा पा, शिन्तीम रे मुर निक्शी क्यारी पथ सोइक्ताक्व। मिनु यहोसुमी मेको आस कली “मेको रागी नु यरीको नेल्ल क्यारी पथ लस” देंत। मिनु मेको निक्शी मेकेर जाक्दीश्शा, राहाब माइश्शो तेल्लेम आ खिंमी बास बाक्सा बाक्त्। मत्ती १:५; हिब्रू ११:३१; याकूब २:२५ २ मिनु मेकेर डा मुर कामी यरीको डा पिप कली “हजुर, मुलाक्त् नाक्दो इस्राएल डा मुर निक्शी एको रागी कली क्यारी पथ, जाक्ताक्व” दे मदा बाक्त्। ३ मिनु यरीको डा पिपमी राहाब आ बाक्तीकेमी मुर सोइक्ता नाक्त्। मेकोपुकीमी राहाब कली “इ खिंमी जाक्शो मेको मुर निक्शी आस कली गुंइशा, एक चाक्को। मारदे हना मेको निक्शी इं रागी नेल्ल कली क्यारी पथ जाक्शो नसी” दे लोव सोइक्ता बाक्त्। ४ तन्न मेको मीश मुरुमी मेको निक्शी आस कली लाइश्शा, खूइक्तीम्सी बाक्त्। मिनु मेकोमी लोव चाक्ब आन कली “मेको निक्शी थमा पा आं बाक्तीकेमी जाक्ताक्व। तन्न ते रे जाक्शो नसी गो मतुइक्त्। ५ मिनु नां रिक्शा, सहर डा ठेयब लाप्चो चोक्ची ना, मेको निक्शी गूशा गाक्ताक्व। मेको ते लसा गो मतुइक्नुड। रीब पा माल्तीनी हना, थिन्तीनी कौं” दे लोव लेत्ता बाक्त्। ६ तन्न मेकोमी मेको निक्शी आस कली तला तारी वोइश्शा, पले आ डाठमी सुम्शा, खूइश्शा वोइश्शो बाक्माक्त्। ७ मिनु मेको निक्शी आस कली खेदा पाइबपुकी यर्दन डा लां लशा, खोला सम्म जाक्दीम्मा बाक्त्। मेको खेदा पाइबपुकी सहर रे गूमा नोले ठेयब लाप्चो चोक्गमे बाक्त्।

८ मेको मीश मुर इप्चा क्येडा डौंइती मेको निक्शी आस बाक्तीक डोइश्शा, गुम्थ लमाक्त्। ९ मिनु मेको मीश मुरुमी मेको आस कली “परमप्रभु यावेमी आंइ रागी इन कली गेशो बाक्ब, दे गो तुइक्नुड। मारदे हना एको रागीम बाक्ब मुर नेल्ल इन कली तशा, शुश हिंनीम। प्रस्थान २३:२७ १० गे इजीप्त् रागी रे गूशा पिनीनु, परमप्रभु यावेमी इन डौंइती लल



समुन्द्र सोवपाइवक्तु। मिनु यर्दन आइक्ची हांबु डा एमोरी आन पिप सीहोन नु ओग आस कली साइशा खतम सेल्शो लोव गोपुकीमी नैतक। प्रस्थान १४:२१; गन्ती २१:२१-२६<sup>11</sup> मोदेशो लोव नेशो नोले, गोपुकी साप्पा हितक। इन पतीक तशा, गो नेल्ल शुश हितक। मारदे हना परमप्रभु यावे, इन परमप्रभु इर स्वर्ग डा नु उइ रागी डा परमप्रभु बाक्ब। यहोसु ५:१; प्रस्थान १५:१४-१५; ब्यवस्था ४:३९<sup>12</sup> मोपतीके गो इस कली वारच पाता। गे परमप्रभु यावे आ नें थिशा, कसम जसे। मार कसम जस देंशा हना, गो इस कली वारच पशो खोदेशो पा, गे लडाइ पनीनु, आं खिं डा मुर नेल्ल आन कली यो वारच पसे। आं कली वारच पतीके चिन्ड का गेयीसी। यहोसु ६:२३,२५<sup>13</sup> मिनु आं आम आफ, आं लोकबपुकी नु मेको आन खिं डा मुर नेल्ल आन कली ब्रोंइचा गेन। बेक्चा रे प्रोनीन” दे मेकोमी देंमाक्त।<sup>14</sup> मिनु मेको निक्शीमी “गे आं पचशो गेय सुइ आन कली मर्देंते हना, नु परमप्रभु यावेमी एको रागी आंइ कली गेवा नोले गो इ कली थमा पा वारच पा रिम्शो पाइनस्कु। इ कली साइक्वा क्येडा डोंइती आंस कली साइक्वा माल्नीम” देंसा बाक्त।

<sup>15</sup> मिनु मेको मीश मुरुमी मेको निक्शी आस कली झेल रे डोरी तोक्शा, उइ तोइक्वा गेम्सी बाक्त। मारदे हना मेको आ खिं मेको सहर डा गारोम बाक्माक्त।<sup>16</sup> मिनु मेको मीश मुरुमी मेको निक्शी आस कली “गे डांडा गे लसे। मेक लाइतीसी हना, खेदा पाइबपुकीमी इस कली मथिल्नीम। मेको खेदा पाइब एक्व मलेम्मा सम्म, गे सां नाक्ती मेकेर खूंइसीस। मिनु नोले इस लां लसे” देंमाक्त।<sup>17</sup> मिनु मेको निक्शीमी “गे आस देंशो मपाप्तीवी हना, गो कसम मजशो खोदेशो दुम्नस्कु।<sup>18</sup> गो लेंशा एक जाक्कानु, गे आंस कली तोइक्तीक झेलम मेको लल डोरी फ्रेंशा वोतो। इ आम आफ, इ लोकब नु इ खिं डा मुर नेल्ल यो इ खिंम बाक्वा माल्नीम।<sup>19</sup> मेना सु इन खिं रे लांम गूबा, मेको साइक्वा पुंडसीब। मिनु आंइ कली मारेइ यो दोस मदुम्ब। सु चहिं इ खिंम बाक्शा यो, साइक्वा पुंडसीबा, मेको आ दोस आंइ तारी दुम्ल।<sup>20</sup> तन्न एको लोव गे सुइ कली देंते हना, आंस कली जपाइश्शो कसम मराइनीक” देंसा बाक्त।<sup>21</sup> मिनु मेको मीश मुरुमी “इस देंशो खोदेशो दुम्ल” देंमाक्त। मिनु मेको निक्शी लसा बाक्त। मिनु नोले मेको मीश मुरुमी आ झेलम मेको लल डोरी फ्रेंशा वोदा बाक्त।

<sup>22</sup> मेको निक्शी लशा, डांडामी जाक्दीश्शा, खेदा पाइब मलेम्मा सम्म नाक्ती सां मेकेर बाक्सा बाक्त। खेदा पाइबपुकीमी मेको निक्शी आस कली साप्पा माल्मे बाक्त हना यो, मथिदमे बाक्त।<sup>23</sup> मिनु मेको निक्शी डांडा रे बुष्शा, लेशशा, खोला आइक्ची हांबु नून आ तौ यहोसु आ बाक्तीक जाक्दीश्शा, मेको कली मार मार दुम्मे, मेको नेल्ल शोव्रताक्स।<sup>24</sup> मेको निक्शीमी यहोसु कली “थमा पा, परमप्रभु यावेमी मेको रागी नेल्ल इं कली गेशो बाक्ब। मेको रागी डा मुर इं कली तशा, शुश हिंशा, खिंखि पशो बाक्तेक्म” देंताक्स। यहोसु २:९

### यर्दन खोला शोक्सीशो

**3** मिनु यहोसु सुनी कना बोक्शा, इस्राएलीपुकी नु शित्तीम प्रोंइशा, यर्दन खोलामी जाक्तेक्म। मिनु आइक्ची हांबु शोक्सीचा क्येडा डोंइती मेकेर बास बाक्तेक्म। गन्ती २५:१<sup>2</sup> मिनु सां नाक्त नोले ठेयब मुरपुकी मुर आन बाक्तीकेमी लाम्तेक्म।<sup>3</sup> मिनु मेकोपुकीमी मुर आन कली “गेपुकी गेना परमप्रभु यावे, इन परमप्रभु आ कबल पशो सन्दोस चढेब लेवीपुकीम कुरशो ताइनीनी, मेना छुल छाल बोक्शा, इन मारेइ मारेइ कुरशा, मेको आन नोले खोतीन।<sup>4</sup> मो पाइतीनी हना, इन लतीक लां तुइक्नीनी। मारदे हना गे मेको लां डोंइती मगाक्शो बाक्तीनी। गे मेको आन क्येडा हज्जार निक्शी हात नोले ला गाक्कीन। मेको आन नेक्था मलन” देंतेक्म। कुबीत का, ०.५ मिटर खोदेशो बाक्ब।<sup>5</sup> मिनु यहोसुमी मुर आन कली “गेपुकी आंम कली परमप्रभु यावे आ डोंइती बाक्चा कली ठीक सेल्सीन। मारदे हना दीसा परमप्रभु यावेमी इं दातेमी छक लाक्चा डा गेय पाइब” देंत। प्रस्थान १९:१०<sup>6</sup> यहोसुमी चढेब आन कली “परमप्रभु आ कबल पशो सन्दोस कुरशा, मुर आन डोंइती गाक्कीन” देंत। मिनु मेकोपुकी सन्दोस कुरशा, मुर आन डोंइती गाक्तेक्म। यहोसु ६:६

<sup>7</sup> मिनु परमप्रभु यावेमी यहोसु कली “मुलाक्ते रे गो इ कली इस्राएली नेल्ल आन डोंइती ठेयब सेल्नन। दोपा गो मोसा नु बाक्डा, मोपा गे नु यो बाक्नुड, दे नेल्ल आन कली तुइक्पाइक्नुड। यहोसु ४:१४; यहोसु १:५, १७<sup>8</sup> गे कबल पशो सन्दोस कुरब चढेब आन कली ‘गेपुकी यर्दन खोला आ सुर डा ब्वाक्कुम जाक्दीश्शा, मेक उइ राष्शा, बाक्चा माल्नीनी’ दे अरेचा माल्नेवे” देंत।<sup>9</sup> मिनु यहोसुमी इस्राएली आन कली “ओथ पिन। मिनु परमप्रभु यावे, इन परमप्रभु आ लोव नेनीन” देंत।<sup>10</sup> मिनु यहोसुमी “ब्रोंइशा बाक्ब परमप्रभु इन दातेमी बाक्ब, गे तुइक्ब दुम्नीनी। मिनु मेकोमी कनानी, हित्ती, हिच्ची, परिज्जी, गिरगाशी, एमोरी नु यबुसी आन कली इन डोंइती रे थमा पा खेरब।<sup>11</sup> कोवडीन, रागी नेल्ल आन कली सासन पाइब परमप्रभु आ कबल पशो सन्दोस इन डोंइडोंइती यर्दन शोक्चा कली लाइब।<sup>12</sup> मिनु मुल इस्राएल डा थरपुकी रे १२ जना वोंइश मुर थर का रे का का पा योवडीन।<sup>13</sup> गेना परमप्रभु यावे, रागी नेल्ल आन कली सासन पाइब परमप्रभु आ कबल पशो सन्दोस कुरब चढेब आन खोइली यर्दन डा ब्वाक्कुमी खुम्नीमी, मेना इर रे यिशो यर्दन डा ब्वाक्कु नांइसीब। मिनु गारो खोदेशो पा राष्शा बाक्ब” देंत। भजन संग्रह ९७:५; मीका ४:१३; जकरिया ४:१४

<sup>14</sup> मिनु मुर नेल्ल यर्दन शोक्सीचा कली ठीक पा बाक्मानु, चढेबपुकीमी मुर आन डोंइती परमप्रभु यावे आ कबल पशो सन्दोस कुरशा गाक्तेक्म।<sup>15</sup> मिनु बाली नाली रुच्ची ना, खोला गेना हना यो शुश बारशो बाक्ब। मिनु चढेबपुकीमी आन खोइली यर्दन खोला आ सुर डा ब्वाक्कुम खुम्मेनु,<sup>16</sup> इर रे यिशो ब्वाक्कु तेक्साक्व। मेको गारो खोदेशो दुम्शा, मुर आन लतीके लां रे डोन बाक्त। मेको ते तेक्सीशो बाक्त देंशा हना, चारेथन आ नेक्था डा आदम सहर माइश्शोमी तेक्सीशो बाक्त। मिनु इर रे यिशो दिंम डा अराबाह समुन्द्र, मेको कली हिक्सी समुन्द्र यो देंनीम, यीब ब्वाक्कु तेक्सीशो बाक्त। प्रस्थान १४:२१-२२; भजन संग्रह ११४:३<sup>17</sup> मिनु मुरपुकी गाक्शा, सोवशो खपीम यर्दन शोक्सीचा गोम्तेक्म। मिनु परमप्रभु यावे आ कबल पशो सन्दोस कुरब चढेबपुकी यर्दन आ दातेमी सोवशो खपीम राष्शा, रिम्शा बाक्तेक्म। मिनु इस्राएली नेल्ल सोवशो खपीम गाक्शा, यर्दन आइक्ची हांबु जाक्दीत्तेक्म।

### १२ ओटा फुल्लु वोइश्शो

**4** मिनु मुर नेल्ल यर्दन आइक्ची हांबु शोक्ने थुम्मे नोले परमप्रभु यावेमी यहोसु कली<sup>2</sup> “मेको मुर आन दाते रे १२ जना वोंइश मुर योवडो। थर का रे का का पा योवशा लावो।<sup>3</sup> मेको आन कली ‘यर्दन आ दातेमी चढेब आन राप्तीके रे १२ ओटा फुल्लु गुष्शा, कुरशा चाक्कीन। मिनु नाक्दो ते बास बाक्नीनी, मेको फुल्लु यो मेक उइ वोतीन’ दे मतो” देंत।<sup>4</sup> मिनु यहोसुमी आ योवशो इस्राएली थर नेल्ल डा का का पा १२ जना वोंइश मुर आन कली ब्रेत्ताक्व।<sup>5</sup> मिनु यहोसुमी मेको आन कली “गे यर्दन आ दातेमी परमप्रभु यावे, इन परमप्रभु आ कबल पशो सन्दोस आ डोंइती लने। मिनु मेकेर इस्राएल आ १२ थर खोदेशो पा १२ ओटा फुल्लु बलाम लाष्शा पितीन।<sup>6</sup> मिनु मेको इन कली मिम्तीके दुम्ल। दीसा निल्थी इन तमी तौपुकीमी ‘एको फुल्लु आ अर्थ मार बाक्म?’ दे हिल्लो पाम्तेक्म हना, प्रस्थान १२:२६;<sup>7</sup> गेपुकीमी मेको आन कली ‘परमप्रभु यावेमी आ कबल पशो सन्दोस यर्दन शोक्ची ना, मेको आ डोंइती यर्दन डा ब्वाक्कु तेक्पाइक्तु। मेको यर्दन शोक्ची ना, यर्दन डा ब्वाक्कु नाइक्पाइक्तु। एको फुल्लु इस्राएली आन कली गेना हना यो मिम्तीक दुम्ल’ देंचा माल्नीनी” देंत।<sup>8</sup> मिनु परमप्रभु यावेमी यहोसु कली माइश्शो खोदेशो पा यहोसुमी दोपा अरेवा, मोपा इस्राएल डा १२ थर डा १२ जना वोंइश मुरुमी १२ ओटा फुल्लु यर्दन आ दाते रे पिष्शा, मेको आन बाक्शो दिंममी वोइक्तेक्म।

### १२ ओटा फुल्लु यर्दनमी वोइश्शो

<sup>9</sup> मिनु यहोसुमी कबल डा सन्दोस कुरशा चढेबपुकी राप्तीकेमी यो यर्दन खोला आ दातेमी १२ ओटा फुल्लु वोइक्तु। मिनु मेको फुल्लुपुकी मुलाक्त सम्म बाक्नीम।

10 मिनु सन्दोस कुरब चढेबपुकी यर्दन आ दातेमी परमप्रभु यावेमी यहोसु कली दैशो लोव्र नेल्ल मपामे सम्म राष्ठा बाक्तेक्म। डोंइती मोसामी अरेशो खोदेशो पा यहोसुमी मुर आन कली मअरेवा सम्म राष्ठा बाक्तेक्म। मिनु मुरपुकी रीब पा शोक्साक्म। 11 मिनु मुरपुकी शोक्ने थुम्मे नोले, परमप्रभु यावे आ कबल पशो सन्दोस कुरब आन डोंइती चढेबपुकी यो शोक्साक्म।

12 मोसामी मेको आन कली दैशो खोदेशो पा, रूबेन आ थर, गाद आ थर नु मनस्से आ उडक्थ थर डा वोंइश मुर या कुरशा, इस्राएली आन डोंइती गाक्तेक्म। यहोसु १:१२-१६ 13 मिनु परमप्रभु यावे आ डोंइती हेररा ४० हजार लडाइ पाइब, या कुरशो वोंइश मुरपुकी शोक्शा, लडाइ पचा कली यरीको डा दिंम गे लांम्तेक्म।

14 मेको नाक्त परमप्रभु यावेमी यहोसु कली इस्राएली आन डोंइती ठेयब सेल्लु। मिनु मेकोपुकीम मोसा कली हिक्शो खोदेशो पा यहोसु कली यो मबेक्म सम्म हिक्तेक्म। यहोसु ३:७

15 मिनु परमप्रभु यावेमी यहोसु कली 16 “कबल पशो सन्दोस कुरब चढेब आन कली ‘मुल यर्दन रे इर कुन’ दैशा ब्रेत्तो” दे माइक्तु। 17 मोपतीके यहोसुमी मेको आन कली “यर्दन रे इर कुन” दे ब्रेत्ताक्व। 18 परमप्रभु यावे आ कबल पशो सन्दोस कुरब चढेबपुकी यर्दन आ दाते रे गाक्शा, खोला आ सुर डा सोव्रशो खपीम थेक्मे नोले यर्दन डा ब्वाक्कु लैशा डोंइती डा खोदेशो पा एर आँथ सुष्ठा शांइसाक्व।

### गिल्गालमी वोइश्शो फुल्लु

19 मिनु इस्राएलीपुकी डोंइती डा महिना डा १० नाक्तीमी यर्दन रे यूतेक्म। मिनु यरीको आ पूर्व गे गिल्गाल माइक्तीकेमी बास बाक्तीक सेल्साक्म। यहोसु ५:९-१० 20 मिनु यहोसुमी मुरपुकीम यर्दन रे गुंइशा पिश्शो १२ ओटा फुल्लु गिल्गालमी पुक्पाइक्तु। 21 मिनु इस्राएली आन कली “इन तमी तौपुकीमी आन आफ आन कली ‘एको फुल्लु आ अर्थ मार बाक्बा?’ दे हिल्लो पांम्तेक्म हना, यहोसु ४:६ 22 गेपुकीमी इन तमी तौ आन कली ‘गो इस्राएलीपुकी सोव्रशो खपीम गाक्शा, यर्दन खोला शोक्सीशो नकी’ दैचा माल्नीनी। 23 दोपा परमप्रभु यावे, इन परमप्रभुमी लल समुन्द्र मशोक्सीशो सम्म सोव्रपदा, मोपान आंइ डोंइती यर्दन मशोक्सीशो सम्म मेकेर डा ब्वाक्कु यो सोव्रपाइक्तु। यहोसु ३:९-१७; प्रस्थान १४:२१-२२ 24 मिनु रागी डा मुर नेल्लेमी परमप्रभु यावे, इन परमप्रभु ठेयब सक्ति पाइश्शो बाक्ब, दे तुइक्तमेक्ल। मिनु गे परमप्रभु यावे, इन परमप्रभु कली तुइश्शा, गेना हना यो मान पा हिनीन, दे मोदेशो पाप्तु” दैत।

### खोइक्तीक चिनु खोइश्शो

5 मिनु यर्दन आइक्वी हांबु पच्छिम गे डा एमोरी आन पिप नेल्ल नु ठेयब समुन्द्र आ नेक्था डा कनानी आन पिप नेल्लेमी “परमप्रभु यावेमी इस्राएली आन डोंइती यर्दन खोला मशोक्सीमा सम्म सोव्रपाइक्तु” दे नैशा, मेकोपुकी इस्राएली आन कली तशा, साप्पा हिंशा आन थुं लुक्व लत। यहोसु ३:१६; यहोसु २:२४

2 मेना परमप्रभु यावेमी यहोसु कली “फुल्लु के खोइक्तीक सेल्शा, चिनु मखोइश्शो इस्राएली आन कली खोइक्तीक चिनु खोतो” दे अरेप्तु। प्रस्थान ४:२५; उत्पत्ती १७:१२-१४ 3 मिनु यहोसुमी फुल्लु के खोइक्तीक सेल्शा, गिबेआथ-हारालोथमी इस्राएली आन कली खोइक्तीक चिनु खोइक्तु। 4 यहोसुमी मारदे इस्राएली आन कली खोइक्तीक चिनु खोइक्तु दैशा हना, इजीप्त रागी रे पिशो वोंइश मुर नु लडाइ पाइब नेल्ल गोरशो रागीमी बेक्ने थुम्शो बाक्तेक्म। 5 इजीप्त रागी रे पिशो वोंइश मुर नेल्ल आन के खोइक्तीक चिनु खोइक्ने थुम्शो बाक्तेक्म। तन्न गोरशो रागीमी जरमेशो आन कली चहिं खोइक्तीक चिनु मखोइश्शो बाक्तेक्म। 6 मिनु डोंइती परमप्रभु यावेमी आंइ किकी पिपी आन कली “दूध नु खुदो शुश बाक्शो रागी इन चच युड आन कली गेनुड” दे कसम जाप्तु। तन्न आ लोव्र मटितीके इजीप्त रे पिशो लडाइ पाइब नेल्ल ४० बर्स गोरशो रागीमी मबेक्मा सम्म हिरचा माल्तेक्म। परमप्रभु यावेमी मेको आन मटितीके मेको आन कली “गे इन कली मेको दूध नु खुदो शुश बाक्शो रागी ओव्रचा मगेनुड” दे कसम

जशो बाक्त। गन्ती १४:२२-२३ 7 मेकोमी आन आफ आन पा डा आन तौ आन कली मेको रागी तचा कली कोल्पाइक्तु। मिनु यहोसुमी मेको आन तौ आन कली खोइक्तीक चिनु खोइक्पाइक्तु। मारदे हना लांमी गाक्तीके मेको आन कली खोइक्तीक चिनु मखोइश्शो बाक्तेक्म।

8 मिनु नेल्ल मुर आन कली खोइक्तीक चिनु खोइक्ने थुम्मे नोले, मेकोपुकी खोइश्शो गार मसाम सम्म आन बाक्तीकेमी बाक्शो बाक्तेक्म। 9 मिनु परमप्रभु यावेमी यहोसु कली “मुलाक्त डा नाक्ती इजीप्त डा इन मुने नेल्ल क्याम्ताक्ड” दैत। मोपतीके मुलाक्त सम्म मेको आन बाक्शो बाक्तीके कली गिल्गाल दैशो बाक्नीम। यहोसु ४:१९

### पास्सा चाड मानेशो

10 इस्राएलीपुकी गिल्गाल सहरम बाक्शो बाक्तेक्म। मिनु मेकोपुकीमी महिना डा १४ नाक्ती पास्सा चाड मानेक्तेक्म। मेको यरीको डा दिंमम बाक्शो बाक्तेक्म। प्रस्थान १२:६,३९; लेवी २३:१०,१४; २राजा २३:२१:२२; होसे ९:१५ 11 पास्सा चाड आ दीसा नाक्ती मेकोपुकीमी मेको रागी डा सिश्शो अन्न रे पा बोब ओख्ती मसुप्शो शोब्ले नु कारशो अन्न जांम्तेक्म। 12 मेको रागी डा अन्न जामे नोले, आ दीसा नाक्त रे मन्ना शोब्ले यिचा नांइसाक्व। मेकोपुकीमी मेको नाक्त रे कनान रागी डा अन्न जांम्तेक्म। प्रस्थान १६:३५

### स्वर्ग डा गेय पाइब नु यहोसु

13 यहोसु यरीको आ नेक्था बाक्मेनु, मेको आ डोंइती गुइमी तरवार शेशा मुर का दोक राष्ठा ताप्तु। मिनु यहोसु मेको आ नेक्था लशा “गे आंइ मुर ननी देय आंइ जोरी सत्रु आ मुर ननी?” दे हिल्लो पाप्तु। गन्ती २२:२३,३१ 14 मिनु मेकोमी “ममाइ, गो परमप्रभु यावे आ फौज आन कली चलेब नड। मोपतीके जाक्ती” दैत। मिनु यहोसुमी गु बाष्ठा सेउ पशा “आं प्रभु, गो इन गेय पाइब नड। आं कली मार लोव्र पाइनीनी?” दे हिल्लो पाप्तु। 15 मिनु परमप्रभु यावे आ फौज आन कली चलेबमी यहोसु कली “इ लिक्शो जुत्ता प्रुतो। मारदे हना इ बाक्शो परमप्रभु यावे आ बाक्तीक बाक्ब” दैत। मिनु यहोसुमी मेको आ दैशो खोदेशो पा आ जुत्ता प्रुइक्तु। प्रस्थान ३:५

### यरीको सहर कली ग्राचशो

6 मिनु यरीको डा मुरपुकीमी इस्राएली आन कली तशा, आन गारो डा ठेयब लाप्चो चोक्तेक्म। मिनु सुइ मुर सहर रे खिंडगा लाडगा मपाम।

2 मिनु परमप्रभु यावेमी यहोसु कली “गो यरीको, मेकेर डा पिप नु मेकेर डा लडाइ पाइब नेल्ल इ कली गेता। 3 मोपतीके ६ नाक्त सम्म, नाक्तीमी खेयप का इ लडाइ पाइब वोंइश मुर नेल्ल आन कली मेको यरीको सहर एर आँथ हिरपतो। 4 मिनु ७ जना चढेब ७ ओटा ताप्तीक ग्रोव्र कुरशा, परमप्रभु यावे आ सल्ला पतीक सन्दोस कुरशो चढेब आन डोंइडोंइती गाक्वा माल्नीम। मिनु ७ नाक्तीमी गे ७ खेयप मेको सहर एर आँथ हिरचा माल्नीनी। मेना मेको ७ जना चढेबपुकीमी आन ग्रोव्र ताम्ना ताम्न गाक्वा माल्नीम। 5 मिनु मेकोपुकीमी शुश रेयके पा ग्रोव्र ताम्ना ताम्न बाक्मानु, इन मुर नेल्लेमी मेको रेयके नेन्मे नोले, ठेयब सेंदा पा ग्रीचा माल्नीम। मोपा ग्रीमानु, मेको सहर डा गारो नेल्ल ब्रेब्ब। मिनु मुर नेल्ल आंम आंम डोंइती बारशा, ब्रेश्शो गारो डोइक्वा माल्नीम” दे परमप्रभुम माइक्तु।

6 मिनु नून आ तौ यहोसुमी चढेब आन कली ब्रेश्शा, मेको आन कली “परमप्रभु यावे आ कबल पशो सन्दोस कुरीन। मेको ७ जना अरु चढेबपुकी चहिं ७ ओटा ताप्तीक ग्रोव्र कुरशा, परमप्रभु यावे आ कबल पशो सन्दोस कुरब आन डोंइती गाक्पतीन” दैत। 7 मिनु मेकोमी मुर आन कली “गे यो सहर एर आँथ हिरसीन। मिनु या कुरशो मुरपुकी परमप्रभु यावे आ कबल पशो सन्दोस आ डोंइडोंइती गाक्वा माल्नीम” दैत।

8 मिनु यहोसुमी दैशो खोदेशो पा मेको ७ जना चढेब परमप्रभु यावे आ डोंइती ताप्तीक ग्रोव्र कुरशा, ताम्ना ताम्न गाक्तेक्म। मिनु परमप्रभु यावे आ कबल पशो सन्दोस कुरबपुकी मेको आन नोले खोइक्तेक्म। 9 मिनु या कुरब

चहिनं ग्रीव तापब चढेब आन डोंडडोंडती गाक्तेक्म। मिनु मुर नेल्ल सन्दोस आ नोनोले गाक्तेक्म। चढेबपुकी ताप्तीक ग्रीव ताम्ना ताम्न गाक्तेक्म।

10 मिनु यहोसुमी नोनोले गाक्ब मुर आन कली "गे काइ मग्रीडीन। इन सेंदा काइ मनसेक्ल। सिक्सी पा गाक्कीन। तेको नाक्त गो इन कली 'ग्रीडीन' देंनुडा, मेको नाक्त ला वाइ ब्रेशशा ग्रीचा माल्नीनी" दे माइक्तु।  
11 मोपा मेकोपुकी परमप्रभु यावे आ कबल पशो सन्दोस नाक्त कामी खेयप का सहर आ एर ओथ हिरताक्म। मिनु मुर नेल्ल आन बाक्तीकेमी लशा, बास बाक्तेक्म।

12 मिनु यहोसु सुनी कना बोक्त। मिनु चढेबपुकीमी परमप्रभु यावे आ कबल पशो सन्दोस कुरतेक्म। 13 मिनु परमप्रभु यावे आ कबल पशो सन्दोस आ डोंडती गाक्ब ताप्तीक ग्रीव कुरब ७ जना चढेबपुकीमी ग्रीव ताम्ना ताम्न गाक्तेक्म। या कुरब मेको आन डोंडडोंडती गाक्तेक्म। अर्को नेल्ल परमप्रभु यावे आ कबल पशो सन्दोस आ नोले मेको ताप्थो नेंना नेंन खोइक्तेक्म।

14 मोपा आ दीसा नाक्त यो खेयप का सहर आ एर ओथ हिरताक्म। मिनु आन बाक्तीकेमी लेत्तेक्म। मोपा ६ नाक्त सम्म मोदेशो पांतेक्म।

यरीको सहर डा गारो ब्रेशशो

15 मिनु मेको आ ७ नाक्ती नां सोवचा क्येडा डोंडती बोक्शा, डोंडती डा खोदेशो पा मेको सहर एर ओथ हिरसाक्म। तन्न मेको नाक्ती मेकोपुकीमी मेको सहर ७ खेयप हिरसाक्म। 16 मिनु ७ खेयप हिरसीमा नोले चढेबपुकीमी ताप्तीक ग्रीव ताप्ची ना, यहोसुमी मुर आन कली "वाइ ब्रेशशा ग्रीडीन। मारदे हना परमप्रभु यावेमी एको सहर इन कली गेप्टु। 17 एको सहर नु एको आगा बाक्शो मारेइ मारेइ खतम सेल्लिक परमप्रभु यावे केन बाक्ब। राहाब तेल्लेम नु आ खिमी बाक्ब मुर ला ब्रोंडचा ताइनीम। मारदे हना मेकोमी आंइ सोइश्शो क्यारी पाइब मुर आस कली खूइश्शा प्रोंडशो बाक्त। *ब्यक्स्था* २०:१६-१७; *यहोसु* २:१२-१३; *हिब्रू* ११:३१ 18 मिनु परमप्रभुमी खतम सेल्चा, देशो थोवक लाइक्चा मडुम्ब। होस पा बाक्कीन। गे परमप्रभु आ देशो मटिथु, मारेइ लाइक्तीनी हना, गे आंमा खतम दुम्नीनी। सुइमी मारेइ खूइ पा, इस्राएली आन बाक्तीकेम वोइक्तीनी हना, मेको खतम दुम्ब। मिनु मुर नेल्ल आन कली श्येत जपाइक्ब। *लेवी* २७:२८; *ब्यक्स्था* ११:३८ 19 सुन चांदी, कांसा नु फलाम के सेल्शो थोवक नेल्ल परमप्रभु यावे केन बाक्नीम। मेको परमप्रभु यावे आ शोंप वोइक्तीकेमी वोइक्चा माल्नीम" देंत। 20 मिनु मुरपुकी वाइ ब्रेशशा ग्रीतेक्म। मिनु चढेबपुकीमी ग्रीव ताम्ना ताम्न बाक्तेक्म। मुरपुकीमी ग्रीव ताप्थो नेंशा, शुश ग्रीतेक्म। मिनु मेको गारो ब्रेत्त। मिनु मुरपुकी ग्येत्य बारशा, मेको सहर आंम के सेल्तेक्म। *हिब्रू* ११:३० 21 मिनु सहर डा मीश मुर वोंडश मुर, आल, खाल्पी खाल्पा बी ब्यफ, क्यारश भेडा, गथा नेल्ल आन कली तरवारम साइक्तेक्म। 22 मिनु यहोसुमी मेको क्यारी पाइब निक्शी आस कली "गे मेको तेल्लेम आ खि लस। मिनु इस कसम जशो खोदेशो पा मेको मीश मुर नु आ खि डा मुर नेल्ल आन कली गुंडदीस" देंत। *यहोसु* २:१२-१४ 23 मिनु मेको डोंडती क्यारी पाइब ठिटा निक्शी मेको आ खि ओव्रशा, राहाब कली गुंडताक्स। मेको नु आ आम आफ आ लोक्ब नु आ खि डा मुर नेल्ल आन कली यो गुंडताक्स। मिनु मेको आन कली इस्राएली आन बाक्तीके आ लाडगाम बाक्चा गेम्ताक्स। *गन्ती* ३१:१९ 24 मिनु मी सुइश्शा, मेको सहर नु आगा डा थोवक नेल्ल क्रोइक्तेक्म। सुन चांदी, कांसा नु फलाम के सेल्शो थोवकपुकी ला परमप्रभु यावे आ खि डा शोंप वोइक्तीकेमी वोइक्तेक्म। 25 तन्न यहोसुमी राहाब तेल्लेम नु आ खि डा मुर आन कली प्रोंडतु। मारदे हना मेकोमी यहोसु आ यरीको सोइश्शो क्यारी पाइब निक्शी आस कली खूइश्शा प्रोंडशो बाक्त। मेको नाक्त रे राहाब आ खि डा मुरपुकी इस्राएली आन दातेमी बाक्तेक्म। *मत्ती* १:५; *न्यायाधीस* १:२५

26 मेना यहोसुमी "सुमी यरीको सहर लेशा सेल्बा, मेको परमप्रभु यावे आ डोंडती सराप राइब। मेकोमी जग फुल्लु वोदानु, आ डोंडती जरमेशो तौ बेक्ब। मिनु आ गारो डा ठेयब लाप्चो वोदानु, आ कान्छा तौ बेक्ब" दे कसम जाप्टु। *१राजा* १६:३४ 27 मिनु परमप्रभु यावेमी यहोसु कली वारच पाप्टु। मेको रागी डा मुर नेल्ल मेको तुइश्शा, यहोसु तशा हितेक्म।

आकानमी मार मार खूइ पशो

7 मिनु इस्राएलीपुकीमी मटिथु, खतम सेल्चा माल्शो परमप्रभु यावे आ थोवक रे खूइ पांतेक्म। यहूदा आ थर डा जेराह आ युइ, जब्दी आ चच, कारमी आ तौ आकानमी मलाइक्चा थोवक रे पा मार मार खूइ पा लदा बाक्त। मोपतीके परमप्रभु यावे इस्राएली नेल्ल आन कली तशा चुरमाक्त। *यहोसु* ६:१८ 2 मिनु यहोसुमी यरीको रे बेथेल आ पूर्व बेथ-आवेन आ नेक्था ऐ सहरमी मुर आन कली सोइक्ताक्व। मिनु मेको आन कली "गेपुकी मेक लशा, मेको रागी कली क्यारी पन" दे माइक्तु। मिनु मेको मुरपुकी लशा, मेको ऐ सहर कली क्यारी पांतेक्म। 3 मिनु मेकोपुकीमी यहोसु बाक्तीक लेशा जाक्शा "मुर नेल्ल ऐ सहरम लचा ममाल्नीम। निक्शी सां हजार मुर ला लशा, लडाइ पांतेक्म हना, ग्रानीम। नेल्ल कली श्येत मगेन। मारदे हना मेकेर शुश मुर मबाक्म" देंतेक्म। 4 मोपतीके हजार सां खोइ मुर ला लांतेक्म। तन्न मेकोपुकी ऐ सहर डा मुरपुकी नु लडाइ ब्रुशा, प्रोक्शा लेत्तेक्म। 5 मिनु ऐ डा मुरपुकीमी ३६ जना इस्राएली आन कली साइक्तेक्म। मेकोपुकीमी सहर डा ठेयब लाप्चो रे शेबारीम डा लुक्च लतीक लां सम्म खेदा पा, मेको आन कली साइक्तेक्म। मिनु इस्राएली आन थुं लुक्च लशा, शुश हितेक्म।

6 मिनु यहोसु नु इस्राएल डा खाल्पापुकीम सुर्ता पा आंम वा खाक्शा, पियामी फुरक फुइश्शा, परमप्रभु यावे आ कबल पशो सन्दोस आ नेक्था पोक्च थेक्शा, मेकेर नाक्दो सम्म बाक्तेक्म। 7 मिनु यहोसुमी "परमप्रभु, परमप्रभु यावे, मारदे गे मेको मुर आन कली यर्दन खोला शोक्चा गेनी? मारदे गे आंइ कली एमीरी आन गुइमी साइक्चा कली गेनी? गो यर्दन आइक्ची हांभु ठीक पा बाक्शो नकी। 8 परमप्रभु, इस्राएली आन जोरी सत्रु रे प्रोक्चा माल्तेक्म। गो मुल मार पाइनुडा डा? 9 मारदे हना कनानीपुकी नु एको रागी डा मुर नेल्लेमी एको लोव नेंशा, आंइ कली पुन्नीम। मिनु आंइ नें रागी रे पा क्यामीम। मिनु गे इन ठेयब नें आ परबम मार पाइनीनी?" दे परमप्रभु यावे कली लोव पाप्टु। *प्रस्थान* ३२:१२

10 मिनु परमप्रभु यावेमी यहोसु कली "बोक्को। गे मारदे इ कुल खूक्शा, बाप्शा बाक्नेवे? 11 इस्राएलीपुकीमी पाप पांतेक्म। मेकोपुकीमी आं माइश्शो 'पचा माल्ब' दे पशो कबल प्रोंडतेक्म। खतम सेल्चा माल्शो थोवक खूइ पा लाइश्शा, आंम थोवक नु ब्वाइश्शा, खूइश्शा वोइक्तेक्म। 12 मोपतीके इस्राएली आन जोरी सत्रु आन कली तशा, प्रोक्नीम। मारदे हना मेकोपुकी यो खतम सेल्चा माल्शो दुश्शो बाक्नीम। मेको आन खतम सेल्चा माल्शो खूइश्शो थोवक इन दाते रे मगुंडताक्नी हना, गो गे नु मबाक्नुड। 13 बोक्को। मुर आन कली आं डोंडती ठीक सेल्पतो। मिनु मेको आन कली गे दीसा कली परमप्रभु यावे आ डोंडती ठीक सेल्सीन। मारदे हना परमप्रभु यावे, इस्राएली आन परमप्रभुमी इन दातेमी खतम सेल्चा माल्शो थोवक बाक्नीम। मेको मगुंडताक्वी हना, इन जोरी सत्रु क्येडा ग्राने मचाप्नीनी। *यहोसु* ३:५ 14 मिनु गे सुनी कना थर थर डा मुरपुकी बुक्शा, जाक्चा माल्नीनी। मिनु परमप्रभु यावेमी तेको थर कली कोंडबा, मेको थर डा नेल्ल खिं खिं डा मुरपुकी जाक्चा माल्नीम। मिनु परमप्रभु यावेमी तेको खिं डा मुर कली कोंडबा, मेको आ खिं खिं डा मुर आन डोंडती जाक्चा माल्नीम। मिनु परमप्रभु यावेमी तेको खिं कली कोंडबा, मेको खिं रे का का पा वोंडश मुरपुकी मुर आन डोंडती जाक्चा माल्नीम। 15 मिनु तेको मुर नु खूइ पशो थोवक बाक्चा तुंडसीब, मेको नु आ मारेइ मारेइ मीम हुम्चा पुंडसीब। मारदे हना मेकोमी परमप्रभु यावे आ देशो मटिथु, इस्राएली आन दातेमी काइ मरिश्शो ग्रान्ग्रा दिशो गेय पाप्टु" दे माइक्तु।

16 मिनु यहोसुमी सुनी कना बोक्शा, इस्राएली नेल्ल आन कली थर थर पा बुक्पाइक्तु। मो पशोनु यहूदा आ थर कोंडचा पुंडसाक्व। *१सामुएल* १०:२०-२१; *१सामुएल* १४:४१-४२ 17 मिनु यहूदा आ खिं खिं डा मुर आन डोंडती जाक्चा माल्तेक्म। मिनु जेराह आ खिं खिं डा मुर कोंडचा पुंडसाक्म। मिनु यहोसुमी जेराह आ खिं खिं डा मुर आन कली आ डोंडती जाक्पाइक्तु। मेको रे जब्दी आ खिं डा मुर कोंडचा पुंडसाक्व। *गन्ती* २६:२० 18 मिनु यहोसुमी मेको आ खिं डा वोंडश मुर का का पा मुर आन डोंडती

जाक्पाइवक्तु। मोपा जाक्मानु, यहूदा आ थर डा जेराह आ युइ, जब्दी आ चच, कारमी आ तौ आकान कोइचा पुंडसाक्व।

19 मिनु यहोसुमी आकान कली “आं तौ, परमप्रभु यावे, इस्राएली आन परमप्रभु कली ठेयब सेलो। मार मार पवी, मेको कली देनो। इ पशो आं कली देनो। लोव्र का यो मखुइवक्तो” दैत। 20 मिनु आकानमी यहोसु कली “थमा, गो परमप्रभु यावे, इस्राएली आन परमप्रभु आ डोइती पाप पाता। गो मार पाता दैशा हना, गन्ती २१:७; न्यायाधीस १०:१०; १सामुएल ७:६; भजन संग्रह ५१:५-६ 21 गो खतम सेल्चा माल्शो थोव्रक रे पा शिनार रागी डा रिम्शो फेक्तीक वा, सहे निक्शी शेकेल चांदी नु ५० शेकेल हेल्शो सुन के कोक्के का ताता। गो मेको साप्पा दाक्ताक्व डा मिन लांडसाक्वी। मिनु मेको आं ताम्बु आगाम थिम्शा वोइक्ता। मेको चांदी नेल्ल क्येडा आगाम बाक्ब” दैत। शेकेल का ११.५ ग्राम बाक्ब।

22 मिनु यहोसुमी गेय पाइब आन कली आकान आ ताम्बुम सोइक्ताक्व। मेकोपुकी दोरशा लशा, मेको आ ताम्बुमी दोशा, फेक्तीक वा नु खुइश्शो थोव्रक नेल्ल गुंडताक्व। मिनु मेको चांदी नेल्ल क्येडा आगाम बाक्ब। 23 मिनु मेकोपुकीमी मेको थोव्रक गुंडशा, यहोसु नु इस्राएली नेल्ल आन बाक्तीकम चाक्तेक्व। मिनु परमप्रभु यावे आ डोइती वोइक्तेक्व। 24 मिनु यहोसु नु इस्राएली नेल्ल गारशा, जेराह आ खिं डा आकान नु आ खुइ पशो चांदी, फेक्तीक वा नु सुन के कोक्के, मेको आ तमी तौ मेको आ बी ब्यफ, आ गधापुकी, आ भेडापुकी, मेको आ ताम्बु नु मेको नु बाक्शो मारेइ मारेइ आकोर आ बेंसीमी लाइक्तेक्व। लेवी २४:१४-१५ 25 मिनु यहोसुमी आकान कली “गे गो आंइ कली शुश श्येत गोप्तीवी। मुलाक्ती परमप्रभु यावेमी इ कली श्येत गेब” दैत। मिनु इस्राएली नेल्लेमी मेको आन कली फुल्लुमी आप्शा साइक्तेक्व। मिनु मेको आन कली साइश्शा, मीम हुम्ताक्व। ब्यक्स्था १३:१६-१७ 26 मिनु मेको आन तारी शुश फुल्लु तेल्तेक्व। मेको फुल्लु तेल्तीके मुलाक्त सम्म बाक्ब। मिनु नोले परमप्रभु यावे आ गाइक्वा नांडसाक्व। मिनु मेको बेंसी आ नें आकोर बेंसी वोइक्तेक्व। मेको मुल सम्म बाक्ब। यसैया ६५:१०; होसे २:१७

ए सहर कली खतम सेल्शो

8 मिनु परमप्रभु यावेमी यहोसु कली “महिनो। इ थुं लुक्च मलल। मुल लडाइ पाइब नेल्ल लाइश्शा, ए सहर कली लडाइ तोवो। मारदे हना गो ए सहर डा पिप, मेकेर डा मुरपुकी, सहर नु रागी इ कली गेता। 2 गो यरीको नु मेकेर डा पिप कली मार मार पवी, ए सहर नु मेकेर डा पिप कली यो मोदेंशो पावो। मेक डा मारेइ मारेइ, बी ब्यफ क्यारश भेडा नेल्ल गे इन कली लांडसीन। मिनु सहर आ नोले गे हुल का मुर बाप्पाइश्शा, वोतीन” दैत। यहोसु ६:२१; ब्यक्स्था २०:१०-१८ 3 मिनु यहोसु नु लडाइ पाइब नेल्ल ए सहर कली लडाइ तोथ, लाम्तेक्व। यहोसुमी ३० हजार लडाइ पाइब मुर आन कली योव्रशा, नाक्दो सोइक्ताक्व। 4 मिनु मेकोमी “गे मेको सहर आ नोले बाप्शा बाक्वा माल्नीनी। मेको सहर क्येडा डोन मलने। लडाइ पचा कली ठीक दुम्शा, होस पा बाक्कीन। 5 गो नु आं मुर नेल्ल सहर गे बारनीकी। मिनु मेको डोइती खोदेंशो पा आंइ कली खेदा पा गूतेक्व हना, गो प्रोक्खु पाइनीकी। 6 मेकोपुकीमी आंइ कली खेदा पा खोइक्नीम। आंइ कली खेदा पा खोदमेनु, गोपुकी मेको आन कली सहर रे शुश डोन लपाइक्वा कली आंइ कली खेदा पपाइक्नीकी। मारदे हना मेकोपुकीमी ‘इस्राएलीपुकी डोइती डा बुदी गो आंइ कली तशा, प्रोक्ना प्रोक्न बाक्नीम’ दे मिन्नीम। मोपा गो प्रोक्कानु, यहोसु ७:५ 7 गोपुकी इन बाप्तीके रे बोक्शा गूशा, सहर आंम के सेलीन। मिनु परमप्रभु यावे, इन परमप्रभुमी मेको सहर इन कली गेब। 8 परमप्रभु यावेमी आ दैशो खोदेंशो पा, सहर इन गुइमी गेवा नोले, मेको कली मी सुइक्तीन” दे मेको आन कली दैत।

9 मिनु यहोसुमी मेको आन कली सोइक्ताक्व। मिनु मेकोपुकी ए क्येडा पच्छिम बेथेल नु ए आस दातेम बाप्शा बाक्तेक्व। मिनु यहोसु मेको नाक्दो आ मुर आन दातेमी बाक्त।

10 मिनु यहोसु सुनी कना बोक्शा, आ मुर आन कली खुप्ताक्व। इस्राएल डा खाल्पा नु ए सहर गे लाम्तेक्व। 11 यहोसु नु बाक्शो लडाइ पाइब नेल्ल

यो मेकेर लाम्तेक्व। मिनु ए सहर आ डोइती जाक्तेक्व। सहर आ उत्तर गे जाक्शा बाक्तेक्व। मेको ए सहर नु आन दातेमी बेंसी का बाक्त। 12 मिनु डोइती यहोसुमी ५ हजार लडाइ पाइब आन कली लाइश्शा, ए क्येडा पच्छिम गे बेथेल नु ए आस दातेम बाप्शा कली वोइक्तु। 13 मोपा ए सहर आ उत्तर गे शुश लडाइ पाइब आन बाक्तीकेमी बाक्मानु, पच्छिम गे मेको बाप्शो ५ हजार लडाइ पाइब बाक्तेक्व। मेको नाक्दो यहोसु नु आ मुरपुकी बेंसीम बाक्तेक्व।

14 मिनु सुनी कना ए डा पिपमी मेको आन कली तशा, ए डा लडाइ पाइब नु सहर डा वोंइश मुर नेल्ल इस्राएली नु लडाइ पथ लाम्तेक्व। पिप नु आ मुर नेल्ल अराबाह माइक्तीकेमी दिंम आ डोइती जाक्तेक्व। तन्न सहर आ नोले मेकोपुकी बाप्शा बाक्शो बाक्नीम मतुइक्तेम। 15 मिनु यहोसु नु इस्राएली नेल्ल ब्रुशो खोदेंशो पा, गोरशो रागी गे प्रोक्खु पाम्तेक्व। 16 मेको पिपमी ए सहर डा मुर नेल्ल आन कली ब्रेश्शा, इस्राएली आन कली खेदा पपाइक्तु। मोपा यहोसु कली खेदा पा, मेकोपुकी ए सहर क्येडा डोन सम्म लाम्तेक्व। 17 ए नु बेथेल डा वोंइश मुर नेल्लेमी इस्राएली आन कली खेदा पाम्तेक्व। खेदा मपाइब का सम्म यो मलीम। मेकोपुकी आंम सहर डा गारो आ ठेयब लाप्शो रोक्शा वोइश्शा, इस्राएली आन कली खेदा पाम्तेक्व।

18 मिनु परमप्रभु यावेमी यहोसु कली “इ गुइमी बाक्शो तरवार ए सहर गे कोंइशा दिंदो। मारदे हना गो मेको सहर इ कली गेनन” दैत। मिनु यहोसुमी आ गुइमी बाक्शो तरवार ए सहर गे कोंइशा दिंताक्व। 19 मिनु यहोसुम आ तरवार दिंदानु, मेको बाप्शा बाक्ब लडाइ पाइब नेल्ल बोक्शा बारशा, ए सहर आगा ओव्रतेक्व। मेकोपुकी ओव्रशा, सहर कली आंम के सेल्शा, मी सुइक्ताक्व। 20 मिनु ए सहर डा खेदा पाइबपुकीमी बिर हिरशा, कोव्रडमेनु, आंम सहरमी कुन जुइश्शो ताम्तेक्व। मोपा कुन जुइश्शो तशा, मेकोपुकीमी एर ओंथ प्रोक्ने मचबेम। मारदे हना गोरशो रागी गे प्रोक्खु पाइब इस्राएलीपुकी लेश्शा, मेकोपुकी नु लडाइ पचा गोम्तेक्व। 21 यहोसु नु इस्राएली नेल्लेमी मेको ए सहर बाप्शा बाक्बपुकीमी सहर आंम के सेल्शो ताम्तेक्व। सहर रे कुन जुइश्शो तामे चोटीन, मेकोपुकी बिर हिरशा, ए सहर डा वोंइश मुर आन कली साइक्वा गोम्तेक्व। 22 मिनु डोइती बाप्शा बाक्बपुकी सहर रे गूतेक्व। मोपा इस्राएलीपुकीमी ए सहर डा मुर आन कली आन दाते पा आन एर ओंथ बाक्शा, का कली यो प्रोक्वा मगेम। नेल्ल आन कली साइक्तेक्व। 23 मिनु मेकेर डा पिप कली चहिं सेसीन ग्याइश्शा, यहोसु आ बाक्तीक चाक्तेक्व।

24 मिनु इस्राएलीपुकीमी ए डा मुर नेल्ल आन कली, गोरशो रागी डा दिंममी साइक्ने थुम्शा, ए सहर लेश्शा, ओव्रशा, मेकेर बाक्शो आन कली यो तरवारमी क्योरशा साइक्तेक्व। 25 मेको नाक्ती साइक्वा पुंडसीशो मुर वोंइश मुर नु मीश मुर नेल्ल पा १२ हजार बाक्तेक्व। ए डा मुर नेल्ल मोशोन बाक्तेक्व।

26 मिनु यहोसुमी ए डा मुर नेल्ल साइक्ने मथुम्मे सम्म आ तरवार शेशा दिंशो गुइ मतोक्व।

27 मिनु परमप्रभु यावेमी यहोसु कली दैशो खोदेंशो पा बी ब्यफ, क्यारश भेडा नु रोइश्शो मारेइ मारेइ इस्राएलीपुकीमी वोंइसाक्व। 28 मिनु यहोसुमी ए सहर कली चोशा, गेनायो मसेल्चा डा पा खतम सेल्लु। मोदेंशो मुल सम्म बाक्ब। 29 मिनु मेकोमी ए डा पिप कली नां मरिक्म सम्म रवामी क्युक्शा वोइक्पाइक्तु। मिनु नां रिक्म नोले यहोसुमी पिप आ रां रवा रे शोल्शा, सहर ओव्रतीक लाप्शोम लाइश्शा ताइक्पाइक्तु। मेको आ तारी शुश फुल्लु तेल्तेक्व। मेको मुल सम्म बाक्ब। ब्यक्स्था २१:२२-२३

एबाल डांडाम अरेशो लोव्र पढेशो

30 मिनु यहोसुमी परमप्रभु यावे, इस्राएली आन परमप्रभु कली एबाल डांडामी चढेतीक का सेल्लु। ब्यक्स्था २७:२-८ 31 परमप्रभु यावे आ गेय पाइब मोसामी इस्राएली आन कली दैशो खोदेंशो पा नु मोसामी अरेशो लोव्र ब्रेक्शा किताबम ब्रेक्शो खोदेंशो, मक्योरशो, फलामम मथिपाइश्शो फुल्लु खुप्शा, चढेतीक का सेल्लेक्व। मेकेर परमप्रभु यावे कली चोशा चढेतीके नु दुशा बाक्वा आ पर्वम चढेतीके चढेतेक्व। प्रस्थान २०:२५; प्रस्थान २४:१-

८<sup>32</sup> मिनु मेकेर इस्राएली नेल्ल आन डॉइती यहोसुमी परमप्रभु यावे आ अरेशो लोव्र मोसामी मुशा ब्रेक्शो खोदेंशो पा, फुल्लुम मुशा ब्रेक्ताक्व।  
 33 मिनु इस्राएली नेल्ल, मेको नु बाक्ब अर्को रागी डा मुरपुकी, खाल्पापुकी, ठेयब मुर नु मेको आन ठेयब मुरपुकी परमप्रभु यावे आ कबल पशो सन्दोस आ नेक्था राष्थो बाक्तेक्म। मेकोपुकी परमप्रभु यावे आ सन्दोस कुरब लेवी आ थर डा चढेब गे कोव्रशा, राष्थो बाक्तेक्म। इस्राएली नु मेको नु बाक्ब अर्को रागी डा मुर नेल्ल आधी गेरीजीम डांडा गे कोव्रशा, अरु आधी एबाल डांडा गे कोव्रशा राष्थो बाक्तेक्म। मिनु परमप्रभु यावे आ गेय पाइब मोसामी अरेशो खोदेंशो पा यहोसुमी इस्राएली नेल्ल आन कली आसीक गेप्तु।  
 ब्यवस्था ११:२९; ब्यवस्था २७:१२-२६; ब्यवस्था २८:-<sup>34</sup> मिनु नोले यहोसुमी परमप्रभु यावे आ अरेशो लोव्र नेल्ल, आसीक नु सराप आ पर्वम ब्रेक्शो यो पढेप्तु। दोदेंशो पा ब्रेक्शो बाक्मे, मोदेंशो पा पढेप्तु।<sup>35</sup> मोसामी मार मार लोव्र अरेशा, ब्रेक्शो बाक्मे, मेको नेल्ल यहोसुमी इस्राएली नेल्ल कली पढेशा नेंपाइक्तु। मेक बाक्शो वोंइश मुर, मीश मुर, आलपुकी नु मेकोपुकी नु बाक्ब अर्को रागी डा मुर आन डॉइती नेल्ल पढेशा नेंपाइक्तु।

गिबोन डा मुरपुकीम जोल पशो

9 मिनु यर्दन आइक्वी हांबु पहाड नु दिंममी, ठेयब समुन्द्र आ नेक्था नु लेबानोन गे बाक्ब हिंत्ती, एमोरी, कनानी, परिज्जी, हिक्वी नु यबुसी आन पिपपुकीमी एको लोव्र नेंशा, <sup>2</sup> मेकोपुकी थुं का दुम्शा, यहोसु नु इस्राएलीपुकी नु लडाइ पचा कली बुक्तेक्म।  
<sup>3</sup> मिनु गिबोन डा मुरपुकीमी यहोसुमी यरीको नु ऐ सहर कली मार मार पवा, मेको लोव्र नेंशा, यहोसु ६:२०-२१; यहोसु ६:२६-२८ <sup>4</sup> मेकोपुकीमी डोन रागी रे जाक्शो खोदेंशो पा बुत सेल्शा, आन गधा तारी माइत धोक्रो वोइश्शा, गाक्शो फेरशो कुशुल के अडगुर शांबु वोइक्तीक कुर पाइक्तेक्म।  
<sup>5</sup> मिनु गाक्शो माइत जुत्ता नु जेक्शो वासी फेक्साक्म। मेको आन कुरशो बुत सोव्रशो नु बुंखी डाइश्शो बाक्त। <sup>6</sup> मिनु मेकोपुकीमी गिल्गाल यहोसु आ बाक्तीकेमी जाक्शा, यहोसु नु इस्राएली नेल्ल वोंइश मुर नेल्ल आन कली “गोपुकी डोन रागी रे जाक्शो नकी। मोपतीके गोपुकी नु गारशा, कबल पने” देंतेक्म। <sup>7</sup> मिनु इस्राएलीपुकीमी मेको हिक्वी आन कली “गोपुकी आंइ दातेमी बाक्ब मुर बाक्नीनी, कौं? गोपुकी गोपुकी नु दोपा गारने चाप्नीकी डा?” देंतेक्म। यहोसु ११:१९; प्रस्थान २३:३२  
<sup>8</sup> मिनु मेकोपुकीमी यहोसु कली “गो इन गेय पाइब नकी” दे लोव्र लेत्ताक्म। मिनु यहोसुमी मेको आन कली “गे सु ननी? ते रे जाक्शो ननी” दे हिल्लो पाप्तु। <sup>9</sup> मिनु मेकोपुकीमी “गो इन गेय पाइबपुकी शुश डोन रागी रे जाक्शो नकी। गोपुकी परमप्रभु यावे, इन परमप्रभु आ पर्वम शुश नेंतक। मिनु इजीप्त रागीमी मार पवा मेको नेल्ल नेंतक। <sup>10</sup> यर्दन आइक्वी हांबु डा एमोरी आन पिप निक्शी, हेश्बोन डा पिप सीहोन कली नु अशतारोथम बाक्ब बाशान डा पिप ओग कली मार मार पनी मेको नेल्ल नेंतक। गन्ती २१:२१-३५ <sup>11</sup> मोपतीके आंइ ठेयब मुरपुकी नु आंइ रागी डा मुर नेल्लेमी ‘गोपुकीमी लांम जतीक बुत कुरशा, मेको आन कली गुम्थ लने’ देंतेक्म। मेको आन कली ‘गो इन गेय पाइब नकी। गे गो नु कबल पा आंइ कली ब्रने, दे देनीन’ देंतेक्म। <sup>12</sup> इन कली गुम्थ गाक्शो नाक्ती गोपुकीमी आंइ खिं रे एको शोब्ले होश कुरशो नकी। मुल सोव्रशा बुंखी डाइश्शो बाक्ब। <sup>13</sup> मिनु आंइ गाक्ची ना एको अडगुर शांबुम प्रिंशो कुशुल के थैलो नक बाक्तेक्म। मुल कोव्रडीन, एको यो गाक्ने थुम्तेक्म। मेको लाइश्शो लां दुम्तीके आंइ फेक्शो वासी नु जुत्ता यो माइत दुम्शा जेक्तेक्म” देंतेक्म। <sup>14</sup> मिनु इस्राएलीपुकीमी आन चाक्शो कोसेली ताक्तेक्म, तन्न परमप्रभु यावे कली हिल्लो मपथु, जाम्तेक्म। गन्ती २७:२१ <sup>15</sup> मिनु यहोसुमी मेको आन कली “इन थुं नांइसीन। ब्रोंइचा ताइनीनी” दे कबल पाप्तु। मिनु मेकेर डा ठेयब मुरपुकीमी यो कसम जाम्तेक्म।  
<sup>16</sup> मिनु कबल पशो सां नाक्त नोले मेको मुर आन नेक्था डा मुर आंम दातेमी बाक्ब मुर बाक्तेक्म, दे इस्राएलीपुकीमी नेंतेक्म। <sup>17</sup> मिनु इस्राएली गाक्शा, सां नाक्तीमी मेको आन सहर जाक्दीत्तेक्म। मेको आन सहर गिबोन, केफीरा, बेयरोथ नु किरयथ-यारीम बाक्तेक्म। <sup>18</sup> मिनु

इस्राएलीपुकीमी मेको आन सहर कली लडाइ मतोम। मारदे हना इस्राएल डा ठेयब मुरपुकीमी मेको नु परमप्रभु यावे, इस्राएली आन परमप्रभु आ डॉइती कसम जशो बाक्तेक्म। मोपतीके मुरपुकीमी इस्राएली आन ठेयब मुर आन पर्वम गन गन पाम्तेक्म। <sup>19</sup> मिनु ठेयब मुरपुकीमी इस्राएली नेल्ल आन कली “गोपुकीमी परमप्रभु यावे, इस्राएली आन परमप्रभु आ नेंमी कसम जाइतक। मोपतीके गो मेको आन कली ब्रोंइचा गेचा माल्नीकी। <sup>20</sup> मुल मेको आन कली ब्रोंइचा गेचा माल्नीकी। मोदेंशो मपाइतक हना, आंइ जशो कसममी पतीके, गो सराप राइनीक” दे इस्राएली आन कली देंतेक्म। गन्ती १:५३; २सामुएल २४:१ <sup>21</sup> मिनु ठेयब मुरपुकीमी “मेको आन कली ब्रोंइचा गेन” देंतेक्म। मिनु मेकोपुकी इस्राएली आन शी चेब्ब नु ब्वाक्कु क्याक्ब वाइल दुम्तेक्म। ठेयब मुरुमी दोदेंशो देंमे मोदेंशो दुम्त।

<sup>22</sup> मिनु यहोसुमी मेको गिबोन डा मुर आन कली ब्रेश्शा “गोपुकी आंइ नेक्था गोपुकी नु बाक्ब बाक्नीनी। तन्न ‘गो डोन रागी डा नकी’ दे मारदे जोल पनी? <sup>23</sup> मोपा जोल पतीके मुल गोपुकी सराप रशो दुम्तीनी। गोपुकी गेना हना यो वाइल दुम्चा माल्नीनी। गोपुकी आं परमप्रभु यावे आ खिं डा शी चेब्ब नु ब्वाक्कु क्याक्ब दुम्तीनी” देंत। <sup>24</sup> मिनु मेकोपुकीमी यहोसु कली “परमप्रभु यावे, इ परमप्रभुमी आ गेय पाइब मोसा कली ‘रागी नेल्ल इन के दुम्ब। एको रागी डा मुर नेल्ल सतीन’ दे अरेशो तुइश्शो नकी। मोपतीके गो इन कली तशा शुश हिंतीके, आंइ कली प्रोंइचा कली जोल पाइतक। <sup>25</sup> मुल गो इन गुइमी बाक्नीकी। आंइ कली मार पशो नु रिम्शो लाक्नीनी, मोदेंशोन पन” देंतेक्म। <sup>26</sup> मोपा यहोसुमी मेको आन कली इस्राएली आन गुइ रे पा प्रोंइतु। मिनु इस्राएलीपुकीमी मेको आन कली साइक्वा मतामे। <sup>27</sup> मिनु मेको नाक्त रे यहोसुमी मेको आन कली इस्राएली नेल्ल नु परमप्रभु यावे आ चढेतीक कली शी चेब्ब नु ब्वाक्कु क्याक्ब सेल्तु। मेकोपुकीम मुल सम्म मोदेंशो पाइनीमी। ब्यवस्था २९:१०; इतिहास २१:२९; इतिहास १:३

नां नाइश्शा बाक्शो

10 मिनु यरूसलेम डा पिप अदोनी-सेदेकमी “यहोसुमी ऐ सहर ग्राशा, खतम सेल्तु। मिनु यरीको नु मेकेर डा पिप कली पाइश्शो खोदेंशो पा मेको ऐ सहर नु मेकेर डा पिप कली यो पाइक्तु। मिनु गिबोन डा मुरपुकी इस्राएली नु गारशा, मुल आन दातेमी बाक्शो बाक्तेक्म” दे नेंतु। यहोसु ६:-; यहोसु ८:-; यहोसु ९:-<sup>2</sup> मिनु मेको नु आ मुर नेल्ल शुश हिंतेक्म। मारदे हना गिबोन थम ठेयब सहर, पिप आ बाक्तीक सहर खोदेंशो, बाक्त। मिनु मेको ऐ सहर क्येडा ठेयब बाक्त। मिनु मेकेर डा वोंइश मुर नेल्ल बोल्यो लडाइ पाइब बाक्तेक्म। <sup>3</sup> मिनु यरूसलेम डा पिप अदोनी-सेदेकमी हेब्रोन डा पिप होहाम, यरमुथ डा पिप पिराम, लाकीश डा पिप याफीया नु एग्लोन डा पिप देबीर बाक्तीकेमी लोव्र सोइक्ताक्व। <sup>4</sup> मिनु मेको आन कली “आं कली वारच पथ पिन। गो नेल्ल गारशा, गिबोन नु लडाइ पय। मारदे हना मेकोपुकी यहोसु नु इस्राएलीपुकी नु गारमा बाक्त” दे लोव्र सोइक्ताक्व।

<sup>5</sup> मोपा एमोरी आन ५ जना पिप, यरूसलेम, हेब्रोन, यरमुथ, लाकीश नु एग्लोन डा पिप खुम्सीशा, आन लडाइ पाइब नेल्ल नु जाक्शा, गिबोन नु लडाइ पाम्तेक्म।

<sup>6</sup> मिनु गिबोन डा मुरपुकीमी गिल्गाल सहरम बाक्शो यहोसु कली “मुल, गे इन गेय पाइब, गो आंइ कली मप्रेंदीन। गे रीब पा जाक्कीन। आंइ कली वारच पा प्रोनीन। मारदे हना पहाड रागीम बाक्ब एमोरी आन पिप नेल्ल गो नु लडाइ पचा कली खुम्सीशो बाक्नीम” दे लोव्र सोइक्ताक्म। <sup>7</sup> मिनु यहोसुमी आ लडाइ पाइब नेल्ल आन कली लाइश्शा, गिल्गाल रे लत। मिनु आ नेल्ल क्येडा बोल्यो लडाइ पाइबपुकी यो मेको नु लाम्तेक्म।

<sup>8</sup> मोपा लमानु, परमप्रभु यावेमी यहोसु कली “मेको आन कली तशा, महिनो। मारदे हना गे मेको आन कली इन गुइमी गेता। मेको आन मुर का सम्म यो इन डॉइती राजे मचाप्नीम” देंत।

<sup>9</sup> मिनु नेल्ल नाक्दो यहोसु नु इस्राएली गिल्गाल रे गाक्शा, मेक जाक्दीश्शा, छक लाक्वा डा पा मेको आन कली लडाइ तोम्तेक्म। <sup>10</sup> मिनु परमप्रभु यावेमी एमोरी डा मुर आन कली इस्राएली आन डॉइती वाम ग्याम

सेल्शा, मेको आन कली गिबोन सहरम ब्रुपाइव्क्तु। इस्राएलीपुकीमी मेको आन कली गिबोन रे बेथ-होरोन डा ग्येत्थ लां रे पा खेदा पाम्तेक्म। आजेका नु माकेदा सम्म खेदा पा साइक्तेक्म। <sup>11</sup> मिनु मोपा इस्राएली आन डॉइती बेथ-होरोन रे आजेका सम्म ब्रुशा प्रोक्मानु, परमप्रभु यावेमी सरीड रे ठेयब मुप्स पिपाइव्क्तु। इस्राएलीपुकीमी तरवारमी क्योरशा बेक्शो क्येडा ठेयब मुप्सीम ख्रशा बेक्शो मुर शुश बाक्तेक्म। *प्रस्थान ९:२२-२५; अय्युब ३८:२२-२३; हबकुक ३:११; २सामुएल १:१८*

<sup>12</sup> मिनु परमप्रभु यावेमी एमोरी आन कली इस्राएली आन गुडमी गेशो नाक्ती यहोसुमी परमप्रभु यावे कली इस्राएली नेल्ल आन डॉइती “नां, गे गिबोन तारी नाइसो। तास्ला, आइयालोन बेसी तारी नाइश्शा बाक्को” देंत।

<sup>13</sup> मिनु यहोसुमी मेको आन कली क्येक्क मलेत्ता सम्म नां नु तास्ला नाइसाक्सा। मेको लोव्र याशाार डा किताबमी यो ब्रेक्सीशो बाक्ब। मिनु नां सरीड आ दातेमी नाइसाक्व। मिनु नां मेको नाक्त का मपेरस। <sup>14</sup> मोदेशो डॉइती नु नोले गेनायो मदुश्शो बाक्त। मारदे हना परमप्रभु यावेमी मुर आ लोव्र नेंशा, इस्राएली आन पबर्म लडाइ पाप्तु। <sup>15</sup> मिनु नोले यहोसु नु इस्राएली नेल्ल आंम बाक्तीके गिल्गाल लेत्तेक्म।

### एमोरी आन पिप साइश्शो

<sup>16</sup> मिनु मेको ५ जना पिपपुकी चहिं प्रोक्शा, माकेदा डा पुक्खीमी खूइसाक्म। <sup>17</sup> मिनु मुरपुकीमी यहोसु कली “मेको ५ जना पिपपुकी माकेदा डा पुक्खीमी खूइश्शो बाक्नीम” दे नैपाइक्तेक्म। *ब्यवस्था २१:२२-२३*

<sup>18</sup> मिनु यहोसुमी “ठेयब ठेयब फुल्लु लोक्शा लाइश्शा, मेको पुक्खी आ ओव्रतीके सुने। मिनु आ डॉइतीमी खाल पाइबपुकी वोतीन। <sup>19</sup> तन्न गेपुकी मो मबाक्कीन। इन जोरी सत्रु आन कली खेदा पना पन डॉइती बारीन। नेल्ल क्येडा नोले डा सम्म यो सतीन। मेको आन कली लेंशा, आन सहर ओव्रचा मगेन। मारदे हना परमप्रभु यावे, इन परमप्रभुमी मेको इन गुडमी गेशो बाक्ब” देंत। <sup>20</sup> मिनु यहोसु नु इस्राएलीपुकीमी मेको आन कली खतम सेल्लेक्म। का निक्शी चहिं प्रोक्शा, गारो पाइश्शो सहर आगा ओव्रतेक्म।

<sup>21</sup> मिनु मुर नेल्ल माकेदा, यहोसु आ बाक्तीकेमी, रिश्शो पा लेत्तेक्म। मेको इस्राएली आन पबर्म सुइ मुरुमी यो शुक्शी लोव्र पने मचबेम। <sup>22</sup> मिनु यहोसुमी “पुक्खी रोक्शा, मेको ५ जना पिप आन कली आं बाक्तीक चाक्कीन” देंत। <sup>23</sup> मिनु मेकोपुकीमी मेको ५ जना पिप आन कली चाक्तेक्म। यरूसलेम डा पिप, हेब्रोन डा पिप, यरमुथ डा पिप, लाकीश डा पिप नु एग्लोन डा पिप कली पुक्खी रे गुंडशा, यहोसु आ बाक्तीकेम चाक्तेक्म। <sup>24</sup> मिनु मेको आन कली यहोसु आ बाक्तीक चाक्मे नोले, यहोसुमी इस्राएली नेल्ल आन कली खुप्शा, लडाइ पाइब आन ठेयब मुर आन कली “एको पिप आन शुरमी इन खोइलीमी दिम्दीन” देंत। मिनु मेकोपुकीमी जाक्शा, आन खोइलीमी मेको पिप आन शुर दिम्ताक्म।

<sup>25</sup> मिनु यहोसुमी मेको आन कली “बोल्यो नु महिंब दुमीन। मारदे हना इं परमप्रभु यावेमी गे सु नु लडाइ पाइनीनी, मेको आन कली मोदेशो पाइब” देंत। <sup>26</sup> मेको नोले यहोसुमी मेको ५ जना पिप आन कली तुप्शा साइश्शा, ५ ओटा रवामी क्युक्पाइव्क्तु। मिनु नाक्दो सम्म क्युक्शा, वोइक्तेक्म। <sup>27</sup> मिनु नां रिक्ची ना, यहोसुमी “मेको आन कली लाइश्शा, डॉइती आन खूइश्शो पुक्खीमी वोतीन। मिनु मेको पुक्खी आ ओव्रतीकेमी ठेयब फुल्लुपुकी लाइश्शा सुने” दे अरेप्तु। मिनु मेको फुल्लु मुल सम्म बाक्नीम। *ब्यवस्था २१:२२-२३*

### कनान रागी कली ग्राशो

<sup>28</sup> मिनु मेको नाक्ती यहोसुमी माकेदा आंम के सेल्लु। मेको सहर डा मुर नेल्ल आन कली नु मेकेर डा पिप कली तरवारमी साइक्तु। मेकोमी मेकेर डा मुर नेल्ल आन कली खतम पोक्तु। सुइ कली यो मप्रोन। मेकोमी यरीको डा पिप कली पशो बुदी माकेदा डा पिप कली यो पाइव्क्तु।

<sup>29</sup> मिनु यहोसु नु इस्राएली नेल्ल माकेदा रे गाक्शा, लिब्ना लाम्तेक्म। मिनु लडाइ पाम्तेक्म। <sup>30</sup> मिनु परमप्रभु यावेमी मेक डा मुर नु पिप कली यो यहोसु नु इस्राएली आन गुडमी गेप्तु। मेकोपुकीमी लिब्ना डा मुर नेल्ल आन

कली तरवारमी साइक्तेक्म। सुइ कली यो मप्रोनेम। यरीको डा पिप कली पशो खोदेशो मेकेर डा पिप कली यो पाम्तेक्म।

<sup>31</sup> मिनु यहोसु नु इस्राएली नेल्ल लिब्ना रे गाक्शा, लाकीश लाम्तेक्म। मिनु लाकीश कली पुप्शा, लडाइ पाम्तेक्म। <sup>32</sup> परमप्रभु यावेमी लाकीश कली यो इस्राएली आन गुडमी गेप्तु। मिनु मेको आ दीसा नाक्ती यहोसुमी लाकीश आंम के सेल्लु। मिनु मेकेर डा मुर नेल्ल आन कली लिब्ना कली पशो खोदेशो पाप्तु। नेल्ल आन कली तरवारमी साइक्तु। <sup>33</sup> मेना गेजेर डा पिप होराम लाकीश कली वारच पथ जाक्त। मिनु यहोसुमी मेको नु आ लडाइ पाइब नेल्ल आन कली फ्रुशा, का कली यो मप्रोइथु, ग्याइश्शा साइक्तु।

<sup>34</sup> मिनु यहोसु नु इस्राएली नेल्ल लाकीश रे गाक्शा, एग्लोन लाम्तेक्म। मिनु मेकेर यो पुप्शा, लडाइ पाम्तेक्म। <sup>35</sup> मेको नाक्ती मेकोपुकीमी एग्लोन कली ग्रातेक्म। मिनु मेकेर डा मुर नेल्ल आन कली तरवारमी साइक्तेक्म। लाकीश कली दोदेशो पामे, एग्लोन कली यो मोदेशो पाम्तेक्म।

<sup>36</sup> मिनु यहोसु नु इस्राएली नेल्ल एग्लोन रे ग्येत्थ डोइश्शा हेब्रोन लाम्तेक्म। मेकेर यो लडाइ पाम्तेक्म। <sup>37</sup> मिनु मेकोपुकीमी हेब्रोन सहर कली ग्राशा, मेको सहर डा पिप नु आ एर आंथ गाउं डा मुर नेल्ल आन कली तरवारमी साइक्तेक्म। सुइ कली यो मप्रोनेम। मेकोपुकीमी एग्लोन कली पशो खोदेशो पा, नेल्ल मुर आन कली खतम पोक्तेक्म।

<sup>38</sup> मिनु यहोसु नु इस्राएली नेल्ल देबीर गे लेश्शा, मेको नु लडाइ पाम्तेक्म। <sup>39</sup> मेकोमी मेकेर डा सहर नेल्ल, आन पिप नु एर आंथ डा गाउं आन कली ग्रातेक्म। मुर नेल्ल आन कली खतम पोक्तेक्म। सुइ कली यो मप्रोनेम। मेकोपुकीमी हेब्रोन नु मेकेर डा पिप नु लिब्ना कली दोदेशो पामे, मोदेशो पा देबीर नु मेकेर डा पिप कली यो पाम्तेक्म।

<sup>40</sup> मोपा यहोसुमी पहाड नेल्ल, नेगेब रागी, पच्छिम नेल्ल डा आइक्च पहाड नु आइक्च डांडा डा देम्सीलो ग्रात। पिप नेल्ल आन कली साइक्तु। का कली यो मप्रोन। मेको ब्रॉइशो नेल्ल आन कली खतम सेल्लु। परमप्रभु यावे, इस्राएली आन परमप्रभुमी दोदेशो अरेवा, मोदेशो पाप्तु। *ब्यवस्था २०:१६-१८* <sup>41</sup> मिनु यहोसुमी कादेश-बारनेआ, गाजा नु गोशेन रे लाइश्शा गिबोन सम्म नेल्ल ग्रात। *यहोसु ११:१६* <sup>42</sup> मिनु यहोसुमी मेको आन पिप आन कली नु आन रागी नेल्ल कली कालेम ग्रात। मारदे हना परमप्रभु यावे, इस्राएली आन परमप्रभुमी इस्राएली आन पा डा लडाइ पाप्तु। <sup>43</sup> मिनु नोले यहोसु नु इस्राएली नेल्ल आन बाक्तीके गिल्गालमी लेत्तेक्म। *यहोसु १०:१५*

### याबीन नु अरु पिपपुकी ब्रुशो

<sup>11</sup> मिनु हासोर डा पिप याबीनमी यहोसुमी पशो नेल्ल नेंशा, मादोन डा पिप योबाब, शिम्रोन डा पिप आकशाफ, <sup>2</sup> उत्तर डा पहाडम बाक्ब पिपपुकी नु किन्नेरोथ डा दक्खिन डा पिप, अराबाह डा पहाडम बाक्ब आन पिप नु पच्छिमम नाफथ-डोर डांडा गे बाक्ब आन पिप, *किन्नेरोथ किन्नेरेथ यो बाक्ब*। <sup>3</sup> पूर्व नु पच्छिम डा कनानी आन पिप नु एमोरी आन पिप, हित्ती आन पिप, परिज्जी आन पिप, पहाड रागीम बाक्ब यबुसी आन पिप नु रागी डा हेरमोन डांडा आइदी मिस्पा रागी गे बाक्ब हिच्वी आन पिप, नेल्ल आन कली ब्रेश्शा सोइक्ताक्व। <sup>4</sup> मिनु मेको पिपपुकी नु आन लडाइ पाइब मुर नेल्ल जाक्तेक्म। मेकोपुकी ठेयब समुन्द डा बाल्वा खोदेशो पा शुश बाक्तेक्म। मिनु मेको आन के शारापुकी नु बग्गीपुकी यो शुश बाक्तेक्म। <sup>5</sup> मिनु मेको पिप नेल्ल खुम्सीशा, इस्राएली नु लडाइ पचा कली मेरोम माइश्शो ब्वाक्कु आ बुक्तीके आ नेक्था बाक्तेक्म।

<sup>6</sup> मिनु परमप्रभु यावेमी यहोसु कली “मेको आन कली तशा महिनीन। मारदे हना दीसा गो मेको आन कली साइश्शा, गे इस्राएली इन गुडमी गेनुड। गे मेको आन शारा आन ठेयब नारी खोइश्शा, आन बग्गी आन कली मीम क्रोतो” देंत। <sup>7</sup> मिनु यहोसु नु आ लडाइ पाइब नेल्लेमी मेरोम माइश्शो ब्वाक्कु बुक्तीके आ नेक्था जाक्दीश्शा, मेकोपुकी नु लडाइ पाम्तेक्म। <sup>8</sup> मिनु परमप्रभु यावेमी मेको आन कली इस्राएली आन गुडमी गेप्तु। मिनु इस्राएलीपुकीमी मेको आन कली ठेयब सहर सीदोन नु मिस्सेपोत-माइम सम्म नु पूर्व डा मिस्पा दिंम सम्म खेदा पा साइक्तेक्म। सुइ कली यो मप्रोनेम।

यहोसु १३:६<sup>९</sup> मिनु यहोसुमी परमप्रभु यावेमी दॅशो खोदॅशो पा, मेको आन शारा आन ठेयब नारी खोइश्शा, मेको आन बग्गीपुकी मीम क्रोइक्तु।

10 मिनु यहोसु नु इस्राएलीपुकी मेकेर रे लेशशा, हासोर ग्रातेक्म। मेकेर डा पिप कली तरवारमी साइक्तेक्म। हासोर चहिं मेको रागी डा नेल्ल व्येडा ठेयब सहर बाक्माक्त। 11 मिनु इस्राएलीपुकीमी मेकेर बाक्ब मुर नेल्ल आन कली तरवारमी साइक्तेक्म। मेकोपुकीमी नेल्ल आन कली खतम सेल्लेक्म। ब्रॉइशो का कली यो मप्रोनेम। मिनु मेकोपुकीमी हासोर सहरम मी सुइक्ताक्म। यहोसु १०:४०

12 मिनु यहोसुमी मेकेर डा पिप नेल्ल आन सहर ग्राशा, पिप नेल्ल आन कली साइक्तु। मिनु परमप्रभु यावे आ गेय पाइब मोसामी दॅशो खोदॅशो पा नेल्ल आन कली खतम पोक्तु। 13 मिनु इस्राएलीपुकीमी अरु डांडाम बाक्शो सहर आन कली मक्रोदेम। यहोसुमी हासोर सहर कली ला क्रोइक्तु। 14 मिनु इस्राएलीपुकीमी मेको सहर डा मार मार थोत्रक नु बी ब्यफ, क्यारश भेडा आंम कली वॉइसाक्म। तन्न मुर नेल्ल आन कली साइक्तेक्म। नेल्ल आन कली खतम सेल्ला, का कली यो मप्रोनेम। ब्यवस्था २०:१०-१५ 15 दोपा परमप्रभु यावेमी आ गेय पाइब मोसा कली अरेशो बाक्मे, मोपा मोसामी यहोसु कली अरेशो बाक्माक्त। मिनु यहोसुमी मोदॅशोन पाप्तु। परमप्रभु यावेमी मोसा कली अरेशो लोत्र यहोसुमी का सम्म यो मप्रोन। नेल्ल रिश्शो पा टिप्तु।

16 मोपा यहोसुमी मेको रागी नेल्ल आंम के सेल्लु। तेको तेको रागी आंम के सेल्लु दॅशा हना, पहाड, नेगेब नेल्ल, गोशेन नेल्ल नु दिंम डा रागी, अराबाह रागी नु इस्राएल डा ठेयब डांडा नु आ दिंम, यहोसु १०:४१ 17 सेडर ग्येत्थ लाइब हालाक माइश्शो डांडा रे पा लेबानोन डा बॅसी हेरमोन डांडा आंडी बाल-गाद सम्म ग्राशा, आंम के सेल्लु। मिनु मेकेर डा पिप नेल्ल आन कली ग्याइश्शा साइक्तु।

18 मिनु शुश नाक्त सम्म यहोसुमी मेको पिपपुकी नु लडाइ पाप्तु। 19 मिनु गिबोन डा मुर हिक्वीपुकी ला इस्राएलीपुकी नु गारशा सल्ला पाप्तेक्म। अरु सहर डा मुरपुकी मेकोपुकी नु गारथ मजाक्म। मोपतीके इस्राएलीपुकीमी सहर नेल्ल नु लडाइ पा ग्राशा, आंम के सेल्लेक्म। यहोसु ९:१५ 20 मारदे हना नेल्ल आन कली खतम सेल्ला, दे परमप्रभु यावेमी मेको नेल्ल आन थुं खकटा सेल्ला, नेल्ल खतम दुम्या कली इस्राएलीपुकी नु लडाइ पतीक थुं गेप्तु। मिनु शिशी मपथु, नेल्ल आन कली खतम सेल्लाइक्तु। परमप्रभु यावेमी मोसा कली अरेशो खोदॅशो दुम्त। प्रस्थान ४:२१; ब्यवस्था ७:२

21 मिनु मेना यहोसुमी हेब्रोन, देबीर, आनाब नु यहूदा आन पहाड नु इस्राएली आन पहाड रागीमी बाक्ब अनाकीम डा मुर आन कली खतम सेल्लु। यहोसुमी मेको आन कली नु आन सहर नेल्ल खतम सेल्लु। यहोसु १४:६-१५; ब्यवस्था ९:२ 22 इस्राएली आन रागीमी अनाकीम डा मुर का सम्म यो मलीम। गाजा, गाथ नु अशदोदमी का निक्शी ला लीतेक्म। १सामुएल १७:४; २सामुएल २१:२२

23 परमप्रभु यावेमी मोसा कली दॅशो खोदॅशो पा यहोसुमी रागी नेल्ल ग्राशा, आंम के सेल्लु। मिनु यहोसुमी इस्राएली आन थर थर डा मुर आन कली कोवशा, रागी रागी योक्शा गेप्तु। मिनु नोले रागी लडाइ रे नाइसाक्म। यहोसु १४:१५

बुशो पिप आन नें नु आन रागी

12 मिनु इस्राएलीपुकीमी यर्दन डा पूर्ब, अरनोन खोला रे हेरमोन डांडा सम्म नु पूर्ब डा अराबाह दिंम नेल्ल आंम के सेल्लेक्म। मेको बुशो पिप सु सु बाक्तेक्म दॅशा हना, 2 एमोरी आन पिप सीहोन, मेको हेश्बोनमी बाक्शो बाक्माक्त। मेकोमी ते ते हुकुम पाइब बाक्माक्त दॅशा हना, अरनोन खोला आ नेक्था बाक्शो आरोएर रे अरनोन खोला आ दाते रे यब्बोक खोला सम्म सासन पाइब बाक्माक्त। मेको अम्मोनी आन सांद बाक्त। मिनु मेकोमी आधा गिलाद कली यो सासन पशो बाक्माक्त। गन्ती २१:२४<sup>३</sup> मिनु पूर्ब गे किन्नेरोथ माइश्शो समुन्द्र रे अराबाह दिंम नु अराबाह हिक्सी समुन्द्र, बेथ-येशीमोथ नु दक्खिन गे पिस्सा डांडा आधी रागी सम्म यो सासन पशो बाक्माक्त। 4 मेको बाशान डा पिप, ओग आ रागी बाक्त। मिनु

मेको रेफाइम आन नोले डा पिप का बाक्माक्त। मेको ते ते सासन पाइबाक्माक्त दॅशा हना, अशतारोथ नु एद्रेइमी सासन पाइबाक्माक्त। गन्ती २१:३३; ब्यवस्था ३:१०-११<sup>५</sup> हेरमोन डांडा, साल्ला, बाशान नेल्ल, गेशुरी आन सांद नु माकाथ आ मुर आन सांद सम्म नु आधा गिलाद रे लाइश्शा, हेश्बोन डा पिप सीहोन आ सांद सम्म सासन पाइबाक्माक्त।

6 परमप्रभु यावे आ गेय पाइब मोसा नु इस्राएलीपुकीमी मेको आन कली ग्राशा साइक्तेक्म। मिनु परमप्रभु यावे आ गेय पाइब मोसामी रूबेन आ थर, गाद आ थर नु मनस्से आ उइक्थ थर डा मुर आन कली “मेको रागी इन के दुम्त” दे गेप्तु। गन्ती ३२:३३

7 मिनु यहोसु नु इस्राएलीपुकीमी यर्दन खोला आ पच्छिम डा पिप आन रागी तेको तेको ग्रातेक्म दॅशा हना, लेबानोन बॅसी डा बाल-गाद, सेडर डा ग्येत्थ लां डा हालाक डांडा सम्म ग्रातेक्म। मिनु डॉइती दॅशो खोदॅशो पा यहोसुमी इस्राएली आन थर थर डा मुर गिश बाक्नीम, दे कोवशा, मेको आन कली “मेको रागी इन के दुम्त” दे गेप्तु। मेको रागी तेको तेको बाक्तेक्म दॅशा हना, 8 पहाड रागी, पच्छिम डा आइक्व डांडापुकी, अराबाह रागी, पहाड डा देम्सीलो, गोरशो रागी नु नेगेब बाक्तेक्म। मेकेर तेको जात डा मुर बाक्तेक्म दॅशा हना, हिक्ती, एमोरी, कनानी, परिज्जी, हिक्वी नु यबुसीपुकी बाक्तेक्म। मिनु ब्रुडब पिप तेको तेको सहर डा बाक्तेक्म दॅशा हना, यहोसु ११:३<sup>९</sup> यरीको डा पिप, ऐ डा पिप, मेको बेथेल आ नेक्था बाक्ब, यहोसु ६:२; यहोसु ८:२९ 10 यरूसलेम डा पिप, हेब्रोन डा पिप, यहोसु १०:- 11 यरमथ डा पिप, लाकीश डा पिप, 12 एग्लोन डा पिप, गेजेर डा पिप, 13 देबीर डा पिप, गेदेर डा पिप यहोसु १३:३८; न्यायाधीस १:११ 14 होरमा डा पिप, आराद डा पिप, न्यायाधीस १:१७; गन्ती २१:१ 15 लिब्ना डा पिप, अदुल्लाम डा पिप, यहोसु १०:२९-३० 16 माकेदा डा पिप, बेथेल डा पिप, यहोसु १०:२८ 17 ताप्पुआह डा पिप, हेफेर डा पिप, यहोसु १५:५३; १सामुएल ४:१; १इतिहास ५:१६ 18 अफेक डा पिप, लशारोन डा पिप, 19 मादोन डा पिप, हासोर डा पिप, यहोसु ११:१, १० 20 शिम्रोन-मेरोन डा पिप, आकशाफ डा पिप, 21 तानाक डा पिप, मेगीददो डा पिप, यहोसु १७:११ 22 केदेश डा पिप, कारमेलम बाक्शो योक्नाम डा पिप, यहोसु १९:३७; यहोसु १९:११ 23 नाफाथ-डोरम बाक्शो डोर डांडा डा पिप, गिल्गालम बाक्शो गोयीम डा पिप, ग्रीक लोत्रम गिल्गाल कली गालील यो दॅब। उत्पत्ती १४:१९ 24 नु तिरचा डा पिप बाक्तेक्म। मेको नेल्ल पा ३१ जना पिप बाक्तेक्म। १राजा १४:१७

ग्राचा लीशो रागीपुकी

13 मिनु यहोसु शुश खाल्पा दुम्त। मिनु परमप्रभु यावेमी मेको कली “गे मुल शुश खाल्पा दुम्ते। रागी शुश इन के सेल्ला माल्शो लीशो बाक्नीम। 2 मिनु तेको तेको रागी लीशो बाक्तेक्म दॅशा हना, पलिस्ती नु गेशुरी आन रागी नेल्ल, १सामुएल २७:८<sup>३</sup> इजीप्त रागी डा पूर्ब डा शीहोर खोला रे लाइश्शा इजीप्त आ उत्तर डा एक्रोन सम्म लीशो बाक्तेक्म। मेको नेल्ल कनानी आन रागी बाक्ब। मिनु पलिस्ती आन ५ जना सासन पाइब आन सहर गाजा, अशदोद, अशकलोन, गाथ नु एक्रोन लीशो बाक्नीम। मिनु दक्खिन डा आक्वीम डा मुर आन रागी यो लीशो बाक्त। 4 मिनु दक्खिन गे कनानी आन रागी नेल्ल नु सीदोनी आन मेआरा रागी रे लाइश्शा, अफेक सहर एमोरी आन सांद सम्म लीशो बाक्नीम। 5 गेबाली आन रागी, लेबानोन नेल्ल नु पूर्ब गे डा हेरमोन डांडा दी डा बाल-गाद रे लाइश्शा, लेबो-हमाथ सम्म लीशो बाक्नीम। 6 मिनु लेबानोन रे मिस्रेपोत-माइम सम्म पहाड डा मुर नेल्ल नु सीदोनी आन रागी लीशो बाक्नीम। गो मेको मुर नेल्ल आन कली इस्राएली आन डॉइती रे गुंडनुडमी। गोम इ कली अरेशो खोदॅशो पा मेको रागी इस्राएली आन कली योक्शा गेवो। मेको रागी आंम के सेल्ला कली योक्शा गेमी। 7 मिनु एको रागी ९ थर नु मनस्से आ उइक्थ थर कली योक्शा गेवो” दे परमप्रभु यावेमी यहोसु कली दॅत।

रूबेन, गाद नु मनस्से आ उइक्थ थर

8 मिनु डोंइती परमप्रभु यावे आ गेय पाइब मोसामी मनस्से आ उइक्थ थर, रूबेन आ थर नु गाद आ थर आन कली यर्दन आइक्वी हांबु पूर्वमी आन रागी गेने थुम्शो बाक्त। यहोसु १३:१५-३२<sup>9</sup> तेको रागी गेशो बाक्त देंशा हना, अरनोन खोला आ नेक्था बाक्शो आरोएर सहर नु दिम आ दातेमी बाक्शो मेदेबा सहर डा दिम दीबोन सहर सम्म डा रागी नेल्ल गेशो बाक्त। 10 मिनु हेश्बोन सहरम हुकुम पाइब एमोरी आन पिप सीहोन आ सहर नेल्ल अम्मोनी आन सांद सम्म गेशो बाक्त। 11 गिलाद रागी नु गेशुरी नु माकाथी आन रागी नु हेरमोन नेल्ल नु बाशान नेल्ल रे लाइश्शा साल्का सम्म गेशो बाक्त। ब्यवस्था ३:१४; २सामुएल ३:३; २सामुएल १५:८<sup>12</sup> मिनु अशतारोथ नु एद्रेइमी सासन पाइब बाशान सहरम बाक्ब ओग माइश्शो पिप आ रागी नेल्ल गेशो बाक्त। मेको पिप ओग ला रेफाइम आन दातेमी ब्रोंइशा लीशो बाक्माक्त। मोसामी मेको आन कली ग्राशा, खेरशो बाक्त।<sup>13</sup> तन्न इस्राएलीपुकीमी गेशुरी नु माकाथ आ मुर आन कली मखेरेम। मोपतीके मुल सम्म मेको गेशुरी नु माकाथी इस्राएली आन दातेमी बाक्शो बाक्नीम। 14 मोसामी लेवी आ थर कली ला रागी मगेवो। मारदे हना परमप्रभु यावे आ देंशो खोदेंशो पा परमप्रभु यावे, इस्राएली आन परमप्रभु कली चोशा चढ़ेशो मेको आन भाग बाक्ब। यहोसु १३:३३; उत्पत्ती ४९:५; गन्ती १८:२०-२१

रूबेन आ थर डा मुर आन रागी

15 मिनु मोसामी रूबेन आ थर डा खिं खिं डा मुर गिश बाक्नीमी, दे कोव्रशा, रागी गेशो बाक्त।<sup>16</sup> मेको आन रागी अरनोन खोला आ नेक्था बाक्शो आरोएर सहर नु मेको दिम आ दातेम बाक्शो सहर नु मेदेबा दिम आ नेक्था डा रागी नेल्ल,<sup>17</sup> हेश्बोन नु दिम डा सहर नेल्ल, दीबोन, बामोथ-बाल नु बेथ-बाल-मेओन,<sup>18</sup> याहास, केदेमोथ नु मेफा-आथ,<sup>19</sup> किरयथ-थाइम, सिब्मा नु बेंसी डा डांडामी बाक्शो सेरेथ-शाहार,<sup>20</sup> बेथ-पेओर, पिसगा डा देम्सीलो, बेथ-येशीमोथ,<sup>21</sup> दिम डा सहर नेल्ल नु एमोरी आन पिप सीहोन आ रागी नेल्ल गेशो बाक्त। सीहोन हेश्बोनमी सासन पाइब बाक्त। मिनु मोसामी मेको कली नु मिदयान डा सासन पाइब आन कली ग्राशा साइश्शो बाक्त। मेको सासन पाइब सु सु बाक्तेक्म देंशा हना, मिदयानमी बाक्शो एवी, रेकेम, सुर, हुर नु रेबा, सीहोनमी वोइश्शो सासन पाइब बाक्तेक्म।<sup>22</sup> मिनु इस्राएलीपुकीमी मेकोपुकी नु बेओर आ तौ बालाम, लिंक्वु कोव्रब कली यो तरवारमी साइक्तेक्म। गन्ती २२:५; गन्ती ३१:८<sup>23</sup> मिनु रूबेन आ थर डा मुर आन सांद यर्दन नु आ सुर सम्म बाक्त। मेको रूबेन आ थर आन खिं खिं डा मुर आन कली गेशो सहर नु गाउंपुकी एकोन बाक्तेक्म।

गाद आ थर डा मुर आन रागी

24 मिनु मोसामी गाद आ थर डा खिं खिं डा मुर आन कली कोव्रशा, रागी गेशो बाक्त। उत्पत्ती ४९:१९<sup>25</sup> मेको आन कली याजेर नु गिलाद डा सहर नेल्ल नु अम्मोनी आन आधा रागी, रब्बाह आ पूर्व डा आरोएर सम्म गेशो बाक्त।<sup>26</sup> मिनु हेश्बोन रे रामाथ-मिस्से नु बेतोनीम सम्म नु महा-नाइम रे देबीर सहर सम्म गेशो बाक्त।<sup>27</sup> मिनु हेश्बोन डा पिप सीहोन आ लीशो राज्य नेल्ल, दिम बेथ-हाराम, बेथ-निम्रा, सुक्कोथ, साफोन, यर्दन नु आ सुर मेको आ सांद बाक्त। मेको आन कली यर्दन डा पूर्व गे किन्नेरेथ समुन्द्र आ दक्खिन उइ सम्म गेशो बाक्त।<sup>28</sup> मेको गाद आ थर आन खिं खिं डा मुर आन कली कोव्रशा गेशो रागी डा सहर नु गाउंपुकी एकोन बाक्नीम।

मनस्से आ थर डा मुर आन रागी

29 मिनु मोसामी मनस्से आ उइक्थ थर कली रागी गेशो बाक्त। मेको आ खिं खिं डा मुर आन कली गिश बाक्नीम, दे कोव्रशा, रागी योक्शा गेशो बाक्त।<sup>30</sup> मेको आन रागी महा-नाइम रे लाइश्शा, बाशान नेल्ल गेशो बाक्त। बाशान डा पिप ओग आ राज्य नेल्ल नु बाशान डा याइर आ सहर नेल्ल पा

६० ओटा सहर गेशो बाक्त। यहोसु १७:१; न्यायाधीस १०:३-४<sup>31</sup> मिनु आधा गिलाद, अशतारोथ नु एद्रेइ बाशान डा पिप ओग आ राज्य डा सहरपुकी मनस्से आ तौ माकीर आ खिं खिं डा आधा मुर आन कली आन खिं खिं कोव्रशा गिश बाक्नीमी योक्शा गेशो बाक्त।

<sup>32</sup> मिनु डोंइती मोसामी मेको रागी नेल्ल मोआब डा दिमम बाक्शा योक्शा गेशो बाक्त। मेको दिम ते बाक्शो बाक्त देंशा हना, यरीको नु यर्दन आ पूर्व गे बाक्त।<sup>33</sup> तन्न लेवी आ थर डा मुर आन कली तेकोइ रागी मगेम। मारदे हना परमप्रभु यावे, इस्राएली आन परमप्रभु मेको आन भाग बाक्ब। यहोसु १३:१४

मनस्से नु ९ थर आन रागी

14 मिनु इस्राएलीपुकीमी कनान रागी डा तेको तेको रागी आंम कली ताम्तेक्म देंशा हना, चढ़ेब एलाजर, नून आ तौ यहोसु नु इस्राएल डा थर नेल्ल आन ठेयब मुरपुकीमी इस्राएली आन थर थर आन कली रागी योक्तेक्म। गन्ती ३४:१७<sup>2</sup> मिनु परमप्रभु यावेमी मोसा कली दोपा अरेवा, मोपा मेको ९ थर नु उइक्थ थर आन कली रागी योक्शा गेशो बाक्त। गन्ती २६:५५<sup>3</sup> मारदे हना मोसामी थर निक्शी नु उइक्थ थर आन कली यर्दन खोला आ पूर्वम रागी गेने थुम्शो बाक्त। तन्न लेवी आन कली मेको आन दातेमी तेकोइ रागी मगेशो बाक्त। यहोसु १३:१४,३३; ब्यवस्था १०:९<sup>4</sup> मिनु योसेफ आ तौ मनस्से नु एफ्राइम निक्शी थर बाक्ताक्स। तन्न लेवी आन कली रागी काइ मगेमे बाक्त। मेकोपुकी बाक्चा कली सहरपुकी नु मेको आन बी ब्यफ, क्यारश भेडा योव्रचा कली इच्का रू ला तामे बाक्त। यहोसु २१:-<sup>5</sup> परमप्रभु यावेमी मोसा कली दोदेंशो पा अरेवा, मोदेंशो पा इस्राएलीपुकीमी थर थर आन कली रागी योक्शा गेम्तेक्म।

हेब्रोन सहर कालेब कली गेशो

<sup>6</sup> मिनु यहूदा आ थर डा वोंइश मुरपुकी यहोसु बाक्तीक गिल्गालमी जाक्तेक्म। मिनु केनीज्जी यपुन्ने आ तौ कालेबमी मेको कली “परमप्रभु यावेमी कादेश-बारनेआमी आं नु इन पर्वमी परमप्रभु आ मुर मोसा कली देंशो लोव्र तुइक्नीनी। गन्ती १४:२४; ब्यवस्था १:३६<sup>7</sup> गो ४० बर्स डा बाक्डानु, परमप्रभु यावे आ गेय पाइब मोसामी कादेश-बारनेआ रे एको रागी कली क्यारी पथ सोइक्ताक्व। मिनु गो क्यारी पा आं तुइश्शो लोव्र शोव्रशो नड। गन्ती १३:६,३०<sup>8</sup> गो नु लशो लोकबपुकीमी चहिं मरिश्शो लोव्र पा, मुर नेल्ल आन कली हिंपाइक्तेक्म। तन्न गो परमप्रभु यावे, आं परमप्रभु कली आं थुं नेल्लेमी आ नोले खोइक्ता।<sup>9</sup> मिनु मेको नाक्ती मोसामी आं कली कसम जशा गे ते गाक्डे, मेको रागी इ कली नु इ तौ, चच युइ आन कली गेना हना यो कली दुम्ल। मारदे हना इ थुं नेल्लेमी परमप्रभु यावे, आं परमप्रभु नोले खोइक्तीवी।<sup>10</sup> मिनु नेनीन, परमप्रभु यावेमी आं कली ब्रोंइचा गेप्टु। इस्राएलीपुकी गोरशो रागीमी हिरसामानु, परमप्रभु यावेमी मोसा कली एको लोव्र देंशो ४५ बर्स दुम्त। मिनु मुलाक्ती गो ८५ बर्स दुम्ती।<sup>11</sup> मिनु मोसामी आं कली सोइक्ची ना दोशो बोल्यो बाक्डा, मोशोन मुलाक्ती यो बोल्यो बाक्नुड। लडाइ पचा नु खिंङगा लाङगा पचा मेना दोदेंशो नडा, मुलाक्ती यो मे मोदेंशोन बाक्नुड।<sup>12</sup> मोपतीके एको डांडा डा रागी आं कली गेने। परमप्रभु यावेमी एको आ पर्वम मेनान देने थुम्तु। मिनु ‘मेकेर अनाकीम डा मुर बाक्नीम। मिनु मेकेर गारो पाइश्शो ठेयब सहर बाक्नीम’ देंशो गे नेंतीनी। मिनु परमप्रभु यावे गो नु बाक्त हना, परमप्रभु यावे आ देंशो खोदेंशो पा गो मेको आन कली खेरने चाप्नुड” देंत। यहोसु ११:२१

<sup>13</sup> मिनु यहोसुमी मेको कली आसीक गेशा, यपुन्ने आ तौ कालेब कली हेब्रोन सहर गेप्टु। यहोसु १५:१३-१९; यहोसु २१:११-१२<sup>14</sup> मोपतीके मुल सम्म केनीज्जी यपुन्ने आ तौ कालेब आ रागी हेब्रोन बाक्ब। मारदे हना मेकोमी परमप्रभु यावे, इस्राएली आन परमप्रभु कली आ थुं नेल्लेमी आ नोले खोइश्शो बाक्त। गन्ती ३२:१२<sup>15</sup> डोंइती हेब्रोन कली किरयथ-अरबा देंशो बाक्तेक्म। मेको अरबा माइश्शो मुर अनाकीम डा मुर आन दातेमी नेल्ल क्येडा लाइश्शो मुर बाक्तेक्म। मिनु मेको रागी लडाइ रे नाइसाक्व। गन्ती १३:२२; यहोसु ११:२३



यहूदा आ थर डा मुर आन रागी

15 मिनु योक्शा गेशो यहूदा आ खिं खिं डा मुर आन रागी एदोम रागी रे दक्खिन जीन माइश्शो गोरशो रागी सम्म बाक्त। उत्पत्ती ४९:८-९; गन्ती ३४:३-५<sup>२</sup> मेको आन रागी डा दक्खिन डा सांद हिक्सी समुन्द्र आ दक्खिन रे दक्खिन गे<sup>३</sup> अक्रब्बीम रे ग्येत्थ लाइश्शा जीन लाक्शा कादेश-बारनेआ आ दक्खिन रे ग्येत्थ लशा, हेस्रोन लाक्शा, अदार सम्म जाक्दीश्शा, कारका सहर सम्म बाक्त।<sup>४</sup> मेकेर रे अचमोन लाक्शा इजीप्त डा खोला रे समुन्द्र जाक्दीश्शा नुष्शो बाक्त। मेको रागी मेको आन के दक्खिन गे डा सांद बाक्त।

<sup>५</sup> मिनु पूर्व डा सांद चहिं हिक्सी समुन्द्र यर्दन आ ओव्रतीक सम्म बाक्त। उत्तर डा सांद यर्दन आ ओव्रतीक रे लाइश्शा<sup>६</sup> बेथ-होग्ला रे बेथ-अराबाह आ उत्तर लाक्शो बाक्त। मिनु मेको सांद रूबेन आ तौ बोहान आ फुल्लु सम्म ग्येत्थ लशो यहोसु १८:१७<sup>७</sup> नु आकोर नें पाइश्शो दिम रे देबीर नु उत्तर गे गिलगाल सम्म बाक्त। गिलगाल अदुम्मीम डा ग्येत्थ लतीक लां रे आइक्वी गे सम्म बाक्त। मेको अदुम्मीम दिम डा दक्खिन गे बाक्ब। मेको सांद एन-शेमेश नें पाइश्शो खोला रे लशा, एन-रोगेल सम्म लशो बाक्त।<sup>२सामुएल १७:१७</sup><sup>८</sup> मेको सांद हिन्नोम आ तौ आ दिम रे यबुसी आन सहर आ दक्खिन रे ग्येत्थ खोइश्शो बाक्त। यबुसी आन सहर यरूसलेम बाक्ब। मिनु मेकेर रे हिन्नोम दिम डा पच्छिमम बाक्शो डांडा ग्येत्थ रे रेफ्राइम आन दिम डा उत्तर सम्म लशो बाक्त।<sup>२इतिहास २८:३</sup><sup>९</sup> मेको सांद डांडा आ थेपील रे नेप्तोआह नें पाइश्शो ब्वाक्कु बुक्तीके जाक्दीश्शा, एफ्रोन पहाड डा सहर सम्म जाक्दीश्शो बाक्त। लेंशा मेको सांद मेको किरयथ-यारीम, मेको कली बालाह यो देंनीम, सम्म जाक्दीश्शो बाक्त। यहोसु १५:६०; यहोसु ९:१७; यहोसु १८:१५<sup>१०</sup> मिनु मेको सांद बालाह रे पा सेइर पहाड सम्म पच्छिम गे हिरब। येआरीम डांडा आ उत्तर गे डा देम्सीलो रे पा बेथ-शेमेश रे लुक्च लशा, तिम्नाह सम्म बाक्त। मेको येआरीम डांडा कली केसालोन यो देंनीम। यहोसु १९:४३; न्यायाधीस १४:३<sup>११</sup> मेको सांद लेंशा एफ्रोन आ उत्तर गे जाक्दीश्शो बाक्त। मिनु शिक्केरोन सहरमी जाक्दीश्शा, बालाह डांडा लाक्शा, यब्नेलमी जाक्दीश्शो बाक्त। मेको सांद समुन्द्र सम्म बाक्त।<sup>१२</sup> पच्छिम डा सांद चहिं ठेयब समुन्द्र सम्म बाक्त। यहूदा आ थर आन खिं खिं डा मुर आन रागी एर ओंथ डा सांद एकोन बाक्नीम। यहोसु १४:६-१५; न्यायाधीस १:१०-१५

<sup>१३</sup> मिनु परमप्रभु यावेमी यहोसु कली अरेशो खोदेंशो पा यहूदा आ थर डा रागी आ दातेमी यपुन्ने आ तौ कालेब कली किरयथ-अरबा गेप्टु। मेको कली हेब्रोन यो देंनीम। मेको अरबा अनाक आ आफ बाक्त।<sup>१४</sup> मिनु कालेबमी हेब्रोन रे अनाक आ चच युड सां शेशै, अहीमान नु तल्मै आन कली खेरतीमी।<sup>१५</sup> मिनु मेकेर रे देबीरमी बाक्ब मुरपुकी नु लडाइ पथ लत। डाँइती देबीर कली किरयथ-सेफेर देंशो बाक्तेक्म।<sup>१६</sup> मिनु कालेबमी “सुमी चहिं किरयथ-सेफेर लडाइ पा ग्राशा, खतम पाइबा, मेको कली आं तमी अकसा ग्युंभे पा गेनुड” देंत। न्यायाधीस १:१२<sup>१७</sup> मिनु कालेब आ लोकब केनाज आ तौ ओथनीएलमी मेको सहर ग्रात। मिनु कालेबमी ओथनीएल कली आ तमी अकसा ग्युंभे पा गेप्टु। न्यायाधीस ३:९

<sup>१८</sup> अकसा ओथनीएल नु लम नोले, अकसामी ओथनीएल कली “आं आफ नु रू का पुन” देंत। मिनु अकसा आ गधा रे तोंइसाक्व। मिनु आ आफ कालेबमी अकसा कली “मार माल्दे” दे हिल्लो पाप्टु।<sup>१९</sup> मिनु अकसामी “आं कली रिम्शो थोव्वक का गेन। मारदे हना गे आं कली नेगेब डा रू गेतीनी। मुल आं कली ब्वाक्कु बुक्तीके यो गेन” देंत। मिनु कालेबमी अकसा कली आइदी नु आइक्था डा ब्वाक्कु बुक्तीके गेप्टु।

<sup>२०</sup> मिनु यहूदा आ थर डा मुर आन खिं खिं डा मुर आन कली गेशो रागी तेको तेको बाक्नीम देंशा हना,<sup>२१</sup> यहूदा आ खिं डा मुर आन दक्खिनम बाक्शो एदोम आ सांद गे डा सहरपुकी कब्सेल, एदेर नु यागुर,<sup>२२</sup> कीनाह, दिमोना नु अदादाह,<sup>२३</sup> केदेश, हासोर नु इधनान,<sup>२४</sup> जीफ, तेयलेम नु बेआलोथ,<sup>२५</sup> हासोर-हादत्ता, केरयोथ-हेस्रोन, मेको कली हासोर यो देंनीम,<sup>२६</sup> अमाम, शेमा नु मोलादा<sup>२७</sup> हासार-गददा, हेश्मोन नु बेथ-पेलेत,

<sup>२८</sup> हासार-शुआल, बेयर-शेबा नु बिज्योत्या,<sup>२९</sup> बालाह, यीम नु एसेम,<sup>३०</sup> एल्लोद, केसील नु होरमा,<sup>३१</sup> सिकलाग, मदमन्ना नु सन्सन्ना,<sup>३२</sup> लेबाओत, शिल्हीम, ऐन नु रिम्मोन सहर बाक्नीम। मेको नेल्ल पा २९ ओटा सहर नु आन नेक्था डा गाउं नेल्ल यो बाक्नीम।

<sup>३३</sup> मिनु दिम गे चहिं एश्ताओल, सोराह नु अश्ना, न्यायाधीस १३:२५; न्यायाधीस १६:३१<sup>३४</sup> जानोह, एन-गन्नीम ताप्पुआह नु एनाम,<sup>३५</sup> यरमुथ, अदुल्लाम, सोकोह नु आजेका,<sup>३६</sup> शा-आराइम, अदीथैम, गेदेराह नु गेदे-रोथैम बाक्नीम। मेको नेल्ल पा १४ ओटा सहर नु आन नेक्था डा गाउं नेल्ल यो बाक्नीम।

<sup>३७</sup> मिनु सेनान, हदाशा नु मिग्दल-गाद,<sup>३८</sup> दिलेआन, मिस्पा नु योकतेल,<sup>३९</sup> लाकीश, बोस्कत नु एग्लोन,<sup>४०</sup> कब्बोन, लहमाम नु किल्लीश,<sup>४१</sup> गेदे-रोथ, बेथ-दागोन, नामा नु माकेदा बाक्नीम। मेको नेल्ल पा १६ ओटा सहर नु आन नेक्था डा गाउं नेल्ल यो बाक्नीम।

<sup>४२</sup> लिब्ना, एथेर नु आशान,<sup>४३</sup> इफताह, अश्ना नु नेजीब,<sup>४४</sup> कैलाह, अकजीब नु मारेशा बाक्नीम। मेको आन बाक्तीक नेल्ल पा ९ ओटा सहर बाक्नीम। यहोसु १९:२९

<sup>४५</sup> मेको एफ्रोन सहर नु आ नेक्था डा खिंपुकी नु गाउं नेल्ल, १सामुएल ५:१०; यहोसु १९:४१-४६<sup>४६</sup> एफ्रोन आ पच्छिम गे डा समुन्द्र सम्म अशदोद आ नेक्था डा सहर नेल्ल नु मेकेर डा गाउं नेल्ल<sup>४७</sup> अशदोद नु मेको आ नेक्था डा खिंपुकी नु गाउं नेल्ल, गाजा नु मेको आ नेक्था डा खिंपुकी नु गाउं नेल्ल नु इजीप्त डा खोला नु ठेयब समुन्द्र आ सुर सम्म बाक्नीम। १सामुएल ५:१; न्यायाधीस १:१८

<sup>४८</sup> मिनु पहाड डा शामीर, यत्तीर नु सोकोह,<sup>४९</sup> दन्ना, किरयथ-सन्ना, मेको कली देबीर यो देंनीम,<sup>५०</sup> आनाब, एश्तेमोह नु अनीम,<sup>५१</sup> गोशेन, होलोन नु गिलोह। मेको नेल्ल पा ११ ओटा सहर नु आन नेक्था डा गाउं नेल्ल यो बाक्नीम।

<sup>५२</sup> अराब, दुमा नु एशान,<sup>५३</sup> यानीम, बेथ-ताप्पुआह नु अफेकाह,<sup>५४</sup> हुस्ता, किरयथ-अरबा, मेको कली हेब्रोन यो देंनीम, नु सीओर बाक्नीम। मेको नेल्ल पा ९ ओटा सहर नु आन नेक्था डा गाउं नेल्ल यो बाक्नीम।

<sup>५५</sup> माओन, कारमेल, जीफ नु युत्ता,<sup>५६</sup> येज्जेल, योकदाम नु जानोह,<sup>५७</sup> काइन, गिबा नु तिम्नाह बाक्नीम। मेको नेल्ल पा १० ओटा सहर नु आन नेक्था डा गाउं नेल्ल यो बाक्नीम।

<sup>५८</sup> हल्लुल, बेथ-सुर नु गेदोर,<sup>५९</sup> माराथ, बेथ-अनोत नु एल्लेकोन। मिनु मेको नेल्ल पा ६ ओटा सहर नु आन नेक्था डा गाउं नेल्ल यो बाक्नीम।

<sup>६०</sup> किरयथ-बाल, मेको कली किरयथ-यारीम यो देंनीम नु रब्बाह बाक्नीम। मेको नेल्ल पा सहर निक्शी नु आस नेक्था डा गाउं नेल्ल यो बाक्नीम। यहोसु ९:१७; यहोसु १८:१४

<sup>६१</sup> मिनु गोरशो रागीमी बेथ-अराबाह, मिदीन नु सेकाका<sup>६२</sup> निब्शान, शुश हिक्सी सेल्ब आन सहर नु एन-गेदी बाक्नीम। मेको नेल्ल पा ६ ओटा सहर नु आन नेक्था डा गाउं नेल्ल यो बाक्नीम।

<sup>६३</sup> तन्न यहूदा आ खिं डा मुरपुकीमी यरूसलेम सहरमी बाक्ब यबुसी आन कली खेरने मचबेम। मोपतीके एको यबुसीपुकी मुलाक्त सम्म यरूसलेममी यहूदा आ खिं डा मुरपुकी नु काथा बाक्नीम। यहोसु १८:२८; २सामुएल ५:६-७

योसेफ आ तौ एफ्राइम आ रागी

16 मिनु योक्शा गेशो योसेफ आ खिं खिं डा मुर आन रागी तेको तेको बाक्तेक्म देंशा हना, यरीको आ नेक्था डा यर्दन रे यरीको खोला आ पूर्व रे ग्येत्थ लाइब गोरशो रागी लाक्शा, बेथेल डा पहाड रागी सम्म बाक्त। उत्पत्ती ४९:२२<sup>२</sup> बेथेल कली लूज यो देंनीम। मेकेर रे अरकी आ मुर आन रागी लाक्शा, अतारोथ सम्म जाक्दीश्शो बाक्त।<sup>३</sup> मिनु पच्छिम गे तोइश्शा याफ्लेत आ मुर आन रागी रे पा आइदी डा बेथ-हीरोन नु गेजेर सम्म डा समुन्द्र जाक्दीश्शा नुष्शो बाक्त।<sup>४</sup> मिनु योसेफ आ तौ निक्शी, मनस्से नु एफ्राइम आस खिं खिं डा मुरपुकीमी आंम कली रागी ताम्तेक्म।

5 मिनू एफ्राइम आ खिं खिं डा मुर आन रागी तेको तेको बाक्तेकम देंशा हना, मेको आन के सांद पूर्व गे अतारोथ-अदार रे पा आइक्था डा बेथ-होरोन सम्म बाक्ता। 6 मिनू मेको सांद ठेयब समुन्द्र सम्म लत। उत्तर गे डा मिकमेथाथ रे लाइश्शा, पूर्व गे तानत-शिलो लाक्शा, पूर्व डा यानोह सम्म जाक्दीश्शा बाक्ता। 7 मिनू नोले यानोह रे पा अतारोथ नु नाराह सम्म तोइश्शा यरीको जाक्दीश्शा, यर्दन सम्म बाक्ता। 8 मेको सांद ताप्पुआह रे पा लाइश्शा पच्छिम गे कानाह खोल्सा सम्म लशा समुन्द्रमी जाक्दीश्शा नुषो बाक्ता। मेको एफ्राइम आ खिं खिं डा मुर आन रागी बाक्ब। 9 एको क्येडा लाक्शा मनस्से आ खिं डा मुर आन दातेमी एफ्राइम आ खिं डा मुर आन कली यो सहर नु गाउंपुकी गेशो बाक्ता। यहोसु १७:९ 10 तन्न मेकोपुकीमी गेजेर सहरमी बाक्ब कनानी आन कली मखेरेम। मोपतीके कनानीपुकी मुल सम्म एफ्राइम आ मुर आन दातेमी बाक्नीम। मेकोपुकी वाइलीम वाइल दुश्शा बाक्शो बाक्नीम। न्यायाधीस १:२९; १राजा ९:१६

मनस्से आ थर डा मुर आन रागी

17 मिनू योसेफ आ ठेयब तौ मनस्से नु मनस्से आ ठेयब तौ माकीर कली योक्शो रागी गिलाद नु बाशान बाक्माक्ता। गिलाद आ किकी पिपी बाक्माक्ता। मेकोपुकी बोल्यो लडाइ पाइब बाक्तेकम। यहोसु १३:३१; गन्ती २६:२९ 2 मिनू मेको योक्शो रागी मनस्से आ लीशो मुर आन कली बाक्ता। मिनू मेको लीशो मुर सु सु बाक्तेकम देंशा हना, अबीएजेर आ खिं डा मुर, हेलेक आ खिं डा मुर, असीएल आ खिं डा मुर, शेकेम आ खिं डा मुर, हेफेर आ खिं डा मुर नु शेमीदा आ खिं डा मुर बाक्तेकम। मेकोपुकी योसेफ आ चच युइ आन खिं खिं डा मुर बाक्तेकम। न्यायाधीस ६:११,२४; न्यायाधीस ८:३२

3 तन्न मनस्से आ तौ माकीर, मेको आ तौ गिलाद, मेको आ तौ हेफेर नु मेको आ तौ सेलोफेहाद के तमीपुकी ला बाक्तेकम, तौ मबाक्म। मेको आ तमीपुकी महालाह, नोआह, होग्ला, मिल्का नु तिरचा बाक्तेकम। गन्ती २६:३३; गन्ती २७:१-८; गन्ती ३६ 4 मेकोपुकीमी चढेब एलाजर, नून आ तौ यहोसु नु ठेयब मुर आन डोंइती जाक्शा "आंड कली आंड लोक्ब आन दातेमीन रागी गेचा, दे परमप्रभु यावेमी मोसा कली अरेशो बाक्ब" देंतेकम। मिनू यहोसुमी मेको आन कली, परमप्रभु यावे आ देंशो खोदेंशो पा, आन बोडो बकान्छा आन दातेमी रागी गोप्ता। 5 मिनू मनस्से कली १० ओटा रागी गेम्तेकम। मिनू मेको कली यर्दन आ पूर्व डा गिलाद नु बाशान रागी यो तेम्शा गेम्तेकम। 6 मारदे हना मनस्से आ थर डा तमीपुकीमी यो मेको आन तौ आन दातेमीन रागी ताम्तेकम। गिलाद रागी चहिं मनस्से आ अरु तौ आन रागी दुम्त।

7 मनस्से आ रागी आशेर रे लाइश्शा शेकेम आ पूर्व डा मिकमेथाथ सम्म बाक्शो बाक्ता। मेको सांद दक्खिन गे लशा एन-ताप्पुआह सहरमी बाक्ब आन रागी सम्म जाक्दीश्शा बाक्ता। 8 मिनू ताप्पुआह आ एर ओंथ डा रागी मनस्से के बाक्ता। तन्न मनस्से आ सांदमी बाक्शो ताप्पुआह सहर चहिं एफ्राइम आ खिं डा मुर आन के बाक्ता। 9 मेको सांद दक्खिन गे कानाह खोला सम्म जाक्दीश्शा बाक्ता। एफ्राइम आ सहर आन दातेमी मनस्से आ सहरपुकी यो बाक्तेकम। तन्न मनस्से आ सांद चहिं खोला आ उत्तर गे डा समुन्द्र जाक्दीश्शा नुषो बाक्ता। 10 दक्खिन गे एफ्राइम आ रागी बाक्ता। मिनू उत्तर गे मनस्से आ रागी बाक्ता। मनस्से थर आ रागी समुन्द्र रे लशा, उत्तर गे आशेर आ रागी नु पूर्व गे इस्साकार आ रागी सम्म जाक्दीश्शा बाक्ता।

11 इस्साकार नु आशेर आस रागी आस दातेमी मनस्से आ सहर नु गाउं का निक्शी यो बाक्तेकम। मेको तेको तेको बाक्तेकम देंशा हना, बेथ-शेआन, इब्लाम नु आ एर ओंथ, एन-डोर, तानाक, मेगीददो नु एर ओंथ डा गाउंपुकी बाक्तेकम। मेको कली डांडा सां यो देंनीम। न्यायाधीस १:२७-२८

12 मिनू मनस्से आ थर डा मुरपुकीमी मेको सहर आंम के सेल्ने मचाप्शो बाक्तेकम। मिनू कनानीपुकी मेकेर बाक्शो बाक्तेकम। 13 मिनू नोले इस्राएलीपुकी बोल्यो दुश्शा, मेको कनानी आन कली वाइलीम वाइल सेल्तेकम। तन्न नेल्ल आन कली मखेरेम। यहोसु १६:१०

14 मिनू योसेफ आ खिं डा मुरपुकीमी यहोसु कली "गे मारदे आंड कली रागी का ला गेनी? गो शुश मुर बाक्नीकी। मिनू परमप्रभु यावेमी आंड कली शुश आसीक गोप्ता" देंतेकम।

15 मिनू यहोसुमी मेको आन कली "गेपुकी मोदेंशो शुश बाक्नीनी नु एफ्राइम आ पहाड रागी इन कली आइक्च दुम्त हना, परिज्जी नु रेफाइम आन रागी डा ब्वाकी कोवथ लने" देंत।

16 मिनू योसेफ आ खिं डा मुरपुकीमी "पहाड रागी आंड कली मजाक्दीप्ब। मिनू दिंमम बाक्ब कनानीपुकी नु फलाम के बग्गी बाक्नीम। मिनू बेथ-शेआन, एर ओंथ डा मुरपुकी नु येजेल आ दिंममी बाक्बपुकी नु यो फलाम के बग्गी बाक्नीम" देंतेकम।

17 मिनू यहोसुमी योसेफ आ खिं डा मुर, एफ्राइम नु मनस्से आस मुर आन कली "गे शुश मुर नु बोल्यो यो बाक्नीनी। गे रागी का ला मताइनीनी। 18 गे पहाड ब्वाकी डा रागी यो ताइनीनी। मिनू लशा, मेको कली शुश लाइश्शा सम्म क्योवडीन। मिनू मेको इन के दुम्ब। मेको कनानीपुकी नु फलाम के बग्गी बाक्ता हना नु बोल्यो बाक्तेकम हना यो, गेपुकीमी मेको आन कली खेरेन चाप्नीनी" देंत।

लीशो रागीपुकी योक्शो

18 मिनू इस्राएल डा मुर नेल्ल शिलोमी बुक्तेकम। मेकेर गुम्तीक ताम्बु कीतेकम। मेना मेको रागी मेको आन रागी दुश्शो बाक्ता।

न्यायाधीस २१:१९; १सामुएल १:३; येरमीया ७:१२-१५ 2 तन्न इस्राएली ७ थरपुकीमी आंम कली रागी मतशो बाक्तेकम।

3 मिनू यहोसुमी इस्राएली आन कली "गे परमप्रभु यावे, इन किकी पिपी आन परमप्रभुमी इन कली गेशो रागी आंम के सेल्चा कली मार रिम्नीनी। 4 मुल गेपुकीमी थर थर रे सां सां मुरपुकी योवडीन। गो मेको आन कली रागी कोवथ सोइक्नुड। मिनू मेकोपुकी लशा, आंम आंम रागी दोदेंशो बाक्मे, मेको ब्रेक्चा माल्नीम। मिनू नोले आं बाक्तीक लेत्चा माल्नीम। 5 मिनू गे मेको रागी कली ७ भाग पा योक्चा माल्नीनी। यहूदा दक्खिन गे आंम रागीमी बाक्ब। योसेफ आ खिं डा मुर चहिं उत्तर गे मेको आन रागीम बाक्नीम। 6 गेपुकीमी मेको रागी कली ७ भाग पा ब्रेक्स ब्रेक्ने थुम्शा नोले, आं बाक्तीक चाक्कीन। मिनू गो परमप्रभु यावे, इं परमप्रभु आ डोंइती मेको रागी इन कली योक्शा गेनन्नी। 7 तन्न लेवी आ थर डा मुरपुकीमी इन दातेमी रागी मताइनीम। मारदे हना परमप्रभु यावे आ चढेब दुम्तीकेन मेको आन भाग बाक्ब। मिनू गाद, रूबेन नु मनस्से आ उइक्थ थरमी यर्दन आ पूर्व गे आन रागी तशो बाक्तेकम। मारदे हना परमप्रभु यावे आ गेय पाइब मोसामी मेको आन कली आन रागी गेने थुम्शो बाक्ता" देंत। यहोसु १३:१४,३३

8 मिनू मेको मुरपुकी बोक्शा लशा, मेको रागी आ ब्रेक्स ब्रेक्चा गोम्तेकम। यहोसुमी मेको आन कली दोदेंशो देंमे, मोदेंशो पाम्तेकम। मिनू डोंइती यहोसुमी "लने, मेको रागी नेल्ल हिरसीन। मिनू मेको रागी आ ब्रेक्स ब्रेक्चा, आ बाक्तीक चाक्कीन। मिनू गो एक शिलोमी गे इन कली परमप्रभु यावे आ डोंइती योक्शा गेनन्नी" देंत।

9 मिनू मेकोपुकी लशा, रागी नेल्ल हिरसाक्म। मिनू सहर सहर कोवशा, मेको रागी ७ भाग सेल्शा ब्रेक्ताक्म। मिनू यहोसु आ बाक्तीके शिलोम लेत्तेकम। 10 मिनू यहोसुमी शिलोमी परमप्रभु यावे आ डोंइती इस्राएली थर डा खिं खिं डा मुर आन कली मेको रागी योक्शा गोप्ता।

बेन्यामीन आ मुर आन रागी

11 मिनू योवडमेनु, बेन्यामीन आ खिं खिं डा मुरपुकीमी आन रागी ताम्तेकम। मेको आन रागी यहूदा थर नु योसेफ आस थर निक्शी आन दातेमी बाक्ता। उत्पत्ती ४९:२७

12 मेको सांद उत्तर गे यर्दन रे पा लाइश्शा यरीको आ उत्तर डा देम्सीलो लाक्शा, पच्छिम गे डा पहाड लाक्शा गोरशो रागी बेथ-आवेन सम्म जाक्दीश्शा बाक्ता। यहोसु ७:२ 13 मेकेर रे मेको सांद दक्खिन डा लूज डा देम्सीलो लाक्शा, अतारोथ-अदार आ आइदी जाक्दीश्शा बाक्ता। लूज कली बेथेल यो देंनीम। मेको आ दक्खिन गे जाक्दीश्शा, आइदी बेथ-होरोन आ

दक्खिन गे डा पहाड रे पा लुक्क लशो बाक्त्त। उत्पत्ती १२:८; उत्पत्ती २८:१९

14 मिनु मेको सांद मेकेर डा पहाड आ डोंइती बाक्शो बेथ-होरोन आ दक्खिन पच्छिम रे पा दक्खिन गे हिरशो बाक्त्त। मिनु किरयथ-बाल सम्म जाक्दीशो बाक्त्त। किरयथ-बाल कली किरयथ-यारीम यो देंनीम। मेको यहूदा आ थर डा मुर आन सहर बाक्त्त। मेको पच्छिम गे बाक्त्त। यहोसु १५:६-९, ६०<sup>15</sup> दक्खिन गे डा सांद चहिं किरयथ-यारीम आ एर ओंथ डा पच्छिम गे बाक्त्त। मिनु मेको सांद एफ्रोन रे नेप्तोआह आ ब्वाक्कु बुक्तीकेमी जाक्दीशो बाक्त्त। यहोसु १५:९<sup>16</sup> नोले मेको सांद बेन-हिन्नोम दिम आ डोंइती डा डांडा आ पुं रे लाइब। मेको रेफाइम आन दिम डा उत्तर गे बाक्त्त। मेको सांद हिन्नोम दिम गे लशा, यबुसी आन सहर आ दक्खिन डा देम्सीलो रे पा लुक्क लशा एन-रोगेलमी तोइशो बाक्त्त।<sup>17</sup> मिनु उत्तर गे लशा, एन-शेमेश लाक्शा, अदुम्मीम आ डोंइती बाक्शो गेलीलोत रे रूबेन आ तौ बोहान आ फुल्लु सम्म जाक्दीशो बाक्त्त।<sup>18</sup> मेकेर रे पा लाक्शा बेथ-अराबाह आ उत्तर डा देम्सीलो रे अराबाह रागीम जाक्दीशो नुष्पो बाक्त्त। यहोसु १५:६३; न्यायाधीस १:२१<sup>19</sup> मेको सांद बेथ-होग्ला आ उत्तर डा देम्सीलो लाक्शा यर्दन आ दक्खिन गे बाक्शो हिव्सी समुन्द्र आ उत्तर डा ओव्रतीक सम्म लशो बाक्त्त। मेको दक्खिन गे डा सांद बाक्त्त।<sup>20</sup> मिनु यर्दन खोला मेको आ पूर्व डा सांद बाक्त्त। बेन्यामीन आ खिं खिं डा मुर आन रागी डा सांद नेल्ल एकोन बाक्त्तीम।

21 बेन्यामीन आ खिं खिं डा मुरपुकीमी तेको तेको सहर ताम्तेक्म देंशा हना, यरीको, बेथ-होग्ला, एमेक-केसीस,<sup>22</sup> बेथ-अराबाह, सेमाराइम, बेथेल,<sup>23</sup> आक्वीम, पारा, ओफ्रा,<sup>24</sup> केफार-अम्मोनी, ओप्नी, गेबा मेको आन के बाक्तीक नेल्ल पा १२ ओटा सहर नु मेको आन गाउंपुकी बाक्तेक्म।

25 गिबोन, रामाह, बेयरोथ,<sup>26</sup> मिसपा, केफारा, मोचाह,<sup>27</sup> रेकेम, इरपेल, तरालाह,<sup>28</sup> जेला, हा-एलेफ, यबुसी आन सहर, मेको कली यरूसलेम यो देंनीम, गिबा नु किरयथ-यारीम बाक्त्तीम। मेको आन के बाक्तीक नेल्ल पा १४ ओटा सहर नु आन गाउंपुकी बाक्तेक्म। मेको बेन्यामीन आन खिं खिं डा मुर आन रागी बाक्त्त।

#### सिमियोन आ मुर आन रागी

19 मिनु नोले योव्रडमेनु, सिमियोन आ खिं खिं डा मुरपुकीमी आन रागी ताम्तेक्म। मेको आन रागी यहूदा आ खिं खिं डा मुर आन रागी आ दातेमी बाक्त्त। उत्पत्ती ४९:५<sup>2</sup> मेको आन रागी तेको तेको बाक्त्त देंशा हना, बेयर-शेबा, मेको कली शेबा यो देंनीम, मोलादा, उत्पत्ती २१:१४, ३१, ३३<sup>3</sup> हासार-शुआल, बलाह, एसेम,<sup>4</sup> एल्लोलद, बेथुल, होरमा,<sup>5</sup> सिकलाग, बेथ-मारकाबोथ, हासार-सूसाह,<sup>6</sup> बेथ-लेबाओथ नु शारूहेन मेको आन के बाक्तीक नेल्ल पा १३ ओटा सहर नु गाउंपुकी बाक्तेक्म।

7 एन, रिम्मोन, एथेर नु आशान। मेको आन के बाक्तीक नेल्ल पा ४ ओटा सहर नु मेकेर डा गाउंपुकी बाक्तेक्म। मेको आन एर ओंथ डा गाउं नेल्ल बालाथ-बेर, दक्खिन गे डा रामाह सम्म बाक्तेक्म।<sup>8</sup> मेको सिमियोन आ थर डा खिं खिं डा मुर कोव्रशा, मेको सहर नेल्ल आन एर ओंथ डा गाउं बालाथ-बेएर नु नेगेब डा रामाह सम्म बाक्त्त।<sup>9</sup> मेको सिमियोन आ खिं खिं डा मुर आन रागी बाक्त्त। मिनु मेको आन रागी यहूदा आ खिं खिं डा मुर आन रे पा तशो बाक्तेक्म। मारदे हना यहूदा थर आन रागी माल्शो क्येडा यो शुश बाक्त्ताक्त्त। मोपतीके सिमियोन आ खिं खिं डा मुरपुकीमी मेको आन रागी यहूदा आन रागीमी ताम्तेक्म।

#### जबूलून आ मुर आन रागी

10 मिनु नोले योव्रडमेनु, जबूलून आ खिं खिं डा मुरपुकीमी आन रागी ताम्तेक्म। मेको आन सांद सारीद सम्म बाक्त्त। उत्पत्ती ४९:१३<sup>11</sup> मिनु पच्छिम गे मरलाह सम्म लशा, दब्बेशेत लाक्शा, योकनाम आ नेक्था डा खोला सम्म जाक्दीत्त।<sup>12</sup> सारीद रे पा लशा, पूर्व नां दाप्तीक गे किरस्लोथ-ताबोर रागी रे दाबेराथमी गूशा याफीया सम्म डोइशो लशो बाक्त्त।<sup>13</sup> मेकेर रे मेको पूर्व गे लशा, गाथ-हेफेर नु एथ-कासीन सम्म जाक्दीशो, यो रिम्मोन सम्म गूशो बाक्त्त। मेको सांद नेआह सम्म जाक्दीशो बाक्त्त।<sup>14</sup> मिनु मेको

सांद हन्नातोन उत्तर गे लशा, हिरशा इप्ताह-एल डा दिममी जाक्दीशो नुष्पो बाक्त्त।<sup>15</sup> मेको सांद आगाम कात्ताथ, नहालाल, शिमोन, इदलाह नु बेथलेहेम यो बाक्तेक्म। मेको आन के बाक्तीक नेल्ल पा १२ ओटा सहर नु मेकेर डा गाउंपुकी बाक्तेक्म। न्यायाधीस १:३०<sup>16</sup> जबूलून आ खिं खिं डा मुर आन सहर नु गाउंपुकी एकोन बाक्तेक्म।

#### इस्साकार आ मुर आन रागी

17 मिनु नोले योव्रडमेनु, इस्साकार आ खिं खिं डा मुरपुकीमी आन रागी ताम्तेक्म।<sup>18</sup> मेको आन सहर तेको तेको बाक्तेक्म देंशा हना, येज्जेल, केसुल्लोथ नु शुनेम,<sup>२२</sup> राजा ४:८<sup>19</sup> हाफ्राइम, शीओन नु अनाहारथ,<sup>20</sup> रब्बीत, किशयोन नु एबेस,<sup>21</sup> रेमेथ, एन-गन्नीम, एन-हददाह नु बेथ-परसेस बाक्तेक्म।<sup>22</sup> मेको सांद ताबोर, शहसूमा नु बेथ-शेमेश सम्म जाक्दीशो, यर्दनमी नुष्पो बाक्त्त। मेको आन के बाक्तीक सहर नेल्ल पा १४ ओटा सहर नु मेकेर डा गाउंपुकी बाक्तेक्म।<sup>23</sup> इस्साकार आ खिं खिं डा मुर आन सहर नु गाउंपुकी एकोन बाक्तेक्म।

#### आशेर आ मुर आन रागी

24 मिनु नोले योव्रडमेनु, आशेर आ खिं खिं डा मुरपुकीमी आन रागी ताम्तेक्म। मेको आन रागी तेको तेको बाक्तेक्म देंशा हना, उत्पत्ती ४९:२०<sup>25</sup> हेल्काथ, हाली, बेतेन नु आकशाफ,<sup>26</sup> अल्लाम्मेलेक, अमाद नु मिशाल बाक्तेक्म। मिनु मेको सांद पच्छिममी कारमेल नु शीहोर-लिब्नाथ सम्म जाक्दीशो बाक्त्त।<sup>27</sup> मिनु नोले पूर्व गे बेथ-दागोन गे लशा, जबूलून नु इप्ताह-एल डा दिम सम्म जाक्दीशो बाक्त्त। मेको उत्तर गे डा बेथ-एमेक नु नेइल लशा, पेरा गे काबुल रागीमी गूशो बाक्त्त।<sup>28</sup> मिनु एब्रोन, रेहोब, हम्मोन नु कानाह सहर रे पा ठेयब सीदोन सम्म जाक्दीशो बाक्त्त।<sup>29</sup> मिनु मेको सांद रामाह नु गारो पाइशो टायर सहर गे हिरशो बाक्त्त। मेको सांद लशा, होसाह गे समुन्द्र आ नेक्था डा अकजीब सहरमी नुष्पो बाक्त्त। यहोसु १५:४४; न्यायाधीस १:३१<sup>30</sup> उम्मा, अफेकाह नु रेहोब, नेल्ल पा मेको आन के २२ ओटा सहर नु मेकेर डा गाउंपुकी बाक्तेक्म।<sup>31</sup> आशेर आ खिं खिं डा मुर आन सहर नु गाउंपुकी एकोन बाक्तेक्म।

#### नाप्ताली आ मुर आन रागी

32 मिनु नोले योव्रडमेनु, नाप्ताली आ खिं खिं डा मुरपुकीमी आन रागी ताम्तेक्म। उत्पत्ती ४९:२१<sup>33</sup> मेको आन सांद हेलेफ, सा-अनानीममी बाक्शो ठेयब रवा, अदामी-नेकेब लाक्शा, यब्नेल रे लक्कुम सम्म लशा, यर्दनमी नुष्पो बाक्त्त।<sup>34</sup> मेको सांद पच्छिममी अचोथ-ताबोर रे लाइशो, हुक्कोकमी गूशो बाक्त्त। मिनु मेको दक्खिन गे जबूलून सम्म, पच्छिम गे आशेर सम्म, नु पूर्व गे यहूदा आ यर्दन सम्म जाक्दीशो बाक्त्त।<sup>35</sup> मिनु गारो पाइशो सहरपुकी चहिं सिददीम, सेर, हम्माथ, रक्कत, किन्नेरेथ,<sup>36</sup> आदामाह, रामाह, हासोर,<sup>37</sup> केदेश, एद्रेइ, एन-हासोर<sup>38</sup> इरोन, मिग्दल-एल, होरेम, बेथ-अनात नु बेथ-शेमेश बाक्तेक्म। मेको नेल्ल पा मेको आन के १९ ओटा सहर नु मेकेर डा गाउंपुकी बाक्तेक्म। न्यायाधीस १:३३<sup>39</sup> मिनु मेको नाप्ताली आ खिं खिं डा मुर आन सहर नु गाउंपुकी एकोन बाक्तेक्म।

#### दान आ मुर आन रागी

40 मिनु नोले योव्रडमेनु, दान आ खिं खिं डा मुरपुकीमी आन रागी ताम्तेक्म। मेको आन रागी तेको तेको बाक्तेक्म देंशा हना, उत्पत्ती ४९:१६<sup>41</sup> सोराह, एशताओल नु इर-शेमेश,<sup>42</sup> शा-आलब्बीन, आइयालोन नु इथ्लाह,<sup>43</sup> एलोन, तिम्नाह नु एक्रोन, यहोसु १५:१०<sup>44</sup> एल-तेके, गिब्बेथोन नु बालाथ,<sup>45</sup> येहुद, बेने-बेराक नु गाथ-रिम्मोन,<sup>46</sup> मे-यारकोन, रक्कोन नु योप्पा आ डोंइती डा रागी बाक्तेक्म। योना १:३<sup>47</sup> मिनु दान आ खिं खिं डा मुर मेको रागी ग्राचा कली श्येत जाम्तेक्म। मिनु मेकोपुकीमी लेशेम सहरमी लशा, लडाइ पा तरवारमी मुर नेल्ल आन कली साइशो ग्रातेक्म। मेकोपुकी मेको सहरमी बाक्शा, मेको कली आंम किकी आ नें दान

वोइक्तेकम। न्यायाधीस १८:२७-२९<sup>48</sup> मिनु मेको दान आ खिं खिं डा मुर आन सहर नु गाउंपुकी एकोन बाक्तेकम।

यहोसु आ रागी

<sup>49</sup> मिनु मेकोपुकीमी रागी नेल्ल योव्रशा, योक्ने थुम्मे नोले इस्राएलीपुकीमी नून आ तौ यहोसु कली मेको आन दातेम रागी गेम्तेकम।  
<sup>50</sup> परमप्रभु यावेमी दैशो खोदैशो पा यहोसुमी पुंडशो एफ्राइम डा पहाड रागी डा तिम्नाथ-सेराह सहर मेको कली गेम्तेकम। मिनु यहोसुमी सहर सेल्शा मेकेन बाक्त। यहोसु २४:३०; न्यायाधीस २:९  
<sup>51</sup> मिनु चढेब एलाजर, नून आ तौ यहोसु नु इस्राएली आन थर थर डा ठेयब मुर नेल्ल परमप्रभु यावे आ डोंइती शिलोम गुम्तीक ताम्बु आ लाचोमी रागी नेल्ल योक्ने थुम्तेकम। मोपा मेकोपुकीमी रागी योक्तीके गेय यो थुम्तेकम। यहोसु १४:१; यहोसु १८:१

साइक्ब प्रोक्शा बाक्तीक सहर

**20** मिनु नोले परमप्रभु यावेमी यहोसु कली<sup>2</sup> “गेम इस्राएली आन कली ‘प्रोक्शा बाक्तीक सहरपुकी वोइक्चा माल्नीनी’ दे दैचा माल्नेवे। गो मोसा रे पा इ कली दैशो खोदैशो पा पावो। गन्ती ३५:९-२९  
<sup>3</sup> मजोक्थु, मतुइक्थु सुइमी सुइ कली साइक्तु हना, मेको साइक्ब मुर प्रोक्शा, मेको सहर लल। मेको सहर क्येक्क लेख रे पा ब्रोंइतीक सहर दुम्ब।  
<sup>4</sup> मिनु मेको मोदैशो सहरमी मुर साइक्ब मुर प्रोक्त हना, मेको सहर डा ठेयब लाचोमी राष्ठा बाक्चा माल्ब। मिनु सहर डा ठेयब मुर आन डोंइती आं लोव्र नैपदल। मिनु नोले मेकोपुकीमी मेको मुर कली सहर ओव्रचा नु बाक्तीक खिं गेचा माल्नीम। मिनु मेको मुर मेकोपुकी नु बाक्चा माल्ब।  
<sup>5</sup> मिनु क्येक्क लेख मुरुमी मेको मुर साइक्ब कली खेदा पाप्तु हना, मेको सहर डा मुरुमी मेको मुर साइक्ब मुर कली जिम्मा गेचा मदुम्ब। मारदे हना मेकोमी मजोक्थु मतुइक्थु साइक्तु।  
<sup>6</sup> मिनु निसाफ दुम नोले नु मेकेर डा नेल्ल क्येडा ठेयब चढेब मबेकम सम्म मेको मुर मेको सहरमीन बाक्चा माल्ब। नोले मेको मुर आंम सहर आंम खिंमी, ते रे प्रोक्शा जाक्मे, मेकेन लेन्ने चाख।  
<sup>7</sup> मिनु मेकोपुकीमी नाप्टाली आ पहाड रागी गालील डा केदेश सहर वोइक्तेकम। एफ्राइम पहाड रागी डा शेकेम नु यहूदा आ पहाड रागी डा किरयथ-अरबा सहर वोइक्तेकम। मेको कली हेब्रोन यो दैनीम। ग्रीक लोव्रम गिल्गाल कली गालील दैब। यहोसु १९:३७; यहोसु १५:१३<sup>8</sup> यर्दन नु यरीको आ पूर्ब गे रूबेन आ थर आन गोरशो रागीमी बाक्शो दिंम डा बेसेर सहर वोइक्तेकम। गाद आ थर डा गिलाद रागीमी रामोथ सहर वोइक्तेकम। मनस्से थर आन बाशानमी गोलान सहर वोइक्तेकम। मेकोपुकी मोपा मुर बाक्तीक सेल्तेकम। ब्यवस्था ४:४१-४३<sup>9</sup> सुइ इस्राएली नु मेको आन दातेमी बाक्शो अर्को रागी डा मुरुमी मतुइक्थु मुर साइक्तु हना, मेको मोदैशो वोइश्शो सहरमी प्रोक्ने चाख। निसाफ दुम्मा क्येडा डोंइती क्येक्क लेख मुर आन गुड रे मेको मुर साइक्चा मपुंडसेकल” दैत।

लेवी आन बाक्तीक सहरपुकी

**21** मिनु लेवी थर डा ठेयब मुरपुकी, चढेब एलाजर, नून आ तौ यहोसु नु इस्राएल थर थर डा ठेयब मुर आन डोंइती बुक्तेकम। यहोसु १४:१; गन्ती ३५:२-८<sup>2</sup> मेको कनान रागी डा शिलोम बुक्शा, मेको आन कली “परमप्रभु यावेमी मोसा कली अरेशो खोदैशो पा, गे आंइ कली बाक्चा कली सहरपुकी नु आंइ बी ब्यफ आन कली योव्रतीक रूपुकी गेचा माल्नीनी” दैतेकम।<sup>3</sup> मिनु परमप्रभु यावेमी अरेशो खोदैशो पा इस्राएलीपुकीमी लेवी आन कली आंम आंम रागी रे पा सहर नु बी ब्यफ, क्यारश भेडा योव्रतीक रूपुकी गेम्तेकम।  
<sup>4</sup> मिनु योव्रडमेनु, कोहाथ आ मुर आन खिं खिं डा गूतेकम। मेकोपुकी लेवी आ थर चढेब हारून आ चच युइ बाक्तेकम। मेकोपुकीमी यहूदा आ थर, सिमियोन आ थर नु बेन्यामीन आ थर रे पा १३ ओटा सहर ताम्तेकम।

गन्ती ३:१७-३९<sup>5</sup> लीशो खिं खिं डा कोहाथ आ चच युइमी एफ्राइम आ थर, दान आ थर नु मनस्से आ उइक्थ थर रे पा १० ओटा सहर ताम्तेकम।

<sup>6</sup> मिनु गेरशोन आ खिं खिं डा मुर आन चच युइमी इस्साकार आ थर, आशेर आ थर, नाप्टाली आ थर नु बाशानमी बाक्ब मनस्से आ उइक्थ थर रे पा १३ सहर ताम्तेकम।

<sup>7</sup> मिनु मेरारी आ चच युइ आन खिं खिं डा मुरुमी रूबेन आ थर, गाद आ थर नु जबूलून आ थर रे पा १२ ओटा सहर ताम्तेकम।

<sup>8</sup> मिनु परमप्रभु यावेमी मोसा कली अरेशो खोदैशो पा इस्राएलीपुकीमी लेवी थर डा मुर आन कली मेको सहरपुकी नु बी ब्यफ, क्यारश भेडा योव्रतीक रूपुकी गेम्तेकम।

<sup>9</sup> मेकोपुकीमी यहूदा आ थर डा खिं खिं डा मुर नु सिमियोन आ थर डा खिं खिं डा मुरपुकीमी तेको तेको सहर ताम्तेकम दैशा हना,<sup>10</sup> लेवी आ थर डा हारून आ चच युइ, कोहाथ आ खिं खिं डा मुरपुकीमी ताम्तेकम। मारदे हना नेल्ल क्येडा डोंइती योव्रडमेनु, मेको आन नै गूत।<sup>11</sup> मिनु मेकोपुकीमी मेको आन कली यहूदा आ पहाड रागीमी किरयथ-अरबा नु आ नेक्था डा योव्रतीक रूपुकी गेम्तेकम। किरयथ-अरबा कली हेब्रोन यो दैनीम। मेको अरबा अनाक आ आफ बाक्त। यहोसु २०:७<sup>12</sup> तन्न मेकोपुकीमी मेको सहर डा रूपुकी नु मेकेर डा गाउंपुकी चहिं यपुन्ने आ तौ कालेब कली गेशो बाक्तेकम। यहोसु १४:३४; यहोसु १५:१३

<sup>13</sup> मिनु चढेब हारून आ चच युइ आन खिं खिं डा मुरपुकीमी मुर साइक्ब मुर प्रोक्शा लशा बाक्तीक सहर हेब्रोन, लिब्ना,<sup>14</sup> यत्तीर, एश्तेमोआ,<sup>15</sup> होलोन, देबीर,<sup>16</sup> ऐन, युत्ता नु बेथ-शेमेश नु आन बी ब्यफ, क्यारश भेडा योव्रतीक रूपुकी गेम्तेकम।  
<sup>17</sup> मिनु बेन्यामीन आ थर रे पा गिबोन नु गेवा,<sup>18</sup> अनाथोथ, अल्मोन नु आन बी ब्यफ, क्यारश भेडा योव्रतीक रूपुकी गेम्तेकम।  
<sup>19</sup> चढेब हारून आ चच युइ आन खिं खिं डा मुर आन के नेल्ल पा १३ ओटा सहर नु आन बी ब्यफ, क्यारश भेडा योव्रतीके दुम्त।

<sup>20</sup> लेवी आ थर डा कोहाथ आ खिं खिं डा लीशो मुर आन कली योव्रडमेनु, एफ्राइम आ थर आ रागी रे पा तेको तेको सहरपुकी ताम्तेकम दैशा हना, यहोसु २०:७<sup>21</sup> एफ्राइम आ पहाड रागीमी मुर साइक्ब मुर बाक्तीक सहर शेकेम नु गेजेर,<sup>22</sup> किब्साइम नु बेथ-होरोन, नेल्ल पा ४ ओटा सहर नु आन बी ब्यफ, क्यारश भेडा योव्रतीक रूपुकी गेम्तेकम।

<sup>23</sup> दान आ थर रे एल-तेके, गिब्बेथोन,<sup>24</sup> आइयालोन, गाथ-रिम्मोन, नेल्ल पा ४ ओटा सहर नु आन बी ब्यफ, क्यारश भेडा योव्रतीक रूपुकी गेम्तेकम।

<sup>25</sup> मनस्से आ उइक्थ थर रे पा तानाक नु गाथ-रिम्मोन सहर निक्शी नु आन बी ब्यफ, क्यारश भेडा योव्रतीक रूपुकी गेम्तेकम।<sup>26</sup> कोहाथ आ खिं खिं डा लीशो मुर आन कली १० ओटा सहर नु आन बी ब्यफ, क्यारश भेडा योव्रतीक रूपुकी गेम्तेकम।

<sup>27</sup> मेकोपुकीमी लेवी थर डा गेरशोन आ खिं खिं डा मुर आन कली मनस्से आ उइक्थ थर रे पा बाशानमी मुर साइक्ब मुर प्रोक्शा लशा बाक्तीक सेल्शो गोलान नु बेयश्तेराह, सहर निक्शी नु आन बी ब्यफ, क्यारश भेडा योव्रतीक रूपुकी गेम्तेकम। यहोसु २०:८<sup>28</sup> मिनु इस्साकार आ थर रे पा किश्योन, दावेराथ,<sup>29</sup> यरमुथ नु एन-गन्नीम, नेल्ल पा ४ ओटा सहर नु आन बी ब्यफ, क्यारश भेडा योव्रतीक रूपुकी गेम्तेकम।<sup>30</sup> मिनु आशेर आ थर रे पा मिशाल नु अब्दोन,<sup>31</sup> हेल्काथ नु रेहोब, नेल्ल पा ४ ओटा सहर नु आन बी ब्यफ, क्यारश भेडा योव्रतीक रूपुकी गेम्तेकम।<sup>32</sup> मिनु नाप्टाली आ थर रे पा गालील रागीमी मुर साइक्ब मुर प्रोक्शा लशा बाक्तीक सहर केदेश, हम्मोथ-डोर नु कारतान, नेल्ल पा सहर सां नु आन बी ब्यफ, क्यारश भेडा योव्रतीक रूपुकी गेम्तेकम। यहोसु २०:७<sup>33</sup> मेको गेरशोनी आ सहर नेल्ल पा १३ ओटा सहर नु आन बी ब्यफ, क्यारश भेडा योव्रतीक रूपुकी गेम्तेकम।

<sup>34</sup> मिनु लेवी आ थर डा लीशो मेरारी आ खिं खिं डा मुर आन कली जबूलून आ थर रे पा योकनाम, कारताह,<sup>35</sup> दीम्नाह नु नहालाल, नेल्ल पा ४ ओटा सहर नु आन बी ब्यफ, क्यारश भेडा योव्रतीक रूपुकी गेम्तेकम।<sup>36</sup> मिनु रूबेन आ थर डा बेसेर नु याहास, यहोसु २०:८<sup>37</sup> केदेमोथ नु मेफा-आथ,

नेल्ल पा ४ ओटा सहर नु आन बी ब्यफ, क्यारश भेडा योव्रतीक रू गेम्तेकम। 38 मिनु गाद आ थर डा मुर साइकब मुर प्रोक्शा लशा बाक्तीक गिलाद रागी डा रामोथ, महा-नाइम, यहोसु २०:८<sup>39</sup> हेशबोन नु याजेर, नेल्ल पा ४ ओटा सहर नु आन बी ब्यफ, क्यारश भेडा योव्रतीक रू गेम्तेकम।

40 मिनु लेवी आ लीशो मेरारी आ खिं खिं डा मुर आन कली योव्रशा १२ ओटा सहर गेम्तेकम।

41 मिनु इस्राएली आन रागी आन दातेमी लेवी आन के ४८ ओटा सहर नु आन बी ब्यफ, क्यारश भेडा योव्रतीक रू दुम्तेकम। 42 एको सहर नेल्ल आन एर ओंथ बी ब्यफ, क्यारश भेडा योव्रतीक रू बाक्तेकम।

43 मोपा परमप्रभु यावेमी इस्राएली आन कली "गेनुड" दे मेको आन किकी पिपी आन कली जशो कसम खापु। मिनु इस्राएलीपुकीमी मेको रागी कली आंम के सेल्शा बाक्तेकम। उत्पत्ती १२:७<sup>44</sup> मिनु परमप्रभु यावेमी इस्राएली आन किकी पिपी आन कली कसम जशो खोदेंशो पा नेल्ल रे पा नाइक्वा गेपु। मेको आन जोरी सत्रु नेल्ल मेको नु ब्रुम्तेकम। परमप्रभु यावेमी मेको आन जोरी सत्रु इस्राएली नेल्ल आन गुइमी गेपु। ब्यवस्था १२:९-१०<sup>45</sup> मिनु परमप्रभु यावेमी पशो रिश्शो लोव्र का सम्म यो मली, नेल्ल खापु। यहोसु २३:१४; १राजा ८:५६

पूर्ब डा वोंइश मुरपुकी खिं लेशो

22 मिनु यहोसुमी रूबेन आ थर, गाद आ थर नु मनस्से आ उइक्थ थर डा वोंइश मुर आन कली ब्रेत्ताकव।<sup>2</sup> मिनु मेको आन कली "परमप्रभु यावे आ गेय पाइब मोसामी इन कली अरेशो नेल्ल पाइतीनी। आं अरेशो लोव्र यो नेल्ल टीतीनी। गन्ती ३२:२०-२२; ब्यवस्था ३:१८-२०<sup>3</sup> गेपुकीमी शुश नाक्ती सम्म इन लोक्ब आन कली यो वारच पा मप्रोंइनी। मिनु परमप्रभु यावे, इन परमप्रभु कली अरेशो नेल्ल टीतीनी।<sup>4</sup> मुल परमप्रभु यावे, इन परमप्रभुमी आ देंशो खोदेंशो पा इन लोक्ब आन कली नाइक्वा गेशो बाक्त। मुल गेपुकी परमप्रभु यावे आ गेय पाइब मोसामी इन कली यर्दन आइक्वी हांबु गेशो इन खिं खिं लेतीन। हिब्रू ४:८<sup>5</sup> मुल गे परमप्रभु यावे आ गेय पाइब मोसामी अरेशो लोव्र होस पा पने। परमप्रभु यावे, इन परमप्रभु कली दाक्तीन। मेको आ लां गाक्कीन। आ अरेशो लोव्र टिने। मेको कली मप्रोनीन। गे इन थुं नेल्लेमी परमप्रभु यावे आ गेय पने" देंत। ब्यवस्था १०:१२

6 मिनु यहोसुमी मेको आन कली आसीक गेशा, सोइक्ताकव। मिनु मेकोपुकी आंम आंम खिं लाम्तेकम।<sup>7</sup> मनस्से आ उइक्थ थर कली मोसामी बाशानमी आंम रागी गेपु। तन्न अर्को उइक्थ थर कली यहोसुमी यर्दन आ पच्छिम गे मेको आन लोक्ब नु गेपु। मिनु यहोसुमी मेको आन कली आंम आंम खिंम सोइक्वी ना मेको आन कली आसीक गेपु।<sup>8</sup> मिनु मेको आन कली "इन जोरी सत्रु रे रोइश्शो शुश शोंप नु शुश बी ब्यफ, क्यारश भेडा, शुश सुन चांदी, कांसा फलाम नु शुश वासी लाइश्शा, इन लोक्ब आन कली यो योक्शा गेचा माल्नीनी" देंत। गन्ती ३१:२७

9 मोपा रूबेन आ थर, गाद आ थर नु मनस्से आ उइक्थ थर डा वोंइश मुर कनान रागी डा शिलो रे इस्राएलीपुकी नु ब्राशा, गिलाद रागी लेत्तेकम। मेको रागी परमप्रभु यावे आ देंशो नु मोसा आ पतीकेमी डोंइती रे ग्राशा, आंम के सेल्शा बाक्ने थुम्शो बाक्तेकम।<sup>10</sup> मिनु मेकोपुकी कनान रागी डा यर्दन खोला आ नेक्था गेलीलोत सहर जाक्दीत्तेकम। मिनु मेको रूबेन आ थर, गाद आ थर नु मनस्से आ उइक्थ थरमी यर्दन खोला नेक्था थम ठेयब चढ़ेतीक का सेल्तेकम।

11 मिनु इस्राएलीपुकीमी "रूबेन आ थर, गाद आ थर नु मनस्से आ उइक्थ थरमी कनान रागी आ सांदमी यर्दन आ नेक्था इस्राएली आन रागीमी ठेयब चढ़ेतीक का सेल्तेकम" देंशो नेंतेकम।<sup>12</sup> मिनु इस्राएलीपुकीमी मेको नेन्मे नोले, मेकोपुकी नु लडाइ पचा कली शिलोमी खुम्साकम।

13 मिनु इस्राएलीपुकीमी चढ़ेब एलाजर आ तौ फिनेहास कली गिलाद रागीमी रूबेन आ थर, गाद आ थर नु मनस्से आ उइक्थ थर आन बाक्तीकेमी सोइक्ताकम। गन्ती २५:७<sup>14</sup> मेको नु काथा इस्राएल डा नेल्ल थर रे पा १० जना ठेयब मुर आन कली यो सोइक्ताकम।<sup>15</sup> मिनु मेकोपुकी

रूबेन आ थर, गाद आ थर नु मनस्से आ उइक्थ थर बाक्तीक गिलाद रागी जाक्दीश्शा, मेको आन कली<sup>16</sup> "परमप्रभु यावे आ मुर नेल्लेमी 'मारदे गेपुकीमी परमप्रभु यावे, इस्राएली आन परमप्रभु रे नोले शोंइसीनी? गे दोपा परमप्रभु यावे रे पा डोन लशा, मेको कली मटिथु, आंम कली चढ़ेतीक सेल्ती? लेवी १७:८-९; ब्यवस्था १२:१३-१४<sup>17</sup> मार, पेओर नु पशो पापम आंइ कली मजाक्दीम्मे? मेना परमप्रभु यावे आ मुर शुश बेक्तेकम हना यो, मेको आ पाप रे गो मुल सम्म आंम कली ठीक सेल्ने मचाप्यो बाक्नीक। गन्ती २५:१-९<sup>18</sup> मुलाक्त गेपुकी परमप्रभु यावे रे नोले शोंइसीनी? गे मुलाक्ती परमप्रभु यावे कली टिचा प्रोंइतीनी हना, मेको आ दीसा इस्राएली नेल्ल आन कली तशा, गाइक्ब, दे मतुइक्तीनी?<sup>19</sup> मिनु आंम इन रागी ग्रांण दिशो बाक्त हना, ओंथ हांबु परमप्रभु यावे आ रागी नु आ बाक्तीक पिशा, गोपुकी नु रागी योक्कीन। तन्न गे परमप्रभु यावे नु आंइ कली मटिथु, परमप्रभु यावे, इं परमप्रभु आ चढ़ेतीक क्येडा लाक्शा, आंम के चढ़ेतीक मसेलीन।<sup>20</sup> मिनु जेराह आ तौ आकानमी मटिथु, खुइ पवानु, परमप्रभु यावे आ गाइश्शोमी नेल्ल आन कली मार दुम्मे? आकान ला मबे, इस्राएली नेल्लेमी श्येत जाम्तेकम" देंतेकम। यहोसु ७:६-१३

21 मिनु रूबेन आ थर, गाद आ थर नु मनस्से आ उइक्थ थरमी इस्राएल आ थर थर डा ठेयब मुर आन कली गन्ती १:१६; गन्ती १०:४<sup>22</sup> "परमप्रभु यावे, नेल्ल क्येडा सक्ति पाइश्शो परमप्रभु यावेमी नेल्ल तुइक्ब। गो परमप्रभु यावे कली मटिथो बाक्तय हना, इस्राएलीपुकीमी यो मेको तुइक्तेकम। मुलाक्त आंइ कली सतीन।<sup>23</sup> गोपुकीमी परमप्रभु यावे आ नोले खोइक्वा प्रोंइशा, आंम कली चढ़ेतीक सेल्शा, मेको चढ़ेतीकेमी चोशा चढ़ेशो, अन्न चढ़ेशो, दुशा बाक्तीक चढ़ेशो चढ़ेतय हना, परमप्रभु यावेमी आंइ कली सजाइ गेवल।

24 तन्न ममाइ, गोपुकीमी मारदे एको चढ़ेतीक सेल्तक देंशा हना, इन चच युइमी आंइ चच युइ आन कली 'गे परमप्रभु यावे, इस्राएली आन परमप्रभु नु मार पाइक्मुनी डा?'<sup>25</sup> परमप्रभु यावेमी यर्दन कली गो आंइ सांद सेल्शा गेपु। गे रूबेन आ थर नु गाद आ थर परमप्रभु यावे के मबाक्नीनी। मिनु इन चच युइमी आंइ चच युइ आन कली परमप्रभु यावे कली मान पा हिंचा तेक्नीमी' देंनीमी कों।

26 मोपतीके गोपुकीमी 'चढ़ेतीक का सेल्शा चोशा चढ़ेतीक नु अरु चढ़ेतीक चढ़ेचा कली ममाइ।<sup>27</sup> तन्न मेको चढ़ेतीक गे नु गो आंइ दातेमी नु आंइ चच युइ आन दातेमी एको चढ़ेतीक सांकछी दुम्ल। मिनु गोपुकीमी परमप्रभु यावे कली आ बाक्तीकेमी ठेयब सेल्शा। मिनु मेकेर गो आंइ चोशा चढ़ेशो नु दुशा बाक्तीक चढ़ेशो चाक्शा चढ़ेनय। मिनु इन चच युइमी गो आंइ चच युइ आन कली "गे परमप्रभु यावे आ मुर मबाक्नीनी" दे देंने मचाप्नीम, दे एको चढ़ेतीक सेल्तक। यहोसु २४:२७<sup>28</sup> मिनु गोपुकीमी मेकोपुकीमी खेयप का आंइ कली कि आंइ चच युइ आन कली मोदेंशो देंतेकम हना, गोपुकीमी मेको आन कली मेको आंइ किकी पिपीमी परमप्रभु यावे कली चढ़ेतीक सेल्शो थोव्रक कोव्रडीन। चोशा चढ़ेतीक नु अरु चढ़ेतीक चढ़ेचा कली ममाइ, तन्न गे नु गो इं दातेमी सांकछी दुम्ल' दे सेल्तक।

29 मिनु गोपुकीमी थमा पा मुलाक्ती परमप्रभु यावे कली मटिथु, मेको आ नोले खोइक्वा प्रोंइशा एको चढ़ेतीक मसेल्क। मेको चढ़ेतीकेमी चोशा चढ़ेतीक, अन्न चढ़ेतीक नु अरु चढ़ेतीक चढ़ेचा कली यो मसेल्क। परमप्रभु यावे, आंइ परमप्रभु आ बाक्तीक आ डोंइती बाक्शो चढ़ेतीके क्येडा लाक्शा अरु मसेल्की" देंतेकम।

30 मिनु चढ़ेब फिनेहास, मेको नु बाक्ब इस्राएली आन ठेयब मुरपुकी नु थर थर डा ठेयब मुरपुकीमी रूबेन आ थर, गाद आ थर नु मनस्से आ उइक्थ थर आन लोव्र नेंशा ग्येरसाकम।<sup>31</sup> मिनु चढ़ेब एलाजर आ तौ फिनेहासमी रूबेन, गाद नु मनस्से आ थर डा मुर आन कली "परमप्रभु यावे गो आंइ दातेमी बाक्ब, दे मुलाक्ती गोपुकीमी तुइक्ताकव। मारदे हना एको चढ़ेतीक सेल्शा कली परमप्रभु यावे रे पा नोले मशोंइसीनी। मुल चहिं गेपुकीमी इस्राएली आन कली परमप्रभु यावे आ गुइ रे प्रोंइतीनी" देंत।<sup>32</sup> मिनु चढ़ेब एलाजर आ तौ फिनेहास नु ठेयब मुर नेल्ल गिलाद रागी रे रूबेन नु गाद आ थर डा मुर युम्तीके रे कनान रागी गे लेत्तेकम। मिनु इस्राएली आन कली मेको लोव्र नेल्ल शेंताकम।<sup>33</sup> मेको लोव्र नेंशा नेल्ल ग्येरसाकम। मिनु

परमप्रभु कली "गे रिम्शो पाइब बाक्नीनी" दे ठेयब सेल्लेक्म। मिनु मेकोपुकीमी लेंशा रूबेन नु गाद आस थर बाक्शो रागी कली खतम सेल्लेक्म नु लडाइ पतीक लोत्र गेनायो मपाम।

34 मिनु रूबेन नु गाद आस थर डा मुरुमी मेको चढ़ेतीक आ नें "सांकछी" वोइक्तेक्म। मिनु मेको आ अर्थ मार बाक्त देंशा हना "गे नु गो इं दातेमी परमप्रभु यावे थमा पा परमप्रभु बाक्ब, दे मेको चढ़ेतीक सांकछी बाक्ब" देंतेक्म।

यहोसु आ नोले डा लोत्र

23 मिनु शुश नाक्त नोले परमप्रभु यावेमी इस्राएली आन कली आन जोरी सत्रु रे पा प्रॉइशा, नाइश्शा बाक्चा गोप्तु। मेना यहोसु खाल्पा दुग्शा, शुश बर्स दुग्शा बाक्त। यहोसु २१:४४<sup>2</sup> मिनु यहोसुमी इस्राएली नेल्ल आन खाल्पा, आन ठेयब मुर, आन निसाफ पाइब नु मेको आन सासन पाइब आन कली ब्रेत्ताक्व। मिनु मेकोमी मेको आन कली "गे मुल खाल्पा दुग्ती। शुश बर्स यो दुग्ती।<sup>3</sup> परमप्रभु यावे, इन परमप्रभुमी मेको रागी रागी डा मुर आन कली गे इन पर्वम मार मार पवा, गोपुकीमी मेको नेल्ल ताइतीनी। परमप्रभु यावे, इन परमप्रभुमी इन पचा डा लडाइ आंमान पाप्तु।<sup>4</sup> गोम योक्शा, लीशो रागी इन थर थर डा मुर आन कली गेता। मिनु गो यर्दन रे पच्छिम गे डा ठेयब समुन्द्र सम्म रागी नेल्ल ग्राती।<sup>5</sup> परमप्रभु यावे, इन परमप्रभुमी मेको लीशो मुर आन कली इन डोंइती रे गुंडब। मिनु मेकोमी मेको आन कली इन डोंइती रे खेरब। मिनु परमप्रभु यावे, इन परमप्रभुमी देंशो खोदेंशो पा, मेको आन रागी इन के सेल्लनीनी।

<sup>6</sup> गे थम बोल्यो दुग्तीन। मिनु मोसा आ ब्रेक्शो अरेशो लोत्र होस पा टिने। गे ग्युरा पेरा गे गेनायो मलने। *ब्यवस्था* ५:२९<sup>7</sup> गे इन दातेमी बाक्शो अर्को रागी डा मुरपुकी नु मब्बाइसीन। मेको आन देवता आन नें मथिने। मेको आन नेंमी कसम मजने। मेको आन कली पूजा मपने। मिनु मेको आन डोंइती बाप्शा सेउ मपने। *प्रस्थान* २३:१३-२४<sup>8</sup> तन्न गोपुकी मुलाक्त डा नाक्त सम्म पशो खोदेंशो पा परमप्रभु यावे, इन परमप्रभु नु ला बाक्कीन।

<sup>9</sup> परमप्रभु यावेमी इन डोंइती रे ठेयब सक्ति पाइश्शो रागी डा मुर आन कली खेरशो बाक्ब। मिनु मुलाक्त सम्म मेको रागी डा मुर सुइमी यो गे इन कली ग्राने मचाप्शो बाक्तेक्म। *लेवी* २६:७-८; *ब्यवस्था* २८:७<sup>10</sup> इन मुर कामी मेको आन के हजार का मुर आन कली खेरने चाप्ब। मारदे हना आ देंशो खोदेंशो पा इन लडाइ पचा डा परमप्रभु यावे, इन परमप्रभुमी पाइब।

<sup>11</sup> मोपतीके गे परमप्रभु यावे, इन परमप्रभु कली दाक्तीन। मिनु होस पने।

<sup>12</sup> तन्न गे नोले शॉइसाक्नी हना नु मेको रागी डा इन दातेमी लीशो मुरपुकी नु गारपाइक्तीनी हना, गे इन तमी मेको आन तौ कली गेतीनी हना, इन तौ कली मेको आन तमी चाक्तीनी हना नु मेको मुरपुकी नु गारशा गेय पाइतीनी हना, <sup>13</sup> परमप्रभु यावे, इन परमप्रभुमी मेको रागी डा मुर आन कली इन डोंइती रे मखेरब, दे तुइक्तीन। तन्न मेकोपुकी इन कली ग्याइल नु ब्वारद दुग्नीम। मेकोपुकी इन ची कली युक्तीक नु इन मिक्च कली चू दुग्नीम। परमप्रभु यावे, इन परमप्रभुमी इन कली गेशो रिम्शो रागी रे गे मबेक्नी सम्म मोदेंशो दुग्ब। *गन्ती* ३३:५५; *ब्यवस्था* ७:१६; *न्यायाधीस* २:३

<sup>14</sup> नेनीन, गो मुल मुर नेल्ल खोदेंशो पा बेक्चा चिक्ताक्ड। मिनु परमप्रभु यावे, इन परमप्रभुमी इन कली देंशो रिम्शो लोत्र मारेइ मली। मेकोमी नेल्ल इन कली खाप्शो बाक्ब। मिनु का सम्म यो मखाइक्थु पाप्तु, दे गे इन थुं डा मिम्तीकेमी तुइक्तीनी। यहोसु २१:४५<sup>15</sup> दोपा परमप्रभु यावे, इन परमप्रभुमी इन कली देंशो रिम्शो लोत्र नेल्ल खाप्बा, मोपा परमप्रभु यावेमी गे आ अरेशो लोत्र मटीतीनी हना, इन कली देंशो हिंच कोंइतीक लोत्र यो खाप्ब। मिनु परमप्रभु यावे, इन परमप्रभुमी इन कली एको रिम्शो रागी रे खेरशा, खतम सेल्ल। *ब्यवस्था* २८:१५-४७<sup>16</sup> गोपुकी परमप्रभु यावे, इन परमप्रभु आ कबल कली प्रॉइशा, अरु देवी देवता आन कली ठेयब सेल्ल लाइतीनी हना नु मेको आन कली बाप्शा सेउ पाइतीनी हना, परमप्रभु यावे शुश चुरशा, मेकोमी इन कली एको रिम्शो रागी रे रीब पा खेरशा खतम सेल्ल" देंत।

शेकेम सहरम पशो कबल

24 मिनु यहोसुमी इस्राएली आन थर नेल्ल कली शेकेममी इस्राएली आन खाल्पा, आन ठेयब मुर, आन निसाफ पाइब नु मेको आन सासन पाइब आन कली ब्रेत्ताक्व। मिनु मेको नेल्ल परमप्रभु आ डोंइती जाक्शा बाक्तेक्म।

<sup>2</sup> मिनु यहोसुमी मुर नेल्ल आन कली "परमप्रभु यावे, इस्राएली आन परमप्रभुमी 'साइ नेसी इन किकी पिपी, अब्राहाम नु नाहोर आ आफ तेराह युफ्रेटीस खोला आ आइक्ची हांबुम बाक्शो बाक्तेक्म। मिनु मेकोपुकीमी अरु देवी देवता आन कली ठेयब सेल्लेक्म। *उत्पत्ती* ११:२६; *उत्पत्ती* ३१:१९; *उत्पत्ती* ३५:२<sup>3</sup> तन्न गो इन किकी पिपी अब्राहाम कली खोला आइक्ची हांबु रे पा पित्ता। मिनु मेको कली कनान रागी नेल्ल हिरताक्ड। मिनु सोशा बोशा, इसहाक माइश्शो तौ का गेता।<sup>4</sup> मिनु इसहाक कली याक्ब नु एसाव माइश्शो तौ निक्शी गेता। मिनु एसाव कली सेइर पहाडम बाक्चा कली गेता। मिनु याक्ब नु आ तौपुकी चहिं इजीप्त रागी लाम्तेक्म। *उत्पत्ती* ३२:४; *उत्पत्ती* ४६:६

<sup>5</sup> मिनु नोले गो मोसा नु हारून कली सोइक्ताक्डसी। मिनु गो इजीप्त डा मुर आन कली श्येत गेता। मिनु गो इन कली मेकेर रे गुंडताक्नी। *प्रस्थान* ३:१०<sup>6</sup> मिनु गो इन किकी पिपी आन कली इजीप्त रागी रे पा गुंडशा पित्ता। मिनु मेकोपुकी लल समुन्द्र सम्म जाक्तेक्म। इजीप्त डा मुरपुकीमी इन किकी पिपी आन कली शारा नु बग्गीमी लल समुन्द्र सम्म खेदा पाम्तेक्म। *प्रस्थान* १२:३३,५१<sup>7</sup> मिनु खेदा पाइब आन कली तशा मेकोपुकीमी परमप्रभु यावे, आं कली "वारच पाइय्की" दे आं कली थोम्तेक्म। मिनु गो मेकोपुकी नु खेदा पाइब आन दातेमी छिडछिड सेल्ला। मिनु मेको खेदा पाइब नेल्ल आन कली ब्वाक्कुमी खूग्शा साइक्तामी। गो इजीप्त रागी डा मुर आन कली मार मार पडा, गे आंमा ताइतीनी। मिनु नोले गोपुकी शुश नाक्ती सम्म गोरशो रागीमी बाक्तीनी। *प्रस्थान* १४:--

<sup>8</sup> मिनु गो इन कली यर्दन आ पूर्व एमोरी आन रागीमी चाक्ता। मिनु मेकोपुकीमी गोपुकी नु लडाइ पाम्तेक्म। मिनु गो मेको आन कली इन गुइमी गेता। गो मेको आन कली इन डोंइती खतम सेल्ला। मिनु गोपुकीमी मेको आन रागी आंम के सेल्लनीनी। *गन्ती* २१:२५,३१<sup>9</sup> मिनु मोआब डा पिप सिप्पोर आ तौ बालाकमी इस्राएलीपुकी नु लडाइ पचा मिग्शा, इन कली सराप पचा कली बेओर आ तौ बालाम कली ब्रेत्थ सोइक्ताक्व। *गन्ती* २२:-<sup>10</sup> तन्न गो बालाम आ लोत्र मनेनु। मोपतीके मेकोमी इन कली आसीक गेस डा गेस पाप्तु। मिनु गो इन कली बालाम आ गुइ रे पा प्रॉइता। *गन्ती* २३:११,२०

<sup>11</sup> मिनु नोले गोपुकी यर्दन शोक्सीशा यरीकोमी जाक्तीनी। मिनु यरीको डा मुरपुकी एमोरी, परिज्जी, कनानी, हिती, गिरगाशी, हिक्वी नु यबुसीपुकीमी गोपुकी नु लडाइ पाम्तेक्म। तन्न गो मेको आन कली इन गुइमी गेता। यहोसु ३:१०; यहोसु ६:१-२१<sup>12</sup> गो इन डोंइडोंइती हिकवा सोइक्ताक्ड। मेकोमी एमोरी आन पिप निक्शी आस कली खेदा पाम्तेक्म। गे इन तरवार नु लिब्रामी खेदा पचा ममाल्नी। *प्रस्थान* २३:२८; यहोसु १०:१-२<sup>13</sup> गो इन कली इन मशोक्शो रू, रागी नु इन मसेल्लो सहर गेता। मिनु गोपुकी मेकेर बाक्नीनी। गोपुकीमी मखूग्शा अडगुर रू नु तेल रवा डा फल जना जन बाक्नीनी" दे परमप्रभुमी देंत" दे यहोसुमी मुर नेल्ल आन कली देंत। *ब्यवस्था* ६:१०-११

<sup>14</sup> मिनु यहोसुमी "मोपतीके मुल परमप्रभु यावे कली मान पा हिंशा, मेको कली थमा पा मप्रॉइथु, गेय पने। इन किकी पिपीमी खोला आइक्ची हांबु नु इजीप्त रागीमी पूजा पशो देवी देवता आन कली ताइक्तीन। परमप्रभु यावे कली ठेयब सेलीन। यहोसु २४:२; *प्रस्थान* ३२:-<sup>15</sup> तन्न परमप्रभु यावे आ नें ठेयब सेल्ला मदाक्नीनी हना, सु कली ठेयब सेल्लनीनी? मुलाक्ती योवडीन। गे इन किकी पिपीमी खोला आइक्ची हांबुम पूजा पशो देवी देवता आन कली ठेयब सेल्लनीनी देय मुल बाक्शो एमोरी आन रागी डा देवी देवता आन कली ठेयब सेल्लनीनी? योवडीन। तन्न गो नु आ खिं डा मुरुमी परमप्रभु यावे कली ला ठेयब सेल्लनीनी" देंत। *ब्यवस्था* ६:१३-१४

16 मिनुरपुकीमी “गो गेनायो परमप्रभु यावे कली मप्रॉइनीकी। मिनुर अरु देवी देवता आन कली पूजा मपाइनीकी। 17 मारदे हना परमप्रभु यावे, आंइ परमप्रभुमी आंइ कली नु आंइ किकी पिपी आन कली इजीप्त रागीम वाइल दुश्शो खिं रे गुंइशा पिश्शो बाक्त। मिनुर मेकोमी आंइ डॉइती दुस्तीक ठेयब ठेयब छक लाक्वा डा गेय पाप्नु। गो ते लाइतक हना यो, परमप्रभु यावेमी आंइ कली कोव्रना कोव्रन बाक्त। 18 मिनुर परमप्रभु यावेमी आंइ डॉइती रे एको रागीम बाक्ब एमोरी आन कली खेरतु। मोपतीके गोपुकीमी यो परमप्रभु यावे कली ठेयब सेल्नीक। मारदे हना मेको आंइ परमप्रभु बाक्ब” देंतेक्म।

19 मिनुर यहोसुमी मुर आन कली “गोपुकीमी परमप्रभु यावे कली ठेयब सेल्ने मचाप्नीनी। मारदे हना मेको का ला परमप्रभु नु रुश पाइब परमप्रभु बाक्ब। मिनुर मेकोमी इन मरिश्शो पशो नु इन पाप मक्याम्ब। *ब्यवस्था* २९:३; *प्रस्थान* २०:५ 20 गोपुकीमी परमप्रभु यावे कली प्रॉइशा, अरु देवी देवता आन कली पूजा पाइतीनी हना, इन कली डॉइती रिश्शो पा, नोले मरिश्शो पचा गोइब। मिनुर इन कली खतम पोक्ब” देंत। 21 मिनुर मुरपुकीमी यहोसु कली “ममाइ, गोपुकीम परमप्रभु यावे कली ठेयब सेल्नीकी” देंतेक्म। 22 मिनुर यहोसुमी “गोपुकीमी परमप्रभु यावे कली ‘ठेयब सेल्नीक’ देंशा, गो आंमा सांकछी दुस्तीनी” देंत। मिनुर मेकोपुकीमी “गो थमा पा सांकछी दुस्तक” देंतेक्म।

23 यहोसुमी “मुल गोपुकी नु बाक्शो देवी देवता ताइक्तीन। इन थुं परमप्रभु यावे, इस्राएली आन परमप्रभु गे हिरदीन” देंत। *उत्पत्ती* ३५:२; 24 मिनुर मुरपुकीमी यहोसु कली “गो परमप्रभु यावे, आंइ परमप्रभु कली ठेयब सेल्नीकी। मेको आ लोव्र टीनीक” देंतेक्म।

25 मेको नाक्ती यहोसुमी मुर आन कली कबल पाप्नु। शेकेममी मेको आन कली पतीक नु मपतीक नेल्ल ब्रेक्ताक्व। *२राजा* २५:३ 26 मिनुर यहोसुमी मेको ब्रेक्स नेल्ल परमप्रभु आ अरेशो लोव्र ब्रेक्तीक किताबमी

ब्रेक्ताक्व। मिनुर मेकोमी ठेयब फुल्लु का लाइश्शा, परमप्रभु यावे आ बाक्तीक आ नेक्था डा ठेयब रवा आ पुंम ख्वक्तु। *उत्पत्ती* ३५:४; *न्यायाधीस* ९:६

27 मिनुर यहोसुमी मुर नेल्ल आन कली “कोव्रडीन, एको फुल्लु आंइ सांकछी बाक्ब। परमप्रभु यावेमी आंइ कली देंशो लोव्र नेल्ल एको फुल्लुमी यो तुइश्शो बाक्ब। मोपतीके गोपुकीमी इन परमप्रभु कली प्रॉइतीनी हना, गो जोल पाइब बाक्नीनी, दे एको फुल्लु सांकछी बाक्ब” देंत। *यहोसु* २२:२७; *उत्पत्ती* ३१:४८ 28 मिनुर यहोसुमी मेको आन कली मेको आन आंम आंम थेरशो रूमी सोइक्ताक्व।

### यहोसु कली थिम्शो

29 मेको नेल्ल दुम नोले नून आ तौ, परमप्रभु यावे आ गेय पाइब यहोसु सहे का १० बर्समी बेक्त। *गन्ती* २७:१८-२३ 30 मिनुर मेकोपुकीमी यहोसु कली गाश डांडा आ उत्तर गे एफ्राइम आ पहाड तिम्नाथ-सेराह माइक्तीक, आंम आ रूमी थिम्तेक्म। *यहोसु* १९:५०

31 इस्राएलीपुकीमी यहोसु आ ब्रॉइतीक नाक्त सम्म परमप्रभु यावे कली ठेयब सेल्तेक्म। मिनुर परमप्रभु यावेमी पशो नेल्ल तशा तुइक्ब खाल्पापुकी बाक्मा सम्म मेकोपुकीमी परमप्रभु यावे कली ठेयब सेल्तेक्म। *न्यायाधीस* २:७ 32 इस्राएलीपुकीमी योसेफ आ रुश कली इजीप्त रागी रे लाइश्शा, शेकेम सहरम थिम्तेक्म। याकूबमी मेको रू कली हमोर आ तौपुकी रे सहे का चांदी के शेकेलमी ग्याप्शो बाक्त। हमोर चहिं शेकेम सेल्ब बाक्त। शेकेम योसेफ आ चच युइ आन थेरशो रू दुस्त। *शेकेल का* ११.५ *ग्राम खोदेंशो बाक्ब। उत्पत्ती* ५०:२५; *उत्पत्ती* ३३:१९ 33 मिनुर हारून आ तौ एलाजर यो बेक्त। मेको कली गिबा सहरमी थिम्तेक्म। मेको एफ्राइम डा पहाड रागीमी बाक्शो सहर, मेको आ तौ फिनेहास कली गेम्तेक्म। *ब्यवस्था* १०:६

## न्यायाधीस

साइ डोंइती डा मुरपुकीमी “सामुएलमी एको किताब ब्रेक्शो बाक्ब” दॅशो बाक्तेक्म। तन्न सामुएल आ ब्रोंइची ना अकों परमप्रभु यावे आ लोव पाइब यो बाक्तेक्म। मेकोपुकीमी यो एको किताब ब्रेक्शो बाक्म माइ, दे यो मिन्नीम। एको किताब ब्रेक्ब सामुएल बाक्त हना, मेको खाल्पा दुम्मेनु, ब्रेक्शो बाक्त। मारदे हना “मेना इस्राएलमी पिप मबाक्म” दे शुश खेयप एको किताबम ब्रेक्शो बाक्ब।

परमप्रभु यावे आ गेना हना यो दाक्तीके नु शिशी कोंइचा कली लोव ब्रेक्शो बाक्ब। दोपा कोंइब दॅशा हना:

१. इस्राएल डा मुरुम परमप्रभु आ डोंइती मरिम्शो पशो बाक्तेक्म।
२. परमप्रभुमी मेको आन कली सजाइ गेब।
३. इस्राएलीपुकीमी परमप्रभु कली पुंइनीम।
४. परमप्रभुमी मेको आन कली श्येत रे प्रोंइब का सोइक्ब।
५. परमप्रभु गे लेश्शो मुर आन कली गेना हना यो माफ गेब, दे शॅशो बाक्ब।

### अदोनी-बेसेक कली ग्याइश्शो

१ यहोसु बेक्म नोले इस्राएलीपुकीमी परमप्रभु यावे कली “डोंइती आंइ दाते डा तेको थरमी कुशा, कनानी आन कली लडाइ तोचा?” दे हिल्लो पामे बाक्त। *उत्पत्ती ४९:८; न्यायाधीस १८:५; न्यायाधीस २०:१८; प्रस्थान २८:३०; गन्ती २७:२१* २ मिनु परमप्रभु यावेमी “यहूदा आ थर डा मुर कुचा माल्नीम। नेनीन, गो मेको रागी मेको आन कली गेनुड” दॅमाक्त। ३ मिनु यहूदा आ लोक्ब सिमियोन कली “गे आं कली गेशो रागी ग्राचा कली वारच पथ पिवो। मोपा गो कनानी नु लडाइ पाइनस। नोले गो गे नु इ कली गेशो रागी ग्राचा कली वारच पथ लाइनुड” दॅमाक्त। मिनु सिमियोन आ थर डा मुर यहूदा आ थर डा मुर नु लमा बाक्त। ४ मिनु यहूदा आ थर डा मुरपुकीमी लडाइ पा परमप्रभु यावेमी कनानी नु परिज्जी आन कली मेको आन गुडम गेवा बाक्त। मेकोपुकीमी मेको आन कली खेदा पामे बाक्त। बेसेक सहरमी १० हजार मुर आन कली साइश्शा ग्रामा बाक्त। ५ मेकेर मेकोपुकीमी अदोनी-बेसेक माइश्शो पिप नु लडाइ पामे बाक्त। मेकोपुकीमी कनानी नु परिज्जी आन कली ग्रामा बाक्त। ६ मिनु अदोनी-बेसेक प्रोक्माक्त। तन्न यहूदा आ थर डा मुरपुकीमी मेको कली खेदा पा थिश्शा, आ गुइ खोइल डा बोंग्ये खोइश्शा गेमे बाक्त। ७ मिनु अदोनी-बेसेकमी “गुइ खोइल डा बोंग्ये खोइश्शा ७० जना पिपमी आं निश्शा जतीक रे दोक्शो जचा थोवक जाम्तेक्म। डोंइती गो दोदॅशो पडा, मुल परमप्रभुमी आं कली यो मोदॅशोन पाप्नु” दॅमाक्त। मिनु यहूदा डा मुरपुकीमी मेको पिप कली यरूसलेम चाक्गामे बाक्त। मिनु मेको मेकेर बेक्माक्त।

### यरूसलेम नु हेब्रोन कली ग्राशो

८ यहूदा आ थर डा मुरपुकीमी यरूसलेम कली लडाइ पा ग्राशा, आंम के सेल्मे बाक्त। मेकोपुकीमी मेकेर डा मुर आन कली तरवारमी क्योरशा सदमे बाक्त। मिनु सहर कली मी सुइक्ते बाक्त। *न्यायाधीस १:२१* ९ मिनु नोले यहूदा डा मुरपुकी पहाडी रागीमी, नेगेब नु दिंममी बाक्शो कनानी नु लडाइ पथ लमा बाक्त। *यहोसु १०:४०; यहोसु ११:१६-२०* १० मिनु मेकोपुकीमी हेब्रोन डा कनानी नु लडाइ पामे बाक्त। मिनु शैशै, अहीमान नु तल्लै कली ग्रामा बाक्त। हेब्रोन आ डोंइती डा नें किरयथ-अरबा बाक्त। *यहोसु १५:१३-१९*

### ओथनीएलमी देबीर कली ग्राशो

११ मिनु नोले देबीर डा मुरपुकी नु लडाइ पचा ठीक दुम्मा बाक्त। देबीर कली डोंइती किरयथ-सेफेर दॅबाक्तेक्म। १२ मिनु कालेबमी “सुम किरयथ-

सेफेर कली लडाइ पा ग्राबा, मेको कली आं तमी अकसा ग्युंभे पा गेनुड” दॅमाक्त। *यहोसु १५:१६* १३ मिनु कालेब आ लोक्ब केनाज आ तौ ओथनीएलमी किरयथ-सेफेर कली ग्रामाक्त। मिनु कालेबमी आ तमी अकसा कली मेको नु ग्युंभे पा गेवा बाक्त। *यहोसु १५:१६-१९* १४ मिनु काबु ओथनीएलमी अकसा कली “आं आफ ‘रू का गेयी’ दे पुन” दे मदा बाक्त। मिनु अकसा आ गधा रे तोंइसे बाक्त। मोपा तोइश्शो तशा कालेबमी “गे मार माल्दे?” दे हिल्लो पवा बाक्त। १५ मिनु अकसामी “आं कली मारेइ गेनीनी कों? गे आं कली नेगेबमी रू गेतीनी। मोपतीके मुल आं कली ब्वाक्कु बुक्तीक पाइश्शो रू यो गेने” दॅमाक्त। मिनु कालेबमी मेको कली आइदी नु आइक्था डा ब्वाक्क बुक्तीके निक्शी गेवा बाक्त।

### यहूदा नु बेन्यामीनम ग्राशो

१६ मोसा आ शिउ आ खिं डा होबाब आ चच युइ, केनीपुकी नु यहूदा डा मुरपुकी खजूर रवा आ सहर रे पा आराद सहर आ नेक्था डा नेगेबमी बाक्शो यहूदा डा गोरशो रागीमी लमा बाक्त। मिनु मेकेर बाक्ब अमालेक डा मुरपुकी नु बाक्चा गोव्रमे बाक्त। *न्यायाधीस ४:११; गन्ती १०:२९; यहोसु १२:१४* १७ मिनु यहूदा डा मुरपुकी आंम लोक्ब सिमियोन आ थर डा मुरपुकी नु लशा, सेफतमी बाक्ब कनानी आन कली लडाइ पा मेको आन सहर खतम पोक्गमे बाक्त। मोपतीके मेको सहर आ नें होरमा वोदमे बाक्त। *ब्यक्स्था २०:१२-१८* १८ यहूदा आ थर डा मुरपुकीमी गाजा, अश्कलोन, एक्रोन सहर नु मेको आ नेक्था बाक्शो रू नेल्ल आंम के सेल्मे बाक्त। १९ मिनु परमप्रभु यावेमी यहूदा आ थर डा मुर आन कली वारच पतीके मेकेर डा पहाडी रागी नेल्ल आंम के सेल्मे बाक्त। तन्न मेकोपुकीमी दिंम डा मुर आन कली खेरने मचाप्बमे बाक्त। मारदे हना मेकोपुकी नु फलाम के बग्गी बाक्मा बाक्त। २० मिनु मोसामी दॅशो खोदॅशो पा कालेब कली हेब्रोन सहर गेमे बाक्त। मिनु मेकोमी अनाक आ तौ सां आन कली मेकेर रे खेरा बाक्त। *यहोसु १४:६-१५* २१ तन्न बेन्यामीन आ थर डा मुरपुकीमी यरूसलेम डा यबुसी आन कली मखेरमे बाक्त। मोपतीके यबुसीपुकी मुलाक्त सम्म यरूसलेममी बेन्यामीन आ थर डा मुरपुकी नु बाक्नीम। *न्यायाधीस १:८; यहोसु १५:६३; यहोसु १८:२८*

### बेथेल सहर ग्राशो

२२ योसेफ आ थर डा मुरपुकीमी बेथेल नु लडाइ पचा कली लमा बाक्त। परमप्रभु यावे योसेफ आ थर डा मुरपुकी नु बाक्माक्त। २३ मेकोपुकीमी बेथेलमी क्यारी पाइब मुर सोइक्ते बाक्त। डोंइती बेथेल आ नें लूज बाक्माक्त। *उत्पत्ती २८:१९; यहोसु १२:१६* २४ मेको क्यारी पाइबपुकीमी



मुर का कली बेथेल सहर रे गूशो तशा, मेको कली "सहर दोपा ओव्रचा? आंड कली शेंदीन। गो इन कली मारेइ यो मरिश्शो मपाइनीकी" देमा बाक्त। 25 मिनु मेको मुरुमी सहर दोपा ओव्रचा, मेको नेल्ल कोंइदा बाक्त। मिनु योसेफ आ थर डा मुरपुकीमी मेको सहर ओव्रशा, मेकेर डा मुर नेल्ल आन कली तरवारमी क्योरशा सदमे बाक्त। तन्न मेको लां शोव्रन नु आ खिं डा मुर आन कली मारेइ यो मपामे बाक्त। *यहोसु ६:२५* 26 मिनु मेको लां कोंइब मुर हिती आन रागी लमाक्त। मिनु मेकेर सहर का सेल्शा, मेको सहर आ नें लूज वोदा बाक्त। मेको सहर कली मुलाक्त सम्म लूज देंनीम।

मनस्से नु एफ्राइम लडाइ ग्राशो

27 मनस्से आ थर डा मुरपुकीमी बेथ-शेआन, तानाक, डोर, इब्लाम नु मेगीददो डा मुर आन कली नु मेकेर डा गाउं डा मुर आन कली मखेरमे बाक्त। मारदे हना कनानीपुकीमी मेकेर बाक्चा थुं पामे बाक्त। *यहोसु १७:११-१३* 28 नोले इस्राएलीपुकी बोल्यो दुम्शा, मेको आन कली वाइलीम वाइल सेल्सा सेल्न बाक्चा बाक्त। तन्न मेको आन कली गेनायो मखेरमे बाक्त।

अर्को थरपुकीमी ग्राना ग्रान लशो

29 एफ्राइम आ थर डा मुरपुकीमी यो गेजेर सहरमी बाक्ब कनानी आन कली मखेरमे बाक्त। मेकोपुकी गेना हना यो गेजेरमी बाक्चा बाक्त। *यहोसु १६:१०* 30 जबूलन आ थर डा मुरपुकीमी कित्रोन नु नहलोल सहरमी बाक्ब कनानी आन कली मखेरमे बाक्त। मिनु कनानी जबूलन डा मुर आन दातेमी बाक्शा, आन वाइलीम वाइल दुम्मा बाक्त। *यहोसु १९:१५* 31 आशेर आ थर डा मुरपुकीमी अक्को, सीदोन, अहलाब, अकजीब, हेल्बा, अफीक नु रेहोब सहरमी बाक्ब आन कली मखेरमे बाक्त। 32 मोपा आशेर आ थर डा मुरपुकी कनानी नु बाक्चा बाक्त। मारदे हना सुइ कली मखेरमे बाक्त। 33 नाप्ताली आ थर डा मुरपुकीमी बेथ-शेमेश नु बेथ-अनात सहरमी बाक्ब आन कली मखेरमे बाक्त। मिनु मेकेर डा कनानी नु बाक्चा बाक्त। तन्न बेथ-शेमेश नु बेथ-अनातमी बाक्ब आन कली वाइलीम वाइल सेल्मे बाक्त। *यहोसु १९:३८*

34 मिनु एमोरीपुकीमी दान आ थर डा मुर आन कली पहाडी रागी मेर सोइक्तेमे बाक्त। दिंममी यिचा मगेमे बाक्त। 35 एमोरीपुकीमी हार-हेरेस, आइयालोन नु शा-आल्बीम सहरम बाक्चा थुं पामे बाक्त। तन्न योसेफ आ थर डा मुरपुकीमी मेको आन कली लडाइ पा ग्राशा, वाइलीम वाइल सेल्मे बाक्त। *यहोसु १९:४२* 36 एमोरी आन सांद दक्खिन अक्रब्बीम आइक्था, सेला सहर रे लाइशा, मेको क्येडा आइक्था सम्म लशो बाक्चा बाक्त।

स्वर्ग डा गेय पाइबमी लोव्र पशो

2 मिनु परमप्रभु यावे आ स्वर्ग डा गेय पाइब गिल्याल रे बोकीम सहरमी कुमाक्त। मेकोमी "गो इन कली इजीप्त रे गुंइताक्न्नी। इन किकी पिपी आन कली 'इन कली गेनुड' देंशो रागीमी चाक्त्न्नी। गो गे नु पशो कबल गेना हना यो खाप्नुड। *यहोसु २४:२९-३१* 2 मिनु गे एको रागी डा मुरपुकी नु काइ कबल मपने। गे मेको आन चढेतीक प्रेत्या माल्नीनी। तन्न गे आं देंशो मटिनी। लो कोव्रडीन, गे मार पनी? 3 मोपतीके 'इन डोंइती रे मेको आन कली मखेरनुड। मेकोपुकी इन कली चू खोदेंशो दुम्नीम। मिनु मेको आन देवी देवता इन कली ग्याइल खोदेंशो दुम्नीम' देंनुड" देंमाक्त। 4 मोपा परमप्रभु यावे आ स्वर्ग डा गेय पाइबमी देंने थुमा नोले, मेकेर डा मुर नेल्ले डाक्शा रोंका पामे बाक्त। 5 मोपतीके मेको आन बाक्तीक कली बोकीम नें वोदमे बाक्त। मिनु मेकोपुकीमी मेकेर परमप्रभु यावे कली मार मार चढेमे बाक्त। *बोकीम आ अर्थ डाक्चा बाक्ब।*

यहोसु बेक्शो

6 मिनु यहोसुमी नेल्ल आन कली लचा गेवा नोले, मेकोपुकी आंम आंम थेरशो रागी आंम के सेल्थ लमा बाक्त। 7 मिनु इस्राएलीपुकीमी यहोसु मबेक्म सम्म परमप्रभु यावे कली ठेयब सेल्मे बाक्त। मिनु परमप्रभु यावेम

इसाएली आन पर्वम पशो ठेयब गेय ताइब खाल्पापुकी बाक्चा सम्म यो परमप्रभु यावे कली ठेयब सेल्मे बाक्त। 8 मिनु नून आ तौ यहोसु, परमप्रभु यावे आ वाइल सहे का १० बर्समी बेक्चा बाक्त। 9 मिनु आ थेरशो रूम थिम्मे बाक्चा बाक्त। आ रू ते बाक्त देंशा हना, गाश डांडा आ उत्तर, एफ्राइम डा पहाडी रागीमी बाक्शो तिम्नाथ-हेरेसमी बाक्चा बाक्त। 10 मेको पाला डा मुर नेल्ल बेक्चा बाक्त। मिनु मेको आन आल ठेयब दुम्मा बाक्त। मेकोपुकी परमप्रभु यावे कली मतुइक्ब बाक्चा बाक्त। मिनु इस्राएल डा मुर आन कली ठेयब गेय पा वारच पशो यो मतुइश्शो बाक्चा बाक्त।

इसाएलीपुकीमी हेंथे पशो

11 मिनु इस्राएलीपुकीमी परमप्रभु यावे आ डोंइती मार मरिश्शो बाक्चे, मेको पामे बाक्त। मेकोपुकीमी बाल देवी देवता आन कली ठेयब सेल्मे बाक्त। 12 मिनु मेको आन कली इजीप्त रागी रे गुंइब, परमप्रभु यावे, आंम किकी पिपी आन परमप्रभु कली प्रोन्मे बाक्त। मेको आन दातेमी बाक्ब जात जात डा मुर आन देवी देवता आन डोंइती बाम्मा बाक्त। मोपा परमप्रभु यावे कली चुरपदमे बाक्त। 13 मेकोपुकीमी परमप्रभु यावे कली प्रोंइशा, बाल नु अशतारोथ देवता कली ठेयब सेल्मे बाक्त। 14 मिनु परमप्रभु यावेमी इस्राएली आन पर्वम गाइश्शा, मेको आन कली रोइक्ब आन गुइमी गेमी बाक्त। मिनु मेकोपुकीमी मेको आन मारेइ मारेइ रोइक्तेमे बाक्त। मिनु मेकोमी मेको आन कली आन नेक्था बाक्ब जोरी सत्रु आन हुकुममी बाक्चा गेमे बाक्त। 15 मोपा इस्राएलीपुकीमी आन जोरी सत्रु आन कली ग्राने मचाप्बमे बाक्त। 16 गेना मेकोपुकी लडाइ पथ गूमा, मेना परमप्रभु यावेमी मेको आन कली श्येत गेमी बाक्त। मोपा परमप्रभु यावेमी मेको आन कली डोंइती देंशो नु आ कबल पशो खबा बाक्त। मोपतीके मेकोपुकीमी शुश श्येत जामे बाक्त। *लेवी २६:१७; ब्यवस्था २:१५; ब्यवस्था २८:२०; १सामुएल १२:१५*

16 मिनु नोले परमप्रभु यावेमी मेको आन कली रोइक्ब आन गुइ रे प्रोंइचा कली निसाफ पाइब सोइक्ता बाक्त। मिनु मेको आन कली प्रोंइना प्रोंइन बाक्चा बाक्त। *प्रेरित १३:२०* 17 तन्न मेकोपुकीमी निसाफ पाइब आन देंशो लोव्र मनेन्मे बाक्त। मेकोपुकीमी तेल्लेम पशो खोदेंशो पा अरु देवी देवता आन नोले खोदमे बाक्त। मेको आन डोंइती बाम्मा बाक्त। मेकोपुकी परमप्रभु यावे आ शेंशो लोव्र टीब आन किकी पिपी आन गाक्शो लां प्रोंइशा, मटीब दुम्मा बाक्त। 18 गेना परमप्रभु यावेमी मेको आन कली निसाफ पाइब सोइक्ता, मेना परमप्रभु यावे मेको नु बाक्चा बाक्त। मेको निसाफ पाइब मबेक्म सम्म आन जोरी सत्रु रे प्रोंइशा वोदा बाक्त। मारदे हना परमप्रभु यावेमी आन जोरी सत्रु रे श्येत जशो तशा शिशी पवा बाक्त। 19 तन्न निसाफ पाइब बेक्म चोटीन आन किकी पिपी क्येडा लाक्शा मरिश्शो पामे बाक्त। देवी देवता आन कली ठेयब सेल्शा, मेको आन डोंइती बाप्शा, मेको आन नोले खोदमे बाक्त। आन मरिश्शो पशो प्रोंइने मबिस्समा बाक्त। *प्रस्थान ३२:९*

20 मोपतीके परमप्रभु यावे इस्राएलीपुकी नु गाइक्ता बाक्त। मिनु "गो मेको आन किकी पिपी आन कली देंशो नु कबल पशो एकोपुकीमी खतम सेल्तेक्म। आं देंशो लोव्र मटितीके 21 मुल यहोसुमी आ बेक्ची ना मखेरशो रागी रागी डा मुर कली यो इस्राएली आन डोंइती रे मखेरनुड" दे परमप्रभु यावेमी देंमाक्त। 22 इस्राएली आन किकी पिपी परमप्रभु यावे आ लांम गाक्शो खोदेंशो पा मेकोपुकी गाक्नीमी कों मगाक्नीमी, दे इस्राएली आन कली नाक्चा कली मेको अर्को जात डा मुर मखेरशो बाक्चा बाक्त। *न्यायाधीस ३:१,४; ब्यवस्था ८:२* 23 मोपा परमप्रभु यावेमी डोंइती यहोसु आ गुइमी मगेशो रागी रागी डा मुर आन कली मोशीन प्रोंइशा वोइश्शो बाक्चा बाक्त। *न्यायाधीस १:२८; भजन संग्रह १०६:३४*

इसाएली आन कली नाक्शो

3 मिनु परमप्रभु यावेमी इस्राएली आन कली नाक्चा, दे रागी रागी डा मुर इस्राएली आन डोंइती रे मखेरशो बाक्चा बाक्त। मेना इस्राएली आन नक पाला डा मुरपुकीम कनान रागीम लडाइ पचा आ पर्वम मारेइ मतुइश्शो बाक्चा बाक्त। *न्यायाधीस २:२२* 2 मोदेंशो मारेइ मतुइक्ब इस्राएली आन कली दोपा लडाइ पचा, दे शेंचा कली परमप्रभुमी अर्को जात डा मुर आन

कली वोइश्शो बाक्मावक्त।<sup>3</sup> मेको तेको तेको जात बाक्मा बाक्त देंशा हना, ५ जना हुकुम पाइब पलिस्ती, कनानी नेल्ले, सीदोन डा मुर नेल्ले नु बाल-हेरमोन डांडा रे लाइश्शा, लेबानोन डा पहाडम लेबो-हमाथ सम्म बाक्ब हिच्वीपुकी बाक्मा बाक्त। *यहोसु १३:३*<sup>4</sup> मिनू परमप्रभु यावेमी इस्राएली आन किकी पिपीम मोसा कली गेशो शेंतीके मेकोपुकीमी पाइनीमी कों मपाइनीमी, दे नाक्वा कली मेको अर्का जात डा मुर आन कली बाक्वा गेवा बाक्त।

<sup>5</sup> मोपा इस्राएलीपुकी कनानी, हित्ती, एमोरी, परिज्जी, हिच्वी नु यबुसी आन दातेमी बाक्शो बाक्मा बाक्त। <sup>6</sup> मिनू मेकोपुकीमी मेको आन तमीपुकी ग्युंवे पा चाक्वमे बाक्त। मिनू आंम तमीपुकी यो मेको आन तौ आन कली ग्युंवे पा गेमे बाक्त। मिनू मेकोपुकीमी मेको आन देवी देवता आन कली यो मार मार च्देशा ठेयब सेल्मे बाक्त। *ब्यवस्था ७:३*

### ओथनीएल

<sup>7</sup> इस्राएलीपुकीमी परमप्रभु यावे आ डोंइती मार मरिश्शो बाक्मे, मेको पामे बाक्त। मेकोपुकीमी परमप्रभु यावे, आन परमप्रभु कली प्रेंदमे बाक्त। मिनू बाल नु अशेराह देवी आस कली ठेयब सेल्मे बाक्त। <sup>8</sup> मिनू परमप्रभु यावेमी इस्राएली आन कली तशा गाइक्ता बाक्त। मिनू मेसोपोटामीया डा अराम-नहाराइम डा पिप कुशन-रिशातैम आ गुइमी लेयडा बाक्त। मेकोम इस्राएली आन कली ८ बर्स सम्म सासन पवा बाक्त। <sup>9</sup> मिनू इस्राएलीपुकीमी “वारच पाइय्की” दे परमप्रभु यावे कली थोव्रमेनु, इस्राएली आन कली प्रोंइचा, दे केनाज आ तौ ओथनीएल कली सोइक्ता बाक्त। मेको कालेब आ लोक्ब बाक्त। मिनू मेकोमी मेको आन कली प्रोना बाक्त। *न्यायाधीस १:१३; यहोसु १५:१७-१८*<sup>10</sup> परमप्रभु यावे आ सोक्त मेको तार जाक्मावक्त। मिनू मेकोमी इस्राएली आन कली निसाफ पवा बाक्त। मिनू मेकोमी लडाइ पचा गोवा बाक्त। मिनू परमप्रभु यावेमी मेसोपोटामीया डा पिप कुशन-रिशातैम कली ओथनीएल आ गुइम गेवा बाक्त। मोपा ओथनीएलमी मेको पिप कली ग्रामावक्त। *न्यायाधीस ६:३४*<sup>11</sup> केनाज आ तौ ओथनीएल मबेक्म सम्म मेको रागी ४० बर्स सम्म लडाइ रे नांइसे बाक्त।

### एहूद

<sup>12</sup> मिनू इस्राएलीपुकीमी लेंशा परमप्रभु यावे आ डोंइती मार मरिश्शो बाक्मे, मेको पामे बाक्त। मिनू मेको आन मरिश्शो पशो आ पर्बम परमप्रभु यावेमी मोआब डा पिप एग्लोन कली इस्राएली क्येडा बोल्यो सेला बाक्त। <sup>13</sup> मिनू एग्लोनमी अम्मोनी नु अमालेक डा मुर आन कली लडाइ पचा कली खुप्तीमी बाक्त। मिनू इस्राएली नु लडाइ पचा गोव्रमे बाक्त। मिनू खजूर रवा बाक्शो सहर आंम के सेल्मे बाक्त। *न्यायाधीस १:३६*<sup>14</sup> इस्राएलीपुकी १८ बर्स सम्म मोआब डा पिप एग्लोन आ सासनमी बाक्मा बाक्त।

<sup>15</sup> मिनू इस्राएलीपुकीमी लेंशा “वारच पाइक्की” दे परमप्रभु यावे कली थोव्रमेनु, परमप्रभु यावेमी इस्राएली आन कली श्येत रे प्रोंइचा कली बेन्यामीन आ थर डा गेरा आ तौ एहूद कली सोइक्ता बाक्त। मेको पेरा गुइम गेय पाइब बाक्त। मिनू इस्राएलीपुकीमी मेको कली मोआब डा पिप एग्लोन आ बाक्तीकेम तिरो थाप्य सोइक्तमे बाक्त। <sup>16</sup> मिनू एहूदमी आंम कली कुबीत का लाइश्शो निक्शी गे हेश्शो क्योरतीक पाइश्शो तरवार का सेल्शा, आ वा आगामी ग्युरा गे खूइश्शा पिप्शा कुरा बाक्त। *कुबीत का ०,५ मितर कि ठेयब हात का खोदेंशो बाक्ब*। <sup>17</sup> मिनू नोले मेकोमी तिरो कुरब लाइश्शा, मोआब डा पिप एग्लोन आ बाक्तीके लमावक्त। एग्लोन साप्पा दोश्शो मुर का बाक्मावक्त। <sup>18</sup> मिनू मेकोमी तिरो नेल्ल पोक्शा, कुरब मुर नु गाक्मावक्त। <sup>19</sup> एहूद चहिं गिल्याल आ नेक्था बाक्शो फुल्लु के मूर्ति आन बाक्तीक रे लेश्शा, पिप कली “पिप, गो इन कली खूइश्शा लोव्र का पचा माल्नुड” देंमावक्त। मिनू पिप एग्लोनम “सिक्सी पने” दे आ नेक्था बाक्ब नेल्ल आन कली लाडगा सोइक्तीमी बाक्त।

<sup>20</sup> मिनू मेको पिप आ दरवार डा तला तारी सितल कोठामी बाक्शो बाक्मावक्त। मिनू एहूद मेको आ डोंइती जाक्शा “परमप्रभु रे पा गो इन कली लोव्र का देंचा माल्नुड” देंमावक्त। <sup>21</sup> मिनू एग्लोन आ निक्तीके रे बोक्शा

राम्मावक्त। मिनू एहूदमी आ पेरा गुइमी आ ग्युरा गे बाक्शो तरवार गुंइशा, मेको पिप आ कोव्रजमी तूदा बाक्त। *२सामुएल २०:१-१०*<sup>22</sup> मेको तरवार आ ग्याइक्तीक सम्म ओव्रमावक्त। मिनू कोव्रज डा बोंसोम मेको तरवार नेल्ल सुमा बाक्त। मिनू पिप आ कोव्रज रे खी गूमावक्त। मिनू एहूदमी तरवार मगुंइधु, प्रोंइशा वोदा बाक्त। <sup>23</sup> मिनू तला तारी डा कोठा डा लाप्चो चोक्शा, एग्लोन कली आगाम चोक्शा, सांचो पाइश्शा वोइश्शा, लाडगा गूमावक्त।

<sup>24</sup> मिनू गूने थुमा नोले, एग्लोन आ गेय पाइब जाक्मा बाक्त। मिनू लाप्चो चोक्शो तशा “पिप डाइश्शा बाक्म कों” दे मिम्तमे बाक्त। <sup>25</sup> मेकोपुकी शुश सम्म रिम्स डा रिम्स बाक्शा, मुने यो पामे बाक्त। तन्न पिपमी तला तारी डा कोठा डा लाप्चो यो मरोक्गा बाक्त। मोपतीके मेकोपुकीमी सांचो चाक्शा, लाप्चो रोक्वमे बाक्त। मिनू आन पिप कली खपीम गोल्शा बेक्शो तामे बाक्त।

<sup>26</sup> मोपा मेकोपुकीमी शुश रिम्शा बाक्मानु, एहूद प्रोक्ने थुश्शो बाक्मावक्त। मेको फुल्लु के मूर्ति आन बाक्तीक लाक्शा सेइरा माइक्तीकेमी जाक्दीम्मावक्त। <sup>27</sup> मिनू एफ्राइम डा पहाड रागीम जाक्दीम नोले, मेकेर रे मेकोमी तुराही तबा बाक्त। मिनू इस्राएली मेको नु पहाड रे तोइश्शा, आ नोले खोदमे बाक्त।

<sup>28</sup> एहूदमी “आं नोले खोतीन। मारदे हना परमप्रभु यावेमी इन जोरी सत्रु मोआबी आन कली इन गुइमी गेशो बाक्ब” दे माइक्मी बाक्त। मोपतीके आ नोनोले तोइश्शा यिमा बाक्त। मिनू मोआबी मप्रोक्मल, दे मेको आ नेक्था डा यर्दन खोला शोक्तीके आन के सेल्मे बाक्त। मिनू सुइ आन कली मेक रे शोक्वा मगेमे बाक्त। <sup>29</sup> मेको नाक्ती १० हजार खोदेंशो मोआबी आन कली सदमे बाक्त। मेको नेल्ल बोल्यो लडाइ पाइब बाक्मा बाक्त। मेको का यो प्रोक्वा मतामे बाक्त। <sup>30</sup> मोपा मेको नाक्ती रे इस्राएलीम मोआबी आन कली हुकुम पामे बाक्त। मिनू मेको रागी ८० बर्स सम्म लडाइ रे नांइसे बाक्त।

<sup>31</sup> एहूद आ नोले अनाथ आ तौ शाम्मार इस्राएली आन निसाफ पाइब दुम्मावक्त। मेकोमी ब्यफ वाक्तीक हरीसमी ६ सहे पलिस्ती आन कली तुप्शा साइक्मी बाक्त। मेकोमी यो इस्राएली आन कली आन जोरी सत्रु रे प्रोंइमी बाक्त। *न्यायाधीस ५:६*

### देबोरा नु बाराक

<sup>4</sup> एहूद बेक्म नोले इस्राएलीपुकीमी लेंशा परमप्रभु यावे आ डोंइती मार मरिश्शो बाक्मे, मेको पामे बाक्त। <sup>2</sup> मोपतीके परमप्रभु यावेमी मेको आन कली हासोरमी सासन पाइब कनानी आन पिप याबीन आ गुइमी गेवा बाक्त। मेको आ लडाइ पाइब आन ठेयब मुर सीसेरा माइश्शो बाक्मावक्त। मेको हरोशेथ-हा-गोयीममी बाक्मावक्त। *यहोसु ११:२*<sup>3</sup> मिनू लेंशा इस्राएलीपुकीमी परमप्रभु यावे कली “वारच पाइय्की” दे थोव्रमे बाक्त। मारदे हना सीसेरा के ९ सहे फलाम के बग्गी बाक्तेक्म। मिनू इस्राएली आन कली २० बर्स सम्म शुश श्येत गेशा, दिप्शा वोइश्शो बाक्मावक्त।

<sup>4</sup> मेना लप्पीदोथ आ मीश, देबोरा इस्राएली आन कली निसाफ पाइब दुश्शो बाक्मावक्त। मेको परमप्रभु यावे आ लोव्र पाइब यो बाक्मावक्त। <sup>5</sup> मेको एफ्राइम डा पहाडी रागी, रामाह नु बेथेल आ दातेमी बाक्शो देबोरा आ खजूर रवा आ पुंमी बाक्शो बाक्मावक्त। मिनू इस्राएलीपुकी निसाफ पुंइध मेक जाक्मा बाक्त। *उत्पत्ती ३५:८*<sup>6</sup> मेकोमी अबीनोअम आ तौ बाराक कली नाप्ताली डा केदेश सहर रे ब्रेथ सोइक्ता बाक्त। मिनू मेको कली परमप्रभु यावे, इस्राएली आन परमप्रभुम इ कली “गे लशा, नाप्ताली नु जबूलून आस थर डा १० हजार मुर आन कली योव्रशा, मेको आन कली ताबोर डांडामी पिप्शा पिपो। *यहोसु २१:३२*<sup>7</sup> गो चहिं याबीन आ लडाइ पाइब आन कप्तान सीसेरा आ मुर नु आ बग्गीपुकी गुंइशा, किशोन खोला आ नेक्था चाक्नुड। मिनू इन गुइमी गेनुड” दे मदा बाक्त। <sup>8</sup> मिनू बाराकमी देबोरा कली “गे गो नु लाइतीनी हना, गो लाइनुड। गे गो नु मलाइतीनी हना, गो मलाइनुड” दे लोव्र लेत्ता बाक्त। <sup>9</sup> मिनू देबोरामी “थमा पा, गो गे नु

लाइनुड। तन्न एको ठेयब गेय आ ततीक मान गे मताइनेवे। मारदे हना परमप्रभु यावेमी सीसेरा कली मीश मुर का आ गुइमी गेशो बाक्ब" देंमाक्त। मिनु देबोरा बोक्शा डा मिन बाराक नु केदेश सहरमी लमाक्त।<sup>10</sup> बाराकमी जबूलून नु नाप्टाली आस थर डा मुर आन कली केदेश सहरमी ब्रेत्ता बाक्त। मोपा १० हजार लडाइ पाइबपुकीमी मेको आ नोले खोदमे बाक्त। मिनु देबोरा मेको नु लमाक्त।

<sup>11</sup> मिनु केनी डा मुर, मोसा आ शिउ होबाब आ चच युइ बाक्मा बाक्त। केनी हेबेर चहिं केनी आन दाते रे ब्राशो बाक्माक्त। मोपा ब्राशा, केदेश सहर आ नेक्था एलोन-बे-सा-अनानीममी बाक्शो ठेयब रवा आ नेक्था जाक्दीशा, आ ताम्बु कीशा बाक्शो बाक्माक्त। *न्यायाधीस १:१६; गन्ती १०:२९*

<sup>12</sup> मिनु सीसेरामी अबीनोअम आ तौ बाराक ताबोर डांडामी लशो बाक्ब देंशो नेना बाक्त। <sup>13</sup> मिनु सीसेरामी आ ९ सहे फलाम के बग्गी नु आ लडाइ पाइब आन कली हरोशेथ-हा-गोयीम रे किशोन खोलाम खुप्ता बाक्त।

<sup>14</sup> मिनु देबोरामी बाराक कली "बोक्को, मुलाक्त परमप्रभु यावेमी सीसेरा कली इ गुइमी गेशो बाक्ब। परमप्रभु यावे इ डोंइती मगाक्बा डा?" देंमाक्त। मोपतीके बाराक नु आ १० हजार लडाइ पाइब ताबोर डांडा रे ब्रुम्मा बाक्त।

<sup>15</sup> मिनु परमप्रभु यावेमी सीसेरा नु आ बग्गी नेल्ले, आ लडाइ पाइब नेल्ल बाराक नु ब्रुपदा बाक्त। सीसेरा चहिं आ बग्गी रे तोइशा प्रोक्माक्त।

*न्यायाधीस ५:२०; उत्पत्ती ३५:५; प्रस्थान २३:२७; ब्यक्था २:२५; यहोसु २:९-११* <sup>16</sup> मिनु बाराकमी बग्गीपुकी नु लडाइ पाइब आन कली हरोशेथ-हा-गोयीम सम्म खेदा पा, सीसेरा आ लडाइ पाइब नेल्ल आन कली तरवारमी क्योरशा सदा बाक्त। का यो ब्रोंइचा मतामे बाक्त।

<sup>17</sup> सीसेरा चहिं खोइलीमी प्रोक्ना प्रोक्न, केनी हेबेर आ मीश याएल आ ताम्बुमी जाक्माक्त। मारदे हना हासोर डा पिप याबीन नु केनी हेबेर डा मुरपुकी लडाइ मपथु, वारच दुम्शो बाक्मा बाक्त।

<sup>18</sup> मिनु याएल सीसेरा कली गुम्चा, दे लाडगा गूमाक्त। मिनु मेकोमी "हजुर ओवडीन। महिनीन" देंमाक्त। मिनु सीसेरा ताम्बु आगा ओवमाक्त। मिनु याएलमी मेको कली खूइशा, वाम सुमा बाक्त।

<sup>19</sup> सीसेरामी याएल कली "आं कली ब्वाक्क तूचा गेन। गो साप्पा तूतू दाक्ती" देंमाक्त। मिनु मेकोमी दूध वोइशा बोस का गुंइशा, मेको कली तूचा गेवा बाक्त। मिनु मेको कली वा फेक्ता बाक्त।

<sup>20</sup> मिनु सीसेरामी मेको कली "ताम्बु आ लाप्चोमी राप्शा बाक्को, सुइ जाक्शा 'एकेर सुइ मुर जाक्मा?' दे हिल्लो पांतेक्म हना, मजाक्म देनो" देंमाक्त।

<sup>21</sup> तन्न हेबेर आ मीश याएलमी थाल्ला का नु ताम्बु डा किला का लाइशा, निन्द्रा पशो सीसेरा आ नेक्था लमाक्त। मिनु याएलमी सीसेरा आ पियामी खप सम्म युक्चा डा पा किला थोक्ता बाक्त। मिनु शुश दशा, निन्द्रा पा बाक्शो, सीसेरा बेक्माक्त।

<sup>22</sup> मिनु बाराक सीसेरा कली खेदा पा मेक जाक्माक्त। मिनु याएलमी मेको कली गुम्शा "ओवडीन, गो इन माल्शो मुर इन कली कोंइनुड" देंमाक्त। मिनु बाराक मेको नु ताम्बु आगा ओवमाक्त। मिनु सीसेरा आ पियामी किला गुक्शा बेक्शो तवा बाक्त।

<sup>23</sup> मेको नाक्ती परमप्रभुमी कनान डा पिप याबीन कली इस्राएलीपुकी नु ब्रुपदा बाक्त।

<sup>24</sup> मिनु इस्राएलीपुकीमी कनानी पिप याबीन कली शुश श्येत गेशा, मसदमे सम्म श्येत गेमे बाक्त।

देबोरा नु बाराक आस कुम्सो

**5** मेको नाक्त देबोरा नु अबीनोअम आ तौ बाराकमी कुम्सो पांसे बाक्त। मेको निक्शीमी मार कुम्सो पांसे बाक्त, देंशा हना

<sup>2</sup> "इसाएल डा ठेयब मुरुमी लडाइ पाइब आन कली खुल्मेनु, मेकोपुकीमी आन ठेयब मुर आन कली टिंतेक्म। मोपतीके परमप्रभु यावे कली ठेयब सेलीन।

<sup>3</sup> पिपपुकी, नेनीन। सासन पाइबपुकी, इन नोफा दाइक्तीन। नेनीन। गो परमप्रभु यावे कली कुम्सो पाइनुड। गो परमप्रभु यावे, इस्राएली आन परमप्रभु कली ताप्तीक का ताप्शा, कुम्सो का पाइनुड। <sup>4</sup> परमप्रभु यावे, सेइर रे पा गाक्नी ना, एदोम रागी रे लाइतीनी, मेना रागी नेल्ल खिंखि पाप्तु। रेउ यित। गोस्सुमी रेउ यिपाइक्तु। *ब्यक्था ३३:२; हबकुक ३:३-६* <sup>5</sup> मिनु

सीनै डांडा डा परमप्रभु यावे आ डोंइती पहाडमी खिनु कुत। परमप्रभु यावे, इस्राएली आन परमप्रभु आ डोंइती डांडा खिंखि पाप्तु। *भजन संग्रह ६८:९*

<sup>6</sup> अनाथ आ तौ शाम्गार आ पालामी, याएल बाक्म सम्म ग्याप्ब लेयब आन हुल ठेयब लां मगाक्ब दुंतेक्म। मुरपुकी खूइशा लांमी गाक्चा गोम्तेक्म। *न्यायाधीस ३:३१* <sup>7</sup> मिनु इस्राएलीपुकीमी आन रूमी शोक्ने खुंजे मचबेम। देबोरा, गे मेको आन दातेमी मजाक्के सम्म मारेइ पने मचबेम। गे इस्राएली आन ममा खोदेंशो पा जाक्ते। <sup>8</sup> इस्राएलीपुकीमी नक देवी देवता आन कली ठेयब सेल्चा कली योव्वची ना सहर डा लाप्चोमी लडाइ दुम्त। मिनु ४० हजार इस्राएली आन के तेक्तीक नु तरवार मबा।

<sup>9</sup> इस्राएली लडाइ पाइब आन ठेयब मुर दाक्नुड। मारदे हना मेकोपुकी महिंथु, लडाइ पचा कली, दे आंम कली जिम्मा गेम्तेक्म। परमप्रभु यावे ठेयब बाक्ब। <sup>10</sup> बुश गधा डोइशा गाक्बपुकी, राडी तारी निब्बपुकी, खोइलीम गाक्ब नेल्लेमी यो परमप्रभु यावेम मेको लडाइ 'दोपा पवा' मेको शेंदीन।

<sup>11</sup> मिनु ब्वाक्कु बुक्तीकेमी बाजा ताप्शा 'परमप्रभु यावे आ ग्रातीक ठेयब बाक्ब' दे लेंशा कुम्सो पाइनीम। 'मिनु इस्राएल डा बोल्यो मुर आन ग्राशो आ पर्बम कुम्सो पाइनीम। मिनु परमप्रभु यावेमी रूम शोक्ब आन कली ग्रापाइक्तु' दे कुम्सो पाइनीम। मिनु परमप्रभु यावे आ मुरपुकी उइ सहर डा ठेयब लाप्चोमी लाम्तेक्म।

<sup>12</sup> बोक्को, देबोरा, बोक्को, बोक्शा डा मीन, कुम्सो पावो। अबीनोअम आ तौ बाराक, बोक्को, इ ग्याइशा मुर आन कली एक रे योल्दो। <sup>13</sup> मिनु ठेयब मुरपुकी उइ गाक्तेक्म। परमप्रभु यावे आ मुरपुकी डोंइती बारशा, बोल्यो मुर नु लडाइ पचा चिक्ताक्म। <sup>14</sup> एफ्राइम आ थर डा मुर दिंमम जाक्तेक्म। बेन्यामीन आ थर डा मुरपुकीमी मेको आन नोले खोइक्तेक्म।

माकीर रे आन ठेयब मुर यिंतेक्म। जबूलून आ थर डा मुर आन रागी रे पिशा, आन थर डा कप्तानपुकी जाक्तेक्म। *यहोसु १७:१* <sup>15</sup> इस्साकार आ थर डा हुकुम पाइबपुकी देबोरा नु जाक्तेक्म। मिनु इस्साकार आ थर डा मुर

बाराक कली मप्रोंइथु आ नोले खोइक्तेक्म। मेकोपुकी उइ दिंममी मेको आ नोले दोरशा लाम्तेक्म। मिनु रूबेन आ थर डा मुर चहिं आन दातेमी 'लचा देय मलचा' दे शुश लोव्र पा मिम्ना मिम्न थुं नाक्मुंतेक्म।

<sup>16</sup> मारदे गोठम बाक्नीनी? मेको योव्रब आन ताप्शो नेंचा दाक्नीनी? मिनु रूबेन आ थर डा मुर आन दातेमी शुश मिम्ना मिम्न बाक्तेक्म। <sup>17</sup> गिलाद डा मुरपुकी यर्दन आइक्ची हांबुमी बाक्तेक्म। दान आ थर डा मुरपुकी, मारदे डोंगा आन

नेक्था रिम्शा बाक्नीनी? मिनु आशेर आ थर डा मुरपुकी समुन्द्र आ नेक्था देश पा बाक्तेक्म। मेकोपुकी डोंगा आन नाइक्तीकेमी मेक उइ बाक्शो बाक्तेक्म।

<sup>18</sup> मिनु जबूलून आ थर डा मुरपुकीमी महिंथु लडाइ पांतेक्म। मिनु नाप्टाली आ थर डा मुरपुकीमी यो लडाइ पांतेक्म।

<sup>19</sup> कनान डा पिपपुकी लडाइ पा जाक्तेक्म। मेगीददो आ नेक्था तानाक सहरमी लडाइ पांतेक्म। तन्न चांदी नु अरु रोइशा मारेइ यो लाइक्चा मताम।

<sup>20</sup> मिनु सोरुलपुकीमी सरीड रे लडाइ पांतेक्म। मेको आन लतीक लां रे सीसेरा नु लडाइ पांतेक्म। *प्रस्थान १४:२५; यहोसु १०:१४* <sup>21</sup> मिनु किशोन खोलामी सीसेरा आ लडाइ पाइब आन कली योल्ताक्व। मेको बारशो किशोन खोलाम मोदेंशो पाप्तु। आं थुं महिंथु, बारशा, लडाइ पावो।

<sup>22</sup> मिनु शारा आन खोइल रेयके पपाइशा मेको साप्पा दोरतेक्म। आन खोइल ताप्शा, मेको साप्पा दोरतेक्म। <sup>23</sup> परमप्रभु यावे आ स्वर्ग डा गेय पाइबमी 'मेरोज कली सराप पावो। मिनु मेकेर बाक्ब मुर आन कली सराप पावो। मारदे हना मेकोपुकीमी परमप्रभु यावे कली मारेइ यो वारच मपाम' देंत।

<sup>24</sup> केनी हेबेर आ मीश याएल मीश मुर नेल्ल आन क्येडा आसीक ताइब दुम्ब। ताम्बुमी बाक्ब मीश मुर नेल्ल आन क्येडा आसीक ताइब बाक्ब।

<sup>25</sup> सीसेरामी ब्वाक्कु पुंइतु। तन्न मेकोमी दूध गेप्तु। मेको कली दारशो डप्कामी दहिं खेत्ताक्व। *न्यायाधीस ४:१९* <sup>26</sup> मिनु मेकोमी ताम्बु आ किला तुल्शा, थाल्ला का गुप्तु। मिनु सीसेरा आ पियाम थोक्ताक्व। मेको कली आ रेक्चे खिंशा साइक्तु। <sup>27</sup> सीसेरा याएल आ खोइलीम बेक्त। मेको आ खोइलीमी गोल्शा बेक्त।

<sup>28</sup> मिनु सीसेरा आ ममामी झेल रे चिवा पा कोव्रतु। मोपा चिवा पा कोव्रशा 'मेको आ बग्गी मारदे मजाक्मे? आ बग्गी आ रेयके मारदे मनेंसे?'

दे वाइ ब्रेत्त। 29 मिनु मेकेर बाक्ब नेल्ल क्येडा अरेब मीश मुरुमी आ दैशो लोत्र आंमान लेन्ना लेन्ना 30 मेको आन रोइश्शो नेल्ल योक्वामे कौ? मुर नेल्ल कली मीश आल का कि निक्शी ताइनीम कौ? मिनु सीसेरामी रिम्शो रड पाइश्शो वा ताइबा कौ? आं कली बुटा आप्शो दारशो कुप्नी निक्शी चाक्बा कौ? दे आंमा नु लोत्र पशो बाक्त।

31 मिनु परमप्रभु यावे, इन जोरी सत्रु नेल्ल मोपान खतम दुम्मल। इन कली दाक्बपुकी चहिं सुनी दाप्शो नां खोदैशो पा ब्रशा सक्ति पाइश्शो दुम्शा, बाक्मल” दे कुम्सो पास्से बाक्त। मिनु ४० बर्स सम्म मेको रागीमी लडाइ मद्रुम्माक्त। *ब्यवस्था* ६:५

### मिदयानीपुकीम श्येत गेशो

6 मिनु इस्राएलीपुकीमी लेंशा परमप्रभु यावे आ डोंइती मार मरिम्शो बाक्मे, मेको पामे बाक्त। मोपतीके परमप्रभु यावेमी मेको आन कली ७ बर्स कली मिदयान डा मुर आन गुइमी गेवा बाक्त। 2 मिनु मिदयान डा मुरपुकीमी इस्राएली आन कली शुश दिप्शा, सक्ति पाइश्शो दुम्मा बाक्त। मोपतीके इस्राएलीपुकी पहाड डा पुक्खी, रेंगु इर लशा, आन खुइश्शा बाक्तीक सेल्मे बाक्त। 3 इस्राएलीपुकीमी वांचेर शोक्वामे चोटीन मिदयान डा मुरपुकी, अमालेक डा मुरपुकी नु पूर्व डा मुरपुकी जाक्शा, इस्राएलीपुकी नु लडाइ पाइबाक्मा बाक्त। *ब्यवस्था* २८:३३ 4 मेको आन ताम्बु कीशा बाक्शा, गाजा सम्म डा बाली नाली कली खतम पोक्वामे बाक्त। मेकोपुकीमी इस्राएल डा मुर आन कली जचा थोत्रक काइ महेंदमे बाक्त। आन भेडा, ब्यफ नु गधा नेल्ल रोइश्शा लदमे बाक्त। 5 मेकोपुकी आंम के बी ब्यफ नु ताम्बुपुकी चाक्शा, सल्हा माले खोदैशो पा जाक्मा बाक्त। मुर नु मेको आन दलओठ हिक्ने मचाप्चा डा पा शुश बाक्तीके, मोपा मेको रागी कली खतम पोक्वामे बाक्त। 6 मिनु मिदयान डा मुरपुकीमी इस्राएली आन कली शुश पुडग सेल्मे बाक्त। मिनु इस्राएलीपुकीमी “वारच पाइय्यीकी” दे परमप्रभु यावे कली थोत्रमे बाक्त।

7 मोपा इस्राएलीपुकीमी परमप्रभु यावे कली मिदयान डा मुर आन पबर्म थोत्रमे नोले 8 परमप्रभु यावेमी मेको आन कली आ लोत्र पाइब का सोइक्ता बाक्त। मिनु मेकोमी “परमप्रभु यावे, इस्राएली आन परमप्रभुम इन कली ‘गो इन कली इजीप्त रागी वाइलीम वाइल दुम्तीक रे प्रोंइशा गुंइशा पिक्ता। 9 गो इन कली इजीप्त डा मुर आन गुइ रे नु इन कली श्येत गेब मुर आन गुइ रे प्रोंइशा चाक्ता। मेको इन कली दिप्ब नेल्ल आन कली इन डोंइती रे खेरताक्मी। मिनु मेको आन रागी इन कली गेता। 10 मिनु गो इन कली गो परमप्रभु यावे, इन परमप्रभु नड। गेपुकी एमोरी आन रागीमी बाक्तीनी हना यो, मेको आन देवी देवता आन कली ठेयब मसेलीन”। तन्न गे आं लोत्र मनेनी” दे मेको परमप्रभु यावे आ लोत्र पाइबमी माइक्मी बाक्त।

### गिदोन कली ब्रेशो

11 मिनु परमप्रभु यावे आ स्वर्ग डा गेय पाइब जाक्शा, ओफ्रा सहर आ नेक्था बाक्शो ठेयब रवा आ पुंम निस्से बाक्त। मेको रू अबीएजेर आ मुर योआश आ रू बाक्माक्त। योआश आ तौ गिदोन चहिं मिदयान डा मुरपुकी रे खुइक्चा कली अडगुर खाक्तीकेमी चेरब तुम्ना तुम्न बाक्मा बाक्त। *यहोसु* १७:२ 12 मिनु परमप्रभु यावे आ स्वर्ग डा गेय पाइब मेको आ डोंइती गूशा मेको कली “गे महिंथु लडाइ पाइब मुर, परमप्रभु यावे गे नु बाक्ब” देंमाक्त। 13 मिनु गिदोनमी मेको कली “हजुर, परमप्रभु यावे गोपुकी नु बाक्त हना, आंइ कली मारदे ओदैशो दुम्मे? मिनु मेको आ छक लाक्चा डा गेय नेल्ले ते बाक्नीमी? आंइ किकी पिपीपुकीमी ‘परमप्रभु यावेमी आंइ कली इजीप्त रागी रे गुंइशा पिश्शो’ दे मर्दमा डा? तन्न मुल परमप्रभु यावेमी आंइ कली प्रोंइतु। मिनु आंइ कली मिदयान डा मुर आन गुइमी गेपु” देंमाक्त।

14 मिनु परमप्रभु यावे मेको गे लेशशा “गे महिं नु बोल्यो बाक्नेवे। मोपतीके लावो। इस्राएली आन कली मिदयान डा मुर आन गुइ रे प्रोनो। गो इ कली सोइक्नुड” देंमाक्त। *न्यायाधीस* ६:३२; *१सामुएल* १२:११; *हिब्रू* ११:३२ 15 मिनु गिदोनमी “हजुर, गो दोपा इस्राएली आन कली प्रोंइने चाप्नुडा? आं खिं मनस्से आ थरमी नेल्ल क्येडा आइक्च बाक्ब। मिनु गो आं

आफ आ खिंमी यो नेल्ल क्येडा आइक्च मुर बाक्नुड” देंमाक्त। 16 मिनु परमप्रभु यावेमी मेको कली “गो गे नु बाक्नुड। मिनु गे मिदयानी नेल्ल आन कली साइक्नेवे” देंमाक्त। *प्रस्थान* ३:१२ 17 मिनु मेकोमी “गो इन डोंइती शिशी ताता हना, नु गे थमा पा गो नु लोत्र पाइब बाक्तीनी हना, आं कली चिन्ड का कोंइदीनी। 18 गो इन कली जचा मख्रेत्तु सम्म, गे एक रे मलन” देंमाक्त। मिनु मेकोमी “गे मजाक्डे सम्म गो एकेन बाक्नुड” देंमाक्त। *न्यायाधीस* १३:१५-१६ 19 मिनु गिदोन खिं ओवशा, क्यारश पाठा का ठीक पवा बाक्त। एफाह का फस के बोर्ब ओख्ती मसुप्शो शोब्ले चोवा बाक्त। मिनु श्ये डालोम कुर पा आ शेक्क चहिं बोस काम लुक्शा, ठेयब रवा आ पुंमी लाइश्शा, मेको कली ख्रेत्ता बाक्त। *एफाह का* २२ *लिटर पुक्तीक बाक्ब। एफाह का* ५ *पाथी खोदैशो बाक्ब। लेवी* ४:२८ 20 मिनु परमप्रभु आ स्वर्ग डा गेय पाइबमी “मेको श्ये नु बोर्ब ओख्ती मसुप्शो शोब्ले एको फुल्लु तारी वोतो। आ शेक्क चहिं आ तार मोतो” देंमाक्त। मिनु मोदैशोन पवा बाक्त। 21 मिनु नोले परमप्रभु यावे आ स्वर्ग डा गेय पाइबमी मेको श्ये नु शोब्ले कली आ गुइम बाक्शो कोक्केमी थिवा बाक्त। मिनु मेको फुल्लु रे पा मी गूशा, मेको श्ये नु बोर्ब ओख्ती मसुप्शो शोब्ले नेल्ल नेक्मा बाक्त। मिनु परमप्रभु यावे आ स्वर्ग डा गेय पाइब यो लमाक्त। *लेवी* ९:१४ 22 मिनु गिदोनमी “थमा पा परमप्रभु यावे आ स्वर्ग डा गेय पाइब बाक्माक्त” दे तुइक्ता बाक्त। मिनु “परमप्रभु, परमप्रभु यावे, आं कली वारच पाइय्यीनी। मुलाक्त परमप्रभु यावे आ स्वर्ग डा गेय पाइब कली आं नेक्थान ताता” देंमाक्त। *न्यायाधीस* १३:२२; *प्रस्थान* ३३:२०

23 मिनु परमप्रभु यावेमी “इ थुं नाइक्तो। महिनो। मारदे हना मबेक्नेवे” देंमाक्त। 24 मिनु गिदोनमी परमप्रभु यावे कली चढ़ेतीक का सेला बाक्त। मिनु आ नें “परमप्रभु यावे थुं नाइक्चा गेब बाक्ब” दे नें वोदा बाक्त। मेको चढ़ेतीक मुलाक्त सम्म अबीएजेर आ मुर आन ओफ्रा सहरम बाक्ब।

25 मेको नाक्दो परमप्रभु यावेमी गिदोन कली “इ आफ आ गोठ रे ७ बर्स दुम्शो ब्यफ चाक्को। इ आफ आ बाल देवता नु आ नेक्था बाक्शो अशेराह देवी आ शी के थाम प्रेशशा गेवो” देंमाक्त। *२राजा* ११:१८; *२राजा* २३:१२-१५ 26 मिनु “मेकेर परमप्रभु यावे, इ परमप्रभु कली आं दैशो खोदैशो पा चढ़ेतीक का सेलो। मिनु नोले आं कली मेको ब्यफ कली इ प्रेशशो अशेराह देवी आ शी के खोल्शो थाम तारी चोशा चढ़ेतीक का चढ़ेवो” देंमाक्त। 27 मिनु गिदोनमी आंम के १० जना गेय पाइब कली लाइश्शा, परमप्रभु यावे आ दैशो खोदैशो पवा बाक्त। मिनु नाक्त मेको गेय पचा कली आं आफ आ खिं डा मुर नु मेको सहर डा मुर आन कली तशा शुश हिंमाक्त। मोपतीके मेकोमी गेय नेल्ले नाक्दोमी पवा बाक्त।

28 मिनु मेको सहर डा मुरपुकी सुनी कना बोक्शा, बाल देवता आ चढ़ेतीके प्रेशशो, मेको आ नेक्था बाक्शो अशेराह देवी आ मूर्ति यो प्रेशशो नु गिदोनमी सेल्शो चढ़ेतीकेम नोले डा ब्यफ चढ़ेशो तामे बाक्त। 29 मिनु मेकोपुकीमी “एको सुम पवा, माइ?” दे हिल्लो पमुमा बाक्त। शुश हिल्लो पामे नोले योआश आ तौ गिदोनमी पाप्तु, दे तुइक्त्मे बाक्त। 30 मिनु सहर डा मुरपुकीमी योआश कली “इ तौ कली लाडगा गुंइदो। मेको बेक्चा माल्ब। मेकोमी बाल देवता आ चढ़ेतीक प्रेदा बाक्त। मिनु आ नेक्था बाक्शो अशेराह देवी आ मूर्ति पाइश्शो थाम यो खोला बाक्त। मोपतीके मेको कली साइक्चा माल्नीक” देंमा बाक्त। 31 मिनु योआशमी मेको आ नेक्था बाक्शो ग्रीब मुर नेल्ल आन कली “गेपुकी बाल देवता आ पबर्म ग्रीशो ननी? बाल देवता कली वारच पचा दाक्नीनी? सुम मेको कली वारच पाइबा, मेको दीसा सुनी सम्म साइक्चा पुंइसीब। आ चढ़ेतीक प्रेत्चा पुंइसीशो बाल देवता थमा पा देवता बाक्त हना, मेकोमी आंमान आ सक्ति कोंइदल” देंमाक्त। *१रजा* १८:२१-३९ 32 मेको नाक्त रे मेकोपुकीमी गिदोन आ नें येरूब-बाल, दे वोदमे बाक्त। मेको आ अर्थ “बाल देवता आंमान गिदोन कली आ सक्ति कोंइदल। मारदे हना गिदोनमी आ चढ़ेतीक प्रेशशो बाक्ब” देंमा बाक्त। *न्यायाधीस* ७:१ 33 मिनु मिदयानी, अमालेकी नु पूर्व डा मुरपुकी खुम्सीशा, हुल का दुम्मा बाक्त। मेकोपुकी यर्दन खोला शोक्शा, येजेल आ दिमम ताम्बु कीडमे बाक्त। 34 मिनु परमप्रभु यावे आ सोक्तीम गिदोन कली सुमा बाक्त। मिनु तुराही ताप्शा, अबीएजेर आ मुर नेल्ल आन कली “आं नोले खोतीन” दे ब्रेत्ता बाक्त। *न्यायाधीस* ३:१०; *न्यायाधीस* ११:२९; *न्यायाधीस* १३:२५

35 मिनु मनस्से आ थर आन बाक्तीकेमी लोव्र कुरब मुर सोइक्ता बाक्त। मिनु मेको आन कली “आं नोले खोतीन” दे ब्रेत्ता बाक्त। मिनु मोपा आशेर, जबूलून नु नाप्टाली आन बाक्तीकेम यो लोव्र कुरब मुर सोइक्ता बाक्त। मिनु मेको नेल्ल गिदोन कली गुम्थ जाक्मा बाक्त।

36 मिनु गिदोनमी परमप्रभु कली “गे देंनी बुदी आं कली इस्राएली आन कली प्रॉइब सेल्लतीनी हना, 37 गो भेडा आ ऊन कली खलामी वोइक्नुड। मेको खला डा ऊन कली ला सीतमी जिश्शो नु एर ओंथ डा खप चहिं मजिश्शो बाक्त हना, इन देंशो लोव्र, गे इस्राएली आन कली प्रॉइचा, दे आं कली ब्रेत्तीनी, देंशो लोव्र थमा बाक्ब, दे तुइक्नुड” देंमाक्त। 38 मिनु मेको आ देंशो खोदेंशोन दुम्माक्त। मेको आ सुनी बोक्शा मेको ऊन रे चिरशा, बोस का ब्वाक्कु गुइदा बाक्त। एर ओंथ डा खप चहिं मजिश्शो बाक्माक्त। 39 मिनु लेंशा गिदोनमी परमप्रभु कली “गो नु मगाइक्तीन। मिनु आं कली चिनु लोव्र का देंचा गेन। गो इन कली लेंशा पुंइनुड। आं कली खेयप का मेको ऊन सोव्रशो नु एर ओंथ डा खप चहिं जिप्पाइश्शा कोंइदीन” देंमाक्त। उत्पत्ती १८:३० 40 मिनु परमप्रभुमी मेको नाक्दो यो गिदोन आ देंशो खोदेंशो पवा बाक्त। खप ला जिम्माक्त, मेको ऊन चहिं सोव्रशो बाक्माक्त।

गिदोन आ मुरपुकीमी ग्राशो।

7 गिदोन कली येरूब-बाल यो देंबाक्तेक्म। मिनु गिदोन नु आ मुर नेल्ले सुनी कना बोक्शा डा मिन हारोद सहर डा ब्वाक्कु बुक्तीके आ नेक्था ताम्बु कीडमे बाक्त। मिदयान डा मुरपुकीमी चहिं मेको आन उत्तर गे डा मोरेह डांडा आ नेक्था डा दिंममी ताम्बु कीडमे बाक्त। न्यायाधीस ६:३२ 2 मिनु परमप्रभु यावेमी गिदोन कली “गे नु बाक्शो मुरपुकी माल्शो क्येडा शुश बाक्नीम। गो मिदयान डा मुर आन कली मोदेंशो शुश मुर आन गुइमी गेता हना, इस्राएलीपुकीमी आं कली प्रेंशा ‘गो आंमा आंइ सक्तिमी मिदयान डा मुर आन कली ग्राशो नकी’ दे ठेयब लेल्नीम। 3 मोपतीके मुल गे मेको नेल्ल आन कली ‘सुइ मुर हिंशा खिंखि पाइब बाक्तेक्म हना, मेको मुर आन खिं लेत्वा माल्नीम’ दे नैपतो” देंमाक्त। मिनु २२ हजार आन खिं लेश्शा, १० हजार इस्राएली ला लीमा बाक्त। ब्यवस्था २०:८ 4 मिनु परमप्रभु यावेमी गिदोन कली “मुल यो शुश मुर बाक्नीम। मोपतीके मेको आन कली उइ खोलामी लतो। मेकेर गो मुर योव्रशा गेनुड। गो इ कली ‘एको मुर लाइब’ देंती हना, ‘मेको मुर गे नु लचा माल्ब। एको मुर गे नु मलाइब’ देंती हना, मेको गे नु लचा मलाइब” देंमाक्त। 5 मिनु गिदोनमी मुर आन कली उइ खोलामी लाइक्मी बाक्त। मिनु परमप्रभु यावेमी गिदोन कली “सु सुमी बाप्शा, खोला डा ब्वाक्कु कुचुममी तुक्शो खोदेंशो पा लेंमी तुक्शा तूनीमी, मेको आन कली एर वोतो। सु सुम चहिं खोला डा ब्वाक्कु पोक्च थेक्शा गुइम तूनीमी, मेको आन कली ओंथ वोतो” देंमाक्त। 6 मिनु कुचुम खोदेंशो पा ब्वाक्कु तुक्शा तूबपुकी सहे सां दुम्मा बाक्त। मिनु अरु नेल्लेमी पोक्च थेक्शा आन गुइमी तूडमे बाक्त। 7 मिनु परमप्रभु यावेमी गिदोन कली “एको सहे सां ब्वाक्कु तुक्शा तूब मुर रे पा मिदयानी आन गुइ रे प्रॉइनुड। लीशो आन कली आंम आंम खिंमी लचा गेमी” देंमाक्त। १सामुएल १४:६ 8 मिनु मुरपुकीमी मेको आन बुत लाम्ज नु तुराही वोइश्शा, मेको आन खिं गाक्मा बाक्त। गिदोनमी मेको सहे सां कली वोइक्मी बाक्त। मिदयानी आन बाक्तीक चहिं मेको आन क्येडा उइ दिंममी बाक्माक्त।

9 मिनु मेको नाक्दो परमप्रभु यावेमी गिदोन कली “बोक्को, मिदयानी आन बाक्तीके ब्रुपो। मारदे हना गो मेको आन कली इ गुइमी गेता। 10 तन्न हिंनेवे हना, इ गेय पाइब पुराह कली लाइश्शा ब्रुपो। 11 मिनु लशा, मेको आन लोव्र पशो नेनो। मेको आन लोव्र नेंनी नोले, मेको आन कली लडाइ तोचा महिंनेवे” देंमाक्त। मिनु मेको आ गेय पाइब पुराह नु मिदयानी आन डॉइती डा ताम्बु आ नेक्था लमाक्त। मेकेर लडाइ पाइबपुकी बाक्शो बाक्मा बाक्त। 12 मेको मिदयानी, अमालेकी नु पूर्ब डा थर डा मुर नेल्ल शुश सल्ला माले खोदेंशो पा दिंममी बाक्शो बाक्मा बाक्त। मेको आन दलओंठ ठेयब समुन्द्र डा बाल्वा खोदेंशो हिक्ने मचाप्चा डा पा शुश बाक्मा बाक्त। 13 मिनु गिदोन मेको आन ताम्बु आ नेक्था जाक्दीम्मेनु, मेकेर डा मुर कामी आ वारच कली आ डोमु शोव्रडा बाक्त। मेकोमी “गो आ डोमुमी क्योव्रज शोब्ले

का गुलुल पा लोकसीशा, मिदयानी आन बाक्तीकेमी जाक्शा, मेको आन ताम्बु चिप्शो ताता” देंमाक्त। 14 मिनु आ वारचमी “थमा पा, मेको इस्राएली योआश आ तौ गिदोन आ तरवार बाक्ब। परमप्रभुमी मिदयान नु मुर नेल्ले आन कली मेको आ गुइमी गेप्तु” देंमाक्त।

15 मिनु गिदोनमी डोमु नु मेको आ अर्थ नेंशा डा मिन परमप्रभु यावे कली ठेयब सेला बाक्त। मिनु इस्राएली आन बाक्तीकेम लेश्शा “बोक्कीन, परमप्रभु यावेमी मिदयानी नेल्ल आन कली इन गुइमी गेप्तु” देंमाक्त। 16 मिनु मेको सहे सां मुर आन कली, हुल सांमी योक्गा बाक्त। मिनु नेल्ल आन कली का का पा तुराही नु आगा रांको वोइश्शो शेत्थ गर का का गेमी बाक्त। 17 मिनु “आं कली कोव्रडीन। आं खोदेंशो पने। गो मेको आन ताम्बु आ नेक्था जाक्दीशा, मार मार पाइनुडा, गे यो मोदेंशो पने। 18 मिनु गो नु बाक्ब हुलमी गेना तुराही ताप्नीमी, मेना गे यो आन बाक्तीक एर ओंथ इन तुराही ताप्शा ‘परमप्रभु यावे कली नु गिदोन कली’ दे ठेयब सेंदा पा ग्रीडीन” देंमाक्त। 19 गिदोन नु मेको नु बाक्ब सहे का मुरपुकी क्येर नाक्दोमी मिदयान डा मुर आन बाक्तीक आ नेक्था जाक्दीम्मा बाक्त। मेको आन खाल पाइब नक फांइसीशो बाक्मा बाक्त। मिनु गिदोन आ मुरपुकीमी तुराही ताप्शा, आन गुइमी कुरशो शेत्थ गर प्रोल्मे बाक्त। 20 मोपा मेको हुल सांमीन तुराही ताप्शा, आन कुरशो गर प्रोल्मे बाक्त। आन पेरा गुइमी रांको नु ग्युरा गुइमी तुराही कुरशा “परमप्रभु यावे कली तरवार का नु गिदोन कली तरवार का” दे ग्रीमा बाक्त। 21 मिनु गिदोन आ मुर नेल्ल मेको आन बाक्तीक एर ओंथ राप्शा बाक्मा बाक्त। मिदयान डा लडाइ पाइबपुकी चहिं नेल्ल वाइ ब्रेश्शा प्रोक्मा बाक्त। 22 मिनु मेको सहे सां मुरुमी तुराही ताप्मेनु, परमप्रभु यावेमी मेको मिदयान डा मुर आन दातेमी साइक्मुपाइक्मी बाक्त। मिनु मिदयान डा लडाइ पाइबपुकी सेरेराह गे बेथ-शित्ता सम्म प्रोक्मा बाक्त। मेको आबेल-मेहोलाह आ सांद तब्बाथ सहर आ नेक्था सम्म प्रोक्मा बाक्त। भजन संग्रह ८३:१०; यसैया ९:३; यसैया १०:२६ 23 मिनु गिदोनमी नाप्टाली आ थर, आशेर आ थर नु मनस्से आ थर डा मुर आन कली ब्रेश्शा, मिदयान डा मुर आन कली खेदा पपदा बाक्त।

24 मिनु गिदोनमी एफ्राइम डा पहाडी रागीम बाक्ब मुर आन कली लोव्र सोइक्ता बाक्त। मार लोव्र सोइक्ता बाक्त, देंशा हना “उइ ब्रुप्शा, मिदयानी आन कली सतीन। बेथ-बाराह सम्म यर्दन डा लांमी प्रोक्चा मगेन” दे लोव्र सोइक्ता बाक्त। मिनु मेको ब्रेश्शो एफ्राइम आ थर डा मुरपुकीमी बेथ-बरा डा ब्वाक्कु रे यर्दन डा शोक्तीक सम्म डा लां तेक्गामे बाक्त।

25 मेकोपुकीमी मेको मिदयानी आन कली खेदा पस डा पस पा आन कप्तान निक्शी ओरेब नु जेयब कली ग्याइक्तमे बाक्त। मिनु मेकोपुकीमी ओरेब कली ओरेब आ फुल्लु तारी नु जेयब कली आ अडगुर खाक्तीक कोलमी सदमे बाक्त। मिनु नोले मेकोपुकीमी ओरेब नु जेयब आस पिया क्योरशा, यर्दन आइक्वी हांम गिदोन आ बाक्तीकेम चाक्गामे बाक्त।

गिदोन नु एफ्राइम आस मुर

8 मिनु एफ्राइम आ थर डा मुरपुकीमी गिदोन कली “मारदे आंइ कली ओदेंशो पाइनीनी? मिदयान डा मुरपुकी नु लडाइ पथ लनीनु, मारदे आंइ कली मब्रेन्नी?” देंमा बाक्त। मिनु गिदोन कली शुश दोस गेशा जिचा तोव्रमे बाक्त। 2 मिनु गिदोनमी “गो मार पडा डा? गे आं क्येडा ठेयब गेय पाइतीनी। मार, अबीएजेर आ मुरपुकीम मिदयान डा मुर नेल्ल आन कली प्रोक्पाइक्चा क्येडा एफ्राइम आ थर डा मुरपुकीमी मेको आन कली साइक्चा ठेयब मबाक्बा डा? 3 परमप्रभुमी मिदयान डा कप्तान ओरेब नु जेयब आस कली इन गुइमी गेशो बाक्ब। गेपुकीमी पशो खोदेंशो गो पडा डा?” देंमाक्त। मिनु आ लोव्र नेंशा आन गाइश्शो नांइसे बाक्त।

पिप आस कली ग्याइश्शो

4 मिनु गिदोन यर्दन खोला जाक्शा, शोक्से बाक्त। मिनु गिदोन नु मेको नु बाक्शो सहे सां मुरपुकी मिदयान डा मुर आन कली खेदा पा दशा योलक योलुक दुश्शा शोव्रलु बेक्शो बाक्मा बाक्त। 5 मिनु गिदोनमी सुक्कोथ डा मुर आन कली “आं मुर आन कली इक्का शोब्ले गेन। मारदे हना एकोपुकी दशा,

शोत्रलु बेक्शो बाक्नीम। मिनु गो मिदयान डा पिप जेबाह नु साल्मुन्ना आस कली खेदा पना पन बाक्नुड” दे पुना बाक्त। उत्पत्ती ३३:१७<sup>6</sup> तन्न सुक्कोथ डा ठेयब मुरपुकीमी “मार, जेबाह नु साल्मुन्ना आस कली गो ग्याइक्ने थुमी डा? इ लडाइ पाइब आन कली मारदे शोब्ले गेनीकी?” दे लोत्र लेत्मे बाक्त।<sup>7</sup> मिनु गिदोनमी “परमप्रभु यावेमी जेबाह नु साल्मुन्ना आस कली आं गुडमी गेपु हना, गो गोरशो रागी डा चोंक चूमी युक्ननी” देंमाक्त।<sup>8</sup> मिनु पेनुएल सहरमी लमाक्त। मिनु मेकेर डा मुर आन कली खाल का डा लोत्र पवा बाक्त। मिनु मेकेर डा मुरपुकीमी यो सुक्कोथ डा मुरपुकीमी खोदेशो पा लोत्र लेत्मे बाक्त।<sup>9</sup> मिनु पेनुएल डा मुर आन कली “गो रिम्शो पा लेडडा नोले, गो मेको इन लाइश्शो खिं प्रेशा गेनन्नी” देंमाक्त।

<sup>10</sup> मिनु जेबाह नु साल्मुन्ना १५ हजार लडाइ पाइब नु कारकोर सहरमी बाक्सा बाक्त। पूर्व डा लडाइ पाइब आन लीशो में मोशोन बाक्सा बाक्त। लाख का २० हजार लडाइ पाइब चहिं साइक्वा पुंडसमा बाक्त।<sup>11</sup> मिनु गिदोन नोबाह नु योग-बेहा आ पूर्वम बाक्शो ग्यापब लेयब आन गाक्तीक लां लशा, जेबाह नु साल्मुन्ना आस लडाइ पाइबपुकीमी लडाइ आ परबम मारेड ममिन्थु बाक्मानु, गिदोनमी लडाइ तोवा बाक्त।<sup>12</sup> मिनु जेबाह नु साल्मुन्ना चहिं मेक रे प्रोक्सा बाक्त। गिदोनमी मेको मिदयानी पिप आस कली खेदा पा ग्याइक्ता बाक्त। मोपतीके मेको आन लडाइ पाइब नेल्ले वाम ग्याम दुम्मा बाक्त।

<sup>13</sup> मिनु योआश आ तौ गिदोन लडाइ रे हेरेस इर गे लतीक लां रे लेम्माक्त।<sup>14</sup> मिनु सुक्कोथ डा ठिटा का कली ग्याइश्शा, मेको कली “सुक्कोथ डा ठेयब मुर नु खाल्पापुकी, सु सु बाक्नीमी?” दे हिल्लो पवा बाक्त। मिनु मेको ठिटापी सुक्कोथ डा ७० जना ठेयब मुर नु खाल्पा आन नें ब्रेक्शा गेवा बाक्त।<sup>15</sup> मिनु नोले गिदोन सुक्कोथ सहरम जाक्शा, मेकेर डा मुर आन कली “जेबाह नु साल्मुन्ना एकेर बाक्नीस। मेको आस परबम गेपुकीमी आं कली ‘मार, जेबाह नु साल्मुन्ना आस कली ग्याइक्ने थुमी डा? इ लडाइ पाइब आन कली गो मारदे शोब्ले गेनीकी डा?’ दे शुक्शी पाइतीनी” देंमाक्त।<sup>16</sup> मिनु सुक्कोथ सहर डा ठेयब मुर नु खाल्पा आन कली लाइश्शा, गोरशो रागी डा चोंक चूम युक्नी बाक्त।<sup>17</sup> पेनुएल सहरम बाक्शो लाइश्शो खिं कली प्रेशा, मेकेर डा वोंइश मुर आन कली साइक्मी बाक्त।

<sup>18</sup> मिनु गिदोनमी जेबाह नु साल्मुन्ना आस कली “गे निक्शीमी ताबोरमी साइश्शो मुर दोदेशो बाक्सा?” दे हिल्लो पाम्सी बाक्त। मिनु “इन खोदेशो बाक्तेक्म। पिप आ तौ खोदेशो बाक्सा बाक्त” दे लोत्र लेत्मे बाक्त।<sup>19</sup> मिनु गिदोनमी “मेकोपुकी आं लोकबपुकी बाक्तेक्म। आं आम आ तौपुकी बाक्तेक्म। मिनु मेको आन कली मसाइक्नी हना, परमप्रभु यावे ब्रोंइशा, बाक्शो खोदेशो पा, गो थमा पा, इस कली ब्रोंइचा गेड वा” दे माइक्सी बाक्त। गन्ती ३५:३१<sup>20</sup> मिनु आ जेठा तौ, येथेर कली “बोक्शा, एको आस कली सांडसी” देंमाक्त। तन्न आ तौ आल बाक्तीके हिंशा, आ तरवार मशोदा बाक्त।<sup>21</sup> मिनु जेबाह नु साल्मुन्नामी “आंमान बोक्शा, आंस कली सतीन। मारदे हना गे नु वोंइश मुर आ बोल बाक्ब” देंसा बाक्त। मिनु गिदोन बोक्शा, मेको निक्शी आस कली सांडसी बाक्त। मिनु मेको आस दलओठ आ शुरमी बाक्शो शुश क्येट लाइब गहनापुकी प्रुइश्शा लदा बाक्त।

### गिदोन आ गेय नेल्ल

<sup>22</sup> मिनु इस्राएलीपुकीमी गिदोन कली “गो आंइ कली मिदयानी रे पा प्रोंइतीनी। मुल आंइ कली हुकुम पाइब दुमीन। मिनु इन तौ नु इन चच नेल्ल आंइ सासन पाइब दुम्मल” देंमा बाक्त।<sup>23</sup> मिनु गिदोनमी “गो नु आं तौ ममाइ, तन्न परमप्रभु यावेमी इन कली हुकुम पाइब” देंमाक्त।<sup>24</sup> मेकोमी “गो इन कली थोत्रक का पुंडनुड, मार पुंडनुड देंशा हना, गेपुकीमी का का पा इन रोइश्शो रे पा नोफाम पांडतीक का का आं कली गेने” देंमाक्त। मारदे हना मेको आन जोरी सत्रु इश्माएली बाक्सा बाक्त। मेकोपुकीमी सुन के नोफाम पांडतीक पाइबाक्सा बाक्त।<sup>25</sup> मिनु मेकोपुकीमी “दुम्ब, गो मेको इन कली गेनीकी” देंमा बाक्त। मिनु वा का ब्रामे बाक्त। मिनु नेल्लेमी आंम के रोइश्शो सुन मेकेर वोदमे बाक्त।<sup>26</sup> मिनु अरु शुश क्येट लाइक्ब माला नु

आन दलओठ आ शुरम रेल्शो सुन के माला, पिप आन फेक्तीक वा मनाक्थु, मेकोमी पुंडशो सुन हजार का ७ सहे शेकेल दुम्माक्त। शेकेल का ११.५ ग्राम खोदेशो बाक्ब। गन्ती ३१:५०<sup>27</sup> मिनु गिदोनमी मेको सुन रे पा निसाफ पतीक ऊरीम नु थुम्मीम बाक्शो झोला का सेल्शा, मेको कली आ सहर ओफ्रामी वोदा बाक्त। मिनु इस्राएली नेल्लेमी मेको कली ठेयब सेल्शा, आंम कली दूली पाइब सेल्मे बाक्त। मेको गिदोन नु आ खिं डा मुर आन कली यो हेंथे पपाइक्चा कली बाक्साक्त। न्यायाधीस १७:५;<sup>28</sup> मोपा मिदयान डा मुरपुकी इस्राएली आन गुडमी दुम्शा, मेकोपुकीमी लेंशा लडाइ मपामे बाक्त। मिनु गिदोन बाक्म सम्म इस्राएल रागी ४० बर्स सम्म लडाइ रे नांइसे बाक्त। न्यायाधीस ३:११; न्यायाधीस ५:३१

### गिदोन बेक्शो

<sup>29</sup> मिनु नोले योआश आ तौ येरूब-बाल आ खिं लशा, बाक्शो बाक्साक्त।<sup>30</sup> गिदोन आ तौ ७० जना बाक्सा बाक्त। मारदे हना मेको आ मीश शुश बाक्सा बाक्त।<sup>31</sup> मेको आ कान्छी मीश शेकेम सहरमी बाक्साक्त। मेकोमी यो तौ का थिमाक्त। गिदोनमी आ तौ आ नें अबीमेलेक वोदा बाक्त।<sup>32</sup> मिनु योआश आ तौ गिदोन शुश खूशो दुम्शा बेक्साक्त। मेको कली आ आफ अबीएजेर आ तुरस ओफ्रा सहरमी थिम्मे बाक्त। न्यायाधीस ६:११<sup>33</sup> गिदोन बेक्म नोले इस्राएलीपुकीमी लेंशा बाल देवता कली ठेयब सेल्मे बाक्त। मेकोपुकीमी बाल-बेरीत कली आंम देवता सेल्मे बाक्त। न्यायाधीस २:११; न्यायाधीस ९:४<sup>34</sup> मिनु मेको आन कली एर ओंथ डा जोरी सत्रु रे प्रोंइब परमप्रभु यावे, आन परमप्रभु कली प्रेंदमे बाक्त।<sup>35</sup> येरूब-बाल माइश्शो गिदोन आ पशो रिम्शो गेय प्रेंशा, मेको आन खिं डा मुर आन कली ममिन्थु, आइक्च सेल्मे बाक्त। न्यायाधीस ९:५, ९, २४

### अबीमेलेक पिप दुम्शो

<sup>9</sup> येरूब-बाल आ तौ अबीमेलेक आ ममा आ खिं डा मुर आन बाक्तीक शेकेम सहरमी लमाक्त। मेकोमी आ मामा आन खिं डा मुर मौली नेल्ल आन कली न्यायाधीस ८:३१<sup>2</sup> “शेकेम सहर डा मुर नेल्ल कली लोत्र का हिल्लो पन। मार लोत्र हिल्लो पन देंशा हना ‘येरूब-बाल आ ७० जना तौ नेल्लेमी इन कली सासन पशो रिम्शो दय गोम इन कली सासन पशो रिम्शो?’ गो इन हुश बाक्नुड, दे मिन्तीन” देंमाक्त। न्यायाधीस ९:१८<sup>3</sup> मिनु आ मामापुकीमी मेको शेकेम डा मुर आन कली मेको लोत्र शोत्रडमे बाक्त। मिनु मुर नेल्लेमी “मेको आंइ लोकब बाक्ब” दे अबीमेलेक आ नोले खोइक्चा थुं पामे बाक्त।<sup>4</sup> मिनु मेकोपुकीमी अबीमेलेक कली बाल-बेरीत आ मन्दीर रे पा ७० शेकेल चांदी के क्येट गेमे बाक्त। मिनु मेकोमी मेको क्येट लाइश्शा, मरिम्शो पाइब मुर आन कली गेवा बाक्त। मिनु मेकोपुकी मेको आ नोले खोदमे बाक्त। न्यायाधीस ८:३३<sup>5</sup> मिनु मेको नेल्ल आ आफ आ खिं ओफ्रामी लमा बाक्त। मेकेर येरूब-बाल आ तौ नेल्ल आन कली फुल्लु का तारी क्योरशा सदमे बाक्त। तन्न येरूब-बाल आ कान्छा तौ योथाम खूइश्शा ब्रोंइमाक्त।<sup>6</sup> मिनु शेकेम नु बेथ-मिल्लो डा ठेयब मुर नेल्ल खुम्सीशा, शेकेममी बाक्शो ठेयब थाम आ नेक्था बाक्शो ठेयब रवा आ पुंमी अबीमेलेक कली पिप सेल्मे बाक्त। उत्पत्ती ३५:४; यहोसु २४:२६

### योथाम आ कथा

<sup>7</sup> मिनु ठेयब मुरपुकीमी मेको लोत्र योथाम कली नेंपदमे बाक्त। मेको लशा गेरीजीम डांडामी राम्माक्त। मिनु ठेयब सेंदामी “शेकेम सहरम बाक्ब ठेयब मुर नेल्ल, गे आं लोत्र नेंतीनी हना, परमप्रभुमी इन लोत्र नेंब।<sup>8</sup> काबु रवा नेल्ल खुम्सीशा, आंम कली पिप सेल्चा, दे लोत्र पमुमा बाक्त। मिनु मेकोपुकीमी तेल रवा कली ‘आंइ पिप दुमीन’ देंमा बाक्त।<sup>9</sup> तन्न तेल रवामी ‘मार, देवी देवता नु मुर आन कली ठेयब सेल्चाइक्ब आंम के रिम्शो तेल सेल्चा प्रोंइशा, गो रवा आन कली सासन पाइनुडा?’ देंमाक्त।<sup>10</sup> मिनु रवापुकीमी फोत्रशी रवा कली ‘गे आंइ पिप दुमीन’ देंमा बाक्त।<sup>11</sup> मिनु फोत्रशी रवामी ‘मार, आंम के रिम्शो जिज नु ब्रोत्रशो फल सेल्चा प्रोंइशा, गो रवा आन कली सासन पाइनुडा?’ देंमाक्त।<sup>12</sup> मिनु रवापुकीमी अडगुर बोट

कली 'गे आंइ पिप दुमीन' देंमा बाक्त। 13 मिनु अडगुर बोटमी 'मार, देवी देवता नु मुर आन कली ग्येरपाइक्ब आं के अडगुर शांबु सेल्चा प्रॉइशा, गो रवा आन कली सासन पाइनुडा?' देंमा बाक्त। 14 मिनु नोले रवापुकीमी चू रवा कली 'गे आंइ पिप दुमीन' देंमा बाक्त। २२राजा १४:९ 15 मिनु चू रवामी 'गोपुकीमी थमा पा, आं कली इन पिप सेल्चा दाक्नीनी हना, आं नेक्था जाक्शा, आं पुंम बाक्कीन। मबाक्तीनी हना, चू रवा रे पा मी गूशा लेबानोन डा ठेयब रवा नेल्ल आन कली खतम सेल्ब' देंमा बाक्त" दे कथा सेल्शा ठेयब सेंदा पा देंमा बाक्त। 16 मिनु योथाममी "मुल नेनीन, गे अबीमेलेक कली थमा सुइश्शा नु रिम्शो थुंमी पिप सेल्तीनी हना, दुम्ब। मिनु येरूब-बाल नु आ खिं डा मुरुम इन कली रिम्शो पशो खोदेंशो पा, गेमी यो मेको आन कली रिम्शो पाइतीनी हना, दुम्ब। 17 आं आफोमी बेक्नुड, दे महिंधु, लडाइ पा इं कली मिदयानी रे पा प्रॉइतु। 18 तन्न मुलाक्त आं आफ आ खिं डा मुर आन कली थम मरिम्शो पाइतीनी। मेको आ ७० जना तौ आन कली फुल्लु तारी क्योरशा साइक्तीनी। मेको आ वाइलीम आ तौ अबीमेलेक कली शेकेम डा पिप सेल्तीनी। मारदे हना मेको इन लोकब बाक्ब। 19 मिनु मुलाक्त गोपुकीमी येरूब-बाल नु आ खिं डा मुर आन कली रिम्शो पा मान पशो बाक्तीनी हना, गे अबीमेलेक नु ग्येरसीन। मिनु अबीमेलेक यो गोपुकी नु ग्येरसेक्ल। 20 तन्न मोदेंशो मदुस्त हना, अबीमेलेक रे मी गूशा, शेकेम नु बेथ-मिल्लो डा मुर आन कली खतम पोक्गल। मिनु शेकेम नु बेथ-मिल्लो डा मुर रे मी गूशा अबीमेलेक कली खतम पोक्गल" देंमा बाक्त। न्यायाधीस ९:५७ 21 मिनु योथाम मेकेर रे प्रोक्शा, बेयर माइश्शो सहरमी जाक्दीम्मा बाक्त। मिनु मेको आ लोकब अबीमेलेक तशा हिंशा, मेकेरेन बाक्मा बाक्त।

#### अबीमेलेक नु शेकेम डा मुरपुकी

22 अबीमेलेकमी इस्राएली आन कली बर्स सां सासन पवा बाक्त। 23 मेना परमप्रभुमी अबीमेलेक नु शेकेम डा ठेयब मुर आन दातेमी जिपाइक्वा कली मरिम्शो जिपाइक्ब वोल का सोइक्ता बाक्त। मिनु शेकेम डा ठेयब मुरपुकीमी मेको कली जोल पा मरिम्शो पामे बाक्त। १सामुएल १६:१४; १सामुएल १८:१०; १सामुएल १९:९ 24 मिनु परमप्रभुमी येरूब-बाल आ ७० जना तौ आन कली हुश खाक्श पोक्तीके, अबीमेलेक नु मेको कली वारच पाइब शेकेम डा ठेयब मुर आन कली क्येक्क लेत्वा कली मोदेंशो जिप्पाइक्ब वोल का सोइश्शो बाक्मा बाक्त। उत्पत्ती ९:६ 25 मिनु शेकेम डा ठेयब मुरपुकीमी अबीमेलेक कली काइ मदाक्थु, साइक्वा, दे डांडाम बाप्चा कली मुर सोइक्तमे बाक्त। मेकोपुकीमी लांम गाक्ब आन मारेइ मारेइ रोइक्तमे बाक्त। मिनु लांम बाप्शो बाक्नीम, दे अबीमेलेक कली तुइक्पदमे बाक्त।

26 मिनु एबेद आ तौ गाल नु आ खिं खिं डा मुर शेकेममी बाक्वा कली जाक्मा बाक्त। मिनु शेकेम डा ठेयब मुरपुकीमी गाल कली थमा सुइश्शा, दाक्वा गोव्रमे बाक्त। 27 शेकेम डा मुर आन अडगुर रूमी लशा, अडगुर सेक्शा कोलमी खाक्गामे बाक्त। मिनु आन देवता आ मन्दीरमी चाड मानेचा कली लमा बाक्त। मिनु मेकेर जशा तूशा अबीमेलेक आ पर्बम शुक्शी लोत्र पामे बाक्त। 28 मिनु एबेद आ तौ गालमी "अबीमेलेक सु बाक्बा डा? मार, मेको येरूब-बाल आ तौ ममाइ डा? मेको नु आ लडाइ पाइब आन कप्तान जेबुलमी शेकेम आ आफ हमोर आ मुर आन कली गेय मपामे? गो शेकेम डा मुर, मारदे मेको कली गेय पाइनीकी? उत्पत्ती ३४:२ 29 गो शेकेम डा मुर आन कली सासन पाइब बाक्शो नड हना, गो अबीमेलेक कली क्याम्दु वा। गो मेको कली 'लडाइ पाइब शुश सेल्शा, लडाइ पय' देड वा" देंमा बाक्त।

30 मिनु सहर डा सासन पाइब जेबुलमी एबेद आ तौ गाल आ देंशो नेंशा, शुश गाइक्ता बाक्त। 31 मिनु मेकोमी खूइश्शोमी अबीमेलेक कली लोत्र सोइक्ता बाक्त। मार लोत्र सोइक्ता बाक्त देंशा हना "एबेद आ तौ गाल नु आ खिं खिं डा मुर शेकेममी जाक्शा बाक्शा, सहर डा मुर आन कली इन पर्बम मरिम्शो लोत्र पना पन बाक्नीम। 32 मोपतीके गे इन लडाइ पाइब नु नाक्दोन बोक्शा, सहर डा लाडगा डा रूमी रिम्दीन। 33 मिनु सुनी कना नां दाप्ची ना सहर कली लडाइ तोन। मिनु गाल नु आ मुरपुकी लाडगा गूमानु, मेको आन कली मार पचा माल्नीनी, मेको पन" देंमा बाक्त।

34 मिनु अबीमेलेक नु आ लडाइ पाइब नाक्दोन बोक्शा, ४ हुल दुम्शा, शेकेम आ लाडगाम लडाइ तोचा कली बाप्शा बाक्मा बाक्त। 35 मिनु एबेद आ तौ गाल सहर डा लाडगा लशा, सहर डा ओव्रतीक लाप्चोमी राप्शा बाक्मा बाक्त। मिनु अबीमेलेक नु आ लडाइ पाइब आन बाप्तीक रे गूमा बाक्त। 36 मिनु गालमी मेको आन कली तशा, जेबुल कली "मुरपुकी डांडा रे ब्रुम्ना ब्रुम्न बाक्नीम" देंमा बाक्त। मिनु जेबुलमी "मेको मुर ममाइ, डांडा आ वांकु बाक्ब। मेको मुर खोदेंशो तांइसीनीम" दे लोत्र लेत्ता बाक्त। 37 मिनु लेंशा गालमी "कोव्रडीन, मुरपुकी रागी आ दाते रे ब्रुम्ना ब्रुम्न बाक्नीम। मुर आ हुल का चहिं चिडगा कोइतीक रवा रे यिना यिन बाक्नीम" देंमा बाक्त। इजीकीएल ३८:१२ 38 मिनु जेबुलमी "इ डॉइती डा ठेयब लेश्शो लोत्र, ते लाक्गा? गे 'अबीमेलेक सु बाक्बा? गो मारदे मेको कली गेय पाइनीकी?' देंशो नवे। इ मदाक्शो मुर मेको मनमी डा? मुल लावो। मेकोपुकी नु लडाइ पावो" देंमा बाक्त। 39 मोपतीके गालमी शेकेम डा ठेयब मुर आन डॉइती लशा, अबीमेलेक नु लडाइ पवा बाक्त। 40 तन्न अबीमेलेकमी मेको लडाइ ग्रामा बाक्त। गाल चहिं प्रोक्मा बाक्त। मिनु शुश मुर साइक्वा पुंइसमा बाक्त। सहर डा ठेयब लाप्चो सम्म शुश मुर शोल्मो पा बेक्शो बाक्मा बाक्त। 41 मिनु अबीमेलेक लशा, अरुमाह माइक्तीक सहरम बाक्मा बाक्त। जेबुलमी चहिं गाल नु आ खिं खिं डा मुर आन कली शेकेम रे खेरमी बाक्त।

42 आ दीसा शेकेम डा मुरपुकी लाडगा रूमी लमा बाक्त। मिनु मुरपुकीमी मेको लोत्र अबीमेलेक कली नेंपदमे बाक्त। 43 मोपतीके आ लडाइ पाइब आन कली हुल सां पा योक्शा, सहर मेर डा रूमी बाप्शा, बाक्पदा बाक्त। मिनु मुरपुकी सहर रे गूशा पिशो तशा, मेको आन कली साइक्मी बाक्त। 44 अबीमेलेक नु आ हुल रीब पा डॉइती बारमा बाक्त। मिनु सहर ओव्रतीक ठेयब लाप्चोमी लडाइ पचा सासमा बाक्त। अरु हुल निक्शी चहिं पिशा, रूमी बाक्शोपुकी नु लडाइ पा मेको आन कली सदमे बाक्त। 45 अबीमेलेकमी सुनी रे नाक्दो सम्म लडाइ पा, मेको सहर कली आंम के सेला बाक्त। मेकेर डा मुर नेल्ल आन कली साइक्मी बाक्त। मिनु सहर खतम पोक्शा, हिक्सी फ्रवा बाक्त।

46 मिनु शेकेम डा बोल्यो दरवार डा ठेयब मुरपुकीमी सहर खतम दुम्शो नेंशा, मेकोपुकी एल-बेरीत देवता आ बोल्यो खिं आगा लमा बाक्त। न्यायाधीस ८:३३ 47 मिनु मुरपुकीमी "शेकेम डा बोल्यो दरवार डा मुर नेल्ल बुक्शा बाक्नीम" दे अबीमेलेक कली नेंपदमे बाक्त। 48 मिनु अबीमेलेक नु आ लडाइ पाइब सल्मोन डांडामी लमा बाक्त। मेकोमी खा लाइश्शा, शाक्श क्योरशा, बालाम लाप्शा कुरा बाक्त। आ लडाइ पाइब आन कली "गे आं कली मार पशो तनी, रीब पा मोदेंशो पन" देंमा बाक्त। 49 मोपा लडाइ पाइब नेल्लेमी मोदेंशो पा शाक्श क्योरशा, यित्मे बाक्त। मिनु अबीमेलेक आ नोले खोदमे बाक्त। मेको शाक्श लाइश्शा, एल-बेरीत आ बोल्यो खिंम तेल्शा, मी सुइक्तमे बाक्त। मिनु शेकेम डा बोल्यो दरवारम बाक्ब नेल्ल बेक्मा बाक्त। मेकेर हजार का खोदेंशो वॉइश मुर नु मीश मुर बाक्शो बाक्मा बाक्त।

#### अबीमेलेक बेक्शो

50 मिनु मेकेर रे अबीमेलेक थेबेस गे लमा बाक्त। मिनु मेको थेबेस सहर कली लडाइ पा आंम के सेला बाक्त। 51 मेको सहर आ दातेमी बोल्यो दरवार का बाक्मा बाक्त। मिनु सहर डा मुर नेल्ले, वॉइश मुर नु मीश मुरपुकी मेकेर खूइश्शा, आन नोले लाप्चो चोक्शा, नेल्ल क्येडा तला तारी कौसीमी डोइश्शा बाक्मा बाक्त। 52 मिनु अबीमेलेक मेको बोल्यो दरवार आ नेक्था जाक्शा, लडाइ तोवा बाक्त। मिनु बोल्यो दरवार कली मी सुइक्वा, दे दरवार डा लाप्चो आ नेक्था जाक्दीम्मा बाक्त। 53 मेना मीश मुर कामी तला डा यात तोक्शा, मेको आ पिशा प्रोल्शा गेवा बाक्त। 54 मिनु अबीमेलेकमी रीब पा आ या कुरब कली ब्रेश्शा "मुरपुकीमी 'मीश मुर कामी मेको कली साइक्वु' दे मदेमल, दे रीब पा इ तरवार शोइश्शा, साइय्मी" दे मदा बाक्त। मिनु आ या कुरबमी तूदानु, अबीमेलेक बेक्मा बाक्त। १सामुएल ३१:४; २सामुएल ११:२१ 55 मिनु इस्राएल डा मुरपुकीमी अबीमेलेक बेक्शो तशा, नेल्ल आंम आंम खिं गे लेम्मा बाक्त। 56 मोपा परमप्रभुमी अबीमेलेक आ आफ कली पशो पाप, आ ७० जना लोकब आन कली साइश्शो आ क्येक्क लेत्ता बाक्त।

57 मिनु परमप्रभुमी शेकेम डा मुर आन मरिश्शो पशो आ पर्वम क्येक्क लेत्ता बाक्त। मेकोपुकीमी येरूब-बाल आ तौ योथाम आ सराप रमा बाक्त।  
न्यायाधीस ९:२०

तोला नु याइर निसाफ पाइब दुश्शो

10 अबीमेलेक आ नोले इस्साकार आ थर डा, पुआ आ तौ दोदो आ चच तोला माइश्शो मुर इस्साएली आन कली प्रॉइचा कली जाक्माक्त। मेको एफ्राइम डा पहाडी रागी शामीरमी बाक्शो बाक्माक्त।  
उत्पत्ती ४६:१३; गन्ती २६:२३<sup>2</sup> तोलाम २३ बर्स सम्म इस्साएली आन कली निसाफ पशो बाक्माक्त मिनु नोले बेक्माक्त। मिनु मुरपुकीमी मेको कली शामीरमी थिम्मे बाक्त।

<sup>3</sup> तोला आ नोले गिलाद डा मुर याइरम २२ बर्स सम्म इस्साएली आन कली निसाफ पशो बाक्माक्त। गन्ती ३२:४१<sup>4</sup> मेको आ तौ ३० जना बाक्मा बाक्त। मेकोपुकी ३० ओटा गधाम डोइक्बाक्मा बाक्त। मिनु गिलाद डा ३० ओटा सहर मेको आन के बाक्माक्त। मुल सम्म मेको सहर आन नें हव्वोथ-याइर देंनीम। मेको गिलाद रागीम बाक्नीम। ब्यवस्था ३:१४<sup>5</sup> मिनु नोले याइर बेक्माक्त। मिनु मुरपुकीमी मेको कली कामोनमी थिम्मे बाक्त।

अम्मोनीपुकीमी श्येत गेशो

<sup>6</sup> मिनु इस्साएलीपुकीमी लेंशा परमप्रभु यावे आ डोंइती मार मरिश्शो बाक्मे, मेको पामे बाक्त। मेकोपुकीमी बाल, अशतारोथ नु देवी देवता आन कली ठेयब सेल्मे बाक्त। मिनु अराम, सीदोन, मोआब नु अम्मोनी नु पलिस्ती आन देवी देवता कली यो ठेयब सेल्मे बाक्त। मोपा परमप्रभु यावे कली प्रॉइशा, मेको कली ठेयब मसेल्मे बाक्त।<sup>7</sup> मोपतीके परमप्रभु यावे मेकोपुकी नु गाइश्शा मेको आन कली पलिस्ती नु अम्मोनी आन गुइमी गेवा बाक्त।<sup>8</sup> मेको बर्समी मेकोपुकीमी इस्साएली आन कली थाम्पा श्येत गेशा, साप्पा दिप्मे बाक्त। मिनु यर्दन खोला आ आइक्वी हांबु, पूर्व गे गिलाद माइश्शो एमोरी आन रागीमी बाक्ब इस्साएली आन कली १८ बर्स सम्म थाम्पा श्येत गेशा दिप्मे बाक्त।<sup>9</sup> अम्मोनीपुकीमी ओथ हाम ला ममाइ, यर्दन आइक्वी हांबु यो शोक्शा, यहूदा आ थर, बेन्यामीन आ थर नु एफ्राइम आ थर डा मुर आन कली लडाइ तोव्रमे बाक्त। मिनु इस्साएलीपुकीमी शुश श्येत जामे बाक्त।

<sup>10</sup> मिनु इस्साएलीपुकीमी परमप्रभु यावे कली “वारच पाइय्की। पाप पाइतक। आंइ परमप्रभु, इन कली प्रॉइशा, बाल देवी देवता आन कली पूजा पाइतक” देमा बाक्त। १सामुएल १२:१०<sup>11</sup> मिनु परमप्रभु यावेमी इस्साएली आन कली “डोंइती इन कली इजीप्त डा मुर, एमोरी, अम्मोनी नु पलिस्ती आन गुइ रे प्रॉइतन्नी।<sup>12</sup> मिनु सीदोन डा मुर, अमालेक आ मुर नु मोआबीपुकीमी इन कली दिप्पेनु ‘वारच पाइय्की’ दे ब्रेत्तीनी। मेना इन कली मेको आन गुइ रे प्रॉइता।<sup>13</sup> तन्न गोपुकीमी आं कली प्रॉइशा, अरु देवी देवता आन कली पूजा पा ठेयब सेल्तीनी। मोपतीके मुल रे गो इन कली मप्रॉइनुड।<sup>14</sup> लने, इन योव्रशो देवी देवता आन कली थोन। मेकोपुकीमी इन कली इन श्येत रे प्रोन्मेक्ल” दे परमप्रभु यावेमी देमाक्त। ब्यवस्था ३२:३७-३८; येरमीया २:२८<sup>15</sup> तन्न इस्साएलीपुकीमी परमप्रभु यावे कली “गोपुकीमी पाप पाइतक। मोपतीके गे आंइ कली मार पचा दाक्नीनी, मेको पन। तन्न मुल आंइ कली प्रोनीन” दे पुन्मे बाक्त।<sup>16</sup> मिनु अरु देवी देवता आन कली ताइश्शा, परमप्रभु यावे कली ठेयब सेल्मे बाक्त। मिनु परमप्रभु यावेमी इस्साएली आन कली मेको क्येडा श्येत गेचा मगेमी बाक्त। यहोसु २४:२३; न्यायाधीस २:१८

<sup>17</sup> मिनु अम्मोनी लडाइ पचा कली खुम्सीशा, गिलादमी ताम्बु कीशा बाक्शो बाक्मा बाक्त। मिनु इस्साएली यो खुम्सीशा, मिस्पामी बाक्शो बाक्मा बाक्त। न्यायाधीस ११:२९<sup>18</sup> मिनु गिलाद सहरम बाक्ब इस्साएली लडाइ पाइब आन कप्तान गुम्मुशा “सुम अम्मोनी आन कली लडाइ तोचा गोइबा, मेकोमी गिलादम बाक्ब आन कली हुकुम पाइब” दे लोव्र पमुमा बाक्त।  
न्यायाधीस ११:६-१०

येप्ता निसाफ पाइब दुश्शो

11 गिलाद सहर डा येप्ता ठेयब नु बोल्यो लडाइ पाइब मुर बाक्माक्त। मेको गिलाद आ तौ तेल्लेम रे पा थिशो बाक्माक्त।

<sup>2</sup> मिनु गिलाद आ मीशेमी यो मेको के शुश तौ थिशो बाक्माक्त। मिनु मेकोपुकी कोल्शो दुश्शा, येप्ता कली खेरमे बाक्त। मेकोपुकीमी येप्ता कली “आंइ आफ आ खिमी इ के मारेइ यो अडस मबाक्ब। गे अको मीश आ तौ नवे” देमा बाक्त। उत्पत्ती २१:१०<sup>3</sup> मोपतीके येप्ता मेको आ लोक्बपुकी रे पा ब्रॉइचा कली प्रोक्शा, तोब रागीमी लशा बाक्शो बाक्माक्त। मिनु मरिश्शो पाइब मुरपुकी मेको नु गारशा, रोइक्थ, लमा बाक्त। न्यायाधीस ९:४; १सामुएल २२:२

<sup>4</sup> मिनु इच्का नोले अम्मोनीपुकीमी इस्साएली नु लडाइ पामे बाक्त।<sup>5</sup> मिनु लडाइ दुम्पेनु, गिलाद डा खाल्पापुकीमी तोब रागीमी बाक्शो येप्ता कली ब्रथ लमा बाक्त।<sup>6</sup> मेकोपुकीमी येप्ता कली “पिन, आंइ लडाइ पाइब आन ठेयब मुर दुमीन। मिनु गो अम्मोनी नु लडाइ पने चाप्तीकी” देमा बाक्त।

<sup>7</sup> मिनु येप्तामी मेको गिलाद डा खाल्पा आन कली “गोपुकीमी आं कली मदाक्थु, आं आफ आ खिं रे खेरतीनी। मुल श्येत जनी ना मारदे आं कली ब्रेत्तीनी?” देमाक्त।<sup>8</sup> मिनु मेको खाल्पापुकीमी येप्ता कली “मोपतीके गो इन कली गुथ्थ जाक्तक। मुल गोपुकी नु गाक्कीन। मिनु अम्मोनी नु लडाइ पा ग्राशा, गिलादमी बाक्ब नेल्ल आंइ ठेयब मुर दुमीन” देमा बाक्त।

न्यायाधीस १०:१८<sup>9</sup> येप्तामी मेको आन कली “गोपुकीमी आं कली अम्मोनी नु लडाइ पथ लेम्शा लाइक्तीनी नु परमप्रभु यावेमी मेको आन कली आं गुइमी गेप्टु हना, इन ठेयब मुर दुम्नुडा?” दे माइक्मी बाक्त।<sup>10</sup> मिनु गिलाद डा खाल्पापुकीमी येप्ता कली “परमप्रभु यावे गो आंइ दातेमी सांक्छी बाक्ब। गो इन देंशो खोर्देशो पाइनीकी” देमा बाक्त।<sup>11</sup> मिनु येप्ता गिलाद डा खाल्पापुकी नु लमाक्त। मेकेर डा मुरपुकीमी मेको कली ठेयब मुर नु लडाइ पाइब आन ठेयब मुर सेल्मे बाक्त। मिनु येप्तामी मिस्पामी परमप्रभु यावे आ डोंइती मेको लोव्र नेल्ल शोव्रडा बाक्त। न्यायाधीस ११:२९; न्यायाधीस १०:१७<sup>12</sup> मिनु येप्तामी अम्मोनी आन पिप कली “गे मारदे आंइ रागी कली लडाइ तोथ पीनीनी? गे नु आंइ दातेमी मार मरिश्शो बाक्बा?” दे हिल्लो पचा कली मुर सोइक्ता बाक्त।<sup>13</sup> मिनु अम्मोनी आन पिपमी येप्ता आ मुर आन कली “इस्साएलीपुकी इजीप्त रे जाक्शा, अरनोन खोला रे यब्बोक नु यर्दन खोला सम्म आंइ रागी लाइक्तेक्म। मेको रागी सिक्सी पा लेत्तीन” दे लोव्र सोइक्ता बाक्त।<sup>14</sup> मिनु येप्तामी लेंशा मुर सोइश्शा अम्मोनी आन पिप कली<sup>15</sup> “येप्ता आ लोव्र मार बाक्त देंशा हना, इस्साएलीपुकीमी गेनायो मोआबी आन रागी नु अम्मोनी आन रागी मलदेम। ब्यवस्था २:९, १९<sup>16</sup> इस्साएलीपुकी इजीप्त रे कुशा, गोरशो रागी रे लल समुन्द्र गे कादेश सहरम जाक्दीम्मा बाक्त।<sup>17</sup> मिनु एदोम डा पिप कली ‘इन रागी डा लां लचा गेकी’ दे लोव्र सोइक्तेमे बाक्त। तन्न एदोम डा पिपमी मेको लोव्र नेंसीन मनेना बाक्त। मिनु मोआबी आन पिप कली यो लोव्र सोइक्तेमे बाक्त। तन्न मेको यो मबिस्से बाक्त। मोपतीके इस्साएलीपुकी कादेशमी बाक्मा बाक्त। गन्ती २०:१४-२१

<sup>18</sup> मेकेर रे एदोम नु मोआब रागी हिरशा, गोरशो रागी रे मोआब आ नां दाप्तीक गे लमा बाक्त। मिनु अरनोन खोला आ नेक्था ताम्बु कीडमे बाक्त। मोआबी आन रागी मओव्रम। मारदे हना अरनोन मोआब आ सांद बाक्माक्त। गन्ती २१:१३<sup>19</sup> मिनु नोले हेश्बोनम बाक्शो एमोरी आन पिप सीहोन कली ‘इन रागी डा लां रे पा आंइ रागी सम्म लचा गेकी’ दे लोव्र सोइक्तेमे बाक्त। गन्ती २१:२१-३१<sup>20</sup> तन्न सीहोनमी इस्साएली आन कली मेकेर रे लाइनीम, दे थमा मसुदा बाक्त। मिनु मुर नेल्ल कली खुप्शा, याहासमी आन ताम्बु कीशा, इस्साएली नु लडाइ पामे बाक्त।<sup>21</sup> मिनु परमप्रभु यावे, इस्साएली आन परमप्रभुमी सीहोन नु आ मुर आन कली इस्साएली आन गुइमी गेमी बाक्त। मिनु मेकोपुकीमी मेको आन कली ग्राशा, आन रागीमी बाक्शो एमोरी आन रागी आंम के सेल्मे बाक्त।<sup>22</sup> मेकोपुकीमी अरनोन खोला रे पा यब्बोक खोला सम्म नु गोरशो रागी रे पा यर्दन खोला सम्म एमोरी आन रागी आंम के सेल्मे बाक्त।<sup>23</sup> मोपा



परमप्रभु यावे, इस्राएली आन परमप्रभुमी आंम मुर आन कली रिश्शो पचा, दे एमोरी आन कली खेरा बाक्त। मुल एको रागी लेंशा ताक्वा मगारनीनी। 24 इन देवता केमोशमी इन कली गेशो ताइनीनी ममाइ डा? परमप्रभु यावे, आंइ परमप्रभुमी मार गेबा, गो यो मेको ताइनीकी। गन्ती २१:२९ 25 मुल मार, गे मोआबी आन पिप सिप्पोर आ तौ बालाक क्येडा रिश्शो बाक्नीनी? मार, मेकोमी इस्राएली नु जिशा, मेको नु लडाइ पवा डा? गन्ती २२:२; यहोसु २४:९ 26 इस्राएलीपुकी सहे सां बर्स सम्म हेश्बोन नु आ एर ओंथ डा गाउंपुकी, आरोएर नु मेको आ एर ओंथ डा गाउंपुकी नु अरनोन आ नेक्था डा सहर नेल्लेम बाक्मा बाक्त। मारदे मेको क्येडा डोंइती इन के मसेल्नी? 27 गोपुकीमी इन कली मारेइ यो मरिश्शो मपशो। तन्न गेपुकीमी आं कली लडाइ तोशा, मरिश्शो पाइनीनी। मुलाक्ती परमप्रभु यावेमी इस्राएली नु अम्मोनी आन दातेमी निसाफ पाइब” दे येफतामी अम्मोनी आन पिप कली लोव सोइक्ता बाक्त। 28 तन्न अम्मोनी आन पिपमी येफतामी सोइश्शो लोव मारेइ खोदेंशो मलाक्माक्ता।

### येफतामी कसम पशो

29 मिनू परमप्रभु यावे आ सोक्तीम येफता कली सुमा बाक्त। मिनू गिलाद नु मनस्से आन रागी लाक्शा, गिलाद डा मिस्पा जाक्दीम्माक्ता। मिनू मेकेर रे अम्मोनी आन रागी लमाक्ता। न्यायाधीस ६:३४ 30 येफतामी परमप्रभु यावे कली कबल का पवा बाक्त। मेकोमी मार कबल पवा बाक्त देंशा हना “परमप्रभु यावे, गे अम्मोनी आन कली आं गुइमी गेतीनी हना, २सामुएल १५:८ 31 गो अम्मोनी रे रिश्शो पा आं खिं लेत्ती हना, सु आं खिमी नेल्ल क्येडा डोंइती गो नु गुथ्ज जाक्वा, मेको इन के दुम्ब। गो मेको कली चोशा चढ़ेनुड” दे कसम जवा बाक्त। २राजा ३:२७

32 मिनू येफता अम्मोनी नु लडाइ पथ आइक्वी हांम शोक्शा लमाक्ता। मिनू परमप्रभु यावेमी अम्मोनी आन कली येफता आ गुइमी गेवा बाक्त। 33 मेकोमी आरोएर रे मिन्नीथ नु आबेल-केरामीम सम्म २० ओटा सहर खतम सेला बाक्त। मोपा इस्राएलीमी अम्मोनी आन कली ग्रामा बाक्त। 34 मिनू येफता आ खिं मिस्पामी लेम्माक्ता। मिनू आ तमी खैजडी ताप्शा, सिल पना पन मेको कली गुथ्ज जाक्माक्ता। मेको आ तमी का ला बाक्माक्ता। अरु आल मबाक्मा बाक्त। 35 मिनू येफतामी आ तमी तवा चोटीन आ वा खाक्शा “आं तमी, आं थुं जिक्तीवी। शुश श्येत गेप्तीवी। गो परमप्रभु यावे कली कसम जाता। मिनू मेको कसम मखाप्थु मदुम्नुड” देंमाक्ता। गन्ती ३०:३ 36 मिनू आ तमीमी “आं आफ, परमप्रभु यावे कली कसम जाइतीनी हना, कबल पशो खोदेंशो पा आं कली पने। मारदे हना परमप्रभु यावेमी इन जोरी सत्रु अम्मोनी नु क्येक्क लेशो बाक्ब। 37 तन्न आं कली शिशी पन। महिना निक्शी सम्म आं कली प्रोनीन। आं वारचपुकी नु एको डांडाम हिरनुड। गो कन्नेमी बेक्वा माल्ताक्वी, दे रोंका पचा तडल” देंमाक्ता। 38 मिनू येफतामी “लावो” देंशा, आ तमी कली महिना निक्शी सम्म प्रोना बाक्त। मिनू मेको आ वारचपुकी नु डांडा लशा डा मीन आ कन्नेमीन बाक्शा बेक्वा माल्शो आ पर्बम डाक्माक्ता। 39 मिनू महिना निक्शी नोले मेको लेशशा जाक्माक्ता। मिनू येफतामी परमप्रभु कली आ पशो कसम खबा बाक्त। मिनू मेको मीश आल कन्नेन बेक्माक्ता। न्यायाधीस ११:३१; ब्यवस्था १२:२९-३१ 40 मेना रे इस्राएल डा तमी नेल्लेमी बर्स बर्समी ४ नाक्त सम्म गिलाद सहर डा येफता आ तमी कली मिश्शा, रोंका पाइनीम।

### येफता नु एफ्राइम

12 एफ्राइम आ थर डा मुरुमी आ लडाइ पाइब आन कली खुप्ता बाक्त। मिनू मेकोपुकी यर्दन आइक्वी हांबु साफोन गे शोक्शा, येफता कली “अम्मोनी नु लडाइ पथ लनीनु, आंइ कली मारदे मब्रेनीनी? मुल इन कली नु इन खिं कली मी सुइक्नीकी” देंमा बाक्त। न्यायाधीस ८:१ 2 मिनू येफतामी “गो नु आं मुर अम्मोनी नु ठेयब लडाइ दुम्मेनु, गे इन कली ‘वारच पन’ दे ब्रेश्शो नड। तन्न गेपुकीमी आंइ कली मेको आन गुइ रे मप्रॉइनी। 3 मिनू गेपुकीमी आंइ कली वारच मपाइनीनी, दे तुइक्तु नोले, महिंथु, खोला शोक्शा, अम्मोनी नु लडाइ पथ गाक्ताक। मिनू परमप्रभु

यावेमी मेको आन कली आंइ गुइमी गेप्तु। मिनू मारदे मुलाक्ती गेपुकी गो नु जिथ जाक्नीनी?” देंमाक्ता। न्यायाधीस ५:१८; न्यायाधीस ९:१७

4 मिनू येफतामी गिलाद डा मुर नेल्ल कली खुप्शा, एफ्राइम आ थर डा मुर नु लडाइ पवा बाक्त। मिनू गिलाद डा मुरपुकीमी मेको आन कली ग्रामा बाक्त। मेको जिचा मारदे बोक्शो बाक्त देंशा हना, एफ्राइम आ थर डा मुरपुकीमी “गे गिलादी एफ्राइम नु मनस्से आन दातेमी बाक्शो ला ननी” दे देंशो बाक्मा बाक्त। 5 मिनू गिलादीपुकीमी यर्दन डा शोक्तीक लां एफ्राइम रे रोइश्शा, आंम के सेल्मे बाक्त। मिनू गिलाद डा मुरपुकीमी खोला शोक्ब मुर आन कली “गे एफ्राइम आ थर डा मुर बाक्नीनी?” दे हिल्लो पामे बाक्त। “गो मनड” देंमा बाक्त हना, 6 गिलाद डा मुरपुकीमी “मो हना, शिब्बोलेथ देनो” देंबाक्मा बाक्त। मिनू मेकोमी ठीक पा देंने मचाप्थु “सिब्बोलेथ” देंतेक्म हना, मेकेर ग्याइश्शा यर्दन आ नेक्था साइक्वाक्मा बाक्त। मेना एफ्राइम आ थर डा मुर ४२ हजार साइक्वा पुंडसमा बाक्त। 7 येफता ६ बर्स सम्म इस्राएली आन निसाफ पाइब दुश्शा बेक्माक्ता। मिनू मेको कली आ सहर गिलादमी थिम्मे बाक्त।

### इब्सान, एलोन नु अब्दोन

8 येफता आ नोले बेथलेहेम डा इब्सान इस्राएली आन निसाफ पाइब दुम्माक्ता। 9 मेको के ३० जना तौ नु ३० जना तमी बाक्मा बाक्त। मेकोमी आ तमी आन कली अरु थर डा मुर नु ग्युबे पा गेवा बाक्त। मिनू आ तौ आन कली अरु थर डा ३० जना मीश आल ग्युबे पा चाक्मा बाक्त। मेको ७ बर्स सम्म इस्राएली आन निसाफ पाइब दुम्माक्ता।

10 मिनू इब्सान बेक्माक्ता। मिनू मेको कली बेथलेहेममी थिम्मे बाक्त। 11 मेको बेक्म नोले जबूलून आ थर डा एलोन १० बर्स सम्म इस्राएली आन निसाफ पाइब दुम्माक्ता। गन्ती २६:२६ 12 मिनू जबूलून आ थर डा एलोन बेक्माक्ता। मिनू मेको कली जबूलून आ रागी डा आइयालोन सहरमी थिम्मे बाक्त। 13 मेको आ नोले पिराथोन सहर डा हिल्लेल आ तौ अब्दोन इस्राएली आन निसाफ पाइब दुम्माक्ता। 14 मेको के ४० जना तौ नु ३० जना चच बाक्मा बाक्त। मेको आन के ७० ओटा गधा बाक्माक्ता। मिनू मेकोपुकी आंम आंम गधामी डोइक्वाक्मा बाक्त। मिनू अब्दोनमी ८ बर्स सम्म इस्राएली आन कली निसाफ पशो बाक्माक्ता। 15 मिनू नोले पिराथोन सहर डा हिल्लेल आ तौ अब्दोन बेक्माक्ता। मिनू अमालेकी आन पहाडी रागी डा एफ्राइम डा पिराथोन सहरमी थिम्मे बाक्त।

### सिम्सोन जरमेशो

13 मिनू इस्राएलीपुकीमी लेंशा परमप्रभु यावे आ डोंइती मार मरिश्शो बाक्मे, मेको पामे बाक्त। मोपतीके परमप्रभु यावेमी मेको आन कली ४० बर्स सम्म पलिस्ती आन गुइमी गेमी बाक्त।

2 मिनू दान आ थर डा मुर का बाक्माक्ता। मेको सोराह सहरमी बाक्शो बाक्माक्ता। मेको मुर आ नें मानोआह बाक्माक्ता। मिनू मेको आ मीश आल मथीब बाक्माक्ता। 3 मिनू परमप्रभु यावे आ स्वर्ग डा गेय पाइब मेको मीश मुर आ डोंइती गूशा, मेको कली “गे आल मथीब बाक्नेवे। तन्न मुल गे कोव्रज कुरशा तौ थीनेवे। उत्पत्ती १५:२; उत्पत्ती २५:२१; उत्पत्ती २९:३१ 4 मोपतीके होस पा बाक्को, अडगुर शांबु नु अरु दुक्तीक काइ मतूडो, मगारचा डा जचा थोव्रक मजावो। गन्ती ६:२-२१; लेवी ११:-; १सामुएल १:११ 5 मारदे हना गे कोव्रज कुरशा, तौ थीनेवे। मेको आ चां गेनायो खोइक्वा मदुम्ब। मारदे हना मेको वोंइश आल जरमेसे चोटीन परमप्रभु कली योव्रशो नाजिरी का दुम्ब। मिनू मेकोमी इस्राएली आन कली पलिस्ती आन गुइ रे प्रॉइचा गोइब” देंमाक्ता। 6 मिनू मेको मीश मुरुमी आ वोंइश कली “परमप्रभु आ गेय पाइब मुर का आं बाक्तीक जाक्ता। मेको आ कुल हिंचा डा परमप्रभु आ स्वर्ग डा गेय पाइब खोदेंशो बाक्त। मिनू ‘सु बाक्नीनी?’ दे हिल्लो मपड। मिनू मेकोमी यो आ नें मदे। 7 तन्न मेकोमी आं कली ‘गे कोव्रज कुरशा तौ थीनेवे। मिनू अडगुर शांबु नु अरु दुक्तीक मतूडो, मगारचा डा जचा थोव्रक मजावो। मारदे हना मेको आल जरमेसे रे मबेक्म सम्म परमप्रभु आ योव्रशो नाजिरी का दुम्ब’ दे माइक्ती” देंमाक्ता। 8 मिनू

मानोआहमी परमप्रभु यावे कली “परमप्रभु, इन सोइश्शो मुर लेंशा आंस नेक्था सोइक्तीन। मेकोमी आंस कली मेको नोले जरमेसीब वॉइश आल कली दोपा कोल्पाइक्चा, गो निकशीमी मार पचा माल्बा, आंस कली शेंदल” दे पुना बाक्त।

<sup>9</sup> मिनू परमप्रभुमी मानोआह आ पुंडुशो लोव्र नेना बाक्त। मिनू आ मीश रूमी बाक्मेनु, परमप्रभु आ स्वर्ग डा गेय पाइब लेंशा जाक्माक्त। मेना आ वॉइश मेको नु मबाक्शो बाक्माक्त। <sup>10</sup> मिनू आ मीश दोरशा लशा, आ वॉइश कली “मेको डॉइती जाक्शो मुर लेंशा आं बाक्तीक जाक्त” देंमाक्त।

<sup>11</sup> मिनू मानोआह बोक्शा, आ मीश नु लशा, मेकेर जाक्दीशा, मेको कली “आं मीश नु लोव्र पाइब गे ननी?” दे हिल्लो पवा बाक्त। मिनू मेकोमी “गो नड” देंमाक्त। <sup>12</sup> मिनू मानोआहमी “इन देंशो लोव्र दुम डा मेरे मेको वॉइश आलमी मार मार पचा दुम्बा, मार मार पचा मदुम्बा” दे हिल्लो पवा बाक्त। <sup>13</sup> मिनू परमप्रभु यावे आ स्वर्ग डा गेय पाइबमी “गो मार मार देंडा, इ मीशेमी रिम्शो पा टिचा माल्ब। <sup>14</sup> अडगुर बोट रे सिश्शो मारेइ यो जचा मदुम्ब। मेकोमी अडगुर शांबु नु अरु दुक्तीक तूचा मदुम्ब। मगारचा डा मारेइ यो जचा मदुम्ब। गो मार मार देंडा, मेकोमी नेल्ल टिचा माल्ब” देंमाक्त।  
*न्यायाधीस १३:४*

<sup>15</sup> मिनू मानोआहमी परमप्रभु यावे आ स्वर्ग डा गेय पाइब कली “गो इन कली पाठा का क्योरशा क्येनीकी। मोपतीके रिम्दीन” देंमाक्त। *न्यायाधीस ६:१८* <sup>16</sup> मिनू परमप्रभु यावे आ स्वर्ग डा गेय पाइबमी “आं कली तेक्तीसी हना यो, गो इन क्येशो मजाइनुड। तन्न गेमी चोशा चढेतीक ठीक सेल्लिनी हना, परमप्रभु यावे कली चढेवो” देंमाक्त। मानोआहमी मेको परमप्रभु यावे आ स्वर्ग डा गेय पाइब बाक्ब, दे मनुइक्ता बाक्त।

<sup>17</sup> मिनू मानोआहमी परमप्रभु यावे आ स्वर्ग डा गेय पाइब कली “इन नें मार बाक्बा? मारदे हना इन लोव्र थमा दुस्त हना, गो इन कली ठेयब सेल्चा दाक्नीकी” देंमाक्त। *उत्पत्ती ३२:३०* <sup>18</sup> मिनू परमप्रभु यावे आ स्वर्ग डा गेय पाइबमी मेको कली “गे मारदे आं नें हिल्लो पाइनेवे? मेको मनुइक्चा डा बाक्ब” देंमाक्त। <sup>19</sup> मिनू मानोआहमी अन्न नु पाठा लाइश्शा, फुल्लु तारी छक लाक्चा डा गेय पाइब परमप्रभु यावे कली चढेवा बाक्त। *न्यायाधीस ६:२१* <sup>20</sup> मिनू मेको चढेतीक रे मी गूशा, सरीड गे लमेनु, परमप्रभु यावे आ स्वर्ग डा गेय पाइब मेको मी नु सरीड गे लमाक्त। मानोआह नु आ मीश कोव्रस डा कोव्रस बाक्शा, सेउ पाम्से बाक्त।

<sup>21</sup> मिनू मेको नोले परमप्रभु यावे आ स्वर्ग डा गेय पाइब मानोआह नु आ मीश आ डॉइती गेनायो मगूमाक्त। मिनू मानोआहमी मेको परमप्रभु यावे आ स्वर्ग डा गेय पाइब बाक्माक्त, दे तुइक्ता बाक्त। <sup>22</sup> मिनू मेकोमी आ मीश कली “गो थमा पा बेक्नस। मारदे हना गो परमप्रभु कली ताइतस” देंमाक्त। *प्रस्थान ३३:२०* <sup>23</sup> तन्न आ मीशेमी “परमप्रभु यावेमी इस कली साइक्चा दाक्शो हना, इस चढेशो चोशा चढेतीक नु अन्न चढेतीक मब्रव वा। इस कली मोदेंशो लोव्र मदे वा, मकोइद वा” देंमाक्त। <sup>24</sup> मिनू मानोआह आ मीशेमी तौ का थिवा बाक्त। मेको कली सिम्सोन नें वोदा बाक्त। मेको आल कोल्ना कोल्न लमाक्त। मिनू परमप्रभु यावेमी मेको कली आसीक गेवा बाक्त। *उत्पत्ती २४:१; उत्पत्ती ३५:९; गन्ती २२:६* <sup>25</sup> मिनू सोराह नु एश्ताओल सहर आस दातेमी बाक्शो माहानेह-दान सहरमी बाक्मेनु, परमप्रभु यावे आ सोक्तीमी मेको कली गेय पपाइक्चा गोवा बाक्त। *न्यायाधीस ३:९-१०; न्यायाधीस ६:३४; न्यायाधीस १४:६,९; न्यायाधीस १५:१४; गन्ती २४:२-४; १सामुएल १०:६,१०; १सामुएल १६:१३; इजीकीएल ११:५*

सिम्सोनमी मीश आल दाक्शो

**14** काबु सिम्सोन तिम्नाह सहर ब्रुम्माक्त। मिनू मेकेर पलिस्ती मीश आल का तवा बाक्त। *यहोसु १९:४३* <sup>2</sup> मिनू आ खिं लेश्शा, आ आम आफ आस कली “तिम्नाहमी पलिस्ती मीश आल का ताता। मेको नु ग्युबे पा गेयीनी” दे माइक्सी बाक्त।

<sup>3</sup> मिनू आ आम आफोमी “मार, आंइ मुर नु इं थर डा मीश आल मबाक्बा? मिनू गे खोइक्तीक चिनु मखोइश्शो, मेको पलिस्ती आ तमी का

चाक्चा दाक्नेवे?” देंसा बाक्त। तन्न सिम्सोनमी “मेको मीश आल आं कली चाक्कीन। मारदे हना गो मेको कली दाक्नुड” देंमाक्त। *उत्पत्ती ३४:१४; प्रस्थान ३४:१६*

<sup>4</sup> परमप्रभु यावेम सिम्सोन कली मेको मीश आल कली दाक्पाइश्शो बाक्त, दे आ आम आफोमी मनुइश्शो बाक्ताक्स। परमप्रभुमी पलिस्ती आन कली खतम पचा कली मोदेंशो पशो बाक्माक्त। मेना पलिस्तीपुकीमी इस्राएली आन कली सासन पशो बाक्मा बाक्त।

<sup>5</sup> मिनू नोले सिम्सोन आ आम आफ नु तिम्नाहमी ब्रुम्माक्त। मिनू मेकेर डा अडगुर रूमी जाक्दीम्माक्त। मिनू मेकेर ठिटा गुप्स का गूशा, मेको कली ग्राम्दा बाक्त। <sup>6</sup> मिनू परमप्रभु यावे आ सोक्तीम सिम्सोन कली ठेयब सक्तिम सुमा बाक्त। मिनू आ गुइमी मारेइ यो या मबाक्त हना यो, मेको गुप्स कली पाठा खोदेंशो पा सदा बाक्त। मिनू गुप्स साइश्शो लोव्र आ आम आफ कली मशोव्रडा बाक्त। *न्यायाधीस १३:२५* <sup>7</sup> मिनू सिम्सोन मेकेर जाक्दीश्शा, मेको मीश आल नु लोव्र पवा बाक्त। मिनू मेको मीश आल कली दाक्शा लेम्माक्त। <sup>8</sup> मिनू इक्का नोले सिम्सोन मेको मीश आल कली ग्युबे पचा कली लेंशा तिम्ना ब्रुम्माक्त। मिनू लां प्रोइशा, साइश्शो गुप्स कोव्रथ लमाक्त। मिनू राक्शो गुप्स आ आगाम हुल का सुरब नु खुदो बाक्माक्त। <sup>9</sup> मिनू खुदो गुंडुशा, जना जन लमाक्त। मेकोमी आ आम आफ आस कली यो जचा गेम्सी बाक्त। मिनू जाम्से बाक्त। तन्न मेको खुदो राक्शो गुप्स आ आगा रे गुंडुशो, दे आ आम आफ कली मशोव्रडा बाक्त।

<sup>10</sup> मिनू सिम्सोन आ आफ मेको मीश आल कोव्रथ लमाक्त। मिनू सिम्सोनमी अरुम ग्युम्लेम पशो खोदेंशो पा भोज का गेवा बाक्त। <sup>11</sup> मिनू मेकेर डा मुरपुकीमी सिम्सोन कली गूग्शा, ३० जना वॉइश मुर मेको कली वारच पचा कली चाक्गामे बाक्त। <sup>12</sup> मिनू सिम्सोनमी मेको आन कली “इन कली लोव्र का हिल्लो पाइनन्नी। एको ७ नाक्त डा भोजमी मेको लोव्र लेन्ने चाप्टीनी हना, गो इन कली ३० ओटा बुश फेक्तीक वा नु ३० ओटा शुश क्येट लाइब फेक्तीक वा गेनन्नी। <sup>13</sup> तन्न आं हिल्लो पशो लोव्र लेन्ने मचाप्टीनी हना, गे आं कली ३० ओटा बुश फेक्तीक वा नु शुश क्येट लाइब फेक्तीक वा गेवा माल्नीनी” देंमाक्त। मिनू मेकोपुकीमी “लो दुम्ब, हिल्लो पन” देंमा बाक्त। <sup>14</sup> मिनू सिम्सोनमी मेको आन कली “शुश ब्वाइब रे जचा थोव्रक गूत। बोल्यो रे जिज थोव्रक गूत। मेको मार बाक्बा?” दे हिल्लो पामी बाक्त। मिनू मेकोपुकीमी नाक्त सां सम्म मिम्ना मिम्न बाक्शा, मेको लोव्र मार बाक्बा, दे लेन्ने मचाप्टमे बाक्त।

<sup>15</sup> मिनू ४ नाक्तीम मेकोपुकीमी सिम्सोन आ मीश कली “इ वॉइश कली लेम्शा, हिल्लो पावो। मिनू आंइ कली शोव्रडो। मोदेंशो मपाप्टीवी हना, गो इ कली नु इ आफ आ खिं कली मी सुइक्नीकी। आंइ कली पुडग सेल्चा कली निम्तो पवी?” देंमा बाक्त। <sup>16</sup> मिनू सिम्सोन आ मीश आ वॉइश आ डॉइती डाक्शा “गे आं कली काइ मदाक्नीनी। गे थमा पा आं कली मदाक्नीनी। गे आं मुर आन कली लोव्र का हिल्लो पाइतीनी। मिनू मेको लोव्र आ अर्थ चहिं आं कली मदेनी” देंमाक्त। मिनू सिम्सोनमी “मेको लोव्र आ अर्थ आं आम आफ कली लाइयो मदेड। मिनू इ कली मारदे देंनुडा?” देंमाक्त। <sup>17</sup> मिनू भोज के ७ नाक्ती मनुम्म सम्म आ मीश सिम्सोन आ डॉइती डाक्स डा डाक्स बाक्माक्त। मोपतीके ७ नाक्त सम्म शुश हिल्लो पा पुंडुतीके सिम्सोनमी मेको लोव्र आ मीश कली शोव्रडा बाक्त। मिनू मेकोमी लशा, आ मुर आन कली देंमाक्त। *न्यायाधीस १६:१६-१७* <sup>18</sup> मिनू मेको ७ नाक्ती नां सोव्रचा क्येडा डॉइती सहर डा मुरपुकीमी सिम्सोन कली “खुदो क्येडा जिज, मार बाक्बा डा? गुप्स क्येडा बोल्यो सु बाक्बा डा?” देंमा बाक्त। मिनू सिम्सोनमी “आं मीशेमी इन कली मेको लोव्र मशोव्रड हना, गोपुकीमी लेन्ने मचाप्टी वा” देंमाक्त। <sup>19</sup> मिनू परमप्रभु यावे आ सोक्तीम सिम्सोन कली ठेयब सक्तिम सुमा बाक्त। मिनू मेको अश्कलोन सहरमी लशा, मेकेर ३० जना मुर साइक्मी बाक्त। मिनू मेको आन के मार मार थोव्रक नु वा पिश्शा, मेको लोव्र लेख आन कली शुश क्येट लाइब फेक्तीक वा गेवा बाक्त। मिनू सिम्सोन गाइश्शा, आ आफ आ खिं लेम्माक्त। <sup>20</sup> मिनू सिम्सोन आ मीश चहिं सिम्सोन कली वारच पाइब का कली गेमे बाक्त। *न्यायाधीस १५:२*

## सिम्सोन आ मीश गुम्थ लशो

15 मिनु इच्का नोले चेरब रिक्वी ना सिम्सोन पाठा का कुरशा, आ मीश कली गुम्थ लमावक्त। मिनु “गो आं मीश आ कोठामी ओवचा दाक्नुड” देंमावक्त। तन्न आ शिउमी ओवचा मगेवा बावक्त।<sup>2</sup> मिनु आ शिउमी “आं तमी काइ मदाक्नीनी, दे मिम्ताक्ड। मोपतीके इन कली वारच पाइब कली गेता। मेको आ लोक्ब मेको क्येडा दारशो मबाक्बा डा? मुल इ मीश आ पा डा मेको कली लतो” देंमावक्त। *न्यायाधीस १४:२०*<sup>3</sup> मिनु सिम्सोनमी “गो मुल पलिस्ती आन कली थम मरिम्शो पाता हना यो, दोस मताइब दुम्ती” देंमावक्त।<sup>4</sup> मिनु सिम्सोनमी लशा, सहे सां सिवार ग्याइश्शा, निक्निक्शी पा आस मीलु फ्रेंशा, आस दातेमी रांको का यो फ्रेंदा बावक्त।<sup>5</sup> मिनु रांको जेशशा, पलिस्ती आन रिक्शा वोइश्शो चेरब, मीशो चेरब रू, अडगुर रू नु तेल रवा रू आगा सोइक्ता बावक्त।<sup>6</sup> मिनु पलिस्तीपुकीमी “एको सुम पवा?” दे हिल्लो पामे बावक्त। मिनु का निक्शीमी “तिम्ना डा मुर आ चांइवा सिम्सोनमी पाप्तु। मारदे हना आ शिउमी आ तमी, सिम्सोन आ मीश दुश्शा यो आ वारच कली गेप्तु” देंमा बावक्त। मिनु पलिस्तीपुकी लशा, सिम्सोन आ मीश नु आ आफ कली मीम क्रोइश्शा सदमे बावक्त।<sup>7</sup> मिनु सिम्सोनमी मेको आन कली “क्येक्क मलेत्थु मप्रॉइनुड” दे कसम जवा बावक्त।<sup>8</sup> मिनु सिम्सोनमी मेको आन कली शुश श्येत गेशा, शुश मुर आन कली साइक्मी बावक्त। मिनु मेकेर रे लशा, एताम डा रोंगु डा पुक्खीमी बाक्मावक्त।

## पलिस्ती आन कली साइश्शो

<sup>9</sup> मिनु पलिस्तीपुकी कुशा यहूदामी ताम्बु कीशा, लेही सहर आ नेक्था बाक्मा बावक्त।<sup>10</sup> मिनु यहूदा आ थर डा मुरपुकीमी मेको आन कली “गे मारदे आंइ कली लडाइ तोइनीनी?” दे हिल्लो पामे बावक्त। मिनु मेकोपुकीमी “गो सिम्सोन कली ग्याइश्शा, फ्रेंचा कली पीतक। मेकोमी आंइ कली मार पवा, गो यो मेको कली मोदेशोन पाइनीक” देंमा बावक्त।<sup>11</sup> मिनु यहूदा डा हजार सां मुर एताम डा रोंगु डा पुक्खीमी यिमा बावक्त। मिनु मेकोपुकीमी सिम्सोन कली “पलिस्तीपुकी आंइ सासन पाइब बाक्नीम, दे गे तुइक्नीनी। गे मारदे आंइ कली मोदेशो पा मरिम्शो पनी?” देंमा बावक्त। मिनु सिम्सोनमी “मेकोपुकीमी आं कली दोदेशो पामे, गो यो में मोदेशो ला पाता” देंमावक्त।<sup>12</sup> मिनु मेकोपुकीमी “गो दा इ कली फ्रेंशा पलिस्ती आन गुइमी गेचा कली जाक्तेक” देंमा बावक्त। मिनु सिम्सोनमी “मो हना आं कली मसाइक्नीक, देंशा, कसम जने” देंमावक्त।<sup>13</sup> मिनु मेकोपुकीमी “इन कली फ्रेंशा ला पलिस्ती आन गुइमी गेनीक। गो इन कली मसाइक्नीक” देंमा बावक्त। मिनु मेकोपुकीमी सिम्सोन कली नक डोरी निक्शीमी फ्रेंशा, पुक्खी क्येडा आइक्था कुल्मे बावक्त।

<sup>14</sup> मिनु मेकोपुकी लेहीमी जाक्दीत्वामेनु, पलिस्तीपुकीमी मेको कली तशा ग्रीना ग्रीन पिमा बावक्त। मेना परमप्रभु यावे आ सोक्तीमी सिम्सोन कली सुमा बावक्त। मिनु सिम्सोनमी आ कली फ्रेंशो डोरी निक्शी मीम दुष्पो पले खोदेशो पा प्रोदा बावक्त। *न्यायाधीस १३:२५*<sup>15</sup> मिनु गधा आ पिया डा रुश खप रे गुष्शा, मेकोमी हजार का मुर आन कली तुष्शा सदा बावक्त।<sup>16</sup> मिनु मेकोमी “गो गधा आ पिया डा रुशेमी तुम्ना तुम्न शुश मुर साइक्ता। तेन्ना तेन्ना हजार का मुर साइक्ता” देंमावक्त।<sup>17</sup> मेकोमी मो देंने थुम्शा, मेको रुश ताइक्ता बावक्त। मोपतीके मेको ठाउं कली रामाथ-लेही नें वोदमे बावक्त।

<sup>18</sup> मिनु सिम्सोनमी ब्वाक्कु तूतू दाक्शा, परमप्रभु यावे कली पुंइशा, “गे इन वाइल कली ठेयब लडाइ ग्रापाइक्तीनी। मुल गो तूतू दाक्शा बेक्नुडा? एको खोइक्तीक चिनु मख्रोइश्शो आन गुइमी बेक्नुडा?” देंमावक्त।<sup>19</sup> मिनु परमप्रभुमी लेही डा खाल्टा कली प्रोल्शा, मेक रे ब्वाक्कु गुंइदा बावक्त। मिनु सिम्सोनमी ब्वाक्कु तूडा बावक्त। मिनु लेंशा, बोल्यो दुम्मावक्त। मोपतीके लेही डा ब्वाक्कु बुक्तीक कली मुलावक्त सम्म एन-हाकोरे देंनीम।<sup>20</sup> मिनु पलिस्तीपुकीमी इस्राएली आन कली दिष्शा सासन पामेनु, सिम्सोनमी २० बर्स सम्म इस्राएली आन निसाफ पशो बाक्मावक्त।

## सिम्सोनमी लाप्चो कुरशो

16 काबु सिम्सोन गाजा सहरमी लमावक्त। मिनु मेकेर तेल्लेम का तशा, मेको नाक्दो मेको नु इप्थ लमावक्त।<sup>2</sup> मिनु गाजेज सहर डा मुरपुकीमी “सिम्सोन मेकेर जाक्शो बाक्ब” दे गाजा डा मुर आन कली तुइक्पदमे बावक्त। मिनु मेकोपुकीमी सिम्सोन आ बाक्तीक पुम्तमे बावक्त। मिनु मुरपुकी नाक्दो सहर डा ठेयब लाप्चोमी बाप्शा बाक्मा बावक्त। नाक्दो मेकोपुकी सिक्सी पा बाक्मा बावक्त। मेकोपुकीमी “नां सोवचीना साइक्चा” दे सल्ला पशो बाक्मा बावक्त।<sup>3</sup> तन्न सिम्सोन क्येर नाक्दो सम्म ला आ ब्राख्येमी गोल्शा बाक्मावक्त। मिनु बोक्शा लशा, सहर डा ठेयब लाप्चो नु आ थाम निक्शी आ दलीन नेल्ल तुल्शा बालाम लाप्शा, हेब्रोन आ नेक्था डा डांडाम लदा बावक्त।

## सिम्सोन नु देलीलाह

<sup>4</sup> मिनु नोले सिम्सोनम सोरेक डा दिंममी बाक्ब देलीलाह माइश्शो मीश मुर का दाक्ता बावक्त।<sup>5</sup> मिनु पलिस्ती आन ठेयब मुरपुकी मेको मीश मुर कली गुम्थ लमा बावक्त। मिनु मेको कली “सिम्सोन कली लेम्शा ‘इ कली सुमी बोल गेबा? दोपा इ कली फ्रेंने चाप्नीकी’ दे हिल्लो पावो। मिनु गो आंइ कली शेंदो। मारदे हना गो ग्याइक्चा दाक्नीकी। मिनु ग्याइश्शा गो का का पा इ कली ११, ११ सहे चांदी के शेकेल गेनीकी” देंमा बावक्त।<sup>6</sup> मिनु देलीलाहमी सिम्सोन कली “सुमी इन कली शुश बोल गेवा? दोपा इन कली फ्रेंने चाम्सीबा? मुरपुकीम दोपा इन कली ग्याइक्ने चाप्नीमी? आं कली शेंदीन” दे हिल्लो पवा बावक्त।<sup>7</sup> मिनु सिम्सोनमी “आं कली लिब्रा आ ७ ओटा क्येख डोरीमी फ्रेंताक्पीमी हना, अरु मुर खोदेशो बोल मपाइश्शो दुम्नुड” देंमावक्त।<sup>8</sup> मिनु पलिस्ती आन ठेयब मुरपुकीमी ७ ओटा लिब्रा आ क्येख डोरी चाक्शा, देलीलाह कली गेमे बावक्त। मिनु मेकोमी सिम्सोन कली फ्रेंदा बावक्त।<sup>9</sup> मेकोमी आगा डा कोठामी मुरपुकी खूइश्शा वोइश्शो बाक्मावक्त। मिनु मेकोमी “सिम्सोन इन कली साइक्चा, दे पलिस्ती जाक्तेक्म” दे ग्रीमावक्त। मिनु सिम्सोनमी मेको डोरी कली मीम किक्शो पले खोदेशो पा प्रोइश्शा प्रोक्मावक्त। मिनु आ बोल चहिं मारम बाक्बा, दे मतुइक्तेमे बावक्त।

<sup>10</sup> मिनु देलीलाहमी सिम्सोन कली “गे आं कली शुक्शी पा जोल पाइतीनी। तन्न मुल डा मेरे दोपा इन कली पाइक्ने चाम्सीबा, लो, देनीन” देंमावक्त।<sup>11</sup> मिनु सिम्सोनमी “आं कली नक मारदे यो मफ्रेंशो डोरीमी फ्रेंताक्पीमी हना, अरु मुर खोदेशो दुम्नुड” देंमावक्त।<sup>12</sup> मोपतीके देलीलाहमी नक डोरी चाक्शा, मेको कली फ्रेंदा बावक्त। मेना यो मुरपुकी आ कोठामी खूइश्शा बाक्शो बाक्मा बावक्त। मिनु मेकोमी “सिम्सोन इन कली साइक्चा, दे पलिस्ती जाक्तेक्म” दे ग्रीमावक्त। मिनु सिम्सोनमी मेको डोरी कली श्येले प्रोइश्शो खोदेशो पा प्रोदा बावक्त।

<sup>13</sup> मिनु देलीलाहमी लेंशा सिम्सोन कली “गे मुल सम्म आं कली शुक्शी पा जोल पाइतीनी। इन कली दोपा फ्रेंने चाम्सीबा?” दे हिल्लो पवा बावक्त। मिनु सिम्सोनमी “गे आं चां डा ७ ओटा लामा कली तोव्र ओल्तीकेम पाइक्ताक्पी नु मेको तोव्र आ प्रोव्रशो हिरतीक ठीक पा वोइक्तीवी हना, अरु मुर खोदेशो पा बोल मपाइश्शो दुम्नुड” देंमावक्त।<sup>14</sup> मोपतीके मेकोमी सिम्सोन इम्मेनु, मेको आ चां डा ७ ओटा लामा कली तोव्र आ प्रोव्रशो हिरतीकेमी हिरशा फ्रेंशा वोदा बावक्त। मिनु मेकोमी “सिम्सोन इन कली साइक्चा, दे पलिस्ती जाक्तेक्म” दे ग्रीमावक्त। मिनु सिम्सोन निन्द्रा रे सेंशा, तोव्र ओल्तीके, तोव्र नेल्ल नु प्रोव्रशो वा यो उइश्शा बोक्मावक्त।

<sup>15</sup> मिनु देलीलाहमी “आं कली दाक्नुड, दे दोपा देंने चाप्नीनी डा? इन थुंमी आं कली मदाक्शो बाक्नीनी। गे आं कली खेयप सां शुक्शी पा, इन ठेयब बोल मारम बाक्बा, मुल सम्म मशेंदीनी” देंमावक्त।<sup>16</sup> मिनु मेकोमी सिम्सोन कली नाक्त किंत किंत हिल्लो पा श्येत गेवा बावक्त। *न्यायाधीस १४:१७*<sup>17</sup> मोपतीके सिम्सोनमी आ खूइश्शो थमा लोव्र मेको कली शेंदा बावक्त। मेकोमी “मुल सम्म आं चां मप्रेक्शो बाक्ब। मारदे हना गो जरमेसी डा रे परमप्रभु आ योव्रशो नाजिरी का नड। आं चां प्रेक्तेक्म हना, आं बोल

लाइब। मिनु गो अरु मुर खोदेशो पा बोल मपाइश्शो दुम्नुड" देंमावक्त।

न्यायाधीस १३:५

18 मिनु सिम्सोनमी देलीलाह कली आ थुं डा लोव्र नेल्ल शोवशा, नोले देलीलाहमी पलिस्ती आन ठेयब मुर आन कली "रीब पा जाक्कीन। मारदे हना मेकोमी आ थुं डा लोव्र नेल्ल शंताकयी" दे ब्रेथ सोइक्ता बावक्त। मिनु पलिस्ती आन ठेयब मुरपुकी चांदी कुरशा जाक्मा बावक्त। 19 मिनु देलीलाहमी सिम्सोन कली आ थुकुमी इप्पदा बावक्त। मिनु मुर का ब्रेश्शा, आ ७ ओटा लामा प्रेक्पदा बावक्त। मोपा देलीलाहमी सिम्सोन आ बोल जाम्पाइश्शा सक्ति मपाइश्शो सेला बावक्त। 20 मिनु मेकोमी "सिम्सोन बोक्कीन, इन कली साइक्वा, दे पलिस्ती जाक्तेक्म" दे ग्रीमावक्त। मिनु मेको निन्द्रा रे बोक्मावक्त। मिनु गो आंम कली गेना हना यो प्रॉइनुड, दे मिम्ता बावक्त। तन्न "परमप्रभु यावेमी आं कली प्रॉइने थुम्तु" दे मेकोमी मतुइक्ता बावक्त। १सामुएल १६:१४ 21 मिनु पलिस्तीपुकीमी मेको कली ग्याइश्शा, आ मिक्च पुक्तमे बावक्त। मिनु गाजा सहरम चाक्मा बावक्त। मिनु कांसा के साडलोमी पाइश्शा जेल्खानमी यात हिल्पदमे बावक्त। 22 मिनु नोले आ प्रेक्शो चां लेंशा लाइश्शो दुम्मावक्त।

### सिम्सोन बेक्शो

23 मिनु पलिस्ती आन ठेयब मुरपुकीमी "इं देवतामी इं सत्रु सिम्सोन कली इं गुइमी गेप्तु" देंशा, आन देवता दागोन कली ठेयब चढ़ेतीक चढ़ेचा कली नु ग्येरसीचा कली खुम्समा बावक्त। 24 मिनु खुम्सीशो मुरपुकीमी सिम्सोन आ पर्बम "इं देवतामी इं सत्रु, इं रागी डा सत्रु, इं रागी डा मुर साइक्ब मुर कली इं गुइमी गेशो बाक्ब" दे ग्रीशा, आन देवता कली ठेयब सेल्मे बावक्त। 25 मिनु शुश ग्येरसीशा "सिम्सोन कली गुंइदीन। मिनु मेकोमी आंइ कली सिल पा कौंडदल" दे पुन्मे बावक्त। मिनु सिम्सोन कली जेल्खान रे गुंइदमे बावक्त। मिनु मेकोमी मेको आन कली सिल पा कौंडदा बावक्त। मिनु मेकोपुकीमी सिम्सोन कली ठेयब थाम आस दातेमी राप्पदमे बावक्त। 26 मिनु सिम्सोनमी आ गुइ ग्याइश्शा खुल्ब ठिटा कली "एको खिं कली तिक्ब नेल्ल क्येडा ठेयब थाम कली ग्याइक्वा गेयी। मिनु गो मेकेर रक एश्शा बाक्नुड" देंमावक्त। 27 मेको खिंम शुश वॉइश मुर नु मीश मुर बाक्मा बावक्त। पलिस्ती आन ठेयब मुरपुकी यो नेल्ल मेकेर बाक्मा बावक्त। हजार सां खोइ वॉइश मुर नु मीश मुर चहिं खिं डा नेल्ल क्येडा तला तार बाक्शा, सिम्सोन आ सिल कोव्रडमे बावक्त।

28 मिनु सिम्सोनमी परमप्रभु यावे कली "परमप्रभु, परमप्रभु यावे, आं कली मिस्तीन। आं कली लेंशा खेयप का सक्ति गेयीनी। परमप्रभु, गो काले आं मिक्च निक्शी आ पर्बम मेको आन कली क्येक्क लेल्ने चबुल" दे पुना बावक्त। 29 मिनु सिम्सोनमी मेको खिं कली तिक्शा वोइक्ब खिं आ दातेमी वोइश्शो थाम निक्शी कली पेरा गुइमी का नु ग्युरा गुइमी अर्को कली ग्याइक्ता बावक्त। 30 मिनु सिम्सोनमी "आं कली पलिस्तीपुकी नु बेक्वा गेन" देंशा, आ सक्ति नेल्लेमी बोल पा मेको थाम निक्शी कली नेप्ता बावक्त। मिनु मेको खिं ब्रेम्मावक्त। मोपा बाक्शो नेल्ल ठेयब मुर नु अरु मुर नेल्ले चिष्शा बेक्मा बावक्त। मोपा सिम्सोनमी आ ब्रॉइशो क्येडा यो आ बेक्ची ना शुश मुर सदा बावक्त। हिब्रू ११:३२-३४ 31 मिनु सिम्सोन आ आफ आ खिं डा मुर नु आ लोक्बपुकी मेकेर जाक्शा, आ रां आ आफ मानोआह आ तुरस सोराह नु एश्ताओल सहर आ दातेमी थिम्मे बावक्त। सिम्सोन २० बर्स सम्म इस्राएली आन निसाफ पाइब दुम्शो बाक्मावक्त। न्यायाधीस १३:२५; न्यायाधीस १५:२०

### मीकाहमी मूर्ति सेल्पाइश्शो

17 एफ्राइम डा पहाडम मीकाह नें पाइश्शो मुर का बाक्मावक्त। 2 मिनु मेकोमी आ आम कली "इन जाम्शो ११ सहे चांदी के शेकेल आ पर्बम सराप पशो, गो नेंता। मेको चांदी के शेकेल गो नु बाक्नीम। गो लाइश्शो नड। मुल गो लेल्ननी" देंमावक्त। मिनु मेको आ ममामी "आं तौ, परमप्रभु यावेमी इ कली आसीक गेवल" देंमावक्त। लेवी ५:१; हितोपदेस २९:२४

3 मिनु मेको ११ सहे चांदी के शेकेल आ ममा कली लेश्शा गेवानु, आ ममामी "एको चांदी आं तौ कली रिम्शो दुम्ल, दे मुशो, चांदीम गिल्शो मूर्ति

सेल्पाइश्शा परमप्रभु यावे कली गेनुड। मोपतीके गो मेको चांदी के शेकेल लेंशा इ कली गेनन" देंमावक्त। शेकेल का ११.५ ग्राम बाक्ब। 4 आ तौमी मेको चांदी आ ममा कली गेवानु, आ ममामी सहे निक्शी चांदी के शेकेल लाइश्शा, चेम्ब कली गेवा बावक्त। मिनु मेकोमी मुशो मूर्ति का सेल्शा मेको कली चांदीम गिला बावक्त। मिनु मेको मीकाह आ खिंमी वोदमे बावक्त।

5 मेको मीकाह के देवता थान का यो बाक्मावक्त। मेकोमी चढ़ेब आ डोंइती फेक्तीके निसाफ पतीक ऊरीम नु थुम्मीम बाक्शो झोला सेल्पाइश्शा, खिं डा देवतापुकी यो सेल्पदा बावक्त। मिनु आ तौ का कली योवशा, चढ़ेब सेला बावक्त। न्यायाधीस ८:२७; उत्पत्ती ३१:१९; प्रस्थान २८:४१ 6 मेना इस्राएल रागीमी पिप मबाक्मा बावक्त। मोपतीके सुम मार पचा दाक्मा, मेको पाइक्बाक्मा बावक्त। न्यायाधीस १८:१; न्यायाधीस १९:१; न्यायाधीस २१:२५

7 मिनु यहूदा डा बेथलेहेम रे पा जाक्शो यहूदा आ थर डा रागीम बाक्ब लेवी ठिटा का बाक्मावक्त। न्यायाधीस १८:३; ब्यवस्था १८:६-८ 8 मेको यहूदा डा बेथलेहेम सहर प्रॉइशा, अर्को सहरम बाक्वा कली बाक्तीक माल्ना माल्न गाक्मावक्त। मोपा गाक्मेनु, मेको एफ्राइम रागी डा पहाड मीकाह आ खिंमी जाक्दीम्मावक्त।

9 मिनु मीकाहमी "ते रे जाक्शो नवे?" दे हिल्लो पवा बावक्त। मिनु मेकोमी "गो यहूदा डा बेथलेहेम रे पा जाक्शो लेवी का नड। मिनु बाक्वा कली बाक्तीक का माल्ना माल्न गाक्ती" देंमावक्त। 10 मिनु मीकाहमी "गो नु बाक्को। मिनु आं आफ नु आं चढ़ेब दुमो। गो इ कली बर्स बर्समी १० ओटा चांदी के शेकेल गेनन। मिनु जचा फेक्वा यो गेनन" देंमावक्त। 11 मोपतीके मेको लेवी मीकाह नु बाक्वा बिस्से बावक्त। मिनु मीकाहमी मेको कली आ तौ आन दाते डा का खोदेशो पा वोदा बावक्त। 12 मिनु मीकाहमी मेको लेवी ठिटा कली आ गेय गेवा बावक्त। मिनु मेको ठिटा आ चढ़ेब दुम्शा, मेको आ खिंम बाक्मावक्त। प्रस्थान २८:४१ 13 मिनु मीकाहमी "मुल परमप्रभु यावेमी आं कली सोशो बोशो सेल्ती, दे तुइक्ताक्ड। मारदे हना लेवी का आं चढ़ेब दुम्शो बाक्ब" देंमावक्त।

### दान आ मुरपुकीम रागी माल्शो

18 मेना इस्राएल रागीम पिप मबाक्मा बावक्त। मिनु मेना दान आ थर डा मुरपुकीमी बाक्वा कली रू माल्ना माल्न बाक्मा बावक्त। मारदे हना इस्राएली आन दातेमी योक्शो रागी मथेरशो बाक्मा बावक्त। न्यायाधीस १:३४; यहोसु १९:४०-४८ 2 मोपतीके दान आ थर डा मुरपुकीमी सोराह नु एश्ताओल रे ५ जना मुर आन कली क्यारी पथ सोइक्ते बावक्त। मिनु मेको आन कली "लन, मिनु मेको रागी कली क्यारी पन" देंमा बावक्त। मिनु मेकोपुकी एफ्राइम आ पहाडी रागी, मीकाह आ खिंमी जाक्शा, बास बाक्मा बावक्त। न्यायाधीस १३:२५ 3 मिनु मेकोपुकी मीकाह आ खिंम बाक्मानु, मेको लेवी ठिटा आ लोव्र पशो नेंशा तुइक्तेमे बावक्त। मिनु मेको लेवी कली "सुम इ कली एकेर चाक्मा? एकेर मार पाइनेवे? मार गेय पाइनेवे?" दे हिल्लो पामे बावक्त। न्यायाधीस १७:७ 4 मिनु मेकोमी "मीकाहमी गेय गेती। मेको आ चढ़ेब दुम्ती" देंमावक्त। 5 मिनु मेकोपुकीमी मेको लेवी कली "मो हना आंइ गेय रिम्शो दुम्बा देय मदुम्बा, परमप्रभु कली हिल्लो पावो" देंमा बावक्त। 6 मिनु लेवीमी "थुं नाइश्शा लने, परमप्रभु यावेमी इन गेय दाक्शो बाक्ब" देंमावक्त।

7 मिनु मेको ५ जना मुर लशा, लाइश सहरमी जाक्दीम्मा बावक्त। मेकोपुकीमी मेकेर डा मुर आन कली सीदोन डा मुरपुकी खोदेशो पा लडाइ मपथु, रिम्शो नु क्येट थीब दुम्शा, बाक्शो तामे बावक्त। मेकोपुकी नु मारेइ मारेइ बाक्मावक्त। मेको आन रागी सीदोनी आन रागी क्येडा डोन बाक्मावक्त। मिनु मेकोपुकी आंमा ला बाक्शो बाक्मा बावक्त। 8 मिनु मेको ५ जना मुर सोराह नु एश्ताओल सहरमी लेश्शा जाक्मा नोले आन लोक्बपुकीमी "मार लोव्र चाक्नी?" दे हिल्लो पामे बावक्त। 9 मिनु क्यारी पाइबपुकीमी "लो, लय। मिनु मेकोपुकी नु लडाइ पय। मारदे हना मेको रागी थम रिम्शो बाक्ब। मुल मार सिक्सी पा बाक्नीनी? मुल लचा कली देश मपने। मिनु मेको रागी कली आंम के सेल्पा। 10 गे मेकेर जाक्दीश्शा, कोव्रनीनु, ठेयब रागीमी थम रिम्शो

पा बाकशो जात का डा मुर आन कली ताइनीनी। मेको मुरपुकीमी लडाइ आ पर्वम मारेइ ममिंशो बाकनीम। मेको रागी परमप्रभुमी इन गुइमी गेशो बाकब। मेको रागीमी बाकशो मारेइ मारेइ थीसीब” दैमा बाकत।

### मीकाह आ मूर्ति रोइश्शो

11 मिनु दान आ थर डा ६ सहे या कुरशो मुरपुकी सोराह नु एश्ताओल सहर रे पा गाकमा बाकत। न्यायाधीस १३:२, २५<sup>12</sup> मेकोपुकी कुशा, यहूदा डा किरयथ-यारीम आ नेकथा ताम्बु कीशा बाकमा बाकत। मोपतीके मुल सम्म मेको कली माहानेह-दान देंनीम। मेको किरयथ-यारीम आ पच्छिममी बाकब।<sup>13</sup> मिनु मेक रे गाकशा, एफ्राइम डा पहाडी रागीम बाकशो मीकाह आ खिंमी जाकदीम्मा बाकत।

14 मिनु डोंइती रागी क्यारी पथ पिशो ५ जना मुरुमी आन लोकब आन कली “एको खिं कामी चढेब आ निसाफ पतीक ऊरीम नु थुम्मीम बाकशो झोला नु खिं डा देवता, मुशा चांदीमी गिल्शो मूर्ति बाकनीम। गेपुकीमी तुइक्वा माल्नीनी। मिनु मुल मार पचा माल्बा, मिम्वा माल्नीनी” दैमा बाकत।

15 मिनु मेकोपुकी मीकाह आ खिं आ नेकथा जाकशा, लेवी ठिटा आ बाकतीक जाकमा बाकत। मिनु “दोदेंशो बाकनेवे?” दे हिल्लो पामे बाकत।

16 या कुरशो ६ सहे दान आ थर डा मुरपुकी चहिं लाप्चोमी बाकमा बाकत।

17 मिनु डोंइती क्यारी पथ जाकशो ५ जना मुर खिं आगा ओव्रमा बाकत। मिनु मेकोपुकीमी मेको मुशा चांदीमी गिल्शो मूर्ति, निसाफ पतीके ऊरीम नु थुम्मीम बाकशो झोला नु खिं डा देवता नेल्ल लदमे बाकत। मेना चढेब यो मेको ६ सहे मुर नु लाप्चोम राप्शा बाकशो बाकमा बाकत। न्यायाधीस १७:५

18 मिनु मोपा मेको ५ जना मुरुमी मीकाह आ खिंमी ओव्रमा, मेको मुशा चांदीमी गिल्शो मूर्ति, चढेब आ डोंइती फेक्शो निसाफ पतीके ऊरीम नु थुम्मीम बाकशो झोला नु खिं डा देवतापुकी लदमेनु, चढेबमी “मार पनी?” दे हिल्लो पामी बाकत।<sup>19</sup> मिनु मेकोपुकीमी “ब्वालेइ पावो। लोव्र का यो मपावो। गो नु गाकशा आंइ आफ नु चढेब दुमो। मार, मुर का आ चढेब दुम्चा रिंशो देय इस्राएल डा थर का नु आन मुर आन चढेब दुम्चा रिंशो दुम्बा? लो, मिम्तो” दैमा बाकत।<sup>20</sup> मिनु मेको चढेब बिश्शा, मेको निसाफ पतीके ऊरीम नु थुम्मीम बाकशो झोला खिं डा देवतापुकी नु मेको मुशा चांदीम गिल्शो मूर्ति कुरशा, मेकोपुकी नु गाकमा बाकत।

21 मिनु मेकोपुकी मेकेर रे लेश्शा, आन लां खोदमे बाकत। मेकोपुकीमी आलपुकी, बस्तु भाव नु आन मारेइ मारेइ लाइश्शा, आन डोंइती खुल्शा गाकमा बाकत।<sup>22</sup> मिनु दान आ थर मा मुरपुकी मीकाह आ खिं रे इक्का डोन जाकदीम्मानु, मीकाहमी आ नेकथा डा मुर आन कली ब्रेश्शा खुल्शा, खेदा पा थिम्मी बाकत।<sup>23</sup> मिनु हुइक्तीमी बाकत। मिनु दान आ थर डा मुरपुकीमी मीकाह कली “इ कली मार दुम्मे? मारदे मोदेंशो पा शुश मुर खुप्तीमी?” दैमा बाकत।<sup>24</sup> मिनु मीकाहमी “आं कली सेल्सीशो देवी देवता नु आं चढेब मुर मारदे लाइक्नी? आं कली मारेइ महेंदीनी। मिनु आं कली ‘इ कली मार दुम्मे?’ दे हिल्लो पाइनीनी?” दैमा बाकत।<sup>25</sup> मिनु दान आ थर डा मुरपुकीमी “ब्वाले पावो। मारदे हना आंइ दाते डा चुरब मुरपुकीमी चुरशा, इ कली नु इ खिं डा मुर आन कली साइक्नीमी” दैमा बाकत।<sup>26</sup> मिनु मेको दान आ थर डा मुरपुकी मेकेर रे गाकमा बाकत। मीकाह यो आ क्येडा बोल्पो मुर तशा, मारेइ मपथु, आ खिं लेम्मा बाकत।

27 मोपा मेको चढेब नु मीकाह आ सेल्सीशो मूर्ति लाइश्शा, मेकोपुकी गाकमा बाकत। मिनु मेकोपुकी लाइश सहर नु लडाइ पामे बाकत। मेकेर डा मुरपुकी थुं नाइश्शा, लडाइ ममिंशु बाकशो बाकमा बाकत। मिनु दान आ थर डा मुरपुकीमी मेको आन कली तरवारमी साइश्शा, मेको आन सहरम मी सुइक्तेम बाकत।<sup>28</sup> मेको आन कली प्रॉइब सुइ मबाकमा बाकत। मारदे हना मेको सहर सीदोन रे शुश डोन बाकमा बाकत। मेको सहर बेथ-रेहोब आ नेकथा डा दिंममी बाकमा बाकत। मिनु दान आ थर डा मुरपुकीमी मेको सहर सेल्शा बाकचा गोव्रमे बाकत।<sup>29</sup> मिनु मेको सहर कली इस्राएल आ तौ, मेको आन किकी पिपी आ नें दान वोदमे बाकत। मेको सहर आ नें डोंइती लाइश बाकमा बाकत। यहोसु १९:४७<sup>30</sup> मिनु दान आ थर डा मुरपुकीमी मेको मूर्ति पूजा पचा कली वोदमे बाकत। इस्राएली नेल्ल ग्याइश्शा लाइक्वा मपुंइसीमा

सम्म मोसा आ तौ गेरशोम, आ तौ योनाथन नु मेको आ चच युइ दान आ थर डा चढेब दुम्मा बाकत। १राजा १२:२९; आमोस ८:१४; प्रस्थान १८:३; २राजा १५:२९<sup>31</sup> परमप्रभु आ खिं शिलोमी बाकम सम्म मेकोपुकीमी मीकाहमी सेल्सीशो मूर्ति कली पूजा पामे बाकत। यहोसु १८:३; येरमीया ७:१२

### गिबा सहरम मरिंशो दुम्शो

19 मेना इस्राएल रागीम पिप मबाकमा बाकत। मिनु लेवी का बाकमा बाकत। मेको एफ्राइम डा नेल्ल क्येडा नोले डा पहाडी रागीम बाकशो बाकमा बाकत। मेकोमी यहूदा डा बेथलेहेम रे मीश का चाकशो बाकमा बाकत। न्यायाधीस १७:६<sup>2</sup> मिनु आ वोंइश नु गाइश्शा, मेको कली प्रॉइशा आ माइत यहूदा डा बेथलेहेममी लशो बाकमा बाकत। मिनु मेको मीश मुर मेकेर बाकशो ४ महिना दुम्शो बाकमा बाकत।<sup>3</sup> मिनु आ वोंइश आ कान्छी मीश कली लेम्शा बिप्पाइश्शा, मेको कली पित्वा कली लमाकत। मेकोमी वाइल का नु गधा निक्शी यो लदा बाकत। मिनु मेको आ शिउ आ खिंमी जाकदीम्मा बाकत। मिनु आ शिउमी मेको कली तशा ग्येरसीशा युमा बाकत।<sup>4</sup> मिनु आ शिउमी “बाककीन” दे नमो सिमो पवा बाकत। मोपतीके नाकत सां सम्म बाकमा बाकत। मेकोपुकी जशा तूशा बाकमा बाकत।<sup>5</sup> मिनु ४ नाकत नोले मेको लेवी सुनी कना बोक्शा, गाक्वा कली सासे बाकत। तन्न आ शिउमी “लचा क्येडा डोंइती मारेइ जने” दैमा बाकत।<sup>6</sup> मोपतीके जशा तूशा बाक्सा बाकत। मिनु आ शिउमी “मुलाकत नाकदो का बाकशा, चिनु ग्येरसीशा लने” दैमा बाकत।<sup>7</sup> मिनु मेको निक्शी जशा तूशा बाक्सा बाकत। मिनु आ शिउमी “चिनु काब नाकदो बाककीन” दे नमो सिमो पवा बाकत।<sup>8</sup> मिनु ५ नाकत मेको लचा कली सुनी कना बोक्मा बाकत। तन्न आ शिउमी “डोंइती जने, नां इक्का चोक्तल। मिनु नोले लने” दैमा बाकत। मोपतीके मेको निक्शी नां चोक्का सम्म बाकशा, जशा तूशा, बाक्सा बाकत।<sup>9</sup> मिनु मेको मुर, आ मीश नु आ वाइल नु लचा, दे बोक्मेनु, आ शिउमी “लो, कोव्रडीन, नां रिक्वापु। मोपतीके मुलाकत नाकदो बाकशा, इन थुं ग्येरपतीन। मिनु दीसा सुनी कना बोक्शा इन खिं लेतीन” दैमा बाकत। लूका २४:२९

10 तन्न मेको नाकदो बाकचा मबिस्से बाकत। मेक रे बोक्शा, आ मीश, आ वाइल नु गधा निक्शी खुल्शा, मेकोपुकी यबुस आ आइदी जाकदीम्मा बाकत। यबुस सहर कली यरूसलेम यो देंबाकमा बाकत। न्यायाधीस १:२१; इतिहास ११:४<sup>11</sup> मिनु यबुस आ नेकथा जाकदीम्मानु, नां रिक्चशो बाकमा बाकत। मिनु वाइलमी “मुलाकत नाकदो लशा, यबुसी आन सहरमी बाक्य” दैमा बाकत।<sup>12</sup> तन्न लेवीमी “गो इस्राएली अरु मुर आन सहरम मलाइनीक। गिबा सहरमी लय।<sup>13</sup> लो, गाक्य, गिबा हना यो रामाह सहर हना यो का सम्म जाकदीशा, बास बाक्य” दैमा बाकत।<sup>14</sup> मिनु गाकमा बाकत। मोपा गाकमा गाकमा बेन्यामीन आन गिबा सहर जाकचामेनु, नां रिक्मा बाकत। यहोसु १८:२८<sup>15</sup> मिनु मेकेर बास माल्शा लामा बाकत। मिनु सहर डा चोकमी बाकमा बाकत। मारदे हना सुइमी मेको आन कली बास बाकचा कली आन खिंमी मलदमे बाकत।

16 मिनु खाल्पा का आ रूमी गेय पा नाकदो खिं लेश्शो बाकमा बाकत। मेको खाल्पा एफ्राइम डा पहाडी रागी डा बाकमा बाकत। तन्न गिबामी बेन्यामीन आ थर डा सहरम बाकबाकमा बाकत।<sup>17</sup> मिनु मेको खाल्पामी इर कोव्रशा सहर डा चोकमी बाकशो लां गाक्ब मुर आन कली तवा बाकत। मिनु लशा मेको आन कली “ते रे पिनी? ते लाइनीनी?” दे हिल्लो पवा बाकत।<sup>18</sup> मिनु मेकोमी “गोपुकी यहूदा डा बेथलेहेम रे एफ्राइम डा नेल्ल क्येडा नोले डा पहाडी रागीम लाइनीकी। गो मेकेर डा नड। गो यहूदा डा यबुस बेथलेहेममी लती। मुल मेक रे लेश्शा, आं खिं लना लन बाक्नुड। मिनु सुइमी आंइ कली बास बाकचा मगेम।<sup>19</sup> गोपुकी नु आंइ गधा कली नल नु जचा थोव्रक बाक्ब। गो, आं मीश नु आं वाइल नेल्ल कली जचा तूचा थोव्रक यो बाक्ब। गो आंइ कली माल्शो मारेइ मारेइ गोपुकी नु बाक्ब” दे लोव्र लेत्ता बाकत।<sup>20</sup> मिनु खाल्पामी “थुं नाइक्तीन। आं खिंम बाक्कीन। इन माल्शो नेल्ल गेनन्नी। गोपुकीमी चोकमी बाकशा, नां सोंइचा काइ मडुम्ब” दैमा बाकत।<sup>21</sup> मिनु

खाल्यामी आ खिंमी लाइक्मी बाक्त। गधा आस कली जचा गोवा बाक्त। मिनु आन खोइल चिक्शा, जशा तूशा बास बाक्मा बाक्त।

22 मेकोपुकी ग्येरसीशा बाक्शा बाक्मानु, सहर डा मरिश्शो मुरपुकीमी मेको खिं कली दि दा रे पा पुम्दमे बाक्त। मिनु खिं डा लाच्यो कली खोकोल पना पन “इ खिंमी ओव्रब मुर कली लाडगा गुंडदो। गोपुकी मेको नु इप्नीकी” दे ग्रीमा बाक्त। उत्पत्ती १९:५-८ 23 मिनु खाल्या लाडगा गूशा, मेको आन कली “आं लोकबपुकी, एको मुर आं वारच बाक्ब। मोर्देशो मरिश्शो मपन। एको मुर आं पौना बाक्ब। मेको कली मारेड यो मपन। 24 एकेर आं कन्ने तमी नु एको पौना आ कान्छी मीश बाक्ब। मेको आस कली लतीन। मिनु इन दाक्शो पन। तन्न एको मुर कली मारेड यो मपन” देमाक्त। 25 तन्न मेको मुरपुकीमी खाल्या आ लोव्र काड मबिस्समा बाक्त। मोपतीके मेको पौनामी आ कान्छी मीश मेको आन बाक्तीक सोइक्ता बाक्त। मिनु मेकोपुकी मेको नाक्दो नेल्ल मेको मीश मुर नु इम्मा बाक्त। मेको कली का का पा बिग्रमे बाक्त। मिनु सुनी सोइक्तमे बाक्त। 26 मिनु सुनी कना आ वोंइश बाक्शो खिं डा लाच्योमी जाक्शा गोल्माक्त। मिनु नां मसोक्म सम्म मेकेरेन गोल्शा बाक्माक्त।

27 मिनु आ वोंइश बोक्शा, मुल गाक्चा, दे लाच्यो रोकगानु, आ मीश कली लाच्यो आ पुंम गोल्शो तवा बाक्त। 28 मिनु “बोक्को, गाक्च” देंमेनु, मारेड लोव्र मलेत्ता बाक्त। मिनु आ मीश कली गधा तारी वोइश्शा खिं लदा बाक्त। 29 मिनु खिं जाक्दीश्शा, आ छूरी गुंडशा आ मीश कली क्योरशा, १२ टुक्रा पा इस्राएल आ थर नेल्ल आन कली सोइक्ता बाक्त। १सामुएल ११:७ 30 मेको ताइब नेल्लेमी “गो इस्राएलीपुकीम इजीप्त रागी रे पिशो रे मुलाक्त सम्म ओर्देशो मदुश्शो नु मतशो बाक्तय। मोपतीके मुल मार पचा मिप्तीन। मिनु सल्ला पने” देमा बाक्त। होसे १०:९

बेन्यामीनी आन कली क्येक्क लेश्शो

20 मिनु इस्राएली नेल्ले दान रे पा बेयर-शेबा सम्म गिलाद रागी परमप्रभु यावे आ डोंइती मिस्पामी गुम्मा बाक्त। यहोसु १८:२६; १सामुएल ७:५ 2 इस्राएली आन थर थर डा ठेयब मुरपुकी नु तरवार कुरब ४ लाख लडाइ पाइबपुकी परमप्रभु आ मुर आन गुम्तीकेमी जाक्मा बाक्त। 3 मिनु बेन्यामीन आ थर डा मुरपुकीमी इस्राएली नेल्ले मिस्पामी बुक्तेक्म, दे तुइक्तमे बाक्त। मिनु इस्राएलीपुकीमी मेको लेवी कली “एको मरिश्शो गेय दोपा दुम्मे?” दे हिल्लो पामे बाक्त।

4 मिनु मेको साइक्चा पुंडसीशो मीश मुर आ वोंइश लेवीमी “गो नु आं मीश बास बाक्चा कली बेन्यामीन आ थर डा गिबा सहरमी लशो नस्कु। न्यायाधीस १९:१४; यहोसु १८:२८ 5 मिनु मेको नाक्दो गिबा सहरम बाक्ब मुरपुकीम आं कली मरिश्शो पचा कली आं बाक्शो खिं पुस्ताक्म। मिनु मेकोपुकीमी आं कली साइक्चा माल्लेक्म। मिनु आं मीश कली कीशा लाइश्शा, मेको नु मबेक्म सम्म का का पा इप्तेक्म। 6 मिनु गो आं बेक्शो मीश कली टुक्रा टुक्रा पा चेक्ता। मिनु इस्राएल आ थर नेल्ल आन रागीम सोइक्ताक्ड। मेकोपुकीमी इस्राएलमी मोर्देशो ग्रांरा दिशो नु मरिश्शो पामे बाक्त, दे तुइक्पाइक्चा कली गो मो पाता। उत्पत्ती ३४:७ 7 मुल गे इस्राएली नेल्ल लोव्र पने। मार पचा माल्बा, इन मिश्शो शोव्रडीन” देमाक्त।

8 मिनु मुर का दुश्शो खोर्देशो पा मुर नेल्ले बोक्मा बाक्त। मिनु मेकोपुकीमी “गोपुकी सुड यो आंम खिं लेश्शा मलय। का सम्म यो लेश्शा मलय। 9 मुल गोपुकीमी गिबा सहर डा मुर आन कली मार पचा दंशा हना, गो फेन्टे आप्था, गिबा सहर लशा, लडाइ तोय। 10 इस्राएल आ थर नेल्ल डा सहे का रे १० जना, हजार का रे सहे का जना, १० हजार रे हजार का जना मुर लाइश्शा, लडाइ पाइब आन कली जचा थोव्रक क्याप्व नु कुरब सेल्य। मिनु मोपा गो गिबा सहरम बाक्ब बेन्यामीन आ थर डा मुरपुकीम इस्राएलम पशो ग्रांरा दिशो गेय आ पर्बम क्येक्क लेत्तय” देमा बाक्त। 11 मोपा इस्राएली नेल्ले थुं का दुश्शा, मेको सहर नु लडाइ पचा कली खुम्साक्मा बाक्त।

12 मिनु इस्राएल आ थर डा मुरपुकीमी बेन्यामीन आ थर डा मुर नेल्ल आन कली “इन दातेमी पशो ग्रांरा दिशो गेय, मार बाक्बा? 13 मोर्देशो

मरिश्शो पाइब आन कली आंइ गुडमी गेन। मिनु गो मेको आन कली साइश्शा, इस्राएल रागी कली मोर्देशो ग्रांरा दिशो रे रिश्शो सेल्नीकी” दे लोव्र पथ, मुर सोइक्तमे बाक्त। तन्न बेन्यामीन आ थर डा मुरपुकीम आंम लोकब इस्राएली आन लोव्र मनेन्मे बाक्त। प्रस्थान २१:१२; गन्ती ३५:३३-३४ 14 मिनु बेन्यामीन आ थर डा मुरपुकी इस्राएलीपुकी नु लडाइ पचा कली गिबामी खुम्समा बाक्त। 15 बेन्यामीन आ थर डा मुरपुकीमी रीब पा २६ हजार तरवार कुरशो लडाइ पाइब मेको सहर रे खुप्तमे बाक्त। मेको आन क्येडा लाक्शा गिबा सहर डा मुर यो बाक्मा बाक्त। 16 मेको आन दातेमी ७ सहे पेरा गुड चलेब, हुरद आप्चा शुश जोक्ब मुर यो बाक्मा बाक्त। आन सहर नु गिबा रे यो जाक्मा बाक्त। 17 मिनु इस्राएलीपुकीमी चहिं बेन्यामीन आ थर डा मुरपुकी नु लडाइ पचा कली तरवार कुरशो ४ लाख लडाइ पाइब ठीक पामे बाक्त।

18 मिनु इस्राएलीपुकी रीब पा बेथेल लशा, परमप्रभु कली “आंइ इस्राएली आन दातेमी तेको थरमी नेल्ल क्येडा डोंइती बेन्यामीन आ थर डा मुर नु लडाइ पचा?” दे हिल्लो पामे बाक्त। मिनु परमप्रभु यावेमी “यहूदा आ थर डा मुरपुकीमी डोंइती लडाइ पचा माल्नीम” देमाक्त। न्यायाधीस १:१-२; गन्ती २७:२१

19 मिनु इस्राएलीपुकी सुनी कना बोक्शा लशा, गिबा आ नेक्था ताम्बु कीशा बाक्मा बाक्त। 20 मेकोपुकीमी बेन्यामीन आ थर डा मुरपुकी नु लडाइ पचा कली गिबा सहर आ नेक्था ठीक पा बाक्मा बाक्त। 21 मेको नाक्ती बेन्यामीन आ थर डा मुरपुकी गिबा सहर रे लशा, लडाइ पा २२ हजार इस्राएली आन कली सदमे बाक्त। 22 तन्न इस्राएल डा मुरपुकी थुं बारपाइश्शा, डोंइती नाक्ती खोर्देशो पा लेंशा लडाइ पचा कली ठीक पा बाक्मा बाक्त।

23 मिनु इस्राएलीपुकी लशा, नाक्दो सम्म परमप्रभु यावे आ डोंइती डाक्मा बाक्त। मिनु मेकोपुकीमी परमप्रभु यावे कली “आंम लोकब बेन्यामीन आ थर डा मुर नु लेंशा लडाइ तोचा देय मतोचा” दे हिल्लो पामे बाक्त। मिनु परमप्रभु यावेमी “मेकोपुकी नु लडाइ पचा कली लन” देमाक्त। 24 आ दीसा नाक्त यो मेकोपुकीमी बेन्यामीन आ थर डा मुरपुकी नु लडाइ पचा गोव्रमे बाक्त। 25 मिनु बेन्यामीन आ थर डा मुरपुकी मेकोपुकी नु लडाइ पचा कली गिबा रे यूमा बाक्त। मिनु मेकोपुकीमी लेंशा १८ हजार इस्राएली आन कली सदमे बाक्त। उत्पत्ती ४९:२७ 26 मिनु इस्राएली नेल्ले बेथेल सहर लमा बाक्त। मिनु मेकोपुकीमी नाक्दो सम्म परमप्रभु यावे आ डोंइती डाक्शा माइजा बाक्मा बाक्त। मेकोपुकीमी परमप्रभु यावे कली चोशा चढेतीक नु दुशा बाक्चा आ पर्बम चढेतीक चढेमे बाक्त। न्यायाधीस २०:१८; यहोसु १८:२१-२२ 27 मिनु इस्राएलीपुकीमी परमप्रभु यावे कली “मार पचा” दे हिल्लो पामे बाक्त। मारदे हना मेना परमप्रभु आ कबल पशो सन्दोस मेकेर बाक्माक्त। 28 मिनु हारून आ तौ एलाजर आ तौ फिनेहासमी मेको कली कोव्रब बाक्माक्त। मिनु इस्राएलीपुकीमी परमप्रभु यावे कली “मुल गो आंइ लोकब बेन्यामीन आ थर डा मुरपुकी नु लडाइ पथ लेंशा लचा देय मलचा” दे हिल्लो पामे बाक्त। मिनु परमप्रभु यावेमी “लन, गो दीसा मेको आन कली इन गुडमी गेनन्नी” देमाक्त। गन्ती २५:७; यहोसु २४:३३

29 मोपतीके इस्राएल डा मुरपुकीमी लडाइ पाइब आन कली गिबा आ एर ओंथ बाप्पदमे बाक्त। यहोसु ८:१२, १४ 30 मेको सां नाक्ती इस्राएलीपुकी बेन्यामीन आ थर डा मुरपुकी नु लडाइ पथ लमा बाक्त। डोंइती पशो खोर्देशो पा लडाइ पचा कली गिबा सहर आ डोंइती ठीक पा बाक्मा बाक्त। 31 मिनु बेन्यामीन आ थर डा मुरपुकी चहिं इस्राएली आन लडाइ पाइब नु लडाइ पचा कली लाडगा यूमा बाक्त। इस्राएलीपुकी सहर रे प्रोक्खु पा मेको आन कली गिबा सहर रे डोन लदमे बाक्त। मिनु बेन्यामीन आ थर डा मुर डोंइती खोर्देशो पा इस्राएली सदमे बाक्त। मेकोपुकी ठेयब लांमी बाक्मा बाक्त। लां का बेथेल गे लाइब नु अरु चहिं गिबा नु अर्को रू गे लाइब लां बाक्माक्त। मेकेर ३० जना इस्राएली कली सदमे बाक्त। 32 मिनु बेन्यामीन आ थर डा मुरपुकीमी “गो डोंइती खोर्देशो पा ग्राना ग्रान बाक्नय” दे मिप्तमे बाक्त। तन्न इस्राएलीपुकीमी “गो प्रोक्खु पा मेको आन कली सहर रे डोन ठेयब लां सम्म गुंडचा माल्नीक” देमा बाक्त। 33 मोपा इस्राएली आन लडाइ पाइब आन ठेयब हुल आंम आन लडाइ पतीके प्रोंइशा बाल-तामार गे प्रोक्खु

पामे बाक्त। मिनु बाप्शा बाक्बपुकी चहिं गेबा आ पच्छिम रे रीब पा गूमा बाक्त। *गेबा गिबा सहर दुम्ने चाप्ब।* 34 मिनु इस्राएल डा १० हजार योव्रसीशो लडाइ पाइबपुकीमी गिबा गे बारशा ठेयब लडाइ तोमे बाक्त। तन्न बेन्यामीन आ थर डा मुरपुकीमी “ठेयब श्येत जाक्वा चिक्शो बाक्त” दे मतुइक्तमे बाक्त।

35 मिनु परमप्रभु यावेमी बेन्यामीन आ थर डा मुर आन कली इस्राएली आन गुइ रे खतम सेला बाक्त। मेको नाक्ती इस्राएलीपुकीमी २५ हजार सहे का बेन्यामीन आ थर डा मुर आन कली सदमे बाक्त। 36 मिनु बेन्यामीन आ थर डा मुरपुकीमी “मुल गो ब्रुइतक” दे तुइक्तमे बाक्त। मारदे हना इस्राएलीपुकीमी ब्रुशो देंखु पा गिबा आ नेक्था बाप्शा बाक्ब आन कली थमा सुइश्शा, प्रोक्खु पामे बाक्त। 37 मिनु मेको बाप्शा बाक्बपुकीमी रीब पा लडाइ पा गिबा सहर ओव्रमा बाक्त। मिनु मेकोपुकीमी मोपा ओव्रशा, गिबा डा मुर नेल्ल कली तरवारमी क्योरशा सदमे बाक्त। 38 इस्राएली नु मेको बाप्शा बाक्ब मुर आन सल्ला मार बाक्त देंशा हना, मेकोपुकीमी सहर ओव्रशा, ग्राशा, मी मुइश्शा सरीड गे कुन सोइक्वा माल्बाक्मा बाक्त। 39 मिनु प्रोक्खु पशो इस्राएल डा ठेयब हुल मेको तशा लेत्वा, दे सल्ला पशो बाक्मा बाक्त। मिनु डॉइती बेन्यामीन आ थर डा मुरपुकीमी इस्राएली आन कली ३० जना साइश्शा “गो थमा पा ग्रानीक” दे मिश्शो बाक्मा बाक्त। 40 मिनु सहर आ दाते रे कुन गूशो तशा, बेन्यामीन आ थर डा मुरपुकीमी नोले हिरशा कोव्रडमे बाक्त। मिनु सहर नेल्लेमी मी ब्रुशो तामे बाक्त। 41 मिनु प्रोक्खु पाइब इस्राएलीपुकी फ्रा लेशशा, बेन्यामीन आ थर डा मुर आन कली लडाइ तोव्रमे बाक्त। मिनु बेन्यामीन आ थर डा मुरपुकी “ला, मुल बेक्साक्व” दे हिंमा बाक्त। 42 मोपतीके बेन्यामीन आ थर डा मुर मेक रे गोरशो रागी गे प्रोक्मा बाक्त। तन्न सहर रे जाक्शो इस्राएलीपुकीमी मेको आन कली दाते पा क्योरशा साइक्वा गोव्रमे बाक्त। 43 मेकोपुकीमी बेन्यामीन आ थर डा मुर नेल्ल कली मनाइक्थु, खेदा पामे बाक्त। मिनु नोहा रे गिबा आ नां दाप्तीके सम्म मेको आन कली खेदा पा साइश्शा ग्रामा बाक्त। 44 मिनु १८ हजार बेन्यामीन आ थर डा मुरपुकी साइक्वा पुंडसमा बाक्त। मेको नेल्ल बोल्यो लडाइ पाइब बाक्मा बाक्त। 45 मिनु लेशशा गोरशो रागी रिम्मोन माइश्शो ठेयब फुल्लु गे प्रोक्मानु, इस्राएलीपुकीमी ठेयब लांमी ५ हजार खोइ बेन्यामीन आ थर डा मुर आन कली सदमे बाक्त। मेकोपुकीमी अरु आन कली गिदोम सहर सम्म खेदा पा हजार निक्शी आन कली सदमे बाक्त। 46 मेको नाक्ती २५ हजार या कुरशो बेन्यामीन आ थर डा मुरपुकी लडाइमी साइक्वा पुंडसमा बाक्त। 47 तन्न ब्रॉइशा लीशो ६ सहे जना बेन्यामीन आ थर डा मुरपुकी गोरशो रागी डा रिम्मोन फुल्लु मेर प्रोक्शा, ४ महिना मेकेर बाक्मा बाक्त। *न्यायाधीस २१:१३* 48 मिनु इस्राएलीपुकीमी बेन्यामीन आ थर डा मुर नेल्ल आन कली लडाइ पा सदमे बाक्त। सहर कली क्रोइश्शा, मुर नु बस्तु भाव मारेइ मारेइ सदमे बाक्त। मेकोपुकीमी लीशो सहर नेल्ल आन कली यो मी सुइक्तमे बाक्त। *उत्पत्ती ३४:२५-२९; गन्ती ३५:३०-३४; ब्यवस्था १३:१३-१९*

### लीशो बेन्यामीनी

21 मिनु डॉइती मिस्पामी जाक्शो इस्राएलीपुकीमी मार कसम जशो बाक्मा बाक्त देंशा हना “गोपुकीमी इं तमी आन कली बेन्यामीन आ थर डा मुर आन कली ग्युंभे पा मगेय” दे कसम जशो बाक्मा बाक्त। *न्यायाधीस २०:१* 2 मिनु मुरपुकी बेथेल लशा, नाक्दो सम्म परमप्रभु आ डॉइती बाक्शा, शुश डाक्मा बाक्त। *न्यायाधीस २०:१८, २३, २६* 3 मेकोपुकीमी “परमप्रभु यावे, इस्राएली आन परमप्रभु, मारदे ओदेंशो दुम्मे? मुलाक्त मारदे इस्राएली आन थर का जाम्मे?” देंमा बाक्त। 4 मिनु आ दीसा मुरपुकी सुनी कना बोक्शा, मेकेर चढेतीके का सेल्शा, चोशा चढेतीक नु दुशा बाक्वा आ पर्वम चढेतीक चढेमे बाक्त। 5 मिनु नोले इस्राएलीपुकीमी “तेको थर परमप्रभु यावे आ डॉइती मजाक्मा?” दे हिल्लो पमुमा बाक्त।

मारदे हना मिस्पामी मेकोपुकीमी “परमप्रभु यावे आ डॉइती सु मजाक्वा, मेको कली साइक्वा माल्ब” दे कसम जशो बाक्मा बाक्त। 6 मिनु आंम लोकब बेन्यामीन आ थर डा मुर आन पर्वम डाक्शा “मुलाक्ती इस्राएल डा थर का क्याम्साक्व। 7 लीशो वॉइश मुर आन कली मीश आल चाक्वा कली मार पय? गोपुकीमी परमप्रभु यावे आ डॉइती मेको आन कली आंइ तमी ग्युंभे पा मगेनीक, दे कसम जशो बाक्नीकी” देंमा बाक्त।

8 मिनु मेकोपुकीमी “परमप्रभु यावे आ डॉइती इस्राएली आन थर डा मिस्पामी मजाक्व, सु बाक्मे?” दे हिल्लो पशा, याबेश-गिलाद रे सुइ यो गुम्तीक ताम्बुमी मजाक्मा बाक्त, दे तुइक्तमे बाक्त। 9 मारदे हना मेकोपुकीमी मुर हिकामेनु, याबेश-गिलाद डा सुइ मुर मजाक्शो तुइक्तमे बाक्त। 10 मोपतीके मेको गुम्शो मुरपुकीमी १२ हजार लडाइ पाइब आन कली याबेश-गिलाद डा वॉइश मुर, मीश मुर, आल ब्रेप्च नेल्ल कली तरवारमी क्योरशा सतीन, दे हुकुम पा सोइक्तमे बाक्त। 11 मिनु “वॉइश मुर नु मेको नु इप्शो मीश मुर नेल्ल आन कली सतीन। तन्न कन्ने आन कली प्रोनीन” दे हुकुम पामे बाक्त। *गन्ती ३१:१७-१८* 12 मिनु सोइश्शोपुकीमी याबेश-गिलादमी ४ सहे सुइ नु मइप्शो कन्ने मीश आल थिश्शा, मेको आन कली कनान डा शिलोम बाक्शो ताम्बुमी चाक्मा बाक्त।

13 मिनु गुम्शो इस्राएली नेल्लेमी रिम्मोनमी खूइश्शा बाक्शो बेन्यामीन आ थर डा मुर आन कली “गारचा” दे ब्रेथ सोइक्मे बाक्त। *न्यायाधीस २०:४७* 14 मिनु बेन्यामीन आ थर डा मुरपुकी लेशशा जाक्मा बाक्त। मिनु मेकोपुकीमी मेको आन कली याबेश-गिलादम सेस प्रॉइशो मीश आल गेमे बाक्त। तन्न बेन्यामीन आ थर डा वॉइश मुर आन कली मेको मीश आल मजाक्दीम्माक्व। 15 मिनु इस्राएलीपुकीमी बेन्यामीन आ थर आ पर्वम सुर्ता पस डा पस बाक्मा बाक्त। मारदे हना परमप्रभु यावेमी इस्राएल डा बेन्यामीन आ थर हेररा क्याम्शो बाक्माक्व। 16 मोपतीके मेको गुम्तीक डा खाल्पापुकीमी “मुल लीशो वॉइश मुर आन कली मीश गेचा कली मार पय? मारदे हना बेन्यामीन आ थर डा मीश मुर नेल्ल बेक्तेक्म” देंमा बाक्त।

17 मिनु मुरपुकीमी “प्रोक्शा ब्रॉइशो बेन्यामीन आ थर डा मुर आन कली चच युइ दुम्वा माल्नीम। मोदेंशो मदुम्त हना, इस्राएल रे थर का ग्याम्शा लाइब। 18 तन्न गो मेको आन कली इं तमी गेने मचाज्य” देंमा बाक्त। मारदे हना इस्राएलीपुकीमी “सुम बेन्यामीन आ थर डा मुर कली आ तमी गेबा, मेको सराप राइब” दे कसम जशो बाक्मा बाक्त। 19 मोपतीके “नेनीन, परमप्रभु यावे आ पर्वम बर्सम काले दुम्ब चाइ शिलोमी पाइनीम। शिलो बेथेल आ उत्तर गे बाक्ब। मिनु मेको बेथेल रे शेकेम लतीक ठेयब लां आ पूर्व नु लेबोना सहर आ दक्खिनम बाक्शो बाक्ब” देंमा बाक्त। *यहोसु १८:१* 20 मिनु बेन्यामीन आ थर डा मुर आन कली “गे लशा अडगुर रूमी खूइश्शा बाक्कीन। 21 मिनु शिलो डा मीश आलपुकी सिल पथ जाक्मानु, अडगुर रू रे फो फु गूशा, आंम मीश सेल्चा कली का का पा मीश आल कीडीन। मिनु बेन्यामीन आ थर डा रागी लन। *प्रस्थान २१:१६; ब्यवस्था २४:७* 22 मिनु मेको मीश आल आन आफ नु लोकबपुकी जाक्शा, आंइ कली लोव्र पाम्तेक्म हना, गो मेको आन कली ‘बेन्यामीन आ थर डा मुर आन कली शिशी पन। मेको आन कली ग्युंभे पचा गेन। मारदे हना गो लडाइमी मेको मिश डा वॉइश मुर आन कली मीश आल ग्याइक्ने मचाप्क। मिनु गे इन तमी गेशा यो दोस मताइनीनी। मारदे हना गे मेको आन कली इन तमी आंमन मगेनी’ देंनीकी” देंमा बाक्त।

23 मिनु बेन्यामीन आ थर डा मुरपुकीमी मोदेंशो पामे बाक्त। मेको सिल पाइब मीश आल का का आंम मीश सेल्चा कली कीडमे बाक्त। मेको आन रागी लेशशा आंम सहर कली लेशा सेल्शा, मेकेर बाक्मा बाक्त। 24 मेना इस्राएली नेल्ल मेकेर रे लशा ब्राशा, आंम आंम थर नु आंम आंम खिं लमा बाक्त। 25 मेना इस्राएल रागीम पिप मबाक्माक्व। मोपतीके सु सुमी मार मार पचा दाक्मा मेको पाइक्बाक्मा बाक्त। *न्यायाधीस १७:६*

## रूथ

साइ डा टाल्मुत माइश्शो किताबमी “एको किताब ब्रेक्ब सामुएल बाक्ब” दे ब्रेक्शो बाक्ब।

दाऊद आ सासन पची ना ब्रेक्शो बाक्ब। मेको आ सासन ११०४-९६५ बि. सी.म बाक्शो बाक्त।

एको किताब डा लोत्र परमप्रभु यावेमी आ वॉइश बेक्शो मीश मुर नु रोम रोइक्च आन कली शिशी पशो सांकछी बाक्ब। रूथ मोआबी दुम्शा यो परमप्रभु यावे कली थमा सुइक्ब दुम्त। मेकोमी बोआज नु ग्युंवे पा येसु आ किकी पिपी दुम्त।

### नाओमी नु आ खिं डा मुर

1 निसाफ पाइबपुकीमी इसाएली आन कली हुकुम पची ना, अन्काल दुम्माक्त। मोपतीके यहूदा रागी डा बेथलेहेम रे मुर का, आ मीश नु आ तौ निक्शी लाइश्शा, मोआबी आन रागीम बाक्थ लमाक्त। गन्ती २५:१-५; १सामुएल २२:३-४<sup>2</sup> मेको मुर आ नें एलीमेलेक बाक्माक्त। आ मीश आ नें नाओमी नु आ तौ निक्शी आस नें का के माहलोन, का के किल्योन बाक्माक्त। मेकोपुकी यहूदा रागी डा बेथलेहेम एफ्राथाह सहरम बाक्शो बाक्मा बाक्त। मिनु मोआबी आन रागी जाक्दीश्शा, मेक उइ बाक्मा बाक्त। उत्पत्ती ४८:७; मीका ५:१<sup>3</sup> मिनु नाओमी आ वॉइश एलीमेलेक बेक्शा, नाओमी नु आ तौ निक्शी प्रॉइचा पुंडसमा बाक्त। ब्यवस्था ७:३; ब्यवस्था २३:४; नेहेम्याह १३:२३<sup>4</sup> मिनु मेको आ तौ निक्शीमी मोआबी मीश आल चाक्से बाक्त। का आ नें ओरपा, का आ नें रूथ बाक्माक्त। मेकोपुकी मेकेर १० बर्स बाक्मा बाक्त।<sup>5</sup> मिनु माहलोन नु किल्योन निम्फा बेक्सा बाक्त। मोपा आ वॉइश नु आ तौ निम्फा बेक्शा, नाओमी ला लीमाक्त।

### रूथ नु आ शिमी

6 मिनु नोले नाओमी आ चाइमी निक्शी नु मोआब रे आ रागी लेत्वा चिक्ता बाक्त। मारदे हना मोआब रागीम बाक्मेनु, नाओमीमी “परमप्रभु यावेम आ मुर आन कली मिम्शा, मेको आन कली जचा गेप्तु” दंशो लोत्र नेना बाक्त। २राजा ८:३<sup>7</sup> मिनु मेको आ चाइमी निक्शी नु आ बाक्तीके रे गाक्शा, यहूदा रागी लमा बाक्त।<sup>8</sup> मिनु नाओमीमी आ चाइमी निक्शी आस कली “इस इस माइत लेतीसे। गे दोपा बेक्शो आन कली नु आं कली रिम्शो पसी, मोपा परमप्रभु यावेमी इस कली रिम्शो पवल।<sup>9</sup> परमप्रभु यावेमी इस कली अर्को वॉइश गेशा, इस थुं नाइश्शा बाक्चा गेवल” दंमाक्त। मिनु आ चाइमी आस कली पुक्पु पाइश्शा, नेल्ल डाक्मा बाक्त। रूथ ३:१<sup>10</sup> मिनु आ चाइमी निक्शीमी “गो थमा पा इन मुर आन बाक्तीके लाइनस्कु” दंसा बाक्त।<sup>11</sup> मिनु नाओमीमी “आं चाइमी निक्शी लेतीसे। मारदे गो नु लचा दाक्नीसी? मार, गो इस वॉइश दुम्पाइक्चा कली तौ थिने चाप्नुडा डा?<sup>12</sup> आं चाइमी निक्शी लेतीस। गो खाल्पी दुम्शा, ग्युंवे पने मचाप्नुड। गो आल मिम्शा, मुलाक्दोन वॉइश नु बाक्शा, तौ थिती हना यो, मेको मकोल्म सम्म<sup>13</sup> रिम्शा बाक्ने चाप्नीसी? मेको आस कली रिम्शा, अर्को ग्युंवे मपथु बाक्नीसी? मद्दुम्ब, आं चाइमी निक्शी। मारदे हना इस क्येडा गो परमप्रभु यावे आ गुइ रे श्येत जाइब बाक्ती” दंमाक्त।<sup>14</sup> मिनु मेकोपुकी लेंशा डाक्मा बाक्त। मेको नोले ओरपामी आ शिमी कली पुक्पु पाइश्शा वॉइश्शा, आ मुर आन बाक्तीके लेम्माक्त। रूथ चहिं आ शिमी नुन बाक्माक्त।

15 मिनु नाओमीमी “नेनो, इ देउरानी आ मुर आन बाक्तीके नु आ देवी देवताम लेत्त। गे इ देउरानी आ पशो खोदेंशो पावो” दंमाक्त।<sup>16</sup> मिनु रूथमी “इन कली प्रॉइपाइश्शा, आं कली लेशशा, सोइक्चा कली ढिपी मपाइय्यीनी। गे ते लाइनीनी, गो यो मेकेन लाइनुड। गे ते बाक्नीनी, गो यो मेकेन बाक्नुड। इन मुरपुकी आं मुर दुम्नीम। इन परमप्रभु आं परमप्रभु दुम्ब।<sup>17</sup> गे ते बेक्नीनी, गो यो मेकेन बेक्नुड। मिनु मेकेन थिम्चा पुंडसीनुड। गो

मबेक्थु इन कली प्रॉइतन्नी हना, परमप्रभु यावेमी सजाइ गेयील” दंमाक्त।<sup>18</sup> मिनु नाओमीमी रूथमी आ कली प्रॉइसीन मप्रॉइब, दे तुइश्शा, अरु मारेइ मदेमाक्त।<sup>19</sup> मिनु मेको निम्फा गाक्शा, बेथलेहेम जाक्सा बाक्त। मिनु बेथलेहेम जाक्सानु, सहर डा मुर नेल्लेमी मेको आस पबर्म लोत्र पामे बाक्त। मिनु मीश मुरपुकीमी “मार, एको नाओमीन बाक्चा?” दंमा बाक्त।<sup>20</sup> मिनु नाओमीमी “आं कली नाओमी मदेनीन। मारा देनीन। मारदे हना नेल्ल क्येडा सक्ति पाइश्शो परमप्रभु यावेमी आं कली मरिम्शो पाइश्शा, श्येत जपाइक्ती। नाओमी दंशो दारशो रुम्सीब, मारा चहिं कशो रुम्सीब।<sup>21</sup> गो मारेइ मारेइमी गाप्शा लशो नड। मुल परमप्रभु यावेमी श्येत्थ लेशशा चाक्ती। गे मारदे आं कली नाओमी देनीनी? नेल्ल सक्ति पाइश्शो परमप्रभु यावेमी आं कली दोस गेशा, मरिम्शो पाइक्ती” दंमाक्त।

<sup>22</sup> मोपा नाओमी नु आ चाइमी मोआबी रूथ मोआब रागी रे बेथलेहेम जाक्सा बाक्त। मेको बेथलेहेमम जाक्सानु, क्योत्रज मीशो बाक्माक्त।

### रूथ सिला माल्दीशो

2 मिनु नाओमी आ वॉइश एलीमेलेक आ खिं डा शुश शॉप पाइश्शो नु ठेयब मुर का बाक्माक्त। मेको आ नें बोआज बाक्माक्त।<sup>2</sup> मिनु मोआबी रूथमी नाओमी कली “गो रूम लशा, सु सुम आं कली शिशी पाइनीमी, मेको आन नोनोले सिला बाला गुप्दी डा?” दंमाक्त। मिनु आ शिमीमी “दुम्ब, आं चाइमी लावो” दंमाक्त।<sup>3</sup> मिनु रूथ लशा, रिक्ब आन नोनोले सिला बाला गुबा बाक्त। आ जाक्दीश्शो रू चहिं एलीमेलेक आ खिं डा मुर बोआज आ रू बाक्माक्त।<sup>4</sup> मेना बोआज बेथलेहेम रे जाक्माक्त। मिनु मेकोमी रिक्ब आन कली “परमप्रभु यावे गेपुकी नु बाक्ल” दंमाक्त। मिनु रिक्बपुकीमी यो “परमप्रभु यावेमी इन कली आसीक गेवल” दंमा बाक्त। रूथ १:२<sup>5</sup> मिनु बोआजमी आ गेय पाइब आन कली कोत्रब कली “एको मीश आल सुम?” दे हिल्लो पवा बाक्त।<sup>6</sup> मिनु मेको गेय पाइब आन कली कोत्रब मुरुमी “एको मोआब रागी रे नाओमी नु जाक्शो मोआबी मीश आल बाक्ब।<sup>7</sup> एकोमी आं कली ‘रिक्ब आन नोनोले मुठा आन नेक्था यो सिला गुप्चा गेयीनी’ दे पुंडतु। मिनु एको सुनी रे इक्कका ला नाइश्शा, सिला गुप्स डा गुप्स बाक्त” दंमाक्त।<sup>8</sup> मिनु बोआजमी रूथ कली “नेनो, गे अरु आन रू सिला गुप्थ मलावो। आं गेय पाइब मीश मुर आन नेक्थान बाक्को।<sup>9</sup> मुरपुकीम ते ते रिक्नीमी, मेके मेके लावो। आं गेय पाइब वॉइश मुर आन कली ‘इ कली मथिचा’ दे माइक्तामी। तूतू दाक्ते हना, वॉइश मुर आन चाक्शो गर डा ब्वाक्कु तूडो” दंमाक्त।<sup>10</sup> मिनु रूथ मेको आ डोंइती बाप्शा, मेको कली “गो अर्को रागी डा मुर नड, दे तुइश्शा यो मारदे आं कली इश डा शिशी पाइय्यीनी?” दंमाक्त। ब्यवस्था २३:४-६<sup>11</sup> मिनु बोआजमी “इ वॉइश बेक्म नोले इ शिमी कली दोदेंशो रिम्शो पवी, मेको नेल्ल मुरपुकीम आं कली माइक्तीमी। गे इ आम आफ, इ जरमेशो रागी प्रॉइशा, मतुइश्शो मुर आंइ बाक्तीके जाक्ते। रूथ १:१६, १७<sup>12</sup> परमप्रभु यावेमी इ कली रिम्शो पवल। परमप्रभु यावे, इसाएली आन परमप्रभुम इ कली वारच पवल, दे मेको आ नेक्था जाक्ते। मेकोमी इ माल्शो नेल्ल गेवल” दंमाक्त। भजन संग्रह ३६:८<sup>13</sup> मिनु रूथमी “प्रभु, इन डोंइती शिशी ताता। गे आं थुं नाइक्पाइक्तीनी। गो इन गेय पाइब मबाक्ती हना यो, गे आं कली रिम्शो



लोत्र पाइतीनी" दैमाक्त। 14 मिनु लाम्ज जची ना, बोआजमी मेको कली "एक पिवो। शोब्ले जावो। इ शोब्ले अडगुर शांबुम तेप्तो" दैमाक्त। मिनु रूथ रिक्ब मुर नु निस्से बाक्त। मिनु बोआजमी मेको कली कारशो क्योव्रज गेवा बाक्त। रूथमी रूथी सम्म जशा, हेंशा वोदा बाक्त। 15 मिनु मेको बोक्शा, सिला गुप्य लमाक्त। बोआजमी आ गेय पाइब वोंडश मुर आन कली "मेको कली मूठा आन नेक्नेक्था यो सिला गुप्या गेने, महुइक्तीन। 16 इच्का बाला तोक्शा गेने। मिनु गुबानु, महुइक्तीन" दे माइक्मी बाक्त। लेवी १०:९-१० 17 मोपा रूथ नां रिक्चावा सम्म सिला गुम्ना गुम्न बाक्माक्त। मिनु तुबानु, एफाह का क्योव्रज दुम्माक्त। एफाह का २२ लिटर पुक्तीके खोदेशो बाक्ब।

18 मिनु मेको कुरशा, सहर जाक्माक्त। आ शिमीमी मिश डा क्योव्रज गुप्या, चाक्शो तवा बाक्त। मिनु रूथमी आ हेंशो जचा थोव्रक यो गुंडशा, आ शिमी कली गेवा बाक्त। 19 मिनु आ शिमीमी "मुलाक्ती सिला गुप्य ते लवे? इ कली शिशी पाइब मुर आसीक तवल" दैमाक्त। मिनु रूथमी ते सिला गुबा आ शिमी कली शेंदा बाक्त। "मुलाक्ती आं सिला गुप्यो रू डा होव्रप आ नें बोआज बाक्त" दैमाक्त। 20 मिनु नाओमीमी आ चाइमी कली "परमप्रभु यावेमी मेको कली आसीक गेवल। मिनु बेक्शो नु ब्रोंडशो मुर आन कली शिशी पचा मप्रोन। मेको मुर इस खाल डा बाक्ब" दैमाक्त। रूथ ४:४ 21 मिनु मोआबी रूथमी "मेकोमी आं कली 'क्योव्रज नेल्ल ओंइने मथुमु सम्म आं मुरपुकी नु सिला गुप्य जाक्को' दैत" दैमाक्त। 22 मिनु नाओमीमी "आं चाइमी, मेको आ गेय पाइब मीश मुर नु गाक्चा रिश्शो बाक्ब। इ कली सुइमी अर्को आन रूमी श्येत मगेमेक्ल" दैमाक्त। 23 मोपतीके क्योव्रज नु चेरब रिक्ने मनुम् सम्म, रूथ बोआज आ गेय पाइब मीश मुरपुकी नु सिला गुबा बाक्त। मिनु आ शिमी नु बाक्बाक्माक्त।

रूथमी नाओमी आ लोत्र टिशो

3 मिनु रूथ आ शिमी नाओमीमी "आं चाइमी, इ कली रिश्शो दुम्चा कली इ खिं पशा बाक्शो तचा दाक्नुड। 2 बोआज इं खाल डा मुर बाक्ब। गे मेको आ गेय पाइब मीश मुरपुकी नु बाक्ते। मुलाक्दो मेकोमी आ क्योव्रज तुप्तीकेम गेय पाइब। 3 मोपतीके गे चिक्शा, तेल खेक्शा, रिश्शो वा फेक्शा, क्योव्रज तुप्तीकेम लावो। बोआजम मजवा मतूडा सम्म मतपांडसो। 4 मिनु मेको इप्दीमेनु, आ इप्तीके कोव्रशा वोतो। मिनु नोले लशा, आ खोइल गे डा फेक्शो वा हुक्शा गोलो। मिनु गे मार पचा माल्नेवे, मेकोमी इ कली दैंब" दैमाक्त। 5 मिनु रूथमी "इन दैंशो, नेल्ल पाइनुड" दैमाक्त। 6 मिनु रूथ क्योव्रज तुप्तीके लशा, आ शिमी आ दैंशो खोदेशो पवा बाक्त।

7 बोआज जशा, तूशा ग्येरसे बाक्त। मिनु क्योव्रज पुक्तीके आ नोले इप्य लमाक्त। मिनु रूथ बोआज आ मतुइक्चा डा पा जाक्शा, आ खोइली गे डा वा हुक्शा, गोल्माक्त। 8 मिनु नाक्दो उइक्थ दुम्मेनु, बोआज सेंसे बाक्त। मिनु आ खोइल गे मीश मुर का गोल्शो तवा बाक्त। 9 मिनु बोआजमी "गे सु नवे?" दे हिल्लो पवा बाक्त। मिनु मेकोमी "गे इन वाइलीम रूथ नड। गे आंइ खाल डा मुर बाक्नीनी, इन वा फेक्तीनी" दैमाक्त। इजीकीएल १६:८ 10 मिनु बोआजमी "परमप्रभु यावेमी इ कली आसीक गेवल। डोंइती पशो क्येडा मुल डा इ पशो रिश्शो बाक्ब। गे क्येट थीब नु मथीब सुइ ठिटा वोंडश मुर आन नोले मखोदी। रूथ २:११ 11 गे महिंथु बाक्को। इ माल्शो गो नेल्ल पाइनुड। गे रिश्शो मीश मुर बाक्नेवे। सहर डा मुर नेल्लेमी तुइश्शो बाक्नीम। 12 गो थमा पा इ खाल डा मुर बाक्नुड। तन्न आं क्येडा यो आं नेक्था डा अर्को मुर का बाक्ब। 13 मुलाक्दो एके बाक्को। दीसा सुनी मेको मुरुमी इ नेक्था डा मुर आ पचा माल्शो गेय पाइब, मपापु हना, परमप्रभु यावे ब्रोंडशा बाक्शो खोदेशो पा, गो एको गेय पाइनुड। नां मसोव्रम सम्म इपो" दैमाक्त। 14 मिनु रूथ नां मसोव्रम सम्म इम्माक्त। मिनु रिश्शो पा नां मसोव्रथु बोक्माक्त। मिनु बोआजमी "क्योव्रज तुप्तीकेमी मीश मुर का बाक्त, दे सुइम मतुइक्तेक्ल। 15 इ कुप्नी दाइक्तो" दैमाक्त। मिनु रूथमी दाइक्तानु, ६ सेआह क्योव्रज गेशा कुरपदा बाक्त। मिनु रूथ सहर लेम्माक्त। सेआह का ७ लिटर खोदेशो बाक्ब। मिनु ६ पुक्तीके ४२ लिटर कि १० पाथी खोदेशो बाक्ब। 16 मिनु आ शिमी आ बाक्तीके जाक्दीम्मेनु, आ शिमीमी "आं

चाइमी, मार दुम्मे?" दे हिल्लो पवा बाक्त। 17 मिनु रूथमी बोआजमी पशो नेल्ल शेंशा "मेकोमी आं कली 'इ शिमी आ बाक्तीके श्येत्थ मलेतो' दे आं कली ६ सेआह क्योव्रज गेती" दैमाक्त। सेआह का ७ लिटर खोदेशो बाक्ब। 18 मिनु नाओमीमी "आं चाइमी, एको दोदेशो दुम्बा, मतुइक्ती सम्म इ थुं नाइश्शा बाक्को। मारदे हना मेकोमी मेको गेय मुलाक्तीन मथुमा सम्म आ थुं यो नाइक्चा मताइब" दैमाक्त।

बोआजम आ नेक्था डा मुर गुम्शो

4 मिनु बोआज सहर डा गारो डा ठेयब लाप्चोम लशा, मेकेर निश्शा बाक्माक्त। मिनु याम का नोले रूथ आ नेक्था डा मुर जाक्शो तशा, बोआजमी आ नें थिशा "एके पिशा, निस्सो" दे ब्रेत्ता बाक्त। मिनु मेको निस्से बाक्त। 2 मिनु बोआजमी १० जना सहर डा खाल्पा आन कली यो तेक्शा "निस्सीने" दैमाक्त। मिनु मेकोपुकी निस्समा बाक्त। 3 मिनु बोआजमी रूथ आ नेक्था डा मुर कली "मोआब रागी रे जाक्शो नाओमीमी इं लोक्ब एलीमेलेक आ रू लेयचा चिक्शो बाक्ब। 4 गो इ कली मो दैंड, दैंशो नड। एको सहर डा मुरपुकी नु खाल्पा आन डोंइती गे ग्याप्चा दाक्नेवे हना, ग्यापो। ग्याप्चा मदाक्नेवे हना, आं कली तुइक्पाइय्यी। मारदे हना इ नेक्था डा मुर गो नड" दैमाक्त। मिनु मेको मुरुमी "गो ग्याप्नुड" दैमाक्त। लेवी २५:२५; येरमीया ३२ 5 मिनु बोआजमी "नाओमी रे मेको रू ग्यबी नाक्ती, गे बेक्शो मुर आ मीश मोआबी रूथ यो ताइनेवे। मेको बेक्शो मुर आ नें आ थेरशो रू नु लील, दे मो दुम्चा माल्ब" दैमाक्त। ब्यक्स्था २५:५-६ 6 मिनु रूथ आ नेक्था डा मुरुमी "गो ग्याप्ता हना, आं आंम थेरशो रू मरिश्शो दुम्ब। आं पचा माल्शो गेय गेन पावो। गो ग्याप्ने मचाप्नुड" दैमाक्त। 7 इस्राएल रागीमी डोंइती रू ग्याप्नेनु, लेयडमेनु, रू डा होव्रप फांडसीमानु, रू लेयबमी ग्याप्ब कली आ जुत्ता पुइश्शा गेचा माल्बाक्माक्त। इस्राएलमी लोत्र फाइक्चा मततीके आ पर्बम मोदेशो पचा माल्बाक्माक्त। ब्यक्स्था २५:७-१० 8 मिनु रूथ आ नेक्था डा मुरुमी बोआज कली "गे ग्याम्सो" दे आ जुत्ता पुइश्शा गेवा बाक्त। 9 मिनु बोआजमी खाल्पापुकी नु मेकेर बाक्ब मुर आन कली "गो एलीमेलेक, माहलोन नु किल्योन आन थेरशो रू नेल्ले नाओमी रे ग्याप्ता। गे मुलाक्ती सांकछी दुम्तीनी। 10 माहलोन आ मीश, मोआबी रूथ यो बेक्शो मुर आ नें, आ थेरशो रू नु लील, दे चाक्ता। मोपा आ लोक्ब आन दातेमी नु आ जरमेशो बाक्तीकेम आ नें लील, दे मो पाता। गेपुकी मुलाक्ती सांकछी दुम्तीनी" दैमाक्त। 11 मिनु ठेयब लाप्चोम बाक्ब नु खाल्पा नेल्लेमी "गो सांकछी दुम्तक। परमप्रभु यावेम एको इ खिंम जाक्शो मीश मुर कली राहेल नु लेआ खोदेशो सेलल। मेको निक्शीमी इस्राएल आ खिं सेल्शो बाक्ताक्से। बेथलेहेम एफ्राथाहम इ नें ठेयब दुम्ल। 12 तामारम यहूदा रे थिशो परेस आ खिं खोदेशो पा, परमप्रभु यावेमी एको ठिटी मीश मुर रे थिशो आलम इ खिं सेलल" दैमा बाक्त। उत्पत्ती ३८:२९

बोआजम रूथ कली ग्युंवे पशो

13 मिनु बोआजमी रूथ चाक्शा, मेको नु बाक्माक्त। मिनु परमप्रभु यावे आ आसीकमी रूथ कोव्रज कुरशा, तौ का थिमाक्त। 14 मिनु मीश मुरपुकीमी नाओमी कली "परमप्रभु यावे ठेयब बाक्ब। मेकोमी इ कली मुल इ खाल डा मुर नु वोइक्ते। परमप्रभुम इ कली चच का गेते। एको आ नें इस्राएलम ठेयब दुम्ल। 15 एकोमी इ कली मुल नक ब्रोंइतीक गेशा, खाल्पी दुम्ने, इ कली थुल्ब। मारदे हना ७ जना तौ आन क्येडा इ कली दाक्ब चाइमीमी रिश्शो पशो बाक्ब" दैमा बाक्त। 16 मिनु नाओमीमी मेको आल ताक्शा, आ थुकुम वोइश्शा, मेको कली कोव्रब दुम्माक्त। 17 मिनु आ नेक्था डा मीश मुरपुकीमी "नाओमी के चच का दुम्त। गो मेको आ नें ओबेद वोइय्य" दैमुमा बाक्त। मेकोन येस्से आ आफ, दाऊद आ बाजे बाक्माक्त। मत्ती १:५-६; लूका २:३२

दाऊद आ किकी पिपी

18 परेसम हेसोन थिमाक्त। 19 हेसोनम राम थिमाक्त। राममी अम्मीनादाब थिमाक्त। इतिहास २:९-१५ 20 अम्मीनादाबमी नहशोन

थिमाक्त। नहशोनमी साल्मोन थिमाक्त। गन्ती १:७<sup>21</sup> साल्मोनमी बोआज थिमाक्त। बोआजमी ओबेद थिमाक्त।<sup>22</sup> ओबेदमी येस्से थिमाक्त। येस्सेमी दाऊद थिमाक्त। १सामुएल १६:१, ११-१३

## १ सामुएल

नेल्ल क्येडा डोंइती एको सामुएल किताब निक्शी, राजा किताब निक्शी नु इतिहास के किताब निक्शी नेल्ल ठेयब किताब का बाक्शो बाक्त। नोले ला सेप्टुआगिन्त माइश्शोमी एको किताब कली ६ ओटा किताब सेल्शो बाक्त। सामुएल नु राजा आन पालाम इतिहास ब्रेक्ब मुर बाक्शो बाक्तेक्म। मेना सामुएल आ ब्रेक्शो तामेनु, परमप्रभु यावे आ लोत्र पाइब नाथान, गाद, येरमीया कि एज्राम एको किताब ब्रेक्शो दुम्ने चाब्ब। पिप दाऊद आ पशो मार मार बाक्मे, मेको डोंइती रे नोले सम्म नेल्ल परमप्रभु यावे आ लोत्र पाइब सामुएल, नाथान नु गाद आन ब्रेक्शो किताबम ब्रेक्शो बाक्ब। सामुएल किताब निक्शी ९७५ बि. सी. नेबुकदनेसरम यरूसलेम खतम सेला नोले डा लोत्र तेम्शा ब्रेक्शो बाक्ब, दे तुंडसीब। परमप्रभु यावेमी आ देंशो पाइब। चढ़ेब एली, पिप सावल नु इस्राएल डा मुरपुकीम परमप्रभु यावे आ लोत्र मटिशो बाक्तेक्म। परमप्रभुमी चढ़ेब एली आ पा डा सामुएल चढ़ेब नु पिप सावल आ पा डा दाऊद कली पिप सेला बाक्त। परमप्रभु यावेमी आ देंशो गेनायो मप्रॉइब।

### डोंइती डा लोत्र

1 रामाथाइम-सोफीम रे जाक्शो मुर का बाक्माक्त। मेको एफ्राइम डा पहाड डा सुफ आ खिं डा बाक्माक्त। मेको आ नें एल्काना बाक्माक्त। एल्काना येरोहाम आ तौ, एलीहु आ चच बाक्माक्त। मेको आ शेर बाजे तोहु नु आ किकी बाजे जूफ माइश्शो एफ्राइम थर डा बाक्माक्त। *इतिहास ६:१; इतिहास १२:१९-२०* 2 एल्काना के मीश निक्शी बाक्सा बाक्त। का आ नें हान्नाह नु अर्को आ नें पेनीनाह बाक्माक्त। पेनीनाह के आल बाक्मा बाक्त, तन्न हान्नाह के आल मबाक्माक्त। *उत्पत्ती २९:३१* 3 एल्काना बर्स बर्सम आ सहर रे शिलो लाइबाक्माक्त। मेकेर मुर नेल्ल आन परमप्रभु यावे कली ठेयब सेल्शा, चढ़ेतीक चढ़ेचा कली लाइबाक्माक्त। मिनु मेकेर चढ़ेब एली आ तौ निक्शी होफनी नु फिनेहास बाक्सा बाक्त। मेको परमप्रभु यावे कली चढ़ेब बाक्सा बाक्त। *यहोसु १८:१* 4 मिनु एल्कानाम चढ़ेशो नाक्ती आ मीश पेनीनाह आ तमी तौ नेल्ल आन कली चढ़ेशो थोत्रक गेबाक्माक्त। 5 मिनु हान्नाह कली निक्शी भाग खोइ गेबाक्माक्त। मारदे हना एल्कानाम हान्नाह कली शुश दाक्बाक्माक्त। तन्न परमप्रभु यावेमी हान्नाह कली आल मथीब सेल्शो बाक्माक्त। 6 हान्नाह के आल मबाक्तीके आ सौतामी मेको कली आ थुं शुश खाइक्पाइश्शा, तोक्शा लोत्र पाइक्बाक्माक्त। मारदे हना परमप्रभु यावेमी हान्नाह कली आल मथीब सेल्शो बाक्माक्त। 7 मोपा एल्कानामी बर्स बर्सम परमप्रभु यावे कली चढ़ेथ लमेनु, आ सौतामी हान्नाह कली श्येत गेस डा गेस पतीके हान्नाह डाक्शा, मारेइ मजवा मब्ववा बाक्त। 8 मिनु आ वोंइश एल्कानामी मेको कली “हान्नाह, गे मारदे डाक्स डा डाक्स बाक्डे? मारदे मजवी मब्ववी? गे मारदे इ थुं खाइक्पाइक्नेवे? मार, गो इ कली १० जना तौ आन क्येडा यो शुश दाक्ब मनडा डा?” देंमाक्त।

### हान्नाह आ प्रार्थना

9 मिनु काले शिलोमी जने तूने थुम्मे नोले हान्नाह बोक्माक्त। मिनु परमप्रभु यावे आ डोंइती लशा राम्माक्त। मेना चढ़ेब एली परमप्रभु यावे आ ताम्बु आ ओव्रतीक नेक्था आ नित्तीकेम निश्शो बाक्माक्त। 10 मिनु हान्नाह आ थुं शुश खाइश्शा, डाक्शा, परमप्रभु यावे कली पुना बाक्त। 11 मिनु मेकोमी कबल पा “मुर नेल्ल आन परमप्रभु यावे, गे इन वाइलीम, आं श्येत तशा, आं कली मिश्शा, मप्रेंताक्नी हना, आं कली तौ का गेयीनी। गो मेको कली मबेक्म सम्म परमप्रभु यावे, इन कली जिम्मा गेनुड। मेको आ चां गेनायो मप्रेक्सीब मेकोम गेनायो अडगुर शांबु मतूब” दे कबल पवा बाक्त। *आमोस २:११; न्यायाधीस १३:५* 12 मिनु मेकोमी परमप्रभु यावे आ डोंइती पुंडस डा पुंडस बाक्मेनु, एलीम मेको आ शोत्र हिक्शो कोव्रशा बाक्माक्त। 13 हान्नाहमी आ थुंम ला पुंडशो बाक्माक्त। मिनु आ शोत्र हिक्साक्व हना यो, आ सेंदा मप्रूमाक्त। मिनु एलीम मेको कली दुक्शो मीश मुर का बाक्त, दे

मिम्ता बाक्त। 14 मिनु एलीमी मेको कली “गे गेना सम्म मोपा दुक्शा बाक्नेवे? अडगुर शांबु तूचा प्रोनो” दे मदा बाक्त। 15 मिनु हान्नाहमी “आं प्रभु, गो थुं खाइश्शो मीश मुर का बाक्नुड। गो मारेइ अडगुर शांबु मतूड। गो परमप्रभु यावे आ डोंइती आं थुं डा श्येत नेल्ल शोव्रता। 16 आं कली मरिम्शो मीश मुर मसुइय्नीनी। आं थुं खाइक्तीके नु शुश श्येत जतीके गो मुल सम्म पुंडस डा पुंडसन बाक्ती” देंमाक्त। 17 मिनु एलीम “इ थुं नाइश्शा लावो। इस्राएली आन परमप्रभुम इ पुंडशो लोत्र गेवल” देंमाक्त।

18 मिनु हान्नाहमी “गे इन शिशी ताइब दुम्डल” देंमाक्त। मिनु नोले मेको लशा, आ वोंइश नु जवा तूडा बाक्त। मिनु नोले लेंशा आ थुं मखाइक्माक्त।

### सामुएल जरमेशो

19 मिनु मेकोपुकी आ दीसा सुनी कना बोक्शा, परमप्रभु यावे कली ठेयब सेल्शा, आन खिं रामाह लेम्मा बाक्त। मिनु एल्काना आ मीश हान्नाह नु इम्माक्त। मिनु परमप्रभु यावेमी हान्नाह कली मिम्ता बाक्त। *उत्पत्ती ३०:२२* 20 मिनु नोले हान्नाहम कोव्रज कुरशा, तौ का थिमाक्त। मेकोमी आ नें सामुएल वोदा बाक्त। मारदे हना मेकोम “गे मेको परमप्रभु यावे नु पुंडशो नड” देंमाक्त।

### हान्नाहमी आ कबल खाप्शो

21 परमप्रभु यावे कली बर्स बर्स डा चढ़ेतीक चढ़ेशा, आंम कबल खाप्शा कली एल्काना आ खिं डा मुर नु इर शिलो लमाक्त। 22 तन्न हान्नाह चहिं मेकोपुकी नु मलमाक्त। मेकोमी आ वोंइश कली “आलम दूध प्रोना नोले गो एको कली परमप्रभु यावे आ बाक्तीक चोव्रदीनुड। मिनु एको गेना हना यो परमप्रभु यावे आ डोंइती मेक उइ बाक्ब” देंमाक्त। 23 मिनु मेको आ वोंइश एल्कानामी “गे मार दाक्ती, मेकोन पावो। मेकोम दूध मप्रोना सम्म खिं उइ बाक्को। परमप्रभु यावेम आ पशो लोत्र कबल” देंमाक्त। मिनु हान्नाह आलम दूध मप्रोना सम्म खिं उइ बाक्शा, थुल्शा, मेको कली कोल्पदा बाक्त। 24 मिनु दूध प्रोना नोले मेको आल लाइश्शा, शिलो लमाक्त। मिनु मेकोमी आ नु बर्स सां डा ब्यफ का, एफाह का फस नु गर का अडगुर शांबु यो इर परमप्रभु यावे आ ताम्बुम लदा बाक्त। मेना मेको आल आइक्वन बाक्माक्त। *एफाह का २२ लिटर बाक्ब। मेको ५ पाथी खोदेंशो बाक्ब। गन्ती १५:३,८-११* 25 मिनु मेकोपुकीम मेको ब्यफ साइश्शा, चढ़ेमे बाक्त। मिनु मेको आल कली एली आ बाक्तीक चाक्दीत्मे बाक्त। 26 मिनु हान्नाहमी मेको कली “आं प्रभु, गे ब्रोंइशा बाक्शो खोदेंशो पा, गो थमा लोत्र पाइनुड। गो परमप्रभु यावे कली पुंडशा, इन डोंइती राप्शा, बाक्ब मीश मुर नड। 27 गो एको वोंइश आल आ पर्वम पुंडशो नड। मिनु परमप्रभु यावेमी आं पुंडशो गेती। 28 मोपतीके गो एको कली परमप्रभु यावे कली जिम्मा गेनुड। एको ब्रोंइशा बाक्म सम्म परमप्रभु यावे कली जिम्मा गेंसीशो बाक्ब”

देंमाक्त। मिनु मेकोपुकी यो परमप्रभु यावे आ डोंइती बाप्शा, मेको कली ठेयब सेल्मे बाक्त। १सामुएल १:११

हान्नाहम आ प्रार्थना

2 हान्नाहमी “आं थुं परमप्रभु यावे नु ग्येरसीब। गो परमप्रभु यावे आ पर्बम आं पिया पोक्नुड। गो आं जोरी सत्रु आन कली ग्राती। गेम आं कली प्रॉइतीके गो ग्येरसाक्मी। लूका १:४६-५५

2 परमप्रभु यावे खोदेंशो अरु सुइ मबाक्नीम। इन क्येडा लाक्शो अर्को सुइ मबाक्नीम। आंइ परमप्रभु, सेरथे फुल्लु खोदेंशो अरु सुइ मबाक्नीम।

ब्यवस्था ४:३५; उत्पत्ती ४९:२४; ब्यवस्था ३२:१८; भजन संग्रह १८:२२

3 ठेयब लेशशो लोव्र नु मरिम्शो लोव्र पचा प्रोनीन। मारदे हना परमप्रभु यावे नेल्ल जोक्ब तुइक्ब बाक्ब। मेकोमी मुर आन पतीके नु लोव्र नेल्ले नाक्ब।

4 सक्ति पाइश्शो मुर आन लिब्रा जिक्शो बाक्ब। तन्न सक्ति मपाइश्शो बोल्यो दुश्शो बाक्नीम। 5 डोंइती मारेइ मारेइम गाप्शो मुर यो मुल जचा आ पर्बम गेय पाइनीम। तन्न शोव्रलु बेक्शोपुकी रूशो बाक्नीम। आल मथीब मीश मुरुमी ७ जना आल थिप्टु। तन्न शुश आल थीब ममा आ थुं बेक्ब।

6 परमप्रभु यावे बेक्पाइक्ब नु सेंपाइक्ब बाक्ब। मेकोमी मुर आन कली बेक्शो मुर आन बाक्तीके सोइक्ब। मिनु मेकोमी सेंपाइक्ने यो चाप्ब।

ब्यवस्था ३२:३९; भजन संग्रह ७१:२० 7 परमप्रभु यावे प्रुडग नु शोप पाइश्शो सेल्ब बाक्ब। मेकोमी आइक्च नु ठेयब यो सेल्ब। भजन संग्रह ७५:८ 8 मेकोमी मारेइ मथीब आन कली फुरक रे पोक्ब। प्रुडग आन कली घुरेन रे पोक्ब। मिनु मेको आन कली पिप आन तौ नु निप्पाइक्ब। मेको ठेयब मुर आन दातेम बाक्चा नु मान पाइक्तीक ताइनीम। मारदे हना रागी आ थाम परमप्रभु यावे केन बाक्नीम। मेकोम मेको तार रागी वोइक्नु। भजन संग्रह ११३:७-८ 9 मेकोमी थमा सुइक्चा पुंइसीब मुर आन कली कोव्रब। तन्न आ अरेशो लोव्र मटीब आन कली छिडछिडमी खतम पोक्पाइक्ब। मारदे हना मुरपुकीम आन सक्तिमी मग्राणीम। भजन संग्रह ३३:१६

10 परमप्रभु यावे आ पर्बम जोरी सत्रु साइक्चा पुंइसीनीम। नेल्ल क्येडा ठेयबमी मेको आन पर्बम सरीड रे बुंबु पपाइक्ब। मिनु परमप्रभु यावेमी रागी नेल्ल आन कली निसाफ पाइब। मेकोम आ पिप कली सक्ति गेब। मिनु आ तेल लुक्शो आ पिया पोक्ब” देंमाक्त।

11 मिनु नोले एल्काना आ खिं डा मुरपुकी नु रामाह लेम्माक्त। मेको वोंइश आल चहिं परमप्रभु यावे कली चढ़ेब एली आ डोंइती बाक्शा, परमप्रभु यावे आ गेय पवा बाक्त।

एली आ तौ निक्शीम मरिम्शो पशो

12 एली आ तौ निम्फा हिंचा डा मरिम्शो पाइब बाक्सा बाक्त। मेको निक्शी परमप्रभु यावे कली मान पा महिंब बाक्सा बाक्त। 13 मेको चढ़ेब निक्शीमी चढ़ेथ जाक्ब मुर आन कली मार पाइक्बाक्ताक्स देंशा हना, मुर आन चाक्शो चढ़ेशो श्ये क्येशा ब्रुइक्तानु, मेको आस गेय पाइब कली ठेयब तूतीक सां पाइश्शो काटा कुरपाइश्शा, लेवी ३:२-५; लेवी ७:११-१७, २८-३४

14 कराइ, ताप्के, दिउरे कि ठेयब बोसुम लोप्शो श्ये तूपाइश्शा, दोशो गूमे मोशो आंम के सेल्बाक्सा बाक्त। मोपा शिलोम चढ़ेथ जाक्शो इस्राएली नेल्ल आन कली मो पाइक्बाक्सा बाक्त। 15 मेको निक्शीमी नेल्ल क्येडा मरिम्शो मार पाइक्बाक्सा बाक्त देंशा हना, मेको बोंसो चोशा चढ़ेचा क्येडा डोंइती आस गेय पाइबपुकी सोइश्शा “चढ़ेब कली वाल्चा कली श्ये गेवो। लोप्शो श्ये मताक्ब। क्येख ला ताक्ब” देंपाइक्बाक्सा बाक्त। 16 मिनु मेको मुरुमी “ममाइ, डोंइती बोंसो चोचा गेयी। मिनु नोले इ दाक्शो लाइक्ने चाप्नेवे” देंमेनु, मेको आस गेय पाइबमी “ममाइ, मुलन गेयी। मगेप्तीवी हना, गो रोइश्शा लाइक्नुड” देंबाक्माक्त। 17 मिनु मेको ठिटा आस मरिम्शो पशो परमप्रभु यावे आ डोंइती ठेयब पाप दुम्माक्त। मारदे हना मुरपुकीमी परमप्रभु यावे कली चढ़ेशो आइक्च मिम्तसे बाक्त।

सामुएल नु आ आम आफ

18 मिनु सामुएल परमप्रभु यावे आ डोंइती गेय पाइक्बाक्माक्त। मेको वोंइश आल सुती वा के कुचु तार चढ़ेब आ फेक्तीके फेक्शा, गेय पाइक्बाक्माक्त। १सामुएल २२:१८; प्रस्थान २८:४-६ हिब्रू लोव्रमी एफोद देंशो कुचु आ फेक्तीक बाक्त। 19 मिनु आ ममाम मेको कली बर्स बर्सम आइक्च फेक्तीक वा फेरबाक्माक्त। मिनु आ वोंइश नु बर्स बर्स डा क्योरशा चढ़ेदीमेनु, मेको वा लाइश्शा गेबाक्माक्त। 20 मिनु एलीमी एल्काना नु आ मीश आस कली आसीक गेशा “एको आल आ पा डा परमप्रभु यावेमी एको मीश रे इन कली आलपुकी गेवल। मारदे हना एको परमप्रभु यावे कली गेप्तीवी” देंबाक्माक्त। मिनु नोले मेको आन खिं लेप्बाक्मा बाक्त। 21 मिनु परमप्रभु यावेमी हान्नाह कली आसीक गेवानु, मेको आल थीब दुश्शा, तौ सां नु तमी निक्शी थिमाक्त। मिनु सामुएल चहिं परमप्रभु यावे आ डोंइती कोल्ना कोल्ल लमाक्त। लूका १:८०

एली आ तौ निक्शीम मटिशो

22 मिनु एली थम खूशो दुम्माक्त। आ तौ निक्शीमी इस्राएली आन कली दोदेंशो पाम्से, मेको नेल्ल नेना बाक्त। मेकोमी आ तौ गुम्तीक ताम्बु आ डोंइती गेय पाइब मीश मुरपुकी नु इप्शो, यो नेना बाक्त। प्रस्थान ३८:८

23 मोपतीके मेकोमी मेको आस कली “गे निक्शीमी मारदे ओदेंशो गेय पसी? गेमी ओदेंशो मरिम्शो गेय पाइतीसी देंशो लोव्र गो मुर नेल्ल आन शोव्र रे नेंता। 24 आं तौ निक्शी ओदेंशो गेय पचा प्रोनीस। मारदे हना, परमप्रभु यावे आ मुर आन दातेमी एको लोव्र ब्रशो नेंता। एको थम मरिम्शो बाक्ब। गे परमप्रभु यावे आ मुर आन कली पाप पपाइक्नीसी। 25 मुरुमी मुर आन कली पाप पाप्नु हना, परमप्रभुम निसाफ पाइब। तन्न मुरुमी परमप्रभु यावे कली पाप पाप्नु हना, सुम गारपाइक्ने चाप्बा डा” देंमाक्त। मेको लोव्र नेल्ल नेंताक्सा हना यो, मेको निक्शीमी आस आफ आ लोव्र मटिम्से बाक्त। मारदे हना परमप्रभु यावेमे मेको निक्शी आस कली साइक्चा माल्शो बाक्माक्त। अय्युब १६:२०-२१

परमप्रभुम एली आ पर्बम लोव्र पशो

26 मिनु सामुएल कोल्ना कोल्ल लमेनु, परमप्रभु यावे नु मुर आन डोंइती दाक्शो दुम्माक्त। लूका २:५२ 27 मिनु परमप्रभु आ लोव्र पाइब का जाक्शा, एली कली “परमप्रभु यावेमी इन कली लोव्र का पाइब। मेको मार बाक्ब देंशा हना, गो इन आफ नु आ खिं डा मुर इजीप्ट फाराओ आ रागीमी बाक्मानु, गो मतपांइसीडा डा? 28 गो इस्राएल डा थर नेल्ल रे मेको कली आं कली चढ़ेब दुम्पाइक्चा कली योव्रता। आं कली चढ़ेतीकेम चढ़ेचा, आं कली धूप चोचा, नु आं डोंइती निसाफ पतीक ऊरीम नु धुम्मीम बाक्शो झोला फेक्चा कली योव्रता। इस्राएल डा मीम चढ़ेशो नेल्ल इ आफ आ खिं डा मुर आन कली गेता। ब्यवस्था १८:१; गन्ती १८:८-२० 29 मारदे गे आं देंशो चढ़ेशो नु जचा थोव्रक चढ़ेशो नेल्ल आइक्च मिम्ती? मिनु आं क्येडा गे इ तौ आस कली ठेयब सेल्नेवे। आं मुर, इस्राएली आन चढ़ेशो रे गे नेल्ल क्येडा रिम्शो मारदे आंम कली वोंइसीशा, इ तौ आस कली ठेयब सेल्नेवे?” देंमाक्त। 30 मोपतीके परमप्रभु यावे, इस्राएली आन परमप्रभुमी “इ किकी पिपी आन खिं डा मुर नेल्ल गेना हना यो आं डोंइती चढ़ेब दुम्नीम, गो कसम जशो नड” देंशो बाक्त। तन्न परमप्रभु यावेमी “मुल ओदेंशो मदुम्ब। मारदे हना आं कली ठेयब सेल्ब आन कली गो ठेयब सेल्नुड। आं कली आइक्च सेल्ब नेल्ल आइक्च सेल्चा पुंइसीनीम। प्रस्थान २८:१; मलाकी ३:१६-१८

31 मुल गे नु इ किकी पिपी आन खिं डा मुर आन सक्ति नेल्ल सामुनुड। इ खिं डा मुर सुइ खूशो दुम्चा मताइनीम। १राजा २:२७ 32 गे आं मुर इस्राएली आन कली गेशो रिम्शो थोव्रक तशा गेहे पाइनीनी। मिनु इ खिंमी सुइ खूशो सम्म मलीनीम। 33 तन्न गो इ तौ चच युइ आन दाते डा आं कली चढ़ेतीकेम गेय पाइब, का कली मसाइक्नुड। मेको शुश डाक्शा, आ थुं लुक्च लाइक्ब। मारदे हना मेकोमी आ वोंइश मुर नेल्ल बेक्ची मजाक्थु बेक्शो ताइब। 34 मिनु इ तौ निक्शी होपनी नु फिनेहास काबुमीन बेक्नीस। मेको आं देंशो

लोव्र थमा बाक्ब, देंशो चिन्ड का बाक्ब। १सामुएल ४:११<sup>35</sup> गो आं कली थमा सुइक्ब चढेब का पोक्नुड। मेकोम आं कली टिशा, आं थुम मिशो पाइब। गो मेको कली गेना हना यो लीब खिं का सेल्लुड। मिनु मेकोमी आं तेल लुक्शो आ डोंइती गेना हना यो गेय पाइब। १राजा २:३५; हिब्रू ५:४-६<sup>36</sup> मिनु इ खिं डा ब्रोंइशा लीशोपुकी मेको आ डोंइती बाप्शा 'टुक्रा का चांदी, शोब्ले का तचा कली, आं कली चढेतीक गेय गेयीनी। मिनु गो नु जचा थोवक बाक्ल' देंनीम" दे परमप्रभु यावेमी देंत।

परमप्रभुम सामुएल कली ब्रेशो

3 मिनु सामुएल एली आ देंशो टिशा, परमप्रभु यावे आ गेय पना पन बाक्माक्त। मेना परमप्रभु यावे आ लोव्र शुश मनैसीबाक्माक्त। मिनु ततीक यो शुश मतांडसीबाक्माक्त। आमोस ८:११<sup>2</sup> मिनु काबु नाक्दो एली आ इप्तीकेमी गोल्शा बाक्माक्त। आ मिक्च ब्राब्रा दुम्शा, रिशो पा तने मचाप्ब दुम्शो बाक्माक्त।<sup>3</sup> मिनु सामुएल परमप्रभु यावे आ ताम्बु डा कबल पशो सन्दोस आ नेक्था इप्शो बाक्माक्त। मेना परमप्रभु आ बत्ती मकाप्शो बाक्माक्त। गन्ती ७:८९<sup>4</sup> मिनु परमप्रभु यावेमी "सामुएल, सामुएल" दे ब्रेत्ता बाक्त। मिनु सामुएलम "गो एक बाक्ती" देंमाक्त।<sup>5</sup> मिनु एली आ बाक्तीकेम दोरशा लशा "गो आं कली ब्रेत्ताक्वीनी। गो एक बाक्ती" देंमाक्त। मिनु एलीमी "गो इ कली मब्रेत्तन, लावो। इपो" दे मदा बाक्त। मिनु मेको लशा इम्माक्त।<sup>6</sup> मिनु परमप्रभु यावेम लेंशा "सामुएल" दे ब्रेम्माक्त। मिनु मेको बोक्शा एली आ बाक्तीक लमाक्त। मिनु मेकोमी "गो एक बाक्ती। गो आं कली ब्रेत्ताक्वीनी" देंमाक्त। मिनु एलीमी "आं तौ, गो इ कली मब्रेत्तन। लावो। इपो" दे मदा बाक्त।<sup>7</sup> मेना सम्म सामुएलम परमप्रभु यावे कली मतुइश्शो बाक्माक्त। परमप्रभु यावे आ लोव्र मेको कली मतुइक्पाइश्शो बाक्माक्त।<sup>8</sup> मिनु परमप्रभु यावेमी मेको कली सां खेयप ब्रेम्माक्त। मिनु मेको लेंशा एली आ बाक्तीक लशा "गो एक बाक्ती। गो आं कली ब्रेत्ताक्वीनी" देंमाक्त। मेना एलीमी "परमप्रभु यावेम एको आल कली ब्रेत्ता बाक्त" दे तुइक्ता बाक्त।<sup>9</sup> मिनु मेकोमी सामुएल कली "लशा, गोल्शा, बाक्को। मेकोम लेंशा ब्रेत्ताक्व हना 'परमप्रभु यावे, लोव्र पने। इन गेय पाइबम नेंशो बाक्नुड' देनो" दे मदा बाक्त। मिनु सामुएल लशा, आ इप्तीकेम गोल्शा, बाक्माक्त।

<sup>10</sup> मिनु परमप्रभु यावे मेकेर जाक्शा, राप्शा, डोंइती डा खोदेंशो पा "सामुएल, सामुएल" दे ब्रेम्माक्त। मिनु सामुएलमी "देनीन, इन गेय पाइबम नेंशो बाक्नुड" देंमाक्त।<sup>11</sup> मिनु परमप्रभु यावेम सामुएल कली "गो इस्त्राएलमी रीब पा गेय का पाइनुड। मेको आ पबर्म नैबपुकी शुश हिंनीम।<sup>12</sup> मेको नाक्ती गो एली नु आ खिं डा मुर आन कली आं देंशो नेल्ल पाइनुड।<sup>13</sup> मारदे हना गो मेको कली 'गो इ खिं डा मुर आन कली गेना हना यो सजाइ गेनुड। मारदे हना एलीमी आ तौ निक्शीमी मरिश्शो पशो तुइश्शा यो, मेको आस कली मतेक्वा। १सामुएल २:२७-३६<sup>14</sup> मोपतीके गो एली आ खिं डा मुर आन पबर्म कसम जशा, एली आ खिं डा मुर आन मरिश्शो पशो मक्याम्सीब। मेको मारेइ मारेइ चढेशोमी मक्याम्सीब' देंशो बाक्नुड" देंमाक्त।

<sup>15</sup> मिनु सामुएल नां सोव्रम सम्म इम्माक्त। मिनु बोक्शा परमप्रभु यावे आ खिं डा लाप्चो रोकवा बाक्त। मिनु मेकोम परमप्रभु यावे आ देंशो नु कोंइशो लोव्र एली कली शेंचा हिंमाक्त।<sup>16</sup> मिनु एलीम सामुएल कली ब्रेशा "ए आं तौ, सामुएल" देंमाक्त। मिनु मेकोमी "गो एक बाक्ती" देंमाक्त।<sup>17</sup> मिनु एलीमी "मेकोमी इ कली मार देंमे? आं कली मेको नेल्ल मख्खुइक्थु, देनो। मेकोम इ कली देंशो लोव्र का सम्म यो ख्खुइक्ताक्वी हना, परमप्रभुम इ कली थम ठेयब सजाइ गेवल" देंमाक्त।<sup>18</sup> मिनु सामुएलम परमप्रभु यावे आ देंशो लोव्र नेल्ल शेंदा बाक्त। तेकोइ लोव्र मख्खुइक्ता बाक्त। मिनु एलीमी "मेको परमप्रभु यावे बाक्ब। मेकोम आ दाक्शो पवल" देंमाक्त। २सामुएल १५:२६

<sup>19</sup> मिनु सामुएल कोल्ना कोल्न लमाक्त। परमप्रभु यावे मेको नु बाक्माक्त। मिनु मेकोम आ लोव्र नेल्ल खबा बाक्त।<sup>20</sup> मिनु दान रे बेयर-शेबा सम्म डा इस्त्राएली नेल्लेमी सामुएल परमप्रभु यावे आ लोव्र पाइब दुम्माक्त, दे तुइक्तमे बाक्त।<sup>21</sup> मिनु परमप्रभु यावेमी शिलोम आंम कली

तुइक्पाइसीन सीन बाक्माक्त। मारदे हना परमप्रभु यावेमी सामुएल कली आ लोव्र नैपदा बाक्त।

पलिस्तीपुकीमी लडाइ पशो

4 मिनु सामुएल आ लोव्र नेल्ल इस्त्राएलम ब्रमाक्त। मेना पलिस्ती इस्त्राएली नु लडाइ पचा कली लशो बाक्मा बाक्त। इस्त्राएलीपुकीम एबेन-एजेरमी आन बाक्तीक सेल्मे बाक्त। मिनु पलिस्तीपुकीम अफेकमी आन बाक्तीक सेल्मे बाक्त। यहोसु १५:५३<sup>2</sup> मिनु पलिस्तीपुकी इस्त्राएली आन डोंइती लडाइ पचा कली गारशा, बाक्मा बाक्त। मिनु लडाइ ठेयब दुम्शा, इस्त्राएलीपुकी ब्रुमा बाक्त। पलिस्तीपुकीम मेकेर ४ हजार खोइ इस्त्राएली सदमे बाक्त।<sup>3</sup> मिनु लडाइ पाइब आन बाक्तीके लेश्शा जाक्मानु, इस्त्राएली आन खाल्पापुकीमी "मुलाक्ती मारदे परमप्रभु यावेमी आंइ कली पलिस्ती नु ब्रुपदा? गो शिलो रे परमप्रभु यावे आ कबल पशो सन्दोस एक चाक्व। मो पाइतय हना परमप्रभु यावे गोपुकी नु बाक्शा, इं जोरी सत्रु रे प्रोंइब" देंमा बाक्त। प्रस्थान २५:१०; यहोसु ३:६, ११<sup>4</sup> मोपतीके मुरपुकीमी शिलोम मुर सोइक्तमे बाक्त। मिनु करूब आस दातेम बाक्ब मुर नेल्ल आन परमप्रभु यावे आ कबल पशो सन्दोस चाक्वामे बाक्त। मिनु एली आ तौ होपनी नु फिनेहास परमप्रभु आ कबल पशो सन्दोस नु बाक्सा बाक्त। प्रस्थान २५:२२; २सामुएल ६:२<sup>5</sup> मिनु परमप्रभु यावे आ कबल पशो सन्दोस लडाइ पाइब आन बाक्तीकेम चाक्वमेनु, इस्त्राएली नेल्ल ठेयब सेंदा पा ग्येरशा रेयके पामे बाक्त। मिनु मेको आन रेयके पशो सेंदामी रागी नेल्ल मुरदा बाक्त।<sup>6</sup> मिनु पलिस्तीपुकीम मेको ग्येरशो सेंदा नेंशा "हिब्रू आन बाक्तीकेम मार दुम्मे? मार रेयके नेंसे?" दे हिल्लो पमुमा बाक्त। मिनु परमप्रभु यावे आ कबल पशो सन्दोस आन बाक्तीकेमी चाक्तेक्म, दे तुइक्तमे बाक्त।<sup>7</sup> मिनु पलिस्तीपुकी हिंशा "परमप्रभु मेको आन बाक्तीकेम जाक्त।<sup>8</sup> आबी, मुल गो बेक्नय। मो देंशो डोंइती गेनायो मद्दुम्शो बाक्त" देंमा बाक्त। "आबी, सुम आंइ कली मेको शुश सक्ति पाइश्शो परमप्रभु रे प्रोंइबा? मेकोम इजीप्ती आन कली श्येत गेशा गोरशो रागीम बेक्तीक रोइ पपाइश्शा साइश्शो बाक्त।<sup>9</sup> गो पलिस्तीपुकी महिनीन। बोल्यो दुमीन। मेकोपुकी दोपा इं वाइल दुम्मा, मोपा गोपुकी यो हिब्रू आन वाइल मद्दुम्मा डा पा, इन थुं लुक्च मलपाइक्थु, लडाइ पने। बोल्यो दुम्मा, लडाइ पने" देंमा बाक्त। न्यायाधीस १३:१<sup>10</sup> मिनु पलिस्तीपुकीम लडाइ पामे बाक्त। मिनु इस्त्राएलीपुकी ब्रुशा, आन आन ताम्बुम प्रोक्मा बाक्त। मेको लडाइम शुश मुर साइक्चा पुंडसमा बाक्त। खोइलीम गाक्ब ३० हजार लडाइ पाइबपुकी बेक्मा बाक्त।<sup>11</sup> मिनु परमप्रभु आ कबल पशो सन्दोस रोइश्शा, एली आ तौ होपनी नु फिनेहास आस कली यो सदमे बाक्त। १सामुएल २:३४

एली बेक्शो

<sup>12</sup> मिनु मेको नाक्ती बेन्यामीन आ थर डा मुर का लडाइ पतीक रे प्रोक्शा, खाक्शो वा फेक्सीशा, आ पियाम फुरक फुंडसीशा, दोरशा शिलोम जाक्माक्त।<sup>13</sup> मेको जाक्मेनु, एली आ नित्तीकेम निश्शा, लां कोव्रशा बाक्शो बाक्माक्त। मारदे हना परमप्रभु आ कबल पशो सन्दोस आ पबर्म थाम्पा सुर्ता पवा बाक्त। मिनु मेको मुर दोरशा, जाक्शा सहर डा मुर नेल्ल आन कली मार दुम्मे, मेको नेल्ल शेंदा बाक्त। मिनु सहर डा मुर नेल्ल ग्रीशा वाइ ब्रेम्मा बाक्त।

<sup>14</sup> मिनु एलीम आन वाइ ब्रेशो नेंशा "एको मार रेयके बाक्मे" देंमाक्त। मेको मुर दोरोर पा दोरशा, एली आ बाक्तीक जाक्शा, लोव्र नेल्ल शेंदा बाक्त।<sup>15</sup> मेना एली ९८ बर्स दुम्शो बाक्माक्त। मिनु मिक्च मताइब दुम्शो बाक्माक्त। १सामुएल ३:२<sup>16</sup> मिनु मेको मुरुम मेको कली "गो लडाइ रे नक जाक्ती। गो लडाइ रे प्रोक्शा जाक्ती" देंमाक्त। मिनु एलीम "ए, आं तौ, मार दुम्मे" दे हिल्लो पवा बाक्त।<sup>17</sup> मिनु मेको दोरशा जाक्बमी "इस्त्राएली पलिस्ती आन क्येडा प्रोक्तेक्म। लडाइ पाइब शुश साइक्चा पुंडसाक्म। इन तौ होपनी नु फिनेहास निम्फा साइक्चा पुंडसाक्स। मिनु परमप्रभु आ कबल पशो सन्दोस यो रोइक्ताक्म" देंमाक्त।<sup>18</sup> मिनु मेकोमी परमप्रभु आ कबल पशो सन्दोस आ पबर्म लोव्र पवानु, एली ठेयब लाप्चो आ नेक्था बाक्शो आ

नित्तीक रे नोले गे गोल्माक्त। मिनु आ शुर जिकशा, मेको बेक्माक्त। मारदे हना मेको खूशो नु ठेयब रां पाइश्शो मुर बाक्माक्त। मेकोम ४० बर्स सम्म इस्राएली आन कली निसाफ पशो बाक्माक्त।

19 मेको आ चाइमी, फिनेहास आ मीशेमी कोव्रज कुरशो बाक्माक्त। मिनु आ आल थिची ना दुश्शो बाक्माक्त। मिनु मेकोमी परमप्रभु आ कबल पशो सन्दोस रोइश्शा योल्शो नु आ शिउ नु आ वोंइश बेक्शो नेंशा, आ आल थितीक रोइम जेत्ता बाक्त। मिनु गोल्शा आल थिवा बाक्त। 20 मिनु मेको बेक्वा चिक्तानु, आ वारच पाइब मीश मुरुम “इ थुं ग्येत्थ लुक्च मदुमो। गे तौ का थिप्तीवी” दे मदा बाक्त। तन्न मेकोम लोव्र मलेत्ता बाक्त। मेकोम आ नोफा मदाइक्ता बाक्त। उत्पत्ती ३५:१७ 21 मिनु मेकोमी आल आ नें इकाबोद वोदा बाक्त। मेको आ अर्थ “परमप्रभु आ छेडछेड इस्राएल रे जाम्त” देंशो बाक्माक्त। मारदे हना परमप्रभु आ कबल पशो सन्दोस रोइश्शो नु आ शिउ नु आ वोंइश बेक्शो मिश्शा इकाबोद आ अर्थ “इस्राएल डा छेडछेड जाम्त” देंशो बाक्त १सामुएल १४:३; भजन संग्रह ७८:६१ 22 “इस्राएल डा छेडछेड जाम्त। मारदे हना परमप्रभु आ कबल पशो सन्दोस रोइसाक्व” देंमाक्त।

### पलिस्तीपुकीमी श्येत जशो

5 पलिस्तीपुकीमी परमप्रभु आ कबल पशो सन्दोस रोइश्शा लाइश्शा, एबेन-एजेर रे अश्दोद सहरम चाक्गामे बाक्त। यहोसु १५:४७ 2 मिनु मेकोपुकीमी मेको कली लाइश्शा दागोन मूर्ति आ थानम चाक्दीत्मे बाक्त। मिनु दागोन आ नेक्था वोदमे बाक्त। न्यायाधीस १६:२३ 3 मिनु आ दीसा अश्दोद डा मुरपुकी सुनी कना बोक्शा कोव्रडमेनु, दागोन आ मूर्ति गोल्शा, परमप्रभु यावे आ कबल पशो सन्दोस आ डोंइती बाप्शो तामे बाक्त। मिनु मेकोपुकीमी दागोन कली पोक्शा, आ बाक्तीकेम वोदमे बाक्त। 4 मिनु मेकोपुकी लेंशा आ दीसा सुनी कना बोक्शा कोव्रडमेनु, दागोन परमप्रभु यावे आ कबल पशो सन्दोस आ डोंइती गोल्शो तामे बाक्त। मिनु मेको मूर्ति आ पिया नु गुइ निक्शी जिकशा, लाप्शो डा शीम बाक्शो तामे बाक्त। दागोन आ रां ला लीशो बाक्माक्त। 5 मोपतीके मेको नाक्तर रे अश्दोद सहरमी दागोन कली चढ़ेबपुकी नु सु सु दागोन आ थानम ओव्रबाक्मा, मेकोपुकीमी दागोन आ थान डा लाप्शो डा शी मदिम्यु, ख्राक्शा ओव्रबाक्मा बाक्त। सेफन्याह १:९

6 मिनु परमप्रभु यावेमी अश्दोद डा मुर आन कली शुश श्येत गेमी बाक्त। मेकोमी मेको अश्दोद डा नु मेको आ एर ओंथ डा मुर आन कली गार मुतीक रोइमी श्येत गेमी बाक्त। मिनु मेको आन रागीम शुश यिच गूमा बाक्त। मिनु मेको आन सहर नेल्लेम मारेइ मारेइ खतम दुम्तीक नु बेक्तीकेम सुमा बाक्त। भजन संग्रह ७८:६६ 7 मिनु अश्दोद डा मुरपुकीमी मोदेंशो दुश्शो तशा “इस्राएली आन परमप्रभु आ कबल पशो सन्दोस एक वोइक्वा मदुम्ब। मारदे हना मेको आ गाइश्शोमी इं कली नु इं देवता दागोन कली श्येत दुश्शो बाक्ब” देंमा बाक्त। 8 मोपतीके मेकोपुकीमी पलिस्ती आन ठेयब मुर आन कली ब्रेश्शा खुप्शा “गो इस्राएली आन परमप्रभु आ कबल पशो सन्दोस मार पय?” दे हिल्लो पामे बाक्त। मिनु मेकोपुकीमी “परमप्रभु आ कबल पशो सन्दोस गाथ सहरम लतीन” देंमा बाक्त। मिनु मेकोपुकीमी इस्राएली आन परमप्रभु आ सन्दोस गाथम चाक्गामे बाक्त। यहोसु ११:२२ 9 मिनु गाथम लदमे नोले परमप्रभु यावेम मेको सहर डा मुर आन कली शुश हिंचा डा श्येत गेमी बाक्त। मेकेर डा ठेयब रे आइक्च मुर नेल्ल आन कली गार मुतीक रोइ पपाइक्मी बाक्त। 10 मिनु मेकोपुकीमी परमप्रभु आ कबल पशो सन्दोस एक्रोनम सोइक्तमे बाक्त। मिनु इस्राएली आन परमप्रभु आ कबल पशो सन्दोस एक्रोनमी चाक्दीत्मेनु, मेकेर डा मुरपुकीमी “मारदे मेकोपुकीमी इं कली नु इं खिं डा मुर आन कली साइक्वा कली इस्राएली आन परमप्रभु आ कबल पशो सन्दोस एक चाक्मे?” दे ग्रीशा रेयके पामे बाक्त। यहोसु १५:४५ 11 मोपतीके मेकोपुकीमी पलिस्ती आन ठेयब मुर नेल्ल आन कली गुम्शा लोव्र पचा कली ब्रेत्थ सोइक्तमे बाक्त। मिनु मेको आन कली “इस्राएली आन परमप्रभु आ कबल पशो सन्दोस आ बाक्तीकेम लेशशा सोइक्तीन। मेको कली आ बाक्तीकेम चाक्दीतीन। मो मपाइतीनी हना, गो नेल्ल

बेक्नय” देंमा बाक्त। सहर डा मुर नेल्ल शुश हिंशो बाक्मा बाक्त। मारदे हना परमप्रभु शुश गाइश्शो बाक्माक्त। 12 मिनु मबेक्शो आन कली गार मुतीक रोइम श्येत जपाइश्शो बाक्माक्त। मेको सहर डा मुर आन डाक्शो सरीड सम्म जाक्दीमाक्त।

### परमप्रभु आ सन्दोस लेशशो

6 परमप्रभु यावे आ कबल पशो सन्दोस पलिस्ती आन रागीम बाक्शो ७ महिना दुश्शो बाक्माक्त। 2 मिनु पलिस्तीपुकीमी दागोन कली चढ़ेब नु लिक्खु कोव्रब आन कली ब्रेश्शा, मेको आन कली “गो परमप्रभु यावे आ कबल पशो सन्दोस कली मार पय? गो मेको आ बाक्तीकेम दोपा सोइक्तय? आंइ कली शेंदीकी” दे हिल्लो पामे बाक्त। 3 मिनु मेकोपुकीमी “गोपुकीमी इस्राएली आन परमप्रभु आ कबल पशो सन्दोस लेशशा सोइक्तीनी हना, मोशा मसोइक्तीन। परमप्रभु कली दोस आ पर्बम चढ़ेतीक नु सोइक्तीन। मिनु नोले गे सानीनी। मिनु मेकोमी लेंशा इन कली श्येत मगेब” देंमा बाक्त।

4 मिनु मेकोपुकीमी “गो दोस आ पर्बम मार चढ़ेतीक सोइक्तीकी?” दे हिल्लो पामे बाक्त। मिनु मेकोपुकीमी “५ ओटा सुन के कान नु ५ ओटा सुन के यिच, इन ५ जना ठेयब मुर खोदेंशो पा नु इन कली श्येत गेब कान खोदेंशो पा सोइक्तीन। यहोसु १३:३ 5 गे इन कान खोदेंशो सुन के कान नु रागी कली खतम पोक्ब यिच खोदेंशो पा सुन के यिच सेलीन। मिनु इस्राएली आन परमप्रभु कली मान पने। मिनु मेकोमी इन कली, इन देवी देवता आन कली नु इन रागी कली श्येत गेचा प्रोंइबा को? 6 गे मारदे इजीप्त डा मुर नु फाराओ खोदेंशो पा इन थुं खकटा सेल्नीनी? मेकोम आ सक्ति कोइदा नोले मेकोपुकी मूर्ख दुश्शा इस्राएली आन कली लचा मगेमे डा?” देंमा बाक्त। प्रस्थान ४:२१; प्रस्थान १२:३१ 7 मिनु “मुल गे नक बग्गी का सेलीन। मिनु गिक्शो नु गेनायो जुवा मलाप्शो बी निक्शी लतीन। मिनु मेको बी आस कली नारेशा, बग्गी कीपाइक्वा कली ठीक पने। मेको आस बाछा कली चहिं फ्राशा गोठम लतीन। 8 मिनु परमप्रभु यावे आ कबल पशो सन्दोस लाइश्शा, बग्गी तारी वोतीन। मिनु मेको इन दोस आ पर्बम चढ़ेशो सुन के थोव्रकी आइक्च सन्दोस काम कुर पा, मेको आ नेक्था वोतीन। मिनु मेको सोइक्तीन। 9 मिनु मेको बग्गी कली कोव्रशा बाक्कीन। मेको सन्दोस कुरशो बग्गी आ रागी, बेथ-शेमेश ग्येत्थ गे लत हना, परमप्रभुमी एको ठेयब श्येत दुम्पाइश्शो बाक्माक्त, दे तुंडसीब। मो मदुम्त हना, एको श्येत मेकोमी मदुम्पाइश्शो बाक्माक्त। आंमा दुश्शो बाक्तेक्म, दे तुंडसीब” देंमा बाक्त।

10 मिनु मेको मुरपुकीमी मो पामे बाक्त। मिनु गिक्शो बी निक्शी चाक्शा, बग्गीम नारेमे बाक्त। मेको आस बाछा चहिं गोठ उइ पाइश्शा, वोदमे बाक्त। 11 मिनु परमप्रभु यावे आ कबल पशो सन्दोस नु सुन के यिच नु सुन के कान बाक्शो आइक्च सन्दोस बग्गी तार वोदमे बाक्त। 12 मिनु मेको बी एर ओंथ मपथु, गाक्वी ना ग्रीना ग्रीन इर बेथ-शेमेश ठेयब लां गे लसा बाक्त। मिनु पलिस्ती आन ठेयब मुरपुकी मेको बी आस नोले बेथ-शेमेश डा सांद सम्म लमा बाक्त। यहोसु १५:१० 13 मेना बेथ-शेमेश डा मुरपुकी दिंमम चेरब रिक्ना रिक्न बाक्मा बाक्त। मिनु मेकोपुकीमी इर गे कोव्रडमेनु, सन्दोस तशा ग्येरशा मेको आ नेक्था लमा बाक्त। 14 मेको बग्गी बेथ-शेमेश डा यहोसु आ रूम जाक्शा, नांइसे बाक्त। मेको आ नेक्था ठेयब फुल्लु का बाक्माक्त। मिनु मेकोपुकीमी मेको बग्गी खोइश्शा, मेको बी साइश्शा, परमप्रभु यावे कली चोशा चढ़ेमे बाक्त। 15 मिनु लेवीपुकीमी परमप्रभु यावे आ कबल पशो सन्दोस नु मेको आ नेक्था बाक्शो सुन के थोव्रक बाक्शो आइक्च सन्दोस शोल्शा, मेको ठेयब फुल्लु तारी वोदमे बाक्त। मिनु मेको नाक्तर बेथ-शेमेश डा मुरपुकीमी परमप्रभु यावे कली चोशा चढ़ेतीक नु अरु चढ़ेतीक चढ़ेमे बाक्त। 16 मिनु पलिस्ती आन ५ जना ठेयब मुरुमी मेको नेल्ल तशा, मेको नाक्तीन एक्रोन लेम्मा बाक्त।

17 मिनु मेको पलिस्तीपुकीमी मेको आन दोस आ पर्बम परमप्रभु यावे कली सोइश्शो सुन के कान मार कली बाक्मा बाक्त देंशा हना, अश्दोद कली का, गाजा कली का, अश्कलोन कली का, गाथ कली का नु एक्रोन कली का बाक्मा बाक्त। 18 मिनु सुन के यिच चहिं गारो हिरशो सहर आन कली नु

आन हुकुम पाइब नु आन एर ओंथ डा सहर आन कली का का बाक्माक्त। मिनु मेकोपुकीमी परमप्रभु यावे आ कबल पशो सन्दोस कली लाइश्शा, ठेयब फुल्लु तारी वोदमे बाक्त। मेको फुल्लु मुल सम्म बेथ-शेमेश डा यहोसु आ रूम सांकछी बाक्ब।

कबल पशो सन्दोस लांम बाक्शो

19 मिनु परमप्रभु यावेमी बेथ-शेमेश डा मुर आन दाते डा ७० जना आन कली सदा बाक्त। मारदे हना मेकोपुकीमी परमप्रभु यावे आ कबल पशो सन्दोस आगा कोव्रडमे बाक्त। मिनु परमप्रभु यावेमी मोदेंशो पशो आ पर्वम मुरपुकी रोंका पामे बाक्त। *गन्ती ४:२०; २सामुएल ६:६-७* 20 मिनु बेथ-शेमेश डा मुरपुकीमी “मेको परमप्रभु यावे, का ला परमप्रभु आ डोंइती सु राप्ने चाप्पा डा? मिनु आंइ बाक्तीके रे मुल मेको सु आ बाक्तीके लाइक्वा माल्बा?” देमा बाक्त। 21 मिनु मेकोपुकीमी किरयथ-यारीम डा मुर आन कली लोव क्रुब सोइश्शा, मेको आन कली “पलिस्तीपुकीमी परमप्रभु यावे आ कबल पशो सन्दोस लेत्ताक्म। उइ यिशा, मेको इन बाक्तीकेम कुतीन” देमा बाक्त। *१इतिहास १३:६; भजन संग्रह ३२:३-६*

सन्दोस किरयथ-यारीम लाइश्शो

7 मिनु किरयथ-यारीम डा मुर जाक्शा, परमप्रभु यावे आ कबल पशो सन्दोस लाइश्शा, डांडाम बाक्ब अबीनादाब आ खिंम चाक्दीत्मे बाक्त। मिनु मेको आ तौ एलाजर कली परमप्रभु यावे आ कबल पशो सन्दोस कोव्रचा कली ठीक सेल्मे बाक्त। *लेवी ८:-*

मुरपुकी परमप्रभु यावे गे लेश्शो

2 मिनु मेको सन्दोस किरयथ-यारीमम वोइश्शो, शुश नाक्त दुश्शा, २० बर्स मेकेर बाक्माक्त। मिनु इस्राएली नेल्लेमी “परमप्रभु यावेम इं कली प्रॉइतु” दे सुर्ता पामे बाक्त। *१सामुएल ६:२१; १सामुएल ४:२२; १इतिहास १३:६*

3 मिनु सामुएलमी इस्राएली नेल्ल आन कली “गे इन थुं नेल्लेमी परमप्रभु यावे गे लेत्वा दाक्ताक्नी हना, इन दाते रे अर्को रागी डा देवी देवता नु अशतारोथ माइश्शो मूर्ति पाइश्शो थाम नेल्ल गुंडदीन। मिनु इन थुं नेल्लेमी परमप्रभु यावे कली ला ठेयब सेलीने। मिनु मेकोम इन कली पलिस्ती आन गुड रे प्रॉइब” देमाक्त। *उत्पत्ती ३५:२; यहोसु २४:२३* 4 मिनु इस्राएलीपुकीमी बाल देवता नु मूर्ति पाइश्शो थाम नेल्ल गुंडदमे बाक्त। मिनु परमप्रभु यावे कली ला ठेयब सेल्मे बाक्त। *न्यायाधीस १०:१६* 5 मिनु सामुएलमी इस्राएली नेल्ल आन कली “मिस्पाम बुक्कीने। मिनु गो परमप्रभु यावे कली इन पर्वम पुंडनुड” देमाक्त। *१सामुएल १०:१७; यहोसु १८:२६; न्यायाधीस २०:१६* 6 मिनु मेकोपुकी मिस्पाम बुक्मा बाक्त। मिनु ब्वाक्कु चाक्शा, परमप्रभु यावे आ डोंइती मोदमे बाक्त। मिनु मेको नाक्ती माइजा बाक्शा, मेकोपुकीमी “गो परमप्रभु यावे आ डोंइती पाप पाइतक” देमा बाक्त। मिनु सामुएलम इस्राएली आन कली मिस्पा सहरम ब्रेश्शा निसाफ पवा बाक्त। *२सामुएल २३:१६*

7 मिनु पलिस्तीपुकीमी इस्राएली मिस्पाम बुक्तेक्म देंशो लोव्र नेंमे बाक्त। मिनु मेको आन ठेयब मुरपुकी इस्राएली नु लडाइ पचा कली लमा बाक्त। मिनु इस्राएलीपुकी मेको नेंशा, पलिस्ती आन कली तशा शुश हिंमा बाक्त।

8 मिनु इस्राएलीपुकीमी सामुएल कली “आंइ कली पलिस्ती आन गुड रे प्रॉइचा कली परमप्रभु यावे, आंइ परमप्रभु कली पुंडचा मप्रोनीन। मिनु मेकोम पलिस्ती आन गुड रे प्रॉइबा कॉ, दे पुनीन” दे सामुएल कली देमा बाक्त। *१सामुएल १२:२३; उत्पत्ती २२:१७; १राजा १३:६; येरमीया ३७:३; येरमीया ७:१६* 9 मिनु सामुएलमी परमप्रभु यावे कली दूध तूब पाठा का चोशा चढ़ेवा बाक्त। मिनु इस्राएली आन पर्वम ठेयब सेंदा पा परमप्रभु यावे कली पुना बाक्त। मिनु परमप्रभु यावेम मेको आ पुंडशो लोव्र नेना बाक्त। 10 सामुएलम चोशा चढ़ेना देन बाक्मेनु, पलिस्तीपुकी इस्राएली नु लडाइ पचा कली आन नेक्था जाक्मा बाक्त। मिनु मेको नाक्ती परमप्रभु यावेमी पलिस्ती आन तारी ठेयब बुंबु पपदा बाक्त। मिनु पलिस्तीपुकी वाम ग्याम दुश्शा, इस्राएली आन डोंइती रे प्रोक्मा बाक्त। *उत्पत्ती ३५:५; प्रस्थान*

*१४:२४; प्रस्थान २३:२७; यहोसु १०:१०; न्यायाधीस ४:१५* 11 मिनु इस्राएलीपुकीमी मेको आन कली मिस्पा रे खेदा पना पन, बेथ-कर आ दी सम्म साइक्ना साइक्न खेदा पामे बाक्त। 12 मिनु सामुएलमी फुल्लु का लाइश्शा, मिस्पा नु येशाना आस दातेमी खुक्गा बाक्त। मेको कली एबेन-एजेर नें वोइश्शा “परमप्रभु यावेम आंइ कली एक सम्म वारच पाप्नु” देमाक्त। 13 मोपा पलिस्ती ब्रुशा, इस्राएली आन रागी लेंशा मओव्रमा बाक्त। मिनु परमप्रभु यावेम सामुएल बाक्म सम्म पलिस्तीपुकी रे इस्राएली आन कली श्वेत मगेपदा बाक्त। 14 मिनु पलिस्ती आन डोंइती ग्राशो सहर एक्रोन रे गाथ सम्म नु आन एर ओंथ डा गाउं नेल्ल इस्राएलीपुकीमी पलिस्ती आन गुड रे ताक्गमे बाक्त। मिनु इस्राएली नु एमोरीपुकी गारमा बाक्त।

15 मिनु सामुएल बाक्म सम्म इस्राएली आन कली निसाफ पवा बाक्त। *न्यायाधीस १०:१-५; न्यायाधीस १२:७-१४* 16 मेकोमी बर्स बर्सम बेथेल, गिल्लाल नु मिस्पाम हिरशा, इस्राएली आन कली निसाफ पाइक्वाक्माक्त। 17 मिनु मेको रामाह लेप्बाक्माक्त। मारदे हना मेको आ खिं मेकेर बाक्माक्त। मिनु मेकोमी मुर आन कली निसाफ पा, परमप्रभु यावे कली चढ़ेतीक का सेला बाक्त। *यहोसु १८:२५*

इस्राएलीपुकीमी पिप पुंडशो

8 सामुएल खूशो दुम्तीके, आ तौ आन कली इस्राएली आन कली निसाफ पाइब सेल्मी बाक्त। 2 मेको आ डोंइती जरमेशो तौ आ नें योएल नु आ माइला तौ आ नें अबीयाह बाक्माक्त। मेको बेयर-शेबाम निसाफ पाइब बाक्सा बाक्त। *१इतिहास ६:१३; आमोस ८:१४* 3 तन्न मेको निक्शीमी आस आफोम पशो खोदेंशो मपाम्से बाक्त। क्येट पाइश्शो दुम्चा कली घूस जाम्से बाक्त। दूली निसाफ पाम्से बाक्त। *ब्यवस्था १६:१९* 4 मोपतीके इस्राएल डा खाल्पा नेल्ल गुम्शा, रामाहम सामुएल आ बाक्तीक जाक्मा बाक्त। *१सामुएल ७:१७* 5 मिनु मेकोपुकीमी “गे मुल खूशो दुम्तीनी। इन तौ निक्शी इन देंशो लांम मगाक्स। मोपतीके अर्को रागी रागी डा मुर आन खोदेंशो पा आंइ कली सासन पचा कली पिप का सेल्शा, गेकी” देमा बाक्त। *ब्यवस्था १७:१४-२०; होसे १३:१०; प्रेरित १३:२१* 6 तन्न सामुएलम सासन पचा कली पिप पुंडशो लोव्र नेंशा, काइ मदाक्ता बाक्त। मिनु सामुएलमी परमप्रभु यावे नु लोव्र पवा बाक्त। 7 मिनु परमप्रभु यावेमी सामुएल कली “मुरुम मार मार देमा, मेको नेल्ल नेनो। मारदे हना मेकोपुकीमी इ कली प्रॉइशो ममाइ, आं कली प्रॉइशो नम। मेकोपुकीमी आं कली आन पिप दुम्शो मदाक्शो नम। *प्रस्थान १५:१८; गन्ती २३:२१; ब्यवस्था ३३:५; भजन संग्रह २४:७-१०; भजन संग्रह ७४:१२; यसैया ६:५* 8 इजीप्त रे गुंडशो नाक्त रे आं कली मार मार पाइय्यीमी, मुल मेकोपुकीमी इ कली यो मो पाइनीम। मेकोपुकीमी अरु देवी देवता आन नोले खोइश्शा, आं कली प्रॉइशो बाक्नीम। मिनु मुल इ कली यो प्रॉइनीम। 9 मिनु मुल मार देना देंन बाक्मा, मेको नेनो। मुल मेको आन कली हिंपाइश्शा शेंदीमी। आन सासन पाइब पिपम दोदेंशो पाइनीमी, मेको आन कली माइक्मी” देमाक्त।

10 मिनु सामुएलमी पिप पुंडब मुर आन कली परमप्रभु यावेम देंशो लोव्र नेल्ल नेंपाइक्मी बाक्त। 11 मिनु सामुएलमी “इन कली सासन पाइब पिपमी मार पाइब देंशा हना, इन तौ आन कली लाइश्शा, आ बग्गी, शारा नु गेय पाइब सेल्ब। मेकोमी मेको आन कली आ बग्गी आ डोंइडोंइती दोरपाइक्ब। 12 मिनु का निक्शी आन कली हजार का जना आन ठेयब मुर सेल्ब। का निक्शी आन कली ५० जना आन ठेयब मुर सेल्ब। मेको आ रू वाक्शा, आ बाली नाली रुख सेल्ब। मिनु मेको आन लडाइ पतीक या नु बग्गी सेल्पाइक्ब। 13 मेकोमी इन तमी आन कली रांम खेक्तीक तेल सेल्पाइक्ब। जचा थोव्रक क्येब नु शोब्ले चोइब सेल्चा कली लाइक्ब। 14 मेकोमी इन नेल्ल क्येडा रिश्शो रू, अडगुर रू नु तेल रवा बाक्शो रू रोइश्शा, आ गेय पाइब आन कली गेब। 15 मेकोमी इन अन्न १० भागमी भाग का लाइक्ब। इन अडगुर यो मोपान लाइक्ब। मिनु आ कप्तान नु आ खिं डा गेय पाइब आन कली गेब। 16 मेकोमी इन वाइलीम वाइल, इन नेल्ल क्येडा रिश्शो बी ब्यफ नु गधापुकी लाइश्शा आ गेय पपाइक्ब। 17 मेकोमी इन क्यारश भेडा रे १० भाग डा भाग का लाइक्ब। मिनु गेपुकी यो मेको आ गेय पाइब दुम्तीनी।

१८ मो दुम्मेनु, इन योव्रशो पिप आ पर्वम ठेयब सेंदा पा पुंडनीनी। तन्न मेना परमप्रभु यावेम इन पुंडशो लोव्र मनैब" देमावत।

१९ तन्न मुरपुकीम सामुएल आ लोव्र नैने मबिस्समा बावत। मिनु मेकोपुकीम "ममाइ, आंड कली पिप का माल्नीकी। २० गो यो अर्को रागी डा मुर खोदेंशो दुम्चा दाक्नीकी। आंड कली सासन पाइब नु लडाइम आंड डोंइती गाक्ब पिप का माल्नीकी" देमा बावत।

२१ मिनु सामुएलम मेको मुर आन देंशो लोव्र नेल्ल नेंशा, परमप्रभु यावे कली नेंपदा बावत। २२ मिनु परमप्रभु यावेम "मेको आन देंशो खोदेंशो पावो। मेको आन कली पिप का गेमी" देमावत। मिनु सामुएलमी इस्राएल डा मुर नेल्ल आन कली आन खिं खिं सोइवतीमी बावत।

### सावलमी जाम्शो गधा माल्शो

९ बेन्यामीन आ थर डा मुर का बाक्मावत। मेको आ नें कीश बाक्मावत। मेको आ आफ अबीएल, मेको आ बाजे जरोर, आ शेर बाजे बेकोराथ नु आ किकी बाजे आफीयाह बेन्यामीन थर डा बाक्मावत। कीश शोंप पाइशो मुर का बाक्मावत। २ मिनु मेको आ तौ का बाक्मावत। मेको आ नें सावल बाक्मावत। मेको ठिटा दारशो बाक्मावत। मेना इस्राएल रागीमी मेको क्येडा दारशो अर्को सुइ मबाक्मा बावत। मुर नेल्ले मेको आ बला डा लुक्च ला बाक्मा बावत।

३ मिनु काबु सावल आ आफ कीश आ गधापुकी जाम्मा बावत। मिनु मेकोमी आ तौ सावल कली "गेय पाइब ठिटा का लाइशशा, गधापुकी माल्थ लावो" दे मदा बावत। ४ मिनु मेको निक्शी एफ्राइम डा पहाड लाक्शा, शालीशाह रागी रे पा लसा बावत। तन्न गधा मथित्से बावत। मेको निक्शी शालीम रागी लसा, बेन्यामीन आ रागी रे पा हिरशा, लसा बावत। मेकेर यो मथिदसे बावत। ५ मिनु मेको निक्शी जूफ रागी ओव्रसा बावत। मिनु सावलम आ गेय पाइब कली "मुल गो लेस्स। मुल मलेत्तस हना, आं आफोम गधा आन पर्वम सुर्ता पचा प्रॉइशा, इस पर्वम सुर्ता पाइब" देमावत। १सामुएल १०:२ ६ मिनु मेको गेय पाइबम "एको सहरम परमप्रभु आ लोव्र पाइब का बाक्ब। मेको आ देंशो नेल्ल गाप्तीके, मेको आ नें थाम्पा चलेशो बाक्ब। गो मेक लांडसाक्व हना, मेकोमी तेको लां लचा माल्बा, मेको शेंबा कों?" देमावत। ७ मिनु सावलमी "गो मेक लशा हना, मेको कली मार गेचा? गो इस नु मारेइ जचा थोव्रक मबाक्ब। परमप्रभु आ मुर कली मारेइ कोसेली यो मबाक्ब" दे आ गेय पाइब कली देमावत। ८ मिनु मेको गेय पाइबमी "गो नु ४ भाग डा भाग का शेकेल चांदी बाक्ब। इस कली लां कोंइचा, दे गो मेको मुर कली एको चांदी गेनुड" देमावत। शेकेल का ११.५ ग्राम बाक्ब। मेको आ गेशो २.६ ग्राम चांदी के क्येट बावत। ९ डोंइती इस्राएल रागीम सुइम परमप्रभु आ लोव्र तुइक्चा माल्ताक्व हना, मार देंबाक्मा बावत देंशा हना "परमप्रभु यावे आ ततीक ताइब आ बाक्तीक लय" देंबाक्मा बावत। तन्न सिनाक्व मुलाक्व परमप्रभु यावे आ ततीके ताइब कली परमप्रभु यावे आ लोव्र पाइब देंनीम। गन्ती २४:३-४; २राजा १७:१३; १इतिहास ९:२२

१० मिनु सावलमी आ गेय पाइब कली "इ देंशो रिम्शो बाक्ब। गो मेको आ बाक्तीक लस" देमावत। मिनु मेको निक्शी मेको परमप्रभु आ मुर बाक्तीक सहर लसा बावत। ११ मिनु मेको निक्शी इर सहर गे लना लन बाक्सानु, ब्वाक्कु दिथ यीब मीश आल आन कली गुम्से बावत। मिनु मेको आन कली "परमप्रभु यावे आ ततीक ताइब खिंम बाक्मे?" दे हिल्लो पाम्से बावत। १२ मिनु मेकोपुकीमी "ओं, इस डोंइती लना लन बाक्ब। रीब पा लने। मेको मुलाक्व सहर रे जाक्वत। मारदे हना मुलाक्व डांडाम क्योरशा चढ़ेतीक नाक्व बाक्ब। १३ मिनु गे सहरम ओव्रतीसी हना, गे मेको कली जचा कली इर लना लन पशो थित्नीसी। मेको मजाक्म सम्म मुरपुकीम भोज मजाइनीम। मारदे हना, मुरुम जचा क्येडा डोंइती मेकोमी क्योरशा चढ़ेतीकेम आसीक गेब। मिनु नोले ला ब्रेशो मुरपुकीम जाइनीम। मिनु इर लसे, गे मुलाक्ती मेको कली गुम्नीसी" देमा बावत। १४ मिनु इर सहर लसा बावत। मिनु सहर ओव्रसानु, सामुएल कली थित्से बावत।

### सावलमी सामुएल कली गुम्शो

१५ मिनु परमप्रभु यावेमी सावल आ जाक्चा क्येडा नाक्व का डोंइती सामुएल कली आ मिम्शो लोव्र तुइक्पाइशो बाक्मावत। १६ मेकोमी "दीसा गो बेन्यामीन रागी डा मुर का इ कली गुम्थ सोइक्नुड। मिनु गे मेको कली आं मुर, इस्राएली, आन पिप सेल्शा, तेल लुक्तो। मेकोमी आं मुर आन कली पलिस्ती आन गुइ रे प्रॉइब। मारदे हना गो आं मुर आन श्येत ताता। मेको आन पुंडशो नेंता" देमावत। १७ मिनु सामुएलम सावल कली जाक्शो तवा बावत। मेना परमप्रभु यावेम मेको कली "आं देंशो मुर एकोन बाक्ब। एको आं मुर आन कली सासन पाइब दुम्ब" देमावत। १८ मिनु सावलमी ठेयब लाप्चोम जाक्शा, सामुएल कली "परमप्रभु यावे आ ततीके ताइब आ खिं ते बाक्म, आं कली कोंइदीनी" देमावत। १९ मिनु सामुएलमी सावल कली "परमप्रभु यावे आ ततीके ताइब गो नड। आं डोंइडोंइती इर गाक्कीस। मारदे हना मुलाक्ती गे गो नु जचा माल्नीसी। मिनु दीसा सुनी इ कली लचा गेनुड। इ थुंम मार मार बाक्मे, गो मेको इ कली शेंनन। प्रस्थान २४:११ २० मिनु नाक्व सां डोंइती जाम्शो गधा आन पर्वम सुर्ता मपावो। मेको थिन्ने थुम्तेक्म। नेल्ल क्येडा ठेयब लोव्र मार बाक्ब देंशा हना, इस्राएली नेल्लेमी इ कली नु इ किकी पिपी आन खिं डा मुर कली मिम्शो बाक्नीम" देमावत। २१ मिनु सावलमी "गो इस्राएली आन नेल्ल क्येडा आइक्च बेन्यामीन आ थर डा मुर का नड। मिनु आं खिं बेन्यामीन आ थर डा नेल्ल क्येडा आइक्च बाक्ब। मिनु गे मारदे आं कली एको लोव्र देंनी?" दे हिल्लो पवा बावत। १सामुएल १५:१७ २२ मिनु सामुएलमी सावल नु आ गेय पाइब आस कली जतीक कोठाम ओइदीम्सी बावत। मिनु ब्रेशो मुर आन दातेमी नेल्ल क्येडा ठेयब नित्तीकेम निप्पदा बावत। मेकेर मेको नेल्ल पा ३० जना मुर बाक्मा बावत। २३ मिनु सामुएलमी क्येब कली "डोंइती गो इ कली तिल्शा वोइक्चा देंशो भाग एक पितो" दे मदा बावत। २४ मिनु मेको क्येबमी फिला चाक्शा, सावल आ डोंइती वोदा बावत। मिनु सामुएलमी "इ कली वोइशो भाग एकोन बाक्ब। ब्वावो। मुर आन कली ब्रेशो भोजम एको इ कली वोइशो भाग बाक्ब" दे सावल कली देमावत। मिनु मेको नाक्ती सावल पौनापुकी नु भोज जवा बावत। २५ मिनु नोले मेकोपुकी डांडा रे सहर ब्रुम्मा बावत। मिनु सामुएलमी सावल कली खिं तला तारी लाइशशा लोव्र पवा बावत। २६ मिनु नां सोव्रची ना सामुएलम सावल कली "बोक्को। मुल गो इ कली चोव्रदीनन" देमावत। मिनु सावल नु आ गेय पाइब बोक्सा नोले सामुएल नु काथ काथा गाक्मा बावत। २७ मिनु मेकोपुकी सहर लाग्मे नोले सामुएलम सावल कली "इ गेय पाइब कली डोंइती सोइक्तो" देमावत। मिनु मेकोमी मो पवा बावत। मिनु सामुएलमी "गे एकेर रिम्दो। गो इ कली परमप्रभु आ लोव्र नेंपाइक्वन" देमावत।

### सामुएलम सावल कली पिप सेल्शो

१० मिनु सामुएलमी तेल कुरतीक रे तेल गुंडशा, सावल आ पिपा तार लुक्ता बावत। मिनु मेको कली पुक्पु पा "परमप्रभु यावेमी इ कली आ मुर इस्राएली आन पिप सेल्लु। गे आ मुर आन कली सासन पाइक्नेवे। मिनु गे मेको आन एर ओंध डा जोरी सत्रु आन गुइ रे प्रॉइनेवे। परमप्रभु यावेम थमा पा इन कली आ मुर आन कली सासन पाइब सेल्शो आ चिन्ड मार बाक्ब देंशा हना, २ गे मुलाक्ती एक रे लाइनीसी। मिनु बेन्यामीन आ सांद सेल्साह सहर आ नेक्था राहेल कली थिम्तीकेमी मुर निक्शी गुम्नीसी। मेको निक्शीमी इस कली 'इन माल्शो गधा थित्तेक्म। इन आफोमी मेको आन पर्वम सुर्ता पचा प्रॉइशा, इस पर्वम सुर्ता पा "मुल आं तौ आ पर्वम गो मार पाइनुडा?" देंत' देंनीस। उत्पत्ती ३५:१९ ३ मिनु मेकेर रे लाक्शा, ताबोर डा ठेयब रवा आ नेक्था सम्म लाइनीसी। मेकेर परमप्रभु कली चढ़ेथ बेथेल गे लाइब मुर सां गुम्नीसी। मेको डोंइती डा मुरुम पाठा सां, दाते डा मुरुम शोब्ले सां नु नोले डा मुरुम गर का अडगुर शांबु कुरशा गाक्शो बाक्नीम। ४ मिनु मेकोपुकीमी इस कली 'रिम्शो बाक्नी?' दे हिल्लो पाइनीम। मिनु इस कली शोब्ले निक्शी गेनीम। मिनु गे मेको ताक्चा माल्नीसी। ५ मिनु नोले गे परमप्रभु आ डांडा गिबेआथ-एलोहीम जाक्नीसी। मेकेर लडाइ पचा कली



बाकशो पलिस्ती बाक्नीमी। मिनु गे मेको सहर ओव्रतीसी हना, डांडा रे यिन यिन पशो परमप्रभु यावे आ लोव्र पाइब आन हुल का गुम्नीसी। मेको आन डॉइती मार मार ताप्तीके ताप्बपुकी गाकशो बाक्नीम। मिनु मेकोमी परमप्रभु यावे आ लोव्र पाइनीम।<sup>6</sup> मिनु परमप्रभु यावे आ सोक्त इन तार जुक्ब। मिनु गे यो परमप्रभु यावे आ लोव्र पाइनीनी। मिनु गे अर्को मुर दुम्नीनी।  
 न्यायाधीस १३:२५<sup>7</sup> मिनु मोदेशो चिन्ड नेल्ल दुम नोले इ डॉइती मार गेय बाक्बा, मेको पावो। मारदे हना परमप्रभु गे नु बाक्ब।<sup>8</sup> मिनु गे आं डॉइती गिलगाल यिवो। मिनु गो चोशा चढेचा नु दुशा बाक्चा आ परबम चढेचा कली इ बाक्तीक जाक्नुड। गो इ बाक्तीक मजाकडा सम्म, ७ नाक्त सम्म आं कली रिम्शा बाक्को। मिनु गो जाक्शा गे मार पचा माल्नेवे, इन कली शॅनुड” दे सामुएलम सावल कली देंमाक्त। १सामुएल १३:८

### सावल आ थुं नक सेल्शो

<sup>9</sup> मिनु सावल गाक्चा कली सामुएल नु ब्रामेनु, परमप्रभुम सावल आ थुं नक सेला बाक्त। मिनु मेको नोले मेको चिन्ड नेल्ल दुम्माक्त।<sup>10</sup> मिनु मेको गिबा जाक्दीस्सानु, परमप्रभु यावे आ लोव्र पाइब हुल मेको कली गुम्थ, यिशो बाक्मा बाक्त। मिनु परमप्रभु आ सोक्तीम मेको कली सुमा बाक्त। मिनु सावल यो मेको आन दातेमी परमप्रभु यावे आ लोव्र पाइब दुम्माक्त। १सामुएल १९:२०-२४<sup>11</sup> मिनु मेको कली डॉइती रे तुइक्ब मुरपुकीम, परमप्रभु यावे आ लोव्र पाइब आन दातेमी लोव्र पाइब दुम्शो तशा “कीश आ तौ कली मार दुम्मे? मार, सावल यो परमप्रभु यावे आ लोव्र पाइब आन दाते डा का बाक्मे” देंमुमा बाक्त।<sup>12</sup> मिनु मेकेर डा मुर कामी “मेरे आन आफ सु बाक्मे?” दे हिल्लो पवा बाक्त। मेना रे मुरपुकीमी “सावल यो परमप्रभु यावे आ लोव्र पाइब आन दाते डा बाक्मे?” दे देंतीक लोव्र लीमाक्त।<sup>13</sup> मिनु मेकोमी परमप्रभु यावे आ लोव्र पने थुम्शा, आ खिं लमाक्त।<sup>14</sup> मिनु सावल आ बकान्छाम, सावल नु आ गेय पाइब आस कली “गे निक्शी ते लसी?” दे हिल्लो पवा बाक्त। मिनु सावलमी “जाम्शो गधा माल्दीशो नस्कु। गो थिन्ने मचाप्कु। मिनु गो सामुएल आ बाक्तीक यो लाइतस्कु” देंमाक्त।<sup>15</sup> मिनु सावल आ बकान्छाम “सामुएलम इ कली मार देंमे? आं कली शॅदीसी” देंमाक्त।<sup>16</sup> मिनु सावलमी “ गधा थित्तेक्म” देंत” देंमाक्त। तन्न पिप दुम्तीके आ परबम देंशो लोव्र मशेंदा बाक्त।

### सावल इस्राएली आन पिप दुम्शो

<sup>17</sup> मेना सामुएलमी मुर आन कली परमप्रभु यावे आ बाक्तीके मिस्पामी गुम्चा, दे ब्रेत्तीमी बाक्त। १सामुएल ७:५<sup>18</sup> मिनु मेकोमी इस्राएली आन कली “परमप्रभु यावे, इस्राएली आन परमप्रभुमी मार देंत देंशा हना ‘गो इस्राएली इन कली इजीप्त रागी रे गुंइशा, एक चाक्तन्नी। इन कली श्येत गेब इजीप्ती आन गुड रे प्रॉइतन्नी। मिनु नोले इन कली दिप्ब अर्को रागी डा मुर आन गुड रे यो प्रॉइतन्नी” देंत।<sup>19</sup> तन्न मुलाक्ती गे इन कली हिंचा डा श्येत नु मरिम्शो रे प्रॉइब इन परमप्रभु कली प्रॉइतीनी। मिनु गेपुकीमी ‘आंइ कली पिप का योव्रशा गेने’ देंतीनी। मोपतीके मुल परमप्रभु यावे आ डॉइती इन थर थर नु खिं खिं डा मुर पा रपीन” दे माइक्मी बाक्त। १सामुएल ८:७<sup>20</sup> मिनु सामुएलमी इस्राएली नेल्ल आन थर आन कली राप्पाइक्मी बाक्त। मिनु बेन्यामीन आ थर योव्रचा पुंइसे बाक्त। १सामुएल १४:४१-४२; यहोसु ७:१६<sup>21</sup> मिनु मेकोमी बेन्यामीन आ थर डा खिं खिं डा मुर आन कली राप्पदा बाक्त। मिनु मात्री आ खिं डा मुर योव्रचा पुंइसमा बाक्त। मिनु मेको नोले कीश आ तौ सावल योव्रचा पुंइसे बाक्त। मिनु मेको कली माल्शा, मथित्मे बाक्त।<sup>22</sup> मिनु मेकोपुकीम परमप्रभु यावे कली “मार, मेको मुर एक बाक्बा?” दे हिल्लो पामे बाक्त। मिनु परमप्रभु यावेमी “मेको मार मार आन दातेमी खुइश्शा बाक्शो बाक्ब” देंमाक्त।<sup>23</sup> मिनु मुरपुकी दोरशा लशा, मेको कली चाक्गमे बाक्त। मिनु मेको मुर आन दातेमी राम्मेनु, नेल्ल आन क्येडा लाइश्शो बाक्माक्त। मुर नेल्ले मेको आ बला डा लुक्च ला बाक्मा बाक्त।<sup>24</sup> मिनु सामुएलम मुर नेल्ल आन कली “परमप्रभु यावेमी योव्रशो मुर कली कोव्रडीन। मुर नेल्ल आन दातेमी एको खोदेशो सुइ मबाक्म” देंमाक्त। मिनु मुर नेल्ल ग्येरशा “पिप शुश ब्रॉइल” दे ग्रीमा बाक्त। मत्ती

२१:९<sup>25</sup> मिनु सामुएलमी मुर आन कली पिप आ अधिकार आ परबम शॅदीमी बाक्त। मिनु मेको नेल्ल कागजम ब्रेक्शा, परमप्रभु यावे आ डॉइती वोदा बाक्त। मिनु नोले मेकोमी मुर आन कली आन खिं खिं सोइक्तीमी बाक्त।<sup>26</sup> मिनु सावल यो आ खिं गिबा लमाक्त। मिनु परमप्रभुम आन थुं थिशो रिम्शो लडाइ पाइबपुकी मेको नु लमा बाक्त।<sup>27</sup> मेकेर मरिम्शो मुर यो बाक्मा बाक्त। मेकोपुकीमी “एको मुरुम आंइ कली आंइ जोरी सत्रु रे दोपा प्रॉइने चाप्बा डा” देंमा बाक्त। मिनु मेकोपुकीमी सावल कली शुक्शी पा मेको कली मान पतीके यो मारेइ मचाक्ममे बाक्त। तन्न सावल सिक्सी पा बाक्माक्त। १सामुएल ११:१२

### सावलम अम्मोनी नु लडाइ पशो

**11** मिनु महिना का नोले अम्मोन डा नाहाशमी याबेश-गिलादम लडाइ पा पुम्दमे बाक्त। याबेश डा वॉइश मुरपुकीम नाहाश कली “गोपुकी नु गरीन। मिनु गो इन गेय पाइब दुम्नीकी” देंमा बाक्त। १सामुएल ३१:११<sup>2</sup> मिनु अम्मोन डा नाहाशमी मेको आन कली “गो गोपुकी नु गारचा कली नेल्ल इन ग्युरा मिक्च पुक्शा ला गोपुकी नु गारनुड। मोपा इस्राएली नेल्ल इन कली मुने तोक्नुड” देंमाक्त।<sup>3</sup> मिनु याबेश सहर डा खाल्पापुकीमी “इस्राएली नेल्ल आन कली नैपाइक्चा कली आंइ कली ७ नाक्त सम्म रिम्दीन। मिनु नोले आंइ कली सुइमी प्रॉइने मचाप्तेक्म हना, गो इन जिम्मा गेंसीनीकी” देंमा बाक्त।<sup>4</sup> मिनु लोव्र कुरबपुकी सावल आ बाक्तीक गिबा जाक्मा बाक्त। मिनु मुर आन डॉइती मेको लोव्र शेंदमे बाक्त। मिनु मुर नेल्ले ठेयब सेंदा पा डाक्मा बाक्त।

<sup>5</sup> मेना सावल रू रे पा ब्यफ खुल्शा जाक्ना जाक्न बाक्माक्त। मिनु मेकोमी “मुरपुकी मारदे ठेयब सेंदा पा डाक्मा” दे हिल्लो पामी बाक्त। मिनु याबेश-गिलाद डा मुरपुकीमी देंशो लोव्र मेको कली शेंदमे बाक्त।<sup>6</sup> मिनु सावलम मेको लोव्र नेनानु, परमप्रभु आ सोक्तीम मेको कली सुमा बाक्त। मिनु सावल थाम्पा गाइक्ता बाक्त। न्यायाधीस १३:२५<sup>7</sup> मिनु मोपा गाइश्शा, हाल का ब्यफ टुक्रा टुक्रा पा चेक्गा बाक्त। मिनु मुर आन कली मेको टुक्रा कुरपाइश्शा इस्राएल रागी नेल्लेमी “सु मुर लडाइ पथ सावल नु सामुएल आस नोले मखोइक्नीमी, मेको आन ब्यफ यो ओदेशो टुक्रा टुक्रान दुम्नीम देनीन” दे सोइक्तीमी बाक्त। परमप्रभु यावेमी मुर आन कली शुश हिंपाइश्शो बाक्माक्त। मोपतीके मेकोपुकी थुं का दुम्शा, सावल नु सामुएल आस नोले खोदमे बाक्त। न्यायाधीस १९:२९<sup>8</sup> मिनु सावलम मेको आन कली बेसेकम लडाइ पचा कली ठीक पामी बाक्त। मेकेर इस्राएल डा लाख सां नु यहूदा डा ३० हजार मुर दुम्मा बाक्त।<sup>9</sup> मिनु मेको डॉइती लोव्र चाक्ब मुर आन कली “याबेश-गिलाद डा मुर आन कली ‘गे दीसा नाक्त उइक्थ दुम्मेनु, ब्रॉइचा ताइनीनी’ दे मतीन” देंमाक्त। मिनु मेकोपुकीमी याबेश डा मुर आन कली मेको लोव्र शेंदमे बाक्त। मिनु मेको नॅशा, शुश ग्येरसमा बाक्त।<sup>10</sup> मिनु याबेश डा मुरपुकीमी अम्मोनी आन कली “गो दीसा इन बाक्तीक जाक्नीकी। मिनु गे मार पचा दाक्नीनी, मेको पने” देंमा बाक्त।<sup>11</sup> मिनु आ दीसा सावलमी आ मुर आन कली हुल सां सेल्मी बाक्त। सुनी कना रिम्शो पा हाम्सो मदुम्थु, मेको आन जोरी सत्रु आन बाक्तीके ओव्रशा, नाक्ती उइक्थ दुम सम्म लडाइ पा अम्मोनी आन कली फ्रूमे बाक्त। मोपा मुरपुकी निक्शी सम्म काथा मदुम्चा डा पा ब्राशा प्रोक्मा बाक्त।

<sup>12</sup> मिनु मुरपुकीम सामुएल कली “ ‘सावलम आंइ कली सासन पने चाप्बा डा?’ देंब सु बाक्मा? मेको आन कली साइक्चा कली आंइ गुइम गेने” देंमा बाक्त। १सामुएल १०:२७<sup>13</sup> तन्न सावलमी “ममाइ, मुलाक्ती परमप्रभु यावेमी इस्राएली इं कली ग्रापदा नाक्त सुइ साइक्चा मदुम्ब” देंमाक्त। १सामुएल १४:४५

<sup>14</sup> मिनु सामुएलम मुर आन कली “गो गिलगालम लशा, एको राज्य कली लॅशा सेल्थ” देंमाक्त। १सामुएल १०:८<sup>15</sup> मोपतीके मेको नेल्ल गिलगालम लशा, परमप्रभु यावे आ डॉइती सावल कली पिप सेल्मे बाक्त। मिनु परमप्रभु यावे आ डॉइती दुशा बाक्चा आ परबम चढेतीक चढेमे बाक्त। मिनु सावल नु इस्राएली नेल्ले शुश ग्येरसमा बाक्त।

## सामुएलम निसाफ पचा प्रॉइशो

12 मिनु सामुएलमी गुमशा बाक्शो इस्राएली नेल्ल आन कली "गो इन पुंडशो नैता। मिनु गो इन कली सासन पपाइक्वा कली पिप का योव्रशा गेतन्नी। १सामुएल ८:७,२२; १सामुएल ११:१५ २ मुल एको पिप इन ठेयब मुर दुमशो बाक्ब। मुल गो खूशो दुमती। आं चां बोइश्शो बाक्ब। आं तौ गेपुकी नु बाक्शो बाक्नीस। गो आं ठिटा रेन इन कली लां कोंइब दुमशो नड। ३ गो एक बाक्ती। आं पबर्म मारेइ मरिश्शो लोव्र पचा बाक्त हना, परमप्रभु यावे नु आ तेल लुक्शो आ डोंइती देनीन। गो सुका आ ब्यफ, गधा रोइश्शो बाक्डा? गो सु सु कली श्येत गेडा? गो सु सु आन कली दिबुमी? मिनु सु सु आन निसाफ पची ना घूस जडा? आं कली देनीन। मिनु गो मेको थाप्नुड" दे माइक्मी बाक्त। गन्ती १६:१५ ४ मिनु मेकोपुकीमी "आंइ कली श्येत मगेनी। गे आंइ कली मदिप्नी। गे सुइ रे मारेइ मलाइक्नी" देमा बाक्त। ५ मिनु सामुएलम मेको आन कली "गे आं कली दोसी सेल्ने मचाप्नी। मेको आ पबर्म परमप्रभु यावे नु आ तेल लुक्शो सांकछी बाक्नीस" देमा बाक्त। मिनु मेकोपुकीमी "मेको सांकछी बाक्नीस" देमा बाक्त।

६ मिनु लेंशा सामुएलम मुर आन कली "परमप्रभु यावे सांकछी बाक्ब। मेकोमी मोसा नु हारून आस कली योव्रतु। मिनु इन किकी पिपी आन कली इजीप्त रागी रे गुंडशा, एक चाक्तु। ७ मिनु गे आं डोंइती बाक्कीन। गो परमप्रभु यावे आ डोंइती गेपुकी नु लोव्र पाइनुड। परमप्रभु यावेमी इन कली नु इन किकी पिपी आन कली दोपा प्रोना, मेको इन कली देनुड। ८ याकूब इजीप्त रागी ब्रुमेनु, इजीप्त डा मुरपुकीमी मेको आन कली दिप्मे बाक्त। मिनु इन किकी पिपीपुकीमी परमप्रभु यावे कली 'वारच पाइक्की' दे पुन्मे बाक्त। मिनु परमप्रभु यावेमी मोसा नु हारून आस कली सोइक्ता बाक्त। मेको निक्शीमी इन किकी पिपी आन कली इजीप्त रे गुंडशा एक चाक्शा बाक्पदसे बाक्त। प्रस्थान ३:७ ९ तन्न मेकोपुकीमी परमप्रभु यावे, आन परमप्रभु कली प्रेंताक्म। मेकोमी मेको आन कली प्रॉइशा, सीसेरा आ गुइमी गेवा बाक्त। सीसेरा हासोर डा पिप याबीन आ नेल्ल क्येडा सक्ति पाइश्शो लडाइ पाइब आन कप्तान बाक्माक्त। परमप्रभुमी मेको आन कली पलिस्ती आन गुइमी गेवा बाक्त। मिनु मोआब डा पिप आन गुइमी यो गेवा बाक्त। मिनु मेकोपुकी मेको नु लडाइ पना पन बाक्मा बाक्त। न्यायाधीस ४:२; न्यायाधीस १०:७; न्यायाधीस १३:१; न्यायाधीस ३:१२ १० मिनु नोले मेकोपुकीम परमप्रभु यावे कली 'गो पाप पाइतक। गो परमप्रभु यावे कली प्रॉइतक। गो बाल देवता नु अशतारोथ माइश्शो मूर्ति पाइश्शो थाम कली पूजा पाइतक। मिनु मुल आंइ जोरी सत्रु आन गुइ रे प्रोनीन। मिनु गो इन कली ला ठेयब सेल्नीकी' देमा बाक्त। गन्ती २१:७; यहोसु ७:२०; न्यायाधीस १०:१०; दानीएल ९:९-१९ ११ मिनु परमप्रभु यावेमी येरूब-बाल, बाराक, येप्ता नु सामुएल आन कली सोइक्ता बाक्त। मिनु मेकोपुकीमी इन एर ओथ बाक्शो जोरी सत्रु रे प्रोन्मे बाक्त। मिनु गेपुकी थुं नाइश्शा, मारेइ मदुमथु बाक्वा तशो बाक्तीनी। न्यायाधीस ६:१४, ३२; न्यायाधीस ४:६; न्यायाधीस ११:२९; १सामुएल ७:३ १२ तन्न गे अम्मोनी आन पिप नाहाश कली लडाइ पथ पिशो ताइतीनी। मिनु गेपुकीमी 'परमप्रभु यावे, इन परमप्रभु इन पिप बाक्त हना यो, आंइ कली सासन पपाइक्वा कली पिप का गेने' देतीनी। १सामुएल ११:१-२; १सामुएल ८:१९ १३ मुल इन पुंडशो पिप एक बाक्ब। गेपुकीम एको कली माल्शा, योव्रतीनी। मिनु परमप्रभु यावेमी इन कली पिप का गेप्तु। १४ गेपुकीम परमप्रभु यावे कली मान पा हिंशा ठेयब सेल्तीनी हना, मेको आ देंशो टीतीनी हना, इन कली सासन पाइब पिपमी यो परमप्रभु यावे, इन परमप्रभु आ नोले खोइक्तु हना, परमप्रभु यावे गेपुकी नु बाक्ब। १५ तन्न गेपुकीम परमप्रभु यावे आ देंशो ममिम्ताक्नी नु आ देंशो मटीतीनी हना, परमप्रभु यावेमी इन कली नु इन पिप कली यो प्रॉइब। न्यायाधीस २:१५ १६ मोपतीके गे बाक्कीन। मिनु परमप्रभु यावेमी इन डोंइती मार ठेयब गेय पाइबा, मेको कोव्रडीन। १७ मुल चेरब रिक्ची जाक्शो बाक्ब। मिनु गो परमप्रभु यावे कली रेउ नु बुबु पुंडनुड। मिनु मेकोम बुबु पपाइश्शा, रेउ यिपाइक्ब। मिनु गे परमप्रभु यावे आ डोंइती पिप पुंडशा, इन परमप्रभु यावे आ अरेशो लोव्र मटिशो ठेयब पाप बाक्ब, दे तुइक्नीनी" देमा बाक्त। १८ मिनु

सामुएलमी परमप्रभु यावे कली पुना बाक्त। मिनु मेकोमी मेको नाक्ती बुंबु पपाइश्शा रेउ यिपदा बाक्त। मिनु मुर नेल्ल परमप्रभु यावे नु सामुएल तशा, शुश हिंमा बाक्त।

१९ मिनु मुर नेल्लेमी सामुएल कली "परमप्रभु यावे, इन परमप्रभु कली आंइ पबर्म 'गो मबेक्कल' दे पुनीन। मारदे हना आंइ मरिश्शो पशो ला ममाइ, आंइ कली पिप का माल्नीकी, दे आंइ मरिश्शो पतीक तेम्ताक्क" देमा बाक्त। २० मिनु सामुएलम मुर आन कली "महिनीन। गेपुकी मेको मरिश्शो नेल्ल पाइतीनी हना यो, परमप्रभु यावे आ नोले खोइक्वा मप्रोनीन। मिनु इन थुं नेल्लेम परमप्रभु यावे कली ठेयब सेलीन। २१ मो मपाइतीनी हना, गे शोर गाक्शो दुम्नीनी। मेकोम इन कली वारच मपाइब। श्येत रे यो मप्रॉइब। ब्यवस्था ३२:३७-३८; यसैया ४१:२९ २२ मारदे हना परमप्रभु यावेमी आ ठेयब नें आ पबर्म आ मुर आन कली कोव्रशा मप्रॉइब। परमप्रभु यावेमी इन कली आंम आ मुर सेल्चा कली ग्येरसाक्व। प्रस्थान १९:६ २३ मिनु गो इन पबर्म पुंडचा प्रॉइचा यो परमप्रभु यावे आ डोंइती पाप बाक्ब। पुंडचा मप्रॉइनुड। गो इन कली रिश्शो नु ठीक लां शेंनुड। १सामुएल ७:८-९; उत्पत्ती १८:२३-३२; प्रस्थान ३२:११-१४, ३२ २४ मिनु परमप्रभु यावे कली मान पा हिनीन। इन थुं नेल्लेम थमा पा मेको कली ठेयब सेलीन। मेकोमी इन कली गिश ठेयब गेय पशो बाक्मे, मेको मिम्तीन। ब्यवस्था ६:१२-१५ २५ तन्न गे मेको तुइश्शा यो, मरिश्शो पाइतीनी हना, गेपुकी नु इन पिप मलीनीनी" देमा बाक्त।

## सावल पलिस्ती नु लडाइ पशो

13 सावल पिप दुम्मेनु, ३० बर्स खोदेंशो दुमशो बाक्माक्त। मेकोमी इस्राएल कली ४२ बर्स क्येडा शुश सासन पचा बाक्त। एको लोव्र मनुइसीब। मारदे हना माइत हिब्रू किताबमी क्याम्सीशो बाक्माक्त। २ सावलमी इस्राएल डा हजार सां मुर आन कली योव्रमी बाक्त। मिनु हजार निक्शी आं नु मिकमाशम नु बेथेल डा पहाडीम बाक्मा बाक्त। मिनु हजार का मुर योनाथन नु बेन्यामीन डा गिबाम बाक्मा बाक्त। लीशो मुर आन कली चहिं आन खिं सोइक्तीमी बाक्त। ३ मिनु योनाथनम गेबा डा पलिस्ती आन ठेयब मुर कली सदा बाक्त। मिनु मेको लोव्र पलिस्ती आन दातेमी ब्रमाक्त। मिनु सावलमी "हिब्रू नेल्लेम नेंन्मेक्ल" दे रागी नेल्लेमी तुराही ताप्पदा बाक्त। १सामुएल १४:४९ ४ मिनु सावलम पलिस्ती आन ठेयब मुर साइक्तीके, पलिस्तीपुकीम इस्राएली आन नें थिचा ग्रांग्रा दीनीम देंशो नेंन्मे बाक्त। मिनु सावल कली वारच पा लडाइ पचा कली मुर नेल्ल गिल्गालमी ब्रेल्मे बाक्त।

५ मिनु पलिस्तीपुकी इस्राएली नु लडाइ पचा कली बुक्मा बाक्त। मेकोपुकी नु ३० हजार बग्गी, ६ हजार शारा डोइक्बपुकी नु समुन्द्र डा बाल्वा खोदेंशो पा हिक्ने मचाप्चा डा पा खोइलीम गाक्ब लडाइ पाइब मुर बाक्मा बाक्त। मेकोपुकी इर गूशा, बेथ-आवेन आ पूर्व गे मिकमाशम आन बाक्तीके सेल्मे बाक्त। ६ मिनु इस्राएलीपुकीमी थम श्येत जामे बाक्त। मारदे हना लडाइ पाइबपुकी थाम्पा आइक्च सेल्चा पुंडसमा बाक्त। मोपतीके मेकोपुकी पुक्खी, काक्पे, सेरथे फुल्लु आन दातेम, बेक्शो मुर वोइक्तीके नु इनार आगाम खुंडसमा बाक्त। ७ का निक्शी हिब्रू यर्दन खोला शोक्शा, गाद आन रागी गिलाद जाक्दीम्मा बाक्त। तन्न सावल चहिं गिल्गाल उइ बाक्माक्त। मेको आ नोले खोइक्ब नेल्ले थाम्पा हिंशा खिंखि पामे बाक्त।

८ मिनु सावलमी सामुएल कली ७ नाक्त सम्म रिम्दा बाक्त। तन्न सामुएल गिल्गालमी मजाक्माक्त। मोपतीके मुरपुकी सावल आ बाक्तीक रे नोले शॉइसीमा बाक्त। १सामुएल १०:८ ९ मिनु सावलमी "चोशा चढेतीक नु दुशा बाक्वा आ पबर्म चढेतीक एक आं बाक्तीक चाक्कीन" देमा बाक्त। मिनु आंमान चोशा चढेतीक चढेवा बाक्त। १० सावलम चोशा चढेतीक चढेने थुमा नोले सामुएल जाक्माक्त। मिनु सावल मेको कली गुमथ लमाक्त। ११ मिनु सामुएलमी "एको मार पवी" देमा बाक्त। मिनु सावलमी "मुरपुकीम आं कली प्रॉइशा, लशो तातामी। इन जाक्नुड देंशो ना मजाक्नी। पलिस्तीपुकी मिकमाशम बुक्तेक्म। १२ पलिस्तीपुकी गो नु लडाइ पथ गिल्गालम जाक्नीम, दे मिम्ताक्ड। गो परमप्रभु यावेम शिशी पवल, दे मपुनु। मोपतीके

गो आंमान एको चोशा चढ़ेतीक चढ़ेचा माल्ताक्यी" देंमाक्त। 13 मिनु सामुएलमी सावल कली "गे मूर्ख गेय पाप्तीवी। परमप्रभु यावे, इ परमप्रभुमी शेंशो लोव्र मटिवी। गे टिशो नवे हना, परमप्रभु यावेमी इ राज्य इस्राएलमी गेना हना यो लीपद वा। 14 तन्न मुल इ राज्य मली। परमप्रभु यावेम आ दाक्शो मुर का योव्रनु। परमप्रभु यावेमी मेको कली आ मुर आन पिप सेल्ब। मारदे हना, गे परमप्रभु यावे आ लोव्र मटिवी" देंमाक्त। १सामुएल १६:१; प्रेरित १३:२२

15 मिनु सामुएल बोक्शा, गिल्गाल प्रॉइशा, बेन्यामीन आ गिबा गे खोदा बाक्त। लीशो मुरपुकी चहिं सावल आ नोले लडाइ पाइब दुम्चा कली खोदमे बाक्त। मिनु सावलमी मेको मुर आन कली हिकगानु, मेको नेल्ल पा ६ सहे मुर बाक्मा बाक्त। 16 सावल, मेको आ तौ योनाथन नु मेको नु बाक्शो मुरपुकी नु बेन्यामीन आ रागी गेबाम लीमा बाक्त। पलिस्तीपुकी चहिं मिकमाशम आन बाक्तीक सेल्शा बाक्मा बाक्त। 17 मिनु पलिस्ती आन बाक्तीक रे रोइक्बपुकी हुल सां गूमा बाक्त। हुल का शुआल आ रागीम बाक्शो ओफ्रा गे लमा बाक्त। 18 अर्को हुल बेथ-होरोन गे लमा बाक्त। मिनु लीशो हुल चहिं डांडा गे लमा बाक्त। मेको डांडा रे सेबोयीम डा बेसी गोरशो रागी तांडसीबाक्माक्त।

19 मेना इस्राएल रागीमी तुप्तील का यो मथिसीबाक्माक्त। मारदे हना पलिस्तीपुकीम हिब्रू आन कली तरवार नु तूतीक सेल्चा मगेशो बाक्मा बाक्त। न्यायाधीस ५:८ 20 इस्राएलीपुकी आंम फाली, कोदाली, खा नु गुये शेष्ठी यो पलिस्ती आन खिं लचा माल्बाक्मा बाक्त। 21 फाली का नु कोदाली का शेष्ठा कली शेकेल का के भाग सांमी भाग निक्शी थाप्चा माल्बाक्मा बाक्त। खा नु ब्यफ खुल्तीक कोक्के शेष्ठा कली शेकेल का के भाग सांमी भाग का थाप्चा माल्बाक्मा बाक्त। शेकेल का ११.५ ग्राम बाक्ब। मेको शेष्ठीक गेय कली का का कली ३.५ ग्राम चांदी थाप्शो बाक्तेक्म। 22 मोपतीके लडाइ दुम्मेनु, सावल नु योनाथन नु बाक्शो लडाइ पाइब आन के तरवार नु तूतीक का यो मबाक्माक्त। तन्न सावल नु योनाथन आस के ला बाक्माक्त।

23 पलिस्तीपुकी मिकमाश डा लां मेर लमा बाक्त।

योनाथन पलिस्ती बाक्तीके लशो

14 काबु सावल आ तौ योनाथनमी, आ या कुरब कली "पिवो, गो लां खोइश्शा, पलिस्ती आन बाक्तीक लस" देंमाक्त। तन्न मेकोमी मेको लोव्र आ आफ कली मशेंदा बाक्त। 2 मेना सावल गिबा सहर क्येडा लाडगा मिग्रोनम बाक्शो अनार रवा आ पुंमी बाक्शो बाक्माक्त। मेको नु ६ सहे मुर ला बाक्मा बाक्त। 3 मिनु परमप्रभु यावे कली चढ़ेब एली आ तौ फिनेहास, फिनेहास आ तौ अहीतुब नु आ लोक्ब इकाबोद मेकेर बाक्मा बाक्त। अहीतुब आ तौ अहीयाह शिलोमी चढ़ेब बाक्शा, निसाफ पतीक ऊरीम नु थुम्मीम बाक्शो झोला यो फेक्शो बाक्माक्त। मेको मुरपुकीमी योनाथन पलिस्ती आन बाक्तीके लशो, मतुइक्तमे बाक्त। २सामुएल ८:१७; १सामुएल ४:१९-२१ प्रस्थान २८:६-३० 4 मिनु योनाथन पलिस्ती आन बाक्तीक लतीक लांमी ठेयब सेरथे फुल्लु निक्शी बाक्सा बाक्त। का एर गे नु अर्को ओंथ गे बाक्सा बाक्त। का आ नें बोसेस नु अर्को आ नें सेनेह बाक्माक्त। 5 मेको का उत्तर मिकमाश गे नु का दक्खिन गेबा गे बोक्शो बाक्सा बाक्त। 6 योनाथनमी आ या कुरब कली "पिवो, गो मेको खोइक्तीक चिनु मखोइश्शो आन बाक्तीक लस। परमप्रभु यावेमी वारच पाइबा, कों? परमप्रभु यावेमी शुश मुर बाक्तेक्म हना यो, इच्छा ला बाक्तेक्म हना यो, इ कली प्रॉइने चाप्ब" दे मदा बाक्त। न्यायाधीस ७:७; २इतिहास १४:१० 7 मेको आ या कुरबमी "गे मार पचा दाक्नीनी, पने। गे मार पाइनीनी गो मेको वारच पाइनुड" देंमाक्त। 8 मिनु योनाथनमी "दुम्ब, गो आइक्वी गे लस। मिनु पलिस्ती आन कली तपाइसस। 9 मिनु मेकोपुकीमी इस कली 'गो मजाक्का सम्म रिम्दीस' देंतेक्म हना, गो मेकेर राप्शा बाक्स। गो मेको आन बाक्तीके मलस। 10 तन्न मेकोपुकीमी 'आंइ बाक्तीक कुस जाक्कीन' देंतेक्म हना, गो इर डोइश्शा लस। मारदे हना परमप्रभु यावेम मेको आन कली इस गुडमी गेशो बाक्माक्त, दे तुइवनस। मेको गो इस कली चिन्ड

बाक्ब" देंमाक्त। 11 मोपतीके मेको निक्शी पलिस्ती आन कली तपाइसस बाक्त। मिनु पलिस्तीपुकीम "कोव्रडीन। हिब्रू आन खूइक्तीक पोव्रला रे गूमा बाक्त" देंमुमा बाक्त। 12 मिनु पलिस्तीपुकीमी योनाथन नु आ या कुरब आस कली "गो आंइ बाक्तीक गे डोइश्शा कुस। गो इस कली मारेइ कोइनीकी" देंमा बाक्त। मिनु योनाथनमी आ या कुरब कली "आं नोले कुवो। परमप्रभु यावेम मेको आन कली इस्राएली आन गुडमी जिम्मा गेशो बाक्त" दे मदा बाक्त। 13 मिनु योनाथन गुइ खोइल थेक्शा डोंइसे बाक्त। मिनु मेको या कुरब आ नोले कुमाक्त। मिनु मेको पलिस्ती योनाथन आ डोंइती गोल्मा बाक्त। मिनु मेको आ नोले जाक्ब आ या कुरबमी मेको आन कली सदा बाक्त। 14 मेको डोंइती डा लडाइमी योनाथन नु आ या कुरबम २० जना खोइ सदसे बाक्त। मेको साइक्तीके रू ४ रोपानी खोदेंशो पा दिंम का बाक्माक्त। 15 मिनु नोले पलिस्तीपुकी शुश हिंमा बाक्त। मिनु लाडगा मेर बाक्ब मुर नु अरु मुर नेल्ल खिंखि पा हिंमा बाक्त। आन ठेयब मुर नु रोइक्ब नेल्ल शुश हिंमा बाक्त। मिनु खिनु कुशा ठेयब खल्बल दुम्माक्त। १सामुएल ७:१०

16 मिनु बेन्यामीन आ गिबाम खाल पाइब सावल आ मुरपुकीम पलिस्ती आन हुल खल्बल पा एर ओंथ दोरशो तामे बाक्त। 17 मिनु सावलमी सु सु मबाक्मा, दे हिक्पाइक्मी बाक्त। मिनु मेकोपुकीमी योनाथन नु आ या कुरब मबाक्शो तुइक्तमे बाक्त। 18 मिनु सावलमी अहीयाह कली "परमप्रभु आ कबल पशो सन्दोस एक चाक्को" देंमाक्त। मेना परमप्रभु आ कबल पशो सन्दोस इस्राएलीपुकी नु बाक्माक्त। १सामुएल २१:१० 19 मिनु सावलम लोव्र पन पना पलिस्ती आन बाक्तीक डा खल्बल ठेयब दुम्ना दुम्न लमाक्त। मिनु मेकोमी चढ़ेब कली "याम का रिम्दो" देंमाक्त। 20 मिनु सावल नु आ मुरपुकी रेयके पना पन लडाइ पतीक गे लमा बाक्त। मेना आन जोरी सत्रु ब्रशा आंम आंमा साइक्मुशो तामे बाक्त। न्यायाधीस ७:२२; २इतिहास २०:२३ 21 मेना सम्म हिब्रूपुकी पलिस्ती नु बाक्मा बाक्त। मेकोपुकीमी यो पलिस्ती आन बाक्तीकेम बाक्शा यो, इस्राएली आन गे लशा सावल नु योनाथन आस कली वारच पदमे बाक्त। 22 एफ्राइम आ पहाडीम बाक्शो प्रोक्शो इस्राएलीपुकीमी पलिस्ती प्रोक्शो लोव्र नेंमे बाक्त। मिनु मेकोपुकी यो गारशा पलिस्ती आन कली खेदा पामे बाक्त। 23 मेको नाक्ती परमप्रभु यावेमी इस्राएली आन कली ग्रापदा बाक्त। मिनु मेको लडाइ बेथ-आवेन आ आइक्वी सम्म दुम्माक्त। सावल आ लडाइ पाइब १० हजार खोइ दुम्मा बाक्त। मेको लडाइ एफ्राइम डा पहाड नेल्लेम दुम्माक्त।

24 मेको नाक्ती सावलमी ममिन्थु, गेय पवा बाक्त। मेकोमी मुर आन कली "गो आं जोरी सत्रु आन कली क्येक्क लेन्ने मथुमु सम्म, सुम नाक्दो दुम्चा क्येडा डोंइती जाइबा, मेको सराप रल" देंशा कसम जपाइक्मी बाक्त। मोपा मेको नाक्ती इस्राएली थाम्पा दशो बाक्मा बाक्त। सुइमी मारेइ मजामे बाक्त। 25 मिनु मेकोपुकी ब्वाकीम जाक्मानु, सुरब खुदो चाका तामे बाक्त। 26 तन्न मेकोपुकीम मेकेर खुदो याप्शो तशा यो, कसम जतीके सुइमी खुदो थिसीन मथीमे बाक्त। 27 तन्न आ आफोम मुर आन कली कसम जपाइश्शो नु मजचा देंशो योनाथनमी मनेंशो बाक्माक्त। मेकोमी आ गुडमी बाक्शो कोक्के दिंशा, मेको आ डरीमी थोक्शा तुक्गा बाक्त। मिनु आ सक्ति बारमाक्त। 28 तन्न लडाइ पाइब कामी मेको कली "इन आफोमी मो पचा मदुम्ब देंशो बाक्ब" देंमाक्त। मेकोमी "मुलाक्त जचा थोव्रक जाइब सराप रल देंशो बाक्ब" देंमाक्त। मुरपुकी चहिं शोव्रलुम बेक्चशो बाक्मा बाक्त। 29 मिनु योनाथनमी "आं आफोमी मुर आन कली श्येत गेतीक गेय डा लाक्शा अरु मपशो बाक्ब। कोव्रडीन गो एको खुदो थाम्पा दोशो सक्ति पाइश्शो दुम्डा। 30 मुरपुकीम जोरी सत्रु रे रोइश्शो मार मार जचा तशो नम हना, गिश रिम्शो दुम वा। पलिस्ती आन कली यो शुश साइक्ने चबेम वा" देंमाक्त।

31 मेको नाक्ती मेकोपुकीम पलिस्ती आन कली ग्रामा बाक्त। मिनु मेको आन कली मिकमाश रे आइयालोन सम्म खेदा पामे बाक्त। मिनु मोपा लडाइ पाइबपुकी शुश दमा बाक्त। 32 तन्न मुरपुकी शोव्रलुम बेक्चा चिक्शा, मार मार रोइक्चा गोव्रमे बाक्त। मोपा भेडा बी ब्यफ नु बाछा ग्याइक्तमे बाक्त। मिनु खपीमीन साइश्शा हुश सुन्दा ब्वामे बाक्त। लेवी ३:१७ 33 मुरपुकीम हुश सुन्दा श्ये ब्वशा "परमप्रभु यावे कली पाप पाप्तेक्म" दे मुरुमी सावल

कली शेंदमे बावत। मिनु सावलमी “एको दा थम मरिंशो दुस्त। ठेयब फुल्लु का लोक्शा एक चाक्कीन” देंमावत।<sup>34</sup> मिनु सावलमी मेको मुर कली “मुर आन दातेमी लशा ‘ग्याइश्शो ब्यफ नु भेडापुकी एक चाक्शा ब्वामेवत। मिनु हुश सुन्दा ब्वशा परमप्रभु यावे कली पाप मपामेवत’ देनो” देंमावत। मिनु मेको नावदो आन ग्याइश्शो ब्यफ खुल्शा जाक्शा मेकेर सदमे बावत।

<sup>35</sup> मोपा सावलमी परमप्रभु यावे कली चढेतीक का सेला बावत। मेको सावलम परमप्रभु यावे कली सेल्शो नेल्ल क्येडा डोंइती डा चढेतीक बावमावत।

<sup>36</sup> मिनु सावलमी “मुल गो उड लशा पलिस्ती आन कली नावदो लडाइ तोय। मिनु नां सोव्रम सम्म मेको आन मारेइ मारेइ रोइवतय। मेको आन कली का यो महेंदय” देंमावत। मिनु मुरपुकीम “गे मार पचा दाक्नीनी मेको पने” देंमा बावत। मिनु चढेबमी “गो डोंइती परमप्रभु नु सल्ला पय” देंमावत।

<sup>37</sup> मिनु सावलमी परमप्रभु कली “मार गो पलिस्ती आन कली खेदा पका? गे मेको आन कली इस्त्राएली आन गुइमी गेनीनी?” दे हिल्लो पवा बावत। तन्न परमप्रभुमी मेको कली मारेइ लोव्र मलेत्ता बावत। *१सामुएल १४:१८; १सामुएल २३:९-१२*<sup>38</sup> मिनु सावलम “इस्त्राएल डा ठेयब मुर नेल्ल आं डोंइती जाक्कीन। मिनु मुलावत मार पाप दुम्मे तुइक्चा माल्तावत।

<sup>39</sup> परमप्रभु यावे ब्रोंइशा बाक्शो खोदेंशो पा नु इस्त्राएल श्येत रे प्रोंइब, गो मेको आ नेंम कसम जशा देंनुड, आं तौ योनाथनम मेको पाप पशो बावत हना यो, मेको कली साइक्चा माल्ब” देंमावत। मिनु सुइमी मेको कली लोव्र मलेत्ते बावत।<sup>40</sup> मिनु मेकोम इस्त्राएली नेल्ल आन कली “गे नेल्ल का पटटी बाक्कीन। गो नु आं तौ योनाथन का पटटी बाक्नस्कु” देंमावत। मिनु मुरपुकीम “गे मार पचा दाक्नीनी मेकोन पने” देंमा बावत।<sup>41</sup> मिनु सावलमी परमप्रभु यावे, इस्त्राएली आन परमप्रभु कली “मुलाक्ती गे इन गेय पाइब कली मारदे लोव्र मलेत्तीनी? मेको दोस गो नु आं तौ योनाथन नु बावत हना यो, तुइक्पतीन” देंमावत। परमप्रभु यावे, इस्त्राएली आन परमप्रभु गे ऊरीम कोंइदीन। तन्न इन मुर दोस ताइब बाक्नीम हना, थुमीम कोंइदीन। मिनु मेको मो पामे नोले योनाथन नु सावल आस नेंम गूमावत। मुरपुकी चहिं ब्रोंइमा बावत। *१सामुएल २८:६; प्रस्थान २८:३०; गन्ती २७:२१; ब्यवस्था ३३:८*<sup>42</sup> मिनु सावलमी “गो नु आं तौ योनाथन आंस दातेमी ऊरीम आपीन” देंमावत। मिनु योनाथन आ नेंम गूमावत।

<sup>43</sup> मिनु सावलमी योनाथन कली “गे मार पवी आं कली देनो” दे हिल्लो पवा बावत। मिनु योनाथनमी “थमा पा गो आं कोक्के आ डरीमी इक्का खोइ खुदो थाम्ता। गो एक बाक्ती, गो बेक्चा कली ठीक बाक्नुड” देंमावत। *यहोसु ७:१९*<sup>44</sup> मिनु सावलमी योनाथन बेक्चान माल्ब, दे कसम जवा बावत।<sup>45</sup> तन्न मुरपुकीम सावल कली “मार, योनाथन सांइसीबा? मेको योनाथनमी ओमो ठेयब गेय पा इस्त्राएल कली मग्रापदा? मोदेंशो मदुम्ल। गेना हना यो ब्रोंइशा बाक्ब परमप्रभु यावे आ नेंमी गो कसम जशा देंनीकी, मेको के चां का यो महेंम्ल। मारदे हना मेकोम मुलाक्ती परमप्रभु नु गेय पशो बाक्ब” देंमा बावत। मोपा मुरपुकीम योनाथन कली प्रोन्मे बावत। मिनु मेको मसांइसे बावत।<sup>46</sup> मिनु सावलमी पलिस्ती आन कली खेदा पचा प्रोना बावत। मिनु पलिस्ती आन खिं लेम्मा बावत।

सावल आ राज्य डा लोव्र

<sup>47</sup> मिनु सावलमी इस्त्राएलमी आ सासन पतीके बोल्यो सेल्ले थुमा बावत। मिनु मेकोमी मोआबी, अम्मोनी, एदोमी, सोबाह डा पिपपुकी नु पलिस्ती आंम एर ओंथ डा जोरी सत्रु नु लडाइ पवा बावत। मेकोपुकी ते ते लमा मेक मेक ग्रामा बावत।<sup>48</sup> मेकोमी अमालेकी आन कली ग्रामा बावत। मिनु इस्त्राएली आन कली रोइक्ब हुल आन रे प्रोना बावत।

<sup>49</sup> सावल आ तौपुकी योनाथन, इश्वी नु माल्कीशुआ बाक्मा बावत। मेको आ डोंइती जरमेशो तमी आ नें मेराब नु अर्को के मिकाल बाक्मावत। *१इतिहास ९:३९*<sup>50</sup> मेको आ मीश चहिं अहीमाज आ तमी अहीनोआम बाक्मावत। मेको आ लडाइ पाइब आन कप्तान मेको आ बकान्छा नेर आ तौ आब्नेर बाक्मावत। *१सामुएल १७:५५*<sup>51</sup> सावल आ आफ कीश नु आब्नेर आ आफ नेर अबीएल आ तौ बाक्सा बावत। *१इतिहास ९:३६, ३९*

<sup>52</sup> सावल आ पालाम पलिस्तीपुकी नु लडाइ दुम्स डा दुम्स दुम्मावत। मेकोमी आ थिश्शो बोल्यो नु सक्ति पाइश्शो मुर आ गेय पचा कली लाइक्बाक्मावत।

सावलम अमालेकी आन कली ग्राशो

**15** मिनु सामुएलम सावल कली “परमप्रभु यावेम इ कली आ मुर इस्त्राएली आन पिप सेल्शा तेल लुक्चा, दे आं कली सोइक्ताक्वी। मोपतीके परमप्रभु यावे आ लोव्र नोफा दाइश्शा नेनो। *१सामुएल १०:१*<sup>2</sup> मुर नेल्ल आन परमप्रभु यावेमी मार देंत, देंशा हना ‘इस्त्राएली इजीप्त रे गूशा पिमानु, अमालेकीपुकीम मेको आन कली लडाइ तोम्तेक्म। मोपतीके अमालेकी आन कली थमा पा सजाइ गेनुडमी’ देंत। *प्रस्थान १७:८-१६; ब्यवस्था २५:१७-१९*<sup>3</sup> अमालेकी आन कली लडाइ तोशा, मेको आन कली सतीन। मेको आन शोंप नेल्ल खतम पोक्कीन। मारेइ मप्रोनीन। नेल्ल आन कली खतम पोक्कीन। मेको आन मीश मुर, वोंइश मुर, मीश आल, वोंइश आल, दूध तूब आल, बी ब्यफ, क्यारश भेडा, दलओंठ नु गधा नेल्ल आन कली खतम पोक्कीन” देंमावत।

<sup>4</sup> मिनु सावलमी मुर नेल्ल आन कली तेलाम बाक्तीकेम जाक्चा कली ब्रेश्शो बावत। मेकेर लाख निक्शी खोइलीम गाक्ब लडाइ पाइब नु यहूदा डा १० हजार लडाइ पाइब बाक्मा बावत।<sup>5</sup> मिनु सावल अमालेक आ सहरमी जाक्मावत। मिनु मेकेर बेंसीम बाप्शा, इक्का नावत बाक्मा बावत।<sup>6</sup> मेना सावलम केनी डा मुर आन कली “अमालेकी आन कली प्रोंइशा उड यिने, दे लोव्र सोइक्ता बावत। मो मपाइतीनी हना, गो इन कली नु मेको आन कली खतम पोक्नुड। मारदे हना इस्त्राएली इजीप्त रे गूशा पिमानु, गेपुकीमी वारच पाइश्शो ननी” देंमावत। मोपतीके केनी डा मुरपुकी अमालेकी आन कली प्रोंइशा, उड ब्रुम्मा बावत। *न्यायाधीस १:१६*<sup>7</sup> मिनु सावलमी हवीलाह रे इजीप्त डा पूर्ब डा सांद शुर सम्म डा अमालेकी आन कली साइक्मी बावत।<sup>8</sup> तन्न मेकोमी अमालेकी आन पिप अगाग कली सेसीन ग्याइक्ता बावत। अरु नेल्ल आन कली तरवारम सदमे बावत।<sup>9</sup> सावल नु मेको आ लडाइ पाइबपुकीमी पिप अगाग आ रिंशो भेडापुकी, बी ब्यफ, दोम्शो बस्तु भाव, पाठापुकी नु वोइक्चा डा मारेइ मारेइ प्रोंइशा वोदमे बावत। मेकोपुकीम मेको आन कली खतम पोक्चा मदावतमे बावत।

परमप्रभुमी देंशो सावलम मटिशो

<sup>10</sup> परमप्रभु यावेमी सामुएल कली<sup>11</sup> “गो बिच्चीम ला सावल कली पिप सेलु बावत। मारदे हना मेकोमी आं नोले खोइक्चा प्रोंइतु। मिनु आं देंशो मटीव” देंमावत। मिनु सामुएल गाइश्शा नावदो रे परमप्रभु यावे कली पुंइना पुंइन बाक्मावत। *उत्पत्ती ६:६*<sup>12</sup> मिनु सामुएल सुनी कना बोक्शा सावल कली गुय्थ लमावत। तन्न मुरुमी “सावल कारमेल लत” दे मेको कली नेंपदमे बावत। सावलम आंम कली मिम्तेक्वत, दे आंम के मूर्ति का सेल्शा, गिल्गालम ब्रुम्मे थुम्शो बाक्मावत। *यहोसु १५:५५*<sup>13</sup> मिनु मेकोमी सावल कली गुमा बावत। मिनु सावलम मेको कली “परमप्रभु यावे आ आसीक इन नु बावत। गो परमप्रभु यावे आ देंशो टीता” देंमावत।<sup>14</sup> तन्न सामुएलम मेको कली “आं नोफाम नेंशो भेडा नु बी ब्यफ आन ग्रीशो चहिं मारम” दे हिल्लो पवा बावत।<sup>15</sup> मिनु सावलमी “मुरपुकीम मेको अमालेकी रे चाक्शो नम। मुरपुकीम भेडा नु बी ब्यफ रे रिंशो चहिं परमप्रभु यावे, इन परमप्रभु कली चोशा चढेचा कली प्रोंइशा वोइक्तेक्म। लीशो आन कली गो नेल्ल साइक्तक” देंमावत।<sup>16</sup> मिनु सामुएलम सावल कली “मोक्ल दुस्त। सिनावदो परमप्रभु यावेम मार देंमे, मेको गो इ कली शेंनन” देंमावत। मिनु सावलमी “देनीन” देंमावत।<sup>17</sup> मिनु सामुएलमी “डोंइती गे आंमा कली आंमान शोर गाक्शो मुर मिंशो ननी। तन्न मुल गे इस्त्राएली आन पिप बाक्नीनी। परमप्रभु यावेमी इन कली तेल लुक्शा इस्त्राएल डा पिप सेल्लु। *१सामुएल ९:२१*<sup>18</sup> परमप्रभु यावेम इन कली मेको पाप पाइब अमालेकी आन कली खतम पोक्चा, दे थमा पा देंशा सोइश्शो बावत। मेको आन कली काइ मवोइक्थु मसाइक्नी सम्म गे लडाइ पस डा पस बाक्चा माल्शो ननी।<sup>19</sup> गे मारदे परमप्रभु यावे आ देंशो मटिनी? गे मारदे रोइश्शो मार मार

तावनी? मिनू परमप्रभु यावे आ डोंइती मार मरिश्शो बाक्मे, मेको पनी”  
 देंमाक्त।<sup>20</sup> तन्न सावलमी सामुएल कली “गो परमप्रभु यावे आ देंशो टीता।  
 गो परमप्रभु यावेम सोइश्शो रागी लती। मिनू अमालेकी आन पिप अगाग  
 कली ग्याइश्शा चाक्ता। गो आ मुर नेल्ल आन कली खतम पोक्तामी।  
<sup>21</sup> मुरपुकीम रोइश्शो मार मार भेडा नु बी ब्यफ नु रिश्शो थोव्रक गिल्लालम  
 परमप्रभु यावे, इन परमप्रभु कली चढ़ेचा कली वोइश्शो बाक्नीम” देंमाक्त।  
<sup>22</sup> मिनू सामुएलमी “परमप्रभु यावेमी चोशा चढ़ेशो नु अरु चढ़ेशो क्येडा  
 आ देंशो टिशो दाक्ब। थमा पा, चढ़ेशो क्येडा आ देंशो टिचा रिश्शो बाक्ब।  
 मिनू सांड आ बोंसो चढ़ेचा क्येडा आ देंशो टिचा रिश्शो बाक्ब। *यसैया*  
 १:११-१७; *येरमीया* ७:२२; *होसे* ६:६; *आमोस* ५:२१-२२; *मीका* ६:६-८;  
*जकरिया* ७:५-७; *मत्ती* ९:१३; *मत्ती* १२:७<sup>23</sup> मेको आ देंशो मटिचा लिक्यु  
 कोव्रचा खोदेंशो पाप बाक्ब। मटिचा हेंथे पतीके मूर्ति पूजा पशो खोदेंशो  
 बाक्ब। मारदे हना गे परमप्रभु यावे आ देंशो टिचा प्रॉइतीनी। मेकोम इन  
 कली यो पिप सेल्लिके रे प्रॉइशो बाक्ब” देंमाक्त। *१सामुएल* १६:१<sup>24</sup> मिनू  
 सावलम सामुएल कली “गो पाप पाता। परमप्रभु यावे आ देंशो नु इन लोव्र  
 ममिन्तु। मारदे हना गो मुर आन क्येडा हिंती। मिनू मुर आन देंशो टीता।  
<sup>25</sup> तन्न गो मुल आं पाप माफ तडल, दे पुंडनुड। गो नु जाक्कीन। मिनू गो  
 परमप्रभु यावे कली ठेयब सेल्लुड” देंमाक्त।<sup>26</sup> मिनू सामुएलमी “गो गे नु  
 मलेल्लुड। गे परमप्रभु यावे आ देंशो प्रॉइतीनी। मिनू परमप्रभु यावेमी यो इन  
 कली इस्राएल डा पिप दुस्तीक रे प्रॉइतु” देंमाक्त।<sup>27</sup> मिनू सामुएल  
 गाक्वानु, सावलम आ वा आ सुर ग्याइक्ता बाक्ता। मिनू मेको गाक्माक्त।  
<sup>28</sup> मिनू सामुएलम मेको कली “मुलाक्त रे परमप्रभु यावेम इस्राएल डा राज्य  
 खाक्शा अर्को कली गेपु। इन नेक्था डा, इन क्येडा रिश्शो मुर का कली  
 गेपु। *१सामुएल* २८:१७<sup>29</sup> परमप्रभु यावे इस्राएल डा मान ताइब बाक्ब।  
 मेकोमी आ लोव्र मफाइक्ब। आ थुं यो मफाइक्ब। मेको थुं फाइक्ब बेक्शा  
 लाइब मुर खोदेंशो ममाइ” देंमाक्त। *गन्ती* २३:१९<sup>30</sup> मिनू सावलमी “गो  
 पाप पाता। मो हना यो खूशो नु इस्राएली आन डोंइती आं मान ततीक गेने।  
 गो नु लेतीन। मिनू गो परमप्रभु यावे, इन परमप्रभु कली ठेयब सेल्लुड”  
 देंमाक्त।<sup>31</sup> मोपतीके सामुएल सावल नु लेशशा लमाक्ता। मिनू सावलमी  
 परमप्रभु यावे कली ठेयब सेला बाक्ता।  
<sup>32</sup> मिनू सामुएलमी “अमालेकी आन पिप अगाग कली एक चाक्कीन”  
 देंमाक्त। मिनू अगाग आंखां पा गाक्शा, मेक जाक्माक्त। मिनू अगागमी  
 “थमा पा, एको बेक्चा डा श्येत बाक्ब” देंमाक्त।<sup>33</sup> मिनू सामुएलमी “दोपा  
 इ तरवारम मीश मुर आन कली आल मपाइश्शो सेला, मोपा इ ममा यो मीश  
 मुर आन दातेमी आल मपाइश्शो दुम्ब” देंमाक्त। मिनू सामुएलमी अगाग  
 कली परमप्रभु यावे आ डोंइती गिल्लालम क्योरशा सदा बाक्ता।<sup>34</sup> मिनू  
 सामुएल रामाहम लमाक्ता। सावल चहिं आ खिं गिबा लमाक्ता।<sup>35</sup> मिनू  
 सामुएल मबेक्म सम्म गेनायो सावल कली ग्रुम्थ मलमाक्ता। तन्न परमप्रभु  
 यावेम “सावल कली बिच्वीम ला इस्राएल डा पिप सेलु बाक्ता” देंशो, मिश्शा  
 सुर्ता पस डा पस बाक्माक्ता।

सामुएलम दाऊद कली पिप सेल्लो

**16** परमप्रभु यावेमी सामुएल कली “गे सावल आ पर्बम गेना सम्म  
 सुर्ता पा बाक्नेवे? गो मेको कली पिप दुस्तीक रे गुंइताक्ड। मुल गे  
 नु बाक्शो ग्रावमी तेल कुर पा लतो। गो इ कली बेथलेहेम डा येस्से आ  
 बाक्तीक सोइक्नन। मारदे हना, गो मेको आ तौ का कली पिप सेल्लो कली  
 योव्रता” देंमाक्त। *१सामुएल* १५:२३, ३५<sup>2</sup> मिनू सामुएलमी “गो दोपा लने  
 चापुनुडा? एको लोव्र सावलम नेंशा, आं कली साइक्ब” देंमाक्त। मिनू  
 परमप्रभु यावेम “गे मगिक्शो बी का लतो। मिनू परमप्रभु यावे कली क्योरशा  
 चढ़ेथ जाक्ता, देनो।<sup>3</sup> येस्से कली यो मेको चढ़ेतीक चाडम ब्रेत्तो। मिनू गे  
 मार पचा माल्नेवे गो शेंनन। गो सु कली कोंइनुडा मेको कली गे तेल लुक्तो”  
 देंमाक्त।<sup>4</sup> मिनू सामुएलमी परमप्रभु यावे आ देंशो खोदेंशो पवा बाक्ता।  
 मेको बेथलेहेम लमाक्ता। मिनू सहर डा खूशोपुकी खिंखि पा गुम्थ जाक्शा,  
 मेकोपुकीमी “गे मारदे जाक्नी? मार, नेल्ल रिश्शोन बाक्बा” देंमा बाक्ता।  
<sup>5</sup> मिनू सामुएलमी “नेल्ल रिश्शोन बाक्ब। गो परमप्रभु यावे कली चढ़ेथ

जाक्ती। गेपुकी आंम कली ठीक सेल्लोशा, चढ़ेतीकेम जाक्कीन” देंमाक्त।  
 मिनू मेकोम चहिं येस्से नु आ तौ आन कली परमप्रभु यावे आ डोंइती ठीक  
 सेल्लोशा चढ़ेतीकेम ब्रेत्तीमी बाक्ता।

<sup>6</sup> मिनू मेको नेल्ल जाक्मा नोले सामुएलमी एलीआब कली तशा  
 “परमप्रभु यावेम तेल लुक्चा देंशो मुर एकोन बाक्ब” दे मिम्ता बाक्ता।  
<sup>7</sup> तन्न परमप्रभु यावेम मेको कली “मेको दारशो नु लाइश्शो बाक्ता हना यो,  
 मेको कली ममिन्तो। गो मेको कली पिप मसेल्लुड। गो, परमप्रभु यावेम  
 मुरुम खोदेंशो पा मकोव्रनुड। मुरुम रां दारशो कोव्रशा मिन्मीम। गो मुर आ थुं  
 कोव्रनुड” देंमाक्त। *येरमीया* १७:१०; *प्रकाश* २:२३; *प्रेरित* १०:३४<sup>8</sup> मिनू  
 येस्सेमी अबीनादाब कली ब्रेत्ता बाक्ता। मिनू सामुएल आ डोंइती गाक्पदा  
 बाक्ता। तन्न मेकोमी “ममाइ, परमप्रभु यावेम योव्रशो एको ममाइ” देंमाक्त।  
<sup>9</sup> मिनू येस्सेमी शम्माह कली चाक्गा बाक्ता। तन्न सामुएलमी “परमप्रभु  
 यावेम एको कली यो मयोव्रड” देंमाक्त।<sup>10</sup> मोपा येस्सेमी आ ७ जना तौ  
 आन कली सामुएल आ डोंइती चाक्मी बाक्ता। तन्न सामुएलमी “एको  
 तेकोइ आन कली परमप्रभु यावेम मयोव्रमी” देंमाक्त। *इतिहास* २:१३-१५;  
*१सामुएल* १७:१२<sup>11</sup> मिनू सामुएलमी “मार इ तौ नेल्ल ओशोन नमी”  
 देंमाक्त। मिनू येस्सेमी “मुल यो कान्छा का नु बाक्ब। तन्न मेको दा भेडा  
 गोठला बाक्ब” देंमाक्त। मिनू सामुएलम येस्से कली “मेको कली ब्रेत्थ  
 सोइक्तो। मेको मजाक्म सम्म गो मनिन्तु बाक्नय” देंमाक्त। *१सामुएल*  
 १७:१४<sup>12</sup> मोपतीके मेकोमी मेको कली ब्रथ मुर सोइक्ता बाक्ता। मेको लल  
 चोव्रको पाइश्शो, दारशो मिक्च पाइश्शो नु दारशो ठिटा का बाक्माक्ता। मिनू  
 परमप्रभु यावेम सामुएल कली “बोक्शा, मेको कली तेल लुक्तो। एकोन  
 बाक्ब” देंमाक्त।<sup>13</sup> मिनू सामुएलमी तेल बाक्शो ग्राव्र गुंइशा, आ लोक्ब  
 आन डोंइती तेल लुक्ता बाक्ता। मिनू परमप्रभु यावे आ सोक्ता दाऊद तार  
 जुक्ता बाक्ता। मिनू मेना रे मेको नुन बाक्माक्ता। मिनू सामुएल रामाह डा लां  
 खोदा बाक्ता। *२सामुएल* २:४; *२सामुएल* ५:३; *भजन संग्रह* ८९:२१

दाऊद सावल आ या कुरब दुश्शो

<sup>14</sup> मिनू परमप्रभु यावे आ सोक्तीम सावल कली प्रोना बाक्ता। परमप्रभु  
 यावे रे मरिश्शो पाइब सोक्तीम मेको कली श्येत गेवा बाक्ता।<sup>15</sup> मेको आ  
 गेय पाइबपुकीम सावल कली “कोव्रडीन हजुर, परमप्रभुमी इन कली श्येत  
 गेब सोक्ता गेशो बाक्ब।<sup>16</sup> इन डोंइती बाक्शो इन गेय पाइब आन कली इन  
 पर्बम बीना ताप्ब का माल्शा चाक्कीन, दे मारदे मदेनी? परमप्रभु रे मेको  
 मरिश्शो पाइब सोक्तीम इन कली सुम्ब। मेना मेको मुरुम बीना ताप्ब। मिनू गे  
 सानीनी” देंमा बाक्ता।<sup>17</sup> मिनू सावलमी आ गेय पाइब आन कली “रिश्शो  
 बीना ताप्ब मुर का मालीन। मिनू मेको कली आं बाक्तीक चाक्कीन”  
 देंमाक्त।<sup>18</sup> मिनू मेको आ गेय पाइब आन दाते डा काम “बेथलेहेम डा  
 येस्से आ तौ आन दातेमी, काम ताप्शो गो नेंशो बाक्नुड। मेको बोल्यो मुर  
 बाक्ब। मिनू रिश्शो लडाइ पाइब, निप्स खाप्शा ब्वाक्ब नु दारशो यो बाक्ब।  
 परमप्रभु यावे मेको नु बाक्शो बाक्ब” देंमाक्त।<sup>19</sup> मोपतीके सावलमी लोव्र  
 कुरब मुर कली येस्से आ बाक्तीक सोइक्ता बाक्ता। मिनू मेकोम आ भेडा  
 योव्रब तौ दाऊद कली सावल आ बाक्तीक सोइक्तीक हुकुम पवा बाक्ता।  
<sup>20</sup> मिनू येस्सेमी कुशुल के थैलो का शांबु, पाठा का इक्का खोइ शोब्ले कुर  
 पा नु आ तौ दाऊद कली सावल आ बाक्तीक सोइक्ता बाक्ता।<sup>21</sup> मिनू  
 दाऊद सावल आ बाक्तीक जाक्माक्ता। मिनू मेको आ गेय पतीकेमी योव्रसे  
 बाक्ता। सावलम मेको कली थाम्पा दाक्चा गोवा बाक्ता। मिनू मेको सावल  
 आ या कुरब दुम्माक्ता।<sup>22</sup> मोपतीके सावलम येस्से कली “दाऊद आं  
 गेयमीन बाक्ता। मारदे हना गो मेको तशा ग्येरसाक्की” दे लोव्र कुरब सोइक्ता  
 बाक्ता।<sup>23</sup> मिनू परमप्रभु रे मरिश्शो श्येत गेब सोक्ता सावल तार जुक्ता, नु,  
 दाऊदमी बीना ताप्बाक्माक्ता। मिनू मरिश्शो पाइब सोक्तीम प्रॉइशा लमेनु,  
 सावल साबाक्माक्ता।

दाऊद नु गोल्याथ

**17** पलिस्तीपुकीम लडाइ पचा कली आन लडाइ पाइब आन कली  
 खुप्तेमे बाक्ता। मिनू यहूदा डा सोकोहम बुक्मा बाक्ता।

मेकोपुकीमी सोकोह नु आजका आस दाते एफेस-दाम्मीम आन बाक्तीके सेल्मे बाक्त। *यहोसु १५:३५*<sup>2</sup> सावल नु इस्राएलीपुकी यो गुम्शा एलाह डा दिंम आन बाक्तीके सेल्मे बाक्त। मेकोपुकी पलिस्ती आन डोंइती लहर पा राम्मा बाक्त।<sup>3</sup> पलिस्तीपुकी डांडा का नु इस्राएलीपुकी अर्को डांडा पा बाक्मा बाक्त। मेको आन दातेमी दिंम का बाक्माक्त।<sup>4</sup> मिनु पलिस्ती आन बाक्तीक रे गाथ डा गोल्याथ नें पाइश्शो बोल्यो लडाइ पाइब का गूशा, पिमाक्त। मेको ६ कुबीत ३ इन्च लाइश्शो बाक्माक्त। *कुबीत का ०.५ मिटर बाक्ब। यहोसु ११:२२*<sup>5</sup> मेको आ पियामी कांसा के टोपी बाक्माक्त। ५ हजार शेकेल डा कांसा के फेक्तीक फेक्शो बाक्माक्त। *शेकेल का ११.५ ग्राम, तोला का खोदेंशो बाक्ब।*<sup>6</sup> मेको आ खोइलीम कांसा के मुइक्तीक मुइश्शो बाक्माक्त। मेको आ बलाम ठेयब कांसा के या कुरशो बाक्माक्त।<sup>7</sup> मेको आ तूतीक आ ग्याइक्तीके वा प्रोव्रब आन शी खोमो बाक्माक्त। मेको आ तूतीके फलाम के बाक्माक्त। मेको ६० शेकेल डा बाक्माक्त। मेको आ या कुरब मेको आ डोंइडोंइती गाक्बाक्माक्त। *शेकेल का ११.५ ग्राम बाक्ब। मेको या ६९० ग्राम बाक्त। इतिहास ११:२३*<sup>8</sup> मेको मुर राप्था, इस्राएल डा मुर नेल्ल आन कली ठेयब सेंदा पा “ए सावल आ गेय पाइबपुकी, गेपुकी मारदे लडाइ पथ जाक्नीनी? गो पलिस्ती नड। गो नु लडाइ पचा कली इन मुर योव्रडीन। मिनु लडाइ पथ पिन। गे सावल आ गेय पाइब मननी डा?<sup>9</sup> आ कान लडाइ पा मेकोम आं कली साइक्ने चाप्ती हना, गो इन वाइल दुम्नीकी। तन्न गो मेको कली ग्राती हना, गेपुकी आंइ वाइल दुम्शा, आंइ गेय पचा माल्नीनी” देमाक्त।<sup>10</sup> मिनु लेंशा “गो मुलाक्ती इस्राएल डा लडाइ पाइब आन कली आइक्च मिन्नुड। मुर का सोइक्तीन। मिनु गो लडाइ पाइक्नुस्कु” देमाक्त। *२राजा १९:१६; भजन संग्रह ७४:१८; सेफन्याह २:८*<sup>11</sup> मिनु सावल नु इस्राएलीपुकी मेको पलिस्ती आ देंशो नेंशा, थाम्पा हिंमा बाक्त।

<sup>12</sup> दाऊद बेथलेहेम, एफ्राथाह सहर डा यहूदा डा येस्से माइश्शो आ तौ बाक्माक्त। मेको येस्से के ८ जना तौ बाक्मा बाक्त। सावल आ पालाम मेको खाल्पा बाक्माक्त। *१सामुएल १६:१-११*<sup>13</sup> येस्से आ तौ, जेठा, माइला नु साइला लडाइ पचा कली सावल आ नोले खोइश्शो बाक्मा बाक्त। मेको जेठा एलीआब, आ माइला अबीनादाब नु आ साइला शम्माह बाक्मा बाक्त।<sup>14</sup> दाऊद चहिं कान्छा बाक्माक्त। मेको ठिटा सां चहिं सावल आ नोले खोइश्शो बाक्मा बाक्त।<sup>15</sup> मेना दाऊद सावल आ बाक्तीके नु बेथलेहेम आ आफ आ क्यारश भेडापुकी कोव्रचा कली एर आँथ पाइक्बाक्माक्त।

<sup>16</sup> मेको पलिस्ती ४० नाक्त सम्म नाक्दो सुनी आन डोंइती जाक्शा आ राप्तीकेम राप्बाक्माक्त।

<sup>17</sup> काबु नाक्ती येस्सेमी आ तौ दाऊद कली “इ लोक्ब आन कली एको ४ पाथी तांब्रा नु १० ओटा शोब्ले लाइश्शा रीब पा चोव्रथ लावो।<sup>18</sup> एको १० ओटा दूध के सेल्शो जचा थोव्रच चहिं आन हजार का मुर आन कप्तान कली लतो। इ लोक्बपुकी दोदेंशो पा बाक्मा कोव्रडो। मिनु मेको आन रे मारेइ चिनु कुरशा जाक्को” दे मदा बाक्त।

<sup>19</sup> मेना सावल, दाऊद आ लोक्ब सां नु इस्राएली नेल्ले एलाह डा दिंम पलिस्ती नु लडाइ पना पन बाक्मा बाक्त।<sup>20</sup> मिनु आ दीसा सुनी कना दाऊद आ भेडापुकी मुर आन कली “कोव्रडीन” दे येस्से आ देंशो खोदेंशो पा, मेको चोव्रथ गाक्माक्त। लडाइ पाइब नेल्ल आन आन राप्तीकेम राप्था लडाइ के बाजा ताप्मे ना, मेको आन बाक्तीकेम जाक्दीम्माक्त।<sup>21</sup> इस्राएली पलिस्ती आन डोंइतीमी, पलिस्ती इस्राएली आन डोंइतीमी लहर पा राम्मा बाक्त।<sup>22</sup> मार मार वोइक्ब आन कली, मार मार गेशा, दाऊद आ लोक्ब आन राप्तीकेम मेको आन कली गुम्थ दोरशा लमाक्त।<sup>23</sup> मिनु मेको आ लोक्बपुकी नु लोव्र पना पन बाक्मेनु, मेको गाथ डा पलिस्ती गोल्याथ आ हुल रे गूशा, डोंइती डा खोदेंशो पा ग्रीमाक्त। मेको लोव्र दाऊदमे नेना बाक्त।

<sup>24</sup> इस्राएलीपुकी मेको मुर कली तामे चोटीन प्रोक्बाक्मा बाक्त।

<sup>25</sup> मेकोपुकीमी “कोव्रडीन, मेरे मुर नाक्त किंत किंत गूशा इस्राएली आन कली ग्रीशा हिंपाइक्ब। मेरे मुर कली साइक्ब कली पिपम शुश इनाम गेब। आ तमी यो मेको मुर कली गेशा ग्युंवे पाइब। मेको आ खिं डा मुर आन कली इस्राएलमी पिप आ गेय पतीक रे थमा पा प्रोंइब” देमा बाक्त।<sup>26</sup> मिनु दाऊदमी आ नेक्था बाक्ब आन कली “मेरे पलिस्ती कली साइक्ब नु

इस्राएली आन कली मुने दोक्तीक रे प्रोंइबमी मार ताइबा? गेना हना यो ब्रोंइशा बाक्ब परमप्रभु आ लडाइ पाइब आन कली शुक्शी पाइब मेरे खोइक्तीक चिनु मखोइश्शो पलिस्तीम मार मिम्बा?” देमाक्त।<sup>27</sup> मिनु मेको आ पर्वम मार दुम्बा? मेको कली साइक्ब मुर कली मार पांइसीबा, दे मुरपुकीमी दाऊद कली शेंदमे बाक्त।

<sup>28</sup> मेको कली मुरपुकी नु लोव्र पा बाक्शो आ लोक्ब एलीआबम नेना बाक्त। मिनु मेको गाइक्ता बाक्त। मेकोम दाऊद कली “गे मारदे एक बाक्डे? गोरशो रागीम बाक्शो मेको इक्का खोइ भेडापुकी यो सु कली कोव्रपाइक्मी? गो इ कली तुइक्नुड। गे मटीब नु हेंथे पाइब बाक्नेवे। गे एक लडाइ कोव्रथ ला जाक्शो नवे” दे मदा बाक्त।<sup>29</sup> मिनु दाऊदमी “मुल गो मार पडा डा? गो हिल्लो पचा यो मताइनुडा?” देमाक्त।<sup>30</sup> मिनु मेको ब्राशा अर्को मुर आन बाक्तीक लशा, मेको लोव्र हिल्लो पामी बाक्त। तन्न नेल्लेमी मेको कली मोदेंशो लोव्र मदमे बाक्त।

<sup>31</sup> मिनु दाऊदम देंशो लोव्र मुरपुकीम सावल कली शेंदमे बाक्त। मिनु मेकोमी दाऊद कली ब्रेथ सोइक्ता बाक्त। *१सामुएल १७:३१*<sup>32</sup> मिनु दाऊदम मेको कली “गे ग्येत्थ लुक्च मदुमीन। गो इन गेय पाइब लशा मेको पलिस्ती नु लडाइ पाइक्नुड” देमाक्त।<sup>33</sup> मिनु सावलमी “गे लशा, मेको पलिस्ती नु लडाइ पने मचाप्नेवे। गे नक डा आलन बाक्नेवे। मेको साइ रेन लडाइ पाइब मुर बाक्ब” दे मदा बाक्त।<sup>34</sup> मिनु दाऊदमी सावल कली “गो आं आफ आ भेडा गोठला नड। जोइ वां जाक्शा। भेडा बगाल रे योल्नीम।<sup>35</sup> मेना गो मेको आन कली खेदा पा लशा, आन शोव्र रे मेको रोइश्शा चाक्नुड। आं कली क्राइक्चा कली मेको लेत्तेक्म हना, मेको आन कली आन शांपेम ग्याइश्शा तुप्शा साइक्नुडमी<sup>36</sup> गो जोइ वांपुकी साइश्शो बाक्नुड। मेको खोइक्तीक चिनु मखोइश्शो पलिस्ती यो मेको आन खोदेंशो दुम्ब। मेकोमी गेना हना यो ब्रोंइशा बाक्ब परमप्रभु आ लडाइ पाइब आन कली शुक्शी पशो बाक्ब।<sup>37</sup> आं कली जोइ नु वां आन शोव्र रे प्रोंइब परमप्रभु यावेमी मेको पलिस्ती आ गुइ रे यो प्रोंइब” देमाक्त। मिनु सावलमी “लावो, परमप्रभु यावे गे नु बाक्ल” देमाक्त।

<sup>38</sup> मिनु सावलमी दाऊद कली आ लडाइम फेक्तीक फेक्पदा बाक्त। कांसा के टोपी आ पियाम गुप्ता बाक्त। मिनु आ कांसा के फेक्तीक यो फेक्ता बाक्त।<sup>39</sup> मेको नोले मेको आ तरवार पिप्ता बाक्त। मिनु दाऊद गाक्चा थुं पवा बाक्त। तन्न मचबा बाक्त। मारदे हना मेकोमी मेको गेना यो मफेक्शो, मपांइशो बाक्माक्त। मोपतीके मेकोम सावल कली “गो एको पांइशा, फेक्शा लने मचाप्नुड। मारदे हना गो एको गेनायो मपांइशो मफेक्शो नड” देमाक्त। मिनु मेकोमी मेको नेल्ल प्रुइक्मी बाक्त।<sup>40</sup> मेको नोले मेकोमी आ कोक्के कुरा बाक्त। मिनु खोला रे ५ ओटा सिल सिल देंशो फुल्लु गुबा बाक्त। मिनु आ झोलाम कुर पवा बाक्त। मिनु आ हुरद शेशा, मेको पलिस्ती नु लडाइ पथ लमाक्त।

<sup>41</sup> मेको पलिस्ती आ या कुरब कली डोंइती गाक्पाइश्शा, दाऊद आ बाक्तीक गे पिमाक्त। मेको आ तेक्तीक कुरबमी मेको कली वारच पशो बाक्माक्त।<sup>42</sup> मिनु मेकोमी दाऊद कली तशा, रिस्से बाक्त। मिनु लल चोव्रको, पाइश्शो दारशो ठिटा कली तशा, शुक्शी पचा गोवा बाक्त। *१सामुएल १६:१२*<sup>43</sup> मिनु मेको पलिस्तीम दाऊद कली “मार, गो कुचुम नडा? मिनु कोक्के शेशा, गो नु लडाइ पथ जाक्डे” मदा बाक्त। मिनु मेकोमी आ देवता आ नें थिशा दाऊद कली सराप पवा बाक्त।<sup>44</sup> मेकोमी “पिवो, गो इ श्ये चिक्ब नु ब्वाकी डा जन्तु आन कली ब्बचा गेनुड” दे मदा बाक्त।<sup>45</sup> मिनु दाऊदमी पलिस्ती कली “गे, गो नु लडाइ पचा कली तूतीक तरवार कुरशा, पिशो बाक्नेवे। तन्न गो गे नु लडाइ पचा कली मुर नेल्ल आन परमप्रभु यावे, इस्राएल डा लडाइ पाइब आन परमप्रभु आ नेंमी पिशो बाक्नुड।<sup>46</sup> मुलाक्ती परमप्रभु यावेम इ कली आं गुइम गेब। गो इ कली साइक्नन। मिनु इ पिया खोइश्शा। इ रां नु पलिस्ती आन रां चिक्ब नु ब्वाकी डा जन्तु आन कली ब्बचा गेनुड। मिनु इस्राएलम परमप्रभु का बाक्ब, दे रागी नेल्ल डा मुरुम तुइक्नीम।<sup>47</sup> मिनु एक बाक्शो मुर नेल्लेम परमप्रभु यावेम तूतीक नु तरवारम मप्रोंइब, दे तुइक्नीम। मारदे हना एको लडाइ परमप्रभु यावे केन बाक्ब। मेकोमी गे नेल्ल इन कली आंइ गुइमी गेब” दे मदा बाक्त। *प्रस्थान १५:३; भजन संग्रह २०:८; जकरिया ४:६*

48 मिनु मेको पलिस्ती दाऊद गे पिमाक्त। मिनु दाऊदमे मेको नु लडाइ पचा कली, आ डोंइती गे दोरशा लमाक्त। 49 मेकोमी आ गुइ झोलाम कुर पा फुल्लु का गुंइदा बाक्त। मिनु हुरदमे वोदा बाक्त। मिनु हिरशा, मेको पलिस्ती आ कुप्फीम आबा बाक्त। मिनु मेको फुल्लुम कुप्फ होदा बाक्त। मिनु मेको खपीम गोल्माक्त। 50 मोपा दाऊद आ हुरद नु फुल्लुम ग्रामाक्त। मेको नु तरवार मबाक्त हना यो, पलिस्ती गोल्याथ कली सदा बाक्त। 51 मेको दोरशा मेको पलिस्ती गोल्याथ गे लमाक्त। मिनु आ नेक्था राम्माक्त। मेको आ तरवार खोत रे शोइशा, मेको कली साइशा आ पिया खोदा बाक्त। पलिस्तीपुकीमी आंम बोल्यो लडाइ पाइब साइशो तामे बाक्त। मिनु मेकोपुकी हींशा प्रोकमा बाक्त।

52 मिनु इस्राएली नु यहूदीपुकीमी लडाइ डा ग्रीतीक ग्रीमा बाक्त। गाथ नु एक्रोन डा ठेयब लाप्चो सम्म मेको आन कली थाम्पा खेदा पामे बाक्त। शा-आराइम, गाथ नु एक्रोन लतीक लां सम्म आन बेक्शो रं नेल्ल थाम्पा ब्रमाक्त। 53 पलिस्ती आन कली खेदा पा लेम्मानु, मेकोपुकीमी मेको आन बाक्तीक डा मारेइ मारेइ खुप्तमे बाक्त। 54 दाऊदमी गोल्याथ आ या मेको आ ताम्बुमीन प्रॉइशा, मेको आ पिया चहिं कुरशा यरूसलेम चाक्गा बाक्त। 55 मिनु सावलमी दाऊद कली पलिस्तीपुकी नु लडाइ पथ लशो तशा, मेकोम आ लडाइ पाइब आन कप्तान आबनेर कली “मेको ठिटा सु का आ तौ बाक्मे?” दे हिल्लो पवा बाक्त। मिनु आबनेरमी “गो इन नेमी कसम जशा देंनुड, गो मेको कली मतुइक्नुड” देंमाक्त। 56 पिपम आबनेर कली “मेको सुका आ तौ बाक्मे रुपो” देंमाक्त। 57 मिनु दाऊद मेको पलिस्ती कली साइशा, लेम नोले आबनेरमी दाऊद कली सावल आ डोंइती चाक्दीदा बाक्त। दाऊदमी मेको पलिस्ती आ पिया गुइम ग्याइशो बाक्माक्त। 58 मिनु सावलमी मेको कली “ए ठिटा, गे सुका आ तौ नवे” दे हिल्लो पवा बाक्त। मिनु दाऊदमी “गो इन गेय पाइब बेथलेहेम डा येस्से आ तौ नड” देंमाक्त।

दाऊद नु योनाथन वारचु दुश्शो

18 मोपा दाऊदमे सावल नु लोत्र पने थुमा बाक्त। नोले योनाथनमी, दाऊद कली आंम कली खोदेशो पा आ थुं रेन दाक्चा गोवा बाक्त। मेको सावलम तुइक्ता बाक्त। 2 मिनु सावलमी दाऊद कली लदा बाक्त। आ आफ आ खिं लेशशा लचा मगेवा बाक्त। १सामुएल १६:२२; १सामुएल १७:१५ 3 मिनु योनाथन नु दाऊद आस थुं रेन थमा पा वारच बु दुस्सा बाक्त। मारदे हना मेको निक्शी काम अर्को कली आंम कली खोदेशो पा दाक्मुसा बाक्त। मिनु कबल का पाम्से बाक्त। १सामुएल २३:१८; २सामुएल २१:७; १सामुएल १९:१; १सामुएल २०:१७; २सामुएल १:२६ 4 मिनु योनाथनमी आ फेक्शो वा प्रुइशा दाऊद कली गेवा बाक्त। आ तरवार, लिब्रा नु पेटी सुन्दा प्रुइशा गेवा बाक्त। 5 दाऊदमे सावल आ पथ सोइशो हिंचा डा गेय यो रिश्शो पा पवा बाक्त। मिनु सावलमी दाऊद कली नेल्ल क्येडा सक्ति पाइशो कप्तान सेला बाक्त। मोपा मेको कली मान बारपाइशोमी सावल नु आ ठेयब मुरपुकी यो ग्येरसमा बाक्त।

दाऊद कली साइक्चा माल्शो

6 दाऊदमे पलिस्ती आन कली साइशा लेम्मेनु, इस्राएल डा सहर नेल्ल डा मीश मुर नेल्ल कोत्रथ गूमा बाक्त। सिल पाइब मीश मुरपुकी खैजडी ताप्शा, कुम्सो पना पन, सिल पना पन पिप सावल कली गुम्थ जाक्मा बाक्त। न्यायाधीस ११:३४ 7 मिनु मीश मुरपुकीम ग्येरसीशा “सावलम हजार हजार आन कली साइक्तीमी। तन्न दाऊदमी १० हजार, हजार आन कली साइक्तीमी” दे कुम्सो पामे बाक्त। १सामुएल २१:१२; १सामुएल २९:५ 8 मिनु सावल थाम्पा गाइक्ता बाक्त। मेको लोत्र नेंशा थाम्पा आ थुं खुरसे बाक्त। मेकोमी दाऊद कली चहिं “१० हजार, हजार तन्न आं कली चहिं हजार हजार ला देंतेक्म। मुल मेको कली पिप सेल्चा का ला लीत” दे मिन्ता बाक्त। 9 मेको नाक्त रे सावलमी दाऊद कली गेहे पचा गोवा बाक्त।

10 आ दीसा परमप्रभु रे मरिश्शो पाइब सोक्त काम सावल कली सुमा बाक्त। मिनु सावलमी आ खिंमी हेंथे पवा बाक्त। मिनु दाऊदमी डोंइती डा खोदेशो पा सावल आ पबर्म बीना तबा बाक्त। सावल आ गुइमी तूतीक का

बाक्माक्त। १सामुएल १६:१४,२३ 11 मेकोम “गो दाऊद कली गारोम क्येजुड” दे मिश्शा, आ तूतीक आबा बाक्त। तन्न दाऊद निक्शी खेयप दिल्ला मख्रपांइसे बाक्त। १सामुएल १९:१०; १सामुएल २०:३३ 12 मिनु सावल दाऊद कली तशा हिंमाक्त। मारदे हना परमप्रभु यावेम आ कली प्रॉइशा दाऊद नु बाक्शो बाक्ब, दे तुइक्ता बाक्त। 13 मोपतीके सावलम दाऊद कली आ दरवार रे गुंइशा, हजार का मुर आन कप्तान सेला बाक्त। मिनु दाऊदमी आ मुर आन कली लडाइम लाइक्मी बाक्त। 14 मिनु परमप्रभु यावे मेको नु बाक्तीके आ पशो गेय नेल्लेमी मेको रिश्शो दुम्माक्त। १सामुएल १८:५ 15 सावलमी दाऊद आ गेय नेल्ल रिश्शो दुश्शो तशा, डोंइती क्येडा हिंमाक्त। 16 इस्राएल नु यहूदा डा मुर नेल्लेमी दाऊद कली दाक्तेमे बाक्त। मारदे हना मेको लडाइ पतीकेम लां कोंइशा डोंइती गाक्बाक्माक्त।

17 मिनु सावलम दाऊद कली “गो आं ठेयब तमी मेराब इ कली गेशा ग्युंभे पपाइक्नुड। तन्न गे मेको आ पबर्म बोल्यो पा आं गेय पचा माल्लेवे। मिनु परमप्रभु यावे आ पबर्म लडाइ पावो” दे मदा बाक्त। मारदे हना सावलम दाऊद कली आंम आ गुइम ममाइ पलिस्ती आन गुइ रे साइक्पाइक्चा माल्शो बाक्माक्त। 18 मिनु दाऊदमी “गो सु नडा डा? आं आफ आ खिं डा मुर इस्राएली सु नमी डा? गो पिप आ चांइवा दुम्नुडा?” देंमाक्त। २सामुएल ७:१८ 19 मो हना यो सावल आ तमी मेराब नु दाऊद आस ग्युंभे दुस्तीक नाक्त जाक्चा क्येडा डोंइती, मेराब कली मेहोला आ मुर अद्रीएल नु ग्युंभे पा सोइक्ता बाक्त। 20 तन्न सावल आ अर्को तमी मिकाल दाऊद नु दाक्मुसा बाक्त। मेको लोत्र सावलम नेनानु “आं मिश्शो गाख दुम्त” दे मिन्ता बाक्त। 21 मेको आ थुंमी “गो मेको कली दाऊद नु ग्युंभे पपाइक्नुड। पलिस्ती आन गुइम बेक्पाइक्चा कली मेको वाल्पाइक्तीक गेय बाक्ब” देंमाक्त। मोपतीके सावलमी आ चांइवा सेल्चा कली लोत्र पवा बाक्त। 22 मेकोमी आ गेय पाइब आन कली “एको लोत्र सुइम मतुइक्चा डा पा दाऊद कली मतीन” देंमाक्त। मिनु मेकोपुकीम दाऊद कली “पिप इन क्येडा थाम्पा ग्येरशो बाक्ब। मिनु आ गेय पाइब नेल्ल आन दाक्शो यो गे बाक्नीनी। पिप आ खिं डा मुर नु ग्युंभे पतीक नाक्ती यो मुलन बाक्ब” देंमा बाक्त। १सामुएल २२:१४ 23 सावल आ मुरपुकीम दाऊद कली मोदेशो लोत्र पामेनु, दाऊदमे मेको आन कली “गेपुकीम पिप आ तमी नु ग्युंभे पचा आइक्च लोत्र मिन्तीनी? आं खोदेशो मारेइ मथीब मुरुम ओदेशो पने चाप्नुडा?” दे माइक्मी बाक्त। 24 मिनु दाऊद आ देंशो लोत्र आ गेय पाइबपुकीम सावल कली शेंदमे बाक्त। 25 मिनु मेकोमी दाऊद कली “जोरी सत्रु आन क्येक्क लेल्चा कली पिपम ग्युन्ली आ पबर्म सहे का पलिस्ती आन खोइक्तीक चिनु खोइक्तीक डा कुशुल ला पुंइब मतीन” देंमाक्त। मारदे हना पलिस्ती आन गुइ रे दाऊद बेक्ल देंशो बाक्माक्त। 26 मिनु सावल आ देंशो लोत्र आ गेय पाइब मुरपुकीम दाऊद कली नेंपदमे बाक्त। मिनु मेको लोत्रमी मेको पिप आ तमी नु ग्युंभे पचा बिस्से बाक्त। 27 मिनु देंशो नाक्त आ डोंइती, नाक्त दाऊद आ मुरपुकी नु लशा सहे निक्शी पलिस्ती आन कली सदमे बाक्त। मिनु मेकोम मेको आन खोइक्तीक चिनु खोइक्तीक डा कुशुल लाइशा, चांइवा सेल्पीनी, दे पिप आ डोंइती हिक्शा, गोवा बाक्त। मिनु सावलमी आ तमी मिकाल दाऊद कली गेशा ग्युंभे पाइक्ता बाक्त। 28 मिनु सावलमी परमप्रभु यावे दाऊद नु बाक्ब, दे तुइक्ता बाक्त। आ तमी मिकालम मेको कली दाक्ब, दे यो तुइक्ता बाक्त। 29 मिनु सावल दाऊद क्येडा शुश हिंचा गोवा बाक्त। मिनु आ लीशो ब्रॉइतीक नाक्त सम्मन मेको दाऊद आ जोरी सत्रु दुम्माक्त। १सामुएल १८:१२

30 पलिस्ती आन कप्तान का का पा लडाइ पथ जाक्बाक्मा बाक्त। मेकोपुकी मोपा जाक्मानु, सावल आ अरु गेय पाइब आन क्येडा दाऊदमी रिश्शो गेय पवा बाक्त। मोपा मेको आ नें ठेयब दुम्माक्त।

योनाथनम दाऊद कली प्रॉइशो

19 सावलमी दाऊद कली साइक्चा, दे आ तौ योनाथन नु आ गेय पाइब नेल्ल आन कली लोत्र पवा बाक्त। तन्न सावल आ तौ योनाथन दाऊद आ वारच बाक्माक्त। १सामुएल १८:३ 2 योनाथनमी आ आफ सावलमी दाऊद कली साइक्चा माल्शो बाक्ब, दे दाऊद कली शेंदा

बाक्त। मेकोमी दाऊद कली "होस पा, दीसा सुनी सुइमी मतुइक्तीकेमी खुइश्शा बाक्कीन।<sup>3</sup> सुनी गो गूशा पीनुड। मिनु इन खुइश्शा बाक्तीके आ नेक्था आं आफ नु गुम्नुड। मिनु मेको नु इन पर्वम लोव पाइनुड। मारेइ तुइक्ताकड हना, गो इन कली शेंनुड" देमाक्त।<sup>4</sup> मिनु योनाथनम आ आफ कली दाऊद आ पर्वम रिश्शो लोव पा "इन गेय पाइब दाऊद कली मारेइ पाप मपने। मारेदे हना मेकोमी इन कली मारेइ पाप मपावो। थमा पा, आ पशो गेय नेल्ल इन कली रिश्शो दुम्ब।<sup>5</sup> मेकोमी पलिस्ती कली सदानु, आंमा चहिं बेक्नुड देय ब्रॉइनुड, दे मतुइश्शो बाक्त। मिनु परमप्रभु यावेम इस्राएल कली ठेयब सेल्शा ग्रापाइक्नु। गे मेको नेल्ल तथा शुश ग्येरशो बाक्तीनी। गे मारेदे मेको दोस मताइब दाऊद कली मरिश्शो पचा माल्नीनी? बिच्चीम मेको कली मारेदे साइक्वा दाक्नीनी?" देमाक्त।<sup>१ सामुएल १७:५०</sup><sup>6</sup> मिनु सावलमी योनाथन आ लोव नेंशा "परमप्रभु यावे ब्रॉइशा बाक्शो खोदेंशो पा, दाऊद मसाइक्नुड" दे कसम जवा बाक्त।<sup>7</sup> मिनु योनाथनमी दाऊद कली ब्रेश्शा, मेको लोव नेल्ल नैपदा बाक्त। मिनु योनाथनमी दाऊद कली सावल आ बाक्तीके चाक्दीदा बाक्त। मिनु मेकोम डोंइती डा खोदेंशो पा सावल आ गेय पवा बाक्त।

<sup>8</sup> मिनु लेंशा पलिस्तीपुकी नु लडाइ दुम्माक्त। दाऊदम मेकोपुकी नु लडाइ पवा बाक्त। मिनु मेकोमी हिंचा डा पा लडाइ पतीके मेको पलिस्ती प्रोक्मा बाक्त।

<sup>9</sup> मिनु काबु परमप्रभु यावे रे मरिश्शो पाइब सोक्तीम सावल कली सुमा बाक्त। मेना सावल आ खिंमी तूतीक शेशा बाक्शो बाक्माक्त। दाऊद चहिं बीना ताप्ना ताप्न बाक्माक्त।<sup>१ सामुएल १८:१०-११</sup><sup>10</sup> मिनु सावलम दाऊद कली गारोम क्येच्चा डा पा तूतीकेम आबा बाक्त। तन्न दाऊद दिल्माक्त। मिनु मेको तूतीक गारोम ग्युक्से बाक्त। दाऊद चहिं ब्रॉइशा प्रोक्माक्त।<sup>11</sup> सावलमी मेको कली सुनी साइक्वा कली दाऊद आ खिंम क्यारी पाइब मुर वोदा बाक्त। तन्न दाऊद आ मीश मिकालमी मेको कली हिंपाइश्शा "गे मुल नाक्दोन प्रोक्शा मगाक्तीनी हना, दीसा इन कली साइक्नीम" दे मदा बाक्त। भजन संग्रह ५९:१<sup>12</sup> मिकालमी दाऊद कली झेल रे उइ तोइक्पदा बाक्त। मिनु मेको सुइमी मतुइक्थु प्रोक्माक्त।<sup>13</sup> मिकालमी मूर्ति चाक्शा, दाऊद आ ब्राख्येम वोदा बाक्त। मिनु आ पिया थांइसीतीकेम चहिं क्यारश आ चां वोदा बाक्त। उत्पत्ती ३१:१९<sup>14</sup> मिनु सावलमी दाऊद कली कोव्रथ मुर सोइक्तानु, मेकोम "रोइ पशो बाक्ब" देमाक्त।<sup>15</sup> मिनु सावलमी मेको आन कली "गे आमा दाऊद कली कोव्रडीन" दे सोइक्तीमी बाक्त। मेकोमी "मेको कली आ खाट सुन्दा क्युक्शा एक चाक्कीन। मिनु गो साइक्नुड" दे सोइक्तीमी बाक्त।<sup>16</sup> मिनु मेकोपुकी जाक्मानु, ब्राख्येम मूर्ति नु पिया थांइतीकेमी क्यारश आ चां ला थित्मे बाक्त।<sup>17</sup> मिनु सावलमी मिकाल कली "गे मारेदे आं कली जोल पाइय्यी? आं जोरी सत्रु कली मारेदे रिश्शो पा प्रोक्पदी?" देमाक्त। मिनु मिकालमी "मेकोम 'आं कली रिश्शो पा मप्रोक्पाइक्ती हना, गो इ कली साइक्नन' दे माइक्ती" देमाक्त।

<sup>18</sup> मिनु दाऊद प्रोक्शा लशा, रामाह सामुएल आ बाक्तीकेम जाक्दीम्माक्त। मिनु सावलमी मार मार पवा, मेको नेल्ल शेंदा बाक्त। मिनु मेको नु सामुएल लशा नायोथमी बाक्सा बाक्त।<sup>19</sup> मिनु मुर कामी सावल कली "दाऊद रामाह डा नायोथम बाक्ब" दे शेंदा बाक्त।<sup>20</sup> सावलमी दाऊद कली ग्याइक्वा, दे मुर आन कली सोइक्ता बाक्त। मेकोपुकीमी परमप्रभु यावे आ लोव पाइब आन हुल परमप्रभु यावे आ सोक्तीम लोव पा बाक्शो तामे बाक्त। मिनु सामुएल मेको आन ठेयब मुर बाक्माक्त। मिनु परमप्रभु आ सोक्तीम मेको आन कली सुमा बाक्त। मिनु मेकोपुकी यो परमप्रभु यावे आ सोक्तीम लोव पामे बाक्त।<sup>१ सामुएल १०:१०-१२</sup><sup>21</sup> मिनु सावलम मेको नेंशा, अर्को हुल का सोइक्ता बाक्त। मेकोपुकीम यो परमप्रभु यावे आ सोक्तीम लोव पामे बाक्त। मिनु सावलमी लेंशा अर्को हुल का सोइक्तीमी बाक्त। मिनु मेकोपुकी यो मोदेंशो दुम्मा बाक्त।<sup>22</sup> मिनु नोले सावल आंमान रामाहम पिशा, सेकुम बाक्शो ठेयब कुवाम जाक्माक्त। मिनु मेकोमी "सामुएल नु दाऊद ते बाक्सा?" दे हिल्लो पवा बाक्त। मिनु "मेको निक्शी रामाह डा नायोथम बाक्नीसी" दे शेंदमे बाक्त।<sup>23</sup> मेको रामाह डा नायोथ लना लन पवानु, परमप्रभु आ सोक्तीम मेको कली यो सुमा बाक्त।

मिनु रामाह डा नायोथ सम्मन, परमप्रभु यावे आ लोव पना पन जाक्दीम्माक्त।<sup>24</sup> मेकोमी यो आ वा पुइश्शा, सामुएल आ डोंइती परमप्रभु यावे आ सोक्तीम लोव पना पन नाक्त रे नु नाक्दो रे शिश्रा बाक्माक्त। मोपतीके मुरपुकीम "मार, सावल यो परमप्रभु यावे आ लोव पाइब आन दातेमी बाक्मे?" देबाक्मा बाक्त।

योनाथनम दाऊद कली वारच पशो

**20** मिनु दाऊद रामाह डा नायोथ रे प्रोक्शा, योनाथन आ बाक्तीक जाक्दीम्माक्त। मिनु मेकोमी योनाथन कली "गो मार पडा? आं दोस मार बाक्बा? मारेदे इन आफोम आं कली साइक्वा माल्बा?" दे हिल्लो पवा बाक्त।<sup>2</sup> मिनु योनाथनमी "मोदेंशो मदुम्न। गे मबेक्नीनी। आं आफोम आं कली मदेंथु, आइक्च नु ठेयब गेय मारेइ मपाइब। ओदेंशो लोव आं आफोम आं रे दोपा खुइक्वा डा? मोदेंशो मपाइब" देमाक्त।<sup>3</sup> मिनु दाऊदमी "गे आं कली दाक्नीनी, दे इन आफोम तुइक्ब। मेकोमी 'योनाथनम मतुइक्तल। तुइक्ताक्व हना, आ थुं खाइक्ब' दे मिश्शो बाक्ब। थमा पा, परमप्रभु यावे ब्रॉइशा बाक्शो खोदेंशो पा बेक्तीक आं नेक्था बाक्त" दे कसम जवा बाक्त।<sup>4</sup> मिनु योनाथनमी दाऊद कली "गे मार देंनीनी, गो मेको पाइनुड" देमाक्त।<sup>5</sup> मिनु दाऊदमी योनाथन कली "दीसा औंसी बाक्ब। गो पिप नु बाक्शा, जचा माल्नुड। गो नाक्त सां सम्म रू मेर लशा खुइश्शा बाक्नुड।<sup>6</sup> इन आफोम आं मजाक्शो आ पर्वम लोव गुंइताक्व हना, मेको कली 'दाऊदमी बेथलेहेम आ खिंम रीब पा लचा माल्तीके, आं कली हिल्लो पती। मारेदे हना मेकेर खिं डा मुर नेल्लेमी बर्सम चट्टेतीक चट्टेचा माल्बाक्माक्त' देनीन।<sup>7</sup> मिनु मेकोम 'ठीक बाक्ब' देंत हना, मेको रिश्शो बाक्ब। तन्न मेको गाइश्शा चुरशा पाप्नु हना, मेकोमी आं पर्वम मरिश्शो मिश्शो बाक्ब, दे गे तुइक्नीनी।<sup>8</sup> मोपतीके गे इन गेय पाइब, गो नु थमा सुइक्वा डा गेय पने। मारेदे हना गे नु गो परमप्रभु यावे आ डोंइती कबल का पशो बाक्नस। गो दोस ताइब बाक्ती हना, गे आं कली साइय्यीनी। इन आफ बाक्तीकेमी मलाइय्यीनी" देमाक्त।<sup>१ सामुएल १८:३</sup><sup>9</sup> मिनु योनाथनम "मोदेंशो लोव मपन। आं आफोम इन कली साइक्वा मिश्शो गो तुइक्ताकड हना, इन कली शेंनुड" देमाक्त।<sup>10</sup> मिनु दाऊदम योनाथन कली "इन आफोम मरिश्शो लोव पाप्नु हना, मेको सुम आं कली तुइक्पाइक्बा?" देमाक्त।<sup>11</sup> मिनु योनाथनमी "गो नु पिने" देमाक्त। मिनु मेको निम्फा हिरथ लसा बाक्त।

<sup>12</sup> मिनु योनाथनम दाऊद कली "गो इन कली, परमप्रभु यावे, इस्राएली आन परमप्रभु आ डोंइती एको लोव पाइनुड। दीसा कि नित्थ नाक्त आं आफ आ थुं थामु नोले मेकोम इन पर्वम रिश्शो मिश्शो बाक्त हना, गो इन कली तुइक्पाइक्नुड।<sup>13</sup> तन्न आं आफोम मरिश्शो मिश्शो बाक्त हना यो, गो इन कली तुइक्पाइक्नुड। गो इन कली मतुइक्पाइक्ता हना नु इन कली मप्रॉइता हना, परमप्रभु यावेमी आं कली सजाइ गेवल। परमप्रभु यावे आं आफ नु बाक्शो खोदेंशो पा गे नु यो बाक्ल।<sup>14</sup> गो ब्रॉइडा सम्म परमप्रभु यावेम आ गेना हना यो दाक्शा मप्रॉइशो खोदेंशो पा इन दाक्तीक आं कली कोइदीन।<sup>15</sup> परमप्रभु यावेम रागी रे दाऊद आ जोरी सत्रु नेल्ल क्याम्ताक्व हना यो, गे इन गेना हना यो दाक्तीक आं खिं डा मुर आन रे मक्याम्दीन" दे योनाथनमी दाऊद कली देमाक्त।<sup>16</sup> मेना योनाथनमी दाऊद आ खिं डा मुर नु कबल पा "परमप्रभु यावेम दाऊद आ जोरी सत्रु आन कली माल्शा गुंइदल" देमाक्त।<sup>17</sup> मेको नु दाक्मुशो आ पर्वम योनाथनमी दाऊद नु कसम जवा बाक्त। मारेदे हना, मेकोम मेको कली आंम कली खोदेंशो पा दाक्बाक्माक्त।

<sup>18</sup> मिनु योनाथनम दाऊद कली "दीसा औंसी बाक्ब। इन नित्तीक श्येत्थ बाक्शो तथा, गे मबाक्नीनी, दे तुंइसीब।<sup>19</sup> मोपतीके नित्थ नाक्त इन खुइक्तीके उइ मेर लने। इन डोंइती खुइक्तीकेम लशा, फुल्लु आ नेक्था बाक्कीन।<sup>20</sup> मिनु गो मेको फुल्लु आ नेक्था ब्रा सां आप्नुड।<sup>21</sup> मिनु गो मेको वोंइश आल कली ब्रा इ डोंइती बाक्नीम, दे माल्थ सोइक्ताकड हना, गे गूशा पिन। परमप्रभु यावे ब्रॉइशा बाक्शो खोदेंशो पा गे ठीक बाक्नीनी।<sup>22</sup> तन्न गो मेको वोंइश आल कली 'कोव्रडो, ब्रा इ नोले गे बाक्नीम। मेको



खुप्शा चाक्को' देंती हना, गे प्रोक्कीन। मारदे हना परमप्रभु यावेम इन कली सोइश्शो बाक्ब।<sup>23</sup> गो निक्शी इस दातेम पशो लोव्र गेना हना यो लील, दे परमप्रभु यावे सांकळी बाक्ब" देंमाक्त।

<sup>24</sup> मोपतीके दाऊद रू मेर खुइश्शा बाक्माक्त। मिनु औसीमी भोज ठीक दुम नोले पिप जचा कली निस्से बाक्त।<sup>25</sup> सावल डॉइती खोदेशो पा आ नित्तीकेम निस्से बाक्त। आ नित्तीके गारो आ नेक्था बाक्शो बाक्त। आब्नेर मेको आ नेक्था निस्से बाक्त। योनाथन चहिं राप्शा बाक्शो बाक्माक्त। तन्न दाऊद आ नित्तीक श्येत्थ बाक्माक्त।<sup>26</sup> मेको नाक्त सावलम मारेइ मदेमाक्त। मेको ग्रंथा दिशो दुम माइ। मोपतीके मजाकम माइ, दे मिस्ता बाक्त। *लेवी १५:१६*<sup>27</sup> औसी आ दीसा दाऊद आ नित्तीक श्येत्थ बाक्माक्त। मिनु सावलम आ तौ योनाथन कली "सिनाक्त मुलाक्त येस्से आ तौ भोजम मारदे मजाकम" दे हिल्लो पवा बाक्त।<sup>28</sup> मिनु योनाथनम सावल कली "दाऊदमी 'गो बेथलेहेम लाइनुड' दे लोव्र पाप्तु।<sup>29</sup> मेकोमी 'आं खिं डा मुरपुकी चढ़ेचा कली सहर लशो बाक्नीम। आं लोकबम आं कली मेक जाक्चा, दे ब्रेत्ताक्वी। मिनु गे आ कली शिशी पाइनीनी हना, आं लोकब आन कली गुम्थ लचा गेयीनी" देंत। मोपतीके मेको पिप नु जथ जाक्ने मचब" देंमाक्त।

<sup>30</sup> मिनु सावल योनाथन नु गाइश्शा मेको कली "गे दूली पाइब नु मटीब मीश आ तौ, गे येस्से आ तौ कली वारच सेल्शा, मुने दोक्शो बाक्नेवे। मिनु इ ममा इ कली जरमेशो आ पर्वम मुने दोक्त।<sup>31</sup> येस्से आ तौ रागीम ब्रॉइशा बाक्म सम्म गे मलीनेवे। इ राज्य यो मलीब। मेको कली रीब पा एक चाक्चा कली ब्रेत्थ सोइक्तीमी। थमा पा मेको साइक्चा पुंइसीब बाक्ब" देंमाक्त।<sup>32</sup> मिनु योनाथनमी आ आफ कली "मेको मारदे साइक्चा पुंइसीबा? मेकोम मार पवा डा?" देंमाक्त।<sup>33</sup> मेको लोव्रम पतीके सावलमी आ तूतीक क्युक्शा, आ तौ कली साइक्चा मला बाक्त। मिनु योनाथनमी आ आफोम दाऊद कली साइक्चान माल्शो बाक्माक्त, दे तुइक्ता बाक्त। *१सामुएल १८:११*<sup>34</sup> मिनु योनाथन गाइश्शा चुरशा आ नित्तीक रे बोक्शा, मारेइ मजवा बाक्त। मारदे हना दाऊद कली साइक्चा माल्शो आ पर्वम सुर्ता पवा बाक्त। आ आफोम दाऊद कली मरिश्शो पचा मिश्शो बाक्माक्त।

<sup>35</sup> मिनु आ दीसा सुनी देंशो खोदेशो पा, योनाथन दाऊद कली गुम्थ लमाक्त। मेको नु वॉइश आल का यो बाक्माक्त।<sup>36</sup> मेकोमी मेको वॉइश आल कली "गो आं आप्शो ब्रा माल्थ लावो" दे मदा बाक्त। मेको वॉइश आल दोरमेनु, योनाथनम आ नोले गे ब्रा आबा बाक्त।<sup>37</sup> मिनु मेको वॉइश आल योनाथनम ब्रा आप्तीकेम जाक्दीम्मेनु, योनाथनम "ब्रा इ नोले गे बाक्ब" दे ब्रेत्ता बाक्त।<sup>38</sup> मिनु योनाथनमी मेको वॉइश आल कली "रीब पा लावो। देश मपावो" दे ब्रेत्ता बाक्त। मिनु मेको वॉइश आल ब्रा गुप्शा आ ठेयब मुर आ बाक्तीक चाक्गा बाक्त।<sup>39</sup> मेको वॉइश आलम मारेइ मतुइश्शो बाक्माक्त। योनाथन नु दाऊदम ला आस डॉइती देंशो लोव्र तुइक्त्से बाक्त।<sup>40</sup> मिनु योनाथनम आ या मेको वॉइश आल कली गेशा "सहरम लतो" दे सोइक्ता बाक्त।<sup>41</sup> मिनु मेको वॉइश आल लम नोले, दाऊद आ खुइक्तीक फुल्लु आ नोले रे गूशा, खेयप सां बाप्शा मान पवा बाक्त। मिनु मेको निक्शी पुक्पु पाइक्मुसा बाक्त। मिनु निम्फा डाक्सा बाक्त। दाऊद योनाथन क्येडा शुश डाक्माक्त।<sup>42</sup> मिनु योनाथनम दाऊद कली "रिश्शो पा लावो। गे नु गो परमप्रभु यावे आ नेंमी कसम जशा, परमप्रभु यावे गे नु गो इस दातेमी बाक्त। मेको इ चच युइ नु आं चच युइ आन दातेमी गेना हना यो बाक्ल" देंमाक्त। मिनु दाऊद बोक्शा लमाक्त। योनाथन चहिं सहर लेम्माक्त।

दाऊद प्रोक्शा नोब नु गाथ लशो

**21** मिनु दाऊद नोब डा चढ़ेब अहीमेलेक आ बाक्तीक जाक्माक्त। मिनु अहीमेलेक खिंखि पा दाऊद कली गुम्था "मारदे इन का ला जाक्नी? गे नु सुइ मबाक्मा" देंमाक्त। *१सामुएल २२:९, १९*<sup>2</sup> मिनु दाऊदम चढ़ेब अहीमेलेक कली "गो पिप आ हुकुममी जाक्ती। मेको गो सुइ आन कली शेंचा मदुम्नुड। गो आं मुर आन कली सुइ मबाक्तीकेम गुम्चा नड, दे माइक्तामी।<sup>3</sup> मुल इन नु मार बाक्बा आं कली ५ ओटा शोब्ले कि दोशो

बाक्मे, मोशो गेयीनी" देंमाक्त।<sup>4</sup> मिनु चढ़ेबम दाऊद कली "गो नु शोब्ले मबाक्ब। कोंइतीक शोब्ले ला बाक्नीम। तन्न मार, मेरे वॉइश मुरपुकी मीश मुर रे डोन बाक्शो बाक्नीमी?" दे हिल्लो पवा बाक्त। *लेवी २४:५-९; प्रस्थान १९:१५*<sup>5</sup> मिनु दाऊदमी "गो इन कली थमा लोव्र पाइनुड, गेना हना यो गो लां गाक्ची ना मीश मुर रे डोन बाक्नीकी। एको वॉइश मुर ग्रंथा मदिशो बाक्नीम। मुल मेको क्येडा ग्रंथा मदिशो बाक्नीकी" देंमाक्त।<sup>6</sup> मोपतीके मेकेर अरु शोब्ले मबाक्तीके चढ़ेबमी मेको परमप्रभु यावे आ डॉइती वोइश्शो कोंइतीक शोब्ले गेवा बाक्त। तेको नाक्ती कोंइतीक शोब्ले परमप्रभु यावे आ डॉइती रे लदमे, मेको नाक्ती अर्को होश शोब्ले वोइक्चा माल्बाक्माक्त। *मत्ती १२:३-४*<sup>7</sup> सावल आ गेय पाइब आन दाते डा गेय पाइब का यो मेको नाक्ती मेकेर परमप्रभु यावे आ डॉइती दिक्शा, बाक्शो बाक्माक्त। मेको एदोम डा दोएग बाक्माक्त। मेको सावल आ गोठला आन नेल्ल क्येडा ठेयब मुर बाक्माक्त। *प्रस्थान २१:१३; लेवी १३:४, ३१; १सामुएल २२:९, १८*<sup>8</sup> दाऊदम अहीमेलेक कली "गे नु तूतीक तरवारपुकी बाक्नीमी? मारदे हना पिप आ गेय रीब पा पचा माल्तीके गो तरवार नु अरु या कुरचा मतड" देंमाक्त।

<sup>9</sup> मिनु चढ़ेबमी "एलाह डा दिंमम इन साइश्शो पलिस्ती गोल्याथ आ तरवार एक बाक्ब। मेको निसाफ पतीक ऊरीम नु थुम्मीम बाक्शो झोला आ नोले वाम गिल्शा वोइश्शो बाक्ब। मेको लाइक्नीनी हना, लतीन। मेको डा लाक्शा एक अर्को या मबाक्ब" देंमाक्त। मिनु दाऊदमी "मेको खोदेशो रिश्शो अर्को तरवार मबाक्ब। आं कली मेकोन गेयीनी" देंमाक्त। *१सामुएल १७:५०-५१; न्यायाधीस ८:२७*

<sup>10</sup> मेको नाक्ती दाऊद बोक्शा सावल रे प्रोक्माक्त। मिनु गाथ डा पिप अकीश आ बाक्तीके जाक्माक्त। *भजन संग्रह ५६:१*<sup>11</sup> अकीश आ गेय पाइबपुकीम मेको कली "थमा पा रागी डा पिप दाऊद एकोन बाक्ब। एको आ पर्वम सावलम हजार हजार आन कली साइक्त्तु। दाऊदम १० हजार हजार आन कली साइक्तीमी" दे कुम्सो मपामे डा? *१सामुएल १८:७*<sup>12</sup> दाऊदम मेको लोव्र आ थुंम वोइश्शो बाक्माक्त। मिनु मेको गाथ डा पिप अकीश तशा थाम्पा हिंमाक्त।<sup>13</sup> मोपतीके मेकोमी मेको आन डॉइती आ निप्स ग्राइश्शो खोदेशो दुम्बु पवा बाक्त। मेकोम ठेयब लाप्चोमी रेन्ना रेन्न नु आ राल आ गल शोक्क्रेम तोक्ना तोक्न बाक्माक्त। *भजन संग्रह ३४:१*<sup>14</sup> मिनु अकीशमी आ गेय पाइब आन कली "एको मुर आ निप्स ग्राइश्शो बाक्त। एको कली मारदे आं बाक्तीक चाक्नी? <sup>15</sup> गो अरु निप्स ग्राइश्शो मुर माल्नुडा? गे मारदे एको कली आं डॉइती हेंथे पपाइक्चा कली चाक्नी। मेको आं खिंमी बाक्ल, दे मिन्नीनी?" दे माइक्मी बाक्त।

दाऊद अदुल्लाम पुक्खीम बाक्शो

**22** दाऊद मेकेर रे प्रोक्शा, अदुल्लाम डा पुक्खीम लमाक्त। मिनु मेको आ लोकब नु आ खिं डा मुर नेल्लेम मेको लोव्र नेंमे बाक्त। मिनु मेकोपुकी आ बाक्तीक जाक्दीम्मा बाक्त। *भजन संग्रह ५७:१; यहोसु १५:३६*<sup>2</sup> श्येत जशो, जेर दुश्शो नु आन थुं मनुशो मुरपुकी मेको आ बाक्तीकेम जाक्मा बाक्त। मिनु दाऊद मेको आन कप्तान दुम्माक्त। मेकोपुकी ४ सहे खोइ बाक्मा बाक्त। *न्यायाधीस ११:३*

<sup>3</sup> मेकेर रे मेकोपुकी मोआब डा मिस्पे लमा बाक्त। मिनु मोआब डा पिप कली "परमप्रभुम आं पर्वम मार पाइबा, मेको मतुइक्त्तु सम्म आं आंम आफ आस कली इन बाक्तीकेम बाक्चा गेने" देंमाक्त। *२सामुएल ८:२; रूथ १:३*<sup>4</sup> दाऊदमी आ आम आफ आस कली मोआब डा पिप नु वोदा बाक्त। मेको आ बोल्यो खुइश्शा बाक्तीकेम बाक्ची ना सम्म आ आम आफ मोआब डा पिप नु बाक्सा बाक्त।<sup>5</sup> मिनु परमप्रभु यावे आ लोव्र पाइब गादमी दाऊद कली "गे मेको बोल्यो खुइश्शा बाक्तीकेम मबाक्कीन। रीब पा यहूदा रागी लने" देंमाक्त। मोपतीके दाऊद हेरेथ डा ब्वाकीम लमाक्त। *भजन संग्रह ६३:१*

सावल नु नोब डा चढ़ेब

दाऊद सावल रे पा प्रोक्शो

6 मिनू सावलमी दाऊद नु आ मुरपुकी ते बाक्शो बाक्मा मेको नेना बाक्त। सावल गिबा डा डांडाम बाक्शो, ठेयब रवा आ पुंम, गुडम तूतीक शेशा बाक्शो बाक्माक्त। मेको आ गेय पाइब नेल्ल आ एर ओंथ राप्शा बाक्शो बाक्मा बाक्त। 7 मिनू सावलमी आ एर ओंथ बाक्शो मुर आन कली “गे बेन्यामीन आ थर डा मुर, आं लोव्र नेनीन। मार, येस्से आ तौमी नेल्ल इन कली रू नु अडगुर रू गेबा कौं? नेल्ल इन कली सहे का डा नु हजार का लडाइ पाइब मुर आन कप्तान सेल्बा कौं, दे आस पाइनीनी? 8 मोपतीके गे नेल्लेम आं कली मरिश्शो पशो बाक्तीनी। इन दातेमी सुइम आं कली आं तौ नु येस्से आ तौ कबल पमुशो मशेदीनी। सुइम आं कली आं तौमीन आं गेय पाइब कली जौब पोक्शा, आं कली बाप्पाइश्शो लोव्र मशेदीनी” दैमाक्त। १सामुएल १८:३ 9 मिनू सावल आ गेय पाइब नु राप्शा बाक्शो एदोम डा दोएगमी “गो येस्से आ तौ कली नोब डा अहीतुब आ तौ अहीमेलेक आ बाक्तीकेम जाक्शो ताता। भजन संग्रह ५२:२; १सामुएल २१:१-१० 10 अहीमेलेकम दाऊद आ पर्वम परमप्रभु यावे कली पुंडतु। मेको नोले जचा थोव्रक नु पलिस्ती गोल्याथ आ तरवार यो मेको कली गेपु” दैमाक्त।

11 मिनू सावलमी नोब डा चढ़ेब अहीतुब आ तौ अहीमेलेक नु नोबम बाक्ब आ खिं डा चढ़ेब नेल्ल आन कली ब्रथ सोइक्तीमी बाक्त। मिनू मेको नेल्ल पिप आ डोंइती जाक्मा बाक्त। 12 मिनू सावलम “ए अहीतुब आ तौ नेनो” दैमाक्त। मिनू मेकोमी “दुम्ब, आं प्रभु” दैमाक्त। 13 मिनू सावलम मेको कली “गे नु येस्से आ तौमी आं पर्वम मारदे मरिश्शो पसी? गे मेको कली शोव्ले नु तरवार गेप्टीवी। मेको आ पर्वम परमप्रभु नु पुंडतीवी। मेको आं पर्वम मरिश्शो पचा कली ठीक दुश्शो बाक्ब। मुल आं कली बाप्शा बाक्वा कली मोदेशो पाइतीनी” दैमाक्त। 14 मिनू अहीमेलेकमी “इन गेय पाइब नेल्लेमी थमा सुइक्वा पुंडसीशो इन चांइवा, इन गेय पाइब दुश्शो, इन खिं मान पाइक्वा पुंडसीब दाऊद बाक्ब। १सामुएल १८:२२, २७ 15 मोदेशो मुर आ पर्वम परमप्रभु नु डोंइती डा खेयप सल्ला पुंडशा, मार मरिश्शो पडा डा? मोदेशो लोव्र आं रे डोन बाक्ल। गो नु आं खिं डा मुर आन कली दोस मगेकी। मारदे हना, गो एको आ पर्वम मारेइ मतुइश्शो बाक्नीकी” दैमाक्त। 16 मिनू पिपम “अहीमेलेक गे थमा पा साइक्वा पुंडसीनेवे। गे नु इ खिं डा मुर नेल्ल साइक्वा पुंडसीनीम” दैमाक्त। 17 मिनू सावलम आ नेक्था उइ राप्शा बाक्शो आ कली खाल पाइब कली “लशा परमप्रभु यावे कली चढ़ेब आन कली सतो। मारदे हना, मेकोपुकी दाऊद नु गारशो बाक्नीम। मेकोपुकीमी दाऊद प्रोक्शो बाक्ब, दे तुइश्शा यो, आं कली मशेदीमी” दैमाक्त। तन्न पिप कली खाल पाइबपुकीमी परमप्रभु यावे कली चढ़ेब आन कली साइक्वा थुं मपामे बाक्त। 18 मोपतीके पिपम एदोम डा दोएग कली “ए दोएग लशा चढ़ेब आन कली सतो” दैमाक्त। मिनू दोएग लशा, चढ़ेब आन कली सदा बाक्त। मिनू मेकोमी मेको नाक्ती ८५ जना निसाफ पतीक ऊरीम नु थुम्मीम बाक्शो झोला फेक्शो मुर आन कली साइक्मी बाक्त। 19 सावलमी चढ़ेब आन सहर नोब डा वोंइश मुर, मीश मुर, आलपुकी, ब्यफ गधा नु भेडा नेल्ल आन कली तरवारमी क्योरशा साइक्मी बाक्त। १सामुएल २१:२

20 अहीतुब आ तौ अहीमेलेक आ तौ का अबीयाथार चहिं प्रोक्शा दाऊद आ बाक्तीक जाक्दीम्माक्त। १सामुएल २३:६; मर्कूस २:२६ 21 मिनू अबीयाथारमी सावलम दोपा परमप्रभु यावे कली चढ़ेब आन कली सदा, मेको नेल्ल दाऊद कली शेंदा बाक्त। 22 मिनू दाऊदमी अबीयाथार कली “मेको नाक्ती एदोम डा दोएग मेकेर बाक्त। मेकोम सावल कली शेंब, दे गो तुइश्शो नड। इ आफ नु आ खिं डा मुर नेल्ल आन कली साइक्पाइक्ब दोस ताइब गो दुम्ती। १सामुएल २२:९ 23 गे एक गो नु बाक्को। महिनो। इ कली साइक्वा माल्बम आं कली साइक्वा माल्शो बाक्ब। गे गो नु मारेइ मदुम्थु बाक्नेवे” दे मदा बाक्त। १राजा २:२६-२७

23 मुरपुकीम दाऊद कली “पलिस्तीपुकीम कैलाह नु लडाइ पा अन्न वोइक्तीक रोइक्ना रोइक्न बाक्नीम” दैमा बाक्त। यहोसु १५:४४ 2 मिनू दाऊदम परमप्रभु यावे कली “गो लशा पलिस्तीपुकी नु लडाइ पड देय मपड” दे हिल्लो पवा बाक्त। मिनू परमप्रभु यावेम “लशा, मेको आन कली लडाइ तोव्रमी कैलाह कली प्रोनो” दैमाक्त। 3 तन्न दाऊद आ मुरपुकीम मेको कली “गो यहूदा रागीम बाक्शा ला यो हिंनीकी। कैलाह डा पलिस्तीपुकी नु लडाइ पाइतय हना, मेको क्येडा शुश हिंनीकी” दैमा बाक्त। 4 मिनू लेंशा दाऊदमी परमप्रभु यावे कली हिल्लो पवा बाक्त। मिनू परमप्रभु यावेमी “कैलाहम लावो। गो पलिस्ती आन कली इन गुइमी गेनुड” दैमाक्त। 5 मोपतीके दाऊद नु आ मुरपुकी कैलाहम लमा बाक्त। मिनू पलिस्तीपुकी नु लडाइ पामे बाक्त। मेकोपुकीम मेको आन बी ब्यफ रोइक्तमे बाक्त। मेको आन कली मरिश्शो पा फ्रूमे बाक्त। मिनू कैलाह डा मुर आन कली प्रोन्मे बाक्त। १सामुएल २२:२०; न्यायाधीस ८:२७

6 अहीमेलेक आ तौ अबीयाथार दाऊद आ बाक्तीक, कैलाह सहर प्रोक्मेनु, निसाफ पतीक ऊरीम नु थुम्मीम बाक्शो झोला यो लाइश्शा लशो बाक्माक्त। 7 दाऊद कैलाह ओव्रशो बाक्ब, दे का निक्शी मुरुमी सावल कली शेंदमे बाक्त। मिनू सावलमी “परमप्रभुम मेको कली आं गुइमी गेशो बाक्ब। मारदे हना मेको गारो हिरशो, आग्लो पाइश्शो, सहरम ओव्रशो बाक्ब” दे मिम्ता बाक्त। 8 सावलम आ लडाइ पाइब नेल्ल आन कली कैलाहम लडाइ पा दाऊद नु आ मुर आन कली एर ओंथ रे पुम्चा नम, दे हुकुम पवा बाक्त। 9 मिनू दाऊदमी आंम पर्वम मरिश्शो पचा चिक्शो तुइक्ता बाक्त। मिनू मेकोमी अबीयाथार चढ़ेब कली “निसाफ पतीक ऊरीम नु थुम्मीम बाक्शो झोला चाक्को” दे मदा बाक्त। १सामुएल ३०:७-८ 10 मिनू नोले मेकोमी “परमप्रभु यावे, इस्राएली आन परमप्रभु सावल कैलाहम जाक्शा, आं पर्वम एको सहर खतम पोक्चशो बाक्ब, देशो लोव्र इन गेय पाइबम नेशो बाक्नुड। 11 मार, कैलाह सहरम बाक्ब मुरपुकीमी आं कली मेको आ गुइम गेनीमी? मार आं नेशो खोदेशो पा सावल एक जाक्बा? परमप्रभु यावे, इस्राएली आन परमप्रभु, इन गेय पाइब कली शेंदीन” दैमाक्त। मिनू परमप्रभु यावेम “थमा पा मेको एक जाक्ब” दैमाक्त। 12 मिनू दाऊदमी “मार कैलाह डा मुरपुकीमी गो नु आं मुर आन कली सावल आ गुइम गेनीमी?” दैमाक्त। मिनू परमप्रभु यावेम “मो पाइनीम” दैमाक्त। 13 मिनू दाऊदमी आ ६ सहे खोइ मुर लाइश्शा, कैलाह रे गाक्माक्त। मिनू तेइ तेइ हिरना हिरन बाक्मा बाक्त। दाऊद कैलाह रे प्रोक्त, देशो लोव्र नेशा, सावल लेम्माक्त। 14 दाऊद जीफ डा पहाड डा गोरशो रागीमी बोल्यो खूइश्शा बाक्तीकेमी खूइश्शा बाक्माक्त। सावल मेको कली नाक्त किंत किंत माल्शा गाक्बाक्माक्त। तन्न परमप्रभुम दाऊद कली मेको आ गुइमी मगेवा बाक्त।

15 दाऊद जीफ डा गोरशो रागी डा होरेशम बाक्मेनु, सावलम थमा पा आ कली साइक्वा कली गूशा पिशो बाक्ब, दे तुइक्ता बाक्त। 16 मिनू सावल आ तौ योनाथन दाऊद आ बाक्तीक होरेश जाक्दीम्माक्त। मिनू मेको कली परमप्रभु आ नेंमी आ थुं बारपदा बाक्त। 17 मेकोमी “गे महिनीन। गे आं आफ आ गुइ रे मबेक्नीनी। मेकोम इन कली मथिप्ब। गे इस्राएल डा पिप दुम्नीनी। गो इन दी डा दुम्नुड। मेको लोव्र आं आफोम तुइश्शो बाक्ब” दैमाक्त। १सामुएल २०:३०-३१; १सामुएल २४:२१ 18 मिनू नोले मेको निक्शीमी परमप्रभु यावे आ डोंइती कबल पाम्से बाक्त। मिनू दाऊद होरेशम बाक्माक्त। योनाथन चहिं आ खिं लेम्माक्त। १सामुएल १८:३

19 मिनू जीफ डा मुरपुकीम सावल गिबाम बाक्मेनु “दाऊद आंइ दाते डा बोल्यो खूइश्शा बाक्तीक होरेशम बाक्ब। मेको हाकीलाह डांडा रे येशीमोन आ दक्खिन गे बाक्ब। १सामुएल २६:१; भजन संग्रह ५४:२ 20 मुल गे गेना ब्रुच्चा दाक्नीनी, मेना ब्रुपीन। मिनू गो मेको कली इन गुइम गेनीकी” दे लोव्र पामे बाक्त। 21 मिनू सावलमी “थमा पा परमप्रभु यावेम इन कली आसीक गेवल। मारदे हना गो आं कली शिशी पाइतीनी। 22 मुल लशा, चिनु रुपीन। मिनू मेको ते बाक्मे? मेको कली सुम तवा तुइक्तीन। मेको मुर आन मिक्च

सिल्व बाक्ब। 23 मेको तेको खुइक्तीकेम बाक्मे, रिश्शो पा रुपीन। मिनु आं बाक्तीक जाक्शा शेंदीनी। मिनु गो गेपुकी नु लाइनुड। मेको एको रागीम बाक्त हना, गो यहूदा आ खिं खिं डा मुर आन दाते रे माल्शा गुंडनुड” देमाक्त।

24 मिनु मेकोपुकी रीब पा सावल क्येडा डोंइती जीफ गे लमा बाक्त। दाऊद नु आ मुर चहिं अराबाह डा माओनम बाक्मा बाक्त। मेको येशीमोन आ दक्खिन गे डा गोरशो रागीम बाक्ब। *यहोसु १५:५५* 25 सावल आ मुरपुकी नु मेको आन कली माल्थ गाक्माक्त। दाऊदम मेको लोत्र नेंशा, रोंगु लुक्च लशा, माओन डा गोरशो रागीम बाक्मा बाक्त। 26 सावल मेको डांडामी लमाक्त। दाऊद नु आ मुर मेको डांडा आ अर्को पटटी बाक्मा बाक्त। दाऊद नु आ मुरपुकी प्रोक्वा माल्ना माल्न बाक्मा बाक्त। सावल नु मेको आ नोले खोइक्बपुकीम चहिं मेको आन कली ग्याइक्वा कली आन नेक्वा जाक्दीम्मा बाक्त। 27 मिनु लोत्र कुरब मुर का सावल आ बाक्तीक जाक्शा “रीब पा जाक्कीन। मारदे हना पलिस्तीपुकीम इन रागीम मारेइ मारेइ रोइक्ना रोइक्न श्येत गेशो बाक्नीम” देमाक्त। 28 मोपतीके सावल, दाऊद कली खेदा पचा प्रोंइशा, पलिस्तीपुकी नु लडाइ पथ लेम्माक्त। मोपतीके मेको कली “प्रोक्पाइक्ब रोंगु” देनीम। 29 मेको नोले दाऊद डांडा डोइश्शा एन-गेदी डा बोल्यो खुइश्शा बाक्तीक मेर बाक्माक्त।

दाऊद एन-गेदी डा पुक्खीम बाक्शो

24 मिनु सावल पलिस्ती आन कली खेदा पा लेम्मेनु, मुरपुकीमी मेको कली “दाऊद एन-गेदी डा गोरशो रागीम बाक्ब” दे लोत्र पामे बाक्त। *यहोसु १५:६२* 2 मिनु सावलमी इस्राएल रे योव्रशो हजार सां मुर लाइश्शा, दाऊद कली रोकोश आन रोंग गे मला बाक्त। 3 मेको लांमी भेडा योव्रबपुकी बाक्मा बाक्त। मेको आ नेक्वा पुक्खी का यो बाक्माक्त। मिनु सावल मेको आगा डाइक्वा कली ओव्रमाक्त। मेको पुक्खी आ नेल्ल क्येडा आगाम दाऊद नु आ मुरपुकी खुइश्शा बाक्शो बाक्मा बाक्त। 4 मिनु दाऊद आ मुरपुकीम “परमप्रभु यावेम देंशो खोदेंशो पा इन जोरी सनु कली इन गुइमी गेतीक नाक्त मुलाक्त बाक्ब। एको कली मार पचा दाक्नीनी मेको पने चाप्नीनी” देमा बाक्त। मिनु दाऊद सिक्सी पा लशा, सावल आ वा आ सुर का रिक्वा बाक्त। *भजन संग्रह १४२:१* 5 मोपा रिक्वा नोले “ला गो पिप आ वा रिक्ता” दे इक्का हिंमाक्त। 6 मिनु दाऊदम आ मुर आन कली “गो आं ठेयब मुर, परमप्रभु यावेम तेल लुक्शो मुर कली मारेइ मपाइनुड। गो मेको कली मसाइक्नुड। मारदे हना मेको परमप्रभु यावे आ तेल लुक्शो मुर बाक्ब” देमाक्त। 7 मोपा दाऊदम आ मुर आन कली हुइश्शा, सावल कली मारेइ पाइक्वा मगेमी बाक्त। मिनु सावल बोक्शा, पुक्खी रे आ लां खोदा बाक्त। *१सामुएल १:३४*

8 मेको नोले दाऊद यो पुक्खी रे लाडगा गूमाक्त। मिनु सावल कली “आं प्रभु, आं पिप” दे ब्रेत्ता बाक्त। मिनु सावल आ नोले लेशशा कोव्रडा बाक्त। मिनु दाऊद बाष्ठा खुम्की पा सेउ पवा बाक्त। 9 मिनु दाऊदमी “गे मारदे आं पर्वम मुर आन लोत्र नेंनीनी? गो इन कली मरिश्शो पाइब, दे थमा सुइक्नीनी? 10 मुलाक्त गेन तुइक्ताक्ड। मुलाक्त पुक्खी आगाम परमप्रभु यावेमी इन कली आं गुइम गेशो बाक्त। का निक्शीम ‘इन कली साइक्वा’ थुं पास्तेक्म। तन्न गो इन कली प्रोंइशा सोइक्ताक्ड। मिनु गो ‘आं प्रभु, इन कली मसाइक्नुड। मारदे हना मेको परमप्रभु यावे आ तेल लुक्शो मुर बाक्ब’ देंती। 11 कोव्रडीन, आं आफ एको आं गुइम बाक्शो वा कोव्रडीन। गो एको रिक्ता, तन्न इन कली मसदु। मोपतीके गे रुपीन। गो इन कली श्येत गेचा नु साइक्वा ममिम्तु। गो इन कली मारेइ पाप मपड। मो हना यो गे आं कली साइक्वा दाक्नीनी। 12 परमप्रभु यावेम इस दातेम निसाफ पवल। मेकोमी आं पर्वम इन कली क्येक्क लेत्ताक्व हना यो, गो इन कली मारेइ मपाइनुड। 13 साइ डोंइती डा लोव्रमी ‘मरिश्शोमी मरिश्शोन जाक्ब’ देंशो बाक्ब। मो हना यो गो आं गुइ इन पर्वम मक्युक्नुड। *रोमी १२:१९; १ पत्रुस २:२३* 14 इस्राएल डा पिप सु का आ पर्वम बोक्शो बाक्बा? गे सु कली खेदा पना पन बाक्नीनी? बेक्शो कुचुम, चुक्बे का कली खेदा पाइनीनी? 15 परमप्रभु

यावे निसाफ पाइब बाक्ब। मिनु मेकोमी इस दातेम निसाफ पवल। परमप्रभु यावेम कोव्रडल। आं परमप्रभु यावेम आं कली इन गुइ रे प्रोंइब” देमाक्त।

16 मिनु दाऊद ब्वाक्ने थुमा नोले, सावलम “मार, मेको इ सेंदा बाक्ब, आं तौ दाऊद?” देंशा, डाक्माक्त। 17 मिनु मेकोमी दाऊद कली “गे आं क्येडा ठीक पाइब मुर बाक्नेवे। गे आं कली रिश्शो पाप्तीवी। गो चहिं इ कली मरिश्शो पाता। 18 मुलाक्त गे आं कली रिश्शो पाप्तीवी। परमप्रभु यावेमी मुलाक्त आं कली इ गुइम गेपु। तन्न गे आं कली मसाइक्थी। 19 सुइमी आंम जोरी सनु आन कली थिश्शा, रिश्शो पा लचा मगेब। मोपतीके मुलाक्त इ पशो गेय आ पर्वम परमप्रभु यावेम इ कली इनाम गेवल। 20 मुल गो थमा पा तुइक्ताक्ड गे पिप दुम्नेवे। इ पालाम इस्राएलम थम रिश्शो दुम्ब। 21 मोपतीके परमप्रभु यावे आ नेंम आं खिं डा मुर आन कली, आं चच युइ आन कली खतम मपाइनुड। आं नें आं आफ आ खिं रे मक्याम्नुड, दे कसम जावो” देमाक्त। *१सामुएल २३:१७* 22 मिनु दाऊदमी सावल नु कसम जवा बाक्त। मिनु सावल आ खिं लेम्माक्त। दाऊद नु आ मुरपुकी चहिं आन बोल्यो खुइश्शा बाक्तीक पुक्खीम लेम्मा बाक्त।

सामुएल बेक्शो

25 मिनु सामुएल बेक्माक्त। मिनु इस्राएली नेल्ल बुक्शा, मेको आ पर्वम रोंका पामे बाक्त। मेको कली आ खिं रामाह उइ थिम्मे बाक्त। मेको नोले दाऊद पारान डा गोरशो रागीम ब्रुम्माक्त। *१सामुएल २८:३*

दाऊद, नाबाल नु अबीगेल

2 माओनमी कारमेल डा मुर का बाक्माक्त। मेको शुश शोंप पाइश्शो मुर बाक्माक्त। मेको के हजार सां भेडा नु हजार का क्यारश बाक्मा बाक्त। मेको कारमेलम आ भेडा आन ऊन प्रेक्शो बाक्माक्त। *यहोसु १५:५५* 3 मेको आ नें नाबाल बाक्माक्त। आ मीश आ नें अबीगेल बाक्माक्त। अबीगेल दारशो नु निप्स पाइश्शो मीश मुर बाक्माक्त। मेको आ वोंइश, कालेब आ चच युइ, खकटा थुं पाइश्शो मरिश्शो पाइब बाक्माक्त। 4 दाऊदमी गोरशो रागीम “नाबालमी आ भेडा आन ऊन प्रेक्शो बाक्ब” देंशो लोत्र नेना बाक्त। 5 मिनु दाऊदमी आ १० ठिटा मुर आन कली “कारमेल लने। मिनु नाबाल कली गुमीन। मिनु मेको कली आं नेंमी ‘रिश्शो बाक्कीन’ मतीन। 6 मिनु मार देनीन देंशा हना ‘इन थुं नाइसेक्ल। इन खिं डा मुर थुं नाइश्शा बाक्वा तामेक्ल। गे नु बाक्ब नेल्ले थुं नाइश्शा बाक्मल। 7 गे नु भेडा आ ऊन प्रेक्ब मुर बाक्नीम, देंशो लोत्र नेंता। इन भेडा योव्रबपुकी गो नु बाक्शो बाक्तेक्म। मिनु गो मेको आन कली मारेइ मरिश्शो मपक। मेकोपुकी कारमेलम बाक्मानु, मेको आन के मारेइ मजाम। 8 इन ठिटा आन कली हिल्लो पने। मिनु मेकोपुकीम इन कली शेंनीम। मोपतीके आं मुर आन कली रिश्शो पा शिशी पा ब्रने। मारदे हना मुलाक्त चाड का बाक्ब। इन गेय पाइब नु इन तौ दाऊद कली मार गेने चाप्नीनी मेको गेने’ देंत, दे मतीन” देमाक्त। 9 मिनु दाऊद आ ठिटा मुरपुकी लशा, नाबाल कली दाऊद आ नेंमी मेको लोत्र नेल्ल मदमे बाक्त। मिनु रिम्तमे बाक्त। 10 तन्न नाबालमी दाऊद आ मुर आन कली “दाऊद माइश्शो सु बाक्बा? येस्से आ तौ बाक्बा? सिनाक्त मुलाक्ती आन होव्रप रे प्रोक्शो वाइल शुश बाक्नीम। 11 आं शोब्ले, आं ब्वाक्कु नु ऊन प्रेक्ब आन कली सेल्थो श्ये लाइश्शा, मतुइश्शो मुर आन कली गेनुडा?” दे माइक्मी बाक्त। 12 मिनु दाऊद आ ठिटा मुरपुकी लेशशा, जाक्दीश्शा, दाऊद कली मेको लोत्र नेल्ल शेंदमे बाक्त। 13 मिनु दाऊदम आ मुर आन कली “नेल्लेमी आंम आंम तरवार पिम्सीन” देमाक्त। दाऊदमी यो आ तरवार पिम्से बाक्त। मिनु ४ सहे जना खोइ मुर दाऊद आ नोले खोदमे बाक्त। सहे निक्शी मुर चहिं मार मार खाल पचा कली मेक उइ बाक्मा बाक्त।

14 मिनु नाबाल आ ठिटा मुर कामी नाबाल आ मीश अबीगेल कली “दाऊदम गोरशो रागी रे आ मुर आन कली आंइ होव्रप कली मान पा, मार मार पुंइथ सोइश्शो बाक्त। तन्न आंइ होव्रपमी मेको आन कली हुइक्ताक्व। 15 मेको मुरपुकीम आंइ कली रिश्शो पशो नम। आंइ कली मारेइ श्येत

मगेम। गोपुकी मेकोपुकी नु ब्वाकीम नाक्दो नाक्ती एर ओंथ पकानु, आंड के मारेड मजाम। 16 गो आंड भेडा योवदीकानु, मेकोपुकी नाक्दो नाक्ती आंड एर ओंथ गारो खोदेशो पा बाक्तेक्म। 17 गे मार पचा माल्नीनी मेको रिश्शो पा मिम्तीन। मारदे हना, आंड होवप नु आ खिं थमा पा खतम दुम्ब। आंड होवप थम मरिश्शो बाक्ब। मेको नु लोव्र पने सुइ मचापब” देंमाक्त।

18 मोपतीके अबीगेलम रीब पा सहे निक्शी शोब्ले, थैलो निक्शी अडगुर शांबु, क्योरशा ठीक सेल्शो ५ ओटा भेडा, ५ एफाह तांब्रा, सहे का सोवपाइश्शो अडगुर के शोब्ले नु सहे निक्शी सोवपाइश्शो फोव्रशी गेडा के शोब्ले ठीक पा गधा आन कली कुरपदा बाक्त। एफाह का ७ लिटर खोदेशो पा रीब। 19 मिनु मेकोमी आ ठिटा गेय पाइब आन कली “गे आं डोंइती लने। गो इन नोले पीनुड” माइक्मी बाक्त। तन्न आ वोंइश नाबाल कली मेको मर्शेदा बाक्त। 20 मिनु मेको डांडाम फारतीक रे गधा लना लन बाक्मानु, दाऊद नु आ मुरपुकी मेको आन गे लुक्च ब्रुम्ना ब्रुम्न बाक्मा बाक्त। मिनु अबीगेलमी मेको आन कली गुमा बाक्त। 21 मिनु दाऊदमी “गोरशो रागीम मारेड मजाम्चा डा पा, मेको मुर आ मार मार खाल पशो मोशा दुम्त। मेकोम आ कली रिश्शो पाइश्शो आ पा डा, आं कली मरिश्शो पाइक्ती” देंमाक्त। 22 मिनु दाऊदमी “दीसा सुनी सम्म गो मेको आ खिं डा वोंइश मुर नेल्ल मसाइक्ताक्मी हना, परमप्रभुम आं कली मोन पवल” दे कसम जवा बाक्त।

23 मिनु अबीगेलमी दाऊद कली तशा, आ गधा रे फ्रु लोइश्शा, दाऊद आ डोंइती बाम्माक्त। 24 मेको आ खोइलीम बाप्शा “आ प्रभु, दोस ताइब गो नड। इन वाइलीम कली ब्वाक्चा गेने। आं लोव्र नेनीन। 25 आ प्रभु, मेको शोर गाक्शो मुर आ पर्बम मगाइक्तीन। मेको आ नें दोपा नाबाल बाक्मे, मेको मो देशोन बाक्ब। आ नें नाबाल बाक्ब। मिनु मेको मूर्ख बाक्ब। तन्न गो, इन गेय पाइबम, इन सोइश्शो ठिटा आन कली मतडमी।

26 आ प्रभु, परमप्रभु यावे ब्रोंइशा बाक्शो खोदेशो पा नु इन ब्रोंइशा बाक्शो खोदेशो पा, परमप्रभु यावेमी इन कली हुश ख्राक्श पोक्तीक नु क्येक्क लेत्तीक रे तेक्शो बाक्ब। इन जोरी सत्रु नु इन कली मरिश्शो पाइब नाबाल खोदेशो दुम्मल। 27 मिनु इन गेय पाइबम, आ प्रभु, इन कली चाक्शो कोसेली इन नोले खोइक्ब ठिटा आन कली गेन। 28 इन गेय पाइब आ मरिश्शो पशो डा आं कली माफ गेयीनी। परमप्रभु यावेमी आं प्रभु, इन खिं डा मुर आन कली गेना हना यो रिश्शो पवल। मारदे हना गे परमप्रभु यावे आ पर्बम लडाइ पशो बाक्नीनी। गे बाक्नी सम्म इन कली मारेड मरिश्शो मडुम्ब। २सामुएल ७:१६ 29 सुइ मुरुम इन कली खेदा पा साइक्चा माल्तु हना, परमप्रभु यावे, इन परमप्रभुमी इन कली कोव्रब। तन्न इन जोरी सत्रु आन कली चहिं हुरदम वोइश्शा ताइश्शो फुल्लु खोदेशो पा ताइक्ब। भजन संग्रह ६९:२९ 30 परमप्रभु यावेम आं प्रभु, इन कली, आ देशो खोदेशो पा रिश्शो पाप्टु हना नु इन कली इस्राएल डा सासन पाइब सेल्लु हना, २सामुएल ५:२ 31 गे मो हुश ख्राक्श पोक्तीक नु इन गाइश्शोमी मरिश्शो पशो आ पर्बम सुर्ता पचा ममाल्नीनी। इन थुं खाइक्पाइक्चा ममाल्नीनी। मिनु परमप्रभु यावेमी इन कली रिश्शो पाप्टु हना, इन गेय पाइब, आं कली यो मिम्तीन” देंमाक्त।

32 मिनु दाऊदमी अबीगेल कली “मुलाक्ती आं कली गुम्पाइक्चा कली इन कली सोइक्ब परमप्रभु यावे, इस्राएली आन परमप्रभु ठेयब बाक्त। 33 इन मिम्तीक रिश्शो बाक्ब। गे मुलाक्ती आं कली हुश ख्राक्श पोक्तीक नु क्येक्क लेत्तीक रे तेक्तीके आसीक राइनीनी। 34 मिनु परमप्रभु यावेम आं कली इ कली श्येत गेतीके रे तेक्शो बाक्ब। मारदे हना गे रीब पा आं कली गुम्थ जाक्तीनी। मो मपशो ननी हना परमप्रभु यावे, इस्राएली आन परमप्रभु ब्रोंइशा बाक्शो खोदेशो पा, सुनी सम्म नाबाल आ खिं डा वोंइश मुर का सम्म यो मलीम वा” देंमाक्त। 35 मिनु दाऊदमी अबीगेलमी आ कली चाक्शो कोसेली ब्रवा बाक्त। मिनु “इन थुं नाइश्शा खिं लेतीन। गो इन लोव्र नेंशा बिस्साक्यी” देंमाक्त।

36 मिनु अबीगेल लेश्शा जाक्मेनु, नाबालमी आ खिंमी, पिपम खोदेशो पा ठेयब भोज सेल्शा भोज पशो तवा बाक्त। नाबाल ग्येरसीशा शांबुम दुक्शा बाक्शो बाक्माक्त। मेको थाम्पा दुक्शा बाक्तीके आ मीशेमी सुनी सम्म रिश्शो मरिश्शो मारेड शेंने मचबा बाक्त। 37 सुनी शांबुम प्रोना नोले आ

मीशेमी लोव्र नेल्ल शेंदा बाक्त। मिनु मेको आ लुडगीर खाइश्शा, फुल्लु खोदेशो दुम्माक्त। 38 मिनु १० नाक्त नोले परमप्रभु यावेमी मेको कली बेक्पदा बाक्त।

39 मिनु दाऊदम नाबाल बेक्शो लोव्र नेंशा मेकोमी “परमप्रभु यावे ठेयब बाक्ब। मारदे हना मेकोमी आं कली मरिश्शो पशो आ पर्बम नाबाल कली सजाइ गेप्टु। मिनु आ गेय पाइब, आं कली मरिश्शो पतीक रे तेक्ती। नाबाल आ मरिश्शो पशो आ पियामीन मोइक्तु” देंमाक्त। मिनु दाऊदमी अबीगेल कली आ मीश सेल्चा कली लोव्र पथ मुर सोइक्ता बाक्त। 40 मिनु दाऊद आ गेय पाइबपुकी अबीगेल आ बाक्तीक कारमेल लशा, मेको कली “दाऊदमी गे नु ग्युंवे पचा कली आंड कली ब्रथ सोइक्ताक्व” देंमाक्त। 41 मिनु अबीगेल बोक्शा बाप्शा सेउ पा “गो इन गेय पाइब आन खोइल चिक्ब वाइलीम नड” देंमाक्त। 42 मिनु अबीगेल रीब पा सासे बाक्त। गधा डोइश्शा आ ५ जना गेय पाइब लाइश्शा लोव्र चाक्ब दाऊद आ मुरपुकी नु लमाक्त। मिनु मेको आ मीश दुम्माक्त। १सामुएल २७:३; १सामुएल ३०:५; २सामुएल ३:३

43 दाऊदम मेको क्येडा डोंइती येजेल डा अहीनोआम कली यो ग्युंवे पशो बाक्माक्त। मिनु मेको निम्फा मेको आ मीश दुम्सा बाक्त। 44 मेना सावलमी आ तमी, दाऊद आ मीश मिकाल कली गाल्लीम डा लाइश आ तौ पाल्ती कली गेवा बाक्त। २सामुएल ३:१४-१५

दाऊदम सावल कली मसाइश्शो

26 मिनु जीफ डा मुरपुकी सावल आ बाक्तीक गिबाम जाक्शा “दाऊद येशीमोन आ आइक्ची हाम हाकीलाह डांडाम खुइश्शा बाक्शो बाक्ब” दे शेंदमे बाक्त। १सामुएल २३:१९-२४:२३; भजन संग्रह ५४:२ 2 मिनु सावलमी दाऊद कली माल्चा, दे हजार सां इस्राएल डा योव्रशो मुरपुकी लाइश्शा, रीब पा जीफ डा गोरशो रागी गे लमाक्त। 3 येशीमोन आइक्ची हाम डा हाकीलाह डांडा डा लां आ नेक्था आन बाक्तीक सेल्मे बाक्त। मेना दाऊद चहिं गोरशो रागीमी बाक्माक्त। मिनु सावलम आ कली खेदा पचा कली गोरशो रागीम जाक्शो बाक्ब देशो लोव्र नेंना चोटीन 4 दाऊदमी क्यारी पाइबपुकी सोइक्ता बाक्त। मिनु सावल आ बाक्तीके तुइश्शा लेम्मा बाक्त। 5 मिनु दाऊद सावल आ बाक्तीक गे लमाक्त। मिनु सावल नु आ लडाइ पाइब आन नेल्ल क्येडा ठेयब मुर, नेर आ तौ आब्नेर इप्शा बाक्शो थिदा बाक्त। आ मुर नेल्लेम एर ओंथ रे हिरतीकेमी सावल इप्शो बाक्माक्त। १सामुएल १४:५० 6 दाऊदमी हिती अहीमेलेक नु सेरूयाह आ तौ योआब आ लोक्ब अबीशै गे लेश्शा कोव्रशा “सावल आ बाक्तीकेम गो नु सु लने चाप्बा” देंमाक्त। मिनु अबीशैमी “गो लाइनुड” देंमाक्त। 7 मिनु नाक्दो दाऊद नु अबीशै सावल आ बाक्तीकेम ओव्रसा बाक्त। मिनु सावल आ मुर आन दातेमी आ तूतीक आ पिया गे खूक्शा, इप्शो थित्से बाक्त। आब्नेर नु आ मुरपुकी चहिं सावल आ एर ओंथ हिरशा इप्शो बाक्मा बाक्त। 8 मिनु अबीशैमी दाऊद कली “परमप्रभुम मुलाक्ती इन जोरी सत्रु आन कली इन गुइमी गेशो बाक्माक्त। तूतीकेम कालेमीन खप सम्म गुक्सीचा डा पा आप्चा कली हुकुम गेयीनी। गो खेयप निक्शी आप्चा ममाल्डल” देंमाक्त। २सामुएल १६:९ 9 तन्न दाऊदमी अबीशै कली “पिप कली साइक्चा ममिम्तो। परमप्रभु यावे आ तेल लुक्शो कली साइक्बपुकी सु चहिं सजाइ मतशो बाक्बा डा?” देंमाक्त। 10 मिनु दाऊदमी लेंशा “परमप्रभु यावे ब्रोंइशा बाक्शो खोदेशो पा, मेकोमीन मेको कली काबु साइक्ब कि आ बेक्ची नाक्त जाक्शा बेक्ब कि लडाइम लशा साइक्चा पुंइसीब। १सामुएल २४:१३ 11 गो परमप्रभु यावे आ तेल लुक्शो पिप कली गेनायो मरिश्शो मपाइनुड। तन्न मुल मेको आ पिया गे खूक्शो तूतीक नु आ ब्वाक्कु तूतीक ग्योब कुरशा गाक्स” देंमाक्त। 12 मिनु दाऊदम मेको आ पिया आ नेक्था बाक्शो तूतीक नु आ ब्वाक्क तूतीक कुरशा गाक्सा बाक्त। सुइमी मेको आस कली मतामे बाक्त। मिनु सुइ मसेसीमा बाक्त। मारदे हना परमप्रभु यावेम मेको आन कली मारेड मतुइक्चा डा पा निन्द्रा पपदा बाक्त। उत्पत्ती १५:१२ 13 मिनु दाऊद आइक्ची हाम लशा, डांडा डोइश्शा मेको आन क्येडा डोन राम्माक्त। 14 मिनु दाऊदम नेर आ तौ आब्नेर आ नें थिशा “ए आब्नेर, गे

आं लोव्र लेत्ती" देंमाक्त। मिनु आब्नेरमी "गे पिप कली हुइश्शा लोव्र पाइब सु नवे" देंमाक्त।<sup>15</sup> मिनु दाऊदमी आब्नेर कली "मार गे मुर मनवे। मार इस्राएलमी अरु यो इ खोदेशो मुर बाक्नीमी? गे मारदे इ प्रभु, पिप कली रिश्शो पा खाल मपवी? मारदे हना आं मुर का इ प्रभु, इ पिप कली साइक्वा कली मेकेर जाक्त।<sup>16</sup> इन पशो मरिश्शो बाक्ब। परमप्रभु यावे ब्रोंइशा बाक्शो खोदेशो पा गे साइक्वा पुंडसीचा डा बाक्नीनी। मारदे हना गे इन प्रभु कली खाल मपनी। परमप्रभु यावे आ तेल लुक्शो कली खाल मपनी। लो कोव्रडीन, मेको इन पिप आ पिया गे बाक्शो आ तूतीक नु ब्वाक्कु तूतीक ग्योब ते बाक्म?" देंमाक्त।<sup>17</sup> मेना सावलमी दाऊद आ सेंदा नेंशा "आं तौ दाऊद, मेको इ सेंदा बाक्बा?" देंमाक्त। मिनु दाऊदमी "आं प्रभु, आं पिप, आं सेंदा बाक्ब" दे लोव्र लेत्ता बाक्त।<sup>18</sup> मिनु दाऊदम "आं प्रभु, मारदे गे इन गेय पाइब, आं कली, खेदा पाइनीनी? गो मार पडा डा? आं दोस मार बाक्बा? <sup>19</sup> मोपतीके आं प्रभु नु आं पिप, इन गेय पाइब, आं लोव्र नेनीन। परमप्रभु यावेमी इन कली आं कली खेदा पपाइक्वा कली पोक्शो बाक्त हना, मेकोमी चढेतीक का ब्राइबा कौ। तन्न बेक्शा लाइब मुरुम इन कली आं कली खेदा पचा कली पोक्शो बाक्त हना, मेको परमप्रभु यावे आ डोंइती सराप रल। मारदे हना मेकोपुकीम मुलाक्त आं कली परमप्रभु यावे आ गेशो रू रे खेरशा 'लावो, अरु देवी देवता आन कली सेउ पावो' दे लोव्र पान्तेक्म। उत्पत्ती ८:२१; ब्यवस्था ३२:९; २राजा ५:१७ <sup>20</sup> मोपतीके परमप्रभु यावे क्येडा डोन आं हुश मशाइक्पतीन। मारदे हना इस्राएल डा पिप चुक्बे का कली माल्थ गूशो बाक्ब। मेको पहाडम थेल्मी सिखार ग्यारशो खोदेशो दुम्त" दे सावल कली देंमाक्त।

<sup>21</sup> मिनु सावलमी "गो मरिश्शो पाता। आं तौ दाऊद, लेशशा जाक्को। मुलाक्ती गे आं कली ब्रोंइचा गेती मुल रे गो इ कली गेनायो श्येत मगेनुड। गो मूर्ख दुम्ती। गो थमा पा मरिश्शो पाता" देंमाक्त। <sup>22</sup> मिनु दाऊदमी "पिप आ तूतीक एक बाक्ब। इन ठिटा मुर का कुशा लदल। <sup>23</sup> परमप्रभु यावेम ठीक पाइब नु थमा सुइक्वा पुंडसीब मुर आन कली इनाम गेब। मिनु मुलाक्ती परमप्रभु यावेमी इन कली आं गुइमी गेप्टु। तन्न गो परमप्रभु यावे आ तेल लुक्शो कली साइक्वे मबिस्सीड। <sup>24</sup> दोपा मुलाक्त गो इन ब्रोंइतीक ठेयब मिम्तु, मोपा परमप्रभु यावेम आं ब्रोंइतीक कली ठेयब मिम्तल। मिनु आं कली हिंचा डा श्येत नेल्ल रे प्रोंइयील" देंमाक्त। <sup>25</sup> मिनु सावलमी दाऊद कली "आं तौ दाऊद, गे आसीक रवे। गे शुश गेय पशा, नेल्ल रिश्शो पाइनेवे। मिनु गे ग्रानेवे" देंमाक्त। मिनु दाऊद आ लां खोदा बाक्त। सावल चहिं आ बाक्तीक मेर लेम्माक्त।

#### दाऊदमी बाक्तीक पुंडशो

**27** दाऊदमी "काबु सावलम आं कली साइक्ब। मोपतीके पलिस्ती आन रागीम आं कली प्रोक्शा लचा रिश्शो दुम्ब। मिनु सावलमी इस्राएल आगामी आं कली माल्चा प्रोंइब। मिनु गो मेको आ गुइ रे ब्रोंइनुड" दे मिम्ता बाक्त। *१सामुएल २३:२३* <sup>2</sup> मोपतीके दाऊद नु आ ६ सहे मुर रीब पा सांद लाक्शा, गाथ डा पिप माओक आ तौ अकीश आ बाक्तीकेम लमा बाक्त। *१सामुएल २१:११-१६* <sup>3</sup> दाऊद आ लडाइ पाइब मुर, मेको आन खिं डा मुर नु दाऊद नु आ मीश निक्शी, येज्जेल डा अहीनोआम नु कारमेल डा बेक्शो नाबाल आ मीश अबीगेल गाथम अकीश नु बाक्मा बाक्त। *१सामुएल २५:४०-४३* <sup>4</sup> दाऊद गाथम प्रोक्शा लत देंशो लोव्र मुरुमी सावल कली नेंपदमे बाक्त। मिनु मेकोम दाऊद कली माल्चा प्रोना बाक्त।

<sup>5</sup> दाऊदम अकीश कली "गे आं कली शिशी पाइतीनी हना, आं कली इन रागी डा तेकोइ सहरम बाक्वा गेयीनी। गो दोपा पिप नु पिप आ सहरम बाक्नुडा?" देंमाक्त। <sup>6</sup> मिनु मेको नाक्ती अकीशम मेको कली सिकलाग गेवा बाक्त। मोपतीके मुल सम्म सिकलाग यहूदा डा पिप आन के बाक्ब। *यहोसु १५:३१* <sup>7</sup> दाऊद पलिस्ती आन रागीम बर्स का ४ महिना सम्म बाक्माक्त।

<sup>8</sup> दाऊद नु मेको आ मुरपुकी लडाइ पथ गूमानु, गेशुरी, गिरजी अमालेकी आन मारेइ मारेइ रोइक्बाक्मा बाक्त। मारदे हना मेकोपुकी तेलाम रे शुर सम्म नु इजीप्त सम्म बाक्बाक्मा बाक्त। <sup>9</sup> दाऊदमी मेको आन रागीम मार

मार रोइक्तानु, मेकेर डा वोंइश मुर मीश मुर सुइ आन कली का यो मवोइक्थु साइक्बाक्माक्त। क्यारश भेडा, बी ब्यफ, गधा, दलओठ वासी नेल्ल लाइश्शा अकीश आन बाक्तीक लेप्बाक्मा बाक्त। <sup>10</sup> मिनु अकीशमी मेको कली "मुलाक्त गे ते रोइक्तीनी" दे हिल्लो पाइक्बाक्माक्त। मिनु मेकोमी "यहूदा रागी डा नेगेब, येराहमेल आ मुर आन नेगेब नु केनी आन नेगेबम रोइक्ताक्क" देंबाक्माक्त। <sup>11</sup> दाऊदमी सेस मीश मुर वोंइश मुर आन कली गाथम मचाक्बाक्माक्त। मारदे हना मेको आन पशो गेय आ पर्बम दाऊद नु आ मुर आन कली मरिश्शो सेल्नीम, दे दाऊद हिंबाक्माक्त। पलिस्ती नु बाक्म सम्म मेकोम मोदेशो पवा बाक्त। <sup>12</sup> अकीशम "दाऊदम आंम रागी इस्राएलमी मरिश्शो पतीके मेक बाक्वा मताइब। मोपतीके गेना हना यो आं मुर दुम्शा गो नु बाक्ब" दे मिश्शो बाक्माक्त।

#### लडाइ दुम्चशो

**28** मेना पलिस्तीपुकीम इस्राएल नु लडाइ पचा, दे आन लडाइ पाइब मुर आन कली खुप्तमे बाक्त। मिनु अकीशम दाऊद कली "गे नु इ मुरपुकी लडाइ पचा कली गो नु लडाइ पतीकेम लचा माल्नीनी। देंशो लोव्र तुइश्शो बाक्डे माइ" देंमाक्त। <sup>2</sup> मिनु दाऊदमी अकीश कली "दुम्ब इन गेय पाइबम मार पने चाप्बा, मेको गे तुइक्नीनी" देंमाक्त। मिनु अकीशमी दाऊद कली "गो इ कली बाक्डे सम्म आं कली खाल पाइब सेल्नन" देंमाक्त।

#### सावल नु एन-डोर डा मीश मुर

<sup>3</sup> सामुएल बेक्ने थुम्शो बाक्माक्त। मिनु इस्राएली नेल्लेमी मेको आ पर्बम रोंका पा मेको कली मेको आ सहर रामाहम थिम्शो बाक्मा बाक्त। सावलमी बेक्शो मुर रे लोव्र पाइब नु लिक्वु कोव्रब आन कली मेको रागी रे गुंडने थुम्शो बाक्माक्त। *१सामुएल २५:१; प्रस्थान २२:१७* <sup>4</sup> पलिस्तीपुकीमी नेल्ल क्येडा सक्ति पाइश्शो आन लडाइ पाइब आन कली गुम्पाइश्शा, शुनेम सहरम आन बाक्तीक सेल्मे बाक्त। सावलम इस्राएली नेल्ल आन कली गुम्पाइश्शा गिल्बोआम आन बाक्तीक सेल्शा बाक्मा बाक्त। *यहोसु १९:१८* <sup>5</sup> मिनु सावल पलिस्ती आन नेल्ल क्येडा सक्ति पाइश्शो लडाइ पाइब कली तशा, थाम्पा हिंशा खिंखि पवा बाक्त। <sup>6</sup> मिनु सावलम परमप्रभु यावे कली हिल्लो पवा बाक्त। तन्न परमप्रभु यावेम डोमुम, ऊरीम नु परमप्रभु यावे आ लोव्र पाइब आन रे लोव्र मलेत्ता बाक्त। *१सामुएल १४:४१; प्रस्थान २८:३०* <sup>7</sup> मोपतीके मेकोमी आ गेय पाइब आन कली "आं कली बेक्शो मुर नु लोव्र पाइब मीश मुर का मालीन। गो मेकेर लशा, मेको कली हिल्लो पाइनुड" देंमाक्त। मिनु "एन-डोरम मोदेशो मीश मुर का बाक्ब" दे आ गेय पाइबपुकीमी देंमा बाक्त। *लेवी १९:३१* <sup>8</sup> मिनु सावल अर्को वा फेक्शा, आ मुर निक्शी नु मेकेर लमाक्त। मिनु नाक्दो मेको मीश मुर आ बाक्तीक जाक्दीशा, मेको कली "आं कली मार दुम्बा बेक्शो मुर कली हिल्लो पा शेंदीनी। मिनु गो तेको बेक्शो मुर कली ब्रेत्वा देंनुडा, मेको कली ब्रेत्तीन" देंमाक्त। <sup>9</sup> मेको मीश मुरुम मेको कली "सावलम मार पवा मेको गे तुइक्नीनी। मेकोमी बेक्शो मुर नु लोव्र पाइब नु लिक्वु कोव्रब नेल्ल कली रागी रे गुंडशा खेरतु। मिनु गे मारदे आं कली साइक्पाइक्वा कली ओदेशो गेय पपाइक्वा माल्नीनी?" देंमाक्त। <sup>10</sup> मिनु सावलमी परमप्रभु यावे आ नेंम कसम जशा, मेको कली "परमप्रभु यावे ब्रोंइशा बाक्शो खोदेशो पा, गे एको गेय आ पर्बम मारेइ सजाइ मताइनीनी" देंमाक्त। <sup>11</sup> मिनु मेको मीश मुरुम "सु कली ब्रेत्वा" दे हिल्लो पवा बाक्त। मिनु सावलमी "सामुएल कली ब्रेत्वा" देंमाक्त। <sup>12</sup> मिनु मेको मीश मुरुमी सामुएल कली तशा ठेयब सेंदा पा ग्रीशा सावल कली "गे आं कली मारदे मरिश्शो पवी? गे सावल बाक्डे बाक्त" देंमाक्त। <sup>13</sup> मिनु पिपम मेको कली "महिनी। गे मार तवी" देंमाक्त। मिनु मेको मीश मुरुम "गो स्वर्ग डा गेय पाइब खोदेशो खप रे गूशो ताता" देंमाक्त। <sup>14</sup> मिनु सावलमी "मेको दोदेशो बाक्मे" दे हिल्लो पवा बाक्त। मिनु मेकोमी "खूशो मुर का गूशा कुत। मेकोमी दारशो वा फेक्शो बाक्त" देंमाक्त। मिनु सावलमी मेको सामुएल बाक्ब, दे तुइश्शा खुम्की पा बाप्शा सेउ पवा बाक्त।

15 मिनु सामुएलमी सावल कली “गे मारदे आं कली श्येत गेशा, गुंडीनी?” दैमाक्त। मिनु सावलमी “गो थम ठेयब श्येतम बाक्नुड। पलिस्तीपुकीम आं कली लडाइ तोशो बाक्नीम। परमप्रभुम आं कली प्रॉइती। मेकोम आं कली आ लोव पाइब नु डोमु रे लोव मलेत्ती। मोपतीके गो इन कली ‘मुल मार पचा माल्नुडा’ दे हिल्लो पचा कली ब्रेत्ताक्नी” दैमाक्त। 16 मिनु सामुएलमी “परमप्रभु यावेम इ कली प्रॉइशा, इ जोरी सत्रु दुश्शो बाक्ब, दे तुइश्शा यो, गे आं कली मारदे हिल्लो पयी। 17 परमप्रभु यावेम डोंइती आं कली दैशो खोदैशो पा पाप्तु। परमप्रभु यावेमी मेको राज्य इ गुड रे लाइश्शा, इ नेक्था डा मुर दाऊद कली गेशो बाक्ब। १सामुएल १५:२८ 18 मारदे हना गे परमप्रभु यावे आ दैशो मटिवी। अमालेकी आन पर्वम परमप्रभु यावे आ गाइश्शो गे मखबी। मोपतीके मेकोम मोदैशो पाप्तु। १सामुएल १५:१८-१९; प्रस्थान १७:१४, १६ 19 मुल चिनु तेम्शा, परमप्रभु यावेमी इस्राएली नु इ कली पलिस्ती आन गुडमी गेब। दीसा गे नु इ तौपुकी गो नु बाक्नीनी। परमप्रभु यावेमी इस्राएल डा लडाइ पाइब नेल्ल आन कली पलिस्ती आन गुडमी गेब” दैमाक्त। १सामुएल ३१:६ 20 मिनु सावल सामुएल आ लोव नैशा हिंशा, आ थुं ग्येथ लुक्च दुश्शा, खपीम गोल्माक्त। मिनु नाक्त् रे नाक्दो रे मारेइ मजतीके मेको आ बोल नेल्ल जाम्माक्त। 21 मिनु मेको मीश मुर सावल आ नेक्था लशा, सावल शुश हिंशो तशा, सावल कली “गो बेक्वा आ पर्वम महिंथु, इन दैशो टीता। 22 मोपतीके मुल गे आं लोव नेनीन। गो इन कली जचा थोवक गेनुड। बोल्यो दुश्शा इन लां गाक्वा कली मेको जने” दैमाक्त। 23 मिनु सावलमी “गो मजाइनुड” दैमाक्त। तन्न आ गेय पाइबमी यो मेको मीश मुर आ दैशो लोवमी लोव तेम्दा बाक्त्। मिनु मेको आन दैशो लोव बिश्शा, खप रे बोक्शा, खाटम निस्से बाक्त्। 24 मेको मीश मुर आ खिंमी दोम्शो बाछा का बाक्माक्त। मेको मीश मुरुम मेको बाछा क्योरशा क्येशा, फस निवा बाक्त्। मिनु बोवब ओखती मसुथो शोब्ले चोवा बाक्त्। प्रस्थान १२:३९ 25 मिनु मेकोमी, सावल नु आ गेय पाइब आन कली खेत्तीमी बाक्त्। मिनु मेकोपुकीम मेको जशा ब्वशा मेको नाक्दोन गाक्मा बाक्त्।

दाऊद पलिस्ती नु ब्राशो

29 पलिस्तीपुकीमी लडाइ पाइब आन कली अफेकम पुक्गमे बाक्त्। इस्राएलीपुकीम चहिं येजेल डा ब्वाक्कु बुक्तीकेम आन बाक्तीक सेल्मे बाक्त्। १सामुएल ४:१; यहोसु १५:५३ 2 पलिस्ती आन ठेयब मुरुम आन नेल्ल क्येडा सक्ति पाइश्शो लडाइ पाइब आन कली सहे सहे नु हजार हजार डा हुल पा कप्तान दुम्मा बाक्त्। दाऊद नु आ मुरपुकी नोले डा हुलमी अकीश नु गाक्शो बाक्मा बाक्त्। यहोसु १३:३ 3 मिनु पलिस्ती आन ठेयब मुरपुकीम “एको हिब्रूपुकी मारदे पिमा?” दैमा बाक्त्। मिनु अकीशमी “एको इस्राएल डा सावल आ गेय पाइब दाऊद बाक्ब। एको गो नु बर्स का क्येडा यो शुश बाक्त्। एको गो नु बाक्म रे मारेइ मरिश्शो मतड” दैमाक्त। १सामुएल २७:७ 4 तन्न पलिस्ती आन ठेयब मुरपुकी गाइश्शा, अकीश कली “मेको मुर कली इन गेशो आ बाक्तीकेम सोइक्तीन। मेकोम आंइ कली वारच पा लडाइ मपवल। मो पाप्तु हना, मेकोम आंइ कली वारच पखु पा मरिश्शो पाइब। आंइ कली साइश्शा आ प्रभु आ शिशी तचा मेको कली नेल्ल क्येडा रिश्शो बाक्ब। 5 एको दाऊद बाक्ब। एको आ पर्वम डोंइती मुरपुकीम ‘सावलम हजार हजार आन कली साइक्तीमी। तन्न दाऊदमी १० हजार हजार आन कली साइक्तीमी’ दे कुम्सो पना पन, सिल पाक्तेक्म” दैमा बाक्त्। १सामुएल १८:७ 6 मिनु अकीशमी दाऊद कली ब्रेश्शा “परमप्रभु यावे ब्रॉइशा बाक्शो खोदैशो पा, गे थमा सुइक्चा पुंडसीब मुर बाक्नेवे। मिनु गे गो नु लडाइ पचा कली आं कली ठीक बाक्ब। मारदे हना इ जाक्शो रे मुल सम्म गेम मारेइ मरिश्शो पशो मतड। तन्न मेको कप्तानपुकीमी इ कली थमा मसुइक्नीम। 7 मोपतीके गे रिश्शो पा लेश्शा खिं लावो। मेको पलिस्ती आन ठेयब मुर आन मिश्शो खोदैशो पा मरिश्शो मपावो” दैमाक्त। 8 मिनु दाऊदमी अकीश कली “गो मार पडा डा? गो इन गेय पचा गोडा रे गे आं कली मार मरिश्शो पशो तनी? गो आं प्रभु, आं पिप, आ जोरी सत्रु नु लडाइ पचा मताइक्नुडा?” दैमाक्त। 9 मिनु अकीशम दाऊद कली “गे आं पर्वम दोस

मताइब नु परमप्रभु आ स्वर्ग डा गेय पाइब खोदैशो बाक्नेवे। तन्न पलिस्ती आन कप्तानम ‘गे मेकोपुकी नु लडाइ पथ लचा मद्मुनेवे’ दैतेक्म। २सामुएल १४:१७ 10 मोपतीके दीसा सुनी कना बोक्शा, गे नु इ नोले खोइक्ब मुरपुकी आं गेशो सहरम लेतीन। दीसा सुनी कना बोक्कीन। मिनु नां सोव्रम चोटीन लने” दैमाक्त। 11 मोपतीके दाऊद नु आ मुरपुकी पलिस्ती आन रागी लेत्वा कली सुनी कना बोक्मा बाक्त्। पलिस्तीपुकी चहिं येजेल डा लां खोदमे बाक्त्।

दाऊदम सिकलाग डा मुर प्रॉइशो

30 मिनु लेम्मा आ नित्थ नाक्ती सिकलाग जाक्दीम्मा बाक्त्। मेना अमालेकीपुकीमी नेगेब रोइक्ने थुश्शा, सिकलागम लडाइ तोशा मी सुइश्शो बाक्मा बाक्त्। १सामुएल २७:६ 2 मेकोपुकीम मीश मुर, आइक्च नु ठेयब मुर नेल्ल आन कली मसाइक्थु सेसीन लाइश्शो बाक्मा बाक्त्। मेकोपुकीमी मेको आन कली डोंइडोंइती गाक्पाइश्शा लाइक्ना लाइक्न बाक्मा बाक्त्। 3 दाऊद नु आ मुरपुकी मेकेर जाक्दीम्मानु, सहर कली मीम क्रोइश्शो नु मेको आन मीश नु तमी तौ नेल्ल आन कली योल्शो तुइक्त्मे बाक्त्। 4 मिनु दाऊद नु मेको नु बाक्शो मुरपुकी डाक्ने मचाप्पी डाक्मा बाक्त्। 5 दाऊद आ मीश निम्फा येजेल डा अहीनोआम नु कारमेल डा बेक्शो नाबाल आ मीश अबीगेल निम्फा ग्याइश्शा लाइक्चा पुंडसीसा बाक्त्। १सामुएल २५:४२-४३ 6 दाऊद कली हिंचा डा दुश्शो बाक्त्। मारदे हना मुरपुकीम मेको आन तमी तौ नेल्ल योल्ने थुम्तीके, दाऊद कली फुल्लु आप्शा साइक्नीकी दैशो बाक्मा बाक्त्। तन्न दाऊदमी परमप्रभु यावे, आ परमप्रभु कली सक्ति पुना बाक्त्।

7 मिनु दाऊदमी अहीमेलेक आ तौ चढेब अबीयाथार कली “निसाफ पतीक ऊरीम नु थुम्मीम बाक्शो एफोद चाक्को” दे मदा बाक्त्। मिनु चाक्का बाक्त्। १सामुएल २३:९ 8 मिनु दाऊदमी परमप्रभु यावे कली “मार, गो मेको रोइक्ब आन कली खेदा पडा? गो मेको आन कली थिन्ने चाप्नुडा?” दैमाक्त। मिनु “मेको आन कली खेदा पावो। थमा पा, गे मेको आन कली थिश्शा, नेल्ल आन कली प्रॉइने चाप्नेवे” दैशो नेना बाक्त्। 9 मिनु दाऊद नु मेको आ ६ सहे मुर गाक्मा बाक्त्। मिनु बेसोर डा खोल्सा सम्म जाक्दीम्मा बाक्त्। मेकेर दशा गाक्ने मचाप्बपुकी बाक्मा बाक्त्। 10 मिनु मेको आन दाते डा सहे निक्शी मुर थाम्पा दशा, बेसोर खोल्सा शोक्ने मचाप्शो बाक्मा बाक्त्। मिनु मेकोपुकी मेकेर बाक्मा बाक्त्। दाऊद चहिं ४ सहे मुर लाइश्शा खेदा पचा कली लमाक्त्।

11 मोपा गाक्ना गाक्न लमानु, मेकोपुकीमी इजीप्त डा मुर का थित्मे बाक्त्। मिनु मेको कली दाऊद आ बाक्तीक चाक्गमे बाक्त्। मिनु मेको कली जचा तूचा गेमे बाक्त्। मिनु मेकोमी जवा तूडा बाक्त्। 12 मेको कली डल्ला का फोवशी गेडा नु डल्ला निक्शी सोक्शो अडगुर यो गेमे बाक्त्। मिनु मेको नेक्वा नोले मेको आ सोक्त् पिमाक्त्। मारदे हना मेकोम नाक्त् सां नु नाक्दो सां सम्म मारेइ मजशो बाक्माक्त्। 13 मिनु दाऊदम मेको कली “गे ते रे जाक्शो नवे। सु आ मुर नवे?” दे हिल्लो पवा बाक्त्। मिनु मेकोमी “गो इजीप्त डा ठिटा का नड। अमालेकी का आ वाइल नड। तन्न गो नाक्त् सां डोंइती रे रोइ पतीके आं होव्रपम आं कली प्रॉइशा गाक्त्। 14 गो यहूदा रागी डा केरेथी आन नेगेब डा मारेइ मारेइ नु कालेब आ नेगेब तेइ तेइ रोइक्ताक्क। मिनु सिकलाग सहरम मी सुइक्ताक्क” दैमाक्त। २सामुएल ८:१८; यहोसु १४:१३ 15 मिनु दाऊदमी “गे आंइ कली लां कोंइशा मेको आन बाक्तीके चाक्दीन्ने चाप्नेवे?” दैमाक्त। मिनु मेकोमी “गे परमप्रभु आ डोंइती ‘आं कली मसाइक्नीकी नु आं होव्रप आ गुडम जिम्मा मगेनीकी’ दे कसम जने। मिनु गो लां कोंइशा मेको आन बाक्तीक चाक्दीन्नुड” दैमाक्त।

16 मिनु मेकोम लां कोंइना कोंइन मेको आन कली उइ चाक्दीदा बाक्त्। मेकेर अमालेकी एर ऑथ ब्रशा जशा तूशा सिल पा, आन रोइश्शो मार मार पुक्शा ग्येरशा बाक्शो बाक्मा बाक्त्। मारदे हना मेकोपुकीम पलिस्ती नु यहूदा रे शुश मार मार रोइश्शो बाक्मा बाक्त्। 17 मिनु दाऊदम मेको आन कली सुनी रे आ दीसा नाक्दो सम्म नेल्ल साइक्मी बाक्त्। ४ सहे ठिटा मुर ला दलऑठ डोइश्शा प्रोक्मा बाक्त्। 18 दाऊदमी अमालेकी आन रोइश्शो

नेल्ल लेंशा थिदा बाक्त। मेको आ मीश निम्फा आस कली यो थिदा बाक्त। 19 मेको आन के मारेइ यो मजाम्माक्त। आन खिं डा आइक्की ठेयब, तमी तौ रोइश्शा लाइश्शो नेल्ल थोव्रक थित्मे बाक्त। मोपा दाऊदमी मारेइ मारेइ प्रोना बाक्त। 20 दाऊद नु आ मुरपुकीम मेकोपुकीम डोंइती रोइश्शो क्यारश भेडा, बी ब्यफ नेल्ल आन कली लदमे बाक्त। मिनु “एको नेल्ल दाऊद के बाक्ब” देंमा बाक्त।

21 नोले दाऊदम बेसोर डा खोल्लसाम नाइश्शा बाक्शो सहे निक्शी मुर आन बाक्तीक जाक्माक्त। मेकोपुकी दाऊद कली नु मेको आ मुर आन कली ग्रुथ जाक्मा बाक्त। मिनु दाऊदम मेको नेल्ल आन कली “मार दुम्मे? दोपा बाक्नी” दे हिल्लो पवा बाक्त। 22 तन्न दाऊद नु लाइब का निक्शी शोर गाक्शो मुरपुकीम मेको आ लोव्र खोइश्शा दाऊद कली “एको मुरपुकी गो नु मलम। गोपुकीम लशा रोइश्शा चाक्शो मार मार गो मेको आन कली योक्शा मगेनीकी। मेकोपुकीम आन मीश नु आन आलपुकी ला लदमेक्ल” देंमा बाक्त। 23 मिनु दाऊदमी मेको आन कली “परमप्रभु यावेम इं कली प्रोंइतु। एको नेल्ल गेप्टु। इं जोरी सत्रु आन कली इं गुइमी गेप्टु। 24 सुम इन देंशो लोव्र बिष्वा? खाल पाइब नु लडाइम लाइब नेल्लेम उइक्थ उइक्थ ताइनीम” देंमाक्त। गन्ती ३१:२४ 25 मिनु दाऊदमी इस्राएलम मेको फुल्लुम मुशा ब्रेक्शो खोदेंशो पा नु निसाफ पतीक लोव्र पवा बाक्त। मेको मेना रे मुल सम्म लीशो बाक्ब।

26 मिनु दाऊद सिकलागम जाक्शा, रोइश्शो मार मार रे यहूदा डा आ वारच खाल्पा आन कली “परमप्रभु यावे आ जोरी सत्रु रे रोइश्शो मार मार एको इन कली कोसेली बाक्ब” देंशा, सोइक्ता बाक्त। 27 मेकोमी सु सु आन कली कोसेली सोइक्ता बाक्त देंशा हना, बेथेल सहर, नेगेब डा रामोथ सहर, यत्तीर, सहर 28 आरोएर सहर, सिफ्मोथ सहर, एश्तेमोआ सहर, 29 राकाल सहर, येराहमेल आ मुर आन सहरम बाक्ब आन कली, केनी आन सहरम बाक्ब आन कली, १सामुएल २७:१० 30 होरमा सहर, बोर-अशान सहर, अथाक सहर 31 हेब्रोन सहरम बाक्ब नेल्ल आन कली नु दाऊद नु आ मुर गाक्शो सहर गाउं नेल्ल आन कली कोसेली सोइक्तीमी बाक्त। डोंइती मेकेर दाऊद नु आ मुरपुकीम मार मार पामे बाक्त।

### सावल नु योनाथन बेक्शो

इतिहास १०:१-१२

- 31 पलिस्ती नु इस्राएली लडाइ पामे बाक्त। मिनु इस्राएली पलिस्ती आन क्येडा ब्रुशा प्रोक्मा बाक्त। शुश इस्राएली गिल्बोआ डांडाम साइक्चा पुंडसमा बाक्त। 2 पलिस्तीपुकीम सावल नु आ तौ आन कली साप्पा खेदा पामे बाक्त। मिनु सावल आ तौ सां योनाथन, अबीनादाब नु माल्कीशुआ आन कली सदमे बाक्त। 3 लडाइम सावलमी थाम्पा श्येत जवा बाक्त। मारदे हना लिब्रा आप्बम मेको कली ख्रपाइश्शा गार सेल्मे बाक्त। 4 मिनु मेकोम आ या कुरब कली “इ तरवार शोइश्शा आं कली साइय्पी। मिनु मेको खोइक्तीक चिनु मख्रोइश्शोपुकीम आं कली शुक्शी पचा मतामेक्ल” देंमाक्त। तन्न मेको या कुरब हिंशा, मबिस्से बाक्त। मेको नोले सावलमी आ तरवार शोइश्शा आंमा थोक्सीशा बेक्माक्त। न्यायाधीस ९:५४ 5 मिनु मेको या कुरबमी सावल बेक्शो तशा, मेको यो आ तरवारम थोक्सीशा मेको नु बेक्माक्त। 6 मोपा सावल, आ तौ सांफा, आ या कुरब नु लडाइ पाइब नेल्ल काबुमीन बेक्मा बाक्त। 7 बेसी नु यर्दन आइक्वी हांबुम बाक्ब इस्राएलीपुकीम लडाइ पाइब इस्राएली प्रोक्शो नु सावल नु आ तौ नेल्ल बेक्शो नेंन्मे बाक्त। मोपतीके मेकोपुकी आंम आंम सहर प्रोंइशा प्रोक्मा बाक्त। मिनु पलिस्ती जाक्शा मेको सहर आन के सेल्मे बाक्त। 8 आ दीसा पलिस्तीपुकी बेक्शो आन मार मार रोइक्चा कली जाक्मा बाक्त। मिनु मेकोपुकीम गिल्बोआ डांडाम सावल नु आ तौपुकी बेक्शो थित्मे बाक्त। 9 मिनु मेकोपुकीम सावल आ पिया खोदमे बाक्त। मिनु आ यापुकी लदमे बाक्त। मेको नोले मेकोपुकीम मेको रिश्शो लोव्र रागी डा तेइ तेइ नु देवी देवता नेल्ल आन कली नेंपाइक्चा, दे मुर सोइक्तमे बाक्त। 10 मेकोपुकीम सावल आ यापुकी अश्तारोथ माइश्शो मूर्ति पाइश्शो थाम आ खिंमी वोदमे बाक्त। मिनु मेको आ बेक्शो रां बेथ-शान डा गारोम किला थोक्शा क्युक्शा वोदमे बाक्त। ब्यवस्था २१:२२-२३ 11 पलिस्तीपुकीम सावल आ बेक्शो रां कली मार पामे, मेको याबेश-गिलाद डा मुरपुकीम नेंन्मे बाक्त। १सामुएल ११:१-११ 12 मिनु मेको आन बोल्यो मुरपुकी नेल्ल नाक्दो रे गाक्शा, सावल नु आ तौ आन बेक्शो रां बेथ-शान डा गारो रे शोल्शा, याबेशम चाक्गमे बाक्त। मिनु मेको आन कली थिम्मे बाक्त। 13 मिनु नोले आन रुश याबेश डा ठेयब रवा आ पुंमी थिम्मे बाक्त। मिनु मेकोपुकी ७ नाक्त सम्म माइजा बाक्मा बाक्त। २सामुएल १:१२

## २ सामुएल

डोंइती १सामुएल नु २सामुएल किताब कान बाक्ताक्स। पिप दाऊद आ पशो मार मार बाक्मे, मेको डोंइती रे नोले सम्म नेल्ल परमप्रभु यावे आ लोव पाइब सामुएल, नाथान नु गाद आन ब्रेक्शो किताबम ब्रेक्शो बाक्मा बाक्त। १७५ बि. सी. क्येडा नोले परमप्रभु यावे आ लोव पाइब रे ब्रेक्शा एको किताब थुम्शो बाक्त। परमप्रभुम इस्राएली आन कली दाक्चा मप्रॉइब आ सांकछी बाक्ब।

दाऊदम सावल बेक्शो लोव नेंशो

१ सावल बेक्म नोले दाऊदम अमालेकी आन कली खेदा पशा, लेशशा नाक्त निक्शी सिकलाग सहरम बाक्शो बाक्माक्त। १सामुएल ३०:२६ २ मिनू आ नित्थ नाक्ती, आ वा खाक्शो नु पियाम खप फुंडसीशो मुर का सावल आ बाक्तीक रे जाक्माक्त। मिनू मेको दाऊद आ बाक्तीक जाक्शा, मेको आ डोंइती खुम्की पा बाम्माक्त। ३ दाऊदम मेको कली “गे ते रे जाक्डे?” दे हिल्लो पवा बाक्त। मिनू मेकोमी “गो इस्राएल डा लडाइ पाइब आन बाक्तीके रे प्रोक्शा जाक्ती” देंमाक्त। ४ मिनू दाऊदमी मेको कली “मार दुम्मे? आं कली देंनो” देंमाक्त। मिनू मेकोमी “लडाइ पाइबपुकी लडाइ रे प्रोक्तेक्म। शुश मुर साइक्चा पुंडसाक्म। मिनू सावल नु आ तौ योनाथन यो साइक्चा पुंडसाक्म” देंमाक्त। ५ मिनू दाऊदम मेको लोव चाक्ब ठिटा कली “सावल नु आ तौ योनाथन साइक्चा पुंडसाक्म, दे दोपा तुइक्ती?” देंमाक्त। ६ मिनू मेको ठिटामी “गो गिल्बोआ डांडाम बाक्शो नड। मेकेर सावल कली आ तूतीक तिव्शा राप्शा बाक्शो ताता। बग्गी डोइक्ब नु शारा डोइक्बपुकीम मेको कली थित्वा चिक्ताक्म। १सामुएल ३१:१-३ ७ मिनू मेकोमी नोले लेशशा कोव्रडानु, आं कली तती। मिनू ब्रेत्ताक्यी। मिनू गो ‘मार देंनी’ देंती। ८ मिनू मेकोमी ‘गे सु नवे’ दे हिल्लो पती। मिनू ‘गो अमालेकी का नड’ देंती। ९ मिनू मेकोमी ‘आं नेक्था जाक्को। आं कली साइय्यी। मारदे हना गो बेक्चा चिक्शो बाक्ती। आं सोक्त् ला बाक्ब’ देंत। १० मोपतीके गो आ नेक्था लशा, मेको कली साइक्ता। मारदे हना मेको मप्रॉइब, दे गो तुइक्ताक्ड। मिनू गो मेको आ पिया रे सिरपेच नु आ गुइ डा पांडीके, आं प्रभु, इन बाक्तीकेम चाक्ता” देंमाक्त। ११ मेको लोव नेंशा, दाऊदम आ वा खाक्मा बाक्त। मेको नु बाक्ब मुर नेल्लेमी यो मो पामे बाक्त। १सामुएल ४:१२ १२ मेकोपुकी नां मरिक्म सम्म सावल नु आ तौ योनाथन आस पर्वम डाक्शा रोंका पा माइजा बाक्मा बाक्त। मारदे हना परमप्रभु यावे आ लडाइ पाइबपुकी नु इस्राएल आ खिं डा मुरपुकी तरवारम साइक्चा पुंडसमा बाक्त। १सामुएल ३१:१३ १३ मिनू दाऊदम मेको लोव चाक्ब ठिटा कली “गे ते रे जाक्शो नवे?” दे हिल्लो पवा बाक्त। मिनू मेकोमी “गो अर्को रागी डा अमालेकी का आ तौ नड” देंमाक्त। १४ मिनू दाऊदमी “परमप्रभु यावे आ तेल लुक्शो मुर कली साइक्चा महिंने?” देंमाक्त। १सामुएल २४:७; १सामुएल २६:९ १५ मिनू दाऊदमी आ ठिटा मुर का कली ब्रेश्शा “मेको कली सतो” दे अरेवा बाक्त। मिनू मेकोमी मेको कली तुप्शा सदा बाक्त। २सामुएल ४:१०-१२ १६ दाऊदमी मेको कली “इ हुश इ पिया तार मॉइसेक्ल। मारदे हना गे ‘गो परमप्रभु यावे आ तेल लुक्शो कली साइक्ता’ देंते। इ शोव्रमीन आंम इ कली दोसी सेल्साक्वे” देंमाक्त।

दाऊदम रोंका पतीक कुम्सो सेल्शो

१७ मिनू दाऊदमी सावल नु आ तौ योनाथन आस पर्वम रोंका पतीक कुम्सो पवा बाक्त। १८ मिनू मेको रोंका पतीक कुम्सो यहूदा डा मुर आन कली शेंचा माल्ब, दे हुकुम पवा बाक्त। मेको कुम्सो याशार आ किताबम ब्रेक्शो बाक्ब। २सामुएल १:२२; यहोसु १०:१३

१९ “इस्राएल, इ छेडछेड डांडाम साइक्चा पुंडसाक्म। सक्ति पाइश्शो मुरपुकी दोपा बेक्मा? २० गाथम एको लोव मपने। अश्कलोन डा लांम एको लोव मपने। मो पाइतीनी हना, पलिस्ती आन तमी ग्येरसीनीम। खोइक्तीक चिनु मखोइश्शो आन तमी ग्येरसीनीम।

२१ गिल्बोआ नें पाइश्शो डांडा, इ तार सीत नु रेउ मयिल। अन्न ग्रेल्ब रू मबाक्ल। मारदे हना सक्ति पाइश्शो आ तेक्तीक ग्रॉग्रा दिशो सेल्तेक्म। सावल आ तेक्तीक कली मुल रे तेल मखेक्नीम।

२२ योनाथन आ लिब्रा साइक्चा पुंडसीशो जोरी सत्रु आन हुश नु बोल्यो मुर आन बोंसो मलुम्सीथु, गेनायो मले। सावल आ तरवार यो मोशा मले।

२३ सावल नु योनाथन दाक्मुबाक्ताक्म। अरुम यो दाक्चा पुंडसाक्म। ब्रॉइसा नु बेक्सा नु यो काथा दुम्ताक्म। मेको निक्शी ककाकुली क्येडा यो रीब पा पाइब बाक्ताक्म। गुप्स क्येडा यो बोल्यो बाक्ताक्म।

२४ इस्राएल डा तमीपुकी सावल आ पर्वम डाक्कीन। मेकोमी इन कली लल दारदारशो शुश क्येट लाइब वा फेक्पाइश्शो बाक्त। मेकोमी इन कली सुन के गहना पांडपाइश्शो बाक्त।

२५ सक्ति पाइश्शो दोपा बेक्मा! मेको लडाइम बेक्तेक्म। योनाथन साइक्चा पुंडसीशा, डांडाम गोल्थो बाक्ब। २६ आं लोक्ब योनाथन, गो इ पर्वम रोंका पाइनुड। गो इ कली थाम्पा दाक्ताक्न। इ आं कली दाक्शो ठेयब बाक्त। मीश मुर आन कली दाक्तीक क्येडा यो लाक्शो बाक्त। २७ सक्ति पाइश्शो दोपा बेक्मा! मेको लडाइम आन या खतम दुम्तेक्म” दे कुम्सो पशो बाक्त।

दाऊद यहूदा डा पिप दुम्शो

२ मेको नोले दाऊदमी परमप्रभु यावे कली “मार गो यहूदा डा सहर काम लडा?” दे हिल्लो पवा बाक्त। मिनू परमप्रभु यावेमी “लावो” देंमाक्त। मिनू दाऊदमी “तेको सहरम लड” दे हिल्लो पवा बाक्त। मिनू “हेब्रोन सहरम लावो” देंमाक्त। १सामुएल २३:६,९; १सामुएल ३०:७-८ २ मोपतीके दाऊद आ मीश निक्शी येजेल डा अहीनोआम नु कारमेल डा बेक्शो नाबाल आ मीश अबीगेल नु मेकेर लमाक्त। १सामुएल २५:४२-४३ ३ मिनू दाऊदमी आ नु गाक्ब मुर आन खिं डा मुर नेल्ल यो लाइक्मी बाक्त। मिनू मेकोपुकी हेब्रोन सहरमी बाक्मा बाक्त। ४ मिनू यहूदा डा मुरपुकी जाक्शा, दाऊद कली तेल लुक्शा, आन पिप सेल्मे बाक्त। मिनू मुरपुकीमी दाऊद कली “याबेश-गिलाद डा मुरपुकीम सावल कली थिम्तेक्म” दे नेंपदमे बाक्त। २सामुएल ५:३; १सामुएल १६:१३; १सामुएल ३१:११-१३ ५ मिनू दाऊदम याबेश-गिलाद डा मुर आन कली लोव कुरब मुर सोइश्शा “परमप्रभु यावेम इन कली आसीक गेवल। मारदे हना गे इन प्रभु सावल कली रिम्शो पा थिम्तीनी। ६ मिनू परमप्रभु यावेमी इन कली गेना हना यो दाक्शा मप्रोनल। मिनू गो यो इन पशो गेय आ पर्वम इन कली इनाम गेनुड। ७ मोपतीके बोल्यो नु महिंन दुमीन। मारदे हना इन प्रभु सावल बेक्शा लत। मिनू यहूदा डा मुरपुकीम आं कली आन पिप सेल्तीमी” दे लोव कुरब मुर सोइक्ता बाक्त।



## इश-बोशेथ पिप दुम्शो

८ मेना सावल आ लडाइ पाइब मुर आन ठेयब मुर नेर आ तौ आबनेरमी सावल आ तौ इश-बोशेथ कली यदन ओंथ हांबु महा-नाइम चाक्का बाक्त। १सामुएल १४:५०; उत्पत्ती ३२:२-३<sup>९</sup> मिनु गिलाद, अश्वुर, येज़ेल, एफ्राइम, बेन्यामीन आ थर डा मुर नु इस्राएली नेल्ल आन पिप सेला बाक्त। १० सावल आ तौ इश-बोशेथ इस्राएल डा पिप दुम्मेनु ४० बर्स दुम्शो बाक्का। मेकोमी बर्स निक्शी सम्म सासन पवा बाक्त। तन्न यहूदा डा मुर दाऊद आ नोले खोदमे बाक्त। ११ दाऊदमी हेब्रोन सहरम यहूदा डा मुर आन कली ७ बर्स ६ महिना सम्म सासन पवा बाक्त।

## आसाहेल बेक्शो

१२ नेर आ तौ आबनेर, सावल आ तौ इश-बोशेथ नु आ गेय पाइबपुकी महा-नाइम रे गिबोन लमा बाक्त। १३ सेरूयाह आ तौ योआबमी दाऊद आ गेय पाइब आन कली लाइशा गिबोन डा दोम्लीम लडाइ पवा बाक्त। मेको निक्शी गिबोन डा दोम्लीम गुम्सा बाक्त। मिनु काम दोम्ली आ आइक्वी हांबुम, काम दोम्ली आ ओंथ हांबुम आस लडाइ पाइब आन कली राप्पदसे बाक्त। १सामुएल २६:६; यहोसु ९:३, १७<sup>१४</sup> मिनु आबनेरम योआब कली “इ लडाइ पाइब मुर नु आं लडाइ पाइब का का पा गुम्शा इस डोंइती लडाइ पामेक्ल” देंमाक्त। मिनु योआबमी “दुम्ब, मो पामेक्ल” देंमाक्त। १५ मोपतीके मेकोपुकी गूशा लशा, बेन्यामीन नु सावल आ तौ इश-बोशेथ आन मुर १२ जना नु दाऊद आ मुर १२ जना का का पा राम्मा बाक्त। १६ मिनु मेको नेल्लेमी आंम आंम जोरी सत्रु आन पियाम ग्याइशा कोखाम तरवारम आप्मे बाक्त। मोपा नेल्ल कालेम बेक्का बाक्त। मोपतीके गिबोन आ नेक्था डा रू कली हेल्काथ-हच्चुरीम देंनीम। मेको नें आ अर्थ तरवार आ क्योरतीक देंसीब। १७ मेको नाक्त थम ठेयब लडाइ दुम्माक्त। मिनु आबनेर नु इस्राएल डा मुर दाऊद आ मुर आन क्येडा ब्रुमा बाक्त।

१८ सेरूयाह आ तौ सांफा योआब, अबीशै नु आसाहेल मेकेर बाक्शो बाक्का बाक्त। आसाहेल ब्वाकी डा दोरब किशिश खोदेंशो रीब पा गेय पाइब बाक्का। १इतिहास २:१६<sup>१९</sup> मेकोम ग्युरा पेरा एर ओंथ मारेड मकोव्रथु दोरशा आबनेर कली खेदा पवा बाक्त। २० मिनु आबनेरम नोले लेशशा कोव्रशा “मार गे आसाहेल नवे?” दे हिल्लो पवा बाक्त। मिनु आसाहेलमी “गो नड” देंमाक्त। २१ मिनु आबनेरमी “ग्युरा गे कि पेरा गे लशा, लडाइ पाइब का कली आ मार मार रोइक्ती” देंमाक्त। तन्न आसाहेलमी मेको कली खेदा पचा मप्रोना बाक्त। २२ मिनु आबनेरमी लेंशा “आं कली खेदा पचा प्रॉइयी। गो इ कली मारदे साइक्नुडा? इ लोक्ब योआब आ डोंइती दोपा आं कुल कोंइनुडा?” देंमाक्त। २३ तन्न आसाहेल एर ओंथ लने मबिस्से बाक्त। मिनु आबनेरमी आ तूतीक नोले गे आप्शा मेको आ कोव्रज खिदा बाक्त। मिनु मेकेर गोल्शा बेक्का। मिनु आसाहेल बेक्शो बाक्तीके जाक्शा मुर नेल्ल दिक्का बाक्त। २सामुएल ३:२७<sup>२४</sup> मिनु योआब नु अबीशैमी आबनेर कली खेदा पस डा पस पाप्से बाक्त। मिनु नां मलाक्थु, मेकोपुकी अम्माह डांडा जाक्का बाक्त। अम्माह डांडा गिअह आ डोंइती, गिबोन रे गोरशो रागी डा लांम बाक्ब।

२५ बेन्यामीन आ थर डा मुर आबनेर गे बुक्का बाक्त। मिनु हुल का दुम्शा, अम्माह डांडा तार लडाइ पचा कली ठीक दुम्मा बाक्त। २६ मिनु आबनेरमी ठेयब सेंदा पा योआब कली “मार, गेना हना यो क्योरमुस डा मुस, साइक्मुस डा साइक्मुस बाक्का? मेको नोले मरिम्शो दुम्ब, दे गे मतुइक्नेवे? आंम लोक्ब आन कली खेदा पचा प्रॉइचा, दे इ मुर आन कली ममाइक्नेवे?” देंमाक्त। २७ मिनु योआबमी “परमप्रभु ब्रॉइशा बाक्शो खोदेंशो पा, गे मो मर्देशो नवे हना, मुरपुकीम दीसा सुनी सम्म यो आन लोक्ब आन कली खेदा पचा मप्रोनेम वा” देंमाक्त। २८ मिनु योआबम तुराही तबा बाक्त। मिनु मुर नेल्लेमी इस्राएली आन कली खेदा पचा प्रोन्मे बाक्त। मिनु लडाइ नाइसे बाक्त। २९ आबनेर नु आ मुरपुकी नाक्दो रे अराबाह रे गाक्शा यदन खोला शोक्समा बाक्त। मिनु सुनी रे गाक्शा महा-नाइम जाक्दीम्मा बाक्त। ३० मिनु योआबमी आबनेर कली खेदा पचा प्रॉइशा, लडाइ पाइब आन कली

पुक्मी बाक्त। मिनु आसाहेल प्रॉइशा, दाऊद आ मुर १९ जना मबाक्का बाक्त। ३१ तन्न दाऊद आ लडाइ पाइबपुकीमी बेन्यामीन आ थर डा मुर नु आबनेर आ नोले खोइक्ब ३ सहे ६० जना आन कली सदमे बाक्त। ३२ मेकोपुकीम आसाहेल कली कुरशा लाइशा, आ आफ आ तुरस बेथलेहेम सहरम थिम्मे बाक्त। मेको नोले योआब नु आ मुरपुकी नाक्दो रे गाक्शा नां सोव्र सोव्र हेब्रोन सहरमी जाक्दीम्मा बाक्त।

## दाऊद आ खिं डा मुर

३ सावल नु दाऊद आस खिं डा मुर शुश नाक्त सम्म लडाइ पस डा पस बाक्का बाक्त। मिनु दाऊद बोल्यो दुम्ना दुम्न लमाक्त। सावल आ खिं डा मुर चहिं मचाप्ब दुम्ना दुम्न लमा बाक्त। २सामुएल ५:१०<sup>२</sup> हेब्रोनमी दाऊद आ तौपुकी जरमेसीमा बाक्त। मेको आ डोंइती जरमेशो तौ अम्नोन बाक्का। मेको आ ममा येज़ेल डा अहीनोआम बाक्का। १इतिहास ३:१-४; २सामुएल १३:१<sup>३</sup> मेको आ माइला तौ किलेआब बाक्का। मेको आ ममा कारमेल डा बेक्शो नाबाल आ मीश अबीगेल बाक्का। मेको आ साइला तौ अब्बालोम बाक्का। मेको आ ममा गेशुर डा पिप तलमै आ तमी माकाह बाक्का। २सामुएल १५:१<sup>४</sup> काइला अदोनीयाह बाक्का। मेको आ ममा हग्गीथ बाक्का। ठाइला शेफत्याह बाक्का। मेको आ ममा अबीतल बाक्का। १राजा १:५<sup>५</sup> आ कान्छा इथ्रेआम बाक्का। मेको आ ममा दाऊद आ मीश एग्लाह बाक्का। मेको नेल्ल हेब्रोनम जरमेशो दाऊद आ तौ बाक्का बाक्त।

## आबनेरमी दाऊद नु कसम जशो

६ सावल नु दाऊद आस खिं डा मुर आन दातेमी लडाइ दुम्ना दुम्न लमेनु, आबनेर सावल आ खिंमी बोल्यो दुम्ना दुम्न लमाक्त। ७ मिनु सावल आ कान्छी मीश का बाक्का। मेको आइयाह आ तमी बाक्का। मेको आ नें रिस्पाह बाक्का। मिनु इश-बोशेथम आबनेर कली “गे आं आफ आ कान्छी मीश नु मारदे इमे?” दे मदा बाक्त। ८ आबनेरमी इश-बोशेथ आ लोव्र नेंशा गाइशा “मार, गो यहूदा आ गेय पाइब कुचुम नडा? मुल सम्म गो इ आफ सावल आ खिं डा मुर, आ लोक्ब नु आ वारच आन कली मानेब मुर बाक्ती। गो इन कली दाऊद आ गुडम मगेड। मो हना यो गे एको मीश मुर आ पर्वम आं कली दोस गेनीनी। ९ गो परमप्रभुमी दाऊद कली देंशो मपाता हना, आं कली सजाइ गेयील। परमप्रभु यावेमी दाऊद कली दोदेंशो कसम जवा, गो मोदेंशो पाइनुड। १० ‘सावल आ खिं डा मुर आन राज्य रोइक्का नु दाऊद कली इस्राएल यहूदा नु दान रे बेयर-शेबा सम्म सासन पपाइक्नुड’ दे परमप्रभु यावेमी देंशो बाक्ब” दे आबनेरम इश-बोशेथ कली देंमाक्त। ११ मिनु इश-बोशेथ आबनेर क्येडा हिंतीके मारेड लोव्र मलेत्ता बाक्त।

१२ मेको नोले आबनेरम हेब्रोनम बाक्ब दाऊद कली “एको रागी सु के बाक्का? गे गो नु कबल का पने। मिनु गो इस्राएल नेल्ल इन के सेल्त्वा कली वारच पाइनुड” दे लोव्र कुरब मुर सोइक्ता बाक्त। १३ मिनु दाऊदमी मेको आन कली “दुम्ब। गो गे नु कबल पाइनुड। तन्न गो इ कली लोव्र का पाइनुड। गे सावल आ तमी मिकाल कली मचाक्तीवी हना, आं डोंइती मजाक्को, दे मतीन” दे माइक्मी बाक्त। १४ मिनु दाऊदमी सावल आ तौ इश-बोशेथ कली यो “आं मीश मिकाल गेयी। गो मेको आ पर्वम सहे का जना पलिस्ती आन खोइक्तीक चिनु खोइश्शो कुशुल थाप्ताक्ड” देंपाइक्थ मुर सोइक्ता बाक्त। १सामुएल १८:२५-२७<sup>१५</sup> मोपतीके इश-बोशेथम मुर सोइश्शा मिकाल आ वोंइश लाइशा आ तौ, पाल्तीएल आ बाक्तीक रे चाक्पदा बाक्त। १सामुएल २५:४४<sup>१६</sup> मेको डाक्ना डाक्न बाहुरीम सहर सम्म मिकल आ नोले खोइश्शा पिमाक्त। मिनु आबनेरमी “लेशशा खिं लावो” दे मदा नोले लेम्माक्त।

१७ मिनु नोले आबनेरम इस्राएल डा खाल्पा आन कली “शुश डोंइती रे गेपुकीम दाऊद कली पिप सेल्त्वा माल्शो ननी। १८ मुल मेको पची जाक्त। मारदे हना परमप्रभु यावेमी दाऊद कली ‘गो आं गेय पाइब दाऊद आ गुड रे आं मुर इस्राएली आन कली पलिस्ती नु आन जोरी सत्रु नेल्ल आन गुड रे प्रॉइनुड’ दे लोव्र थोक्शो बाक्ब” देंमाक्त। १९ आबनेरमी बेन्यामीन आ थर

डा मुर नु यो लोव पवा बाक्त। नोले आबनेर दाऊद आ बाक्तीक हेब्रोन लमाक्त। मिनु इस्राएली नु बेन्यामीन आ थर डा मुर आन पचा देशो लोव नेल्ल देंमाक्त।

२० मिनु आबनेर २० जना मुर नु दाऊद आ बाक्तीक हेब्रोन जाक्दीम्माक्त। दाऊदम आबनेर नु मेको नेल्ल आन कली भोज गेमी बाक्त।<sup>२१</sup> मिनु आबनेरमी दाऊद कली “मुल आं कली इस्राएली नेल्ल आन कली आं प्रभु, पिप इन डोंइती चाक्चा गेयीनी। मिनु मेकोपुकीम गे नु कबल का पाइनीम। गे इन दाक्शो राज्य कामी रागी नेल्ल डा पिप दुम्नीनी” देंमाक्त। नोले दाऊदमी आबनेर नु गारशा सोइक्ता बाक्त।

#### योआबम आबनेर कली साइशो

२२ मेना योआब दाऊद आ मुरपुकी नु गारशा, लडाइ पा मार मार रोइशशा जाक्मा बाक्त। आबनेर चहिं गाक्ने थुम्तीके दाऊद नु हेब्रोन सहरम मबाक्माक्त। मारदे हना दाऊदम मेको नु गारशा, सोइक्ने थुम्शो बाक्माक्त।<sup>२३</sup> मिनु योआब नु लडाइ पाइब हुल जाक्मानु, मुरुमी “नेर आ तौ आबनेर दाऊद आ बाक्तीक जाक्मेनु, दाऊदमी मेको नु गारशा सोइक्ताक्व” दे नेंपदमे बाक्त।<sup>२४</sup> मिनु योआबम पिप आ बाक्तीक लशा “गे एको मार पनी? आबनेर इन बाक्तीक जाक्माक्त। गे मारदे मेको कली मो लेशशा सोइक्तीनी?”<sup>२५</sup> गे नेर आ तौ आबनेर कली तुइक्नीनी। मेकोम इन कली जोल पा इन पबर्म रुप्चा कली नु गे मार पा बाक्नी, मेको तुइक्चा कली जाक्शो बाक्व” देंमाक्त।<sup>२६</sup> मिनु योआब दाऊद आ बाक्तीक रे गूशा, लोव कुरब मुर कली आबनेर आ नोले सोइक्ता बाक्त। मिनु मेकोम आबनेर कली सिराह डा कुवा रे लेशशा चाक्दीत्मे बाक्त। तन्न दाऊदम मेको नेल्ल मतुइक्ता बाक्त।<sup>२७</sup> मोपा आबनेर हेब्रोनम लेशशा जाक्मेनु, योआबमी लोव पचा, दे सुइ मबाक्तीकम लदा बाक्त। मिनु आ कोव्रजम थोक्गा बाक्त। मोपा मेको आसाहेल साइशो आ पबर्म बेक्माक्त।<sup>१राजा २:५; २सामुएल २:२३</sup><sup>२८</sup> मिनु नोले दाऊदम मेको लोव नेंशा “गो नु आं राज्य परमप्रभु यावे आ डोंइती गेनायो नेर आ तौ आबनेर साइशो आ पबर्म दोस मताइब दुम्नीकी।<sup>२९</sup> मेको दोस योआब नु आ आफ आ खिं डा मुर आन पियाम दुम्न। योआब आ खिमं ग्रांग्रा यितीके रोइ पाइब कि कोव्र मुशो रोइ पाइब कि कोक्के तिवशा गाक्व कि तरवारम साइक्चा पुंइसीब कि जचा मताइब मुर का गेना हना यो बाक्व” देंमाक्त।<sup>३०</sup> मोपा योआब नु आ लोक्व अबीशैमी आबनेर कली सदसे बाक्त। मारदे हना आबनेरमी मेको आस लोक्व आसाहेल कली गिबोन डा लडाइम साइशो बाक्माक्त।<sup>न्यायाधीस ८:१८-२१; २राजा १४:५</sup>

<sup>३१</sup> मिनु दाऊदमी योआब नु आ नु बाक्व नेल्ल आन कली “इन वा खाक्कीन। मिनु भाडग्रा फेक्सीन। मिनु आबनेर आ पबर्म रोंका पने” देंमाक्त। मिनु पिप दाऊद बेक्शो आबनेर कुरब आन नोले गाक्माक्त।<sup>३२</sup> मिनु आबनेर कली हेब्रोनम थिम्मे बाक्त। मिनु पिप आबनेर आ तुरसुम ठेयब सेंदा पा डाक्माक्त। मिनु मुर नेल्ल यो डाक्मा बाक्त।<sup>३३</sup> मिनु पिपमी आबनेर आ पबर्म रोंका पशो कुम्सो सेला बाक्त। मेकोमी “मार, आबनेर परमप्रभु यावे आ अरेशो मटीब खोदेंशो दुम्शा, बेक्चा माल्दा?”<sup>३४</sup> इ गुइ मफ्रेंशो बाक्त। इ खोइलीम साडलो मपाइशो बाक्त। गे परमप्रभु यावे आ अरेशो मटीब आन डोंइती मेकोपुकी खोदेंशो पा गोल्ते” देंमाक्त। मिनु मुर नेल्ल मेको आ पबर्म लेंशा डाक्मा बाक्त।<sup>३५</sup> मिनु मुरपुकीमी दाऊद कली “नां लाक्चा डोंइती जने” देंमा बाक्त। तन्न दाऊदमी कसम जशा “नां मलाक्गा सम्म गो मारेइ जचा थोव्रक मथीनुड। थीता हना, परमप्रभुमी सजाइ गेयील” देंमाक्त।<sup>३६</sup> मुर नेल्लेम मेको लोव रुप्शा बिस्समा बाक्त। मिनु ग्येरसमा बाक्त। पिप आ पशो नेल्ल दाक्तमे बाक्त।<sup>३७</sup> मेको नाक्ती इस्राएल डा मुर नेल्लेमी नेर आ तौ आबनेर साइशोमी पिप आ दोस मबा, दे तुइक्तमे बाक्त।<sup>३८</sup> मिनु पिपमी आ गेय पाइब आन कली “मुलाक्ती इस्राएलमी लडाइ पाइब नु ठेयब मुर का बेक्त, दे तुइक्चा माल्नीनी।<sup>१सामुएल २६:१५</sup><sup>३९</sup> गो तेल लुक्शो पिप दुम्नी हना यो, मुलाक्ती सक्ति मपाइशो दुम्शो बाक्नुड। एको हुश खाक्श पोक्व सेरूयाह आ तौ गो नु

मगारनीम। परमप्रभु यावेमी मरिम्शो पाइब आन कली आन पशो क्येक्क लेक्ब” देंमाक्त।<sup>२सामुएल २:१८</sup>

#### इश-बोशेथ साइक्चा पुंइसीशो

४ सावल आ तौ इश-बोशेथम हेब्रोनम आबनेर साइशो लोव नेंशा आ थुं लुक्च लमाक्त। मिनु इस्राएली नेल्ल हिंशा ग्येथ लुक्च दुम्मा बाक्त।<sup>२सामुएल ३:२७</sup><sup>२</sup> सावल आ तौ के मार मार रोइक्ब आन हुल डा कप्तान निक्शी बाक्सा बाक्त। मेको का आ नें बानाह नु अर्को आ नें रेकाब बाक्माक्त। मेको बेयरोथ सहर डा बेन्यामीन आ थर डा रिम्मोन आ तौ बाक्सा बाक्त। मारदे हना बेयरोथ यो बेन्यामीन आ रागीम बाक्माक्त।<sup>यहोसु ९:१७</sup><sup>३</sup> मिनु बेयरोथ सहर डा मुर गित्ताइम सहर प्रोक्शा लशो बाक्मा बाक्त। मिनु मेना रे मेकेर अर्को रागी डा मुर दुम्शा बाक्मा बाक्त।<sup>नेहेम्याह ११:१३</sup>

<sup>४</sup> मिनु सावल आ तौ योनाथन के यो तौ का बाक्माक्त। मेको खोइल निम्फा मडुक्ब बाक्माक्त। मेको ५ बर्स दुम्मेनु, सावल नु योनाथन बेक्ताक्स देंशो लोव येज्जेल रे नेंसे बाक्त। मेको लोव नेंशा आ खाल पाइब मीश मुरुमी मेको कली कुरशा प्रोक्मेनु, थिश्शा मेको आल आ खोइल मडुक्ब दुम्शो बाक्माक्त। मेको आ नें मेफी-बोशेथ बाक्माक्त।<sup>मेफी-बोशेथ आ नें मेरीब-बाल नु इश-बोशेथ देंनीम। २सामुएल ९:३; १इतिहास ८:३४; १इतिहास ९:४०</sup>

<sup>५</sup> बेयरोथ सहर डा मुर रिम्मोन आ तौ निक्शी रेकाब नु बानाह नाक्ती उइक्थ दुम्मेनु, इश-बोशेथ आ खिमं जाक्सा बाक्त। मेना इश-बोशेथ इप्शो बाक्माक्त।<sup>२सामुएल २:८</sup><sup>६</sup> मेको निक्शी चेरब लाइक्चशो खोदेंशो पखु पा, खिं ओव्रसा बाक्त। मिनु मेको कली कोव्रजम तूशा सदसे बाक्त। मिनु रेकाब नु आ लोक्ब बानाह सुइम मतुइक्थ प्रोक्सा बाक्त।<sup>७</sup> मेको निक्शीमी इश-बोशेथ कली दोपा सदसे बाक्त देंशा हना, इश-बोशेथ इप्शा बाक्शो कोठा ओव्रशा, मेको कली तूशा साइशशा आ पिया खोइशशा लदसे बाक्त। मिनु नाक्दो रे अराबाह रे गाक्शा, हेब्रोन जाक्सा बाक्त।<sup>८</sup> मिनु मेको निक्शीमी मेको पिया दाऊद आ बाक्तीक हेब्रोनमी चाक्गासे बाक्त। मिनु पिप कली “सावल आ तौ इश-बोशेथ आ पिया एको बाक्व। इन कली साइक्चा माल्ब इन सत्रु बाक्त। मुलाक्ती परमप्रभु यावेमी सावल नु आ चच युइ आन कली क्येक्क लेक्ताक्व” देंसा बाक्त।

<sup>९</sup> मिनु दाऊदमी बेयरोथ सहर डा रिम्मोन आ तौ रेकाब नु बानाह आस कली “परमप्रभु यावे ब्रोंइशा बाक्शो खोदेंशो पा, मेकोमी आं कली आं श्येत नेल्ल रे प्रोंइती।<sup>१०</sup> ‘सावल बेक्शो रिम्शो लोव बाक्व’ दे मिम्शा आं कली देंब मुर कली गो ग्याइशशा सिकलागमी साइक्ता। मेको आ लोव आ इनाम बाक्त।<sup>२सामुएल १:१५</sup><sup>११</sup> मिनु परमप्रभु यावे आ अरेशो मटीब मुरुमी ठीक पाइब मुर कली आ आंम खिमं बाक्शा, इप्तीकम इप्शो मुर कली साइक्ब आस कली मेको क्येडा यो क्येक्क लेक्चा ममाल्नुडा डा? मार, मुल गो मेको आ हुश आ क्येक्क लेशशा इस कली साइशशा, रागी रे मक्याम्नुडा?” देंमाक्त।<sup>२सामुएल ३:३२</sup><sup>१२</sup> मिनु दाऊदम ठिटा मुर आन कली “मेको आस कली सतीन” दे अरेवा बाक्त। मिनु मेको आस कली सदमे बाक्त। आस गुइ खोइल खोइशशा, हेब्रोन डा दोम्ली आ नेक्था क्युक्गामे बाक्त। मिनु मुरपुकीमी इश-बोशेथ आ पिया लाइशशा, आबनेर आ तुरस हेब्रोनमी थिम्मे बाक्त।<sup>ब्यवस्था २१:२२-२३</sup>

#### दाऊद पिप दुम्शो

१इतिहास ११:१-३

५ मिनु नोले इस्राएल आ थर डा मुर नेल्ल दाऊद आ बाक्तीक हेब्रोनम जाक्शा, मेको कली “गो इन हुश नकी।<sup>२</sup> डोंइती सावल आइ पिप बाक्मेनु, गे लडाइ पाइब आन कली लाइक्तीक नु चाक्तीक पशो ननी। परमप्रभु यावेमी इन कली ‘गे आं मुर इस्राएली आन गोठला दुम्चा माल्नेवे। गे इस्राएली आन पिप दुम्नेवे’ देंशो बाक्व” देंमा बाक्त।<sup>१सामुएल १८:१३, १६; १सामुएल १३:१४; १सामुएल २५:३०</sup><sup>३</sup> मिनु इस्राएल डा खाल्पा नेल्ल पिप आ बाक्तीक हेब्रोनम जाक्मा बाक्त। मेकेर पिप दाऊदमी

मेकोपुकी नु परमप्रभु यावे आ डोंइती कबल का पवा बाक्त। मिनु मेकोपुकीम दाऊद कली तेल लुक्शा, इस्राएल डा पिप सेल्मे बाक्त। २सामुएल २:४; १सामुएल १६:१३<sup>4</sup> दाऊद ३० बर्स दुम्मेनु, पिप दुम्माक्त। मिनु मेकोमी ४० बर्स सासन पवा बाक्त। १राजा २:११; १इतिहास ३:४; १इतिहास २९:२७<sup>5</sup> मेकोम हेब्रोनम बाक्शा, यहूदा कली ७ बर्स ६ महिना सासन पवा बाक्त। मिनु यरूसलेम सहरमी बाक्शा ३३ बर्स इस्राएल नेल्ल नु यहूदा कली सासन पवा बाक्त।

दाऊदमी यरूसलेम ग्राशो  
१इतिहास ११:४-९; १इतिहास १४:१-७

6 नोले पिप दाऊद नु आ मुरपुकी, यरूसलेम सहरम बाक्ब यबुसी नु लडाइ पचा कली यरूसलेम लमा बाक्त। मिनु यबुसीपुकीम दाऊद कली “गे एक जाक्ने मचाप्नीनी। मिक्च मताइब नु खोइल मदुक्बम यो इन कली प्रोक्पाइक्नीम” देंमा बाक्त। मोपा दाऊद जाक्ने मचाप्ब, दे मिम्तमे बाक्त। यहोसु १५:६३; न्यायाधीस १:२३; न्यायाधीस १९:१०-१२<sup>7</sup> मो हना यो दाऊदमी गारो हिरशो सियोन ग्रामाक्त। मिनु मेको दाऊद आ सहर दुम्माक्त।<sup>8</sup> मेको नाक्त दाऊदमी “सुम यबुसी आन कली साइक्बा, मेकोम ब्वाक्कु यितीक रे जाक्शा, दाऊद कली ग्रांया दीब मिक्च मताइब नु खोइल मदुक्ब आन कली सदमेक्ल” देंमाक्त। मोपतीके “मिक्च मताइब नु खोइल मदुक्ब पिप आ खिं ओव्रचा मताइनीम” देंशो बाक्मा बाक्त।<sup>9</sup> मिनु दाऊद मेको गारो हिरशो सहरम बाक्शा, मेको आ नें दाऊद आ सहर वोदा बाक्त। मिनु दाऊदमी मिल्लो रे पा आगा एर ओंथ नेल्ल सहर सेला बाक्त।<sup>10</sup> मिनु दाऊद शुश ठेयब दुम्ना दुम्न लमाक्त। मारदे हना परमप्रभु यावे मुर नेल्ल आन परमप्रभु मेको नु बाक्माक्त। २सामुएल ३:३

11 टायर डा पिप हीराममी आ लोव कुरब आन कली दाऊद आ बाक्तीके सोइक्ता बाक्त। हीरामम लेबानोन डा लाइशो रवा आ शी नु शी सेल्ब नु गारो प्रोव्रब यो सोइक्ता बाक्त। मिनु मेकोपुकीम दाऊद कली खिं का सेल्मे बाक्त।<sup>12</sup> मिनु दाऊदमी “परमप्रभु यावेम आं कली इस्राएल डा सक्ति पाइशो पिप सेल्थी बाक्त। मिनु आ मुर इस्राएली आन पर्वम मेको आन राज्य ठेयब सेला बाक्त” दे तुइक्ता बाक्त।

13 दाऊद हेब्रोन रे यरूसलेम याक्से नोले मेकोमी मेकेर शुश मीश चाक्गा बाक्त। मेको के अर्को तमी तौ यो जरमेसमा बाक्त। २सामुएल ३:२-५; १इतिहास ३:५-९<sup>14</sup> यरूसलेम सहरम जरमेशो दाऊद आ तौपुकी शम्मुआ, शोबाब, नाथान, सोलोमन, लूका ३:३१; मत्ती १:६<sup>15</sup> इभार, एली-शुआ, नेफेग, याफीया<sup>16</sup> एली-शामा, एली-आदा नु एली-फेलेत बाक्मा बाक्त।

दाऊदम पलिस्ती आन कली फ्रुशो  
१इतिहास १४:८-१७

17 पलिस्तीपुकीम दाऊद इस्राएल डा पिप दुम्त देंशो लोव्र नेन्मे बाक्त। मिनु पलिस्ती नेल्ल लडाइ पाइब लाइशशा, दाऊद कली माल्थ लमा बाक्त। तन्न दाऊदम मेको लोव्र नेंशा उइ डा बोल्यो दरवार लशा बाक्माक्त। १सामुएल २२:१; २सामुएल २३:१४<sup>18</sup> मिनु पलिस्तीपुकी जाक्शा, रेफाइम डा बेंसीम ब्रशा बाक्मा बाक्त। यहोसु १५:८; यहोसु १८:१६<sup>19</sup> मिनु दाऊदमी परमप्रभु यावे कली “गो पलिस्ती आन कली लडाइ तोतामी हना, गे मेको आन कली आं गुइमी गेनीनी?” दे हिल्लो पवा बाक्त। मिनु परमप्रभु यावेमी “लावो, गो थमा पा मेको आन कली इ गुइम गेनुड” देंमाक्त। १सामुएल ३०:८<sup>20</sup> मिनु दाऊद लशा, बाल-पेराजीमम लडाइ तोमी बाक्त। मिनु मेको आन कली ग्रामाक्त। मिनु दाऊदमी “बारशो ब्वाक्कुम आ एर ओंथ प्रेशो खोदेंशो पा, परमप्रभु यावेम आं जोरी सत्रु आन कली फ्रुप्तु” देंमाक्त। मोपतीके मेकेर बाल-पेराजीम नें लीमाक्त। यसैया २१:२८<sup>21</sup> पलिस्तीपुकीम आन मूर्ति मेक उइ प्रोन्मे बाक्त। मिनु दाऊद नु आ मुरपुकीमी मेको लदमे बाक्त।

22 मिनु लेंशा पलिस्तीपुकी जाक्शा रेफाइम डा बेंसीम ब्रशा बाक्मा बाक्त।<sup>23</sup> मिनु दाऊदम लेंशा परमप्रभु यावे कली हिल्लो पवा बाक्त। मिनु परमप्रभु यावेमी “मुल सोजो लडाइ मपावो। हिरशा, ठेयब रवा आ आइक्वी हांबु नोले रे लडाइ पावो।<sup>24</sup> रवा आन डरम लडाइ पाइब आन दोरशो नेंनी

चोटी होस पावो। मारदे हना परमप्रभु यावे पलिस्ती आन कली फ्रुचा कली इ डोंइती गाक्ब” देंमाक्त।<sup>25</sup> मिनु दाऊदमी परमप्रभु यावेम आ कली देंशो खोदेंशो पा पवा बाक्त। मिनु पलिस्ती आन कली गेबा रे गेजेर सहर डा लां सम्म शोल्मो पा सदमे बाक्त। न्यायाधीस १:२९

परमप्रभु आ सन्दोस चाक्शो  
१इतिहास १३:-; १इतिहास १५:१६

6 मिनु दाऊदमी इस्राएल डा ३० हजार योव्रशो मुर आन कली खुप्तीमी बाक्त।<sup>2</sup> मिनु दाऊद नु मेको मुर नेल्ल परमप्रभु आ सन्दोस चाक्वा कली यहूदा डा बाले सहर रे लमा बाक्त। मेको सन्दोस तार आ नें बाक्त। मुर नेल्ल आन परमप्रभु यावे आ नें मेकेर बाक्ब। मेको करूब आस दातेम बाक्ब। बाले सहर आ अर्को नें किरयथ-यारीम बाक्त। यहोसु १५:९ प्रस्थान २५:२२<sup>3</sup> मेकोपुकीम परमप्रभु आ सन्दोस डांडाम बाक्शो अबीनादाब आ खिं रे गुंइशा, नक बग्गी काम वोदमे बाक्त। अबीनादाब आ तौ निक्शी उज्जाह नु अहीयोमी मेको नक बग्गी खुल्ना खुल्ल लदसे बाक्त। १सामुएल ७:१<sup>4</sup> मेकोपुकीम परमप्रभु आ सन्दोस डांडाम बाक्शो अबीनादाब आ खिं रे लदमे बाक्त। अहीयो चहिं मेको बग्गी आ डोंइती गाक्माक्त।<sup>5</sup> मिनु दाऊद नु इस्राएली नेल्ल आन जोंब बोक्शा परमप्रभु यावे आ डोंइती कुम्सो पना पन बीना, तार पाइशो ठेयब ताप्तीक, खैजडी, मार मार ताप्तीक नु बुप्केल ताप्शा सिल पना पन गाक्मा बाक्त।

6 मेकोपुकी नाकोन आ खलाम जाक्मानु, ब्यफ दाइल पांडससा बाक्त। मिनु उज्जाहम आ गुइ दिंशा, परमप्रभु आ सन्दोस तिकगा बाक्त।<sup>7</sup> मिनु परमप्रभु यावे उज्जाह कली तशा, गाइक्ता बाक्त। मिनु परमप्रभुमी मेको आ गुइ दिंशा, सन्दोस थिशो तशा, आ सन्दोस आ नेक्था उइ सदा बाक्त। १सामुएल ६:१९; गन्ती ४:१५<sup>8</sup> मिनु दाऊद गाइक्ता बाक्त। मारदे हना परमप्रभु यावेम उज्जाह आ पर्वम गाइशशा, मेको कली सदा बाक्त। मोपतीके मेकेर पेरेस-उज्जा नें वोदा बाक्त। मेको आ नें मुल सम्म मेकोन बाक्ब।<sup>9</sup> मेको नाक्ती दाऊद परमप्रभु यावे क्येडा हिंमाक्त। मिनु “मुल गो परमप्रभु यावे आ सन्दोस दोपा लाइक्नुडा?” देंमाक्त।<sup>10</sup> मिनु दाऊदमी परमप्रभु यावे आ सन्दोस आ बाक्तीके, दाऊद आ सहर, लाइक्ने मचबा बाक्त। मिनु आ खिं लाइक्वा आ पा डा मेको गित्त आ खिं डा मुर, ओबेद-एदोम आ खिमी चाक्दीदा बाक्त।<sup>11</sup> मोपा परमप्रभु यावे आ सन्दोस ओबेद-एदोम आ खिमी महिना सां सम्म बाक्माक्त। मिनु परमप्रभु यावेमी गित्त आ खिं डा ओबेद-एदोम नु आ खिं डा मुर नेल्ल आन कली आसीक गेमी बाक्त।

सन्दोस यरूसलेमम चाक्शो

12 मिनु मुरपुकीमी दाऊद कली “परमप्रभु यावेमी, परमप्रभु आ सन्दोस वोइशो आ पर्वम ओबेद-एदोम आ खिं डा मुर नु आ मारेइ मारेइ आन कली आसीक गेप्तु” दे मदमे बाक्त। मिनु दाऊद लशा, ओबेद-एदोम आ खिं रे थाम्पा ग्येरसीशा, मेको परमप्रभु आ सन्दोस आ सहरमी चाक्गा बाक्त।<sup>13</sup> परमप्रभु यावे आ सन्दोस कुरब मुर ६ पैला गाक्शा नोले, मेकोपुकीम ब्यफ का नु दोम्शो बाछा का क्योरशा चढेमे बाक्त। १राजा ८:५<sup>14</sup> दाऊदम सुती के ऊरीम नु थुम्मीम कुरतीके पांइशा, परमप्रभु यावे आ डोंइती आ जोंब बोक्शा सिल पवा बाक्त। प्रस्थान २८:६; १सामुएल २:१८; १सामुएल २२:१८<sup>15</sup> मिनु दाऊद नु इस्राएल आ खिं डा मुर नेल्ल रेयके पना पन तुराही ताम्ना ताम्न परमप्रभु यावे आ सन्दोस चाक्गमे बाक्त।

16 मिनु परमप्रभु यावे आ सन्दोस दाऊद आ सहरमी चाक्गामेनु, सावल आ तमी मिकालमी झेल रे कोव्रडा बाक्त। मिनु पिप दाऊद कली परमप्रभु यावे आ डोंइती प्रेक्ना प्रेक्न, सिल पशो तशा, आ थुमी ग्रांया दिमाक्त।<sup>17</sup> मिनु मेकोपुकीम परमप्रभु यावे आ सन्दोस वोइक्वा कली दाऊदम कीशो ताम्बुम ओंइदमे बाक्त। मिनु दाऊदमी परमप्रभु यावे आ डोंइती चोशा चढेतीक नु दुशा बाक्वा आ पर्वम चढेतीक चढेवा बाक्त।<sup>18</sup> दाऊदमी मेको चोशा चढेतीक नु दुशा बाक्वा आ पर्वम चढेतीके चढेने थुंशा, मुर नेल्ल आन परमप्रभु यावे आ नेंमी आ मुर नेल्ल आन कली आसीक गेमी बाक्त।

१ राजा ८:५५<sup>19</sup> मिनू दाऊदमी इस्राएली नेल्ल आन कली नु मेकेर देल्शो मीश मुर, वोंडश मुर नेल्ल आन कली शोब्ले का का, चोकटा का का श्ये, सोव्रशो अडगुर शोब्ले गेमी बावक्त। मिनू मुर नेल्ल आन खिं खिं लेम्मा बावक्त।

20 मिनू दाऊद आ खिं डा मुर आन कली आसीक गेथ लेम्मेनु, सावल आ तमी मिकाल मेको कली गुम्थ लाडगा गूशा पिमावक्त। मिनू मेकोम “मुलावती इस्राएल डा पिप थम ठेयब मिम्सीशो बावक्त। मेको मुलावक्त आ गेय पाइब वाइलीम आन डोंइती शिश्रा दुम्शा, मुने मपाइशो आइक्च मुर खोदेंशो दुम्त” देमावक्त।<sup>21</sup> मिनू दाऊदम मिकाल कली “इ आफ नु आ खिं डा मुर आन पा डा आं कली इस्राएल डा आ मुर आन पिप सेल्ब परमप्रभु यावे आ डोंइती मो पाता। गो परमप्रभु यावे आ डोंइती ग्येरशा सिल पाइनुड।  
२ सामुएल ५:२<sup>22</sup> गो थमा पा मुल यो मेको क्येडा यो आइक्च दुम्नुड। तन्न मेको आं वाइलीम आन परबम गे मार देंने, मेकोपुकीमी आं कली मो पशो आ परबम मान पाइनीम” देमावक्त।<sup>23</sup> मोपतीके मेको सावल आ तमी मिकाल के आ बेक्ची नावक्त सम्म तमी तौ मदुम्मा बावक्त।

परमप्रभुमी दाऊद नु लोव्र पशो

१इतिहास १७:-

7 मिनू पिप आंम खिम बाक्म नोले, परमप्रभु यावेम मेको कली आ एर ओथ डा जोरी सत्रु नेल्ल आन रे नाइक्वा गेवा बावक्त।<sup>2</sup> मिनू पिपमी परमप्रभु यावे आ लोव्र पाइब नाथान कली “कोव्रडीन। गो लेबानोन डा लाइशो रवा आ शी के सेल्शो खिम बाक्शो बाक्नुड। तन्न परमप्रभु आ सन्दोस चहिं ताम्बुम बाक्ब” देमावक्त। भजन संग्रह १३२:३-५<sup>3</sup> मिनू नाथानमी पिप कली “दुम्ब, इन थुंम मार बाक्मे, मेको पने। मारदे हना परमप्रभु यावे गे नु बाक्ब” देमावक्त।

4 तन्न मेको नाक्दोन परमप्रभु यावेम नाथान कली लोव्र पवा बावक्त।  
5 मार लोव्र पवा बावक्त देंशा हना “गे लशा, आं गेय पाइब दाऊद कली ‘गे आं कली बाक्चा कली खिं सेल्नेवे डा? १इतिहास २२:८; १ राजा ५:१७<sup>6</sup> गो इस्राएली आन कली इजीप्ट रे चाक्गुमी रे मुल सम्म गेनायो खिम मबाक्ड। ताम्बु नु अरु बाक्तीकेम बाक्ती। १ राजा ८:१६, २७; यसैया ६६:१<sup>7</sup> गो इस्राएल डा आं मुरपुकी नु ते ते गाक्डा, मेक मेक मार आं मुर इस्राएली आन कली कोव्रब, आन थर डा ठेयब मुर आन कली आं कली लेबानोन डा लाइशो रवा आ शी के खिं मारदे मसेल्नी’ देंडा डा? 8 मोपतीके गे आं गेय पाइब दाऊद कली मुर नेल्ल आन परमप्रभु यावेमी मार देंत देंशा हना ‘इ कली, आं मुर इस्राएली आन कली कोव्रब दुम्पाइक्चा कली भेडा योव्रतीक रे चाक्तन। १ सामुएल १६:११-१३; २ सामुएल ५:२<sup>9</sup> गे ते ते गाक्डे, मेक मेक गो गे नु बाक्ती। गो इ जोरी सत्रु नेल्ल आन कली इ डोंइती रे खेरतामी। गो इ नें रागी डा ठेयब मुर आन नें खोदेंशो पा ठेयब सेल्नुड।<sup>10</sup> गो आं मुर इस्राएली आन कली बाक्तीक का योव्रनुड। मिनू मेकोपुकी आंम आंम रागीम बाक्नीम। मुल रे मेको आन कली सुडम श्येत मगेनीम। डोंइती डा खोदेंशो पा मुल रे मेको आन कली सुडम मरिम्शो मपाइनीम, श्येत मगेनीम।  
11 आं मुर इस्राएली आन कली निसाफ पाइब योव्रशो रे गो इ कली इ जोरी सत्रु नेल्ल रे नाइक्पाइक्चन। मिनू परमप्रभु यावेमी इ कली चच युइ गेब’ दे मतौ” देमावक्त।

दाऊदम आसीक तशो

12 परमप्रभु यावेम दाऊद कली “इ नाक्त नुप्त हना नु इ किकी पिपी नु बाक्थ लचा नोले गो इ खिं डा मुर आन दाते रे का कली इ पा डा पिप सेल्नुड। मिनू मेको आ राज्य बोल्यो सेल्नुड। १ राजा ८:२०<sup>13</sup> मिनू मेकोमी आं नैमी खिं का सेल्ब। गो मेको आ राज्य गेना हना यो बाक्ब सेल्नुड। १ राजा ५:१९; १ राजा ६:१२; भजन संग्रह ८९:४-५; यसैया ९:६<sup>14</sup> गो मेको आ आफ दुम्नुड। मिनू मेको आं तौ दुम्ब। मेकोम मरिम्शो पाप्तु हना, गो मेको कली मुर खोदेंशो पा कोक्केम तुप्नुड। भजन संग्रह २:७; भजन संग्रह ८९:२७; लूका १:३२; हिब्रू १:५<sup>15</sup> तन्न गो गेना हना यो आं दाक्तीकेम मप्रोंइनुड। मेको इ डोंइती सावल कली प्रोंइशो खोदेंशो पा मेको कली मप्रोंइनुड। १ सामुएल १५:२३-२६<sup>16</sup> इ खिं नु इ राज्य गेना हना यो आं

डोंइती लीब। इ सासन पतीक गेना हना यो लीब” देमावक्त। भजन संग्रह ७२:-; यसैया ५५:३<sup>17</sup> मिनू नाथानम मेको देंशो लोव्र नु कोंइशो नेल्ल दाऊद कली देमावक्त।

दाऊदम परमप्रभु कली ठेयब सेल्शो

18 मिनू पिप दाऊद परमप्रभु यावे आ बाक्तीक ओव्रशा, मेको कली “परमप्रभु यावे, गो सु नडा? आं खिं डा मुर सु बाक्नीमी? मिनू गे आं कली एक सम्म चाक्नीमी? 19 आं कली पशो इन डोंइती आइक्च बाक्ब। गे इन गेय पाइब आ खिं आ परबम नोले दुम्ब लोव्र यो पाइतीनी। परमप्रभु यावे, मेको इन मुर आन कली अरेशो लोव्र बाक्ब।<sup>20</sup> परमप्रभु यावे, मुल गो एको क्येडा शुश मार देंने चाप्नुडा डा? मारदे हना गे इन गेय पाइब कली रिम्शो पा तुइक्नीनी।<sup>21</sup> गे इन थुंम मिम्शा, थोक्शा पशो लोव्र इन गेय पाइब, आं कली तुइक्पाइक्चा कली मोदेंशो ठेयब गेय पाइतीनी।<sup>22</sup> मोपतीके परमप्रभु यावे, परमप्रभु गे ठेयब बाक्नीनी। इन खोदेंशो अरु सुइ मबाक्नीम। अर्को परमप्रभु यो मबाक्नीम।<sup>23</sup> इन मुर खोदेंशो अर्को सु बाक्नीमी? इस्राएली खोदेंशो सु बाक्नीमी? रागी नेल्लेमी परमप्रभुम प्रोंइशो इस्राएली खोदेंशो अर्को जात यो बाक्मा कों? गे इन नें ठेयब सेल्चा कली गे इन मुर आन कली ठेयब नु छक लाक्चा डा गेय पाइतीनी। गे इन मुर आन डोंइती रे रागी रागी डा मुर नु आन देवी देवता आन कली खेरतीनी। ब्यक्स्था ४:७<sup>24</sup> गे इन मुर इस्राएली आन कली गेना हना यो इन मुर दुम्पाइक्चा कली बोल्यो सेल्तीनी। मिनू परमप्रभु यावे, गे मेको आन परमप्रभु दुम्तीनी।<sup>25</sup> परमप्रभु यावे, मुल परमप्रभु, इन गेय पाइब नु मेको आ खिं डा मुर आन परबम देंशो गेना हना यो खपीन। इन थोक्शा पशो लोव्र खोदेंशो पा पने।<sup>26</sup> मुर नेल्ल आन परमप्रभु यावे इस्राएली आन परमप्रभु बाक्ब। मिनू इन गेय पाइब दाऊद आ खिं गेना हना यो इन डोंइती लीब, दे इन नें गेना हना यो ठेयब सेल्नीम।<sup>27</sup> मारदे हना गे, मुर नेल्ल आन परमप्रभु यावे, इस्राएल आ परमप्रभु, इन गेय पाइब कली ‘गो इ खिं सेल्नुड’ देंतीनी। गो महिंथु, एको लोव्र पाता। यसैया ५०:५<sup>28</sup> परमप्रभु यावे, गे परमप्रभु बाक्नीनी। इन लोव्र थमा बाक्ब। गे इन गेय पाइब कली रिम्शो थोक्शा पशो लोव्र पाइतीनी। १ राजा ८:२६<sup>29</sup> मोपतीके मुल इन गेय पाइब आ खिं कली आसीक गेने। मिनू मेको इन डोंइती गेना हना यो लील। परमप्रभु यावे मेको गे पाइतीनी। मिनू इन आसीकमी इन गेय पाइब आ खिं गेना हना यो आसीक राइब” दे परमप्रभु कली पुना बावक्त।

दाऊद आ पशो नु ग्राशो लडाइ

१इतिहास १८:१-१३

8 मिनू इक्का नोले दाऊदमी पलिस्ती आन कली लडाइ तोशा ग्रामावक्त। दाऊदमी मेथेग-आम्माह सहर आंम के सेला बावक्त।  
2 दाऊदम मोआबी आन कली यो फ्रुवा बावक्त। मिनू मेको आन कली खपीम इप्पाइक्मी बावक्त। मिनू डोरी कामी थाप्शा भाग सां सेल्मी बावक्त। भाग निक्शी डा मुर आन कली साइक्मी बावक्त। मिनू भाग का डा मुर आन कली प्रोंइमी बावक्त। मिनू मोआबीपुकी मेको आ वाइल दुम्मा बावक्त। मिनू मेकोपुकीम दाऊद कली तिरो थाप्चा माल्मा बावक्त। १ सामुएल २२:३<sup>3</sup> मिनू दाऊद युफ्रेटीस खोला आ नेक्थाम आ अधिकार वोइक्चा कली लमेनु, सोबाह सहर डा रेहोब आ तौ पिप हादादेजेर कली यो लडाइ पा ग्रामावक्त।<sup>4</sup> दाऊदम मेको रे हजार का ७ सहे शारा डोइक्बपुकी नु २० हजार जना खोइलीम गाक्ब लडाइ पाइब आन कली ग्याइक्तीमी बावक्त। मिनू दाऊदम बग्गी कीब शारा आन नारी खोदा बावक्त। मिनू आंम कली सहे का शारा बग्गी कीचा कली वोदा बावक्त। यहोसु ११:९<sup>5</sup> मेना दमस्कस डा अराम डा मुर सोबाह सहर डा पिप हादादेजेर कली वारच पाइक्चा कली जाक्मा बावक्त। मिनू दाऊदम मेको आन दाते डा २२ हजार अरामी आन कली साइक्मी बावक्त।<sup>6</sup> मिनू दाऊदम मेको अराम डा मुर आन रागी दमस्कसम कोव्रब मुर वोइक्मी बावक्त। मिनू मेकोपुकी दाऊद आ वाइल दुम्शा, तिरो थाप्चा माल्मा बावक्त। मोपा परमप्रभु यावेम दाऊद ते ते गाक्मे, मेक मेक ग्रापदा बावक्त।<sup>7</sup> हादादेजेर आ गेय पाइब आन कुरशो सुन के तेक्तीके दाऊदम आइक्के सेला बावक्त। मिनू मेको यरूसलेम सहरम चाक्गा

बाक्त। ८ मेकोमी हादादेजेर आ सहर, बेताह नु बेरोथाइ सहर रे शुश कांसा चाक्का बाक्त।

९ मिनू हमाथ डा पिप तोइमी “दाऊदम हादादेजेर आ लडाइ पाइब नेल्ल आन कली फ्रुप्तु” देंशो नेना बाक्त। १० मिनू पिप तोइमी आ तौ योराम कली दाऊद कली गुम्थ सोइक्ता बाक्त। मिनू मेकोमी दाऊद कली “गे लडाइम हादादेजेर कली फ्रुशा रिम्शो पाइतीनी” देंथ नु मान पा ठेयब सेल्लीक लोत्र पथ सोइक्ता बाक्त। मारदे हना हादादेजेर नु तोइ आस दातेमी लडाइ दुम्ना दुम्न बाक्शो बाक्माक्त। योराममी सुन चांदी नु कांसा के ग्योब यो चाक्का बाक्त। ११ पिप दाऊदमी मेको यो परमप्रभु यावे कली गेवा बाक्त। आ फ्रुशो रागी नेल्ल डा सुन चांदी मोपा गेबाक्माक्त। १२ एदोम, मोआब, अम्मोन पलिस्ती नु अमालेक रे चाक्शो सुन चांदी, सोबाह सहर डा रेहोब आ तौ पिप हादादेजेर रे रोइश्शो मारेइ मारेइ परमप्रभु यावे कली गेवा बाक्त।

१३ दाऊद लडाइ ग्राशा, आ नें चेंम्शा लेम्मेनु, हिक्सी बाक्शो बेंसीम १८ हजार एदोम डा मुर आन कली साइक्मी बाक्त। भजन संग्रह ६०:२

१४ मेकोमी एदोम रागी नेल्लेम कोव्रब मुर वोइक्मी बाक्त। मिनू एदोम डा मुर नेल्ल दाऊद आ वाइल दुम्मा बाक्त। मोपा परमप्रभु यावेम दाऊद ते ते लमे, मेक मेक ग्रापदा बाक्त। उत्पत्ती २७:४०; गन्ती २४:१८

दाऊद आ गेय पाइबपुकी

१इतिहास १८:१४-१७

१५ मिनू दाऊदमी इस्राएल रागी नेल्लेम सासन पवा बाक्त। मिनू आ मुर नेल्ल आन कली ठीक निसाफ पवा बाक्त। १६ सेरूयाह आ तौ योआब लडाइ पाइब आन ठेयब मुर बाक्माक्त। अहीलुद आ तौ येहो-शाफात मेको आ ब्रेक्ब बाक्माक्त। २सामुएल २:२३-२६ १७ अहीतुब आ तौ सादोक नु अबीयाथार आ तौ अहीमेलेक चढ़ेब बाक्सा बाक्त। सेरायाह ब्रेक्ब बाक्माक्त। १८ येहो-यादा आ तौ बेनायाह, केरेथी नु पेलेथी, पिप कली कोव्रब आन ठेयब मुर बाक्माक्त। दाऊद आ तौपुकी चहिं चढ़ेब बाक्सा बाक्त। २सामुएल १५:१८

दाऊदमी शिशी पशो

९ मिनू दाऊदमी “मार, सावल आ खिं डा मुर सुइ ब्रोंइशो बाक्नीमी? मेको आन कली गो योनाथन आ पर्वम शिशी पाइक्ने चाप्नुडा?” दे हिल्लो पवा बाक्त। २ सावल आ खिं डा सीबा नें पाइश्शो गेय पाइब मुर का बाक्माक्त। दाऊदम मेको कली ब्रेथ सोइक्ता बाक्त। मिनू पिपमी मेको कली “मार, गे सीबा नवे” देंमाक्त। मिनू मेकोम “ओं, गो इन गेय पाइब सीबा नड” देंमाक्त। २सामुएल १६:१ ३ मिनू पिपमी “सावल आ खिं डा सुइ ब्रोंइशा लीशो बाक्नीमी? गो मेको कली परमप्रभु आ दाक्तीक कोंइचा दाक्नुड?” देंमाक्त। मिनू सीबाम पिप कली “योनाथन आ तौ का ब्रोंइशा लीशो बाक्ब। मेको आ खोइल निम्फा मदुक्ब बाक्ब” देंमाक्त। ४ मिनू पिपमी मेको कली “मेको ते बाक्म?” दे हिल्लो पवा बाक्त। मिनू सीबामी “मेको लो-देबार सहर डा अम्मोएल आ तौ माकीर आ खिंम बाक्ब” देंमाक्त। २सामुएल १७:२७

५ मिनू पिप दाऊदमी लो-देबार डा अम्मोएल आ तौ माकीर आ खिंम मुर सोइश्शा मेको कली चाक्पदा बाक्त। ६ मिनू योनाथन आ तौ सावल आ चच मेफी-बोशेथ दाऊद आ बाक्तीके जाक्माक्त। मिनू मेकोमी खुम्की पा बाप्शा पिप कली सेउ पवा बाक्त। मिनू दाऊदम मेको कली “मेफी-बोशेथ” देंमाक्त। मिनू मेफी-बोशेथमी “गो इन गेय पाइब एक बाक्ती” देंमाक्त। ७ मिनू दाऊदम मेको कली “महिंनो, गो इ कली इ आफ योनाथन आ पर्वम शिशी पाइक्नुड। गो इ कली इ बाजे सावल आ रू नेल्ल लेश्शा गेनन। मिनू गे गेना हना यो गो नु बाक्शा जाइनेवे” देंमाक्त। ८ मिनू मेफी-बोशेथम खुम्की पा बाप्शा “गो सु नडा डा? पिपमी गो बेक्शो कुचुम खोदेंशो मुर, आं कली शिशी पाइय्नीनी?” देंमाक्त। ९ मिनू दाऊदमी सावल आ गेय पाइब सीबा कली ब्रेश्शा “सावल नु आं खिं डा शोंप नेल्ल गो इ होव्रप आ चच कली गेता। २सामुएल १९:२९-३० १० गे, इ तौपुकी नु इ गेय पाइब नेल्लेमी मेको आ रूम गेय पचा माल्नीनी। मिनू गे इ होव्रप आ चच आ खिं डा मुर

आन कली गेचा माल्नेवे। तन्न इ होव्रप आ चच मेफी-बोशेथ गेना हना यो गो नु काथा बाक्शा जाइब” दे मदा बाक्त। सीबा के १५ जना तौ नु २० जना गेय पाइब बाक्मा बाक्त। ११ मिनू सीबाम पिप कली “आं प्रभु पिप, गो इन गेय पाइबमी इन देंशो खोदेंशो पा नेल्ल पाइक्नुड” देंमाक्त। मेफी-बोशेथ पिप आ तौ का खोदेंशो पा पिप दाऊद आ खिंम बाक्शा, जवा बाक्त। १२ मेफी-बोशेथ आ तौ का बाक्माक्त। मेको आ नें मीका बाक्माक्त। मिनू सीबा आ खिं डा मुर नेल्ल मेफी-बोशेथ आ गेय पाइब दुम्मा बाक्त। १३ तन्न मेफी-बोशेथ यरूसलेमम बाक्माक्त। मारदे हना मेकोमी गेना हना यो पिप नु जवा बाक्त। मेको आ खोइल निम्फा मदुक्ब बाक्माक्त। २सामुएल ९:३

दाऊदमी लडाइ पशो

१इतिहास १९:१-१९

१० मिनू नोले अम्मोनी आन पिप बेक्माक्त। मिनू मेको आ पा डा आ तौ हानुन पिप दुम्माक्त। २ दाऊदम “नाहाशमी आं कली रिम्शो पशो खोदेंशो पा गो नाहाश आं तौ हानुन कली रिम्शो पाइनुड” दे मिम्ता बाक्त। मिनू मेकोमी आ आफ बेक्शो आ पर्वम लेम्शो लोत्र नेंपाइक्थ लोत्र कुरब मुर आन कली सोइक्ता बाक्त। मिनू दाऊद आ मुरपुकी अम्मोनी आन रागीम ओव्रमानु, १सामुएल ११:१ ३ अम्मोनी आन कली सासन पाइबम आन प्रभु हानुन कली “दाऊदमी इन आफ कली ठेयब सेल्चा आ पर्वम इन कली लेम्शो लोत्र नेंपाइक्थ सोइश्शो बाक्ब, दे थमा सुइक्नीनी? एको मुरपुकी क्यारी पाइब नम। दाऊदमी एको आन कली इन सहर दोपा ओव्रचा, दे क्यारी पथ सोइश्शो बाक्ब” देंमा बाक्त। ४ मोपतीके हानुनमी दाऊद आ सोइश्शो मुर आन कली ग्याइश्शा, आन गल शोके उइक्थ उइक्थ खोइश्शा नु आन फेक्शो वा क्रातो सम्म खोइश्शा सोइक्तीमी बाक्त। ५ मेको आन कली मो पशो दाऊदम नेना बाक्त। मिनू दाऊदमी मेको आन कली गुम्थ मुर सोइक्ता बाक्त। मारदे हना मेकोपुकी थम मुने तोक्चा पुंइसमा बाक्त। मिनू दाऊदमी “मेको आन गल शोके डोंइती डा खोदेंशो मदुम सम्म यरीको सहरमी बाक्मल” देंमाक्त।

६ मिनू अम्मोन डा मुरपुकीमी दाऊद कली गाइक्पाइश्शो तुइक्तेमे बाक्त। मिनू अम्मोन डा मुरपुकीम बेथ-रेहोब, सोबाह डा २० हजार मुर नु अराम डा खोइलीम गाक्ब लडाइ पाइब आन कली गाल्च थाप्शा चाक्कामे बाक्त। मेकोपुकीम माकाह डा पिप नु हजार का मुर नु तोब रागी रे १२ हजार मुरपुकी गाल्च थाप्शा चाक्कामे बाक्त। ७ दाऊदम मेको लोत्र नेंशा, योआब नु लडाइ पाइब नेल्ल आन कली सोइक्तीमी बाक्त। ८ अम्मोन डा मुर जाक्शा सहर ओव्रतीक ठेयब लाप्चोमी ठीक दुम्मा बाक्त। तन्न सोबाह, रेहोब सहर डा, अराम डा मुरपुकी नु तोब नु माकाह रागी डा मुरपुकी चहिं दिंम लडाइ पचा कली ठीक दुम्मा बाक्त।

९ योआबम आ डोंइती नु नोले निम्फा पटटी रे लडाइ तोचशो तवा बाक्त। मिनू मेकोमी इस्राएल डा योव्रशो मुर आन कली अरामी आन डोंइती वोइक्मी बाक्त। १० लीशो मुर चहिं आ लोक्ब अबीशै आ हुकुममी गेमी बाक्त। मेकोपुकी अम्मोनी आन डोंइती लडाइ तोचा कली ठीक दुम्मा बाक्त। ११ योआबम “अराम डा मुरपुकीम आंइ कली ग्राना ग्रान पिम्तेक्म हना, आंइ कली वारच पने। अम्मोन डा मुरपुकीम इन कली ग्राना ग्रान पिम्तेक्म हना, गो इन कली वारच पाइनीकी। १२ सक्ति पाइश्शो बोल्यो दुमीन। गो आंम मुरपुकी नु आंम परमप्रभु आ सहर आ पर्वम महिंथु, लडाइ पय। मिनू परमप्रभु यावेमी आ दाक्शो पवल” देंमाक्त। १३ मिनू योआब नु आ मुरपुकी अरामी नु लडाइ पामे बाक्त। मिनू अरामी मेको आन डोंइती रे प्रोक्मा बाक्त। १४ मिनू अम्मोनीपुकीम अराम डा मुर आन कली प्रोक्शो तशा, आं यो अबीशै आ डोंइती रे प्रोक्शा, आन सहर ओव्रमा बाक्त। मिनू योआब अम्मोनी नु लडाइ पचा प्रोंइशा, लेश्शा यरूसलेम जाक्माक्त।

१५ तन्न अरामी इस्राएली नु ब्रुशो तशा, लेंशा बुक्मा बाक्त। १६ हादादेजेरमी युफ्रेटीस खोला आ आइक्वी हांबु रे अरामी आन कली ब्रेथ सोइक्तीमी बाक्त। मिनू मेकोपुकी हादादेजेर आ लडाइ पाइब आन ठेयब मुर शोबाक आ हुकुममी हेलाम सहरम जाक्मा बाक्त। १७ मिनू दाऊदमी मेकोपुकी लडाइ पथ पिशो लोत्र नेना बाक्त। मिनू मेकोम रीब पा इस्राएल डा लडाइ पाइब नेल्ल आन कली खुप्शा यर्दन आइक्वी हांबु शोक्से बाक्त।

मिनु हेलाम सहरम जाकमा बाक्त। मेकेर अरामीपुकी दाऊद नु लडाइ पचा कली ठीक दुम्मा बाक्त। मिनु लडाइ पामे बाक्त।<sup>18</sup> तन्न इस्राएलीपुकीम मेको आन कली प्रोक्पदमे बाक्त। मेकेर दाऊदमी ७ सहे बगी डोइक्ब नु ४० हजार शारा डोइक्ब अरामी आन कली सदा बाक्त। लडाइ पाइब आन ठेयब मुर शोबाक कली बेक्चा डा पा गार सेला बाक्त। मिनु मेको लडाइ पतीकेमीन बेक्माक्त।<sup>19</sup> मिनु हादादेजेर कली वारच पाइब पिप नेल्लेमी इस्राएली नु ब्रुशो, दे तुइश्शा, इस्राएली नु गारचा गोव्रमे बाक्त। मिनु इस्राएली आन हुकुममी बाक्ने बिस्समा बाक्त। मेना रे अराम डा मुरपुकीम अम्मोनी आन कली लेंशा गेनायो वारच मपदमे बाक्त।

### दाऊदमी पाप पशो

11 नक बर्स जाक्मेनु, पिपपुकी लडाइ पथ गूमा बाक्त। दाऊदमी योआब, लडाइ पाइब आन ठेयब मुर नु इस्राएल डा लडाइ पाइब नेल्ल आन कली सोइक्तीमी बाक्त। मिनु मेकोपुकीम अम्मोन खतम पोक्गमे बाक्त। रब्बाह सहर कली पुम्दमे बाक्त। तन्न दाऊद चहिं यरूसलेम सहरमी बाक्माक्त। *इतिहास २०:१*<sup>२</sup> काबु नाक्ती नाक्नाक्दो दाऊद आ इप्तीक रे बोक्शा, खिं तार हिरसेनु, मेकोमी मीश मुर का चिक्शो तवा बाक्त। मेको थम दारशो बाक्माक्त। *मत्ती ५:२८-२९*<sup>३</sup> मेको सु बाक्म, दे हिल्लो पथ, मुर का सोइक्ता बाक्त। मिनु मेकोमी “मेको एलीआम आ तमी, हिती उरीयाह आ मीश बाथ्शेबा बाक्त” देमाक्त। *२सामुएल २३:३९*<sup>४</sup> मिनु दाऊदमे मेको कली ब्रथ सोइक्ता बाक्त। मिनु मेको जाक्माक्त। मिनु दाऊद मेको नु इम्माक्त। मेको मीश मुर मेना आ रां ब्रोल्शा चिक्शो बाक्माक्त। मिनु नोले बाथ्शेबा आ खिं लेम्माक्त। *प्रस्थान २०:१४; लेवी २०:१०; ब्यक्स्था २२:२२; लेवी १५:१९*<sup>५</sup> मिनु मेकोमी कोव्रज कुरा बाक्त “गो कोव्रज कुरशो दुस्ती” दे दाऊद कली लोव्र सोइक्ता बाक्त।

<sup>६</sup> मिनु दाऊदमी योआब कली “मेको आ वोंइश हिती उरीयाह कली आं बाक्तीक सोइक्तो” दे लोव्र कुरब सोइक्ता बाक्त। मिनु योआबमी मेको कली दाऊद आ बाक्तीक सोइक्ता बाक्त।<sup>७</sup> मिनु उरीयाह जाक्मेनु, दाऊदमी “लडाइ दोदेशो दुम्मे, योआब नु अरु लडाइ पाइबपुकी मार पामे?” दे हिल्लो पवा बाक्त।<sup>८</sup> मेको नोले दाऊदमी हिती उरीयाह कली “उइ इ खिं लशा नाइसो, इ खोइल चिक्सो” दे मदा बाक्त। मिनु मेको पिप आ खिं रे गूशा गाक्मेनु, पिपमी मेको आ नोले कोसेली सोइक्ता बाक्त।<sup>९</sup> तन्न उरीयाह उइ आ खिं मलथु, पिप आ ओव्रतीक लाप्चो आ नेक्था इम्माक्त। मेकेर आ प्रभु आ गेय पाइबपुकी यो इप्शो बाक्मा बाक्त।<sup>१०</sup> मिनु दाऊदमे उरीयाह उइ आ खिं मला देशो लोव्र नेना बाक्त। मिनु मेको कली “गे लाइश्शो लां गाक्शा जाक्शो बाक्नेवे। मारदे गे उइ इ खिं मलवे?” दे मदा बाक्त।<sup>११</sup> मिनु उरीयाहमी “परमप्रभु आ सन्दोस, इस्राएल नु यहूदा डा मुर नेल्ल, आं प्रभु योआब नु इन गेय पाइब नेल्ल दिंम डा बाक्तीकेम बाक्शो बाक्नीम। मिनु गो दोपा जचा तूचा नु आं मीश नु इप्चा कली खिं लाइक्नुडा? गे इन ब्रोंइशा बाक्शो खोदेशो पा, गो मो पने मचाप्नुड” देमाक्त।<sup>१२</sup> मिनु दाऊदमी उरीयाह कली “मो हना मुलाक्त का एक बाक्को। मिनु दीसा लेशशा सोइक्नन” देमाक्त। मोपतीके उरीयाह मेको नाक्ती यरूसलेम उइ बाक्माक्त।<sup>१३</sup> मिनु आ दीसा दाऊदमी मेको कली आ बाक्तीकेम जथ ब्रेत्ता बाक्त। मिनु मेको कली दुक्पदा बाक्त। तन्न नाक्दो मेको लाडगा गूशा आ प्रभु आ गेय पाइबपुकी नु आ ब्राख्येम इम्माक्त। तन्न मेको उइ आ खिं मलमाक्त।

<sup>१४</sup> आ दीसा दाऊदमी योआब कली चिठी का ब्रेक्शा, उरीयाह आ गुइमी सोइक्ता बाक्त।<sup>१५</sup> मेको चिठीम “तेकेर ठेयब लडाइ दुम्मे मेकेर उरीयाह कली सोइश्शा, गेपुकी चहिं नोले शोंइसीन। मिनु मेको बेक्ल” दे ब्रेक्ता बाक्त। *प्रस्थान २०:१३*<sup>१६</sup> योआब नु लडाइ पाइबपुकीमी सहर कली पुम्दमे बाक्त। मिनु मेकोमी उरीयाह कली थम ठेयब लडाइ दुम्तीकेम सोइक्ता बाक्त।<sup>१७</sup> मिनु सहर डा मुरपुकी फो फु गूशा योआब नु लडाइ पामे बाक्त। दाऊद आ मुरपुकी का निक्शी बेक्मा बाक्त। हिती उरीयाह यो साइक्चा पुंइसे बाक्त।<sup>१८</sup> मिनु योआबमी लडाइ डा लोव्र नेल्ल देशा, मुर का दाऊद आ बाक्तीकेम सोइक्ता बाक्त।<sup>१९</sup> योआबमी लोव्र कुरब मुर कली “गे

लडाइम मार मार दुम्मे, मेको लोव्र नेल्ल पिप कली शेंने थुमी नोले,<sup>२०</sup> पिप गाइश्शा ‘लडाइ पनीनु सहर आ नेक्था मारदे लनी? गारो तार रे आप्नीम, दे मतुइक्नीनी?’<sup>२१</sup> येरूब-बाल आ तौ अबीमेलेक कली सुम सदा? मीश मुर कामी थेबेस डा गारो रे यात तोक्शा साइश्शो बाक्ब। मारदे गे गारो आ नेक्था लनी?’ दैत हना, गे मेको कली ‘इन गेय पाइब हिती उरीयाह यो बेक्त’ मतो” दे मदा बाक्त। *न्यायाधीस ९:५३-५४*

<sup>२२</sup> मिनु मेको लोव्र कुरब मुर दाऊद आ बाक्तीक जाक्माक्त। मिनु योआब आ देशो खोदेशो पा लोव्र नेल्ल शोव्रडा बाक्त।<sup>२३</sup> मिनु मेको लोव्र चाक्ब मुरुमी दाऊद कली “मुरपुकी आंइ कली लडाइ तोचा कली बुक्तेक्म। मिनु फो फु गूशा दिंम आंइ कली लडाइ तोम्तेक्म। गोपुकीम मेको आन कली सहर आ लाप्चो सम्म खेदा पा लाइतक।<sup>२४</sup> मिनु ब्रा आप्बपुकीम इन गेय पाइब आंइ कली गारो तार रे ब्रा आप्तेक्म। मिनु इन मुर का निक्शी बेक्तेक्म। इन वाइल हिती उरीयाह यो बेक्त” देमाक्त।<sup>२५</sup> मिनु दाऊदमे मेको कली “गे योआब कली ‘गे मेको साइश्शो मुर आन पर्बम सुर्ता मपावो। मारदे हना तरवारम गेना हना यो मुर साइक्ब। गे सहर कली लडाइ तोस डा तोस बाक्शा, ग्रानीनी’ दे आ थुं बारपतीन” देमाक्त।

<sup>२६</sup> मिनु उरीयाह आ मीशेम आ वोंइश बेक्शो लोव्र नेंशा, मेको आ पर्बम रोंका पवा बाक्त।<sup>२७</sup> मिनु रोंका पतीक नाक्त नुम नोले दाऊदमे मुर सोइश्शा आ खिं चाक्गा बाक्त। मिनु मेको दाऊद आ मीश दुम्शा, तौ का थिमाक्त। तन्न दाऊद आ पशो परमप्रभु यावे आ डोंइती थम मरिश्शो बाक्माक्त।

### नाथान आ कथा

12 परमप्रभु यावेमी आ लोव्र पाइब नाथान कली दाऊद आ बाक्तीक सोइक्ता बाक्त। मिनु मेको दाऊद आ बाक्तीक जाक्शा, मेको कली “सहर कामी मुर निक्शी बाक्सा बाक्त। मुर का शोंप पाइश्शो नु का प्रुडग बाक्माक्त। *प्रस्थान २०:१७*<sup>२</sup> शोंप पाइश्शो मुर के शुश क्यारश भेडा नु बी ब्यफ बाक्मा बाक्त।<sup>३</sup> मेको प्रुडग मुर के पाठी का ला बाक्माक्त। मेको कली ग्याप्शो बाक्माक्त। मेको पाठी कली थुल्शा, आ आलपुकी नु कोल्पदा बाक्त। मिनु मेकोमी मेको आ भाग जशा तूशा बाक्बाक्माक्त। मेको आ थुकुमीन इप्बाक्माक्त। मिनु मेको मुरुमी मेको पाठी कली आ तमी खोदेशोन पाइक्बाक्माक्त।<sup>४</sup> काबु नाक्ती मेको शोंप पाइश्शो मुर आ खिंम पौना का जाक्माक्त। मेको शोंप पाइश्शो मुरुम आ पौना कली थुल्चा कली आ क्यारश भेडा रे मारेइ गेचा थुं मपवा बाक्त। तन्न मेको प्रुडग मुर आ पाठी चाक्शा आ पौना कली जचा ब्वचा थोव्रक सेला बाक्त” दे मदा बाक्त।<sup>५</sup> मिनु दाऊदमे मेको लोव्र नेंशा, मो पाइब मुर आ पर्बम थाम्पा गाइक्ता बाक्त। मिनु मेकोमी नाथान कली “परमप्रभु यावे ब्रोंइशा बाक्शो खोदेशो पा मेको मुर साइक्चा पुंइसीब।<sup>६</sup> मेकोम मोपा शिशी मकोइतीके मेको पाठी का के ४ ओटा पाठी गेचा माल्ब” देमाक्त। *प्रस्थान २१:३७*

<sup>७</sup> मिनु नाथानम दाऊद कली “मेको मुर गेन ननी। इस्राएली आन परमप्रभु यावेमी मार दैत देशा हना ‘गे इ कली तेल लुक्शा, इस्राएल डा पिप सेल्लन। सावल आ गुइ रे प्रोंइतन। *१राजा २०:४०*<sup>८</sup> गो इ कली इ होव्रप आ खिं नु आ मीशपुकी गेत्तन। गो इस्राएल नु यहूदा डा मुर इ कली गेत्तन। मोशोम मगाप्ते हना यो, गो अरु शुश गेन वा।<sup>९</sup> गे मारदे आं लोव्र मटिवी? मारदे आं डोंइती मरिश्शो पवी? गे हिती उरीयाह कली तरवारम क्योरतीवी। मिनु मेको आ मीश लाइश्शा, आ वोंइश कली अम्मोनी आन गुइम साइक्पाइक्तीवी। *२सामुएल ११:-; १राजा १५:५*<sup>१०</sup> मोपतीके इ खिं गेना हना यो तरवार रे नाइक्चा मताइब। मारदे हना गे आं लोव्र मटिथु, हिती उरीयाह आ मीश चाक्तीवी” दैत। *२सामुएल १३:२८-२९; २सामुएल १८:१४; १राजा २:२४-२५; २राजा २५:७*<sup>११</sup> परमप्रभु यावेमी ‘गे इ कली इ खिं रे श्येत दुम्पाइक्नुड। गो इ मीश आन कली इ डोंइती इ नेक्था डा मुर कली गेनुड। मिनु मेकोमी नाक्तीन मुर नेल्लेम तचा डा पा मेकोपुकी नु इक्ब। *२सामुएल १६:२२; अय्युब ३१:९-१०*<sup>१२</sup> मारदे हना गे मेको खुइश्शा पाप्तीवी। तन्न गो इस्राएली नेल्ल आन तचा डा पा नाक्तीन पाइनुड” देशो बाक्ब” दे नाथानमी देमाक्त।<sup>१३</sup> मिनु दाऊदमी नाथान कली “गे परमप्रभु यावे आ डोंइती पाप पाता” देमाक्त। मिनु नाथानमे मेको कली “परमप्रभु यावेमी इ पाप

क्यास्ताकव। गे मबेक्नेवे। २सामुएल २४:१०; भजन संग्रह ५१:३; इजीकीएल १८:२१-२३<sup>14</sup> तन्न गे एको पाप पा परमप्रभु यावे कली गाइक्पाइक्तीवी। मोपतीके इ थिशो आल चहिं बेक्ब” देमाक्त। २सामुएल ११:२७

<sup>15</sup> मिनु नाथान आ खिं लमाक्त। परमप्रभु यावेम उरीयाह आ मीश रे पा जरमेशो दाऊद आ आल कली रोइ पपदा बाक्त। <sup>16</sup> मोपतीके दाऊदम मेको आल आ परबम परमप्रभु कली पुना बाक्त। मेको मारेइ मजथु खिंडगा लशा खपीम गोल्शा नां सोंइदा बाक्त। <sup>17</sup> खिं डा खाल्पापुकीमी मेको कली “गे बोक्कीन” देमा बाक्त। तन्न मेको मबिस्से बाक्त। मिनु मेकोपुकी नु जने यो मबिस्से बाक्त। <sup>18</sup> मिनु ७ नाक्त नोले आल बेक्माक्त। मिनु दाऊद आ गेय पाइबपुकीमी “आल बेक्त” दे दाऊद कली देंचा हिंमा बाक्त। मारदे हना मेकोपुकीमी “आल सेस बाक्मेनु ला यो इं लोत्र मननें। मुल मेको कली ‘आल बेक्त’ दे दोपा देंचा? मेकोमी आंम आ कली मारेइ मरिश्शो पाइक्बा कों?” देमा बाक्त। <sup>19</sup> तन्न दाऊदम आ गेय पाइबपुकीमी शिप शिप पा देंशो लोत्र नेंशा, आल बेक्माक्त, दे तुइक्ता बाक्त। मिनु दाऊदमी आ गेय पाइब आन कली “आल बेक्मे” दे हिल्लो पामी बाक्त। मिनु मेकोपुकीमी “बेक्त” देमा बाक्त।

<sup>20</sup> मिनु दाऊद खप रे बोक्शा, चिक्सीशा, तेल खेक्सीशा, अर्को वा फेक्से बाक्त। मिनु परमप्रभु यावे आ बाक्तीक लशा, परमप्रभु यावे कली ठेयब सेला बाक्त। मिनु नोले खिं जाक्शा, जचा थोवक पुंइशा, जवा बाक्त।

<sup>21</sup> मिनु मेको आ गेय पाइबपुकीमी मेको कली “गे मार पनी? आल सेस बाक्म सम्म गे मेको आ परबम मारेइ मजथु डाक्शा बाक्तीनी। तन्न आल बेक्म नोले बोक्शा जाइतीनी” देमा बाक्त। <sup>22</sup> मिनु दाऊदमी “आल सेस बाक्म सम्म गो मारेइ मजथु डाक्शा बाक्ती। परमप्रभु यावेमी आं कली शिशी पा, आल ब्रोंइबा, कों? दे मिस्ताक्ड। <sup>23</sup> तन्न मुल मेको बेक्त। मारदे गो मारेइ मजथु बाक्नुडा? मार गो मेको कली लेशशा चाक्ने चाप्नुडा डा? गो मेको आ बाक्तीक लाइनुड। तन्न मेको आं बाक्तीक लेशशा मजाक्ब” देमाक्त।

<sup>24</sup> मिनु दाऊदमी आ मीश बाथ्शेबा कली लेम्दा बाक्त। मिनु मेको नु इम्माक्त। मिनु अर्को तौ का थिमाक्त। मेको आ नें सोलोमन वोदमे बाक्त। मिनु परमप्रभु यावेमी मेको कली दाक्ता बाक्त। <sup>25</sup> मिनु मेको आ नें येदीदीयाह वोइक्वा माल्ब, दे आ लोत्र पाइब नाथान रे पा दाऊद कली लोत्र सोइक्ता बाक्त। येदीदीयाह आ अर्थ चहिं “परमप्रभु यावे आ दाक्शो मुर” बाक्ब।

दाऊदम रब्बाह सहर ग्राशो

१इतिहास २०:१-३

<sup>26</sup> मेको नोले योआबमी लडाइ पा अम्मोनी आन पिप आ रब्बाह सहर, ग्रामाक्त। <sup>27</sup> मेकोमी “गो रब्बाहम लडाइ पा मेको शुश ब्वाक्कु बाक्शो सहर ग्राती। <sup>28</sup> गेमी लीशो मुर आन कली खुष्शा, मेको सहर कली लडाइ तोशा ग्राडीन। मो मपाइतीनी हना, गो आं के सेल्लुड। मिनु मेको सहर आं के दुम्ब” दे दाऊद कली लोत्र सोइक्ता बाक्त। <sup>29</sup> मोपतीके दाऊदम मुर नेल्ल आन कली खुप्तीमी बाक्त। मिनु रब्बाह सहर लमाक्त। मिनु लडाइ तोशा मेको आइक्के सेला बाक्त। <sup>30</sup> मेकोमी मिल्कोम आ पिया रे सिरपेच प्रुदा बाक्त। मेको टलेन्ट का सुन के बाक्माक्त। मेको तारी हीरा का यो क्येष्शो बाक्माक्त। मेको दाऊद कली गुक्मे बाक्त। मेकोम सहर रे शुश मार मार यो रोइश्शा चाक्गा बाक्त। टलेन्ट का ३४ किलो खोइ बाक्ब। <sup>31</sup> मेकोमी मेकेर डा मुर आन कली लाइश्शा आरा, खन्ती नु खामी गेय पपदा बाक्त। मिनु इंटा सेल्लिकेम गेय पपदा बाक्त। मेको अम्मोनी आन सहर नेल्लेम मोदेँशो पवा बाक्त। मिनु नोले दाऊद नु आ मुर नेल्ल यरूसलेम लेम्मा बाक्त।

अम्मोनमी मरिश्शो पशो

**13** मेको मो दुश्शो इक्का बर्स दुम्माक्त। मिनु दाऊद आ तौ अब्बालोम के थम दारशो समी का बाक्माक्त। मेको आ नें तामार बाक्माक्त। दाऊद आ अर्को तौ अम्मोनम मेको कली दाक्ता बाक्त।

२सामुएल ३:२-३<sup>2</sup> अम्मोन आ सान्मा आ तमी तामार नु दाक्मुतीके, आ थुंम थम मरिश्शो दुम्माक्त। मिनु मेकोमी दाक्तीके मेको रोइ पवा बाक्त। मारदे हना मेको कन्ने मीश आल बाक्तीके, मेकोम मारेइ मरिश्शो पने मचबा बाक्त। <sup>3</sup> तन्न अम्मोन आ वारच का बाक्माक्त। मेको आ नें योनादाब बाक्माक्त। मेको दाऊद आ लोक्ब शिमेआह आ तौ बाक्माक्त। मेको मिक्व सिल्ब मुर का बाक्माक्त। <sup>१सामुएल १७:१३</sup><sup>4</sup> मेकोम अम्मोन कली “ए पिप आ तौ, मारदे गे नाक्त किंत किंत मरिश्शो दुम्ना दुम्न लवे? मार दुमे आं कली देनो” दे मदा बाक्त। मिनु अम्मोनमी “गो आं लोक्ब अब्बालोम आ समी तामार कली दाक्नुड” देमाक्त। <sup>5</sup> मिनु योनादाबमी “रोइ पाता, देँखु पा इप्शा बाक्को। मिनु इ आफ इ कली कोव्रथ जाक्त हना, गे मेको कली ‘आं समी तामारम आं कली जचा थोवक सेल्शा गेयील। मेकोम जचा थोवक आं डॉइती सेलल। मिनु गो मेको आ सेल्शो कोव्रनुड। मिनु मेको आ गुइ रे जाइनुड” देनो” देमाक्त। <sup>6</sup> मोपतीके अम्मोन “रोइ पाता” देँखु पा इप्शा बाक्माक्त। मिनु पिप मेको कली कोव्रथ जाक्माक्त। मिनु अम्मोनमी पिप कली “आं समी तामारम आं डॉइती शोब्ले निक्शी चोशा गेयील। मिनु गो मेको आ गुइ रे जाइनुड” देमाक्त।

<sup>7</sup> मिनु दाऊदमी खिम लोत्र कुरब मुर का तामार आ बाक्तीक सोइक्ता बाक्त। मेकोमी “इ लोक्ब अम्मोन आ बाक्तीक लशा, मेको कली जचा थोवक सेल्शा गेवो” दे लोत्र पथ सोइक्ता बाक्त। <sup>8</sup> मिनु तामार आ लोक्ब अम्मोन आ खिं लमाक्त। मिनु मेको कली इप्शा बाक्शो थिदा बाक्त। मिनु तामारमी फस निशा, आ डॉइती शोब्ले चोशा गेवा बाक्त। <sup>9</sup> मिनु मेकोम तांइ शेशा अम्मोन आ बाक्तीक लशा, शोब्ले कुर पवा बाक्त। तन्न अम्मोन जने मबिस्से बाक्त। मिनु अम्मोनमी “नेल्ल आन कली लाडगा सोइक्तो” देमाक्त। मिनु मुर नेल्ल लमा बाक्त। <sup>10</sup> मिनु अम्मोनमी तामार कली “मेको जचा थोवक आं कोठाम पितो। मिनु गो इ गुइ रे जाइनुड” दे मदा बाक्त। मिनु तामारमी आ चोशो शोब्ले आ लोक्ब अम्मोन आ कोठाम लदा बाक्त। <sup>11</sup> मिनु मेकोम शोब्ले गेवानु, अम्मोनम मेको कली ग्याइश्शा “आं समी पिपो। गो नु इपो” देमाक्त। लेवी १८:९<sup>12</sup> तन्न तामारमी “ममाइ, आं लोक्ब, आं कली ओदेँशो मपने। इस्राएलम ओदेँशो गेय पचा मटुम्ब। ओदेँशो मरिश्शो गेय मपने। <sup>13</sup> गो आं मुनेम आं कुल गुंइने मचाप्नुड। गे यो इस्राएलम काइ मरिश्शो मुर दुम्नीनी। आं परबम पिप नु लोत्र पने। गो नु ग्युबे पचा कली पिप बिब्ब” देमाक्त। <sup>14</sup> तन्न मेकोम तामार आ लोत्र का यो मनेना बाक्त। मिनु मेको कली बोल पा ग्याइश्शा, मेको नु इम्माक्त।

<sup>15</sup> मिनु नोले अम्मोनम मेको कली मदाक्ता बाक्त। अम्मोन आ डॉइती डा दाक्शो क्येडा नोले डा ग्रांरा दिशो शुश बाक्माक्त। मिनु अम्मोनम मेको कली “बोक्शा लावो” दे मदा बाक्त। <sup>16</sup> मिनु तामारमी “ममाइ, आं लोक्ब, इ पशो गेय क्येडा यो आं कली गुंइशा सोइक्वा थम मरिश्शो बाक्ब” देमाक्त। तन्न अम्मोनम मेको आ लोत्र मनेना बाक्त। <sup>17</sup> मिनु अम्मोनम आ गेय पाइब वोंइश आल कली ब्रेश्शा “एको मीश मुर कली आं डॉइती रे गुंइदो। एको कली गुंइशा आग्लो पतो” देमाक्त। <sup>18</sup> तामारमी कन्ने मीश आल पिप आ तमीमी फेक्तीक लाइश्शो वा फेक्शो बाक्माक्त। मिनु अम्मोन आ गेय पाइब वोंइश आलम तामार कली गुंइशा, आ नोले लाप्चोम आग्लो पदा बाक्त। <sup>19</sup> मिनु तामारमी आ पियाम पुलु फुंइसीशा, आ लाइश्शो वा खाक्गा बाक्त। मिनु आ पियाम गुइ वोइश्शा ठेयब सेंदा पा डाक्ना डाक्न लमाक्त।

<sup>20</sup> मेको आ लोक्ब अब्बालोमम “मार, इ लोक्ब अम्मोन गे नु इम्मे? मुल आं समी सिक्सी पा बाक्को। मेको इ लोक्ब बाक्ब। सुर्ता मपावो” देमाक्त। मोपतीके तामार आ लोक्ब अब्बालोम आ खिमी प्रोंइचा पुंइसीशो मीश मुर खोदेँशो पा बाक्माक्त। <sup>21</sup> मिनु पिप दाऊदम मेको लोत्र नेंशा थाम्पा गाइक्ता बाक्त। तन्न अम्मोन कली सजाइ मगेवा बाक्त। मारदे हना आ दाक्शो डॉइती डा तौ बाक्माक्त। <sup>22</sup> अब्बालोमम अम्मोन कली रिश्शो मरिश्शो मारेइ लोत्र मपवा बाक्त। आ समी तामार कली बिथोलो सेल्लिके अब्बालोमम अम्मोन कली काइ मदाक्ता बाक्त।

## अब्बालोममी क्येक्क लेशो

23 बर्स निक्शी नोले अब्बालोमम आ भेडा आन ऊन प्रेक्चा कली मुर आन कली ब्रेत्ता बाक्त। मेको एफ्राइम आ नेक्था बाल-हजोरम बाक्माक्त। मिनु मेको भोजमी पिप आ तौ नेल्ल आन कली ब्रेत्तीमी बाक्त। 24 अब्बालोमम पिप आ बाक्तीक जाक्शा “गो, इन गेय पाइबम, ऊन प्रेक्तीक चाड मानेशो बाक्नुड। पिप नु इन गेय पाइबपुकी यो गो नु गाक्कीन” देमाक्त। 25 तन्न पिपमी “ममाइ, आं तौ, गो नेल्ल जाक्शा इ कली श्येत मगेनीकी” देमाक्त। अब्बालोमम “जाक्कीन कि जाक्कीन” देमाक्त। मिनु पिप मबिस्से बाक्त। तन्न आसीक गेशा सोइक्ता बाक्त। 26 मिनु अब्बालोमम “गे जाक्ने मचाप्पीनी हना यो, आं लोकब अम्नोन कली गो नु लचा गेनीनी कौ?” देमाक्त। मिनु पिपमी “मारदे मेको गे नु लाइबा?” दे हिल्लो पवा बाक्त। 27 तन्न दाऊदम अम्नोन नु अरु आ तौ मसोइक्ता सम्म अब्बालोमम देस डा देस पवा बाक्त। मिनु अब्बालोमम पिप आन कली गारचा डा ठेयब भोज सेला बाक्त। 28 मेकोम आ गेय पाइब आन कली “रिम्शा बाक्कीन। अम्नोन अडगुर शांबुम दुक्त हना, गो ‘मेको कली सतीन’ देनुड। मिनु गे मेको कली सतीन। मारेइ हिंचा ममाल्नीनी। एको आं हुकुम बाक्ब। महिंथु बाक्कीन” दे माइक्मी बाक्त। *लेवी २०:१७* 29 मिनु अब्बालोम आ गेय पाइबपुकीम आ देशो खोदेशो पा अम्नोन कली पामे बाक्त। मिनु पिप आ तौ नेल्ल आन आन खच्चर डोइश्शा डांडा रे खिं प्रोक्मा बाक्त।

## अब्बालोम प्रोक्शो

30 मेकोपुकी लांम बाक्न बाक्ना पिप कली “अब्बालोमम पिप आ तौ नेल्ल आन कली साइक्तु। सुइ मब्रॉइम” देशो लोत्र चाक्दीत्मे बाक्त। 31 मिनु पिप बोक्शा आ वा खाक्मा बाक्त। मिनु खपीम निस्से बाक्त। मेको आ एर ओंथ बाक्ब आ गेय पाइब नेल्लेमी यो आन वा खाक्मामे बाक्त। 32 मिनु दाऊद आ लोकब शिमेआह आ तौ योनादाबम “आं प्रभु, मेकोमी पिप आ तौ नेल्ल साइक्तु, दे ममिम्तीन। अम्नोन कली ला साइश्शो बाक्ब। अम्नोनम तामार कली बिथोलो सेला नाक्त रे अब्बालोम आ कुल राव किक्शो तांइसीशो बाक्ब। 33 आं प्रभु, पिप आ तौ नेल्ल आन कली साइक्तु देशो जोल लोत्र मनेनीन। अम्नोन ला साइक्चा पुंइसाक्व” देमाक्त।

34 मिनु अब्बालोम प्रोक्शा गाक्माक्त। मेना कोत्रब मुरुमी इर गे कोत्रडानु, होरोनाइम डांडा रे पा मुर आन हुल यिंशो तवा बाक्त। 35 मिनु योनादाबम पिप कली “गो इन गेय पाइब, आं देशो खोदेशो पा पिप आ तौपुकी यिना यिन बाक्नीम” देमाक्त। 36 मेकोम लोत्र पने थुमानु, पिप आ तौपुकी खिंडगा ओत्रशा ठेयब सेंदा पा डाक्मा बाक्त। पिप नु आ गेय पाइब मुरपुकी यो हुइ हुइ पा डाक्मा बाक्त।

37 तन्न अब्बालोम प्रोक्शा गेशुर डा पिप अम्मीहुद आ तौ तल्लै आ बाक्तीक लशा बाक्माक्त। दाऊद आ तौ आ पर्वम शुश नाक्त सम्म रौंका पवा बाक्त। 38 अब्बालोम गेशुरम प्रोक्म रे बर्स सां सम्म मेक उइ बाक्माक्त। 39 अम्नोन बेक्शो शुश दुम नोले, पिपमी आ थुं अब्बालोम गे हिरदा बाक्त। *२सामुएल ३:३; २सामुएल १४:२३; यहोसु १३:११*

## अब्बालोम कली लेशा चाक्शो

14 मिनु सेरूयाह आ तौ योआबम पिप आ थुंम अब्बालोम कली दाक्चा गोप्तु, दे तुइक्ता बाक्त। 2 मिनु योआबम मुर का कली तेकोहा सहरम सोइश्शा जोक्ब तुइक्ब मीश मुर का कली चाक्पाइक्मी बाक्त। योआबम मेको मीश मुर कली “रौंका पशो मीश मुर खोदेशो पखु पावो। रौंका पतीक वा फेक्सो। पियाम तेल मखेक्सो। शुश नाक्त रे बेक्शो मुर आ पर्वम रौंका पशो मीश मुर खोदेशो पखु पावो। 3 मिनु पिप आ बाक्तीक लशा, आं शेशो लोत्र देनो” दे मदा बाक्त। मिनु मार देंचा माल्बा, योआबम मेको कली शेंदा बाक्त।

4 मिनु तेकोहा सहर डा मीश मुर पिप आ बाक्तीक जाक्शा, खप सम्म बाप्शा सेउ पवा बाक्त। मिनु डाक्ना डाक्न “पिप वारच पाइय्नीनी” देमाक्त।

5 मिनु पिपमी मेको कली “इ कली मार श्येत दुम्मे?” दे मदा बाक्त। मिनु मेकोमी “गो वौइश बेक्शो मीश मुर का नड। आं वौइश बेक्त। 6 मेको इन वाइल आ तौ निक्शी बाक्ताक्स। मेको निक्शी दिंमम राम्शी पाम्से बाक्त। मेको आस कली फ्राब सुइ मबाक्मा बाक्त। मिनु काम आ लोकब कली तुष्ठा सदा बाक्त। 7 मुल आ थर डा मुर नेल्लेमी, इन वाइलीम कली ‘आ लोकब साइक्ब कली आंइ गुइम गेने। मिनु गो मेको कली साइक्नीकी। मारदे हना आ लोकब कली साइक्तु। गो इ अडस ताइब सुइ मबाक्त हना यो, गो मेको कली साइक्नीक’ देतेक्म। मेकोपुकीम मो पाम्तेक्म हना, आं लीशो मी यो काप्पीम। मिनु आं वौइश आ नें नु चच युइ यो रागी रे क्याम्सीनीम” देमाक्त। *ब्यवस्था १९:११-१३* 8 मिनु पिपमी मेको मीश मुर कली “इ खिं लावो। इ निसाफ गो कोत्रनुड” देमाक्त। 9 मिनु मेको तेकोहा सहर डा मीश मुरुमी पिप कली “आं प्रभु पिप, मेको दोस गो नु आं आफ आ खिं कली दुम्त। पिप नु इन राज्य दोस मतवल” देमाक्त। 10 मिनु पिपमी “मुल यो सुइम इ कली मारेइ देतेक्म हना, मेको आन कली आं बाक्तीक चाक्को। मिनु मेकोपुकीम इ कली लेंशा श्येत मगेनीम” दे मदा बाक्त। 11 मिनु मेको मीश मुरुमी “पिप, गे परमप्रभु यावे, इन परमप्रभु कली मिम्शा गेय पने। मिनु हुश खाक्श पोक्चा नांइसेक्ल। मिनु आं तौ साइक्चा मपुंइसीब” देमाक्त। मिनु पिपमी “परमप्रभु यावे ब्रॉइशो खोदेशो पा इ तौ के चां का यो महम्ब” देमाक्त। *गन्ती ३५:१९-२१*

12 मिनु मेको मीश मुरुमी “आं प्रभु पिप, गो इन वाइलीममी मुल यो लोत्र का देंचा ताइक्नुडा कौ?” देमाक्त। मिनु पिपमी “देनो” देमाक्त। 13 मिनु मेको मीश मुरुमी “गे परमप्रभु आ मुर आन कली मारदे ओदेशो पचा मिम्तीनी? गे मोदेशो पाइतीनी हना, गे दोसी खोदेशो दुम्नीनी। गे रागी रे गुंइशा सोइश्शो मुर कली लेंशा जाक्चा गेने मबिस्सीनी। 14 गो नेल्ल बेक्चा माल्नय। गो खपीम क्युष्ठा हुइक्ने मचाप्चा डा ब्वाक्कु खोदेशो बाक्नय। तन्न परमप्रभुमी मुर कली मखेरब। मेकोमी आ डोंइती चाक्चा कली मिम्ना मिम्न बाक्ब। *इजीकीएल १८:२३* 15 गो, इन वाइलीम, एको लोत्र आं प्रभु पिप, इन कली देंच जाक्ती। मारदे हना मुरपुकीम आं कली हिंच कौइताक्वीमी। मिनु गो पिप नु लोत्र पाइनुड। मेकोमी आ वाइलीम कली आ पुंइशो गेबा कौ? 16 मिनु पिपमी आ गेय पाइब, आं लोत्र नेंशा, गो नु आं तौ आंस कली श्येत गेब मुर रे प्रॉइबा कौ, देंती। मारदे हना मेको मुरपुकीमी आंस कली परमप्रभु आ गेशो रू रे क्याम्चा माल्तेक्म। 17 मिनु इन वाइलीम, आं प्रभु, आं पिप, आ लोत्रम आं थुं नाइक्चा गेब। मारदे हना गो, आं प्रभु पिप, परमप्रभु आ स्वर्ग डा गेय पाइब खोदेशो बाक्नीनी। रिम्शो नु मरिम्शो तिल्ल बाक्नीनी। परमप्रभु यावे, इन परमप्रभु गे नु बाक्ब” देमाक्त। *२सामुएल १९:२८; १सामुएल २९:९* 18 मिनु पिपमी मेको मीश मुर कली “आं डोंइती मारेइ लोत्र मखुइक्तो, इ कली लोत्र का हिल्लो पाइक्नुड” देमाक्त। मिनु मीश मुरुमी “आं प्रभु पिप, देनीन” देमाक्त। 19 मिनु पिपमी “मार, एको नेल्ल योआब आ देशो बाक्मे?” देमाक्त। मिनु मेको मीश मुरुमी “इन ब्रॉइशा बाक्शो खोदेशो पा, आं प्रभु पिप, गे मारेइ लोत्र हिल्लो पनीनु, लोत्र लेक्ब के ग्युरा पेरा लतीक मबाक्ब। मारदे हना इन गेय पाइब योआबम आं कली मोदेशो लोत्र पचा शेंशा सोइक्ताक्वी। 20 योआबमी इन थुं डा मिम्शो गेय फाइक्चा कली मोदेशो पपाइक्ती। तन्न गे, आं प्रभु, परमप्रभु आ स्वर्ग डा गेय पाइब खोदेशो पा रुप्तीक थुं पाइश्शो बाक्नीनी। रागीम मार दुम्शो बाक्बा, मेको नेल्ल तुइक्नीनी” देमाक्त। *२सामुएल १४:१७*

21 मिनु पिपमी योआब कली “दुम्ब, गो एको लोत्र बिस्साक्वी। लशा, मेको टिटा अब्बालोम कली लेशा चाक्कीन” देमाक्त। 22 मिनु योआबमी आ कुल खप सम्म बाप्शा, सेउ पवा बाक्त। मेकोमी पिप कली “परमप्रभु यावेमी इन कली आसीक गेवल। मुलाक्ती गो आं प्रभु, पिप इन डोंइती शिशी ताता, दे तुइक्ताक्ड। मारदे हना गे आं पुंइशो गेतीनी” देमाक्त। 23 मिनु योआब रीब पा गेशुर लशा, अब्बालोम कली यरूसलेमम चाक्मा बाक्त। *२सामुएल १३:३७* 24 तन्न पिपमी “मेको आ खिमीन बाक्ल। आं डोंइती जाक्चा मदुम्ब” देमाक्त। मोपतीके अब्बालोम आ खिमीन बाक्शा, पिप आ डोंइती मजाक्माक्त।

25 इस्त्राएल नेल्लेमी अब्बालोम खोदेशो दारशो सुइ मबाक्मा बाक्त। आ पिया रे खोइल सम्म मेको के मारेइ मरिम्शो मदुम्शो मबाक्माक्त। 26 मेकोम



बर्स बर्सम आ चां खोइक्बाक्माक्त। मारदे हना हेल्बाक्माक्त। मिनु मेको आ चां पिप आ नाक्तीकेम नाक्शोनु, सहे निक्शी शेकेल डा दुम्बाक्त। २०० शेकेल २ किलो ३०० ग्राम खोदेशो बाक्ब। २७ अब्बालोम के तौ सां नु तमी का बाक्मा बाक्त। आ तमी आ नें तामार बाक्माक्त। मेको थाम्पा दारशो मीश मुर बाक्माक्त।

२८ मिनु अब्बालोम बर्स निक्शी सम्म यरूसलेमम बाक्माक्त। मेको पिप आ डोंइती मजाक्थु बाक्माक्त। २९ मिनु अब्बालोममी पिप कली गुम्चा कली योआब कली लोव सोइक्ता बाक्त। तन्न योआब जाक्ने मबिस्से बाक्त। लेंशा ब्रथ सोइक्तानु यो, जाक्ने मबिस्से बाक्त। ३० मिनु अब्बालोमम आ गेय पाइब आन कली “योआब आ रू का आं रू आ नेक्था बाक्ब। मेको के क्योव्रज वाशो बाक्ब, दे गे तुइक्नीनी। मेकेर मी सुइक्तीन” दे माइक्मी बाक्त। मोपतीके अब्बालोम आ गेय पाइबपुकीम मेकेर मी सुइक्तमे बाक्त। ३१ मिनु योआब रीब पा अब्बालोम आ खिं लशा, मेको कली “मारदे इन गेय पाइबपुकीम आं रूम मी सुइक्तमे?” दे हिल्लो पवा बाक्त। ३२ मिनु अब्बालोममी योआब कली “गो इन कली ब्रथ सोइक्ताक्ड। गे आं पर्बम पिप कली लोव लाइक्नीनी कों, दे मिम्ताक्ड। गे पिप कली ‘गो मारदे गेशुर रे जाक्चा माल्डा? गो मेक उइ बाक्शो नड हना, रिम्शो दुम वा’ देंचा कली ब्रेथ सोइक्ताक्ड। गो पिप आ डोंइती लचा तडल। गो मारदे मरिम्शो पशो बाक्ती हना, दोस ताइब बाक्ती हना, साइय्यील” देंमाक्त। ३३ मिनु नोले योआब पिप आ बाक्तीक लशा, अब्बालोम आ लोव नेंपदा बाक्त। मिनु पिपमी अब्बालोम कली ब्रेथ सोइक्ता बाक्त। मिनु मेको पिप आ डोंइती जाक्शा खप सम्म बाप्शा, सेउ पवा बाक्त। मिनु पिपमी अब्बालोम कली पुक्पु पदा बाक्त।

#### अब्बालोम पिप दुम्चा माल्शो

15 मिनु नोले अब्बालोमम बग्गी का, शारा नु आ डोंइडोंइती दोरचा कली ५० जना मुर आंम कली वोदा बाक्त। १राजा १:५

२ अब्बालोम सुनी कना बोक्शा, सहर ओव्रतीक ठेयब लाप्चोमी बाक्बाक्माक्त। मिनु मुरपुकी पिप कली निसाफ पुंइथ जाक्बाक्तेक्म। अब्बालोममी मेको आन कली का का पा “तेको सहर रे जाक्शो नवे” देंबाक्माक्त। मिनु मेकोमी “इन गेय पाइब इस्राएल डा एको थर रे जाक्शो नड” देंबाक्मा बाक्त। ३ मिनु अब्बालोमम मेको कली “इ लोव ठीक बाक्ब। तन्न पिपमी इ कली ठीक निसाफ पा मनेंपाइक्ब” देंबाक्माक्त। ४ मिनु नोले अब्बालोममी “गो एको रागी डा निसाफ पाइब दुम्शो नड हना, सु सु कली निसाफ माल्दा, गो मेको नेल्ल आन कली निसाफ गेड वा” देंबाक्माक्त। ५ सुइ मुर मेको कली सेउ पथ जाक्मेनु, मेको कली आ गुइ हाम्शा मुप्शा, पुक्पु पाइक्बाक्माक्त। ६ अब्बालोममी पिप आ निसाफ पतीकेम इस्राएली सु सु जाक्बाक्मा, मेको आन कली मोपा आन थुं खुइ पाइबाक्माक्त।

७ मिनु ४ बर्स नोले अब्बालोमम पिप कली “गे आं कली हेब्रोन लचा गेयीनी। गो परमप्रभु यावे कली पशो कबल खाप्चा दाक्नुड। ८ मारदे हना गो, इन गेय पाइबम अराम डा गेशुरम बाक्डानु, कबल का पाता। गो मार कबल पाता देंशा हना, ‘परमप्रभु यावे, गे आं कली थमा पा यरूसलेमम लेश्शा चाक्ती हना, गो हेब्रोनम परमप्रभु यावे, इन कली ठेयब सेल्नुड’ दे कबल पाता” देंमाक्त। उत्पत्ती २८:२०-२१; २सामुएल १३:३७-३८ ९ मिनु पिपमी “गे इ थुं नाइश्शा लावो” देंमाक्त। मिनु मेको बोक्शा, हेब्रोन लमाक्त।

१० मिनु अब्बालोमम इस्राएल डा थर नेल्ल आन कली सुइम मतुइक्वा डा पा, लोव कुरब सोइश्शा “तुराही ग्रीशो नेंनी चोटी, गेपुकीम ‘अब्बालोम हेब्रोनम पिप दुम्’ देंनीन” देंपाइक्मी बाक्त। ११ यरूसलेम डा सहे निक्शी जना मुर अब्बालोम आ नोले खोइक्ब दुम्मा बाक्त। मेको आन कली अब्बालोमम ब्रेश्शो बाक्माक्त। तन्न मेकोपुकी मारदे मतुइक्थु, लशो बाक्मा बाक्त। १२ अब्बालोमम आ क्योरशा चढ़ेतीकेम चढ़ेवानु, गिलीह सहर डा अहीथोफेल कली ब्रेथ सोइक्ता बाक्त। मेको अहीथोफेल चहिं गिलीह सहर डा दाऊद कली अर्ती गेब मुर बाक्माक्त। मोपा पिप कली मरिम्शो गेय पना पन लशा अब्बालोम आ मुर शुश दुम्ना दुम्न लमा बाक्त। २सामुएल २३:३४; यहोसु १५:५१

#### दाऊद प्रोक्शो

१३ मिनु लोव कुरब मुर का दाऊद आ बाक्तीकेम जाक्शा “इस्राएल डा मुरपुकी अब्बालोम आ नोले खोइक्तेक्म” देंमाक्त। १४ मिनु दाऊदम यरूसलेमम आं नु बाक्ब आ ठेयब गेय पाइब आन कली “बोक्कीन, गोपुकी रीब पा प्रोक्चा माल्नय। मो मपाइतय हना, गो सुइ अब्बालोम आ गुइ रे ब्रोंइचा मताइनय। रीब पा पने, मो मदुम्त हना, मेकोमी इं क्येडा लाक्शा, इं कली शुश श्येत गेशा, सहर कली लडाइ तोइब” देंमाक्त। १५ मिनु पिप आ ठेयब गेय पाइबपुकीमी “गे आंइ प्रभु पिपमी, मार देंनी, गो इन गेय पाइबम मेको पाइनीकी” देंमा बाक्त। १६ मिनु पिपमी आ खिं डा सुइ सुइ आन कली लाइश्शा गाक्माक्त। मेकोमी १० जना नोले चाक्शो मीश आन कली खिं कोव्रचा कली प्रोंइशा वोइक्मी बाक्त। १७ मिनु पिप गाक्माक्त। मिनु मुर नेल्ल आ नोले खोदमे बाक्त। मिनु नोले डा खिंम चहिं दिक्मा बाक्त। १८ मिनु पिप आ ठेयब गेय पाइब, केरेथी नु पेलेथी नेल्ल, गाथ सहर रे जाक्शो ६ सहे गित्त आ खिं डा नु मुर नेल्ल पिप आ डोंइती लाक्गमे बाक्त। २सामुएल ८:१८; १सामुएल २७:२

१९ मिनु पिपमी गित्त आ खिं डा इत्ताइ कली “मारदे गे यो गो नु पिवे? लेश्शा लशा, पिप नु बाक्को। मारदे हना गे अर्को रागी डा मुर नवे। गे इ रागी रे गुंइचा पुंइसीशो मुर नवे। २० गे सिनाक्त साबेर नाक्त ला जाक्शो मुर नवे। गो मुलाक्त इ कली दोपा गो नु गाक्को देंनुडा? गो ते लाइक्नुडा आंमान मतुइक्नुड। गे खिं लावो। मिनु इ मुर आन कली यो लाइक्मी। परमप्रभु यावेमी इ कली आ गेना हना यो दाक्शा मप्रोंइतीके कोंइदल” देंमाक्त। २१ तन्न इत्ताइमी पिप कली “परमप्रभु यावे ब्रोंइशा बाक्शो खोदेशो पा नु आं प्रभु पिप इन ब्रोंइशा बाक्शो खोदेशो पा, गे ते लाइतीनी हना यो, गो मेक लाइक्नुड। ब्रोंइतीनी हना यो, बेक्तीनी हना यो, गो इन गेय पाइब, इन नु बाक्नुड” दे मदा बाक्त। २२ मिनु दाऊदमी इत्ताइ कली “लो, दुम्ब गाक्को” दे मदा बाक्त। मोपा गित्त आ खिं डा इत्ताइ, आ मुर नेल्ल नु आ आल नेल्ल नु गाक्मा बाक्त। २३ पिप मोपा गाक्मेनु लांम बाक्ब मुर नेल्ल डाक्मा बाक्त। पिप किद्रोन खोला शोक्शा गोरशो रागी गे लमा बाक्त।

२४ मिनु अबीयाथार, सादोक नु लेवी नेल्ल परमप्रभु आ कबल पशो सन्दोस कुरशा, जाक्मा बाक्त। मेकोपुकी चहिं सहर डा मुर नेल्ल गूशा मगाक्मा सम्म सन्दोस नाइश्शा रिम्शा बाक्मा बाक्त। २५ मिनु पिपमी सादोक कली “परमप्रभु आ सन्दोस सहर लेश्शा लतीन। परमप्रभु यावेमी आं कली शिशी पाइक्ती हना, आं कली लेश्शा जाक्चा गेब। मिनु सन्दोस नु मेको वोइक्तीके लेंशा कोव्रचा गेब। २६ तन्न परमप्रभु यावेमी ‘गो इ कली शिशी मपाइनुड’ देंत हना, गो एक उइ बाक्नुड। मेकोम आं कली आ दाक्शो पवल। २७ कोव्रडीन, गे नु इ तौ अहीमाज नु अबीयाथार नु आ तौ योनाथन एको ठिटा निक्शी आस कली लाइश्शा, सहर लेतीन। १राजा १:४२ २८ गो गोरशो रागी आ सुरमी इन लोव मनेंनु सम्म रिम्शा बाक्नुड। एको लोव मप्रेंदीन” देंमाक्त। २९ मिनु सादोक नु अबीयाथारम परमप्रभु आ सन्दोस यरूसलेम लेश्शा लदसे बाक्त। मिनु मेको मेक उइ बाक्सा बाक्त।

३० तन्न दाऊद जैतून डांडा डा ग्येथ लांमी डाक्ना डाक्न लमाक्त। मेकोम आ पिपा सुम्शो बाक्माक्त। श्येथ खोइल गाक्शो बाक्माक्त। मेको नु गाक्ब नेल्ल यो आन पिपा सुम्शा डाक्ना डाक्न गाक्मा बाक्त। ३१ मिनु दाऊद कली अहीथोफेल मरिम्शो पाइब आन दातेम अब्बालोम नु बाक्त देंशो लोव नेंपदमे बाक्त। मिनु दाऊदम “परमप्रभु यावे अहीथोफेल आ अर्ती शोर गाक्शो सेलीन” दे पुंन बाक्त। २सामुएल १७:१४ ३२ मिनु दाऊद परमप्रभु कली ठेयब सेल्तीक डांडा तार जाक्माक्त। मेना अरकी आ खिं डा हुशाइ आ वा खाक्शा, आ पिपाम खप फुंइसीशा दाऊद कली गुम्थ जाक्माक्त। १राजा ३:२; यहोसु १६:२ ३३ दाऊदम मेको कली “गे गो नु गाक्ते हना, आं कली श्येत ला दुम्ब। ३४ तन्न गे सहर लेश्शा लशा अब्बालोम कली ‘गो इन आफ आ गेय पशो खोदेशो पा इन गेय पाइब दुम्नुड’ देंते हना, मिनु मेक बाक्ते हना, अहीथोफेल आ अर्ती खतम सेल्चा कली आं कली वारच पाइनेवे। २सामुएल १७:७ ३५ चढ़ेब सादोक नु अबीयाथार गे नु मेक बाक्नीस। पिप आ खिंम मार मार लोव नेंनी, मेको

नेल्ल मेको आस कली शेंदीम्सी।<sup>36</sup> मेको निक्शी नु आस तौ मेको नु बाक्नीस। सादोक आ तौ अहीमाज नु अबीयाथार आ तौ योनाथन रे इन नेंशो लोव्र नेल्ल आं कली नैपाइक्ने चाप्नीनी” देमाक्त। २सामुएल १७:१५-२१<sup>37</sup> मिनु दाऊद आ वारच हुशाइ, अब्बालोम यरूसलेमम ओव्रन ओव्रना, सहर जाक्दीम्माक्त। १इतिहास २७:३३

सीबामी दाऊद कली गुम्शो

16 दाऊद डांडा तार रे इक्का आइक्ची जाक्दीम्मेनु, मेफी-बोशेथ आ गेय पाइब सीबामी दाऊद कली गुमा बाक्त। मेकोम लगम पाइश्शो गधा निक्शीम सहे निक्शी शोब्ले, सहे का मुठा सोव्रशो अडगुर, सहे का फल फुल नु मसक का अडगुर शांबु कुरपाइश्शा, चाक्का बाक्त। २सामुएल ७:२<sup>2</sup> पिपमी सीबा कली “गे एको नेल्ल मारदे चाक्की?” दे हिल्लो पवा बाक्त। मिनु सीबाम “एको गधा पिप आ खिं डा मुर डोइक्चा कली बाक्नीस। शोब्ले नु फल फुल चहिं ठिटा आन कली जचा कली बाक्ब। अडगुर शांबु गोरशो रागीम दशा थशो आन कली तूचा कली बाक्ब” देमाक्त।<sup>3</sup> मिनु पिपमी “इ होव्रप आ तौ ते बाक्म” दे हिल्लो पवा बाक्त। मिनु सीबाम “मेको यरूसलेममीन बाक्शो बाक्ब। मेकोमी ‘मुलाक्ती इस्राएलीपुकीम आ बाजे आ राज्य लेश्शा गेनीम’ दे रिश्शा बाक्शो बाक्ब” देमाक्त। २सामुएल १९:२५-३१<sup>4</sup> मिनु पिपमी सीबा कली “मुल मेफी-बोशेथ आ मारेइ मारेइ इ के दुम्ब” दे मदा बाक्त। मिनु सीबामी “आं प्रभु पिप, गो इन वाइल का नड। इन डोंइती शिशी तडल” देमाक्त। १राजा २:८-९; प्रस्थान २२:२७

शिमेइम दाऊद कली सराप पशो

<sup>5</sup> मिनु पिप दाऊद बाहुरीम सहरम जाक्माक्त। मिनु मेकेर सावल आ खिं डा मुर का, गेरा आ तौ शिमेइ गूशा दाऊद कली सराप चीले पना पन पिमाक्त।<sup>6</sup> मेकोम पिप दाऊद नु आ गेय पाइब नेल्ल, लडाइ पाइब नेल्ल नु अरु मुर नेल्ल आन कली एर ओथ नेल्ल फुल्लु क्रोम्दीमी बाक्त। दाऊद आ ग्युरा नु पेरा आ लडाइ पाइब नु आ मुर बाक्मा बाक्त।<sup>7</sup> शिमेइमी “लावो, लावो, ए मुर साइक्ब नु मरिश्शो पाइब” दे ग्रीशा, सराप पवा बाक्त।<sup>8</sup> मिनु “परमप्रभु यावेम सावल आ खिं डा मुर आन हुश आ क्येक्क लेत्ताक्वे। गे मेको आ पा डा सासन पाप्तीवी। मिनु परमप्रभु यावेमी एको राज्य इ तौ अब्बालोम कली गेफ्तु। मुल गे खतम दुम्ते श्येत जाइनेवे। मारदे हना गे हुश खाक्श पोक्ब बाक्नेवे” देमाक्त।

<sup>9</sup> मिनु सेरूयाह आ तौ अबीशैमी पिप कली “मारदे मेरे बेक्शो कुचुममी आं प्रभु, पिप इन कली सराप पवा? गो आइक्ची हांबु लशा मेरे आ पिया खोइक्नुड” देमाक्त। १सामुएल २६:८<sup>10</sup> तन्न पिपमी “ए सेरूयाह आ तौ, गे गो नु मगारचा डा बाक्नीसी। परमप्रभु यावेमी मेको कली ‘दाऊद कली सराप पावो’ दे सोइश्शो बाक्त हना, सुम तेक्ने चाप्पा डा?” देमाक्त। २सामुएल १९:१७-२४<sup>11</sup> मिनु दाऊदम अबीशै नु आ गेय पाइब नेल्ल आन कली “आं तौमी आं कली साइक्चा माल्ब हना, मेरे बेन्यामीन आ थर डा मुर के मार लोव्र पचा डा? मेरे कली प्रोनीन। मेरेमी सराप पवल। मारदे हना परमप्रभु यावेमीन मेरे कली सराप पचा गेशो बाक्म माइ।<sup>12</sup> परमप्रभु यावेम मेरे मुलाक्त डा सराप आ पा डा आं श्येत तशा आं कली रिश्शो पाइबा कौ” देमाक्त।<sup>13</sup> मिनु दाऊद नु आ मुर आन लां खोदमे बाक्त। शिमेइ चहिं दाऊद आ लां गे आइक्ची हांबुइ आइक्ची हांबु लमाक्त। लमेनु दाऊद कली सराप पना पन फुल्लु आप्ना आप्ना, खप ब्वारना ब्वारन लमाक्त।<sup>14</sup> मिनु पिप नु मेको नु गाक्ब मुर नेल्ल यर्दन खोला आ नेक्था जाक्दीम्मा बाक्त। मिनु मेको थाम्पा दशा नाइसमा बाक्त।

अब्बालोम यरूसलेम जाक्शो

<sup>15</sup> अब्बालोम नु मेको नु बाक्ब इस्राएली नेल्ल यरूसलेम जाक्मा बाक्त। अहीथोफेल यो मेको नु बाक्माक्त।<sup>16</sup> मिनु अरकी आ खिं डा हुशाइ दाऊद आ वारचमी अब्बालोम कली गुमा बाक्त। मिनु मेकोमी अब्बालोम कली “पिप गेना हना यो ब्रोंइशा बाक्ल। पिप गेना हना यो ब्रोंइशा बाक्ल”

देमाक्त। २सामुएल १५:३७<sup>17</sup> तन्न अब्बालोममी हुशाइ कली “इ वारच कली मप्रोंइतीके, मोदेशो बाक्बा डा? मारदे गे इ वारच नु मलवे” दे मदा बाक्त।<sup>18</sup> मिनु हुशाइमी अब्बालोम कली “ममाइ, परमप्रभु यावे मेकेर बाक्ब मुर नु इस्राएली नेल्लेमी योव्रशो मुर आ गेय पचा मिन्ताक्ड। गो एक बाक्नुड।<sup>19</sup> मुल गो सुका आ गेय पाइनुड डा? पिप आ तौ कली गेय पचा मदुम्बा डा? गो दोपा इन आफ आ गेय पडा, मोपा इन गेय यो पाइनुड” देमाक्त।

अहीथोफेलमी अर्ती गेशो

<sup>20</sup> मिनु अब्बालोममी अहीथोफेल कली “आंइ कली इन अर्ती गेने। गो दोपा गेय पचा माल्नीकी?” दे हिल्लो पवा बाक्त।<sup>21</sup> मिनु अहीथोफेलमी अब्बालोम कली “इन आफोमी आ खिं कोव्रचा कली प्रोंइशा वोइश्शो आ नोले चाक्शो मीशपुकी नु इपो। मोपा इन आफ कली मरिश्शो पशो इस्राएल नेल्लेम नेंनीम। मिनु इन नोले खोइक्ब आन थुं बारब” देमाक्त। २सामुएल १५:१६<sup>22</sup> मोपतीके मेकोपुकीम अब्बालोम कली खिं तार ताम्बु का कीडमे बाक्त। मिनु अब्बालोममी इस्राएली नेल्लेम तचा डा पा, आ आफ आ नोले चाक्शो मीशपुकी नु इम्माक्त।<sup>23</sup> मेना मुरपुकीम अहीथोफेल आ अर्ती परमप्रभु आ लोव्र खोदेशो मिम्बाक्मा बाक्त। मोपतीके दाऊद नु अब्बालोमम अहीथोफेल आ अर्ती ठेयब मिम्बाक्सा बाक्त।

अहीथोफेल आ अर्ती क्याम्शो

17 अहीथोफेलम अब्बालोम कली “आं कली १२ हजार योव्रशो मुर गेयीनी। मिनु गो मुलाक्दो दाऊद कली खेदा पाइनुड।<sup>2</sup> मेको दशा, आ थुं लुक्च लशा बाक्मेनु, मेको कली थिन्नुड। मिनु मेको नु बाक्ब मुर नेल्ल ब्रशा प्रोक्नीम। मिनु गो पिप कली ला साइक्नुड, अरु सुइ मसाइक्नुड।<sup>3</sup> मिनु गो इस्राएली नेल्ल आन कली ग्युम्ली आ ग्युम्ले बाक्तीक जाक्शो खोदेशो पा इन बाक्तीक चाक्नुडमी। गे मुर का आ सोक्त माल्ना माल्न बाक्नीनी। लीशो मुर मारेइ मदुम्मीम” देमाक्त।<sup>4</sup> मिनु अब्बालोम नु इस्राएल डा खाल्पा नेल्लेम अहीथोफेल आ अर्ती दाक्तमे बाक्त।

<sup>5</sup> तन्न अब्बालोमम “अरकी आ हुशाइ कली ब्रेत्तीन। मेकोमी मार देंबा, मेको नेंय” देमाक्त। २सामुएल १६:१६<sup>6</sup> मिनु हुशाइ अब्बालोम आ डोंइती जाक्मेनु, अब्बालोममी “अहीथोफेल आ देशो नेल्ल शेंदा बाक्त। मेको आ देशो पचा, दे मपचा? मपचा हना, गे मार मिम्मेवे देंनो” देमाक्त।

<sup>7</sup> मिनु हुशाइमी अब्बालोम कली “एको मुल डा अहीथोफेल आ देशो ठीक मदुम्ब” देमाक्त।<sup>8</sup> मिनु हुशाइमी लेंशा “गे इन आफ नु मेको नु बाक्ब मुरपुकी थम जोक्ब लडाइ पाइबपुकी बाक्नीम, दे तुइक्नीनी। मेकोपुकी चाइक्ब रोइक्चा पुंइसीशो वां खोदेशो दुम्शो बाक्नीम। इन आफ लडाइ पतीकेम जोक्ब तुइक्ब बाक्ब। मेको नाक्दो आ लडाइ पाइब नु काथा मबाक्ब।<sup>9</sup> मुल यो मेको तेकोइ ढोडोडगा नु अरु बाक्तीकेमी खूइश्शा बाक्म माइ? मिनु ई लडाइ पाइबपुकी डोंइती साइक्चा पुंइसाक्म हना, मेको नेंबपुकीमी ‘अब्बालोम आ नोले खोइक्बपुकी बेक्ना बेक्न बाक्नीम’ देशो नेंनीम।<sup>10</sup> मोदेशो दुम्मेनु, महिंब गुप्स खोदेशो थुं पाइश्शो लडाइ पाइब मुर यो हिनीम। मारदे हना इस्राएली नेल्लेमी इन आफ बोल्यो लडाइ पाइब मुर बाक्ब, दे तुइक्नीम। मेको नु बाक्ब थम बोल्यो बाक्नीम, दे तुइक्नीम।

<sup>11</sup> आं अर्ती चहिं मार बाक्ब देंशा हना, दान रे बेयर-शेबा सम्म डा इस्राएली नेल्ल आन कली खुप्चा माल्नीम। मेको समुन्द्र डा बाल्वा खोदेशो पा शुश बाक्नीम। मिनु गे मोदेशो पा लडाइ पथ लने।<sup>12</sup> मिनु मेको ते बाक्त हना यो, गो मेको कली थिश्शा लडाइ तोइनय। गो सीत यिशो खोदेशो पा मेको तार जुक्नय। मिनु मेको नु मेको कली खोइक्ब का यो ब्रोंइचा मताइनीम।

<sup>13</sup> मेको प्रोक्शा सहर लशा, बाक्तीक पुंइशा बाक्त हना यो गो इस्राएली नेल्ल मेकेर लशा मेको सहर कली डोरीम कीशा फुल्लु का यो खोप्पा मलीपाइक्थु, दिंमम चाक्नय” दे हुशाइमी देमाक्त।<sup>14</sup> मिनु अब्बालोम नु इस्राएली नेल्लेमी “अहीथोफेल आ अर्ती क्येडा अरकी आ हुशाइमी गेशो अर्ती रिश्शो बाक्ब” देमा बाक्त। मारदे हना परमप्रभु यावेमी अहीथोफेल आ अर्ती क्याम्शा, अब्बालोम कली खतम पोक्चा कली मो पवा बाक्त।

२सामुएल १५:३१-३४<sup>१५</sup> मिनु नोले हुशाइमी चढेब सादोक नु अबीयाथार आस कली अहीथोफेलम अब्सालोम नु इस्राएल डा खाल्पा आन कली गेशो अर्ती नु आ गेशो अर्ती नेल्ल शेंदीम्सी बाक्त।<sup>१६</sup> मिनु गे दाऊद कली “गोरशो रागी आ सुरम बास मबाक्थु, गोरशा रागी लाक्शा गाक्कीन। मो मपाइतीनी हना, पिप नु आ नु बाक्ब नेल्ल साइक्चा पुंडसीनीम” देमाक्त।

<sup>१७</sup> मेना योनाथन नु अहीमाज एन-रोगेलमी रिम्शा बाक्शो बाक्सा बाक्त। मिनु वाइलीम का लशा, मेको आस कली शेंबाक्सा बाक्त। मिनु मेको निक्शीमी पिप दाऊद कली शेंबाक्सा बाक्त। मारदे हना सहर डा मुरुम मतामेक्ल, दे मो पाइक्बाक्सा बाक्त। २सामुएल १५:३६; यहोसु १५:७-८<sup>१८</sup> तन्न मेना वोंइश आल काम मेको आस कली तशा, अब्सालोम कली शेंदा बाक्त। मोपतीके मेको निक्शी रीब पा बाहुरीम डा मुर का आ खिं जाक्दीस्सा बाक्त। मेको आ लाडगाम इनार का बाक्सा बाक्त। मिनु मेको निक्शी मेको आगा ओव्रसा बाक्त।<sup>१९</sup> मेको खिं डा मुर आ मीशेमी सुम्तीक का चाक्शा, मेको तार बिस्कुन हामा बाक्त। सुइम मारेइ मतुइक्त्मे बाक्त।<sup>२०</sup> मिनु अब्सालोम आ गेय पाइब मुरपुकी जाक्शा, मेको मीश मुर कली “अहीमाज नु योनाथन ते बाक्सा” दे हिल्लो पामे बाक्त। मिनु मेकोमी “मेको निक्शी आइक्ची हांबु लाक्ताक्स” देमाक्त। मेको मुरपुकीम एर ओंथ माल्मे बाक्त, तन्न मथिदमे बाक्त। मोपतीके मेकोपुकी यरूसलेम लेम्मा बाक्त।<sup>२१</sup> मिनु मेकोपुकी लमा नोले मेको निक्शी इनार रे गूसा बाक्त। मिनु मेको लशा पिप दाऊद कली नेल्ल शोव्रडसे बाक्त। मेको निक्शीमी दाऊद कली “बोक्कीन, रीब पा खोला शोक्सीन” देसा बाक्त। अहीथोफेल आ देंशो अर्ती डा लोव्र यो शेंदसे बाक्त।<sup>२२</sup> मोपतीके दाऊद नु आ मुरपुकी रीब पा यर्दन खोला शोक्सीमा बाक्त। बुरु पा हाम्सो दुम्मेनु, आइक्ची हांबु मजाक्दीप्ब, सुइ मलीमा बाक्त।

<sup>२३</sup> मिनु अहीथोफेलमी आ अर्ती डा लोव्र मबिश्शो तुइश्शा, आ गधा ठीक पा आ सहर डा खिं लमाक्त। मिनु आ खिं डा मुर आन कली देंचा माल्शो लोव्र देंशा, आं चहिं ग्युक्शा बेक्सा बाक्त। मेको मोपा बेक्शा आ आफ आ तुरसुम थिम्चा पुंडसे बाक्त। १सामुएल ३१:४; १राजा १६:१८; मत्ती २७:५

<sup>२४</sup> मिनु दाऊद महा-नाइमम जाक्दीम्मा बाक्त। मेना अब्सालोम नु मेको नु बाक्शो इस्राएली यर्दन खोला शोक्सीने थुम्मे बाक्त। २सामुएल २:८<sup>२५</sup> अब्सालोमम योआब आ पा डा इश्माएली इश्मा आ तौ आमासा कली कप्तान सेला बाक्त। इश्थामी अबीगेल कली ग्युंवे पवा बाक्त। अबीगेल, नाहाश नु सेरूयाह आस समी आ तमी बाक्सा बाक्त। सेरूयाह योआब आ ममा बाक्सा बाक्त।<sup>२६</sup> इस्राएलीपुकी नु अब्सालोमम गिलादमी आन बाक्तीक सेल्मे बाक्त।<sup>२७</sup> मिनु दाऊद महा-नाइमम जाक्मेनु, रब्बाहम बाक्ब अम्मोनी नाहाश आ तौ शोबी, लो-देबारम बाक्ब अम्मीएल आ तौ माकीर नु रोगेलीम बाक्ब गिलाद आ मुर बारजील्लाइम, इइतिहास १९:१; २सामुएल ९:४; १राजा २:७<sup>२८</sup> ब्रतीक फेक्तीक, ग्योबपुकी, खप के ग्योबपुकी, क्योव्रज नु चेरब, फस, सिबी, दाल,<sup>२९</sup> खुदो, दहि, भेडा नु दूध के सेल्शो जचा थोव्रक दाऊद नु मेको नु बाक्ब मुर आन कली चाक्शा, गेमे बाक्त। मारदे हना मेकोपुकीम दाऊद नु आ मुरपुकी गोरशो रागीम शोव्रलु बेक्शो, तूतू दाक्शो नु थाम्पा दशो बाक्नीम, दे तुइक्त्मे बाक्त।

अब्सालोम साइक्चा पुंडसीशो

**१८** दाऊदमी आं नु बाक्शो मुर आन कली लडाइ पचा कली पुक्मी बाक्त। मिनु हजार का नु सहे का डा मुर आन कप्तान योव्रमी बाक्त।<sup>२</sup> मिनु नोले दाऊदमी आ लडाइ पाइब आन कली भाग सां सेल्मी बाक्त। भाग का योआब आ हुकुममी, भाग का सेरूयाह आ तौ अबीशै योआब आ लोक्ब आ हुकुममी नु भाग का गित्त आ खिं डा मुर इत्ताइ आ हुकुममी गेमी बाक्त। मिनु पिपमी “गो यो गेपुकी नु लडाइम लाइनुड” देमाक्त। २सामुएल १५:१९<sup>३</sup> तन्न मेकोपुकीमी “ममाइ, गे चहिं मलने। बुशा प्रोक्चा माल्ताक्क हना, आंइ कली सुइम मतुइक्नीम। गो उइक्थ बेक्त्क हना यो, मेकोपुकीम आंइ कली मकोव्रनीम। तन्न गे आंइ १० हजार खोदेंशो बाक्नीनी। मोपतीके गे सहरम बाक्शा, आंइ कली वारच पाइतीनी हना, रिम्शो दुम्ब” देमा बाक्त।<sup>४</sup> मिनु पिपमी “मो हना गो, गे मार देंनी,

मेको पाइनुड” देमाक्त। मिनु मेको ठेयब लाप्चोम राप्शा बाक्सा बाक्त। मिनु लडाइ पाइबपुकी हजार का, सहे का डा हुल पा आ डोंइती रे लमा बाक्त।<sup>५</sup> पिपमी योआब, अबीशै नु इत्ताइ आन कली “गो आं पर्वम मेको ठिटा अब्सालोम नु मरिम्शो मपने” दे अब्सालोम आ पर्वम लडाइ पाइब आन कली अरेशो मुर नेल्लेमे नेम्मे बाक्त। २सामुएल १८:१२

<sup>६</sup> मिनु लडाइ पाइबपुकी इस्राएली नु लडाइ पथ जाक्दीम्मा बाक्त। मेको लडाइ एफ्राइम डा ब्वाकीम दुम्मा बाक्त।<sup>७</sup> मेकेर दाऊद आ मुरपुकीम इस्राएली आन कली फ्रूमे बाक्त। मेको नाक्ती थम ठेयब लडाइ दुम्शा २० हजार मुर बेक्सा बाक्त।<sup>८</sup> लडाइ राज्य आ एर ओंथ नेल्ल ब्रमाक्त। तरवारम साइश्शो क्येडा ब्वाकीम साइश्शो मुर शुश दुम्मा बाक्त।

<sup>९</sup> अब्सालोममी दाऊद आ मुर कली तवा बाक्त। अब्सालोम आ खच्चर डोइश्शो बाक्सा बाक्त। मेको खच्चर शुश राशी पाइश्शो ठेयब बोल्यो रवा का आगा रे ग्रीशा लमाक्त। मिनु अब्सालोम आ चां मेको बोल्यो रवा आ राशीम ब्वेक्ता बाक्त। मिनु मेको ग्युक्शा लीमाक्त। आ खच्चर चहिं ग्रीशा लाक्सा बाक्त।<sup>१०</sup> मुर कामी मेको तशा योआब कली “गो अब्सालोम कली बोल्यो ठेयब रवा काम ग्युक्शा लीशो ताता” मदा बाक्त।<sup>११</sup> योआबमी मेको मुर कली “गे मेको कली मोपा तशा, मारदे मसदी? गो इ कली १० टुक्रा चांदी नु काम्बरी का गेन वा” देमाक्त।<sup>१२</sup> मेको मुरुम योआब कली “गे आं कली हजार का टुक्रा चांदी गेतीनी हना यो, गो पिप आ तौ आ पर्वम आं गुइ मक्युक्नुड। मारदे हना पिपमी ‘मेको ठिटा अब्सालोम कली सुम थिप्बा, मेकोमी रिम्शो पने’ दे अबीशै, इत्ताइ नु इन कली देंशो गो नेल्लेम नेंतक। २सामुएल १८:५<sup>१३</sup> मिनु गो मेको कली मरिम्शो पा साइक्ता हना, मेको लोव्र पिपमी रीब पा नेंब। मिनु गे दोस मताइब दुम्नीनी” देमाक्त।<sup>१४</sup> मिनु योआबमी “गो गे नु लोव्र पा मग्योल्नुड” देमाक्त। मिनु मेकोमी तूतीक सां शेशा, अब्सालोम मो पा रवाम ग्युक्शा बाक्मेनु, आ कुचुमी थोक्सा बाक्त। मेना सम्म अब्सालोम सेस बाक्शो बाक्सा बाक्त।<sup>१५</sup> मिनु योआब आ या कुरब १० जना मुरुम अब्सालोम कली आ एर ओंथ बाक्शा, मेको कली आप्शा सदमे बाक्त।

<sup>१६</sup> मिनु योआबम तुराही तबा बाक्त। मिनु लडाइ पाइबपुकी इस्राएली आन कली खेदा पचा प्रोइशा, लेम्मा बाक्त। मारदे हना योआबम लडाइ पाइब आन कली तेक्मी बाक्त।<sup>१७</sup> मेकोपुकीम अब्सालोम आ बेक्शो रां लाइश्शा, ब्वाकी डा ठेयब ढोडोडगा काम ताइक्त्मे बाक्त। मिनु मेको तार शुश फुल्लु पुक्गमे बाक्त। मिनु इस्राएली नेल्ल आन आन खिं प्रोक्सा बाक्त। यहोसु ८:२९

<sup>१८</sup> डोंइती अब्सालोममी पिप आ बेंसीम थाम का खूक्शो बाक्सा बाक्त। मारदे हना मेकोमी “आं नें वोइक्चा कली आं तौ मबाक्ब” देंशो बाक्सा बाक्त। मेकोमी मेको थाम कली आ नें वोइश्शो बाक्सा बाक्त। मुल सम्म मेको थाम कली अब्सालोम आ थाम देंसीब। २सामुएल १४:२७

<sup>१९</sup> मिनु सादोक आ तौ अहीमाजम “परमप्रभु यावेम क्येक्क लेत्ताक्व। मिनु पिप कली आ जोरी सत्रु आन गुइ रे प्रोइत्, देंचा कली आं कली दोरपा सोइक्तीनी” देमाक्त। २सामुएल १५:३६; २सामुएल १७:१७<sup>२०</sup> तन्न योआबमी मेको कली “मुलाक्ती इ लोव्र लाइक्तीक नाक्त् ममाइ। अर्को नाक्ती गे लोव्र लाइक्चा माल्नेवे। मारदे हना मुलाक्ती पिप आ तौ बेक्शो बाक्ब” देमाक्त।<sup>२१</sup> मिनु योआबमी कूश आ खिं डा मुर का कली “लशा, इ तशो नेल्ल पिप कली नेंपतो” दे मदा बाक्त। मिनु मेको कूश आ मुर योआब कली बाप्शा सेउ पा दोरशा लमाक्त।<sup>२२</sup> मिनु सादोक आ तौ अहीमाजम लेंशा, योआब कली “मार दुम्त हना यो आं कली कूश डा मुर आ नोनोले दोरशा लचा गेयीनी” देमाक्त। मिनु योआबमी “आं तौ गे मारदे लाइनेवे? इ लोव्र आ पर्वम गे मारेइ इनाम मताइनेवे” दे मदा बाक्त।<sup>२३</sup> मिनु मेकोमी “मार दुम्त हना यो, गो दोरशा लाइनुड” देमाक्त। मिनु योआबमी “मो हना लावो” देमाक्त। मिनु अहीमाज यर्दन डा बेंसी रे पा दोरमाक्त। मिनु मेकोम कूश आ खिं डा मुर कली ग्रामाक्त।

<sup>२४</sup> मेना दाऊद लाप्चो निक्शी आस दातेमी बाक्शो बाक्सा बाक्त। खाल पाइबमी गारो आ तार लशा कोव्रडा बाक्त। मिनु मुर का दोरशा पिशो तवा बाक्त।<sup>२५</sup> मिनु मेको खाल पाइबम पिप कली ठेयब सेंदा पा देमाक्त। मिनु पिपमी “मेको आ का ला बाक्त् हना, मारेइ लोव्र चाक्त्” देमाक्त। मेको मुर

आन नेक्था जाक्माक्त। २६ मिनू मेको खाल पाइबमी अर्को मुर का यो दोरशा पिशो तवा बाक्त। मिनू लाप्चो खाल पाइब कली “कोवडीन, दे अर्को मुर का यो आ कान दोरशा पिन पिन बाक्ब” देंमाक्त। मिनू पिपमी “मेकोम यो लोत्र चाक्गा माइ” देंमाक्त। २७ मिनू मेको खाल पाइबमी “मेरे डोंइती दोरब सादोक आ तौ अहीमाज खोदेशो पा दोरत” देंमाक्त। मिनू पिपमी “मेको रिश्शो मुर बाक्ब, मेकोम रिश्शो लोत्र चाक्गा माइ” देंमाक्त।

२८ मिनू अहीमाजम पिप कली ठेयब सेंदा पा “नेल्ल रिश्शो बाक्ब” देंमाक्त। मिनू पिप आ डोंइती खुम्की पा बाप्शा, पिप कली “परमप्रभु यावे, इन परमप्रभु ठेयब बाक्ब। मेकोम आं प्रभु, पिप इन कली मरिश्शो पाइब आन कली इन गुडमी गेशो बाक्ब” देंमाक्त। २९ मिनू पिपमी “मार मेको ठिटा अब्सालोम रिश्शोन बाक्मे?” देंमाक्त। मिनू अहीमाजम “इन गेय पाइब योआबम आं कली सोइक्तानु, गो ठेयब ग्रांये माग्ये दुश्शो ताता। तन्न मार दुश्शो बाक्मे मतुइक्नुड” देंमाक्त। ३० मिनू पिपमी मेको कली “गे मेकेर राप्शा बाक्को” दे मदा बाक्त। मिनू मेको मेकेर राप्शा बाक्माक्त।

३१ मिनू मेको कूश आ मुर जाक्शा मेकोमी “आं प्रभु, आ पिप, इन कली नेल्ल रिश्शो बाक्ब। मारदे हना मुलाक्ती परमप्रभु यावेमी इन कली मरिश्शो पाइब आन गुड रे प्रॉइशो बाक्ब” देंमाक्त। ३२ मिनू पिपमी मेको कूश आ मुर कली “मेको ठिटा अब्सालोम रिश्शोन बाक्मे” दे हिल्लो पवा बाक्त। मिनू मेको कूश आ मुरुमी “आं प्रभु, पिप आ जोरी सत्रु नु मरिश्शो पाइब नेल्ल मेको ठिटा खोदेशो दुम्मल” देंमाक्त। ३३ मिनू पिप आ थुं ग्येत्थ लुक्च दुश्शा, मेको ठेयब लाप्चो आ तार डा कोठाम लशा डाक्माक्त। मिनू गाक्ना गाक्न लमेनु “आं तौ अब्सालोम, आं तौ अब्सालोम, इ पा डा गो बेक्शो नड हना, दुम वा। अब्सालोम! आं तौ, आं तौ” दे डाक्माक्त।

अब्सालोम आ पर्बम रोंका पशो

१९ मिनू योआबम “पिप दाऊद अब्सालोम आ पर्बम डाक्ना डाक्न रोंका पा बाक्शो बाक्ब” देशो लोत्र नेना बाक्त। २ मेको नाक्त डा ग्राशो नेल्ल लडाइ पाइब आन कली रोंका पतीक दुम्माक्त। मारदे हना लडाइ पाइबपुकीमी पिप आ तौ आ पर्बम रोंका पशो बाक्ब, दे नेंमे बाक्त। ३ मेको नाक्ती लडाइ पाइबपुकी लडाइम ब्रुशा आन कुल कोंइने मचाप्थु, मुने दोक्शा प्रोक्शो मुर खोदेशो पा सिक्सी पा सहर ओत्रमा बाक्त। ४ पिप आ कुल सुम्शा ठेयब सेंदा पा डाक्ना डाक्ना “आं तौ अब्सालोम, अब्सालोम, आं तौ, आं तौ” देंमाक्त। ५ मिनू योआब पिप आ खिंम ओत्रशा मेको कली “गे मुलाक्ती इन कप्तान नेल्ल आन कली मुने तोक्तीनी। मारदे हना मुलाक्ती मेकोपुकीमी इन कली प्रॉइतेक्म। इन तमी तौ, इन मीशपुकी नु इन नोले चाक्शो मीश आन कली यो प्रॉइतेक्म। ६ इन कली काइ मदाक्ब कली गे दाक्नीनी। इन कली दाक्ब आन कली गे काइ मदाक्नीनी। मुलाक्ती गो लडाइ पाइब आन कप्तान नु ठेयब मुर इन डोंइती मारेइ मनकी, दे रुप्पाइक्तीनी। मुलाक्ती अब्सालोम ब्रॉइशा, गो नेल्ल बेक्शो नकी हना, गे ग्येरसीनी वा। ७ मुल रीब पा लशा, इन गेय पाइब आन थुं बारपतीन। गे मो मपाइतीनी हना, गो परमप्रभु यावे आ नेंमी कसम जशा ‘मुलाक्दो गे नु सुइ मबाक्नीम’ देंनुड। मिनू डोंइती इन तशो श्येत क्येडा मुलाक्त डा श्येत ठेयब दुम्ब” देंमाक्त। ८ मिनू पिप बोक्शा, ठेयब लाप्चोम बाक्माक्त। मिनू पिप ठेयब लाप्चोम बाक्शो बाक्ब, दे लडाइ पाइब आन कली नेंपदमे बाक्त। मिनू लडाइ पाइब नेल्ल पिप आ डोंइती जाक्मा बाक्त। मेना सम्म इस्राएली नेल्ल आन आन खिं प्रोक्ने थुश्शो बाक्मा बाक्त।

दाऊद यरूसलेम लेश्शो

९ इस्राएल डा थर नेल्ल डा मुरुम आंम आंम लोत्र पा “पिपमी आंइ कली आंइ जोरी सत्रु रे प्रॉइतु। पलिस्ती आन गुड रे यो प्रॉइतु। मुल अब्सालोमम पतीके आंम रागी रे प्रोक्शा गाक्शो बाक्ब। १० मुल गो इं पिप सेल्शो अब्सालोम लडाइम बेक्त। मोपतीके गो मुल मारदे पिप कली लेश्शा मचाक्नया?” देंमुमा बाक्त।

११ मिनू पिप दाऊदमी सादोक नु अबीयाथार कली “यहूदा डा खाल्पा आन कली ‘मारदे गे पिप कली आ खिंमी लेश्शा चाक्चा कली नेल्ल क्येडा

नोले दुम्चा दाक्नीनी? इस्राएली नेल्लेम देशो लोत्र पिपमी नेंने थुश्शो बाक्ब। १२ गोपुकी आं मुर ननी। आं हुश ननी। पिप कली लाइक्चा कली गे मारदे नोले दुम्नी’ मतीस। २सामुएल ५:१ १३ मिनू आमासा कली ‘गे आं मुर नु आं हुश मनवे? गे योआब आ पा डा गो बाक्डा सम्म कप्तान दुम्नेवे। मो मपाता हना, परमप्रभुमी सजाइ गेवल’ देंत मतीस” देंमाक्त। २सामुएल १:२५ १४ मिनू आमासामी यहूदा डा मुर नेल्लेमी “दाऊद कली ब्रेत्वा माल्ब” दे थुं का सेला बाक्त। मिनू मेकोपुकीम पिप कली “गे नु इन गेय पाइब नेल्ल नु लेश्शा जाक्कीन” दे लोत्र सोइक्तमे बाक्त। १५ मोपतीके पिप लेश्शा यर्दन जाक्माक्त। डोंइती यहूदा डा मुरपुकी गिल्गालम पिप गुम्चा कली जाक्मा बाक्त। मेकोपुकीमी पिप कली यर्दन खोला शोक्पाइक्थ जाक्मा बाक्त।

१६ बेन्यामीन आ थर डा मुर बाहुरीम डा गेरा आ तौ शिमेइ यो यहूदा डा मुर नु रीब पा पिप दाऊद कली गुम्थ जाक्माक्त। १७ मेको नु हजार का जना बेन्यामीन आ थर डा मुर यो बाक्मा बाक्त। सावल आ गेय पाइब सीबा यो आ १५ जना तौ नु आ २० जना गेय पाइब नु मेकेर बाक्शो बाक्माक्त। मेकोपुकी पिप आ डोंइती यर्दन खोला जाक्दीम्मा बाक्त। २सामुएल ९:२, १०; २सामुएल १६:१-४ १८ मिनू मेको आइक्वी हांबुम लचा कली पिप आ खिं डा मुर आन कली शोक्चा कली नु पिप आ माल्शो पचा कली मेकेर जाक्मा बाक्त। मिनू गेरा आ तौ शिमेइ पिप खोला शोक्वी ना पिप आ डोंइती बाक्माक्त। १९ मिनू शिमेइमी पिप कली “आं प्रभु, पिप, गे यरूसलेम प्रॉइची ना आं मरिश्शो पशो आ पर्बम दोस मगेथु ममिस्तीन। २० मारदे हना गो, इन गेय पाइबम पाप पाता, दे तुइक्नुड। मोपतीके गो योसेफ आ खिं डा मुर नेल्ल आन क्येडा डोंइती आं प्रभु पिप इन कली गुम्थ जाक्ती” देंमाक्त। २१ मिनू सेरूयाह आ तौ अबीशैमी “परमप्रभु यावे आ तेल लुक्शो कली सराप पतीके शिमेइ साइक्चा मपुंडसीबा डा?” देंमाक्त। २२ तन्न दाऊदमी “सेरूयाह आ तौ, गे आं कली काइ मगारब मुर बाक्नीसी। गे मुलाक्ती आं जोरी सत्रु दुम्तीसी? मुलाक्ती इस्राएलमी तेकोइ मुर साइक्चा मदुम्ब। मुलाक्ती गो इस्राएल डा पिप दुम्ती, दे गो मतुइक्नुडा डा?” देंमाक्त। २सामुएल १६:१० २३ मिनू पिपमी शिमेइ कली “गे साइक्चा मपुंडसीनेवे” देंमाक्त। मिनू पिपमी मेको लोत्र थमा सेल्चा कली कसम जवा बाक्त। १राजा २:८-९

२४ सावल आ चच मेफी-बोशेथ यो दाऊद पिप कली गुम्थ उइ यिमाक्त। मेकोम पिप गाक्म रे ग्राशा मलेम्म सम्म आ खोइल डा ग्ये यो मखोदा बाक्त। आ गल शोक्ने यो मप्रेक्गा बाक्त। आ वा यो ममुरशो बाक्माक्त। २सामुएल ९:६ २५ मेको पिप कली गुम्थ यरूसलेम रे जाक्मेनु, पिपमी मेको कली “मेफी-बोशेथ गे मारदे गो नु मगाक्डे?” दे मदा बाक्त। २६ मिनू मेकोमी “आं प्रभु पिप, आं गेय पाइबम आं कली मरिश्शो पाप्तु। गो आं गधाम लगम पाइश्शा पिप नु गाक्चा ठीक दुश्शो नड। मारदे हना गो इन गेय पाइब खोइल थेक्ने मचाप्ब मुर नड। २७ मेको आ लोत्रमी आं प्रभु पिप इन कली आं पर्बम मरिश्शो दुम्पाइक्तु। गे आं प्रभु पिप परमप्रभु आ स्वर्ग डा गेय पाइब खोदेशो बाक्नीनी। गे मार पचा दाक्नीनी मेको पने। २सामुएल १६:३; २सामुएल १४:१७ २८ आं आफ आ खिं डा मुर नेल्ल इन गुडमी बेक्चा डा नकी। तन्न गो इन गेय पाइब आं कली इन नु जचा बाक्चा गेतीनी। मेको क्येडा लाक्शा, गो मार शिशी ताइक्नुडा डा?” देंमाक्त। २सामुएल ९:७ २९ मिनू पिपमी “मुल दुम्त। सीबा नु गे रू योक्सीस, देंती” देंमाक्त। २सामुएल ९:९-१०; २सामुएल १६:३-४ ३० मिनू मेफी-बोशेथमी पिप कली “नेल्ल मेकोम पांइसेक्ल। मारदे हना गे आं प्रभु पिप मारेइ मदुम्थु खिं लेश्शा जाक्तीनी” देंमाक्त।

३१ मिनू गिलाद आ मुर बारजील्लाइ यो रोगेलीम रे उइ यिमाक्त। मिनू पिप कली यर्दन शोक्चा कली पिप आ नेक्था जाक्माक्त। २सामुएल १७:२७; १राजा २:७ ३२ बारजील्लाइ ८० बर्स दुश्शो थम खूशो बाक्माक्त। मेकोमी पिप महा-नाइमम बाक्मेनु, पिप कली जचा थोत्रक गेशो बाक्माक्त। मारदे हना मेको थम शोंप पाइश्शो मुर बाक्माक्त। ३३ पिपमी बारजील्लाइ कली “गो नून खोला शोक्शा लय। गो इन कली यरूसलेममी कोव्रशा थुल्शा वोइक्नुड” देंमाक्त। ३४ मिनू बारजील्लाइमी पिप कली “गो शुश बर्स मब्रॉइनुड। दोपा गो पिप नु यरूसलेम लाइनुड। ३५ मुल गो ८० बर्स दुम्ती। मुल गो रिश्शो नु मरिश्शो दोपा तुइक्नुडा? आं जशो तूशो ब्रॉइशो नु मब्रॉइशो

मारैड मतुइक्नुड। वोंइश मुर मीश मरुम कुम्सो पशो, गो नेंने मचापुनुड। मोपतीके गो आं प्रभु पिप इन कली मारदे श्येत तेम्नुडा? <sup>३६</sup> गो इन गेय पाइब यर्दन आइक्वी हांबु इक्का सम्म पिप इन नु लाइनुड। पिपमी आं कली मारदे ओदेंशो रिश्शो इनाम गेयीनी? <sup>३७</sup> आं कली लचा गेयीनी। मिनु आं आंम सहरम आं आम आफ आस तुरस आ नेक्था आं लीशो नाक्त थुम्चा गेयीनी। तन्न इन वाइल किम्हाम एक बाक्ब। मेको कली आं प्रभु पिप इन नु आइक्वी हांबु लतीन। गे मार रिश्शो लाक्नीनी, मेकोन पने” देंमाक्त। *येरमीया ४१:१७* <sup>३८</sup> मिनु पिपमी “मो हना किम्हाम गो नु आइक्वी हांबु गाक्त। मिनु गे मार पचा दाक्नीनी, मेको इन देंशो खोदेंशो पाइनुड। गे मार दाक्नीनी गो मेको पाइनुड” देंमाक्त। <sup>३९</sup> मिनु मुर नेल्ल यर्दन आइक्वी हांबु शोक्समा बाक्त। पिप यो शोक्से बाक्त। मिनु पिपमी बारजील्लाड कली पुक्पु पा आसीक गेवा बाक्त। मिनु बारजील्लाड आंम आ खिं लेम्माक्त। <sup>४०</sup> पिप खोला शोक्शा गिल्गाल जाक्माक्त। किम्हाम मेको नु गाक्शो बाक्माक्त। यहूदा डा मुर नेल्ल नु इस्राएल डा उइक्थ मुरम पिप कली इक्का आइक्वी सम्म चाक्दीत्मे बाक्त।

<sup>४१</sup> मिनु इस्राएल डा मुर नेल्ल काथा दुम्शा, पिप आ बाक्तीक जाक्मा बाक्त। मिनु मेकोपुकीमी “मारदे आंइ लोकब यहूदा डा मुरपुकीम इन कली खुड पा लदमे? पिप, आ खिं डा मुर नु इन मुर नेल्ल लाइश्शा यर्दन आइक्वी हांबु चाक्दीत्मे?” देंमा बाक्त। <sup>४२</sup> मिनु यहूदा डा मुर नेल्लेमी इस्राएल डा मुर आन कली “पिप आंइ नेक्था डा मुर बाक्ब। गे मारदे आंइ पर्बम गाइक्नीनी? मार, गो पिप आ शोंप जका? मार पिपमी गो आंइ कली मारैड गेवा?” देंमा बाक्त। *२सामुएल १९:१२-१३* <sup>४३</sup> मिनु इस्राएल डा मुरपुकीम यहूदा डा मुर आन कली “पिप इन क्येडा १० खेयप शुश आंइ पिप बाक्ब। गे मारदे आइक्व सेल्नीनी? पिप दाऊद कली लेशशा चाक्ता, दे गोपुकीम डॉइती देंशो बाक्नीकी, मेको मर्प्रेदीन” देंमा बाक्त। तन्न इस्राएल डा मुर क्येडा यहूदा डा मुरपुकीमी ठेयब लोत्र पामे बाक्त। *२सामुएल १९:१०-११*

शेबा आ मरिश्शो पशो

**२०** शेबा नें पाइश्शो मरिश्शो पाइब मुर का बाक्माक्त। मेको बेन्यामीन आ थर डा बिक्री आ तौ बाक्माक्त। मेकोम तुराही ताप्शा ग्रीशा “दाऊद नु आंइ के मार बाक्बा डा? येस्से आ तौ नु आंइ के मारैड मबाक्ब। ए इस्राएली, गे इन ताम्बु ताम्बुम लने” देंमाक्त। *१राजा १२:१६* <sup>२</sup> मोपतीके इस्राएली नेल्लेमी दाऊद कली प्रॉइशा, बिक्री आ तौ शेबा आ नोले खोदमे बाक्त। तन्न यहूदा डा मुरपुकी चहिं दाऊद कली मर्प्रॉइथु, यर्दन रे यरूसलेम सम्म आ नोले खोइक्स डा खोइक्स पामे बाक्त।

<sup>३</sup> मिनु दाऊद आ खिं यरूसलेम जाक्माक्त। मिनु मेकोम आ खिं कोव्रचा कली वोंइश्शो मेको १० जना नोले चाक्शो मीश आन कली खिं कामी कोव्रब मुर का वोंइश्शा वोंइक्मी बाक्त। मेकोमी आन माल्शो नेल्ल गेमी बाक्त। तन्न मेको नु गेनायो मइम्माक्त। मोपा मेको आन बेक्ची नाक्त सम्म यो मर्प्रॉइथु वोंइक्मी बाक्त। मोपा मेकोपुकी वोंइश बेक्शो मीश मुर खोदेंशो पा बाक्मा बाक्त। *२सामुएल १६:२१* <sup>४</sup> पिपमी आमासा कली “यहूदा डा वोंइश मुर आन कली खुप्तीमी। मिनु नाक्त सांमी आं बाक्तीकेमी जाक्पाइक्मी। मिनु गे यो जाक्को” दे मदा बाक्त। <sup>५</sup> मोपतीके आमासा यहूदा डा मुर आन कली खुप्चा कली गाक्माक्त। तन्न पिपमी देंशो क्येडा मेको कली शुश नाक्त माल्दा बाक्त। <sup>६</sup> मिनु दाऊदमी अबीशै कली “अब्बालोम क्येडा बिक्री आ तौ शेबामी इं कली शुश श्येत गेब। पिप आ गेय पाइब आन कली लाइश्शा, मेको कली खेदा पावो। मेको गारो हिरशो सहरम ओव्रत हना, इं गुड रे ब्रॉइब” दे मदा बाक्त। <sup>७</sup> मिनु योआबम केरेथी, पेलेथी नु लडाइ पाइब नेल्ल यरूसलेम रे लाइश्शा, बिक्री आ तौ शेबा कली खेदा पवा बाक्त। *२सामुएल ८:१८* <sup>८</sup> मिनु मेकोपुकी गिबोन डा ठेयब फुल्लु बाक्तीक जाक्मानु, आमासा, मेको आन कली गुम्थ जाक्माक्त। मिनु योआबम लडाइ पतीक वा फेक्शो बाक्माक्त। मेको तार किष्चुर किष्चो बाक्माक्त। मिनु खोतम शुइश्शा तरवार किष्चुरम पिष्चो बाक्माक्त। मिनु मेको डॉइती गे लमेनु, मेको तरवार खोत रे दोक्माक्त। *मत्ती २६:४८-५०* <sup>९</sup> योआबम आमासा कली “आं लोकब आमासा गे रिश्शोन बाक्डे?” दे

हिल्लो पवा बाक्त। मिनु मेकोमी आमासा कली पुक्पु पाइक्चा कली आ ग्युरा गुडमी मेको आ गल शोक्के ग्याइक्ता बाक्त। <sup>१०</sup> आमासामी योआब आ गुडमी तरवार बाक्शो मतुइक्ता बाक्त। मिनु योआबमी मेको आ कोव्रजम तूदा बाक्त। मिनु मेको आ गा क्यी खपीम दोक्शा बेक्माक्त। मेकोमी खेयप निक्शी तूचा ममाल्दा बाक्त। मिनु योआब नु आ लोकब अबीशै बिक्री आ तौ शेबा कली खेदा पना पन लसा बाक्त। *१राजा २:५* <sup>११</sup> मिनु योआब आ ठिटा मुर काम आमासा आ बेक्शो रां आ नेक्था राप्शा “योआब नु दाऊद आस नोले खोइक्बपुकीम योआब आ नोले खोदमेक्ल” देंमाक्त। <sup>१२</sup> आमासा आ बेक्शो रां हुशेम गिल्शा ठेयब लांमी गोल्शा बाक्माक्त। मिनु मुर नेल्ल लांमी दिक्शा बाक्शो बाक्मा बाक्त। मिनु मेकोम आमासा आ बेक्शो रां कली लां रे लाइश्शा आइक्वी खेतम ताइक्ता बाक्त। मिनु मेको कली वा काम सुमा बाक्त। <sup>१३</sup> मेको कली ठेयब लां रे लदमे नोले, मुर नेल्लेम बिक्री आ तौ शेबा कली खेदा पचा कली योआब आ नोले खोदमे बाक्त।

<sup>१४</sup> शेबा इस्राएल डा थर नेल्ल लाक्शा, आबेल डा बेथ-माकाहम जाक्मा सम्म बिक्री आ खिं डा मुर नेल्ल तेइ तेइ रे गुम्मा बाक्त। मिनु मेको आ नोले सहर ओव्रमा बाक्त। <sup>१५</sup> योआब आ लडाइ पाइब मुर नेल्ल जाक्शा, आबेल डा बेथ-माकाह कली पुम्दमे बाक्त। मिनु सहर डा गारो गे मार मार तेल्शा, गारो डोइक्तीक ठीक पामे बाक्त। मिनु योआब आ लडाइ पाइबपुकीमी गारो प्रेत्या गोव्रमे बाक्त। <sup>१६</sup> मिनु जोक्ब तुइक्ब मीश मुर काम सहर रे ब्रेश्शा “नेनीन, नेनीन, योआब कली ब्रेश्शा सोइक्तीन। मिनु गो मेको नु लोत्र पाइनुड” देंमाक्त। <sup>१७</sup> मिनु योआब आ डॉइती जाक्माक्त। मिनु मेको मीश मुरुमी “मार, गे योआब ननी?” देंमाक्त। मिनु योआबम “ओं, गो नड” देंमाक्त। मिनु मेको मीश मुरुमी “इन गेय पाइब आं लोत्र रिश्शो पा नेनीन” देंमाक्त। मिनु मेकोमी “नेंता” देंमाक्त। <sup>१८</sup> मिनु मेकोमी “साइ रे मुरपुकीमी लोत्र नेंचा कली ‘आबेल सहर लचा माल्नीम’ देंशो बाक्ब। मिनु मोपा निसाफ दुम्बाक्त। <sup>१९</sup> आं सहर इस्राएल डा सहरपुकीम लडाइ मपाइब, पिप कली दाक्शा मान पाइब सहरम हिक्सीब। मिनु गे एको सहर, इस्राएली आन कली कोव्रब ममा खोदेंशो सहर कली खतम सेल्चा माल्नीनी? मारदे गे परमप्रभु यावे आ शोंप कली खतम पोक्चा माल्नीनी?” देंमाक्त। *ब्यवस्था ३२:९* <sup>२०</sup> मिनु योआबमी “गो खतम मपोक्नुड, मक्याम्नुड। <sup>२१</sup> गो मो पचा माल्शो मनकी। तन्न एफ्राइम पहाड डा बिक्री आ तौ शेबामी पिप दाऊद कली मरिश्शो पचा माल्शो बाक्ब। मेको मुर कली आंइ कली गेने। मिनु गो सहर प्रॉइशा गाक्नीक” देंमाक्त। मिनु मेको मीश मुरुम योआब कली “मेको आ पिया सहर रे लाडगा ब्वारनीकी” देंमाक्त। <sup>२२</sup> मिनु मेको मीश मुरुम आ लोत्र मुर नेल्ल आन कली नेंपाइक्मी बाक्त। मिनु मेकोपुकीम बिक्री आ तौ शेबा आ पिया खोइश्शा, योआब कली ब्वारदमे बाक्त। मिनु योआबम तुराही तबा बाक्त। मिनु लडाइ पाइब नेल्ल सहर प्रॉइशा आन खिं खिं लेम्मा बाक्त। योआब चहिं पिप आ बाक्तीके यरूसलेम लेशशा लमाक्त।

ठेयब मुर आन नें

<sup>२३</sup> योआब इस्राएल डा लडाइ पाइब आन नेल्ल क्येडा ठेयब मुर बाक्माक्त। येहो-यादा आ तौ बेनायाह केरेथी नु पेलेथी पिप कली खाल पाइब आन ठेयब मुर बाक्माक्त। *२सामुएल ८:१६-१८; १राजा ४:४-६* <sup>२४</sup> अदोराम वाइलीम वाइल आन ठेयब मुर बाक्माक्त। अहीलुद आ तौ येहो-शाफात ब्रेक्ब बाक्माक्त। <sup>२५</sup> शेवा चहिं लडाइ पाइब आन ब्रेक्ब बाक्माक्त। सादोक नु अबीयाथार चहिं चढ़ेब बाक्सा बाक्त। <sup>२६</sup> याइर आ मुर इरा चहिं दाऊद आ चढ़ेब बाक्माक्त।

अन्काल नु रिस्पाह आ कथा

**२१** पिप दाऊद आ पालाम बर्स सां सम्म अन्काल दुम्स डा दुम्स पवा बाक्त। मिनु दाऊदमी परमप्रभु यावे कली हिल्लो पवा बाक्त। मिनु परमप्रभु यावेमी “सावल नु आ खिं डा मुर आन तार हुश आ दोस बाक्शो बाक्ब। मारदे हना मेकोम गिबोनी आन कली साइक्तु” देंमाक्त। <sup>२</sup> मिनु पिपमी गिबोनी आन कली ब्रेश्शा, मेकोपुकी नु लोत्र पवा बाक्त। गिबोनी इस्राएली आन थर डा मुर मबाक्मा बाक्त। मेकोपुकी एमोरी रे ब्रॉइशा लीशो

बाक्मा बाक्त। इस्राएलीपुकीम मेको आन कली प्रॉइतीक कसम जशो बाक्मा बाक्त। मो हना यो सावलमी इस्राएल नु यहूदा आ पर्बम मेको आन कली क्याम्चा माल्शो बाक्माक्त। *यहोसु १:३, १५, १९* <sup>३</sup> दाऊदमी गिबोनी आन कली “गो इन कली मार पड? परमप्रभु यावे आ मुर आन कली आसीक गेचा कली गो दोपा गारपाइक्नुडा?” दे हिल्लो पवा बाक्त। *ब्यवस्था ३२:९* <sup>४</sup> मिनू गिबोनीपुकीमी “सावल आ खिं नु आंइ खिं डा मुर आन दातेम सुन नु चांदीम गार पाइक्ने मचास्सीब। इस्राएली का यो साइक्चा मगारनीकी” देंमा बाक्त। मिनू दाऊदम “मिनू मुल गोम इन कली मार पवल, दे मिन्नीनी?” देंमाक्त। <sup>५</sup> मिनू मेकोपुकीम पिप कली “सुम आंइ कली खतम पोक्गा, आंइ कली रागी रे क्याम्दा, मेको कली खतम पोक्चा कली आंइ गुडम गेने। <sup>६</sup> मेको आ ७ जना तौ चच आंइ कली गेने। मिनू गो मेको आन कली परमप्रभु यावे आ डॉइती आ डांडा गिबोन सहरमी साइक्नीकी” देंमा बाक्त। मिनू पिपमी “गो मेको इन कली गेनुड” देंमाक्त। *ब्यवस्था २१:२२-२३*

<sup>७</sup> तन्न पिपमी परमप्रभु यावे आ नैम नु सावल आ तौ योनाथन नु कसम जतीके सावल आ चच योनाथन आ तौ मेफी-बोशेथ कली प्रॉइशा वोदा बाक्त। *१सामुएल २०:१५-१७*; <sup>८</sup> पिपमी आइयाह आ तमी रिस्पाहम सावल रे जरमेशो तौ निक्शी आरमोनी नु मेफी-बोशेथ चाक्गा बाक्त। मिनू सावल आ तमी मेराबम मेहोला आ मुर बारजील्लाड आ तौ अद्रीएल रे जरमेशो ५ जना तौ यो चाक्गा बाक्त। *२सामुएल ३:७*; *१सामुएल १८:१९* <sup>९</sup> मिनू मेको आन कली गिबोनी आन गुडमी गेमी बाक्त। मेकोपुकीम मेको आन कली परमप्रभु यावे आ डॉइती सदमे बाक्त। मिनू मेको ७ जना कालेम बेक्मा बाक्त। मेकोपुकी क्योत्रज रिक्तीक आ डॉइती डा नाक्त साइक्चा पुंडसीमा बाक्त।

<sup>१०</sup> आइयाह आ तमी रिस्पाहम रेंगु तारी आंम कली बाक्तीक सेल्चा कली भाडग्रा ब्रवा बाक्त। मिनू क्योत्रज ऑइतीक आ डॉइती डा नाक्त रे रेउ यिचा सम्म मेकोमी आ तौ आन बेक्शो रां आन कली खाल पवा बाक्त। नाक्ती आन तार चिक्ब जुक्चा मगेथु, नाक्दो ब्वाकी डा जन्तुम ब्वचा मगेमी बाक्त। <sup>११</sup> मिनू दाऊदमी सावल आ नोले चाक्शो मीश आइयाह आ तमी रिस्पाह आ पशो नेंशा, <sup>१२</sup> मेकोमी सावल नु आ तौ योनाथन आस रुश याबेश-गिलाद डा मुर आन गुड रे चाक्गा बाक्त। मेकोपुकीम सावल नु योनाथन आस बेक्शो रां बेथ-शान सहर डा चोक रे लदमे बाक्त। पलिस्तीपुकीमी मेको आस कली गिल्बोआम साइश्शा, नोले मेकेर क्युक्शो बाक्मा बाक्त। *१सामुएल ३१:१२* <sup>१३</sup> मेकोम मेकेर रे सावल नु योनाथन आस रुश चाक्गा बाक्त। मिनू मेको रिस्पाह आ तौ आन रुश यो खुप्तमे बाक्त। <sup>१४</sup> मेकोपुकीम सावल नु आ तौ योनाथन आस रुश बेन्यामीन आ थर आन रागी डा जेला सहर सावल आ आफ कीश आ तुरसुम थिम्मे बाक्त। पिपमी मेको आन कली मार मार देंमे, मेको पामे बाक्त। मेको नोले परमप्रभुम रागी आ पर्बम पुंडशो लोत्र नेना बाक्त। *२सामुएल २४:२५*

दाऊदम लडाइ ग्राशो

१इतिहास २०:४-८

<sup>१५</sup> पलिस्ती नु इस्राएली लडाइ पामे बाक्त। दाऊद आ मुर नु लडाइ पथ यिमाक्त। मिनू पलिस्ती नु लडाइ पामे बाक्त। मिनू दाऊद थाम्पा दमाक्त। <sup>१६</sup> इशबी-बेनोब रेफाइम आ बोल्यो लाइश्शो मुर का बाक्माक्त। मेको आ तूतीके सहे सां शेकेल कांसा के बाक्माक्त। मिनू नक या का यो पिम्सीशो बाक्माक्त। मेकोमी “दाऊद कली साइक्नुड” देंमाक्त। *शेकेल का ११.५ ग्राम बाक्ब। ३०० शेकेल ३ किलो आधा बाक्ब।* <sup>१७</sup> मेना सेरूयाह आ तौ अबीशै दाऊद कली वारच पाइक्थ जाक्शा, मेको पलिस्ती कली सदा बाक्त। मेना दाऊद आ लडाइ पाइबपुकीमी “मुल रे गे गो नु लडाइमी मगाक्कीन। मारदे हना गे इस्राएल डा छेडछेडन ननी। मेको मकाप्ल” दे कसम जामे बाक्त। *२सामुएल २३:१८; २सामुएल २२:२९*

<sup>१८</sup> मिनू नोले लेंशा, गोब सहरम पलिस्तीपुकी नु लडाइ दुम्माक्त। मेना हुशा डा मुर सिब्बेकैम साफ माइश्शो रेफाइ आ मुर कली सदा बाक्त। *रेफा थम लाइश्शो रेफाइ माइश्शो मुर आन किकी पिपी बाक्शो बाक्त।* <sup>१९</sup> मिनू लेंशा गोब सहरम पलिस्तीपुकी नु अर्को लडाइ का दुम्माक्त। बेथलेहेम डा

यारे-ओरेगीम आ तौ एल्हानानम गाथ सहर डा गित्त आ खिं डा मुर गोल्याथ कली सदा बाक्त। मेको आ तूतीक आ बिड तोत्र प्रोत्रब आन प्रोत्रतीक शी खोमो बाक्माक्त। *१सामुएल १७:७* <sup>२०</sup> मिनू नोले लेंशा गाथ सहरम लडाइ दुम्माक्त। मेकेर यो ठेयब लाइश्शो मुर का बाक्माक्त। मेको आ गुड नु खोइलीम ६, ६ ओटा अम्ला, नेल्ल पा २४ ओटा अम्ला पाइश्शो रेफाइ आन मुर बाक्माक्त। <sup>२१</sup> मिनू मेकोम इस्राएली आन कली हिंच कोइदा बाक्त। मिनू दाऊद आ लोक्ब शिमेइ आ तौ योनाथनमी मेको कली सदा बाक्त। *१सामुएल १७:१०* <sup>२२</sup> मेको ४ जना मुर गाथम बाक्ब रेफाइ आन दाते डा बाक्मा बाक्त। मेको नेल्ल दाऊद नु आ मुर आन गुड रे बेक्मा बाक्त।

दाऊदम परमप्रभु कली ठेयब सेल्शो

भजन संग्रह १८:-

**२२** परमप्रभु यावेमी दाऊद कली आ जोरी सत्रु नेल्ल नु सावल रे प्रोना नोले दाऊदमी परमप्रभु यावे कली कुम्सो पवा बाक्त।

<sup>२</sup> मेकोमी “परमप्रभु यावे आं सेरथे फुल्लु, आं बोल्यो दरवार नु आं कली श्येत रे प्रॉइब बाक्ब। <sup>३</sup> आं परमप्रभु आं सेरथे फुल्लु आं खुडक्तीके बाक्ब। मेको आं तेक्तीक नु आं ब्रॉइतीक बाक्ब। मेको आं बोल्यो दरवार नु आं फाम्सीतीक बाक्ब। मेको आं कली हुश खाक्श पोक्तीके रे प्रॉइब बाक्ब। <sup>४</sup> गो परमप्रभु यावे कली थोइनुड। मेको ठेयब सेल्चा पुंडसीब बाक्ब। मिनू मेकोम आं कली आं जोरी सत्रु रे प्रॉइब।

<sup>५</sup> बेक्पाइक्बम आं कली ब्वाक्कु आ छालम खोदेंशो पा गिल्ली। खतम पोक्ब बारशो ब्वाक्कुम आं कली सुम्ती। <sup>६</sup> बेक्शो मुर आन बाक्तीकेम आं एर ऑथ नेल्ल रे गिल्ली। बेक्पाइक्ब आ ब्वारद आं डॉइती बाक्ब।

<sup>७</sup> मिनू गो आं श्येत आ पर्बम परमप्रभु यावे कली थोवता। गो आं परमप्रभु कली ‘वारच पने’ दे पुंडता। मिनू मेकोमी आ बाक्तीके रे आं सेंदा नेंतु। आं पुंडशो नेंतु।

<sup>८</sup> मिनू रागीमी खिनु कुत। सरीड डा जग हिम्साक्म। मारदे हना, परमप्रभु यावे गाइश्शो बाक्त। <sup>९</sup> मेको आ नें रे कुन गूत। मेको आ शोत्र रे ग्राव गू दाक्ब मी गूत। मेकेर रे ब्रशो कोइला गूतेक्म। <sup>१०</sup> मेको सरीड रे तोंइसाक्व। मेको आ खोइली आगा क्येर गोस्स बाक्त। <sup>११</sup> मेको करूब डोइश्शा बेरत। फश के फ्राम बेरशो तांइसाक्व। <sup>१२</sup> मेको छिडछिडम सुम्साक्व। शुश ब्वाक्कु बाक्शो क्येर गोस्स आ एर ऑथ बाक्तेक्म। <sup>१३</sup> मेको आ डॉइती डा छेडछेड रे ब्रशो कोइला गूतेक्म। <sup>१४</sup> परमप्रभु यावेमी सरीड रे बुंबु पाप्तु। नेल्ल क्येडा ठेयबम आ सेंदा नेंपाइक्तु। <sup>१५</sup> मेकोम ब्रा आप्शा, एर ऑथ ब्रपाइक्तु। चिला आप्शा, सोइक्ताक्व। <sup>१६</sup> समुन्द्र आ पुं तांइसाक्व। रागी आ जग हुक्साक्व। मेको परमप्रभु यावे आ हुइश्शो नु आ सास रे मोदेंशो दुन्त। <sup>१७</sup> मेकोमी इर रे आ गुड दिंशा ग्याइक्ताक्पी। आं कली ठेयब समुन्द्र रे कीशा गुंडताक्पी। <sup>१८</sup> मेकोमी आं कली आं बोल्यो जोरी सत्रु नु आं कली काइ मदाक्ब, रे प्रॉइती। मेको आं क्येडा शुश बोल्यो बाक्तेक्म। <sup>१९</sup> मेकोपुकीमी गो हिंचा डा श्येत जडा ना आं कली लडाइ तोम्तेक्म। तन्न परमप्रभु यावेमी आं कली तिक्ती। <sup>२०</sup> मेकोमी आं कली लाडगा डा ठेयब बाक्तीकेम गुंडशा, श्येत रे प्रॉइती। मारदे हना मेको आं कली तशा ग्येरशो बाक्त।

<sup>२१</sup> परमप्रभु यावेमी आं कली आं ठीक पशो डा इनाम गेती। आं गुडम हुश मशाइक्पाइक्तीके आं रिश्शो पशो डा गेती। <sup>२२</sup> मारदे हना गो परमप्रभु यावे आ लाम गाक्शो बाक्ती। गो आ अरेशो लोत्र मटीब खोदेंशो पा आं परमप्रभु रे डोन मलड। <sup>२३</sup> मारदे हना आ ठीक पतीक लोत्र आं डॉइती बाक्तेक्म। गो मेको आ फुल्लुम मुशा ब्रेक्शो लोत्र नेल्ल टिशा पाता। <sup>२४</sup> मेको आ डॉइती गो दोस मताइब बाक्ती। गो मरिश्शो पतीक रे डोन बाक्ती। <sup>२५</sup> मोपतीके परमप्रभु यावेमी आं कली आं ठीक नु रिश्शो पशो आ पा डा गेती।

<sup>२६</sup> गे मप्रॉइब आन कली मप्रॉइब बाक्नीनी। दोस मताइब आन कली दोस मताइब बाक्नीनी। <sup>२७</sup> गे रिश्शो पाइब आन कली रिश्शो पाइब बाक्नीनी। दूली पाइब आन कली दूली पाइब बाक्नीनी। <sup>२८</sup> गे ब्रेक्शो मुर आन कली प्रॉइनीनी। तन्न ठेयब लेशो आन कली आइक्च सेल्नीनी। <sup>२९</sup> परमप्रभु यावे गे थमा पा आं बत्ती खोदेंशो बाक्नीनी। परमप्रभु यावेमी आं कली छिडछिडमी छेडछेड दुम्पाइक्ब। <sup>३०</sup> इन पतीकेमी गो लडाइ पाइब आन कली ग्रानुड। आं परमप्रभु गो गारो खाक्शा लाक्ने चाप्नुड। <sup>३१</sup> परमप्रभु आ

लां ठीक बाक्ब। परमप्रभु यावे आ थोशा पशो लोव्र थमा बाक्ब। मेको आ बाक्तीकेम खूँइसीब आन कली तेक्तीक बाक्ब।

३२ परमप्रभु यावे क्येडा अर्को तेकोइ परमप्रभु मबाक्ब। आंइ परमप्रभु क्येडा लाक्शा अर्को तेकोइ सेरथे फुल्लु मबाक्ब। ३३ परमप्रभुमी आं कली सक्ति गेती। आं गाक्तीक लां ब्रेश्शो सेल्लु। ३४ मेकोम आं कली किश्श खोदेशो पा दोरब सेल्ली। मेकोमी आं कली इर वोइश्शा कोव्रब। ३५ मेकोम आं गुइ कली लडाइ पचा शेंब। मोपा आं गुइमी कांसा के लिब्रा खुक्ने चाब्ब। ३६ गे आं कली इन तेक्शा ब्रॉइतीक गेतीनी। इन वारच पतीकेम आं कली ठेयब सेल्ली। ३७ गे आं कली ठीक पा गाक्चा गेतीनी। मोपतीके आं खोइल गेनायो मग्रेक्ब। ३८ गो आं जोरी सत्रु आन कली खेदा पा खतम पोक्तामी। गो मेको नेल्ल आन कली खतम मपोक्गुमी सम्म मलेडड। ३९ गो मेको आन कली खतम पोक्शा साइक्नुडमी। मिनु मेकोपुकी गेनायो बोक्ने मचाप्नीम। मेकोपुकी आं खोइली आगाम गोल्तेक्म। ४० गे आं कली लडाइ पचा कली सक्ति गेतीनी। आं जोरी सत्रु आन कली आं डोंइती आइक्च सेल्लतीनी। ४१ गे आं जोरी सत्रु आन कली आं डोंइती रे प्रोक्पाइक्नीनी। गो आं कली काइ मदाक्ब आन कली खतम पोक्तामी। ४२ मेकोपुकीम कोव्रना कोव्रन बाक्तेक्म। तन्न मेको आन कली प्रॉइब सुइ मबाक्ब। मेकोपुकीम परमप्रभु यावे कली पुंइतेक्म। तन्न मेकोमी मेको आन कली लोव्र मलेत्त। ४३ गो मेको नेल्ल आन कली रागी डा फुरक खोदेशो पा फस पोक्तामी। गो मेको आन कली लां डा हिलो खोदेशो पा दिम्ताक्डमी।

४४ गे आं कली मुर आन जिचा पोक्तीक रे प्रॉइतीनी। गे आं कली रागी रागी डा मुर आन ठेयब मुर सेल्शा वोइक्तीनी। आं मतुइश्शो मुरपुकीम आं कली गेय पास्तेक्म। ४५ अर्को रागी डा मुर जाक्शा आं कली मान पास्तेक्म। आं लोव्र नेंशा, मेकोपुकी आं देंशो टिम्तेक्म। ४६ अर्को रागी डा मुर हिंशा खिंखि पा आन बोल्यो दरवार रे जाक्तेक्म।

४७ परमप्रभु यावे ब्रॉइशा बाक्ब। आं सेरथे फुल्लु ठेयब बाक्ब। आं परमप्रभु मान ताइब बाक्ब। मेको आं कली प्रॉइब, सेरथे फुल्लु बाक्ब। ४८ परमप्रभुम आं पर्वम क्येक्क लेत्ताक्व। मिनु मुर आन कली आं सासनम वोइक्तीमी। ४९ मेकोम आं कली आं जोरी सत्रु रे प्रॉइती। गे आं कली आं जोरी सत्रु आन क्येडा ठेयब सेल्लतीनी। गे आं कली हुश खाक्श पोक्ब रे प्रॉइतीनी। ५० मोपतीके परमप्रभु यावे, गो रागी रागी डा मुर आन दातेमी इन कली ठेयब सेल्लुड। मिनु इन कली ठेयब सेल्लतीक कुम्सो पाइनुड। ५१ परमप्रभु यावे पिप, आं ब्रॉइशा बाक्तीक बाक्ब। मेकोम आ तेल लुक्शो दाऊद कली नु आ चच युइ आन कली गेना हना यो दाक्तीक कोंइब” दे दाऊदमी परमप्रभु यावे कली ठेयब सेला बाक्त।

दाऊद आ नोले डा लोव्र

२३ एको दाऊद आ नोले डा लोव्र बाक्ब। येस्से आ तौ दाऊद आ नोले देंशो लोव्र एको बाक्ब। परमप्रभुमी ठेयब सेल्शो मुर आ पशो लोव्र एको बाक्ब। याक्ब आ परमप्रभुमी मेको कली तेल लुक्शा, पिप सेल्शो बाक्त। इस्राएली आन सक्ति पाइश्शो आन दातेमी दाऊद कली नेल्ल क्येडा दाक्ब बाक्ब। १ सामुएल १६:१३ २ “परमप्रभु यावे आ सोक्त आं रे पा ब्वाक्शो बाक्ब। मेको आ देंशो लोव्र आं शोव्रम बाक्ब। ३ इस्राएली आन परमप्रभुम लोव्र पाप्तु। इस्राएली आन सेरथे फुल्लुमी आं कली ‘सुमी मुर आन कली ठीक निसाफ पाइबा, सुम परमप्रभु कली मान पा हिंशा हुकुम पाइबा, ४ मेको सुनी डा नां खोदेशो बाक्ब। मेको गोस्स मबाक्शो सुनी दाप्शो नां खोदेशो बाक्ब। मिनु मेको रेउ यिम नोले वाशो घांस खोदेशो बाक्ब’ दैत। न्यायाथीस ५:३१ ५ मोपा आं खिं परमप्रभु नु बाक्ब। मारदे हना मेकोमी गो नु गेना हना यो लीब कबल का पशो बाक्ब। मेको नेल्ल रिश्शो नु लीब। मिनु मेकोमी आं रिश्शो दुश्शो नु आं दाक्शो बारना बारना लपाइक्ब। ६ तन्न परमप्रभु यावे आ अरेशो मटीब फशेम बेरशो चू खोदेशो बाक्नीम। सुइम मेको कली गुइम थिने मचाप्नीम। ७ सुम मेको कली ताइक्चा दाक्बा, मेकोमी फलाम नु कोक्के लाइश्शा गुप्नीम। मेको मीम हुश्शा, रीब पा दाक्चा पुंइसीनीम” दैत।

दाऊद आ बोल्यो लडाइ पाइब

१इतिहास ११:१०-४७

८ दाऊद आ बोल्यो लडाइ पाइब मुर आन नें मार बाक्तेक्म देंशा हना, डोंइती ताह-केमोन आ खिं डा मुर योशेब-बाशेबेथ बाक्माक्त। मेको बोल्यो सां आन दाते डा कप्तान बाक्माक्त। मेकोमी ८ सहे मुर आन कली आ तूतीकेम कालेमी साइक्मी बाक्त। ९ मेको आ नोले डा बोल्यो सां लडाइ पाइब आन दाते डा अहोही आ चच दोदो आ तौ एलाजर बाक्माक्त। मेको दाऊद नु बाक्शो बाक्माक्त। मेकेर पलिस्तीपुकी लडाइ पचा कली बुक्शो बाक्मा बाक्त। मिनु इस्राएलीपुकी प्रोक्मानु, मेको कामीन लडाइ पतीकेम राप्शा, १० मदम सम्म पलिस्ती आन कली तरवारम क्योरस डा क्योरस पामी बाक्त। मेको आ गुइमी तरवार खोक्शो बाक्माक्त। मोपा परमप्रभु यावेम मेको नाक्ती थाम्पा ग्रापदा बाक्त। मेको नोले मुरपुकी बेक्शो मुर आन मार मार रोइक्थ ला जाक्मा बाक्त। ११ मेको आ नोले डा हरारी आगी आ तौ शम्माह बाक्माक्त। पलिस्तीपुकी लेहीम बुक्शो बाक्मा बाक्त। मेकेर मस शोक्शो थम रिश्शो रू का बाक्माक्त। मिनु अरामीपुकी पलिस्ती आन डोंइती रे ब्रुशा प्रोक्मा बाक्त। १२ मिनु पलिस्तीपुकीमी मुर आन कली खेदा पा लदमेनु, मेको शम्मा मस शोक्शो रू आ दातेमी राप्शा, खाल पा बाक्शो बाक्माक्त। मिनु मेकोमी पलिस्ती आन कली साइक्मी बाक्त। मोपा परमप्रभु यावेमी मेको आन कली थाम्पा ग्रापदा बाक्त।

१३ अन्न रिक्तीक डोंइती डा नाक्ती, मेको ३० जना कप्तान आन दाते डा मेको सां अदुल्लाम डा पुक्खी दाऊद आ बाक्तीकेम जाक्शो बाक्मा बाक्त। पलिस्ती आन हुल का चहिं रेफाइम डा बेंसीम बाक्तीक सेल्शा बाक्शो बाक्मा बाक्त। १ सामुएल २२:१ १४ मेना दाऊद डां डा गारो हिरशो बोल्यो बाक्तीकेम बाक्शो बाक्माक्त। पलिस्ती आन लडाइ पाइब हुल बेथलेहेमम बाक्मा बाक्त। १५ मिनु काबु नाक्त दाऊद थाम्पा ब्वाक्कु तूतू दाक्शो बाक्माक्त। मिनु मेकोमी तूतू दाक्शा “सुइमी आं कली बेथलेहेम डा ठेयब लाप्शो आ नेक्था बाक्शो इनार डा ब्वाक्कु तूचा गेयीमी हना, रिश्शो दुम वा” दैमाक्त। १६ मिनु मेको बोल्यो लडाइ पाइब सां पलिस्ती आन दाते रे ग्रीशा लशा बेथलेहेम डा ठेयब लाप्शो आ नेक्था बाक्शो इनार डा ब्वाक्कु चाक्शा दाऊद कली गेमे बाक्त। तन्न दाऊदम मेको तूने मबिस्से बाक्त। मेकोमी मेको ब्वाक्कु परमप्रभु यावे आ डोंइती मोदा बाक्त। १७ मेकोमी “परमप्रभु यावे आ नेंमी गो एको ब्वाक्कु मतनुड। मार, गो एको मुर आन हुश तूनुडा? एकोपुकीम एको ब्वाक्कु हेररा आन गिंम सोइक्चा डा पा लशा चाक्तेक्म” दैमाक्त। मोपतीके दाऊदमी मेको ब्वाक्कु मतूडा बाक्त। मेको बोल्यो लडाइ पाइब सां आन ठेयब गेय मेकोन बाक्त।

अरु बोल्यो लडाइ पाइब

१८ मिनु सेरूयाह आ तौ योआब आ लोक्ब अबीशै मेको ३० जना आन दाते डा ठेयब बाक्माक्त। मेकोमी सहे सां जना मुर आन कली आ तूतीकेम लडाइ पा साइक्मी बाक्त। मेको सांमी “मेको बोल्यो मुर बाक्ब” दैमा बाक्त। २ सामुएल २१:१७ १९ मेको, मेको ३० जना आन दाते डा नेल्ल क्येडा हिक्सीशो मुर बाक्शो बाक्त। मिनु मेको आन कप्तान दुम्माक्त। तन्न मेको बोल्यो मुर सां खोदेशो दुम्ने मचबा बाक्त।

२० कब्सेल सहर डा येहो-यादा आ तौ बेनायाह यो बोल्यो लडाइ पाइब का बाक्माक्त। मेकोमी ठेयब गेय पशो बाक्माक्त। मेकोम मोआब डा अरीएल आ तौ निक्शी साइश्शो बाक्माक्त। फुं यिम ना मेकोमी खाल्टाम लशा मेकेर गुप्स का साइश्शो बाक्माक्त। २ सामुएल ८:१८; यहोसु १५:२१ २१ मेकोमी दारशो बोल्यो इजीप्त डा मुर का कली साइश्शो बाक्माक्त। मेको इजीप्त डा मुर तूतीक का शेशो बाक्माक्त। तन्न बेनायाह कोक्के का शेशा लशा, मेको इजीप्त डा मुर आ तूतीक आ गुइ रे रोइश्शा, मेको कली सदा बाक्त। २२ येहो-यादा आ तौ बेनायाह आ पशो मेकोन बाक्ब। मेको सांमी “मेको बोल्यो लडाइ पाइब का बाक्ब” दैमा बाक्त। २३ मेको, मेको ३० जना मुर आन दाते डा हिक्सीशो मुर का बाक्शो बाक्त। तन्न मेको बोल्यो सां खोदेशो

दुम्ने मचबा बाक्त। मिनु दाऊदमी मेको कली आं कली खाल पाइब आन ठेयब मुर सेला बाक्त।

24 मिनु मेको ३० जना आन दातेमी सु सु बाक्मा बाक्त दॅशा हना, योआब आ लोक्ब आसाहेल, बेथलेहेम डा दोदो आ तौ एल्हानान, २सामुएल २:१८ 25 हारोद सहर डा शम्माह, हारोद सहर डा एलीका, 26 पाल्ती आ खिं डा हेलेस, तेकोहा सहर डा इक्केशा आ तौ इरा, 27 अनाथोथ सहर डा अबीएजेर, हुशा डा मुर मेबुन्नाइ, 28 अहोही आ खिं डा मुर सल्मोन, नेतोफाह आ खिं डा माहाराइ, 29 नेतोफाह आ खिं डा बानाह आ तौ हेलेब, गिबा सहर डा बेन्यामीन आ थर डा रिबाइ आ तौ इत्ताइ, 30 पिराथोन सहर डा बेनायाह, गाश खोला डा हिददाइ, 31 अरबा आ खिं डा मुर अबी-अल्बोन, बाहुरीम सहर डा अज्मावेथ, 32 शा-अल्बोन सहर डा एली-अहबा, याशेन आ तौ योनाथन, 33 हरारी सहर डा शम्माह, हरारी सहर डा शरार आ तौ अहीयाम, २सामुएल १५:१२ 34 माकाह सहर डा अहास्बाइ आ तौ एली-फेलेत, गिलो डा अहीथोफेल आ तौ एलीआम, 35 कारमेल पहड डा हेस्रो, यहूदा डा अरब सहर डा पाराइ, 36 सोबाह सहर डा नाथान आ तौ इगाल, गाद आ थर डा बानी, 37 अम्मोनी जेलेक, बेयरोथ सहर डा नहाराइ, मेको सेरूयाह आ तौ योआब आ या कुरब बाक्मावत। 38 इथ्री आ खिं डा इरा, इथ्री आ खिं डा गारेब नु २सामुएल ११:३ 39 हित्ती आ मुर उरीयाह, मेको नेल्ल पा ३७ जना बाक्मा बाक्त।

मुर आन कली हिक्शो

१इतिहास २१:-

24 मिनु परमप्रभु यावे इस्त्राएली आन पर्बम लॅशा गाइक्ता बाक्त। मिनु मेकोमी दाऊद कली मेको आन पर्बम मरिश्शो पपाइक्चा कली क्युक्गा बाक्त। मिनु दाऊदमी “इस्त्राएल नु यहूदा डा मुर आन कली हिक्कीन” दॅमावत। 2 मिनु पिपमी योआब नु मेको नु बाक्ब लडाइ पाइब आन ठेयब मुर नेल्ल आन कली “दान रे बेयर-शेबा सम्म डा इस्त्राएल आ खिं खिं डा मुर आन बाक्तीक तेइ तेइ लशा, नेल्ल आन कली हिक्शा, मेको दोशो बाक्मा, आं बाक्तीकेम ब्रेक्शा चाक्कीन” दॅमावत। प्रस्थान ३०:१२ 3 तन्न योआबम पिप कली “परमप्रभु यावे, इन परमप्रभुम मुर आन कली सहे का खेयप हिक्शो क्येडा यो शुश सेलल। मेको तचा डा पा इन ब्रौइची ना दुम्त। तन्न मारदे आं प्रभु पिप मोदॅशो पचा माल्नी?” दे हिल्लो पवा बाक्त। 4 तन्न पिप आ अरॅशो योआब नु लडाइ पाइब आन ठेयब मुरपुकीम पचा माल्मा बाक्त। मोपतीके योआब नु लडाइ पाइब आन ठेयब मुर पिप आ डौंइती रे इस्त्राएल डा मुर आन कली हिक्चा कली लमा बाक्त। 5 मिनु मेकोपुकी यर्दन खोला शोक्शा, आरोएर सहर नु दिंम आ दाते डा सहर रे गाद नु याजेर गे लमा बाक्त। ब्यक्था २:३६ 6 मिनु मेकोपुकी हित्ती आन रागी गिलाद नु कादेश जाक्मा बाक्त। नोले दान लशा, सीदोन जाक्दीम्मा बाक्त। 7 मिनु नोले गारो हिरशो सहर टायर, हिक्वी नु कनानी आन सहर नेल्ल लमा बाक्त। नोले यहूदा डा नेगेब डा बेयर-शेबा सहर सम्म लमा बाक्त। 8 मिनु ९ महिना नु २० नाक्त नोले मेकोपुकी रागी नेल्ल हिरशा, लेश्शा यरूसलेम जाक्मा बाक्त। 9 मिनु योआबम पिप कली “या चलेने चाख लडाइ पाइब इस्त्राएलम ८ लाख नु यहूदाम ५ लाख बाक्तेक्म” दे शॅदा बाक्त।

10 मिनु नोले दाऊद मुर आन कली हिक्शो आ पर्बम आ थुं मनुमावत। मिनु दाऊदमी परमप्रभु यावे कली “गो मुर आन कली हिक्शा ठेयब पाप

पाता। मुल परमप्रभु यावे, इन वाइल आ मरिश्शो पशो क्याम्दीन। मारदे हना गो थम मूर्ख गेय पाता” दॅमावत। २सामुएल १२:१३ 11 मिनु दाऊद सुनी कना बोक्मावत। मिनु परमप्रभु यावेमी आ लोत्र पाइब गाद कली लोत्र पवा बाक्त। 12 मार लोत्र पवा बाक्त दॅशा हना “गे दाऊद कली परमप्रभु यावेम इ कली मार दॅब दॅशा हना ‘गो इ कली लोत्र सां गेनन। मेको आन दाते डा का योत्रचा माल्नेवे। मिनु गो मेको इ कली पाइनुड’ दॅत” दॅमावत। 13 मिनु गाद दाऊद आ बाक्तीक जाक्शा “इन कली नु रागी कली बर्स सां सम्म अन्काल दुम्तीके, महिना सां सम्म इन जोरी सन्तुम खेदा पचा पुंइसीतीके नु इन रागीम नाक्त सां सम्म मुर बेक्तीक रोइ जाक्तीके, तेको योत्रनीनी मिम्शा दॅनीन। मिनु आं कली सोइक्ब कली मार दॅचा माल्नुडा दॅनीन” दॅमावत। येरमीया २४:१०; इजीकीएल ६:११-१२ 14 मिनु दाऊदम गाद कली “गो शुश श्येत जशो बाक्नुड। आंइ कली परमप्रभु यावे आ गुडम दुम्चान रिश्शो बाक्ब। मारदे हना आ शिशी ठेयब बाक्ब। गो मुर आन गुडम मदुम्डल” दॅमावत।

15 मोपतीके परमप्रभु यावेमी आ दॅशो नाक्त रे इस्त्राएल नेल्लेम मुर बेक्तीक रोइ जाक्पदा बाक्त। मिनु दान रे बेयर-शेबा सम्म ७० हजार मुर बेक्मा बाक्त। 16 मिनु परमप्रभु यावे आ स्वर्ग डा गेय पाइबमी यरूसलेम खतम पोक्चा कली आ गुइ मेक गे दिंदा बाक्त। मिनु परमप्रभु यावेमी मुर आन कली खतम सेल्ब आ स्वर्ग डा गेय पाइब कली तेक्शा “मोक्ल, मुल दुम्त” दॅमावत। मेना मेको परमप्रभु यावे आ स्वर्ग डा गेय पाइब यबुसी अरौनाह आ खलाम राप्शो बाक्मावत। उत्पत्ती १९:१३; प्रस्थान १२:२३; यसैया ५४:१६ 17 मिनु दाऊदमी मेको मुर आन कली साइक्ब परमप्रभु आ आ स्वर्ग डा गेय पाइब कली तवा बाक्त। मिनु मेकोमी परमप्रभु यावे कली “पाप पाइब, गो आं का ला नड। इन अरॅशो लोत्र मटीब यो गो नड। तन्न एको मुर मार पामे डा? गे आं कली नु आं खिं डा मुर आन कली श्येत गेने” दॅमावत। गन्ती १६:२२ 18 मेको नाक्ती गाद दाऊद आ बाक्तीकेम जाक्शा, मेको कली “गे लशा, यबुसी अरौनाह आ खलाम परमप्रभु यावे कली चढेतीक का सेलो” दॅमावत। 19 मिनु परमप्रभु यावेमी अरॅशो गादमी दॅशो खोदॅशो पा दाऊद इर डोइश्शा लमावत। 20 मिनु अरौनाहम पिप नु आ मुर आन कली आ बाक्तीक गे पिशो तशा, पिप आ डौंइती खुम्की पा बाप्शा सेउ पवा बाक्त। 21 मिनु अरौनाहमी “मारदे आं प्रभु पिप इन वाइल कली गुम्थ जाक्नी” दे हिल्लो पवा बाक्त। मिनु दाऊदमी “गो परमप्रभु यावे कली चढेतीक का सेल्चा, दे इ खला ग्याप्थ जाक्ती। मो पाता हना, एको मुर बेक्तीक रोइ दिक्बा कौं?” दॅमावत। 22 मिनु अरौनाहमी दाऊद कली “आं प्रभु पिप मेको इन के दुम्त। मिनु दोदॅशो दाक्नीनी मोदॅशो पा चढेन। चोशा चढेचा कली गो नु ब्यफ बाक्नीम। शी कली जुवा नु दांइ पतीक शी बाक्नीम। 23 पिप, गो इन कली मेको नेल्ल गेनुड। परमप्रभु यावे, इन परमप्रभुम इन चढेचो ब्रवल” दॅमावत। 24 तन्न पिपमी अरौनाह कली “ममाइ, गो मेको ग्याप्नुड। गो क्येट मथाप्शो थोत्रक परमप्रभु यावे, आं परमप्रभु कली मचढेनुड” दॅमावत। मोपतीके दाऊदम मेको खला नु ब्यफ डा ५० शेकेल चांदी थाप्शा ग्यबा बाक्त। शेकेल का ११.५ ग्राम बाक्ब। 25 मिनु दाऊदम मेकेर परमप्रभु यावे कली चढेतीक का सेला बाक्त। मिनु चोशा चढेतीक नु दुशा बाक्चा आ पर्बम चढेतीके चढेवा बाक्त। मिनु परमप्रभु यावेमी रागी आ पर्बम पुंइशो लोत्र नेना बाक्त। मिनु इस्त्राएलम मुर बेक्तीक रोइ दिक्मावत। २सामुएल २१:१४



## १ राजा

नेल्ल क्येडा नोले ब्रेक्ब मुर मतुइक्नीम। एको ब्रेक्ब मुरुमी यहूदा डा पिप आन इतिहास नु इस्राएल डा पिप आन इतिहास डा किताब तुइश्शो बाक्त। एको किताब ५६१ बि. सी. मेर ब्रेक्शो दुम्चा माल्ब। मारदे हना मेना पिप योयाकीन जेल्खान रे गूशो बाक्त।

डॉइती १राजा नु २राजा हिब्रू लोव्रमी ब्रेक्शो किताब का बाक्त। नेल्ल ग्रीक लोव्रमी सेप्टुआगीन्त माइश्शो किताबम निक्शी सेल्मे बाक्त। डॉइती राजा किताब निक्शी, सामुएल किताब निक्शी, यहोसु नु न्यायाधीस किताब कली “परमप्रभु यावे आ लोव्र पाइब आन किताब” दँशो बाक्मा बाक्त। मेको किताबपुकीमी मोसा रे इस्राएली ग्याइश्शा लाइक्चा पुंडसीमा सम्म डा लोव्र नेल्ल ब्रेक्शो बाक्त। १राजा किताबमी दाऊद खाल्पा दुम्शो रे आ तौ सोलोमन नोले डा यहूदा नु इस्राएल डा पिप आहाब नु आ तौ अहज्याह सम्म डा लोव्र ब्रेक्शो बाक्ब।

### अबीशागम पिप कली काल्गी पशो

1 मिनू दाऊद पिप शुश बर्स दुम्शा, थम खूशो दुम्माक्त। मिनू वा फेक्सेनु, यो महोमाक्त। 2 मोपतीके मेको आ गेय पाइबपुकीम मेको कली “आंड प्रभु पिप इन कली कोव्रचा कली नु इन काल्गी पचा कली, गो कन्ने मीश आल का माल्नीकी। मिनू मेको आंड प्रभु पिप, इन कली होपाइक्चा कली इन नु इप्ल” देमा बाक्त। 3 मिनू मेकोपुकीम इस्राएल रागी नेल्लेम दारशो मीश आल का माल्मेनु, शुनेम सहर डा अबीशाग, कन्ने मीश आल कली थित्मे बाक्त। मिनू मेको कली पिप आ बाक्तीक चाक्मे बाक्त। 4 मेको थम दारशो मीश आल बाक्माक्त। मिनू मेकोमी पिप कली कोव्रचा नु आ काल्गी पचा गोवा बाक्त। तन्न पिप मेको नु मबाक्माक्त।

### अदोनीयाह पिप दुम्चा माल्शो

5 मिनू हग्गीथ आ तौ अदोनीयाहम आंम कली ठेयब सेल्शा “गोन पिप दुम्नुड” दँचा गोवा बाक्त। मोपतीके मेकोम बग्गीपुकी, शारा डोइक्बपुकी नु आ डॉइडॉइती दौरपाइक्चा कली ५० जना मुर ठीक पवा बाक्त। २सामुएल ३:४; २सामुएल १५:१ 6 मिनू मेको आ आफोम मेको कली “गे मारदे मोदँशो पवी?” दे गेनायो महुइक्ता बाक्त। अदोनीयाह यो थम दारशो मुर का बाक्माक्त। मेको अब्बालोम क्येडा नोले जरमेशो बाक्माक्त। 7 मिनू मेकोमी सेरूयाह आ तौ योआब नु चढेब अबीयाथार नु लोव्र गारपदा बाक्त। मिनू मेको निक्शीमी अदोनीयाह कली वारच पदसे बाक्त। १राजा २:२७ 8 तन्न चढेब सादोक, येहो-यादा आ तौ बेनायाह, परमप्रभु यावे आ लोव्र पाइब नाथान, शिमेइ, रेड नु दाऊद आ लडाइ पाइबपुकी चहिं अदोनीयाह नु मगारमा बाक्त।

9 मिनू अदोनीयाहमी एन-रोगेल आ नेक्था डा सोहेलेथ दँशो फुल्लुम भेडा, ब्यफ नु दोम्शो बस्तु भाव चढेवा बाक्त। मिनू मेकोमी आ लोक्ब नेल्ले, पिप आ तौ नेल्ले नु पिप आ ठेयब गेय पाइब यहूदा डा मुर नेल्ल आन कली ब्रेत्तीमी बाक्त। यहोसु १५:७-८ 10 तन्न मेकोमी परमप्रभु यावे आ लोव्र पाइब नाथान, बेनायाह, लडाइ पाइबपुकी नु आ लोक्ब सोलोमन आन कली चहिं मब्रेत्ता बाक्त।

11 मिनू नाथानमी सोलोमन आ ममा बाथ्शेबा कली “मार गे हग्गीथ आ तौ अदोनीयाह आंड प्रभु दाऊद आ मतुइक्थु पिप दुम्त दँशो लोव्र मननी? 12 मोपतीके मुल नेनीन। आंम इन कली नु इन तौ सोलोमन कली दोपा प्रॉइने चाम्सीबा, मेको आ पर्वम गो इन कली सल्ला गेनुड। 13 मुल रीब पा लशा, पिप दाऊद कली गुमीन। मिनू मेको कली ‘आं प्रभु, मार, गे इन वाइलीम नु थमा पा इ तौ सोलोमन आं नोले पिप दुम्ब। मिनू मेको आं नित्तीकेम निख्व दँशो मननी डा? मिनू मुल मारदे अदोनीयाह कका पिप दुम्मे?’ देनीन। १इतिहास २८:५-१० 14 मिनू मोपा गे पिप नु लोव्र पना पन बाक्नीनु, गो जाक्नुड। मिनू गो इन दँशो लोव्रम लोव्र तेम्नुड” दँमाक्त।

15 मिनू बाथ्शेबा पिप आ बाक्तीक कोठाम ओव्रमाक्त। पिप थम खूशो दुम्शो बाक्माक्त। मेना शुनेम सहर डा अबीशागमी मेको आ काल्गी पना पन बाक्माक्त। 16 मिनू बाथ्शेबाम पिप आ डॉइती बाप्शा आ पोक्च थेक्शा सेउ पवा बाक्त। मिनू पिपम “गे मार पुनी” दे मदा बाक्त। 17 मिनू मेकोमी पिप कली “आं प्रभु, गे इन वाइलीम, आं कली परमप्रभु यावे, इन परमप्रभु आ डॉइती कसम जशा ‘इ तौ सोलोमन आं नोले पिप दुम्ब। मिनू आं नित्तीकेम निख्व’ दँशो ननी। 18 तन्न मुल अदोनीयाह कका पिप दुम्त। एको लोव्र आं प्रभु पिपम मतुइश्शो बाक्नीनी। 19 मेकोमी शुश ब्यफ नु दोम्शो बस्तु भाव नु भेडा क्योरशा चढेशो बाक्ब। मिनू पिप आ आल नेल्ले, चढेब अबीयाथार नु लडाइ पाइब आन नेल्ल क्येडा ठेयब मुर योआब नेल्ल आन कली ब्रेश्शो बाक्ब। तन्न इन गेय पाइब सोलोमन कली चहिं मब्रेश्शो बाक्ब। 20 मिनू मुल आं प्रभु पिप, इन नोले सु पिप दुम्ब? मिनू इन नित्तीकेम सु निख्वा, दे तुइक्चा कली इस्राएल डा मुर नेल्लेम इन लां कोव्रशो बाक्नीम। 21 मो मद्दुम्त हना, नोले गे आं प्रभु पिप इन किकी पिपी नु इप्नीनी। मिनू गो नु आं तौ सोलोमन आंस कली मरिम्शो पाइब खोदँशो सेल्नीम” दे बाथ्शेबाम दँमाक्त।

22 मिनू मेको पिप नु लोव्र पना पन बाक्मेनु, परमप्रभु यावे आ लोव्र पाइब नाथान जाक्माक्त। 23 मिनू पिप कली “परमप्रभु यावे आ लोव्र पाइब नाथान जाक्शो बाक्ब” दँशो लोव्र नैपदमे बाक्त। मिनू नाथान जाक्शा, खप सम्मन बाप्शा, पिप कली सेउ पवा बाक्त। 24 मिनू नाथानम “आं प्रभु पिपमी ‘अदोनीयाह आं नोले पिप दुम्ब। मिनू आं नित्तीकेमी निख्व’ दँशो ननी देय मननी? 25 मेको मुलाक्ती उइ ब्रुष्ठा शुश ब्यफ, दोम्शो बस्तु भाव नु भेडा क्योरशा चढेशो बाक्ब। मिनू मेकोम पिप इन आल नेल्ले, लडाइ पाइब आन ठेयब मुर योआब नु चढेब अबीयाथार नेल्ल आन कली ब्रेश्शो बाक्ब। मिनू मुल मेको नेल्ल मेको आ डॉइती जना जन, तूना तून ‘पिप अदोनीयाह गेना हना यो ब्रॉइशा बाक्ल’ दँना दँन बाक्नीम। 26 तन्न मेकोम इन गेय पाइब आं कली, चढेब सादोक, येहो-यादा आ तौ बेनायाह नु इन गेय पाइब सोलोमन आंड कली मब्रेत्तीकी। 27 मार, आं प्रभु पिप इन दँतीके मो पशो नमी? मिनू गो इन गेय पाइब आंड कली चहिं इन नोले सु पिप दुम्ब, दे मशँदीनी” दँमाक्त।

### दाऊदम सोलोमन कली पिप सेल्शो

28 मिनू पिप दाऊदमी “बाथ्शेबा कली आं नेक्था ब्रेत्तीन” दँमाक्त। मिनू मेको पिप आ डॉइती जाक्शा राम्माक्त। 29 मिनू पिपमी “गो आं कली आं श्येत नेल्ल रे प्रॉइब नु गेना हना यो बाक्ब परमप्रभु यावे ब्रॉइशा बाक्शो खोदँशो पा गो कसम जाइनुड। 30 डॉइती गो परमप्रभु यावे, इस्राएली आन परमप्रभु आ नैमी इ कली ‘इ तौ सोलोमन आं नोले पिप दुम्ब। मिनू आं नित्तीकेम निश्शा, आं पा डा पिप दुम्ब’ दँती। मुलाक्त गो मेको कसम जशो खान्पुड” दँमाक्त। 31 मिनू बाथ्शेबा पिप आ डॉइती आ पोक्च थेक्शा बाप्शा “आं प्रभु पिप दाऊद गेना हना यो ब्रॉइशा बाक्ल” दँमाक्त।

32 मिनु पिप दाऊदम “चढ़ेब सादोक, परमप्रभु यावे आ लोत्र पाइब नाथान नु येहो-यादा आ तौ बेनायाह आन कली ब्रेत्तीने” दैमाक्त। मिनु मेको पिप आ डोईती जाक्का बाक्त। 33 मिनु पिपम मेको आन कली “गे इन प्रभु, आं ठेयब गेय पाइब आन कली लतीन। मिनु आं तौ सोलोमन कली आं खच्चरम डोइक्पाइश्शा गिहोन सम्म लतीन। 34 मिनु मेकेर चढ़ेब सादोक नु परमप्रभु यावे आ लोत्र पाइब नाथानमी मेको कली तेल लुक्शा इस्त्राएल डा पिप सेल्सेक्ल। मिनु तुराही ताप्शा ‘पिप सोलोमन गेना हना यो ब्रॉइशा बाक्ल’ दैमल। 35 मिनु मेको आ नोले खोतीन। मेको जाक्का आं नित्तीकेम नित्त्वा माल्ब। मिनु मेकोम आं पा डा सासन पचा माल्ब। मारदे हना गो मेको कली इस्त्राएल नु यहूदाम सासन पचा कली योव्रता” दैमाक्त। 36 मिनु येहो-यादा आ तौ बेनायाहम पिप कली “आमेन। परमप्रभु यावे, आं प्रभु पिप आ परमप्रभुमी मोदेशोन पवल। 37 दोपा परमप्रभु यावे आं प्रभु पिप इन नु बाक्मे, मोपान सोलोमन नु यो बाक्ल। मिनु मेको आ राज्य आं प्रभु पिप दाऊद आ राज्य क्येडा यो सक्ति पाइश्शो सेलल” दैमाक्त।

### सोलोमन कली पिप सेल्शो

38 मिनु चढ़ेब सादोक, परमप्रभु यावे आ लोत्र पाइब नाथान, येहो-यादा आ तौ बेनायाह नु केरेथी नु पेलेथी उड ब्रुप्शा सोलोमन कली दाऊद पिप आ खच्चरम डोइक्पाइश्शा गिहोन सम्म लदमे बाक्त। २सामुएल ८:१८ 39 मिनु चढ़ेब सादोकमी परमप्रभु यावे आ ताम्बु रे तेल वोइश्शो ग्राव्र गुंइशा सोलोमन कली लुक्शा पिप सेला बाक्त। मिनु मेकोपुकीम तुराही ताप्मे बाक्त। मिनु मुर नेल्लेम ठेयब सैदा पा “पिप सोलोमन गेना हना यो ब्रॉइशा बाक्ल” दैमा बाक्त। १इतिहास २३:१; २सामुएल २९:२२ 40 मिनु मुर नेल्ल ठेयब सैदा पा ग्येरशा बांसुरी ताप्शा, मेको आन नोनोले इर डोइश्शा लमा बाक्त। मिनु मेको आन ग्येरशा रेयके पशोम रागी नेल्ल मुरदा बाक्त।

41 मिनु अदोनीयाह नु आ मुरपुकीम मेको रेयके नेन्मे बाक्त। मेना मेकोपुकीमी नक भोज जने ला थुश्शो बाक्का बाक्त। मिनु योआबमी तुराही ग्रीशो नैशा “सहरम मार रेयके पामे?” दैमाक्त। 42 मिनु मेकोमी मो दैन दैना चढ़ेब अबीयाथार आ तौ योनाथन जाक्का बाक्त। मिनु अदोनीयाहमी मेको कली “खिंडगा पिवो। गे रिश्शो मुर बाक्नेवे। मिनु गे थमा पा रिश्शो लोत्र चाक्मी माड” दैमाक्त। २सामुएल १५:२७, ३६ 43 मिनु योनाथनमी अदोनीयाह कली “ममाड, इ प्रभु पिप दाऊदमी सोलोमन कली पिप सेल्लु। 44 पिपमी चढ़ेब सादोक, परमप्रभु यावे आ लोत्र पाइब नाथान, येहो-यादा आ तौ बेनायाह नु केरेथी नु पेलेथी आन कली मेको नु सोइक्ताक्वा। मिनु मेकोपुकीम मेको कली पिप आ खच्चरम डोइक्पाइश्शा लाइक्तेक्म।

45 मिनु चढ़ेब सादोक नु परमप्रभु यावे आ लोत्र पाइब नाथानमी मेको कली गिहोनमी तेल लुक्शा, पिप सेल्लाक्सा। मिनु मुल मेकोपुकीम मेको कली ग्येरशा इर खिं लाइक्तेक्म। मोपतीके सहरम रेयके दुश्शो बाक्ब। गेपुकीम मेको रेयके नैशो बाक्नीनी। 46 मुल सोलोमन पिप आ नित्तीकेम निष्ब।

47 मिनु पिप आ खिं डा ठेयब गेय पाइब मुरपुकीमी इं प्रभु पिप दाऊद कली ‘इन परमप्रभुम इन तौ सोलोमन आ नें इन क्येडा यो सक्ति पाइश्शो सेलल। मिनु मेको आ नित्तीक इन नित्तीक क्येडा यो सक्ति पाइश्शो सेलल’ दैथ लशो बाक्नीम। मिनु पिपमी आ खाटमी बाप्शा 48 ‘परमप्रभु यावे, इस्त्राएली आन परमप्रभु ठेयब बाक्ब। मुलाक्ती मेकोमी आं सेस बाक्ना बाक्न, आं कली तपाइक्वा कली आं नित्तीकेम पिप का निप्पाइक्वु’ दैत” दैमाक्त।

49 मोपतीके अदोनीयाह आ मुरपुकी हिंशा छुल छाल बोक्शा आन लां खोदमे बाक्त। 50 मिनु अदोनीयाह आंमा यो सोलोमन क्येडा हिंशा लशा, चढ़ेतीक डा ग्राव्र ग्याइक्ता बाक्त। 51 मेको नोले सोलोमन कली “अदोनीयाह पिप क्येडा हिंशा, चढ़ेतीक डा ग्राव्र ग्याइश्शा ‘पिप सोलोमनम आ गेय पाइब आं कली मक्योरनुड, दे कसम जवल’ दैशो बाक्ब” दैशो लोत्र नैपदमे बाक्त। १राजा २:२८ 52 मिनु सोलोमनमी “मेकोमी गो ओदेंब पाइब मुर नड, दैने चाप्तु हना, मेको के आ चां का यो महेम्ब। तन्न मेकोम मरिश्शो पशो थिंसाक्व हना, मेको थमा पा साइक्वा पुंइसीब” दैमाक्त। २सामुएल १४:११ 53 मिनु पिप सोलोमनम मुर आन कली सोइश्शा, मेको कली चढ़ेतीक रे उड तोइक्पदा बाक्त। मिनु अदोनीयाह जाक्का, पिप सोलोमन

कली सेउ पवा बाक्त। मिनु सोलोमनम मेको कली “इ खिं लावो” दे मदा बाक्त।

### दाऊदमी सोलोमन कली अरेशो

2 मिनु दाऊद आ बेक्ची ना जाक्का बाक्त। मिनु मेकोमी आ तौ सोलोमन कली आ बाक्शो मारेइ मारेइ जिम्मा गेवा बाक्त। 2 मिनु मेकोमी “गो रागी डा मुर नेल्ल आन खोदेंशो पा बेक्नुड। मोपतीके गे बोल्यो नु महिंब दुमो। 3 मिनु गे परमप्रभु यावे, इ परमप्रभु आ दैशो टिवो। मेको आ लांम गाक्को। मिनु मोसा आ अरेशो लोत्रम गेशो खोदेंशो पा परमप्रभु यावे आ फुल्लुम मुशा ब्रेक्शो लोत्र, आ शेंशो, आ दैशो पतीक लोत्र नु आ गेशो अर्ती नेल्ल पावो। मिनु गे मार मार पाइनेवे, ते ते लाइनेवे, मेको नेल्ल रिश्शो दुम्ल। ब्यक्स्था १७:१४-२०; यहोसु १:७ 4 परमप्रभु यावेमी आं कली ‘इ तौ चच नेल्लेम आंमा दोपा बाक्का माल्बा, दे मिम्ताक्म हना नु आन थुं नु आन सोक्त नेल्लेम आं कली मप्रॉइथु आं डोईती गाक्तेक्म हना, गेना हना यो इस्त्राएलम हुकुम पचा कली इ तौ चच का लीब’ दे लोत्र गेशा कबल पशो बाक्ब।

5 सेरूयाह आ तौ योआबम आं कली मार पवा? गे मेको तुइक्नेवे। मेकोमी इस्त्राएल डा लडाइ पाइब आन ठेयब मुर नेर आ तौ आबनेर नु येथेर आ तौ आमासा आस कली साइक्तीम्सी। मेको लोत्र गे आंमा तुइश्शो बाक्नेवे। मेकोमी मेको निम्फा आस कली लडाइ मडुम्थु, थुं नाइश्शा बाक्तीक ना साइक्तीम्सी। मिनु मेको हुशेमीन आ किप्थुर नु आ जुत्ता दोस ताइब सेल्लु। २सामुएल ३:२७; २सामुएल २०:१० 6 मोपतीके इ जोक्ब तुइक्ब थुंम मार पचा दैबा, मेको पावो। तन्न मेको आ बोइश्शो चां थुं मनाइक्थु बेक्शो मुर आन बाक्तीकेम लल। 7 गिलाद डा बारजील्लाड आ तौ आन कली चहिं मप्रॉइथु रिश्शो पावो। मेको गे नु काथा जाइब आन दातेमी बाक्मल। गो इ लोक्ब अब्बालोम क्येडा प्रोक्शा गाक्कानु, मेकोपुकीम रिश्शो पाम्तेक्म। २सामुएल १७:२७; २सामुएल १९:३२-४१; २सामुएल १५:- 8 मिनु गे बाहुरीम डा बेन्यामीन आ थर डा गेरा आ तौ शिमेइ कली योवकी पावो। मेकोमी गो महा-नाइम लडा नाक्त आं कली थाप्मा सराप पाइक्ती। नोले मेको यर्दन खोलाम आं कली ग्युम्थ जाक्त। मिनु मेना गो मेको कली ‘मसाइक्वन’ दे परमप्रभु यावे आ नें थिशा कसम जाता। २सामुएल १६:५; २सामुएल १९:१७-२४ 9 तन्न मुल गे मेको कली दोस मताइब ममिम्तो। गे जोक्ब तुइक्ब मुर बाक्नेवे। मोपतीके मेको कली मार पचा माल्बा, मेको तुइक्नेवे। मेको आ बोइश्शो चां हुश सुन्दा बेक्शो मुर आन बाक्तीकेम सोइक्तो” दैमाक्त।

10 मिनु दाऊद बेक्का बाक्त। मिनु दाऊद आ सहरम थिम्चा पुंइसे बाक्त।

11 दाऊदम इस्त्राएलम ४० बर्स सम्म सासन पवा बाक्त। मेकोम ७ बर्स हेब्रोनमी नु ३३ बर्स यरूस्सलेमम सासन पवा बाक्त। २सामुएल ५:४-५; १इतिहास २९:२७ 12 मिनु सोलोमन आ आफ दाऊद आ पा डा पिप दुम्माक्त। मिनु मेको आ राज्य बोल्यो दुम्माक्त।

### सोलोमनमी अदोनीयाह साइश्शो

13 मिनु हग्गीथ आ तौ अदोनीयाह, सोलोमन आ ममा बाथोबा बाक्तीक जाक्का बाक्त। मिनु बाथोबाम मेको कली “मार गे रिश्शो मिम्शा जाक्डे” दे हिल्लो पवा बाक्त। मिनु मेकोमी “ओं रिश्शो पान जाक्ती” दैमाक्त। 14 मिनु मेकोम लेंशा “गो इन कली लोत्र का दैनुड” दैमाक्त। मिनु मेकोम “दुम्ब दैनो” दैमाक्त। 15 मिनु अदोनीयाहम “राज्य आं के बाक्त। गे मेको तुइक्नीनी। मिनु इस्त्राएली नेल्लेम आं कली पिप दुम्ब, दे मिम्शो बाक्तेक्म। तन्न मारेइ मारेइ दूली दुम्त। मुल राज्य आं लोक्ब के दुम्त। मारदे हना परमप्रभु यावे आ दाक्शो मेकोन बाक्त। 16 मुल गो इन कली लोत्र का पाइनुड। आं पशो लोत्र मडुम्ब मदेनीन” दैमाक्त। मिनु मेकोमी “मेको मार बाक्बा? दैनो” दैमाक्त। 17 मिनु अदोनीयाहम “गो शुनेम सहर डा अबीशाग कली ग्युंवे पचा तडल, दे पिप सोलोमन कली पुनीन। मेकोमी इन कली मडुम्ब मदेन” दैमाक्त। १राजा १:३; २सामुएल ३:७ 18 मिनु बाथोबाम “मेको रिश्शो बाक्ब। गो इ पर्वम पिप नु लोत्र पाइनुड” दैमाक्त।

19 मोपतीके बाथ्शेबा अदोनीयाह आ पर्वम लोत्र पथ पिप सोलोमन आ बाक्तीक लमाक्त। मिनु पिप मेको कली मान पथ बोक्माक्त। मिनु आ ममा आ डोंइती बाष्ठा मान पा, आ नित्तीकेम निस्से बाक्त। पिप सोलोमनम आ ममा कली नित्चा कली नित्तीक का चाक्पदा बाक्त। मिनु मेको पिप आ ग्युरा गे निस्से बाक्त। 20 मिनु मेकोमी “गो गे नु आइक्च लोत्र का पचा माल्नुड। मेको आं लोत्र मदुम्ब मदेनो” देमाक्त। मिनु पिपमी आ ममा कली “मार देंनीनी? आं ममा गो इन लोत्र मदुम्ब मदेनुड” देमाक्त। 21 मिनु मेकोमी “इ लोकब अदोनीयाह नु शुनेम सहर डा अबीशाग आस कली ग्युंवे पाइक्सी” देमाक्त। 22 मिनु पिप सोलोमनम आ ममा कली “गे मारदे शुनेम सहर डा अबीशाग नु अदोनीयाह आस कली ग्युंवे पाइक्चा कली पुंडनी? गे मेको कली राज्य पुंडतीनी हना यो दुम्ब। मारदे हना मेको आं ठेयब लोकब बाक्ब। चढेब अबीयाथार नु सेरूयाह आ तौ योआब आस पर्वम यो पुनीन” देमाक्त। १राजा १:६-७ 23 मिनु पिप सोलोमनम परमप्रभु यावे आ नें थिशा “एको आ पर्वम अदोनीयाह साइक्चा मपुंडसाक्व हना, परमप्रभुम आं कली थम मरिश्शो सजाइ गेयील” दे कसम जवा बाक्त। 24 मनु “मुल आं कली आं आफ दाऊद आ राज्यम वोइक्ब नु आ पाइनुड देंशो लोत्र खाष्ठा, आं थर आन कली सेल्ब परमप्रभु यावे ब्रॉइशा बाक्शो खोदेंशो पा, गो कसम जशा देंनुड, अदोनीयाह मुलाक्तीन साइक्चा पुंडसीब” देमाक्त। 25 मेको नोले पिप सोलोमनम येहो-यादा आ तौ बेनायाह कली “अदोनीयाह कली तुष्ठा सतो” दे हुकुम गेवा बाक्त। मिनु मेकोम अदोनीयाह कली तुष्ठा सदा बाक्त।

26 मिनु पिपम चढेब अबीयाथार कली “अनाथोथम बाक्शो इ खिंम लावो। गे साइक्चा पुंडसीब बाक्नेवे। मो हना यो मुल गो इ कली मसाइक्चन। मारदे हना गे आं आफ दाऊद आ डोंइती परमप्रभु यावे आ सन्दोस कुरब बाक्ते। मिनु गे मेको आ श्येत नेल्लेम बाक्शो बाक्ते” देमाक्त। १राजा १:७; १सामुएल २२:२०-२३; १सामुएल ३०:७; २सामुएल १५:२४ 27 मोपतीके सोलोमनम अबीयाथार कली परमप्रभु यावे कली चढेतीक गेय रे गुंडदा बाक्त। मोपा परमप्रभु यावेमी शिलोम एली आ खिं आ पर्वम देंशो लोत्र गाम्माक्त। १सामुएल २:३१-३२

28 मिनु मेको लोत्र नेल्ल योआबम नेना बाक्त। मेको अब्बालोम गे ममाइ, तन्न अदोनीयाह गे बाक्शो बाक्माक्त। मिनु योआब प्रोक्शा परमप्रभु यावे आ ताम्बुम लमाक्त। मिनु चढेतीक आ ग्रोत्र ग्याइश्शा बाक्माक्त। १राजा १:५१ 29 मिनु पिप सोलोमनम “योआब प्रोक्शा लशा, परमप्रभु यावे आ ताम्बुम चढेतीक आ नेक्था जाक्दीश्शा बाक्शो बाक्ब” देंशो लोत्र नेना बाक्त। मिनु मेकोम येहो-यादा आ तौ बेनायाह कली “योआब कली तुष्ठा सतो” दे अरेशा सोइक्ता बाक्त। प्रस्थान २१:१२-१४ 30 मोपतीके बेनायाह परमप्रभु यावे आ ताम्बुम ओव्रशा, योआब कली “पिपम लाडगा गूडो देंशो बाक्ब” दे मदा बाक्त। तन्न मेकोम “गो एक उइ बेक्नुड” देमाक्त। मिनु बेनायाहमी लशा पिप कली योआब आ लोत्र नेंपदा बाक्त। 31 मिनु पिपमी बेनायाह कली “मेको आ देंशो खोदेंशो पावो। मेको कली साइश्शा थिमीन। मोपा योआब आ मोशा हुश ख्राक्श पोक्शो दोस गो नु आं आफ आ खिं रे क्याम्दीन। 32 मिनु परमप्रभु यावेमी मेको आ हुश ख्राक्श पोक्शो मेको आ पियामीन मोइक्ब। मारदे हना मेकोमी आं आफ दाऊद आ मतुइक्थु आ क्येडा ठीक पाइब इस्त्राएल डा लडाइ पाइब आन ठेयब मुर निक्शी नेर आ तौ आब्लेर नु येथेर आ तौ यहूदा डा ठेयब मुर आमासा आस कली साइश्शो बाक्त। १राजा २:५ 33 मेको आस हुश आ दोस गेना हना यो योआब नु मेको आ तौ चच आन पिया तार लील। तन्न दाऊद नु मेको आ तौ चच आन तार, मेको आन खिंम नु आन राज्यम परमप्रभु यावे आ डोंइती गेना हना यो थुं नाइश्शा बाक्तीक दुम्ब” देमाक्त। 34 मोपतीके येहो-यादा आ तौ बेनायाह इर लमाक्त। मिनु योआब कली तुष्ठा सदा बाक्त। मिनु मेको कली गोरशो रागी, आ खिं आ नेक्था आ रूम थिम्मे बाक्त। 35 मिनु पिपमी येहो-यादा आ तौ बेनायाह कली योआब आ पा डा लडाइ पाइब आन ठेयब मुर सेला बाक्त। मिनु चढेब अबीयाथार आ पा डा सादोक कली चढेब सेला बाक्त। १राजा ४:४

36 मेको नोले पिपमी शिमेइ कली ब्रथ सोइश्शा, मेको कली “यरूसलेममी खिं का सेल्शा, मेक उइ बाक्को। मिनु सहर प्रॉइशा तेइ मलावो। 37 सहर

प्रॉइशा, किद्रोन खोल्सा शोक्साक्वे हना, गे थमा पा साइक्चा पुंडसीनेवे। मो पाप्तीवी हना, इ हुश आ दोस इ पियामीन मॉइसीब” दे मदा बाक्त। 38 मिनु शिमेइम पिप कली “गे मार देंनी मेको रिश्शो बाक्ब। आं प्रभु पिपम आ वाइल कली देंशो खोदेंशो पा गो पाइनुड” देमाक्त। मोपतीके शुश नाक्त सम्म शिमेइ यरूसलेममीन बाक्माक्त।

39 तन्न बर्स सां नोले मेको आ वाइल निक्शी प्रोक्शा, गाथ डा पिप माकाह आ तौ अकीश आ बाक्तीक लसा बाक्त। मिनु शिमेइम “इ वाइल निक्शी गाथ सहरम बाक्ताक्स” देंशो लोत्र नेना बाक्त। 40 मिनु शिमेइ रीब पा आ गथाम लगम पाइश्शा, आ वाइल आस कली माल्थ गाथ डा अकीश आ बाक्तीक लमाक्त। मोपा शिमेइमी गाथ रे आ वाइल निक्शी आस कली चाक्सी बाक्त। 41 मिनु पिप सोलोमन कली शिमेइ यरूसलेम रे गाथ जाक्दीश्शा लेश्शा जाक्शो लोत्र नेंपदमे बाक्त। 42 मिनु पिपमी शिमेइ कली ब्रथ सोइक्ता बाक्त। मिनु मेको कली “मार, गो इ कली परमप्रभु यावे आ नें थिशा कसम जपाइश्शो मनडा डा? गे अर्को रागी लचा कली एको सहर रे गाक्ते हना, साइक्चा पुंडसीनेवे, देंशो मनडा? मिनु मेना गे आं कली ‘इन देंशो लोत्र रिश्शो बाक्ब देंशो मनवे?’ मेना गे ‘इन देंशो टीनुड’ देंशो नवे। 43 मिनु मारदे गे परमप्रभु यावे आ नें थिशा कसम जशो नु आं देंशो लोत्र मटिवी?” दे हिल्लो पवा बाक्त। 44 मिनु पिपम शिमेइ कली “आं आफ दाऊद आ पर्वम पशो मरिश्शो नेल्ल गे तुइश्शो बाक्नेवे। मुल परमप्रभु यावेमी मेको मरिश्शो पशो आ क्येक्क इ पियामीन मोइक्ब। १राजा २:८ 45 तन्न पिप सोलोमन आसीक ताइब। मिनु परमप्रभु यावे आ डोंइती दाऊद आ राज्य गेना हना यो लीब” देमाक्त। 46 मिनु पिपमी येहो-यादा आ तौ बेनायाह कली हुकुम गेवा बाक्त। मिनु मेको लशा, शिमेइ कली तुष्ठा सदा बाक्त। मिनु मेको बेक्माक्त। मोपा पिप सोलोमन आ राज्य बोल्यो दुम्माक्त।

सोलोमनम तुइक्तीक थुं पुंडशो

२इतिहास १:१-१२

3 सोलोमन आ ग्युंवेम पतीके इजीप्ट डा पिप फाराओ आ खिं डा मुर दुम्माक्त। मिनु सोलोमनम फाराओ आ तमी नु ग्युंवे पवा बाक्त।

मिनु मेको कली पिप आ खिं, परमप्रभु यावे आ खिं नु यरूसलेम डा गारो सेल्ने मथुमा सम्म दाऊद आ सहरम चाक्शा वोदा बाक्त। ब्यवस्था २३:८; १राजा ११:१-२ 2 मेना सम्म मुरपुक्कीम डांडा मेर चढेबाक्मा बाक्त। मारदे हना परमप्रभु यावे आ नें कली मान पा तेकोइ खिं मसेल्शो बाक्माक्त।

3 सोलोमनम चहिं परमप्रभु यावे कली दाक्शा, मेको आ लांम गाक्शा आ आफ दाऊद आ पशो खोदेंशो पवा बाक्त। तन्न मेकोमी डांडा डा थानम चढेशा, धूप चोइबाक्माक्त। 4 काले पिप सोलोमन गिबोन सहरम मार मार चढेथ लमाक्त। मारदे हना मेको डांडा नेल्ल क्येडा ठेयब चढेतीक बाक्माक्त। मिनु मेको चढेतीकेम सोलोमनम हजार का मार मार चोशा चढेतीक चढेवा बाक्त। इतिहास २१:२९; १राजा ९:२ 5 मिनु मेको नाक्दो परमप्रभु यावे गिबोनम सोलोमन आ डोमुम जाक्शा “गे मार पुंडनेवे, मेको गेनन” देमाक्त। 6 मिनु सोलोमनम “गे इन गेय पाइब, आं आफ दाऊद कली इन ठेयब गेना हना यो दाक्तीक कोंइताक्नी। मारदे हना मेको इन कली मप्रॉइथु, ठीक पाइब नु रिश्शो थुं पाइश्शो इन नोले खोइक्ब मुर बाक्त। मिनु गे मेको कली इन ठेयब नु गेना हना यो दाक्तीके कोंइशो बाक्तीनी। मिनु मुलाक्ती मेको आ नोले आ नित्तीकेम वोइक्चा कली मेको कली तौ का गेतीनी। १राजा १:४८ 7 मिनु मुल परमप्रभु यावे, आं परमप्रभु गे इन गेय पाइब, आं कली, आं आफ दाऊद आ पा डा पिप सेल्तीनी। मो हना यो गो आइक्च आल का ला बाक्नुड। मिनु गो दोपा लाडगा लचा माल्नुडा, दोपा जाक्चा माल्नुडा, मेको मतुइक्नुड। 8 मुल गो इन गेय पाइब इन योव्रशो मुर इस्त्राएली आन दातेम बाक्शो बाक्नुड। मेको शुश नु हिकने मचाप्चा डा बाक्नीम। १राजा ४:२० 9 मोपतीके इन गेय पाइब, आं कली इन मुर आन कली ठीक पा सासन पचा कली रुप्तीक थुं गेयीनी। मिनु गो रिश्शो नु मरिश्शो तिल्स जोक्नुड। मो मदुम्ब हना, एको इश्का इन मुर आन कली सुम सासन पने चाप्नीमी डा” देमाक्त।

10 मिनु परमप्रभु यावे सोलोमनम मेको लोत्र पुंडशो तशा, ग्येरसे बाक्त।

11 मोपतीके परमप्रभुमी मेको कली “गेमी एको लोत्र पुंडतीके, तन्न आंम इ

पर्वम शुश ब्रॉइतीक, शॉप चेम्तीके नु इ जोरी सत्रु आन कली साइक्तीक मपुंडतीके, मार ठीक बाक्म, दे रुप्तीक थुं पुंडतीके, <sup>12</sup> मुल गो इ पुंडशो गेनुड। गो थमा पा इ कली जोक्तीक तुइक्तीक थुं नु रुप्तीक थुं गेनन। डॉइती इ खोदेंशो अर्को सुइ मबाक्म। मिनु नोले यो इ खोदेंशो सुइ मद्दुम्नीम *ब्यवस्था* २६:१४ <sup>13</sup> मेको प्रॉइशा यो, गो अर्को इ मपुंडशो यो गेनन। गो मबेक्डे सम्म इ कली शॉप नु मान ततीके यो गेनन। तेकोइ पिपपुकी गे नु उइक्थ मद्दुम्नीम। *मत्ती* ६:३३ <sup>14</sup> मिनु गे इ आफ दाऊदम खोदेंशो पा, आं लांम गावते हना, आं फुल्लुम मुशा ब्रेक्शो लोत्र नु आं शेंतीके टिप्तीवी हना, गो इ कली शुश ब्रॉइचा गेनन” दैमाक्त।

<sup>15</sup> मिनु नोले सोलोमन सेंसे बाक्त। मिनु एको दा डोमु कका बाक्त, दे तुइक्ता बाक्त। मिनु मेको नोले यरूसलेम लेम्माक्त। मिनु परमप्रभु यावे आ कबल पशो सन्दोस आ नेक्था राम्माक्त। मिनु मेकेर चोशा चढेतीक नु दुशा बाक्तीक आ पर्वम चढेतीके चढेवा बाक्त। मिनु मेकोमी आ गेय पाइब नेल्ल आन कली भोज का गेमी बाक्त।

### सोलोमन आ निसाफ

<sup>16</sup> मिनु नोले तेल्लेम मीश मुर निक्शी पिप आ डॉइती जाक्शा, राप्सा बाक्त। <sup>17</sup> मिनु मेको आस दाते डा काम “आं प्रभु, एको मीश मुर नु गो खिं कामीन बाक्नस्कु। मिनु गो एको नु बाक्डानु, आल का थीता। <sup>18</sup> मिनु गो आल थिडा आ नाक्त सां नोले एकोमी यो आल का थिप्तु। मेकेर गो निक्शी ला बाक्शो नस्कु। मेको खिंम आंस निक्शी डा लाक्शा, अर्को सुइ मबाक्म। <sup>19</sup> मिनु नाक्दो एको मीश मुरुम आ तौ कली चिप्शा सदा बाक्त। <sup>20</sup> मिनु नाक्दो उइक्थ दुम्मेनु, गो, इन वाइलीम निन्द्रा पडा ना एको बोक्शा जाक्शा, आं तौ लदा बाक्त। मिनु आ बेक्शो तौ चहिं आं थुकुम वोदा बाक्त। <sup>21</sup> मिनु आ दीसा सुनी गो बोक्शा ‘आल दूध तुंडु’ दंडानु दा, आल बेक्शो बाक्त। तन्न गो मेको कली सुनी रिम्शो पा शिरशा कोवडुनु, मेको आं थिशो तौ ममाइ बाक्त” दैमाक्त। <sup>22</sup> मिनु मेको अर्को मीश मुरुम “ममाइ सेस आल आं तौ बाक्ब। बेक्शो इ के बाक्ब” दैमाक्त। तन्न डॉइती डा मीश मुरुम “ममाइ बेक्शो तौ इ के बाक्ब। सेस चहिं आं तौ बाक्ब” दैमाक्त। मोपा मेको निक्शी पिप आ डॉइती जिम्से बाक्त।

<sup>23</sup> मिनु पिपम “कामी ‘सेस तौ आं के बाक्ब। बेक्शो चहिं इ के बाक्ब’ दैत। मिनु अर्कोम ‘ममाइ बेक्शो तौ इ के बाक्ब। सेस चहिं आं तौ बाक्ब’ दैत” दैमाक्त। <sup>24</sup> मिनु पिपम “आं कली तरवार का चाक्शा गेयीनी” दैमाक्त। मिनु मेकोपुकीम पिप कली तरवार का चाक्शा गेमे बाक्त। <sup>25</sup> मिनु पिपम “मेको सेस आल कली उइक्थ पा क्योरीन। मिनु उइक्थ भाग का, का कली नु अर्को उइक्थ भाग का अर्को कली गेने” दैमाक्त। <sup>26</sup> मिनु मेको सेस आल आ ममाम आ तौ कली शिशो पा पिप कली “ए प्रभु, एको सेस आल एकोमीन लदल। एको आल कली मसतीन” दैमाक्त। मिनु अर्कोम चहिं “एको आल गे यो लाइक्वा मताइनेवे, गो यो लाइक्वा मताइनुड। एको कली उइक्थ पा क्योरीन” दैमाक्त। *यसैया* ४९:१५ <sup>27</sup> मिनु पिपम आ निसाफ डा लोत्र नैपाइशा “एको सेस आल डॉइती डा मीश मुर कली गेने। एको आल कली मसतीन। आल आ ममा एकोन बाक्ब” दैमाक्त। <sup>28</sup> मिनु पिप आ निसाफ नैशा, इस्राएली नेल्ल आन थुंमी रिम्शो पशो तुइश्शा, हिंमा बाक्त। मारदे हना मेकोपुकीम ठीक पा निसाफ पचा कली मेको आ थुंम परमप्रभु आ रुप्पाइक्तीक थुं बाक्त, दे तुइक्तमे बाक्त।

### सोलोमन आ गेय पाइबपुकी

<sup>4</sup> मोपा पिप सोलोमनम इस्राएल नेल्लेम सासन पवा बाक्त। <sup>2</sup> मेको आ ठेयब गेय पाइब सु सु बाक्मा बाक्त दैशा हना, सादोक आ तौ अजारयाह चढेब बाक्माक्त। <sup>3</sup> शीशा आ तौ एली-होरेफ नु अहीयाह ब्रेक्ब बाक्सा बाक्त। अहीलुद आ तौ येहो-शाफात हिक्शा ब्रेक्शा वोइक्ब मुर बाक्माक्त। <sup>4</sup> येहो-यादा आ तौ बेनायाह लडाइ पाइब आन ठेयब मुर बाक्माक्त। सादोक नु अबीयाथार चढेब बाक्सा बाक्त। *१राजा* २:३४-३५; *२सामुएल* २३:२० <sup>5</sup> नाथान आ तौ अजारयाह सासन पाइब आन ठेयब मुर बाक्माक्त। नाथान आ तौ जाबुद चढेब नु पिप आ वारच बाक्माक्त।

<sup>6</sup> अहीशार पिप आ खिं डा मारेइ मारेइ कोवब मुर बाक्माक्त। अब्दा आ तौ अदोनीराम गेय पाइब आन कली कोवब बाक्माक्त। *१राजा* ५:२८

<sup>7</sup> सोलोमनम इस्राएल नेल्लेम १२ जना सासन पाइब वोइश्शो बाक्माक्त। मेकोपुकीम पिप कली नु पिप आ खिं डा मुर आन कली जचा थोव्रक गारपाइक्बाक्मा बाक्त। मेको नेल्लेमी बर्सम महिना का का कली जचा थोव्रक चाक्तीक गेय पाइक्बाक्मा बाक्त। *१सामुएल* ८:११-१८ <sup>8</sup> मेको आन नें मार मार बाक्मा बाक्त दैशा हना, बेन-हुर, एफ्राइम पहाड डा ठेयब मुर बाक्माक्त। *बेन-हुर दैशो हुर आ तौ बाक्ब*। <sup>9</sup> बेन-देकेर, माकाज, शा-आल्बीम, बेथ-शेमेश नु एलोन-बेथ-हानान सहर डा ठेयब मुर बाक्माक्त। <sup>10</sup> बेन-हेसेद, अरुब्बोथ डा ठेयब मुर बाक्माक्त। मेको आ जिम्माम सोकोह नु हेफेर डा रागी नेल्ल बाक्मा बाक्त। <sup>11</sup> बेन-अबीनादाब नाफाथ-डोर डा ठेयब मुर बाक्माक्त। बेन-अबीनादाबम सोलोमन आ तमी थाफाथ कली ग्युंवे पशो बाक्माक्त। *१सामुएल* १६:८ <sup>12</sup> अहीलुद आ तौ बाना तानाक सहर, मेगीददो नु बेथ-शेआन डा ठेयब मुर बाक्माक्त। बेथ-शेआन चारेथन आ नेक्था नु येजेल आ दी बाक्ब। मेको बेथ-शेआन रे आबेल-मेहोलाह योकमाम सहर आ अर्को पटटी सम्म डा ठेयब मुर बाक्माक्त। <sup>13</sup> बेन-गेबेर रामोथ-गिलाद डा ठेयब मुर बाक्माक्त। मेको आ जिम्माम मनस्से आ तौ याइर आ गिलादम बाक्शो गाउंपुकी बाक्मा बाक्त। मेको के बाशान रागी डा अरगोब गारो हिरशो ६० ओटा ठेयब सहर यो बाक्मा बाक्त। मेको गारो डा लाप्चोम कांसा के आग्लो बाक्मा बाक्त। *गन्ती* ३२:४१ <sup>14</sup> इददो आ तौ अहीनादाब महा-नाइम डा ठेयब मुर बाक्माक्त। <sup>15</sup> अहीमाज नाप्टाली डा ठेयब मुर बाक्माक्त। मेकोम सोलोमन आ तमी बासेमाथ नु ग्युंवे पशो बाक्माक्त। <sup>16</sup> हुशाइ आ तौ बाना आशेर नु बेआलोथ डा मुर आन ठेयब मुर बाक्माक्त। <sup>17</sup> पारुआह आ तौ येहो-शाफात इस्साकार डा ठेयब मुर बाक्माक्त। <sup>18</sup> एला आ तौ शिमेइ बेन्यामीन रागी डा ठेयब मुर बाक्माक्त। <sup>19</sup> ऊरी आ तौ गेबेर गिलाद डा ठेयब मुर बाक्माक्त। मेको एमोरी आन पिप सीहोन नु बाशान रागी डा पिप ओग आस रागी डा यो ठेयब मुर बाक्माक्त। मिनु यहूदा रागी कली कोवब अर्को मुर मबाक्मा बाक्त।

### सोलोमन आ राज्य

<sup>20</sup> यहूदा नु इस्राएल डा मुरपुकी समुन्द्र डा बाल्वा खोदेंशो पा शुश बाक्मा बाक्त। मेकोपुकी जशा तूशा ग्येरशा बाक्बाक्मा बाक्त। *१राजा* ३:८; *उत्पत्ती* १३:१६ <sup>21</sup> सोलोमनम युफ्रेटीस खोला रे पलिस्ती आन रागी इजीप्ट डा सांद सम्म डा राज्यम सासन पशो बाक्माक्त। मिनु मेको रागीम सोलोमन कली तिरो थाप्वाक्मा बाक्त। मिनु मेकोपुकी सोलोमन ब्रॉइम सम्म मेको आ गेय पाइब दुश्शा बाक्मा बाक्त। *उत्पत्ती* १५:१८

<sup>22</sup> सोलोमन आ खिंमी काबु डा जचा थोव्रक ३० कोर रिम्शो फस नु ६० कोर अरु फस बाक्मा बाक्त। *कोर का* २२० लिटर डा ठेयब पुक्तीके बाक्ब। <sup>23</sup> मिनु १० ओटा दोम्शो ब्यफ, २० ओटा खर्कम योवशो ब्यफ नु सहे का क्यारश भेडा बाक्मा बाक्त। मेको प्रॉइशा किश्श, रोकेश नु दोम्शो हांसपुकी यो बाक्मा बाक्त। <sup>24</sup> मारदे हना मेकोम युफ्रेटीस खोला आ पच्छिम गे डा रागी तिप्साह रे गाजा सम्म युफ्रेटीस खोला आ पच्छिम गे बाक्ब पिप नेल्ल आन कली सासन पशो बाक्माक्त। मेको आ राज्य नेल्ल लडाइ मद्दुम्थु थुं नाइश्शा बाक्शो बाक्मा बाक्त। <sup>25</sup> सोलोमन बाक्म सम्म दान रे बेयर-शेबा सम्म यहूदा नु इस्राएल रिम्शो दुश्शा बाक्सा बाक्त। मुर नेल्ल आंम आंम अडगुर नु फोव्रशी जशा बाक्मा बाक्त। *लेवी* २५:१८ <sup>26</sup> सोलोमन के ४ हजार बग्गी कीब शारा आन कली वोइक्तीक खिं बाक्माक्त। मेको के १२ हजार शारा डोइक्ब बाक्मा बाक्त। *२इतिहास* ९:२५ <sup>27</sup> मिनु मेको १२ जना सासन पाइबपुकीमी महिना महिनाम पाल्पालो पा सोलोमन नु मेको नु बाक्शा जाइब आन कली जचा थोव्रक चाक्बाक्मा बाक्त। मोपा चाक्मेनु, मेकोपुकीम तेकोइ थोव्रक मखाइक्थु चाक्बाक्मा बाक्त। <sup>28</sup> मेकोपुकीमी शारा नु बग्गी कीब शारा आन कली यो क्योव्रज नु नल चाक्बाक्मा बाक्त। नेल्लेम आन पचा डा गेय पाइबाक्मा बाक्त।

### सोलोमन आ जोक्तीक तुइक्तीक

29 परमप्रभुमी सोलोमन कली शुश जोक्तीक तुइक्तीक थुं गेवा बाक्त। मेको आ रुप्तीके समुन्द्र डा बाल्वा खोदेशो पा शुश बाक्माक्त। 30 पूर्ब डा मुर नेल्ल नु इजीप्त डा मुर नेल्ले आन दातेमी सोलोमन के खोदेशो जोक्तीक तुइक्तीक थुं सुइ के मबाक्मा बाक्त। 31 मिनु मेको अरु नेल्ल आन क्येडा जोक्ब तुइक्ब दुम्माक्त। मेको एज्राह आ खिं डा एथान नु माहोल आ तौ हेमान, कल्कोल नु दारदा आन क्येडा यो शुश जोक्ब तुइक्ब बाक्माक्त। मिनु मोपा आ जोक्तीके तुइक्तीके रागी रागी डा मुर नेल्ल आन दातेमी ब्रमाक्त। 32 मेकोमी हजार सां अर्ती ब्रेक्ता बाक्त। मिनु हजार का ५ ओटा कुम्सो सेला बाक्त। उपदेसक १२:९ 33 मेकोमी रवा आन परबम लेबानोन डा लाइश्शो रवा रे लाइश्शा, गारोम वाब हिस्सोप माइश्शो सुप्तीक बोट सम्म आन परबम ब्रेक्ता बाक्त। मिनु मेकोमी चिक्ब, जन्तु, खपीम गेशा गाक्ब जन्तु नु डांड नेल्ल आन परबम यो ब्रेक्ता बाक्त। 34 रागी डा शुश मुर सोलोमन आ जोक्तीक तुइक्ती नेंचा तुइक्चा कली जाक्बाक्मा बाक्त। रागी डा पिपपुकीम सोलोमन आ परबम नेंशा, मेको आ लोव्र नेंचा कली मुर आन कली सोइक्बाक्मा बाक्त।

### परमप्रभु आ खिं सेल्चा चिक्शो

२इतिहास २:-

5 टायर डा पिप हीराममी सोलोमन आ आफ आ पा डा पिप दुम्शो बाक्ब देंशो लोव्र नेना बाक्त। मिनु मेकोमी आ गेय पाइब आन कली सोलोमन आ बाक्तीक सोइक्ता बाक्त। मारदे हना मेको गेना हना यो दाऊद आ वारच दुम्शा बाक्शो बाक्माक्त। २सामुएल ५:११ 2 मिनु सोलोमनम हीराम कली लोव्र सोइक्ता बाक्त। 3 मार लोव्र सोइक्ता बाक्त देंशा हना “परमप्रभु यावे, आं आफ दाऊदम आ परमप्रभु आ नें कली मान पा खिं का सेल्चा थुं पशा यो सेल्ने मचब। मारदे हना मेको आ एर ओंथ नेल्ल डा जोरी सनु नु लडाइ दुम्तीके नु परमप्रभु यावेमी मग्रापदा सम्म मोदेशो दुम्शो बाक्त। गे मेको लोव्र नेल्ल तुइक्नीनी। 4 तन्न मुल परमप्रभु यावे, आं परमप्रभुमी आं कली सुइ नु लडाइ मपपाइक्थु, थुं नाइश्शा बाक्चा गेती। आं कली लडाइ तोशा श्येत गेब सुइ मबाक्नीम। 5 मोपतीके मुल परमप्रभु यावेमी आं आफ दाऊद कली देंशो खोदेशो पा, गो परमप्रभु यावे, आं परमप्रभु आ नें कली मान पा, खिं का सेलु देंती। परमप्रभु यावेमी आं आफ दाऊद कली ‘गे इ पा डा पिप दुम्ब इ तौमी आं कली मान पा खिं का सेल्ब’ देंशो बाक्त। २सामुएल ७:१३ 6 मोपतीके गे आं कली लेबानोन रे लाइश्शो रवा क्योरशा चाक्चा हुकुम गेयीनी। आं गेय पाइबपुकी, इन गेय पाइबपुकी नु गारशा गेय पाइनीम। मिनु गे इन गेय पाइब आन कली दोशो गाल्च गेचा देंनीनी, गो मेको गेनुडमी। सीदोनी खोदेशो पा शी क्योरस जोक्ब एक आंइ दातेमी सुइ मबाक्नीम” दे लोव्र कुरब मुर सोइक्ता बाक्त।

7 मिनु हीरामम सोलोमन आ लोव्र नेंशा थाम्पा ग्येरसीशा “परमप्रभु यावे ठेयब बाक्ब। मारदे हना मेकोम दाऊद कली इश्का मुर आन कली सासन पाइब जोक्ब तुइक्ब तौ का गेप्टु” देंमाक्त। १राजा १०:९ 8 मिनु हीरामम सोलोमन कली “गो इन सोइश्शो लोव्र नेंता। इन माल्शो नेल्ल गेनुड। लेबानोन डा लाइश्शो रवा नु अरु रवा आन शी खाप्शा गेनुड। 9 आं गेय पाइबपुकीम मेको रवा लेबानोन रे समुन्द्र सम्म चाक्नीम। मिनु गो मेको शी फ्रेंपाइश्शा, इन देंतीक सम्म समुन्द्रम योल्पाइश्शा सोइक्पाइक्नुडमी। गो मेको आन कली इन देंतीकेम प्राक्पाइक्नुडमी। मिनु गे मेको लाइक्ने चाप्नीनी। मिनु गे आं खिं कली जचा थोव्रक सोइश्शा आं मिम्शो खपीन” दे लोव्र कुरब मुर सोइक्ता बाक्त। 10 मोपा हीरामम सोलोमन कली माल्शो लेबानोन डा लाइश्शो रवा आ शी नु अरु शी नेल्ले सोइक्ता बाक्त। 11 मिनु सोलोमनम चहिं मेको आ पा डा हीराम आ खिं कली २० हजार कोर चेरब नु २० कोर रिम्शो तेल सोइक्ता बाक्त। मोपा सोलोमनम बर्स बर्सम मेको सोइक्ता बाक्त। कोर का २२० लिटर बाक्ब। १राजा ५:२ 12 मिनु परमप्रभु यावेमी कबल पा देंशो खोदेशो पा सोलोमन कली जोक्तीक तुइक्तीक थुं

गेवा बाक्त। मिनु हीराम नु सोलोमन आस दातेमी दुशा बाक्तीक दुम्माक्त। मिनु मेको निम्फा गारशा बाक्स, दे सल्ला पमुसा बाक्त।

13 मिनु पिप सोलोमनम इस्राएल नेल्ल रे मोशा गेय पाइब ३० हजार मुर आन कली खुप्तीमी बाक्त। 14 मिनु मेकोमी मेको आन कली महिना महिना १०, १० हजार पा लेबानोनम सोइक्तीमी बाक्त। मोपा मुरपुकी महिना का लेबानोनम नु महिना निक्शी आन खिंम बाक्मा बाक्त। मेको गेय पाइब आन कली कोव्रब अदोनीराम बाक्माक्त। १राजा ४:६ 15 सोलोमन के ७० हजार कुरब नु ८० हजार फुल्लु खोइक्ब मुर पहाडम बाक्मा बाक्त। 16 सोलोमन आ गेय पाइब आन कली कोव्रब ३३ सहे ठेयब मुर बाक्मा बाक्त। 17 मिनु पिप आ अरेशो खोदेशो पा, परमप्रभु यावे आ खिंम जग वोइक्चा कली रिम्शो पा फुल्लु खोइश्शा गुंडम बाक्त। 18 मोपा सोलोमन नु हीराम आस मुरपुकी नु गेबाल डा मुरपुकीम खिं सेल्चा कली फुल्लु खोइश्शा शी ठीक सेल्मे बाक्त। यहोसु १३:५; इजीकीएल २७:९

### सोलोमनम परमप्रभु आ खिं सेल्शो

२इतिहास ३:१-१४

6 इस्राएली इजीप्त रे गूशा जाक्शो ४ सहे ८० बर्स दुम्शो बाक्माक्त। मिनु सोलोमनम इस्राएली आन कली हुकुम पशो ४ बर्स नु महिना निक्शी डा जिव महिनाम परमप्रभु यावे आ खिं सेल्चा गोवा बाक्त। मत्ती १:१७ 2 सोलोमनमी परमप्रभु यावे कली सेल्शो खिं ६० कुबीत लाइश्शो, २० कुबीत ब्रेम्शो नु ३० कुबीत ग्येथ लाइश्शो बाक्माक्त। कुबीत का ०.५ मिटर खोदेशो बाक्ब। 3 मेको परमप्रभु यावे आ खिं आ डोंइती डा पिंडी आ ब्रेम्शो नु आ लाइश्शो २० कुबीत बाक्माक्त। मेको खिं आ डोंइती गे १० कुबीत लाइश्शो गूशो बाक्माक्त। कुबीत का ०.५ मिटर खोदेशो बाक्ब। १राजा ७:१५-२१ 4 मेकोमी खिं आ दी गे गारोम रोकतीक पाइश्शो झेलपुकी सेल्पदा बाक्त। 5 नोले मेकेर चोव्रखो नु नेल्ल क्येडा चोव्रखो बाक्शो खिं आ एर ओंथ डा गारो नेल्लेम बोइश्शो कोठापुकी सेल्पदा बाक्त। 6 मिनु नेल्ल क्येडा आगा डा तला ५ कुबीत ब्रेम्शो बाक्माक्त। मिनु दाते डा तला ६ कुबीत ब्रेम्शो नु नेल्ल क्येडा आ तार डा तला ७ कुबीत ब्रेम्शो बाक्माक्त। मेकोमी ठेयब गारो आ एर ओंथ नेल्ले लाडगा गे पाइद्रा वोइक्चा कली गारो प्रोव्रपदा बाक्त। मोपा पाइद्रा खिं डा गारो मओव्रचा डा पा सेल्पदा बाक्त। 7 खिं सेल्मेनु, फुल्लु खानीमीन खोदमे बाक्त। मेको खिं सेल्मेनु घन, खा नु मारदे फलाम के या आन रेयके मनसे बाक्त। 8 नेल्ल क्येडा आगा डा तला डा ओव्रतीक दक्खिन गे बाक्माक्त। मिनु मेकेर रे दाते डा नु आ तार डा तला लचा कली हिरशो थेंकापुकी बाक्मा बाक्त। 9 मोपा मेकोम लेबानोन डा लाइश्शो रवा के पाइद्रा नु फलेक साप्शा खिं सेल्ने थुम्पदा बाक्त। 10 मेकोम खिं आ एर ओंथ नेल्ल आइक्च आइक्च कोठा सेल्पदा बाक्त। मेको कोठा नेल्ल ५, ५ कुबीत लाइश्शो बाक्मा बाक्त। मिनु मेको कोठा नेल्ल लेबानोन डा लाइश्शो रवा आ शीम खिं नु बोइश्शो बाक्मा बाक्त।

11 मिनु परमप्रभु यावेम सोलोमन कली लोव्र पवा बाक्त। 12 मार लोव्र पवा बाक्त देंशा हना “एको इ सेल्शो खिं आ परबम लोव्र पाइनुड। गे आं फुल्लुम मुशा ब्रेक्शो लोव्र पाप्तीवी हना, आं देंशो पतीक लोव्र नु आं शेंशो नेल्ल पशा, आं लांम गाक्ते हना, इ आफ दाऊद नु थोक्शा पशो कबल गे नु पाइनुड। २सामुएल ७:१३ 13 मिनु गो इस्राएल डा आं आल आन दातेम बाक्नुड। मिनु गो आं मुर इस्राएली आन कली गेनायो मप्रोइनुडमी” देंमाक्त। प्रस्थान २९:४५

14 मोपा सोलोमनम परमप्रभु यावे आ खिं सेल्ने थुमा बाक्त। प्रेरित ७:४७ 15 मेकोमी खिं आगा गे डा गारोम लेबानोन डा लाइश्शो रवा आ शी के फलेक गारपाइश्शा क्येप्पदा बाक्त। खप रे इर डा शी सम्मन शी के फलेक गारपाइश्शा क्येप्पदा बाक्त। मिनु खपीम चहिं अरु रवा डा फलेक ब्रपदा बाक्त। 16 सोलोमनमी मेको खिं आगा आ नोले गे २० कुबीत लाइश्शो नेल्ल क्येडा चोव्रखो कोठा सेल्पदा बाक्त। मेको कोठा नेल्ले लेबानोन डा लाइश्शो रवा आन फलेक गारपाइश्शा क्येप्पदा बाक्त। कुबीत का ०.५ मिटर बाक्ब। 17 मेको नेल्ल क्येडा चोव्रखो कोठा आ डोंइती ४० कुबीत लाइश्शो बाक्माक्त। १ कुबीत ०,५ खोदेशो बाक्ब। 18 मेको खिं आ आगा गे

लेबानोन डा लाइश्शो रवा आ शी के फलेकम चहिं लौका नु बोइश्शो फू आ बुटा मुशा आप्शो बाक्मा बाक्त। मेको शी नेल्ल मोदेशो बाक्मा बाक्त। मेकेर फुल्लु का यो मताइसीशो बाक्मा बाक्त। 19 मेको आ खिं आ नेल्ल क्येडा आगाम चहिं परमप्रभु यावे आ कबल पशो सन्दोस वोइक्का कली नेल्ल क्येडा चोव्रखो कोठा सेल्पदा बाक्त। 20 मेको नेल्ल क्येडा चोव्रखो कोठा पुक्शो नु २० कुबीत लाइश्शो, २० कुबीत ब्रेम्शो नु २० कुबीत ग्येथ लाइश्शो बाक्मा बाक्त। मिनु मेकोमी मेकेर नेल्ल क्येख सुन क्येप्पदा बाक्त। मिनु मोदेशो पा मेकोमी लेबानोन डा लाइश्शो रवा आ शी के सेल्शो चढेतीक कली यो सुनम गिल्पदा बाक्त। *कुबीत का ०,५ खोदेशो बाक्ब। १राजा ७:४८*

21 सोलोमनम मेको खिं आगा गे नेल्ल क्येख सुन क्येप्पदा बाक्त। मिनु आगा डा नेल्ल क्येडा चोव्रखो कोठा नेल्ल सुन क्येप्पाइश्शा, आ डोंइती सुन के साडलीपुकी क्याइक्पदा बाक्त। 22 मोपा मेकोम खिं आगा नेल्ल सुन क्येप्पदा बाक्त। आगा बाक्तीक डा चढेतीक कली यो सुनम गिल्पदा बाक्त।

23 मेकोमी परमप्रभु यावे आ खिं आगा डा चोव्रखो बाक्तीकेम तेल रवा आ शी के करूब निक्शी सेल्पदा बाक्त। मेको निम्फा १०, १० कुबीत ग्येथ लाइश्शो बाक्सा बाक्त। *कुबीत का ०,५ खोदेशो बाक्ब। प्रस्थान ३७:७-९*

24 करूब आ फ्रां का ५ कुबीत लाइश्शो बाक्मा बाक्त। मिनु अर्को यो ५ कुबीत लाइश्शो बाक्मा बाक्त। मिनु फ्रां का आ डर रे अर्को फ्रां आ डर सम्म १० कुबीत लाइश्शो बाक्मा बाक्त। 25 मोपान अर्को करूब आ फ्रां यो १० कुबीत लाइश्शो बाक्मा बाक्त। मारदे हना मेको करूब निम्फा उडक्थ उडक्थ पा खाल का डा बाक्सा बाक्त। 26 मेको करूब निम्फा खाल का डा पा १०, १० कुबीत लाइश्शो बाक्सा बाक्त। 27 मिनु मेकोमी मेको करूब आस कली परमप्रभु यावे आ खिं डा नेल्ल क्येडा चोव्रखो कोठाम वोदा बाक्त। मेको करूब आस फ्रां प्राक्पाइश्शा सेल्शो बाक्मा बाक्त। मोपा करूब का आ फ्रां कामी गारो का कली नु अर्को करूब आ फ्रां कामी अर्को गारो कली थिथो बाक्मा बाक्त। मिनु मेको आस अर्को फ्रां चहिं दातेम थिमुशो बाक्सा बाक्त।

28 मिनु मेकोमी मेको करूब आस कली यो सुनम गिल्पदा बाक्त। 29 मेकोमी परमप्रभु यावे आ खिं डा नेल्ल क्येडा चोव्रखो कोठा आ एर ओंथ नेल्ल, गारो नेल्ल करूब, खजूर रवा नु बोइश्शो फु आन बुटा मुशा आप्पदा बाक्त। मेको चोव्रखो कोठा आगा नु लाडगा नेल्ल मोदेशो पा मुशा बुटा आप्पदा बाक्त। 30 मिनु मेकोमी परमप्रभु यावे आ खिं डा नेल्ल क्येडा चोव्रखो कोठा डा खप नेल्ल सुन ब्रपदा बाक्त।

31 मेकोमी नेल्ल क्येडा चोव्रखो कोठा ओव्रचा कली तेल रवा आ शी के लाप्चो निक्शी सेल्पदा बाक्त। मेको लाप्चो डा शी ५ सुर पाइश्शो पा सेल्पदा बाक्त। 32 मिनु मेकोम तेल रवा आ शी के लाप्चो निक्शीम करूब, खजूर रवा नु बोइश्शो फु आन बुटा मुशा आप्पदा बाक्त। मिनु सुनम गिल्पदा बाक्त।

33 मेको खिं डा लाप्चो डा शी यो तेल रवा आ शी के ४ पाटे पा सेल्पदा बाक्त। 34 मिनु मेकोमी अरु शी के लाप्चो निक्शी सेल्पदा बाक्त। मेको आगा नु लाडगा डा लाप्चो हिरब लाप्चो बाक्सा बाक्त। 35 मिनु मेकोमी मेकेर नेल्ल करूब, खजूर रवा नु बोइश्शो फु आन बुटा मुशा आप्पदा बाक्त। मिनु सुनम गिल्पदा बाक्त। 36 मिनु मेकोमी खिं आगा डा गारो यो खोइश्शो फुल्लु सां खेयप खोप्शा क्येप्शा, मेको आ तारी लेबानोन डा लाइश्शो रवा के फलेकम सुम्पदा बाक्त।

37 सोलोमनमी सासन पवा आ ४ बर्स जिव माइश्शो महिनामी परमप्रभु यावे आ खिं आ जग वोदमे बाक्त। *१राजा ६:१* 38 मिनु ११ बर्स डा बुल माइश्शो महिनामी मेको खिं नेल्ले सेल्ने थुम्मे बाक्त। मेको सेल्चा कली ७ बर्स माल्दा बाक्त।

### सोलोमनम आ खिं सेल्शो

7 सोलोमन आ खिं सेल्चा कली १३ बर्स माल्दा बाक्त। मिनु मेकोमी आ खिं नु मारेइ मारेइ सेल्ने थुमा बाक्त। *१राजा ९:१०* 2 मेकोमी लेबानोन डा ब्वाकी माइश्शो खिं सेला बाक्त। मेको खिं सहे का कुबीत लाइश्शो, ५० कुबीत ब्रेम्शो नु ३० कुबीत ग्येथ लाइश्शो बाक्मा बाक्त। मेको खिं ४ लहर लेबानोन डा लाइश्शो रवा आ शी के थाम पाइश्शो बाक्मा बाक्त।

मिनु मेको आ तार लेबानोन डा लाइश्शो रवा आ पाइद्रा वोदा बाक्त। *कुबीत का ०.५ मिटर खोदेशो बाक्ब। यसैया २२:८* 3 मेको नेल्ल लेबानोन डा लाइश्शो रवा आ शी के फलेकम साप्शो बाक्मा बाक्त। मेको थाम लहर कामी १५ ओटा पा, लहर सांमी ४५ ओटा बाक्मा बाक्त। 4 मेकेर लहर सां पा झेलपुकी वोइश्शो बाक्मा बाक्त। मेकोपुकी एर ओंथ पा कोव्रमुशो बाक्मा बाक्त। 5 लाप्चो डा शी नेल्ल ४ पाटे बाक्मा बाक्त। मेको यो नेल्ल लहर सां पा कोव्रमुशो बाक्मा बाक्त।

6 मेकोमी ५० कुबीत लाइश्शो नु ३० कुबीत ब्रेम्शो थाम पाइश्शो ठेयब पिंडी सेल्पदा बाक्त। मिनु मेको आ डोंइती थाम पाइश्शो ओव्रतीक बाक्मा बाक्त। मेको आ डोंइती इप्तीक का यो बाक्मा बाक्त।

7 मेकोमी निसाफ पचा कली ठेयब नित्तीके बाक्शो कोठा का सेल्पदा बाक्त। मेको कली निसाफ पतीक कोठा, दे नें वोदा बाक्त। मिनु मेकोमी मेको कोठा नेल्ले इर रे उइ सम्म लेबानोन डा लाइश्शो रवा आ शी के फलेक क्येप्पदा बाक्त।

8 मेकोम मेको निसाफ पतीक खिं आ नोले आ बाक्तीक खिं सेल्पदा बाक्त। मेको खिं डोंइती डा खिं खोदेशो पा सेल्पदा बाक्त। मिनु सोलोमनमी आ ग्युबे पा चाक्शो फाराओ आ तमी कली यो मोदेशोन खिं सेल्पदा बाक्त। *१राजा ३:१*

9 मेको खिं नेल्ल शुश क्येट लाइब फुल्लु रे पा सेल्शो बाक्मा बाक्त। मेको फुल्लु नेल्ले गारपा अराम खोइश्शो बाक्मा बाक्त। मेको खिं इर रे उइ सम्म नु खिंङगा रे लाडगा सम्म मोदेशो फुल्लु के सेल्शो बाक्मा बाक्त। 10 मेको आ जग फुल्लु ठेयब नु शुश क्येट लाइब बाक्मा बाक्त। मेको पुक्शोन कोइ १० कुबीत लाइश्शो, कोइ ८ कुबीत लाइश्शो बाक्मा बाक्त। 11 मेको आ तार शुश क्येट लाइब, थम गारपा खोइश्शो फुल्लु ब्रपदा बाक्त। मिनु मेको तार लेबानोन डा लाइश्शो रवा आ शी के फलेक गारपा ब्रपदा बाक्त। 12 मिनु ठेयब लाडगाम एर ओंथ नेल्ल खोइश्शा गारपाइश्शो फुल्लु सां खेयप ब्रशा, फुल्लु तार लेबानोन डा लाइश्शो रवा आ शी के फलेक ब्रशो बाक्मा बाक्त। मिनु परमप्रभु यावे आ खिं आगा डा लाडगा नु आ पिंडी यो मोदेशोन बाक्मा बाक्त। *१राजा ६:३६*

हुराम आ गेय  
२इतिहास ३:१५-५:१

13 पिप सोलोमनम हुराम कली टायर रे ब्रेथ सोइक्ता बाक्त। *२इतिहास २:१३-१४* 14 मेको आ ममा नाप्ताली आ खिं डा आ वोंइश बेक्शो मीश मुर का बाक्मा बाक्त। मेको आ आफ टायर डा थाम्पा कांसा के गेय पस जोक्ब मुर बाक्मा बाक्त। मोपतीके हुराम यो थाम्पा कांसा के गेय पस जोक्ब बाक्मा बाक्त। मिनु मेको पिप सोलोमन आ बाक्तीक जाक्मा बाक्त। मिनु आ कली गेशो गेय नेल्ल पवा बाक्त।

### कांसा के थाम निक्शी

15 मेकोम यपाइश्शा कांसा के थाम निक्शी सेला बाक्त। मेको थाम का १८ कुबीत लाइश्शो बाक्मा बाक्त। मेको आ एर ओंथ नेल्ल १२ कुबीत बाक्मा बाक्त। मिनु अर्को यो मोदेशोन बाक्मा बाक्त। *कुबीत का ०.५ मिटर खोदेशो बाक्त। २राजा २५:१७* 16 मिनु मेकोमी मेको थाम आस डरम पिया वोइक्का कली यपाइश्शो कांसा के पिया निक्शी सेला बाक्त। मेको निम्फा ५, ५ कुबीत लाइश्शो बाक्सा बाक्त। 17 मेकोमी थाम आ पिया कली बुटा आप्शो जाली के ७ ओटा झुम्का सेला बाक्त। मिनु अर्को थाम कली यो मोदेशोन सेला बाक्त। 18 मिनु मेको थाम आ पिया ग्योम्वा कली कांसा के जाली नेल्ल आन एर ओंथ लहर निक्शी बुटा आप्शो दारीमपुकी सेला बाक्त। मिनु मेकोम अर्को कली यो मोदेशो पान सेला बाक्त। 19 मिनु मेको पिंडी डा थाम आन पिया ४, ४ कुबीत लाइश्शो लिली फू खोदेशो पा सेला बाक्त। 20 मिनु मेको थाम आ पियामी कचौरा खोदेशो बाक्तीकेम जाली थाम आ पिया आ एर ओंथ नेल्ल लहर लहर पा सहे निक्शी दारीम क्याइक्का कली सेला बाक्त। मिनु अर्को थाम कली यो मोदेशोन सेला बाक्त। 21 मिनु मेकोमी परमप्रभु यावे आ खिं आ पिंडीम मेको थाम निक्शी

राप्पदा बाव्त। मिनु दक्खिन गे डा थाम आ नें याकीन वोदा बाव्त। मिनु उत्तर गे डा थाम आ नें बोआज वोदा बाव्त। 22 मेको थाम आस पिया लिली फू खोदेशो बाक्मा बाव्त। मोपा मेको थाम आस गेय नुम्माव्त।

कांसा के ठेयब बोस

23 मिनु मेकोमी कांसा के यपाइशा ब्वाक्कु वोइक्तीक ठेयब बोस का सेला बाव्त। मेको आ सुर का रे अर्को सुर सम्म १० कुबीत बाक्माव्त। मेको ५ कुबीत ग्येत्थ लाइश्शो बाक्माव्त। मेको आ एर ओंथ पुक्शोनु ३० कुबीत बाक्माव्त। 24 मेको ठेयब बोस आ एर ओंथ नेल्ल डा सुरमी कुबीत काम १०, १० ओटा लौका आ बुटा आप्शा गुंइशो बाक्माव्त। मोपा मेको ठेयब बोसुम लहर निक्शी लौका सेला बाव्त। 25 मेको ठेयब बोस १२ ओटा ब्यफ आन तार वोइश्शो बाक्माव्त। मेको ब्यफ सां उत्तर गे, सां पच्छिम गे, सां दक्खिन गे नु सां पूर्व गे कोव्रशो बाक्मा बाव्त। मेको ब्यफ नेल्ल लाडगा गे हिरशो बाक्मा बाव्त। 26 मेको बोस ४ आंइची थांइशो बाक्माव्त। मिनु मेको आ शोव्र चहिं कचौरा नु बोइक्वशो लिली फू खोदेशो बाक्माव्त। मेकेर हजार निक्शी बाथ ब्वाक्कु रिक्बाक्माव्त। *बाथ का २२ लिटर खोदेशो बाक्ब।*

कांसा के १० ओटा चिक्तीक

27 मिनु मेकोमी कांसा के १० ओटा अरु निप्पाइक्तीक सेला बाव्त। मेको नेल्ल ४, ४ कुबीत लाइश्शो ४, ४ कुबीत ब्रेम्शो नु ३, ३ कुबीत ग्येत्थ लाइश्शो बाक्मा बाव्त। *कुबीत का ०.५ मिटर खोदेशो बाक्ब।* 28 मेको निप्पाइक्तीक आन खोइली आन दातेमी बोइक्तीके बाक्मा बाव्त। 29 मेको वोइक्तीकेमी ब्यफ, गुप्स नु करूब आन बुटा आप्शो बाक्मा बाव्त। मेको आन दी गे यो झुम्का क्याइश्शो बाक्मा बाव्त। 30 मेको निप्पाइक्तीक नेल्लेम कांसा के ४, ४ ओटा गुगील बाक्मा बाव्त। मेको बोस आन पुंमी तिव्कीक क्येप्शो बाक्मा बाव्त। मेको झुम्का आन नेक्था बाक्मा बाव्त। 31 मेको आन रोक्तीक कुबीत का ग्येत्थ लाइश्शो बाक्मा बाव्त। मेको कुल कुल दँशो बाक्मा बाव्त। मेको कुबीत का नु आधा ब्रेम्शो बाक्मा बाव्त। मिनु मेको आन रोक्तीकेमी बुटा आप्शो बाक्मा बाव्त। मिनु मेको निप्पाइक्तीक चहिं कुल कुल दँशो ममाइ ४ पाटे बाक्मा बाव्त। 32 मेको ४ ओटा गुगील आगा गे बाक्मा बाव्त। मिनु मेको गुगील आन बोइक्तीक नु बोइश्शो बाक्मा बाव्त। मेको गुगील नेल्ल कुबीत का नु आधा डा बाक्मा बाव्त। 33 मेको गुगील बग्गी आन गुगील खोदेशो पा सेल्शो बाक्मा बाव्त। मेको आन गुगील नु आन मारेइ मारेइ यपाइशा सेल्शो बाक्मा बाव्त। 34 मेको निप्पाइक्तीक आन तिव्कीक ४ पाटे बाक्मा बाव्त। मेको नेल्ल टुक्रा का के सेल्शो बाक्मा बाव्त। 35 मेको निप्पाइक्तीक आन तार आधा आधा कुबीत ग्येत्थ लाइश्शो कुल कुल दँशो सुर बाक्मा बाव्त। मेको निप्पाइक्तीक आन तार बाक्शा, मेको नु टुक्रा का के बाक्मा बाव्त। 36 मिनु मेकोमी मेकेर तेक तेक श्येत्थ बाक्मा, मेक मेक गुप्स, करूब नु खजूर रवा आन बुटा आबा बाव्त। मेको आन एर ओंथ नेल्ल मुशा सेल्शो कांसा के मालापुकी सेला बाव्त। 37 मोपा मेकोमी मेको १० ओटा निप्पाइक्तीक सेला बाव्त। मेको नेल्ल खाल का डा पा सेला बाव्त।

38 मेको नोले मेकोम कांसा के १० ओटा चिक्तीक बोस सेला बाव्त। मेको नेल्लेमी ४०, ४० बाथ ब्वाक्कु रिक्बाक्मा बाव्त। मेको पुक्शोनु ४, ४ कुबीत डा बाक्मा बाव्त। मेको निप्पाइक्तीक नेल्ल आन कली का का बाक्मा बाव्त। *बाथ का २२ लिटर खोदेशो बाक्ब।* 39 मिनु मेकोमी ५ ओटा निप्पाइक्तीके खिं आ दक्खिन गे नु ५ ओटा खिं आ उत्तर गे वोदा बाव्त। मिनु ठेयब बोस चहिं परमप्रभु यावे आ खिं आ दक्खिन पूर्व गे वोदा बाव्त।

परमप्रभु आ खिं डा मार मार

40 हुराममी बोसपुकी, पुलु ताप्तीक नु ग्योबपुकी सेला बाव्त। मोपा हुराममी पिप सोलोमन आ दँशो खोदेशो पा परमप्रभु यावे आ खिं डा मारेइ मारेइ सेल्ले थुमा बाव्त। 41 थाम निक्शी, मेको आस डर सुम्चा कली कचौरा खोदेशो पिया निक्शी, मेको थाम आस पिया ग्योम्तीक बुटा आप्शो

जाली निक्शी, 42 मेको जाली निक्शी आस कली ४ सहे दारीम, मेको कचौरा खोदेशो पिया पाइश्शो थाम निक्शी आस कली सुम्तीक जाली आस कली लहर निक्शी दारीम, 43 मेको १० ओटा निप्पाइक्तीक आन कली १० ओटा बोस, 44 ठेयब बोस का मेको आगा डा १२ ओटा ब्यफ सेल्ले थुमा बाव्त।

45 हुराममी बोसपुकी, पुलु ताप्तीक नु ग्योबपुकी सेला बाव्त। मोपा हुराममी पिप सोलोमन आ दँशो खोदेशो पा परमप्रभु यावे आ खिं डा मारेइ मारेइ सेल्ले थुमा बाव्त। मेको नेल्ल टल्केशो कांसा के बाक्मा बाव्त।

46 मेको नेल्ल पिपम यर्दन खोला डा दिंम सुक्कोथ नु चारेथन आस दातेमी मार मार यपाइक्तीकेम यपाइश्शा, सेल्पाइश्शो बाक्माव्त। 47 सोलोमनम मेको मिश का थोव्रक सेल्लेके, मेको नेल्ल मनाव्थुन वोदमे बाव्त। मेको सेल्चा कली दोशो कांसा माल्दा, मेको यो मनाव्त्मे बाव्त।

48 मिनु सोलोमनम परमप्रभु यावे आ खिं दारपाइक्वा कली मारेइ मारेइ थोव्रक नेल्ल सेल्पदा बाव्त। मेकोमी सुन के चढेतीके नु कौंइतीक शोब्ले वोइक्तीक सुन के टेबल यो सेल्पदा बाव्त। 49 क्येख सुन के बत्ती दातीक सेल्पाइश्शा, नेल्ल क्येडा चोव्रखो बाक्तीक कोठाम दक्खिन गे ५ ओटा नु उत्तर गे ५ ओटा पा वोइक्पदा बाव्त। सुन के फू खोदेशो बुटा, सुन के बत्ती दातीक, सुन के थनारो, 50 क्येख सुन के ग्योब, सल्दो खोइक्तीक कांइची, बोसपुकी थनारो, कोइला कुरतीके, ब्वाक्कु बुइक्तीक डाडु, कचौरा, थनारो, नेल्ल क्येडा चोव्रखो कोठा डा लाप्चो नु अरु लाप्चो डा हेक्तीक नेल्ल क्येख सुन के सेल्पदा बाव्त।

51 मिनु पिप सोलोमनम परमप्रभु यावे आ खिं डा गेय नेल्ल थुम्पदा बाव्त। मिनु मेकोमी आ आफ दाऊदमी जिम्मा गेशो थोव्रकपुकी, सुन, चांदी नु दारपाइक्तीक चाक्पाइश्शा, परमप्रभु यावे आ खिं डा शोप वोइक्तीकेमी वोइक्पाइक्मी बाव्त।

कबल पशो सन्दोस चाक्शो

२इतिहास ५:७-७,१०

8 मिनु नोले सोलोमनम इस्राएल डा खाल्पा, इस्राएल डा थर थर डा ठेयब मुर नु इस्राएली आन खिं खिं डा मुर आन कली दाऊद आ सहर, सियोन रे परमप्रभु यावे आ कबल पशो सन्दोस चाक्वा कली यरूसलेम सहरम बुक्वा कली ब्रेप्पाइक्मी बाव्त। 2 मिनु एथानीम माइश्शो ७ महिना डा चाड नाक्ती, इस्राएल डा मुर नेल्ल पिप सोलोमन आ डौंइती बुक्मा बाव्त। 3 मिनु इस्राएल डा खाल्पा नेल्ल जाक्ने थुम्मे नोले, चढेबपुकीमी परमप्रभु यावे आ सन्दोस कुरमे बाव्त। 4 मिनु चढेब नु लेवीपुकीमी परमप्रभु यावे आ सन्दोस नु ग्योम्तीक ताम्बुम बाक्शो परमप्रभु आ मारेइ मारेइ कुरशा, डर लदमे बाव्त। 5 मिनु पिप सोलोमन इस्राएल डा मुर नेल्ले नु मेको आ डौंइती बुक्ब नेल्लेम, सन्दोस आ डौंइती हिक्ने मचाप्चा डा पा भेडा नु ब्यफ क्योरशा चढेमे बाव्त। २सामुएल ६:१३ 6 मिनु नोले चढेबपुकीमी परमप्रभु यावे आ कबल पशो सन्दोस खिं डा नेल्ल क्येडा चोव्रखो बाक्तीकेम चाक्शा करूब आस फ्रां आगाम वोदमे बाव्त। २सामुएल ६:१७; १राजा ६:२७ 7 मारदे हना मेको करूब आस फ्रांम सन्दोस नु कुरतीक कोक्के कली सुम्शो बाक्सा बाव्त। 8 मेको कुरतीक कोक्के थम लाइश्शो बाक्तीके, मेको आन सुर नेल्ल क्येडा चोव्रखो बाक्तीक आ डौंइती रे तांइसीबाक्मा बाव्त। तन्न नेल्ल क्येडा चोव्रखो बाक्तीक आ लाडगा रे मतांइसी बाक्मा बाव्त। मेको मुल सम्म मेकेर बाक्नीम। *प्रस्थान २५:१३-१५* 9 मिनु होरेब डांडाम परमप्रभु यावेमी इस्राएली आन कली इजीप्तर रे गुंइची ना कबल पशो बाव्त। मेना मोसामी मेको कबल पशो लोव्र मुशा ब्रेक्शो फुल्लु निक्शी सन्दोसम कुर पा वोदा बाव्त। मेको सन्दोसम फुल्लु निक्शी डा लाक्शा अर्को मारेइ मबाक्माव्त। *प्रस्थान २५:२१; ब्यवस्था १०:५* 10 मिनु चढेब नेल्ल क्येडा चोव्रखो बाक्तीक रे ग्युमानु, परमप्रभु यावे आ खिं गोस्सुम ब्रीमाव्त। 11 मिनु मेकेर गोस्सुम सुम्तीके चढेबपुकीमी गेय पने मचाप्मे बाव्त। मारदे हना परमप्रभु यावे आ छेडछेडम आ खिं ब्रीशो बाक्माव्त। *प्रस्थान ४०:३४-३५*

12 मिनु सोलोमनमी “परमप्रभु यावे क्येर गोस्सुम बाक्ब दॅशो बाक्ब। प्रस्थान २०:२१<sup>13</sup> गो इन कली गेना हना यो बाक्वा कली गारचा डा खिं का सेल्ता” दॅमाक्त।

14 मिनु पिपमी लेशशा कोव्रशा, इस्राएल डा बुक्शो मुर नेल्ल आन कली आसीक गेमी बाक्त। मेना मेकोपुकी चहिं राप्शो बाक्मा बाक्त।<sup>15</sup> मिनु मेकोमी “परमप्रभु यावे, इस्राएली आन परमप्रभु ठेयब बाक्ल। मेकोमी आं आफ दाऊद नु कबल पा, मुल मेको खाप्तु।<sup>16</sup> मारदे हना मेकोमी ‘गो आं मुर आन कली इजीप्त रे गुंडशा चाक्गु रे मुल सम्म इस्राएल डा तेकोइ थर डा मुर आन सहरम आं नें बाक्ल, दे आं खिं सेल्चा कली मयोव्रडु। तन्न गो आं मुर इस्राएली आन कली सासन पचा कली दाऊद कली योव्रता’ दॅत।<sup>17</sup> आं आफ दाऊदमी परमप्रभु यावे, इस्राएली आन परमप्रभु आ नें कली मान पा खिं का सेल्चा मिश्शो बाक्त।<sup>18</sup> २सांमुएल ७:-<sup>18</sup> तन्न परमप्रभु यावेमी आं आफ दाऊद कली ‘गे आं नें कली मान पा खिं का सेल्चा मिम्ताक्वी, मेको रिश्शो बाक्त।<sup>19</sup> मो हना यो गे मेको खिं मसेल्नेवे। तन्न इ तौमी आं नें कली मान पा खिं का सेल्ब’ दॅशो बाक्तीनी।<sup>20</sup> मुल परमप्रभु यावेमी ‘गो पाइनुड’ दॅशो लोव्र खाप्तु। गो आं आफ दाऊद आ पा डा पिप दुश्शो बाक्नुड। मिनु परमप्रभु यावेमी ‘पाइनुड’ दॅशो खोदॅशो पा गो इस्राएल डा पिप दुस्ती। मिनु परमप्रभु यावे, इस्राएली आन परमप्रभु आ नें कली मान पा एको खिं सेल्ता।<sup>21</sup> गो मेकेर परमप्रभु यावे आ कबल पशो सन्दोस बाक्तीके का सेल्ता। परमप्रभु यावेमी इं किकी पिपी आन कली इजीप्त रागी रे गुंडशा चाक्गानु, मेकोपुकी नु कबल पशो बाक्माक्त” दॅमाक्त।

#### सोलोमन आ प्रार्थना

22 मिनु सोलोमनम इस्राएल डा बुक्शो मुर नेल्ल आन दातेम परमप्रभु यावे कली चढेतीक आ डोंइती राप्शा, आ गुड सरीड गे क्युक्मा बाक्त।<sup>23</sup> मिनु मेकोमी “परमप्रभु यावे, इस्राएली आन परमप्रभु इर स्वर्गम नु रागीम इन खोदॅशो अर्को तेकोइ परमप्रभु मबाक्नीम। इन कली आन थुं नेल्लेमी नोले खोइक्ब, इन गेय पाइब आन कली पशो कबल खाप्शा, मेको आन कली गेना हना यो दाक्नीनी।<sup>24</sup> गे इन गेय पाइब, आं आफ दाऊद नु पशो कबल खाप्तीनी। मुलाक्ती ‘गो पाइनुड’ दॅशो कबल थमा पा खाप्तीनी।<sup>25</sup> मोपतीके परमप्रभु यावे, इस्राएली आन परमप्रभु इन गेय पाइब आं आफ दाऊद नु पशो कबल खाप्तीनी। गे मेको नु कबल पा ‘गेना हना यो इ तौ चच रे इस्राएलम पिप दुस्तीम। तन्न मेकोपुकी इ खोदॅशो पा आं डोंइती होस पा गाक्तेक्म हना, ला मोदॅशो दुम्ब’ दॅशो बाक्तीनी।<sup>26</sup> मोपतीके इस्राएली आन परमप्रभु, इन गेय पाइब आं आफ दाऊद कली ‘गो पाइनुड’ दॅशो लोव्र खाप्तीनी” दॅमाक्त।

27 मेकोमी “मार, थमा पा परमप्रभु रागीम बाक्बा डा? कोव्रडीन, इर डा ठेयब सरीडम ला यो गे मरिक्नीनी हना, एको आं सेल्शो खिम दोपा रिक्नीनी डा? यस्सैया ६६:१; प्रेरित १७:२४<sup>28</sup> मो हना यो परमप्रभु यावे, आं परमप्रभु इन गेय पाइब आं प्रार्थना नु आं पुंडशो लोव्र नेनीन। मुलाक्ती इन गेय पाइबमी इन डोंइती ठेयब सॅदा पा पुंडशो लोव्र नेनीन।<sup>29</sup> मिनु नाक्दो नाक्ती एको खिं कली कोव्रडीन। गे ‘गो एको खिम बाक्नुड’ दॅशो बाक्तीनी। मोपतीके इन गेय पाइब आं लोव्र नेनीन। जकरिया १२:४; प्रस्थान २:२४<sup>30</sup> इन गेय पाइब नु इन मुर इस्राएलीम एको खिं गे कोव्रशा पुंडतेक्म हना, मेको आन पुंडशो गेना। मेको आन लोव्र इर इन बाक्तीक रे नेनीन। मिनु गे मेको आन पुंडशो गेशा, माफ गेने।

31 सुड मुरुमी आ नेक्था डा मुर आन पर्वम मरिश्शो पा कसम जपाइक्तु हना, मेकोम मेको कसम एको इन खिं डा चढेतीक आ डोंइती जाप्तु हना,<sup>32</sup> गे इर स्वर्गम मेको आन लोव्र नॅशा, निसाफ पने। मिनु दोस ताइब आ मरिश्शो पशो आ पियामी मोइक्तीन। मिनु ठीक पाइब कली दोस मताइब बाक्ब दॅनीन। मोपा ठीक पाइब कली रिश्शो पाइब दुमीन।

33 मिनु इन मुर, इस्राएलीपुकीमी पाप पशा आन जोरी सत्रु नु ब्रुशा, इन गे लेशशा ‘गे आंइ परमप्रभु यावे बाक्नीनी’ दे एको इन खिं गे कोव्रशा पुंडतेक्म हना,<sup>34</sup> इर स्वर्ग रे मेको आन पुंडशो नेनीन। मिनु इन मुर इस्राएली आन

पाप माफ गेन। मिनु मेको आन किकी पिपी आन कली गेशो रागीम लेशशा चाक्कीन।

35 मिनु इन मुरपुकीमी पाप पतीके सरीड चोक्सीशा रेउ मयित हना, इन गेशो सजाइ तुइश्शा, ‘गे आंइ परमप्रभु यावे बाक्नीनी’ दे आन पशो पाप प्रॉइतेक्म हना, १ राजा १७:१<sup>36</sup> इर स्वर्ग रे मेको आन पुंडशो लोव्र नॅशा, इन गेय पाइब, इन मुर इस्राएली आन पाप माफ गेने। मेको आन पचा माल्शो शॅदीन। मिनु मेको आन कली गेशो रागीमी रेउ यिपतीन।

37 मेको रागीम अन्काल दुस्त हना, मुर बेक्तीक रोइ जाक्त हना, बाली नाली सोव्रतीक नु बुक्खी डाइक्तीक रोइ जाक्त हना, सल्हा माले नु बुस्स जाक्तेक्म हना, मेको आन तेकोइ सहरम जोरी सत्रुम पुम्ताक्म हना, मारेइ श्येत नु मारेइ रोइ जाक्त हना,<sup>38</sup> इन मुर इस्राएली सुडम आन थुंम श्येत जशा, एको इन खिं गे कोव्रशा आन गुड क्युक्शा पुन्नेनु, इन बाक्तीक इर स्वर्ग रे मेको आन पुंडशो नेनीन।<sup>39</sup> गे मुर नेल्ल आन थुं तुइक्तीके, इन बाक्तीक स्वर्ग रे मेको आन लोव्र नॅशा, आन पशो कोव्रशा माफ गेने। मारदे हना गे ला मुर नेल्ल आन थुं तुइक्ब बाक्नीनी। भजन संग्रह १३९:१-२<sup>40</sup> मिनु मेकोपुकी इन कली मान पा हिंशा, आंइ किकी पिपी आन कली इन गेशो रागीम बाक्नीम।

41 मिनु इन मुर इस्राएली ममाइ, तन्न अर्को रागी डा मुर सुडमी इन कली तुइश्शा डोन डोन रागी रे जाक्तेक्म हना, गन्ती १५:१४-१६<sup>42</sup> मेकोपुकीम इन ठेयब नें, इन ठेयब सक्ति नु इन वारच पतीके नॅशो बाक्तेक्म। मोदॅशो मुर जाक्शा, एको खिं गे कोव्रशा पुंडतेक्म हना,<sup>43</sup> गे मेको आन लोव्र इन बाक्तीक स्वर्ग रे नॅशा, मेको अर्को रागी डा मुर आन पुंडशो नेल्ल गेने। मिनु इन मुर इस्राएली खोदॅशो पा रागी डा मुर नेल्लेम इन नें तुइक्तेक्म। मिनु इन कली मान पा हिंमल। गे एको आं सेल्शो खिम बाक्नीनी, दे तुइक्तेक्म।

44 मिनु इन मुर आन जोरी सत्रु नु लडाइ पथ लाम्तेक्म हना, गे मेको आन कली तेइ सोइक्ताक्नी हना, मेकोपुकीम एको इन योव्रशो सहर नु गोम इन कली सेल्शो एको खिं गे कोव्रशा, पुंडतेक्म हना,<sup>45</sup> गे स्वर्ग रे मेको आन पुंडशो नेनीन। मिनु मेको आन कली वारच पतीन।

46 मेकोपुकीम पाप पाम्तेक्म हना, मारदे हना पाप मपाइब सुड मबाक्नीम। मिनु गे इन गाइश्शोमी आन जोरी सत्रु आन गुडम गेतीनी। मिनु मेकोपुकीम मेको आन कली आन रागीम ग्याइश्शा लाइक्तेक्म हना, भजन संग्रह १४:३-४; रोमी ३:२३<sup>47</sup> मिनु मेकोपुकीम आन कली ग्याइश्शा लाइश्शो रागीम श्येत जशा ‘गो पाप पाइतक। दूली पा काइ मरिश्शो पाइतक’ दॅतेक्म हना, नेहेम्याह ९:३३; दानीएल ९:५<sup>48</sup> मिनु मेको आन ग्याइश्शा लाइश्शो जोरी सत्रु आन रागीमी आन थुं नेल्लेम इन गे लेत्तेक्म हना, मेको आन किकी पिपी आन कली इन गेशो रागी नु इन योव्रशो एको सहर नु इन नें कली मान पा आं सेल्शो खिं गे कोव्रशा, इन कली पुंडतेक्म हना, दानीएल ६:११<sup>49</sup> इन बाक्तीक इर स्वर्ग रे मेको आन पुंडशो लोव्र नॅशा, आन माल्शो गेन। मिनु मेको आन कली वारच पतीन।<sup>50</sup> मिनु मेको इन मुर आन पाप नु हेंथे पशो नेल्ल माफ गेने। मिनु मेको आन जोरी सत्रुम शिशी पपतीन।<sup>51</sup> मारदे हना मेकोपुकी इन खिं डा मुर बाक्नीम। गे मेको आन कली शुश श्येत गेतीके इजीप्त रागी रे गुंडशा चाक्तीनी।<sup>52</sup> मिनु गे इन गेय पाइब नु इन मुर इस्राएली आन कली कोव्रडीन। मेको आन पुंडशो लोव्र गेना हना यो नेनीन। मिनु मेकोपुकीम इन कली ब्रेम्मानु, मेको आन ब्रेश्शो नेनीन।<sup>53</sup> मारदे हना गे मेको आन कली इन मुर सेल्चा कली, रागी नेल्ल डा मुर आन दाते रे योव्रशा तिल्लीनी। मोपा आंइ किकी पिपी आन कली इजीप्त रे गुंडशा चाक्नीनु, इन गेय पाइब मोसा कली मोदॅशो लोव्र पशो बाक्तीनी” दॅमाक्त। प्रस्थान १९:५-६

54 मोपा सोलोमनम परमप्रभु यावे कली प्रार्थना पा पुंडने थुमा बाक्त। मिनु मेको परमप्रभु यावे कली चढेतीक आ डोंइती रे बोक्माक्त। मेकेर सरीड गे कोव्रशा आ गुड क्युक्शा आ पोक्च थेक्शा प्रार्थना पशो बाक्माक्त।<sup>55</sup> मिनु मेको राप्शा, ठेयब सॅदा पा बुक्शा बाक्शो इस्राएली नेल्ल आन कली आसीक गेमी बाक्त।

56 मेकोमी “आ मुर इस्राएली आन कली आ दॅशो खोदॅशो पा नाइक्वा गेब परमप्रभु यावे ठेयब बाक्त। मेकोम आ गेय पाइब मोसा रे पा पाइनुड दॅशो रिश्शो गेय नेल्ले का सम्म यो मख्राइक्थु, पाप्तु। यहोसु २१:४५



57 परमप्रभु यावे इं परमप्रभु इं किकी पिपी नु बाक्शो खोदेंशो पा गोपुकी नु यो बाक्ल। मेकोमी इं कली गेनायो मप्रोनल। 58 मेकोमी इं किकी पिपी आन कली शेंशो लोव, आ फुल्लुम मुशा ब्रेक्शो लोव नु आ ठीक पतीक लोव पना पन, इन थुं नेल्लेमी मेको आ लांम गाक्कीन। 59 गो इं परमप्रभु यावे आ डोंइती पुंइशो लोव नाक्दो नाक्ती परमप्रभु यावे, इं परमप्रभु आ डोंइती बाक्ल। मिनु मेकोमी नाक्त किंत किंत आ गेय पाइब नु आ मुर इस्त्राएली इं माल्शो गेशा, वारच पवल। 60 मिनु रागी डा मुर नेल्लेमी परमप्रभु यावे ला परमप्रभु बाक्ब, दे तुइक्नीम। मिनु मेको डा लाक्शा अर्को सुइ परमप्रभु मबाक्ब, दे यो तुइक्नीम। 61 मोपतीके इं थुं नेल्लेमी परमप्रभु यावे, इं परमप्रभु कली जिम्मा गेसय। मुलाक्त खोदेंशो पा गोपुकीमी आ फुल्लुम मुशा ब्रेक्शो लोव टिना टिन, आ शेंशो पना पन बाक्कय” देमाक्त।

परमप्रभु आ खिं जिम्मा गेशो

62 मिनु नोले पिप नु इस्त्राएली नेल्लेमी परमप्रभु यावे आ डोंइती चढेतीक चढेमे बाक्त। 63 सोलोमनमी दुशा बाक्चा आ पर्बम २२ हजार ब्यफ नु लाख का २० हजार भेडा चढेवा बाक्त। मोपा पिप नु इस्त्राएल डा मुर नेल्लेमी परमप्रभु यावे आ खिं कली जिम्मा गेमे बाक्त। 64 मेको नाक्त पिपमी परमप्रभु यावे आ खिं आ डोंइती बाक्शो लाडगा आ दाते डा लाडगा कली यो तिला बाक्त। मारदे हना मेकोमी मेकेर चोशा चढेतीके, अन्न चढेतीके नु दुशा बाक्चा आ पर्बम चढेतीके आन बोंसो चढेवा बाक्त। अन्न चढेतीके, दुशा बाक्चा आ पर्बम चढेतीके नु चोशा चढेतीक आन बोंसो वोइक्चा कली मेको परमप्रभु यावे आ डोंइती बाक्शो कांसा के चढेतीके आइक्च दुम्माक्त। 65 मिनु सोलोमन नु मेको नु बुक्शा बाक्शो इस्त्राएली लेबो-हमाथ रे इजीप्त डा खोला सम्म डा ठेयब हुल नेल्लेमी परमप्रभु यावे, इं परमप्रभु आ डोंइती मेको नाक्त रे ७ नाक्त सम्म नु अर्को ७ नाक्त तेम्शा, नेल्ल पा १४ नाक्त सम्म चाड मानेमे बाक्त। 66 मिनु आ दीसा मेकोमी मुर आन कली आन खिं सोइक्तीमी बाक्त। मिनु मेकोपुकीम पिप कली ठेयब सेल्मे बाक्त। मिनु परमप्रभु यावेमी आ गेय पाइब दाऊद नु आ मुर इस्त्राएली आन कली रिम्शो पशो तशा, ग्येरना ग्येरन आन आन खिं लमा बाक्त।

परमप्रभुमी लोव पशो  
२इतिहास ७:११-२२

9 मिनु सोलोमनम परमप्रभु यावे आ खिं, पिप आ खिं नु आ सेल्चा दाक्शो मारेइ मारेइ नेल्ल सेल्ने थुमा बाक्त। 2 मेना परमप्रभु यावेम सोलोमन कली गिबोनम लोव पशो खोदेंशो पा लेंशा लोव पवा बाक्त। १राजा ३:५ 3 मिनु परमप्रभु यावेमी मेको कली “गो इ आं डोंइती पशो प्रार्थना नु इ पुंइशो लोव नेंता। गो एको इ सेल्शो खिं कली आं के सेल्ता। मिनु गो गेना हना यो एकेर बाक्नुड। आं थुं एकेर बाक्शा, गो एको खिं कली गेना हना यो कोव्रनुड। १राजा ८:२९ 4 मिनु गे चहिं ब्रेम्शो दुम्शा, इ आफ दाऊद खोदेंशो पा आं डोंइती गेना हना यो रिम्शो पाइब नु रिम्शो थुं पाइश्शो दुम्ते हना, आं इ कली शेंशो नेल्ल पना पन, आं फुल्लुम मुशा ब्रेक्शो लोव नु आं निसाफ पतीक लोव नेल्ल पाप्तीवी हना, 5 गो इ राज्य इस्त्राएल कली गेना हना यो बोल्यो दुम्पाइक्नुड। मिनु गो इ आफ दाऊद कली ‘इ तौ चच रे गेना हना यो इस्त्राएलम पिप दुम्नीम’ दे कबल पशो खोदेंशो पा गे नु यो कबल पाइनुड। २सामुएल ७:१२; येरमीया ३३:१७

6 तन्न गे नु इ आलपुकी आं नोले खोइक्चा प्रॉइशा, गो इन डोंइती वोइश्शो आं शेंशो नु आं फुल्लुम मुशा ब्रेक्शो लोव मपाइतीनी हना नु देवी देवता आन कली पूजा पाइतीनी हना, 7 गो इस्त्राएली आन कली आं गेशो रागी रे खेरनुडमी। मिनु एको आं कली सेल्शो खिं कली प्रॉइशा मकोव्रनुड। मिनु इस्त्राएली चहिं मुर नेल्ल आन दातेमी मुने दोक्शा, ग्रान्ना दिक्तीक दुम्नीम। ब्यवस्था ४:२६; ब्यवस्था ८:१९-२०; मत्ती २३:३८ 8 एको खिं ब्रेक्शा, फुल्लु देल्शो दुम्ब। मिनु नोले एकेर गाक्ब मुर नेल्ल छक लाक्नीम। मिनु मुरपुकीमी मेको तशा ‘मारदे परमप्रभु यावेमी एको खिं नु एको रागी कली ओं पवा, माइ?’ दे शुक्शी पाइनीम। 9 मिनु मुरपुकीमी ‘मेकोपुकीमी परमप्रभु यावे, आन परमप्रभुम मेको आन किकी पिपी आन कली इजीप्त

रागी रे गुंइशा चाक्तु हना यो, मेको कली प्रॉइशा, देवी देवता आन कली मानेशा, पूजा पाक्तेक्म। मोपतीके परमप्रभु यावेमी मेको आन कली मोदेंशो श्येत गेप्टु’ देंनीम” देमाक्त।

सोलोमन नु हीराम  
२इतिहास ८:७-११

10 सोलोमन कली परमप्रभु यावे आ खिं नु आ बाक्तीक खिं सेल्चा कली २० बर्स माल्दा बाक्त। १राजा ६:३८; १राजा ७:१ 11 टायर डा पिप हीराममी सोलोमन कली माल्शो लेबानोन डा लाइश्शो रवा आ शी, अरु शी, सुन नु आ माल्शो नेल्ल गेशो बाक्माक्त। मोपतीके पिप सोलोमनमी हीराम कली गालील रागी डा २० ओटा सहर गेवा बाक्त। २इतिहास ८:२ 12 मिनु हीरामम टायर रे मेको सोलोमन आ गेशो सहरपुकी कोव्रथ लमाक्त। मिनु मेकोम मेको सहर मदाक्ता बाक्त। 13 मिनु मेकोमी सोलोमन कली “आं लोकब, मेको इ गेशो सहरपुकी दा दोकका देंशो बाक्तेक्मे” देमाक्त। मिनु मेकोम मेको सहर आन कली “काबुल रागी” देंशो नें वोदा बाक्त। मेको सहर आन नें मुल सम्म मेकोन बाक्नीम। 14 मिनु हीराममी पिप सोलोमन कली सहे का २० टलेन्ट सुन सोइक्ता बाक्त। टलेन्ट का ३४ किलो बाक्ब।

सोलोमन आ गेय पाइब

15 पिप सोलोमनम पपाइश्शो गेय मार मार बाक्त देंशा हना, परमप्रभु यावे आ खिं, आ बाक्तीक खिं, मिल्लो माइश्शो बोल्यो दरवार, यरूसलेम डा गारो, हासोर, मेगीददो नु गेजेर सहर सेल्पदा बाक्त। 16 इजीप्त डा पिप फाराओम गेजेर सहर कली लडाइ तोशा ग्राशा, मेकेर मी सुइश्शो बाक्माक्त। मेकोम मेकेर बाक्ब कनानी आन कली साइश्शा, मेको सहर आ तमी, सोलोमन आ मीश कली दाइजो गेशो बाक्माक्त। यहोसु १६:१०; १राजा ३:१ 17 मिनु सोलोमनम गेजेर सहर, बेथ-होरोन, 18 बालाथ नु मेको गोरशो रागी डा तामार नु आ एर ओंथ डा रागी, 19 सोलोमन आ मार मार वोइक्तीक सहरपुकी, आ बग्गी नु शारा वोइक्तीके नु शारा डोइक्ब आन कली बाक्चा कली सहरपुकी यो सेल्पदा बाक्त। सोलोमनमी यरूसलेम, लेबानोन नु आ सासन पशो राज्य नेल्लेमी मार सेल्चा दाक्शो बाक्मे, मेको सेल्ने थुमा बाक्त। १राजा १०:२६ 20 मिनु लीशो एमोरी, हिती, परिज्जी, हिक्वी नु यबुसी चहिं इस्त्राएली आन थर डा मुर मबाक्मा बाक्त। 21 इस्त्राएलीपुकीमी मेको रागीम लीशो मेको आन चच युइ आन कली काइ मवोइक्थु साइक्ने मचाप्शो बाक्मा बाक्त। सोलोमनमी मेको आन कली गेय पाइब वाइल सेल्शा वोइक्मी बाक्त। मेको मुल सम्म मोपान बाक्शो बाक्नीम। यहोसु १६:१० 22 तन्न सोलोमनम इस्त्राएली सुइ आन कली वाइलीम वाइल मसेल्मी बाक्त। मेकोपुकी चहिं लडाइ पाइब, लडाइ पाइब आन ठेयब मुर, कप्तान, बग्गी चलेब आन ठेयब मुर नु शारा डोइक्ब सेल्मी बाक्त।

23 मिनु सोलोमन आ ठेयब गेय पाइब ५ सहे ५० जना बाक्मा बाक्त। मेकोपुकी गेय पाइब आन कली कोव्रब बाक्मा बाक्त।

24 मिनु फाराओ आ तमी दाऊद आ सहर रे पिप सोलोमनम सेल्शा गेशो आंम खिंम लमाक्त। सोलोमनमी मिल्लो माइश्शो बोल्यो दरवार यो सेल्पदा बाक्त।

25 मिनु सोलोमनमी परमप्रभु यावे कली सेल्शो चढेतीकेमी बर्सम खेयप सां परमप्रभु यावे आ डोंइती चोशा चढेतीक नु दुशा बाक्चा आ पर्बम चढेतीक चढेशा धूप यो चोशा चढेवा बाक्त। मोपा मेकोम परमप्रभु यावे आ खिं डा गेय नेल्ल पवा बाक्त।

सोलोमनम जहाज सेल्पाइश्शो

26 मिनु पिप सोलोमनम लल समुन्द्र आ शुंइच एदोम रागी एलोथ आ नेक्था एस्योन-गेबेर सहरम जहाजपुकी यो सेल्पदा बाक्त। गन्ती ३३:३५; २इतिहास ८:१७-१८ 27 हीराममी समुन्द्र आ पर्बम तुइक्ब नु जहाजम गेय पाइब मुर सोलोमन आ गेय पाइबपुकी नु गेय पपाइक्चा कली सोइक्तीमी बाक्त। १राजा १०:११ 28 मिनु मेकोपुकी जहाजम ओफीर लमा बाक्त।

मिनु मेकेर रे ४ सहे २० टलेन्ट सुन चाक्मे बाक्त। मिनु मेको पिप सोलोमन कली गेमे बाक्त। उत्पत्ती १०:२९

शेबा डा पिपीम जाक्शो  
२इतिहास ९:१-१२

10 शेबा डा पिपीममी सोलोमन आ रिम्शो पशो नेल्ल, परमप्रभु यावे आ ठेयब नें नु आ पशो नेल्ल नेना बाक्त। मिनु लोव लेन्ने मचाच्चा डा लोव कुरशा सोलोमन कली नाक्चा कली जाक्माक्त। मत्ती १२:४२; १राजा ५:१४<sup>२</sup> मेको शुश मुर नु शुश मस्ला, सुन नु शुश क्येट लाइब हीरा दलओठम कुरपाइशा यरूसलेम जाक्माक्त। मिनु आ थुंम बाक्शो लोव नेल्ल सोलोमन कली देंमाक्त।<sup>३</sup> मिनु सोलोमनम मेको आ हिल्लो पशो लोव नेल्ल लेत्ता बाक्त। मेको हिल्लो पशो लोव लेत्चा कली पिप कली मारेइ श्येत मद्दुम्माक्त।<sup>४</sup> मिनु शेबा डा पिपीममी सोलोमन आ जोक्तीक तुइक्तीक नेल्ले, मेको आ सेल्शो पिप आ खिं,<sup>५</sup> मेको आ जचा थोवक, मेको आ एर ओथ बाक्ब आ ठेयब गेय पाइब आन बाक्तीके, आ गेय पाइब आन गेय पशो, मेको आन फेक्शो वा, आ ग्योबपुकी, परमप्रभु यावे आ खिंम चोशा चढेतीकपुकी तशा, शुश छक लाक्माक्त।

<sup>६</sup> मिनु मेकोमी पिप कली “गो आं रागीमी इन गेय नु जोक्तीक तुइक्तीक आ पबर्म लोव नेंता।<sup>७</sup> तन्न गो आंमा जाक्शा, मतडा सम्म थमा मसुदु। मेको आं कली नेंशो दा उडक्थ लाइ यो मनेंशो बाक्ती। इन जोक्तीक तुइक्तीक, इन पशो गेय नु इन शोंप आ पबर्म आं नेंशो क्येडा यो शुश बाक्त।<sup>८</sup> इन मीशपुकी नु इन गेय पाइबपुकीमी गेना हना यो इन जोक्शो तुइक्शो लोव नेंशा ग्येरीसीशो बाक्नीमी।<sup>९</sup> मिनु परमप्रभु यावे, इन परमप्रभु ठेयब बाक्ब। मेकोमी इन कली दाक्शा इस्राएल कली सासन पचा कली पिप सेल्लु। परमप्रभु यावेमी इस्राएली आन कली गेना हना यो दाक्ताक्व। मोपतीके मेकोमी इन कली ठीक निसाफ पचा नु ठीक पचा कली मेको आन पिप सेल्शो बाक्त” देंमाक्त। १राजा ५:२१<sup>१०</sup> मिनु नोले मेकोमी पिप कली सहे का २० टलेन्ट सुन, शुश मस्लापुकी नु शुश क्येट लाइब हीरापुकी गेवा बाक्त। शेबा डा पिपीममी सोलोमन कली गेशो खोदेंशो पा शुश मस्ला डोंइती सुइम मचाक्गमे बाक्त। टलेन्ट का ३४ किलो बाक्ब।

<sup>११</sup> मेको नेल्ल प्रॉइशा यो हीराम आ जहाजपुकीम ओफीर रे सुन चाक्बाक्मा बाक्त। मेकोपुकीमी जहाजम सिरी खन्ड के शुश क्येट लाइब शी नु हीरापुकी चाक्बाक्मा बाक्त। १राजा ९:२७-२८<sup>१२</sup> मिनु पिपमी मेको सिरी खन्ड के शी रे परमप्रभु यावे आ खिं नु आ बाक्तीके खिं कली क्रेसी डा ग्याइक्तीक सेल्पदा बाक्त। मिनु कुम्सो पाइब आन कली बीना नु तार पाइशो ताप्तीक यो मेको शी के सेल्पदा बाक्त। मेको मोदेंशो पा सिरी खन्ड के शी गेना यो मचाक्शो बाक्मा बाक्त। मिनु मेना रे मुल सम्म यो गेनायो मताइसीशो बाक्ब।

<sup>१३</sup> मिनु पिप सोलोमनम शेबा डा पिपीम कली आ गेशो प्रॉइशा यो आ दाक्शा पुंइशो थोवक नेल्ल गेवा बाक्त। मेको नोले मेको आ गेय पाइब नेल्ल लाइशा आ रागी लेम्माक्त।

सोलोमन आ शोंप  
२इतिहास ९:१३-२८

14 सोलोमन आ बाक्तीकेम बर्स बर्सम जाक्शो सुन सहे सां ६६ टलेन्ट दुम्बाक्माक्त। टलेन्ट का ३४ किलो बाक्ब।<sup>१५</sup> मेको प्रॉइशा, ग्याब्ब लेयब आन चाक्शो, अराब रागी डा पिपपुकी नु अर्को रागी डा सासन पाइबपुकी रे यो सुन जाक्बाक्माक्त।<sup>१६</sup> मिनु पिप सोलोमनम तुप्शा सेल्शो सुन के सहे निक्शी ठेयब तेक्तीक सेल्पदा बाक्त। मेको का सेल्चा कली ६ सहे शेकेल सुन माल्दा बाक्त। शेकेल का ११.५ ग्राम खोदेंशो बाक्ब। १राजा १४:२६<sup>१७</sup> मेकोमी तुप्शो सुन के सहे सां आइक्च आइक्च तेक्तीक यो सेल्पदा बाक्त। मेको का सेल्चा कली सहे सां शेकेल सुन माल्दा बाक्त। मिनु पिपमी मेको नेल्ल लेबानोन डा ब्वाकी माइशो खिंम वोइक्पाइक्मी बाक्त। १राजा ७:२<sup>१८</sup> मिनु पिपम हात्ती आ दारा के ठेयब निक्तीक का सेल्शा, मेको कली क्येख सुनमी गिल्पदा बाक्त।<sup>१९</sup> मेको निक्तीक तार डोइक्तीक ६ ओटा थेंका बाक्मा बाक्त। मेको निक्तीक आ नोले गे कुल कुल पा सेल्शो

बाक्माक्त। मेको निक्तीक आ निम्फा गे गुइ वोइक्तीक पाइशो बाक्माक्त। मेको गुइ वोइक्तीक आस नेक्था गुप्स निक्शी सेल्शो बाक्माक्त।<sup>२०</sup> मेको ६ ओटा थेंका नेल्ले एर गे का, ओथ गे का पा १२ ओटा गुप्स बाक्मा बाक्त। मेको मोदेंशो निक्तीके तेकोइ राज्य डा पिप आन पबर्म मसेल्शो बाक्माक्त।

<sup>२१</sup> पिप सोलोमन आ तूतीक कचौरा नेल्ल सुन के बाक्मा बाक्त। मिनु लेबानोन डा ब्वाकी माइशो पिप आ खिंम बाक्शो ग्योब नेल्ले क्येख सुन के बाक्मा बाक्त। चांदी के मारेइ मबाक्मा बाक्त। मारदे हना सोलोमन आ पालाम चांदी मारेइ खोदेंशो मबाक्माक्त।<sup>२२</sup> मिनु पिप नु हीराम आस जहाजपुकी टारसीस गे लाइबाक्मा बाक्त। मिनु बर्स सां सांमी मेको जहाजम काले टारसीस रे सुन, चांदी, हात्ती आन खूइ, बुदी नु मजुर चाक्शा, जाक्बाक्मा बाक्त।

<sup>२३</sup> मोपा सोलोमन आ शोंप नु आ जोक्तीक तुइक्तीकेमी पिप नेल्ल आन क्येडा ठेयब दुम्माक्त।<sup>२४</sup> रागी नेल्ल डा मुरपुकी परमप्रभुम सोलोमन कली गेशो जोक्शो तुइशो लोव नेंचा कली जाक्बाक्मा बाक्त।<sup>२५</sup> मेको मोपा जाक्ब नेल्लेमी बर्स बर्सम कोसेली सुन चांदी के मार मार, फेक्तीक वा, यापुकी, मस्ला, शारा नु खच्चर चाक्बाक्मा बाक्त।

<sup>२६</sup> सोलोमनम शुश बग्गी नु शारा तेलमी बाक्त। मेको के १४ सहे बग्गी नु १२ हजार शारा बाक्मा बाक्त। मेकोमी बग्गी आन कली बग्गी वोइक्तीक सहरम वोदा बाक्त। का निक्शी आन कली चहिं आं नुन यरूसलेमम वोइक्मी बाक्त। १राजा ५:६<sup>२७</sup> पिपमी यरूसलेमम चांदी फुल्लु खोदेंशो पा तेलमी बाक्त। मिनु लेबानोन डा लाइशो रवा आ शी चहिं शेफेलाह डा फोवशी रवा खोदेंशो पा शुश तेलमी बाक्त।<sup>२८</sup> सोलोमन आ शारा इजीप्त नु क्युए रे ग्याप्शा चाक्शो बाक्मा बाक्त।<sup>२९</sup> मेकोपुकीम इजीप्त रे ६ सहे शेकेल चांदीम बग्गी नु सहे का ५० शेकेल चांदीम शारा ग्याप्शाक्मा बाक्त। मिनु पिप आ ग्याप्ब लेयबपुकीम हिक्ती आन पिप नु अराम डा पिप नेल्ल आन कली लेयबाक्मा बाक्त। शेकेल का ११.५ ग्राम, तोला का खोदेंशो बाक्ब।

सोलोमन आ मीशपुकी

11 पिप सोलोमनम फाराओ आ तमी ग्युंभे पा यो, मेकोमी शुश अर्को रागी डा मीश मुर, मोआबी, अम्मोनी, एदोमी, सीदोनी नु हिक्ती आन कली दाक्तीमी बाक्त। ब्यक्था १७:१७<sup>२</sup> परमप्रभु यावेमी इस्राएली आन कली मेको रागी डा मुर आन पबर्म “गेपुकीम मेको आन कली ग्युंभे पचा मद्दुम्नीनी। मारदे हना मेकोपुकीम थमा पा इन थुं आन देवी देवता आन नोले खोइक्पाइक्नीम” देंशो बाक्माक्त। तन्न सोलोमनम मेको आन कली दाक्तीमी बाक्त। प्रस्थान ३४:१६<sup>३</sup> मेको के ७ सहे ग्युंभे पशो मीश नु सहे सां अरु नोले चाक्शो मीश बाक्मा बाक्त। मिनु मेकोपुकीम आ थुं क्याल्पदमे बाक्त।<sup>४</sup> मिनु सोलोमन खूशो दुम्मेनु, मेको आ मीशपुकीम आ थुं अरु देवी देवता आन गे हिरपदमे बाक्त। मिनु मेको आ आफ दाऊद आ थुंम खोदेंशो पा आ थुं नेल्लेम परमप्रभु यावे, आ परमप्रभु आ नोले मखोदा बाक्त।<sup>५</sup> मोपा सोलोमन सीदोनी आन अशतोरथ देवी नु अम्मोनी आन ग्रान्ग्रा दिशो मूर्ति मोलोके आस नोले खोदा बाक्त। मोलोके नु वोइशो देवता मिल्कोम यो बाक्त।<sup>६</sup> मोपा सोलोमनम परमप्रभु यावे आ डोंइती मार मरिम्शो बाक्मे, मेको पवा बाक्त। मेको आ आफ दाऊद खोदेंशो पा आ थुं नेल्लेमी परमप्रभु यावे आ नोले मखोदा बाक्त।<sup>७</sup> मिनु सोलोमनम मोआब डा ग्रान्ग्रा दिशो मूर्ति केमोश नु अम्मोनी आन ग्रान्ग्रा दिशो मूर्ति मोलेके आस कली यरूसलेम आ पूर्ब गे डा डांडा काम पूजा पतीक थान सेला बाक्त। गन्ती २१:२९; २राजा २३:१३<sup>८</sup> मेकोमी अर्को रागी डा आ मीश नेल्ल आन कली मोदेंशो पवा बाक्त। मेकोपुकीमी आन देवी देवता आन कली धूप चोशा चढेमे बाक्त।

<sup>९</sup> मिनु परमप्रभु यावे सोलोमन क्येडा गाइक्ता बाक्त। मारदे हना परमप्रभुमी मेको नु खेयप निक्शी लोव पशो बाक्त हना यो, मेको परमप्रभु यावे, इस्राएली आन परमप्रभु रे डोन लशो बाक्माक्त। १राजा ३:५; १राजा ९:२<sup>१०</sup> परमप्रभु यावेमी सोलोमन कली “अरु देवी देवता आन नोले मखोतो” देंशो बाक्माक्त। मो हना यो सोलोमनम परमप्रभु यावे आ शेंशो

मपवा बाक्त। 11 मोपतीके परमप्रभु यावेम इस्राएली आन पिप सोलोमन कली "इ मो पशो, आं कबल प्रोइशो नु इ कली पावो, दे आं फुल्लुम मुशा ब्रेक्शो लोव्र मटितीके गो थमा पा एको इ राज्य रोइश्शा इ गेय पाइब कली गेनुड। १सामुएल १५:२८ 12 मो हना यो इ आफ दाऊद आ पर्वम इ पालामी मो मपाइनुड। गो एको राज्य इ तौ आ पालाम रोइक्नुड। १राजा १२:१९ 13 तन्न गो राज्य नेल्ल मरोइक्नुड। आं गेय पाइब दाऊद नु आं योव्रशो सहर यरूसलेम आस पर्वम इस्राएल डा थर का इ तौ कली गेनुड" देंमाक्त।

### सोलोमन आ जोरी सत्रु

14 मिनु परमप्रभु यावेमी इस्राएली आन मुर एदोम डा पिप आ खिं डा मुर हादाद कली सोलोमन आ जोरी सत्रु सेल्शा पोक्गा बाक्त। 15 डोंइती दाऊदम एदोमी नु लडाइ पवानु, मेको आ लडाइ पाइब आन ठेयब मुर योआबमी मेकेर बेक्शो मुर आन कली थिम्थ लमेनु, मेको रागी डा वोंइश मुर नेल्ल आन कली साइश्शो बाक्माक्त। २सामुएल ८:१४ 16 मेना योआब नु इस्राएली नेल्ले एदोम डा वोंइश मुर नेल्ल आन कली साइक्ने मथुम्मे सम्म मेकेर ६ महिना बाक्मा बाक्त। 17 मेना हादाद आलन बाक्माक्त। मिनु आ आफ आ गेय पाइब का निक्शी एदोमी नु प्रोक्शा इजीप्त लशो बाक्माक्त। 18 मिनु मेकोपुकी मिदयान रे पारानम जाक्मा बाक्त। मिनु पारान रे सुइ मुर आन कली लाइश्शा इजीप्त डा पिप फाराओ आ बाक्तीके लशो बाक्मा बाक्त। मिनु फाराओमी हादाद कली आ रागीम खिं का रू नु जचा तूचा थोव्रक गार पा गेशा वोइश्शो बाक्माक्त। 19 फाराओमी हादाद कली शुश दाक्ता बाक्त। मिनु मेकोम आ मीश पिपीम तहपेनेस आ लोक्ब का गेशा ग्युबे पदा बाक्त। 20 मिनु तहपेनेस आ लोक्बमी हादाद रे गेनुबाथ नें पाइश्शो तौ का थिवा बाक्त। मिनु तहपेनेसमी मेको आल कली दूध प्रोइपाइश्शा फाराओ आ खिंम थुला बाक्त। मिनु गेनुबाथ फाराओ आ आलपुकी नुन कोल्माक्त। 21 मिनु हादाद इजीप्तम बाक्मेनु, मेकोम दाऊद बेक्शो नु मेको आ लडाइ पाइब आन ठेयब मुर योआब यो बेक्ने थुम्शो लोव्र नेना बाक्त। मिनु हादादम फाराओ कली "आं कली आं रागी लेत्वा गेयीनी" देंमाक्त। 22 तन्न फाराओम मेको कली "आं रागीम इन कली मार मजाक्दीम्मे? मिनु 'आं रागी लेश्शा लाइनुड' देंनी" दे हिल्लो पवा बाक्त। मिनु मेकोमी "मारैइ माल्शो मबाक्ब। तन्न आं कली लचा गेयीनी" देंमाक्त। 23 मिनु परमप्रभुम सोलोमन आ पर्वम अर्को जोरी सत्रु का यो पोक्गा बाक्त। मेको एल-आदा आ तौ रेसोन बाक्माक्त। मेको आ होव्रप सोबाह डा पिप हादादेजेर रे प्रोक्शा लशो बाक्माक्त। २सामुएल ८:३ 24 मिनु दाऊदम सोबाह डा लडाइ पाइब आन कली सदानु, मेको रेसोनमी आ मुर आन कली खुप्ता बाक्त। मिनु मेको मरिश्शो पाइब आन हुल डा ठेयब मुर दुम्माक्त। मिनु मेको मरिश्शो पाइब आन हुल दमस्कस लमा बाक्त। मिनु मेकोपुकीम मेकेर ग्राशा दमस्कस आन के सेल्मे बाक्त। मिनु मेको मेकेर डा पिप दुम्माक्त। २सामुएल १०:१८ 25 रेसोन सोलोमन बाक्म सम्मन इस्राएल आ जोरी सत्रु दुम्माक्त। मिनु हादाद आ मरिश्शो पशोम, मेकोम मरिश्शो तेम्दा बाक्त। मिनु अरामम हुकुम पवा बाक्त। मिनु मेको इस्राएल आ जोरी सत्रु दुम्माक्त।

### येरोबाम जोरी सत्रु दुम्शो

26 एफ्राइम आ थर, सेरेदाह सहर डा नेबात आ तौ येरोबाम सोलोमन आ गेय पाइब बाक्माक्त। मेको आ ममा आ नें सेरूआह बाक्माक्त। मेको आ वोंइश बेक्शो मीश मुर बाक्माक्त। मेको येरोबाममी यो सोलोमन कली श्येत गेचा गोवा बाक्त। 27 मेकोमी पिप कली मार पवा बाक्त देंशा हना, सोलोमनम मेको कली मिल्लो बोल्यो दरवार सेल्पाइश्शो नु आ आफ दाऊद आ सहर डा ब्रेश्शो गारो सुपाइश्शो बाक्माक्त। १राजा ९:१५, २४ 28 येरोबाम थाम्पा गेय पाइब मुर का बाक्माक्त। मेको ठिटा मुर आ गेय पशो तशा, सोलोमनमी मेको कली योसेफ आ खिं डा गेय पाइब आन कली कोव्रब मुर सेला बाक्त। 29 मिनु येरोबाम यरूसलेम रे अर्को रागी लना लन बाक्माक्त। मेना परमप्रभु यावे आ लोव्र पाइब शिलो सहर डा अहीयाहमी मेको कली लांम गुमा बाक्त। अहीयाहम नक वा फेक्शो बाक्माक्त। लांम

गुम्सानु मेको निक्शी ला बाक्सा बाक्त। 30 मिनु अहीयाहमी मेको आ फेक्शो नक वा खाक्शा १२ टुक्रा सेला बाक्त। 31 मिनु मेकोमी येरोबाम कली "१० टुक्रा गुम्सो। मारदे हना परमप्रभु यावे, इस्राएली आन परमप्रभुमी 'गो एको राज्य सोलोमन आ गुइ रे रोइक्नुड। मिनु इ कली १० थर गेनन। १राजा १२:१५; १राजा १४:२ 32 थर का मेको केन लीब। आं गेय पाइब दाऊद नु यरूसलेम आ पर्वम मोदेंशो दुम्ब। मारदे हना गो यरूसलेम सहर इस्राएली आन थर नेल्ल आन दाते रे आं के दुम्पाइश्शा योव्रता। भजन संग्रह १३२:१३ 33 मेकोमी आं कली प्रोइतीके, गो मो पाइनुड। मेकोमी सीदोनी आन देवी अशतोरेथ, मोआब डा देवता केमोश नु अम्मोनी आन देवता मोलेक कली पूजा पाप्तु। मेको आं लांम मगा। मेकोमी आं डोंइती मार ठीक बाक्मे, मेको मपावो। मेकोम आ आफ दाऊदम पशो खोदेंशो पा, आं फुल्लुम मुशा ब्रेक्शो लोव्र नु आं निसाफ पतीक लोव्र मपावो। मोलेक देवता कली मिल्लोम यो देंशो बाक्त। 34 मो हना यो गो मेको आ राज्य नेल्ल मरोइक्नुड। गो मेको कली मबेक्म सम्म सासन पाइब सेल्लुड। मेको आं योव्रशो गेय पाइब नु आं शेंशो नु आं फुल्लुम मुशा ब्रेक्शो लोव्र टीब दाऊद आ पर्वम मोदेंशो पाइनुड। २सामुएल ७:१२ 35 तन्न गो मेको आ राज्य आ तौ रे १० थर रोइश्शा इ कली गेनन। 36 थर का चहिं गो मेको आ तौ कली गेनुड। मोपा आं योव्रशा बाक्शो सहर यरूसलेमम आं गेय पाइब दाऊद आ मुर का लीमल। १राजा १५:४; २राजा ८:१९ 37 गो इ कली सासन पपाइक्नुड। गो इ दाक्शो नेल्ल आन कली सासन पाइनेवे। गो इस्राएल डा पिप दुम्नेवे। 38 मिनु गे आं गेय पाइब दाऊद खोदेंशो पा आं शेंशो नेल्ल पाप्तीवी नु आं लांम गाक्ते हना, आं डोंइती मार ठीक बाक्मे, मेको नेल्ल पाप्तीवी हना, आं फुल्लुम मुशा ब्रेक्शो लोव्र नु आं शेंशो नेल्ल आं गेय पाइब दाऊदम खोदेंशो पा टिप्तीवी हना, गो गे नु बाक्नुड। गो इ खिं कली गेना हना यो लीपाइक्नुड। मिनु इस्राएल इ कली गेनन। १राजा ९:४ 39 मिनु गो दाऊद आ चच युइ आन कली सजाइ गेनुडमी। तन्न गेना हना यो कली ममाइ' दे परमप्रभुम देंशो बाक्ब" देंमाक्त। 40 मोपतीके सोलोमनमी येरोबाम कली साइक्वा मला बाक्त। तन्न येरोबाम इजीप्त डा पिप शीशक आ बाक्तीक प्रोक्शा लमाक्त। मिनु सोलोमन मबेक्म सम्म मेकेर बाक्माक्त। १राजा १४:२५

### सोलोमन बेक्शो

41 मिनु सोलोमनम पशो अरु गेय, आ जोक्तीक तुइक्तीक, मार, मेको सोलोमन आ इतिहासम ब्रेक्शो मबाक्बा डा? २इतिहास ९:२९-३१ 42 सोलोमनमी यरूसलेमम बाक्शा, इस्राएली नेल्ल आन कली ४० बर्स सम्म सासन पवा बाक्त। 43 मिनु नोले मेको बेक्माक्त। मिनु आ आफ दाऊद आ सहरमी थिम्चा पुंइसे बाक्त। मिनु मेको आ पा डा आ तौ रेहोबाम पिप दुम्माक्त।

### रेहोबामम इस्राएल कली मरिश्शो पशो २इतिहास १०:-

12 रेहोबाम शेकेम सहर लमाक्त। मारदे हना इस्राएली नेल्ले मेको कली पिप सेल्चा कली मेकेर लशो बाक्मा बाक्त। 2 मिनु नेबात आ तौ येरोबामम मेको लोव्र नेना बाक्त। मेको मेना सम्म इजीप्त रागीमी बाक्शो बाक्माक्त। मेको सोलोमन पिप क्येडा प्रोक्शा, लशो बाक्माक्त। मिनु येरोबाम इजीप्त रे लेम्माक्त। १राजा ११:४० 3 मोपतीके मुरपुकीम येरोबाम कली ब्रेथ सोइक्तमे बाक्त। मिनु मेको नु इस्राएली नेल्ल जाक्शा रेहोबाम कली 4 "इन आफोमी आंइ कली शुश श्येत गेपु। मिनु मुल गे इन आफ खोदेंशो मपथु, आंइ कली मोदेंशो श्येत रे प्रोनीन। मिनु गो इन गेय पाइब दुम्नीकी" देंमा बाक्त। 5 मिनु रेहोबामम मेको आन कली "आं कली नाक्त सां सम्म मिम्चा गेयीनी। मिनु लेंशा जाक्कीन" देंमाक्त। मोपतीके मुरपुकी खिं लमा बाक्त।

6 मिनु पिप रेहोबाममी आ आफ सोलोमन आ पाला डा सल्ला गेब खाल्पापुकी नु सल्ला पुंइशा "एको मुर आन कली गो मार देंड, गे मार सल्ला गेनीनी?" दे हिल्लो पामी बाक्त। 7 मिनु मेकोपुकीमी "मुलाक्त गे

मेको मुर आन कली रिम्शो पाइतीनी हना, गे मेको आन गेय पाइब खोदेशो दुमीन। मिनु मेको आन कली रिम्शो लोव्र पने। मिनु नोले मेकोपुकी गेना हना यो इन गेय पाइब दुम्नीम” देमा बाक्त।<sup>8</sup> तन्न मेकोमी मेको खाल्पा आन सल्ला मबिस्से बाक्त। मिनु मेकोमी आ खोदेशो आ नु कोल्शो सल्ला गेब ठिटा आन कली सल्ला पुना बाक्त।<sup>9</sup> मिनु मेकोमी मेको आन कली “गे मार देंनीनी? मुरपुकीमी ‘इन आफोम शुश श्येत गेपु’ देंतेक्म। मुल गो मेको आन कली मार देंचा माल्नुडा?” दे हिल्लो पामी बाक्त।<sup>10</sup> मिनु मेको नु कोल्शो ठिटापुकीम मेको कली “इन कली ‘इन आफोम शुश श्येत गेपु, मुल गे आंइ कली मेको श्येत रे प्रोनीन’ देंब आन कली गे मार देंचा माल्नीनी देंशा हना ‘आं आइक्च ब्रेप्चो आं आफा आ क्रातो क्येडा यो ठेयब बाक्ब।<sup>11</sup> आं आफोम इन कली श्येत गेपु। मुल गो इन कली मेको क्येडा यो शुश श्येत गेनुड। आं आफोम इन कली कोक्केम तुप्पाइश्शो बाक्त। तन्न मुल गो इन कली बिच्छीम क्राइक्पाइक्वन्नी” दे मतीन” देमा बाक्त।

<sup>12</sup> मिनु पिपमी नाक्त सां नोले जाक्कीन, दे सोइश्शो येरोबाम नु मुर नेल्ले पिप रेहोबाम आ बाक्तीक जाक्मा बाक्त।<sup>13</sup> मिनु पिपमी मेको खाल्पा आन गेशो सल्ला मनैधु, मेको आन कली मरिम्शो लोव्र पाइक्मी बाक्त। *हितोपदेस १५:१*<sup>14</sup> मेको ठिटा आन गेशो सल्ला बिश्शा, मुर आन कली “आं आफोम इन कली श्येत गेपु। मुल गो इन कली मेको क्येडा यो शुश श्येत गेनुड। आं आफोमी इन कली कोक्केम तुप्पाइश्शो बाक्त। तन्न मुल गो इन कली बिच्छीम क्राइक्पाइक्वन्नी” दे माइक्मी बाक्त।<sup>15</sup> मोपा पिपम मेको मुर आन लोव्र मनेना बाक्त। मारदे हना, शिलो सहर डा अहीयाह रे पा नेबात आ तौ येरोबाम कली देंशो लोव्र गाप्चा कली परमप्रभु यावेमी मोदेशो पशो बाक्माक्त। *१ राजा ११:२९-३१*

#### येरोबाम कली पिप सेल्चशो

<sup>16</sup> मिनु इस्राएली नेल्लेमी पिपम मेको आन लोव्र मनैशो तुइश्शा, मेकोपुकीम पिप कली “दाऊद नु आंइ के ततीक मार बाक्बा डा? येस्से आ तौ नु आंइ के ततीक मारेइ मबाक्ब। इस्राएली, आंम आंम खिं लेतीन। दाऊद गे आंम थुती थाती पांइसो” देमा बाक्त। मोपतीके इस्राएली आन आन खिं लेम्मा बाक्त। *२सामुएल २०:१*<sup>17</sup> तन्न पिप रेहोबामम यहूदा डा सहरम बाक्ब इस्राएली आन कली सासन पना पन बाक्माक्त।<sup>18</sup> मिनु पिप रेहोबामम वाइल आन गेय कोव्रब अदोराम कली सोइक्ता बाक्त। तन्न इस्राएली नेल्लेम मेको कली फुल्लु आप्शा सदमे बाक्त। मोपतीके पिप रेहोबाम रीब पा आ बग्गी डोइश्शा यरूसलेम प्रोक्माक्त।<sup>19</sup> मोपतीके मेको नाक्त रे मुल सम्म इस्राएलीपुकी दाऊद आ खिं डा मुर नु जोरी सत्रु दुम्शो बाक्नीम।

#### येरोबाम इस्राएल डा पिप दुम्शो

२इतिहास ११:१-४

<sup>20</sup> मिनु इस्राएली नेल्लेमी “येरोबाम लेशशा जाक्शो बाक्ब” देंशो लोव्र नैशा, मेको कली ब्रेत्थ सोइक्तमे बाक्त। मिनु मेको कली इस्राएल डा पिप सेल्मे बाक्त। यहूदा आ थर डा मुर ला दाऊद आ खिं डा मुर आ नोले खोदमे बाक्त।

<sup>21</sup> मिनु सोलोमन आ तौ रेहोबाम यरूसलेमम जाक्शा, इस्राएली नु लडाइ पा आ राज्य लेत्वा कली यहूदा नु बेन्यामीन आस थर डा लाख का ८० हजार लडाइ पाइब आन कली खुप्तीमी बाक्त।<sup>22</sup> तन्न परमप्रभुमी आ मुर शेमायाह कली लोव्र पवा बाक्त।<sup>23</sup> मार लोव्र पवा बाक्त देंशा हना “सोलोमन आ तौ यहूदा डा पिप रेहोबाम, यहूदा नु बेन्यामीन आस थर डा मुर नेल्ल नु लीशो मुर आन कली,<sup>24</sup> परमप्रभु यावेमी ‘गेपुकी आंम लोक्ब इस्राएली नु लडाइ पचा कली इर मलने। गे नेल्ल इन खिं खिं लेशशा लने। मारदे हना एको आं मिम्शा पशो बाक्ब’ देंनो” देमाक्त। मोपतीके मेकोपुकी परमप्रभु यावे आ देंशो खोदेशो पा लडाइ पथ मलथु, आन खिं खिं लेशशा लमा बाक्त।

#### येरोबाम आ पाप

<sup>25</sup> मेको नोले येरोबाममी एफ्राइम डा पहाडम बाक्शो शेकेम सहर सेला बाक्त। मिनु आ रागी बोल्यो सेल्शा, मेकेर बाक्माक्त। मेकेर रे लशा मेकोम पेनुएल सहर सेला बाक्त।<sup>26</sup> मिनु येरोबामम आ थुंमी “एको राज्य दाऊद आ खिं गेन लेशशा लाइब।<sup>27</sup> एको मुरपुकी गेना हना यो परमप्रभु यावे आ खिं यरूसलेमम चढ़ेथ लाम्तेक्म हना, मेको आन थुं आन ठेयब मुर यहूदा आ खिं डा पिप रेहोबाम गे लेप्ब। मेकोपुकीम आं कली साइश्शा यहूदा डा पिप रेहोबाम गे लेत्नीम” दे मिम्शो बाक्माक्त।<sup>28</sup> मिनु पिपम सल्ला पा सुन के बाछा निक्शी सेल्पा बाक्त। मिनु मेकोम मुर आन कली “गे मुल यरूसलेम लशा शुश श्येत जाइनीनी। इस्राएली, इन कली, इजीप्त रे गुंइशा चाक्ब देवता एकेन बाक्नीम” दे माइक्मी बाक्त। *प्रस्थान ३२:४,८*<sup>29</sup> मिनु मेकोमी मेको बाछा का बेथेल सहरम नु का चहिं दानम वोदा बाक्त। *न्यायाधीस १८:३०*<sup>30</sup> मिनु मेको मो पशो इस्राएलमी पाप दुम्माक्त। मुरपुकी मेको देवता आस कली पूजा पचा कली बेथेल नु दान सम्म लाइबाक्मा बाक्त। *१ राजा १४:१६*<sup>31</sup> मिनु येरोबामम डांडा तार यो पूजा पतीक थानपुकी सेला बाक्त। मिनु मेकेर लेवी आन मुर मबाक्तेक्म हना यो अर्को थर डा मुर रे चढ़ेबपुकी योवशा वोइक्मी बाक्त।<sup>32</sup> मिनु येरोबामम ८ महिना डा १५ नाक्त यहूदा डा चाड खोदेशो पा चाड का मानेतीक नाक्त सेला बाक्त। मिनु थानपुकीम क्योरशा चढ़ेपपाइक्मी बाक्त। मेकोमी आ सेल्शो बाछा आस कली यो मार मार क्योरशा चढ़ेपपाइक्मी बाक्त। मेकोमी बेथेलम आ सेल्शो डांडा डा थानपुकीमी यो चढ़ेब आन कली योवशा वोइक्मी बाक्त।<sup>33</sup> मेकोम ८ महिना डा १५ नाक्त आ देंशो ना बेथेल डा आ सेल्शो चढ़ेतीकेम मार मार चढ़ेवा बाक्त। मोपा मेकोम इस्राएली आन कली चाड का मानेतीक नाक्त सेला बाक्त। मिनु मेकोमी धूप चोवा बाक्त।

#### यहूदा रे जाक्शो परमप्रभु आ मुर

**13** मिनु येरोबाम धूप चोचा कली चढ़ेतीक आ नेक्था राम्मेनु, परमप्रभु आ मुर का परमप्रभु यावे आ लोव्र कुरशा यहूदा रे बेथेलम जाक्माक्त।<sup>2</sup> मिनु मेकोमी मेको चढ़ेतीक आ पर्बम परमप्रभु यावे आ लोव्र पा “ए चढ़ेतीके! ए चढ़ेतीके! परमप्रभु यावेमी ‘दाऊद आ खिं रे योसीयाह नें पाइश्शो आल का जरमेब। मिनु मेकोमी इर थान डा धूप चोइब चढ़ेब आन कली क्योरशा इ तार चढ़ेब। मेको आन रुश इ तार चोइब’ देंशो बाक्ब” देमाक्त। *२ राजा २३:१६, २०*<sup>3</sup> मेको नाक्त मेको मुरुमी चिन्ड का कोइदा बाक्त। मेकोमी “परमप्रभु यावे आ लोव्र आ चिन्ड मार बाक्ब देंशा हना, मेको चढ़ेतीक ब्रेप्ब। मिनु मेकेर बाक्शो पुलु चहिं लाडगाम ब्राइब” देमाक्त।<sup>4</sup> मिनु येरोबामम परमप्रभु आ मुरुम बेथेल डा चढ़ेतीक आ पर्बम ठेयब सेंदा पा देंशो लोव्र नेना बाक्त। मिनु मेकोम चढ़ेतीक रे आ गुइ दिंशा “मेरे कली ग्याइक्तीन” देमाक्त। तन्न येरोबाम आ गुइ मुक्ने मचबा बाक्त।<sup>5</sup> परमप्रभु यावे आ लोव्रमी आ मुर रे देंशो लोव्र गाप्चा, चढ़ेतीक ब्रेम्माक्त। पुलु यो लाडगाम ब्रमाक्त।<sup>6</sup> मिनु पिपमी परमप्रभु आ मुर कली “आं गुइ डोइती डा खोदेशो दुम्ल, दे परमप्रभु यावे, इन परमप्रभु कली आं पर्बम पुनीन” देमाक्त। मिनु पिप आ देंशो खोदेशो पा मेको परमप्रभु आ मुरुम परमप्रभु यावे कली पुना बाक्त। मिनु पिप आ गुइ डोइती डा खोदेशो दुम्माक्त। *प्रस्थान ८:४*<sup>7</sup> मिनु पिपम परमप्रभु आ मुर कली “गो नु आं खिं गाक्कीन। मिनु मारेइ जचा थोव्रक जने। मिनु गो इन कली कोसेली गेनन्नी” देमाक्त।<sup>8</sup> तन्न मेको परमप्रभु आ मुरुमी पिप कली “गे आं कली इन राज्य उदक्थ पा योक्शा गेतीनी हना यो, गो इन खिं मलाइनुड। गो जचा थोव्रक यो मजाइनुड, ब्वाक्कु यो मत्तूनुड।<sup>9</sup> मारदे हना परमप्रभु यावेमी आं कली ‘गे मेकेर जचा थोव्रक मजावो। ब्वाक्कु यो मत्तूडो। मिनु इ लशो लां रे लेशशा मपिवो’ देंशो बाक्ब” देमाक्त।<sup>10</sup> मोपतीके मेको अर्को लां रे पा लेम्माक्त। डोइती बेथेल जाक्शो लां रे मलेम्माक्त।

<sup>11</sup> मेना बेथेलमी खूशो परमप्रभु यावे आ लोव्र पाइब मुर का बाक्माक्त। मिनु मेको आ तौपुकी जाक्शा, मेको नाक्त परमप्रभु आ मुरुम बेथेलम पशो गेय नेल्ल शेंदमे बाक्त। मेकोपुकीम मेकोमी पिप कली देंशो लोव्र यो आन

आफ कली शेंदमे बावत। 12 मिनु मेको आन आफोमी मेको आन कली “मेको तेको लां रे लम?” दे हिल्लो पामी बावत। मिनु आ तौपुकीम यहूदा रे जाक्शो मेको परमप्रभु आ मुर लशो लां कौडदमे बावत। 13 मिनु मेकोमी आ तौ आन कली “आं कली गधा काम लगम पाइश्शा गेयीनी” दे माइक्मी बावत। मिनु मेकोपुकीम मेको कली गधा काम लगम पाइश्शा गेमे बावत। मिनु मेको गधाम डोइश्शा, मेको मुर आ नोले खोदा बावत। 14 मिनु मेकोमी परमप्रभु आ मुर माल्शा, मेको कली रवा आ पुंमी नाइश्शा बाक्शो थिदा बावत। मिनु मेकोमी मेको कली “यहूदा रे जाक्शो परमप्रभु आ मुर गेन ननी?” दे हिल्लो पवा बावत। मिनु मेकोम “ओं, गोन नड” देंमावत। 15 मिनु मेकोमी मेको कली “गो नु आं खिं लशा, मारेड जचा थोवक जने” देंमावत। 16 तन्न मेकोमी “गो गे नु लेशशा लने मचापुड। इन खिंम ओवने मचापुड। गो एको रागीम मारेड जने तूने मचापुड। 17 मारेदे हना परमप्रभु यावेमी ‘गे मेको रागीम जचा थोवक मजावो। ब्वाक्कु यो मतूडो। इ लशो लां रे मलेतो’ देंशो बाक्ब” देंमावत। 18 मिनु मेको परमप्रभु यावे आ लोव पाइब खूशोमी मेको कली “गो यो इन खोदेंशो परमप्रभु यावे आ लोव पाइब नड। मिनु परमप्रभु यावे आ स्वर्ग डा गेय पाइब काम गो नु जचा तूचा कली इन कली आं खिंम चाक्वा माल्नेवे देंत” देंमावत। तन्न मेकोमी मेको कली जोल पाइश्शा बाक्मावत। 19 नोले मेको परमप्रभु आ मुर लेशशा, मेको नु लमावत। मिनु मेको आ खिंम जवा तूडा बावत।

20 मिनु मेकोपुकी जना जन बाक्मानु, परमप्रभु यावेमी मेको लेशशा चाक्ब, आ लोव पाइब खूशो कली लोव पपदा बावत। 21 मिनु मेकोमी यहूदा रे जाक्शो, परमप्रभु आ मुर कली ठेयब सेंदा पा “परमप्रभु यावेमी ‘गे परमप्रभु यावे आ लोव मटिवी। मिनु गे परमप्रभु यावे, इ परमप्रभु आ अरेशो मटिवी। 22 मेको आ मजावो, मतूडो देंशो रागीम लेशशा, जथ तूथ जाक्ते। मोपतीके मुल इ बेक्शो रां इ किकी पिपी आन तुरसुम मथिम्सीब’ देंशो बाक्ब” देंमावत। 23 मिनु मेको परमप्रभु आ मरुम जने तूने थुमा नोले, मेको कली लेशशा चाक्ब परमप्रभु यावे आ लोव पाइब खूशोमी मेको कली आ लगम पाइश्शा गधा गेवा बावत। 24 मिनु मेको लना लन बाक्मेनु लांम गुप्स का गूशा मेको कली सदा बावत। मिनु मेको आ बेक्शो रां लांम गोल्शा लीमावत। गधा मेको आ नेक्थान राप्शा बाक्शो बाक्मावत। मिनु गुप्स यो मेको आ नेक्था राप्शा बाक्शो बाक्मावत। १राजा २०:३६ 25 मिनु मेको लां रे पा गाक्ब मुरपुकीम मेको आ बेक्शो रां लांम गोल्शा बाक्शो नु गुप्स मेको आ नेक्थान बाक्शो तामे बावत। मिनु मेकोपुकीम मेको खूशो परमप्रभु यावे आ लोव पाइब आ सहर लशा, मेको लोव शोवडमे बावत।

26 मिनु मेको कली लां रे लेशशा चाक्ब मेको खूशो परमप्रभु यावे आ लोव पाइबमी मेको लोव नेना बावत। मिनु मेकोम “मेको परमप्रभु आ मुर बाक्ब। मेकोम परमप्रभु यावे आ लोव मटिशो बावत। मोपतीके परमप्रभु यावेम मेको कली गुप्स कली गेवा बावत। मिनु परमप्रभु यावेम मेको आ पर्वम पशो लोव गाप्चा कली गुप्सम मेको कली सदा बावत” देंमावत 27 मिनु मेको परमप्रभु यावे आ लोव पाइब खूशोमी आ तौ आन कली “आं कली गधा काम लगम पाइश्शा गेयीनी” दे माइक्मी बावत। मिनु गधाम लगम पाइश्शा गेमे बावत। 28 मिनु मेको लमेनु, मेको मुर बेक्शा लांम गोल्शा बाक्शो नु गधा नु गुप्स मेको आ नेक्था राप्शा बाक्शो थिदा बावत। मेको गुप्सम मेको बेक्शो मुर कली मब्वशो बाक्मावत। गधा कली यो मसाइश्शा बाक्मावत। 29 मिनु मेको परमप्रभु यावे आ लोव पाइब खूशोमी मेको परमप्रभु आ मुर आ बेक्शो रां गुप्शा गधाम वोदा बावत। मिनु मेको आ पर्वम रोंका पा थिम्चा कली आ सहरमी चाक्वा बावत। 30 मिनु मेकोम मेको बेक्शो मुर कली आ तुरसुमीन थिमा बावत। मिनु मेकोपुकीम “ए आंइ लोक्ब, ए आंइ लोक्ब” दे रोंका पामे बावत। *येरमीया २२:१८* 31 मिनु मेको कली थिम्ने थुम्शा, मेको परमप्रभु यावे आ लोव पाइब खूशोमी आ तौ आन कली “गो बेक्डा नोले आं कली यो मेकेर वोतीन। आं रुश मेको परमप्रभु आ मुर आ नेक्था लीमल। 32 मारेदे हना मेको मुर आ देंशो, बेथेलम बाक्शो परमप्रभु यावे कली चढेतीक नु सामरीया सहर डा डांडा डा थान आन पर्वम देंशो नेल्ल थमा पा गाप्ब” देंमावत।

33 मिनु मेको नोले यो येरोबामम आ मरिम्शो पतीक मप्रोना बावत। मेकोम डांडाम बाक्शो थानम थर नेल्ल डा मुर रे चढेब योवशा वोइक्ना

वोइक्न बाक्मावत। सुइ मुर चढेब दुम्चा दाक्ताक्व हना, मेको कली तेकोइ डांडा का डा चढेब सेल्शा वोदा बावत। १राजा १२:३१; प्रस्थान २८:४१ 34 मेको येरोबाम आ खिं डा पाप बावत। मोपतीके मेको आ खिं मलीथु, रागी रे क्याम्चा पुंडसे बावत।

येरोबाम आ तौ बेक्शो

14 मिनु येरोबाम आ तौ अबीयाह रोइ पवा बावत। 2 मिनु येरोबाममी आ मीश कली “गे येरोबाम आ मीश नवे, दे मुरुम मतुइक्पाइक्वा डा पा वा फेक्सो। मिनु शिलो सहरम लावो। मेकेर परमप्रभु यावे आ लोव पाइब अहीयाह बाक्ब। मेकोम आं कली एको मुर आन पिप दुम्नेवे देंशो बावत। १राजा ११:२९-३१ 3 मिनु गे १० ओटा शोब्ले, आइक्च बटुक नु गर का खुदो लाइश्शा, मेको आ बाक्तीक लावो। मिनु मेकोमी आल कली मार दुम्बा, मेको इ कली शेंब” दे मदा बावत।

4 मोपतीके येरोबाम आ मीशम मेकोम देंशो खोदेंशो पवा बावत। मिनु मेको रीब पा शिलो अहीयाह आ खिं लमावत। मेना अहीयाह मिक्च मताइब दुम्शो बाक्मावत। मारेदे हना मेको खूशो दुम्शो बाक्मावत। 5 तन्न परमप्रभु यावेमी अहीयाह कली “येरोबाम आ मीश आ रोइ पशो तौ आ पर्वम इ कली हिल्लो पथ जाक्ब। मिनु गे मेको कली आं देंशो लोव मतो” देंमावत। मिनु मेको अर्को मीश मुर दुम्बु पा जाक्मावत। 6 मिनु अहीयाहमी आ लाप्चोम खोइल थेक्शो नेंशा, मेको कली “ए येरोबाम आ मीश खिंङगा पिवो। गे मारेदे अर्को मीश मुर खोदेंशो दुम्बु पवी? गो इ कली मरिम्शो लोव देंचा माल्नुड। 7 गे येरोबाम कली परमप्रभु यावे, इस्राएली आन परमप्रभुमी ‘गो इ कली मुर आन दाते डा ठेयब मुर सेल्ला। मिनु आं मुर इस्राएली, आन कली सासन पाइब सेल्लन। १राजा ११:३७ 8 गो दाऊद आ खिं डा मुर रे राज्य खोइश्शा, इ कली गेतन। तन्न गे आं गेय पाइब दाऊद खोदेंशो मदुमे। मेकोमी आं डोंइती मार ठीक बाक्मे, मेको पना पन आं देंशो टिप्नु। मिनु आ थुं नेल्लेम आं नोले खोइक्ती। 9 तन्न गे इ क्येडा डोंइती डा मुर नेल्ल आन क्येडा यो शुश मरिम्शो पाप्तीवी। गे इ कली यपाइश्शा देवी देवता आन मूर्ति सेल्शा, आं कली गाइक्पाइक्ती। मिनु गे नोले शोंइसाक्वे। 10 मोपतीके गो येरोबाम आ खिंम श्वेत चाक्शा, मरिम्शो पाइनुड। गो इस्राएलम बाक्शो येरोबाम आ खिं डा वोंइश मुर, वाइल बाक्तेक्म हना यो, अरु मुर बाक्तेक्म हना यो, नेल्ल आन कली साइक्नुडमी। गो मेको आन कली मनुम्मा सम्म येरोबाम आ खिं कली गोबर चोशो खोदेंशो पा चोइनुड। १राजा १५:२९; १राजा २१:२१ 11 सहरम बेक्शो येरोबाम आ खिं डा मुर आन कली कुचुमम ब्वाइनीम। मिनु रू मेर बेक्शो आन कली चिक्बीम ब्वाइनीम’ दे परमप्रभु यावेमी देंशो बाक्ब। १राजा १६:४; १राजा २१:२४ 12 मुल गे लेशशा इ खिं लावो। गे सहरम ओवडे चोटी इ आल बेक्ब। 13 मिनु इस्राएली नेल्लेमी मेको आ पर्वम रोंका पा, मेको कली थिम्नीम। मारेदे हना मेको का ला रिम्शो पा थिम्चा पुंडसीब बावत। परमप्रभु यावे, इस्राएली आन परमप्रभुमी मेको आल कली दाक्ताक्व। 14 मिनु परमप्रभु यावेमी इस्राएलमी पिप का सेल्ब। मेकोमी येरोबाम आ खिं कली क्याम्ब। मेको मुलाक्तीन बाक्ब। १राजा १५:२९

15 परमप्रभु यावेम इस्राएल कली ब्वाक्कुम एर ओंथ पा हिम्शो बुदी मीलु घांस खोदेंशो सेल्ब। मेकोमी इस्राएली आन किकी पिपी आन कली गेशो, एको रिम्शो रागी रे खेरब। मिनु मेको आन कली युफ्रेटीस खोला आ आइक्ची हांबुम एर ओंथ ब्रपाइक्ब। मारेदे हना मेकोपुकीम देवी आ मूर्ति पाइश्शा थाम सेल्शा, परमप्रभु यावे कली गाइक्पाइक्तेक्म। २राजा १७:२३ 16 मिनु मेकोमी येरोबामम मरिम्शो पतीके नु इस्राएली आन कली मरिम्शो पपाइश्शा आ पर्वम इस्राएल कली प्रोंइब” देंमावत। १राजा १२:२८-३०; १राजा १३:३४

17 मिनु येरोबाम आ मीश बोक्शा, आ खिं तिरचा सहर लेम्मावत। मिनु मेको आ खिं डा लाप्चो जाक्मेनु, आल बेक्मावत। 18 मिनु परमप्रभु यावेम आ गेय पाइब, अहीयाह रे पा देंशो खोदेंशो पा इस्राएली नेल्लेमी मेको आ पर्वम रोंका पा थिम्मे बावत।

19 येरोबाम आ पशो अरु गेय, मेको आ पशो लडाइपुकी, मेकोम दोदेशो पा सासन पवा, मेको नेल्ल इस्राएल डा पिप आन इतिहासम ब्रेक्शो बाक्ब। 20 येरोबाममी २२ बर्स सासन पवा बाक्त। मिनु मेको बेक्माक्त। मिनु मेको आ पा डा आ तौ नादाब पिप दुम्माक्त। १ राजा १५:२५

यहूदा डा पिप रेहोबाम  
२इतिहास १२:-

21 मिनु सोलोमन आ तौ रेहोबाम यहूदा डा पिप दुम्माक्त। मेको ४१ बर्स दुम्शो बाक्माक्त। मेकोम यरूसलेम सहरम १७ बर्स सासन पवा बाक्त। परमप्रभु यावेमी इस्राएली आन थर नेल्ल आन दातेम बाक्वा कली मेको सहर योव्रशो बाक्माक्त। रेहोबाम आ ममा आ नें नामा बाक्माक्त। मेको अम्मोनी का बाक्माक्त। १ राजा १२:१७ 22 यहूदा डा मुरपुकीम परमप्रभु यावे आ डोंइती मार मरिश्शो बाक्मे, मेको पामे बाक्त। मेकोपुकीमी आन किकी पिपीम मरिश्शो पशो क्येडा यो शुश मरिश्शो पामे बाक्त। परमप्रभु यावे कली थाम्पा रुश पपदमे बाक्त। 23 मेकोपुकीम इर डांडा डांडा डा थानम, देवी आ मूर्ति पाइश्शो थाम नु लाइश्शो डांडा डा शुश सफा पाइश्शो रवा आन आगाम थान सेल्समा बाक्त। २ राजा १६:१-४ 24 मेको रागी डा थानम तेल्लेम वोंइश मुरपुकी यो बाक्मा बाक्त। मेकोपुकीमी परमप्रभु यावेमी आन डोंइती रे खेरशो रागी रागी डा मुर आन ग्रांरा दिशो नेल्ल पामे बाक्त।

25 मिनु रेहोबामम सासन पवा आ ५ बर्सम इजीप्त डा पिप शीशकमी यरूसलेम कली लडाइ तोवा बाक्त। १ राजा ११:४० 26 मिनु मेकोमी परमप्रभु यावे आ खिं नु पिप आ खिं डा शुश क्येट लाइब मारेड मारेड रोइश्शा लदा बाक्त। मेकोम सोलोमन आ सेल्शो सुन के तेक्तीक नेल्ल योल्दा बाक्त। १ राजा १०:१६ 27 मिनु पिप रेहोबामम मेको आ पा डा कांसा के तेक्तीक सेल्शा, पिप आ खिं डा लाप्चो खाल पाइब आन ठेयब मुर आन कली जिम्मा गेमी बाक्त। 28 मिनु पिप परमप्रभु यावे आ खिंम ओइमेनु, मेको खाल पाइबपुकीम मेको तेक्तीके कुरबाक्मा बाक्त। मिनु नोले लेश्शा चाक्शा खाल पाइब आन कोठाम वोइक्बाक्मा बाक्त।

29 रेहोबाम आ पशो अरु गेय, मेको आ पशो नेल्ले मार, मेको यहूदा डा पिप आन इतिहासम ब्रेक्शो मबाक्बा डा? 30 रेहोबाम नु येरोबाम आस दातेम गेना हना यो लडाइ दुम्स डा दुम्स बाक्माक्त। 31 मिनु रेहोबाम बेक्माक्त। मिनु मेको आ किकी पिपी नु दाऊद आ सहरम थिम्चा पुंइसे बाक्त। मेको आ ममा आ नें नामा बाक्माक्त। मेको अम्मोनी बाक्माक्त। मिनु रेहोबाम आ पा डा आ तौ अबीयाम पिप दुम्माक्त।

यहूदा डा पिप अबीयाम

15 मिनु अबीयाम यहूदा डा पिप दुम्माक्त। मेना नेबात आ तौ येरोबाम पिप दुम्शो १८ बर्स दुम्शो बाक्माक्त। २इतिहास १३:- 2 मेकोमी यरूसलेमम बर्स सां सासन पवा बाक्त। मेको आ ममा आ नें माकाह बाक्माक्त। मेको अबीशालोम आ तमी बाक्माक्त। 3 मेकोमी आ आफ खोदेशो पा मरिश्शो पवा बाक्त। मेको आ किकी दाऊद खोदेशो पा, आ थुं नेल्लेमी परमप्रभु यावे, आ परमप्रभु आ नोले मखोदा बाक्त। 4 मो हना यो परमप्रभु यावे, मेको आ परमप्रभुमी दाऊद आ पर्बम अबीयाम आ पा डा पिप दुम्पाइक्वा कली तौ का गेवा बाक्त। मोपा यरूसलेम बोल्यो सेला बाक्त। १ राजा ११:३६ 5 मारदे हना दाऊदमी परमप्रभु यावे आ डोंइती ठीक पशो बाक्माक्त। मेको परमप्रभु यावे आ देशो रे एर ओंथ मपवा बाक्त। मेकोमी हिंती उरीयाह कली मरिश्शो पशो डा लाक्शा अरु मारेड मरिश्शो मपवा बाक्त। २सामुएल ११:-; २सामुएल १२:९ 6 रेहोबाम नु येरोबाम आस दातेमी लडाइ दुम्स डा दुम्स बाक्माक्त। अबीयाम ब्रॉइम सम्म मोदेशो दुम्माक्त। 7 अबीयाम आ पशो अरु गेय, मेको आ पशो नेल्ले, मार, मेको यहूदा डा पिप आन इतिहासम ब्रेक्शो मबाक्बा डा? अबीयाम नु येरोबाम आस दातेम गेना हना यो लडाइ दुम्स डा दुम्स बाक्माक्त। 8 मिनु अबीयाम बेक्माक्त। मिनु मेको दाऊद आ सहरमी थिम्चा पुंइसे बाक्त। मिनु मेको आ पा डा आ तौ आसा पिप दुम्माक्त।

यहूदा डा पिप आसा

9 आसा यहूदा डा पिप दुम्माक्त। मेना इस्राएल डा पिप येरोबाम पिप दुम्शो २० बर्स दुम्शो बाक्माक्त। 10 मिनु आसामी यरूसलेममी ४१ बर्स सासन पवा बाक्त। मेको आ बगे अबीशालोम आ तमी माकाह बाक्माक्त। 11 आसामी आ किकी दाऊद खोदेशो पा, परमप्रभु यावे आ डोंइती मार ठीक बाक्मे, मेको पवा बाक्त। 12 मेकोमी थानम बाक्ब तेल्लेम वोंइश मुर आन कली रागी रे गुंइदीमी बाक्त। मिनु मेकोमी आ किकी पिपपुकीम सेल्शो मूर्ति नेल्ल ताइक्तीमी बाक्त। २ राजा २३:७; २इतिहास १४:१-४ 13 मिनु आ बगे माकाह कली राज्य डा ममा रे गुंइदा बाक्त। मारदे हना मेकोमी अशोराह देवी आ ग्रांरा दिशो थाम पाइश्शो मूर्ति का सेल्सीशो बाक्माक्त। आसामी मेको मूर्ति पाइश्शो थाम क्योरशा खोल्शा किद्रोन खोल्साम चोपाइक्मी बाक्त। 14 मेकोमी इर डांडा डा थान चहिं मप्रेत्तीके लीमा बाक्त। तन्न आसा ब्रॉइम सम्म आ थुं नेल्लेमी परमप्रभु यावे आ नोले खोदा बाक्त। १ राजा २२:४४ 15 मेकोमी आं नु आ आफोम चदेशो सुन, चांदी नु अरु मार मार परमप्रभु यावे आ खिंम चाक्पाइक्मी बाक्त।

16 मेको पिप आसा नु इस्राएल डा पिप बाशा आस दातेम गेना हना यो लडाइ दुम्स डा दुम्स बाक्माक्त। २इतिहास १६:१-६ 17 इस्राएल डा पिप बाशामी यहूदा कली लडाइ तोवा बाक्त। मिनु सुइ आन कली यहूदा डा पिप आसा आ रागी लचा मगेथु, रामाह सहरम गारो प्रोव्रशा तेक्मा बाक्त। 18 मोपतीके आसामी परमप्रभु यावे आ खिं नु दरवार डा लीशो सुन नु चांदी नेल्ल लाइश्शा, आ गेय पाइब आन कली गेमी बाक्त। पिप आसामी मेको नेल्ल आ गेय पाइब आन कली गेशा, पिप ताब्रीमोन आ तौ, अराम डा हेज्योन आ चच, पिप बेन-हादाद आ बाक्तीक सोइक्तीमी बाक्त। मेको दमस्कस सहरम बाक्शो बाक्माक्त। २ राजा १२:१९ 19 मिनु पिप आसामी पिप बेन-हादाद कली "इस आफ गारशो खोदेशो पा, गो यो गारस। गो एको सुन नु चांदी कोसेली सोइक्ताक्ड। मुल इस्राएल डा पिप बाशा नु पशो कबल प्रोनीन। मिनु मेकोमी आं रागी प्रोनल" दे सल्ला पचा कली मुर सोइक्ता बाक्त। 20 मिनु बेन-हादादमी पिप आसा आ देशो बिस्से बाक्त। मिनु मेकोमी आ लडाइ पाइब आन ठेयब मुर आन कली इस्राएल डा सहर नु लडाइ पथ सोइक्ता बाक्त। मिनु मेकोपुकीम इयोन, दान, आबेल-बेथ-माकाह किन्नेरोथ नेल्ल नु नाप्टाली आ रागी नेल्ल ग्रामा बाक्त। २ राजा १५:२९ 21 मिनु बाशामी मेको लोव्र नेंशा, रामाह सहर कली बोल्यो सेल्चा प्रोना बाक्त। मिनु तिरचा लेश्शा लमाक्त। 22 मिनु पिप आसामी यहूदा डा मुर नेल्ल आन कली "बाशामी रामाह कली बोल्यो सेल्चा कली तेल्लो शी फुल्लु चाक्कीन" दे अरेमी बाक्त। मिनु पिप आसामी मेको शी फुल्लुमी बेन्यामीन डा गेवा नु मिस्या सहर सेला बाक्त। 23 आसा आ पशो अरु गेय, मेको आ सक्ति, मेको आ पतीके, मेको आ सेल्शो सहर, मार, मेको यहूदा डा पिप आन इतिहासम ब्रेक्शो मबाक्बा डा? मिनु मेको खूशो दुम्मेनु, आ खोइल रोइ पवा बाक्त। २इतिहास १६:११-१४ 24 मिनु आसा बेक्माक्त। मिनु मेको आ किकी पिपी नु दाऊद आ सहरम थिम्चा पुंइसे बाक्त। मिनु मेको आ पा डा तौ येहो-शाफात पिप दुम्माक्त। १ राजा २२:४१

इस्राएल डा पिप नादाब

25 येरोबाम आ तौ नादाब इस्राएल डा पिप दुम्माक्त। मेना आसा यहूदा डा पिप दुम्शो बर्स निक्शी दुम्शो बाक्माक्त। मिनु पिप नादाबमी इस्राएलम बर्स निक्शी सासन पवा बाक्त। 26 मेकोम परमप्रभु यावे आ डोंइती मार मरिश्शो बाक्मे, मेको पवा बाक्त। मेको आ आफोम खोदेशो पा पाप पा मेको आ लांम गाक्माक्त। मिनु आ आफोमी इस्राएली आन कली पपाइश्शो पाप यो पवा बाक्त। १ राजा १२:२८-३०

27 मिनु इस्साकार आ खिं डा मुर अहीयाह आ तौ बाशाम मेको कली मरिश्शो पचा गोवा बाक्त। मिनु बाशामी मेको कली गिब्बेथोन सहरम तुष्शा सदा बाक्त। मेको गिब्बेथोन सहर नादाब नु इस्राएली नेल्लेम पुष्शा वोइश्शो, पलिस्ती आन सहर बाक्माक्त। यहोसु १९:४४ 28 मिनु यहूदा डा पिप आसा पिप दुम्शो बर्स सां दुम्मेनु, बाशामी नादाब कली सदा बाक्त। मिनु मेको आ

पा डा पिप दुम्माक्त।<sup>29</sup> मिनु मेको पिप दुम चोटीन येरोबाम आ खिं डा मुर नेल्ल आन कली साइक्मी बाक्त। मेकोम येरोबाम आ खिं डा सेस बाक्शो नेल्ल आन कली साइक्मी बाक्त। मोपा परमप्रभु यावेमी आ गेय पाइब शिलो डा अहीयाह रे पा देशो लोत्र नेल्ल खबा बाक्त। १राजा १४:१०-११ 30 येरोबाम आ पशो पाप, मेकोमी इस्राएली आन कली पपाइश्शो पापम पतीके नु मेकोमी परमप्रभु यावे, इस्राएली आन परमप्रभु कली गाइक्पाइक्तीके मो दुम्शो बाक्माक्त।<sup>31</sup> नादाबमी पशो अरु गेय, मेको आ पशो नेल्ल, मार, मेको इस्राएल डा पिप आन इतिहासम ब्रेक्शो मबाक्बा डा? 32 पिप आसा नु इस्राएल डा पिप बाशा आस दातेमी गेना हना यो लडाइ दुम्स डा दुम्स बाक्माक्त।

### इस्राएल डा पिप बाशा

33 मिनु अहीयाह आ तौ बाशामी इस्राएलम सासन पवा बाक्त। मेना आसा यहूदा डा पिप दुम्शो बर्स सां दुम्शो बाक्माक्त। मिनु बाशा तिरचा सहरम बाक्शा २४ बर्स इस्राएल कली सासन पवा बाक्त।<sup>34</sup> मिनु मेको येरोबाम आ लांम गाक्शा, मेकोमी इस्राएली आन कली पपाइश्शो पाप पशा, परमप्रभु यावे आ डोंइती मार मरिश्शो बाक्मे, मेको नेल्ल पवा बाक्त।

16 मेको नोले परमप्रभु यावेम बाशा आ पर्वम हानानी आ तौ यहू कली लोत्र पवा बाक्त।<sup>2</sup> मार लोत्र पवा बाक्त देशा हना "गो इ कली फुरक रे पोक्शा आं मुर इस्राएली आन ठेयब मुर सेल्लन। तन्न गे येरोबाम आ लांम गाक्शा, आं मुर इस्राएली आन कली पाप पपाइक्तीवी। मिनु मेको आन पापम पतीके आं कली गाइक्पाइक्तीमी। १राजा १४:७ 3 मोपतीके गो बाशा नु आ खिं कली खतम पोक्चा चिक्शो बाक्नुड। मिनु गो इ खिं कली नेबात आ तौ येरोबाम आ खिं खोदेशो सेल्लुड। १राजा १५:२९ 4 बाशा, इ खिं डा सहरम बेक्शो मुर आन कली कुचुमम ब्वाइनीम। मिनु रूम बेक्शो मुर आन कली चिक्बपुकीम ब्वाइनीम" दैमाक्त। १राजा १४:११

5 बाशा आ पशो नु अरु गेय, मेको आ सक्ति, मार, मेको इस्राएल डा पिप आन इतिहासम ब्रेक्शो मबाक्बा डा? 6 मिनु बाशा बेक्माक्त। मिनु तिरचा सहरम आ किकी पिपी आ नेक्था थिम्चा पुंइसे बाक्त। मिनु मेको आ पा डा आ तौ एलाह पिप दुम्माक्त।<sup>7</sup> डोंइती परमप्रभु यावेमी हानानी आ तौ, आ लोत्र पाइब यहू कली बाशा नु आ खिं डा मुर आन पर्वम लोत्र पशो बाक्माक्त। मेकोमी परमप्रभु यावे आ डोंइती मरिश्शो पा गाइक्पाइक्तीके, येरोबाम आ खिं डा मुर खोदेशो दुम्तीके नु येरोबाम नु आ खिं डा मुर आन कली खतम पोक्तीके हानानी आ तौ, आ लोत्र पाइब यहू कली मोदेशो लोत्र पशो बाक्माक्त।

### इस्राएल डा पिप एलाह

8 बाशा आ तौ एलाह इस्राएल डा पिप दुम्माक्त। मेना आसा यहूदा डा पिप दुम्शो २६ बर्स दुम्शो बाक्माक्त। मिनु एलाहम तिरचा सहरम बाक्शा, बर्स निक्शी इस्राएल कली सासन पवा बाक्त।<sup>9</sup> मिनु मेको आ लडाइ पाइब बग्गी चलेब, आन भाग निक्शीमी भाग का डा ठेयब मुर जिम्मीमी मेको कली मरिश्शो पचा गोवा बाक्त। मेना पिप एलाह तिरचा सहरम आ खिं डा मारेइ मारेइ कोत्रब अरचा आ खिं तिरचा सहरम बाक्शा, तूशा दुक्शो बाक्माक्त।<sup>10</sup> मिनु जिम्मी आगा ओव्रशा, मेको कली तुष्ठा सदा बाक्त। मिनु मेको आ पा डा पिप दुम्माक्त। मेना आसा यहूदामी पिप दुम्शो २७ बर्स दुम्शो बाक्माक्त। २राजा ९:३१

11 मिनु जिम्मी पिप दुम चोटीन बाशा आ खिं डा मुर नेल्ल आन कली साइक्मी बाक्त। मेकोम बाशा आ खिं डा मुर, मेको आ वारचपुकी नु आ नाता गोवता वोंइश मुर नेल्ल आन कली का यो मप्रोंइथु साइक्मी बाक्त।<sup>12</sup> परमप्रभु यावेमी बाशा आ पर्वम आ लोत्र पाइब यहू रे देशो खोदेशो पा, जिम्मीमी बाशा आ मुर नेल्ल आन कली साइक्मी बाक्त।<sup>13</sup> बाशा नु मेको आ तौ एलाहमी पशो पाप नु इस्राएली आन कली पपाइश्शो पाप आ पतीके, आन शोर गाक्शो मूर्ति सेल्लतीके नु परमप्रभु यावे, इस्राएली आन परमप्रभु

कली गाइक्पाइक्तीके मोदेशो दुम्शो बाक्माक्त।<sup>14</sup> एलाह आ पशो नु अरु गेय नेल्ले, मार, इस्राएल डा पिप आन इतिहासम ब्रेक्शो मबाक्बा डा?

### इस्राएल डा पिप जिम्मी

15 मिनु जिम्मीम तिरचा सहरम ७ नाक्त सासन पवा बाक्त। मेना आसा यहूदा डा पिप दुम्शो २७ बर्स दुम्शो बाक्माक्त। लडाइ पाइबपुकी चहिं पलिस्ती आन सहर गिब्बेथोन आ नेक्था बाक्तीक सेल्शा बाक्शो बाक्मा बाक्त। १राजा १५:२७ 16 मिनु बाक्तीक सेल्शा बाक्ब इस्राएलीपुकीमी जिम्मी आ पशो नु पिप कली साइश्शो लोत्र नैशा, मेको नाक्तीन मेकोपुकीमी आन बाक्तीक उइ लडाइ पाइब आन ठेयब मुर ओम्मी कली इस्राएल डा पिप सेल्मे बाक्त।<sup>17</sup> मिनु ओम्मी नु इस्राएल डा लडाइ पाइब नेल्लेम गिब्बेथोन प्रोंइशा तिरचा कली पुम्दमे बाक्त।<sup>18</sup> मिनु जिम्मीमी सहर ग्राशो तवा चोटी पिप आ खिं ओव्रशा मी सुइश्शा, आंमा यो दुष्ठा बेक्माक्त। २सामुएल १७:२३ 19 मेकोम परमप्रभु यावे आ डोंइती मार मरिश्शो बाक्मे, मेको पशा, येरोबाम आ लांम गाक्शो बाक्माक्त। मिनु येरोबाम आ पशो पाप नु इस्राएली आन कली पपाइश्शो पाप पतीकेम मेको मोदेशो दुम्शो बाक्माक्त।<sup>20</sup> जिम्मी आ पशो नु अरु गेय, एलाह कली मरिश्शो पशो, मार, मेको इस्राएल डा पिप आन इतिहासम ब्रेक्शो मबाक्बा डा?

### इस्राएल डा पिप ओम्मी

21 मेको नोले इस्राएल डा मुरपुकी हुल निक्शी दुम्मा बाक्त। हुल काम गिनाथ आ तौ तिब्नी कली पिप सेल्चा कली वारच पदमे बाक्त। मिनु हुल का चहिं ओम्मी आ नोले खोदमे बाक्त।<sup>22</sup> तन्न ओम्मी आ नोले खोइक्बपुकी गिनाथ आ तौ तिब्नी आ नोले खोइक्ब आन क्येडा बोल्यो बाक्मा बाक्त। मोपतीके तिब्नी कली साइश्शा, ओम्मी पिप दुम्माक्त।<sup>23</sup> मोपा ओम्मी इस्राएल डा पिप दुम्माक्त। मेना आसा यहूदाम पिप दुम्शो ३१ बर्स दुम्शो बाक्माक्त। ओम्मीमी नेल्ल पा १२ बर्स सासन पवा बाक्त। मेकोम ६ बर्स तिरचा सहरम बाक्शा, सासन पवा बाक्त।

24 मेकोम टलेन्ट निक्शी चांदीम शेमेर आ गुइ रे सामरीया डा डांडा ग्याष्ठा, मेकेर गारो हिरशो सहर का सेला बाक्त। मिनु मेको सहर डा होव्रप शेमेर आ नें रे पा मेको आ नें सामरीया वोदा बाक्त। टलेन्ट का ३४ किलो बाक्ब।

25 तन्न ओम्मीमी परमप्रभु यावे आ डोंइती मार मरिश्शो बाक्मे, मेको पवा बाक्त। मेकोम आ डोंइती डा पिप नेल्ल आन क्येडा शुश मरिश्शो पवा बाक्त। मीका ६:१६ 26 मेको नेबात आ तौ येरोबाम आ पाप डा लांम गाक्माक्त। मेकोमी मेको पाप इस्राएली आन कली पपाइश्शो बाक्माक्त। मिनु मेकोपुकीम मेको पाप पा आन ग्रांरा दिशो मूर्ति आन पर्वम परमप्रभु यावे, इस्राएली आन परमप्रभु कली गाइक्पाइश्शो बाक्मा बाक्त।<sup>27</sup> ओम्मी आ पशो नु अरु गेय, मेको आ सक्ति कोंइतीके नेल्ल, मार, मेको इस्राएल डा पिप आन इतिहासम ब्रेक्शो मबाक्बा डा? 28 मिनु ओम्मी बेक्माक्त। मिनु सामरीया सहरम थिम्चा पुंइसे बाक्त। मिनु मेको आ पा डा आ तौ आहाब पिप दुम्माक्त।

### आहाब इस्राएल डा पिप दुम्शो

29 ओम्मी आ तौ आहाब इस्राएल डा पिप दुम्माक्त। मेना आसा यहूदा डा पिप दुम्शो ३८ बर्स दुम्शो बाक्माक्त। ओम्मी आ तौ आहाब सामरीया सहरम बाक्शा, इस्राएल कली २२ बर्स सासन पवा बाक्त।<sup>30</sup> मिनु ओम्मी आ तौ आहाबमी परमप्रभु यावे आ डोंइती पिप नेल्ल आन क्येडा मरिश्शो पवा बाक्त।<sup>31</sup> नेबात आ तौ येरोबाम आ पाप डा लांम गाक्चा, मेको कली मारेइ खोदेशो म्दुम्माक्त। मेकोम सीदोन डा पिप एथ-बाल आ तमी इजेबेल कली ग्युबे पवा बाक्त। मिनु बाल देवता कली पूजा पा ठेयब सेला बाक्त।<sup>32</sup> मेकोम सामरीयाम बाल आ खिम बाल कली चढेतीक का सेला बाक्त। २राजा ३:२; २राजा १०:२७-२८; २राजा ११:१८ 33 आहाबम अशेराह देवी आ मूर्ति पाइश्शो थाम का यो सेल्पदा बाक्त। मिनु मेकोम आ क्येडा डोंइती डा इस्राएल डा पिप आन क्येडा परमप्रभु यावे, इस्राएली आन परमप्रभु

कली शुश गाइक्पाइक्तीक गेय पवा बाक्त।<sup>34</sup> आहाबम सासन पवा ना बेथेल डा हीएलमी यरीको सहर लेंशा सेला बाक्त। मेको आ जग वोदमेनु, मेको आ डोंइती जरमेशो तौ अबीराम बेक्माक्त। मिनु मेको आ ठेयब लाप्चो वोदमेनु, मेको आ कान्छा तौ सेगुब बेक्माक्त। मोपा परमप्रभु यावेमी नून आ तौ यहोसु रे पा देंशो लोत्र खबा बाक्त। यहोसु ६:२६

खदपुकीम एलीया कली थुल्शो

17 मिनु गिलाद डा तिश्बे सहर डा एलीयाम आहाब कली “परमप्रभु यावे, इस्राएली आन परमप्रभु ब्रोंइशा बाक्शो खोदेंशो पा, गो मेको आ डोंइती राप्शा गेय पाइनुड। इस्राएलम रेउ नु सीत मारेड मयीब” देंमाक्त। १राजा ८:३५; लूका ४:२५; याकूब ५:१७; प्रकाश ११:६<sup>2</sup> मिनु परमप्रभु यावेमी एलीया कली लोत्र पवा बाक्त।<sup>3</sup> मार लोत्र पवा बाक्त देंशा हना “एको रागी प्रोंइशा, पूर्ब गे लावो। मिनु यर्दन आ पूर्ब गे बाक्शो केरीथ खोलाम लशा खुइश्शा बाक्को।<sup>4</sup> गे मेको खोला डा ब्वाक्कु तूडो। मिनु गो इ कली थुल्चा कली मेकेर डा खद आन कली अरेता” देंमाक्त।<sup>5</sup> मिनु मेकोमी परमप्रभु यावे आ देंशो खोदेंशो पवा बाक्त। मिनु मेको यर्दन आ पूर्बम बाक्शो केरीथ खोला लशा, खुइश्शा बाक्माक्त।<sup>6</sup> मिनु खदपुकीम मेको कली नाक्दो सुनी शोब्ले नु श्ये चाक्शा, गेमे बाक्त। मिनु एलीया मेको खोला डा ब्वाक्कु तूशा बाक्माक्त।<sup>7</sup> इच्का नाक्त नोले रेउ मयितीके मेको खोला डा ब्वाक्कु सोत्रमाक्त।

चारेफाथ डा मीश मुर

8 मिनु परमप्रभु यावेमी मेको कली लोत्र पवा बाक्त।<sup>9</sup> मार लोत्र पवा बाक्त देंशा हना “मुल गे सीदोन डा चारेफाथ सहर लावो। गो मेकेर इ कली थुल्चा कली आ वोंइश बेक्शो मीश मुर का कली अरेता” देंमाक्त। लूका ४:२५-२६<sup>10</sup> मोपतीके मेको चारेफाथ सहरम लमाक्त। मिनु मेको चारेफाथ सहर डा ठेयब लाप्चोम जाक्दीम्मेनु, आ वोंइश बेक्शो मीश मुर का शी खुम्ना खुम्न बाक्शो तवा बाक्त। मिनु मेको कली ब्रेश्शा “आं कली शिशी पा लोटा का ब्वाक्कु तूचा गेयी। मिनु गो तूनुड” देंमाक्त।<sup>11</sup> मिनु मेको मीश मुर ब्वाक्कु ब्रथ लन लना, लेंशा ब्रेश्शा “आं कली शिशी पा टुका का शोब्ले यो पिश्शा गेयी” देंमाक्त।<sup>12</sup> तन्न मेकोमी “परमप्रभु यावे, इन परमप्रभु ब्रोंइशा बाक्शो खोदेंशो पा बोसुम मुठी का फस नु ढुङ्ग्रोम इच्का खोइ तेल डा लाक्शा, आं खिंम मारेड मबाक्ब। गो इच्का खोइ शी खुप्शा, खिं लशा, गो नु आ तौ आंस कली शोब्ले सेल्नुड। मिनु गो मेको जशा, बेक्नस्कु” देंमाक्त।<sup>13</sup> मिनु एलीयाम मेको कली “महिनो, खिं लशा इ देंशो खोदेंशो पावो। तन्न मेको क्येडा डोंइती बटुक का सेल्शा, एक आं बाक्तीक चाक्को। मिनु मेको नोले इस कली जचा थोत्रक सेलो।<sup>14</sup> मारदे हना परमप्रभु यावे, इस्राएली आन परमप्रभुमी ‘गो रागीम रेउ मयिपदु सम्म फस मनुप्ब। मिनु ढुङ्ग्रो डा तेल यो मनुप्ब’ देंशो बाक्ब” देंमाक्त। २राजा ४:२-४<sup>15</sup> मिनु मेको मीश मुर लशा एलीयाम देंशो खोदेंशो पवा बाक्त। मिनु मेको नेल्ल आन कली शुश नाक्त सम्म जचा थोत्रक गाम्माक्त।<sup>16</sup> मारदे हना एलीया रे पा परमप्रभु यावेम देंशो खोदेंशो पा बोस डा फस मनुम्माक्त। मिनु ढुङ्ग्रो डा तेल यो मनुम्माक्त।

17 इच्का नाक्त नोले मेको मीश मुर, मेको खिं डा होत्रपोक्म आ तौ रोइ पवा बाक्त। मिनु मेको नाक्त किंत किंत मरिश्शो दुम्ना दुम्न लमाक्त। मिनु नोले बेक्माक्त।<sup>18</sup> मिनु मेको मीश मुरुम एलीया कली “परमप्रभु आ मुर, गे नु गो इस दातेम मार मरिश्शो दुम्शो बाक्बा? मार, गे आं पाप कोंइशा, आं तौ कली साइक्थ जाक्नी?” देंमाक्त।<sup>19</sup> मिनु एलीयाम “इ तौ आं कली गेयी” देंमाक्त। मिनु मेकोमी मेको आ तौ आ गुइ रे ताक्शा आ बाक्तीक तला तार लदा बाक्त। मिनु मेको कली आ ब्राख्मेम वोदा बाक्त।<sup>20</sup> मेको नोले मेकोमी ठेयब सेंदा पा परमप्रभु यावे कली “परमप्रभु यावे, आं परमप्रभु, गो सुका आ खिंम बाक्डा, मेको आ तौ बेक्पा मेको वोंइश बेक्शो मीश मुर कली मारदे श्येत गेनी” देंमाक्त।<sup>21</sup> मिनु मेको सां खेयप मेको बेक्शो आल तार गोल्माक्त। मिनु ठेयब सेंदा पा, परमप्रभु यावे कली “परमप्रभु यावे, आं परमप्रभु, एको आल कली लेंशा ब्रोंइपतीन” देंमाक्त। २राजा ४:३४; प्रेरित

२०:१०<sup>22</sup> मिनु परमप्रभु यावेमी एलीया आ पुंइशो लोत्र नेना बाक्त। मिनु मेको आल ब्रोंइमाक्त।<sup>23</sup> मिनु एलीयाम मेको कली पोक्शा तला तार रे आगा यिदा बाक्त। मिनु मेको आ ममा कली गेशा “कोत्रडो, इ तौ ब्रोंइत” दे मदा बाक्त। लूका ७:१५; हिब्रू ११:३५<sup>24</sup> मिनु मेको मीश मुरुमी एलीया कली “गे परमप्रभु आ मुर बाक्नीनी, दे मुल गो थमा पा तुइक्ताक्ड। मिनु इन देंशो परमप्रभु यावे आ लोत्र थमा बाक्त” देंमाक्त।

एलीया नु ओबदिया गुम्शो

18 मिनु परमप्रभु यावेम रागी सोत्रशो शुश नाक्त नोले बर्स सांमी एलीया कली लोत्र पवा बाक्त। मार लोत्र पवा बाक्त देंशा हना “गे लशा, आहाब कली गुमो। मिनु गो रागीम रेउ यिपाइक्नुड” देंमाक्त।<sup>2</sup> मोपतीके एलीया आहाब कली गुम्थ लमाक्त। मेना सामरीया सहरम ठेयब अन्काल दुम्शो बाक्माक्त।<sup>3</sup> मिनु आहाबमी आ खिं कोत्रब ओबदिया कली ब्रेथ सोइक्ता बाक्त। मेको ओबदिया परमप्रभु यावे कली शुश मान पा हिंशा, थमा सुइक्ब मुर का बाक्माक्त।<sup>4</sup> इजेबेलम परमप्रभु यावे आ लोत्र पाइब आन कली साइक्ना साइक्न बाक्मेनु, ओबदियामी मेको आन दाते डा सहे का जना आन कली लाइश्शा, मेको आन कली प्रोंइचा कली जचा तूचा थोत्रक गेशा ५०, ५० जना डा हुल पा पुक्खी निक्शीम खुइश्शा वोइश्शो बाक्माक्त।<sup>5</sup> मिनु आहाबम ओबदिया कली “रागी डा ब्वाक्कु बुक्तीके, खोल्ला मेर लावो। गो शारा नु खच्चर आन कली प्रोंइचा कली घांस थिन्सका कों? मोपा इं बस्तु भाव आन कली साइक्चा ममाल्न्या कों?” देंमाक्त।<sup>6</sup> मिनु मेको निक्शीमी कोत्रचा कली रागी योक्ससा बाक्त। मिनु आहाब का गे नु ओबदिया अर्को गे लसा बाक्त।

<sup>7</sup> मिनु ओबदिया लॉम गाक्ना गाक्न बाक्मेनु, एलीयाम मेको कली गुमा बाक्त। मिनु ओबदियामी मेको कली तुइश्शा खप सम्मन बाप्शा सेउ पा “आं प्रभु, गे थमा पा एलीयान ननी?” देंमाक्त।<sup>8</sup> मिनु एलीयाम “ओं, गो नड। गे लशा इ होत्रप कली ‘एलीया एक बाक्त’ मतो” देंमाक्त।<sup>9</sup> मिनु ओबदियामी “गो मार मरिश्शो पडा डा? गे इन गेय पाइब, आं कली साइक्पाइक्चा कली आहाब आ गुइम गेनीनी? <sup>10</sup> परमप्रभु यावे, इन परमप्रभु गेना हना यो ब्रोंइशा बाक्शो खोदेंशो पा, आं होत्रपम इन कली रागी रागी नु राज्य नेल्लेम माल्थ सोइक्ताक्व। तेकोइ रागी नु राज्य मलीशो बाक्ब। मिनु मेकोपुकीमी ‘एलीया एक मबाक्ब। गो थमा पा मेको कली थिन्ने मचाप्का’ देंमानु, मेको कसम जचा माल्लेक्म।<sup>11</sup> तन्न मुल गे आं कली लावो, इ होत्रप कली ‘एलीया एक बाक्त, देंनो’ देंतीनी।<sup>12</sup> गो इन कली प्रोनु चोटी परमप्रभु यावे आ सोक्तीम इन कली लाइक्ब। मिनु गो लशा आहाब कली मो देंडानु, मेकोमी इन कली मथित्तु हना, आं कली साइक्ब। मो हना यो, गो, इन गेय पाइब, आं आल रेन परमप्रभु यावे कली मान पा हिंशा, थमा सुइक्ब बाक्नुड।<sup>13</sup> आं प्रभु, इजेबेलम परमप्रभु यावे आ लोत्र पाइब आन कली साइक्ना साइक्न बाक्मेनु, गो मार पडा, मेको गे मनेनी डा? गो मेको आन दाते डा सहे का जना आन कली ५०, ५० जना पा पुक्खीम खुइश्शा वोइक्तामी। मिनु मेको आन कली जचा तूचा गेतामी।<sup>14</sup> मिनु मुल गे आं कली लावो, इ होत्रप कली ‘एलीया एक बाक्त’ देंनो, देंतीनी। मेकोमी आं कली थमा पा साइक्ब” देंमाक्त।<sup>15</sup> मिनु एलीयामी “गो मेको आ डोंइती बाक्शो मुर नेल्ल आन परमप्रभु यावे ब्रोंइशा बाक्शो खोदेंशो पा, मुलाक्ती थमा पा आहाब कली गुम्नुड” देंमाक्त।<sup>16</sup> मिनु ओबदिया आहाब कली गुम्थ लमाक्त। मिनु मेको कली मेको लोत्र शेंदा बाक्त। मिनु आहाब एलीया कली गुम्थ जाक्माक्त।

एलीया कारमेल डांडाम बाक्शो

17 मिनु आहाबमी एलीया कली तशा, मेको कली “इस्राएल कली श्येत गेब गेन नवे?” दे मदा बाक्त। येरमीया ३८:४<sup>18</sup> मिनु एलीयाम “इस्राएल कली श्येत गेब गो मनड। तन्न गे नु इन आफ आ खिं डा मुर इस्राएल कली श्येत गेब ननी। मारदे हना गे परमप्रभु यावे आ शेंतीक प्रोंइशा, बाल देवता आ नोले खोइश्शो बाक्तीनी। १राजा १६:३१-३३<sup>19</sup> मोपतीके मुल कारमेल डांडाम इस्राएल डा मुर नेल्ल आं कली गुम्पाइक्चा कली ब्रेत्तीन। मिनु



इजेबेलम थुल्शा वोइश्शो बाल देवता आ नोले दुम्ब लोत्र पाइब ४ सहे ५० जना मुर नु अशेराह देवी आ नोले दुम्ब लोत्र पाइब ४ सहे जना मुर नेल्ल आन कली यो ब्रेत्तीन" दैमाक्त।

20 मोपतीके आहाबमी इस्राएली नेल्ल आन कली लोत्र सोइक्तीमी बाक्त। मिनु बाल नु अशेराह देवी आस नोले दुम्ब लोत्र पाइब नेल्ल आन कली कारमेल डांडाम पुक्मी बाक्त। 21 मिनु एलीया मुर नेल्ल आन डोंइती राष्ठा "गे गेना सम्म थुं निक्शी पा बाक्नीनी? परमप्रभु यावे, थमा परमप्रभु बाक्ब देंनीनी हना, मेको आ नोले खोतीन। बालन परमप्रभु बाक्ब देंनीनी हना, मेको आ नोले खोतीन" दैमाक्त। तन्न मुरपुकीम लोत्र का यो मलेत्थु, सिक्सी पा बाक्मा बाक्त। *यहोसु २४:१४; मत्ती ६:२४* 22 मिनु एलीयाम मेको आन कली "परमप्रभु यावे आ लोत्र पाइब गो आं का ला लीती। तन्न बाल आ नोले दुम्ब लोत्र पाइब ४ सहे ५० जना बाक्नीम। 23 मुल आंइ कली ब्यफ निक्शी चाक्शा गेने। मिनु मेकोपुकीम का योवसीशा मेको कली क्योरशा चेक्शा, शी तार वोइश्शा, मी मसुइक्थु वोइक्चा माल्नीम। गो यो मेको अकों कली क्योरशा मो पान शी तार वोइश्शा मी मसुइक्थु वोइक्नुड। 24 मिनु गे इन देवता आ नें थिशा, मेको कली पुनीन। गो परमप्रभु यावे आ नें थिशा, मेको कली पुंडुनुड। मिनु पुंडुशो नेंशा, मी सोइक्ब, परमप्रभु बाक्ब" दैमाक्त। मिनु मुर नेल्लेमी "दुम्ब इन देंशो लोत्र ठीक बाक्ब" दैमा बाक्त। *उत्पत्ती १५:१७* 25 मिनु एलीयाम बाल आ लोत्र पाइब नेल्ल आन कली "गे डोंइती ब्यफ का योवशा, मेको कली क्योररीन। मारदे हना गे शुश बाक्नीनी। मिनु इन देवता आ नें थिशा पुनीन। तन्न मी मसुइक्तीन" दे माइक्मी बाक्त। 26 मोपतीके मेको आन योवशा ब्यफ लांडसीशा, क्योरशा चढ़ेशा, बाल आ नें थिशा सुनी रे नाक्त सम्म "ए बाल! आंइ कली लोत्र लेत्तीकी" दे ग्रीमा बाक्त। तन्न मेकेर मारेइ मदुम्माक्त। मारेइ सेंदा यो मनैसे बाक्त। मिनु मेकोपुकी मेको आन सेल्शो चढ़ेतीक आ एर ओंथ प्रेक्ना प्रेक्न सिल पामे बाक्त। 27 मिनु नाक्त उइक्थ दुम्मेनु, एलीयाम मेको आन कली "मुल यो ठेयब सेंदा पा ग्रीडीन। मेको थमा पा देवता बाक्ब। मेको मिम्ना मिम्न बाक्म माइ, ना हिरथ गाक्म कों? ना डोन लम कों? ना इष्ठा बाक्म कों? मेको कली पोक्चा माल्ब" दे शुक्शी पा लोत्र पवा बाक्त। 28 मोपतीके मेको चिनु ठेयब सेंदा पा ग्रीमा बाक्त। मिनु मेकोपुकीम आन रिती थिती पा आंम आन रां तरवार नु भालाम चेस्सीशा, हुश चुंडिसमा बाक्त। 29 मोपा नाक्त रे नाक्दो चढ़ेची ना सम्म ग्रीना ग्रीन बाक्मा बाक्त। तन्न मेकेर मारेइ मदुम्माक्त। मारेइ सेंदा यो मनैसे बाक्त। मी यो मयिमाक्त।

30 मिनु एलीयाम मुर नेल्ल आन कली "आं नेक्था जाक्कीन" दैमाक्त। मिनु मेको नेल्ल मेको आ नेक्था जाक्मा बाक्त। मिनु मेकोम डोंइती ब्रेशो परमप्रभु यावे कली चढ़ेतीके लेंशा सेला बाक्त। 31 मिनु एलीयाम १२ ओटा फुल्लु चाक्मी बाक्त। मेको याक्ब आ १२ जना तौ आन थर का का पा १२ ओटा फुल्लु गुबा बाक्त। डोंइती परमप्रभु यावेमी याक्ब कली "इ नें इस्राएल दुम्ब" देंशो बाक्माक्त। *प्रस्थान २४:४; उत्पत्ती ३२:२९* 32 मिनु मेकोमी मेको फुल्लु रे परमप्रभु यावे आ नेंम चढ़ेतीक का सेला बाक्त। मिनु मेको चढ़ेतीक कली एर ओंथ हिरशा, कुला दोवा बाक्त। मेकेर सेआह अन्न पुक्तीक बोस निक्शी रिक्ब बाक्माक्त। *सेआह का ७.३ लिटर बाक्ब।* 33 मिनु नोले शी गार पाइश्शा, मेको ब्यफ क्योरशा चेक्शा, मेको शी तार वोदा बाक्त। मिनु मेकोमी मुर आन कली "गे ४ गाग्री ब्वाक्कु चाक्शा, एको चोशा चढ़ेतीक नु शी तार लुक्तीन" दे माइक्मी बाक्त। मिनु मेकोपुकीम मो पामे बाक्त। 34 मिनु नोले मेकोमी "मेको लेंशा पने" दैमाक्त। मिनु मेकोपुकीम मो पामे बाक्त। मिनु मेकोम लेंशा "चीनु खेयप सां मो पने" दैमाक्त। मिनु मेकोपुकीम खेयप सां यो मो पामे बाक्त। 35 मिनु चढ़ेतीक आ एर ओंथ डा कुला नेल्ल ब्वाक्कु ब्रीशा क्युम्माक्त।

36 मिनु नाक्त किंत किंत डा नाक्दो डा चढ़ेची ना परमप्रभु यावे आ लोत्र पाइब एलीयामी मेको आ चढ़ेतीक आ डोंइती लशा "परमप्रभु यावे, अब्राहाम, इसहाक नु इस्राएल आ परमप्रभु, गे का ला इस्राएल रागीम परमप्रभु बाक्नीनी, दे मुलाक्ती एको आन कली तुइक्पतीन। मिनु गो इन गेय पाइब बाक्नुड। मिनु गो एको नेल्ल इन देंतीके पशो बाक्नुड, दे यो एको आन कली तुइक्पतीन। 37 आं लोत्र लेत्तीनी। परमप्रभु यावे, आं लोत्र लेत्तीनी। मिनु एको मुरपुकीम गेन परमप्रभु यावे, थमा परमप्रभु बाक्नीनी, दे

तुइक्तमेक्ल। एको आन थुं लेप्पाइक्ब गेन बाक्नीनी" दैमाक्त। 38 मिनु इर रे परमप्रभु यावे आ मी थिशा चोशा चढ़ेतीके, चोशा चढ़ेतीक डा शी, फुल्लु नु खप नेल्ल नेक्मा बाक्त। मिनु मेको कुला डा ब्वाक्कु यो सोव्रमाक्त। *लेवी ९:२४* 39 मिनु मुर नेल्ल मेको तशा, खुम्की पा बाष्ठा "परमप्रभु यावे, थमा पा परमप्रभु बाक्माक्त। परमप्रभु यावे, थमा पा परमप्रभु बाक्माक्त" दैमा बाक्त। 40 मिनु एलीयामी मेको आन कली "बाल आ लोत्र पाइब आन कली ग्याइक्तीन। का यो प्रोक्चा मतामेक्ल" दे माइक्मी बाक्त। मिनु मेकोपुकीम मेको आन कली ग्याइक्तमे बाक्त। मिनु एलीयाम मेको आन कली किशोन खोल्साम लाइश्शा साइक्मी बाक्त। *प्रस्थान २२:१९; ब्यवस्था १३:६-९*

41 मिनु एलीयाम आहाब कली "लशा जने तूडीन। मारदे हना गो ठेयब रेउ आ रेयके नेंता" दैमाक्त। *याक्ब ५:१८* 42 मिनु आहाब जचा तूचा कली लमाक्त। तन्न एलीया चहिं कारमेल डांडा डोइश्शा, मेकेर आ पिया पोक्चीम खेष्ठा बाक्माक्त। 43 मिनु मेकोमी आ गेय पाइब कली "लशा, समुन्द्र गे कोव्रडो" दे मदा बाक्त। मिनु मेको लशा कोव्रडा बाक्त। मिनु मेकोमी "मेकेर मारेइ मबा" दैमाक्त। मिनु एलीयामी मेको कली "७ खेयप मेकेर लशा, कोव्रडो" दे सोइक्ता बाक्त। 44 मिनु ७ खेयप डा पाली मेकोमी "मुर आ गुड खोमो गोस्स का समुन्द्र रे बोक्शो ताता" दैमाक्त। मिनु एलीयाम मेको कली "मुल लशा आहाब कली 'इन बग्गी ठीक पा, उइ खिं लने। मो मपाइतीनी हना, इन कली रेउम तेक्ब' दे मतो" दैमाक्त। 45 मिनु क्येर गोस्सुम सरीड सुष्ठा, फश गिवार पा ठेयब रेउ यिचा गोवा बाक्त। मिनु आहाब आ बग्गी डोइश्शा येज्जेल सहर लमाक्त। 46 मिनु परमप्रभु यावेमी एलीया कली थिवा बाक्त। मिनु मेको आ फेक्शो वा खाइश्शा आहाब आ डोंइडोंइती येज्जेल डा ठेयब लाप्चो सम्म दोरशा लमाक्त।

एलीया प्रोक्शा, होरेब डांडा लशो

19 मिनु आहाबमी इजेबेल कली एलीया आ पशो गेय नेल्ल नु मेकोमी दोपा देवी देवता आन लोत्र पाइब नेल्ल आन कली तरवारम सदा, मेको नेल्ल शेंदा बाक्त। 2 मिनु इजेबेलम एलीया आ बाक्तीकेम "गे दोपा मेको आन कली सदी, मोपा गो दीसा एं ना सम्म इ कली मसाइक्तन हना, देवतापुकीम आं कली यो मोदेंशोन पाइय्यीमील। मेको क्येडा यो शुश पाइय्यीमील" देंथ लोत्र कुरब मुर सोइक्ता बाक्त। 3 मिनु एलीया हिंशा, प्रोक्माक्त। मिनु मेको प्रोक्शा यहूदा डा बेयर-शेबा जाक्माक्त। मिनु मेकोमी आ गेय पाइब कली मेक उइ प्रोना बाक्त। 4 मिनु आं चहिं काबु डा लां डोन गोरशो रागीम ओव्रमाक्त। मिनु मेको बुटा आगाम निश्शा, परमप्रभु यावे कली "मुल नुप्त। आ सोक्त ब्रने। मारदे हना गो आं किकी पिपी आन क्येडा रिष्शो मनड" दैमाक्त। *अय्युब ७:१५; योना ४:३* 5 मिनु नोले बुटा आ आगामीन गोल्शा निन्द्रा पवा बाक्त। मेना परमप्रभु यावे आ स्वर्ग डा गेय पाइब कामी मेको कली ब्रा थिशा "बोक्शा जावो" दैमाक्त। 6 मिनु मेकोमी बोक्शा, एर ओंथ कोव्रडानु, आ पिया गे चोशो होश शोब्ले का नु ढुडग्रो का ब्वाक्कु तवा बाक्त। मिनु मेकोम मेको जशा तूशा लेंशा इम्माक्त। 7 मिनु परमप्रभु यावे आ स्वर्ग डा गेय पाइब लेंशा जाक्शा, मेको कली थिशा "बोक्शा जावो। इ लां थम लाइश्शो बाक्ब" दैमाक्त। 8 मोपतीके मेको बोक्शा, जवा तूडा बाक्त। मिनु मेको आ बोलम मेको ४० नाक्त नु ४० नाक्दो सम्म गाक्शा, परमप्रभु आ डांडा होरेब जाक्दीम्माक्त। *प्रस्थान २४:१८* 9 मिनु मेकेर डा पुक्खी काम ओव्रशा, मेक उइ नां सोंइदा बाक्त। मेकेर बाक्मेनु, परमप्रभु यावेमी मेको कली "एलीया, गे एक मार पा बाक्डे?" दे हिल्लो पवा बाक्त। 10 मिनु मेकोमी "परमप्रभु यावे, मुर नेल्ल आन परमप्रभु, गो इन पर्वम शुश गेय पाता। इस्राएलीमी इन कबल प्रोंइतेक्म। इन कली चढ़ेतीक प्रेत्तेक्म। मिनु इन लोत्र पाइब आन कली तरवारम क्योरशा साइक्तेक्म। गो आं का ला लीशो बाक्नुड। मिनु मुल मेकोपुकीमी आं कली यो साइक्चा माल्शो बाक्नीम" दैमाक्त। *भजन संग्रह ६९:१०; यसैया ४९:४; १राजा १८:२२; रोमी ११:३*

11 मिनु परमप्रभु यावेमी "गूडो, आं डोंइती डांडाम रपो" दैमाक्त। मारदे हना परमप्रभु यावे मेकेर रे लन लन बाक्माक्त। मिनु परमप्रभु यावे आ डोंइडोंइती ठेयब फश गिवार डांडा आन कली प्रोल्ना प्रोल्न नु फुल्लु आन

कली खिन्ना खिन्न जाक्माक्त। तन्न परमप्रभु यावे मेको फशेम मबाक्माक्त। मेको आ नोले ठेयब खिनु कुमाक्त। तन्न परमप्रभु यावे मेको खिनुमी यो मबाक्माक्त। प्रस्थान ३३:२२<sup>12</sup> मिनु मेको खिनु आ नोले मी का जाक्माक्त। तन्न मेको मीमी यो परमप्रभु यावे मबाक्माक्त। मिनु मी आ नोले इन्चीली सेंदा का जाक्माक्त।<sup>13</sup> मिनु एलीयामी मेको सेंदा नेंशा, आ वामी आ कुल सुम्से बाक्त। मिनु लाडगा गूशा पुक्खी आ डोंइती राम्माक्त। मिनु मेको आइक्च सेंदाम “एलीया गे एक मार पन पन बाक्डे?” देंमाक्त।<sup>14</sup> मिनु मेकोमी “परमप्रभु यावे, मुर नेल्ल आन परमप्रभु गो इन पर्वम शुश गेय पाता। इस्राएलीमी इन कबल प्रॉइतेक्म। इन कली चढ़ेतीक प्रेत्तेक्म। मिनु इन लोव्र पाइब आन कली तरवारम क्योरशा साइक्तेक्म। गो आं का ला लीशो बाक्नुड। मिनु मुल मेकोपुकीमी आं कली यो साइक्चा माल्शो बाक्नीम” देंमाक्त।<sup>15</sup> मिनु परमप्रभु यावेम मेको कली “गे तेको लां रे जाक्शो बाक्डे, मेको लां रे पा लेश्शा दमस्कस डा गोरशो रागीम लावो। मिनु गे मेको सहर जाक्दीश्शा, हजाएल कली अराम डा पिप सेलो। २२राजा ८:१३,१५<sup>16</sup> मिनु निम्शी आ तौ येहू कली यो इस्राएल डा पिप सेलो। आबेल-मेहोलाह डा शाफात आ तौ एलीशा कली इ पा डा आं लोव्र पाइब सेलो। २२राजा ९:२-३<sup>17</sup> मिनु हजाएल आ तरवार रे ब्रॉइशो आन कली येहूमी साइक्ब। मिनु येहू आ तरवार रे ब्रॉइशो आन कली एलीशामी साइक्ब।<sup>18</sup> मो हना यो, गो ७ हजार जना आन कली इस्राएलम प्रॉइशा वोइक्नुडमी। मेकोपुकीमी बाल आ डोंइती आन पोक्च मथेक्शो बाक्नीम। मिनु मेकोपुकीम बाल कली पुक्पु मपाइश्शो बाक्नीम” देंमाक्त। रोमी ११:४

#### एलीयामी एलीशा कली ब्रेश्शो

<sup>19</sup> मिनु एलीया मेकेर रे लमाक्त। मिनु शाफात आ तौ एलीशा कली गुमा बाक्त। मेको १२ हाल ब्यफ वाक्ना वाक्न बाक्माक्त। मेको चहिं मेको नेल्ल क्येडा नोले डा हाल वाक्ना वाक्न बाक्माक्त। मिनु एलीया लशा, आ फेक्शो वा मेको आ तार कोप्ता बाक्त।<sup>20</sup> मिनु एलीशामी आ ब्यफ प्रॉइशा, एलीया आ नोनोले दोरमाक्त। मिनु मेकोम “आं कली आं आंम आफ आस कली पुक्पु पाइक्चा गेयीनी। मिनु इन नोले खोइक्नुड” देंमाक्त। मिनु एलीयाम “लावो, गो इ कली मार पडा मेको मिम्तो” दे मदा बाक्त। लूका ९:६१-६२<sup>21</sup> मिनु एलीशाम एलीया कली प्रॉइशा लमाक्त। मिनु मेकोमी आ हाल ब्यफ लाइश्शा क्योरा बाक्त। मिनु मेकोम हलो चोशा श्ये क्येवा बाक्त। मिनु मुर आन कली ब्वचा गेमी बाक्त। मिनु मुरपुकीम ब्वामे बाक्त। मिनु मेको नोले एलीया आ नोले खोदा बाक्त। मिनु मेको आ गेय पाइब दुम्माक्त।

#### बेन-हादादम लडाइ तोशो

**20** अराम डा पिप बेन-हादादम आ लडाइ पाइब नेल्ल आन कली खुप्तीमी बाक्त। मिनु मेकोमी ३२ जना पिप, मेको आन शारा नु बग्गीपुकी लाइश्शा, सामरीया सहर कली पुम्शा लडाइ तोवा बाक्त।<sup>2</sup> मेकोमी लोव्र कुरब आन कली सहरम सोइश्शा, इस्राएल डा पिप आहाब कली “बेन-हादाद आ लोव्र नेनीन,<sup>3</sup> ‘इन सुन चांदी आं के नम। इन नेल्ल क्येडा दारशो मीश नु इन तमी तौ यो आं केन नम’ देंत” देनीन, दे सोइक्तीमी बाक्त।<sup>4</sup> मिनु इस्राएल डा पिपमी मेको आन कली “आं प्रभु, पिप इन देंशो खोदेंशो पा ‘गो नु बाक्शो मारेइ मारेइ इन केन नम, देंत’ मतीन” दे सोइक्तीमी बाक्त।<sup>5</sup> मिनु लेंशा बेन-हादादमी लोव्र कुरब सोइश्शा “इन सुन चांदी, इन मीश नु इन तमी तौ नेल्ल आं कली गेन।<sup>6</sup> गो दीसा एं ना आं गेय पाइब आन कली, इन खिं नु इन ठेयब गेय पाइब आन खिंमी इन शुश क्येट लाइब थोव्रक ब्रथ सोइक्नुडमी। मेकोपुकीमी आन दाक्शो मारेइ मारेइ लाइक्नीम” दे लोव्र कुरब सोइक्ता बाक्त।<sup>7</sup> मिनु इस्राएल डा पिपम आ रागी डा खाल्पा नेल्ल आन कली ब्रेश्शा, मेको आन कली “गे तुइश्शो बाक्नीनी। मेको मुरुम लडाइ पचा कली खुच्ची माल्ना माल्न बाक्ब। मेकोम आं मीश, आं आलपुकी नु आं सुन चांदी आ केन नम देंमेनु यो, गो मारेइ मरेंड” देंमाक्त।<sup>8</sup> मिनु खाल्पा नु मुर नेल्लेमी मेको कली “मेको आ लोव्र मनेनीन। गे मेको आ देंशो मबिस्सीन” देंमा बाक्त।<sup>9</sup> मोपतीके मेकोमी बेन-हादाद आ लोव्र कुरब आन कली “आं प्रभु

पिप कली ‘आं ठेयब पिप आ डोंइती पुइशो नेल्ल गेनुड। तन्न मुल इन पुइशो लोव्र गो गेने मचाप्नुड’ मुल लशा गेपुकीम बेन-हादाद कली एको लोव्र मतीन” दे माइश्शा सोइक्तीमी बाक्त। मिनु मेको लोव्र कुरबपुकी लशा, आन होव्रप बेन-हादाद कली शोव्रडमे बाक्त।<sup>10</sup> मिनु बेन-हादादम आहाब कली “गो नु शुश लडाइ पाइब बाक्नीम। आं लडाइ पा ग्राशो सामरीया डा फुरक, आं लडाइ पाइब आन कली योल का का गेचा कली यो मगाप्ब। मेको गाप्त हना, देवतापुकीम आं कली खतम पोय्यीमील” देंथ मुर सोइक्ता बाक्त।<sup>11</sup> मिनु मेको आन कली इस्राएल डा पिपमी “मेको कली ‘लडाइ ग्राचा गेना गेना, मुल कना मार ठेयब लेश्शो लोव्र पाइनेवे’ देंत, मतीन” दे सोइक्तीमी बाक्त।<sup>12</sup> मेना बेन-हादाद नु अरु पिप आन बाक्तीकेम शांबु दुक्शा बाक्मानु, मेको लोव्र नेना बाक्त। मिनु मेकोमी रीब पा आ लडाइ पाइब आन कली “लडाइ पचा ठीक दुमीन” दे हुकुम गेमी बाक्त। मिनु मेकोपुकी मेको सहर कली लडाइ तोचा कली ठीक दुम्मा बाक्त।

#### आहाबमी बेन-हादाद कली फ्रुशो

<sup>13</sup> मेना परमप्रभु यावे आ लोव्र पाइब का इस्राएल डा पिप आहाब आ बाक्तीक जाक्शा, मेको कली “परमप्रभु यावेमी ‘मार, गे एको ठेयब हुल लडाइ पाइब आन कली तवी? कोव्रडो, गो मुलाक्तीन मेको आन कली इ गुइमी गेनुड। मिनु गोन परमप्रभु यावे नड, दे तुइक्नेवे’ देंत” देंमाक्त।<sup>14</sup> मिनु आहाबमी “तन्न मेको सुम पाइबा?” दे हिल्लो पवा बाक्त। मिनु परमप्रभु यावे आ लोव्र पाइबमी “परमप्रभु यावेम ‘हुकुम पाइब ठेयब मुर आन गेय पाइब ठिटापुकीम लडाइ पाइनीम’ ” देंमाक्त। मिनु पिपमी “लडाइ सुम गोचा माल्बा?” दे हिल्लो पवा बाक्त। मिनु मेको परमप्रभु यावे आ लोव्र पाइबम “गे गोचा माल्नीनी” देंमाक्त।<sup>15</sup> मिनु आहाबमी मेको हुकुम पाइब ठेयब मुर आन गेय पाइब सहे निक्शी ३२ जना ठिटा आन कली खुप्थ सोइक्तीमी बाक्त। मिनु नोले इस्राएली नेल्ल आन कली पुक्मी बाक्त। मेको नेल्ले ७ हजार बाक्मा बाक्त।<sup>16</sup> मिनु नाक्त उइक्थ दुम्मेनु, बेन-हादाद नु मेको आ वारच ३२ जना पिप आन बाक्तीकेमी दुक्शो बाक्मा ना मेकोपुकी गूमा बाक्त।<sup>17</sup> मिनु मेको हुकुम पाइब आन गेय पाइब ठिटापुकी डोंइती बारमा बाक्त। मेना बेन-हादादमी क्यारी पाइबपुकी सोइश्शो बाक्माक्त। मिनु मेकोपुकी जाक्शा “सामरीया रे मुरपुकी पिशो बाक्नीम” देंमा बाक्त।<sup>18</sup> मिनु बेन-हादादम “मेकोपुकी गारचा कली जाक्शो बाक्तेक्म हना, मेको आन कली सेसीन ग्याइक्तीन। लडाइ पथ जाक्शो बाक्तेक्म हना यो, सेसीन ग्याइक्तीन” दे माइक्मी बाक्त।

<sup>19</sup> मिनु मेको हुकुम पाइब ठेयब मुर आन गेय पाइब ठिटापुकी सहर रे लाडगा गूमानु, आहाब आ अरु लडाइ पाइबपुकी मेको आन नोले खोइश्शा गूमा बाक्त।<sup>20</sup> मिनु नेल्लेमी आन जोरी सत्रु आन कली सदमे बाक्त। मिनु मो दुम्मेनु अरामी प्रोक्मा बाक्त। मिनु इस्राएलीपुकीम मेको आन कली खेदा पामे बाक्त। तन्न अराम डा पिप बेन-हादाद आ शारा डोइश्शा, अरु शारा डोइक्बपुकी नु प्रोक्माक्त।<sup>21</sup> मिनु इस्राएल डा पिप डोंइती बारशा, शारा नु बग्गी आन कली ग्रामाक्त। मिनु अरामी शुश आन कली साइक्मी बाक्त।

<sup>22</sup> मिनु नोले मेको परमप्रभु यावे आ लोव्र पाइब इस्राएल डा पिप आ बाक्तीक जाक्शा, मेको कली “इन लडाइ पाइब आन कली ठीक पा वोतीन। मार पचा माल्बा, मेको रिम्शो पा मिम्तीन। मारदे हना मुल जाक्शो बर्सम अराम डा पिपम लेंशा गेपुकी नु लडाइ पाइब” देंमाक्त।

<sup>23</sup> मिनु अराम डा पिप आ गेय पाइबपुकीम आन पिप कली “मेको आन देवता पहाड डा देवता बाक्नीम। मोपतीके मेकोपुकी इं क्येडा शुश बोल्यो बाक्नीम। मुल गोपुकीम मेको आन कली दिंमम लडाइ पाइतय हना, थमा पा गो मेको आन क्येडा बोल्यो दुम्नय।<sup>24</sup> मुल गे मार पचा माल्नीनी देंशा हना, एको पिप आन कली लडाइ पाइब आन ठेयब मुर रे गुंइदीन। मिनु मेको आन पा डा अर्को मुर योव्रडीन।<sup>25</sup> डोंइती बेक्शो लडाइ पाइब आन खोदेंशो पा, अर्को लडाइ पाइब आन हुल का सेलीन। शारा डोइक्ब आन कली शारा नु बग्गी डोइक्ब आन कली बग्गी ठीक पने। मिनु नोले गो इस्राएली नु दिंमम लडाइ पथ लय। मिनु गो थमा पा मेको आन क्येडा बोल्यो दुम्नय” देंमा

बाक्त। मिनु बेन-हादादमी मेको आन सल्ला बिश्शा, मेको आन दॅशो खोदॅशो पवा बाक्त।

26 मिनु मेको जाक्शो बर्सम बेन-हादादम लडाइ पचा कली अरामी आन कली पुक्मी बाक्त। मिनु इस्राएली नु लडाइ पचा कली अफेक सहर गे लमा बाक्त। 27 मिनु इस्राएली यो खुम्सीशा, जशा तूशा, मेको नु लडाइ पचा कली हुल हुल पा गूमा बाक्त। इस्राएलीम अरामी आन डोंइती गे आन बाक्तीक सेल्मे बाक्त। मेकोपुकी क्यारश आन आइक्च हुल निक्शी खोदॅशो बाक्मा बाक्त। तन्न अरामी चहिं मेको रागी डा दिम एर ओंथ नेल्ल ब्रीशा बाक्मा बाक्त। 28 मिनु परमप्रभु आ मुर का इस्राएल डा पिप आ बाक्तीकेम जाक्शा, मेको कली “परमप्रभु यावेम ‘अरामीपुकीम परमप्रभु यावे, इस्राएली आन परमप्रभु पहाड डा देवता ला बाक्ब। बेसी डा देवता ममाड, दे मिश्शो बाक्नीम। मोपतीके गो एको ठेयब हुल लडाइ पाइब आन कली इ गुडमी गेनुड। मिनु गे गोन परमप्रभु यावे नड, दे तुइक्नेवे’ दॅत” दॅमाक्त। प्रस्थान ७:५ 29 मिनु मेको आन डोंइती आन बाक्तीकेम कोवमुशा ७ नाक्त सम्म बाक्मा बाक्त। मिनु नोले ७ नाक्तीम लडाइ पामे बाक्त। मिनु इस्राएलीपुकीम काबुम अरामी आन खोइलीम गाक्ब लडाइ पाइब लाख का आन कली सदमे बाक्त। 30 मिनु मेको आन दाते डा लीशोपुकी अफेक डा सहरम प्रोक्मा बाक्त। मिनु मेकेर डा गारो ब्रेश्शा १७ हजार आन कली चिप्ता बाक्त। बेन-हादाद चहिं सहर ओव्रशा, खुइश्शा बाक्माक्त। 31 मिनु मेको आ गेय पाइबपुकीम मेको कली “गोपुकीमी इस्राएल आ खिं डा पिपपुकी दा शिशी पाइब बाक्नीम दॅशो लोव्र नॅशो बाक्नीकी। मोपतीके क्रातोम अरन्डी फेक्सीय। मिनु पियाम डोरी फ्रॅसीशा इस्राएल डा पिप आ बाक्तीक लय। मिनु मेकोम इन कली ब्रॉइचा गेबा कों?” दॅमा बाक्त। 32 मोपतीके मेकोपुकीमी आन क्रातोम अरन्डी फेक्शा, आन पियाम डोरी फ्रॅसीशा इस्राएल डा पिप आ बाक्तीक लशा मेको कली “इन वाइल बेन-हादादम ‘गो आं कली ब्रॉइचा गेयीमी’ दॅशो बाक्ब” दॅमा बाक्त। मिनु पिपमी “मार, मेको मुल यो सेसीन बाक्मे? मेको आं लोक्ब बाक्ब” दॅमाक्त। 33 मिनु मेको मुरपुकीम पिप आ लोव्र रिश्शो बाक्माक्त दाप्शा “ओं, इन लोक्ब बेन-हादाद मुल यो सेसीन बाक्ब” दॅमा बाक्त। मिनु पिपमी मेको आन कली “लशा, मेको कली एक चाक्कीन” दॅमाक्त। मिनु बेन-हादाद गूशा जाक्मेनु, आहाबम मेको कली आ बग्गीम डोइक्पदा बाक्त। 34 मिनु बेन-हादादमी मेको कली “आं आफोम इन आफ रे ग्राशो सहर नेल्ल गो लेश्शा गेनन्नी। मिनु आं आफोम सामरीयाम पशो खोदॅशो पा, गे यो दमस्कसम ग्याप्तीक लेयतीक सेल्मे चाप्नीनी” दॅमाक्त। मिनु इस्राएल डा पिप आहाबमी “मेको सल्लाम पतीके गो इ कली प्रॉइनन” दॅमाक्त। मोपा आहाबमी दुचा आ पर्बम लोव्र पा, मेको कली प्रोना बाक्त।

आहाब कली दोस गेशो

35 मिनु परमप्रभु यावे आ लोव्र पा, मेको आ लोव्र पाइब आन दाते डा काम आ वारच का कली “आं कली तुब्यी” दॅमाक्त। तन्न मेकोमी तुप्ने मबिस्से बाक्त। 36 मिनु मेको परमप्रभु यावे आ लोव्र पाइबमी “गे परमप्रभु यावे आ अरेशो लोव्र मटितीके आं कली प्रॉइशा लवे चोटीन इ कली गुप्स काम साइक्ब” दॅमाक्त। मिनु मेको लम नोले गुप्स काम थिश्शा, मेको कली सदा बाक्त। १ राजा १३:२४ 37 मिनु मेको परमप्रभु यावे आ लोव्र पाइबमी अर्को मुर का कली गूम्शा, मेको कली “आं कली तुब्यी” दॅमाक्त। मोपतीके मेकोमी मेको कली तुप्शा, गार सेला बाक्त। 38 मिनु मेको परमप्रभु यावे आ लोव्र पाइब लशा, मतुइक्पांइसीचा डा पा आ मिक्चीम वा फ्रॅशा पिप कली लांम रिम्दा बाक्त। 39 मिनु पिप मेको आ नेक्था रे लमेनु, मेकोमी पिप कली ब्रेश्शा “गो इन वाइल लडाइ पतीकेम जाक्दीश्शो नड। मिनु मेकेर लडाइ पाइब मुर काम फ्रॅशो मुर का चाक्शा आं बाक्तीक जाक्त। मिनु मेकोमी आं कली ‘एको मुर जिम्मा ब्रावो। एको मुर दोकका पा प्रोक्त हना, एको आ पा डा गे बेक्चा माल्नेवे कि टलेन्ट का चांदी थाप्चा माल्नेवे’ दॅत। टलेन्ट का ३४ किलो बाक्ब। २ राजा १०:२४ 40 मिनु गो, इन वाइल, गेय पा बाक्डा सम्म, मेको ग्याइश्शो मुर प्रोक्माक्त” दॅमाक्त। मिनु इस्राएल डा पिपमी मेको कली “गे इ निसाफ आंमान पाप्तीवी। मेकोन इ कली पतीक निसाफ बाक्ब”

दॅमाक्त। 41 मिनु मेको परमप्रभु यावे आ लोव्र पाइबमी रीब पा आ मिक्चीम फ्रॅशो वा पुदा बाक्त। मिनु इस्राएल डा पिपम मेको कली परमप्रभु यावे आ लोव्र पाइब का बाक्त, दे तुइक्ता बाक्त। 42 मिनु मेकोमी पिप कली “परमप्रभु यावेमी ‘गो साइक्चा कली ठीक पशो मुर कली गे प्रॉइतीवी। मोपतीके मेको आ पा डा गे बेक्चा माल्नेवे। मिनु मेको आ मुर आन पा डा इ मुर बेक्चा माल्नीम’ दॅत” दॅमाक्त। 43 मिनु इस्राएल डा पिपमी “मार लोव्र पवा?” दे गाइश्शा, आ खिं सामरीयाम जाक्माक्त।

नाबोथ आ अडगुर रू

21 इक्का नाक्त नोले मार दुम्माक्त दॅशा हना, येजेल सहर डा नाबोथ माइश्शो मुर का बाक्माक्त। मेको के अडगुर रू का बाक्माक्त। मेको अडगुर रू येजेल सहर सामरीया डा पिप आहाब आ दरवार आ नेक्था बाक्माक्त। 2 काबु नाक्ती आहाबमी नाबोथ कली “इ अडगुर रू आं कली गिग खाइ खुम्चा कली गेयी। मारदे हना मेको आं खिं आ नेक्था बाक्ब। मेको आ पा डा गो इ कली अर्को मेको क्येडा रिश्शो अडगुर रू का गेनन। क्येट दॅनेवे हना यो, क्येट गेनन” दॅमाक्त। 3 तन्न नाबोथमी आहाब कली “परमप्रभु यावे आ डोंइती मोदॅशो पने मचाप्नुड। गो आं किकी पिपी आन गेशो रू इन कली गेने मचाप्नुड” दॅमाक्त। 4 मोपतीके आहाब आ थुं खुरसीशा गाइश्शा आ खिं लमाक्त। मारदे हना येजेली नाबोथमी “आं किकी पिपी आन गेशो रू इन कली मगेनुड” दॅशो बाक्माक्त। मिनु मेको आ कुल किरशा आ ब्राख्येम इप्शा बाक्माक्त। जने यो मबिस्से बाक्त।

5 मिनु मेको आ मीश इजेबेल जाक्शा, मेको कली “गे मारदे इन थुं खुरसीनी? मारदे मारेइ जने मबिस्सीनी?” दे हिल्लो पवा बाक्त। 6 मिनु मेकोम इजेबेल कली “गो येजेली नाबोथ कली ‘इ अडगुर रू ग्याप्चा गेयी कि इ दाक्शो रू नु फाइक्स’ माइक्ता। तन्न मेकोम ‘गो आं अडगुर रू इन कली मगेनन्नी’ दॅत” दॅमाक्त। 7 मिनु मेको आ मीश इजेबेलम मेको कली “गे इस्राएल डा पिप बाक्नीनी। मिनु गे मोदॅशो पाइनीनी? बोक्शा, जने तूडीन। मिनु ग्येरसीने। गो येजेली नाबोथ आ अडगुर रू इन कली गेनन्नी” दॅमाक्त।

8 मिनु इजेबेलम आहाब आ नॅमी चिठी का ब्रेक्ता बाक्त। मिनु मेकेर पिप आ छाप थोक्ता बाक्त। मिनु मेको नाबोथ आ सहर डा खाल्पा नु ठेयब मुर आन कली सोइक्ता बाक्त। 9 मेकोम मेको चिठीमी “माइजा बाक्तीक नाक्त का बाक्ब” दॅनीन। मिनु नाबोथ कली मरिश्शो पाइब आन निक्तीकेम निप्पतीन। 10 मिनु मरिश्शो पाइब मुर निक्शी आस कली मेको आ डोंइती निप्पाइश्शा, एकोम ‘परमप्रभु नु पिप कली सराप पशो बाक्ब’ दे दोस गेपतीन। मिनु मेको नोले मेको कली लाडगा गुंइशा फुल्लु आप्शा सतीन” दे ब्रेक्ता बाक्त। ब्यवस्था १७:६; मती २६:५९-६१; प्रस्थान २२:२७ 11 मिनु इजेबेलम मेको आन कली चिठीम ब्रेक्शो खोदॅशो पा, मेको सहर डा मुर, खाल्पा नु मेकेर डा ठेयब मुरपुकीम पामे बाक्त। 12 मिनु मेकोपुकीम माइजा बाक्तीक नाक्त का सेल्मे बाक्त। मिनु नाबोथ कली मरिश्शो पाइब आन कली निप्पाइक्तीकेम निप्पदमे बाक्त। 13 मिनु मेको नोले मेको मरिश्शो पाइब मुर निक्शी जाक्शा, मेको आ डोंइती निस्ससा बाक्त। मिनु मेको निक्शीमी “नाबोथम परमप्रभु नु पिप कली सराप पशो बाक्ब” दे नेल्लेम नॅचा डा पा दोस गेम्से बाक्त। मिनु मेकोपुकीम मेको कली लाडगा गुंइशा फुल्लु आप्शा सदमे बाक्त। 14 मेको नोले मेकोपुकीमी इजेबेल कली “नाबोथ कली फुल्लु आप्शा साइक्तक” दे लोव्र कुरब मुर सोइक्तमे बाक्त। 15 मिनु इजेबेलम नाबोथ कली फुल्लु आप्शा साइक्तेक्म दॅशो लोव्र नॅना चोटीन आहाब कली “मुल बोक्शा येजेल सहर डा नाबोथम इन कली लेयने मबिश्शो रू इन के सेलीन। मारदे हना मेको बेक्त” दॅमाक्त। 16 मिनु नाबोथ बेक्माक्त दॅशो लोव्र नॅशा, आहाब बोक्शा येजेल सहर डा नाबोथ आ अडगुर रू हिरशा आंम के सेल्थ लमाक्त।

17 मिनु परमप्रभु यावेमी तिश्बे सहर डा एलीया कली लोव्र पवा बाक्त। 18 मार लोव्र पवा बाक्त दॅशा हना “इस्राएल डा पिप आहाब कली गुम्थ उड लावो। मेको सामरीयाम बाक्शो नाबोथ आ अडगुर रू आंम के सेल्थ लशो बाक्ब। 19 गे मेको कली परमप्रभु यावेमी ‘मार, गे मुर का कली साइश्शा,

मेको आ रू इ के मसेली डा?' दैत, मतो। मिनु मेको कली परमप्रभु यावेमी 'नाबोध आ हुश कुचुमम तुक्तीकेमीन इ हुश यो कुचुमम तुक्नीम' दैत, मतो" दैमाक्त। १राजा २२:३८

20 मिनु आहाबमी एलीया कली "आं सत्रु, गे आं कली थिय्यी?" दे मदा बाक्त। मिनु मेकोम "ओ, गो इ कली थिल्लन। मारदे हना गे परमप्रभु यावे आ डोंइती मार मरिश्शो बाक्मे, मेको ला पना पन बाक्ते। 21 मोपतीके परमप्रभु यावेमी 'मुल गो इ तार शुश श्येत कोप्नुड। गो इस्राएल रागीम बाक्ब, गे नु इ खिं डा वोंइश मुर नेल्ल आन कली साइक्नुडमी। वाइल बाक्मल कि प्रोंइचा पुंइसीशो बाक्मल, नेल्ल आन कली साइक्नुडमी। २राजा ९:७-८ 22 मिनु गो इ खिं कली नेबात आ तौ येरोबाम नु अहीयाह आ तौ बाशा आस खिं कली पाइश्शो खोदेंशो पाइनुड। मारदे हना गे आं कली गाइक्पाइक्तीके नु इस्राएल कली पाप पपाइक्तीके, मो पाइनुड" दैत। १राजा १५:२९; १राजा १६:११-१२ 23 मिनु परमप्रभु यावेम इजेबेल आ पर्बम 'कुचुमपुकीम इजेबेल कली येजेल सहरम ब्वाइनीम। २राजा ९:३३-३६ 24 सहरम बेक्शो आहाब आ खिं डा मुर आन कली कुचुमम ब्वाइनीम। मिनु रूम बेक्शो आन कली चिक्बपुकीम ब्वाइनीम" दैत" दैमाक्त। १राजा १४:११; १राजा १६:४; १राजा २१:२४

25 आहाबम आ मीश इजेबेल आ लोत्र नेंशा, परमप्रभु यावे आ डोंइती काइ मरिश्शो पवा बाक्त। मोदेंशो मुर अर्को सुइ मबाक्मा बाक्त। 26 मेको परमप्रभु यावेमी इस्राएली आन डोंइती रे खेरशो एमोरी खोदेंशो पा मेको आन ग्रांग्रा दिशो मूर्ति आन नोले खोदा बाक्त।

27 मिनु आहाबम मेको लोत्र नेंशा, आ वा खाक्गा बाक्त। मिनु अरन्डी फेक्शा माइजा बाक्माक्त। मेको अरन्डी फेक्शा आ थुं लुक्च लशा इम्माक्त। 28 मिनु परमप्रभु यावेम तिश्बे सहर डा एलीया कली लोत्र पवा बाक्त। 29 मार लोत्र पवा बाक्त देंशा हना "आहाब आं डोंइती ब्रेश्शो दुश्शो तवी? मारदे हना मेको ब्रेश्शो दुस्तीके गो मेको आ पालाम ठेयब श्येत मद्रुम्पाइक्नुड। तन्न मेको आ तौ आ पालाम मेको आ खिंम ठेयब श्येत चाक्नुड" दैमाक्त। २राजा ९:२६

मीकायामी लोत्र पशो  
२इतिहास १८:-

22 मिनु बर्स सां सम्म अरामी नु इस्राएली आन दातेमी लडाइ मद्रुम्माक्त। 2 तन्न बर्स सां नोले यहूदा डा पिप येहो-शाफात इस्राएल डा पिप कली गुम्थ ब्रुम्माक्त। १राजा २२:४१ 3 मिनु इस्राएल डा पिपमी आ गेय पाइब आन कली "गे नेल्लेम रामोथ-गिलाद इं के बाक्ब, दे तुइक्नीनी। मो हना यो गो मेको अराम डा पिप रे लेशशा ताक्चा कली मारेइ मपशो बाक्नय" दैमाक्त। यहोसु २१:३८ 4 मोपतीके मेकोम येहो-शाफात कली "रामोथ-गिलाद कली लडाइ तोचा कली गे आं कली वारच पाइक्नीनी?" दे हिल्लो पवा बाक्त। मिनु येहो-शाफातमी इस्राएल डा पिप कली "गो इन खोदेंशो नड। आं मुरपुकी इन मुर नम। आं शारा नेल्ल इन केन नम" दैमाक्त। २राजा ३:७

5 तन्न येहो-शाफातम इस्राएल डा पिप कली "डोंइती परमप्रभु यावे कली हिल्लो पने" दैमाक्त। 6 मोपतीके इस्राएल डा पिपम ४ सहे जना खोइ परमप्रभु यावे आ लोत्र पाइब आन कली पुक्शा, मेको आन कली "गो रामोथ-गिलाद कली लडाइ तोड देय मतोड" दे हिल्लो पामी बाक्त। मिनु मेकोपुकीमी "तोन, परमप्रभु यावेम मेको इन गुइमी गेब" दैमा बाक्त। 7 मिनु येहो-शाफातम "हिल्लो पचा कली परमप्रभु यावे आ लोत्र पाइब अर्को सुइ मबाक्नीमी" दैमाक्त। २राजा ३:११ 8 मिनु इस्राएल डा पिपम येहो-शाफात कली "परमप्रभु यावे कली हिल्लो पचा कली अर्को का बाक्ब। मेको इम्लाह आ तौ मीकाया बाक्ब। तन्न गो मेको मुर कली काइ मदाक्नुड। मारदे हना मेकोम आं पर्बम गेनायो रिश्शो लोत्र मपाइब। गेना हना यो मरिश्शो लोत्र ला पाइब" दैमाक्त। मिनु येहो-शाफातमी पिप कली "पिपम मोदेंशो लोत्र मपवल" दैमाक्त। २इतिहास १८:७-२७ 9 मिनु इस्राएल डा पिपम आ मुर आन दाते डा का कली ब्रेश्शा "इम्लाह आ तौ मीकाया कली रीब पा चाक्को" दे मदा बाक्त। 10 मिनु इस्राएल डा पिप नु यहूदा डा पिप येहो-शाफात पिपम फेक्तीक वा फेक्शा सामरीया डा ठेयब लाचो आ

डोंइती आस आस नित्तीकेम निश्शा बाक्शो बाक्सा बाक्त। मिनु परमप्रभु यावे आ लोत्र पाइब नेल्ले मेको आस डोंइती बाक्शा नोले दुम्ब लोत्र पना पन बाक्शो बाक्मा बाक्त। 11 मेको आन दाते डा का केनानाह आ तौ सिदकीयाहमी चहिं फलाम के ग्रोत्र सेल्सीशो बाक्माक्त। मिनु मेकोमी "परमप्रभु यावेमी 'गे एको ग्रोत्रमी अरामी आन कली नेल्ल मबेक्मा सम्म खूइक्नीनी" दैत" दैमाक्त। 12 मिनु परमप्रभु यावे आ लोत्र पाइब नेल्लेमी मेको मोदेंशोन लोत्र पशो बाक्मा बाक्त। मेकोपुकीमी "रामोथ-गिलाद कली लडाइ तोशा रीब पा ग्राडीन। मारदे हना परमप्रभु यावेम मेको पिप इन गुइमी गेब" देंशो बाक्मा बाक्त।

13 मिनु मीकाया कली ब्रेश्शा चाक्ब मुरुम मेको कली "परमप्रभु यावे आ लोत्र पाइब नेल्लेमी लोत्र का पा पिप कली ग्येरपाइश्शो बाक्नीम। गे यो मेको आन खोदेंशो पा रिश्शो लोत्र पने" दैमाक्त। 14 तन्न मीकायाम चहिं "गो परमप्रभु यावे गेना हना यो ब्रोंइशा बाक्शो खोदेंशो पा परमप्रभु यावेमी आं कली मार देंबा, मेको ला देंनुड" दैमाक्त।

15 मिनु मीकाया पिप आ डोंइती जाक्मेनु, पिपमी मेको कली "मीकाया, गो रामोथ-गिलाद कली लडाइ तोड देय मतोड?" दे हिल्लो पवा बाक्त। मिनु मेकोमी "लडाइ तोने। मिनु ग्राडीन। मारदे हना परमप्रभु यावेमी मेको इन गुइमी गेब" दैमाक्त। 16 मिनु पिपमी मेको कली "परमप्रभु यावे आ नेंमी थमा लोत्र ला पचा, दे गिश खेयप कसम जपाइक्नना?" दैमाक्त। 17 मिनु मीकायामी "गो इस्राएली नेल्ल आन कली गोठला मबाक्शो भेडा खोदेंशो पा, डांडा मेर ब्रशो तातामी। मिनु परमप्रभु यावेमी 'मेको मुर आन ठेयब मुर मबाक्ब। मेको नेल्ल आन थुं नाइश्शा आन खिं लमल" देंशो बाक्ब" दैमाक्त। गन्ती २७:१७; मत्ती ९:३६ 18 मिनु इस्राएल डा पिपम येहो-शाफात कली "मार एकोम आं पर्बम मरिश्शो लोत्र डा लाक्शा अर्को मारेइ मर्देंब, देंडा ममाइ डा?" दैमाक्त।

19 मिनु मीकायामी लोत्र तेम्शा "एको परमप्रभु यावे आ लोत्र नेनीन। गो परमप्रभु यावे आ स्वर्ग डा गेय पाइब नेल्ल आन कली आ ग्युरा गे नु आ पेरा गे राप्पाइश्शा, परमप्रभु यावे आ नित्तीकेम बाक्शो ताता। २इतिहास १८:१८; अय्युब १:६; यसैया ६:१ 20 मिनु परमप्रभु यावेमी 'आहाब कली रामोथ-गिलाद नु लडाइ पपाइश्शा, मेको कली साइक्पाइक्चा कली सुम क्युक्बा?" दैत। मिनु काम लोत्र का पाप्नु, अर्कोम अर्को लोत्र पाप्नु। 21 मिनु नोले का जाक्शा, परमप्रभु यावे आ डोंइती राप्शा 'गो मेको आ थुं क्याक्नुड" दैत। यसैया १९:१४ 22 मिनु परमप्रभु यावेमी मेको कली 'दोपा?' दे हिल्लो पाप्नु। मिनु मेकोमी 'गो लशा मेको आ नोले दुम्ब लोत्र पाइब नेल्ल आन शोत्रमी जोल पाइब सोक्त का दुम्नुड" दैत। मिनु परमप्रभु यावेम मेको कली 'गे थमा पा मेको कली क्युक्ने चाप्नेवे। गे लावो। मिनु इ देंशो पावो' दैत। १यूहन्ना ४:६ 23 मोपतीके परमप्रभु यावेम इन नोले दुम्ब लोत्र पाइब नेल्ल आन शोत्रमी जोल पाइब सोक्त कुर पशो बाक्ब। परमप्रभु यावेम इन कली खतम दुस्तीक नाक्त चाक्शो आ पर्बम नेंपाइक्ने थुश्शो बाक्ब" दैमाक्त।

24 मिनु केनानाह आ तौ सिदकीयाह, इर डोइश्शा मीकाया आ चोत्रचो रबा बाक्त। मिनु मेको कली "दोपा परमप्रभु यावे आ सोक्त आं रे पा इ थुंम ब्वाक्थ जाक्मे?" दैमाक्त। 25 मिनु मीकायाम "गे आंमा आगा डा कोठाम खूइक्थ लवे नाक्त, तुइक्नेवे" दे मदा बाक्त। 26 मिनु इस्राएल डा पिपम "मीकाया कली ग्याइक्तीन। मिनु सहर डा ठेयब मुर आमोन नु पिप आ तौ योआश आस जिम्मा गेने। 27 मिनु एको मुर कली चोक्शा वोतीन। गो रिश्शो पा लेशशा मजाक्डा सम्म एको कली शोब्ले नु ब्वाक्कु डा लाक्शा अरु मारेइ मगेने" दैमाक्त। 28 मिनु मीकायाम मेको कली "गे रिश्शो पा लेशशा जाक्तीनी हना, परमप्रभु यावे गो नु मब्बाक्शो बाक्माक्त, देंनुड" दैमाक्त। मिनु मेकोम चिनु लोत्र तेम्शा "गे नेल्लेम एको लोत्र नेंशा, इन थुंम वोतीन" दैमाक्त।

आहाब साइक्चा पुंइसीशो

29 मिनु इस्राएल डा पिप नु यहूदा डा पिप येहो-शाफात रामोथ-गिलाद लसा बाक्त। 30 मिनु इस्राएल डा पिपम येहो-शाफात कली "गो मद्रुम्माक्त

डा वा फेक्शा लडाइ पथ लाइनुड। तन्न गे इन फेक्तीक वा फेक्शा बाक्कीन” देमाक्त। मिनु इस्राएल डा पिप मतुइक्पांडसीचा डा वा फेक्शा लडाइ पथ लमाक्त।<sup>31</sup> मिनु अराम डा पिपम आ ३२ जना बग्गी डोइश्शा लडाइ पाइब आन ठेयब मुर आन कली “इस्राएल डा पिप डा लाक्शा अरु आइक्च ठेयब सुइ नु लडाइ मपने” दे हुकुम गेशो बाक्माक्त।<sup>32</sup> मिनु बग्गी डोइश्शा, लडाइ पाइब आन ठेयब मुरपुकीम येहो-शाफात कली तशा “थमा पा इस्राएल डा पिप मेकोन बाक्ब” देशा, मेको नु लडाइ पचा कली लमा बाक्त। तन्न येहो-शाफात ठेयब सेंदा पा वाइ ब्रेम्माक्त।<sup>33</sup> मिनु मेको बग्गी डोइश्शा, लडाइ पाइब आन ठेयब मुरपुकीम “एको दा इस्राएल डा पिप ममाइ बाक्माक्त” दे तुइक्तमे बाक्त। मिनु मेको कली खेदा पचा प्रोइशा लेम्मा बाक्त।<sup>34</sup> तन्न मुर कामी आ लिब्रा खुक्शा, हेंथे पा ब्रा आप्शा सोइक्ता बाक्त। मिनु मेको ब्रामी इस्राएल डा पिप आ कुचु तेक्तीक पाता आ बोंइसेम ख्रवा बाक्त। मिनु पिपम आ बग्गी खुल्ब कली “बग्गी हिरशा लडाइ रे गुंइदी। गो ठेयब गार दुम्शो बाक्नुड” देमाक्त।<sup>35</sup> मिनु नाक्त रे ठेयब लडाइ दुम्माक्त। पिप चहिं आ बग्गीम अरामी आन डोंइती राप्शा बाक्शो बाक्माक्त। मेको आ गार रे गूशो हुश बग्गी आगामीन शाइश्शो बाक्माक्त। मिनु मेको पिप मेको नाक्दोन बेक्माक्त।<sup>36</sup> मिनु नां लाक्गा नोले लडाइ पाइब आन हुलम “मुर नेल्ल इन सहर सहर नु इन बाक्तीक लने” देशो लोव्र नेन्मे बाक्त।

<sup>37</sup> मोपा पिप बेक्माक्त। मिनु मुरपुकीम मेको कली सामरीयाम चाक्शा थिम्मे बाक्त।<sup>38</sup> मिनु मेकोपुकीम मेको बग्गी सामरीया डा दोम्ली काम मुरमे बाक्त। मेकेर कुचुमपुकीम आ हुश तुक्गमे बाक्त। तेल्लेमपुकी मेकेर जाक्शा, चिक्सीमा बाक्त। मोपा परमप्रभु यावे आ देशो खोदेशो दुम्माक्त।  
१राजा २१:१९; २राजा ९:२५-२६<sup>39</sup> आहाब आ पशो अरु गेय, मेको आ पशो नेल्ले, मेको आ सेल्शो हात्ती आन खूइ के खिं नु मेको आ सेल्शो सहरपुकी, मार, मेको इस्राएल डा पिप आन इतिहासम ब्रेक्शो मबाक्बा डा?  
<sup>40</sup> मोपा आहाब बेक्माक्त। मिनु मेको आ पा डा आ तौ अहाज्याह पिप दुम्माक्त।

यहूदा डा पिप येहो-शाफात  
२इतिहास २०:३१-२१:१

<sup>41</sup> आसा आ तौ येहो-शाफात यहूदा डा पिप दुम्माक्त। मेना इस्राएल डा पिप आहाबम सासन पशो ४ बर्स दुम्शो बाक्माक्त। १राजा १५:२४<sup>42</sup> येहो-

शाफात पिप दुम्मेनु ३५ बर्स दुम्शो बाक्माक्त। मिनु मेकोम यरूसलेमम २५ बर्स सासन पवा बाक्त। मेको आ ममा आ नें अजुबाह बाक्माक्त। मेको शिल्ही आ तमी बाक्माक्त।<sup>43</sup> मेको गेना हना यो आ आफ आसा आ लांम गाक्माक्त। मिनु मेको रे गेनायो मलेम्माक्त। मेकोमी परमप्रभु यावे आ डोंइती मार रिम्शो बाक्मे, मेको पवा बाक्त। मो हना यो मेकोम डांडा मेर सेल्शो थानपुकी मप्रेदा बाक्त। मिनु मेना सम्म मुरपुकीम मेकेर पूजा पना पन धूप चोना चोन बाक्मा बाक्त।<sup>44</sup> येहो-शाफात इस्राएल डा पिप नु यो गारशा बाक्माक्त। १राजा १५:१४; २राजा १२:४

<sup>45</sup> येहो-शाफात आ पशो अरु गेय, आ सक्ति कोंइशो, मेको आ लडाइ पशो, मार, मेको यहूदा डा पिप आन इतिहासम ब्रेक्शो मबाक्बा डा?  
<sup>46</sup> मेकोमी आ आफ आसा आ पालाम लीशो थान डा तेल्लेम वोंइश मुर आन कली क्याम्दा बाक्त। २इतिहास १७:-२०:-

<sup>47</sup> मेना एदोमम सुइ पिप मबाक्मा बाक्त। मिनु मेकेर सोइश्शो मुर कामी मेको रागीम सासन पवा बाक्त। १राजा १५:१२<sup>48</sup> येहो-शाफातम ओफीर रे सुन चाक्चा कली टारसीस डा खोदेशो पा जहाजपुकी सेल्पदा बाक्त। तन्न मेकोपुकी एस्योन-गेबेरम बिग्रेतीके समुन्द्रम लने मचाप्मे बाक्त।<sup>49</sup> मेना आहाब आ तौ अहाज्याहम येहो-शाफात कली “इन गेय पाइबपुकी आं गेय पाइब नु जहाजम लचा गेने” देमाक्त। तन्न येहो-शाफात मबिस्से बाक्त। १राजा ९:२८<sup>50</sup> मिनु नोले येहो-शाफात बेक्माक्त। मिनु मेको आ आफ दाऊद आ सहरम थिम्चा पुंडसे बाक्त। मिनु मेको आ पा डा आ तौ येहोराम पिप दुम्माक्त।

इस्राएल डा पिप अहाज्याह

<sup>51</sup> आहाब आ तौ अहाज्याह सामरीयाम इस्राएल डा पिप दुम्माक्त। मिनु मेकोम बर्स निक्शी इस्राएलम सासन पवा बाक्त। मेना यहूदा डा पिप येहो-शाफात पिप दुम्शो १७ बर्स दुम्शो बाक्माक्त। २राजा ८:१६<sup>52</sup> पिप अहाज्याहमी परमप्रभु यावे आ डोंइती मार मरिम्शो बाक्मे, मेको पवा बाक्त। मेको आ आंम आफ नु इस्राएली आन कली पाप पपाइक्ब नेबात आ तौ येरोबाम आ लांम गाक्माक्त। १राजा २२:४०<sup>53</sup> मेकोम बाल देवता कली पूजा पवा बाक्त। मेकोमी आ आफोम परमप्रभु यावे, इस्राएली आन परमप्रभु कली गाइक्पाइश्शो खोदेशो पा, मेकोमी यो परमप्रभु कली गाइक्पदा बाक्त। १राजा १२:२८-३०

## २ राजा

नेल्ल क्येडा नोले ब्रेक्ब, सुडम मतुडक्नीम। एको ब्रेक्ब मुरुमी यहूदा डा पिप आन इतिहास डा किताब नु इस्राएल डा पिप आन इतिहास डा किताब तुडश्शो बाक्त।

५६१ बि. सी. पिप योयाकीन जेल्खान रे प्रॉइचा पुंडुसीशो बर्सम बाक्त।

डॉइती १राजा नु २राजा हिब्रू लोत्र रे ब्रेक्शो किताब का बाक्त। मेको ब्रेक्ब मुरुमी ग्रीक लोत्र डा सेप्टुआगीन्त माइश्शो किताब निक्शी सेल्मे बाक्त। राजा किताब निक्शी, सामुएल निक्शी, यहोसु नु न्यायाधीस कली डॉइती डा परमप्रभु यावे आ लोत्र पाइब आन किताब देंनीम। मेको किताबपुकीमी मोसामी इस्राएली आन कली इजीप्ट रे प्रॉइशा बेबीलोन डा मुर आन कली ग्याइश्शा लाइश्शो सम्म डा लोत्र नेल्ल ब्रेक्शो बाक्ब।

एलीयाम पिप कली लोत्र पशो

1 मिनु आहाब बेक्म नोले मोआबमी इस्राएली आन कली मटिवा बाक्त। २सामुएल ८:२; २राजा ३:४-२७<sup>2</sup> अहाज्याह सामरीया सहर डा आ खिं डा तला तार रे दोक्शा, गार दुम्माक्त। मोपतीके मेकोमी मुर आन कली “लशा, एक्रोन डा देवता बाल-जेबुब नु पुनीन। गो एको आं गार रे सानुडा देय मसानुडा?” दे हिल्लो पचा कली सोइक्तीमी बाक्त। १राजा २२:५२-५४<sup>3</sup> तन्न परमप्रभु यावे आ स्वर्ग डा गेय पाइबमी तिश्बे सहर डा एलीया कली “बोक्शा लशा, सामरीया डा पिप आ लोत्र कुरब आन कली गुम्शा, मेको आन कली ‘मार, इस्राएलम परमप्रभु मबाक्बा डा? मिनु गेपुकी एक्रोन डा देवता बाल-जेबुब आ बाक्तीके हिल्लो पथ लनी?’ यसैया ८:१९<sup>4</sup> मोपतीके परमप्रभु यावेमी अहाज्याह कली ‘गे इ रोइ पा गोल्तीक रे मबोक्नेवे। गे थमा पा बेक्नेवे’ देंशो बाक्ब, देनीन” देंमाक्त। मिनु एलीया गाक्माक्त।

5 मिनु मेको लोत्र कुरब मुरपुकी पिप आ बाक्तीक लेशशा जाक्मा बाक्त। मिनु पिपमी “गे मारदे लेशशा जाक्नी?” दे हिल्लो पामी बाक्त। 6 मिनु मेकोपुकीमी “गो आइ कली गुम्थ मुर का जाक्त। मिनु मेकोमी ‘लेशशा लशा इन कली सोइक्ब पिप आ बाक्तीक लने। मिनु मेको कली परमप्रभु यावेमी मार, इस्राएलम परमप्रभु मबाक्बा डा? गे एक्रोन डा देवता बाल-जेबुब कली हिल्लो पथ मुर सोइक्तीके, मसानीनी, बेक्नीनी’ देंत माइक्चा” देंमा बाक्त। 7 मिनु पिपमी मेको आन कली “इन कली गुम्शा, मेको लोत्र पाइब मुर दोदेंशो बाक्म” दे हिल्लो पामी बाक्त। 8 मिनु मेकोपुकीमी “दलओठ आ चां के प्रोत्रशो वा फेक्सीशो नु कुशुल के पेटी किम्सीशो बाक्त” देंमा बाक्त। मिनु मेकोमी “मेको तिश्बे सहर डा एलीया बाक्ब” देंमाक्त। इतिहास १६:१७; मत्ती ३:४

9 मिनु पिपमी ५० जना लडाइ पाइब नु आन कप्तान आन कली एलीया आ बाक्तीक सोइक्तीमी बाक्त। मिनु मेको ठेयब मुर डां डा डॉइश्शा एलीया आ बाक्तीक लमाक्त। मेना एलीया डां डाम बाक्शो बाक्माक्त। मिनु मेको कप्तानमी “परमप्रभु आ मुर, पिपमी इन कली ‘यिन’ देंशो बाक्ब” देंमाक्त। 10 मिनु एलीयामी मेको ५० जना डा लडाइ पाइब आन कप्तान कली “गो परमप्रभु आ मुर बाक्ती हना, सरीड रे मी दोक्शा, गे नु इ लडाइ पाइब ५० जना इन कली दाक्गाल” देंमाक्त। मिनु सरीड रे मी दोक्शा, मेको कप्तान नु आ लडाइ पाइब ५० जना आन कली दाक्गा बाक्त। लूका ९:५४; प्रकाश ११:५

11 मिनु मेको नोले पिपमी अर्को ५० जना लडाइ पाइब नु आन कप्तान कली एलीया आ बाक्तीक सोइक्तीमी बाक्त। मिनु मेको लडाइ पाइब आन कप्तान डां डा डॉइश्शा लशा “परमप्रभु आ मुर, पिपमी इन कली ‘रीब पा यिन’ देंत” देंमाक्त। 12 मिनु एलीयाम “गो परमप्रभु आ मुर बाक्ती हना, सरीड रे मी दोक्शा, गे नु इ ५० जना लडाइ पाइब इन कली दाक्गाल” देंमाक्त। मिनु परमप्रभु आ मी सरीड रे दोक्शा, मेको नु मेको आ लडाइ पाइब ५० जना आन कली दाक्गा बाक्त।

13 मिनु पिपमी लेंशा ५० जना लडाइ पाइब नु आन कप्तान कली सोइक्तीमी बाक्त। मिनु मेको सोइश्शो लडाइ पाइब आन कप्तान डां डा डॉइश्शा एलीया आ बाक्तीक लमाक्त। मिनु मेकोमी एलीया आ डॉइती पोक्च थेक्शा सेउ पा “परमप्रभु आ मुर, गो नु एको इन गेय पाइब ५० जना आइ कली शिशी पा ब्रॉइचा गेने। 14 डॉइती डा ५०, ५० जना लडाइ पाइब नु आन कप्तान निक्शी आस कली सरीड रे मी दोक्शा, दाक्तु। तन्न मुल आइ कली शिशी पा ब्रॉइचा गेने” देंमाक्त। 15 मिनु परमप्रभु यावे आ स्वर्ग डा गेय पाइबमी एलीया कली “मेको नु उड ब्रुपो। मेको क्येडा महिनो” देंमाक्त। मोपतीके एलीया मेको लडाइ पाइब आन कप्तान नु पिप आ बाक्तीक लमाक्त। 16 मिनु मेकोमी पिप कली “परमप्रभु यावेमी इन कली ‘मार, इस्राएलम परमप्रभु मबाक्बा डा? मिनु गे मुर आन कली एक्रोन डा देवता बाल-जेबुब आ बाक्तीके हिल्लो पथ सोइक्तीनी? मोपतीके गे इन गोल्तीके रे मबोक्नीनी। गे थमा पा बेक्नीनी’ देंशो बाक्ब” देंमाक्त।

17 मिनु एलीयामी देंशो खोदेंशो पा, परमप्रभु यावे आ लोत्र गाप्शा अहाज्याह बेक्माक्त। मिनु मेको आ पा डा आ लोक्ब येहोराम पिप दुम्माक्त। मारदे हना अहाज्याह के तौ मबाक्मा बाक्त। मेना यहूदा डा पिप येहो-शाफात आ तौ येहोराम यहूदा डा पिप दुम्शो बर्स निक्शी दुम्शो बाक्माक्त। येहोराम कली ब्रेत्तीक नें योराम यो बाक्त। २राजा ३:१<sup>18</sup> अहाज्याह आ पशो अरु गेय, मार, इस्राएल डा पिप आन इतिहासम ब्रेक्शो मबाक्बा डा?

परमप्रभुम एलीया कली लाइश्शो

2 परमप्रभु यावेमी एलीया कली फश गिवारम क्युक्शा स्वर्ग लाइक्चा चिक्शो बाक्माक्त। मेना एलीया नु एलीशा गिल्गाल प्रॉइशा गाक्ना गाक्न बाक्सा बाक्त। 2 मिनु एलीयामी एलीशा कली “गे एक उड बाक्को। मारदे हना परमप्रभु यावेमी आं कली बेथेल सोइश्शो बाक्ब” देंमाक्त। तन्न एलीशामी “परमप्रभु यावे ब्रॉइशा बाक्शो खोदेंशो पा नु इन ब्रॉइशा बाक्शो खोदेंशो पा, गो इन कली मप्रॉइनुड” देंमाक्त। मोपतीके मेको निक्शी बेथेल ब्रुप्सा बाक्त। 3 मिनु मेकेर परमप्रभु यावे आ लोत्र पाइब आन हुल का जाक्शा, एलीशा कली “परमप्रभु यावेमी मुलाक्ती इन होत्रप कली लाइक्ब, दे तुडक्नीनी?” दे हिल्लो पामे बाक्त। मिनु एलीशामी “गो तुडक्नुड। गे सिक्सी पने” देंमाक्त।

4 मिनु एलीयामी मेको कली “एलीशा गे एक बाक्को। मारदे हना परमप्रभु यावेमी आं कली यरीको सोइश्शो बाक्ब” देंमाक्त। तन्न मेकोमी “परमप्रभु यावे ब्रॉइशा बाक्शो खोदेंशो पा नु इन ब्रॉइशा बाक्शो खोदेंशो पा, गो इन कली मप्रॉइनुड” देंमाक्त। मोपतीके मेको निक्शी यरीको सम्म ब्रुप्सा बाक्त।

5 मिनु यरीकोम परमप्रभु यावे आ लोत्र पाइब आन हुल का जाक्शा, एलीशा कली “परमप्रभु यावेमी मुलाक्ती इन होत्रप कली लाइक्ब, दे तुडक्नीनी?” दे हिल्लो पामे बाक्त। मिनु मेकोमी “गो तुडक्नुड। गे सिक्सी पने” देंमाक्त।

6 मिनु एलीयामी मेको कली “गे एक उड बाक्को। मारदे हना परमप्रभु यावेमी आं कली ‘यर्दन खोला लावो’ दे सोइक्ताक्यी” देंमाक्त। तन्न

एलीशामी “परमप्रभु यावे ब्रॉइशा बाक्शो खोदेशो पा नु इन ब्रॉइशा बाक्शो खोदेशो पा, गो इन कली मप्रॉइनुड” दैमाक्त। मोपतीके मेको निम्फा गाक्सा बाक्त। 7 मिन ५० जना परमप्रभु यावे आ लोत्र पाइबपुकीम एलीया नु एलीशा आस नोले खोदमे बाक्त। मिन मेको निक्शी यर्दन खोला आ नेक्था राप्शा बाक्सानु, मेकोपुकी डोन रे कोव्रशो बाक्सा बाक्त। 8 मिन एलीयामी आ फेक्शो वा पुइश्शा ओल्शा यर्दन खोला डा ब्वाक्कु तुबा बाक्त। मिन ब्वाक्कु ग्युरा गे नु पेरा गे ब्राशा, सोव्रशो लां दुम्माक्त। मेको निक्शी आइक्वी हांबु मजावदीस्सा सम्म मोपा ब्राशा बाक्सा बाक्त। प्रस्थान १४:२१-२२; यहोसु ३:१६

9 मिन खोला शोक्ससा नोले एलीयाम एलीशा कली “आं कली इ रे पा लाइक्चा पुंडसीचा क्येडा डोंइती गो इ पर्बम मार पड?” दैमाक्त। मिन एलीशामी “इन सोक्त क्येडा भाग निक्शी आं कली गेयीनी” दैमाक्त। ब्यवस्था २१:१७ 10 मिन एलीयामी “गे दा ठेयब लोत्र कका पुंडतीवी। तन्न आं कली एक रे क्युक्शा लाइश्शो ताप्तीवी हना, मेको इ पुंडशो गाप्ब। तन्न मताप्तीवी हना, मेको इ पुंडशो मगाप्ब” दैमाक्त। 11 मिन मेको निक्शी लोत्र पना पन गाक्सा बाक्त। मिन रीब पा मी ब्रशो बग्गी नु शारापुकी गूमा बाक्त। मिन मेकोपुकीमी मेको निक्शी आस कली फ्रादमे बाक्त। मिन एलीया फश गिवारम क्युक्शा इर सरीड लाइक्चा पुंडसे बाक्त। उत्पत्ती ५:२४ 12 मिन एलीशाम मेको तशा, वाइ ब्रेश्शा “ए आं आफ! ए आं आफ! इस्राएल डा बग्गी नु शारा डोइक्बपुकी” दैमाक्त। मिन मेना रे एलीशाम एलीया कली लेंशा मतवा बाक्त। मिन नोले मेकोमी आ वा जेर खाक्गा बाक्त। २ राजा ६:२१; २ राजा १३:१४

13 मिन एलीशाम एलीया आ दोक्शो फेक्शो वा गुबा बाक्त। मिन लेश्शा यर्दन खोला आ नेक्था राम्माक्त। 14 मिन मेकोमी एलीया आ फेक्शो वामी ब्वाक्कु तुप्शा “परमप्रभु यावे, एलीया आ परमप्रभु ते बाक्म?” दैमाक्त। मिन ब्वाक्कु तुबा बाक्त। मिन ब्वाक्कु ग्युरा गे नु पेरा गे ब्रामेनु, मेको ओंथ हांबु शोक्से बाक्त।

15 मिन मेको कोव्रशा बाक्ब यरीको डा परमप्रभु यावे आ लोत्र पाइब हुलमी “एलीया आ सोक्त एलीशा तार जाक्सा बाक्त” दैमा बाक्त। मिन मेकोपुकी एलीशा कली गुम्थ जाक्सा बाक्त। मिन मेको आ डोंइती खप सम्मन बाग्मा बाक्त। 16 मिन मेकोपुकीम एलीशा कली “कोव्रडीन, गो इन गेय पाइबपुकी नु बोल्यो ५० जना मुर बाक्नीम। मेकोपुकी लशा, इन होव्रप कली माल्चा गेने। परमप्रभु यावे आ सोक्तीम क्युक्शा लाइश्शा, मेको कली तेकोइ पहाड, बेसीम वोइश्शो बाक्म माइ” दैमा बाक्त। तन्न एलीशाम “ममाइ, मेको आन कली मसोइक्तीन” दैमाक्त। 17 तन्न मेकोपुकीम एलीशा कली सोइक्तीन कि सोइक्तीन दैमा बाक्त। मिन एलीशाम मेको आन कली “लो, मो हना सोइक्तीन” दैमाक्त। मिन मेकोपुकीम मेको ५० जना मुर आन कली सोइक्तमे बाक्त। मिन मेकोपुकीम नाक्त सां सम्म माल्शा मथिदमे बाक्त। 18 मिन एलीशा यरीकोम बाक्मेनु, मेकोपुकी लेश्शा, मेको आ बाक्तीक जाक्सा बाक्त। मिन एलीशाम मेको आन कली “मार, गो इन कली मलन मर्देडा डा?” दे माइक्मी बाक्त।

एलीशाम ब्वाक्कु रिम्शो सेल्शो

19 मिन मेको सहर डा मुरपुकीम एलीशा कली “एको आंइ सहर रिम्शो बाक्ब। तन्न एकेर डा ब्वाक्कु मरिम्शो बाक्ब। मिन एको ब्वाक्कुमी आल शाम्पाइक्ब” दैमा बाक्त। 20 मिन मेकोमी “आं कली नक बोस का गेयीनी। मिन मेकेर हिक्सी कुर पने” दैमाक्त। मिन मेकोपुकीम मोपा चाक्गमे बाक्त। 21 मिन एलीशा मेको ब्वाक्कु बुक्तीकेम लशा, मेको हिक्सी ब्रुइश्शा, मेकोमी “परमप्रभु यावेमी मार दैत दैशा हना ‘गो एको ब्वाक्कु कली रिम्शो सेल्ता। मुल एकोमी मबेक्पाइक्ब, मशाम्पाइक्ब’ दैत” दैमाक्त। 22 मिन एलीशा आ देशो खोदेशो पा मेको ब्वाक्कु मुल सम्म रिम्शो बाक्ब।

एलीशा कली शाक्शो

23 मेको नोले एलीशा इर बेथेल लमाक्त। मिन लना लन बाक्मेनु, सहर डा हुल का वॉइश आल जाक्शा, मेको कली शाक्शा “ए तालु खुइले, इर लावो।

ए तालु खुइले, इर लावो” दे ग्रीमा बाक्त। 24 मिन मेकोम लेश्शा कोव्रशा, मेको आन कली परमप्रभु यावे आ नैमी सराप पाइक्मी बाक्त। मिन ब्वाकी रे छाउरी वां निक्शी गूशा, मेको आन दाते डा ४२ जना आन कली क्राइश्शा साइक्मी बाक्त। 25 मिन मेको मेकेर रे कारमेल डांडा लमाक्त। मिन नोले सामरीया लेम्माक्त।

येहोराम इस्राएल डा पिप दुम्शो

3 आहाब आ तौ येहोराम सामरीयाम इस्राएल डा पिप दुम्माक्त। मिन मेकोमी १२ बर्स सासन पवा बाक्त। मेना यहूदा डा पिप येहो-शाफात पिप दुम्शो १८ बर्स दुम्शो बाक्सा बाक्त। २ राजा १:१७ 2 मिन येहोराममी परमप्रभु यावे आ डोंइती मार मरिम्शो बाक्मे, मेको पवा बाक्त। तन्न मेको आ आंम आफोम पशो खोदेशो चहिं ममाइ। मेकोमी आ आफ आ सेल्शो बाल आ थामपुकी प्रेदा बाक्त। १ राजा १६:३२ 3 मो हना यो मेकोमी नेबात आ तौ येरोबामम इस्राएली आन कली पपाइश्शो पाप मप्रॉइनु, पवा बाक्त।

4 मोआब डा पिप मेशामी भेडा थुल्बाक्सा बाक्त। मिन मेकोमी गेना हना यो इस्राएल डा पिप कली लाख का पाठा नु लाख का सांड आन ऊन गेबाक्सा बाक्त। 5 तन्न आहाब बेक्म नोले मोआब डा पिपमी इस्राएल डा पिप कली मटिवा बाक्त। 6 मोपतीके पिप येहोराम सामरीया रे जाक्शा, इस्राएली नेल्ल आन कली खुप्तीमी बाक्त। 7 मिन मेकोमी यहूदा डा पिप येहो-शाफात कली “मोआब डा पिपम आं कली मटीयी। गे आं कली मोआब डा पिप नु लडाइ पचा कली वारच पाइक्नीनी” दे लोत्र कुरब मुर सोइक्तीमी बाक्त। मिन मेकोमी “गो वारच पाइनुड। गो गे नु बाक्नुड। आं मुर इन मुर नम। आं शारा नेल्ल इन के नम” दैमाक्त। १ राजा २२:४ 8 मिन येहो-शाफातमी “गो ते रे लडाइ तोय?” दे हिल्लो पवा बाक्त। मिन येहोराममी “एदोम डा गोरशो रागी रे” दैमाक्त।

9 मोपतीके इस्राएल डा पिप, यहूदा डा पिप नु एदोम डा पिप गारशा, लडाइ पथ लमा बाक्त। मिन मेकोपुकी ७ नाक्त सम्म गाक्मानु, लडाइ पाइब नु आन लाइश्शो बी ब्यफ आन कली तूतीक ब्वाक्कु मबाक्सा बाक्त। 10 मिन इस्राएल डा पिपमी “आबी, परमप्रभु यावेमी गो पिप सां इं कली मोआबी आन गुडमी जिम्मा गेचा कली एक चाक्शो बाक्त” दैमाक्त। 11 तन्न येहो-शाफातमी “मार एकेर परमप्रभु यावे आ लोत्र पाइब सुइ मबाक्नीमी? मेको रे पा गो परमप्रभु यावे कली हिल्लो पने चाप्नीक” दैमाक्त। मिन इस्राएल डा पिप आ गेय पाइब आन दाते डा काम “एलीया आ गुडम ब्वाक्कु लुक्ब शाफात आ तौ एलीशा एक बाक्ब” दैमाक्त। १ राजा २२:५, ७; १ राजा १९:१९-२१

12 मिन येहो-शाफातमी “परमप्रभु यावे आ लोत्र मेको नु बाक्ब” दैमाक्त। मोपतीके इस्राएल डा पिप, येहो-शाफात नु एदोम डा पिप एलीशा आ बाक्तीक बुम्मा बाक्त।

13 मिन एलीशाम इस्राएल डा पिप कली “गे नु गो इस के मार बाक्बा डा? इन आम आफ आस नोले दुम्ब लोत्र पाइब आन बाक्तीक लने” दैमाक्त। तन्न इस्राएल डा पिपमी मेको कली “ममाइ, परमप्रभु यावेमी गो पिप सांफा आंइ कली मोआबी आन गुडमी जिम्मा गेचा कली एक चाक्शो बाक्ब” दैमाक्त। 14 मिन एलीशामी “गो आं गेय पशो, मुर नेल्ल आन परमप्रभु यावे ब्रॉइशा बाक्शो खोदेशो पा यहूदा डा पिप येहो-शाफात कली मान मपशो नड हना, गो इन कली मसेत्तु वा, मारेइ मसुदु वा” दैमाक्त। १ राजा १८:१५ 15 मिन मेकोमी “तन्न मुल आं कली तार पाइश्शो ताप्तीके ताप्ब का चाक्कीन” दैमाक्त। मिन मेकोमी तार पाइश्शो ताप्तीक ताप्बमी तबानु, परमप्रभु यावे आ सक्तिम एलीशा कली सुमा बाक्त। १ सामुएल १६:१६ 16 मिन मेकोमी “परमप्रभु यावेमी ‘गे एको खोल्सा डा दिंमम दोम्ती नु शुश खाल्टा दोन’ ” दैमाक्त। 17 मारदे हना परमप्रभु यावेमी “गे फश गिवार नु रेउ यिथो मताइनीनी। मो हना यो एको दिंम ब्वाक्कुम ब्रीब। मिन गे, इन बी ब्यफ नु इन शाराम ब्वाक्कु तूनीनी। 18 एको परमप्रभु यावे आ डोंइती आइक्च गेय का ला बाक्ब। मेकोमी मोआबी आन कली यो इन गुडम गेब। 19 गेपुकीम गारो हिरशो सहर नेल्ल नु ठेयब दारशो सहर नेल्ल

ग्रानीनी। गेपुकीम रिम्शो रवा नेल्ल तिम्नीनी। मिनु ब्वाक्कु यितीक नेल्ल तेक्नीनी। मिनु रू नेल्लेम फुल्लु तेल्नीनी, देंशो बाक्ब" देंमाक्त। 20 मिनु आ दीसा सुनी चढेची ना छक लाक्वा डा पा एदोम रे ब्वाक्कु शाइश्शा पिचा गोवा बाक्त। मिनु रागी नेल्ल ब्वाक्कुम ब्रीमाक्त। गन्ती २८:४-५

21 मेना मोआबीपुकीम पिप नेल्ल गोपुकी नु लडाइ पथ जाक्शो बाक्नीम देंशो लोव्र नेन्मे बाक्त। मोपतीके या चलेने चाप्ब वोंइश मुर, ठिटा नु खाल्पा नेल्ल आन कली ब्रेत्ता बाक्त। मिनु मेको आन कली लडाइ पचा कली ठीक पामे बाक्त। 22 मिनु मेकोपुकी आ दीसा सुनी कना बोक्मा बाक्त। मिनु मेना ब्वाक्कुम नां टल्केशो तांइसीशो बाक्माक्त। मिनु मोआबीपुकीम मेको आन डॉइती डा ब्वाक्कु नांम हुश खोदेंशो लल तामे बाक्त। 23 मिनु मेकोपुकीम "एको दा हुश बाक्त। मेको पिपपुकी आंम आंमा लडाइ पा साइक्मुमा बाक्त, थांका। मुल ए मोआबी, मार मार रोइक्थ लय" देंमुमा बाक्त।

24 मिनु मोआबी इस्राएली आन बाक्तीकेम जाक्मानु, इस्राएली गूशा मेको आन कली मप्रोक्पदमे सम्म लडाइ तोव्रमे बाक्त। मिनु इस्राएलीम मोआबी आन कली लडाइ तोस डा तोस पामे बाक्त। 25 मिनु मेकोपुकीम मेको आन सहर प्रेशशा श्येत्थ पोक्गमे बाक्त। मिनु मुर नेल्लेमी मेको आन रूम फुल्लु का का ताइश्शा, तेइ तेइ फुल्लुम प्रिंदमे बाक्त। मेकोपुकीम ब्वाक्कु यितीक नेल्ल तेक्गमे बाक्त। मिनु रिम्शो रवा नेल्ल तिम्मे बाक्त। मेकोपुकीम किर-हारेसेथ सहर डा गारो ला हेंदमे बाक्त। तन्न मेको सहर कली हुरद आप्बपुकीम तेक्शा लडाइ तोव्रमे बाक्त।

26 मिनु मोआब डा पिपमी लडाइ ब्रुइनुड, दे तुइश्शा, तरवार शेब लडाइ पाइब ७ सहे जना आन कली लाइश्शा, एदोम डा पिप आ बाक्तीक ओव्रचा कली लमाक्त। तन्न मेकोमी मो पने मचबा बाक्त। 27 मिनु मेकोमी आ पा डा पिप दुम्ब आ डॉइती जरमेशो तौ कली गारोम क्योरशा चोशा चढेवा बाक्त। मिनु इस्राएली छक लाक्वा लेशशा आन रागी लमा बाक्त।

#### एलीशामी वारच पशो

4 मिनु परमप्रभु यावे आ लोव्र पाइब का आ मीश जाक्शा ठेयब सेंदा पा एलीशा कली "इन गेय पाइब आं वोंइश बेक्त। मेको परमप्रभु यावे कली मान पा हिंन बाक्त, दे तुइक्नीनी। तन्न मुल मेको आ जेर जशो मुर जाक्शा आं आल निक्शी आस कली वाइल सेल्चा कली लाइक्चशो बाक्ब" देंमाक्त। 2 मिनु एलीशामी मेको कली "गो इ कली मार पाइनुडा? इ खिंम मार बाक्बा? आं कली देनो" देंमाक्त। मिनु मेकोमी "गो, इन वाइलीम आं खिंम गर का तेल डा लाक्शा अर्को मारेइ मबाक्ब" देंमाक्त। १राजा १७:१२ 3 मिनु एलीशामी "इ नेक्था डा मुर आन खिं लशा, श्येत्थ गर का निक्शी ला ममाइ, शुश गर पुंइशा चाक्को। 4 मिनु गे खिं ओव्रशा, इ आल आस कली यो आगा ओंइशा, लाप्चो चोक्को। मिनु मेको गर डा तेल अर्को गर नेल्लेम कुर पावो। मिनु ब्रीशो गार याक्शा वोतो" देंमाक्त। 5 मिनु मेको मीश मुर एलीशा आ बाक्तीक रे गाक्माक्त। मिनु आ खिं जाक्दीश्शा, आ आल आस कली खिंङगा ओंइशा लाप्चो चोक्का बाक्त। मिनु आ चाक्शो श्येत्थ गर शुशेमी तेल प्रिंदा बाक्त। 6 मिनु मेको गर तेलम ब्रीमा बाक्त। मिनु मेकोमी आ तौ कली "अर्को गर चाक्को" देंमाक्त। मिनु मेकोमी "मुल श्येत्थ गार का यो मबा" देंमाक्त। मिनु तेल यिचा यो देक्माक्त। 7 मिनु मेको लशा, मेको परमप्रभु आ मुर कली शेंदा बाक्त। मिनु मेकोमी "लशा मेको तेल लेयडो। मिनु इ जेर थाप्तो। मिनु लीशो क्येट चहिं इन खिं डा मुर आन कली थुल्चा कली दुम्ब" दे मदा बाक्त।

#### एलीशा नु शुनेम डा मीश मुर

8 काबु नाक्ती एलीशा शुनेम सहर लमाक्त। मेकेर शुश शॉप पाइश्शो मीश मुर का बाक्माक्त। मिनु मेकोम एलीशा कली जथ तूथ ब्रेत्ता बाक्त। मिनु एलीशा मेको मेर गाक्मेनु, जथ तूथ ओव्रबाक्माक्त। यहोसु १९:१८ 9 मिनु काबु नाक्त मेको मीश मुरुमी आ वोंइश कली "एको गेना हना यो इं लां रे गाक्ब मुर थमा पा परमप्रभु आ मुर बाक्ब, दे गो तुइक्नुड। 10 गो तला तार थरपु हिरशा मेको कली आइक्च कोठा का सेल्शा गेय। मिनु मेको कोठाम

मेको कली खाट का, टेबल का, निक्तीक का नु बत्ती का वोइश्शा गेचा। मिनु मेको एक जाक्मेनु, मेकेर बाक्तीक पवल" देंमाक्त।

11 मिनु काबु नाक्त एलीशा जाक्शा, नाइक्चा कली मेको कोठाम लशा गोल्माक्त। 12 मिनु मेकोम आ गेय पाइब गेहाजी कली "मेको शुनेम सहर डा मीश मुर कली ब्रेश्शा कुतो" दे मदा बाक्त। मिनु मेकोम, मेको कली ब्रेत्ता बाक्त। मिनु मेको एलीशा आ डॉइती जाक्माक्त। 13 मिनु एलीशाम आ गेय पाइब कली "मेको कली 'गे आं पर्वम इश्का श्येत पाप्तीवी। मुल गो इ कली मार पने चाप्नुडा? मार, गो इ पर्वम पिप नु लडाइ पाइब आन ठेयब मुर नु मारेइ लोव्र पशा गेना?' दे मेको कली हिल्लो पावो" दे मदा बाक्त। मिनु मेको मीश मुरुमी "गो एक आं मुर आन दातेमीन बाक्नुड" देंमाक्त। 14 मिनु एलीशाम गेहाजी कली "मो हना मुल गो मेको कली मार पने चाप्नुडा?" देंमाक्त। मिनु गेहाजीम "मेको के तौ मबाक्ब। आ वोंइश खूशो दुम्शो बाक्ब" देंमाक्त। 15 मिनु एलीशामी "मेको कली ब्रेत्तो" देंमाक्त। मिनु गेहाजीम मेको कली ब्रेत्तानु, मेको लाप्चोम राम्माक्त। २राजा २:२५ 16 मिनु एलीशामी "अर्को बर्स इ थुकुम तौ का बाक्ब" देंमाक्त। मिनु मेकोमी "ममाइ, आं प्रभु, गे परमप्रभु आ मुर बाक्नीनी। मोपा इन वाइलीम आं कली जोल मपने" देंमाक्त। उत्पत्ती १८:१०,१४

17 मिनु मेको कोव्रज कुरशो दुम्शा, एलीशाम देंम ना तौ का थिमाक्त।

18 मिनु मेको आल कोल्शा, काबु आ आफ नु खेल्ला आन अन्न खुप्तीकेम लमाक्त। २राजा ४:१६ 19 मिनु मेकोमी आ आफ कली ठेयब सेंदा पा "आं पिया ब्वती, आं पिया ब्वती" देंमाक्त। मिनु आ आफोम आ गेय पाइब का कली "एको कली आ ममा आ बाक्तीक लतो" दे मदा बाक्त। लूका १०:४ 20 मिनु मेको गेय पाइब मुरुम मेको आल कली आ ममा आ बाक्तीक चाक्दीदा बाक्त। मिनु मेको आल आ ममा आ थुकुम नाक्ती उइक्थ दुम सम्म बाक्शा बेक्माक्त। 21 मिनु मेको मीश मुरुमी मेको आल कली इर परमप्रभु आ मुर आ ब्राख्येम लाइश्शा खोल्शा वोइश्शा लाप्चो चोक्का गूशा गाक्माक्त। 22 मिनु मेकोमी आ वोंइश कली ब्रेश्शा "आं कली गेय पाइब का नु गधा का सोइक्तीनी। मिनु गो रीब पा परमप्रभु आ मुर बाक्तीक लशा लेत्नुड" देंमाक्त। 23 मिनु आ वोंइशेमी "मुलाक्त मारदे लचा माल्दे? औसी यो ममाइ, नाइक्तीक नाक्त यो ममाइ" दे मदा बाक्त। मिनु मेकोमी "लचा माल्नुड" देंमाक्त। 24 मिनु मेकोमी गधाम लगम पाइश्शा, आ गेय पाइब कली "गो नाइक्तो मर्देडा सम्म खुलो देश मपावो" दे मदा बाक्त। 25 मोपा मेको गाक्शा, परमप्रभु आ मुर बाक्तीके कारमेल डांडाम जाक्माक्त। मिनु परमप्रभु आ मुरुम मेको कली डोन रेन तशा आ गेय पाइब गेहाजी कली "कोव्रड, दे मेरे जाक्ब शुनेम सहर डा मीश मुर बाक्ब। 26 गे दोरशा लशा मेरे कली 'मार नेल्ल रिम्शोन बाक्बा? मार, इ वोंइश रिम्शोन बाक्मे? इ आल रिम्शोन बाक्मे?' दे हिल्लो पावो" दे मदा बाक्त। मिनु मेकोम हिल्लो पवानु "नेल्ल रिम्शोन बाक्नीम" देंमाक्त। 27 मिनु मेको परमप्रभु आ मुर बाक्तीक डांडाम जाक्शा, एलीशा आ खोइल मुबा बाक्त। मिनु गेहाजी मेको कली फ्राचा कली जाक्मेनु, परमप्रभु आ मुरुम एको कली "मपावो, एको कली ठेयब श्येत दुम्शो बाक्ब। तन्न परमप्रभु यावेमी मेको लोव्र खूइश्शा, आं कली मर्शेदी" देंमाक्त। 28 मिनु मेको मीश मुरुमी "ए आं प्रभु, मार गो तौ पुंइशो नडा डा? आं कली आस कोंइशा मोशा मसेल्पीनी देंशा पुंइशो मनडा डा?" देंमाक्त। 29 मिनु एलीशाम गेहाजी कली "इ किप्शुर किम्सो। एको आं कोक्के कुरशा दोरशा लावो। लांम सुइ गुम्तीवी हना, मेकोपुकी नु लोव्र पचा कली मदिको। सुइमी इ कली लोव्र पाप्तेक्म हना, मेको आन कली लोव्र मलेत्तो। एको आं कोक्के लाइश्शा, मेको आल आ कुलुम वोतो" दे मदा बाक्त। 30 तन्न मेको आल आ ममामी "परमप्रभु यावे ब्रोंइशा बाक्शो खोदेंशो पा नु इन ब्रोंइशा बाक्शो खोदेंशो पा गो इन कली मप्रोंइनुड" देंमाक्त। मोपतीके एलीशा बोक्शा, मेको मीश मुर आ नोले खोदा बाक्त। 31 गेहाजी चहिं डॉइती लशा मेको कोक्के मेको आल आ कुलुम वोदा बाक्त। तन्न मेको मारेइ मद्रुम्माक्त। मोपतीके एलीशा कली गुम्चा कली गेहाजी लेम्माक्त। मिनु मेको कली "मेको आल मसेस" देंमाक्त। 32 मिनु एलीशा खिं जाक्मेनु, मेको आल कली आ ब्राख्येम बेक्शो थिदा बाक्त। 33 मिनु एलीशा आगा ओव्रशा लाप्चो चोक्का, परमप्रभु यावे कली पुना बाक्त। प्रेरित ९:४० 34 मेको नोले मेको ब्राख्येम डोइश्शा, मेको आल



आ शोव्रम आ शोव्र, मेको आ मिक्चम आ मिक्ची नु मेको आ गुइम आ गुइ वोइश्शा, मेको आल तार गोल्मावक्त। मिनु मेको आल होना होन लमावक्त। १ राजा १७:२१<sup>35</sup> मिनु एलीशा बोक्शा कोठाम एर ऑथ पवा बावक्त। मिनु मेको लेंशा खाट डोइश्शा मेको आल कली कोव्रडानु, मेको आलम ७ खेयप हाक्च पा, आ मिक्च पाक्गा बावक्त।<sup>36</sup> मिनु एलीशाम गेहाजी कली “मेको शुनेम सहर डा मीश मुर कली ब्रेश्शा, एक चाक्को” दे मदा बावक्त। मिनु मेकोमी मेको कली ब्रेत्ता बावक्त। मिनु मेको मीश मुर जाक्मेनु, एलीशामी मेको कली “इ तौ लतो” दे मदा बावक्त।<sup>37</sup> मिनु मेको आगा ओव्रशा एलीशा आ खोइलीम खप सम्मन बाम्मावक्त। मिनु मेको नोले आ तौ लाइश्शा गूशा लमावक्त।

### बोसुम ओश्वेर बाक्शो

<sup>38</sup> मिनु एलीशा लेशशा गिल्गाल लमावक्त। मेना मेको रागीम ठेयब अन्काल दुश्शो बाक्मावक्त। परमप्रभु यावे आ लोव्र पाइब आन हुल का मेको आ डोंइती बाक्मा बावक्त। मिनु मेकोम आ गेय पाइब कली “चुप्लुम ठेयब बोस का काशा एको परमप्रभु यावे आ लोव्र पाइब आन हुल आन कली खोले क्येवो” दे मदा बावक्त।<sup>39</sup> मेको आन दाते डा का चहिं गिग खाइ माल्थ रू मेर लमावक्त। मिनु ब्वाकी डा वोबीस थिदा बावक्त। मिनु मेकोम मेको सेक्शा पोल्टो का पा चाक्गा बावक्त। मेकोमी मेको मार बाक्मे, दे मतुइक्थु प्रेक्शा खोलेम सुप्ता बावक्त।<sup>40</sup> मिनु मुरपुकीम जामेक्ल, दे मेको तेम्शा ख्रेत्तीमी बावक्त। मिनु मेकोपुकीम जशा, ठेयब सेंदा पा “ए परमप्रभु आ मुर, एको बोसुम दा ओश्वेर कका बावक्त” देंमा बावक्त। मिनु मेकोपुकीम मेको जने मचाप्मे बावक्त।<sup>41</sup> मिनु एलीशाम “इक्का खोइ फस चाक्कीन” देंमावक्त। मिनु मेकोम मेको फस बोसुम कुर पवा बावक्त। मिनु मेकोमी “मुल मेको आन कली एको जचा गेने” देंमावक्त। मेको नोले मेको बोसुम ओश्वेर मबाक्मावक्त।

### सहे का मुर आन कली थुल्शो

<sup>42</sup> मिनु बाल-शालीशा डा मुर काम परमप्रभु आ मुर कली आ डोंइती मीशो क्योव्रज के २० ओटा शोब्ले नु नक मीशो अन्न चाक्शा जाक्मावक्त। मिनु एलीशाम “एको मुर आन कली जचा गेने” देंमावक्त। मत्ती १५:३३, ३७; मत्ती १६:९-१०; यूहन्ना ६:९<sup>43</sup> मिनु मेको आ गेय पाइबमी “गो एको सहे का मुर आन कली जचा थोव्रक दोपा जचा गेनुडमी” देंमावक्त। मिनु मेकोमी लेंशा “एको मुर आन कली जचा गेमी। मारदे हना परमप्रभु यावेम ‘मेको नेल्लेम जशा यो, इक्का हेंब’ देंशो बाक्ब” देंमावक्त।<sup>44</sup> मिनु मेकोमी मुर आन डोंइती ख्रेत्तीमी बावक्त। मिनु परमप्रभु यावे आ देंशो खोदेंशो पा, मेको मुरपुकीम जशा यो हेंमावक्त।

### नामान कोव्र पशो रे साशो

<sup>5</sup> नामान अराम डा पिप आ लडाइ पाइब आन ठेयब मुर बाक्मावक्त। मेको आ होव्रपम मेको कली शुश दाक्बाक्मावक्त। मेको शुश हिक्सीशो मुर का बाक्मावक्त। मारदे हना मेकोम पतीकेन परमप्रभु यावेम अराम कली ग्रापाइश्शो बाक्मावक्त। मिनु मेको थम सक्ति पाइश्शो लडाइ पाइब मुर यो बाक्मावक्त। तन्न मेको कोव्र पशो बाक्मावक्त।<sup>2</sup> मिनु अराम रे लडाइ पाइबपुकी लशा इस्राएल डा मीश आल का कली ग्याइश्शा चाक्शो बाक्मा बावक्त। मिनु मेको नामान आ मीश आ गेय पाइब दुश्शो बाक्मावक्त।<sup>3</sup> मिनु मेकोमी आ होव्रपोक्म कली “आं होव्रप, आं प्रभुमी सामरीयाम बाक्ब परमप्रभु यावे आ लोव्र पाइब कली गुश्शो हना, मेकोमी आ कोव्र सापद वा” देंमावक्त।<sup>4</sup> मिनु नामान आ प्रभु पिप बाक्तीक लशा, मेको इस्राएल रे चाक्शो मीश आल आ देंशो लोव्र नेल्ल नेंपदा बावक्त।<sup>5</sup> मिनु अराम डा पिपमी “दुम्ब, गे लावो। गो इस्राएल डा पिप कली चिठी का ब्रेक्नुड” देंमावक्त। मोपतीके नामान १० टलेन्ट चांदी, ६ हजार शेकेल सुन नु १० जोर फेक्तीक वा कुरशा लमावक्त। टलेन्ट का ३४ किलो बाक्ब। शेकेल का ११.५ ग्राम बाक्ब।<sup>6</sup> मिनु मेकोमी मेको चिठी इस्राएल डा पिप आ बाक्तीक चाक्गा बावक्त। मेको चिठीम इस्राएल डा पिप कली “गो एको चिठी नु आं गेय पाइब ठेयब मुर नामान कली इन बाक्तीक सोइक्ताक्ड। गे

मेको आ कोव्र सापतीन” दे ब्रेक्शो बाक्मावक्त।<sup>7</sup> मिनु इस्राएल डा पिपम मेको चिठी पढेवा चोटीन आ वा खाक्शा “मार, गो परमप्रभु नडा डा? मिनु बेक्पाइक्ने नु सेंपाइक्ने चाप्नुडा? मेको मुरुम मारदे एको मुर कली आ कोव्र सापाइक्का कली आं बाक्तीक सोइक्ता? मेकोम गो नु खुञ्जी माल्लु” देंमावक्त।

<sup>8</sup> मिनु इस्राएल डा पिपमी आ वा खाक्शो लोव्र परमप्रभु आ मुर एलीशाम नेना बावक्त। मिनु मेकोमी पिप कली “गे मारदे इन वा खाक्नी? मेको मुर कली एक आं बाक्तीक सोइक्तीन। मिनु मेकोमी इस्राएलमी परमप्रभु यावे आ लोव्र पाइब मुर का बाक्ब, दे तुइक्ब” दे लोव्र कुरब मुर सोइक्ता बावक्त।<sup>9</sup> मोपतीके नामान आ बग्गी नु शारापुकी चाक्शा जाक्मावक्त। मिनु एलीशा आ खिं आ लाप्चोमी राम्मावक्त।<sup>10</sup> मिनु एलीशाम मेको कली “गे लशा, यर्दन खोलाम ७ खेयप चिक्सीचा माल्लेवे। मिनु इन श्ये डोंइती डा खोदेंशो दुम्ब। मिनु गे ग्रांगा मदिशो दुम्नीनी” देंथ मुर का कली सोइक्ता बावक्त।<sup>11</sup> तन्न नामान गाइश्शा “गो मेको गूशा राप्शा, थमा पा, परमप्रभु यावे, आ परमप्रभु आ नें थिशा पुंइशा, आं गार तार आ गुइ वोइश्शा, आं कोव्र सापाइक्ब, दे मिश्शो नड।<sup>12</sup> मार, आबाना, फारपार नु दमस्कस डा खोला मेर डा ब्वाक्कु इस्राएल डा ब्वाक्कु नेल्ल क्येडा रिम्शो ममाइ डा? मार, गो मेकेर डा ब्वाक्कुम चिक्शा साने मचाप्नुडा डा?” दे गाइश्शा गाक्मावक्त।<sup>13</sup> तन्न नामान आ गेय पाइबपुकी जाक्शा मेको कली “ए, आंइ आफ, मार परमप्रभु यावे आ लोव्र पाइबमी इन कली ‘श्येत डा गेय का पने’ देंशो हना, गे मेको मपाइनीनी डा? मेकोमी इन कली ‘ब्वाक्कुम चिक्शा ग्रांगा मदिशो दुम्नीन’ देंमेनु, मेको मारदे मपाइनीनी?” देंमा बावक्त।<sup>14</sup> मोपतीके मेको उइ ब्रुम्मावक्त। मिनु परमप्रभु आ मुरुम देंशो खोदेंशो पा, यर्दन खोलाम ७ खेयप चिक्से बावक्त। मिनु मेको आ श्ये नु कुशुल डोंइती डा खोदेंशो पा ठिटा आन के खोदेंशो दुम्मावक्त। मिनु मेको ग्रांगा मदिशो दुम्मावक्त। लेवी १४:७-९; लूका ४:२७

<sup>15</sup> मिनु मेको नु आ मुर नेल्ल लेशशा परमप्रभु आ मुर बाक्तीके जाक्मा बावक्त। मिनु मेको एलीशा आ डोंइती राप्शा “इस्राएलम डा लाक्शा, अर्को तेकोइ रागीम परमप्रभु मबाक्मावक्त। मुल गो तुइक्ताक्ड। इन गेय पाइब आं गुइ रे कोसेली का ताक्कीन” देंमावक्त। २ राजा ५:५<sup>16</sup> मिनु परमप्रभु यावे आ लोव्र पाइबमी “गो आ गेय पशो, परमप्रभु यावे ब्रोंइशा बाक्शो खोदेंशो पा, गो मारेइ मब्राइनुड” देंमावक्त। नामानम मेको कली ताक्कीन कि ताक्कीन देंमावक्त। मो हना यो मेको मबिस्से बावक्त।<sup>17</sup> मिनु नामानमी “गे एको मताक्नीनी हना, इन गेय पाइब, आं कली भारी निक्शी गधाम कुरतीक खप लाइक्का गेयीनी। मारदे हना मुल गो इन गेय पाइबम, परमप्रभु यावे कली डा लाक्शा अरु तेकोइ देवी देवता आन कली चोशा चढ्ढेतीक नु अरु चढ्ढेतीक मचढ्ढेनुड।<sup>18</sup> तन्न एको गेय काम ला परमप्रभु यावेम इन गेय पाइब कली माफ गेवल। मेको आं होव्रप रिम्मोन कली पूजा पथ लमेनु, आं गुइमी ग्याइक्पाइश्शा आगा ओव्रब। मिनु मेकोमी मेकेर पूजा पवानु, गो यो बाप्चा माल्लुड। मोपतीके मेको आ पर्वम परमप्रभु यावेमी आ गेय पाइब, आं कली माफ गेयील” देंमावक्त।<sup>19</sup> मेको नोले एलीशाम मेको कली “इ थुं नाइश्शा लावो” दे मदा बावक्त। मिनु नामान गाक्शा इक्का आइक्ची जाक्दीम्मेनु,<sup>20</sup> परमप्रभु आ मुर एलीशा आ गेय पाइब गेहाजी आ थुंमी “एको आं होव्रपमी दा एको अरामी नामान आ चाक्शो मारेइ मब्रथु लेशशा कका सोइक्ताक्व। मुल गो परमप्रभु यावे ब्रोंइशा बाक्शो खोदेंशो पा, गो मेको आ नोले लशा मारेइ थोव्रक ताक्नुड” दे मिम्ता बावक्त।<sup>21</sup> मोपतीके गेहाजी नामान आ नोले दोरशा लमावक्त। मिनु नामानम मेको कली आ नोनोले दोरशा पिशो तवा बावक्त। मिनु मेको कली गुम्चा कली नामान आ बग्गी रे तोइश्शा “मार नेल्ल ठीक बाक्बा?” दे हिल्लो पवा बावक्त।<sup>22</sup> मिनु गेहाजीम “मारेइ मदुम। तन्न आं होव्रपमी आं कली एफ्राइम पहाड डा परमप्रभु यावे आ लोव्र पाइब आन हुल रे ठिटा निक्शी जाक्ताक्स। मिनु शिशी पा मेको आस कली ‘टलेन्ट का चांदी नु जोर निक्शी वा गेने’ देंथ सोइक्ताक्वी” देंमावक्त। टलेन्ट का ३४ किलो बाक्ब।<sup>23</sup> मिनु नामानमी मेको कली “थमा पा गे टलेन्ट निक्शी लतीन” देंमावक्त। मिनु नामानमी गेहाजी कली “लतीन कि लतीन” दे मदा बावक्त। मिनु मेको कली टलेन्ट निक्शी चांदी नु जोर निक्शी वा थैलो निक्शीम कुर पा, फ्रेंशा गेवा बावक्त। मेकोमी

मेको आ गेय पाइब निक्शी आस कली मेको कुरपाइश्शा गेहाजी कली चोव्रथ सोइक्ता बाक्त। *टलेन्ट का ३४ किलो बाक्ब।* <sup>24</sup> मिनू मेको गेहाजी डांडाम जाक्शा, मेको गेय पाइब आस गुइ रे ताक्शो थोव्रक आ खिम वोदा बाक्त। मिनू मेको आस कली चहिं सोइक्तीम्सी बाक्त। मिनू मेको गाक्सा बाक्त।

<sup>25</sup> मिनू मेको आगा लशा, आ होव्रप एलीशा आ डोंइती राम्माक्त। मिनू एलीशामी “गेहाजी गे ते लवे” दे हिल्लो पवा बाक्त। मिनू गेहाजीम “इन गेय पाइब, गो तेइ मलशो बाक्नुड” देंमाक्त। <sup>26</sup> तन्न एलीशाम मेको कली “मार, मेको मुर आ बग्गी रे तोइश्शा इ कली ग्रुम्थ पिमेनु, आं सोक्त गे नु मबाक्म डा? मुल क्येट, वा, तेल रवा, अडगुर रू, भेडा, ब्यफ नु वाइलीम वाइलपुकी आंम के सेल्लिक ना बाक्बा डा? <sup>27</sup> मुल नामान आ कोव्र पतीक रोइ गे नु इ चच युइ इन खिम गेना हना यो खोक्शा लीब” दे मदा बाक्त। मिनू गेहाजी मेको आ डोंइती रे लमाक्त। मिनू मेको फुं खोदेंशो पा बुश पा कोव्र मुमाक्त।

### खा ब्वाक्कु तार गूशो

**6** परमप्रभु यावे आ लोव्र पाइब आन हुल काम एलीशा कली “एको इं बाक्शो खिं इं कली थम आइक्च बाक्ब। <sup>2</sup> मुल गो यर्दन खोला आ नेक्था लय। मिनू मेकेर नेल्लेम शी चाक्शा खिं का सेल्सय” देंमा बाक्त। मिनू एलीशाम “दुम्ब लने” देंमाक्त। <sup>3</sup> मिनू मेको आन दाते डा काम “गे यो इन गेय पाइबपुकी नु लाइनीनी?” देंमाक्त। मिनू एलीशाम “दुम्ब गो यो लाइनुड” देंमाक्त। <sup>4</sup> मिनू एलीशा मेकोपुकी नु लमाक्त। मिनू मेकोपुकी यर्दन खोला जाक्दीश्शा रवा तिम्चा गोव्रमे बाक्त। <sup>5</sup> मिनू मुर काम रवा तिम्ना तिम्न पवानु, आ खा बुइश्शा ब्वाक्कुम ओव्रमाक्त। मिनू मेको ठेयब सेंदा पा “आबी, आं प्रभु, मेको दा पुंइशा चाक्शो खा कका बाक्ब” देंमाक्त। <sup>6</sup> मिनू मेको परमप्रभु आ मुरुम “मेको ते दोक्म” दे हिल्लो पवा बाक्त। मिनू मेकोम एकेर दोक्त, दे कोंइदा बाक्त। मिनू एलीशाम मेकेर शी का खोइश्शा ब्वारदा बाक्त। मिनू मेको खा ब्वाक्कु तार गूमाक्त। <sup>7</sup> मिनू एलीशाम “शोल्शा लतो” देंमाक्त। मिनू मेको मुरुम आ गुइ दिंशा शोल्शा लदा बाक्त।

### एलीशाम मिक्च मताइब सेल्शो

<sup>8</sup> काले अराम डा पिप इस्राएल नु लडाइ पना पन बाक्माक्त। मिनू मेकोम आ गेय पाइब लडाइ पाइब आन ठेयब मुरपुकी नु सल्ला पा “गो आं बाक्तीक मेकेर सेल्नुड” देंमाक्त। <sup>9</sup> मिनू परमप्रभु आ मुरुम इस्राएल डा पिप कली “मेकेर रे गाक्वी ना होस पा गाक्कीन। मारदे हना अरामी मेकेर लशो बाक्नीम” देंमाक्त। <sup>10</sup> मोपतीके इस्राएल डा पिपमी आ मुर आन कली मेकेर गाक्नीनु “होस पा गाक्कीन” दे का निक्शी खेयप हिंच कोंइदा बाक्त। मिनू मेकोपुकी होस पा बाक्मा बाक्त।

<sup>11</sup> मोपतीके अराम डा पिपमी “इस्राएल डा पिपम इं बाक्तीक दोपा तुइक्ता” दे थाम्पा गाइक्ता बाक्त। मिनू मेकोम आ लडाइ पाइब आन ठेयब मुर आन कली ब्रेश्शा “गे इन दाते डा सुमी चहिं इस्राएल डा पिप कली लोव्र शेंदीनी? लो, देनीन” देंमाक्त। <sup>12</sup> मिनू मेको लडाइ पाइब आन ठेयब मुर आन दाते डा काम “आं प्रभु पिप, आं प्रभु, गो सुइम मो मपक। तन्न इस्राएल डा परमप्रभु यावे आ लोव्र पाइब एलीशाम गे इन इप्तीक कोठाम ब्वाक्शो यो शेंब” देंमाक्त। <sup>13</sup> मिनू पिपमी “मेको ते बाक्मे माल्शा तुइश्शा जाक्कीन। मिनू गो मुर आन कली सोइश्शा, मेको कली ग्याइक्पाइक्नुड” देंमाक्त। मिनू मेकोम “मेको दोथान सहरम बाक्ब” देंमाक्त। <sup>14</sup> मिनू पिपम शारा नु बग्गी पाइश्शो ठेयब सक्ति पाइश्शो लडाइ पाइब आन हुल का मेक सोइक्ता बाक्त। मिनू मेकोपुकी नाक्दो लशा, मेको सहर पुम्दमे बाक्त।

<sup>15</sup> मिनू परमप्रभु आ मुर आ गेय पाइब सुनी कना बोक्शा लाडगा गूमाक्त। मिनू मेना शारा नु बग्गी पाइश्शो लडाइ पाइब आन हुलमी सहर पुश्शो तवा बाक्त। मिनू मेको गेय पाइब लशा आ होव्रप कली “आबी, आं प्रभु, मुल मार पय” देंमाक्त। <sup>16</sup> मिनू मेको परमप्रभु यावे आ लोव्र पाइबमी “महिनी। मेकोपुकी नु बाक्शो आन क्येडा गो नु बाक्शो शुश बाक्नीम” देंमाक्त। <sup>17</sup> मिनू एलीशामी “परमप्रभु यावे, एको आ मिक्च ताइब सेलीन।

मिनू एकोम तवल” दे पुना बाक्त। मिनू परमप्रभु यावेम मेको गेय पाइब आ मिक्च ताइब सेला बाक्त। मिनू मेकोमी एलीशा आ एर ऑथ डा डांडा नेल्लेम मी ब्रशो शारा नु बग्गीम ब्रीशो तवा बाक्त। *यहोसु ५:१३* <sup>18</sup> मिनू अरामीपुकी तोइश्शा मेको आ बाक्तीक पिमानु, एलीशाम परमप्रभु यावे कली “एको मुर आन कली मिक्च मताइब सेलीन” दे पुना बाक्त। मिनू एलीशाम पुंइशो खोदेंशो पा, परमप्रभु यावेम मेको आन कली मिक्च मताइब सेल्मी बाक्त। *उत्पत्ती १९:११* <sup>19</sup> मिनू एलीशाम मेको आन कली “एको लां ममाइ। एको सहर यो ममाइ। गे आं नोले खोइय्यीनी। मिनू गो इन माल्शो मुर आ बाक्तीक चाक्दील्ननी” दे माइक्मी बाक्त। मिनू एलीशाम मेको आन कली सामरीयाम चाक्दीम्मी बाक्त।

<sup>20</sup> मिनू मेकोपुकी सामरीया सहरम जाक्दीम्मा नोले एलीशाम “ए परमप्रभु यावे, एको मुर आन कली मिक्च ताइब सेलीन। मिनू एकोपुकीम लेंशा तने चाप्मेक्ल” दे पुना बाक्त। मिनू परमप्रभु यावेमी मेको आन कली मिक्च ताइब सेल्मी बाक्त। मिनू मेकोपुकीम कोव्रडमेनु, सामरीया सहरम बाक्शो तामे बाक्त। <sup>21</sup> मिनू इस्राएल डा पिपमी मेको आन कली तशा, एलीशा कली “आं आफ, मार गो एको आन कली सदुमी। एको आन कली सदुमी?” दे हिल्लो पवा बाक्त। <sup>22</sup> मिनू एलीशाम “मेको आन कली मसतीन। मार, गे आंमा इन लिब्रा नु तरवारम ग्याइश्शो आन कली साइक्ने चाप्नीनी डा? गे एको मुर आन कली जचा तूचा गेने। मिनू एकोपुकी जशा तूशा आन होव्रप बाक्तीक लमल” देंमाक्त। *लेवी १९:१८; २इतिहास २८:९-१५; हितोपदेस २५:२१-२२* <sup>23</sup> मिनू पिपमी मेको आन कली ठेयब भोज का सेल्शा थुल्मी बाक्त। मिनू मेकोपुकी जशा तूशा पामे नोले मेको आन कली आन होव्रप बाक्तीक सोइक्तीमी बाक्त। मिनू मेको आन होव्रप बाक्तीक लेम्मा बाक्त। मेना रे अरामीपुकीमी इस्राएली आन कली लडाइ तोतीक नु मार मार रोइक्तीक मपामे बाक्त।

### सामरीयाम अन्काल दुम्शो

<sup>24</sup> तन्न इक्का नाक्त नोले अराम डा पिप बेन-हादादमी आ लडाइ पाइब आन कली खुप्शा सामरीयाम सोइश्शा, मेको कली एर ऑथ नेल्ल रे पुम्पदा बाक्त। <sup>25</sup> मिनू मोपा पुम्दमे नोले मेको सहरम थम ठेयब अन्काल दुम्माक्त। मेकेर गधा आ पिया का कली ८० शेकेल चांदी नु काब का डा ४ भाग, डा भाग का डुकुर आन ख्री कली ५ शेकेल चांदी थाप्चा माल्दा बाक्त। *शेकेल का ११.५ ग्राम बाक्ब। काब का १.२ लिटर खोदेंशो पुक्तीके बाक्ब। काब डा ४ भाग डा भाग का, १/४ लिटर खोदेंशो बाक्ब।* <sup>26</sup> काबु नाक्त इस्राएल डा पिप सहर डा गारो तार हिरसे बाक्त। मिनू मीश मुर काम पिप कली “आं प्रभु पिप, आं प्रभु आं कली वारच पाइय्यीनी” देंमाक्त। <sup>27</sup> मिनू पिपमी “परमप्रभु यावेमी इ कली वारच पवल। गो ते रे वारच पाइक्नना? अन्न तुप्तीक रे देय अडगुर ख्राक्तीक रे?” देंमाक्त। <sup>28</sup> मिनू पिपम मेको कली “इ कली मार दुम?” दे मदा बाक्त। मिनू मेको मीश मुरुम “एको मीश मुरुम आं कली ‘मुलाक्ती इ तौ ब्वचा योक्को। मिनू दीसा चहिं आं तौ ब्वय’ देंत। *ब्यवस्था २८:५३* <sup>29</sup> मिनू गो आं तौ कली ब्वाइतक। मिनू गो एको कली ‘मुलाक्त ब्वचा कली इ तौ चाक्को’ दे माइक्ता। तन्न एकोम आ तौ खुइश्शा मगुंइद” देंमाक्त। <sup>30</sup> मिनू पिपमी मेको मीश मुर आ लोव्र नेंशा, आ वा खाक्गा बाक्त। मुरपुकीम मेको कली आगाम अरन्डी फेक्शो तामे बाक्त। मारदे हना मेको सहर डा गारो तार गाक्शो बाक्माक्त। <sup>31</sup> मिनू मेकोम “मुलाक्त गो शाफात आ तौ एलीशा आ पिया मख्रोइक्ता हना, परमप्रभुम सजाइ ला ममाइ, मेको क्येडा यो शुश पाइय्यील” देंमाक्त। <sup>32</sup> मिनू पिपम आ लोव्र कुरब मुर का कली एलीशा आ बाक्तीक सोइक्ता बाक्त। मेना एलीशा खाल्पापुकी नु आ खिम बाक्शो बाक्माक्त। तन्न मेको लोव्र कुरब मुर जाक्चा क्येडा डोंइती एलीशाम मेको खाल्पा आन कली “मेको मुर साइक्बम आं पिया खोइक्पाइक्चा कली मुर सोइश्शो गे मतनी? कोव्रडीन, मेको आ लोव्र कुरब जाक्मेनु, लाप्चो चोक्कीन। मिनू थम बोल्यो पा नेप्शा बाक्कीन। मार मेको आ होव्रप मेको आ नोनोले मपिशो बाक्बा डा?” देंमाक्त। <sup>33</sup> मिनू एलीशाम मेकोपुकी नु लोव्र पना पन बाक्मेनु मेको लोव्र कुरब मुर जाक्माक्त। मिनू पिपमी “एको खतम दुम्तीक परमप्रभु यावे रे

जावशो बाक्ब। मुल गो मारदे परमप्रभु यावे कली आस पा बाक्नुडा?"  
देमाक्त। *आमोस ३:६*

जचा थोवक तांडसीब देंशो

7 एलीशाम "परमप्रभु यावे आ लोव्र नेनीन। परमप्रभु यावेमी 'दीसा सामरीया डा ठेयब लाचो आ डोंइती शेकेल का चांदीमी सेआह माइशो पुक्तीक का रिश्शो फस नु शेकेल का चांदीम पुक्तीक निक्शी क्योव्रज लेयसीब' देंशो बाक्ब" देमाक्त। *शेकेल का ११.५ ग्राम खोदेंशो बाक्ब। सेआह का आगा ७.३ लिटर रिक्शो ठेयब पाथी खोदेंशो पुक्तीके बाक्ब। २राजा ७:१६-१९* 2 मिनू पिप कली कुक्ब लडाइ पाइब आन ठेयब मुरुम परमप्रभु आ मुर कली "परमप्रभु यावेमी आ सरीड डा झेल नेल्ल रोक्नु हना यो, मोदेंशो गेनायो दुम्ने मचाब्ब" देमाक्त। मिनू एलीशाम "गे मेको इ मिक्चीमीन ताइनेवे। तन्न जचा चहिं मताइक्नेवे" देमाक्त।

सहर पुम्चा प्रॉइशो

3 मिनू मेको सहर डा लाचो आ डोंइती ४ जना कोव्र पशो मुर बाक्मा बाक्त। मिनू मेकोपुकीम "गो मबेक्या सम्म मारदे एकेर बाक्नया? लेवी १३:४६ 4 गो सहर ओव्रतय हना, मेकेर डा अन्कालम बेक्नय। एक उड बाक्तय हना यो, शोव्रलुम बेक्नय। मोपतीके गो अरामी आन लडाइ पाइब आन बाक्तीकेम लशा, जिम्मा गेसय। मिनू मेकोपुकीम इ कली प्रॉइतेक्म हना, गो ब्रॉइनय। साइक्तेक्म हना, यो बेक्य" देमुमा बाक्त। 5 मिनू मेकोपुकी नाक्नाक्दो बोक्शा अरामी आन बाक्तीक गे लमा बाक्त। मिनू मेकोपुकी अरामी आन बाक्तीक आ नेक्था जाक्मानु, सुइ आन कली मतामे बाक्त। 6 मारदे हना परमप्रभुमी अरामी आन कली शारा बग्गी नु ठेयब लडाइ पाइब हुल आन रेयके नेंपाइशो बाक्माक्त। मिनू मेकोपुकीम आंम आंमा "इसाएल डा पिपम गोपुकी नु लडाइ पचा कली हिती नु इजीप्त डा पिप कली क्येट थाप्था ब्रेतीमी बाक्त, थांका" देमुमा बाक्त। *२राजा १९:७* 7 मोपतीक मेकोपुकीम आन बाक्तीक ताम्बु यो मो हेंथे पा प्रॉइशा, शारा नु गधा यो प्रॉइशा, आन गिंम पॉइचा कली प्रोक्मा बाक्त। 8 मिनू मेको कोव्र पशो मुर अरामी आन बाक्तीक जाक्दीम्मा बाक्त। मिनू मेकोपुकी ताम्बु काम ओव्रशा जशा तूशा बाक्मा बाक्त। मिनू सुन चांदी वापुकी एर ऑथ लाइशशा खुइशशा वोदमे बाक्त। मेको नोले मेकोपुकी लेंशा अर्को बाक्तीकेम ओव्रमा बाक्त। मिनू मार मार लाइशशा खुइशशा वोदमे बाक्त।

9 मिनू मेकोपुकी आंम आंमा "गो मरिश्शो गेय पाइतय। मुलाक्ती रिश्शो लोव्र नेंपाइक्तीक नाक्त बाक्ब। गोपुकी चहिं सिक्सी पा बाक्शो बाक्नय। दीसा सम्म गो ओं पा बाक्तय हना, दोस ताइनय। मुल गो रीब पा लशा, पिप आ दरवारम एको लोव्र नेंपाइय्य" देमुमा बाक्त। 10 मिनू मेकोपुकी लशा, सहर डा ठेयब लाचो खाल पाइब आन कली ब्रेशशा "गोपुकी अरामी आन बाक्तीक लाइतक। मिनू मेकेर मुर का यो मतक। मारेइ चाल चुल मबा। शारा नु गधापुकी पाइक्स डा पाइक्स बाक्तेक्म। मिनू मुर आन ताम्बु यो मो प्रॉइशो बाक्तेक्म" देमा बाक्त। 11 मिनू लाचो खाल पाइबपुकीम ठेयब सेंदा पा मेको लोव्र पिप आ खिंम नेंपदमे बाक्त। 12 मिनू पिप नाक्दो कना बोक्शा, आ गेय पाइब मुर आन कली "गो इन कली लोव्र का पाइनुड। अरामीपुकीम गो इ कली मार पामे? गो मेको इन कली देंनुड। गोपुकी शोव्रलु बाक्शो बाक्नय, दे मेकोपुकीम तुइशो बाक्नीम। मोदेंशो मिश्शा आन बाक्तीक प्रॉइशा, एर ऑथ लशा खुइशशा बाक्शो बाक्नीम। मेकोपुकीम 'गोपुकी थमा पा गूनीम। मिनू गो मेको आन कली सेसीन ग्याइशशा, सहर ओव्रनय' देंशो बाक्नीम" दे माइक्मी बाक्त। 13 मिनू मेको आ गेय पाइब काम "इं सहर डा ५ ओटा शारा आन कली कोव्रथ सोइक्तीन। मेकोपुकी एको बेक्शो इस्राएली खोदेंशोन दुम्नीम। थमा पा मेकोपुकी एक बेक्ब इस्राएली खोदेंशोन दुम्नीम। मार दुम्शो बाक्मे, मेको तुइक्का कली सोइक्तय" देमाक्त। 14 मिनू मेकोपुकीम बग्गी निक्शी निक्निक्शी शारा थुंइदमे बाक्त। मिनू पिपम मेको आन कली "अरामी लडाइ पाइब आन कली मार दुम्मे, मेको रुपीन" दे सोइक्तीमी बाक्त। 15 मिनू मेको यर्दन खोला सम्मन कोव्रन कोव्रन लमा बाक्त। मिनू अरामी नेल्लेम रीब पा प्रोक्मानु, लां

नेल्ल मेको आन प्रॉइशो वासी नु यापुकी तामे बाक्त। मिनू क्यारी पथ लाइब मुरपुकी लेशशा जाक्शा, मेको लोव्र पिप कली शेंदमे बाक्त।

16 मिनू मुरपुकी गूशा, अरामी आन बाक्तीक डा मार मार नेल्ल लदमे बाक्त। मिनू परमप्रभु यावे आ देंशो खोदेंशो पा सेआह पुक्तीक का रिश्शो फस शेकेल का चांदीम नु पुक्तीक निक्शी क्योव्रज शेकेल का चांदीम लेयडमे बाक्त। *शेकेल का ११.५ ग्राम चांदी के क्येट बाक्ब।* 17 मिनू पिप कली कुक्शा गाक्ब लडाइ पाइब आन ठेयब मुर कली लाचोम कोव्रब सेल्शा वोदमे बाक्त। मिनू मेको कली मुरपुकीम दिम्शा सदमे बाक्त। मिनू पिप मेको कली गुम्थ आ खिंम लमेनु, परमप्रभु आ मुरुम देंशो खोदेंशो पा मेको कली मुरपुकीम ठेयब लाचोम दिम्शा साइशो बाक्मा बाक्त। 18 परमप्रभु आ मुरुम पिप कली "दीसा सेआह पुक्तीक का रिश्शो फस शेकेल का चांदीम नु पुक्तीक निक्शी क्योव्रज शेकेल का चांदीम सामरीया डा ठेयब लाचो आ डोंइती लेयसीब" देंशो बाक्माक्त। 19 मिनू मेको लडाइ पाइब आन ठेयब मुरुम परमप्रभु आ मुर कली "परमप्रभु यावेम आ सरीड डा झेल रोक्नु हना यो, मोदेंशो दुम्ने मचाब्ब" देंशो बाक्माक्त। मिनू परमप्रभु आ मुरुम "गे मेको मो पशो ताइनेवे, तन्न जचा चहिं मताइक्नेवे" देंशो बाक्माक्त। 20 मिनू मेको कली मोदेंशोन दुम्माक्त। मारदे हना मेको कली मुरपुकीम लाचोम दिम्शा सदमे बाक्त। मिनू मेको बेक्माक्त।

शुनेम डा मीशेम आ रू तशो

8 तेको मीश मुर आ तौ कली एलीशाम बेक्शो रे सेंशो बाक्मे, मेको मीश मुर कली एलीशाम "इ खिं डा मुर नेल्ल मेकेर रे गाक्कीन। मिनू इक्का नाक्ती कली ते दुम्बा, मेक लशा बाक्कीन। मारदे हना परमप्रभु यावेम एको रागीम ७ बर्स सम्म अन्काल दुम्पाइक्ब" दे माइशो बाक्माक्त। *२राजा ४:३५* 2 मिनू मेको परमप्रभु आ मुरुम देंशो खोदेंशो पा, मेको मीश मुरुम पवा बाक्त। मिनू मेको आ खिं डा मुर नेल्ल लाइशशा लमाक्त। मिनू लशा पलिस्ती आन रागीम ७ बर्स सम्म बाक्मा बाक्त। 3 मिनू ७ बर्स नोले मेको पलिस्ती आन रागी रे लेशशा जाक्माक्त। मिनू मेको आ रू नु खिं लेशशा तचा कली पिप आ बाक्तीक लमाक्त। 4 मेना पिप चहिं परमप्रभु आ मुर आ गेय पाइब गेहाजी कली "एलीशाम पशो ठेयब ठेयब गेय नेल्ल आं कली शेंदी" दे मेको नु लोव्र पना पन बाक्शो बाक्माक्त। 5 मिनू गेहाजीम एलीशाम बेक्शो मुर आन कली दोपा सेंपदा, मेको नेल्ल पिप कली शेंना शेंन बाक्शो बाक्माक्त। मेना मेको आ तौ बेक्शो रे सेंपाइशो मीश मुर आ रू नु खिं लेशशा तडल, दे पिप आ बाक्तीकेम कागज ब्रेक्शा गेथ जाक्माक्त। मिनू गेहाजीम "ए आं प्रभु पिप, एलीशाम बेक्शो रे सेंपाइशो। एको मीश मुर आ तौ बाक्ब। मिनू बेक्शो रे सेंसीशो आ तौ एकोन बाक्ब" देमाक्त। 6 मिनू पिपमी मेको मीश मुर कली मेको आ पर्वम हिल्लो पवा बाक्त। मिनू मेकोमी यो शोव्रडा बाक्त। मिनू पिपम आ गेय पाइब ठेयब मुर का कली "एकोम आ रागी प्रॉइशा गाक्म नाक्त रे मुल सम्म डा मेको रू डा मारेइ मारेइ एको कली लेशशा गेने" देमाक्त।

हजाएलम बेन-हादाद साइशो

7 मिनू एलीशा दमस्कस लमाक्त। मेना अराम डा पिप बेन-हादाद रोइ पशो बाक्माक्त। मिनू मुरपुकीम पिप कली "परमप्रभु आ मुर एक जाक्शो बाक्ब" दे नेंपदमे बाक्त। 8 मिनू पिपमी हजाएल कली "कोसेली लाइशशा, परमप्रभु आ मुर कली गुम्थ लावो। मेको रे पा परमप्रभु यावे कली 'गो एको रोइ रे सानुडा देय मसानुडा' दे हिल्लो पपतो" दे अरेवा बाक्त। 9 मिनू हजाएलम दमस्कसम बाक्शो रिश्शो रिश्शो मारेइ मारेइ कोसेली ४० ओटा दलओंठम कुरपाइशशा लमाक्त। मिनू मेको आगा ओव्रशा परमप्रभु यावे आ लोव्र पाइब आ डोंइती राम्माक्त। मिनू मेकोम "इन तौ, अराम डा पिप बेन-हादादमी आं कली 'गो आं रोइ रे सानुडा देय मसानुडा' दे हिल्लो पथ सोइक्ताक्यी" देमाक्त। 10 मिनू एलीशाम मेको कली "लशा, पिप कली 'गे थमा पा सानीनी' दे मतो" देमाक्त। तन्न एलीशाहमी "परमप्रभु यावेम आं कली 'मेको थमा पा बेक्ब' देंशो बाक्ब" देमाक्त। 11 मिनू मेकोमी पर डोशा, हजाएल कली कोव्रस डा कोव्रस बाक्माक्त। मिनू हजाएल मुने पवा

बाक्त। मिनु मेको परमप्रभु आ मुर डाक्माक्त। लूका १९:४१-४४<sup>१२</sup> मिनु हजाएलम “ए आं प्रभु, गे मारदे डाक्नी?” दे हिल्लो पवा बाक्त। मिनु मेकोमी हजाएल कली “गेम इस्राएल डा मुर आन कली काइ मरिश्शो पशो तुइक्नुड। गे मेको आन दरवारम मी सुइक्नेवे। मिनु मेको आन ठिटा मुर आन कली तरवारम क्योरनेवे। मेको आन आइक्च आल आन कली खपीम राष्ठा साइक्नेवे। मेको आन कोव्रज कुरशो मीश मुर आन कोव्रज पाक्नेवे” दे मदा बाक्त। २ राजा १०:३२<sup>१३</sup> मिनु हजाएलमी “गे महिक्शो, कुचुम खोदेशो मुरुम ओदेशो ठेयब गेय दोपा पने चाप्नुड डा?” देमाक्त। मिनु एलीशाम “परमप्रभु यावेम गे अराम डा पिप दुम्नेवे, दे आं कली कोंइशो बाक्ब” देमाक्त। १ राजा १९:१५<sup>१४</sup> मेको नोले हजाएल एलीशा आ डोंइती रे गाक्माक्त। मिनु आ होवप बेन-हादाद आ बाक्तीक लेशशा जाक्माक्त। मिनु बेन-हादादम “एलीशाम इ कली मार देमे?” दे हिल्लो पवा बाक्त। मिनु मेकोमी “गे थमा पा सानीनी नें” दे मदा बाक्त।<sup>१५</sup> तन्न आ दीसा हजाएलमी सुम्तीक वा का ब्वाक्कुम नुष्ठा, पिप आ कुलुमी सुमा बाक्त। मिनु मोपा मेको पिप बेक्माक्त। मिनु बेन-हादाद आ पा डा हजाएल पिप दुम्माक्त।

### यहूदा डा पिप येहोराम

२इतिहास २१:१,५-१०; २इतिहास २२:१-६

१६ येहो-शाफात आ तौ येहोराम यहूदा डा पिप दुम्शा, सासन पचा गोवा बाक्त। मेना इस्राएल डा पिप आहाब आ तौ येहोराम पिप दुम्शो ५ बर्स दुम्शो बाक्माक्त। मेको निक्शी आस नें येहोराम बाक्त। मेको आस कली योराम यो देमा बाक्त। १ राजा २२:५१<sup>१७</sup> येहोराम पिप दुम्मेनु, मेको ३२ बर्स दुम्शो बाक्माक्त। मिनु मेकोम यरूसलेममी ८ बर्स सासन पवा बाक्त।<sup>१८</sup> मेको इस्राएल डा पिप, आहाब आ खिं डा मुर आन लांम गाक्माक्त। मारदे हना मेकोम आहाब आ तमी ग्युंवे पशो बाक्माक्त। मिनु मेकोम परमप्रभु यावे आ डोंइती मार मरिश्शो बाक्मे, मेको पवा बाक्त।<sup>१९</sup> मो हना यो परमप्रभु यावेमी आ गेय पाइब दाऊद आ पर्बम यहूदा कली मक्याम्दा बाक्त। मेकोमी दाऊद कली इ तौ चच का गेना हना यो पिप दुम्शा बाक्ब, दे कबल पशो बाक्माक्त। २सामुएल ७:११-१६; १ राजा ११:३६

२० येहोरामम पिप पवा ना एदोम डा मुरुमी यहूदा आ देशो मटिथु, आंम आन पिप का सेल्मे बाक्त।<sup>२१</sup> मोपतीके यहूदा डा पिप येहोराम आ बग्गी नेल्ल लाइशा, आइक्वी हांबु जाइर सहरमी लमाक्त। मिनु एदोमीपुकीम येहोराम आ बग्गी नेल्ल नु आ लडाइ पाइब आन ठेयब मुर नेल्ल आन कली पुन्दमे बाक्त। मिनु मेको आ लडाइ पाइबपुकी चहिं प्रोक्शा, आन आन खिं लेम्मा बाक्त।<sup>२२</sup> मोपतीके एदोम मुल सम्म यहूदा रे ब्राशो बाक्ब। मेना लिब्ना यो यहूदा आ देशो मटिथु ब्राशो बाक्माक्त।<sup>२३</sup> मिनु यहूदा डा पिप येहोराम आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा? <sup>२४</sup> यहूदा डा पिप येहोराम बेक्माक्त। मिनु मेको आ किकी पिपी नु दाऊद आ सहरमी थिम्चा पुंडसे बाक्त। मिनु मेको आ पा डा आ तौ अहाज्याह पिप दुम्माक्त।

### यहूदा डा पिप अहाज्याह

२५ मिनु यहूदा डा पिप येहोराम आ तौ अहाज्याह यहूदाम पिप दुम्माक्त। मेना इस्राएल डा पिप आहाब आ तौ येहोराम पिप दुम्शो १२ बर्स दुम्शो बाक्माक्त।<sup>२६</sup> अहाज्याह पिप दुम्मेनु २२ बर्स दुम्शो बाक्माक्त। मिनु मेकोम यरूसलेममी बर्स का सासन पवा बाक्त। मेको आ ममा आ नें अथाल्याह बाक्माक्त। मेको इस्राएल डा पिप ओम्री आ चच बाक्माक्त। २ राजा ११:१<sup>२७</sup> अहाज्याह आहाब आ खिं डा मुर आन लांम गाक्माक्त। मिनु आहाब आ खिं डा मुरपुकीम खोदेशो पा परमप्रभु यावे आ डोंइती मार मरिश्शो बाक्मे, मेको पवा बाक्त। मारदे हना मेको आहाब आ चांइवा दुम्शो बाक्माक्त।<sup>२८</sup> यहूदा डा पिप अहाज्याह नु आहाब आ तौ इस्राएल डा पिप येहोराम नु गारशा, अराम डा पिप हजाएल नु लडाइ पचा कली रामोथ-गिलादम लमाक्त। तन्न अरामीपुकीम येहोराम कली गार सेल्मे बाक्त।<sup>२९</sup> मिनु अराम डा पिप हजाएल नु लडाइ पथ लमेनु, रामाहम गार दुम्शो रे साचा कली

येहोराम येजेल सहरम लमाक्त। मिनु यहूदा डा पिप येहोराम आ तौ अहाज्याह इस्राएल डा पिप आहाब आ तौ येहोराम कली कोव्रथ येजेल सहर लमाक्त। मारदे हना मेको कली गार दुम्शो बाक्माक्त। २ राजा ९:१४-१६

### येहू इस्राएल डा पिप दुम्शो

९ परमप्रभु यावे आ लोव्र पाइब एलीशामी परमप्रभु यावे आ लोव्र पाइब आन हुल डा का कली ब्रेश्शा “इ किष्पूर किष्ठा, एको तेल कुरशा रामोथ-गिलादम लावो।<sup>२</sup> मिनु मेक जाक्दीश्शा, निम्शी आ चच, येहो-शाफात आ तौ येहू कली मालो। मिनु मेको कली आ वारचपुकी रे फ्राशा, आगा डा कोठाम लतो।<sup>३</sup> मिनु नोले मेको तेल मेको आ पियाम लुक्शा ‘परमप्रभु यावेम इ कली इस्राएल डा पिप सेल्ला’ देशो बाक्ब, दे मतो। मिनु लाप्चो ग्यु रोकशा प्रोक्को। देश मपावो” दे मदा बाक्त। १ राजा १९:१६

४ मोपतीके परमप्रभु यावे आ लोव्र पाइब, ठिटा रामोथ-गिलादमी लमाक्त।<sup>५</sup> मिनु मेको मेक जाक्दीम्मेनु, येहू लडाइ पाइब आन ठेयब मुरपुकी नु युम्शा काथा बाक्शो थिम्मी बाक्त। मिनु मेकोम येहू कली “लडाइ पाइब आन ठेयब मुरपुकी, गो इन नु लोव्र का पचा माल्नुड” देमाक्त। मिनु येहू “गो आंइ दाते डा सु नु लोव्र पचा माल्नेवे?” देमाक्त। मिनु मेकोम “इन नु” देमाक्त।<sup>६</sup> मिनु येहू बोक्शा, आगा डा कोठाम ओव्रमाक्त। मिनु मेको ठिटांम येहू आ पियाम तेल लुक्शा “परमप्रभु यावे, इस्राएली आन परमप्रभुमी ‘गो इ कली आं मुर इस्राएली आन पिप सेल्लन।’<sup>७</sup> गे इ होव्रप आहाब आ खिं डा मुर आन कली साइक्वा माल्नेवे। मिनु इजेबेलमी आं गेय पा आं लोव्र पाइबपुकी नु आं गेय पाइब मुर आन कली साइश्शो आ क्येक्क लेत्नुड।<sup>८</sup> आहाब आ खिं डा मुर नेल्ल बेक्वा माल्नीम। इस्राएलम मेको आ खिं डा वोंइश मुर वाइल बाक्मल कि मबाक्मल, गो नेल्ल आन कली साइक्नुडमी। १ राजा १४:१०<sup>९</sup> गो आहाब आ खिं कली नेबात आ तौ येरोबाम नु अहीयाह आ तौ बाशा आस खिं खोदेशो सेल्लुड। १ राजा १५:२९; १ राजा १६:३, ११<sup>१०</sup> इजेबेल कली चहिं येजेल डा रू काम कुचुमम ब्वाइनीम। मेको कली सुइम मथिम्नीम’ देशो बाक्ब” देशा, मेको लाप्चो ग्यु रोकशा दोरशा प्रोक्माक्त। १ राजा २१:२३

११ मिनु येहू मेको नोले लडाइ पाइब आन ठेयब मुर आन बाक्तीक जाक्माक्त। मिनु मेकोपुकीम मेको कली “मार नेल्ल रिम्शोन बाक्बा? मेको आ निप्स ग्यशो मुर इ बाक्तीक मारदे जाक्म?” दे हिल्लो पामे बाक्त। मिनु येहूमी मेको आन कली “गे मेको मुर कली तुइक्नीनी। मिनु मेकोम मार देबा, मेको यो तुइक्नीनी” दे माइक्मी बाक्त।<sup>१२</sup> मिनु मेकोपुकीम “गे जोल पाइनीनी। आंइ कली थमा लोव्र पने” देमा बाक्त। मिनु येहू “मेकोमी आं कली मार देत देशा हना, परमप्रभु यावेमी ‘गो इ कली इस्राएल डा पिप सेल्लुड’ देशो बाक्ब” दे माइक्मी बाक्त।<sup>१३</sup> मिनु मेकोपुकीम रीब पा आन आ तार फेक्शो वा पुइश्शा, तला डोइक्तीक थेंका डा फुल्लु तार ब्रामे बाक्त। मिनु मेकोपुकीम तुराही ताप्शा, ठेयब सेंदा पा “येहू पिप दुम्त” देमा बाक्त। मत्ती २१:७

### येहूमी येहोराम कली साइश्शो

१४ मोपतीके निम्शी आ चच येहो-शाफात आ तौ येहू येहोराम कली मरिश्शो पचा गोवा बाक्त। मिनु येहोराम नु इस्राएली नेल्ले अराम डा पिप हजाएल आ जोरी सत्रु दुम्शा रामोथ-गिलाद कली खाल पामे बाक्त।<sup>१५</sup> तन्न पिप येहोराम चहिं आ गार सापाइक्वा कली येजेल लशो बाक्माक्त। मेको गार अराम डा पिप हजाएल नु लडाइ पवानु, अरामीपुकीम सेल्शो बाक्मा बाक्त। मिनु येहूमी मेको लडाइ पाइब आन ठेयब मुर आन कली “गे गो नु बाक्तीनी हना, सुइ मुर रामोथ-गिलाद सहर रे एको लोव्र शोव्रचा कली येजेल रे गूचा मतामेक्ल” देमाक्त। २ राजा ८:२८-२९<sup>१६</sup> मिनु येहू आ बग्गीम डोइश्शा येजेल लमाक्त। मारदे हना येहोराम मेकेर नाइश्शा बाक्माक्त। मिनु यहूदा डा पिप अहाज्याह यो येहोराम कली कोव्रथ मेक उइ बाक्शो बाक्माक्त।

17 मिनु येजेल सहर कली कोव्रशा खाल पाइबमी येहू नु आ मुर आन कली जाक्शो तवा बाक्त। मिनु मेकोमी ठेयब सेंदा पा “गो हल का लडाइ पाइब मुर पिशो तातामी” देंमाक्त। मिनु येहोराममी “शारा डोइक्ब का मेको आन कली गुम्थ सोइश्शा ‘मार, गे रिश्शो पथ जाक्शो बाक्नीनी?’ दे हिल्लो पपतो” देंमाक्त। 18 मिनु मेको शारा डोइक्ब मुर येहू कली गुम्थ लशा “पिपमी इन कली ‘मार, गे रिश्शो पथ जाक्नी?’ दे हिल्लो पाप्तु” देंमाक्त। मिनु येहूम “रिश्शो पथ जाक्डल कि मरिश्शो पथ जाक्डल, गे मारदे माल्दे? आं नोले खोइय्यी” दे मदा बाक्त। मिनु मेको कोव्रशा खाल पाइबमी पिप कली “मेको लोव कुरबम मेको आन कली गुम्था दा गुम्तु, तन्न मेको लेश्शा मजा” देंमाक्त। 19 मिनु पिपमी अर्को शारा डोइक्ब सोइक्ता बाक्त। मिनु मेको, मेको आन नेक्था जाक्दीश्शा “पिपमी ‘गे रिश्शो पथ जाक्नी’ दे हिल्लो पाप्तु” देंमाक्त। मिनु येहूम “रिश्शो पथ जाक्डल कि मरिश्शो पथ जाक्डल इ कली मारदे माल्दे, आं नोले खोइय्यी” दे मदा बाक्त। 20 मिनु मेको कोव्रशा खाल पाइबमी “मेको लोव कुरबमी मेको आन कली गुम्था दा गुम्तु, तन्न मेको यो लेश्शा मजा। मेरे बग्गी दोरपाइक्ब दा निम्शी आ चच येहू बाक्त। मारदे हना मेकोम निप्स ग्यशो मुरुमी दोरपाइश्शो खोदेशो पा दोरपाइक्ब” देंमाक्त।

21 मिनु येहोराममी “आं बग्गी ठीक पने” देंमाक्त। मिनु मेकोपुकीम मेको ठीक पामे बाक्त। मिनु इस्राएल डा पिप येहोराम नु यहूदा डा पिप अहाज्याह आस बग्गी डोइश्शा येहू कली गुम्थ लसा बाक्त। मिनु मेको निक्शीम येहू कली “येजेल सहर नाबोध आ रूम गुम्से बाक्त। १राजा २१:१ 22 मिनु येहोरामम येहू कली तशा, मेको कली ‘येहू, गे मार रिश्शो मिश्शा गुम्थ जाक्डे?’ दे हिल्लो पवा बाक्त। तन्न येहूम इ ममा इजेबेलम आ ग्रंग्रा दिशो मूर्ति पूजा पाइब, टुना मुना पाइब। मिनु मार रिश्शो पा गुम्थ जाक्नुडा?” देंमाक्त। 23 मिनु येहोराममी आ बग्गी लेश्शा अहाज्याह कली “अहाज्याह मरिश्शो दुस्त” देंना देंन प्रोक्माक्त। 24 मिनु येहूम आ लिब्रा कीशा येहोराम आ बला आ दातेमी आबा बाक्त। मिनु मेको ब्राम मेको आ लुडगीर खिदा बाक्त। मिनु मेको आ बग्गीमी गोल्माक्त। 25 मिनु येहूम आ लडाइ पाइब आन ठेयब मुर बिदकार कली “मेरे कली पोक्शा येजेली नाबोध आ रूम ताइक्तो। गे नु गो मेको आ आफ आहाब नु शाराम काथ काथा लसानु, मेको आ पर्बम परमप्रभु यावेम लोव पशो गे तुइश्शो बाक्नेवे। १राजा २१:१९; यसैया १३:१; येरमीया २३:३३-४० 26 परमप्रभु यावेमी ‘गो सिनाक्ती नाबोध नु मेको आ आल आन हुश ताता। मिनु गो थमा पा इ कली एको रूमी क्येक्क लेत्नुड’ देंशो बाक्त। मोपतीके मेरे कली पोक्शा परमप्रभु यावे आ देंशो खोदेशो पा मेको रूमीन ताइक्तो” दे मदा बाक्त।

येहूमी अहाज्याह कली साइश्शो

27 मिनु यहूदा डा पिप अहाज्याह मेको तशा, बेथ-हाग्गान लतीक लां गे प्रोक्माक्त। मिनु येहू मेको आ नोनोले खेदा पना पन लशा “मेरे कली यो सतीन” देंमाक्त। मिनु मेको कली इब्लाम डा गुर डा ग्येत्थ लतीक लांम आप्शा गार सेल्मे बाक्त। तन्न मेको प्रोक्शा मेगीददोम जाक्दीम्माक्त। मिनु मेक उड बेक्माक्त। २इतिहास २२:७-९ 28 मिनु मेको आ गेय पाइब ठेयब मुरपुकीम मेको आ बेक्शो रां यरूसलेमम लाइश्शा दाऊद आ सहरम मेको आ किकी पिप नु आ तुरसुम थिम्मे बाक्त। 29 आहाब आ तौ येहोरामम सासन पवा आ ११ बर्सम अहाज्याह यहूदा डा पिप दुम्शो बाक्माक्त।

येहूमी इजेबेल कली साइश्शो

30 मिनु येहू येजेल सहरमी जाक्माक्त। मार मार दुम्मे, मेको नेल्ल इजेबेलम नेंशो बाक्माक्त। मिनु मेकोम आ मिक्चीम गाजल खेक्से बाक्त। मिनु चां मिंसीशा झेल रे उड लां गे कोव्रडा बाक्त। 31 मिनु येहू ठेयब लाप्चो रे ओव्रमाक्त। मिनु इजेबेलम “ए आंम होव्रप कली साइक्ब जिम्नी, मार, गे रिश्शो पथ जाक्डे” दे मदा बाक्त। १राजा १६:९-१० 32 मिनु मेकोमी इर झेल गे कोव्रशा ठेयब सेंदा पा “आं गे सु बाक्नी? सु बाक्नी?” देंमाक्त। मिनु का निक्शी दरवार डा गेय पाइब मेको गे कोव्रडमे बाक्त। 33 मिनु येहूमी “मेको कली झेल रे ताइक्तीन” देंमाक्त। मिनु मेकोपुकीम इजेबेल कली उड

ताइक्तमे बाक्त। मिनु मेको आ हुश प्रेक्शा कोइ गारोमी नु कोइ शारा आन कली जुक्तमे बाक्त। 34 मेको नोले येहू आगा ओव्रशा जचा तूचा थोव्रक जवा तूडा बाक्त। मिनु मेकोमी “मेको सराप रशो मीश मुर कली लाइश्शा थिमीन। मारदे हना मेको पिप आ तमी बाक्ब” देंमाक्त। 35 मिनु मुरपुकी मेको कली थिम्चा कली उड बुम्मा बाक्त। तन्न मेकेर आ पिया, गुड नु खोइल डा लाक्शा अरु मारदे मथिदमे बाक्त। 36 मिनु मेकोपुकी लेश्शा जाक्शा येहू कली शेंदमे बाक्त। मिनु मेकोमी “परमप्रभु यावेम आ गेय पाइब तिश्बे सहर डा एलीया रे पा ‘इजेबेल कली येजेल सहरम कुचुमम ब्वाइनीम। १राजा २१:२३ 37 इजेबेल आ बेक्शो रां येजेल सहरम मोव्रल खोदेशो पा राक्ब। मिनु मेको कली एको इजेबेल बाक्ब, दे सुइम मतुइक्नीम’ देंशो बाक्ब” देंमाक्त।

आहाब आ तौपुकी साइश्शो

10 आहाब आ ७० जना तौ सामरीया सहरम बाक्शो बाक्मा बाक्त। मोपतीके येहूमी चिठी का ब्रेक्शा सामरीयाम, येजेल डा हुकुम पाइब, खाल्पा नु आहाब आ तौ आन कली कोव्रब मुर आन कली सोइक्ता बाक्त। 2 मेको चिठीम “गे इन होव्रप आ तौ मेकेर बाक्तीके, इन बग्गी, शारा, गारो हिरशो सहर नु यापुकी बाक्तीके, 3 गेपुकीमी इन होव्रप आ तौ आन दातेमी नेल्ल क्येडा रिश्शो नु नेल्ल क्येडा निप्स पाइश्शो, का कली आ आफ आ पा डा पिप सेलीन। मिनु मेको नोले इन होव्रप आ खिं आ पर्बम लडाइ पने” दे ब्रेक्शा सोइक्तीमी बाक्त। 4 तन्न मेकोपुकी थाम्पा हिंशा सुर्ता पा “पिप निक्शी ला यो मेको आ डोंइती राप्ने मचबेस हना, गो मार पने चाप्नया डा?” देंमुमा बाक्त। 5 मोपतीके पिप आ खिं डा खाल पाइबपुकी, सहर डा हुकुम पाइबपुकी, खाल्पापुकी नु आहाब आ तौ आन कली कोव्रब नेल्ल गारशा येहू कली “गोपुकी इन गेय पाइब नकी। गे आंइ कली मार देंनीनी, गो मेको पाइनीकी। गो सुइ कली पिप मसेल्नीकी। गे मार पचा दाक्नीनी, मेको पने” दे लोव कुरब मुर सोइक्तमे बाक्त। 6 मिनु येहूमी मेको आन कली अर्को चिठी का ब्रेक्शा “गेपुकी आं गे बाक्तीनी हना नु आं अरेशो बिन्तीनी हना, दीसा एं खोइ ना इन होव्रप आ तौ आन पिया कुरशा येजेल सहरमी जाक्कीन” दे ब्रेक्शा सोइक्ता बाक्त। मेना मेको पिप आ ७० जना तौ चहिं आन कली कोव्रब मुर आन खिंमी बाक्शो बाक्मा बाक्त। 7 मिनु मेको चिठी मेक जाक्दीम्मेनु, मेकोपुकीम मेको ७० जना पिप आ तौ आन कली लाइश्शा सदमे बाक्त। मिनु मेकोपुकीम मेको आन खोइश्शो पिया थुन्सेपुकीम कुर पा येजेल सहरम सोइक्तमे बाक्त। 8 मिनु लोव कुरब मुर जाक्शा, येहू कली “मेकोपुकीम पिप आ तौ आन पिया चाक्तेक्म” देंमाक्त। मिनु येहूमी मेको कली “मेको आन कली पुक्शी निक्शी पा पुक्शा, सहर डा ठेयब लाप्चो आ डोंइती दीसा सुनी सम्म वोतीन” देंमाक्त। 9 मिनु आ दीसा सुनी येहू लाइगा गूमाक्त। मिनु मेकोम मेकेर राप्शा बाक्ब नेल्ल आन कली “गे दोस ताइब मननी। आंम होव्रप कली मरिश्शो पा साइक्ब मुर दा गो नड। तन्न एको नेल्ल आन कली चहिं सुम सदा? 10 आहाब आ खिं डा मुर आन कली परमप्रभु यावेम देंशो लोव का यो मोशा मदुम्ब। परमप्रभु यावेम आ गेय पाइब एलीया रे पा देंशो लोव नेल्ल गाप्त” देंमाक्त। १राजा २१:२१ 11 मोपा येहूमी येजेलम लीशो आहाब आ खिं डा मुर नेल्ल, मेको आ ठेयब गेय पाइब मुरपुकी, मेको आ वारच नु मेको आ चढ़ेब, नेल्ल आन कली का यो मप्रोंइथु साइक्मी बाक्त। होसे १:४

12 मेको नोले येहू सामरीया गे लमाक्त। मिनु गोठला आन बाक्तीक बेथ-एकेद सहरम जाक्दीम्माक्त। 13 मिनु मेकेर येहूम यहूदा डा पिप अहाज्याह आ मुर आन कली गुमा बाक्त। मिनु येहूमी मेको आन कली “गे सु ननी?” दे हिल्लो पामी बाक्त। मिनु मेकोपुकीम “गे पिप अहाज्याह आ मुर नकी। मिनु गो पिप तौ आन कली नु ठेयब पिपीमी आ तौ आन कली गुम्थ लाइतक” देंमा बाक्त। २इतिहास २२:८ 14 मिनु येहूम “एको आन कली सेसीन ग्याइक्तीन” देंमाक्त। मिनु मेकोपुकीम मेको आन कली सेसीन ग्याइश्शा बेथ-एकेद सहरम सदमे बाक्त। मेकोपुकीम मेकेर ४२ जना वोंइश मुर आन कली का यो सेस मप्रोन्मे बाक्त।

15 मिनु मेकोम मेकेर रेकाब आ तौ येहो-नादाब आ कली गुम्थ पिशो तवा बाक्त। मिनु येहूम मेको कली रिम्शो पा “मार गो आं थुं इ गे बाक्शो खोदेंशो पा, गे यो इ थुं नेल्लेम आं गे बाक्नेवे?” दे मदा बाक्त। मिनु येहो-नादाबम “बाक्नुड” देंमाक्त। मिनु येहूमी “मो हना इ गुइ आं कली गेयी” दे मदा बाक्त। मिनु मेकोम आ गुइ गेवा बाक्त। मिनु येहूम मेको कली लाइश्शा आ बगीम निप्पदा बाक्त। *येरमीया ३५:६* 16 मिनु येहूम मेको कली “गे गो नु पिने। मिनु परमप्रभु यावे कली आं जौब बोक्शा गेय पशो कोवडीन” दे मदा बाक्त। मिनु मेकोम मेको कली आ बगीम लदा बाक्त। 17 मिनु येहू सामरीयाम जाक्दीश्शा, परमप्रभु यावेमी एलीया कली देंशो खोदेंशो पा, आहाब आ खिं डा लीशो मुर नेल्ल आन कली का यो मप्रोंइथु, साइक्मी बाक्त। *१राजा २१:२९*

बाल कली चढेब आन कली साइश्शो

18 मिनु येहूमी मुर नेल्ल आन कली ब्रेश्शा, मेको आन कली “आहाबम दा इच्का ला बाल आ पूजा पाप्तु। तन्न येहूमी मेको क्येडा यो थम ठेयब पा पूजा पाइब। *१राजा १६:३१-३३* 19 मुल बाल आ लोव्र पाइब नेल्ले, मेको आ नोले खोइक्ब नेल्ल नु मेको कली चढेब नेल्ल आन कली ब्रेत्तीन। मेकोपुकी का यो मग्राइक्मल। मारदे हना गो बाल कली ठेयब पूजा का पाइनुड। मेको पूजाम मजाक्ब सुइ ब्रोंइचा मताइनीम” देंमाक्त। तन्न येहूम बाल आ नोले खोइक्ब नेल्ल आन कली साइक्वा कली मोपा जोल पशो बाक्माक्त। 20 मिनु येहूम “बाल आ पर्वम चाड का मानेचा माल्ब” देंमाक्त। मोपतीके मेकोपुकीम मेको लोव्र नेल्ल आन कली नेंपदमे बाक्त। 21 मिनु येहूम मेको लोव्र इस्राएल नेल्लेम नेंपाइक्वा कली लोव्र कुरब मुर सोइक्तीमी बाक्त। मिनु बाल आ नोले खोइक्ब नेल्ल जाक्मा बाक्त। का यो मलीमा बाक्त। मेकोपुकी बाल आ खिंम जाक्शा क्राक्शी चोक्शी दुम्शा एर डा गारो रे ओंथ डा गारो सम्म दुम्मा बाक्त। 22 मिनु मेकोमी वा वोइक्ब आन कली “बाल आ नोले खोइक्ब नेल्ल आन कली वा गुंइदीन” दे माइक्मी बाक्त। मिनु मेकोम मेको आन कली वा गुंइदमे बाक्त। 23 मिनु येहू, रेकाब आ तौ येहो-नादाब नु बाल आ खिं ओव्रमाक्त। मिनु येहूम बाल आ नोले खोइक्ब आन कली “होस पा एर ओंथ नेल्ल कोवडीन। मिनु थमा पा एकेर गे इन दातेम परमप्रभु यावे आ गेय पाइब सुइ मबाक्मल। बाल आ नोले खोइक्ब ला बाक्मल” देंमाक्त। 24 मिनु मेको क्योरशा चढेचा नु चोशा चढेचा कली आगा ओव्रसा बाक्त। येहूमी लाडगाम ८० जना मुर आन कली योव्रशा, मेको आन कली “गो एको मुर आन कली इन जिम्मा गेशो बाक्नुड। सुइम का कली यो प्रोक्वा गेप्नु हना, मेको आ पा डा मेको प्रोक्पाइक्ब मुर साइक्वा पुंइसीब” देंशो बाक्माक्त। 25 मिनु येहूम मार मार चढेने थुमा चोटी खाल पाइब नु आ दी डा योव्रशा मुर आन ठेयब मुर आन कली “ओव्रशा, मेको नेल्ल आन कली का यो मप्रोंइथु, क्योरशा सतीन” दे हुकुम गेमी बाक्त। मोपतीके मेको खाल पाइबपुकी नु योव्रशा आन ठेयब मुरपुकीम सुइ आन कली प्रोक्वा मगेथु तरवारम क्योरशा सदमे बाक्त। मिनु मेको आन बेक्शो रं लाडगा गुंइशा बाल आ खिं आ लाडगाम ताइक्तमे बाक्त। *१राजा १८:४०* 26 मिनु मेकोपुकीम बाल आ खिं डा थाम लाडगा गुंइशा चोव्रमे बाक्त। 27 मिनु नोले मेकोपुकीम बाल आ थाम प्रेत्मे बाक्त। मिनु आ खिं यो प्रेत्मे बाक्त। मिनु मेको डाइक्तीक खिं सेल्मे बाक्त। मेको मुल सम्म बाक्ब। 28 मोपा येहूमी इस्राएलमी बाल आ नोले खोइक्ब नेल्ल आन कली क्याम्दा बाक्त। *१राजा १२:२६-३३* 29 मो हना यो येहूम इस्राएली आन कली पाप पपाइक्ब नेबात आ तौ येरोबाम आ पतीक मप्रोना बाक्त। बेथेल नु दान डा सुन के बाछा आस कली पूजा पतीक गेय में डा में वोदा बाक्त। 30 मिनु परमप्रभु यावेम येहू कली “गे आं डोंइती मार रिम्शो बाक्मे, मेको पाप्तीवी। मिनु आं मिम्शो लोव्र आहाब आ खिं डा मुर नेल्ल आन कली पाप्तीवी। मोपतीके इ तौ चच ४ पाला सम्म इस्राएल डा पिप दुम्नीम” देंमाक्त। 31 मो हना यो येहूम आ थुं नेल्लेम होस पा परमप्रभु यावे, इस्राएली आन परमप्रभु आ अरेशो मटिवा बाक्त। मेकोमी इस्राएली आन कली पाप पपाइक्ब येरोबाम आ पाप पतीक मप्रोना बाक्त।

32 मेना परमप्रभु यावेमी इस्राएल कली आइक्व सेल्चा गोवा बाक्त। मिनु हजाएलमी इस्राएल कली लडाइ पा ग्रामाक्त। *२राजा ८१:२* 33 मिनु यर्दन खोला आ पूर्व गे गिलाद डा रागी नेल्ल, गाद, रूबेन नु मनस्से आन रागी, अरनोन खोला आ नेक्था आरोएर, गिलाद डा लां रे पा बाशान सम्म इस्राएली आन कली फ्रूमी बाक्त। 34 येहू आ पशो अरु गेय, मेको आ पशो नेल्ल नु आ सक्ति मार, मेको इस्राएल डा पिप आन इतिहासम ब्रेक्शो मबाक्बा डा? 35 मिनु येहू बेक्माक्त। मिनु मेको सामरीयाम थिम्चा पुंइसे बाक्त। मिनु मेको आ पा डा आ तौ येहो-अहाज पिप दुम्माक्त। *२राजा १३:१* 36 येहू सामरीया सहरम बाक्शा २८ बर्स इस्राएल कली सासन पवा बाक्त।

अथाल्याह नु योआश

11 अहाज्याह आ ममा अथाल्याहम आ तौ कली साइश्शो तशा, पिप आ खिं डा मुर नेल्ल आन कली साइक्वा गोवा बाक्त। *२राजा ८:२६; २राजा ९:२७* 2 तन्न पिप येहोराम आ तमी, अहाज्याह आ समी येहो-शेबा बाक्माक्त। मेकोमी अहाज्याह आ तौ योआश कली मेको साइक्वा पुंइसीब पिप आ आल आन दाते रे लाइश्शा, मेको आ खाल पाइब मीश मुर नु इप्तीके कोठा काम खूइक्ता बाक्त। मोपा अथाल्याहमी मेको आल कली साइक्वा मतवा बाक्त। 3 मिनु मेको आल ६ बर्स सम्म मेको नु परमप्रभु यावे आ खिंम खूइश्शा बाक्माक्त। मेना अथाल्याहमी सासन पशो बाक्माक्त।

4 मिनु ७ बर्सम येहो-यादामी सहें, सहें जना पिप कली कोव्रब केरेती नु खाल पाइब आन ठेयब मुर आन कली परमप्रभु यावे आ खिंम ब्रेश्शा चाक्मी बाक्त। मिनु येहो-यादाम मेको आन कली कबल का पपाइश्शा, परमप्रभु यावे आ खिंम कसम जपाइक्मी बाक्त। मिनु मेको आन कली पिप आ तौ कोइदीमी बाक्त। *केरेती परमप्रभु यावे आ खिं कोव्रब बाक्नीम।* 5 मिनु येहो-यादामी मेको आन कली “गे मार पचा माल्नीनी देंशा हना, सु सु नाइक्तीक नाक्ती गेय पथ जाक्नीनी, मेकोपुकीम भाग सां डा भाग का पिप आ खिं खाल पने। 6 मिनु अर्को भाग का सुर माइश्शो लाप्चोम बाक्कीन। नोले डा भाग लाप्चो खाल पाइब आन नोले गे बाक्शा, दरवार कोव्रचा माल्नीम। 7 मिनु गे नाइक्तीक नाक्ती गेय मपाइब हुल निक्शी चहिं परमप्रभु यावे आ खिं खाल पा बाक्कीन। 8 गे नेल्ल आंम आंम गुइम या शेशा, पिप कली खाल पा आ एर ओंथ बाक्वा माल्नीनी। इन नेक्था जाक्ब नेल्ल आन कली सतीन। पिप ते लत हना यो, गे मेको आ नेक्था बाक्वा माल्नीनी” दे अरेमी बाक्त।

9 मिनु पिप कली कोव्रब आन ठेयब मुरपुकीमी चढेब येहो-यादा आ अरेशो नेल्ल पामे बाक्त। मेको नेल्लेमी आन आन मुर आन कली खुप्तमे बाक्त। नाइक्तीक नाक्ती गेय पचा माल्शो नु ममाल्शो नेल्ल चढेब येहो-यादा आ बाक्तीक जाक्मा बाक्त। 10 मिनु मेको चढेबम मेको आन कली परमप्रभु यावे आ खिंम बाक्शो दाऊद आ तूतीक नु तेक्तीक गेमी बाक्त। *२सामुएल ८:७* 11 मिनु मेको खाल पाइबपुकी आंम आंम या शेशा परमप्रभु यावे आ खिं आ दक्खिन रे उत्तर सम्म, खिं नु चढेतीक आ एर ओंथ पिप कली खाल पा बाक्मा बाक्त।

12 मिनु येहो-यादाम पिप आ तौ कली गुंइदा बाक्त। मिनु मेको आ पियाम सिरपेच गुक्ता बाक्त। मिनु येहो-यादामी मेको कली कबल डा कागज का गोवा बाक्त। मिनु मेको कली तेल लुक्शा पिप सेला बाक्त। मिनु मुरपुकीम गुइ फ्रोक्वा “पिप गेना हना यो ब्रोंइशा बाक्ल” देंमा बाक्त। *ब्यक्था १७:१८-१९; १राजा १:३९*

13 मिनु अथाल्याहमी खाल पाइब नु मुरपुकी ठेयब सेंदा पा रेयके पशो नेना बाक्त। मिनु मेको परमप्रभु यावे आ खिंम बाक्शो मुर आन नेक्था लमाक्त। 14 मिनु मेकोम कोव्रडानु, पिप थाम आ नेक्था राप्पाइश्शो तवा बाक्त। मेको आन पतीक पशा ठेयब मुरपुकी नु तुराही ताप्बपुकी पिप आ नेक्था बाक्मा बाक्त। मिनु रागी डा मुर नेल्ल तुराही ताप्ना ताप्न ग्येरसीशो बाक्मा बाक्त। मिनु अथाल्याहम आ वा खाक्मा बाक्त। मिनु ठेयब सेंदा पा “गो नु रागी नेल्ल खतम! गो नु रागी नेल्ल खतम!” दे वाइ ब्रेम्माक्त।

15 मिनू चढ़ेब येहो-यादामी लडाइ पाइब आन ठेयब मुर आन कली "मेको कली खिं रे गुंडदीन। मेको आ नोले खोइक्ब नेल्ल आन कली तरवारम सतीन। मारदे हना 'मेको परमप्रभु यावे आ खिम साइक्वा मपुंडसेक्ल' " देमाक्त। 16 मिनू मेको कली ग्याइश्शा, शारा वोइक्तीक लाइश्शा, सदमे बाक्त।

17 मेको नोले येहो-यादामी परमप्रभु यावे, पिप नु आ मुर कली कबल का पवा बाक्त। मेकोपुकी परमप्रभु यावे आ मुर दुम्नीम, दे कबल पवा बाक्त। मिनू मेकोम पिप नु मुर आन दातेम यो कबल का पवा बाक्त। 18 मिनू मेको रागी डा मुर नेल्ल बाल आ खिं लशा, मेको प्रेत्मे बाक्त। मेकोपुकीम मेको आ चढ़ेतीक नु आ मूर्ति जिक्वा ताइक्तमे बाक्त। मिनू बाल कली चढ़ेब मत्तान कली चढ़ेतीक आ डोंइती सदमे बाक्त। मिनू चढ़ेब येहो-यादाम परमप्रभु यावे आ खिं कली खाल पाइब मुर योवमी बाक्त। २२राजा १०:२६-२७; न्यायाधीस ६:२५ 19 मिनू येहो-यादामी सहे का जना लडाइ पाइब आन कप्तानपुकी, केरेती, खाल पाइबपुकी नु रागी डा मुर नेल्ल आन कली लाइक्मी बाक्त। मिनू मेकोपुकीमी पिप कली परमप्रभु यावे आ खिं रे खाल पाइब आन लाप्चो लां पा पिप आ खिम चाक्वामे बाक्त। मिनू पिप आ नित्तीकेम निप्पदमे बाक्त। करेती परमप्रभु यावे आ खिं कोव्रब बाक्तेक्म। 20 मिनू रागी डा मुर नेल्ल ग्येरसमा बाक्त। मिनू सहरम थुं नाइश्शा बाक्तीक दुम्माक्त। मारदे हना अथाल्याह तरवारमी साइक्वा पुंडसे बाक्त। 21 योआश पिप दुम्मेनु, मेको ७ बर्स दुम्शो बाक्माक्त। योआश नु येहो-आश नें का बाक्ब, येहो-आश कली योआश यो बाक्ब।

योआश यहूदा डा पिप दुम्शो

२इतिहास २४:-

12 योआश यहूदा डा पिप दुम्माक्त। मेना येहू इस्राएल डा पिप दुम्शो

७ बर्स दुम्शो बाक्माक्त। मिनू योआशमी यरूसलेम ४० बर्स सासन पवा बाक्त। मेको आ ममा आ नें सिबीयाह बाक्माक्त। मेको बेयर-शेबा डा बाक्माक्त। 2 योआशमी चढ़ेब येहो-यादाम शेंशो खोदेंशो पा, ब्रॉइम सम्म परमप्रभु यावे आ डोंइती मार रिम्शो बाक्मे, मेको पवा बाक्त। 3 मो हना यो मेकोमी डांडाम बाक्शो थानपुकी मताइक्ता बाक्त। मेना सम्म मुरपुकीम मेकेर क्योरशा चढ़ेतीक चढ़ेशा, धूप चोव्रमे बाक्त।

4 मिनू योआशमी चढ़ेब आन कली "परमप्रभु यावे आ खिंमी मुरपुकीमी आन दाक्शा गेशो क्येट, मुर आन कली हिक्शो नु बोक्शो क्येट नु मुरपुकीम ग्येरशा गेशो क्येट नेल्ले परमप्रभु यावे आ खिम वोतीन। २२राजा १४:४; १राजा २२:४४ 5 चढ़ेबपुकीमी मेको क्येट मुर रे ताक्वा माल्नीम। मिनू परमप्रभु यावे आ खिं डा बिग्रेशो मार मार बाक्मा, मेको सेल्पाइक्वा माल्नीम" देमाक्त। 6 तन्न योआशमी सासन पवा आ २३ बर्स सम्म यो चढ़ेबपुकीम मेको बिग्रेशो मारेइ मसेल्पदमे बाक्त। 7 मोपतीके पिप योआशमी चढ़ेब येहो-यादा नु अरु चढ़ेब आन कली ब्रेश्शा "मारदे गे परमप्रभु यावे आ खिं डा ब्रेश्शो मसेल्नी? मुल रे गेपुकीम इन कली गेशो क्येट मताक्कीन। तन्न मेको अरु परमप्रभु यावे आ खिं डा ब्रेश्शो सेल्ब आन कली कोव्रब आ गुइमी गेचा माल्नीनी" देमाक्त। 8 मोपतीके चढ़ेबपुकीमी "मुल गो क्येट यो मताक्वय नु बिग्रेशो यो मसेल्न" दे सल्ला पामे बाक्त।

9 मिनू चढ़ेब येहो-यादामी सन्दोस का सेल्शा, मेको आ सुम्तीकेम पोव्रला का सेला बाक्त। मिनू येहो-यादामी मेको सन्दोस परमप्रभु यावे आ खिं आगा ओव्रतीकेम चढ़ेतीक आ नेक्वा ग्युरा गे वोदा बाक्त। मिनू परमप्रभु यावे आ खिं डा लाप्चो कोव्रब चढ़ेबपुकीम परमप्रभु यावे आ खिम चाक्शो क्येट नेल्ल मेकेर कुर पामे बाक्त। 10 मिनू मेकोपुकीमी मेको सन्दोस "शुश क्येट बाक्ब" दे तुइक्तमेनु, पिप आ ब्रेक्ब नु नेल्ल क्येडा ठेयब चढ़ेब जाक्शा, मेको परमप्रभु यावे आ खिं डा क्येट हिक्शा थैलोम कुर पा फ्रेंशा वोइक्बाक्मा बाक्त। 11 मिनू मेकोपुकीम मेको हिक्वामे नोले, मेको परमप्रभु यावे आ खिम गेय पाइब आन कली कोव्रब मुर कली गेबाक्मा बाक्त। मिनू मेकोपुकीम मेको रे परमप्रभु यावे आ खिं सेल्ब आन कली गेबाक्मा बाक्त। मेकोपुकीम मेको क्येट शी के गेय पाइब नु सेल्ब आन कली गेबाक्मा बाक्त। 12 मेकोपुकीमी मेको क्येट गारो प्रोव्रब, फुल्लु खोइक्ब नु शी नु खोइश्शो फुल्लु ग्याप्चा कली गेबाक्मा बाक्त। मिनू मेको क्येट परमप्रभु यावे आ खिं

डा बिग्रेशो सेल्वा कली नु परमप्रभु यावे आ खिं डा अरु मार मार लेंशा सेल्वा कली चलेबाक्मा बाक्त। 13 मेकोपुकीम चांदी के बोस, सल्दो क्राम्तीक थनारो, ग्योब, तुराही नु अरु सुन चांदी के मारेइ मारेइ सेल्वा कली परमप्रभु यावे आ खिम चाक्शो क्येट रे मसेल्पदमे बाक्त। 14 मारदे हना मेको क्येट परमप्रभु यावे आ खिं डा बिग्रेशो लेंशा सेल्ब मुर आन कली गेमे बाक्त। 15 मिनू मेको गेय पाइब आन कली गेचा कली, मेको आन कोव्रब मुर आन कली गेशो क्येट सु सु कली गेनी, मार मार पनी, दे हिल्लो मपाइक्बाक्मा बाक्त। मारदे हना मेकोपुकी थमा सुइक्वा पुंडसीशो मुर बाक्मा बाक्त। २२राजा २२:७ 16 मिनू दोस आ पर्वम नु पाप आ पर्वम चढ़ेशो क्येट चहिं परमप्रभु यावे आ खिं डा क्येट नु मब्वाइक्तमे बाक्त। मेको चहिं चढ़ेब आन के दुम्बाक्माक्त।

17 मेना अराम डा पिप हजाएल इर कुशा, गाथ कली लडाइ तोशा मेको आ के सेला बाक्त। मेको नोले हजाएल यरूसलेम नु लडाइ पचा कली मेक गे लमाक्त। 18 तन्न यहूदा डा पिप योआशमी मेको आ किकी पिपी, यहूदा डा पिप येहो-शाफात, येहोराम नु अहाज्याहम चढ़ेशो परमप्रभु यावे आ खिं डा क्येट नु आंम आ चढ़ेशो थोव्रक, परमप्रभु यावे आ खिम बाक्शो थोव्रक नु आ दरवारम बाक्शो सुन नेल्ल अराम डा पिप हजाएल कली सोइक्ता बाक्त। मिनू हजाएल यरूसलेम रे लेम्माक्त। २२राजा १०:३२

19 योआश आ पशो अरु गेय नु आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा? १राजा १५:१८ 20 मिनू नोले मेको आ गेय पाइब मुरपुकीम मेको कली साइक्वा माल्मे बाक्त। मिनू योआश कली सिल्ला सहर डा लुक्च लतीक लां मिल्लो माइश्शो दरवारम सदमे बाक्त। २२राजा १४:५ 21 मेको कली साइक्ब, योआश आ गेय पाइब शिमेआथ आ तौ योजाकार नु शोमेर आ तौ येहो-जाबाद बाक्सा बाक्त। मिनू योआश बेक्शा आ किकी पिप नु दाऊद आ सहरम थिम्वा पुंडसे बाक्त। मिनू मेको आ पा डा आ तौ अमस्याह पिप दुम्माक्त। २२राजा १४:१

इस्राएल डा पिप येहो-अहाज

13 येहू आ तौ येहो-अहाज सामरीयाम इस्राएल डा पिप दुम्माक्त। मेना यहूदा डा पिप अहाज्याह आ तौ योआशम सासन पशो २३ बर्स दुम्शो बाक्माक्त। मिनू येहो-अहाजम १७ बर्स सासन पवा बाक्त। २२राजा १०:३५ 2 मेकोमी परमप्रभु यावे आ डोंइती मार मरिम्शो बाक्मे, मेको पवा बाक्त। मिनू इस्राएली आन कली पाप पपाइक्ब नेबात आ तौ येरोबाम आ लांम गाक्माक्त। मिनू मेकोमी येरोबाम आ लांम मप्रोना बाक्त। १राजा १२:२८-३० 3 मोपतीके परमप्रभु यावेमी इस्राएली आन कली तशा गाइक्ता बाक्त। मिनू मेकोमी मेको आन कली शुश खेयप अराम डा पिप हजाएल नु मेको आ तौ बेन-हादाद आस गुइमी गेमी बाक्त। २२राजा १०:३२ 4 तन्न येहो-अहाजमी परमप्रभु यावे कली पुना बाक्त। मिनू परमप्रभु यावेम मेको आ पुंडशो नेना बाक्त। मारदे हना अराम डा पिपमी इस्राएली आन कली दिप्शा श्येत गेशो तवा बाक्त। उत्पत्ती १६:१३ 5 मिनू परमप्रभु यावेमी इस्राएली आन कली प्रोंइब का योव्रडा बाक्त। मिनू मेकोपुकी अरामी आन गुइ रे ब्रॉइमा बाक्त। मिनू इस्राएली डोंइती डा खोदेंशो पा आन आन खिम बाक्वा तामे बाक्त। २२राजा १४:२७ 6 तन्न मेकोपुकीमी इस्राएली आन कली पाप पपाइक्ब येरोबाम आ पाप पतीके मप्रोंइथु, पना पन बाक्मा बाक्त। मिनू मूर्ति पाइश्शो थाम यो सामरीयाम बाक्स डा बाक्स दुम्माक्त। १राजा १६:३३ 7 येहो-अहाज के ५० जना शारा डोइक्ब, १० ओटा बग्गी नु १० हजार खोइलीम गाक्ब लडाइ पाइब डा लाक्शा अर्को मारेइ मलीशो बाक्माक्त। मारदे हना अरु आन कली अराम डा पिपम साइश्शा, खप डा फुरक खोदेंशो सेल्शो बाक्माक्त। 8 येहो-अहाज आ पशो अरु गेय, मेको आ पशो नेल्ल नु आ सक्ति दोदेंशो बाक्मे, मार, मेको इस्राएल डा पिप आन इतिहासम ब्रेक्शो मबाक्बा डा? 9 मिनू येहो-अहाज बेक्माक्त। मिनू मुरपुकीम मेको कली आ किकी पिपी नु सामरीयाम थिम्मे बाक्त। मिनू मेको आ पा डा आ तौ योआश पिप दुम्माक्त।

## इसाएल डा पिप योआश

10 मिनु येहो-अहाज आ तौ योआश सामरीयाम इसाएल डा पिप दुम्मावक्त। मेना योआश यहूदा डा पिप दुम्शो ३७ बर्स दुम्शो बाक्मावक्त। मिनु इसाएल डा पिप योआशमी १६ बर्स सासन पवा बावक्त। यहूदा डा पिप नु इसाएल डा पिप आस नें खाल का डा बावक्त। योआश नु येहो-आश नें का बाक्ब, येही-आश कली योआश यो दैशो बावक्त।<sup>11</sup> मेकोमी परमप्रभु यावे आ डोंइती मार मरिश्शो बाक्मे, मेको पवा बावक्त। मिनु इसाएली आन कली पाप पपाइक्ब नेबात आ तौ येरोबाम आ लांम गाक्मावक्त। मिनु मेकोमी येरोबाम आ लां मप्रोना बावक्त।<sup>12</sup> योआश आ पशो अरु गेय, मेको आ पशो नेल्ल, यहूदा डा पिप अमस्याह नु लडाइ पा सक्ति कोंइशो, मार, मेको इसाएल डा पिप आन इतिहासम ब्रेक्शो मबाक्बा डा? २राजा १४:८-१६  
13 मिनु योआश बेक्मावक्त। मेको आ पा डा येरोबाम पिप दुम्मावक्त। योआश इसाएल डा पिपपुकी नु सामरीयाम थिम्चा पुंडसे बावक्त। २राजा १४:२३

## एलीशा बेक्शो

14 एलीशा रोइ पवा बावक्त। मिनु नोले मेको रोइ रे बेक्मावक्त। मिनु इसाएल डा पिप योआश मेको कली कोव्रथ लमावक्त। मिनु मेको आ डोंइती डाक्शा "ए, आं आफ! ए, आं आफ! इसाएल डा बग्गी नु शारा डोइक्बपुकी" दैमावक्त। २राजा २:१२<sup>15</sup> मिनु एलीशामी मेको कली "लिब्रा का नु ब्रा गुपो" दैमावक्त। मिनु मेकोम लिब्रा नु ब्रा गुबा बावक्त।<sup>16</sup> मिनु मेकोमी इसाएल डा पिप कली "लिब्रा खुक्को" दैमावक्त। मिनु मेकोम खुक्का बावक्त। मिनु एलीशामी आ गुइ पिप आ गुइ तार वोदा बावक्त।<sup>17</sup> मिनु एलीशामी "पूर्ब गे डा झेल रोकको" दे मदा बावक्त। मिनु रोकगा बावक्त। मिनु एलीशाम मेको कली "ब्रा आपो" दे मदा बावक्त। मिनु मेकोमी आबा बावक्त। मिनु एलीशाम "परमप्रभु यावे आ अराम रागी कली प्रातीक ब्रा बावक्त। गे अफेक सहरमी अरामी आन कली लडाइ पा ग्रानीनी" दे मदा बावक्त।<sup>18</sup> मिनु लेंशा मेकोम "ब्रापुकी गुपो" दैमावक्त। मिनु मेकोमी गुबा बावक्त। मिनु मेकोमी इसाएल डा पिप कली "खप तुपो" दैमावक्त। मिनु पिपम खेयप सां तुप्शा नांडसे बावक्त।<sup>19</sup> मिनु परमप्रभु आ मुरुमी गाइश्शा मेको कली "गे खपीम ५, ६ खेयप तुप्चा माल्शो नवे। मिनु गे अराम कली गेना हना यो कली ग्राडे वा। तन्न मुल गे अराम कली खेयप सां ला ग्रानेवे" दे मदा बावक्त।<sup>20</sup> मेको नोले एलीशा बेक्मावक्त। मुरपुकीम मेको कली थिम्मे बावक्त। मोआब डा रोइक्बपुकी बर्स बर्समी मेको रागी ओव्रबाक्मा बावक्त।<sup>21</sup> काले इसाएलीपुकीम बेक्शो मुर का थिम्मेनु मोदेंशो रोइक्ब मोआबी आन कली तामे बावक्त। मोपतीके मेकोपुकीम मेको बेक्शो मुर एलीशा वोइक्तीकेमी ताइश्शा, प्रोक्मा बावक्त। मिनु मेको बेक्शो मुरुम एलीशा आ रुश थिवा चोटी सेस दुम्शा बोक्मावक्त।

<sup>22</sup> मिनु अराम डा पिप हजाएलमी इसाएल कली श्वेत गेस डा गेस बाक्मावक्त। मेना येहो-अहाजम इसाएलम सासन पशो बाक्मावक्त।<sup>23</sup> तन्न परमप्रभु यावेमी अब्राहाम, इसहाक नु याकूब नु पशो कबलम पतीके, मेको आन कली शिशी पाइक्मी बावक्त। मेकोम मेको आन कली मिम्तीमी बावक्त। मिनु परमप्रभु यावेमी मेको आन कली साइक्वा नु आ डोंइती रे तिल्वा थुं मपवा बावक्त। लेवी २६:४२

<sup>24</sup> मिनु अराम डा पिप हजाएल बेक्मावक्त। मिनु मेको आ पा डा आ तौ बेन-हादाद पिप दुम्मावक्त।<sup>25</sup> मिनु येहो-अहाज आ तौ योआशमी आ आफ रे हजाएल आ तौ बेन-हादादम लडाइ पा प्राशो सहरपुकी लेंशा ताक्गा बावक्त। योआशमी खेयप सां मेको कली ग्रामावक्त। मिनु मोपा मेकोमी इसाएल डा सहरपुकी लेंशा आं के सेला बावक्त। २राजा १३:१९

## यहूदा डा पिप अमस्याह

२इतिहास २५:-

14 योआश आ तौ अमस्याह यहूदा डा पिप दुम्मावक्त। मेना यो-आहाज आ तौ योआश इसाएल डा पिप दुम्शो बर्स निक्शी दुम्शो बाक्मावक्त। योआश नु येहो-आश नें का बाक्ब, येही-आश कली योआश यो

दैशो बावक्त। २राजा १२:२२<sup>2</sup> यहूदा डा पिप अमस्याह पिप दुम्मेनु २५ बर्स दुम्शो बाक्मावक्त। मिनु मेकोमी यरूसलेमम २९ बर्स सासन पवा बावक्त। मेको आ ममा आ नें येहो-अददीन बाक्मावक्त। मेको यरूसलेम डा बाक्मावक्त।<sup>3</sup> अमस्याहमी परमप्रभु यावे आ डोंइती मार रिश्शो बाक्मे, मेको पवा बावक्त। तन्न मेको आ किकी दाऊदमी पशो खोदेंशो चहिं मपवा बावक्त। मेकोमी आ आफ योआशमी पशो खोदेंशो पवा बावक्त। २राजा १२:३-४<sup>4</sup> मो हना यो मेकोमी डांडाम बाक्शो थानपुकी मताइक्ता बावक्त। मेना सम्म मुरपुकीम मेकेर क्योरशा चढेतीक चढेशा, धूप चोत्रमे बावक्त।<sup>5</sup> मेकोमी आ राज्य डा गेय बोल्यो सेला नोले, आ आफ कली साइक्ब, आ गेय पाइब आन कली साइक्मी बावक्त। २राजा १२:२१:२२; २सामुएल ३:३०<sup>6</sup> तन्न मेकोमी मोसा आ अरेशो किताबम ब्रेक्शो खोदेंशो पा "तमी तौ आन पाप आ पर्वम आन आम आफ आस कली मसतीन। मिनु आम आफ आस पाप आ पर्वम यो आन तमी तौ आन कली मसतीन। सुम पाप पाइनीमी मेको ला साइक्वा पुंडसमल" दैशो, मेकोमी परमप्रभु यावे आ लोव्र टिशा, नेल्ल आंम आन पशो पापम ला साइक्वा पुंडसीनीम। ब्यवस्था २४:१६

<sup>7</sup> मेकोम हिक्सी के बेसीम १० हजार एदोमी आन कली साइक्मी बावक्त। मिनु लडाइम सेला सहर ग्राशा, मेको आ नें योक्तेल वोदा बावक्त। मेको सहर आ नें मुल सम्म मेकोन बाक्ब।<sup>8</sup> मेको नोले अमस्याहम इसाएल डा पिप येहू आ चच येहो-अहाज आ तौ योआश कली लडाइ पतीक लोव्र पा "जाक्को, गो नु आं डोंइती राप्शा लडाइ पावो" दे लडाइ पचा कली लोव्र कुरब मुर सोइक्ता बावक्त।<sup>9</sup> तन्न इसाएल डा पिप योआशम यहूदा डा पिप अमस्याह कली "लेबानोन डा चू बुटा काम लेबानोन डा लाइश्शो रवा का कली 'इ तमी आं तौ नु ग्युंभे पचा गेवो' दैमावक्त। तन्न लेबानोन डा ब्वाकीमी बाक्ब जन्तु का मेको मेर पा पिमावक्त। मिनु मेकोम चू बुटा कली दिम्शा ताइश्शा पवा बावक्त। न्यायाधीस ९:१४<sup>10</sup> गे एदोम कली ग्राशा, ठेयब लेश्शो दुम्तीनी। इन ग्राशोम ग्येरसीने। तन्न इन खिंमी सिक्सी पा बाक्कीन। आंम इन कली नु यहूदा कली मारदे खतम सेल्चा दाक्नीनी?" दैपाइक्थ लोव्र कुरब मुर का सोइक्ता बावक्त।

<sup>11</sup> मो हना यो अमस्याहमी मेको लोव्र मनेना बावक्त। मोपतीके इसाएल डा पिप योआशमी लडाइ तोवा बावक्त। मिनु मेको नु यहूदा डा पिप अमस्याह यहूदा डा बेथ-शेमेशम लडाइ पाम्से बावक्त। यहोसु १५:१०<sup>12</sup> मिनु यहूदा डा पिप इसाएली आन क्येडा ब्रुमावक्त। मिनु मुर नेल्ल प्रोक्मा बावक्त।<sup>13</sup> मिनु इसाएल डा पिप योआशमी यहूदा डा पिप अहाज्याह आ चच, योआश आ तौ अमस्याह कली बेथ-शेमेशमी ग्याइक्ता बावक्त। मिनु मेको नोले योआश यरूसलेम लेश्शा जाक्मावक्त। मिनु इसाएल डा पिपमी यरूसलेम डा गारो एफ्राइम डा ठेयब लाप्चो रे कुना डा ठेयब लाप्चो सम्म ४ सहे कुबीत प्रेप्पदा बावक्त। कुबीत का आधा मिटर खोदेंशो बाक्ब।<sup>14</sup> मेकोमी परमप्रभु यावे आ खिंम बाक्शो नु पिप आ खिंम थिश्शो सुन चांदी नु ग्योंब नेल्ल नु मुर यो ग्याइश्शा लदा बावक्त। मिनु नोले सामरीया लेम्मावक्त।

<sup>15</sup> मेको योआश आ पशो अरु गेय, आ पशो नेल्ल, आ सक्ति नु यहूदा डा पिप अमस्याह नु पशो लडाइ, मार, मेको नेल्ल इसाएल डा पिप आन इतिहासम ब्रेक्शो मबाक्बा डा? <sup>16</sup> मिनु योआश बेक्मावक्त। मिनु इसाएल डा पिपपुकी नु सामरीयाम थिम्चा पुंडसे बावक्त। मिनु मेको आ पा डा आ तौ येरोबाम पिप दुम्मावक्त। २राजा १३:१३

<sup>17</sup> यहूदा डा पिप योआश आ तौ अमस्याह, इसाएल डा पिप येहो-अहाज आ तौ योआश क्येडा १५ बर्स शुश ब्रोंइमावक्त।<sup>18</sup> अमस्याह आ पशो अरु गेय, मार, मेको यहूदा डा पिप आन इतिहासम ब्रेक्शो मबाक्बा डा? <sup>19</sup> मिनु यरूसलेम सहरम मुरपुकीमी मेको कली साइक्वा माल्मे बावक्त। मोपतीके मेको लाकीश सहरम प्रोक्मावक्त। तन्न मेको कली खेदा पाइब मुर सोइश्शा मेक उइ साइक्पदमे बावक्त। २राजा १२:२१<sup>20</sup> मिनु मेको आ बेक्शो रां शाराम कुर पा यरूसलेम चाक्गमे बावक्त। मिनु मेको कली आ किकी पिपी नु दाऊद आ सहरम थिम्मे बावक्त।<sup>21</sup> मिनु यहूदा डा मुर नेल्लेम १६ बर्स दुम्शो अमस्याह आ तौ अजारयाह कली मेको आ पा डा पिप सेल्मे बावक्त। २राजा १५:१-२<sup>22</sup> मेकोमी अमस्याह बेक्ने थुमा नोले एलाथ सहर लेंशा सेल्शा लेश्शा ताक्गा बावक्त। २राजा १६:६



## येरोबाम इस्राएल डा पिप दुश्शो

23 मिनु योआश आ तौ येरोबाम सामरीया सहरम इस्राएल डा पिप दुम्माक्त। मेना योआश आ तौ अमस्याह यहूदा डा पिप दुश्शो १५ बर्स दुश्शो बाक्माक्त। मिनु येरोबाम ४१ बर्स सासन पवा बाक्त। *होसे १:१; आमोस १:१* 24 मेकोमी परमप्रभु यावे आ डोंइती मार मरिश्शो बाक्मे, मेको पवा बाक्त। मिनु इस्राएली आन कली पाप पपाइक्व नेबात आ तौ येरोबाम आ लांम गाक्माक्त। मिनु मेकोमी येरोबाम आ लां मप्रोना बाक्त। *१राजा १२:२८-३०* 25 मिनु परमप्रभु यावे आ गेय पाइब नु आ लोव्र पाइब इस्राएल डा गाथ-हफेर सहर डा अमीत्तै आ तौ योना आ पशो परमप्रभु यावे, इस्राएली आन परमप्रभु आ लोव्र गाम्माक्त। लेबो-हमाथ रे अराबाह डा समुन्द्र सम्म इस्राएल डा सांद लेंशा सेल्ब येरोबाम बाक्माक्त। *योना १:१* 26 मारदे हना परमप्रभु यावेमी इस्राएली आन कली शुश श्येत जशो तवा बाक्त। वाइल दुश्शो नु मदुश्शो सुइ मलीमा बाक्त। इस्राएली आन कली वारच पाइब सुइ मबाक्मा बाक्त। 27 परमप्रभु यावेमी इस्राएल कली रागी रे क्याम्वा मदेंतीके, मेकोमी योआश आ तौ येरोबाममी मेको आन कली प्रॉइमी बाक्त। *२राजा १३:५*

28 येरोबाम आ पशो अरु गेय, मेको आ पशो नेल्ल, आ सक्ति, मेको आ लडाइ पशो नु दोपा यहूदा डा दमस्कस नु हमाथ सहर लेंशा इस्राएल के सेला, मार, मेको इस्राएल डा पिप आन इतिहासम ब्रेक्शो मबाक्वा डा? 29 मिनु येरोबाम बेक्माक्त। मिनु इस्राएल डा पिप नु थिम्वा पुंडसे बाक्त। मिनु मेको आ पा डा आ तौ जकरिया पिप दुम्माक्त। *२राजा १५:८*

## यहूदा डा पिप अजारयाह

15 मिनु अमस्याह आ तौ अजारयाह यहूदा डा पिप दुम्माक्त। मेना येरोबाम इस्राएल डा पिप दुश्शो २७ बर्स दुश्शो बाक्माक्त। *२इतिहास २६:-; २राजा १४:२१* 2 मिनु अजारयाह पिप दुम्मेनु १६ बर्स दुश्शो बाक्माक्त। मिनु मेकोम यरूसलेममी ५२ बर्स सासन पवा बाक्त। मेको आ ममा आ नें येकोल्याह बाक्माक्त। मेको यरूसलेम डा बाक्माक्त। 3 मेकोम आ आफ अमस्याह खोदेंशो पा, परमप्रभु यावे आ डोंइती मार रिश्शो बाक्मे, मेको पवा बाक्त। 4 मो हना यो मेकोमी डांडाम बाक्शो थानपुकी मताइक्ता बाक्त। मेना सम्म मुरपुकीम मेकेर चढेतीक चढेशा धूप चोव्रमे बाक्त। *२राजा १४:३-४* 5 मिनु परमप्रभु यावेमी पिप कली कोव्र मुपदा बाक्त। मिनु मेको मबेक्म सम्म आ कान खिं काम बाक्वा माल्दा बाक्त। मिनु पिप आ तौ योथाममी पिप आ दरवार डा मारेइ मारेइ गेय पशा, राज्य डा मुर आन कली सासन पवा बाक्त। *लेवी १३:४६* 6 अजारयाह आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्वा डा? 7 मिनु अजारयाह बेक्माक्त। मिनु आ किकी पिपी नु दाऊद आ सहरम थिम्वा पुंडसे बाक्त। मिनु मेको आ पा डा आ तौ योथाम पिप दुम्माक्त। *२राजा १५:३२*

## इस्राएल डा पिप जकरिया

8 मिनु येरोबाम आ तौ जकरिया सामरीयाम इस्राएल डा पिप दुम्माक्त। मेना अजारयाह यहूदा डा पिप दुश्शो ३८ बर्स दुश्शो बाक्माक्त। मिनु जकरियामी ६ महिना सासन पवा बाक्त। *२राजा १४:२९* 9 मेकोमी आ किकी पिपी खोदेंशो पा, परमप्रभु यावे आ डोंइती मार मरिश्शो बाक्मे, मेको पवा बाक्त। मिनु इस्राएली आन कली पाप पपाइक्व नेबात आ तौ येरोबाम आ लांम गाक्माक्त। *१राजा १२:२८-३०; आमोस ७:९* 10 याबेश आ तौ शाल्लुममी जकरिया कली साइक्वा मला बाक्त। मिनु शाल्लुममी मेको कली मुर आन दातेमीन तुष्शा सदा बाक्त। मिनु मेको आ पा डा शाल्लुम पिप दुम्माक्त। 11 जकरिया आ पशो अरु गेय, मेको आ पशो नेल्ल, इस्राएल डा पिप आन इतिहासम ब्रेक्शो बाक्ब। 12 मोपा परमप्रभु यावेम येहू कली "इ मुर ४ पाला सम्म पिप दुम्नीम" देंशो लोव्र गाम्माक्त। मिनु मोदेंशोन दुम्माक्त। *२राजा १०:३०*

## इस्राएल डा पिप शाल्लुम

13 मिनु याबेश आ तौ शाल्लुम सामरीयाम पिप दुम्माक्त। मेना उज्जीयाह यहूदा डा पिप दुश्शो ३९ बर्स दुश्शो बाक्माक्त। मिनु शाल्लुममी सामरीया सहरम महिना का सासन पवा बाक्त। 14 मेको नोले गादी आ तौ मेनाहेम तिरचा सहर रे सामरीयाम कुमाक्त। मिनु मेकोमी याबेश आ तौ शाल्लुम कली तुष्शा सदा बाक्त। मिनु मेको कली साइश्शा, आ पा डा पिप दुम्माक्त। 15 शाल्लुम आ पशो अरु गेय, मेको आ पशो नेल्ल नु जकरिया कली साइश्शो मेको इस्राएल डा पिप आन इतिहासम ब्रेक्शो बाक्ब। 16 मेना मेनाहेममी तिरचा सहर रे लाइश्शा, तिप्साह नु मेको आ एर ऑथ बाक्शो रागी नेल्ल आन कली लडाइ तोव्रमी बाक्त। मारदे हना मेकोपुकीम मेको कली ठेयब लाचो रोक्शा मगेमे बाक्त। मेकोम तिप्साह कली खतम सेला बाक्त। मिनु आल कुरशो मीश मुर नेल्ल आन कोव्रज पाक्मी बाक्त। *तिफसाह ताप्पुआह सहर आ हिब्रू नें बाक्ब। यहोसु १२:२४; २राजा ८:१२*

## इस्राएल डा पिप मेनाहेम

17 गादी आ तौ मेनाहेम इस्राएल डा पिप दुम्माक्त। मेना अजारयाह यहूदा डा पिप दुश्शो ३९ बर्स दुश्शो बाक्माक्त। मिनु मेनाहेम सामरीयाम १० बर्स सासन पवा बाक्त। 18 मेकोमी परमप्रभु यावे आ डोंइती मार मरिश्शो बाक्मे, मेको पवा बाक्त। मिनु मेकोमी ब्रॉइम सम्म इस्राएली आन कली पाप पपाइक्व नेबात आ तौ येरोबाम आ लां मप्रोना बाक्त। 19 मिनु अस्सुर डा पिप पुलमी मेको रागी कली लडाइ तोवा बाक्त। मिनु मेनाहेममी आ राज्य बोल्यो सेल्चा कली, पुल कली हजार का टलेन्ट, चांदी गेवा बाक्त। *टलेन्ट का ३४ किलो बाक्ब। २राजा १५:२९* 20 मेनाहेममी मेको क्येट इस्राएल डा शॉप पाइश्शो मुर रे पोक्गा बाक्त। मिनु मेकेर डा मुरपुकीमी अस्सुर डा पिप कली ५० शेकेल चांदी गेचा माल्बाक्मा बाक्त। मोपतीके अस्सुर डा पिप मेको रागीम मबाक्थु, आ रागी लेशा लमाक्त। *शेकेल का ११.५ ग्राम खोदेंशो बाक्ब। २राजा २३:३५* 21 मेनाहेम आ पशो अरु गेय, मेको आ पशो नेल्ल, मार, मेको इस्राएल डा पिप आन इतिहासम ब्रेक्शो मबाक्वा डा? 22 मिनु मेनाहेम बेक्माक्त। मिनु मेको आ पा डा आ तौ पेकाहीयाह पिप दुम्माक्त।

## इस्राएल डा पिप पेकाहीयाह

23 मिनु मेनाहेम आ तौ पेकाहीयाहम सामरीयाम इस्राएल डा पिप दुम्माक्त। मेना अजारयाह यहूदा डा पिप दुश्शो ५० बर्स दुश्शो बाक्माक्त। मिनु पेकाहीयाह बर्स निक्शी सासन पवा बाक्त। 24 मेकोमी परमप्रभु यावे आ डोंइती मार मरिश्शो बाक्मे, मेको पवा बाक्त। मिनु इस्राएली आन कली पाप पपाइक्व नेबात आ तौ येरोबाम आ लांम गाक्माक्त। 25 मिनु मेको आ लडाइ पाइब आन कप्तान रेमाल्याह आ तौ पेकाहमी मेको पिप कली साइक्वा मला बाक्त। मिनु मेकोम गिलाद डा ५० जना मुर आन कली लाइश्शा सामरीया डा पिप पेकाहीयाह आ दरवारम ओव्रशा, मेको कली सदा बाक्त। मिनु अरगोब नु अरीएह आस कली यो सांडसी बाक्त। मोपा पेकाह आ पा डा पिप दुम्माक्त। *२राजा १५:१०, १५, ३०* 26 पेकाहीयाह आ पशो अरु गेय, मेको आ पशो नेल्ल, इस्राएल डा पिप आन इतिहासम ब्रेक्शो बाक्ब।

## इस्राएल डा पिप पेकाह

27 रेमाल्याह आ तौ पेकाह सामरीयाम इस्राएल डा पिप दुम्माक्त। मेना अजारयाह यहूदा डा पिप दुश्शो ५२ बर्स दुश्शो बाक्माक्त। मिनु पेकाहमी २० बर्स सासन पवा बाक्त। 28 मेकोमी परमप्रभु यावे आ डोंइती मार मरिश्शो बाक्मे, मेको पवा बाक्त। मिनु इस्राएली आन कली पाप पपाइक्व नेबात आ तौ येरोबाम आ लांम गाक्माक्त। मिनु मेकोमी येरोबाम आ लां मप्रोना बाक्त।

29 इस्राएल डा पिप पेकाहमी सासन पवा ना अस्सुर डा पिप तिग्लात-पिलेसेरमी लडाइ तोशा, इयोन, आबेल-बेथ-माकाह, यानोह, केदेश, हासोर,

गिलाद, गालील रागी नु नाप्ताली आ रागी नेल्ल आ के सेल्शा, मेकेर डा मुर आन कली ग्याइश्शा अस्सुर लाइक्मी बाक्त। १इतिहास ५:२६<sup>30</sup> मिनु एलाह आ तौ होशेआमी रेमाल्याह आ तौ पेकाह कली साइक्वा मला बाक्त। मिनु पेकाह कली तुष्शा सदा बाक्त। मिनु मेको आ पा डा पिप दुम्माक्त। मेना यहूदामी उज्जीयाह आ तौ योथामम सासन पशो २० बर्स दुम्शो बाक्माक्त। २राजा १७:१; २राजा १५:२५<sup>31</sup> पेकाह आ पशो अरु गेय, मेको आ पशो नेल्ल इस्राएल डा पिप आन इतिहासम ब्रेक्शो बाक्ब।

#### यहूदा डा पिप योथाम

32 मिनु उज्जीयाह आ तौ योथाम यहूदा डा पिप दुम्माक्त। मेना रेमाल्याह आ तौ पेकाह इस्राएल डा पिप दुम्शो बर्स निक्शी दुम्शो बाक्माक्त। २इतिहास २७:१-७<sup>33</sup> योथाम पिप दुम्मेनु २५ बर्स दुम्शो बाक्माक्त। मिनु मेकोम यरूसलेमम १६ बर्स सासन पवा बाक्त। मेको आ ममा आ नें येरुशा बाक्माक्त। मेको सादोक आ तमी बाक्माक्त। 34 मेकोम आ आफ उज्जीयाह खोदेंशो पा, परमप्रभु यावे आ डोंइती मार रिम्शो बाक्मे, मेको पवा बाक्त। २राजा १५:३,४<sup>35</sup> मो हना यो मेकोमी डांडा डा थानपुकी मताइक्ता बाक्त। मेना सम्म मुरपुकीम मेकेर चढ़ेतीक चढ़ेशा, धूप चोवमे बाक्त। मेकोमी परमप्रभु यावे आ खिं डा उत्तर गे डा ठेयब लाप्चो यो सेल्पदा बाक्त। 36 योथाम आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा? 37 मेना परमप्रभु यावेमी अराम डा पिप रेसीन नु रेमाल्याह आ तौ पेकाह आस कली यहूदा नु लडाइ पचा कली क्युक्सी बाक्त। २राजा १६:५<sup>38</sup> मिनु योथाम बेक्माक्त। मिनु मेको दाऊद आ सहरम आ किकी पिपी नु थिम्चा पुंडसे बाक्त। मिनु मेको आ पा डा आ तौ आहाज पिप दुम्माक्त।

#### यहूदा डा पिप आहाज

16 मिनु योथाम आ तौ आहाज यहूदा डा पिप दुम्माक्त। मेना रेमाल्याह आ तौ पेकाह इस्राएल डा पिप दुम्शो १७ बर्स दुम्शो बाक्माक्त। २इतिहास २८:१-६<sup>2</sup> आहाज पिप दुम्मेनु २० बर्स दुम्शो बाक्माक्त। मिनु मेकोमी यरूसलेमम १६ बर्स सासन पवा बाक्त। मेकोमी आ किकी दाऊदम खोदेंशो पा परमप्रभु यावे, आ परमप्रभु आ डोंइती मार रिम्शो बाक्मे, मेको मपवा बाक्त। 3 मेको इस्राएल डा पिप आन लाम गाक्माक्त। मेकोमी आ तौ कली चोशा चढ़ेवा बाक्त। मोदेंशो ग्रांग्रा दिशो गेय पशो आ पबर्म परमप्रभु यावेमी डोंइती रागी रागी डा मुर आन कली इस्राएल रे गुंडशो बाक्माक्त। लेवी १८:२१<sup>4</sup> मेकोमी डांडा डा थानम, पहाड मेर नु गिग रवा आन पुं नेल्लेमी चढ़ेतीक चढ़ेशा धूप चोवा बाक्त।

5 मिनु अराम डा पिप रेसीन नु इस्राएल डा पिप रेमाल्याह आ तौ पेकाहमी यरूसलेम कली लडाइ तोशा पुम्दमे बाक्त। तन्न मेकोम आहाज कली ग्राने मचाप्से बाक्त। यसैया ७:१-९<sup>6</sup> मेना अराम डा पिपमी रेसीन एलाथ डा यहूदी आन कली खेरशा, एलाथ सहर एदोमी आन कली गेवा बाक्त। मिनु एदोम डा मुर मुल सम्म मेकेर बाक्शो बाक्नीम। २राजा १४:२२<sup>7</sup> मिनु आहाजम अस्सुर डा पिप तिग्लत-पिलेसेर कली “गो इन गेय पाइब नु इन तौ नड। आं कली लडाइ तोइब अराम नु इस्राएल डा पिप रे प्रोंइचा नड। मेकोपुकीम आं कली लडाइ तोशो बाक्नीम” देंशा लोव कुरब मुर सोइक्ता बाक्त। २इतिहास २८:१६-२७<sup>8</sup> मिनु आहाजमी परमप्रभु यावे आ खिंम बाक्शो नु पिप आ खिंम बाक्शो सुन नु चांदी नेल्ल अस्सुर डा पिप कली कोसेली सोइक्ता बाक्त। १राजा १५:१८<sup>9</sup> मिनु अस्सुर डा पिपमी मेको आ लोव नेना बाक्त। मिनु दमस्कस कली लडाइ तोशा मेको आ के सेला बाक्त। मेकोमी मेकेर डा मुर आन कली ग्याइश्शा कीर सहर लाइक्मी बाक्त। मिनु नोले रेसीन कली सदा बाक्त।

10 मिनु पिप आहाज, अस्सुर डा पिप तिग्लत-पिलेसेर कली गुम्थ दमस्कस लमाक्त। मिनु मेकोमी दमस्कसम चढ़ेतीक का तवा बाक्त। मिनु मेको दोदेंशो बाक्मे, मेको नेल्ल ब्रेक्शा चढ़ेब उरीयाह आ बाक्तीक सोइक्ता बाक्त। 11 मिनु चढ़ेब उरीयाहम दमस्कस रे पिप आहाजम सोइश्शो ब्रेक्स खोदेंशो पा, चढ़ेतीक का सेला बाक्त। मिनु मेकोमी मेको चढ़ेतीक पिप

आहाज दमस्कस रे जाक्वा क्येडा डोंइतीन सेल्ले थुमा बाक्त। 12 मिनु पिप दमस्कस रे लेश्शा जाक्शा, मेको चढ़ेतीक कोव्रडा बाक्त। मिनु पिपम चढ़ेतीक आ नेक्था लशा डोंइसे बाक्त। 13 मेकोम मेकेर चोशा चढ़ेतीके नु अन्न चढ़ेतीके चढ़ेवा बाक्त। मिनु तूचा थोवक चढ़ेतीक लुक्शा दुशा बाक्वा आ पबर्म चढ़ेशो आ हुश मेको तार ब्रुइक्ता बाक्त। 14 मेकोमी परमप्रभु यावे आ खिं आ डोंइती बाक्शो कांसा के चढ़ेतीक परमप्रभु यावे आ खिं नु चढ़ेतीक आस दातेम मबाक्ल, दे याक्ता बाक्त। नक चढ़ेतीक लाइश्शा, मेकेर वोदा बाक्त। मेको माइत चढ़ेतीक चहिं उत्तर गे वोदा बाक्त। 15 मेको नोले पिप आहाजमी चढ़ेब उरीयाह कली “एको ठेयब नक चढ़ेतीकम सुनी चोशा चढ़ेतीके नु नाक्दो डा अन्न चढ़ेतीके, पिप आ चोशा चढ़ेतीके, मेको आ अन्न चढ़ेतीके, रागी डा मुर नेल्ल आन चोशा चढ़ेतीके नु मेको आन अन्न चढ़ेतीके नु तूचा थोवक चढ़ेतीके चढ़ेवो। चढ़ेतीकम चोशा चढ़ेतीक नु चढ़ेशो नेल्ल आन हुश ब्रुइक्वा माल्ल। तन्न मेको कांसा के चढ़ेतीके चहिं परमप्रभु यावे कली मारेइ लोव हिल्लो पची ना गो मेकेर चढ़ेशा हिल्लो पाइनुड” दे मदा बाक्त। 16 मिनु चढ़ेब उरीयाहम पिप आहाज आ देशो नेल्ल पवा बाक्त।

17 मेको नोले पिप आहाजमी चिक्तीक बोस आन निल्लीकपुकी मेको आन एर आंथ डा चिक्तीक बोस गुंडपदा बाक्त। मिनु मेको आ नेक्था बाक्शो ब्वाक्कु कुर पतीक ठेयब बोस कली ब्यफ आन तार रे गुंडपदा बाक्त। मिनु मेको ठेयब बोस कली फुल्लुम तिकशा वोइक्पदा बाक्त। १राजा ७:२३-३९<sup>18</sup> मेकोमी परमप्रभु यावे आ खिंम सेल्शो नाइक्तीक नाक्त कली सेल्शो ठेयब कोठा नु परमप्रभु यावे आ खिं डा लाडगा पिप आ खिं रे ओव्रतीक अस्सुर डा पिप आ पबर्म अर्को सेला बाक्त। 19 आहाज आ पशो अरु गेय नु मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा? 20 मिनु आहाज बेक्माक्त। मिनु दाऊद आ सहरमी आ किकी पिपी नु थिम्चा पुंडसे बाक्त। मिनु मेको आ पा डा आ तौ हिज्कीयाह पिप दुम्माक्त। २राजा १८:१

#### इस्राएल डा पिप होशेआ

17 एलाह आ तौ होशेआ सामरीयाम इस्राएल डा पिप दुम्माक्त। मेना यहूदा डा पिप आहाज पिप दुम्शो १२ बर्स दुम्शो बाक्माक्त। मिनु होशेआम ९ बर्स सासन पवा बाक्त। २राजा १८:९-१२; २राजा १५:३०<sup>2</sup> मेकोम परमप्रभु यावे आ डोंइती मार मरिम्शो बाक्मे, मेको पवा बाक्त। तन्न आ डोंइती डा इस्राएल डा पिप आन पशो खोदेंशो चहिं मपवा बाक्त। 3 मिनु अस्सुर डा पिप शाल्मानेसेर होशेआ कली लडाइ तोथ जाक्माक्त। मिनु होशेआमी मेको कली तिरो थाप्चा माल्दा बाक्त। 4 तन्न अस्सुर डा पिपमी होशेआम आ कली मटिशो तवा बाक्त। मारदे हना मेकोमी इजीप्त डा पिप सो कली लोव कुरब मुर सोइश्शो तुइक्ता बाक्त। मिनु बर्स बर्सम गेतीक तिरो यो अस्सुर डा पिप कली मथाप्ता बाक्त। मोपतीके अस्सुर डा पिपमी मेको कली ग्याइश्शा जेल्खानम चोक्गा बाक्त। होसे १२:२<sup>5</sup> मिनु अस्सुर डा पिपम रागी नेल्ल आन कली लडाइ तोशा, सामरीया जाक्माक्त। मिनु मेको कली लडाइ तोशा, बर्स सां सम्म पुम्दा बाक्त। यसैया २८:२<sup>6</sup> अस्सुर डा पिपमी होशेआम सासन पशो ९ बर्स दुम्मेनु, सामरीया कली ग्रामाक्त। मेकोमी इस्राएल डा मुर आन कली ग्याइश्शा अस्सुर लाइक्मी बाक्त। मिनु मेको आन कली हालाह सहर नु गोजान डा खोला हाबोर आ नेक्था नु मादी आन सहरम वोइक्मी बाक्त।

#### इस्राएली ग्याइक्वा पुंडसीशो

7 मारदे मोदेंशो दुम्शो बाक्त देंशा हना, परमप्रभु यावे, आन परमप्रभुम मेको आन कली इजीप्त रागी डा पिप फाराओ आ गुइ रे गुंडशा चाक्गा रे इस्राएलीपुकीम देवी देवता आन कली पूजा पशो बाक्मा बाक्त। 8 मेकोपुकीम परमप्रभु यावेमी आन डोंइती गुंडशो रागी रागी डा मुर आन पतीके पशो बाक्मा बाक्त। इस्राएल डा पिप आन पशो मरिम्शो गेय नेल्ल पशो बाक्मा बाक्त। मेकोपुकीमी परमप्रभु यावे कली मटिशो बाक्मा बाक्त। २राजा १६:३<sup>9</sup> इस्राएल डा मुरपुकीम परमप्रभु यावे, आन परमप्रभु आ

डोंडती खुइश्शा मरिम्शो पशो बाक्मा बाक्त। खाल पतीक लाइश्शो खिं रे सहर नेल्लेम आंम कली थान सेल्मे बाक्त। <sup>10</sup> मेकोपुकीम डांडा नेल्ल नु शुश गिग रवा आन पुंमी खुक्शो फुल्लु नु मूर्ति पाइश्शो थामपुकी सेल्मे बाक्त। २ राजा १६:४; १ राजा १४:२३ <sup>11</sup> मेकोपुकीम परमप्रभु यावेमी मेको आन डोंडती रे गुंइशो रागी रागी डा मुर खोदेशो पा डांडा डा थानम धूप चोवमे बाक्त। मेकोपुकीम परमप्रभु यावे आ अरेशो काइ मटिथु, गाइक्पदमे बाक्त। <sup>12</sup> मेकोपुकीमी मूर्ति पूजा पामे बाक्त। डोंडती परमप्रभु यावेमी “मोदेशो पचा मडुम्ब” देशो बाक्माक्त। <sup>13</sup> मो हना यो परमप्रभु यावेमी आ लोत्र पाइब नु आ कोंडतीक ताइब नेल्ल रे पा इस्राएल नु यहूदा डा मुर आन कली “गे इन मरिम्शो लां रे लेतीन। आं शेंशो, आं फुल्लुमु मुशा ब्रेक्शो लोत्र नु इन किकी पिपी आन कली गेशा आं अरेशो नेल्ल पने” दे आ गेय पाइबपुकीमी मेको आन कली थाम्पा हिंच कोंडपदा बाक्त। <sup>14</sup> तन्न मेकोपुकीम आन थमा मसुइक्ब किकी पिपी खोदेशो पा परमप्रभु यावे आ लोत्र मनैथु, काइ मटीमे बाक्त। <sup>15</sup> मेकोपुकीम मेको आ फुल्लुमु मुशा ब्रेक्शो लोत्र, मेको आन किकी पिपी नु पशो कबल नु हिंच कोंडशो ममिम्तमे बाक्त। मेकोपुकी शोर गाक्शो मूर्ति आन नोले खोइश्शा, आंमा यो शोर गाक्शो दुम्शो बाक्मा बाक्त। मेको आन एर ऑथ बाक्ब रागी रागी डा मुर आन नोले खोदमे बाक्त। परमप्रभु यावेमी मेको आन कली “गे मेको आन पशो खोदेशो मपने” देशा, अरेशो बाक्माक्त। प्रस्थान २३:२४

<sup>16</sup> मेकोपुकीम परमप्रभु यावे, आन परमप्रभु आ शेंशो मटिथु, आंम कली यपाइश्शा बाछा निक्शी नु मूर्ति पाइश्शो थाम का सेल्समा बाक्त। मेकोपुकी नां, तास्ला नु सौरुल आन डोंडती बाक्मा बाक्त। मिनु बाल देवता कली पूजा पामे बाक्त। १ राजा १२:२८; १ राजा १६:३३ <sup>17</sup> मेकोपुकीम आंम तमी तौ आन कली क्योरशा चोशा चढेमे बाक्त। मिनु लिंक्यु कौवशा, मन्तर तन्तर पामे बाक्त। मिनु परमप्रभु यावे आ डोंडती मार मरिम्शो बाक्मे, मेको पना पन बाक्मा बाक्त। मिनु मेको कली गाइक्पदमे बाक्त। लेवी १८:२१

<sup>18</sup> मोपतीके परमप्रभु यावे इस्राएल आ पर्वम थाम्पा गाइक्ता बाक्त। मिनु मेको आन कली आ डोंडती रे खेरमी बाक्त। यहूदा आ थर डा मुर ला प्रोंइशा वोइक्चा पुंडसमा बाक्त।

<sup>19</sup> मिनु यहूदा आ मुरपुकीम यो परमप्रभु यावे, आन परमप्रभु आ शेंशो लोत्र मटीमे बाक्त। मेकोपुकीम इस्राएली आन पशो पामे बाक्त।

<sup>20</sup> मोपतीके परमप्रभु यावेम इस्राएल आ चच युइ नेल्ल आन कली प्रोंइमी बाक्त। मिनु मेको आन कली सजाइ गेशा, रोइक्ब आन गुइमी गेमी बाक्त। आ डोंडती रे मखेरा सम्म मो पवा बाक्त।

<sup>21</sup> मेकोमी “इस्राएली आन कली दाऊद आ खिं रे तिल्लुड” दे नेबात आ तौ येरोबाम कली पिप सेल्पदा बाक्त। मिनु येरोबामम इस्राएली आन कली परमप्रभु यावे कली प्रोंइपाइश्शा, ठेयब पाप पपाइक्मी बाक्त। १ राजा १२:२० <sup>22</sup> मिनु इस्राएलीपुकीम येरोबाम आ पपाइश्शो पाप नेल्ल पामे बाक्त। मिनु मेको मप्रोन्मे बाक्त। <sup>23</sup> परमप्रभु यावेमी आ गेय पा, आ लोत्र पाइबपुकी रे डोंडती देशो खोदेशो पा इस्राएली आन कली आ डोंडती रे खेरमी बाक्त। मोपतीके इस्राएलीपुकी आंम आन रागी रे अस्सुर रागीम ग्याइश्शा लाइक्चा पुंडसमा बाक्त। मिनु मुल सम्म मेक उइ बाक्शो बाक्नीमी। ब्यक्स्था २८:६३-६४

सामरीयाम अर्को रागी डा मुर वोइश्शो

<sup>24</sup> मेको नोले अस्सुर डा पिपमी बेबीलोन, कूथाह, अक्वा, हमाथ नु सेफारवाइम रे मुरपुकी चाक्मी बाक्त। मिनु मेको आन कली इस्राएली आन पा डा सामरीया डा सहरपुकीम बाक्पाइक्मी बाक्त। मेकोपुकी सामरीया आंम के सेल्शा मेकेर बाक्मा बाक्त। <sup>25</sup> मिनु डोंडती मेकोपुकी मेकेर बाक्मानु, परमप्रभु यावे कली ममानेमे बाक्त। मोपतीके परमप्रभु यावेमी मेको आन दातेमी गुप्स सोइक्तीमी बाक्त। मिनु मेको गुप्सपुकीम कोइ कोइ आन कली सदमे बाक्त। होसे १३:८ <sup>26</sup> मिनु मेकोपुकीमी अस्सुर डा पिप कली “गे इन सोइश्शो रागी रागी डा मुर सामरीया डा सहरम बाक्नीम। मेकोपुकीमी मेको रागी डा परमप्रभु आ अरेशो मतुइक्नीम। मोपतीके परमप्रभुम मेको आन दातेमी गुप्स सोइक्ताक्व। मारदे हना मेकोपुकी मेको

रागी डा परमप्रभु कली मतुइक्तीके ठेयब सेल्स मजोक्तीके, मेको गुप्समी मुर आन कली साइक्तेक्म” दे लोत्र कुरब मुर सोइक्तेमे बाक्त। <sup>27</sup> मिनु अस्सुर डा पिपमी “सामरीया रे ग्याइश्शा लाइश्शो अस्सुर रागीम चाक्शो तेकोइ चढेब का मेक बाक्चा कली लेश्शा सोइक्तेमेक्ल। मिनु मेकोमी मेको रागी डा परमप्रभु आ अरेशो लोत्र मुर आन कली शेंचा माल्ब” दे अरेवा बाक्त। <sup>28</sup> मोपतीके डोंडती सामरीया रे ग्याइश्शा लाइश्शो चढेब का बेथेलम लेश्शा जाक्शा, मेकेर बाक्माक्त। मिनु मेकोमी मुर आन कली परमप्रभु यावे कली दोपा ठेयब सेल्चा माल्नीमी मेको शेंदीमी बाक्त।

<sup>29</sup> मो हना यो रागी रागी डा मुरपुकीम आंम आन बाक्तीके सहर सहरम आन देवी देवता सेल्शा, मेको डांडा डा थानम वोदमे बाक्त। मोपा आन बाक्शो सहर नेल्लेमी सामरीया डा मुर आन सेल्शो डांडा डा थान यो बाक्मा बाक्त। <sup>30</sup> बेबीलोन डा मुरपुकीम आन देवता सुक्कोथ-बेनोथ सेल्मे बाक्त। कूथ डा मुरपुकीम नेरगल सेल्मे बाक्त। हमाथ डा मुरपुकीम अशीमा सेल्मे बाक्त। <sup>31</sup> अक्वा सहर डा मुरपुकीम निभाज नु तारतक सेल्मे बाक्त। मिनु सेफारवाइम डा मुरपुकीमी आन आल आन कली आन देवता अद्राम्मेलेक नु अनाम्मेलेक आस कली चोशा चढेमे बाक्त। २ राजा १७:३१ <sup>32</sup> मेकोपुकीम परमप्रभु यावे कली यो ठेयब सेल्मे बाक्त। मिनु डांडा डा थानमी अरु मुर आन कली चढेब सेल्मे बाक्त। मेकोपुकीमी डांडा डा थानपुकीम मुर आन पर्वम चढेमे बाक्त। १ राजा १२:३१ <sup>33</sup> मिनु मोपा मेकोपुकीम परमप्रभु यावे कली ठेयब सेल्शा, आंम आन देवी देवता आन कली यो पूजा पामे बाक्त। तेको रागी रे चाक्शो बाक्मा, मेको आन देवी देवता आन पतीक पशा, पूजा पामे बाक्त। <sup>34</sup> मेकोपुकीमी मुलाक्त सम्म मोदेशो पना पन बाक्नीम। मिनु मेकोपुकीमी परमप्रभु यावे कली मान पा महिनीम। मेको आ फुल्लुमु मुशा ब्रेक्शो लोत्र, आ निसाफ पतीक लोत्र, आ अरेशो नु आ शेंशो मपामे बाक्त। परमप्रभु यावेमी मोदेशो पचा माल्नीनी, दे इस्राएल माइश्शो याक्कूब आ आल आन कली अरेशो बाक्माक्त। उत्पत्ती ३२:२९ <sup>35</sup> परमप्रभु यावेमी इस्राएली नु कबल का पवा बाक्त। मिनु मेकोमी इस्राएली आन कली “गेपुकीम देवी देवता आन कली ममानेन। मेको आन डोंडती मबपीन। मेको आन गेय मपने। मेको आन कली मारेइ मचढेन। प्रस्थान २३:२४ <sup>36</sup> मिनु आ सक्ति नु आ क्युक्शो गुइम इन कली इजीप्त रे गुंइशा एक चाक्ब परमप्रभु यावे कली ला ठेयब सेलीन। मेको आ डोंडती ला बाप्पीन। मेको कली ला चढेचा माल्नीनी” देमाक्त। <sup>37</sup> मेकोमी इन कली “आं फुल्लुमु मुशा ब्रेक्शो लोत्र नु आं पतीके लोत्र, आं अरेशो नु आं शेंशो लोत्र नेल्ल शुश होस पा गेना हना यो पचा माल्नीनी। गेपुकीमी देवी देवता आन कली मानेचा मडुम्नीनी। <sup>38</sup> गेपुकीम गो नु पशो कबल मप्रेंदीन। मिनु देवी देवता आन कली मानेचा मडुम्नीनी। <sup>39</sup> तन्न गेपुकीम परमप्रभु यावे, इन परमप्रभु कली ला ठेयब सेलीन। मेकोमी इन कली इन जोरी सत्रु आन गुइ रे प्रोंइब” दे अरेशो बाक्माक्त। ब्यक्स्था ६:१२-१९ <sup>40</sup> मो हना यो मेकोपुकीम मेको लोत्र मनेन्मे बाक्त। मिनु मेको आन डोंडती डा पशो खोदेशो पामे बाक्त।

<sup>41</sup> मेको रागी रागी डा मुरपुकीमी परमप्रभु यावे कली ठेयब सेल्शा यो आन मुशा सेल्शो मूर्ति आन कली पूजा पामे बाक्त। मुल सम्म आन चच युइमी आन किकी पिपीम पशो खोदेशो पना पन बाक्नीम।

यहूदा डा पिप हिज्कीयाह

२इतिहास २९:३१:-

**18** आहाज आ तौ हिज्कीयाह यहूदा डा पिप दुम्माक्त। मेना एलाह आ तौ होशेआ इस्राएल डा पिप दुम्शो बर्स सां दुम्शो बाक्माक्त। २ राजा १६:२० <sup>2</sup> मिनु हिज्कीयाह पिप दुम्मेनु, २५ बर्स दुम्शो बाक्माक्त। मेकोमी यरूस्सलेमम २९ बर्स सासन पवा बाक्त। मेको आ ममा आ नें आबी बाक्माक्त। मेको जकरिया आ तमी बाक्माक्त। <sup>3</sup> मेकोम आ किकी दाऊदम खोदेशो पा, परमप्रभु यावे आ डोंडती मार रिम्शो बाक्मे, मेको पवा बाक्त। २ राजा २०:३ <sup>4</sup> मेकोम डांडा डा थानपुकी प्रेशशा, ताइक्तीमी बाक्त। खुक्शो फुल्लु जिक्शा, मूर्ति पाइश्शो थाम क्योरशा ताइक्तीमी बाक्त। मेकोमी मोसा आ सेल्शो कांसा के बुस्स कली टुक्रा टुक्रा पवा बाक्त। मारदे हना मेना सम्म इस्राएलीपुकीम मेको कली धूप चोइबाक्मा बाक्त। मेकोपुकीम मेको कली नहुश्तन देबाक्मा बाक्त। २ राजा १५:३५; गन्ती २१:८-९ <sup>5</sup> हिज्कीयाहम

परमप्रभु यावे, इस्राएली आन परमप्रभु कली थमा सुदा बाक्त। मेको आ क्येडा डोइती डा नु आ क्येडा नोले डा यहूदा डा पिप नेल्ले मेको खोदेंशो मद्दुम्मा बाक्त। २ राजा २३:२५<sup>६</sup> मेकोमी परमप्रभु यावे आ नोले खोइक्का गेनायो मप्रोना बाक्त। मिनु परमप्रभु यावेमी मोसा कली शेंशो लोव्र नेल्ल टिवा बाक्त।<sup>७</sup> मिनु परमप्रभु यावे मेको नु बाक्माक्त। मेको आ पशो गेय नेल्लेमी रिम्शो दुम्माक्त। मेको अस्सुर डा पिप कली मटीब दुम्माक्त। मिनु मेको आ देंशो मपवा बाक्त।<sup>८</sup> मेकोमी पलिस्ती आन रागी गाजा रे खाल पाइब आन लाइश्शो खिं नु गारो हिरशो सहर नेल्ल ग्रामाक्त।

### सामरीया खतम दुम्शो

<sup>९</sup> हिज्कीयाहमी सासन पशो ४ बर्स दुम्माक्त। इस्राएल डा पिप एलाह आ तौ होशेआम सासन पशो ७ बर्स दुम्मेनु, अस्सुर डा पिप शाल्मानेसेरमी सामरीया कली लडाइ तोशा पुम्दा बाक्त। २ राजा १७:३-६<sup>१०</sup> मिनु अस्सुरीपुकीमी मेको सहर कली बर्स सां सम्म पुम्शा, आन के सेल्मे बाक्त। मेना हिज्कीयाह पिप दुम्शो ६ बर्स नु इस्राएल डा पिप होशेआ पिप दुम्शो ९ बर्स दुम्शो बाक्माक्त। मिनु अस्सुर डा पिपमी सामरीया ग्रामाक्त।<sup>११</sup> मिनु मेकोमी इस्राएली आन कली ग्याइश्शा अस्सुर लाइक्की बाक्त। मिनु मेको आन कली हालाह, गोजान डा खोला हाबोर आ नेक्था नु मादी आन सहरम बाक्पाइक्की बाक्त।<sup>१२</sup> मारदे हना मेकोपुकीमी परमप्रभु यावे, आन परमप्रभु आ देंशो मटिथु, आ कबल पशो हेंथे पशो बाक्मा बाक्त। परमप्रभु यावे आ गेय पाइब मोसामी शेंशो लोव्र मनेशो नु मटिथो बाक्मा बाक्त।

यरूसलेम कली लडाइ तोशो  
२इतिहास ३२:१-१९; यसैया ३६:-

<sup>१३</sup> पिप हिज्कीयाहमी सासन पशो १४ बर्स दुम्मेनु, अस्सुर डा पिप सन्हेरीबमी यहूदा डा गारो हिरशो सहर नेल्ल कली लडाइ तोशा ग्रामाक्त।<sup>१४</sup> मोपतीके यहूदा डा पिप हिज्कीयाहमी लाकीश सहरम बाक्ब अस्सुर डा पिप कली “गो मरिश्शो पाता। आं रागी रे लेतीन। मिनु गे आं कली मार देंनीनी, मेको पाइनुड” दे लोव्र कुरब मुर सोइक्ता बाक्त। मिनु अस्सुर डा पिपम हिज्कीयाह कली सहे सां टलेन्ट चांदी नु ३० टलेन्ट सुन थाप्पदा बाक्त। टलेन्ट का ३४ किलो बाक्ब।<sup>१५</sup> मिनु हिज्कीयाहमी परमप्रभु यावे आ खिं नु पिप आ खिंम थिश्शो चांदी नेल्ल मेको कली गेवा बाक्त। २ राजा १६:८<sup>१६</sup> मेना हिज्कीयाहमी परमप्रभु यावे आ खिं डा लाप्चो नु लाप्चो डा शीम आंम आ गिल्शो सुन नेल्ल शोल्शा, अस्सुर डा पिप कली गेवा बाक्त।

### सन्हेरीबम हिंच कौइशो

<sup>१७</sup> मिनु अस्सुर डा पिपम लडाइ पाइब आन नेल्ल क्येडा ठेयब मुर तारतान, दरवार डा ठेयब मुर राब्शारीस, पिप आ ठेयब गेय पाइब राब्शाके नु ठेयब हुल का लडाइ पाइब आन कली लाकीश रे पिप हिज्कीयाह आ बाक्तीक यरूसलेम सहरम सोइक्तीमी बाक्त। मिनु मेकोपुकी यरूसलेम जाक्मा बाक्त। मिनु आइक्था दोम्ली डा ब्वाक्कु शाइक्तीक वा मुरब आन लांमी जाक्शा राम्मा बाक्त। यसैया ७:३<sup>१८</sup> मिनु मेकोपुकीम पिप कली ब्रेत्मे बाक्त। मिनु पिप आ खिं डा ठेयब मुर हिल्कीयाह आ तौ दरवार कोव्रब एल्याकीम, ब्रेक्ब शेब्ना नु आसाफ आ तौ पिप आ लोव्र कुरब योआह मेको आन कली गुम्थ जाक्मा बाक्त।

<sup>१९</sup> मिनु राब्शाकेमी मेको आन कली “हिज्कीयाह कली, ठेयब पिप, अस्सुर डा पिपमी, मार देंब देंशा हना, गे सु कली तशा, महिब बाक्नीनी?<sup>२०</sup> गे लोव्र पा ला लडाइ ग्रानीनी डा? सुम इन कली वारच पा आं क्येडा महिंथु, आं कली मटिपदा?<sup>२१</sup> गे इजीप्त रागीम इन कली वारच पाइब, दे मिम्नीनी। मेको जिक्शो किन्दा खोदेंशो बाक्ब। मेकोमी ‘वारच पाइब’ देंब आन गुइ थोक्ब। ‘मेकोमी वारच पाइब’ देंब नेल्ल आन कली इजीप्त डा पिप फाराओ मोदेंशोन बाक्ब।<sup>२२</sup> तन्न गे आं कली ‘गो परमप्रभु यावे, आंइ परमप्रभु आ मुर नकी। मेकोम आंइ कली वारच पाइब’ देंतीनी हना, मार, हिज्कीयाहम मेको डांडा डा थान नु चढेतीक प्रेशा यहूदा नु यरूसलेम सहर डा मुर आन कली ‘गेपुकीम यरूसलेमम बाक्शो चढेतीकेम ला चढेचा

माल्नीनी’ मदेम डा? ब्यवस्था १२:१४<sup>२३</sup> मुल आं होव्रप अस्सुर डा पिप नु गारीन। इन के मिश डा शारा डोइक्ब बाक्तेक्म हना, गो इन कली हजार निक्शी शारा गेनन्नी।<sup>२४</sup> आं होव्रप आ नेल्ल क्येडा आइक्च लडाइ पाइब आन ठेयब मुर का कली ला यो दोपा नोले शोइक्पाइक्ने चाप्नीनी डा? गे बग्गी नु शारा डोइक्ब आन परबम इजीप्त कली थमा सुइश्शो बाक्नीनी।<sup>२५</sup> मिनु अर्को लोव्र, मार गो एको रागीम परमप्रभु यावे नु सल्ला मपथु खतम पोक्थ जाक्का डा? परमप्रभु यावेमी आं कली ‘एको रागीम लडाइ पा खतम पोक्को’ देंशो बाक्ब” देंमाक्त।

<sup>२६</sup> मिनु हिल्कीयाह आ तौ एल्याकीम, शेब्ना नु योआहमी मेको लडाइ पाइब आन ठेयब मुर राब्शाके कली “शिशी पा, इन वाइल गोपुकी नु अरामी लोव्रम ब्वाक्कीन। मारदे हना गो मेको लोव्र रुप्नीकी। गारोम बाक्ब मुर नेल्लेम नेंचा डा पा यहूदी लोव्रम म्बवाक्कीन” देंमा बाक्त।<sup>२७</sup> तन्न राब्शाकेम मेको आन कली “मार, आं होव्रपमी एको लोव्र इन कली नु इन होव्रप कली ला नेंपाइक्का कली सोइश्शो बाक्बा डा? मार, गारोम बाक्ब मुर नेल्ल आन कली यो ममाइ डा? गेपुकीम खोदेंशो पा, मेकोपुकीम यो आन ख्री चारनाक जचा तूचा माल्नीम” देंमाक्त।

<sup>२८</sup> मिनु मेको लडाइ पाइब आन ठेयब मुर राब्शाके राष्ठा यहूदी लोव्रमी ठेयब सेंदा पा “ठेयब पिप, अस्सुर डा पिप आ लोव्र नेनीन।<sup>२९</sup> मेकोमी मार देंत देंशा हना ‘हिज्कीयाहमी इन कली जोल पशो थमा मसुतीन। मारदे हना मेकोमी इन कली आं गुइ रे प्रौइने मचाप्ब’ देंत।<sup>३०</sup> हिज्कीयाहमी ‘परमप्रभु यावेम थमा पा इं कली श्येत रे प्रौइब। मिनु एको सहर अस्सुर डा पिप आ गुइम मद्दुम्ब’ दे इन कली परमप्रभु यावे कली थमा मसुइक्पदल।

<sup>३१</sup> हिज्कीयाह आ लोव्र मनेनीन। अस्सुर डा पिपम ‘गो नु गारीन। मिनु गूशा आं बाक्तीक जाक्कीन। मिनु गेपुकीमी इन अडगुर रू डा अडगुर नु इन रवा डा फोव्रशी जचा ताइनीनी। इन इनार डा ब्वाक्कु तूचा ताइनीनी। १ राजा ५:५<sup>३२</sup> गे जाक्शा इन कली आंम इन रागी खोदेंशो रागीम लाइक्नन्नी। मेको रागी अन्न नु अडगुर शांबु, शोब्ले नु अडगुर रू, तेल रवा नु खुदो बाक्शो रागी बाक्ब। गेपुकी बेक्तीक आ पा डा ब्रौइतीक योव्रडीन। हिज्कीयाह आ लोव्र मनेनीन, मेकोम इन कली “परमप्रभु यावेमी इं कली प्रौइब” दे जोल पाइब।<sup>३३</sup> मार रागी रागी डा तेकोइ देवी देवताम आन रागी कली अस्सुर डा पिप आ गुइ रे प्रौइने चाप्शो बाक्नीमी डा? यसैया १०:१०-११<sup>३४</sup> हमथ नु अरपाद डा देवी देवता ते लाक्वामे? सेफारवाइम, हेना नु इव्वाह डा देवी देवता ते बाक्मा? मार, मेकोपुकीम सामरीया कली आं गुइ रे प्रौइने चाप्मे डा? <sup>३५</sup> मार, मेको रागी डा देवी देवता आन दाते डा तेकोइमी आ रागी कली आं गुइ रे प्रौइने चबा डा? मिनु परमप्रभु यावेमी यरूसलेम कली आं गुइ रे दोपा प्रौइने चाप्बा डा? ” दे इस्राएली आन कली देंमाक्त। दानीएल ३:१५

<sup>३६</sup> तन्न मुर नेल्ल सिक्सी पा बाक्शा, लोव्र का यो मलेत्मे बाक्त। मारदे हना पिपमी मेको आन कली “सुइम लोव्र मलेत्वा” दे अरेशो बाक्माक्त।<sup>३७</sup> मिनु पिप, हिल्कीयाह आ तौ दरवार कोव्रब एल्याकीम, ब्रेक्ब शेब्ना नु आसाफ आ तौ पिप आ लोव्र कुरब योआहम आन वा खाक्वामे बाक्त। मिनु हिज्कीयाह आ बाक्तीक जाक्शा, राब्शाके आ लोव्र नेंपदमे बाक्त।

हिज्कीयाहम परमप्रभु नु लोव्र पशो  
२इतिहास ३२:२०-२३; यसैया ३७:१-७

**19** मिनु पिप हिज्कीयाहम मेको लोव्र नेंशा, आ वा खाक्वा बाक्त। मिनु अरन्डी फेक्शा, परमप्रभु यावे आ खिं लमाक्त।<sup>२</sup> मेकोमी दरवार कोव्रब एल्याकीम, ब्रेक्ब शेब्ना नु ठेयब चढेब आन कली अरन्डी फेक्पाइश्शा, परमप्रभु यावे आ लोव्र पाइब आमोज आ तौ यसैया आ बाक्तीकेम सोइक्तीमी बाक्त।<sup>३</sup> मिनु मेकोपुकीमी यसैया कली “हिज्कीयाहमी ‘मुलाक्ती श्येत जतीक, हुइक्का पुंइसीतीक नु मुने दोक्तीक नाक्त बाक्ब। दोपा आल थिचा चिक्शो मीश मुर कली आल थिचा कली बोल मबाक्बा, मोदेंशो दुम्शो बाक्ब।<sup>४</sup> परमप्रभु यावे, इन परमप्रभुमी अस्सुर डा पिपमी सोइश्शो मेको राब्शाके आ लोव्र नेल्ल नेंना माइ। आ होव्रप, अस्सुर डा पिपमी ब्रौइशा बाक्शो परमप्रभु कली शुक्शी पथ सोइश्शो बाक्ब। मिनु परमप्रभु यावे, इन परमप्रभुमी आ नेंशो लोव्र आ परबम मेको

कली हुइक्वा कौं। मोपतीके मुल लीशो मुर आन पर्वम प्रार्थना पने' दैत" देमा बाक्त। १सामुएल १७:१०; २राजा १८:३५ ५ मिनु पिप हिज्कीयाह आ सोइशो गेय पाइबपुकी यसैया आ बाक्तीकेम बाक्मानु, ६ यसैयामी मेको आन कली "परमप्रभु यावेमी इन होवप कली 'इ नैशो लोवम महिनो। अस्सुर डा पिप आ गेय पाइबपुकीमी आं कली शुक्शी पशो लोव नैता। ७ गो मेको आ थुंम सोक्त का कुर पाइनुड। मिनु मेकोमी लोव का नैब। मिनु मेको आ रागी लेशा लाइब। मेकेर गो मेको कली तरवारम साइक्पाइक्नुड' दैत, दे मतीन" दे माइक्मी बाक्त। २राजा १९:९; २राजा १९:३५-३७

८ मिनु राब्शाकेमी "अस्सुर डा पिपमी लाकीश प्रॉइतु" दैशो लोव नेना बाक्त। मिनु मेको लेम्माक्त। मिनु मेकोमी पिप कली लिब्ना नु लडाइ पना पन बाक्शो थिदा बाक्त। ९ मिनु मेको पिपमी "एथीयोपीया डा पिप तिरहाकाह गे नु लडाइ पचा कली पिना पिन बाक्ब" दैशो लोव नेना बाक्त। मोपतीके मेकोमी यहूदा डा पिप हिज्कीयाह आ बाक्तीकेम लोव कुरब मुर सोइशा, १० यहूदा डा पिप हिज्कीयाह कली "यरूसलेम अस्सुर डा पिप आ गुडम मदुम्ब, दे थोक्शा लोव पाइब इ थमा सुइशो परमप्रभुमी इ कली जौल मपवल। ११ अस्सुर डा पिपमी रागी नेल्ल आन कली मार पवा, मेको आन कली दोपा खतम पोक्गा, मेको थमा पा नैतीनी। मिनु मार, 'गो ब्रॉइनुड' दे आस पाइनीनी? १२ मार, आं किकी पिपी आन क्याम्शो रागी रागी डा देवी देवताम मेको आन कली प्रॉइने चाप्ने डा? गोजान, हारान, रेचेफ नु तेलास्सार सहरम बाक्ब एदेन डा मुर आन देवी देवता ते लाक्वामे? १३ हमाथ, अरपाद सेफारवाइम सहर, हेना नु इक्वाह डा पिप ते लाक्वामे?" दैपाइक्वा कली मुर सोइक्ता बाक्त।

### हिज्कीयाह आ पुंइशो लोव

१४ मिनु हिज्कीयाह मेको चिठी चाक्ब मुर आन गुइ रे ताक्शा पढेवा बाक्त। मिनु परमप्रभु यावे आ खिं लमाक्त। मिनु मेको परमप्रभु यावे आ डॉइती प्राक्शा वोदा बाक्त। १५ मिनु हिज्कीयाहम मेको परमप्रभु यावे आ डॉइती प्राक्शा वोइशा "परमप्रभु यावे, इस्राएली आन परमप्रभु गे करूब आन तार बाक्नीनी। रागी डा राज्य नेल्लेम गे का ला परमप्रभु बाक्नीनी। गे रागी नु सरीड सेल्ब बाक्नीनी। प्रस्थान २५:२२; भजन संग्रह ८०:२ १६ परमप्रभु यावे आं लोव नेनीन। परमप्रभु यावे कोवडीन, सन्हेरीबम ब्रॉइशा बाक्शो परमप्रभु, इन कली शुक्शी पा सोइशो लोव नेनीन। १७ परमप्रभु यावे, अस्सुर डा पिपपुकीम रागी रागी डा मुर नु आन रागी कली खतम पोक्तेक्म। एको थमा बाक्ब। १८ मेकोपुकीमी मेको आन देवी देवता आन कली मीम हुम्शा नेक्पाइक्तेक्म। मारदे हना मेको परमप्रभु मनम। मेको मुरुमी सेल्शो शी नु फुल्लु के ला बाक्तेक्म। मोपतीके मेको खतम दुम्तेक्म। १९ मुल परमप्रभु यावे, आंइ परमप्रभु आंइ कली मेको आ गुइ रे प्रीनीन, दे पुंइनुड। मिनु रागी नेल्ल डा मुरपुकीम परमप्रभु यावे, गे का ला परमप्रभु बाक्नीनी, दे तुइक्तेक्म" दे पुना बाक्त।

### यसैयामी सन्हेरीब खतम दुम्ब दैशो

२० मिनु आमोज आ तौ यसैयाम हिज्कीयाह कली "परमप्रभु यावे, इस्राएली आन परमप्रभुमी मार दैत दैशा हना 'गो अस्सुर डा पिप सन्हेरीब आ पर्वम इ पुंइशो लोव नैता' दैत। २१ सन्हेरीब आ पर्वम परमप्रभु यावे आ दैशो लोव मार बाक्ब दैशा हना 'सियोन डा तमीमी इ कली शुक्शी पाइब। मिनु गे प्रोक्शा लवेनु, यरूसलेम डा तमीमी आ पिया हिक्ब।

२२ गे सु कली शाक्शा शुक्शी पवी? गे सुका आ पर्वम ठेयब लेशा लोव पवी? मेको इस्राएली आन का ला बाक्शो परमप्रभु यावे आ पर्वम बाक्ब। २३ गे इ लोव कुरबपुकी सोइशा, परमप्रभु यावे कली शुक्शी पाप्तीवी'। मिनु गे 'गो आं शुश बगीम ठेयब पहाड डॉइसाक्यी। गो लेबानोन डा नेल्ल क्येडा डोन डॉइसाक्यी। गो मेकेर डा नेल्ल क्येडा लाइशो रवा नु मेकेर डा नेल्ल क्येडा रिश्शो अरु रवा तिम्तामी। गो मेको आ सुर सम्म डा नेल्ल क्येडा ठेयब ब्वाकीम जाक्दीत्ती। २४ गो इनार दोशा, अर्को रागी डा ब्वाक्कु तूता। गो आं खोइलीम दिम्शा इजीप्त रागी डा खोला नेल्ल सोवपाइक्तामी' दैशो बाक्नेवे।

२५ गे 'गो साइ डॉइती रे मेको नेल्ल दैशो नड। गो मेको साइ रे मो पाइनुड दैशो नड। मुल गो मेको थुम्ता। मार, मेको मनैशो बाक्नीनी? गे गारो हिरशो सहर आन कली प्रेशा, फुल्लु तेल्लो खोदैशो सेल्शो बाक्नेवे। २६ मिनु मेको सहर डा मुर आन सोक्त जाम्शा आन थुं लुक्च लत। मेकोपुकी रू डा कल्लो घांस खोदैशो दुम्तेक्म। मेकोपुकी खिं तार वाशो घांस खोदैशो दुम्शा, वामा चोटीन सोवशो बाक्नीम।

२७ गो इ बाक्शो बोक्शो नेल्ल तुइक्नुड। गो इ लाडगा खिंडगा पशो नेल्ल तुइक्नुड। मिनु आं पर्वम इ गाइशो तुइक्नुड। २८ मारदे हना गेम आं पर्वम गाइशा, इ ठेयब लेशो लोव पशो नैता। मोपतीके गो इ नैमी आं बोल्सी ब्वेक्नुड। इ शोव्रमी लगम पाइक्नुड। मिनु गो इ जाक्शो लां रेन लेप्पाइक्नन' दे परमप्रभु यावेमी सन्हेरीब आ पर्वम दैत" देमाक्त।

२९ मिनु लैशा "मेको नेल्ल थमा दुम्ब, दे मार चिन्ड दुम्ब दैशा हना, गेपुकी एको बर्स आंमा वाशो जाइनीनी। मिनु नोले डा बर्स मेको रे वाशो जाइनीनी। मिनु बर्स सांमी गेपुकीम शोक्शा खुप्शा जने, अडगुर खुम्शा जने। ३० मिनु यहूदा आ खिं डा ब्रॉइशा लीशोपुकीम रागीम शाक्श थोक्नीम। मिनु रागी तार फल सिल्लीम। ३१ मारदे हना यरूसलेम रे लीशो मुरपुकी लाइनीम। सियोन डांडा रे हुल का ब्रॉइशो मुर गूशा जाक्नीम। मुर नेल्ल आन परमप्रभु यावेमी आ जौब बोक्शा मेको पाइब" देमाक्त। यसैया ९:६

३२ मिनु परमप्रभु यावेमी अस्सुर डा पिप आ पर्वम "सन्हेरीब एको सहरम मओवब। एको सहरम ब्रा का यो मआप्ब। मेको आ तेक्तीक कुरशा एको सहर आ डॉइती मजाक्ब। सहर ओवचा कली गारो डोइक्तीक मसेल्ब। ३३ मेको आ जाक्शो लां रेन लेशा लाइब। मेको सहरम मओवब। ३४ मारदे हना गो आंम आं पर्वम नु आं गेय पाइब दाऊद आ पर्वम मेको सहर कली वारच पा प्रॉइनुड" देमाक्त। २राजा २०:६

३५ मिनु मेको नाक्दो परमप्रभु यावे आ स्वर्ग डा गेय पाइब का जाक्माक्त। मिनु मेकोमी अस्सुर डा पिप आ लडाइ पाइब आन बाक्तीकेम ओवशा, लाख का ८५ हजार मुर आन कली साइक्मी बाक्त। मिनु आ दीसा सुनी मुरपुकी बोक्मानु मेकेर बेक्शो मुर ला तामे बाक्त। यसैया ३७:३६-३८ ३६ मोपतीके अस्सुर डा पिप सन्हेरीब ताम्बु पोक्शा लेशा आ खिं निनवे लमाक्त। ३७ मिनु मेको काबु आ देवता निस्रोक आ खिमी पूजा पना पन बाक्मेनु, मेको आ तौ अद्राम्मेलेक नु शरसेरमी मेको कली तरवारम क्योरशा सदसे बाक्त। मिनु प्रोक्शा आरारात रागी लसा बाक्त। मिनु मेको आ पा डा आ तौ एसर-हददोन पिप दुम्माक्त। २राजा १९:७

### हिज्कीयाह रोइ पशो

इतिहास ३२:२४-२६; यसैया ३८:१-८

२० मेना हिज्कीयाह रोइ पा बेक्चा चिक्ता बाक्त। मिनु आमोज आ तौ परमप्रभु यावे आ लोव पाइब यसैया हिज्कीयाह आ बाक्तीक जाक्शा, "परमप्रभु यावेमी इन कली मार दैत दैशा हना 'इन खिं डा मुर आन कली इन अरेचा माल्लो लोव अरेने। मारदे हना गे बेक्नीनी। मसानीनी' दैत" देमाक्त। २ मिनु हिज्कीयाह गारो गे हिरशा, परमप्रभु यावे कली पुना बाक्त। ३ मेकोमी "परमप्रभु यावे, गो इन डॉइती रिश्शो पा बाक्ती। गो इन कली गेनायो मप्रॉइथु आं थुं नेल्लेमी इन नोले खोइक्ता। इन डॉइती मार रिश्शो बाक्मे, मेको पाता, मेको मिम्तीन" दे आ थुं खाइशा डाक्माक्त। ४ मिनु यसैया दाते डा लाडगा रे गूचा क्येडा डॉइती परमप्रभु यावेम मेको कली लोव पवा बाक्त। ५ मार लोव पवा बाक्त दैशा हना "लेशा लशा, परमप्रभु यावे इ किकी दाऊद आ परमप्रभुमी 'आं मुर आन कली सासन पाइब हिज्कीयाह कली "गो इ पुंइशो लोव नैता। मिनु इ प्रेक्कु ताता। गो इ कली सापाइक्नुड। मिनु नाक्त सां नोले गे परमप्रभु यावे आ खिं लाइनेवे। ६ गो इ ब्रॉइतीक नाक्त १५ बर्स तेम्नुड। मिनु इ कली नु एको सहर कली अस्सुर डा पिप आ गुइ रे प्रॉइनुड। गो आं पर्वम नु आं गेय पाइब दाऊद आ पर्वम एको सहर कली वारच पा प्रॉइनुड" दैत' देनो" देमाक्त। २राजा १९:३४ ७ मिनु यसैयामी "मेको कली सापाइक्चा कली आ कानम फोवशी गेडा शेप्शा खेक्तीन" देमाक्त। मिनु मुरपुकीम मेको आ कानम फोवशी गेडा शेप्शा खेक्तेमे बाक्त।

8 मिनू हिज्कीयाहमी यसैया कली “गो सानुड, मिनू नाक्त सां नोले परमप्रभु यावे आ खिं लाइनुड, दे परमप्रभु यावेमी आं कली दोपा तुडक्पाइक्वा?” दे हिल्लो पवा बाक्त। 9 मिनू यसैयामी “परमप्रभु यावेमी आ दँशो थमा पा पाइब, दे इन कली मार कौडब दँशा हना, नां आ वांकु १० खेयप डौंइती गे ग्रेल देय नोले गे लेल्ल?” दे हिल्लो पवा बाक्त। 10 मिनू हिज्कीयाहम “नां आ वांकु १० खेयप डौंइती ग्रेचा दा आ गेयन बाक्ब। मेको १० खेयप नोले गे लेत्वा माल्ब” दँमाक्त। 11 मिनू परमप्रभु यावे आ लोत्र पाइब यसैयाम, परमप्रभु यावे कली पुना बाक्त। मिनू परमप्रभु यावेमी आहाज आ नां आ वांकु कौंइतीके १० खेयप नोले गे लेप्पदा बाक्त।

बेबीलोन डा पिप आ लोत्र  
२इतिहास ३२:३१; यसैया ३९:-

12 मेना बेबीलोन डा पिप बालादन आ तौ मेरोदाक-बालादानमी हिज्कीयाह आ बाक्तीकेम कोसेली नु चिठी कुर पा मुर सोइक्ता बाक्त। मारदे हना मेकोम हिज्कीयाह रोड पा साशो बाक्ब दँशो नेना बाक्त। 13 मिनू हिज्कीयाहम मेको चिठी चाक्ब मुर आन कली मान पाइक्मी बाक्त। मिनू मेको आन कली आ शौप वोइक्तीकेम नेल्ल कौंइदा बाक्त। सुन चांदी, मस्ला, ब्रोवशो रिना पाइश्शो खेक्तीक तेल, आ यापुकी नु आ मार मार वोइक्तीकेम बाक्शो मारेड मारेड थोत्रक कौंइदीमी बाक्त। हिज्कीयाह आ खिंम नु आ नेक्थाम बाक्शो मेको आन कली मकोइशो मारेड मलीमाक्त। 14 मिनू नोले परमप्रभु यावे आ लोत्र पाइब यसैया जाक्शा, पिप हिज्कीयाह कली “मेको मुरपुकीम मार दँमा? मेकोपुकी ते रे जाक्शो नमी?” दे हिल्लो पवा बाक्त। मिनू हिज्कीयाहमी “एकोपुकी डोन रागी बेबीलोन रे जाक्शो नम” दँमाक्त। 15 मिनू मेकोमी “मेकोपुकीम इन खिंम मार मार तामे?” दे हिल्लो पवा बाक्त। मिनू हिज्कीयाहम “एकोपुकीम आं खिंम बाक्शो नेल्ल ताम्तेक्म। आं मार मार वोइक्तीक खिंम बाक्शो मतशो मारेड मली” दँमाक्त। 16 मिनू यसैयाम हिज्कीयाह कली “परमप्रभु यावे आ लोत्र नेनीन। 17 परमप्रभु यावेमी ‘काबु नाक्त इ खिंम बाक्शो मारेड मारेड थोत्रक नु इ किकी पिपी नु इन आम तेल्लो थोत्रक नेल्ल बेबीलोनम चाक्दील्नीम। मारेड मप्रौंइनीम। २राजा २४:१३-१४ 18 मेकोपुकीम इन तौ का निक्शी यो लाइक्नीम। मिनू मेकोपुकी बेबीलोन डा पिप आ दरवारमी गेय पाइब दुन्नीम” दे परमप्रभु यावे दँत” दँमाक्त। दानीएल १:३-४ 19 मिनू हिज्कीयाहम यसैया कली “इन दँशो परमप्रभु यावे आ लोत्र रिश्शन बाक्ब” दँमाक्त। मारदे हना मेकोमी “आं पाला सम्म थुं नाइश्शा बाक्तीक दुम्ब” दे मिम्ता बाक्त। २राजा २२:२०

हिज्कीयाह बेक्शो

20 हिज्कीयाह आ पशो अरु गेय, मेको आ सक्ति, मेको आ दोम्ली नु ब्वाक्कु लतीके सेल्शो, सहर कली ब्वाक्कु चाक्शो, मार, मेको नेल्ल यहूदा डा पिप आन इतिहासम ब्रेक्शो मबाक्बा डा? 21 मिनू हिज्कीयाह बेक्माक्त। मिनू मेको आ पा डा आ तौ मनस्से पिप दुम्माक्त।

यहूदा डा पिप मनस्से  
२इतिहास ३३:-

21 मनस्से पिप दुम्मेनु, १२ बर्स दुम्शो बाक्माक्त। मिनू मेकोम यरूसलेमम ५५ बर्स सासन पवा बाक्त। मेको आ ममा आ नें हेप्सीबाह बाक्माक्त। 2 मेकोम परमप्रभु यावे आ डौंइती मार मरिश्शो बाक्मे, मेको पवा बाक्त। परमप्रभु यावेमी इस्राएली आन डौंइती रे खेरशो रागी रागी डा मुर आन ग्रान्ग्रा दिशो गेय पवा बाक्त। 3 मेकोमी आ आफ हिज्कीयाहमी खतम पोक्शो डांडा डा थानपुकी लँशा सेला बाक्त। मेकोम इस्राएल डा पिप आहाब खोदँशो पा बाल कली चढेतीक नु मूर्ति पाइश्शो थाम सेला बाक्त। इस्राएल डा पिप आहाब खोदँशो पा मेकोमी नां तास्ला नु सौरुल आन कली खुम्की पा बाप्शा पूजा पवा बाक्त। १राजा १६:३३ 4 मेकोमी परमप्रभु यावे आ खिंमी मेको देवी देवता आन कली चढेतीकपुकी सेला बाक्त। परमप्रभु यावेमी मेको खिं आ पर्बम “यरूसलेमम गो आं नें

वोइक्नुड” दँशो बाक्माक्त। 5 मिनू मेकोमी परमप्रभु यावे आ खिं आ लाइगा निम्फामी नां तास्ला नु सौरुल आन कली चढेतीक सेला बाक्त। २राजा २३:१२ 6 मेकोमी आ तौ कली चोशा चढेवा बाक्त। मिनू मन्तर तन्तर, तुना मुना पा, बेक्शो मुर रे लोत्र पचा गेशा, लिंक्नु कोत्रडा बाक्त। मेकोम परमप्रभु यावे आ डौंइती शुश मरिश्शो पवा बाक्त। मिनू मेको कली थाम्पा गाइक्पदा बाक्त। २राजा १६:३; लेवी १८:२१ 7 मेकोम आ मुशा सेल्शो अशेराह देवी आ मूर्ति परमप्रभु यावे आ खिंम वोदा बाक्त। परमप्रभु यावेमी मेको खिं आ पर्बम दाऊद नु आ तौ सोलोमन आस कली “गो एको इस्राएल आ थर नेल्ल आन रे आं योत्रशो यरूसलेम सहर डा एको खिंम आं नें गेना हना यो वोइक्नुड। १राजा ८:२९; १राजा ९:३ 8 मिनू इस्राएलीम आं शँशो होस पना पन बाक्तेक्म हना, मोसा रे पा, मेको आन कली आं अरेशो पना पन बाक्तेक्म हना, मेको आन किकी पिपी आन कली आ गेशो रागी प्रौंइशा गाक्चा ममाल्नीम। 9 तन्न मुरपुकीम मेको नँसीन मनेन्मे बाक्त। मनस्सेम मेको आन कली हँथे लां खोइक्पाइश्शो बाक्माक्त। मिनू मेकोपुकीम परमप्रभु यावेम इस्राएली आन डौंइती रे खतम पोक्शो रागी रागी डा मुर आन क्येडा यो शुश मरिश्शो पामे बाक्त” दँमाक्त।

10 मिनू परमप्रभु यावेम आ गेय पा आ लोत्र पाइब आन रे पा 11 “यहूदा डा पिप मनस्सेम एको ग्रान्ग्रा दिशो गेय पशो बाक्ब। मेकोम डौंइती बाक्शो एमोरी आन क्येडा यो शुश ग्रान्ग्रा दिशो गेय पशो बाक्ब। मिनू मेकोमी यहूदा डा मुर आन कली मूर्ति पूजामी पाप पपाइश्शो बाक्ब” दँमाक्त। 12 मोपतीके परमप्रभु यावे, इस्राएली आन परमप्रभुमी “गो यरूसलेम नु यहूदाम शुश खतम दुम्तीक चाक्नुड। मेको नँब आन नोफामी ग्रीब। यसैया १९:३ 13 गो सामरीया कली पुक्तीकेमी यरूसलेम कली पुक्नुड। गो आहाब आ खिं कली थाप्शो डोरीम यरूसलेम कली थाप्नुड। मुरपुकीम दोपा थाल शेक्शा गुक्शा वोइक्नीमी, मोपा गो यरूसलेम कली शेक्शा गुक्शा वोइक्नुड। 14 गो आं लीशो मुर आन कली प्रौंइशा सोइक्नुडमी। मिनू मेको आन कली आन जोरी सत्रु आन गुडमी गेनुडमी। मेको आन जोरी सत्रुम ग्याइश्शा लाइक्वा पुंइसीनीम। 15 मारदे हना मेकोपुकीम आं डौंइती मार मरिश्शो बाक्मे, मेको पास्तेक्म। मेको आन किकी पिपी आन कली इजीप्त रे गुंइशा चाक्नु रे मुल सम्म आं कली गाइक्पाइक्स डा गाइक्पाइक्स बाक्शो बाक्नीम” दँमाक्त।

16 मेको क्येडा लाक्शा यो मनस्सेम दोस मताइब शुश मुर आन हुश शाइक्पाइश्शा, यरूसलेम आ सुर का रे अर्को सुर सम्म प्रिंदा बाक्त। मिनू मेकोम यहूदा कली पाप पपदा बाक्त। मिनू मेकोपुकीम परमप्रभु यावे आ डौंइती मार मरिश्शो बाक्मे, मेको पामे बाक्त। २राजा २४:४; भजन संग्रह १०६:३८

17 मनस्से आ पशो अरु गेय, मेको आ पशो नेल्ल, मेको आ पशो पाप, मार, मेको यहूदा डा पिप आन इतिहासम ब्रेक्शो मबाक्बा डा? 18 मिनू मनस्से बेक्माक्त। मिनू मेको उज्जा आ खिं डा रूम थिम्का पुंइसे बाक्त। मिनू मेको आ पा डा आ तौ आमोन पिप दुम्माक्त।

यहूदा डा पिप आमोन

19 आमोन पिप दुम्मेनु २२ बर्स दुम्शो बाक्माक्त। मेकोम यरूसलेमम बर्स निक्शी सासन पवा बाक्त। मेको आ ममा आ नें मेशुल्लेमेथ बाक्माक्त। मेको योल्बाह डा हारुच आ तमी बाक्माक्त। 20 मेकोम आ आफ मनस्से खोदँशो पा, परमप्रभु यावे आ डौंइती मार मरिश्शो बाक्मे, मेको पवा बाक्त। 21 मेको आ आफ आ लांम गाक्माक्त। मिनू आ आफोम पूजा पशो मूर्ति आन डौंइती खुम्की पा बाक्माक्त। मिनू मेको आन कली पूजा पवा बाक्त। 22 मेकोम परमप्रभु यावे, आ किकी पिपी आन परमप्रभु कली प्रोना बाक्त। मेको परमप्रभु यावे आ लांम मगाक्माक्त। 23 आमोन आ गेय पाइबपुकीम मेको कली साइक्वा माल्मे बाक्त। मिनू मेको कली पिप आ खिंमीन सदमे बाक्त। 24 मिनू मेको रागी डा मुरपुकीम मेको पिप आमोन कली साइक्ब मुर नेल्ल आन कली सदमे बाक्त। मिनू मेको आ तौ योसीयाह कली आ पा डा पिप सेल्मे बाक्त। 25 आमोन आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा? 26 मिनू

मेको बेक्शा उज्जा आ तुरसुम थिम्चा पुंडसे बाक्त। मिनु मेको आ पा डा आ तौ योसीयाह पिप दुम्माक्त।

परमप्रभु आ अरेशो लोत्र थिश्शो  
२इतिहास ३४:१-२८

22 योसीयाह पिप दुम्मेनु ८ बर्स दुम्शो बाक्माक्त। मिनु मेकोमी यरूसलेमम ३१ बर्स सासन पवा बाक्त। मेको आ ममा आ नें येदीदाह बाक्माक्त। मेको बोस्कत डा अदायाह आ तमी बाक्माक्त।  
2 योसीयाहमी परमप्रभु यावे आ डोंइती मार रिम्शो बाक्मे, मेको पवा बाक्त। मेको ग्युरा पेरा मपथु, आ किकी दाऊद आ लांम गाक्माक्त। २राजा १८:३  
3 योसीयाह पिप दुम्मे आ १८ बर्सम मेकोमी मेशुल्लाम आ चच असाल्याह आ तौ ब्रेक्ब शाफान कली परमप्रभु यावे आ खिंम सोइक्ता बाक्त।  
4 योसीयाहम मेको कली “ठेयब चढेब हिल्कीयाह आ बाक्तीक लावो। मिनु लाच्यो खाल पाइबपुकीम ताक्शो, मुरपुकीम परमप्रभु यावे आ खिंम चाक्शो क्येट ठीक पा वोइक्चा माल्नीम, दे मतो। २राजा १२:११ 5 मिनु मेको परमप्रभु यावे आ खिंम बाक्ब ठेयब गेय पाइब आन कली गेचा नम। मिनु मेकोपुकीम परमप्रभु यावे आ खिंम बिग्रेशो मार मार सेल्ब आन कली गेमेक्ल। 6 मेकोपुकीम परमप्रभु यावे आ खिंम डा बिग्रेशो लेंशा सेल्चा कली शी सेल्ब, गारो प्रोव्रब नु मार मार सेल्ब आन कली गेमेक्ल। मिनु शी नु खोइश्शो फुल्लुपुकी ग्याप्मेक्ल। 7 मेको आन कली गेशो क्येट ब्रेक्शा वोइक्चा ममाल्नीम। मारदे हना मेकोपुकी थमा सुइश्शो गेय पाइब बाक्नीम” दे मदा बाक्त। २राजा १७:१६  
8 मिनु ठेयब चढेब हिल्कीयाहम ब्रेक्ब शाफान कली “गो परमप्रभु यावे आ खिंम अरेशो लोत्र ब्रेक्शो कागज थित्ता” देंमाक्त। मिनु हिल्कीयाहमी मेको कागज शाफान कली गेवा बाक्त। मिनु शाफानमी मेको पढेवा बाक्त।  
9 मिनु मेको ब्रेक्ब शाफान पिप आ बाक्तीक लशा मेको कली “इन गेय पाइबपुकी परमप्रभु यावे आ खिंम लशा, मेकेर डा क्येट परमप्रभु यावे आ खिंम डा गेय कोव्रब आन कली गेम्तेक्म” देंमाक्त। 10 मिनु नोले मेको ब्रेक्ब शाफानमी पिप कली “चढेब हिल्कीयाहम आं कली कागज का गेती” दे शेंदा बाक्त। मिनु नोले शाफानम मेको ठेयब सेंदा पा पढेशा पिप कली नेंपदा बाक्त।  
11 मिनु पिपमी मेको कागज डा लोत्र नेंशा, आ वा खाक्गा बाक्त।  
12 मिनु नोले पिपमी चढेब हिल्कीयाह, शाफान आ तौ अहीकाम, मीकाया आ तौ आकबोर, ब्रेक्ब शाफान नु पिप आ गेय पाइब आसायाह आन कली येरमीया २६:२४ 13 “गे आं पर्बम, आं मुर आन पर्बम नु यहूदा आ पर्बम मेको थिश्शो कागजमी मार ब्रेक्शो बाक्मे, दे परमप्रभु यावे कली हिल्लो पथ लने। मारदे हना परमप्रभु यावे थाम्पा गाइश्शो बाक्ब। इं किकी पिपीम एको कागजम ब्रेक्शो लोत्र मटीमे। मेकोपुकीम इं पर्बम मेकेर ब्रेक्शो लोत्र नेल्ल मपाम” देंमाक्त।  
14 मोपतीके चढेब हिल्कीयाह, अहीकाम, आकबोर, शाफान नु आसायाह पिप आ खिंम वासी कोव्रब हारहास आ चच, तिकवाह आ तौ शाल्लुम आ मीश परमप्रभु यावे आ लोत्र पाइब हुल्दा आ बाक्तीके यरूसलेमम हिल्लो पथ लमा बाक्त। मेको आ खिंम यरूसलेम डा नक सहरम बाक्बाक्माक्त।  
15 मिनु हुल्दामी मेको आन कली “परमप्रभु यावे, इस्राएली आन परमप्रभुम इन कली आं बाक्तीके सोइक्ब कली मार देंत देंशा हना 16 मेकोमी ‘यहूदा डा पिपम मेको कागजम पढेशो श्येत डा लोत्र, गो मेको श्येत यहूदा नु मेकेर बाक्ब मुर आन कली थमा पा गेनुड। 17 मारदे हना मेकोपुकीम आं कली प्रोइशा, देवी देवता आन कली धूप चोम्तेक्म। मिनु आन गुइम सेल्शो मूर्ति रे पा आं कली गाइक्पाइक्तीमी। मोपतीके गो एको रागी आ पर्बम गाइक्ताक्वी। मिनु मेको गाइश्शो मनाइक्ब’ देंत। ब्यवस्था ३१:२९; ब्यवस्था ३२:२१-२३ 18 परमप्रभु यावे कली हिल्लो पथ सोइक्ब यहूदा डा पिप कली परमप्रभु यावे, इस्राएली आन परमप्रभुमी मार देंत देंशा हना ‘गे आं लोत्र नेंतीवी। 19 गे आं कली टिचा दाक्शा, इ थुं आं डोंइती ब्रेम्शो दुम्शा, गे सुर्ता पा इ वा खाक्शो ताता। मारदे हना गो यहूदा रागी नु मेकेर डा मुर आन पर्बम सराप रशा, मुर मबाक्तीक दुम्ब, देंती। गे मेको आ पर्बम आं डोंइती डाक्शो नेंता। 20 मिनु गे इ थुं नाइश्शा बेक्नेवे। मिनु गो यहूदा कली गेशो ठेयब श्येत

गे तचा ममाल्नेवे’ दे मतो” दे परमप्रभुमी देंमाक्त। मिनु मेकोपुकीम मेको लोत्र पिप आ बाक्तीकेम चाक्गामे बाक्त। २राजा २०:१९; यसैया ५७:१-२

योसीयाहम परमप्रभु आ लोत्र टिशो  
२इतिहास ३४:२९-३५:२५

23 मिनु नोले पिपम यहूदा नु यरूसलेम डा खाल्पा नेल्ल आन कली आ डोंइती बुक्चा, दे ब्रेत्थ सोइक्तीमी बाक्त। 2 मिनु पिप परमप्रभु यावे आ खिंम लमाक्त। मिनु मेको नु यहूदा डा मुर नेल्ल, यरूसलेम डा मुर, चढेबपुकी, परमप्रभु यावे आ लोत्र पाइबपुकी नु आइक्च नु ठेयब मुर नेल्ल पिप नु परमप्रभु यावे आ खिंम लमा बाक्त। मिनु पिपमी नेल्ल नेंशा, परमप्रभु यावे आ खिंम थिश्शो कबल डा लोत्र ब्रेक्शो कागज पढेवा बाक्त। 3 मिनु पिप थाम आ पुंम राप्शा, परमप्रभु यावे आ डोंइती कबल का पवा बाक्त। मेको कबल मार बाक्त देंशा हना, “गो परमप्रभु यावे आ शेंशो, आ देंशो लोत्र, आ फुल्लुम मुशा ब्रेक्शो लोत्र आं थुं नु रां नेल्लेमी टिशा पाइनुड। मोपा एको कागजम ब्रेक्शो कबल डा लोत्र नेल्ल खाप्नुड” देंमाक्त। मिनु मेको नोले मुर नेल्लेमी “गोपुकीम यो मेको कबल खाप्नीकी” देंमा बाक्त। प्रस्थान २४:३-८; यहोसु २४:२५  
4 मेको नोले पिपमी नेल्ल क्येडा ठेयब चढेब हिल्कीयाह, मेको आ नोले डा अरु चढेबपुकी नु लाच्यो खाल पाइब आन कली “परमप्रभु यावे आ खिंम रे बाल देवता, अशेराह देवी, नां तास्ला नु सोरुल आन कली सेल्शो मारेइ मारेइ बोसपुकी गुंडदीन” दे अरेवा बाक्त। मिनु मेकोपुकीमी मेको नेल्ल यरूसलेम डा किद्रोन खोल्साम चोत्रमे बाक्त। मिनु पुलु चिंम बेथेलम लदमे बाक्त। २राजा २१:३ 5 डोंइती यहूदा डा पिपपुकीम यहूदा डा सहर नु यरूसलेम डा डांडा डा थानम बाक्शो देवी देवता आन कली चढेब आन कली वोइश्शो बाक्मा बाक्त। मेकोपुकीमी बाल, नां, तास्ला, सोरुल आन कली धूप चोइबाक्मा बाक्त। मिनु पिपम मेको आन कली गुंडपदा बाक्त। 6 मेकोमी अशेराह देवी आ मूर्ति पाइश्शो थाम परमप्रभु यावे आ खिंम यरूसलेम रे गुंडशा, किद्रोन खोल्साम लाइश्शा चोपाइक्मी बाक्त। मिनु मुरपुकीम मेको कली फुरक सेल्मे बाक्त। मिनु मेको आइक्च मुर आन तुरसुम फ्रामे बाक्त। २राजा २१:७ 7 मेकोमी तेल्लेम वोइश मुर आन बाक्तीक प्रेत्मे बाक्त। मेको खिं, अशेराह देवी आ मूर्ति कली नु मीश मुर आन लोत्र प्रोव्रतीके परमप्रभु यावे आ खिंम आ नेक्था बाक्शो बाक्माक्त। १राजा १४:२४ 8 योसीयाहमी यहूदा डा सहर रे चढेब नेल्ल आन कली गुंडदीमी बाक्त। मिनु गेबा सहर रे बेयर-शेबा सम्म डा डांडा डा थान आन कली ग्रांरा दिशो सेल्पदा बाक्त। मेकोमी सहर डा लाच्यो डा देवता थानपुकी प्रेप्पदा बाक्त। मेको सहर डा सासन पाइब यहोसु आ लाच्यो आ डोंइती गे बाक्माक्त। मेको सहर डा ठेयब लाच्यो आ पेरा गे बाक्माक्त। 9 मेको डांडा डा थान डा गेय पाइब चढेबपुकीम यरूसलेम डा परमप्रभु यावे आ खिंम डा चढेतीकेम जाक्ने मचाप्बमे बाक्त। तन्न मेकोपुकीम आन वारच चढेबपुकी नु बोर्ब ओख्ती मसुप्शो शोब्ले जाइबाक्मा बाक्त। 10 मिनु पिप योसीयाहम मोलेक कली आन तमी तौ क्योरशा चढेथ मजाक्मल, दे बेन-हिन्नीम बेंसीम बाक्शो तोफेथ थान कली ग्रांरा दिशो सेल्पदा बाक्त। २राजा १७:१७; लेवी १८:२१ 11 मेकोम यहूदा डा पिपपुकीम परमप्रभु यावे आ खिंम ओव्रतीक लाच्यो आ डोंइती नां कली मान पचा कली सेल्शो शारा प्रेशशा ताइक्पाइक्मी बाक्त। मेको चिंम नाथान-मेलेक नें पाइश्शो मुर आ कोठा आ नेक्था बाक्माक्त। मिनु योसीयाहम नां कली मान पचा कली सेल्शो बग्गीपुकी क्रोइक्पाइक्मी बाक्त। 12 आहाज आ तार डा कोठा डा कौसीम यहूदा डा पिपपुकीम सेल्शो चढेतीकपुकी नु परमप्रभु यावे आ खिंम डा लाइगा निम्फा गे डा मनस्सेम सेल्शो चढेतीकपुकी प्रेशशा, फस पोक्शा, मेको नेल्ल किद्रोन खोल्साम ताइक्पदा बाक्त। २इतिहास २८:२४; २राजा २१:४-५ 13 मिनु पिपमी यरूसलेम आ पूर्व गे बाक्शो डांडा डा थान ग्रांरा दिशो सेल्पदा बाक्त। मेको खतम सेल्ब डांडा आ दक्खिन गे बाक्माक्त। मिनु मेकेर पिप सोलोमनमी सीदोनी आन ग्रांरा दिशो अशतरेथ देवी आ मूर्ति, मोआब डा ग्रांरा दिशो देवता केमोश आ मूर्ति नु अम्मोनी आन ग्रांरा दिशो देवता मोलेक आ मूर्ति आन थान सेल्पाइश्शो बाक्माक्त। मिनु योसीयाहमी मेको आ सेल्शो पूजा पतीक थान प्रेशशा ग्रांरा दिशो सेल्पदा बाक्त। मेको मोलेक

देवता कली मिल्कोम यो देंशो बाक्त। १राजा ११:७<sup>14</sup> मिनु योसीयाहमी थान डा खूक्शो फुल्लु जिकशा फस पोक्पाइक्मी बाक्त। मिनु मूर्ति पाइश्शो थाम एश्शा मेको आ बाक्तीकेम मुर आन रुशेम प्रिपाइक्मी बाक्त।

15 मिनु मेकोम इस्राएली आन कली पाप पपाइक्ब नेबात आ तौ येरोबामम बेथेल डा डांडाम सेल्शो थान यो प्रेप्पदा बाक्त। मेकोम चढेतीक नु थाम यो खतम सेल्पदा बाक्त। मेको थान क्रोइश्शा, पुलु सेल्पदा बाक्त। मेकोमी मेको मूर्ति पाइश्शो थाम यो चोपदा बाक्त। मिनु मेको कली फस पोक्पदा बाक्त। मेकोम अशेराह आ थाम यो चोपदा बाक्त। १राजा १२:३२<sup>16</sup> मेको नोले योसीयाहम एर ओंथ कोवडा बाक्त। मिनु मेकोमी डांडाम बाक्शो तुरसपुकी तवा बाक्त। मिनु मेकोमी तुरस रे रुश गुंडपदा बाक्त। मिनु मेकोम चढेतीक ग्रांरा दिशो सेल्वा कली मेको चढेतीकेम चोपाइक्मी बाक्त। परमप्रभु आ मुरुमी, येरोबाम चढेतीकेम बाक्मेनु, देंशो परमप्रभु यावे आ लोव गाप्चा कली योसीयाहमी मो पवा बाक्त। मिनु पिपमी एर ओंथ कोवडा, मोदेंशो नोले दुम्ब लोव पाइब परमप्रभु आ मुर आ तुरस तवा बाक्त। १राजा १३:२<sup>17</sup> मिनु पिपमी “मेरे आं तशो तुरस सु के बाक्मे?” दे हिल्लो पामी बाक्त। मिनु मेको सहर डा मुरपुकीमी “मेरे परमप्रभु आ मुर आ तुरस बाक्ब। मेको यहूदा रे जाक्शा, बेथेल डा चढेतीकमी येरोबाम आ डोंइती मुल इन पशो गेय आ पर्वम नोले दुम्ब लोव पाइब, परमप्रभु आ मुर आ तुरस बाक्ब” देमा बाक्त। १राजा १३:३०-३२<sup>18</sup> मिनु मेकोमी “मो हना बाक्वा गेन। सुडम मेको आ रुश मथिने” देमाक्त। मोपतीके मुरपुकीम मेको सामरीया रे जाक्शो परमप्रभु यावे आ लोव पाइब आ रुश नु यहूदा रे जाक्शो परमप्रभु आ मुर आ रुश चहिं मशोल्मे बाक्त।<sup>19</sup> मिनु मेको प्रोइशा पिप योसीयाहम इस्राएल डा पिपपुकीम सामरीया डा सहरपुकीम सेल्पाइश्शो डांडा डा थान प्रेप्पदा बाक्त। मुरपुकीमी मेको थान सेल्शा पूजा पा परमप्रभु यावे कली गाइक्पाइश्शो बाक्मा बाक्त। मिनु योसीयाहमी मेको आन कली बेथेलम पशो खोदेंशो ग्रांरा दिशो सेल्पाइक्मी बाक्त।<sup>20</sup> पिप योसीयाहमी मेको डांडा डा थानपुकीम बाक्शो चढेतीक तार आन चढेब नेल्ल साइक्पाइक्मी बाक्त। मिनु मेको चढेतीक आन तार मुर आन रुश चोपाइक्मी बाक्त। मिनु मेको नोले यरूसलेम लेम्माक्त।

पास्सा नाक्त डा चाड लेंशा मानेशो

21 मिनु पिपमी मुर नेल्ल आन कली “परमप्रभु यावे, इन परमप्रभु आ कबल डा लोव ब्रेक्शो खोदेंशो पा पास्सा नाक्त डा चाड मानेचा माल्नीनी” दे माइक्मी बाक्त। *ब्यवस्था* १६:१-८; *यहोसु* ५:१०-११<sup>22</sup> इस्राएली आन कली निसाफ पाइबपुकीम हुकुम पामे रे नु इस्राएल नु यहूदा डा पिपपुकीम सासन पामे ना रे मुल सम्म मोदेंशो पा पास्सा चाड ममानेशो बाक्मा बाक्त। *न्यायाधीस* २:१०, १६, १७<sup>23</sup> तन्न पिप योसीयाहम सासन पवा आ १८ बर्सम यरूसलेमम मेको परमप्रभु यावे आ पास्सा नाक्त डा चाड मानेमे बाक्त।

24 परमप्रभु यावे आ खिमी चढेब हिल्कीयाहमी थिश्शो ब्रेक्शो लोव खाप्चा कली योसीयाहम बेक्शो मुर नु लोव पाइब, लिंक्यु कोवड नु खि डा मूर्ति नेल्ल, यहूदा नु यरूसलेमम बाक्शो ग्रांरा दिशो मारेड मारेड नेल्ल ताइक्पाइक्मी बाक्त। *लेवी* २०:२७; *ब्यवस्था* २९:१६-१७<sup>25</sup> मोपा योसीयाह खोदेंशो पा आ थुं नेल्ले आ रां नेल्ले नु आ सक्ति नेल्लेमी मोसा आ ब्रेक्शो लोव टिशा गाक्शा परमप्रभु यावे गे लेख मेको आ डोंइती नु नोले तेकोइ पिप मदुम्मा बाक्त। २राजा १८:५; *ब्यवस्था* ६:५

26 मो हना यो परमप्रभु यावेम आ ठेयब पा गाइश्शो चुरशो मलेत्ता बाक्त। यहूदा आ पर्वम मेको आ गाइश्शो मनाइसे बाक्त। मिनु मनस्सेमी यो मेको कली थाप्पा गाइक्पाइश्शो बाक्माक्त। २राजा २१:११-१६<sup>27</sup> मिनु परमप्रभु यावेमी “गो दोपा इस्राएल कली गुंडदु, मोपा यहूदा कली यो आं डोंइती रे गुंडनुड। मिनु गो आं योवशो यरूसलेम सहर नु आं नें बाक्ब देंशो आं खिं प्रोइनुड” देंशो बाक्माक्त। २राजा १७:१८; १राजा ८:२९

योसीयाह बेक्शो  
२इतिहास ३६:१-८

28 योसीयाह आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा? 29 पिप योसीयाहम सासन पवा ना इजीप्त डा पिप फाराओ नेको अस्सुर डा पिप नु लडाइ पचा कली युफ्रेटीस खोला गे लमाक्त। मिनु पिप योसीयाह फाराओ नेको नु लडाइ पचा कली मेकेर लमाक्त। तन्न नेकोम योसीयाह नु लडाइ पा मेको कली मेगीददोम सदा बाक्त।<sup>30</sup> मिनु मेको आ गेय पाइबपुकीम मेको आ बेक्शो रां बग्गीम कुर पा मेगीददो रे यरूसलेमम चाक्गमे बाक्त। मिनु मेको कली आ तुरसुमीन वोदमे बाक्त। मिनु मेको रागी डा मुरपुकीम मेको आ तौ येहो-अहाज कली तेल लुक्शा, मेको आ पा डा पिप सेल्मे बाक्त।

यहूदा डा पिप येहो-अहाज

31 येहो-अहाज पिप दुम्मेनु २३ बर्स दुम्शो बाक्माक्त। मेकोम यरूसलेममी महिना सां सासन पवा बाक्त। मेको आ ममा आ नें हामुतल बाक्माक्त। मेको लिब्ना डा येरमीया आ तमी बाक्माक्त।<sup>32</sup> मेकोमी आ किकी पिपी खोदेंशो पा, परमप्रभु यावे आ डोंइती मार मरिश्शो बाक्मे, मेको पवा बाक्त।<sup>33</sup> मिनु फाराओ नेकोमी मेकोम यरूसलेमम सासन मपवल, दे साडलोम फ्रेशा हमाथ रागी डा रिब्लामी चोक्शा वोदा बाक्त। मिनु मेकोमी यहूदा कली सहे का टलेन्ट चांदी नु टलेन्ट का सुन तिरो थाप्पदा बाक्त। *टलेन्ट का ३४ किलो बाक्ब। इजीकीएल* १९:४<sup>34</sup> मिनु फाराओ नेकोमी योसीयाह आ तौ एल्याकीम कली मेको आ आफ योसीयाह आ पा डा पिप सेल्शा वोदा बाक्त। मिनु फाराओ नेकोमी मेको आ नें एल्याकीम रे येहो-याकीम वोदा बाक्त। तन्न मेकोमी येहो-अहाज कली इजीप्त रागी लदा बाक्त। मिनु मेको इजीप्त उड बेक्माक्त। *१इतिहास* ३:१५<sup>35</sup> मिनु फाराओ नेको आ पुंडुशो सुन नु चांदी थाप्चा कली येहो-याकीमम आ रागी डा मुर आन कली तिरो थाप्पाइक्मी बाक्त। मिनु देंशो खोइ तिरो थाप्चा कली मेकोमी आ रागी डा मुरपुकी रे सुन नु चांदी पोक्गा बाक्त। २राजा १५:२०

यहूदा डा पिप येहो-याकीम

36 येहो-याकीम पिप दुम्मेनु मेको २५ बर्स दुम्शो बाक्माक्त। मेकोम यरूसलेममी ११ बर्स सासन पवा बाक्त। मेको आ ममा आ नें जेबीदाह बाक्माक्त। मेको रूमाह सहर डा पेदायाह आ तमी बाक्माक्त।<sup>37</sup> मिनु मेकोमी आ किकी पिपी खोदेंशो पा, परमप्रभु यावे आ डोंइती मार मरिश्शो बाक्मे, मेको पवा बाक्त।

नेबुकदनेसरमी लडाइ तोशो

24 येहो-याकीममी सासन पवा ना बेबीलोन डा पिप नेबुकदनेसर मेको रागी नु लडाइ पथ जाक्माक्त। मिनु बर्स सां सम्म येहो-याकीम मेको आ सासनम बाक्माक्त। तन्न बर्स सां नोले मेकोमी आ थुं फाइश्शा, नेबुकदनेसर कली मटिवा बाक्त। *येरमीया* २२:१३-१९<sup>2</sup> मिनु परमप्रभु यावेमी यहूदा नु लडाइ पचा कली कल्दी, अरामी, मोआबी नु अम्मोनी आन कली सोइक्तीमी बाक्त। परमप्रभु यावेमी आ गेय पा आ लोव पाइब आन देंशो खोदेंशो दुम्पाइश्शा यहूदा कली खतम पोक्पाइक्चा कली मेको आन कली सोइक्तीमी बाक्त।<sup>3</sup> परमप्रभु यावेमी आ मिश्शो खाप्शा, मनस्से आ पशो मरिश्शो नु आ पाप आ पर्वम मेको आन कली आ डोंइती रे गुंडचा कली मो पशो बाक्माक्त। २राजा २१:१०-१६; २राजा २३:२६-२७<sup>4</sup> मारदे हना मनस्सेम दोस मताइब मुर आन कली साइश्शा, यरूसलेम कली हुशेम प्रिंशो बाक्माक्त। मिनु परमप्रभु यावेमी मेको कली माफ गेने मबिश्शो बाक्माक्त।<sup>5</sup> मिनु येहो-याकीम आ पशो अरु गेय, मेको आ पशो नेल्ल, मार, मेको यहूदा डा पिप आन इतिहासम ब्रेक्शो मबाक्बा डा? 6 मिनु येहो-याकीम बेक्माक्त। मिनु मेको आ पा डा आ तौ येहो-याकीम पिप दुम्माक्त।<sup>7</sup> इजीप्त डा पिप आ रागी प्रोना नोले लेंशा मजाक्माक्त। मारदे हना



बेबीलोन डा पिपम इजीप्त डा खोला रे युफ्रेटीस खोला सम्म डा रागी नेल्ल आ के सेल्शो बाक्मावक्त।

यहूदा डा पिप येहो-याकीन  
२इतिहास ३६:९-१०

८ येहो-याकीन पिप दुम्मेनु १८ बर्स दुम्शो बाक्मावक्त। मेकोमी यरूसलेमम महिना सां सासन पवा बावक्त। मेको आ ममा आ नें नहुशता बाक्मावक्त। मेको यरूसलेम डा एल्नाथान आ तमी बाक्मावक्त। *येरमीया २२:२४-३०* ९ येहो-याकीनमी आ आफ खोदेंशो पा, परमप्रभु यावे आ डोंइती मार मरिम्शो बाक्मे, मेको पवा बावक्त।

१० मेना बेबीलोन डा पिप नेबुकदनेसर आ लडाइ पाइबपुकी यरूसलेमम लडाइ पथ जाक्शा, मेको सहर कली पुम्शो बाक्मा बावक्त। ११ मिनु आ लडाइ पाइबपुकीम मेको सहर पुम्दमेनु, बेबीलोन डा पिप नेबुकदनेसर जाक्मावक्त। १२ मिनु यहूदा डा पिप येहो-याकीन, नेबुकदनेसर कली जिम्मा गेसे बावक्त। मिनु मेको नु मेको आ ममा, आ गेय पाइबपुकी, आ ठेयब मुरपुकी नु आ लडाइ पाइब आन ठेयब मुर नेल्ल बेबीलोन डा पिप कली जिम्मा गेसमा बावक्त। मिनु बेबीलोन डा पिपम सासन पवा आ ८ बर्सम येहो-याकीन कली ग्याइश्शा चोक्मा बावक्त।

१३ मेकोमी परमप्रभु यावे आ खिं डा शोंप नु पिप आ खिं डा शोंप नेल्ल लदा बावक्त। मेकोमी सोलोमनम सेल्शो परमप्रभु यावे आ खिं डा सुन के बोस खोइश्शा लदा बावक्त। मोपा परमप्रभु यावे आ देंशो लोत्र गाम्मावक्त। *२राजा २०:१७* १४ मेकोपुकीम यरूसलेम डा ठेयब मुर, लडाइ पाइब आन ठेयब मुर नेल्ल, लडाइ पाइब नेल्ल १० हजार मार मार सेल्स जोक्ब नु तुप्तील नेल्ल ग्याइश्शा लदा बावक्त। थम प्रुडग आन कली ला प्रोंइशा वोदा बावक्त। *येरमीया २४:१* १५ नेबुकदनेसरमी येहो-याकीन कली ग्याइश्शा बेबीलोनम लदा बावक्त। पिप आ ममा, पिप आ मीशपुकी, मेको आ ठेयब गेय पाइबपुकी नु नेल्ल क्येडा जोक्ब तुडक्ब आन कली यरूसलेम रे ग्याइश्शा बेबीलोन लदा बावक्त। *येरमीया २२:२६* १६ बेबीलोन डा पिपमी ७ हजार बोल्यो लडाइ पाइब नु हजार का मार मार सेल्स जोक्ब नु तुप्तील आन कली ग्याइश्शा बेबीलोन लाइक्मी बावक्त। मेको नेल्ल लडाइ पचा कली बोल्यो मुर बाक्मा बावक्त। १७ बेबीलोन डा पिपमी येहो-याकीन आ बकान्छा मत्तन्याह कली मेको आ पा डा पिप सेला बावक्त। मिनु मेको आ नें सिदकीयाह वोदा बावक्त।

यहूदा डा पिप सिदकीयाह  
२इतिहास ३६:११-२१; येरमीया ५२:१-३०

१८ सिदकीयाह पिप दुम्मेनु, मेको २१ बर्स दुम्शो बाक्मावक्त। मिनु मेकोमी यरूसलेमम ११ बर्स सासन पवा बावक्त। मेको आ ममा आ नें हामुतल बाक्मावक्त। मेको लिब्ना सहर डा येरमीया आ तमी बाक्मावक्त। १९ मेकोम येहो-याकीनम पशो खोदेंशो पा परमप्रभु यावे आ डोंइती मार मरिम्शो बाक्मे, मेको पवा बावक्त। *२राजा २३:३७* २० मिनु परमप्रभु यावे आ गाइश्शोम पतीके यरूसलेम नु यहूदा डा मुर नेल्ल आन कली आ डोंइती रे गुंडदीमी बावक्त। मिनु नोले सिदकीयाहमी बेबीलोन डा पिप कली मटिवा बावक्त। *२राजा २३:२७*

यरूसलेम खतम दुम्शो

२५ सिदकीयाहम सासन पशो ९ बर्स १० महिना डा १० नाक्त बेबीलोन डा पिप नेबुकदनेसर आ लडाइ पाइब नेल्ल चाक्शा यरूसलेम नु लडाइ पथ जाक्मावक्त। मिनु यरूसलेम कली पुम्शा एर ओंथ गारो डोइक्तीक सेल्मे बावक्त। *येरमीया ३४:१* २ पिप सिदकीयाहमी सासन पशो ११ बर्स दुम्मेनु, सहर पुम्दमे बावक्त। ३ मिनु मेको ४ महिना डा ९ नाक्त सहरम थम ठेयब अन्काल दुम्मावक्त। मिनु मेको रागीम मुर आन कली जचा थोत्रक मारेइ मबाक्मावक्त। ४ मेना पिप नु लडाइ पाइब नेल्ल गारो होइश्शा, नाक्दो प्रोक्मा बावक्त। मेको पिप आ रू रे गारो निक्शी आस दाते डा लाप्चो रे कल्दीपुकी सहर आ एर ओंथ बाक्तेक्म हना यो, प्रोक्मा बावक्त। मोपा

मेकोपुकी अराबाह गे प्रोक्मा बावक्त। ५ तन्न कल्दी डा लडाइ पाइबपुकीम पिप कली खेदा पामे बावक्त। मिनु मेको कली यरीको डा दिंममी थित्मे बावक्त। आ लडाइ पाइब नेल्ल मेको कली प्रोंइशा एर ओंथ ब्रमा बावक्त। ६ मिनु मेको कली ग्याइश्शा बेबीलोन डा पिप आ डोंइती रिब्ला सहरम चाक्गमे बावक्त। मिनु मेकोमी मेको आन कली निसाफ पवा बावक्त। ७ मेकोपुकीम सिदकीयाह आ तौ आन कली मेको आ डोंइतीन सदमे बावक्त। मिनु नोले सिदकीयाह आ मिक्च पुक्तमे बावक्त। मिनु मेको कली कांसा के साडलोम पाइश्शा बेबीलोन लदमे बावक्त। *२सामुएल १२:१०*

यहूदा डा मुर आन कली लाइश्शो

८ बेबीलोन डा पिप नेबुकदनेसरमी सासन पशो १९ बर्स ५ महिना डा ७ नाक्त, नेबुकदनेसर कली खाल पाइब आन ठेयब मुर नेबुजरादान यरूसलेम जाक्मावक्त। ९ मिनु मेकोमी परमप्रभु यावे आ खिं, पिप आ दरवार, यरूसलेम सहर डा खिं नेल्ल नु ठेयब खिं नेल्ल मी सुइक्ता बावक्त। १० मेको पिप कली खाल पाइब आन ठेयब मुर आ हुकुमम बाक्शो कल्दी लडाइ पाइबपुकीम यरूसलेम आ एर ओंथ डा गारो नेल्ल प्रेत्मे बावक्त। ११ मेको पिप कली खाल पाइब आन ठेयब मुर नेबुजरादानमी सहरम प्रोंइचा पुंडसीथो मुर नु अरु बेबीलोन डा पिप कली जिम्मा गेंसीथो मुर आन कली ग्याइश्शा बेबीलोन लाइक्मी बावक्त। १२ तन्न मेको पिप कली खाल पाइब आन ठेयब मुरम अडगुर रू रोक्चा नु रू दोचा कली थम प्रुडग आन कली चहिं प्रोंइशा वोइक्मी बावक्त।

१३ मिनु कल्दीपुकीमी परमप्रभु यावे आ खिंम बाक्शो कांसा के थामपुकी, निप्पाइक्तीकपुकी नु कांसा के ठेयब बोस प्रोल्शा आइक्च सेल्शा बेबीलोन लदमे बावक्त। *येरमीया २७:१९-२२* १४ मेकोपुकीम ग्योंबपुकी, बेल्चापुकी, सल्दो थेप्तीके थनारोपुकी, कचौरापुकी, थनारोपुकी नु चढेतीकेम चलेतीक कांसा के मारेइ मारेइ ग्योंब नेल्ल लदमे बावक्त। १५ मेकोपुकीमी मी कुरतीके नु बोस नेल्ले लदमे बावक्त। मिनु पिप कली खाल पाइब आन ठेयब मुरमी सुन नु चांदीम सेल्शो मारेइ मारेइ लदा बावक्त। १६ सोलोमनमी परमप्रभु यावे आ खिं कली सेल्शो थाम निक्शी, ठेयब बोस नु निप्पाइक्तीक सेल्शो कांसा नाक्ने मचाप्चा डा बाक्मा बावक्त। *१राजा ७:१५; १राजा ७:२३; १राजा ७:२७* १७ मेको थाम का १८ कुबीत लाइश्शो बाक्मावक्त। मिनु मेको थाम का आ पिया कुबीत सां लाइश्शो बाक्मावक्त। मिनु मेको कांसा के जालीम आ एर ओंथ क्युक्शा हिरशो दारीम बाक्मावक्त। अर्को थाम यो जालीम हिरशा मेको खोदेंशो पा सेल्शो बाक्मावक्त। *कुबीत का आधा मिटर खोदेंशो बाक्ब।*

१८ मिनु पिप कली खाल पाइब आन ठेयब मुरम ठेयब चढेब सेरायाह नु मेको आ दी डा सेफन्याह नु लाप्चो कोत्रब सां आन कली यो ग्याइश्शा लाइक्मी बावक्त। १९ मेकोमी सहरम मुल यो लीशो आन दाते डा लडाइ पाइब आन ठेयब मुर नु ५ जना पिप कली सल्ला गेब आन कली यो लाइक्मी बावक्त। मेकोम रागी डा मुर आन कली लडाइ पाइब मुर सेल्चा कली योत्रब ब्रेक्ब ठेयब मुर नु सहरम थिश्शो ६० जना मुर आन कली यो लाइक्मी बावक्त। २० मेको पिप कली खाल पाइब आन ठेयब मुर नेबुजरादानमी मेको आन कली बेबीलोन डा पिप आ बाक्तीक रिब्ला सहरम चाक्मी बावक्त। २१ मिनु बेबीलोन डा पिपम मेको आन कली हमाथ आ रागीम रिब्लाम साइक्पाइक्मी बावक्त। मोपा यहूदा डा मुर आन रागी रे ग्याइश्शा लाइक्चा पुंडसमा बावक्त। *२राजा २३:३३*

गेदाल्याहमी सासन पशो  
येरमीया ४०:५; येरमीया ४१:३

२२ बेबीलोन डा पिप नेबुकदनेसरमी शाफान आ चच अहीकाम आ तौ गेदाल्याह कली यहूदाम प्रोंइशा वोइश्शो इक्का खोइ मुर आन कली सासन पाइब सेल्शा वोदा बावक्त। २३ मिनु लडाइ पाइब आन ठेयब मुर नेल्ल नु मेको आन मुरपुकीम बेबीलोन डा पिपम गेदाल्याह कली सासन पाइब सेल्शो लोत्र नेन्मे बावक्त। मिनु मेको नेल्ल गेदाल्याह आ बाक्तीके मिस्पा सहरम जाक्मा बावक्त। मेको नेथन्याह आ तौ इश्माएल, कारेआह आ तौ योहानान, नेतोफाह सहर डा तन्हुमेथ आ तौ सेरायाह, माकाथी आ तौ

याजन्याह नु मेको आन मुरपुकी जाक्मा बाक्त। <sup>24</sup> मिनु गेदाल्याहमी मेकोपुकी नु आन मुर आन कली कसम जशा रिम्शो लोव्र पाइक्मी बाक्त। मिनु मेकोम “कल्दी डा ठेयब मुर आन कली तशा महिनीन। रागीम बाक्कीन। मिनु बेबीलोन डा पिप आ गेय पने। मिनु इन कली रिम्शो दुम्ब” दे माइक्मी बाक्त। <sup>25</sup> तन्न ७ महिनाम पिप आ खिं डा मुर एली-शामा आ चच, नेथन्याह आ तौ इश्माएलम १० जना मुर आन कली चाक्शा जाक्माक्त। मिनु मेकोमी गेदाल्याह नु मेको नु मिस्पा सहरम बाक्ब यहूदा नु कल्दी डा मुर आन कली तुप्शा साइक्मी बाक्त। <sup>26</sup> मोपतीके कल्दी आन क्येडा हिंशा आइक्च रे ठेयब मुर नु लडाइ पाइब आन ठेयब मुर नेल्ल प्रोक्शा इजीप्त रागी जाक्दीम्मा बाक्त। *ब्यक्स्था २८:६८*

येहो-याकीन कली प्रोइशो  
येरमीया ५२:३१-३४

<sup>27</sup> यहूदा डा पिप येहो-याकीन ग्याइश्शा लाइश्शो ३७ बर्स, १२ महिना डा २७ नाक्त दुम्मेनु, प्रोइचा पुंडसे बाक्त। मिनु एवील-मेरोदक बेबीलोन डा पिप दुम्शा सासन पशो आ डोंइती डा बर्सम मेको कली प्रोना बाक्त। *२राजा २४:१५* <sup>28</sup> मेकोमी येहो-याकीन कली रिम्शो लोव्र पवा बाक्त। मिनु मेको कली बेबीलोनम बाक्शो पिप आन दातेमी नेल्ल क्येडा ठेयब सेला बाक्त। <sup>29</sup> मोपा येहो-याकीनमी आ चोक्सीशो वा प्रुदा बाक्त। मिनु आ लीशो नाक्त नेल्ल पिप नु बाक्शा जवा बाक्त। <sup>30</sup> बेबीलोन डा पिपमी मेको कली ब्रोंइम सम्म नाक्त किंत किंत आ माल्शो मारेइ मारेइ गेवा बाक्त।

## १ इतिहास

एको इतिहास किताब निक्शी हिब्रू बाइबलम किताब का बाक्त। मेकेर राजा किताब निक्शी नु सामुएल किताब निक्शीम मब्रेक्शो लीशो लोत्र ब्रेक्शो बाक्ब। एको किताब आ ब्रेक्स एज्रा आ ब्रेक्शो खोदेंशो तांडसीब। मिनु एज्रा किताब इतिहास किताब नु थम गारचा डा बाक्त। तन्न एज्रा ब्रेक्ब मुर बाक्त हना यो, अर्को मुरुम यो लोत्र तेम्शो बाक्तेक्म।

एको किताब रागी सेल्चा रे पिप कोरेस आ सासन पशो ५३६ बि. सी. सम्म डा बाक्ब। तन्न पिप दाऊद आ पर्वम शुश लोत्र बाक्ब।

एको किताब इस्राएली आन इतिहासम तेम्शो लोत्र बाक्ब।

१. आदम रे इस्राएल आ १२ थर

२. पिप दाऊद आ सासनम इस्राएली आन इतिहास

आदम रे अब्राहाम सम्म डा मुर

१ आदम आ तौ सेथ बाक्माक्त। सेथ आ तौ एनोश बाक्माक्त।  
उत्पत्ती ५:-<sup>२</sup> एनोश आ तौ केनान बाक्माक्त। केनान आ तौ मा-  
हालालेल बाक्माक्त। मा-हालालेल आ तौ यरेद बाक्माक्त।<sup>३</sup> यरेद आ तौ  
हनोक बाक्माक्त। एनोक आ तौ मेथुसेलाह बाक्माक्त। मेथुसेलाह आ तौ  
लमेक बाक्माक्त।<sup>४</sup> लमेक आ तौ नोआह बाक्माक्त। नोआह आ तौ शेम,  
हाम नु यफेथ बाक्मा बाक्त।

यफेथ आ तौ चच

<sup>५</sup> यफेथ आ तौ गोमेर, मागोग, मादै, यावान, तूबाल, मेशेक नु तिरास  
बाक्मा बाक्त। उत्पत्ती १०:२-५<sup>६</sup> गोमेर आ तौ अशकेनज, दिफाथ नु  
तोगारमाह बाक्मा बाक्त।<sup>७</sup> यावान आ तौ एलीशाह, टारशीश, कितीम नु  
रोदानीम बाक्मा बाक्त।

हाम आ तौ चच युड

<sup>८</sup> हाम आ तौ कूश, इजीप्त, पूत नु कनान बाक्मा बाक्त। उत्पत्ती १०:६-  
२०<sup>९</sup> कूश आ तौ शेबा, हवीलाह, साब्ताह, रामाह नु साब्तेका बाक्मा  
बाक्त। रामाह आ तौ शेबा नु देदान बाक्सा बाक्त।<sup>१०</sup> कूश निम्रोद आ आफ  
बाक्माक्त। निम्रोद रागी आ डोंइती सक्ति पाइश्शो मुर का बाक्माक्त।

<sup>११</sup> इजीप्त माइश्शो मुर लूदीम अनामीम, लेहाबीम नु नपत्तुहीम,  
<sup>१२</sup> पथ्यूसीम, कस्तुहीम, काप्तोरीम आन आफ बाक्माक्त। मेको रे पलिस्ती  
दुम्शो बाक्मा बाक्त।

<sup>१३</sup> कनान माइश्शो मुर आ डोंइती थिशो तौ सीदोन नु हेथ आस आफ  
बाक्माक्त।<sup>१४</sup> मेको निक्शी रे यबुसी, एमोरी, गिरगाशी,<sup>१५</sup> हिच्वी, अरकी,  
सिनी,<sup>१६</sup> अरवादी, सेमारी नु हमथी दुम्शो बाक्मा बाक्त।

शेम आ तौ चच युड

<sup>१७</sup> शेम आ तौ एलाम, अश्शुर, अरपक्शाद, लूद, अराम, ऊज, हुल, गेथेर  
नु मेशेक बाक्मा बाक्त। उत्पत्ती १०:२१-३०<sup>१८</sup> अरपक्शाद शेलाह आ  
आफ बाक्माक्त। मिनु शेलाह एबेर आ आफ बाक्माक्त।<sup>१९</sup> मिनु एबेरमी तौ  
निक्शी थिवा बाक्त। का आ नें पेलेग बाक्माक्त। मेको थिशो ना रागी  
योक्शो बाक्माक्त। मेको आ लोक्ब आ नें योक्तन बाक्माक्त। उत्पत्ती  
११:१-९<sup>२०</sup> मिनु योक्तन आ चच युड अल्मोदाद, शेलेफ, हासार-मावेथ,  
येराह,<sup>२१</sup> हदोराम, उजाल, दिक्लाह,<sup>२२</sup> एबाल, अबीमा-एल, शेबा,  
<sup>२३</sup> ओफीर, हवीलाह नु योबाब बाक्मा बाक्त। मेको नेल्ल योक्तन आ चच  
युड बाक्मा बाक्त। उत्पत्ती ११:१०-२६

<sup>२४</sup> शेम रे अब्राम सम्म सु सु बाक्मा बाक्त देंशा हना, अरपक्शाद, शेलाह,  
<sup>२५</sup> एबेर, पेलेग रेऊ, उत्पत्ती ११:१०-२६<sup>२६</sup> सेरूग, नाहोर, तेराह,<sup>२७</sup> नु  
अब्राम बाक्मा बाक्त। अब्राम कली अब्राहाम यो देंबाक्मा बाक्त।

अब्राहाम आ तौ चच युड

<sup>२८</sup> अब्राहाम आ तौ निक्शी इसहाक नु इश्माएल बाक्सा बाक्त। उत्पत्ती  
२१:३; उत्पत्ती १६:१५<sup>२९</sup> इश्माएल आ डोंइती थिशो तौ नेबायोथ  
बाक्माक्त। मेको आ नोले डा तौ केदार, अदबेल, मिब्साम, उत्पत्ती २५:१३-  
१६<sup>३०</sup> मिश्मा, दुमा, मस्सा, हादाद, तेमा,<sup>३१</sup> येतुर, नाफीश नु केदमा बाक्सा  
बाक्त। मेको नेल्ल इश्माएल आ तौ बाक्सा बाक्त।

<sup>३२</sup> अब्राहाम आ नोले चाक्शो मीश केतुराहमी जिम्नान, योक्शान, मेदान,  
मिदयान, इश्बाक नु शुआह थीमी बाक्त। मिनु योक्शान आ तौ शेबा नु  
देदान बाक्सा बाक्त। उत्पत्ती २५:१-४<sup>३३</sup> मिदयान आ तौ एफाह, एफेर,  
हनोक, अबीदा नु एल्दाह बाक्सा बाक्त। मेको नेल्ल केतुराह आ तौ चच  
बाक्सा बाक्त।

<sup>३४</sup> अब्राहाम आ तौ इसहाक बाक्माक्त। मिनु इसहाक आ तौ निक्शी  
एसाव नु इस्राएल बाक्सा बाक्त। उत्पत्ती २५:१९-२६<sup>३५</sup> एसाव आ तौ  
एलीफाज, रूएल, येऊश, यालाम नु कोराह बाक्सा बाक्त। उत्पत्ती ३६:१०-  
१४, २०-२८<sup>३६</sup> एलीफाज आ तौ तेमान, ओमार, सेफी, गाताम, केनाज,  
तिम्ना नु अमालेक बाक्सा बाक्त।<sup>३७</sup> रूएल आ तौ नाहाथ, जेराह, शम्माह  
नु मिज्जा बाक्सा बाक्त।

एदोम आ डोंइती डा मुर

<sup>३८</sup> सेडर आ तौ लोतान, शोबाल, सिबोन, अनाह, दीशोन, एजेर नु दीशान  
बाक्सा बाक्त।<sup>३९</sup> लोतान होरी नु होमाम आ किकी पिपी बाक्साक्त। मिनु  
लोतान आ समी तिम्ना बाक्साक्त।<sup>४०</sup> शोबाल अल्यान, मानाहाथ, एबाल,  
शेफी नु ओनाम आ थर डा किकी पिपी बाक्सा बाक्त। सिबोन आ तौ  
आइयाह नु अनाह बाक्सा बाक्सा।<sup>४१</sup> अनाह आ तौ दीशोन बाक्साक्त।  
दीशोन आ तौ हाम्रान, एश्वान, इथ्रान नु केरान बाक्सा बाक्त।<sup>४२</sup> एजेर आ  
तौ बिल्हान, जावान नु याकान बाक्सा बाक्त। दीशान आ तौ ऊज नु अरान  
बाक्सा बाक्त।

एदोम डा पिपपुकी

<sup>४३</sup> इस्राएल रागीम पिप दुम्चा क्येडा डोंइती एदोम रागीमी बेओर आ तौ  
बेला पिप दुम्शा बाक्शो बाक्साक्त। मेको आ सहर दिनहाबा बाक्साक्त।  
उत्पत्ती ३६:३१-४३<sup>४४</sup> मिनु बेला बेक्म नोले बोजा सहर डा जेराह आ तौ  
योबाब पिप दुम्माक्त।<sup>४५</sup> मिनु योबाब बेक्म नोले तेमान डा मुर आन रागी  
डा हुशाम पिप दुम्माक्त।<sup>४६</sup> मिनु हुशाम बेक्म नोले बेदाद आ तौ हादाद  
पिप दुम्माक्त। मेकोम मोआब रागीम मिदयानी आन कली लडाइ पा फ्रूमी

बाक्त। मेको आ सहर आ नें अवीथ बाक्माक्त। 47 मिनू हादाद बेक्म नोले मास्केहाह सहर डा सम्ला पिप दुम्माक्त। 48 मिनू सम्ला बेक्म नोले युफ्रेटीस खोला आ नेक्था डा रेहोबोथ डा शावल पिप दुम्माक्त। 49 मिनू शावल बेक्म नोले आकबोर आ तौ बाल-हनान पिप दुम्माक्त। 50 मिनू बाल-हनान बेक्म नोले हादाद पिप दुम्माक्त। मेको आ सहर आ नें पाही बाक्माक्त। मेको आ मीश आ नें मेहेताबेल बाक्माक्त। मेको मात्रेद आ तमी, मे-जाहाब आ चच बाक्माक्त। 51 मिनू हादाद बेक्माक्त। एदोम रे दुम्शो थरपुकी तिम्ना, अल्याह, येथेथ, 52 ओहोली-बामा, एलाह, पिनोन, 53 केनाज, तेमान, मिब्सार, 54 मग्दीएल नु यिराम बाक्मा बाक्त। मेको नेल्ल एदोम रे दुम्शो थर बाक्मा बाक्त।

इस्स्राएल माइश्शो याकूब आ तौ

2 इस्स्राएल आ तौ रूबेन, सिमियोन, लेवी, यहूदा, इस्साकार, जबूलून, 2 दान, योसेफ, बेन्यामीन, नाफ्ताली, गाद नु आशेर बाक्मा बाक्त। उत्पत्ती ३५:२२-२६

यहूदा आ तौ चच  
इतिहास ४:-

3 यहूदा आ तौ एर, ओनान नु शेलाह बाक्मा बाक्त। मेको आन ममा कनानी मीश बाथ-शुआ बाक्माक्त। मिनू यहूदा आ डोंइती थिशो तौ एरमी परमप्रभु यावे आ डोंइती मरिश्शो पवा बाक्त। मोपतीके परमप्रभु यावेमी मेको कली सदा बाक्त। उत्पत्ती ३८:१-७ 4 मिनू यहूदा आ चाइमी तामारमी यहूदा रे पा पेरेस नु जेराह थिम्सी बाक्त। मिनू यहूदा आ तौ नेल्ल पा ५ जना दुम्मा बाक्त। उत्पत्ती ३८:२७-३०

5 पेरेस आ तौ हेस्रोन नु हामुल बाक्सा बाक्त। उत्पत्ती ४६:१२ 6 जेराह आ तौ जिम्मी, एथान, हेमान कल्कोल नु दारा बाक्मा बाक्त। मेको नेल्ल ५ जना बाक्मा बाक्त। 7 कारमी आ तौ आकान बाक्माक्त। मेकोमी इस्स्राएली आन कली शुश श्वेत गेवा बाक्त। परमप्रभु आ थोन्नक लदा बाक्त। यहोसु ७:- 8 मिनू एथान आ तौ अजारयाह बाक्माक्त।

राम आ तौ चच

9 हेस्रोन आ तौ येराहमेल, राम नु कलूबै बाक्मा बाक्त। रूथ ४:१९-२२; मत्ती १:३ 10 राम अम्मीनादाब आ आफ बाक्माक्त। अम्मीनादाब नहशोन आ आफ बाक्माक्त। मेको यहूदा आ तौ आन दाते डा नेल्ल क्येडा ठेयब बाक्माक्त। गन्ती १:७; गन्ती २:३; गन्ती ७:११-१२ 11 नहशोन साल्मा आ आफ बाक्माक्त। साल्मा बोआज आ आफ बाक्माक्त। 12 बोआज ओबेद आ आफ बाक्माक्त। ओबेद येस्से आ आफ बाक्माक्त। 13 येस्से एलीआब आ आफ बाक्माक्त। मेको आ डोंइती थिशो तौ बाक्माक्त। मेको आ माइला अबीनादाब, साइला शिमेआ, 14 सासामुएल १६:५-१० 14 काइला नेथनेल, अन्तरे रदाइ, 15 जन्तरे ओसेम नु कान्छा दाऊद बाक्मा बाक्त। 16 सासामुएल १७:१२ 16 मेको आन समी सेरूयाह नु अबीगेल बाक्सा बाक्त। सेरूयाह आ तौ अबीशै, योआब नु आसाहेल सां बाक्मा बाक्त। 2 सासामुएल २:१८ 17 अबीगेलम आमासा थिवा बाक्त। मेको आ आफ इश्माएली येथेर बाक्माक्त। 2 सासामुएल १७:२५

कालेब आ तौ चच

18 हेस्रोन आ तौ कालेबमी आ मीश अजुबाह नु येरीओथ रे पा तमी तौ थिवा बाक्त। मेको आ तौ येशेर, शोबाब नु अरदोन बाक्मा बाक्त। इतिहास २:९, ४२ 19 मिनू अजुबाह बेक्म नोले कालेबमी एफ्राथ कली ग्युंवे पवा बाक्त। मिनू मेकोमी हुर थिवा बाक्त। इतिहास २:५० 20 मिनू हुर आ तौ ऊरी बाक्माक्त। ऊरी आ तौ बेजालेल बाक्माक्त। प्रस्थान ३१:२ 21 मिनू हेस्रोन ६० बर्स दुम्मेनु, माकीर आ तमी नु ग्युंवे पवा बाक्त। मेको गिलाद आ समी बाक्माक्त। मिनू हेस्रोन मेको नु बाक्शा सेगुब थिवा बाक्त। 22 मिनू सेगुब याइर आ आफ बाक्माक्त। याइरम गिलाद डा २३ सहर सासन पवा बाक्त। न्यायाधीस १०:३-६; १ राजा ४:१३ 23 तन्न गेशुर नु अराम आस

राज्य निक्शीमी मेको रे हव्वोथ-याइर, केनाथ नु आ नेक्था डा सहर ६० ओटा सहर लडाइ पा ग्राशा आस के सेल्से बाक्त। मेको नेल्ल माकीर आ तौ बाक्मा बाक्त। माकीर चहिं गिलाद आ आफ बाक्माक्त। 24 हेस्रोन कालेब-एफ्राथाह सहरम बेक्म नोले हेस्रोन आ मीश अबीयाहम मेको के अशहुर थिवा बाक्त। मेको तेकोहा आ आफ बाक्माक्त। इतिहास ४:५

येराहमेल आ तौ चच

25 हेस्रोन आ डोंइती थिशो तौ येराहमेल बाक्माक्त। येराहमेल आ डोंइती थिशो तौ राम बाक्माक्त। मिनू नोले डा तौ बुनाह, ओरेन, ओसेम नु अहीयाह बाक्मा बाक्त। इतिहास २:९ 26 येराहमेल के अर्को मीश का यो बाक्माक्त। मेको आ नें अतारा बाक्माक्त। मेकोमी ओनाम थिवा बाक्त। 27 येराहमेल आ डोंइती थिशो तौ राम आ तौ मास, यामीन नु एकेर बाक्मा बाक्त। 28 ओनाम आ तौ शम्माइ नु यादा बाक्सा बाक्त। मिनू शम्माइ आ तौ नादाब नु अबीशुर बाक्सा बाक्त। 29 अबीशुर आ मीश आ नें अबीहेल बाक्माक्त। मेकोमी अहबान नु मोलीद थिवा बाक्त। 30 नादाब आ तौ सेलेद नु अप्पाइम बाक्सा बाक्त। मिनू सेलेद आल मथिथु बेक्माक्त। 31 अप्पाइम आ तौ इशी बाक्माक्त। मिनू इशी आ तौ शेशान बाक्माक्त। शेशान आ तौ अहलै बाक्माक्त। 32 शम्माइ आ लोकब यादा आ तौ येथेर नु योनाथन बाक्सा बाक्त। मिनू येथेर आल मथिथु बेक्माक्त। 33 योनाथन आ तौ पेलेथ नु जाजा बाक्सा बाक्त। मेको नेल्ल येराहमेल आ तौ चच बाक्मा बाक्त। 34 मिनू शेशान के तौ मबाक्म। तमी ला बाक्मा बाक्त। शेशान के इजीप्त डा यारहा माइश्शो वाइल का बाक्माक्त। इतिहास २:३१; गन्ती २७:७ 35 मिनू शेशानमी आ तमी का कली आ वाइल यारहा नु ग्युंवे पदा बाक्त। मिनू आ तमीमी अत्तै थिवा बाक्त। 36 अत्तै नाथान आ आफ बाक्माक्त। नाथान जाबाद आ आफ बाक्माक्त। 37 जाबाद एफलाल आ आफ बाक्माक्त। एफलाल ओबेद आ आफ बाक्माक्त। 38 ओबेद येहू आ आफ बाक्माक्त। येहू अजारयाह आ आफ बाक्माक्त। 39 अजारयाह हेलेस आ आफ बाक्माक्त। हेलेस एलेआसाह आ आफ बाक्माक्त। 40 एलेआसाह सिस्माइ आ आफ बाक्माक्त। सिस्माइ शाल्लुम आ आफ बाक्माक्त। 41 शाल्लुम येकाम्याह आ आफ बाक्माक्त। येकाम्याह एली-शामा आ आफ बाक्माक्त।

कालेब आ तौ चच युइ

42 येराहमेल आ लोकब कालेब आ डोंइती थिशो तौ मेशाह बाक्माक्त। मेको कली हिब्रू लोवमी मारेशा यो देंसीब, मेको आ तौ जीफ बाक्माक्त। मारेशा आ तौपुकी हेब्रोन आ मुर बाक्मा बाक्त। इतिहास २:१८ 43 हेब्रोन आ तौ कोराह, ताप्पुआह, रेकेम नु शेमा बाक्मा बाक्त। 44 शेमा राहाम आ आफ बाक्माक्त। मिनू रहम योरकेआम आ आफ बाक्माक्त। रेकेम शम्माइ आ आफ बाक्माक्त। 45 शम्माइ आ तौ माओन बाक्माक्त। माओन आ तौ बेथ-सुर बाक्माक्त। 46 कालेब आ अर्को मीश एफाहमी हारान, मोचा नु गाजेज थिवा बाक्त। मिनू हारान गाजेज आ आफ बाक्माक्त। 47 याहदै आ तौ रेगेम, योथाम, गेशान, पेलेत, एफाह नु शाफ बाक्मा बाक्त। 48 कालेब आ अर्को मीश माकाहमी शेबेर नु तिरहानाह थिवा बाक्त। 49 मेकोमी मदमन्ना आ आफ शाफ, मकबेनाह आ आफ शेवा नु गिबा आ आफ थिवा बाक्त। कालेब आ तमी अकसा बाक्माक्त। यहोसु १५:१६; न्यायाधीस १:१२ 50 मेको कालेब आ तौ चच युइ बाक्मा बाक्त। कालेब आ मीश एफ्राथाह आ डोंइती थिशो तौ हुर बाक्माक्त। हुर आ तौ शोबाल किरयथ-यारीम डा मुर आन आफ बाक्माक्त। इतिहास २:१९ 51 साल्मा बेथलेहेम आ आफ बाक्माक्त। हारेफ बेथ-गादेर आ आफ बाक्माक्त। 52 किरयथ-यारीम आ किकी पिपी शोबाल के अर्को तौ यो बाक्मा बाक्त। मेको हारोए नु मेनुहोथ सहर डा आधा मुर बाक्मा बाक्त।

53 मिनू किरयथ-यारीम सहरम बाक्शो खिं खिं डा मुर इथ्री, पूथी, शुमाथी नु मिश्री बाक्मा बाक्त। मेकोपुकी रे सोराथी नु एस्ताओली दुम्मा बाक्त। इतिहास ४:२

54 साल्मा आ तौ बेथलेहेम, नेतोफाह अत्रोथ-बेथ-योआब नु मानाहाथ सहर डा आधा मुर नु सोराह सहर डा मुर बाक्मा बाक्त। इतिहास ९:१६

55 याबेस सहरम बाक्ब मेको आन खिं खिं डा मुर तिराथी, शिमेआथ आ खिं डा मुरपुकी नु सुकाथी बाक्मा बाक्त। मेको हम्माथ सहर रे जाक्शो केनी बाक्मा बाक्त। मेको आन किकी पिपी रेकाब बाक्मा बाक्त। *येरमीया ३५:-*

### दाऊद आ तौपुकी

3 हेब्रोन सहरम थिशो दाऊद आ तौ सु सु बाक्मा बाक्त देशा हना, आ डोंइती थिशो तौ अम्मोन, दाऊद आ मीश येजेल डा अहीनोआम के बाक्मा बाक्त। नोले डा तौ दानीएल, दाऊद आ मीश कारमेल डा अबीगेल के बाक्मा बाक्त। 2 नोले डा तौ अब्खालोम, दाऊद आ मीश गेशुर डा पिप तल्मै आ तमी माकाह के बाक्मा बाक्त। नोले डा तौ अदोनीयाह, दाऊद आ मीश हग्गीथ के बाक्मा बाक्त। 3 नोले डा तौ शेफत्याह, दाऊद आ मीश अबीतल के बाक्मा बाक्त। नोले डा तौ इध्रेआम, दाऊद आ मीश एग्लाह के बाक्मा बाक्त। 4 मेको नेल्ल हेब्रोन सहरम थिशो दाऊद आ तौ बाक्मा बाक्त। दाऊदमी हेब्रोन सहरम ७ बर्स ६ महिना सासन पवा बाक्त। मिनु यरूसलेमम ३३ बर्स सासन पवा बाक्त। 5 यरूसलेम सहरम थिशो दाऊद आ तौ सु सु बाक्मा बाक्त देशा हना, शिमेआ, शोबाब, नाथान नु सोलोमन बाक्मा बाक्त। मेको ४ जना अम्मीएल आ तमी बाथ-शुआम थिवा बाक्त। *इतिहास १४:५-७; २सामुएल ५:१४-१६* 6 अरु यरूसलेम सहरम दाऊद आ थिशो तौ इभार, एली-शामा, एली-फेलेत, 7 नोगाह, नेफेग, याफीया, 8 एली-शामा, एली-आदानु नु एली-फेलेत ९ जना तौ बाक्मा बाक्त। 9 अरु चाक्शो मीश आन तौपुकी प्रोइशा, मेको दाऊद आ तौ बाक्मा बाक्त। मिनु मेको आन समी तामार बाक्मा बाक्त। *२सामुएल १३:१*

### सोलोमन आ तौ चच युइ

10 सोलोमन आ तौ चच युइ सु सु बाक्मा बाक्त देशा हना, रेहोबाम आ तौ बाक्मा बाक्त। रेहोबाम आ तौ अबीयाह बाक्मा बाक्त। अबीयाह आ तौ आसा बाक्मा बाक्त। आसा आ तौ येहो-शाफात बाक्मा बाक्त। *मत्ती १:७-१२* 11 येहो-शाफात आ तौ योराम बाक्मा बाक्त। योराम आ तौ अहाज्याह बाक्मा बाक्त। अहाज्याह आ तौ योआश बाक्मा बाक्त। 12 योआश आ तौ अमस्याह बाक्मा बाक्त। अमस्याह आ तौ अजारयाह बाक्मा बाक्त। अजारयाह आ तौ योथाम बाक्मा बाक्त। 13 योथाम आ तौ आहाज बाक्मा बाक्त। आहाज आ तौ हिज्कीयाह बाक्मा बाक्त। हिज्कीयाह आ तौ मनस्से बाक्मा बाक्त। 14 मनस्से आ तौ आमोन बाक्मा बाक्त। अम्मोन आ तौ योसीयाह बाक्मा बाक्त। 15 योसीयाह आ डोंइती थिशो तौ योहानान बाक्मा बाक्त। योसीयाह आ माइला येहो-याकीम, आ साइला सिदकीयाह नु आ कान्छा शाल्लुम बाक्मा बाक्त। 16 येहो-याकीम आ तौ चच युइ सु सु बाक्मा बाक्त देशा हना, आ तौ येकोन्याह बाक्मा बाक्त। येकोन्याह आ तौ सिदकीयाह बाक्मा बाक्त। *इतिहास ३६:९-१०*

17 मिनु ग्याइश्शा लाइक्वा पुंडसीशो येकोन्याह आ तौ शाल्तीएल बाक्मा बाक्त। 18 अरु ग्याइश्शा लाइक्वा पुंडसीशो माल्कीराम, पेदायाह, शेनास्सार, येकाम्याह, होशामा नु नेदाब्याह बाक्मा बाक्त। 19 पेदायाह आ तौ जेरूब-बाबेल नु शिमेइ बाक्सा बाक्त। जेरूब-बाबेल आ तौ मेशुल्लाम नु हनान्याह बाक्सा बाक्त। मेको आस समी शेलोमीथ बाक्मा बाक्त। *एज्रा ३:२, ८* 20 अर्को हशुबाह, ओहेल, बेरेक्याह, हासादीयाह नु युशब-हेसेद ५ जना तौ बाक्मा बाक्त। 21 हनान्याह आ तौ पेलात्याह नु येशायाह बाक्सा बाक्त। येशायाह आ तौ रेफायाह बाक्मा बाक्त। रेफायाह आ तौ अरनान बाक्मा बाक्त। अरनान आ तौ ओबदिया बाक्मा बाक्त। ओबदिया आ तौ शेकन्याह बाक्मा बाक्त। 22 शेकन्याह आ तौ शेमायाह बाक्मा बाक्त। शेमायाह आ तौ हत्तुश, इगाल, बारयाह, नेआरयाह नु शाफात नेल्ल पा ६ जना तौ बाक्मा बाक्त। 23 नेआरयाह आ तौ एली-ओ-एनाइ, हिज्कीयाह नु अज्रीकाम सां बाक्मा बाक्त। 24 एली-ओ-एनाइ आ तौ होदावीयाह, एल्याशीब, पेलायाह, अक्कुब, योहानान, देलायाह नु अनानी नेल्ल ७ जना बाक्मा बाक्त।

### यहूदा आ तौ चच युइ

4 यहूदा आ तौ पेरेस, हेस्रोन, कारमी, हुर नु शोबाल बाक्मा बाक्त। *इतिहास २:४-५; इतिहास ७:१९, ५०* 2 शोबाल आ तौ रेआयाह,

याहाथ आ आफ बाक्मा बाक्त। याहाथ अहुमै नु लाहाद आस आफ बाक्मा बाक्त। मेको सोराथी आन चच युइ बाक्मा बाक्त। *इतिहास २:५३*

3 एताम आ तौ येजेल, इश्मा नु इदबाश बाक्मा बाक्त। मेको आन समी आ नें हास्सल-एल-पोनी बाक्मा बाक्त। 4 पेनुएल गेदोर आ आफ बाक्मा बाक्त। एजेर हुशाह आ आफ बाक्मा बाक्त। मिनु कालेब आ मीश एफाथाह आ डोंइती थिशो तौ हुर बाक्मा बाक्त। मेको आ तौ चच युइ बेथलेहेम डा मुर बाक्मा बाक्त। *इतिहास २:१९, ५०* 5 तेकोहा आ आफ अशुर के मीश निक्शी बाक्सा बाक्त। मेको का आ नें हेलाह नु अर्को आ नें नाराह बाक्मा बाक्त। 6 नाराहमी अहुज्जाम, हेफेर, तेमेनी नु हाहाशतारी थिवा बाक्त। एको नाराह आ तौ बाक्मा बाक्त। 7 हेलाह आ तौ सेरेथ, इच्चार नु एथान बाक्मा बाक्त। 8 कोस आनुब नु जोबेबा आस आफ बाक्मा बाक्त। मिनु कोस हारुम आ तौ अहारहेल आ चच युइ आन किकी पिपी बाक्मा बाक्त।

9 मिनु याबेस माइश्शो मुर का बाक्मा बाक्त। मेको आ लोकब आन क्येडा शुश मान ताइब बाक्मा बाक्त। मेको आ ममामी मेको कली श्येत पा थितीके मेको आ नें याबेस वोइश्शो बाक्मा बाक्त। 10 मिनु याबेसमी इसाएली आन परमप्रभु कली "आं कली आसीक गेने। आं कली रू तेम्शा गेयीनी। गे गो नु बाक्कीन। आं कली श्येत रे डोन वोइय्यीनी" दे पुना बाक्त। मिनु परमप्रभुमी मेको आ पुंडशो गेवा बाक्त।

11 शुहाह आ लोकब केलुब मेहीर आ आफ बाक्मा बाक्त। मेहीर एशतोन आ आफ बाक्मा बाक्त। 12 एशतोन बेथ-राफा, पासओह नु तेहीन्नाह आन आफ बाक्मा बाक्त। तेहीन्नाह इर-नाहाश आ आफ बाक्मा बाक्त। मेको रेकाह आ मुर बाक्मा बाक्त। 13 केनाज आ तौ ओथनीएल नु सेरायाह बाक्सा बाक्त। ओथनीएल आ तौ हथाथ नु मेओनोथाइ बाक्सा बाक्त। *यहोसु १५:१७; इत्यायाधीस १:१३*

14 मेओनोथाइ ओफ्रा आ आफ बाक्मा बाक्त। सेरायाह योआब आ आफ बाक्मा बाक्त। योआब गे-हाराशीम आ आफ बाक्मा बाक्त। मेको मुरपुकी मार मार सेल्स जोक्ब बाक्तीके मेको आन नें मेकोन बाक्मा बाक्त।

15 यपुन्ने आ तौ कालेब आ तौ इरू, एलाह नु नाआम बाक्मा बाक्त। एलाह आ तौ केनाज बाक्मा बाक्त। *गन्ती १३:६; गन्ती १४:६* 16 येहल्लेल आ तौ जीफ, जीफाह, तिरया नु असारेल बाक्मा बाक्त। 17 एज्राह आ तौ येथेर, मेरेद, एफेर नु यालोन बाक्मा बाक्त। मेरेदमी फाराओ आ तमी बिथीयाह ग्युंभे पवा बाक्त। मेकोमी मिरयाम, शम्माइ नु इश्बा थिवा बाक्त। इश्बा एशतेमोआ आ आफ बाक्मा बाक्त। 18 मेरेद आ यहूदी मीशेमी येरेद, हेबेर नु येकुथीएल थिवा बाक्त। येरेद गेदोर आ आफ बाक्मा बाक्त। हेबेर सोको आ आफ बाक्मा बाक्त। येकुथीएल जानोह आ आफ बाक्मा बाक्त। 19 होदीयाहम नाहाम आ समी ग्युंभे पवा बाक्त। मेको आ तौपुकी गारम डा कैलाह आ थर नु माकाथी एशतेमोआ आ थर डा किकी पिपी बाक्मा बाक्त।

20 शिमोन आ तौ अम्मोन, रिन्नाह, बेन-हानान नु तिलोन बाक्मा बाक्त। इशी आ तौ जोहेथ नु बेन-जोहेथ बाक्सा बाक्त।

### शेलाह आ तौ चच युइ

21 यहूदा आ तौ का शेलाह बाक्मा बाक्त। शेलाह आ तौ एर नु लेकाह सहरम बाक्बपुकी बाक्मा बाक्त। आ तौ लादाह नु मारेशा सहरम बाक्बपुकी बाक्मा बाक्त। बेथ-अश्वेया सहरम बाक्ब रिश्शो सुती श्येले के वा प्रोव्व नु गेय पाइब आ चच युइ बाक्मा बाक्त। *इतिहास २:३* 22 आ तौ योकीम नु कोजेबा सहरम बाक्ब मुर नु आ तौ योआश नु सारब बाक्मा बाक्त। योआश नु सारबमी मोआबी मीश आल ग्युंभे पास्से बाक्त। तन्न लेहेम सहर लेशा जाक्शो बाक्सा बाक्त। (एको लोव्र थम माइत बाक्त।) बेथलेहेम बाक्म कों, लाशुबी-लाहेम सहर बाक्म, मेको मतुंडसीब। 23 मेकोपुकी खप के ग्योव्व सेल्ब बाक्मा बाक्त। मिनु नेताइम नु गेदेराह सहरम बाक्शा, पिप आ गेय पाइब बाक्मा बाक्त।

### सिमियोन आ तौ चच युइ

24 सिमियोन आ तौपुकी नेमुएल, यामीन, यारीब, जेराह नु शावल बाक्मा बाक्त। *उत्पत्ती ४६:१०* 25 शावल आ तौ शाल्लुम बाक्मा बाक्त। शाल्लुम आ

तौ मिब्सां बाक्मावत्। मिब्सां आ तौ मिश्मा बाक्मावत्। 26 मिश्मा आ तौ हाम्मुएल बाक्मावत्। हाम्मुएल आ तौ जाक्कुर बाक्मावत्। जाक्कुर आ तौ शिमेइ बाक्मावत्। 27 शिमेइ के १६ जना तौ नु ६ जना तमी बाक्मा बावत्। तन्न मेको आ लोकब के शुश आल मबाक्मा बावत्। मोपतीके मेको आन खिं डा मुर यहूदा डा मुर खोदेंशो पा शुश मद्दुम्मा बावत्। 28 मेकोपुकी बेयर-शेबा, मोलादा, हासार-शुआल, यहोसु १९:२-८ 29 बिल्हाह, एसेम नु तोलाद, 30 बेथुएल, होरमा नु सिकलाग, 31 बेथ-मारकाबोथ, हासार-सुसीम, बेथ-बीरी नु शा-आराइम सहरमी बाक्बाक्मा बावत्। दाऊदम सासन मपवा सम्म सिमियोन आ थर डा मुर मेको सहरम बाक्शो बाक्मा बावत्। 32 मेकोपुकी अर्को बाक्तीके एताम, ऐन, रिम्मोन, तोकेन नु आशान नेल्ल पा ५ सहर बाक्मा बावत्। 33 मेको सहर आन एर ओंथ डा गाउंपुकीम बाल सहर सम्म आन बाक्तीके बाक्मा बावत्। मिनु मेकोपुकीमी आन नें तौ चच युड आन नें ब्रेक्ना ब्रेक्न बाक्शो बाक्मा बावत्।

34 मेको आन खिं खिं डा ठेयब मुर सु सु बाक्मा बावत् देंशा हना, मेशोबाब, याम्लेक, अमस्याह आ तौ योशाह, 35 योएल, येहू योशीबीयाह आ तौ बाक्मा बावत्। योशीबीयाह सेरायाह आ तौ बाक्मावत्। सेरायाह असीएल आ तौ बाक्मावत्। 36 एली-ओ-एनाइ, याकोबाह, येशोहायाह, आसायाह, अदीएल, येसीमीएल बेनायाह, 37 जीजा शिफी आ तौ बाक्मा बावत्। शिफी अल्लोन आ तौ बाक्मावत्। अल्लोन येदायाह आ तौ बाक्मावत्। येदायाह शिमी आ तौ बाक्मावत्। शिमी शेमायाह आ तौ बाक्मावत्। 38 मोदेंशो आन नें ब्रेक्शो मुर आन खिं खिं डा ठेयब मुर बाक्मा बावत्। मिनु आन खिं डा मुर सोशा बोशा शुश दुम्मा बावत्। 39 मेको आन बस्तु भाव योव्रतीके माल्ला माल्न दिंम नेल्ल आ पूर्व गेदोर सहर सम्म लमा बावत्। 40 मेकेर शुश नु रिम्शो बस्तु भाव योव्रतीके थित्मे बावत्। मेकेर मारेइ रेयके मनेंसीब रिम्शो ठेयब दिंम बाक्मावत्। मेको क्येडा डोंइती हाम आ मुर बाक्शो बाक्मा बावत्। इतिहास १:८-१६ 41 यहूदा डा पिप हिज्कीयाहम सासन पवा ना मेको नें ब्रेक्शो मुरपुकीम गेदोर सहरम बाक्ब हाम नु मेउनीम आस मुर आन ताम्बु नु खिं खतम सेल्मे बावत्। मुर आन कली सदमे बावत्। मेकेर रिम्शो बस्तु भाव योव्रतीके बाक्शा, मेक उड आंमान बाक्शो बाक्मा बावत्। २२राजा १८:३ 42 मिनु मेको सिमियोन आ थर डा ५ सहे खोइ मुरुमी सेइर पहाड कली लडाइ तोमे बावत्। मेको आन ठेयब मुर इशी आ तौ पेलात्याह, नेआरयाह, रेफायाह नु उज्जीएल बाक्मा बावत्। 43 मेकोपुकीम प्रोक्शा लीशो अमालेकी नेल्ल आन कली साइश्शो बाक्मा बावत्। मिनु सिमियोन आ थर डा मुर मुल सम्म मेक उड बाक्शो बाक्नीम। १सामुएल १५:३-८

रूबेन आ तौ चच युड

5 इस्राएल आ तौ आन दाते डा नेल्ल क्येडा डोंइती थिशो रूबेन बाक्मावत्। नेल्ल क्येडा डोंइती थिशो बावत् हना यो, आ आफ आ मीश नु इप्तीके, आ डोंइती थिशो तौ आ तचा डा अधिकार इस्राएल आ तौ योसेफ आ तौ आस कली गेशो बाक्मावत्। मिनु रूबेन आ नें, डोंइती डा तौ आ नें ब्रेक्तीकेम मब्रेक्शो बाक्मावत्। उत्पत्ती ३५:२२; उत्पत्ती ४९:३-४ 2 मिनु यहूदा आ लोकब आन दातेमी नेल्ल क्येडा ठेयब दुम्त हना यो, मेको रे पा सासन पाइब का गूत हना यो, डोंइती थिशो तौ आ अधिकार योसेफ केन दुम्शो बाक्मावत्। उत्पत्ती ४९:८, १०; ब्यवस्था ३३:७; उत्पत्ती ४९:२२; ब्यवस्था ३३:१३-१७ 3 इस्राएल आ डोंइती थिशो तौ रूबेन बावत्। रूबेन आ तौ हनोक, पल्लु, हेस्रोन नु कारमी बाक्मा बावत्। प्रस्थान ६:१४ 4 योएल आ तौ शेमायाह बाक्मावत्। शेमायाह आ तौ गोग बाक्मावत्। गोग आ तौ शिमेइ बाक्मावत्। 5 शिमेइ आ तौ मीकाह बाक्मावत्। मीकाह आ तौ रेआयाह बाक्मावत्। रेआयाह आ तौ बाल बाक्मावत्। 6 बाल आ तौ बेयराह बाक्मावत्। मिनु मेको अस्सुर डा पिप तिल्याथ-पिलेसेरमी ग्याइश्शा लाइक्वा पुंइसे बावत्। मेको रूबेन आ मुर आन दाते डा ठेयब मुर का बाक्मावत्। इतिहास ५:२६ 7 रूबेन आ थर डा खिं खिं डा मुर आन नें ब्रेक्तीकेमी ब्रेक्शो बाक्मा बावत्। मेको आन ठेयब मुर यिएल, जकरिया नु 8 आजाज आ तौ बेला बाक्मा बावत्। बेला आ तौ शेमा बाक्मावत्। मेको योएल आ खिं डा मुर बाक्मा बावत्। मेकोपुकी आरोएर सहरम बाक्शो बाक्मा बावत्। आन

रागी नेबो रे बाल-मेओन सम्म बाक्मावत्। 9 मेकोपुकीम पूर्व गे गोरशो रागी आ डोंइती युफ्रेटीस खोला आ ओंथ हांबु सम्म आन के सेल्शो बाक्मा बावत्। मारदे हना गिलादम बाक्मानु, आन बस्तु भाव शुश दुम्शो बाक्मा बावत्। 10 मेकोपुकी सावल आ पालाम हाग्री नु लडाइ पा ग्राशो बाक्मा बावत्। मिनु मेकोपुकीम गिलाद आ पूर्व नेल्लेमी आन ताम्बुमी बाक्शो बाक्मा बावत्।

गाद आ तौ चच युड

11 गाद आ मुरपुकी रूबेन आ मुर आन नेक्था बाशान रागीम साल्का सम्म बाक्शो बाक्मा बावत्। 12 मेको आन ठेयब मुर योएल बाक्मावत्। मेको आ नोले डा शाफाम बाक्मावत्। मेको आस नोले बाशान रागीम यानाइ नु शाफात बाक्सा बावत्। 13 मिनु आन मुर, आन खिं खिं डा मुर सु सु बाक्मा बावत् देंशा हना, मिकाएल, मेशुल्लाम, शेबा, योराइ, याकान, जिआ नु एबेर नेल्ल पा ७ जना बाक्मा बावत्। 14 मेकोपुकी अबीहेल आ तौ हुरी, हुरी आ तौ यारोआह, यारोआह आ तौ गिलाद, गिलाद आ तौ मिकाएल, मिकाएल आ तौ येशीशाइ, येशीशाइ आ तौ याहदो, याहदो आ तौ बूज, 15 अब्दीएल आ तौ आही, आही आ तौ गुनी मेको आ खिं खिं डा आन ठेयब मुर बाक्मा बावत्। 16 गाद आ मुरपुकी गिलाद, बाशान नु मेको आ नेक्था डा सहर नेल्लेमी नु शारोन डा बस्तु भाव योव्रतीके सम्म बाक्मा बावत्। 17 यहूदा डा पिप योथाम नु इस्राएल डा पिप येरोबामम सासन पास्से ना मेको आन नें नेल्ल नें ब्रेक्तीकेम ब्रेक्शो बाक्मा बावत्। २२राजा १५:३२; २२राजा १४:२३

18 रूबेन, गाद नु मनस्से आ उडक्थ थर डा मुर बोल्यो लडाइ पाइब बाक्मा बावत्। मेको तेक्तीक नु या कुरमे बावत्। मेको लिब्रा आण्व नु लडाइ पाइब जोक्ब बाक्मा बावत्। मेको ४४ हजार ७ सहे ६० जना बाक्मा बावत्। लडाइ पचा कली ठीक दुम्शो बाक्मा बावत्। 19 मिनु हाग्री, येतुरी, नाफीशी नु नोदाब आ मुर नु लडाइ पामे बावत्। 20 मेकोपुकीमी लडाइम परमप्रभु कली "वारच पाइक्की" दे पुंइतीके, मेको आन जोरी सनु हाग्री नु अरु सु बाक्तेक्म हना यो, आन गुइमी गेवा बावत्। मारदे हना मेकोपुकीमी थमा सुदमे बावत्। 21 मेकोपुकीमी बस्तु भाव गिश लदमे बावत् देंशा हना, ५० हजार दलओंठ, लाख निक्शी ५० हजार भेडा, हजार निक्शी गधा नु लाख का मुर आन कली ग्याइश्शा लदमे बावत्। 22 मेको लडाइम शुश मुर बेक्मा बावत्। मारदे हना मेको लडाइ परमप्रभु रे पा दुम्शो बाक्मावत्। मिनु मेकोपुकी ग्याइश्शा लाइक्वा मपुंइसामा सम्म मेको आन बाक्तीकेम बाक्मा बावत्।

मनस्से आ उडक्थ तौ चच युड

23 मनस्से आ उडक्थ थर डा मुर शुश दुम्शो बाक्मा बावत्। मेको बाशान रागी रे बाल-हेरमोन, सेनीर हेरमोन डांडा सम्म बाक्शो बाक्मा बावत्। ब्यवस्था ३:८-९ 24 मेको आन खिं खिं डा मुर आन ठेयब मुर सु सु बाक्मा बावत् देंशा हना, एफेर, इशी, एलीएल, अज्जीएल, येरमीया, होदावीयाह नु याहदीएल बाक्मा बावत्। मेको नेल्ल बोल्यो लडाइ पाइब मुर बाक्मा बावत्। मेको आन खिं डा ठेयब मुर बाक्मा बावत्। 25 तन्न मेकोपुकीम आन किकी पिपी आन परमप्रभु आ पबर्म मरिम्शो पामे बावत्। मिनु परमप्रभुम मेको आन डोंइती खतम पोक्शो जात डा मुर आन देवता आन कली पूजा पा आन नोले खोदमे बावत्। 26 मोपतीके इस्राएली आन परमप्रभुमी अस्सुर डा पिप पुल, तिल्याथ-पिलेसेरमी कली क्युकगा बावत्। मिनु मेकोपुकीम रूबेन, गाद नु मनस्से आ उडक्थ थर डा मुर आन कली ग्याइश्शा लदमे बावत्। मेको आन कली हालाह, हाबोर, हारा नु गोजान खोला सम्म लदमे बावत्। मेको मुल सम्म मेकेर बाक्शो बाक्नीम। २२राजा १५:१९; २२राजा १५:२९

लेवी आ तौ चच युड

6 लेवी आ तौ गेरशोम, कोहाथ नु मेरारी बाक्मा बावत्। 2 कोहाथ आ तौ अग्राम, इच्हार, हेब्रोन नु उज्जीएल बाक्मा बावत्। प्रस्थान ६:२०; गन्ती २६:५९; मीका ६:४; प्रस्थान ६:२३; गन्ती २६:६० 3 अग्राम आ आल हारून, मोसा नु मिरयाम बाक्मा बावत्। हारून आ तौ नादाब,

अबीहु, एलाजर नु इथामार बाक्मा बाक्त। १इतिहास ६:३५-३८<sup>4</sup> एलाजर फिनेहास आ आफ बाक्माबाक्त। फिनेहास अबीशुआ आ आफ बाक्माबाक्त।<sup>5</sup> अबीशुआ बुक्की आ आफ बाक्माबाक्त। बुक्की उज्जी आ आफ बाक्माबाक्त।<sup>6</sup> उज्जी जेराहीयाह आ आफ बाक्माबाक्त। जेराहीयाह मेरायोथ आ आफ बाक्माबाक्त।<sup>7</sup> मेरायोथ अमारयाह आ आफ बाक्माबाक्त। अमारयाह अहीतुब आ आफ बाक्माबाक्त।<sup>8</sup> अहीतुब सादोक आ आफ बाक्माबाक्त। सादोक अहीमाज आ आफ बाक्माबाक्त। २सामुएल ८:१७; २सामुएल १५:२७,३६<sup>9</sup> अहीमाज अजारयाह आ आफ बाक्माबाक्त। अजारयाह योहानान आ आफ बाक्माबाक्त।<sup>10</sup> योहानान अजारयाह आ आफ बाक्माबाक्त। मेको अजारयाहम सोलोमनमी यरूसलेमम सेल्शो परमप्रभु यावे आ खिंम चढेतीक गेय पाइबाक्माबाक्त।<sup>11</sup> अजारयाह अमारयाह आ आफ बाक्माबाक्त। अमारयाह अहीतुब आ आफ बाक्माबाक्त।<sup>12</sup> अहीतुब सादोक आ आफ बाक्माबाक्त। सादोक शाल्लुम आ आफ बाक्माबाक्त।<sup>13</sup> शाल्लुम हिल्कीयाह आ आफ बाक्माबाक्त। हिल्कीयाह अजारयाह आ आफ बाक्माबाक्त।<sup>14</sup> अजारयाह सेरायाह आ आफ बाक्माबाक्त। सेरायाह यहो-सादाक आ आफ बाक्माबाक्त। २राजा २५:१८; एज्रा ७:१; नहेम्याह १२:२६<sup>15</sup> मेना परमप्रभु यावेमी यहूदा नु यरूसलेम कली नेबुकदनेसर आ गुडम गेशो बाक्माबाक्त। मिनु यहो-सादाक यो ग्याइश्शा लाइक्चा पुंइसीशो बाक्माबाक्त। २राजा २५:२१

### लेवी आ खिं खिं डा मुर

16 लेवी आ तौ गेरशोम, कोहाथ नु मेरारी बाक्मा बाक्त। प्रस्थान ६:१६-१९<sup>17</sup> गेरशोम आ तौ आस नें लिब्नी नु शिमेइ बाक्सा बाक्त।<sup>18</sup> कोहाथ आ तौ अम्राम, इच्चार, हेब्रोन नु उज्जीएल बाक्मा बाक्त।<sup>19</sup> मेरारी आ तौ माहली नु मुशी बाक्सा बाक्त। चढेब लेवी आ खिं खिं डा मुर मेको बाक्मा बाक्त।

20 गेरशोम आ तौ चच युइ सु सु बाक्मा बाक्त दंशा हना, लिब्नी, लिब्नी आ तौ याहाथ, याहाथ आ तौ जिम्माह,<sup>21</sup> जिम्माह आ तौ योआह, योआह आ तौ इददो, इददो आ तौ जेराह नु जेरह आ तौ येआथेराइ बाक्मा बाक्त।<sup>22</sup> कोहाथ आ तौ चच युइ सु सु बाक्मा बाक्त दंशा हना, अम्मीनादाब, अम्मीनादाब आ तौ कोराह, कोराह आ तौ अस्सीर, १इतिहास ९:१९; प्रस्थान ६:२४<sup>23</sup> अस्सीर आ तौ एल्काना, एल्काना आ तौ एब्यासाफ, एब्यासाफ आ तौ अस्सीर,<sup>24</sup> अस्सीर आ तौ तहाथ, नाहाथ आ तौ उरीएल, उरीएल आ तौ उज्जीयाह, उज्जीयाह आ तौ शावल बाक्मा बाक्त।<sup>25</sup> एल्काना आ तौ सु बाक्सा बाक्त दंशा हना, अमासै नु अहीमोथ बाक्सा बाक्त।<sup>26</sup> अहीमोथ आ तौ एल्काना, एल्काना आ तौ जोफाइ, जोफाइ आ तौ नाहाथ,<sup>27</sup> नाहाथ आ तौ एलीआब, एलीआब आ तौ येरोहाम, येरोहाम आ तौ एल्काना नु एल्काना आ तौ सामुएल बाक्मा बाक्त। १सामुएल १:१<sup>28</sup> सामुएल आ डोंइती थिशो तौ योएल नु कान्छा अबीयाह बाक्सा बाक्त।<sup>29</sup> मेरारी आ तौ सु सु बाक्मा बाक्त दंशा हना, माहली, माहली आ तौ लिब्नी, लिब्नी आ तौ शिमेइ, शिमेइ आ तौ उज्जाह,<sup>30</sup> उज्जाह आ तौ शिमेआ, शिमेआ आ तौ हग्गीयाह नु हग्गीयाह आ तौ आसायाह बाक्मा बाक्त।

### परमप्रभु कली कुम्सो पाइबपुकी

31 दाऊदमी परमप्रभु यावे आ बाक्तीकेम सन्दोस वोदा नोले कुम्सो पाइब आन कली योव्रडा बाक्त। २सामुएल ६:१७<sup>32</sup> सोलोमनम यरूसलेमम परमप्रभु यावे आ खिं मसेला सम्म मेकोपुकीमी गुम्तीक ताम्बु आ डोंइती कुम्सो पना पन बाक्मा बाक्त। आन पालो पालोम कुम्सो पना पन बाक्मा बाक्त।<sup>33</sup> मेको कुम्सो पाइब नु आन तौ सु सु बाक्मा बाक्त दंशा हना, कोहाथ आ खिं डा कुम्सो पाइब हेमान बाक्माबाक्त। हेमान योएल आ तौ बाक्माबाक्त। योएल सामुएल आ तौ बाक्माबाक्त। १इतिहास १५:१७,१९<sup>34</sup> सामुएल एल्काना आ तौ बाक्माबाक्त। एल्काना येरोहाम आ तौ बाक्माबाक्त। येहोराम एलीएल आ तौ बाक्माबाक्त। एलीएल तोआह आ तौ बाक्माबाक्त। तोआह जूफ आ तौ बाक्माबाक्त।<sup>35</sup> जूफ एल्काना आ तौ

बाक्माबाक्त। एल्काना माहाथ आ तौ बाक्माबाक्त। माहाथ अमासै आ तौ बाक्माबाक्त। अमासै एल्काना आ तौ बाक्माबाक्त।<sup>36</sup> एल्काना योएल आ तौ बाक्माबाक्त। योएल अजारयाह आ तौ बाक्माबाक्त। अजारयाह सेफन्याह आ तौ बाक्माबाक्त।<sup>37</sup> सेफन्याह तहाथ आ तौ बाक्माबाक्त। तहाथ अस्सीर आ तौ बाक्माबाक्त। अस्सीर एब्यासाफ आ तौ बाक्माबाक्त। एब्यासाफ कोराह आ तौ बाक्माबाक्त। कोराह इज्हार आ तौ बाक्माबाक्त।<sup>38</sup> इच्चार कोहाथ आ तौ बाक्माबाक्त। कोहाथ लेवी आ तौ बाक्माबाक्त। लेवी इस्राएल आ तौ बाक्माबाक्त।<sup>39</sup> हेमान आ लोकब आसाफ आ ग्युरा गे बाक्शो बाक्माबाक्त। आसाफ बेरेक्याह आ तौ बाक्माबाक्त। बेरेक्याह शिमेआ आ तौ बाक्माबाक्त। १इतिहास १५:१७,१९<sup>40</sup> शिमेआ मिकाएल आ तौ बाक्माबाक्त। मिकाएल बासैयाह आ तौ बाक्माबाक्त। बासैयाह माल्कीयाह आ तौ बाक्माबाक्त।<sup>41</sup> माल्कीयाह एथनी आ तौ बाक्माबाक्त। एथनी जेराह आ तौ बाक्माबाक्त। जेरह अदायाह आ तौ बाक्माबाक्त।<sup>42</sup> अदायाह एथान आ तौ बाक्माबाक्त। एथान जिम्माह आ तौ बाक्माबाक्त। जिम्माह शिमेइ आ तौ बाक्माबाक्त।<sup>43</sup> शिमेइ याहाथ आ तौ बाक्माबाक्त। याहात गेरशोम आ तौ बाक्माबाक्त। गेरशोम लेवी आ तौ बाक्माबाक्त।

44 हेमान आ लोकब मेरारी आ तौ आ पेरा गे बाक्शो बाक्मा बाक्त। अरु सु सु बाक्मा बाक्त दंशा हना, एथान किशी आ तौ बाक्माबाक्त। किशी अब्दी आ तौ बाक्माबाक्त। अब्दी माल्लुक आ तौ बाक्माबाक्त। १इतिहास १५:१९<sup>45</sup> माल्लुक हशाब्याह आ तौ बाक्माबाक्त। हशाब्याह अमास्याह आ तौ बाक्माबाक्त। अमस्याह हिल्कीयाह आ तौ बाक्माबाक्त।<sup>46</sup> हिल्कीयाह अम्जी आ तौ बाक्माबाक्त। अम्जी बानी आ तौ बाक्माबाक्त। बानी शेमेर आ तौ बाक्माबाक्त।<sup>47</sup> शेमेर माहली आ तौ बाक्माबाक्त। माहली मुशी आ तौ बाक्माबाक्त। मुशी मेरारी आ तौ बाक्माबाक्त। मेरारी लेवी आ तौ बाक्माबाक्त।<sup>48</sup> मेको आन लोकब लेवी आ मुर नेल्ल परमप्रभु आ बाक्तीक ताम्बु डा मार मार पचा कली योव्रशो बाक्मा बाक्त।

### हारून आ चच युइ

49 मिनु हारून नु आ तौपुकीमी ला चढेतीकेम चोशा चढेतीक नु धूप चोशा चढेतीकेम चढेमे बाक्त। मेकोम नेल्ल क्येडा चोव्रखो कोठा डा गेय यो पामे बाक्त। इस्राएली आन पर्बम पाप क्याम्तीक गेय पामे बाक्त। परमप्रभु आ गेय पाइब मोसामी दोदेशो पा अरेवा मोदेशो पा पामे बाक्त। प्रस्थान २८:१; लेवी १६:-<sup>50</sup> हारून आ तौपुकी सु सु बाक्मा बाक्त दंशा हना, एलाजर, एलाजर आ तौ फिनेहास, फिनेहास आ तौ अबीशुआ, १इतिहास ५:१०-३४<sup>51</sup> अबीशुआ आ तौ बुक्की, बुक्की आ तौ उज्जी, उज्जी आ तौ जेराहीयाह,<sup>52</sup> जेरह आ तौ मेरायोथ, मेरायोथ आ तौ अमारयाह, अमारयाह आ तौ अहीतुब,<sup>53</sup> अहीतुब आ तौ सादोक, सादोक आ तौ अहीमाज बाक्मा बाक्त।

### लेवी आन सहरपुकी

यहोसु २१:-

54 हारून आ तौ कोहाथ आ खिं खिं डा मुर नेल्ल आन क्येडा डोंइती योव्रशा गेशो बाक्तीके तेको बाक्मा बाक्त दंशा हना,<sup>55</sup> मेको आन कली यहूदा आ थेरशो रू रे हेब्रोन सहर नु आ एर ओंथ डा बस्तु भाव योव्रतीके गेमे बाक्त।<sup>56</sup> तन्न मेको सहर डा रू नु आ एर ओंथ डा गाउंपुकी यपुन्ने आ तौ कालेब कली गेमे बाक्त।<sup>57</sup> हारून आ तौ आन कली प्रोक्शा लशा ब्रोंइशा बाक्तीक सहर हेब्रोन, लिब्ना नु आ एर ओंथ डा बस्तु भाव योव्रतीके, यत्तीर, एश्तेमोआ, नु आ एर ओंथ डा बस्तु भाव योव्रतीके,<sup>58</sup> हीलेन नु आ एर ओंथ डा बस्तु भाव योव्रतीके, देबीर नु आ एर ओंथ डा बस्तु भाव योव्रतीके,<sup>59</sup> आशान नु आ एर ओंथ डा बस्तु भाव योव्रतीके, बेथ-शेमेश नु आ एर ओंथ डा बस्तु भाव योव्रतीके नेल्ल गेमे बाक्त।<sup>60</sup> मिनु बेन्यामीन आ थर डा मुर आन थेरशो रू रे मार गेमे बाक्त दंशा हना, गेबा नु आ एर ओंथ डा बस्तु भाव योव्रतीके, आलेमेथ नु आ एर ओंथ डा बस्तु भाव योव्रतीके, अनाथोथ नु आ एर ओंथ डा बस्तु भाव योव्रतीके गेमे बाक्त। मिनु कोहाथ

आ खिं खिं डा मुर आन कली योक्सीशो सहर नेल्ल १३ ओटा बाक्मा बाक्त।

61 मिनु कोहाथ आ लीशो मुर आन कली मनस्से आ आधा थर डा मुर आन रे बाजी आप्शा १० ओटा सहर गेमे बाक्त। 62 गेरशोम आ खिं खिं डा मुर आन कली बाजी आप्शा इस्साकार आ थर, आशेर आ थर, नाप्ताली आ थर नु बाशान रागीम बाक्ब मनस्से आ आधा थर डा मुर आन थेरशो रू रे १३ ओटा सहर गेमे बाक्त। 63 मेरारी आ खिं खिं डा मुर आन कली बाजी आप्शा रूबेन आ थर, गाद आ थर नु जबूलून आ थर आन थेरशो रू रे १२ ओटा सहर गेमे बाक्त। 64 मोपा इस्राएलीपुकीमी लेवी आन कली सहर नु आन एर ओंथ डा बस्तु भाव योव्रतीके गेमे बाक्त। 65 मेकोपुकीमी यो बाजी आप्शा, यहूदा आ थर, सिमियोन आ थर नु बेन्यामीन आ थर आन थेरशो रू रे मेको नें ब्रेक्शो सहरपुकी गेमे बाक्त।

66 कोहाथ आ तौ आन खिं डा का निक्शी मुर एफ्राइम आ थर डा मुर आन थेरशो रू रे सहरपुकी तामे बाक्त। 67 मेकोपुकीमी मेको आन कली पहाड रागी डा शेकेम सहर नु आ एर ओंथ डा बस्तु भाव योव्रतीके एफ्राइम पहड नु गेजेर सहर नु आ बस्तु भाव योव्रतीके, 68 योकमाम सहर नु आ एर ओंथ डा बस्तु भाव योव्रतीके, बेथ-होरोन सहर नु आ एर ओंथ डा बस्तु भाव योव्रतीके, 69 आइयालोन सहर नु आ एर ओंथ डा बस्तु भाव योव्रतीके, गाथ-रिम्मोन सहर नु आ एर ओंथ डा बस्तु भाव योव्रतीके तामे बाक्त। 70 मनस्से आ उडक्थ थर डा मुर आन थेरशो रू रे आनेर सहर नु आ एर ओंथ डा बस्तु भाव योव्रतीके, बिलाम सहर नु आ एर ओंथ डा बस्तु भाव योव्रतीके मेको नेल्ल कोहाथ आ लीशो मुरपुकीमी तामे बाक्त।

71 मनस्से आ उडक्थ थर डा मुर आन थेरशो रू रे गेरशोम आ मुर आन कली मार गेमे बाक्त दैशा हना, बाशानम बाक्ब गोलान सहर नु आ एर ओंथ डा बस्तु भाव योव्रतीके, अशतारोथ सहर नु आ एर ओंथ डा बस्तु भाव योव्रतीके गेमे बाक्त। 72 मिनु इस्साकार आ थर डा मुर आन थेरशो रू रे केदेश सहर नु आ एर ओंथ डा बस्तु भाव योव्रतीके, दाबेराथ सहर नु आ एर ओंथ डा बस्तु भाव योव्रतीके, 73 रामोथ सहर नु आ एर ओंथ डा बस्तु भाव योव्रतीके नु आनेम सहर नु आ एर ओंथ डा बस्तु भाव योव्रतीके गेमे बाक्त। 74 आशेर आ थर डा मुरपुकीमी आन थेरशो रू रे माशाल सहर नु आ एर ओंथ डा बस्तु भाव योव्रतीके नु अब्दीन सहर नु आ एर ओंथ डा बस्तु भाव योव्रतीके, 75 हुकोक सहर नु आ एर ओंथ डा बस्तु भाव योव्रतीके, रेहोब सहर नु आ एर ओंथ डा बस्तु भाव योव्रतीके गेमे बाक्त। 76 नाप्ताली आ थर डा मुर आन थेरशो रू रे गालील डा केदेश सहर नु आ एर ओंथ डा बस्तु भाव योव्रतीके, हम्मोन सहर नु आ एर ओंथ डा बस्तु भाव योव्रतीके नु किरयथ-थाइम सहर नु आ एर ओंथ डा बस्तु भाव योव्रतीके गेमे बाक्त। 77 जबूलून आ थर डा मुरपुकीमी आन थेरशो रू रे मेरारी आ लीशो मुर आन कली रिम्मोनो सहर नु आ एर ओंथ डा बस्तु भाव योव्रतीके, ताबोर सहर नु आ एर ओंथ डा बस्तु भाव योव्रतीके गेमे बाक्त। 78 रूबेन आ थर डा मुरपुकीमी आन थेरशो रू रे यर्दन आ आइक्वी हांबु यरीको आ पूर्व गे गोरशो रागीम बाक्बो बेसेर सहर नु एर ओंथ डा बस्तु भाव योव्रतीके, याहसाह सहर नु आ एर ओंथ डा बस्तु भाव योव्रतीके, 79 केदेमोथ सहर नु आ एर ओंथ डा बस्तु भाव योव्रतीके नु मेफा-आथ सहर नु आ एर ओंथ डा बस्तु भाव योव्रतीके गेमे बाक्त। 80 मिनु गाद आ थर डा मुरपुकीमी आन थेरशो रू रे गिलाद डा रामोथ नु सहर नु आ एर ओंथ डा बस्तु भाव योव्रतीके, महा-नाइम सहर आ एर ओंथ डा बस्तु भाव योव्रतीके, 81 हेश्वोन सहर नु आ एर ओंथ डा बस्तु भाव योव्रतीके नु याजेर सहर नु आ एर ओंथ डा बस्तु भाव योव्रतीके गेमे बाक्त।

इस्साकार आ तौ चच युड

7 इस्साकार आ तौ तोला, पुआ, याशुब नु शिप्रोन ४ जना बाक्मा बाक्त। उत्पत्ती ४६:१३; गन्ती २६:२३-२४<sup>२</sup> तोला आ तौ उज्जी, रेफायाह, येरीएल, याहमाइ, इब्साम नु शेमुएल बाक्मा बाक्त। मेको नेल्ले आन खिं खिं डा ठेयब मुर बाक्मा बाक्त। दाऊदम सासन पवा ना तोला आ खिं खिं डा मुर २२ हजार ६ सहे बोल्यो लडाइ पाइब बाक्मा बाक्त।<sup>३</sup> उज्जी

आ तौ इज्जायाह बाक्मा बाक्त। इज्जायाह आ तौ मिकाएल, ओबदिया, योएल नु इस्शीयाह बाक्मा बाक्त। मेको ५ जना नेल्ल ठेयब मुर बाक्मा बाक्त।<sup>४</sup> मेको प्रोइशा यो अरु मुर आन पाला पाला डा खिं खिं डा मुर आन कली हिक्शोन ३६ हजार लडाइ पाइब मुर बाक्मा बाक्त। मारदे हना मेको आन के शुश मीश नु तौ बाक्मा बाक्त।<sup>५</sup> मेको आन खिं खिं डा मुर नेल्ल इस्साकार आ थर डा मुर बाक्मा बाक्त। मेको नेल्ल ८७ हजार बोल्यो लडाइ पाइब बाक्मा बाक्त।

बेन्यामीन आ तौ चच युड

6 बेन्यामीन आ तौ बेला, बेकेर नु येदीएल सां बाक्मा बाक्त। इतिहास ८:१-२; उत्पत्ती ४६:२१<sup>७</sup> बेला आ तौ एस्बोन, उज्जी, उज्जीएल, येरीमोथ नु इरी ५ जना आन खिं खिं डा ठेयब मुर बाक्मा बाक्त। आन नें ब्रेक्शो २२ हजार ३४ जना बोल्यो लडाइ पाइब बाक्मा बाक्त।<sup>८</sup> बेकेर आ तौ जेमीरा, योआश, एलीएजर, एली-ओ-एनाइ, ओम्री, येरेमोथ, अबीयाह, अनाथोथ नु आलेमेथ बाक्मा बाक्त। मेको नेल्ल बेकेर आ तौ बाक्मा बाक्त।<sup>९</sup> मेको आन नें पाला पालामी ब्रेक्शो बाक्मा बाक्त। आन खिं खिं डा मुर आन ठेयब मुर बाक्मा बाक्त। मिनु आन दाते डा २० हजार सहे निक्शी बोल्यो लडाइ पाइब बाक्मा बाक्त।<sup>१०</sup> येदीएल आ तौ बिल्हान बाक्मा बाक्त। बिल्हान आ तौ येऊश बेन्यामीन, एहूद, केनानाह, जेथान, टारशीश नु अहीशाहार बाक्मा बाक्त।<sup>११</sup> मेको नेल्ल येदीएल आ तौ नु मेको आन खिं खिं डा ठेयब मुर बाक्मा बाक्त। मेको १७ हजार सहे निक्शी बोल्यो लडाइ पाइब बाक्मा बाक्त। मेको लडाइ पचा कली ठीक दुश्शो बाक्मा बाक्त।<sup>१२</sup> इर आ तौ शुप्पीम नु हुप्पीम बाक्सा बाक्त। आहेर आ तौ हुशीम बाक्मा बाक्त।

नाप्ताली आ तौ चच युड

13 नाप्ताली आ तौ याहसीएल, गुनी, येसेर नु शाल्लुम बाक्मा बाक्त। मेको बिल्हाह आ चच युड बाक्मा बाक्त। उत्पत्ती ४६:२४

मनस्से आ तौ चच युड

14 मनस्से आ तौ असीएल बाक्मा बाक्त। मेको आ नोले चाक्शो अरामी मीश रे थिशो तौ बाक्मा बाक्त। मेकोमी गिलाद आ आफ माकीर कली यो थिवा बाक्त।<sup>१५</sup> मिनु माकीरमी हुप्पीम नु शुप्पीम आस कली मीश आल का का माल्शा, ग्युंबे पदा बाक्त। माकीर आ समी आ नें माकाह बाक्मा बाक्त। मेको आ माइला तौ आ नें सेलेफेहाद बाक्मा बाक्त। सेलोफेहाद के तमी ला बाक्मा बाक्त। गन्ती २७:१<sup>१६</sup> माकीर आ मीश माकाहमी तौ निक्शी थिवा बाक्त। मेको आस नें पेरेश नु शेरेश वोदा बाक्त। पेरेशम तौ निक्शी थिम्सी बाक्त। आस नें ऊलाम नु रेकेम वोदा बाक्त।<sup>१७</sup> ऊलाम आ तौ बेदान बाक्मा बाक्त। मेको नेल्ले गिलाद आ तौ चच युड बाक्मा बाक्त। गिलाद माकीर आ तौ नु मनस्से आ चच बाक्मा बाक्त।<sup>१८</sup> गिलाद आ समी हम्मोलेकेथमी तौ सां थीमी बाक्त। मेको इशहोद, अबीएजेर नु महालाह बाक्मा बाक्त।<sup>१९</sup> शेमीदा आ तौ अहीयान, शेकेम, लिखी नु अन्याम बाक्मा बाक्त।

एफ्राइम आ तौ चच युड

20 एफ्राइम आ तौ शुथेलाह बाक्मा बाक्त। शुथेलाह आ तौ बेरेद बाक्मा बाक्त। बेरेद आ तौ तहाथ बाक्मा बाक्त। तहाथ आ तौ एलेआदाह बाक्मा बाक्त। एलेआदाह आ तौ तहथ बाक्मा बाक्त। गन्ती २६:३५<sup>२१</sup> तहथ आ तौ जाबाद बाक्मा बाक्त। जाबाद आ तौ शुथेलाह बाक्मा बाक्त। शुथेलाह आ अरु तौ एजेर नु एलेआद बाक्सा बाक्त। मेको निक्शी गाथ डा मुर आन बस्तु भाव रोइक्थ लसानु, गाथ डा मुरपुकीमी मेको आस कली सदमे बाक्त।<sup>२२</sup> मेको आस आफ एफ्राइममी मेको आस पर्वम शुश नाक्त सम्म रोंका पवा बाक्त। आ लोकबपुकी मेको कली लेम्थ जाक्मा बाक्त।<sup>२३</sup> मेको नोले एफ्राइम आ मीश नु बाक्मा बाक्त। मिनु मेकोमी कोव्रज कुरशा तौ का थिवा बाक्त। मेको आ नें बेरीआ वोदा बाक्त। मारदे हना मेना मेको खिं श्येत दुश्शो बाक्मा बाक्त।<sup>२४</sup> एफ्राइम के शोराह माइश्शो तमी का यो बाक्मा बाक्त। मेकोमी आइदी नु आइक्था बेथ-होरोन सहर नु उज्जेन-शोराह सहर सेल्शो बाक्मा बाक्त।



25 एफ्राइम के रेफाह माइशो तौ यो बाक्मावक्त। रेफाह आ तौ रेशेफ बाक्मावक्त। रेशेफ आ तौ तेलाह बाक्मावक्त। तेलाह आ तौ तहन बाक्मावक्त। 26 तहन आ तौ लादान बाक्मावक्त। लादान आ तौ अम्मीहुद बाक्मावक्त। अम्मीहुद आ तौ एली-शामा बाक्मावक्त। गन्ती १:१० 27 एली-शामा आ तौ नून बाक्मावक्त। नून आ तौ यहोसु बाक्मावक्त। गन्ती १३:८, १६ 28 मेको मुर आन थेरशो रू नु आन बाक्तीके बेथेल सहर नु मेको आ एर ओथ डा सहर, पूर्ब गे नारान सहर नु आ एर ओथ डा सहर, पच्छिम गे गेजेर सहर नु आ एर ओथ डा सहर नेल्ले, शेकेम सहर नु आ एर ओथ डा सहर, अय्याह नु आ एर ओथ डा सहर बाक्मा बावक्त। यहोसु १६:१; यहोसु १६:१० 29 मनस्से आ मुर आन सांद बेथ-शेआन नु आ एर ओथ डा सहर, तानाक नु आ एर ओथ डा सहर, मेगीददो नु आ एर ओथ डा सहर नु डोर नु आ एर ओथ डा सहर बाक्मा बावक्त। मेको सहर नेल्लेम इस्राएल आ तौ योसेफ आ चच युड बाक्शो बाक्मा बावक्त। यहोसु १७:११

आशेर आ तौ चच युड

30 आशेर आ तौ इम्नाह, इश्वाह, इश्वी नु बेरीआ बाक्मा बावक्त। मेको आन समी सेराह बाक्मावक्त। 31 बेरीआ आ तौ हेबेर नु माल्कीएल बाक्सा बावक्त। माल्कीएल बिरजाइथ आ आफ बाक्मावक्त। उत्पत्ती ४६:१७ 32 हेबेर याप्लेत, शोमेर, होथाम नु मेको आन समी शुआ आन आफ बाक्मावक्त। 33 याप्लेत आ तौ पासाक, बिम्हाल नु अश्वाथ बाक्मा बावक्त। मेकोपुकी याप्लेत आ तौ बाक्मा बावक्त। 34 शेमेर आ तौ आही, रोहगाह, हूब्बाह नु अराम बाक्मा बावक्त। 35 आन लोकब हेलेम आ तौ सोफाह, इम्ना, शैलेश नु आमाल बाक्मा बावक्त। 36 सोफाह आ तौ सुआह, हारनेफेर, शुआल, बेरी, इम्राह, 37 बेसेर, होद, शाम्मा, शिल्शाह, इथ्रान नु बेयरा बाक्मा बावक्त। 38 येथेर आ तौ यपुन्ने, पिस्पा नु आराह बाक्मा बावक्त। 39 उल्ला आ तौ आराह, हन्नीएल नु रिसीया बाक्मा बावक्त। 40 मेको नेल्ल आशेर आ खिं डा मुर नु मेको आन खिं खिं डा ठेयब मुर, बोल्यो लडाइ पाइब नु योव्रशो जोक्ब तुइक्ब लां कौडब हिकचा पुंडसीशो मुर बाक्मा बावक्त। मेको आन खिं खिं पा हिकशा, नें ब्रेक्तीकेमी नें ब्रेक्शो लडाइ पाइब २६ हजार मुर बाक्मा बावक्त।

बेन्यामीन आ तौ चच युड

8 बेन्यामीन आ डोंइती थिशो तौ बेला, माइला अशबेल, साइला अहाराह, उत्पत्ती ४६:२१ 2 काइला नोहा नु कान्छा रेफा आन आफ बाक्मावक्त। 3 बेला आ तौ अददार, गेरा, अबीहुद, 4 अबीशुआ, नामान, अहोयाह, 5 गेरा, शेफुफान नु हुराम बाक्मा बावक्त। 6 एहूद आ तौ आन खिं खिं डा ठेयब मुर बाक्मा बावक्त। मेको गेबा सहरम बाक्शो बाक्मा बावक्त। ग्याइक्ब मुरपुकीमी मेको आन कली मानाहाथ सहरम बाक्चा गेमी बावक्त। एहूद आ तौ सु सु बाक्मा बावक्त दॅशा हना, 7 नामान, अहीयाह नु गेरा बाक्मा बावक्त। हेग्लाम माइशो गेरा उज्जा नु अहीहुद आस आफ बाक्मावक्त। मेकोपुकी ग्याइशहा लाइक्चा पुंडसीमा बावक्त। 8 मिनु शाहारैममी आ मीश हुशीम नु बारा आस कली प्रोना नोले मोआब रागीम तौपुकी थिवा बावक्त। 9 आ मीश होदेशमी योबाब, सिबीया, मेशा, माल्काम, 10 येऊस, साकीया नु मिरमाह थीमी बावक्त। मेको शाहारैम आ तौ आन खिं खिं डा ठेयब मुर बाक्मा बावक्त। 11 शाहारैम आ मीश हुशीममी यो अहीतुब नु एल्याल थिम्सी बावक्त। 12 एल्याल आ तौ एबेर, मिशाम नु शेमेद बाक्मा बावक्त। मेकोपुकीम ओनो नु लोद सहर नु आस एर ओथ डा सहर सेल्मे बावक्त। 13 मिनु बेरीआ नु शेमा आइयालोन सहरम बाक्ब आन खिं खिं डा मुर आन ठेयब मुर बाक्सा बावक्त। मेको निक्शीमी गाथ सहरम बाक्ब मुर आन कली प्रोक्पदसे बावक्त। 14 मिनु बेरीआ आ तौ अहीयो, शाशाक, येरेमोथ, 15 जेबदीयाह, आराद, एदेर, 16 मिनु बेरीआ तौ मिकाएल, इश्पाह नु योहा बाक्मा बावक्त। 17 एल्याल आ तौ जेबदीयाह, मेशुल्लाम, हिज्की, हेबेर, 18 इश्मेराइ, इज्जीयाह नु योबाब बाक्मा बावक्त। 19 शिमेइ आ तौ याकीम, जिक्री, जब्दी, 20 एली-एनाइ, सिल्लेथाइ, एलीएल, 21 अदायाह, बेरायाह नु शिन्नाथ बाक्मा बावक्त। 22 शाशाक आ तौ इश्पान, एबेर, एलीएल, 23 अब्दोन, जिक्री, हानान, 24 हनान्याह, एलाम, अन्थोथीयाह, 25 इप्दैयाह नु पेनुएल,

बाक्मा बावक्त। 26 येरोहाम आ तौ शाम्शेराइ, शेहारयाह, अथाल्याह, 27 यारेश्याह, एलीया नु जिक्री बाक्मा बावक्त। 28 मेको आन पाला डा खिं खिं डा मुर आन ठेयब मुर बाक्मा बावक्त। मिनु यरूसलेम सहरम बाक्शो बाक्मा बावक्त।

सावल आ खिं डा मुर

29 गिबोन आ आफ यिएल गिबोन सहरम बाक्मावक्त। मेको आ मीश आ नें माकाह बाक्मावक्त। १इतिहास ९:३५-४४ 30 मेको आ डोंइती थिशो तौ अब्दोन बाक्मावक्त। मेको आ नोले डा तौ सुर, कीश, बाल, नादाब, 31 गेदोर, अहीयो, जेकेर नु मीक्लोथ बाक्मा बावक्त। 32 मीक्लोथ शिमेआह आ आफ बाक्मावक्त। मेको नेल्ल यरूसलेम सहरम आन खिं खिं डा मुर आन नेक्था बाक्शो बाक्मा बावक्त।

33 नेर कीश आ आफ बाक्मावक्त। कीश सावल आ आफ बाक्मावक्त। सावल योनाथन, माल्कीशुआ, अबीनादाब नु एश-बाल आन आफ बाक्मावक्त। १सामुएल १४:५१; २सामुएल २:८ 34 योनाथन आ तौ मेरीब-बाल बाक्मावक्त। मेरीब-बाल मीकाह आ आफ बाक्मावक्त। 35 मीकाह आ तौ पिथोन, मेलेक, ताहरेआ नु आहाज बाक्मा बावक्त। 36 आहाज येहो-अदाह आ आफ बाक्मावक्त। येहो-अदाह आलेमेथ, अज्मावेथ नु जिम्नी आन आफ बाक्मावक्त। जिम्नी मोचा आ आफ बाक्मावक्त। 37 मोचा बिनेआ आ आफ बाक्मावक्त। बिनेआ आ तौ रेफा बाक्मावक्त। रेफा आ तौ एलेआसाह बाक्मावक्त। एलेआसाह आ तौ आसेल बाक्मावक्त। 38 आसेल के ६ जना तौ बाक्मा बावक्त। मेको आन नें अज्जीकाम, बोकेरु, इश्माएल, शेआरयाह, ओबदिया नु हानान बाक्मा बावक्त। मेको नेल्ल आसेल आ तौ बाक्मा बावक्त। 39 मेको आ लोकब एशेक आ डोंइती थिशो तौ ऊलाम, माइला येऊश नु कान्छा एली-फेलेत बाक्मा बावक्त। 40 ऊलाम आ तौ रिम्शो पा लिब्रा आण्ड नु बोल्यो लडाइ पाइब बाक्मा बावक्त। मेको आन के शुश आल नु चच बाक्मा बावक्त। मेको नेल्ल सहे का ५० जना बाक्मा बावक्त। मेको नेल्ल बेन्यामीन आ थर डा मुर बाक्मा बावक्त।

बाबेल रे लेशशा, यरूसलेममी बाक्ब मुर

9 मोपा इस्राएली नेल्ल आन खिं खिं डा मुर आन नें ब्रेक्शो बाक्मा बावक्त। मेको आन नें इस्राएल डा पिप आन किताबमी ब्रेक्शो बाक्मा बावक्त। मिनु यहूदा डा मुर आन परमप्रभु आ दॅशो मटितीके बेबीलोनम ग्याइशहा लाइक्चा पुंडसीमा बावक्त। २राजा २४:१५-१६ 2 मिनु नेल्ल क्येडा डोंइती लॅशा आंम थेरशो रू नु आंम आन सहरपुकीम बाक्ब सु सु बाक्मा बावक्त दॅशा हना, इस्राएल डा मुर, चदेब, लेवी नु परमप्रभु यावे आ खिंम गेय पाइबपुकी बाक्मा बावक्त। यहोसु ९:२३, २७; एज्जा ८:२०

3 मिनु यहूदा आ थर डा, बेन्यामीन आ थर डा, एफ्राइम आ थर डा नु मनस्से आ थर डा मुर का निक्शी यरूसलेम सहरम बाक्मा बावक्त। नहेम्याह ११:३-१९ 4 मेको सु सु बाक्मा बावक्त दॅशा हना, उथाइ आ आफ अम्मीहुद, अम्मीहुद आ आफ ओम्री ओम्री आ आफ इम्री, इम्री आ आफ बानी बानी आ आफ पेरेस नु पेरेस आ आफ यहूदा बाक्मा बावक्त। 5 मिनु शिलो डा मुर रे डोंइती थिशो तौ आसायाह नु आ तौपुकी बाक्मा बावक्त। 6 जेराह आ डोंइती डा तौ येहुएल नु आ खिं खिं डा मुर बाक्मा बावक्त। मेको नेल्ल पा ६ सहे ९० जना बाक्मा बावक्त। 7 बेन्यामीन आ थर डा मुर रे सल्लु आ आफ मेशुल्लाम, मेशुल्लाम आ आफ होदावीयाह, होदावीयाह आ आफ हास्सेनुआ, 8 हास्सेनुआ आ आफ इब्नेआ, इब्नेआ आ आफ येरोहाम येरोहाम आ आफ एलाह, आ आफ उज्जी, उज्जी आ आफ मिक्री, मिक्री आ आफ मेशुल्लाम, मेशुल्लाम आ आफ शेफत्याह, शेफत्याह आ आफ रूएल, रूएल आ आफ इब्नीयाह बाक्मा बावक्त। 9 मिनु आन पाला डा खिं खिं डा ९ सहे ५६ जना मुर बाक्मा बावक्त। मेको नेल्ले आन खिं खिं डा ठेयब मुर बाक्मा बावक्त।

10 चदेब आन दाते डा सु सु बाक्मा बावक्त दॅशा हना, येदायाह, येहो-यारीब, याकीन, 11 अजारयाह आ आफ हिल्कीयाह, हिल्कीयाह आ आफ मेशुल्लाम, मेशुल्लाम आ आफ सादोक, सादोक आ आफ मेरायोथ,

मेरायोथ आ आफ अहीतुब बाक्मा बाक्त। अहीतुब परमप्रभु आ खिं डा नेल्ल क्येडा ठेयब मुर बाक्मा बाक्त। १इतिहास ५:३८-३९<sup>12</sup> मिनु अदायाह आ आफ येरोहाम, येरोहाम आ आफ पाशहुर, पशहुर आ आफ माल्कीयाह, माल्कीयाह आ आफ मासाइ, मासाइ आ आफ अदीएल, अदीएल आ आफ याहजेराह, याहजेराह आ आफ मेशुल्लाम, मेशुल्लाम आ आफ मेशील्लेमीथ, मेशील्लेमीथ आ आफ इम्मर बाक्मा बाक्त।<sup>13</sup> मेको आन खिं खिं डा ठेयब मुर बाक्मा बाक्त। मिनु नेल्ले परमप्रभु आ खिं गेय पचा जोक्ब तुइक्ब हजार का ७ सहे ६० जना बाक्मा बाक्त।

<sup>14</sup> मिनु लेवी आ थर डा मुर सु सु बाक्मा बाक्त देंशा हना, शेमायाह आ आफ हाशुब, हाशुब आ आफ अज्रीकाम, अज्रीकाम आ आफ हशाब्याह, हशाब्याह आ आफ मेरारी बाक्मा बाक्त।<sup>15</sup> मिनु बाकबाकार, हेरेश, गालाल नु मत्तन्याह आन आफ मीका, मीका आ आफ जिक्री, आ आफ जिक्री आ आफ आसाफ बाक्मा बाक्त।<sup>16</sup> मिनु ओबदिया आ आफ शेमायाह, शेमायाह आ आफ गालाल, गालाल आ आफ येदुथून, येदुथून आ आफ बेरेक्याह, बेरेक्याह आ आफ आसा नु आसा आ आफ एल्काना बाक्मा बाक्त। मेकोपुकी नेतोफाह डा मुर आन गाउंमी बाक्शो बाक्मा बाक्त। १इतिहास २:५४

<sup>17</sup> लाचो खाल पाइबपुकी शाल्लुम, अक्कुब, ताल्मोन नु अहीमान बाक्मा बाक्त। मिनु आन लोक्ब शाल्लुम आन ठेयब मुर बाक्मा बाक्त।<sup>18</sup> मेको डोंइती पूर्व गे पिप आ लाचो खाल पाइब बाक्मा बाक्त। मिनु अरु लेवीपुकी लेवी आन बाक्तीक डा लाचो खाल पाइब बाक्मा बाक्त।<sup>19</sup> शाल्लुम आ आफ कोरे, कोरे आ आफ एब्यासाफ, एब्यासाफ आ आफ कोराह बाक्मा बाक्त। कोराह आ खिं खिं डा मुर गेय आन ठेयब मुर बाक्तेक्म। मिनु परमप्रभु यावे आ ताम्बु आ ओव्रतीक खाल पाइब आन किकी पिपी खोदेशो पाइब बाक्मा बाक्त। २इतिहास ३४:९<sup>20</sup> मेको क्येडा डोंइती एलाजर आ तौ फिनेहास मेको आन कली कोव्रब ठेयब मुर बाक्मा बाक्त। मिनु परमप्रभु यावे मेको नु बाक्मा बाक्त। गन्ती २५:७-१३<sup>21</sup> जकरिया मेशेलेम्याह आ तौ ग्रुन्तीक ताम्बु डा ओव्रतीक खाल पाइब बाक्मा बाक्त।<sup>22</sup> मेको नेल्ल लाचो खाल पाइब योव्रशो सहे निक्शी १२ जना मुर बाक्मा बाक्त। मेको आन नें आन गाउं गाउंमी ब्रेक्तीकेम ब्रेक्शो बाक्मा बाक्त। दाऊद नु परमप्रभु यावे आ लोव्र पाइब सामुएलम थमा सुइक्चा पुंइसीशो मुर आन कली मेको गेय गेम्से बाक्त। १सामुएल ९:८-११<sup>23</sup> मेको नु आन तौ चच परमप्रभु यावे आ बाक्तीक डा ओव्रतीक खाल पाइब बाक्मा बाक्त। मेको बाक्तीक ताम्बु बाक्मा बाक्त।<sup>24</sup> मेकोपुकी परमप्रभु यावे आ बाक्तीके खाल पाइब पूर्व, पच्छिम, उत्तर नु दक्खिन एर ओंथ गे बाक्मा बाक्त।<sup>25</sup> मेको आन खिं खिं डा मुर आन गाउंम बाक्मा बाक्त। मेकोपुकी ७, ७ नाक्त पा मेको नु बाक्थ जाक्चा माल्मा बाक्त।<sup>26</sup> मिनु मेको लाचो खाल पाइब आन कली कोव्रब ठेयब मुर लेवी आ मुर ४ जना बाक्मा बाक्त। मेकोपुकी परमप्रभु आ खिं डा कोठा नु शोप वोइक्तीक कोठा खाल पाइब बाक्मा बाक्त।<sup>27</sup> मेकोपुकी नाक्दो परमप्रभु आ बाक्तीके आ नेक्था बाक्बाक्मा बाक्त। मारदे हना मेको आन गेय नाक्दो कोव्रतीक बाक्मा बाक्त। मिनु सुनी कुस कुस परमप्रभु आ बाक्तीक रोक्चा माल्बाक्मा बाक्त।

<sup>28</sup> मेको आन दाते डा का निक्शीमी परमप्रभु आ बाक्तीके डा गेय पतीक मार मार खाल पाइब बाक्मा बाक्त। मेकोपुकीमी मार मार आगा लदमेनु नु गुंइदमेनु, हिक्शा वोइक्चा माल्बाक्मा बाक्त।<sup>29</sup> मेको आन दाते डा अरुमी परमप्रभु यावे आ ग्योब नेल्ल, फस, अडगुर शांबु, तेल, धूप नु मस्ला खाल पाइब बाक्मा बाक्त।<sup>30</sup> चढेब आन तौ डा का निक्शीम मस्ला ब्वाइक्तीक गेय पाइबाक्मा बाक्त। प्रस्थान ३०:२३-२५<sup>31</sup> मिनु लेवी आ थर डा कोराह आ खिं डा मुर शाल्लुम आ डोंइती थिशो तौ मत्तीथ्याहमी शोब्ले सेल्लीक गेय पाइब बाक्मा बाक्त।<sup>32</sup> मेको आन खिं खिं डा मुर कोहाथ आ मुर का निक्शीमी नाइक्तीक नाक्ती कोंइतीक शोब्ले ठीक पा वोइक्तीके गेय पाइबाक्मा बाक्त। लेवी २४:५-८

<sup>33</sup> मिनु कुम्सो पाइब नु लेवी आन खिं खिं डा ठेयब मुर परमप्रभु यावे आ खिं डा कोठापुकीम बाक्बाक्मा बाक्त। मिनु अरु गेय पचा ममाल्बाक्मा बाक्त। मारदे हना मेको आन गेय नाक्दो नु नाक्ती बाक्मा बाक्त।<sup>34</sup> मेको

नेल्ल आन पालामी लेवी आ थर डा खिं खिं डा ठेयब मुर बाक्मा बाक्त। मिनु यरूसलेम सहरम बाक्बाक्मा बाक्त।

सावल आ किक नु चच युड  
१इतिहास ८:२८-३८

<sup>35</sup> गिबोन आ आफ यिएल गिबोन सहरम बाक्शो बाक्मा बाक्त। मेको आ मीश आ नें माकाह बाक्मा बाक्त।<sup>36</sup> मेको आ डोंइती थिशो तौ अब्दोन बाक्मा बाक्त। मिनु नोले डा तौ सुर, कीश, बाल, नेर, नादाब,<sup>37</sup> गेदोर, अहीयो, जकरिया नु मीक्लोथ बाक्मा बाक्त।<sup>38</sup> मीक्लोथ शिमे-आम आ आफ बाक्मा बाक्त। मेकोपुकी यो यरूसलेमम आन खिं खिं डा मुर आन नेक्था बाक्बाक्मा बाक्त।<sup>39</sup> नेर कीश आ आफ बाक्मा बाक्त। कीश सावल आ आफ बाक्मा बाक्त। सावल योनाथन, माल्कीशुआ, अबीनादाब नु एश-बाल आन आफ बाक्मा बाक्त।<sup>40</sup> योनाथन आ तौ मेरीब-बाल बाक्मा बाक्त। मिनु मेरीब-बाल मीकाह आ आफ बाक्मा बाक्त।<sup>41</sup> मीकाह आ तौ पिथोन, मेलेक, ताहरेआ नु आहाज बाक्मा बाक्त।<sup>42</sup> आहाज याराह आ आफ बाक्मा बाक्त। मिनु याराह आलेमेथ अज्मावेथ नु जिम्नी आन आफ बाक्मा बाक्त। जिम्नी मोचा आ आफ बाक्मा बाक्त।<sup>43</sup> मिनु मोचा बिनेआ आ आफ बाक्मा बाक्त। बिनेआ आ तौ रेफायाह बाक्मा बाक्त। रेफायाह आ तौ एलेआसाह बाक्मा बाक्त। एलेआसाह आ तौ आसेल बाक्मा बाक्त।<sup>44</sup> आसेल के ६ जना तौ बाक्मा बाक्त। मिनु मेको आन नें अज्रीकाम, बोकेर, इश्माएल, शेआरयाह, ओबदिया नु हानान बाक्मा बाक्त। मेको नेल्ल आसेल आ तौ बाक्मा बाक्त।

सावल नु आ तौपुकी बेक्शो  
१सामुएल ३१:-

**10** पलिस्तीपुकीम इस्राएल नु लडाइ पामे बाक्त। मिनु इस्राएल डा मुर पलिस्ती आन डोंइती रे प्रोक्मा बाक्त। मिनु गिल्बोआ डांडाम साइक्चा पुंइसामा बाक्त।<sup>2</sup> मिनु पलिस्तीपुकीम सावल नु आ तौ आन कली खेदा पामे बाक्त। मिनु सावल आ तौ सांफा योनाथन, अबीनादाब नु माल्कीशुआ सदमे बाक्त।<sup>3</sup> मेको लडाइम सावल कली थम श्येत दुम्मा बाक्त। मारदे हना का निक्शी ब्रा आप्बपुकीम मेको कली आप्मे बाक्त। मिनु सावल मेको रे गार दुम्मा बाक्त।

<sup>4</sup> मोपतीके सावलमी आ या कुरब कली “इ तरवार शोइश्शा साइय्यी। खोइक्तीक चिनु मखोइश्शोपुकीम आं कली ग्याइश्शा मरिम्शो मपाइय्यीमील” दे मदा बाक्त। तन्न आ या कुरब हिंशा, मबिस्से बाक्त। मिनु सावल आ या शोइश्शा, तूसे बाक्त।<sup>5</sup> मिनु मेको या कुरबम सावल कली बेक्शो तशा, आं यो आ या शोइश्शा आंम कली सांडसे बाक्त।<sup>6</sup> मोपा सावल नु आ तौ सांफा आ खिं डा मुर नेल्ल कालेम बेक्मा बाक्त।<sup>7</sup> मिनु बेंसीम बाक्शो इस्राएली नेल्लेमी लडाइ पाइब प्रोक्शो नु सावल नु आ तौ बेक्शो तशा, मेको आन सहर प्रोंइशा प्रोक्मा बाक्त। मिनु पलिस्ती मेकेर जाक्दीश्शा, मेको सहर आन के सेल्मे बाक्त।

<sup>8</sup> मिनु आ दीसा पलिस्तीपुकी बेक्शो मुर आन मार मार गुथ जाक्शा, सावल नु आ तौ आन कली गिल्बोआ डांडाम बेक्शो थिन्मे बाक्त।<sup>9</sup> मिनु मेकोपुकीम मेको आ फेक्तीक फ्रुइश्शा, आ पिया खोइश्शा लाइश्शा, आन रागी डा देवता नु मुर नेल्ल आन कली मेको लोव्र नेंपाइक्चा कली कुरब मुर आन कली सोइक्त्तमे बाक्त।<sup>10</sup> मेकोपुकीम सावल आ या आन देवी देवता आन थानम वोदमे बाक्त। आ पिया दागोन आ थानम क्युक्गमे बाक्त।

<sup>11</sup> मिनु याबेश-गिलाद सहर डा मुरपुकीमी पलिस्तीमी सावल कली मार मार पदमे, मेको नेंशा,<sup>12</sup> बोल्यो लडाइ पाइब नेल्ले बोक्शा, सावल नु आ तौ आन रां ब्रथ लमा बाक्त। मिनु मेकोपुकीम मेको आन रां याबेश सहर चाक्गमे बाक्त। मिनु याबेश डा मुरपुकीमी मेको आन कली यावेश डा ठेयब रवा आ पुंम थिन्मे बाक्त। मिनु ७ नाक्त सम्म माइजा बाक्मा बाक्त।

२सामुएल २:४-५

<sup>13</sup> मोपा सावल आ परमप्रभु यावे प्रोंइतीके आ पर्वम बेक्चा माल्दा बाक्त। मेकोमी परमप्रभु यावे आ शेंशो मटिथु, बेक्शो मुर नु लोव्र पाइब आ लोव्र नेना बाक्त। १सामुएल १५:२३; १सामुएल २८:८<sup>14</sup> मिनु परमप्रभु

यावे आ अर्ती ममाल्थु, मनेना बाक्त। मोपतीके परमप्रभु यावेमी मेको कली सदा बाक्त। मिनु आ राज्य येस्से आ तौ दाऊद कली गेवा बाक्त।

दाऊद इस्राएली आन पिप दुम्शो  
२सामुएल ५:१-१०

11 मिनु मेको नोले इस्राएल डा मुर नेल्ल युम्शा दाऊद आ बाक्तीक हेब्रोन सहरम बुक्मा बाक्त। मिनु मेकोपुकीम “गोपुकी इन मुर नकी। उत्पत्ती २९:१४<sup>2</sup> डोंइती सावल पिप बाक्मेनु, गे इस्राएल डा लडाइ पाइब आन ठेयब कप्तान बाक्तीनी। मिनु परमप्रभु यावे, इन परमप्रभुमी इन कली ‘गे आं मुर, इस्राएली आन गोठला नु आन पिप दुम्नेवे’ दॅशो बाक्त” दॅमा बाक्त।

3 मिनु इस्राएल डा खाल्पा नेल्ल पिप आ बाक्तीक हेब्रोन सहरम जाक्मा बाक्त। मिनु दाऊदमी हेब्रोन सहरमी परमप्रभु यावे आ डोंइती मेकोपुकी नु कबल पवा बाक्त। दाऊद कली तेल लुक्शा इस्राएल डा पिप सेल्मे बाक्त। दोपा परमप्रभु यावेम सामुएल कली दोदॅशो दॅमे, मोदॅशो पामे बाक्त।  
१सामुएल १६:१,३,११,१२

दाऊदम यरूसलेम सहर ग्राशो

4 मिनु दाऊद नु इस्राएल डा लडाइ पाइब नेल्ले यरूसलेम लमा बाक्त। मेको यबुस सहर बाक्मा बाक्त। मेकेर यबुसी बाक्शो बाक्मा बाक्त। 5 मिनु यबुसम बाक्ब मुरपुकीमी दाऊद कली “गे एक गेनायो जाक्ने मचाप्नेवे” दॅमा बाक्त। मो हना यो दाऊदम सियोन डा बोल्यो सहर ग्रामा बाक्त। मेको कली मुल सम्म दाऊद आ सहर दॅनीम।

6 दाऊदमी “सु यबुसी आन कली डोंइती लडाइ तोइबा, मेको नेल्ल क्येडा ठेयब कप्तान दुम्ब” दॅशो बाक्मा बाक्त। मिनु मेकेर डोंइती सेरूयाह आ तौ योआब डोंइसे बाक्त। मोपतीके मेको ठेयब कप्तान दुम्मा बाक्त।

7 मिनु दाऊद मेको बोल्यो सहरम बाक्शो बाक्मा बाक्त। मोपतीके मुरुमी मेको सहर कली दाऊद आ सहर दॅमा बाक्त। 8 मिनु दाऊदमी मेको सहर आ एर ओंथ डा गारो तिक्तीक रे सहर नेल्ल आ एर ओंथ गारो हिरशा सेला बाक्त। मिनु योआबम लीशो ब्रेशो खिं लॅशा सेला बाक्त। 9 मोपा दाऊद शुश बोल्यो दुम्ना दुम्न लमा बाक्त। मारदे हना मुर नेल्ल आन परमप्रभु यावे मेको नु बाक्मा बाक्त।

दाऊद आ बोल्यो लडाइ पाइब  
२सामुएल २३:८-३९

10 मिनु दाऊद आ राज्य बोल्यो सेल्ब नु आ लडाइ पाइब आन ठेयब कप्तान आन परबम ब्रेक्शो लोत्र एको बाक्मा बाक्त। मेकोपुकी नु इस्राएली नेल्लेमी दाऊद कली आन पिप सेल्मे बाक्त। परमप्रभु यावेमी इस्राएली आन परबम दोदॅशो लोत्र पवा, मोदॅशो पामे बाक्त।

11 दाऊद आ बोल्यो लडाइ पाइब सु सु बाक्मा बाक्त दॅशा हना, हाकमोनी आ तौ याशोबाम कप्तान सां आन ठेयब कप्तान बाक्मा बाक्त। मेकोमी आ तूतीकेमी कालेमी सहे सां मुर आन कली सदा बाक्त।

12 मेको आ नोले अहोही डा मुर दोदो आ तौ एलाजर बाक्मा बाक्त। मेको बोल्यो मुर सां आन दाते डा का बाक्मा बाक्त। १इतिहास २७:४<sup>13</sup> मेको दाऊद नु पलिस्ती नु लडाइ पचा कली पास-दम्मीम बाक्शो बाक्मा बाक्त। मेकेर क्योव्रज रू का बाक्मा बाक्त। मिनु मुर नेल्ल पलिस्ती आन डोंइती रे प्रोक्मा बाक्त। 14 तन्न एलाजर नु दाऊद ला रू आ दातेमी राप्शा बाक्सा बाक्त। मिनु मेको निक्शीमी पलिस्ती आन कली ग्राशा क्योव्रज रू कली मारेड दुम्चा मगेम्से बाक्त। मोपा परमप्रभु यावेमी ठेयब पा ग्रापाइश्शा प्रोक्पदा बाक्त।

15 मेको ३० जना कप्तान आन दाते डा सां दाऊद आ बाक्तीके अदुल्लाम डा पुक्खी आ नेक्था बाक्शो सेरथे फुल्लुम लमा बाक्त। मेना पलिस्ती आन लडाइ पाइब रेफाइम डा बेसीम ताम्बु कीशा बाक्शो बाक्मा बाक्त। १सामुएल २२:१<sup>16</sup> दाऊद बोल्यो बाक्तीकेमी बाक्शो बाक्मा बाक्त। मिनु पलिस्ती आन लडाइ पाइब बेथलेहेम सहरम बाक्शो बाक्मा बाक्त। 17 मिनु दाऊदमी थाम्पा तूत दाक्शा “सुडम आं कली बेथलेहेम डा ठेयब लाप्चो आ

डोंइती बाक्शो इनार डा ब्वाक्कु तूचा गेयीमी हना, दुम वा” दॅमा बाक्त।

18 मेना मेको मुर सां पलिस्ती आन दाते रे ग्रीशा लशा बेथलेहेम डा ठेयब लाप्चो आ डोंइती डा इनार डा ब्वाक्कु ताप्शा, दाऊद आ बाक्तीकेम चाक्मामे बाक्त। तन्न दाऊदम मेको तूने मबिस्से बाक्त। मिनु ब्वाक्कु परमप्रभु यावे आ डोंइती मोदा बाक्त। 19 मेकोमी “आं परमप्रभुम आं कली ओदॅशो पचा मगेयील। गो एको मुर आन हुश तूनुडा? मारदे हना एको आन गिंग खतम दुम्चा डा पा लशा ब्वाक्कु चाक्तेक्म” दॅमा बाक्त। मोपतीके मेकोमी मेको ब्वाक्कु मतूडा बाक्त। मेको बोल्यो लडाइ पाइब सां आन पशो गेय मेकोन बाक्मा बाक्त।

20 योआब आ लोकब अबीशै मेको ३० जना आन कप्तान बाक्मा बाक्त। मेकोमी आ तूतीकेमी कालेम सहे सां मुर आन कली लडाइ पा साइक्मी बाक्त। मिनु मोपा मेको सां आन दातेमी हिक्चा पुंडसे बाक्त। 21 मेको ३० जना आन दातेम ठेयब दुम्मा बाक्त। मेको सां आन दातेमी मान तवा बाक्त। मिनु आन कप्तान दुम्मा बाक्त। तन्न मेको डोंइती डा सां आन खोदॅशो पा मान मतवा बाक्त।

22 येहो-यादा आ तौ बेनायाह कब्सेल सहर डा शुश बोल्यो लडाइ पाइब का बाक्मा बाक्त। मेकोमी मोआब डा अरीएल आ तौ निक्शी आस कली सदा बाक्त। फुं यिम नाक्त ढोडोडगाम बाक्ब गुप्स का सदा बाक्त। 23 मेकोमी ५ कुबीत लाइश्शो इजीप्त डा मुर का यो सदा बाक्त। मेको आ तूतीक वा प्रोव्रतीक शी खोमो बाक्मा बाक्त। मेको बेनायाहमी कोक्के का कुरशा, मेको तूतीक इजीप्त डा मुर आ गुड रे रोइश्शा, आंम आ तूतीकेमी सदा बाक्त। कुबीत का ०.५ मिटर बाक्ब। १सामुएल १७:७<sup>24</sup> मेको येहो-यादा आ तौ बेनायाह आ पशो बाक्मा बाक्त। मिनु मोपा बेनायाह मेको मुर सां आन दातेम हिक्से बाक्त। १इतिहास २७:५-६<sup>25</sup> मिनु ३० जना आन क्येडा मेकोमी शुश मान तवा बाक्त। तन्न मेको सां आन दातेम महिक्से बाक्त। दाऊदमी मेको कली आ कली खाल पाइब आन ठेयब मुर सेला बाक्त।

26 मिनु अरु मान तशो लडाइ पाइब सु सु बाक्मा बाक्त दॅशा हना, योआब आ लोकब आसाहेल, बेथलेहेम डा दोदो आ तौ एल्लानान, 27 हारोद सहर डा शाम्मोथ, पेलोन डा मुर हेलेस, १इतिहास २७:१०<sup>28</sup> तेकोहा सहर डा इक्केश आ तौ इरा, अनाथोथ डा अबीएजेर, 29 हुशा डा मुर सिब्बेके, अहोही आ मुर इलाइ, 30 नेतोफाह डा माहाराइ, नेतोफाह डा बानाह आ तौ हेलेद, 31 बेन्यामीन आ थर डा गिबा डा रिबाइ आ तौ इथाइ, पिराथोन डा बेनायाह, 32 गाश डा खोल्सा आ नेक्था बाक्ब हूरै, अरबा आ मुर अबीएल, 33 बाहारुम सहर डा अज्मावेथ, शा-आल्बोन सहर डा एली-अहबा, 34 गिजोन डा मुर हाशेम, हरारी शागे आ तौ योनाथन, 35 हरारी साकार आ तौ अहीयाम, ऊर आ तौ एलीफाल, 36 मेकारा सहर डा मुर हेफेर, पेलोन डा मुर अहीयाह, 37 कारमेल डा हेसो, एज्बाइ आ तौ नाराइ, 38 नाथान आ लोकब योएल, हाग्री आ तौ मिभार, 39 अम्मोनी जेलेक, बेयरोथ सहर डा नहाराइ, मेको नहाराइ डा सेरूयाह आ तौ योआब आ या कुरब बाक्मा बाक्त। 40 इथी आ मुर इरा, इथी आ मुर गारेब, २सामुएल ११:३<sup>41</sup> हिक्ती उरीयाह, अहलै आ तौ जाबाद, 42 रूबेन आ थर डा शीजा आ तौ अदीना मेको रूबेन आ थर डा मुर आन ठेयब मुर का बाक्मा बाक्त। मेको नु आ मुर नु ३० जना बाक्मा बाक्त। 43 माकाह आ तौ हानान, मिथनी आ मुर योशाफात, 44 अशतारोथ सहर डा मुर उज्जीया, आरोएर आ मुर होथाम आ तौ शामा नु यिएल, 45 शिम्नी आ तौ येदीएल नु आ लोकब तिजी आ मुर योहा, 46 महाब आ मुर एलीएल, एल्लाम आ तौ येरीबाइ नु योशावीयाह नु मोआबी इथ्माह, 47 एलीएल, ओबेद नु मेजोबी यासीएल बाक्मा बाक्त।

दाऊद आ लडाइ पाइबपुकी

12 दाऊद सिकलाग सहरम बाक्मेनु, आ बाक्तीक जाक्ब बोल्यो लडाइ पाइब नु लडाइम वारच पाइब बाक्मा बाक्त। मेना दाऊद कीश आ तौ सावल आ डोंइती रे प्रोक्शो बाक्मा बाक्त। १सामुएल २७:६<sup>2</sup> मेकोपुकी लिब्रा कुरब बाक्मा बाक्त। मिनु ग्युरा नु पेरा गुड निम्फामी ब्रा नु हुरद आप्ने चाप्ब बाक्मा बाक्त। मेकोपुकी बेन्यामीन आ थर डा सावल आ खिं खिं डा मुर बाक्मा बाक्त।

3 मिनू सु सु बाक्का बाक्त देंशा हना, मेको आन दाते डा ठेयब मुर अही-एजेर नु योआश निम्फा गिबा डा शेमाह आ तौ बाक्सा बाक्त। मिनू अरु अज्मावेथ आ तौ येजीएल नु पेलेत बाक्सा बाक्त। बेराकाह नु अनाथोथ डा येहू बाक्सा बाक्त। 4 गिबोन डा इश्मायाह मेको ३० जना आन दाते डा बोल्यो लडाइ पाइब नु मेको आन ठेयब मुर बाक्का बाक्त। अरु येरमीया, याहासीएल, योहानान नु गेदेराह सहर डा योजाबाद, 5 एलुजाइ, येरीमोथ, बेअल्याह, शेमारयाह, हारुफ आ मुर शेफत्याह बाक्का बाक्त। 6 कोराह आ खिं डा एल्काना, इस्शीयाह, अजारेल, योएजेर नु याशोबाम बाक्का बाक्त। 7 मिनू गेदोर डा येरोहाम आ तौ योएलाह नु जेबदीयाह बाक्सा बाक्त।

8 मिनू गाद आ थर डा मुर यो गोरशो रागीम दाऊद आ बोल्यो बाक्तीकेम जाक्को बाक्का बाक्त। मेको तेक्तीक नु तूतीक कुरशो जोक्ब तुइक्ब लडाइ पाइब बाक्का बाक्त। मेको आन कुल गुप्स खोदेशो हिंका डा बाक्का बाक्त। रोकशो खोदेशो पा दोरने चाप्ब बाक्का बाक्त। 9 मेको आन ठेयब मुर एजेर बाक्का बाक्त। एजेर आ नोले डा ओबदिया बाक्का बाक्त। ओबदिया आ नोले डा एलीआब बाक्का बाक्त। 10 एलीआब आ नोले डा मिशमन्नाह बाक्का बाक्त। मिशमन्नाह आ नोले डा येरमीया बाक्का बाक्त। 11 येरमीया आ नोले डा अत्ते बाक्का बाक्त। अत्ते आ नोले डा एलीएल बाक्का बाक्त। 12 एलीएल आ नोले डा योहानान बाक्का बाक्त। योहानान आ नोले डा एल्जाबाद बाक्का बाक्त। 13 एल्जाबाद आ नोले डा येरमीया बाक्का बाक्त। येरमीया आ नोले डा माकबन्नाइ बाक्का बाक्त। 14 मेको मुरपुकी गाद आ थर डा लडाइ पाइब आन कप्तान बाक्का बाक्त। मेको आन दाते डा नेल्ल क्येडा आइक्च सहे का नु लडाइ पने चाप्ब नु नेल्ल क्येडा ठेयब हजार का नु लडाइ पने चाप्ब बाक्का बाक्त। 15 मेको नेल्ले डोंइती डा महिनाम यर्दन खोला शोक्सा मा बाक्त। मेना खोला बारशा लशो बाक्का बाक्त। मिनू यर्दन खोला शोक्शा, मेको आ पूर्व नु पच्छिम डा बेसीम बाक्ब मुर नेल्ल आन कली खेदा पा खेरशो बाक्का बाक्त।

16 मिनू बेन्यामीन आ थर नु यहूदा आ थर डा का निक्शी मुर गोरशो रागीम दाऊद आ बोल्यो बाक्तीकेम जाक्का बाक्त। 17 मिनू दाऊद मेको आन कली गुम्थ लशा, मेको आन कली “गे गो नु वारचु दुम्शा, आं कली वारच पाइक्थ जाक्को ननी हना, गो इन कली दाक्नुड। तन्न गेपुकीम आं कली क्यारी पथ नु आं जोरी सत्रु आन कली शेंथ जाक्तीनी हना, इं किकी पिपी आन परमप्रभुम एको तशा, इन कली निसाफ पवल” देंमाक्त। 18 मेना परमप्रभु आ सोक्तीम मेको ३० जना आन दाते डा कप्तान अमासै कली सुमा बाक्त।

मिनू मेकोम “दाऊद, गो इन मुर नकी। येस्से आ तौ दाऊद गो मे नु बाक्नीकी। इन थुं नाइक्सेक्ल। मिनू इन कली वारच पाइब आ थुं नाइक्सेक्ल। इन परमप्रभु इन कली वारच पाइब बाक्ब” देंमाक्त।

मिनू दाऊद म मेको आन कली ब्रावा बाक्त। मिनू मेको आन कली आ हुल डा कप्तान सेल्मी बाक्त।

19 मिनू दाऊद पलिस्ती नु गारशा, सावल नु लडाइ पथ लमाक्त। मेना मनस्से आ थर डा मुर का निक्शी सावल कली प्रॉइशा, दाऊद आ बाक्तीके जाक्का बाक्त। तन्न पलिस्ती नु गारशा लडाइ चहिं मपामे बाक्त। मारदे हना पलिस्ती आन सासन पाइबपुकीमी आंम आंमा सल्ला पा दाऊद कली आ नु लडाइ मपपदमे बाक्त। मेकोपुकीम “मेकोमी आ होत्रप सावल कली वारच पा, गो इं कली प्रॉइब। मिनू मो दुम्मेनु, गो लडाइ ब्रुइनय। गो बेक्नय” देमुमा बाक्त। १सामुएल २९:३-४ 20 मिनू दाऊद सिकलाग सहरम लामेनु, मेको आ बाक्तीक जाक्ब मनस्से आ थर डा मुर आदनाह, योजाबाद, येदीएल, मिकाएल, योजाबाद, एलीहु नु सिल्लेथाइ बाक्का बाक्त। मेकोपुकी मनस्से आ खिं डा हजार का का डा लडाइ पाइब आन कप्तान बाक्का बाक्त। 21 मिनू मेकोपुकीमी दाऊद कली मार मार रोइक्ब आन पर्बम लडाइ पचा कली वारच पाइश्शो बाक्का बाक्त। मारदे हना, मेको नेल्ल लडाइ पाइब नु कप्तान बाक्का बाक्त। 22 थमा पा नाक्त किंत किंत दाऊद आ बाक्तीके अर्को लडाइ पाइब वारच पथ जाक्का बाक्त। नोले परमप्रभु आ फौज खोदेशो शुश दुम्मा बाक्त।

दाऊद कली वारच पाइब मुर

23 दाऊद हेब्रोन सहरम बाक्मेनु, या कुरशा, वारच पाइब लडाइ पाइब शुश जाक्का बाक्त। परमप्रभु यावेम देंशो खोदेशो पा सावल आ राज्य रोइश्शा दाऊद कली गेचा, दे मो पामे बाक्त। 24 मेको सु सु बाक्का बाक्त देंशा हना, यहूदा आ थर डा ६ हजार ८ सहे तेक्तीक नु तूतीक कुरशो लडाइ पाइब बाक्का बाक्त। 25 सिमियोन आ थर डा ७ हजार सहे का बोल्यो लडाइ पाइब बाक्का बाक्त। 26 लेवी आ थर डा ४ हजार ६ सहे मुर बाक्का बाक्त। 27 मेको हारून आ खिं डा ठेयब मुर येहो-यादा नु हजार सां ७ सहे मुर बाक्का बाक्त। 28 मिनू ठिटा लडाइ पाइब सादोक नु मेको आ खिं खिं डा मुर २२ जना कप्तान बाक्का बाक्त। १इतिहास ५:३४; २सामुएल १५:२४ 29 सावल आ खिं डा मुर बेन्यामीन आ थर डा हजार सां मुर बाक्त। तन्न सावल आ खिं डा शुश मुर सावल कली मप्रॉइथु बाक्का बाक्त। 30 एफ्राइम आ थर डा २० हजार ८ सहे बोल्यो लडाइ पाइब नु आन खिं डा ठेयब मुर बाक्का बाक्त। 31 मनस्से आ उइक्थ थर डा १८ हजार मुर बाक्का बाक्त। मेको दाऊद कली पिप सेल्चा कली योव्रशो मुर बाक्का बाक्त। 32 इस्साकार आ थर डा इस्राएल डा मुर तेको लां गाक्पाइक्का माल्बा, मार मार पचा माल्नीम मारेइ मारेइ तुइक्ब सहे निक्शी कप्तान बाक्का बाक्त। मेको आन खिं खिं डा लडाइ पाइब मुर आन कप्तान बाक्का बाक्त। 33 जबूलून आ थर डा ५० हजार लडाइ पस जोक्ब मारेइ मारेइ या कुरब बाक्का बाक्त। मेको आन थुं नेल्लेमी दाऊद कली वारच पाइब बाक्का बाक्त। 34 नाप्ताली आ थर डा हजार का कप्तान नु ३७ हजार तेक्तीक नु तूतीक कुरब लडाइ पाइब मुर बाक्का बाक्त। 35 दान आ थर डा २८ हजार ६ सहे या कुरब लडाइ पाइब बाक्का बाक्त। 36 आशेर आ थर डा ४० हजार लडाइ पचा कली ठीक दुम्शो लडाइ पाइब बाक्का बाक्त। 37 यर्दन खोला आइक्की हांबु, पूर्व डा रूबेन आ थर, गाद आ थर नु मनस्से आ उइक्थ थर डा लाख का २० हजार मारेइ मारेइ या कुरब लडाइ पाइब बाक्का बाक्त।

38 मेको लडाइ पाइब नेल्ले दाऊद कली इस्राएल डा पिप सेल्चा कली दाऊद आ बाक्तीक हेब्रोन सहरमी ठेयब फौज जाक्का बाक्त। मिनू अरु इस्राएली नेल्लेमी यो दाऊद कली पिप सेल्चा, दे मिश्शो बाक्का बाक्त। 39 मिनू मेको नेल्ले मेकेर जना जन, तूना तून नाक्त सां सम्म दाऊद नु बाक्का बाक्त। मारदे हना मेको आन मुरपुकीम मेको आन कली जचा तूचा थोव्रक ठीक पशो बाक्का बाक्त। 40 मिनू आन नेक्था डा मुर, इस्साकार आ थर, जबूलून आ थर नु नाप्ताली आ थर डा मुर डोन रे गधा, दलऑठ, खच्चर नु ब्यफपुकीम जचा थोव्रक चाक्को बाक्का बाक्त। मेकोपुकीम शुश फस, सोत्रपाइश्शो फोव्रशी गेडा, सोत्रपाइश्शो अडगुर, अडगुर शांबु, तेल, बी ब्यफ, भेडा शुश चाक्को बाक्का बाक्त। मारदे हना, इस्राएली नेल्ल येरशो बाक्का बाक्त।

दाऊदम सन्दोस चाक्का माल्शो

२सामुएल ६:१-११

13 दाऊदम मार पचा माल्ताक्व हना यो, आ हजार हजार डा लडाइ पाइब आन कप्तान नु सहे सहे डा लडाइ पाइब आन कप्तान आन कली लोव्र पा सल्ला पाइबाक्का बाक्त। 2 मिनू दाऊदम इस्राएल डा युम्शो मुर नेल्ल आन कली “गेपुकी रिश्शो मिम्नीनी हना, नु परमप्रभु यावे इं परमप्रभु आ दाक्को बाक्त हना, गो इस्राएल रागी नेल्लेमी लीशो इं मुरपुकी ‘मुर नेल्ल जाक्कीन’ दे लोव्र कुरब सोइक्तय। मेको आन दातेमी सहर आ एर ऑथ डा बी ब्यफ योव्रतीकेम बाक्ब चढेब नु लेवीपुकी बाक्नीम। नेल्ल आन कली ‘जाक्कीन’ दे लोव्र कुरब मुर सोइक्तय। 3 गो इं परमप्रभु आ सन्दोस एक चाक्क। मारदे हना सावल बाक्म सम्म, गो मेको कली ममिन्तय” देंमाक्त। 4 मिनू मेको युम्शो मुर नेल्लेमी मेको लोव्र बिस्समा बाक्त। मारदे हना मुर नेल्लेमी मोदेशो पचा दाक्तामे बाक्त।

5 मोपतीके दाऊद इजीप्त डा खोला शीहोर रे लेबो-हमाथ सम्म इस्राएली नेल्ल पुक्की बाक्त। मेको नेल्लेमी परमप्रभु आ सन्दोस किरयथ-यारीम रे चाक्का माल्मे बाक्त। 6 मिनू दाऊद नु इस्राएली नेल्ल बालाह डोइश्शा लमा

बाक्त। बालाह सहर यहूदा डा किरयथ-यारीमम बाक्माक्त। मेकेर रे परमप्रभु, परमप्रभु यावे आ सन्दोस ब्रथ लमा बाक्त। परमप्रभु यावे सन्दोस तारी बाक्शो करूब आस दातेम बाक्शो बाक्माक्त। मेको परमप्रभु, परमप्रभु यावे आ सन्दोस बाक्माक्त। *यहोसु १५:९* 7 मिनु मेकोपुकीम परमप्रभु आ सन्दोस अबीनादाब आ खिं रे गुंइशा नक बग्गी कामी कुर पामे बाक्त। मिनु उज्जाह नु अहीयोमी मेको बग्गी खुल्ना खुल्न लसा बाक्त। 8 मिनु दाऊद नु इस्राएली नेल्ले परमप्रभु आ डोंइती ग्येरशा कुम्सो पना पन आइक्च नु ठेयब तार पाइशो ताप्तीके, खैजडी, बुक्केल नु तुराही ताप्शा, जॉब बोक्शा, सिल पामे बाक्त।

9 मिनु मेकोपुकी किदोन आ चेरब तुप्तीकेम जाक्मानु, ब्यफोमी सन्दोस हिकपदसे बाक्त। मिनु उज्जाहमी सन्दोस तिव्का कली आ गुड दिंदा बाक्त। 10 मिनु परमप्रभु यावे उज्जाह क्येडा गाइशशा, मेको कली सदा बाक्त। मारदे हना मेकोमी सन्दोस ग्याइक्का कली आ गुड दिंदा बाक्त। मोपतीके मेको परमप्रभु आ डोंइती बेक्माक्त। 11 दाऊदमी परमप्रभु यावे उज्जाह आ पबर्म गाइशो तशा, चुरमाक्त। मिनु मेको बाक्तीके आ नें पेरस-उज्जाह वोदा बाक्त। मेको आ नें मुल सम्म मेकोन बाक्ब। 12 मेको नाक्ती दाऊद परमप्रभु क्येडा हिंमाक्त। मेकोमी “मुल ऑ दुम्मेनु, गो परमप्रभु आ सन्दोस दोपा कोव्रशा वोइक्नुडा?” देंमाक्त। 13 मोपतीके दाऊदमे मेको सन्दोस कोव्रशा वोइक्का कली आ सहर मलदा बाक्त। आ कोव्रशा वोइक्का आ पा डा गित्त आ खिं डा ओबेद-एदोम आ खिं लदमे बाक्त। 14 मोपा मेको परमप्रभु आ सन्दोस ओबेद-एदोम आ खिम महिना सां सम्म लीमाक्त। मिनु परमप्रभु यावेमी ओबेद-एदोम आ खिं डा मुर नु आ मारेइ मारेइ कली आसीक गेवा बाक्त।

दाऊद नु आ खिं डा मुरपुकी

२सामुएल ५:११-२५

14 टायर डा पिप हीराममी आ लोव कुरबपुकी दाऊद आ बाक्तीकेम सोइक्ता बाक्त। मेको कुरब मुर नु दाऊद आ खिं सेल्वा कली लेबानोन डा लाइशो रवा आ शी, गारो प्रोवब नु शी के गेय पाइब सोइक्तीमी बाक्त। 2 मिनु दाऊदमी “मुल परमप्रभु यावेम आं कली इस्राएली आन पिप सेल्ली। मिनु आ मुर इस्राएली आन पबर्म आ राज्य ठेयब नु मान ताइब सेल्शो बाक्ब” दे तुइक्ता बाक्त। 3 दाऊदमी यरूसलेमम बाक्मेनु, अर्को मीश चाक्मी बाक्त। मिनु शुश तमी तौ आन आफ दुम्माक्त। 4 यरूसलेमम थिशो आ आल आन नें मार मार बाक्मा बाक्त देंशा हना, शम्मुआ शोबाब, नाथान, सोलोमन, 5 इभार, एली-शुआ नु एली-फेलेत, 6 नोगाह, नेफेग, याफीया, 7 एली-शामा, बेलीआदा नु एली-फेलेत बाक्मा बाक्त।

दाऊद नु पलिस्ती लडाइ पशो

8 मिनु पलिस्तीमी दाऊद इस्राएल नेल्ल डा पिप दुम्त देंशो लोव नेंशा, मेको नेल्ले दाऊद कली माल्थ लमा बाक्त। मिनु दाऊदमे मेको लोव नेंशा पलिस्ती नु लडाइ पथ लमाक्त। 9 मिनु पलिस्ती जाक्शा, रेफाइम डा बेंसीम मार मार रोइक्तमे बाक्त। 10 मोपतीके दाऊदमी परमप्रभु कली “गो लशा, पलिस्ती आन कली लडाइ तोडमी? गे मेको आन कली आं गुडमी गेनीनी?” दे हिल्लो पवा बाक्त। मिनु परमप्रभु यावेमी “इर डोइशशा लावो, गो मेको आन कली इ गुडमी गेनन” देंमाक्त।

11 मोपतीके दाऊद नु आ मुरपुकी इर डोइशशा लशा, बाल-पेराजीमम मेको आन कली लडाइ तोशा ग्रामा बाक्त। मिनु दाऊदमी “परमप्रभुमी खोला आ नेक्था डा रू प्रेशो खोदेंशो पा, आं जोरी सत्रु आन कली साइक्मी बाक्त” देंत। मोपतीके मेको बाक्तीक आ नें बाल-पेराजीम वोदमे बाक्त। 12 मेकेर पलिस्तीपुकीम आन देवी देवता प्रोंइशा वोदमे बाक्त। मिनु दाऊदमी “मेको चोने” दे अरेवा बाक्त। *ब्यवस्था ७:५-२५*

13 मिनु पलिस्तीपुकीम लेंशा बेंसीम मार मार रोइक्का गोव्रमे बाक्त। 14 मिनु दाऊदमी लेंशा परमप्रभु कली हिल्लो पवा बाक्त। मिनु परमप्रभुमे मेको कली “मुल गे इर डोइशशा मलने। गे नोले रे हिरशा, लचा माल्नेवे। शुश

रवा बाक्तीके रे मेको आन नेक्था लशा लडाइ तोव्रमी। 15 गे रवा आन डर डरमी लडाइ पाइब आन गाक्शो नेंनी चोटी मेको आन कली लडाइ तोव्रमी। मारदे हना परमप्रभु इन डोंइती पलिस्ती आन लडाइ पाइब नु लडाइ पथ लाइब” देंमाक्त। 16 मिनु दाऊदमी परमप्रभुमे देंशो खोदेंशो पा लडाइ पवा बाक्त। मिनु मेकोम पलिस्ती आन लडाइ पाइब आन कली गिबोन रे गेजेर सम्म खेदा पा सदमे बाक्त। 17 मोपा दाऊद आ ठेयब दुम्तीके रागी नेल्ल ब्रमाक्त। मिनु परमप्रभु यावेमी रागी रागी डा मुर नेल्ल आन थुंमी दाऊद क्येडा हिंतीक थुं वोदा बाक्त।

दाऊदमी सन्दोस चाक्शो

२सामुएल ६:१२-१६

15 दाऊदमी आ सहरमी आंम कली खिंपुकी सेला बाक्त। मिनु परमप्रभु आ कबल पशो सन्दोस वोइक्का कली बाक्तीक का सेल्शा, ताम्बु का कीडा बाक्त। 2 मिनु नोले दाऊदमे “लेवी आ थर डा मरुमी ला परमप्रभु आ सन्दोस कुरचा माल्नीम” दे हुकुम पवा बाक्त। मारदे हना परमप्रभु यावेमी लेवी आन कली आ सन्दोस कुरचा नु गेना हना यो परमप्रभु आ गेय पचा कली योव्रशो बाक्मा बाक्त।

3 मिनु दाऊदमे परमप्रभु यावे आ कबल पशो सन्दोस आ ठीक पशो बाक्तीकेम चाक्का कली इस्राएली नेल्ल आन कली यरूसलेम सहरम पुक्मी बाक्त। 4 नोले दाऊदमे हारून आ चच युड नु लेवी नेल्ल आन कली खुप्तीमी बाक्त। 5 मेको सु सु बाक्मा बाक्त देंशा हना, कोहाथ आ तौ आन ठेयब मुर उरीएल नु सहे का २० जना आन खिं खिं डा मुर बाक्मा बाक्त। 6 मेरारी आ तौ आन ठेयब मुर आसायाह नु सहे निक्शी २० जना आन खिं खिं डा मुर बाक्मा बाक्त। 7 गेरशोम आ तौ आन ठेयब मुर योएल नु सहे का ३० जना आन खिं खिं डा मुर बाक्मा बाक्त। 8 एली-जाफान आ तौ आन ठेयब मुर शेमायाह नु सहे निक्शी आन खिं खिं डा मुर बाक्मा बाक्त। 9 हेब्रोन आ तौ आन ठेयब मुर एलीएल नु ८० जना आन खिं खिं डा मुर बाक्मा बाक्त। 10 उज्जीएल आ तौ आन ठेयब मुर अम्मीनादाब नु सहे का १२ जना आन खिं खिं डा मुर बाक्मा बाक्त।

11 मिनु दाऊदमी चढ़ेब सादोक नु अबीयाथार नु लेवी उरीएल, आसायाह, योएल, शेमायाह, एलीएल नु अम्मीनादाब आन कली ब्रेत्तीमी बाक्त। *२सामुएल १५:२९* 12 मिनु मेको आन कली “गे लेवी आन खिं डा ठेयब मुर ननी। परमप्रभु यावे, इस्राएली आन परमप्रभु आ सन्दोस आं ठीक पशो बाक्तीके कुइक्का, दे इन कली नु इन खिं खिं डा मुर आन कली ठीक सेलीन। 13 डोंइती गे मेको कली मकुरतीके परमप्रभु यावे, इं परमप्रभु गोपुकी नु गाइक्ताक्व। मारदे हना गो मेको सन्दोस कली ठीक पा मचाक्क” देंमाक्त। *इतिहास १३:९-११* 14 मोपतीके परमप्रभु यावे, इस्राएली आन परमप्रभु आ सन्दोस चाक्का कली चढ़ेब नु लेवी आंम आंम कली ठीक सेल्समा बाक्त। 15 मिनु लेवीपुकीम परमप्रभु आ सन्दोस शुइशो कोक्केमी आन बलामी कुरमे बाक्त। परमप्रभु यावेम मोसा कली दोपा देंमे, मोपा मोसा आ शेंशो पामे बाक्त। *प्रस्थान २५:१४; गन्ती ४:१५*

16 मिनु दाऊदमे लेवी आन ठेयब मुर आन कली “इन खिं खिं डा मुर कुम्सो पाइब योव्रशा, वोइक्का माल्नीनी। मेकोपुकी तार पाइशो ताप्तीके, बीना नु बुक्केल ताप्शा, ग्येरशा ठेयब सेंदा पा कुम्सो पचा माल्नीम” दे अरेमी बाक्त। 17 मोपतीके लेवीपुकीम योएल आ तौ हेमान नु आ खिं खिं डा मुर बेरेक्याह आ तौ आसाफ, नु मेरारी आ तौ आन खिं खिं डा मुर रे कुशायाह आ तौ एथान आन कली योव्रडमे बाक्त। 18 मिनु मेको आन नोले जकरिया, याजीएल, शेमीरामोथ, येहीएल, उन्नी, एलीआब, बेनायाह, मासेयाह, मतीथ्याह, एली-फेलेहु, मीक्नैयाह नु लाप्चो खाल पाइब ओबेद-एदोम नु यिएल आन कली योव्रडमे बाक्त। 19 मिनु कुम्सो पाइब हेमान, आसाफ नु एथान कांसा के बुक्केल ताप्शा कली योव्रचा पुंइसमा बाक्त। *इतिहास ६:१८; इतिहास ६:२४; इतिहास ६:२९; इतिहास २५:१* 20 मिनु जकरिया, अजीएल, शेमीरामोथ, येहीएल, उन्नी, एलीआब, मासेयाह नु बेनायाह अलामोथ देंशो आइक्च सेंदा पाइशो तार पाइशो ताप्तीके ताप्शा कली योव्रचा पुंइसमा बाक्त। 21 मिनु मतीथ्याह, एली-फेलेहु, मीक्नैयाह, ओबेद-एदोम, यिएल नु अजजीयाह शेमीनीथ देंशो ठेयब सेंदा पाइशो बीना

तापतीके ताप्या कली योवचा पुंडसमा बावत्।<sup>22</sup> लेवी आन ठेयब मुर केनानीयाह कुम्सो पचा नु ताप्या जोक्ब तुडक्ब बाक्तीके मेको आन कली चलेब दुम्मावत्।<sup>23</sup> बेरेक्याह नु एल्काना सन्दोस बाक्तीके डा लाप्यो कोव्रब बाक्सा बावत्।<sup>24</sup> मिनु चढेब शेबान्याह, योशाफात, नेथनेल, अमासै, जकरिया, बेनायाह नु एलीएजर परमप्रभु आ कबल पशो सन्दोस आ डोंइती तुराही ताप्या माल्बाक्मा बावत्। ओबेद-एदोम नु येहीयाह यो सन्दोस बाक्तीके डा लाप्यो कोव्रब बाक्सा बावत्।

<sup>25</sup> मिनु दाऊद नु इस्राएल डा खाल्पा नु हजार हजार डा लडाइ पाइब आन कप्तानपुकी ओबेद-एदोम आ खिं लशा, ग्येरशा परमप्रभु यावे आ कबल पशो सन्दोस चाक्मा मे बावत्।<sup>26</sup> मिनु परमप्रभु यावेमी आ कबल पशो सन्दोस कुरब लेवी आन कली वारच पाइक्तीके मेकोपुकीमी ७ ओटा ब्यफ नु ७ ओटा सांड चढेमे बावत्।<sup>27</sup> मिनु दाऊद नु सन्दोस कुरब लेवी, कुम्सो पाइब नु केनानीयाह ताप्य नु कुम्सो पाइब आन कली चलेब नेल्ल रिम्शो सुती के वा फेक्शो बाक्मा बावत्। दाऊदम रिम्शो सुती वा के कुचु तार फेक्तीके यो फेक्शो बाक्मावत्। प्रस्थान २५:७<sup>28</sup> मोपा इस्राएली नेल्लेमी ठेयब रेयके पा नु ग्रीव, तुराही, बुपकेल, तार पाइश्शो तापतीके नु बीना ताप्या परमप्रभु यावे आ कबल पशो सन्दोस कुइश्शा कुमा बावत्।

<sup>29</sup> मिनु परमप्रभु यावे आ कबल पशो सन्दोस दाऊद आ सहरम ऑइदमेनु, सावल आ तमी, दाऊद आ मीश मिकालमी झेल रे कोव्रडा बावत्। मिनु पिप दाऊद कली ग्येरशा सिल पशो तशा, आ थुंमी पिप कली आइक्च मिम्ता बावत्।

दाऊदम मुर आन कली आसीक गेशो

२सामुएल ६:१७-१९

**16** मिनु मेकोपुकीमी परमप्रभु आ कबल पशो सन्दोस चाक्शा, दाऊदमी कीशो ताम्बु आगाम वोदमे बावत्। मिनु मेकोपुकीमी परमप्रभु आ डोंइती चोशा चढेतीक नु दुशा बाक्चा आ पबर्म चढेतीक चढेमे बावत्।<sup>2</sup> मिनु दाऊदमी मेको चोशा चढेतीके नु दुशा बाक्चा आ पबर्म चढेतीके चढेने थुम्शा, मुर आन कली परमप्रभु यावे आ नेमी आसीक गेवा बावत्।<sup>3</sup> मिनु मेकोमी इस्राएली नेल्ल आन कली, मीश मुर नु वोंइश मुर आन कली शोब्ले का का, श्ये नु अडगुर शोब्ले का का जचा ब्वचा गेमी बावत्।

<sup>4</sup> मिनु दाऊदमी परमप्रभु यावे आ सन्दोस आ डोंइती गेय पचा, दे लेवी आन कली योव्रशा वोइक्मी बावत्। मेकोपुकीमी परमप्रभु कली पुंडतीक लोव्र "गे रिम्शो पाइब बाक्नीनी" दे नु परमप्रभु यावे, इस्राएली आन परमप्रभु कली ठेयब सेल्चा माल्बाक्मा बावत्।<sup>5</sup> मेको आन ठेयब मुर आसाफ बाक्मावत्। मेको आ नोले डा जकरिया, यिएल, शेमीरामोथ, येहीएल, मत्तीथ्याह, एलीआब, बेनायाह, ओबेद-एदोम नु यिएल ठेयब नु आइक्च तार पाइश्शो तापतीके नु सितार ताप्य बाक्मा बावत्। आसाफ बुपकेल ताप्य बाक्मावत्।<sup>6</sup> मिनु चढेब बेनायाह नु याहासीएलमी नाक्त् किंत् किंत् परमप्रभु आ कबल पशो सन्दोस आ डोंइती तुराही तप्या माल्बाक्सा बावत्।

दाऊदमी कुम्सो पशो

भजन संग्रह १०५:१-१५; भजन संग्रह ९६; भजन संग्रह १०६:१,४६,४८

<sup>7</sup> मेको नाक्ती दाऊदमी नेल्ल क्येडा डोंइती आसाफ नु आ खिं खिं डा मुर आन कली परमप्रभु यावे कली ठेयब सेल्तीक कुम्सो पपाइक्मी बावत्।

<sup>8</sup> "परमप्रभु यावे, गे रिम्शो पाइब बाक्नीनी, आ नें थिशा मेको कली पुंनीन। मेको आ पशो जात जात डा मुर आन कली तुडक्पतीन।<sup>9</sup> मेको कली कुम्सो पने। मेको कली ठेयब सेल्तीक कुम्सो पने। मुर आन कली मेको आ छक लाक्चा डा गेय नेल्ल आन पबर्म लोव्र पने।<sup>10</sup> मेको आ ठेयब नें आ पबर्म ग्येरसीन। परमप्रभु यावे कली माल्बपुकीमी ग्येरसीन।<sup>11</sup> परमप्रभु यावे नु मेको आ सक्ति मालीन। मेको नु बाक्चा कली माल्ना माल्न बाक्कीन।<sup>12</sup> मेको आ रिम्शो गेय मप्रैदीन। आ पशो छक लाक्चा डा गेय नु आ निसाफ पतीके मप्रैदीन।<sup>13</sup> आ गेय पाइब इस्राएल आ चच युइ, याकूब आ आल, आ योव्रशोपुकी परमप्रभु आ पशो गेय मप्रैदीन।<sup>14</sup> मेको परमप्रभु

यावे, इं परमप्रभु बाक्ब। मेकोमी रागी नेल्ल आन कली निसाफ पाइब।

<sup>15</sup> आ पशो कबल गेना हना यो मप्रैदीन। मेको कबल हजार हजार पाला डा मुर आन कली पशो बावत्।<sup>16</sup> मेकोमी अब्राहाम नु कबल पशो बावत्। मेकोमी इसहाक नु कसम जशा, थोक्शो लोव्र पशो बावत्।<sup>17</sup> मेको कबल याकूब कली फुल्लुम मुशा ब्रेक्शा गेशो बावत्। इस्राएल कली गेना हना यो लीब कबल पशो बावत्।<sup>18</sup> मेको कबल मार बावत् देंशा हना 'गे इ कली कनान रागी गेनन। इ रागी नु इ थेरशो रू बाक्ब' दे मेको कबल बावत्।

<sup>19</sup> मेकोपुकी शुश मुर मबाक्तीके, मान मताइब नु अर्को रागी डा मुर बाक्शा,<sup>20</sup> रागी रागी डा मुर आन दातेम हिरशा, राज्य कारे अर्को जात डा मुर सम्म हिरना हिरन गाक्बाक्तेक्म।<sup>21</sup> परमप्रभु यावेमी सुइमी मेको आन कली दिप्या मगेमी। मेको आन पबर्म पिप आन कली यो हुइश्शा उत्पत्ती १२:१७; उत्पत्ती २०:३,७; उत्पत्ती २६:९<sup>22</sup> 'आं तेल लुक्शो आन कली मथिने। आं नोले दुम्ब लोव्र पाइब आन कली श्येत मगेने' देंशो बावत्।

<sup>23</sup> रागी डा मुर नेल्लेमी परमप्रभु यावे कली कुम्सो पने। नाक्त् किंत् किंत् आ श्येत रे प्रोंइशो आ पबर्म लोव्र पने।<sup>24</sup> रागी रागी डा मुर आन दातेमी मेको आ सक्ति आ पबर्म लोव्र पने। जात जात डा मुर आन दातेमी मेको आ पशो छक लाक्चा डा गेय आ पबर्म लोव्र पने।<sup>25</sup> मारदे हना परमप्रभु यावे ठेयब बाक्ब। ठेयब मान पाइक्चा पुंडसीब बाक्ब। देवी देवता नेल्ल आन क्येडा मान पाइक्चा पुंडसीब बाक्ब।<sup>26</sup> मारदे हना जात जात डा मुर आन देवी देवता नेल्ल मूर्ति बाक्नीम। तन्न परमप्रभु यावेमी सरीड सेल्शो बाक्ब।<sup>27</sup> ठेयब दुम्तीक नु मान ततीक मेको नु बाक्नीस। सक्ति नु ग्येरतीक मेको आ बाक्तीकेम बाक्नीस।

<sup>28</sup> जात जात डा खिं खिं डा मुरपुकीमी परमप्रभु यावे कली 'छेडछेड नु सक्ति इन के बाक्ब' दे ठेयब सेलीन। भजन संग्रह २९:१२<sup>29</sup> परमप्रभु यावे कली आ नें शिरचा डा पा मान पने। चढेतीक चाक्शा, आ डोंइती जाक्कीन। आंम आन कली परमप्रभु यावे आ डोंइती ठीक सेल्शा मेको कली ठेयब सेलीन।<sup>30</sup> रागी नेल्ल मेको आ डोंइती थिर थिर पा खिंखि पने। रागी नेल्ल कली गेना हना यो मदुक्चा डा पा वोइश्शो बाक्ब।<sup>31</sup> सरीड ग्येरसेक्त्। रागी थाम्पा ग्येरसेक्त्। मिनु रागी रागी डा मुर आन दातेमी 'परमप्रभु यावे पिप बाक्ब' देंमल।<sup>32</sup> समुन्द्र नु मेकेर बाक्ब मारेइ मारेइ नेल्ल ग्येरशा रेयके पामेक्त्। रू नु मेकेर बाक्ब मारेइ मारेइ ग्येरसीमल।<sup>33</sup> मेना ब्वाकी डा रवा परमप्रभु यावे आ डोंइती ग्येरशा कुम्सो पाइनीम। मारदे हना मेको रागी कली निसाफ पथ जाक्ब।<sup>34</sup> परमप्रभु यावे कली 'गे रिम्शो पाइब बाक्नीनी' देंनीन। मारदे हना आ दाक्तीक गेना हना यो लीब। २इतिहास २०:२१

<sup>35</sup> मिनु गेपुकीमी 'आंइ कली श्येत रे प्रोनीन। गे आंइ कली प्रोंइब परमप्रभु बाक्नीनी। आंइ कली रागी रागी रे खुष्शा, प्रोंइकी' दे यो देनीनी। गोपुकीमी इन कली 'गे रिम्शो पाइब बाक्नीनी' देंशा इन नें ठेयब सेल्शा, ग्येरशा बाक्नीकी।<sup>36</sup> परमप्रभु यावे, इस्राएली आन परमप्रभु गेना हना यो ठेयब बाक्ब। गेना हना यो मोदेंशो बाक्ब" दे कुम्सो पवा बावत्।

मिनु नोले मुर नेल्लेमी "आमेन" देंशा, परमप्रभु यावे कली ठेयब सेल्मे बावत्। भजन संग्रह ४१:१४

नाक्त् किंत् किंत् पचा माल्शो

<sup>37</sup> मिनु दाऊदम आसाफ नु आ खिं खिं डा मुर आन कली परमप्रभु यावे आ कबल पशो सन्दोस आ डोंइती नाक्त् किंत् किंत् पचा माल्शो गेय पचा, दे वोदा बावत्।<sup>38</sup> ओबेद-एदोम नु आ खिं डा मुर मेको आन कली वारच पाइब बाक्मा बावत्। येदुथून आ तौ ओबेद-एदोम नु होसाह लाप्यो कोव्रब आन ठेयब मुर बाक्सा बावत्।<sup>39</sup> दाऊदम चढेब सादोक नु मेको आ खिं खिं डा चढेब आन कली गिबोनम बाक्शो डांडा डा परमप्रभु यावे आ बाक्तीकेम वोइश्शो बाक्मावत्। १इतिहास २१:२९<sup>40</sup> मेकोपुकीमी नाक्त् किंत् किंत् नाक्दो नु सुनी चढेतीकेमी चोशा चढेतीक चढेचा माल्शो बाक्मा बावत्। परमप्रभु यावेमी इस्राएली आन कली ब्रेक्शा आ अरेशो लोव्रम खोदेंशो पा नेल्ल पचा माल्मे बावत्। २प्रस्थान २९:३८-३९<sup>41</sup> हेमान, येदुथून नु आन नें ब्रेक्शो योव्रशो मुर मेको नु बाक्मा बावत्। मेको परमप्रभु कली "गे रिम्शो पाइब बाक्नीनी। मारदे हना इन दाक्तीक गेना यो लीब" देंचा कली वोइश्शो

बाक्मा बाक्त। 42 हेमान नु येदुथून आस ताप्तीक तुराही नु बुकेल यो बाक्मा बाक्त। परमप्रभु कली कुम्सो पचा कली अरु ताप्तीके यो बाक्मा बाक्त। येदुथून आ तौपुकी लाप्चो खाल पाइब बाक्मा बाक्त।

43 मिनु नोले मुर नेल्ल आन खिं खिं लेम्मा बाक्त। मिनु दाऊद आ खिं डा मुर आन कली आसीक गेथ लमाक्त।

परमप्रभुमी दाऊद नु कबल पशो  
२सामुएल ७:१-१६

17 मिनु दाऊद आ खिंम बाक्म नोले परमप्रभु यावे आ लोत्र पाइब नाथान कली “गो लेबानोन डा लाइश्शो रवा आ शी के खिंम बाक्शो बाक्नुड। तन्न परमप्रभु यावे आ कबल पशो सन्दोस ताम्बुम वोइश्शो बाक्ब” दे मदा बाक्त।

2 मिनु नाथानम दाऊद कली “गे इन थुंम मार बाक्मे, मेको पने। मारदे हना परमप्रभु गे नु बाक्ब” दे मदा बाक्त।

3 तन्न मेको नाक्दो परमप्रभु यावेमी नाथान कली लोत्र पवा बाक्त।  
4 मेकोमी “आं गेय पाइब दाऊद कली ‘परमप्रभु यावेमी इ कली मार देंब देंशा हना, गे आं कली बाक्तीक खिं मसेलो। 5 इस्राएली आन कली इजीप्त रे गुंइशा एक चाक्शो नाक्त रे मुल सम्म गो गेनायो खिंम मबाक्ड। गो ताम्बुम, आं बाक्तीकेम बाक्शो बाक्ती। 6 मिनु गो इस्राएली आन दातेम नु ते ते गाक्डा, गो मेको आं मुर आन कली लां कौइब इन निसाफ पाइब आन कली आं कली लेबानोन डा लाइश्शो रवा आ शी डा खिं सेलो, दे गेनायो मदेडा’। 7 मोपतीके आं गेय पाइब दाऊद कली मुर नेल्ल आन परमप्रभु यावेमी इ कली मार देंब देंशा हना ‘गो क्यारश भेडा योवतीके रे आं मुर इस्राएली आन पिप दुम्वा कली योवतन। 8 गे ते ते लवे, गो यो मेक मेक बाक्शो बाक्ती। मिनु इ लांम बाक्शो इ जोरी सत्रु आन कली खतम पोक्तामी। मुल गो इ कली रागी डा थम ठेयब मुर खोदेंशो पा ठेयब सेल्लन। 9 गो आं मुर इस्राएली आन कली रागी का योवतनुड। मिनु गो मेको आन कली मेकेर बाक्पाइक्नुडमी। मिनु मेको आन रागीम बाक्नीम। मुल रे मेको आन कली श्येत गेबपुकी सुइम श्येत मगेनीम। 10 गोमी डोंइडोंइती आं मुर इस्राएली आन कली सासन पाइब निसाफ पाइबपुकी योवतनुडमी रे मेको आन कली मरिश्शो मुरपुकीम श्येत गेशो खोदेंशो पा मुल गेनायो श्येत मगेनीम। गो इ जोरी सत्रु नेल्ल आन कली इ सासनम सेल्लुडमी। गो इ परमप्रभु यावेम इ राज्य नु इ खिं बोल्यो सेल्लुड। 11 मिनु इ नाक्त नुप्शा, गे बेक्शा इ किकी पिपपुकी नु लाइनेवे। मिनु नोले गो इ तौ का कली इ पा डा पिप सेल्लुड। मिनु गो मेको आ राज्य महिम्सीब सेल्लुड। 12 मिनु मेकोमीन आं कली खिं का सेल्चा माल्ब। गो मेको आ राज्य गेना हना यो लीपाइक्नुड। 13 इतिहास २२:१०-२८ 13 गो मेको आ आफ दुम्नुड। मिनु मेको आं तौ दुम्ब। गो मेको आ डोंइती डा सासन पाइब रे आं गेना हना यो दाक्तीके प्रोंइशो खोदेंशो पा दाऊद रे मप्रोंइनुड। 14 गो मेको कली आं खिं नु आं राज्यम गेना हना यो कली वोइक्नुड। मिनु मेको आ सासन पतीक गेना हना यो महिम्सीथु बाक्ब’ देंशो लोत्र” नाथान कली तुइक्पदा बाक्त। 15 मिनु नाथानमी मेको कली देंशो लोत्र नु कौइशो नेल्ल दाऊद कली शेंदा बाक्त।

“गे रिश्शो पाइब बाक्नीनी” देंशो  
२सामुएल ७:१७-२९

16 मिनु पिप दाऊद परमप्रभु यावे आ बाक्तीक लशा “परमप्रभु यावे, परमप्रभु, गो सु नडा? मिनु आं खिं मार बाक्बा? मिनु गे आं कली एक सम्म चाक्वीनी। उत्पत्ती ३२:११ 17 मो हना यो परमप्रभु एको इन डोंइती शुश ममाइ। परमप्रभु यावे, परमप्रभु, गेमी इन कबल इन गेय पाइब आ खिं कली शुश नोले सम्म कली बारपाइश्शो बाक्नीनी। 18 इन गेय पाइब कली इन गेशो मान आ पर्वम दाऊदम अरु मार देंने चाप्बा डा? गे इन गेय पाइब कली रिश्शो पा तुइश्शो बाक्नीनी। 19 परमप्रभु यावे, गे इन गेय पाइब आ पर्वम नु इन पत दाक्शो गेय खोदेंशो पा गे थम ठेयब गेय पशो बाक्नीनी। मिनु एको इन पशो ठेयब कबल तुइक्पाइश्शो बाक्नीनी।

20 इन खोदेंशो अर्को सुइ मबाक्नीम। परमप्रभु यावे, इन डा लाक्शा अर्को तेकोइ परमप्रभु मबाक्नीम। डोंइती इन देंशो नैशो नेल्ल मुल आंइ मिक्चीम

ताइतक। यसैया ४४:६ 21 मिनु इन मुर इस्राएली आन कली सु नु थाप्ने चाम्सीबा डा? मेको आन वाइल दुम्तीक रागी रे आंम मुर सेल्चा कली आंमान रागीम चाक्ब अर्को तेको जात डा मुर आन परमप्रभु बाक्नीमी डा? गेमी ठेयब नु हिंचा डा गेय पा इजीप्त रे प्रोंइशो इन मुर आन डोंइडोंइती अर्को जात डा मुर आन कली खेरशा इन मुर आन कली बाक्पाइश्शो बाक्नीनी। 22 गेम इन मुर इस्राएली आन कली गेना हना यो कली इन के सेल्शो बाक्नीनी। परमप्रभु यावे गे मेको आन परमप्रभु दुम्शो बाक्नीनी।

23 मुल ए परमप्रभु यावे, गे इन गेय पाइब नु मेको आ खिं आ पर्वम मार मिश्शा पशो बाक्नी, मेको गेना हना यो लील। गे मार कबल पशो बाक्नी, मेको गाप्ल। 24 मिनु इन पशो गेय ठेयब दुम्वा कली मेको गेना हना यो लील। मिनु मुर नेल्ल आन परमप्रभु यावे, इस्राएली आन परमप्रभु बाक्ब। मिनु इन गेय पाइब दाऊद आ खिं इन डोंइती बोल्यो दुम्शा लीब।

25 गे आं परमप्रभुम इन गेय पाइब आं खिं सेल्चा कली इन मिश्शो शेंशो बाक्नीनी। मोपतीके गो इन गेय पाइबम इन डोंइती एको प्रार्थना पचा चिक्शो बाक्नुड। 26 ए परमप्रभु यावे, गेन परमप्रभु बाक्नीनी। गे इन गेय पाइब नु एको रिश्शो कबल पशो बाक्नीनी। 27 मेको गेना हना यो इन डोंइती बाक्ल, दे इन गेय पाइब आ खिं कली आसीक गेचा इन मिश्शो बाक्ब। मारदे हना गेन मेको कली आसीक गेशो बाक्नीनी। मिनु मेको गेना हना यो आसीक रशो बाक्ब” दे दाऊदम परमप्रभु कली लोत्र पवा बाक्त। उत्पत्ती १२:३

दाऊद आ राज्य बारशो  
२सामुएल ८:१-१४

18 मेको आ इच्का नोले दाऊदमी पलिस्ती नु लडाइ पा ग्राशा फ्रूमी बाक्त। मिनु पलिस्ती आन गाथ सहर नु मेको आ एर ऑथ डा गाउं नेल्ल आइक्के सेला बाक्त।

2 मेकोमी मोआबी आन कली यो फ्रूमी बाक्त। मिनु मेकोपुकी दाऊद आ सासनम दुम्शा, मेको कली तिरो थाप्चा माल्मा बाक्त।

3 मिनु दाऊदमी युफ्रेटीस खोला सम्म आ ग्राशो अधिकार ठीक वोइक्थ लमेनु, सोबाह डा पिप हादादेजेर नु हमाथ सम्म लडाइ पवा बाक्त। 4 मिनु दाऊदम मेको रे पा हजार का बग्गी, ७ हजार शारा डोइक्ब नु २० हजार खोइलीम गाक्ब लडाइ पाइब आन कली ग्याइक्तीमी बाक्त। मिनु मेकोम सहे का शारा प्रोंइशा अरु बग्गी डा शारा नेल्ल आन कली खोइल डा नारी खोदमे बाक्त।

5 मिनु सोबाह डा पिप हादादेजेर कली वारच पाइक्वा कली दमस्कस डा अरामीपुकी जाक्मे बाक्त। मिनु दाऊदमी मेको आन दाते डा २२ हजार आन कली साइक्मी बाक्त। 6 मिनु दाऊदम दमस्कस डा अराम सहरम आ ताम्बु कीडा बाक्त। मिनु अरामीपुकी मेको आ सासनम दुम्शा मेको कली तिरो थाप्तमे बाक्त। मोपा दाऊद ते लत हना यो परमप्रभु यावेम मेको कली ग्रापदा बाक्त। 7 दाऊदम हादादेजेर आ लडाइ पाइब आन ठेयब मुरपुकीम कुरशो सुन के ब्रा, तेक्तीकपुकी रोइश्शा यरूसलेमम चाक्गमे बाक्त। 8 दाऊदम हादादेजेर आ तिब्हाथ नु कुन सहर रे शुश कांसा चाक्गमे बाक्त। मेको रे पा सोलोमनम ठेयब चिक्तीक बोस, थामपुकी नु ग्योबपुकी सेला बाक्त। १राजा ७:२३; १राजा ७:१५

9 मिनु हमाथ डा पिप तोऊमी दाऊदमी सोबाह डा पिप हादादेजेर आ लडाइ पाइब नेल्ल आन कली फ्रुशो लोत्र नेना बाक्त। 10 मिनु दाऊदमी हादादेजेर कली लडाइ फ्रुशो आ पर्वम मेको कली रिश्शो पाइतीनी देंथ तोऊम आ तौ हदोराम कली दाऊद आ बाक्तीक सोइक्ता बाक्त। मारदे हना हादादेजेर नु तोऊ आस दातेमी लडाइ दुम्शो बाक्माक्त। मिनु हदोराममी आं नु बाक्शो सुन चांदी नु कांसा के ग्योबपुकी चाक्गा बाक्त।

11 मिनु दाऊद पिपम मेको आ चाक्शो सुन नु चांदी के ग्योब नेल्ल परमप्रभु यावे कली चढ़ेवा बाक्त। मेकोमी अर्को जात नेल्ल एदोम, मोआब, अम्मोनी, पलिस्ती नु अमालेकी रे चाक्शो सुन चांदी यो चढ़ेवा बाक्त।

12 सेरूयाह आ तौ अबीशैमी हिक्सी आ बेंसीम १८ हजार एदोमी लडाइ पा सदा बाक्त। 13 मिनु मेको आन रागीम ताम्बु कीडा बाक्त। मिनु एदोमी

नेल्ल दाऊद आ सासनम दुम्मा बाक्त। मोपा दाऊद ते ते लमे, मेक मेक परमप्रभु यावेमी मेको कली ग्रापदा बाक्त।

दाऊद आ कप्तानपुकी  
२सामुएल ८:१५-१८

14 मिनु दाऊदम इस्राएल नेल्लेमी सासन पवा बाक्त। मिनु आ मुर नेल्ल आन कली ठीक निसाफ पवा बाक्त। 15 सेरूयाह आ तौ योआब कप्तान बाक्माक्त। अहीलुद आ तौ येहो-शाफात ठेयब ब्रेक्ब बाक्माक्त। 16 अहीतुब आ तौ सादोक नु अबीयाथार आ तौ अहीमेलेक चढेब बाक्सा बाक्त। शाव्शा लडाइ पाइब आन ठेयब ब्रेक्ब बाक्माक्त। 17 येहो-यादा आ तौ बेनायाह केरेथी नु पेलेथी पिप कली खाल पाइब आन कप्तान बाक्माक्त। दाऊद आ तौपुकी चहिं पिप आ गेय पाइब आन ठेयब मुर बाक्सा बाक्त।

दाऊद आ मुर आन कली मुने तोक्शो  
२सामुएल १०:-; २सामुएल ११:१; २सामुएल १२:२६-३१

19 मिनु इच्का नाक्त नोले अम्मोनी आन पिप नाहाश बेक्माक्त। मिनु मेको आ पा डा आ तौ पिप दुम्माक्त। 1 सामुएल ११:१ 2 मिनु दाऊदमी “आ आफोम आं कली रिम्शो पशो खोदेशो पा, गो नाहाश आ तौ हानुन नु थमा पा वारचु दुम्मा माल्नस्कु” देंमाक्त। मिनु मेको आ आफ बेक्शो आ पर्बम सुरता पशो लोत्र पथ लोत्र कुरब मुर सोइक्ता बाक्त। मिनु दाऊद आ लोत्र कुरबपुकी हानुन कली रिम्शो लोत्र पथ अम्मोनी आन रागीम जाव्दीम्मा बाक्त। 3 मिनु अम्मोनी आन ठेयब मुरपुकीम हानुन कली “दाऊदमी इन कली रिम्शो लोत्र पथ मुर सोइक्तानु, गे दाऊदमी इन आफ कली मान पा मुर सोइश्शो बाक्ब, दे मिम्नीनी? इन रागीम तेरे ओव्रशा खतम पोक्चा, दे कोव्रथ कका सोइश्शो बाक्ब। आ मुरपुकी क्यारी पथ जाक्शो मनमी डा?” दे मदमे बाक्त। 4 मिनु हानुनमी दाऊद आ सोइश्शो मुर आन कली ग्याइश्शा आन चां प्रेक्तमे बाक्त। आन वा इर रे आन देल्लो सम्म रिक्शा सोइक्तमे बाक्त। 5 मिनु दाऊदमी आ मुर आन कली मो पशो लोत्र नेना बाक्त। मिनु मेको आन कली गुम्चा, दे मुर सोइक्तमे बाक्त। मारदे हना मेकोपुकी थाम्पा मुने तोक्चा पुंइसीशो बाक्सा बाक्त। मिनु मेको आन गल शोक्रे डोंइती डा खोदेशो पा मबारम सम्म मेको आन कली “यरीको सहरम बाक्मल” दे अरेवा बाक्त।

अम्मोनी लडाइ पचा ठीक दुम्शो

6 मिनु अम्मोनीपुकीमी “दाऊद आ डोंइती मरिम्शो पाइतक” दे तुइक्तमे बाक्त। मिनु हानुन नु अम्मोनीपुकीमी मेसोपोटामीया डा अराम-नाहाराइम, अराम-माकाह नु सोबाह रे बगीपुकी नु शारा डोइक्ब चाक्चा कली हजार का टलेन्ट चांदी सोइक्तमे बाक्त। टलेन्ट का ३४ किलो बाक्ब। 7 मिनु मेकोपुकीमी ३२ हजार बगी नु माकाह डा पिप नु आ लडाइ पाइब आन कली थाप्पा चाक्चामे बाक्त। मेकोपुकी जाक्शा मेदेबा सहर आ नेक्था ताम्बु कीडमे बाक्त। अम्मोनीपुकी आन सहर सहर रे गूशा लडाइ पचा कली ठीक पामे बाक्त। 8 मिनु दाऊदम मेको लोत्र नेंशा, योआब नु लडाइ पाइब नेल्ल आन कली सोइक्ता बाक्त। 9 अम्मोनीपुकी जाक्शा, सहर ओव्रतीकेमी लडाइ पचा कली ठीक दुम्मा बाक्त। मेको नु जाक्शो पिपपुकी सहर ओव्रतीकेम मबाक्थु, इच्का डोन राप्पा लडाइ पचा ठीक दुम्मा बाक्त।

10 मिनु योआबम आ नोले नु डोंइती निम्फा पटटी रे लडाइ तोचशो तवा बाक्त। मिनु मेकोमी कोइ कोइ योव्रशो हिक्सीशो लडाइ पाइब इस्राएली आन कली अरामी नु लडाइ पथ सोइक्ता बाक्त। 11 मिनु लीशो लडाइ पाइब आन कली आ लोक्ब अबीशै आ हुकुममी गेवा बाक्त। मिनु मेको अम्मोनी नु लडाइ पचा कली ठीक दुम्माक्त। 12 मिनु योआबमी “अरामीपुकी आं क्येडा ग्राचा चिक्ताक्म हना, गे आं कली वारच पथ पिवो। अम्मोनी इं क्येडा ग्राचा चिक्ताक्म हना, गो इ कली वारच पथ पीनुड। 13 सक्ति पाइश्शो दुमीन। गोपुकी आंम जात नु इं परमप्रभु आ सहर आ पर्बम महिंथु, लडाइ पय। परमप्रभु यावेम मार मिम्शो बाक्बा, मेको पाइब” देंमाक्त। 14 मिनु योआब

नु मेको आ मुरपुकी अरामी आन नेक्था लशा, मेको आन कली खेदा पामे बाक्त। मिनु मेकोपुकी मेको आन क्येडा प्रोक्सा बाक्त 15 मिनु अम्मोनीपुकी यो अरामी प्रोक्शो तशा, योआब आ लोक्ब अबीशै आ डोंइती रे प्रोक्शा सहर ओव्रमा बाक्त। मोपतीके योआब यरूसलेम लेम्माक्त।

16 मिनु अरामी इस्राएली आन क्येडा ब्रुका बाक्त, दे तुइश्शा, युफ्रेटीस खोला आ आइक्ची हांबु डा हादादेजेर आ कप्तान शोफाक आ हुकुमम बाक्शो अरु अरामी आन कली ब्रेथ सोइक्तमे बाक्त। 17 मेको आन मो पशो लोत्र दाऊद कली नेंपदमे बाक्त। मिनु मेकोमी रीब पा इस्राएली लडाइ पाइब नेल्ल आन कली खुप्शा यर्दन खोला शोक्शा लडाइ पचा कली सोइक्तीमी बाक्त। मिनु मेकोपुकी लशा लडाइ पचा कली ठीक दुम्मा बाक्त। अरामी यो मोपान दाऊद नु लडाइ पचा कली ठीक दुम्मा बाक्त। मिनु लडाइ पामे बाक्त। 18 तन्न इस्राएलीपुकीम मेको आन कली फ्रुशा खेदा पामे बाक्त। दाऊदमी ७ हजार अरामी आन बगी खुल्ब नु ४० हजार लडाइ पाइब नु मेको आन कप्तान शोफाक आन कली सदमे बाक्त।

19 मिनु हादादेजेरम आ मुरपुकी इस्राएली आन क्येडा ब्रुशो तशा गारचा कली सल्ला पथ मुर सोइक्ता बाक्त। मिनु दाऊद कली जिम्मा गेसमा बाक्त। मोपतीके मेको नोले गेनायो अरामीपुकीम अम्मोनी आन कली वारच मपामे बाक्त।

दाऊदम रब्बाह सहर ग्राशो

20 मिनु बर्खा जाक्मेनु, पिपपुकी लडाइ पथ गूमा बाक्त। मिनु योआबमी लडाइ पाइबपुकी लाइश्शा अम्मोनी आन रागी कली गोरशो सेला बाक्त। मिनु मेको रब्बाह सहर पुम्शा, आ एर औथ नेल्ल हिरदा बाक्त। दाऊद चहिं यरूसलेम उइ बाक्माक्त। मिनु योआबमी रब्बाह सहर कली लडाइ पा खतम सेल्शा ग्रामाक्त। 2 मिनु दाऊदमी मेको आन पिप आ पियारे सिरपेच लदा बाक्त। मेको सुन नाक्शोनु, टलेन्ट का बाक्माक्त। मेको सिरपेचम शुश क्येट लाइब हीरा यो क्येप्शो बाक्माक्त। मेको सिरपेच दाऊद कली गुक्से बाक्त। दाऊदमी मेको सहर रे शुश मार मार रोइश्शा लदा बाक्त। टलेन्ट का ३४ किलो बाक्ब 3 मेको रागी डा मुर आन कली गुंइशा, मेको आन कली आरा, कोदाली नु खामी गेय पपदमे बाक्त। मोदेशो दाऊदमी अम्मोनी आन सहर नेल्लेमी पवा बाक्त। नोले दाऊद नु आ मुर नेल्ले यरूसलेम लेम्मा बाक्त।

पलिस्ती नु लडाइ पशो

२सामुएल २१: १८-२१

4 मेको आ नोले पलिस्तीपुकी नु गेजेर सहरमी लडाइ दुम्माक्त। मेना हुशा डा मुर सिब्बेके माइश्शो सिप्पाइ कली सदा बाक्त। सिप्पाइ चहिं रेफाइ आ चच युइ का बाक्शो बाक्माक्त। पलिस्ती ब्रुम्मा बाक्त। १इतिहास २७:११ 5 नोले लेंशा पलिस्ती नु लडाइ दुम्माक्त। याइर आ तौ एल्हानानमी गित्त आ खिं डा मुर गोल्याथ आ लोक्ब लाहमी कली सदा बाक्त। मेको आ तूतीक आ ग्याइक्तीक वा प्रोक्ब आन शी खोमो ठेयब बाक्माक्त। 6 मिनु नोले लेंशा गाथ सहरमी लडाइ दुम्माक्त। मेकेर लाइश्शो मुर का बाक्माक्त। आ गुइ नु खोइली नेल्लेम ६,६ ओटा ब्रेप्चो पाइश्शो नेल्ल पा २४ ओटा ब्रेप्चो पाइश्शो मुर का बाक्माक्त। मेको रेफाइ आ चच युइ का बाक्माक्त। 7 मेकोमी इस्राएली आन कली शुक्शी पवा बाक्त। मिनु दाऊद आ लोक्ब शिमेआ आ तौ योनाथनमी मेको कली सदा बाक्त। 8 मेको गाथ डा लाइश्शो मुर आन चच युइ, रेफाइ आ मुर बाक्सा बाक्त। मिनु दाऊद नु आ मुरपुकीमी मेको आन कली सदमे बाक्त।

दाऊदम मुर आन कली हिक्शो

२सामुएल २४:-

21 मिनु सैतानमी इस्राएली आन कली मरिम्शो पचा कली दाऊद कली आ मुर इस्राएली आन कली हिक्पाइक्मी बाक्त। 2 मोपतीके दाऊदम योआब नु आ कप्तान आन कली “बेयर-शेबा रे दान सम्म डा इस्राएली आन कली हिक्शा, आं कली शेंचा नड। मिनु मेकोपुकी दोशो



बाक्मा, गो तुइक्चा माल्नुड" दे अरेमी बाक्ता।<sup>3</sup> तन्न योआबमी "परमप्रभु यावेमी आ मुर आन कली एको क्येडा यो सहे खेयप हिव्शो खोइ सोशा बोशा शुश सेलल। मेकोपुकी आं पिप इन गेय पाइब मुर मद्दुम्नीमी डा? गे मारदे मो पचा माल्नीनी? गे मारदे इस्राएली आन कली दोस चाक्नीनी?" देंमाक्ता। प्रस्थान ३०:१२<sup>4</sup> तन्न पिपमी योआब आ लोव्र मनेना बाक्ता। मिनु योआब लशा, इस्राएल नेल्ल हिरशा, यरूसलेमम लेशशा जाक्माक्ता।<sup>5</sup> मिनु योआब यरूसलेम जाक्शा, दाऊद कली आ हिव्शो मुरपुकी ओशो बाक्तेक्म, दे शेंदा बाक्ता। मेकोमी "इस्राएलम या चलेने चाप्ब, लडाइ पाइब ११ लाख नु यहूदाम ४ लाख ७० हजार बाक्नीम" देंमाक्ता।<sup>6</sup> तन्न योआबमी लेवी आ थर डा मुर नु बेन्यामीन आ थर डा मुर आन कली महिकमी बाक्ता। मारदे हना योआबमी पिप आ हुकुम पशो कली काइ मदाक्ता बाक्ता।

### दाऊदम सजाइ तशो

<sup>7</sup> मिनु परमप्रभु दाऊद आ पशो तशा, गाइक्ता बाक्ता। मिनु इस्राएली आन कली सजाइ गेवा बाक्ता *इतिहास* २७:२४<sup>8</sup> मिनु दाऊदम परमप्रभु कली "गो मोर्देशो पा ठेयब पाप पाता। मुल इन गेय पाइब आं दोस क्याम्दीन। मारदे हना गो थम मरिम्शो पाइब दुम्ती" देंमाक्ता।<sup>9</sup> मिनु परमप्रभु यावेमी आ लोव्र पाइब गाद कली "गे लशा दाऊद कली<sup>10</sup> परमप्रभु यावेमी इन कली मार लोव्र पाइब देंशा हना 'गो इ डोंइती लोव्र सां वोइक्नुड। मेको रे का योव्रसो। मिनु मेको इ कली पाइनुड' देंत, मतो" देंमाक्ता।<sup>11</sup> मिनु गाद दाऊद आ बाक्तीके जाक्शा, मेकोमी "परमप्रभु यावेमी इन कली लोव्र पाइब। मिनु गे लोव्र का योव्रसो।<sup>12</sup> 'गो इ डोंइती लोव्र सां वोइक्नुड। मेको रे का योव्रसो' देंशो बाक्ब। मेको लोव्र सां तेको बाक्नीम देंशा हना, डोंइती डा बर्स सां सम्म अन्काल दुम्तीके, नोले डा महिना सां सम्म इन जोरी सत्रुमी खेदा पचा पुंइसीतीके, आन तरवारम इन कली ग्रातीके नु नेल्ल क्येडा नोले डा परमप्रभु यावेमी आ तरवार रे नाक्त्त सां सम्म रागी नेल्लेम बेक्चा डा रोइ पपाइश्शा मुर साइक्तीक। मेको लोव्र सांमी का योव्रसो। परमप्रभु यावे आ स्वर्ग डा गेय पाइबमी नाक्त्त सां सम्म इस्राएल रागीम शुश मुर आन कली साइक्तीक। मेको लोव्र सां बाक्तेक्म। का योव्रसो। गो आं कली सोइक्ब कली मार देंचा माल्नुड, देंनीन" देंमाक्ता।<sup>13</sup> मिनु दाऊदम गाद कली "गो थम श्येत जाइब दुम्ती। परमप्रभु यावे आ गुइमी दुम्चा गेयीनी। मारदे हना मेको आ शिशी थम ठेयब बाक्ब। तन्न मुर आन गुइमी दुम्चा मगेयीनी" दे मदा बाक्ता।<sup>14</sup> मोपतीके परमप्रभु यावेमी इस्राएल रागीम बेक्चा डा रोइ पपाइक्मी बाक्ता। मिनु ७० हजार बेक्मा बाक्ता।<sup>15</sup> मिनु परमप्रभुमी आ स्वर्ग डा गेय पाइब का यरूसलेम सहर खतम पोक्चा कली सोइक्ता बाक्ता। तन्न मेकोमी खतम पोक्चा चिक्तानु, परमप्रभु यावेमी मेको खतम पोक्तीक तशा, शिशी पा तेक्गा बाक्ता। मेकोमी खतम पोक्ब आ स्वर्ग डा गेय पाइब कली "मुल दुम्त्त। इ गुइ तेक्को" दे मदा बाक्ता। मेना परमप्रभु यावे आ स्वर्ग डा गेय पाइब यबुसी ओरनान आ खला आ नेक्था राप्शा, बाक्शो बाक्माक्ता।<sup>16</sup> मिनु दाऊदमी इर गे कोव्रडानु, परमप्रभु यावे आ स्वर्ग डा गेय पाइब का सरीड नु रागी आस दातेमी राप्शा, आ गुइमी शोइश्शो तरवार का यरूसलेम गे दिंशो तवा बाक्ता। मिनु दाऊद नु मेको नु बाक्शो खूशोपुकी भाडग्रा फेक्शा खुम्की पा बाम्मा बाक्ता।<sup>17</sup> मिनु दाऊदम परमप्रभु कली "मुर आन कली हिव्चा कली गो कका अरेतामी। गो कका पाप पा काइ मरिम्शो पाता। तन्न एको भेडापुकीम मार पामे डा? परमप्रभु यावे, आं परमप्रभु, इन गेचा डा श्येत आं कली नु आं आफ आ खिं कली दुम्ल। तन्न इन मुर आन कली मोर्देशो श्येत मगेन" देंमाक्ता।

### दाऊदम चढेतीक सेल्शो

<sup>18</sup> मिनु परमप्रभु यावे आ स्वर्ग डा गेय पाइबमी गाद कली "गे दाऊद कली 'यबुसी ओरनान आ खलामी परमप्रभु यावे कली चढेतीक का सेलो' दे मतो" देंमाक्ता।<sup>19</sup> मोपतीके दाऊदमी गादम परमप्रभु यावे आ नेंमी अरेशो लोव्र खोर्देशो पवा बाक्ता।<sup>20</sup> मेना ओरनान आ चेरब दांइ पा लेशशा कोव्रडानु, परमप्रभु यावे आ स्वर्ग डा गेय पाइब कली तवा बाक्ता। आ नु

बाक्शो आ ४ जना तौ चहिं खुंइसमा बाक्ता। ओरनान चहिं चेरब तुप्स डा तुप्स बाक्माक्ता।<sup>21</sup> दाऊद मेको आ बाक्तीक जाक्दीम्मेनु, ओरनानम पिप कली तशा, आ डोंइती खुम्की पा बाम्माक्ता।<sup>22</sup> मिनु दाऊदम ओरनान कली "एको खला डा रू परमप्रभु यावे कली चढेतीक का सेल्चा कली गेयी। मेको गिश बाक्मे, मेको डा क्येट गेनुड। मुर आन कली गेशो बेक्तीक रोइ नाइक्सेक्ल" देंमाक्ता।<sup>23</sup> मिनु ओरनानमी दाऊद कली "मेको ताक्कीन। हजुर, पिपम मार पचा दाक्नीनी, मेको पने। चोशा चढेचा कली ब्यफपुकी गेनुड। शी कली दांइ पशो शी बाक्ब। अन्न चढेचा कली चेरब बाक्ब। गो मो गेता" देंमाक्ता।<sup>24</sup> तन्न पिप दाऊदमी ओरनान कली "ममाइ, गो नेल्ल गिश बाक्मे मिश क्येट थाप्नुड। गो मोशा इ मार मार ताक्शा परमप्रभु यावे कली मचढेनुड" देंमाक्ता।<sup>25</sup> मोपतीके दाऊदमी ओरनान कली मेको रू डा ६ सहे सुन के शेकेल नाक्शा गेवा बाक्ता। *सेकेल का ११.५ ग्राम डा चांदी के क्येट बाक्ब।*<sup>26</sup> मिनु दाऊदम मेकेर परमप्रभु यावे कली चढेतीक का सेला बाक्ता। मिनु चोशा चढेतीक नु दुशा बाक्चा आ पर्वम चढेतीक चढेवा बाक्ता। मिनु परमप्रभु यावे आ नें थिशा पुना बाक्ता। परमप्रभु यावेमी सरीड रे चोशा चढेतीके तारी मी तोक्शा लोव्र लेक्ता बाक्ता। *१राजा १८:२४*<sup>27</sup> मिनु परमप्रभु यावेमी आ स्वर्ग डा गेय पाइब कली "इ तरवार खोतम पिप्तो" दे मदा बाक्ता।

<sup>28</sup> मेना दाऊदम परमप्रभु यावेम यबुसी ओरनान आ खलाम आ लोव्र लेक्ताक्पी, दे तुइश्शा मेकेर चढेवा बाक्ता।<sup>29</sup> मोसाम गोरशो रागीम सेल्शो परमप्रभु यावे आ बाक्तीक नु चढेतीके मेना सम्म गिबोन इर डा पूजा पतीकेम बाक्शो बाक्माक्ता। *१राजा ३:४; २इतिहास १:३, ६*<sup>30</sup> तन्न दाऊद परमप्रभु कली पुंइचा मेकेर लने मचाप्शो बाक्माक्ता। मारदे हना परमप्रभु यावे आ स्वर्ग डा गेय पाइब आ तरवार क्येडा हिंमाक्ता।

### परमप्रभु यावे आ खिं सेल्चा चिक्शो

**22** मिनु दाऊदमी "एकेर परमप्रभु आ खिं नु इस्राएलीपुकीमी परमप्रभु यावे कली चोशा चढेतीक सेल्चा माल्ब" देंमाक्ता।

<sup>2</sup> मिनु दाऊदमी "इस्राएलम बाक्ब अर्को रागी डा मुर आन कली बुक्कीन" दे अरेवा बाक्ता। मिनु मेको आन कली परमप्रभु आ खिं सेल्चा कली फुल्लु खोइक्तीक गेय गेमी बाक्ता।<sup>3</sup> दाऊदमी शुश फलाम नु कांसा गेवा बाक्ता। मेको लाप्चो नु लाप्चो डा शी आन कली कांटी नु ग्याइक्पाइक्तीके सेल्चा कली वोइश्शो बाक्ता। मेको नाक्ने मचाप्चा डा पा शुश बाक्शो बाक्ता।<sup>4</sup> मिनु हिव्के मचाप्चा डा पा लेबानोन डा लाइश्शो रवा आन शी तेल्पाइमी बाक्ता। मारदे हना सीदोन नु टायर डा मुरपुकीमी दाऊद कली लेबानोन डा रवा आन शी शुश चाक्गामे बाक्ता।<sup>5</sup> मिनु दाऊदमी "आं तौ सोलोमन मुल सम्म आइक्च नु मतुइक्ब बाक्ब। परमप्रभु यावे कली सेल्शो खिं थम दारशो, रागी नेल्लेमी मिम्चा डा पा नु ठेयब दुम्चा माल्ब। मोपतीके गो मेको सेल्चा कली मारेइ मारेइ ठीक पचा माल्नुड" देंमाक्ता। मिनु दाऊदम आ बेक्चा क्येडा डोंइती मार मार शुश तेल्मी बाक्ता। *१इतिहास २९:१*

<sup>6</sup> मिनु नोले दाऊदमी आ तौ सोलोमन कली ब्रेथ सोइक्ता बाक्ता। मेको कली "परमप्रभु यावे इस्राएली आन परमप्रभु कली खिं का सेलो" दे अरेवा बाक्ता।<sup>7</sup> मिनु सोलोमन कली "आं तौ, गो परमप्रभु यावे, आं परमप्रभु कली खिं का सेल्चा थुं पशो बाक्ती।<sup>8</sup> तन्न परमप्रभु यावेमी आं कली लोव्र पाप्नु। मेकोमी 'गे शुश हुश खाक्श पोक्तीवी। गे ठेयब ठेयब लडाइ पाप्तीवी। मोपतीके आं कली खिं सेल्चा मद्दुम्ब। मारदे गे आं डोंइती रागीम शुश हुश खाक्श पोक्शो बाक्नेवे।<sup>9</sup> गे तौ का थीनेवे। मेको लडाइ मपाइब मुर दुम्ब। गो मेको आ एर ओंथ डा जोरी सत्रु नेल्ल आन कली लडाइ मपाइक्नुड। मिनु मेको आ नें सोलोमन दुम्चा माल्ब। आ सासन पची ना, गो इस्राएलम लडाइ मद्दुम्पाइक्थु रिम्शो पा बाक्चा गेनुड।<sup>10</sup> मेकोमी आं नें ठेयब सेल्चा कली खिं का सेल्चा माल्ब। मिनु मेको आं तौ दुम्ब। मिनु गो मेको आ आफ दुम्नुड। गो इस्राएलम मेको आ सासन पतीके गेना हना यो बोल्पो सेल्नुड' दे परमप्रभुम आं कली देंत।<sup>11</sup> आं तौ, परमप्रभु यावे गे नु बाक्ता। मिनु परमप्रभु यावे, इ परमप्रभुमी इ पर्वम देंशो खोर्देशो पा गे मेको कली खिं

सेल्चा माल्नेवे। मेको गेय नेल्ल रिम्शो दुम्ब।<sup>12</sup> परमप्रभु यावेमी इ कली रुप्तीक नु जोक्ब तुइक्ब थुं गेवल। मेकोमी इ कली इसाएल कली सासन पचा गेवानु, गे परमप्रभु यावे, इ परमप्रभु आ अरेशो लोत्र टिशा पाइब दुम्नेवे।<sup>13</sup> परमप्रभु यावेमी मोसा कली आ फुल्लुम मुशा ब्रेवशो लोत्र नु निसाफ पतीक लोत्र इसाएली आन कली टिशा पचा कली गेशो बाक्त। गे मेको नेल्ल पाप्तीवी हना, इ गेय रिम्शो दुम्ब। गे बोल्यो नु महिं दुमो। हिंशा इ थुं लुक्च लचा मगेवो। १राजा २:२-३<sup>14</sup> गो शुश श्येत पा परमप्रभु यावे आ खिं सेल्चा कली मार वोइक्ता देशा हना, लाख का टलेन्ट सुन, १० लाख टलेन्ट चांदी नु नाक्ने मचाप्चा डा पा कांसा नु फलाम खेक्शा वोइक्तामी। मारदे हना मेकेर शुश बाक्शो बाक्त। शी नु फुल्लुपुकी यो ठीक पा वोइक्तामी। गे अर्को यो तेम्चा माल्नेवे। टलेन्ट का ३४ किलो बाक्ब। १इतिहास २९:२<sup>15</sup> गे नु शुश गेय पाइब बाक्शो बाक्नीम। मार गेय पाइब बाक्शो बाक्नीम देशा हना, फुल्लु खोइक्ब, गारो प्रोवब, शी के गेय पाइब, शुश दारशो गेय जोक्शा पाइब यो बाक्नीम।<sup>16</sup> मेकोपुकीमी सुन, चांदी, कांसा नु फलाम के मारेइ मारेइ गेय पाइब बाक्नीम। मुल गेय पचा गोवो। परमप्रभु यावे गे नु बाक्ल” दे दाऊदमी सोलोमन कली मदा बाक्त।

<sup>17</sup> मिनु दाऊदमी इसाएली आन ठेयब मुर नेल्ल आन कली “आं तौ सोलोमन कली वारच पने।<sup>18</sup> परमप्रभु यावे, इन परमप्रभु गेपुकी नु बाक्ब। मेकोमी इन रागी नेल्लेमी काइ लडाइ मदुपद। इन थुं नाइक्पाइश्शा वोइक्तु। मेकोमी एको रागी डा मुर आन कली आं गुइमी गेशो बाक्त। मारदे हना परमप्रभु यावेमी एको रागी डा मुर आं गुइम गेती। मेको रागीपुकी परमप्रभु यावे नु आ मुर आन सासनमी वोइक्तु। १इतिहास २३:२५<sup>19</sup> मुल इन थुं नेल्लेमी परमप्रभु यावे, इन परमप्रभु कली मालीन। मिनु परमप्रभु यावे, परमप्रभु आ बाक्तीक सेल्चा गोने। मिनु नोले परमप्रभु यावे आ कबल पशो सन्दोस नु परमप्रभु आ ग्योबपुकी परमप्रभु यावे कली सेल्शो खिंमी वोइक्चा माल्नीनी” दे माइक्मी बाक्त।

लेवी नु चढेब आन गेय

**23** मिनु दाऊद खूशो नु शुश बर्स दुम्शा, आ तौ सोलोमन कली इसाएल डा पिप सेला बाक्त। १राजा १:२८-४०<sup>2</sup> मिनु मेकोमी इसाएली आन ठेयब मुर नेल्ले नु चढेबपुकी नु लेवी आन कली गुम्पाइक्मी बाक्त।<sup>3</sup> मिनु ३० बर्स गाप्शो नु मेको क्येडा लाक्शो लेवी आन कली हिक्शोनु, मेको नेल्ल ३८ हजार बाक्मा बाक्त।<sup>4</sup> मिनु दाऊदमी लेवी आन पर्बम “मेको आन दाते डा २४ हजार परमप्रभु यावे आ खिं डा गेय कोव्रचा माल्नीम। ६ हजार मेको आन ठेयब मुर नु निसाफ पाइब दुम्चा माल्नीम।<sup>5</sup> मिनु ४ हजार लाप्चो खाल पाइब दुम्चा माल्नीम। मिनु नोले डा ४ हजार आं गेशो बाजापुकी ताप्शा, परमप्रभु यावे कली ठेयब सेल्तीक कुम्सो पचा माल्नीम” देमाक्त।<sup>6</sup> मिनु दाऊदम मेको आन कली लेवी आ तौ गेरशोम, कोहाथ नु मेरारी का का पा हुल पा योक्शा गेमी बाक्त। १इतिहास ६:१<sup>7</sup> गेरशोम आ तौ लादान नु शिमेइ बाक्सा बाक्त।<sup>8</sup> लादान आ डोंइती थिशी तौ येहीएल ठेयब मुर बाक्मा बाक्त। आ नोले डा जेथाम नु योएल नेल्ल पा सां बाक्मा बाक्त। १इतिहास २६:२१<sup>9</sup> शिमेइ आ तौ शेलोमोथ, हजीएल नु हारान सां बाक्मा बाक्त। मेकोपुकी लादान आ खिं डा ठेयब मुर बाक्मा बाक्त।<sup>10</sup> मिनु शिमेइ आ तौ याहाथ, जीना, येऊश नु बेरीआ, ४ जना बाक्मा बाक्त।<sup>11</sup> याहाथ मेको आन ठेयब मुर बाक्मा बाक्त। मेको आ नोले डा जीजाह बाक्मा बाक्त। तन्न येऊश नु बेरीआ आस के शुश तौ मबाक्तीके मेको आस कली खिं का डा मुर हुल का सेल्शा हिक्चा पुंडसमा बाक्त।

<sup>12</sup> कोहाथ आ तौ अग्राम, इच्हार, हेब्रोन नु उज्जीएल ४ जना बाक्मा बाक्त।<sup>13</sup> अग्राम आ तौ हारून नु मोसा बाक्सा बाक्त। हारून नेल्ल क्येडा चोव्रखो चढेतीक गेय पाइब सेल्चा कली योव्रचा पुंडसे बाक्त। मेको नु आ तौपुकी गेना हना यो परमप्रभु यावे आ डोंइती चढेचा माल्दमे बाक्त। परमप्रभु आ डोंइती गेय पचा कली नु आ नेमी गेना हना यो आसीक गेचा कली योव्रशो बाक्मा बाक्त। १इतिहास ५:२९; १इतिहास ६:३४; ब्यवस्था १०:८; गन्ती ६:२४-२७<sup>14</sup> मोसा परमप्रभु आ मुर बाक्शो बाक्मा बाक्त। मेको नु आ तौपुकी अरु लेवी आ थर डा मुर खोदेशो पा हिक्शो बाक्मा बाक्त।

<sup>15</sup> मोसा आ तौ गेरशोम नु एलीएजर बाक्सा बाक्त। प्रस्थान १८:३-४<sup>16</sup> गेरशोम आ तौ शेबुएल ठेयब मुर का बाक्मा बाक्त। मेको डोंइती डा बाक्मा बाक्त। १इतिहास २६:२४<sup>17</sup> एलीएजर आ तौ रेहब्याह ठेयब मुर बाक्मा बाक्त। मेको एलीएजर आ तौ का ला बाक्मा बाक्त। तन्न रेहब्याह के तौ शुश बाक्मा बाक्त। १इतिहास २४:२१-३०<sup>18</sup> इच्हार आ तौ शेलोमीथ ठेयब मुर बाक्मा बाक्त।<sup>19</sup> हेब्रोन आ तौ येरीयाह ठेयब मुर बाक्मा बाक्त। मेको आ माइला अमारयाह, आ साइला याहासीएल, नु आ कान्छा येकामेआम बाक्मा बाक्त।<sup>20</sup> उज्जीएल आ तौ मीकाह ठेयब मुर बाक्मा बाक्त। मेको आ नोले डा तौ इस्थीयाह बाक्मा बाक्त।

<sup>21</sup> मेरारी आ तौ माहली नु मुशी बाक्सा बाक्त। माहली आ तौ एलाजर नु कीश बाक्सा बाक्त। १इतिहास ६:४<sup>22</sup> एलाजर तौ मथिथु बेक्मा बाक्त। मेको के तमीपुकी ला बाक्मा बाक्त। मेको आ लोक्ब कीश आ तौपुकीमी मेको आन कली ग्युंवे पामे बाक्त।<sup>23</sup> मुशी आ तौपुकी माहली, एदेर नु येरेमोथ सां बाक्मा बाक्त।

<sup>24</sup> मेको लेवी आ थर डा खिं खिं डा मुर बाक्मा बाक्त। मेको खिं खिं डा २० बर्स गाप्शो नु मेको क्येडा लाक्शो बाक्मा बाक्त। मेको आन कली हिक्शा, आन नें ब्रेवशो बाक्मा बाक्त। मारदे हना मेकोपुकी परमप्रभु यावे आ खिंम गेय पचा माल्बाक्मा बाक्त।<sup>25</sup> मिनु दाऊदमी “परमप्रभु यावे, इसाएली आन परमप्रभुमी आ मुर आन कली थुं नाइक्चा गेशो बाक्ब। मिनु परमप्रभु यरूसलेम सहरम गेना हना यो बाक्ब।<sup>26</sup> मोपतीके मुल रे लेवी आ थर डा मुरपुकी परमप्रभु यावे आ बाक्तीके नु मेको आ मार मार ग्योबपुकी गेनायो कुरचा ममाल्नीम” देमाक्त। योएल ४:२१<sup>27</sup> दाऊद आ नोले देशो लोत्र रे पा मेको २० बर्स गाप्शो नु मेको क्येडा लाक्शो लेवी आ थर डा मुर हिक्चा बाक्मा बाक्त।<sup>28</sup> मेकोपुकीमी हारून आ तौ परमप्रभु यावे आ खिं डा गेय पतीकेम वारच पचा माल्मा बाक्त। लाडगा नु कोठापुकी कोव्रचा, चोव्रखो थोव्रकपुकी सफा पचा, परमप्रभु आ खिं डा अरु गेय नेल्ल पचा माल्बाक्मा बाक्त।<sup>29</sup> मिनु मेकोपुकीमी चढेचो शोब्ले वोइक्चा कली, अन्न चढेतीक डा रिम्शो फसी, बोरब ओख्ती मसुप्शो शोब्ले, तेल ब्वाइश्शो चढेतीक, नेल्ल नाक्तीक गेयम वारच पचा माल्बाक्मा बाक्त।<sup>30</sup> मिनु मेकोपुकी सुनी कुस कुस नु नाक्दो कुस कुस परमप्रभु यावे आ डोंइती “गे रिम्शो पाइब बाक्नीनी” दे ठेयब सेल्चा माल्बाक्मा बाक्त।<sup>31</sup> नाइक्तीक नाक्त परमप्रभु यावे कली चोशो चढेतीक चढेचा कली, औसी नाक्त नु नेल्ल पचा डा चाड डा चढेतीके गेय परमप्रभु यावे आ डोंइती वारच पचा माल्बाक्मा बाक्त।

<sup>32</sup> मोपा मेकोपुकीमी गुम्तीक ताम्बु नु चोव्रखो बाक्तीक नेल्ल कोव्रचा माल्मा बाक्त। मिनु मेकोपुकीमी हारून आ तौ चच आन दी बाक्शा परमप्रभु यावे आ खिं डा गेय पचा माल्बाक्मा बाक्त।

चढेब आन गेय पाइब योव्रशो

**24** मिनु योव्रसीशो हारून आ तौ चच सु सु बाक्मा बाक्त देशा हना, आ तौ नादाब, अबीहु एलाजर नु इथामार बाक्मा बाक्त। १इतिहास २३:६; १इतिहास ५:२९<sup>2</sup> नादाब नु अबीहु चहिं आस आफ बेक्चा क्येडा डोंइती तौ मथिथु, बेक्सा बाक्त। मोपतीके एलाजर नु इथामार चढेब दुम्शो बाक्सा बाक्त।<sup>3</sup> मिनु दाऊदमी एलाजर नु आ तौ सादोक नु इथामार नु आ तौ अहीमेलेक नु मेको आन गेय पचा कली हुल सेल्शा गेमी बाक्त।<sup>4</sup> मिनु इथामार आ खिं खिं डा ठेयब मुर आन क्येडा एलाजर आ खिं खिं डा मुर शुश बाक्शो बाक्मा बाक्त। मोपतीके एलाजर आ तौ आन खिं खिं डा ठेयब मुर १६ जना आन कली हुल हुल सेल्मे बाक्त। इथामार आ तौ आन खिं खिं डा ठेयब मुर ८ जना आन कली हुल हुल सेल्मे बाक्त।<sup>5</sup> मिनु आन दातेम बाजी आप्शा, आन हुल हुल सेल्मे बाक्त। मारदे हना एलाजर नु इथामार आस तौ आस खिं खिं डा मुर नेल्ल खाल का डा ठेयब मुर बाक्मा बाक्त। मेको नेल्ले परमप्रभु नु आ बाक्तीक डा ठेयब मुर बाक्मा बाक्त।<sup>6</sup> नेथनेल आ तौ शेमायाह, लेवी आ थर डा ब्रेक्ब का बाक्मा बाक्त। मेकोमी पिप नु ठेयब मुरपुकी, चढेब सादोक, अबीयाथार आ तौ अहीमेलेक, चढेब लेवी आन खिं खिं डा ठेयब मुर आन डोंइती चढेब आन नें ब्रेक्ता बाक्त।

एलाजर आ खिं खिं डा नु इथामार आ खिं खिं डा गेय पतीक हुल सेल्मे बावक्त। १इतिहास १८:१६

7 मिनु डॉइती डा बाजी आप्शो येहो-यारीब आ नेंमी, मेको आ नोले डा बाजी येदायाह आ नेंमी, 8 मेको आ नोले डा बाजी हारीम आ नेंमी, मेको आ नोले डा बाजी सेओरीम आ नेंमी, 9 मेको आ नोले डा बाजी माल्कीयाह आ नेंमी, मेको आ नोले डा बाजी मियामीन आ नेंमी, 10 मेको आ नोले डा बाजी हककोस आ नेंमी, मेको आ नोले डा बाजी अबीयाह आ नेंमी, लूका १:५ 11 मेको आ नोले डा बाजी येशुआ आ नेंमी, मेको आ नोले डा बाजी शेकन्याह आ नेंमी, 12 मेको आ नोले डा बाजी एल्याशीब आ नेंमी, मेको आ नोले डा बाजी याकीम आ नेंमी, 13 मेको आ नोले डा बाजी हुप्पाह आ नेंमी, मेको आ नोले डा बाजी येशेबे-आब आ नेंमी, 14 मेको आ नोले डा बाजी बिल्याह आ नेंमी, मेको आ नोले डा बाजी इम्मेर आ नेंमी, 15 मेको आ नोले डा बाजी हेजीर आ नेंमी, मेको आ नोले डा बाजी हप्पीसेस आ नेंमी, 16 मेको आ नोले डा बाजी पेथायाह आ नेंमी, मेको आ नोले डा बाजी येहेजकेल आ नेंमी, 17 मेको आ नोले डा बाजी याकीन आ नेंमी, मेको आ नोले डा बाजी गामुल आ नेंमी, 18 मेको आ नोले डा बाजी देलायाह आ नेंमी नु मेको आ नेल्ल क्येडा नोले डा बाजी माजीयाह आ नेंमी दुम्मावक्त। नेल्ल पा २४ हुल बाक्मा बावक्त। 19 मेको आन किकी हारूनमी गेशो पतीक लोत्र गेय बाक्मावक्त। दोपा परमप्रभु यावे आ खिं लचा ब्रेक्शो बावक्त। परमप्रभु यावे, इस्राएली आन परमप्रभुमी हारून कली गेशा शेंशो लोत्र खोदेशो बाक्शो बावक्त। हारून आ खिं खिं डा लेवी आन गेय पचा माल्मा बावक्त।

#### लेवी आ थर डा अरु मुरपुकी

20 मिनु लीशो लेवी आ थर डा मुर सु सु बाक्मा बावक्त देंशा हना, अग्राम आ तौ आन दाते डा शुबाएल बाक्मावक्त। शुबाएल आ तौ आ दाते डा येहदयाह बाक्मावक्त। 21 रेहब्याह आ तौ आन दाते डा मेको आन ठेयब मुर इस्शीयाह बाक्मावक्त। 22 इच्चार आ तौ आन दाते डा शेलोमोथ बाक्मावक्त। शेलोमोथ आ तौ आन दाते डा याहाथ बाक्मावक्त। 23 हेब्रोन आ तौ आन दाते डा येरीयाह मेको आन ठेयब मुर बाक्मावक्त। मेको आ माइला अमारयाह बाक्मावक्त। आ साइला याहासीएल बाक्मावक्त। आ कान्छा येकामेआम बाक्मावक्त। 24 उज्जीएल आ तौ आन दाते डा मीकाह बाक्मावक्त। मीकाह आ तौ आन दाते डा शामीर बाक्मावक्त। 25 मिनु मीकाह आ लोक्ब इस्शीयाह आ तौ आन दाते डा जकरिया बाक्मावक्त। 26 मेरारी आ तौ आन दाते डा माहली नु मुशी बाक्मावक्त। याजीयाह आ तौ बेनो बाक्मावक्त। 27 मेरारी आ तौ चच आन दाते डा याजीयाह, बेनो, शोहाम, जाक्कुर नु इब्री बाक्मा बावक्त। 28 माहली आ तौ आन दाते डा एलाजर बाक्मावक्त। मेको के तौ मबाक्मा। 29 कीश आ तौ आन दाते डा येराहमेल बाक्मावक्त। 30 मिनु मुशी आ तौ आन दाते डा माहली, एदेर नु येरीमोथ बाक्मा बावक्त। मेको लेवी आ थर डा खिं खिं डा मुर बाक्मा बावक्त। 31 मेकोपुकीमी पिप दाऊद, सादोक अहीमेलेक नु चढेब आन खिं खिं डा ठेयब मुरपुकी नु लेवी आ थर डा मुर आन डॉइती बाजी आप्मे बावक्त। खिं खिं डा ठेयब मुर नु नेल्ल क्येडा आइक्च नेल्लेम खाल का डा पामे बावक्त। मिनु गेना गेय पचा, दे यो बाजी आप्मे बावक्त। १इतिहास २५:८

#### कुम्सो पाइब नु ताप्ब योत्रशो

25 दाऊद नु आ कप्तानपुकीमी आसाफ आ तौपुकी, हेमान आ तौपुकी नु येदुथून आ तौ आन कली परमप्रभु यावे आ सोक्तीम ब्रीशा आइक्च नु ठेयब तार पाइश्शो ताप्तीके नु बुप्केल ताप्चा कली योत्रडमे बावक्त। मेको गेय पाइब आन नें ब्रेक्तमे बावक्त। १इतिहास १५:१९ 2 मिनु सु बाक्मा बावक्त देंशा हना, आसाफ आ तौ आन दाते डा जाक्कुर, योसेफ, नेथन्याह नु अशारेलाह बाक्मा बावक्त। आसाफ मेको आन कली अरेब बाक्मावक्त। आसाफमी पिप आ देंशो परमप्रभु यावे आ सोक्तीम ब्रीशो कुम्सो सेला बावक्त। 3 येदुथून आ तौ नु गेदाल्याह, सेरी, येशायाह, शिमेइ, हशाब्याह नु मत्तीथ्याह ६ जना बाक्मा बावक्त। आन आफ येदुथून मेको आन

कली अरेब बाक्मावक्त। मेकोमी बीना ताप्चा परमप्रभु यावे आ सोक्तीम ब्रीशा “गे रिम्शो पाइब बाक्नीनी” दे ठेयब सेल्ल्तीक कुम्सो पवा बावक्त। 4 हेमान आ तौपुकी बुक्कीयाह, मत्तन्याह, उज्जीएल, शेबुएल, येरीमोथ, हनान्याह, हानानी, एली-आथा, गिदाल्ती, रोमाम्ती-एजेर, योश्वे-काशाह, माल्लोथी, होथीर नु माहाजी-ओथ बाक्मा बावक्त। 5 मेको नेल्ल पिप कली परमप्रभु आ लोत्र पाइब हेमान आ तौ बाक्मा बावक्त। मेकोपुकीमी परमप्रभु आ देंशो खोदेशो पा परमप्रभु कली ठेयब सेल्चा माल्मा बावक्त। मारदे हना परमप्रभुमी हेमान कली १४ जना तौ नु तमी सां गेशो बाक्मावक्त। २इतिहास ३५:१५ 6 मिनु आन आफोमी परमप्रभु यावे आ खिं मेको नेल्ल आन कली बीना ताप्चा, तार पाइश्शो ताप्तीके ताप्चा नु बुप्केल ताप्चा कली शेंशो बाक्मावक्त। पिपमी आसाफ, येदुथून नु हेमान आन कली दोपा अरेवा, मोपा पामे बावक्त। 7 मेको नु आन खिं खिं डा मुरपुकी परमप्रभु यावे कली कुम्सो पचा शेंसीशो बाक्मा बावक्त। नेल्ल तुइक्ब जोक्ब बाक्शो बाक्मा बावक्त। कुम्सो पाइब नेल्ल सहे निक्शी ८८ जना बाक्मा बावक्त। 8 मिनु मेकोपुकीमी गेना गेय पचा, दे बाजी आप्मे बावक्त। आइक्च नु ठेयब, शेंसीब नु शेंब खाल का डा बाक्मा बावक्त। १इतिहास २४:३१

9 मिनु डॉइती डा बाजी आप्शो आसाफ आ तौ योसेफ आ नेंम गूमावक्त। मिनु मेको आ नोले डा गेदाल्याह, आ लोक्बपुकी नु आ तौ आन नेंम दुम्मावक्त। मेको नेल्ल १२ जना बाक्मा बावक्त। 10 मेको आ नोले डा बाजी जाक्कुर, आ तौपुकी नु आ लोक्ब आन नेंमी दुम्मावक्त। मेको नेल्ल १२ जना बाक्मा बावक्त। 11 मेको आ नोले डा बाजी इज्री, आ तौपुकी नु आ लोक्ब आन नेंमी दुम्मावक्त। मेको नेल्ल १२ जना बाक्मा बावक्त। 12 मेको आ नोले डा बाजी नेथन्याह, आ तौपुकी नु आ लोक्ब आन नेंमी दुम्मावक्त। मेको नेल्ल १२ जना बाक्मा बावक्त। 13 मेको आ नोले डा बाजी बुक्कीयाह, आ तौपुकी नु आ लोक्ब आन नेंमी दुम्मावक्त। मेको नेल्ल १२ जना बाक्मा बावक्त। 14 मेको आ नोले डा बाजी येसारेला, आ तौपुकी नु आ लोक्ब आन नेंमी दुम्मावक्त। मेको नेल्ल १२ जना बाक्मा बावक्त। 15 मेको आ नोले डा बाजी येशायाह, आ तौपुकी नु आ लोक्ब आन नेंमी दुम्मावक्त। मेको नेल्ल १२ जना बाक्मा बावक्त। 16 मेको आ नोले डा बाजी मत्तन्याह, आ तौपुकी नु आ लोक्ब आन नेंमी दुम्मावक्त। मेको नेल्ल १२ जना बाक्मा बावक्त। 17 मेको आ नोले डा बाजी शिमेइ, आ तौपुकी नु आ लोक्ब आन नेंमी दुम्मावक्त। मेको नेल्ल १२ जना बाक्मा बावक्त। 18 मेको आ नोले डा बाजी अजारेल, आ तौपुकी नु आ लोक्ब आन नेंमी दुम्मावक्त। मेको नेल्ल १२ जना बाक्मा बावक्त। १इतिहास १२:७ 19 मेको आ नोले डा बाजी हशाब्याह, आ तौपुकी नु आ लोक्ब आन नेंमी दुम्मावक्त। मेको नेल्ल १२ जना बाक्मा बावक्त। 20 मेको आ नोले डा बाजी शुबाएल, आ तौपुकी नु आ लोक्ब आन नेंमी दुम्मावक्त। मेको नेल्ल १२ जना बाक्मा बावक्त। 21 मेको आ नोले डा बाजी मत्तीथ्याह, आ तौपुकी नु आ लोक्ब आन नेंमी दुम्मावक्त। मेको नेल्ल १२ जना बाक्मा बावक्त। 22 मेको आ नोले डा बाजी येरीमोथ, आ तौपुकी नु आ लोक्ब आन नेंमी दुम्मावक्त। मेको नेल्ल १२ जना बाक्मा बावक्त। 23 मेको आ नोले डा बाजी हनान्याह, आ तौपुकी नु आ लोक्ब आन नेंमी दुम्मावक्त। मेको नेल्ल १२ जना बाक्मा बावक्त। 24 मेको आ नोले डा बाजी योश्वे-काशाह, आ तौपुकी नु आ लोक्ब आन नेंमी दुम्मावक्त। मेको नेल्ल १२ जना बाक्मा बावक्त। 25 मेको आ नोले डा बाजी हानानी, आ तौपुकी नु आ लोक्ब आन नेंमी दुम्मावक्त। मेको नेल्ल १२ जना बाक्मा बावक्त। 26 मेको आ नोले डा बाजी माल्लोथी, आ तौपुकी नु आ लोक्ब आन नेंमी दुम्मावक्त। मेको नेल्ल १२ जना बाक्मा बावक्त। 27 मेको आ नोले डा बाजी एली-आथा, आ तौपुकी नु आ लोक्ब आन नेंमी दुम्मावक्त। मेको नेल्ल १२ जना बाक्मा बावक्त। 28 मेको आ नोले डा बाजी होथीर, आ तौपुकी नु आ लोक्ब आन नेंमी दुम्मावक्त। मेको नेल्ल १२ जना बाक्मा बावक्त। 29 मेको आ नोले डा बाजी गिदाल्ती, आ तौपुकी नु आ लोक्ब आन नेंमी दुम्मावक्त। मेको नेल्ल १२ जना बाक्मा बावक्त। 30 मेको आ नोले डा बाजी डा माहाजी-ओथ, आ तौपुकी नु आ लोक्ब आन नेंमी दुम्मावक्त। मेको नेल्ल १२ जना बाक्मा बावक्त। 31 मेको आ नेल्ल क्येडा नोले डा बाजी रोमाम्ती-एजेर, आ तौपुकी नु आ लोक्ब आन नेंमी दुम्मावक्त। मेको नेल्ल १२ जना बाक्मा बावक्त।

## लाच्यो खाल पाइब योव्रशो

26 मिनु लाच्यो खाल पतीक गेय पाइब सु सु बाक्मा बाक्त देंशा हना, कोराह आ खिं खिं डा मुर आसाफ आ तौ रे कोराह आ तौ मेशेलेम्याह बाक्मावाक्त। २इतिहास ८:१४; २इतिहास ३५:१५ २ मेशेलेम्याह आ डोंइती थिशो तौ जकरिया, आ माइला येदीएल, आ साइला जेबदीयाह, आ काइला याथनीएल, ३ आ अन्तरे एलाम, आ जन्तरे येही-हानान नु आ कान्छा एली-ए-होएनाइ बाक्मा बाक्त। ४ ओबेद-एदोम आ डोंइती थिशो तौ शेमायाह, आ माइला येही-जाबाद, आ साइला योआह, आ काइला साकार, आ अन्तरे नेथनेल, २सामुएल ६:११ ५ आ जन्तरे अम्मीएल, आ खन्तरे इस्साकार नु आ कान्छा पेउल्लेथाइ ८ जना बाक्मा बाक्त। मारदे हना परमप्रभुमी ओबेद-एदोम कली आसीक गेशो बाक्मावाक्त। ६ मेको आ तौ शेमायाह के यो तौपुकी बाक्मा बाक्त। मेको आन खिं खिं डा ठेयब मुर बाक्मा बाक्त। मारदे हना मेकोपुकी शुश जोक्ब तुइक्ब मुर बाक्मा बाक्त। ७ शेमायाह आ तौपुकी ओथनी, रेफाएल, ओबेद नु एल्जाबाद बाक्मा बाक्त। मेको आन लोक्ब एलीहु नु सेमक्याह यो जोक्ब तुइक्ब मुर बाक्सा बाक्त। ८ मेको ओबेद-एदोम आ तौपुकी, मेको आन तौ नु आन लोक्ब नेल्ले मेको गेय पचा कली जोक्ब तुइक्ब बाक्मा बाक्त। ओबेद-एदोम आ मुर नेल्ले पा ६२ जना बाक्मा बाक्त। ९ मेशेलेम्याह आ तौपुकी नु आ लोक्बपुकी नेल्ल जोक्ब तुइक्ब मुर बाक्मा बाक्त। मेको नेल्ल १८ जना बाक्मा बाक्त। १० मेरारी आ तौ होसाह आ तौपुकी सु सु बाक्मा बाक्त देंशा हना, शिम्मी आ डोंइती थिशो तौ मबाक्त हना यो, मेको आन ठेयब मुर बाक्मावाक्त। आ आफोमी मेको कली ठेयब मुर सेला बाक्त। ११ मिनु होसाह आ तौ माइला हिल्कीयाह, आ साइला तेबल्याह नु आ कान्छा जकरिया बाक्मा बाक्त। होसाह आ तौपुकी नु आ लोक्बपुकी नेल्ल १३ जना बाक्मा बाक्त। १२ परमप्रभु यावे आ खिं डा लाच्यो खाल पाइब आन हुल नु आन ठेयब मुर आन खिं खिं डा मुरपुकी खोदेंशो पा परमप्रभु यावे आ खिम गेय पचा कली योव्रशो बाक्मा बाक्त। १३ मिनु मेकोपुकीमी आन खिं खिं डा मुर कली तेको लाच्यो खाल पचा, दे बाजी आप्मे बाक्त। खूशो नु ठिटा नेल्ल कली खाल का डा पा बाजी आप्मे बाक्त। १४ मिनु पूर्ब डा लाच्यो खाल पचा कली शेलेम्याह आ नैम दुम्मावाक्त। मेकोपुकीमी आ तौ जकरिया आ पर्बम यो बाजी आप्मे बाक्त। मिनु उत्तर डा लाच्यो खाल पचा कली दुम्मावाक्त। जकरिया रिम्शो अर्ती गेब बाक्मावाक्त। १५ ओबेद-एदोम दक्खिन डा ठेयब लाच्यो खाल पाइब दुम्मावाक्त। आ तौ आन गेय मार मार वोइक्तीक खिं कोव्रतीक बाक्मावाक्त। १६ मिनु शुप्पीम नु होसाह पच्छिम डा लाच्यो नु शल्लेकेथ माइशो लाच्यो खाल पाइब दुम्सा बाक्त। मेको लाच्यो ग्येथ लतीक लाम नेक्नेक्था बाक्मावाक्त। १७ मिनु पूर्ब गे नाक्त किंत किंत ६ जना लेवी, उत्तर गे नाक्त किंत किंत ४ जना, दक्खिन गे नाक्त किंत किंत ४ जना खाल पाइब बाक्मा बाक्त। मार मार वोइक्तीक खिं खाल पचा कली नाक्त किंत किंत निक्निक्शी मुर बाक्सा बाक्त। १८ परमप्रभु यावे आ खिं डा पच्छिम गे डा लाम ४ जना खाल पाइब बाक्मा बाक्त। आ खिं आ नेक्था चहिं खाल पाइब निक्शी बाक्सा बाक्त। १९ मेको नेल्ल कोराह नु मेरारी आस खिं खिं डा लाच्यो खाल पाइब आन हुल बाक्मा बाक्त।

## परमप्रभु आ मार मार कोव्रब मुर

20 मिनु अरु लेवी आ थर डा मुर आन गेय मार बाक्त देंशा हना, परमप्रभु आ खिं डा मार मार शोंप वोइक्तीके नु मार मार परमप्रभु कली गेशो वोइक्तीके कोव्रब अहीयाह बाक्मावाक्त। २१ लादान आ तौपुकी, लादान आ खिं डा गेरशोनी नेल्ले, गेरशोनी आ खिं डा ठेयब मुर येहीएली बाक्मा बाक्त। १इतिहास २३:८ २२ येहीएली आ तौ जेथाम नु आ लोक्ब योएल परमप्रभु यावे आ खिं डा मार मार शोंप वोइक्तीके कोव्रब बाक्मा बाक्त। २३ मिनु अग्राम आ खिं डा मुरपुकी, इच्चार आ खिं डा मुरपुकी, हेब्रोन आ खिं डा मुरपुकी नु उज्जीएल आ खिं डा मुरपुकी २४ मार मार वोइक्तीके कोव्रब आन ठेयब मुर शेबुएल बाक्मावाक्त। मेको मोसा आ चच, गेरशोम आ तौ

बाक्मावाक्त। १इतिहास २३:१६ २५ गेरशोम आ लोक्ब एलीएजर आ तौ रेहब्याह बाक्मावाक्त। मेको आ तौ येशायाह, येशायाह आ तौ योराम योराम आ तौ जिक्री नु जिक्री आ तौ शेलोमोथ बाक्मा बाक्त। १इतिहास २३:१७ २६ शेलोमोथ नु आ लोक्बपुकी पिप दाऊदमी गेशो, खिं खिं डा ठेयब मुरपुकीमी गेशो, हजार हजार लडाइ पाइब आन कप्तानपुकीमी गेशो नु सहे सहे डा लडाइ पाइब आन कप्तानपुकीमी गेशो शोंप वोइक्तीके कोव्रब बाक्मा बाक्त। २७ मेकोपुकीमी लडाइम रोइश्शा चाक्शो मार मार परमप्रभु यावे आ खिम चालेचा कली गेशो बाक्मा बाक्त। २८ परमप्रभु यावे आ लोव्र पाइब सामुएल, कीश आ तौ सावल, नेर आ तौ आबनेर नु सेरूयाह आ तौ योआबमी गेशो मारेइ मारेइ शेलोमोथ नु आ लोक्बपुकी कोव्रब बाक्मा बाक्त।

## लेवी आन गेय

२९ इच्चार आ थर डा मुर आन दाते रे केनानीयाह नु आ तौ आन कली इस्त्राएली आन कली कोव्रब नु निसाफ पाइब बाक्मा बाक्त। ३० हेब्रोन आ खिं डा मुर आन दाते रे हशाब्याह नु आ लोक्बपुकी हजार का ७ सहे जोक्ब तुइक्ब मुर यर्दन खोला आ पच्छिम गे डा इस्त्राएल रागी डा परमप्रभु यावे आ खिं डा गेय नु पिप आ गेय आ पर्बम कोव्रब बाक्मा बाक्त। ३१ दाऊद ४० बर्सम पिप दुम्तीके हेब्रोन आ मुर रे तेको तेको खिं डा ठेयब जोक्ब तुइक्ब मुर माल्मे बाक्त। मिनु गिलाद डा याजेर सहरमी मेको आन कली शुश थित्मे बाक्त। मिनु येरीयाह मेको आन ठेयब मुर बाक्मावाक्त। ३२ पिप दाऊदमी येरीयाह नु आ लोक्बपुकी, हजार निक्शी ७ सहे जोक्ब तुइक्ब नु आंम आन खिं डा ठेयब मुर दुम्शो आन कली गेय पपाइक्मी बाक्त। मार गेय पपाइक्मी बाक्त देंशा हना, मेकोपुकी रूबेन आ थर डा मुर, गाद आ थर डा मुर नु मनस्से आ आधा थर डा मुर आन कली परमप्रभु आ पर्बम मार गेय पचा नु पिप आ पर्बम मार गेय पचा मेको कोव्रब सेल्मी बाक्त।

## लडाइ पाइब आन हुल

27 मिनु इस्त्राएली आन खिं खिं डा ठेयब मुरपुकी, हजार हजार लडाइ पाइब आन कप्तानपुकी, सहे सहे डा लडाइ पाइब आन कप्तानपुकी नु मेको आन ठेयब मुरपुकी बाक्मा बाक्त। मेकोपुकीमी लडाइ पाइब आन हुल हुल आन कली बर्सम महिना महिनामी पालो पा पिप आ गेय पपाइक्बाक्मा बाक्त। लडाइ पाइब आन हुल का का पालो पा बर्स डा महिना का गेय पपदमे बाक्त। हुल काम १४ हजार मुर बाक्मा बाक्त। पिप आ नेल्ल क्येडा ठेयब कप्तान सु सु बाक्मा बाक्त देंशा हना, २ बर्स आ डोंइती डा महिना डा डोंइती डा हुल आन कप्तान जब्दीएल आ तौ याशोबाम बाक्मावाक्त। मेको आ हुलम १४ हजार मुर बाक्मा बाक्त। ३ मेको पेरेस आ खिं खिं डा मुर बाक्मा बाक्त। मेको डोंइती डा महिना डा लडाइ पाइब नेल्ल आन कप्तान, क्येडा ठेयब मुर बाक्मावाक्त। ४ मेको आ नोले डा महिना डा हुल आन कप्तान अहोही आ मुर दोदाइ बाक्मावाक्त। मेको हुल नेल्ल आन कप्तान क्येडा ठेयब मुर मीक्लोथ बाक्मावाक्त। मेको आ हुलम १४ हजार मुर बाक्मा बाक्त। ५ मेको आ नोले डा महिना डा हुल आन नेल्ल क्येडा ठेयब कप्तान चढ़ेब येहो-यादा आ तौ बेनायाह बाक्मावाक्त। मेको आ हुलम १४ हजार मुर बाक्मा बाक्त। १इतिहास ११:२२-२५ ६ मेको बेनायाह शुश सक्ति पाइश्शो ३० जना मुर आन दाते डा का बाक्मावाक्त। मिनु मेको ३० जना सक्ति पाइश्शो मुर आन ठेयब मुर बाक्मावाक्त। मेको आ तौ अम्मीजाबाद बेनायाह आ लडाइ पाइब आ हुल डा मुर आन कप्तान बाक्मावाक्त। ७ मेको आ नोले डा महिना डा हुल आन कप्तान योआब आ लोक्ब आसाहेल बाक्मावाक्त। मेको आ नोले आ तौ जेबदीयाह कप्तान दुम्मावाक्त। मेको आ हुलम १४ हजार मुर बाक्मा बाक्त। १इतिहास ११:२६ ८ मेको आ नोले डा महिना डा हुल आन कप्तान इच्चारयाह आ मुर शाम्हुथ बाक्मावाक्त। मेको आ हुलम १४ हजार मुर बाक्मा बाक्त।

9 मेको आ नोले डा महिना डा हुल आन कप्तान तेकोहा आ मुर इक्केश आ तौ इरा बाक्माक्त। मेको आ हुलम १४ हजार मुर बाक्मा बाक्त।  
१इतिहास ११:२८

10 मेको आ नोले डा महिना डा हुल आन कप्तान एफ्राइम आ थर डा, पेलोन आ खिं डा मुर हेलेस बाक्माक्त। मेको आ हुलम १४ हजार मुर बाक्मा बाक्त। १इतिहास ११:२७

11 मेको आ नोले डा महिना डा हुल आन कप्तान जेराह डा हुशा डा मुर सिब्बेके बाक्माक्त। मेको आ हुलम १४ हजार मुर बाक्मा बाक्त। १इतिहास ११:२९; १इतिहास २०:४

12 मेको आ नोले डा महिना डा हुल आन कप्तान बेन्यामीन आ थर डा अनाथोथ सहर डा अबीएजेर बाक्माक्त। मेको आ हुलम १४ हजार मुर बाक्मा बाक्त। १इतिहास ११:२८

13 मेको आ नोले डा महिना डा हुल आन कप्तान जेरह आ खिं डा नेतोफाह सहर डा मुर माहाराइ बाक्माक्त। मेको आ हुलम १४ हजार मुर बाक्मा बाक्त। १इतिहास ११:३०

14 मेको आ नोले डा महिना डा हुल आन कप्तान एफ्राइम आ थर डा पिराथोन सहर डा बेनायाहम बाक्माक्त। मेको आ हुलम १४ हजार मुर बाक्मा बाक्त। १इतिहास ११:३१

15 मिनु बर्स आ नेल्ल क्येडा नोले डा महिना डा हुल आन कप्तान ओथीएल आ खिं डा नेतोफाह सहर डा हेल्दाइ बाक्माक्त। मेको आ हुलम १४ हजार मुर बाक्मा बाक्त।

#### थर थर डा ठेयब मुरपुकी

16 इस्राएली आन थर थर डा ठेयब मुरपुकी सु सु बाक्मा बाक्त दॅशा हना, रूबेन आ थर डा जिब्री आ तौ एलीएजर ठेयब मुर बाक्माक्त। सिमियोन आ थर डा माकाह आ तौ शेफत्याह बाक्माक्त। 17 लेवी आ थर डा केमुएल आ तौ हशाब्याह बाक्माक्त। हारून आ खिं डा सादोक बाक्माक्त।

18 यहूदा आ थर डा दाऊद आ लोकब एलीहु बाक्माक्त। इस्साकार आ थर डा मिकाएल आ तौ ओम्री बाक्माक्त। 19 जबूलून आ थर डा ओबदिया आ तौ इश्मायाह बाक्माक्त। नाप्ताली आ थर डा अज्जीएल आ तौ येरेमोथ बाक्माक्त। 20 एफ्राइम आ थर डा अजजीयाह आ तौ होशेआ बाक्माक्त। मनस्से आ उइक्थ थर डा पेदायाह आ तौ योएल बाक्माक्त। 21 मिनु गिलादम बाक्शो मनस्से आ उइक्थ थर डा जकरिया आ तौ इददो बाक्माक्त। बेन्यामीन आ थर डा आब्नेर आ तौ यासीएल बाक्माक्त। 22 दान आ थर डा येरोहाम आ तौ अजारेल बाक्माक्त। मेको नेल्ल इस्राएली आन थर थर डा ठेयब मुर बाक्मा बाक्त। 23 मिनु दाऊदमी २० बर्स मगाथो आन कली महिक्मी बाक्त। मारदे हना परमप्रभु यावेमी "इस्राएली आन कली सरीड डा सोरुल खोदॅशो पा शुश सेल्लुडमी" दे कबल पशो बाक्माक्त। उत्पत्ती २२:१७ 24 सेरूयाह आ तौ योआबमी मुर आन कली हिक्चा गोवा बाक्त। आ गेय मथुथु, परमप्रभु यावेमी इस्राएली आन पर्बम गाइक्ता बाक्त। मोपतीके मेना पिप दाऊद आ सासन पची ना मार मार दुश्शो बाक्मा ब्रेक्तीकेम गिश मुर हिक्शो बाक्मा मेको मब्रेक्शो बाक्माक्त। १इतिहास २१:७, १४

#### पिप आ मार मार कोव्रबपुकी

25 मिनु अदीएल आ तौ अज्मावेथ पिप आ मार मार वोइक्तीके कोव्रब आन ठेयब मुर बाक्माक्त। उज्जीयाह आ तौ योनाथन चहिं रूमी, सहरपुकीमी, गाउंपुकीमी नु वोइक्तीके लाइश्शो खिंमी बाक्शो पिप आ मार मार कोव्रब आन ठेयब मुर बाक्माक्त। 26 केलुब आ तौ एजी रूम गेय पा दोइब आन कली कोव्रब आन ठेयब मुर बाक्माक्त। 27 रामाह सहर डा शिमेइ अडगुर रूपुकी कोव्रब आन ठेयब मुर बाक्माक्त। शिफमी आ मुर जब्दी चहिं अडगुर शांबु वोइक्तीके कोव्रब आन ठेयब मुर बाक्माक्त। 28 गेदेराह सहर डा बाल-हनान शेफेलाह डा दिंममी बाक्शो तेल रवा नु फल सिब्ब फोव्रशी रवापुकी कोव्रब आन ठेयब मुर बाक्माक्त। योआश चहिं तेल वोइक्तीक कली कोव्रब आन ठेयब मुर बाक्माक्त। 29 शारोन दिंम डा

शित्राइ मेकेर डा दिंममी जोइब बी ब्यफ आन कली कोव्रब आन ठेयब मुर बाक्माक्त। अदलाइ आ तौ शाफात चहिं अरु दिंमम जोइब बस्तु भाव आन कली कोव्रब आन ठेयब मुर बाक्माक्त। 30 इश्माएली ओबील दलओठ आन कली कोव्रब आन ठेयब मुर बाक्माक्त। मेरोनोथ डा येहदयाह गधा आन कली कोव्रब आन ठेयब मुर बाक्माक्त। मिनु हाग्री आ मुर याजीज क्यारश भेडा आन कली कोव्रब आन ठेयब मुर बाक्माक्त। 31 मेको नेल्ले पिप दाऊद आ शोप कोव्रब आन ठेयब मुर बाक्मा बाक्त।

#### पिप दाऊद आ नेक्था डा मुरपुकी

32 दाऊद आ बकान्छा योनाथन दाऊद कली अर्ती गेब बाक्माक्त। मेको शुश जोक्ब तुइक्ब नु ब्रेक्स तुइक्ब मुर बाक्माक्त। हाकमोनी आ तौ येहीएल पिप आ तौ आन कली कोव्रब बाक्माक्त। 33 मिनु अहीथोफेल यो पिप कली अर्ती गेब बाक्माक्त। अरकी आ मुर हुशाइ पिप आ वारच बाक्माक्त। 34 अहीथोफेल आ नोले बेनायाह आ तौ येहो-यादा नु अबीयाथार पिप कली अर्ती गेब बाक्सा बाक्त। मिनु योआब पिप आ लडाइ पाइब आन ठेयब मुर बाक्माक्त। २सामुएल ८:१६

#### परमप्रभु आ खिं सेल्चा मिश्शो

28 मिनु दाऊदमी यरूसलेम सहरम इस्राएली आन ठेयब मुर नेल्ले आन कली गुम्पदा बाक्त। सु सु गुम्पदा बाक्त दॅशा हना, थर थर डा ठेयब मुर, पिप आ गेय पाइब हुल हुल आन ठेयब मुर, हजार हजार लडाइ पाइब आन कप्तानपुकी, सहे सहे लडाइ पाइब आन कप्तानपुकी, पिप नु आ तौ आन मार मार नु बी ब्यफ कोव्रब आन ठेयब मुरपुकी, दरवारमी गेय पाइब आन ठेयब मुरपुकी, शुश सक्ति पाइश्शो लडाइ पाइबपुकी नु अरु महिब लडाइ पाइब आन कली गुम्पदा बाक्त। 2 मिनु पिप दाऊद बोक्शा मेको आन कली "आं लोकब नु आं मुर आं लोव्र नेनीन। गो परमप्रभु यावे आ कबल पशो सन्दोस कली नाइक्चा कली बाक्तीक का सेल्चा मिश्शो बाक्ती। परमप्रभु यावे, इ परमप्रभु आ खोइल थेक्तीक खोदॅशो दुश्चा माल्ब। गो मेको सेल्चा कली ठीक पाता। १इतिहास २२:६-१०; भजन संग्रह ९९:५; भजन संग्रह १३२:७ 3 तन्न परमप्रभुमी आं कली 'गे आं नें ठेयब सेल्चा कली खिं सेल्चा मदुम्ब। मारदे हना गे लडाइ पा हुश ख्राक्श पोक्शो बाक्ते' दॅत। 4 मो हना यो परमप्रभु यावे, इस्राएली आन परमप्रभुमी आं आफ आ खिं खिं रे आं कली गेना हना यो इस्राएलम पिप दुश्चा कली योव्रती। मारदे हना मेकोमी लां कौइचा कली यहूदा कली योव्रतु। मिनु यहूदा आ थर डा खिं खिं रे आं आफ आ खिं कली योव्रतु। मिनु आ आफ आ तौ आन दातेमी आं कली दाक्शा, इस्राएल डा पिप सेल्ती। उत्पत्ती ४९:१०; १सामुएल १६:१, १२ 5 परमप्रभु यावेमी आं कली शुश तौ गेती। परमप्रभु यावेमी आ राज्य इस्राएलम पिप दुश्चा कली आं तौ सोलोमन कली योव्रतु। 6 मिनु आं कली 'इ तौ सोलोमनमी आं खिं नु आं लाडगा सेल्चा माल्ब। मारदे हना गो आं तौ दुश्चा, दे मेको कली योव्रता। गो आ आफ दुम्नुड। १इतिहास १७:११-१४ 7 मेकोमी आं शॅशो नु निसाफ पतीक लोव्र टिना टिन बाक्ब। मुल खोदॅशो पा रिश्शो टिप्टु हना, गो मेको आ राज्य गेना हना यो बोल्यो सेल्लुड' दॅमाक्त। 8 मोपतीके गे परमप्रभु यावे आ नॅम गुश्शो इस्राएली नेल्ल आन डौइती नु इ परमप्रभु आ डौइती परमप्रभु यावे, इन परमप्रभु आ शॅतीके टिशा बिस्सीन। मिनु नोले मेको रिश्शो रागी इन के दुम्ब नु इन नोले इन आल आन कली गेना हना यो थेरशो रू दुम्ब।

9 आं तौ सोलोमन, इ आफ आ परमप्रभु कली तुइश्शा मालो। इ थुं नेल्लेमी ग्येरशा मेको आ नोले खोतो। मारदे हना परमप्रभु यावेमी इ थुं कोव्रना कोव्रन, इन मिश्शो नु पशो नेल्ल तुइक्ब। गे मेको कली माल्तीवी हना, गे थिन्नेवे। तन्न गे मेको कली प्रौइतीवी हना, इ कली गेना हना यो कली प्रौइब। येरमीया २९:१३-१४; १राजा ११:३१, ३३ 10 मुल होस पावो। मारदे हना परमप्रभु यावेमी आंम आ बाक्तीक खिं सेल्चा कली इ कलीन योव्रतु। इ थुं ग्येथ लुक्च मपथु, गेय पावो" दे पिप दाऊदमी आ तौ कली मदा बाक्त।

11 मिनु नोले दाऊदम आ तौ सोलोमन कली परमप्रभु यावे आ खिं सेलीक ब्रेक्स गेवा बाक्त। मेको खिं डा ब्रेक्समी परमप्रभु आ बाक्तीक, आ पिंडी, अरु खिं, मार मार वोइक्तीक, खिं आ तार डा कोठापुकी, आगा डा कोठापुकी नु सन्दोस नु आ सुम्तीके आ कोठा बाक्शो बाक्माक्त। प्रस्थान २५:९<sup>12</sup> दाऊद आ मिशो नेल्ल मेको ब्रेक्सम बाक्शो बाक्त। मेकोमी परमप्रभु यावे आ खिं डा लाडगा, आ एर ओंथ नेल्ल डा कोठापुकी, परमप्रभु आ खिं डा मार मार वोइक्तीक कोठा नु नेल्ल गेशो थोव्रक कली वोइक्तीक कोठा आ तौ कली गेवा बाक्त।<sup>13</sup> मिनु लेवी नु चढेब आन हुल हुल, परमप्रभु यावे आ खिंमी मार मार गेय पचा नु मेकेर मार मार ग्योबपुकी परमप्रभु यावे आ खिं डा गेय कली सेल्चा नेल्ल मेको ब्रेक्सम ब्रेक्शो बाक्माक्त।<sup>14</sup> मार मार गेय पचा कली सुन के ग्योब सेल्चा कली गिश सुन माल्बा, चांदी के ग्योब सेल्चा कली गिश चांदी माल्बा, मेको ब्रेक्शो बाक्माक्त।<sup>15</sup> मिनु सुन के बत्ती दातीक नु आ दियारी आन कली गिश सुन माल्बा, चांदी के बत्ती दातीक नु आ दियारी आन कली गिश चांदी माल्बा नु मार मार गेय कली मार माल्बा नेल्ल ब्रेक्शो बाक्माक्त।<sup>16</sup> लहर पा वोइश्शो कौइतीक शोब्ले कली सुन के टेबल गिश सुन नु चांदी के टेबल आन कली गिश चांदी माल्बा मेको ब्रेक्शो बाक्माक्त।<sup>17</sup> मिनु कांटा, बुइक्तीक बोस, लोटा नु सुन के बोस आन कली गिश क्येख सुन माल्बा, मेको ब्रेक्शो बाक्माक्त। मिनु चांदी के बोस गिश चांदी माल्ब, मेको ब्रेक्शो बाक्माक्त।<sup>18</sup> क्येख सुन के धूप चोतीक कली गिश क्येख सुन माल्बा, मेको ब्रेक्शो बाक्माक्त। सुन के फ्रां प्राक्शा परमप्रभु यावे आ सन्दोस सुम्ब करूब आस कली कुरब बगी के यो ब्रेक्स यो सेल्शो बाक्माक्त। मिनु गिश सुन माल्बा, मेको ब्रेक्शो बाक्माक्त।

<sup>19</sup> मिनु दाऊदमी “एको नेल्ल परमप्रभु यावेमी मार पचा, दोपा सेल्चा आं कली शेंताक्यी। मोपा गो मेको नेल्ल गेय डा ब्रेक्स ब्रेक्ताकड” दे दाऊदमी देंमाक्त।

<sup>20</sup> मिनु दाऊदमी आ तौ सोलोमन कली “बोल्यो नु महिंब दुश्शा, एको गेय पावो। महिनो, इ थुं ग्येथ लुक्व मपावो। मारदे हना परमप्रभु यावे, आं परमप्रभु गे नु बाक्ब। परमप्रभु यावेमी आ खिंमी गेय पचा कली मारेइ मारेइ सेल्ने मथुमा सम्म इ कली मप्रौइथु वारच पाइब। इतिहास २२:१३; ब्यवस्था ३१:६<sup>21</sup> परमप्रभु आ खिंमी गेय पचा कली चढेब नु लेवी आन हुल हुल ठीक दुश्शो बाक्नीम। मिनु मेको गेय पचा कली शुश जोक्ब तुइक्ब नु ग्येरशो गेय पाइब गे नु बाक्नीम। मिनु ठेयब मुरपुकी नु मुर नेल्लेमी इ देंशो नेल्ल टीनीम” दे दाऊदम आ तौ सोलोमन कली देंमाक्त।

परमप्रभु कली मार मार गेशो

29 मिनु पिप दाऊदमी बुक्शा बाक्शो मुर नेल्ल आन कली “परमप्रभुमी आं तौ सोलोमन का ला योव्रतु। मेको मुल सम्म ठिटा बाक्ब। एको खिं सेल्चा चहिं थम ठेयब गेय बाक्ब। मारदे हना एको खिं मुर आन कली ममाइ, परमप्रभु, परमप्रभु यावे आ खिं बाक्ब। इतिहास २२:५<sup>2</sup> गो आं परमप्रभु आ खिं सेल्चा कली मार मार वोइक्ता देंशा हना, सुन के थोव्रक कली सुन, चांदी के थोव्रक कली चांदी, कांसा के थोव्रक कली कांसा, फलाम के थोव्रक कली फलाम, शी के थोव्रक कली शी, हीरा नु सुनम ग्याइश्शो हीरा, दारपाइक्वा कली मार मार रड पाइश्शो फुल्लु, मार मार हीरा नु अरु दारशो फुल्लु शुश तेल्ला वोइक्ता।<sup>3</sup> मेको आं परमप्रभु आ बाक्तीके सेल्चा कली खुप्शा वोइश्शो मार मार प्रौइशा यो आं परमप्रभु आ खिं सेल्चा थाम्पा दाक्तीके गो आंम आं सुन नु चांदी परमप्रभु आ खिं सेल्चा कली गेता।<sup>4</sup> परमप्रभु यावे आ खिं डा आगा डा गारो गिल्ला कली ४३ हजार टलेन्ट ओफीर डा सुन नु ७ हजार टलेन्ट याप्पाइश्शो चांदी वोइश्शो बाक्ब। टलेन्ट का ३४ किलो बाक्ब। इतिहास २२:१४; प्रस्थान ३५:४-९<sup>5</sup> मिनु रिश्शो जोक्ब तुइक्ब गेय पाइब आन कली एको सुन के थोव्रक कली सुन नु चांदी के थोव्रक सेल्चा कली चांदी वोइश्शो बाक्ब। मुल परमप्रभु यावे कली आं खोदेंशो पा सु सुम मार मार गेवा दाक्नीनी?” दे हिलो पवा बाक्त।

<sup>6</sup> मिनु खिं खिं डा ठेयब मुरपुकी, इस्राएली आ थर थर डा ठेयब मुरपुकी, हजार हजार डा लडाइ पाइब आन कप्तानपुकी नु सहे सहे डा लडाइ पाइब

आन कप्तानपुकी नु पिप आ गेय पाइब आन कली कोव्रब मुरपुकी हाइश्शो दुश्शा मार मार गेमी बाक्त।<sup>7</sup> मेकोपुकीमी ग्येरशा परमप्रभु आ खिं सेल्चा कली मार मार गेमे बाक्त देंशा हना, ५ हजार टलेन्ट सुन, नु सुन के क्येट १० हजार दारीके, १० हजार टलेन्ट चांदी, १८ हजार टलेन्ट कांसा लाख का टलेन्ट फलाम गेमे बाक्त। दारीके का ८.४ ग्राम सुन के क्येट बाक्ब।<sup>8</sup> मिनु सु सु नु हीरा बाक्मा, मेकोमी परमप्रभु यावे आ शोप वोइक्तीक कली गेरशोन आ खिं डा मुर येहीएल आ गुइमी गेमे बाक्त। प्रस्थान ३५:२७<sup>9</sup> मिनु मुरपुकीमी हाइश्शो थुंमी गेशा ग्येरसीशा बाक्मा बाक्त। मारदे हना मेकोपुकीमी ग्येरसीशा परमप्रभु यावे कली शुश गेशो बाक्मा बाक्त। पिप दाऊद यो थाम्पा ग्येरशो बाक्माक्त।

परमप्रभु कली ठेयब सेल्शो

<sup>10</sup> मिनु दाऊदमी मुर नेल्ल आन डोंइती परमप्रभु यावे कली “परमप्रभु यावे, आंइ किकी पिपी इस्राएल आ परमप्रभु, गे गेना हना यो ठेयब बाक्नीनी।<sup>11</sup> परमप्रभु यावे, नेल्ल क्येडा ठेयब दुम्तीके, सक्ति, छेडछेड, ग्रातीके नु मान तचा पुंइसीतीके नेल्ल इन के बाक्नीम। मारदे हना रागी नु सरीडम बाक्शो मारेइ मारेइ इन के नम। परमप्रभु यावे, मेको राज्य इन के बाक्ब। गे नेल्ल क्येडा ठेयब बाक्नीनी। प्रकाश ४:११; ५:१३<sup>12</sup> गे शोप नु मान ततीक गेब बाक्नीनी। गे नेल्ल आन कली सासन पाइनीनी। बोल नु सक्ति इन गुइमी बाक्ब। गे इन गुइमी ठेयब सेल्शा, सक्ति गेनीनी। इतिहास २०:६<sup>13</sup> मुल आंइ परमप्रभु, गो इन कली ‘गे रिश्शो पाइब बाक्नीनी’ दे इन नें ठेयब सेल्नीकी।

<sup>14</sup> मिनु गो आंइ थुंम ग्येरशा सोम्शा ओपा शुश गेने चाप्नीकी? गो सु नडा? आं मुरपुकी सु बाक्नीमी? मारदे हना नेल्ल थोव्रक इन गुइ रे जाक्नीम। गोपुकीमी इन गेशो रे इन कली गेतक।<sup>15</sup> गोपुकी इन डोंइती शुश नाक्त मबाक्ब अर्को रागी डा मुर दुश्शो बाक्नीकी। आंइ किकी पिपी यो मोदेंशो बाक्मा बाक्त। आंइ रागीम बाक्तीके नाक्ती वांकु खोदेंशो बाक्नीम। शुश बाक्तीक आस मबाक्ब। भजन संग्रह ३९:१३; हिब्रू ११:१३; अय्युब १४:२<sup>16</sup> परमप्रभु यावे, आंइ परमप्रभु खिं सेल्शा, इन नें ठेयब सेल्चा कली आंइ तेल्लो शोप नेल्ल इन गुइ रे जाक्शो बाक्ब।<sup>17</sup> आं परमप्रभु, गे मुर आन थुं नाक्शा कोव्रनीनी, दे तुइक्नुड। गे ब्रेश्शो थुं पाइश्शो मुर तथा ग्येरनीनी। गो आं ब्रेश्शो थुं दुम्तीकेमी ग्येरशा एको नेल्ल इन कली चढेता। मुल गो एक बाक्शो इन मुर आन कली ताता। ग्येरशो थुंमी एको नेल्ल चढेक्तेक्म। भजन संग्रह ७:१०<sup>18</sup> परमप्रभु यावे, आंइ किकी पिपी अब्राहाम, इसहाक नु याकूब आन परमप्रभु, इन मुर आन थुंमी मोदेंशो मिम्चा नु पचा गेना हना यो लीपतीन। मिनु मेको आन थुं इन गे कीडीन।<sup>19</sup> आं तौ सोलोमन कली इन शेंतीके, इन देंशो नु फुल्लुम मुशा ब्रेक्शो लोव्र आ थुं नेल्लेमी पपतीन। मेकोमी नेल्ल पने चबल। मिनु आं ठीक पा वोइश्शो थोव्रकमी इन खिं सेल्ने चबल” दे दाऊदमी परमप्रभु कली देंमाक्त।

सोलोमन पिप दुश्शो

<sup>20</sup> मिनु नोले दाऊदमी मुर नेल्ल आन कली “परमप्रभु यावे, इन परमप्रभु कली ठेयब सेलीन” देंमाक्त। मिनु मुर नेल्लेमी परमप्रभु यावे, आन किकी पिप आन परमप्रभु कली ठेयब सेल्शा बाक्मा बाक्त। मिनु परमप्रभु यावे नु पिप आ डोंइती बाप्शा, सेउ पामे बाक्त।<sup>21</sup> मिनु आ दीसा नाक्ती मेकोपुकीमी परमप्रभु यावे कली मार मार चढेतीके नु चोशा चढेतीक चढेमे बाक्त। मेकोपुकीमी हजार का ब्यफ, हजार का सांड, हजार का पाठा, तूचा थोव्रक चढेमे बाक्त। इस्राएली नेल्ल आन परबम शुश चढेमे बाक्त।<sup>22</sup> मेको नाक्त शुश ग्येरसीशा परमप्रभु यावे आ डोंइती जशा, तूडमे बाक्त। मिनु नोले मेकोपुकीमी दाऊद आ तौ सोलोमन कली लेंशा पिप सेल्मे बाक्त। मिनु सोलोमन कली तेल लुक्शा पिप सेल्मे बाक्त। मिनु सादोक कली चढेब सेल्मे बाक्त। इतिहास २३:१<sup>23</sup> नोले सोलोमन आ आफ दाऊद आ पा डा परमप्रभु यावे आ नित्तीकेमी निश्शा, पिप दुश्शा, ठेयब दुम्माक्त। इस्राएली नेल्लेमी मेको आ देंशो बिस्समा बाक्त। इतिहास २८:५; १राजा १:३४, ३५, ३९<sup>24</sup> ठेयब मुर नेल्ले, सक्ति पाइश्शो लडाइ पाइब नेल्ले नु पिप दाऊद आ

तौ नेल्लेमी यो पिप सोलोमन कली आन पिप बाक्ब, दे कसम जामे बाक्त।  
 25 मिनु परमप्रभु यावेमी सोलोमन कली इस्राएली नेल्ल आन डोंइती ठेयब  
 सेला बाक्त। मिनु मेको कली राज्य नु मान ततीके शुश गेवा बाक्त।  
 इस्राएलम मेको क्येडा डोंइती डा तेकोइ पिप आन कली मोदेशो मान ततीके  
 मगेशो बाक्माक्त।

#### दाऊद बेक्शो

26 मोपा येस्से आ तौ दाऊदमी इस्राएल नेल्लेमी सासन पवा बाक्त।  
 27 मेकोमी इस्राएल कली ४० बर्स सासन पवा बाक्त। हेब्रोनम ७ बर्स नु

यरूसलेममी ३३ बर्स सासन पवा बाक्त। १राजा २:११<sup>28</sup> मिनु शुश खूशो  
 दुम्शा बेक्माक्त। मेको के शोंप नु मान ततीके शुश बाक्माक्त। मिनु आ तौ  
 सोलोमन आ नोले पिप दुम्माक्त। उत्पत्ती २५:८; उत्पत्ती ३५:२९; २इतिहास  
 २४:१५; अय्युब ४२:१७<sup>29</sup> पिप दाऊद आ पशो मार मार बाक्मे, मेको  
 डोंइती रे नोले सम्म नेल्ल परमप्रभु यावे आ लोव्र पाइब सामुएल, नाथान नु  
 गाद आन ब्रेक्शो किताबम ब्रेक्शो बाक्ब। १इतिहास २१:९<sup>30</sup> दोपा सासन  
 पवा, आ सक्ति नु आ पशो नेल्ल, इस्राएली आन तशो नु रागी रागी डा  
 राज्यम मार मार दुम्मे, मेको लोव्र नेल्ल मेकेर ब्रेक्शो बाक्ब।

## २ इतिहास

एजा ब्रेक्ब मुर बाक्त हना यो, अर्को मुरपुकीम यो लोव तेम्शो बाक्तेक्म।  
 १इतिहास खोदेशो पा ५३६ बि. सी. सम्म डा इस्राएली आन इतिहास बाक्ब।  
 १. सोलोमन आ सासन पची ना डा इस्राएली आन इतिहास।  
 २. यहूदा रागी डा पिप आन सासन पची ना डा इस्राएली आन इतिहास।

सोलोमनम तुइक्तीक थुं पुंडीशो

१राजा ३:१-१५

1 दाऊद आ तौ सोलोमन पिप दुम्शा, आ राज्य बोल्यो दुम्माक्त। मारदे हना परमप्रभु यावे, आ परमप्रभु मेको नु बाक्शा, मेको कली थाप्पा ठेयब मान ताइब सेला बाक्त। १राजा २:१२,४६  
 2 मिनु सोलोमनम इस्राएली नेल्ल, हजार हजार नु सहे सहे डा लडाइ पाइब आन कप्तान, निसाफ पाइबपुकी, इस्राएली आन ठेयब मुरपुकी नु आन खिं खिं डा ठेयब मुर नेल्ल खुप्शा लोव्र पवा बाक्त। 3 मिनु सोलोमन नु मेको मुर नेल्ल गिबोन सहर आ नेक्था बाक्शो लाइश्शो डांडाम लमा बाक्त। मारदे हना परमप्रभु यावे आ गेय पाइब मोसाम गोरशो रागीम सेल्शो परमप्रभु आ गुम्तीक ताम्बु मेकेर बाक्माक्त। १इतिहास १६:३९ 4 मिनु दाऊदम डोंइती परमप्रभु आ कबल पशो सन्दोस कली किरयथ-यारीम रे आ ठीक पशो बाक्तीके यरूसलेमम चाक्शो बाक्माक्त। मारदे हना मेको कली मेकेर ताम्बु का कीशो बाक्माक्त। १इतिहास १३:६; १इतिहास १५:३,२; १इतिहास १६:१ 5 मिनु हुर आ चच ऊरी आ तौ बेजालेलमी सेल्शो कांसा के चोशा चढेतीके परमप्रभु यावे आ बाक्तीके आ डोंइती गिबोनम बाक्शो बाक्माक्त। प्रस्थान ३८:३-८ 6 मिनु सोलोमन नु आ खुप्शो मुर नेल्ल इर परमप्रभु यावे आ डोंइती जाक्मा बाक्त। मिनु सोलोमन मेको कांसा के चढेतीक सम्म डोइश्शा लमाक्त। मेको गुम्तीक ताम्बु आ डोंइती बाक्शो बाक्माक्त। मेको आ तारी हजार का चोशा चढेतीक चढेवा बाक्त। 7 मेको नाक्दो परमप्रभुम सोलोमन कली तपांडसे बाक्त। मिनु सोलोमन कली “गो इ कली मार गेन? लो पुनो” देमाक्त। 8 मिनु सोलोमनम परमप्रभु कली “गे आं आफ दाऊद कली ठेयब नु गेना हना यो दाक्तीक कोंइताक्नी। मिनु आं कली मेको आ पा डा पिप सेल्शो बाक्नीनी। 9 मुल आं परमप्रभु यावे, गे आं आफ दाऊद कली गेशो इन लोव्र खाप्पीन। मारदे हना गे आं कली एको रागी डा फुरक खोदेशो पा हिक्ने मचाप्पा डा शुश मुर आन पिप सेल्तीनी। 10 आं कली एको मुर आन कली सासन पाइब सेल्तीनी। मोपतीके आं कली रुप्तीक नु तुइक्तीक थुं गेयीनी। मिनु आं कली एको मुर नु रिम्शो पा बाक्चा गेयीनी। मारदे हना एको इश्का इन मुर आन कली सुम सासन पने चाप्पा डा?” देमाक्त। 11 मिनु परमप्रभुम सोलोमन कली “गे आं मुर आन पिप दुम्चा कली रुप्तीक नु तुइक्तीक थुं पुंडीवी। तन्न गे शुश क्येट नु शॉप, मान ततीके, आंम जोरी सत्रु आन कली साइक्तीके नु आंम कली शुश ब्रॉइडल, दे मपुनी। 12 मोपतीके गो इ कली रुप्तीक नु तुइक्तीक थुं गेनन। मिनु गो इ कली शुश क्येट, शॉप नु मान ततीके यो गेनन। मेको इ क्येडा डोंइती नु इ क्येडा नोले डा तेकोइ पिपपुकीम मतशो बाक्नीम” दे मदा बाक्त। 13 मिनु सोलोमन गिबोन सहर आ नेक्था डा डांडा गुम्तीक ताम्बु आ बाक्तीक रे यरूसलेमम जाक्शा, इस्राएली आन कली सासन पवा बाक्त।

सोलोमन आ शॉप

१राजा १०:२६-२९

14 मिनु सोलोमनम शुश बग्गी नु शारापुकी खुप्तीमी बाक्त। मेको के हजार का ४ सहे बग्गी नु हजार का सहे निक्शी शारा बाक्मा बाक्त। मिनु

मेकोमी आ बग्गी आन कली बग्गी वोइक्तीक सहरम वोइक्पदा बाक्त। तन्न का निक्शी चहिं आं सहर यरूसलेमम वोइक्पदा बाक्त। 15 सोलोमनम सुन नु चांदी यरूसलेमम बाक्शो फुल्लु खोदेशो पा शुश तेला बाक्त। मिनु लेबानोन डा लाइश्शो रवा आ शी, शेफेलाह डा फोव्रशी रवा खोदेशो पा शुश तेला बाक्त। 16 सोलोमनम शारापुकी इजीप्त नु क्युए रे ग्याप्शा, चाक्पाइक्बाक्माक्त। मिनु मेको आ ग्याप्ब लेयबपुकीम क्युएम क्येट थाप्शा ग्याप्शा चाक्बाक्मा बाक्त। 17 मेकोपुकीम इजीप्त रे ग्याप्शा अर्को रागी कली लेयबाक्मा बाक्त। बग्गी का कली ६ सहे चांदी के शेकेल नु शारा का कली सहे का ५० चांदी के शेकेलम लेयबाक्मा बाक्त। मिनु सोलोमन आ ग्याप्ब लेयबपुकीमी मेको हिक्ती नु अरामी पिप आन कली लेयबाक्मा बाक्त।

परमप्रभु आ खिं सेल्चशो

१राजा ५:१-१८

2 मिनु सोलोमनम परमप्रभु यावे कली मान पचा, दे खिं का नु आंम कली दरवार का सेल्चा थुं पवा बाक्त। 2 मिनु सोलोमनमी ७० हजार कुरब मुर, ८० हजार पहाडम फुल्लु खोइक्चा कली नु मेको गेय पाइब आन कली कोव्रब हजार सां ६ सहे मुर आन कली योव्रमी बाक्त। 3 मिनु सोलोमनम टायर डा पिप हुराम कली “गे आं आफ दाऊद कली आ खिं सेल्चा कली लेबानोन डा लाइश्शो रवा आ शी सोइश्शो बाक्तीनी। १इतिहास १४:१ 4 मिनु मुल गो परमप्रभु यावे, आं परमप्रभु कली मान पचा, दे मेको कली खिं का सेल्चा दाक्नुड। मिनु मेको खिं परमप्रभु यावे आ डोंइती ब्रोव्रशो रिना पाइश्शो धूप चोचा कली, मेकेर नाक्त किंत किंत डा कोंइतीक शोब्ले हार हार पा चढेचा कली, नाक्दो सुनी चोशा चढेचा कली, नाइक्तीक नाक्ती, औंसी नाक्ती नु परमप्रभु यावेम, आंइ परमप्रभु गेना हना यो ‘मानेन’ दे इस्राएली आन कली गेशो चाड मानेचा कली जिम्मा गेचा दाक्नुड। 5 गो आं सेल्चा चिक्शो खिं थम ठेयब नु रिम्शो खिं दुम्चा माल्ब। मारदे हना आंइ परमप्रभु देवी देवता नेल्ल आन क्येडा ठेयब बाक्ब। 6 तन्न सरीड नु स्वर्गम मेको मरिक्ब हना, सुम मेको कली खिं सेल्ने चाप्पा डा? मेको कली मार मार चढेचा क्येडा लाक्शा, आ खिं सेल्ब गो सु नडा डा? २इतिहास ६:१८; १राजा ८:२७ 7 मोपतीके गे आं कली सेल्स जोक्ब तुइक्ब मुर का सोइक्तीन। मेको मुरुम सुन, चांदी, कांसा नु फलाम चेम्शा, मार मार सेल्स जोक्चा माल्ब। मेकोमी प्याजी, लल नु नीलो श्येले रे मार मार प्रोव्रस जोक्चा माल्ब। मिनु मार मार मुशा, बुटा आप्पा शेंसीशो मुर दुम्चा माल्ब। मिनु मेकोमी आं आफ दाऊदम योव्रशो मारेइ मारेइ पस जोक्ब यहूदा नु यरूसलेमम गो नु बाक्ब मुरपुकी नु गेय पचा माल्ब। 8 गे आं कली यो लेबानोन डा लाइश्शो रवा आ शी नु लेबानोन डा अरु रवा आ शी सोइक्तीनी। मारदे हना इन लेबानोन डा मुरपुकीम रिम्शो पा शी खोइक्स जोक्ब बाक्नीम, दे गो तुइक्नुड। आं गेय पाइब इन गेय पाइब नु गेय पाइनीम। 9 आं कली शुश शी तिम्शा सोइक्तीन। मारदे हना गो ठेयब नु दारशो खिं सेल्चा दाक्नुड। 10 गो इन गेय पाइब रवा तिम्ब आन कली २० हजार कोर हिल्शो चेरब, २० हजार कोर क्योव्रज, २० हजार बाथ अङ्गुर शांबु नु २० हजार बाथ तेल गेनुडमी” दे लोव्र कुरब मुर सोइक्ता बाक्त। कोर का २२० लिटर पुक्तीके बाक्ब। बाथ का २२ लिटर बाक्ब।



11 मिनु टायर डा पिप हुराममी चिठी का ब्रेक्शा, सोलोमन कली सोइक्ता बाक्त। मिनु मेकोमी “परमप्रभु यावेमी आ मुर आन कली दाक्तीके, इन कली मेको आन पिप सेल्लु।<sup>12</sup> सरीड नु रागी सेल्लु परमप्रभु यावे, इस्राएली आन परमप्रभु ठेयब बाक्ब। मेकोमी पिप दाऊद कली रुप्तीक नु तुइक्तीक थुं पाइश्शो तौ का गेप्तु। मेकोमी परमप्रभु यावे कली खिं का नु आंम कली दरवार का सेल्लु।<sup>13</sup> गो इन कली वारच पाइक्वा कली मार मार सेल्लु शुश जोक्ब नु तुइक्ब हुराम-अबी कली सोइक्नुड। १राजा ७:१३<sup>14</sup> मेको दान आ थर डा मीश मुर आ तौ बाक्ब। मेको आ आफ चहिं टायर डा बाक्ब। मेको सुन, चांदी, कांसा, फलाम, हीरा, शी नु प्याजी, लल, नीलो श्येले नु रिम्शो पा किरशो सुती श्येले रे प्रोव्रशो वा रे मार मार सेल्ले चाप्ब। मुशा मार मार सेल्लु यो जोक्ब बाक्ब। इन कली मार मार ब्रेक्स माल्नीनी, मेकोमी पने चाप्ब। मेको मारेड मारेड जोक्ब मुरपुकी नु ठेयब पिप, इन आफ दाऊद आ मारेड मारेड सेल्लुपुकी नु गेय पने चाप्ब। प्रस्थान ३१:२-६<sup>15</sup> इन ब्रेक्शो खोदेंशो पाइन गेय पाइब आन कली चेरब, क्योव्रज, तेल नु अडगुर शांबु सोइक्तीन।<sup>16</sup> गो इन माल्शो शी नेल्लु लेबानोनम तिम्नीकी। मिनु फ्रेंशा योप्पा सहर सम्म ठेयब समुन्द्र रे पा सोइक्नीकी। मिनु गे मेकेर रे यरूसलेम सम्म लतीन” दे चिठी ब्रेक्शा सोइक्ता बाक्त।

17 मिनु सोलोमनम इस्राएलम बाक्शो अर्को रागी डा मुर आन कली हिक्पाइक्मी बाक्त। डोंइती आ आफ दाऊदमी मुर आन कली हिक्पाइश्शो बाक्माक्त। मुल मेकोपुकी लाख का ५३ हजार ६ सहे वोंइश मुर बाक्मा बाक्त। १इतिहास २२:२<sup>18</sup> मेको रे ७० हजार आन कली कुरब, ८० हजार आन कली पहाडम फुल्लु खोइक्ब नु हजार सां ६ सहे आन कली मेको गेय पाइब आन कली कोव्रब सेल्लुमी बाक्त।

परमप्रभु यावे कली खिं सेल्लो

१राजा ६:-

3 मिनु सोलोमनमी यरूसलेम डा मोरीयाह डांडाम परमप्रभु यावे आ खिं सेल्लु गोवा बाक्त। डोंइती परमप्रभु यावेमी आ आफ दाऊद कली मेको मोरीयाह डांडाम कोंइशो बाक्माक्त। मिनु दाऊदमी “परमप्रभु आ खिं यबुसी ओरनान आ चेरब तुप्तीकेम सेल्लु माल्ब” दे माइश्शो बाक्माक्त। १इतिहास २१:१८-२६<sup>2</sup> मिनु सोलोमन पिप दुम्शो आ ४ बर्स डा महिना निक्शी डा नाक्त निक्शीमी मेको खिं सेल्लु गोवा बाक्त।<sup>3</sup> सोलोमनम परमप्रभु आ खिं दोमो सेल्लु थुं पशो बाक्माक्त देंशा हना, माइत पुक्तीके रे आ लाइश्शो ६० कुबीत नु आ ब्रेम्शो २० कुबीत बाक्माक्त। कुबीत का ०.५ मिटर बाक्ब।<sup>4</sup> खिं आ डोंइती २० कुबीत लाइश्शो, २० कुबीत ब्रेम्शो नु सहे का २० कुबीत ग्येत्थ लाइश्शो पिंडी बाक्माक्त। मेको आगा डा गारोमी क्येख सुनम गिल्पदा बाक्त।<sup>5</sup> मेको खिं आ आगा नेल्ल सला के फलेक क्येप्पदा बाक्त। मिनु नेल्ल कली क्येख सुनम गिल्पदा बाक्त। मेको दारपाइक्वा कली मेको आ तार खजूर रवा नु सिक्रीपुकी बुटा आप्शा सेल्लुपा बाक्त।<sup>6</sup> मेको खिं कली दारपाइक्वा कली हीरापुकी क्येप्पदा बाक्त। मेको आन माल्शो सुन पारवाइम माइक्तीके रे चाक्शो बाक्मा बाक्त।<sup>7</sup> मिनु मेको खिं आगा नेल्ले सुनम गिल्पदा बाक्त। मेको आ थाम, लाप्चो आ पुं डा शी, गारो नु लाप्चो नेल्ल गिल्पदा बाक्त। आन गारोम करूबपुकी मुशा सेल्लुपा बाक्त।

8 मिनु मेकोमी नेल्ल क्येडा चोव्रखो कोठा सेल्लुपा बाक्त। खिं आ ब्रेम्शो आ लाइश्शो यो खाल का डा पा २० कुबीत लाइश्शो नु २० कुबीत ब्रेम्शो सेल्लुपा बाक्त। मिनु मेकोमी आ आगा नेल्ल ६ सहे टलेन्ट क्येख सुनम गिल्पदा बाक्त। टलेन्ट का ३४ किलो बाक्ब।<sup>9</sup> मेको कांटी डा सुन नाक्शोनु, ५० शेकेल बाक्मा बाक्त। मेकोमी आ इर गे डा कोठा यो सुनम गिल्पदा बाक्त। शेकेल का ११.५ ग्राम बाक्ब

10 मिनु मेकोमी नेल्ल क्येडा चोव्रखो कोठा कली करूब निक्शी मुशा, सुनम गिल्पदा बाक्त।<sup>11</sup> मेको करूब आस फ्रां नेल्ल प्राक्शा पुक्शोनु, २० कुबीत लाइश्शो बाक्मा बाक्त। मेको करूब आ फ्रां का ५ कुबीत लाइश्शो बाक्माक्त। मिनु मेको वोइश्शा, आ फ्रां काम परमप्रभु यावे आ खिं डा गारो थिशो बाक्माक्त। मिनु मेको आ अर्को ५ कुबीत लाइश्शो फ्रांम चहिं अर्को करूब आ फ्रां थिशो बाक्माक्त।<sup>12</sup> मोपान अर्को करूब आ फ्रां खिं आ

अर्को गे डा गारो थिशो ५ कुबीत लाइश्शो बाक्माक्त। मिनु मेको आ अर्को फ्रांम अर्को डोंइती डा करूब आ फ्रांम थिशो बाक्माक्त, मेको यो ५ कुबीत लाइश्शो बाक्माक्त।<sup>13</sup> मेको करूब आस फ्रां नेल्ल पा २० कुबीत प्राक्शो बाक्मा बाक्त। मेको निक्शी राप्शो बाक्सा बाक्त। मिनु मेको निक्शीमी मेको खिं गे कोव्रशो बाक्सा बाक्त।<sup>14</sup> मिनु सोलोमनम फारतीक वा नीलो, प्याजी नु लल श्येले नु रिम्शो पा किरशो सुती श्येले रे प्रोव्रशो वा के सेल्लुपा बाक्त। मिनु करूब आ बुटा आप्शा प्रोव्रपदा बाक्त। प्रस्थान २६:३१

परमप्रभु आ खिं डा थाम निक्शी

१राजा ७:१५-२२

15 मिनु खिं आ डोंइती ३५ कुबीत लाइश्शो कांसा के थाम निक्शी सेल्लुपा बाक्त। मेको आस कली ५ कुबीत लाइश्शो गुप्तीके गुप्पदा बाक्त।<sup>16</sup> मेको थाम निक्शी आस गुप्तीके एर ऑथ हिरचा कली जाली खोदेंशो साडली निक्शी सेल्लुपाइश्शा, सहे का दारीम सेल्लुशा, मेको दारीम साडलीम क्युक्पदा बाक्त।<sup>17</sup> मेको थाम निक्शी परमप्रभु यावे आ खिं आ डोंइती का ग्युरा गे, का पेरा गे राप्पदा बाक्त। मिनु ग्युरा गे डा थाम आ नें याकीन वोदा बाक्त। पेरा गे डा थाम आ नें बोआज वोदा बाक्त। याकीन आ अर्थ “थुं बारपाइक्ब” बाक्ब। बोआज आ अर्थ “मेकोमी सक्ति गेब” बाक्ब।

खिं कली मार मार सेल्लो

१राजा ७:२३-५९

4 मिनु सोलोमनमी हुराम-अबी कली २० कुबीत लाइश्शो २० कुबीत ब्रेम्शो नु १० कुबीत ग्येत्थ लाइश्शो कांसा के चढ़ेतीक का सेल्लुपा बाक्त। कुबीत का ०.५ मिटर बाक्ब। १इतिहास ७:७

2 मिनु नोले यपाइश्शा कांसा के थम ठेयब बोस का सेल्लुपा बाक्त। मेको कली दोम्ली देंमा बाक्त। मेको सुर का रे अर्को सुर सम्म १० कुबीत बाक्माक्त। मिनु मेको आ ग्येत्थ लाइश्शो ५ कुबीत बाक्माक्त। मेको आ एर ऑथ पुक्शोनु ३० कुबीत बाक्माक्त।<sup>3</sup> मेको दोम्ली आ लाडगा गे हार निक्शी ब्यफ दारपाइक्वा कली बाक्माक्त। कुबीत काम १० ओटा ब्यफ बाक्शो बाक्मा बाक्त। मेको बोस नु दारपाइक्तीक ब्यफ कांसा यपाइक्तीक गेय रे कालेमीन सेल्लुशा बाक्मा बाक्त।<sup>4</sup> मेको दोम्ली १२ ओटा ब्यफ आन तार वोइश्शो बाक्माक्त। ब्यफ सां उत्तर गे कोव्रशो, सां पच्छिम गे कोव्रशो, सां दक्खिन गे कोव्रशो नु सां पूर्व गे कोव्रशो बाक्मा बाक्त। मिनु मेको दोम्ली मेको ब्यफ आन तार वोइश्शो बाक्माक्त। मेको ब्यफ आन मीलु आगा गे बाक्शो बाक्मा बाक्त।<sup>5</sup> मेको दोम्ली आ सुर लिली फू आ सफा खोदेंशो पा रोम्सीशो बाक्माक्त। मेको आ सुर लोटा के खोदेंशो बाक्माक्त। मेको बोस इन्ची सां थांइशो बाक्माक्त। मेको आ आगाम हजार सां बाथ ब्वाक्कु रिक्बाक्माक्त। बाथ का २२ लिटर बाक्ब।

6 मिनु सोलोमनम चिनु तेम्शा १० ओटा आइक्च कांसा के चिक्तीक बोस सेल्लुपा बाक्त। मिनु मेको के ५ ओटा दोम्ली आ ग्युरा गे नु ५ ओटा आ पेरा गे वोइक्पाइक्मी बाक्त। मिनु चोशा चढ़ेचा कली मार मार मुरचा माल्तेक्म हना, मेकेर मुरबाक्मा बाक्त। मेको दोम्ली चहिं चढ़ेब आन चिक्तीक बाक्माक्त।

7 मिनु मोसामी डोंइती बत्ती दातीक सेल्लुपा शेंशो खोदेंशो पा, १० ओटा सुन के बत्ती दातीक सेल्लुपा बाक्त। मिनु मेको परमप्रभु यावे आ खिम ५ ओटा दक्खिन गे नु ५ ओटा उत्तर गे पा वोइक्पदा बाक्त।<sup>8</sup> मेकोमी १० ओटा टेबल यो सेल्लुशा, परमप्रभु यावे आ खिम ५ ओटा ग्युरा गे नु ५ ओटा पेरा गे पा वोइक्पदा बाक्त। मिनु सहे का सुन के ब्रुइक्तीक बोस यो सेल्लुपा बाक्त।

9 मेकोमी चढ़ेब आन बाक्तीक लाडगा, ठेयब लाडगा नु लाडगा डा लाप्चोपुकी सेल्लुपा बाक्त। मिनु लाप्चो आन कली कांसाम गिल्पदा बाक्त।<sup>10</sup> मिनु मेको दोम्ली माइश्शो ठेयब ब्वाक्कु वोइक्तीके परमप्रभु यावे आ खिं आ दक्खिन पूर्व गे डा कुनाम वोइक्पदा बाक्त।

### हुराममी मार मार सेल्शो

11 मिनु हुराममी ग्यॉब, बेल्चा नु बोसपुकी सेला बाक्त। मोपा हुराममी पिप सोलोमन आ गेशो परमप्रभु आ खिं डा गेय नेल्ल थुमा बाक्त। 12 हुराममी थाम निक्शी, बोस खोदेंशो गुप्तीके, मेको आस एर ऑथ क्युक्शो दारपाइक्तीक जाली खोदेंशो साडली सेल्शा थुमा बाक्त। 13 मेको साडलीम क्युक्चा कली ४ सहे दारीम सेला बाक्त। मेको थाम आस डरम बाक्शो गुप्तीक बोस आस कली सुम्चा कली सेल्शो जाली खोदेंशो साडली नु मेको साडलीम हार निक्शी पा वोइक्चा कली दारीमपुकी, 14 बोसपुकी राप्पाइक्तीक वोइक्तीके नु बोसपुकी, 15 मेको दोम्ली माइश्शो ठेयब चिक्तीके नु मेको आ राप्पाइक्तीके डा १२ ओटा ब्यफपुकी, 16 ग्यॉबपुकी, बेल्चापुकी, श्ये गुंडतीक कांटापुकी नु मेकेर माल्शो मारेइ मारेइ सोलोमनम अरेशो खोदेंशो पा हुराममी परमप्रभु यावे आ खिं कली सेल्शो नेल्ल टल्केपपाइश्शो कांसा के बाक्मा बाक्त। 17 मिनु पिपमी मेको नेल्ल यर्दन डा दिम डा खपीम, सुक्कोथ नु सेरेदाह सहर आस दातेम यपाइश्शा सेल्पाइश्शो बाक्मावक्त। 18 मोपा सोलोमनमी मेकेर शुश कांसा के सेल्तीके सेल्पदा बाक्त। मेको कली दोशो कांसा माल्दमे, मेको मतुइश्शो बाक्मा बाक्त। 19 मिनु सोलोमनम परमप्रभु आ खिं कली माल्तीक मारेइ मारेइ सुन के चढेतीके, कौंइतीक शोब्ले वोइक्तीके टेबलपुकी सेल्पदा बाक्त। 20 मिनु मोसाम देंशो खोदेंशो पा नेल्ल क्येडा चोव्रखो कोठा आ डौंइती दाचा कली क्येख सुन के बन्ती दातीक नु आन तेल वोइक्तीके सेल्पदा बाक्त। 21 मेकोमी क्येख सुन के फू, तेल वोइक्तीके नु थनारोपुकी, 22 क्येख सुन के सल्दो क्योरतीके, बोसपुकी नु डाडुपुकी नु मी कुरतीके सेल्पदा बाक्त। मिनु परमप्रभु यावे आ खिं डा लाप्चो, आगा डा नेल्ल क्येडा चोव्रखो कोठा डा लाप्चो नु ठेयब बाक्तीक डा लाप्चो नेल्ल सुन के सेल्पदा बाक्त।

### कबल पशो सन्दोस चाक्शो

5 मिनु सोलोमनम परमप्रभु यावे आ खिं कली पशो गेय नेल्ल थुमा नोले, आ आफ दाऊदमी परमप्रभु यावे कली गेशो नेल्ल चाक्गा बाक्त। मेको सुन चांदी नु ग्यॉब नेल्ल मारेइ मारेइ परमप्रभु आ खिं डा शॉप वोइक्तीकेमी वोइक्पदा बाक्त। *इतिहास १८:११; इतिहास २९:२-४* 2 मिनु नोले सोलोमनम परमप्रभु यावे आ कबल पशो सन्दोस दाऊद आ सहर सियोन रे चाक्चा कली इस्राएल डा खाल्पापुकी, इस्राएली आन थर थर डा ठेयब मुर नेल्ले नु इस्राएली आन खिं खिं डा ठेयब मुर आन कली यरूसलेममी बुक्चा, दे ब्रेतीमी बाक्त। 3 मिनु इस्राएल डा खुम्सीशो मुर नेल्ल ७ महिना डा चाड नाक्ती पिप आ डौंइती जाक्मा बाक्त। *लेवी २३:३४* 4 मिनु इस्राएल डा खाल्पा नेल्ल जाक्मानु, लेवीपुकीम कबल पशो सन्दोस कुरमे बाक्त। 5 मिनु चढेबपुकी नु लेवीपुकीम सन्दोस, ग्रुम्तीक ताम्बु नु ताम्बुम बाक्शो ग्यॉब परमप्रभु आ मारेइ मारेइ थोव्रक कुरशा, इर लदमे बाक्त। 6 मिनु पिप सोलोमन आ डौंइती बुक्शो इस्राएल डा मुर नेल्ले मेको कबल पशो सन्दोस आ डौंइती बाक्शो बाक्मा बाक्त। मिनु मेकोपुकीम हिक्ने मचाप्चा डा पा शुश ब्यफ नु भेडा चढेमे बाक्त। 7 मिनु नोले चढेबपुकीम परमप्रभु यावे आ कबल पशो सन्दोस आ बाक्तीक परमप्रभु यावे आ खिं आ आगा डा नेल्ल क्येडा चोव्रखो कोठाम चाक्शा करूब आस फ्रां आगाम वोदमे बाक्त। 8 मेको करूब आस फ्रां मेको कबल पशो सन्दोस बाक्तीक आ तारी प्राक्शो बाक्सा बाक्त। मोपा मेको करूब निक्शीमी आस प्राक्शो फ्रांम कबल पशो सन्दोस नु आ कोक्के सुम्शो बाक्सा बाक्त। 9 मेको कोक्के चहिं थम लाइश्शो बाक्तीके नेल्ल क्येडा चोव्रखो कोठा रे ठेयब बाक्तीकेम तांडसीशो बाक्मावक्त। तन्न मेको लाडगा रे मतांडसीबाक्मावक्त। मेको मुल सम्म यो बाक्नीम। 10 मोसामी होरेब डांडाम मेको कबल पशो सन्दोस आगा वोइश्शो फुल्लु निक्शी क्येडा लाक्शा, अरु मारेइ मबाक्मावक्त। मेना परमप्रभु यावेमी इस्राएली इजीप्त प्रौंइशा गाक्मानु, कबल पशो बाक्मावक्त। *ब्यवस्था १०:५; हिल्बू ९:४* 11 मिनु चढेबपुकी नेल्ल क्येडा चोव्रखो कोठा रे गूमा बाक्त। मेकेर बाक्शो चढेब नेल्ले आन पालो मरिम्थुन परमप्रभु यावे आ डौंइती जाक्चा

कली ठीक सेल्सीशो बाक्मा बाक्त। *इतिहास ८:१४; लूका १:८-९* 12 मिनु कुम्सो पाइब लेवी नेल्ल, आसाफ, हेमान, येदुथून नु मेको आन तौपुकी, मेको आन खिं खिं डा वौंइश मुर नेल्ल रिम्शो पा किरशो श्येले रे प्रोव्रशो सुती वा फेक्सीशा बुक्केल, ठेयब नु आइक्च तार पाइश्शो ताप्तीके कुरशा चढेतीक आ पूर्व गे राम्मा बाक्त। मिनु मेकोपुकी नु सहे का २० जना चढेब यो बाक्मा बाक्त। मिनु मेकोपुकी चहिं तुराही ताप्ब बाक्मा बाक्त। *इतिहास १५:१९; इतिहास १६:३७; इतिहास १६:४१-४२* 13 मिनु तुराही ताप्बपुकी नु कुम्सो पाइबपुकीम खाल का डा सेंदा पा “परमप्रभु यावे, गे ठेयब बाक्नीनी। गे रिम्शो पाइब बाक्नीनी” दे कुम्सो पतीक मेको आन गेय बाक्मावक्त। मिनु मेकोपुकीम तुराही, बुक्केल नु अरु ताप्तीक ताप्शा, परमप्रभु यावे कली “गे रिम्शो पाइब बाक्नीनी। इन दाक्तीके गेना हना यो लीब” दे कुम्सो पामे बाक्त। मिनु परमप्रभु यावे आ खिं गोस्सुम ब्रीमावक्त। *इतिहास १६:३४; भजन संग्रह १०६:१* 14 मिनु मेको गोस्सुम खिं ब्रीतीके चढेबपुकीम गेय पने मचाप्मे बाक्त। मारदे हना परमप्रभु यावे आ खिं आ छेडछेडम ब्रीशो बाक्मावक्त। *इतिहास ७:१-३; प्रस्थान ४०:३५*

### सोलोमनम परमप्रभु नु लोव्र पशो

१ राजा ८:१२-५३

6 मिनु सोलोमनम “परमप्रभु यावे, गे ‘गो थम क्येर गोस्सुम बाक्नुड’ देंशो बाक्तीनी। 2 गो इन कली गेना हना यो बाक्चा कली थम दारशो खिं का सेल्ता” देंमावक्त।

3 मिनु नोले पिप खुम्सीशो इस्राएली गे हिरशा, नेल्ल आन कली आसीक गेमी बाक्त। मेना मुर नेल्ले राप्शो बाक्मा बाक्त। 4 मिनु मेकोमी “परमप्रभु यावे, इस्राएली आन परमप्रभु, गे ठेयब बाक्नीनी। गे आं आफ दाऊद नु देंशो लोव्र मुल खाप्शो बाक्नीनी। 5 गे आं आफ दाऊद कली ‘गो आं मुर आन कली इजीप्त रागी रे गुंडशा चाक्गुमी रे मुल सम्म आं नें वोइक्चा नु आं खिं सेल्चा कली इस्राएल डा तेकोइ थर आन सहर मयोव्रडु। मिनु गो आं मुर इस्राएली आन कली सासन पपाइक्चा कली पिप मयोव्रडु। 6 तन्न गो आं नें कली मान पचा, दे यरूसलेम कली योव्रता। मिनु दाऊद कली आं मुर इस्राएली आन पिप दुम्चा कली योव्रता’ देंशो बाक्तीनी। 7 आं आफ दाऊदम परमप्रभु यावे, इस्राएली आन परमप्रभु आ नें कली मान पा खिं का सेल्चा कली थुं पशो बाक्मावक्त। *२सामुएल ७:२-१३* 8 तन्न परमप्रभु यावे, गे आं आफ दाऊद कली ‘गे आं नें कली मान पा खिं का सेल्चा थुं पाप्तीवी। मेको रिम्शो बाक्ब। 9 मो हना यो गे मेको सेल्चा मदुम्नेवे। तन्न इ तौम आं नें कली मान पा खिं का सेल्चा माल्ब’ दे माइश्शो बाक्तीनी। 10 मुल परमप्रभु यावे, गे इन देंशो लोव्र खाप्तीनी। परमप्रभु यावे, गे इन लोव्र खोदेंशो पा गो आं आफ दाऊद आ पा डा पिप दुम्ती। मिनु गो इस्राएल डा पिप आ ठेयब नित्तीकेम निश्शो बाक्नुड। मिनु गो परमप्रभु यावे, इस्राएली आन परमप्रभु, इन नें कली मान पा एको खिं सेल्ता। *जकरिया ४:९* 11 मिनु गो इन कबल पशो सन्दोस मेको आगाम वोइक्ता। परमप्रभु यावे, इन इस्राएली नु पशो कबल आगाम बाक्ब” देंमावक्त। *ब्यवस्था ९:९; ब्यवस्था १०:५*

### परमप्रभु आ खिं जिम्मा गेशो

12 मिनु सोलोमन परमप्रभु यावे कली चढेतीक आ डौंइती नु इस्राएल डा खुम्सीशो मुर नेल्ल आन डौंइती राप्शा, आ गुइ निम्फा पोक्गा बाक्त। 13 सोलोमनम ५ कुबीत लाइश्शो, ५ कुबीत ब्रेम्शो नु कुबीत सां ग्येत्थ लाइश्शो कांसा के राप्तीक का सेल्पाइश्शा, लाडगा आ दातेम वोइश्शो बाक्मावक्त। मिनु मेको तार राम्मावक्त। मिनु नोले खुम्सीशो इस्राएली नेल्ल आन डौंइती आ पोक्च थेक्शा, आ गुइ सरीड गे पोक्गा बाक्त। *कुबीत का ०.५ मिटर बाक्ब।* 14 मिनु मेकोमी “परमप्रभु यावे, इस्राएली आन परमप्रभु, सरीड नु रागीम इन खोदेंशो सुइ मबाक्नीम। गे कबल खाप्ब बाक्नीनी नु इन कली नेल्ल थुंम खोइक्ब इन वाइल आन कली गे गेना हना यो दाक्नीनी। 15 गे इन वाइल, आं आफ दाऊद कली देंशो लोव्र खाप्तीनी। इन देंशो लोव्र मुलाक्त पाइतीनी। 16 मोपतीके परमप्रभु यावे, इस्राएली आन परमप्रभु इन गेय पाइब, आं आफ दाऊद कली देंशो लोव्र खपीन। मार देंशो लोव्र खपीन

देंशा हना, 'इसाएली आन कली सासन पचा कली गेना हना यो इ मुर बाक्ब। गे आं डोंइती गाक्शो खोदेंशो पा इ आलपुकीम आं अरेशो लोव्र पास्तेक्म हना, इसाएल डा ठेयब निस्तीकेम पिप दुम्चा कली गेना हना यो इ मुर का बाक्ब' देंशो बाक्तीनी। २सामुएल ७:१६<sup>17</sup> मिनु मुल परमप्रभु यावे, इसाएली आन परमप्रभु, इन गेय पाइब दाऊद कली देंशो लोव्र थमा दुम्पतीन।

18 मिनु मार, परमप्रभु थमा पा मुर नु रागीम बाक्बा डा? सरीड नु स्वर्गम इन कली मरिक्ब हना, इन कली सेल्शो खिंम इन कली दोपा रिक्बा डा? १इतिहास २:५<sup>19</sup> इन गेय पाइब, आं पुंइशो, आं पशो लोव्र नेनीन। परमप्रभु यावे, आं परमप्रभु, आं ब्रेशो नु आं प्रार्थना नेनीन। 20 मिनु इन देंशो लोव्र खोदेंशो पा इन नें कली मान पचा कली सेल्शो बाक्तीक, एको खिं कली नाक्दो नाक्ती कोव्रडीन। मिनु इन खिं गे कोव्रशा पुनुनु, आं लोव्र नेनीन। 21 मिनु इन गेय पाइब नु इसाएली, इन मुरुम एको खिं गे कोव्रशा पुन्मेनु, इन स्वर्ग डा बाक्तीक रे नेनीन। मिनु नेंशा मेको आन पाप क्याम्दीन।

22 सुइम अरु मुर कली पाप पशो बाक्त् हना, कसम जचा माल्ताक्व हना, मेको मुर कली इन कली चढेतीक नु इन खिं आ डोंइती कसम जपाइक्तेक्म हना, ब्यवस्था २७:२६; प्रस्थान २२:१०<sup>23</sup> गे स्वर्ग रे मेको नेंशा, मार पचा माल्बा, मेको पने। मिनु इन गेय पाइब आस दातेम निसाफ पने। दोस ताइब कली सजाइ गेने। मिनु दोस मताइब कली प्रोनीन। दोपा ठीक पवा, मेको आ पशो खोदेंशो पा, मेको कली गेने।

24 मिनु इसाएली, इन मुरपुकीमी इन कली पाप पशा, आन जोरी सत्रु नु लडाइ पा ब्रुम्तेक्म हना, तन्न एको इन खिं जाक्शा, इन नें थिशा, इन कली पुंइशा, इन गे लेत्तेक्म हना, ब्यवस्था २८:२५<sup>25</sup> गे स्वर्ग रे मेको आन पुंइशो नेनीन। मिनु इसाएल डा मुर आन पाप क्याम्दीन। मिनु गे मेको आन कली नु आन किकी पिपी आन कली गेशो रागीम लेश्शा चाक्कीन।

26 मिनु मेकोपुकीम इन कली पाप पतीके, रेउ मयित हना, मेकोपुकीम इन बाक्तीक गे कोव्रशा, इन कली पुंइनीम। मिनु गे मेको आन कली सजाइ गेब परमप्रभु बाक्तीनी, दे तुइक्नीम। मिनु आन पाप रे लेश्शा, इन कली पुंइतेक्म हना, ब्यवस्था २८:२३-२४<sup>27</sup> गे, स्वर्ग डा बाक्तीक रे मेको आन पुंइशो लोव्र नेनीन। मिनु इन गेय पाइब, इसाएली आन पाप क्याम्दीन। गे मेको आन गाक्वा माल्शो रिम्शो लां कोंइदीन। मिनु गे इन इसाएल डा मुर आन कली गेशा आन थेरशो रागीम रेउ थिपतीन।

28 मिनु रागीम अन्काल दुम्त हना, मुरपुकी बेक्तीक रोइ पास्तेक्म हना, चेरब सोव्रतीक रोइ जाक्त् हना, बुंखी डाइक्ताक्व हना, सल्हा सौपु जोम्तेक्म हना, आन जोरी सत्रुम आन बाक्तीक पुम्ताक्म हना, दोदेंब हिंचा डा श्येत नु रोइ बोक्त् हना यो,<sup>29</sup> इन इसाएल डा मुर नु अरु सुइम आन श्येत इन कली शोव्रशा, एको खिं गे कोव्रशा, आन गुइ पोक्शा, इन कली पुंइतेक्म हना,<sup>30</sup> गे, इन मुर आन पुंइशो इन स्वर्ग डा बाक्तीक रे नेनीन। मिनु मेको आन पाप क्याम्दीन। गे इन मुर आन थुं तुइश्शो खोदेंशो पा रिम्शो कली रिम्शो नु मरिम्शो कली मरिम्शो पने। मारदे हना गे ला मुर आन थुं तुइक्ब बाक्तीनी। भजन संग्रह १३९:१-४, २३<sup>31</sup> मोपा इन कली मान पा हिंशा, मबेक्मा सम्म इन लां गाक्शा नु इन गेशो आन किकी पिपीम थेरशो रागीम रिम्शो पा बाक्तीनी।

32 मिनु इन मुर, इसाएली मबाक्थु, अर्को रागी डा मुरपुकीम डोन रागी रे जाक्शा, इन ठेयब नें, इन सक्ति नु इन वारच पतीके नेंशा, एको खिं गे कोव्रशा, पुंइतेक्म हना,<sup>33</sup> गे, इन स्वर्ग डा बाक्तीक रे मेको आन पुंइशो नेंशा, मेको अर्को रागी डा मुर आन पुंइशो गेने। मोपा इसाएली खोदेंशो पा रागी डा मुर नेल्लेमी इन कली तुइश्शा, इन कली मान पा हिंनीम। मिनु मेकोपुकीम आं सेल्शो खिंम गे थमा पा बाक्तीनी, दे तुइक्नीम।

34 मिनु इन मुरपुकीम आन जोरी सत्रु नु लडाइ पचा कली तेको लां रे सोइक्ताक्नी हना यो, इन योव्रशो सहर नु गोम इन कली मान पा सेल्शो खिं गे कोव्रशा, पुंइतेक्म हना, दानीएल ६:११<sup>35</sup> गे मेको आन पुंइशो लोव्र इन स्वर्ग डा बाक्तीक रे नेंशा आन माल्शो गेशा वारच पने।

36 मिनु मेकोपुकीमी इन कली पाप पास्तेक्म हना, मारदे हना पाप मपाइब सुइ मबाक्तीनी। गे मेको आन कली तशा गाइश्शा, मेको आन कली आन जोरी सत्रु आन गुइमी गेतीनी हना, मेकोमी मेको आन कली ग्याइश्शा,

डोन रागी हना यो, आन नेक्था डा रागी हना यो लाइश्शा, चोक्तेक्म हना,<sup>37</sup> मिनु मेको रागीमी मेको आन थुं इन गे लेश्शा, मेकोपुकीम 'गो पाप पाइतक, गो दूली पाइतक, गो काइ मरिम्शो पाइतक' देंशा, दानीएल ९:५<sup>38</sup> मिनु मेको रागीम आन थुं नेल्लेमी इन गे लेश्शा, आन किकी पिपीम थेरशो रागी, इन योव्रशो सहर नु गो इन कली मान पचा कली सेल्शो खिं गे कोव्रशा, इन कली पुंइतेक्म हना,<sup>39</sup> इन स्वर्ग डा बाक्तीक रे मेको आन पुंइशो लोव्र नेनीन। मिनु मेको आन माल्शो गेन। आन पशो पाप नेल्ल क्याम्दीन।<sup>40</sup> मुल आं परमप्रभु, मेको खिं रे इन मुर आन लोव्र नेंशा कोव्रडीन। मिनु आन पुंइशो नेनीन।

41 परमप्रभु यावे, परमप्रभु, मुल बोक्कीन। गे नु इन सक्ति डा कबल पशो सन्दोस इन नाइश्शा बाक्तीकेम जाक्कीन। परमप्रभु यावे, परमप्रभु, इन कली चढेबपुकीम इन मुर आन कली पाप क्याम्तीक गेय पपतीन। मिनु इन कली थमा सुइक्ब इन रिम्शो पशो तशा ग्येरसमल। भजन संग्रह १३२:८<sup>42</sup> परमप्रभु यावे, परमप्रभु, गे इन तेल लुक्शो मुर, आं कली मप्रोंइयीनी। इन गेय पाइब दाऊद कली पशो इन गेना हना यो दाक्तीक मिम्तीन" दे सोलोमनम परमप्रभु कली देंमाक्त्। भजन संग्रह ८९:४-५

परमप्रभु आ खिंमी चाड मानेशो

१राजा ८:५४-६६

7 मिनु सोलोमनम मेको पुंइने थुमा नोले सरीड रे मी यिमाक्त्। मिनु मेको मीम चोशा चढेशो नु अरु चढेशो नेल्ल नेक्मा बाक्त्। मिनु परमप्रभु यावे आ छेडछेडम आ खिं कली ब्रीमाक्त्। लेवी ९:२४; १राजा १८:३८; प्रस्थान ४०:३४<sup>2</sup> मिनु परमप्रभु यावे आ खिं आ छेडछेडम ब्रीतीके, चढेबपुकी परमप्रभु यावे आ खिं ओव्रने मचबमे बाक्त्।<sup>3</sup> इसाएली नेल्लेमी मेको मी यिशा नु परमप्रभु यावे आ खिं आ तार छेडछेड बाक्शो तामे बाक्त्। मेकोपुकीमी खप सम्मन बाप्शा "परमप्रभु यावे, गे रिम्शो पाइब बाक्तीनी। इन दाक्तीके गेना हना यो लीब" देंशा, ठेयब सेल्मे बाक्त्। २इतिहास ५:१३-१४; भजन संग्रह १०६:१

4 मिनु नोले पिप नु मुर नेल्लेमी परमप्रभु यावे आ डोंइती चढेमे बाक्त्। 5 मिनु पिप सोलोमनम २२ हजार ब्यफ नु लाख का, २० हजार भेडा चढेवा बाक्त्। मोपा पिप नु मुर नेल्लेमी मेको खिं परमप्रभु कली जिम्मा गेमे बाक्त्। 6 चढेब आन पालो खोदेंशो पा बाक्मा बाक्त्। लेवीपुकी परमप्रभु यावे कली ताप्तीक ताप्चा कली आन ताप्तीके शेशा बाक्मा बाक्त्। पिप दाऊदम मेको ताप्तीकपुकी परमप्रभु यावे कली ठेयब सेल्चा कली "आ दाक्चा गेना हना यो लीब" दे कुम्सो पचा कली, परमप्रभु यावे कली ठेयब सेल्ची ना कली सेल्शो बाक्माक्त्। मिनु लेवीपुकीमी कुम्सो पामे बाक्त्। चढेबपुकी कोव्रमुशा तुराही ताप्मे बाक्त्। मेना इसाएली नेल्ल राप्शा बाक्मा बाक्त्। २इतिहास ४:१

7 मिनु नोले सोलोमनम परमप्रभु यावे आ खिं आ डोंइती डा लाडगा परमप्रभु कली जिम्मा गेवा बाक्त्। मिनु मेकेर चोशा चढेतीक चढेवा बाक्त्। दुशा बाक्चा आ पर्वम चढेशो आन बाँसो यो चढेवा बाक्त्। मारदे हना मेको आ सेल्शो कांसा के चढेतीकेम चोशा चढेशो, अन्न चढेशो नु बाँसो चढेचा कली मरिक्त् बाक्त्। २इतिहास ४:१

8 मेना सोलोमनम ७ नाक्ती सम्म चाड सेला बाक्त्। मिनु इसाएली नेल्ले मेको नु बाक्मा बाक्त्। लेबो-हमाथ रे इजीप्त डा खोला सम्म शुश मुरुमी ७ नाक्त् सम्म चाड मानेमे बाक्त्। 9 मिनु मेकोपुकीमी ८ नाक्तीम परमप्रभु यावे कली ठेयब गुम्तीक का सेल्मे बाक्त्। मारदे हना मेकोपुकीम चढेतीक डा जिम्मा गेतीके ७ नाक्त् सम्म मानेमे बाक्त्। मिनु नोले ७ नाक्त् डा चाड यो मानेमे बाक्त्। गन्ती ७:१०<sup>10</sup> मिनु ७ महिना डा २३ नाक्तीम सोलोमनम मुर आन कली आन खिं खिं सोइक्तीमी बाक्त्। मेकोपुकी थुं नाइश्शा, थम ग्येरसीशा लमा बाक्त्। मारदे हना परमप्रभु यावेमी दाऊद, सोलोमन नु आ मुर आन कली थम रिम्शो पवा बाक्त्। 11 मो पा सोलोमनम परमप्रभु यावे आ खिं नु आ दरवार सेल्ने थुमा बाक्त्। मिनु परमप्रभु यावे आ खिं नु आ खिं सेल्चा थुं पा रिम्शो पा थुमा बाक्त्।

## परमप्रभुमी लोव्र पशो

१राजा ९:१-९

12 मिनु नोले परमप्रभु यावे नाक्दो सोलोमन आ डोंइती तपांडसीशा, मेको कली "गो इ पुंडशो लोव्र नेता। मिनु गो मेको खिं मुरपुकीमी आं कली मेकेर चढ़ेचा कली योव्रता। *ब्यवस्था* १२:५-६; *यसैया* ५६:७; *मर्कूस* ११:१७; *यूहन्ना* २:१६ 13 गो सरीड कली चोक्शो खोदेंशो पा रेउ मयिपाइक्ता हना, गो रागी कली खतम पोक्चा कली सल्हा सोइक्ताकड हना, आं मुर आन दातेम बेक्तीक रोइ पपाइक्ता हना, 14 मिनु आं मुरपुकी ब्रेम्शो दुम्शा, आं कली पुंडशा, आं कली माल्तेक्म हना, आन मरिम्शो लां रे लेत्तेक्म हना, गो स्वर्ग रे मेको आन पुंडशो नेंनुड। मिनु मेको आन पाप क्याम्नुड। मिनु गो मेको आन रागी कली डोंइती डा खोदेंशो पा रिम्शो सेल्नुड। 15 मिनु मेको बाक्तीकेमी मुरपुकीमी आं कली पुंडशो लोव्र गो कोव्रशा नोफा दाइक्नुड। *२इतिहास* ६:४० 16 मारदे हना गो आं नें गेना हना यो बाक्चा कली एको खिं कली योव्रता। एको आं के ला बाक्ब। गो मेको कली कोव्रनुड। आं थुं गेना हना यो मेकेर बाक्ब। 17 मिनु गे चहिं इ आफ दाऊद आं डोंइती गाक्शो खोदेंशो पा गाक्तेवे नु आं इन कली शेंशो फुल्लुम मुशा ब्रेक्शो लोव्र नु आ निसाफ पतीक लोव्र नेल्ल पाप्तीवी हना, 18 गो इ राज्य बोल्यो नु ठेयब सेल्नुड। गो इ आफ दाऊद कली कबल पशो खोदेंशो पा इ कली यो 'गेना हना यो इस्राएली आन कली सासन पचा कली इ खिं डा मुर का बाक्ब' दे कबल पाइनुड। *२इतिहास* ६:१६

19 तन्न गे नोले शोंइसीशा, गो इ डोंइती वोइश्शो आं फुल्लुम मुशा ब्रेक्शो लोव्र नु आं शेंतीके मटिप्तीवी हना, नु लशा अर्को देवी देवता आन कली सेउ पा पूजा पाप्तीवी हना, 20 गो इन कली गेशो रागी रे गुंडनुड। मिनु गो आं नें बाक्शो खिं प्रॉइनुड, काइ मकोव्रनुड। मिनु गो एको कली जात जात डा मुर आन दातेमी खिसी नु शुक्शी पाइक्तीक सेल्नुड। *ब्यवस्था* २८:६३; *१राजा* १४:१५ 21 मिनु एको खिं आ पर्वम मार देंनीमी? मुल ठेयब दारशो बाक्ब। तन्न नोले एको लां रे गाक्ब मुर नेल्ल छक लाक्शा 'मारदे परमप्रभु यावेम एको रागी नु एको खिं ओदेंशो सेला?' दे हिल्लो पाइनीम। *ब्यवस्था* २९:२३-२८; *येरमीया* २२:८-९ 22 मिनु लेंशा मुरपुकीमी 'मारदे हना मेकोपुकीमी परमप्रभु यावे, आन किकी पिपी आन परमप्रभुमी मेको आन कली इजीप्ट रे गुंडशा चाक्ब परमप्रभु यावे कली प्रॉइतेक्म। मिनु अर्को देवी देवता आंम के सेल्शा, पूजा पा गेय पाप्तेक्म। मोपतीके परमप्रभु यावेमी मेको आन कली मोदेंशो श्येत गेप्तु' दे लोव्र लेत्नीम" देमा बाक्त।

## सोलोमन आ अरु पतीके

१राजा ९:१०-२८

8 मिनु सोलोमन परमप्रभु यावे आ खिं नु आ दरवार सेल्चा कली २० बर्स माल्दा बाक्त। 2 मिनु पिप हुरामम सोलोमन कली सहरपुकी गेवा बाक्त। मिनु सोलोमन मेको सहर आन कली लेंशा सेला बाक्त। मेकेर इस्राएल डा मुर आन कली बाक्पाइक्मी बाक्त। 3 मिनु सोलोमन हमाथ-सोबा लशा, लडाइ पा मेको आ के सेला बाक्त। 4 मिनु गोरशो रागीमी तदमोर माइश्शो सहर सेला बाक्त। मिनु हमाथम यो मार मार वोइक्तीक सहरपुकी सेला बाक्त। 5 मेकोमी आइक्था डा बेथ-होरोन नु आइदी डा बेथ-होरोन यो सेला बाक्त। मिनु गारो हिरशो, ठेयब लाप्चो वोइश्शो नु आगलो पाइश्शो बोल्यो सहर दुम्मा बाक्त। 6 मेकोमी बालाथ सहर नु सोलोमन आ मार मार वोइक्तीक सहरपुकी सेला बाक्त। मिनु बग्गी वोइक्तीक सहर नु शारा आन कली वोइक्तीक सहरपुकी सेला बाक्त। मेकोमी यरूसलेम, लेबानोनम नु आ राज्य नेल्लेमी आ दाक्शो खोदेंशो पा सहरपुकी सेला बाक्त। 7 हित्ती, एमोरी, परिज्जी, हिक्वी नु यबुसी इस्राएली मबाक्शो मुर, 8 आन चच युइ इस्राएल रागीमी लीशो बाक्मा बाक्त। मारदे हना मेको आन कली मसाइक्थु, ब्रोंइचा गेशो बाक्मा बाक्त। मिनु सोलोमनम मेको आन कली वाइल सेल्शा, गेय पपदा बाक्त। मेको मुल सम्म मोदेंशोन बाक्नीम। *यहोसु* १६:१० 9 तन्न सोलोमनम इस्राएल डा मुर रे मोदेंशो वाइल गेय पचा कली सुइ मलदा बाक्त। मेको आन कली लडाइ पाइब, आन ठेयब मुर, आ बग्गी चलेब नु शारा डोइक्ब आन कप्तान सेल्मी

बाक्त। 10 पिप सोलोमन के सहे निक्शी ५० जना अधिकार पाइश्शो मुर बाक्मा बाक्त। मेकोपुकी मुर आन कली कोव्रब बाक्मा बाक्त।

11 मिनु सोलोमनम फाराओ आ तमी कली दाऊद आ सहर रे मेको कली सेल्शो खिम चाक्गा बाक्त। मारदे हना मेकोमी "आं मीश इस्राएल डा पिप दाऊद आ खिंमी बाक्चा मदुम्ब। मारदे हना मेको परमप्रभु यावे आ कबल पशो सन्दोस बाक्शो, परमप्रभु आ बाक्तीक ला बाक्ब" देमाक्त। *१राजा* ३:३

12 मिनु नोले सोलोमनम परमप्रभु यावे आ खिं डा पिंडी आ डोंइती वोइश्शो आ सेल्शो चढ़ेतीकेम परमप्रभु यावे कली चोशा चढ़ेतीके चढ़ेवा बाक्त। *२इतिहास* ४:१ 13 मोसा आ अरेशो खोदेंशो पा नाइक्तीक नाक्ती, औंसी नाक्ती, बर्स डा चाड सां बोर्ब ओख्दी मसुप्शो जिज शोब्ले जतीक चाड, ७ नाक्त डा चाड नु गोठ सेल्शा बाक्तीक चाड मानेतीक नु नाक्त किंत किंत चढ़ेचा माल्शो चढ़ेतीक चढ़ेवा बाक्त। *लेवी* २३:-; *गन्ती* २८:२,४,११,१७,२६; *गन्ती* २९:१२ 14 सोलोमन आ आफ दाऊदम ब्रेक्शो अरेशो लोव्र खोदेंशो पा, तेको चढ़ेबम गेना चढ़ेचा माल्बा, आन पालोम पतीक गेय नेल्ल देंशो बाक्माक्त। मिनु लेवीपुकीमी परमप्रभु यावे कली ठेयब सेल्तीक कुम्सो पचा कली नु चढ़ेब आन कली वारच पचा कली बाक्मा बाक्त। मिनु लाप्चो खाल पाइब आन कली आन हुल हुल पा योव्रशा, तेको तेको लाप्चोम बाक्चा माल्दा मोपा वोइक्पाइश्शो बाक्माक्त। मारदे हना परमप्रभु आ मुर दाऊद मोदेंशो अरेशो बाक्त। *१इतिहास* २३:- *१इतिहास* २६:- 15 मिनु चढ़ेबपुकी नु लेवीपुकीमी पिप आ अरेशो नेल्ल ठीक पा पामे बाक्त। मोपा मेकोपुकीमी शोंप वोइक्तीक कोठा यो कोव्रडमे बाक्त।

16 सोलोमनम परमप्रभु यावे आ खिं डा जग दोवा रे नेल्ल मथुमा सम्म मोदेंशो दुम्माक्त।

17 मेको नोले सोलोमन ठेयब समुन्द्र आ नेक्था एदोम रागी डा एस्पोन-गेबेर नु एलोथ लमाक्त। 18 मिनु पिप हुराममी आ गेय पाइबपुकी, आ जहाजपुकी नु जहाज चलेब आन कली सोलोमन कली वारच पचा कली ठेयब समुन्द्रम सोइक्ता बाक्त। मेकोपुकी सोलोमन आ गेय पाइबपुकी नु ओफीर लशा, ४ सहे ५० टलेन्ट सुन ग्याप्शा चाक्शा, पिप सोलोमन कली गेमे बाक्त। *टलेन्ट का* ३४ *किलो बाक्ब*।

## शेबा डा पिपीम जाक्शो

१राजा १०:१-१३

9 शेबा डा पिपीममी सोलोमन आ शुश नें चलेशो नेना बाक्त। मिनु मेकोमी सोलोमन कली नाक्चा कली लेन्ने मचाप्चा डा लोव्र हिल्लो पथ यरूसलेमम जाक्माक्त। मेको शुश मुर नु जाक्शा, शुश दलओठम मस्लापुकी, शुश सुन नु हीरापुकी कुर पा जाक्माक्त। मिनु मेकोमी सोलोमन कली ग्रुम्शा, आ थुम बाक्शो लोव्र नेल्ल हिल्लो पवा बाक्त। *मत्ती* १२:४२ 2 मिनु सोलोमनमी आ हिल्लो पशो लोव्र नेल्ल लेत्ता बाक्त। मेकोमी तेको लोव्र हिल्लो पवा, मेको लोव्र सोलोमनम मारदेइ श्येत मलाक्थु, लेत्ता बाक्त। 3 मिनु शेबा डा पिपीममी सोलोमन आ रुप्तीक थुं नेल्ल तशा, मेको आ सेल्शो खिं, 4 मेको आ टेबल डा जचा थोव्रक, मेको आ एर ओथ निश्शो आ सरकार डा ठेयब मुरपुकी, मेको आ गेय पाइब आन दारशो वा, अरु आन फेक्तीके नु पिप कली तूचा गेब आन वा कोव्रस डा कोव्रस दुम्माक्त। मिनु परमप्रभु यावे आ खिं लशा, मेको आ चोशा चढ़ेशो तशा, शुश छक लाक्माक्त।

5 मिनु मेकोमी पिप कली "आं रागीम इन पतीके नु शुश रुप्तीक थुं आ पर्वम नेंशो लोव्र नेल्ल थमा बाक्त। 6 तन्न गो जाक्शा, आंमा मतडा सम्म मेको आन देंशो लोव्र थमा मसुदु। मेकोपुकीमी आं कली इन रुप्तीक थुं आ पर्वम नेल्ल लोव्र मशोव्रडमे बाक्त। इक्का ला शोव्रडमे बाक्त। तन्न गे शुश रुप्तीक थुं पाइश्शो बाक्तीनी। 7 इन मुर ग्येरशो मुर बाक्नीमी। नाक्त किंत किंत इन डोंइती गेय पाइबपुकीम इन रुप्तीक थुं डा लोव्र नेंशा, ग्येरसीशो बाक्नीमी। 8 परमप्रभु यावे, इन परमप्रभु ठेयब बाक्ब। इन कली तशा ग्येरसीशा आ ठेयब निक्तीकेमी इन कली निप्पाइश्शा, आ पा डा पिप सेल्तु। मारदे हना परमप्रभु यावे, इन परमप्रभुम इस्राएली आन कली दाक्शा, गेना हना यो बाक्पाइक्चा थुं पाप्तु। मोपतीके इन कली मेकेर ठीक निसाफ पचा

नु ठीक पतीके शेंचा, दे आन पिप सेल्लु" देंमाक्त। १इतिहास २९:२३<sup>9</sup> मिनु नोले मेकोमी पिप कली सहे का २० टलेन्ट सुन शुश मस्ला नु शुश हीरा गेवा बाक्त। शेबा डा पिपीममी सोलोमन कली गेशो मस्लापुकी, थम रिम्शो बाक्शा तेइ मथिसीब बाक्माक्त। टलेन्ट का ३४ किलो बाक्ब।

10 मिनु मेको नेल्ल प्रॉइशा, पिप हुराम नु सोलोमन आस गेय पाइबपुकीम ओफीर रे सुन चाक्वामे बाक्त। मिनु मेकोपुकीमी शुश क्येट लाइब शी नु हीरापुकी यो चाक्वामे बाक्त। 11 मिनु पिपमी मेको शी रे परमप्रभु यावे आ खिं नु दरवार कली थेंका सेला बाक्त। कुम्सो पाइब आन कली ठेयब नु आइक्च तार पाइशो ताप्तीकपुकी सेला बाक्त। डॉइती मोदेंशो रिम्शो शी यहूदा रागीम गेनायो मबाक्शो बाक्माक्त।

12 मिनु पिप सोलोमनम शेबा डा पिपीम कली आ चाक्शा गेशो कोसेली क्येडा यो शुश आ माल्शो मारेइ मारेइ गेवा बाक्त। मिनु नोले मेको आ गेय पाइबपुकी नु आ रागी लेम्माक्त।

सोलोमन आ शॉप नु आ मान तशो

१राजा १०:१४-२९

13 सोलोमन आ बाक्तीकेम बर्स काम ६ सहे ६६ टलेन्ट सुन ताक्बाक्माक्त। टलेन्ट का ३४ किलो बाक्ब। 14 मेको प्रॉइशा, आ ग्याप्ब लेयबपुकीमी यो चाक्बाक्मा बाक्त। अराब रागी डा पिपपुकी नु रागी रागी डा सासन पाइबपुकीमी यो सोलोमन कली सुन नु चांदी चाक्बाक्मा बाक्त। 15 मिनु पिप सोलोमनमी तुप्शो सुन के सहे निक्शी लडाइ पाइब आन कली ठेयब तेक्तीक सेला बाक्त। मेको तेक्तीक का सेल्चा कली ६ सहे शेकेल सुन माल्मा बाक्त। शेकेल का ११.५ ग्राम डा चांदी के क्येट बाक्ब। 16 मेकोमी लेंशा तुप्शो सुन के सहे सां आइक्च तेक्तीक सेला बाक्त। मेको तेक्तीक का सेल्चा कली सहे सां शेकेल सुन माल्मा बाक्त। मिनु पिपमी मेको नेल्ल लेबानोन ब्वाकी डा खिंम वोइक्पदा बाक्त। १राजा ७:२ 17 मिनु पिपम हात्ती आ दारा के ठेयब नित्तीक का सेल्शा, मेको कली क्येख सुनम गिल्पदा बाक्त। 18 मेको ठेयब नित्तीके आ डॉइती ६ ओटा थेंका नु सुन के खोइल वोइक्तीक बॉइसीशो बाक्माक्त। मेको ठेयब नित्तीक आ निम्फा पटटी गुइ वोइक्तीक बाक्माक्त। मेको गुइ वोइक्तीक निम्फा पटटी गे राष्णो गुप्स का का सेल्शो बाक्माक्त। 19 मेको ६ ओटा थेंकामी थेंका कामी एर गे गुप्स का, ऑथ गे गुप्स का पा १२ ओटा गुप्स सेल्शो बाक्माक्त। तेकोइ राज्यम मोदेंशो ठेयब नित्तीके गेनायो मसेल्शो बाक्माक्त। 20 सोलोमन आ तूतीक बोस नेल्ल सुन के बाक्माक्त। मिनु लेबानोन ब्वाकी डा खिं डा बोस नेल्ले क्येख सुन के बाक्मा बाक्त। चांदी के मारेइ मसेल्शो बाक्मा बाक्त। मारदे हना सोलोमन आ पालाम चांदी मारेइ खोदेंशो मबाक्माक्त। 21 हुराम आ गेय पाइबपुकी पिप सोलोमन आ जहाजपुकी नु टारसीस डा बाक्त। मिनु बर्स सां सांमी मेको पिप आ जहाजपुकीम सुन, चांदी, हात्ती आ दारा, मोरपुकी नु मजुरपुकी चाक्बाक्मा बाक्त।

22 मोपा पिप सोलोमन शॉप पाइशो नु रुप्तीक थुंम रागी डा पिप नेल्ल आन क्येडा ठेयब दुम्माक्त। 23 मिनु परमप्रभुम सोलोमन कली गेशो रुप्तीक थुं डा लोत्र नेंचा कली रागी रागी डा पिप नेल्ले मेको कली गुम्थ जाक्बाक्मा बाक्त। 24 मिनु मेको कली गुम्थ जाक्ब नेल्लेमी सुन नु चांदी के मार मार, फेक्तीक वापुकी, यापुकी, मस्लापुकी, शारापुकी नु खचरपुकी बर्स बर्सम कोसेली चाक्बाक्मा बाक्त।

25 सोलोमन के ४ हजार शारा नु बग्गीपुकी वोइक्तीक खिं बाक्मा बाक्त। मिनु मेको के १२ हजार शारा बाक्मा बाक्त। मेकोमी शारा नु बग्गी आन कली बग्गी वोइक्तीक सहरम नु का निक्शी चहिं आं नु यरूसलेममी वोइक्पाइक्बाक्माक्त। २इतिहास १:१४-१७; १राजा ५:६ 26 मेकोमी युफ्रेटीस खोला रे पलिस्ती आन रागी नु इजीप्त आ सांद सम्म सासन पवा बाक्त। 27 पिपमी फुल्लु खोदेंशो पा यरूसलेम सहरम चांदी तेला बाक्त। लेबानोन डा ठेयब रवा आ शी शेफेलाहम बाक्शो फोत्रशी रवा खोदेंशो पा शुश तेला बाक्त। 28 सोलोमन आ शारापुकी चहिं इजीप्त नु अरु नेल्ल रागी रे ग्याप्शा चाक्बाक्मा बाक्त।

सोलोमन बेक्शो

१राजा ११:४१-४३

29 मिनु पिप सोलोमन आ डॉइती रे डा नोले सम्म पशो नेल्ल परमप्रभु यावे आ लोत्र पाइब नाथान आ इतिहासम मब्रेक्शो बाक्बा डा? मिनु शिलो डा नोले दुम्ब लोत्र पाइब अहीयाहम मब्रेक्शो बाक्बा डा? इददोमी नेबात आ तौ येरोबाम आ पबर्म तशो मब्रेक्शो बाक्बा डा? 30 सोलोमनम यरूसलेमम बाक्शा, इस्राएल नेल्ल कली ४० बर्स सासन पवा बाक्त। 31 मिनु सोलोमन बेक्माक्त। मिनु मुरपुकीम मेको कली आ आफ दाऊद आ सहरमी थिम्मे बाक्त। मिनु मेको आ पा डा आ तौ रेहोबाम पिप दुम्माक्त। १राजा १४:२१

पिप रेहोबामम अर्ती मनेंशो

१राजा १२:१-२४

10 रेहोबाम शेकेमम लमाक्त। मारदे हना इस्राएली नेल्ल मेको कली पिप सेल्चा कली शेकेमम जाक्शो बाक्मा बाक्त। 2 मिनु नेबात आ तौ येरोबामम मेको लोत्र नेनानु, इजीप्त उइ बाक्शो बाक्माक्त। मेको सोलोमन पिप क्येडा प्रोक्शा इजीप्त लशो बाक्माक्त। मिनु येरोबाम इजीप्त रागी रे लेम्माक्त। 3 मिनु मुरपुकीम मेको कली ब्रेत्थ सोइक्तेम बाक्त। मिनु मेको नु इस्राएली नेल्ल रेहोबाम आ बाक्तीक जाक्शा, मेको कली 4 "इन आफोम आइ कली हेल्शो गेय पपाइशो बाक्त। मुल गे इन आफोम गेशो हेल्शो गेय इक्का सोपी पाइतीनी हना, गो इन कली गेय पाइतीनी" देंमा बाक्त। 5 मिनु रेहोबामम "आं कली नाक्त सां सम्म मिम्वा गेयीनी। मिनु लेंशा जाक्कीन" दे सोइक्तीमी बाक्त। मोपतीके मुरपुकी लेश्शा लमा बाक्त।

6 मिनु नोले पिप रेहोबामम आ आफ सोलोमन ब्रॉइशा बाक्मेनु, अर्ती गेब खाल्पापुकी नु अर्ती पुंइशा "एको मुर आन कली मार लोत्र लेत्तुमी? गे मार अर्ती गेनीनी?" दे हिल्लो पवा बाक्त। 7 मिनु मेकोपुकीम "गे एको मुर आन कली शिशी पा रिम्शो लोत्र पाइतीनी हना, मेकोपुकी गेना हना यो इन गेय पाइब दुन्नीम" दे अर्ती गेमे बाक्त। 8 तन्न मेकोमी मेको खाल्पा आन अर्ती मनेना बाक्त। मिनु आ नु कोल्शो ठिटा आन अर्ती पुंइशा 9 "मेकोपुकीम आं आफोम आन कली गेशो हेल्शो गेय सोपी सेल्चा कली पुंइतेक्म। मिनु गो मेको आन कली मार लोत्र लेत्तुमी? गे मार अर्ती गेनीनी?" दे हिल्लो पवा बाक्त। 10 मिनु मेको नु काथा कोल्शो ठिटापुकीम "इन आफोम आइ कली हेल्शो गेय गेशो बाक्त। मुल मेको सोपी सेल्शा गेकी, दे पुंइब मुर आन कली 'आं आइक्च ब्रेचो आं आफ आ क्रातो क्येडा ठेयब बाक्ब। 11 आं आफोम इन कली हेल्शो गेय पपाइशो बाक्माक्त। तन्न मुल गो मेको क्येडा हेल्शो गेय पपाइक्नुड। आं आफोम इन कली कोक्केम तुप्पाइशो बाक्माक्त। तन्न मुल गो इन कली बिच्छीम क्राइक्पाइक्नन्नी' मतीन" दे अर्ती गेमे बाक्त।

12 मिनु येरोबाम नु मेको मुर नेल्ल पिप रेहोबामम देंशो खोदेंशो पा नाक्त सां नोले रेहोबाम आ बाक्तीकेम जाक्मा बाक्त। 13 मिनु पिपम मेको मुर आन कली मरिम्शो लोत्र पाइमी बाक्त। मारदे हना मेकोमी खाल्पा आन गेशो अर्ती मनेना बाक्त। 14 मिनु मेको ठिटापुकीम गेशो अर्ती बिश्शा, मेको आन कली "आं आफोम इन कली हेल्शो गेय गेशो बाक्माक्त। तन्न मुल गो मेको क्येडा हेल्शो गेय गेनुड। आं आफोम इन कली तुप्पाइशो बाक्माक्त। तन्न मुल गो इन कली बिच्छीम क्राइक्पाइक्नन्नी" दे माइक्मी बाक्त। 15 मिनु पिपम मेको मुर आन लोत्र मनेना बाक्त। मारदे हना परमप्रभुमी शिलो डा अहीयाह रे पा नेबात आ तौ येरोबाम आ पबर्म देंशो लोत्र खाप्चा कली परमप्रभु यावेम मोदेंशो पपाइशो बाक्माक्त। १राजा ११:२९-३१

यहूदा थर नु उत्तर डा इस्राएली ब्राशो

16 मिनु उत्तरम बाक्ब इस्राएलीपुकी नेल्लेमी "पिपम आइ देंशो मबिप्ब" दे तुइक्तेम बाक्त। मिनु मेकोपुकीमी पिप कली "दाऊद नु आइ के मार भाग बाक्बा डा? येस्से आ तौ नु आइ के मार बाक्बा डा? गे इस्राएलीपुकी, आंम ताम्बुम लने। मुल दाऊद आ खिं डा मुर, गे आंमा इन खिं कली कोत्रडीन" देंमा बाक्त। मोपतीके इस्राएली नेल्ल आन ताम्बुम लमा बाक्त। 17 तन्न रेहोबामम यहूदा डा सहरम बाक्ब इस्राएली आन कली सासन पा

बाकमावत। 18 मिनु पिप रेहोबाममी आ गेय पाइब आन कली कोव्रब हदोराम कली मुर आन बाक्तीकेम सोइक्ता बावत। तन्न इस्राएलीपुकीम मेको कली फुल्लु आप्शा सदमे बावत। मिनु पिप रीब पा दयु प्रेक्शा आ बग्गी डोइश्शा, यरूसलेम लमावत। 19 मिनु मेको नाक्ती रे मुल सम्म उत्तरम बाकब इस्राएलीपुकीम दाऊद आ खिं डा मुरपुकी नु मडुथु, सासन पचा मगेशो बाक्नीम।

### रेहोबाम यरूसलेम लेश्शो

11 मिनु रेहोबाम यरूसलेमम लेश्शा, आंम राज्य लेंशा ताक्चा कली यहूदा नु बेन्यामीन थर डा लाख का ८० हजार बोल्यो लडाइ पाइब मुरपुकी इस्राएली नु लडाइ पचा कली खुप्ता बावत। १राजा १२:२१-२४  
2 तन्न परमप्रभु यावे आ लोव्र परमप्रभु आ मुर शेमायाह कली जाक्मावत।  
3 मिनु परमप्रभुमी शेमायाह कली “सोलोमन आ तौ यहूदा डा पिप रेहोबाम, इस्राएलम बाकब यहूदा डा मुर नु बेन्यामीन डा मुर नेल्ल आन कली,  
4 परमप्रभु यावेमी मार देंब देंशा हना ‘गे इन लोकबपुकी नु लडाइ पथ इर डोइश्शा मलने। गे नेल्ल इन खिं लेश्शा लने। मारदे हना एको नेल्ल आं रे पा पिशो बाकब’ दे माइक्मी” देंमावत। मोपतीके मेकोपुकीम परमप्रभु यावे आ लोव्र टिशा, येरोबाम नु लडाइ पचा थुं मपामे बावत।

### रेहोबामम यहूदा कली बोल्यो सेल्शो

5 मिनु रेहोबाम यरूसलेमम बाक्शा, यहूदा डा सहरपुकी बोल्यो सेला बावत। 6 मेकोमी बेथलेहेम, एताम, तेकोहा, 7 बेथ-सुर, सोको, अदुल्लाम, 8 गाथ, मारेशा, जीफ, 9 अदौरैम, लाकीश, आजेका, 10 सोराह, आइयालोन नु हेब्रोन बोल्यो सेला बावत। मेको सहरपुकी यहूदा नु बेन्यामीनम बाक्मा बावत। 11 मिनु मेकोमी मेको सहरपुकी थम बोल्यो सेला बावत। मिनु मेकेर कप्तानपुकी योव्रशा वोदा बावत। मिनु जचा थोवक, तेल, अडगुर शांबु खेक्शा वोइक्पदा बावत। 12 मिनु मेकोमी सहर नेल्लेम ठेयब तेक्तीक नु तूतीकपुकी, तेल्ला वोइक्पदा बावत। मिनु मेको सहर नेल्ल थम बोल्यो सेला बावत। मोपा मेकोमी यहूदा नु बेन्यामीन आ राज्य बोल्यो सेल्शा सासन पवा बावत।

13 इस्राएल रागीम ब्राशा बाक्शा चढेब नु लेवीपुकी नेल्ल आन बाक्तीक रे रेहोबाम आ बाक्तीक जाक्मा बावत। 14 लेवीपुकीम आन बाक्तीक नेल्ले प्रॉइशा, यहूदा नु यरूसलेमम बाक्थ जाक्मा बावत। मारदे हना येरोबाम नु आ तौपुकीमी मेको आन कली परमप्रभु यावे कली चढेतीक गेय पचा मगमे बावत। २इतिहास १३:९ 15 मिनु येरोबाममी डांडा डा थानम आ सेल्शो क्यारश आ मूर्ति नु बाछा आन मूर्ति पूजा पचा कली आ चढेब वोइक्पदा बावत। 16 मिनु सु सुमी परमप्रभु यावे, इस्राएली आन परमप्रभु कली खोइक्चा थुं पशो बाक्मा, मेको इस्राएली नेल्ल परमप्रभु यावे, आन किकी पिपी आन परमप्रभु कली चढेथ यरूसलेम सहरम लमा बावत। मिनु लेवीपुकी मेको आन नोले खोदमे बावत। १राजा १२:२६-२७ 17 मेकोपुकीम यहूदा डा राज्य बोल्यो सेल्शा, बर्स सां सम्म सोलोमन आ तौ रेहोबाम कली वारच पदमे बावत। मारदे हना मेकोपुकी बर्स सां सम्म दाऊद नु सोलोमन आस रिश्शो लांम गाक्मा बावत।

18 मिनु रेहोबामम महलाथ कली ग्युंवे पा चाक्मा बावत। मेको आ आफ दाऊद आ तौ येरीमोथ नु मेको आ ममा चहिं येस्से आ तौ एलीआब आ तमी अबीहेल बाक्मावत। १सामुएल १६:६ 19 मेकोमी रेहोबाम कली येऊशा, शेमारयाह नु चाहम तौ थिवा बावत। 20 मेको आ नोले रेहोबाममी अब्बालोम आ तमी माकाह कली ग्युंवे पवा बावत। मेकोमी अबीयाह, अल्लै, जीजा नु शेलोमीथ थीमी बावत। 21 मिनु रेहोबाममी आ ग्युंवे पशो मीशपुकी नु अरु मीश आन क्येडा अब्बालोम आ तमी माकाह कली शुश दाक्बाक्मावत। मेको के १८ जना ग्युंवे पशो मीश नु ६० जना अरु मीश बाक्मा बावत। मेको के २८ जना तौ नु ६० जना तमी बाक्मा बावत। 22 रेहोबामम आ तौ नेल्ल आन दाते डा माकाह आ तौ अबीयाह कली आ नोले, आ पा डा पिप सेल्चा कली मिम्ता बावत। 23 मिनु मेकोमी रुपतीक थुं पा अर्को तौ आन कली यहूदा नु बेन्यामीन डा रागी डा बोल्यो सहरम सासन

पाइब सेला बावत। मेको आन कली मार मार माल्मा, शुश गेशा, मेको आन कली शुश मीश आल, मीश सेल्चा कली चाक्शा गेवा बावत। २इतिहास २१:३

### यहूदा कली लडाइ तोशो

१राजा १४:२५-३१

12 रेहोबाम आ राज्य बोल्यो दुम नोले मेको सक्ति पाइश्शो दुम्मावत। मिनु मेकोमी परमप्रभु यावे आ अरेशो लोव्र प्रोना बावत। मिनु मेको नु इस्राएली नेल्लेमी यो परमप्रभु यावे आ अरेशो लोव्र प्रोन्मे बावत। 2 मिनु रेहोबामम पिप पशो ५ बर्स दुम्मेनु, इजीप्त डा पिप शीशक यरूसलेम कली लडाइ तोचा कली जाक्मावत। मारदे हना इस्राएलीपुकीमी परमप्रभु यावे कली प्रॉइशा बाक्मा बावत। 3 पिप शीशक हजार का सहे निक्शी बग्गी नु ६० हजार शारा डोइक्ब लडाइ पाइबपुकी चाक्शा जाक्मावत। शीशक नु इजीप्त रे हिक्ने मचाप्चा डा पा लिबीया, सुक्कीम नु एथीयोपीया डा लडाइ पाइब मेको नु जाक्मा बावत। 4 मिनु मेकोमी यहूदा डा बोल्यो सहरपुकी ग्राना ग्रान यरूसलेम सम्म जाक्मावत। २इतिहास ११:५-१० 5 मिनु परमप्रभु यावे आ लोव्र पाइब शेमायाह नु रेहोबाम यहूदा डा ठेयब मुर आन बाक्तीक जाक्सा बावत। मेकोपुकी शीशक आ लडाइ तोशो रे ब्रॉइचा कली प्रोक्शा, यरूसलेमम बुक्शो बाक्मा बावत। मिनु शेमायाहम मेको आन कली “परमप्रभु यावेमी मार देंत देंशा हना ‘गेपुकीम आं कली प्रॉइतीनी। मोपतीके गो इन कली प्रॉइशा, शीशक आ गुइमी गेतन्नी’ देंशो बाक्ब” दे माइक्मी बावत। 6 मिनु इस्राएल डा ठेयब मुरपुकी नु पिप आन थुं ब्रेम्शो दुम्शा “परमप्रभु यावेम थमा लोव्र पवा बावत” देंमा बावत। 7 मिनु परमप्रभु यावेमी मेको आन थुं ब्रेम्शो दुम्शो तशा, मेको शेमायाह कली “मेकोपुकी ब्रेम्शो दुम्तीके, गो मेको आन कली खतम मसेल्लुडमी। तन्न गो मेको आन कली ब्रॉइचा गेनुडमी। आं गाइश्शो शीशक आ पतीके रे पा यरूसलेमम ममोइक्नुड। 8 मो हना यो मेकोपुकी मेको शीशक आ गेय पाइब दुम्मीम। मोपा मेकोपुकीमी आं कली गेय पचा नु अर्को राज्य डा मुर आन कली गेय पचा गिश फरक दुम्बाक्मे, मेको तुइक्नीम” देंशो बाक्मावत। 9 मिनु इजीप्त डा पिप शीशकम यरूसलेम कली लडाइ तोशा ग्राशा, परमप्रभु यावे आ खिं डा शॉप नु पिप आ दरवार डा शॉप लदा बावत। मिनु सोलोमन आ सेल्शो सुन के तेक्तीकपुकी यो योल्दा बावत। 10 मिनु पिप रेहोबामम मेको सुन के तेक्तीक आन पा डा कांसा के तेक्तीक सेल्शा, पिप आ दरवार डा लाप्चो खाल पाइब आन ठेयब मुर आन कली जिम्मा गेशा वोइक्पदा बावत। 11 मिनु पिप परमप्रभु यावे आ खिं ओव्रमेनु, मेको खाल पाइबपुकीम मेको तेक्तीक कुरशा, मेको नु आगा ओव्रबाक्मा बावत। मिनु नोले मेकोपुकीम मेको तेक्तीक खाल पाइब आन बाक्तीकेम वोइक्बाक्मा बावत। 12 मारदे हना परमप्रभु यावेमी रेहोबाम ब्रेम्शो दुम्शो तशा, मेको आ पर्वम गाइक्तीके प्रोना बावत। मिनु नेल्ल खतम मसेला बावत। मिनु यहूदामी रिश्शो दुम्शो यो बारना बारन लमावत। २इतिहास ३२:२६ 13 मोपा पिप रेहोबाममी यरूसलेममी आ राज्य बोल्यो सेल्शा, सासन पवा बावत। रेहोबाम पिप दुम्मेनु, ४१ बर्स दुम्शो बाक्मावत। मिनु मेकोमी यरूसलेम सहरम १७ बर्स सासन पवा बावत। परमप्रभु यावेम इस्राएल डा थर नेल्ल आन दाते रे आ नें कली मान पा बाक्चा, दे यरूसलेम सहर योव्रशो बाक्मावत। रेहोबाम आ ममा आ नें नामा बाक्मावत। मेको अम्मोनी बाक्मावत। २इतिहास ६:२० 14 रेहोबामम मरिश्शो पवा बावत। मारदे हना मेकोमी आ थुं नेल्लेमी परमप्रभु यावे आ नोले मखोदा बावत। 15 मिनु रेहोबाम आ डोंइती रे डा नोले सम्म पशो नेल्ल परमप्रभु यावे आ लोव्र पाइब शेमायाह नु इददोम इतिहासम मब्रेक्शो बाक्बा डा? मेकोपुकीम मुर आन किकी पिपी ब्रेक्त्से बावत। रेहोबाम नु येरोबाम आस दातेमी गेना हना यो लडाइ दुम्ना दुम्न बाक्मावत। २इतिहास १३:२२ 16 मिनु रेहोबाम बेक्मावत। मिनु मुरपुकीम मेको कली दाऊद आ सहर, यरूसलेममी थिम्मे बावत। मिनु आ तौ अबीयाह पिप दुम्मावत।

## अबीयाह यहूदा डा पिप दुम्शो

१ राजा १५:३-८

13 येरोबाम पिप पशो १८ बर्स दुम्मेनु, अबीयाह यहूदा डा पिप दुम्माक्त। 2 मेकोमी बर्स सां यरूसलेमम सासन पवा बाक्त। आ ममा गिबा सहर डा उरीएल आ तमी मीकाया बाक्माक्त। मिनु अबीयाह नु येरोबाम आस दातेम लडाइ दुम्ना दुम्न बाक्माक्त। 3 अबीयाहमी लडाइ पचा कली थम बोल्यो ४ लाख लडाइ पाइबपुकी ठीक पवा बाक्त। येरोबामम चहिं ८ लाख बोल्यो लडाइ पाइबपुकी खुप्ता बाक्त। 4 मिनु अबीयाह एफ्राइम डा पहाड रागी डा सेमाराइम डांडाम राप्शा, ठेयब सेंदा पा “येरोबाम नु इस्राएल डा मुर नेल्ल, आं लोव्र नेनीन। 5 मार, गे परमप्रभु यावे, इस्राएली आन परमप्रभु दाऊद नु गेना हना यो लीब हिक्सी कबल पशो मतुइक्नीनी? मेको कबल मार बाक्ब देशा हना, मेको इस्राएली आन राज्य नेल्ल दाऊद नु आ तौ आन कली गेना हना यो कली गेशो बाक्ब, दे मतुइक्नीनी? लेवी २:१३; गन्ती १८:१९ 6 मो हना यो दाऊद आ तौ सोलोमन आ गेय पाइब नेबात आ तौ येरोबामम आ होव्रप कली मटिथु, मेको आ पर्वम मरिम्शो पाप्नु। 7 मिनु शोर गाक्शो मुरपुकी मेको नु बाक्शा, सोलोमन आ तौ रेहोबाम कली शुक्शी पाप्तेक्म। मेना रेहोबाम आइक्च बाक्माक्त। मोपतीके मारेइ पने मचाप्वा बाक्त।

8 मुल गे दाऊद आ तौम सासन पशो, परमप्रभु यावे आ राज्य नु लडाइ पचा कली मिम्शो बाक्नीनी? गेपुकी थमा पा ठेयब हुल का बाक्नीनी। मार, गेपुकी नु येरोबामम सेल्थो सुन के बाछापुकी इन देवता दुम्चा कली गे नु बाक्नीमी? गे ग्रासीब, दे मिम्नीनी? १ राजा २२:२८ 9 मार, गेपुकीम हारून आ चच युइ परमप्रभु यावे कली चढेब लेवी आन कली खेरशा, आंम मुर आन कली योव्रशा, अर्को रागी खोर्देशो पा चढेबपुकी मसेल्नी डा? सुइ मुरुम चढेब दुम्चा कली बाछा का नु ७ ओटा सांड चाक्शा जाक्त हना, गे मेको कली चढेब सेल्नीनी। मिनु मेको मारेइ पने मचाप्ब मूर्ति कली चढेब दुम्ब। प्रस्थान २१:४८; २इतिहास ११:१५ 10 तन्न परमप्रभु यावे आंइ परमप्रभु बाक्ब। मिनु गोपुकीम मेको कली मप्रॉइक। मिनु परमप्रभु यावे कली चढेब हारून आ चच युइ बाक्नीम। मिनु लेवीपुकीमी मेको आन कली वारच पाइनीम। 11 मेकोपुकीम नाक्दो नु सुनी परमप्रभु यावे कली चोशा चढेतीक चढेनीम। मेकोपुकीम ब्रोव्रशो रिना पाइश्शो धूप चोइनीम। मेकोपुकीम कौंइतीक शोब्ले लहर पा क्येख सुन के टेबलम वोइक्नीम। मेकोपुकी नाक्दो कुस कुस सुन के बती दातीकेम बती दानीम। मोपा गोपुकीम आंइ परमप्रभु यावेम देशो नेल्ल थमा पा पाइनीकी। तन्न गेपुकीम मेको कली प्रॉइतीनी। गन्ती २८:३-८ 12 परमप्रभु गोपुकी नु बाक्शा, आंइ डौंइती गाक्ब। मेको आ चढेब आन तुराही गे नु लडाइ पचा कली ताप्चा चिक्शो बाक्नीम। गे इस्राएली मुरपुकी, गे परमप्रभु यावे, इन किकी पिपी आन परमप्रभु नु लडाइ मपने। गे मग्राणीनी” देंमाक्त। गन्ती १०:९

13 येरोबामम नोले रे जाक्शा लडाइ पचा कली हुल का बाप्पाइश्शा वोइश्शो बाक्माक्त। मिनु मेको आन लडाइ पाइब आन ठेयब हुलम चहिं यहूदा नु लडाइ पामे बाक्त। येरोबाम आ बाप्पाइश्शो हुल चहिं नोले रे जाक्मा बाक्त। 14 मिनु यहूदा डा मुरपुकीम लेशशा कोव्रडमेनु, लडाइ आन डौंइती नु नोले यो बाक्माक्त, दे तुइक्तमे बाक्त। मिनु मेकोपुकीम “वारच पाइक्की” दे परमप्रभु यावे कली वाइ ब्रेश्शा थोव्रमे बाक्त। मिनु चढेबपुकीम आन तुराही ताप्मे बाक्त। 15 मिनु यहूदा डा मुरपुकी लडाइ पचा कली वाइ ब्रेश्शा, ग्रीमा बाक्त। मोपा ग्रीमानु, परमप्रभुमी येरोबाम नु इस्राएली नेल्ल आन कली अबीयाह नु यहूदा डा मुर आन डौंइती ब्रुपदा बाक्त। 16 मिनु इस्राएलीपुकी यहूदा डा मुर आन डौंइती रे प्रोक्मा बाक्त। मिनु परमप्रभुमी मेको आन कली यहूदा डा मुर आन गुइमी गेवा बाक्त। 17 मोपा अबीयाह नु आ लडाइ पाइबपुकीम इस्राएली आन कली खतम पोक्शा, ग्रामा बाक्त। मिनु इस्राएल डा योव्रशो बोल्यो लडाइ पाइब ५ लाख मुर साइक्चा पुंडसमा बाक्त। 18 मेना इस्राएलीपुकी ब्रुशा, दिप्चा पुंडसमा बाक्त। मिनु यहूदा डा मुरपुकी ग्रामा बाक्त। मारदे हना मेकोपुकीमी परमप्रभु यावे, आन किकी पिपी आन परमप्रभु कली थमा सुइश्शो बाक्मा बाक्त। 19 अबीयाहमी येरोबाम कली खेदा पवा बाक्त। मिनु मेकोमी बेथेल सहर नु आ एर ओंथ डा

गाउंपुकी, येशाना सहर नु आ एर ओंथ डा गाउंपुकी नु एफ्रोन सहर नु आ एर ओंथ डा गाउंपुकी आंम के सेला बाक्त। 20 मिनु अबीयाह आ पालाम येरोबामम लेंशा लडाइ तोने मचबा बाक्त। मिनु परमप्रभु यावेमी येरोबाम कली रोइ पपाइश्शा, बेक्पदा बाक्त। 21 मिनु अबीयाह बोल्यो दुम्माक्त। मेकोमी १४ जना मीश चाक्मा बाक्त। मिनु मेको २२ जना तौ नु १६ जना तमी आन आफ दुम्माक्त। 22 अबीयाह आ पशो नेल्ले, दोपा बाक्मे मार मार पवा, परमप्रभु यावे आ लोव्र पाइब इददो आ किताबम ब्रेक्शो बाक्ब। २इतिहास १२:१५

## आसा यहूदा डा पिप दुम्शो

१ राजा १५:९-१२

14 मिनु अबीयाह बेक्माक्त। मिनु मुरपुकीम मेको कली दाऊद आ सहरमी थिम्मे बाक्त। मिनु मेको आ पा डा आ तौ आसा पिप दुम्माक्त। मेकोमी सासन पवानु, आ रागीमी १० बर्स सम्म लडाइ मदुम्माक्त। 2 मिनु आसामी परमप्रभु यावे, आ परमप्रभु आ डौंइती मार रिम्शो नु ठीक बाक्मे, मेकोन पवा बाक्त। 3 मेकोमी यहूदामी अर्को रागी डा चढेतीकपुकी नु डांडा डा थानपुकी प्रेशशा, खूक्शो फुल्लु नु मूर्ति पाइश्शो थाम खोल्पाइश्शा ताइक्तीमी बाक्त।

4 मिनु मेकोमी यहूदा डा मुर आन कली परमप्रभु यावे, आन किकी पिपी आन परमप्रभु आ माल्शा, आ अरेशो नु आ शेंशो लोव्र नेल्ल पचा, दे सासन पवा बाक्त। 5 मेकोमी यहूदा डा नेल्ल सहरम बाक्शो डांडा डा थान नु धूप चोतीके यो प्रेशशा गेवा बाक्त। मेको आ सासनमी आ राज्य नाइक्चा तवा बाक्त। २इतिहास १५:१५ 6 मेकोमी रागीम लडाइ मदुम्तीके यहूदा डा सहर कली बोल्यो सेला बाक्त। मेना मेको नु सुइम लडाइ मपामे बाक्त। मारदे हना परमप्रभु यावेम मेको कली नाइक्चा गेशो बाक्माक्त। २इतिहास १५:१५

7 मिनु आसामी यहूदा डा मुर आन कली “एको सहरपुकी सेल्य। एको आन एर ओंथ नेल्ल गारो हिरशा लाइश्शो खिं नु ठेयब आग्लो पाइश्शो लाप्चोपुकी सेल्शा बोल्यो सेल्य। मारदे हना गोपुकीम परमप्रभु यावे, इं परमप्रभु कली माल्शा, मेको रागी इं के बाक्ब। मिनु मेकोमी इं कली थुं नाइक्चा गेप्तु” देंमाक्त। मोपतीके मेकोपुकीम सेल्तीक गेय पा सोशो बोशो दुम्मा बाक्त। 8 आसा के ठेयब तेक्तीक नु तूतीक बाक्मा बाक्त। यहूदा रे जाक्शो लाख सां लडाइ पाइब बाक्मा बाक्त। मिनु बेन्यामीन रे जाक्शो लाख निक्शी ८० हजार आइक्च तेक्तीक नु लिब्रा आप्ब लडाइ पाइबपुकी बाक्मा बाक्त। मेको नेल्ल बोल्यो सक्ति पाइश्शो लडाइ पाइबपुकी बाक्मा बाक्त। 9 एथीयोपीया डा जेराहमी मेकोपुकी नु लडाइ पचा कली हजार हजार लडाइ पाइबपुकी नु सहे सां बगी चाक्शा, मारेशा सम्म जाक्मा बाक्त।

10 मिनु मेकोपुकी जाक्मानु, आसा मेको कली ग्रुम्थ लमाक्त। मिनु मेकोपुकी मारेशा आ नेक्था सेफाथाह डा दिंमम लडाइ पामे बाक्त।

11 मिनु आसामी परमप्रभु यावे, आ परमप्रभु कली “परमप्रभु यावे, गे सक्ति पाइश्शो नु सक्ति मपाइश्शो मुर आन कली वारच पने चाप्नीनी। सु कली वारच पचा दाक्नीनी, मेकोन चाप्नीनी। परमप्रभु यावे, आंइ परमप्रभु, आंइ कली वारच पाइप्पीकी। मारदे हना गो इन कली थमा सुइक्नीकी। मिनु गोपुकी इन नैमी एको इश्का लडाइ पाइब नु लडाइ पथ जाक्तक। परमप्रभु यावे, आंइ परमप्रभु, इन कली सुइ मुरुम ग्राने मचाप्नीम” दे पुना बाक्त। १सामुएल १४:६ 12 मिनु परमप्रभु यावेम आसा नु यहूदा डा मुर आन डौंइती एथीयोपीया डा मुर नु लडाइ पा ग्रापदा बाक्त। मिनु एथीयोपीया डा मुर प्रोक्मा बाक्त। 13 मिनु आसा नु मेको आ लडाइ पाइबपुकीम मेको आन कली गेरा सक्मे खेदा पामे बाक्त। एथीयोपीया डा मुर नेल्ल साइक्चा पुंडसमा बाक्त। मारदे हना परमप्रभु यावे आ लडाइ पाइबपुकीमी मेकोपुकी नु लडाइ पामे बाक्त। मिनु यहूदा डा मुरपुकीम मारेइ मारेइ रोइश्शा शुश लदमे बाक्त। 14 मोपा लशा, मेकोपुकीम गेरा आ एर ओंथ डा सहर नेल्ल खतम पोक्गमे बाक्त। मारदे हना मेक डा मुरपुकी परमप्रभु यावे आ पशो तशा शुश हिंमा बाक्त। मिनु यहूदा डा मुरपुकीमी मेको सहर डा मारेइ मारेइ रोइक्तमे बाक्त। मारदे हना मेकेर शुश रोइक्चा डा मार मार बाक्मा बाक्त।

15 मेकोपुकीमी ताम्बुम बाक्शो बस्तु भाव थुल्ब आन कली यो खेदा पा मेको आन शुश क्यारश भेडा दलओठ रोइश्शा, यरूसलेम लेम्मा बाक्त।

आसा आ रिम्शो गेय

15 मिनु परमप्रभु आ सोक्तीम ओदेद आ तौ अजारयाह कली सुमा बाक्त। 2 मिनु मेको आसा कली गुम्थ लशा, मेको कली "आसा, यहूदा डा मुर नु बेन्यामीन डा मुर नेल्ले, आं लोव्र नेनीन। परमप्रभु यावे गे नु बाक्ब। मेको गे नु बाक्ब। गेपुकीम मेको कली माल्तीनी हना, गे थिल्लीनी। तन्न गेपुकीमी मेको कली प्रॉइतीनी हना, मेकोमी यो इन कली प्रॉइब। 3 इस्राएली शुश बर्स सम्म थमा डा परमप्रभु नु मबाक्शो बाक्तेक्म। मेको आन कली शैब चढेब का यो मबाक्शो बाक्माक्त। मिनु परमप्रभु आ अरेशो लोव्र यो मतुइक्तेम। होसे ३:४ 4 तन्न मेकोपुकीम श्येत जामेनु, परमप्रभु यावे, इस्राएली आन परमप्रभु गे लेश्शा, माल्शा, मेको कली थिल्लेक्म। मिनु मेको आन कली वारच पाप्तु। *येरमीया* २९:१३-१४ 5 मेना सुइ लाडगा लशा, रिम्शो पा जाक्ने मचाप्शो बाक्तेक्म। मारदे हना मेकेर शोर गाक्शो शुश मुर बाक्मा बाक्त। मिनु रागीम बाक्ब नेल्लेमी श्येत जाम्तेक्म। 6 मेको नेल्ल ठेयब श्येतम बाक्तेक्म। रागी नु रागी लडाइ पाम्तेक्म। सहर नु सहर यो लडाइ पाम्तेक्म। मारदे हना परमप्रभुमी मेको आन कली मार मार श्येत गेना गेन बाक्त। *लूका* २१:१० 7 तन्न गे इन थुं बारपाइश्शा बोल्यो दुम्शा, गेय पने। मारदे हना गे इन पशो गेय डा इनाम ताइनीनी" देंमाक्त। *१कोरिन्थी* १५:५८

8 मिनु आसाम परमप्रभु यावे आ लोव्र पाइब ओदेद आ तौ अजारयाह आ लोव्र नेंशा, आ थुं बारपदा बाक्त। मिनु यहूदा, बेन्यामीन नु सहर नेल्लेमी नु आ ग्राशो एफ्राइम डा पहाड रागी डा सहरपुकीम बाक्शो ग्रांग्रा दिचा डा मूर्ति नेल्ल लाइश्शा, खतम पोक्गा बाक्त। मिनु परमप्रभु यावे आ खिं डा पिंडी आ डोंइती बाक्शो परमप्रभु यावे कली चढेतीक यो लेंशा सेल्पदा बाक्त। 9 मिनु आसामी यहूदा डा मुर, बेन्यामीन डा मुर नु मेको नु बाक्ब एफ्राइम, मनस्से नु सिमियोन रे प्रोक्शो मुर नेल्ल खुप्ता बाक्त। मेकेर बाक्ब एफ्राइम, मनस्से नु सिमियोन डा मुरपुकी परमप्रभु यावे पिप आसा नु बाक्ब, दे तुइश्शा, इस्राएल रे प्रोक्शा, यहूदामी जाक्शो बाक्मा बाक्त। मारदे हना परमप्रभु यावे, आ परमप्रभु यावे मेको नु बाक्शो तुइश्शा, इस्राएल डा शुश मुरपुकी यहूदाम बाक्थ जाक्शो बाक्मा बाक्त। *२इतिहास* ११:१६; *येरमीया* ४१:५ 10 आसा पिप दुम्शो १५ बर्स डा महिना सांम मेको नेल्ले यरूसलेममी बुक्मा बाक्त। 11 मिनु मेको नाक्ती मेकोपुकीमी लडाइम रोइश्शा चाक्शो ७ सहे ब्यफ नु ७ हजार क्यारश भेडा चढेमे बाक्त। 12 मिनु मेकोपुकीम आन थुं नेल्लेमी परमप्रभु यावे, आन किकी पिपी आन परमप्रभु आ नोले खोइक्चा, दे कबल पामे बाक्त। *यहोसु* २४:२५ 13 मिनु सु सुमी परमप्रभु यावे, इस्राएली आन परमप्रभु आ नोले खोइक्चा मबिस्से, मेको साइक्चा पुंइसे बाक्त। खाल्या बाक्त हना यो, ठिटा बाक्त हना यो, मीश मुर बाक्त हना यो, वोंइश मुर बाक्त हना यो साइक्चा पुंइसे बाक्त। 14 मिनु मेको मुर नेल्लेमी "परमप्रभु यावे आ नोले खोइक्चय" दे कसम जशा, ग्येरसीशा ठेयब सेंदा पा, तुराही नु ग्रोव्र ताप्मे बाक्त। 15 यहूदा डा मुर नेल्लेमी मेको कसम जतीके ग्येरसमा बाक्त। मारदे हना मेकोपुकीमी आन थुं नेल्लेमी परमप्रभु यावे कली खोइक्चा थमा पा दाक्तेमे बाक्त। मिनु परमप्रभु कली थिश्शो बाक्मा बाक्त। मोपतीके परमप्रभु यावेमी मेको नेल्ल आन रागीमी लडाइ मदुम्पाइक्थु, आन थुं नाइक्चा गेवा बाक्त। *२इतिहास* १४:५-६; *२इतिहास* २०:३०

16 पिप आसामी आ बगे माकाह कली यो पिप आ ममा आ गेय रे गुंइदा बाक्त। मारदे हना मेकोमी अशोराह देवी आ ग्रांग्रा दिचा डा मूर्ति सेल्पदा बाक्त। आसामी मेको मूर्ति क्योरशा जिक्शा फस सेल्शा किद्रोन डा खोलाम चोवा बाक्त। *१राजा* १५:१३-१५ 17 तन्न मेकोमी डांडा डा थान नेल्ल इस्राएल रे मगुंइदा बाक्त। मो हना यो आसा मबेक्म सम्म आ थुं नेल्लेमी परमप्रभु यावे आ मुर दुम्शा बाक्माक्त। 18 मेकोमी आ आफोम परमप्रभु कली गेशो थोव्रक नु आ गेशो थोव्रक सुन चांदी नु ग्योबपुकी परमप्रभु आ

खिंम चाक्गा बाक्त। 19 आसा पिप दुम्मेनु, ३५ बर्स सम्म लडाइ का यो मदुम्माक्त।

पिप आसा आ नोले डा बर्सपुकी

१राजा १५:१६-२४

16 पिप आसाम सासन पशो ३६ बर्सम इस्राएल डा पिप बाशामी यहूदा कली लडाइ तोवा बाक्त। मिनु पिप बाशामी यहूदा डा पिप आसा आ रागी ओव्रतीक नु गूतीक लां नेल्ल तेक्चा कली रामाह सहर कली बोल्यो सेला बाक्त। 2 मिनु आसामी परमप्रभु यावे आ खिं नु पिप आ दरवार डा शोप वोइक्तीक रे सुन नु चांदी गुंइशा, दमस्क्स सहरम बाक्शो अराम डा पिप बेन-हादाद कली सोइश्शा, मेको कली 3 "इन आफ नु आं आफ आस दातेम गारशो खोदेंशो पा, गे नु गो यो गारस। मुल गो इन कली सुन नु चांदी सोइक्ताक्ड। मोपतीके इस्राएल डा पिप बाशा नु गारशो लोव्र प्रोनीन। मिनु मेकोमी आं कली पचशो लडाइ मपवल" दे लोव्र सोइक्ता बाक्त। 4 मिनु बेन-हादादम पिप आसा आ लोव्र बिस्से बाक्त। मिनु मेकोमी आ लडाइ पाइब आन कप्तान आन कली "इस्राएल डा सहर आन कली लडाइ तोन" दे हुकुम पवा बाक्त। मिनु मेकोपुकीम इयोन सहर, दान सहर, आबेल-मैम सहर नु नाप्ताली आन मार मार वोइक्तीक सहर आन के सेल्मे बाक्त। 5 मिनु बाशामी मेको लोव्र नेंशा, रामाह कली बोल्यो सेल्चा प्रॉइशा, आ गेय नेल्ल तेक्गा बाक्त। 6 मिनु नोले पिप आसामी यहूदा डा मुर नेल्ल आन कली खुप्शा, रामाह लाइश्शा, रामाह सहर डा सेल्तीक फुल्लु नु शी नेल्ल कुरपाइश्शा लदा बाक्त। बाशाम मेको फुल्लु नु शी रामाह सहर बोल्यो सेल्चा कली मेकेर वोइश्शो बाक्माक्त। मिनु पिप आसाम मेको चाक्शो फुल्लु नु शीम गेबा नु मिस्पा सहर आस कली बोल्यो सेला बाक्त।

परमप्रभु आ लोव्र पाइब हानानी

7 मेना परमप्रभु यावे आ लोव्र पाइब हानानी यहूदा डा पिप आसा आ बाक्तीकेम जाक्शा, मेको कली "गे अराम डा पिप कली थमा सुइक्तीनी नु परमप्रभु यावे, इन परमप्रभु कली थमा मसुइक्नी। मोपतीके इस्राएल डा पिप आ लडाइ पाइब इन डोंइती रे प्रोक्चा ताम्तेक्म। 8 मार, डोंइती एथीयेपीया लिबीया डा लडाइ पाइबपुकी शुश मबाक्मा? बग्गी नु शारा डोइक्ब हिव्ने मचाप्शा डा शुश मबाक्मा? मेना गे परमप्रभु यावे कली थमा सुइक्तीनी। मिनु मेकोमी नेल्ल आन कली इन गुइमी गेप्तु। *२इतिहास* १४:८-१२ 9 परमप्रभु यावेमी सु आन थुंम थमा पा मेको नु बाक्बा, मेकोमी रागी नेल्लेम माल्ना माल्न मेको कली कोव्रशा, मेको आन कली बोल्यो सेल्ब। गे अराम डा पिप नु गारशा मरिम्शो पाइतीनी। मुल रे गे लडाइ पस डा पस बाक्चा माल्नीनी" देंमाक्त। *हितोपदेस* १५:३ 10 मिनु परमप्रभु यावे आ लोव्र पाइबम मोदेंशो लोव्र पा, आसा कली शुश गाइक्पदा बाक्त। मिनु मेको कली फ्रेंशा चोक्शा वोइक्पदा बाक्त। मेना पिप आसामी का निक्शी अरु मुर आन कली यो काइ मरिम्शो पवा बाक्त। *२इतिहास* १८:२६; *मत्ती* १४:३

11 पिप आसा आ पशो, डोंइती नु नोले डा नेल्ल, मेको यहूदा नु इस्राएल डा पिप आन इतिहास डा किताबम ब्रेक्शो बाक्नीम। 12 आसाम सासन पशो ३९ बर्स दुम्मेनु, आ खोइली राक्तीक रोइ पवा बाक्त। मिनु मेको रोइ शुश ठेयब दुम्माक्त। शुश रोइ पवा बाक्त हना यो परमप्रभु यावे आ वारच पशो कली ममाल्थु, ओख्ती खेक्ब आन कली मला बाक्त। 13 मिनु आसा आ सासन पशो ४१ बर्स दुम्मेनु मेको बेक्माक्त। 14 मिनु मुरपुकीमी दाऊद आ सहरम आसामी सेल्पाइसीशो बेक्शो मुर कली वोइक्तीक कोठामी वोदमे बाक्त। मेकेर जोक्ब मुरुमी थम ब्रोव्रशो मार मार ब्वाइश्शा ब्रोव्रशो रिना पाइब घांस सेल्शा, मेको आ तारी वोदमे बाक्त। मिनु मुरपुकीम मेको पिप कली मान पचा, दे थम ठेयब मी मुइक्तेमे बाक्त। *२इतिहास* २१:१९; *येरमीया* ३४:५

यहूदा डा पिप येहो-शाफात

17 मिनु पिप आसा बेक्म नोले आ तौ येहो-शाफात पिप दुम्माक्त। मिनु मेकोमी "इस्राएल कली तेक्नुड" दे आ लडाइ पाइब बोल्यो



सेला बावत। <sup>2</sup> मेकोमी यहूदा डा बोल्यो सेल्शो सहर नेल्लेमी लडाइ पाइबपुकी वोदा बावत। मिनु यहूदा नेल्ल नु आ आफ आसाम ग्राशो एफ्राइम डा सहरपुकी यो खाल पचा कली लडाइ पाइब वोदा बावत। <sup>3</sup> मिनु परमप्रभु यावे येहो-शाफात नु बाक्मावत। मारदे हना मेको आ किकी पिपी दाऊद आ डॉइती डा नाक्ती रिश्शो पा गाक्शो खोदेशो पा गाक्मावत। मेकोमी वारच पचा कली बाल देवता आन कली ममला बावत। <sup>4</sup> तन्न मेको परमप्रभु यावे, आ आफ आ परमप्रभु आ नोले खोदा बावत। मिनु मेको आ शेंशो पवा बावत। मेको इस्राएल डा पिप आन लांम मगाक्मावत। <sup>5</sup> मोपतीके परमप्रभु यावे मेको आ राज्य बोल्यो सेला बावत। मिनु यहूदा डा मुर नेल्लेमी येहो-शाफात कली मार मार चाक्गमे बावत। मिनु मेको शुश शोंप पाइश्शो नु मान ताइब दुम्मावत। *२इतिहास १८:१* <sup>6</sup> मेकोमी परमप्रभु यावे आ लांम गाक्वा कली काइ महिंधु आ थुं बारपदा बावत। मेकोम यहूदाम बाक्शो डांडा डा थान नु मूर्ति पाइश्शो थाम प्रेशा ताइक्ता बावत।

<sup>7</sup> मेकोमी सासन पशो आ बर्स सांमी आ राज्य डा ठेयब गेय पाइब बेन-हेल, ओबदिया, जकरिया, नेथनेल नु मीकाया आन कली यहूदा डा सहरपुकीम मुर आन कली शेंचा कली सोइक्तीमी बावत। <sup>8</sup> मेकोपुकी नु लेवीपुकी बाक्मा बावत। मेको लेवीपुकी सु सु बाक्मा बावत देशा हना, शेमायाह, नेथन्याह, जेबदीयाह, आसाहेल, शेमीरामोथ, येहो-नाथान, अदोनीयाह, तोबीयाह, तोबा-दोनीयाह बाक्मा बावत। मिनु मेको नु चढेब एली-शामा नु येहोराम यो बाक्सा बावत। <sup>9</sup> मेकोपुकीम परमप्रभु यावे आ अरेतीक लोव्र डा किताब मेको नु बाक्शो बावत। यहूदा डा सहर नेल्ल डा मुर आन कली शेंदमे बावत।

#### येहो-शाफात आ सक्ति

<sup>10</sup> मिनु यहूदा आ एर ऑथ बाक्शो राज्य डा मुर नेल्ल परमप्रभु यावे क्येडा हिंमा बावत। मोपतीके मेकोपुकीम येहो-शाफात नु लडाइ मपामे बावत। <sup>11</sup> पलिस्ती आन दातेमी का निक्शीमी येहो-शाफात कली आन गेचा माल्शो चांदी चाक्गमे बावत। मिनु अराबीपुकीमी यो मेको कली ७ हजार ७ सहे सांड नु ७ हजार ७ सहे बोका चाक्गमे बावत। *१राजा ५:१* <sup>12</sup> मिनु येहो-शाफात शुश सक्ति पाइश्शो दुम्मावत। मेकोमी यहूदामी गारो हिरशा, बोल्यो दरवार नु मार मार वोइक्तीक सहरपुकी सेला बावत। <sup>13</sup> मेकोमी यहूदा डा सहरपुकीम शुश सेल्तीक गेय यो पवा बावत। यरूसलेम सहरम लडाइ पाइब नु थम बोल्यो लडाइ पस जोक्ब मुर बाक्मा बावत। <sup>14</sup> मेको यहूदा डा मुर आन खिं खिं डा हजार हजार लडाइ पाइब आन कप्तान आदनाह बाक्मावत। मेको नु लाख सां सक्ति पाइश्शो लडाइ पाइब बाक्मा बावत। <sup>15</sup> मेको आ नोले डा येहो-हानान बाक्मावत। मेको लाख निक्शी ८० हजार लडाइ पाइब आन कप्तान बाक्मावत। <sup>16</sup> मेको आ नोले डा जिक्री आ तौ अमासीयाह बाक्मावत। मेको परमप्रभु यावे आ गेय पाइब कली कोव्रब यो बाक्मावत। मेको लाख निक्शी सक्ति पाइश्शो लडाइ पाइब आन कप्तान बाक्मावत। <sup>17</sup> बेन्यामीन आ थर डा एली-आदा बोल्यो लडाइ पाइब बाक्मावत। मेको नु लाख निक्शी लिब्रा आण्ब नु तेतीक कुरब बाक्मा बावत। <sup>18</sup> मिनु मेको आ नोले डा येहो-जाबाद बाक्मावत। मेको नु लाख का ८० हजार या कुरशो लडाइ पाइब बाक्मा बावत। <sup>19</sup> मिनु मेको नेल्ल पिप आ लडाइ पाइब बाक्मा बावत। मेको प्रॉइशा अरु लडाइ पाइबपुकी यो यहूदा डा गारो हिरशो सहरम बाक्मा बावत।

#### मीकायाम आहाब कली लोव्र पशो

*१राजा २२:-*

**18** मिनु पिप येहो-शाफात शुश शोंप पाइश्शो, मान ताइब नु थाम्पा ठेयब मुर दुम्मावत। मिनु मेकोमी आहाब आ खिं डा मुर नु ग्युबे पा नाता सेला बावत। <sup>2</sup> मिनु इक्का बर्स नोले मेको आहाब कली ग्युथ सामरीया लमावत। मिनु आहाबम मेको नु आ मुर आन कली थुल्चा, दे शुश भेडा नु ब्यफ क्योरा बावत। मिनु आहाबमी येहो-शाफात कली रामोथ-गिलाद नु लडाइ पचा कली क्युक्मा बावत। <sup>3</sup> मिनु इस्राएल डा पिप आहाबमी यहूदा डा पिप येहो-शाफात कली “रामोथ-गिलाद नु लडाइ पचा कली गे आं कली

वारच पाइक्नीनी?” देंमावत। मिनु मेकोमी “गो गे नु बाक्नुड। आं मुर इन मुर यो बाक्नीम। एको लडाइम गो इन कली वारच पाइक्नीकी” देंमावत।

<sup>4</sup> तन्न येहो-शाफातमी इस्राएल डा पिप कली “गे डॉइती परमप्रभु यावेम मेको लडाइ आ पर्वम मार देंबा? पुनीन” देंमावत। *२राजा ३:११* <sup>5</sup> मिनु इस्राएल डा पिपमी ४ सहे आ नोले दुम्ब लोव्र पाइब आन कली पुक्शा, मेको आन कली “गो रामोथ-गिलाद कली लडाइ तोड देय मतोड?” दे हिल्लो पामी बावत। मिनु मेकोपुकीम “लडाइ तोने। मारदे हना परमप्रभुम मेको आन कली इन गुडम गेब” देंमा बावत। <sup>6</sup> तन्न येहो-शाफातमी “परमप्रभु यावे कली हिल्लो पचा कली थमा पा परमप्रभु यावे आ लोव्र पाइब एकेर सुइ मबाक्नीमी?” दे हिल्लो पवा बावत। <sup>7</sup> मिनु इस्राएल डा पिपमी येहो-शाफात कली “परमप्रभु यावे कली हिल्लो पचा कली मुर का बाक्ब। मेको इम्लाह आ तौ मीकाया बाक्ब। तन्न गो मेको कली काइ मदाक्नुड। मारदे हना आं पर्वम गेनायो रिश्शो लोव्र मपाइब। मेकोमी मरिश्शो लोव्र डा लाक्शा अरु मारेइ मर्देब” देंमावत। मिनु येहो-शाफातमी “पिपम मोदेशो लोव्र पचा मदुम्ब” देंमावत। <sup>8</sup> मिनु इस्राएल डा पिपम आ गेय पाइब का कली ब्रेशा “इम्लाह आ तौ मीकाया कली रीब पा चाक्को” दे ब्रथ सोइक्ता बावत। <sup>9</sup> मेना इस्राएल डा पिप नु यहूदा डा पिप येहो-शाफात आस आस पिपम फेक्तीक वा फेक्शा, सामरीया डा ठेयब लाण्चो ओव्रतीक डा चेरब तुप्तीक दिंमम आस आस ठेयब नित्तीकेमी बाक्शो बाक्सा बावत। मिनु मेको नोले दुम्ब लोव्र पाइब नेल्ल मेको आस डॉइती नोले दुम्ब लोव्र पन पन बाक्शो बाक्मा बावत। <sup>10</sup> मेको आन दाते डा केनानाह आ तौ सिदकीयाहमी फलाम के ग्रोव्र सेल्सीशो बाक्मावत। मिनु मेकोमी “परमप्रभु यावेम मार देंत देशा हना ‘एको ग्रोव्रम गेम अराम डा मुर आन कली खुशा खतम पोक्नीनी’ देशो बाक्ब” देंमावत। <sup>11</sup> मिनु अरु नोले दुम्ब लोव्र पाइब नेल्लेम यो मोदेशो लोव्र पशो बाक्मा बावत। मेकोपुकीम “रामोथ-गिलाद कली लडाइ तोशा ग्राडीन। मारदे हना मेको परमप्रभु यावेम पिप आ गुडमी गेब” देंमा बावत।

<sup>12</sup> मिनु मीकाया कली ब्रेशा चाक्ब मुरम मीकाया कली “नेनीन, अरु नोले दुम्ब लोव्र पाइबपुकी नेल्ल थुं का दुम्शा, पिप कली रिश्शो लोव्र पशो बाक्नीम। मिनु इन लोव्र यो मेको आन देशो नु गारचा डा रिश्शो लोव्र पने” देंमावत। <sup>13</sup> तन्न मीकायाम “परमप्रभु यावे ब्रॉइशा बाक्शो खोदेशो पा, आं परमप्रभुम मार देंबा, मेको लोव्र ला पाइनुड” देंमावत।

<sup>14</sup> मिनु पिप आ बाक्तीक जाक्मेनु, पिप आहाबमी मेको कली “मीकाया, गो रामोथ-गिलाद कली लडाइ तोक देय मतोक” दे मदा बावत। मिनु मेकोमी “लडाइ तोने। मिनु ग्राडीन। मारदे हना परमप्रभु यावेमी मेको इन गुडम गेब” देंमावत। <sup>15</sup> तन्न पिपम मेको कली “परमप्रभु यावे आ नेंम थमा लोव्र ला पचा, दे गिश खेयप इ कली कसम जपाइक्नना?” दे मदा बावत। <sup>16</sup> मिनु नोले मीकायाम “गो इस्राएली नेल्ल आन कली गोठला मबाक्शो भेडा खोदेशो पा पहाडम ब्रशो ताता। मिनु परमप्रभु यावेमी ‘मेको मुर आन के होव्रप मबा। मेको नेल्ल थुं नाइश्शा आन खिं लेम्मल’ देशो नेंता” देंमावत। *मती १:३६* <sup>17</sup> मिनु इस्राएल डा पिपम येहो-शाफात कली “मार, एकोम आं पर्वम मरिश्शो लोव्र डा लाक्शा अरु मारेइ मर्देब, खतम लोव्र ला देंब, दे गो इन कली मर्देडा डा?” देंमावत।

<sup>18</sup> मिनु मीकायाम “मुल परमप्रभु यावे आ लोव्र नेनीन। गो परमप्रभु यावे कली आ ठेयब नित्तीकेम निश्शो ताता। मिनु आ स्वर्ग डा गेय पाइब नेल्ले आ ग्युरा गे नु आ पेरा गे राण्चो बाक्तेक्म। *यसैया ६:१* <sup>19</sup> मिनु परमप्रभु यावेमी ‘इस्राएल डा पिप आहाब कली रामोथ-गिलाद नु लडाइ पा साइक्वा पुंडसीचा कली सुमी मेको कली जोल पाइबा?’ देशो नेंता। मिनु काम लोव्र का पापु, अर्कोमी अर्को लोव्र पापु। <sup>20</sup> नोले सोक्त का परमप्रभु यावे आ डॉइती जाक्शा ‘गो मेको कली जोल पाइनुड’ देंत। *अय्युब १:६* <sup>21</sup> मिनु परमप्रभु यावेमी ‘दोपा?’ दे हिल्लो पापु। मिनु मेकोमी ‘गो लशा आहाब आ नोले दुम्ब लोव्र पाइब नेल्ल आन शोव्रम जोल पाइब सोक्त दुम्नुड’ देंत। मिनु परमप्रभु यावेमी ‘गे मेको कली जोल पावो। गे मेको पने चाण्जेवो। लावो’ देंत। <sup>22</sup> लो कोव्रडीन, परमप्रभु यावेमी इन नोले दुम्ब लोव्र पाइब आन शोव्रम जोल पाइब सोक्त का वोइश्शो बावत। परमप्रभु यावेम इन कली खतम सेल्चा थुं पने थुश्शो बाक्ब” देंमावत।

23 मिनु केनानाह आ तौ सिदकीयाह इर डोइश्शा लशा, मीकाया आ चोवचो राप्शा “दोपा परमप्रभु यावे आ सोक्त आं रे पा गे नु लोव पथ लम” देमाक्त। 24 मिनु मीकायाम “मेको गे हिंशा, आगा डा कोठामी खुंडसे नाक्ती कका तुइक्नेवे” देमाक्त। 25 मिनु नोले इस्राएल डा पिपम “मीकाया कली लाइश्शा, सहर कली हुकुम पाइब आमोन नु पिप आ तौ योआश आस कली गेन। मिनु मेको आस कली 26 ‘पिप आ देशो मार बाक्ब देशा हना, मेको मुर कली जेल्खानम चोक्शा वोतीन। रिम्शो पा लेशशा मजाकडा सम्म, एको कली इक्का शोब्ले नु ब्वाक्कु ला गेने’ दे पिपम हुकुम पशो बाक्ब देनीन” देमाक्त। २इतिहास १६:१० 27 मिनु मीकायामी “गे रिम्शो पा लेशशा जाक्तीनी हना, परमप्रभु यावे आं रे म्बाक्वशो बाक्माक्त, देनुड” देमाक्त। मिनु मेकोमी चिनु लोव तेष्शा “मुर नेल्लेमी आं लोव नोपा दाइश्शा नेनीन” देमाक्त।

### आहाब साइक्वा पुंडसीशो

28 मिनु इस्राएल डा पिप नु यहूदा डा पिप येहो-शाफात रामोथ-गिलाद येथ लसा बाक्त। 29 मिनु इस्राएल डा पिपम येहो-शाफात कली “गो मतुइक्वा डा पा अर्को वा फेक्शा, लडाइम लाइनुड। तन्न गे इन पिपम फेक्तीक वा फेक्शा बाक्कीन” देमाक्त। मोपा इस्राएल डा पिप अर्को वा फेक्शा, लडाइम लमाक्त। 30 मिनु अराम डा पिपम आ बग्गी चलेब आन कप्तान आन कली “इस्राएल डा पिप कली डा लाक्शा, अरु आइक्च ठेयब सुइ नु लडाइ मपने” दे माइश्शो बाक्माक्त। 31 मिनु बग्गी चलेब आन कप्तानमी येहो-शाफात कली तशा “मेकोन इस्राएल डा पिप बाक्ब” देमाक्त। मिनु मेको कली लडाइ तोथ लमा बाक्त। तन्न येहो-शाफात ठेयब सेंदा पा वाइ ब्रेम्माक्त। मिनु परमप्रभु यावेमी मेको कली वारच पशा, मेको बग्गी चलेब आन कली मेकेर रे लेप्पा बाक्त। 32 मारदे हना बग्गी चलेब लडाइ पाइब आन कप्तानपुकीमी “एको इस्राएल डा पिप मबाक्माक्त” दे तुइश्शा, मेको कली खेदा पचा प्रोन्मे बाक्त। 33 तन्न मुर काम आ लिब्रा खुक्शा, हेंथे पा ब्रा आप्शा सोइक्ता बाक्त। मिनु मेको ब्रामी इस्राएल डा पिप आ कुचु सुम्तीके नु कुचु तेक्तीक आस दातेम खवा बाक्त। मिनु पिपम आ बग्गी चलेब कली “बग्गी हिरशा लडाइ रे गुंडदी। आं कली ब्राम खशा गार सेल्टी” दे मदा बाक्त। 34 मेको लडाइ नाक्त रेन दुम्ना दुम्न लमाक्त। मिनु इस्राएल डा पिप आ बग्गीम राप्शा, अरामी नु लडाइ पशो कोवडा बाक्त। मेको नाक्तर रे मोपान बाक्माक्त। मिनु नां लाक्गानु, मेको बेक्माक्त।

### येहूमी येहो-शाफात कली लोव पशो

19 मिनु यहूदा डा पिप येहो-शाफात मारेइ मदुथु आ दरवार यरूसलेम लेशशा जाक्माक्त। 2 मिनु परमप्रभु यावे आ नोले दुम्ब लोव पाइब हानानी आ तौ येहू मेको कली गुम्थ जाक्माक्त। मिनु मेकोमी येहो-शाफात कली “मार, मरिम्शो पाइब कली वारच पाइश्शा, परमप्रभु यावे आ जोरी सत्रु कली दाक्का ठीक बाक्बा? इन पशो तशा परमप्रभु यावे इन पर्वम गाइक्ताक्वा। 3 मो हना यो गे का निक्शी रिम्शो गेय यो पशो बाक्नीनी। गे रागी रे मूर्ति थाम आन कली गुंडताक्नी। मिनु परमप्रभु आ नोले खोइक्वा थुं पाइतीनी” देमाक्त। २इतिहास १७:३,६

### निसाफ पाइबपुकी वोइश्शो

4 येहो-शाफात आ दरवार यरूसलेमम बाक्माक्त। मिनु मेको लेंशा बेयर-शेबा रे एफ्राइम डा पहाड डा मुर आन बाक्तीक लशा, मेको आन कली लेंशा परमप्रभु यावे, आन किकी पिपी आन परमप्रभु गे लेशशा चाक्मी बाक्त। 5 मेकोमी यहूदा डा बोल्यो सहर नेल्लेमी निसाफ पाइबपुकी वोदा बाक्त। 6 मिनु मेकोमी मेको निसाफ पाइब आन कली “गेपुकीम मार पाइनीनी, मेको मिम्तीन। गेपुकीम निसाफ नेंपाइक्नीनु, मुर आन कली ममाइ तन्न परमप्रभु यावे आ डोंइती निसाफ पाइनीनी। गे निसाफ पची ना मेको गे नु बाक्ब। ब्यक्स्था १:१७ 7 परमप्रभु यावे कली मान पा हिनीन। होस पा निसाफ पने। मारदे हना परमप्रभु यावे, इं परमप्रभुमी दूली निसाफ मपाइब।

मेको कुल मकोवब नु घूस मताक्ब निसाफ पाइब बाक्ब” देमाक्त। प्रस्थान १८:२१; ब्यक्स्था १०:१७; रोमी २:३१

8 येहो-शाफातम यरूसलेममी लेवीपुकी, चढेबपुकी नु इस्राएल डा खिं खिं आन ठेयब मुर आन कली परमप्रभु यावे आ डोंइती निसाफ पचा कली नु जीब आन दातेमी गारपाइक्वा कली वोइश्शो बाक्माक्त। मिनु मेकोपुकी यरूसलेमम बाक्बाक्मा बाक्त। ब्यक्स्था १७:८-९; ब्यक्स्था १९:१७ 9 मिनु मेकोमी मेको आन कली “इन गेय दोपा पचा देशा हना, इन पशो नेल्लेमी परमप्रभु यावे कली मान पा हिंशा, थमा सुइक्वा डा दुम्शा, इन थुं नेल्लेमी पचा माल्नीनी। 10 मिनु अरु सहर डा आइक्च निसाफ पाइब इन लोक्ब, इन बाक्तीक सहरम इन कली हिल्लो पचा कली जाक्नीमी। मार बाक्त हना यो, मुर साइश्शो आ पर्वम बाक्त हना यो, परमप्रभु यावे आ अरेशो लोव आ पर्वम बाक्त हना यो, शेंतीक लोव आ पर्वम बाक्त हना यो, फुल्लुम मुशा ब्रेक्शो लोव नु निसाफ पतीक लोव बाक्त हना यो, गे मेको आन कली शेंचा माल्नीनी। मोपा मेकोपुकीमी दूली मपथु, परमप्रभु यावे आ डोंइती पाप मपाइनीम। मेकोपुकीम मरिम्शो पाम्तेक्म हना, परमप्रभु इन पर्वम नु इन लोक्ब, आइक्च निसाफ पाइब आन पर्वम गाइक्ब। पाप मपथु, रिम्शो शेंदीने। 11 परमप्रभु यावे आ पर्वम तुइक्ब नु इन कली वारच पाइब ठेयब चढेब अमारयाह बाक्ब। मिनु पिप नु राज्य आ पर्वम तुइक्ब यहूदा आ थर डा मुर आन ठेयब मुर इश्माएल आ तौ जेबदीयाह इन कली वारच पाइब बाक्ब। लेवीपुकीम चहिं इन निसाफ पची ना ब्रेक्ब नु मार मार वारच पाइब बाक्नीम। महिंथु इन गेय पने। परमप्रभु यावे रिम्शो पाइबपुकी नु बाक्ल” दे अर्ती गेमी बाक्त।

### येहो-शाफातम ग्राशो

20 मिनु नोले मोआबी अम्मोनी नु का निक्शी सेइर डांडा रे अर्को जात डा मेउनी माइश्शो मुरपुकी येहो-शाफात नु लडाइ पथ जाक्मा बाक्त। 2 मिनु मुरपुकीमी येहो-शाफात कली “थम ठेयब हुल का लडाइ पाइब एदोम रे इन कली लडाइ तोचा कली जाक्शो बाक्नीम। मेकोपुकी हिक्सी समुन्द्र आ आइक्ची हांबु रे पिना पिन बाक्नीम। मेको हासासोन-तामार जाक्दीत्तेक्म” दे लोव नेंपदमे बाक्त। मेको रागी कली एन-गेदी यो देनीम। 3 मिनु येहो-शाफातम हिंशा, परमप्रभु यावे कली पुंडचा, दे थुं पवा बाक्त। यहूदा रागी डा मुर नेल्ल कली “माइजा बाक्कीन” दे हुकुम पवा बाक्त। 4 मिनु यहूदा डा मुरपुकी परमप्रभु यावे कली “वारच पाइक्की” दे पुंडचा कली बुक्मा बाक्त। यहूदा रागी डा सहर नेल्ल डा मुरपुकी परमप्रभु यावे कली पुंडथ जाक्मा बाक्त। २इतिहास १५:९-१५

5 मिनु येहो-शाफात परमप्रभु यावे आ खिं डा नक लाडगामी यहूदा नु यरूसलेम डा खुम्सीशो मुर आन डोंइती राप्शा 6 “आंइ परमप्रभु यावे, आंइ किकी पिपी आन परमप्रभु गे स्वर्गम बाक्ब परमप्रभु मननी डा? गे रागी रागी डा राज्य सासन पाइब मननी डा? सक्ति नु अधिकार नेल्ल इन के बाक्ब। गे इन क्येडा ग्राब सुइ मबाक्नीम। उत्पत्ती १८:२५; १इतिहास २९:१२ 7 आंइ परमप्रभु, मार, गे इन मुर इस्राएली जाक्मानु, एको रागी डा मुर आन कली मखेरनी डा? इन वारच अब्राहाम नु आ चच युइ आन कली मेको रागी गेना हना यो कली गेशो मननी डा? 8 मेकोपुकी मेकेर बाक्शो बाक्तेक्म। मिनु इन नें कली मान पचा, दे इन कली बाक्तीक खिं का सेल्शो बाक्तेक्म। 9 मेकोपुकीम ‘आंइ कली ठेयब श्येत दुम्त हना, लडाइ दुम्त हना, निसाफ पतीके, मुर बेक्तीक रोइ, अन्काल दुम्त हना, इन खिं इन डोंइती राप्कीकी। मारदे हना इन नें कली मान पशो खिं रे आंइ श्येत जशा पुंडशो लोव नेंशा, आंइ कली प्रॉइनीनी’ दे पुंडतेक्म। २इतिहास ६:२८-३० 10 आंइ किकी पिपी इजीप्त रे जाक्मानु, गे इस्राएली आन कली ‘अम्मोनी, मोआबी नु सेइर डांडा डा मुर आन रागी मओवडीन’ देशो बाक्तीनी। मोपतीके मेकोपुकी एर ओंथ रे हिरशा, मेको आन कली खतम मसेल्थु लमा बाक्त। ब्यक्स्था २:४,५,९,१९ 11 तन्न मुल कोवडीन, एको मुरपुकीम आंइ कली दोदेशो पा क्येक्क लेत्नीमी। गे आंइ कली गेशो आंइ थेरशो रागी रे आंइ कली खेरचा कली जाक्शो बाक्नीम। 12 आंइ परमप्रभु, गे मेको आन कली निसाफ मपाइनीनी डा? मारदे हना गोपुकी एको शुश मुर आन डोंइती मारेइ

पने मचाख बावनीकी। मुल गो मार पचा माल्नीकी मारेइ मतुइवनीकी। तन्न गो इन गे कोवनीकी” दे पुना बावत।

13 मिनु यहूदा डा मुर नेल्ले, मेको आन मीशपुकी, आन आल ब्रेच नेल्ल परमप्रभु यावे आ डोंइती राम्मा बावत। 14 मिनु परमप्रभु यावे आ सोक्तीम खुम्सीशो मुर नेल्ल आन दातेमी आसाफ आ खिं डा लेवी याहासीएल कली सुमा बावत। मेको जकरिया आ तौ, बेनायाह आ चच बाक्मावत। आ अरु किकी पिपी यिएल नु मत्तन्याह बाक्सा बावत। 15 मिनु मेकोमी “यहूदा नु यरूसलेमम बाक्ब मुर नेल्ले नु पिप येहो-शाफात नेनीन। परमप्रभु यावेमी इन कली मार देंब देंशा हना ‘गे एको लडाइ पाइब आन ठेयब हुल तशा महिनीन। इन थुं लुकच मलल। मारदे हना एको लडाइ परमप्रभु के बाक्ब। इन के ममाइ। प्रस्थान १४:१३-१४ 16 दीसा मेकोपुकी नु लडाइ पथ ब्रुपीन। मेकोपुकी जीज डा ग्येथ लतीक लां रे पा कुडनीम। मिनु गेपुकीम मेको आन कली येरूएल डा गोरशो रागी डा बरखे खोला क्येडा आइदी ग्रुन्नीनी।

17 यहूदा नु यरूसलेम डा मुर, गेपुकीम एको लडाइ पचा ममाल्नीनी। आं देंतीकेम लने। मिनु रिम्शा बाक्कीन। इन पा डा गो परमप्रभु यावेम लडाइ पा ग्राशो, कोवडीन। महिनीन। इन थुं लुकच मलल। गे गूशा, मेकोपुकी नु लडाइ पथ लने। मारदे हना परमप्रभु यावे गेपुकी नु बाक्ब’ ” देंमावत।

18 मिनु येहो-शाफातम खपीम बाप्शा सेउ पवा बावत। मिनु यहूदा नु यरूसलेमम बाक्ब मुर नेल्ल परमप्रभु यावे आ डोंइती बाप्शा, परमप्रभु यावे कली ठेयब सेल्मे बावत। 19 मिनु लेवी, कोहाथ नु कोराह आन मुर बोक्शा परमप्रभु यावे, इस्राएली आन परमप्रभु कली ठेयब सेंदा पा ठेयब सेल्तीक कुम्सो पामे बावत।

20 मिनु मेकोपुकी सुनी कना बोक्शा, तेकोहा सहर डा गोरशो रागीम लमा बावत। मिनु मेकोपुकी गूशा लमानु, येहो-शाफातम “यहूदा नु यरूसलेमम बाक्ब मुर नेल्लेम आं लोत्र नेनीन। गे परमप्रभु यावे, इन परमप्रभु कली थमा सुइश्शा बाक्कीन” देंमावत। यसैया ७:९; यसैया १८:१६ 21 मिनु मेकोमी मुरपुकी नु सल्ला पशा, लडाइ पाइब आन डोंइती रिम्शो वा फेक्शा, परमप्रभु यावे कली ठेयब सेल्तीक कुम्सो पाइब योवमी बावत। मिनु मेकोपुकीम “परमप्रभु यावे कली ‘गे रिम्शो पाइब बाक्कीनी। मारदे हना इन दाक्तीक गेना हना यो लीब’ ” दे कुम्सो पामे बावत। भजन संग्रह १०६:१ 22 मिनु मेकोपुकीम कुम्सो पा परमप्रभु यावे कली ठेयब सेल्मे चोटीन परमप्रभु यावेमी बाक्ब हुल का वोदा बावत। मिनु यहूदा नु लडाइ पथ जाक्ब अम्मोनी, मोआबी नु सेडर डांडा डा मुर आन कली क्याम्दा बावत। 23 मिनु मार दुम्मावत देंशा हना, अम्मोनी नु मोआबी गारशा सेडर डांडा डा मुर आन कली लडाइ पा सदमे बावत। मेको आन कली साइक्ने थुम्मे नोले, लीशो मुरपुकी आंम आंमा साइक्मुमा बावत।

24 मिनु यहूदा डा मुरपुकी गोरशो रागी डा कोवतीक लाइश्शो खिं जाक्शा, लडाइ पाइब आन कली कोवडमेनु, मेको आन कली शोल्लो पा खपीम गोल्ला बेक्शो तामे बावत। मेको आन दाते डा का सम्म यो प्रोक्ने मचाप्शो बाक्मा बावत। 25 मिनु येहो-शाफात नु आ मुरपुकी मार मार रोइक्थ जाक्मा बावत देंशा हना, मार मार वासी, सुन चांदी के शॉप मार मार थोवक थित्मे आंम कली कुरने मचाप्शा डा पा रोइक्तमे बावत। मिनु मेको आन बस्तु भाव यो लदमे बावत। मेकोपुकीम नाक्त सां सम्म मेको रोइश्शो मार मार खुप्तमे बावत। मारदे हना मेको थम शुश बाक्मावत। 26 मिनु ४ नाक्ती मेकोपुकी बेराकाह डा दिंमम गुम्मा बावत। मिनु मेकेर परमप्रभु यावे कली ठेयब सेल्मे बावत। मुल सम्म मेको आं नें बेराकाह डा दिंम लीशो बाक्ब। बेराकाह आ अर्थ आसीक बाक्ब। 27 मेको नोले यहूदा नु यरूसलेम डा मुर नेल्लेमी येहो-शाफात कली डोंइती गाक्पाइश्शा, ग्येरसीशा यरूसलेम लेम्मा बावत। मारदे हना परमप्रभु यावेमी मेको आन कली आन जोरी सत्रु रे ग्रापाइश्शा, थम ग्येरसीशो बाक्मा बावत। 28 मिनु मेकोपुकीम ठेयब नु आइक्च तार पाइश्शो ताप्तीके नु तुराही ताम्ना ताम्न यरूसलेमम परमप्रभु यावे आ खिं जाक्मा बावत। 29 परमप्रभु यावेमी इस्राएल आ जोरी सत्रु नु लडाइ पा ग्रामावत देंशो लोत्र नेंशा, रागी रागी डा राज्य डा मुर नेल्ल परमप्रभु क्येडा हिंमा बावत। 30 मिनु येहो-शाफात आ राज्यम लडाइ

मदुम्थु, नाइसे बावत। मारदे हना आ परमप्रभुमी मेको रागी कली एर ऑथ नेल्ल रे नाइक्पदा बावत। २इतिहास १५:१५

येहो-शाफात आ सासन

१राजा २२:४१-५०

31 मोपा येहो-शाफातम यहूदाम सासन पवा बावत। मेको पिप दुम्मेनु, ३५ बर्स दुम्शो बाक्मावत। मेकोमी यरूसलेम मी २५ बर्स सासन पवा बावत। मेको आ ममा आ नें अजुबाह बाक्मावत। मेको शिल्ही आ तमी बाक्मावत। 32 येहो-शाफात आ आफ आसा आ लांम गाक्मावत। मिनु मेको लां रे ग्युरा पेरा मपवा बावत। मेकोमी परमप्रभु यावे आ डोंइती मार ठीक बाक्मे, मेको पवा बावत। 33 मो हना यो मेकोमी डांडा डा थानपुकी नेल्ल मप्रदा बावत। मिनु मुरपुकीम आन थुं आन किकी पिपी आन परमप्रभु गे मलेत्मे बावत।

34 मिनु हानानी आ तौ येहूम येहो-शाफात आ पशो डोंइती रे नोले सम्म नेल्ल इस्राएल डा पिप आन इतिहासम ब्रेक्शा, वोइश्शो बाक्ब।

35 मिनु नोले यहूदा डा पिप येहो-शाफात, इस्राएल डा काइ मरिम्शो पाइब पिप अहाज्याह नु वारचु दुम्मावत। मेको काइ मरिम्शो पाइब बाक्मावत। १राजा २२:५२-५४ 36 मेकोमी टारशीश लशा ग्याप्तीक लेयतीक गेय पचा कली जहाजपुकी सेल्चा कली अहाज्याह नु गारमावत। मिनु मेको ठेयब जहाजपुकी एर्योन-गेबेरम सेल्मे बावत। 37 मारेशा डा दोदा-वाहु आ तौ एलीएजेरमी येहो-शाफात आ पर्बम परमप्रभु आ लोत्र पवा बावत। मेकोमी “गे अहाज्याह नु वारचु दुम्तीके, परमप्रभु यावेम इन गेय खतम सेल्ब” देंमावत। मिनु मेको ठेयब जहाजपुकी खतम दुम्मा बावत। टारशीश लचा मतामे बावत।

यहूदा डा पिप येहोराम

१राजा २२:५१; २राजा ८:१६-२२

21 मिनु येहो-शाफात बेक्मावत। मिनु मुरपुकीमी मेको आ किकी पिपी आन कली थिम्तीके दाऊद आ सहरम थिम्मे बावत। मिनु आ तौ येहोराम पिप दुम्मावत। 2 येहो-शाफात आ तौपुकी, येहोराम नु आ लोकबपुकी अजारयाह, येहीएल जकरिया, अजारयाह, मिकाएल नु शेफत्याह बाक्मा बावत। मेको नेल्ल यहूदा डा पिप येहो-शाफात आ तौ बाक्मा बावत। 3 मेको आन आफोम मेको आन कली सुन, चांदी, शुश क्येट लाइब शॉप नु यहूदा डा बोल्यो सहरपुकी यो गेशो बाक्मावत। तन्न मेको राज्य येहोराम कली गेवा बावत। मारदे हना मेको आ डोंइती थिशो तौ बाक्मावत।

पिप येहोराम आ मरिम्शो पशो

4 मिनु येहोराम आ आफ आ पा डा सासन पा बोल्यो दुम्शा, मेकोमी आ लोकब नेल्ल नु इस्राएल डा का निक्शी ठेयब मुर आन कली तरवारम क्योरशा साइक्मी बावत। 5 येहोराम पिप दुम्मेनु, ३२ बर्स दुम्शो बाक्मावत। मेकोमी यरूसलेम ८ बर्स सासन पवा बावत। 6 मेकोमी आहाब आ खिं डा मुर खोदेंशो पा इस्राएल डा पिप आन लांम गाक्मावत। मारदे हना मेको आ मीश पिप आहाब आ तमी बाक्मावत। मेकोमी परमप्रभु यावे आ डोंइती मार मरिम्शो बाक्मे, मेको पवा बावत। 7 मो हना यो परमप्रभु यावेमी दाऊद नु पशो कबल आ पतीके दाऊद आ खिं डा मुर आन कली साइक्चा मदाक्ता बावत। मारदे हना मेकोमी दाऊद नु आ तौ चच युइ आन कली “इ खिं रे गेना हना यो इस्राएली आन कली सासन पाइब का बाक्ब” देंशो बाक्मावत। २सामुएल ७:१२; १राजा ११:३६; भजन संग्रह १३२:१७

8 मिनु येहोराममी सासन पवानु, एदोम डा मुर यहूदा नु मदुम्थु, आंम आ राज्य सेल्शा, आंम पिप सेल्मे बावत। 9 मोपतीके येहोराम आ लडाइ पाइबपुकी, कप्तान नु आ बग्गी नेल्ल लाइश्शा, एदोम गे लमावत। मेकोपुकी नाक्दो बोक्शा, आंम कली, आ कप्तान नु आ बग्गी कली पुम्ब एदोमी नु लडाइ पा खेरमे बावत। 10 एदोम मुल सम्म यहूदा डा सासन पाइब नु मदुम्थो बाक्ब। मेना लिब्ना यो येहोराम आ मरिम्शो सासन आ पर्बम बोक्मावत।

मारदे हना येहोराम परमप्रभु यावे, आ किकी पिपी आन परमप्रभु कली प्रॉइशो बाक्माक्त।

11 मेकोमी यहूदा डा पहाडमी डांडा डा थानपुकी सेला बाक्त। मिनु मेकोमी यरूसलेम बाक्ब मुर आन कली मूर्ति पूजा पा परमप्रभु कली प्रॉइपाइक्मी बाक्त। मिनु यहूदा कली दूली लांम गाक्पदा बाक्त।<sup>12</sup> मिनु येहोराममी परमप्रभु यावे आ लोव पाइब एलीया रे चिठी का तवा बाक्त। मिनु मेको चिठीमी “परमप्रभु यावेमी मार देंत देंशा हना, परमप्रभु यावे, इन किकी पिपी दाऊद आ परमप्रभुम ‘गे इ आफ येहो-शाफात नु यहूदा डा पिप आसा खोदेंशो पा मेको आन लांम मगावडे।<sup>13</sup> तन्न गे आहाब आ खिं डा मुर खोदेंशो पा इस्राएल डा पिप आ लांम गाक्शा, आहाबमी इस्राएली आन कली परमप्रभु प्रॉइपाइक्शो हेंथे गाक्शो खोदेंशो पा, गे यहूदा नु यरूसलेम डा मुर आन कली मूर्ति पूजा पपाइश्शा, परमप्रभु कली प्रॉइपाइक्तीवी। मिनु इ आफ आ तौपुकी, इ लोक्ब आन कली यो साइक्तीवी। मेकोपुकी इं क्येडा रिंशो मुर बाक्तेक्म।<sup>14</sup> मेको इ पतीके परमप्रभु यावेमी इ खिं डा मुर, इ तौपुकी, इ मीशपुकी नु इ मुर नेल्ल आन कली मुर बेक्तीक रोइ पपाइक्नुड।<sup>15</sup> मिनु गे मसाब कोव्रज डा रोइ पाइनेवे। मिनु मेको रोइम पतीके इ कोव्रज राक्शा इ गा क्यी नाक्त किंत किंत गूनीम’ देंशो बाक्ब” दे ब्रेक्शो बाक्माक्त।

16 मिनु मेको नोले परमप्रभु यावेमी येहोराम नु लडाइ पपाइक्वा कली पलिस्ती नु एथीयोपीया आ नेक्था बाक्ब अराबी आन कली क्युक्मी बाक्त।<sup>17</sup> मिनु मेकोपुकीम यहूदा कली लडाइ तोशा, आ आगा ओव्रमा बाक्त। मिनु मेकोपुकीम पिप आ दरवारम थिंशो शॉप नेल्ल, मेको आ तौपुकी नु मेको आ मीशपुकी नेल्ल लदमे बाक्त। मेको आ कान्छा तौ येहो-अहाज डा लाक्शा अर्को तौ मलीमा बाक्त। *येहो-अहाज कली अहाज्याह यो देंनीम।*

18 मेको नेल्ल दुम नोले परमप्रभु यावेमी येहोराम कली मसाक्ब कोव्रज राक्तीक रोइ पपदा बाक्त।<sup>19</sup> मिनु मेको रोइ पा बर्स निक्शी नोले आ कोव्रज राक्शा, आ गा क्यी गूशा, शुश श्येत जशा बेक्माक्त। मिनु मेको आ मुरपुकीम मेको आ किकी पिपी आन पर्वम पशो खोदेंशो पा मेको कली मान पचा कली ठेयब मी ममुइक्तेमे बाक्त। *२इतिहास १६:१४*<sup>20</sup> मेको पिप दुम्मेनु, ३२ बर्स दुम्शो बाक्माक्त। मेकोमी यरूसलेमम ८ बर्स सासन पवा बाक्त। मेको बेक्मेनु सुइम रॉका मपामे बाक्त। मिनु मुरपुकीमी मेको कली दाऊद आ सहरमी थिंमे बाक्त। तन्न पिप आन कली थिंमीकेम मथिंमे बाक्त। *२इतिहास २४:२५*

यहूदा डा पिप अहाज्याह

२राजा ८:२५-२९

22 मेको नोले यरूसलेम डा मुरपुकीम मेको आ पा डा मेको आ कान्छा तौ अहाज्याह कली पिप सेल्मे बाक्त। मारदे हना अराबी नु जाक्शोपुकीम मेको अरु तौ आन कली साइश्शो बाक्मा बाक्त। मोपतीके येहोराम आ कान्छा तौ अहाज्याह यहूदा डा पिप दुम्माक्त।<sup>2</sup> अहाज्याह पिप दुम्मेनु, २२ बर्स दुम्शो बाक्माक्त। मेकोमी यरूसलेमम बर्स का सासन पवा बाक्त। मेको आ ममा आ नें अथाल्याह बाक्माक्त। मेको ओम्नी आ चच बाक्माक्त।<sup>3</sup> मेको यो आहाब आ खिं डा मुर खोदेंशो पा मेको आन लांम गाक्माक्त। मारदे हना आ ममामी मेको कली परमप्रभु यावे आ अरेशो मटिचा कली अर्ती गेवा बाक्त।<sup>4</sup> मेकोमी यो आहाब आ खिं डा मुर खोदेंशो पा परमप्रभु यावे आ डोंइती मार मरिंशो बाक्मे, मेको पवा बाक्त। मारदे हना आ आफ बेक्म नोले मेको मुरपुकीमी अर्ती गेशा, मेको कली खतम सेल्मे बाक्त।<sup>5</sup> मेकोमी आन गेशो अर्ती रामोथ-गिलादम अराम डा पिप हजाएल नु लडाइ पचा कली इस्राएल डा पिप आहाब आ तौ येहोराम नु वारच्छु दुम्वा बिस्से बाक्त। मिनु अरामीपुकीम मेको कली गार सेल्मे बाक्त।<sup>6</sup> मिनु योराम रामाह सहरम अराम डा पिप हजाएल नु लडाइम दुम्शो गार साचा कली येजेलम लेशशा लमाक्त। मिनु यहूदा डा पिप येहोराम आ तौ अहाज्याह, आहाब आ तौ, योराम कली गुम्थ येजेलम लमाक्त। मारदे हना मेको रोइ पशो बाक्माक्त। *येहोराम योराम यो देंनीम।*

<sup>7</sup> तन्न परमप्रभु आ मिंशो खोदेंशो पा योराम नु अहाज्याह गुम्सानु, अहाज्याह आ बेक्तीक दुम्माक्त। मेको गुम्शा, अहाज्याह नु येहोराम निंशी

आ तौ यहू कली गुम्थ लसा बाक्त। परमप्रभु यावेमी आहाब आ खिं डा मुर आन कली थुम्पाइक्वा कली यहू कली योव्रशो बाक्माक्त। *१राजा १९:१६; २राजा ९:६-७*<sup>8</sup> मिनु येहूम आहाब आ खिं डा मुर आन कली सदानु, अहाज्याह आ गेय पाइब यहूदा डा ठेयब मुरपुकी नु मेको नु पिशो आ लोक्ब आन तौ आन कली यो थिंशा साइक्मी बाक्त। *२राजा १०:१२-१४*<sup>9</sup> मेको नोले मेकोमी अहाज्याह कली मला बाक्त। मिनु यहू आ मुरपुकीम मेको कली सामरीयाम थिंमे बाक्त। मिनु मेकोपुकीम अहाज्याह कली यहू आ बाक्तीक चाक्शा सदमे बाक्त। मिनु मुरपुकीम मेको आ पर्वम “आ थुं नेल्लेमी परमप्रभु यावे आ नोले खोइक्ब येहो-शाफात आ चच एकोन बाक्ब” दे थिंमे बाक्त। मेको नोले अहाज्याह आ खिं डा मुर सासन पाइब सुइ मलीमा बाक्त। *२राजा ९:२७-२९*

अथाल्याह नु योआश

२राजा ११:-

10 मिनु अहाज्याह आ ममा अथाल्याहम आ तौ साइश्शो तुइश्शा, मेकोमी यहूदा डा पिप आ खिं डा मुर नेल्ल आन कली साइक्वा कली बोक्माक्त।<sup>11</sup> तन्न पिप येहोराम आ तमी येहो-शबेआथम अहाज्याह आ तौ योआश कली साइक्वा चिक्शो पिप आ तौ आन दाते रे प्रेंइशा लदा बाक्त। मिनु मेको कली कोव्रब नु मेको आल आस कली इप्तीक कोठा कामी खुइश्शा, वोइक्सी बाक्त। पिप येहोराम आ तमी येहो-शेबा चढेब येहो-यादा आ मीश बाक्माक्त। मारदे हना अहाज्याह आ दिदी बाक्तीके, मेकोमी योआश कली अथाल्याह आ गुइ रे प्रेंइशा खुइश्शा वोइक्पदा बाक्त। मिनु अथाल्याहम मेको कली साइक्वा मतवा बाक्त।<sup>12</sup> मेको रागीम अथाल्याहम सासन पवानु, योआश मेकोपुकी नु ६ बर्स सम्म परमप्रभु आ खिंम खुइश्शा बाक्माक्त।

योआश यहूदा डा पिप दुम्शो

23 मिनु ७ बर्सम येहो-यादा महिंब दुम्शा, सक्ति कोंइदा बाक्त। मेकोमी सहे सहे डा लडाइ पाइब आन कप्तानपुकी, येरोहाम आ तौ अजारयाह, येहो-हानान आ तौ इश्माएल, ओबेद आ तौ अजारयाह, अदायाह आ तौ मासेयाह नु जिक्की आ तौ एली-शाफात नु सल्ला पवा बाक्त।<sup>2</sup> मिनु यहूदा डा सहरपुकी रे लेवीपुकी नु इस्राएल डा खिं खिं डा ठेयब मुर आन कली यरूसलेमम गुम्पाइक्वा कली यहूदा नेल्लेमी लोव्र सोइश्शा, मेकोपुकी जाक्मा बाक्त।<sup>3</sup> मिनु मेकेर जाक्ब खुम्सीशो नेल्लेमी परमप्रभु आ खिंम पिप आ तौ योआश नु कबल पामे बाक्त। मिनु येहो-यादाम मेको आन कली “परमप्रभु यावेमी दाऊद आ तौ चच आन पर्वम देंशो लोव्र खोदेंशो पा पिप आ तौ पिप दुम्वा माल्ब।<sup>4</sup> मुल गेपुकीम मार पचा माल्नीनी देंशा हना, नाइक्तीक नाक्ती गेय पाइब चढेबपुकी नु लेवीपुकी भाग सांमी भाग का ठेयब लाप्चोमी बाक्कीन।<sup>5</sup> मिनु अर्को भाग का पिप आ दरवारम बाक्वा माल्नीम। अर्को भाग काम दरवार आ लाडगा डा ठेयब लाप्चो खाल पने। मिनु अरु मुर नेल्ल परमप्रभु यावे आ लाडगाम बाक्वा माल्नीम।<sup>6</sup> चढेबपुकी नु गेय पाइब लेवीपुकी डा लाक्शा, अरु सुइ आन कली परमप्रभु यावे आ खिं ओव्रचा मगेचा नम। मेकोपुकी ला ओव्रने चाप्नीम। मारदे हना मेकोपुकी परमप्रभु यावे आ डोंइती ठीक सेल्शो बाक्नीम। मिनु अरु मुर नेल्लेम परमप्रभु यावे आ ब्रेक्शो अरेशो लोव्र टिशा पचा माल्नीम।<sup>7</sup> लेवीपुकी नेल्ले आन आन या शेशा, पिप आ एर ओंथ बाक्वा माल्नीम। सुइ परमप्रभु यावे आ खिं ओव्रतेक्म हना, मेको कली साइक्वा माल्नीम। पिप ते लत हना यो, मेकोपुकी मेको नुन लचा माल्नीनी” दे माइक्मी बाक्त।

<sup>8</sup> मिनु चढेब येहो-यादाम देंशो खोदेंशो पा लेवीपुकी नु यहूदा डा मुरपुकी नेल्लेमी पामे बाक्त। मेको नेल्लेम नाइक्तीक नाक्ती गेय पाइब आंम मुर आन कली नु गेय थुम्शा नाइश्शो आन कली चाक्वामे बाक्त। मारदे हना चढेब योहोयादाम सुइ आन कली मप्रॉइशो बाक्माक्त।<sup>9</sup> मिनु चढेब येहो-यादाम लडाइ पाइब आन कप्तान आन कली परमप्रभु आ खिंम बाक्शो दाऊद आ सेल्शो तूतीक नु आइक्च नु ठेयब तेक्तीकपुकी गेमी बाक्त।

10 मिनु मेकोमी मुर नेल्ल आन कली आन गुइ गुइमी या शेशा पिप कली खाल पचा कली वोइक्की बाक्ता। मेको आन कली दक्खिन रे उत्तर सम्म नु चढ़ेतीक आ एर ओंथ हिरशा खिं नेल्ल कली खाल पपाइश्शा वोइक्की बाक्ता। 11 मेको नोले येहो-यादाम पिप आ तौ कली लाङगा गुंडा बाक्ता। मिनु मेको आ पियाम सिरपेच गुष्ठा, पिप दुम्तीक कागज गेशा, यहोयादा नु आ तौपुकीम मेको कली पिप सेल्शा, तेल लुक्तेम बाक्ता। मिनु मेकोपुकीम ठेयब सेंदा पा “पिप शुश ब्रॉइशा बाक्ता” दे ग्रीमा बाक्ता।

12 मिनु अथाल्याहमी मुरपुकीमी आन पिप कली ठेयब सेल्शा शुश रेयके पशो नेना बाक्ता। मिनु मेको परमप्रभु यावे आ खिं मुर आन बाक्तीकेम जाक्माक्ता। 13 मिनु कोव्रडानु, पिप कली थाम आ नेक्था लाप्चोम राष्ठा बाक्शो तवा बाक्ता। मिनु कप्तानपुकी नु तुराही ताप्बपुकी पिप आ एर ओंथ बाक्शो बाक्मा बाक्ता। मिनु मेको रागी डा मुर नेल्ल पिप आ डॉइती ग्येरशा, तुराही ताप्ना ताप्न बाक्शो बाक्मा बाक्ता। मिनु कुम्सो पाइबपुकी ताप्तीक ताप्था, मुर नेल्ल आन डॉइती कुम्सो पना पन बाक्मा बाक्ता। मिनु अथाल्याहमी आ वा खाक्शा, ठेयब सेंदा पा “गो नु रागी नेल्ल खतम! गो नु रागी नेल्ल खतम!” दे शुश गाइश्शा ग्रीमाक्ता। 14 मिनु चढ़ेब येहो-यादाम लडाइ पाइब आन कप्तान आन कली “मेको कली मुर आन दाते रे गुंडदीन। मेको आ नोले खोइक्ब नेल्ल आन कली तरवारम क्योरशा सतीन। मेको आन कली परमप्रभु यावे आ खिं आगाम मसतीन” दे अरेमी बाक्ता। 15 मिनु मेकोपुकीम मेको कली ग्याइक्तेम बाक्ता। मिनु पिप आ दरवार डा शारा लाप्चोम लाइश्शा, सदमे बाक्ता।

16 मेको नोले येहो-यादामी, मुर नेल्ल नु पिप कली परमप्रभु यावे आ मुर दुम्चा माल्ब, दे कबल पवा बाक्ता। २इतिहास १५:१२ 17 मिनु मुरपुकी नेल्ल बाल देवता आ खिं ओव्रशा, प्रेत्मे बाक्ता। मेको कली चढ़ेतीक नु आ मूर्ति नेल्ल फस पोक्गमे बाक्ता। मिनु बाल कली चढ़ेब मत्तान कली चढ़ेतीक आन डॉइती सदमे बाक्ता। 18 मिनु येहो-यादामी “दाऊदमी देंशो खोदेंशो पा परमप्रभु यावे आ खिं कोव्रचा कली लेवी आ थर डा चढ़ेब आन कली जिम्मा गेमी बाक्ता। डॉइती दाऊदम मोसामी ब्रेक्शो परमप्रभु यावे आ अरेशो लोव्र खोदेंशो पा कुम्सो पन पन ग्येरना ग्येरन परमप्रभु यावे कली चोशा चढ़ेतीक चढ़ेचा माल्नीम” दे अरेशो बाक्माक्ता। २इतिहास ७:६; २इतिहास २९:१५-३० 19 येहो-यादाम मारेइ पा ग्रॉग्रा दिशो दुम्शो मुर आन कली ओव्रचा मगेचा कली परमप्रभु यावे आ खिं डा लाप्चोम खाल पाइबपुकी वोइक्पदा बाक्ता। 20 मिनु मेकोमी कप्तानपुकी, ठेयब मुरपुकी, मुर आन कली हुकुम पाइबपुकी नु रागी डा मुर नेल्ल आन कली लाइश्शा, पिप कली परमप्रभु यावे आ खिं रे पा आइक्था डा लाप्चो रे ओव्रशा, पिप आ दरवारम चाक्गा बाक्ता। मिनु पिप कली पिप आ ठेयब नित्तीकेम निप्पदा बाक्ता। 21 मिनु रागी डा मुर नेल्ल ग्येरसमा बाक्ता। मिनु अथाल्याह तरवारम क्योरशा साइक्चा पुंडसे नोले सहरमी थुं नाइश्शा बाक्तीक दुम्माक्ता।

परमप्रभु आ खिं लेंशा सेल्शो

२राजा १२:१-१७

24 योआश पिप दुम्मेनु, ७ बर्स दुम्शो बाक्माक्ता। मेकोमी यरूसलेमम ४० बर्स सासन पवा बाक्ता। मेको आ ममा आ नें बेयर-शेबा डा सिबीयाह बाक्माक्ता। 2 मिनु योआशम चढ़ेब येहो-यादा ब्रॉइम सम्म परमप्रभु यावे आ डॉइती मार ठीक बाक्मे, मेको पवा बाक्ता। 3 येहो-यादामी मेको कली मीश निक्शी योव्रडा बाक्ता। मिनु मेको तमी तौ आन आफ दुम्माक्ता।

4 मेको आ इक्का नोले योआशम परमप्रभु यावे आ खिं लेंशा ठीक सेल्चा थुं पवा बाक्ता। 5 मिनु मेकोमी चढ़ेब नु लेवी आन कली ब्रेश्शा “यहूदा डा सहरपुकीम लशा, इस्राएली नेल्ल आन रे परमप्रभु आ खिं लेंशा ठीक सेल्चा कली मेको आन बर्स बर्सम गेतीक क्येट पोक्कीन। एको गेय रीब पा पने” देंमाक्ता। तन्न लेवीपुकीम मेको गेय रीब पा मपामे बाक्ता। 6 मोपतीके पिपम ठेयब चढ़ेब येहो-यादा कली ब्रेश्शा “परमप्रभु यावे आ गेय पाइब मोसामी गोरशो रागीमी मुर आन कली ‘परमप्रभु यावेमी लोव्र पतीक ताम्बु कली क्येट गेचा माल्नीम’ देंशो बाक्ब। मारदे गे लेवीपुकी, यहूदा नु यरूसलेम डा मुर रे पोक्चा माल्शो क्येट रीब पा मचावनीनी?” दे हिल्लो पवा बाक्ता।

7 डॉइती मेको काइ परमप्रभु कली मटीब मीश मुर अथाल्याह नु आ नोले खोइबपुकीम परमप्रभु आ खिं ओव्रशा, मेकेर डा परमप्रभु यावे आ थोव्रक नेल्ल बाल देवता आ पूजा पतीकेम चलेशो बाक्मा बाक्ता। २इतिहास २२:३-४

8 मिनु पिपम मेको आन कली सन्दोस का सेल्पाइश्शा “परमप्रभु यावे आ खिं डा ठेयब लाप्चो आ लाङगाम वोतीन” दे अरेमी बाक्ता। 9 मिनु मेकोपुकीम यहूदा नु यरूसलेम डा मुर नेल्ल आन कली “परमप्रभु आ गेय पाइब मोसाम गोरशो रागीम इस्राएली आन कली देंशो थाप्चा माल्शो क्येट मुरपुकीम परमप्रभु यावे आ खिंम चाक्चा माल्नीम” देंशा नेंपदमे बाक्ता। 10 मिनु ठेयब मुरपुकी नु मुर नेल्लेमी ग्येरशा, आन गेचा माल्शो क्येट चाक्शा, मेको सन्दोस मन्नीम सम्म मेकेर कुर पामे बाक्ता। 11 मिनु लेवीपुकीम पिप आ सरकार डा गेय पाइब आन बाक्तीकेम सन्दोस चाक्गामेनु, मेकोपुकीम दोशो क्येट बाक्मे, मेको कोव्रबाक्मा बाक्ता। मिनु पिप आ ब्रेक्ब मुरम मेको ब्रेक्शा, ठेयब चढ़ेब आ गेय पाइबपुकीम मेको सन्दोस श्येत्य सेल्शा, लेंशा आ बाक्तीकेम लाइश्शा वोइक्बाक्मा बाक्ता। मेकोपुकीम नाक्त् कित कित मो पा शुश क्येट खुप्तमे बाक्ता। 12 मिनु पिप नु येहो-यादाम मेको क्येट परमप्रभु यावे आ खिं डा गेय पाइब आन कली कोव्रब मुर कली गेमी बाक्ता। मेकोपुकीम चहिं गारो प्रोक्ब मुर, शी के गेय पाइब नु फलाम नु कांसा के गेय पाइब आन कली ब्रेश्शा, गाल्च गेशा, लेंशा परमप्रभु यावे आ खिं सेल्पदमे बाक्ता। 13 मिनु मेको गेय पाइबपुकीमी शुश गेय पा लेंशा ठीक पतीके गेय रिम्शो दुम्ना दुम्न लमाक्ता। मेकोपुकीम परमप्रभु आ खिं डॉइती डा खोदेंशो पा ठीक नु बोल्यो सेल्मे बाक्ता। 14 मिनु मेकोपुकीम गेय थुम्मे नोले मेको लीशो क्येट पिप नु येहो-यादा आस कली लेंशा गेमे बाक्ता। मिनु मेको क्येटीम परमप्रभु यावे आ खिं कली ग्योबपुकी सेल्मे बाक्ता। गेय पचा कली, चोशा चढ़ेचा कली माल्तीक थोव्रकपुकी नु सुन नु चांदी के डाडुपुकी नु ग्योबपुकी सेल्मे बाक्ता। यहोयादा बाक्म सम्म परमप्रभु यावे आ खिंम नाक्त् कित कित चोशा चढ़ेतीक चढ़ेमे बाक्ता।

15 मिनु येहो-यादा शुश ब्रॉइशा खूशो दुम्शा, सहे का ३० बर्स दुम्मेनु, बेक्माक्ता। १इतिहास २९:२८ 16 मिनु मुरपुकीम मेको कली दाऊद आ सहरम पिप आन कली थिम्तीकेमी थिम्मे बाक्ता। मारदे हना मेकोमी इस्राएलमी रिम्शो पवा बाक्ता। परमप्रभु नु आ खिं कली यो थम रिम्शो पवा बाक्ता।

पिप योआश आ मरिम्शो पशो

17 मिनु येहो-यादा बेक्म नोले यहूदा डा सरकार आ गेय पाइब पिप योआश कली गुम्थ जाक्शा, मेको कली सेउ पामे बाक्ता। मिनु पिपम मेको आन लोव्र नेना बाक्ता। 18 मिनु मेकोपुकीम परमप्रभु यावे, आन किकी पिपी आन परमप्रभु आ खिं प्रॉइशा, अशेराह आ मूर्ति पाइश्शो थाम नु अरु मूर्ति आन कली पूजा पामे बाक्ता। मोपतीके परमप्रभु यावे यहूदा नु यरूसलेम डा मुर आन पाप आ पर्बम गाइक्ता बाक्ता। 19 मो हना यो परमप्रभु यावेम मेको आन कली आ गे लेप्पाइक्चा कली आ लोव्र पाइबपुकी सोइक्तीमी बाक्ता। मिनु मेकोपुकीम मेको आन मरिम्शो पशो कौडदमे बाक्ता। तन्न मुरपुकीम मेको आन लोव्र मनेन्मे बाक्ता।

20 मिनु परमप्रभु आ सोक्तीम चढ़ेब येहो-यादा आ तौ जकरिया कली सुमा बाक्ता। मिनु मेको मुर आन डॉइती राष्ठा मेको आन कली “परमप्रभुमी मार देंशो बाक्त्, देंशा हना, ‘गे मारदे परमप्रभु यावे आ शेंशो मपाइनीनी? मोपतीके गे गेना हना यो श्येत जशा, रिम्शो मडुम्नीनी। गेपुकीम परमप्रभु यावे कली प्रॉइतीके, मेकोमी यो इन कली प्रॉइशो बाक्ब’ देंशो बाक्ब” देंमाक्ता। मत्ती २३:३५; हिब्रू ११:३७ 21 तन्न मेकोपुकीम जकरिया आ पर्बम गारशा, पिप आ हुकुम पतीकेमी जकरिया कली परमप्रभु यावे आ खिं डा लाङगाम फुल्लु आप्था सदमे बाक्ता। 22 पिप योआशम जकरिया आ आफ येहो-यादाम आ कली रिम्शो पशो नेल्ल प्रेंदा बाक्ता। मिनु मेको आ तौ कली सदा बाक्ता। मिनु आ बेक्ची ना जकरियामी “परमप्रभु यावेम एको तशा, क्येक्क लेत्तल” देंमाक्ता। २इतिहास २३:-

23 मिनु मेको बर्स नुच्ची ना अराम रागी डा लडाइ पाइबपुकी योआश नु लडाइ पथ जाक्मा बाक्त। मिनु मेकोपुकीम यहूदा नु यरूसलेम जाक्शा, मेकेर डा मुर आन दाते डा सरकार डा गेय पाइब नु ठेयब मुर नेल्ले आन कली सदमे बाक्त। मिनु आन रोइश्शो मारेइ मारेइ दमस्कस डा पिप कली सोइक्त्तमे बाक्त। २२:१८-२२ 24 अराम डा लडाइ पाइब इक्का ला बाक्तेक्म हना यो, परमप्रभु यावेमी इस्राएल डा शुश लडाइ पाइब आन कली मेको आन गुइमी गेमी बाक्त। मारदे हना यहूदा डा मुरपुकीम परमप्रभु यावे, आन किकी पिपी आन परमप्रभु कली प्रॉइशो बाक्मा बाक्त। मोर्देशो पा योआशमी निसाफ नु सजाइ तवा बाक्त।

25 मिनु अराम रागी डा लडाइ पाइबपुकीमी पिप कली शुश गार सेल्शा, गाक्मा नोले, पिप आ ठेयब गेय पाइबपुकीमी गारशा, चढेब येहो-यादा आ तौ कली साइश्शो आ क्येक्क लेत्वा कली पिप आ ब्राख्येम बाक्मेनु, सदमे बाक्त। मोपा मेको बेक्माक्त। मिनु मुरपुकीम मेको कली दाऊद आ सहरमी थिम्मे बाक्त। तन्न पिप आन कली थिम्तीकेम मथिम्मे बाक्त। २इतिहास २१:२० 26 मेको कली साइक्व अम्मोनी मीश मुर शिमेआथ आ तौ जाबाद नु मोआबी मीश मुर शिमीथ आ तौ येहो-जाबाद बाक्सा बाक्त। 27 योआश आ चच युइ आन पर्वम ब्रेक्शो लोव, मेको आ थाप्चा माल्शो क्येट आ पर्वम लोव नु दोपा मेकोमी लेंशा परमप्रभु आ खिं सेला, मेको नेल्ल पिप आन किताबम ब्रेक्शो बाक्ब। मिनु मेको आ पा डा आ तौ अमस्याह पिप दुम्माक्त।

यहूदा डा पिप अमस्याह

२२:१४:१-२०

25 अमस्याह पिप दुम्मेनु, २५ बर्स दुश्शो बाक्माक्त। मेकोमी यरूसलेममी २९ बर्स सासन पवा बाक्त। मेको आ ममा आ नें येहो-अदान बाक्माक्त। मेको यरूसलेम डा बाक्माक्त। 2 मेकोमी परमप्रभु यावे आ डोंइती मार ठीक बाक्मे, मेको पवा बाक्त। तन्न आ थुं नेल्लेम ममाइ। 3 मेकोमी आ राज्य डा सासन बोल्यो दुम नोले, आ आफ कली साइक्व, आ गेय पाइब आस कली सांइसी बाक्त। २इतिहास २४:२५ 4 तन्न मेको आस आल आन कली मसदा बाक्त। मारदे हना मोसा आ किताबम ब्रेक्शो परमप्रभु यावे आ अरेशो “आम आफ आन तमी तौ आन पर्वम नु तमी तौ आन आम आफ आन पर्वम साइक्वा मदुम्ब। सुम पाप पाइबा, मेको साइक्वा पुंइसीब” देंशो परमप्रभु यावे आ लोव टिवा बाक्त। व्यवस्था २४:१६

5 मिनु अमस्याहम यहूदा नु बेन्यामीन डा मुर नेल्ल आन कली युम्पाइश्शा, आन खिं खिं डा मुर हजार हजार आन कली कप्तान का का नु सहे सहे डा आन कली कप्तान का का वोइक्पदा बाक्त। मेकोमी २० बर्स गाप्शो नु मेको क्येडा लाक्शो मुर नेल्ल आन कली पुक्मी बाक्त। मेको आन कली हिक्शोनु, लाख सां बाक्मा बाक्त। मेको नेल्ल लडाइ पने चाप्ब बाक्मा बाक्त। तूतीक नु तेक्तीक चलेने चाप्ब बाक्मा बाक्त। 6 मेकोमी इस्राएल रे लाख का बोल्यो लडाइ पाइब आन कली ब्रेश्शा, सहे का टलेन्ट चांदी गेवा बाक्त। टलेन्ट का ३४ किलो बाक्ब। 7 तन्न परमप्रभु आ मुर का मेको आन बाक्तीक जाक्शा “आं पिप, इस्राएल डा लडाइ पाइब आन कली गे नु मलाइक्मी। मारदे हना परमप्रभु यावे इस्राएलीपुकी नु एफ्राइम आ थर डा मुर नेल्ल नु मबाक्ब। 8 गे मोपा बोल्यो दुश्शा बाक्शो मिम्तीनी नु इस्राएल डा लडाइ पाइब लाइक्तीनी हना, परमप्रभुम इन कली इन जोरी सत्रु आन डोंइती ब्रुपाइक्ब। मारदे हना ग्रापाइक्तीक नु ब्रुपाइक्तीक सक्ति परमप्रभु आ गुइम बाक्ब” देंमाक्त। 9 मिनु अमस्याहम परमप्रभु आ मुर कली “इस्राएली लडाइ पाइब आन पर्वम गेशो मेको सहे का टलेन्ट चांदी आ पर्वम गो मार पाइनुडा?” दे हिल्लो पवा बाक्त। मिनु परमप्रभु आ मुरुम “परमप्रभु यावेम इन कली मेको क्येडा यो शुश गेने चाप्ब” देंमाक्त। 10 मोपतीके पिप अमस्याहम एफ्राइम रे जाक्शो लडाइ पाइब आन कली आन खिं लेंशा सोइक्तीमी बाक्त। मिनु मेकोपुकी यहूदा नु शुश गाइक्त्तमे बाक्त। मिनु थाम्पा चुरशा, आन खिं लेंशा लमा बाक्मा बाक्त।

11 मिनु अमस्याहम बोल पा महिंथु थुं बारपाइश्शा, आ लडाइ पाइब आन कली हिक्सी दिंमम लाइक्मी बाक्त। मिनु मेकेर सेइर डा १० हजार मुर आन

कली साइक्मी बाक्त। 12 मिनु यहूदा डा लडाइ पाइबपुकीम अर्को १० हजार मुर आन कली सेसीन ग्याइश्शा, मेको आन कली ठेयब सेरथे फुल्लु तार लाइश्शा, नेप्शा खीडमे बाक्त। खीशो नेल्ले चोकटा लाम्ता दुश्शा बेक्मा बाक्त। 13 मेना अमस्याहम लडाइम मलाइक्थु, खिं लेंशा सोइश्शो लडाइ पाइबपुकीम यहूदा डा सहरपुकी सामरीया रे बेथ-होरोन सम्म मारेइ मारेइ रोइक्त्तमे बाक्त। मेकोपुकीम मेकेर हजार सां मुर आन कली सदमे बाक्त। मिनु शुश मार मार रोइश्शा लदमे बाक्त।

14 मिनु अमस्याहम एदोमी आन कली ग्राशा लेम्मेनु, सेइर डा मुर आन देवतापुकी चाक्शा आ देवता सेला बाक्त। मिनु मेकोमी मेको देवता आन कली पूजा पा मेको आन कली चढेवा बाक्त। 15 मोपतीके परमप्रभु यावे अमस्याह नु गाइश्शा, आ लोव पाइब का सोइक्ता बाक्त। मिनु मेकोमी “गे मारदे आ मुर आन कली लायो इ गुइ रे प्रॉइने मचाप्ब देवता आन नोले खोदी?” दे हिल्लो पवा बाक्त। 16 मिनु मेकोमी लोव पना पन, पिपमी “मार गोपुकीम इन कली पिप कली अर्ती गेब सेल्शो नकी डा? ब्वाले पावो। मारदे साइक्वा पुंइसीनेवे?” दे मदा बाक्त। मिनु मेको परमप्रभु यावे आ लोव पाइबम सिक्सी पचा क्येडा डोंइती “गेम ऑ पाइतीनी, ऑ लोव मनंतीके परमप्रभुमी इन कली थमा पा खतम पोक्वा थुं पवा बाक्त। गो तुइक्नुड” देंमाक्त।

17 मेको नोले यहूदा डा पिप अमस्याहम आ अर्ती गेबपुकी नु सल्ला पा इस्राएल डा पिप येहू आ चच येहो-अहाज आ तौ योआश कली “जाक्को। गे नु गो लडाइ पस” दे मदा बाक्त। 18 तन्न इस्राएल डा पिप योआशमी यहूदा डा पिप अमस्याह कली कथा का देंमाक्त। मार कथा देंमाक्त देंशा हना “लेबानोन डा चू बुटा कामी लेबानोन डा लाइश्शो रवा का कली ‘इ तमी आं तौ नु ग्युंवे पचा गेवो’ देंमाक्त। तन्न लेबानोन डा ब्वाकी डा जन्तु का मेको रे पा पिमेनु, मेको चू बुटा कली दिम्शा लाक्मा बाक्त। न्यायाधीस १:१४ 19 गे एदोम कली ग्राती, दे बोरशा ठेयब मलेतो। गे इ खिं उइ बाक्को। गे मारदे आंम कली नु यहूदा कली खतम पोक्वा माल्नेवे?” दे लोव लेत्ता बाक्त।

20 तन्न अमस्याहम मेको लोव मनना बाक्त। मोपतीके परमप्रभुमी मेको कली मुर आन गुइमी गेवा बाक्त। मारदे हना मेकोपुकीम एदोम डा देवता आन कली खोइश्शो बाक्मा बाक्त। 21 मिनु इस्राएल डा पिप योआश डोंइती लमाक्त। मिनु मेको नु यहूदा डा पिप अमस्याह यहूदा डा बेथ-शेमेशम लडाइ पाम्से बाक्त। 22 मिनु यहूदा डा मुरपुकी इस्राएली आन क्येडा ब्रुमा बाक्त। मिनु मेको नेल्ल आन खिं प्रोक्मा बाक्त। 23 मिनु इस्राएल डा पिप योआशमी योआश आ तौ, अहाज्याह आ चच, यहूदा डा पिप अमस्याह कली बेथ-शेमेशम ग्याइश्शा यरूसलेमम चाक्मा बाक्त। मिनु मेकोमी एफ्राइम डा ठेयब लाप्चो रे सुर डा ठेयब लाप्चो सम्म डा ४ सहे कुबीत लाइश्शो गारो प्रेदा बाक्त। कुबीत का ०.५ मिटर बाक्ब। 24 मेकोमी ओबेद-एदोम आ खाल पशो परमप्रभु आ खिंम बाक्शो सुन चांदी, ग्योबपुकी नु पिप आ खिंम बाक्शो सुन चांदी शुश क्येट लाइब थोवकपुकी नु मुर आन कली ग्याइश्शा लाइश्शा, सामरीया लेम्माक्त। पिप आ मुर आन कली यो ग्याइश्शा लाइश्शा, सामरीया लेम्माक्त। इतिहास २६:१३,१५

25 इस्राएल डा पिप येहो-अहाज आ तौ योआश क्येडा यहूदा डा पिप योआश आ तौ अमस्याह १५ बर्स शुश ब्रॉइमाक्त। 26 अमस्याह आ पशो, आ डोंइती रे नोले सम्म नेल्ल यहूदा नु इस्राएल डा पिप आन इतिहासम ब्रेक्शो बाक्ब। 27 मेको अमस्याह परमप्रभु यावे रे डोन दुम नाक्त रे यरूसलेमम मेको कली साइक्वा, दे सल्ला पा गारशो बाक्मा बाक्त। मेको प्रोक्शा ब्रॉइचा कली लाकीशम लमाक्त। तन्न मेकोपुकीम लाकीशम आ नोनोले खेदा पाइब मुर सोइश्शा, मेको कली मेक उइ साइक्पदमे बाक्त। २इतिहास २४:२५ 28 मेको नोले मेको आ बेक्शो रां शाराम कुर पा, यरूसलेम चाक्मामे बाक्त। मिनु मुरपुकीमी मेको कली आ किकी पिपी आन कली थिम्तीके दाऊद आ सहरम थिम्मे बाक्त।

यहूदा डा पिप उज्जीयाह

२२:२१-२२; २२:२५:१-७

26 मिनु यहूदा डा मुरपुकी नेल्लेम १६ बर्स दुश्शो अमस्याह आ तौ उज्जीयाह कली मेको आ आफ आ पा डा पिप सेल्मे बाक्त।

2 मिनू अमस्याह बेवम नोले उज्जीयाहमी एलोथ सहर लेंशा ताक्शा, यहूदा कली लेशशा गेशा, रिश्शो सेला बाक्ता। <sup>3</sup> उज्जीयाह पिप दुम्मेनु, मेको १६ बर्स दुश्शो बाक्माक्ता। मेकोमी यरूसलेमम ५२ बर्स सासन पवा बाक्ता। मेको आ ममा आ नें येकोल्याह बाक्माक्ता। मेको यरूसलेम डा बाक्माक्ता।

4 मेकोमी आ आफ अमस्याह खोदेंशो पा परमप्रभु यावे आ डोंइती मार ठीक बाक्मे, मेको पवा बाक्ता। *२इतिहास २५:२* <sup>5</sup> मेना जकरिया पिप कली परमप्रभु यावे कली मान पा हिंचा आ पर्बम शेंब बाक्माक्ता। मिनू पिपमी जकरिया आ पालाम परमप्रभु यावे आ नोले खोइक्ना खोइक्न बाक्माक्ता। मोपा खोदा सम्म परमप्रभुम अमस्याह आ पशो नेल्ल रिश्शो दुम्पदा बाक्ता।

6 मिनू मेको पलिस्ती नु लडाइ पचा कली लडाइ पतीकेम लमाक्ता। मिनू मेकोमी गाथ, याब्नेह नु अशदोद कली ग्राशा, गारो प्रेशशा गेवा बाक्ता। मिनू मेकोमी अशदोद नु आ नेक्था पलिस्ती रागी आन दातेम अरु सहरपुकी सेला बाक्ता। <sup>7</sup> परमप्रभुमी मेको कली पलिस्ती, गुर-बालम बाक्ब अराबीपुकी नु मेउनीपुकी नु लडाइ दुम्तीकेम वारच पदा बाक्ता। <sup>8</sup> मिनू अम्मोनीपुकीमी उज्जीयाह कली आन गेचा माल्शो मार मार गेमे बाक्ता। मिनू मेको आ सोशो बोशो लोत्र इजीप्त आ नेक्था सम्म जाक्दीम्माक्ता। मारदे हना मेको शुश सक्ति पाइश्शो दुश्शो बाक्माक्ता। <sup>9</sup> मेकोमी यरूसलेमम गारो डा सुर डा ठेयब लाचो, बेंसी डा ठेयब लाचो नु गारो आ सुर हिरतीकेमी यो लाइश्शो खिंपुकी सेला बाक्ता। मिनू मेको कली बोल्यो सेला बाक्ता। <sup>10</sup> मेकोमी गोरशो रागीम अरु लाइश्शो खिंपुकी सेला बाक्ता। मिनू मेकोमी शुश इनारपुकी दोपाइक्मी बाक्ता। मारदे हना मेको के शेफेलाह नु दिंममी शुश बी ब्यफ बाक्मा बाक्ता। मिनू मेको के पहाडम नु रिश्शो खप डा दिंमम रू दोइब नु अडगुर रू कोत्रब मुरपुकी बाक्मा बाक्ता। मारदे हना मेको खेतीपाती पचा दाक्ब मुर बाक्माक्ता। <sup>11</sup> मेको प्रोंइशा, उज्जीयाह के बोल्यो लडाइ पाइब शुश बाक्मा बाक्ता। मेकोपुकी गेना हना यो लडाइ पचा कली ठीक दुश्शा बाक्बाक्मा बाक्ता। मिनू मेको लडाइ पाइब आन ब्रेक्ब यिएल नु पुक्ब मासेयाहम मेको आन कली हुल हुल सेल्शा, पिप आ कप्तान हनान्याहम देंशो खोदेंशो पा पास्से बाक्ता। <sup>12</sup> खिं खिं डा बोल्यो सक्ति पाइश्शो लडाइ पाइब हजार निक्शी ६ सहे बाक्मा बाक्ता। <sup>13</sup> मेको ठेयब मुर आन हुकुममी पिप कली आ जोरी सत्रु रे वारच पाइक्वा कली लाख सां ७ हजार ५ सहे बोल्यो लडाइ पाइब आन हुल का यो बाक्माक्ता। <sup>14</sup> मिनू उज्जीयाहमी लडाइ पाइब नेल्ल आन कली तेक्तीके, तूतीक, फलाम के टोपी, कुचुम पांइतीके, लिब्रा नु हुरद आप्तीक फुल्लु ठीक पा गेवा बाक्ता। <sup>15</sup> मेकोमी यरूसलेम डा गारो डा लाइश्शो खिं तारी नु सुरपुकीम जोक्ब मुर आन सेल्शो ब्रा आप्तीक नु ठेयब फुल्लु आप्तीक वोइक्पदा बाक्ता। आ ठेयब दुम्तीके तेइ तेइ ब्रशो बाक्माक्ता। मेको सक्ति पाइश्शो दुम्माक्ता। मारदे हना परमप्रभुमी मेको कली छक लाक्वा डा पा वारच पवा बाक्ता। मेको आ पर्बम शुश लोत्र ब्रशो बाक्माक्ता।

16 मोपा मेको सक्ति पाइश्शो दुम्तीके ठेयब लेशशा, खतम दुम्माक्ता। मेकोमी परमप्रभु यावे, आ परमप्रभु कली मटिथु, धूप चोतीकेम धूप चोचा कली परमप्रभु यावे आ खिं ओत्रमाक्ता। *२इतिहास २५:१९* <sup>17</sup> तन्न चढेब अजारयाह नु अरु परमप्रभु यावे कली चढेब बोल्यो नु महिं ८० जना मुरुमी मेको आ नोले खोदमे बाक्ता। <sup>18</sup> मिनू पिप उज्जीयाह कली तेक्चा, दे “पिप उज्जीयाह परमप्रभु यावे कली धूप चोतीक गेय इन के ममाइ। एको गेय पचा कली जिम्मा गेशो हारून आ चच युइ चढेब आन के बाक्ब। परमप्रभु यावे आ बाक्तीक रे गूडीन। मारदे हना गे दूली पाइतीनी। मिनू मुल परमप्रभु यावेमी इन कली मारेइ मान मगोपाइक्ब” दे मदमे बाक्ता। *गन्ती १८:७; प्रस्थान ३०:७* <sup>19</sup> मिनू गुइम थनौरो शेशा धूप चोचा कली ठीक दुश्शो पिप गाइक्ता बाक्ता। मिनू मेको चढेबपुकी नु गाइक्ना गाइक्नन आ कुप्फीम कोत्रब गूमाक्ता। मेको नेल्ल चढेब आन डोंइती, परमप्रभु यावे आ खिं आगाम नु धूप चढेतीक आ डोंइती दुम्माक्ता। <sup>20</sup> मिनू ठेयब चढेब अजारयाह नु अरु चढेबपुकीम मेको कली कोत्रना कोत्रन मेको आ कुप्फीम कोर गूशो तशा, मेको कली रीब पा परमप्रभु यावे आ खिं रे लाडगा गूइदमे बाक्ता। मेको आंमा यो रीब पा लाडगा गूचा माल्शो बाक्माक्ता। मारदे हना परमप्रभु यावेम मेको कली मेको रोइमी आप्शो बाक्माक्ता। <sup>21</sup> मिनू पिप उज्जीयाह आ बेक्ची नाक्त सम्मन कोत्ररी दुश्शा बाक्माक्ता। मेको कोत्ररी दुश्शा खिं काम

आ कान बाक्चा माल्दा बाक्ता। मेको परमप्रभु यावे आ खिं रे तिल्वा पुंडसे बाक्ता। मिनू मेको आ तौ योथाममी दरवार कली कोत्रशा, मुर आन कली सासन पचा गोवा बाक्ता। *गन्ती ५:२* <sup>22</sup> उज्जीयाह आ पशो नेल्ल डोंइती रे नोले सम्म डा गेय नेल्ल आमोज आ तौ परमप्रभु यावे आ लोत्र पाइब यसैयाम ब्रेक्शो बाक्ब। *यसैया ६:१; यसैया १:१* <sup>23</sup> मिनू उज्जीयाह बेक्माक्ता। मिनू मेकोपुकीमी आ किकी पिपी आन कली थिम्तीके आ नेक्था डा रू काम थिम्मे बाक्ता। मारदे हना मुरपुकीम “कोत्ररी का बाक्ब” देमा बाक्ता। मिनू मेको आ पा डा आ तौ योथाम पिप दुम्माक्ता।

यहूदा डा पिप योथाम

२राजा १५:३२-३८

27 योथाम पिप दुम्मेनु, २५ बर्स दुश्शो बाक्माक्ता। मेकोमी यरूसलेमम १६ बर्स सासन पवा बाक्ता। मेको आ ममा आ नें येरुशाह बाक्माक्ता। मेको सादोक आ तमी बाक्माक्ता। <sup>2</sup> मेकोमी आ आफ उज्जीयाह खोदेंशो पा परमप्रभु यावे आ डोंइती मार ठीक बाक्मे, मेको पवा बाक्ता। तन्न मेको आ आफ खोदेंशो पा परमप्रभु यावे आ खिं मओत्रमाक्ता। मो हना यो मुर आन मरिश्शो गेय पस डा पस बाक्मा बाक्ता। *२इतिहास २६:२६* <sup>3</sup> मेकोमी परमप्रभु यावे आ खिं डा आइक्था डा लाचो लेंशा सेला बाक्ता। मिनू मेकोमी ओफेल डा गारोम शुश गेय पा बोल्यो पा सेला बाक्ता। <sup>4</sup> मेकोमी यहूदा डा पहाडमी यो सहरपुकी सेला बाक्ता। मिनू ब्वाकी डा डांडापुकीम बोल्यो दरवार नु लाइश्शो खिंपुकी सेला बाक्ता। *२इतिहास २६:१०* <sup>5</sup> मिनू योथाममी अम्मोनी आन पिप नु लडाइ पा मेको आन कली ग्रामाक्ता। मिनू मेको बर्स अम्मोनीपुकीम मेको कली सहे का टलेन्ट चांदी, १० हजार कोर चेरब नु १० हजार कोर क्योत्रज गेमे बाक्ता। मिनू मेकोपुकीम आ नोले डा बर्स नु मेको क्येडा नोले डा बर्सम यो मोपान तिरो थाप्तमे बाक्ता। *टलेन्ट का ३४ किलो बाक्ब। कोर का २२० लिटर खोदेंशो बाक्ब।* <sup>6</sup> मिनू योथामम परमप्रभु यावे, आ परमप्रभु आ डोंइती रिश्शो गेय पतीके मेको थम सक्ति पाइश्शो दुम्माक्ता। <sup>7</sup> योथामम मार मार पवा, मेको आ पशो लडाइ नेल्ले नु आ गाक्शो लां इस्राएल नु यहूदा डा पिप आन इतिहासम ब्रेक्शो बाक्ब। <sup>8</sup> मेको पिप दुम्मेनु, २५ बर्स दुश्शो बाक्माक्ता। मिनू मेकोमी यरूसलेमम १६ बर्स सासन पवा बाक्ता। <sup>9</sup> मिनू योथाम बेक्माक्ता। मिनू मुरपुकीमी मेको कली दाऊद आ सहरम थिम्मे बाक्ता। मिनू आ नोले मेको आ तौ आहाज पिप दुम्माक्ता।

यहूदा डा पिप आहाज

28 आहाज पिप दुम्मेनु, २० बर्स दुश्शो बाक्माक्ता। मेकोमी यरूसलेमम १६ बर्स सासन पवा बाक्ता। मेकोमी आ किकी पिपी दाऊद खोदेंशो पा परमप्रभु यावे आ डोंइती मार ठीक बाक्मे, मेको मपवा बाक्ता। <sup>2</sup> मेको इस्राएल डा पिप आन लाम गाक्माक्ता। मिनू चेम्शा बाल देवता आ मूर्तिपुकी सेला बाक्ता। <sup>3</sup> मिनू पिप आहाजम बेन-हिन्नोम आ बेंसीम धूप चढेवा बाक्ता। आहाजमी रागी रागी डा मुर आन ग्रांरा दिशो गेय खोदेंशो पा, आ तौ आन कली मीम चोशा चढेवा बाक्ता। मोपतीके परमप्रभु यावेमी रागी रागी डा मुर आन कली इस्राएली आन डोंइती रे खेरशो बाक्माक्ता। *ब्यक्था १८:९-१२* <sup>4</sup> मेकोमी डांडा डा थानपुकीम चढेवा बाक्ता। मिनू नेल्ल डांडाम नु ठेयब रवा आ पुंम चढेतीक चढेशा धूप चोवा बाक्ता। *१राजा १४:२२-२३*

<sup>5</sup> मोपतीके परमप्रभु यावे, आ परमप्रभुमी मेको कली अराम डा पिप नु ब्रुपाइश्शा, मेको आ गुइमी गेवा बाक्ता। मिनू मेकोमी पिप आहाज आ शुश मुर आन कली ग्याइश्शा, दमस्कसम लदा बाक्ता। मेको इस्राएल डा पिप नु यो ब्रुमाक्ता। मिनू मेको पिपम शुश मुर आन कली सदा बाक्ता। <sup>6</sup> रेमाल्याह आ तौ पेकाहमी काबुमीन यहूदा डा लाख का २० हजार मुर आन कली साइक्मी बाक्ता। मेको नेल्ल बोल्यो लडाइ पाइब बाक्मा बाक्ता। मारदे हना यहूदा डा मुरपुकीम परमप्रभु यावे, आन किकी पिपी आन परमप्रभु कली प्रोंइशो बाक्मा बाक्ता। <sup>7</sup> एफ्राइम डा जिक्री माइश्शो बोल्यो लडाइ पाइब मुर

काम पिप आ तौ मासेयाह, पिप आ दरवार कोत्रब कप्तान अजीकाम नु पिप आ ठेयब ब्रेक्ब एल्काना आन कली साइक्मी बाक्त।

८ इस्राएलीपुकीमी लाख निक्शी आन थर थर डा मुर ग्याइश्शा लदमे बाक्त। मेको मीश मुर, तमी नु तौ बाक्मा बाक्त। मिनु मेकोपुकीम शुश मार मार यो रोइश्शा, नेल्ल सामरीया लदमे बाक्त। ९ तन्न मेकेर ओदेद नें पाइश्शो परमप्रभु यावे आ लोत्र पाइब का बाक्माक्त। मिनु लडाइ पाइबपुकी सामरीया लेम्मानु, मेको आन कली गुम्थ जाक्माक्त। मिनु मेकोमी मेको लडाइ पाइब आन कली “परमप्रभु यावे, इन किकी पिपी आन परमप्रभु यहूदा डा मुरपुकी नु गाइक्तीके, मेकोमी मेको आन कली इन गुइमी गेपु। तन्न गेपुकीम इन गाइक्तीकेम मेको आन कली साइक्तीनी। मेको मो पशो इर स्वर्ग सम्म जाक्दीश्शो बाक्ब। *लेवी १९:१८* १० मुल गे यहूदा नु यरूसलेम डा मीश मुर, वॉइश मुर नेल्ल आन कली इन वाइलीम वाइल सेल्वा थुं पाइनीनी। गेपुकीम परमप्रभु यावे, इन परमप्रभु आ डॉइती पाप ला पाइनीनी। अरु मार पाइनीनी? ११ मुल आं लोत्र नेनीन। इन ग्याइश्शो आंम मुर आन कली प्रॉइशा लेत्वा गेने। मारदे हना परमप्रभु यावे इन कली तशा शुश चुरशो बाक्ब” देमाक्त। १२ मिनु लेंशा का निक्शी एफ्राइम डा ठेयब मुर योहानान आ तौ अजारयाह, मेशील्लेमोथ आ तौ बेरेक्याह, शाल्लुम आ तौ येहीज्क्याह नु हादले आ तौ आमासाम लडाइ रे लेशशा जाक्शो आन कली गुम्था, १३ मेको आन कली “गेपुकीम एको ग्याइश्शो आन कली एक चाक्वा मदुम्ब। गेपुकीम मार मिश्शो बाक्नी? मेको आ पबर्म गोपुकीम परमप्रभु यावे आ डॉइती दोस ताइनीकी। मार, गेपुकीम इं मरिश्शो पशो नु इं पाप तेम्चा दाक्नीनी? मार, इं पाप ठेयब मबाक्वा डा? परमप्रभु यावे इस्राएल आ पबर्म डॉइती रे गाइक्ना गाइक्न बाक्ब” दे मदमे बाक्त। १४ मोपतीके लडाइ पाइबपुकीम ग्याइश्शोपुकी नु आन रोइश्शो मारेइ मारेइ मेको आन ठेयब मुर नु मेको देल्शा बाक्शो मुर आन डॉइती प्रोन्मे बाक्त। १५ मिनु ठेयब मुरपुकीमी नें थिशा का निक्शी मुर आन कली ब्रेत्मे बाक्त। मेको ब्रेश्शो मुरपुकीम ग्याइश्शा चाक्शो शिश्रा मुर आन कली रोइश्शो वा फेक्पदमे बाक्त। जुत्ता मुइक्पदमे बाक्त। जचा नु तूचा गेशा, तेल ख्रेक्तमे बाक्त। मिनु थाम्पा दशो नु गाक्ने मचाप्ब मुर आन कली गधा डोइक्पा, खजूर रवा आ सहर, यरीको आन खिं खिं सम्म चोक्डमे बाक्त। मिनु मेकोपुकी सामरीया लेम्मा बाक्त। *२राजा ६:२२; हितोपदेस २५:२१-२२*

१६ मेना पिप आहाजम अस्सुर डा पिप कली “वारच पाइक्की” दे पुंइथ मुर सोइक्ता बाक्त। १७ मारदे हना एदोमीपुकीम लेंशा लडाइ पा यहूदा कली ग्राशा, मेकेर डा मुर आन कली ग्याइश्शा लाइश्शो बाक्मा बाक्त। १८ पलिस्तीपुकीमी यो यहूदा डा शेफेलाह नु नेगेब डा सहरपुकी रोइक्तमे बाक्त। मिनु मेकोपुकीम बैथ-शेमेश, आइयालोन, गेदे-रोथ, सोको नु मेको आ गाउंपुकी, तिम्नाह नु मेको आ गाउंपुकी, गिम्जो नु मेको आ गाउंपुकी आंम के सेल्शा बाक्मा बाक्त। *यहोसु १५:१०* १९ यहूदा डा पिप आहाजम पतीकेन परमप्रभु यावेम यहूदा कली थम आइक्च सेल्शो बाक्माक्त। मारदे हना पिप आहाजम थम मरिश्शो पा परमप्रभु यावे कली प्रॉइशो बाक्माक्त। २० मिनु अस्सुर डा पिप तिल्याथ-पिलेसेर मेको कली वारच पाइक्थ जाक्माक्त। तन्न मेकोमी मेको कली वारच पाइक्चा आ पा डा श्येत कका गेवा बाक्त। २१ मिनु आहाजम परमप्रभु यावे आ खिं, पिप आ दरवार नु आ ठेयब मुर आन खिं रे मार मार लाइश्शा, अस्सुर डा पिप कली “वारच पाइक्की” दे गेवा बाक्त। तन्न मेको नेल्ल मोशा दुम्माक्त।

२२ मोपा पिप आहाज दोशो श्येत जवा, मोशोन परमप्रभु यावे क्येडा डोन दुम्माक्त। २३ मेकोमी आंम कली बुपाइक्ब दमस्कस डा देवता आन कली चढ़ेवा बाक्त। मारदे हना मेकोमी “अराम डा पिप आ देवतापुकीम मेको आन कली वारच पाइक्तेक्म। गो यो मेको आन कली मार मार चढ़ेनुड। मिनु आं कली यो वारच पाइक्कीमिल” दे मिम्ता बाक्त। तन्न मेको देवतापुकी मेको कली नु इस्राएली नेल्ल आन कली खतम पोक्तीक दुम्माक्त। २४ मेको नोले आहाजमी परमप्रभु आ खिं डा ग्योबपुकी खुप्शा, खोइश्शा बिग्रेवा बाक्त। मिनु परमप्रभु यावे आ खिं डा लाप्चो चोक्गा बाक्त। मिनु मेकोमी यरूसलेमम तेइ तेइ थानपुकी सेला बाक्त। २५ मिनु यहूदा डा सहर सहरमी डांडा डा थानपुकी सेला बाक्त। अरु देवता आन कली मार मार चढ़ेवा बाक्त। मोपा मेकोमी परमप्रभु यावे, आंम किकी पिपी आन परमप्रभु कली

थाम्पा गाइक्पदा बाक्त। २६ मिनु मेकोमी नोले सम्म मार मार पवा नु आ डॉइती नु नोले डा गाक्शो लां नेल्ल, यहूदा नु इस्राएल डा पिप आन किताबम ब्रेक्शो बाक्ब। २७ मिनु आहाज बेक्माक्त। मिनु मुरपुकीम मेको कली यरूसलेम सहरम थिम्मे बाक्त। तन्न मेकोपुकीम मेको कली इस्राएल डा पिप आन कली थिम्तीकेम मथिम्मे बाक्त। मिनु मेको आ पा डा आ तौ हिज्कीयाह पिप दुम्माक्त। *२इतिहास २१:२०*

यहूदा डा पिप हिज्कीयाह

२९ हिज्कीयाह पिप दुम्मेनु २५ बर्स दुश्शो बाक्माक्त। मेकोमी यरूसलेमम २९ बर्स सासन पवा बाक्त। मेको आ ममा आ नें अबीयाह बाक्माक्त। मेको जकरिया आ तमी बाक्माक्त। २ मेकोमी आ किकी पिपी दाऊदम पशो खोदेंशो पा परमप्रभु यावे आ डॉइती मार ठीक बाक्मे, मेको पवा बाक्त।

परमप्रभु आ खिं डा गेय

३ मिनु मेको पिप दुश्शो डॉइती डा बर्स डा डॉइती डा महिनाम मेकोमी परमप्रभु यावे आ खिं डा लाप्चोपुकी रोक्शा, मेको आन कली सेल्पदा बाक्त। *२इतिहास २८:२४* ४ मेकोमी चढ़ेब नु लेवी आन कली पुक्शा पूब डा लाडगाम गुम्पाइक्मी बाक्त। ५ मिनु मेकोमी मेको आन कली “लेवीपुकी, आं लोत्र नेनीन। मुल गेपुकी आंम कली परमप्रभु यावे आ डॉइती ठीक सेल्सीन। मिनु परमप्रभु यावे, इन किकी पिपी आन परमप्रभु आ खिं ठीक सेलीन। मिनु परमप्रभु यावे आ बाक्तीक रे ग्रांरा दिशो नेल्ल गुंइशा ताइक्तीन। ६ मारदे हना इं किकी पिपीम परमप्रभु यावे कली प्रॉइशा, परमप्रभु यावे, इं परमप्रभु आ डॉइती मार मरिश्शो बाक्मे, मेको पाम्तेक्म। मेकोपुकीम मेको कली प्रॉइशा, मेको आ बाक्तीक आ पबर्म मारेइ ममिम्तेम। मेकोपुकीम परमप्रभु यावे आ खिं कली हिरशान मकोवडेम। ७ मेकोपुकीम पिंडी डा लाप्चोपुकी यो चोक्तेक्म। बत्ती काप्ताक्म। मेकोपुकीम इस्राएली आन परमप्रभु आ खिंम धूप चोचा नु चोशा चढ़ेचा प्रॉइतेक्म। ८ मोपतीके परमप्रभु यावे यहूदा नु यरूसलेम आस पबर्म गाइक्ताक्व। मिनु मेकोमी मेको आन कली आन रागी आ नेक्था डा मुर आन डॉइती ग्रांरा दित्वा डा शुक्शी पचा डा नु तोक्चा पुंइसीब सेल्लु। मेको गे आंमा तशो बाक्नीनी। ९ मोपतीके इं आफ तरवारम क्योरशा साइक्चा पुंइसाक्म। मिनु इं तमी तौ नु इं मीश ग्याइश्शा लाइक्चा पुंइसाक्म। *२इतिहास २८:५-८* १० मिनु मुल गो परमप्रभु यावे, इस्राएली आन परमप्रभु नु कबल पचा थुं पशो बाक्नुड। मोपा इं पबर्म गाइश्शो बेक्वा कों? ११ मोपतीके आं तौपुकी, मुल देश मपने। मारदे हना गे परमप्रभु यावे आ डॉइती राष्ठा आ गेय पचा कली नु मेको कली चढ़ेचा कली योत्रसीशो बाक्नीनी” देमाक्त।

१२ मिनु लेवीपुकी गेय पचा कली बोक्मा बाक्त। मेको सु सु बाक्मा बाक्त देंशा हना, कोहाथी रे अमासै आ तौ माहाथ, अजारयाह आ तौ योएल, मेरारी रे अब्दी आ तौ किश नु येहल्लेल आ तौ अजारयाह, गेरशोनी रे जिम्माह आ तौ योआह नु योआह आ तौ एदेन, १३ एली-जाफान रे शिम्री नु येहुएल, आसाफ रे जकरिया नु मत्तन्याह, १४ हेमान रे येहुएल नु शिमैड, येदुथून रे शेमायाह नु उज्जीएल, मेको लेवीपुकी बाक्मा बाक्त। १५ मिनु मेकोपुकीम आन आन लोक्ब आन कली खुप्तमे बाक्त। मिनु मेकोपुकीम आंम कली परमप्रभु यावे आ डॉइती ठीक सेल्सीमा बाक्त। मिनु पिपम परमप्रभु यावेमी देंशो खोदेंशो पा हुकुम पवा बाक्त। मिनु मेकोपुकीम परमप्रभु यावे आ खिं ओव्रशा, ग्रांरा दिशो मार मार गुंइदमे बाक्त। १६ मिनु चढ़ेबपुकी परमप्रभु यावे आ खिं ओव्रमा बाक्त। मोपा ओव्रशा, मेकेर बाक्शो ग्रांरा दिशो थोव्रक नेल्ल गुंइशा लाडगाम तेल्मे बाक्त। मिनु लेवीपुकीम मेको गुप्शा, किद्रोन खोल्साम लाइश्शा ताइक्तमे बाक्त। १७ मेकोपुकीम डॉइती डा महिना डा डॉइती डा नाक्ती ठीक सेल्तीक गेय पचा गोव्रमे बाक्त। मिनु ८ नाक्तीम मेकोपुकी पिंडी सम्म जाक्दीम्मा बाक्त। मिनु अर्को ८ नाक्ती नोले मेकोपुकीम परमप्रभु यावे आ खिं नेल्ले ठीक सेल्शो बाक्मा बाक्त। मिनु मेकोपुकीम डॉइती डा महिना डा १६ नाक्तीम मेको गेय थुम्मे बाक्त।



18 मेको नोले मेकोपुकी पिप हिज्कीयाह आ बाक्तीक लशा "गोपुकीम परमप्रभु यावे शोब्ले लहर पा वोइक्तीक टेबल नु मेको आ मारेइ मारेइ ठीक सेल्ने थुम्तक। 19 मिनु पिप आहाजम पिप पवा ना, परमप्रभु यावे कली प्रोइशा, तिल्शा वोइश्शो थोव्रकपुकी नेल्ल ठीक सेल्शा, आन आन बाक्तीकेम वोइक्तक। मुल मेको परमप्रभु यावे कली चढेतीक आ डोंइती वोइश्शो बाक्नीम" देमा बाक्त।

20 मिनु पिप हिज्कीयाह सुनी कना बोक्शा, सहर डा ठेयब मुर आन कली पुक्पाइश्शा, परमप्रभु यावे आ खिं ग्येत्थ लमा बाक्त। 21 मेकोपुकीम ७ ओटा ब्यफ, ७ ओटा सांड, ७ ओटा पाठा नु ७ ओटा बोका चाक्गमे बाक्त। मेको नेल्ले राज्य, परमप्रभु यावे आ बाक्तीक नु यहूदा आ पाप आ पर्बम चढेचा कली बाक्मा बाक्त। मिनु पिपम मेको नेल्ल हारून आ चच युड, चढेब आन कली परमप्रभु यावे आ चढेतीकेम चढेचा, दे हुकुम पवा बाक्त।

22 मेकोपुकीम मेको ब्यफ आन कली क्योरमे बाक्त। मिनु चढेबपुकीम मेको आन हुश ताक्शा चढेतीकेम ब्रुइक्तमे बाक्त। मिनु मेकोपुकीम सांड आन कली क्योरमे बाक्त। मिनु मेको आन हुश ताक्शा चढेतीकेम ब्रुइक्तमे बाक्त। मिनु पाठा आन कली क्योरशा, मेको आन हुश ताक्शा चढेतीकेम ब्रुइक्तमे बाक्त। 23 मिनु मेको नोले मेकोपुकीम पाप आ पर्बम चढेतीक बोका आन कली पिप नु मुर आन डोंइती चाक्गमे बाक्त। मिनु पिप नु मुरपुकीम मेको आन तार आन आन गुड वोदमे बाक्त। लेवी १६:१५-२२ 24 मिनु चढेबपुकीम मेको बोका क्योरशा, आन हुश पाप आ पर्बम चढेतीकेम चढेमे बाक्त। इस्राएली नेल्ल आन पर्बम पाप क्याम्तीक गेय पामे बाक्त। मारदे हना पिपम चोशा चढेतीक नु पाप आ पर्बम चढेतीक इस्राएली नेल्ल आन पर्बम चढेचा माल्ब, दे अरेशो बाक्माक्त।

25 मिनु पिपम लेवी आन कली परमप्रभु यावे आ खिंम बुक्केल नु ठेयब नु आइक्च तार पाइश्शो ताप्तीके ताप्चा कली ठीक दुम्पाइक्मी बाक्त। मारदे हना डोंइती दाऊदम, परमप्रभु यावे आ लोव्र ताइब, गाद नु नाथान रे पा मोदेंशो शेंशो बाक्माक्त। १इतिहास २५:१ 26 मिनु लेवीपुकीम दाऊद आ सेल्शो ताप्तीकपुकी नु चढेबपुकीम तुराही शेशा राम्मा बाक्त। 27 मिनु हिज्कीयाहम चोशा चढेशो चढेतीकेम चढेचा माल्नीम, दे हुकुम पवा बाक्त। मिनु चोशा चढेतीकेम चढेचा गोव्रमेनु, परमप्रभु यावे कली कुम्सो पामे बाक्त। तुराही नु इस्राएल डा पिप दाऊदमी सेल्शो ताप्तीक मेको कुम्सो नु ताप्मे बाक्त। १इतिहास २३:५ 28 मिनु खुम्सीशो मुर नेल्ले बाष्शा, परमप्रभु यावे कली ठेयब सेल्मे बाक्त। कुम्सो पाइबपुकीम कुम्सो पामे बाक्त। मिनु तुराही ताप्बपुकीम तुराही ताप्मे बाक्त। चोशा चढेतीक मनुम्म सम्म मोदेंशो पामे बाक्त। 29 मिनु चढेशो नुम नोले पिप नु मेकेर बाक्ब नेल्लेमी बाष्शा ठेयब सेल्मे बाक्त। 30 मिनु पिप हिज्कीयाह नु मेको आ सरकार डा ठेयब मुरपुकीम लेवी आन कली दाऊद नु परमप्रभु यावे आ लोव्र पाइब आसाफ आ ब्रेक्शो कुम्सो पा परमप्रभु यावे कली ठेयब सेल्पदमे बाक्त। मोपा मेकोपुकीम थाप्मा ग्येरसीशा परमप्रभु यावे आ डोंइती बाष्शा ठेयब सेल्मे बाक्त। २इतिहास २३:१८

31 मिनु हिज्कीयाहम "मुल गे आंमा परमप्रभु यावे कली जिम्मा गेसाक्नी। गेपुकीम चढेतीक नु 'गे रिम्शो पाइब बाक्नीनी' दे चढेतीके चाक्शा परमप्रभु यावे आ खिंम जाक्कीन" देमाक्त। मोपतीके खुम्सीशो मुरपुकीम चढेतीक नु "गे रिम्शो पाइब बाक्नीनी" दे चढेतीक कुरशा जाक्मा बाक्त। मिनु सुइमी ग्येरसीशा चोशा चढेतीके चाक्चा दाक्ताक्म हना, मेको पामे बाक्त। 32 मिनु मेको खुम्सीशो मुरपुकीम चाक्शो चोशा चढेतीक हिक्शोनु, ७० ओटा ब्यफ, सहे का सांड नु सहे निक्शी पाठा बाक्मा बाक्त। मिनु मेको नेल्ल परमप्रभु यावे कली चोशा चढेचा कली बाक्मा बाक्त। 33 मिनु परमप्रभु यावे कली चढेचा कली गेशो ६ सहे ब्यफ नु हजार सां भेडा बाक्मा बाक्त। 34 तन्न चढेबपुकी इक्का ला बाक्तीके मेको चोशा चढेशो नेल्ल आन कुशुल उक्ने मचाप्मे बाक्त। मोपतीके मेको आन लोक्ब लेवीपुकीम मेको गेय नेल्ल मनुम्म सम्म नु अरु चढेबपुकीम आंम कली परमप्रभु यावे आ डोंइती ठीक मसेल्मे सम्म वारच पामे बाक्त। मारदे हना आंम कली परमप्रभु यावे आ डोंइती ठीक सेल्चामी चढेब आन क्येडा लेवीपुकी थम होस पाइक्बाक्मा बाक्त। २इतिहास ३:३, १६, १७ 35 चोशा चढेतीक नेल्ल नु दुशा बाक्चा आ पर्बम चढेशो आ बोंसो नु चोशा चढेशो कली तूचा थोव्रक चढेतीक शुश

बाक्मा बाक्त। मोपा परमप्रभु यावे आ खिं डा पतीक गेय डोंइती डा खोदेंशो पा रिम्शो दुम्माक्त। लेवी ३:१६; गन्ती १५:४-१० 36 मिनु हिज्कीयाह नु मुर नेल्ल थाप्मा ग्येरसमा बाक्त। मारदे हना परमप्रभुम आ मुर आन कली पशो रीब पा छक लाक्चा डा पा दुम्माक्त।

पास्सा चाड मानेशो

30 मिनु हिज्कीयाहम इस्राएली नु यहूदा डा मुर आन कली "यरूसलेमम बाक्शो परमप्रभु यावे आ खिंम परमप्रभु यावे, इस्राएली आन परमप्रभु कली पास्सा चाड मानेथ जाक्कीन" दे ब्रेत्ता बाक्त। मिनु मेकोमी एफ्राइम नु मनस्से डा मुर आन कली यो चिठी ब्रेक्शा ब्रेत्ता बाक्त। २इतिहास ३५:१ 2 मिनु पिप, आ सरकार डा ठेयब मुर नु यरूसलेमम खुम्सीशो मुर नेल्लेम निक्शी महिनाम पास्सा चाड मानेचा कली लोव्र गारपदमे बाक्त। 3 मेकोपुकीम डोंइती परमप्रभुम देंशो खोदेंशो पा मानेने मचाप्शो बाक्मा बाक्त। मारदे हना शुश चढेबपुकीम आंम कली परमप्रभु यावे आ डोंइती ठीक मसेल्सीशो बाक्मा बाक्त। मिनु मुरपुकी यो यरूसलेमम मदेल्शो बाक्मा बाक्त। 4 मिनु पिप नु खुम्सीशो मुर नेल्लेमी मेको चाड मानेतीक लोव्र आ पर्बम "ठीक बाक्ब" देमा बाक्त। 5 मिनु मेकोपुकीम दक्खिन डा बेयर-शेबा रे उत्तर डा दान सम्म डा इस्राएली नेल्ल आन कली परमप्रभु यावे, इस्राएली आन परमप्रभु आ पर्बम पास्सा चाड मानेचा कली यरूसलेमम जाक्चा माल्मा बाक्त। एको क्येडा डोंइती इश्का मुर दुम्शा, एको चाड ममानेशो बाक्मा बाक्त। 6 मिनु पिप नु आ सरकार डा ठेयब मुरुम ब्रेक्शो चिठी चोक्ब मुरपुकी पिप आ देंशो खोदेंशो पा यहूदा नु इस्राएलम लमा बाक्त। मिनु मेको चिठीम मार ब्रेक्शो बाक्माक्त देंशा हना "इस्राएली परमप्रभु यावे, इन किकी पिपी अब्राहाम, इसहाक नु इस्राएल आन परमप्रभु गे लेत्तीन। मेना मेकोमी अस्सुर डा पिपम मलाइश्शो लीशो मुर आन कली लेंशा कोव्रब। इस्राएल याक्ब आ नें बाक्ब। 7 गेपुकी इन किकी पिपी नु आंम मुर खोदेंशो मडुमीन। मेकोपुकीम परमप्रभु यावे, इन किकी पिपी आन परमप्रभु कली प्रोइतेक्म। मोपतीके परमप्रभु यावेमी मेको आन कली खतम सेला बाक्त। मेको आंमा तशो बाक्नीनी। 8 गेपुकी इन किकी पिपी खोदेंशो पा काइ मटीब मडुमीन। तन्न परमप्रभु यावे कली आ अरेशो टिशा, आ बाक्तीकेम जाक्कीन। मिनु 'मेको गेना हना यो आं बाक्तीकेम बाक्ब' देंशो बाक्ब। गे परमप्रभु यावे कली गेय पने। मोपा इन पर्बम आ गाइश्शो बेक्बा, कों? 9 गे परमप्रभु यावे गे लेत्तीनी हना, ग्याइश्शा लाइक्चा पुंडसीशो इन खिं खिं डा मुर नु इन आलपुकीम ग्याइक्ब मुर रे शिशी तशा, मेकोपुकी एको रागीम लेंशा जाक्नीम। मारदे हना परमप्रभु यावे, इन परमप्रभु दाक्ब नु शिशी पाइब बाक्ब। गेपुकी मेको गे लेत्तीनी हना, मेको यो इन गे लेक्ब" दे ब्रेक्शो बाक्माक्त।

10 मिनु मेको चिठी चोक्बपुकी एफ्राइम नु मनस्से आस सहर सहर नेल्ल हिरशा जबूलून सम्म जाक्दीम्मा बाक्त। तन्न मुरपुकीम मेको आन कली रिश्शा श्वशी पामे बाक्त। 11 मो हना यो आशेर, मनस्से नु जबूलून डा मुर का निक्शी ब्रेक्शो दुम्शा यरूसलेम लमा बाक्त। २इतिहास ११:१६ 12 परमप्रभु यावेमी यहूदा डा मुर यो थुं का दुम्पदा बाक्त। मिनु मेकोपुकीमी पिप नु सरकार डा ठेयब मुर आन कली देंशो, परमप्रभु यावे आ लोव्र खोदेंशो पा पामे बाक्त।

13 मिनु शुश मुर महिना निक्शीम बोख ओख्ती मसुप्शो शोब्ले डा चाड मानेचा कली यरूसलेमम जाक्मा बाक्त। मेकेर शुश मुर खुम्सीशो बाक्मा बाक्त। 14 मिनु मेकोपुकीम यरूसलेम आ एर आंथ बाक्शो चढेतीकपुकी नु धूप चोतीक प्रेशा, किद्रोन खोल्लसाम लाइश्शा ताइक्तमे बाक्त। 15 मिनु मेकोपुकीम महिना निक्शी डा १४ नाक्ती पास्सा चाड मानेतीक पाठा क्योरमे बाक्त। मिनु चढेब नु लेवी परमप्रभु यावे आ डोंइती आंम कली ठीक मसेल्तीके मुने दोक्शो बाक्मा बाक्त। मिनु मुल आंम कली ठीक सेल्शा, परमप्रभु यावे आ खिंम चोशा चढेतीक चढेमे बाक्त। गन्ती ९:१०-१३ 16 परमप्रभु आ मुर मोसा आ ब्रेक्शो अरेशो लोव्र खोदेंशो पा मेको आन गेय पतीकेम बाक्मा बाक्त। मिनु लेवीपुकीम चाक्शो हुश चढेबपुकीम ताक्शा ब्रुइक्तमे बाक्त। 17 तन्न मेको शुश खुम्सीशो मुर परमप्रभु यावे आ डोंइती

आंम कली ठीक सेल्ले मचाप्शो बाक्मा बाक्त। मोपतीके लेवीपुकीमी मेको मुर आन पर्वम आन पास्सा चाड डा पाठा क्योरचा माल्मा बाक्त।<sup>18</sup> मिनु एफ्राइम, मनस्से, इस्साकार नु जबूलून रागी रे जाक्शो शुश मुरपुकी परमप्रभु यावे आ डोंइती आंम कली ठीक मसेल्लेमीशो बाक्मा बाक्त। मो हना यो मेकोपुकीम परमप्रभु यावे अरेशो मपथु, पास्सा चाड मानेमे बाक्त। प्रस्थान १२:-<sup>19</sup> तन्न हिज्कीयाहम मेको आन पर्वम “परमप्रभु यावे गे शिशो पाइब बाक्नीनी। सु सुमी आन थुं नेल्लेमी इन कली, परमप्रभु यावे, आन किकी पिपी आन परमप्रभु खोइक्चा दाक्बा नु इन देंशो खोदेंशो पा आंम कली ठीक सेल्ले मचाप्शो बाक्मा, मेको आन कली मारेइ मपन” दे पुना बाक्त।<sup>20</sup> मिनु परमप्रभु यावेम हिज्कीयाह आ पुंडशो लोव्र नेना बाक्त। मिनु मुर आन कली सापाइक्मी बाक्त। २इतिहास ७:१४<sup>21</sup> मिनु यरूसलेमम जाक्ब इस्त्राएली नेल्लेमी ७ नाक्त सम्म थाम्पा ग्येरसीशा बोरब ओख्ती मसुप्शो शोव्ले डा चाड मानेमे बाक्त। मिनु लेवी नु चढेबपुकीम ठेयब सेंदाम कुम्सो पा, ताप्तीक ताप्शा, नाक्त किंत किंत परमप्रभु यावे कली ठेयब सेल्ले बाक्त।<sup>22</sup> मिनु हिज्कीयाहम परमप्रभु यावे आ गेय रिम्शो पस जोक्ब लेवी आन कली लोव्र पा आन थुं बारपाइक्मी बाक्त। मिनु मुरपुकीम मेको चाड डा जचा थोव्रक ७ नाक्ती सम्म जना जन बाक्मा बाक्त। मेकोपुकीम दुशा बाक्चा आ पर्वम चढेतीक चढेशा, परमप्रभु यावे, आन किकी पिपी आन परमप्रभु कली “गे रिम्शो पाइब बाक्नीनी” दे ग्येरसीशा बाक्मा बाक्त।<sup>23</sup> मिनु खुम्सीशो मुर नेल्लेमी अर्को ७ नाक्त सम्म चाड मानेचा कली लोव्र गारपदमे बाक्त। मोपतीके मेकोपुकीम अर्को ७ नाक्ती सम्म यो ग्येरशा मेको चाड मानेमे बाक्त।<sup>24</sup> यहूदा डा पिप हिज्कीयाहम मेको खुम्सीशो मुर आन कली हजार का ब्यफ नु ७ हजार भेडा चढेचा कली गेमी बाक्त। मिनु सरकार डा ठेयब मुरपुकीम मेको खुम्सीशो मुर आन कली हजार का ब्यफ नु १० हजार भेडा गेमी बाक्त। शुश चढेबपुकीम यो आंम कली परमप्रभु यावे आ डोंइती ठीक सेल्लेमीमा बाक्त।<sup>25</sup> मिनु यहूदा डा खुम्सीशो मुर नेल्ले, चढेब नु लेवीपुकी नेल्ल, इस्त्राएल रे जाक्शो मुरपुकी नु इस्त्राएल रे प्रोक्शो यहूदाम बाक्ब मुर नेल्ले ग्येरसीशो बाक्मा बाक्त।<sup>26</sup> मोपा यरूसलेमम थम ठेयब ग्येरसीतीक दुम्माक्त्त। मेको मोदेंशो इस्त्राएल डा पिप दाऊद आ तौ सोलोमन आ पाला रे गेनायो मदुम्शो बाक्माक्त्त।<sup>27</sup> मिनु चढेबपुकी नु लेवीपुकी बोक्शा मुर आन कली आसीक गेमे बाक्त। मेको आन पुंडशो लोव्र परमप्रभु यावे आ बाक्तीक स्वर्ग सम्म नेंसे बाक्त।

### मुरपुकीम थान प्रेशो

31 मिनु मेको नेल्ल नुष्ठा नोले यरूसलेम जाक्शो इस्त्राएली नेल्ल यहूदा डा सहरपुकीम लशा, पूजा पतीक खूक्शो फुल्लु प्रेत्मे बाक्त। मूर्ति पाइश्शो थाम खोल्मे बाक्त। यहूदा, बेन्यामीन, एफ्राइम नु मनस्से रागी नेल्ल डा डांडा डा थान बुल बाल उइश्शा ताइक्त्तमे बाक्त। मिनु नोले इस्त्राएली आन आन सहर नु आन आन बाक्तीकेम लेम्मा बाक्त। २इतिहास २९:-; ब्यवस्था ७:५; २राजा १८:४

### चढेब आन भाग

2 पिप हिज्कीयाहमी चढेब नु लेवी आन कली आन गेय गेना पचा दे पालो पालो पा वोइक्पदा बाक्त। मिनु चढेब नु लेवी आन कली परमप्रभु यावे कली चोशा चढेतीक चढेचा नु दुशा बाक्चा आ पर्वम चढेचा, परमप्रभु यावे कली “गे रिम्शो पाइब बाक्नीनी” दे कुम्सो पा, ठेयब सेल्लेतीक कुम्सो नु परमप्रभु यावे आ बाक्तीक डा लाप्चो आ डोंइती गेय पचा कली आन पालो योक्शा गेशो बाक्त।<sup>3</sup> मिनु पिपम आ गोठ रे चोशा चढेचा कली मार गेशो बाक्माक्त्त देंशा हना, नाक्दो डा चोशा चढेतीके, सुनी डा चोशा चढेतीके, नाइक्तीक नाक्त डा चोशा चढेतीके, औसी डा चोशा चढेतीके नु देंशो चाड नेल्ल कली चोशा चढेतीक गेशो बाक्माक्त्त। परमप्रभु यावे आ अरेशो लोव्र दोपा ब्रेक्शो बाक्मे, मोपा पवा बाक्त। गन्ती २८:-<sup>4</sup> मिनु चढेब नु लेवीपुकीम परमप्रभु यावे आ अरेशो लोव्र डा गेय पस डा पस बाक्मल, दे पिपम यरूसलेमम बाक्ब मुर आन कली मेको आन गेचा माल्शो भाग चढेब नु लेवी आन कली गेचा माल्नीम, दे हुकुम पवा बाक्त।<sup>5</sup> मिनु मुरपुकीम पिप आ हुकुम नेन्मे

चोटीन आन नेल्ल क्येडा डोंइती डा मीशो नु सिश्शो अन्न, नक अडगुर शांबु, तेल, खुदो नु आन रूम सिश्शो मार मार शुश चाक्शा गेमे बाक्त। मेकोपुकीम आन मारेइ मारेइ के १० भागम भाग का चाक्गमे बाक्त। प्रस्थान २३:१९; ब्यवस्था १४:२२-२३<sup>6</sup> मिनु इस्त्राएल नु यहूदा डा सहरपुकीम बाक्ब मुरपुकीम यो आन १० भाग डा भाग का बी ब्यफ नु क्यारश भेडा चाक्गमे बाक्त। परमप्रभु यावे, आन परमप्रभु कली गेशो थोव्रक रे १० भाग डा भाग का चाक्शा तेल्मे बाक्त। लेवी २७:३२<sup>7</sup> मेकोपुकीम बर्स डा महिना सांमी चाक्शा तेल्चा गोव्रमे बाक्त। मिनु ७ महिनाम चाक्ने थुम्मे बाक्त।<sup>8</sup> मिनु हिज्कीयाह नु मेको आ सरकार डा ठेयब मुर जाक्शा, मेको तेल्शो थोव्रक तशा, परमप्रभु यावे नु आ मुर इस्त्राएली आन कली “गे रिम्शो पाइब बाक्नीनी” देंमा बाक्त।<sup>9</sup> मिनु हिज्कीयाहमी मेको तेल्शो थोव्रक आन पर्वम चढेब नु लेवी आन कली हिल्लो हिव्सी पामी बाक्त।<sup>10</sup> मिनु सादोक आ खिं डा मुर, ठेयब चढेब अजारयाहम “मुरपुकीम परमप्रभु यावे आ खिं कली आन भाग चाक्गमे रे आंइ कली जचा गात्त। मिनु शुश मार मार हेंशो यो बाक्ब। मारदे हना परमप्रभु यावेम आ मुर आन कली शुश आसीक गेशो बाक्ब। मिनु एको इश्का मार मार हेंशो यो बाक्ब” देंमाक्त्त।

<sup>11</sup> मिनु नोले हिज्कीयाहमी “परमप्रभु यावे आ खिमी मार मार वोइक्तीक कोठापुकी सेलीन” दे हुकुम पवा बाक्त। मिनु मेको सेल्ले बाक्त।<sup>12</sup> मिनु मुर नेल्लेमी जोल मपथु, आन १० भाग डा भाग का नु परमप्रभु कली गेशो नेल्ल चाक्गमे बाक्त। मेको १० भाग डा भाग का ताक्शो कोव्रब ठेयब लेवी कोनन्याह बाक्माक्त्त। मिनु मेको आ लोक्ब शिमेइ चहिं मेको आ दी डा ठेयब मुर बाक्माक्त्त।<sup>13</sup> मिनु पिप हिज्कीयाह नु परमप्रभु आ खिं डा ठेयब मुर अजारयाहमी कोनन्याह नु आ लोक्ब शिमेइ आस कली वारच पाइब येहीएल, अजजीयाह, नाहाथ, आसाहेल, येरीमोथ, योजाबाद, एलीएल, इस्त्राएल, माहाथ नु बेनायाह आन कली योव्रशा वोइक्पदसे बाक्त।<sup>14</sup> मिनु इम्नाह आ तौ कोरे पूर्व डा लाप्चो खाल पाइब लेवी बाक्माक्त्त। मेकोमी मुर आन परमप्रभु कली ग्येरशा चढेतीक गेशो मारेइ मारेइ कोव्रब बाक्माक्त्त। मिनु चढेशो, चाक्शो मारेइ मारेइ परमप्रभु यावे कली नु सु सु कली योक्चा माल्बा, मेको नेल्ल कोव्रब बाक्माक्त्त।<sup>15</sup> मिनु कोरे कली चढेब आन सहरम वारच पाइब एदेन, मीन्यामीन, येशुआ, शेमायाह, अमारयाह नु शेकन्याह बाक्मा बाक्त। मेकोपुकीम पालो पालो पा गेय पाइब चढेब खाल्पा नु ठिटा नेल्ल आन कली खाल का डा पा थमा पा जोल मपथु, योक्तीक गेय पामे बाक्त।<sup>16</sup> मोपतीके सु सु आन भाग गेचा पुंडसीब बाक्मा, परमप्रभु यावे आ खिं डा गेय पाइब परमप्रभु यावे आ लोव्र खोदेंशो पालो पालो पा आन नें ब्रेक्तीक कागजम ब्रेक्शो बाक्मा बाक्त। बर्स सां लाक्शो वोंइश आल आन नें ब्रेक्शो बाक्माक्त्त।<sup>17</sup> मेको चढेब आन खिं खिं कोव्रशा, ब्रेक्सीशो बाक्मा बाक्त। लेवीपुकी २० बर्स लाक्शो, आन पचा डा गेय नु पालो कोव्रशा ब्रेक्शो बाक्मा बाक्त।<sup>18</sup> चढेब, आन आइक्च आल, आन मीश, आन तमी तौ नेल्ल आन नें ब्रेक्शो बाक्माक्त्त। मारदे हना मेकोपुकीम “परमप्रभु यावे आ गेय ला पाइनीकी” दे थुं पशो बाक्मा बाक्त।<sup>19</sup> मिनु हारून आ तौ डा चढेब वोंइश मुरपुकी सहर आन नेक्था डा योक्तीकेम बाक्शो, चढेब आन दातेमी सु सु वोंइश मुर आन नें ब्रेक्शो बाक्मा, मेको आन भाग गेचा पुंडसमा बाक्त। मिनु चढेब नु लेवी आन दातेमी सु सु आन नें ब्रेक्शो बाक्मा, मेको गेचा पुंडसमा बाक्त।<sup>20</sup> मिनु हिज्कीयाहम यहूदा नेल्लेमी मोदेंशो पवा बाक्त। मेकोमी परमप्रभु यावे, आ परमप्रभु आ डोंइती मार रिम्शो, मार ठीक नु थमा सुइक्चा पुंडसीशो बाक्मे, मेको पवा बाक्त।<sup>21</sup> मेकोमी परमप्रभु यावे आ खिं डा गेय पतीके, परमप्रभु यावे आ अरेशो लोव्र नु आ शेंशो तुइक्तीकेमी आ परमप्रभु कली आ थुं नेल्लेमी मला बाक्त। मिनु आ पशो नेल्लेमी रिम्शो दुम्माक्त्त। भजन संग्रह १:३

### सन्हेरीबम लडाइ पशो

२राजा १८:१३-१९,३७; यसेया ३६:-; यसेया ३७:-

32 मिनु हिज्कीयाहम मेको रिम्शो गेय नेल्ले पने थुमा नोले, अस्सुर डा पिप सन्हेरीब यहूदा ओव्रशा “यहूदा डा बोल्यो सहरपुकी आंम के सेल्लुड” दे मिम्शा, मेको सहरपुकी आ नेक्था ताम्बु कीडा बाक्त।<sup>2</sup> मिनु

हिज्कीयाहमी सन्हेरीब जाक्शा, यरूसलेम कली लडाइ तोचा चिक्शो तवा चोटीन <sup>3</sup> मेकोमी सहर डा लाडगा डा ब्वाक्कु बुक्तीके तेक्चा, दे सरकार डा ठेयब मुर नु कप्तानपुकी नु सल्ला पवा बाक्त। मिनु मेकोपुकीमी पिप कली वारच पामे बाक्त। <sup>4</sup> मेकोपुकीमी शुश मुर खुष्ठा, आन रागी रे ब्वाक्कु बुक्तीक नु खोल्सा नेल्ल तेक्गमे बाक्त। मिनु मेकोपुकीमी “अस्सुर डा पिपपुकी एक जाक्शा, शुश ब्वाक्कु तूचा मतामेक्ल” देंमा बाक्त। <sup>5</sup> मिनु हिज्कीयाहम शुश बोल पा सहर डा ब्रेशो गारो नेल्ल सेल्पदा बाक्त। मिनु आ तार लाइशो खिंपुकी सेल्पदा बाक्त। मिनु मेकोमी गारो डा लाडगा गे अर्को गारो सेल्पदा बाक्त। मिनु दाऊद आ सहर डा गारो तिक्चा कली खप तेल्पदा बाक्त। मिनु मेकोमी शुश या नु तेक्तीक यो सेल्पदा बाक्त।

२इतिहास २५:२३; <sup>6</sup> मेकोमी लडाइ पाइब आन कप्तान योवशा, मेको आन कली सहर डा ठेयब लाप्चो आ डोंइती डा दिंममी पुक्शा, मेको आन कली आन थुं बारपाइशा <sup>7</sup> “बोल्यो नु महिंब दुमीन। अस्सुर डा पिप नु मेको आ चाक्शो शुश मुर तशा, महिनीन। मारदे हना मेकोपुकी नु बाक्शो क्येडा गोपुकी नु बाक्शो का थम ठेयब बाक्ब। <sup>8</sup> मेको नु शुश मुर ला बाक्नीम। तन्न गोपुकी नु परमप्रभु यावे, इं परमप्रभु बाक्ब। मेकोमी इं कली वारच पा इं पा डा लडाइ पाइब” दे यहूदा डा पिप हिज्कीयाहमी मुर आन थुं बारपदा बाक्त। *येरमीया १७:५-६*

<sup>9</sup> मेको नोले अस्सुर डा पिप सन्हेरीबम आ लडाइ पाइब लाकीशम बाक्मानु, यहूदा डा पिप हिज्कीयाह नु यरूसलेम डा मुर नेल्ल आन कली लोव्र नेंपाइक्चा कली मुरपुकी सोइक्ता बाक्त। <sup>10</sup> मिनु मेकोपुकीमी “अस्सुर डा पिप सन्हेरीबम मार लोव्र पाइब देंशा हना, गे एर ओंथ रे पुशो यरूसलेम सहरम दोपा ब्रोंइने चाप्नीनी, दे सु कली थमा सुइक्नीनी? <sup>11</sup> पिप हिज्कीयाहमी ‘परमप्रभु यावे, इं परमप्रभु कली अस्सुर डा पिप आ गुइ रे प्रोंइब, दे जोल मपवा? तन्न मेकोमी इन बाक्तीकेमीन अन्काल नु ब्वाक्कु तूतू दाक्पाइशा, इन कली बेक्पाइक्चा कली मोदेशो लोव्र पशो बाक्ब। <sup>12</sup> मार, मेको हिज्कीयाहमी डांडा डा थान नु आ चढेतीक बुल बाल एशा खतम मपोक्पदा? मिनु यहूदा नु यरूसलेम डा मुर नेल्ल आन कली, चढेतीक काम पूजा पा नु मेकेर ला चढेचा’ मदेम डा? <sup>13</sup> गो नु आं किकी पिपीम अर्को रागी जात जात डा मुर आन कली मार पाइक्का, मेको गेपुकीम मतुइशो बाक्नीनी डा? मार, मेको रागी रागी डा मुर आन देवताम मेको रागी आन कली आं गुइ रे प्रोंइने चाप्मे डा? <sup>14</sup> आं किकी पिपीम खतम पोक्शो रागी रागी डा मुर आन देवता आन दाते डा तेको देवताम आं गुइ रे आ मुर आन कली प्रोंइने चबा डा? मिनु दोपा इन परमप्रभुमी इन कली आं गुइ रे प्रोंइने चाप्बा? <sup>15</sup> मोपतीके हिज्कीयाहम इन कली जोल पा दूली लां खोइक्पाइक्चा मगेन। मेको कली थमा मसुतीन। मिनु तेकोइ देवतापुकीम आन रागी नु राज्य डा मुर आन कली आं किकी पिपी नु आं गुइ रे प्रोंइने मचाप्शो बाक्तेक्म हना, इन परमप्रभुमी इन कली आं गुइ रे दोपा प्रोंइने चाप्बा डा? देंशो बाक्ब मतीन” देंमाक्ता।

<sup>16</sup> मिनु सन्हेरीब आ गेय पाइबपुकीमी परमप्रभु यावे नु मेको आ गेय पाइब हिज्कीयाह आ पर्बम चिनु मरिश्शो लोव्र तेम्शा, लोव्र पामे बाक्त। <sup>17</sup> पिप सन्हेरीबम परमप्रभु यावे, इस्राएली आन परमप्रभु कली यो तोक्शा लोव्र पा चिठी ब्रेक्शो बाक्माक्ता। मिनु मेको चिठीम मार ब्रेक्शो बाक्माक्ता देंशा हना “दोपा अर्को रागी रागी डा मुर आन देवतापुकीम आन मुर आन कली आं गुइ रे प्रोंइने मचाप्मे, मोपा हिज्कीयाह आ परमप्रभुमी यो आ मुर आन कली आं गुइ रे प्रोंइने मचाप्ब” दे ब्रेक्शो बाक्माक्ता। <sup>18</sup> मिनु मेकोपुकीम सहर आन के सेल्चा कली यरूसलेम डा गारो तार राब्ब मुर आन कली हिंच कोंइचा कली ठेयब सेंदा पा यहूदी आन लोव्रमी मेको चिठीम ब्रेक्शो लोव्र पा ग्रीमा बाक्त। <sup>19</sup> मेकोपुकीम मुर आन गुइम सेल्शो रागी डा देवता आन कली खोदेशो पा यरूसलेम डा परमप्रभु कली तोक्शा लोव्र पामे बाक्त।

सन्हेरीब कली मुने दोक्पाइशो

<sup>20</sup> मेना पिप हिज्कीयाह नु आमोज आ तौ परमप्रभु यावे आ लोव्र पाइब यसैयाम परमप्रभु कली ठेयब सेंदा पा पुन्से बाक्त। <sup>21</sup> मिनु परमप्रभु यावेम

आ स्वर्ग डा गेय पाइब का अस्सुर डा पिप आ बाक्तीकेम सोइशा, आ बोल्यो लडाइ पाइबपुकी, आ कप्तानपुकी नु आ ठेयब मुरपुकी नेल्ल साइक्पदा बाक्त। मिनु सन्हेरीब मुने दोक्शा आ रागी लेम्माक्ता। मिनु मेको आ देवता थान ओव्रमेनु, आ तौ का निक्शीमी तरवारम क्योरशा सदमे बाक्त। <sup>22</sup> मोपा परमप्रभु यावेम हिज्कीयाह नु यरूसलेमम बाक्ब मुर आन कली अस्सुर डा पिप सन्हेरीब नु मेको आन जोरी सत्रु नेल्ल आन गुइ रे प्रोना बाक्त। परमप्रभु यावेमी मेको रागी कली नाइक्चा गेवा बाक्त। <sup>23</sup> मिनु शुश मुरपुकीम यरूसलेम परमप्रभु यावे कली मार मार चाक्गमे बाक्त। मिनु यहूदा डा पिप हिज्कीयाह कली शुश शोंप चाक्गमे बाक्त। मोपा रागी रागी डा मुर नेल्लेमी मेको कली मान पामे बाक्त।

हिज्कीयाह रोइ पशो

२राजा २०:-; यसैया ३८:-; यसैया ३९:-

<sup>24</sup> मिनु नोले हिज्कीयाह शुश रोइ पा बेक्चा चिक्ता बाक्त। मिनु मेकोमी परमप्रभु यावे कली पुना बाक्त। मिनु परमप्रभु यावेमी मेको कली लोव्र लेशशा, चिन्ड का गेवा बाक्त। <sup>25</sup> तन्न हिज्कीयाहमी परमप्रभु यावेमी मेको कली रिश्शो पशोमी “गे रिश्शो पाइब बाक्नीनी” मदेथु ठेयब लेशशो दुम्माक्ता। मोपतीके परमप्रभु यहूदा नु यरूसलेम आ पर्बम गाइक्ता बाक्त। <sup>26</sup> मिनु हिज्कीयाह नु यरूसलेम डा मुर नेल्लेम ब्रेम्शो सेल्सीमे बाक्त। मोपतीके परमप्रभु यावे हिज्कीयाह आ पालाम मेकोपुकी नु मगाइक्ता बाक्त।

हिज्कीयाह आ नोले डा नाक्ती

<sup>27</sup> हिज्कीयाह शुश शोंप पाइशो नु मान ताइब मुर दुम्शो बाक्माक्ता। मेकोमी आ सुन चांदी, हीरापुकी, मस्लापुकी तेक्तीकपुकी नु अरु मार मार शुश क्येट लाइब वोइक्तीक खिंपुकी सेला बाक्त। <sup>28</sup> शुश अन्न, नक अडगुर शांबु नु तेल वोइक्तीक खिंपुकी सेला बाक्त। मिनु शुश बी ब्यफ नु क्यारश भेडा आन कली ठेयब गोठपुकी सेला बाक्त। <sup>29</sup> मेकोमी आंम कली सहरपुकी सेला बाक्त। मेको के बी ब्यफ नु क्यारश भेडा शुश बाक्मा बाक्त। मारदे हना परमप्रभुम मेको कली थमा पा शुश शोंप गेशो बाक्माक्ता। <sup>30</sup> मेको हिज्कीयाहमी गिहोन आ आइक्था डा बुक्शो ब्वाक्कु तेक्शा उइ दाऊद आ सहर आ पच्छिम गे शाइक्पाइशो बाक्माक्ता। मेको आ पशो गेय नेल्ले रिश्शो दुम्शा, सोशो बोशो दुम्माक्ता। <sup>31</sup> मिनु बेबीलोन डा सरकार डा ठेयब मुर आन सोइशो मुर मेको रागीम तांइसीशो छक लाक्चा चिन्ड आ पर्बम हिल्लो पथ जाक्मा बाक्त। तन्न परमप्रभुम हिज्कीयाह कली नाक्शा कोव्रचा कली नु मेको आ थुंम बाक्शो मार बाक्बा, दे तुइक्चा कली वारच मपवा बाक्त।

हिज्कीयाह बेक्शो

<sup>32</sup> हिज्कीयाह आ नोले डा गेय नु आ रिश्शो पशो आमोज आ तौ परमप्रभु यावे आ लोव्र ताइब यसैया आ यहूदा डा पिप आन किताबम ब्रेक्शो बाक्ब। <sup>33</sup> मिनु हिज्कीयाह बेक्माक्ता। मिनु मुरपुकीम मेको कली दाऊद आ चच युइ आन कली थिम्तीक देम्सीलो मेर थिम्मे बाक्त। मिनु मेको बेक्मेनु, यहूदा नु यरूसलेम डा मुर नेल्लेमी मान पामे बाक्त। मिनु मेको आ नोले आ तौ मनस्से पिप दुम्माक्ता। *२इतिहास १६:१४*

यहूदा डा पिप मनस्से

२राजा २१:१-१८

**33** मनस्से पिप दुम्मेनु, १२ बर्स दुम्शो बाक्माक्ता। मेकोमी यरूसलेमम ५५ बर्स सासन पवा बाक्त। <sup>2</sup> मेको परमप्रभु यावेम इस्राएली आन डोंइती रे खेरशो रागी रागी डा मुर आन ग्रांग्रा दिशो लांम गाक्माक्ता। मिनु परमप्रभु यावे आ डोंइती मार मरिश्शो बाक्मे, मेको पवा बाक्त। *ब्यक्था १८:९* <sup>3</sup> मेकोमी आ आफ हिज्कीयाहम खतम पोक्शो डांडा डा थान लेंशा सेला बाक्त। मिनु मेकोमी बाल देवता आन कली चढेतीक सेला बाक्त। मेकोमी मूर्ति पाइशो थाम यो सेला बाक्त। मेकोमी सरीड डा

सोरुल आन कली पूजा पा बाप्पा, सेउ पवा बाक्त। २राजा १८:४<sup>4</sup> मेकोमी परमप्रभु यावे आ खिंम चढेतीकपुकी सेला बाक्त। मेको खिं आ पर्बम परमप्रभु यावेम “यरूसलेमम आं नें गेना हना यो लीब” देशो बाक्माक्त। *ब्यवस्था* १२:५, ११; १राजा ९:३<sup>5</sup> मेकोमी सरीड डा सोरुल आन कली परमप्रभु यावे आ खिं डा लाडगा निम्फाम चढेतीक सेला बाक्त।<sup>6</sup> मेकोमी आ तौ कली बेन-हिन्मो आ बेंसीम चोशा चढेवा बाक्त। मन्तर तन्तर, टुना मुना पा नु लिंक्वु कोवडा बाक्त। मेकोमी टुना मुना पा नु बेक्शो मुर नु लोव पवा बाक्त। मिनु जादू कली गेय पपदा बाक्त। मोपा परमप्रभु यावे आ डोंइती थम मरिश्शो पवा बाक्त। मिनु मेको कली गाडक्पदा बाक्त।

२इतिहास २८:३; लेवी २०:६<sup>7</sup> मेकोमी मुपाइश्शो मूर्ति परमप्रभु आ खिंम वोडक्पदा बाक्त। मेको खिं आ पर्बम परमप्रभुम दाऊद नु आ तौ सोलोमन आस कली “गो इस्राएल डा थर नेल्ल आन दाते रे यरूसलेम कली योवता। मिनु यरूसलेमम बाक्शो एको खिंम गेना हना यो आं नें वोडक्नुड।<sup>8</sup> मेकोपुकीम मोसामी गेशो आं शेंशो अरेशो लोव नेल्ल पशा, फुल्लुम मुशा ब्रेक्शो लोव नु निसाफ पतीक लोव होस पा रिश्शो पा पांस्तेक्म हना, गो आन किकी पिपी आन कली गेशो इस्राएल रागी रे इस्राएली आन कली मगुंडुडमी” देशो बाक्माक्त।<sup>9</sup> मनस्सेम यहूदा नु यरूसलेम डा मुर आन कली थम दूली लां खोडक्पाइश्शो बाक्माक्त। परमप्रभु यावेमी इस्राएली आन डोंइती खतम पोक्शो रागी रागी डा मुर आन क्येडा यो शुश मरिश्शो पपाइश्शो बाक्माक्त।

<sup>10</sup> परमप्रभु यावेम मनस्से नु आ मुर आन कली लोव पवा बाक्त। तन्न मेकोपुकी मबिस्समा बाक्त।<sup>11</sup> मोपतीके परमप्रभु यावेम मेकोपुकी नु लडाइ पपाइक्वा कली अस्सुर डा पिप आ लडाइ पाइब आन कप्तान आन कली चाक्मी बाक्त। मिनु मेकोपुकीम मनस्से कली ग्याइश्शा मेको आ शोवम बोल्सी ब्वेक्तमे बाक्त। मिनु मेको कली कांसा के साडलोम पाइश्शा बेबीलोन लदमे बाक्त।<sup>12</sup> मिनु मेको मोपा श्येत जवानु, परमप्रभु यावे, आ परमप्रभु आ शिशी मला बाक्त। मिनु आ किकी पिपी आन परमप्रभु आ डोंइती आ थुं ब्रेप्पदा बाक्त।<sup>13</sup> मिनु मेकोमी परमप्रभु कली पुना बाक्त। मिनु परमप्रभुम मेको आ पुंइशो नेंशा, लेंशा यरूसलेमम चाक्मा बाक्त। मिनु लेंशा मेकेर डा पिप सेला बाक्त। मिनु मोपा मनस्सेम परमप्रभु यावे, थमा परमप्रभु बाक्ब, दे तुडक्ता बाक्त। १राजा १८:३९

<sup>14</sup> मिनु मेको लेशशा नोले दाऊद आ सहर डा लाडगाम अर्को गारो गिहोन आ पच्छिम गे सेला बाक्त। मेको ओफेल हिरशा, डांड लाच्यो सम्म सेला बाक्त। मेकोमी मेको गारो शुश दुइश्शो सेला बाक्त। मिनु मेकोमी यहूदा डा बोल्यो सहर नेल्लेमी कप्तानपुकी वोडक्पदा बाक्त। २इतिहास २७:३<sup>15</sup> मेकोमी अर्को रागी डा देवतापुकी नु मुशा सेल्शो मूर्ति परमप्रभु यावे आ खिं रे गुंडदा बाक्त। मिनु आ परमप्रभु यावे आ खिं बाक्शो डांडाम नु यरूसलेमम सेल्शो चढेतीक नेल्ल ताडक्ता बाक्त। मिनु मेको नेल्ल आन कली सहर रे गुंडशा ताडक्ता बाक्त।<sup>16</sup> मिनु नोले मेकोमी परमप्रभु यावे कली चढेतीके लेंशा सेल्शा, मेकेर दुशा बाक्वा आ पर्बम चढेतीक नु “गे रिश्शो पाइब बाक्नीनी” दे चढेतीक चढेवा बाक्त। मिनु यहूदा डा मुर आन कली परमप्रभु यावे, इस्राएली आन परमप्रभु कली ला गेय पचा, दे हुकुम पवा बाक्त।<sup>17</sup> मेना सम्म मुरपुकीम डांडा डा थानम चढेमे बाक्त। तन्न परमप्रभु यावे, आन परमप्रभु कली चढेमे बाक्त।

<sup>18</sup> मिनु मनस्सेम अरु मार मार पवा, आ परमप्रभु कली पशो पुंइतीक लोव, नु परमप्रभु यावे, इस्राएली आन परमप्रभु आ नेंमी आ लोव पाइब आन लोव नेल्ल इस्राएल डा पिप आन इतिहासम ब्रेक्शो बाक्ब।<sup>19</sup> मेको आ पुंइतीक लोव नु परमप्रभुम आ पुंइशो दोपा नेना, आ ब्रेक्शो दुम्वा क्येडा डोंइती पशो पाप नेल्ल नु आ परमप्रभु कली थमा मसुडक्थु, डांडा डा थान ते ते सेला, मूर्ति पाइश्शो थाम नु मूर्ति वोइश्शो नेल्ल परमप्रभु यावे आ लोव पाइब आन इतिहासम ब्रेक्शो बाक्ब।<sup>20</sup> मिनु मनस्से बेक्माक्त। मिनु मुरपुकीम आ दरवार डा बाक्तीकेम थिम्मे बाक्त। मेको आ नोले आ तौ आमोन पिप दुम्माक्त।

यहूदा डा पिप आमोन

२राजा २१:१९-२६

<sup>21</sup> आमोन पिप दुम्मेनु, २२ बर्स दुम्शो बाक्माक्त। मेकोमी बर्स निक्शी यरूसलेमम सासन पवा बाक्त।<sup>22</sup> मेकोमी आ आफ मनस्से खोदेशो पा परमप्रभु यावे आ डोंइती मार मरिश्शो बाक्मे, मेको पवा बाक्त। आमोनमी आ आफ मनस्सेम सेल्शो मूर्ति नेल्ले आन कली चढेशा, पूजा पवा बाक्त।<sup>23</sup> तन्न मेकोमी आ आफ मनस्से खोदेशो पा परमप्रभु यावे आ डोंइती आंम कली ब्रेक्शो मसेला बाक्त। आमोन आ पशो मरिश्शो शुश बारना बारन लमाक्त।<sup>24</sup> मिनु आमोन आ दरवारम गेय पाइबपुकीम लोव गारपाइश्शा, मेको कली सदमे बाक्त।<sup>25</sup> तन्न मेको रागी डा मुरपुकीम पिप आमोन कली साइक्ब आन कली यो सदमे बाक्त। मिनु आ तौ योसीयाह कली मेको आ आफ आ पा डा पिप सेल्मे बाक्त।

यहूदा डा पिप योसीयाह

२राजा २२:१-२; २राजा २३:४-१४

**34** योसीयाह पिप दुम्मेनु, ८ बर्स दुम्शो बाक्माक्त। मेकोमी यरूसलेमम ३१ बर्स सासन पवा बाक्त।<sup>2</sup> मेकोमी परमप्रभु यावे आ डोंइती मार ठीक बाक्मे, मेको पवा बाक्त। मेको ग्युरा पेरा मपथु, आ किकी पिपी दाऊद आ लांम गाक्माक्त। २इतिहास २९:२

मूर्ति पूजा थुम्पाइश्शो

<sup>3</sup> मेकोमी सासन पशो ८ बर्स दुम्मेनु, ठिटा बाक्ना बाक्ना आ किकी पिपी दाऊद आ परमप्रभु कली माल्चा गोवा बाक्त। मिनु सासन पशो १२ बर्समी यहूदा नु यरूसलेम डांडा डा थानपुकी, मूर्ति पाइश्शो थामपुकी नु मुशा नु चेम्शा सेल्शो मूर्तिपुकी ताडक्वा गोवा बाक्त। *लेवी* २६:३०<sup>4</sup> मिनु पिप आ डोंइती बाल देवता आन चढेतीकपुकी प्रेप्पदा बाक्त। मिनु मेको इच्का इर बाक्शो धूप चोतीकपुकी नु चढेतीक प्रोल्शा खतम पोक्मा बाक्त। मिनु मेकोमी मूर्ति पाइश्शो थाम, चेम्शा सेल्शो मूर्तिपुकी फस पोक्मी बाक्त। मिनु मेको कली चढेब आन तुरस तारी फ्रवा बाक्त।<sup>5</sup> मिनु मेकोमी चढेब आन रुश यो आन चढेतीकेम चोवा बाक्त। मोपा मेकोमी यहूदा नु यरूसलेम कली ग्रांग्रा मदिशो सेला बाक्त। १राजा १३:२<sup>6</sup> मेकोमी मनस्से, एफ्राइम, सिमियोन नु नाप्ताली आन सहर सम्म नु मेको आन एर ओथ ब्रेक्शो खिंम बाक्शो २इतिहास ३१:१<sup>7</sup> अशेराह आ चढेतीकपुकी प्रेशशा नु मूर्ति पाइश्शो थामपुकी नु मूर्ति नेल्ल फस पोक्मा बाक्त। मिनु मेकोमी इस्राएल रागी नेल्ल डा धूप चोतीक खतम पोक्मा बाक्त। मिनु नोले मेको यरूसलेम लेम्माक्त।

परमप्रभु आ खिं ठीक सेल्शो

२राजा २२:३-२०; २३:१-३

<sup>8</sup> मेकोमी आ सासन पशो १८ बर्सम रागी नु परमप्रभु यावे आ खिं ग्रांग्रा मदिशो सेल्मे थुमा नोले, असाल्याह आ तौ शाफान, सहर डा हुकुम पाइब मासेयाह नु राज्य डा ब्रेक्ब यो-आहाज आ तौ योआह आन कली परमप्रभु यावे, आ परमप्रभु आ खिं बिग्रेशो सेल्च सोडक्तीमी बाक्त।<sup>9</sup> मिनु मेकोपुकी ठेयब चढेब हिल्कीयाह आ बाक्तीक जाक्शा, परमप्रभु आ खिंम चाक्शो क्येट मेको कली गेमे बाक्त। मेको क्येट लाच्यो खाल पाइब लेवीपुकीम मनस्से, एफ्राइम नु इस्राएल डा लीशो मुर नेल्ल रे, यहूदा, बेन्यामीन नु यरूसलेमम बाक्ब मुर नेल्ल रे खुप्शो बाक्मा बाक्त।<sup>10</sup> मिनु मेकोपुकीमी मेको क्येट परमप्रभु यावे आ खिंम गेय पाइब आन कली कोवब आन कली गेमे बाक्त। मिनु मेको कोवबपुकीमी गेय पाइब आन कली गेमे बाक्त। मेको क्येट बिग्रेशो सेल्तीक गेय नु मेको कली डोंइती डा खोदेशो सेल्तीक गेय पचा कली माल्मा बाक्त।<sup>11</sup> मेकोपुकीम मेको यहूदा डा पिपपुकीम प्रॉइशो खिं लेंशा रिश्शो सेल्चा कली माल्मा बाक्त। मेको क्येट शी सेल्ब आन कली शी, दालीन, योव्रलो ग्याप्चा कली गेमे बाक्त। मिनु गारो योव्रब आन कली खोइश्शो फुल्लु ग्याप्चा कली गेमे बाक्त।<sup>12</sup> मिनु मुरपुकीम रिश्शो गेय पामे बाक्त। मिनु लेवीपुकी मेरारी आ तौ याहाथ नु ओबदिया, कोहाथ आ तौ

जकरिया नु मेशुल्लाम गेय पाइब आन कली कोव्रब वोइश्शो बाक्मा बाक्त। अरु लेवीपुकी ताप्तीक ताप्स शुश जोक्ब बाक्मा बाक्त।<sup>13</sup> मेकोपुकी कुरब मुर कोव्रचा कली नु गेय चलेचा कली वोइश्शो बाक्मा बाक्त। का निक्शी लेवीपुकी ब्रेक्ब, का निक्शी मार माल्बा, मार बाक्बा, तुइक्चा कली नु का निक्शी लाप्चो खाल पाइब बाक्मा बाक्त।

अरेशो लोव्र डा किताब थिश्शो

<sup>14</sup> मेकोपुकी परमप्रभु यावे आ खिंम चाक्शो क्येट गुंडमेनु, चढेब हिल्कीयाहम मोसा रे पा गेशो परमप्रभु यावे आ अरेशो लोव्र ब्रेक्शो किताब थिदा बाक्त।<sup>15</sup> मिनु हिल्कीयाहम ब्रेक्ब शाफान कली “गो परमप्रभु यावे आ खिंम आ अरेशो लोव्र ब्रेक्शो किताब थिश्शो बाक्नुड” दे मदा बाक्त। मिनु हिल्कीयाहम मेको किताब शाफान कली गेवा बाक्त।<sup>16</sup> मिनु शाफानम मेको किताब पिप आ बाक्तीक चाक्शा “इन गेशो गेय नेल्ल इन गेय पाइबपुकीम पशो बाक्नीम।<sup>17</sup> मेकोपुकीम परमप्रभु यावे आ खिंम बाक्शो क्येट मेकेर डा कोव्रब मुर नु गेय पाइब आन कली गेशो बाक्नीम” देमाक्त।<sup>18</sup> मिनु ब्रेक्ब शाफानम पिप कली “चढेब हिल्कीयाहम आं कली किताब का गेशो बाक्ब” दे शेंदा बाक्त। मिनु शाफानम मेको किताब पिप आ डोंइती पढेशा नेंपदा बाक्त।

<sup>19</sup> मिनु पिपम मेको अरेशो लोव्र ब्रेक्शो किताबम ब्रेक्शो लोव्र नेना नोले थुं खाइश्शा, आ वा खाक्गा बाक्त।<sup>20</sup> मिनु पिपमी हिल्कीयाह, शाफान आ तौ अहीकाम, मीकाह आ तौ अब्दोन, ब्रेक्ब शाफान नु पिप कली गेय पाइब आसायाह आन कली,<sup>21</sup> “गो नु इस्राएल नु यहूदाम लीशो मुर आन पर्वम परमप्रभु यावे कली हिल्लो पने। मेको थिश्शो किताबम ब्रेक्शो लोव्र गो नु आंइ किकी पिपीम मटितीके परमप्रभु यावे गोपुकी नु शुश गाइश्शो बाक्माक्त। मेको ब्रेक्शो लोव्र गो मपक” देमाक्त।

<sup>22</sup> मोपतीके हिल्कीयाह नु पिपम सोइश्शो मुरपुकी परमप्रभु यावे आ लोव्र पाइब हुल्दा आ बाक्तीकेम हिल्लो पथ लमा बाक्त। मेको पिप आ दरवार डा वासी कोव्रब हासा आ चच तोखाथ आ तौ शाल्लुम आ मीशे बाक्माक्त। मेको यरूसलेम डा नक सहरम बाक्बाक्माक्त। मिनु मेको कली नेल्ल लोव्र देमा बाक्त।<sup>23</sup> मिनु हुल्दाम मेको आन कली “परमप्रभु यावे, इस्राएली आन परमप्रभुम मार दैत देंशा हना, गे आं बाक्तीकेम सोइक्ब मुर कली<sup>24</sup> परमप्रभु यावेम “यहूदा डा पिप आ डोंइती पढेशो किताबम ब्रेक्शो सराप नेल्ल खाप्चा कली, गो एको रागी नु एकेर बाक्ब मुर नेल्ल आन कली खतम पोक्नुडमी। ब्यक्स्था २८:१५-६८<sup>25</sup> मारदे हना मेकोपुकीम आं कली प्रॉइशा, अर्को देवी देवता आन कली चढेशो बाक्नीम। मिनु मेकोपुकीम आंम आन गुडम सेल्शो मूर्तिम आं कली गाइक्पाइश्शो बाक्नीम। मोपतीके गो मेको रागी तशा गाइक्ताक्ड। मिनु आं गाइश्शो मबेक्ब” दैत।<sup>26</sup> तन्न परमप्रभु यावे कली हिल्लो पथ इन कली सोइक्ब यहूदा डा पिप कली परमप्रभु यावे, इस्राएली आन परमप्रभुम मार दैत देंशा हना<sup>27</sup> “गे परमप्रभु यावेमी मेको रागी नु आ मुर आ पर्वम ब्रेक्शो लोव्र नेंशा, इ थुंम परमप्रभु आ डोंइती ब्रेक्शो सेल्शा, इ वा खाक्शा, डाक्शा, इ पशो लोव्र नेंता। २इतिहास ३३:१२-१३<sup>28</sup> मोपतीके गे एको खतम दुस्तीके मताइनेवे। गे थुं नाइश्शा बेक्नेवे। मिनु इ किकी पिपी आन कली थिम्तीकेम थिम्चा पुंइसीनेवे” दे मतीने” देमाक्त। मिनु सोइश्शोपुकीमी हुल्दा आ देंशो पिप कली मदमे बाक्त।

<sup>29</sup> मेको नोले पिपम यहूदा नु यरूसलेम डा खाल्पा नेल्ल आन कली युम्चा, दे ब्रेथ सोइक्ता बाक्त।<sup>30</sup> मिनु पिप परमप्रभु यावे आ खिं लमाक्त। मिनु यहूदा डा मुर नेल्ल, यरूसलेमम बाक्ब मुरपुकी, चढेब नु लेवीपुकी, आइक्च नु ठेयब मुर नेल्लेम मेको आ नोले खोदमे बाक्त। मिनु पिपम परमप्रभु यावे आ खिंम थिश्शो आ कबल डा किताब पढेशा नेंपाइक्मी बाक्त।<sup>31</sup> मिनु पिप आ बाक्तीकेम राप्शा, परमप्रभु यावे नु कबल का पवा बाक्त। मार कबल पवा बाक्त देंशा हना, परमप्रभु यावे आ नोले खोइक्चा, मेको आ शेंतीके, आ देंशो नु आ फुल्लुम मुशा ब्रेक्शो लोव्र थुं नेल्लेमी पचा नु मेको किताबम ब्रेक्शो कबल डा लोव्र नेल्ल पचा कली कबल पवा बाक्त। २इतिहास १५:१२<sup>32</sup> मेको नोले यरूसलेम नु बेन्यामीन रे जाक्शो मुर नेल्ल

आन कली मेको ब्रेक्शो लोव्र खाप्जीकी, दे कसम जपाइक्मी बाक्त। मिनु यरूसलेमम बाक्ब मुरपुकीम आन किकी पिपी आन परमप्रभु आ कबल खाप्मे बाक्त।<sup>33</sup> मिनु योसीयाहम इस्राएली आन रागी नेल्ल रे ग्रांरा दिशो मूर्ति नेल्ल गुंइशा ताइक्ता बाक्त। मिनु इस्राएलम बाक्ब मुर नेल्ल आन कली परमप्रभु यावे, आंम परमप्रभु आ नोले ठेयब सेल्पदा बाक्त। मेको पिप ब्रॉइम सम्म मुरपुकीम परमप्रभु यावे, आन किकी पिपी आन परमप्रभु कली खोदमे बाक्त।

योसीयाहम पास्सा चाड मानेशो

२राजा २३:२१-२३

**35** योसीयाहमी यरूसलेममी परमप्रभु यावे कली पास्सा चाड मानेवा बाक्त। मिनु मुरपुकीमी डोंइती डा महिना डा १४ नाक्ती पास्सा चाड डा पाठा क्योरमे बाक्त। प्रस्थान १२:६<sup>2</sup> मिनु पिपमी चढेब आन कली आन आन गेय गेमी बाक्त। मिनु मेकोमी परमप्रभु यावे आ खिंम गेय पचा, दे आन थुं बारपाइक्मी बाक्त।<sup>3</sup> मिनु लेवीपुकी इस्राएली आन कली शेंब बाक्मा बाक्त। मेकोपुकी परमप्रभु यावे आ गेय ला पाइब बाक्मा बाक्त। मिनु पिपमी मेको आन कली “इस्राएल डा पिप दाऊद आ तौ सोलोमनम सेल्शो परमप्रभु यावे आ कबल पशो सन्दोस परमप्रभु यावे आ खिंम वोतीन। मुल रे गेपुकीमी मेको कली इन बालाम कुरचा ममाल्नीनी। मुल परमप्रभु यावे, इन परमप्रभु नु आ मुर इस्राएली आन गेय पने। २इतिहास ५:४-५; १इतिहास २३:२६, २८; प्रस्थान २५:१३-१५<sup>4</sup> इस्राएल डा पिप दाऊद नु आ तौ सोलोमनम ब्रेक्शा गेशो लोव्र टिने। १इतिहास २३:-<sup>5</sup> गे परमप्रभु यावे आ खिंम इन पालोम इन किकी पिपी आन खिं खिं डा मुर गारशा गेय पने। मिनु गेना हना यो खिं खिंमी परमप्रभु यावे कली गेय पाइब लेवी चढेब आन कली वारच पचा कली बाक्चा माल्नीनी।<sup>6</sup> मिनु गे परमप्रभु यावे आ डोंइती ठीक सेल्सीन। पास्सा डा पाठा क्योरीन। दोशो मुरुम मेको पाठा ब्नेन चाप्नीम, मोशो ला ब्रेत्तीन। मोसा रे पा परमप्रभु यावे आ देंशो लोव्र टिशा, गेय पने” देमाक्त।

<sup>7</sup> मिनु योसीयाहम मेकेर बुक्ब मुर नेल्ल आन कली पास्सा चाड मानेचा, दे ३० हजार क्यारश भेडा पाठा नु हजार सां ब्यफ गेमी बाक्त। पिपमी मेको नेल्ल आंम आ गोठ रे पा गेवा बाक्त।<sup>8</sup> मिनु मेको आ सरकार डा गेय पाइबपुकीमी थुं रे ग्येरशा मुर आन कली चढेब नु लेवी आन कली मार मार गेमे बाक्त। परमप्रभु यावे आ खिं डा ठेयब गेय पाइब हिल्कीयाह, जकरियामी नु येहीएलम, चढेब आन कली पास्सा चाड कली हजार निक्शी ६ सहे क्यारश भेडा पाठा नु सहे सां ब्यफ गेमे बाक्त।<sup>9</sup> मिनु लेवी आन ठेयब मुर कोनन्याह नु मेको आ लोक्बपुकी, शेमायाह नु नेथनेल, हशाब्याह, यिएल नु योजाबादमी ५ हजार क्यारश भेडा पाठा नु ५ सहे ब्यफ गेमे बाक्त।

<sup>10</sup> मिनु चढेतीक गेय ठीक सेल्ने थुम्मे नोले चढेब आन बाक्तीकेम बाक्मा बाक्त। मिनु लेवी आन आन हुल पिपम देंशो खोदेंशो पा राम्मा बाक्त।<sup>11</sup> मिनु मेकोपुकीम पास्सा चाड डा पाठा क्योरमे बाक्त। मिनु लेवीपुकीम गेशो हुश चढेबपुकीम ताक्शा, चढेतीकेम बुइक्तमे बाक्त। मिनु लेवीपुकीम चहिं मेको आ कुशुल उक्ममे बाक्त।<sup>12</sup> मिनु मेकोपुकीम मोसा आ किताबम ब्रेक्शो खोदेंशो पा मुर आन खिं खिं डा हुल आन कली योक्चा, दे परमप्रभु यावे कली चोशा चढेतीक श्ये तिल्शा वोदमे बाक्त। मिनु ब्यफ आन कली यो मो देंशो पामे बाक्त। नोले चढेबपुकीमी मेको चढेचा माल्मा बाक्त।<sup>13</sup> मिनु पतीके लोव्रम ब्रेक्शो खोदेंशो पा पास्सा चाड डा श्ये मीम चोव्रमे बाक्त। मिनु परमप्रभु यावे कली गेशो श्ये खरकुंडा, कराइ नु तस्लाम लोप्मे बाक्त। मिनु मेको मुर नेल्ले आन कली रीब पा योक्शा गेमे बाक्त। प्रस्थान १२:३-१०<sup>14</sup> मेको नोले आंम कली नु चढेब आन कली जचा थोव्रक ठीक पामे बाक्त। हारून आ खिं डा चढेबपुकी नाक्दो सम्मन चोशा चढेतीक नु बॉसो चढेतीक गेय पचा माल्मा बाक्त।<sup>15</sup> दाऊद आ देंशो खोदेंशो पा आसाफ आ चच युइ कुम्सो पाइबपुकी आसाफ, हेमान नु पिप कली परमप्रभु यावे आ लोव्र पाइब येदुथून आन बाक्तीकेम बाक्मा बाक्त। पिप दाऊदम देंशो खोदेंशो पा मेकोपुकीम पामे बाक्त। लाप्चो खाल पाइबपुकीमी आन गेय प्रॉइचा ममाल्मा बाक्त। मारदे हना आन लोक्ब लेवीपुकीम मेको आन कली जचा थोव्रक चाक्शा गेमे बाक्त। १इतिहास २५:-; १इतिहास २६:१-९

16 मोपा पिप योसीयाह आ देशो खोदेशो पा परमप्रभु यावे कली पचा माल्शो गेय ठीक पशो बाक्माक्त। पास्सा चाड मानेचा नु परमप्रभु यावे आ चढेतीकेम चोशा चढेतीक चढेशो बाक्मा बाक्त। 17 मेना मेकेर बाक्ब इस्राएली नेल्लेमी पास्सा चाड मानेमे बाक्त। मिनु ७ नाक्त सम्म बोरब ओख्ती मसुपुशो शोब्ले डा चाड मानेमे बाक्त। 18 परमप्रभु यावे आ लोत्र पाइब सामुएल आ पाला रे मेना सम्म मोदेशो पा पास्सा चाड इस्राएलम गेनायो ममानेशो बाक्मा बाक्त। पिप योसीयाहम खोदेशो पा तेकोइ पिपम मोदेशो ठेयब पास्सा चाड ममानेशो बाक्मा बाक्त। चढेबपुकी, लेवीपुकी नु यहूदा नु यरूसलेमम बाक्ब मुरपुकी नु मेकेर जाक्शो इस्राएल डा मुरपुकीम मानेमे बाक्त। २इतिहास ३०:२६ 19 योसीयाहम सासन पशो १८ बर्स दुम्मेनु, मेको पास्सा चाड मानेशो बाक्मा बाक्त।

योसीयाह बेक्शो  
२राजा २३:२८-३०

20 मिनु योसीयाहम परमप्रभु यावे आ खिं डा गेय नेल्ल गारपदा नोले इजीप्त रागी डा पिप नेको, युफ्रेटीस खोला आ शुंइच डा कारकेमीश सहर कली लडाइ तोचा कली गूमाक्त। मिनु योसीयाह मेकोपुकी नु लडाइ पथ लमाक्त। 21 तन्न नेकोमी “यहूदा डा पिप, गे नु गो इस दातेम मार जितीक खेतीक दुश्शो बाक्बा डा? मुलाक्ती गो गे नु लडाइ पचा कली जाक्शो मनड। तन्न गो आं लडाइ तोशो मुरपुकी नु ला गाइश्शो बाक्नुड। परमप्रभुम आं कली ‘रीब पा लशा लडाइ पावो’ देशो बाक्ब। मोपतीके परमप्रभु आ पर्बम मरिश्शो पा मबोक्कीन। मेको गो नु बाक्शो बाक्ब। बोक्तीनी हना, मेकोमी इन कली खतम पोक्ब” दे आ लोत्र पाइब आन कली सोइक्ता बाक्त। 22 मो हना यो योसीयाहम मेको आ देशो लोत्र मनेना बाक्त। तन्न मेको नेको नु लडाइ पचा कली अर्को वा फेक्से बाक्त। मेकोमी नेको आ देशो परमप्रभु आ लोत्र मनेना बाक्त। मिनु मेको मेगीददो डा दिंमम मेको नु लडाइ पचा कली रीब पा लमाक्त। 23 मिनु लिब्रा आप्बपुकीम पिप योसीयाह कली आप्मे बाक्त। मिनु पिपम आ गेय पाइब मुर कली “आं कली लडाइ पतीक रे गुंइदो। मारदे हना गो ठेयब गार दुश्शो बाक्नुड” दे मदा बाक्त। 24 मोपतीके आ गेय पाइबपुकीम मेको कली आ बग्गी रे गुंइशा, अर्को बग्गीम कुर पा यरूसलेम सहरम चाक्गामे बाक्त। मिनु मेको मेकेर बेक्माक्त। मिनु मुरपुकीमी मेको कली आ किकी पिपी आन कली थिम्तीकेम थिम्मे बाक्त। मिनु यहूदा नु यरूसलेम डा मुरपुकीम योसीयाह आ पर्बम रोंका पामे बाक्त। 25 मिनु येरमीयाम यो योसीयाह आ पर्बम रोंका पशो कुम्सो सेला बाक्त। मिनु कुम्सो पाइब मीश मुर वोंइश मुर नेल्लेमी मुल सम्म मेको रोंका पतीक कुम्सो पा योसीयाह कली मिम्नीम। मिनु मेको रोंका पतीक कुम्सो इस्राएली आन पतीके दुश्शो बाक्ब। मेको कुम्सो बिलाप किताबपुकी बाक्नीम। 26 मिनु योसीयाह आ पतीके, परमप्रभु यावे आ अरेशो टिशो, 27 मेको आ पशो डॉइती रे नोले सम्म इस्राएल नु यहूदा डा पिपी आन ब्रेक्शो बाक्ब।

यहूदा डा पिप येहो-अहाज  
२राजा २३:३०-२४:१७

36 मिनु मेको रागी डा मुरपुकीम योसीयाह आ तौ येहो-अहाज कली चाक्शा, यरूसलेमम मेको आ आफ आ पा डा पिप सेल्मे बाक्त। 2 येहो-अहाज पिप दुम्मेनु २३ बर्स दुश्शो बाक्माक्त। मेकोमी यरूसलेमम महिना सां सासन पवा बाक्त। 3 मिनु इजीप्त डा पिपम मेको कली पिप रे गुंइदा बाक्त। मिनु यरूसलेम कली सहे का टलेन्ट चांदी नु टलेन्ट का सुन तिरो थाप्पदा बाक्त। टलेन्ट का ३४ किलो बाक्ब। 4 मिनु इजीप्त डा पिपम येहो-अहाज आ लोक्ब एल्याकीम कली यहूदा नु यरूसलेम डा पिप सेला बाक्त। मिनु मेकोमी मेको आ नें फाइश्शा येहो-याकीम वोदा बाक्त। मिनु नेकोम आ लोक्ब येहो-अहाज कली इजीप्त रागी लदा बाक्त। येरमीया २२:४-१२

यहूदा डा पिप येहो-याकीम

5 मिनु येहो-याकीम पिप दुम्मेनु, २५ बर्स दुश्शो बाक्माक्त। मेकोमी यरूसलेमम ११ बर्स सासन पवा बाक्त। 6 मेकोमी आ परमप्रभु यावे आ डॉइती मार मरिश्शो बाक्मे, मेको पवा बाक्त। मिनु बेबीलोन डा पिप नेबुकदनेसरम मेको आ रागी कली लडाइ तोशा, मेको कली कांसा के साडलोम फ्रेशा बेबीलोन लदा बाक्त। येरमीया २२:१८ 7 नेबुकदनेसरम परमप्रभु यावे आ खिं डा ग्योबपुकी का निक्शी लाइश्शा, बेबीलोनम आ दरवारम वोदा बाक्त। एज्रा १:७ 8 मिनु येहो-याकीम आ पशो, आ पशो ग्रांग्रा दिशो नु आ दोस तशो गेय नेल्ल इस्राएल नु यहूदा डा पिप आन इतिहासम ब्रेक्शो बाक्ब। मिनु मेको आ नोले मेको आ तौ येहो-याकीन पिप दुम्माक्त।

यहूदा डा पिप येहो-याकीन

9 येहो-याकीन पिप दुम्मेनु, ८ बर्स दुश्शो बाक्माक्त। मिनु मेकोमी यरूसलेमम महिना सां नु १० नाक्ती सासन पवा बाक्त। मिनु मेकोमी परमप्रभु यावे आ डॉइती मार मरिश्शो बाक्मे, मेको पवा बाक्त। येहो-याकीन पिप दुम्मेनु, २राजामी १८ बर्स देंब। २राजा २४:८ 10 मिनु बर्खा जाक्चावानु, पिप नेबुकदनेसरम मुर सोइश्शा परमप्रभु यावे आ खिं डा रिश्शो रिश्शो ग्योबपुकी नु मेको पिप कली बेबीलोनम चाक्पदा बाक्त। मिनु मेकोमी मेको पिप आ खिं डा मुर का सिदकीयाह कली यहूदा नु यरूसलेम डा पिप सेला बाक्त। येरमीया २२:२४-३०

यहूदा डा पिप सिदकीयाह  
२राजा १४:१८-२५; येरमीया ५२:१-३०

11 सिदकीयाह पिप दुम्मेनु २१ बर्स दुश्शो बाक्माक्त। मेकोमी यरूसलेमम ११ बर्स सासन पवा बाक्त। 12 मेकोमी आ परमप्रभु यावे आ डॉइती मार मरिश्शो बाक्मे, मेको पवा बाक्त। परमप्रभु यावे आ लोत्र पाइब येरमीयाम मेको कली परमप्रभु यावे आ लोत्र पशो बाक्माक्त। तन्न पिपमी मेको आ डॉइती आ थुं कली ब्रेम्शो मसेला बाक्त। येरमीया ३७:-; ३८:- 13 मिनु पिप नेबुकदनेसरमी मेको कली परमप्रभु आ नेंम कसम जपदा बाक्त। तन्न मेको पिप कली यो मरिश्शो पवा बाक्त। मेको मरिश्शो पाइब नु काइ मटीब दुश्शा, परमप्रभु यावे, इस्राएली आन परमप्रभु गे लेन्ने मबिस्से बाक्त। 14 मेको प्रॉइशा, चढेब नु मुरपुकीम थाप्पा मरिश्शो पा, रागी रागी डा मुर आन ग्रांग्रा दिशो गेयपुकी नेल्ल पामे बाक्त। मोपा यरूसलेम डा परमप्रभु यावे आ खिं ग्रांग्रा दिशो सेल्मे बाक्त। व्यवस्था १८:९

यरूसलेम खतम दुश्शो

15 मिनु परमप्रभु यावे, आन किकी पिपी आन परमप्रभुमी आ लोत्र पाइबपुकी मेको आन दातेम सोइक्ना सोइक्न बाक्शो बाक्माक्त। मारदे हना आ मुर नु आ बाक्तीक कली शिशी पाइक्बाक्माक्त। 16 तन्न परमप्रभु आ लोत्र पाइब आन कली शुक्शी पामे बाक्त। आ लोत्र मटिथु, आ लोत्र पाइब आन कली तोक्शा लोत्र पामे बाक्त। मोपतीके परमप्रभु यावे आ गाइश्शो मबेक्माक्त। लूका २०:१०-१२; प्रेरित ७:२२

यहूदा ग्याइक्चा पुंइसीशो

17 मिनु परमप्रभुम मेको आन कली लडाइ तोपाइक्चा कली कल्दी आन पिप कली चाक्गा बाक्त। मिनु मेकोपुकीमी मेको आन आल आन कली परमप्रभु यावे आ बाक्तीक खिम तरवारम क्योरशा सदमे बाक्त। मेकोपुकीमी वोंइश आल नु मीश आल आन कली, खाल्पा नु खूशो आन कली काइ शिशी मपामे बाक्त। परमप्रभुम मेको नेल्ल आन कली पिप नेबुकदनेसर आ गुडमी गेमी बाक्त। 18 मिनु मेकोमी परमप्रभु आ खिं डा आइक्च ठेयब ग्योब नेल्ल, मेकेर डा शॉप नु दरवार नु सरकार डा गेय पाइब आन खिं डा शॉप नेल्ल बेबीलोन लदमे बाक्त। 19 मेकोपुकीम परमप्रभु आ खिम मी सुइक्तमे बाक्त। यरूसलेम सहर डा गारो प्रेत्मे बाक्त। मिनु

मेकोपुकीम सहर डा दरवार नेल्लेम मी सुइश्शा, आगा बाक्शो शोंप खतम सेल्मे बाक्त। *येरमीया २६:६*<sup>20</sup> मिनु मेकोमी तरवार रे ब्रोंइशो नेल्ल आन कली फ्रेंशा बेबीलोन लदमे बाक्त। मिनु पारसी आ राज्य मजाकम सम्म मेकोपुकीम, मेको ग्याइक्चा पुंडसीब आन तमी तौ आन कली वाइलीम वाइल सेल्मे बाक्त।<sup>21</sup> मिनु परमप्रभु यावे आ लोव्र पाइब येरमीया रे पा देशो परमप्रभु यावे आ लोव्र गाप्चा कली ७० बर्स मगाम सम्म इस्राएल रागीम आ नाइक्तीक नाक्ती मानेवा बाक्त। मेको रागीम ७० बर्स सम्म श्येत्थ दुम्मेनु, आ नाइक्तीक नाक्ती मानेवा बाक्त। *येरमीया २५:११; लेवी २६:३४; बिलाप २:६*

कोरेस आ देशो लोव्र

एजा १:१-३

<sup>22</sup> मिनु पारसी डा पिप कोरेसमी पिप पवा आ डोंइती डा बर्सम येरमीया आ देशो परमप्रभु यावे आ लोव्र गाप्चा कली परमप्रभु यावेम पारसी डा पिप आ थुंमी लोव्र पवा बाक्त। मिनु मेकोमी आ ठेयब राज्य नेल्लेम लोव्र पा ब्रेक्शा, उरदी पपदा बाक्त। *येरमीया २९:१०; यसैया ४४:२८*<sup>23</sup> फारसी डा पिप कोरेसम मार उरदी पपदा बाक्त। देशा हना “परमप्रभु यावे, स्वर्ग डा परमप्रभुम रागी डा राज्य नेल्ल आं कली गेशो बाक्ब। मिनु मेकोमी आं कली यहूदा डा यरूसलेमम आ कली खिं का सेल्चा कली अरेशो बाक्ब। इन दातेम बाक्शो मेको आ मुर बाक्तेकम हना ‘परमप्रभु यावे, आ परमप्रभु मेको नु बाक्त। मिनु मेको यरूसलेम लमल’ देनुड” देमाक्त।

## एज्रा

एको किताब एज्रा आंमान इच्का ब्रेक्शो बाक्त। तन्न नोले मेको नेल्ल सुम ब्रेक्ता, मतुइक्नीम। डोंइती एज्रा नु नेहेम्याह किताब का बाक्त। मुरुमी ग्रीक लोव्रमी सेल्ची ना किताब का रे निक्शी सेल्शो बाक्तेक्म।

एको किताब १०० बर्स डा इतिहास बाक्ब। जेरूब-बाबेल नु ५० हजार ग्याइश्शा लाइक्वा पुंडसीशो इस्राएली यरूसलेम लेशशो रे नेहेम्याह यरूसलेम जाक्शो सम्म डा लोव्र बाक्ब।

५३६ बि. सी. पिप कोरेसमी इस्राएली आन कली लेत्वा गोवा बाक्त।

५३६ बि. सी. चढेतीक लेंशा सेल्शा, गोठ सेल्तीक चाड मानेमे बाक्त।

५३५ बि. सी. परमप्रभु यावे आ खिं लेंशा सेल्चा गोवमे बाक्त।

५२० बि. सी. परमप्रभु आ लोव्र पाइब हागै नु जकरियाम आस गेय पचा गोम्से बाक्त।

५१६ बि. सी. परमप्रभु यावे आ खिं जिम्मा गेशो बाक्त।

५१५ बि. सी. पास्सा चाड मानेशो बाक्तेक्म।

४५८ बि. सी. एज्रा नु १८ हजार इस्राएली लेंशा यरूसलेम लेशशो बाक्तेक्म।

४४६ बि. सी. नेहेम्याह यरूसलेम जाक्शो बाक्त।

एको १ इतिहास नु २ इतिहास किताबमी ब्रेक्शो नेल्ल दुश्शो नोले डा इस्राएली आन इतिहास बाक्ब। परमप्रभु यावे आ खिं लेंशा सेल्शो आ पर्बम ब्रेक्शो बाक्ब।

### यहूदीपुकी यरूसलेम लेशशो

२इतिहास ३६:२२-२३

1 पारसी रागीमी पिप कोरेस आ डोंइती डा बर्समी परमप्रभु यावेमी येरमीया रे पा देंशो लोव्र खाप्चा कली पिप कोरेस आ थुं क्युकगा बाक्त। मिनु मेको पिपमी आ राज्य नेल्लेमी मेको लोव्र नेंपाइक्वा कली ब्रेक्पदा बाक्त। *यसैया ४५:१; यसैया ४४:२८*

2 मिनु पारसी डा पिप कोरेसमी मार लोव्र ब्रेक्पदा बाक्त देंशा हना “परमप्रभु यावे, स्वर्ग डा परमप्रभुमी, रागी डा राज्य नेल्ल आं कली गेशो बाक्ब। मिनु मेकोमी आं कली ‘यहूदा रागी डा यरूसलेममी आं खिं सेलो’ दे माइक्ती। 3 मिनु इन दातेमी सु सु परमप्रभु आ मुर बाक्नीमी, मेको नु परमप्रभु बाक्ब। मिनु मेको मुरपुकी इर लशा, यहूदा रागी डा यरूसलेममी बाक्ब परमप्रभु यावे, इस्राएली आन परमप्रभु आ खिं सेलीन। 4 मिनु लीशो यहूदी ते ते बाक्मा, मेकोपुकीमी यरूसलेमम परमप्रभु आ खिं सेल्चा कली सुन चांदी, अरु शॉप नु बी ब्यफ चाक्शा, आन आंम दाक्शो गेचा माल्नीम” दे पिप कोरेसमी ब्रेक्शो बाक्त।

5 मिनु नोले यरूसलेम सहरमी परमप्रभु यावे आ खिं लेंशा सेल्चा कली परमप्रभुमी मुर आन थुं पोक्चा पुंडसीशो यहूदा नु बेन्यामीन आस खिं खिं डा ठेयब मुरपुकी, चढेबपुकी नु लेवी नेल्ल मेकेर लचा कली सासमा बाक्त। 6 मिनु मेको आन नेक्था बाक्ब नेल्लेमी आन डोंइती गेशो प्रोंइशा, चांदी के बोस, सुन के थोव्रक, अरु थोव्रक, बी ब्यफ नु शुश क्येट लाइब मार मार थोव्रक शुश तेम्शा गेशा, मेको आन कली वारच पाम्तेक्म। 7 डोंइती नेबुकदनेसरमी यरूसलेममी परमप्रभु यावे आ खिं डा बोसपुकी रोइश्शा चाक्शा, आ देवता आ खिंमी वोइश्शा बाक्माक्ता। मिनु पारसी डा पिप कोरेसमी मेको बोस नेल्ल मेकेर रे गुंडपाइक्ता। *२इतिहास ३६:७, १८* 8 मिनु पारसी डा पिप कोरेसमी मेको बोसपुकी आ शॉप कोव्रब मिश्रेदाथ आ गुइ रे पा यहूदा आ खिं डा नेल्ल क्येडा ठेयब मुर शेश-बस्सार कली हिक्पाइश्शा, ब्रेक्शा गेप्ता। *एज्रा ५:१४* 9 मिनु मेको बोस मार मार बाक्तेक्म देंशा हना, सुन के बोस ३० ओटा, चांदी के बोस हजार का ओटा, क्योरतीके २९ ओटा, 10 सुन के आइक्च बोस ३० ओटा, अरु चांदी के आइक्च बोस ४ सहे १० ओटा अरु बोस हजार का ओटा गेशो बाक्त। 11 सुन नु चांदी के बोस नेल्ल पा ५ हजार ४ सहे ओटा बाक्तेक्म। मिनु ग्याइश्शा लाइक्वा पुंडसीशो

मुरपुकी बेबीलोन रे यरूसलेम लेशशा जाक्मानु, शेश-बस्सारमी मेको बोस नेल्ल यरूसलेममी लेशशा चाक्ता।

### लेशशो इस्राएल डा मुर

नेहेम्याह ७:५-७२

2 बेबीलोन डा पिप नेबुकदनेसरमी यहूदा नु यरूसलेम डा मुर आन कली ग्याइश्शा बेबीलोन लाइश्शो बाक्ता। मेको ग्याइश्शा लाइक्वा पुंडसीशो आन दाते डा यहूदा नु यरूसलेम आंम आंम सहरम लेशशा जाक्शो मुर आन नें मार बाक्तेक्म देंशा हना, 2 जेरूब-बाबेल नु बेबीलोन रे यरूसलेम जाक्ब येशुआ, नेहेम्याह सेरायाह, रेलायाह, मोरदेकै, बिल्थान, मिस्पार, बिग्वाइ, रेहुम नु बानाह जाक्शो बाक्तेक्म। मेको इस्राएली सु सु नु गिश मुर बाक्तेक्म देंशा हना, 3 पारोश आ चच युइ २,१७२ 4 शेफत्याह आ चच युइ ३७२ 5 आराह आ चच युइ ७७५ 6 पहाथ-मोआब आ चच युइ आ तौ येशुआ नु योआब आस चच युइ २,८१२ 7 एलाम आ चच युइ १,२५४ 8 जत्तु आ चच युइ ९४५ 9 जक्काइ आ चच युइ ७६० 10 बानी आ चच युइ ६४२ 11 बेबाइ आ चच युइ ६२३ 12 अज्गाद आ चच युइ १,२२२ 13 अदोनीकाम आ चच युइ ६६६ 14 बिग्वाइ आ चच युइ २,०५६ 15 आदीन आ चच युइ ४५४ 16 आतेर आ मुर हिक्कीयाह आ चच युइ ९८ 17 बेजाइ आ चच युइ ३२३ 18 योराह आ चच युइ ११२ 19 हाशुम आ चच युइ २२३ 20 गिब्बार आ चच युइ ९५ 21 बेथलेहेम डा १२३ 22 नेतोफाह डा ५६ 23 अनाथोथ डा १२८ 24 अज्मावेथ डा ४२ 25 किरयथ-यारीम केफीरा नु बेयरोथ डा ७४३ 26 रामाह नु गोबा डा ६२१ 27 मिकमास डा १२२ 28 बेथेल नु ऐ डा २२३ 29 नेबो डा ५२ 30 मग्बीश आ चच युइ १५६ 31 अर्को एलाम आ चच युइ १,२५४ 32 हारीम आ चच युइ ३२० 33 लोद, हादीद नु ओनो सहर डा ७२५ 34 यरीको सहर डा ३४५ 35 नु सेनाह आ चच युइ ३,६३० जना बाक्तेक्म।

### लेशशो चढेब

36 लेशशो चढेब सु सु बाक्तेक्म देंशा हना, येदायाह आ चच युइ, येशुआ आ खिं डा मुर ९७३ 37 इम्मेर आ चच युइ १,०५२ 38 पशहुर आ चच युइ १,२४७ 39 नु हारीम आ चच युइ १,०१७ जना बाक्तेक्म।



## लेशो लेवी नु कुम्सो पाइब

40 लेशा जाक्शो लेवी आ मुर सु सु बाक्तेक्म देंशा हना, येशुआ नु कदमीएल आस चच युइ, नु होदावीयाह आ चच युइ ७४ जना बाक्तेक्म। *नेहेम्याह १२:८* 41 कुम्सो पाइबपुकीमी आसाफ आ चच युइ १२८ जना बाक्तेक्म।

## लेशो लाप्चो खाल पाइब

42 लाप्चो खाल पाइब सु सु बाक्तेक्म देंशा हना, शाल्लुम, आतेर, ताल्मोन, अक्कुब, हतीता नु शोबाइ आन चच युइ नेल्ल पा १३९ जना मुर बाक्तेक्म।

## लेशो परमप्रभु आ खिं डा वाइल

43 परमप्रभु यावे आ खिंमी गेय पाइब वाइल आन चच युइ सु सु बाक्तेक्म देंशा हना, एजा ८:२० सीहा, हासुफा, तब्बाओथ, 44 केरोस, सीआहा, पादोन, 45 लेबानाह, हगावाह, अक्कुब, 46 हागाब, शाम्लाइ, हानान, 47 गिददेल, गहार, रेआयाह, 48 रेसीन, नेकोदा, गज्जाम, 49 उज्जा, पासेआह, बेसाइ, 50 अरनाह, मेउनीम, नेफीसीम, 51 बाकबुक, हकुफा, हारहुर, 52 बस्लुथ, मेहीदा, हारशा, 53 बारकोस, सीसेरा, तेमाह, 54 नेसीयाह नु हतीफा आन चच युइ बाक्तेक्म।

55 सोलोमन आ गेय पाइब आन चच युइ सु सु बाक्तेक्म देंशा हना, सीताइ, हास्सोफेरेथ, पेरुदा, १राजा ९:२१ 56 यालाह, दारकोन, गिददेल, 57 शेफत्याह, हत्तील, पोकेरेथ-हस्सेबाइम नु आमी आन चच युइ बाक्तेक्म। 58 परमप्रभु यावे आ खिं डा गेय पाइब नु सोलोमन आ गेय पाइब नेल्ल पा ३९२ मुर बाक्तेक्म। *यहोसु ९:२३*

59 मिनु तेल-मैलाह, तेल-हारशा करूब, अददान नु इम्मरे रे लेशा जाक्ब यो बाक्तेक्म। तन्न मेकोपुकीमी आन किकी पिपी नु आन खिं डा मुर इस्राएल डा सु रे जाक्शो बाक्मा, मेको देंने मचबेम। 60 मेकोपुकी देलायाह आ चच युइ, तोबीयाह आ चच युइ नु नेकोदा आ चच युइ नेल्ल पा ६५२ जना बाक्तेक्म। 61 परमप्रभु कली चढेब हबायाह आ चच युइ, हककोस आ चच युइ नु बारजील्लाइ आ चच युइ यो आन किकी पिपी नु आन खिं डा मुर इस्राएली सु रे बोशो बाक्मा देंने मचबेम। बारजील्लाइ नें वोइश्शो मुर गिलाद डा बारजील्लाइ आ तमी कली ग्युबे पवा बाक्त। मिनु आ शिउ आ नें वोदा बाक्त। *२सामुएल १७:२७; २सामुएल १९:३२* 62 मेकोपुकीमी मुर आन नें ब्रेक्तीकेमी आन नें माल्तेक्म, तन्न मथिदेम। मोपतीके मेकोपुकीम चढेचा मताम। मिनु चढेतीक गेय रे तिल्चा पुंडसाक्म। 63 मिनु ऊरीम नु थुम्मीममी गेय पने चाप्ब चढेब का मगूम सम्म मेकोपुकीमी नेल्ल क्येडा चोव्रखो चढेतीक थोव्रक रे जचा मताम।

64 मिनु मेकेर जाक्ब मुर नेल्ल पा ४२,३६० बाक्तेक्म। 65 मिनु मेको आन वाइलीम वाइल ७,३३७ मुर बाक्तेक्म। मेको आन दातेमी २०० कुम्सो पाइब मीश मुर नु वोइश मुर यो बाक्तेक्म। 66 मिनु मेको नु ७३६ शारा नु २४५ खच्चर बाक्तेक्म। 67 मिनु मेको नु ४३५ दलओठ नु ६,७२० गधा यो बाक्तेक्म। *गन्ती १८:९; प्रस्थान २८:३०; १सामुएल १४:४१*

68 मिनु मेकोपुकी यरूसलेममी बाक्शो परमप्रभु यावे आ खिं जाक्मा नोले का निक्शी खिं डा ठेयब मुरपुकीमी परमप्रभु आ खिं डोंइती डा आ बाक्तीके उइ लेंशा सेल्चा कली ग्येरशा आन दाक्स पा क्येट गेम्तेक्म। 69 मेकोपुकीमी आन चाप्स पा सेल्तीक गेय कली ६१ हजार सुन के आदारकोन नु ५ हजार चांदी के मीना नु चढेब आन कली सहे का फेक्तीक वा गेम्तेक्म। *आदारकोन का ८.४ ग्राम सुन के क्येट बाक्ब। चांदी के मीना का ६०० ग्राम खोदेंशो बाक्ब।*

70 मिनु चढेबपुकी, लेवीपुकी नु का निक्शी अरु मुर यरूसलेम नु आ एर ओंथ डा गाउंपुकीमी बाक्तेक्म। मिनु कुम्सो पाइबपुकी, लाप्चो खाल पाइबपुकी, परमप्रभु यावे आ खिंमी गेय पाइबपुकी नु लीशो इस्राएली नेल्ल आंम आन सहरम बाक्तेक्म।

## चोशा चढेशो

3 मिनु इस्राएली आंम आन गाउंमि नेल्ल गारपा बाक्ने थुम्शो बाक्तेक्म। आन बाक्शो ७ महिना दुम नोले मुर नेल्ल थुं का डा दुम्शा, यरूसलेममी बुक्तेक्म। 2 मेना योसादाक आ तौ येशुआ नु मेको आ वारच चढेब, शाल्तीएल आ तौ जेरूब-बाबेल नु मेको आ खिं डा मुर नेल्लेमी इस्राएली आन परमप्रभु कली चढेतीके सेल्तेक्म। परमप्रभु आ मुर मोसामी आ अरेशो लोव्रम दोपा ब्रेक्शो बाक्मे, मोपा चोशा चढेचा कली मेको चढेतीक सेल्तेक्म। *एजा २:२; प्रस्थान २७:१; लेवी ६:२* 3 मेकोपुकीमी चढेतीक डोंइती ते बाक्मे मेकेर लेंशा चढेतीक सेल्तेक्म। मारदे हना मेको आन एर ओंथ डा अर्को जात डा मुर आन कली तशा हिंशा, सुनी नु नाक्नाक्दो परमप्रभु यावे कली चढेतीकेम चोशा चढेतीक चढेम्तेक्म।

4 मिनु मेकोपुकीमी गोठ सेल्शा बाक्तीक चाड मानेम्तेक्म। मिनु दोपा पतीके ब्रेक्शो बाक्मे, मोपा नाक्त किंत किंत डा पचा माल्शो चोशा चढेतीके दोशो चढेचा माल्मा, मोशो चढेम्तेक्म। *लेवी २३:३४-४३* 5 मिनु नाक्त किंत किंत डा चोशा चढेतीके, औंसी नाक्त डा चढेतीके नु परमप्रभु यावेमी देंशो चाड डा चढेतीके चढेम्तेक्म। सु सुमी आन ग्येरशो थुं रे परमप्रभु यावे कली चढेचा दाक्तमे, मेको चढेम्तेक्म। 6 मिनु परमप्रभु यावे आ खिं डा जग मवोइश्शो बाक्त हना यो, ७ महिना डा डोंइती डा नाक्त रे परमप्रभु यावे कली चोशा चढेतीक चढेचा गोम्तेक्म।

7 मिनु मेकोपुकीमी गारो प्रोव्रब नु शी के गेय पाइब आन कली क्येट गेम्तेक्म। मिनु पारसी डा पिप कोरेसमी देंशो खोदेंशो पा सीदोन नु टायर डा मुर आन कली लेबानोन डा लाइश्शो रवा आ शी समुन्द्र रे पा योप्पा सम्म चाक्चा कली जचा तूचा थोव्रक नु तेल गेम्तीमी। *१राजा ५:१६-२५*

## परमप्रभु आ खिं लेंशा सेल्शो

8 मिनु मुरपुकी यरूसलेममी बाक्शो परमप्रभु आ खिं जाक्शो बर्स निक्शी नु महिना निक्शी दुम्माक्त। मिनु शाल्तीएल आ तौ जेरूब-बाबेल, योसादाक आ तौ येशुआ नु मेको आस लीशो लोक्ब, चढेबपुकी, लेवीपुकी नु बेबीलोन रे लेशा यरूसलेम जाक्ब नेल्लेमी परमप्रभु आ खिं लेंशा सेल्चा गोम्तेक्म। मिनु परमप्रभु यावे आ खिं सेल्तीक गेय कोव्रचा कली २० बर्स जाक्दीश्शो नु मेको क्येडा लाक्शो लेवी आन कली योव्रशा वोइक्तीमी। 9 मिनु परमप्रभु आ खिं सेल्तीक गेय पाइब आन कली कोव्रब येशुआ नु आ तौपुकी नु आ लोक्ब, कदमीएल नु आ तौपुकी, बिन्नुइ नु होदावीयाह नु हेनादाद आ तौपुकी नु लेवी आन तौ नु खिं डा मुर नेल्ल गेय पाइब आन कली कोव्रब दुम्तेक्म।

## परमप्रभु आ खिं डा जग

10 मिनु परमप्रभु यावे आ खिं सेल्बपुकीमी जग वोइक्तेक्म। चढेबमी आन वा फेक्शा तुराही ताप्तेक्म। आसाफ आ तौ लेवीपुकीम बुक्केल ताप्तेक्म। इस्राएल डा पिप दाऊदमी अरेशो खोदेंशो पा परमप्रभु यावे कली ठेयब सेल्चा कली आन आन बाक्तीकेमी राप्तेक्म। 11 मिनु मेकोपुकीमी पालो पालो पा कुम्सो पाप्तेक्म। परमप्रभु यावे कली ठेयब सेल्चा सेल्न "गे रिम्शो पाइब बाक्नीनी" दे मान पा कुम्सो पाप्तेक्म। मेकोपुकीमी "परमप्रभु यावे रिम्शो पाइब बाक्ब, नु आ गेना हना यो दाक्तीक इस्राएली नु लीब" दे कुम्सो पाप्तेक्म। परमप्रभु यावे आ खिं डा जग वोइश्शो बाक्तीके मुर नेल्लेमी ठेयब सेंदा पा परमप्रभु यावे कली ठेयब सेल्तेक्म। *२इतिहास ५:१३; भजन संग्रह ११८:१*

12 परमप्रभु यावे आ डोंइती डा खिं तशो चढेबपुकी, लेवीपुकी नु आन खिं खिं डा ठेयब मुर नु अरु खाल्पापुकी परमप्रभु यावे आ खिं डा जग वोइश्शो तशा, ठेयब सेंदा पा डाक्तेक्म। मिनु अरु मुर चहिं ग्येरशा ठेयब सेंदामी रेयके पाप्तेक्म। *हाग्यै २:३* 13 मिनु नेंब मुरपुकीमी ग्येरशा ग्रीशो नु डाक्शो मार बाक्मे मारदे मरुबेम। मारदे हना मुर आन रेयके पशो सेंदा थम ठेयब बाक्त। मेको रेयके पशो डोन डोन सम्म नेंसे बाक्त।

## जोरी सत्रुमी श्येत गेशो

4 लेशा जाक्वशो ग्याइश्शा लाइक्वा पुंडसीशो यहूदा नु बेन्यामीन आस थर डा मुरपुकीमी परमप्रभु यावे, इस्राएली आन परमप्रभु आ खिं सेल्ना सेल्न बाक्नीम देंशो लोत्र आन जोरी सत्रुमी नेंतेक्म। 2 मिनु मेकोपुकीमी जेरूब-बाबेल, येशुआ नु खिं खिं डा ठेयब मुर आन बाक्तीकेमी जाक्वशा “गो आंड कली यो गे नु गारशा, मेको खिं सेल्चा गेकी। गो यो गे इन खोदेंशो पा इन परमप्रभु कली ठेयब सेल्ना सेल्न बाक्नीकी। मिनु गो आंड कली एक चाक्ब अस्सुर डा पिप एसर-हददोन आ पाला रे गो यो इन परमप्रभु कली चढ़ेन चढ़ेन बाक्तक” देंतेक्म। *येरमीया ४१:५; २राजा १७:२४-३३; २राजा १९:३७* 3 तन्न जेरूब-बाबेल, येशुआ नु इस्राएली आन लीशो खिं खिं डा ठेयब मुरपुकीमी मेको आन कली “एको खिं गो इस्राएली आंड परमप्रभु कली सेल्नीकी। एकेर गे इन पचा माल्शो मारेड मबाक्ब। पारसी डा पिप कोरेसमी आंड कली अरेशो खोदेंशो पा, गो आंड परमप्रभु यावे, इस्राएली आन परमप्रभु आ खिं आंमान सेल्नीकी” दे माइक्तेक्म। 4 मिनु नोले मेको रागी डा मुरपुकीमी यहूदी आन कली आन थुं तोक्शा गेतेक्म। मिनु मेको खिं मसेल्पाइक्वा कली हिंच कोइताक्म।

## सेल्तीक गेय क्याम्चा माल्शो

5 मिनु यहूदी आन गेय नेल्ल क्याम्पाइक्वा कली, मेकोपुकीमी दरवार डा ठेयब मुर आन कली घूस गेतेक्म। मिनु मेकोपुकीमी पिप कोरेस आ सासन पची ना रे पारसी डा पिप दारा आ सासन पची ना सम्म मोदेंशो गेय पना पन बाक्तेक्म। *एजा ४:२४*

6 मिनु अहासूरसमी सासन पचा गोवा आ डोंइती डा बर्स, मेको रागी डा मुरपुकीमी यहूदा नु यरूसलेम डा मुर आन कली दोस गेशो ब्रेक्स का ब्रेक्शा सोइक्ताक्मी।

7 मिनु बिश्लाम, मिथ्रेदाथ, ताबेल नु मेको आ वारच नेल्ल गारशा पारसी डा पिप आरता-सास्त कली ब्रेक्स का ब्रेक्ताक्म। मेको ब्रेक्स अरामी आन लोत्रमी ब्रेक्शो बाक्त। मिनु मेको आ अर्थ यो ब्रेक्शो बाक्त।

8 पिप आ सोइश्शो रेहुम नु ब्रेक्तीक गेय पाइब शिम्शाइमी, पिप आरता-सास्त कली यरूसलेम आ पर्वम ब्रेक्स का ब्रेक्ताक्म। 9 पिप आ सोइश्शो रेहुम, ब्रेक्तीक गेय पाइब शिम्शाइ नु मेको निक्शी नु गेय पाइबपुकी, निसाप पाइबपुकी, पिप आ सोइश्शोपुकी, पारसी डा ठेयब मुरपुकी, एरेक नु बेबीलोनमी बाक्ब सुसा एलाम डा मुरपुकी 10 नु नेल्ल क्येडा ठेयब मान पचा पुंडसीशो ओस्नापरमी ग्याइश्शा लाइश्शो मुर आन रागी रे गुंडशा सामरीया सहर नु आ एर ऑथ नु युफ्रेटीस खोला आ आइक्वी हांबुमी वोइश्शो मुरपुकीमी ब्रेक्ताक्म। 11 मेको सोइश्शो ब्रेक्स डा लोत्र मार बाक्त देंशा हना “पिप आरता-सास्त कली युफ्रेटीस आइक्वी हांबुमी बाक्ब गेय पाइबपुकीमी इन कली ‘रिम्शो बाक्कीन’ देंनीम। 12 पिप इन कली मार लोत्र तुइक्पाइक्वा दाक्नीकी देंशा हना, इन कली प्रॉइशा एको रागीमी जाक्ब यहूदीपुकी यरूसलेममी जाक्तेक्म। मिनु मेकोपुकीमी काइ मटीब नु मरिम्शो पाइब आन सहर कली लेंशा सेल्ना सेल्न बाक्नीम। मेकोपुकीमी मेको आ जग लेंशा सेल्शा, आ गारो यो प्रोवने थुम्चशो बाक्नीम।

13 पिप इन कली मार लोत्र तुइक्पाइक्वा दाक्नीकी देंशा हना, मेको सहर कली लेंशा सेल्तेक्म नु मेको आ गारो प्रोवने थुम्तेक्म हना, मेकोपुकीमी पिप कली थाप्तीके, आन चेम्शो रे थाप्तीक नु आन रू डा थाप्तीके मारेड मथाप्नीम। मिनु मो पामेनु, पिप इन कली मरिम्शो दुम्ब। 14 गो पिप इन गेशो जाइनीकी। मोपतीके सुइम इन कली मान मपशो कोवचा मदाक्नीकी। मोपतीके पिप इन कली एको लोत्र तुइक्पाइक्वा कली लोत्र कुरब मुर सोइक्ताक्म। 15 इन किकी पिपीमी ब्रेक्शा वोइश्शो ब्रेक्स माल्शा, कोवडीन। मेकेर मार ब्रेक्शो बाक्मे थिल्लीनी। मेको सहरम काइ मटीब मुर बाक्नीम। मेकोपुकी पिप नु रागी कली मरिम्शो पाइब बाक्नीम। मोपतीके एको सहर कली खतम पोक्शो बाक्त। 16 मिनु गो पिप इन कली मार लोत्र तुइक्पाइक्वा दाक्नीकी देंशा हना, एको सहर लेंशा सेल्तेक्म हना, नु मेको

आ एर ऑथ डा गारो प्रोवने थुम्तेक्म हना, युफ्रेटीस आइक्वी हांबुम इन के मारेड अधिकार मलीब” दे ब्रेक्शो बाक्त।

## पिपमी लोत्र लेशो

17 मिनु पिपमी “आं सोइश्शो रेहुम, ब्रेक्तीक गेय पाइब शिम्शाइ नु सामरीया सहर नु आ एर ऑथ नु ठेयब खोला आइक्वी हांबु बाक्ब इन गेय पाइब आन कली ‘रिम्शो बाक्कीन’ दे ब्रेक्नुड। 18 इन सोइश्शो ब्रेक्स आं कली रिम्शो पा पढेशा मेको आ अर्थ नेंपाइक्तीमी। 19 मिनु गे इन देंशो खोदेंशो पा ब्रेक्शा वोइश्शो लोत्रपुकी माल्पाइक्तामी। मिनु मार थिसाक्व देंशा हना, मेको सहर डा मुरुमी पिप आ सासन पतीकेमी मटिशो आ पर्वम शुश लोत्रपुकी ब्रेक्शा वोइश्शो थिसाक्व। मिनु साइ रे मोदेंशो मटितीके, पना पन पिशो बाक्तेक्म। 20 यरूसलेममी सासन पाइब सक्ति पाइश्शो पिपपुकी बाक्तेक्म। मेकोपुकीमी युफ्रेटीस आइक्वी हांबु डा रागी नेल्ल अधिकारम वोइश्शो बाक्तेक्म। मिनु मुरपुकीमी पिप कली थाप्तीके, आन चेम्शो रे थाप्तीके नु आन रू डा थाप्तीके नेल्ल थाप्शो बाक्तेक्म।

21 मोपतीके मेको मुर आन गेय तेक्वा माल्ब, दे मतीन। मिनु गो हुकुम मगोडा सम्म मेको सहर लेंशा मसेल्मेक्ल। 22 गेपुकीमी मेको आ पर्वम इन पचा माल्शो गेय हेंथे मपने। पिप आ गेय रिम्शो दुम्पाइक्वा कली मेको मरिम्शो गेय तेक्वा माल्ब” दे लोत्र कुरब मुर सोइक्ताक्व।

## परमप्रभु आ खिं सेल्चा नाइश्शो

23 मिनु रेहुम, ब्रेक्तीक गेय पाइब शिम्शाइ नु मेको नु गेय पाइब आन डोंइती पिप आरता-सास्त आ ब्रेक्स पढेमे चोटीन रेहुम नु मेको नु बाक्ब छुल छाल बोक्शा दोरोर पा यरूसलेम लशा, मेकेर डा यहूदी आन आन सेल्तीक गेय नेल्ल ग्रा गु तेक्तेक्म। 24 मे नोले यरूसलेममी परमप्रभु आ खिं सेल्तीक गेय देक्त। मिनु मोदेंशो पा पारसी डा पिप दारा आ सासन पशो बर्स निक्शी जाक्दीम सम्म मेको सेल्तीक गेय देक्शा लीत।

## परमप्रभु आ खिं लेंशा सेल्शो

5 मिनु परमप्रभु यावे आ लोत्र पाइब हाग्गै नु इददो आ तौ जकरियामी यहूदा नु यरूसलेममी बाक्ब यहूदी आन कली इस्राएली आन परमप्रभु आ देंशो लोत्र पाम्ताक्स। *हाग्गै १:१; जकरिया १:१* 2 मिनु शाल्तीएल आ तौ जेरूब-बाबेल नु योसादाक आ तौ येशुआमी यरूसलेममी परमप्रभु आ खिं लेंशा सेल्चा गोम्सेनु, परमप्रभु यावे आ लोत्र पाइबपुकीमी यो मेको आन कली वारच पाम्तेक्म।

## यहूदी आन गेय तेक्वा माल्शो

3 मिनु युफ्रेटीस आइक्वी हांबु डा रागीम सासन पाइब तत्तेनाइ, शेथार-बोजेनाइ नु मेको नु बाक्बपुकी रीब पा यहूदी आन बाक्तीकेम जाक्शा “एको खिं लेंशा सेल्चा नु थुम्चा कली इन कली सुम अधिकार गेवा?” देंतेक्म। 4 मिनु मेकोपुकीमी मेको खिं सेल्ब आन नें यो पुंडतेक्म। 5 तन्न परमप्रभुमी यहूदी आन खाल्पा आन कली वारच पात्तु। मिनु मेकोपुकी पिप दारा आ बाक्तीकेम आन ब्रेक्स जाक्दीश्शा, पिपमी मार देंबा, मेको लोत्र मनेन्मे सम्म, मेको गेय तेक्ने मचबेम। *ब्यवस्था ११:१२; १राजा ८:२९*

## तत्तेनाइमी पिप दारा कली ब्रेक्शो

6 युफ्रेटीस आइक्वी हांबु डा रागी कली हुकुम पाइब, तत्तेनाइ, शेथार-बोजेनाइ नु मेको नु बाक्ब सोइश्शोपुकीमी पिप दारा कली ब्रेक्स का ब्रेक्शा सोइश्शो बाक्तेक्म। मेको ब्रेक्स एको बाक्ब। 7 मेको आन सोइश्शो ब्रेक्समी मार ब्रेक्शो बाक्त देंशा हना “पिप दारा इन थुं नाइश्शा रिम्शो बाक्कीन। 8 पिप, इन कली लोत्र का तुइक्पाइक्वा दाक्नीकी। मार लोत्र तुइक्पाइक्वा दाक्नीकी देंशा हना, गो यहूदा रागीमी ठेयब परमप्रभु आ खिं बाक्तीक लाइतक। मेको ठेयब खोइश्शो फुल्लुमी सेल्नीम। आ गारो तार शी वोइक्ने थुम्तेक्म। शुश गेय पा, रीब पा सेल्ना सेल्न बाक्नीम” दे ब्रेक्शो बाक्त।

9 मिनु मेको खाल्पा आन कली “इन कली एको खिं लेंशा सेल्चा नु थुम्चा कली सुम अधिकार गेवा? दे हिल्लो पाइतक। 10 मिनु इन कली ब्रेक्चा नु तुइक्पाइक्चा कली मेको आन ठेयब मुर आन नें यो हिल्लो पाइतक। 11 तन्न मेकोपुकीमी ‘गो सरीड नु रागी डा परमप्रभु आ गेय पाइब नकी। मिनु शुश बर्स डोंइती सेल्शो खिं लेंशा सेल्ना सेल्न बाक्नीकी। मेको डोंइती डा खिं इस्राएल डा ठेयब पिप कामी सेल्शो बाक्त। 12 तन्न आंइ किंकी पिपीमी स्वर्ग डा परमप्रभु कली चुरपाइश्शो बाक्तेक्म। मिनु मेकोमी मेको आन कली बेबीलोन डा कल्दी आन पिप नेबुकदनेसर आ गुडमी गेशो बाक्त। मिनु मेको पिपमी एको खिं कली प्रेशो बाक्त। मुर आन कली ग्याइश्शा बेबीलोन रागीमी लाइश्शो बाक्त। 2 राजा 24:1-18; 2 राजा 24:9 13 तन्न बेबीलोन डा पिप कोरेसमी आ सासन पशो डोंइती डा बर्समी एको परमप्रभु आ खिं लेंशा सेल्चा कली हुकुम गेशो लोत्र ब्रेक्चा गुंडशो बाक्त। एजा 1:1-2 14 नेबुकदनेसरमी यरूसलेम डा सुन नु चांदी के बोसपुकी परमप्रभु आ खिं रे लाइश्शा बेबीलोन डा मन्दीरम वोइश्शो बाक्त। मिनु पिप कोरेसमी मेको बोसपुकी बेबीलोन डा मन्दीर रे गुंडशा शेश-बस्सार कली गेत्तु। पिप कोरेसमी शेश-बस्सार कली सासन पचा कली योत्रशो बाक्त। एजा 1:7-15 15 मिनु मेको कली ‘एको बोसपुकी लाइश्शा यरूसलेम डा परमप्रभु आ खिंमी वोतो’ देंत। मिनु परमप्रभु आ खिं डोंइती आ बाक्तीक उइ लेंशा सेल्चा माल्नीम” दे माइक्तु। 16 मिनु मेको शेश-बस्सार जाक्शा, यरूसलेममी परमप्रभु आ खिं आ जग वोइक्तु। मेना रे मुल सम्म एको लेंशा सेल्ना सेल्न बाक्नीम। मिनु मेको मुल सम्म सेल्ने मथुश्शो बाक्ब। 17 मोपतीके मुल पिप, गे दाक्नीनी हना, बेबीलोन डा पिप आन पालामी मार मार दुश्शो बाक्मे, मेको ब्रेक्स वोइक्तीकेमी माल्पतीन। मिनु पिप कोरेसमी यरूसलेममी परमप्रभु आ खिं लेंशा सेल्चा कली हुकुम पशो लोत्र ब्रेक्चा गुंडशो बाक्म कों मबाक्म? मिनु मेको आ पबर्म इन दाक्शो मार बाक्बा, मेको आंइ कली तुइक्पतीन, दे ब्रेक्शो बाक्त। एजा 1:36

पिप कोरेस आ ब्रेक्स थिश्शो

6 मिनु बेबीलोन रागीमी पिप दारामी सासन पा मार मार ब्रेक्स वोइक्तीकेमी पिप आन ब्रेक्स माल्तेक्म। 2 मिनु मादी रागी डा ठेयब सहर एक-बतानामी तोल्शा वोइश्शो ब्रेक्स का थित्तेक्म। मिनु मेको ब्रेक्समी मार ब्रेक्शो बाक्त देंशा हना 3 पिप कोरेसमी सासन पशो डोंइती डा बर्समी यरूसलेममी परमप्रभु आ खिं आ पबर्म हुकुम पशो ब्रेक्स का गुंडशो बाक्ब। मार लोत्र गुंडशो बाक्ब देंशा हना “मेको खिं लेंशा सेलीन। मेको चढ़ेचा कली नु चोशा चढ़ेतीक चढ़ेचा कली बाक्ब। आ ग्येत्थ लाइश्शो 60 कुबीत नु आ पित्थ ब्रेम्शो 60 कुबीत दुम्चा माल्ब। कुबीत का आधा मिटर खोदेंशो बाक्ब। 4 मेको खोइश्शो फुल्लु के लहर सां नु शी के लहर का पा सेल्चा। मिनु मेको सेल्चा कली आ माल्शो नेल्ल पिप आ क्येट वोइक्तीक रे गेचा। 5 पिप नेबुकदनेसरमी यरूसलेम डा परमप्रभु आ खिं रे गुंडशा बेबीलोन सहरम चाक्शो सुन नु चांदी के बोसपुकी यो लेंशा डोंइती डा आन बाक्तीक उइ वोइक्चा। मेको नेल्ल यरूसलेममी परमप्रभु आ खिंमी लाइश्शा वोइक्चा नम” दे ब्रेक्शो बाक्त।

पिप दारामी वारच पशो

6 मिनु पिप दारामी “युफ्रेटीस आइक्ची हांबु डा रागीमी हुकुम पाइब तत्तेनाइ, शेतार-बोजेनाइ नु इन गेय पाइबपुकी नु युफ्रेटीस आइक्ची हांबुम बाक्ब सोइश्शो नेल्ल इन कली 7 परमप्रभु आ खिं सेल्तीक गेय मतेक्कीन। यहूदी आन कली सासन पाइब नु मेको आन खाल्पा आन कली परमप्रभु आ खिं डोंइती डा आ बाक्तीक उइ सेल्चा गेने। 8 मिनु गो हुकुम का पाइनुड। गे यहूदी आन खाल्पा आन कली परमप्रभु आ खिं सेल्चा कली मार पचा माल्नीनी मेको यो इन कली हुकुम गेनन्नी। मेको सेल्तीक गेय पचा कली युफ्रेटीस आइक्ची हांबु डा रागी रे पोक्शो तिरो रे पिप आ क्येट वोइक्तीक रे मेको आन कली माल्शो नेल्ल गेने।

9 मिनु मेको आन कली माल्शो, बाछा, सांड, पाठा स्वर्गम बाक्ब परमप्रभु कली चोशा चढ़ेतीक चढ़ेचा कली गेचा माल्नीनी। यरूसलेममी बाक्ब चढ़ेब आन माल्शो चेरब, हिक्सी, अडगुर शांबु नु तेल मप्रेंथु, नाक्त किंत किंत रीब पा गेचा माल्नीनी। 10 मिनु मेकोपुकीमी स्वर्ग डा परमप्रभु आ दाक्चा डा पा चढ़ेने चाप्नीम। मिनु पिप नु आ तौपुकी शुश ब्रोंइशा बाक्ने चाप्नेक्ल, दे परमप्रभु कली पुंडनीम। 11 मेको प्रोंइशा यो गो एको हुकुम गेनन्नी सुमी एको आं अरेशो लोत्र फाइक्बा, मेको आ खिं डा थाम का गुंडशा, मेको थाममी क्युक्चा पुंडसीब। मिनु मोशो ला ममाइ, आ खिं यो प्रेशा गेचा पुंडसीब। 12 परमप्रभुमी आ नें तुइक्पाइक्चा कली यरूसलेममी आ बाक्तीक सेल्पाइश्शो बाक्त। परमप्रभुमी आ हुकुम फाइक्ब नु यरूसलेम आ खिं प्रेख पिप नेल्ल नु अरु मुर, सु बाक्तेक्म हना यो, मेको आन कली खतम पोक्गल। गो पिप दाराम हुकुम पाता। मेको रीब पा पचा माल्नीम” दे हुकुम पात्तु।

परमप्रभु आ लोत्र गाप्शो

13 मिनु पिप दारामी अरेशो लोत्र युफ्रेटीस आइक्ची हांबु डा रागीमी हुकुम पाइब तत्तेनाइ, शेतार-बोजेनाइ नु मेको नु बाक्ब नेल्लेमी का यो मखाइक्थु पाक्तेक्म। 14 मिनु यहूदी आन खाल्पापुकीमी सेल्ना सेल्न बाक्तेक्म। परमप्रभु यावे आ लोत्र पाइब हाग्ने नु इददो आ तौ जकरिया आस देंशो खोदेंशो पा रीब पा दुम्ना दुम्न लत। इस्राएली आन परमप्रभु आ देंशो खोदेंशो पा, पारसी रागी डा पिप कोरेस आ हुकुम गेशो खोदेंशो पा, पिप दारा आ वारच पतीकेमी नु पिप आरता-सास्त आन ब्रेक्चा गुंडशो हुकुम खोदेंशो पा मेकोपुकीमी मेको खिं लेंशा सेल्ने थुम्तेक्म। 15 पिप दारा आ सासन पशो 6 बर्स दुम्मेनु, अदार माइश्शो महिना डा सां नाक्तीम मेको खिं सेल्ने थुम्तेक्म।

परमप्रभु आ खिं जिम्मा गेशो

16 मिनु नोले इस्राएल डा मुरपुकी, चढ़ेबपुकी, लेवीपुकी नु लेशशा जाक्शो ग्याइश्शा लाइक्चा पुंडसीब नेल्लेमी परमप्रभु आ खिं परमप्रभु कली “इन के बाक्ब” दे ग्येरसीशा जिम्मा गेम्तेक्म। 17 मोपा मेकोपुकीमी मेको खिं परमप्रभु कली जिम्मा गेमेनु, सहे का ब्यफ, सहे निक्शी सांड नु 8 सहे पाठा चढ़ेम्तेक्म। मिनु इस्राएली आन पाप आ पबर्म 12 थर आन कली, बोका का का पा, 12 ओटा बोका चढ़ेम्तेक्म। गन्ती 7:10 18 मिनु मेकोपुकीमी मोसा आ किताबमी ब्रेक्शो खोदेंशो पा चढ़ेब आन पालो पालो पा नु लेवी आन पालो पालो पा यरूसलेममी परमप्रभु आ गेय पचा कली लेंशा वोइक्तेक्म। गन्ती 3:6

पास्सा चाड मानेशो

19 मिनु लेशशा जाक्शो ग्याइश्शा लाइक्चा पुंडसीबपुकीमी डोंइती डा महिना डा 18 नाक्तीमी पास्सा चाड मानेम्तेक्म। 20 चढ़ेब नु लेवी नेल्लेमी आंम आन कली ठीक सेल्सीशो बाक्तेक्म। मेको नेल्ल परमप्रभु कली गेय पचा कली ठीक दुश्शो बाक्तेक्म। मेकोपुकीमी लेशशा जाक्शो ग्याइश्शा लाइक्चा पुंडसीब, चढ़ेब आन लोक्ब आन कली नु आंम आन कली पास्सा चाड डा पाठा क्योरतेक्म। 21 लेशशा जाक्शो ग्याइश्शा लाइक्चा पुंडसीब इस्राएलीपुकीम मेको ब्वाम्तेक्म। मिनु रागी डा मरिश्शो दुम्तीके रे दिल्लो परमप्रभु यावे, इस्राएली आन परमप्रभु कली ठेयब सेल्ब मुरपुकी मेको नु गारशा ब्वाम्तेक्म। ब्यक्स्था 16:1-12 22 मिनु मेकोपुकीमी ग्येरशा 7 नाक्त सम्म बोरब ओख्ती मसुप्शो शोब्ले डा चाड मानेम्तेक्म। मारदे हना परमप्रभु यावेमी मेको आन कली ग्येरपाइश्शो बाक्त। मेकोमी अस्सुर डा पिप आ थुं हिरशा, मेको आन कली दाक्पाइश्शो बाक्त। मोपतीके मेको पिपमी इस्राएल डा परमप्रभु आ खिं सेल्चा कली मेको आन कली वारच पाइक्तीमी।

एजा यरूसलेममी जाक्शो

7 मिनु मेको नोले, पारसी रागी डा पिप आरता-सास्तमी सासन पची ना, सेरायाह आ तौ एजा बेबीलोन रे कुत। मेको सेरायाह आ आफ अजारयाह बाक्त। अजारयाह आ आफ हिल्कीयाह बाक्त। इतिहास

५:३९-४०<sup>२</sup> हिल्कीयाह आ आफ शाल्लुम बाक्त। शाल्लुम आ आफ सादोक बाक्त। सादोक आ आफ अहीतुब बाक्त।<sup>३</sup> अहीतुब आ आफ अमारयाह बाक्त। अमारयाह आ आफ अजारयाह बाक्त। अजारयाह आ आफ मेरायोथ बाक्त।<sup>४</sup> मेरायोथ आ आफ जेराह बाक्त। जेराहीयाह आ आफ उज्जी बाक्त। उज्जी आ आफ बुक्की बाक्त।<sup>५</sup> बुक्की आ आफ अबीशुआ बाक्त। अबीशुआ आ आफ फिनेहास बाक्त। फिनेहास आ आफ एलाजर बाक्त। एलाजर आ आफ नेल्ल क्येडा ठेयब चढेब हारून बाक्त।<sup>६</sup> मेको एजा बेबीलोन रागी रे जाक्त। मोसा रे पा गेशो, परमप्रभु यावे, इस्राएली आन परमप्रभु आ अरेशो लोत्र जोक्ब तुइक्ब बाक्त। मिनु पिपमी आ पुंडशो नेल्ल गेपु। मारदे हना आ परमप्रभु यावे आ गुड मेको आ तारी बाक्त। एजा ८:१८-२२; नेहेम्याह २:८

<sup>७</sup> आरता-सास्त पिप दुम्शो ७ बर्स जाक्दीम्मेनु, का निक्शी इस्राएली, का निक्शी चढेब, लेवी, कुम्सो पाइब, लाप्चोम खाल पाइब नु परमप्रभु आ खिंमी गेय पाइब मेको नु यरूसलेम लाम्तेक्म।<sup>८</sup> मिनु पिपमी सासन पशो ७ बर्स डा ५ महिना दुम्मेनु, मेकोपुकी यरूसलेममी जाक्दीत्तेक्म।<sup>९</sup> मिनु डोंइती डा महिना डा डोंइती डा नाक्तीमी बेबीलोन रागी रे यरूसलेम लचा गोम्तेक्म। मिनु मेकोपुकी ५ महिना डा डोंइती डा नाक्तीमी यरूसलेम जाक्तेक्म। मारदे हना परमप्रभु यावे, आ परमप्रभु आ शिशी पतीक गुड मेको आन तारी बाक्त।<sup>१०</sup> एजामी परमप्रभु यावे आ अरेशो लोत्र रुप्चा नु पचा कली आ थुं फ्रेंशो बाक्त। मिनु परमप्रभु आ फुल्लुम मुशा ब्रेक्शो नु आ ठीक पतीक लोत्र इस्राएलम शेंचा कली मिम्शो बाक्त।

### पिपम एजा कली ब्रेक्स गेशो

<sup>११</sup> मेको पिप आरता-सास्तमी चढेब एजा कली गेशो ब्रेक्स डा लोत्र एको बाक्ब “मेको एजा नेल्ल ब्रेक्स तुइक्ब, परमप्रभु यावेमी इस्राएली आन कली शेंशो नु फुल्लुम मुशा ब्रेक्शो लोत्र रुप्चा जोक्ब बाक्त।<sup>१२</sup> ‘पिप आन पिप आरता-सास्तमी स्वर्ग डा परमप्रभु आ अरेशो लोत्र जोक्ब तुइक्ब चढेब एजा कली थुं नाइश्शा बाक्को!’<sup>१३</sup> गो हुकुम का गेनन। मार हुकुम गेनन देंशा हना, आं रागीम बाक्शो इस्राएल डा मुर, चढेबपुकी नु लेवीपुकी यरूसलेममी सु सु लचा दाक्नीमी, मेको गे नु लने चाप्नीम।<sup>१४</sup> गो, पिप नु आं ७ जना अर्ती गेबपुकीमी इन कली यहूदा नु यरूसलेममी मार दुम्ना दुम्न बाक्मे, मेको कोत्रचा कली सोइश्शो बाक्नीकी। गे नु बाक्ब इन परमप्रभु आ अरेशो लोत्र पशो बाक्मा कों, मपशो बाक्मा, मेको कोत्रडो।<sup>१५</sup> गो, पिप नु आं ७ जना अर्ती गेबपुकीमी ग्येरशा गेशो सुन चांदी यरूसलेममी बाक्ब इस्राएली आन परमप्रभु कली लतीन।<sup>१६</sup> मिनु गे बेबीलोन रागी नेल्लेमी इ कली गेशो सुन चांदी लाइश्शा लने। मुर नु चढेबपुकीमी यरूसलेम सहरम बाक्ब आन परमप्रभु आ खिं कली ग्येरशा गेशो मार मार यो लतीन।<sup>१७</sup> मिनु मेको क्येटीमी यरूसलेममी इन परमप्रभु कली चढेतीकेमी चढेचा कली ब्यफ, सांड नु पाठापुकी ग्यापीन। मेको नु चढेचा कली अन्न नु तूचा थोत्रक यो ग्याप्चा माल्नीनी।<sup>१८</sup> मेको मोपा ग्याप्शा यो सुन चांदी हेंत हना, इन परमप्रभु आ दाक्स पा, गे नु इन लोक्बपुकीमी मार पशो नु रिम्शो लाक्नीनी, मेको पने चाप्नीनी।<sup>१९</sup> इन परमप्रभु आ खिंमी गेय पचा कली गेशो बोसपुकी, गे मेको यरूसलेममी परमप्रभु आ डोंइती वोइक्चा माल्नीनी।<sup>२०</sup> मिनु इन परमप्रभु आ खिं कली मारदे माल्ताक्व हना, मेको पिप आ क्येट वोइक्तीक रे शोल्शा, गेय पने चाप्नीनी।

<sup>२१</sup> गो, पिप आरता-सास्तमी, युफ्रेटीस आइक्वी हांबु डा रागी डा क्येट कोत्रशा वोइक्ब आन कली हुकुम गेतामी। नेल्ल आन कली ‘स्वर्ग डा परमप्रभु आ अरेशो लोत्र जोक्ब तुइक्ब चढेब एजामी इन कली मार पुंडतु हना यो, रीब पा गेने।<sup>२२</sup> सहे का टलेन्ट चांदी, सहे का कोर चेरब, सहे का बाथ अडगुर शांबु, सहे का बाथ तेल नु हिक्सी दोशो माल्नीमी मोशो गेन। टलेन्ट का ३४ किलो बाक्ब। कोर का २२० लिटर, ठेयब पुक्तीके बाक्ब। बाथ का २२ लिटर बाक्ब।<sup>२३</sup> स्वर्ग डा परमप्रभुमी मार अरेशो बाक्मे आ खिं कली मार माल्दा मेको रीब पा स्वर्ग डा परमप्रभु कली गेने। मो मदुस्त हना, आ गाइश्शो पिप आ राज्य नु आ तौ चच आन तार मोंइसीब।<sup>२४</sup> मिनु गो इन कली मार तुइक्पाइक्चा दाक्नीकी देंशा हना, चढेब, लेवी, कुम्सो

पाइब, लाप्चो खाल पाइब, परमप्रभु आ खिंमी गेय पाइब नु अरु गेय पाइब आन कली पिप कली गेतीक क्येट नु तिरो पोक्चा मताइनीम’ दे हुकुम गेनन्नी।

<sup>२५</sup> मिनु गे, एजा इ परमप्रभुमी इ कली तुइक्ब थुं गेशो बाक्त। मोपतीके युफ्रेटीस आइक्वी हांबु डा रागी कली हुकुम पाइब नु निसाफ पाइब योत्रशा वोइक्चा माल्नेवे। मेकोपुकीमी युफ्रेटीस आइक्वी हांबु डा मुर नेल्ल आन कली निसाफ पचा माल्नीम। मेको परमप्रभु आ अरेशो लोत्र तुइक्ब दुम्चा माल्नीम। गे म्नुइक्ब आन कली शेंचा माल्नेवे।<sup>२६</sup> इ परमप्रभु आ लोत्र मटीब नु पिप आ अरेशो मटीब, नेल्ल आन कली सजाइ गेचा माल्नीम। मेको आन कली साइक्चा पुंडसीचा डा, रागी रे तिल्चा पुंडसीतीके, मेको आन शोंप नेल्ल रोइक्चा पुंडसीतीके नु चोक्चा पुंडसीतीके, मार सजाइ हना यो गेचा माल्नीम” दे ब्रेक्शो बाक्त।

<sup>२७</sup> मिनु एजामी “परमप्रभु यावे, आंइ किंकी पिपी आन परमप्रभु, गे ठेयब बाक्नीनी। यरूसलेममी बाक्शो परमप्रभु यावे, इन खिं आ मान नु छेडछेड बारपाइक्चा कली पिप आ थुंमी मोदेंशो रिम्शो पतीके कुर पाइतीनी।<sup>२८</sup> मिनु पिप, आ अर्ती गेबपुकी नु गेय पाइब आन ठेयब मुरपुकीमी आं कली दाक्ब सेल्लनी” देंत। मारदे हना परमप्रभु यावे, आं परमप्रभु आ गुड आं तारी बाक्ब, दे तुइश्शा, आं थुं ठेयब सेल्ला। मिनु गो नु यरूसलेम लचा कली बेबीलोनम बाक्शो इस्राएली आन ठेयब मुर आन कली पुक्ताक्मी।

बेबीलोन रे लेश्शा जाक्ब आन नें

**८** पिप आरता-सास्तमी सासन पचा ना बेबीलोन रे गो नु लाइब खिं खिं डा ठेयब मुर आन नें ब्रेक्तीकेम ब्रेक्शो सु सु बाक्तेक्म देंशा हना, एजा ७:१, ७<sup>२</sup> फिनेहास आ चच युइ रे गेरशोम, इथामार आ चच युइ रे दानीएल, दाऊद आ चच युइ रे हत्तुश, इइतिहास ३:२२<sup>३</sup> शेकन्याह आ चच युइ, पारोश आ चच युइ, जकरिया नु नें ब्रेक्तीकेम नें ब्रेक्शो १५० जना वोंइश मुर, ४ पहाथ-मोआब आ चच युइ रे, जेराहीयाह आ तौ एली-ए-होएनाइ नु मेको नु २०० जना वोंइश मुर, एजा २:६<sup>५</sup> जत्तु आ चच युइ रे याहासीएल आ तौ शेकन्याह नु ३०० जना वोंइश मुर, ६ आदीन आ चच युइ रे योनाथन आ तौ एबेद नु ५० जना वोंइश मुर, ७ एलाम आ चच युइ रे अथाल्याह आ तौ येशायाह नु ७० जना वोंइश मुर, ८ शेफत्याह आ चच युइ रे मिकाएल आ तौ जेबदीयाह नु ८० जना वोंइश मुर, ९ योआब आ चच युइ रे येहीएल आ तौ ओबदिया नु २१८ जना वोंइश मुर, १० बानी आ चच युइ रे योसीफीया आ तौ शेलोमीथ नु १६० जना वोंइश मुर, एजा २:१०<sup>११</sup> बेबाइ आ चच युइ रे आ तौ जकरिया नु २८ जना वोंइश मुर, १२ अजगाद आ चच युइ रे हककातान आ तौ योहानान नु ११० जना वोंइश मुर, १३ नोले जाक्शो अदोनीकाम आ चच युइ रे एली-फेलेत, येहुएल नु शेमायाह नु ६० जना वोंइश मुर, १४ मिनु बिग्वाइ आ चच युइ रे उथाइ, जाक्कुर नु ७० जना वोंइश मुर बाक्तेक्म।

चढेब लेवी आन कली माल्शो

<sup>१५</sup> गो मेको मुर नेल्ल आन कली अहावा गे लाइब खोला आ नेक्थाम पुक्ताक्मी। मिनु गो मेकेर नाक्त सां सम्म बाक्तीक सेल्शा बाक्तक। मिनु गो मुर नु चढेब आन कली कोत्रडुमीनु, लेवी आ चच युइ काइ मबाक्म।<sup>१६</sup> मिनु गो मुर आन कली एलीएजर, अरीएल, शेमायाह, एल्नाथान, यारीब, एल्नाथान, नाथान, जकरिया नु मेशुल्लाम आन कली ब्रेथ सोइक्ताक्ड। मेको लेवी आन दातेमी ठेयब मुर बाक्तेक्म। जोक्ब तुइक्ब योयारीब नु एल्नाथान आस कली यो ब्रेथ सोइक्ताक्ड।<sup>१७</sup> मिनु गो कासीपीया डा ठेयब मुर इददो आ बाक्तीकेमी “लन” दे सोइक्ताक्डमी। मिनु मेको आन कली कासीपीयाम लशा, इददो मेको आ मुरपुकी नु मेकेर डा परमप्रभु आ खिंम गेय पाइब आन कली “आंइ परमप्रभु आ खिंमी गेय पचा कली गेय पाइबपुकी सोइक्तीन” दे माइक्थ सोइक्ताक्डमी।<sup>१८</sup> आंइ परमप्रभु आ शिशी पतीके गुड आंइ तारी बाक्त। मारदे हना मेकोपुकीमी जोक्ब तुइक्ब मुर का चाक्तेक्म। मेको इस्राएल आ तौ लेवी आ तौ माहली आ चच युइ शेरब्याह माइश्शो मुर बाक्त। मेको आ तौपुकी नु आ लोक्ब नेल्ल पा १८

जना वोंइश मुर चाक्तेक्म। एज्रा ७:६<sup>19</sup> मिनु मेकोपुकीम यो हशाब्याह, मेरारी आ चच युइ येशायाह नु मेको आ लोक्ब नु मेको आन तौ २० जना यो चाक्तेक्म।<sup>20</sup> मिनु मेको आन कली प्रोंइशा २२० जना परमप्रभु आ खिंमी गेय पाइब यो चाक्तेक्म। डोंइती दाऊद नु आ गेय पाइब ठेयब मुरपुकीमी लेवी आन कली वारच पचा कली योव्रशा वोइश्शो बाक्त। मेको नेल्ल आन नें नें ब्रेक्तीकेम ब्रेक्शो बाक्तेक्म। *इइतिहास ९:२*

माइजा बाक्शा, पुंडशो लोव

21 मिनु गो अहावा खोलाम बाक्कानु, गो मुर आन कली “परमप्रभु कली पुंडचा कली गो माइजा बाक्वा मालन्य” देंती। “परमप्रभु आ डोंइती आंड दाक्शो मपथु, आंड कली, आंड आल आन कली नु आंड शोंप कली लाम रिश्शो दुम्ल” दे परमप्रभु कली पुंडतक।<sup>22</sup> गो आंड कली लाम आंड जोरी सत्रु रे प्रोंइचा कली लडाइ पाइब नु शारा डोइक्बपुकी सोइक्तीकी, दे पिप कली पुंडचा मुने पाता। मारदे हना गोपुकीमी पिप कली “आंड परमप्रभुमी आ नोले खोइक्ब नेल्ल आन कली कोव्रब। तन्न मेको कली प्रोंइब आन कली आ गाइश्शो कोंइब” देंशो नड।<sup>23</sup> मिनु गो आंड रिश्शो पा गाक्तीक आ पर्वम माइजा बाक्शा, आंड परमप्रभु कली पुंडतक। मिनु परमप्रभुमी आंड पुंडशो नेंतु।

परमप्रभु आ शोंप जिम्मा गेशो

24 मिनु गो ठेयब चढ़ेब आन दाते रे १२ जना आन कली योव्रतामी। मेको सु सु बाक्तेक्म देंशा हना, शेरैब्याह नु हशाब्याह नु मेको आस लोक्ब १० जना बाक्तेक्म।<sup>25</sup> मिनु पिप आ अर्ती गेब, मेको आ गेय पाइब ठेयब मुरपुकी नु मेकेर बाक्ब इस्त्राएली नेल्लेमी परमप्रभु आ खिं कली गेशो सुन चांदी नु अरु बोसपुकी नाक्शा, मेको आन कली गेतामी।<sup>26</sup> गो मेको आन कली ६ सहे ५० टलेन्ट चांदी, अरु सहे का टलेन्ट डा चांदी के बोस नु सुन सहे का टलेन्ट, *टलेन्ट का ३४ किलो बाक्ब।*<sup>27</sup> सुन के बोस २० ओटा, मेको नेल्ल हजार का आदारकोन डा बाक्नीम। नु सुन खोदेंशो रिश्शो कांसा के बोस निक्शी यो गेतामी। *आदारकोन सुन के क्येट बाक्ब। टुक्रा का ८.४ ग्राम बाक्ब।*

28 मिनु गो मेको आन कली “गे परमप्रभु यावे आ मुर बाक्नीनी। एको बोस यो परमप्रभु यावे आ बोस बाक्नीम। मुरपुकीमी एको सुन नु चांदी इन किकी पिपी आन परमप्रभु कली ग्येरशा गेशो बाक्नीम।<sup>29</sup> गे मेको नेल्ल कली रिश्शो कोव्रडीन। यरूसलेम परमप्रभु यावे आ खिंमी ठेयब चढ़ेबपुकी, लेवी नु इस्त्राएली आन खिं खिं डा ठेयब मुर आन डोंइती नाक्शा मगेशो सम्म होस पा कोव्रडीन” दे माइक्तामी।

30 मिनु मेको चढ़ेब नु लेवीपुकीमी यरूसलेमम बाक्शो आंड परमप्रभु आ खिंमी लाइक्वा कली मेको नाक्शो सुन चांदी नु बोसपुकी ताक्तेक्म।

इस्त्राएलीपुकी यरूसलेम जाक्शो

31 मिनु गो डोंइती डा महिना डा १२ नाक्तीमी यरूसलेम लचा कली अहावा खोला रे गाक्तक। मिनु आंड परमप्रभु आ गुइ आंड तार बाक्त। मेकोमी पतीके जोरी सत्रु नु लाम बाप्शा बाक्ब रे ब्रोंइतक।<sup>32</sup> मिनु गो यरूसलेम जाक्शा नाक्त सां सम्म नाइसाक्क।

परमप्रभु आ खिं डा शोंप चाक्शो

33 मिनु आ दीसा मेको सुन चांदी नु बोसपुकी, आंड परमप्रभु आ खिंमी लाइश्शा, चढ़ेब उरीयाह आ तौ मेरेमोथ कली नाक्शा गेतक। मेको नु फिनेहास आ तौ एलाजर यो बाक्त। मिनु मेको निक्शी नु लेवी आन दाते डा येशुआ आ तौ योजाबाद नु बिन्नुइ आ तौ नोआदीयाह यो बाक्ताक्सा।

34 मेको नेल्ल हिक्शा नाक्शा ब्रेक्शा वोइक्तेक्म।

जाक्बपुकीमी चोशा चढ़ेशो

35 लेश्शा जाक्शो ग्याइश्शा लाइक्वा पुंडसीब इस्त्राएलीपुकीम आन परमप्रभु कली चोशा चढ़ेक्तेक्म। इस्त्राएली नेल्ल आन पर्वम १२ ओटा ब्यफ, १६ ओटा सांड, ७७ ओटा पाठा नु पाप आ पर्वम चढ़ेतीके चढ़ेचा कली १२ ओटा बोका चढ़ेक्तेक्म। मेको नेल्ल परमप्रभु यावे कली चोशा चढ़ेतीके बाक्तेक्म। एज्रा ६:१७<sup>36</sup> मेकोपुकीमी पिपमी ब्रेक्शा अरेशो लोव युफ्रेटीस आइक्ची हांबु डा रागी डा पिप आ गेय पाइब नु हुकुम पाइब आन कली गेक्तेक्म। मिनु मेकोपुकीमी मुर आन कली नु परमप्रभु आ खिं कली ठेयब वारच पाइक्तेक्म।

इस्त्राएली आन मरिश्शो पशो

9 मिनु मेको नेल्ल पने थुम्शो नोले का निक्शी योव्रचा पुंडसीशो मुरपुकी आं बाक्तीकेम जाक्शा “इस्त्राएल डा मुरपुकी, चढ़ेब नु लेवीपुकीमी, कनानी हिंती, परिज्जी, यबुसी, अम्मोनी, मोआबी, इजीप्ती नु एमोरी आन ग्रान्ग्रा दिशो गेय रे डोन मद्दुश्शो बाक्नीम।<sup>2</sup> मेकोपुकीमी मेको आन तमी आंम कली नु आन तौ आन कली मीश चाक्शो बाक्तेक्म। मोदेंशो पा परमप्रभु आ आंम मुरपुकी अर्को रागी डा मुरपुकी नु खाल्साक्म। मिनु योव्रचा पुंडसीशो ठेयब मुर नु सासन पाइब आन परमप्रभु आ देंशो मपथु, शुश दोस ताइब बाक्नीम” देंतेक्म। *ब्यक्स्था ७:३; ब्यक्स्था २३:३; गन्ती ११:१७-२५; नेहेम्याह १३:२३*<sup>3</sup> मिनु गो मेको लोव नेंशा आं फेक्शो वा खाक्ता। आं चां नु गल शोक्रे तुल्ला। मारेइ लोव पने मचाप्थु, सिक्सी पा बाक्ती।<sup>4</sup> मेको ग्याइश्शा लाइक्वा पुंडसीब आन मरिश्शो पतीके आ पर्वम इस्त्राएली आन परमप्रभु आ लोव कली मान पा हिंभपुकी आं बाक्तीकेम एर ओंथ बुक्तेक्म। मेकेर रे गो नाक्दो डा चढ़ेतीक सम्म मारेइ लोव पने मचाप्थु, सिक्सी पा बाक्ती।

एज्रामी परमप्रभु कली पुंडशो

5 मिनु नाक्दो डा चढ़ेतीक दुम्मेनु, आं खाक्शो वा फेक्शा, गो पोक्च थेक्शा, आं गुइ परमप्रभु यावे, आं परमप्रभु गे दिंशा<sup>6</sup> “आं परमप्रभु, गो इन कली आं कुल कोंइचा थाम्पा मुने पाता। मारदे हना आंड मरिश्शो पतीके आंड पिया क्येडा यो लाक्शो बाक्ब। मिनु आंड दोस सरीड सम्म जाक्दीशो बाक्ब। *दानीएल ९:७-८*<sup>7</sup> गो आंड किकी पिपी रे मुलाक्त डा नाक्त सम्म आंड दोस थम ठेयब बाक्ब। आंड काइ मरिश्शो पतीके आंड पिप नु चढ़ेबपुकी अर्को रागी डा पिप आन गुइमी साइक्वा, चोक्वा, मारेइ मारेइ रोइक्वा पुंडसीचा नु शुश मुने तोक्वा पुंडसाक्म। मिनु गोपुकी यो सिनाक्त मुलाक्त मोदेंशो दुम्शो बाक्नीकी।<sup>8</sup> तन्न मुल परमप्रभु यावे, आंड परमप्रभुमी आंड कली का निक्शी लीशो मुर गेतीनी। आंड वाइल दुम्तीक रे इक्का नाक्त कली नाइक्वा गेतीके आंड परमप्रभु आ बाक्तीकेमी बाक्वा ताइतक। याम का कली आंड कली शिशी पा ग्येरपाइक्तीनी।<sup>9</sup> गो वाइलीम वाइल बाक्तक हना यो, आंड परमप्रभुमी आंड कली मप्रोंइशो बाक्ब। पारसी रागी डा पिप आ डोंइती इन गेना हना यो दाक्तीके कोंइशो बाक्तीनी। आंड कली नक ब्रोंइचा गेशा, आंड परमप्रभु आ खिं लेंशा सेल्चा कली नु ब्रेश्शो नेल्ल लेंशा सेल्चा कली नु यहूदा नु यरूसलेम एर ओंथ गारो प्रोव्रचा गेतीनी।

10 मोदेंशो बाक्त हना यो, आंड परमप्रभु, मुल गो मार देंने चाप्कीकी? गोपुकीमी इन शेंशो मटिथु, प्रोंइतक।<sup>11</sup> गो इन लोव पाइब रे मार लोव पपाइक्तीनी देंशा हना ‘इन के सेल्चा कली ओव्रशो रागी ग्रान्ग्रा दिशो बाक्त। मारदे हना मेको रागी डा मुर आन ग्रान्ग्रा दिक्वा डा गेयमी मेको रागी डा कुना कुना नेल्ल ब्रीशो बाक्त। *लेवी १८:२४-२५*<sup>12</sup> मोपतीके गेपुकीमी इन तमी मेको आन तौ आन कली ग्युंवे पा मगेन। इन तौ आन कली मेको आन तमी नु ग्युंवे पा मचाक्कीन। मिनु गेपुकीमी मेको आन कली रिश्शो दुम्वा नु दारचा कली वारच मपने। मोपा गेपुकी शुश बोल्यो दुम्शा, मेको रागी डा रिश्शो थोव्रक जचा ताइनीनी। मिनु गे मेको रागी इन चच युइ आन कली गेना हना यो आन के दुम्पाइश्शा वोइक्नीनी’ दे लोव पपाइक्तीनी।<sup>13</sup> गोपुकीमी आंड मरिश्शो पतीके नु आंड ठेयब दोस आ पर्वम श्येत जशो बाक्तक। मो हना यो

आंइ परमप्रभुमी आंइ तचा माल्शो वयेडा इच्का ला सजाइ गेतीनी। मिनु आंइ कली ब्रॉइचा गेतीनी।<sup>14</sup> गो लेंशा इन शेंशो लोव्र मटिथु, मेको ग्रांघा दिशो गेय पाइब नु ग्युंवे पाइनीकी डा? गे गोपुकी नु चुरशा, आंइ कली मसाइक्नीनी डा? मिनु ब्रॉइशा बाक्ब सुइ मलीब।<sup>15</sup> परमप्रभु यावे, इस्राएली आन परमप्रभु गे ठीक पाइब बाक्नीनी। मुल गो इच्का खोइ लीशो बाक्नीक। गो आंइ मरिश्शो पतीकेमी इन डॉइती बाक्नीकी। मो हना यो गो इन डॉइती पिपा पोक्ने मचाप्नीकी” देंती।

आन थुं परमप्रभु गे लेश्शो

10 एज्रा परमप्रभु आ खिं आ डॉइती गु बाष्ठा, आन मरिश्शो पशो नेल्ल शोवशा, डाक्ना डाक्न बाक्शो बाक्त। मिनु ठेयब हुल का इस्राएली वॉइश मुर, मीश मुर नु आलपुकी एज्रा आ एर ऑथ बुक्तेक्म। मिनु मेको यो शुश डाक्तेक्म।<sup>2</sup> मिनु एलाम आ चच युइ डा येहीएल आ तौ शेकन्याहमी एज्रा कली “गो आंइ परमप्रभु कली मटिथु, एको रागी डा अर्को जात डा मीश आल ग्युंवे पा चाक्तक। मोदेशो पाइतक हना यो, इस्राएली आन कली आस पतीके बाक्ब।<sup>3</sup> मोपतीके मुल आंइ परमप्रभु नु कबल का पय। आ प्रभु नु परमप्रभु आ शेंतीक मान पा हिंशा टीब आन देशो खोदेशो पा एको मीश मुर नु आन आल नेल्ल आन कली प्रॉइशा सोइक्वा कली लोव्र थोक्तय। मिनु परमप्रभु आ अरेशो लोव्रम देशो खोदेशो पय।<sup>4</sup> मिनु मुल बोक्कीन। एको गेय नेल्ल इन के बाक्ब। गो इन कली वारच पाइनीकी। मोपतीके थुं बारपाइश्शा गेय पने” देंत।

कसम जपाइश्शो

<sup>5</sup> मोपतीके एज्रा बोक्शा, ठेयब चढेबपुकी, लेवीपुकी नु नेल्ल इस्राएली आन कली “डॉइती देशो लोव्र पाइनीक” दे कसम जपाइक्तीमी। मिनु मेकोपुकीमी कसम जाक्तेक्म।<sup>6</sup> मिनु नोले एज्रा परमप्रभु आ खिं आ डॉइती रे बोक्शा, एल्याशीब आ तौ येहो-हानान आ कोठाम लत। मिनु मेकोमी शोब्ले मजव ब्वाक्कु यो मत्तुड। मारदे हना ग्याइश्शा लाइक्वा पुंइसीब आन मटितीके आ पबंम सुर्ता पना पन बाक्त।

<sup>7</sup> मिनु यहूदा नु यरूसलेमम बाक्ब लेश्शा जाक्शो ग्याइश्शा लाइक्वा पुंइसीब नेल्ल यरूसलेमम बुक्मल, दे नेंपाइक्तेक्म।<sup>8</sup> मिनु हुकुम पाइब नु खाल्पापुकीमी “सुइ मुर नाक्त सां सम्ममी मजाक्त हना, मेको आ शोप नेल्ल रोइक्वा पुंइसीब। मिनु लेश्शा जाक्शो ग्याइश्शा लाइक्वा पुंइसीब आन दाते रे तिल्वा पुंइसीब” दे यहूदा नु यरूसलेम डा तेइ तेइ लोव्र सोइक्ताक्म।

<sup>9</sup> मिनु यहूदा नु बेन्यामीन डा मुर नेल्ल नाक्त सां यरूसलेममी बुक्तेक्म। मेको ९ महिना डा २० नाक्तीम बाक्त। मुर नेल्ल परमप्रभु आ खिं डा लाइगाम निस्साक्म। मेको नेल्ल लोव्र नु ठेयब ठेयब रेउ आ पबंम खिंखिं पाक्तेक्म।<sup>10</sup> मिनु चढेब एज्रा बोक्शा मेको आन कली “गेपुकीमी अर्को जात डा मीश आल ग्युंवे पा चाक्तीनी। इस्राएली आन दोस तेम्ताक्नी।<sup>11</sup> मुल गे परमप्रभु यावे, इन किकी पिपी आन परमप्रभु आ डॉइती इन मरिश्शो पशो शोवडीन। मिनु आ दाक्शो पने। गे मेको रागी डा मुर नु अर्को जात डा मीश रे ब्राडीन” दे मेको आन कली माइक्तीमी।<sup>12</sup> मिनु मेकेर बुक्शो मुर नेल्लेमी ठेयब सेंदामी “इन देशो थमा बाक्ब। गोपुकीमी इन देशो खोदेशो पचा माल्नीकी।<sup>13</sup> तन्न गो एकेर शुश मुर बाक्नीकी। रेउ यिना यिन बाक्ब। मिनु गो हाक्सीतीकेमी राष्ठा बाक्ने मचाप्नीकी। एको गेय काबु निक्बुम मथुम्सीब। मारदे हना आंइ दातेमी शुश मुरुम मोदेशो मरिश्शो

पाक्तेक्म।<sup>14</sup> गे आंइ ठेयब मुरपुकीमी यरूसलेमम मेको लोव्र नेंपतीन। मिनु सु सुमी आंइ सहरम अर्को जात डा मीश चाक्गमे, मेको सहर डा खाल्पा नु निसाफ पाइब आन डॉइती देशो ना जाक्वा माल्नीम। आंइ परमप्रभु आ थाम्पा गाइश्शो मनाइसे सम्म मोदेशो पने” दे ठेयब सेंदामी लोव्र लेत्ताक्म।<sup>15</sup> मिनु आसाहेल आ तौ योनाथन नु तिकवाह आ तौ याहजैयाह मबिस्सस। मेशुल्लाम नु शब्बेथाइ लेवी निक्शीमी मेको आस कली वारच पाइक्ताक्म।

<sup>16</sup> मिनु नोले लेश्शा जाक्शो ग्याइश्शा लाइक्वा पुंइसीबपुकीमी मार पाक्तेक्म देशा हना, चढेब एज्रा कली खिं खिं डा ठेयब मुर आन कली मेको गेय पपाइक्वा कली नें ब्रेक्शा योव्रपाइक्तेक्म। मिनु मेकोपुकीमी १० महिना डा डॉइती डा नाक्त रे मेको गेय पचा गोक्तेक्म।<sup>17</sup> मिनु डॉइती डा महिना डा डॉइती डा नाक्ती अर्को जात डा मीश नु ग्युंवे पाइब नेल्ल सु सु बाक्मा तुइक्ने थुक्तेक्म।

अर्को जात डा मीश चाक्ब आन नें

<sup>18</sup> मिनु अर्को जात डा मीश ग्युंवे पाइबपुकीमी, चढेबपुकीमी योसादाक आ तौ येशुआ आ चच युइ रे नु आ लोक्ब रे मासेयाह एलीएजर, यारीब नु गेदाल्याह बाक्तेक्म। एज्रा ३:२<sup>19</sup> मेकोपुकी आन मीश रे ब्रातेक्म। मिनु आन दोस क्याम्वा कली आन बगाल रे सांड का का चढेचा कली चाक्तेक्म।<sup>20</sup> इम्मर आ चच युइ रे हनानी नु जेबदीयाह,<sup>21</sup> हारीम आ चच युइ रे मासेयाह, एलीया, शेमायाह, येहीएल, नु उज्जीयाह बाक्तेक्म<sup>22</sup> पश्हुर आ चच युइ रे एली-ओ-एनाइ, मासेयाह, इश्माएल, नेथनेल, योजाबाद नु एलासाह बाक्तेक्म।<sup>23</sup> लेवीपुकी रे योजाबाद, शिमेइ, केलीता माइश्शो केलायाह, पेथायाह, यहूदा नु एलीएजर बाक्तेक्म। नेहेम्याह ८:७; नेहेम्याह १०:११

<sup>24</sup> कुम्सो पाइबपुकी रे एल्याशीब, लाप्चो खाल पाइबपुकीमी शाल्लुम, तेयलेम नु ऊरी बाक्तेक्म।<sup>25</sup> मिनु इस्राएल डा पारोश आ चच युइ रे राम्याह, इज्जीयाह, माल्कीयाह मियामीन, एलाजर, हशाब्याह नु बेनायाह बाक्तेक्म।<sup>26</sup> एलाम आ चच युइ रे मत्तन्याह, जकरिया, येहीएल, अब्दी, येरेमोथ, नु एलीया बाक्तेक्म।<sup>27</sup> जत्तु आ चच युइ रे एली-ओ-एनाइ, एल्याशीब, मत्तन्याह, येरेमोथ, जाबाद नु अजीजा बाक्तेक्म।<sup>28</sup> बेबाइ आ चच युइ रे येहो-हानान, हनान्याह, जब्बै नु आथ्लै बाक्तेक्म।<sup>29</sup> बानी आ चच युइ रे मेशुल्लाम, माल्लुक, अदायाह, याशुब, शेआल नु येरेमोथ बाक्तेक्म।<sup>30</sup> पहाथ-मोआब आ चच युइ रे अदना, केलाल, बेनायाह, मासेयाह, मत्तन्याह, बेचालेल, बिन्नुइ नु मनस्से बाक्तेक्म।<sup>31</sup> हारीम आ चच युइ रे एलीएजर, इस्शीयाह, माल्कीयाह, शेमायाह, शिमेओन,<sup>32</sup> बेन्यामीन, माल्लुक नु शेमारयाह बाक्तेक्म।<sup>33</sup> हाशुम आ चच युइ रे मत्तताह मतेनाइ, जाबाद, एली-फेलेत, येरेमाइ, मनस्से नु शिमेइ बाक्तेक्म।<sup>34</sup> बानी आ चच युइ रे मा-अदाइ, अग्राम नु ऊएल,<sup>35</sup> बेनायाह, बेदेयाह, केलुही,<sup>36</sup> वान्याह, मेरेमोथ, एल्याशीब,<sup>37</sup> मत्तन्याह, मतेनाइ नु यासु बाक्तेक्म।<sup>38</sup> बिन्नुइ आ चच युइ रे<sup>39</sup> शिमेइ, शेलेम्याह, नाथान नु अदायाह,<sup>40</sup> माक-नादेबाइ, शाशाइ, शाराइ,<sup>41</sup> अजारेल, शेलेम्याह, शेमारयाह,<sup>42</sup> शाल्लुम, अमारयाह नु योसेफ बाक्तेक्म।<sup>43</sup> नेबो आ चच युइ रे यिएल, मत्तीथ्याह, जाबाद, जेबीना, यददाइ, योएल नु बेनायाह बाक्तेक्म।<sup>44</sup> मेको नेल्लेमी अर्को जात डा मीश ग्युंवे पशो बाक्तेक्म। मिनु मेकोपुकीमी आन मीश नु आन आल प्रॉइशा सोइक्ताक्म।

## नेहेम्याह

एको किताब नेहेम्याह आंमान इच्का ब्रेक्शो बाक्त। तन्न नोले सुमी मेको आ ब्रेक्शो नु एज्रा आ ब्रेक्शो किताब का सेला मतुंडसीब। डोंइती एज्रा नु नेहेम्याह किताब का बाक्शो बाक्त। मेको कली ग्रीक लोवमी सेल्शा, मेको किताब का रे निक्शी सेल्शो बाक्तेक्म।

४४६ बि. सी.म नेहेम्याहमी यरूसलेम आ पर्वम लोव नेंशो। ४४५ बि. सी.म नेहेम्याह यरूसलेम लशो। ४४५-४३३ बि. सी.म सुसा सहर लेशो। ४३३ बि. सी.म नेहेम्याह लेंशा यरूसलेम लशो।

एको किताबमी १इतिहास नु २इतिहासम ब्रेक्शो नेल्ल दुश्शो नोले डा रागी डा इतिहास बाक्ब। यरूसलेम सहर डा ब्रेक्शो गारो ५२ नाक्तीमी लेंशा प्रोवशो आ पर्वम ब्रेक्शो बाक्ब।

### नेहेम्याह आ पुंडशो लोव

१ एको हाकाल्याह आ तौ नेहेम्याह आ लोव बाक्ब। २० बर्स डा किस्लेव महिनामी गो सुसा डा दरवारम बाक्ती।

२ मेना आं लोक्ब हानानी, का निक्शी मुर नु यहूदा रागी रे जाक्त। मिनु गो मेको आन कली “प्रोक्शा, गाक्शो नु ग्याइश्शा, लाइक्वा मपुंडसीशो रे लीशो यहूदीपुकी दोदेशो बाक्नीमी? यरूसलेम दोदेशो तांडसीबा?” दे हिल्लो पातामी। ३ मिनु मेकोपुकीमी आं कली “ग्याइक्वा मपुंडसीशो मेक उड लीशोपुकीमी शुश श्येत जशा, खेदा पचा पुंडसीना सीन बाक्नीम। यरूसलेम डा गारो ब्रेक्शो बाक्ब। मेकेर डा ठेयब लाप्चोपुकी मीम दुप्शो बाक्नीम” देंतेक्म। २इतिहास ३६:१९ ४ मिनु गो मेको लोव नेंशा निश्शा, सुर्ता पा, शुश नाक्त सम्म डाक्ना डाक्न बाक्ती। मजथु स्वर्ग डा परमप्रभु कली एज्रा ९:३ ५ “परमप्रभु यावे, स्वर्गम बाक्ब परमप्रभु, गे नेल्ल क्येडा ठेयब नु मान पा हिंचा माल्शो परमप्रभु बाक्नीनी। इन कली दाक्शा, इन अरेशो लोव टीब आन कली शिशी पाइब नु कबल खाप्ब बाक्नीनी। दानीएल ९:४ ६ गो, इन वाइल, इस्राएली आन पर्वम नाक्दो नाक्त पुंडनुड। आं पुंडशो लोव नेंचा कली गे इन नोफा दाइक्तीन। मिनु आं गे कोवडीन। गो, इस्राएली नु आं आफ आ खिं डा मुर नेल्लेमी इन डोंइती मरिश्शो पाइतक। मिनु गो यो पाप पाता। ७ गे इन वाइल मोसा कली शेंतीक गेतीनी। गोपुकीमी चहिं मेको इन गेशो फुल्लुम मुशा ब्रेक्शो लोव नु इन ठीक पतीक लोव मटिथु, इन डोंइती मरिश्शो पाइतक। ८ मिनु गे इन वाइल मोसा कली ‘गे आं देंशो मटीतीनी हना, गो इन कली रागी रागी डा मुर आन दातेमी फ्राइनन्नी’ देंतीनी। ब्यवस्था ४:२७ ९ तन्न ‘आं गे लेत्तीनी, आं शेंतीक लोव नेंशा टीतीनी हना, गो इन कली डोन डोन रागी मेर फ्राइतन्नी हना यो, खुप्नन्नी। इन कली खुप्शा, आं नें ठेयब सेल्चा कली आं योवशो रागीमी चाक्नन्नी’ दे इन डोंइती पशो लोव मिन्तीन। ब्यवस्था ३०:४-९ १० मिनु मेकोपुकी इन वाइली नु इन रागी डा मुर बाक्नीमी। डोंइती गे मेको आन कली इन ठेयब सक्ति नु इन बोल्यो गुइमी प्रोंइशो बाक्तीनी। ११ परमप्रभु, इन नोफा दाइक्तीन। मिनु इन नें कली मान पचा दाक्ब इन वाइल आन पुंडशो लोव यो नेनीन। मुलाक्ती आं पुंडशो खपीन। पिप आ डोंइती गो शिशी तडल” दे पुंडता। मेना गो पिप कली तूचा गेब आन ठेयब मुर बाक्ती।

### नेहेम्याह आ पुंडशो तशो

२ आरता-सास्त पिप दुश्शो २० बर्स जाक्दीश्शो बाक्त। मिनु काबु निसान महिनामी पिप आ अडगुर शांबु ठीक पा लाइश्शा, पिप कली खेत्ताक्ड। गो सुर्ता पशो नड। पिपमी मेको क्येडा डोंइती आं कली सुर्ता पशो गेनायो मतशो बाक्त। २ मिनु पिपमी “मारदे इ कुल राव किक्पदी? गे रोड पशो मबाक्नेवे, इ थुं दोक्शो तांडसीब” देंत। मो देंमेनु, गो शुश हिंती। ३ मिनु “हजुर, गेना हना यो ब्रोंइशा बाक्कीन। आं किकी पिपी आन कली थिश्शो सहर, खतम दुश्शो बाक्ब। मिनु गारो डा ठेयब लाप्चो मीम दुप्शो

बाक्नीम। मिनु गो दोपा सुर्ता मपाइनुडा डा?” देंती। ४ मिनु पिपमी “गे मार माल्नेवे?” दे हिल्लो पती। मिनु गो आं थुमी स्वर्गम बाक्ब परमप्रभु कली लोव पाता। ५ मिनु गो पिप कली “गे दाक्नीनी नु इन शिशी ताता हना, आं किकी पिपी थिश्शो, यहूदा रागी डा सहर कली लेंशा सेल्थ सोइक्तीनी” देंती। ६ मेना पिपीम पिप नु निश्शो बाक्त। मिनु पिपमी “मो पचा कली गिश नाक्त माल्नेवे? मिनु गेना लेश्शा जाक्नेवे?” दे हिल्लो पती। मिनु गो आं माल्शो नाक्त देंती। मिनु पिपम आं देंशो बिश्शा लचा गेती। ७ मिनु गोमी पिप कली “गे रिश्शो लाक्नीनी हना, युफ्रेटीस ठेयब खोला आ आइक्वी हांबुमी सासन पाइब मुर आन कली, आं कली यहूदा रागी सम्म ग्रीशा लचा गेचा कली ब्रेक्स का ब्रेक्शा गेयीनी। ८ मिनु परमप्रभु यावे आ खिं आ नेक्था डा बोल्यो खिं कली लाप्चो कली, सहर डा गारो डा ठेयब लाप्चो आन कली, नु आं बाक्तीक खिं कली शी माल्नुड। इन ब्वाकी कोवब आसाफ कली आं माल्शो शी गेचा, दे यो ब्रेक्स का ब्रेक्शा गेयीनी” दे पुंडता। मिनु पिपमी आं पुंडशो नेल्ल गेती। मारदे हना आं परमप्रभु आ शिशी आं तारी बाक्त। एज्रा ७:६

९ पिपमी आं कली वारच पाइक्वा कली सिपाइ आन ठेयब मुरपुकी नु शारा डोइक्बपुकी यो गो नु काथा सोइक्ताक्व। मिनु युफ्रेटीस, ठेयब खोला आ आइक्वी हांबु डा ठेयब मुर आन बाक्तीक जाक्दीश्शा, पिप आ ब्रेक्सपुकी गेतामी। १० मिनु होरोनी सान्बल्लत नु आ गेय पाइब अम्मोनी तोबीयाह, निम्फा “इस्राएली आन कली रिश्शो पाइब का जाक्शो बाक्ब” देंशो नेंशा, थाम्पा चुरताक्स।

### नेहेम्याह यरूसलेम जाक्शो

११ मिनु गो यरूसलेम जाक्शा, नाक्त सां सम्म मेकेर बाक्ती। १२ मिनु नोले गो नाक्दो बोक्शा, का निक्शी मुर नु गारो कोवत्र लती। तन्न आं परमप्रभुमी आं थुमी यरूसलेम आ पर्वम वोइश्शो लोव सुइ आन कली मशेंदुमी। मिनु गो आं डोइश्शो शारा डा लाक्शा, अरु शारा मलदु। १३ मेको नाक्दो गो बेंसी लाप्चो रे ठेयब बुस्स माइश्शो ब्वाक्कु बुक्तीके नु मोवल लाप्चो गे लती। मिनु यरूसलेम डा ब्रेक्शो गारो नु मीम दुप्शो ठेयब लाप्चोपुकी कोवतामी। १४ मेकेर रे पा ब्वाक्कु बुक्तीक लाप्चो नु पिप दोम्ली गे लती। तन्न आं शारा कली गाक्तीक लां मबा। नेहेम्याह ३:१५ १५ मिनु गो मेको नाक्दो बेंसी रे ग्येथ डोइश्शा, गारो कोवतामी। मिनु लेश्शा, लेंशा बेंसी लाप्चो रे सहर जाक्ती। १६ मिनु सहर डा ठेयब मुरपुकीम गो ते लडा नु मार पडा, मारदे मतुइक्तेम। मारदे हना गो मेना सम्म यहूदी, चढ़ेब, मान ताइब, ठेयब मुर नु अरु आन कली मारदेइ मशेंदुमी।

### नेहेम्याहमी मुर आन थुं बारपाइश्शो

१७ मिनु मेको नोले गो सहर डा मुर नेल्ल आन कली “गे गो आंइ खतम दुश्शो नेल्ल तुइक्तीनी। यरूसलेम यो खतम दुश्शो बाक्ब। मिनु गारो डा ठेयब लाप्चोपुकी मीम दुप्शो बाक्नीम। लो, गो नेल्ल गारशा, यरूसलेम डा

गारो सेल्शा, आंइ मुने साम्य” दे माइक्तामी। 18 मिनु आं परमप्रभु आ शिशी आं तारी बाक्तीके नु पिपमी आं कली देंशो लोव्र यो मेको आन कली शेंताक्डमी। मिनु मेकोपुकीमी “लो, गो एको गेय पय” दे ग्येरशा, आन थुं बारपाइक्तेक्म।

19 मिनु होरोनी सान्बल्लत, आ गेय पाइब अम्मोनी तोबीयाह नु अराबी गेशेममी चहिं एको लोव्र नेंशा, आंइ कली शुक्शी पा ठेयब लेश्शा “गे मार पाइनीनी, हां? पिप आ सासन प्रॉइचा माल्नी?” दे हुइक्ताक्की। 20 मिनु गो मेको आन कली “स्वर्गम बाक्ब परमप्रभुमी आंइ कली गारो सेल्चा गेब। मिनु गो परमप्रभु आ वाइलपुकीमी गारो प्रोव्रनीकी। यरूसलेममी इन खिं मबाक्ब, एकेर मारेइ यो पशो मबाक्नीनी। मिनु इन कली ते खाइक्नी?” दे मेको आन कली माइक्तामी।

यरूसलेम डा गारो प्रोव्रचा गोशो

3 नेल्ल क्येडा ठेयब चढेब एल्याशीब नु चढेबपुकीमी भेडा लाचो सेल्लेक्म। मिनु ठेयब लाचो सेल्ले थुम्शा “परमप्रभु के बाक्ब” दे थारतेक्म। मिनु मेकोपुकीमी मेआ माइश्शो लाइश्शो खिं नु हानानेल माइश्शो लाइश्शो खिं सम्म गारो प्रोव्रना प्रोव्रन “परमप्रभु के बाक्ब” दे वोइक्तेक्म। *नेहेम्याह १२:१; येरमीया ३१:३८* 2 मिनु मेकेर रे बोइश्शा, यरीको डा मुरपुकीमी प्रोव्रतेक्म। मिनु मेकेर रे बोइश्शा, इम्री आ तौ जाक्कुरमी प्रोव्रतु।

3 मिनु हास्सेनाह आ तौपुकीमी डांइ लाचो सेल्लेक्म। मेकोपुकीमी ठेयब लाचो डा शी वोइश्शा, ठेयब लाचो थारशा, लाचो नु चोक्तीके आग्लो वोइक्तेक्म। 4 मिनु मेकेर रे बोइश्शा, हककोस आ तौ उरीयाह आ तौ मेरेमोथमी गारो प्रोव्रतु। मिनु मेकेर रे बोइश्शा, मेशेजाबेल आ तौ बेरेक्याह आ तौ मेशुल्लाममी सेल्लु। मेकेर रे बोइश्शा, बाना आ तौ सादोकमी प्रोव्रतु। 5 मेकेर रे बोइश्शा, तेकोहा आ मुरपुकीमी प्रोव्रतेक्म। मेको आन ठेयब मुरपुकीम चहिं “गो गारो प्रोव्रतीक गेय पचा आंइ कली मशिरब” दे गारो मप्रोव्रडेम।

6 माइत गारो डा ठेयब लाचो पासेआह आ तौ यो-यादानु बेसोदैयाह आ तौ मेशुल्लाममी सेल्लाक्स। मेकोमी ठेयब लाचो डा शी वोइश्शा, लाचो थारशा, पाइक्तीक नु चोक्तीके आग्लो वोइक्तेक्म। 7 मेकेर रे बोइश्शा, गिबोन डा मेलत्याह नु मेरोनोथ डा मुर यादोन, गिबोन नु मिस्पा डा मुरपुकीमी प्रोव्रतेक्म। मेकोपुकी युफ्रेटीस आंथ हांबु डा जिल्ला डा सासन पाइब आ हुकुममी बाक्तेक्म। 8 मेकेर रे बोइश्शा, हारहायाह आ तौ सुन चेम्ब उज्जीएलमी प्रोव्रतु। मेकेर रे बोइश्शा, ब्रोव्रशो रिना पाइब खेक्तीक सेल्ल हनान्याहमी गारो प्रोव्रतु। मेकोपुकीमी ब्रेम्शो गारो सम्म गारो सेल्शा प्रोव्रतेक्म। 9 मेकेर रे बोइश्शा, हुर आ तौ रेफायाहमी प्रोव्रतु। मेको रेफायाह चहिं आधा यरूसलेम कली हुकुम पाइब बाक्त। 10 मेकेर रे बोइश्शा, हरुमाफ आ तौ येदायाहमी आ खिं आ डोंइती डा गारो प्रोव्रतु। मिनु मेकेर रे बोइश्शा, हशाब्नैयाह आ तौ हत्तुशमी प्रोव्रतु। 11 मेकेर रे बोइश्शा, हारीम आ तौ माल्कीयाह नु पहाथ-मोआब आ तौ हाश्शुबमी प्रोव्रताक्स। मेको निक्शीमी गारो नु मी मुइक्तीक लाइश्शो खिं यो सेल्लाक्स। 12 मेकेर रे बोइश्शा, हल्लोहेश आ तौ, यरूसलेम डा अर्को आधा हुकुम पाइब शाल्लुम नु आ तमीपुकीमी प्रोव्रतेक्म।

13 मिनु मेकेर रे बोइश्शा, हानुन नु जानोह डा मुरपुकीमी बेंसी लाचो सेल्लेक्म। मेकोपुकीमी ठेयब लाचो सेल्शा, थारशा, लाचो चोक्तीक आग्लो वोइक्तेक्म। मिनु मेकोपुकीमी मोव्रल लाचो माइश्शो ठेयब लाचो सम्म, हजार का कुबीत गारो प्रोव्रतेक्म। *कुबीत का आधा मिटर खोदेंशो बाक्ब।*

14 मिनु मेको मोव्रल लाचो रेकाब आ तौ माल्कीयाहमी सेल्लु। मेको बेथ-हक्केरेम जिल्ला डा सासन पाइब बाक्त। मेकोमी ठेयब लाचो सेल्शा, थारशा, लाचो चोक्तीक आग्लो वोइक्तु।

15 मिनु कोल-होजे आ तौ, मिस्पा सहर डा ठेयब हुकुम पाइब शाल्लुममी ब्वाक्कु बुक्तीक लाचो प्रोव्रतु। मेकोमी साप्शा ठेयब लाचो सेल्शा, थारशा, लाचो पाइक्तीके नु चोक्तीके आग्लो वोइक्तु। मेकोमी पिप आ फल फुल रू आ नेक्था डा शेलाह माइश्शो दोम्ली डा गारो प्रोव्रशा, दाऊद आ सहर रे ब्रुप्तीके सम्म डा गारो प्रोव्रतु। *नेहेम्याह २:१४; २राजा २०:२०; यूहन्ना ९:७*

16 मेकेर रे पा बोइश्शा, अच्चुक आ तौ, उइक्थ बेथ-सुर सहर डा हुकुम पाइब, नेहेम्याहमी प्रोव्रतु। मेकोमी दाऊद नु आ किकी पिपी आन कली थिम्तीके आ आइक्की रे मुर आन सेल्शो दोम्ली नु सिपाइ आन खिं सम्म गारो प्रोव्रतु। 17 मेकेर रे बोइश्शा, लेवीपुकीमी प्रोव्रतेक्म। बानी आ तौ रेहुम मेको आन कली कोव्रब बाक्त। मिनु मेकेर रे बोइश्शा, कैलाह सहर डा उइक्थ जिल्लामी हुकुम पाइब, हशाब्नैयाहमी प्रोव्रतु। 18 मेकेर रे बोइश्शा, आन लोकबपुकीमी प्रोव्रतेक्म। मेको कैलाह डा लीशो भाग डा हुकुम पाइब, हेनादाद आ तौ बिन्नुइ बाक्त। 19 मेकेर रे बोइश्शा, मेको येशुआ आ तौ, मिस्पा डा हुकुम पाइब, एजेरमी प्रोव्रतु। मिनु कुना डा लडाइ पाइब आन या वोइक्तीक खिं रे ग्येत्थ लतीके आ डोंइती सम्म यो प्रोव्रतु। 20 मेकेर रे बोइश्शा, जब्बै आ तौ बारुकमी प्रोव्रतु। मेकोमी कुना रे नेल्ल क्येडा ठेयब चढेब एल्याशीब आ खिं डा ओव्रतीक सम्म प्रोव्रतु। *नेहेम्याह ३:१* 21 मेकेर रे बोइश्शा, हककोस आ तौ उरीयाह, आ तौ मेरेमोथमी एल्याशीब आ खिं डा ओव्रतीक रे खिं ची सम्म प्रोव्रतु। *एज्जा ८:३३* 22 मेकेर रे बोइश्शा, आ नेक्था बाक्शो चढेबपुकीमी प्रोव्रतेक्म। 23 मेकेर रे बोइश्शा, बेन्यामीन नु हाश्शुबमी आस खिं खिं आस डोंइती डा गारो प्रोव्रताक्स। मेकेर रे बोइश्शा, अनान्याह आ चच, मासेयाह आ तौ, अजारयाहमी आ खिं आ नेक्था डा गारो प्रोव्रतु। 24 मेकेर रे बोइश्शा, हेनादाद आ तौ बिन्नुइमी अजारयाह आ खिं रे कुना सम्म प्रोव्रतु। 25 मेकेर रे बोइश्शा, उजाइ आ तौ पालालमी कुना नु पिप आ खिं आ नेक्था डा लाइश्शो खिं आइक्की एरे सम्म डा गारो प्रोव्रतु। *येरमीया ३२:२* 26 मेकेर रे बोइश्शा, पारोश आ तौ पेदायाह नु ओफेलम बाक्शो परमप्रभु यावे आ खिं डा गेय पाइबपुकीमी नां दाप्तीक गे, ब्वाक्कु लाचो आइक्की नु गारो डा लाइश्शो खिं सम्म प्रोव्रतेक्म। 27 मेकेर रे बोइश्शा, तेकोहा आ मुरपुकीमी ठेयब लाइश्शो खिं आ डोंइती रे ओफेल डा गारो सम्म प्रोव्रतेक्म। 28 शारा लाचो आ ग्येत्थ गे चढेबपुकीमी आन खिं डोंइडोंइती डा गारो प्रोव्रतेक्म। *२राजा ११:३६* 29 मेकेर रे बोइश्शा, इम्मेर आ तौ सादोकमी आ खिं डोंइती डा गारो प्रोव्रतु। मेकेर रे बोइश्शा, शेकन्याह आ तौ शेमायाहमी गारो प्रोव्रतु। शेकन्याह चहिं नां दाप्तीक लाचो डा खाल पाइब बाक्त। 30 मेकेर रे बोइश्शा, शेलेम्याह आ तौ हनान्याह नु सालाफ आ जन्तरे तौ हानुनमी गारो प्रोव्रताक्स। मेकेर रे बोइश्शा, बेरेक्याह आ तौ मेशुल्लाममी आ खिं आ डोंइती डा गारो प्रोव्रतु। 31 मेकेर रे बोइश्शा, सुन चेम्ब माल्कीयाहमी कुना डा खिं डा इर डा कोठा सम्म ग्याप्ब लेयब आन खिं रे गारो प्रोव्रशा, खाल पाइब लाचो आ डोंइती, कौसी पाइश्शो कुना डा तला तारी डा कोठा सम्म गारो प्रोव्रतु। 32 मेको गारो आ कुनाम बाक्शो तला तारी डा कोठा नु भेडा लाचो आ दातेमी सुन चेम्ब नु ग्याप्ब लेयबपुकीमी गारो प्रोव्रतेक्म।

जोरी सत्रुमी गेय तेक्चा माल्शो

4 “गो गारो प्रोव्रना प्रोव्रन बाक्नीकी” देंशो लोव्र सान्बल्लतमी नेंशा, उरशा, शुश गाइश्शा, यहूदी आन पर्वम शुक्शी पाप्तु। *नेहेम्याह २:१०,११* 2 मिनु मेकोमी यहूदी आन पर्वम शुक्शी पा, आ लोकबपुकी नु सामरीया डा लडाइ पाइब आन डोंइती “एको मारेइ सोक्त मपाइश्शो यहूदीपुकीमी मार पना पन बाक्नीमी? मार, मेकोपुकीमी आन गारो लेंशा प्रोव्रने चाप्नीमी? मार, मेकोपुकीमी चढेनीमी? मार, मेकोपुकीमी काबुमी थुम्नीमी? मेको मीम दुप्शो फुल्लुम गारो प्रोव्रने चाप्नीमी डा?” दे लोव्र पाप्तु। 3 मिनु अम्मोनी डा तोबीयाह सान्बल्लत आ नेक्था बाक्शा “मेकोपुकीमी मेको प्रोव्रतेक्म हना यो, सिवार का मेको तारी डोंइसाक्व हना, नेल्ल ब्रेक्ब” देंत। 4 मिनु गो चहिं “आंइ परमप्रभु, इन नोफा दाइश्शा, नेनीन। गो शुश शुक्शी पाइक्चा पुंइसाक्क। मेको आन पशो शुक्शी लेश्शा, मेको आन तार कोप्तीन। मेको आन कली ग्याइश्शा, अरु आन रागी लाइक्पतीन। 5 मेको आन मरिश्शो पतीके नेल्ल क्याम्शा मगेने। मारदे हना मेकोपुकीमी गारो प्रोव्रब आन कली शुक्शी पा, आन थुं तोक्शा गेम्तेक्म” दे परमप्रभु कली पुंइता। 6 मिनु गोपुकीमी आधा लाइश्शो सम्म गारो प्रोव्रशा, एर आंथ नेल्ल हिरने थुम्शो। मारदे हना प्रोव्रब मुरपुकीमी आन थुं नुशा, ग्येरशा, गारो प्रोव्रतेक्म।



## जोरी सत्रु आन कली तेक्शो

7 मिनु सान्बल्लत, तोबीयाह, अराबीपुकी, अम्मोनीपुकी नु अशदोदीपुकीमी “यरूसलेम डा गारो रिश्शो पा सेल्ना सेल्ल बाक्नीम। आ पोवला यो सुना सुन बाक्नीम” दे तुइश्शा, शुश गाइक्ताक्म। 8 मिनु मेकोपुकी गारशा, यरूसलेम कली लडाइ पा, खतम सेल्चा, दे खुम्साक्म। 9 गोपुकी चहिं आंइ परमप्रभु कली पुंडना पुंडन बाक्तक। मिनु गोपुकीमी “मारेइ पाइनीमी, को” दे मेको आन कली कोवशा, नाक्दो नाक्त खाल पाइबपुकी वोइक्तक।

10 मिनु यहूदा डा मुरपुकीमी “फुल्लु कुरब आन बोल जाम्ना जाम्न लत। मारदे हना शोर गाक्शो शी, फुल्लु नु खप शुश दुम्तीके, गोपुकी गारो प्रोवने मचाप्नीकी” दे गन गन पास्तेक्म। 11 मिनु आंइ जोरी सत्रुपुकीमी “मेको आन मतुइक्थु, मतथु, मेको आन दातेमी जाक्दीश्शा, मेको आन कली साइश्शा, आन गेय थुम्पाइय्य” देंमुमा बाक्त। 12 तन्न मेको आन नेक्था बाक्ब गाउं गाउं डा यहूदीपुकी आंइ बाक्तीक जाक्शा “आंइ जोरी सत्रु गोपुकी नु लडाइ पचा कली बुक्शा बाक्नीम” दे शुश खेयप देंतेक्म। 13 मोपतीके गो गारो आ नेल्ल क्येडा आइक्च दुम्तीके, आंइ जोरी सत्रु आन शुश श्येत मजथु, ओवने चाप्तीकेम, मुर आन कली खुप्ताक्डमी। मेको आन कली तरवार, तूतीक नु लिब्रा कुरपाइश्शा मेकेर वोइक्तामी। 14 मिनु गो मेको आन कली हिंशो तशा “महिनीन। नेल्ल क्येडा ठेयब नु मान पा हिंचा माल्शो परमप्रभु कली मिम्तीन। मिनु आंम लोकब, तमी तौ, मीशु नु आंम खिं आ पर्बम लडाइ पने” दे ठेयब मुरपुकी, सासन पाइबपुकी नु मुर नेल्ल आन कली माइक्तामी। नेहेम्याह १:५

15 आन मिम्शो गोपुकीमी तुइक्ताक्क नु परमप्रभुमी आन मिम्शो नेल्ल क्याम्शा गेवा बाक्त, दे आंइ जोरी सत्रुपुकीमी तुइक्तामे बाक्त। मोपतीके गो नेल्ल आंम आंम गेय पा गारो प्रोवथ लेत्तक। 16 मेको नाक्त डा मेरे गो आंइ उइक्थ मुरपुकीमी गारो प्रोवशा बाक्शो। मिनु लीशो उइक्थ मुरपुकीमी तूतीक, तेक्तीक नु लिब्रा कुरशा, फलाम के फेक्तीक फेक्शा बाक्तेक्म। मिनु ठेयब मुरपुकीमी गारो प्रोवथ यहूदा डा मुर नु गारशा, आन थुं बारपाइक्तेक्म। 17 कुरब मुरपुकीमी आन गुइ कामी कुरतीक नु अर्को गुइमी या कुरतेक्म। 18 गारो प्रोवथ मुरपुकीमी आन किप्शुरमी चुक्ब पिप्शा प्रोवतेक्म। तुराही ताप्ब आं नेक्था बाक्शो बाक्त। 19 मिनु गोमी ठेयब मुर, हुकुम पाइब नु मुर नेल्ल आन कली “गेय थम ठेयब नु शुश ब्रशा बाक्शो बाक्ब। गोपुकी गारो आ नेक्था, तन्न डोन डोन बाक्नीकी। 20 तेकेर रे तुराही ग्रीशो नैनीनी, मेकेर रीब पा बुक्कीन। आंइ परमप्रभुमी आंइ पर्बम लडाइ पाइब” दे माइक्तामी। प्रस्थान १४:१४ 21 मोपा गो उइक्थ मुरपुकीमी गेय पस डा पस बाक्तक। मिनु उइक्थ मुरपुकी सुनी रे नाक्दो सम्म या शेशा बाक्तेक्म। 22 मेना गो मुर आन कली “नाक्दो खाल पाइब, नाक्त गेय पाइब नु मेको आन कली वारच पाइब नेल्ल यरूसलेममीन नां सौंइचा माल्नीम” दे यो माइक्तामी। 23 मोदेंशो पा गो, आं लोकबपुकी, आं गेय पाइबपुकी नु आं नेक्था बाक्ब खाल पाइबपुकी वा मप्रुइक्थु, आंइ या शेशान इप्तक।

## प्रुडग आन कली वारच पशो

5 मिनु नोले मार दुस्त देंशा हना, मुरपुकी नु आन मीशपुकीमी आंम आन यहूदी लोकब आन पर्बम लोव का ब्रपाइक्तेक्म। 2 का निक्शीमी “गो, आंइ तमी तौ शुश बाक्नीमी। गो शुश बाक्तीके ब्रौइचा कली अन्न माल्नीकी” देंतेक्म। 3 मिनु का निक्शीमी “अन्कालमी अन्न ग्याप्चा कली आंइ रूपुकी, आंइ अडगुर रूपुकी नु आंइ खिंपुकी जाकट वोइक्चा माल्ताक्क” देंतेक्म। 4 मिनु का निक्शीमी “पिप कली तिरो थाप्चा कली आंइ रू नु अडगुर रूपुकी गेशा, जेर ताक्तक। 5 गो यो आंइ लोकब खोदेंशो बाक्नीकी। आंइ तमी तौ मेको आन तमी तौ खोदेंशो बाक्नीम। मिनु गो आंइ तमी तौ आन कली वाइलीम वाइल दुम्चा कली लेयचा माल्नीकी। आंइ तमी का निक्शी डोंइतीन लेयचा पुंडसाक्म। गोपुकीमी मेको आन कली प्रौंइने मचाप्नीकी। मारदे हना आंइ रू नु अडगुर रू नेल्ल मुर आन के दुम्ने थुम्नु” देंतेक्म। लेवी २५:३९; २२राजा ४:१; यसेया ५०:१; मत्ती १८:२५

6 मोपा मेको आन लोव नेंशा, आन डाक्शो तशा, शुश गाइक्ताक्वी। 7 तन्न गो आं थुमी लोव पाता। मिनु गो मान ताइब नु ठेयब मुर आन कली हुइश्शा “क्येट आ चाइक्ब ताक्चा, दे आंम लोकब आन कली जेर गेनीनी” दे माइक्ताक्मी। मिनु मेको आन पर्बम मुर नेल्ल खुप्ताक्डमी। प्रस्थान २२:२४ 8 मिनु गो मेको आन कली “गोपुकीमी अर्को रागीम लेयशो वाइलीम वाइल दुम्शो आंइ लोकब यहूदी आन कली आंइ चाप्शो थाप्शा, मुर आन गुइ रे प्रौंइतक। गोपुकी चहिं आंम इन लोकब रागी रागी डा मुर आन कली लेयनीनी? मिनु मेकोपुकीमी गो आंमान लेंशा ग्याप्चा माल्नीकी?” दे शुश हुइक्ताक्ड। मिनु मेकोपुकी सिक्सी पा मारेइ मदेम। लेवी २५:४७-४९ 9 मिनु लेंशा “इन पशो मरिम्शो बाक्ब। आंइ जोरी सत्रुपुकीमी आंइ कली शुक्शी मपपाइक्थु, आंइ परमप्रभु कली मान पा हिंशा, गेय पचा ममाल्नीनी डा? 10 गो आंमान, आं लोकबपुकी नु आं गेय पाइबपुकीमी यो मेको आन कली क्येट नु अन्न जेर गेतक। मुल गो चाइक्ब पुंडचा प्रौंइय। व्यवस्था १५:१-११ 11 गो मुलाक्तीन मेको आन रू, अडगुर रू, आन तेल रवा रू नु आन खिं लेशशा गेने। मिनु क्येट, अन्न, नक अडगुर रस नु तेल, मार मार जेर पुन्मे, मेको नेल्ल मो गेने” दे माइक्तामी। 12 मिनु मेकोपुकीमी “गो नेल्ल लेशशा गेनीकी। मेकोपुकी रे मारेइ मताक्नीकी। इन देंशो खोदेंशो पा नेल्ल पाइनीकी” देंतेक्म। मिनु गो चढेब आन कली ब्रेश्शा “आंइ देंशो खोदेंशो पा पाइनीकी” दे कसम जपाइक्तामी। 13 मिनु नोले गो आं फेक्शो वा रे थुर थुर पा फुरक हेम्शा “आन देंशो मखाप्ब कली परमप्रभुमी आन खिं नु आन थेरशो रू रे ओं पान थुर थुर पा हेमल। मोपा थुर थुर पा श्येत दुम्मल” देंती। मिनु मेकेर बुक्शा बाक्ब नेल्लेमी “आमेन” देंतेक्म। मिनु मेकोपुकीमी परमप्रभु यावे कली ठेयब सेल्शा, आन देंशो खोदेंशो पास्तेक्म। आमेन देंबमी “गो यो मोदेंशो मिम्नुड” देंब।

## नेहेम्याहमी रिश्शो पशो

14 मिनु आरता-सास्त पिप दुम्शो २० बर्स दुम्मेनु, गो यहूदा रागीमी हुकुम पचा कली योव्रचा पुंडसाक्वी। मेना रे मुल १२ बर्स दुम्त। मेको आरता-सास्त पिप दुम्शो ३२ बर्स दुम्त। मेको १२ बर्स सम्म गो नु आं लोकबपुकीमी हुकुम पाइब आन ततीक जचा थोव्रक मजक। 15 आं क्येडा डोंइती डा आं खोदेंशो पा हुकुम पाइबपुकीमी मुर आन कली ठेयब श्येत गेशो बाक्तेक्म। मेकोपुकीमी नाक्त किंत किंत डा जचा थोव्रक, शोब्ले, अडगुर शांबु नु ४० चांदी के शेकेल यो लाइश्शो बाक्तेक्म। मिनु मेको आन गेय पाइबपुकीमी यो मुर आन कली साप्पा दिप्शो बाक्तेक्म। तन्न गो परमप्रभु कली मान पा हिंशा मोदेंशो मपड। चांदी के शेकेल का ११.५ ग्राम डा क्येट बाक्ब। 16 मिनु गो आंमा गारो प्रोवतीक गेय यो पाता। गोपुकीमी रू का यो मर्याक्क। आं गेय पाइब नेल्ल गारो प्रोवथ जाक्तेक्म। 17 मिनु गो नु सहे का ५० जना यहूदी आन ठेयब मुरपुकी काथा बाक्शा जास्तेक्म। मिनु एर ओंथ रागी रे आंइ कली युम्थ जाक्बपुकी यो गो नु बाक्शा जास्तेक्म। 18 नाक्त का कली मार जचा थोव्रक ठीक सेल्शो बाक्त, देंशा हना, ब्यफ का, ६ ओटा रिम्शो दोम्शो भेडा नु ब्वापुकी ठीक सेल्शो बाक्तेक्म। मिनु १०, १० नाक्त कली मारेइ मारेइ अडगुर शांबु यो चाक्शो बाक्त। मोदेंशो शुश माल्ती हना यो, गो गेनायो हुकुम पाइब आ तचा माल्शो जचा थोव्रक ममलु। मारदे हना मुरपुकी शुश श्येत जशो बाक्तेक्म। 19 गो परमप्रभु यावे कली “आं परमप्रभु, गो एको मुर आन कली मार मार रिम्शो पडा, मेको मप्रदेदीन” देंती। नेहेम्याह १३:१४, २२, ३१

## जोरी सत्रुमी हिंच कोंइशो

6 मिनु नोले सान्बल्लत, तोबीयाह, अराबी गेशेम नु आंइ जोरी सत्रुपुकीमी “गोपुकीमी गारो प्रोवशा, पोवला नेल्ल यो सुने थुम्तक” देंशो नेंतेक्म। गो ठेयब लाप्चो थारने मथुम्शो बाक्ती। 2 मेना सान्बल्लत नु गेशेममी आं कली “ओनो दिंम डा गाउं काम युम्थ” दे लोव सोइक्ताक्वीमी। तन्न मेकोपुकीमी आं कली मरिम्शो पचा माल्शो बाक्तेक्म। 3 मिनु गो मेको आन कली “मुल आं के ठेयब गेय का बाक्ब। मोपतीके यिने मचाप्नुड। मेक यिशा, आं गेय क्योल्चा मदाक्नुड” दे लोव सोइक्ताक्ड। 4 मिनु मेकोपुकीमी

आं कली ४ खेयप सम्म “यिने” दे लोत्र सोइक्ताक्यीमी। मिनु गो यो डोंइती डा खोदेशो पा लोत्र लेशशा सोइक्ताकडमी।<sup>5</sup> मिनु सान्बल्लतमी लेंशा, ५ खेयपमी आं गेय पाइब मुर, नेल्ल आन कली पढेचा डा पा, ब्रेक्स का सोइक्ताकव।<sup>6</sup> मिनु मेको ब्रेक्समी “अर्को जात डा मुरपुकीमी ‘गे नु यहूदीपुकी गारशा सरकार कली तुल्लचशो बाक्नीनी’ देंतेक्म। गेशेममी यो मोन देंत। मोपतीके गे गारो सेल्ला सेल्ल बाक्नीनी। गे चहिं मेको आन पिप दुम्चा माल्लशो बाक्नेवे, देंशो यो नेंसाक्व। नेहेम्याह २:१९; एज्रा ४:१२<sup>7</sup> मिनु ‘यहूदामी पिप का बाक्व’ देंपाइक्वा कली परमप्रभु यावे आ लोत्र पाइब आन कली यो योत्रशा, यरूसलेम लोत्र पथ, वोइश्शो बाक्ते। मिनु पिपमी एको लोत्र थमा पा नेंब। मोपतीके एको आ पबर्म लोत्रसी पचा कली रीब पा यिने” दे ब्रेक्शो बाक्त।<sup>8</sup> मिनु गो “इ देंशो लोत्र नेल्ल जोल बाक्व। आंम इ मिम्शो बाक्व” दे लोत्र लेशशा, सोइक्ताकड।<sup>9</sup> मिनु मेको नेल्लेमी आंइ कली हिंच कोंइचा माल्लेक्म। मेकोपुकीमी “एको गारो प्रोत्रचा प्रॉइनीम। मथुन्मीम” दे मिम्मे बाक्त। मिनु गो “परमप्रभु, आं थुं बारपतीन” दे पुंइता।

शेमायाहम रिम्शो लोत्र पखु पशो

<sup>10</sup> मिनु काबु गो देलायाह आ तौ, मेहेताबेल आ चच शेमायाह आ खिंमी लती। मेको आ खिंमी चोक्सीशा बाक्शो बाक्त। मेकोमी आं कली “गो निक्शी परमप्रभु यावे आ खिं नेल्ल क्येडा आगा ओत्रशा, लाप्चोपुकी चोक्शा, बाक्स। मारदे हना मेकोपुकी इन कली साइक्थ पिना पिन बाक्नीम। नाक्दो इन कली साइक्थ जाक्नीम” दे माइक्ती।<sup>11</sup> तन्न गो मेको कली “मार, आं खोदेशो मुर प्रोक्वा डा? गो परमप्रभु यावे आ खिंम ओत्रशा, ब्रॉइनुडा डा? गो मलाइनुड” दे माइक्ता।<sup>12</sup> मिनु गो “परमप्रभु आ सोइश्शो ममाइ, आं कली मरिम्शो पचा, दे सान्बल्लत नु तोबीयाहमी मेको कली नोले दुम्ब लोत्र पपाइक्वु पशो बाक्ताक्स।<sup>13</sup> आं कली हिंच कोंइचा नु पाप पपाइक्वा माल्लाक्से। मोपा मेकोमी आं पबर्म मरिम्शो लोत्र ब्रपाइक्वा कली क्येट ताक्शो बाक्त” दे तुइक्ताकड।<sup>14</sup> मिनु गो “आं परमप्रभु, तोबीयाह नु सान्बल्लत आस पशो मिम्तीन। आं कली हिंच कोंइचा दाक्व नोले दुम्ब लोत्र पाइब नोआदीयाह माइश्शो मीश मुर नु अरु नोले दुम्ब लोत्र पाइब, नेल्ल आन पतीके यो मिम्तीन” दे परमप्रभु कली पुंइता। नेहेम्याह ३:३३-३७

यरूसलेम डा गारो सेल्ले थुम्शो

<sup>15</sup> एलुल महिना डा २५ नाक्त गोपुकीमी गारो सेल्ले थुम्तक। सेल्ले थुम्चा कली ५२ नाक्त माल्लाक्क।<sup>16</sup> मिनु आंइ जोरी सत्रुपुकीमी एको लोत्र नेंतेक्म, देंशो नेंशा, आंइ एर ओंथ बाक्शो अर्को जात डा मुर नेल्ल शुश हिंतेक्म। मिनु मेकोपुकीमी “इं परमप्रभुम पशो बाक्त” दे तुइक्ताकव।

<sup>17</sup> मेना यहूदा डा ठेयब मुरपुकीमी तोबीयाह कली शुश ब्रेक्स ब्रेक्शा, सोइक्ना सोइक्न बाक्तेक्म। मिनु तोबीयाहमी यो मेको आन कली ब्रेक्स सोइक्ना सोइक्न बाक्त।<sup>18</sup> मिनु यहूदा डा शुश मुरुमी तोबीयाह आ लोत्र बिश्शा “इन मुर दुम्नीकी” दे कसम जशो बाक्तेक्म। मारदे हना तोबीयाह आ चांइवा आराह आ तौ शेकन्याह बाक्त। मिनु आ तौ येहो-हानानमी बेरेक्याह आ तौ मेशुल्लाम आ तमी चाक्शो बाक्त।<sup>19</sup> मेको मुरपुकीमी आं डोंइती तोबीयाहमी मार मार रिम्शो गेय पात्तु, दे आं कली लोत्र पाम्तेक्म। मिनु आं देंशो लोत्र यो तोबीयाह कली शोत्रतेक्म। मिनु तोबीयाहमी आं कली हिंच कोंइशा चिठीपुकी सोइक्ताक्यी।

नेहेम्याहम हुकुम पाइब सेल्लो

<sup>7</sup> मिनु गारो प्रोत्रने थुम्शा, लाप्चोपुकी थारशा गारपाइश्शा वोइक्ताक्यी। लाप्चो खाल पाइबपुकी, कुम्सो पाइबपुकी नु लेवी नेल्ल योत्रशा वोइक्तामी।<sup>2</sup> मिनु गो आं लोक्व हानानी नु लडाइ पाइब आन नेल्ल क्येडा ठेयब मुर हनान्याह आस कली यरूसलेममी हुकुम पाइब सेल्लासी। मारदे हना शुश मुर आन क्येडा हनान्याह दीगो नु रिम्शो पाइब परमप्रभु कली मान पा हिंब बाक्त।<sup>3</sup> मिनु गो मेको आस कली “यरूसलेम डा ठेयब लाप्चोपुकी नां चोक्ता नोले ला रोक्पतीन। मिनु नोले खाल पाइबपुकी ठेयब लाप्चोम गेय पची ना लाप्चोपुकी चोक्शा, आग्लो शुइक्वा

माल्नीम। यरूसलेम डा मुरपुकी का का पा खाल पाइब सेल्ला माल्नीम। का निक्शी गारो कोत्रब सेल्ला, का निक्शी आंम आन खिं आ डोंइती खाल पचा माल्नीम” दे माइक्तामी।<sup>4</sup> सहर ठेयब बाक्व। मिनु मुर शुश मबाक्तीके, ब्रशा बाक्शो बाक्तेक्म। मिनु सुइमी आन खिं लेंशा सेल्लो मबाक्म।

यरूसलेम लेशशा जाक्व आन नें

एज्रा २:१-६

<sup>5</sup> मिनु आं परमप्रभुमी आं कली “ठेयब मुर, सरकार डा अधिकार ताइब नु अरु मुर नेल्ल आन कली बुक्पाइश्शा, मेको नु आन खिं डा मुर आन नें ब्रेक्वा माल्लुड” दे मिम्पाइक्ती। मिनु गो ग्याइश्शा लाइक्वा पुंइसीशो रे, यरूसलेम लेशशा जाक्व आन नें ब्रेक्शो किताब थित्ता। मिनु मेको किताबम सु सु आन नें ब्रेक्शो बाक्तेक्म देंशा हना,<sup>6</sup> डोंइती बेबीलोन डा पिप नेबुकदनेसरमी यरूसलेम नु यहूदा डा मुर आन कली ग्याइश्शा लाइश्शो बाक्त। मिनु सु सु नोले यरूसलेम नु यहूदा डा आंम आन सहर लेत्वा तशो बाक्तेक्म देंशा हना,<sup>7</sup> जेरूब-बाबेल, येशुआ, नेहेम्याह, अजारयाह, राम्याह, नाहामानी, मोरदेकै, बिल्शान, मिस्पेरेथ बिग्वाइ, नेहुम नु बानाह लेत्वा तशो बाक्तेक्म।

<sup>8</sup> लेत्वा ताइब इस्राएली सु सु बाक्तेक्म देंशा हना, पारोश नु आ खिं डा मुर २,१७२<sup>9</sup> शेफत्याह नु आ खिं डा मुर ३७२<sup>10</sup> आराह नु आ खिं डा मुर ६५२<sup>11</sup> पहाथ-मोआब नु आ खिं डा मुर नु येशुआ नु योआब आस खिं डा मुर नेल्ल २,८१८<sup>12</sup> एलाम नु आ खिं डा मुर १,२५४<sup>13</sup> जत्तु नु आ खिं डा मुर ८४५<sup>14</sup> जक्काइ नु आ खिं डा मुर ७६०<sup>15</sup> बिन्नुड नु आ खिं डा मुर ६४८<sup>16</sup> बेबाइ नु आ खिं डा मुर ६२८<sup>17</sup> अज्गाद नु आ खिं डा मुर २,३२२<sup>18</sup> अदोनीकाम नु आ खिं डा मुर ६६७<sup>19</sup> बिग्वाइ नु आ खिं डा मुर २,०६७<sup>20</sup> आदीन नु आ खिं डा मुर ६५५<sup>21</sup> आतेर नु हिज्कीयाह नु आस खिं डा मुर ९८<sup>22</sup> हाशुम नु आ खिं डा मुर ३२८<sup>23</sup> बेजाइ नु आ खिं डा मुर ३२४<sup>24</sup> हारीफ नु आ खिं डा मुर ११२<sup>25</sup> गिबोन नु आ खिं डा मुर ९५<sup>26</sup> बेथलेहेम नु नेतोफाह सहर डा मुर १८८<sup>27</sup> अनाथोथ सहर डा मुर १२८<sup>28</sup> बेथ-अज्मावेथ सहर डा मुर ४२<sup>29</sup> किरयथ-यारीम, केफीरा नु बेयरोथ सहर डा मुर ७४३<sup>30</sup> रामाह नु गेबा सहर डा मुर ६२१<sup>31</sup> मिकमास सहर डा मुर १२२<sup>32</sup> बेथेल नु ऐ सहर डा मुर १२३<sup>33</sup> अर्को नेबो सहर डा मुर ५२<sup>34</sup> अर्को एलाम आ तौ १,२५४<sup>35</sup> हारीम आ तौ ३२०<sup>36</sup> यरीको सहर डा वोंइश मुर ३४५<sup>37</sup> लोद, हादीद नु ओनो सहर डा वोंइश मुर ७२१<sup>38</sup> सेनाह सहर डा वोंइश मुर ३,९३० जना लेत्वा ताइब बाक्तेक्म।

चढेबपुकी

<sup>39</sup> येशुआ आ खिं डा येदायाह आ चच युइ ९७३<sup>40</sup> इम्मेर आ चच युइ १,०५२<sup>41</sup> पशहुर आ चच युइ १,२४७<sup>42</sup> हारीम आ चच युइ १,०१७ जना बाक्तेक्म।

लेवीपुकी

<sup>43</sup> होदेवाह आ खिं डा येशुआ नु कदमीएल आस चच युइ ७४ जना लेत्वा तशो बाक्तेक्म।

कुम्सो पाइबपुकी

<sup>44</sup> आसाफ आ चच युइ १४८ जना लेत्वा तशो बाक्तेक्म।

लाप्चो खाल पाइबपुकी

<sup>45</sup> शाल्लुम, आतेर, ताल्मोन, अक्कुब, हतीता नु शोबाइ आन चच युइ १३८ जना लेत्वा तशो बाक्तेक्म।

परमप्रभु आ खिंम गेय पाइबपुकी

<sup>46</sup> सीहा आ तौपुकी, हासुफा आ तौपुकी, तब्बाओथ आ तौपुकी,<sup>47</sup> केरोस आ तौपुकी, सीआ आ तौपुकी, पादोन आ तौपुकी,<sup>48</sup> लेबाना

आ तौपुकी, हगाबा आ तौपुकी, शाल्माइ आ तौपुकी 49 हानान आ तौपुकी, गिददेल आ तौपुकी, गहार आ तौपुकी, 50 रेआयाह आ तौपुकी, रेसीन आ तौपुकी, नेकोदा आ तौपुकी, 51 गज्जाम आ तौपुकी, उज्जा आ तौपुकी, पासेआह आ तौपुकी, 52 बेसाइ आ तौपुकी, मेउनीम आ तौपुकी, नेफुशेसीम आ तौपुकी, 53 बाकबुक आ तौपुकी, हकुफा आ तौपुकी, हारहुर आ तौपुकी, 54 बास्लुथ आ तौपुकी, मेहीदा आ तौपुकी, हारशा आ तौपुकी, 55 बारकोस आ तौपुकी, सीसेरा आ तौपुकी, तेमाह आ तौपुकी, 56 नु नेसीयाह नु हतीफा आस तौपुकी परमप्रभु यावे आ खिं डा गेय पाइब लेत्वा तशो बाक्तेकम।

### सोलोमन आ गेय पाइबपुकी

57 सोताइ आ तौपुकी, सोफेरेथ आ तौपुकी, परीदा आ तौपुकी, 58 याला आ तौपुकी, दारकोन आ तौपुकी, गिददेल आ तौपुकी, 59 शेफत्याह आ तौपुकी, हत्तील आ तौपुकी, पोकेरेथ-हस्सेबाइम आ तौपुकी नु आमोन आ तौपुकी, 60 परमप्रभु यावे आ खिं डा गेय पाइब नु सोलोमन आ खिं डा गेय पाइब आन तौ नेल्ल पा ३९२ जना लेत्वा तशो बाक्तेकम।

### का निक्शी अर्को सहर डा मुर

61 तेल-मेलाह, तेल-हारशा, करूब, अददोन नु इम्मेर सहर रे कुडब मुर आन किकी पिपी इस्राएली बाक्नीम, दे ब्रेक्तीकेमी कौंइने मचबेम। 62 देलायाह, तोबीयाह नु नेकोदा आन तौ नेल्ल पा ६४२ जना बाक्तेकम। 63 चढेब आन दाते रे होबायाह, हककोस आस चच युइ नु बारजील्लाड बाक्नीम। बारजील्लाडमी चहिं गिलादी बारजील्लाड आ तमी का ग्युंवे पा आ शिउ आ नें बारजील्लाड माइक्वा पुंडसीशो बाक्त। 64 मेको आन नें ब्रेक्शो मथित्तीके, चढेतीक गेय पचा मशिरनीम, दे तिल्वा पुंडसीशो बाक्तेकम। 65 हुकुम पाइबमी ऊरीम नु थुम्मीम रे गेय पाइब चढेब मगूम सम्म मेको आन कली चढेशो थोवकी जचा मगमे बाक्त। *प्रस्थान २८:३०; गन्ती १८:९; १सामुएल १४:४१*

66 यरूसलेम लेशशा जाक्ब नेल्ल ४२,३६० जना बाक्तेकम। 67 मेको आन वाइलीम वाइल ७,३३७ जना बाक्तेकम। मिनु कुम्सो पाइबपुकी २४५ जना मुर बाक्तेकम। 68 मिनु ७३६ ओटा शारा, २४५ ओटा खच्चर, 69 दलओठ ४३५ नु ६,७२० ओटा गधा बाक्तेकम।

### परमप्रभु कली ग्येरशा गेशो

एज्रा २:६८-६९

70 मिनु का निक्शी खिं डा ठेयब मुरपुकीमी गारो प्रोवचा कली मार मार गेम्तेकम। हुकुम पाइबमी सुन के आदारकोन माइश्शो क्येट हजार का टुक्रा, ५० ओटा बोस नु ५ सहे ३० ओटा चढेब आन कली फेक्तीके वा गेप्टु। *आदारकोन का ८.४ ग्राम सुन के क्येट बाक्ब।* 71 मिनु का निक्शी खिं डा ठेयब मुरपुकीमी गेय कली सुन के आदारकोन २० हजार टुक्रा नु चांदी के मीना माइश्शो क्येट हजार निक्शी सहे निक्शी टुक्रा गेम्तेकम। *मीना का ६०० ग्राम खोदेंशो बाक्ब।* 72 लीशो मुरपुकीमी सुन के आदारकोन २० हजार टुक्रा नु चांदी के मीना हजार निक्शी टुक्रा नु ६७ ओटा चढेब आन कली फेक्तीके वा गेम्तेकम। 73 मिनु चढेबपुकी, लेवीपुकी, लाप्चो खाल पाइबपुकी, कुम्सो पाइबपुकी, परमप्रभु यावे आ खिंमी गेय पाइबपुकी नु अरु नेल्ल इस्राएली आन आंम आंम सहरमी लशा बाक्शो बाक्तेकम।

### एज्रामी परमप्रभु आ लोव्र पढेशो

8 मिनु ७ महिना थेक्चावानु, इस्राएली आंम आन आन सहरमी बाक्मानु, मुर नेल्ल थुं का दुश्शा, ब्वाक्कु लाप्चो आ नेक्था डा ठेयब बाक्तीकेम बुक्तेकम। मिनु मेकोपुकीमी परमप्रभु यावे आ लोव्र जोक्ब तुइक्ब चढेब एज्रा कली “परमप्रभु यावेमी मोसा कली गेशो इस्राएली आन कली अरेशो लोव्र डा किताब चाक्को” देंतेकम। *एज्रा ७:६* 2 मिनु ७ महिना डा डोंइती डा नाक्तीमी चढेब एज्रामी मेको किताब मुर आन डोंइती चाक्तु। मेकेर वोंइश मुर, मीश मुरपुकी नु सु सु रुप्ने चाप्ब बाक्मा, मेको नेल्ल बुक्शो

बाक्तेकम। *ब्यवस्था ३१:१०-१३* 3 मोपा एज्रामी ब्वाक्कु लाप्चो आ नेक्था डा बाक्तीकेमी सुनी रे नाक्त सम्म वोंइश मुर, मीश मुर नु लोव्र रुप्ने चाप्ब नेल्ल आन डोंइती मेको किताब पढेप्टु। मिनु परमप्रभु यावे आ अरेशो लोव्र डा किताब पढेवानु, नेल्लेमी नोफा दाइश्शा नेंतेकम। 4 मिनु परमप्रभु यावे आ लोव्र जोक्ब तुइक्ब एज्रा मुर नेल्ल आन कली रिम्शो नेंपाइक्वा कली शी के सेल्शो लाइश्शो राप्तीकेमी राप्शो बाक्त। मेको आ ग्युरा गे मत्तीथ्याह, शेमा, आनायाह, उरीयाह, हिल्कीयाह नु मासेयाह राप्शो बाक्तेकम। मिनु आ पेरा गे पेदायाह, मीशाएल, माल्कीयाह, हाशुम, हशबादानाह, जकरिया नु मेशुल्लाम राप्शो बाक्तेकम। 5 मिनु एज्रामी आ लाइश्शो बाक्तीकेमी राप्शा, नेल्लेम तचा डा पा मुर आन डोंइती मेको किताब प्राक्तु। मेको किताब प्राक्वानु, मुर नेल्ल बोक्तेकम। 6 मिनु एज्रामी नेल्ल क्येडा ठेयब परमप्रभु यावे कली “गे ठेयब ननी” दे मान पवानु, मुर नेल्लेमी आन गुड पोक्शा “आमेन, आमेन” देंतेकम। मिनु नेल्लेमी आन पिया खुक्शा, परमप्रभु यावे आ डोंइती खप सम्म बाप्शा ठेयब सेल्तेकम। 7 मिनु येशुआ, बानी, शेरब्याह, यामीन, अक्कुब, शब्बेथाइ, होदीयाह, मासेयाह, केलीता, अजारयाह, योजाबाद, हानान, पेलायाह नु लेवीपुकीमी मुर आन कली परमप्रभु आ अरेशो लोव्र रुप्पाइक्तेकम। मिनु मुर आन बाक्तीकेम राप्शा बाक्तेकम। 8 मेकोपुकीमी परमप्रभु आ अरेशो लोव्र रुप्पा डा पा पढेम्तेकम। आन पढेशो रुप्मेक्ल, दे मुर आन कली आ अर्थ यो शेंताकम।

9 मिनु परमप्रभु यावे आ अरेशो लोव्र नेंशा, मुर नेल्ल शुश डाक्तेकम। मोपतीके पिप आ वोइश्शो हुकुम पाइब, नेहेम्याह, परमप्रभु यावे आ लोव्र जोक्ब तुइक्ब चढेब एज्रा नु मुर आन कली शेंब लेवीपुकीमी “मुलाक्ती परमप्रभु यावे, इन परमप्रभु आ ठेयब नाक्त बाक्ब। हिशेक मपने। मडाक्कीन” दे मुर आन कली माइक्तेकम। 10 मिनु मेकोपुकीमी मुर आन कली “मुल गे नेल्ल लने। ब्रोवशो ब्रोवशो जने ब्वने, तूडीन। मिनु मथीब आन कली यो मार मार सोइक्तीने। मारदे हना मुलाक्ती आइ परमप्रभु आ ठेयब नाक्त बाक्ब। हिशेक मपने। मारदे हना परमप्रभु यावे आ गेशो ग्येरतीकेमी इन थुं बारपाइक्ब” देंतेकम। 11 मिनु लेवीपुकीमी मुर नेल्ल आन कली “सिक्सी पा बाक्कीन। मुलाक्ती परमप्रभु आ ठेयब नाक्त बाक्ब। हिशेक मपने। मडाक्कीन” देंतेकम। मारदे हना मुर नेल्ल परमप्रभु यावे आ लोव्र नेंशा डाक्तेकम। *नेहेम्याह ५:१४* 12 मिनु मुर नेल्लेमी आन देंशो लोव्र रुप्शा, ठेयब ग्येरतीक चाड मानेचा कली जचा ब्वचा तूचा नु मथीब आन कली मार मार सोइक्वा कली लाम्तेकम।

### गोठ सेल्शा बाक्तीक चाड

13 मिनु आ दीसा खिं नेल्ल डा ठेयब मुर, चढेब नु लेवी नेल्ल परमप्रभु यावे लोव्र जोक्ब तुइक्ब एज्रा आ डोंइती परमप्रभु यावे आ अरेशो लोव्र शेंसीचा कली बुक्तेकम। 14 मिनु परमप्रभु यावेमी मोसा कली “इस्राएलीपुकीमी ७ महिना डा ७ नाक्त कली गोठ सेल्शा बाक्तीक चाड मानेचा माल्नीम” दे शेंशा, परमप्रभु यावे आ अरेशो लोव्रम ब्रेक्शो थित्तेकम। *लेवी २३:३४-३६; लेवी २३:४०* 15 मिनु मेकोपुकीमी आंम बाक्तीक सहर नेल्लेमी नु यरूसलेम डा मुर आन कली “गे इर ब्वाकी ग्येत्थ लशा, मार मार तेल रवा, मुरे रवा, खजूर रवा नु शुश सफा पाइश्शो रवा आन राशी गोठ सेल्शा कली चाक्कीन। मिनु दोदेंशो ब्रेक्शो बाक्मे, मोदेंशो पने” दे नेंपतीन देंतेकम। *लेवी २३:४०* 16 मिनु मुरपुकी लशा, सेउला चाक्तेकम। मिनु आन खिं तारी, आन लाडगामी, परमप्रभु आ खिं डा लाडगामी, ब्वाक्कु लाप्चो आ नेक्थामी नु एफ्राइम लाप्चो आ नेक्थामी गोठ सेल्शा बाक्तेकम। *नेहेम्याह ८:१* 17 मिनु मुर नेल्ल, सु सु ग्याइश्शा लेत्वा पुंडसीशो बाक्मा, मेको नेल्ल, गोठ सेल्शा, आगाम बाक्तेकम। मिनु नून आ तौ यहोसु आ पाला रे मेको नाक्त सम्म इस्राएलीपुकीमी मोदेंशो मपशो बाक्तेकम। मेको चाडमी मुर नेल्ल शुश ग्येरसाक्म। 18 मिनु डोंइती डा नाक्त रे नोले डा नाक्त सम्म एज्रा मी नाक्त किंत किंत परमप्रभु आ अरेशो लोव्र डा किताब पढेप्टु। मेकोपुकीमी मेको चाड ७ नाक्त सम्म मानेम्तेकम। मिनु दोदेंशो पा ब्रेक्शो बाक्मे, मोदेंशो पा आ दीसा ८ नाक्तीमी चाड थुम्तीक नाक्त नेल्ल क्येडा ठेयब पा मानेम्तेकम।

### मुरपुकीमी मरिश्शो पशो

9 मिनु मेको महिना डा २४ नाक्त नोले इस्राएलीपुकी माइजा बाक्शा, अरन्डी फेक्शा नु आन पियामी फुरक देप्शा खुम्साकम।

2 इस्राएलीपुकीमी अर्को जात डा मुरपुकी रे आम कली तिल्साकम। मिनु आन बाक्तीकम राप्शा, आन मरिश्शो पशो नु आन किकी पिपी आन मरिश्शो पशो शोव्रतेकम। 3 मिनु नेल्ल आन बाक्तीकमी राप्शा, घन्टा सां सम्म परमप्रभु यावे, आन परमप्रभु आ अरेशो लोव्र डा किताब पठेशो नैतेकम। मिनु अर्को घन्टा सां सम्म चहिं आम आंम आन मरिश्शो पशो शोव्रना शोव्रन, परमप्रभु यावे आ डोंइती बाप्शा, परमप्रभु यावे, आन परमप्रभु कली ठेयब सेल्ना सेल्न बाक्तेकम।

4 येशुआ, बानी, कदमीएल, शेबान्याह, बुन्नी, शेरैब्याह, बानी नु केनानी लेवी आन शी के सेल्शो राप्तीके डा क्रेसीमी बाक्शा, ठेयब सेंदामी परमप्रभु यावे, आन परमप्रभु कली लोव्र पाप्तेकम। 5 मिनु लेवी येशुआ, कदमीएल, बानी, हशाब्नैयाह, शेरैब्याह, होदीयाह, शेबान्याह नु पेथायाहमी मुर आन कली “बोक्कीन, गेना हना यो बाक्ब परमप्रभु यावे, इन परमप्रभु कली ठेयब सेलीन। ‘इन नें ठेयब बाक्ब। नेल्ल आन ठेयब सेल्तीके आन क्येडा इन नें ठेयब सेल्चा पुंडसीशो बाक्ब’ देंचा माल्नीनी” दैतेकम।

6 मिनु एज्जामी “गे का ला परमप्रभु यावे बाक्नीनी। गे सरीड सेल्तीनी। स्वर्ग नु मेकेर बाक्ब नेल्ल सेल्तीनी। गे रागी नु मेकेर डा मारेड मारेड, समुन्द्र नु मेकेर डा मारेड मारेड आन कली सेल्तीनी। मिनु मेको नेल्ल कली ब्रोंइचा गेतीनी। मिनु स्वर्ग डा गेय पाइबपुकीमी इन कली ठेयब सेल्तीनी। 7 परमप्रभु यावे, गे परमप्रभुमी अब्राम कली योव्रशा, कल्दी आन रागी ऊर सहर रे गुंडशा, अब्राहाम नें वोइक्तीनी। उत्पत्ती ११:३१; उत्पत्ती १७:५ 8 मिनु मेको आ थुं इन कली मप्रोंइब, ठीक पाइब बाक्ब, दे तुइश्शा, मेको नु कबल का पाइतीनी। मार कबल पाइतीनी दैशा हना, मेको कली कनानी, हिंती, एमोरी, परिज्जी, यबुसी नु गिरगाशी आन रागी आ चच युइ आन कली गेनुड, दे कबल पाइतीनी। मिनु गे इन कबल खाप्तीनी। मारदे हना गे ठीक पाइब बाक्नीनी। उत्पत्ती १५:१८-२१ 9 मिनु आंइ किकी पिपी इजीप्त रागीम बाक्मानु, मेको आन श्येत जशो ताइतीनी। लल समुन्द्रम बाक्शा आन डाक्शो नैतीनी। प्रस्थान ३:७ 10 मिनु गेमी पिप फाराओ आ गेय पाइब नु आ रागी डा मुर नेल्ल आन डोंइती चिन्ड नु छक लाक्वा डा गेय पाइतीनी। मारदे हना मेकोपुकीमी आंइ किकी पिपी आन कली ठेयब लेश्शा, श्येत गेशो बाक्तेकम, दे तुइक्ताक्नी। मोदेंशो पा इन नें ठेयब सेल्साक्नी। मुल सम्म मेको मोदेंशो बाक्ब। प्रस्थान १८:११ 11 मेको आन डोंइती समुन्द्र कली चेश्शा लां का सेल्तीनी। मेकोपुकी सोव्रशो खपीम गाक्शा, समुन्द्र शोक्साकम। मेको खेदा पाइब आन कली चहिं ब्वाक्कुम खुम्तीनी। फुल्लु ब्वारशा, ब्वाक्कुम ताइश्शो खोदेंशो पा खुम्तीनी। प्रस्थान १४:२१; प्रस्थान १५:५, १० 12 आंइ किकी पिपी आन कली नाक्त गोस्स के थामम लां कोंइताक्नी। मिनु नाक्दो आन लां तपाइक्वा कली मी के थाम दुश्शा लां कोंइताक्नी। 13 गे सीनै डांडामी यितीनी। मिनु स्वर्ग रे मेकोपुकी नु लोव्र पाइतीनी। गे मेको आन कली इन ठीक पतीक लोव्र, थमा शेंतीके, इन रिश्शो फुल्लुम मुशा ब्रेक्शो लोव्र नु इन शेंतीके गेतीनी। प्रस्थान १९:१८; प्रस्थान २०:१-१७ 14 इन नाइक्तीक नाक्त नाइक्वा, दे मेको आन कली तुइक्पाइक्तीनी। मेको आन कली मोसा रे पा इन शेंतीके, इन फुल्लुम मुशा ब्रेक्शो लोव्र नु इन अरेशो लोव्र गेतीनी। 15 मेको आन कली शोव्रलु बेक्मानु, सरीड रे शोब्ले गेतीनी। मेको आन कली तूतू मदाक्वा डा पा, रूचा डा पा सेरथे फुल्लु रे ब्वाक्कु गुंडशा गेतीनी। मिनु मेको आन कली ‘गेपुकी मेको रागी ओव्रशा, नेल्ल आंम के सेलीन’ दे माइक्तीनी। मिनु मेको आन कली ‘गे मेको नेल्ल गेनुड’ दे कसम जाइतीनी। प्रस्थान १६:४, १४, १५; प्रस्थान १७:६

16 मिनु आंइ किकी पिपीमी ठेयब लेश्शा, आन मिश्शो ला पशा, इन शेंशो मटीब दुश्शो बाक्तेकम। प्रस्थान ३२:१, ९ 17 इन कली टिने मबिस्सम। आन दातेमी पशो इन चिन्ड नु छक लाक्वा डा गेय ममिश्शो बाक्तेकम। मेकोपुकी इन दैशो मटीब दुश्शो बाक्तेकम। मिनु आन काइ मटितीकेमी इजीप्त रागी लेश्शा लशा, लैशा वाइलीम वाइल दुश्चा कली थुंम वोइश्शो बाक्तेकम। गे

चहिं आंइ मरिश्शो पशो क्याम्शा गेब परमप्रभु बाक्नीनी। शिशी पाइब नु गेना हना यो दाक्ब बाक्नीनी। गे ओंखां पा चुरब बाक्शा, गेना हना यो दाक्तीके पाइश्शो बाक्नीनी। मोपतीके गे इन मुर आन कली दाक्शा मप्रोंइनी। प्रस्थान ३४:६ 18 मेकोपुकीमी सुन के बाछा सेल्शा ‘इजीप्त रागी रे प्रोंइशा कुइब, आंइ परमप्रभु एकोन बाक्ब’ देंमानु यो, इन कली ठेयब शुक्शी लोव्र पशो बाक्तेकम हना यो, प्रस्थान ३२:४ 19 गे मेको आन कली शुश शिशी पशा, गोरशो रागीमी प्रोंइशा मसोइक्तीनी। आन लतीक लां तपाइक्वा कली नाक्त गोस्स के थाम नु नाक्दो मी के थाम दुश्शा गेनायो मप्रोंइनी। 20 मिनु मेको आन कली शेंचा, दे इन रिश्शो पाइब सोक्त गेतीनी। मेको आन कली मन्ना शोब्ले गेचा मप्रोंइनी। मिनु मेको आन कली रूथ्री पा ब्वाक्कु तूचा गेतीनी। प्रस्थान १६:३५; प्रस्थान १७:६; गन्ती ११:१७-२५; भजन संग्रह ७८:१५-१६; भजन संग्रह ७८:२३-२४ 21 गे मेको आन कली ४० बर्स सम्म गोरशो रागीमी मारेड ममाल्चा डा पा थुल्तीनी। मेको आन वा मजेकम, आन खोइल यो गेनायो महोम्म। ब्यवस्था ८:४ 22 मेको आन कली राज्य नु जात जात डा मुरपुकी नु ग्रापाइक्तीनी। मेको आन बाक्तीके का का पा योव्रशा गेतीनी। मिनु सीहोन माइश्शो, हेश्बोन रागी डा पिप नु ओग माइश्शो, बाशान रागी डा पिप आस रागी यो मेको आन कली गेतीनी। गन्ती २१:२३-२४; गन्ती २१:३३, ३५ 23 गे मेको आन तौ सरीड डा सोरुल खोदेंशो पा हिक्ने मचाप्चा डा पा शुश सेल्तीनी। मिनु आन किकी पिपी आन कली ‘गे मेको रागी आंम के सेलीन’ दैशो रागीमी चाक्दील्तीनी। 24 मिनु मेको आन तौ चच युइमी मेको रागी ओव्रशा, आंम के सेल्साकम। मिनु गे मेको रागीम बाक्ब कनानी नु आन पिपपुकी यो मेको आन गुइम गेतीनी। यहोसु १२:- 25 मेकोपुकीमी एर ओंथ नेल्ल ठेयब गारो हिरशो सहरपुकी ग्राशो बाक्तेकम। शुश ग्रेल्ब रू आंम के सेल्शो बाक्तेकम। रिश्शो थोव्रकीम ब्रीशो खिंपुकी आंम के सेल्शो बाक्तेकम। फुल्लु मुशा सेल्शो इनार, अडगुर रू, तेल रवा रू नु मार मार फल फुल रू शुश तशो बाक्तेकम। मिनु मेकोपुकीमी जशा ब्वशा, रूशा, दोम्शा इन ठेयब शिशी तशा, ग्येरसीशो बाक्तेकम। ब्यवस्था ६:१०-११; ब्यवस्था ३२:१५

26 मेको नेल्ल तशा यो इन दैशो मटिथु, ठेयब लेश्शा, इन अरेशो लोव्र मटीमे बाक्त। इन लोव्र पाइबपुकीमी आन कली ‘गे मरिश्शो पाइब बाक्नीनी। आं गे लेतीन’ देंमानु, मेको आन कली सदमे बाक्त। मिनु मेकोपुकीमी शुश शुक्शी पामे बाक्त। 27 मोपतीके गे मेको आन कली आन जोरी सत्रु आन गुइमी गेनी बाक्त। मेकोपुकीमी मेको आन कली शुश श्येत गेमे बाक्त। मिनु श्येत जामेनु ‘वारच पाइक्की’ दे इन कली पुन्मेनु, गे स्वर्ग रे आन पुंडशो नैनी बाक्त। गे इन ठेयब शिशीमी मेको आन कली आन जोरी सत्रु रे प्रोंइचा कली मुर सोइक्तीनी बाक्त। मिनु मेकोपुकीमी मेको आन कली प्रोन्मे बाक्त। न्यायाधीस ३:९, १५; न्यायाधीस २:१४-२२ 28 एर ओंथ डा आन जोरी सत्रु रे प्रोंइपाइसीशा, नाइश्शा बाक्मा नोले, लैशा इन मदाक्शो पामे बाक्त। मिनु गे मेको आन कली आन जोरी सत्रु आन गुइमी गेनी बाक्त। आन जोरी सत्रुपुकीमी मेको आन कली हुकुम पामे बाक्त। मिनु लैशा मेकोपुकीमी इन कली ‘वारच पाइक्की’ दे ग्रीमानु, गे स्वर्ग रे मेको आन पुंडशो नैशा, मेको आन कली इन ठेयब शिशीमी शुश खेयप प्रोंइनी बाक्त। 29 मिनु मेको आन कली इन अरेशो लोव्र गे लेत्वा कली, मेको आन कली टिचा शेंदीनी बाक्त। तन्न मेकोपुकी ठेयब लेश्शा, इन शेंतीके काइ मटिथु, इन पतीक लोव्र मपामे बाक्त। मुरपुकीमी इन पतीक लोव्र पशो नम हना, ब्रोंइचा ताम वा। तन्न मेकोपुकीम इन लोव्र मनैथु, मटिथु, इन गे आन ची हिरदमे बाक्त। लेवी १८:५ 30 गे शुश बर्स सम्म मेको आन कली फाल्नी बाक्त। इन लोव्र पाइबपुकीमी मेको आन कली इन सोक्त रे पा शेंपाइक्नी बाक्त। तन्न मेकोपुकीमी नैचा मबिस्समा बाक्त। मोपतीके गे मेको आन कली अर्को जात जात डा मुर आन गुइमी गेनी बाक्त। येरमीया ७:२५-२६; येरमीया ४४:४-६ 31 मो पाप्तेकम हना यो, इन ठेयब शिशीमी मेको आन कली मसाइक्थु, आन श्येत रे प्रोंइनी बाक्त। मारदे हना गे शिशी पाइब नु शुश दाक्ब परमप्रभु बाक्नीनी।

32 मिनु आंइ परमप्रभु, गे नेल्ल क्येडा ठेयब सक्ति पाइश्शो नु मान पा हिंचा माल्शो परमप्रभु बाक्नीनी। इन पशो कबल इन गेना हना यो दाक्तीक खाप्ब बाक्नीनी। अस्सुर डा पिप आन पाला रे मुलाक्त सम्म आंइ कली गेशो

श्वेत, आंइ पिप आन कली, आंइ ठेयब मुर आन कली, इन कली चढ़ेब आन कली, इन लोव्र पाइब आन कली, आंइ किकी पिपी आन कली नु इन मुर नेल्ल आन कली गेशो श्वेत कली आइक्व ममिन्तीन। *ब्यवस्था* ७:९, १२; १राजा ८:२३; *नेहेम्याह* १:५<sup>33</sup> आंइ कली दुम्तीके, गे ठीक पशो बाक्नीनी। मारदे हना गे आंइ कली रिम्शो पाइतीनी। गोपुकीमी चहिं इन कली थम मरिम्शो पाइतक। *दानीएल* ९:५, ७<sup>34</sup> आंइ पिप, आंइ ठेयब मुरपुकी, इन कली चढ़ेबपुकी नु आंइ किकी पिपीमी इन अरेशो लोव्र मपथु, इन शेंतीके नु इन गेशो होस पतीक लोव्र मनेशु, हिक्सीन महिक्मे बाक्त।<sup>35</sup> मिनु आन आंम राज्यमी, इन रिम्शो पतीकेमी नु आन बाली नाली शुश ग्रेल्ब ठेयब रागीमी इन कली मान मपामे बाक्त। आन काइ मरिम्शो गेय मप्रोन्मे बाक्त।<sup>36</sup> मुलाक्ती गो वाइलीम वाइल दुम्शो बाक्नीकी। आंइ किकी पिपी आन कली मेको रागी डा फल फुल जचा नु मेकेर डा रिम्शो रिम्शो थोव्रक तचा कली गेशो बाक्तीनी। इन गेशो रागीमी गो वाइलीम वाइल दुम्शो बाक्नीकी।<sup>37</sup> मेको रागी डा मारेइ मारेइ रिम्शो थोव्रकी गे आंइ कली हुकुम पपाइक्व पिप आन कली ताइब सेलतीनी। मेको आंइ मरिम्शो पतीके आ पब्रम बाक्व। मेकोपुकीमी आंइ कली नु आंइ बी ब्यफ नु क्यारश भेडा आन कली आन दाक्स पा पाइनीमी। मोदेशो पा गो शुश श्वेत जशो बाक्नीकी” दे एज्जामी परमप्रभु कली लोव्र पाप्तु।

<sup>38</sup> मिनु मेको आन पशो नेल्ल मिम्शा, गोपुकीमी परमप्रभु नु कबल का पाइतक। मिनु मेको कबल डा लोव्र नेल्ल ब्रेक्ताक्क। मेको छाप थोक्शो ब्रेक्सम आंइ ठेयब मुरपुकी, लेवीपुकी नु चढ़ेब आन नें ब्रेक्शो बाक्तेक्म।

छाप थोक्शो ब्रेक्सम मुर आन ब्रेक्शो नें

**10** मेको छाप थोक्शो ब्रेक्स आगाम सु सु आन नें ब्रेक्शो बाक्त दंशा हना: हाकाल्याह आ तौ हुकुम पाइब नेहेम्याह नु सिदकीयाह आस नें ब्रेक्शो बाक्त।

<sup>2</sup> मिनु चढ़ेबपुकी: सेरायाह, अजारयाह, येरमीया, <sup>3</sup> पशुर, अमारयाह, माल्कीयाह, <sup>4</sup> हत्तुश, शेबान्याह, माल्लुक <sup>5</sup> हारीम, मेरेमोथ, ओबदिया, <sup>6</sup> दानीएल, गिन्नेथोन, बारुक, <sup>7</sup> मेशुल्लाम, अबीयाह, मियामीन, <sup>8</sup> माजीयाह, बिल्गाइ नु शेमायाह आन नें ब्रेक्शो बाक्त।

<sup>9</sup> मिनु लेवीपुकी अजन्याह आ तौ येशुआ, हेनादाद आ खिं डा बिन्नुइ, कदमीएल <sup>10</sup> नु मेको आन लोकबपुकी शेबान्याह, होदीयाह, केलीता, पेलायाह, हानान, <sup>11</sup> मीका, रेहोब, हशाब्बाह, <sup>12</sup> जाक्कुर, शेरेब्याह, शेबान्याह, <sup>13</sup> होदीयाह, बानी नु बेनीनु आन नें ब्रेक्शो बाक्त।

<sup>14</sup> ठेयब मुरपुकी पारोश, पहाथ-मोआब, एलाम, जत्तु, बानी, <sup>15</sup> बुन्नी, अज्गाद, बेबाइ, <sup>16</sup> अदोनीयाह, बिग्वाइ, आदीन, <sup>17</sup> आतेर, हिज्कीयाह, अज्जुर, <sup>18</sup> होदीयाह, हाशुम, बेजाइ, <sup>19</sup> हारीफ, अनाथोथ, नेबाइ, <sup>20</sup> माग्पीअश, मेशुल्लाम, हेजीर <sup>21</sup> मेशेजाबेल, सादोक, यादुअ, <sup>22</sup> पेलात्याह, हानान, आनायाह, <sup>23</sup> होशेआ हनान्याह, हाशुब <sup>24</sup> हल्लोहेश, पिल्हा, शोबेक, <sup>25</sup> रेहुम, हशाब्नाह, मासेयाह, <sup>26</sup> अहीयाह, हानान, आनान, <sup>27</sup> माल्लुक, हारीम नु बानाह आन नें ब्रेक्शो बाक्त।

इसाएली आन पशो कबल

<sup>28</sup> मिनु लीशो मुरपुकी: चढ़ेबपुकी, लेवीपुकी, लाप्चो खाल पाइबपुकी, कुम्सो पाइबपुकी, परमप्रभु यावे आ खिमी गेय पाइबपुकी नु परमप्रभु आ अरेशो पचा कली अर्को रागी डा मुरपुकी रे तिल्सीशो वोंइश मुर, मीश मुर, आन तमी तौपुकी सु सु रुजे चाप्ब बाक्मा, मेको नेल्ल बाक्तेक्म। <sup>29</sup> मेको आन लोकब नु आन ठेयब मुरपुकी नु गारशा, परमप्रभु यावे आ वाइल मोसामी गेशो परमप्रभु आ अरेशो लोव्र टिचा कली थुं का पाम्तेक्म। आंइ परमप्रभु यावे आ शेंशो, आ पतीक लोव्र नु आ फुल्लुम मुशा ब्रेक्शो लोव्र तुइश्शा पचा कली कसम जाप्तेक्म। <sup>30</sup> मिनु गोपुकीमी आंइ तमी आन कली मेको रागी डा अर्को जात डा मुर आन कली मगेनीक। आंइ तौ आन कली यो मेको आन तमीपुकी मचाक्नीकी। *प्रस्थान* ३४:१६; *ब्यवस्था* ७:३; *एज्जा* ९:२<sup>31</sup> मिनु मेको रागी डा मुरपुकीमी नाइक्तीक नाक्त मार मार लेयतीक थोव्रक नु अन्न लेयथ चाक्तेक्म हना, गोपुकीमी नाइक्तीक नाक्त

नु परमप्रभु आ ठेयब नाक्तीम मेको आन के मारेइ मग्याप्नीकी। मिनु गोपुकी ६ बर्स आ नोले डा बर्सम मारेइ मखुम्नीकी। जेर गेशो बाक्तक हना यो, मेको बर्समी जेर नु आ चाइक्व काइ मपोक्थु, प्रॉइनीकी। *ब्यवस्था* १५:१-११; *नेहेम्याह* ५:१०; *नेहेम्याह* १३:१५-१८; *येरमीया* १७:२१-२७<sup>32</sup> मिनु गोपुकीमी बर्स बर्स कली शेकेल का के भाग सां डा भाग का परमप्रभु यावे आ खिं डा गेय कली गेनीकी, दे आंइ थुं फ्रेंताक्क। *शेकेल का* ११.५ *ग्राम डा क्येट बाक्ब।* *इतिहास* २४:६; *मत्ती* १७:२४<sup>33</sup> मार पचा कली गेनीकी दंशा हना, परमप्रभु आ डोंइती वोइश्शो कोंइतीक शोब्ले कली अन्न चढ़ेतीक नु चोशा चढ़ेतीक कली, नाइक्तीक नाक्तीम चढ़ेतीक, औसीम चढ़ेतीक, अरु चाड डा चढ़ेतीक, नेल्ल इं परमप्रभु आ खिं कली माल्शो थोव्रकी, पाप क्याम्पाइक्वा कली चढ़ेतीक, मोदेशो पा इसाएली आन मरिम्शो पशो क्याम्वा कली नु इं परमप्रभु आ खिमी पतीक गेय नेल्ल कली गेनीकी। <sup>34</sup> मिनु गो, चढ़ेबपुकी, लेवीपुकी नु मुर नेल्लेमी इं परमप्रभु आ खिं कली कचेत सु सुम क्याक्वा, दे फेन्टे आप्तक। खिं खिं डा मुरपुकी बर्स बर्समी परमप्रभु यावे आ अरेशो लोव्रम ब्रेक्शो खोदेशो पा परमप्रभु यावे, इं परमप्रभु आ खिंम चढ़ेचा कली शी चाक्वा माल्नीम। *प्रस्थान* २५:३०<sup>35</sup> मिनु बर्स बर्सम नेल्ल क्येडा डोंइती डा आंइ रूम सिश्शो, मार मार रवा आन फल फुल परमप्रभु यावे आ खिंम चाक्नय। *लेवी* ६:५<sup>36</sup> आंइ नेल्ल क्येडा डोंइती जरमेशो तौ नु बस्तु भाव आन डोंइती जरमेशो परमप्रभु आ अरेशो खोदेशो पा परमप्रभु आ खिंमी चाक्वा कली आंइ थुं फ्रेंताक्क। आंइ नेल्ल क्येडा डोंइती जरमेशो बी ब्यफ, क्यारश, भेडा आंइ परमप्रभु आ खिंमी गेय पाइब चढ़ेब आन कली चाक्नीक, दे थुं फ्रेंताक्क। *प्रस्थान* १३:२<sup>37</sup> मिनु आंइ निशो फस डा नेल्ल क्येडा डोंइती डा भाग, अन्न चढ़ेतीके, मार मार रवा आन फल, अङ्गुर शांबु नु तेल चढ़ेब आन कली गेचा, दे परमप्रभु आ खिं डा वोइक्तीक कोठाम चाक्नीकी। मोदेशो पा लेवी नेल्लेम रागी डा १० भाग डा भाग का ताइनीम। मेको लेवीपुकीमी आंइ गेय पतीक सहर जाक्शा, १० भाग डा भाग का पोक्वा माल्नीम। *गन्ती* १५:२०-२१; *गन्ती* १८:२१<sup>38</sup> मोदेशो पा लेवीपुकी पोक्थ गाक्मानु, चढ़ेब हारून आ चच युइ यो लेवीपुकी नु गाक्वा माल्नीम। मिनु लेवीपुकी मेको आन पोक्शो रे पा १० भाग डा भाग का परमप्रभु आ खिं डा वोइक्तीक कोठामी वोइक्वा माल्नीम। *गन्ती* १८:२६, २८<sup>39</sup> मिनु इसाएली नु लेवीपुकीमी मेको चाक्शो अन्न, अङ्गुर शांबु नु तेल मार मार वोइक्तीक कोठाम चाक्वा माल्नीम। मारदे हना मेको परमप्रभु आ खिं डा बोसपुकी वोइक्तीके बाक्त। मिनु मेकेर गेय पाइब चढ़ेबपुकी, लाप्चोम खाल पाइबपुकी नु कुम्सो पाइबपुकी यो मेकेर बाक्नीम। मिनु गोपुकीम “परमप्रभु आ खिं श्येत्थ मवोइय्य” दे आंइ थुं फ्रेंताक्क।

यरूसलेम सहरम बाक्ब मुर

इतिहास ९:२-१७

**11** मिनु इसाएली आन ठेयब मुरपुकी यरूसलेममी बाक्शो बाक्तेक्म। लीशो मुर आन दाते रे सु परमप्रभु यावे आ सहर यरूसलेममी बाक्वा ताइबा, दे १० जना मुर आन दाते रे का योव्रचा कली फेन्टे आप्तेक्म। अरु ९ जना मुर चहिं अरु बाक्तीकेमी बाक्तेक्म। <sup>2</sup> मुरपुकीमी यरूसलेममी ग्येरशा लाइब नेल्ल आन कली आसीक गेम्तेक्म। <sup>3</sup> गाउं गाउं डा ठेयब मुर यरूसलेम सहरम बाक्शो बाक्तेक्म। अरु मुरपुकी, चढ़ेबपुकी, लेवीपुकी, परमप्रभु यावे आ खिंमी गेय पाइबपुकी नु सोलोमन आ खिं डा गेय पाइब आन चच युइ नेल्ल यहूदा डा सहर सहर, गाउं गाउंम आंम आंम बाक्तीक उइ बाक्वा माल्बाक्तेक्म।

यरूसलेमम बाक्ब यहूदी

<sup>4</sup> यरूसलेममी यहूदा नु बेन्यामीन आस थर डा मुर का निक्शी बाक्शो बाक्तेक्म। यहूदा आ थर डा मुर सु सु बाक्तेक्म दंशा हना, उज्जीयाह आ तौ अथायाह, मेको उज्जीयाह आ आफ जकरिया बाक्त। जकरिया आ आफ अमारयाह बाक्त। अमारयाह आ आफ शेफत्याह बाक्त। मिनु शेफत्याह आ आफ मा-हालालेल बाक्त। मिनु मेको पेरेस आ चच युइ बाक्तेक्म। <sup>5</sup> मिनु

बारुक आ तौ मासेयाह बाक्त। बारुक आ आफ कोल-होजे बाक्त। कोल-होजे आ आफ हाजायाह बाक्त। हाजायाह आ आफ अदायाह बाक्त। अदायाह आ आफ योयारीब बाक्त। योयारीब आ आफ जकरिया बाक्त। मेको शिलो डा मुर आ खिं डा मुर बाक्तेकम।<sup>6</sup> यरूसलेमम बाक्ब पेरेस आ चच युड नेल्ल पा ४ सहे ६८ जना बोल्यो नु महिं ब वोंडश मुर बाक्तेकम।

यरूसलेमम बाक्ब बेन्यामीनी

<sup>7</sup> मिनु बेन्यामीन आ थर डा मुर सु सु बाक्तेकम देंशा हना, मेशुल्लाम आ तौ सल्लु बाक्त। मेशुल्लाम आ आफ योएद बाक्त। योएद आ आफ पेदायाह बाक्त। पेदायाह आ आफ कोलायाह बाक्त। कोलायाह आ आफ मासेयाह बाक्त। मासेयाह आ आफ इथीएल बाक्त। इथीएल आ आफ येशायाह बाक्त।<sup>8</sup> मिनु मेको सल्लु आ नोले गब्बाइ नु सल्लाइ बाक्ताक्से। मेको नेल्ल पा ९ सहे २८ जना बाक्तेकम।<sup>9</sup> जिक्री आ तौ योएल मेको आन कली कोवब, ठेयब मुर बाक्त। हास्सेनुआ आ तौ यहूदा योएल नोले सहर डा ठेयब मुर दुश्शो बाक्त।

यरूसलेमम बाक्ब चढ़ेबपुकी

<sup>10</sup> मिनु चढ़ेब सु सु बाक्तेकम देंशा हना, योयारीब आ तौ येदायाह, याकीन,<sup>11</sup> हिल्कीयाह आ तौ सेरायाह, हिल्कीयाह आ आफ मेशुल्लाम, मेशुल्लाम आ आफ सादोक, सादोक आ आफ मेरायोथ, मेरायोथ आ आफ अहीतुब चढ़ेब बाक्तेकम। मिनु अहीतुब परमप्रभु आ खिं डा ठेयब मुर बाक्त। २राजा २५:१८; एज्रा २:२<sup>12</sup> मिनु मेको नु परमप्रभु आ खिम गेय पाइब लोकबपुकी ८ सहे २२ जना बाक्तेकम। मिनु येरोहाम आ तौ अदायाह, येरोहाम आ आफ पेलायाह, पेलायाह आ आफ अम्जी, अम्जी आ आफ जकरिया, जकरिया आ आफ पशहुर, पशहुर आ आफ माल्कीयाह बाक्त।<sup>13</sup> मिनु मेको आ लोकब आन खिं डा ठेयब मुरपुकी बाक्तेकम। मेको नेल्ल पा २४२ जना बाक्तेकम। मिनु अजारेल आ तौ अमाशै बाक्त। मेको असारेल आ आफ अहजाइ, अहजाइ, आ आफ मेशील्लेमोथ, मेशील्लेमोथ, आ आफ इम्मेर बाक्त।<sup>14</sup> मिनु मेको आन लोकबपुकी महिं ब ठेयब थुं पाइश्शो लडाइ पाइब वोंडश मुर बाक्तेकम। मेको नेल्ल पा १२८ जना बाक्तेकम। मेको आन ठेयब मुर हग्गोदोलीम आ तौ जब्दीएल बाक्त।

यरूसलेमम बाक्ब लेवीपुकी

<sup>15</sup> लेवीपुकी सु सु बाक्तेकम देंशा हना, हश्शुब आ तौ शेमायाह, हाश्शुब आ आफ अञ्जीकाम, अञ्जीकाम आ आफ हशाब्याह, हशाब्याह आ आफ बुन्नी बाक्त।<sup>16</sup> मिनु लेवी आन ठेयब मुरपुकी शब्बेथाइ नु योजाबाद बाक्ताक्स। मेको निक्शी परमप्रभु आ खिं डा लाडगा माल्शो मारेइ मारेइ गेय पचा कली कोवब वोंडशो बाक्ताक्स।<sup>17</sup> मिनु मीका आ तौ मत्तन्याह बाक्त। मीका आ आफ जब्दी बाक्त। जब्दी आ आफ आसाफ बाक्त। आसाफमी परमप्रभु कली पुंडची ना “गे रिश्शो पाइब ननी” दे ठेयब सेल्शा, कुम्सो पपाइक्ब बाक्त। मेको आसाफ आ नोले डा शेंब आ लोकब बाक्बुकीयाह बाक्त। मिनु शम्मुआ आ तौ अब्दा, शम्मुआ आ आफ गालाल, गालाल आ आफ येदुथून बाक्त।<sup>18</sup> मेको सहरम बाक्ब लेवी नेल्ल पा २८४ जना बाक्तेकम।

लाप्चो खाल पाइबपुकी

<sup>19</sup> लाप्चो खाल पाइब सु सु बाक्तेकम देंशा हना, अक्कुब ताल्मोन नु आन लोकब नेल्ल पा सहे का ७२ जना बाक्तेकम।<sup>20</sup> मिनु लीशो इस्त्राएली, चढ़ेबपुकी नु लेवीपुकी यहूदा डा सहरपुकीमी आंम आंम आन बाक्तीकेमी बाक्शो बाक्तेकम।<sup>21</sup> मिनु परमप्रभु यावे आ खिं डा गेय पाइबपुकी यरूसलेम सहर ओफेल माइक्तीकेमी बाक्शो बाक्तेकम। सीहा नु गिशपा परमप्रभु यावे आ खिं डा गेय पाइब आन कली कोवब बाक्ताक्से।

<sup>22</sup> यरूसलेममी बाक्ब लेवी आन कली कोवब सु सु बाक्तेकम देंशा हना, बानी आ तौ उज्जी बाक्त। उज्जी आ आफ हशाब्याह बाक्त। हशाब्याह आ आफ मत्तन्याह बाक्त। मत्तन्याह आ आफ मीका बाक्त। मेको नेल्ले

परमप्रभु आ खिम कुम्सो पाइब शेंब आसाफ आ चच युड बाक्तेकम।

<sup>23</sup> मिनु पिपमी मेको कुम्सो पाइब आन पर्बम आन नाक्त कित कित डा पतीके आंमान ब्रेक्शा, अरेवा बाक्त। मेको आन कली मार मार गेचा, दे यो ब्रेक्शो बाक्त।<sup>24</sup> मिनु जेराह आ चच युड रे मेशेजाबेल आ तौ पेथायाह बाक्त। मेको मेशेजाबेल आ आफ बाक्त। मिनु जेराह आ आफ यहूदा बाक्त। मेको पेथायाह चहिं मुरपुकीम मार मार माल्नीमी, दे कोवब, पिप आ खिम गेय पाइब बाक्त।

यरूसलेम एर ओंथ डा गाउं

<sup>25</sup> मिनु यहूदा आ थर डा मुरपुकी का निक्शी आंम आंम आन खिम नु रूम बाक्शो बाक्तेकम। मेकोपुकी किरयथ-अरबा नु मेको मेर डा गाउंपुकी, दीबोन नु मेको मेर डा गाउंपुकीम, येकाबसेल सहर नु मेको मेर डा गाउंपुकीम, यहोसु २०:७<sup>26</sup> येशुआ, मोलादा नु बेथ-पेलेत सहरम,<sup>27</sup> हासार-शुआल, बेयर-शेबा सहर नु मेको मेर डा गाउंपुकीम,<sup>28</sup> सिकलाग, मेकोनाह सहर नु मेको मेर डा गाउंपुकीम, यहोसु १५:३१<sup>29</sup> एन-रिम्मोन, सोराह, यरमुथ,<sup>30</sup> जानोह, अदुल्लाम सहर नु मेको मेर डा गाउंपुकीम, लाकीश नु मेको मेर डा रूपुकीम नु आजेका नु मेको मेर डा गाउंपुकीमी बाक्तेकम। मोपा बेयर-शेबा रे हिन्नाम बेसी सम्म बाक्शो बाक्तेकम।<sup>31</sup> बेन्यामीन आ चच युड गेबा सहर रे मिकमाश, अय्या, बेथेल नु मेको मेर डा गाउंपुकीम, यहोसु १८:२२<sup>32</sup> अनाथोथ, नोब, अनान्याह,<sup>33</sup> हासोर, रामाह, गित्ताइम,<sup>34</sup> हादीद, सेबोयीम, नेबल्लात<sup>35</sup> लोद नु ओनो सहरमी गेय पाइब आन बाक्तीक सम्म बाक्तेकम।<sup>36</sup> यहूदामी बाक्ब का निक्शी लेवीपुकी बेन्यामीन थर नु बाक्थ लशो बाक्तेकम।

चढ़ेब नु लेवीपुकी

<sup>12</sup> शाल्तीएल आ तौ जेरूब-बाबेल नु येशुआ नु काथा लेशशा जाक्ब चढ़ेब नु लेवीपुकी सु सु बाक्तेकम देंशा हना, सेरायाह, येरमीया, एज्रा एज्रा २:२<sup>2</sup> अमारयाह, माल्लुक, हत्तुश,<sup>3</sup> शेकन्याह, रेहुम, मेरेमोथ,<sup>4</sup> इददो, गिन्नेथोइ, अबीयाह, लूका १:५<sup>5</sup> मियामीन, मा-अदीयाह, बिल्गाह,<sup>6</sup> शेमायाह, योयारीब येदायाह,<sup>7</sup> सल्लु, अमोक, हिल्कीयाह नु येदायाह बाक्तेकम। मेकोपुकी येशुआ आ पाला डा चढ़ेब नु आन लोकब आन ठेयब मुर बाक्तेकम।

<sup>8</sup> मिनु लेवीपुकी सु सु बाक्तेकम देंशा हना, येशुआ, बिन्नुइ, कदमीएल, शेरब्याह, यहूदा नु मत्तन्याह बाक्तेकम। मेको नु आन लोकबपुकी परमप्रभु यावे कली ठेयब सेल्तीक कुम्सो पपाइक्ब बाक्तेकम।<sup>9</sup> मेको आन लोकब बाक्बुकीयाह नु उन्नो कुम्सो पची ना आन नेक्था बाक्बक्ताक्स।

<sup>10</sup> येशुआ योयाकीम आ आफ बाक्त। योयाकीम एल्याशीब आ आफ बाक्त। एल्याशीब यो-यादा आ आफ बाक्त। नेहेम्याह ३:१<sup>11</sup> यो-यादा योनाथन आ आफ बाक्त। मिनु योनाथन यादुअ आ आफ बाक्त।

चढ़ेब आन ठेयब मुरपुकी

<sup>12</sup> योयाकीम आ पालामी चढ़ेब आन खिं खिं डा ठेयब मुर सु सु बाक्तेकम देंशा हना, सेरायाह आ खिं डा ठेयब मुर मेरायाह, येरमीया आ खिं डा ठेयब मुर हनान्याह,<sup>13</sup> एज्रा आ खिं डा ठेयब मुर मेशुल्लाम, अमारयाह आ खिं डा ठेयब मुर येहो-हानान,<sup>14</sup> माल्लुक आ खिं डा ठेयब मुर योनाथन, शेबान्याह आ खिं डा ठेयब मुर योसेफ,<sup>15</sup> हारीम आ खिं डा ठेयब मुर अदना, मेरायोथ आ खिं डा ठेयब मुर हेल्काइ,<sup>16</sup> इददो आ खिं डा ठेयब मुर जकरिया, गिन्नेथोन आ खिं डा ठेयब मुर मेशुल्लाम,<sup>17</sup> अबीयाह आ खिं डा ठेयब मुर जिक्री, मीन्यामीन आ खिं डा ठेयब मुर का, मोअदयाह आ खिं डा ठेयब मुर पिल्लाइ,<sup>18</sup> बिल्गाह आ खिं डा ठेयब मुर शम्मुआ, शेमायाह आ खिं डा ठेयब मुर येहो-नाथान,<sup>19</sup> योयारीब आ खिं डा ठेयब मुर मतेनाइ, येदायाह आ खिं डा ठेयब मुर उज्जी,<sup>20</sup> सल्लाइ आ खिं डा ठेयब मुर कल्लाइ, अमोक आ खिं डा ठेयब मुर एबेर,<sup>21</sup> हिल्कीयाह आ खिं डा ठेयब मुर हशाब्याह नु येदायाह आ खिं डा ठेयब मुर नेथनेल बाक्तेकम।

22 पारसी डा पिप दारा आ पालामी चढेब नु लेवी आन खिं डा ठेयब मुर आन नें ब्रेक्शा वोइश्शो बाक्त। चढेब आन नेल्ल क्येडा ठेयब चढेब एल्याशीब, यो-यादा, योहानान नु यादुअ आन पाला सम्म आन खिं डा ठेयब मुर आन नें ब्रेक्शो बाक्तेक्म।

23 मिनु लेवी आन खिं डा ठेयब मुर आन नें एल्याशीब आ तौ योहानान आ पाला सम्म इतिहास डा किताबमी ब्रेक्शो बाक्तेक्म।

#### परमप्रभु कली ठेयब सेल्शो

24 मिनु लेवी आन ठेयब मुरपुकी हशाब्याह, शेरब्याह नु कदमीएल आ तौ येशुआम परमप्रभु यावे कली ठेयब सेल्तेक्म। आन लोकबपुकी परमप्रभु आ मुर दाऊदम देशो खोदेशो पा मेको आन आइक्वी गे राप्शा, पालो पा परमप्रभु यावे कली कुम्सो पा ठेयब सेल्तेक्म। मोपा कुम्सो पाइब आन हुल का एर गे नु हुल का ओथ गे बाक्तेक्म। *इतिहास २५:-; २इतिहास २९:२५* 25 मत्तन्याह, बाकबुकीयाह, ओबदिया, मेशुल्लाम, ताल्मोन नु अक्कुब चहिं ठेयब लाप्चो आ नेक्था डा मार मार वोइक्तीक कोठा डा लाप्चो खाल पाइब बाक्तेक्म। *२इतिहास ८:१४* 26 मेको नेल्लेमी योसादाक आ चच, येशुआ आ तौ योयाकीम नु हुकुम पाइब नेहेम्याह नु परमप्रभु यावे आ लोव्र जोक्ब तुइक्ब चढेब एज्रा आ पालामी मोदेशो गेय पाइब बाक्तेक्म। *इतिहास ५:४०-४१*

#### गारो सेल्ने थुम्शो

27 मिनु यरूसलेम डा गारो प्रोवने थुम्तीक चाड कली लेवी आन कली आन आन बाक्तीक तेइ तेइ रे माल्शा, यरूसलेममी चाक्तेक्म। मारदे चाक्तेक्म देशा हना, गारो थुम्तीके परमप्रभु यावे आ डोंइती ग्येरसीशा "गे रिम्शो पाइब ननी" दे ठेयब सेल्तीक कुम्सो पचा नु खैजडी, तार पाइश्शो ठेयब ताप्तीके नु बीना ताप्चा कली चाक्तेक्म। 28 मिनु कुम्सो पाइबपुकी यरूसलेम नु आ एर ओथ नु नेतोफाह आ मुर आन बाक्तीक रे यरूसलेममी खुम्साक्म। 29 बेथ-गिल्याल नु गेबा सहर नु अज्मावेथ रे यो जाक्तेक्म। मारदे हना कुम्सो पाइबपुकीमी यरूसलेम आ एर ओथम आम आम कली बाक्तीके सेल्शा बाक्शो बाक्तेक्म। 30 चढेब नु लेवीपुकीमी आम आम कली चोव्रखो सेल्सीशा, नोले मुर आन कली नु ठेयब लाप्चोपुकी नु गारो आन कली चोव्रखो सेल्तेक्म।

#### गारो थुम्शा चाड मानेशो

31 मिनु गो यहूदा रागी डा ठेयब मुर आन कली गारो तार डोइक्पाइक्तामी। परमप्रभु यावे कली ठेयब सेल्ब कुम्सो पाइब आन कली ठेयब हुल निक्शी पा वोइक्ता। हुल का गारो तारी ग्युरा गे पा, मोव्रल लाप्चो गे लाम्तेक्म। 32 मिनु मेको कुम्सो पाइब आन नोले होशयाह नु यहूदा डा ठेयब मुर आन हुल का लाम्तेक्म। 33 मिनु मेको आन नोले अजारयाह, एज्रा, मेशुल्लाम, 34 यहूदा, बेन्यामीन, शेमायाह नु गेरमीया लाम्तेक्म। 35 मिनु चढेब आन तौ का निक्शी तुराही ताप्बपुकी यो मेको आन नोले खोइक्तेक्म। योनाथन आ तौ जकरिया, योनाथन आ आफ शेमायाह, शेमायाह आ आफ मत्तन्याह, मत्तन्याह आ आफ मीकाया नु जाक्कुर आ आफ आसाफ बाक्त। 36 मिनु मेको आ लोकबपुकी शेमायाह, अजारेल, मिलालाइ, गिलालाइ, माड, नेथनेल, यहूदा नु हानानी बाक्तेक्म। मेकोपुकीमी परमप्रभु आ मुर दाऊद आ ताप्तीकपुकी ताप्शा गाक्तेक्म। मिनु परमप्रभु यावे आ लोव्र जोक्ब तुइक्ब एज्रा मेको आन डोंइती गाक्ब बाक्त। 37 मिनु मेकोपुकी ब्वाक्कु बुक्तीक लाप्चो गे लाम्तेक्म। मिनु क्रेसी डोइश्शा, ग्येत्थ लशा, दाऊद आ सहर डा गारो डोइश्शा, दाऊद आ खिं लाक्शा, पूर्व गे बाक्शो ब्वाक्कु लाप्चो गे लाम्तेक्म।

38 मिनु परमप्रभु यावे कली "गे रिम्शो पाइब बाक्नीनी" दे कुम्सो पाइब आन अर्को हुल चहिं गारो तारी पेरा गे लाम्तेक्म। मिनु गो नु ठेयब मुर आन अर्को हुल मेको आन नोले खोइश्शा, मी मुइक्तीक माइश्शो लाइश्शो खिं लाक्शा, ब्रेम्शो गारो गे लाइतक। 39 मिनु नोले एफ्राइम लाप्चो, माइत गारो डा ठेयब लाप्चो, डांड लाप्चो, हानानेल माइश्शो लाइश्शो खिं, मेआ माइश्शो

लाइश्शो खिं लाक्शा, भेडा लाप्चो गे लाइतक। मिनु मेकोपुकी जेल्खान लाप्चोम जाक्दीशा नाइसाक्म।

40 मेकेर जाक्शा, परमप्रभु कली "गे रिम्शो पाइब बाक्नीनी" दे कुम्सो पाइब आन हुल निक्शी परमप्रभु आ खिं आ डोंइती राप्तेक्म। मिनु गो नु ठेयब मुर आन हुल का यो मेकेर बाक्तक। 41 मिनु चढेब एल्याकीम, मासेयाह, मीन्यामीन, मीकाया, एली-ओ-एनाइ, जकरिया नु हनान्याहमी तुराही ताप्तेक्म। 42 मिनु मासेयाह, शेमायाह, एलाजर, उज्जी, येहो-हानान, माल्कीयाह, एलाम नु एजेर यो मेको नु बाक्तेक्म। मिनु कुम्सो पाइबपुकीमी येजरायाह कुम्सो पाइब आन कली शेंब नु कुम्सो पाम्तेक्म। 43 मेको नाक्त ठेयब चढेतीक चढेशा, शुश ग्येरशो बाक्तेक्म। मारदे हना परमप्रभुमी मेको आन थुं थाम्पा ग्येरपाइक्तु। मीश मुरपुकी नु आलपुकी यो शुश ग्येरसाक्म। मिनु यरूसलेम डा मुर आन ग्येरसीशा सेंदा डोन डोन सम्म नेंसाक्व।

#### खाल पाइब आन गेय

44 मिनु मेको नाक्त मार मार वोइक्तीक कोठा खाल पाइब मुर आन कली वोइक्तेक्म। मेकोपुकी मुर आन गेशो चढेशो, डोंइती सिश्शो मार मार नु १० भाग डा भाग का चाक्शो ताक्शा साम्चा कली वोइश्शो बाक्तेक्म। मेकोपुकीमी सहर मेर डा रू रे चढेब नु लेवी आन भाग खुप्शा वोइक्तेक्म। मारदे हना यहूदा डा मुरपुकीम चढेब नु लेवी आन पशो तशा, दाक्शा, नेल्ल शुश ग्येरसीशा बाक्तेक्म। 45 चढेब नु लेवीपुकीमी परमप्रभु आ देशो खोदेशो पा चोव्रखेतीक गेय पाम्तेक्म। मिनु कुम्सो पाइब नु लाप्चो खाल पाइबपुकी यो दाऊद नु आ तौ सोलोमनमी देशो खोदेशो पा चोव्रखेतीके गेय पाइब बाक्तेक्म। 46 मारदे हना दाऊद नु आसाफ आस पालामी कुम्सो पाइब आन कली शेंब का बाक्शो बाक्त। मेना यो परमप्रभु कली ठेयब सेल्तीक नु "गे रिम्शो पाइब बाक्नीनी" दे कुम्सो पाइब बाक्शो बाक्तेक्म। *इतिहास २५:-* 47 मिनु इस्राएल डा मुर नेल्लेमी जेरूब-बाबेल नु नेहेम्याह आस पालामी कुम्सो पाइब नु लाप्चो खाल पाइब आन कली नाक्त किंत किंत डा माल्शो गेम्तेक्म। लेवी आन भाग वोइक्तेक्म। मिनु लेवीपुकीमी आन ताक्शो रे हारून आ चच युइ आन भाग वोइक्तेक्म। *गन्ती १८:२६; नेहेम्याह १०:३९*

#### अर्को रागी डा मुर तिल्शो

13 मेको नाक्ती मुर आन डोंइती मोसा आ ब्रेक्शो किताब पढेशो बाक्त। मिनु मेकेर मार ब्रेक्शो बाक्त देशा हना "अम्मोन नु मोआब डा मुरपुकी रे सुइ परमप्रभु आ मुर आन गुम्तीकेमी गेनायो जाक्चा मताइनीम। *ब्यक्स्था २३:४-६* 2 मारदे हना मेकोपुकी इस्राएली आन कली शोब्ले नु ब्वाक्कु गेचा कली गुम्थ मजाक्शो बाक्तेक्म। तन्न इस्राएली आन कली सराप पाइक्चा कली बालाम कली क्येट गेशा, ब्रेश्शो बाक्तेक्म। मो पाम्तेक्म हना यो, आइ परमप्रभुमी मेको सराप रे आसीक सेल्शो बाक्त" दे ब्रेक्शो बाक्त। *गन्ती २२:५-६* 3 मिनु मेको अरेशो लोव्र पढेशो नेंशा, अर्को रागी डा मुर नेल्ल आन कली तिल्तेक्म।

#### चढेब एल्याशीब कली हुइश्शो

4 मिनु मेको क्येडा डोंइती चढेब एल्याशीब आइ परमप्रभु आ खिं डा ठेयब कोव्रब बाक्त। मेको तोबीयाह एल्याशीब आ नेक्था डा मुर बाक्त। *नेहेम्याह २:१९* 5 मिनु चढेब एल्याशीबमी आम खिं डा मुर, तोबीयाह कली परमप्रभु यावे आ खिं डा वोइक्तीक ठेयब कोठा का गेशो बाक्त। डोंइती मेको कोठामी मार मार शेंशो खोदेशो पा चढेशो १० भाग डा अन्न, धूप, परमप्रभु यावे आ खिं डा बोसपुकी, मुर आन गेशो १० भाग डा भाग का अन्न, अडगुर शांबु नु तेल वोइश्शो बाक्त। मेको परमप्रभुमी शेंशो खोदेशो पा लेवी, कुम्सो पाइब, लाप्चो खाल पाइब नु चढेब आन तचा डा भाग वोइश्शो बाक्त।

6 मेको नेल्ल दुम्ची ना गो यरूसलेममी मबाक्शो बाक्ती। मारदे हना गो बेबीलोन डा पिप आरता-सास्त ३२ बर्स जाक्दीम्मेनु, पिप आ बाक्तीकेमी लेत्ती। मिनु इक्का नोले "यरूसलेम लेश्शा, लचा गेयीनी" दे पिप कली पुंडता। 7 मिनु गो यरूसलेम जाक्डानु, एल्याशीबमी तोबीयाह कली

परमप्रभु आ खिं डा कोठा गेशा, मरिश्शो पशो तुइक्ताकड।<sup>8</sup> मेको तुइश्शा, शुश गाइक्ताकड। मिनु गो तोबीयाह आ मार मार नेल्ल मेको कोठा रे गुंइशा ताइक्ताकड।<sup>9</sup> मिनु “मेको कोठा नेल्ल कली रिश्शो सेल्चा माल्नीम” दे अरेता। मिनु गो परमप्रभु आ खिं डा बोसपुकी, चढेशो अन्न नु ब्रोव्रशो रिना पाइब थोव्रक लेंशा वोइक्तामी।

<sup>10</sup> मिनु लेवीपुकीमी आन तचा माल्शो भाग मतशो बाक्तेक्म, दे आं कली तुइक्पाइक्तेक्म। मोपा मेको लेवीपुकी नु ठेयब सेल्लिक कुम्सो पाइब आन गेय प्रॉइशा, आंम आंम रूमी लशा, गेय पाइबाक्तेक्म। नेहेम्याह १२:४७  
<sup>11</sup> मोपतीके गो ठेयब मुर आन कली “परमप्रभु यावे आ खिं मारदे प्रॉइनी?” दे हुइक्ताकडमी। मिनु गो लेवी नु कुम्सो पाइब आन कली ब्रेश्शा, आन गेय पपाइक्तामी।<sup>12</sup> मिनु यहूदा रागीम बाक्ब नेल्लेमी १० भाग डा भाग का अन्न, नक अडगुर शांबु नु तेल परमप्रभु यावे आ खिं डा मार मार वोइक्तीक कोठामी चाक्तेक्म। गन्ती १८:२१  
<sup>13</sup> मिनु गो चढेब शेलेम्याह, ब्रेक्ब सादोक नु लेवी आ थर डा पेदायाह मेको सांफा कली मार मार वोइक्तीक कोठा कोव्रब मुर सेल्लामी। मिनु मत्तन्याह, आ चच नु जाक्कुर आ तौ हानान कली मेको आन कली वारच पाइब सेल्लता। मेकोपुकी थमा सुइक्चा पुंइसीशो मुर बाक्तेक्म। मिनु मेको आन लोक्ब आन तचा डा थोव्रक गेचा माल्लेक्म।<sup>14</sup> गो परमप्रभु यावे कली “आं परमप्रभु, इन खिं कोव्रशा नु मेकेर डा पशो रिश्शो पतीक मप्रेंदीन। आं कली मिम्तीन” देंती। नेहेम्याह ५:१९

#### नाइक्तीक नाक्त

<sup>15</sup> मेना गो का निक्शी यहूदाम बाक्बपुकीमी नाइक्तीक नाक्ती कोल खाक्शो, चेरब खुप्शो गधा आन कली मार मार कुरपा नाइक्तीक नाक्त यरूसलेममी चाक्शो तातामी। मेकोपुकीमी नाइक्तीक नाक्त अडगुर शांबु, अडगुर नु फोव्रशी यो यरूसलेमम लेयचा कली चाक्तेक्म। मिनु गो मेको आन कली “गे नाइक्तीक नाक्ती मेको मलेयडीन” दे हुइक्ताकडमी। नेहेम्याह १०:३२  
<sup>16</sup> यरूसलेममी बाक्ब टायर डा मुरपुकीमी यो डांइ नु लेयतीक मार मार थोव्रक नाइक्तीक नाक्त चाक्शा, यरूसलेममी बाक्ब यहूदी आन कली लेयतेक्म।<sup>17</sup> मिनु यहूदा डा ठेयब मुर आन कली हुइश्शा “नाइक्तीक नाक्त गे मार मरिश्शो गेय पनी? गे नाइक्तीक नाक्त अरु नाक्त खोदेंशो सेल्लनी। गे मत्तुइक्तीनी?”<sup>18</sup> मार, इन किकी पिपीमी यो मोदेंशोन मपामे डा? मो दुम्तीके, इं परमप्रभुमी एको सहर नु इं कली एको श्येत गेशो ममाइ डा? मिनु मुल गे नाइक्तीक नाक्त, गेय पतीक नाक्त खोदेंशो सेल्शा, परमप्रभु आ गाइक्तीक तेम्नीनी?” दे हुइक्ताकडमी। इजीकीएल २०:१२-१३

<sup>19</sup> मिनु “यरूसलेम डा गारो डा ठेयब लाप्चोपुकी नाइक्तीक नाक्त नां रिक्चा क्येडा डॉइती चोक्चा माल्नीम। मिनु नाइक्तीक नाक्त मनुम्म सम्म

रोक्चा मदुम्ब” दे माइक्तामी। मिनु नाइक्तीक नाक्ती मार मार थोव्रक यरूसलेममी मचाक्गमेक्ल, दे आंम आंम गेय पाइब का निक्शी आन कली लाप्चोपुकी खाल पचा कली वोइक्तामी।<sup>20</sup> मिनु नाक्दो मेको मार मार ग्याप्ब लेयबपुकीमी यरूसलेम मेर नां सोइताक्म। का निक्शी खेयप मोदेंशो पाम्तेक्म।<sup>21</sup> मिनु गो मेको आन कली “मारदे नाइक्तीक नाक्त गारो आ डॉइती उइ नां सोइदीनी? गे लेंशा मो पाइतीनी हना, इन कली मो मप्रॉइनन्नी” दे हुइक्ताकडमी। मेको नोले सुइ मुर नाइक्तीक नाक्ती मेकेर मजाक्म।<sup>22</sup> मिनु गो लेवी आन कली ब्रेश्शा “आंम कली ठीक सेल्लिनी। नाइक्तीक नाक्त परमप्रभु यावे के बाक्ब, दे मानेचा कली ठेयब लाप्चोपुकी खाल पथ बाक्कीन” दे माइक्तामी। मिनु गो “आं परमप्रभु, आं ओदेंशो पशो यो मिम्तीन। मिनु इन ठेयब नु गेना हना यो दाक्तीके कौइदीनी” देंती।

#### अर्को रागी डा मीश चाक्शो

<sup>23</sup> मिनु मेना यो गो अश्दोदी, अम्मोनी नु मोआबी मीश आन कली चाक्ब यहूदी आन कली गुम्तामी।<sup>24</sup> मेको आन आलपुकीमी का निक्शी अश्दोदी लोव्र पाइबाक्तेक्म। यहूदी आन लोव्र मजोक्थु, अर्को रागी डा मुर आन लोव्र पाइबाक्तेक्म।<sup>25</sup> मिनु गो मेकोपुकी नु जिशा, सराप पाइश्शा, का निक्शी आन कली तुप्शा, आन चां रोक्ताकडमी। मिनु मेको आन कली परमप्रभु आ नेंमी लोव्र पाइक्तामी। “गे इन तमीपुकी मेको आन तौ कली गेतीनी नु आन तमी इन तौ आन कली चाक्तीनी हना, आंइ कली खतम दुम्पाइक्नीनी” देंती। ब्यवस्था ७:३  
<sup>26</sup> मिनु “इस्त्राएल डा पिप सोलोमनमी मोदेंशो मीश चाक्शा पाप पवा, ममाइ? शुश रागी आन दातेमी मेको खोदेंशो पिप सुइ मबाक्म। मिनु परमप्रभुमी मेको कली दाक्शा, इस्त्राएली नेल्ल आन पिप सेल्शो बाक्त। मोदेंशो बाक्त हना यो, अर्को रागी डा मीश मुरपुकीमी मेको कली पाप पपाइश्शो बाक्तेक्म। १राजा ११:३-८  
<sup>27</sup> मिनु मार, गोपुकीमी इन लोव्र नेंशा, इन खोदेंशो पा इं परमप्रभु कली शुश मरिश्शो पा, अर्को रागी डा मीश चाक्नीनी?” दे हुइक्ताकडमी।

<sup>28</sup> मिनु नेल्ल क्येडा ठेयब चढेब एल्याशीब आ चच, येहो-यादा आ तौमी होरोनी सान्बल्लत आ तमी का चाक्शो बाक्त। मोपतीके गो मेको कली आं डॉइती रे गुंइशा खेरता। नेहेम्याह २:१०, १९; नेहेम्याह १२:१०  
<sup>29</sup> “आं परमप्रभु, मेकोपुकीमी इन कली चढेतीक गेय नेल्ल मरिश्शो सेल्लेक्म। मोदेंशो पा मेकोपुकीमी चढेब नु लेवी आन पशो कबल प्रॉइतेक्म। मेको मिम्तीन” देंती।<sup>30</sup> मिनु गो मेको आन कली अर्को रागी डा मारेइ मारेइ रे ठीक सेल्लामी। मिनु गो चढेब नु लेवी आन पचा माल्शो गेय लेंशा पपाइक्तामी। गन्ती २५:१२-१३; मलाकी २:८  
<sup>31</sup> मिनु परमप्रभु आ खिं कली शी नु नेल्ल क्येडा डॉइती सिश्शो फल चाक्चा आ पर्वम लोव्रसी गारपाइक्ता। मिनु गो “आं परमप्रभु, आं पशो मिम्शा, आं कली रिश्शो पाइय्यीनी” देंती।



## एस्तर

ब्रेक्ब मुर सु बाक्मे, मेको मतुंडसीब देंनीम। तन्न मोरदेकैमी एस्तर आ पर्वम नेल्ल ब्रेक्शो बाक्ब, देंनीम। का निक्शी मुरुम “एज्राम ब्रेक्शो बाक्ब” देंनीम। इस्राएलीपुकी ग्याइश्शा बेबीलोन लाइक्चा पुंडसीशो नोले जेरूब-बाबेल नु इस्राएली यरूसलेम लेशो बाक्तेक्म। मेको आन दातेमी एज्रा यो बाक्त। एको ५३६-४५८ बि. सी. डा लोत्र बाक्ब। मेना एज्रा नु नेहेम्याह यरूसलेम सहरमी गेय पशो बाक्ताक्स। हागै नु जकरिया यो बाक्सा बाक्त। मेना एस्तर आ किताब ब्रेक्शो बाक्त।

एको किताब परमप्रभुमी आ मुर आन कली दाक्शा, श्येत रे प्रॉइशो आ पर्वम कोंइशा ब्रेक्शो बाक्ब। मेना रे यहूदीपुकीमी पुरीम चाड मानेनीम। मेको पुरीम चाड एस्तरमी यहूदी आन कली श्येत रे प्रॉइशो आ पर्वम मिस्तीक चाड का बाक्ब।

### पिप अहासूरस आ ठेयब दुस्तीके

1 एको लोत्र नेल्ल अहासूरस माइश्शो पिप आ पालाम दुश्शो लोत्र बाक्ब। अहासूरसमी भारत रे एथीयोपीया माइश्शो कूश रागी सम्म पा १२७ ओटा रागी आन कली सासन पाइब बाक्त। 2 मेना मेको पिप अहासूरसमी आ राज्य डा सुसा दरवारमी आ ठेयब नित्तीकेमी निश्शा सासन पाप्तु। 3 मिनु मेको पिप दुश्शो ३ बर्स जाक्दीम्मेनु, आ हुकुम पाइब मुर नु सरकार डा गेय पाइब नेल्ल आन कली भोज का गेप्तु। मेको भोजमी मादी नु पारसी आन ठेयब मुर नु मेको रागी डा हुकुम पाइब नेल्ल जाक्शो बाक्तेक्म। 4 मिनु मेको पिपमी १८० नाक्त सम्म आ राज्य डा शुश शोंप, आ दारस नु आ ठेयब दुस्तीके मेको आन कली कोंइताक्मी। 5 मेको कोंइतीक नाक्त नुम्मेनु, मेको पिपमी आ दरवार डा ठेयब नु आइक्च मुर नेल्ल आन कली ठेयब भोज गेप्तु। मिनु मेको भोज सुसा दरवार डा लाडगाम ७ नाक्त सम्म दुम्त। 6 मिनु पिप आ दरवार नेल्ल दारपाइक्चा कली बुश नु नीलो वा क्याइश्शो बाक्तेक्म। मेको वापुकी नीलो झुम्का पाइश्शो दारशो मलमल के बाक्तेक्म। मिनु मेको वा आन कली बुश नु नीलो डोरी पाइश्शो, चांदी के ग्याइक्तीकेमी शुश क्येट लाइब बुश फुल्लु के थामम क्युक्शो बाक्तेक्म। मेकेर सुन नु चांदी के सेल्शो नित्तीके बाक्तेक्मे। मेको बुटा आप्शो शुश क्येट लाइब बुश, गिगी नु क्येर फुल्लुम साप्शो खप तारी वोइश्शो बाक्तेक्म। 7 मिनु मेको मुर आन कली सुन के कचौरामी अडगुर शांबु तूचा गेशो बाक्तेक्म। मेको कचौरा का का पा अर्को अर्को खाल डा बुटा आप्शो बाक्तेक्म। मिनु पिपमी मेको आन कली शुश अडगुर शांबु तूचा गेप्तु। 8 मेको नेल्लेमी आंम आंम दाक्शो पा तूचा ताम्तेक्म। मारदे हना पिपम “नेल्ल आन कली आंम दाक्शो तूचा गेन” दे आ शांबु ख्रेष्व आन कली माइश्शो बाक्त।

### पिपमी वास्तीमी पिप कली मटिशो

9 मिनु वास्ती पिपमीमी यो दरवार डा मीश मुर आन कली पिप अहासूरस आ दरवारमीन ठेयब भोज का गेप्तु। 10 मेको भोज दुश्शो ७ नाक्तीमी पिप अहासूरस अडगुर शांबुम रांइशा, पिपम आ दरवार डा ७ जना शुश अधिकार पाइश्शो गेय पाइब मेहमान, बिस्था, हारबोना, बिग्थान, आबाग्था, जेथार नु कारकस आन कली 11 “पिपमी वास्ती कली आ सिरपेच गुम्सीशा, मुर नेल्ल नु हुकुम पाइब आन डोंइती आ दारस कोंइचा कली चाक्कीन” दे अरेशा सोइक्ताक्व। मारदे हना मेको पिपमी शुश दारशो बाक्त। 12 तन्न पिपमीमी पिप आ सोइश्शो मुर आन देंशो मबिस्से। मोपा वास्तीम मबिश्शो तशा, मेको पिप हिंचा डा पा गाइक्ताक्व।

### पिपमी वास्ती कली सजाइ गेशो

13 मिनु पिपमी “मुल मार पचा” दे जोक्ब तुइक्ब नु लोत्र पाप्तु। मेको जोक्ब तुइक्बमी डोंइती रे पिप कली अर्ती गेबाक्मा बाक्त। मिनु ऐन कानुन

जोक्ब तुइक्ब नेल्लेमी “मुल मार पचा” दे सल्ला पाम्तेक्म। 14 मेको पिप कली सल्ला गेब सु बाक्मा बाक्त, देंशा हना, पारसी नु मादी डा ७ जना हुकुम पाइब कारशेना, शेथार, अदमाथा, टारशीश, मेरेस, मारसेना नु मेमुकान बाक्मा बाक्त। मेकोपुकी पिप आ डोंइती बाक्शा, नेल्ल क्येडा ठेयब अधिकार पा गेय पाइब बाक्तेक्म। 15 मिनु पिप अहासूरसमी मेको आन कली “आं गेय पाइब रे पा आं सोइश्शो लोत्र पिपमी वास्तीमी मटीव। मोपतीके मेको कली ऐन कानुन कोत्रशा मार पचा?” दे हिल्लो पाप्तु। 16 मिनु मेमुकानमी पिप नु आ सरकार डा हुकुम पाइब नेल्ल आन डोंइती “पिपमी वास्तीमी पिप कली ला ममाइ, तन्न हुकुम पाइब नेल्ल आन कली नु पिप अहासूरस आ रागी डा मुर नेल्ल आन कली मरिश्शो पाप्तु। 17 मुल पिपमी आ मरिश्शो पशो मीश मुर नेल्लेमी तुइक्नीम। मोपतीके मेकोपुकीमी यो आन वोंइश कली आइक्च सेल्शा मटीनीम। मेकोपुकीमी ‘पिप अहासूरसमी पिपमी वास्ती कली आ बाक्तीकेमी ब्रेत्ताक्व, तन्न पिपमीमी मटीव’ दे लोत्र पाइनीम। 18 मिनु पिपमी आ पशो आ पर्वम नेंब मादी नु पारसी डा सासन पाइब आन मीश मुरपुकीमी, पिप आ सासन पाइब नेल्ल आन कली मुलाक्त डा लोत्र पाइनीम। मिनु मीश मुरुमी आन वोंइश आन कली मटिथु, शुश जिचा पोक्नीम। 19 मोपतीके गे दाक्नीनी हना, पिपमी वास्ती गे इन डोंइती गेनायो जाक्ने मचबल। मिनु आ पिपमी दुस्तीके क्याम्शा, अर्को मेको क्येडा दारशो मीश आल कली पिपमी सेलीन। मेको इन सेल्शो कानुन पारसी नु मादी आन कानुनमी यो गेनायो मक्याम्सीचा डा पा ब्रेक्पतीन। दानीएल ६:९ 20 मिनु एको पिप आ ब्रेक्पाइश्शो लोत्र एको राज्य नेल्लेमी नेंतेक्म हना, ठेयब नु आइक्च मीश मुर नेल्लेमी आन वोंइश कली मान पाइनीम” देंत।

21 मिनु मेमुकान आ लोत्र पिप नु सासन पाइबपुकीमी “रिश्शो बाक्ब” दे दाक्ताक्म। मिनु पिपमी मेमुकान आ देंशो खोदेंशो पाप्तु। 22 मिनु मेकोमी आ रागी नेल्ले डा मुर आन आंम आंम ब्रेक्स नु आंम आंम लोत्रमी “खिं डा ठेयब वोंइश मुरुमी आंम खिं डा मुर आन कली अधिकार पचा माल्नीम” दे मुर नेल्ल आन जात जात डा ब्रेक्स नु आंम आंम लोत्रम ब्रेक्पाइश्शा सोइक्ताक्व। एस्तर ३:१२; एस्तर ८:९

### मीश आल खुप्शो

2 मिनु पिप अहासूरस आ गाइक्चा बेक्म नोले मेकोमी वास्ती आ पशो आ पर्वम नु मेको आ पर्वम ब्रेक्शो ब्रेक्स कली मिम्ताक्व। 2 मिनु पिप आ गेय पाइबपुकीमी पिप कली “इन कली दारशो नु कन्ने मीश आल माल्पतीन। 3 इन राज्य डा, रागी नेल्ल डा दारशो नु कन्ने मीश आल चाक्चा, दे मेकेर डा ठेयब मुर आन कली लोत्र सोइक्तीन। मिनु मेको मीश आल आन कली सुसा दरवार डा मीश मुर आन बाक्तीकेमी चाक्चा माल्नीम। मिनु मेको मीश मुर आन कली कोत्रब, इन गेय पाइब हेगे आ जिम्मीमी वोइक्चा माल्नीम। मिनु मेको मीश आल आन कली खेक्तीक नु ब्रोत्रशो रिना पाइक्तीक मार मार यो गेचा माल्नीम। 4 मिनु गे तेको मीश

आल कली दाक्नीनी, मेको कली वास्ती आ पा डा पिपीम सेलीन" देंतेक्म।  
मिनु पिपमी मेको लोव्र दाक्ताक्व। मिनु मोर्देशो पाप्तु।

### सुसा दरवारमी

5 मिनु सुसा दरवारमी मोरदेकै माइश्शो यहूदी मुर का बाक्माक्त। मेको बेन्यामीन थर डा याइर आ तौ, शिमेइ आ चच, कीश आ युइ बाक्माक्त।  
१सामुएल ९:१<sup>6</sup> बेबीलोन डा पिप नेबुकदनेसरमी यरूसलेम रे यहूदा रागी डा पिप येकोन्याह नु ग्याइश्शा लाइक्वा पुंडसीशो आन दातेमी मोरदेकै आ किकी पिपी कीश यो बाक्माक्त। २राजा २४:१५<sup>7</sup> मिनु मोरदेकैमी आ बकान्छा आ तमी हदस्सा कली आ तमी खोर्देशो सेल्शा, थुल्शा वोइश्शो बाक्माक्त। मेको के आ आम आफ निम्फा बेक्शो बाक्ताक्व। मेकोमी हदस्सा कली एस्तर नें यो वोइश्शो बाक्माक्त। एस्तर रिश्शो नु दारशो मीश आल बाक्माक्त। मेको आ आम आफ बेक्सा नोले मोरदेकैमी मेको कली आंम तमी खोर्देशो पा दाक्शा, थुल्शो बाक्माक्त। एस्तर ८:१

### एस्तर दरवारम लाइक्वा पुंडसीशो

8 मिनु पिप आ गुंडशो ब्रेक्स नेंमे नोले, शुश मीश आल आन कली सुसा दरवारमी चाक्तेक्म। मिनु एस्तर कली यो अरु मीश आल नु काथा मीश मुर कोव्रब हेगे कली जिम्मा गेम्तेक्म।<sup>9</sup> मिनु एस्तर कली तशा, मेको हेगे थाम्पान ग्येरसाक्व। मिनु मेकोमी एस्तर कली दारपाइक्वा कली ग्योम्तीक, किप्तीक, खेक्तीक नु रिश्शो जचा थोव्रक नेल्ल गेप्तु। मिनु पिप आ दरवार डा ७ जना नेल्ल क्येडा रिश्शो गेय पाइब मीश आल यो एस्तर कली गेप्तु। मिनु मीश मुर आन कली वोइक्तीक खिंमी एस्तर नु आ कली वारच पाइब आन कली नेल्ल आन क्येडा रिश्शो नु गारशो बाक्तीक गेप्तु।<sup>10</sup> मिनु डोंइती मोरदेकैमी एस्तर कली "इ जात नु इ किकी पिपी सु बाक्नीमी, मेको मशोव्रडो" देंशो बाक्तीके, एस्तरमी सुइ आन कली मेको लोव्र मशोव्रशो बाक्त।<sup>11</sup> एस्तर कली दोर्देशो बाक्मे? मार पवा, दे तुइक्वा कली मोरदेकै नाक्त किंत किंत मेको मीश आल बाक्तीक खिं आ लाडगा रे एर आंथ गाक्तीक पाइबाक्त।

12 पिप अहासूरस आ बाक्तीकेम लचा क्येडा डोंइती मीश आलपुकीमी ६ महिना सम्म मूरे तेल खेक्सीशा, अर्को ६ महिना ब्रोव्रशो रिना पाइश्शो तेल नु दारपाइक्तीक मार मार खेक्सीशा, १२ महिना आंम कली दारपाइक्तीक गेय पचा माल्बाक्तेक्म। मोपा १२ महिना जाक्दीम नोले पिप अहासूरस आ बाक्तीकेमी मीश आल का का पा लचा माल्बाक्तेक्म।<sup>13</sup> मिनु मीश आलपुकी पिप आ दरवारम लमानु, मेको आन बाक्तीके रे मार मार लाइक्वा दाक्तेमे मेको लाइक्वा ताइबाक्तेक्म।<sup>14</sup> मोपा मेकोपुकी नाक्दो का का पा पिप आ बाक्तीकेम लशा, सुनी मेको अरु मीश आल बाक्तीक खिं डा कोव्रब शा-आशगज माइश्शो पिप आ गेय पाइब आ जिम्मामी बाक्वा कली लेत्वा माल्बाक्तेक्म। मिनु पिपमी मेको कली दाक्शा आ नें थिशा मब्रेत्ता सम्म लेंशा पिप आ बाक्तीकेम लचा मताइबाक्तेक्म।

### एस्तर पिपीम दुश्शो

15 मिनु मोरदेकै आ बकान्छा अबीहेल आ तमी एस्तर पिप आ बाक्तीकेम लतीक पालो जाक्त। एस्तर पिप आ बाक्तीकेम लमेनु, मीश आल आन कली कोव्रब ठेयब मुर हेगेम मार मार गेवा, मेको ला लाइश्शा लमाक्त। अरु मारेइ मपुंडा बाक्त। सु सुमी एस्तर कली तामे, मेको नेल्लेमी एस्तर कली दाक्तेमे बाक्त।<sup>16</sup> मिनु एस्तर कली पिप अहासूरस आ बाक्तीकेम लदमेनु, अहासूरस पिप दुश्शो ७ बर्स १० महिना जाक्दीश्शो बाक्माक्त। मेको महिना कली तेबेथ महिना देंबाक्तेक्म।

17 मिनु पिपमी मीश आल नेल्ल आन क्येडा एस्तर कली दाक्ताक्व। मिनु अरु आन क्येडा मेको कली योव्रतु। मिनु एस्तर कली पिपीम आ सिरपेच गुष्शा, वास्ती आ पा डा आ पिपीम सेल्लु।<sup>18</sup> मिनु नोले पिपमी एस्तर कली मान पचा कली हुकुम पाइब नेल्ल नु गेय पाइब आन कली ठेयब भोज का गेप्तु। मिनु रागी नेल्ल डा मुर आन कली गेय मपथु बाक्वा गेशा, पिपम गेचा माल्शो मुर आन कली शुश इनाम गेम्तीमी।

### मोरदेकैमी पिप कली प्रोंइशो

19 मेको कन्ने मीश आल आन कली लेंशा पिप आ दरवारमी चाक्तामेनु, मोरदेकै यो दरवार डा ठेयब लाप्चोम बाक्शो बाक्त।<sup>20</sup> मोरदेकै आ देंशो खोर्देशो पा एस्तरमी आ किकी पिपी मार जात डा बाक्मा, सु बाक्मा सुइ आन कली मशोव्रशो बाक्त। मेकोमी आल बाक्म ना मोरदेकै कली टिशो खोर्देशो पा, ठेयब दुश्शा यो टिप्तु।<sup>21</sup> मेना मोरदेकै पिप आ दरवार डा ठेयब लाप्चोमी बाक्शो बाक्त। मिनु सु जाक्म, दे कोव्रब, पिप आ ठेयब गेय पाइब बिगथान नु तेरेश माइश्शो मुर चुरशा गारशा, पिप अहासूरस कली साइक्वा लोव्र पाम्से बाक्त। एस्तर ६:१-२<sup>22</sup> मिनु मेको आस लोव्र मोरदेकैमी नेंशा तुइश्शा, एस्तर कली शेंदा बाक्त। मिनु एस्तरमी मोरदेकै आ नेंमी पिप कली लोव्र नेल्ल शोव्रतु।<sup>23</sup> मिनु मेको लोव्र हिल्लो हिक्सी पामेनु, थमा बाक्त, दे पिपमी तुइक्ताक्व। मिनु मेको ठेयब गेय पाइब आस कली थामम क्युक्शा साइक्तेक्म। मिनु नोले पिप आ डोंइती मेको लोव्र नेल्ल इतिहास ब्रेक्तीक किताबमी ब्रेक्ताक्म।

### हामान मोरदेकै नु गाइश्शो

3 मिनु नोले पिप अहासूरसमी अगाग आ मुर हम्मदाता आ तौ हामान कली आ मान बारपाइक्तु। मिनु मेको कली हुकुम पाइब नेल्ल आन क्येडा ठेयब सेल्शा, ठेयब मान गेशा वोइक्तु। १सामुएल १५:३२; प्रस्थान १७:१४-१६<sup>2</sup> मिनु पिप आ लोव्र टिशा, दरवार डा गेय पाइब नेल्लेमी दरवार डा ठेयब लाप्चोमी हामान आ डोंइती बाप्शा पोक्च थेक्शा, सेउ पाम्तेक्म। तन्न मोरदेकैमी मोर्देशो पा पोक्च थेक्शा, सेउ मपावो। मत्ती ४:९-१०<sup>3</sup> मिनु पिप आ दरवार डा ठेयब लाप्चोम गेय पाइबपुकीमी मोरदेकै कली "गे मारदे पिप आ देंशो मटीनीनी?" दे हिल्लो पाम्तेक्म।<sup>4</sup> मिनु नाक्त किंत किंत मेकोपुकीमी मेको कली मो पा लोव्र पाम्तेक्म। तन्न मोरदेकैमी मेको आन लोव्र का यो मनेन। मोर्देशो पशो हामानम फाल्ने चाप्बाक्म कौ मचाप्बाक्म, दे कोव्रचा कली, मेकोपुकीमी मेको लोव्र हामान कली शोव्रतेक्म। मारदे हना मोरदेकैमी मेको आन कली "गो यहूदी नड" देंशो बाक्त।<sup>5</sup> मिनु मोरदेकैमी आ डोंइती बाप्शा, सेउ पा मान मपशो तशा, हामान साप्पा चुरमाक्त।

### यहूदी नेल्ल साइक्वशो

6 मिनु हामानमी मोरदेकै आ जात, आ लोक्ब सु बाक्मा, दे तुइक्ता नोले, मेको कली ला ममाइ, तन्न पिप अहासूरस आ राज्य डा यहूदी, मोरदेकै आ जात डा मुर नेल्ल आन कली खतम सेल्लीक लां माल्लु।<sup>7</sup> मिनु अहासूरस पिप दुश्शो १२ बर्स दुश्शा, आ डोंइती डा निसान माइश्शो महिनामी हामान आ अर्ती गेब मेको नु गारशा, यहूदी आन कली गेना साइक्वा, दे हामान आ डोंइती जोक्ब तुइक्ब आन कली साहीत कोव्रपाइक्तु। मेको साहीत कोव्रतीके कली पुर देंतेक्म। मिनु मेको साहीत १२ महिना नोले अदार महिनामी गूत। प्रस्थान १३:४; प्रस्थान १२:२; एस्तर ९:२४<sup>8</sup> मिनु हामानमी पिप अहासूरस कली "इन राज्य डा रागी नेल्लेमी मुर आन दातेमी जात का डा मुर ब्रशा बाक्शो बाक्नीम। मेकोपुकी अरु मुर रे ब्राशा बाक्नीम। मिनु मेको आन पतीके गो नु मगारचा डा बाक्ब। मेकोपुकीमी इन ऐन कानुन मटीनीम। मिनु गेमी मेको आन कली मोर्देशो पचा गेचा मदुम्ब। ब्यक्स्था ४:५-८<sup>9</sup> मोपतीके गे दाक्नीनी हना, मेको आन कली खतम सेल्चा, दे ब्रेक्स का ब्रेक्पतीन। मिनु गो नोले मेको पिप आ क्येट वोइक्तीके डा गेय पाइब आन कली १० हजार टलेन्ट चांदी पिप आ क्येट वोइक्तीकेमी वोइक्वा कली गेनुड" देंत। टलेन्ट का चांदी ३४ किलो बाक्ब। एस्तर ४:७<sup>10</sup> मिनु पिपमी आ छाप पाइश्शो औंठी पुइश्शा, यहूदी आन जोरी सत्रु अगाग आ मुर हम्मदाता आ तौ हामान कली गेप्तु।<sup>11</sup> मिनु पिपमी हामान कली "मेको चांदी नु मेको मुरपुकी इन केन बाक्नीम। गे मार दाक्नीनी मेको पने चाप्नीनी" देंत।

12 मिनु डोंइती डा महिना डा १३ नाक्तीमी पिप आ ब्रेक्स पाइब आन कली ब्रेक्ताक्मी। मिनु हामानमी देंशो खोर्देशो पा रागी नेल्ल इन सरकार डा गेय पाइब नु जात जात डा मुर आन ठेयब मुर नु रागी रागी डा हुकुम पाइब

आन कली मेको मुर नेल्ल आन जात जात डा ब्रेक्स नु आंम आंम लोव्रम ब्रेक्पदा बाक्त। मेको ब्रेक्सम पिप अहासूरस आ छाप थोक्शा, मेको आ नैमी ब्रेक्शो बाक्त।<sup>13</sup> मिनु मेको सोइश्शो मुरपुकीमी मेको ब्रेक्स रीब रीब पा पिप आ रागी डा मुर नेल्ल आन कली सोइक्तामे बाक्त। मेको ब्रेक्समी मार ब्रेक्शो बाक्त देंशा हना, अदार माइश्शो महिना डा १३ नाक्त, काबुमीन यहूदी नेल्ल आन कली साइक्वा माल्नीम। वोंइश आल रे खाल्पा सम्म नु मीश मुर नु आल ब्रेक्च नेल्ल आन कली यो साइक्वा माल्नीम। मिनु यहूदी आन शोंप नेल्ल रोइक्वा माल्नीम, दे ब्रेक्शो बाक्त।<sup>14</sup> मिनु मेको नाक्त कली सासीशा बाक्वा, दे जात नेल्ल डा मुर आन कली तुइक्पाइक्वा, दे लेंशा ब्रेक्स का ब्रेक्शा, रागी डा मुर नेल्ल आन कली का का पा गेशा, उरदी पचा कली सोइक्ताक्म।<sup>15</sup> पिपम मेको लोव्र चोव्रथ लाइक्ब आन कली रीब रीब पा सोइक्ताक्म। मिनु सुसा दरवारमी यो मेको लोव्र ब्रपाइक्तेक्म। मो पामे नोले पिप नु हामान तूचा कली निस्साक्स। तन्न सुसा सहरम चहिं खाल बाल बोक्त।

यहूदी आन कली प्रोंइचा माल्शो

4 मिनु मोरदेकैमी मेको लोव्र नेल्ल तुइश्शा, आ वा खाक्तु। मिनु अरन्डी फेक्शा, पुलु मोंइसीशा, ठेयब सेंदामी रोंका पना पन सहरम हिरसाक्म।<sup>2</sup> मिनु मोपा दरवार डा ठेयब लाप्चो आ डोंइती जाक्त। तन्न अरन्डी फेक्शो सुइ मुर दरवार डा ठेयब लाप्चो रे ओव्रचा मताइबाक्तेक्म।<sup>3</sup> पिप आ सोइश्शो मेको लोव्र नेंशा, रागी नेल्ल डा यहूदी माइजा बाक्शा, डाक्शा, रोंका पाम्तेक्म। मिनु मेको आन दाते डा शुश मुर अरन्डी फेक्शा, पुलु तारी निस्साक्म।<sup>4</sup> मिनु पिपीम एस्तर आ गेय पाइबपुकी जाक्शा, एस्तर कली मेको लोव्र शोव्रतेक्म। पिपीममी मेको नेंशा, शुश सुर्ता पाप्तु। मिनु “अरन्डी पुइश्शा वा फेक्सीन” दे मोरदेकै कली वा सोइक्ताक्म। तन्न मोरदेकैमी मेको वा ताक्ने मबिस्से।<sup>5</sup> मोपतीके एस्तरमी पिप आ वोइश्शो आ गेय पाइब हथाक कली ब्रेश्शा “मोरदेकै कली मार श्येत दुम्मे? मिनु मेको श्येत दोपा दुम्मे?” दे हिल्लो पथ सोइक्ताक्म।<sup>6</sup> मिनु हथाक पिप आ दरवार डा ठेयब लाप्चो आ डोंइती ठेयब लाडगामी मोरदेकै कली गृथ लत।<sup>7</sup> मिनु मोरदेकैमी आंम कली मार दुम्मे, मेको नेल्ल हथाक कली देंत। मिनु हामानमी यहूदी नेल्ल आन कली साइक्वा, दे पिप आ क्येट वोइक्तीकेमी दोशो क्येट वोइक्वा, दे लोव्र पवा, मेको यो हथाक कली शेंताक्म। एस्तर ३:९<sup>8</sup> मिनु मोरदेकैमी सुसामी यहूदी आन कली साइक्वा, दे पिप आ लोव्र ब्रेक्शो ब्रेक्स यो एस्तर कली कोंइशा, तुइक्पाइक्वा, दे हथाक कली गोप्तु। मिनु मेकोमी हथाक कली “आंम मुरुम शिशी तामेक्ल, दे पिप कली नमो सिमो पचा कली एस्तर पिप आ बाक्तीकेमी लचा माल्ब देनीन” देंत।

<sup>9</sup> मिनु हथाक एस्तर आ बाक्तीकेम लशा, मोरदेकै आ देंशो नेल्ल देंत।<sup>10</sup> मिनु एस्तरमी हथाक कली मोरदेकै आ बाक्तीकेमी सोइश्शा,<sup>11</sup> “पिप आ गेय पाइब नु रागी डा मुर नेल्ल पिपमी मब्रेत्थु, वोंइश मुर नु मीश मुर सुइ पिप आ डोंइती लाम्तेक्म हना, साइक्वा पुंइसीनीम। मेको ऐन कानुनम ब्रेक्शो बाक्ब। तन्न पिपमी आ राज दन्ड मेको मुर गे दिंशा कोंइताक्म हना ला, मेको मुर ब्रोंइचा ताइब। मिनु गो ३० नाक्त सम्म मब्रेस्सीशो बाक्नुड” दे देंचा कली सोइक्ताक्म। एस्तर ५:२; एस्तर ८:४

<sup>12</sup> मिनु मोपा हथाकमी मोरदेकै कली एस्तर आ सोइश्शो लोव्र नेल्ल शोव्रतु।<sup>13</sup> मिनु मोरदेकैमी हथाक कली पिपीम कली “गे पिप आ दरवारम बाक्ते हना यो, यहूदी नेल्ल आन दातेमी गे ला ‘साइक्वा मपुंइसीनुड’ दे ममिम्तो।<sup>14</sup> मो देंशो दुम्मेनु, गे सिक्सी पा बाक्तीनी हना, यहूदी आन कली वारच पा प्रोंइचा कली अर्को मुर रे यो जाक्ब। तन्न गे नु इं आफ आ खिं डा मुरपुकी चहिं खतम दुम्चा माल्नीम। गे यहूदी आन कली प्रोंइचा कली पिपीम दुम्शो बाक्नेवे, कों?” दे एस्तर कली माइक्वा, दे हथाक कली सोइक्ताक्म। उत्पत्ती ४५:७

यहूदीपुकी माइजा बाक्शो

<sup>15</sup> मिनु एस्तरमी मोरदेकै कली<sup>16</sup> “सुसा सहरमी लशा, यहूदी नेल्ल आन कली आं पब्रम माइजा बाक्वा कली पुक्कीन। नाक्त सां नु नाक्दो सां सम्म

मारेइ मजने, मारेइ मतूडीन। मिनु गो नु आं गेय पाइबपुकी यो गे खोदेंशो पा माइजा बाक्नीकी। मिनु में नोले ऐन कानुनमी मगेशो बाक्त हना यो, गो पिप आ बाक्तीकेम लाइनुड। गो खतम दुम्ती हना, यो दुम्डल” दे लोव्र सोइक्ताक्म।<sup>17</sup> मिनु मोरदेकै लशा, एस्तर आ देंशो खोदेंशो पाप्तु।

एस्तर पिप आ डोंइती जाक्शो

5 मिनु नाक्त सां नोले एस्तरमी पिपीम आ फेक्तीके फेक्साक्म। मोपा लशा, पिप आ दरवार आ लाडगाम बाक्शा, खिं गे कोव्रशा, राप्त। मेना पिप आ खिमी आ ठेयब नित्तीकेमी निश्शा, लाप्चो गे कोव्रशा, बाक्शो बाक्त।<sup>2</sup> मिनु पिपमी पिपीम एस्तर कली दरवार डा लाडगामी राप्शा बाक्शो तशा, मेको कली शिशी पा, आ शेशा बाक्शो राज दन्ड एस्तर गे दिंताक्म। मिनु एस्तर पिशा, मेको कोक्के आ डर थिप्तु। एस्तर ४:११<sup>3</sup> मिनु पिपमी मेको कली “पिपीम एस्तर, मारदे जाक्नी? गे मार माल्नीनी? आं रागी उइक्थ इन कली गेचा माल्ताक्वी हना यो, मेको इन कली गेनन्नी” देंत। मर्कूस ६:२३<sup>4</sup> मिनु एस्तरमी “हजुर, गे दाक्नीनी हना, मुल नाक्दो गो इन कली सेल्शो भोजमी गे हामान नु काथा जाक्कीने” देंत।<sup>5</sup> मिनु पिपमी एस्तर आ देंशो पचा कली हामान कली ब्रेत्वा कली मुर सोइक्ताक्म। मिनु पिप नु हामान एस्तरमी सेल्शो भोज जथ लाम्ताक्म।<sup>6</sup> मिनु पिपमी अडगुर शांबु तूशा, एस्तर कली “गे मार दाक्नीनी? गो इन कली गेनन्नी। आं रागी उइक्थ पुंइतीनी हना यो, गो मेको इन कली गेनन्नी” देंत।<sup>7</sup> मिनु एस्तरमी सेउ पा “गो लोव्र का पुंइचा दाक्नुड।<sup>8</sup> मिनु गो इन शिशी ताता हना, गे आं पुंइशो गेचा दाक्ताक्नी हना, हजुर, दीसा यो गे निक्शी मुलाक्त डा खोदेंशो पा, आं सेल्शो भोजम जाक्कीन। मेना गो इन हिल्लो पशो लोव्र लेत्नुड” देंत। एस्तर ६:१४

हामानम आंम कली ठेयब सेल्सीशो

<sup>9</sup> मिनु मेको नाक्त हामान शुश ग्यरसीशा, आ थुं जाव बोर्पा लत। तन्न हामानमी मोरदेकै कली दरवार डा ठेयब लाप्चोमी बाक्शो नु आ डोंइती बाप्शा मान मपशो तशा, चुरशा लां मताव।<sup>10</sup> मो दुम्त हना यो, हामानमी आ चुरशो मकोइथु, आ खिं लत। मिनु आ खिं जाक्दीश्शा, आ वारच आन कली नु आ मीश जेरेश कली ब्रेत्थ सोइक्ताक्म।<sup>11</sup> मिनु मेको आन कली “आं शोंप, आं थेरशो रू नु शुश तौ बाक्नीम। मिनु पिपमी सासन पाइब नु गेय पाइब नेल्ल आन क्येडा आं कली शुश मान गेशो बाक्ब” दे आ नें बोर्पाइश्शा लोव्र पाप्तु।<sup>12</sup> मिनु हामानमी “मोशो ला ममाइ, पिपीम एस्तरमी सेल्शो भोजमी आं कली ला ब्रेत्ताक्वी। मिनु दीसा यो पिप नु लचा कली आं कली ब्रेश्शो बाक्ब।<sup>13</sup> तन्न मेको यहूदी मोरदेकै कली दरवार डा लाप्चोम बाक्शो तडानु, आंम कली मारेइ खोइ मलाक्ड” देंत।<sup>14</sup> मिनु आ मीश जेरेश नु आ वारच नेल्लेमी “५० कुबीत लाइश्शो थाम का युक्तीने। मिनु सुनी कना मोरदेकै कली मेकेर क्युक्शा साइक्वा कली पिप नु लोव्र पने। मिनु ग्यरशा, पिप नु भोज जथ लने” देंतेक्म। मिनु हामानमी मेको लोव्र दाक्ताक्म। मिनु मेकोमी मुर कली क्युक्शा साइक्तीक थाम का युक्पाइक्तु। कुबीत का आधा मिटर खोदेंशो बाक्ब।

मोरदेकैमी ठेयब मान तशो

6 मिनु मेको नाक्दो पिप इप्ने मचब। मिनु पिपमी इतिहास ब्रेक्शो किताब चाक्पाइक्तु। मिनु मेको पठेपपाइश्शा नेंतु। एस्तर २:२१-२२<sup>2</sup> मिनु मेको किताबमी पिप आ लाप्चोम बाक्ब बिग्थान नु तेरेश माइश्शो ठेयब लाप्चोम गेय पाइब निक्शीमी चुरशा पिप अहासूरस कली साइक्वा माल्शो लोव्र नु मोरदेकैमी पिप कली तुइक्पाइश्शो आ पब्रम ब्रेक्शो बाक्त।<sup>3</sup> मिनु पिपमी “एको आं पशो आ पब्रम मोरदेकै कली मारेइ मान नु दर्जा गेशो बाक्मे?” दे हिल्लो पाप्तु। मिनु मेकेर बाक्ब पिप आ गेय पाइबपुकीमी “मोरदेकै आ पब्रम मारेइ मपशो बाक्ब” देंतेक्म।<sup>4</sup> मिनु पिपमी “लाडगाम सु बाक्मे?” दे हिल्लो पाप्तु। मेना हामानमी आ युक्शो, मुर कली क्युक्शा साइक्तीक थाममी “मोरदेकै कली साइक्वा गेयीनी” दे पिप कली पुंइथ लाडगामी नक जाक्शो बाक्त। एस्तर ५:१४<sup>5</sup> मिनु पिप आ गेय

पाइबपुकीमी “हामान लाडगामी राप्शा बाक्त” देंतेकम। मिनु पिपमी “मेको कली खिं गा ब्रेत्तीन” देंत।<sup>6</sup> मिनु हामान खिं गा ओव्रमेनु, पिपमी मेको कली “पिप आंमान मान गेचा दाक्शो मुर कली मार पचा माल्बा?” दे हिल्लो पापु। मिनु हामानमी आ थुं थुंमी “आं डा लाक्शा, तेको मुर कली पिपमी मान गेचा दाक्बा डा?” दे मिम्ताक्व।<sup>7</sup> मिनु मेकोमी पिप कली “पिप सु कली मान गेचा दाक्नीनी,<sup>8</sup> मेको कली पिप आ डोंइती फेक्शो वा नु पिया ग्योम्सीशो पिप आ शारा चाक्पतीने। दानीएल ५:२९<sup>9</sup> मिनु मेको पिप आ डोंइती फेक्शो वा नु आ शारा नेल्ल आन क्येडा मान तशो मुर कली गेचा माल्ब। मिनु नेल्ल क्येडा अधिकार पाइश्शो मुरुमी पिपमान गेचा दाक्शो मुर कली फेक्त्तल। मिनु मेको कली शारा डोइक्पाइश्शा, सहर डा लांमी गाक्पाइक्वा माल्ब। मिनु नेल्लेमी ‘पिपमी मान गेचा दाक्शो मुर कली मार पवा, मेको कोव्रडीन’ देंना देंन हिरदमेक्ल” देंत। उत्पत्ती ४१:४२-४३

<sup>10</sup> मिनु पिपमी हामान कली “गे इ देंशो खोदेंशो पा फेक्तीक नु शारा मुल कना चाक्शा, लाप्चोम बाक्ब यहूदी मोरदेकै कली मोदेंशो पावो। इ देंशो का यो मखाइक्व, पावो” दे माइक्तु।

<sup>11</sup> मिनु हामानमी फेक्तीक वा नु शारा चाक्शा, मोरदेकै कली मेको वा फेक्शा, शाराम डोइक्पाइश्शा, सहर डा लां मेर लाइश्शा, आ डोंइती “पिपमी मान गेचा दाक्शो मुर कली मार पवा, मेको कोव्रडीन” देंना देंन मोरदेकै कली हिरताक्व।<sup>12</sup> मिनु नोले मोरदेकै पिप आ दरवार डा ठेयब लाप्चोम लेत्त। मिनु हामान चहिं मुने पा कुल सुम्शा दोरोर पा दोरशा, आ खिं लत।<sup>13</sup> मिनु मेकोमी आ मीश जेरेश नु आ वारच नेल्ल आन कली मार दुम्मे, मेको नेल्ल का का पा शोव्रतु। मिनु मेको आ वारचपुकी नु आ मीशेमी मेको कली “इन जोरी सत्रु मोरदेकै, यहूदी बाक्त हना, गे मेको कली मारेइ पने मचाप्नीनी। मुल गे मेको आ डोंइती खतम दुम्नीनी” देंतेकम।

<sup>14</sup> मोपा लोव्र पना पन बाक्मेनु, पिप आ गेय पाइबपुकी जाक्शा, हामान कली पिपमी एस्तरमी सेल्शो भोज जचा कली लाइक्तेकम। एस्तर ५:८

एस्तरमी पिप कली पुंइशो लोव्र

<sup>7</sup> मिनु पिप नु हामान, निम्फा पिपमी एस्तरमी सेल्शो भोज जथ लाप्ताक्स।<sup>2</sup> मिनु मेको नाक्त्त यो पिप अडगुर शांबु तूशा, एस्तर कली “गे मार दाक्नीनी? मेको इन कली गेनन्नी। आं रागी उइक्थ पा पुंइतीनी हना यो, गो मेको इन कली गेनन्नी” देंत।<sup>3</sup> मिनु पिपमी एस्तरमी “गोमी इन शिशो तशो बाक्ती नु गे दाक्ताक्नी हना, गो नु आं जात डा मुर आन कली साइक्वा रे प्रोनीन।<sup>4</sup> मारदे हना गो नु आं जात डा मुर नेल्ल क्याम्चा, साइक्वा नु खतम दुम्चा कली लेयसीशो बाक्नीकी। गो वाइलीम वाइल सेल्चा कली ला लेयसीशो बाक्त्तक हना, गो सिक्सी पा बाक्ड वा। मारदे हना मेको आइक्व लोव्रमी पिप कली मारेइ श्येत मदुम वा” देंत।<sup>5</sup> मिनु पिप अहासूरसमी पिपमी एस्तर कली “मोदेंशो पचा माल्ब मुर सु बाक्बा? मिनु मेको मुर ते बाक्बा?” दे हिल्लो पापु।<sup>6</sup> मिनु एस्तरमी “मेको श्येत गेब, मरिश्शो मुर एको हामान बाक्ब” देंत। मिनु हामान पिप नु पिपमी आ डोंइती हिंशा, सेंदा का यो गुंइने मचब।

हामानम साइक्वा पुंइसीशो

<sup>7</sup> मिनु पिप चुरशा, भोज रे छुल बोक्शा, दरवार डा फू रूमी लत। हामानमी चहिं “पिपमी आ थुंमी आं कली खतम पचा मिम्ताक्व” दे तुइश्शा, पिपमी एस्तर नु माफ पुंइचा कली आ बाक्तीक उइ बाक्त।<sup>8</sup> मिनु पिप फू रू रे लेश्शा, भोज जतीक कोठाम जाक्मेनु, हामान चहिं एस्तर आ इप्तीकम बाप्शा, आ नेक्था गुर ब्वेशा बाक्शो तापु। मिनु पिपमी ठेयब सेंदामी “मार, मेकोमी पिपमी कली आं डोंइती थिचा मिम्बा?” देंत। मिनु पिपम मोदेंशो देंन नोले, पिप आ गेय पाइबपुकीमी हामान आ कुल सुम्तेकम।<sup>9</sup> मिनु पिप नु बाक्शा, गेय पाइब आन दाते डा हारबोना माइश्शो कामी “हामान आ खिं आ नेक्था इन कली रिश्शो पाइब नु प्रोंइब मोरदेकै कली क्युक्शा साइक्वा कली ५० कुबीत लाइश्शो मुर साइक्तीक थाम युक्शा वोइश्शो बाक्ब” देंत। मिनु पिपमी “मुल हामान कली मेको थाममी क्युक्शा सतीन” देंत। कुबीत का आधा मिटर खोदेंशो बाक्ब।<sup>10</sup> मिनु मेकोपुकीमी मोरदेकै कली

साइक्वा, दे युक्शो थाममी, हामान कली लाइश्शा क्युक्तेकम। मिनु पिप आ थुं नांइसाक्व।

यहूदीपुकीम अधिकार तशो

<sup>8</sup> मिनु मेको नाक्त्त पिप अहासूरसमी यहूदी आन जोरी सत्रु हामान आ खिं पिपमी एस्तर कली गेपु। मारदे हना एस्तरमी पिप कली “गो मोरदेकै आ खिं डा मुर का नड” दे शेंतीके, मोरदेकै पिप आ बाक्तीकम जाक्वा माल्ताक्व। एस्तर २:७<sup>2</sup> मिनु पिपमी हामान रे रोइश्शो अधिकार डा छाप थोक्तीक औंठी पुइश्शा, मोरदेकै कली गेपु। मिनु एस्तरमी मोरदेकै कली हामान आ खिं कली अधिकार पाइब सेल्तु। एस्तर ३:१०

पिपमी एस्तरमी लेंशा पुंइशो

<sup>3</sup> मिनु एस्तरमी लेंशा पिप आ खोइलीम बाप्शा, डाक्शा नमो सिमो पा “अगाग आ मुर हामानमी यहूदी आन पर्वम ब्रेक्शो मरिश्शो ब्रेक्स क्याम्शा गेन” दे पुंइतु।<sup>4</sup> मिनु पिपमी आ राज दन्ड एस्तर गे शुक्तु। मिनु एस्तर बोक्शा, पिप आ डोंइती रापु। एस्तर ४:११; एस्तर ५:२<sup>5</sup> मिनु एस्तरमी “पिपम दाक्नीनी नु गो इन शिशो ताता नु आं देंशो लोव्र गे दाक्नीनी नु आं देंशो नेंनीनी हना, अगाग आ मुर हम्मदाता आ तौ हामानमी इन राज्य डा हुकुम पाइब नेल्ल आन कली ‘यहूदी नेल्ल आन कली साइक्वा’ दे ब्रेक्शा सोइश्शो ब्रेक्स नेल्ल क्याम्चा, दे ब्रेक्स का ब्रेक्शा सोइक्तीन।<sup>6</sup> मारदे हना आं जात नु आं खिं डा मुरपुकी खतम दुम्शो गो दोपा फाल्ने चापुडा डा?” देंत।<sup>7</sup> मिनु पिप अहासूरसमी पिपमी एस्तर नु यहूदी मोरदेकै कली “हामानमी यहूदी आन कली खतम सेल्चा माल्तीके, मेको आ खिं पिपमी एस्तर कली गेता। मारदे हना हामान क्युक्शा साइक्वा पुंइसाक्व।<sup>8</sup> मुल आं नेंमी इन दाक्स पा यहूदी आन कली रिश्शो दुम्चा आ पर्वम नक ब्रेक्स का ब्रेक्तीन। मिनु मेकोमी आं छाप थोक्तीन। मारदे हना पिप आ नेंमी ब्रेक्शा, आं छाप थोक्शो हुकुम गेनायो क्याम्ने मचाम्सीब” देंत।

मोरदेकै आ सोइश्शो ब्रेक्स

<sup>9</sup> मिनु सिवान माइश्शो ३ महिना डा २३ नाक्तीम पिपम आ ब्रेक्स पाइब मुर आन कली ब्रेक्ताक्मी। मेकोपुकीमी मोरदेकै आ देंशो खोदेंशो पा यहूदी, सरकार डा गेय पाइब, मान ताइब नु रागी रागी आन कली हुकुम पाइब भारत रे कूश माइश्शो एथीयोपीया सम्म डा १२७ ओटा रागी नेल्लेमी मुर नेल्ल आन ब्रेक्स नु आंम आंम लोव्रम नु यहूदी आन कली आंम आंम आन ब्रेक्स नु आंम आंम आन लोव्रम पिप आ अरेशो लोव्र ब्रेक्ताक्म।<sup>10</sup> मोपा मेको ब्रेक्स कली पिप अहासूरस आ नेंमी ब्रेक्शा, पिप आ छाप थोक्ताक्व। मिनु मेको ब्रेक्स कली शारा दोरपाइक्ब आन कली गेशा, थाम्पान दोरपा चोव्रथ सोइक्ताक्म। मेको आन डोइश्शो शारा पिप आ नेल्ल क्येडा रिश्शो शारा बाक्तेकम।<sup>11</sup> मेको ब्रेक्समी मार ब्रेक्शो बाक्त देंशा हना “सहर नेल्ल डा यहूदी बुक्शा, आंम कली खतम पाइबपुकी रे प्रोंइसीमल। मिनु मेकोपुकीमी तेको तेको जात डा नु तेको तेको रागी डा बुक्शो मुर, सु सुम आन मीश नु आन आल आन कली श्येत गेमे, मेको आन कली काबुमीन क्याम्चा, साइक्वा नु खतम सेल्चा कली बुक्वा माल्नीम। मिनु मेकोपुकीमी श्येत गेब मुर आन मारेइ मारेइ रोइक्ने चाप्नीम। एस्तर ३:१३; एस्तर ९:७-१०, १५, १६<sup>12</sup> पिप अहासूरसमी आ रागी नेल्लेमी मेको श्येत गेब आन कली अदार माइश्शो १२ महिना डा १३ नाक्तीम खतम सेल्चा माल्ब” दे ब्रेक्शो बाक्त।<sup>13</sup> मिनु मेको ब्रेक्स नेल्ल रागी डा मुर आन कली तुइक्पाइक्वा कली लेंशा मोदेंशो ब्रेक्स ब्रेक्शा, उरदी पपाइक्वा, दे लोव्र सोइक्ताक्म। मिनु यहूदी चहिं मेको नाक्त्त आन जोरी सत्रु आन कली क्येक्क लेत्चा कली सासीशा बाक्मल, दे यहूदी आन कली अरेशा ब्रेक्शा सोइक्ताक्म।<sup>14</sup> मिनु पिपमी मेको शारा डोइक्ब आन कली आ देंशो लोव्र चोव्रथ शारा डोइक्वा थाम्पान दोरपाइश्शा सोइक्ताक्व। मिनु मेको लोव्र सुसा दरवार रे योक्वा गोम्तेकम।

### यहूदी आन ग्येरतीक नाक्त

15 मिनु मोरदेकै पिप आ बाक्तीक रे दरवार डा ठेयब नीलो नु बुश फेक्तीक वा फेक्शा, पियाजी रड डा बरखी रुक्शा, पियामी सुन के ठेयब सिरपेच गुष्ठा, सहर लत। मिनु मोरदेकै कली तशा, सुसा सहर डा मुरपुकी थाम्पान ग्येरसाक्म। 16 मिनु यहूदी आन कली मेको नाक्त आन थुं बारपाइक्तीके, शुश ग्येरतीके नु मान ततीके नाक्त दुस्त। 17 मिनु पिप आ ब्रेक्स नु आ हुकुम जाक्दीशो नेल्ल रागी नु सहर नेल्लेमी यहूदी साप्पा ग्येरसाक्म। मिनु मेको नाक्त चाड सेल्शा, भोज जास्तेक्म। मिनु मेको रागी डा शुश मुर यहूदी दुस्तेक्म। मारदे हना मुर नेल्ल यहूदी आन कली तशा हितेक्म।

### यहूदीपुकीम ग्राशो

9 मिनु अदार माइश्शो १२ महिना डा १३ नाक्त पिप आ ब्रेक्शो लोव्र खाप्तीक नाक्त जाक्त। मेको नाक्त यहूदी आन जोरी सत्रुमी यहूदी आन कली साइक्वा मिश्शो बाक्तेक्म। तन्न मुल यहूदीपुकीम कका आन जोरी सत्रु आन कली साइक्तीक नाक्त जाक्त। 2 मेको नाक्त पिप अहासूरस आ रागी नु सहर डा यहूदी नेल्ल आन जोरी सत्रु आन कली साइक्वा, दे बुक्तेक्म। मिनु मेको यहूदी आन कली सुइमी तेक्ने मचबेम। मारदे हना यहूदी आन कली तशा, मुर नेल्ल शुश हितेक्म। 3 मिनु मोरदेकै कली तशा, हितीके रागी नेल्ल डा हुकुम पाइबपुकी, सरकार डा गेय पाइबपुकी नु ठेयब मुर नेल्लेमी यहूदी आन कली वारच पास्तेक्म। 4 मोरदेकै पिप आ दरवारमी ठेयब मुर दुस्त। मिनु रागी नेल्लेमी आ नें तुइक्ताक्म। मोपा मेको आ सक्ति बारना बारन लत। 5 मिनु यहूदीपुकीम आन जोरी सत्रु आन कली तरवारम तूशा, क्योरशा साइश्शा थुस्तेक्म। यहूदीपुकीमी आन कली खेदा पाइब मुर आन कली मार पचा दाक्तेमे, मेको पास्तेक्म। 6 यहूदीपुकीमी सुसा दरवारमी ५ सहे मुर आन कली साइक्तेक्म। 7 मिनु मेको हम्मदाता आ तौ हामान आ १० जना तौ पारशान-दाता, दाल्फोन, अस्पता, 8 पोरता, अदाल्या, अरीदाता, 9 पारमश्ता, अरीसाइ, अरीदाइ नु वाइजाता बाक्तेक्म। उत्पत्ती १४:२१-२४ 10 मिनु मेको यहूदी आन जोरी सत्रु हम्मदाता आ तौ हामान आ १० जना तौ कली यो साइक्तेक्म। मेको आन शॉप नु आन थेरशो रू चहिं मरोइक्तेम।

11 मिनु मेको नाक्त सुसा दरवारमी गिश मुर आन कली सदमे, मेको पिप कली शोव्रतेक्म। 12 मिनु पिपमी पिपीम एस्तर कली “सुसा दरवारमी यहूदीपुकीमी ५ सहे मुर नु हामान आ १० जना तौ नेल्ल आन कली साइक्तेक्म। मिनु अरु आं रागीपुकीमी मार मार पामे माइ? गे मार पुंडतीनी हना यो, मेको गेनन्नी। चिनु मार पुंडतीनी? मेको दुम्ब” देंत। 13 मिनु एस्तरमी “हजुर, गे दाक्नीनी हना, दीसा यो सुसा सहरमी यहूदीपुकीम मुलाक्त डा खोदेशो पचा तामेक्ल, दे हुकुम पने। मिनु हामान आ साइश्शो १० जना तौ आन कली क्युक्तीक थाममी क्युकपतीन” देंत। 14 मिनु पिपमी “मोदेशो पामेक्ल” दे हुकुम पाप्तु। मिनु सुसा सहरमी पिप आ हुकुम खोदेशो पा, हामान आ साइश्शो तौ नेल्ल आन कली थामम क्युक्तेक्म। 15 मिनु सुसा सहरम बाक्शो यहूदीपुकी अदार महिना डा १४ नाक्तीमी लेंशा बुक्तेक्म। मिनु सुसा सहरमी ३ सहे मुर साइक्तेक्म। तन्न मेको आन शॉप नु आन थेरशो रू मारेइ मरोइक्तेम। 16 मिनु पिप आ रागी डा यहूदीपुकी आंम कली आन जोरी सत्रु रे प्रोंइचा कली बुक्तेक्म। मिनु मेकोपुकीमी आंम कली काइ मदाक्ब ७५ हजार जना मुर आन कली साइक्तेक्म। मोपा मेकोपुकीमी आन जोरी सत्रु रे थुं नाइक्वा तास्तेक्म। तन्न मेको आन शॉप नु आन थेरशो रू चहिं मारेइ मरोइक्तेम।

### पुरीम चाड सेल्शो

17 मिनु मेको नेल्ल अदार माइश्शो महिना डा १३ नाक्तीम पास्तेक्म। मिनु मेकोपुकी आ दीसा १४ नाक्तीम नाइसाक्म। मिनु मेको नाक्त चाड का सेल्शा, ग्येरतीक नाक्त सेल्तेक्म। 18 सुसा सहरम बाक्ब यहूदीपुकी चहिं अदार महिना डा १३ नु १४ नाक्त बुक्तेक्म। मिनु १५ नाक्त नाइसाक्म।

मिनु मेको नाक्त चाड का सेल्शा, ग्येरतीक नाक्त सेल्तेक्म। 19 मोपतीके डोन डोन गाउं डा नु अको सहरम बाक्ब यहूदीपुकीमी अदार माइश्शो महिना डा १४ नाक्त, नाइक्तीक नाक्त, चाड नु ग्येरतीक नाक्त सेल्नीम। मेको नाक्त मेकोपुकीमी कोसेली गेमुइनीम।

20 मिनु मोरदेकैमी मार मार दुम्मे, मेको नेल्ल ब्रेक्ताक्व। मिनु पिप अहासूरस आ नेक्था नु डोन डा रागीम बाक्ब यहूदी नेल्ल आन कली सोइक्ताक्व। 21 मिनु मेकोमी मार ब्रेक्ताक्व देंशा हना “अदार महिना डा १४ नु १५ नाक्त यहूदी नेल्लेमी बर्स बर्समी चाड नु ग्येरतीक नाक्त सेल्चा माल्नीम। 22 मारदे हना मेको नाक्त यहूदी आन जोरी सत्रु रे नाइक्वा तास्तेक्म। मिनु मेको महिनामी आन थुं लुक्च लतीक रे ग्येरशो थुं दुस्तेक्म। मिनु आन रोंका पतीके रे ठेयब ग्येरतीक नाक्त फांडसाक्व। मेकोपुकीमी मेको नाक्त चाड का सेल्शा, ग्येरतीक नाक्त सेल्चा माल्नीम। मिनु कोसेली सोइक्मुशा, प्रुडग आन कली मार मार गेचा माल्नीम” दे ब्रेक्शो बाक्त। 23 मोपतीके यहूदीपुकीमी मोरदेकै आ ब्रेक्शो खोदेशो पचा गोस्तेक्म। मिनु मेको मोदेशो पा गेना हना यो पचा कली आन लोव्र थोक्ताक्म। 24 डोंइती यहूदी आन जोरी सत्रु अगाग आ मुर हम्मदाता आ तौ हामानमी यहूदी आन कली खतम सेल्चा नु साइक्वा कली मेको पुर माइश्शो साहीत कोव्रपाइश्शो बाक्त। एस्तर ३:७ 25 मिनु मेको लोव्र पिप कली तुइक्पदमे नोले पिपमी, ब्रेक्स पा यहूदी आन कली मरिश्शो नु श्येत गेचा मिश्शो नेल्ल हामान आंम आ पियामी कोप्ताक्व। मिनु मेको नु आ तौ थामम क्युक्शा साइक्वा पुंडसाक्म, दे छाप आप्शो ब्रेक्तीक का ब्रेक्शा गुंडताक्व। एस्तर ७:१० 26 मेको पुर माइश्शो साहीत कोव्रशा थोक्शो बाक्त। मिनु मेको नाक्त निक्शी कली पुरीम नें वोइक्तेक्म। मिनु मोरदेकै आ ब्रेक्शो, यहूदी आंमा आन तशो नु अरु आन देंशो लोव्र नेंशा, 27 यहूदीपुकीमी आंम आन कली नु आन चच युइ आन कली नु सु सु यहूदी दुम्चा दाक्नीमी, मेको नेल्ल आन कली गेना हना यो बर्स बर्समी मेको नाक्त निक्शी “पुरीम माइश्शो चाड मानेचा माल्ब” दे रिती थिती वोइक्तेक्म। दोदेशो ब्रेक्शो बाक्मे, मोदेशो पचा माल्तेक्म। 28 मिनु नेल्ल आन पालामी, नेल्ल आन खिं डा मुरपुकीमी, रागी नेल्लेमी नु सहर नेल्लेमी मेको नाक्त निक्शी कली मिश्शा, चाड सेल्चा माल्नीम। मिनु यहूदी आन दातेमी मेको पुरीम चाड कली गेनायो मप्रंदमेक्ल। गेना हना यो मिम्तमेक्ल।

29 मिनु अबीहेल आ तमी एस्तर पिपीम नु मेको यहूदी मोरदेकैमी दोपा नु गेना मेको पुरीम माइश्शो चाड सेल्चा, मेको आ पबर्म शुश ब्रेक्ताक्स। 30 मिनु मोरदेकैमी पिप अहासूरस आ राज्य डा १२७ ओटा रागीम बाक्शो यहूदी आन कली चिठी ब्रेक्शा सोइक्ताक्व। मार ब्रेक्शो बाक्त देंशा हना “इन थुं नाइश्शा, आं डोंइती ब्रेक्शो पुरीम चाड मानेचा मप्रोनीन” दे ब्रेक्शो बाक्त। 31 मिनु मेको यहूदी मोरदेकै नु पिपीम एस्तरमी दोदेशो देंसा, मोदेशो पा पुरीम चाड ठीक नाक्तीमी पचा कली ब्रेक्शो बाक्त। मिनु यहूदीपुकीमी आंम कली नु आन चच युइ आन कली “मेको पुरीम चाड पचा माल्ब” दे आन थुंमी मिम्चा माल्नीम। मेको माइजा बाक्तीक नाक्त आन रोंका पशो नेल्ल मिम्चा माल्नीम। 32 मिनु एस्तर आ हुकुममी मेको पुरीम डा लोव्र नुप्त। मिनु मेको लोव्र किताबम ब्रेक्शा वोइक्तेक्म।

### मोरदेकै आ पाला डा यहूदीपुकी

10 मिनु पिप अहासूरसमी आ रागी डा मुर आन कली नु समुन्द्र डा टापुपुकीम बाक्ब मुर आन कली तिरो थाप्पाइक्तु। 2 पिप अहासूरस आ अधिकार नु सक्ति आन पबर्म नु दोपा मेकोमी मोरदेकै कली ठेयब गेय पपदा, मेको आ पबर्म मादी नु पारसी पिप आन इतिहास डा किताबमी ब्रेक्शो बाक्ब। एस्तर २:८,१५ 3 मेको यहूदी मोरदेकै पिप अहासूरस आ नोले, मेको आ रागी डा नेल्ल क्येडा ठेयब मुर दुस्त। मेको यहूदी आन दातेमी यो नेल्ल क्येडा ठेयब मान तशो मुर बाक्त। मिनु आ लोक्बपुकीमी मेको कली शुश दाक्ताक्म। मारदे हना मेकोमी आ मुर आन कली रिश्शो नु आन थुं नुचा डा गेय पाप्तु। मिनु मेकोमी नेल्ल रिश्शो दुम्ल, दे आ जात डा मुर आन पबर्म पिप कली लोव्र पाप्तु।

## अय्युब

साइ डा टाल्मुत माइश्शो किताबम मोसा एको किताब ब्रेक्ब मुर बाक्ब, दे ब्रेक्शो बाक्ब। तन्न अर्को जोक्ब तुइक्ब मोसा आ बाक्वी ना क्येडा नोले डा मुर ब्रेक्ब बाक्नीम देंनीम।

अय्युब ठेयब मुर दुश्शा, मोसा आ क्येडा डोंइती, अब्राहाम, इसहाक नु याकूब आन बाक्वी ना ब्रोंइशो बाक्त। एको काथा ला ममाइ, थमा पा अय्युब मुर का बाक्त, दे उत्पत्ती रे यो तुंडसीब। अय्युब किताबम ब्रेक्शो नें उत्पत्तीमी यो बाक्नीम।

१. अय्युब शुश शॉप पाइश्शो नु श्येत जाइब दुश्शो
२. अय्युब आ वारच नु लोव पशो
३. अय्युब परमप्रभु नु लोव पशो
४. अय्युब श्येत जवा नोले

### अय्युब कली नाक्शो

१ साइ नेसी ऊज रागीमी अय्युब नें पाइश्शो मुर का बाक्माक्त। मेको ब्रोंइम सम्म दोस मतथु नु रिम्शो थुं पाइश्शो दुश्शा बाक्वा माल्ब मुर बाक्माक्त। मेको परमप्रभु कली मान पा हिंशा मरिम्शो पतीक रे डोन बाक्ब मुर बाक्माक्त। *येरमीया २५:२०; बिलाप ४:२१; इजीकीएल १४:२४, २०; याकूब ५:११* २ मेको के ७ जना तौ नु तमी सां बाक्मा बाक्त। ३ मेको के ७ हजार भेडा, हजार सां दलओंठ, ५ सहे हाल ब्यफ नु ५ सहे गधा बाक्मा बाक्त। मिनु शुश वाइलीम वाइल यो बाक्मा बाक्त। मोपा अय्युब पूर्ब डा नेल्ल क्येडा शॉप पाइश्शो नु ठेयब मुर बाक्माक्त। ४ मेको आ तौपुकीम पाल्पालो पा आन आन खिमी भोज पतीक पाइबाक्मा बाक्त। मिनु मेकोपुकीम जचा तूचा कली आन समी सांफा आन कली यो ब्रेप्बाक्मा बाक्त। ५ मिनु अय्युबम मेको आन भोज पतीक नाक्त नेल्ल नुम नोले, आ तमी तौ आन कली “परमप्रभु आ डोंइती ठीक सेल्सीन” देंथ, मुर सोइक्बाक्माक्त। मिनु अय्युबमी सुनी कना बोक्शा, मेको आन पर्बम चोशा चढ़ेतीक का का चढ़ेशा, मेको आन पाप क्याप्तीक गेय पाइबाक्माक्त। मारदे हना मेकोमी “आं आलपुकीम मारेइ पा परमप्रभु आ पर्बम पाप पामे कों” दे मिम्शा, गेना हना यो मो पाइबाक्माक्त।

### डोंइती डा खेयप नाक्शो

६ मिनु काबु स्वर्गम बाक्ब परमप्रभु आ मुरपुकी परमप्रभु यावे आ डोंइती जाक्मानु, सैतान यो मेकोपुकी नु जाक्माक्त। *अय्युब २:१; उत्पत्ती ६:२; इतिहास २१:१* ७ मिनु परमप्रभु यावेमी सैतान कली “गे ते रे जाक्डे?” दे हिल्लो पवा बाक्त। मिनु सैतानमी परमप्रभु यावे कली “रागी डा एर ओंथ नेल्ल हिरशा जाक्ती” देंमाक्त। ८ मिनु परमप्रभु यावेमी सैतान कली “गे आं गेय पाइब अय्युब कली तवी? परमप्रभु कली मान पा हिंब, मरिम्शो पतीक रे डोन बाक्ब, रागीम मेको खोदेंशो पा पाप मपाइब नु ब्रेम्शो मुर अरु सुइ मबाक्नीम” दे मदा बाक्त। ९ मिनु सैतानमी परमप्रभु यावे कली “मार, अय्युब परमप्रभु कली मो मान पा हिंशो बाक्बा डा? *भजन संग्रह ७३:१३* १० गे मेको कली मेको आ खिं, आ शॉप नु आ मारेइ मारेइ नेल्ल एर ओंथ तेइ तेइ रे थरपु हिरशा, मवोइश्शो बाक्नीनी डा? मेको आ गेय नेल्लेम गे आसीक गेशा वोइश्शो बाक्नीनी। मेको आ क्यारश भेडा नु बी ब्यफ शुश दुश्शो बाक्नीम। ११ तन्न गे इन गुइ दिंशा, मेको आ मारेइ मारेइ थिने। मिनु मेकोमी इन कली इन डोंइतीन सराप चीले पाइब” देंमाक्त। १२ मिनु परमप्रभु यावेम सैतान कली “दुम्ब मोदेंशोन दुम्ब। मेको के मार मार बाक्मे, मेको नेल्ल इ मिम्शो पावो। तन्न अय्युब कली चहिं मारेइ मपतो” दे मदा बाक्त। मिनु सैतान परमप्रभु यावे आ डोंइती रे गाक्माक्त। *ब्यवस्था ८:२*

### अय्युब आ मारेइ मारेइ खतम दुश्शो

१३ मिनु काबु अय्युब आ तमी तौ आन ठेयब लोकब आ खिंम, जन जन, तून तून बाक्मा बाक्त। १४ मेको नाक्ती लोव कुरब मुर का दोरशा जाक्शा अय्युब कली “ब्यफपुकी वाक्ना वाक्न बाक्मानु नु गधापुकी मेको आन नेक्था जोना जोन बाक्मानु, १५ साबा रागी डा मुरपुकी जाक्शा, गोठला आन कली लडाइ तोशा साइक्तेक्म। मिनु मेको मारेइ मारेइ योल्ताक्म। इन कली एको लोव शोवचा कली गो का ला ब्रोंइती” देंमाक्त। १६ मेकोमी मेको लोव पन पना अर्को लोव कुरब मुर का जाक्शा, मेकोमी “परमप्रभु आ मी सरीड रे दोक्शा, भेडा नु गोठला नेल्ल आन कली नेक्तु। इन कली एको लोव शोवचा कली गो का ला ब्रोंइती” देंमाक्त। *भजन संग्रह ७८:४८* १७ मिनु मेकोम लोव पन पना, अर्को लोव कुरब मुर का जाक्शा “हुल सां कल्दी रागी डा मुर जाक्शा, गोठला आन कली तरवारम क्योरशा दलओंठ नेल्ल योल्ताक्म। इन कली एको लोव शोवचा कली गो का ला ब्रोंइती” देंमाक्त। *येरमीया ५१:२४* १८ मेकोम लोव पन पना अर्को यो दोरशा जाक्शा “इन तमी तौ आन ठेयब लोकब आ खिंम जना जन तूना तून बाक्तेक्म। १९ मेना गोरशो रागी रे फश गिवार जाक्शा, खिं आ एर ओंथ नेल्ल रे थोक्ताक्व। मिनु मेको खिं मेको आन तार ब्रेश्शा, मेको नेल्ल आन कली चिप्शा साइक्तु। इन कली एको लोव शोवचा कली गो का ला ब्रोंइती” देंमाक्त।

२० मिनु अय्युब बोक्शा आ वा खाक्गा बाक्त। आ चां प्रेक्गा बाक्त। मिनु खुम्की पा बाप्शा, २१ “गो आं ममा आ कोवज रे शिश्रा यिती। शिश्रा लेश्शा लाइनुड। गो ते रे श्येथी जाक्डा, मेकेन श्येथी लेश्शा, लाइनुड। मेको नेल्ल परमप्रभु यावेमी गेती। मिनु मेकोमी नेल्ल लेश्शा लाइक्तु। परमप्रभु यावे आ नें ठेयब बाक्ल” देंमाक्त। *उपदेसक ५:१४; इतिमीथी ६:७; याकूब ५:११* २२ मेको नेल्लेमी अय्युबमी पाप मपवा बाक्त। परमप्रभु कली दोस मगेवा बाक्त।

### निक्शी खेयप नाक्शो

२ मिनु काबु स्वर्गम बाक्ब परमप्रभु आ मुरपुकी परमप्रभु यावे आ डोंइती जाक्मानु, सैतान यो मेकोपुकी नु परमप्रभु यावे आ डोंइती जाक्माक्त। *अय्युब १:६* २ मिनु परमप्रभु यावेम सैतान कली “गे ते रे जाक्डे?” दे हिल्लो पवा बाक्त। मिनु मेकोमी परमप्रभु यावे कली “रागी डा एर ओंथ नेल्ल हिरशा जाक्ती” देंमाक्त। ३ मिनु परमप्रभु यावेम सैतान कली “गे आं गेय पाइब अय्युब कली तवी? रागीमी मेको खोदेंशो अरु सुइ मबाक्नीम। मेको दोस मताइब, गेना हना यो ठीक पाइब नु आं कली मान पा हिंब बाक्ब। मेकोम मरिम्शो मपाइब। गे मेको कली श्येत गेचा कली आं कली क्युक्ती, हना यो मुल सम्म मेको आ थमा सुइक्तीके ग्येथ लुक्च मदुश्शो बाक्ब” दे मदा बाक्त। ४ मिनु सैतानम परमप्रभु यावे कली “कुशुल

आ पा डा कुशुल। मुरुम ब्रॉइचा कली आ मारेइ मारेइ मगेबा डा? 5 इन गुड दिंशा, मेको आ रुश नु श्ये थिने। मिनु मेकोम इन डॉइतीन इन कली सराप चीले पाइब" दे लोव्र लेत्ता बाक्त। 6 मिनु परमप्रभु यावेम सैतान कली "लो मो हना, मेको कली इ मिशो पावो। तन्न मेको कली मसतो" देंमाक्त।

7 मिनु सैतान परमप्रभु यावे आ डॉइती रे गाक्माक्त। मेकोमी अय्युब आ पिया रे खोइल सम्म गार मुपदा बाक्त। ब्यवस्था २८:२७ 8 मिनु अय्युबम ब्वाम्सीचा कली गर आ गम्टे का शेशा पुलु तार निस्से बाक्त।

9 मिनु मेको आ मीशेमी मेको कली "मार, गे मुल सम्म थमा सुइक्वा मप्रॉइनीनी? परमप्रभु कली सराप चीले पा बेक्कीन" दे मदा बाक्त। 10 तन्न अय्युबमी "गे मूर्ख मीश मुर खोदेशो पा लोव्र पाप्तीवी। परमप्रभु आ गेशो रिम्शो चहिं ताक्शा, मरिम्शो चहिं मताक्वा डा?" दे मदा बाक्त। मेको लोव्र नेल्लेम अय्युबमी मारेइ पाप मपवा बाक्त। अय्युब १:२२

अय्युब आ वारच सां जाक्शो

11 मिनु अय्युब आ वारच सांम मेको कली मोदेशो श्येत दुम्शो लोव्र नेम्मे बाक्त। मेको आन नें तेमान डा एलीफाज, शुआह डा बिल्दाद नु नामा डा सोफार बाक्मा बाक्त। मिनु मेकोपुकीम मेको कली लेम्चा कली नु मेको आ थुं नाइक्पाइक्वा कली गारशा आन खिं प्रॉइशा अय्युब आ खिम जाक्मा बाक्त। उत्पत्ती ३६:१५; येरमीया ४९:७; उत्पत्ती २५:२; यहोसु १५:४१ 12 मिनु मेकोपुकीम अय्युब कली डोन रे तशा, अय्युब कली मतुइक्वामे बाक्त। मिनु मेकोपुकीम अय्युब कली तुइक्वामे नोले वाइ ब्रेश्शा डाक्शा, श्येत लाक्शा आन वा खाक्शा, आन पियाम फुरक फुंडसमा बाक्त। 13 मिनु मेकोपुकी ७ नाक्ती नु ७ नाक्दो मारेइ लोव्र मपथु, मेको आ नेक्था खपीम निस्समा बाक्त। मारेदे हना मेकोपुकीम अय्युब कली शुश श्येत दुम्शो तामे बाक्त।

अय्युबम लोव्र पशो

3 मिनु नोले अय्युबम आ जरमेशो नाक्ती कली सराप चीले पवा बाक्त। येरमीया २०:१४-१८ 2 मिनु अय्युबम 3 "आं जरमेशो नाक्त खतम दुम्स। 'वोइश आल का जोल्शो बाक्ब' देशो नाक्दो खतम दुम्स। 4 मेको नाक्त छिडछिड दुम्स। परमप्रभुम मेको कली ममिम्तल। मेको नाक्ती हाम्सो मदुम्स। 5 मेको नाक्ती कली क्येर छिडछिडम सुमल। मेको गोस्सुम सुमल। मेको आ छिडछिड हिंचा डा दुम्स। 6 मेको नाक्दो कली थम छिडछिडम सुमल। बर्स डा नाक्त आन दातेम मेको ग्येरचा मतवल। महिना डा हिक्तीकेम मेको नाक्ती हिक्वा मपुंडसेक्ल। 7 मेको नाक्दो आल मथीब दुम्स। मेको नाक्दोमी ग्येरशो सेंदा मनसेक्ल। 8 नाक्त कली सराप चीले पाइब मुरुम, मेको नाक्ती कली सराप चीले पवल। मेकोम लेव्याथन कली पोक्वा कली ठीक दुम्शो बाक्ब। 9 मेको आ सुनी डा सोरुल आ हाम्सो मताइसेल। मेकोम नां सोव्रचा कली रिम्शो मोशा दुम्स। नां दाप्शो गेनायो तचा मतवल। 10 मारेदे हना मेकोम आं कली जरमेब ममा कली मतेक्मा। मिनु आं कली श्येत मजचा डा पा मखुइक्ती।

11 गो मारेदे जरमेसी डा चोटीन मबेक्डा? गो मारेदे कोव्रज रे गूडानु मबेक्डा? 12 मारेदे आं कली वोइक्वा कली थुकु बाक्मे? मारेदे आं कली तुंडचा कली दूध बाक्मे? 13 मो दुम्शो हना, गो सिक्सी पा गोल्लो बाक्ड वा। गो इप्शा नाइश्शा बाक्ड वा। २सामुएल १८:१८ 14 गो रागी डा पिपपुकी नु मेको आन कली अर्ती गेबपुकी नु बाक्ड वा। मेकोपुकीम आंम आन कली ब्रेश्शो दरवारपुकी लेंशा सेल्नीम। 15 शुश सुन पाइश्शो तौ नु बाक्ड वा। मेकोपुकीम आन खिं चांदीम प्रिंनीम। 16 मारेदे गो शाम्शो आल खोदेशो पा थिमचा मपुंडसीडा? मो दुम्शो हना गो हाम्सो गेनायो मतशो आल खोदेशो पा बाक्ड वा। 17 मेकेर परमप्रभु यावे आ अरेशो मटीबपुकीम ग्रांग्ये माग्ये पने मचाप्नीम। मेकेर दशो मुरपुकी नाइक्वा ताइनीम। 18 मेकेर चोक्शा वोइश्शोपुकी नाइक्वा ताइनीम। गेय पपाइक्ब आ सेंदा मनसेसीब। 19 मेकेर ठेयब नु आइक्च नेल्ल बाक्नीम। वाइलीम वाइल यो आन होव्रप रे ब्रॉइशो बाक्नीम।

20 श्येत जाइब कली मारेदे हाम्सो तचा गेशो बाक्बा? आन थुं लुक्च लशो कली मारेदे ब्रॉइचा गेशो बाक्बा? 21 मेकोमी बेक्वा कली रिम्शो बाक्ब। तन्न मेको मबेक्ब। मेकोमी थिमशा वोइश्शो शॉप दोशा माल्लो क्येडा यो शुश माल्ल। प्रकाश ९:६ 22 मेकोपुकी तुरसुम जाक्दीम्मानु आन थुं नाइश्शा, शुश ग्येरसीनीम। 23 परमप्रभुम लां मताइब आन कली मारेदे हाम्सो गेशो बाक्बा? मेको आन एर ऑथ नेल्ल रे थरपु हिरशो बाक्ब। अय्युब १९:८ 24 आं जचा थोव्रक आ पा डा हुकयी पतीके दुम्शो बाक्ब। आं हुकयी पशो ब्वाक्कु खोदेशो पा यीब। 25 गो मार मिम्शा हिंडा, मेकोमीन थिल्ली। गो मार तशा शुश हिंडा, मेको आं तार जाक्त। 26 आं थुं मनाइसीब। गो सिक्सी पा मबाक्नुड। नाइक्वा मताइनुड। श्येत ला जाक्ब" देंमाक्त।

एलीफाजम लोव्र पशो

4 मिनु तेमान डा एलीफाजमी अय्युब कली 2 "मार, सुइमी गे नु लोव्र पचा माल्लु हना, इन थुं खाइक्पाइक्नीनी? तन्न सु मब्वाक्थु बाक्ने चाप्नीमी डा? 3 गे शुश मुर आन कली शेंताक्नी। गे मचाप्ब मुर आन कली बोल्यो सेल्तीनी। 4 दाइल पा गोल्लो आन कली इन लोव्रमी आन थुं बारपाइक्तीनी। मिनु गे खोइल मथेक्ब आन कली खोइल थेक्ब सेल्तीनी। 5 तन्न मुल इन तार मोदेशो श्येत जाक्मेनु, गे फाल्ले मचाप्ब दुम्शो बाक्नीनी। मेको श्येतमी इन कली थिवानु, इन थुं लुक्च लशो बाक्ब। 6 मार इन परमप्रभु कली मान पा हिंतीकेम थमा मसुइक्नीनी? इन ठीक पतीकेमी आस मगेबा?

7 मारेइ दोस मताइब मुर खतम दुम्शो बाक्नीमी? मेको मिम्तीन। गेना हना यो रिम्शो पाइब मुर साइक्वा पुंडसीनीमी? 8 मरिम्शो पाइब नु ग्रांग्ये माग्ये पोक्ब आंम आन पशो ताइनीम। हितोपदेस २२:८ 9 परमप्रभु आ मुइश्शोम मेकोपुकी खतम दुम्नीम। मिनु मेको आ गाइश्शो आ मीम नेक्वा पुंडसीनीम। 10 गुप्स ग्रीमल, बोल्यो गुप्स डरर डरर पामेक्ल। मो हना यो ठिटा गुप्स आन खूइ जिक्या पुंडसाक्म। 11 बोल्यो गुप्सपुकी सिखार ब्वचा मतथु नुप्नीम। मिनु छाउरी गुप्स आन चाइक्ब एर ऑथ ब्राइनीम।

12 आइक्च लोव्र का आं नोफाम नेंता। मिनु गो शिप शिप पा लोव्र पशो नेंता। 13 नाक्दो डोमु ततीके बाक्ब। मुर ठेयब निन्द्रा पशो बाक्नीम। अय्युब ३३:१५; उत्पत्ती १५:१२ 14 मोदुम्तीके गो शुश हिंशा खिंखि पाता। मिनु मेकोम आं पोक्च कली शुश खिंखि पपाइक्नु। 15 फश का आं डॉइती रे पा लत। मिनु आं रां डा चां बोक्तेक्म। 16 मेको दिक्शा बाक्त। तन्न मेको मार बाक्मे, गो मारेइ मतुइक्नु। आं डॉइती मार कका राप्त। नोले सिक्सी दुम्शा, सेंदा का गूत। 17 मेको सेंदामी 'मार बेक्शा लाइब मुर परमप्रभु आ डॉइती नेल्लेम ठीक पाइब दुम्ने चाप्बा डा? मुर आ कली सेल्ब क्येडा रिम्शो दुम्ने चाप्बा डा?' देंत। १राजा ८:४६; भजन संग्रह १४:३; हितोपदेस २०:९ 18 परमप्रभुम आ गेय पाइब आन कली थमा मसुइक्ब। मिनु आ स्वर्ग डा गेय पाइब आन कली दोस गेब। अय्युब १५:१५ 19 मिनु खप के खिम बाक्ब मुर मेको आन क्येडा शुश दोस मताइनीमी डा? मुर आन जग फुरक बाक्ब। मेको तुम्ब खोदेशो पा दिप्शा साइक्वा पुंडसीनीम। 20 मेकोपुकी नाक्त काम साइक्वा पुंडसीनीम। सुइम मतुइक्थु बेक्नीम। 21 मेको आन ताम्बु डा डोरी गुंडशो बाक्ब। मेकोपुकी जोक्ब तुइक्ब मदुम्थु बेक्नीमी" देंमाक्त।

एलीफाज आ लोव्र

5 मिनु एलीफाजमी "मुल ब्रेश्शा कोव्रडीन। इन कली सुम लोव्र लेप्बाक्मा? गे सु कली 'वारच पाइय्थीनी' दे ब्रेल्नीनी? 2 गाइक्तीकेम मूर्ख आन कली साइक्ब। मिनु गेहे पतीकेम मारेइ मजोक्ब आन कली साइक्ब। 3 गो मूर्ख आन शाक्श थोक्शो तशो बाक्नुड। तन्न गो कालेमीन मेको आन खिं कली सराप चीले पाइक्ता। भजन संग्रह ३७:३५-३६ 4 मेको आन आल कोव्रब मुर मबाक्नीम। मेकोपुकी ठेयब लाप्चोम साइक्वा पुंडसीनीम। मेको आन कली प्रॉइब सुइ मबाक्ब। 5 थोव्रलु बेक्शोपुकीम मेको आन खुप्शो मारेइ मारेइ नेक्नीम। आन जचा थोव्रक चू आन दाते रे यो खुप्शा योल्नीम। तूत दाक्शोपुकी मेको आन शॉप तशा वाल्नीम। 6 मारेदे

हना श्येत जतीके फुरक रे मजाक्ब। खप रे श्येत मयूब। 7 मुरपुकी श्येत जचा कली जरमेसीनीम। मेकोपुकी मी आ फिलीडगो खोदेंशो पा जाम्नीम।

8 गो मेको नड हना, गो परमप्रभु कली मलु वा। आं पुंडशो लोव्र परमप्रभु कली देंड वा। 9 मेकोमी ठेयब, रुने मचाप्चा डा नु छक लाक्वा डा गेय हिकने मचाप्चा डा पा पाइब। अय्युब ९:१० 10 मेकोम खप कली रेउ यिपाइक्ब। मिनु रू कली ब्वाक्कु सोइक्ब। 11 मेकोम महिक्सीशो मुर आन कली ठेयब सेल्ब। मिनु रोंका पाइब आन कली लेंशा ग्येरपाइक्ब। भजन संग्रह ७५:८; लूका १:५२ 12 मेकोम मरिश्शो मिश्शा पाइब आन कली आन मिश्शो मदुम्पाइक्ब। मिनु मेकोपुकीम आन मिश्शो पने मचाप्चीम। 13 मेकोमी आंम कली जोक्ब तुइक्ब मिश्शा गेय पाइब कली आंम गेयमी मेको कली ग्याइक्पाइक्ब। मिनु आन मरिश्शो मिश्शो रीब पा खतम दुम्ब। १कोरिन्थी ३:१९ 14 मेको आन कली नाक्तीन छिडछिड दुम्ब। मिनु नाक्ती उइक्व दुम्मेनु, मेकोपुकी नाक्दो खोदेंशो पा सुल्शा गाक्नीम। यसैया ५९:९-१० 15 तन्न मेकोम मारेड मथीब आन कली आन मरिश्शो लोव्र रे प्रोंडब। मिनु सक्ति पाइश्शो आन गुड रे प्रोंडब। 16 मोपतीके प्रुडग आन आस बाक्ब। मिनु ठीक मपाइबपुकीमी आन शोव्र खेप्चा माल्नीम।

17 परमप्रभुमी ठीक सेल्चा पुंडसीशो मुर ग्येरसीशो बाक्नीम। मोपतीके नेल्ल क्येडा ठेयब सक्ति पाइश्शो आ शेंशो आइक्च ममिम्तीन। भजन संग्रह ९४:१२; हितोपदेस ३:११ 18 मारदे हना मेकोमी गार सेल्ब। मिनु मेकोमीन फ्रेंब। मेकोमी तुप्ब। मिनु मेकोमीन सापाइक्ब। ब्यवस्था ३२:३९; होसे ६:१ 19 मेकोमी इन कली ६ खेयप श्येत दुस्त हना यो, प्रोंडब। ७ खेयप डा श्येतमी इन कली मथीब। भजन संग्रह ३७:२४; हितोपदेस २४:१६ 20 मेकोमी अन्काल दुम्मेनु, इन कली बेक्चा रे प्रोंडब। मिनु लडाइ दुम्मेनु, तरवार रे प्रोंडब। 21 मेकोम इन कली शुक्शी पाइब रे प्रोंडब। मिनु खतम दुम्तीक नाक्त जाक्मेनु गे हिंचा ममाल्नीनी। 22 खतम दुम्तीके नु अन्काल जाक्मेनु, गे रिश्शा बाक्नीनी। मिनु गे ब्वाकी डा जन्तु आन क्येडा हिंचा ममाल्नीनी। 23 इन रूमी फुल्लु मबाक्नीम। मिनु ब्वाकी डा जन्तुपुकीम इन कली श्येत मगेनीम। यसैया ११:६-९; होसे २:२० 24 गे इन ताम्बु मारेड मदुश्शो बाक्ब दे तुइश्शो बाक्नीनी। मिनु गे इन क्यारश भेडा कली हिक्शा कोव्रनीनु, का यो मजाम्शो बाक्नीम। 25 इन चच युइ शुश दुश्शो बाक्नीम। इन आल घांस खोदेंशो पा शुश दुश्शो बाक्नीम। 26 गे खूशो दुश्शा बेक्नीनी। बाली नाली ओइची ना खोदेंशो पा, इन नाक्त जाक्ब। 27 गोपुकीम एको आन पर्वम हिल्लो हिक्सी पाइतक। मिनु नेल्ल थमा बाक्ब। मोपतीके एको नेनीन। मिनु तुइक्तीन” दे एलीफाजमी अय्युब कली मदा बाक्त।

अय्युबमी लोव्र लेशो

6 मिनु अय्युबमी 2 “आं सुर्ता नाक्ने चाप्शो हना नु आ शुश हिंचा डा श्येत नाक्शो हना, 3 मेको समुन्द्र डा बाल्वा आन क्येडा यो शुश हेल्शो दुम वा। मोपतीके आं लोव्र रिश्शो मबाक्म को। 4 नेल्ल क्येडा ठेयब सक्ति पाइश्शो आ ब्राम आं कली गुक्शो बाक्नीम। आं सोक्तीम मेको आन बीख तूचा माल्ब। परमप्रभुमी आं कली हिंपाइश्शो बाक्ब। भजन संग्रह ३८:३ 5 ब्वाकी डा गधा घांस ब्ववानु, ग्रीबा डा? ब्यफ आ खोले जवानु, ग्रीबा डा? 6 मब्रोवशो जचा थोव्रक हिक्सी मसुप्थु जने चाम्सीबा? मार ब्वोफु आ बुश ब्रोव्रशो बाक्ब डा? 7 गो मेको जचा मदाक्नुड। आं कली काइ मब्रोवब।

8 गो आं पुंडशो तड हना, परमप्रभुम आं माल्शो गेशो हना, 9 आं कली खतम सेल वा। परमप्रभुमी आं कली साइय्यी वा। 10 मेको मोदेंशो दुश्शो हना, आं थुं नांडस वा। मिनु शुश खाइश्शा यो ग्येरसीड वा। मारदे हना गो का ला परमप्रभु आ लोव्र मलाक्शो बाक्नुड। 11 गो आं रिश्शा बाक्तीक सक्ति बाक्ब डा? गो दोपा बेक्नुडा। गो रिश्शा बाक्ने चाप्नुडा डा? 12 आं सक्ति फुल्लु खोदेंशो बाक्ब डा? आं श्ये कांसा के बाक्ब डा? 13 थमा पा, गो आंम कली तिक्शा वोइक्ने मचाप्नुड। आं सक्ति नेल्ल लत।

14 सुमी आन वारच कली शिशी मपाइनीमी, मेकोम नेल्ल क्येडा सक्ति पाइश्शो कली मान पा हिंचा थुम्शो बाक्नीम। 15 आं लोक्बपुकी बारशा यीब खोला खोदेंशो बाक्नीम। सोव्रशो खोला खोदेंशो बाक्नीम। भजन संग्रह

३८:१२ 16 आन ब्वाक्कु मरिश्शो दुश्शा, फुं यशो खोदेंशो पा जाम्ब। 17 मिनु नाप्शोमी मेको आ शाइक्तीक रे जाम्ब। 18 मिनु लां गाक्ब आन लां रे हिरना हिरन गाक्नीम। मिनु मेकोपुकी मुर मबाक्तीकेम गाक्शा, बेक्नीम। 19 तेमा डा लां गाक्बपुकीम तूचा कली मेको खोला डा ब्वाक्कु माल्तेक्म। साबा डा ग्याप्ब लेयबपुकीम मेको ब्वाक्कु तूचा कली आस पास्तेक्म। अय्युब १:१५ 20 मेको आन आस सोव्रशो खोला तशा बेक्त। मेकेर जाक्दीश्शा आन थुं बेक्त। 21 मुल गे आं कली मोदेंशो दुम्तीनी। गे आं खतम दुम्तीके तशा हिनीनी। 22 गो इन कली ‘आं कली कोसेली चाक्कीन’ देंडा डा? गो इन कली ‘इन शोप गेयीनी’ देंडा डा? 23 मिनु ‘आं कली आं जोरी सन्तु आन गुड रे प्रोंडयीनी’ देंडा डा? ‘आं कली दिक्ब आन गुड रे प्रोंडयीनी’ दे गो इन कली गेनायो मर्देड।

24 आं कली शेंदीनी। मिनु गो सिक्सी पा नेंनुड। गो मार दूली पडा, आं कली रुप्पतीन। 25 थमा लोव्र बोल्यो बाक्नीमी। तन्न इन देंशो लोव्र मार रिश्शो बाक्ब डा? 26 गे आं लोव्र रिश्शो सेल्चा माल्नीनी? गे थुं लुक्च लशो मुर आ लोव्र फश बाक्ब, दे मिम्नीनी? 27 गेपुकीमी रोम रोइक्च आन पर्वम फेन्टे आप्नीनी। मिनु इन वारच आन पर्वम मार मार फाइक्नीनी।

28 मुल आं कली कोव्रडीन। गो इन कली जोल मपाइनुड। 29 गे खिं लेतीन। मिनु आं पर्वम अरु मरिश्शो मपने। लेतीन। मारदे हना गो ठीक पाइब बाक्नुड। 30 मार, आं लोव्रम मारेड जोल बाक्ब? मार, आं लोव्रम रिश्शो नु मरिश्शो तिल्ले मचाप्चा डा?” दे अय्युबमी आ वारच कली लोव्र लेत्ता बाक्त।

अय्युबमी परमप्रभु नु लोव्र पशो

7 मिनु अय्युबमी “मुर रागीम बाक्मानु, शुश गेय पचा माल्नीम। मेको आन नाक्ती गेय पाइब आन नाक्त खोदेंशो बाक्नीम। अय्युब १४:६ 2 मेको नाक्दो डा वांकु रिश्शो वाइलीम वाइल खोदेंशो पा बाक्नीम। आ गेय पशो डा गाल्च ताक्चा कली रिश्शा बाक्शो खोदेंशो बाक्नीम। 3 गो महिना नेल्ल मोशीन सोइक्ताक्डमी। नाक्दो कुस कुस श्येत जतीके आं भाग बाक्ब। 4 गो नाक्दो इप्चा कली गोल्डानु, गेना नां सोव्रबा, दे मिम्नुड। तन्न नाक्दो शुश लाइश्शो दुम्ब। मिनु गो नां मसोव्रम सम्म एर ओंथ लोक्सीशा बाक्नुड। 5 आं रां लुस्पुम ब्रीशा, फुरक लुम्सीशो बाक्ब। मिनु आं कुशुल जेशशा नेंने गूशो बाक्ब। 6 आं नाक्त वा प्रोव्रब आन थूरी क्येडा यो रीब पा लाइनीम। मेको नेल्ल आस मपाइश्शो दुम्नीम। यसैया ३८:१२

7 आं ब्रोंडतीक नाक्ती का ले कीशो सोक्त खोदेंशो बाक्नीम, दे मिम्तीन। गो लेंशा रिश्शो नाक्त तचा मताइनुड। 8 आं कली ताइबमी लेंशा गेनायो मताइब। गे आं कली कोव्रनीनु, गो लने थुम्शो बाक्नुड। 9 गोस्स ब्रशा जाम्शो खोदेंशो पा बेक्शो मुर आन बाक्तीक उइ लाइबपुकी गेनायो लेशशा मजाक्नीम। 10 मेको आन खिंम लेशशा मजाक्नीम। मिनु मेको आन बाक्तीकेमी मेको आन कली मतुइक्नीम। अय्युब १०:२१; अय्युब १४:१२; भजन संग्रह १०३:१६

11 मोपतीके गो सिक्सी पा मबाक्नुड। गो आं थुं डा श्येतम लोव्र पाइनुड। गो आं लुक्च लशो थुंम लोव्र पाइनुड। 12 मार, गो समुन्द्र नडा? गो समुन्द्र डा ठेयब जन्तु नडा? गे मारदे आं कली खाल पाइब वोइक्नीनी? 13 गो आं ब्राख्येम गोल्शा, आं थुं नाइक्ब, दे मिम्नुड। इप्डानु आं श्येत प्रेंनुड, दे मिम्नुड। 14 तन्न मेना गे आं कली आं डोमुम हिंपाइक्नीनी। मिनु कोंडतीक कोंडशा आं कली हिंच कोंडनीनी। 15 मोपतीके गो मेको रांम ब्रोंडचा क्येडा सोक्त मकीथु बेक्चा दाक्नुड। 16 गो ब्रोंडशा बाक्चा मदाक्नुड। गो गेना हना यो ब्रोंडशा बाक्चा मदाक्नुड। गे आं कली प्रोंडयीनी। मारदे हना आं ब्रोंडशो का ले कीशो सोक्त खोदेंशो बाक्ब। १राजा १९:४ 17 मुर मार नमी डा? गे मेको आन पर्वम शुश मिम्नीनी? मारदे गे मेको आन कली शुश दाक्नीनी। भजन संग्रह ८:४; भजन संग्रह १४४:३ 18 गे मेको आन कली सुनी कुस कुस कोव्रनीनी। गे मेको आन कली गेना हना यो नाक्शा कोव्रनीनी 19 गिश सम्म आं रे इन मिक्च हिरनीनी? शेप्चुक मदाक्नु सम्म आं कली प्रोंडयीनी। 20 गो पाप पाता हना यो, इन कली मार दुम्बा डा, गे मुर आ थुं नाक्शा कोव्रनीनी? गे मारदे आं कली खेदा पस डा पस बाक्नीनी। गे मारदे आं कली



तशा ब्रीनीनी? 21 गे मारदे आं हेंथे पशो माफ मगेयीनी? मारदे आं मरिम्शो पशो मक्याम्नीनी? मुल गो बेक्नुड। मिनु गे आं कली माल्तीनी हना यो, मथिल्लीनी" दे अय्युबमी परमप्रभु यावे कली देंमाक्त।

बिल्दाद आ डोंइती डा लोव

8 मिनु शुआह डा बिल्दादमी लोव लेशशा 2 "गे गेना सम्म ओदेंशो लोव पस डा पस बाक्नीनी। इन लोव ठेयब फश ला बाक्नीम। 3 मार, परमप्रभुम दूली निसाफ पाइबा डा? मार, नेल्ल क्येडा सक्ति पाइश्शो परमप्रभुम मार ठीक बाक्बा, मेको मतुइक्बा डा? अय्युब ३४:१० 4 इन तमी तौपुकीम मेको आ परबम पाप पास्तेक्म। मोपतीके मेकोम मेको आन कली आन हेंथे पशो मोइक्ताक्व। अय्युब १:४-५ 5 गे नेल्ल क्येडा सक्ति पाइश्शो परमप्रभु कली माल्तीनी नु मेको कली पुंइतीनी हना, 6 गे ग्रांग्रा मदिचा डा नु गेना हना यो रिम्शो पाइब बाक्तीनी हना, मेको थमा पा इन पोन बोक्व। मिनु मेकोम इन खिं लेंशा, डोंइती डा खोदेंशो पा गेब। भजन संग्रह ३५:२३ 7 मिनु इन डोंइती डा बाक्शो क्येडा, इन नोले डा बाक्शो शोंप शुश दुम्ब। अय्युब ४२:१०

8 डोंइती डा पाला डा मुर आन कली हिल्लो पने। मिनु मेको आन किकी पिपी आन मिम्शा पशो, मिम्तीन। 9 मारदे हना गोपुकी सिनाक्त ला जरमेशो बाक्नीकी। मिनु गो मारेड मतुइक्व बाक्नीकी। रागीम आंड नाक्ती वांकु खोदेंशो ला बाक्ब। 10 मेको किकी पिपीम इन कली मशेंनीमी? इन कली लोव मपाइनीमी? इन कली आन रुप्थो लोव मशेंनीमी?

11 ब्वाक्कु मबाक्तीकेम कागज सेल्लिक बोट मवानीम। ब्वाक्कु मबाक्तीकेम बुदी मीलु लाइश्शो मदुम्नीम। 12 मेको कोल्ना कोल्न बाक्मानु, रिक्ची मजाक्थु, घांस क्येडा यो रीब पा सोल सुल बेक्नीमी। 13 परमप्रभु कली प्रेंबपुकी यो मोदेंशोन दुम्नीम। परमप्रभु कली मटीब मुर आन आस यो मोपा जाम्शा लाइब। अय्युब ११:२०; हितोपदेस १०:२८ 14 मेको आन आंमा कली थमा सुइक्तीक थम आइक्च श्येले खोदेंशो बाक्ब। मेको आन आस माखा आ जाल खोदेंशो बाक्ब। 15 मेको आ जालम रक एश्शा बाक्त हना, मेको कली मतिक्व। मेको कली ग्याइक्ताक्व हना यो, मेको ब्रेक्ब। 16 परमप्रभु यावे आ अरेशो मटीबपुकी नां तशो घांस सुवा खोदेंशो पा वानीम। मिनु मेको आन शाक्श तेड तेड ब्रशा लाइनीम। 17 मेको आन शाक्शम फुल्लु आन कली रुक्नीम। मिनु मेको फुल्लु आन दातेम बाक्नीम। 18 मेको आन बाक्तीक रे खतम दुम्मानु, आन बाक्तीकेम मेको आन कली 'गो इन कली गेनायो मतशो नड' देंब। 19 मेको आन ग्येरशा ब्रोंइतीक नाक्ती मोदेंशो बाक्नीम। मिनु अर्को तेड तेड खप रे वाशा गूनीम।

20 नेनीन, परमप्रभुमी दोस मताइब मुर कली मतिक्व। मेकोम मरिम्शो गेय पाइब मुर आन कली वारच मपाइब। 21 मो हना यो, मेकोमी इन कली रिप्पाइक्व। ग्येरशा ठेयब सेंदाम लोव पपाइक्व। 22 मिनु परमप्रभुमी इन कली काइ मदाक्व आन मुने दोक्पाइक्व। मिनु परमप्रभु यावे आ अरेशो मटीब आन ताम्बु जाम्शा लाइनीम" दे बिल्दादमी अय्युब कली देंमाक्त।

अय्युबमी लोव लेशशो

9 मिनु अय्युबम लोव लेशशा 2 "गो एको थमा बाक्ब, दे तुइक्नुड। तन्न परमप्रभु आ डोंइती बेक्शा लाइब मुर दोपा ठीक बाक्ने चाप्बा डा? अय्युब ४०:३-५; भजन संग्रह १४३:२ 3 सुइमी मेको नु लोव जिपाइक्वा मिम्ताक्व हना, मेकोम हजार का लोवम लोव का यो लेन्ने मचाप्ब। भजन संग्रह १९:१३ 4 मेको जोक्ब तुइक्व नु सक्ति पाइश्शो बाक्ब। मेको कली मटिथु, सु ग्येत्थ लने चाप्बा डा? 5 मेकोम डांडा आन कली आन मतुइक्थुन याक्व। मिनु गाइश्शा, मेको आन कली लोक्ब। 6 मेकोम रागी कली आ बाक्तीक रे हिक्ब। मिनु मेको आ थाम नेल्ल खिंखि पाइनीम। 7 मेकोम नां कली 'मदपो' दे अरेब। मिनु सोरुल आन छेडछेड साम्ब। 8 मेको आ कामीन सरीड प्राक्शो बाक्ब। मेको समुन्द्र आ छाल तार गाक्ब। 9 मेकोमी सप्तबर्सी, मिर्गसीरा नु किरकिटी सोरुल नु दक्खिन डा सोरुल आन हुल सेल्लु। अय्युब ३८:३१; आमोस ५:८ 10 मेकोम ठेयब नु मरुप्चा डा गेय पाइब। मिनु हिक्ने मचाप्बा डा छक लाक्वा डा गेय पाइब।

अय्युब ५:९ 11 मेको आं बाक्तीक रे पा लाइब। गो मेको कली मताइनुड। मेको आ लां खोइश्शा गाक्मेनु, गो मतुइक्नुड। 12 मेकोम रोइक्ताक्व हना, मेको कली सुम तेक्ने चाप्बा डा? सुमी मेको कली 'गे मार पनी' दे हिल्लो पने चाप्बा डा?

13 परमप्रभुम आ गाइक्वा मलेक्ब। राहाब माइश्शो समुन्द्र डा ठेयब जन्तु कली वारच पाइबपुकी मेको आ खोइलीम बाप्नीम। अय्युब २६:१२; भजन संग्रह ८९:११ 14 मोदेंशो बाक्त हना, गो मेको कली दोपा लोव लेन्ने चाप्नुडा डा? गो मार लोव देंनुडा डा? 15 गो दोस मतशो बाक्ती हना यो, मेको कली लोव लेन्ने मचाप्नुड। आं कली दोस गेब कली गो 'शिशी पाइय्यीनी' दे पुंइने ला चाप्नुड। 16 गो मेको कली ब्रेत्तुनु, लोव लेत्ताक्वी हना यो, मेकोम आं लोव नेंतु, दे थमा मसुइक्नुड। 17 मारदे हना मेकोमी आं कली फश गिवारम खतम सेल्ब। मोशान आं गार शुश सेल्ब। 18 मेकोम आं कली लेंशा सोक्त कीचा यो मगेब। श्येत जपाइश्शा आं थुं लुक्च लपाइक्व। 19 एको सक्ति पाइश्शो लोव बाक्त हना, मेको आं क्येडा बोल्थो बाक्ब। एको ठीक पतीके लोव बाक्त हना, मेको कली सुम सेन्ने चाप्बा डा? अय्युब ९:३३ 20 गो दोस मताइब बाक्ती हना यो, आं लोवमीन आं कली दोस ताइब सेल्ब। गो दोस मपाइश्शो बाक्ती हना यो, मेकोमी 'गे दोस ताइब बाक्नेवे' दे चिन्ड कोंइब। 21 गो दोस मताइब बाक्नुड। मो हना यो गो आं परबम मारेड मतुइक्नुड। गो ब्रोंइचा मदाक्नुड। 22 लोव नेल्ल कान बाक्ब। मोपतीके गो मेकोम दोस मताइब नु आ अरेशो मटीब निम्फा आस कली खतम सेल्ब, देंनुड। अय्युब ८:२०; उपदेसक ९:२-३ 23 हिंचा डा श्येतमी कालेमीन मुर कली साइक्ब। मेकोम दोस मताइब आन हिंचा डा श्येत जशो आ परबम शुक्शी पाइब। 24 रागी परमप्रभु यावे आ अरेशो मटीब आन गुइमी गेशो बाक्ब। मेकोम निसाफ पाइब आन मिक्च सिल्ब। मेकोम मो मपाप्नु हना, सुम पाइबा डा?

25 आं ब्रोंइतीक नाक्त दोरब आन क्येडा यो शुश दोरशो बाक्ब। मारेड ग्येरतीक मतथु, मेको नुम्ना नुम्न लाइनीम। 26 मेको बुदी मीलु के सेल्थो डोंगा खोदेंशो पा, रीब पा शाइश्शा लाइनीम। ब्वारदे आन सिखार तार जुक्शो खोदेंशो पा लाइनीम। 27 गो आं श्येत प्रेंनुड। गो ग्येरशो कुल कोंइशा रिन्नुड, देंती हना यो, 28 गो आं श्येत जचा माल्थो तशा हिंनुड। मारदे हना गे आं कली दोस मताइब मदेनीनी, दे तुइक्नुड। 29 गो दोस ताइब दुम्ने थुम्शो बाक्ती हना, मोशान मारदे श्येत पाइनुडा? 30 गो साबुनम चिक्साक्वी हना यो, आं गुइ थम सफा पा चिक्साक्वी हना यो, येरमीया २:२२ 31 गे आं कली हिलोमीन ब्वारनीनी। मिनु आं वाम यो आं कली ग्रांग्रा दिक्ब। 32 मेको आं खोदेंशो बेक्शा लाइब मुर ममाइ। मिनु गो मेको कली लोव लेन्ने मचाप्नुड। मोदेंशो दुम हना, निसाफ पाइब आन डोंइती लोव पने चबु वा। उपदेसक ६:१० 33 आंस दातेम गारपाइक्व सुइ मबाक्म। आंस दातेम गुइ वोइक्व सुइ मबाक्म। 34 परमप्रभुम आ कोक्के आं ची रे याक्त हना, आं कली महिपद हना, 35 गो मेको नु महिथु लोव पड वा। तन्न आ मिम्शो दुम्मेनु, गो तुइक्नुड" दे अय्युबमी शुआह डा बिल्दाद कली देंमाक्त।

अय्युब आ थुं लुक्च लशो

10 मिनु अय्युबम "गो ब्रोंइचा मदाक्नुड। गो आं श्येत आ परबम लोव पस डा पस बाक्नुड। गो आं कशो थुंमी लोव पाइनुड। 2 गो परमप्रभु कली 'आं कली सजाइ मगेयीनी' देंनुड। आं कली मारदे निसाफ पाइनीनी, मेको शेंदीनी। 3 गे मुर आन कली दिप्शा, ग्येरनीनी? इन सेल्थो आन कली ममिम्चा रिम्शो लाक्नीनी? इन अरेशो लोव मटीबमी मरिम्शो पशो दाक्नीनी? 4 इन मिक्च मुर आन मिक्च खोदेंशो बाक्बा? गे मुर आन कोवशो खोदेंशो पा कोवनीनी? १सामुएल १६:७ 5 इन नाक्ती बेक्शा लाइब मुर आन नाक्त खोदेंशो बाक्नीमी? इन ब्रोंइतीक बर्स मुर आन बर्स खोदेंशो बाक्नीमी? 6 गे आं मरिम्शो पशो माल्शा, आं पाप थिश्शा गुंइनीनी? 7 गो दोस मताइब बाक्नुड, दे गे तुइक्ताक्वी हना यो, इन गुइ रे आं कली सुइम प्रॉइने मचाप्ब, दे यो तुइक्नीनी। 8 डोंइती गे आं कली सेल्लतीनी। मुल आं कली खतम पोक्नीनी? भजन संग्रह १३९:१४ 9 गे आं कली खप के सेल्लतीनी। मेको मिम्तीन। मिनु मुल फुरक सेल्लतीनी? अय्युब ३३:६; उत्पत्ती २:७; उत्पत्ती ३:१९ 10 गे आं कली दूध मोइश्शो खोदेंशो पा आं ममा आ

कोव्रजीम वोइक्तीनी। मोदेशो पा आं रां सेल्लतीनी? 11 गे आं कली श्ये नु कुशुलम ग्योम्शा, रुश नु नाडीम बोइक्ताक्यीनी। 12 गे आं कली ब्रॉइतीक सोवत गेतीनी। मिनु गेना हना यो दाक्ताक्यीनी। मिनु आं कली ब्रॉइचा गेचा कली कोव्रशा वोइक्तीनी। 13 आं कली श्येत गेचा कली डॉइती रे इन थुंम खुइश्शा वोइक्तीनी। मेको इन थुंम बाक्त्, दे तुइक्ताकड। 14 गो पाप पाता हना, गे आं कली कोव्रना कोव्रन बाक्तीनी। मिनु आं मरिश्शो पशो मक्याम्नीनी। 15 गो थमान इन अरेशो मटीब बाक्ती हना, आं कली हिंचा डा दुम्त। गो ठीक पाइब बाक्ती हना यो, आं पिया पोक्ने मचाप्नुड। मारदे हना गो आं मुनेम ब्रीशा, आं श्येत तना तन बाक्नुड। 16 गो ठेयब लेशशो बाक्ती हना, गे गुप्स कली सिखार ग्यारशो खोदेशो पा आं कली माल्यीनी वा। मिनु लेंशा इन ठेयब सक्तिम श्येत गेयीनी वा। यस्वैया ३८:१३ 17 गे आं मरिश्शो पशो आ पर्वम नक सांकछी चाक्तीनी। मिनु आं पर्वम इन गाइक्तीक तेम्नीनी। आं पर्वम इन हुल हुल लडाइ पाइबपुकी चाक्तीनी।

18 गे मारदे आं कली जरमेपपाइक्ती? आं कली सुइम मतथु, बेक्शो नड हना, रिश्शो दुम वा। अय्युब ३:११; येरमीया २०:१४ 19 गो जरमेसीन मजरमेशो नड हना, शास्मीशा तुरसुम जाक्दीश्शो नड हना, दुम वा। 20 आं ब्रॉइतीक नाक्ती शुश मबाक्तीनी। आं कली आं कान प्रॉइयीनी। मिनु आं थुं इक्का नांडसीबा कों? 21 लेशशा मजाक्तीक रागीम लचा क्येडा डॉइती, थम छिडछिड नु क्येर नाक्दो 22 नु ग्रांगे माग्ये दुम्तीकेम लचा क्येडा डॉइती आं कली आं कान प्रॉइयीनी। मेकेर डा छेडछेड यो छिडछिड दुम्त” दे अय्युबम परमप्रभु कली देंमाक्त्। अय्युब ७:१०

सोफारमी अय्युब कली दोस गेशो

11 मिनु नामा डा सोफारमी 2 “मार, गो एको इश्का लोव्र आ पर्वम लोव्र मलेत्नुडा? मार एको लोव्रमाते आ लोव्र नेल्ल ठीक बाक्बा डा? 3 इन गेनायो मनुप्तीक लोव्रम मुर आन कली सिक्सी पपाइक्बा? गे शुक्शी पनीनु, इन कली मुने मदुम्बा? 4 गे ‘आं शेंशो ठीक बाक्ब। परमप्रभु, आ डॉइती गो ग्रांग्रा मदिशो बाक्ती’ देंनीनी। अय्युब ९:२१; अय्युब १०:७ 5 परमप्रभु ब्वाक्त्। मिनु इन कली लोव्र पवल दे आस पाइनुड। 6 मिनु मेकोमी खुइश्शो तुइक्तीक इन कली शेंदल। मारदे हना तुइक्तीक शुश बाक्तीनी। परमप्रभुम इन मरिश्शो पशो आ पा डा तचा माल्शो सजाइ मगेवा। इक्का ला गेप्त्।

7 मार, गे परमप्रभु आ खुइश्शोम मिश्शो तुइक्ने चाप्तीनी? गे नेल्ल क्येडा ठेयब सक्ति पाइश्शोम मार पने चाप्बा, मेको तुइक्ने चाप्तीनी? 8 मेको सरीड क्येडा यो इर बाक्ब। गे मार पने चाप्तीनी डा? मेको बेक्शो मुर आन बाक्तीक क्येडा यो लुक्च लशो बाक्ब। गे मार तुइक्ने चाप्तीनी डा? 9 मेको पुक्शोनु रागी क्येडा यो लाइश्शो बाक्ब। मिनु समुन्द्र क्येडा यो ब्रेश्शो बाक्ब। 10 मेको जाक्शा, मुर आन कली जेल्खानम चोक्शा, मुर आन कली निसाफ पचा कली खुप्ताक्व हना, सुम मेको कली तेक्ने चाप्बा डा? 11 सु सु शोर गाक्शो मुर बाक्मा, मेको परमप्रभुमी तुइक्ब। मेकोमी मरिश्शो पाइब आन कली तुइक्ब। 12 मूर्ख मुर रुब् दुम्ने मचाप्ब। मेको मो दुम्त हना, ब्वाकी डा गधा आ चाइक्ब मुर दुम्शा जरमेशो खोदेशो दुम्ब।

13 मो हना यो गे इन थुं परमप्रभु गे हिरनीनी, गे इन गुइ पोक्शा, मेको कली पुंइनीनी। 14 मिनु गे मरिश्शो पाइन बाक्तीनी हना, मेको कली थुमीन। मिनु परमप्रभु यावे आ अरेशो मटितीक इन ताम्बुम बाक्चा मगेन। 15 नोले गे थमा पा मारदे दोस मतथु इन पिया पोक्तीनी। रिश्शो पा महिंथु बाक्तीनी। 16 मिनु गे इन श्येत प्रेंनीनी। गे मेको कली शाइश्शा लशो ब्वाक्कु खोदेशो मिम्नीनी। 17 इन ब्रॉइतीक नाक्त् डा छेडछेड खोदेशो दुम्ब। मिनु इन श्येत डा छिडछिड सुनी डा छेडछेड खोदेशो दुम्ब। 18 गे थमा सुइक्तीनी। मारदे हना मेकेर आस बाक्ब। गे कोव्रचा पुंइसीशा, महिंथु रिश्शो पा बाक्तीनी। भजन संग्रह ४:९ 19 गे सुइ आन क्येडा महिंथु इप्तीनी। मिनु शुश मुरुम इन शिशी तचा कली आस पाइनीम। 20 तन्न परमप्रभु यावे आ अरेशो मटीब आन मिक्च मताइनीम। मेको आन प्रोक्तीक लां देक्ब। मिनु मेको आन आस बेक्चा बाक्ब” दे सोफारम अय्युब कली देंमाक्त्। अय्युब ८:१४

अय्युबम सोफार कली लोव्र पशो

12 मिनु अय्युबम लोव्र लेशशा 2 “गेपुकी थमा पा हिक्सीशो मुर बाक्तीनी। मिनु तुइक्तीके गेपुकी नु बेक्शा लाइब। गो मेको तुइक्नुड। 3 तन्न इन खोदेशो रुप्तीक थुं आं के यो बाक्ब। गो यो इन खोदेशो जोक्ब तुइक्ब नड। मेको मुर नेल्लेम तुइक्तीनी। 4 आं वारचपुकीमी आं पर्वम रिन्तीम। गो परमप्रभु कली पुंइता। मिनु मेकोमी लोव्र लेत्ताक्यी। गो ठीक पाइब दोस मताइब मुर बाक्ती हना यो, आं पर्वम रिन्तीम। 5 श्येत मजाइब, रिश्शो पा बाक्ब मुरपुकीम हिंचा डा श्येत जाइब आन कली तशा ग्रांग्रा दीनीम। गे श्येत जशा ग्रेक्चा चिक्शो कली श्येत तेम्नीनी। 6 मिनु रोइक्ब आन ताम्बुम थुं नाइश्शा बाक्तीनी। मिनु परमप्रभु कली गाइक्पाइक्बपुकी रिश्शो पा ब्रॉइशा बाक्तीनी। मेकोपुकीम आंम सक्ति कली ठेयब सेल्लनीम। हबकुक् १:११

7 मुल ब्वाकी डा जन्तु आन कली हिल्लो पने। मेकोपुकीम इन कली शेंनीम। सरीडम बेरब चिक्ब आन कली हिल्लो पने। मेकोपुकीम इन कली देंनीम। 8 गे खप कली हिल्लो पने। मेकोमी इन कली शेंब। समुन्द्र डा डांइपुकीम इन कली शेंनीम। 9 परमप्रभु यावेम मेको नेल्ल पशो बाक्ब, दे सुम मतुइक्तीमी डा? 10 ब्रॉइशा बाक्ब नेल्ल आन ब्रॉइतीक नु मुर नेल्ल आन ब्रॉइतीक सोक्त् मेको आ गुइमी बाक्ब। गन्ती १६:२२; प्रेरित १७:२८ 11 जचा थोव्रक ब्रॉव्रशो नु मब्रॉव्रशो लेंम तुइश्शो खोदेशो पा, पशो लोव्र रिश्शो नु मरिश्शो नोफाम मनेंबा डा? 12 खाल्पा आन दातेम तुइक्तीक बाक्ब। खूशो आन दातेमी रुप्तीक बाक्ब। अय्युब ८:८

13 मिनु परमप्रभु नु तुइक्तीक नु सक्ति बाक्शो बाक्ब। मेको नु अर्ती गेतीके नु रुप्तीक थुं बाक्शो बाक्ब। 14 मेकोमी प्रेतु हना, मेको लेंशा सेल्ले मचाप्तीम। मेकोमी मुर कली जेल्खानम चोक्त् हना, सुइमी मेको कली गुंइने मचाप्तीम। प्रकाश ३:७ 15 मेकोमी ब्वाक्कु तेक्त् हना, रू नेल्ल सोवनीम। मेकोमी ब्वाक्कु प्रॉइत्तु हना, रागी खतम पोक्ब। १राजा १७:१,७; उत्पत्ती ७:१९-२३ 16 सक्ति नु तुइक्तीक परमप्रभु नु बाक्ब। दूली पाइब नु दूली पपाइक्ब, निम्फा आ केन बाक्तीस। १राजा १२:२८-३०; २राजा १९:१०-३७ 17 मेकोमी अर्ती गेब आन कली मुने दोक्पाइक्ब। मिनु निसाफ पाइब आन कली मूर्ख सेल्ल। 18 पिप आन फेक्शो वा प्रुइक्ब। मिनु मेको आन कली किश्शुर क्यिप्पाइक्ब। 19 चढेब आन कली मुने दोक्पाइश्शा सोइक्ब। डॉइती रे गेय पाइब आन कली गुंइब। १सामुएल २:३०-३२; १सामुएल २२:१८-१९ 20 थमा सुइक्चा पुंइसीशो शेंब आन कली सिक्सी पपाइक्ब। खाल्पा आन तुइक्तीक लोव्र शोर गाक्शो सेल्ल। 21 हुकुम पाइब आन कली शुक्शी पचा पुंइसीब सेल्ल। सक्ति पाइश्शो आन कली मचाप्ब सेल्ल। १सामुएल १७:५; १सामुएल ३१:९; २राजा १९:३७; दानीएल ४:२९,३० 22 मेकोम छिडछिड आगाम बाक्शो गुंइब। मिनु थम छिडछिड कली छेडछेड सेल्ल। 23 रागी रागी आन कली हिक्सीशो सेल्ल। नोले मेको आन कली खतम सेल्ल। रागी रागी आन कली ठेयब सेल्लशा, मेकेर डा मुर आन कली एर ऑथ ब्रपाइक्ब। 24 रागी डा हुकुम पाइब आन कली मरुब्ब सेल्ल। मिनु नोले मेको आन कली लां मबाक्शो गोरशो रागीम एर ऑथ हिरपाइक्ब। 25 मिनु मेकोपुकी हाम्सो मबाक्तीके, छिडछिडम सुल्शा गाक्तीनी। मेको आन कली दुक्शो मुर खोदेशो पा गोल्ला चिक्शा गाक्पाइक्ब।

अय्युब आ लोव्र

13 गो मेको नेल्ल ताता। गो मेको नेंशा रुप्ता। 2 इन तुइश्शो, गो यो तुइक्नुड। गो इन क्येडा मतुइक्ब मनड। 3 तन्न गो नेल्ल क्येडा ठेयब सक्ति पाइश्शो आ डॉइती लोव्र पाइनुड। मिनु गो परमप्रभु नु लोव्र पा, आं पर्वम हिल्लो पाइनुड। 4 गेपुकीम चहिं इन जोल लोव्र पा ठेयब सेल्लसीनीनी। गे शोर गाक्शो लेम्ब बाक्तीनीनी। 5 गेपुकी सिक्सी पा बाक्शो ननी हना, तुइक्ब मुर बाक्तीनी, दे तुंइस वा। हितोपदेस १७:२८ 6 मुल आं लोव्र नेनीन। पचा माल्शो लोव्र इन नोफा दाइश्शा नेनीन। 7 गेपुकी परमप्रभु आ लोव्र पखु पाइनीनी? मोदेशो जोल लोव्र कली थमा बाक्ब, दे थमा सेल्लनीनी? 8 मार गेपुकी परमप्रभु आ कुल कोव्रशा, मेको आ पा डा पचा

माल्शो लोव्र देंनीनी? 9 परमप्रभुमी इन कली नाक्शा कोव्रडानु, गे नेल्ल ठीक बाक्नीनी? मार, मुर आन मिक्च सिल्शो खोदेंशो पा, मेको आ मिक्च यो सिल्ने चाप्नीनी? 10 गे खूइश्शोमी कुल कोव्रनीनी, परमप्रभुम इन कली थमा पा हुइक्ब। 11 परमप्रभु आ मान ततीकेम इन कली महिंपाइक्बा? मेको आ हिंच कोइशोमी इन कली ग्येत्थ लुक्च मसेल्बा? 12 इन आं कली देंशो लोव्र पुलु ला बाक्नीम। इन बोल्यो अर्ती खप के बाक्नीम।

13 सिक्सी पा बाक्कीन। मिनु गो लोव्र पाइनुड। मिनु आं परबम मार मार दुम्बा, दुम्ब। 14 गो ब्रॉइनुडा देय मब्रॉइनुडा। गो बेक्नुडा कों ब्रॉइनुडा। 15 मेकोम आं कली साइक्ब। गो आस मपाइनुड। तन्न मुल गो आं लोव्र मेको आ डॉइती वोइक्नुड। 16 परमप्रभु कली मटीब मुर मेको आ डॉइती जाक्ने मचाप्नीम। मेको आं कली प्रॉइतीक दुम्ब। 17 नोफा दाइश्शा, आं लोव्र नेनीन। मिनु आं शेंशो रिश्शो पा नेनीन। 18 गो आं देंचा माल्शो लोव्र ठीक पाता। मिनु नोले गो दोस मताइब बाक्नुड, दे तुइक्नुड। 19 सुमी आं कली कछडी बाक्शा, दोस गेने चाप्बा? मोदेंशो दुम्त हना, गो सिक्सी पा फाल्शा बाक्शा, बेक्नुड। 20 परमप्रभु, गो इन कली थोव्रक निक्शी पुंइनुड। मिनु गो इन डॉइती रे मखूइक्नुड। 21 आं कली श्येत मगेयीनी। मिनु इन हिंपाइक्तीकेमी आं कली महिंपतीन। अय्युब ९:३४ 22 गे आं कली ब्रेत्तीनी। मिनु गो लोव्र लेत्नुड। डॉइती गो ब्वाक्नुड। मिनु गे आं कली लोव्र लेत्तीनी। 23 आं मरिश्शो पशो नु आ पाप गिश बाक्नीमी? आं हेंथे पशो नु आं पाप तुइक्पाइय्यीनी। 24 गे मारदे इन कुल खूइक्नीनी? मिनु आं कली इन जोरी सनु खोदेंशो पाइनीनी। अय्युब १९:११ 25 गे बेरशो सफा कली यो हिंच कोइनीनी? गे सोव्रशो भूस आ नोले खोइक्नीनी? 26 गे आं परबम कशो लोव्र ब्रेक्नीनी। मिनु आं ठिटा ना डा मरिश्शो पशो आ परबम सजाइ गेतीनी। भजन संग्रह २५:७ 27 आं खोइलीम ठेंडरो थोक्ताक्नी। आं लां नेल्ल कोव्रशा, वोइक्नीनी। अय्युब ३३:११ 28 मोपतीके मुर राक्शो थोव्रक खोदेंशो पा जाम्नीमी। तुम्बुम खोइश्शो वा खोदेंशो पा नुश्शो बाक्नीमी” दे अय्युबमी देंमाक्त।

ब्रॉइचा नु बेक्चा आ परबम लोव्र

14 मिनु लेंशा अय्युबमी “मीश मुर रे जरमेशो बेक्शा लाइब मुर इक्का नाक्त ब्रॉइशा, श्येत ला जाइब। 2 मेको फू खोदेंशो पा बोइश्शा, सोल सुल बेक्ब। वांकु जाम्शो खोदेंशो पा जाम्शा लाइब। भजन संग्रह ९०:५ 3 गे मोदेंशो कोव्रनीनी? मिनु गे आं कली निसाफ पाइनीनी? 4 सुमी ग्रांरा दिशो रे ग्रांरा मदिशो सेल्ने चाप्बा? सुइमी मचाप्ब। 5 मुर आ ब्रॉइतीक नाक्ती हिक्शा वोइश्शो बाक्नीम। मिनु मेको गिश महिना ब्रॉइशो बाक्नीमी, मेको तुइक्नीनी। इन देंशो नाक्त लाक्ने मचाप्नीम। भजन संग्रह ३१:१६; भजन संग्रह ३९:५ 6 गे मुर आन कली मकोव्रडीन। मिनु नाक्त किंत किंत गेय पाइब मुर खोदेंशो ग्येरशा बाक्चा गेन। अय्युब ७१-२

7 रवा कली आस बाक्ब। तिश्शो नोले यो कोच्चा दाप्ब। मिनु वाना वान बाक्नीम। 8 मेको आ शाक्श खप आगाम चोक्ताक्व हना यो, मेको आ ठुटा खप आगाम राक्त हना यो, 9 लेंशा इक्का ब्वाक्कु तवानु, वाब। मिनु ठेयब रवा खोदेंशो पा राशी दाप्ब। 10 तन्न बेक्शा लाइब मुर बेक्शा जाम्शा लाइनीम। मुर आ सोक्त लाइब। मिनु ते लाइबा मतुंइसीब? 11 दोपा दोम्ली डा ब्वाक्कु इक्का पा सोव्रना सोव्रन लाइबा, दोपा खोला आइक्च दुम्ना दुम्न लशा सोव्रबा, 12 मोपा बेक्शा लाइब मुर गोल्ब। मिनु मेको लेंशा गेनायो मबोक्ब। सरीड मक्याम्से सम्म, बेक्शो मुर लेंशा मबोक्नीम। मेको आन निन्द्रा रे मसेंसीनीम। अय्युब ७:१० 13 गे आं कली बेक्शो मुर आन बाक्तीकेम खूइक्तीन। इन गाइश्शो मनाइक्तीनी सम्म आं कली खूइक्तीन। मिनु नोले आं कली फ्रुक्शा, गो नु ग्रुस्तीक नाक्त का वोतीन। यसैया २६:२० 14 मार, बेक्शो मुर लेंशा ब्रॉइनीमी डा? गो रिश्शो नाक्त कली रिश्शा बाक्नुड। आं श्येत मथुमु सम्म रिश्शा बाक्नुड। 15 मिनु गे आं कली ब्रेन्नी नोले, गो इन कली लोव्र लेत्नुड। मिनु गे इन आंम गुइम सेल्शो मुर, आं कली, शिशी पाइनीनी। 16 गे आं पशो नेल्ल मकोव्रनीनी। गे आं पाप हिक्शा मवोइक्नीनी। 17 आं हेंथे पशो नेल्ल ब्रेक्शा, इन थैलोम वोइश्शो बाक्ब। गे आं मरिश्शो पशो नेल्ल सुश्शा वोइश्शो बाक्नीनी। होसे १३:१२

18 मिनु डांडा ब्रेश्शा, जाम्शा लाइब। सेरथे फुल्लु मेको आ बाक्तीक रे याक्सीशो बाक्नीम। 19 ब्वाक्कुम फुल्लु आन कली योल्ब। बारशो ब्वाक्कुम रागी डा खप योल्ब। मोपा गे मुर आन आस थुम्पाइक्नीनी। रोमी ५:५ 20 गे मेको आन कली गेना हना यो ग्रानीनी। मिनु मुर बेक्नीम। गे मुर आन रां फाइश्शा ताइक्नीनी। 21 मेको आन आल ठेयब दुम्शा मान पाइक्चा पुंइसाक्म हना यो, मेकोपुकीम मतुइक्नीम। आइक्च सेल्चा पुंइसाक्म हना यो, मतुइक्नीम। 22 मेकोपुकीम आन रां डा श्येत ला तुइक्नीम। मिनु आन परबम ला रोंका पाइनीम” दे अय्युबमी देंमाक्त।

एलीफाजमी लोव्र पशो

15 मिनु तेमान डा एलीफाजमी 2 “मार, जोक्ब तुइक्ब मुरुम ओदेंशो डर ना पुं डा लोव्र पा लोव्र लेत्चा दुम्बा? मेको आ कोव्रजीम फश लोव्रमी प्रिंचा दुम्बा? 3 जोक्ब तुइक्बमी इन कली शोर गाक्शो लोव्र लेत्चा दुम्बा? मारेइ रिश्शो मपाइब लोव्र लेत्चा दुम्बा? 4 गे परमप्रभु कली मान पा हिंतीके तेक्नीनी। मिनु परमप्रभु कली मिश्शा पुंइचा यो तेक्नीनी। 5 इन देंशो नेल्ल इन मरिश्शो पतीके रे पिशो बाक्ब। गे मिलो शिलो पशो दाक्नीनी। 6 इन आंम लोव्रमी इन कली दोस ताइब सेल्ब। गो इन कली दोस मगेनुड। इन लोव्र इन परबम सांक्छी बाक्ब।

7 गे मुर आन दातेमी नेल्ल क्येडा डॉइती जरमेशो ननी? मार गे डांडा आन क्येडा डॉइती दुम्शो ननी? 8 गे परमप्रभु आ अर्ती गेतीकेमी बाक्शा नेंनी? तुइक्तीक इन के ला बाक्ब, दे मिन्नीनी? अय्युब ११:७; रोमी ११:३३ 9 गो आंइ मतुइश्शो गे मार तुइक्नीनी डा? गो आंइ मरुश्शो गे मार रुप्नीनी डा? अय्युब १३:२ 10 मिनु खाल्पा नु खूशोपुकी गो नु बाक्नीमी। इन आफ क्येडा यो खूशो मुर गोपुकी नु बाक्नीम। 11 परमप्रभुम इन कली लेम्शो आइक्च मिन्नीनी? इन कली आइक्च सेंदाम रिश्शो लोव्र पशोमी इन कली मगाम्मे? 12 मारदे इन थुमी इन कली दूली सेल्बा? मिनु गे मारदे गाइश्शा, मिक्च केक्शा कोव्रनी? 13 मारदे गे इन गाइक्तीक परमप्रभु कली कोइनीनी? मिनु गे ओदेंशो लोव्र पाइनीनी? 14 बेक्शा लाइब मुर नेल्ल दोस ताइब दुम्नीम। मीश मुर रे जरमेशो सु ठीक पाइब बाक्ने चाप्बा डा? अय्युब १४:४ 15 परमप्रभुम आंम आ मुर आन कली थमा मसुइक्ब। मिनु स्वर्गम बाक्ब यो मेको आ डॉइती दोस ताइब बाक्नीम। अय्युब ४:१८; अय्युब २५:५ 16 मेको आन क्येडा ग्रांरा दिशो नु खराप दुम्शो कली दोपा थमा सुइक्बा डा? मेकोमी मरिश्शो पतीक ब्वाक्कु तूशो खोदेंशो पा तूब कली दोपा थमा सुइक्बा डा?

17 मिनु गो इन कली शेंनन्नी। आं लोव्र नेनीन। गो आं तशो इन कली शेंनन्नी। 18 जोक्ब तुइक्बमी आन किकी पिपी रे आन तशो नेंशो लोव्र मखूइक्तमे बाक्त। 19 मेको आन कली रागी आंम के सेल्चा कली गेशो बाक्माक्त। मेको आन दातेम अर्को रागी डा मुर सुइ मबाक्मा बाक्त। 20 परमप्रभु यावे आ अरेशो मटीब ब्रॉइमा सम्म श्येत जाइनीम। मरिश्शो मुर आन ब्रॉइतीक बर्स नेल्ल मोदेंशो बाक्नीम। उत्पत्ती ४:१४ 21 मेकोपुकीम हिंचा डा रेयके नेंनीमी। मेको मारेइ मारेइ गाप्शा बाक्मानु, मेको आन कली खतम सेल्ब जाक्ब। 22 मेकोपुकीमी ‘छिडछिड रे लेत्ने मचाप्नीक’ दे हिंनीम। मेकोपुकी तरवारम क्योरचा पुंइसीनीम। 23 मेकोपुकी जचा थोव्रक माल्शा, हिरना हिरन बाक्नीमी। मिनु आन श्येत जतीक नाक्ती जाक्चा चिक्शो बाक्ब, दे तुइक्नीमी। 24 मेकोपुकी श्येत नु हिंतीके आ परबम खिंखि पाइनीम। मेकोपुकीमी परमप्रभु कली लडाइ तोइनीम। लडाइ पचा चिक्शो पिप खोदेंशो पा सासीशो बाक्नीम। 25 मारदे हना मेकोपुकीम परमप्रभु आ परबम आन गुइ क्युक्शो बाक्नीम। मिनु नेल्ल क्येडा ठेयब सक्ति पाइश्शो कली ‘गो इन क्येडा ठेयब नकी’ दे मेको कली मटीनीम। 26 मिनु ठेयब नु बोल्यो तेक्तीक शेशा परमप्रभु कली लडाइ तोचा कली बारशो बाक्नीम। 27 मारदे हना मेकोपुकी शुश जशा, दोम्शो बाक्नीम। 28 मेकोपुकी ब्रेश्शो सहर नु मुर मबाक्चा डा खिम बाक्नीम। मेको खिं ब्रेश्शा फुल्लु देल्शो बाक्नीम। 29 मेकोपुकी शॉप पाइश्शो मदुम्नीम। मेको आन शॉप मलीब। मेको रागीम मलीनीम। 30 मेकोपुकी छिडछिड रे ब्रॉइने मचाप्नीम। मीम मेको आन ठोसा सोव्रपाइक्ब। मेको आन फु कली फशेम योल्ब।

31 मेकोपुकीम मबाक्शो लोव्र कली थमा मसुदमेक्ल। मोपा आंम आन कली मरिश्शो मसेल्मेक्ल। मारदे हना मेकोपुकीम मेको आ पा डा मारेड मताइनीम। 32 मेको आन नाक्त जाक्वा क्येडा डोंइतीन मेको आन मारेड मारेड नुब। मिनु मेको आन राशी गिगी मदुम्नीम। 33 मेकोपुकी क्येखीन हेम्शो अडगुर बोट खोदेंशो दुम्नीम। मेको फू हेम्शो तेल रवा खोदेंशो दुम्नीम। 34 मारदे हना परमप्रभु आ अरेशो मटीब नु गाक्ब शोर गाक्शो बाक्ब। घूस जाइब आन ताम्बुपुकी मीम नेक्ब। 35 मेकोपुकीम आल कुरशो खोदेंशो पा मरिश्शो मिम्तीके कुरनीम। मिनु मरिश्शो पतीके जरमेनीम। मेको आन थुंम मरिश्शो पचा कली ठीक दुम्नीम” दे एलीफाजम अय्युब कली देंमाक्त।  
यसैया ५९:४

अय्युबमी लोव्र लेशो

16 मिनु अय्युबमी 2 “गे ओदेंशो लोव्र शुश नेंता। गे नेल्ल मोशा लेम्बु पाइब ला बाक्नीनी। 3 मार मेको फश लोव्र गेनायो मनुज्वा? मारम इन कली ओदेंशो लोव्र पपाइक्बा? 4 गे आं खोदेंशो बाक्नी हना, गो यो इन खोदेंशो पा लोव्र पने चबु वा। गो इन कली यो मोदेंशो लोव्र पड वा। गो इन कली शुक्शी पा आं पिया हिव्का कोइदन्नी वा। भजन संग्रह २२:८ 5 गो इन थुं बारपाइक्तीक लोव्र पड वा। मिनु आं शिशी पाइक्तीकेमी इन कली लेम्द वा।

6 गो ब्वाक्ती हना यो, आं खाइश्शो मसाब। गो सिक्सी पा बाक्ती हना यो, श्येत जस डा जस बाक्नुड। 7 थमा पा, परमप्रभुम आं कली थाम्पा दपाइक्ती। आं एर ओथ डा नेल्ल आन कली खतम सेल्लु। 8 मेकोम आं कली रोम्पाइक्ती। मिनु एको आं पर्वम सांकछी दुम्शो बाक्ब। गो रुश नु कुशुल ला लीशो बाक्नुड। एको यो आं पर्वम सांकछी दुम्शो बाक्ब। 9 परमप्रभुमी आ गाइश्शोमी आं कली एर ओथ फ्रशो बाक्ब। मिनु आं कली काइ मदाक्ब। मेकोम आं पर्वम आ खूइ शेप्शो बाक्ब। आं जोरी सत्रुमी आं कली सिम्ले पा कोव्रशो बाक्नीम। 10 मुरपुकीम आं कली शुक्शी पशो बाक्तेक्म। मेकोपुकीम आं चोव्रचो शुश राप्शो बाक्तेक्म। आं कली मरिश्शो पाइक्वा कली बुक्तेक्म। 11 परमप्रभुम आं कली थमा मसुदक्ब आन गुडमी गेशो बाक्ब। मिनु परमप्रभु यावेम आं कली आ अरेशो मटीब आन गुडम ब्वारशो बाक्ब। 12 गो रिश्शो पा बाक्शो नड। तन्न मेकोमी आं कली खोइक्तु। आं शुरम ग्याइश्शा चोकटा लाम्ता सेल्लती। मेकोम आं कली आ मिक्च आ क्रिक्बील सेल्लती। बिलाप ३:१२ 13 आ लिब्रा आप्पुपुकीम आं एर ओथ नेल्ल हिरिशो बाक्नीम। मेकोम आं कली शिशी मपथु, आं चिच खिल्लाक्वी। मेकोम आं खाइल पुक्शा खपीम तोक्तु। 14 मेकोम आं कली पाक्ना पाक्न, लडाइ पाइब खोदेंशो पा आं गे बारब। 15 गो आं रां सुम्वा कली भाडग्रा फेक्साक्वी। गो आं पिया फुरकुम पुम्ता। लेवी ३७:३४ 16 डाक्शा डाक्शा आं कुल लल जिशो बाक्ब। आं मिक्च आ एर ओथ नेल्ल क्येर दुम्शो बाक्ब। 17 मो हना यो आं गुडमी मरिश्शो मपशो बाक्ती। आं पुंइशो लोव्र रिश्शो बाक्ब।

18 ए खप, आं हुश मसुमो। आं पुंइशो लोव्र गेनायो मनाइसेक्ल। उत्पत्ती ४:१०; इजीकीएल २४:७-८ 19 मो हना यो आं सांकछी स्वर्गम बाक्ब। आं पर्वम लोव्र पाइब इर बाक्शो बाक्ब। अय्युब १७:३ 20 आं वारचम आं कली शुक्शी पाइनीम। गो डाक्शा परमप्रभु गे कोव्रनुड। १सामुएल २:२५ 21 मेकोमी परमप्रभु नु आंस दातेमी निसाफ पवल। मुर नु आ वारच आन दातेमी दोपा निसाफ पाइबा, मोपा पवल। 22 इक्का बर्स नोले गो गेनायो मलेत्वा डा पा लाइनुड” देंमाक्त। अय्युब १०:२१

परमप्रभु कली “वारच पने” दे पुंइशो

17 मिनु अय्युबमी “आं थुं जिक्शो बाक्ब। आं नाक्त नुष्ठा लशो बाक्नीम। आं कली तुरस ठीक दुम्शो बाक्ब। 2 थमा पा, आं एर ओथ शुक्शी पाइब बाक्नीम। मेको आन शुक्शी पशो मारेड ममिम्नुड। अय्युब १६:१९

3 परमप्रभु, गे आंमा आं जाकटी दुमीन। अरु सु आं पर्वम जमानी बाक्ने चाप्पा डा? 4 गे मेको आन थुं रे रुक्तीक गुंइताक्नी। मोपतीके गे मेको आन

कली ठेयब दुम्चा मगेनी। 5 सुमी आ शोंप वारच आन कली कोंइशा योक्वा कली ब्रेब्बा, मेको आ आल जचा मताइनीम।

6 मेकोमी आं कली मुर नेल्ल आन दातेम कथा पतीक का सेल्शो बाक्ब। मुरपुकीमी आं डोंइती तोक्सीनीम। अय्युब ३०:९ 7 आं मिक्च श्येत जतीके ब्रा ब्रा दुम्शो बाक्ब। आं गुइ खोइल सोव्रशो बाक्नीम। गो वांकु खोदेंशो बाक्नुड। 8 रिश्शो थुं पाइश्शो मुर मेको तशा, छक लाक्नीम। दोस मताइबपुकी परमप्रभु यावे आ अरेशो मटीब आन कली तशा गाइक्नीम। 9 मिनु ठीक पाइब मुर आंम लां रिश्शो पा गाक्नीम। मोदेंशो मुर बोल्यो क्येडा यो बोल्यो दुम्ना दुम्न लाइनीम। 10 मुल गे नेल्ल लेतीन। गो इन दातेमी निप्स पाइश्शो मुर का यो मतडमी। 11 आं नाक्त नुप्तेक्म। आं मिश्शो नेल्ल मोशा दुम्त। मिनु आं थुं डा मिश्शो जाम्था लत। 12 मेको मुरपुकीम नाक्दो कली नाक्त देंनीम। मिनु सुनी दुम्मेनु ‘नां रिक्त्’ देंनीम। 13 गो आं आस पशो खिं बेक्शो मुर आन बाक्तीक बाक्त् हना, आं ब्राख्ये छिडछिडम सेल्ला हना यो, 14 गो तुरस कली ‘गे आं आफ बाक्नीनी’ मिनु लुस्पु कली ‘आं ममा आं समी बाक्नीमी’ देंती हना, 15 आं आस पशो ते लाक्गा? मिनु सुम आं पर्वम आस पाइबा? 16 मार एको बेक्शो मुर आन बाक्तीक आ नेक्वा लाइबा? मार, गो नेल्ल उइ फुरकुम काथा लाइनया?” दे अय्युबम देंमाक्त।

बिल्दादम लोव्र पशो

18 मिनु शुआह डा बिल्दादमी 2 “गे एको लोव्र गेना थुम्नीनी? डोंइती मिम्तीन। मिनु गो लोव्र पने चाण्य। 3 मारदे आंइ कली बी ब्यफ खोदेंशो मिम्तीनी? गे मारदे आंइ कली निप्स मपाइश्शो सुइक्नीनी? 4 गे इन गाइश्शोम आंम कली खतम सेल्सीनीनी। मार, इन पर्वम गो रागी प्रॉइनीकी? सेरथे फुल्लु आन बाक्तीक रे याक्वा?

5 थमा पा, परमप्रभु यावे आ अरेशो मटीब आन बत्ती काप्ब। मिनु मेको आन मी डा राप रे हाम्सो मगूब। हितोपदेस १३:९ 6 मेको आन ताम्बुम छेडछेड, छिडछिड दुम्ब। मिनु मेको आन बत्ती काप्शो बाक्ब। अय्युब २१:१७ 7 मेको आन लांमी आन खोइली ग्येत्थ लुक्च पाइब। मिनु मेको आन थुंम मिम्शा पशोमी मेको आन कली खोल्ब। 8 आंम खोइलीम मेको आन कली ब्वारदम लपाइक्ब। मेको ब्वारदम गिल्लीशा बिकतीकेमी दोक्नीम। 9 मेको आन खोइली ब्रिम्सोम रेत्वा पुंइसीनीम। क्येयलम रेत्वा पुंइसीनीम। 10 मेको आन पर्वम खपीम ब्वारद आ डोरी खूइश्शो बाक्ब। मोपा आन लांमी ब्वारद दाइश्शो बाक्ब। 11 शुश हिंतीकेम मेको आन कली खिंखि पपाइक्ब। ते बाक्तेक्म हना यो, मेकेर हिंतीके यो बाक्ब। लेवी २६:३६ 12 मेकोपुकी शोव्रलु बेक्तीके सक्ति मपाइश्शो बाक्नीम। मिनु श्येत दुम्शा गोल्नीम। 13 रोइ पतीकेमी मेको आन कुशुल नेल्ल नेक्शो बाक्ब। बेक्पाइक्ब रोइमी मेको आन गुइ खोइली मदुक्ब सेल्ब। गन्ती १२:१०-१२ 14 मेको आन ब्रॉइशा बाक्तीक रां आन पर्वम ‘रिश्शो बाक्ब’ दे थमा सुइश्शा, मुल रां रे गुंइचा पुंइसीनीम। मिनु हिंपाइक्ब पिप आ बाक्तीके लाइक्वा पुंइसीनीम। 15 मेको आन ताम्बुम मारेड मलीब। मेको आन बाक्तीकेम गन्धक ब्रुइश्शो बाक्ब। 16 मेको आन शाक्श खप आगाम सोव्रनीम। मिनु आन राशी सोल सुल बेक्नीम। 17 रागी डा मुरुम मेको आन कली प्रेंनीम। मेको आन नें ममिम्नीम। 18 मेको छेडछेड रे छिडछिडम खेरचा पुंइसीनीम। मिनु रागी रे गुंइचा पुंइसीनीम। 19 मेको आन आल मबाक्नीम। आन चच युइ यो मबाक्नीम। मेको आन डोंइती डा बाक्तीकेमी सुइ ब्रॉइशा मबाक्नीम। 20 पच्छिम डा मुरपुकी मेको आन श्येत जशो नेंशा हिंनीम। पूर्व डा मुरपुकी शुश हिंशा खिंखि पाइनीम। भजन संग्रह ३७:१३ 21 थमा पा, परमप्रभु आ अरेशो मटीब मुर आन बाक्तीके मोदेंशो दुम्ब। परमप्रभु कली मतुइक्ब मोदेंशोम दुम्नीम” दे बिल्दादम अय्युब कली लोव्र लेत्ता बाक्त्।

अय्युबम लोव्र लेशो

19 मिनु अय्युबमी 2 “गे आं कली गेना सम्म श्येत गेनीनी? मिनु इन लोव्रमी आं कली मरिश्शो सेल्नीनी? 3 आं कली १० खेयप सम्म दोस गेतीनी। आं कली काइ मरिश्शो लोव्र पचा मुने मपाइनीनी? 4 गो थमा

पा मरिश्शो पशो बाक्ती हना यो, मेको मरिश्शो पशो आं के बाक्ब। 5 थमा पा, गे आं क्येडा ठेयब दुम्चा मिम्नीनी। मिनु आं श्येत तशा, आं कली मरिश्शो सुइक्नीनी। 6 परमप्रभुमी आं कली मोशा श्येत गेती। आं एर ओंथ नेल्ल ब्वारद दाइश्शो बाक्ब। 7 गो 'हुश खाक्श पोक्तीमी' दे ग्रीती हना यो, आं कली लोव्र मलेष्व। 'वारच पाइय्नीनी' दे पुंडता हना यो, निसाफ मताइनुड। *येरमीया २०:८; हबकुक १:२; अय्युब ३०:२०* 8 मेकोमी आं लां तेक्शो बाक्ब। मिनु गूशा लने मचापुड। मिनु मेकोमी आं लां छिडछिडम सुम्तु। *अय्युब ३:२३; बिलाप ३:७,९* 9 मेकोमी आं मान ततीक रोइक्ताक्यी। आं पिया रे आं सिरपेच पुइक्तु। 10 मेकोम आं कली लुक्च लाइब सेल्ती। गो खतम दुम्ती। रवा तुल्शो खोदेंशो पा आं आस नेल्ल नुप्पाइक्तु। 11 मेको आं पर्वम गाइक्ताक्व। मिनु आं कली आ जोरी सत्रु खोदेंशो मिम्ताक्यी। *अय्युब १३:२४; अय्युब ३३:१०* 12 मेको आ लडाइ पाइबपुकी बुक्शा आं कली पुम्नीम। मेकोपुकीम आं ताम्बु आ एर ओंथ नेल्ल आन बाक्तीक सेल्नीम।

13 मेकोम आं खिं डा मुर आन कली आं क्येडा डोन वोइश्शो बाक्ब। आं वारच आं कली मतुइक्ब दुम्शो बाक्नीम। *भजन संग्रह ३१:१२* 14 आं नेक्वा डा मुर नु गो नु गारब वारच आं क्येडा डोन दुम्तेक्म। *भजन संग्रह ३८:१२* 15 आं खिम पौना दुम्शा बाक्बपुकीम प्रेंताक्यीमी। आं वाइलीमपुकीम आं कली अर्को रागी डा मुर खोदेंशो पा मतुइश्शो खोदेंशो पाइनीम। 16 गो आं वाइल कली ब्रेत्नुड। तन्न मेकोम लोव्र मलेष्व। गो मेको कली शुश लेम्शा पुंडचा माल्नुड। 17 आं सास आं मीश कली रिना नु ग्रांया दिशो दुम्शो बाक्ब। गो आं खिं डा मुर आन कली ग्रांया दिशो दुम्शो बाक्ती। 18 आइक्व आलपुकीमी यो आं कली तशा ग्रांया दिन्तीम। मिनु आं कली तामेनु, मेकोपुकीम शुक्शी पाइनीम। 19 गो नु गारब वारच नेल्लेम आं कली ग्रांया दिन्तीम। आं दाक्शो मुरपुकी आं पर्वम दूली पा बोक्शो बाक्नीम। 20 आं के रुश नु कुशुल ला लीशो बाक्ब। गो बेक्वा चिक्शो बाक्ती। 21 आं वारचपुकी, आं कली शिशी पाइय्नीनी, शिशी पाइय्नीनी। मारदे हना परमप्रभुम आं कली दिप्शा, श्येत गेशो बाक्ब। 22 गेपुकीमी यो परमप्रभुमी आं कली खेदा पशो खोदेंशो पा मारदे खेदा पाइनीनी? मार, आं कली मिश डा श्येत गेशा मरूनी?

23 आं पशो लोव्र ब्रेक्शो हना, मेको किताबम ब्रेक्शो हना, रिश्शो दुम वा। 24 मेको फलाम के याम मुशा नु सिसाम ब्रेक्शो हना, फुल्लुम गेना हना यो लीचा डा पा मुशा ब्रेक्शो हना, रिश्शो दुम वा। 25 तन्न आं कली श्येत रे प्रोइब का बाक्ब। मेको नोले डा नाक्त रागीम जाक्शा आं सांकछी दुम्ब। मेको गो तुइक्नुड। *यसैया ४१:१४; होसे १३:१४; अय्युब २६:६* 26 मिनु आं कुशुल राक्शा खतम दुम नोले, गो आं रांमी परमप्रभु कली ताइनुड। *भजन संग्रह १७:१५; भजन संग्रह ७३:२४* 27 गो मेको कली आं मिक्वीमीन आं नेक्वा ताइनुड। गो मेको तचा कली शुश रिम्ना रिम्न बाक्नुड। 28 गेपुकीम आं कली 'एको कली दोपा खेदा पचा? मारदे हना श्येत आ शाक्श एको आ आगाम बाक्ब' देंतीनी। 29 गेपुकी तरवार क्येडा हिनीन। मारदे हना गाइश्शो आ सजाइ तरवार रे पा जाक्ब। मिनु निसाफ का बाक्ब, दे तुइक्तीन" दे अय्युबम लोव्र लेत्तीमी बाक्त।

सोफारमी लोव्र पशो

अय्युब १५:-; १८:-

20 मिनु नामा डा सोफारमी 2 "नोफा दाइक्तीन। आं मिश्शोम आं कली लोव्र लेप्पाइक्ब सेल्ती। मारदे हना गो आं थुं काइ मनुशो बाक्नुड। 3 गो आं कली शुक्शी पशो लोव्र नेंशो बाक्नुड। आं थुं डा रुप्तीकेम आं कली लोव्र लेष्व सेल्शो बाक्ब। 4 गे एको माइत लोव्र तुइक्नीनी? मुर रागीम बाक्मा रे एको लोव्र बाक्शो बाक्ब। 5 एको मार लोव्र बाक्ब देंशा हना, परमप्रभु यावे आ अरेशो मटीब आन ठेयब लेश्शो इक्का नाक्त ला लीब। मेको आन ग्येरसीशो याम का ला लीब। 6 मेको आन ठेयब लेत्तीक सरीड खोइ लाइक्त हना यो नु मेको आन पियाम गोस्स कली थिप्तु हना यो, *भजन संग्रह ३७:३५-३६* 7 मेको खी खोदेंशो पा जाम्नीम। मिनु मेको आन कली ताइब नेल्लेम 'मेको ते लाक्गामे, खोइ?' देंनीम। *मीका ७:१०* 8 मेकोपुकी डोमु पशो खोदेंशो पा जाम्शा लाइनीम। मेको आन कली मथिंसीब। मेकोपुकी नाक्दो तशो ततीक खोदेंशो पा जाम्शा लाइनीम।

9 मेको आन कली तुइक्बपुकीम लेंशा गेनायो मताइनीम। मिनु आन बाक्तीके रे यो जाम्शा लाइनीम। *भजन संग्रह ३७:१०* 10 मेको आन आलपुकीम पुडग आन शिशी माल्नीम। मिनु मेको आन तौपुकीमी पुडग आन शॉप लाइश्शा गेनीम। 11 मेकोपुकी ठिटा दुम्शा, सक्ति पाइश्शो बाक्तेक्म हना यो, बेक्शा, तुरस डा फुरकुम वोइक्वा पुंडसीनीम।

12 परमप्रभु यावे आ अरेशो मटीब आन मरिश्शो पशो मेको आन कली ब्रोव्रशो बाक्त हना, मेको आन लें आगाम खूइश्शा वोइक्नीम। 13 मेको आंम कली वोइश्शा, मप्रोइब। मेको आन शोव्रम वोइक्तेक्म हना यो, 14 मेको आन जचा थोव्रक आन कोव्रजम फांडसीब। मिनु मेकेर बुस्स आन बीस दुम्ब। 15 मेकोपुकीम मेको आन नेक्शो शॉप लेंशा मेचा माल्नीम। परमप्रभुमी मेको आन कली मेपाइक्ब। 16 मेकोपुकीम बुस्स आ बीस युनीम। मिनु बीस पाइश्शो बुस्सुमी मेको आन कली कोक्शा साइक्ब। 17 मेको आन के तर नु खुदो शुश बाक्त हना यो, ग्येरशा जचा तूचा मताइनीम। 18 मेको आन श्येत पा चेम्शो मारेइ मारेइ मजथु लेश्शा गेचा माल्नीम। मिनु आन ग्याप्शा लेयशा चेम्शो क्येट ग्येरशा जचा मताइनीम। *ब्यक्स्था २८:३०-३३* 19 मारदे हना मेकोपुकीमी पुडग आन कली दिप्शा श्येत गेम्तेक्म। मेकोपुकीम आन मसेल्शो खिं आंम के सेल्शो बाक्नीम।

20 मेको आन शोव्रलु गेनायो मउइक्ब। मिनु मेको आन शॉप मलीब। 21 मेकोपुकीम जामे नोले मारेइ महेक्ब। मोपा आन शॉप नेल्ल नुप्शा लाइब। 22 मेको आन मिश्शो नेल्ल गाप्त हना यो, मेकोपुकी श्येत जाइनीम। मारेइ मारेइ श्येत मेको आन तार कोम्सीब। 23 मेकोपुकी रूने थुम्मे नोले, परमप्रभुम आ गाइश्शो मेको आन तार मोइक्ब। दोशो जामे मोशो परमप्रभुम सजाइ गेचा पुंडसीनीम। 24 मेकोपुकी फलाम के या रे प्रोक्तेक्म हना यो, कांसा के डर पाइश्शो ब्राम मेको आन कली खिष्व। 25 मेको ब्रा मेको आन कली खिश्शा गूनीम। मेको ब्रा आन टल्केशो डरम मेको आन खाइल पुक्शा गुंडब। मोपा मेको शुश हिंनीम। *ब्यक्स्था ३२:४१* 26 मेको आन शॉप कली थम छिडछिडमी रिम्शा बाक्शो बाक्ब। थाम्पा ब्रशो मीम मेको आन कली दाक्ब। मिनु आन ताम्बुम लीशो मारेइ मारेइ नेक्ब। *ब्यक्स्था ३२:२२* 27 स्वर्गम मेको आन मरिश्शो पशो नेल्ल कौंडब। रागी मेको आन कली दोस गेचा कली ठीक दुम्शो बाक्ब। 28 मेको आन खिं डा शॉप नेल्ल योल्नीम। मेको गाइक्ता नाक्त मेको नेल्ल योल्नीम। 29 मेको परमप्रभु यावे आ अरेशो मटीब आन भाग बाक्ब। परमप्रभुमी गेशो इनाम मेकोन बाक्ब" दे लोव्र लेत्ता बाक्त।

मटीब आन पर्वम शेंशो

21 मिनु अय्युबमी 2 "इन नोफा दाइश्शा, आं लोव्र नेनीन। मेको आं कली इन गेशो लेम्तीके बाक्ब। 3 गो लोव्र पडानु, आं कली फाल्शा नेनीन। गो लोव्र थुमु नोले आं कली शुक्शी पने चाप्नीनी। 4 मार, आं थुं मनुथु पशो लोव्र बेक्शा लाइब मुर आन कली ममाइ। मारदे गो फाल्शा बाक्वा माल्नुडा? 5 आं कली कोव्रयीनी। मिनु सिक्सी पने। मारदे हना गो ग्रांया दिचा डा तांडसीनुड। इन शोव्र सुम्सीन। *अय्युब ४०:४* 6 गो आं कली 'मार दुम्बा' दे मिम्नुड। मिनु ग्रीचोक पा हिंनुड। आं रां नेल्ल थुर थुर पा खिखि पाइब।

7 परमप्रभु यावे आ अरेशो मटीब मुर मारदे ब्रौइना ब्रौइन बाक्नीमी? मारदे मेकोपुकी खूशो दुम्मानु यो बोल्यो नु सक्ति पाइश्शो दुम्नीमी? *येरमीया १२:१* 8 मेको आन तमी तौ मेकोपुकी नु बाक्नीमी। मिनु मेकोपुकीम आन चच युइ नेल्ल ताइनीम। 9 मेको आन खिम महिंथु बाक्नीम। परमप्रभुम मेको आन कली सजाइ मगेब। 10 मेको आन बी ब्यफ सोशा बोशा दुम्नीम। बी नेल्ल गिक्नीमी, गेनायो मशाम्नीम। 11 मेको आन आल आन कली क्यारश भेडा आन पाठा खोदेंशो पा ग्यारथ सोइक्नीम। मिनु मेको आन आइक्च आल सिल पना पन प्रेक्शो बाक्नीम। 12 मेकोपुकी खैजडी नु बीना ताप्शा कुम्सो पाइनीम। मिनु बांसुरी ताप्शा ग्येरसीनीम। 13 मेकोपुकीम आन नाक्त ग्येरशा सोइक्नीम। मिनु मेको आन थुं नाइश्शा बेक्शो मुर आन बाक्तीक लाइनीम। 14 मेकोपुकीम परमप्रभु कली आंइ रे पा डोन लन। गो इन लांम गाक्वा मदाक्नीकी, देंनीम। *अय्युब २२:१७* 15 'नेल्ल क्येडा ठेयब सक्ति पाइश्शो सु

बाकम्? गो मारदे मेको आ गेय पचा माल्नीकी? गो मेको कली पुंडशा मार ताइनीकी डा?' देंनीम। प्रस्थान ५:२; २ राजा १८:३५; भजन संग्रह १२:५; दानीएल ३:१५ 16 परमप्रभु यावे आ अरेशो मटीब आन सोशा बोशा लशो, मेको आंम आन पतीके ममाइ। मिनु आन मिम्शो तुइश्शा, गो ग्रंग्रा दीनुड। अय्युब २२:१८

17 परमप्रभु यावे आ अरेशो मटीब आन बत्ती गिश खेयप काम्सीबा? मेको आन पियाम गिश खेयप हिंचा डा श्येत जुक्वा? शुश खेयप मजुक्वा। परमप्रभु आ गाइश्शोमी मेको आन कली गिश खेयप श्येत गेबा? शुश खेयप मगेब। 18 गिश खेयप फशेम बेरशो पराल खोदेंशो दुम्नीमी? मेकोपुकी गिश खेयप फश गिवारम बेरपाइश्शो भूस खोदेंशो दुम्नीमी? शुश खेयप मदुम्नीम। भजन संग्रह १:४ 19 गेपुकीम 'परमप्रभुमी मेको आन मरिम्शो पतीके आन तमी तौ आन कली खेक्वा वोइक्व' देंनीनी। मोदेंशो मदुम्न। तन्न मेकोमी मेको नेल्ल आन कली सजाइ गेवल। मिनु मेकोपुकीम तुइक्वतमेक्ल। अय्युब २०:१०; प्रस्थान २०:५ 20 मेकोपुकीम आंमा आन कली खतम दुम्तीक तामेक्ल। मेकोपुकीम नेल्ल क्येडा ठेयब सक्ति पाइश्शो आ गाइश्शो तुइक्वतमेक्ल। 21 मुर आन ब्रौइतीक नुम नोले मेको आन खिं कोवने चाप्नीमी डा? मेको आन ब्रौइतीक नुख। 22 मुरुम परमप्रभु कली जोक्तीक तुइक्तीक लोव्र शेंने चाप्नीमी डा? मेकोमी इर बाक्व आन कली यो निसाफ पाइब। उपदेसक ५:७ 23 का निक्शी मुर आन माल्शो नेल्ल गाप्शा बेक्नीम। मेको काइ महिंथु रिम्शा बाक्नीम। 24 मेको आन रां दोम्शो बाक्नीमी। मेको आन रुशेम मासी बाक्ना बाक्न बेक्नीम। 25 का निक्शी चहिं श्येतम ब्रीशा, आन थुं कशो दुम्शा बेक्नीम। मेकोपुकीम गेनायो ग्येरचा मतामे। 26 मिनु मेको नेल्ल काथा थिम्चा पुंडसीनीम। मिनु लुस्पुमी मेको आन कली सुम्नीम। अय्युब ३:१८-१९

27 गेपुकी मार मिम्ना मिम्न बाक्नी, गो मेको रिम्शो पा तुइक्नुड। मेको आं पर्वम दूली मिम्तीक लोव्र बाक्व, दे गो तुइक्नुड। 28 गेपुकीम 'मेको सासन पाइब आ खिं ते बाक्म? मेको परमप्रभु यावे आ अरेशो मटीब मुर आन ताम्बु ते बाक्नीमी?' दे हिल्लो पाइनीनी। 29 मार, गेपुकीम लां गाक्व आन कली गेनायो हिल्लो मपनी? गे मेको आन देंशो मतुइक्नीनी? 30 शुश हिंचा डा श्येत दुम्नेनु, परमप्रभु यावे आ अरेशो मटीबपुकी ब्रौइचा ताइनीम। मिनु परमप्रभु आ गाइक्वी नाक्व मेकोपुकी प्रौइचा पुंडसीनीम। 31 सुइम मेको आन कली दोस मगेनीम। सुइमी मेको आन मरिम्शो पशो आ पा डा क्येक्व मलेलीम। 32 मिनु मेको बेक्शा, कुरशा तुरसुम लाइक्वा पुंडसीनीम। मिनु मेको आन तुरसुम खाल पाइब वोइक्नीम। 33 तुरस डा खप यो मेको आन कली रिम्शो बाक्व। मिनु शुश मुर मेको आन नोले खोइक्नीम। मिनु हिक्ने मचाप्पा डा पा शुश मुर मेको आन क्येडा डौइती लाम्तेक्म। 34 गेपुकी इन देंशो फश लोव्रम दोपा आं कली लेम्नीनी डा?" दे अय्युबमी सोफार कली लोव्र लेत्ता बाक्त।

एलीफाजमी अय्युब कली दोस गेशो

22 मिनु तेमान डा एलीफाजमी 2 "बेक्शा लाइब मुरुम परमप्रभु कली मार पने चाप्पा डा? शुश जोक्व तुइक्व मुरुम यो मेको कली मार गेय पने चाप्पा डा? 3 गे ठीक पाइब बाक्तीनी हना, नेल्ल क्येडा ठेयब सक्ति पाइश्शो कली मार रिम्शो दुम्बा डा? इन पशो नेल्ल दोस मततीक बाक्त हना, मेको कली मार रिम्शो दुम्बा डा? अय्युब ३५:६-८ 4 इन परमप्रभु कली मान पा हिंतीके आ पर्वम इन कली महुइक्व। मेको आ पर्वम इन कली निसाफ मपाइब। 5 इन परमप्रभु यावे आ अरेशो मटितीके ठेयब बाक्व। इन मरिम्शो पतीके गेनायो मनुख। 6 गे मोशान इन लोक्व आ वा जाकटी लाइक्तीनी। आन वा रोइश्शा शिश्रा सेल्तीनी। प्रस्थान २२:२५-२६; अय्युब २४:९-१० 7 गे तूत दाक्शा, लकचा सोव्रशो मुर आन कली ब्वाक्कु मगेनी। मिनु शोव्रलु बेक्शो मुर आन कली जचा थोव्रक मगेनी। अय्युब ३१:१७; मत्ती २५:४२-४३ 8 सक्ति पाइश्शो मुर आन के शुश रू बाक्नीम। मेको आन दाक्शो मुर आन कली मेकर बाक्वा गेनीम। 9 गे आन वौइश बेक्शो मीश मुर आन कली श्येत्थ गुइ सोइक्ताक्नी। मिनु रोम रोइक्व आन तचा माल्शो मगेनी। अय्युब २९:१२-१३ 10 मोपतीके इन गाक्तीक लां आ

एर ऑथ नेल्ल ब्वारद दाइश्शो बाक्नीम। मिनु इन कली इन मतुइक्वा डा पा शुश हिंतीके जाक्व। 11 मिनु तने मचाप्पा डा छिडछिडम इन कली सुम्ब। मिनु ब्वाक्कु बारशा यिशा इन कली सुम्ब।

12 परमप्रभु इर स्वर्गम बाक्व। सोरुल आन कली कोव्रडीन। गिश इर बाक्नीमी। 13 मोपतीके गे 'परमप्रभुमी मार तुइक्वा डा? मेकोम गोस्स आ छिडछिड रे दोपा निसाफ पाइबा डा? 14 गोस्स आ छिडछिड मेको कली सुम्तीके, मेकोम आंइ कली तने मचाप्ब। मिनु मेको सरीडम एर ऑथ गाक्वा बाक्व' देंतीनी। 15 गे परमप्रभु यावे आ अरेशो मटीब आन माइत लां मप्रौइब बाक्नीनी? 16 मेको आन नाक्व मजाक्वु साइक्वा पुंडसाक्म। मेको आन जग ब्वाक्कुम योल्ताक्व। अय्युब १५:३२-३३; उत्पत्ती ७:२१ 17 मेको मुरपुकीम परमप्रभु कली 'आंइ रे पा डोन लन। नेल्ल क्येडा सक्ति पाइश्शोमी आंइ कली मार पने चाप्पा डा?' देंतेक्म। अय्युब २१:१४ 18 मो हना यो मेकोमी, मेको आन खिं रिम्शो थोव्रकमी प्रिताक्व। तन्न परमप्रभु यावे आ अरेशो मटीब आन मिम्शो काइ मदाक्नुड। 19 ठीक पाइबपुकी मेको आन कली तशा ग्येरसीनीम। दोस मताइबपुकीम मेको आन कली शुक्शी पा रिन्नीम। भजन संग्रह १०७:४२ 20 मेकोपुकीमी 'थमा पा, इं जोरी सत्रु साइक्वा पुंडसाक्म। मिनु मेको आन शॉप मीम नेक्तु' देंतीम।

21 परमप्रभु नु गारीन। मिनु थुं नाइक्तीन। मो पाइतीनी हना इन रिम्शो दुम्तीके लेंशा ताइनीनी। 22 मेको आ शेंशो पने। मिनु इन थुंम वोतीन। 23 गे नेल्ल क्येडा ठेयब सक्ति पाइश्शो गे लेतीन। मिनु डौइती डा खोदेंशो दुम्नीनी। गे इन ठीक मपतीके इन क्येडा डोन वोतीन। अय्युब ८:५-७; अय्युब ११:१४-१५ 24 गे सुन फुरक खोदेंशो मिम्ताक्नी हना, ओफीर डा सुन कली खोला डा फुल्लु खोदेंशो मिम्ताक्नी हना, 25 नेल्ल क्येडा ठेयब सक्ति पाइश्शो इन शॉप दुम्ब। मेको इन सुन चांदी दुम्त हना, 26 मेना नेल्ल क्येडा ठेयब सक्ति पाइश्शो कली मिम्शा, ग्येरशा बाक्नीनी। मिनु गे इन पिया पोक्शा परमप्रभु गे कोव्रनीनी। 27 गे मेको कली पुंडनीनु, मेकोमी इन पुंडशो नेंब। मिनु गे इन जशो कसम खाप्नीनी। भजन संग्रह ५०:१४-१५ 28 गे मार पाइनुड, दे मिम्नीनी, मेको दुम्ब। मिनु इन लांम छेडछेड दुम्ब। 29 मारदे हना मेकोमी ठेयब लेशो लोव्र पाइब आन कली आइक्व सेल्ब। ब्रेम्शो मुर आन कली चहिं प्रौइब। १ पत्रुस ५:५ 30 मेकोमी दोस ताइब आन कली यो प्रौइब। गे दोस मताइब बाक्तीके मेको आन कली प्रौइब" दे एलीफाजमी अय्युब कली लोव्र लेत्ता बाक्त। भजन संग्रह १८:२१, २५; २कोरिन्थी ५:२

अय्युबम लोव्र पशो

23 मिनु अय्युबमी 2 "मुलाक्ती आं देंशो लोव्र थुं मनुचा डा बाक्व। गो हुकयी पना पन बाक्ती हना यो, परमप्रभुमी आं कली श्येत गेना गेन बाक्व। 3 गे मेको कली ते बाक्वा, मेको तुइक्तु हना, गो मेको आ बाक्तीके लाड वा। 4 गो आं श्येत मेको आ डौइती नेल्ल शोव्रडु वा। गो मेको कली आं देंचा माल्शो लोव्र नेल्ल देंड वा। 5 मेकोमी आं कली मार लोव्र लेप्बाक्मे गो मेको तुइक्तु वा। मिनु गो मेकोम आं कली मार देंबाक्मे मेको रुबु वा। 6 मेको आ ठेयब सक्तिमी गो नु लोव्र पाइबा डा? ममाइ, परमप्रभुमी आं कली गेनायो दोस मगेब। 7 रिम्शो थुं पाइश्शो मुरपुकीमी मेको नु लोव्र पने चाप्नीम। मिनु गो आं निसाफ पाइब रे गेना हना यो प्रौइचा पुंडसीड वा। 8 गो डौइती गे लती हना, मेको मेक मबाक्व। गो नोले गे लेत्ती हना यो, मेको मेक मबाक्व। 9 मेकोमी पेरा गे खूइक्ताक्व हना, गो मेको कली मताइनुड। गो ग्युरा गे हिरसीडानु यो मेको कली तने मचाप्नुड। अय्युब ४२:५ 10 तन्न मेकोमी आं गाक्शो लां तुइक्व। मेकोमी आं कली नाक्शा कोव्रयीनु, गो सुन खोदेंशो दुम्नुड। भजन संग्रह १७:३; भजन संग्रह १३९:२३-२४ 11 गो मेको आ नोले खोइश्शो बाक्नुड। गो मेको आ लांम ला गाक्शो बाक्ती। गो ग्युरा पेरा मपड। 12 गो मेको आ शेंशो पाता। मेको आ लोव्र नाक्व किंत किंत डा आं जचा थोव्रक क्येडा यो शुश मिम्ताक्ड। 13 तन्न मेको आ कान बाक्व। मिनु सुमी मेको कली तेक्ने चाप्पा डा? मेकोमी आ मिम्शो खोदेंशो पाइब। 14 मेकोमी आं कली मार पचा मिम्बा, मेको नेल्ल पाइब। मिनु मोदेंशो शुश मिम्ब। 15 मोपतीके गो मेको नु गुम्चा शुश हिंनुड। गो मेको कली मिम्शा हिंशा खिंखि पाइनुड। 16 परमप्रभुम आं

थुं थपाइशो बाक्ब। नेल्ल क्येडा ठेयब सक्ति पाइशोमी आं कली हिंपाइक्ब। <sup>17</sup> छिडछिडमी आं कली सिक्सी पपाइक्ने मचाप्ब। मेको छिडछिडमी आं कली सुम्ने मचाप्ब” दे अय्युबमी देंमाक्त।

परमप्रभु कली मटीब

**24** मिनू अय्युबमी “नेल्ल क्येडा ठेयब सक्ति पाइशोमी निसाफ पतीके नाक्त मतुइक्पदा? आ नेक्था बाक्बपुकीम यो मेको आन नाक्त मारदे मतुइक्पदा? <sup>उपदेसक ३:११; उपदेसक ८:६</sup> <sup>2</sup> परमप्रभु यावे आ अरेशो मटीब मुरपुकीम सांद डा फुल्लु याक्नीम। मेकोपुकीम क्यारश भेडा खुइ पशा योवनीम। <sup>ब्यवस्था २७:१७</sup> <sup>3</sup> मेकोपुकीम रोम रोइक्च आन गधा खुल्शा लाइक्नीम। मिनू वोंइश बेक्शो मीश मुर आन ब्यफ जाकटी वोंइसीनीम। <sup>4</sup> मेकोपुकीम पुडग आन कली लां मेर चुशा थोक्शा गाक्नीम। रागी डा पुडग आन कली खुइक्पाइक्नीम। <sup>5</sup> ब्वाकी डा गधा गोरशो रागीम जचा थोक्क माल्शा गाक्शो खोदेंशो पा, पुडगपुकी जचा थोक्क माल्शा गाक्नीम। मिनू गोरशो रागीम मेको आन तमी तौ आन कली जचा थोक्क माल्नीम। <sup>6</sup> पुडगपुकीम मुर आन रूम सिला माल्नीम। परमप्रभु यावे आ अरेशो मटीब मुर आन अडगुर रूम सिला पाइनीम। <sup>7</sup> वा मबाक्तीके मेकोपुकी शिश्रा इप्नीम। मेको आन के ग्यूमी फेक्तीक मबाक्ब। <sup>8</sup> मेको पहाडम बाक्शा रेउम जिल्लीम। फाम्सीतीके मबाक्तीके, फुल्लु आ नेक्था फाम्सीनीम।

<sup>9</sup> परमप्रभु यावे आ अरेशो मटीबपुकीम रोम रोइक्च आन कली आन ममा आ थुकु रे रोइश्शा, लाइनीम। मिनू मारेइ मथीब मुर आन आल आन कली आन जेर आ पा डा लाइनीम। <sup>10</sup> मेकोपुकी वा मबाक्तीके शिश्रा गाक्नीम। शोव्रलु बेक्शा यो, क्योव्रज चेरब आ मुठा कुरनीम। <sup>यसैया ५८:७</sup>

<sup>11</sup> मेकोपुकीम गारो आन दातेमी तेल खाक्नीम। अडगुर खाक्तेक्म हना यो तूतू, दाक्शो बाक्नीम। <sup>याकूब ५:४</sup> <sup>12</sup> सहर रे बेक्चा चिक्शो मुर आन हुकयी पशो नेंसीब। मिनू गार दुश्शो मुरुम ‘वारच पाइय्यीनी’ दे वाइ ब्रेक्ब। मो हना यो परमप्रभुम मेको आन पुंइशो मनेंन।

<sup>13</sup> का निक्शी मुर छेडछेड आ पर्वम मरिश्शो लोव्र पाइनीम। मेकोपुकीम छेडछेड डा लां मतुइक्च, मगाक्नीम। <sup>14</sup> मुर साइक्ब मुर नां रिक्म नोले बोक्शा पुडग नु मारेइ मथीब आन कली साइक्ब। मिनू नाक्दो मेको खुइ खोदेंशो दुम्ब। <sup>15</sup> मुर आन मीश नु मुर आन वोंइश नु इक्ब नां रिक्चा रिम्ब। मिनू मेकोमी ‘नाक्दो सुइम आं कली मतुइक्तमेक्ल’ दे आ कुल फाइक्ब। <sup>भजन संग्रह १०:११</sup> <sup>16</sup> खुइपुकी नाक्दो खिं प्रोल्शा ओवनीम। मिनू नाक्त खुंइसीनीम। मिनू मेकोपुकीम छेडछेड मतुइक्नीम। <sup>17</sup> मारदे हना क्येर नाक्दो मेको आन कली सुनी बाक्ब। क्येर नाक्दो डा शुश हिंतीके मेको आन वारच बाक्ब।

<sup>18</sup> मेको मोदेंशो मुरपुकी ब्वाक्कु आ तार डा बोग्यो खोदेंशो बाक्नीम। मेको आन थेरशो रू सराप चीले तशो बाक्नीम। सुइ मुर आन अडगुर रू गे मलाइनीम। <sup>19</sup> दोपा यशो फुं कली नां नु होशोम सोव्रपाइक्बा, मोपा बेक्शो मुर आन बाक्तीकेमी पापी आन कली साम्पाइक्ब। <sup>20</sup> मेको आन कली जरमेब कोव्रजीम मेको आन कली प्रेंब। मिनू लुस्पुमी ‘मेको ब्रोवशो बाक्नीम’ दे मिन्नीम। मुरुम मेको आन कली प्रेंनीमी। मोपा परमप्रभु यावे आ अरेशो मटीबपुकी दिम्शो रवा खोदेंशो दुम्नीम।

<sup>21</sup> मेकोपुकीमी आल मथीब मीश मुर आन कली श्येत गेनीम। मिनू आ वोंइश बेक्शो मीश मुर आन कली मारेइ रिम्शो मपाइनीम। <sup>22</sup> मो हना यो परमप्रभु आ सक्तिमी मेको बोल्यो मुर आन कली ब्रोंइचा गेब। तन्न गेना बेक्नीमी मतुइक्नीम। <sup>23</sup> परमप्रभुम मेको आन कली प्रोंइतु हना यो, मेकोमी मेको आन कली गेना हना यो कोव्रशो बाक्ब। <sup>24</sup> याम का कली मरिश्शो पाइबपुकी ग्येत्थ क्युक्चा पुंइसीनीम। मिनू नोले मेको जाम्नीम। अरु खोदेंशो पा मेकोपुकी यो बेक्शा लाइनीम। मिनू मेकोपुकी चेरब पेक्शो खोदेंशो पा पेत्सीनीम। <sup>25</sup> सुइमी आं कली ‘गे जोल पाइब नवे’ दे देंने मचाप्नीम। मिनू आं कली ‘फश लोव्र पाइब’ देंने मचाप्नीम” देंमाक्त।

बिल्दादमी लोव्र पशो

**25** मिनू शुआह डा बिल्दादमी <sup>2</sup> “नेल्ल क्येडा ठेयब दुम्तीके नु मान पा हिंतीके परमप्रभु नु बाक्ब। मेकोमी इर स्वर्गम थुं नाइश्शा बाक्तीक सेल्ब। <sup>3</sup> मेको आ लडाइ पाइब हिक्ने मचाप्चा डा बाक्नीम। मेको आ छेडछेड नेल्ल आन बाक्तीके मजाक्बा डा? <sup>4</sup> बेक्शा लाइब मुर दोपा परमप्रभु आ डोंइती ठीक पाइब दुम्ने चाप्नीमी डा? मीश मुर रे जरमेशो मुर दोपा ग्रोग्रा मदिचा डा दुम्ने चाप्नीमी डा? <sup>अय्युब ९:२; भजन संग्रह १४३:२</sup> <sup>5</sup> मेको आ डोंइती तास्लाम ठीक पा छेडछेड मगेब। सोरुल आन छेडछेड मगारचा डा बाक्नीम। <sup>अय्युब १५:१५</sup> <sup>6</sup> मिनू लुस्पु खोदेंशो मुर, दोपा परमप्रभु आ डोंइती ठीक दुम्ने चाप्चा डा?” दे बिल्दादम देंमाक्त। <sup>यसैया ४१:१४</sup>

अय्युबमी लोव्र लेशो

**26** मिनू अय्युबमी <sup>2</sup> “गे दोपा बोल मपाइश्शो मुर कली वारच पाइक्नी? योक्शो गुइ कली गे दोपा नाइक्चा गेनी? <sup>3</sup> गे मतुइक्ब मुर कली, अर्ती गेतीनी। मिनू गे शुश रिम्शो लोव्र शेंताक्नी। <sup>4</sup> ओदेंशो लोव्र पचा कली गे ते शेंसीनी? मिनू तेको सोक्त रे पा ओदेंशो लोव्र पनी?” दे अय्युबमी देंमाक्त।

<sup>5</sup> “उइ डा मुर आन वांकु खिंखि पाइनीम। ब्वाक्कु नु मेकेर बाक्बपुकी यो खिंखि पाइनीम। <sup>6</sup> परमप्रभु आ डोंइती बेक्शो मुर आन बाक्तीके मरुंइसीशो बाक्ब। मिनू जाम्शा लतीके मसुम्सीशो बाक्ब। <sup>भजन संग्रह १३९:८; हितोपदेस १५:११; आमोस ९:२; प्रकाश ९:१</sup> <sup>7</sup> मेकोम श्येत्थ बाक्तीकेमी उत्तर डा सरीड प्राक्ब। मिनू रागी कली मारेइ मबाक्तीकेम क्युक्ब। <sup>8</sup> मेकोमी ब्वाक्कु कली क्येर गोस्सुम तेक्शा वोइक्ब। मिनू मेको गोस्स मप्रोल्ब। ब्वाक्कु मगूब। <sup>9</sup> मेकोमी पूर्न डा तास्ला कली सुम्ब। मिनू आ गोस्सपुकी मेको आ तारी प्राक्ब। <sup>10</sup> मेकोमी ब्वाक्कु आ सुरम सांद वोइश्शो बाक्ब। छिडछिड नु छेडछेड फ्राचा कली मो पशो बाक्ब। <sup>11</sup> मिनू सरीड डा थामपुकी हिम्सीनीम। परमप्रभु आ हुइश्शोमी हिंशा सिक्सी पाइनीम। <sup>12</sup> मेकोम आ सक्तिम समुन्द्र कली थेल्लु। मिनू आ रुप्तीकेम राहाब माइश्शो समुन्द्र डा ठेयब जन्तु कली खतम सेल्लु। <sup>अय्युब ९:१३; भजन संग्रह ८९:११</sup> <sup>13</sup> मेको आ फश पतीकेमी सरीड हाक्साक्ब। मेकोम दोरशा प्रोक्ब ठेयब जन्तु कली साइक्तु। <sup>यसैया २७:१४</sup> मेको आ सक्ति डा आइक्च गेय ला बाक्नीम। मेको रे गो आइक्च सेंदा डा लोव्र ला नेंतक। मिनू मेको आ सक्तिम पशो बुंबु, सुम रुप्ने चाप्चा डा?” देंमाक्त।

अय्युबम लोव्र पशो

**27** मिनू लेंशा अय्युबमी <sup>2</sup> “परमप्रभु यावे ब्रोंइशा बाक्शो खोदेंशो पा आं ठीक पशो आ पर्वम मारेइ मदे। नेल्ल क्येडा ठेयब सक्ति पाइश्शोम आं थुं खाइक्पाइश्शो बाक्ब। <sup>3</sup> गो आं रांम सोक्त बाक्म सम्म, परमप्रभु आ सोक्त आं नेंम बाक्म सम्म, <sup>4</sup> गो मारेइ जोल मपाइनुड। मिनू मिलो शिलो मपाइनुड। <sup>भजन संग्रह ३४:१४</sup> <sup>5</sup> गो गेपुकी ठीक बाक्नीनी, दे मदेनुड। गो मबेक्डा सम्म आं रिम्शो पतीक मप्रोंइनुड। <sup>6</sup> गो आं ठीक पतीके कली गेनायो मप्रोंइनुड। गो मबेक्डा सम्म दोस मताइब बाक्नुड। <sup>प्रेरित २४:१६; १कोरिन्थी ४:४</sup>

<sup>7</sup> आं जोरी सत्रु परमप्रभु यावे आ अरेशो मटीब खोदेंशो दुम्मल। आं कली मदाक्बपुकी ठीक मपाइब खोदेंशो दुम्मल। <sup>8</sup> परमप्रभु यावे आ अरेशो मटीब मुर बेक्चामेनु, परमप्रभुम मेको आन सोक्त लाइक्चावानु, मेको आन के मार आस बाक्बा डा? <sup>लूका १२:२०</sup> <sup>9</sup> श्येत जचा चिक्त्तमेनु, आन डाक्शो परमप्रभुमी नेंबा डा? <sup>10</sup> मार, मेकोपुकीम नेल्ल क्येडा ठेयब सक्ति पाइश्शो कली मिम्शा ग्येरसीनीमी? मेकोपुकीम गेना हना यो मेको कली मिम्शा पुंइनीमी डा? <sup>11</sup> गो इन कली परमप्रभु आ पशो आ पर्वम शेंनुड। गो नेल्ल क्येडा ठेयब सक्ति पाइश्शो आ मिम्शो मरुंइक्नुड। <sup>12</sup> मेको गे नेल्लेम ताइतीनी। गेपुकी मारदे फश लोव्र पाइनीनी?

13 परमप्रभु यावे आ अरेशो मटीब आन कली गेशो भाग एकोन बाकब। नेल्ल क्येडा ठेयब सक्ति पाइशोम शिशी मपाइकब आन कली गेशो भाग एकोन बाकब। *हितोपदेस* १३:२२; *उपदेसक* २:२६ 14 मेको आन तौ शुश बाक्तेकम हना यो, मेकोपुकी तरवारम क्योरशा साइकचा पुंडसीनीम। मिनु मेको आन चच युड रूथ्री जचा मताइनीम। *अय्युब* २१:१९ 15 मिनु लीशोपुकी बेक्तीक रोड पा बेकशा थिम्चा पुंडसीनीम। मिनु आन मीशपुकी रोंका मपाइनीम। 16 मेकोपुकीम फुरक खोदेशो पा चांदी खुप्ताकम हना यो, खप खोदेशो पा शुश वासी तेल्लेकम हना यो, 17 मेकोपुकीम तेल्लीमी, तन्न ठीक पाइबपुकीम फेक्नीम। मिनु मेको आन चांदी दोस मताइब आन कली योक्शा गेनीम। 18 मेको आन खिं ग्योत्र खोदेशो पा सेल्शो बाकब। अडगुर रू खाल पाइब मुर आन बाक्तीके खोदेशो दुम्ब। 19 मेको शोंप पाइशो दुम्बा इप्नीम। तन्न मुल रे मोदेशो मदुन्नीम। मेको बोक्मानु, मेको नेल्ल लने थुम्शो बाकब। 20 शुश हिंतीकेम मेको आन कली बारशो ब्वाक्कुम खोदेशो पा सुम्ब। मिनु नाक्दो फश गिवारमी मेको आन कली योल्ब। 21 पूर्व डा फशेमी मेको आन कली बेर पा योल्ब। मिनु मेको आन बाक्तीके योल्चा पुंडसीनीम। 22 फशेमी शिशी मपथु, मेको आन कली योल्ब। मिनु मेकोपुकी मेकेर रे प्रोक्चा माल्लीम। 23 मेको फशेमी मेको आन कली तशा, आन गुड फेक्नीम। मेको आन बाक्तीकेम मेको आन कली शुक्शी पाइब” देमाक्त।

सोफार आ लोव

28 मिनु अय्युबमी “चांदी आन खानी बाक्नीम। सुन यपाइशशा रिम्शो सेल्तीक बाक्नीम। 2 फलाम दोशा खप रे गुंडनीम। फुल्लु रे तांबा यपाइशशा गुंडनीम। 3 मुरुम छिडछिड कली थुम्पाइक्नीम। मेकोपुकी रागी आगा डा छिडछिडम खानी माल्ला माल्न गाक्नीम। 4 मुर आन बाक्तीक रे शुश डोन लाइनीम। मिनु मुरुम मथेक्तीक रागी लाइनीम। मेकोपुकीमी खानी आगा लतीक पोत्रला दोइनीम। मिनु मेकोपुकी सुइ मबाक्तीकेम डोरीम ग्युक्शा बिक्तीकेम गेय पाइनीम। 5 मिनु अन्न रू आन आगाम खानी दोना दोन बाक्नीम। मिनु नेल्ल खल्बल सेल्नीम। खप कली मी सेल्नीम। 6 मेको फुल्लु रे साफीर माइशो हीरा नु सुन के फुरक गुंडनीम। 7 तेकोइ सिखार पाइब चिक्बीम मेकेर लतीक लां रे मलाइनीम। मिनु ब्वारदे आ शुश ताइब मिक्चीमी यो मेको मतशो बाकब। 8 ठेयब लेशो जन्तु यो मेकेर मजाक्दीलीम। मिनु गुप्सपुकी मेको लां रे मलाइनीम। 9 मुरुम आन गुडमी सारो फुल्लु क्योरनीम। मिनु पहाड आन कली दिंम सेल्नीम। 10 मेकोपुकीम रोंगुम पोत्रला मुडनीम। मिनु शुश क्येट लाइब हीरापुकी ताइनीम। 11 मेकोपुकीम खोला आ बुक्तीक माल्लीम। मिनु रागीम थिम्शा वोइशो शोंप गुंडनीम।

12 तन्न तुइक्तीक चहिं ते थिंसीबा? मिनु रुप्तीके ते बाक्बा? 13 बेक्शा लाइब मुरपुकीम मेको आ लां मतुइक्नीम। ब्रॉइशा बाक्ब मुर आन रागीम मेको मथिंसीब। 14 मिनु खप आ लुक्च लशोमी ‘मेको गो नु मबाक्ब’ देब। मिनु समुन्द्रमी यो ‘मेको गो नु मबाक्ब’ देब। 15 मुरुमी सुनमी रुप्तीके ग्याप्ने मचाप्नीम। चांदी नाक्शा यो मेको कली थाप्ने मचाप्नीम। *हितोपदेस* ३:१३-१५ 16 रुप्तीके कली ओफीर डा सुन, शुश क्येट लाइब ओनीक्स नु साफीर माइशो हीरामी यो ग्याप्ने मचाप्नीम। 17 सुन नु सिसा आस क्येडा तुइक्तीके नु रुप्तीके ठेयब बाक्ब। क्येख सुन के गहाना नु यो मेको फाइक्ने मचाप्नीम। 18 लल मूगा नु टल्केब फुल्लु आ पर्वम लोव पचा ममाल्ब। तुइक्तीक थुं मोती आन क्येडा यो शुश क्येट लाइब बाक्ब। *भजन संग्रह* १११:१०; *हितोपदेस* १:७, ९:१० 19 एथीयोपीया रागी डा पुशपराज माइशो हीरा मेको नु उइक्थ दुम्ने मचाप्ब। मेको क्येख सुनम ग्याप्ने मचाप्नीम।

20 मिनु तुइक्तीक थुं ते रे जाक्बा? मिनु रुप्तीके ते बाक्बा? 21 मेको ब्रॉइशा बाक्ब नेल्ल आन डोंइती रे खुइशो बाक्ब। मेको सरीडम बेरब चिक्ब आन क्येडा यो खुइशो बाक्ब। 22 जाम्शा लतीके नु बेक्पाइक्बमी ‘गो मेको आ पर्वम नेशो ला बाक्नस्कु’ देंनीस।

23 तन्न परमप्रभुमी मेको आ लां तुइक्ब। मेको ते रे जाक्बा मेको यो तुइक्ब। *हितोपदेस* ८:२२-३१ 24 मारदे हना मेकोमी रागी आ एर ओंथ नेल्ल ताइब। मिनु सरीड आगा डा मारेइ मारेइ नेल्ल आन कली कोव्रब।

25 मेकोमी फश कली सक्ति गेप्तु। मिनु समुन्द्र आ सांद वोइक्तु। 26 मेकोम ‘दोशो रेउ यिचा माल्बा’ मेको अरेप्तु। मिनु बुंबु कली आ लां कोंइताक्व। 27 मेना मेकोम रुप्तीक नु तुइक्तीक कली तशा ‘एकेर बाक्ब। मोदेशो दुम्चा माल्ब। मेको रिम्शो बाक्ब’ देमाक्त। 28 मिनु मेकोमी मुर आन कली ‘परमप्रभु यावे कली मान पा हिंतीके तुइक्तीक बाक्ब। मरिम्शो पतीक रे डोन बाक्चा रुप्तीके बाक्ब’ देत” दे अय्युबमी देमाक्त। *भजन संग्रह* १११:१०; *हितोपदेस* १:७

डोंइती डा ग्येरशा बाक्शो मिम्शो

29 मिनु लेंशा अय्युबमी 2 “गो डोंइती डा खोदेशो बाक्ड हना! मेना परमप्रभुमी आं कली कोव्रशो बाक्त। 3 मेना मेको आ छेडछेड आं पिप्या तार बाक्त। मिनु गो छिडछिडम मेको आ हाम्सोम गाक्ती। *भजन संग्रह* १८:२९ 4 गो आं थम रिम्शो नाक्तीम परमप्रभु आं वारच दुम्शा, आं नेक्था बाक्त। *भजन संग्रह* २५:१४ 5 मेना मेको नेल्ल क्येडा ठेयब सक्ति पाइशो गो नु बाक्शो बाक्त। मिनु आं तौपुकी आं एर ओंथ बाक्तेकम। 6 मेना आं लांम दूध शाइशो बाक्त। मिनु सेरथे फुल्लु रे तेल के खोला शाइशो बाक्त। 7 गो आं बाक्तीके रे सहर डा ठेयब लाप्चो रे पा लाडगा आं नित्तीकेमी नित्थ लडानु, 8 ठिटापुकीम आं कली तशा, लां प्रॉइशा गेतीमी। मिनु खूशोपुकी आं कली तशा मान पा राप्तेकम। 9 ठेयब मुरपुकी सिक्सी पा बाक्तेकम। मिनु मेकोपुकीम आन गुडमी आन शोव सुम्तेकम। 10 सासन पाइब आन ब्वाक्चा देक्शा, सिक्सी पा बाक्तेकम। 11 आं ब्वाक्शो नेंबपुकीम आं कली ठेयब सेल्तीमी। मिनु आं कली तशा ‘रिम्शो बाक्ब’ देतेकम। 12 मारदे हना गो ‘वारच पाइक्की’ देब प्रुडग आन कली वारच पा प्रॉइतामी। वारच पाइब मबाक्शो रोम रोइक्च आन कली वारच पाइक्तामी। *अय्युब* ३१:१६; *प्रस्थान* २२:२१-२२ 13 मारेइ आस मबाक्शो मुरपुकीम आं कली आसीक गेतीमी। गो आन वॉइश बेक्शो मीश मुर आन थुं ग्येरपाइक्तामी। 14 गो ठीक पतीक कली वा फेक्सीशो खोदेशो पा फेक्साक्यी। आं ठीक निसाफ पतीके आ वा नु आं फेटा खोदेशो बाक्त। 15 गो मिक्च मताइब आन मिक्च दुम्ती। मिनु खोइल मदुक्ब आन खोइल दुम्ती। 16 मारेइ मथीब आन कली आन आफ खोदेशो दुम्ती। गो अर्को रागी डा मुर आन कली आन मुददा कोव्रशा गेतामी। *अय्युब* ३१:१८ 17 गो ठीक मपाइब आन सक्ति नेल्ल खतम पोक्तामी। मिनु मेको आन रोइशो लेप्पाइक्ता। 18 मेना गो आं खिंम श्येत मजथु बेक्नुड, दे मिम्शो नड। मिनु गो शुश बर्स ब्रॉइनुड, दे मिम्शो नड। 19 आं शाक्श बारशा ब्वाक्कु बाक्तीक गे लाम्तेकम। मिनु आं राशीम सीत बाक्त। 20 आं सक्ति गेना हना यो बाक्त। मिनु आं गुड डा लिब्रा गेना हना आप्ने चाप्शो बाक्ती।

21 गो लोव पडानु, मुर नेल्लेमी सिक्सी पा नेंतेकम। मिनु नोफा दाइशशा आ अर्थ नेंतेकम। 22 गो आं लोव थुमु नोले सुइमी अरु लोव तेम्चा ममाल्देम। आं लोव मेको आन थुंमी सीत खोदेशो पा जिन्ना जिन्न लत। 23 मेकोपुकीम बर्खा डा रेउ रिम्शो खोदेशो पा आं कली रिम्ताक्यीमी। मिनु नोले डा रेउ रिम्शो खोदेशो आन शोव वोक पाक्शा आं लोव नेंतेकम। 24 गो ज्याउ रिस्सीडानु, आन थुं बारत। आं ग्येरशो कुल तशा, मेको आन कली लेम्तीक दुम्त। 25 गो मेको आन गाक्चा माल्शो लां योव्रशा गेतामी। मिनु गो ‘ओं पने’ दे अरेतामी। गो पिप आ लडाइ पाइब आन दातेम बाक्शो खोदेशो बाक्ती। गो रोंका पाइब आन कली लेम्ब खोदेशो दुम्ती” दे अय्युबमी देमाक्त।

अय्युब आ थुं लुक्च लशो

30 मिनु अय्युबमी “मुल ठिटापुकी आं कली तशा शुक्शी पा रिस्साकम। मेको आं क्येडा ठिटा बाक्नीम। मेको आन आफ आन कली गो आं क्यारशा भेडा खाल पाइब कुचुमुपुकी नु काथा वोइक्चा यो मशिरशो मिम्शो नड। *अय्युब* १९:१८ 2 मेको आन गेय आं कली शोर गाक्शो बाक्त। मारदे हना मेको आन सक्ति ग्युम्ने थुम्शो बाक्त। 3 मेकोपुकी शुश प्रुडग नु शोव्लु बेक्शो बाक्तेकम। मेकोपुकी गोरशो सोव्रशो रागीम आन जचा थोव्रक माल्तेकम। 4 मेकोपुकीम हिक्सी डाम्शो सुवा, बुटा आन सफा सेक्शा जाइनीम। मिनु मार मार आन शाक्श दोम्तेकम। 5 मेकोपुकी मुर आन



दाते रे तिल्ला पुंडसीशो बाक्तेक्म। मुरपुकीम मेको आन कली खेदा पशो खोदेशो पा ग्रीतेक्म।<sup>6</sup> मेकोपुकी सोव्रशो खोलामी, पुक्खी आगा नु ब्रोल्शो सेरथे फुल्लु मेर बाक्तेक्म।<sup>7</sup> मेकोपुकीमी बुटा आन आगामी ग्रीतेक्म। मिनु बुटा आगामी बुक्तेक्म।<sup>8</sup> मेको निप्स मपाइशो, महिवसीशो मुर बाक्तेक्म। रागी रे तिल्ला खेरचा पुंडसीशो बाक्तेक्म।

<sup>9</sup> मुल गो मेको आन शुक्शी पतीके कुम्सो दुम्ती। आं पर्वम शुक्शी लोव ला पाइनीम। *भजन संग्रह ६९:१३; बिलाप ३:६३* <sup>10</sup> मेकोपुकीम आं कली ग्रांग्रा दिशो मिन्नीम। आं क्येडा डोन बाक्नीम। आं कुलुम तोक्चा मुने मपाइनीम। *अय्युब १७:६; मत्ती २६:६७* <sup>11</sup> मारदे हना परमप्रभुमी आं लिब्रा प्राक्शा, आं कली श्येत गेतीके, मेकोपुकीम आं डोंइती 'मारेइ मारेइ पने चाप्नीक' दे मिन्नीम। <sup>12</sup> आं ग्युरा गे थम मरिश्शो मुर बोक्नीम। मिनु आं खोइली ग्रेक्पाइक्नीम। मिनु मेकोपुकीम आं गाक्तीक लां तेक्नीम। <sup>13</sup> मेकोपुकीम आं लां प्रेल्लीम। आं श्येत तेन्नीम। मिनु सुइमी मेको आन कली 'मोदेशो मपचा' दे मतेक्नीम। <sup>14</sup> मेकोपुकी ठेयब पोव्रलाम रिक्थी मरिक्थी पा ओव्रनीम। मेकोपुकी ब्रेश्शो गारो रे नेम्मुशा जाक्नीम। <sup>15</sup> मिनु गो शुश हिना हिंन बाक्नुड। मेकोम आं मान ततीक फशेम खोदेशो पा हरुर पा योल्पाइक्नु। आं शौप बाक्शा रिश्शो दुम्तीके गोस्स खोदेशो पा जाम्शा लत।

<sup>16</sup> मुल आं थुं बेक्ना बेक्न लशो बाक्ब। मिनु श्येत जतीक नाक्त ला लीशो बाक्नीम। <sup>17</sup> नाक्दो आं रुश शुश खाइक्नीम। मेको खाइक्तीके गेनायो मनाइक्ब। <sup>18</sup> परमप्रभुमी आं ठेयब सक्तिमी आं वा फ्रुक्ब। मिनु वाम शुरम खाइशो खोदेशो पा खाइक्ब। *अय्युब ७:५; अय्युब १६:८* <sup>19</sup> मेकोमी आं कली हिलोम ब्वारशो बाक्ब। मिनु गो फुरक नु पुलु खोदेशो दुश्शो बाक्नुड।

<sup>20</sup> गो इन कली 'वारच पाइक्नीनी' दे पुंडता। तन्न गे आं कली लोव मलेत्तीनी। गो इन कली राप्शा रिश्शा बाक्ती। तन्न गे आं कली मकोव्रयीनी। *अय्युब १९:७; भजन संग्रह २२:३* <sup>21</sup> गे आं कली ठेयब श्येत गेब दुश्शो बाक्नीनी। इन ठेयब सक्तिमी आं कली खेदा पाइनीनी। <sup>22</sup> गे आं कली क्युक्शा फश गिवारम बेरपाइक्तीनी। मिनु आं थुं लुक्च लपाइक्तीनी। <sup>23</sup> गे आं कली साइक्नीनी, गो मेको तुइश्शो बाक्नुड। ब्रोंइशो नेल्ल मेको लां लाइनीम।

<sup>24</sup> थमा पा, मेकोमी पुडग आन कली श्येत मगेब। मुर श्येत जशा 'वारच पाइक्नीनी' दे ग्रीनीम। <sup>25</sup> मार, गो श्येत जशो मुर आन पर्वम मडाक्डा डा? मार, पुडग आन पर्वम आं थुं मखाइक्म डा? <sup>26</sup> मो हना यो गो रिश्शो दुम्तीक आस पाता। तन्न मरिश्शो कका जाक्त। छेडछेड रिश्शा बाक्ती। तन्न छिडछिड कका जाक्त। <sup>27</sup> आं थुं गेना हना यो ग्येत्थ लुक्च दुम्ब। गो गेना हना यो श्येत जचा माल्नुड। <sup>28</sup> गो क्येर नाक्दोम गाक्नुड। गो गुम्तीकेमी 'वारच पाइक्नीनी' दे पुंडनुड। <sup>29</sup> गो सिवार आन लोक्ब दुश्शो बाक्नुड। हुहुचील आन वारच दुश्शो बाक्नुड। <sup>30</sup> आं कुशुल क्येर दुश्शा, आं रुश नेल्ल चोइनीम। <sup>31</sup> आं बीना रोंका पा ग्रीब। आं बांसुरी डाक्शो मुर आन कली ताप्शो बाक्ब" देमाक्त।

अय्युबमी "गो ठीक पाइब नड" देशो

**31** मिनु अय्युबमी "गो सुइ मीश आल आन कली मरिश्शो थुंम मकोव्रचा कली, आं मिक्च नु कबल पाता। *मत्ती ५:२८-२९* <sup>2</sup> मिनु परमप्रभुमी इर रे आं कली गेबा? नेल्ल क्येडा ठेयब सक्ति पाइश्शोमी मार शौप गेबा? <sup>3</sup> मार, ठीक मपाइब आन कली शुश हिंचा डा श्येत मदुम्बा डा? मरिश्शो पाइब आन कली खतम दुम्तीकेम मसुम्बा डा? <sup>4</sup> परमप्रभुम आं पशो नेल्ल तुइक्ब। मिनु आं गाक्शो नेल्ल कोव्रब। *अय्युब २३:१०*

<sup>5</sup> गो हेंथे गाक्शो बाक्ती हना, दूली लां गाक्शो बाक्ती हना, <sup>6</sup> परमप्रभुमी आं कली ठीक नाक्तीकेमी नाक्तील। मिनु मेकोमी आं गेना हना यो रिश्शो पशो तुइक्ब। <sup>7</sup> गो ठीक लां रे ग्येत्थ लुक्च लशो बाक्ती हना, आं थुंम आं मिक्चीम दाक्शो खोदेशो पा पशो बाक्ती हना, आं गुइमी ग्रांग्रा दिशो गेय पशो बाक्ती हना, <sup>8</sup> आं खुश्शो अन्न अरुम जामेक्ल। मिनु आं शौक्शो मारेइ मारेइ तुल्सीमल। *उत्पत्ती २६:१६*

<sup>9</sup> आं कली मीश मुरुम हेंथे गाक्पाइक्ती हना, गो आं नेक्था डा मुर आन लाप्चोमी बाप्शा बाक्शो बाक्ती हना, <sup>10</sup> आं मीश अरु मुर आन वाइलीम दुम्शा लल। मिनु अरु मुर मेको नु इम्मल। *२सामुएल १२:३२* <sup>11</sup> मारदे हना मेको थम मरिश्शो गेय बाक्ब। मेको निसाफ पचा कली मरिश्शो बाक्ब। <sup>12</sup> मेको जम्शा लतीकेम सोइक्ब मी खोदेशो बाक्ब। मेकोमी आं बाक्शो मारेइ मारेइ खतम पोक्ब।

<sup>13</sup> गो आं वाइलीम वाइल आन थुं मनुशो लोव पाता हना, सिक्सी पपाइक्तामी। <sup>14</sup> परमप्रभु आं पर्वम बोक्मेनु, गो मार पाइनुडा? मेकोमी आं कली लोव पथ ब्रेत्ताक्व हना, गो मार लोव लेत्नुडा? <sup>15</sup> आं ममा आ कोव्रजम आं कली सेल्बम मेको आन कली यो मसेला डा? मेकोमीन आंइ कली आंइ ममा आ कोव्रजीम मसेला डा? *हितोपदेस १४:३१; मत्ती २५:४०*

<sup>16</sup> गो पुडग आन कली आन माल्शो थोव्रक मगेशो बाक्ती हना, आन वोंइश बेक्शो मीश मुर आन कली डाक्पाइश्शो बाक्ती हना, *अय्युब २९:१२* <sup>17</sup> गो आं जचा थोव्रक आं कान जशो बाक्ती हना नु रोम रोइक्च आन कली योक्शा मगेशो बाक्ती हना, मोदेशो दुम्ल। <sup>18</sup> गो रोम रोइक्च आन कली आन आफोमी खोदेशो पा थुल्तामी। गो जरमेसीड रेन आन वोंइश बेक्शो मीश मुर आन कली वारच पाइक्तामी। *अय्युब २९:१६* <sup>19</sup> गो पुडग आन कली वा मफेक्शो ताता हना, नाक्दो फेक्तीक मबाक्शो बाक्त हना, <sup>20</sup> मेको आन कली आं भेडा आन ऊन रे सेल्शो फेक्तीकेम महोपाइक्तीके मेकोपुकीम आं कली आसीक मगेशो बाक्तेक्म हना, <sup>21</sup> गो रोम रोइक्च आन कली मरिश्शो पशो बाक्ती हना, ठेयब लाप्चोम बाक्बपुकीमी 'गे ठीक पाइब बाक्नीनी' देशो बाक्तेक्म हना, *रूथ ४:१-१०* <sup>22</sup> आं बला आं ची रे दोक्ल। आं गुइ जिक्शा दोक्ल। <sup>23</sup> तन्न गो परमप्रभु आ गेशो हिंचा डा श्येत तशा हिंनुड। मिनु गो मेको आ ठेयब मान ततीके फाल्ने मचबु।

<sup>24</sup> गो सुन कली थमा सुइश्शो नड हना, क्येख सुनमी आं कली रिश्शो ब्रोंइचा गेब, दे मिश्शो नड हना, *भजन संग्रह ५२:९* <sup>25</sup> गो आं ठेयब शौप तशा शुश ग्येरसीशो बाक्ती हना, आं शुश मारेइ मारेइ बाक्शो आ पर्वम आं कली रिश्शो बाक्चा गेब, दे मिश्शो नड हना, <sup>26</sup> गो नां गे कोव्रशा मेको कली ठेयब सेल्शो नड हना, तास्ला आ दारस कली ठेयब सेल्शो नड हना, *ब्यवस्था ४:१९* <sup>27</sup> मेकोम आं थुं कली खुइश्शोमी हेंथे मिम्ब सेल्शो बाक्ती हना, मेको कली पुक्पु पाइक्चा कली आं गुइ क्युक्शो बाक्ती हना, <sup>28</sup> मेको नेल्ल सजाइ तचा डा पाप दुम वा। मारदे हना गो स्वर्गम बाक्ब परमप्रभु आ पर्वम दूली लोव पाइब दुम्ड वा।

<sup>29</sup> गो आं कली काइ मदाक्बपुकीमी श्येत जशो तशा ग्येरशो बाक्ती हना, मेको आन कली मरिश्शो दुम्तीकेम सुमानु, ग्येरसीशो बाक्ती हना, *हितोपदेस २४:१७; भजन संग्रह ५:५; भजन संग्रह ३५:१३-१४* <sup>30</sup> गो 'मेकोपुकी बेक्मल' दे सराप चीले पा पाप मपड। *१ पत्रुस ३:९* <sup>31</sup> आं गेय पाइब नेल्लेम गेनायो 'अय्युब आ भोजम मुर मरूम' मदेम। <sup>32</sup> अर्को रागी डा मुरपुकी गेनायो लांम इप्चा ममाल्म। लां गाक्ब आन कली गेना हना यो आं खिं डा लाप्चो रोक्शो बाक्त। *न्यायाधीस १९:२०-२१; १ पत्रुस ४:९; हिब्रू १३:२* <sup>33</sup> अरु मुरपुकीम आन हेंथे पशो खुइक्चा माल्शो खोदेशो पा, गो आं थुंमी आं मरिश्शो पशो मखुइक्नु। <sup>34</sup> मारदे हना गो हुलपुकीम मार देनीमी, दे हिंती। मिनु खिं खिं डा आन शुक्शी पतीक रे शुश हिंती। मोपतीके गो सिक्सी पा बाक्ती। गो खिं रे मग्रूड।

<sup>35</sup> गो आं लोव नैब का बाक्शो हना, नेल्ल क्येडा ठेयब सक्ति पाइश्शोमी आं लोव लेत्तल। आं कली दोस गेशा ब्रेक्शो ब्रेक्स ते बाक्बा? *अय्युब २३:३-७* <sup>36</sup> थमा पा, गो मेको आं बलाम लाम्सीड वा। गो मेको सिरपेच खोदेशो पा गुक्सीड वा। <sup>37</sup> मिनु आं पशो गेय नेल्ल मेको कली शेंदु वा। गो मेको आ डोंइती ठेयब मुर कली गुम्थ लशो खोदेशो पा लड वा।

<sup>38</sup> आं रू आं कली दोस गेशा ग्रीशो बाक्त हना, मेकेर डा खप नेल्ल डाक्शो नम हना, <sup>39</sup> मेकेर वाशो मार मार मथाप्थु, जशो बाक्ती हना, मेको रू आ होव्रप कली श्येत गेशो बाक्ती हना, <sup>40</sup> चेरब आ पा डा चोंक चू वामल। क्योव्रज आ पा डा सुवा वामल" देमाक्त। मोपा अय्युबमी आ लोव थुमा बाक्त।

एलीहु आ लोव  
अय्युब ३२:- अय्युब ३७:-

32 मिनु मेको मुर सांमी अय्युब कली लोव पचा प्रोन्मे बाक्त। मारदे हना अय्युबम आंम कली "गो ठीक पाइब नड" देंस डा देंस पवा बाक्त। 2 मिनु राम आ खिं डा बूज डा बाराकेल आ तौ एलीहु गाइक्ता बाक्त। मारदे हना अय्युबमी आंम कली परमप्रभु आ डोंइती शुश पाप मपाइब खोदेंशो सेल्से बाक्त। उत्पत्ती २२:२१; अय्युब १३:१८; अय्युब १९:६-७; अय्युब २५:५-६ 3 अय्युब आ वारच सां आन कली तथा यो गाइक्ता बाक्त। मारदे हना मेकोपुकीमी अय्युब कली लोव लेन्ने मचाप्मे बाक्त। मो हना यो मेकोपुकीमी अय्युब कली दोस ताइब सेल्मे बाक्त। अय्युब १५:४; अय्युब १८:२१; अय्युब २०:२९; अय्युब २२:५ 4 मेकोपुकी अय्युब नु लोव पामेनु एलीहु चहिं सिक्सी पा बाक्शो बाक्माक्त। मारदे हना, मेको आन क्येडा आल बाक्माक्त। 5 मिनु मेको सांमी अय्युब कली लोव लेन्ने मचाप्शो तथा, एलीहु गाइक्ता बाक्त।

6 मिनु बूज डा बाराकेल आ तौ एलीहुम "गो आइक्वीन बाक्नुड। गेपुकी खाल्पा बाक्नीनी। मोपतीके इन डोंइती आं तुइश्शो मदेड, दे सिक्सी पा बाक्ती। 7 गो 'खाल्पा मुर ब्वाक्चा माल्नीम। खूशोपुकीम आन तुइक्तीके शेंदमेक्ल' देंती। अय्युब १२:१२ 8 बेक्शा लाइब मुरपुकी नु नेल्ल क्येडा ठेयब सक्ति पाइश्शो आ सोक्त बाक्ब। मिनु मेकोमी मुर आन कली रुपतीक थुं गेब। 9 खाल्पापुकी ला जोक्ब तुइक्ब मबाक्नीम। खूशोपुकी यो मार ठीक बाक्बा, मेको मरुप्नीम। 10 मोपतीके गो आं लोव नेनीन। गो आं मिश्शो देंचा गेयीनी।

11 नेनीन। गो इन लोव नेंस डा नेंस बाक्ती। गो इन लोव रिम्ना रिम्न बाक्ती। इन मिश्शा पशो जोक्तीक तुइक्तीक लोव नोफा दाइश्शा नेंशा बाक्ती। 12 गो इन देंशो लोव नेंना नेंन बाक्ती। तन्न गेपुकीम अय्युब कली शेंने मचाप्नी। मेको आ लोव यो लेन्ने मचाप्नी। 13 'गोपुकीम तुइक्तीक थुं तशो बाक्नीकी' मदेनी। 'मुरपुकीम ममाइ परमप्रभुमीन मेको कली सजाइ गेवल' मदेनी। 14 तन्न अय्युबम आं पर्वम मारेइ मदे। गो इन लोव खोदेंशो पा मेको कली लोव मलेत्तु।

15 एकोपुकी श्येत दुश्शो बाक्नीमी। मिनु एकोपुकीमी मारेइ लोव लेन्ने मचाप्नीम। 16 एकोपुकी मब्बाक्तेक्म हना यो, गो रिश्शा बाक्नुडा डा? मारदे हना एकोपुकी राप्शा बाक्नीम, लोव चहिं मलेत्तीम। 17 मुल गो लोव लेत्तुड। आं मिश्शो लोव पाइनुड। 18 मारदे हना गो शुश लोव पचा माल्शो बाक्नुड। आं आगा डा सोक्तीमी आं कली लोव पपाइक्ब। 19 गो लोव पचा मताता हना, नक शांबुम ब्रीशो कुशुल के थैलो खोदेंशो पा बुक्ने चाप्नुड। 20 आं थुं नाइक्पाइक्चा कली गो ब्वाक्चान माल्नुड। गो लोव लेत्चा माल्नुड। 21 गो सुइ आन कुल कोव्रशा लोव मपाइनुड। गो सुइ नु मिलो शिलो मपाइनुड। 22 मारदे हना गो मिलो शिलो पस मजोक्नुड। मो पाता हना आं कली सेल्बम आं कली रीब पा खतम पोक्ब।

33 अय्युब, मुल आं लोव नेनीन। आं देंशो लोव नेल्ल नोफा दाइश्शा नेनीन। 2 कोव्रडीन, गो लोव लेत्चा कली ठीक दुश्शो बाक्नुड। आं शोव लोव्रम ब्रीशो बाक्ब। 3 गो आं लोवमी 'गो रिश्शो थुं पाइश्शो मुर नड' दे कोइनुड। गो मार लोव देनुडा, मेको थमा बाक्ब। 4 परमप्रभु आ सोक्तीम आं कली सेल्ती। मिनु नेल्ल क्येडा ठेयब सक्ति पाइश्शोमी आ ब्रोंइतीक सोक्त गेती 5 गे चाप्नीनी हना, आं लोव लेत्तीनी। इन देंचा माल्शो लोव डोंइतीन मिम्तीन। मिनु गो नु लोव पने। 6 परमप्रभु आ डोंइती गो यो इन खोदेंशोन नड। गो यो खप केन सेल्शो नड। अय्युब १०:९ 7 गे आं कली तथा महिनीन। गो इन कली श्येत मगेनुड।

8 गो इन देंचा माल्शो लोव नेल्ल नेंता। मिनु इन ब्वाक्शो नेंता। 9 गे 'गो दोस मताइब नु हेंथे मपाइब बाक्नुड। गो मरिश्शो मपाइब, गेना हना यो रिश्शो पाइब बाक्नुड' अय्युब १६:१७; अय्युब २७:६; अय्युब ३१:१-४ 10 मो हना यो 'परमप्रभुम आं दोस थिन्ना थिन्न बाक्ब। मेकोमी आं कली आ जोरी सत्रु मिश्शो बाक्ब। अय्युब १३:२६; अय्युब १९:११ 11 आं खोइलीम ठेंडरो थोक्ताक्नी। आं लां नेल्ल कोव्रशा, वोइक्नीनी' दे लोव पाइतीनी। अय्युब १३:२७ 12 तन्न गे दूली मिम्ब बाक्नीनी। गो इन कली

लोव लेत्तन्नी। बेक्शा लाइब मुर आन क्येडा परमप्रभु ठेयब बाक्ब। 13 गे मारदे परमप्रभु नु इन थुं मनुशो लोव पाइनीनी। मिनु गे 'मेकोम आं लोव काइ मलेक्ब' देंनीनी? 14 परमप्रभुमी खेयप का निक्शी लोव पाइब। तन्न मुरपुकीम मेको मरुप्नीम। 15 डोमुमी, नाक्दो ततीकेमी, निन्दा पशोनु, बेक्शा लाइब मुर ब्राख्येम गोल्शा इम्मानु, अय्युब ४:१२-१६ 16 परमप्रभुम मेको आन नोफा नेंब सेल्ब। मिनु मेको आन कली शेंदानु, 'परमप्रभु आ लोव बाक्माक्त' दे तुइक्नीम। अय्युब ३६:१० 17 मेकोमी मुर आन कली आन मरिश्शो पशो रे रिश्शो सेल्चा कली नु मेको आन ठेयब लेत्तीक तेक्चा कली लोव पाइब। 18 परमप्रभुम मेको कली बेक्चा रे प्रोंइचा दाक्ब। मेको आन कली तरवार रे प्रोंइचा दाक्ब। 19 मिनु मुर खाइक्स डा खाइक्स पा आन ब्राख्येम इप्शा, सजाइ ताइनीम। मिनु आन रुश गेना हना यो खिंखि पाइनीम। 20 मोपा मेकोपुकीम आन जचा थोवक ग्रंग्रा दीनीम। मिनु थम ब्रोंव्रशो जचा थोवक यो मदाक्नीम। 21 मिनु मेको आन रां गेयशा सोव्रनीम। मिनु मेको आन खूइश्शो रुश तांइसीनीम। 22 मेको आन सोक्त लचा चिक्शो बाक्ब। मेको आन ब्रोंइतीक नाक्त नुच्चा चिक्शो बाक्ब। 23 मो हना यो मेको मुर आन दातेमी का कली परमप्रभु आ हजार हजार स्वर्ग डा गेय पाइब कामी वारच पा, मेकोमी 'मेको रिश्शो थुं पाइश्शो मुर बाक्ब' देंत हना, 24 मिनु मेकोमी मुर कली शिशी पा 'मेको मुर कली बेक्चा रे प्रोनीन। मेको कली प्रोंइतीक थोवक गो नु बाक्ब' देंत हना, भजन संग्रह ४९:८-११ 25 मेको मुर आ श्ये ठिटा के खोदेंशो पा नक दुम्ब। मेको आ ठिटा ना डा खोदेंशो दुम्ब। भजन संग्रह १०३:५ 26 मिनु मेकोमी प्रार्थना पवानु, परमप्रभुमी नेंब। मेको परमप्रभु आ डोंइती बाक्शा, ग्येरसीशा कुम्सो पाइब। परमप्रभुम मेको आ ठीक पतीक लेंशा डोंइती डा खोदेंशो सेल्ब। 27 मिनु मेको मुरम मुर आन बाक्तीक जाक्शा, मेको आन कली 'गो पाप पाता। गो ठीक पतीके कली दूली सेल्ता। गो आं तचा माल्शो सजाइ मतड। 28 मेकोमी आं सोक्त कली बेक्तीक रे प्रोंइतु। मिनु गो छेडछेड तचा कली ब्रोंइती' देंब।

29 परमप्रभुमी एको नेल्ल बेक्शा लाइब मुर आन पर्वम पाइब। खेयप निक्शी, खेयप सां सम्म मो पाइब। 30 बेक्चा चिक्शो मुर आन कली तुरसुम लचा रे लेप्पाइक्ब। मोपा ब्रोंइतीक छेडछेड लेंशा ताइनीम। भजन संग्रह ५६:१४; भजन संग्रह १०३:४; भजन संग्रह ११६:९ 31 नेनीन अय्युब आं लोव नोफा दाइश्शा नेनीन। गे सिक्सी पा बाक्कीन। गो लोव पाइनुड। 32 इन देंचा माल्शो मारेइ लोव बाक्त हना, आं कली देंनीन। गे ब्वाक्कीन। मिनु गो इन पोन बोक्नुड। 33 तन्न इन देंचा माल्शो लोव मबाक्त हना, सिक्सी पा आं लोव नेनीन। मिनु गो इन कली रुपतीक लोव शेंनुड" दे एलीहुम देंमाक्त।

"परमप्रभु ठीक पाइब बाक्ब" देंशो

34 मिनु एलीहुमी 2 "जोक्ब तुइक्ब मुरपुकी आं लोव नेनीन। शुश जोक्ब मुरपुकी आं लोव इन नोफा दाइश्शा नेनीन। अय्युब १२:११ 3 मारदे हना दोपा नोफाम लोव नेंबा, मोपान लेंम जचा थोवक थाम्ब। 4 मोपतीके मार ठीक बाक्बा, मेको गो आंमा योव्रय। मिनु तेको लोव रिश्शो बाक्मे, मेको आंमा गारशा कोव्रय। 5 मारदे हना अय्युबम 'गो दोस मताइब मुर बाक्नुड। तन्न परमप्रभुम आं कली ठीक निसाफ मगेयी। अय्युब ३३:९; अय्युब २७:२ 6 गो ठीक पाइब बाक्ती हना यो, आं कली जोल पाइब सुइक्ती। गो हेंथे मपाता हना यो, आं गार मसा' देंत। अय्युब ९:१५,२०; अय्युब ६:४ 7 ब्वाक्कु तूशो खोदेंशो पा शुक्शी पाइब, अय्युब खोदेंशो अरु सुइ मबाक्नीम। 8 मेको मरिश्शो गेय पाइब नु बाक्ब। मिनु परमप्रभु यावे आ अरेशो मटीब नु गाक्ब। भजन संग्रह १:१ 9 मारदे हना मेकोमी 'परमप्रभु कली ग्येरशा टिचा, शोर गाक्शो बाक्ब' देंब। अय्युब ९:२२

10 मोपतीके मारेइ मारेइ तुइक्ब मुरपुकी आं लोव नेनीन। परमप्रभुम गेनायो मरिश्शो मपाइब। नेल्ल क्येडा ठेयब सक्ति पाइश्शोमी गेनायो दूली मपाइब। अय्युब ८:३; ब्यवस्था ३२:४; रइतिहास १९:७ 11 मेकोमी मुर आन कली मेको आन पशो खोदेंशो पा पाइब। मार पाइनीमी, मेकोन ताइनीमी। 12 एको थमा लोव बाक्ब। परमप्रभुम गेनायो मरिश्शो मपाइब। नेल्ल क्येडा ठेयब सक्ति पाइश्शोमी दूली निसाफ मपाइब। अय्युब १९:६ 13 सुम रागी

मेको आ जिम्मा मेवा? सुम मेको कली रागी नेल्ल डा अधिकार मेवा?  
14 मेकोमी ब्रॉइचा गेब सोक्त नु आ सास लेशशा लाइक्वा मिस्ताक्व हना,  
15 याम कामीन सोक्त पाइश्शो नेल्ल बेक्नीम। मिनु मुर लेंशा फुरकुम लेशशा  
लाइनीम। भजन संग्रह १०४:२९

16 गे इन के रुप्तीक थुं बाक्व हना, आं देंशो नेनीन। गो मार देंडा, मेको  
नोफा दाइश्शा नेनीन। 17 ठीक निसाफ कली काइ मदाक्व मुर सासन पने  
चाप्पा डा? मार, गे ठीक पाइब नु सक्ति पाइश्शो कली दोस ताइब मिम्नीनी?  
18 सुमी पिप कली 'हिंचा डा मरिश्शो पाइब बाक्नीनी' देंबा? मिनु ठेयब मुर  
आन कली 'परमप्रभु यावे आ अरेशो मटीब बाक्नीनी' देंबा? 19 मेकोम पिप  
आ तौ आन कुल मकोवब। मेकोम शॉप पाइश्शो नु प्रुडग नेल्ल आन कली  
उडक्व मिम्ब। मारदे हना मेको नेल्ल आ सेल्शो नम। 20 मेकोपुकी याम  
कामीन बेक्शा लाइनीम। नाक्वो उडक्व दुम्मेनु, मेकोपुकी खिंखि पा  
बेक्नीम। सक्ति पाइश्शो मुर यो सुडम मारेड मपाइक्वु बेक्नीम।

21 मेकोमी मुर नेल्ल आन पतीके कोवशो बाक्व। मिनु मेको आन गाक्वो  
नेल्ल कोवशो बाक्व। अय्युब ३१:४; हितोपदेस ५:२१ 22 मेकेर मरिश्शो  
पाइब आन खूंडसीतीक छिडछिड मबाक्व। भजन संग्रह १३९:११-१२  
23 परमप्रभुम आ डोंइती निसाफ पुंडथ जाक्व मुर आन कली 'एको नाक्व  
जाक्कीन' मदेशो बाक्व। 24 मेकोम खुदील निदील मपथुन सक्ति पाइश्शो  
आन कली तिल्ल। मिनु मेको आन पा डा अरु आन कली वोइक्व। 25 मारदे  
हना मेकोम मेको आन पशो गेय नेल्ल तुइक्व। मिनु मेको आन कली काबु  
नाक्वोमीन तिल्ल। मिनु मेकोपुकी खतम दुम्नीम। 26 परमप्रभु यावे आ  
अरेशो मटिशो आ पबर्म मेको कली खतम पोक्व। मिनु मेको मुर नेल्लेम  
ताइनीम। 27 मारदे हना मेकोपुकी मेको आ नोले खोइक्वा प्रोइतेक्म। मिनु  
आ कोइशो लां ममिम्तेम। 28 मेकोपुकीम प्रुडग आन डाक्वो मेको आ  
डोंइती जाक्वीपपाइक्तेक्म। मेकोम मारेड मथीब आन पुंडशा ब्रेश्शो नेंतु।  
उत्पत्ती १६:११ 29 तन्न मेको सिक्सी पा बाक्व हना, सुम मेको कली दोस  
गेने चाप्पा डा? मेकोम आ कुल खूइक्ताक्व हना, सुम मेको कली तने चाप्पा  
डा? रागी डा मुर नेल्ल कली नु मुर का कली मेको कान बाक्व। 30 मिनु  
परमप्रभु कली मटीब मुरुम सासन मपवल। मिनु मुर आन कली श्येत गेब  
सासन पाइब मदुमल।

31 मिनु मेकोमी परमप्रभु कली 'गो सजाइ फाल्ता। गो मुल रे मरिश्शो गेय  
मपाइक्नुड। 32 आं मतुइश्शो आं कली शेंदीनी। गो मरिश्शो पाता हना यो,  
मुल रे मो मपाइनुड' देंबा। 33 मार, मेकोम इन देंशो खोदेंशो पा इन कली  
पचा माल्बा डा? मारदे हना गे आ देंशो मबिल्लीनी। गे इन लां योवचा  
माल्लीनी। गो मो मपाइनुड। मोपतीके इन तुइश्शो आं कली शेंदीनी।  
34 निप्स पाइश्शो मुर नेल्लेम नु जोक्व तुइक्व कामी आं लोव नेंशा  
35 'अय्युब मजोक्वु, लोव पाइब बाक्व। आ लोव मरुप्पा डा बाक्व' देंनीम।  
अय्युब ३८:२ 36 अय्युबम मेको क्येडा तेम्शा श्येत जवल। मारदे हना आ  
लोव परमप्रभु आ अरेशो मटीब आन लोव खोदेंशो बाक्व। 37 मेकोमी आ  
पाप तेम्ब। आंइ दातेमी शुश हेंथे पना पन बाक्व। मिनु मेकोमी परमप्रभु आ  
पबर्म मरिश्शो लोव शुश तेम्ब" दे एलीहुमी देंमाक्व।

एलीहु आ लोव

35 मिनु एलीहुमी 2 अय्युब कली "परमप्रभु आ डोंइती 'गो ठीक  
बाक्नुड' देंचा रिश्शो बाक्वा? अय्युब ३२:२ 3 गे मेको कली 'गो  
पाप मपाता हना, मार दुम्बा डा? मिनु पाप मपथु आं कली मार रिश्शो दुम्बा  
डा?' देंतीनी। अय्युब ३४:९ 4 गे नु इन वारच सां इन कली गो लोव लेतुड।  
5 इर सरीड गे कोवडीन। इन क्येडा इर बाक्वो गोस्स कली कोवडीन। 6 गे  
पाप पाइतीनी हना, मेको कली मार दुम्बा डा? गे शुश हेंथे पाइतीनी हना यो,  
मेको कली मार दुम्बा डा? 7 गे ठीक पाइब दुम्तीनी हना, मेको कली मार  
गेनीनी डा? इन गुड रे मेकोम मार ताइबा डा? अय्युब २२:२-३; रोमी  
११:३५ 8 इन परमप्रभु यावे आ अरेशो मटितीके इन कली श्येत दुम्शो  
खोदेंशो पा अरु मुर आन कली यो श्येत दुम्ब। मिनु इन ठीक पतीके रिश्शो  
दुम्शो खोदेंशो पा अरु आन कली यो रिश्शो दुम्ब।

9 शुश दिक्वा पुंडसीतीके मुरपुकी वाइ ब्रेत्नीम। मिनु सक्ति पाइश्शो आन  
पबर्म पुंडशा ग्रीनीम। 10 तन्न सुइमी 'आं कली सेल्ब परमप्रभु ते बाक्वा?  
नाक्वो आं कली ठेयब सेल्तीक कुम्सो गेब, परमप्रभु ते बाक्वा? प्रेरित  
१६:२५ 11 मेकोमी आंइ कली रागी डा जन्तु आन क्येडा शुश शेंताक्की।  
मिनु सरीड डा चिक्व आन क्येडा आंइ कली जोक्व तुइक्व सेल्तु?'  
मर्देनीम। 12 मिनु मुरपुकीम डाक्शा पुन्मेनु, मेको आन लोव मर्नेब। मारदे  
हना मेको मरिश्शो पाइबपुकी ठेयब लेशशो बाक्नीम। 13 थमा पा परमप्रभुमी  
मेको आन हेंथे पुंडशो लोव मर्नेब। नेल्ल क्येडा ठेयब सक्ति पाइश्शोमी मेको  
लोव नोफा मदाइक्व। यूहन्ना ९:३१ 14 मिनु गे 'गो मेको कली मतड'  
देंनीनी। इन पशो नेल्ले मेको आ डोंइती बाक्व। मोपतीके रिम्दीन। अय्युब  
२३:८-९ 15 परमप्रभु आ गाइश्शोम सजाइ मगेब। मिनु हेंथे गाक्वो  
मकोवब। उपदेसक ८:११ 16 मोपतीके अय्युबम फश लोव ला पात्तु। शुश  
फश लोव ला पात्तु" देंमाक्व।

परमप्रभु आ गेय ठेयब बाक्व

36 मिनु एलीहुमी लेंशा 2 "गो नु फाल्शा बाक्तीनी हना, इन कली  
मारेड कोइनुड। गो मुल यो परमप्रभु आ पबर्म इन कली लोव पचा  
माल्नुड। 3 आं जोक्वो थुं डा लोव डोन रे चाक्नुड। आं कली सेल्ब ठीक  
पाइब बाक्व। 4 थमा पा, आं लोव हेंथे मबाक्व। आं लोव थम पा जोक्व  
तुइक्व मुर इन डोंइती बाक्व।

5 थमा पा परमप्रभु सक्ति पाइश्शो बाक्व। मेकोम सुइ आन कली आइक्व  
मसेल्ब। मेको आ जोक्तीक तुइक्तीक ठेयब बाक्व। 6 मेकोमी आ अरेशो  
मटीब आन कली ब्रॉइचा मगेब। आइक्व मुर आन कली ठीक निसाफ  
पाइब। भजन संग्रह ७२:४, १२; भजन संग्रह १४६:७-९ 7 मेकोम ठीक पाइब  
आन कली कोवब। मिनु मेको आन कली गेना हना यो पिप नु वोइक्व। मिनु  
मेकोपुकी ठेयब सेल्चा पुंडसीनीम। भजन संग्रह ११३:७-८ 8 तन्न मेको  
आन कली साडलोम पाइक्ताक्म हना, श्येत जाम्तेक्म हना, 9 मेको आन  
शुश हेंथे पशो नु ठेयब लेशशो आ पबर्म परमप्रभुमी सजाइ गेशो बाक्व।  
10 मेकोमी मेको आन कली श्येत गेशा रुक्व मुर सेल्ब। मिनु मेको आन  
मरिश्शो पतीके रे लेप्पाइक्वा कली अरेब। अय्युब ३३:१६ 11 मिनु  
मेकोपुकीम मेको आ लोव नेंतेक्म हना, मेको आ अरेशो टिशा आ गेय  
पाप्तेक्म हना, मेकोपुकीम आन लीशो नाक्वी रिश्शो पा बाक्वा ताइनीम।  
मिनु आन लीशो बर्स रिश्शो पा लाक्नीम। 12 तन्न मेकोपुकीम मेको आ लोव  
मनेतेक्म हना, मारेड मतुइक्वु, तरवारम साइक्वा पुंडसीनीम।

13 परमप्रभु कली मान मपाइब मुर गाइक्स डा गाइक्स बाक्नीम।  
परमप्रभु रे पा सजाइ तामेनु, यो मेकोपुकीम 'वारच पाइक्की' दे मपुंडनीम।  
14 मेकोपुकी ठिटा बाक्वी ना मुने दोक्शा बेक्नीम। 15 परमप्रभुमी श्येत  
जशो आन कली आन श्येत रे प्रोइब। मोपा मेको आन श्येत तशा, रुक्व  
दुम्नीम। 16 मोपा इन कली यो श्येत रे गुंडब। इन कली रिश्शो बाक्तीकेमी  
वोइक्व। गे लेंशा ब्रॉइशो जचा थोवक जचा ताइनीनी।

17 गे मुल चहिं परमप्रभु यावे आ अरेशो मटीब आन ततीक सजाइ तन  
तन बाक्नीनी। मोपान मेको आन दोस नु सजाइम इन कली यो ग्याइक्व।  
18 होस पा बाक्कीन। इन गाइक्तीकेम इन कली शुक्शी मपपदल। मिनु शुश  
घूस जतीकेमी इन कली हेंथे पाइब मसेलल। 19 गे इन कली 'वारच  
पाइय्यीनी' दे ग्रीचा शोर गाक्वो बाक्व। इन शुश शॉप नु इन सक्तिम इन  
कली श्येत रे प्रोइने चाप्पा डा? 20 गेना नां रिक्वा, मिनु इक्वा, दे ममिम्तीन।  
मारदे हना मुर आन इप्तीकेम साइक्वा पुंडसीनीम। 21 मरिश्शो पतीक गे  
मलन। होस पा बाक्कीन। मारदे हना गे मेको आ पबर्म श्येत जाइब दुम्तीनी।  
22 परमप्रभु आ सक्तिम पतीके ठेयब सेल्चा पुंडसीब। मेको खोदेंशो शेंब  
अर्को सु बाक्वा डा? भजन संग्रह २५:९ 23 सुम मेको कली आ लां कोइशो  
बाक्वा? मिनु मेको कली 'गे दूली पाइतीनी' दे सुम देंने चाप्पा डा?

एलीहु परमप्रभु कली ठेयब सेल्शो

24 गे मेको कली मेको आ गेय आ पबर्म ठेयब सेल्चा, मर्देदीन। मुरपुकीम  
मेको आ पबर्म कुम्सो पशो बाक्तेक्म। 25 मुर नेल्लेमी आ पशो तशा

कोव्रतेकम। तन्न डोन रे ला ताम्तेकम। 26 परमप्रभु थमा पा ठेयब बाक्ब। मिनु गो मेको मतुइक्नीकी। मेको आ बर्स हिवने मचाप्सीब। 27 मेकोम ब्वाक्कु आ तेप्का गुप्ब। मिनु आ सेल्शो गोस्सुम वोइक्ब। 28 मिनु सरीड रे रेउ यीब। मेकोमी मुर आन कली शुश जिप्पाइक्ब। 29 सुम गोस्स आ ब्रशो रुप्ने चाप्बा डा? आ बाक्तीक रे बुंबु पशो सुम रुप्ने चाप्बा डा? 30 मेकोमी सरीड आ एर ओंथ आ चिला सोइक्ब। मिनु मेको समुन्द्र आगा सम्म लाइब। 31 मोपा मेकोम जात जात डा मुर आन कली सासन पाइब। मिनु मेको आन कली शुश जचा थोवक गेब। 32 मेको आ गुइम चिला बाक्ब। मिनु मेकोमी खपाइक्वा कली आप्ब। 33 मेको चिला आ पपाइश्शो रेयकेम मेको आ सक्ति आ परबम लोव्र पाइब। मेको हेंथे गाक्ब आन परबम रुश पा शुश गाइक्ब।

एलीहुम लेंशा लोव्र पशो

37 मेको तुइश्शा आं लुङगीर थाम्पा प्रेक्ब। मेको आ बाक्तीक प्रोइशा प्रेक्ब। 2 नेनीन, आ सेंदाम बुंबु पशो नेनीन। मिनु मेको आ शोव्रम ब्वाक्वो ठेयब सेंदा नेनीन। 3 मेकोम सरीड आ एर ओंथ आ सेंदा नेंपाइक्ब। आ चिला रागी डा सुर सम्म दाप्पाइक्ब। 4 मेको आ नोले मेको आ ठेयब सेंदा नेंसीब। मेको आ मान पाइक्वा पुंडसीब सेंदा नेंसीब। मिनु मेकोम आ सेंदा नेंपाइक्ब। आ चिला पतीके मतेक्ब। 5 परमप्रभु आ सेंदा बुंबु पशो खोदेंशो हिंचा डा पा नेंसीब। मेकोमी गोपुकीम मरुप्वा डा पा ठेयब गेय पाइब। 6 मेकोम फुं कली 'रागीम दोक्को' देंब। मिनु रेउ कली 'धारा खोदेंशो पा यीवो' देंब। 7 मेको मुर नेल्ल आन चिन्ड का बाक्ब। मिनु आ सेल्शो मुर नेल्लेम 'मेको परमप्रभुम पाप्तु' दे तुइक्नीम। 8 मेना ब्वाकी डा जन्तु आन पुक्खी गे लाइनीम। मिनु मेकेर लशा बाक्नीम। भजन संग्रह १०४:२१-२२ 9 फश गिवार आ बाक्तीक रे गूब। मिनु फश रे पा ग्यू जाक्ब। 10 परमप्रभु आ सासमी फुं दुम्ब। मिनु ठेयब ब्वाक्कु नेल्ल रीब पा फुं दुम्नीम। 11 मेकोमी ठेयब गोस्स कली ब्वाक्कु कुरपाइक्ब। मिनु गोस्सपुकीमी आ चिला तेइ तेइ फ्राइनीम। 12 मेकोपुकी आ कोंइशो रागी आ एर ओंथ डा लां नेल्ल गाक्नीम। मोपा मेकोपुकीमी परमप्रभु आ देंशो मुर बाक्वो रागी आ तार नेल्ल पाइनीम। 13 परमप्रभुम रागी जिप्पाइक्वा कली रेउ यिपाइक्ब। मेकोम मुर आन कली सजाइ गेचा कली नु आ रागी कली शिशी कोंइचा कली रेउ यिपाइक्ब।

14 अय्युब, गे एको लोव्र नेनीन। सिक्सी पा बाक्वा परमप्रभु आ छक लाक्वा डा गेय मिम्नीन। 15 परमप्रभुम गोस्स आन गेय दोपा पपाइक्वा? मिनु आ गोस्स रे दोपा चिला दाप्पाइक्वा, मेको गे तुइक्नीनी डा? 16 गोस्सपुकी दोपा सरीडम ग्युक्वा बाक्नीमी? मेको आ छक लाक्वा डा गेय बाक्ब। मेको नेल्ल जोक्ब बाक्ब, दे गे मतुइक्नीनी? 17 दक्खिन डा फशेम इन फेक्वो वा होश सेल्ब। रागी नेल्ल कली सिक्सी पपाइक्ब। 18 मार, गे परमप्रभु खोदेंशो पा कांसा के ऐना खोदेंशो सारो सरीड कली प्राक्ने चाप्नीनी डा? 19 मेको कली मार देंचा माल्बा, गे मेको आंइ कली शेंदीन। मारदे हना गो छिडछिडम पतीके मारेइ मिम्ने मचाप्नीकी। 20 गो मार देंनुडा, मेको कली हिल्लो पचा माल्नुडा डा? सुइ मुरुम आंम कली दाक्वा पुंडसीचा मदाक्बा डा? 21 हाम्सो बाक्त्त हना यो, गोस्सुम सुम्शो नां कली मुरुम तने मचाप्सीब। फशेमी गोस्स आन कली योल्दा नोले ला नां कली तने चाम्पीब। 22 मेको उत्तर रे हो हो पा दाप्शा गूब। मेको परमप्रभु आ एर ओंथ छक लाक्वा डा छेडछेड बाक्ब। 23 तन्न गो नेल्ल क्येडा ठेयब सक्ति पाइश्शो कली थिन्ने मचाप्नीकी। मेको आ नेल्ल क्येडा सक्तिम गेय पाइब बाक्ब। मेकोमी निसाफ पशो नु ठीक पतीके गेनायो दूली मपाइब। 24 मोपतीके मुरपुकीम मेको कली तशा मान पा हिंनीम। मिनु आन थुंम 'गो जोक्ब तुइक्ब नड' दे मिम्ब आन कली ठेयब ममिम्ब" दे एलीहुम देंमाक्त्त।

परमप्रभुम अय्युब कली लोव्र पशो

अय्युब ३८:४२:-

38 मिनु परमप्रभु यावेमी अय्युब कली फश गिवार रे पा लोव्र लेश्शा, अय्युब ३१:३५ 2 "दूली लोव्र पा अर्ती गेब सु बाक्म? मारेइ

मजोक्थु मार लोव्र पवा? अय्युब ३४:३५ 3 गे बोल्यो मुर खोदेंशो दुम्शा रपो। मिनु गो इ कली लोव्र हिल्लो पाइनुड। मिनु गे लोव्र लेत्ती।

4 गो रागी आ जग वोदुनु, गे ते बाक्डे? गे रुप्नेवे हना आं कली देनो। 5 मेको कली दोमो सेल्चा, दे सुम देंमे? गे तुइक्नेवे? मेको पुक्वा कली सुम डोरी कीडा। मेको गे तुइक्नेवे? हितोपदेस ३०:४ 6 मेको आ जग मार तार वोदा? मेको आ सुर डा फुल्लु सुम वोदा? 7 मेना सुनी डा सोरुलपुकीमी कालेम कुम्सो पाप्तेकम। मिनु स्वर्गम बाक्ब नेल्ल ग्येरीशा ग्रीतेकम। भजन संग्रह १९:२; अय्युब १:६

8 समुन्द्र रागी आ कोव्रज रे बुक्शा गूमानु, मेको ब्वाक्कु तेक्वा कली सुम लाप्चो चोक्गा? भजन संग्रह १०४:८-९; हितोपदेस ८:२९ 9 गो मेको कली गोस्स के फेक्तीक सेल्शा, क्येर नाक्दोम मेको कली गिल्शा वोइक्त्ता। 10 मेको आ सांद वोइश्शा, थरपु हिरशा, लाप्चोपुकी वोइक्त्ता। 11 मिनु गो मेको कली 'गे ओशो सम्म ला जाक्ने चाप्नेवे। एकेर सम्म ला जाक्नेवे। इन ठेयब छालपुकी मेक उइ देक्वा माल्नीम' दे माइक्तामी।

12 गे मुल सम्म 'सुनी दुमो' दे अरेवी? सुनी कली मेको आ बाक्तीके तुइक्पदी? 13 मेकोमी रागी आ सुर सम्म हाम्सो सेल्ब। आं अरेशो मटीब आन कली खेरचा कली हिम्ब। 14 दोपा खप रे मार मार सेल्सीबा, मोपा रागी फांइसीब। मेको वा कली रडम नुप्शो खोदेंशो बाक्ब। 15 आं अरेशो मटीबपुकीम छेडछेड मताइनीम। मिनु मेको आन पोक्वो गुइ जिक्वा पुंडसीनीम।

16 गे समुन्द्र आ बुक्तीक सम्म जाक्दीने? आ नेल्ल क्येडा लुक्च डा बाक्तीकेम हिरशा गाक्डे? 17 बेक्पाइक्ब आ ठेयब लाप्चो इ कली कोंइदमे? गे क्येर नाक्दो डा लाप्चोपुकी तवी? 18 गे रागी गिश ठेयब बाक्बा, दे तुइक्नेवे? गे मेको नेल्ल तुइक्नेवे हना, आं कली देनो।

19 छेडछेड आ लतीक लां ते बाक्बा? मिनु छिडछिड आ बाक्तीक ते बाक्बा? 20 गे मेको नेल्ल आन बाक्तीकेम लने चाप्नेवे? मिनु गे मेको आन बाक्तीक लतीक लां तुइक्नेवे? 21 थमा पा, गे मेको नेल्ल तुइक्नेवे। मारदे हना मेना गे जरमेने थुम्शो बाक्ते। मिनु गे शुश बर्स ब्रॉइने थुम्तीवी।

22 गे शुश फुं बाक्तीकेम ओव्रडे? गे शुश मुप्स बाक्तीक तवी? यहोसु १०:११; यसेया ३०:३० 23 गो मेको श्येत डा नाक्ती नु लडाइ डा नाक्त्त कली खेक्वा वोइक्त्ता। 24 तेको लां रे छेडछेड ब्राइबा? मिनु पूर्ब डा फश ते रे गूबा?

25 सुम ठेयब रेउ लतीक लां सेला? बुंबु पतीक आ लां सुम सेला? अय्युब २८:२६ 26 मेको मुर मबाक्वो रागी नु गोरशो रागी जिप्पाइक्वा कली बाक्ब। 27 मुर मबाक्वो रागी नु सोव्रशो रागी गिगी सेल्चा कली सुम लां सेला?

28 मार रेउ आ आफ बाक्बा? सीत कली जरमेब सु बाक्बा? 29 सुका आ कोव्रज रे फुं जरमेसे? सरीड रे दोक्ब फुरश आ ममा सु बाक्बा? 30 ब्वाक्कु फुल्लु खोदेंशो सारो दुम्ब। फुरश समुन्द्र आ तार सारो दुम्ब।

31 गे किरकिटी सोरुल आन कली पाइक्ने चाप्नेवे? गे मिर्रासीरा सोरुल कली खिक्वो डोरी आ गाठो प्राक्ने चाप्नेवे? अय्युब ९:९ 32 मार गे सोरुल आ हुल आन कली आन गाक्वो लां रे गुंइने चाप्नेवे? सप्तबर्सी सोरुल आन हुल कली लां कोंइने चाप्नेवे? 33 मार गे स्वर्ग डा फुल्लुम मुशा ब्रेक्वो तुइक्नेवे? गे रागीम मेको मोदेंशो सेल्ने चाप्नेवे? येरमीया ३३:२५ 34 गे गोस्स कली 'रेउ यीवो' दे अरेने चाप्नेवे? मिनु मोपा आंम कली जिप्पाइक्ने चाप्नेवे? 35 मार गे चिला कली आ लांम सोइक्ने चाप्नेवे? मार मेकोपुकीम 'गो एक बाक्त्तक' दे इ कली देंनीमी। 36 सुम थुं कली तुइक्तीक गेवा? सुम थुं कली रुप्तीक गेवा? 37 सरीड डा मारेइ मारेइ हिवने चाप्तीक तुइक्तीक थुं पाइश्शो सु बाक्बा? मिनु सरीड डा ब्वाक्कु वोइक्तीके रे सुम ब्वाक्कु थोक्ने चाप्बा? 38 मोदेंशो दुम्त्त हना, फुरक हिलो दुम्शा, खप डल्ला दुम्शा ग्याइक्मुशा बाक्नीमी।

39 गे गुप्स कली आ सिखार माल्शा गेने चाप्नेवे? मेको आ शोव्रलु बेक्वो रूपाइक्ने चाप्नेवे? 40 मेको आन पुक्खीम बाक्नीम। खुइश्शा सिखार बाप्शो बाक्नीम। गे मेको कली रूपाइक्ने चाप्नेवे? 41 एर ओंथ हिरशो खद आन चाइक्बमी जचा मतथु परमप्रभु कली पुन्मे नोले सुम मेको आन कली थुल्बा?" दे परमप्रभुमी अय्युब कली देंमाक्त्त। भजन संग्रह १४७:९

परमप्रभु आ हिल्लो पशो लोव

परमप्रभु यावेमी आ सक्ति कौंइशो

39 परमप्रभुमी अय्युब कली “रोकोश गेना गिक्बा, गे तुइक्नेवे? छाउरी किश्श गिक्मेनु मेको तशो बाक्नेवे? 2 मेकोपुकीम कोवजम चाइक्ब कुरमेनु, गे मेको आन महिना हिक्ने चाप्नेवे? गे मेको आन गिक्ची ना तुइक्नेवे? 3 मेकोपुकी गिक्चा कली बाप्नीम। मिनु आन चाइक्ब जरमेनीम। मिनु आन चाइक्ब ब्रॉइशा बाक्नीम। 4 मिनु मेको आन चाइक्ब बोल्यो दुम्नीम। ब्वाकीम कोल्नीम। काबु ब्वाकी मेर लशा, लेशशा मजाक्नीम।

5 सुम ब्वाकी डा गधा कली प्रॉना। सुम मेको आ डोरी प्रुदा। 6 गो मेको आन कली ‘बाक्कीन’ दे गोरशो रागी गेता। मिनु हिक्सी बाक्शो रागी मेको आन कली गेता। 7 मेको सहर डा रेयके रे डोन बाक्नीम। मिनु मेकोम शारा दोरपाइक्ब आन ग्रीशो मनेनीम। 8 मेकोम डांडा मेर आन जोतीक सेल्नीम। मिनु गिगी घांस नेल्ल माल्शा नेक्नीम।

9 मार ब्वाकी डा सांढे ब्यफोम इ गेय पने बिष्वा? मार मेको इ घांस लाप्तीकेम नां सौंइबा? 10 गे मेको कली वाक्ने चाप्नेवे? मार मेकोमी दांटे पा इ रू दिंम सेल्बा? 11 मार गे मेको आ बोल तशा इ गेय पपाइक्नेवे? इन गेय नेल्ल पचा गेनेवे? 12 मेको इ अन्न कुरशा चाक्चा कली लेशशा जाक्ब, दे थमा सुइक्नेवे?

13 ठेयब चिक्बीम ग्येरशा आ फ्रां हाम्ब। तन्न मेको सारस खोदेंशो पा बेरने मचाप्ब। 14 मेकोम आ ब्वोफु होल दे खपीम वोइक्ब। मिनु मेक उड प्रॉइब। 15 मिनु मेको कली खोइलीम दिम्नीम, दे प्रेंब। ब्वाकी डा जन्तुपुकीम दिम्ने चाप्नीम, दे ममिम्ब। 16 मेकोम आंम चाइक्ब, आ के ममाइ खोदेंशो पा, आन कली शिशी मपाइब। मेको आ ब्वोफु पतीके मोशा लत हना यो, महिंब। 17 परमप्रभुमी मारदे हना मेको कली तुइक्तीक थुं मपाइश्शो सेल्शो बाक्ब। मिनु मेको कली मारेइ मरुख सेल्शा प्रॉइशो बाक्ब। 18 मिनु मेको दोरशा आ फ्रां प्राक्ब। मिनु शारा नु शारा डोइक्ब आन कली कोवशा रिष्ब।

19 गे शारा कली मेको आ बोल गेनेवे? मेको आ शूर चांम ग्योम्नेवे? 20 गे मेको कली सल्हा खोदेंशो पा प्रेक्पाइक्नेवे? मेको आ ठेयब सेंदा पा ग्रीशोम नेल्ल आन कली हिंपाइक्ब। 21 मेकोम आ गेंचम प्रेक्ना प्रेक्न राप्ब। मेकोम आ बोल नेल्ल कौंइशा, लडाइ पतीकेम लाइब। 22 मेकोम हिंतीक आ पर्बम मारेइ ममिम्ब। मेको तरवार तशा मप्रोक्ब। 23 मेको आ ब्रा हुरुर पा ग्रीब। मिनु मेकेर तूतीक नु तरवार हिरनीम। 24 तन्न मेको थाम्पा आ जौब बोक्शा, दोरशा लाइब। तुराही ताप्शो नेनानु, मेको सिक्सी पा बाक्ने मचाप्ब। 25 मेकोम तुराही ताप्शो नेंशा ‘आहा’ देंब। मिनु मेकोम डोन रेन लडाइ पाइब आन हुल नु लडाइ डा रिना नेंब।

26 ब्वारदे आ फ्रां हाम्शा दक्खिन गे बेरचा कली इ रुपतीकेमी शेंदी? 27 मार ककाकुलीम आ ग्योव इर रोंगुम सेल्चा कली इ अरेशो बाक्बा? 28 मेको रोंगुम बास बाक्ब। मिनु आ ग्योव मेकेन सेल्ब। 29 मेकेर रे आ सिखार कोवना कोवन बाक्ब। मेकोमी डोन डोन नेल्ल रिम्शो पा तने चाप्ब। 30 मेको आ चाइक्बपुकीम हुश तूनीम। मेको ते ते मार मार सिखार बाक्मा, मेको मेकेर बाक्नीम” दे परमप्रभुम अय्युब कली देंमाक्त। हबकुक् १:८; मत्ती २४:२८

अय्युबमी परमप्रभु कली लोव लेशशो

40 मिनु परमप्रभु यावेमी लेंशा अय्युब कली 2 “नेल्ल क्येडा सक्ति पाइश्शो, गो आं कली दोस गेबमी आं कली लोव लेत्चा माल्ब” देंमाक्त। यसैया ४५:९

3 मिनु नोले अय्युबमी परमप्रभु यावे कली लोव लेशशा 4 “गो शोर गाक्शो मुरुम इन कली मार लोव लेन्ने चाप्नुडा डा? गो आं गुइम आं शोव सुम्नुड। उत्पत्ती ३२:९; यसैया ६:५; हितोपदेस ३०:३२ 5 गो खेयप का लोव पने थुम्ता। मुल लेंशा लोव मपाइनुड। गो खेयप निक्शी ब्वाक्ती, मुल ब्वाक्तीक लोव मबाक्ब” देंमाक्त।

6 मिनु परमप्रभु यावेम अय्युब कली फश गिवार रे पा लोव लेशशा 7 “गे बोल्यो मुर खोदेंशो दुम्शा रपो। मिनु गो इ कली लोव हिल्लो पाइनुड। मिनु गे लोव लेत्ती। अय्युब ३८:३ 8 गो आं कली ‘दूली पाइब’ देंनेवे? मिनु गे आंमा ठीक पाइब बाक्नुड देंचा कली आं कली दोस गेनेवे? 9 मार इ सक्ति परमप्रभु के खोदेंशो बाक्बा? गे बुबु पशो सेंदा खोदेंशो पा ग्रीने चाप्नेवे?

10 चाप्नेवे हना, मान ततीकेम नु ठेयब दुम्तीकेम आंम कली ग्योम्सो। गे इ एर आंथ दारस नु छेडछेड वौंइसो। 11 इ गाइक्तीक कौंइदो। मिनु ठेयब लेशशो मुर आन कली कोवशा, मेको आन कली दिप्शा आइक्ब सेलो। 12 ठेयब लेशशो मुर नेल्ल आन कली कोवडो। मेको आन कली आइक्ब सेलो। मिनु आं अरेशो लोव मटीब आन कली आन राप्तीकेमी दिम्दीमी। 13 मेको नेल्ल आन कली खपीम खूइक्तीमी। मिनु रागी आगाम मेको आन कुल खूइक्पाइक्मी। 14 मिनु गो ‘इ ग्युरा गुइमी ग्राने चाप्बाक्ते’ दे थमा सुइक्नुड।

15 गो इ कली सेल्शो खोदेंशो पा बेहेमोथ माइश्शो ठेयब जन्तु कली सेल्ता। मेकोमी बी ब्यफ खोदेंशो पा घांस ब्वाइब। बेहेमोथ ब्वाक्कु डा ठेयब जन्तु बाक्ब। 16 मेको आ सक्ति आ फिलाम बाक्ब। मिनु आ बोल आ कोवजम बाक्ब। 17 मेको आ मीलु लेबानोन डा लाइश्शो रवा खोदेंशो खकटा बाक्ब। मेको आ फिला डा नाडी थम खांइसीशो बाक्नीम। 18 मेको आ रुश कांसा खोदेंशो बाक्नीम। मिनु मेको आ खोइली फलाम खोदेंशो बाक्नीम।

19 मेको परमप्रभु आ नेल्ल क्येडा डौंइती डा ठेयब गेय बाक्ब। मो हना यो मेको कली सेल्ब तरवार शेंशा ला मेको आ नेक्था लने चाप्ब। 20 डांडामी मेको आ जोतीक बाक्ब। ब्वाकी डा जन्तु नेल्ल मेकेर ग्यारनीम। 21 मेको कमल फू आगाम इप्ब। मेको बुदी मीलु नु ब्वाक्कु बाक्तीक मेर खूइश्शा बाक्ब। 22 कमल फूमी मेको कली आ वांकु गेब। मेको आ एर आंथ डा खोला मेर बुटा बाक्नीम। 23 मेको खोला बारशा कुत हना यो महिंब। बारशो खोला आ गे पित हना यो दिल थिश्शा इप्शा बाक्ब। 24 सुइ मुरुम मेको कली आ बोल्सीम रेन्ने मचाप्ब। सुम मेको आ मिक्च थिने चाप्बा? सुम मेको कली ब्वारदम रेशशा आ नें खिन्ने चाप्बा डा?” दे परमप्रभुमी अय्युब कली देंमाक्त।

लेव्याथन आ पर्बम लोव

41 परमप्रभुमी “गे लेव्याथन माइश्शो ठेयब जन्तु कली बोल्सीमी रेन्ने चाप्नेवे? मेको आ लें डोरीम नेजे चाप्नेवे? भजन संग्रह ७४:१४ 2 गे मेको आ नें खिश्शा डोरी लिक्ने चाप्नेवे? मेको आ शांपे बोल्सीम ब्वेक्ने चाप्नेवे। 3 मेकोमी ‘आं कली प्रॉइयी, शिशी पाइय्पीनी’ दे पुंडबा? मेकोमी इ कली मिलो शिलो पाइबा डा? 4 मेकोम गे नु कबल पाइबा? ‘गो गेना हना यो वाइल दुम्नुड’ देंबा? 5 गे मेको नु चिक्ब खोदेंशो पा ग्यारने चाप्नेवे? मार, मेको कली इ मीश आल नु ग्यारचा कली पाइश्शा वोइक्चा दाक्नेवे? 6 मार, मेको आन पर्बम ग्याप्ब लेयबपुकीम ‘ओशो लाइब’ देंनीमी? ग्याप्ब लेयबमी आन दातेमी मेको कली भाग भाग सेल्नीमी? 7 मार, गे मेको आ कुशुल कली तूतीकेम तूने चाप्नेवे? मार, डांइ साइक्तीक याम मेको आ पिया आप्ने चाप्नेवे? 8 गे ‘गो मेको नु लडाइ पाइनुड’ दे मिम्ताक्वी हना, मिनु राम्शी पाप्तीवी हना, गे मोदेंशो लेंशा गेनायो मपाइक्नेवे? 9 सुम मेको कली ‘ग्याइक्नुड’ दे मिम्बा, मेको मचाप्ब। सुम मेको कली ताइबा, मेको हिंशा गोल्ब। 10 मेको कली पोक्ने चाप्ब, सुइ मबाक्नीम। मोपा मेको आ डौंइती सु राप्ने चाप्बा डा? 11 गो आं कली लडाइ तोशा, सु ब्रॉइशा बाक्ने चाप्बा डा? सरीड आगा डा मारेइ मारेइ आं केन नम।

12 गो मेको आ खोइली आ पर्बम लोव पाइनुड। मेको आ सक्ति नु मेको आ दारस आ पर्बम इन कली लोव पाइनुड। 13 मेको आ फेक्शो वा सुम प्रुइक्ने चाप्बा? मेको आ तेक्तीक कली सुम तूने चाप्बा? 14 सुम मेको आ शोव पाक्ने चाप्बा? मेको आ खूइ हिंचा डा बाक्नीम। 15 मेको आ ची

तेक्तीकपुकीम सेल्सीशो बाक्ब। मेको थम नेक्था नेक्था पा गार पाइश्शा वोइश्शो खोदेशो बाक्ब। 16 मेको का आ तार अर्को पा बाक्शो बाक्नीम। मोपतीके फश यो मेको आगा ओवने मचाप्ब। 17 मेकोपुकी का का पा अर्को नु खोम्सीशा मब्राचा डा पा बाक्शो बाक्नीम। 18 मेकोम हाक्च पवानु, मी गूब। मिनु मेको आ मिक्च सुनी डा नां खोदेशो बाक्ब। 19 मेको आ शोव रे रांको नु मी आ फिलीडगो गूनीम। 20 मेको आ नें रे कुन गूब। मेको शुश ब्रुइश्शो रे गूशो सोलोल खोदेशो बाक्ब। 21 मेको आ सासमी कोइला ब्रापाइक्ब। मिनु मेको आ शोव रे हुरुर पा ब्रशो मी गूब। 22 मेको आ शुर शुश बोल्यो बाक्ब। मेको आ एर ओथ शुश हिंतीक बाक्ब। 23 मेको आ श्ये रोम्सीशो बाक्ब। मारेडम चिप्ताक्व हना यो, मेको कली मारेड मडुम्ब। 24 मेको आ थुं फुल्लु खोदेशो पा खकटा बाक्ब। मेको यात आ आगा डा फुल्लु खोदेशो पा खकटा बाक्ब। 25 मेको बोक्शा राम्मेनु, बोल्यो नेल्ल हिंनीम। मेकोम लडाइ तोवानु, मेको नेल्ल नोले शोंइसीनीम। 26 तेकोइ तरवारमी मेको कली साइक्ने मचाप्ब। तूतीक, ब्रा नु अरु आप्तीकेम मेको कली मारेड मपाइब। 27 मेकोम फलाम कली पराल खोदेशो मिम्ब। कांसा कली राक्शो शी खोदेशो मिम्ब। 28 तेकोइ ब्राम मेको कली प्रोक्पाइक्ने मचाप्ब। हुरद डा फुल्लु मेको कली भूस खोदेशो बाक्ब। 29 थाल्ला मेको कली भूस खोदेशो बाक्ब। तूतीक शेशा बाक्शोनु, मेकोम रिश्शा कोव्रब। 30 मेको आ कोव्रजीम हेश्शो गम्टे खोदेशो बाक्ब। मेको गाक्मेनु दांदे पशो खोदेशो पा गाक्ब। 31 मेकोम समुन्द्र डा ब्वाक्कु कली ब्रुइश्शो खोदेशो सेल्ब। मिनु समुन्द्र कली ग्योबुम मलम खाल्शो खोदेशो पा खाल्ब। 32 मेको गाक्मेनु आ नोले टल्केशो लां प्रोंइशा गाक्ब। मेको लां ठेयब समुन्द्र डा बुश चां खोदेशो तांडसीब। 33 रागीम मेको नु उइक्थ मारेड मबाक्नीम। मेको हिंतीक मपाइश्शो बाक्ब। 34 मेकोमी ठेयब लेश्शो नेल्ल आन कली आइक्व मिम्ब। मेको ठेयब लेश्शो नेल्ल आन पिप बाक्ब” देंमाक्त।

अय्युब परमप्रभु कली तुइक्ब दुश्शो

42 मिनु अय्युबम परमप्रभु यावे कली 2 “गे मारेड मारेड पने चाप्नीनी, दे गो तुइक्नुड। इन मिम्शो मारेड मारेड सुडम क्याम्ने मचाप्नीम। 3 ‘दूली लोव्र पा अर्ती गेब सु बाक्म? मारेड मजोक्थु मार लोव्र पवा?’ देंतीनी गो थमा पा, आंमा मरुप्थु लोव्र पाता। मेको आं रुप्ने मचाप्थो थम छक लाक्वा डा बाक्नीम। अय्युब ३८:२ 4 मुल गो लोव्र पाइनुड। नेनीन। गो इन कली लोव्र हिल्लो पाइनुड। मिनु गो आं लोव्र लेत्तीनी। अय्युब ३८:४ 5 इन पबर्म नेशो ला बाक्ती। तन्न मुल गो इन कली ताता। अय्युब १९:२६-२७ 6 मोपतीके गो आं कली आइक्व मिम्ताक्ड। मिनु गो फुरक नु पुलुम बाक्शा, माफ पुंइनुड” दे अय्युबमी देंमाक्त।

अय्युब आ रिम्शो नाक्ती लेश्शो

7 मिनु परमप्रभु यावेम अय्युब नु लोव्र पने थुम्शा, मेकोम तेमान डा एलीफाज कली “गे नु इ वारच निक्शी इन कली तशा, गो गाइश्शो बाक्नुड। मारेदे हना गे आं पबर्म थमा लोव्र मपनी। तन्न आं गेय पाइब अय्युबमी आं पबर्म थमा लोव्र पाप्तु। 8 मोपतीके गे ७ ओटा ब्यफ नु ७ ओटा सांड लाइश्शा आं गेय पाइब अय्युब आ बाक्तीके लने। मिनु गेपुकीम इन पबर्म चोशा चढेतीक चढेने। मिनु आं गेय पाइब अय्युबमी इन पबर्म आं कली माफ पुंइचा माल्ब। मिनु गो मेको आ पुंइशो लोव्र नेंनुड। मिनु गे इन मूर्ख लोव्र पशो डा सजाइ मगेनन्नी। मारेदे हना गे आं पबर्म थमा लोव्र मपनी। तन्न आं गेय पाइब अय्युबमी आं पबर्म थमा लोव्र पाप्तु” देंमाक्त। १इतिहास १५:२६; इजीकीएल १४:१४ 9 मिनु तेमान डा एलीफाज, शुआह डा बिल्दाद नु नामा डा सोफारमी परमप्रभु यावेम देशो खोदेशो पामे बाक्त। मिनु परमप्रभु यावेमी अय्युब आ पुंइशो लोव्र नेना बाक्त।

10 मोपा अय्युबम आ वारच आन पबर्म पुना नोले, परमप्रभु यावेम अय्युब आ शोप नेल्ल लेश्शा गेवा बाक्त। मिनु मेको आ शोप नेल्ल, डोंइती डा क्येडा निक्शी खेयप शुश गेवा बाक्त। अय्युब १:२; अय्युब ८:७ 11 मेको नोले अय्युब आ लोक्ब नेल्ले, आ समी नेल्ले नु मेको आ डोंइती डा तुइश्शो मुर नेल्ल जाक्शा, मेको आ खिंम भोज जामे बाक्त। मिनु मेकोपुकीमी अय्युब कली “गे परमप्रभु यावे आ गुइ रे शुश श्येत नु मरिम्शो दुम्तीके ताइतीनी” दे मेको कली थम रिम्शो लोव्र पामे बाक्त। मिनु नेल्लेम मेको कली सुन के क्येट नु सुन के ओंठी गेमे बाक्त। अय्युब १९:१३-१४, १९ 12 मिनु परमप्रभु यावेम अय्युब कली आ नोले डा ब्रोंइशो नाक्ती कली आ डोंइती डा ब्रोंइशो नाक्ती क्येडा शुश आसीक गेवा बाक्त। मिनु मेको के १४ हजार भेडा, ६ हजार दलओंठ, हजार का हाल ब्यफ नु हजार का गधा दुम्मा बाक्त। 13 मिनु मेको के ७ जना तौ नु तमी सां दुम्मा बाक्त। अय्युब १:२ 14 मेकोमी आ डोंइती जरमेशो तमी आ नें येमीमाह, माइली आ नें केसीया नु कान्छी आ नें केरेन-हाप्पुक वोइक्मी बाक्त। 15 मिनु रागी नेल्लेम अय्युब आ तमी खोदेशो दारशो अरु सुइ मबाक्मा बाक्त। मिनु मेको आन आफोम मेको आन कली आन लोक्बपुकी नु उइक्थ उइक्थ पा शोप योक्शो गेमी बाक्त। गन्ती २७:८-११ 16 मेको नोले अय्युब सहे का ४० बर्स सम्म ब्रोंइमाक्त। मेकोम आ तौपुकी नु ४ पाला सम्म डा चच युइ नेल्ल तवा बाक्त। भजन संग्रह ९०:१० 17 मिनु नोले अय्युब आ नाक्त नेल्ल नेक्शा, शुश ब्रोंइशा खूशो दुम्शा बेक्माक्त। उत्पत्ती २५:८; उत्पत्ती ३५:२९; १इतिहास २९:२८

## भजन संग्रह

भजन संग्रह कली हिब्रू लोवमी “ठेयब सेल्टीक कुम्सो” देंनीम। १५० ओटा कुम्सोमी ७३ ओटा कुम्सो पिप दाऊदम ब्रेक्शो बाक्ब। २ ओटा भजन संग्रह सोलोमनमी सेल्शो बाक्ब। ५० ओटा कुम्सो आन ब्रेक्ब मुर मतुइसीब। लीशो २५ ओटा कुम्सो कोराह आ तौपुकी, आसाफ, मोसा, एथान नु हेमान आन सेल्शो बाक्नीम। भजन संग्रह आगामी ५ ओटा किताब बाक्नीम।

१. डोंइती डा किताब १-४१ सम्म मेको कली दाऊद आ किताब देंने चाम्सीब।

२. मेको आ नोले डा किताब ४२-७२ सम्म कोराह आ तौ आन सेल्शो कुम्सो रे गोइब। एकेर आसाफ, दाऊद नु अरु मतुइश्शो मुर आन के यो बाक्नीम। मेको कली कोराह आ तौ आन किताब देंनीम।

३. मेको आ नोले डा किताब ७३-८९ सम्म एकेर आसाफ आ ८ ओटा कुम्सो बाक्नीम। तन्न कोराह आ तौपुकी, दाऊद, हेमान नु एथान आन कुम्सो यो बाक्नीम। एको कली आसाफ आ किताब देंनीम।

४. मेको आ नोले डा किताब ९०-१०६ सम्म मोसा आ कुम्सो, दाऊद आ कुम्सो निक्शी नु मतुइश्शो मुर आन के १४ ओटा कुम्सो बाक्नीम। मोपतीके मेको कली मतुइश्शो मुर आन ब्रेक्शो किताब देंनीम।

५. नेल्ल क्येडा नोले डा किताबम १०७-१५० सम्म बाक्ब। एकेर २८ ओटाकुम्सो मतुइश्शो मुर, दाऊद आ १५ ओटा कुम्सो नु सोलोमन आ कुम्सो का बाक्नीम। एको किताब कली चाड डा कुम्सो किताब देंनीम।

एको कुम्सो नेल्ल गेना ब्रेक्शो बाक्नीमी, देंने मचाप्सीब। तन्न पिप दाऊद रे इजीकीएल सम्म ३०० बर्समी ब्रेक्शो बाक्नीम। का निक्शी कुम्सो मेको क्येडा माइत यो बाक्नीम।

भजन संग्रह डा लोव नेल्ल क्येडा शुश माइत नु नक लोव डा किताबम यहूदी आन ठेयब किताब बाक्ब। मेको शुश मुर आन पर्वम लोव बाक्ब हना यो, भजन संग्रह डा ठेयब लोव परमप्रभु यावे कली ठेयब सेल्टीक कुम्सो बाक्नीम।

### परमप्रभु कली टीब नु मटीब

१ सु परमप्रभु आ अरेशो लोव मटीब नु मगाक्बा, पापी आन लां मखोइक्बा नु परमप्रभु आ पर्वम शुक्शी पाइब नु मबाक्बा, मेको ग्येरसीशो मुर दुम्ब। भजन संग्रह २६:४; भजन संग्रह ११९:१; हितोपदेस ४:१४; येरमीया १५:१७ २ मेको मुरुमी परमप्रभु यावे आ अरेशो लोव दाक्शा, नाक्दो नाक्ती मेको कली मिम्ना मिम्न बाक्ब। भजन संग्रह ११९:१४८; यहोसु १:८

३ मिनु मेको मुर खोला आ नेक्था ख्रुम्शो रवा खोदेंशो बाक्ब। दोपा मेको आ फल सिट्ची ना सिब्बा नु आ सफा यो महेशु बाक्बा, मोपा मेको मुर आ पतीक नेल्ल रिम्शो बाक्ब। भजन संग्रह ९२:१३-१५; येरमीया १७:८

४ परमप्रभु आ अरेशो मटीबपुकी चहिं मोदेंशो मबाक्नीम। मेकोपुकी फशेमी बेरपाइश्शो भूस खोदेंशो बाक्नीम। ५ मिनु मेको निसाफ दुम नाक्ती जाम्शा लाइनीम। पापीपुकी ठीक पाइबपुकी नु बाक्बा मताइनीम।

६ परमप्रभु यावेमी ठीक पाइब आन कली लां कोंइब। आ अरेशो मटीब आन लां चहिं जाम्शा लाइब।

### परमप्रभु आ तौ आ सासन

२ मारदे रागी रागी डा मुर नेल्ल गारशा, परमप्रभु यावे आ पर्वम गाइक्नीमी? मारदे जात जात डा मुर जाम्शा लाइब मरिम्शो ला मिम्नीमी? प्रेरित ४:२५-२६; प्रकाश ११:१८ २ मारदे रागी डा पिपपुकी ठेयब मुरपुकी नु गारशा, परमप्रभु यावे नु आ तेल लुक्शा सोइश्शो आस पर्वम ३ “मेको आस देंशो मपय, मेको आस कली मटिय” दे लोव पमुइनीमी? येरमीया ५:५

४ मिनु स्वर्गम बाक्ब परमप्रभु चहिं मेको मुर आन कली तशा, रिब्ब। मेको आन पशो तशा शुक्शी पाइब। भजन संग्रह ५९:९ ५ मिनु नोले मेको गाइश्शा, लोव पाइब। मोपा चुरशा, मेको आन कली हिं च कोंइब। यसैया ३४:२; प्रकाश ६:१५-१७ ६ मिनु मेकोमी “गो आं सियोन डांडामी आं तेल लुक्शा सोइश्शो पिप कली वोइक्ता” देंत। जकरिया ८:३ ७ परमप्रभु यावेमी लोव पा आं कली “गे आं तौ नवे, मुलाक्ती गो इ कली सेल्ला” देंत। भजन

संग्रह ८९:२७-२८; रसामुएल ७:१४; प्रेरित १३:३३; हिब्रू १:५; हिब्रू १:५; हिब्रू ५:५

८ मिनु लेंशा परमप्रभु यावेमी आं कली “गे आं कली पुंइतीवी हना, गो रागी रागी डा मुर इ कली गेनुड। रागी डा सुर सम्म नेल्ल इ कली गेनुड। दानीएल ७:१३-१४; हिब्रू १:२ ९ गे मेको आन कली फलाम के कोक्केमी खप के सेल्शो ग्योब प्रोल्शो खोदेंशो पा प्रोल्नेवे” दे लोव पापु। प्रकाश २:२७; प्रकाश १२:५; प्रकाश १९:१५

१० मोपतीके गे पिपपुकी, जोक्ब तुइक्ब दुम्शा बाक्कीन। गे निसाफ पाइब हिंशा, होस पा रुप्ब दुमीन। ११ परमप्रभु यावे कली मान पा हिंशा, मेको आ देंशो गेय पने। हिंशा खिंखि पा मेको आ डोंइती ग्येरशा बाप्पीन। फिलिप्पी २:१२; हिब्रू १२:२८ १२ मिनु आ तौ आ डोंइती बाप्शा, आ खोइल पुक्पु पने। मेको गाइक्ताक्ब हना, गेपुकी लांमीन जाम्शा लाइनीनी। मो मपाइतीनी हना, गाइक्ता चिक्शो बाक्ब। सु सु मेको कली थमा सुइश्शा, आ नेक्था लाइनीमी, मेको ग्येरसीशो मुर दुम्नीमी।

### सुनी डा कुम्सो

आ तौ अब्बालोम रे प्रोक्म ना डा दाऊद आ कुम्सो। रसामुएल १५:-

३ परमप्रभु यावे, आं कली श्येत गेब शुश बाक्नीमी। आं जोरी सत्रु शुश बाक्नीम। २ मिनु मेकोपुकीमी आं पर्वम “परमप्रभुमी मेको कली श्येत रे मप्रोंइब” देंनीम। ठेयब सेंदा पा। ३ परमप्रभु यावे, गे आं एर ओंथ वोइश्शो तेक्तीके खोदेंशो बाक्नीनी। गे आं कली ठेयब सेल्पाइक्ब, आं थुं बारपाइक्ब नु आं पिया पोक्ब बाक्नीनी। उत्पत्ती १५:१ ४ गो परमप्रभु यावे कली ब्रेत्नुड। मिनु आं कली आ योवशो डांडा रे लोव लेक्ब। ठेयब सेंदा पा।

५ गो इप्शा, निन्द्रा पा, सेंसाक्यी, मारदे हना परमप्रभु यावे आं कली कोवब बाक्ब। भजन संग्रह ४:९ ६ गो आं कली हजार हजार मुरपुकीमी पुस्ताक्यीमी हना यो, महिनुड। भजन संग्रह २७:३

७ आं परमप्रभु यावे, बोक्कीन। आं परमप्रभु, आं जोरी सत्रु रे प्रोंइयीनी। मिनु गे मेको आन चोवचो राप्तीने। इन अरेशो लोव मटीब आन ख्रुड

जिक्तीने। गन्ती १०:३५<sup>८</sup> परमप्रभु यावे, गे मुर आन कली प्रॉइब बाक्नीनी। इन आसीक इन मुर नु बाक्ब। ठेयब सेंदा पा।

नाक्दो डा पुंडशो लोव

कुम्सो पपाइक्ब कली तार पाइश्शो ताप्तीके ताप्शा पतीक दाऊद आ कुम्सो।

4 गो इन कली लोव पडानु, आं कली लोव लेत्तीने। गे आं कली ठीक सेल्ब परमप्रभु बाक्नीनी। गो श्येत जडानु, आं कली बाक्तीक गेतीनी। गे आं कली शिशी पने। आं पुंडशो नेंशा गेयीनी।<sup>२</sup> गे मुरपुकी, गेना सम्म आं कली मान मपाइनीनी? गेना सम्म गेपुकी जाम्शा लाइब थोवक दाक्नीनी नु जोल पाइनीनी? ठेयब सेंदा पा।<sup>३</sup> परमप्रभु यावेमी आ कली टीब आन कली आ नेक्था वोइक्वा कली योव्रशो बाक्त्, दे तुइक्तीन। मिनु परमप्रभु यावेमी आं पुंडशो लोव नेंब।<sup>४</sup> गेपुकी गाइश्शा, पाप मपने। इन ब्राख्येम इप्शा, इन थुं नु लोव पने। मिनु सिक्सी पा बाक्तीन। ठेयब सेंदा पा। एफिसी ४:२६<sup>५</sup> मिनु परमप्रभु यावे कली ठीक पतीक चढेने। आ देंशो लोव थमा सुइश्शा पने। भजन संग्रह ५१:१९,२१; १पत्रुस २:५<sup>६</sup> शुश मुरुमी “सुमी आंइ कली रिश्शो बाक्वा गेबा” दे हिल्लो पाइनीम। परमप्रभु यावे, इन कुल डा छेडछेड आंइ तार ब्रपतीन। गन्ती ६:२५<sup>७</sup> मेकोपुकी नु अन्न नु अडगुर रस शुश बाक्त् हना यो, गे आं कली मेको आन क्येडा ग्येरपाइक्तीनी।<sup>८</sup> गो हेम पा बाक्शा, इप्शा निन्द्रा पाइनुड। मारदे हना परमप्रभु यावे, गे आं कली श्येत मजपाइक्थु, बाक्वा गेनीनी। भजन संग्रह ३:६

सुनी डा पुंडशो लोव

कुम्सो पपाइक्ब कली मुराली ताप्शा पतीके। दाऊद आ कुम्सो।

5 परमप्रभु यावे, आं देंशो लोव नेनीने। आं हुकयी पशो नेनीन।<sup>२</sup> आं पिप, परमप्रभु, आं ठेयब सेंदा नेनीने। मारदे हना गो इन कली लोव पा पुंडनुड।<sup>३</sup> परमप्रभु यावे, गे सुनी कना आं सेंदा नेनीनी। गो मार माल्नुडा, मेको इन कली पुंडशा, रिश्शा बाक्नुड।<sup>४</sup> मिनु गे मरिश्शो पाइब आन कली मदाक्ब परमप्रभु बाक्नीनी। इन अरेशो मटीब काइ यो गे नु बाक्ने मचाप्नीम।<sup>५</sup> ठेयब लेशशो मुरपुकी इन डोंइती राजे मचाप्नीम। गे मरिश्शो पाइब आन कली मदाक्नीनी।<sup>६</sup> गे जोल पाइब आन कली खतम पाइनीनी। मिनु हुश खाक्श पोक्ब नु थमा मसुइक्ब मुर आन कली ग्रांग दिक्तीनी।<sup>७</sup> गो चहिं इन गेना हना यो ठेयब दाक्तीकेमी इन खिं ओव्रचा ताइनुड। मिनु गो इन कली मान पा हिंशा, इन खिं गे कोव्रशा, पोक्ब थेक्शा ठेयब सेल्नुड। भजन संग्रह २६:८

<sup>८</sup> आं जोरी सत्रु शुश बाक्नीमी। मोपतीके आं कली इन ठीक पतीके लां कोंइदीने। आं डोंइती इन लां ठीक सेलीन।

<sup>९</sup> आं जोरी सत्रुमी जोल ला पाइनीम। आन थुंमी “दोपा खतम सेल्नुडा” दे ला मिन्नीम। आन लकचा मुर थिम्तीके खोदेंशो बाक्ब। मेकोपुकी मिलो शिलो पाइब बाक्नीम। रोमी ३:१३<sup>१०</sup> परमप्रभु, मेको आन मरिश्शो पशो आंम आन कली दुम्ल। मेको आन शुश मरिश्शो पशो आ पर्वम मेको आन कली इन डोंइती रे तिलीन। मारदे हना मेको इन कली मटीब बाक्तेक्म।<sup>११</sup> सुमी इन कली थमा सुइक्नीमी, मेको ग्येरसीनीम। मेकोपुकी गेना हना यो शुश ग्येरशा, इन खाल पतीकेमी ग्येरशा बाक्नीम। मिनु इन कली तुइश्शा, इन नें दाक्शा, ग्येरशा कुम्सो पाइनीम।<sup>१२</sup> मिनु परमप्रभु यावे, गे मेको ठीक पाइब आन कली आसीक गेनीनी। इन दाक्तीके मेको आन कली एर ऑथ वोइश्शो तेक्तीक खोदेंशो बाक्ब।

श्येत जाइब आ पुंडशो लोव

कुम्सो पपाइक्ब कली ८ ओटा तार पाइश्शो ताप्तीके ताप्शा पतीके दाऊद आ कुम्सो।

6 परमप्रभु यावे, गे आं कली तशा गाइक्ताक्नी हना यो, सजाइ मगेयीनी। गे गाइक्ताक्नी हना यो, आं कली श्येत मगेयीनी। येरमीया १०:२४<sup>२</sup> परमप्रभु यावे, गे आं कली शिशी पने। मारदे हना गो बेक्वा चिक्शो बाक्नुड। गे आं कली सापाइय्यीनी। मारदे हना आं खोइली खिंखि पाइब।<sup>३</sup> मिनु आं थुं यो हिंशो बाक्ब। परमप्रभु यावे, गे गेना सम्म आं कली मोदेंशो पा बाक्पाइक्नीनी?

<sup>४</sup> परमप्रभु यावे, गे आं गे लेतीने। इन गेना हना यो दाक्तीकेमी आं थुं बेक्वा रे प्रॉइयीनी।<sup>५</sup> मारदे हना बेक्शो नोले सुइ मुरुमी इन कली ममिन्नीम। मिनु बेक्शो मुर आन बाक्तीकेमी सुइमी इन कली ठेयब मसेल्नीमी। भजन संग्रह ३०:१०; भजन संग्रह ८८:११; भजन संग्रह ११५:१७-१८; यसैया ३८:१८<sup>६</sup> गो थुं खाइश्शा, डाक्शा दती। गो नाक्दो आं खाट नेल्ल प्रेक्कुमी जिप्पाइक्नुड। आं इप्तीकेमी डाक्शा ला बाक्नुड।<sup>७</sup> सुर्ता पतीके मिक्च मताइब खोदेंशो दुम्ती। मारदे हना आं जोरी सत्रु शुश बाक्नीम।<sup>८</sup> गे मरिश्शो पाइबपुकी, आं क्येडा डोन लने। मारदे हना परमप्रभु यावेमी आं डाक्शो नेंतु।<sup>९</sup> परमप्रभु यावेमी आं पुंडशो लोव नेंतु। मिनु परमप्रभु यावेमी आं पुंडशो गेब।<sup>१०</sup> आं जोरी सत्रु नेल्ल मुने दोक्शा, शुश श्येत जाइब दुम्नीम। मिनु मुने दोक्शा, आन बाक्तीके लेत्नीम।

परमप्रभु ठीक निसाफ पाइब

दाऊदमी बेन्यामीन थर डा कूश माइश्शो मुर रे श्येत जशा, परमप्रभु यावे आ डोंइती पशो कुम्सो।

7 परमप्रभु यावे, आं परमप्रभु, गो इन कली जिम्मा गेंसीनुड। मिनु खेदा पाइब नेल्ल आन गुइ रे आं कली प्रॉइयीनी।<sup>२</sup> गे आं कली मप्रॉइतीनी हना, मेकोपुकीमी आं कली गुप्सम खोदेंशो पा दिप्शा ब्वाइनीम। मिनु सुइमी आं कली मेको आन गुइ रे प्रॉइने मचाप्नीम।

<sup>३</sup> परमप्रभु यावे, आं परमप्रभु, मेको आन देंशो खोदेंशो पा, गो आं गुइमी मरिश्शो पाता हना, अय्युब ३१:७-३४<sup>४</sup> गो गे नु दुशा बाक्ब आन कली श्येत गेता हना, आं कली बिक्वीम श्येत गेमेनु, गो क्येक्क लेत्ताक्डमी हना,<sup>५</sup> आं जोरी सत्रुम आं कली खेदा पा ग्रामल। मिनु आं कली खपीम दिप्शा साइय्यीमील। मिनु आं नें जाम्शा लल। ठेयब सेंदा पा।

<sup>६</sup> परमप्रभु यावे, गे गाइश्शा, बोक्कीन। आं जोरी सत्रु आन पशो तशा, आं कली वारच पथ बोक्कीन। गे “गो निसाफ पचा माल्नुड” दे लोव पाइतीनी।<sup>७</sup> मिनु रागी रागी डा मुरपुकी इन डोंइती राजीम। मोपतीके इर डा इन बाक्तीकेम मेको आन कली निसाफ पचा कली इन ठेयब निक्तीकेमी निस्सीन।<sup>८</sup> परमप्रभु यावे जात जात डा मुर आन कली निसाफ पाइब बाक्ब। परमप्रभु यावे, आं ठीक पशो नु आं आगाम बाक्शो ठीक पाइब थुं तशा, आं कली निसाफ पने। भजन संग्रह १८:२१-२७<sup>९</sup> इन अरेशो मटीब आन मरिश्शो पतीके थुम्पतीन। मिनु नोले गे ठीक पाइब आन कली बोल्पो सेलीन। ठीक पाइब परमप्रभु, गे मुर आन थुं नु आन पतीके नाक्ब बाक्नीनी। भजन संग्रह १०४:३५; भजन संग्रह १३९:१; येरमीया ११:२०; प्रकाश २:२३<sup>१०</sup> परमप्रभु आं तेक्तीके बाक्ब। मेकोमी रिश्शो थुं पाइश्शो आन कली श्येत रे प्रॉइब।<sup>११</sup> परमप्रभु ठीक निसाफ पाइब बाक्ब। नाक्त् किंत किंत मेको पापी आन कली तशा गाइक्ब।<sup>१२</sup> थमा पा आ जोरी सत्रुम आन तरवार शेप्नीम। आन लिब्रा कीशा आप्चा कली ठीक पाइनीम। ब्यवस्था ३२:४१<sup>१३</sup> मिनु आन साइक्तीक या आंम कली ठीक पशो बाक्नीम। आन ब्राम मी ब्रपाइश्शो बाक्नीम।<sup>१४</sup> नेनीन, मेकोमी मरिश्शो ला मिन्नीम। मिनु श्येतम ब्रीशा, जोल पना पन बाक्नीम।<sup>१५</sup> मेकोपुकीमी बिक्तीक दोइनीम। मिनु नोले आंम आन दोशो बिक्तीकेमी आंमा बिक्नीम। हितोपदेस २६:२७<sup>१६</sup> मुर आन कली गेचशो श्येत आंमान जाइनीम। मेको आन हुश खाक्श पोक्शो आंम आन पियामीन मॉइसीब।

<sup>१७</sup> गो परमप्रभु यावे आ ठीक पशो तशा, मेको कली “गे रिश्शो पाइब बाक्नीनी” दे कुम्सो पाइनुड। गो परमप्रभु यावे, नेल्ल क्येडा ठेयब आ नें आ पर्वम कुम्सो पाइनुड।



## परमप्रभुम आ रिम्स कौडशो

कुम्सो पपाइक्व कली गित्तीथ कुम्सो आ लायो डा दाऊद आ कुम्सो।

8 परमप्रभु यावे, आंइ परमप्रभु, रागी नेल्लेमी इन नें ठेयब बाक्व। गे इन छेडछेड सरीड क्येडा आइक्वथा वोइक्तीनी। प्रस्थान ३:१३-१५  
2 आइक्व आल नु बुकलु आलपुकीमी इन कली ठेयब सेल्पांडसाक्नी। मोपा गे इन जोरी सत्रु नु क्येक्क लेख आन कली ब्वालेइ पपाइक्तीनी। मत्ती २१:१६<sup>3</sup> गो सरीड गे कोवडुनु, इन सेल्थो तास्ला नु सोरुल तातामी, 4 गे मोपा ठेयब थोवक सेल्लेनी हना, मुर आन पर्वम दोपा मिन्ने चाप्पीनी? दोपा मेको आन कली कोवनीनी। हिब्रू २:६-८<sup>5</sup> गे मुर आन कली इन स्वर्ग डा गेय पाइब आन क्येडा इक्का ला आइक्व सेल्लेनी। मुर आन कली मान नु छेडछेडमी सिरपेच गुप्शो खोदेंशो पा ग्योम्ताक्नी। हिब्रू २:६-८<sup>6</sup> मिनु इन सेल्थो मारेइ मारेइ आन कली हुकुम पाइब सेल्लेनी। मोपा मुर इन सेल्थो आन दातेमी नेल्ल क्येडा ठेयब बाक्व। उत्पत्ती १:२७<sup>7</sup> भेडा, बी ब्यफ, ब्वाकी डा जन्तु, 8 चिक्व, समुन्द्रमी बाक्व डांइ नु समुन्द्रमी मार मार बाक्वमा, मेको नेल्ल आन कली हुकुम पाइब सेल्लेनी। १कोरिन्थी १५:२७  
9 परमप्रभु यावे, आंइ परमप्रभु, रागी नेल्लेमी इन नें ठेयब बाक्व।

“गे रिम्सो पाइतीनी” दे कुम्सो पशो

कुम्सो पपाइक्व कली मुख-लाब्बेन कुम्सो आ लायो। दाऊद आ कुम्सो।

9 परमप्रभु यावे, गो आं थुं नेल्लेमी इन कली “गे रिम्सो पाइतीनी” दे इन कली ठेयब सेल्लुड। इन पशो छक लाक्वा डा गेय नेल्ल आन कली नेंपाइक्नुडमी। भजन संग्रह ४४:२<sup>2</sup> इन कली तुइश्शा, ग्येरनुड। शुश ग्येरशा, गो इन कली ठेयब सेल्लेक कुम्सो पाइनुड। गे नेल्ल क्येडा ठेयब बाक्नीनी। 3 आं जोरी सत्रु इन कली तशा, आन जाक्शो लां रे लेशशा प्रोक्शा लमानु, गुल गाल थिश्शा, साइक्वा पुंडसाक्म।  
4 मारदे हना गे ठीक निसाफ पाइब बाक्शा, इन ठेयब नित्तीकेमी निश्शो बाक्तीनी। मिनु आं ठीक गेय पशो तुइश्शा, गे आं कली निसाफ पाइतीनी।  
5 मिनु गे रागी रागी डा मुर आन कली हुइक्ताक्नी। इन अरेशो मटीब आन कली साइक्तीनी। मेको आन नें लेंशा ममिम्चा डा पा क्याम्ताक्नी।  
6 परमप्रभु, आं जोरी सत्रु आन खिं गेनायो मसेल्चा डा पा प्रेत्तीनी। गे मेको आन सहर हु हा प्रेत्तीनी। मिनु मेको आन नें यो काइ मलीथु, जाम्शा लत। भजन संग्रह ३४:१७

7 तन्न परमप्रभु यावे गेना हना यो बाक्व। निसाफ पचा कली आ ठेयब नित्तीके ठीक पशो बाक्व। 8 मिनु रागी रागी डा मुर आन कली आ ठीक पतीकेमी निसाफ पाइब। जात जात डा मुर आन कली आन कुल मकोवथु, निसाफ पाइब। 9 परमप्रभु यावे दिप्चा पुंडसीशो मुर आन कली बोल्यो दरवार खोदेंशो बाक्व। श्येत जशो आन कली बोल्यो खुइश्शा बाक्तीक बाक्व। 10 परमप्रभु यावे, इन नें तुइक्वपुकीमी इन कली थमा सुइक्नीम। मारदे हना गे इन कली माल्ब आन कली मप्रॉइनीनी। 11 सियोन डांडामी बाक्व परमप्रभु यावे कली ठेयब सेल्लेक कुम्सो पने। जात जात डा मुर आन कली आ पशो शेंदीने। 12 मिनु परमप्रभुमी मुर साइक्व आन कली आन क्येक्क लेख। मिनु श्येत जशो आन डाक्शो मिम्ब। उत्पत्ती ४:१०; उत्पत्ती ९:५; भजन संग्रह ७२:४; उत्पत्ती १६:११

13 परमप्रभु यावे, आं कली शिशी पने, आं कली मदाक्वपुकीमी गेशो श्येत कोवडुन। गे आं कली बेक्वा चिक्शो रे प्रॉइतीनी। 14 मिनु ब्रॉइशा, गो परमप्रभु आ योवशो सियोन डा ठेयब लाप्चोम मुर आन कली “परमप्रभुमी आं कली श्येत रे प्रॉइती” दे इन कली ठेयब सेल्था, ग्येरसीशा तुइक्वाइक्नुडमी। भजन संग्रह २२:२३; भजन संग्रह १३:६<sup>15</sup> रागी रागी डा मुरपुकी आंमा दोशो ठेयब खाल्टाम बिक्शो बाक्नीम। मिनु आन दाइश्शो ग्याइलीमी आंमा रेश्शो बाक्नीम।

16 परमप्रभु यावेमी मेको ठीक निसाफ पाइब बाक्व, दे मुर नेल्ल कली तुइक्वाइश्शो बाक्व। आ अरेशो मटीब मुर आंम आन पशोमीन खतम दुम्नीम। ताप्तीकेमी ठेयब सेंदा पा। 17 परमप्रभु आ अरेशो मटीब रागी रागी

डा मुरपुकी नु मटीबपुकी बेक्शो मुर आन बाक्तीकेम लाइब बाक्नीम। 18 परमप्रभुमी श्येत जाइब आन कली मप्रेंब। मिनु पुडग आन आस पशो गेना हना यो मिम्ब। भजन संग्रह २२:२५; भजन संग्रह १०:१७<sup>19</sup> परमप्रभु यावे, बोक्कीन। मुरपुकी मग्रामल। रागी रागी डा मुर इन डॉइती जाक्शा, निसाफ पचा पुंडसमल। गन्ती १०:३५<sup>20</sup> परमप्रभु यावे, मेको आन कली हिंपतीन। रागी रागी डा मुरपुकीमी “गो मुर ला बाक्नय” दे तुइक्वमेक्ल। ठेयब सेंदा पा।

थमा मसुइक्व आन शुक्शी पशो

10 परमप्रभु यावे, गो आंइ श्येत जची ना, मारदे डोन बाक्शा, खुइक्नीनी? 2 परमप्रभु आ अरेशो लोव मटीबपुकीमी ठेयब लेश्शो दुम्शा, पुडग आन कली खेदा पाइनीम। मेको आन मरिम्शो मिम्तीके नु आन पतीकेमी ग्याइक्वा पुंडसीनीम। 3 परमप्रभु आ अरेशो लोव मटीबपुकीमी “आं दला दाक्स नेल्ल पने चाप्नुड” दे ठेयब लेल्लेनीम। लोभी आन कली आसीक गेनीम। मिनु परमप्रभु यावे कली मान मपथु, महिंथु, मेको आ पर्वम शुक्शी लोव पाइनीम। 4 मिनु ठेयब लेश्शा, आन थुंमी “परमप्रभुमी आंइ कली मरिम्शो मसुइक्व। मारदे हना मेको मबाक्व” दे मिम्नीम। 5 मोपा यो मारेइ मारेइम गाप्शा श्येत मजाइनीम। मारदे मेकोपुकीमी इन निसाफ पशो मताइनीमी? मेकोपुकीमी आन जोरी सत्रु आन क्येडा महिंथु मेको आन कली ग्रानीम। आमोस ६:३<sup>6</sup> मिनु मेकोपुकीमी आन थुंमी “गो श्येत मजाइनुड। आं चच युइ सम्म यो श्येत मजाइनीम” दे मिम्नीम। भजन संग्रह ७३:६-८<sup>7</sup> मेको मुरपुकीमी सराप नु जोल पना पन बाक्शा, अरु आन कली दिप्शो बाक्नीम। मेको आन लोवमी श्येत नु मरिम्शो ला दुम्पाइक्नीम। रोमी ३:१४<sup>8</sup> मेकोपुकीमी गाउं मेर खुइश्शा बाक्शा, दोस मताइब आन कली साइक्नीम। श्येत जाइब आन कली यो बाप्शा बाक्नीम। 9 गुप्स ब्वाकीम बाप्शो खोदेंशो पा खुइश्शा, पुडग आन कली रिम्नीम। पुडग आन कली आन ब्वारदम रेश्शा ग्याइक्नीम। 10 मिनु मेको गु बाप्शा बाक्नीम। श्येत जाइबपुकी मेको आन सक्तिमी गोल्नीम। 11 मेको आन थुंमी “परमप्रभुमी आंइ पशो मताइब। आ कुल खुइक्ताक्व, आंइ पशो प्रेंब” दे मिम्नीम। भजन संग्रह ७३:११; भजन संग्रह ९४:७; यसेया २९:१५

12 परमप्रभु यावे, परमप्रभु, बोक्कीन। परमप्रभु, इन गुइ क्युक्शा मरिम्शो पाइब आन कली सजाइ गेने। दिप्चा पुंडसीशो आन कली मिम्शा, वारच पने। गन्ती १०:३५<sup>13</sup> मारदे मेको इन अरेशो मटीब मुरपुकीमी परमप्रभु कली शुक्शी पाइनीमी? मारदे मेकोपुकीमी “आं कली दोसी मसुइक्व” दे मिम्नीमी? 14 परमप्रभु, गे नेल्ल ताइतीनी। गे श्येत जाइब नु मरिम्शो पाइक्वा पुंडसीब आन कली वारच पाइश्शा, क्येक्क लेख बाक्नीनी। मेको श्येत जाइबपुकी इन कली जिम्मा गेंसीशो बाक्नीम। गे रोम रोइक्व आन कली वारच पाइब बाक्नीनी। भजन संग्रह ६८:६; प्रस्थान २२:२२<sup>15</sup> गे इन अरेशो मटीब नु काइ मरिम्शो पाइब आन गुइ जिक्तीन। मेको आन खुइश्शा मरिम्शो पशो कली निसाफ पने! मिनु मोदेंशो नोले मलीनीम। अय्युब ३८:१५<sup>16</sup> परमप्रभु यावे गेना हना यो पिप बाक्व। रागी रागी डा मुरपुकी आ राज्य रे दिल्ला, जाम्शा लाइनीम। 17 परमप्रभु यावे, गे ब्रेम्शो मुर आन पुंडशो लोव नेंतीनी। गे मेको आन थुं बारपाइश्शा, आन पुंडशो लोव नेंचा कली नोफा दाइश्शा बाक्तीनी। 18 गे रोम रोइक्व नु दिप्चा पुंडसीशो मुर आन पर्वम ठीक निसाफ पाइनीनी। मो दुम्नेनु, मुरपुकीमी अरु आन कली लेंशा श्येत मगेनीम।

परमप्रभु ठीक पाइब बाक्व

कुम्सो पपाइक्व कली दाऊद आ कुम्सो।

11 गो परमप्रभु यावे कली जिम्मा गेसाक्वी। गेपुकीम आं कली “चिक्व खोदेंशो पा पहाडम बेरो” दे दोपा देंने चाप्पीनी? 2 नेनीन, इन अरेशो मटीबपुकीमी आन लिब्रा कीशा, आन ब्रा डोरीम वोइश्शा, ठीक पाइब रिम्शो थुं पाइश्शो मुर आन कली खुइश्शा आप्नीम। 3 जगन ब्रेत्त हना, ठीक पाइबम मार पने चाप्पा डा? 4 परमप्रभु यावे आ खिंमी बाक्व।

आ ठेयब नित्तीके स्वर्गम बाक्ब। मिनु उइ कोव्रना कोव्रन मुर आन कली नाक्ब। हाबाकुक २:२०; यसैया ६६:१; भजन संग्रह ३३:१३-१४<sup>५</sup> परमप्रभु यावेमी ठीक पाइब नु आ अरेशो मटीब आन कली नाक्ब। मिनु हुश खाक्श पोक्वा दाक्ब आन कली काइ मदाक्ब।<sup>६</sup> परमप्रभुमी आ अरेशो मटीब आन तारी मी नु गन्धक यिपाइक्ब। मिनु मेको आन तारी होश फश पपाइक्ब। मरिश्शो पाइब मोदेशो पाइक्वा पुंइसीशो बाक्नीम।<sup>७</sup> परमप्रभु यावे ठीक पाइब बाक्ब। मोपतीके ठीक पतीके दाक्ब। मिनु रिश्शो थुं पाइश्शो मुरपुकीमी आ कुल ताइनीम। मत्ती ५:८

मरिश्शो पाइब आन पबर्म लोव

कुम्सो पपाइक्ब कली ८ ओटा तार पाइश्शो ताप्तीके ताप्शा पतीके दाऊद आ कुम्सो।

12 परमप्रभु यावे, वारच पाइक्की। इन लां खोइक्ब जाम्शा लाम्तेक्म। मुर आन दातेमी इन कली थमा सुइक्बपुकी यो मबाक्नीम।<sup>२</sup> नेल्लेमी आन नेक्था डा मुर नु जोल ला पमुइनीम। चिप्लो लोव पाइब थुं निक्शी पाइश्शो ला बाक्नीम।<sup>३</sup> परमप्रभु यावेमी, मिलो शिलो पाइब नु ठेयब लेशो लोव पाइब नेल्ल आन कली क्याम्दल।<sup>४</sup> मोदेशो ठेयब लेशो लोव पाइबपुकीमी “आंइ लोवमीन ग्रानीकी। गो जोक्ब तुइक्ब बाक्नीकी। आंइ प्रभु सु बाक्बा डा?” देंनीम। भजन संग्रह ७३:८-९; अय्युब २१:१४-१५

<sup>५</sup> परमप्रभु यावेमी “गो प्रुडग आन कली दिप्शो ताता। श्येत जाइब आन डाक्शो नेंता। मोपतीके गो मुल बोक्नुड, मेको आन कली श्येत मजतीकेम वोइक्नुड” देंब।

<sup>६</sup> परमप्रभु यावे आ लोव थमा बाक्ब। मेको ७ खेयप यपाइश्शो क्येख चांदी खोदेशो बाक्ब।

<sup>७</sup> परमप्रभु यावे, गे इन मुर आन कली कोव्रशा, आंइ कली मरिश्शो पाला डा मुर रे प्रोइकी।<sup>८</sup> मारदे हना मुर आन दातेमी इन अरेशो मपाइब शुश दुम्शा, मरिश्शो पाइबपुकी तेइ तेइ ब्रशो बाक्नीम।

“वारच पने” दे पुंइशो

कुम्सो पपाइक्ब कली दाऊद आ कुम्सो।

13 परमप्रभु यावे, आं कली गेना सम्म प्रेंनीनी? गेना सम्म इन कुल खुइक्नीनी? भजन संग्रह ७७:८; हाबाकुक १:२<sup>२</sup> गो गेना सम्म सुर्ता पा, नाक्त कित कित आं थुं खाइश्शा बाक्वा माल्नुडा? आं जोरी सत्रु गेना सम्म आं क्येडा बोल्यो बाक्नीमी?

<sup>३</sup> परमप्रभु यावे, आं परमप्रभु, आं कली मिश्शा, आं लोव लेत्तीनी। आ बोल लेंशा गेयीनी। मो मपाइतीनी हना, गो बेक्नुड।<sup>४</sup> मोदेशो दुम्मेनु, आं जोरी सत्रु “गो मेको कली ग्रानीकी” दे आं कली हिम्सीशो तशा, ग्येरसीनीम।

<sup>५</sup> तन्न गो “गे गेना हना यो दाक्ब बाक्नीनी” दे थमा सुइक्नुड। इन वारच पा प्रोइतीके तशा, आं थुं ग्येरना ग्येरन बाक्ब।<sup>६</sup> परमप्रभु यावेमी आं कली रिश्शो वारच पाइक्ती। गो मेको कली कुम्सो पाइनुड।

थमा मसुइक्ब आन ब्रुतीके

कुम्सो पपाइक्ब कली दाऊद आ कुम्सो। भजन संग्रह ५३:-

14 मूर्खपुकीमी “परमप्रभु मबाक्ब” दे मिम्नीम। मेकोपुकी ग्रांग दिचा डा दुम्शा, मरिश्शो गेय पाइनीम। मेको आन दातेमी रिश्शो पाइब सुइ मबाक्नीम।<sup>२</sup> परमप्रभु यावेमी स्वर्ग रे मुर आन कली कोव्रब। मारदे कोव्रब देंशा हना, मुर आन दातेमी जोक्ब तुइक्ब परमप्रभु कली माल्ब, सुइ बाक्मा को, दे कोव्रब।<sup>३</sup> तन्न मुर नेल्ल परमप्रभु कली प्रोइशा, दूली पाइब दुम्तेक्म। रिश्शो पाइब का यो मबाक्नीम। उत्पत्ती ६:१२; रोमी ३:१०-१२

<sup>४</sup> मरिश्शो पाइबपुकीमी परमप्रभु यावे कली मतुइक्नीम। आ मुर आन कली शोब्ले जशो खोदेशो पा नेक्नीम। मेकोपुकीमी परमप्रभु यावे कली यो मपुंइनीम। मीका ३:३<sup>५</sup> मिनु नोले मेकोपुकी शुश हिंशा, खिंखि पाइनीम। मारदे हना परमप्रभु ठीक पाइब आन दातेमी बाक्ब।<sup>६</sup> मुरपुकीमी प्रुडग आन मिश्शो बिग्रेचा दाक्नीम। तन्न परमप्रभु यावे मेको आन खुइक्तीके बाक्ब।

<sup>७</sup> सियोन रे इस्त्राएली आन ब्रोंइतीके तामेक्ल। परमप्रभु यावेमी आ मुर आन कली प्रोनानु, याक्ब आ चच युइ, इस्त्राएली नेल्ल ग्येरसीमल। भजन संग्रह १२६:१

सु परमप्रभु नु बाक्ने चाप्बा डा?

दाऊद आ कुम्सो। भजन संग्रह २४:२-६; यसैया ३३:१४-१६

15 परमप्रभु यावे, इन बाक्तीकेमी सु बाक्ने चाप्बा डा? इन डांडाम सु बाक्वा ताइबा डा? उपदेसक ४:१७

<sup>२</sup> सुमी रिश्शो पना पन बाक्शा, ठीक गेय ला पाइबा नु आ थुं नेल्लेमी थमा लोव ला पाइबा,<sup>३</sup> सुमी अरु आन लोव मपाइबा, आ नेक्था डा मुर आन कली काइ मरिश्शो मपथु, शुक्शी मपाइबा,<sup>४</sup> सुमी परमप्रभु आ अरेशो मटीब आन कली महिक्थु, परमप्रभु यावे कली मान पा हिंब आन कली चहिं हिक्ना हिक्न बाक्बा, कसम जशा, श्येत दुम्मेनु यो, आ कसम जशो मप्रोइथु बाक्बा,<sup>५</sup> सुमी क्येट जेर गेशा, चाइक्ब मताक्बा, सुमी दोस मताइब कली श्येत गेचा कली घूस मजाइबा, मोदेशो मुर गेना हना यो महिम्सीथु, परमप्रभु यावे आ बाक्तीकेम बाक्वा ताइब। प्रस्थान २२:२४; ब्यवस्था २३:२०-२१

दाऊदमी परमप्रभु नु लोव पशो

दाऊद आ कुम्सो।

16 “परमप्रभु, आं कली कोव्रयीनी। मारदे हना गो इन कली जिम्मा गेंसीशो बाक्नुड।<sup>२</sup> गो परमप्रभु यावे कली ‘गे आं परमप्रभु बाक्नीनी। गो इन क्येडा अर्को मारदे रिश्शो मतुइक्नुड’ देंती। भजन संग्रह ७३:२५<sup>३</sup> रागीम बाक्ब इन योव्रशो मुर, थमा पा ठेयब मुर बाक्नीम। गो मेको मुर आन कली तशा ग्येरसीनुड।<sup>४</sup> मिनु देवी देवता आन नोले खोइक्ब आन श्येत बारना बारन लाइब। मेको आन तूतीक चढ़ेतीक डा हुश गेनायो मचढ़ेनुड। मेको आन नें यो मथीनुड।

<sup>५</sup> परमप्रभु यावे, गे आं भाग बाक्नीनी। मिनु आं कचौरा प्रिंनीनी। गे आं थेरशो रू कोव्रब बाक्नीनी। भजन संग्रह ७३:२६; गन्ती १८:२०; बिलाप ३:२४<sup>६</sup> इन गेशो रू रिश्शो बाक्ब। गो थम रिश्शो शोंप ताता।<sup>७</sup> आं कली अर्ती गेब, परमप्रभु यावे कली ठेयब सेल्लुड। नाक्दो यो आं थुमी आं कली मोदेशो पचा शेंब।<sup>८</sup> गो परमप्रभु यावे कली गेना हना यो आं डोंइती वोइक्ता। मोपा मेको आं ग्युरा गे बाक्मेनु, गो महिम्सीनुड। प्रेरित २:२५-२८

<sup>९</sup> मोपतीके आं थुं ग्येरसीब। गो आं थुमी कुम्सो पाइनुड। गो महिंथु बाक्ने चाप्नुड।<sup>१०</sup> मारदे हना गे आं कली बेक्वा मगेनीनी। इन योव्रशो कली राक्वा मगेनीनी। प्रेरित १३:३५<sup>११</sup> गे आं कली ब्रोंइतीक लां कोंइनीनी। गो इन डोंइती बाक्डानु, आं थुं ग्येरतीकेम ब्रीब। इन ग्युरा गे बाक्डानु, गेना हना यो थम रिश्शो दुम्नुड” दे लोव पाता।

परमप्रभु कली “वारच पने” देंशो

दाऊद आ पुंइशो लोव।

17 “परमप्रभु यावे, गे ठीक पशो आ पबर्म आं लोव नेनीन। आं ब्रेशो नेनीन। आं जोल मपथु पुंइशो लोव इन नोफा दाइश्शा नेनीन।<sup>२</sup> आं ठीक दुम्तीके इन लां रे जाक्मल। गे आं ठीक पतीके ताइनीनी। भजन संग्रह ४३:१<sup>३</sup> गे आं कली नाक्ताक्नी। नाक्दो यो आं कली नाक्शा, आं आगामी मारदे मरिश्शो मथिन्नी। गो मरिश्शो लोव मपाइनुड, दे आं थुं फ्रेंशा बाक्ती। भजन संग्रह १३९:१<sup>४</sup> मुर आन पतीके तशा, गो इन लोव

मिम्शा, हुश खाक्श पोक्ब आन लां मखोइक्नुड। 5 आं खोइली मग्नेक्वा डा पा इन लांम थेक्शो बाक्ती।

6 गो इन कली लोत्र पाता, मारदे हना गे आं लोत्र नैनीनी। परमप्रभु, इन नोफा आं गे दाइश्शा, आं लोत्र नैनीनी। 7 आं कली इन गेना हना यो दाक्तीक इन ग्युरा गुइमी इन कली थमा सुइक्ब आन कली आन जोरी सत्रु रे प्रॉइनीनी। 8 मिक्च दोदेशो रिम्शो पा वोइश्शो बाक्बा, मोदेशो पा आं कली यो रिम्शो पा वोतीन। इन फ्रां आगाम पुत्तीनी। *ब्यवस्था ३२:१०; भजन संग्रह ६१:५; भजन संग्रह ६३:८; प्रस्थान ३७:७-९* 9 मोपा इन अरेशो मटीब, आं कली साइक्वा कली पुम्बपुकीमी आं कली मथिल्लीम। 10 मेको आन थुं खकटा पा, ठेयब लेशो लोत्र ला पाइनीम। 11 गो ते लती हना यो, मेकोपुकीमी आं कली पुम्नीम। आं कली साइक्वा माल्लीम। 12 मेकोपुकी शोव्रलु बेक्शो गुप्स खोदेशो बाक्नीम। ठिटा गुप्सम बाप्शो खोदेशो पा बाप्शो बाक्नीम।

13 परमप्रभु यावे, बोक्कीन। मेको आन कली दोक्पतीन। आं कली इन तरवारमी इन अरेशो मटीब मुर रे प्रॉइयीनी। *गन्ती १०:३५* 14 परमप्रभु यावे, इन गुइमी रागी दाक्ब मुर आन गुइ रे प्रॉइयीनी। मेकोपुकी मबेक्मा सम्म रिम्शो ला ताइनीम। गे मेको आन कोव्रज ब्रोव्रशो थोव्रकम प्रिनीनी। मेको आन तौपुकी यो रूश्री जाइनीमी। मिनु आन लीशो मारेइ मारेइ आन तौपुकीम ताइनीम। 15 गो चहिं ठीक पा बाक्शा, थमा पा इन कुल ताइनुड। सुनी सेंसीशा, इन कली तशा, रूशो खोदेशो दुम्शा, ग्येरसीनुड" देंती।

परमप्रभु कली ठेयब सेल्शो

*कुम्सो पपाइक्ब कली परमप्रभु यावे आ गेय पाइब दाऊद आ कुम्सो। परमप्रभु यावेमी दाऊद कली आ जोरी सत्रु नु सावल आ गुइ रे प्रोना नोले दाऊद आ पशो कुम्सो।*

२सामुएल २२:-

18

परमप्रभु यावे, गे आं सक्ति बाक्नीनी। गो इन कली दाक्नुड। 2 परमप्रभु यावे आं सेरथे फुल्लु, आं बोल्यो दरवार नु आं जोरी सत्रु रे प्रॉइब बाक्ब। आं परमप्रभु, गे आं खूइक्तीके सेरथे फुल्लु बाक्नीनी। परमप्रभु आं तेक्तीके नु आं कली ग्येरपाइक्ब, आं कली प्रॉइब नु आ बोल्यो दरवार बाक्ब। *ब्यवस्था ३२:१८* 3 गो परमप्रभु यावे नु लोत्र पाइनुड। मेको ठेयब सेल्चा पुंडसीब बाक्ब। मेकोम आं कली आं जोरी सत्रु रे प्रॉइब।

4 गो साइक्वा पुंडसीचशो दुम्शा, हेरा बेक्ती। आं कली साइक्ब ब्वाक्कु आ छाल खोदेशो पा जाक्शा, हिंपाइक्ती। *भजन संग्रह ११६:३* 5 थमा पा साइक्वा पुंडसीब दुम्ती। साइक्बमी आं कली ब्वारदम खोदेशो पा रुक्ताक्वी। 6 गो श्येत जडानु, परमप्रभु यावे कली "वारच पने" दे आं परमप्रभु कली ठेयब सेंदा पा पुंडता। मिनु परमप्रभु आ बाक्तीकेम बाक्शा, आं सेंदा नैतु। आं पुंडशो लोत्र र्फुत।

7 रागी हिम्शा, खिनु कुत। मिनु डांडा नेल्ल हिम्साक्म। मारदे हिम्साक्म देंशा हना, परमप्रभु आ गाइक्तीकेम हिम्साक्म। 8 आ नें रे कुन कुत। आ शोव्र रे ठेयब मी गूशा, ब्रशो कोइला हुरर पा बेरतेक्म। *प्रस्थान १९:१८* 9 मिनु परमप्रभु सरीड रे यित। आ खोइल आगामी क्येर गोस्स के छिडछिड बाक्त। *भजन संग्रह १४४:५-७* 10 मेको करूब का डोइश्शा, फशेम बेरत। *भजन संग्रह ९९:१* 11 छिडछिडमी खूइश्शा, आ एर ओथ नेल्ल ब्वाक्कु कुरशो क्येर गोस्स बाक्तेक्म। 12 परमप्रभु आ छेडछेड रे मुप्स, मी ब्रशो कोइला नु चिला खोदेशो पा गोस्स गूतेक्म। 13 परमप्रभु यावेमी सरीड रे बुंबु पशो खोदेशो पा आ सेंदा नैपाइश्शो बाक्त। 14 मिनु मेकोमी आ ब्रा आबानु, आं जोरी सत्रु ब्रपाइक्तीमी। ठेयब चिला पपाइश्शा, प्रोक्पाइक्तीमी। 15 परमप्रभु यावे इन हुइक्तीकेमी नु इन नें रे गूशो सोक्तामी समुन्द्र नु रागी आ जग गूत।

16 परमप्रभुमी इर रे आं गुइ ग्याइश्शा, ठेयब ब्वाक्कु रे कीशा गुंडताक्वी। 17 मिनु आं कली मदाक्बपुकी नु आं क्येडा बोल्यो जोरी सत्रु रे प्रॉइती। 18 श्येत जडा नाक्त आं जोरी सत्रुम पुम्ताक्वीमी, तन्न परमप्रभु यावेमी वारच पाइक्ती। 19 मिनु आं कली प्रॉइशा, रिम्शो ब्रॉइशा बाक्तीकेम चाक्ती। मारदे हना आं कली दाक्शो बाक्त।

20 गो दोदेशो पा ठीक पडा, मोदेशो पा परमप्रभु यावेमी आं कली पाप रे डोन बाक्शो तशा, आं कली रिम्शो पाइक्ती। 21 मिनु गो परमप्रभु यावे आ लां गाक्शा, आ अरेशो टिशा, आं परमप्रभु रे नोले मशॉइसीड। 22 आ पतीके लोत्र नेल्ल आं डोंइती बाक्तेक्म। गो मेको आ फुल्लुम मुशा ब्रेक्शो लोत्र का यो मप्रोनो। 23 मिनु मेको आ डोंइती गो दोस मताइब बाक्ती। मिनु गो ठीक मपतीके रे डोन बाक्ती। 24 गो दोदेशो पा ठीक पडा, मोदेशो पा परमप्रभु यावेमी आं कली आ डोंइती पाप रे डोन बाक्शो तशा, रिम्शो पाइक्ती। 25 गे जमान खाक्ब आन कली जमान खाक्ब बाक्नीनी। गे ठीक पाइब आन कली इन ठीक पतीके कोंइनीनी। 26 गे पाप रे डोन बाक्ब आन कली इन पाप रे डोन बाक्तीके कोंइनीनी। तन्न गे दूली पाइबपुकी नु काइ मगारनीनी। 27 गे दिप्चा पुंडसीशो मुर आन कली श्येत रे प्रॉइनीनी। मिनु ठेयब लेशो मुर आन कली आइक्ब सेल्नीनी। *अय्युब २२:२९* 28 गे आं बती ब्रपाइक्तीनी। परमप्रभु यावे, आं परमप्रभु, गे आं छिडछिड कली छेडछेड सेल्नीनी। 29 इन वारच पाइक्तीके गो शुश जोरी सत्रु नु ग्रानुड। इन वारच पाइक्तीके गो ठेयब गारो प्रेक्शा खाक्ने चाप्नुड।

30 परमप्रभु आ लां ठीक बाक्ब। परमप्रभु यावे आ लोत्र क्येख सुन खोदेशो बाक्ब। सु सु मेको कली जिम्मा गेंसीनीमी, मेको आन कली तेक्तीक बाक्ब। 31 परमप्रभु यावे क्येडा अर्को सु परमप्रभु बाक्बा डा? आंइ परमप्रभु क्येडा अर्को तेको सेरथे फुल्लु बाक्बा डा? 32 परमप्रभुमी आं कली शुश सक्ति पाइश्शो सेल्ती। मेकोमी आं लां ठीक सेल्ब। 33 मेकोमी आं खोइली किश्श आ खोइली खोदेशो सेल्शा, लाइश्शो इर डा बाक्तीकेमी राप्पाइक्ती। 34 मेकोमी आं कली लडाइ पचा नु आं गुइ कली कांसा के लिब्रा खुक्वा शेंब। 35 गे ब्रॉइतीके डा इन तेक्तीक आं कली गेतीनी। इन ग्युरा गुइमी आं कली वारच पाइश्शा, ठेयब सेल्तीनी। 36 आं लां ठेयब सेल्तीनी। मोपतीके आं खोइली मग्नेक्वु, गाक्ने चाप्नुड।

37 गो आं जोरी सत्रु आन कली खेदा पा थित्तामी। मेको आन कली साइक्ने मथुमु सम्म गो मलेडड। 38 गो मेको आन कली बोक्ने मचाप्चा डा पा तुप्तामी। मेकोपुकी आं खोइलीम गोल्तेक्म। 39 मारदे हना गे आं कली लडाइ पचा कली शुश सक्ति गेतीनी। आं जोरी सत्रु आन कली आं खोइलीम बाप्पाइक्तीनी। 40 गे आं जोरी सत्रु आन कली प्रोक्पाइक्तीनी। मिनु गो आं कली काइ मदाक्ब आन कली साइक्तामी। 41 मेकोपुकीमी "वारच पाइक्ती" दे ग्रीमानु, मेको आन कली प्रॉइब सुइ मबा। परमप्रभु यावे कली पुंडतेक्म हना यो, मेकोमी मेको आन कली लोत्र मलेत्त। *हितोपदेस १:२८* 42 मिनु गो मेको आन कली फशेम बेरपाइश्शो फुरक खोदेशो पा फस सेल्तामी। गो मेको आन कली लां डा ग्रांरा खोदेशो पा ताइक्ताक्डमी। 43 गे मुर आन साइक्तीक रे आं कली प्रॉइतीनी। रागी रागी कली सासन पाइब सेल्तीनी। आं मतुइश्शो जात डा मुरपुकी आं गेय पाइब दुम्तेक्म। 44 आं अरेशो नेन्मेनु, मेकोपुकीम टिम्तेक्म। अर्को रागी डा मुरपुकी आं डोंइती बाप्तेक्म। 45 अर्को रागी डा मुरपुकी खिंखि पा हिंशा आन बोल्यो दरवार रे गूतेक्म।

46 परमप्रभु यावे ब्रॉइशा बाक्ब आं सेरथे फुल्लु ठेयब दुम्ल। आं कली प्रॉइब परमप्रभु मान ताइब बाक्ल। 47 परमप्रभुमी आं कली क्येक्क लेत्तीक सक्ति गेशा, जात जात डा मुर आन कली आं सासनम बाक्ब सेल्तु। 48 मेकोमी आं जोरी सत्रु रे प्रॉइती। मेको आन क्येडा आं कली ठेयब सेल्ती। मिनु आं कली दिप्शा हुश खाक्श पोक्ब आन क्येडा प्रॉइती।

49 मोपतीके परमप्रभु यावे, रागी रागी डा मुर आन दातेमी गो इन नें ठेयब सेल्शा, इन कली कुम्सो पाइनुड। *रोमी १५:९* 50 परमप्रभुमी आ पिप कली शुश ग्राब सेल्तु। आ तेल लुक्शो पिप दाऊद नु आ चच युइ आन कली गेना हना यो दाक्ब। *२सामुएल ७:१२-१६*

परमप्रभु आ सेल्शो नेल्ल रिम्शो बाक्ब

*कुम्सो पपाइक्ब कली दाऊद आ कुम्सो।*

19 सरीडमी परमप्रभु आ छेडछेड आ पर्बम लोत्र पाइब। सरीड आ ठेयब दुम्तीकेमी परमप्रभु आ गेय आ पर्बम लोत्र पाइब। *रोमी १:१९-२०* 2 नाक्त कामी अर्को नाक्त कली शेंब। नाक्दो कामी अर्को नाक्दो

कली देंब। 3 मारेइ लोत्र मबाक्ब। ब्वाक्शो यो मनैसीब। 4 मो हना यो रागी नेल्ले म तुइक्कीम। मेकोमी सरीडम नां कली बाक्तीक सेल्लु। रोमी १०:१८  
5 मेको नां ग्युबे पचा चिक्शो ग्युम्ले खोदेशो बाक्ब। मेको ग्येरसीशा आ लां गाक्ब। 6 मेको पूर्व रे दाप्शा, तेइ तेइ हिरसीब। मेको आ नाप्शो रे मारेइ खुइश्शा लीने मचाप्पीम।

7 परमप्रभु यावे आ अरेशो लोत्र नेल्ल आन कली गारब। मेकोमी लेंशा ब्रॉइपाइक्ब। परमप्रभु यावे आ देंतीके थमा लोत्र बाक्ब। मेकोमी मतुइक्ब आन कली तुइक्ब सेल्लु। 8 परमप्रभु यावे आ ब्रेक्शा अरेशो लोत्र ठीक बाक्शा, मुर आन थुं ग्येरपाइक्ब। परमप्रभु यावे आ शेंशोमी मुर मिक्च ताइब दुम्नीम। 9 परमप्रभु यावे कली मान पा हिंचा रिम्शो दुम्शा, गेना हना यो लीब। परमप्रभु यावे आ निसाफ पतीक लोत्र थमा नु गेना हना यो ठीक बाक्नीम। 10 मेको सुन क्येडा यो शुश माल्चा डा, क्येख सुन क्येडा यो क्येट लाइब खोदेशो बाक्ब। मेको चाका रे याप्शो खुदो क्येडा यो जिज बाक्ब।

11 मेकोमी इन गेय पाइब कली होस पा बाक्पाइक्ब। मेको लोत्र टीबपुकीम ठेयब इनाम ताइनीम। 12 आ मतुइक्थु दूली पशो, सुम तुइक्बा डा? आं मतुइक्थु मरिम्शो पशो माफ गेयीनी। अय्युब ४२:३-६ 13 इन गेय पाइब कली ठेयब लेश्शो दुम्तीक रे तेक्कीन। ठेयब लेश्शो दुम्तीकेमी आं कली हुकुम मपवल। मोपा गो दोस नु हेंथे पतीक रे ब्रॉइनुड।

14 परमप्रभु यावे, आं सेरथे फुल्लु नु आं कली श्येत रे प्रॉइब, आं पशो लोत्र नु आं मिम्शो ब्रने।

ग्राचा कली पुंडशो लोत्र

कुम्सो पपाइक्ब कली दाऊद आ कुम्सो।

20 गे श्येत जनीनु, परमप्रभु यावेमी इन लोत्र लेत्तल। याकूब आ परमप्रभु आ नें आ पबर्म इन जोरी सत्रुम थिन्ने मचाप्मेक्ब। हितोपदेस १८:१० 2 मेकोमी आ बाक्तीक रे इन कली वारच पाइब सोइक्त्तल। सियोन रे इन कली वारच पवल। 3 मेकोमी इन चढ़ेशो नु चोशा चढ़ेशो नेल्ल मिम्शा ब्रवल। ठेयब सेंदा पा। 4 मेकोमी इन दाक्शो नेल्ल गेवल। इन मिम्शो नेल्ल खबल। भजन संग्रह २१:३ 5 गो इन ग्राशो तशा, ग्येरशा ग्रीशा आंइ परमप्रभु आ नेंमी छेदर पोक्नीकी। परमप्रभु यावेमी इन पुंडशो नेल्ल गेवल।

6 परमप्रभु यावेमी आ तेल लुक्शो पिप कली प्रॉइब, दे मुल तुइक्ताक्ड। आ स्वर्ग डा बाक्तीकेमी यो इन लोत्र नेंशा, आ सक्ति पाइश्शो ग्युरा गुइमी वारच पाइब। प्रस्थान १५:६ 7 कोइ मुरपुकीमी शारा, बगी तशा, ग्रानीकी, दे मिम्नीम। तन्न गोपुकी परमप्रभु यावे, आंइ परमप्रभु आ नें मिम्शा, ग्रानीकी। भजन संग्रह ३३:१७; ब्यक्स्था २०:१; यसैया ३१:१ 8 मेकोपुकी गोल्नीम। तन्न गोपुकी राप्स डा राप्स बाक्नीकी।

9 परमप्रभु यावे, आंइ पिप कली ग्रापतीन। गो पुंडकानु, आंइ लोत्र लेत्तीन।

परमप्रभुम पिप कली वारच पशो

कुम्सो पपाइक्ब कली दाऊद आ कुम्सो।

21 परमप्रभु यावे, इन सक्ति तशा, पिप ग्येरसाक्ब। इन प्रॉइतीकेमी मेको शुश ग्येरसाक्ब। 2 गे आ थुं डा दाक्शो गेतीनी। आ पुंडशो "मगेनुड" मदेनी। ठेयब सेंदा पा। भजन संग्रह २०:५; भजन संग्रह ३७:४  
3 गे मेको कली आसीक गेशा, रिम्शो पाइक्तीनी। मिनु आ पियाम क्येख सुन के सिरपेच गुप्ताक्नी। 4 मेकोमी "ब्रॉइचा गेयी" दे इन कली पुंडतु। मिनु गे मेको कली गेना हना यो ब्रॉइशा, बाक्चा गेतीनी। भजन संग्रह ६१:७ 5 इन प्रॉइतीकेमी आ दारस ठेयब दुम्त। शोंप नु मान ततीके मेको तारी वोइक्तीनी। 6 गे मेको कली गेना हना यो आसीक राइब सेल्शा, इन डॉइती ग्येरपाइक्तीनी।

7 मारदे हना पिपमी परमप्रभु यावे कली थमा सुइश्शा, नेल्ल क्येडा ठेयब आ गेना हना यो दाक्तीकेमी पोक्च थेक्शा बाक्ब। 8 गे इन गुइमी इन जोरी सत्रु नेल्ल आन कली माल्शा ग्याइक्नीनी। इन कली काइ मदाक्ब आन कली

इन ग्युरा गुइमी साइक्नीनी। 9 इन जाक्वी ना मेको आन कली ठेयब चुप्लुम हुम्शो खोदेशो पा हुम्नीनी। परमप्रभु यावे, गे चुरशा, मेको आन कली दाक्शो खोदेशो पा मीम दाक्पाइक्नीनी। 10 मेको आन चच युइ आन कली रागी रे क्याम्नीनी। आन आल आन कली मुर आन दाते रे क्याम्नीनी।

11 मेकोपुकीमी इन कली मरिम्शो पचा, दे मिम्शो बाक्तेक्म हना यो, आन मिम्शो पने मचाप्पीम। यसैया ८:१० 12 गे मेको आन कली प्रोक्पाइश्शा, आन कुलम ख्रपाइक्चा कली लिब्रा कीनीनी।

13 परमप्रभु यावे, इन सक्तिम बोक्नीनी। गोपुकीमी कुम्सो पशा, इन सक्ति ठेयब बाक्ब, दे इन कली ठेयब सेल्नीकी।

श्येत जापु हना यो, छेडछेड ताइब

कुम्सो पपाइक्ब कली सुनी डा किश्श आ लायो डा दाऊद आ कुम्सो। यसैया ५३:-; मत्ती २७:३५-४६

22 आं परमप्रभु, आं परमप्रभु, गे मारदे आं कली प्रॉइयीनी? मारदे गे आं कली वारच मपथु, डोन बाक्नीनी। मारदे आं थोशो मनैनीनी। मत्ती २७:४६ 2 आं परमप्रभु, गो इन कली नाक्त्त ब्रेडडानु, गे लोत्र मलेत्तीनी। गो नाक्दो ब्रेडडानु यो, आं थुं नाइक्चा मतड। 3 मिनु इस्राएलीपुकीम इन कली ठेयब सेल्तीक कुम्सो पामेनु, गे का ला मेको आन तार बाक्नीनी। 4 आंइ किकी पिपीम इन कली थमा सुइक्ना सुइक्न बाक्शो बाक्मा बाक्त्त। गे मेको आन कली आन जोरी सत्रु रे प्रॉइशो बाक्तीनी। 5 इन कली पुंडशा ब्रेश्शा, ब्रॉइचा तशो बाक्तेक्म। इन कली जिम्मा गेंसीशा, थमा सुइश्शा, मुने मदोक्म। भजन संग्रह २५:२-३ 6 गो चहिं मुर मदुम्थु, लुस्पु खोदेशो दुम्ती। मुरपुकीम आं कली शुक्शी पा ग्रांरा दिल्लीम। अय्युब २५:६; यसैया ४१:१४ 7 आं कली ताइब नेल्लेमी आं पबर्म रिश्शा, ठेयब लेश्शो लोत्र पशा, आन पिया हिम्नीम। अय्युब १६:१० 8 मिनु मेकोपुकीमी "परमप्रभु यावे कली थमा सुइक्ब, परमप्रभु यावेमी इन कली श्येत रे प्रोनल। मारदे हना परमप्रभुमी इन कली दाक्ब" दे शुक्शी पाइनीम। मत्ती २७:४३ 9 गो मोदेब दुम्ती हना यो, गे आं कली जरमेपपाइक्तीनी। गो आं ममा आ दूध तूड रे आं कली कोव्रतीनी।

10 डॉइती रे गो इन के दुम्ती। आं ममामी थियी रे गे आं परमप्रभु बाक्नीनी। 11 गे आं रे डोन मबाक्कीन। मारदे हना गो श्येत जचा चिक्शो बाक्नुड। वारच पाइब सुइ मबाक्नीम।

12 ठेयब सांढेपुकीमी पुम्ताक्यीमी। बाशान रागी डा हिंचा डा सांढेपुकीमी यो पुम्ताक्यीमी। 13 शोव्रलु बेक्शा ग्रीशो गुप्स खोदेशो पा आन शोत्र पाक्शा, ग्राम्चा चिक्ताक्यीमी। 14 गो लुक्शो ब्वाक्कु खोदेशो दुम्ती। आं रुश नेल्ल गलाक गुलुक दुम्तेक्म। आं लुडगीर मयीन खोदेशो दुम्शा, यशो बाक्ब। 15 आं सक्ति ग्युम्त। ब्रोल्लो खप के गर खोदेशो दुम्त। आं शोत्र सोव्रत। मिनु गे आं कली साइक्चा ठीक पाइतीनी। यूहन्ना १९:२८

16 कुचुमपुकीमी आं कली पुम्ताक्यीमी। काइ मरिम्शो पाइब आन हुल आं एर औथ बाक्नीम। आं गुइ खोइली ख्रित्ताक्यीमी। यूहन्ना २०:२५, २७  
17 गो आं रुश का का पा हिक्ने चाप्नुड। मेकोपुकीमी आं कली शुक्शी पा कोव्रस डा कोव्रस बाक्नीम। 18 आं वासी योक्सीशा, आं फेक्शो वा आ पबर्म "सुम ताइबा" दे फेन्टे ग्यारनीम। यूहन्ना १९:२४ 19 परमप्रभु यावे, गे आं क्येडा डोन मबाक्कीन। गे आं कली सक्ति गेब बाक्नीनी। गे रीब पा आं कली वारच पाइक्पीनी।

20 आं कली तरवार नु कुचुम रे प्रॉइयीनी। 21 गुप्स आ शोत्र नु ब्वाकी डा सांढे आन ग्राव रे प्रॉइयीनी। दानीएल ६:२३

22 गो "इन नें ठेयब बाक्ब" दे आं लोक्ब आन कली शेंनुडमी। मिनु थमा सुइक्ब आन गुम्तीकेमी इन नें ठेयब सेल्नुड। भजन संग्रह २६:१२; हिब्रू २:१२ 23 गे परमप्रभु यावे कली मान पा हिंबपुकीमी, मेको कली ठेयब सेलीन। याकूब आ चच युइ, मेको कली "गे नेल्ल क्येडा ठेयब बाक्नीनी" देनीन। इस्राएल आ चच युइ नेल्ल मेको कली मान पा हिनीन। 24 मारदे हना मेकोमी श्येत जाइब आन श्येत तशा, आ कुल मखुइक्थु, आं ब्रेश्शो नेंतु। हिब्रू १५:७

25 ठेयब गुम्तीकेमी आं इन कली ठेयब सेल्लिक कुम्सो इन लां रे जाक्ब। आं कसम जशो इन कली मान पा हिंब आन डोंइती खाप्नुड।<sup>26</sup> प्रुडग मुरपुकी जशा रूनीम। मिनु परमप्रभु यावे कली माल्बपुकीमी “परमप्रभु यावे ठेयब बाक्ब” देंनीम। गेपुकी गेना हना यो ब्रोंइशा बाक्वा ताइनीनी। भजन संग्रह ६९:३३<sup>27</sup> रागी रागी डा मुरपुकीमी आं कली मिम्शा, परमप्रभु यावे गे लाइनीम। मिनु रागी डा खिं खिं डा मुरपुकी परमप्रभु आ डोंइती बाप्नीम।<sup>28</sup> मारदे हना मेको राज्य परमप्रभु यावे केन बाक्ब। मिनु मेकोमी रागी रागी डा मुर आन कली सासन पाइब।<sup>29</sup> रागी रागी डा जाइब तूब, शुश क्येट थीबपुकी परमप्रभु आ डोंइती बाप्नीम। मिनु बेक्शा, फुरक दुम्ब नेल्ले मेको आ डोंइती बाप्नीम।<sup>30</sup> मिनु मेको आन चच युडपुकीमी मेको कली सेवा पाइनीम। मिनु आन नोले डा पाला डा मुर परमप्रभु यावे आ पर्वम शेंचा पुंडसीनीम।<sup>31</sup> मेकोपुकीमी नोले जरमेशो मुर आन कली परमप्रभु आ ठीक पतीके आ पर्वम शेंनीम। मेकोमी प्रोंइतु, दे नेल्ल आन कली तुइक्पाइक्नीम।

रिम्शो गोठला

दाऊद आ कुम्सो।

23 परमप्रभु यावे आं गोठला बाक्ब। आं माल्शो नेल्ल बाक्ब। उत्पत्ती ४८:१५; यसैया ४०:११; यूहन्ना १०:११-३०<sup>2</sup> आं कली रिम्शो घांस बाक्तीकेम इप्पाइक्ब। ब्रोंवशो ब्वाक्कु आ नेक्था चाक्दीप्ब। इजीकीएल ३४:१३-१४; प्रकाश ७:१७<sup>3</sup> मेकोमी आं थुं बारपाइक्ब। आं कली आंम आ नें आ पर्वम ठीक लां कोंइब।<sup>4</sup> मिनु गो बेक्वा डा बेंसीम गाक्ती हना यो, महिंनुड। मारदे हना गे गो नु बाक्नीनी। इन कोक्के तशा आं थुं नाइश्शा ग्येरनुड। भजन संग्रह ४६:३<sup>5</sup> गे आं कली आं जोरी सत्रु आन डोंइती थुल्नीनी। आं पिया तार तेल लुक्नीनी। आं कचौरा क्युप्वा डा पा प्रिंताक्नी। भजन संग्रह ३६:९<sup>6</sup> थमा पा गो मबेक्वा सम्म परमप्रभु आ रिम्शो पतीके नु आ दाक्तीके गो नु बाक्ब। मिनु गो गेना हना यो परमप्रभु यावे आ खिंम बाक्नुड। भजन संग्रह ८४:५

परमप्रभु आ बाक्तीक ओव्रशो

दाऊद आ कुम्सो।

24 रागी नेल्ल, मेकेर डा मारेड मारेड नु मेकेर डा ब्रोंइशा बाक्ब नेल्ल परमप्रभु यावे केन बाक्नीम। यूहन्ना १:११; १कोरिन्थी १०:२६<sup>2</sup> मारदे हना परमप्रभुमी मेको नेल्ल आन कली ब्वाक्कु तारी सेल्शा, शुश ब्वाक्कु तारी लीमल, दे सेल्शो बाक्त।

<sup>3</sup> सु परमप्रभु यावे आ डांडा डोइक्वा ताइबा डा? सु आ वोव्रशो बाक्तीकेम बाक्ने चाप्वा डा? भजन संग्रह १५:-<sup>4</sup> आन गुडमी काइ मरिम्शो मपाइबपुकी, रिम्शो थुं पाइश्शोपुकी, मूर्ति आन डोंइती सेड मपाइबपुकी नु जोल पा कसम मजाइबपुकी ला मेकेर डोइक्ने चाप्नीम।<sup>5</sup> मेकोपुकीमी परमप्रभु यावे आ आसीक ताइनीम। मिनु पाप रे प्रोंइब परमप्रभुमी मेको आन कली आ ठीक पतीके गेब। यसैया ४८:१८<sup>6</sup> मोदेशो मुरपुकी परमप्रभु कली माल्ब बाक्नीम। मिनु “याक्ब आ परमप्रभु, इन कुल तचा दाक्नीक” देंनीम। ठेयब सेंदा पा।

<sup>7</sup> मिनु “गे ठेयब लाप्चोपुकी इन पिया पोक्कीन। माइत लाप्चोपुकी रोक्सीन। मिनु मेकेर रे छेडछेड डा पिप ओव्रल। २सामुएल ६:१-१९; यसैया ४०:३-४<sup>8</sup> मेको छेडछेड डा पिप सु बाक्मे? मेको मारेड मारेड पने चाप्ब ठेयब सक्ति पाइश्शो परमप्रभु यावे बाक्ब। परमप्रभु यावे लडाइम ग्राब बाक्ब।<sup>9</sup> गे ठेयब लाप्चोपुकी इन पिया पोक्कीन। माइत लाप्चोपुकी रोक्सीन। मिनु मेकेर रे छेडछेड डा पिप ओव्रल।<sup>10</sup> मेको छेडछेड डा पिप सु बाक्मे? मेको मुर नेल्ल आन परमप्रभु यावे बाक्ब। मेको छेडछेड डा पिप बाक्ब”। ठेयब सेंदा पा।

परमप्रभुमी माफ गेशा, लां कोंइब

दाऊद आ कुम्सो।

25 परमप्रभु यावे, गो आं थुंमी इन नेक्था दुम्नुड।<sup>2</sup> आं परमप्रभु, गो इन कली मिम्शा, महिंथु बाक्शो बाक्नुड। गो मुने मदोक्डल। आं जोरी सत्रु आं क्येडा मग्रामल।<sup>3</sup> इन लां कोव्रब नेल्ल मुने मदोक्मल। मोशान श्येत गेबपुकी चहिं मुने दोक्मल।

<sup>4</sup> परमप्रभु यावे, आं कली इन लां कोंइदीनी। इन गाक्तीक लां शेंदीनी।<sup>5</sup> इन थमा पतीकेम आं कली गाक्वा, शेंदीनी। मारदे हना गे आं कली श्येत रे प्रोंइब परमप्रभु बाक्नीनी। गो नाक्तर रे इन लां कोव्रशा, बाक्नुड।<sup>6</sup> परमप्रभु यावे, इन शिशी नु गेना हना यो दाक्तीके कली मिम्तीन। मारदे हना मेको साइ डोंइती रेन बाक्त।<sup>7</sup> गो ठिटा बाक्डा ना आं पशो पाप नु आं मरिम्शो पशो प्रेंदीन। परमप्रभु यावे, इन गेना हना यो दाक्तीके नु रिम्शो पतीकेम आं कली मिम्तीन।<sup>8</sup> परमप्रभु यावे रिम्शो नु रिम्शो थुं पाइश्शो बाक्ब। मोपतीके मेकोमी पाप पाइब आन कली आ लां आ पर्वम शेंब।<sup>9</sup> ब्रेम्शो आन कली ठीक लां कोंइशा, आ लां शेंब।<sup>10</sup> परमप्रभु यावे आ कबल नु आ देशो टीब नेल्ल परमप्रभु आ गेना हना यो दाक्तीके नु आ दाक्शा मप्रोंइतीकेमी ब्रीशो बाक्नीम।<sup>11</sup> परमप्रभु यावे, आं पाप ठेयब बाक्त हना यो, इन नें आ पर्वम आं ठीक मपशो माफ गेयीनी। प्रस्थान ३४:६-७

<sup>12</sup> सु सुमी परमप्रभु यावे कली मान पा हिंनीमी, मेको आन कली तेको लां लचा माल्नीमी, मेको शेंब।<sup>13</sup> मिनु मेको आन माल्शो नेल्ल तशा, आन थुं नाइक्नीम। मेको आन आलपुकीम मेको रागी ताइनीम। भजन संग्रह ३७:९<sup>14</sup> परमप्रभु यावे आ कली मान पा हिंब आन वारच बाक्ब। मिनु मेको आन कली आ कबल शेंब।<sup>15</sup> गो गेना हना यो परमप्रभु यावे गे ला कोव्रनुड। मारदे हना मेकोमी आं खोइली ब्वारद रे प्रोंइब।

<sup>16</sup> गे आं गे हिरसीने। मिनु आं कली शिशी पाइय्थीनी। मारदे हना गो आं का दुम्शा, श्येत जशो बाक्नुड।<sup>17</sup> आं थुं डा श्येत बारशो बाक्नीम। मेको श्येत रे प्रोंइयीनी।<sup>18</sup> आं श्येत जशो नु आ थुं खाइश्शो कोव्रडीन। मिनु आं पशो पाप नेल्ल क्याम्दीने।<sup>19</sup> आं जोरी सत्रु आन कली कोव्रडीन, मारदे हना मेको शुश बाक्नीम। मिनु मेकोपुकीमी आं कली काइ मदाक्नीम। भजन संग्रह ३५:१९<sup>20</sup> आं कली खाल पा प्रोंइयीनी। गो मुने मदोक्डल। मारदे हना इन कली जिम्मा गेसाक्थी।<sup>21</sup> रिम्शो पतीके नु रिम्शो थुं बाक्तीकेमी आं कली खाल पयील। मारदे हना गो इन लां कोव्रशो बाक्नुड।<sup>22</sup> परमप्रभु, इसाएल कली आ श्येत नेल्ल रे प्रीनीन। भजन संग्रह १३०:८

परमप्रभु आ डोंइती लोव्र पशो

दाऊद आ कुम्सो।

26 परमप्रभु यावे, आं कली निसाफ पने। गो मारेड दोस तचा डा गेय मपड। परमप्रभु यावे, गो इन कली जिम्मा गेंसीशा, महिम्शीथु बाक्ती।<sup>2</sup> परमप्रभु यावे, गे आं कली नाक्तीन। आं थुं नु मिम्तीक नाक्शा कोव्रडीन।

<sup>3</sup> इन गेना हना यो दाक्तीक आं डोंइती बाक्ब। मिनु गो इन कली मप्रोंइथु, गाक्शो बाक्नुड।<sup>4</sup> गो दूली पाइब मुरपुकी नु मबाक्ड। मिनु जोल पाइबपुकी नु गारशा गेय मपड। भजन संग्रह १:३<sup>5</sup> मरिम्शो पाइब आन देल्लिके ग्रांरा दीनुड। मिनु इन अरेशो मटीब नु मबाक्नुड।<sup>6</sup> आं गुडमी मारेड मरिम्शो मपड। परमप्रभु यावे, इन कली ठेयब सेल्शा, इन चढेतीके आ एर औथ हिरशा बाक्नुड। ब्यवस्था २१:६-७; मत्ती २७:२४<sup>7</sup> मेना इन नें ठेयब सेल्ना सेल्ल कुम्सो पा, इन पशो छक लाक्वा डा गेय नेल्ल ठेयब सेंदाम शेंनुड।<sup>8</sup> परमप्रभु यावे, इन बाक्तीक खिं नु इन छेडछेड दाक्नुड। भजन संग्रह २२:४; भजन संग्रह १२२:१-२

<sup>9</sup> आं कली मरिम्शो पाइब नु हुश ख्राक्श पोक्ब नु मसाइय्थीनी।<sup>10</sup> मेकोपुकीम मरिम्शो ला पशा, घूस जाइनीम।<sup>11</sup> गो चहिं, मारेड दोस तचा डा गेय मपथु, बाक्शो बाक्नुड। आं कली शिशी पचा मप्रोंइयीनी।<sup>12</sup> परमप्रभु यावे, गो दिंममी राप्शा, शुश मुर आन गुम्तीकेमी इन कली ठेयब सेल्लनुड। भजन संग्रह २२:२३

परमप्रभु यावे नु थुं का दुश्शो

दाऊद आ कुम्सो।

27 परमप्रभु यावे आं छेडछेड नु आं कली श्येत रे प्रॉइब बाक्ब। गो सु नु हिंचा माल्नुडा डा? परमप्रभु यावे आं ब्रॉइतीक सक्ति नु आं खूइक्तीक बाक्ब। आं कली सुम हिंच कौंइने चाप्बा डा? मीका ७:८; भजन संग्रह ५६:५<sup>2</sup> मरिश्शो मुरपुकी आं श्ये ब्वचा कली आं नेक्था जाक्मानु, आं कली खेदा पाइब नु आं जोरी सत्रु दाइल पपाइश्शा खोल्चा पुंडसाक्म।<sup>3</sup> मिनु ठेयब लडाइ पाइब हुलम पुन्ताक्वीमी हना यो, गो महिनुड। जिचा पोक्तेक्म हना यो “परमप्रभुमी आं कली प्रॉइब” दे थमा सुइश्शा बाक्नुड। भजन संग्रह ३:७

4 गो परमप्रभु यावे नु लोव का पुंडनुड। मिनु मेको माल्ना माल्न बाक्नुड। मेको मार बाक्ब दॅशा हना “गो मबेक्डा सम्म परमप्रभु यावे आ बाक्तीकेमी बाक्शा, परमप्रभु यावे आ रिश्शो पतीके तचा नु आ खिंम मेको कली माल्शा तुइक्चा दाक्नुड। भजन संग्रह २६:८; भजन संग्रह ४२:५; भजन संग्रह ६३:३; भजन संग्रह ८४:४, ५, ११<sup>5</sup> मारदे हना श्येत दुम नाक्ती, मेकोमी आं कली आ बाक्तीकेमी खूइश्शा वोइक्ब। मिनु आं कली सेरथे फुल्लु तारी वोइक्ब। भजन संग्रह ३१:२१<sup>6</sup> मोपा आं एर ओंथ बाक्शो जोरी सत्रु आन डॉइती आं पिया पोक्ब। मिनु गो ग्येरशा ठेयब सॅदामी परमप्रभु यावे कली चढेशा, कुम्सो पाइनुड।

7 परमप्रभु यावे, गो इन कली ब्रेडडानु, गे आं लोव नॅशा, शिशी पा आं पुंडुशो गेयीनी।<sup>8</sup> परमप्रभु यावे, इन लोवमी ‘आं कली मालीन’ दे ब्रेक्शो खोदॅशो पा, आं थुंमी इन कली माल्नुड। ब्यक्स्था ४:२९<sup>9</sup> इन कुल आं क्येडा मखूइक्तीन। इन गाइक्तीकेमी इन गेय पाइब, आं कली, मतिल्यीनी। गे आं कली वारच पाइब बाक्नीनी। गो नु बाक्शा, मप्रॉइयीनी। गे आं कली श्येत रे प्रॉइब बाक्नीनी।<sup>10</sup> आं आम आफोमी आं कली प्रॉइतीसी हना यो, परमप्रभु यावेमी आं कली कोवब।<sup>11</sup> परमप्रभु यावे, आं कली इन लां शॅदीनी। मिनु आं जोरी सत्रु आन पर्वमी आं कली ठीक लां कोइदीनी। भजन संग्रह ८६:११; भजन संग्रह १३९:२४<sup>12</sup> आं कली खेदा पाइब आन गुडमी मगेयीनी। मारदे हना मेको जोल पा सांकछी बाक्शो बाक्नीम। मेकोपुकी हुश खाक्श पोक्ब बाक्नीम।<sup>13</sup> गो ब्रॉइशा बाक्ब आन बाक्तीकेमी, परमप्रभु यावे आ रिश्शो पतीके ताइनुड, दे थमा सुइक्नुड” दे लोव पाता। यसैया ३८:११<sup>14</sup> गो इ कली “परमप्रभु यावे आ वारच पतीके रिम्दो। बोल्यो दुमो। इ थुं बारपतो। मिनु परमप्रभु यावे आ वारच पतीके रिम्दो” दे कुम्सो पाता।

शिशी नु वारच पतीके पुंडुशो

दाऊद आ कुम्सो।

28 परमप्रभु यावे, गो इन कली लोव पाइनुड। गे आं सेरथे फुल्लु बाक्नीनी। आं कली लोव मलेत्थु, आं क्येडा डोन मलने। मो पाइतीनी हना, गो बेक्शो मुर खोदॅशो दुम्नुड।<sup>2</sup> आं पुंडुशो लोव नेनीन। गो इन योव्रशो बाक्तीके रे आं गुड पोक्शा “वारच पाइय्यीनी” दे आं ब्रेश्शो लोव नेनीन।<sup>3</sup> आं कली इन अरेशो मटीब नु मरिश्शो पाइब मुर नु मक्याम्दीन। मेको आन नेक्था डा मुर नु गारशो लोव पाइनीम। तन्न आन थुं मरिश्शो पतीकेमी ब्रीशो बाक्नीम। २सामुएल २०:९-१०<sup>4</sup> मेको आन पशो नु थाम्पा मरिश्शो पशो आ पर्वम क्येक्क लेत्तीन। दोदॅशो पा पामे, मोदॅशो पा क्येक्क लेत्तीन।<sup>5</sup> मेकोपुकीमी परमप्रभु यावे आ पशो नु आ गुडमी सेल्शो मारैड ममिन्नीम। परमप्रभुमी मेको आन कली गेनायो मबोक्चा डा पा क्याम्शा, लॅशा मसेल्ब। यसैया ५:१२-१३

6 गो परमप्रभु यावे कली ठेयब सेल्नुड। मारदे हना “आं कली वारच पाइय्यीनी” दे आं पुंडुशो नॅतु।<sup>7</sup> परमप्रभु यावे आं सक्ति नु आं तेक्तीके बाक्ब। गो मेको कली थमा सुइक्ता। मोपा आं कली वारच पाइक्ती। मोपतीके गो थाम्पा ग्येरसीशो बाक्नुड। गो आं कुम्सोमी मेको कली ठेयब सेल्नुड।

8 परमप्रभु यावे आ मुर आन सक्ति बाक्ब। आ तेल लुक्शो पिप कली प्रॉइब बाक्ब।<sup>9</sup> इन मुर आन कली प्रोनीन। इन रागी कली आसीक गेने। मिनु मेको आन कली गेना हना यो गोठला खोदॅशो पा योव्रशा, गुप्शा, कुरशा पने।

परमप्रभु कली ठेयब सेल्शो

दाऊद आ कुम्सो।

29 गे सक्ति पाइश्शो आन तौपुकी, परमप्रभु यावे कली “गे सक्ति नु छेडछेड पाइश्शो बाक्नीनी” देनीन। भजन संग्रह १०३:२०-२१<sup>2</sup> गे परमप्रभु यावे कली “इन नॅ नेल्ल आन क्येडा ठेयब बाक्ब” देनीन। गे परमप्रभु यावे आ दाक्तीकेमी ग्योम्सीशा परमप्रभु यावे आ डॉइती बाप्पीन।<sup>3</sup> परमप्रभु यावे आ सॅदा ब्वाक्कु तारी बाक्ब। छेडछेड डा परमप्रभुमी ठेयब ब्वाक्कु तारी बुंबु पपाइक्ब। परमप्रभु यावे ब्वाक्कु तारी बाक्ब।<sup>4</sup> परमप्रभु यावे आ सॅदा सक्ति पाइश्शो बाक्ब। परमप्रभु यावे आ सॅदा नेल्ल मान ततीक बाक्ब।<sup>5</sup> परमप्रभु यावे आ सॅदामी लेबानोन डा लाइश्शो रवा आन कली जिक्ब। परमप्रभु यावे आ लोवमी लेबानोन डा लाइश्शो रवा आन कली जिक्ब।<sup>6</sup> मेकोमी लेबानोन डांडा कली बाछा नु हेरमोन डांडा कली ब्वाकी डा ब्यफ खोदॅशो पा प्रेक्पाइक्ब। ब्यक्स्था ३:८-९<sup>7</sup> परमप्रभु यावे आ सॅदा चिला खोदॅशो बाक्ब।<sup>8</sup> परमप्रभु यावे आ सॅदामी गोरशो रागी हिम्पाइक्ब। परमप्रभु यावेमी कादेश माइश्शो गोरशो रागी हिम्पाइक्ब।<sup>9</sup> परमप्रभु यावे आ सॅदामी ठेयब रवा कली जिक्पाइक्ब। ब्वाकी डा रवा नेल्ल शोल्मो पा खोल्ब। मिनु नेल्लेमी “परमप्रभु ला ठेयब बाक्ब” दे आ बाक्तीकेमी लोव पाइनीम।

10 परमप्रभु यावे आ ठेयब नित्तीके ब्वाक्कु तारी बाक्ब। मेको आ ठेयब नित्तीकेम निश्शा, गेना हना यो सासन पाइब।<sup>11</sup> परमप्रभु यावेमी आ मुर आन कली सक्ति गेब। परमप्रभु यावेमी आ मुर आन कली आसीक गेशा, थुं नाइक्पाइक्ब।

बेक्चा रे प्रॉइशो

परमप्रभु यावे आ खिं सेल्ने नुम्मेनु पतीक, दाऊद आ कुम्सो।

30 परमप्रभु यावे, गो इन कली मान पाइनुड। मारदे हना गे आं कली उइ रे ग्येत्थ पोक्तीनी। मिनु आं जोरी सत्रु आन कली आं पर्वम ग्येरचा मगेनी।<sup>2</sup> परमप्रभु यावे, आं परमप्रभु, इन कली “वारच पाइय्यीनी” दे ब्रेडडानु, गे आं कली सापाइक्तीनी।<sup>3</sup> परमप्रभु यावे, गे आं कली बेक्शो मुर आन बाक्तीक रे गुंडताक्वीनी। बेक्शो मुर आन दातेमी आं कली ब्रॉइतीक सोक्त गेशा, प्रॉइतीनी। भजन संग्रह ११६:३,४, ७-९

4 परमप्रभु यावे कली टीबपुकी, मेको कली कुम्सो पने। मिनु आ नॅ ठेयब सेलीन।<sup>5</sup> मारदे हना आ गाइक्तीक इक्का ला बाक्ब। तन्न आ शिशी पतीके ब्रॉइशो सम्म लीब। मुर नाक्दो रे डाक्चा माल्ताक्व हना यो, सुनी ग्येरपाइक्चा पुंडसीब। यसैया ५४:७-८

6 गो थुं नाइश्शा बाक्डानु “गे गेनायो महिम्सीनुड” देंती।<sup>7</sup> परमप्रभु यावे गेमी शिशी पा आं डांडा बोल्यो सेल्तीनी। मिनु नोले इन कुल खूइक्तीनीनु, गो हिंती।<sup>8</sup> परमप्रभु यावे, गो इन कली पुंडता। गो इन कली ब्रेत्ती।<sup>9</sup> गो बेक्डानु, इन कली मार रिश्शो दुम्बा डा? फुरकुमी इन कली ठेयब सेल्बा डा? मार, इन दाक्शा गेनायो मप्रॉइतीक आ पर्वम शॅबा डा? भजन संग्रह ६:६<sup>10</sup> परमप्रभु यावे, आं लोव नेनीन। आं कली शिशी पाइय्यीनी। आं कली वारच पाइब दुमीन।

11 गो रोंका पाइब मुर, सिल पाइब दुम्ती। आं रोंका पतीक अरन्डी प्रुइश्शा, ग्येरतीक किप्शुर खोदॅशो पा किप्ताक्वीनी।<sup>12</sup> गो सिक्सी पा मबाक्थु, इन पर्वम कुम्सो पाइनुड। परमप्रभु यावे, गेना हना यो बाक्ब आं परमप्रभु, गो इन कली ठेयब सेल्नुड।

## परमप्रभु कली जिम्मा गेंसीशो

कुम्सो पपाइक्व कली दाऊद आ कुम्सो।

31 परमप्रभु यावे गो इन कली जिम्मा गेंसीनुड। गो गेनायो मुने मदोक्डल। इन ठीक पतीकेमी आं कली प्रॉइयीनी।<sup>2</sup> इन नोफा दाइक्तीने, आं कली रीब पा प्रॉइयीनी। गे आं खुइक्तीक सेरथे फुल्लु नु आं कली प्रॉइब बोल्यो दरवार दुमीन। भजन संग्रह ७१:३<sup>3</sup> इन नें आ पर्वम आं कली शेंशा, लां कौंडीनी। मारदे हना गे आं सेरथे फुल्लु नु आं बोल्यो दरवार बाक्नीनी।<sup>4</sup> मेकोपुकीमी आं कली मतचा डा पा ब्वारद दाइक्ताक्म। आं कली प्रॉइयीनी। मारदे हना गे आं सक्ति बाक्नीनी।<sup>5</sup> आं सोक्त इन गुइमी जिम्मा गेनुड। परमप्रभु यावे, गे आं कली श्येत रे प्रॉइतीनी। गे इन मुर आन कली दाक्शा मप्रॉइब परमप्रभु बाक्नीनी। लूका २३:४६<sup>6</sup> गो शोर गाक्शो मूर्ति आन कली सेउ पाइब आन कली ग्रांघा दित्नुडमी। गो परमप्रभु यावे इन कली जिम्मा गेसाक्यी।<sup>7</sup> इन गेना हना यो दाक्तीक तशा, ग्येरना ग्येरन बाक्ती। मारदे हना गे आं श्येत तशा, आं थुं लुक्च लशो तुइश्शो बाक्नीनी।<sup>8</sup> गे आं कली आं जोरी सत्रु आन गुइमी मगेनी। गे आं कली रिश्शो ठेयब बाक्तीकेमी बाक्पाइक्तीनी।

<sup>9</sup> परमप्रभु यावे, आं कली शिशी पाइय्यीनी। मारदे हना गो श्येत जशो बाक्नुड। आं थुं लुक्च दुम्तीके आं मिक्च ओव्रशो नु आं रां सोव्रशो बाक्ब।<sup>10</sup> आं थुं ग्येत्थ लुक्च लतीके, गो बेक्चा चिक्शो बाक्ती। हुकयी पतीकेमी आ ब्रॉइतीक नाक्ती योल्तेक्म। आं ठीक मपशोमी आं बोल नेल्ल ग्युम्शो बाक्ब। मिनु आं रुश नेल्ल मुक्शो बाक्नीम।<sup>11</sup> आं जोरी सत्रु आन क्येडा आं नेक्था डा मुरपुकीमी शुश शुक्शी पाइक्चा पुंडसीब दुम्ती। आं तुइश्शो मुर आं कली तशा हिंनीम। आं कली लांम गुम्ब मुरपुकी आं कली तशा हिंशा प्रोक्नीम।<sup>12</sup> बेक्शो मुर खोदेंशो पा सुइमी आं कली ममिम्नीम। गो ब्रोल्लो गर खोदेंशो दुम्ती।<sup>13</sup> गो ते लती हना यो हिंतीके ला बाक्ब। मारदे हना शुशेमी आं पर्वम जोल पा लोव्र पशो नेंता। मेकोपुकी बुक्शा, आं कली साइक्चा कली सल्ला पाम्तेक्म। येरमीया २०:३

<sup>14</sup> तन्न परमप्रभु यावे, इन कली जिम्मा गेंसीशो बाक्नुड। गो “गे आं परमप्रभु बाक्नीनी” देंती।<sup>15</sup> आं ब्रॉइतीक नाक्ती इन गुइमीन बाक्ब। आं जोरी सत्रु नु आं कली खेदा पाइबपुकी रे प्रॉइयीनी। भजन संग्रह १३९:१६; उपदेसक ३:१-८<sup>16</sup> इन छेडछेड डा कुल इन वाइल तारी वोतीन। इन शिशी पतीकेमी आं कली प्रॉइयीनी। भजन संग्रह ८०:४; गन्ती ६:२५<sup>17</sup> परमप्रभु यावे, गो मुने मदोक्डल। मारदे हना गो इन कली “वारच पने” दे पुंडता। इन अरेशो मटीबपुकी मुने दोक्मल। मेकोपुकी बेक्शो मुर आन बाक्तीकेम सिक्सी पा बाक्मल।<sup>18</sup> ठेयब लेश्शो मुरपुकीमी ठीक पाइब आन कली आइक्च सेल्शा, मरिश्शो पाइनीम। जोल पा लोव्र पाइनीम। मेको आन शोव्र ख्रेप्तीन।

<sup>19</sup> गे इन कली मान पा हिंब आन कली गेना हना यो शुश दाक्नीनी। इन कली जिम्मा गेंसीब आन कली दाक्तीके मुर आन डॉइती कौंडनीनी।<sup>20</sup> इन मुर आन कली मरिश्शो मुर आन क्येडा प्रॉइचा, दे इन बाक्तीकेमी खुइक्नीनी। गे इन मुर आन कली मरिश्शो लोव्र पाइब आन क्येडा खुइक्नीनी। भजन संग्रह २७:५

<sup>21</sup> परमप्रभु यावे ठेयब बाक्ब। आं कली बोल्यो सहरम पुश्शो खोदेंशो पा आ छक लाक्चा डा दाक्तीके कौंडताक्यी।<sup>22</sup> डॉइती गो हिंशा “गे आं कली मताइनीनी” देंती हना यो “वारच पाइय्यीनी” दे आं पुंडशो लोव्र नेंतीनी।

<sup>23</sup> परमप्रभु यावे आ मुर नेल्लेमी परमप्रभु कली दाक्तीन। परमप्रभु यावेमी आ कली थमा सुइक्ब आन कली कोव्रब। ठेयब लेश्शो आन कली आन क्येक्क लेक्ब।<sup>24</sup> परमप्रभु यावे आ लां कोव्रशा रिम्बपुकी, सक्ति पाइश्शा, ठेयब थुं पाइश्शो दुमीन।

मरिश्शो पशो क्याम्चा पुंडसीशो

शेंतीक लोव्र डा दाऊद आ कुम्सो।

32 सु सु आन हेंथे पशो क्याम्चा पुंडसीशो बाक्मा, मेको ग्येरसीशो मुर बाक्नीम। मारदे हना आन पाप सुम्शो बाक्ब। रोमी ४:६-८<sup>2</sup> परमप्रभु यावेमी सु सु आन मरिश्शो पशो ममिम्बा, मेको ग्येरसीशो बाक्नीम। मेको आन थुंमी जोल पतीक काइ मबाक्ब।

<sup>3</sup> गो आं मरिश्शो पशो आ पर्वम सिक्सी पा बाक्शा, नाक्त रे आं श्येत जशोमी हुकयी पाता। मिनु आं रुश नेल्ल मुक्ताक्मे।<sup>4</sup> मारदे हना नाक्दो नाक्ती इन गुइमी चिप्ताक्यीनी। गो नाप्शो नांम किक्शो खोदेंशो दुम्ती। ठेयब सेंदा पा। भजन संग्रह ३८:१९; हितोपदेस २८:१३; याकूब ५:१६; यसैया ३८:१७<sup>5</sup> मिनु “गो परमप्रभु यावे कली आं पाप शोव्रनुड” देंशा, गो आं मरिश्शो पशो इन डॉइती मखुइक्तु। मिनु गे आं मरिश्शो पशो क्याम्ताक्नी। ठेयब सेंदा पा।

<sup>6</sup> मोपतीके इन कली टीब मुर नेल्लेम श्येत जशा, इन कली लोव्र पाइनीम। मिनु ब्वाक्कु बारशा जाक्त हना यो, मेको आन बाक्तीके मजाक्दीब्ब।<sup>7</sup> गे आं खुइश्शा बाक्तीके बाक्नीनी। गे आं कली श्येत रे प्रॉइनीनी। गे आं कली श्येत रे प्रॉइतीक कुम्सो पपाइक्तीनी। ठेयब सेंदा पा।

<sup>8</sup> मिनु परमप्रभुमी “गे तेको लांम गाक्चा माल्नीनी, मेको इन कली शेंननी। गो इन कली कोव्रशा, लां कौंडननी।<sup>9</sup> गे मिम्तीके मपाइश्शो शारा नु खच्चर खोदेंशो मदुमीन। मेको आन कली बिप्पाइक्चा कली लगम नु चलेतीके माल्ब। मो मदुम्त हना, मेकोपुकी इन नेक्था मजाक्नीम” देंत।

<sup>10</sup> इन अरेशो मटीबपुकी शुश श्येत जाइनीम। तन्न परमप्रभु यावे कली थमा सुइक्बपुकी आ गेना हना यो दाक्तीक ताइनीम।<sup>11</sup> गे ठीक पाइबपुकी, परमप्रभु यावे कली मिम्शा ग्येरसीने। रिश्शो थुं पाइश्शोपुकी ग्येरशा, कुम्सो पने।

परमप्रभु कली ठेयब सेल्शो कुम्सो

33 ठीक पाइबपुकी परमप्रभु यावे कली मिम्शा ग्येरसीने। रिश्शो थुं पाइश्शोपुकीमी परमप्रभु यावे कली ठेयब सेल्तीक कुम्सो पचा शिरनीम।<sup>2</sup> बीना ताप्शा, परमप्रभु यावे कली ठेयब सेलीन। १० ओटा तार पाइश्शो ठेयब ताप्तीक ताप्शा, मेको कली कुम्सो पने।<sup>3</sup> मेको कली नक कुम्सो का पने। रिश्शो पा ताप्शा, ग्येरसीने। भजन संग्रह ४०:४; भजन संग्रह ९६:१; भजन संग्रह ९८:३; भजन संग्रह १४४:९; भजन संग्रह १४९:१; यसैया ४२:१०; प्रकाश ५:९<sup>4</sup> मारदे हना परमप्रभु यावे आ लोव्र थमा बाक्ब। मिनु मेको आ गेय नेल्ल आ दाक्शा मप्रॉइतीकेमी पाइब।<sup>5</sup> मेकोमी ठीक पतीके नु ठीक निसाफ दाक्ब। रागी नेल्ल परमप्रभु यावे आ गेना हना यो दाक्तीकेमी ब्रीशो बाक्ब।

<sup>6</sup> परमप्रभु यावेमी लोव्र पशा, सरीड सेल्लु। आ मुइश्शोमी सोरुल नेल्ल दुम्तेक्म। उत्पत्ती १:६, १४<sup>7</sup> मेकोमी समुन्द्र डा ब्वाक्कु कली गारो खोदेंशो पा राप्पाइश्शो बाक्त। मिनु मेको कली वोइक्तीकेमी वोइश्शो बाक्त। भजन संग्रह १०४:९<sup>8</sup> रागी नु मेकेर बाक्ब मुर नेल्ले परमप्रभु यावे कली मान पा हिंमल।<sup>9</sup> मारदे हना परमप्रभुमी लोव्र पा मारेड मारेड दुम्शो बाक्त। मेकोमी अरेवानु, दुम्शो बाक्तेक्म। भजन संग्रह १४८:५<sup>10</sup> परमप्रभु यावेमी रागी रागी डा मुर आन मिम्शा पशो खतम सेल्ब। मेकोमी जात जात डा मुर आन मिम्शो गेय शोर गाक्शो सेल्ब।<sup>11</sup> परमप्रभु यावे आ मिम्शो गेना हना यो लीब। आ थुंम मिम्शो नेल्ल पाला सम्म लीब।<sup>12</sup> तेको रागीम परमप्रभु, आं परमप्रभु यावे बाक्बा, मेको ग्येरसीशो रागी बाक्ब। मारदे हना मेको योव्रसीशो रागी बाक्ब। ब्यवस्था ३३:२९<sup>13</sup> परमप्रभु यावेमी स्वर्ग रे कोव्रशा, मुर नेल्ल आन कली ताइब।<sup>14</sup> मेकोमी आ बाक्तीक रे रागीम बाक्ब मुर नेल्ल आन कली कोव्रब।<sup>15</sup> मेकोमी मुर नेल्ल आन थुं डा मिम्तीके सेल्ब। मुर नेल्ल आन पशो यो कोव्रब। हितोपदेस २१:१

<sup>16</sup> मिनु सुइ पिप लडाइ पाइब आन पतीकेमी ब्रॉइने मचाप्नीम। लडाइ पाइब मुर आन ठेयब बोलम ब्रॉइने मचाप्नीम। १सामुएल १७:-<sup>17</sup> मिनु “लडाइम शुश शारा बाक्तीके ब्रॉइनीकी” देंचा जोल बाक्ब। मेको आन ठेयब सक्तिम यो प्रॉइने मचाप्ब। भजन संग्रह २०:८<sup>18</sup> परमप्रभु यावेमी आ कली मान पा हिंब नु आ गेना हना यो दाक्तीक कली रिम्ब आन कली कोव्रब।<sup>19</sup> मिनु मेको आन कली बेक्चा रे प्रॉइब। मिनु अन्काल दुम्मेनु, ब्रॉइपाइक्ब।

20 गोपुकी परमप्रभु यावे आ लां कोव्रशो बावनीक। मेको आंइ कली वारच पाइब नु तेक्तीके बाक्ब।<sup>21</sup> मिनु परमप्रभु आ पर्वम आंइ थुं ग्येरब। मारदे हना गोपुकी मेको आ नैमी जिम्मा गेसाक्क।<sup>22</sup> परमप्रभु यावे, गो दोपा इन लां कोव्रका, मोपा इन गेना हना यो दाक्तीके गोपुकी नु बाक्ल।

### परमप्रभुमी कोव्रशो

दाऊद आ कुम्सो। दाऊदमी पिप अबीमेलेक क्येडा हिंशा, निप्स ग्यशो दुम्ची ना पशो कुम्सो। अबीमेलेकमी दाऊद कली खेरानु, दाऊद लशो। १सामुएल २१:१४-१६

34 गो परमप्रभु यावे कली गेना हना यो ठेयब सेल्लुड। मेको कली ठेयब सेल्लिक लोव्र गेना हना यो आं शोव्रम बाक्ब।<sup>2</sup> परमप्रभु यावे कली मिम्तीके आं थुं बारशा, ग्येरब। ब्रेमशो थुं पाइशोपुकी यो एको नैशा, ग्येरसीनीम।<sup>3</sup> गे गो नु परमप्रभु यावे कली ठेयब सेलीन। मिनु गो नेल्ल गारशा, आ नें ठेयब सेल्य।

<sup>4</sup> मिनु गो परमप्रभु यावे कली माल्ला। मेकोमी आं लोव्र लेत्ताक्यी। मेकोमी आं कली हिंतीक नु श्येत रे प्रॉइती।<sup>5</sup> मेको आ लां कोव्रबपुकी ग्येरशो दुम्नीम। मेकोपुकी मुने मदोक्मल।<sup>6</sup> एको श्येत जाइबम पुंइतु। मिनु परमप्रभु यावेमी आ लोव्र नैशा, आ श्येत रे प्रॉइतु।<sup>7</sup> परमप्रभु यावे आ स्वर्ग डा गेय पाइबम परमप्रभु कली मान पा हिंब नेल्ल आन एर आंथ बाक्शा, खाल पाइब। मिनु मेको आन कली आन श्येत रे प्रॉइब। भजन संग्रह ९१:११; उत्पत्ती ३२:२-३; २राजा ६:१७<sup>8</sup> परमप्रभु यावे कली कोव्रडीन, मेको रिम्शो बाक्ब। मेको कली जिम्मा गेंसीबपुकी ग्येरसीशो बावनीम।<sup>१</sup> पत्रुस २:३<sup>२</sup> परमप्रभु यावे आ मुरपुकी मेको कली मान पा हिनीन। मारदे हना मेको कली मान पा हिंबपुकी मारेड मारेडम गाप्शो बावनीम।<sup>10</sup> शुश क्येट थीब आन तमी तौ जचा व्चचा मतथु, शोव्रलु बेक्नीम। तन्न परमप्रभु यावे कली माल्ब मारेड मारेडम गाप्शो बावनीम। लूका १:५३

<sup>11</sup> आलपुकी, एक जाक्कीन। मिनु आं लोव्र नेनीन। गो इन कली परमप्रभु यावे कली मान पा हिंतीके आ पर्वम शेंनन्नी।

<sup>12</sup> सु सुमी शुश नाक्ती ब्रॉइचा नु रिम्शो तचा दाक्नीमी,<sup>13</sup> मेको मरिम्शो लोव्र नु जोल पतीके रे डोन बाक्चा माल्नीम।<sup>14</sup> मरिम्शो पतीके रे लेश्शा, रिम्शो पने। थुं नाइश्शा बाक्तीके माल्शा बाक्कीन।

<sup>15</sup> परमप्रभु यावेमी ठीक पाइब आन गे कोव्रशा, मेको आन पुंइशो नेंब।<sup>16</sup> परमप्रभु यावेमी मरिम्शो पाइब आन कली कोव्रना कोव्रन बाक्ब। मिनु मेको आन कली मिम्तीके का यो मवोइक्थु रागी रे क्याम्ब। हितोपदेस १०:७<sup>17</sup> ठीक पाइबपुकीमी पुंइनीम। मिनु परमप्रभु यावेमी मेको आन पुंइशो नैशा, आन श्येत नेल्ल रे प्रॉइब।<sup>18</sup> परमप्रभु यावे थुं लुक्च लशो आन नेक्था बाक्ब। आन थुं बेक्शो आन कली प्रॉइब। भजन संग्रह ५१:१९<sup>19</sup> ठीक पाइबपुकी शुश श्येत जाइनीम। तन्न परमप्रभु यावेमी मेको आन कली श्येत नेल्ल रे प्रॉइब। २कोरिन्थी १:५<sup>20</sup> मिनु मेकोमी आन रुश नेल्ल कोव्रब। मुरुम का यो मजिक्नीम। यूहन्ना १९:३६; प्रस्थान १२:४६<sup>21</sup> मिनु परमप्रभु आ अरेशो मटीब आन मरिम्शो पतीकेमी साइक्चा पुंइसीनीम। ठीक पाइब आन कली मदाक्बपुकी दोस तशा सजाइ ताइनीम।<sup>22</sup> परमप्रभु यावेमी आ गेय पाइब आन कली श्येत रे प्रॉइब। मेको कली जिम्मा गेंसीबपुकी दोस मतथु, काइ सजाइ मताइनीम।

जोरी सत्रु कली निसाफ पने, देंशो

दाऊद आ कुम्सो।

35 परमप्रभु यावे, आं कली जिचा तोइब आन कली जिचा तोने। आं कली लडाइ तोइब आन कली लडाइ तोने।<sup>2</sup> ठेयब तेक्तीक नु या शेशा, आं कली वारच पथ बोक्कीन।<sup>3</sup> इन तूतीक नु तरवार शेशा, आं कली खेदा पाइब आन लां तेक्कीन। मिनु आं थुं कली “गो इ कली प्रॉइब नड” देनीन।<sup>4</sup> आं कली साइक्चा माल्बपुकी खतम दुम्शा, मुने दोक्मल। आं कली मरिम्शो पाइक्चा, दे मिम्बपुकी नोले लेश्शा, मुने दोक्मल।<sup>5</sup> मेकोपुकी फशेम योल्शो भूस खोदेशो दुम्मल। मिनु परमप्रभु यावे आ स्वर्ग डा गेय

पाइबमी मेको आन कली खेदा पस डा पस पवल।<sup>6</sup> मेको आन लां छिडछिड नु ग्रेक्शा थित्तीके दुम्ल। मोपा यो परमप्रभु यावे आ स्वर्ग डा गेय पाइबमी खेदा पवल।

<sup>7</sup> मारदे हना मेकोपुकीमी मोशान आं कली ब्वारद दाइक्ताक्यीमी। मिनु मोशान आं कली साइक्चा कली बिक्तीक दोम्तेक्म।

<sup>8</sup> मेको आन मतुइक्थु, हिंचा डा ठेयब श्येत दुम्ल। मिनु मेको आन खूइश्शा दाइश्शो ब्वारदम आंमान रेम्मल। मेको आन दोशो बिक्तीकेमी आंमान बिक्शा, बेक्मल।<sup>9</sup> गो चहिं परमप्रभु यावेमी आं कली प्रॉइशो तशा ग्येरसीनुड।<sup>10</sup> मिनु गो आं रां नेल्लेमी “परमप्रभु यावे, इन खोदेशो सु बाक्बा?” देंनुड। गे मचाप्ब नु श्येत जाइब आन कली बोल्पो मुर आ गुड रे प्रॉइनीनी।

<sup>11</sup> जोल पाइब सांकछीपुकी गूनीम। मिनु आं मतुइश्शो लोव्र हिल्लो पाइनीम।<sup>12</sup> गो मेको आन कली रिम्शो पाता। मेकोपुकीम चहिं मरिम्शो पाइक्तीमी। गो का ला दुम्ती, सुइम आं कली वारच मपाइय्यीमी।<sup>13</sup> मेकोपुकी रोइ पामेनु, गो अरन्डी फेक्शा, माइजा बाक्शा, सुर्ता पाता। गो बाप्शा मेको आन पर्वम परमप्रभु कली पुंइता। अय्युब ३१:२९<sup>14</sup> आं वारच नु आं लोक्ब आन पर्वम खोदेशो पा, मेको आन पर्वम रोंका पाता। आं ममा आ पर्वम खोदेशो पा आं पिया खुक्शा, रोंका पाता। रोमी १२:१५<sup>15</sup> तन्न गो दाइल पांइसीडानु, मेकोपुकी रिश्शा, आं पर्वम शुक्शी पचा कली बुक्तेक्म। आं मतुइश्शो शुक्शी पाइबपुकी आं कली मरिम्शो पचा कली बुक्तेक्म। मिनु मेकोपुकीम आं कली शुक्शी पस डा पस पतीमी।

<sup>16</sup> मेकोपुकी नेल्ल क्येडा मरिम्शो दुम्शा, शुक्शी पा, आन खूइ शेप्नीम।

<sup>17</sup> परमप्रभु, गे गेना सम्म मेको आन कली कोव्रशा बावनीनी? परमप्रभु मरिम्शो पाइबपुकी रे आं कली प्रॉइयीनी। आं कली नेल्ल क्येडा बोल्पो मुर रे प्रॉइयीनी? <sup>18</sup> मिनु गो शुश मुर आन डोंइती इन कली “गे ठेयब बावनीनी” देंनुड। ठेयब हुल आन दातेमी इन कली कुम्सो पा ठेयब सेल्लुड।

<sup>19</sup> मेकोपुकी मोशान आं जोरी सत्रु दुम्शा, आं पर्वम ग्येरचा मतामेक्ल। मोशान खेदा पाइबपुकी आं पर्वम आन मिक्च रिक्चा मतामेक्ल। भजन संग्रह २५:१९; भजन संग्रह ६९:५<sup>20</sup> मारदे हना मेकोपुकी थुं नाइश्शा बाक्तीक आ पर्वम लोव्र मपाइनीम। रागीम थुं नाइश्शा बाक्ब आन कली जोल पा दोस गेचा कली मिम्नीम।<sup>21</sup> मेकोपुकीमी ठेयब शोव्र सेल्शा, आं पर्वम “आहा आहा, आंइ मिक्चीम तचा ताइतक” देंनीम।<sup>22</sup> परमप्रभु यावे, गे एको ताइतीनी। मिनु सिक्सी पा मबाक्कीन। परमप्रभु यावे आं क्येडा डोन मदुमीन।<sup>23</sup> बोक्कीने। मिनु आं कली वारच पाइय्यीनी। परमप्रभु, आं परमप्रभु यावे, आं पोन बोक्कीन।<sup>24</sup> परमप्रभु यावे, आं परमप्रभु, इन ठीक पतीकेम आं कली निसाफ पने। आं पर्वम मेकोपुकी ग्येरचा मतामेक्ल।<sup>25</sup> मेकोपुकीमी आन थुंमी “आहा, आंइ मिम्शो दुम्ल” देंचा मतामेक्ल। मेकोपुकीमी “गो मेको कली खतम पोक्तक” देंचा मतामेक्ल।

<sup>26</sup> गो श्येत जडानु, आं पर्वम रिप्ब नेल्ले मुने दोक्मल। मिनु मेको “क्येडा ठेयब नकी” देंबपुकी मुने दोक्शा आइक्च सेल्चा पुंइसीमल।<sup>27</sup> आं कली दाक्बपुकी आं ठीक पशो तशा, ग्येरसीशा कुम्सो पामेक्ल। मिनु मेकोपुकीमी गेना हना यो “परमप्रभु यावे आ नें ठेयब बाक्ल। मेकोमी आ गेय पाइब कली रिम्शो दुम्शो तचा दाक्ब” देंमल।<sup>28</sup> मिनु गो नाक्त रे इन ठीक पतीके नु इन ठेयब दुम्तीके आ पर्वम लोव्र पाइनुड।

परमप्रभु आ रिम्शो पतीके

कुम्सो पपाइक्ब कली परमप्रभु यावे आ गेय पाइब दाऊद आ कुम्सो।

36 परमप्रभु आ अरेशो मटीब आन थुंमी हेंथे पतीक लोव्र बाक्ब। मार लोव्र बाक्ब देंशा हना “मेकोपुकीम परमप्रभु कली मान पा महिनीम” देंशो लोव्र बाक्ब। रोमी ३:१८<sup>2</sup> मेकोपुकी ठेयब लेश्शा “आंइ मरिम्शो पशो गेनायो मतुंइसीब, गो दोस मताइनय” दे मिम्नीम। रोमी ३:१८<sup>3</sup> मेको आन लोव्र मरिम्शो नु जोल ला बाक्ब। मेकोपुकीमी रुब् थुंम मिम्शा, रिम्शो पचा प्रॉइने थुम्शो बावनीम।<sup>4</sup> मेको आन ब्राख्येम बाक्मानु, आन मरिम्शो पतीक ला मिम्ना मिम्न बावनीम। मेको मरिम्शो लां खोइक्नीम। मेकोमी आन थुंमी “मरिम्शो पशो ग्रांरा दिशा मपाइनीकी” दे मदेनीम। मीका



२:१<sup>5</sup> परमप्रभु यावे, इन गेना हना यो दाक्तीके सरीड सम्म जाक्दीशो बाक्ब। इन दाक्शा मप्रौइतीके गोस्स क्येडा इर बाक्ब।<sup>6</sup> इन ठीक पतीके ठेयब डांडापुकी खोदेशो नु इन निसाफ पशो शुश लक्च लशो समुन्द्र खोदेशो बाक्ब। गे मुरपुकी, बी ब्यफ, क्यारश भेडा नु जन्तु आन कली कोव्रशा, श्येत रे प्रौइतीनी।<sup>7</sup> परमप्रभु, इन गेना हना यो दाक्तीक थम रिशो बाक्ब। मिनु मुरपुकी इन फ्रां आगाम फाम्सीनीम।<sup>8</sup> मेकोपुकी इन खिं डा जचा तूचामी रूनीम। गे मेको आन कली इन ग्येरतीकेमी ग्येरपाइक्नीनी।<sup>9</sup> मारदे हना गे नु ब्रौइतीके बाक्ब। मिनु गो इन छेडछेडमी हाम्सो ताइनीकी। *येरमीया २:१३; यूहन्ना ४:१४*

<sup>10</sup> इन गेना हना यो दाक्तीके इन कली तुइक्ब आन तार मोतीन। इन ठीक पतीके रिशो थुं पाइशो आन तार मोतीन।<sup>11</sup> मिनु ठेयब लेशो मुर आन खोइलीम आं कली मदिम्दीमील। इन अरेशो मटीबपुकीमी आं कली मखेरयीमील।<sup>12</sup> मरिशो पाइबपुकी गोल्शा, खतम दुशो बाक्नीम। मेकोपुकी बोक्ने मचाप्चा डा पा गोल्शो बाक्नीम।

टीब नु मटीब आन पर्वम

*दाऊद आ कुम्सो।*

**37** परमप्रभु आ अरेशो मटीब आन कली तशा, गाइशा, चुरशा मपने। दूली पाइब आन कली तशा, गेहे मपने। *हितोपदेस २४:१९*  
<sup>2</sup> मारदे हना मेकोपुकी घांस खोदेशो पा रीब पा सोव्रनीम। गिग खाइ खोदेशो पा सोल सुल बेक्नीम।<sup>3</sup> परमप्रभु यावे कली जिम्मा गेंसीशा, रिशो पने। रागीम रिशो दुशा बाक्चा ताइनीनी।<sup>4</sup> परमप्रभु यावे कली तुइशा, ग्येरसीने। मेकोमी इन थुंम पुंइशो गेब। *भजन संग्रह २०:५*<sup>5</sup> गे परमप्रभु यावे कली जिम्मा गेंसीने। मिनु मेकोमी इन पर्वम गेय पाइब।<sup>6</sup> मेकोमी इन ठीक दुम्तीके छेडछेड खोदेशो पा गूपाइक्ब। इन ठीक पतीके नाक्ती खोदेशो दुम्पाइक्ब। *मीका ७:९*<sup>7</sup> परमप्रभु यावे आ डौंइती सिक्सी पा बाक्शा, मेकोमी पाइब, दे रिम्दीन। आन दला दाक्स पाइब नु मरिशो मिम्शा पाइब आन पर्वम मचुरीने।<sup>8</sup> गाइक्चा नु चुरचा प्रोनीन। मगाइक्तीन। मारदे हना मो पतीकेमी इन कली मरिशो पपाइक्ब।<sup>9</sup> परमप्रभु आ अरेशो मटीब क्याम्चा पुंइसीनीम। तन्न परमप्रभु यावे आ लां कोव्रबपुकी रागीम बाक्चा ताइनीम।<sup>10</sup> इक्का नाक्त् नोले परमप्रभु आ अरेशो मटीब मलीनीम। गेपुकीमी मेको आन कली माल्तीनी हना यो, मथिल्लीनी। मेको आन बाक्तीके श्येतथ बाक्ब।<sup>11</sup> ब्रेशोपुकी रागीम बाक्चा ताइनीम। मारेइ मारेइ तशा ग्येरशा, ठेयब थुं पा बाक्चा ताइनीम। *मत्ती ५:५*

<sup>12</sup> मिनु परमप्रभु आ अरेशो मटीबपुकीमी ठीक पाइब मुर आन पर्वम “दोपा श्येत गेचा नमी” दे मिम्शा, आन खूइ शेषो बाक्नीम।<sup>13</sup> तन्न परमप्रभु मेको आन कली तशा, रिष्व। मारदे हना मेको आन नाक्त् नुषो तुइशो बाक्ब। *अय्युब १८:२०*<sup>14</sup> परमप्रभु आ अरेशो मटीबपुकीमी प्रुडग नु श्येत जाइब आन कली साइक्चा कली तरवार शोइक्नीम। आन लिब्रा कीनीम। रिशो थुं पाइशो मुर आन कली साइक्चा माल्नीम।<sup>15</sup> तन्न मेको आन तरवारमी आंमा आन लुडगीर तूचा पुंइसीनीम। आन लिब्रा जिक्नीम।<sup>16</sup> परमप्रभु आ अरेशो मटीब आन शुश शौप क्येडा ठीक पाइब आन इक्का खोइ शौप रिशो बाक्ब। *हितोपदेस १५:१६*<sup>17</sup> मारदे हना परमप्रभु यावे आ अरेशो मटीब आन गुइ जिक्चा पुंइसीनीम। परमप्रभु यावेमी ठीक पाइब आन कली रिशो पा बाक्चा गेब।<sup>18</sup> परमप्रभु यावेमी दोस मताइब आन नाक्ती तुइक्ब। मिनु मेको आन शौप गेना हना यो लीब। *उपदेसक ८:१२*<sup>19</sup> ठेयब श्येत दुम नाक्ती मेकोपुकी मुने मदोक्नीम। मिनु अन्काल दुम नाक्ती मेकोपुकी जशा रूचा ताइनीम। *हितोपदेस १०:३*<sup>20</sup> परमप्रभु आ अरेशो मटीबपुकी खतम दुम्नीम। मिनु परमप्रभु यावे आ जोरी सन्तु दिम डा रिशो घांस खोदेशो बाक्नीम। मिनु मेकोपुकी सोल सुल बेक्शा, कुन खोदेशो पा जाम्शा लाइनीम।

<sup>21</sup> परमप्रभु आ अरेशो मटीबपुकीमी जेर जशा, मथानीम। मिनु ठीक पाइबपुकीमी हाइशो दुशा गेनीम।<sup>22</sup> परमप्रभु रे आसीक ताइबपुकीमी रागी ताइनीम। परमप्रभु रे सराप ताइबपुकी जाम्शा लाइनीम।<sup>23</sup> परमप्रभु यावेमी आ मुर आन थेक्तीक बोल्यो सेल्ब। मेको आन कली तशा ग्येरब।

24 मेको दाइल पाइसाक्म हना यो, मगोल्नीम। मारदे हना परमप्रभु यावेमी मेको आन गुइ ग्याइशा, तिक्ब। *हितोपदेस २४:१६*

<sup>25</sup> गो ठिटा बाक्ती, मुल खाल्पा दुम्ती। तन्न ठीक पाइबपुकी नु आन तमी तौ नु चच युइमी मुल सम्म पुंइशा जशो गेनायो मतडमी।<sup>26</sup> मिनु मेकोपुकीमी नेल्ल नाक्ती हाइशो दुशा, प्रुडग आन कली मार मार गेनीम। मिनु मेको आन आलपुकीमी आसीक ताइनीम।<sup>27</sup> मरिशो पतीके रे डोन बाक्कीन। रिशो पने। मिनु गे गेना हना यो ब्रौइचा ताइनीनी।<sup>28</sup> मारदे हना परमप्रभु यावेमी ठीक निसाफ दाक्ब। आ कली मप्रौइब आन कली नेल्ल नाक्त् गेना हना यो कोव्रब। ठीक पाइब गेना हना यो रिशो बाक्चा ताइनीम। तन्न आ अरेशो मटीब आन तमी तौ नु चच युइ तिल्चा पुंइसीनीम।<sup>29</sup> ठीक पाइबपुकीमी रागी ताइनीम। मिनु गेना हना यो मेकेर बाक्नीम। *यसैया ६०:२१*

<sup>30</sup> ठीक पाइबपुकीमी जोक्तीक तुइक्तीक लोव्र पाइनीम। मिनु मेकोपुकीमी ठीक पतीके शेंनीम।<sup>31</sup> आन परमप्रभु आ अरेशो लोव्र मेको आन थुंमी बाक्ब। मिनु हेंथे मपथु, परमप्रभु आ लांम गाक्नीम।<sup>32</sup> परमप्रभु आ अरेशो मटीबपुकीमी बाप्शा, ठीक पाइब आन कली साइक्चा माल्नीम।<sup>33</sup> तन्न परमप्रभु यावेमी ठीक पाइब आन कली मेको आन गुइम दुम्चा मगेब। ठीक पाइब आन निसाफ दुम्मेनु, दोस मताइब दुम्पाइक्ब।<sup>34</sup> परमप्रभु यावे कली रिम्दीन। मेको आ लांम गाक्कीन। मेकोमी इन कली ठेयब सेल्शा, रागी इन कली गेब। मिनु गे परमप्रभु आ अरेशो मटीब आन कली खतम सेल्चा ताइनीनी।

<sup>35</sup> गो परमप्रभु आ अरेशो मटीब लेबानोन डा ठेयब रवा खोदेशो दुम्शो ताता। *१सामुएल ३५:२-३८; इजीकीएल ३१:३-१४*<sup>36</sup> मिनु गो आ बाक्तीक कोव्रता, मेको मुर मबा। गो मेको कली माल्ता, मथिदु।<sup>37</sup> दोस मताइब आन कली कोव्रडीन। रिशो थुं पाइशो मुर कली कोव्रडीन। मारदे हना मेकोपुकी थुं नाइशा बाक्शो बाक्नीम। *उत्पत्ती ३९:७-९*<sup>38</sup> तन्न हेंथे पाइब नेल्ल खतम दुम्नीम। परमप्रभु आ अरेशो लोव्र मटीब नेल्ल खतम दुम्नीम। आन तमी तौ चच युइ यो तिल्चा पुंइसीनीम।<sup>39</sup> परमप्रभु यावे ठीक पाइब आन कली वारच पाइब बाक्ब। मिनु मेको आन कली श्येत दुम्मेनु, मेको आन फाम्सीतीके दरवार बाक्ब।<sup>40</sup> परमप्रभु यावेमी मेको आन कली वारच पा प्रौइब। मिनु आ अरेशो मटीब आन गुइ रे प्रौइब। मारदे हना मेकोपुकी परमप्रभु कली जिम्मा गेंसीशो बाक्नीम। *लूका १८:७-८*

मरिशो पशो क्याम्चा, दे पुंइशो

*मप्रेंथु मिम्चा कली दाऊद आ कुम्सो।*

**38** परमप्रभु यावे इन गाइक्तीकेमी आं कली महुइक्तीनी। इन चुरतीकेमी आं कली सजाइ मगेयीनी।<sup>2</sup> मारदे हना इन ब्राम आं कली देशो बाक्नीम। मिनु इन गुइमी आं कली चिप्शो बाक्ब। *अय्युब ६:४*  
<sup>3</sup> इन गाइक्तीकेमी आं रां नेल्ल खाइशो बाक्ब। आं मरिशो पतीकेम आं रुश नेल्ल मुक्शो खोदेशो बाक्नीम।<sup>4</sup> आं मरिशो पशोमी आं पिया सम्म गुम्शो बाक्ब। मेको आं कुरने मचाप्चा डा पा हेल्शो बाक्नीम। *बिलाप १:१४*;  
<sup>5</sup> आं निप्स काप्शो आ पर्वम आं गार राक्शा, रिना पाइशो बाक्नीम।  
<sup>6</sup> गो नाक्त् रे आं पिया खुक्शा, रौंका पा गुर ब्वेशा गाक्शो बाक्नुड।<sup>7</sup> आं ची नेल्ल खाइशो बाक्ब। आं रां नेल्ल सेस मबाक्ब।<sup>8</sup> गो गलाक गुलुक दुम्शा, काइ सक्ति मपाइशो दुम्शो बाक्ती। आं थुं डा श्येतम शुश हुकयी पाइनुड।

<sup>9</sup> आं परमप्रभु, गे आं दाक्शो नेल्ल तुइशो बाक्नीनी। आं हुकयी पतीके यो तुइशो बाक्नीनी।<sup>10</sup> आं लुडगीर प्रेक्शा, आं सक्ति जाम्त। आं मिक्च ब्रा ब्रा दुम्शो बाक्ब।<sup>11</sup> आं वारच नु आं खिं डा मुर आं श्येत तशा, डोन बाक्नीम। मिनु आं नेक्था डा मुरपुकीमी डोन रे कोव्रनीम। *भजन संग्रह ६९:९; भजन संग्रह ८९:९; अय्युब १९:१३-१९*<sup>12</sup> आं कली साइक्चा माल्बपुकीमी ब्वारद दाइशा, वोइशो बाक्नीम। आं कली श्येत दुम्शो कोव्रकोव्र दाक्बपुकीमी “मेको कली दोपा श्येत गेचा, दोपा मेको आ पर्वम जोल पचा” दे नाक्त् रे लोव्र पाइनीम।<sup>13</sup> गो नोफा मनेंन मुर खोदेशो दुम्ती, मनेंनुड। ब्वाक्ने मचाप्ब मुर खोदेशो दुम्ती, काइ लोव्र मपाइनुड। *भजन*

संग्रह ३९:१३<sup>14</sup> गो थमा पा नोफा मनेब खोदेशो दुश्शा, मारेड लोव्र मलेत्नुड।<sup>15</sup> परमप्रभु यावे, गो इन कली रिम्नुड। गे आं लोव्र लेत्नीनी। गे परमप्रभु यावे, आं परमप्रभु बाक्नीनी।<sup>16</sup> मिनु गो “मेकोपुकीमी आं पबर्म शुक्शी पा ग्येरचा मतामेक्ल। आं कली ग्रेक्शो तशा, बोरचा मतामेक्ल” देंती।<sup>17</sup> मारदे हना गो दाइल पांडसीचा चिक्शो बाक्नुड। गो श्येत जस डा जस बाक्नुड।<sup>18</sup> गो आं काइ मरिम्शो पशो शोव्रनुड। आं मरिम्शो पशो मिम्शा सुर्ता पाइनुड। भजन संग्रह ३२:५; <sup>19</sup> आं जोरी सत्रु चहिं रिम्शो पा ब्रोंइशा, बोल्यो दुश्शो बाक्नीम। आं कली मोशान मदाक्ब शुश बाक्नीम।<sup>20</sup> मुरपुकीमी आं रिम्शो पशो आ पा डा आं कली मरिम्शो पाइनीम। मारदे हना गो रिम्शो पाइब बाक्ती हना यो, आं कली खेदा पाइनीम।<sup>21</sup> परमप्रभु यावे, आं परमप्रभु, आं कली मप्रोंइयीनी। आं क्येडा डोन मदुमीन।<sup>22</sup> परमप्रभु, आं कली वारच पाइश्शा, श्येत रे प्रोंइचा कली रीब पा जाक्कीन।

मुर आ ब्रोंइतीक इक्का ला बाक्ब

कुम्सो पपाइक्ब येदुथून कली। दाऊद आ कुम्सो।

१इतिहास २५:१,३

39 मिनु गो “गो आं गेय नेल्ल होस पा पाइक्नुड। गो लोव्र पचा यो होस पा पाइक्नुड। मरिम्शो पाइबपुकी आं नेक्था बाक्तेक्म हना, गो सिक्सी पा बाक्नुड” देंती।<sup>2</sup> गो मब्वाक्थु, सिक्सी पा बाक्ती। मिनु रिम्शो लोव्र यो मपथु, आं थुं डा श्येत बारत। भजन संग्रह ३८:१४<sup>3</sup> आं थुं चोशो बाक्त। शुश मिम्शा, मी ब्रशो खोदेशो दुम्ती।

<sup>4</sup> “परमप्रभु यावे, आं बेक्तीक नाक्त कोंइदीनी। आं ब्रोंइचा गिशा नाक्त लीमे तुइक्पाइय्यीनी। गो रीब पा जाम्शा लाइब मुर बाक्नुड। भजन संग्रह ९०:१२; अय्युब १४:५<sup>5</sup> गे आं ब्रोंइतीक नाक्त बिल्ला का निक्शी खोदेशो सेल्लतीनी। आं ब्रोंइतीक नाक्त इन डोंइती मारेड ममाइ। मुर नेल्ले आन ब्रोंइतीके जाम्शा लाइब फश खोदेशो बाक्नीम” देंती। भजन संग्रह ९०:५-६ ठेयब सेंदा पा।<sup>6</sup> मुरपुकी वांकु खोदेशो पा गाक्शो बाक्नीम। मेकोपुकी मोशा सुर्ता पाइनीम। शुश शोंप तेल्नीम। मेको सुम जाइबा मतुइक्नीम। भजन संग्रह ४९:१७-२१; उपदेसक २:१८-२१; लूका १२:१५-२१

<sup>7</sup> “परमप्रभु, गो मार कली रिम्ना रिम्न बाक्नुडा? गो इन लां ला कोवशा बाक्नुड।<sup>8</sup> आं मरिम्शो पशो रे प्रोंइयीनी। मूर्खपुकीम आं कली शुक्शी मपामेक्ल।<sup>9</sup> गो सिक्सी पा बाक्शा मब्वाक्ड। मारदे हना गे मो पपाइक्तीनी।<sup>10</sup> इन याम पाइश्शो लेत्तीन। गो इन तुप्शोमी जाम्शा लाइब दुम्ती।<sup>11</sup> गे मुर आन कली पाप पशो आ पबर्म तुप्तीनी। आ दाक्शो तुम्बुम वा नेक्शो खोदेशो पा जाम्शा लाइब। थमा पा मुर नेल्ले आन ब्रोंइतीक जाम्शा लाइब फश खोदेशो बाक्नीम। ठेयब सेंदा पा।

<sup>12</sup> परमप्रभु यावे, आं पुंडशो लोव्र नेनीन। आं वाइ ब्रेश्शो नेनीन। आं डाक्शो तशा, वारच पाइय्यीनी। मारदे हना गो इन डोंइती आं किकी पिप खोदेशो पा, रागी डा पौना खोदेशो बाक्नुड। भजन संग्रह ११९:१९; लेवी २५:२३; १ पत्रुस २:११; हिब्रू ११:१३<sup>13</sup> आं बेक्चा डोंइती आं पबर्म गाइक्चा प्रोनीन। मिनु गो लेंशा ग्येरशा बाक्चा तडल” दे पुंडता।

“परमप्रभुमी वारच पात्तु” देंशो

कुम्सो पपाइक्ब कली दाऊद आ कुम्सो।

40 गो परमप्रभु यावे कली रिम्स डा रिम्स बाक्ती। मेकोमी आं गे कोवशा, आं वाइ ब्रेश्शा, पुंडशो लोव्र नेंतु।<sup>2</sup> मेकोमी आं कली ग्रांग्रा दिचा डा हिलोम बिक्शा बेक्तीक रे गुंडताक्यी। मिनु आं कली सेरथे फुल्लु का तार राप्पाइक्ती। मिनु महिम्सीचा डा पा नाइक्पाइक्ती।<sup>3</sup> मेकोमी आं कली नक कुम्सो का पपाइक्ती। आंइ परमप्रभु कली ठेयब सेल्लतीक कुम्सो पपाइक्ती। मिनु शुश मुरुम एको तशा, नेंशा, परमप्रभु यावे कली मान पा हिंशा, मेको कली थमा सुइक्नीम। भजन संग्रह ३३:३<sup>4</sup> सु सुमी परमप्रभु यावे कली थमा सुइक्नीमी, मेको ग्येरसीशो मुर बाक्नीमी। मेकोपुकी ठेयब लेशो नु जोल डा सक्ति पाइश्शो देवी देवता गे लाइब नु मबाक्नीम।

<sup>5</sup> मिनु गो “परमप्रभु यावे, आं परमप्रभु, गे आंइ पबर्म पशो छक लाक्चा डा गेय नु इन मिम्शो कोंइताक्की। मेको शुश बाक्नीम। इन खोदेशो सुइ मबाक्नीम। गो मेको आन कली शेंशें दाक्ती, देंती हना यो, नेल्ल शेंने मचबु। मारदे हना मेको शुश बाक्नीम। भजन संग्रह १३९:१७-१८<sup>6</sup> गे मार मार क्योरशा चढेशो नु जचा चढेशो तशा मग्येरसीनी। तन्न इन अरेशो लोव्र नेंचा कली नोफा दाइक्ब सेल्लतीनी, चोशा चढेशो नु पाप आ पबर्म चढेशो मपुंडनी। भजन संग्रह ५०:८-१३; भजन संग्रह ५१:१८; १सामुएल १५:२२; हिब्रू १०:५-१०<sup>7</sup> मिनु गो ‘गो एक बाक्ती, दे परमप्रभु यावे आ लोव्रमी आं पबर्म ब्रेक्शो बाक्ब’ देंती।<sup>8</sup> परमप्रभु, गो इन दाक्शो पशोमी आं कली ग्येरपाइक्ब। इन अरेशो लोव्र आं थुंम बाक्ब।<sup>9</sup> गो ठेयब गुम्तीकेमी इन रिम्शो ब्रोंइतीक लोव्र आ पबर्म लोव्र पाइनुड। परमप्रभु यावे, गो सिक्सी पा मबाक्नुड। मेको गे तुइक्नीनी।<sup>10</sup> गो इन मुर आन कली श्येत रे प्रोंइतीके आं थुंम ख्रुइश्शा मवोंइक्थु, इन दाक्शा मप्रोंइतीके नु मुर आन कली श्येत रे प्रोंइतीके आ पबर्म लोव्र पाता। गो इन गेना हना यो दाक्तीके नु दाक्शा मप्रोंइतीके आ पबर्म मख्रुइक्थु, ठेयब गुम्तीकेमी शेंताक्डमी।<sup>11</sup> परमप्रभु यावे, गे इन शिशी पतीके मतेक्कीन। इन गेना हना यो दाक्तीक नु दाक्शा गेनायो मप्रोंइतीकेम आं कली गेना हना यो खाल पयीसील।<sup>12</sup> मारदे हना हिक्ने मचाप्चा डा श्येतपुकीमी आं कली पुम्शो बाक्नीम। आं मरिम्शो पतीकेम आं पिया खुक्शो बाक्ती। मेकोपुकी आं पिया डा चां क्येडा यो शुश बाक्नीम। मोपा आं थुं लुक्च लशो बाक्ब।<sup>13</sup> परमप्रभु यावे, श्येत रे प्रोंइयीनी। परमप्रभु यावे, आं कली वारच पाइक्चा कली रीब पा जाक्कीन। भजन संग्रह ७०:-<sup>14</sup> आं कली साइक्चा माल्ब नेल्ले मुने दोक्शा, ग्येत्थ लुक्च दुम्मल। आं कली श्येत जशो दाक्ब नेल्ल लेश्शा लशा, खतम दुम्मल।<sup>15</sup> आं कली शुक्शी पाइबपुकीमी ‘आहा, आहा’ देंशो, नेल्ल रे मुने दोक्मल।<sup>16</sup> तन्न सु सुमी इन कली माल्नीमी, मेको नेल्ले इन पबर्म शुश ग्येरसमल। आन श्येत रे प्रोंइचा पुंडसीब नेल्लेमी गेना हना यो ‘परमप्रभु यावे ठेयब बाक्ब’ देंमल।<sup>17</sup> गो प्रुडग नु श्येत जाइब बाक्ती हना यो, परमप्रभुम आं कली मिम्ब। गे आं कली वारच पाइब नु आं कली श्येत रे प्रोंइब बाक्नीनी। आं परमप्रभु देश मपने” दे लोव्र पाता।

रोइ पाइबमी परमप्रभु कली पुंडशो

कुम्सो पपाइक्ब कली दाऊद आ कुम्सो।

41 सु सुमी प्रुडग मुर आन पबर्म सुर्ता पा, वारच पाइनीमी, मेको आन कली परमप्रभु यावेमी आन श्येत रे प्रोंइब। हिलोपदेस १४:२१; मत्ती ५:७<sup>2</sup> परमप्रभु यावेमी मेको आन कली कोवशा, खाल पा प्रोंइब। मेको रागीम बाक्मानु, ग्येरसमल। गे मेको आन कली आन जोरी सत्रु आन गुडम मगेनीनी।<sup>3</sup> मेकोपुकी रोइ पा गोल्शा बाक्मानु, परमप्रभु यावेमी मेको आन रोइ सापाइक्ब।<sup>4</sup> गो “परमप्रभु यावे आं कली शिशी पा सापाइय्यीनी। मारदे हना गो इन कली मरिम्शो पाता” देंती।<sup>5</sup> आं जोरी सत्रुमी “मेको गेना बेक्बा डा, आ नें क्याम्सीबा?” देंनीम।<sup>6</sup> मिनु आं कली सु सुम कोव्रथ जाक्नीमी, मेकोमी आं कली रिम्शो लोव्र पखु पाइनीम। मिनु नोले आं पबर्म “मार, मरिम्शो लोव्र पड” दे मिम्शा, मरिम्शो लोव्र ब्रपाइक्नीम।<sup>7</sup> आं कली ग्रांग्रा दिक्ब नेल्ल गुम्शा, आं पबर्म “मार मरिम्शो पाइक्चा” दे नोफा मुइक्मुइक्नीम।<sup>8</sup> मेकोपुकीमी “मेको कली बेक्तीक रोइमी ग्याइश्शो बाक्ब, आ गोल्तीक रे मबोक्ब” देंनीम।<sup>9</sup> गो आं नेक्था डा वारच, आं शोब्ले जाइबमी यो, आं कली ताइक्चा कली आ खोइल क्युक्तु।<sup>10</sup> परमप्रभु यावे, गे आं कली शिशी पाइश्शा, पोक्वीनी। मिनु गो मेको आन कली क्येक्क लेन्ने चबुल। भजन संग्रह ५५:१३-१५; यूहन्ना १३:१८; प्रेरित १:१६

<sup>11</sup> मोदेशो पाइतीनी हना, गे आं कली दाक्नीनी, दे तुइक्नुड। मारदे हना आं जोरी सत्रु आं पबर्म ग्येरचा मताइनीम।<sup>12</sup> आं रिम्शो थुं आ पबर्म गे आं कली ग्योम्ताक्वीनी। मिनु गे आं कली गेना हना यो इन डोंइती राप्पाइक्तीनी।

13 परमप्रभु यावे, इस्राएली आन परमप्रभु कली “गे गेना हना यो ठेयब बाक्नीनी। मेको थमा बाक्ब” देमल। आमेन आमेन। भजन संग्रह ७२:१८; भजन संग्रह ८९:५३; भजन संग्रह १०६:४८; भजन संग्रह १५०:६

ठेयब श्येतम परमप्रभु कली मिम्शो

कुम्सो पपाइक्व कली शेंतीक कुम्सो। कोराह आ तौ आन कुम्सो। इतिहास ६:१६,२२; इतिहास २०:१९

42 दोपा रोकेशेमी खोला डा ब्वाक्कु तूत दाक्शा ब्वाक्कु मिम्बा, मोपा आं थुंमी यो परमप्रभु, इन कली मिम्ब। 2 मोपा आं थुं ब्रॉइशा बाक्ब परमप्रभु आ नेक्था बाक्चा दाक्ब। गो गेना परमप्रभु आ डोंइती बाक्चा ताइनुडा? भजन संग्रह ६३:२; भजन संग्रह ८४:३; भजन संग्रह १४३:६ 3 आं प्रेक्कु नाक्दो नाक्ती आं जचा थोव्रक दुम्शो बाक्ब। मारदे हना मुरपुकीमी नाक्त किंत किंत “इ परमप्रभु ते बाक्मे?” दे शुक्शी पा हिल्लो पस डा पस बाक्नीम। भजन संग्रह ७९:१० 4 मिनु गो मेको नेल्ल मिम्शा, परमप्रभु, इन खिं लाइब शुश मुर आन कली लां कोंइशा, मेकोपुकी नु लना लन बाक्डानु, ग्येरसीशा “गे रिम्शो पाइब बाक्नीनी” दे गो नेल्लेमी कुम्सो पा चाड मानेतक। भजन संग्रह २७:४

5 आं थुं, गे मारदे लुक्च लाइनेवे? मारदे ग्येत्थ लुक्च दुम्नेवे? परमप्रभुमी मार पाइबा, मेको रिम्दो। मिनु नोले मेकोमी आं कली श्येत रे प्रॉइशो तशा, गो परमप्रभु कली ठेयब सेल्लुड। मारदे हना मेको आं कली श्येत रे प्रॉइब नु आं परमप्रभु बाक्ब। 6 आं परमप्रभु, आं थुं, ग्येत्थ लुक्च दुम्त। गो यर्दन डा दिंम नु हेरमोन डा मिसार डांडा रे इन कली मिम्नुड। 7 मिनु इन बारशो ब्वाक्कु आ ग्रीशोमी अर्को ब्वाक्कु कली ब्रेप्ब। मेको इन ब्वाक्कु आ छालमी आं कली सुम्शो बाक्ब।

8 मिनु गो नाक्ती परमप्रभु यावे आ गेना हना यो दाक्तीके तुइक्नुड। मिनु नाक्दो आ कुम्सो आं थुंमी बाक्ब। मेको आं कली ब्रॉइचा गेब परमप्रभु नु लोव्र पतीके बाक्ब।

9 गो परमप्रभु, आं संरथे फुल्लु कली “गे मारदे आं कली प्रेंदीनी? गो मारदे आं जोरी सत्रु रे पा खेदा पचा पुंइसीशा, थुं ग्येत्थ लुक्च दुम्शा, गाक्चा माल्डा?” देंती। ब्यवस्था ३२:४ 10 आं कली दिप्बपुकीमी आं रुश जिक्वशो खोदेशो पा शुक्शी पाइनीम। मिनु मेकोपुकीमी गेना हना यो “इ परमप्रभु ते बाक्मे” दे शुक्शी पा, हिल्लो पस डा पस बाक्नीम।

11 आं थुं, गे मारदे लुक्च लाइनेवे? मारदे ग्येत्थ लुक्च दुम्नेवे? परमप्रभुमी मार पाइबा, मेको रिम्दो। मिनु नोले आं कली श्येत रे प्रॉइशो तशा, गो परमप्रभु कली ठेयब सेल्लुड। मारदे हना मेको आं कली श्येत रे प्रॉइब नु आं परमप्रभु बाक्ब।

“वारच पाइय्यीनी” दे पुंइशो

43 परमप्रभु, आं कली वारच पाइय्यीनी। इन कली थमा मसुइक्व मुर आन पर्बम आं पोन बोक्कीन। मिनु जोल पाइब नु मरिम्शो पाइब मुरपुकी रे आं कली प्रॉइय्यीनी। 2 परमप्रभु, गे आं कली प्रॉइब बोल्यो दरवार बाक्नीनी। गे आं कली मारदे प्रॉइय्यीनी? गो मारदे आं जोरी सत्रुम खेदा पचा पुंइसीशा, रोंका पचा माल्डा? 3 इन छेडछेड नु इन थमा पतीके सोइक्तीन। मिनु मेकोमी आं कली लां कोंइशा इन डांडा नु इन बाक्तीकेमी चाक्यील। 4 मेना गो परमप्रभु कली चढेतीकेम जाक्नुड। मिनु परमप्रभुमी आं कली शुश ग्येरपाइश्शा, आं थुं नाइक्पाइक्ब। परमप्रभु, आं परमप्रभु, गो ठेयब ताप्तीक ताप्शा, कुम्सो पा इन कली ठेयब सेल्लुड।

5 आं थुं, गे मारदे लुक्च लाइनेवे? मारदे ग्येत्थ लुक्च दुम्नेवे? परमप्रभुम मार पाइबा, मेको रिम्दो। मिनु नोले आं कली श्येत रे प्रॉइशो तशा, गो परमप्रभु कली ठेयब सेल्लुड। मारदे हना मेको आं कली श्येत रे प्रॉइब नु आं परमप्रभु बाक्ब।

“लेंशा वारच पने” दे पुंइशो

कुम्सो पपाइक्व कली सेल्शो शेंतीक कुम्सो। कोराह आ तौ आन कुम्सो।

44 परमप्रभु, साइ आंइ किकी पिपीमी आन पालामी पशो इन गेय नेल्ल आंइ कली शेंताक्म। मिनु गो मेको नेल्ल नेंतक। ब्यवस्था ६:२०-२५ 2 रे रागी रागी डा मुर आन कली खेरशा, आंइ किकी पिपी आन कली बाक्पाइश्शो बाक्तीनी। गे मेको मुर आन कली क्याम्शा, आंइ किकी पिपी आन कली सोशा बोशा ब्रपाइश्शो बाक्तीनी। मोपा मेको आन कली प्रॉइशो बाक्तीनी। 3 मेको आन तरवारम मेको रागी मग्राशो बाक्तेक्म। आन सक्तिमी यो मग्राशो बाक्तेक्म। इन सक्ति नु इन कुल डा छेडछेडमी ग्रातेक्म। मारदे हना गे मेको आन कली दाक्शो बाक्तीनी।

4 गे आं पिप नु आं परमप्रभु बाक्नीनी। याक्ब कली ग्रापतीन। 5 इन पतीकेमी आंइ जोरी सत्रु आन कली ग्रानीकी। इन नेंमी आंइ जोरी सत्रु आन कली दिम्शा साइक्नीकी। 6 गो आं लिब्राम ग्राती, मर्देनुड। मिनु आं तरवारम यो आं कली ग्रापाइक्ने मचाप्ब। 7 तन्न गे आंइ कली आंइ जोरी सत्रु आन क्येडा ग्रापाइक्तीनी। मिनु आंइ कली काइ मदाक्ब आन कली वाम ग्याम सेल्लनीनी। 8 गोपुकीमी नाक्त किंत किंत परमप्रभु कली मिम्शा, आंइ नें बोरपाइक्नीकी। मिनु गोपुकीमी गेना हना यो “इन नें ठेयब बाक्ब” दे ठेयब सेल्लनीकी। ठेयब सेंदा पा। येरमीया ८:२२-२३

9 तन्न गे आंइ कली प्रॉइशा, श्येत जपाइक्तीनी। मिनु गे आंइ लडाइ पाइब नु मलनी। 10 मिनु गे आंइ कली आंइ जोरी सत्रु आन क्येडा ब्रपाइक्तीनी। मिनु आंइ कली मदाक्बपुकीमी आंइ मार मार रोइश्शा लाइक्तेक्म। 11 गे आंइ कली क्योरचा पुंइसीब भेडा खोदेशो पा प्रॉइतीनी। मिनु आंइ कली रागी रागीम ब्रपाइक्तीनी। 12 गे इन मुर आन कली मोशा लेयतीनी। मिनु मेको आन कली लेयशा, मारेइ ताक्चा थुं मपनी।

13 आंइ नेक्था डा मुर आन डोंइती आंइ कली गाइश्शा, शुक्शी पाइक्चा पुंइसीब सेल्लनीनी। गे मुर आन कली आंइ पर्बम तोक्शो नु मरिम्शो लोव्र पपाइक्तीनी। इकोरिन्थी १५:३१; रोमी ८:३६; भजन संग्रह ७९:४; इराजा ९:७ 14 गे आंइ कली रागी रागी डा मुर आन दातेम शुक्शी पाइक्चा पुंइसीब सेल्लनीनी। मुरपुकीमी आंइ कली तशा, आन पिया हिम्नीम। 15 गो नाक्त किंत किंत मुने दोक्नुड। आं मुनेमी आं कुल सुम्सीशो बाक्नुड। 16 आं कली शुक्शी पाइब, मरिम्शो लोव्र पाइब, जोरी सत्रुमी पतीके नु क्येक्क लेप्ब आन पतीके मोदेशो दुम्शो बाक्नुड।

17 मोदेशो दुम्त हना यो, गो इन कली मर्पेदक। मिनु इन कबल यो मर्पेदक। 18 गो नोले मर्शोइसक। इन लां रे ग्येत्थ लुक्च मपक। 19 तन्न गे आंइ कली फस पोक्शा, सिवार आन बाक्तीक खोदेशो पा छिडछिडमी सुम्तीनी।

20 गो आंइ परमप्रभु आ नें प्रेंशो नकी नु अरु देवी देवता आन कली पूजा पशो नकी हना, 21 मार, परमप्रभुमी मतुइक्वा डा? मारदे हना परमप्रभुमी मुर आन थुं डा खुइश्शो नेल्ल तुइक्ब। 22 मो हना यो गो इन पर्बम नाक्त रे साइक्चा पुंइसीनीकी। मिनु क्योरचा चिक्वशो भेडा खोदेशो पा हिक्सीशो बाक्नीकी। इकोरिन्थी १५:३१; रोमी ८:३६ 23 बोक्कीन, परमप्रभु, गे मारदे इप्नीनी? सेंसीने। आंइ कली मो पा मप्रोनीने। 24 गे मारदे इन कुल खुइक्नीनी? मिनु आंइ श्येत नु आंइ कली दिप्शो प्रेंनीनी? 25 आंइ थुं लुक्च लशो बाक्ब। आंइ रां खपीम गोल्शो बाक्ब। 26 बोक्कीन। मिनु आंइ कली वारच पने। इन गेना हना यो दाक्तीकेमी आंइ कली एको श्येत रे प्रॉइकी।

पिप आ ग्युंवे कली कुम्सो

कुम्सो पपाइक्व कली लिली फू डा कुम्सो आ लायो। शेंतीक कुम्सो। कोराह आ तौ आन कुम्सो। ग्युंवे डा कुम्सो।

45 आं थुं रिम्शो लोव्रमी ब्रीतीके गो पिप कली कुम्सो पाइक्नुड। आं लें थाम्पा ब्रेक्स जोक्ब मुर आन कलम खोदेशो दुम्शो बाक्ब।

2 गे वॉइश मुर आन दातेमी नेल्ल क्येडा रिम्शो बाक्नीनी। इन लोव्र यो शुश रिम्शो बाक्ब। मारदे हना परमप्रभुमी इन कली गेना हना यो लीब आसीक गेशो बाक्ब। 3 गे बोल्यो मुर, इन किप्शुर किप्शा इन तरवार पिम्सीन। मिनु इन दारस नु इन मान ततीके कोंइदीन। 4 इन मान ततीकेमी, थमा पतीके, ब्रेम्शो थुं दुम्तीके नु इन ठीक पतीकेमी गाक्शा, इन सक्तिमी छक लाक्चा डा गेय कोंइदीन। 5 गे इन हेश्शो ब्रामी इन जोरी सत्रु आन

लुङगीरमी देत्नीम। जात जात डा मुर इन डोंइती साइक्वा पुंडसीनीम।  
 6 परमप्रभु, इन ठेयब नित्तीके गेना हना यो लीब। इन ठीक पतीके इन राज  
 दन्ड खोदेशो बाक्ब। हिब्रू १:८-९ हिब्रू १:८,९<sup>7</sup> गे ठीक पतीके दाक्नीनी।  
 इन अरेशो मटीब आन कली चहिं काइ मदाक्नीनी। मोपतीके परमप्रभु, इन  
 परमप्रभुमी इन वारच नेल्ल आन क्येडा इन कली दाक्शा, इन कली तेल  
 लुकशो खोदेशो पा ग्येरपाइक्वु।<sup>8</sup> इन वा नेल्ल एलोव, मूरे नु ब्रोवशो रिना  
 पाइशो बाक्नीम। हात्ती आ दारामी दारपाइशो दरवारम बाक्शा, तार  
 पाइशो ताप्तीके ताप्शा इन कली ग्येरपाइक्ब।<sup>9</sup> इन कली मान पाइब आन  
 दातेमी पिप आन तमी यो बाक्नीम। इन ग्युरा गे ओफीर डा सुनम ग्योम्सीशो  
 पिपीम राक्ब।

<sup>10</sup> आं तमी, नोफा दाइशा, नेनो। इ रागी नु इ खिं डा मुर आन कली  
 प्रेंदो। <sup>11</sup> पिपमी इ दारस तशा, इ कली दाक्शो बाक्ब। मेको कली जिम्मा  
 गेंसीशा मान पावो। मारदे हना मेको इ प्रभु बाक्ब। <sup>12</sup> टायर सहर डा मीश  
 आलपुकी कोसेली चाक्शा, जाक्नीम। रागी रागी डा शुश क्येट थीब  
 मुरपुकीम इन शिशी माल्नीम।

<sup>13</sup> पिप आ तमी थम दारशो नु सुन के श्येलेम प्रोवशो वा फेक्शा, आ  
 बाक्तीकेम बाक्ब। <sup>14</sup> मिनु बुटा आप्शो वा फेक्पाइशा, मेको कली पिप आ  
 बाक्तीके चाक्नीम। मेको आ गेय पाइब मीश आल आ नोले खोइक्पाइशा,  
 पिप आ बाक्तीकेमी जाक्नीम। <sup>15</sup> मिनु मुरपुकीमी मेको आन कली ग्येरशो  
 कुम्सो पा लां कोंइनीम। मिनु पिप आ खिं ओइनीम।

<sup>16</sup> मिनु इन आफ आ पा डा इन तौपुकी दुम्नीम। गे मेको आन कली रागी  
 डा सासन पाइब सेल्नीनी। <sup>17</sup> गो इन नें इन चच युइ आन पाला नेल्ल  
 मिम्पाइक्नुड। मोपतीके जात जात डा मुरपुकीमी इन कली गेना हना यो  
 ठेयब सेल्नीम।

परमप्रभु आंइ नेक्था बाक्ब

कुम्सो पपाइक्ब कली अलामोथ कुम्सो आ लायो। कोराह आ तौ आन  
 कुम्सो।

**46** परमप्रभु आंइ खुइशा बाक्तीके नु आंइ सक्ति बाक्ब। गो श्येत  
 जकानु, गेना हना यो आंइ नेक्था बाक्शा वारच पाइब बाक्ब।  
 2 मोपतीके गो महिनीकी। रागी नु डांडापुकी हिम्सीशा समुन्द्रम गुम्तेक्म हना  
 यो गो महिनीकी। <sup>3</sup> मिनु समुन्द्र ग्रीशा, बोग्यो पोक्तु हना यो नु बुइशा कुशा,  
 डांडापुकी हिम्ताक्व हना यो गो महिनीकी। ठेयब सेंदा पा।

<sup>4</sup> मिनु ठेयब खोला का बाक्ब। मेको रे पा ब्राशो आइक्व खोलापुकीमी  
 परमप्रभु आ बाक्तीके सहर कली ग्येरपाइक्नीम। मेको नेल्ल क्येडा ठेयब  
 आ बाक्तीके सहर बाक्त। *यसैया १२:५*<sup>5</sup> मिनु परमप्रभु मेको सहरम  
 बाक्ब। मिनु मेको महिम्सीब। परमप्रभुमी मेको सहर कली नां सोव्रम रेन  
 वारच पाइब। <sup>6</sup> मिनु रागी रागी डा मुरपुकी जिशा खेशा पाइनीम। राज्यपुकी  
 क्याम्चा पुंडसीनीम। परमप्रभुमी आ सेंदा नेंपाइक्वु हना, रागी नेल्ल  
 याइनीम।

<sup>7</sup> मुर नेल्ल आन परमप्रभु यावे गोपुकी नु बाक्ब। याकूब आ परमप्रभु  
 आंइ बोल्यो दरवार बाक्ब। ठेयब सेंदा पा।

<sup>8</sup> परमप्रभु यावे आ ठेयब गेय कोव्रथ जाक्कीन। मेकोमी रागी खतम  
 पोक्शो कोव्रडीन। *२राजा १९:३५*<sup>9</sup> मेकोमी नेल्ल क्येडा डोन रागी सम्म डा  
 लडाइ तेक्ब। मेकोमी लिब्रा जिक्शा नु तूतीक नेल्ल टुक्रा टुक्रा सेल्ब।  
 तेक्तीके नेल्ल मीम हुम्ब। *भजन संग्रह ७६:४*<sup>10</sup> मेकोमी "सिक्सी पा  
 बाक्कीन। गो परमप्रभु नड, दे तुइक्तीन। गो रागी रागी डा मुर आन दातेमी  
 ठेयब दुम्नुड। गो रागी नेल्लेमी नेल्ल क्येडा ठेयब दुम्नुड" देंत।

<sup>11</sup> मुर नेल्ल आन परमप्रभु यावे गोपुकी नु बाक्ब। याकूब आ परमप्रभु  
 आंइ बोल्यो दरवार बाक्ब। ठेयब सेंदा पा।

परमप्रभु रागी नेल्ल डा पिप बाक्ब

कुम्सो पपाइक्ब कली कोराह आ तौ आन कुम्सो।

**47** जात जात डा मुर नेल्लेमी इन गुइ फ्रोक्तीन। गे ग्येरशा, परमप्रभु  
 कली कुम्सो पने। <sup>2</sup> मारदे हना परमप्रभु यावे, नेल्ल क्येडा ठेयब नु  
 हिंचा डा बाक्ब। मेको रागी नेल्ल डा ठेयब पिप बाक्ब। <sup>3</sup> मेकोमी रागी आन  
 कली आंइ के सेल्शा, शुश मुर आन कली आंइ कली हुकुम पचा गेपु।  
<sup>4</sup> मेकोमी आंइ कली शोप योवशा गेपु। मेको याकूब आ दाक्शो रागी  
 बाक्त। मारदे हना परमप्रभुमी याकूब कली शुश दाक्ताक्व। *ठेयब सेंदा पा।  
 ब्यवस्था ३२:९*

<sup>5</sup> मुरपुकी शुश ग्येरसमानु, परमप्रभु आ नित्तीकेम लाइब। परमप्रभु यावे  
 तुराही ताप्शो नेंशा लाइब। <sup>6</sup> परमप्रभु कली ठेयब सेल्तीक कुम्सो पने। लेंशा  
 ठेयब सेल्तीक कुम्सो पने। आंइ पिप कली ठेयब सेल्तीक कुम्सो पने। लेंशा  
 ठेयब सेल्तीक कुम्सो पने। <sup>7</sup> मारदे हना परमप्रभु रागी नेल्ल डा पिप बाक्ब।  
 मेको कली ठेयब सेल्तीक कुम्सो का पने। *भजन संग्रह ९३:१*<sup>8</sup> परमप्रभुमी  
 रागी रागी नेल्ल आन कली सासन पाइब। मिनु परमप्रभु आंम आ ठेयब  
 नित्तीकेमी निक्ब। <sup>9</sup> मिनु जात जात डा सासन पाइबपुकी नु अब्राहाम आ  
 परमप्रभु आ मुर नेल्ल मेकेर गुम्शो बाक्नीम। मारदे हना रागी रागी डा  
 पिपपुकी परमप्रभु आ गुइमी बाक्नीम। मेको थम ठेयब बाक्ब।

सियोन आ दारस नु सक्ति

कोराह आ तौ आन कुम्सो।

**48** परमप्रभु यावे ठेयब बाक्ब। परमप्रभु आ बाक्तीक सहरम  
 बाक्शा, मान पाइक्वा पुंडसीब बाक्ब। *भजन संग्रह ४६:५-६*<sup>2</sup> आ  
 डांडा दारशो नु लाइशो बाक्ब। मुर नेल्ले मेको तशा ग्येरसीनीम। सियोन  
 डांडा उत्तर गे बाक्ब। मेको ठेयब पिप आ बाक्तीक सहर बाक्ब। *बिलाप  
 २:१५; मत्ती ५:३५*<sup>3</sup> मिनु परमप्रभु मेको सहर डा बोल्यो दरवारम बाक्ब।  
 मेको ठेयब नु सक्ति पाइशो बाक्ब, दे नेल्लेम तुइक्नीम। <sup>4</sup> पिप नेल्ले गुम्शा,  
 हुल हुल पा लडाइ पचा कली आ डोंइती बारतेक्म। *२राजा १८:१७-१८;  
 मलाकी १:११*<sup>5</sup> मिनु मेकोपुकीमी मेको तशा, छक लाक्शा, हिंशा,  
 प्रोक्तेक्मे। <sup>6</sup> मिनु मेक उइ गिक गिक पा खिंखि पाम्तेक्म। आल थिची ना  
 डा रोइ पशो मीश मुर खोदेशो दुम्तेक्म। <sup>7</sup> गे टारसीस डा जहाज आन कली  
 पूर्ब डा फश पतीकेमी खतम सेल्तीनी। <sup>8</sup> आंइ डोंइती नेंशो लोव्र, मुर नेल्ल  
 आन परमप्रभु यावे आ सहरम ताइतक। मार ताइतक देंशा हना, आंइ  
 परमप्रभुमी आ सहर गेना हना यो लीपाइक्वा कली बोल्यो सेल्लु। *ठेयब सेंदा  
 पा।*<sup>9</sup> परमप्रभु, गो इन खिंमी बाक्शा, इन गेना हना यो दाक्तीके मिम्शा,  
 बाक्नीकी। <sup>10</sup> परमप्रभु इन नें नु इन कली ठेयब सेल्तीके रागी आ सुर सम्म  
 बाक्ब। गे इन सक्तिमी ग्राना ग्रान बाक्नीनी। <sup>11</sup> सियोन डांडा ग्येरसेक्ल।  
 यहूदा डा सहर नेल्ले इन निसाफ पशोमी ग्येरसमल। <sup>12</sup> सियोन आ एर ओंथ  
 हिरशा, मेकेर डा लाइशो खिं हिक्कीन। <sup>13</sup> मेकेर डा बोल्यो गारोपुकी  
 रिम्शो पा कोव्रडीन। आ बोल्यो दरवार यो रिम्शो पा कोव्रडीन। मिनु नोले गे  
 इन चच युइ आन कली मेको आन पर्बम शेंने चाप्नीनी। <sup>14</sup> मारदे हना मेको  
 परमप्रभु, आंइ परमप्रभु बाक्ब। मेकोमी गेना हना यो आंइ कली लां कोंइब।  
*यसैया २५:९*

शुश क्येटीम बेक्चा रे प्रोंइने मचाक्ब

कुम्सो पपाइक्ब कली कोराह आ तौ आन कुम्सो।

**49** जात जात डा मुर नेल्ले, नेनीन। <sup>2</sup> ठेयब नु आइक्व, क्येट थीब नु  
 प्रुडग नेल्लेमी नोफा दाइशा, नेनीन। <sup>3</sup> मिनु गो जोक्शा तुइशा  
 लोव्र पाइनुड। आं थुंमी मिम्शा पशो लोव्रमी मुर आन कली रुक्ब सेल्ब। <sup>4</sup> गो  
 अर्ती डा लोव्र का नेता। गो ठेयब ताप्तीके ताप्शा, आं लोव्र रुप्पाइक्नुड।  
<sup>5</sup> मिनु श्येत जतीक नाक्ती जाक्मेनु, श्येत गेबपुकीमी आन ठीक मपशोमी  
 आं एर ओंथ रे पुम्दीमीनु, गो मारदे हिंनुडा डा? <sup>6</sup> मेकोपुकीमी आन शुश  
 क्येटीम थमा सुइक्नीमी। आन शुश क्येटीम ठेयब लेत्नीमी। <sup>7</sup> सुइमी आंम  
 लोकब कली क्येट थाप्शा, बेक्चा रे प्रोंइने मचाक्ब। मोपा मेकोमी परमप्रभु  
 कली शुश क्येट थाप्शा आ गिंम प्रोंइने मचाक्ब। *मीका ६:६-८; मत्ती १६:२६*  
<sup>8</sup> बेक्चा रे ब्रोंइतीक शुश ठेयब बाक्ब। मेको मुरुम गेनायो ग्याप्ने मचाप्नीम।

मत्ती १६:२६<sup>९</sup> गेना हना यो ब्रॉइशा बाक्ब, सुइ मबाक्नीम। मुर नेल्ले थिम्वा पुंडसीनीम।

10 मिनु नेल्लेमी जोक्ब तुइक्ब मुर, मूर्ख नु मिम्तीक मपाइश्शो नेल्ल बेक्नीम, दे तुइश्शो बाक्नीम। मिनु आन शुश क्येट नेल्ल अरु आन कली प्रॉइशा लाइनीम। उपदेसक २:१६; उपदेसक ६:२<sup>११</sup> मिनु आन तुरस गेना हना यो मेको आन खिं दुम्ब। मोर्देशो पाला नेल्ल आन कली दुम्ब। मिनु मेकोपुकीमी आन नें आन रू कली वोइश्शो बाक्तेक्म हना यो, मोर्देशो दुम्नीम।

12 गिश क्येट थीब बाक्तेक्म हना यो, मुरपुकी मलीनीम। मेकोपुकी बेक्शा लाइब जन्तु खोर्देशो बाक्नीम। उपदेसक ३:१९<sup>१३</sup> आंम आन मिम्शो थमा सुइक्ब नु मेको आन लोव्र नेंशा, ग्येरसीब मेको आन नोले डा मुर यो मोर्देशो दुम्नीम। ठेयब सेंदा पा।

14 मेकोपुकी भेडा खोर्देशो पा बेक्चा कली बाक्नीम। बेक्पाइक्बमी मेको आन कली दाक्ब। सुनी कना रिम्शो थुं पाइश्शो मुरपुकीमी मेको आन कली हुकुम पाइनीम। मेको आन बाक्तीके रे डोन दुम्शा, आन रां तुरसुम राक्शा लाइनीम।<sup>१५</sup> तन्न परमप्रभुमी आं कली तुरस रे प्रॉइब। मेकोमी थमा पा आ बाक्तीकेम लाइक्ब। ठेयब सेंदा पा। होसे १३:१४; भजन संग्रह ७३:२४

16 मिनु गे शुश क्येट चेम्शा, आन खिं दारपाइक्ना पाइक्न बाक्ब मुर आन कली तथा, महिनीन। अय्युब २१:७-१५<sup>१७</sup> मारदे हना मेको बेक्मानु, मारेइ मलाइक्नीम। मेको आन मार मार आन नोले खोइश्शा, मलाइनीम। उपदेसक ५:१४; १तिमोथी ६:७<sup>१८</sup> मिनु मेको ब्रॉइसा सम्म “गे आसीक ताइब नकी” देंनीम। मुरपुकीमी थीब मुर आन कली ठेयब सेल्नीम। १तिमोथी ६:७ लूका १२:१६-२१; लूका १६:१९-३१<sup>१९</sup> मो हना यो मेको बेक्शा, आन किकी पिपी आन बाक्तीके लाइनीम। मेकोपुकीमी गेनायो हाम्सो मताइनीम।<sup>२०</sup> मुर गिश क्येट थीब बाक्तेक्म हना यो, मेको बेक्शा लाइब बस्तु भाव खोर्देशो बाक्नीम।

परमप्रभु रिम्शो निसाफ पाइब

आसाफ आ कुम्सो।

50 ठेयब सक्ति पाइश्शो, परमप्रभु, परमप्रभु यावेमी लोव्र पाप्तु। नां दाप्तीक रे नां पेरतीक सम्म डा रागी कली लोव्र पाप्तु। १इतिहास २५:१<sup>२</sup> परमप्रभु सियोन रे आ दारसम ग्योम्सीशा छेडछेड दुम्शा, गृशो बाक्ब। यसैया ६२:१<sup>३</sup> आंइ परमप्रभु जाक्शा, सिक्सी पा मबाक्ब। मेको आ डोंइती ग्राव गु दाक्ब मी ब्राइब। मिनु आ एर ऑथ नेल्ले कुमीर गिमीर पा फश गिवार पाइब।<sup>४</sup> मेकोमी आ मुर आन कली निसाफ पचा कली सरीड नु रागी डा नेल्ल आन कली ब्रेब्ब। ब्यवस्था ३२:१; यसैया १:२<sup>५</sup> परमप्रभुमी “आं कली थमा सुइक्ब आन कली खुप्तीन। मेकोपुकीमी मार मार क्योरशा चढ़ेशा, गो नु कबल पाम्तेक्म” देंब। प्रस्थान २४:४-११<sup>६</sup> मिनु स्वर्गम बाक्बपुकीमी “एको ठीक पाइब बाक्ब। मारदे हना परमप्रभुमी एको मुर आन कली निसाफ पाइब” देंनीम। ठेयब सेंदा पा।

7 मिनु परमप्रभुमी “आं मुरपुकी, नेनीन। गो इन कली लोव्र पाइनुड। गो इस्राएली इन कली दोस गेशा, लोव्र पाइनुड। गो परमप्रभु, इन परमप्रभु नड। प्रस्थान २०:२<sup>८</sup> इन मार मार चढ़ेशो आ पर्वम गो इन कली दोस मगेनुड। इन चोशा चढ़ेशो गेना हना यो आं डोंइती बाक्नीम। भजन संग्रह ४०:७; १सामुएल १५:२२; यसैया १:११<sup>९</sup> गो इन खिं डा ब्यफ नु इन गोठ डा बोकापुकी ममाल्नुड।<sup>१०</sup> मारदे हना ब्वाकी डा जन्तु नेल्ल नु हजार हजार डांडा डा बी ब्यफ नेल्ल आं केन नम।<sup>११</sup> मिनु गो सरीड डा चिक्ब नेल्ल आन कली तुइक्नुड। मिनु रागी डा सोक्त पाइश्शो नेल्ल आं केन नम।<sup>१२</sup> गो शोव्रलु बाक्शो नड हना यो, इन कली मर्देड वा। मारदे हना रागी नु रागीम बाक्शो मारेइ मारेइ आं केन नम।<sup>१३</sup> मार, गो ब्यफ आन श्ये ब्वाइनुडा डा? बोका आन हुश तूनुडा डा? 14 गे आं कली ‘गे रिम्शो पाइब बाक्नीनी’ देनीन। मिनु नेल्ल क्येडा ठेयब, आं कली इन कसम जशो खपीन। योना २:१०<sup>१५</sup> मिनु श्येत जनी नाक्त आं कली पुनीन। मिनु गो इन कली श्येत रे प्रॉइनन्नी। मिनु आं कली ‘गे ठेयब बाक्नीनी’ देंनीनी” देंत। भजन संग्रह ९१:१५

16 तन्न परमप्रभुमी आ अरेशो मटीब आन कली “आं फुल्लुम मुशा ब्रेक्शो लोव्र मारदे पढेनी? आं कबल आ पर्वम मारदे लोव्र पनी? रोमी २:२१-२३<sup>१७</sup> गे आं शेंशो लोव्र ग्रांरा दीतीनी। मिनु आं लोव्र प्रॉइतीनी।<sup>१८</sup> गे खुइ आन कली गुम्नीनु, खुइ आन वारच दुम्तीनी। मिनु गे खुइ नु हेंथे गाक्ब नु गारतीनी।<sup>१९</sup> गे मरिम्शो लोव्र पाइब नु जोल पाइब बाक्नीनी।<sup>२०</sup> मिनु गे इन लोक्ब आन कली दोस गेशा बाक्नीनी। मिनु कयी का रे जरमेशो इन लोक्ब आन कली शुक्शी पाइनीनी। उत्पत्ती २:२१<sup>२१</sup> गे मेको नेल्ल पाइतीनी हना यो, गो सिक्सी पा बाक्ती। गे आं खोर्देशो मिम्साक्नी। तन्न गो इन कली हुइश्शा, इन दोस कोंइनन्नी।<sup>२२</sup> गे परमप्रभु कली प्रेंबपुकी तुइक्तीन। मो मपाइतीनी हना, गो इन कली साइक्नन्नी। मिनु इन कली सुइमी प्रॉइने मचाप्नीम।<sup>२३</sup> सु सुमी ‘गे रिम्शो पाइब बाक्नीनी’ देंनीमी, मेकोपुकीमी आं कली ठेयब सेल्नीम। मिनु गो मेको आन कली लां सेल्नुड। गो मेको आन कली आं पाप रे प्रॉइतीके कोंइनुडमी” दे परमप्रभुमी देंत।

आं पाप क्याम्दीन, दे पुंडशो

कुम्सो पपाइक्ब कली दाऊदमी बाथ्शोबा नु हेंथे पवा नोले नाथान जाक्मेनु, पशो दाऊद आ कुम्सो। २सामुएल १२:१-१५

51 परमप्रभु इन गेना हना यो दाक्तीकेमी आं कली शिशी पने। इन शुश शिशीमी आं हेंथे पशो क्याम्दीन। लूका १८:१७<sup>२</sup> परमप्रभु, इन शिशी पतीकेमी आं मरिम्शो पशो नेल्ल मुरशा गेयीनी। मिनु आं कली पाप रे प्रॉइयीनी।<sup>३</sup> मारदे हना गो आं मरिम्शो पशो तुइक्नुड। मिनु आं पाप गेना हना यो मिम्नुड।<sup>४</sup> गो इन डोंइती ला पाप पाता। इन डोंइती इन मदाक्शो पाता। गे आं कली निसाफ पा, ठीक पाइब बाक्नीनी। आं कली निसाफ पा सजाइ गेतीनी, गे मेको आ पर्वम दोस मताइब बाक्नीनी।<sup>५</sup> थमा पा, गो जरमेशी डा रेन मरिम्शो पाइब बाक्ती। आं ममा आ कोव्रजम जोल्डा रेन मरिम्शो पाइब बाक्ती। रोमी ३:४; यूहन्ना ३:६<sup>६</sup> गे आंम पर्वम आंम थुं डा थमा मिम्तीकेम दाक्नीनी। मोपतीके गे आं थुं कली जोक्तीक तुइक्तीक शेंदीने।

7 गे हिस्सोप के ब्राक्सुमी आं पाप क्याम्दीन। मिनु आं पाप क्याम्सीशो बाक्ब। मिनु आं कली चिक्तीनी। मिनु गो फुं क्येडा बुश दुम्नुड। प्रस्थान १२:२२-२३; यसैया १:१८<sup>८</sup> आं कली ग्येरतीके नु थुं नाइक्तीके लोव्र नेंपाइय्यीनी। मिनु इन फस पोक्शो आं रुश लेंशा ग्येरसमल। भजन संग्रह ३२:३-४<sup>९</sup> इन कुल आं पाप रे खुइक्तीन। मिनु आं मरिम्शो पशो नेल्ल क्याम्दीन।

10 परमप्रभु, आं थुं क्येख सुन खोर्देशो सेलीन। मिनु नक नु ठीक पाइब सोक्त गेयीनी। मत्ती ५:८; इजीकीएल ३६:२६-२७<sup>११</sup> आं कली इन डोंइती रे मखेरयीनी। इन सोक्त आं रे मलतीन।<sup>१२</sup> इन पाप रे प्रॉइतीके आ पर्वम ग्येरशो लेंशा गेयीनी। आं थुं इन देंशो खोर्देशो सेलीन।

13 मिनु गो मरिम्शो पाइब आन कली इन लां कोंइनुडमी। मिनु पाप पाइबपुकी इन गे लेल्नीम।<sup>१४</sup> परमप्रभु, गे आं कली पाप रे प्रॉइब परमप्रभु बाक्नीनी। आं हुश खाक्श पोक्शो पाप रे प्रॉइयीनी। मिनु गो इन प्रॉइतीके आ पर्वम कुम्सो पाइनुड।<sup>१५</sup> परमप्रभु आं कली लोव्र पपाइय्यीनी। मिनु गो इन कली ठेयब सेल्नुड।<sup>१६</sup> गे मार मार क्योरशा, चढ़ेशोमी मग्येरनीनी। ग्येरसीनी हना, गो क्योरशा चढ़ेड वा। गे चोशा चढ़ेशोम मग्येरसीनीनी। भजन संग्रह ४०:७<sup>१७</sup> परमप्रभु, गे मरिम्शो पशो आ पर्वम जिक्शो थुं नु ब्रेम्शो मुर आन थुं दाक्नीनी। भजन संग्रह ३४:३९

18 इन दाक्शो खोर्देशो पा सियोन कली रिम्शो दुम्तीक गेने। यरूसलेम डा गारो लेंशा सेलीने।<sup>१९</sup> मिनु नोले मुरपुकीमी ठीक पा चढ़ेनीम। मुरपुकीमी इन कली ग्येरपाइक्चा कली चोशा चढ़ेतीक नेल्ल चढ़ेनीम। मिनु इन कली ब्यफ चढ़ेनीम।

परमप्रभु आ शिशी नु निसाफ

कुम्सो पपाइक्व कली। शेंतीक कुम्सो एदोमी दोएगमी सावल कली "दाऊद अहीमेलेक आ बाक्तीकेम खूँइसाक्व" देंचा नोले डा दाऊद आ कुम्सो।  
१सामुएल २२:९-१९

52 गे थम बोल्यो मुर, मारदे मरिश्शो पचा आ पर्वम बोरनीनी? परमप्रभु आ शिशी नाक्तर रे लीब। 2 गे नाक्तर रे खतम सेल्चा आ पर्वम मिन्नीनी? इन शोव शेष्यो करद खोदेंशो बाक्व। गे जोल पाइब ला बाक्नीनी। 3 गे रिश्शो पचा क्येडा मरिश्शो पचा ला दाक्नीनी। थमा लोव पचा क्येडा जोल पचा ला दाक्नीनी। ठेयब सेंदा पा। 4 गे जोल पाइब मुर, मारेइ मारेइ खतम सेल्तीक लोव ला दाक्नीनी।

5 परमप्रभुमी थमा पा इन कली गेना हना यो कली खतम सेल्ब। मेकोमी इन कली इन बाक्तीके रे कीशा, गुंडब। मिनु मेकोमी इन कली ब्रॉइशा बाक्तीक रागी रे इन शाक्श सुन्दा उइश्शा, ताइक्व। ठेयब सेंदा पा। 6 ठीक पाइबपुकी मेको आन कली तशा, हिनीम। मिनु मेकोपुकीमी रिश्शा कोव्रशा भजन संग्रह ९१:८ 7 एको मुर कली कोव्रडीन। एकोमी परमप्रभु कली जिम्मा मगेंसे। आ शुश शॉपोम "गो मारेइ मारेइ पने चाप्नुड देंशा, अरु आन कली खतम पोक्शा, बोल्यो दुम्त" दे रिश्शा, कोव्रनीम।

8 तन्न गो परमप्रभु आ खिमी गिग तेल रवा खोदेंशो बाक्नुड। गो आं कली गेना हना यो दाक्व परमप्रभु कली थमा सुइक्नुड। भजन संग्रह ९२:१३-१६ 9 गो "इन पशो आ पर्वम गेना हना यो इन कली ठेयब सेल्नुड। गो इन नें 'पाप रे प्रॉइब बाक्व' दे आस पाइनुड। मारदे हना इन नें रिश्शो बाक्व। गो इन कली थमा सुइक्व आन दातेमी ठेयब सेल्नुड" देंती।

मुर आन मरिश्शो पशो

कुम्सो पपाइक्व कली महलाथ नें पाइश्शो कुम्सो आ लायो। दाऊद आ शेंतीक कुम्सो। भजन संग्रह १४:-

53 मूर्खपुकीमी आन थुमी "परमप्रभु मबाक्व" देंनीम। मेकोपुकी काइ मरिश्शो दुम्शा ग्रांया दिचा डा गेय पाइनीम। रिश्शो पाइब का यो मबाक्नीम।

2 मिनु परमप्रभुमी स्वर्ग रे मुर आन कली कोव्रब। मारदे कोव्रब देंशा हना, आ कली माल्ब, रुक्व मुर का बाक्म कों, दे कोव्रब। 3 मुर नेल्ले हेंथे लां खोइश्शो बाक्नीम। मेको नेल्ले दूली पाइब बाक्नीम। रिश्शो पाइब का यो मबाक्नीम। 4 मार, मरिश्शो पाइबपुकी मारेइ मर्शेंसीनीमी? मेकोपुकीमी शोब्ले जशो खोदेंशो पा आं मुर आन कली नेक्नीम। मेकोपुकीमी परमप्रभु कली काइ मपुंडनीम। 5 मिनु नोले मेकोपुकी थाम्पा हिनीम। डॉइती मोपा हिंतीके मबा। मारदे हना परमप्रभुमी थमा मसुइक्व आन रुश फ्राइब। मिनु मेकोपुकी मुने दोक्नीम। मारदे हना परमप्रभुमी मेको आन कली तिल्शो बाक्व। 6 इस्राएल कली श्येत रे प्रॉइब सियोन रे जाक्शो हना, गिश रिश्शो दुम वा। परमप्रभुमी आ मुर आन कली थुं नाइश्शा, रिश्शो पा बाक्तीक लेंशा गेपु हना, याकूब आ मुर कुम्सो पाइनीम। मिनु इस्राएल डा मुर ग्येरसीनीम।

"जोरी सत्रु रे प्रोनीन" दे पुंडशो

कुम्सो पपाइक्व कली तार पाइश्शो ताप्तीके ताप्शा, शेंतीक कुम्सो। जीफ डा मुरपुकीमी सावल कली "दाऊद आंइ दातेमी खूँइसीब" देंशो ना डा दाऊद आ कुम्सो। १सामुएल २३:१९; १सामुएल २६:१

54 परमप्रभु, इन नेंमी आं कली प्रॉइयीनी। इन ठेयब सक्तिमी आं कली दोस मताइब बाक्व, दे कौइदीन। 2 परमप्रभु, आं लोव नेनीन, आं पुंडशो लोव नेनीने।

3 मरिश्शो पाइबपुकी आं गे बारतेक्म। हुश खाक्श पोक्वपुकीमी साइक्व माल्तीमी। मेकोपुकी परमप्रभु कली ममिम्थु, महिनीम। ठेयब सेंदा पा।

4 परमप्रभु थमा पा आं कली वारच पाइब बाक्व। मेको आं कली ब्रॉइचा गेब बाक्व। 5 सु सुम आं कली मरिश्शो पाइनीमी, मेको आन कली मरिश्शो दुम्ल। इन दाक्शा मप्रॉइतीकेमी मेको आन कली खतम पोक्कीन।

6 परमप्रभु, गो इन कली आं दाक्तीके चढेनुड। परमप्रभु यावे, गो इन कली "गे रिश्शो पाइब बाक्नीनी" दे इन नें ठेयब सेल्नुड। मारदे हना परमप्रभु यावे रिश्शो पाइब बाक्व। 7 गे आं श्येत नेल्ले रे प्रॉइतीनी। मिनु गो आं जोरी सत्रु आन कली ग्राती।

"आ वारचम प्रोनानु" पुंडशो

कुम्सो पपाइक्व कली तार पाइश्शो ताप्तीके ताप्शा शेंतीक। दाऊद आ कुम्सो।

55 परमप्रभु, आं लोव नेनीन। आं डॉइती रे इन कुल मखूइक्तीन। 2 आं पुंडशो नेंशा, लोव लेत्तीनी। गो श्येत जशा, आं थुं ग्येत्थ लुक्च दुम्शा, मारदे रौका पा गाक्ती देंशा हना, 3 गो आं जोरी सत्रु आन लोव नेंशा, इन अरेशो मटीबपुकीमी श्येत गेतीके रौका पा गाक्ती। मारदे हना मेकोपुकी गाइश्शा आं जोरी सत्रु दुम्शा, श्येत गेतीमी।

4 आं थुं ग्येत्थ लुक्च पशो बाक्व। आं कली बेक्चा डा हिंतीकेमी सुम्ती। 5 गो हिंशा खिंखि पाता। गो साप्पा हिंनुड। 6 गो आं के "दुकुर खोदेंशो पा फ्रां बाक्शो हना, बेरशा लशा, नाइसीड वा" देंती। 7 गो थमा पा बेरशा डोन लशा, गोरशो रागीम बाक्ड वा। ठेयब सेंदा पा। 8 गो फश गिवार रे प्रोक्शा, रीब पा फाम्सीड वा।

9 परमप्रभु, मरिश्शो पाइब आन मिश्शो खतम पा गेने। मेको आन लोव खाल्शा गेने। मारदे हना गो सहरमी हुश खाक्श पोक्शो नु जिशो खेशो ला ताता। 10 मेकोपुकी नाक्दो नाक्ती सहर डा गारो डोइश्शा एर ऑथ हिरशो बाक्नीम। मेको सहरम मरिश्शो पतीके नु श्येत ला बाक्व। 11 मेको सहरम मारेइ मारेइ खतम पोक्व बाक्व। मुर आन कली दिप्तीके नु जोल पतीके सहर प्रॉइशा मलाइनीम।

12 आं कली काइ मदाक्वमी शुक्शी पाइय्ठी हना, गो फाल्ने चबु वा। जोरी सत्रुमी आं कली लडाइ तोशो नम हना, गो मेको आन क्येडा प्रोक्शा खूँइसीड वा। भजन संग्रह ४१:१० 13 तन्न गे आ खोदेंशो मुर बाक्ते। गो नु बाक्व आं वारच बाक्नेवे। 14 डॉइती गो गे नु ग्येरशा बाक्शो बाक्ती। गो मुरपुकी नु परमप्रभु आ खिंम काथा गाक्शो नय।

15 बेक्पाइक्वमी आं जोरी सत्रु आन कली आन मतुइक्वा डा पा जाक्शा दाक्गल। मेकोपुकी सेलीन बेक्शो मुर आन बाक्तीके लमल। मारदे हना मेको आन दातेमी मरिश्शो पतीके बाक्व। गन्ती १६:३१-३३ 16 तन्न गो परमप्रभु कली पुंडनुड। मिनु मेकोमी आं कली प्रॉइब। 17 गो सुनी, नाक्दो, नाक्ती श्येत जडानु, परमप्रभु कली आं श्येत आ पर्वम पुंडनुड। मिनु मेकोमी आं लोव नेंब। 18 मेकोमी आं कली लडाइ रे मारेइ दुम्पाइक्थु, प्रॉइब। शुश मुरमी आं कली मदाक्ताक्वीमी हना यो, प्रॉइब। 19 परमप्रभु गेना हना यो ठेयब निक्तीकेमी निश्शो बाक्व। मेकोमी मेको आन लोव नेंशा, श्येत गेब। ठेयब सेंदा पा। मारदे हना मेकोपुकीमी आन लां गेनायो ठीक मसेल्नीम। परमप्रभु कली मान पा महिनीम। 20 आं वारचमी आं कली जोल पा श्येत गेती। मेकोमी आ कबल प्रॉइतु। 21 मिनु मेकोमी मिलो शिलो लोव पाप्तु। तन्न मेको आ थुंमी जिचा खेचा ला बाक्व। मेको आ लोव तेल खेक्शो खोदेंशो बाक्व। तन्न आ आगाम शोइश्शो तरवार बाक्व। येरमीया ९:७

22 इन थुं डा श्येत नु मार पचा दो पचा देंतीके परमप्रभु यावे आ डॉइती वोतीन। मिनु मेकोमी इन कली कुक्व। मेकोमी ठीक पाइब आन कली गेनायो हिम्सीचा मगेब। १पत्रुस ५:७ 23 तन्न परमप्रभु, गे मरिश्शो पाइब आन कली खतम दुम्तीकेमी ताइक्नीनी। हुश खाक्श पोक्व नु जोल पाइब आन ब्रॉइतीक नाक्तर उइक्थ यो मब्रॉइनीम। तन्न गो इन कली थमा सुइश्शा बाक्नुड। भजन संग्रह १०२:२५

थमा सुइक्व थुं महिंब थुं बाक्व

मरिम्शो पाइब कली सजाइ

कुम्सो पपाइक्व कली डोन डा रवाम बाक्वशो ढुकुर आ कुम्सो आ लायो। पलिस्तीपुकीमी गाथ सहरम दाऊद कली ग्याइक्वी ना डा दाऊद आ कुम्सो।  
१सामुएल २१:१०-१५

कुम्सो पपाइक्व कली कुम्सो आ लायो, खतम मसेलो देंशो दाऊद आ सेल्शो कुम्सो। भजन संग्रह ८२:२-४

56 परमप्रभु आं कली शिशी पाइय्यीनी। मारदे हना मुरपुकीमी आं कली शुश खेदा पाइनीमी। नाक्त रे आं कली दिप्शो बाक्नीम।  
2 नेल्ल क्येडा ठेयब, नाक्त रे आं कली दिप्बपुकीमी आं कली श्येत गेनीमी। आं कली खेदा पाइब शुश बाक्नीम।<sup>3</sup> गो हिंडानु, इन कली थमा सुइक्वुड।  
4 मिनु गो परमप्रभु आ लोव्र ठेयब सेल्लुड। मेकोमी प्रॉइब, दे थमा सुइश्शा, महिथु बाक्नुड। मुरपुकीमी आं कली मार पाइक्ने चाप्नीमी डा? भजन संग्रह २७:१; भजन संग्रह ११८:६; यसैया १२:२; यसैया ५१:१२; मत्ती १०:२८  
5 नाक्त रे मेकोपुकीमी आं लोव्र दूली सेल्शा लोव्र पाइनीम। मेको आन मिम्शो नेल्ले आं कली श्येत गेचा कली ला बाक्व।<sup>6</sup> मिनु मेकोपुकीमी आं कली क्यारी पा बाप्शा साइक्वा माल्नीम।  
7 परमप्रभु, मेको आन कली काइ प्रोक्वा मगेन। इन गाइक्वामी मेको मुर आन कली खतम पोक्कीन।<sup>8</sup> आं रोंका पशो मिम्तीन। आं प्रेक्कु इन ग्योबुम कुर पा वोतीन। मार, मेको इन लोव्र ब्रेक्वशो किताबम ब्रेक्वशो मबाक्वा डा?  
9 मिनु गो इन कली “वारच पाइय्यीनी” दे पुनुनु, आं जोरी सत्रु लेशशा प्रोक्नीम। मिनु परमप्रभुमी आं कली दाक्व, दे तुइक्वुड।<sup>10</sup> गो परमप्रभु आ लोव्र ठेयब सेल्लुड। गो परमप्रभु यावे आ लोव्र आ पर्वम ग्येरशा लोव्र पाइनुड।<sup>11</sup> गो “परमप्रभुमी श्येत रे प्रॉइब” दे थमा सुइश्शा, महिथु बाक्नुड। मुरपुकीमी आं कली मार पाइक्ने चाप्नीमी डा?  
12 परमप्रभु, गो गे नु कसम जशो, खाप्चा माल्लुड। गो इन कली “गे रिम्शो पाइब बाक्नीनी” दे चढेतीके चढेनुड।<sup>13</sup> मारदे हना गे आं कली बेक्वा रे प्रॉइतीनी। मिनु आं कली गोल्चा रे प्रॉइतीनी। परमप्रभु, गो ब्रॉइशो आन छेडछेडम गाक्वा तडल। अय्युब ३३:३०

श्येत रे प्रॉइब, दे पुंडतीक

कुम्सो पपाइक्व कली खतम मसेलो देंशो कुम्सो आ लायो। दाऊद सावल रे प्रोक्मेनु, पुक्खीम बाक्शा, पशो कुम्सो। १सामुएल २२:१

57 परमप्रभु शिशी पने। आं कली शिशी पाइय्यीनी। मारदे हना आं थुं गे नु खूंडसीबा। एको खतम पोक्व फश गिवार मनुम्म सम्म गो इन फ्रॉं आगामी खूंडसीशा बाक्नुड। भजन संग्रह १७:८; भजन संग्रह ९१:१-२  
2 गो नेल्ल क्येडा ठेयब, परमप्रभु कली ब्रेल्लुड। परमप्रभुमी आं पर्वम आ मिम्शो खाप्ब।<sup>3</sup> मेकोमी स्वर्ग रे वारच पाइब सोइश्शा, आं कली प्रॉइब। मिनु आं कली खेदा पाइब आन कली हुइक्व। ठेयब सेंदा पा। परमप्रभुमी आं कली गेना हना यो दाक्व। आ दाक्शा मप्रॉइतीकेमी आं कली कोव्रब।  
4 गो गुप्स आन दातेमी बाक्वशो बाक्नुड। गो मुर ब्वाइब जन्तु आन दातेमी गोल्शो बाक्नुड। मेको मुर आन खूइ तूतीक नु ब्रा खोदेंशो बाक्नीम। मेको आन लें हेश्शो तरवार खोदेंशो बाक्व।  
5 परमप्रभु, गे सरीड क्येडा ठेयब बाक्नीनी। मिनु रागी इन सक्तिम प्रिदीन।<sup>6</sup> मेकोपुकीमी आं खोइली रेप्पाइक्वा कली ब्वारद दाइक्ताक्म। गो श्येत जशा गुर ब्वेशो बाक्नुड। मेकोपुकीमी आं लांम खाल्टा दोम्तेक्म। तन्न मेकोपुकी मेकेर आंमा बिक्तेक्म। ठेयब सेंदा पा।  
7 परमप्रभु, आं थुं ग्येत्थ लुक्व मपथु बाक्व। गो ताप्तीक ताप्शा कुम्सो पाइनुड। भजन संग्रह १०८:२-६<sup>8</sup> आं थुं सेंशा बोक्को। ताप्तीकपुकी ठीक पा बाक्कीन। मारदे हना गो नां सोव्रचा क्येडा डोंइती कुम्सो पाइनुड।  
9 परमप्रभु, गो जात जात डा मुर आन दातेमी इन कली ठेयब सेल्लुड। गो रागी रागी आन दातेमी इन पर्वम कुम्सो पाइनुड।<sup>10</sup> मारदे हना इन गेना हना यो दाक्तीके सरीड सम्म जाक्दीश्शो ठेयब बाक्व। मिनु इन दाक्शा मप्रॉइतीके गोस्स सम्म जाक्दीश्शो ठेयब बाक्व।<sup>11</sup> परमप्रभु, गे सरीड क्येडा ठेयब बाक्नीनी। मिनु रागी इन सक्तिम प्रिदीन।

58 गे निसाफ पाइबपुकी, ठीक लोव्र पाइनीनी? गे मुर आन कली ठीक निसाफ पाइब बाक्नीनी? 2 ममाइ, गे इन थुंमी ठीक ममिम्नीनी। मिनु गे रागीम हुश खाक्वश पोक्नीनी।<sup>3</sup> परमप्रभु आ अरेशो मटीबपुकी जरमेसमा रेन मरिम्शो पाइनीम। कोव्रज रेन मरिम्शो पाइब दुम्शो बाक्नीम। मिनु जोल पाइनीम।<sup>4</sup> मेको आन बीस बुस्स आन बीस खोदेंशो बाक्व। मेको थम ठेयब बुस्स आन नोफा सुशो खोदेंशो बाक्नीम।<sup>5</sup> मिनु मन्तर तन्तर पाइब नु नु टुना मुना पाइब आन लोव्र मनेनीम।  
6 परमप्रभु, मेको आन खूइ जिक्तीन। परमप्रभु यावे, गुप्स आन खूइ तुल्दीन।<sup>7</sup> मेकोपुकी शाइश्शो ब्वाक्कु खोदेंशो पा जाम्शा, लमल। मेकोपुकीमी लिब्राम ब्रा आप्मेनु, मेको आन ब्रा हेंथे लमल।<sup>8</sup> मेकोपुकी गाक्ना गाक्न यशा, दे खोदेंशो दुम्मल। मेकोपुकीमी शाम्शो आलपुकीम खोदेंशो पा नां मतामेक्ल।  
9 इन ग्योबपुकी सोव्रशो चूमी ब्रशो मीम होचा क्येडा डोंइती, मरिम्शो पाइबपुकी जाम्शा लाइनीम।<sup>10</sup> मिनु ठीक पाइबपुकी मरिम्शो पाइब आन कली क्येक्क लेशशो तशा, ग्येरसीनीम। मिनु मेको आन हुशेम गाक्नीम।  
11 मिनु मुरपुकीमी “ठीक पाइबपुकीमी थमा पा इनाम ताइनीम। थमा पा, परमप्रभु रागीम निसाफ पाइब बाक्व” देंनीम।

“जोरी सत्रु रे प्रोनीन” दे पुंडशो

कुम्सो पपाइक्व कली खतम मसेलो देंशो कुम्सो आ लायो। दाऊद आ कुम्सो। सावलमी दाऊद आ खिम बाक्म कों, मेको कली साइक्वा, दे क्यारी पथ सोइश्शो बाक्त। १सामुएल १९:११

59 आं परमप्रभु, आं जोरी सत्रु रे प्रॉइयीनी। आं कली मरिम्शो पाइब आन क्येडा प्रॉइयीनी।<sup>2</sup> आं कली मरिम्शो पाइब नु हुश खाक्वश पोक्व आन रे प्रॉइयीनी।<sup>3</sup> कोव्रडीन, मेकोपुकीमी आं कली साइक्वा कली बाप्शा बाक्वशो बाक्नीम। परमप्रभु यावे, गो मारेइ मरिम्शो मपथु, मेको मुर साइक्वपुकीमी आं कली जिचा तोशो बाक्नीम।<sup>4</sup> गो मारेइ मरिम्शो मपथु, मेकोपुकीमी आं कली साइक्वा चिक्वशो बाक्नीम। आं श्येत जशो कोव्रडीन। मिनु वारच पाइक्वा कली बोक्कीन।<sup>5</sup> परमप्रभु यावे, मुर नेल्ल आन परमप्रभु, इसाएल आ परमप्रभु, रागी रागी आन कली सजाइ गेचा कली बोक्कीन। इन कली प्रॉइशा, मरिम्शो पाइब आन कली काइ शिशी मपने। ठेयब सेंदा पा।  
6 नाक्दो कुस कुस मेकोपुकी सहर आ एर ओंथ कुचुम खोदेंशो पा डरर डरर पा हिरसीनीम।<sup>7</sup> मेकोपुकीमी आन शोव्र रे मार गुंडबाक्मा? मेकोपुकीमी साइक्वा डा लोव्र पाइनीम। मिनु मेकोपुकीमी “सुम नेंबा डा” देंनीम।<sup>8</sup> तन्न परमप्रभु यावे, गे मेको आन पर्वम रिन्नीनी। गे रागी रागी नेल्ल आन पर्वम रिन्नीनी।  
9 गे आं सक्ति बाक्नीनी। गो इन कली ठेयब सेल्शा कुम्सो पाइनुड। परमप्रभु, गे आं बोल्यो दरवार बाक्नीनी। भजन संग्रह ९:१०-११  
10 परमप्रभु आं कली गेना हना यो दाक्तीकेम गुम्ब। मिनु मेकोमी आं कली आं जोरी सत्रु आन कली ग्रापाइक्व।<sup>11</sup> मेको आन कली मसतीन। मो पाइतीनी हना, आं मुरपुकीमी प्रेनीमी। परमप्रभु, गे आंइ तेक्तीक बाक्नीनी। गे मेको आन कली इन सक्तिमी एर ओंथ ब्रापाइश्शा, आइक्व सेलीन।  
12 मेको आन पशो लोव्रमी, आन ठेयब लेशशो कोइनीमी। गे गाइश्शा मेको आन सराप पतीके नु जोल पतीके खतम पोक्कीन।<sup>13</sup> मेको आन कली इन गाइक्तीकेमी सतीन। गे मेको आन कली रागी रे क्याम्ताक्नी हना, मुर नेल्लेमी परमप्रभुमी याक्व कली सासन पाइब, दे तुइक्नीम। ठेयब सेंदा पा।  
14 नाक्दो कुस कुस मेकोपुकी सहर आ एर ओंथ कुचुम खोदेंशो पा डरर डरर पा हिरसीनीम।<sup>15</sup> मेकोपुकी जचा थोव्रक माल्थ गाक्नीम। मिनु मरुतेक्म हना, ग्रीनीम।<sup>16</sup> तन्न गो चहिं इन सक्ति आ पर्वम कुम्सो पाइनुड।

सुनी कना गो इन गेना हना यो दाक्शो आ पर्वम कुम्सो पाइनुड। मारदे हना गे आं ब्रोंइशा बाक्तीक बोल्यो दरवार बाक्नीनी। मिनु श्येत जडानु, आं खुइक्तीक बाक्नीनी।<sup>17</sup> गे, आं सक्ति बाक्नीनी, गो इन कली ठेयब सेल्तीक कुम्सो पाइनुड। गे आं बोल्यो दरवार नु आं कली गेना हना यो दाक्ब परमप्रभु बाक्नीनी।

लडाइ ब्रुशा पुंडशो

कुम्सो पपाइक्ब कली कबल डा फू आ लायो। दाऊद आ सेल्शो शेंतीक कुम्सो। मेकोमी अराम-नहाराइन नु अराम-सोबाह नु लडाइ पवानु, योआब लेशशा, १२ हजार एदोमी कली हिक्सी दिमम साइक्तु। २सामुएल ८:३, १३; २सामुएल १०:१३, १८

60 परमप्रभु, गे आंइ कली वारच पाइक्वा प्रोंइशो बाक्तीनी। गे आंइ लडाइ पतीके कली प्रोंइशो बाक्तीनी। गे आंइ पर्वम थाम्पा गाइक्ताक्नी। मुल आंइ कली डोंइती डा खोदेंशो पा रिश्शो सेलीन।<sup>2</sup> गे खिनु कुपाइक्तीनी। मिनु रागी कली चेतनीनी। मेको जेशो लेंशा सेलीन। मारदे हना हिम्सीन सीन बाक्ब।<sup>3</sup> परमप्रभु, गे इन मुर आन कली ठेयब श्येत जपाइक्तीनी। गे आंइ कली दिड दाड गोल्ब तूचा थोवक तूपाइक्तीनी। भजन संग्रह ७५:९

4 मिनु इन क्येडा मान पा हिंब आन कली प्रोक्तीक लां कोंइचा कली चिन्ड का वोइक्तीनी। मेकेर लमानु, ब्राम मख्राइनीम। ठेयब सेंदा पा। प्रस्थान १७:१५

5 इन सक्तिमी आंइ कली प्रोनीन। मिनु इन दाक्शो मुरपुकी ब्रोंइचा तामेक्ल। भजन संग्रह १०८:७-१४<sup>6</sup> परमप्रभुमी आ बाक्तीक रे “ग्येरपाइक्तीकेमी, गो शेकेम कली योक्नुड। सुक्कोथ डा दिम पुक्नुड।<sup>7</sup> गिलाद नु मनस्से आं के बाक्नीस। एफ्राइम आं पियाम गुप्तीक बाक्ब। यहूदा आं राज दन्ड बाक्ब। उत्पत्ती ४९:१०<sup>8</sup> मोआब आं चिकतीके बोस बाक्ब। गो एदोम तार आं जुत्ता ब्वारनुड। गो पलिस्ती आन कली ग्रानुड।

9 सुम आं कली गारो हिरशो सहर सम्म चाक्दीष्वा? सुम आं कली लां कोंइशा, एदोम सम्म चाक्दीष्वा?” देंत।<sup>10</sup> परमप्रभु, गे आंइ क्येडा डोन मलनी? गे आंइ कली प्रोंइतीनी। गे आंइ लडाइ पाइबपुकी नु मलाइनीनी।

11 मिनु आंइ जोरी सत्रु क्येडा ग्राचा कली आंइ कली वारच पने। मारदे हना मुर आन वारच पशो शोर गाक्शो बाक्ब।<sup>12</sup> गो परमप्रभु आ वारच पाइश्शोमी ग्राणीकी। मिनु मेकोमी आंइ जोरी सत्रु आन कली दिम्ब।

परमप्रभुमी वारच पशो

कुम्सो पपाइक्ब कली तार पाइश्शो ताप्तीके ताप्शा पतीक, दाऊद आ कुम्सो।

61 परमप्रभु, आं ब्रेशो नेनीन। आं पुंडशो लोव नेनीन।<sup>2</sup> गो डोन रागी रे इन कली ब्रेत्नुड। आं थुं ग्येत्थ लुक्च दुम्मेनु, ब्रेत्नुड। आं कली लाइश्शो सेरथे फुल्लु तार लाइय्यीनी।<sup>3</sup> मारदे हना गे आं खुइक्तीके बाक्नीनी। गे डोंइती रे आं जोरी सत्रुमी मथित्तीके बोल्यो लाइश्शो खिं बाक्नीनी। भजन संग्रह ७१:३; हितोपदेस १८:१०

4 गे आं कली इन ताम्बुमी गेना हना यो बाक्चा गेने। मिनु इन फ्रां आगाम खुंडसीनुड। ठेयब सेंदा पा। भजन संग्रह १७:८<sup>5</sup> परमप्रभु, गे आं कसम जशो नेंतीनी। गे इन नें कली मान पा हिंब आन कली गेशो खोदेंशो पा, आं कली यो गेतीनी।

6 पिप कली शुश ब्रोंइतीक नाक्त गेने। शुश पाला सम्म आ ब्रोंइतीक नाक्त बारपतीन। भजन संग्रह २१:५<sup>7</sup> मेको परमप्रभु आ डोंइती गेना हना यो आ नित्तीकेम बाक्चा तवल। इन गेना हना यो दाक्तीके नु इन दाक्शा मप्रोंइतीकेमी मेको कली खाल पपतीन। २सामुएल ७:१६

8 मेना गो इन नें गेना हना यो ठेयब सेल्तीक कुम्सो पाइनुड। मिनु नाक्त किंत किंत गो आं कसम जशो खानुड।

परमप्रभुमी प्रोंइब, देंशो

कुम्सो पपाइक्ब येदुथून कली दाऊद आ कुम्सो।

62 आं थुंम सिक्सी पा परमप्रभु कली रिम्ब। मेकोमी आं कली प्रोंइब। यसैया ३०:१५<sup>2</sup> मेको ला आं सेरथे फुल्लु नु आं कली वारच पाइब बाक्ब। मेको आं बोल्यो दरवार बाक्ब। गो गेनायो महिम्सीनुड। भजन संग्रह १८:३

3 गे नेल्लेमी मुर का कली गेना सम्म बाप्शा साइक्वा माल्नीनी? गे गोल्चा चिकशो गारो नु ब्रेत्वा चिकशो थरपु खोदेंशो मुर कली खोल्नीनी?

4 मेकोपुकीमी ठेयब मुर कली साइक्वा माल्शो बाक्नीम। मेकोपुकी जोल पतीकेमी ग्येरसीनीम। मिनु शोत्रम आसीक गेखु पाइनीम। तन्न आन थुंमी चहिं सराप पाइनीम। ठेयब सेंदा पा।

5 आं थुंम सिक्सी पा परमप्रभु कली ला रिम्ब। मारदे हना गो मेको कली आस पाइनुड।<sup>6</sup> मेको ला आं सेरथे फुल्लु नु आं कली वारच पाइब बाक्ब। मेको आं बोल्यो दरवार बाक्ब। गो महिम्सीनुड।<sup>7</sup> आं कली श्येत रे प्रोंइतीके नु मान ततीके परमप्रभु रे जाक्ब। परमप्रभु आं खुइक्तीक सेरथे फुल्लु नु आं बोल्यो दरवार बाक्ब।<sup>8</sup> मुर नेल्ले, गेना हना यो परमप्रभु कली थमा सुतीन। मेको आ डोंइती इन थुं डा लोव देंनीन। मारदे हना परमप्रभु इं खुइक्तीके बाक्ब। ठेयब सेंदा पा।

9 महिक्सीशो मुरपुकी फश ला बाक्नीम। हिक्सीशो मुर आन ठेयब दुम्तीके जोल ला बाक्ब। मेकोपुकी नाक्सीमानु, मारेइ मबाक्नीम। हिक्सीशो नु महिक्सीशो मुर नेल्ल मुठी का सोक्त डा ला बाक्नीम।<sup>10</sup> मुर आन कली दिप्शा “रिम्शो दुम्नुड” दे ममिम्तीन। खुइ पशो मार मार तशा, ठेयब मलेतीन। इन शोप शुश दुम्त हना यो, मेको कली थमा मसुतीन। मत्ती १९:२२; लूका १२:१५-२१; १तिमोथी ६:९, १७

11 परमप्रभुमी लोव पात्तु। गो लोव निक्शी नेंता “परमप्रभु के सक्ति बाक्ब।<sup>12</sup> परमप्रभु यावे गेना हना यो दाक्ब बाक्ब” देंशो नेंता। गे थमा पा मुर नेल्ल आन कली आन पशो खोदेंशो पा गेनीनी। रोमी २:६-११

परमप्रभु नु बाक्चा दाक्शो

यहूदा आ गोरशो रागीम बाक्शो ना डा दाऊद आ कुम्सो। १सामुएल २२:५

63 परमप्रभु, गे आं परमप्रभु बाक्नीनी। गो इन कली थमा पा माल्नुड। गो ब्वाक्कु तूतू दाक्शो खोदेंशो पा आं थुंमी इन कली माल्नुड। गो ब्वाक्कु मबाक्शो रागीम ब्वाक्कु माल्शो खोदेंशो पा इन कली माल्स डा माल्स बाक्नुड। भजन संग्रह ४२:३

2 गो इन कली इन बाक्तीकेमी ताता। मिनु इन सक्ति नु छेडछेड ताता।<sup>3</sup> आं ब्रोंइतीके क्येडा इन गेना हना यो दाक्तीके ठेयब बाक्ब। मोपतीके गो इन कली ठेयब सेल्नुड।<sup>4</sup> गो मबेक्डा सम्म इन कली ठेयब सेल्नुड। मिनु गो आं गुइ पोक्शा, इन कली प्रार्थना पाइनुड।<sup>5</sup> ब्रोंवशो जशो खोदेंशो पा इन कली मिम्शा ग्येरनुड। गो कुम्सो पा इन कली ठेयब सेल्नुड।<sup>6</sup> गो आं ब्राख्येम बाक्डानु, इन कली मिम्नुड। मिनु नाक्दो यो इन कली मिम्शा बाक्नुड। येरमीया २६:९<sup>7</sup> मारदे हना गे आं कली वारच पाइब बाक्नीनी। मोपतीके गो इन प्रोंइतीके तुइश्शा, कुम्सो पाइनुड। भजन संग्रह १७:८<sup>8</sup> आं थुं गे नु बाक्ब। गे आं कली कोव्रब बाक्नीनी।

9 तन्न आं कली साइक्वा माल्बपुकी खतम दुम्शा, खप आगा ओव्रनीम।<sup>10</sup> मेकोपुकी तरवारम साइक्वा पुंडसीनीम। मिनु सिवारम मेको आन कली ब्वाइनीम।

11 तन्न पिप चहिं परमप्रभु नु थुं नाइश्शा ग्येरशा बाक्ब। परमप्रभु आ नेंम कसम जाइबपुकीमी मेको कली ठेयब सेल्नीम। तन्न जोल पाइबपुकी ब्वाक्चा मताइनीम।

परमप्रभुमी निसाफ पवल

कुम्सो पपाइक्ब कली दाऊद आ कुम्सो।



64 परमप्रभु, आं कली श्येत गेशो आ पर्वम इन कली शेंदुनु, आं लोव्र नेनीन। आं कली आं जोरी सत्रु आन क्येडा प्रोइयीनी।<sup>2</sup> इन अरेशो मटीब आन क्येडा खुइक्तीनी। मरिश्शो पाइब आन खुइश्शा मिश्शो रे खुइक्तीनी।

<sup>3</sup> मेकोपुकीमी तरवार खोदेंशो पा आन लें हेप्पाइक्नीम। मेको आन लोव्रमी साइक्ब ब्रा खोदेंशो पा आजीमी।<sup>4</sup> मेकोपुकीमी बाप्शा, दोस मपाइश्शो मुर आन कली आजीमी। मेकोपुकीमी मेको आन कली महिंधु ब्रा ब्रु आजीमी।

<sup>5</sup> मिनु मेकोपुकीमी आन मरिश्शो पशो आ पर्वम आंम आंमा ठीक पाइतीनी, देंमुइनीम। खुइश्शा ब्वारद दाइक्तीक आ पर्वम लोव्र पाइनीम।

मेकोपुकीमी “इं कली सुम ताइबा डा” देंनीम। भजन संग्रह १४:७

<sup>6</sup> मेकोपुकीमी मरिश्शो पतीक आ पर्वम गारशा “गो शुश मिश्शा, गेय पाइतय” देंनीम। थमा पा मुर आन मिस्तीके नु थुं मरिश्शो बाक्ब।

<sup>7</sup> तन्न परमप्रभुमी मेको आन कली ब्रा आण्ब। मिनु मेको आन मतुइक्थु गोल्नीम।<sup>8</sup> परमप्रभुमी मेको आन कली आन लोव्र आ पर्वम खतम सेल्ब। मेको आन कली साइक्ब। मिनु मेको आन कली ताइब नेल्लेमी हिंशा आन पिया हिक्नीम।<sup>9</sup> नोले मुर नेल्ल हिंनीम। मिनु परमप्रभु आ पशो आ पर्वम लोव्र पाइनीम। मिनु मेको आ पशो मिन्नीम। प्रस्थान ८:१५<sup>10</sup> ठीक पाइबपुकी परमप्रभु यावे आ पर्वम ग्येरसीने। मिनु मेको नु खुइसीन। रिश्शो थुं पाइश्शो मुर नेल्ले ग्येरसीन।

परमप्रभु कली ठेयब सेल्शो

कुम्सो पपाइक्ब कली। दाऊद आ कुम्सो।

65 परमप्रभु, सियोनमी इन कली ठेयब सेल्तीक कुम्सो पाइनीमी। मिनु आंइ कसम जशो नेल्ल इन डोंइती खाजीकी।<sup>2</sup> गे प्रार्थना नेंब बाक्नीनी। मोपतीके मुर नेल्ल इन डोंइती जाक्नीम।<sup>3</sup> गो आंइ पापमी गुम्कानु, आंइ मरिश्शो पशो माफ गेतीनी।<sup>4</sup> सु सु इन योव्रचा पुंइसीशो बाक्नीमी, मेकोपुकी ग्येरसीशो बाक्नीमी। मेको आन कली इन खिंम बाक्पाइक्चा कली चाक्नीनी। गो इन खिं, इन आंम बाक्तीके डा ब्रोव्रशो थोव्रकमी रूनीकी। भजन संग्रह ६३:३-४; भजन संग्रह ८४:२-५; ब्यवस्था ४:७

<sup>5</sup> आंइ पुंइशो लोव्र इन ठेयब गेयमी आंइ कली प्रोइशा लोव्र लेल्नीनी। परमप्रभु, आंइ कली श्येत रे प्रोइब बाक्नीनी। गे डोन बाक्ब रागी नु नेल्ल क्येडा डोन डा समुन्द्र आ नेक्था बाक्ब आन आस बाक्नीनी।<sup>6</sup> गे इन सक्तिमी डांडा नेल्ल सेल्तीनी। गे ठेयब सक्ति पाइश्शो बाक्नीनी।<sup>7</sup> गे समुन्द्र आन ग्रीशो सिक्सी पपाइक्तीनी। गे समुन्द्र आन बोक्शो नाइक्पाइक्तीनी। मिनु जात जात डा मुर आन जिचा खेचा साम्नीनी। भजन संग्रह ८९:१०<sup>8</sup> मिनु डोन डोन रागीम बाक्बपुकी इन छक लाक्चा डा गेय तशा हिंनीम। परमप्रभु, गे नां दाप्तीके नु नां पेरतीकेम बाक्ब आन कली ग्येरसीशा कुम्सो पपाइक्तीनी।<sup>9</sup> गे रागी हिरशा, रेउ यिपाइक्तीनी। गे मेको कली शुश ग्रेल्पाइक्तीनी। परमप्रभु आ खोला ब्वाक्कुम ब्रीशो बाक्नीम। मोपा मुर आन कली शुश अन्न खेल्नीनी। मारदे हना मेकोन इन मिश्शो बाक्ब। भजन संग्रह ६७:७<sup>10</sup> गे रू नेल्ल ब्वाक्कुम जिप्पाइक्तीनी। मेको कली थेल्नीनी। रेउ यिपाइश्शा, मेको कली मार मार वापाइक्ब सेल्तीनी। मिनु मेकेर सिश्शो अन्न कली आसीक गेनीनी। भजन संग्रह १०४:१३-१६<sup>11</sup> गे इन गेना हना यो दाक्तीकेमी शुश अन्न ग्रेल्ब सेल्तीनी। इन बग्गी मारेइ मारेइम ब्रीशो बाक्नीम।<sup>12</sup> गोरशो रागी डा बी ब्यफ योव्रतीके गिग दुम्नीम। पहाड थाम्पा ग्येरसीशो बाक्नीम।<sup>13</sup> योव्रतीके नेल्ल क्यारश भेडापुकीमी ब्रीशो बाक्नीम। दिंमपुकी अन्नमी सुम्सीशो बाक्नीम। मेकोपुकी शुश ग्येरसीशा कुम्सो पाइनीम।

परमप्रभु वारच पाइब बाक्ब

कुम्सो पपाइक्ब कली कुम्सो का।

66 ए रागी डा मुर नेल्ले, ग्येरशा परमप्रभु कली कुम्सो पने।<sup>2</sup> गे परमप्रभु कली “इन नें ठेयब बाक्ब” दे कुम्सो पने। मेको कली रिश्शो कुम्सो पने।<sup>3</sup> मिनु परमप्रभु कली “इन गेय ठेयब नु हिंचा डा बाक्नीमी। इन जोरी सत्रु इन डोंइती हिंशा, खिंखि पा बाजीमी। मारदे हना इन सक्ति थम ठेयब बाक्ब” देनीन।<sup>4</sup> रागी डा मुर नेल्ल इन डोंइती बाजीमी। मेकोपुकीमी इन कली ठेयब सेल्शा, कुम्सो पाइनीम। मिनु इन नें कली ठेयब सेल्शा, कुम्सो पाइनीम। ठेयब सेंदा पा।

<sup>5</sup> जाक्कीन, परमप्रभु आ गेय कोव्रडीन। मेकोमी मुर आन दातेमी ठेयब नु हिंचा डा गेय पाप्तु।<sup>6</sup> मेकोमी समुन्द्रम सोव्रशो लां सेल्लु। मुरपुकी सोव्रशो लांम गाक्शा, खोला शोक्साक्म। मेकेर गो मेको आ पर्वम ग्येरसाक्क। प्रस्थान १४:२१-२२; यहोसु ३:१६-१७<sup>7</sup> मेकोमी आ सक्तिमी गेना हना यो सासन पाइब। मेकोमी रागी रागी आन कली कोव्रब। मेको कली मटीब ठेयब मलेम्मल। ठेयब सेंदा पा।

<sup>8</sup> जात जात डा मुरपुकी, आंइ परमप्रभु कली ठेयब सेलीन। मेको कली ठेयब सेल्शो लोव्र नेंसेक्ल।<sup>9</sup> मेकोमी आंइ कली बेक्चा रे प्रोइतु। आंइ कली ग्रेक्चा मगेव।<sup>10</sup> मारदे हना परमप्रभु, गे आंइ कली नाक्ताक्नी। गे आंइ कली चांदी यपाइश्शो खोदेंशो पा यपाइक्तीनी। हितोपदेस १७:३<sup>11</sup> गे आंइ कली जेल्खानम चोक्पाइक्तीनी। मिनु हेल्शो भारी कुरपाइक्तीनी।<sup>12</sup> गे मुर आन कली आंइ पियाम थेक्पाइक्तीनी। गो मी नु ब्वाक्कुम गाक्त्क। तन्न गे आंइ कली ठेयब रागीम चाक्तीनी। यसैया ४३:२

<sup>13</sup> गो इन खिंमी चोशा चढेचा कली जाक्नुड। मिनु आं पशो कसम खाप्नुड।<sup>14</sup> गो श्येत जडानु, कसम जाता। मिनु मुल खाप्नुड।<sup>15</sup> गो इन कली दोम्शो बस्तु चढेनुड। गो बोका चढेनुड। गो ब्यफपुकी नु क्यारश चढेनुड। ठेयब सेंदा पा।

<sup>16</sup> परमप्रभु कली मान पा हिंबपुकी, नेल्ल जाक्शा नेनीन। मेकोमी आं पर्वम मार पवा, मेको गो इन कली शेंनुड।<sup>17</sup> गो मेको कली ठेयब सेंदा पा पुंइता। गो मेको कली ठेयब सेल्ता।<sup>18</sup> आं थुंमी पाप बाक्शो हना, परमप्रभुमी आं लोव्र मनेन वा। हितोपदेस २८:९<sup>19</sup> तन्न परमप्रभुमी आं लोव्र थमा पा नेंतु। मेकोमी आं पुंइशो लोव्र नेंतु।<sup>20</sup> परमप्रभु ठेयब बाक्ल। मारदे हना मेकोमी आं पुंइशो लोव्र गेती। मिनु आं कली गेना हना यो दाक्ब।

“रिश्शो पाइतीनी” दे कुम्सो पशो

कुम्सो पपाइक्ब कली तार पाइश्शो ताप्तीके ताप्शा पतीक कुम्सो।

67 परमप्रभुमी इं कली शिशी पा आसीक गेवल। मिनु इं कली आ शिशी कोंइदल। ठेयब सेंदा पा। गन्ती ६:२४-२५<sup>2</sup> रागी रागी डा मुरपुकीमी इन लां नु इन प्रोइतीक सक्ति तुइक्त्मेक्ल।

<sup>3</sup> परमप्रभु, जात जात डा मुरपुकीमी इन कली ठेयब सेल्मेक्ल। मिनु मुर नेल्लेमी इन कली ठेयब सेल्मेक्ल।<sup>4</sup> रागी रागी डा मुरपुकी ग्येरशा सोम्शा, कुम्सो पामेक्ल। मारदे हना गे जात जात डा मुर आन कली कुल मकोव्रथु निसाफ पाइनीनी। मिनु रागी रागी डा मुर आन कली इन लां कोंइनीनी। ठेयब सेंदा पा।<sup>5</sup> परमप्रभु, जात जात डा मुरपुकीमी इन कली ठेयब सेल्मेक्ल। मिनु जात जात डा मुर नेल्लेमी इन कली ठेयब सेल्मेक्ल।<sup>6</sup> मिनु रूम अन्न खेल्ब। इं परमप्रभुमी इं कली आसीक गेब। भजन संग्रह ६५:१०<sup>7</sup> परमप्रभुम, इं कली आसीक गेना गेन बाक्ब। मिनु रागी डा मुर नेल्ले मेको कली मान पा हिंनीम।

परमप्रभु कली कुम्सो पशो

कुम्सो पपाइक्ब कली दाऊद आ कुम्सो।

68 परमप्रभु बोक्ब। मिनु आ जोरी सत्रु ब्रशा, आ डोंइती रे प्रोक्नीम। गन्ती १०:३५<sup>2</sup> दोपा फशेमी कुन बेरपाइश्शा योल्बा, मोपा मेको आन कली बेरपाइश्शा योल्पतीन। मी आ नेक्था मयीन यशो खोदेंशो पा परमप्रभु आ अरेशो मटीबपुकी मेको आ डोंइती जाम्शा लाइनीम।<sup>3</sup> तन्न ठीक पाइबपुकी परमप्रभु आ डोंइती ग्येरसमल। मेकोपुकी ग्येरशा सोम्शा बाक्मल।

4 परमप्रभु कली कुम्सो पने। मेको आ नें आ पर्वम कुम्सो पने। गोस्स तार गाक्ब कली ठेयब सेल्लिक कुम्सो पने। मेको आ नें परमप्रभु यावे बाक्ब। गे मेको आ डोंइती ग्येरशा सोम्शा बाक्कीन। *यसैया* ५७:१४<sup>5</sup> परमप्रभु आ बाक्तीकेमी बाक्शा, रोम रोइक्च आन आफ बाक्ब। वोंइश बेक्शो मीश मुर आन कली वारच पाइब यो बाक्ब। *भजन संग्रह* १०:१४<sup>6</sup> परमप्रभुमी आ का ला बाक्शो मुर कली बाक्तीक खिं गेब। मेकोमी चोक्सीशो आन कली प्रोंइशा रिश्शो सेल्ब। तन्न मटीबपुकी चहिं नांम दुष्शा सोव्रशो रागीम बाक्चा माल्नीम।

7 परमप्रभु, गे इन मुर आन डोंइडोंइती गाक्तीनी। गे मेको आन कली गोरशो रागीम खुल्नीनी। *ठेयब सेंदा पा। प्रस्थान* १३:२१<sup>8</sup> परमप्रभु सीनैम बाक्ब। इस्राएली आन परमप्रभु आ डोंइती खिनु कुत। मिनु शुश रेउ यित। *प्रस्थान* १९:१६-१८<sup>9</sup> परमप्रभु, गे ठेयब रेउ यिपाइक्तीनी। इन सोव्रने धुम्शो रागी जिप्पाइक्तीनी।<sup>10</sup> इन मुर आन कली मेको रागीम बाक्पाइक्तीनी। मिनु गे, परमप्रभु, इन दाक्तीकेमी श्येत जाइब आन कली धुल्तीनी।

11 परमप्रभुमी आ लोव्र नेंपाइक्त्तु। मिनु मेको लोव्र शेंब मीश मुर शुश दुन्तेक्म। *यसैया* ५२:७<sup>12</sup> लडाइ पाइब आन पिप हिंशा दाम दाम पा प्रोक्नीम। मिनु मीश मुरपुकीमी मेको प्रोक्ब आन प्रोंइशो मारेइ मारेइ योक्सीनीम।<sup>13</sup> गे चहिं भेडा आन दातेमी इप्चा दाक्नीनी? चांदीम गिल्शो फ्रां पाइश्शो ढुकुर बाक्ब। मिनु आ ओफ्लापुकी टल्केशो सुनमी गिल्शो बाक्नीम।<sup>14</sup> मिनु नेल्ल क्येडा सक्ति पाइश्शोमी पिप आन कली ब्रपाइक्ची ना सल्मोन डांडामी फुं यिपाइक्त्तु। *न्यायाधीस* ५:१६

15 बाशान डा डांडा परमप्रभु आ डांडा बाक्ब। मेको थम ठेयब बाक्ब। मेकेर डांडा शुश बाक्नीम।<sup>16</sup> गे शुश डांडा पाइश्शो पहाड, मारदे गे परमप्रभु आ सासन पचा कली योव्रशो डांडा गे कोव्रशा, गेहे पाइनीनी? मेकेर परमप्रभु गेना हना यो बाक्ब। *भजन संग्रह* १३:२:१३<sup>17</sup> परमप्रभु आ बग्गी हजार हजार क्येडा शुश बाक्नीम। मिनु परमप्रभु सीनै रे आ बाक्तीकेम जाक्शो बाक्ब।<sup>18</sup> गे इर डोइश्शा लाइतीनी। ग्याइश्शो मुर आन कली लाइक्तीनी। मुर आन दातेमी गे मारेइ मारेइ ताइतीनी। डोंइती मटीब आन दातेमी यो ताइतीनी। परमप्रभु यावे मेकेर बाक्ब। *एफिसी* ४:८-१०<sup>19</sup> परमप्रभु कली नाक्त्त कित कित ठेयब सेल्मेक्ल। मेको आंइ श्येत कुरशा, आंइ जोरी सत्रु रे प्रोंइब बाक्ब। *ठेयब सेंदा पा। १कोरिन्थी* १०:१३

20 आंइ परमप्रभु श्येत रे प्रोंइब बाक्ब। मिनु परमप्रभु यावेमी बेक्चा रे प्रोंइब।

21 परमप्रभुमी थमा पा आ जोरी सत्रु आन पिपा प्रोल्ब। मेको मुर आन चां पाइश्शो पिपा पापम ब्रीशो बाक्ब।<sup>22</sup> मिनु परमप्रभुमी “गे मेको आन कली बाशान रे चाक्नुडमी। मेको आन कली समुन्द्र आगा रे गुंइनुडमी।<sup>23</sup> गेपुकीमी इन खोइली इन जोरी सत्रु आन हुशेम खुम्नीनी। मिनु इन कुचुमपुकीमी यो आन भाग ताइनीम” देंत।

24 परमप्रभु, मुरपुकीमी इन कली ताइनीम। आं परमप्रभु, आं पिप कली आ बाक्तीकेम लशो ताइनीम। *भजन संग्रह* २४:७; *२सामुएल* ६:१३-१५<sup>25</sup> डोंइडोंइती कुम्सो पाइबपुकी गाक्नीम। मेको आन नोले मार मार ताप्बपुकी गाक्नीम। मिनु मेको आन एर ओंथ खैजडी ताप्ब मीश आलपुकी गाक्नीम। *प्रस्थान* १५:२०<sup>26</sup> परमप्रभु कली गुम्तीकेमी ठेयब सेलीन। परमप्रभु यावे कली इस्राएली आन गुम्तीकेमी ठेयब सेलीन। *यसैया* ४८:१

27 नेल्ल क्येडा आइक्च थर बेन्यामीन आ खिं डा मुरपुकीमी मेको आन कली लां कोंइनीम। यहूदा आ थर डा ठेयब मुर, जबूलून आ थर नु नाप्ताली आ थर डा ठेयब मुर मेको हुलम बाक्नीम।<sup>28</sup> परमप्रभु इन सक्ति कोंइदीन। डोंइती पशो खोदेशो पा परमप्रभु, इन सक्ति कोंइदीन।<sup>29</sup> मिनु पिपपुकीमी इन कली यरूसलेम डा इन खिं आ पर्वम मार मार चाक्नीम। *भजन संग्रह* ७२:१०<sup>30</sup> बुदी मीलु आन दातेम बाक्ब जन्तु खोदेशो मुर आन कली हुइक्तीन। जात जात डा बाछा आन दातेम बाक्ब ब्यफ खोदेशो मुर आन हुल कली खेरीन। मेकोपुकी ब्रुमा नोले चांदी चाक्चा माल्नीम। लडाइ पचा दाक्ब जात जात डा मुर आन कली ब्रपतीन।<sup>31</sup> इजीप्त्त रे मुर जाक्नीम। एथीयोपीया डा मुरपुकी परमप्रभु कली जिम्मा गेंसीनीम। *यसैया* १८:७; *यसैया* १९:२१; *यसैया* ४५:१४ *प्रैरित* ८:२७<sup>32</sup> ए रागी डा राज्यपुकी, परमप्रभु कली कुम्सो पने। परमप्रभु यावे कली ठेयब सेल्लिक कुम्सो पने।

*ठेयब सेंदा पा।*<sup>33</sup> परमप्रभु डोंइती रे स्वर्गम बाक्ब। मेको आ सेंदा बुंबु पशो खोदेशो सक्ति पाइश्शो बाक्ब।<sup>34</sup> परमप्रभु सक्ति पाइश्शो बाक्ब। मेको कली इस्राएलीम मान पाइनीम। मेको आ सक्ति सरीडम बाक्ब।<sup>35</sup> परमप्रभु, इन बाक्तीकेमी हिंचा डा बाक्नीनी। इस्राएली आन परमप्रभुम आ मुर आन कली सक्ति नु बोल गेब। परमप्रभु ठेयब बाक्ब।

“वारच पने” दे पुंइशो

*कुम्सो पपाइक्ब कली लिली फू आ लायो। दाऊद आ कुम्सो।*

69 “परमप्रभु, आं कली श्येत रे प्रोंइयीनी। मारदे हना ब्वाक्कु आं शुर सम्म जाक्शो बाक्ब।<sup>2</sup> गो थेक्तीक मबाक्शो हिलो आगाम गुम्ना गुम्न बाक्नुड। शुश लुक्च लशो ब्वाक्कुमी गुम्ना गुम्न बाक्नुड। आं एर ओंथ ब्वाक्कु ला बाक्ब।<sup>3</sup> गो ‘वारच पने’ दे प्रवा किवा पा दती। आं सेंदा सोव्रती। आं परमप्रभु कली माल्शा आं मिक्च ब्राब्रा दुम्ती।<sup>4</sup> आं कली मोशा काइ मदाक्बपुकी आं चां क्येडा यो शुश बाक्नीम। मिनु मेकोपुकी मोशा आं जोरी सत्रु दुम्शो बाक्नीम। मेकोपुकीमी आं कली साइक्चा माल्शो बाक्नीम। आं मरोइश्शो मार मार थोव्रक, मेकोपुकीमी ‘लेत्तो’ देंनीम। *यूहन्ना* १५:२५<sup>5</sup> परमप्रभु, गे आं दूली पशो तुइश्शो बाक्नीनी। आं दोस इन डोंइती मखूइश्शो बाक्ब।

6 इन कली आस पाइबपुकी आं पतीके मुने मदोक्मल। परमप्रभु, मुर नेल्ल आन परमप्रभु यावे, इन कली माल्बपुकी आं पतीके मुने मदोक्मल। गे इस्राएली आन परमप्रभु बाक्नीनी।<sup>7</sup> गो इन पर्वम शुक्शी पाइक्चा पुंइसीनुड। मिनु मुनेमी आं कुल सुम्सीशो बाक्नुड। *भजन संग्रह* ४४:२३<sup>8</sup> गो आं लोक्ब आन दातेमी मतुइश्शो मुर खोदेशो दुम्शो बाक्नुड। गो आं ममा आ तौ आंइ दातेमी अर्को रागी डा मुर खोदेशो दुम्ती। *भजन संग्रह* ३८:१२<sup>9</sup> मारदे हना इन खिं कली दाक्तीके नाक्त्त कित कित आं डोंइती बाक्ब। इन कली पशो शुक्शी आं कली दुम्त्त। *भजन संग्रह* ११९:१३९; *यूहन्ना* २:१७; *रोमी* १५:३<sup>10</sup> गो डाक्शा, माइजा बाक्डानु, मुरपुकीमी रिक्ताक्वीमी।<sup>11</sup> गो भाडग्रा फेक्सीडानु, मुरपुकीमी आं कली शुक्शी पाइक्तीमी।<sup>12</sup> ठेयब लाप्चोम बाक्बपुकीमी आं कली शुक्शी पाइनीम। दुक्शो मुरपुकीमी आं पर्वम कुम्सो पाइनीम। *अय्युब* ३०:९

13 तन्न परमप्रभु यावे, गो इन कली इन शिशी पाइक्ची ना लोव्र पाइनुड। इन गेना हना यो दाक्तीकेमी आं पुंइशो श्येत रे प्रोंइतीके गेयीनी। परमप्रभु आं कली लोव्र लेत्तीनी। *यसैया* ४९:८<sup>14</sup> आं कली हिलोमी गुम्तीक रे प्रोंइयीनी। आं कली गुम्चा मगेयीनी। आं कली काइ मदाक्बपुकी रे प्रोंइयीनी। मेको बारशो ब्वाक्कु रे प्रोंइयीनी।<sup>15</sup> बारशो ब्वाक्कुम आं कली मसुम्पील। ब्वाक्कुम मयोल्दील। बेक्शो मुर आन बाक्तीकेमी आं कली मब्रेत्तील। *उत्पत्ती* २९:३<sup>16</sup> परमप्रभु यावे, इन गेना हना यो दाक्तीकेमी आं कली लोव्र लेत्तीनी। इन ठेयब शिशी आं गे लेत्तीन। *गन्ती* ६:२६<sup>17</sup> इन कुल इन गेय पाइब रे मखूइक्तीन। गो श्येत जशो बाक्नुड। आं कली रीब पा लोव्र लेत्तीनी।<sup>18</sup> आं नेक्था जाक्कीन। मिनु आं कली प्रोंइयीनी। आं जोरी सत्रु रे आं कली प्रोंइयीनी।<sup>19</sup> मुरपुकीमी आं पर्वम दोपा रिक्तीमी, मुने तोक्वीमी नु शुक्शी पाइक्वीमी, गे मेको नेल्ल तुइक्नीनी। आं जोरी सत्रु नेल्ल इन डोंइती बाक्नीम।<sup>20</sup> आं कली रिश्शा कोव्रशो आ पर्वम आं थुं जिक्शो बाक्ब। मिनु गो मारेइ पने मचाप्ब दुम्शो बाक्ती। आं कली शिशी पाइब ‘सुइ बाक्मा कों’ दे कोव्रता, तन्न सुइ मबाक्म। लेम्ब यो सुइ मबाक्म।<sup>21</sup> मेकोपुकीमी आं जचा थोव्रकमी खाइल कुर पा गेतीमी। गो तूतू दाक्डानु, ग्युरशो तूचा थोव्रक गेतीमी। *मत्ती* २७:३४,४८

22 मेको आन जचा थोव्रक आन ब्वारद दुम्ल। मेको आन कली वारच पाइब आन बेक्तीक दुम्ल। *रोमी* ११:९-१०<sup>23</sup> मेको आन मिक्ची ब्राब्रा दुम्शा, मताइब दुम्मल। मेको आन ची गेना हना यो गुर ब्वेशो दुम्ल।<sup>24</sup> गे इन गाइक्चा मेको आन कली मोइक्तीन। इन गाइश्शो मेको आन कली दुम्ल।<sup>25</sup> मेको आन बाक्तीके श्येत्थ दुम्ल। मेको आन ताम्बुम सुइ मलीमल। *प्रैरित* १:२०<sup>26</sup> मारदे हना इन तुप्शो मुर कली खेदा पाइनीम। मेकोपुकीमी इन खाइक्पाइश्शो मुर आन कली लडाइ तोइनीम।<sup>27</sup> मेको आन ठीक मपतीकेम ठीक मपतीक तेम्दीन। मेकोपुकीम इन पाप रे प्रोंइतीके

मतामेकल। 28 ब्रॉइतीक किताब रे मेको आन नें क्याम्सेकल। ठीक पाइब आन नें ब्रेकशो किताबमी मेको आन नें मबाकल। प्रस्थान ३२:३२-३३; दानीएल १२:१; लूका १०:२०; फिलिप्पी ४:३ 29 परमप्रभु, गो श्येत जशा, रोइ पशो बाकनुड। इन प्रॉइतीकेमी आं कली खाल पयील” दे परमप्रभु कली लोव पाता।

30 गो कुम्सो पा, परमप्रभु आ नें ठेयब सेल्लुड। “गे रिम्शो पाइब बाकनीनी” दे मेको कली ठेयब सेल्लुड। 31 मार मार क्योरशा, चदेशो क्येडा एको कुम्सो नेंशा, परमप्रभु यावे ग्येरसीब। ग्रोत्र नु गेंच पाइश्शो ब्यफ चदेशो क्येडा यो शुश ग्येरसीब। भजन संग्रह ५०:८-१३ 32 दिच्वा पुंडसीशो मुरपुकी मेको तशा ग्येरसीनीम। परमप्रभु यावे कली माल्बपुकी, इन थुं ग्येथ लुक्च मदुम्ल। 33 परमप्रभु यावेमी प्रुडग आन पुंडशो नेंब। मिनु ग्याइक्चा पुंडसीशो आ मुर आन कली आइक्च ममिम्ब। 34 सरीड नु रागीमी मेको कली ठेयब सेल्सेकल। समुन्द्र नु मेकेर बाकशो नेल्लेमी मेको कली ठेयब सेल्मेकल। 35 मारदे हना परमप्रभुमी सियोन कली प्रॉइब। मिनु यहूदा डा सहरपुकी लेंशा सेल्ब। मिनु मुरपुकी मेकेर बाकशा, मेको आन के दुम्ब। 36 मिनु मेको आ गेय पाइब आन आल आन के यो दुम्ब। मेको आ नें दाक्बपुकी मेकेर बाकनीम।

“आं कली राइक्तीनी” दे पुंडशो

कुम्सो पपाइक्ब कली मिम्पाइक्चा कली दाऊद आ कुम्सो। भजन संग्रह ४०:१४-१८

70 “परमप्रभु, आं कली राइक्चा कली रीब पा जाक्कीन। परमप्रभु यावे आं कली वारच पचा कली रीब पा जाक्कीन। 2 आं कली साइक्चा माल्बपुकी मुने दोक्शा, वाम ग्याम दुम्मल। आं कली मरिम्शो दुम्शो दाक्बपुकी प्रोक्शा, ठेयब मुने दोक्मल। 3 मिनु सुमी आं पर्बम ‘ठीक दुम्त!’ देंमा, मेको मुने पा लल गोगो जिमल। 4 तन्न सु सुमी इन कली माल्नीमी, मेकोपुकी इन पर्बम ग्येरशा सोम्शा बाक्मल। सु सुमी इन पाप रे प्रॉइतीक दाक्नीमी, मेकोपुकीमी गेना हना यो ‘परमप्रभु ठेयब बाक्ब’ देंमल।

5 गो प्रुडग नु श्येत जाइब बाक्ती हना यो, परमप्रभु रीब पा आं बाक्तीक जाक्कीन। गे आं कली वारच पाइब नु आं कली राइक्ब बाक्नीनी। परमप्रभु यावे, रीब पा जाक्कीन” दे पुंडता।

खाल्पा दुम्शो ना डा पुंडशो

71 परमप्रभु यावे, गो इन कली जिम्मा गेंसीशो बाकनुड। गो गेनायो मुने मदोक्डल। 2 इन ठीक पतीकेम आं कली राइश्शा प्रॉइयीनी। आं लोव नेंशा, आं कली प्रॉइयीनी। 3 आं प्रोक्शा लशा खुइश्शा बाक्तीके सेरथे फुल्लु दुमीन। गे आं कली प्रॉइचा कली ब्रॉइशा बाक्तीक दरवार बाक्नीनी। मारदे हना गे आं सेरथे फुल्लु नु आं ब्रॉइशा बाक्तीक दरवार बाक्नीनी। भजन संग्रह ३१:३-४ 4 आं परमप्रभु, गे आं कली इन अरेशो मटीब आन गुइ रे राइक्तीनी। ठीक मपाइब नु तुप्शा दिक्ब मुर आन गुइ रे राइक्तीनी।

5 मारदे हना परमप्रभु यावे, गे आं आस बाक्नीनी। गो आ ठिटा दुम्डा रेन इन कली थमा सुइक्ता। 6 गो जरमेसीडा रेन इन कली थमा सुइक्ता। गे आं ममा आ कोव्रज रेन आं कली कोव्रब बाक्तीनी। गो इन कली गेना हना यो ठेयब सेल्लुड। 7 शुश मुरपुकीमी आं कली तशा “परमप्रभुमी मेको कली ताइक्ताक्व” दे मिन्नीम। तन्न गे आं खुइश्शा बाक्तीक बाक्नीनी। 8 गो इन कली गेना हना यो ठेयब सेल्लुड। गो नाक्त रे इन नें ठेयब सेल्लुड।

9 गो खूशो दुम्डानु, आं कली मप्रॉइयीनी। आं सक्ति जाम्मेनु यो आं कली मप्रॉइयीनी। 10 मारदे हना आं जोरी सत्रुमी आं पर्बम मरिम्शो लोव पाइनीम। आं कली साइक्चा माल्बपुकीमी लोव गारपाइक्नीम। 11 मेकोपुकीमी “परमप्रभुमी मेको कली वारच पचा प्रॉइशो बाक्ब। मेको कली खेदा पा ग्याइक्तय। मारदे हना मेको कली राइक्ब सुइ मबाक्नीम” देंनीम। 12 परमप्रभु, आं क्येडा डोन मबाक्कीन। आं परमप्रभु, आं कली राइक्चा कली रीब पा जाक्कीन। 13 आं कली दोस गेबपुकी मुने दोक्शा खतम

दुम्मल। आं कली साइक्चा माल्बपुकी तोक्शा लोव पाइक्चा, शुक्शी पाइक्चा नु आइक्च सेल्चा पुंडसमल।

14 तन्न गो चहिं इन कली आस पस डा पस बाकनुड। गो इन कली डॉइती क्येडा ठेयब सेल्लुड। 15 गो इन ठीक पतीके आ पर्बम लोव पाइनुड। गे आं कली गिश खेयप प्रॉइयीनी, मतुइक्ताक्ड हना यो, गो इन श्येत रे प्रॉइतीके आ पर्बम नाक्त रे लोव पाइनुड। 16 परमप्रभु, गो इन सक्ति पाइश्शो गेय आ पर्बम शेंना शेंन गाक्नुड। मिनु इन ठीक पतीके आ पर्बम इन कली ठेयब सेल्लुड। 17 परमप्रभु, गो ठिटा बाक्डा रेन, गे आं कली शेंताक्यीनी। मिनु गो मुल सम्म इन छक लाक्चा डा गेय आ पर्बम लोव पाइनुड। 18 परमप्रभु, गो खूशो दुम्शा, आं चां बोइक्म सम्म यो, आं कली मप्रॉइयीनी। मिनु गो आं नोले डा पाला डा मुर आन कली इन सक्ति नु इन ठीक पतीके आ पर्बम शेंनुड। यसैया ४६:४

19 मिनु इन ठीक पतीके ठेयब दुम्शा, इर सरीड थीब। गे थम ठेयब गेय पाइतीनी। परमप्रभु, इन खोदेशो अरु सु बाक्नीमी डा? 20 गे आं कली शुश नु ठेयब श्येत जपाइक्तीनी हना यो, लेंशा ब्रॉइचा गेनीनी। गे आं कली लुक्च लतीक रे लेंशा ग्येथ लपाइक्नीनी। १सामुएल २:६ 21 गे आं कली लेंशा मान ताइब सेल्शा लेम्नीनी।

22 आं परमप्रभु, गो इन दाक्शा गेनायो मप्रॉइतीके आ पर्बम ठेयब तार पाइश्शो ताप्तीके ताप्शा, ठेयब सेल्लुड। गे इस्राएली आन का ला परमप्रभु बाक्नीनी। गो बीना ताप्शा इन कली कुम्सो पाइनुड। गे इस्राएली आन का ला परमप्रभु बाक्नीनी। २राजा १९:२२; यसैया ४३:३ 23 गे आं कली श्येत रे प्रॉइब बाक्तीनी। मोपतीके गो ग्येरशा सोम्शा इन कली कुम्सो पा ठेयब सेल्लुड। 24 गो इन ठीक पतीके आ पर्बम नाक्त रे लोव पाइनुड। मारदे हना आं कली खती पचा माल्बपुकी मुने दोक्शा, मार पचा ना मार पचा दुम्तेक्म।

पिप आ पर्बम पुंडशो

सोलोमन आ कुम्सो।

72 परमप्रभु, पिप कली इन निसाफ डा लोव गेने। पिप आ तौ कली इन ठीक पतीके गेने। 2 मेकोमी इन मुर आन कली ठीक पतीकेमी निसाफ पवल। इन प्रुडग मुर आन कली ठीक पा निसाफ पवल। 3 मोदेशो ठीक पतीके तशा, डांडा नु पहाड डा रूपुकी अन्न ग्रेल्ब दुम्मल। 4 मेकोमी मुर आन दातेमी प्रुडग आन कली कोव्रडल। मिनु श्येत जाइब आन तमी तौ आन कली प्रोनल। मेकोमी दिक्ब आन कली खतम पोक्मल।

5 नां तास्ला बाक्सा सम्म नु मुर नेल्ल आन पाला सम्म मेको ब्रॉइशा बाक्ल। 6 मिनु मेको घांस रिक्शो दिंममी रेउ यिशो खोदेशो दुम्ल। 7 मेको आ पालामी मुर आन दातेमी ठीक पतीके ठेयब दुम्ल। मिनु तास्ला लीम सम्म मुर आन थुं नाइक्तीक दुम्ल।

8 मेकोमी समुन्द्र कारे अर्को समुन्द्र सम्म नु ठेयब खोला रे रागी आ सुर सम्म सासन पवल। जकरिया ९:१० 9 गोरशो रागी डा मुरपुकी मेको आ डॉइती बाम्मल। मिनु आ जोरी सत्रुमी फुरक तुक्गामेक्ल। 10 टारशीशु नु डोन डा टापु डा पिपपुकीमी मेको कली तिरो थाप्तमेक्ल। शेबा नु सेबा डा पिपपुकीमी मेको कली कोसेली चाक्गामेक्ल। यसैया ६०:९; भजन संग्रह ६८:३०; १राजा १०:१-२ 11 पिप नेल्ल मेको आ डॉइती बाम्मल। मिनु रागी रागी डा मुर नेल्लेमी मेको कली गेय पामेक्ल।

12 मारदे हना मेकोमी आ कली पुंडब श्येत जाइब आन कली प्रॉइब।

वारच पाइब मबाक्शो प्रुडग आन कली वारच पाइब। अय्युब ३६:१५

13 मचाक्ब नु श्येत जाइब आन कली शिशो पाइब। मेकोमी प्रुडग आन कली साइक्तीक रे प्रॉइब। 14 मेको आन कली दिप्तीक नु हुश खाक्श पोक्तीक रे प्रॉइब। मारदे हना मेको आ डॉइती हिक्सीशो बाक्नीम। भजन संग्रह ९:१३; भजन संग्रह ११६:१५

15 मेको शुश नाक्त ब्रॉइल। शेबा डा सुन मेको कली चाक्गामेक्ल। मुरपुकीमी मेको आ पर्बम प्रार्थना पस डा पस पामेक्ल। नाक्त रे मेको कली आसीक गेमेक्ल। 16 मिनु रागी शुश अन्नम ब्रील। डांडा तार यो अन्न ग्रेल्ल। मिनु फल फुल लेबानोन डा खोदेशो पा सिल्ल। सहरम बाक्ब मुर घांस खोदेशो पा सौशा बोशा शुश दुम्मल। 17 मेको आ नें गेना हना यो लील। नां

बाकम सम्म आ नें ठेयब बाक्ल। रागी रागी डा मुर नेल्लेम मेको रे पा आसीक तामेक्ल। मिनु मेकोपुकीमी मेको आ पर्वम “ग्येरसीशो मुर बाक्ब” देंमल। *उत्पत्ती १२:३; उत्पत्ती २२:१८*

18 परमप्रभु, परमप्रभु यावे, इस्राएली आन परमप्रभु ठेयब बाक्ब। मेकोमी ला छक लाक्वा डा गेय पाइब। *भजन संग्रह ४१:१४* 19 मेको आ नें गेना हना यो ठेयब बाक्ब। रागी नेल्ल आ सक्तिमी ब्रील। आमेन, मेको थमा बाक्ब। *यसैया ६:३* 20 येस्से आ तौ दाऊद आ प्रार्थना एकोन बाक्नीम।

“परमप्रभु, गो इन मुर नड” देंशो

आसाफ आ कुम्सो।

73 परमप्रभु इस्राएल डा मुर आन कली थमा पा रिम्शो पाइब बाक्ब। आन पाप क्याम्चा पुंडसीशा, रिम्शो थुं पाइश्शो आन कली रिम्शो पाइब बाक्ब। *अय्युब २१:७* 2 तन्न गो ग्रेक्शा, आं थेक्तीक साम्चा चिक्शो बाक्ती। 3 मारदे हना गो परमप्रभु आ अरेशो मटीब आन रिम्शो दुश्शो तशा नु मेको आन ठेयब लेश्शो तशा, गेहे पाता। 4 मेको आन कली श्येत मबाक्ब। मेकोपुकी रोइ मपशो नु बोल्यो बाक्नीम। 5 मेकोपुकी अरुपुकीम खोदेंशो पा श्येत मजाइनीम। मेकोपुकी अरु खोदेंशो पा श्येत मदुम्नीम। 6 मोपतीके ठेयब लेत्तीके मेको आन माला खोदेंशो दुम्ब। आन दिष्वा हुश खाक्श पोक्तीके आन फेक्तीक वा खोदेंशो दुम्ब। 7 मेको आन खकटा थुंम मरिम्शो पतीके बाक्ब। मेको आन थुं डा मरिम्शो पतीके मिम्शा, मिम्ने मजाप्शो बाक्ब। 8 मेकोपुकीमी शुक्शी पा मरिम्शो लोत्र पाइनीम। मिनु आन ठेयब लेत्तीकेमी मुर आन कली हिंच कौंइनीम। 9 मेकोपुकीमी “स्वर्ग नेल्ल आंइ के बाक्ब” देंनीम। मिनु रागी नेल्ल आंम के सेल्नीम। 10 मोपतीके मुरपुकी मेको आन गे लेत्नीम। मिनु आन लोत्र थमा सुइश्शा आन नोले खोइश्शा मेको आन कली ठेयब सेल्नीम। 11 मिनु मेकोपुकीमी “परमप्रभुमी दोपा तुइक्वा डा? मार मेको नेल्ल क्येडा ठेयब तुइक्ब बाक्बा डा?” देंनीम। *भजन संग्रह १०:११* 12 परमप्रभु आ अरेशो मटीबपुकी मोदेंशो बाक्नीम। मेकोपुकी महिंधु, क्येट चेम्ना चेम्न बाक्नीम। 13 गो आयेसो ला रिम्शो थुं पाइश्शो दुम्डा बाक्त। मिनु मोशा दोस मताइब दुम्डा बाक्त। *मलाकी ३:१४* 14 गो नाक्तर रे हिंचा डा श्येत जाता। मिनु सुनी कुस कुस सजाइ ताता। 15 गो मेको आन खोदेंशो पाता हना, गो इन मुर आन कली मरिम्शो पदुमी वा। 16 गो एको नेल्ल रुप्चा माल्ता, आं कली थम श्येत दुम्त। 17 मिनु गो परमप्रभु आ खिं ओव्रती। मेना गो मेको आन कली नोले मार दुम्बा, मेको नेल्ल तुइक्ताकड।

18 गे मेको आन कली थमा पा ग्रेक्तीके लांम गाक्पाइक्नीनी। गे मेको आन कली खतम पोक्नीनी। 19 मेको मतुइक्थु रीब पा खतम दुम्नीम। मेकोपुकी हिंतीकेमी योल्चा पुंडसीशो बाक्नीम। 20 दोपा मुरपुकी सुनी सेंसीमानु, डोमु पशा, थमा ममाइ, दे तुइक्नीमी, मोपा परमप्रभु, गे बोक्ची ना मेको आन कली क्याम्नीनी।

21 डौंइती आ थुं लुक्च लशा, कशो दुश्शो बाक्त। 22 गो ममिम्ब नु मारदे मतुइक्ब बाक्ती। इन डौंइती जन्तु खोदेंशो बाक्ती। 23 मो हना यो गो गेना हना यो गे नु काथा बाक्नुड। गे आं ग्युरा गुइ ग्याइश्शो बाक्नीनी। *रोमी ८:३५-३९* 24 गे आं कली इन लोत्रमी लां कौंइनीनी। मिनु नोले गे आं कली छेडछेडम ताक्नीनी। *भजन संग्रह ४९:१६* 25 स्वर्गम इन डा लाक्शा, अरु आं के सु बाक्नीमी डा? रागीमी यो आं माल्शो इन डा लाक्शा अरु सुइ मबाक्नीम। 26 आं रां नु आं थुं निम्फा ग्येत्थ लुक्च दुश्शो बाक्नीस। तन्न परमप्रभु गेना हना यो आं सक्ति नु आं भाग बाक्ब। *भजन संग्रह १६:५*

27 इन क्येडा डोन बाक्बपुकी थमा पा जाम्शा लाइनीम। गे इन क्येडा नोले शौंइसीशो नेल्ल आन कली खतम पोक्नीनी। 28 तन्न गो चहिं परमप्रभु आ नेक्था बाक्वा दाक्नुड। परमप्रभु यावे आं प्रोक्शा लशा बाक्तीक बाक्ब। गो इन पशो गेय नेल्ल आन पर्वम लोत्र पाइनुड।

“श्येत रे प्रौंइयीकी” दे पुंडशो

शंतीक कुम्सो। आसाफ आ कुम्सो।

74 परमप्रभु, गे मारदे आंइ कली मदाक्थु, गेना हना यो प्रौंइनीनी? इन भेडा आन कली तशा मारदे गाइक्नीनी? 2 साइ इन ग्याप्शो मुर आन कली मिम्तीन। इन के सेल्चा कली श्येत रे प्रौंइशो मुर आन कली मिम्तीन। गे इन बाक्तीक सियोन डांडा कली मिम्तीन। *भजन संग्रह ७६:३* 3 मिनु गे इन ब्रेश्शो खिं कली कोव्रथ लने। इन जोरी सत्रुमी इन खिं मोदेंशो पा खतम पोक्तेक्म। 4 इन जोरी सत्रुमी इन बाक्तीक नेल्ल खतम पोक्तेक्म। मेकोपुकीमी मेकेर आन छेदर ग्युक्ताक्मे। 5 मेकोपुकीमी रवा तिम्शा, नेल्ल श्येत्थ पोक्ब मुर खोदेंशो पा पाम्तेक्म। 6 मेकोपुकीमी ग्येत्थ डा लाप्चो डा बुटा आप्शो गारो डा शी नेल्ल आन खा नु घनमी खतम पोक्तेक्म। 7 मेकोपुकीमी इन खिं कली मी सुइक्ताक्म। रागीमी इन ग्युम्तीक खिं नेल्ल मी सुइश्शा खतम सेल्तेक्म। 8 *२राजा २५:९* 8 मेकोपुकीमी आन थुंमी “गो एको आन कली नेल्ल खतम पोक्नीकी” देंतेक्म। मेकोपुकीमी रागीम बाक्शो इन नैम बुक्तीके खिं नेल्ले मी सुइक्ताक्म। 9 गोपुकीमी मारदे छक लाक्वा डा गेय मतक। मुल परमप्रभु आ लोत्र पाइब सुइ मलीम। गेना सम्म एको ओदेंशो दुम्बा, गो सुइम मतुइक्नीकी।

10 परमप्रभु, इन जोरी सत्रुमी इन कली गेना सम्म शाक्नीमी? मार, जोरी सत्रुमी इन नें आ पर्वम गेना हना यो शुक्शी पस डा पस बाक्नीमी? 11 गे मारदे इन सक्ति मकोइनीनी? इन गुइ इन वा आगा रे गुंइदीन। मिनु मेको आन कली खतम पोक्कीन।

12 परमप्रभु, गे साइ नेसी रे डा आं पिप बाक्नीनी। गे रागी रागी आन कली प्रौंइनीनी। 13 गे इन सक्तिमी समुन्द्र कली फ्राताक्नी। गे समुन्द्रमी बाक्ब ठेयब जन्तु आन पिया प्रोल्तीनी। *भजन संग्रह १०४:६-८; प्रस्थान १४:२१-२२; यसैया २७:१* 14 गे लेव्याथन आ पियापुकी प्रोल्तीनी। मिनु मेको कली गोरशो रागी डा जन्तु आन कली ब्वचा गेतीनी। *अय्युब ४०:२५* 15 ब्वाक्कु बुक्पाइक्ब नु खोल्सा सेल्ब गे बाक्नीनी। मिनु गे गेना हना यो यिस डा यिस बाक्ब ठेयब खोला आन कली सोत्रपाइक्तीनी। 16 नाक्दो इन के बाक्ब। मिनु नाक्ती यो इन के बाक्ब। गे नां नु तास्ला सेल्तीनी। *भजन संग्रह १०४:१९* 17 गे रागी रागी आन सांद वोइक्तीनी। गे हिंउद नु बर्खा सेल्तीनी।

18 परमप्रभु यावे इन जोरी सत्रुमी इन कली दोपा शाक्मे। मिनु इन कली मटीबपुकीमी दोपा इन नें आ पर्वम शुक्शी पामे? मेको मिम्तीन। 19 गे इन ढुकुर ब्वाकी डा जन्तु आन कली मगेने। गे इन श्येत जशो मुर आन कली गेना हना यो मिम्शा बाक्कीन। 20 गे इन कबल खपीन। मारदे हना रागी डा खूइक्तीके नेल्ले हिंतीके नु हुश खाक्श पतीकेमी ब्रीशो बाक्नीम। 21 दिष्वा पुंडसीब आन कली मुने दोक्चा मगेने। पुडग नु श्येत जाइबपुकीमी इन नें ठेयब सेल्मेक्ल। 22 परमप्रभु, बोक्कीन। मिनु इन पर्वम लडाइ पने। मटीबपुकीमी नाक्तर रे इन कली शाक्शो, मिम्तीन। *भजन संग्रह १४:१-३* 23 इन पर्वम दूली लोत्र पाइब आन रेयके नु इन जोरी सत्रु आन लडाइ पस डा पस पशो मप्रेंदीन।

परमप्रभुमी निसाफ पशो

कुम्सो पपाइक्ब कली खतम मसेलो देंशो कुम्सो आ लायो। आसाफ आ कुम्सो।

75 परमप्रभु, गो इन कली “गे आंइ कली रिम्शो पाइतीनी” देंनीकी। मारदे हना इन नें आ पर्वम नेंशो बाक्नीकी। मुरपुकीमी इन छक लाक्वा डा गेय आ पर्वम लोत्र पना पन बाक्नीम। *यसैया ४६:१३* 2 गे “गो आं देंशो नाक्ती गो ठीक निसाफ पाइब नड। 3 रागी रागीम खिनु कुमेनु, मुर नेल्ले खिंखि पाइनीम। तन्न रागी डा जग वोइक्ब गो नड” देंतीनी। *ठेयब सेंदा पा।*

4 गे ठेयब लेश्शो आन कली “ठेयब लेश्शो मदुमीन” देंशा, इन अरेशो मटीब आन कली “मबोरीन” देंतीनी। 5 गे “स्वर्ग आ पर्वम ठेयब लोत्र मपने। मिनु इन शुर किरशा लोत्र मपने” देंतीनी।

6 पूर्व, पच्छिम नु गोरशो रागी तेइ रे सुइमी मुर आन कली ठेयब सेल्ने मचाप्नीम। 7 तन्न परमप्रभुमी मुर आन कली निसाफ पाइब। मेकोमी का निक्शी आन कली दिष्ब, का निक्शी आन कली क्युक्ब। *१सामुएल २:७*

8 परमप्रभु यावे आ गुडमी बोटको का बाक्ब। मेकेर मार मार सुप्लो बोग्यो बोक्शो अडगुर शांबु बाक्ब। परमप्रभुमी मेको तूचा गेब। मिनु रागी रागी डा आ अरेशो मटीबपुकीमी मेको तूचा माल्नीम। भजन संग्रह ६०:५; येरमीया २५:१५-१६<sup>9</sup> तन्न गो चहिं मुर आन दातेमी शुश ग्येरसीशो लोत्र पाइनुड। गो याकूब आ परमप्रभु कली ठेयब सेल्शा, कुम्सो पाइनुड।<sup>10</sup> गे इन अरेशो मटीब नेल्ल आन कली आइक्व सेल्नीनी। तन्न ठीक पाइबपुकी ठेयब सेल्चा पुंडसीनीम।

सक्ति पाइश्शो परमप्रभु यावेमी ग्राब

कुम्सो पपाइक्व कली तार पाइश्शो ताप्तीके ताप्शा पतीके, आसाफ आ कुम्सो।

76 यहूदा आ रागीमी परमप्रभु कली तुइक्नीम। मेको आ नें इस्राएल रागीमी ठेयब बाक्ब।<sup>2</sup> आ ताम्बु सालेम सहरमी बाक्ब। आ बाक्तीके सियोनमी बाक्ब। भजन संग्रह १३२:१३<sup>3</sup> मेकोमी मेकेर ब्रशो ब्रापुकी, तेक्तीकपुकी, तरवार नु लडाइ पतीक मारेइ मारेइ जिक्तीमी। ठेयब सेंदा पा। भजन संग्रह ४६:१०

<sup>4</sup> गे छेडछेडमी नां खोदेशो तांडसीनीनी। गे गेना हना यो लीब पहाड क्येडा यो ठेयब बाक्नीनी।<sup>5</sup> महिंभ मुरपुकी रोइक्चा पुंडसाक्म। मेकोपुकी साइक्चा पुंडसाक्म। लडाइ पाइब आन दातेमी कामी यो आन गुइ क्युक्ने मचबेम।<sup>6</sup> याकूब आ परमप्रभु, इन हुइश्शोमी शारा नु शारा डोइक्ब निम्फा बेक्ताक्स।<sup>7</sup> गे मान पा हिंचा माल्शो बाक्नीनी। गे गाइक्तीनीनु, इन डोंइती सु राप्ने चाप्पा डा? <sup>8</sup> गे स्वर्ग रे इन निसाफ नेंपाइक्तीनी। मिनु रागी हिंशा, सिक्सी पाप्तु। भजन संग्रह ४६:१; हबकुक २:२०<sup>9</sup> मेना परमप्रभु, गे रागीम दिप्चा पुंडसीशो नेल्ल आन कली प्रोंइचा कली निसाफ पथ बोक्तीनी। ठेयब सेंदा पा।<sup>10</sup> थमा पा, मुर आन गाइक्तीकेमी इन कली ठेयब सेल्ब। मिनु इक्का लीशो गाइक्तीकेमी इन कली ठेयब सेल्ब।

<sup>11</sup> परमप्रभु यावे, इन परमप्रभु आ नें थिशा कसम जशो खपीन। मेको आ नेक्था बाक्ब नेल्लेमी मान पा हिंचा डा परमप्रभु कली कोसेली चाक्मेक्ल।<sup>12</sup> मेकोमी सासन पाइब आन ठेयब लेत्तीके फस पोक्ब। मेको रागी डा पिप आन कली हिंपाइक्ब बाक्ब।

श्येत दुम्मेनु, लेम्शो

कुम्सो पपाइक्व शेंब येदुथून कली आसाफ आ कुम्सो।

77 गो परमप्रभु कली “वारच पाइय्यीनी। आं लोत्र नेनीन” दे ठेयब सेंदा पा ब्रेत्ती।<sup>2</sup> गो श्येत जडानु, परमप्रभु कली माल्ता। गो नाक्दो यो मदथु, परमप्रभु कली पुंडता। आं थुं खाइक्स डा खाइक्स बाक्त।<sup>3</sup> गो परमप्रभु कली मिम्ताक्ड, गो रोंका पाता। गो आं श्येत मिम्ना मिम्न बाक्ती। मिनु आं थुं लुकच लत। ठेयब सेंदा पा।<sup>4</sup> “गे आं कली निन्द्रा पचा यो मगेनीनी। मिनु गो शुश श्येत जशा, ब्वाक्ने यो मचबु।<sup>5</sup> गो डोंइती डा नाक्त नु साइ डा बर्सपुकी मिम्ताक्ड। भजन संग्रह १४३:५<sup>6</sup> गो नाक्दो आं थुंमी रिम्शो बाक्बा देय मरिम्शो बाक्बा” दे मिम्स डा मिम्स बाक्ती।<sup>7</sup> मार, परमप्रभुमी गेनायो आं कली मब्राइबा? मिनु मेकोमी गेनायो शिशी मपाइबा? <sup>8</sup> मेको आ गेना हना यो दाक्तीक जाम्शो बाक्बा? मेको आ थोक्शा पशो लोत्र शोर गाक्शो दुम्शो बाक्बा? <sup>9</sup> मार, परमप्रभुमी शिशी पचा प्रेंशो बाक्बा? मेको गाइश्शा, आ शिशी पतीके तेक्शो बाक्बा? ठेयब सेंदा पा।<sup>10</sup> मिनु गो “नेल्ल क्येडा ठेयबमी आ थुं फाइक्तीके आं कली श्येत दुम्त” दे मिम्ताक्ड।

<sup>11</sup> मिनु “परमप्रभु यावे, गो इन पशो मिम्नुड। गो इन साइ डोंइती डा पशो छक लाक्चा डा गेय मप्रेंनुड।<sup>12</sup> गो इन पशो नेल्ल मिम्स डा मिम्स बाक्नुड। साइ डोंइती डा इन छक लाक्चा डा गेय आ पर्वम मिम्नुड।<sup>13</sup> परमप्रभु, इन लां ठीक बाक्ब। आंइ परमप्रभु खोदेशो ठेयब अरु तेको देवता बाक्बा डा? प्रस्थान १५:११<sup>14</sup> गे छक लाक्चा डा गेय पाइब परमप्रभु बाक्नीनी। गे जात जात डा मुर आन दातेमी इन सक्ति कोंइताक्नी।<sup>15</sup> गे इन सक्तिमी इन

मुर आन कली प्रोंइतीनी। गे याकूब, योसेफ नु आ चच युइ आन कली प्रोंइतीनी। ठेयब सेंदा पा।

<sup>16</sup> परमप्रभु, समुन्द्र डा ब्वाक्कु इन कली तशा हिंतेक्म। शुश लुकच लशो समुन्द्र खिंखि पाप्तु।<sup>17</sup> मिनु गोस्सुमी रेउ यिपाइक्तेक्म। सरीड रे ठेयब बुंबु पाप्तु। इन चिला तेइ तेइ ब्रत।<sup>18</sup> फश गिवारम इन बुंबु पशो नेंसाक्व। इन चिलामी रागी नेल्ल छेडछेड दुम्त। रागी खिंखि पा हिम्साक्व।<sup>19</sup> इन लां समुन्द्र रे पा लशो बाक्त। इन गाक्शो लां ठेयब समुन्द्र आ दातेमी बाक्त। मो हना यो इन खोइलीम दिम्शो मारेइ मताइसे। प्रस्थान १४:२१-३१<sup>20</sup> मोसा नु हारून आस गुइ रे पा, गे इन मुर आन कली भेडा आन हुल खुल्शो खोदेशो पा गाक्पाइक्तीनी” दे परमप्रभु कली लोत्र पता।

परमप्रभुमी मार मार पवा

शेंतीक कुम्सो। आसाफ आ कुम्सो।

भजन संग्रह १०६:-

78 आं मुरपुकी, आं शेंशो लोत्र नेनीन। इन नोफा दाइश्शा आं लोत्र नेनीन।<sup>2</sup> गो कथा पा लोत्र शेंनुड। साइ डोंइती डा लोत्र पाइनुड। मत्ती १३:३५<sup>3</sup> एको लोत्र आंइ किकी पिपीमी आंइ कली नेंपाइश्शो नु तुइक्पाइश्शो बाक्नीम। प्रस्थान १३:१४; ब्यवस्था ४:९-१०<sup>4</sup> गोपुकी एको लोत्र मेको आन तौ चच आन क्येडा मखुइक्नय। मिनु नोले दुम्ब पाला डा मुर आन कली यो परमप्रभु यावे आ ठेयब नु सक्ति पाइश्शो छक लाक्चा डा गेय आ पर्वम शेंनीकी।

<sup>5</sup> मेकोमी याकूब आ मुर आन कली दोपा बाक्चा माल्बा, मेको देंत। मेकोमी इस्राएलमी मेको आ अरेशो लोत्र वोइक्तु। मिनु परमप्रभुमी आंइ किकी पिपी आन कली “इन आल आन कली शदीने” दे माइक्तीमी।<sup>6</sup> मेको आन नोले डा पाला डा मुरपुकीमी एको लोत्र नेल्ल तुइक्तमेक्ल। मिनु मेको आन क्येडा नोले जरमेशो आल कोल्शा तुइश्शा, मेकोपुकीमी आन आल आन कली शेंदमेक्ल।<sup>7</sup> मोपा मेकोपुकीमी परमप्रभु कली थमा सुदमेक्ल। मिनु आ पशो मप्रेंदमेक्ल। मिनु आ शेंशो टीमेक्ल।<sup>8</sup> मेको आन किकी पिपी खोदेशो मदुम्मल। मेकोपुकी खकटा थुं पाइश्शो नु मटीब पाला डा मुर बाक्तेक्म। मेकोपुकी नोले शोंइसीशा, परमप्रभु कली प्रोंइतेक्म। ब्यवस्था ३२:५-६

<sup>9</sup> एफ्राइम डा मुरपुकी लिब्रा शेशा, ठीक दुम्शा, लडाइ दुम्मेनु, प्रोक्तेक्म। न्यायाधीस २:११-१३<sup>10</sup> मेकोपुकीमी परमप्रभु आ कबल पशो मटीम। मिनु मेको आ अरेशो लोत्र मटीम।<sup>11</sup> मेकोपुकीमी परमप्रभु आ गेय नु आन डोंइती पशो छक लाक्चा डा गेय प्रेंताक्म।<sup>12</sup> मेकोमी मेको आन किकी पिपी आन डोंइती इजीप्त नु सोआन रागीमी छक लाक्चा डा गेय पशो बाक्त।<sup>13</sup> मेकोमी समुन्द्र कली फ्राशा, लां सेल्लु। मिनु मेको लां रे पा मेको आन कली आइक्ची हांबु शोक्ताक्मी। मेकोमी ब्वाक्कु कली गारो खोदेशो पा एर ओंथ राप्पाइक्तु। प्रस्थान १४:२१-२२<sup>14</sup> मेकोमी मेको आन कली नाक्त गोस्सुम नु नाक्दो मी आ हाम्सोमी लां कोंइताक्व। प्रस्थान १३:२१<sup>15</sup> मेकोमी गोरशो रागीमी सेरथे फुल्लु कली प्रोल्शा ब्वाक्कु बुक्पाइक्तु। मिनु शुश ब्वाक्कु तूचा गेम्तीमी। प्रस्थान १७:६; गन्ती २०:७-११; ब्यवस्था ३२:१८<sup>16</sup> सेरथे फुल्लु रे पा ब्वाक्कु बुक्पाइक्तु। मिनु खोला खोदेशो पा शाइक्पाइक्तु।

<sup>17</sup> तन्न मेकोपुकीमी गोरशो रागीमी नेल्ल क्येडा ठेयब कली मटिथु, मरिम्शो पा डोंइती क्येडा शुश पाप पाप्तेक्म।<sup>18</sup> मेकोपुकीमी आन दाक्शो पा जचा थोत्रक पुंडशा, परमप्रभु आ थुं नाक्ताक्म। प्रस्थान १६:३; गन्ती ११:४<sup>19</sup> मेकोपुकीमी थमा मसुइक्थु “मार, परमप्रभुम गोरशो रागीम जचा थोत्रक गेने चाप्पा डा? <sup>20</sup> मेकोमी सेरथे फुल्लु तुप्शा प्रोल्शा ब्वाक्कु बुक्पाइश्शा, शुश खोला सेल्लु। मार, मेकोमी आ मुर आन कली शोब्ले नु श्ये यो गेने चाप्पा डा?” देंतेक्म।

<sup>21</sup> मिनु परमप्रभु यावे मेको आन लोत्र नेंशा, थाम्पा गाइक्ताक्व। मिनु परमप्रभुमी याकूब कली दाक्पाइक्चा कली मी सोइक्ताक्व। मिनु इस्राएली आन पर्वम शुश चुरत। गन्ती ११:१<sup>22</sup> मारदे हना मेकोपुकीमी परमप्रभु कली थमा मसुदेम। मिनु “परमप्रभुमी आंइ कली प्रोंइने मचाप्ब” देंतेक्म।

23 मो हना यो मेकोमी सरीड कली अरेशा सरीड डा लाचो रोक्पाइश्शा गेत्तु। 24 मेकोमी मुर आन कली थुल्चा कली सरीड रे मन्ना यिपाइक्त्तु। मेको आन कली स्वर्ग डा अन्न गेत्तु। प्रस्थान १६:४, १४, १५ 25 मुर नेल्लेमी परमप्रभु आ स्वर्ग डा गेय पाइब आन शोब्ले जाम्तेक्म। परमप्रभुमी मेको आन कली शुश जचा गेत्तु। 26 मेकोमी सरीडमी पूर्व डा फश सोइक्ताक्व। मिनु मेको आ सक्तिमी दक्खिन रे फश पपाइक्त्तु। गन्ती ११:३१-३३ 27 मेकोमी फुरक खोदेशो पा श्ये यिपाइक्त्तु। समुन्द्र डा बाल्वा खोदेशो पा चिक्व यिपाइक्त्तु। 28 मेको चिक्व आन कली आन बाक्तीके एर ओंथ दोक्पाइक्त्तु। 29 मिनु मेकोपुकी मेको ब्वशा रूतेक्म। मारदे हना परमप्रभुमी मेको आन कली आन पुंड्रशो खोदेशो पा गेत्तु। 30 तन्न मेकोपुकीमी ब्वना ब्वन, आन ब्वशो श्ये आन शोव्रम बाक्ना बाक्न, 31 परमप्रभु शुश गाइक्ताक्व। मिनु मेको आन दातेम नेल्ल क्येडा बोल्यो मुर आन कली साइक्तीमी। इस्राएल डा ठिटा नेल्ल आन कली साइक्तीमी।

32 मो पा यो मेकोपुकीम पाप पस डा पस बाक्तेक्म। मेको आ छक लाक्वा डा गेय तशा यो, मेकोपुकीमी थमा मसुदेम। 33 मोपतीके परमप्रभुमी मेको आन नाक्त्त मोशा नु मेको आन बर्सपुकी श्येत जपाइश्शा साम्तु। गन्ती १४:२२-२३; १कोरिन्थी १०:५ 34 परमप्रभुमी मेको आन दातेमी का निक्शी सदानु, मेको लीशोपुकी मेको गे लेश्शा, मेको कली थाम्पा माल्तेक्म। 35 मिनु मेकोपुकीमी परमप्रभु आन सेरथे फुल्लु नु नेल्ल क्येडा ठेयब परमप्रभु मेको आन कली श्येत रे प्रॉइब बाक्माक्त्त, दे तुइक्ताक्म। 36 तन्न मेकोपुकीमी आन शोव्रम ला लोव्र पाम्तेक्म। मेकोपुकीमी जोल ला पाम्तेक्म। 37 आन थुंमी थमा पा मेको आ नोले मखोदेम। आ पशो कबल मटीमे। 38 मो हना यो परमप्रभु शिशी पाइब बाक्तीके मेको आन ठीक मपशो माफ गेम्तीमी। मेको आन कली मसद। खेयप खेयप मेको आन पर्वम आ गाइश्शो तेक्त्तु। मेकोमी आ गाइश्शो नेल्ल मगुंड्र। 39 परमप्रभुमी “मेको मुर ला बाक्नीम। फश खोदेशो पा लाक्नीम। मिनु लेश्शा मजाक्नीम” दे मिम्ताक्व। भजन संग्रह १०३:१४-१६ 40 मेकोपुकीमी गोरशो रागीम शुश खेयप परमप्रभु कली मटीमे। परमप्रभु कली मुर मबाक्तीकेमी श्येत गेम्तेक्म। 41 मेकोपुकीमी लेंना लेंन आ थुं नाक्ताक्म। मिनु इस्राएली आन का ला बाक्शो परमप्रभु कली गाइक्पाइक्तेक्म। 42 मेकोपुकीमी आ सक्ति ममिम्तेम। मेको आन कली आन जोरी सत्रु रे प्रॉइशो यो ममिम्तेम। 43 परमप्रभुमी इजीप्तीमी आ चिन्ड कौइशा, सोआन रागीमी छक लाक्वा डा गेय पची ना 44 खोला डा ब्वाक्कु हुश सेल्शो बाक्त्त। मिनु इजीप्तीपुकीमी मेको ब्वाक्कु तूने मचबेम। प्रस्थान ७:१९-२० 45 मेकोमी मेको आन बाक्तीकेमी चुरमु बोपाइश्शो बाक्त्त। मिनु मेकोपुकीमी मेको आन कली क्राइक्तेक्म। मिनु परमप्रभुमी क्लक्कु गृपाइक्त्तु। मेकोपुकीमी मेको आन कली खतम सेल्तेक्म। प्रस्थान ८:२०; प्रस्थान ८:२ 46 परमप्रभुमी मेको आन बाली नाली माले आन कली गेम्तीमी। मेको आन शुश गेय पा वापाइश्शो बाली नाली सल्हापुकीम नेक्पाइक्त्तु। प्रस्थान १०:१३ 47 मेकोमी मेको आन अडगुर बोट मुप्सीमी नु आन फोव्रशी फुरशेम खतम पोक्पाइक्त्तु। प्रस्थान ९:२५ 48 मेकोमी मेको आन बी ब्यफ मुप्सीम नु क्यारश भेडा आन कली चिलामी आप्तु। 49 मेको आन पर्वम गाइश्शा, चुरशा, श्येत गोपाइक्वा कली खतम सेल्ब स्वर्ग डा गेय पाइब आन कली सोइक्ताक्व। 50 मेकोमी आ गाइक्तीक कली लां का सेल्लु। मिनु मेको आन कली बेक्वा रे मप्रोन। मेको आन कली मुर बेक्तीक रोइ पपाइक्तीमी। प्रस्थान ९:८-१२ 51 मेकोमी इजीप्त्त डा मुर, हाम आ चच युइ आन डौइती जरमेशो तौ नेल्ल साइक्त्तु। प्रस्थान १२:२९ 52 मिनु नोले आ मुर आन कली भेडा खोदेशो पा गुंडताक्व। मिनु मेको आन कली भेडा आन हुल खोदेशो पा गोरशो रागीमी लां कौइशा गाक्पाइक्तीमी। भजन संग्रह ७७:२१ 53 मेकोमी मेको आन कली मारेइ श्येत मदुम्पाइक्थु गाक्पाइक्तीमी। मोपतीके मेकोपुकी काइ महिम। आन जोरी सत्रु समुन्द्रम गुम्शा बेक्तेक्म। प्रस्थान १४:१९, २२, २७ 54 मोपा परमप्रभुमी आ मुर आन कली आ रागीमी चाक्त्तु। आ सक्तिमी ग्राशो डांडाम चाक्त्तु। प्रस्थान १५:१७ 55 रागी रागी डा मुर आन कली मेको आन डौइती रे खेरतु। मिनु इस्राएली आन कली मेको रागी योक्शा, गेम्तीमी। मिनु इस्राएल आ थर थर डा मुर आन कली आन ताम्बुमी बाक्वा गेम्तीमी।

56 तन्न मेकोपुकीमी परमप्रभु आ थुं थाम्तेक्म। नेल्ल क्येडा ठेयब परमप्रभु कली मटीम। मिनु मेको आ अरेशो लोव्र मबिस्सम। 57 मेको आन किकी पिपी खोदेशो पा नोले शौइसाक्म। मिनु मेकोपुकी ब्रोइक्वशो लिब्रा खोदेशो पा दूली पाइब दुम्तेक्म। 58 मेकोपुकीमी आन मूर्ति वोइश्शो डांडामी परमप्रभु कली गाइक्पाइक्तेक्म। मेको आन सेल्शो मूर्तिमी मेको कली गेहे पपाइक्तेक्म। ब्यक्स्था ३२:२१ 59 परमप्रभुमी मेको नैशा, थाम्पा गाइक्ताक्व। मिनु इस्राएली आन कली थमा पा वारच मपाइक्थु प्रौइतीमी। 60 मेकोमी शिलो डा आ बाक्तीके प्रौइत्तु। मेको ताम्बु मुर आन बाक्तीके आन दातेमी वोइश्शो बाक्त्त। १सामुएल १:३; १सामुएल ४:११; येरमीया ७:१२ 61 मेकोमी आ कबल पशो सन्दोस आ जोरी सत्रु आन गुडमी गेत्तु। मोपा सक्ति पाइश्शो कली रोइक्पाइक्त्तु। भजन संग्रह १३२:८; १सामुएल ४:२१ 62 मेकोमी आ मुर आन कली तरवारम साइक्पाइक्वा कली गेत्तु। मिनु आ योव्रशो मुर आन कली तशा, थाम्पा गाइक्ताक्व। 63 मिनु मीम मेको आन ठिटा वौइश मुर आन कली दाक्तीमी। मिनु आन तमी आन कली ग्युबे पाइक्वा मतामे। 64 मेको आ चढेबपुकी तरवारम क्योरचा पुंडसाक्म। मिनु मेको आन मीश रोंका पने मचबेम। १सामुएल ४:१७-२० 65 मिनु नोले परमप्रभु निन्द्रा रे सेंसीशो खोदेशो पा सेंसाक्व। लडाइ पाइब मुर अडगुर शांबु तूशा नोले रिम्शो दुम्शो खोदेशो पा, ठेयब सेंदाम ग्रीत। 66 मिनु मेकोमी आ जोरी सत्रु आन कली एर ओंथ ब्रपाइक्त्तु। मेकोमी मेको आन कली गेना हना यो मुने दोक्पाइक्त्तु। १सामुएल ५:६-१२

67 मेकोमी योसेफ आ थर डा मुर आन कली प्रौइत्तु। एफ्राइम आ खिं डा मुर आन कली यो मयोव्रड। 68 तन्न मेकोमी यहूदा आ खिं डा मुर आन कली योव्रतु। मेकोमी आ दाक्शो सियोन डांडा कली यो योव्रतु। २इतिहास ६:६ 69 मेकोमी आ बाक्तीके लाइक्पाइश्शा, इर स्वर्ग खोदेशो सेल्लु। आ गेना हना यो कली सेल्शो रागी खोदेशो पा सेल्लु। 70 मेकोमी आ गेय पाइब दाऊद कली भेडा गोठ रे योव्रतु। 71 परमप्रभुमी दाऊद कली गिक्शो भेडा आन कली योव्रतीक गेय रे गुंडताक्व। मेकोमी दाऊद कली याक्ब आ थर डा, परमप्रभु आ मुर आन कली कोव्रचा कली गुंडताक्व। मेको इस्राएल डा मुर परमप्रभु आ शोप बाक्नीम। १सामुएल १६:११-१२; २सामुएल ७:८ 72 दाऊदमी आ थुं डा रिम्शो पतीकेमी मेको आन कली कोव्रतीमी। मेकोमी जोक्ब तुइक्व दुम्शा, मेको आन कली लां कौइताक्मी।

यरूसलेम आ पर्वम रोंका पशो

आसाफ आ कुम्सो।

79 परमप्रभु, रागी रागी डा मुरपुकी इन योव्रशो रागीम जाक्तेक्म। मेकोपुकीमी इन खिं कली ग्राग्रा दिशो सेल्तेक्म। यरूसलेम कली प्रेश्शा, फुल्लु देल्शो खोदेशो सेल्तेक्म। 2 मेकोपुकीमी इन गेय पाइब आन बेक्शो रां चिक्व आन कली ब्वचा गेम्तेक्म। मिनु इन योव्रशो मुर आन श्ये ब्वाकी डा जन्तु आन कली ब्वचा गेम्तेक्म। 3 मेकोपुकीमी मेको आन हुश ब्वाक्कु खोदेशो पा यरूसलेम आ एर ओंथ नेल्ल शाइक्पाइक्तेक्म। मिनु मेको आन कली थिम्ब सुइ मबाक्म। 4 आंइ नेक्वा बाक्व मुरपुकीमी आंइ कली शुक्शी पाइक्नीम। मिनु आंइ एर ओंथ डा मुरपुकीमी आंइ कली रिश्शा तोक्शा लोव्र पाइनीम। भजन संग्रह ४४:१४

5 परमप्रभु यावे, गे गेना सम्म गाइक्व डा गाइक्व बाक्नीनी? इन गेहे पतीके गेना सम्म मी खोदेशो पा ब्रस डा ब्रस बाक्बा? 6 इन कली मतुइक्व रागी रागी डा मुर नु इन नें मथीब राज्य आन तार इन गाइक्वा मोतीन। येरमीया १०:२५ 7 मारदे हना मेकोपुकीमी याक्ब आ थर डा मुर आन कली खतम सेल्शो दाक्तेक्म। मिनु आन बाक्तीक खिं प्रेश्शा खतम सेल्तेक्म।

8 आंइ किकी पिपी आन पशो पाप आ क्येक्क आंइ कली मलेत्तीन। आंइ कली रीब पा इन शिशी गेकी। मारदे हना आंइ थुं लुक्च लशो बाक्ब। 9 आंइ कली श्येत रे प्रॉइब परमप्रभु, इन नें डा सक्तिमी आंइ कली वारच पने। इन नें आ पर्वम आंइ कली प्रोनीन। मिनु आंइ पाप क्याम्दीने। 10 मारदे रागी रागी डा मुरपुकीमी “मेको आन परमप्रभु ते बाक्म?” दे हिल्लो पाइनीमी। रागी रागी डा मुरपुकीमी इन मुर आन कली आन डौइती साइश्शो आ क्येक्क लेक्ब, दे तुइक्तेक्म। भजन संग्रह ११५:२; योएल २:१७ 11 चोक्वा

पुंडसीशो आन हुकयी पशो इन डोंइती जाक्ल। साइक्वा पुंडसीब दुश्शो आन कली इन सक्तिमी प्रोनीन। <sup>12</sup> परमप्रभु आ पर्वम शुक्शी पा मुरपुकीमी मुने तोक्वा माल्शो बाक्नीमी। मेको मो पशो डा आंड नेक्था डा मुर आन कली ७ खेयप क्येक्क लेत्तीन। भजन संग्रह १३७:७-९ <sup>13</sup> गो इन मुर, इन योव्रशो भेडा खोदेंशो नकी। गो इन कली “गे रिम्शो पाइब बाक्नीमी” दे आंड चच युइ आन पाला सम्म ठेयब सेल्नीकी। मिनु इन पर्वम लोव्र पाइनीकी।

परमप्रभु, आंड कली लेंशा सेल्की

कुम्सो पपाइक्व कली लिली फू आ लायो डा कबल पतीक, आसाफ आ कुम्सो।

**80** इस्राएल डा गोठला, आंड लोव्र नेनीन। गे योसेफ कली भेडा आन हुल खोदेंशो पा खुल्तीनी। गे करूब आन तार ठेयब नित्तीकेमी निल्लीनी। भजन संग्रह १८:११; २सामुएल ६:२ <sup>2</sup> एफ्राइम, बेन्यामीन नु मनस्से आन डोंइती इन छेडछेड कोइदीन। मिनु इन सक्ति कोइशा, आंड कली प्रोंइथ जाक्कीन।

<sup>3</sup> परमप्रभु, आंड कली लेंशा सेल्की। इन कुल डा छेडछेड आंड तार वोतीन। मिनु गो ब्रोंइने चाक्कल।

<sup>4</sup> परमप्रभु यावे, मुर नेल्ल आन परमप्रभु, इन मुर आन पुंडशो आ पर्वम गेना सम्म गाइक्नीनी? <sup>5</sup> गे मेको आन कली श्येत डा शोब्ले जपाइक्तीनी। मिनु आन प्रेक्कु तूचा ब्वाक्कु खोदेंशो पा शुश दुम्त। <sup>6</sup> गे आंड कली आंड नेक्था डा मुर आन कली जीब सेल्शो बाक्तीनी। मिनु आंड जोरी सत्रुमी आंड कली शुक्शी पाइब सेल्तीनी।

<sup>7</sup> मुर नेल्ल आन परमप्रभु, आंड कली लेंशा सेल्की। इन कुल डा छेडछेड आंड तार वोतीन। मिनु गो ब्रोंइने चाक्कल।

<sup>8</sup> गे इजीप्त रे अडगुर बोट का चाक्तीनी। मिनु रागी रागी डा मुर आन कली खेरशा, मेको ख्रुम्तीनी। यसैया ५:१-७; येरमीया २:२१ <sup>9</sup> गे मेकेर मेको कली ख्रुम्तीक रू का सेल्तीनी। मिनु मेको शाक्श थोक्शा, रागी नेल्ल ब्रीत। <sup>10</sup> पहाड नेल्ल मेको आ वांकुम सुम्साक्म। मिनु मेको आ लाइशो परमप्रभु आ राशीम रवा नेल्ल सुम्साक्म। <sup>11</sup> मेको आ राशी समुन्द्र सम्म जाक्दीत्तेक्म। मिनु मेको आ कोच्चा चहिं ठेयब खोला सम्म जाक्दीत्तेक्म। होसे १०:१ <sup>12</sup> मारदे गे मेको आन गारो प्रेन्नी? मेकेर गाक्ब नेल्लेमी मेको आ फल सेक्नीम। <sup>13</sup> ब्वाकी डा पोव्रपुकीमी मेको कली खतम पोक्नीम। मिनु ब्वाकी डा जन्तुपुकी मेकेर जोइनीम।

<sup>14</sup> मुर नेल्ल आन परमप्रभु, आंड कली कोव्रडीन। सरीड रे उइ कोव्रडीन। मेको अडगुर बोट कली कोव्रडीन। होसे ११:१ <sup>15</sup> इन सक्तिमी ख्रुम्शो बोट कली कोव्रडीन। गे इन तौ इन कली कोल्पाइक्तीनी। <sup>16</sup> आंड जोरी सत्रुमी मेको कली तुल्शा, मीम चोम्तेक्म। मेकोपुकी इन हुइशोमी खतम दुम्मल। इजीकीएल १५:२-४ <sup>17</sup> इन ग्युरा गे बाक्ब मुर आ तारी इन गुइ लील। मेको कली थुल्शा कोल्पाइक्तीनी। <sup>18</sup> मिनु गो इन डोंइती रे गेनायो नोले मशोंइसीनीकी। आंड कली ब्रोंइचा गेकी। मिनु गो इन नें थिशा, प्रार्थना पाइनीकी। <sup>19</sup> परमप्रभु यावे, मुर नेल्ल आन परमप्रभु, आंड कली लेंशा सेल्की। इन कुल डा छेडछेड आंड तार वोतीन। मिनु गो ब्रोंइनीकी।

इस्राएलीपुकीमी मटिशो

कुम्सो पपाइक्व कली गिल्तीथ ताप्शा पतीके, आसाफ आ कुम्सो।

**81** आंड कली सक्ति गेब परमप्रभु कली कुम्सो पने। ग्येरशा सोम्शा ठेयब सेंदा पा याक्ब आ परमप्रभु कली कुम्सो पने। <sup>2</sup> खैजडी ताप्शा, कुम्सो पने। रिम्शो बीना नु तार पाइशो ठेयब ताप्तीक ताप्शा कुम्सो का पने। <sup>3</sup> औंसी, पूर्ने नु इं ठेयब चाड नाक्त तुराही तापीन। लेवी २३:२४ <sup>4</sup> मारदे हना मोदेंशो चाड मानेचा इस्राएल डा गेना हना यो पतीके बाक्ब। मेको याक्ब आ परमप्रभु आ अरेशो बाक्ब। <sup>5</sup> मेको लोव्र परमप्रभुमी इजीप्त रे गुंडशो योसेफ आ मुर आन कली अरेशो लोव्र बाक्ब। गो मतुइशो सेंदा का नेंतक। <sup>6</sup> मेको सेंदामी “गो इन बला रे भारी शोल्ता। गे भारी कुरचा ममाल्नीनी। प्रस्थान ६:६; यसैया ९:३ <sup>7</sup> गे श्येत जनीनु, आं कली ब्रेत्ताक्नी।

मिनु गो इन कली प्रोंइतन्नी। गो इन कली बुंबु रे लोव्र लेत्ताक्नी। गो मेरीबा डा ब्वाक्कुमी इन कली थुं थाम्शा कोव्रतन्नी। ठेयब सेंदा पा। प्रस्थान १९:१६; प्रस्थान १७:२-७; गन्ती २०:१३ <sup>8</sup> आं मुरपुकी, आं अरेशो नेनीन। इस्राएलीपुकी, गे आं लोव्र नेंशो ननी हना, रिम्शो दुम वा। <sup>9</sup> इन दातेमी देवी देवता आन कली बाक्वा मगेने। अर्को रागी डा देवी देवता आन डोंइती बाप्शा, सेउ मपने। प्रस्थान २०:२-३ <sup>10</sup> गो परमप्रभु यावे, इन परमप्रभु नड। गो इन कली इजीप्त रे गुंडशा एक चाक्तन्नी। इन शोव्र पाक्कीन, मिनु गो प्रिनन्नी। <sup>11</sup> तन्न आं मुरपुकीमी आं लोव्र मनेनेम। इस्राएल आ मुरपुकीम आं कली मदाक्थु, आं देंशो मबिस्सम। <sup>12</sup> मोपतीके गो ‘आन दाक्स पामेक्ल’ दे आन दला दाक्स पचा गेतामी। <sup>13</sup> आं मुरपुकीमी आं लोव्र नेंशो नम हना, इस्राएल डा मुर आं लांम गाक्शो नम हना, <sup>14</sup> गो मेको आन कली रीब पा आन जोरी सत्रु रे प्रोनुमी वा। मेको आन जोरी सत्रु आन कली खतम पोक्नुमी वा। <sup>15</sup> परमप्रभु यावे कली काइ मदाक्बपुकी हिंशा आं डोंइती बांबा पा गाक्म वा। मिनु मोदेंशो गेना हना यो दुम वा। <sup>16</sup> मिनु गो इस्राएल डा मुर, इन कली नेल्ल क्येडा रिम्शो चेरब जचा गेन्नी वा। मिनु रोका खुदोमी रूपाइक्नी वा” दे परमप्रभुमी देंत। ब्यवस्था ३२:१३

हुकुम पाइब आन कली हुइशो

आसाफ आ कुम्सो।

**82** परमप्रभु आ मुर आन ग्युम्तीकेमी बाक्शो बाक्ब। मेकोमी आ मुर आन दातेमी निसाफ पाइब। १राजा २२:१९ <sup>2</sup> मेकोमी “गे गेना सम्म ठीक निसाफ मपाइनीनी? गे गेना सम्म परमप्रभु यावे आ अरेशो मटीब आन कुल कोव्रनीनी? ठेयब सेंदा पा। ब्यवस्था १:१७

<sup>3</sup> गे मचाप्ब नु रोम रोइक्च आन कली ठीक पा निसाफ पने। पुडग नु दिप्वा पुंडसीशो आन कली ठीक निसाफ पने। यसैया १:१७ <sup>4</sup> मचाप्ब नु श्येत जाइब आन कली, परमप्रभु यावे आ अरेशो मटीब आन गुइ रे प्रोनीन। <sup>5</sup> हुकुम पाइबपुकीमी मारेइ मजोक्नीम, मतुइक्नीम। मेकोपुकी छिडछिडम गाक्शो बाक्नीम। रागी आ जग नेल्ल हिम्सीशो बाक्नीम। <sup>6</sup> गो इन पर्वम ‘गे अधिकार पाइशो बाक्नीनी। गे नेल्ल क्येडा ठेयब आ तौ बाक्नीनी। यूहन्ना १०:३४ <sup>7</sup> मो हना यो गे मुर खोदेंशो पा बेक्नीनी। अरु मरिम्शो पा हुकुम पाइब खोदेंशो पा खतम दुम्नीनी” “ दे परमप्रभुम देंत। उत्पत्ती १८:२५ <sup>8</sup> परमप्रभु बोक्कीन। मिनु रागी कली निसाफ पने। मारदे हना रागी नेल्ल इन के बाक्नीम।

लडाइ पची ना पुंडशो लोव्र

आसाफ आ कुम्सो।

**83** “परमप्रभु, गे सिक्सी पा मबाक्कीन। मारेइ पने मचाप्ब खोदेंशो मदुमीन। <sup>2</sup> इन जोरी सत्रु शुश ग्याल्शो बाक्नीमी। कोव्रडीन, मेकोपुकी बारशा, ग्राचा चिक्शो बाक्नीम। <sup>3</sup> मेकोपुकीमी इन मुर आन कली दोपा साइक्वा, दे लोव्र गारपाइक्नीम। इन कोव्रशो मुर आन कली मरिम्शो पचा कली ख्रुइशा लोव्र गारपाइक्नीम। भजन संग्रह ३५:२० <sup>4</sup> मेकोपुकीमी ‘जाक्कीन, गो मेको आन रागी मलीचा डा पा क्याम्दय। मिनु इस्राएल आ नें मलील’ देंनीम। <sup>5</sup> मेकोपुकी थुं का दुम्शा, इन कली मरिम्शो पचा कली लोव्र गारपाइक्नीम। <sup>6</sup> मेको एदोम, इश्माएल, मोआब नु हाग्री आ मुरपुकी, <sup>7</sup> गेबाल, अम्मोन, अमालेक, पलिस्ती नु टायर डा मुरपुकी बाक्नीम। <sup>8</sup> अस्सुर यो मेकोपुकी नु गारशो बाक्ब। मेको नेल्ल लोत आ खिं डा सक्ति पाइशो मुर बाक्नीम। ठेयब सेंदा पा।

<sup>9</sup> मिदयानी आन कली पाइशो खोदेंशो पा मेको आन कली पतीन। सीसेरा नु याबीन कली किशोन खोलाम पाइशो खोदेंशो पतीन। न्यायाधीस ७:१४; यसैया ९:३; न्यायाधीस ४:२ <sup>10</sup> मेकोपुकी एन-डोर सहरम खतम दुम्शा, रू कली मोवल खोदेंशो दुम्तेक्म। <sup>11</sup> गे मेको आन कली नु मेको आन ठेयब मुर आन कली ओरेब नु जेयब आस कली खोदेंशो सेलीन। मेको आन सासन पाइब नेल्ल कली जेबाह नु साल्मुन्ना खोदेंशो सेलीन। न्यायाधीस

७:२५; न्यायाधीस ८:२१<sup>12</sup> मेकोपुकीमी 'परमप्रभु आ रिम्शो रागी इं के सेल्य' देमुस्तेक्म।

<sup>13</sup> आं परमप्रभु, मेको आन कली फशेम योल्शो फुरक नु फशेम बेरपाइशो भूस खोदेशो सेलीन। <sup>14</sup> दोपा मीम ब्वाकी नेक्बा नु आ होशेमी पहाड जेष्वा, <sup>15</sup> मोपा इन फश गिवारम मेको आन कली खेदा पने। इन फश गिवारम मेको आन कली हिंच कौंडीन। <sup>16</sup> मेको आन कली मुने तोक्कीन। मोपा मुरपुकीमी परमप्रभु यावे, इन कली माल्मेक्ल। <sup>17</sup> मेकोपुकी मेना हना यो मुने दोक्मल। आन थुं लुक्च लमल। मेकोपुकी मुने दोक्शा, खतम दुम्मल। <sup>18</sup> मेकोपुकीमी इन नें परमप्रभु यावे बाक्ब, दे तुइक्तमेक्ल। गे रागी डा नेल्ल क्येडा ठेयब बाक्नीनी" दे परमप्रभु कली ठेयब सेल्ला। होसे १२:१६

परमप्रभु आ खिं कली दाक्शा

कुम्सो पपाइक्ब कली गिल्लीथ ताप्शा पतीके कोराह आ तौ आन कुम्सो।  
१इतिहास २६:१

**84** "मुर नेल्ल आन परमप्रभु यावे, इन बाक्तीके गिश रिम्शो बाक्ब।  
<sup>2</sup> गो आं थुं नेल्लेमी परमप्रभु यावे आ खिं डा लाडगा लचा दाक्नुड। गो ग्येरशा सोम्शा ब्रोंडशा बाक्ब परमप्रभु कली कुम्सो पाइनुड।  
भजन संग्रह ४२:३

<sup>3</sup> मिनु चिक्बपुकीमी यो इन चढ़ेतीके आ नेक्थामी ग्योव सेल्शा, आन चाइक्ब पुक्नीम। गे, मुर नेल्ल आन परमप्रभु यावे, आं पिप नु आं परमप्रभु बाक्नीनी। <sup>4</sup> इन खिंम बाक्चा ताइब आसीक तशो बाक्नीम। मेकोपुकीमी मेना हना यो इन कली कुम्सो पा ठेयब सेल्नीम। ठेयब सेंदा पा। भजन संग्रह ६५:५ <sup>5</sup> गे इन सक्ति ताइब नेल्ल ग्येरसीशो बाक्नीम। मेको आन थुंमी सियोन कली मिम्ना मिम्न बाक्नीम। <sup>6</sup> मेकोपुकी बाका माइशो गोरशो रागी डा दिंम रे पा लमानु, मेकोपुकीमी मेकेर ब्वाक्कु बुक्शो रागी सेल्नीम। डोंइती रेड यिशा, ब्वाक्कु देम्ब। <sup>7</sup> मेकोपुकी शुश बोल्यो दुम्नीम। मेकोपुकी परमप्रभु आ डोंइती सियोनम जाक्नीम। <sup>8</sup> परमप्रभु यावे, मुर नेल्ल आन परमप्रभु, आं पुंडशो लोव नेनीन। याक्ब आ परमप्रभु आं लोव नेनीन! ठेयब सेंदा पा। <sup>9</sup> परमप्रभु, आंइ कली कोवब कली कोवडीन। इन आंइ कली गेशो पिप कली कोवडीन।

<sup>10</sup> मिनु हजार का नाक्त ते ते बाक्चा क्येडा काबु नाक्त इन खिंम बाक्चा रिम्शो बाक्ब। इन अरेशो मटीब आन ताम्बुम बाक्चा क्येडा आं परमप्रभु आ खिं डा लाप्चो खाल पाइब दुम्चा दाक्नुड। भजन संग्रह २७:४ <sup>11</sup> मारदे हना परमप्रभु, परमप्रभु यावे नां नु तेक्तीक बाक्ब। परमप्रभु यावेम ठेयब दुस्तीक नु मान गेब। मेकोमी ठीक लां खोइक्ब आन कली रिम्शो पाइब। <sup>12</sup> मुर नेल्ल आन परमप्रभु यावे, इन कली जिम्मा गेंसीशो थमा सुइक्बपुकी ग्येरसीशो बाक्नीम" देंती।

थुं नाइक्तीक लोव

कुम्सो पपाइक्ब कली कोराह आ तौ आन कुम्सो।

**85** परमप्रभु यावे, गे इन रागी कली शिशी पाइतीनी। याक्ब आ रिम्शो दुस्तीके लेंशा सेल्तीनी। <sup>2</sup> गे इन मुर आन ठीक मपशो माफ गेतीनी। मेको आन पाप नेल्ल सुम्तीनी। ठेयब सेंदा पा। <sup>3</sup> गे इन गाइक्चा नेल्ल साम्तीनी। मिनु चुरचा प्रोंइतीनी।

<sup>4</sup> आंइ कली पाप रे प्रोंइब परमप्रभु, आंइ कली लेंशा डोंइती डा खोदेशो सेल्की। मिनु इन आंइ कली मदाक्तीके समीन। <sup>5</sup> मार, गे मेना हना यो गोपुकी नु गाइक्स डा गाइक्स बाक्नीनी? गे गोपुकी नु आंइ चच युड आन पाला सम्म गाइक्स डा गाइक्स बाक्नीनी? <sup>6</sup> मार, गे इन मुर आंइ कली गे नु ग्येरसीचा कली लेंशा, मबोक्पाइक्नीनी? <sup>7</sup> परमप्रभु यावे, गे इन मेनायो मनुष्य दाक्तीके कौंडीकी। मिनु आंइ कली श्येत रे प्रोंइकी।

<sup>8</sup> परमप्रभु, परमप्रभु यावेमी मार देंबा, आं कली नेंपतीन। मेकोमी आ मुर, आ लोव टीब नु आंम कली जिम्मा गेंसीशो मुरपुकी नु थुं नाइक्तीक लोव पाइब। मेको आन कली लेंशा दूली गाक्चा मगेने। येरमीया २९:११; मीका

५:४<sup>9</sup> परमप्रभु कली मान पा हिंब मुर ब्रोंडचा ताइनीम। मेको आ छेडछेड इं रागीम बाक्ल।

<sup>10</sup> मेना हना यो दाक्तीक नु थमा पा दाक्शा मप्रोंइतीक गारनीस। ठीक पतीक नु थुं नाइक्तीक पुक्पु पमुइनीस। <sup>11</sup> थमा पा दाक्शा मप्रोंइतीके खप रे वाशो खोदेशो पा गूब। मिनु ठीक पतीकेमी सरीड रे कोवब। <sup>12</sup> परमप्रभु यावेमी मार रिम्शो बाक्मे, मेको गेब। मिनु आंइ रागीम बाली नाली ग्रेल्पाइक्ब। <sup>13</sup> ठीक पतीकेमी मेको आ डोंइती गाक्शा, आन लां सेल्ब।

श्येत जशोनु, पुंडशो लोव

दाऊदमी परमप्रभु कली पुंडशो लोव।

**86** परमप्रभु यावे, आं पुंडशो लोव नेनीन। मिनु लोव लेत्तीनी। मारदे हना गो प्रुडग नु श्येत जशो बाक्नुड। <sup>2</sup> आं कली खाल पा साइक्चा मगेयीनी। मारदे हना गो इन कली थमा सुइशा, इन गेय पाइब नड। गे आं परमप्रभु बाक्नीनी। <sup>3</sup> परमप्रभु, आं कली शिशी पाइय्यीनी। मारदे हना गो नाक्त रे इन कली ब्रेशो बाक्नुड। <sup>4</sup> इन गेय पाइब आ थुं ग्येरपतीन। मारदे हना गो आं थुं परमप्रभु, इन कली जिम्मा गेनुड। <sup>5</sup> परमप्रभु, गे रिम्शो पाइब नु माफ गेब बाक्नीनी। इन कली पुंडब नेल्ल आन कली मेना हना यो दाक्नीनी। <sup>6</sup> परमप्रभु यावे आं पुंडशो लोव नेनीने। मिनु शिशी पाइक्चा कली आं पुंडशो नेनीन। <sup>7</sup> गो श्येत जडानु इन कली पुंडनुड। मिनु गे आं लोव लेत्तीनी। भजन संग्रह ५०:१५

<sup>8</sup> परमप्रभु, देवी देवता आन दातेमी इन खोदेशो अरु तेकोइ मबाक्नीम। इन पशो गेय खोदेशो पा अरु सुइम मपाइनीम। भजन संग्रह १३५:५; प्रस्थान १५:११ <sup>9</sup> परमप्रभु, इन सेल्शो रागी रागी डा मुर इन डोंइती बाप्शा, इन नें थिशा, इन कली ठेयब सेल्चा माल्नीम। <sup>10</sup> मारदे हना गे ठेयब बाक्नीनी। मिनु छक लाक्चा डा गेय पाइनीनी। गे ला परमप्रभु बाक्नीनी। <sup>11</sup> परमप्रभु यावे, आं कली इन लां खोइक्चा शेंदीनी। मिनु गो इन थमा पतीकेमी गाक्नुड। आं कली थुं का पा इन कली मान पा हिंब सेल्पीनी। यूहन्ना १४:६ <sup>12</sup> परमप्रभु यावे, आं परमप्रभु, गो आं थुं नेल्लेमी "गे रिम्शो पाइब बाक्नीनी" देंनुड। मिनु गो मेना हना यो इन नें ठेयब सेल्नुड। <sup>13</sup> मारदे हना इन मेना हना यो आं कली दाक्तीके ठेयब बाक्ब। गे आं कली बेक्शो मुर आन नेल्ल क्येडा आगा डा बाक्तीके रे प्रोंइतीनी। <sup>14</sup> परमप्रभु, शिशी मपाइब मुरपुकीमी आं कली खेदा पतीमी। मरिम्शो पाइब आन हुलमी साइक्चा माल्तीमी। मेकोपुकीमी इन कली ममिम्नीम। <sup>15</sup> तन्न परमप्रभु, गे दाक्ब नु शिशी पाइब परमप्रभु बाक्नीनी। रीब पा मगाइक्ब, मेना हना यो दाक्शा मप्रोंइब बाक्नीनी। भजन संग्रह १०३:८; प्रस्थान ३४:६ <sup>16</sup> आं कली कोवशा, शिशी पाइय्यीनी। इन गेय पाइब कली इन सक्ति गेने। इन वाइलीम आ तौ कली श्येत रे प्रोनीन। <sup>17</sup> गे इन दाक्तीके चिन्ड का गेयीनी। मिनु आं कली काइ मदाक्बपुकी मेको तशा, मुने दोक्मल। मारदे हना परमप्रभु यावे, गे आं कली वारच पाइतीनी। मिनु लेम्ताक्पीनी।

मुर आन नें आ किताबम ब्रेक्शो

कोराह आ तौ आन कुम्सो।

**87** परमप्रभुम आ डांडामी आ सहर सेल्लु। <sup>2</sup> परमप्रभु यावेमी याक्ब आ मुर आन बाक्तीके क्येडा सियोन सहर डा गारो डा लाप्चो दाक्ब। <sup>3</sup> परमप्रभुम आ सहर आ पर्वम रिम्शो लोव पशो बाक्ब। ठेयब सेंदा पा।

<sup>4</sup> राहाब नु बेबीलोनम आं कली तुइक्नीस। पलिस्ती आन रागी, टायर नु एथीयोपीया यो मेको नु बाक्नीम। मिनु मेको आन पर्वम "एको नु मेको मेकेर जरमेशो नम" देंनीम। इजीप्त रागी कली राहाब यो देंनीम। भजन संग्रह ६७:४-५ <sup>5</sup> सियोन आ पर्वम चहिं "मुर नेल्ल मेकेर रेन जरमेशो बाक्नीम। मारदे हना नेल्ल क्येडा ठेयबमी मेको कली रिम्शो सेल्शा कोवब" देंनीम। <sup>6</sup> परमप्रभु यावेमी जात जात डा मुर आन नें का का पा आ किताबमी ब्रेक्ब। मिनु "एको नु मेको सियोनमी जरमेशो बाक्ब" दे ब्रेक्ब। ठेयब सेंदा



पा।<sup>7</sup> कुम्सो पाइब नु सिल पाइबपुकीमी “आंड आसीक नेल्ल सियोनम बाक्ब” दे कुम्सो पाइनीम। भजन संग्रह ३६:१०

“वारच पाइयीनी” दे पुंडशो

कुम्सो पपाइक्ब कली महलेथ आ कुम्सो। कोराह आ तौ आन कुम्सो। एज्राह आ मुर हेमान आ सेल्शो शेंतीक कुम्सो।

१इतिहास ६:१८

88 परमप्रभु यावे, आं परमप्रभु, गे आं कली श्येत रे प्रॉइब बाक्नीनी। नाक्दो नाक्त गो इन डोंइती पुंडशो बाक्नुड।<sup>2</sup> आं पुंडशो लोव इन डोंइती जाक्ल। आं लोव नेनीन।

<sup>3</sup> मारदे हना आं थुं श्येतम ब्रीशो बाक्ब। मिनु गो बेक्वा चिक्शो बाक्नुड।<sup>4</sup> गो बेक्शा लाइब मुर नु हिक्सीशो दुम्ती। गो सक्ति मपाइशो मुर खोदेशो दुम्ती।<sup>5</sup> गो बेक्शो मुरपुकी नु तिल्या पुंडसीशो बाक्नुड। तुरसुम बाक्शो साइक्वा पुंडसीशो मुर खोदेशो दुम्ती। मोपा इन क्येडा डोन बाक्शो इन मफुक्शो मुर खोदेशो दुम्ती।<sup>6</sup> गे आं कली बेक्शो मुर आन बाक्तीके छिडछिड डा नेल्ल क्येडा आगा डा बाक्तीकेमी वोइक्तीनी।<sup>7</sup> इन गाइक्तीकेमी आं कली दिप्शो बाक्ब। मिनु इन छालम आं कली सुम्तीनी। ठेयब सेंदा पा।

<sup>8</sup> गे आं वारच आन कली गो नु गुम्चा हिंपाइक्तीनी। गो आं वारच आन कली हिंचा डा दुम्ती। गो चोक्सीशो, श्येत रे ब्रॉइशा, प्रोक्ने मचाप्नुड। भजन संग्रह ३८:१२<sup>9</sup> सुर्ता पतीके आं मिक्च ब्रा ब्रा दुम्ती। परमप्रभु यावे, गो नाक्त किंत किंत इन कली पुंडना पुंडन बाक्नुड। मिनु इन नेंमी आं गुड पोक्नुड।<sup>10</sup> मार, गे बेक्शो मुर आन कली छक लाक्वा डा गेय पाइनीनी? मार, मेको बेक्शो मुरपुकीम बाक्शा, इन कली ठेयब सेल्नीमी? ठेयब सेंदा पा। भजन संग्रह ६:६; यसैया ३८:१८

<sup>11</sup> मार, गे इन गेना हना यो दाक्तीके आ पर्वम बेक्शो मुर आन बाक्तीकेमी लोव पाइनीमी? इन दाक्शा मप्रॉइतीके आ पर्वम तुरसुम शेंनीमी? <sup>12</sup> मार, इन छक लाक्वा डा गेय छिडछिडमी तुइक्तीनी? इन श्येत रे प्रॉइतीके बेक्शो मुर आन दातेमी तुइक्तीनी डा?

<sup>13</sup> परमप्रभु यावे, गो चहिं सुनी कना इन कली लोव पाइनुड।<sup>14</sup> परमप्रभु यावे, गे आं कली मारदे प्रॉइयीनी? मारदे इन कुल खूइक्तीनी? <sup>15</sup> गो ठिटा रेन श्येत जशा, बेक्वा चिक्शो बाक्नुड। इन हिंच कोंइशोमी गो श्येत जशो बाक्नुड। मिनु आं थुं लुक्च लशो बाक्ब। <sup>16</sup> गे आं पर्वम गाइक्ताक्तीनी। इन हिंच कोंइशोमी आं कली खतम पोक्शो बाक्ब। <sup>17</sup> मेकोपुकीम नाक्त रे ब्वाक्कु खोदेशो पा आं एर ओंथ नेल्ल हिरशो बाक्नीम। मेकोपुकीम आं कली पुम्शा हिंच कोंइताक्तीमी। <sup>18</sup> गे आं कली दाक्ब नु आं वारच आन कली आं कली तशा हिंपाइक्तीनी। मिनु छिडछिड आं नेक्था डा वारच दुम्शो बाक्ब।

परमप्रभुम आ दाक्तीके मप्रॉइब

एज्राह आ मुर एथान आ कुम्सो।

89 परमप्रभु यावे, गो इन गेना हना यो दाक्तीक आ पर्वम कुम्सो पाइनुड। गो नेल्ल पाला डा मुर आन कली इन दाक्तीकेम गेनायो मप्रॉइब बाक्नीनी, दे शेंनुड।<sup>2</sup> गे इन दाक्तीक गेना हना यो लीपाइक्वा कली वोइक्तीनी। इन दाक्शा गेनायो मप्रॉइतीके सरीड खोदेशो ठेयब बाक्ब। <sup>3</sup> गे “गो आं योवशो नु कबल पाता। आं गेय पाइब दाऊद नु कसम जाता। मार कसम जाता देंशा हना, यसैया ५५:३; भजन संग्रह १३२:११<sup>4</sup> गो गेना हना यो इ चच युड रे पिप का सेल्नुड। मिनु इ पिप दुम्तीके नेल्ल आन पाला सम्म लीपाइक्नुड” देंतीनी। ठेयब सेंदा पा। २सामुएल ७:१६; प्रेरित २:३०

<sup>5</sup> परमप्रभु यावे, स्वर्गम बाक्ब नेल्लेमी इन छक लाक्वा डा गेय आ पर्वम इन कली ठेयब सेल्नीम। इन मुर आन गुम्तीकेमी इन दाक्शा गेनायो मप्रॉइतीके आ पर्वम इन कली ठेयब सेल्नीम। <sup>6</sup> सरीडमी परमप्रभु यावे कली सु नु थाप्ने चाम्सीबा डा? मिनु स्वर्गम बाक्ब आन दातेमी सु परमप्रभु यावे खोदेशो बाक्बा डा? १राजा २२:१९<sup>7</sup> आंम मुर आन बुक्तीकेमी

परमप्रभु कली मान पा हिंनीम। मेको आ एर ओंथ बाक्ब नेल्ल आन क्येडा मेको शुश ठेयब नु मान पा हिंचा माल्शो बाक्ब।<sup>8</sup> परमप्रभु यावे, मुर नेल्ल आन परमप्रभु, इन खोदेशो ठेयब सक्ति पाइशो सु बाक्बा डा? इन दाक्शा मप्रॉइतीके इन एर ओंथ बाक्ब।<sup>9</sup> गे बारशो समुन्द्र कली हुकुम पाइनीनी। मिनु मेको आन छाल बोक्मेनु गे नाइक्पाइक्तीनी। भजन संग्रह ६५:८; मत्ती ८:२६<sup>10</sup> गे राहाब कली बेक्शो जन्तु खोदेशो पा साइक्तीनी। इन जोरी सन्तु आन कली इन सक्तिमी एर ओंथ ब्रपाइक्तीनी। इजीप्त रागी कली राहाब यो देंनीम। भजन संग्रह ८७:४ अय्युब ९:१३; अय्युब २६:१२; यसैया ३०:७; यसैया ५१:९<sup>11</sup> सरीड नु रागी निम्फा इन के बाक्नीस। रागी नु मेकेर बाक्शो नेल्ल इन सेल्शो बाक्नीम। भजन संग्रह २४:१<sup>12</sup> उत्तर नु दक्खिन इन सेल्शो बाक्नीस। ताबोर नु हेरमोन इन नेंम ग्येरशा कुम्सो पाइनीस।<sup>13</sup> गे सक्ति पाइशो बाक्नीनी। गे बोल्यो नु ठेयब बाक्नीनी।<sup>14</sup> ठीक पतीक नु कुल मकोव्रथु निसाफ पतीके इन राज्य डा सक्ति बाक्ब। इन दाक्शा गेनायो मप्रॉइतीके इन डोंइती बाक्ब।<sup>15</sup> इन कली ग्येरशा ठेयब सेल्बपुकी ग्येरसीशो मुर बाक्नीम। मारदे हना मेकोपुकी, परमप्रभु यावे, इन डोंइती डा छेडछेडमी गाक्नीम।<sup>16</sup> मेकोपुकी नाक्त रे इन नेंमी ग्येरसीनीम। मिनु इन ठीक पतीकेमी थुं नाइशशा बाक्नीम।<sup>17</sup> मारदे हना गे मेको आन सक्ति गेब बाक्नीनी। मिनु गो इन शिशीमी आंड पिपा पोक्शो बाक्नीकी।<sup>18</sup> आंड तेक्तीके, आंड पिप इसाएल डा परमप्रभु यावे केन बाक्ब।

<sup>19</sup> साइ डोंइती गे इन कली मप्रॉइब मुर आन कली कोंइतीक कोंइशा, लोव पाइतीनी। मिनु गे “गो लडाइ पाइब का कली सक्ति गेता। गो मुर आन दाते रे का कली ठेयब सेल्ता। १सामुएल १३:१४; १सामुएल १६:१३<sup>20</sup> गो आं गेय पाइब, दाऊद कली थिल्ला। गो मेको तारी तेल लुक्ताक्ड।<sup>21</sup> मिनु गो मेको कली कोव्रनुड। मिनु सक्ति गेनुड।<sup>22</sup> आ जोरी सन्तुमी मेको कली ग्राने मचाप्नीम। परमप्रभु आ अरेशो मटीबपुकीमी मेको कली दिप्ने मचाप्नीम।<sup>23</sup> मेको आ जोरी सन्तु आन कली मेको आ डोंइती खतम पोक्नुड। मिनु मेको कली काइ मदाक्ब आन कली साइक्नुडमी।<sup>24</sup> आं दाक्शा मप्रॉइतीके नु आं गेना हना यो दाक्तीके मेको नु बाक्ब। मिनु आं नेंमी मेकोमी आ पिपा पोक्ने चाप्ब। आ सक्ति बारब।<sup>25</sup> गो मेको कली समुन्द्र नु ठेयब खोला नेल्ल कली हुकुम पाइब सेल्नुड। भजन संग्रह ७२:८<sup>26</sup> मेकोमी आं कली ‘गे आं आफ बाक्नीनी। आं परमप्रभु, आं कली श्येत रे प्रॉइब सेरथे फुल्लु बाक्नीनी’ देंब। २सामुएल ७:१४<sup>27</sup> गो मेको कली आं डोंइती जरमेशो तौ सेल्नुड। रागी डा पिप नेल्ल आन पिप सेल्नुड।<sup>28</sup> गो मेको कली गेना हना यो दाक्नुड। मिनु मेको नु पशो कबल खाप्नुड।<sup>29</sup> गो मेको आ चच युड आन कली गेनायो मग्याम्चा डा पा वोइक्नुड। मिनु मेको आ सासन पतीके सरीड लीम सम्म बाक्ब।<sup>30</sup> तन्न मेको आ चच युडपुकीमी आं अरेशो लोव प्रॉइतेक्म हना, आं निसाफ पतीके लोव मटिम्तेक्म हना,<sup>31</sup> आं पचा देंशो, आं फुल्लुम मुशा ब्रेक्शो लोव मपात्तेक्म हना, आं शेंशो मटिम्तेक्म हना,<sup>32</sup> गो मेको आन पाप आ पर्वम कोक्केमी सजाइ गेनुडमी। गो मेको आन ठीक मपशो आ पर्वम तुप्शा सजाइ गेनुडमी।<sup>33</sup> तन्न गो मेको आन कली आं गेना हना यो दाक्तीकेम मप्रॉइनुड। आं दाक्शा मप्रॉइतीके मेको नु लीब।<sup>34</sup> गो आं कबल नेल्ल खाप्नुड। आं डोंइती देंशो लोव थमा पा पाइनुड।<sup>35</sup> गो आं नेंमी काले कसम जाता, गो दाऊद कली जौल मपाइनुड।<sup>36</sup> मेको आ चच युड गेना हना यो लीनीम। मिनु मेको आ सासन पतीके आं डोंइती नां बाक्म सम्म बाक्ब। भजन संग्रह ७२:१७<sup>37</sup> तास्ला खोदेशो पा मेको आ सासन पतीके गेना हना यो बाक्ब। सरीड बाक्शो खोदेशो पा गेना हना यो बाक्ब” देंतीनी। ठेयब सेंदा पा उत्पत्ती ९:१३

<sup>38</sup> तन्न गे इन तेल लुक्शो कली प्रॉइशो बाक्तीनी। गे इन तेल लुक्शो आ पर्वम शुश गाइक्ताक्तीनी।<sup>39</sup> गे इन गेय पाइब नु पशो कबल प्रॉइशो बाक्तीनी। गे मेको आ सिरपेच खपीम ताइशशा, ग्रान्ना दिशो सेल्तीनी।<sup>40</sup> आ गारो नेल्ल प्रेशशा, आ दरवार नेल्ल खतम पोक्तीनी।<sup>41</sup> मेको लां रे पा लाइब नेल्लेमी मेको आ मार मार रोइशशा लाइक्तेक्म। मेको आ नेक्था डा मुरपुकीमी मेको कली शुक्शी पाइक्तेक्म।<sup>42</sup> गे मेको आ जोरी सन्तु आन कली बोल्यो सेल्तीनी। गे मेको आ जोरी सन्तु नेल्ल आन कली ग्येरपाइशो बाक्तीनी।<sup>43</sup> गे मेको कली ब्रुपाइक्तीनी। मिनु लडाइमी वारच मपाइक्तीनी।

44 गे मेको आ ठेयब दुम्तीके खतम पोक्तीनी। मिनु मेको आ सासन पतीके साम्शा गेतीनी। 45 मेको आ ब्रोंइतीके नाक्त इच्का ला सेल्तीनी। गे मेको कली मुनेम सुम्पाइक्तीनी। *ठेयब सेंदा पा।*

46 परमप्रभु यावे, गे गेना सम्म खूइशा बाक्नीनी? इन गाइक्चा गेना सम्म मी खोदेशो पा ब्राइबा? 47 परमप्रभु, आं ब्रोंइशा बाक्तीक नाक्त इच्का ला बाक्ब। गे मुर नेल्ल आन कली जाम्शा लाइब सेल्शो बाक्नीनी। 48 मार, मुर गेनायो मबेक्थु, ब्रोंइशा बाक्नीमी? सुम आंम कली बेक्तीक रे प्रोंइने चाप्बा डा? *ठेयब सेंदा पा।*

49 परमप्रभु यावे, इन साइ डा गेना हना यो दाक्तीके ते लाक्गा? गे दाऊद कली कसम जशा, इन दाक्शा मप्रोंइतीकेमी लोव्र पाइतीनी। 50 परमप्रभु यावे, दोपा इन गेय पाइब, गो शुक्शी पा रिश्शा कोव्रचा पुंडसीडा, मेको मिम्तीन। गो मारदे जात जात डा मुरपुकीमी शुक्शी पाइशो फाल्चा माल्डा? मेको यो मिम्तीन। *भजन संग्रह ४४:१-२५* 51 परमप्रभु यावे, मारदे इन जोरी सत्रुमी आं कली शुक्शी पाइय्यीमी? मेकोपुकीमी मारदे इन तेल लुक्शो, आं कली ते ते थेक्त्तु, मेक मेक शुक्शी पाइय्यीमी? 52 परमप्रभु यावे गेना हना यो ठेयब बाक्ब। मेको थमा बाक्ब, आमेन। *भजन संग्रह ४१:१४*

परमप्रभु खूइसीतीके बाक्ब

*परमप्रभु आ मुर मोसा आ पुंडशो लोव्र।*

90 परमप्रभु गे नेल्ल पाला सम्म आंइ बाक्तीके दुम्शो बाक्नीनी।

2 मिनु पहाड दुम्चा क्येडा डोंइती नु रागी सेल्चा क्येडा डोंइती गे गेना हना यो बाक्ब परमप्रभु बाक्तीनी।

3 गे मुर आन कली लेंशा फुरक दुम्पाइक्तीनी। मिनु गे "मुरपुकी, आं गे लेतीन" देंनीनी। *भजन संग्रह १४६:४; उपदेसक १:४* 4 हजार का बर्स इन कली सिनाक्त खोदेशो बाक्ब। नाक्दो का इन कली याम का खोदेशो बाक्ब। *२पत्रुस ३:८* 5 गे मुर आन कली फिक्शा, लाइक्नीनी। मुर आन ब्रोंइतीक डोमु तशो खोदेशो बाक्ब। मेकोपुकी सुनी नक वाशो घांस खोदेशो बाक्नीम। *भजन संग्रह १०२:१२; भजन संग्रह १०३:१५; अय्युब १४:२; यसैया ४०:६; १पत्रुस १:२४-२५* 6 मेको सुनी गिग दुम्नीम। मिनु नाक्दो सोल सुल बेक्नीम।

7 गो इन गाइशोमी खतम दुम्शो बाक्नीकी। मिनु इन चुरशो तशा हिंकीकी। 8 आंइ मरिम्शो पशो इन डोंइती वोइशो बाक्तीनी। आंइ खूइशा पशो इन कुल डा छेडछेड आ डोंइती बाक्ब। 9 गो आंइ नाक्त नेल्ले इन गाइशोमी लाक्शो बाक्नीकी। आंइ नाक्त नेल्ल हुकयी पशो खोदेशो पा लाक्नीम। 10 आंइ ब्रोंइतीके ७० बर्स ला बाक्ब। बोल पा ब्रोंइतक हना, ८० बर्स सम्म ब्रोंइतीकी। मो हना यो आंइ ब्रोंइतीक नाक्ती नेल्ल श्येत नु मरिम्शो दुम्तीके ला बाक्ब। ब्रोंइतीक नाक्ती रीब पा नुप्ब। मिनु गो बेक्शा लाइनीकी। *उपदेसक १:३*

11 इन गाइक्तीक सक्ति सुम तुइक्बा? गो इन गाइक्तीके आ पर्बम इन क्येडा हिंकीकी। 12 मोपतीके आंइ ब्रोंइतीक नाक्ती गिशा बाक्नीमी मिम्शा, हिक्चा शेंदीकी। मिनु गो जोक्ब तुइक्ब थुं पाइशो दुम्कल। *भजन संग्रह ३९:५-७*

13 परमप्रभु यावे, गेना सम्म डोन बाक्नीनी? आंइ गे लेतीन। इन गेय पाइब आंइ कली शिशी पने। 14 सुनी आंइ कली इन गेना हना यो दाक्तीकेमी ग्येरपाइक्की। मिनु गो ब्रोंइका सम्म ग्येरशा कुम्सो पा बाक्ने चाप्कल। 15 गे गिशा नाक्त सम्म आंइ कली श्येत गेनी? मिशा नाक्त सम्म आंइ कली ग्येरपाइक्की। गो शुश बर्स श्येत जाइतक। 16 इन गेय पाइबपुकीमी इन गेय तुइक्वतमेक्ल। मिनु मेको आन आल आन कली इन छेडछेड डा सक्ति कोंइदीन। *यसैया ५:१२* 17 परमप्रभु यावे, आंइ परमप्रभु, इन शिशी आंइ तार बाक्ब। मिनु आंइ गुइ डा गेय रिम्शो दुम्ल। थमा पा, आंइ पशो नेल्ल रिम्शो सेलीन।

श्येत रे प्रोंइतीके

91 सु नेल्ल क्येडा ठेयब आ फाप्तीकेम बाक्बा नु नेल्ल क्येडा सक्ति पाइशो आ नेक्था बाक्बा, 2 मेकोमी परमप्रभु यावे कली "गे आं

खूइक्तीक नु आं बोल्यो दरवार बाक्नीनी। गे आं परमप्रभु बाक्नीनी। गो इन कली थमा सुइक्नुड" देंब। 3 मेकोमी इ कली चिक्ब ग्याइक्ब मुर आ ब्वारद नु मुर साइक्ब रोइ रे प्रोंइब। 4 मेकोमी इ कली आ फ्रामी फाप्ब। मिनु गे मेको आ फ्रं आगामी खूइशा बाक्नेवे। मेको आ दाक्शा गेनायो मप्रोंइतीके इ तेक्तीक नु गारो दुम्ब। 5 मिनु गे नाक्दो डा हिंतीके नु नाक्ती बेरशा जाक्ब ब्रा तशा महिनेवे। 6 छिडछिडम जाक्ब मुर साइक्ब रोइ नु नाक्ती याक्सीब रोइ तशा महिनेवे। 7 मिनु हजार का जना मुर इ डोंइती साइक्चा पुंडसीनीम। मिनु इ ग्युरा गे १० हजार मुर साइक्चा पुंडसाक्म हना यो, गे साइक्चा मपुंडसीनेवे। 8 परमप्रभु कली मटीबपुकी दोपा क्येक्क लेत्चा पुंडसीनीमी, गे मेको ताइनेवे। 9 मारदे हना गे "परमप्रभु यावे आं खूइक्तीके बाक्ब" देंते। मिनु गे नेल्ल क्येडा ठेयब कली इ बाक्तीक सेल्तीवी। 10 इ कली मारेइ मरिम्शो मदुम्ब। इ बाक्तीक आ नेक्था मारेइ हिंचा डा मदुम्ब। 11 मारदे हना मेकोमी आ स्वर्ग डा गेय पाइब आन कली इ लां नेल्लेमी इ कली वारच पपाइक्ब। *मत्ती ४:६* 12 मेकोपुकीमी इ कली आन गुइ गुइम ताक्शा कुरनीम। इ खोइली फुल्लुम मथोक्पाइक्चा कली मोदेशो पाइनीम। 13 गे गुप्स नु बीस पाइशो बुस्स दिम्नेवे। मेको बोल्यो बाक्तेक्म हना यो, मेको आन कली दिम्शा साइक्नेवे। *लूका १०:१९*

14 मिनु परमप्रभुमी "मेकोमी आं कली दाक्तीके, गो मेको कली श्येत रे प्रोंइनुड। मेकोमी आं नें तुइक्तीके, गो मेको कली फाप्नुड। 15 मेकोमी आं कली थोइब। मिनु गो आ लोव्र लेत्नुड। मेको श्येत जवानु, गो मेको नु बाक्नुड। मेको कली श्येत रे प्रोंइशा, मान ताइब सेल्नुड। *भजन संग्रह ५०:१५* 16 गो मेको कली शुश ब्रोंइचा गेशा, आं प्रोंइतीके तपाइक्नुड" दे परमप्रभुमी देंत। *यसैया ५२:१०*

परमप्रभु कली पुंडशो

*नाइक्तीक नाक्त पतीक कुम्सो।*

92 परमप्रभु यावे कली "गे रिम्शो पाइब बाक्नीनी" देंचा रिम्शो बाक्ब। मिनु "इन नें नेल्ल क्येडा ठेयब बाक्ब" दे कुम्सो पचा रिम्शो बाक्ब। *भजन संग्रह १४७:१* 2 सुनी इन गेना हना यो दाक्तीके नु नाक्दो इन दाक्शा मप्रोंइतीके आ पर्बम लोव्र पचा रिम्शो बाक्ब। 3 बेन्जो नु तार पाइशो ठेयब ताप्तीक ताप्शा, बीना आ लायोमी मोदेशो कुम्सो पचा रिम्शो बाक्ब। 4 मिनु गो "परमप्रभु यावे, इन पशोमी आं कली ग्येरपाइक्तीनी" दे इन पशो तशा, ग्येरशा कुम्सो पाइनुड। 5 परमप्रभु यावे, इन गेय थम ठेयब बाक्नीम। इन मिम्तीके यो थम ठेयब बाक्ब। *भजन संग्रह १०४:२४; यसैया ५५:९* 6 निप्स मपाइशो मुरपुकीमी मेको तुइक्ने मचाप्नीम। मूर्खपुकीमी मेको रुप्ने मचाप्नीम। 7 मिनु परमप्रभु आ अरेशो मटीबपुकी घांस खोदेशो पा बारनीम। मरिम्शो पाइबपुकी फू खोदेशो पा बोइक्नीम। नोले मेकोपुकी गेनायो मलीचा डा पा क्याम्चा पुंडसीनीम। 8 तन्न परमप्रभु यावे, गे गेना हना यो ठेयब सेल्चा पुंडसीनीनी। 9 परमप्रभु यावे, इन जोरी सत्रु क्याम्चा पुंडसीनीम। मरिम्शो पाइब नेल्ल एर ओंथ ब्राइनीम। 10 गे आं कली ब्वाकी डा ब्यफ खोदेशो पा सक्ति गेतीनी। आं कली नेल्ल क्येडा रिम्शो तेल लुक्ताक्यीनी। *भजन संग्रह २३:५* 11 गो आं जोरी सत्रु ब्रुशो तशा ग्येरसीनुड। आं कली मरिम्शो पाइबपुकी खतम दुम्शो लोव्र नेंशा, ग्येरसीनुड।

12 ठीक पाइबपुकी चहिं खजूर रवा खोदेशो पा बारनीम। मेकोपुकी लेबानोन डा लाइशो रवा खोदेशो पा लाइक्नीम। *भजन संग्रह १:३; भजन संग्रह ५२:१०* 13 मेकोपुकी आंइ परमप्रभु यावे आ खिंमी खूम्शो दुम्शा, आंइ परमप्रभु आ लाडगाम बोइक्नीम। 14 मिनु मेकोपुकी शुश बर्स दुम्मानु यो, फल सिल्लीम। मेकोपुकी गिग नु नक डा नक लीनीम। 15 मिनु गो "परमप्रभु यावे गेना हना यो ठीक पाइब बाक्ब। मेको आं सेरथे फुल्लु बाक्ब। मेको नु मारेइ मरिम्शो मबाक्ब" देंनुड। *ब्यक्स्था ४२:४*

## परमप्रभु आ ठेयब दुस्तीके

93 परमप्रभु यावेमी सासन पाइब। मेको पिप आ वाम ग्योस्सीशो बाक्ब। परमप्रभु यावेमी आ सक्ति किम्सीशो बाक्ब। रागी आ जग बोल्यो बाक्ब, मेको गेनायो महिम्सीब। भजन संग्रह ४७:८; भजन संग्रह ९६:१०; भजन संग्रह ९७:१; भजन संग्रह ९८:६; भजन संग्रह ९९:१; भजन संग्रह १४६:१०; प्रस्थान १५:१८<sup>२</sup> इन ठेयब निल्लीके साइ डोंइती रे वोइश्शो बाक्ब। गे साइ रेन बाक्शो बाक्तीनी।<sup>३</sup> परमप्रभु यावे, समुन्द्र बारशा कुशो बाक्ब। मेको आ छाल आ रेयके ठेयब दुश्शो बाक्ब।<sup>४</sup> ठेयब समुन्द्र आ रेयके नु समुन्द्र आ बोल्यो छाल क्येडा इरीम बाक्ब। परमप्रभु यावे नेल्ल क्येडा ठेयब सक्ति पाइश्शो बाक्ब।<sup>५</sup> इन दंशो लोत्र गेना हना यो बाक्नीम। परमप्रभु यावे, इन खिं गेना हना यो इन सक्तिमी ब्रीशो बाक्ब।

## ब्रोंइचा आ पर्वम पुंडशो लोत्र

94 परमप्रभुमी क्येक्क लेख्ब। परमप्रभु यावे, परमप्रभु, इन छेडछेड कोइदीन। ब्यवस्था ३२:३५<sup>२</sup> रागी कली निसाफ पाइब, बोक्कीन। मिनु ठेयब लेशो आन कली आन पशो डा क्येक्क लेत्तीन। उत्पत्ती १८:२५<sup>३</sup> परमप्रभु यावे, इन अरेशो मटीबपुकी गेना सम्म ठेयब लेत्तीमी?

<sup>४</sup> मेकोपुकीम ठेयब लेशो लोत्र ला पाइनीम। मरिश्शो पाइब नेल्लेम आन नें बोरपाइक्नीम।<sup>५</sup> परमप्रभु यावे, मेकोपुकीमी इन मुर आन कली दिम्शा ताइश्शा पशो बाक्नीम। इन योत्रशो रागी खतम पोक्शो बाक्नीम।<sup>६</sup> मेकोपुकीमी आन वोंइश बेक्शो मीश मुर नु अर्को रागी डा मुर आन कली साइश्शो बाक्नीम। मिनु रोम रोइक्च आन कली यो साइश्शो बाक्नीम।<sup>७</sup> मिनु मेकोपुकीमी “परमप्रभु यावेमी मताइब। याक्ब आ परमप्रभुमी मतुइक्ब” देंनीम। भजन संग्रह १०:११

<sup>८</sup> गे, निप्स मपाइश्शो मुरपुकी रुपीन। गे, मूर्खपुकी गेना जोक्ब तुइक्ब दुम्नीनी?<sup>९</sup> इन नोफा सेल्बमी मनैबा डा? मिक्च सेल्बमी मताइबा डा? प्रस्थान ४:११<sup>१०</sup> रागी रागी डा मुर आन कली सजाइ गेबमी इन कली सजाइ मगेबा डा? मेकोमी मुर आन कली मारेइ मारेइ तुइक्पाइक्ब।

<sup>११</sup> परमप्रभु यावेमी मुर आन मिश्शो तुइक्ब। मेकोमी इं मिश्शो नेल्ल जाम्शा लाइब, दे यो तुइक्ब। १कोरिन्थी १:२०

<sup>१२</sup> परमप्रभु यावे, गे सु सु कली सजाइ गेशा, शेंदीनी, मेको ग्येरसीशो मुर दुम्नीम। मारदे हना मेको आन कली इन अरेशो लोत्र शेंदीनी। अय्युब ५:१७<sup>१३</sup> इन अरेशो मटीब मबेक्मा सम्म, गे मेको इन शेंशो आन कली श्येत रे नाइक्वा गेनीनी।<sup>१४</sup> मारदे हना परमप्रभु यावेमी आ मुर आन कली मप्रोंइब। मिनु आ योत्रशो रागी यो मप्रोंइब। यसैया ३७:३३-३५<sup>१५</sup> ठीक मुर लेंशा ठीक पतीके ताइनीम। ब्रेम्शो थुं पाइश्शो मुर ठीक लां खोइक्नीम।

<sup>१६</sup> परमप्रभु आ अरेशो लोत्र मटीब आन पर्वम सु पोन बोक्बा? मरिश्शो पाइब आन पर्वम सु पोन बोक्बा? भजन संग्रह ११५:१७<sup>१७</sup> परमप्रभु यावेमी आं कली वारच मपाइश्शो हना, गो बेक्शो मुर आन बाक्तीके जाक्दीड वा।<sup>१८</sup> गो “आं खोइल ग्रेक्त्” देंती। मिनु परमप्रभु यावे, इन गेना हना यो दाक्तीकेमी तिक्तीनी।<sup>१९</sup> गो आं थुंमी थाम्पा सुर्ता पाता। इन लेम्शोमी आं थुं नाइसाक्व। २कोरिन्थी १:४-५<sup>२०</sup> मार, इन अरेशो मटीब हुकुम पाइबपुकी गे नु गारनीमी डा? मेकोपुकीमी इन फुल्लुम मुशा ब्रेक्शो लोत्र दूली सेल्शो बाक्नीमी।<sup>२१</sup> मेकोपुकीमी ठीक पाइब आन पर्वम दोपा मरिश्शो पचा, दे लोत्र गारपाइक्नीम। मिनु दोस मताइब आन कली साइक्नीम।<sup>२२</sup> तन्न परमप्रभु यावे आं बोल्यो दरवार नु आं खूइक्तीक सेरथे फुल्लु बाक्ब।<sup>२३</sup> मेकोमी मेको आन मरिश्शो पशो आन पिया तार मोइक्ब। मिनु मेको आन अरेशो मटितीके मेको आन कली साइक्ब। परमप्रभु यावे, आंइ परमप्रभुमी मेको आन कली खतम पोक्ब।

## ठेयब सेल्लिक कुम्सो पय

95 जाक्कीन, ग्येरसीशा परमप्रभु यावे कली कुम्सो पय। इं कली श्येत रे प्रोंइब सेरथे फुल्लु कली ठेयब सेंदा पा कुम्सो पय।<sup>२</sup> “गे रिश्शो पाइब बाक्नीनी” देंना देंन, मेको आ डोंइती लय। कुम्सो पा मेको

कली ठेयब सेल्य।<sup>३</sup> मारदे हना परमप्रभु यावे ठेयब परमप्रभु बाक्ब। देवी देवता नेल्ल आन ठेयब पिप बाक्ब। प्रस्थान १५:११<sup>४</sup> मिनु रागी डा उइ रे डांडा डा इर सम्म नेल्ल मेको आ गुइम बाक्ब।<sup>५</sup> समुन्द्र नु सोत्रशो रागी नेल्ल मेको आ सेल्शो बाक्ब।

<sup>६</sup> जाक्कीन, मेको कली बाप्शा ठेयब सेल्य। इं कली सेल्ब, परमप्रभु यावे आ डोंइती पोक्च थेक्तय।<sup>७</sup> मारदे हना मेको इं परमप्रभु बाक्ब। गो मेको आ योत्रशो भेडा नय। मिनु मुलाक्त् मेको आ सेंदा नेनीन। भजन संग्रह १००:३; यूहन्ना १०:२७-२८

<sup>८</sup> गेपुकी मेरीबाम पशो खोदेंशो पा इन थुं खकटा मसेलीन। गेपुकी गोरशो रागी मास्साह माइश्शोमी बाक्ची ना पशो खोदेंशो मपने। हिब्रू ३:७-८; हिब्रू ४:७<sup>९</sup> परमप्रभुमी “इन किकी पिपीमी आं पशो गेय नेल्ल ताम्तेक्म हना यो, मेकोपुकीमी आं कली नाक्शा कोव्तीमी। प्रस्थान १७:२,७<sup>१०</sup> गो ४० बर्स सम्म मेकोपुकी नु गाइक्ताक्ड। एको दूली पाइब मुर बाक्नीम। आं कली मटीब बाक्नीम।<sup>११</sup> मोपतीके गो आं गाइक्तीकेमी ‘एको आन कली आं थुं नाइक्पाइक्तीके मगोनुड’ दे कसम जाता” दे परमप्रभुम देंत। गन्ती १४:२२-२३; हिब्रू ४:३

## परमप्रभु रागी नेल्ल डा पिप बाक्ब

## इतिहास १६:२३-३३

96 परमप्रभु यावे कली नक कुम्सो का पय। रागी रागी डा मुर नेल्लेमी परमप्रभु यावे कली कुम्सो पने।<sup>२</sup> परमप्रभु यावे कली कुम्सो पने। आ नें ठेयब सेलीन। गे नाक्त् किंत् किंत् मेको मुर आन कली श्येत रे प्रोंइशो आ पर्वम रागी रागी डा मुर आन कली शेंदीनी।<sup>३</sup> रागी रागी डा मुर आन दातेमी मेको आ सक्ति आ पर्वम लोत्र पने। जात जात डा मुर आन दातेमी आ छक लाक्वा डा गेय आ पर्वम लोत्र पने।<sup>४</sup> मारदे हना परमप्रभु यावे ठेयब बाक्ब। ठेयब सेल्शा मान पाइक्वा पुंडसीब बाक्ब। मेको देवी देवता नेल्ल आन क्येडा मान पा हिंचा माल्शो बाक्ब।<sup>५</sup> मारदे हना जात जात डा मुर आन देवी देवता शोर गाक्शो मूर्ति ला बाक्नीम। तन्न परमप्रभु यावेमी सरीड सेल्लु।<sup>६</sup> मान ततीके नु नेल्ल क्येडा ठेयब दुस्तीके मेको नु बाक्ब। मेको आ बाक्तीक सक्ति नु छेडछेडम ब्रीशो बाक्ब।

<sup>७</sup> गे रागीम बाक्ब खिं खिं डा मुरपुकीमी परमप्रभु यावे कली “गे सक्ति नु छेडछेड पाइश्शो बाक्नीनी” दे ठेयब सेलीन।<sup>८</sup> गेपुकीमी परमप्रभु यावे आ नें थिशा, मेको कली “गे ठेयब बाक्नीनी” देनीन। चढ़ेतीक चाक्शा, मेको आ बाक्तीक डा लाडगाम जाक्कीन।<sup>९</sup> रिश्शो पतीकेमी ग्योस्सीशा, परमप्रभु यावे कली “गे ठेयब बाक्नीनी” दे लोत्र पने। रागी डा मुर नेल्ले मेको आ डोंइती मेको कली मान पा खिंखि पने।<sup>१०</sup> गे रागी रागी डा मुर आन दातेमी “परमप्रभु यावे पिप बाक्ब” दे शेंदीन। रागी महिम्सीचा डा पा सेल्शो बाक्ब। मेको मयाक्सीब। मेकोमी जात जात डा मुर आन कली कुल मकोव्थु निसाफ पाइब। भजन संग्रह ९३:१<sup>११</sup> सरीड नु रागी ग्येरसीसल। समुन्द्र नु मेकेर बाक्ब नेल्ल रेयके पामेक्ल। भजन संग्रह ९८:७-९; यसैया ४९:१३<sup>१२</sup> रू नु मेकेर वाशो नेल्ल ग्येरसीमल। मिनु ब्वाकीम बाक्शो रवा नेल्ल ग्येरशा,<sup>१३</sup> परमप्रभु यावे आ डोंइती कुम्सो पाइनीम। मारदे हना परमप्रभु यावे जाक्ब। मेको रागी कली निसाफ पथ जाक्ब। मेकोमी रागी नेल्ल कली ठीक पतीकेमी निसाफ पाइब। मिनु जात जात डा मुर आन कली थमा पा आन कुल मकोव्थु निसाफ पाइब। भजन संग्रह ८२:८; प्रेरित १७:३

## परमप्रभु नेल्ल क्येडा ठेयब बाक्ब

97 परमप्रभु यावे पिप बाक्ब। रागी ग्येरसेक्ल। डोन डोन डा रागी डा मुरपुकी यो ग्येरसीमल। भजन संग्रह ९३:१<sup>२</sup> मेको आ एर ऑथ गोस्स नु ठेयब छिडछिड बाक्ब। ठीक पतीके नु ठीक निसाफ मेको आ सासन पतीक जग बाक्ब।<sup>३</sup> मेको आ डोंइडोंइती मी लशा, आ एर ऑथ डा जोरी सत्रु नेल्ल आन कली दाक्ब। हबकुक् ३:४<sup>४</sup> मेको आ चिलामी रागी नेल्ल हाम्सो दुम्ब। रागी रागी डा मुर मेको तशा खिंखि पाइनीम।<sup>५</sup> परमप्रभु

यावे आ डोंडती डांडा मयीन खोदेंशो पा याइनीम। रागी नेल्ल परमप्रभु यावे आ डोंडती मोदेंशो दुम्ब। *यहोसु ३:१३*

6 मिनु स्वर्गम मेको आ ठीक पतीके नेल्ल कोंडब। जात जात डा मुर नेल्लेमी मेको आ छेडछेड ताइनीम। *भजन संग्रह ६७:५-६; यसैया २४:२१-२२* 7 मूर्ति पूजा पाइब नेल्ल मुने तोक्का पुंडसीनीम। मूर्ति कली थमा सुइक्बपुकी मुने दोक्नीम। देवी देवता नेल्ल परमप्रभु आ डोंडती बाप्पीन। *येरमीया ४६:२५; हिब्रू १:६*

8 परमप्रभु यावे आ निसाफ पशो नेंशा, सियोन नु यहूदा डा सहर नेल्ल ग्येरसीनीम। 9 मारदे हना परमप्रभु यावे, गे रागी डा नेल्ल क्येडा ठेयब बाक्नीनी। देवी देवता नेल्ल आन क्येडा गे शुश ठेयब बाक्नीनी। *प्रस्थान १५:११*

10 परमप्रभु यावेमी मरिश्शो पतीक कली काइ मदाक्ब मुर आन कली दाक्ब। आ कली थमा सुइक्ब आन कली कोव्रब। मेको आन कली आ अरेशो मटीब आन गुइ रे प्रोंडब। 11 ठीक पाइब आन कली छेडछेड बाक्ब। मिनु ब्रेम्शो थुं पाइश्शो मुर आन कली ग्येरतीक बाक्ब। 12 ठीक पाइबपुकी परमप्रभु यावे नु ग्येरसीन। मेको कली “गे रिश्शो पाइब बाक्नीनी” देनीन।

परमप्रभुमी वारच पाइब

कुम्सो का।

98 परमप्रभु यावे कली नक कुम्सो का पय। मारदे हना मेकोमी छक लाक्का डा गेय पाप्टु। मेको आ ठेयब सक्तिमी ग्रात। *भजन संग्रह ३३:३; यसैया ५९:१६; यसैया ६३:५* 2 परमप्रभु यावेमी आ ग्रातीके कोंडशा, आ श्येत रे प्रोंडतीके रागी रागी आन डोंडती कोंडताक्व। 3 मेकोमी इस्राएली आन कली आ गेना हना यो दाक्तीके नु आ दाक्शा मप्रोंडतीके कोंडताक्व। रागी नेल्ल डा मुरपुकीमी आंइ परमप्रभुम मेको आन कली श्येत रे प्रोंडिशो ताम्तेक्म। *यसैया ५२:१०*

4 रागी रागी डा मुर नेल्ल परमप्रभु यावे कली ग्येरसीशा कुम्सो पने। साप्पा ग्येरसीशा मेको कली ठेयब सेलीन। 5 गे ठेयब नु आइक्च तार पाइश्शो ताप्तीक ताप्शा परमप्रभु यावे कली कुम्सो पा ठेयब सेलीन। 6 आंइ पिप, परमप्रभु यावे आ डोंडती ग्येरसीशा तुराही नु ग्राव ताप्पीन। *भजन संग्रह ९३:१*

7 समुन्द्र नु मेकेर बाक्ब नेल्लेमी परमप्रभु कली ठेयब सेलीन। रागी नु रागीम बाक्ब नेल्लेमी यो परमप्रभु कली ठेयब सेलीन। *भजन संग्रह ९६:११-१३* 8 समुन्द्र डा छालपुकीमी आन गुइ फ्रोक्का माल्नीम। डांडा नेल्ल ग्येरसीशा परमप्रभु यावे आ डोंडती कालेम कुम्सो पने। 9 मारदे हना परमप्रभु यावे रागी कली निसाफ पथ जाक्ब। मेकोमी ठीक पा जात जात डा मुर आन कुल मकोव्रथु निसाफ पाइब।

परमप्रभु यावे पिप बाक्ब

99 परमप्रभु यावे पिप बाक्ब। जात जात डा मुरपुकी खिंखि पामेक्ल। मेको करूब आन तारी बाक्ब। रागीम खिनु कुल। *भजन संग्रह ९३:१; भजन संग्रह १८:११* 2 परमप्रभु यावे सियोनम ठेयब बाक्ब। जात जात डा मुर नेल्ल आन क्येडा ठेयब बाक्ब। 3 मेको नेल्लेमी इन ठेयब नु हिंचा डा नें कली ठेयब सेल्लेक्ल। परमप्रभु यावे का ला बाक्ब। 4 सक्ति पाइश्शो पिपम, ठीक निसाफ दाक्ब, गे कुल मकोव्रथु, याक्ब आ रागीमी ठीक पतीके नु ठीक निसाफ वोइक्तीनी। *यसैया ९:६* 5 परमप्रभु यावे, आंइ परमप्रभु कली ठेयब सेलीन। आ खोइल थेक्तीकेमी मान पने। मारदे हना मेको का ला परमप्रभु बाक्ब। *भजन संग्रह १३२:७-८; १इतिहास २८:२; बिलाप २:१*

6 मोसा नु हारून मेको कली चढेब बाक्ताक्स। परमप्रभु यावे कली पुंडशा लोव्र पाइब आन दातेमी सामुएल का यो बाक्त। मेकोपुकीमी परमप्रभु यावे कली पुंडशा लोव्र पामेनु, मेकोमी मेको आन कली लोव्र लेशो बाक्त। 7 मेकोमी गोस्स के थाम रे पा मेकोपुकी नु लोव्र पशो बाक्त। मेकोपुकीमी मेको आ देंशो नु आ फुल्लुम मुशा ब्रेक्शो लोव्र टिशो बाक्तेक्म।

8 परमप्रभु यावे, आंइ परमप्रभु, गे मेको आन कली लोव्र लेशो बाक्तीनी। गे मेको आन कली माफ गेब परमप्रभु बाक्तीनी। गे मेको आन मरिश्शो पशो आ क्येक्क यो लेशो बाक्तीनी। *प्रस्थान ३४:७* 9 परमप्रभु यावे, आंइ परमप्रभु कली ठेयब सेलीन। मेको कली आ डांडाम मान पने। मारदे हना परमप्रभु यावे, आंइ परमप्रभु का ला बाक्ब।

“रिश्शो पाइब बाक्ब” दे पशो कुम्सो

परमप्रभु कली “गे रिश्शो पाइब बाक्नीनी” दे चढेतीकेम पशो कुम्सो।

100 रागी रागी डा मुर नेल्ल परमप्रभु यावे कली ग्येरसीशा कुम्सो पने। 2 ग्येरसीशा परमप्रभु यावे कली ठेयब सेलीन। गे कुम्सो पना पन आ नेक्था लने। 3 परमप्रभु यावे का ला परमप्रभु बाक्ब, दे रुपीन। मेकोमी इं कली सेल्शो बाक्त, गो मेको आ मुर बाक्नय। गो मेको आ योव्रतीक डा भेडा बाक्नय। *भजन संग्रह ९५:७*

4 मिनु “गे रिश्शो पाइब बाक्नीनी” दे आ ठेयब लाप्चो रे ओव्रडीन। आ कली मान पा आ लाडगाम ठेयब सेल्तीक कुम्सो पने। मेको कली “गे रिश्शो पाइब बाक्नीनी” दे आ नें कली मान पा ठेयब सेलीने। *भजन संग्रह १०६:१* 5 मारदे हना परमप्रभु यावे रिश्शो पाइब बाक्ब। मिनु आ गेना हना यो दाक्तीके लीब। मिनु आ दाक्शा मप्रोंडतीके नेल्ल पाला सम्म बाक्ब।

पिप आ मिश्शो लोव्र

दाऊद आ कुम्सो।

101 परमप्रभु यावे, गो इन दाक्शा मप्रोंडतीक नु इन ठीक निसाफ पतीक आ पर्वम इन कली कुम्सो पाइनुड। 2 गो दोस मततीक लां शेंसीचा दाक्नुड। गो मेको गेना पने चाण्डा? गो आं खिंमी रिश्शो थुं पाइश्शो मुर दुम्शा बाक्का दाक्नुड। 3 गो मारदे मरिश्शो मिश्शा कोव्रचा मदाक्नुड। नोले शोंइसीब आन पतीके काइ मदाक्नुड। गो मोदेंशो मद्मुडल। *हितोपदेस २०:८, २८* 4 दूली पतीक थुं आं क्येडा डोन बाक्का माल्ब। मिनु गो मरिश्शो पतीके यो तुइक्का मदाक्नुड। 5 सु आ नेक्था डा मुर आन पर्वम मरिश्शो लोव्र पाइबा, गो मेको कली खतम सेल्नुड। ठेयब लेशो नु बोर्शो थुं पाइश्शो मुर आन कली आं नेक्था बाक्का मगेनुड। 6 गो रागी डा थमा सुइक्का पुंडसीब मुर आन कली दाक्शा कोव्रनुड। मिनु गो नु बाक्का गेनुडमी। सु सु दोस मततीक लां गाक्नीमी, मेको आन कली आं गेय पाइब सेल्नुडमी। *हितोपदेस २२:११* 7 दूली पाइब आन कली आं खिंम बाक्का मगेनुडमी। जोल पाइबपुकी आं डोंडती बाक्का मताइनीम। 8 गो सुनी कुस कुस रागीम बाक्ब परमप्रभु आ अरेशो लोव्र मटीब आन कली खतम सेल्नुडमी। मोपा परमप्रभु यावे आ सहरम बाक्ब मरिश्शो पाइब मलीनीम। *हितोपदेस २०:२६*

श्येत जशा आस पशो

श्येत जाइबमी परमप्रभु यावे आ डोंडती पुंडिशो।

102 परमप्रभु यावे आं पुंडिशो नेनीन। आं डाक्शा पुंडिशो इन बाक्तीकेम जाक्ल। 2 गो श्येत जडा नाक्ती इन कुल मखूइक्तीन। गो ब्रेडडा नाक्ती आं लोव्र फ्रा लेल्तीनी।

3 मारदे हना आं नाक्त कुन बुद पा जाम्नीम। मिनु आं रुश नेल्ल ठेयब मीम नाप्शो खोदेंशो पा चोशो बाक्नीम। 4 आं थुं घांस खोदेंशो पा बेक्ब। मोपतीके गो आं शोब्ले यो जने मचबु। 5 हुकयी पा आं कुशुल नेल्ल रुशेम क्येप्शो बाक्नीम। 6 गो गोरशो रागी डा हुहुचील खोदेंशो दुम्शो बाक्नुड। गो ब्रेश्शो खिं आन दातेम बाक्ब बुक्स खोदेंशो दुम्शो बाक्नुड। 7 गो इप्ने मचाप्थु, खिं तार आ का ला बाक्शो चिक्ब खोदेंशो दुम्शो बाक्नुड। 8 नेल्ल नाक्त आं जोरी सत्रुमी आं कली शुक्शी पा बाक्नीम। आं कली शुक्शी पाइबपुकीमी आं नें थिशा साराप पाइनीम। 9 मारदे हना गो शोब्ले खोदेंशो पा पुलु जाइनुड। मिनु प्रेक्कु ब्वाइश्शो ब्वाक्कु त्नुड। 10 एको नेल्ल इन

गाइक्तीकेमी दुश्शो बाक्ब। मारदे हना गे आं कली क्युक्शा, ताइक्ताक्यीनी। 11 आं ब्रॉइतीक नाक्त पेरचा चिक्शो नां खोदेंशो बाक्ब। मिनु गो घांस खोदेंशो पा बेक्शो बाक्नुड। भजन संग्रह ९०:५-६

12 परमप्रभु यावे, गे गेना हना यो पिप बाक्नीनी। मिनु गे नेल्ल पाला सम्म बाक्नीनी। भजन संग्रह १३५:१३ 13 गे बोक्शा, सियोन कली थमा पा शिशी पाइनीनी। मेको कली शिशी पतीक नाक्त जाक्शो बाक्ब। 14 मारदे हना इन गेय पाइबपुकीमी मेकेर डा फुल्लु यो दाक्नीम। मिनु मेकेर डा फुरक कली यो शिशी पाइनीम। 15 रागी रागी डा मुरपुकी परमप्रभु यावे आ नें नेंशा हिंनीम। रागी डा पिप नेल्ले मेको आ सक्ति तशा हिंनीम। 16 मारदे हना परमप्रभु यावेमी सियोन कली लेंशा सेल्ब। मिनु आ छेडछेडमी गूब। 17 मेकोमी श्येत जाइब आन पुंडशो नेंब। मिनु आन पुंडशो गेब।

18 एको लोव मुल जाक्ब पाला आन कली ब्रेक्चा माल्ब। मिनु नोले जरमेबपुकीमी परमप्रभु यावे कली ठेयब सेल्नीम। 19 मारदे हना परमप्रभु यावेमी इर आ बाक्तीक रे कोव्रशो बाक्ब। परमप्रभु यावेमी स्वर्ग रे कोव्रशो बाक्ब। भजन संग्रह १४:२ 20 मेकोमी ग्याइश्शा चोक्चा पुंडसीशो आन हुकयी पशो नेंब। मिनु साइक्चा पुंडसीब आन कली प्रॉइब। 21 मोपा “परमप्रभु यावे ठेयब बाक्ब” दे सियोन डा मुर आन कली शेंदमेक्ल। मिनु यरूसलेम डा मुरपुकीम मेको कली ठेयब सेल्मेक्ल। 22 मिनु जात जात नु राज्य राज्य डा मुर बुक्शा, परमप्रभु यावे कली ठेयब सेल्नीम। भजन संग्रह ८७:४; येरमीया ६०:३-१०; लूका १३:२९-३०

23 गो ठिटा बाक्ना बाक्न, परमप्रभुमी आं सक्ति क्युम्ताक्यी, आं ब्रॉइतीक नाक्त क्युम्ताक्यी। 24 मिनु गो “आं परमप्रभु, आं कली बेक्ची मजाक्थु, मलाइय्थीनी। इन नाक्त नेल्ल पाला सम्म लीनीम” देंती। भजन संग्रह ५५:२४

25 साइ डोंइती गे रागी आ जग सेल्शो बाक्तीनी। मिनु सरीड इन गुड डा गेय बाक्ब। हिब्रू १:१०-१२ 26 मेको नेल्ल जाम्शा लाइनीम। तन्न गे गेना हना यो बाक्नीनी। मेको रागी नु सरीड वा खोदेंशो पा माइत दुश्शा जेक्नीम। गे फेक्तीके वा फाइश्शो खोदेंशो पा, मेको आन कली फाइक्नीनी। मिनु मेकोपुकी जाम्शा लाइनीम। २पत्रुस ३:१० 27 तन्न गे गेना हना यो खाल का डा बाक्नीनी। मिनु इन नाक्त गेनायो मनुप्नीम। 28 इन गेय पाइब आन चच युइ रिश्शो पा बाक्चा माल्नीम। मिनु आन चच युइ इन डोंइती बोल्यो दुश्शा बाक्नीम।

परमप्रभु कली ठेयब सेल्शो

दाऊद आ कुम्सो।

103 आं थुं, परमप्रभु यावे कली ठेयब सेलो। मिनु गो आं थुं नेल्लेमी आ नें ठेयब सेल्नुड। 2 आं थुं, परमप्रभु यावे कली ठेयब सेलो। मिनु इ कली रिश्शो पशो नेल्ल मप्रेंदो। ब्यक्स्था ४:९ 3 मेकोमी इ मरिश्शो पशो नेल्ल क्याम्शा गेशो बाक्ब। मिनु इ रोइ नेल्ल सापाइक्ब। भजन संग्रह ३२:१ 4 मेकोमी इ कली खतम दुम्तीकर रे प्रॉइब। इ कली आ गेना हना यो दाक्तीके नु शिशी पतीकेमी कोव्रब। 5 मेकोमी इ ब्रॉइतीक नाक्त नेल्ल इ माल्शो खाप्शा गेब। मिनु इ ब्रॉइतीके ककाकुली के खोदेंशो पा लेंशा ठिटा सेल्ब। यसैया ४०:३१ 6 परमप्रभु यावेमी दिप्चा पुंडसीशो नेल्ल आन कली वारच पा ठीक निसाफ पाइब। 7 मेकोमी मोसा कली आ लां नु इस्राएल डा मुर आन कली आ गेय कोंइताक्व। प्रस्थान ३३:१३ 8 परमप्रभु यावे शिशी पाइब नु रिश्शो पाइब बाक्ब। मेको रीब पा मगाइक्थु, आ गेना हना यो दाक्तीके शुश कोंइब। भजन संग्रह ८६:१५ 9 मेकोमी गेना हना यो “गे दूली पाइतीनी” मदेंब। मिनु गेना हना यो मगाइक्ब। यसैया ५७:१६ 10 मेकोमी इ पशो पाप आ पर्वम सजाइ मगेब। मिनु इ मरिश्शो पशो डा क्येक्क मलेप्ब। 11 रागी रे सरीड दोशो इर बाक्बा, मोशोन आ गेना हना यो दाक्तीके आ कली मान पा हिंब आन कली पशो बाक्ब। भजन संग्रह ३६:६; यसैया ५५:८-९ 12 नां दाप्तीक रे नां पेरतीक दोशो डोन बाक्बा, मोशोन आंइ मरिश्शो पशो नेल्ल डोन तिल्शो बाक्ब। 13 आफोमी आ तमी तौ आन कली दोदेंशो पा शिशी पाइबा, मोदेंशो पा परमप्रभु यावेमी आ कली मान पा हिंब आन कली शिशी पशो बाक्ब। लूका १५:११-२४ 14 मारदे हना गो दोपा

सेल्सीशो बाक्नीकी, मेकोमी तुइक्ब। मेकोमी गो फुरक ला बाक्नीक, दे यो तुइक्ब। उत्पत्ती २:७; उत्पत्ती ३:१९

15 मुर आन ब्रॉइतीके घांस खोदेंशो बाक्ब। रूमी बोइश्शो फू खोदेंशो पा बोइक्ब। भजन संग्रह ९०:५-६; अय्युब ७:१० 16 मिनु फश पवानु, मेको जाम्शा लाइब। मिनु आ बाक्तीक यो मतुइक्ब। 17 तन्न परमप्रभु यावे आ गेना हना यो दाक्तीक आ कली मान पा हिंब नु गेना हना यो लीब। मिनु आ ठीक पतीके आन तौ चच आन पाला सम्म लीब। लूका १:५० 18 सु सुमी कबल पा, आ शेंशो टीनीमी, मेकोपुकी नु आ गेना हना यो दाक्तीक लीब।

19 परमप्रभु यावेमी आ ठेयब नित्तीके स्वर्गम वोइश्शो बाक्ब। मिनु स्वर्ग नु रागीम बाक्शो नेल्ल कली सासन पाइब। 20 परमप्रभु यावे आ स्वर्ग डा गेय पाइबपुकी, परमप्रभु यावे कली ठेयब सेलीन। गे सक्ति पाइश्शो, आ देंशो टीबपुकी मेको कली ठेयब सेलीन। यसैया ६:१-४; भजन संग्रह २९:१; भजन संग्रह १४८:-; दानीएल ७:१० 21 गे स्वर्ग डा गेय पाइबपुकी परमप्रभु यावे कली ठेयब सेलीन। आ गेय पाइब नेल्ल परमप्रभु यावे आ दाक्शो पने। 22 परमप्रभु यावे आ सासन पतीकेमी बाक्शो, आ सेल्शो नेल्लेमी परमप्रभु यावे कली ठेयब सेलीन। आं थुं, परमप्रभु यावे कली ठेयब सेलो।

परमप्रभु ठेयब बाक्ब

104 आं थुं, परमप्रभु यावे कली ठेयब सेलो। परमप्रभु यावे, आं परमप्रभु गे थम ठेयब बाक्नीनी। ठेयब दुम्तीके नु मान ततीके इन के बाक्ब। 2 गे छेडछेड कली वा फेक्शो खोदेंशो पा फेक्शो बाक्नीनी। मिनु सरीड कली ताम्बु खोदेंशो पा प्राक्शा कीशो बाक्नीनी। 3 गे इन बाक्तीक डा थाम ब्वाक्कु तारी सेल्शो बाक्नीनी। गे गोस्स कली इन बग्गी सेल्शो बाक्नीनी। मिनु गे फश आ फ्रां तार डोइश्शा गाक्ब बाक्नीनी। उत्पत्ती १:६-८; भजन संग्रह १८:१०-१२ 4 मिनु गे फश कली इन लोव्र चोव्रब नु मी कली इन गेय पाइब सेल्शो बाक्नीनी। हिब्रू १:७ 5 रागी गेना यो महिम्सेक्ल, दे आ जग वोइक्तीनी। मत्ती २४:३५; प्रकाश २१:१ 6 गे मेको कली वा बुद पा ब्वाक्कुमी सुम्तीनी। मिनु ब्वाक्कु डांडा तार सम्म जाक्दीश्शो बाक्त। 7 गे हुइक्तीनीनु, मेको प्रोक्ब। इन बुंबु पशो सेंदामी मेको दोरोर पा लाइब। 8 मेको ब्वाक्कु डांडा ग्येत्थ बारशा, दिंम मेर शाइक्ब। मिनु इन देंशो बाक्तीके सम्म लाइनीम। 9 मेको लेंशा रागी कली सुम्थ मजाक्मल, दे गे सांद सेल्तीनी। अय्युब ३८:८-११; हितोपदेस ८:२९

10 गे दिंम मेर ब्वाक्कु बुक्तीक सेल्तीनी। मिनु मेको डांडा आन दाते रे शाइश्शा लाइनीम। 11 गे ब्वाकी डा जन्तु नेल्ल आन कली तूचा गेनीनी। ब्वाकी डा गथापुकीमी यो मेकेर डा ब्वाक्कु तूशा, ब्रॉइनीम। 12 मेको खोला आन नेक्था चिक्बपुकीमी आन ग्योव्र सेल्नीम। मिनु राशीम बाक्शा कुम्सो पाइनीम। 13 इन इर डा बाक्तीक रे रेउ यिपाइश्शा डांडा आन कली जिप्पाइक्नीनी। इन गेय पशोमी रागी नेल्ल ग्येरसीनीम।

14 गे बी ब्यफ आन कली घांस वापाइक्नीनी। मिनु खप रे मुर आन कली जचा थोव्रक वापाइक्नीनी। 15 मिनु गे मुर आन थुं ग्येरपाइक्चा कली अडगुर सिप्पाइक्नीनी। मिनु आन कुल दारपाइक्चा कली तेल नु आन रां बोल्यो सेल्चा कली शोब्ले गेनीनी। 16 परमप्रभु यावे आ खुम्शो लेबानोन डा लाइश्शो रवा शुश ब्वाक्कु ताइब बाक्नीमी। 17 मेकेर चिक्बमी आन ग्योव्र सेल्नीम। मिनु ठेयब बुश चिक्बपुकीमी सला रवाम आन ग्योव्र सेल्नीम। 18 लाइश्शो डांडापुकी ब्वाकी डा क्यारश आन कली बाक्नीम। सेरथे फुल्लु आइक्च जन्तु आन खुइक्तीके बाक्नीम।

19 मिनु गे बर्खा नु हिंउद कोंइचा कली तास्ला सेल्तीनी। नांमी आ दाप्तीक पेरतीक तुइक्ब। भजन संग्रह ७४:१६ 20 गे छिडछिड सेल्तीनी। मिनु नाक्दो दुम्ब। मेना ब्वाकी डा जन्तु गूनीम। 21 मिनु गुप्स आ चाइक्बपुकीमी सिखार माल्शा, ग्रीशा आन जचा थोव्रक परमप्रभु आ गुइ रे पुंडनीम। 22 मिनु नां दाप्नेनु, मेको आन पुक्खीम लशा, खुइश्शा गोल्नीम। 23 मुरपुकी चहिं आन गेय पथ लाइनीम। मिनु नाक्दो सम्म गेय पाइनीम।

24 परमप्रभु यावे, इन गेय ठेयब नु शुश बाक्नीम। गे जोक्ब तुइक्ब दुश्शा, नेल्ल सेल्तीनी। रागी नेल्ल इन सेल्शो मारेइ मारेइम ब्रीशो बाक्ब। उत्पत्ती १:३१ 25 मेकेर ठेयब नु ब्रेम्शो समुन्द्र बाक्ब। मिनु मेकेर हिक्ने मचाप्चा डा

पा ठेयब नु आइक्व जन्तु रमल ग्यमल पा बाक्नीम। 26 मेकेर रे जहाजपुकी यो गाक्नीम। मिनु गे मेकेर ग्यारचा कली लेव्याथन यो सेल्तीनी।

27 मिनु मेको नेल्लेमी “जचा थोवक गेकी” दे इन कली कोवनीम। भजन संग्रह १४५:१५-१६ 28 गे मेको आन कली गेनीनु, मेकोपुकीमी खुपनीम। इन मुठी प्राक्नीनु, मेकोपुकी ब्रोवशो नु रिम्शो थोवकीमी रूनीम। 29 मिनु इन कुल खूइक्तीनीनु, मेकोपुकी श्येत जाइनीम। मेको आन सोक्त लाइक्नीनु, मेकोपुकी बेक्नीम। मिनु लेंशा फुरक दुम्नीम। उत्पत्ती ३:१९ 30 मिनु इन सोक्त सोइश्शा, मेको आन कली सेल्तीनी। मिनु गे रू आन कली लेंशा सेल्तीनी।

31 परमप्रभु यावे आ सक्ति गेना हना यो लीशा बाक्ल। परमप्रभु यावे आ गेय तशा, आमा ग्येरसेक्ल। 32 गे रागी कली कोवनीनु, मेको खिंखि पाइब। गे डांडा कली थिनीनु, कुन गूब। 33 गो ब्रॉइडा सम्म परमप्रभु यावे कली कुम्सो पना पन बाक्नुड। गो मबेक्डा सम्म आं परमप्रभु कली ठेयब सेल्शा, कुम्सो पना पन बाक्नुड। 34 मेकोमी आं मिम्शो दाक्तल। मारदे हना गो परमप्रभु यावे कली मिम्शा ग्येरसीनुड। 35 पाप पाइबपुकी रागी रे क्याम्चा पुंडसीमल। मिनु आ अरेशो मपाइबपुकी मलीमल। आं थुं परमप्रभु यावे कली ठेयब सेलो। परमप्रभु यावे कली ठेयब सेलो।

### परमप्रभु कली मान पतीके

105 परमप्रभु यावे कली “गे रिम्शो पाइब बाक्नीनी” दे लोव्र पने। जात जात डा मुर आन कली परमप्रभु आ पशो तुइक्पतीन। इतिहास १६:८-२२ 2 मेको कली कुम्सो पने। मेको कली ठेयब सेल्तीक कुम्सो पने। मुर आन कली आ पशो छक लाक्चा डा गेय शेंदीन। 3 गे परमप्रभु आ नें तुइक्तीके ग्येरसीन। परमप्रभु यावे कली माल्ब आन थुं ग्येरसीमल। 4 गे परमप्रभु यावे नु आ सक्ति मालीन। गे गेना हना यो मेको आ नेक्था बाक्चा मालीन। 5 गे मेको आ पशो रिम्शो गेय मिम्तीन। आ छक लाक्चा डा गेय नु आ निसाफ पशो मिम्तीन। 6 मेको आ गेय पाइब अब्राहाम आ चच युड नु याकूब आ तौपुकी, आ योवशो नेल्ल मिम्तीन।

7 मेको परमप्रभु यावे, आंइ परमप्रभु बाक्ब। मेको आ निसाफ रागी नेल्ल कली बाक्ब। 8 मेकोमी आ पशो कबल गेना हना यो मिम्ब। आ देंशो लोव्र हजार हजार पाला सम्म मिम्ब। ब्यवस्था ७:९ 9 मेकोमी अब्राहाम नु मेको कबल पशो बाक्त। मिनु इसहाक नु यो थोक्शा लोव्र पशो बाक्त। 10 मेकोमी आ फुल्लुम मुशा ब्रेक्शो लोव्र याकूब कली गेशो बाक्त। मिनु मेको इस्राएल कली गेना हना लीब कबल बाक्ब। 11 मेकोमी “गो इ कली कनान रागी गेनुड। मेको इन के दुम्ब” देंशो बाक्त। उत्पत्ती १२:७ 12 मेना मेको आन कली हिक्शोनु, इक्का खोइ ला बाक्मा बाक्त। मिनु मेकेर अर्को रागी डा मुर यो बाक्मा बाक्त। 13 मेकोपुकी रागी का रे अर्को रागी नु राज्य का रे अर्को राज्य पा हिरना हिरन बाक्बाक्मा बाक्त। 14 परमप्रभुमी मेको आन कली सुइमी श्येत गेचा मगेमी बाक्त। मिनु मेको आन पर्वम पिप आन कली हुइक्तीमी बाक्त। गन्ती २३:७-१० 15 मेकोमी “आं तेल लुक्शो आन कली मथिने। आं लोव्र पाइब आन कली मारेइ मपतीन” दे हुइक्तीमी बाक्त।

16 मिनु परमप्रभुमी मेको रागीमी अन्काल सोइश्शा, अन्न नेल्ल खतम सेल्शा, उत्पत्ती ४१:५४ 17 मुर का कली मेको आन डॉइती सोइक्ता बाक्त। मेको योसेफ वाइल सेल्चा कली लेयचा पुंडसीशो बाक्त। उत्पत्ती ३७:२८ 18 मिनु मेको कली आ खोइलीम साडलो पाइश्शा, आ शुरमी फलाम के साडलो पाइक्तेमे बाक्त। 19 मिनु योसेफ आ लोव्र थमा मदुम सम्म, परमप्रभु यावेमी मेको कली वारच पवा बाक्त। 20 मिनु पिपमी मुर सोइश्शा, मेको कली प्रोना बाक्त। जात जात डा मुर आन कली सासन पाइबमी मेको कली प्रोना बाक्त। उत्पत्ती ४१:१४ 21 मिनु मेकोमी योसेफ कली आ दरवार डा ठेयब मुर सेल्शा, आ शॉप नेल्ल आन होव्रप सेला बाक्त। 22 मिनु आ आइक्व हुकुम पाइब आन कली शेंचा नु खाल्पा आन कली तुइक्ब सेल्चा कली योसेफ कली वोदा बाक्त।

23 मिनु इस्राएल डा मुर इजीप्टमी ओव्रमा बाक्त। मिनु याकूब हाम आ रागीमी बाक्ब दुम्माक्त। उत्पत्ती ४६:१, ७ 24 मिनु परमप्रभु यावेमी आ मुर आन कली शुश सोशा बोशा सेल्मी बाक्त। मिनु मेको आन कली आन जोरी

सत्रु आन क्येडा बोल्यो सेल्मी बाक्त। प्रस्थान १:७, १२ 25 परमप्रभुमी इजीप्टी आन थुं इस्राएली आन कली काइ मदाक्ब सेल्मी बाक्त। मिनु इस्राएली आन कली काइ मरिम्शो पाइब सेल्मी बाक्त।

26 मिनु परमप्रभुमी आ योवशो गेय पाइब मोसा नु हारून आस कली मेकेर सोइक्ता बाक्त। प्रस्थान ३:१०; प्रस्थान ४:१४-१६ 27 मेको निक्शीमी हाम आ रागी डा मुर आन दातेमी परमप्रभु आ चिन्ड नु छक लाक्चा डा गेय कांइदसे बाक्त। प्रस्थान ७:-१२:- 28 मेकोमी छिडछिड सोइक्ता बाक्त। मिनु मेकेर छिडछिड दुम्माक्त। तन्न मेकोपुकीमी मेको आ लोव्र मटीमे बाक्त। 29 मेकोमी मेको आन ब्वाक्कु हुश सेलानु, मेकेर डा डांड नेल्ल बेक्मा बाक्त। 30 आन रागीमी कुक्कुपुकी जाक्शा, आन पिप आन बाक्तीके सम्म जाक्दीम्मा बाक्त। 31 परमप्रभुमी लोव्र पवानु, आन रागी भुस्ना नु चुरमुमी ब्रीमा बाक्त। 32 मेकोमी रेउ आ पा डा मुप्स यिपदा बाक्त। मिनु मेको रागी नेल्लेमी चिला दाप्पदा बाक्त। 33 मिनु मेकोमी आन अडगुर बोट नु फोव्रशी रवा नेल्ल खतम सेल्शा, रागी नेल्ल डा रवा फस पोक्मा बाक्त। 34 मेकोमी लोव्र पवानु, माले जाक्मा बाक्त। हिक्ने मचाप्चा डा पा माले नु आन चाइक्ब शुश जाक्मा बाक्त। 35 मेकोपुकीमी मेको रागी डा बाक्शो गिग नु फल फुल नेल्ल नेक्गमे बाक्त। 36 मिनु मेकोमी आन डॉइती थिशो तौ सदा बाक्त। आन डॉइती डा बोल डा आल खतम सेला बाक्त।

37 मिनु नोले परमप्रभुमी इस्राएली आन कली सुन चांदी कुरपाइश्शा मेक रे गुंडीमी बाक्त। मिनु मेको रे गूब नेल्ल बोल्यो बाक्मा बाक्त। प्रस्थान १२:३५ 38 मिनु इजीप्ट रागी डा मुरपुकी इस्राएलीपुकी गूशा लमानु, शुश ग्येरसामा बाक्त। मारदे हना मेको आन कली तशा शुश हिंशो बाक्मा बाक्त। 39 मिनु परमप्रभुमी आ मुर आन कली सुम्चा कली गोस्स सोइक्ता बाक्त। मिनु नाक्दो गाक्चा कली मी के थाम गेमी बाक्त। प्रस्थान १४:२० 40 मेको आन पुंडतीके मेको आन कली चिक्ब गेमी बाक्त। मिनु सरीड रे जचा थोवक यिपदा बाक्त। प्रस्थान १६:१३-१५ 41 मेकोमी सेरथे फुल्लु रे ब्वाक्ब बुक्पदा बाक्त। मिनु मेको गोरशो रागीमी खोला खोदेंशो पा शांइसे बाक्त। प्रस्थान १७:६ 42 मारदे हना परमप्रभुमी आ थोक्शा पशो लोव्र नु आ गेय पाइब, अब्राहाम कली मिम्ता बाक्त।

43 मोपा परमप्रभुमी आ योवशो मुर आन कली ग्येरपाइश्शा गुंडीमी बाक्त। मिनु मेकोपुकी कुम्सो पा गूमा बाक्त। 44 मिनु परमप्रभुमी रागी रागी डा मुर आन रागी नु आन शॉप मेको आन कली गेमी बाक्त। 45 मेकोपुकीमी परमप्रभुमी फुल्लुम मुशा ब्रेक्शो लोव्र, आ अरेशो लोव्र टीमेक्ल, दे मोदेंशो पवा बाक्त। परमप्रभु यावे कली ठेयब सेलीन।

### ठेयब सेल्तीके

106 परमप्रभु यावे कली ठेयब सेलीन। गेपुकीमी “गे रिम्शो पाइब बाक्नीनी” दे लोव्र पने। मारदे हना मेको रिम्शो पाइब बाक्ब। मिनु आ दाक्तीके गेना हना यो लीब। भजन संग्रह १००:४-५; प्रस्थान १०७:१; प्रस्थान ११८:१; इतिहास १६:३४ 2 सुमी परमप्रभु यावे आ सक्ति पाइश्शो गेय आ पर्वम देंने चाप्चा डा? सुमी मेको कली ठेयब सेल्तीक नेल्ल देंने चाप्चा डा? यूहन्ना २१:२५; हिब्रू ११:३२ 3 सु सुमी ठीक पा निसाफ पाइनीमी नु गेना हना यो ठीक बाक्नीमी, मेको ग्येरसीशो मुर बाक्नीम।

4 परमप्रभु यावे, गे इन मुर आन कली शिशो पनी ना, आं कली यो मिम्तीन। मेको आन कली प्रॉइनीनु, आं कली यो वारच पन। 5 मिनु मोपा गो इन योवशो मुर आन रिम्शो पा बाक्शो तने चाप्नुड। मिनु इन मुर ग्येरसीशा बाक्शो तशा, ग्येरसीनुड। गो इन योवशो मुर दुम्शा ग्येरसीनुड।

6 गेपुकी नु आंइ किकी पिपीम पाप पाइतक। गेपुकीमी मरिम्शो पा इन अरेशो लोव्र मटिक। दानीएल ९:५ 7 इजीप्ट रागीम बाक्शो आंइ किकी पिपीम इन छक लाक्चा डा गेय ममिम्शो बाक्तेक्म। मिनु इन शुश गेना हना यो दाक्तीके प्रेंशो बाक्तेक्म। मिनु लल समुन्द्रमी नेल्ल क्येडा ठेयब कली गाइश्शा लोव्र पशो बाक्तेक्म। प्रस्थान १४:११-१२ 8 मोदेंशो पाम्तेक्म हना यो, परमप्रभुमी आ नें आ पर्वम मेको आन कली श्येत रे प्रॉइशो बाक्त। मोदेंशो पा आ ठेयब सक्ति कांइशो बाक्त। 9 मेकोमी लल समुन्द्र कली हुइक्तानु, सोव्रशो बाक्त। मिनु मेको आन कली गोरशो रागी खोदेंशो पा,

समुन्द्र डा लां रे खुल्शो बावत। 10 मिनु मेको आन कली आन जोरी सत्रु आन गुड रे प्रौडशो बावत। मोपा आ प्रौडशो मुर दुश्शो बावतेकम। 11 मेको ब्वाक्कुमी आन जोरी सत्रु आन कली सुम्शा साइश्शा, का यो मलीशो बावतेकम। 12 मिनु नोले आ दँशो थमा सुइश्शो बावतेकम। मिनु परमप्रभु कली ठेयब सेल्तीक कुम्सो पशो बावतेकम। प्रस्थान १५:२१

13 तन्न मेकोपुकीमी परमप्रभु आ पशो रीब पा प्रँशो बावतेकम। मेको आ अर्ती नँचा मबिश्शो बावतेकम। 14 मिनु मेकोपुकी गोरशो रागीम बाक्मानु, आन शोव रक सुइश्शो बावत। मिनु परमप्रभु कली गोरशो रागीम नाक्शा कोवशो बावतेकम। गन्ती ११:४-६ 15 मिनु परमप्रभुमी मेको आन पुंडशो गेशो बावत। तन्न मेको आन दातेमी बेक्तीक रोइ सोइश्शो बावत।

16 मिनु मेकोपुकीमी परमप्रभु यावे रे पा योवसीशो मोसा नु हारून आस कली गेहे पशो बावतेकम। गन्ती १६:१-३ 17 मिनु रागी जेशा, दाथान कली दाक्शो बावत। मिनु अबीराम आ हुल कली सुम्शा बावत। गन्ती १६:३१-३५ 18 मिनु मेको आन दातेमी मी गूशा, परमप्रभु आ अरेशो मपाइब आन कली ग्राव गु दाक्शो बावत।

19 मेकोपुकीमी हारेब डांडाम बाछा का सेल्शा, मेको मूर्ति कली पूजा पशो बावतेकम। प्रस्थान ३२:१-६ 20 मेकोपुकीमी आन मान पशो परमप्रभु आ पा डा घांस ब्वाइब ब्यफ आ मूर्ति कली ठेयब सेल्शो बावतेकम। रोमी १:२३ 21 मेकोपुकीमी आन कली श्येत रे प्रौडब नु इजीप्तम ठेयब गेय पाइब आन परमप्रभु कली प्रँशो बावतेकम। ब्यवस्था ३२:१८ 22 मेकोमी हाम आ रागीमी छक लाक्वा डा गेय नु लल समुन्द्र आ नेक्था शुश हिंचा डा गेय पशो बावत। 23 मोपतीके मेकोमी “मेको आन कली खतम सेल्लुड” दे मिश्शो बावत। तन्न आ योवशो मुर मोसामी “मेको आन कली मोदँशो मपचा” दे पुंडशो बावत। मिनु आ गाइश्शो नाइश्शो बावत। प्रस्थान ३२:११,३२; ब्यवस्था ९:२५-२९; इजीकीएल १३:४-५

24 मिनु नोले मेकोपुकीमी परमप्रभु आ गेशो रागी मदाक्शो बावतेकम। आ धोक्शा पशो लोव थमा मसुइश्शो बावतेकम। गन्ती १४:२-४; ब्यवस्था ८:७-१० 25 मेकोपुकीमी आन ताम्बुम गन गन पशो बावतेकम। मिनु परमप्रभु यावे आ दँशो मटिशो बावतेकम। 26 मोपतीके मेको आन कली “गो इन कली गोरशो रागीम साइक्नुड। 27 मिनु इन चच युइ आन कली रागी रागीम फ्राइनुड” दे कसम जशो बावत।

28 मिनु मेकोपुकीमी पेओर डा बाल कली पूजा पशो बावतेकम। मिनु बेक्शो मुर आन कली चढेशो जशो बावतेकम। गन्ती २५:३ 29 मेकोपुकीमी आन पतीकेमी परमप्रभु कली गाइक्पाइश्शो बावतेकम। मिनु मेको आन दातेम बेक्तीक रोइ गूशो बावत। 30 मिनु फिनेहास बोक्शा परमप्रभु कली पुंडशो बावत। मिनु मेको मुर बेक्तीक रोइ नाइसीशो बावत। गन्ती २५:१२-१३ 31 मेको आ पुंडतीके इसाएलीपुकीमी “फिनेहास ठीक पाइब बाक्ब” दे शुश पाला सम्म मिश्शो बावतेकम। 32 मेकोपुकीमी मेरीबा डा ब्वाक्कु आ नेक्था परमप्रभु कली गाइक्पाइश्शो बावतेकम। मोपतीके मेको आन पर्वम मोसा कली मरिश्शो दुश्शो बावत। गन्ती २०:२-१३ 33 मेकोपुकीमी मोसा कली गाइक्पदमेनु, मोसाम मरिश्शो लोव पशो बावत।

34 मिनु मेकोपुकीमी परमप्रभु यावे आ दँशो खोदँशो पा जात जात डा मुर आन कली मसदमे बावत। ब्यवस्था ७:१२; ब्यवस्था १२:२-३; न्यायाधीस १:२८; न्यायाधीस २:२३-३:६ 35 मेकोपुकीमी रागी रागी डा मीश आल आन कली ग्युंवे पामे बावत। मिनु रागी रागी डा मुर आन पशो यो पामे बावत। 36 मेकोपुकीमी मेको आन मूर्ति आन कली पूजा पामे बावत। मिनु मेको आन कली ग्याइल खोदँशो दुम्मावत। 37 मेकोपुकीमी आंम तमी तौ वोल आन कली चढेमे बावत। २राजा २१:६, १६ 38 मेकोपुकीमी आन पाप मपशो तमी तौ आन कली कनानी आन मूर्ति कली चढेशा, आन हुश जारदमे बावत। मेको आन हुशेमी मेको रागी ग्रांरा दिशो दुम्मावत। 39 मोपा मेको आन गेयम पतीके ग्रांरा दिशो दुम्मा, तेल्लेम खोदँशो दुम्मा बावत।

40 मोपतीके परमप्रभु यावे आ मुर नु गाइक्ता बावत। आ योवशो मुर आन कली तशा ग्रांरा दिमावत। 41 मिनु मेकोमी मेको आन कली रागी रागी डा मुर आन गुइम गेमी बावत। मिनु मेको आन जोरी सत्रुम मेको आन कली सासन पामे बावत। न्यायाधीस २:१४ 42 मिनु आन जोरी सत्रुमी मेको आन कली दिप्शा, आन सक्तिम हुकुम पामे बावत। 43 मिनु परमप्रभुमी मेको

आन कली शुश खेयप प्रौडमी बावत। तन्न मेकोपुकीमी गेनायो परमप्रभु कली मटीमे बावत। मेको आन मरिश्शो पतीकेमी खतम दुम्मा बावत। 44 तन्न परमप्रभुमी मेको आन डाक्शो नँशा, आन श्येत जशो रे प्रौडमी बावत। 45 मिनु मेकोमी मेको आन कली पशो कबल मिम्ता बावत। मिनु मेको आ गेना हना यो शुश दाक्तीक डा शिशी कौइदीमी बावत। 46 मिनु परमप्रभुमी इसाएली आन कली सासन पाइब आन थुंमी शिशी पतीक कुर पवा बावत। 47 मिनु गे “परमप्रभु यावे, आंइ परमप्रभु, आंइ कली प्रोनीन। मिनु इन कली ‘गे रिश्शो पाइब बाक्नीनी’ दँचा कली नु इन नँ ठेयब सेल्शा ग्येरसीचा कली आंइ कली रागी रागी रे खुप्तीन। ब्यवस्था ३०:३; १इतिहास १६:३५

48 परमप्रभु यावे, इसाएली आन परमप्रभु गेना हना यो ठेयब बाक्ब। मिनु मुरपुकीमी ‘मोदँशो दुम्ब। आमेन’ देनीन” परमप्रभु यावे ठेयब बाक्ब। भजन संग्रह ४१:१४; १इतिहास १६:३६

“गे रिश्शो पाइब बाक्नीनी” दँशो

107 गे परमप्रभु यावे कली “गे रिश्शो पाइब बाक्नीनी” दे कुम्सो पने। मारदे हना मेको आ दाक्तीके गेना हना यो लीब। भजन संग्रह १०६:१ 2 परमप्रभु यावेमी श्येत रे प्रौडचा पुंडसीशोपुकीमी मोपा कुम्सो पचा माल्नीम। 3 मेको आन कली रागी रागी रे खुप्ताक्मी। पूर्ब, पच्छिम, उत्तर, दक्खिन नु ब्वाक्कु बुक्तीके रे नु ब्वाक्कु शाइक्तीक रे खुप्ताक्मी।

4 का निक्शी गोरशो रागी मेर हिरशा, मुर बाक्तीक सहर मथिदेम। 5 मेकोपुकी जचा तूचा मतथु बेक्चा चिक्ताक्मे। 6 मोपा श्येत जशा, परमप्रभु यावे कली पुंडतेकम। मिनु मेकोमी मेको आन कली आन श्येत रे प्रौडतु। 7 मेकोमी मेको आन कली पित्थ लांम खुल्तीमी। मिनु मुर बाक्तीक सहरम चाक्दीत्तीमी। 8 मेकोपुकीमी परमप्रभु यावे कली “गे रिश्शो पाइब बाक्नीनी” दँचा माल्नीम। मारदे हना मेकोमी मुर आन कली गेना हना यो दाक्शा, मेको आन कली वारच पा, छक लाक्वा डा गेय पाइब। 9 मेकोमी तूतू दाक्ब आन कली तूपाइक्ब। मिनु शोवलु बेक्शो आन कली ब्रोवशो जचा थोव्रकमी रूपाइक्ब। लूका १:५३

10 का निक्शी श्येत जशा छिडछिडम बावतेकम। चोक्चा पुंडसीशोपुकी साडलोम पाइक्चा पुंडसीशा, श्येत जशो बावतेकम। 11 मारदे हना मेकोपुकीमी परमप्रभु आ लोव मटिशो बावतेकम। नेल्ल क्येडा ठेयब आ अर्ती मननेम। 12 मोपतीके मेकोपुकीमी शुश गेय पचा माल्तेकम। मेकोपुकी गोल्तेकम। तन्न मेको आन कली वारच पाइब सुइ मबाक्म। 13 मोपा श्येत जशा, परमप्रभु यावे कली पुंडतेकम। मिनु मेकोमी मेको आन कली आन श्येत रे प्रौडतु। 14 मेकोमी मेको आन कली आन श्येत नु छिडछिड रे गुंडताक्मी। मिनु मेको आन साडलो प्रौडक्तु। 15 मेकोपुकीमी परमप्रभु यावे कली “गे रिश्शो पाइब बाक्नीनी” दँचा माल्नीम। मारदे हना मेकोमी मुर आन कली गेना हना यो दाक्शा, मेको आन कली वारच पा, छक लाक्वा डा गेय पाइब। 16 मेकोमी कांसा के लाप्चोपुकी प्रोल्ब। मिनु फलाम के बार जिक्ब।

17 का निक्शी मूर्ख दुम्शा, आंम आन मरिश्शो पतीकेमी श्येत जाम्तेकम। 18 मेकोपुकीमी जचा थोव्रक ग्रांरा दिशा, मारदे जत मदाक्म। मिनु बेक्चा चिक्ताक्म। 19 मोपा श्येत जशा, परमप्रभु यावे कली पुंडतेकम। मिनु मेकोमी मेको आन कली आन श्येत रे प्रौडतु। 20 मेकोमी आ लोव सोइश्शा, मेको आन कली सापाइक्तु। मेको आन कली बेक्चा रे प्रौडतु। 21 मेकोपुकीमी परमप्रभु यावे कली “गे रिश्शो पाइब बाक्नीनी” दँचा माल्नीम। मारदे हना मेकोमी मुर आन कली गेना हना यो दाक्शा, मेको आन कली वारच पा, छक लाक्वा डा गेय पाइब। 22 मेकोपुकीमी “गे रिश्शो पाइब बाक्नीनी” दे चढेमेक्ल। मिनु परमप्रभु आ पशो नेल्ल ग्येरशा कुम्सो पा शँदमेक्ल।

23 का निक्शी जहाज डोइश्शा, समुन्द्रम लाम्तेकम। मेकोपुकी ग्याप्ब लेयब दुम्शा, ठेयब समुन्द्रम गावतेकम। 24 परमप्रभु यावेमी ठेयब समुन्द्रम मार मार छक लाक्वा डा गेय पवा, मेको ताम्तेकम। 25 मिनु मेकोमी अरेशा, ठेयब फश गिवार पपाइक्तु। मिनु ठेयब समुन्द्र आ छाल पोक्तु।

26 मेकोपुकी सरीड सम्म जाव्दीत्तेकम्। मिनु लेंशा ठेयब समुन्द्रमी दोक्तेकम्। मिनु मेकोपुकी शुश हिंशा वाम ग्याम दुम्तेकम्। 27 मिनु मेकोपुकी दुक्शो मुर खोदेशो पा गोल्चा चिक्शा गाक्तेकम्। मिनु मारेड पने मचाब्ब दुम्तेकम्। 28 मोपा श्येत जशा, परमप्रभु यावे कली पुंडतेकम्। मिनु मेकोमी मेको आन कली आन श्येत रे प्रोंडु। 29 मेकोमी फश गिवार दिक्पाइकु। मिनु ठेयब समुन्द्र आ छाल दिक्तेकम्। 30 मिनु फश गिवार दिक्मेनु, मेकोपुकी ग्येरसाकम्। मिनु मेकोमी मेको आन कली आन जहाज नाइक्तीकेम चाव्दीत्तु। 31 मेकोपुकीमी परमप्रभु यावे कली “गे रिम्शो पाइब बाक्नीनी” देंचा माल्नीम। मारदे हना मेकोमी मुर आन कली गेना हना यो दाक्शा, मेको आन कली वारच पा, छक लाक्चा डा गेय पाइब। 32 मेकोपुकीमी मुर आन गुम्तीकेमी परमप्रभु कली ठेयब सेल्मेकल। खाल्पा आन दातेमी “परमप्रभु ठेयब बाक्ब” देंमल।

33 मेकोमी खोला आन कली गोरशो रागी सेल्ब। ब्वाक्कु बुक्तीके आन कली सोव्रशो रागी दुम्पाइक्ब। 34 मेकोमी ग्रेल्ब रू कली हिक्सी रू सेल्ब। मारदे हना मेकेर बाक्ब मुर आ अरेशो मटीब बाक्नीम। उत्पत्ती १९:२४-२५ 35 मेकोमी गोरशो रागी कली दोम्ली बाक्शो रागी सेल्ब। मिनु थाम्पा सोव्रशो रागीम शुश ब्वाक्कु बुक्पाइक्ब। 36 मेकेर शोव्रलु बेक्शो मुर आन कली बाक्चा गेब। मिनु मेकोपुकीमी मेकेर बाक्तीक सहर सेल्नीम। 37 मेकोपुकीमी रूमी वांचेर शोक्नीम। अडगुर ख्नुमीम। मिनु मेको नेल्ल शुश ग्रेल्नीम। 38 मेकोपुकी परमप्रभु आ आसीक तशा, सोशा बोशा दुम्नीम। मिनु आन बी ब्यफ आन कली यो शुश दुम्पाइक्ब।

39 मिनु मेकोपुकी दिप्चा पुंडसीतीके नु श्येत जतीके शुश मलीशो बाक्तेकम्। 40 मिनु परमप्रभुमी मेकेर डा हुकुम पाइब आन कली लां मबाक्शो गोरशो रागीम गाक्पाइक्तीमी। अय्युब १२:२१ 41 तन्न मेकोमी श्येत जाइब आन कली श्येत रे प्रोंडु। मिनु मेको आन खिं डा मुर आन कली भेडा आन हुल खोदेशो पा शुश सेल्ब। 42 मिनु रिम्शो थुं पाइश्शो मुरपुकी मेको तशा, ग्येरसीनीम। मिनु परमप्रभु आ अरेशो मटीब कोव्रस डा कोव्रस दुम्शा ब्वाक्ने मचाप्नीम। अय्युब २२:१९-२० 43 सु जोक्ब तुइक्ब बाक्मे, मेकोमी एको लोव्र रुबल। मिनु परमप्रभु यावे आ गेना हना यो दाक्तीके आ पर्बम मिन्तल।

ठेयब सेल्तीक कुम्सो

दाऊद आ कुम्सो।

108 परमप्रभु, गो थमा सुइक्ब दुम्ती। गो थमा पा इन नोले खोइक्ब दुम्ती। गो ताप्तीक ताप्शा कुम्सो पाइनुड। आं थुं मुल सेंसो!

भजन संग्रह ५७:८-१२ 2 ठेयब तार पाइश्शो ताप्तीके नु बीना बोक्कीस। गो सुनी कली सेंपाइक्नुड। 3 परमप्रभु यावे गो जात जात डा मुर आन दातेमी इन कली “गे रिम्शो पाइब बाक्नीनी” देंनुड। मिनु रागी रागी डा मुर आन दातेमी इन कली ठेयब सेल्शा कुम्सो पाइनुड। 4 मारदे हना इन गेना हना यो दाक्तीक सरीड खोदेशो ठेयब बाक्ब। मिनु इन दाक्शा मप्रोंडुतीके गोस्स खोदेशो पा इर डोन लाइब। भजन संग्रह ३६:६; भजन संग्रह ५७:११

5 परमप्रभु, गे सरीड क्येडा यो ठेयब बाक्नीनी। इन छेडछेड रागी नेल्ल आन तार बाक्ल। 6 मिनु इन सक्तीमी आंइ कली वारच पने। मिनु आं लोव्र लेत्तीनी। इन दाक्शोपुकी ब्रोंडुमल। भजन संग्रह ६:७-१४

7 परमप्रभुमी आ बाक्तीक रे “गे ग्येरसीशा शेकेम कली योक्नुड। मिनु सुक्कोथ डा दिम पुक्शा, योक्नुड। 8 गिलाद आं के बाक्ब। मिनु मनरसे यो आं केन बाक्ब। एफ्राइम आं फलाम के ताकी बाक्ब। यहूदा आं राज दन्ड बाक्ब। 9 मोआब आं ब्वाक्कु तेम्तीक बोस बाक्ब। गो एदोम तार आं जुत्ता ब्वारनुड। गो पलिस्ती आन कली ग्राशा, ग्येरशा ग्रीनुड” देंत।

10 सुम आं कली गारो हिरशो सहर सम्म चाव्दीप्चा? सुम आं कली लां कोंइशा एदोम सम्म चाव्दीप्चा? 11 परमप्रभु गे आंइ कली प्रोंडुतीनी। मुल गे आंइ लडाइ पाइब नु मगाक्नीनी। 12 गे आंइ जोरी सत्रु आन कली फ्रुचा कली वारच पने। मारदे हना मुर आन वारच पशो शोर गाक्शो बाक्ब। 13 गो परमप्रभु आ वारच पशोम ला ग्रानीकी। मिनु मेकोमी आंइ जोरी सत्रु आन कली दिम्ब।

क्येक्क लेत्चा कली पुंडशो लोव

कुम्सो पपाइक्ब कली दाऊद आ कुम्सो।

109 “परमप्रभु, गो इन कली ठेयब सेल्नुड। गे सिक्सी पा मबाक्कीन। 2 मारदे हना इन अरेशो मटीब नु जोल पाइबपुकीमी आं पर्बम जोल पा लोव्र पाइनीम। 3 मेकोपुकीमी आं कली काइ मदाक्थु, लोव्र पा, आं कली जिचा तोशा मोशा ग्राम्नीम। 4 मेकोपुकीमी आं दाक्शो आ पा डा, आं कली दोस गेनीम। मो हना यो गो मेको आन पर्बम पुंडनुड। 5 मोपा मेकोपुकीमी आं रिम्शो पाइश्शो आ पा डा मरिम्शो पाइनीम। आं दाक्शो आ पा डा आं कली काइ मदाक्नीम।

6 मेकोपुकीमी मेको कली दोस गेचा कली परमप्रभु आ अरेशो मटीब का वोतीन। मेको कली दोस गेचा कली मेको आ ग्युरा गे राप्चा माल्ब। मत्ती ५:४३,४४; लूका २३:३४ 7 मिनु मेको आ निसाफ दुम्मेनु, मेको दोस ताइब दुम्ल। मिनु मेको आ परमप्रभु कली पुंडतीक लोव्र पाप दुम्ल। 8 मेको आ ब्रोंडुतीके नाक्त इक्का ला दुम्ल। मिनु मेको आ गेय अर्कोम पवल। प्रेरित १:२० 9 मेको आ तमी तौ रोम रोइक्च दुम्मल। मिनु मेको आ मीश वोंइश बेक्शो मीश दुम्ल। 10 मिनु आ तमी तौ हिरशा पुंडशा जाइब दुम्मल। मेको आन ब्रेशो खिं रे यो खेरचा पुंडसीमल। 11 मेको कली जेर गेबमी मेको आ मारेड मारेड नेक्गल। अरु मुरुमी मेको आ चेम्शो नेल्ल रोइक्तमेक्ल। 12 सुइमी मेको कली शिशी मकोइदमेक्ल। आ तमी तौ आन कली यो शिशी मपामेक्ल। 13 मेको आ खिं डा मुर नेल्ल क्याम्सीमल। मिनु आ तमी तौ आन पालाम मेको आन नें क्याम्सेक्ल। इजीकीएल १८:२०-२३ 14 मिनु परमप्रभु यावेमी मेको आ किकी पिपी आन पशो पाप मिम्चा माल्ब। मेको आ ममा आ पशो पाप मक्याम्सेक्ल। प्रस्थान २०:५ 15 मेको आन पाप गेना हना यो परमप्रभु यावे आ डोंडुती लील। मिनु सुइमी मेको आन कली रागीम ममिम्तमेक्ल। 16 मारदे हना मेकोमी काइ शिशी मपव। तन्न प्रुडग, श्येत जाइब नु थुं लुक्च लशो मुर आन कली साइक्चा कली खेदा पाप्नु। 17 मेकोमी सराप चीले पचा दाक्ताक्व। मिनु मेको सराप चीले रल। मेकोमी आसीक गेचा मदाक्त। मोपतीके आसीक मेको रे डोन बाक्ल। 18 मेकोमी सराप चीले वा फेक्सीशो खोदेशो पा फेक्साक्व। सराप आ रांम ब्वाक्कु खोदेशो पा बाक्ल। तेल खोदेशो पा मेको आ रुशेम ब्रील। गन्ती ५:२४ 19 मेकोमी सराप चीले आ वा खोदेशो पा फेक्सेक्ल। मिनु किप्शुर खोदेशो पा नाक्त किंत किंत किम्सेक्ल।

20 परमप्रभु यावेमी आं कली दोस गेब नु आ पर्बम मरिम्शो लोव्र पाइब कली मोदेशो सजाइ गेवल। 21 तन्न परमप्रभु यावे, परमप्रभु, गे इन नें आ पर्बम आं कली वारच पाइय्यीनी। मारदे हना इन गेना हना यो दाक्तीके ठेयब बाक्ब। 22 गो प्रुडग नु श्येत जाइब दुम्ती। मिनु आं थुं खाइश्शो बाक्ब। 23 गो नां लाक्शो ना डा वांकु खोदेशो पा जाम्शो बाक्नुड। थुर थुर पाइश्शो सल्हा खोदेशो बाक्नुड। 24 गो माइजा बाक्डानु, आं खोइली योक्शो बाक्ब। मिनु गेयशो बाक्नुड। 25 आं कली दोस गेबपुकी आ कली तशा गाइक्नीम। मिनु आन पिया हिम्नीम।

26 परमप्रभु यावे, आं परमप्रभु, वारच पाइय्यीनी। इन गेना हना यो दाक्तीकेमी आं कली प्रोंडुतीनी। 27 मेकोपुकीमी ‘परमप्रभु यावेम आं कली वारच पाइब’ दे तुइक्तमेक्ल। 28 मेकोपुकीमी सराप चीले पामेक्ल। तन्न गे आसीक गेने। मेकोपुकी बोक्मानु, मुने दोक्मल। तन्न इन गेय पाइब ग्येरसीब। लूका ६:२७-२८ 29 आं कली दोस गेब आन कुल मुनेम सुम्सीमल। मिनु आन मुने दोक्तीके फेक्तीके वा खोदेशो पा फेक्सीमल। 30 गो परमप्रभु यावे कली ‘गे थम रिम्शो पाइब बाक्नीनी’ देंनुड। शुश मुर आन दातेमी गो मेको कली ठेयब सेल्नुड” देंती। 31 मारदे हना मेको श्येत जाइब आन कली साइक्ब आन गुइ रे प्रोंइशा वारच पाइब बाक्ब।

परमप्रभुम पिप कली अधिकार गेब

दाऊद आ कुम्सो।



110 परमप्रभु यावेमी, आं परमप्रभु कली “गे आं ग्युरा गे निस्सो।  
मिनु गो इ जोरी सत्रु आन कली इ खोइल थेक्तीके सेल्लुडमी।  
मत्ती २२:४४; प्रेरित २:३४; हिब्रू १:१३; १कोरिन्थी १५:२५; फिलिप्पी २:८-११; हिब्रू १०:१२-१३

2 परमप्रभु यावेमी सियोन रे पा इन सक्ति डा राज दन्द दिब। मिनु गे इन जोरी सत्रु आन कली सासन पने” देंत। भजन संग्रह २:६<sup>३</sup> गे लडाइ पनी नाक्ती इन मुर आन थुंम ग्येरशा इन नोले खोइक्नीम। सुनी डा सीत खोदेंशो पा इन रागी डा ठिटापुकी खुम्सीशा इन नेक्था जाक्नीम।<sup>४</sup> मिनु परमप्रभु यावेमी “गे मेल्कीसेदेक खोदेंशो पा गेना हना यो चढेब दुम्नेवे” दे कसम जाप्टु। मेकोमी आ थुंम फाइक्व। उत्पत्ती १४:१८-२०; हिब्रू ५:६,१०; हिब्रू ६:२०; हिब्रू ७:१७,२१<sup>५</sup> परमप्रभु इन ग्युरा गे बाक्व। मेको गाइक्ता नाक्ती पिप आन कली खतम पोक्व। भजन संग्रह २:२,५,९<sup>६</sup> मेकोमी रागी रागी डा मुर आन कली निसाफ पाइब। मिनु मेको आन रागी बेक्शो मुरुम प्रिं। मिनु बेक्शो मुर आन पिया रागी मेर फ्राइब। दानीएल २:४४<sup>७</sup> मेकोमी लां आ नेक्था डा खोला डा ब्वाक्कु तूब। मोपतीके मेको सक्ति पाइश्शो दुम्शा ग्राब।

परमप्रभु कली ठेयब सेल्लिक कुम्सो

111 परमप्रभु यावे कली ठेयब सेलीन। गो रिम्शो थुं पाइश्शो मुर आन दातेमी आं थुं नेल्लेमी “परमप्रभु, गे रिम्शो पाइब बाक्नीनी” दे गुम्तीकेम देंनुड।<sup>२</sup> परमप्रभु यावे आ गेय थम ठेयब बाक्नीम। सु सुम मेको कली दाक्नीमी, मेकोपुकीमी मेको शेंसीनीम।<sup>३</sup> मेको आ गेय ठेयब नु मान पाइक्वा पुंडसीब बाक्नीम। मिनु परमप्रभु आ ठीक पतीके गेना हना यो लीब।<sup>४</sup> मेकोमी आ छक लाक्वा डा गेय मिम्पाइश्शो बाक्व। परमप्रभु यावे दाक्व नु शिशी पाइब बाक्व। प्रस्थान १२:१-२२<sup>५</sup> मेकोमी आ कली मान पा हिंन आन कली जचा गेब। मिनु आ पशो कबल गेना हना यो मिम्ब। भजन संग्रह १४५:१५<sup>६</sup> मेकोमी आ मुर आन कली रागी रागी डा मुर आन शोंप गेशा, आ सक्ति कौडिशो बाक्व।<sup>७</sup> मेको आ गेय नेल्ल आ देशो खोदेंशो नु ठीक बाक्नीम। आ अरेशा ब्रेक्शो लोत्र नेल्ल थमा सुइक्वा माल्शो बाक्नीम।<sup>८</sup> मेको गेना हना यो लीब बाक्नीम। मुरपुकीमी मेको मप्रौडथु, आन थुं नेल्लेमी टिचा माल्नीम।<sup>९</sup> मेकोमी आ मुर आन कली श्येत रे प्रौडतु। मेकोमी आ पशो कबल गेनायो मक्याम्चा कली सेल्शो बाक्व। मेको आ नें का ला मान पा हिंन डा बाक्व।<sup>१०</sup> परमप्रभु यावे कली मान पा हिंन तुइक्व दुम्वा कली गोतीक बाक्व। मिनु सु सुमी मेको पाइनीमी मेको शुश रुख दुम्नीम। परमप्रभु कली ठेयब सेल्लिके गेना हना यो लीब। हितोपदेस १:७

दाक्वा मप्रौडब आन ग्येरशो

112 परमप्रभु यावे कली ठेयब सेलीन। सु परमप्रभु यावे कली मान पा हिंन, मेको ग्येरसीशो मुर बाक्व। मेकोमी परमप्रभु आ शेंशो शुश दाक्व। भजन संग्रह १:२; हितोपदेस २०:७<sup>२</sup> मेको आ चच युइ रागीम ठेयब मुर दुम्नीम। रिम्शो थुं पाइश्शो मुर आन पाला आसीक राइनीम।<sup>३</sup> मेको आन खिंमी शोंप बाक्व। मेको आन ठीक पतीके गेना हना यो लीब।<sup>४</sup> रिम्शो थुं पाइश्शो मुर छिडछिडम बाक्तेक्म हना यो, छेडछेड दुम्ब। मेको मुर आन कली दाक्व, शिशी पाइब नु ठीक पाइब बाक्नीम।<sup>५</sup> हाइश्शो दुम्शा, गेब मुर आन कली रिम्शो दुम्ब। मेकोपुकीमी आन गेय ठीक पतीकेमी पाइनीम।<sup>६</sup> ठीक पाइबपुकी गेनायो मप्रेंसीनीम। मेको आन कली मिम्तीके गेना हना यो लीब।<sup>७</sup> मेको मरिम्शो लोत्र नेंशा, महिनीम। मेको आन थुं नेल्लेमी परमप्रभु यावे सक्ति पाइश्शो बाक्व, दे तुइक्नीम।<sup>८</sup> मेको आन थुं ग्येतथ लुक्च मपथु, महिनीम। मिनु नोले आन जोरी सत्रु आन कली ब्रुशो ताइनीम। भजन संग्रह ९१:८<sup>९</sup> मेकोपुकीमी हाइश्शो थुं पा पुडग आन कली मार मार गेम्तेक्म। मेको आन ठीक पतीके गेना हना यो लीब। मेको मान ताइब बाक्नीम। २कोरिन्थी ९:९<sup>१०</sup> मिनु परमप्रभु आ अरेशो मटीबपुकीमी मेको नेल्ल तशा आन थुं खुरसीनीम। मेको आन ख्रुइ शेप्शा, थाम्पा गाइक्नीम। मेको आन मिम्शो गेनायो मजाक्दीप्व।

परमप्रभु आ मान ततीके

113 परमप्रभु यावे कली ठेयब सेलीन। परमप्रभु यावे आ गेय पाइबपुकी परमप्रभु यावे आ नें ठेयब सेलीन। गे “परमप्रभु यावे आ नें ठेयब बाक्व” देनीन।<sup>२</sup> परमप्रभु यावे आ नें मुल रे गेना हना यो ठेयब सेल्मेक्व।<sup>३</sup> नां दाप्तीक रे नां पेरतीक सम्म परमप्रभु यावे आ नें ठेयब सेल्वा माल्नीम। भजन संग्रह ५०:१<sup>४</sup> परमप्रभु यावे रागी रागी डा नेल्ल आन क्येडा ठेयब बाक्व। मेको आ छेडछेड स्वर्ग क्येडा यो इर बाक्व।<sup>५</sup> परमप्रभु यावे, आंइ परमप्रभु खोदेंशो अर्को सु बाक्वा डा? सु नेल्ल क्येडा इर निश्शो बाक्वा डा? प्रस्थान १५:११; यसैया ५७:१५<sup>६</sup> मेकोमी सरीड नु रागी कोत्रब।<sup>७</sup> मेकोमी पुडग आन कली फुरकुम निश्शो रे पोक्व। मिनु श्येत जाइब आन कली ग्रांरा दितीक रे पोक्व। १सामुएल २:८; लूका १:४८; उत्पत्ती ४१:४०-४१<sup>८</sup> मेको आन कली आ मुर आन ठेयब मुर नु निप्पाइक्वा कली पोक्व।<sup>९</sup> मिनु मेकोम आल मथीब मीश मुर आन कली ग्येरसीशो ममा सेल्ब। परमप्रभु यावे कली ठेयब सेलीन। उत्पत्ती २१:२ १सामुएल १:२०; लूका १:५७-५८

इसाएलीपुकी इजीप्त रे ब्रौडिशो

114 इसाएली इजीप्त रे ब्रौडिशो जाक्मानु, याक्व आ खिं डा मुर अर्को जात डा लोत्र ब्वाक्तीक रे गूशा जाक्मानु, प्रस्थान १२:४१<sup>२</sup> यहूदा परमप्रभु आ बाक्तीक नु इसाएल आ राज्य दुम्त।<sup>३</sup> मोदेंशो दुम्शो तशा समुन्द्र प्रोक्त। यर्दन खोला दूली पा शाइक्व। प्रस्थान १४:२१-२२; यहोसु ३:१३,१६<sup>४</sup> डांडा बोका खोदेंशो पा प्रेक्तेक्म। पहाड भेडा खोदेंशो पा प्रेक्तेक्म।<sup>५</sup> समुन्द्र, गे मारदे प्रोक्डे? यर्दन खोला, मारदे दूली गे शांइसे? यहोसु ४:२३-२४<sup>६</sup> डांडा गे मारदे बोका खोदेंशो पा प्रेक्नी? पहाड गे मारदे भेडा खोदेंशो पा प्रेक्नी? रागी, परमप्रभु आ डौंइती खिंखि पावो। याक्व आ परमप्रभु आ डौंइती खिंखि पावो। प्रस्थान १९:१८<sup>८</sup> मेकोमी सेरथे फुल्लु कली फाइश्शा, ब्वाक्कु देम्तीके सेल्लु। मिनु शेराल फुल्लु फाइश्शा, ब्वाक्कु बुक्तीके सेल्लु। प्रस्थान १७:६

परमप्रभु यावे ला परमप्रभु बाक्व

भजन संग्रह १३५:१५-२०

115 परमप्रभु यावे, आंइ कली ममाइ, इन नें ठेयब सेल्वा गेने। इन गेना हना यो दाक्तीके नु दाक्शा मप्रौडतीके आ पर्बम इन नें ठेयब सेल्वा माल्शो बाक्व।<sup>२</sup> रागी रागी डा मुरपुकीमी “मेको आन परमप्रभु ते बाक्म?” दे मारदे हिल्लो पाइनीमी? भजन संग्रह ४२:४

<sup>३</sup> आंइ परमप्रभु स्वर्गम बाक्व। मेकोमी मार दाक्ता, मेको पाइब।<sup>४</sup> मेको आन मूर्तिपुकी मुर आन गुडम सेल्शो सुन नु चांदी के बाक्नीम। ब्यवस्था ४:२८; यसैया ४४:९-२०<sup>५</sup> मिनु मेको आन के शोत्र बाक्नीम, तन्न ब्वाक्ने मचाप्नीम। मिक्च बाक्नीम, तन्न तने मचाप्नीम।<sup>६</sup> मिनु मेको आन के नोफा बाक्नीम। तन्न नेंने मचाप्नीम। नें बाक्नीम, तन्न नाम्ने मचाप्नीम।<sup>७</sup> मेको आन के गुड बाक्नीम, तन्न सुल्ने मचाप्नीम। खोइल बाक्नीम, तन्न गाक्ने मचाप्नीम। मेकोपुकीमी आन शोत्र रे मारेइ सेंदा गुंइने मचाप्नीम।<sup>८</sup> मेको आन कली सेल्ब यो मोदेंशो न बाक्नीम। मिनु मेको आन कली थमा सुइक्व यो मोदेंशो न दुम्नीम।

<sup>९</sup> गे इसाएलीपुकी, परमप्रभु यावे कली थमा सुतीन। मेको इन कली वारच पाइब नु तेक्तीक बाक्व।<sup>१०</sup> हारून आ खिं डा मुरपुकी, परमप्रभु यावे कली थमा सुतीन। मेको इन कली वारच पाइब नु तेक्तीक बाक्व।<sup>११</sup> सु सुम परमप्रभु यावे कली मान पा हिंशा, थमा सुइक्नीमी, मेको आन कली वारच पाइब नु तेक्तीक बाक्व।

<sup>१२</sup> परमप्रभु यावेमी आंइ कली मिम्ब। मिनु आसीक गेब। मेकोमी इसाएल डा मुर आन कली आसीक गेब। मेकोमी हारून आ खिं डा मुर आन कली आसीक गेब।<sup>१३</sup> मेकोमी परमप्रभु यावे कली मान पा हिंन आइक्व ठेयब नेल्ल आन कली आसीक गेब।

14 परमप्रभु यावेमी इन कली नु इन आल आन कली सोशा बोशा दुम्पदल। 15 सरीड नु रागी सेल्ब परमप्रभु यावेमी इन कली आसीक गेवल। भजन संग्रह १३४:३

16 स्वर्ग परमप्रभु यावे केन बाक्ब। तन्न रागी चहिं मुर आन कली गेशो बाक्ब। 17 बेक्शो मुर नु बेक्शो मुर आन बाक्तीकेम लाइबपुकीमी परमप्रभु यावे कली ठेयब मसेल्नीम। यसैया ३८:१८ 18 तन्न गो दा मुल रे गेना हना यो परमप्रभु यावे कली ठेयब सेल्नीकी। परमप्रभु यावे कली ठेयब सेलीन।

परमप्रभु कली ठेयब सेल्शो

116 गो परमप्रभु यावे कली दाक्नुड। मारदे हना मेकोमी आं पुंडशो नु ब्रेशो नेशो बाक्ब। 2 मेकोमी आं लोव नेंतु। मोपतीके गो ब्रोंडडा सम्म मेको कली पुंडशा लोव पाइनुड। 3 गो बेक्वा चिक्शो बाक्ती। हेररा तुरसुम लाइक्वा पुंडशीशो बाक्ती। सुर्ता पतीके नु हिंतीके थुंम सुम्शो बाक्ती। 4 मेना गो परमप्रभु यावे आ नें थोशा “परमप्रभु यावे, आं कली ब्रोंडचा गेयीनी” दे पुंडता।

5 परमप्रभु यावे शिशो पाइब नु ठीक पाइब बाक्ब। आंइ परमप्रभु शुश दाक्ब बाक्ब। 6 परमप्रभु यावेम आइक्व थुं पाइशो आन कली कोवब। आं थुं लुक्व लमेनु, मेकोमी आं कली श्येत रे प्रोंडती। 7 आं थुं लेंशा नांडसो। मारदे हना परमप्रभु यावेमी इ कली रिम्शो पाइशो बाक्ब। भजन संग्रह ४२:६

8 गे आं सोक्त कली बेक्वा रे प्रोंडशो बाक्तीनी। आं कली डाक्तीक नु दाइल पाइक्तीक रे प्रोंडतीनी। 9 गो ब्रोंडशो मुर आन बाक्तीक रागीमी परमप्रभु यावे आ डोंडती गाक्नुड। भजन संग्रह १४२:६ 10 गो शुश श्येत जशा यो, आं थमा सुइक्तीक मप्रोनु। 11 गो सुर्ता पा श्येत जडानु “मुर नेल्ले जोल पाइब ला बाक्नीम” देंती। रोमी ३:४

12 परमप्रभु यावेमी आं कली गिश रिम्शो पाइय्यी, गो मेको आ पा डा मेको कली मार गेनुडा? 13 गो “गे आं कली श्येत रे प्रोंडतीनी” देंशा, परमप्रभु यावे आ नें थिशा, मेको कली ठेयब सेल्नुड। 14 गो परमप्रभु यावे आ डोंडती मुर आन दातेमी आं जशो कसम खाप्नुड। 15 परमप्रभु यावे आ मुर बेक्वा मेको कली थम ठेयब बाक्ब। भजन संग्रह ७२:१४ 16 परमप्रभु यावे, गो इन गेय पाइब नड। गो इन गेय पाइब मीश मुर आ तौ, इन वाइल नड। गे आं कली बेक्तीक रे प्रोंडतीनी। 17 गो इन कली “गे रिम्शो पाइब बाक्नीनी” दे चढेतीक चढेनुड। मिनु परमप्रभु यावे, इन नें थिशा, इन कली ठेयब सेल्नुड। योना २:१० 18 गो परमप्रभु यावे आ मुर नेल्ल आन डोंडती आं जशो कसम खाप्नुड। 19 परमप्रभु यावे आ खिं डा लाडगा नु यरूसलेमम बाक्बपुकी परमप्रभु यावे कली ठेयब सेलीन।

परमप्रभु कली ठेयब सेलीन

117 रागी रागी डा मुर नेल्लेम परमप्रभु यावे कली ठेयब सेलीन। जात जात डा मुर नेल्लेम मेको कली मान पने! रोमी १५:११ 2 मारदे हना परमप्रभु यावे आ गेना हना यो दाक्तीके नु आ दाक्शा गेनायो मप्रोंडतीके ठेयब बाक्ब। मिनु आ दाक्शा गेनायो मप्रोंडतीके गेना हना यो लीब। मोपतीके परमप्रभु यावे कली ठेयब सेलीन। प्रस्थान ३४:६

ठेयब सेल्तीक कुम्सो

118 परमप्रभु यावे कली “गे रिम्शो पाइब बाक्नीनी” देनीन। मारदे हना मेको रिम्शो पाइब बाक्ब। मिनु आ दाक्तीके गेना हना यो लीब। भजन संग्रह १०६:१ 2 इस्राएलीपुकीमी “मेको आ दाक्तीके गेना हना यो लीब” देंमल। 3 हारून आ खिं डा मुरपुकीमी “मेको आ दाक्तीके गेना हना यो लीब” देंमल। 4 परमप्रभु यावे कली मान पा हिंबपुकीमी “मेको आ दाक्तीके गेना हना यो लीब” देंमल।

5 गो श्येत जडानु, परमप्रभु यावे कली पुंडता। मिनु मेकोमी आं लोव लेत्ताक्वी। मिनु आं कली श्येत रे प्रोंडती। 6 परमप्रभु यावे गो नु बाक्तीके गो महिनुड। मुरपुकीमी आं कली मार पाइवने चाप्नीमी डा? रोमी ८:३१; भजन संग्रह ५६:५; हिब्रू १३:६ 7 परमप्रभु यावे गो नु बाक्शा, आं कली वारच

पाइब बाक्ब। गो आं कली काइ मदाक्ब आन कली ग्राशा कॉइनुडमी। 8 मुर आन कली तशा “मेकोमी वारच पाइनीम” देंचा क्येडा परमप्रभु यावे नु फाम्सीचा रिम्शो बाक्ब। भजन संग्रह १४६:३ 9 मिनु हुकुम पाइब मुर आन कली तशा “मेकोमी वारच पाइनीम” देंचा क्येडा परमप्रभु यावे नु फाम्सीचा रिम्शो बाक्ब। 10 रागी रागी डा मुर नेल्लेमी आं कली पुम्ताक्वीमी। तन्न गो परमप्रभु यावे आ नेंमी नेल्ल आन कली खतम पोक्ताक्वी। 11 मेकोपुकीमी आं कली तेइ तेइ रे पुम्ताक्वीमी। तन्न गो परमप्रभु यावे आ नेंमी नेल्ल आन कली खतम पोक्ताक्वी। 12 मेकोपुकीमी आं कली सुरबुम खोदेंशो पा गिल्लीमी। मेकोपुकी चूम ब्रशो मी खोदेंशो पा ब्राम्तेक्म। तन्न गो परमप्रभु यावे आ नेंमी मेको आन कली खतम पोक्ताक्वी। 13 गो नेच्चा पुंडशीशा, गोल्चा चिक्शो नड। तन्न परमप्रभु यावेमी वारच पाइक्ती। 14 परमप्रभु यावे आं बोल नु सक्ति बाक्ब। मिनु मेको आं कली श्येत रे प्रोंडब दुम्शो बाक्ब। प्रस्थान १५:२ 15 ठीक पाइब आन ताम्बुमी ग्येरशो नु ग्राशा कुम्सो पशो नेंसीब। परमप्रभु यावेमी सक्ति पाइशो गेय पाइब। 16 परमप्रभु यावेमी “गो ग्राती” दे आ ग्युरा गुइ पोक्शो बाक्ब। परमप्रभु यावेमी सक्ति पाइशो गेय पाइब। 17 गो मबेक्नुड, तन्न ब्रोंडशा बाक्शा, परमप्रभु यावे आ पशो नेल्ल शेंनुडमी। 18 परमप्रभु यावेमी आं कली शुश सजाइ गेती। तन्न बेक्वा मगेयी। २कोरिन्थी ६:९

19 आं कली परमप्रभु यावे आ खिं डा लाप्चो रोक्कीन। मिनु गो ओव्रशा, परमप्रभु यावे कली “गे रिम्शो पाइब बाक्नीनी” देंनुड। 20 एको परमप्रभु यावे आ लाप्चो बाक्ब। ठीक पाइबपुकी एको लाप्चो रे ओव्रनीम। यसैया २६:२ 21 गे आं पुंडशो नेंशा, लोव लेत्ताक्वीनी। मोपतीके गो इन कली “गे रिम्शो पाइब बाक्नीनी” देंनुड। गे आं कली श्येत रे प्रोंडब दुम्तीनी। 22 खिं सेल्बपुकीमी गारो प्रोवडमेनु “एको फुल्लु मगार” दे ताइक्तेम बाक्त। मिनु मेको मगारथु ताइशो फुल्लु चहिं जग डा सुरे फुल्लु दुम्माक्त। यसैया २८:१६; मत्ती २१:४२ 23 मेको परमप्रभु यावेमी पशो बाक्ब। गो मेको तशा, छक लाक्नीकी। 24 परमप्रभु यावेमी मुलाक्ती डा नाक्ती सेल्शो बाक्ब। गोपुकी कुम्सो पा ग्येरसय।

25 परमप्रभु यावे आंइ कली श्येत रे प्रोंडकी। परमप्रभु यावे आंइ गेय रिम्शो दुम्ल। 26 परमप्रभु यावे आ नेंमी जाक्ब आसीक रशो बाक्ब। गो परमप्रभु यावे आ खिं रे पा इन कली आसीक गेनीकी। मत्ती २१:९; मत्ती २३:३९ 27 परमप्रभु यावे ला परमप्रभु बाक्ब। मेकोमी आ छेडछेड आंइ तार दाप्पाइशो बाक्ब। रवा आ राशी शेशा, ग्येरशा, चढेतीक आ ग्रोव ग्योम्दीन। प्रस्थान २७:१-२ 28 गे आं परमप्रभु बाक्नीनी। गो इन कली “गे रिम्शो पाइब बाक्नीनी” देंनुड। गे आं परमप्रभु बाक्नीनी। मिनु गो इन कली मान पा ठेयब सेल्नुड। 29 गे परमप्रभु यावे कली “गे रिम्शो पाइब बाक्नीनी” देनीन। मारदे हना मेको रिम्शो पाइब बाक्ब। मिनु आ दाक्तीके गेना हना यो लीब। भजन संग्रह १०६:१; भजन संग्रह १०७:१; भजन संग्रह ११८:१; भजन संग्रह १३६:१

परमप्रभु आ अरेशो लोव ठेयब सेल्शो

एको भजन संग्रह कली सुन के हिब्रू आकछेर यो देंनीम। मारदे हना मेको आ टुक्रा टुक्रा हिब्रू लोव डा आल्फाबेट रे पा गोंडनीम। डोंडती डा टुक्रा आलेफ देंसीब, अध्याय नेल्ल आन डोंडती डा हिब्रू आकछेर लोवमी आलेफ बाक्ब।

आलेफ

119 सु सु रिम्शो पाइनीमी नु दोस मताइब बाक्नीमी, मेको ग्येरसीशो मुर बाक्नीम। मारदे हना मेकोपुकीमी परमप्रभु यावे आ अरेशो टिशो बाक्नीम। भजन संग्रह ११२:१-२ 2 सु सुमी परमप्रभु आ देंशो मिम्शा पाइनीमी नु आन थुं नेल्लेमी मेको कली माल्नीमी, मेकोपुकी ग्येरसीशो मुर बाक्नीम। 3 मेको मुरपुकी काइ मरिम्शो मपथु, परमप्रभु आ लांम गाक्नीम। 4 गे इन ब्रेक्शा अरेशो आंइ कली होस पा पचा कली गेशो बाक्तीनी। 5 गो गेना हना यो इन फुल्लुम मुशा ब्रेक्शो लोव पशा गाक्डल। 6 गो इन शेंतीके नेल्ले होस पा पशो नड हना, मुने मदोक्ड वा। 7 गो इन निसाफ पतीक लोव

शेंसाकयी हना, इन कली रिम्शो थुंमी ठेयब सेल्ने चाप्नुड। 8 गो इन फुल्लुम मुशा ब्रेक्शो लोव्र टीनुड। आं कली काइ मप्रॉइयीनी।

बेथ

9 ठिटा वॉइश मुर दोपा हेंथे मपथु, आन लांम गाक्ने चाप्नीमी? मेको इन लोव्र टिशा ला मो पने चाप्नीम। 10 गो आं थुं नेल्लेमी इन कली माल्नुड। आं कली इन शेंतीके रे डोन लचा मगेयीनी। 11 गो मरिम्शो मपडल, दे इन लोव्र आं थुंम वोइश्शो बाक्नुड। 12 परमप्रभु यावे, इन नें ठेयब बाक्ब। आं कली इन फुल्लुम मुशा ब्रेक्शो लोव्र शेंदीनी। भजन संग्रह ११९:२६, ६४, ६८ 13 गो इन देंशो पतीक लोव्र नेल्ल शेंनुडमी। 14 गो शुश शोप तशा ग्येरसीशो मुर खोदेंशो पा इन देंशो लां तशा ग्येरसाकयी। 15 गो इन ब्रेक्शा अरेशो मिम्ना मिम्न, इन लां कोव्रशा गाक्नुड। 16 गो इन फुल्लुम मुशा ब्रेक्शो लोव्र तुइश्शा, ग्येरसाकयी। इन लोव्र मप्रेंनुड।

गिमेल

17 इन गेय पाइब कली रिम्शो पने। मिनु गो इन लोव्र टिशा ब्रॉइडल। 18 गो आं कली मिक्च ताइब सेल्यीनी। मोपा गो इन अरेशो लोव्र डा छक लाक्चा डा गेय तने चबुल। 19 गो रागीम पौना का बाक्नुड। गो इन शेंतीके लोव्र आं मतुइक्चा डा पा मखुइक्तीन। भजन संग्रह ३९:१३ 20 आं थुं गेना हना यो इन पतीक लोव्र तुइक्चा कली माल्स डा माल्स बाक्ब। 21 गो इन शेंशो प्रॉइब ठेयब लेशो नु सराप रशो मुर आन कली हुइक्नीनी। व्यवस्था २७:२६; गलाती ३:१० 22 गो मेको आन शुकशी पतीके नु दोस गेतीके आं क्येडा डोन वोतीन। मारदे हना गो इन देंशो टीब मुर बाक्ती। 23 मिनु सासन पाइबपुकी बुक्शा, आं कली मरिम्शो पाइक्चा कली लोव्र गारपाइक्नीम। मो हना यो गो, इन गेय पाइबमी, इन फुल्लुम मुशा ब्रेक्शो लोव्र मिम्स डा मिम्स बाक्नुड। 24 इन देंशो लोव्र आं थुं ग्येरपाइक्ब नु आं कली अर्ती गेब बाक्नीम।

दालेथ

25 आं थुं लुक्च लशो बाक्ब। इन लोव्र पतीकेमी आं थुं बारपाइक्तीनी। 26 गो इन कली आं पशो तुइक्पाइक्तन्नी। मिनु गो आं लोव्र लेत्ताक्नी। इन फुल्लुम मुशा ब्रेक्शो लोव्र शेंदीनी। 27 गो इन ब्रेक्शा अरेशो लोव्र रुप्पाइक्तीनी। मिनु गो इन छक लाक्चा डा गेय मिम्स डा मिम्स बाक्नुड। 28 आं थुं सुर्ता पा लुक्च लत। इन लोव्र पतीकेमी आं कली ब्रॉइचा गेयीनी। 29 दूली लां आं क्येडा डोन वोतीन। मिनु गे शिशी पा इन अरेशो लोव्र शेंदीनी। भजन संग्रह ११९:१०४, १२८ 30 गो इन कली मप्रॉइतीक लां योव्रता। गो इन पतीक लोव्र आं डोंइती वोइक्ता। 31 परमप्रभु यावे, गो इन देंशो थमा पा पाइनुड। आं कली मुने मदोक्पाइक्तीनी। 32 गो इन शेंशो पना पन बाक्ती। मिनु गे आं रुप्तीक थुं बारपाइक्तीनी।

हे

33 परमप्रभु यावे, इन फुल्लुम मुशा ब्रेक्शो लोव्र शेंदीनी। मिनु गो मेको नोले सम्म मप्रॉइनुड। 34 गो आं कली रुप्तीक थुं गेयीनी। मिनु गो इन अरेशो लोव्र आं थुं नेल्लेमी पाइनुड। 35 इन शेंतीके लांम गाक्पाइक्तीनी। मारदे हना गो मेको कली दाक्नुड। 36 आं थुं कली इन देंशो ला मिम्पतीन। शुश क्येट चेम्तीके ममिम्पतीन। 37 मरिम्शो थोव्रक मकोव्रपाइक्तीनी। इन दाक्चा डा पा ब्रॉइचा गेयीनी। 38 गो इन गेय पाइब कली इन थोक्शा पशो लोव्र खाप्पीन। इन थोक्शा पशो लोव्र इन कली मान पा हिंब आन कली बाक्ब। 39 हिंचा डा शुकशी पाइक्चा पुंइसीतीक आं क्येडा डोन वोतीन। मारदे हना इन पतीक लोव्र रिम्शो बाक्नीम। 40 इन ब्रेक्शा अरेशो लोव्र शुश दाक्नुड। इन निसाफ पतीकेमी आं कली ब्रॉइचा गेयीनी।

वाव

41 परमप्रभु यावे, इन गेना हना यो दाक्तीक आं कली दुम्ल। इन थोक्शा पशो लोव्र खोदेंशो पा आं कली श्येत रे प्रॉइयीनी। 42 मिनु गो आं कली

शुकशी पाइब आन कली लोव्र लेन्ने चाप्नुड। मारदे हना गो इन लोव्र थमा सुइक्नुड। 43 गो इन थमा लोव्र पचा कली मतेक्कीनी। मारदे हना गो इन पतीक लोव्र आस पा बाक्नुड। 44 गो इन अरेशो लोव्र थमा पा गेना हना यो टीनुड। 45 मिनु गो सुइ क्येडा महिंथु बाक्नुड। मारदे हना इन ब्रेक्शा अरेशो लोव्र माल्ता। 46 गो पिप आन डोंइती इन देंशो लोव्र आ पर्वम लोव्र पाइनुड। मिनु मुने मदोक्नुड। मत्ती १०:१८ 47 गो इन शेंतीके तुइश्शा ग्येरसीनुड। मारदे हना गो मेको कली दाक्नुड। 48 गो इन शेंशो लोव्र ठेयब सेल्चा दाक्नुड। मोपा इन फुल्लुम मुशा ब्रेक्शो लोव्र मिम्ना मिम्न बाक्नुड।

चायीन

49 इन गेय पाइब कली पशो लोव्र मिम्तीन। आं कली मेको आ लां कोव्रपाइक्तीनी। 50 गो श्येत जडानु, इन थोक्शा पशो लोव्रमी आं कली लेम्शा ब्रॉइचा गेब। 51 ठेयब लेशो मुरुमी आं कली शुश शुकशी पाइनीम। तन्न गो इन अरेशो लोव्र मप्रॉइनुड। 52 परमप्रभु यावे, गो इन साइ डोंइती डा पतीक लोव्र मिम्शा, आं थुं नाइक्नुड। 53 इन अरेशो लोव्र प्रॉइब मुर आन पर्वम गो गाइश्शा चुरशा बाक्ती। 54 गो ते बाक्ती हना यो, इन फुल्लुम मुशा ब्रेक्शो लोव्र आं कुम्सो दुम्शो बाक्तेक्म। 55 परमप्रभु यावे, गो नाक्दो इन कली मिम्शा, इन अरेशो लोव्र पाइनुड। 56 गो आसीक राइब दुम्ती। मारदे हना गो इन ब्रेक्शा अरेशो लोव्र टिशा बाक्ती।

हेथ

57 परमप्रभु यावे, गो आं परमप्रभु बाक्नीनी। गो इन लोव्र टिना टिन बाक्नुड। 58 गो आं थुं नेल्लेमी इन कली पुंइता। इन थोक्शा पशो लोव्र खोदेंशो पा, आं कली शिशी पाइक्तीनी। 59 गो इन पतीके मिम्शा, इन देंशो लोव्र डा लांम गाक्नुड। 60 गो इन शेंतीके रीब पा टीनुड। गो देश मपाइनुड। 61 इन अरेशो लोव्र मटीबपुकीमी आं कली फ्रेंताकयीमी हना यो, गो इन अरेशो लोव्र मप्रेंनुड। 62 गो नाक्दो बोक्शा, इन निसाफ पतीक लोव्र आ पर्वम इन कली ठेयब सेल्लुड। भजन संग्रह ४२:९ 63 गो इन कली मान पा हिंब नु इन ब्रेक्शा अरेशो लोव्र टीब आन वारच नड। 64 परमप्रभु यावे, रागी इन गेना हना यो दाक्तीकेमी ब्रीशो बाक्ब। इन फुल्लुम मुशा, ब्रेक्शो लोव्र शेंदीनी।

टेथ

65 परमप्रभु यावे, इन लोव्र खोदेंशो पा गो इन गेय पाइब कली रिम्शो पाइक्तीनी। 66 आं कली रुख नु तुइक्ब सेलीन। मारदे हना गो इन शेंतीके थमा सुइक्नुड। 67 गो श्येत जचा क्येडा डोंइती हेंथे लां खोइश्शो नड। तन्न मुल इन लोव्र टीनुड। 68 गो रिम्शो पाइब नु दाक्ब बाक्नीनी। मोपतीके आं कली इन फुल्लुम मुशा, ब्रेक्शो लोव्र शेंदीनी। 69 ठेयब लेशो मुरपुकीमी आं पर्वमी जोल पाइनीम। गो चहिं आं थुं नेल्लेमी इन ब्रेक्शा अरेशो लोव्र पना पन बाक्नुड। 70 मेको आन थुं थांइशो बाक्ब। तन्न गो इन अरेशो लोव्र तुइश्शा ग्येरसीशो बाक्नुड। 71 गो आं कली श्येत जपाइक्तीनी, मेको रिम्शो बाक्त। मोपा इन फुल्लुम मुशा ब्रेक्शो लोव्र शेंसाकयी। 72 मिनु हजार हजार दुक्रा सुन चांदी क्येडा इन अरेशो लोव्र आं कली रिम्शो बाक्ब।

योध

73 गो आं कली सेल्लतीनी। मिनु इन शेंशो लोव्र शेंसीचा कली रुप्तीक थुं गेयीनी। 74 इन कली मान पा हिंबपुकी आं कली तशा ग्येरसीनीम। मारदे हना गो इन लोव्र डा लां कोव्रना कोव्रन बाक्नुड। 75 परमप्रभु यावे, इन निसाफ पतीके ठीक बाक्नीम। गो मेको तुइक्नुड। गो आं कली इन दाक्शा मप्रॉइतीकेमी श्येत गेतीनी। 76 इन गेय पाइब, आं कली इन गेना हना यो दाक्तीकेमी इन थोक्शा पशो लोव्र खोदेंशो पा लेम्दीनी। 77 गो आं कली शिशी पाइतीनी हना, गो ब्रॉइनुड। मारदे हना इन अरेशो लोव्र तुइश्शा, ग्येरसाकयी। 78 ठेयब लेशो मुर मुने दोक्मल। मारदे हना मेकोपुकीमी आं कली मो दिम्ताकयीमी। गो चहिं इन अरेशा ब्रेक्शो लोव्र मिम्ना मिम्न बाक्नुड। 79 इन कली मान पा हिंब आं नेक्था जाक्मल। मोपा इन देंशो लोव्र

रुपमेकल। 80 गो इन फुल्लुम मुशा ब्रेक्शो लोव्र पशा दोस मतडल। मोपा मुने मदोक्डल।

## काफ

81 गो आं श्येतम इन प्रॉइतीक शुश माल्नुड। मिनु गो इन लोव्र डा लां कोव्रना कोव्रन बाक्नुड। 82 गो इन थोकशा पशो लोव्र शुश रिम्ना रिम्न बाक्नुड। मिनु “आं कली गेना लेम्नीनी?” दे हिल्लो पाइनुड। 83 मारदे हना गो कुनम वोइश्शो कुशुल के थैलो खोदेंशो बाक्नुड। मो हना यो गो इन फुल्लुम मुशा ब्रेक्शो लोव्र मप्रेंदु। 84 गो, इन गेय पाइब, दोशो सम्म फाल्वा माल्नुडा? गे आं कली खेदा पाइब आन कली गेना निसाफ पाइनीनी? 85 ठेयब लेश्शोपुकीमी आं कली खाल्ता दोम्तेक्म। मेकोपुकी इन अरेशो काइ मपाइब बाक्नीम। 86 इन शेंतीके नेल्ले गेना हना यो लीनीम। मिनु मेकोपुकीमी आं कली मोशा खेदा पाइनीम। आं कली वारच पाइय्यीनी। 87 मेकोपुकीमी आं कली रागी रे हेररा क्याम्ताक्पीमी। गो चहिं इन ब्रेक्शा अरेशो लोव्र मप्रोनु। 88 इन गेना हना यो दाक्तीकेमी ब्रॉइपाइय्यीनी। मोपा गो इन देंशो टिना टिन बाक्नुड।

## लामेध

89 परमप्रभु यावे गेना हना यो बाक्ब। इन लोव्र स्वर्गम वोइश्शो बाक्ब। यसैया ४०:८ 90 इन मुर आन कली दाक्शा मप्रॉइतीके पाला पाला सम्म लीब। गे रागी सेल्शा वोइक्तीनी। मिनु मेको महिम्सीब। 91 इन लोव्र पतीकेमी मेको महिम्सीब। मारदे हना नेल्लेमी इन लोव्र टीनीम। 92 इन अरेशो लोव्रम आं कली मग्येरपाइश्शो हना, गो आं श्येतम बेक्ड वा। येरमीया १५:१६ 93 गो इन अरेशा ब्रेक्शो लोव्र गेनायो मप्रेंनुड। मारदे हना गे मेको आ पतीकेमी आं कली ब्रॉइपाइक्तीनी। 94 गो इन मुर नड। आं कली प्रॉइय्यीनी। मारदे हना गो इन ब्रेक्शा अरेशो लोव्र माल्ता। 95 इन अरेशो लोव्र मटीबपुकीमी आं कली साइक्वा कली बाप्शो बाक्नीमी। गो चहिं इन देंशो मिम्शा बाक्नुड। 96 मुरुमी नेल्ल क्येडा रिम्शो मारेइ सेल्ने मचाप्नीम। गो मेको तुइक्नुड। तन्न इन शेंशो लोव्र नेल्ल क्येडा रिम्शो बाक्ब।

## मेम

97 गो इन अरेशो लोव्र शुश दाक्नुड। गो नाक्त किंत किंत मेको आ पर्वम मिम्नुड। भजन संग्रह १:२ 98 गे इन शेंशो लोव्रम आं जोरी सत्रु आन क्येडा आं कली तुइक्ब सेल्ब। मारदे हना मेको गेना हना यो गो नु बाक्ब। 99 मिनु आं कली शेंब आन क्येडा गो जोक्ब तुइक्ब दुम्ती। मारदे हना इन देंशो मिम्ना मिम्न बाक्ती। 100 गो खाल्पा आन क्येडा यो जोक्ब तुइक्ब दुम्ती। मारदे हना इन ब्रेक्शा अरेशो लोव्र टिना टिन बाक्नुड। 101 गो इन लोव्र टिका कली मरिम्शो लां मखोइक्थु बाक्नुड। 102 गो इन देंशो पतीक लोव्र रे डोन मलड। मारदे हना गे आं कली शेंताक्पीनी। 103 इन देंशो लोव्र ब्रॉव्रशो बाक्ब। मेको खुदो क्येडा यो जिजी बाक्ब। 104 इन ब्रेक्शा अरेशो लोव्र रे रुष्व दुम्ती। मोपतीके गो दूली पतीक नेल्ल काइ मदाक्नुड। भजन संग्रह ११९:२९

## नुन

105 इन लोव्र आं खोइली कली छेडछेड बाक्ब, आं लां तचा कली रांको खोदेंशो बाक्ब। २पत्रुस १:१९ 106 गो इन निसाफ पतीक लोव्र पाइनुड, दे कसम जशा खाप्ता। 107 परमप्रभु यावे, गो शुश श्येत जाइनुड, इन लोव्रम देंशो खोदेंशो पा आं कली ब्रॉइचा गेयीनी। 108 परमप्रभु यावे, गो इन कली ठेयब सेल्शो, चढेतीक खोदेंशो पा ब्रने। मिनु आं कली इन पतीक लोव्र शेंदीनी। भजन संग्रह १९:१५ 109 गो गेना हना यो बेक्वा चिक्शा बाक्ती। मो हना यो गो इन अरेशो लोव्र मप्रेंनुड। 110 इन अरेशो लोव्र मटीबपुकीमी आं कली ब्वारद दाइश्शो बाक्नीम। मो हना यो इन ब्रेक्शा अरेशो लोव्र मप्रॉइनुड। 111 इन देंशो लोव्र गेना हना यो आं शोंप बाक्ब। मारदे हना मेकोमी आं थुं शुश ग्येरपाइक्ब। 112 गो इन फुल्लुम मुशा ब्रेक्शो लोव्र मबेक्डा सम्म पाइनुड, दे आं थुं फ्रेंशा बाक्ती।

## सामेख

113 गो थुं निक्शी पाइश्शो मुर आन कली काइ मदाक्नुड। मिनु इन अरेशो लोव्र दाक्नुड। भजन संग्रह ३१:७; १राजा १८:२१ 114 गे आं खुइक्तीक नु तेक्तीक बाक्नीनी। गो इन लोव्र डा लां कोव्रना कोव्रन बाक्नुड। 115 गो आं परमप्रभु आ शेंतीके पने चबुल, गे मरिम्शो पाइबपुकी, आं क्येडा डोन लने। 116 इन थोकशा पशो लोव्र खोदेंशो पा आं कली ब्रॉइचा गेयीनी। मिनु गो इन लां कोव्रशा, मुने मदोक्डल। 117 आं कली प्रॉइचा कली वारच पाइय्यीनी। गो गेना हना यो इन फुल्लुम मुशा ब्रेक्शो लोव्र दाक्नुड। 118 इन फुल्लुम मुशा ब्रेक्शो लोव्र डा लां रे हेंथे गाक्ब नेल्ल आन कली तिल्लीनी। मारदे हना मेको आन लां जोल बाक्त। 119 रागी डा इन अरेशो मटीब नेल्ल आन कली पुनु खोदेंशो पा फिक्तीनी। मोपतीके गो इन देंशो लोव्र दाक्नुड। यसैया १:२५ 120 गो इन कली मान पा हिंशा खिंखि पाइनुड। मिनु गो इन निसाफ पतीक मिम्शा हिंनुड।

## आयीन

121 गो ठीक निसाफ पाता। आं कली दिप्ब आन कली जिम्मा मगेयीनी। 122 इन गेय पाइब कली वारच पा, रिम्शो पने। इन कली मटीबपुकीमी आं कली दिप्चा मगेने। 123 गो इन प्रॉइतीक नु इन ठीक निसाफ पा पशो लोव्र कली शुश कोव्रशा रिम्नुड। 124 इन गेय पाइब कली इन गेना हना यो दाक्तीकेमी वारच पने। मिनु आं कली इन फुल्लुम मुशा ब्रेक्शो लोव्र शेंदीनी। 125 गो इन गेय पाइब नड। आं कली रुप्तीक थुं गेयीनी। मोपा गो इन देंशो रुप्ने चबुल। 126 परमप्रभु यावे, इन गेय पची ना दुम्शो बाक्ब। मारदे हना मुरपुकीम इन अरेशो लोव्र मटीम। 127 गो सुन नु क्येख सुन क्येडा इन शेंतीके दाक्नुड। 128 मोपतीके गो आं लां नेल्लेमी इन ब्रेक्शा अरेशो लोव्र मिम्नुड। मिनु दूली लां नेल्ल काइ मदाक्नुड। भजन संग्रह ११९:२९

## पे

129 इन देंशो लोव्र शुश रिम्शो बाक्नीम। मोपतीके गो मेको टिना टिन बाक्नुड। 130 इन लोव्र नेंशोनु, रुप्तीक थुं गेब। मतुइक्ब आन कली तुइक्ब सेल्ब। 131 गो ब्वाक्कु तूतू दाक्शो खोदेंशो पा इन शेंशो लोव्र माल्ना माल्न बाक्नुड। 132 गे आं गे लेश्शा शिशी पने। इन नें दाक्ब आन कली शिशी पशो खोदेंशो पा आं कली यो शिशी पने। 133 आं कली इन थोकशा पशो लोव्र डा लां गाक्पाइय्यीनी। मरिम्शो पतीकेम आं कली हुकुम पचा मगेने। 134 आं कली मुर आन दिप्तीक रे प्रॉइय्यीनी। मिनु गो इन ब्रेक्शा अरेशो लोव्र पने चबुल। 135 इन कुल इन गेय पाइब तार नां खोदेंशो पा ब्रपतीन। मिनु इन फुल्लुम मुशा ब्रेक्शो लोव्र आं कली शेंदीनी। 136 गो डाक्नुड। मारदे हना मुरपुकीमी इन अरेशो लोव्र मटीम।

## चाधे

137 परमप्रभु यावे, गे रिम्शो पाइब बाक्नीनी। मिनु इन पशो निसाफ ठीक बाक्नीम। 138 गे इन देंशो लोव्र ठीक निसाफ पतीकेमी वोइक्तीनी। गो मेको कली थमा सुइक्नीकी। 139 गो चुरना चुरन बाक्नुड। मारदे हना आं कली खेदा पाइबपुकीमी इन लोव्र प्रेंताक्म। भजन संग्रह ६९:१० 140 इन थोकशा पशो लोव्र शुश रिम्शो बाक्ब। मिनु गो, इन गेय पाइबमी मेको दाक्नुड। 141 गो आइक्च बाक्नुड। आं कली सुइमी महिक्नीम। मो हना यो गो इन ब्रेक्शा अरेशो लोव्र मप्रेंनुड। 142 इन निसाफ पतीके गेना हना यो ठीक बाक्ब। मिनु इन अरेशो लोव्र थमा लोव्र बाक्ब। 143 गो हिंती नु श्येत जाइब दुम्ती हना यो, इन शेंतीकेम आं कली ग्येरपाइक्ब। 144 इन देंशो गेना हना यो ठीक बाक्नीम। आं कली रुप्तीक थुं गेतीनी हना, गो ब्रॉइनुड।

## क्वोफ

145 गो आं थुं नेल्लेमी इन कली पुंइनुड। परमप्रभु यावे आं लोव्र लेत्तीनी। गो इन फुल्लुम मुशा ब्रेक्शो लोव्र टिना टिन बाक्नुड। 146 गो इन कली “गे

आं कली श्येत रे प्रॉइयीनी” दे पुंडनुड। मिनु गो इन देंशो पाइनुड। 147 गो नां मदाप्यु बोक्शा, इन कली “वारच पाइयीनी” दे पुंडनुड। गो इन लोव्र डा लां कोव्रना कोव्रन बाक्नुड। 148 गो इन थोक्शा पशो लोव्र मिम्चा कली नाक्दो सेंना सेंन बाक्ती। 149 इन गेना हना यो दाक्तीकेमी आं पुंडशो नेनीन। परमप्रभु यावे, इन निसाफ पतीकेमी आं कली ब्रॉइचा गेयीनी। 150 आं कली खेदा पाइबपुकी आं कली साइक्चा कली आं नेक्था जाक्नीम। मेकोपुकी इन अरेशो लोव्र रे डोन बाक्नीम। 151 तन्न परमप्रभु यावे, गे आं नेक्था बाक्नीनी। इन शेंशो लोव्र नेल्ल थमा बाक्ब। 152 गो डोंइती रे इन देंशो लोव्र पढेशा, मेको गेना हना यो कली सेल्शो बाक्ब, दे तुइक्ताकड।

रेश

153 आं श्येत जशो कोव्रडीन, गो श्येत जाइनुड। मिनु आं कली प्रॉइयीनी। मारदे हना गो इन अरेशो लोव्र मप्रेंदु। 154 गे आं निसाफ पाइब दुमीन। मिनु आं कली प्रॉइयीनी। इन थोक्शा पशो लोव्र खोदेंशो पा ब्रॉइचा गेयीनी। 155 इन अरेशो लोव्र मटीब आन कली गे श्येत रे मप्रॉइनीनी। मारदे हना मेकोपुकीमी इन फुल्लुम मुशा ब्रेक्शो लोव्र पचा ममलेम। 156 परमप्रभु यावे, इन शिशी ठेयब बाक्ब। इन निसाफ पतीक लोव्र खोदेंशो पा आं कली ब्रॉइचा गेयीनी। 157 आं कली खेदा पाइब नु आं जोरी सत्रु शुश बाक्नीम। मो हना यो गो इन देंशो लोव्र मप्रोन। 158 मेको नोले शॉइसीशो आन कली तशा ग्रॉग्रा दीती। मारदे हना मेकोपुकीमी इन शेंशो टिचा प्रॉइतेक्म। 159 गो इन ब्रेक्शा अरेशो लोव्र दाक्नुड, दे मिम्तीन। परमप्रभु यावे, इन गेना हना यो दाक्तीकेमी आं कली ब्रॉइचा गेयीनी। 160 इन लोव्र नेल्ले थमा बाक्ब। मिनु इन निसाफ पतीक लोव्र गेना हना यो ठीक बाक्नीम। यूहन्ना १७:१७

सिन नु शिन

161 ठेयब मुरपुकीमी आं कली बिट्वीम खेदा पाइनीमी। तन्न आं थुं इन लोव्र क्येडा हिब। 162 गो शुश शॉप तशा, ग्येरसीचा क्येडा इन लोव्र तशा ग्येरसाक्पी। 163 दूली पतीके नु जोल पतीक काइ मदाक्थु, ग्रॉग्रा दीनुड। तन्न इन अरेशो लोव्र दाक्नुड। 164 गो इन निसाफ पतीक लोव्र आ पर्वम इन कली नाक्त कित कित ७ खेयप ठेयब सेल्नुड। 165 इन अरेशो लोव्र दाक्बपुकी थुं नाइश्शा बाक्चा ताइनीम। मेको आन कली मारेइ श्येत मदुम्ब। 166 परमप्रभु यावे, गो इन श्येत रे प्रॉइतीक कली रिम्शा बाक्नुड। मिनु इन शेंशो पाइनुड। 167 गो इन देंशो लोव्र टिना टिन बाक्ती। मिनु गो मेको कली थाम्पा दाक्नुड। 168 इन ब्रेक्शा अरेशो लोव्र नु इन देंशो लोव्र टिना टिन बाक्नुड। मारदे हना आं पशो नेल्ल इन डोंइती बाक्नीम।

थाव

169 परमप्रभु यावे, आं पुंडशो लोव्र नेनीन। इन लोव्रम देंशो खोदेंशो पा आं कली रुब् थुं गेयीनी। 170 आं पुंडशो लोव्र नेनीन। इन थोक्शा पशो लोव्र खोदेंशो पा श्येत रे प्रॉइयीनी। 171 गे आं कली इन फुल्लुम मुशा, ब्रेक्शो लोव्र शेंताक्यीनी। मोपतीके गो इन कली ठेयब सेल्ना सेल्ल बाक्नुड। 172 गो इन थोक्शा पशो लोव्र आ पर्वम कुम्सो पाइनुड। मारदे हना इन शेंशो लोव्र नेल्ल ठीक बाक्ब। 173 गे आं कली वारच पाइयीनी। मारदे हना गो इन ब्रेक्शा अरेशो लोव्र योव्रशा, आं के सेल्तामी। 174 परमप्रभु यावे, गो इन श्येत रे प्रॉइतीक कली रिम्नुड। इन अरेशो लोव्र दाक्शा ग्येरसीनुड। 175 गे आं कली ब्रॉइचा गेयीनी। मिनु गो इन कली ठेयब सेल्नुड। मिनु इन पतीक लोव्रमी आं कली वारच पवल। 176 गो जाम्शो भेडा खोदेंशो पा लां जाम्शो बाक्नुड। इन गेय पाइब, आं कली माल्यीनी। मारदे हना गो इन शेंशो लोव्र मप्रेंनुड। यस्सैया ५३:६

“वारच पाइयीनी” दे पुंडशो

लां डा कुम्सो।

120 गो श्येत जडानु, परमप्रभु यावे कली पुंडनुड। मिनु मेकोमी आं लोव्र लेख। 2 परमप्रभु यावे, आं कली जोल पाइब नु लें निक्शी

पाइश्शो मुर रे प्रॉइयीनी। 3 मिनु गे जोल पाइब, इ कली मार पचा? गे लें निक्शी पाइश्शो मुर इ कली अरु मार पाइक्चा माल्बा? 4 लडाइ पाइबमी आ हेश्शो ब्रा आण्ब। मिनु ब्रशो कोइला इ तार जुक्पाइक्नीम।

5 गो श्येत जाइब दुम्ती। गो मेशेक रागीम बाक्चा माल्नुड। केदार आ ताम्बु आन दातेम बाक्चा माल्नुड। 6 गो थुं नाइश्शा बाक्चा काइ मदाक्ब आन दातेमी शुश बाक्ती। 7 गो थुं नाइश्शा बाक्चा दाक्ब मुर नड। तन्न गो लोव्र पडानु, मेकोपुकी लडाइ पचा कली ठीक दुम्नीम। रोमी १२:१८

परमप्रभुम वारच पा, श्येत रे प्रॉइशो

लां डा कुम्सो।

121 गो डांडा गे कोव्रनुड। आं कली वारच पाइब ते रे जाक्बाक्मे? 2 सरीड नु रागी सेल्ब परमप्रभु यावेमी आं कली वारच पाइब।

3 मेकोमी इ खोइल ग्रेक्चा मगेब। इ कली कोव्रन गेनायो मइक्ब।

4 इस्राएली आन कली वारच पाइब थमा पा गेनायो मनाइसीब, गेनायो मइक्ब।

5 परमप्रभु यावे इ कली खाल पाइब बाक्ब। परमप्रभु यावे इ ग्युरा गे डा फाम्सीतीके बाक्ब। 6 मिनु नाक्ती नांम इ कली मनाण्ब। नाक्दो तास्लाम इ कली मारेइ मरिम्शो पने मचाण्ब।

7 परमप्रभु यावेमी इ कली श्येत नेल्ल रे प्रॉइब। मेकोमी इ कली ब्रॉइचा गेब। गन्ती ६:२४-२६ 8 परमप्रभु यावेमी गे लाडगा खिंडगा पवीनु यो इ कली खाल पाइब। मुल रे गेना हना यो मो पाइब। ब्यवस्था २८:६

यरूसलेम आ पर्वम पुंडशो

लां डा कुम्सो। दाऊद आ कुम्सो।

122 मेकोपुकीमी आं कली “परमप्रभु यावे आ खिं लय” देंतेक्म। मिनु गो ग्येरसाक्पी। भजन संग्रह २६:८; इजीकीएल ४८:३५

2 गोपुकीमी “यरूसलेम, इ ठेयब लाप्चोपुकीमी राप्शो बाक्नीकी” देंतेक्म।

3 यरूसलेम रिम्शो पा सेल्शो सहर बाक्ब। मेकेर खिं नेक्नेक्था बाक्नीम।

4 मिनु इस्राएल आ थर थर डा मुरपुकी परमप्रभु यावे आ मुर दुम्तीके मेकेर लाइनीम। परमप्रभु यावेमी इस्राएली आन कली दोपा अरेवा, मोपा मेकोपुकीमी मेकेर लशा “गे रिम्शो पाइब बाक्नीनी” दे आ नें ठेयब सेल्नीम।

5 मेकेर निसाफ पाइब आन नित्तीक बाक्नीम। मेकेर दाऊद आ चच युइ आन नित्तीके बाक्नीम।

6 यरूसलेम कली “रिम्शो दुम्ल” दे आसीक गेने। मिनु “यरूसलेम, इ कली दाक्बपुकी रिम्शो दुम्मल। जकरिया ४:७ 7 इ गारो आगामी थुं नाइश्शा बाक्तीक दुम्ल। इ गारो डा लाइश्शो खिंमी मारेइ श्येत मदुम्ल” देनीन। 8 मिनु गो आं लोक्ब नु आं वारच आन पर्वम “इ आगामी थुं नाइश्शा बाक्तीक दुम्ल। 9 मिनु परमप्रभु यावे, आंइ परमप्रभु आ खिं आ पर्वम इन कली रिम्शो दुम्शो तचा दाक्नुड” देंती।

“शिशी पने” दे पुंडशो

लां डा कुम्सो।

123 इर स्वर्ग डा नित्तीकेम बाक्ब, गो इन गे कोव्रशा इन कली पुंडनुड। 2 दोपा वाइलपुकीम आन होव्रप आन गुइ गे कोव्रनीमी नु वाइलीमपुकीमी आन होव्रपोक्म आन गुइ गे कोव्रनीम, मोपा गोपुकीमी परमप्रभु यावे गे कोव्रनीकी। आंइ कली शिशी मपवा सम्म मोपा कोव्रनीकी।

3 परमप्रभु यावे, आंइ कली शिशी पने। आंइ कली शिशी पने। मारदे हना गो शुश दिप्चा पुंडसीशो बाक्नीकी। 4 ठेयब लेश्शोपुकी नु मरिम्शो पाइबपुकीमी आंइ कली महिक्थु शुश श्येत गेतीके गो ब्रीताक्क।

परमप्रभु यावेमी वारच पशो

लां डा कुम्सो। दाऊद आ कुम्सो।

- 124 परमप्रभु यावे गोपुकी नु मबाक्शो हना, <sup>2</sup> मुरपुकीमी आंइ कली लडाइ तोवमेनु, परमप्रभु यावे गोपुकी नु मबाक्शो हना, <sup>3</sup> मेकोपुकीमी आंइ कली तशा गाइवतमेनु, आंइ कली सेलीन दाक्मोम वा। <sup>4</sup> मिनु बारशा जाक्शो ब्वाक्कुम आंइ कली योल्द वा। मिनु मेको ब्वाक्कुम आंइ कली सुम वा। भजन संग्रह ६९:१६; भजन संग्रह ४२:८ <sup>5</sup> मेको बारशो ब्वाक्कुम आंइ कली मोशा योल्शा लद वा। <sup>6</sup> परमप्रभु यावे ठेयब बाक्ब। मारदे हना मेकोमी आंइ कली क्रिम्चा मगेव। <sup>7</sup> मिनु गोपुकी सिखारी आन ब्वारद रे ब्रोंइशो चिक्ब खोदेंशो पा प्रोक्तक। मेको ब्वारद ब्रोंइक्त। मिनु गोपुकी प्रोक्तक। <sup>8</sup> सरीड नु रागी सेल्ब परमप्रभु यावेमी आंइ कली वारच पशो बाक्ब।

परमप्रभु आ मुर नु बाक्ब

लां डा कुम्सो।

- 125 परमप्रभु यावे कली थमा सुइक्बपुकी सियोन डांडा खोदेंशो बाक्नीमी। मेको याक्ने मचाप्सीब। गेना हना यो बाक्ब। <sup>2</sup> यरूसलेम आ एर ओंथ नेल्ल पहाड बाक्नीम। मिनु मुल रे गेना हना यो परमप्रभु यावेमी मेको खोदेंशो पा आ मुर आन एर ओंथ बाक्ब। <sup>3</sup> परमप्रभु आ अरेशो मटीब आन हुकुम पतीके ठीक पाइब आन रागीम मदुम्ब। मिनु ला ठीक पाइबपुकीमी दूली मपाइनीम। <sup>4</sup> परमप्रभु यावे, रिम्शो पाइब नु रिम्शो थुं पाइश्शो मुर आन कली रिम्शो पने। <sup>5</sup> तन्न परमप्रभु यावेमी नोले शोंइसीशा मरिम्शो लां खोइक्ब आन कली मरिम्शो पाइश्शा खतम पोक्ब। इस्राएलमी थुं नाइश्शा बाक्तीक दुम्ल। भजन संग्रह १२८:६; गलाती ६:१६

“वारच पने” दे पुंइशो

लां डा कुम्सो।

- 126 परमप्रभु यावेमी ग्याइश्शा लाइक्चा पुंइसीशो आन कली सियोनम लेश्शा चाक्मानु, गोपुकी डोमु तशो खोदेंशो दुम्तक। भजन संग्रह १४:७ <sup>2</sup> मिनु गोपुकी शुश ग्येरसीशा रिस्साक्क। थाम्पा ग्येरशा ग्रीतक। मिनु रागी रागी डा मुरपुकीमी “परमप्रभु यावेमी मेको आन कली वारच पा, ठेयब गेय पाप्तु” देमुक्तेक्म। <sup>3</sup> परमप्रभु यावेमी आंइ कली थमा वारच पा ठेयब गेय पाप्तु। मिनु गो शुश ग्येरसाक्क। <sup>4</sup> परमप्रभु यावे, दोदेंशो पा नेगेब रागी डा बारशो खोला शाइश्शा लाइनीमी, मोदेंशो पा आंइ रिम्शो दुम्तीके लेश्शा चाक्कीन। <sup>5</sup> मिनु डाक्ना डाक्न शोक्बपुकीमी ग्येरसीशा खुप्नीम। मत्ती ५:४ <sup>6</sup> डाक्ना डाक्न शोक्थ लाइनीम। तन्न ग्रेल्शो क्योव्रज चेरब कुरशा, ग्येरसीशा कुम्सो पा खिं लेत्नीम। यसैया ३५:१०

परमप्रभु रिम्शो नाक्त गेब बाक्ब

लां डा कुम्सो। सोलोमन आ कुम्सो।

- 127 परमप्रभु यावेमी खिं मसेल्शो हना, खिं सेल्ब आन गेय मोशा दुम वा। परमप्रभु यावेम सहर खाल मपशो हना, खाल पाइब आन खाल पशो मोशा दुम वा। <sup>2</sup> गे सुनी कना बोक्शा, नाक्दो सम्म शुश गेय पाइनीनी। मिनु इन शोब्ले सुर्ता पा जाइनीनी। मेको मोशा बाक्ब। मारदे हना परमप्रभुमी आ दाक्शो मुर आन कली इप्ची ना आन माल्शो गेब। हितोपदेस १०:२२ <sup>3</sup> तमी तौ परमप्रभु यावे आ गेशो बाक्नीम। आलपुकी मेको आ गेशो इनाम बाक्नीम। भजन संग्रह १२८ ३-४; उत्पत्ती ३०:२; उत्पत्ती ३३:५ <sup>4</sup> मिनु ठिटा ना थिशो तौपुकी लडाइ पाइब आन गुइम बाक्शो ब्रा खोदेंशो बाक्नीम। <sup>5</sup> सु सु आन ब्रा कुरतीके मेकोमी ब्रीशो बाक्नीमी, मेको मुर ग्येरसीशो बाक्नीम। मिनु मेकोपुकी ठेयब लाप्चोमी आन जोरी सत्रुमी लोव्र पा जिचा पोक्वामेनु, मुने मदोक्नीम।

परमप्रभु आ आसीक

लां डा कुम्सो।

- 128 परमप्रभु यावे कली मान पा हिंबपुकी आसीक तशो बाक्नीम। मेकोपुकी परमप्रभु यावे आ लांम गाक्शो बाक्नीम। <sup>2</sup> गे इ पशो गेय रे जाइनेवे। गे ग्येरसीशा मारेइ मारेइमी दारनेवे। <sup>3</sup> मिनु इ मीश इ खिंमी सिश्शो अडगुर बोट खोदेंशो बाक्ब। इ आल इ खिंम तेल रवा आ कोच्चा दाप्शो खोदेंशो बाक्नीम। भजन संग्रह १२७:३ <sup>4</sup> मोपा परमप्रभु यावे कली मान पा हिंब मुर आसीक ताइब। <sup>5</sup> परमप्रभु यावेमी इ कली सियोन रे आसीक गेब। गे मबेक्थु नाक्त किंत किंत यरूसलेममी रिम्शो दुम्शो ताइनेवे। <sup>6</sup> मिनु गे इ चच युइ आन कली ताइनेवे। इस्राएली आन थुं नाइश्शा बाक्मल। उत्पत्ती ४८:११; भजन संग्रह १२५:५

जोरी सत्रु आन पर्बम पुंइशो

लां डा कुम्सो।

- 129 इस्राएलमी “मेकोपुकीमी गो ठिटा बाक्डा रेन आं कली थाम्पा श्येत गेतीमी” देंत। <sup>2</sup> मिनु लेंशा “मेकोपुकीमी गो ठिटा बाक्डा रेन आं कली थाम्पा श्येत गेतीमी। मो हना यो आं क्येडा ग्राने मचबेम। <sup>3</sup> ब्यफ वाक्बपुकीमी आं चीमी वाक्ताक्म। मिनु आं ची नेल्ल चेततेक्म” देंत। यसैया ५१:२३ <sup>4</sup> परमप्रभु यावे ठीक पाइब बाक्ब। मेकोमी आ अरेशो मटीब आन जोरी प्रोइश्शा गेप्तु। <sup>5</sup> सियोन कली काइ मदाक्बपुकी मुने दोक्शा, लेश्शा लमल। <sup>6</sup> मेकोपुकी खिं तार वाशो घांस खोदेंशो दुम्मल। मेको बारचा क्येडा डोंइती सोवनीम। <sup>7</sup> घांस रिक्बपुकीमी मेको मुठी का यो रिक्ने मचाप्नीम। मुठा फ्रेंबपुकीमी मेको अडला का यो प्रिने मचाप्नीम। <sup>8</sup> मिनु मेको रे पा लाइबपुकीमी “गे परमप्रभु यावे आ आसीक रावो। परमप्रभु यावे आ नैम इ कली आसीक गेनीकी” मदेनीम। रूथ २:४

शुश श्येत दुम्ची ना पुंइशो

लां डा कुम्सो।

- 130 परमप्रभु यावे, गो हिंचा डा श्येत जडानु, इन कली पुंइनुड। <sup>2</sup> परमप्रभु यावे, आ लोव्र नेनीन। “शिशी पाइय्यीनी” दे आं पुंइशो लोव्र इन नोफा दाइक्तीन। <sup>3</sup> परमप्रभु यावे, गे आंइ मरिम्शो पशो मिम्ताक्नी हना, इन डोंइती राजे चाप्नीमी डा? <sup>4</sup> गे माफ गेनीनी। मोपतीके मुर इन कली मान पा हिंचा माल्नीम। यसैया ५५:७; रोमी ६:१-२ <sup>5</sup> गो परमप्रभु यावे कली रिम्नुड। आं थुं नेल्लेमी यो रिम्नुड। मिनु गो इन लोव्र आस पाइनुड। यसैया २१:११; लूका १२:३५-३६ <sup>6</sup> नाक्दो खाल पाइबमी गेना नां सोव्रबा, दे रिम्शो क्येडा यो, गो आं थुं नेल्लेमी परमप्रभु कली शुश रिम्नुड। <sup>7</sup> इस्राएल, परमप्रभु यावे कली आस पा बाक्को। मारदे हना परमप्रभु यावेमी गेना हना यो दाक्ब। मेको नु मरिम्शो पशो रे प्रोंइतीक शुश बाक्ब। <sup>8</sup> मिनु मेकोमी इस्राएली आन कली आन मरिम्शो पशो नेल्ल रे प्रोंइब। मत्ती १:२१

ब्रेम्शो थुं पाइश्शो मुर ग्येरसीशो

लां डा कुम्सो। दाऊद आ कुम्सो।

- 131 परमप्रभु यावे, गो ठेयब मलेश्शो बाक्नुड। गो मबोरशो बाक्नुड। गो आं मचाप्चा डा नु ठेयब गेयम मग्योल्नुड। <sup>2</sup> मिनु आं थुं ग्येत्थ लुक्च मपथु, नाइश्शा बाक्ब। आं थुं आ ममा नु बाक्शो आइक्च आल खोदेंशो दुम्ब। आं थुं सिक्सी पा बाक्ब आल खोदेंशो बाक्ब। भजन

संग्रह ६२:२<sup>३</sup> इस्राएल, गे मुल रे गेना हना यो परमप्रभु यावे कली आस पा बाक्को।

परमप्रभु आ खिं आ पर्वम पुंडशो

लां डा कुम्सो।

132 परमप्रभु यावे दाऊद कली फ्रुक्कीन। मेको आ श्येत फाल्शो नेल्ल मिम्तीन।<sup>२</sup> मेकोमी परमप्रभु यावे आ नैम कसम जशो बाक्त्। मिनु याकूब आ नेल्ल क्येडा सक्ति पाइश्शो आ नैम कसम जाप्त्।<sup>३</sup> गो आं खिं मओव्रनुड। मिनु आं ब्राख्येम मइप्नुड।<sup>२सामुएल ७:२; प्रेरित ७:४६</sup> 4 गो निन्द्रा मपाइनुड। गो मइप्नुड।<sup>५</sup> मारदे मोदेशो पाइनुड देशा हना, गो याकूब आ नेल्ल क्येडा सक्ति पाइश्शो आ बाक्तीक मथिदु, सम्म मो पाइनुड।

6 गोपुकीमी एफ्राथाहमी परमप्रभु यावे आ कबल पशो सन्दोस आ पर्वम नैतय। मिनु गोपुकीमी मेको यार सहर डा दिंमम थित्तय।<sup>१सामुएल ७:१; १इतिहास १३:५-६</sup> 7 गो मेको आ बाक्तीक लय। मिनु मेको आ खोइल थैक्तीक आ डोंइती बाप्य।

8 परमप्रभु यावे बोक्कीन, इन नाइश्शा बाक्तीके नु इन सक्ति पाइश्शो कबल पशो सन्दोस बाक्तीकेम जाक्कीन।<sup>गन्ती १०:३५; २इतिहास ६:४१; भजन संग्रह ७८:६१</sup> 9 इन कली चढेबपुकीमी ठीक पतीके वा फेक्शो खोदेशो पा फेक्समल। मिनु इन मुरपुकी ठेयब सेंदा पा ग्येरसमल।<sup>१०</sup> इन गेय पाइब दाऊद आ पर्वम इन तेल लुक्शो कली मप्रोनीन।

11 परमप्रभु यावेमी दाऊद नु लोव्र पा कसम जशो बाक्त्। मेकोमी “गो इ सासन पतीकेमी इ तौ का वोइक्नुड” दे लोव्र पशो बाक्त्। परमप्रभु यावेमी आ पशो लोव्र खाप्व।<sup>भजन संग्रह ८९:४-५; हिब्रू ६:१७</sup> 12 मेकोमी “इ तौपुकीमी आं कबल नु आं देशो पास्तेक्म हना, मेको आन तौपुकी यो इ सासन पतीकेम सासन पचा ताइनीम” देशो बाक्त्।

13 परमप्रभु यावेमी सियोन कली योव्रशो बाक्त्। “आं बाक्तीके मेकेर बाक्त्” दे मिश्शो बाक्त्।<sup>भजन संग्रह ६८:१७; भजन संग्रह ७६:३</sup> 14 मिनु परमप्रभुमी “एकेर नाइक्नुड। एकेर गेना हना यो बाक्नुड, मारदे हना गो मेको दाक्नुड।<sup>१५</sup> मिनु गो मेकेर डा मुर आन कली शुश जचा तूचा गेशा, आसीक गेनुडमी। पुडग आन कली रूथ्री जचा गेनुडमी।<sup>१६</sup> गो मेकेर डा चढेब आन कली मरिश्शो पतीके रे ब्रोंइतीक दोदेशो बाक्त्। तुइक्पाइक्नुडमी। मेकेर डा थमा सुइक्बपुकी कुम्सो पा ग्येरसीनीम।<sup>१७</sup> गो मेकेर दाऊद आ खिं डा मुर आन मान बारपाइक्नुड। आं तेल लुक्शो मुर कली रिश्शो तौ का गेता।<sup>१सामुएल २:१०; १राजा ११:३६</sup> 18 गो मेको आ जोरी सनु आन कली मुने तोक्नुडमी। मिनु मेको रिश्शो पा सासन पाइब दुम्ब” दे परमप्रभुमी दैत।

लोक्बपुकी गारशो

लां डा कुम्सो। दाऊद आ कुम्सो।

133 लोक्बपुकी गारशा बाक्त् शुश रिश्शो बाक्त्।<sup>उत्पत्ती १३:८</sup> 2 मेको पियाम लुक्शो शुश क्येट थाप्शो तेल खोदेशो बाक्त्। मेको हारून आ गल शोक्त्रे रे शाइश्शा, आ वा सम्म जाक्दीप्व।<sup>३</sup> मेको हेरमोन डांडा डा सीत सियोन डांडाम यिश्शो खोदेशो बाक्त्। मेको गेना हना यो ब्रोंइतीक परमप्रभु यावे आ आसीक बाक्त्।

नाक्दो डा कुम्सो

लां डा कुम्सो।

134 नाक्दो परमप्रभु यावे आ खिंम बाक्त्शा, परमप्रभु यावे आ गेय पाइब नेल्लेमी परमप्रभु यावे कली ठेयब सेलीन।<sup>२</sup> मिनु परमप्रभु यावे आ खिंमी इन गुइ पोक्शा, परमप्रभु यावे कली ठेयब सेलीन।

3 सरीड नु रागी सेल्ब परमप्रभु यावेमी सियोन रे इन कली आसीक गेवल।  
भजन संग्रह ११५:१५

परमप्रभु यावे आ ठेयब गेय

135 परमप्रभु यावे कली ठेयब सेलीन। परमप्रभु यावे आ नें ठेयब सेलीन। परमप्रभु यावे आ गेय पाइबपुकी, मेको कली ठेयब सेलीन।<sup>२</sup> गे परमप्रभु यावे आ खिंमी गेय पाइबपुकी नु आ खिं डा लाडगाम बाक्त्पुकी, आंइ परमप्रभु कली ठेयब सेलीन।<sup>३</sup> परमप्रभु यावे कली ठेयब सेलीन। मारदे हना परमप्रभु यावे रिश्शो पाइब बाक्त्। मेको कली कुम्सो पने। मारदे हना मेको रिश्शो बाक्त्।<sup>४</sup> परमप्रभु यावेमी याकूब कली आ मुर दुम्पाइक्त्वा कली नु इस्राएल कली आंम के सेल्वा कली योव्रशो बाक्त्।<sup>प्रस्थान १९:५-६</sup>

5 परमप्रभु यावे थम ठेयब बाक्त्। मेको गो तुइक्नुड। मिनु आंइ परमप्रभु देवी देवता नेल्ल आन क्येडा ठेयब बाक्त्।<sup>भजन संग्रह ८६:८</sup> 6 परमप्रभु यावेमी सरीड, रागी, समुन्द्र नु समुन्द्र आ आगामी मार दाक्त्वा, मेको पाइब।<sup>७</sup> मेकोमी रागी आ सुर सुर रे गोस्स पोक्त्। मेकोमी चिला दाप्पाइश्शा, रेउ यिपाइक्त्। मिनु मेकोमी आ बाक्तीक रे फश पपाइक्त्।<sup>येरमीया १०:१३</sup> 8 मेकोमी इजीप्त् रागीमी मुर नु बी ब्यफ, क्यारश भेडा मारेइ मारेइ आन डोंइती जरमेशा नेल्ल आन कली साइक्तीमी।<sup>प्रस्थान १२:२९</sup> 9 मेकोमी इजीप्त् रागीमी फाराओ नु आ गेय पाइब मुर नेल्ल आन डोंइती चिन्ड नु छक लाक्त्वा डा गेय कोंइताक्त्।<sup>भजन संग्रह ७८:४२-५२</sup> 10 मेकोमी शुश रागी आन कली खतम पोक्तीमी। मिनु मेकोमी बोल्यो पिप आन कली साइक्तीमी।<sup>गन्ती २१:२१-३५</sup> 11 मेकोमी एमोरी आन पिप सीहोन, बाशान डा पिप ओग नु कनान डा पिप नेल्ल आन कली साइक्तीमी।<sup>१२</sup> मिनु मेकोमी मेको आन रागी आ मुर, इस्राएली आन कली आन के सेल्वा कली गेम्तीमी।<sup>यहोसु १२:१-६</sup>

13 परमप्रभु यावे इन नें गेना हना यो बाक्त्। परमप्रभु यावे इन नें गेनायो मक्याम्सीब।<sup>भजन संग्रह १०२:१३</sup> 14 मारदे हना परमप्रभु यावेमी आ मुर आन कली निसाप पतीकेमी वारच पाइब। मिनु आ गेय पाइब आन कली शिशी पाइब।<sup>ब्यक्त्वा ३२:३६</sup>

15 रागी रागी डा मुर आन मूर्ति सुन नु चांदी के बाक्तीम। मेको नेल्ले मुर आन सेल्शो ला बाक्तीम।<sup>भजन संग्रह ११५:४-११</sup> 16 मेको आन के शोव्र बाक्त्, तन्न मब्वाक्तीम। मिक्च बाक्त्, तन्न मताइनीम।<sup>१७</sup> नोफा बाक्त्, तन्न मनैनीम। मेकोपुकीमी आन सोक्त् कीने मचाप्नीम।<sup>१८</sup> मेको आन कली सेल्बपुकी यो मोदेशो दुम्मल। मिनु मेको आन कली थमा सुइक्बपुकी यो मोदेशान दुम्मल।

19 इस्राएल आ खिं डा मुरपुकी, परमप्रभु यावे कली ठेयब सेलीन। हारून आ खिं डा मुरपुकी परमप्रभु यावे कली ठेयब सेलीन।<sup>२०</sup> लेवी आ मुरपुकी, परमप्रभु यावे कली ठेयब सेलीन। परमप्रभु यावे कली मान पा हिंबपुकी, परमप्रभु यावे कली ठेयब सेलीन।<sup>२१</sup> सियोन रे परमप्रभु यावे कली ठेयब सेल्मेक्त्। यरूसलेमम बाक्त्पुकीमी परमप्रभु यावे कली ठेयब सेल्मेक्त्। परमप्रभु यावे कली ठेयब सेलीन।

परमप्रभु आ दाक्तीके लीब

136 परमप्रभु यावे कली “गे रिश्शो पाइब बाक्तीनी” देनीन। मारदे हना मेको रिश्शो पाइब बाक्त्। मेको आ दाक्तीके गेना हना यो लीब।<sup>भजन संग्रह १०१:६</sup> 2 मिनु देवी देवता आन परमप्रभु कली “गे रिश्शो पाइब बाक्तीनी” देनीन। मारदे हना मेको आ दाक्तीके गेना हना यो लीब।<sup>३</sup> मिनु परमप्रभु, आन परमप्रभु कली “गे रिश्शो पाइब बाक्तीनी” देनीन। मारदे हना मेको आ दाक्तीके गेना हना यो लीब।<sup>४</sup> मेकोमी ला ठेयब छक लाक्त्वा डा गेय पाइब। मारदे हना मेको आ दाक्तीके गेना हना यो लीब।<sup>५</sup> मेकोमी जोक्ब तुइक्ब दुम्तीकेमी सरीड सेल्त्। मारदे हना मेको आ दाक्तीके गेना हना यो लीब।<sup>६</sup> मेकोमी ब्वाक्कु तार रागी सेल्त्। मारदे हना मेको आ दाक्तीके गेना हना यो लीब।<sup>७</sup> मेकोमी नां तास्त्वा सेल्त्। मारदे हना मेको आ दाक्तीके गेना हना यो लीब।<sup>उत्पत्ती १:१४-१८</sup> 8 मेकोमी नाक्ती

कली नां सेल्लु। मारदे हना मेको आ दाक्तीके गेना हना यो लीब। 9 मेकोमी नाक्दो कली तास्ला नु सौरुल सेल्लिमी। मारदे हना मेको आ दाक्तीके गेना हना यो लीब।

10 मेकोमी इजीप्त रागीमी डोंइती जरमेशो नेल्ल आन कली साइक्तीमी। मारदे हना मेको आ दाक्तीके गेना हना यो लीब। *भजन संग्रह १३५:८-१२*

11 मेकोमी इस्राएली आन कली इजीप्ती आन दाते रे गुंडशा चाक्तीमी। मारदे हना मेको आ दाक्तीके गेना हना यो लीब। 12 मेकोमी आ ठेयब सक्तिमी मेको आन कली गुंडशा चाक्तीमी। मारदे हना मेको आ दाक्तीके गेना हना यो लीब। 13 मेकोमी लल समुन्द्रमी लां सेल्लु। मारदे हना मेको आ दाक्तीके गेना हना यो लीब। 14 मेकोमी इस्राएली आन कली मेको लां रे पा शोक्पाइक्तीमी। मारदे हना मेको आ दाक्तीके गेना हना यो लीब।

15 मेकोमी फाराओ नु आ लडाइ पाइब आन कली लल समुन्द्रमी योल्पाइक्तु। मारदे हना मेको आ दाक्तीके गेना हना यो लीब। 16 मेकोमी आ मुर आन कली गोरशो रागीम लां कोंइताक्मी। मारदे हना मेको आ दाक्तीके गेना हना यो लीब। 17 मेकोमी ठेयब पिप आन कली साइक्तीमी। मारदे हना मेको आ दाक्तीके गेना हना यो लीब। *गन्ती २१:२३-३५*

18 मेकोमी सक्ति पाइश्शो पिप आन कली साइक्तीमी। मारदे हना मेको आ दाक्तीके गेना हना यो लीब। 19 मेकोमी एमोरी आन पिप सीहोन कली साइक्तु। मारदे हना मेको आ दाक्तीके गेना हना यो लीब। 20 मेकोमी बाशान डा पिप ओग कली साइक्तु। मारदे हना मेको आ दाक्तीके गेना हना यो लीब। 21 मेकोमी मेको आस रागी आ मुर आन कली योक्शा, गेम्तीमी। मारदे हना मेको आ दाक्तीके गेना हना यो लीब। 22 मेकोमी मेको रागी आ गेय पाइब इस्राएली आन कली गेम्तीमी। मारदे हना मेको आ दाक्तीके गेना हना यो लीब।

23 मेकोमी गो श्येत जकानु, आंइ कली मिम्ताक्व। मारदे हना मेको आ दाक्तीके गेना हना यो लीब। 24 मेकोमी आंइ कली आंइ जोरी सत्रु आन गुड रे प्रॉइतु। मारदे हना मेको आ दाक्तीके गेना हना यो लीब। 25 मेकोमी ब्रॉइब नेल्ल आन कली जचा गेब। मारदे हना मेको आ दाक्तीके गेना हना यो लीब। *भजन संग्रह १४५:१५*

26 स्वर्ग डा परमप्रभु कली “गे रिश्शो पाइब बाक्नीनी” देनीन। मारदे हना मेको आ दाक्तीके गेना हना यो लीब।

बेबीलोनम बाक्ब आन कुम्सो

137 गो बेबीलोन डा खोला आ नेक्था बाक्शा, सियोन कली मिम्शा डाक्तक। 2 गोपुकीमी आंइ तार पाइश्शो ताप्तीके मेकेर डा रवामी क्युक्तक। 3 मारदे हना आंइ कली ग्याइश्शा लाइक्बपुकीमी मेकेर कुम्सो पपाइक्तेक्म। मिनु आंइ कली श्येत गेबपुकीमी ग्येरतीक कुम्सो पपाइक्तेक्म। मेकोपुकीमी आंइ कली “सियोन डा कुम्सो का पने” देंतेक्म।

4 गो आंइ मतुइश्शो रागीमी परमप्रभु यावे आ कुम्सो दोपा पने चाप्तीकी? 5 गो यरूसलेम, इ कली प्रेंताक्ड हना, आं ग्युरा गुड मदुक्ब दुम्ब। *येरमीया ५१:५०* 6 गो इ कली ममिश्शो नड हना, गो यरूसलेम कली आं नेल्ल क्येडा ठेयब ग्येरतीके बाक्ब, दे ममिश्शो नड हना, आं लें आं कुंकुम क्येप्लल।

7 परमप्रभु यावे, यरूसलेम खतम दुम नाक्ती एदोम डा मुर मार पामे, मेको मिम्तीन। मेकोपुकीमी “एको कली प्रेतीन। जग रेन खतम पोक्कीन” दे वाइ ब्रेत्तेक्म। *भजन संग्रह ७९:१२; ओबदिया १०:१५* 8 बेबीलोन सहर, गे मुल खतम पोक्का पुंडसीनेवे। गे मार पवी मेको आ क्येक्क लेब्ब ग्येरसीशो मुर बाक्ब। 9 इन आल आन कली ग्याइश्शा, फुल्लु तार राप्शा साइक्ब, ग्येरसीशो बाक्नीम। *यसैया १३:१६; रोमी १२:१९*

ठेयब सेल्लिक कुम्सो

दाऊद आ कुम्सो।

138 परमप्रभु, गो आं थुं नेल्लेमी इन कली ठेयब सेल्लुड। गो देवी देवता आन डोंइती इन कली ला ठेयब सेल्लिक कुम्सो पाइनुड। 2 गो इन खिं गे बाप्शा, इन कली “गे रिश्शो पाइब बाक्नीनी” देंनुड। मारदे

हना इन गेना हना यो दाक्तीकेमी दाक्शा मप्रॉइनीनी। मिनु इन नें नु इन लोव नेल्ल आन क्येडा ठेयब बाक्नीम। 3 गो इन कली ब्रेडडानु, आं लोव लेत्ताक्पीनी। गे आं कली महिंभ थुं गेशा, बोल्यो सेल्लिनी।

4 परमप्रभु यावे, रागी डा पिप नेल्लेमी इन लोव नेंतेक्म। मोपतीके मेकोपुकीमी इन कली ठेयब सेल्लेक्व। *यसैया २:३* 5 मिनु मेकोपुकीमी परमप्रभु यावे आ लां आ पर्वम कुम्सो पामेक्व। मारदे हना परमप्रभु यावे आ सक्ति थम ठेयब बाक्ब। 6 परमप्रभु यावे नेल्ल क्येडा ठेयब बाक्त हना यो, मेकोमी आइक्च मुर आन कली कोव्रब। तन्न ठेयब लेशो मुर आन क्येडा डोन बाक्ब।

7 मिनु गो शुश श्येत जाता हना यो, गे आं कली प्रॉइनीनी। गे आं कली तशा आं जोरी सत्रु आन गाइश्शो रे प्रॉइनीनी। गे इन सक्तिमी आं कली प्रॉइनीनी। 8 परमप्रभु यावेमी आं पर्वम आ पचा माल्शो नेल्ल पाइब। परमप्रभु यावे इन दाक्तीके गेना हना यो लीब। इन सेल्लो मुर, आं कली मप्रॉनीन।

परमप्रभुम मुर आन थुं तुइक्ब

कुम्सो पपाइक्ब कली दाऊद आ कुम्सो।

139 परमप्रभु यावे, गे आं कली नाक्शा तुइश्शो बाक्नीनी। *भजन संग्रह ७:१०; येरमीया १७:१०* 2 गे आं निश्शो बोक्शो तुइश्शो बाक्नीनी। आं मिम्शो नेल्ल तुइक्नीनी। 3 गे आं गाक्शो इप्शो थमा पा तुइक्नीनी। आं पशो नेल्ल गे तुइश्शो बाक्नीनी। 4 परमप्रभु यावे, गे आं ब्वाक्का क्येडा डोंइती आं लोव नेल्ल तुइक्नीनी। 5 गे आं एर ओंथ नेल्ल बाक्शा, इन गुड आं तार वोइक्तीनी। 6 मेको तुइक्तीके आं कली थम ठेयब बाक्ब। मिनु गो मेको रुप्ने मचाप्नुड।

7 मिनु गो इन सोक्त क्येडा ते लशा खूइक्ने चाप्नुडा डा? गो इन डोंइती रे ते प्रोक्ने चाप्नुडा डा? 8 गो सरीड लती हना यो, गे मेके बाक्नीनी। गो बेक्शो मुर आन बाक्तीकेम आं बाक्तीक सेल्ला हना यो, गे मेके बाक्नीनी। *आमोस ९:२* 9 गो नां दाप्तीक सम्म बेरशा लती हना यो, शुश डोन समुन्द्र तार लती हना यो, *योना १:३* 10 गे मेकेर यो आं कली लां कोंइनीनी। मिनु गो इन सक्तिमी आं कली वारच पाइनीनी। 11 मिनु गो “छिडछिडम आं कली सुम्शा, आ एर ओंथ डा छेडछेड नेल्ल नाक्दो खोर्देशो दुम्ब” देंती हना यो, *अय्युब ३४:२२* 12 छिडछिड इन कली छिडछिड मदुम्ब। नाक्दो नाक्त खोर्देशो पा छेडछेड दुम्ब। मारदे हना छिडछिड इन कली छेडछेड खोर्देशो बाक्ब।

13 मिनु गे आं आगा डा मारेइ मारेइ सेल्लिनी। गे आं कली आं ममा आ कोव्रजम सेल्लिनी। 14 गो इन कली ठेयब सेल्लुड। मारदे हना गे आं कली छक लाक्का डा नु रिम्शो पा सेल्लिनी। इन गेय नेल्ल छक लाक्का डा बाक्नीम। गे आं कली थमा पा तुइश्शो बाक्नीनी। 15 गो खूइश्शा जोल्ना जोल्न बाक्डानु, गे आं कली तशो बाक्तीनी। मेना गो रागी आगाम जोल्ना जोल्न बाक्शो नड। 16 गे आं मजोल्शो रां तशो बाक्तीनी। मिनु आं कली गेशो ब्रॉइतीक नाक्ती नेल्ले इन किताबम ब्रेक्शो बाक्तेक्म। मेको दुम्चा क्येडा डोंइतीन ब्रेक्शो बाक्त। *भजन संग्रह ३१:१६* 17 परमप्रभु, इन मिम्शो आं कली थम ठेयब बाक्ब। इन मिम्तीके शुश बाक्नीमी। *भजन संग्रह ४०:६* 18 गो मेको आन कली हिक्का माल्शो नड हना, मेको बाल्वा क्येडा यो शुश दुम वा। गो सेंसीडानु, गो गे नु बाक्शो बाक्नुड। *भजन संग्रह ६३:७*

19 परमप्रभु, गे इन अरेशो मटीब आन कली साइक्नी हना, रिश्शो दुम वा। हुश खाक्श पोक्ब आं क्येडा डोन लमल। 20 मेकोपुकीमी इन पर्वम मरिम्शो लोव पाइनीमी। मिनु ठेयब लेशशा, शुश मरिम्शो पाइब बाक्नीमी।

21 परमप्रभु यावे, इन कली काइ मदाक्ब आन कली गो यो काइ मदाक्नुडमी। मिनु गो इन कली मरिम्शो पचा कली बोक्ब आन कली तशा ग्रांग्रा दिल्नुडमी। 22 गो मेको आन कली थमा पा काइ मदाक्नुडमी। मिनु गो मेको आन कली आं जोरी सत्रु मिम्नुडमी। 23 परमप्रभु, गे आं कली नाक्शा, आं थुं कोव्रपीनी। मिनु आं कली कोव्रशा आं मिम्शो तुइक्तीन। 24 गो आं थुंम इन अरेशो मटितीके बाक्म कों? कोव्रडीन। मिनु गे आं कली गेना हना यो ब्रॉइशा बाक्तीक लांम खुल्पीनी।



## ब्रोंडचा आ परबम पुंडशो

कुम्सो पपाइक्व कली दाऊद आ कुम्सो।

- 140 परमप्रभु यावे, आं कली मरिश्शो पाइब आन गुइ रे प्रोंडयीनी। आं कली हुश खाक्वश पोक्व आन गुइ रे प्रोंडयीनी।  
 2 मेकोपुकीमी आन थुमी मरिश्शो पतीक मिम्ना मिम्न बाक्नीम। मिनु जिचा पोक्नीम।<sup>3</sup> मेकोपुकी कोक्चा चिक्वशो बुस्स खोदेंशो बाक्नीम। मेको आन लोव बुस्स आन बीस खोदेंशो बाक्व। *ठेयब सेंदा पा। रोमी ३:१३*  
 4 परमप्रभु यावे, इन अरेशो मटीब नु हुश खाक्वश पोक्व मुर आं क्येडा डोन वोतीन। मेकोपुकीमी आं कली दाइल पपाइक्वा माल्नीम।<sup>5</sup> ठेयब लेशशो मुरपुकीमी खूइश्शा आं कली ब्वारद दाइक्ताक्म। डोरी के ब्वारद दाइक्ताक्म। मेकोपुकीमी आं लांमी ब्वारद दाइक्ताक्म। *ठेयब सेंदा पा*  
 6 मिनु गो परमप्रभु यावे कली “गे आं परमप्रभु बाक्नीनी। परमप्रभु यावे, गे आं पुंडशो लोव नेनीन। *भजन संग्रह २२:११*<sup>7</sup> परमप्रभु यावे, आं परमप्रभु, गे इन सक्तिमी आं कली प्रोंडनीनी। लडाइ दुम्मेनु, गे आं कली प्रोंडनीनी।<sup>8</sup> परमप्रभु यावे, इन अरेशो मटीब आन मिश्शो दला दाक्स दुम्चा मगेने। मो दुम्त हना, मेकोपुकी ठेयब लेत्नीम। *ठेयब सेंदा पा।*  
 9 मेको ठेयब लेशशोपुकी आं एर ओंथ बाक्वशो बाक्नीम। मेको आन मरिश्शो पशो आंमा रमल। *ठेयब सेंदा पा।*<sup>10</sup> गे मेको आन तारी ब्रशो कोइला मोतीन। मेकोपुकी गेनायो गूने मचाप्चा पा खाल्टाम बिक्मल।<sup>11</sup> मुर आन परबम जोल पाइब रागीम मदुम्मल। हुश खाक्वश पोक्वपुकी रीब पा खतम दुम्मल।  
 12 परमप्रभु यावे, श्येत जशो आन कली वारच पाइब नु प्रुडग आन कली ठीक निसाफ पाइब बाक्नीनी, दे तुइक्नुड।<sup>13</sup> ठीक पाइबपुकीमी, थमा पा इन नें ठेयब सेल्नीम। मिनु रिश्शो थुं पाइश्शो मुर इन डोंडती बाक्नीम” देंती।

“आं कली कोवयीनी” दे पुंडशो

दाऊद आ कुम्सो।

- 141 परमप्रभु यावे, गो इन कली पुंडनुड। मिनु गे रीब पा जाक्कीन। गो इन कली पुंडशा ब्रेडडानु, आं ब्रेशो नेनीन।<sup>2</sup> आं पुंडशो लोव इन डोंडती धूप खोदेंशो दुम्ल। मिनु आं गुइ क्युक्वशो नाक्दो डा चढ़ेशो खोदेंशो दुम्ल। *प्रस्थान ३०:७; प्रस्थान २९:३९*  
 3 परमप्रभु यावे, आं शोवमी खाल पाइब का वोतीन। आं कली मरिश्शो लोव पचा मगेयीनी। *भजन संग्रह ३९:२; याकूब ३:५-६*<sup>4</sup> आं थुं कली मरिश्शो मिम्चा मगेने। मरिश्शो पाइब नु गारशा, इन मदाक्वशो गेय पचा मगेने। मिनु गो मेको आन ब्रोंवशो जचा थोवक जचा मदाक्नुड।  
 5 ठीक पाइबमी आं कली तुप्यील। मेको आं शिशो बाक्व। मेकोमी आं कली हुइक्तील। मेको आं पियाम लुक्वशो तेल खोदेंशो दुम्ब। तन्न इन अरेशो मटीब आन तेल आं पियाम मलुम्सेक्ल। मो हना यो गो मेको आन मरिश्शो पशो आ परबम पुंडना पुंडन बाक्नुड। *लेवी १९:१७; हितोपदेस २७:५-६*  
 6 मेको आन निसाफ पाइब रोंगु रे तोक्चा पुंडसामानु, मरिश्शो पाइबपुकीमी आं लोव “थमा बाक्व” दे रुप्नीम।<sup>7</sup> दोपा फुल्लु प्रोल्शा रू मेर फ्राइनीमी, मोपान मेको आन रुश बेक्वशो मुर आन बाक्तीकेमी ब्रशो बाक्नीम।  
 8 तन्न परमप्रभु यावे, आं परमप्रभु, गो इन गे कोवनुड। गो गे नु फाम्सीनुड। गे आं कली बेक्वा मगेयीनी।<sup>9</sup> गे आं कली मेको आन दाइश्शो ब्वारद रे प्रोंडयीनी। आं कली मरिश्शो पाइब आन दाइश्शो ब्वारद रे प्रोंडयीनी।<sup>10</sup> इन अरेशो मटीब नेल्ले आंम आन दाइश्शो ब्वारदम रेम्मल। गो चहिं मारेइ मदुम्थु लाक्नुड।

“श्येत जशोनु, वारच पाइय्यीनी”

शेंतीक कुम्सो। पुक्खीम बाक्शा, दाऊद आ सेल्शो कुम्सो। १सामुएल २४:४

- 142 गो परमप्रभु यावे कली वाइ ब्रेल्लुड। गो परमप्रभु यावे कली पुंडनुड।<sup>2</sup> आं लोव नेल्ल मेको आ डोंडती वोइक्नुड। गो मेको कली आं श्येत नेल्ल देंनुड।<sup>3</sup> आं थुं लुक्व लत हना, गो मार पचा माल्लुडा, गे मेको तुइक्नीनी। मुरपुकीमी आं गाक्तीक लांमी ब्वारद दाइक्ताक्म।<sup>4</sup> गो आं ग्युरा गे कोवता, मिनु आं कली मिम्ब सुइ मबाक्म। आं कली खूइक्तीके तेइ मबाक्व। सुइमी आं कली वारच मपाइय्यीमी।  
 5 परमप्रभु यावे गो इन कली ब्रेल्लुक्क। गो “गे आं खूइक्तीके बाक्नीनी। ब्रोंडशा बाक्व आन रागीमी गे आं भाग बाक्नीनी” देंती। *भजन संग्रह २७:१३*  
 6 आं पुंडशो लोव नेनीन। मारदे हना आ थुं शुश लुक्व लत। आं कली खेदा पाइब रे प्रोंडयीनी। मारदे हना मेकोपुकी आं क्येडा बोल्यो बाक्नीम।<sup>7</sup> आं कली आं चोक्सीतीके रे प्रोंडयीनी। मिनु गो इन कली “गे रिश्शो पाइब बाक्नीनी” देंने चबुल। मिनु आं कली रिश्शो पशो तशा, ठीक पाइबपुकी आं एर ओंथ बाक्शा ग्येरसीनीम।

श्येत जामेनु, पुंडशो

दाऊद आ कुम्सो।

- 143 परमप्रभु यावे, आं पुंडशो लोव नेनीन। “गो शिशो तडल” दे इन दाक्शा मप्रोंडतीकेमी आं पुंडशो लोव नेनीन। मिनु इन ठीक पतीकेमी आं लोव लेत्तीनी।<sup>2</sup> मिनु इन गेय पाइब कली निसाफ पा दोस मगेने। मारदे हना ब्रोंडशोपुकी इन डोंडती ठीक पाइब सुइ मबाक्नीम। *भजन संग्रह १३०:३; अय्युब ९:२; रोमी ३:२०*  
 3 आं जोरी सत्रुमी आं कली खेदा पतीमी। आं कली खपीम खोल्शा, साइक्वा चिक्ताक्पीमी। मेकोपुकीमी आं कली बेक्वशो मुर आन बाक्तीकेम खोदेंशो पा छिडछिडम बाक्पाइक्तीमी।<sup>4</sup> मोपतीके आं थुं लुक्व लत। मिनु गो वाम ग्याम दुम्ती।  
 5 गो साइ डोंडती डा नाक्त मिम्नुड। मिनु इन गेय नेल्ल मिम्ना मिम्न बाक्नुड। इन गुइम पशो नेल्ल मिम्नुड। *भजन संग्रह ७७:६*<sup>6</sup> गो आं गुइ इन गे दिनुड। मिनु कोक्त रूमी ब्वाक्कु माल्लो खोदेंशो पा, आं थुमी इन कली माल्ब। *ठेयब सेंदा पा। भजन संग्रह ४२:२-३*  
 7 परमप्रभु यावे, गे आं कली रीब पा लोव लेत्तीनी। आं थुं लुक्व लशो बाक्व। इन कुल आं क्येडा मखूइक्तीन। मो दुम्त हना, गो बेक्वशो मुर आन बाक्तीक लाइब मुर खोदेंशो दुम्नुड।<sup>8</sup> आं कली सुनी इन गेना हना यो दाक्तीके आ परबम नेंपाइय्यीनी। मारदे हना गो इन कली थमा सुइक्नुड। गो तेको लां गाक्चा माल्लुडा, मेको आं कली शेंदीनी। गो इन लां कोवशा बाक्नुड।<sup>9</sup> परमप्रभु यावे, गे आं कली आं जोरी सत्रु रे प्रोंडयीनी। मारदे हना गो इन बाक्तीकेमी खूइक्थ जाक्नुड।<sup>10</sup> आं कली इन दाक्वशो पचा कली शेंदीनी। मारदे हना गे आं परमप्रभु बाक्नीनी। इन रिश्शो सोक्तीम आं कली ठीक लांम गाक्पाइय्यीनी।  
 11 परमप्रभु यावे, इन नें आ परबम आं कली ब्रोंडचा गेयीनी। इन निसाफ पतीकेमी आं कली श्येत रे प्रोंडयीनी।<sup>12</sup> इन गेना हना यो दाक्तीकेमी आं जोरी सत्रु आन कली खतम पोक्कीन। मिनु आं जोरी सत्रु नेल्ल आन कली सतीन। मारदे हना गो इन गेय पाइब बाक्नुड।

ग्राचा कली पुंडशो लोव

दाऊद आ कुम्सो।

- 144 परमप्रभु यावे, आं सेरथे फुल्लु, ठेयब बाक्व। मेकोमी आं कली लडाइ पचा शेंब।<sup>2</sup> गो आं कली दाक्व, आं दरवार, आं खूइश्शा ब्रोंडशा बाक्तीके, आं कली श्येत रे प्रोंडनु आं तेक्तीक बाक्नीनी। गो इन बाक्तीकेमी खूइश्शा बाक्नुड। गे आं कली मुर आन कली सासन पाइब सेल्नीनी। *भजन संग्रह १८:३*  
 3 परमप्रभु यावे, मुर आइक्व बाक्तेक्म हना यो, गे मेको आन कली कोवनीनी। बेक्वा लाइब मुर मार नमी डा? तन्न गे मेको आन कली मिम्नीनी।<sup>4</sup> मुर कीशो सोक्त खोदेंशो बाक्नीम। मेको आन ब्रोंडतीक नाक्ती जाग्शा लाइब वांकु खोदेंशो बाक्नीम। *अय्युब १४:२*

5 परमप्रभु यावे, इन सरीड रे तोइश्शा यिने। डांडा आन कली थिशा, कुन गूपतीन। भजन संग्रह १८:१०-१७<sup>6</sup> चिला दाप्पाइश्शा, मेको एर ओंथ ब्रपतीन। इन ब्रा आप्शा मेको आन कली खेदा पने।<sup>7</sup> इर रे इन गुड दिंदीन। मिनु आं कली बारशो खोला नु अर्को रागी डा मुर आन गुड रे प्रॉइयीनी।<sup>8</sup> मेकोपुकीमी जोल नु मरिश्शो ला पाइनीम।

<sup>9</sup> परमप्रभु, गो इन कली नक कुम्सो का पाइनुड। १० ओटा तार पाइश्शो ताप्तीक ताप्शा, इन कली कुम्सो पाइनुड। भजन संग्रह ३३:३<sup>10</sup> गे पिप आन कली ग्रापाइक्नीनी। गे इन गेय पाइब दाऊद कली बेक्वा रे प्रॉइतीनी।<sup>11</sup> आं कली मुर साइक्व तरवार रे प्रॉइयीनी। अर्को रागी डा मुर आन गुड रे प्रॉइयीनी। मेकोपुकीमी जोल नु मरिश्शो ला पाइनीम।

<sup>12</sup> मिनु आं तौपुकी कोल्मानु, रवा खोदेंशो दुम्मल। आंइ तमीपुकी दरवारम बाक्शो मुशो थाम खोदेंशो दुम्मल।<sup>13</sup> आंइ अन्न वोइक्तीके शुश खाल डा अन्नमी ब्रीमल। आंइ भेडा हजार हजार दुम्मल। आंइ भेडा आंइ रूम लाख लाख दुम्मल।<sup>14</sup> आंइ बीपुकी गिक्व दुम्मल। आंइ गारो मब्रेल्ल। आंइ कली सुइमी ग्याइश्शा मलदमेक्ल। मिनु आंइ लाम्मी सुइ डाक्शो मनेंसीब।<sup>15</sup> मोदेंशो आसीक ताइब मुर ग्येरसीशो बाक्नीम। सु मुर आन परमप्रभु, परमप्रभु यावे बाक्बा, मेको ग्येरसीशो मुर बाक्नीम। व्यवस्था ३३:२९

### ठेयब सेल्लिक कुम्सो

परमप्रभु कली "ठेयब बाक्नीनी" देंशो दाऊद आ कुम्सो।

**145** आं परमप्रभु, गे आं पिप बाक्नीनी। गो इन कली मान पाइनुड। इन नें गेना हना यो ठेयब सेल्लुड।<sup>2</sup> गो इन कली नाक्त् किंत किंत ठेयब सेल्लुड। गो इन नें गेना हना यो ठेयब सेल्लुड।<sup>3</sup> परमप्रभु यावे ठेयब बाक्ब। मेको ठेयब सेल्ल्या शिरशो बाक्ब। मिनु मेको आ ठेयब दुम्तीके सुइमी रुजे मचाप्नीम।

<sup>4</sup> पाला का डा मुरुम आन नोले डा पाला डा मुर आन कली "इन गेय ठेयब बाक्नीम" दे शेंचा माल्नीम। मेकोपुकीमी इन सक्ति पाइश्शो गेय आ पर्वम लोव्र पचा माल्नीम।<sup>5</sup> आं पिप, गो इन शुश दारस डा मान ततीके नु इन छक लाक्वा डा गेय आ पर्वम मिम्ना मिन्म बाक्नुड। भजन संग्रह १९:२-७<sup>6</sup> मुरपुकीमी इन ठेयब सक्ति आ पर्वम लोव्र पचा माल्नीम। मिनु गो इन ठेयब दुम्तीके आ पर्वम शेंनुडमी।<sup>7</sup> मेकोपुकीमी इन शुश रिश्शो पतीके आ पर्वम चाड मानेचा माल्नीम। मिनु इन ठीक पतीके आ पर्वम ठेयब सेंदा पा कुम्सो पचा माल्नीम।

<sup>8</sup> परमप्रभु यावे दाक्ब नु शिशी पाइब बाक्ब। मेको रीब पा मगाइक्ब। मिनु मेको आ गेना हना यो दाक्तीके ठेयब बाक्ब। प्रस्थान ३४:६<sup>9</sup> परमप्रभु यावे नेल्ल आन कली रिश्शो पाइब बाक्ब। मिनु आ सेल्लो नेल्ल आन कली शिशी पाइब।<sup>10</sup> परमप्रभु यावे, इन सेल्लो मारेइ मारेइमी इन कली "गे रिश्शो पाइब बाक्नीनी" देंचा माल्नीम। मिनु इन कली थमा सुइक्वपुकीमी ठेयब सेल्ल्या माल्नीम।<sup>11</sup> मेकोपुकीमी इन राज्य डा रिश्शो दुम्तीके आ पर्वम लोव्र पचा माल्नीम। इन सक्ति आ पर्वम लोव्र पचा माल्नीम।<sup>12</sup> मेकोपुकीमी इन ठेयब सक्ति पाइश्शो गेय नु इन राज्य डा दारस आ पर्वम मुर आन कली तुइक्वाइक्वा माल्नीम।<sup>13</sup> इन राज्य गेना हना यो लीब राज्य बाक्ब। इन सासन पतीके पाला पाला सम्म बाक्ब। परमप्रभु यावेमी आ देंशो नेल्ल पाइब। मिनु आ पशो मारेइ मारेइ शिशीम पाइब।

<sup>14</sup> मिनु परमप्रभु यावेमी गोल्शो नेल्ल आन कली पोक्ब। मेकोमी आन थुं लुक्च लशो आन कली आन थुं बारपाइक्ब। भजन संग्रह १४६:८<sup>15</sup> मारेइ मारेइमी इन गे कोव्रनीम। मारदे हना गे मेको आन कली आन जची ना जचा थोव्रक गेनीनी। भजन संग्रह १०४:२७-२८; भजन संग्रह १३६:२५<sup>16</sup> गे हाइश्शो दुम्शा, ब्रॉइब नेल्ल कली रूपाइक्नीनी।<sup>17</sup> परमप्रभु यावे नेल्ल ठीक पाइब बाक्ब। मिनु आ गेय नेल्ले शिशीम पाइब।<sup>18</sup> परमप्रभु यावे आ कली पुंडब नेल्ल आन नेक्था बाक्ब। सु सुमी मेको कली थमा पा पुंडनीमी, मेको आन नेक्था बाक्ब।<sup>19</sup> मेकोमी आ कली मान पा हिंब नेल्ल आन दाक्शो गेब। मेकोमी मेको आन पुंडशो नेंब। मिनु मेको आन कली श्येत रे प्रॉइब। हितोपदेस १०:२४<sup>20</sup> परमप्रभु यावेमी आ कली दाक्ब नेल्ल आन

कली कोव्रब। तन्न मेकोमी आ अरेशो मटीब नेल्ल आन कली खतम पोक्ब।

<sup>21</sup> गो परमप्रभु यावे कली ठेयब सेल्ल्या, लोव्र पाइनुड। सोक्त् पाइश्शो नेल्लेमी मेको कली गेना हना यो ठेयब सेल्लनीम।

### मचाप्ब कली वारच पाइश्शो

**146** परमप्रभु यावे कली ठेयब सेलो। आं थुं, परमप्रभु यावे कली ठेयब सेलो।<sup>2</sup> गो ब्रॉइडा सम्म परमप्रभु यावे कली ठेयब सेल्लुड। गो मबेक्डा सम्म आं परमप्रभु कली कुम्सो पा ठेयब सेल्लुड।<sup>3</sup> गे रागी डा सासन पाइब मुर आन कली थमा मसुतीन। मारदे हना मेकोपुकीमी अरु आन कली वारच पने मचाप्नीम। भजन संग्रह ११८:८-९; येरमीया १७:५<sup>4</sup> मेको आन सोक्त् लाइब। मिनु मेकोपुकी खप दुम्नीम। मेना मेको आन मिश्शा पशो नेल्ल जाम्शा लाइब। उत्पत्ती ३:१९; उपदेसक ३:२०

<sup>5</sup> याक्ब आ परमप्रभु वारच पाइक्वा पुंडसीब मुर, ग्येरसीशो बाक्नीम। मेकोपुकीमी परमप्रभु यावे, आन परमप्रभु आ लां कोव्रशो बाक्नीम। येरमीया १७:७<sup>6</sup> मेको सरीड नु रागी समुन्द्र नु मेकेर बाक्ब आन कली सेल्ल बाक्ब। मेकोमी आ देंशो गेना हना यो पाइब।<sup>7</sup> मेकोमी दिप्चा पुंडसीब आन कली ठीक निसाफ पाइब। शोव्रलु बेक्शो आन कली जचा गेब। परमप्रभु यावेमी चोक्वा पुंडसीशो आन कली प्रॉइब।<sup>8</sup> परमप्रभु यावेमी मिक्च मताइब आन कली ताइब सेल्ल। मिनु आन थुं लुक्च लशो मुर आन कली आन थुं बारपाइक्ब। परमप्रभु यावेमी ठीक पाइब आन कली दाक्ब। भजन संग्रह १४५:१४<sup>9</sup> मिनु परमप्रभु यावेमी अर्को रागी डा मुर आन कली कोव्रब। मेकोमी वॉइश बेक्शो मीश मुर नु रोम रोइक्च आन कली यो कोव्रब। तन्न आ अरेशो मटीब आन मिश्शो दुम्चा मगेब। प्रस्थान २२:२०-२१<sup>10</sup> परमप्रभु यावेमी गेना हना यो सासन पाइब। सियोन, इ परमप्रभुमी पाला पाला सम्म सासन पाइब। परमप्रभु यावे कली ठेयब सेलीन। भजन संग्रह ९३:१

### परमप्रभु कली ठेयब सेल्लो

**147** परमप्रभु यावे कली ठेयब सेलीन। मारदे हना आंइ परमप्रभु कली ठेयब सेल्लिक कुम्सो पचा रिश्शो नु शिरशो बाक्ब। भजन संग्रह ९२:२<sup>2</sup> परमप्रभु यावेमी यरूसलेम कली सेल्ल। मेकोमी इस्राएल रे खेरशो ब्रशा बाक्शो मुर आन कली खुब्ब।<sup>3</sup> मेकोमी थुं जिक्वशो आन कली सापाइक्ब। मिनु मेको आन कली वाम फ्रेंब। यसैया ६१:१<sup>4</sup> मेकोमी सोरुल आन कली हिक्शा, का का पा आन नें वोइक्ब। यसैया ४०:२६<sup>5</sup> आंइ परमप्रभु ठेयब बाक्ब। मेको आ सक्ति नेल्ल क्येडा ठेयब बाक्ब। आ रुप्तीक सक्ति सुइम तुइक्ने मचाप्नीम। लूका १:५२<sup>6</sup> परमप्रभु यावेमी श्येत जाइब आन कली कोव्रब। तन्न आ अरेशो मटीब आन कली खपीम ताइक्ब।

<sup>7</sup> गे परमप्रभु यावे कली ठेयब सेल्लिक कुम्सो पने। तार पाइश्शो ताप्तीके ताप्शा आंइ परमप्रभु कली कुम्सो पा ठेयब सेलीन।<sup>8</sup> मेकोमी सरीड कली गोस्सुम सुम्पाइक्ब। रागी कली रेउ यिपाइक्ब। मिनु डांडाम घांस वापाइक्ब।<sup>9</sup> मेकोमी जन्तु नु बी ब्यफ आन कली थुल्ब। खद आन चाइक्ब आन कली यो जचा गेब। अय्युब ३८:४१<sup>10</sup> मेको शारा आन सक्ति तशा मयेरसीब। मुर आन रीब पा दोरशो मारेइ ममिम्ब।<sup>11</sup> तन्न परमप्रभु यावेमी आ कली मान पा हिंब नु आ गेना हना यो दाक्तीके कली रिम्ब आन कली दाक्ब।

<sup>12</sup> यरूसलेम, परमप्रभु यावे कली ठेयब सेलो। सियोन, इ परमप्रभु कली ठेयब सेलो।<sup>13</sup> मारदे हना मेकोमी इ सहर डा लाप्चोपुकी बोल्यो सेल्लो बाक्ब। मिनु इ आगाम बाक्ब आल आन कली आसीक गेब।<sup>14</sup> मेकोमी इ सांदमी लडाइ मद्रुम्पाइक्ब। मेकोमी इ कली रिश्शो चेरबीम रूपाइक्ब।

<sup>15</sup> मेकोमी आ शेंतीके रागीम सोइक्ब। मेको आ लोव्र रीब पा तेइ ते ब्राइब। अय्युब ३८:२२-३०<sup>16</sup> मेकोमी ऊन खोदेंशो पा फुं यिपाइक्ब। मिनु पुलु खोदेंशो पा फुरश यिपाइक्ब।<sup>17</sup> मेकोमी फुल्लु खोदेंशो पा मुप्स यिपाइक्ब। मेको आ काइश्शो फशेमी सु राप्ने चाप्बा डा? <sup>18</sup> मेकोमी लोव्र पा फुरश यिपाइक्ब। मेकोमी फश पपाइक्ब। मिनु ब्वाक्कु शाइक्पाइक्ब।<sup>19</sup> मेकोमी आ लोव्र याक्ब कली शेंब। मिनु इस्राएल कली आ फुल्लुम मुशा ब्रेक्शो लोव्र नु आ पतीक लोव्र शेंब। व्यवस्था ४:८; प्रेरित १४:१६; रोमी ३:२<sup>20</sup> मेकोमी अर्को रागी डा सुइ मुर आन पर्वम मोदेंशो मपावो। मिनु

मेकोपुकीमी आ पतीक लोत्र मतुइवनीम। परमप्रभु यावे कली ठेयब सेलीन।

परमप्रभु कली ठेयब सेल्शो

148 परमप्रभु यावे कली ठेयब सेलीन। परमप्रभु यावे कली सरीड रे ठेयब सेलीन। इर रे मेको कली ठेयब सेलीन। भजन संग्रह १०३:२०-२२<sup>२</sup> आ स्वर्ग डा गेय पाइबपुकी, मेको कली ठेयब सेलीन। आ स्वर्गम बाक्ब नेल्लेमी मेको कली ठेयब सेलीन।<sup>३</sup> नां नु तास्ला मेको कली ठेयब सेलीस। छेडछेड पाइशो सौरुल नेल्लेमी मेको कली ठेयब सेलीन। उत्पत्ती १:१-२७<sup>४</sup> नेल्ल क्येडा इर सरीड नु मेको आ तार बाक्ब ब्वाक्कु नेल्लेमी मेको कली ठेयब सेलीन।<sup>५</sup> मेकोपुकीमी परमप्रभु यावे कली ठेयब सेल्मेक्ल। मारदे हना मेकोमी लोत्र पवानु, मेको दुस्तेक्म। भजन संग्रह ३३:९<sup>६</sup> मेकोमी मेको आन कली गेना हना यो बाक्मल, दे वोइक्नु। मिनु मेकोमी मेको आन कली अरेवानु, आन बाक्तीकेम बाक्शा टिस्तेक्म।

<sup>७</sup> रागी रे पा ब्वाक्कुम बाक्ब ठेयब जन्तु नु शुश लुक्च लशो ब्वाक्कु, परमप्रभु यावे कली ठेयब सेलीन।<sup>८</sup> मी नु मुप्स, फुं नु फुरश नु फश गिवारमी आ देंशो टीनीम।

<sup>९</sup> पहाड नु डांडा, फल फुल सिब्ब रवा नु लाइशो रवा नेल्ले,<sup>१०</sup> ब्वाकी डा जन्तु नु बी ब्यफ नेल्ले, आइक्च खपीम गेशा गाक्ब जन्तु नु बेरब चिक्ब नेल्ले<sup>११</sup> रागी डा पिपपुकी नु जात जात डा मुर नेल्ले, रागी डा सासन नु हुकुम पाइब नेल्ले,<sup>१२</sup> वोंइश आल नु मीश आल, खाल्पा खाल्पी नु आल नेल्लेमी परमप्रभु यावे कली ठेयब सेलीन।<sup>१३</sup> मेको नेल्लेमी परमप्रभु यावे आ नें ठेयब सेल्मेक्ल। मारदे हना मेको आ नें ला ठेयब बाक्ब। मेको आ मान ततीक डा छेडछेड रागी नु सरीड तार बाक्ब।<sup>१४</sup> मेकोमी आ मुर आन कली सक्ति पाइशो नु ठेयब सेल्लु। आ कली थमा सुइक्ब नेल्ले नु आ नेक्था बाक्ब इस्राएलीपुकीमी परमप्रभु यावे कली ठेयब सेलीन। ब्यवस्था ४:७-८

परमप्रभु कली ठेयब सेल्शो

149 परमप्रभु यावे कली ठेयब सेलीन। परमप्रभु यावे कली नक कुम्सो का पने। थमा सुइक्ब आन गुम्तीकेमी मेको कली ठेयब

सेलीन। भजन संग्रह ३३:३<sup>२</sup> इस्राएल आ कली सेल्ब आ पर्बम ग्येरसेक्ल। सियोन डा मुर आन पिप आ पर्बम ग्येरसमल। भजन संग्रह १००:३; भजन संग्रह ९३:१<sup>३</sup> मेकोपुकीमी सिल पना पन मेको आ नें ठेयब सेल्मेक्ल। खैजडी नु बीना ताप्शा, मेको कली कुम्सो पामेक्ल।<sup>४</sup> मारदे हना परमप्रभु यावे आ मुर आन पर्बम ग्येरसीशो बाक्ब। आइक्च मुर आन कली ग्रातीकेमी ग्योम्ब।<sup>५</sup> थमा सुइक्बपुकी शुश ग्येरसमल। मिनु आन ब्राख्येमी यो ग्येरशा कुम्सो पामेक्ल।

<sup>६</sup> मेकोपुकीमी परमप्रभु कली ठेयब सेल्तीक कुम्सो पामेक्ल। मेको आन गुडमी निम्फा गे क्योरतीक पाइशो तरवार बाक्ल।<sup>७</sup> मेकोपुकीमी रागी रागी डा मुर आन कली सजाइ गेशा, क्येक्क लेत्नीम।<sup>८</sup> मिनु मेको आन पिप आन कली साडलो नु मेको आन ठेयब मुर आन कली फलाम के फ्रेंतीकेम फ्रेंने चाप्नीम।<sup>९</sup> मिनु मेकोपुकीमी ब्रेक्शा अरेशो कोवशा, मेको आन कली निसाफ पाइनीम। मेको परमप्रभु आ मुर आन रिम्शो बाक्ब। परमप्रभु यावे कली ठेयब सेलीन। यसैया ३४:-; यसैया ६३:४-६; योएल ४:२-२४

परमप्रभु कली ठेयब सेल्शो

150 परमप्रभु यावे कली ठेयब सेलीन। परमप्रभु कली आ बाक्तीकेमी ठेयब सेलीन। परमप्रभु यावे कली आ सरीड डा ठेयब बाक्तीकेमी ठेयब सेलीन।<sup>२</sup> मेको कली आ सक्ति पाइशो गेय आ पर्बम ठेयब सेलीन। मेको कली आ नेल्ल क्येडा ठेयब दुम्तीके आ पर्बम ठेयब सेलीन।

<sup>३</sup> तुराही ताप्शा, मेको कली ठेयब सेलीन। तार पाइशो ताप्तीक नु ठेयब ताप्तीक ताप्शा, मेको कली ठेयब सेलीन।<sup>४</sup> खैजडी ताप्शा, सिल पा मेको कली ठेयब सेलीन। तार पाइशो ताप्तीक नु बांसुरी ताप्शा, मेको कली ठेयब सेलीन।<sup>५</sup> आइक्च बुक्केल ताप्शा, मेको कली ठेयब सेलीन। ठेयब सेंदा पा मुरब बुक्केल ताप्शा, मेको कली ठेयब सेलीन।<sup>६</sup> सोक्त पाइशो नेल्लेमी परमप्रभु यावे कली ठेयब सेलीन। परमप्रभु यावे कली ठेयब सेलीन। भजन संग्रह ४१:१४; प्रकाश ५:१३

## हितोपदेस

सोलोमनमी मुर आन देशो लोव्र खुष्ठा नु आं थुं डा तुइक्तीक लोव्र एको किताबम ब्रेक्शो बाक्व। गेना ब्रेक्शो: एको किताब सोलोमोन आ सासन पची ना ९६५-९२६ बि. सी.म ब्रेक्शो बाक्व।

एको किताब सोलोमन आ सासन पची ना ९६५-९२६ बि. सी. ब्रेक्शो बाक्व।

१. सोलोमनम “जोक्व तुइक्व थुं मालीन”
२. सोलोमोनम “हेंथे मगाक्कीन”
३. अरु जोक्व तुइक्वम ब्रेक्शो रिम्शो पतीक लोव्र
४. सोलोमनम “मुर आन दातेमी रिम्शो बाक्कीन”
५. आगुर नु लेमुएलम “खिं डा मुर ग्येरसीशो दुम्चा माल्नीम” दे ब्रेक्शो बाक्व।

हितोपदेस किताब डा शेंसीचा माल्शो लोव्र: परमप्रभु यावे कली मान पा हिंब मुर जोक्व तुइक्व दुम्शा, रिम्शो दुम्नीम।

### एको किताब आ शेंशो लोव्र

१ एको दाऊद आ तौ इस्राएली आन पिप सोलोमन आ देशो लोव्र बाक्व। १राजा ५:९-१२ २ एको किताबम तुइक्तीके नु अर्ती टिका आ पबर्म शेंसीतीके लोव्र बाक्व। मेको शेंसाक्नी हना, गे रुब्ब नु जोक्व तुइक्व दुम्नीमी। ३ मिनु ब्रेक्व मुर आ अर्ती सुमी टीबा, मेकोमी तुइश्शा गेय पने चाप्ब। ठीक पतीके, ठीक निसाफ पतीके नु कुल मकोव्रथु रिम्शो पने चाप्ब। ४ मारेइ मजोक्व आन कली निप्स खाप्शा गेय पचा शेंब। ठिटा आन कली जोक्व नु होस पाइब सेल्ब। ५ जोक्व तुइक्व नेल्लेमी एको लोव्र रिम्शो पा नेंबमी तेम्शा शुश रुब्ब दुम्नीम। निप्स पाइश्शो मुर जोक्व दुम्शा, ६ एको देंतीक लोव्र, कथा, जोक्व तुइक्व आन लोव्र नु खुइश्शो लोव्र रुन्नीम। ७ परमप्रभु यावे कली मान पा हिंचा तुइक्तीक दुम्चा कली गोतीक बाक्व। मूर्खपुकीमी तुइक्तीके नु अर्ती मदाक्नीम। हितोपदेस ८:१३; हितोपदेस ९:१०; अय्युब २८:२८; भजन संग्रह १११:१०

### मरिम्शो पाइब नु मगाक्को

८ आं तौ, इ आफ आ अर्ती नेनो। इम्मा आ शेंशो मप्रोनो। हितोपदेस ६:२०; ब्यवस्था २१:१८-२१ ९ मारदे हना मेको इ पिया डा ग्योम्तीके नु इ कली सुन के माला नस। १० आं तौ, मरिम्शो पाइब मुरुम इ कली “हेंथे पय” दे लोव्र पास्तेक्म हना, मेको आन लोव्र मबिस्सो। हितोपदेस १६:२९; ब्यवस्था १३:७-९ ११ मेकोपुकीमी “पिवो, मुर साइक्चा कली बाप्शा बाक्व। रिम्शो पाइब कली बाप्शा, १२ मेको कली बेक्शो मुर आन बाक्तीकेम सोइक्तय। गो मेको कली सेसीन तुरसुम सोइक्तय। १३ मिनु गोपुकीम आ बाक्शो शोंप नेल्ल रोइक्नय। मेको रोइश्शोमी आंम आंम खिं प्रिनय। १४ गे, गोपुकी नु लते हना, नेल्ल गारशा योक्सय” देंतेक्म हना यो, १५ आं तौ, गे मेकोपुकी नु मलावो। मेकोपुकी नु मगाक्को। १६ मारदे हना मेकोपुकी मरिम्शो गेय पचा कली रीब पा दोरनीम। हुश ख्राक्श पोक्चा कली चुइक्नीम। १७ चिक्बीमी तचा डा पा ब्यारद दाइश्शो शोर गाक्शो गेय बाक्व। १८ मेको मुरपुकी साइक्चा पुंइसीचा कली बाप्शो बाक्नीम। आंमान खतम दुम्चा कली बाप्शा बाक्नीम। १९ मुर आन मार मार रोइश्शा, तेल्सीबपुकी मोदेशो पा साइक्चा पुंइसीनीम।

### तुइक्तीकेमी मुर आन कली अरेब

२० लां मेर तुइक्तीके लोव्र नेंसीब। सहर मेर आ सेंदा गूब। हितोपदेस ८:१-३ २१ मेको शुश मुर आन देल्तीके मेर ब्रेन्ना ब्रेन्न बाक्व। सहर ओव्रतीक ठेयब लाचोमी आ लोव्र पाइब। २२ मार लोव्र पाइब देंशा हना “गे मारेइ मजोक्वपुकी, गेना सम्म मारेइ मजोक्व दुम्चा दाक्नीनी? गे शुक्शी

पाइबपुकी, गेना सम्म शुक्शी पचा दाक्नीनी? गे मूर्खपुकी, गेना सम्म तुइक्तीके कली काइ मदाक्नीनी? २३ गे आं हुइश्शो लोव्र नेनीन। आं मिम्शो इन कली देंनुड। आं लोव्र इन कली तुइक्पाइक्नुड। २४ मिनु गो इन कली ब्रेत्तुनु, गोपुकीम मनेनी। गो आं गुइ हामुनु, सुइ मपिनी। यसैया ६५:२, १२ २५ आं अर्ती नेल्ल मटितीके, आं हुइश्शो नेंचा मदाक्तीके, २६ गो यो गे श्येत जनी ना, रिश्शा बाक्नुड। मिनु गे शुश हिंनीना, गो शुक्शी पाइनुड” दे लोव्र पाइब। ब्यवस्था २८:६३ २७ शुश हिंतीके ठेयब फश खोदेशो पा इन तारी जाक्त हना, श्येत फश गिवार खोदेशो पा इन तार जाक्त हना, श्येत नु हिंतीकेम इन कली सुम्तु हना, २८ मेना आं कली थोनीनु, गो इन कली लोव्र मलेत्नुड। गोपुकीमी आं कली शुश माल्तीनी हना यो, मथिल्लीनी। यसैया ५९:२; मीका ३:४ २९ मेकोपुकीम जोक्तीक कली काइ मदाक्तीके नु परमप्रभु यावे कली मान मपथु महिंतीके, ३० आं अर्ती मनेतीके, आं हुइश्शो नेंचा मदाक्तीके, ३१ मेकोपुकीमी आन आन पशो मरिम्शो गेय आन इनाम तचा माल्नीम। मिनु आन आन मरिम्शो पतीकेमी ब्रीमल। ३२ मारदे हना मारेइ मजोक्व आन मटितीके साइक्चा पुंइसीनीम। मूर्ख आन मारेइ ममिम्तीके खतम दुम्नीम। ३३ तन्न सु सुम आं लोव्र नेंनीमी, मेकोपुकी श्येत मजाइनीमी। महिंथु, रिम्शो दुम्शा बाक्नीमी।

### तुइक्तीकेमी बेक्तीक रे प्रोंइब

२ आं तौ, गे आं लोव्र नेनो, आं शेंशो इ थुंम वोइक्तीवी हना, २ गे इ नोफा दाइश्शा, तुइक्तीक लोव्र नेंतीवी नु रुप्तीके दाक्तीवी हना, ३ गे जोक्तीके तुइक्तीक माल्शा, रुप्तीके कली ठेयब सेंदा पा पुंइतीवी हना, याकूब १:५ ४ गे मेको कली चांदी खोदेशो पा माल्तीवी नु थिम्शा वोइश्शो शोंप माल्शो खोदेशो पा दोप्तीवी हना, ५ गे परमप्रभु यावे कली दोपा मान पा हिंचा माल्बा, मेको तुइक्ने चाप्नेवे। मिनु गे परमप्रभु कली तुइश्शा शेंसीने चाप्नेवे। ६ मारदे हना परमप्रभु यावे तुइक्तीक थुं गेब बाक्व। आ शोव्र रे जोक्तीक नु रुप्तीक लोव्र गूब। दानीएल २:२०-२३ ७ मेकोमी रिम्शो थुं पाइश्शो मुर आन कली तुइक्तीक थुं गेब। मेको दोस मताइब आन कली तेक्तीके बाक्व। भजन संग्रह ७:११ ८ परमप्रभु यावेमी ठीक निसाफ बाक्वा देय मबाक्वा मेको कोव्रब। आ लां गाक्व आ मुर आन कली कोव्रब। ९ मिनु गे ठीक पतीके नु ठीक निसाफ, कुल मकोव्रथु रिम्शो पतीके नु रिम्शो लां मार बाक्मे रुप्नेवे। १० मेना तुइक्तीके इ थुंमी ओव्रब नु इ जोक्तीकेमी इ थुं कली ग्येरपाइक्व। १कोरिन्थी १:३० ११ मिनु होस पतीकेमी इ कली खाल पाइब। रुप्तीकेमी इ कली कोव्रब। १२ मेकोमी इ कली मरिम्शो लां नु दूली लोव्र पाइब मुर रे प्रोंइब। १३ मेकोपुकी रिम्शो थुं पाइश्शो मुर आन लांम गाक्चा प्रोंइशा, छिडछिड डा लांम गाक्नीमी, १४ मेकोपुकी थम मरिम्शो पचा कली ग्येरसीनीम। शुश दूली नु मरिम्शो पतीकेमी ग्येरसीनीम। १५ मेको आन पतीक काइ मरिम्शो बाक्व। हेंथे लां गाक्व बाक्नीम।

16 होस पतीके नु रुप्तीकेमी इ कली हेंथे पाइब मीश मुर नु आ वाल्वा डा लोत्र रे यो प्रॉइब। 17 मेकोमी आ ग्युबे पशो वॉइश कली प्रॉइशा, परमप्रभु यावे आ डोंइती पशो कबल प्रेंताक्व। 18 मेको आ खिं ओव्रब नेल्ल बेक्तीक लां लाइनीम। मेको आ खिं डा लां बेक्शो मुर आन बाक्तीक लतीक लां बाक्ब। 19 मोदेशो मीश मुर आ बाक्तीक लाइबपुकी गेनायो लेन्ने मचाप्नीम। मिनु ब्रॉइतीक लां यो मताइनीम।

20 मोपतीके रिम्शो मुर आन लां गाक्को। ठीक पाइब आन लां गाक्को। 21 मारदे हना रिम्शो थुं पाइश्शो मुर रागीम बाक्वा ताइनीम। दोस मताइबपुकी रागीम लीनीम। *भजन संग्रह ३७:९; मत्ती ५:५* 22 तन्न परमप्रभु यावे आ अरेशो मटीबपुकी आन शाक्श रेन रागी रे तुल्चा पुंडसीनीम। थमा मसुइक्बपुकी सुवा खोदेशो पा ताइक्वा पुंडसीनीम। *भजन संग्रह ३७:१०*

थमा सुइक्बमी आसीक ताइनीम

3 आं तौ, आं अरेशो मप्रेंदो। मिनु आं शेंशो लोत्र इ थुंमी वोतो। *लेवी १८:५* 2 मारदे हना मेकोमी इ कली शुश बर्स ब्रॉइतीक नु थम रिम्शो बाक्वा गेनीस। 3 गेना हना यो दाक्शा गेनायो मप्रेंडथु, बाक्को। मेको निक्शी कली माला खोदेशो पा रेल्शा, इ थुंम ब्रेक्शो खोदेशो पा वोतो। *ब्यवस्था ६:८; येरमीया ३१:३३* 4 मो पाप्तीवी हना, गे परमप्रभु आ आसीक ताइनेवे। मुर नेल्लेमी इ कली रिम्शो देंनीम।

5 गे इ थुं नेल्लेमी परमप्रभु यावे आ देंशो मिम्शा, थमा सुतो। इ आंम जोक्शो तुइश्शो थमा मसुतो। 6 इ पतीक नेल्लेमी “परमप्रभु यावेमी मार दाक्बा” दे मिम्तो। मो पाप्तीवी हना, परमप्रभु यावेमी इ कली ठीक लां कोंइब। 7 गे “गो जोक्ब तुइक्ब मुर नड” दे ममिम्तो। तन्न परमप्रभु यावे कली मान पा हिंनो। मरिम्शो पतीके रे डोन बाक्को। *यसैया ५:२१* 8 मो पाप्तीवी हना, मेको इ रां कली सापाइक्तीके बाक्ब। मिनु इ गुइ खोइल बोल्यो दुम्नीम।

9 इ शोंपोमी परमप्रभु यावे कली मान पावो। मिनु इ बाली नाली रे नेल्ल क्येडा डोंइती सिश्शोमी आ नें ठेयब सेलो। *प्रस्थान २३:१९* 10 मो पाप्तीवी हना, इ कोठो भकारी अन्नमी शुश ब्रीशो बाक्नीम। इ अडगुर खाक्तीके अडगुर रसम ब्रीशो बाक्नीम।

11 आं तौ, परमप्रभु यावेमी इ कली देंशो रिम्शो पावो। आ हुइश्शो नेंशा, मरिम्शो मसुतो। *हिब्रू १२:५-६; अय्युब ५:१७-१९* 12 मारदे हना परमप्रभु यावेमी आ दाक्शो मुर आन कली ला हुइक्ब। मेकोमी रिम्शो आफोमी आ दाक्शो तौ कली खोदेशो पा सजाइ गेब। *१कोरिन्थी ११:३२; प्रकाश ३:१९*

तुइक्तीकेमी मुर कली रिम्शो सेल्ब

13 तुइक्तीके ताइब नु रुप्बपुकी ग्येरसीशो मुर बाक्नीम। 14 मारदे हना तुइक्तीके चेम्शो चांदी क्येडा शुश रिम्शो बाक्ब। मिनु आ चेम्शो सुन क्येडा यो शुश क्येट लाइब बाक्ब। *हितोपदेस ८:१०* 15 तुइक्तीके हीरा क्येडा शुश क्येट लाइब बाक्ब। इ माल्शो मारेइ मारेइ नेल्ल मेको क्येडा आइक्च बाक्नीम। 16 मेको आ ग्युरा गुइमी शुश ब्रॉइतीक नाक्त् बाक्नीम। आ पेरा गुइमी शोंप नु मान ततीके बाक्ब। 17 मेको आ लां रिम्शो नु थुं नाइक्तीके बाक्नीम। 18 मेको नु बाक्बपुकी शुश नाक्त् ब्रॉइनीम। मेको कली मुष्ठा बाक्ब आन पर्वम मुरपुकीमी “मेकोपुकी ग्येरसीशो मुर बाक्नीम” देंनीम। *हितोपदेस ११:३०; हितोपदेस १३:१२; हितोपदेस १५:४*

19 परमप्रभु यावेमी आ तुइक्तीकेमी रागी सेल्लु। आ रुप्तीकेमी सरीड वोइक्त्। *हितोपदेस ८:२२-३१* 20 आ जोक्तीकेमी ब्वाक्कु बुक्पाइक्त्। मिनु गोस्स रे फुरश यिपाइक्त्।

21 आं तौ, आं देंशो गेय पचा क्येडा डोंइती मिम्शा, गेनायो मप्रेंनो। ठीक तुइक्तीके नु होस पतीके गे नु बाक्ल। 22 मारदे हना मेको इ ब्रॉइतीक नु इ दारस बाक्नीस। 23 मिनु गे इ लांम रिम्शो पा गाक्डे नु इ खोइल दाइल मपाइब। 24 गे निस्सेनु, हिंका ममाल्नेवे। इमेनु ब्रोंवशो निन्द्रा पाइनेवे। *भजन संग्रह ३:६* 25 शुश हिंका डा दुम्मेनु, महिनो। फश पवानु, परमप्रभु यावे आ

अरेशो मटीबपुकी खतम दुम्मानु, गे महिनो। 26 मारदे हना परमप्रभु यावे गे नु बाक्ब, मेकोमी इ खोइल कली रेत्तीक रे प्रॉइब। *हितोपदेस १०:२९*

मुर आन कली वारच पावो देंशो

27 मिनु मुर आन कली गेचा डा गेवो। इ गुइमी बाक्त् हना, शिंम मदुमो। 28 गे नु बाक्त् हना “दीसा जाक्को। मिनु गेनन” दे इ नेक्था डा मुर आन कली मदेनो।

29 इ नेक्था बाक्ब कली मरिम्शो पचा ममिम्तो। मारदे हना इ कली थमा सुइश्शा, इ नेक्था बाक्ब। 30 इ कली मारेइ मरिम्शो मपथु जिचा मपोक्को। 31 रोइक्ब मुर आ मारेइ मारेइ तशा, मवलो। मेको आ लांम काइ मगाक्को। 32 मरिम्शो दूली पाइब तशा, परमप्रभु यावे ग्रांरा दीब। रिम्शो थुं पाइश्शोपुकी चहिं मेको नु बाक्वा ताइनीम। *भजन संग्रह २५:१४* 33 परमप्रभु यावेमी आ अरेशो मटीब आन खिं डा मुर आ सराप राइब। तन्न ठीक पाइब आन खिंम आसीक राइब। 34 मिनु परमप्रभु यावेमी ठेयब लेश्शो शुक्शी पाइब मुर आन कली शुक्शी पाइब। ब्रेम्शो थुं पाइश्शो आन कली चहिं शिशी पाइब। *१ पत्रुस ५:५* 35 तुइक्ब मुरपुकी मान पाइक्वा पुंडसीनीम। तन्न मटीब मूर्खपुकी मुने दोक्नीम।

तुइक्तीक थुं रिम्शो बाक्ब

4 आं तौपुकी, आं अर्ती नेनीन। गे जोक्ब तुइक्ब दुम्चा कली इन नोफा दाइश्शा नेनीन। 2 गो इन कली रिम्शो पा अरेनुड। आं शेंशो लोत्र मप्रोनीन। 3 गो यो आं आफ नु बाक्शो बाक्ती। गो आं ममा आ दाक्शो तौ बाक्ती। 4 मिनु आं आफोमी आं कली “आं लोत्र इ थुंमी वोतो। मिनु आं शेंशो टिशा ब्रोनो। *लेवी १८:५* 5 तुइक्तीके मालो नु जोक्ब तुइक्ब दुमो। आं देंशो लोत्र मप्रोनो। 6 मेको कली मप्रॉइतीवी हना, इ कली कोव्रब। मेको कली दाक्ताक्वी हना, इ कली खाल पाइब। 7 तुइक्तीके आ गोतीक मार बाक्त् देंशा हना, तुइक्तीके शुश माल्चा माल्नेवे। मार ताप्तीवी हना यो, नेल्ल क्येडा ठेयब जोक्ब तुइक्ब दुमो। 8 मेको कली ठेयब सेल्लतीवी हना, इ कली ठेयब सेल्ब। गे मेको कली मुप्तीवी हना, इ कली मान ततीक गेब। 9 मेकोमी इ पिया दारशो पा ग्योम्पाइक्ब। इ पिया तारी रिम्शो सिरपेच गुक्ब” दे शेंताक्पी।

तुइक्तीकेमी ब्रॉइचा गेब

10 आं तौ, इ नोफा दाइश्शा, आं लोत्र नेंशा, ब्रावो। मो पाप्तीवी हना, गे शुश ब्रॉइनेवे। *हितोपदेस ३:२* 11 गो इ कली तुइक्तीक लां शेंताक्न। गो इ कली रिम्शो थुं डा मुर आन लांम गाक्पाइक्त्तन। 12 गे गाक्डेनु, इ कली सुइम मतेक्नीम। मिनु दोरते हना, दाइल मपांइसीनेवे। 13 अर्ती कली मिम्शा, मेको कली मप्रेंदो। मेको कली टिवो। मारदे हना मेको इ ब्रॉइतीक बाक्ब। 14 परमप्रभु यावे आ अरेशो मटीब नु मगाक्को। मरिम्शो पाइब आन लां मगाक्को *भजन संग्रह १:१* 15 मेकोपुकी नु मगाक्को। आन लां मलावो। आन लां हेरशा लावो। 16 मारदे हना मेकोपुकी मरिम्शो मपामे सम्म इजे मचाप्नीम। मुर कली मथिपदमे सम्म निन्द्रा मपाइनीम। *भजन संग्रह ३६:५; मीका २:१* 17 परमप्रभु यावे आ अरेशो मटितीके मेको आन जचा थोव्रक खोदेशो बाक्ब। हुश खाक्श पोक्तीके आन तूचा थोव्रक खोदेशो बाक्ब। 18 तन्न ठीक पाइब आन लां सुनी डा छेडछेड खोदेशो बाक्ब। मेको नाक्ती उइक्थ दुम सम्म बारना बारन शुश छेडछेड दुम्ब। *हितोपदेस २४:२०* 19 परमप्रभु यावे आ अरेशो मटीब आन लां क्येर नाक्दो डा छिडछिड खोदेशो बाक्ब। मेकोपुकीम मारेइमी दाइल पाइक्नीम, दे मतुइक्नीम। 20 आं तौ, आं लोत्र नेनो। इ नोफा दाइश्शा, आं देंशो नेनो। 21 आं लोत्र कली गेना हना यो मिम्तो। मिनु मेको कली इ थुंमी वोतो। 22 मारदे हना सु मेको ताइबा, मेको आ ब्रॉइतीक दुम्ब। मिनु मेको आ रां नेल्ल कली सापाइक्तीक बाक्ब। *हितोपदेस ३:८* 23 नेल्ल आन क्येडा इ थुं कली कोव्रडो। मारदे हना मेको रे इ ब्रॉइतीक जाक्ब। 24 इ शोव्र कली मरिम्शो लोत्र पचा मगेवो। हेंथे लोत्र इ क्येडा डोन वोतो।

25 इ मिक्ची मरिक्थु ठीक पा डोंइती कोव्रडो। सिका मपथु डोंइती गे कोव्रडो। हितोपदेस १७:२४ 26 ठीक लां ला गाक्को। मिनु इ पतीके नेल्ल रिम्शो दुम्नीम। 27 ग्युरा पेरा मलावो। मरिम्शो पतीक नेल्ल रे डोन बाक्को। यहोसु १:७

तेल्लेम क्येडा होस पचा

5 आं तौ, आं तुइक्तीक नेंशा शुश मिम्तो। आं रुपतीक तुइक्चा कली इ नोफा दाइक्तो। 2 मोपा गे होस पा बाक्शा, जोक्शा लोव्र पने चाप्नेवे।

3 हेंथे पाइब मीश मुर आ शोव्र रे खुदो याब्ब। मिनु मेको आ लोव्र तेल क्येडा ग्रेन्देल बाक्ब। हितोपदेस २:१६-१९ 4 नोले मेको मीश मुर ककीर खोदेशो कशो नु निम्फा गे हेश्शो धार पाइश्शो तरवार खोदेशो दुम्ब। 5 मेको आ लां बेक्चा कली लुकच लाइब। मेको बेक्शो मुर आन बाक्तीके लचा कली आंम कली तेक्ने मचाप्ब। 6 मिनु मेको ब्रोंइचा गेब लां रे डोन लाइब। मेको आ लां हेंथे बाक्त हना यो, मेकोमी मारेइ मतुइक्ब।

7 मुल आं तौपुकी, आं लोव्र नेनीन। आं देंशो लोव्र मनेंशो खोदेशो मपने। 8 मोदेशो मीश मुर क्येडा डोन बाक्कीन। मिनु आ खिं डा लाप्चो आ नेक्था मलने। 9 लाइतीनी हना, गे इन मान अरु आन कली गेशा, साइक्ब आ गुइमी दुम्नीनी। 10 मिनु अरु मुरुमी इन शोंप नेल्ले जाइनीम। इन श्येत पा चेम्शो मारेइ मारेइ अरु आन खिं लाइब। 11 मिनु नोले गे श्येत जशा, बेक्चा चिक्शा हुकयी पा, रां नेल्ल सोव्रशा गेयशो दुम्नीनी। 12 मिनु गे “गो मारेदे परमप्रभु आ शेंशो मपडा, माइ? मारेदे आ हुइश्शो मटिडा माइ? 13 गो आं कली शेंब आन लोव्र मनेंनु। आं कली अर्ती गेब आन लोव्र मटिड। 14 मुल गो खतम दुम्ती। मुर नेल्ल आन तुइक्चा डा पा खतम दुम्ती” देंनेवे। ब्यवस्था २२:२८-२९ 15 मिनु गे आंम कुवा डा ब्वाक्कु नु आंम बुक्तीके डा ब्वाक्कु तूशो खोदेशो पा गे इ मीश नु बाक्को। 16 इ बुक्शो ब्वाक्कु, लां मेर लचा गेनेवे? अरु मीश रे थिशो आल लांमी बाक्मानु, इ कली रिम्शो दुम्बा? 17 इ आल इ के ला दुम्ल। मेको अरु आन के मदुम्ल। 18 इ बुक्शो ब्वाक्कुम आसीक तवल। इ ठिटा बाक्ची ना ग्युंवे पशो मीश आल नु ग्येरसीशा बाक्को। उपदेसक ९:९ 19 मेको दारशो किश्श नु रिम्शो रोकेश खोदेशो बाक्ब। मेको आ दारस नु दाक्तीकेमी गे गेना हना यो ग्येरशा बाक्को।

20 आं तौ, गे मारेदे मारेइ मतुइक्थु हेंथे मीश मुर नु गाक्नेवे? गे मारेदे अरु मुर आ मीश कली मुप्नेवे? 21 मारेदे हना परमप्रभु यावेमी मुर आ पशो नेल्ल ताइब। मेकोमी मुर आन लां नाक्ब। 22 परमप्रभु यावे आ अरेशो मटीब मुर आ मरिम्शो पशोमी ग्याइक्चा पुंडसीब। मेको आ पाप आ ग्याइलीमी रेट्चा पुंडसीब। 23 आंम कली चलने मचाप्थु, हुइश्शो मटितीके मेको बेक्ब। आ मरिम्शो पतीकेम मेको जाग्शा लाइब।

४ ओटा होस पतीके

6 आं तौ, इ नेक्था डा मुर आ जमानी दुम्ते हना, सल्ला पने थुम्शो बाक्ते हना, हितोपदेस ११:१५; हितोपदेस २०:१६; हितोपदेस २२:२६ 2 गे इ लोव्रमी फ्रेंसीशो बाक्ते हना, गे गुम्चशो बाक्नेवे। 3 मुल मार पचा माल्नेवे देंशा हना, गे आंम कली प्रोनो। मारेदे हना गे इ नेक्था डा मुर आ गुइमी बाक्नेवे। मेको कली नमो सिमो पा आ डोंइती बाप्पो। 4 इप्शा मबाक्को। काइ निन्द्रा मपावो। 5 किश्श सिखारी आ गुइ रे ब्रोंइशो नु चिक्ब ग्याइक्ब आ गुइ रे बेरशो खोदेशो पा, गे यो आंम कली प्रोनो।

6 गे अल्से, रकमिक्च आन कली कोव्रडो। आन पशो कोव्रडो। मिनु जोक्ब तुइक्ब दुमो। हितोपदेस १०:४; हितोपदेस २०:४ 7 मेको आन कली अरेब, सासन पाइब नु हुकुम पाइब मबाक्तेक्म हना यो, 8 मेकोपुकीमी जचा थोव्रक खेक्चा कली खुप्ची ना खुप्नीम। 9 गे अल्से, गेना सम्म इप्शा बाक्नेवे? गेना निन्द्रा रे सेंसीशा बोक्नेवे? 10 याम का डा निन्द्रा पतीके, याम का डा मुकु जिशा बाक्तीके नु याम का कुचुमी गुइ वोइश्शा, नाइश्शा बाक्तीकेमी, हितोपदेस २४:३३-३४ 11 प्रुडग दुम्तीके खुइ खोदेशो पा जाक्ब। इन मार मार माल्तीके या कुरशो लडाइ पाइब खोदेशो पा जाक्ब।

12 हिंचा डा मरिम्शो पाइब नु शोर गाक्शो मुर हेंथे लोव्र पा गाक्नीम। हितोपदेस १०:३१-३२ 13 मिक्च रिक्शा, खोइलीमी चाल पा, ब्रेचोमी यो चाल पाइनीम। हितोपदेस १०:१० 14 मेको आन दूली थुंमी मरिम्शो मिन्नीम। मेकोपुकीमी गेना हना यो मुर आन कली जिपाइक्नीम। 15 मोपतीके मेको आन मतुइक्चा डा पा मेको आन तार श्येत जाक्ब। मिनु मारेइ पचा मतथु, खतम दुम्नीम।

16 परमप्रभु यावेमी ६ ओटा थोव्रक काइ मदाक्ब। ७ ओटा थोव्रक पशो तशा ग्रांरा दीब। 17 मेको मार बाक्नीम देंशा हना, ठेयब लेत्तीके, जोल पतीके, दोस मताइब मुर आन कली हुश खाक्श पोक्तीके, 18 मरिम्शो पचा कली मिम्ब थुं, मरिम्शो पचा चुइक्तीके, 19 जोल पाइब सांक्छी बाक्तीके नु वोबु आन दातेम जिचा पोक्ब काइ मदाक्ब। मेको ७ ओटा थोव्रक बाक्नीम।

वोंइश मुर आन कली अर्ती

20 आं तौ, इ आफ आ अरेशो टिवो, इम्मा आ शेंशो लोव्र मप्रोनो। हितोपदेस १:८ 21 मेको गेना हना यो इ थुंम वोतो। मेको कली माला खोदेशो पा रेल्सो। 22 मिनु गे ते लते हना यो, मेकोमी इ कली लां कोंइनीस। गे इप्ते हना, मेकोमी इ कली खाल पाइनीस। गे सेंसेनु, गे नु लोव्र पाइनीस। भजन संग्रह ११९:१७ 23 मारेदे हना मेको अरेशो बत्ती नु शेंशो छेडछेड बाक्नीस। ठीक पचा कली हुइक्तीके ब्रोंइचा गेब लां बाक्ब। 24 मेकोमी हेंथे गाक्ब मीश मुर रे डोन बाक्पाइक्नीम। मिनु हेंथे गाक्ब ग्युंवे पशो मीश मुर आन ग्रेन्देल लोव्र रे डोन बाक्पाइक्नीम। हितोपदेस २:१६ 25 मेको आ दारशो कुल तशा इ थुंमी मवलो। मेको आ कोव्रशोमी इ कली हेंथे मगाक्पदल। 26 तेल्लेम आ गाल्च शोब्ले का डा ला बाक्ब। तन्न ग्युंवे पशो मीश मुर नु बाक्चा वोंइश मुर आ ब्रोंइतीक नेल्ल रोइक्ब। 27 मुरुमी आ कुचुमी मी वोइक्नु हना, आ वा मदुप्चा डा? 28 मुर ब्रशो कोइला तार गाक्त हना, मेको आ खोइली मचोइबा डा? 29 अरु मुर आ मीश नु इक्ब मुर मोदेशो दुम्शा, सु मेको मीश मुर कली थीबा, मेको सजाइ मतथु, मब्रोंइब। हितोपदेस ५:८-१४ 30 खुइमी शोव्रलु बेक्शा, जचा थोव्रक खुइ पाप्नु हना, मेको मुने मदोक्ब। 31 तन्न मेको ग्याइक्चा पुंडसाक्व हना, आ खुइ पशो ७ खेयप तेम्शा थाप्चा माल्ब। मेकोमी आ खिं आ शोंप नेल्ल थाप्चा माल्ब। प्रस्थान २१:३७ 32 मोपा मुर आन मीश नु इक्ब, निप्स मपाइश्शो मूर्ख बाक्ब। मोदेशो पाइबमी आंम कली खतम सेल्ब। 33 मेको तुप्चा नु मुने तोक्चा पुंडसीब। मेको आ मुने गेनायो मक्याम्सीब। 34 मिनु मेको मीश मुर आ वोंइश शुश गाइक्ब। मिनु मेकोमी क्येक्क लेत्ची नाक्ती मेको कली मारेइ शिशी मपाइब। 35 मेको कली गिश क्येत गेप्तीवी हना यो, मेकोमी मताक्ब।

हेंथे पाइब मीश मुर

7 आं तौ, आं लोव्र टिवो। आं शेंशो लोव्र इ थुंम वोतो। 2 गे आं अरेशो मप्रेंताक्वी हना, गे ब्रोंइनेवे। आं शेंशो इ मिक्च खोदेशो पा होस पा वोतो। 3 मेको कली इ ब्रेचोम फ्रेंदो। इ थुंमी ब्रेक्शा वोतो। 4 गे तुइक्तीक कली “आं समी ननी” देनो। मिनु जोक्तीक तुइक्तीके कली “आं नेल्ल क्येडा गारब वारच बाक्नीनी” दे लोव्र पावो। 5 मो पाप्तीवी हना, मेकोमी इ कली हेंथे पाइब ग्युंवे पशो मीश मुर आ ग्रेन्देल लोव्र रे प्रोंइब।

6 मिनु गोमी आं खिं डा झेल रे कोंवता। गोमी लां गे कोंवता। 7 मिनु गो मार ताता देंशा हना, मारेइ मजोक्ब नु ठिटा आन दातेमी निप्स मपाइश्शो ठिटा का कली ताता। 8 मेको वोंइश आल लां मेर गाक्शो ताता। मेको हेंथे गाक्ब मीश मुर आ खिं गे लना लन पशो ताता। 9 गो मेको कली नां रिचावानु, छिडछिड दुम्ची ना ताता। 10 मेको मीश मुर मेको कली गुम्चा कली गूत। तेल्लेम खोदेशो पा फेक्शा “मेको कली हेंथे खोइक्पाइक्नुड” दे मिम्शो बाक्त। 11 मेको मीश मुर मारेइ महिंन नु मुने मपाइब बाक्ब। मेको गेनायो आ खिंम बाक्चा मदाक्ब। 12 मिनु मेको लां एर ऑथ, शुश मुर बाक्तीके मेरे हिरशा, कुना मेर रिम्ना रिम्न बाक्ब। 13 मिनु मेको मीश मुरुमी मेको कली ग्याइश्शा, पुक्पु पा मुने मपथु 14 “गो मुलाक्ती दुशा बाक्चा आ पर्वम चढ़ेतीके चढ़ेचा माल्शो नड। मेको आं कसम मुलाक्ती खाप्ता। लेवी ७:१५-१७ 15 मोपतीके गो इ कली गुम्थ जाक्ती। गो इ कली शुश माल्शा

थित्ता। 16 गो आं ब्राख्येमी बरखी ब्राता। मेको इजीप्त रागी डा श्येलेम प्रोव्रशो बाक्ब। 17 गो आं ब्राख्येमी मूरे, एलोव्र नु सिन्कोलीमी ब्रोव्रशो रिना पपाइक्ता। 18 पिवो। गो निकशी इप्स। नेल्ल नाक्दो काथा ग्येरसीशा इप्स। 19 मारदे हना आं वोंइश खिमी मबाक्ब। मेको डोन लत। 20 मेको शुश क्येट कुरसीशा लत। मोपतीके पूर्ने सम्म मजाक्ब” देंत।

21 मोपा शुश लेम्शा, मेकोमी वोंइश आल कली लाइक्त्तु। आ मिलो शिलो लोव्रमी मेको कली हेंथे खोइक्पाइक्त्तु। 22 मिनु मेको वोंइश आल मेको मीश मुर आ नोले रीब पा खोइक्त्तु। क्योरचा कली खुल्शो ब्यफ खोदेंशो पा गाक्त्त। ब्वारदमी रेट्चा कली प्रेक्शो किश्श खोदेंशो पा मेको आ नोले लत। 23 मिनु ब्राम ख्रशा, बेक्चा सम्म रिम्ब। चिक्ब ब्वारदम रेट्चा चिक्शो खोदेंशो पा “बेक्नुड” दे मतुइक्ब।

24 मुल आं तौपुकी, आं लोव्र नेनीन। इन नोफा दाइश्शा, आं लोव्र नेनीन। 25 इन थुं मोदेंशो मीश मुर आ लांम लचा मगेने। मेको आ हेंथे लां मलने। 26 मेकोमी शुश मुर आन कली खतम सेल्त्तु। आ साइश्शो शुश बाक्नीम। 27 मेको आ खिं बेक्शो मुर आन बाक्तीक लतीक लां खोदेंशो बाक्ब। मेको लां बेक्तीक कोठा जाक्दीप्ब।

### तुइक्तीके ठेयब बाक्ब

8 तुइक्तीकेमी लोव्र मपाइबा डा? रुपतीकेमी ठेयब सेंदा पा मब्रेप्बा डा? हितोपदेस १:२०-२३ 2 मेको लां आ नेक्था डा डांडा तारी नु ब्रालाम दोक राप्ब। 3 ठेयब लाप्चो आ नेक्था सहर आ डोंइती, मेको आ ओव्रतीकेमी ठेयब सेंदामी ग्रीब। 4 मार देशा ग्रीब देशा हना, मुरपुकी, गो इन कली लोव्र पाइनुड। मुर नेल्ल आन कली लोव्र पाइनुड। 5 मारेइ मजोक्बपुकी होस पतीके शेंसीन। निप्स मपाइश्शो बाक्तीनी हना, निप्स पाइश्शो दुमीन। 6 नेनीन, गो रिम्शो लोव्र पाइनुड। आं लोव्र ठीक बाक्ब। 7 गो थमा लोव्र ला पाइनुड। परमप्रभु यावे आ अरेशो मटितीके तशा, गो ग्रान्गा दीनुड। 8 गो ठीक लोव्र ला पाइनुड। दूली नु हेंथे लोव्र मपाइनुड। 9 मिनु मेको आं लोव्र रुपब आन कली मखुइश्शो लोव्र बाक्ब। जोक्ब आन कली ठीक लोव्र बाक्ब। 10 चांदी आ पा डा आं अर्ती खुप्तीन। क्येख सुन आ पा डा जोक्ब थुं मालीन। हितोपदेस ३:१४ 11 मारदे हना हीरा क्येडा तुइक्तीके रिम्शो बाक्ब। इ माल्शो मारेइ मारेइ नेल्ल मेको क्येडा आइक्च बाक्नीम। 12 गो तुइक्तीके नड। गो होस पतीक नु बाक्नुड। गो जोक्ब नु मिम्ब दुम्नुड। 13 परमप्रभु यावे कली मान पा हिंचा, मरिम्शो पचा कली काइ मदाक्चा बाक्ब। फुरती कोंइचा, ठेयब लेश्शो दुम्चा, मरिम्शो थुं डा गेय पचा नु दूली लोव्र पचा काइ मदाक्नुड। 14 अर्ती नु ठीक पा तुइक्तीक गो नु बाक्नीस। गो नु जोक्तीक तुइक्तीक नु बोल यो बाक्नीम। 15 गो रे पा पिपुकीमी सासन पाइनीम। हुकुम पाइबपुकीमी ठीक पा अरेतीक लोव्र पाइनीम। हितोपदेस १६:१२ 16 आं पतीकेमी रागी रागी डा हुकुम पाइबमी हुकुम पाइनीम। 17 सुमी आ कली दाक्नीमी, गो यो मेको आन कली दाक्नुड। सुम आं कली शुश माल्नीमी, मेकोमी आं कली थिन्नीम। 18 शोंप नु मान गो नु बाक्नीस। मिनु मनुप्ब शोंप नु सोशा बोशा ग्येत्थ लतीक गो नु बाक्नीस। 19 सुन नु क्येख सुन क्येडा आं गेशो फल रिम्शो बाक्ब। आं रे पा गूशो मारेइ मारेइ चांदी क्येडा रिम्शो बाक्नीम। 20 गो ठीक पतीक लां गाक्नुड। ठीक निसाफ पाइनुड। 21 आं कली दाक्ब आन कली गो शुश शोंप गेनुड। गो मेको आन मार मार वोइक्तीक नेल्ल प्रिंशा गेनुड।

22 मिनु मेकोमी “परमप्रभु यावेमी नेल्ल सेल्चा क्येडा डोंइती आं कली सेल्ती। अय्युब २८:२३-२८ 23 नेल्ल क्येडा डोंइती डा गो नड। रागी क्येडा डोंइती यो गो नड। 24 समुन्द्र दुम्चा क्येडा डोंइती गो नड। ब्वाक्कु बुक्चा क्येडा डोंइती गो बाक्ती। 25 डांडापुकी दुम्चा क्येडा डोंइती नु पहाड दुम्चा क्येडा डोंइती गो नड। 26 मेकोमी रू नु रागी सेल्चा क्येडा डोंइती गो नड। खप सेल्चा क्येडा डोंइती गो नड। 27 मेकोमी सरीड प्राक्शा वोइक्ची ना गो नड। 28 गोस्स कली सरीडमी वोइक्ची ना नु खप आगा डा ब्वाक्कु बुक्तीके कली ठीक पा वोइक्चा ना, 29 ठेयब समुन्द्र आ शुंइच वोइक्ची ना नु रागी आ जग वोइक्ची ना गो नड। भजन संग्रह १०४:९ 30 मेना गो परमप्रभु यावे आ नेक्था जोक्ब तुइक्ब गेय पाइब खोदेंशो पा बाक्शो नड। मेकोमी नाक्त्

किंत किंत आं कली तशा ग्येरसाक्ब। गो यो मेको नु ग्येरसीशा बाक्ती।

31 मिनु आ मुरपुकीम ब्रीशो रागी तशा ग्येरसाक्वी। गो मुर आन कली तशा ग्येरसाक्वी।

32 आं तौपुकी, मुल आं लोव्र नेनीन। आं कोंइशो लां गाक्बपुकी ग्येरसीशो मुर दुम्नीम। 33 आं अर्ती नेंशा जोक्ब तुइक्ब मुर दुमीन। मेको कली मप्रोनीन। 34 सुम आं लोव्र नेंबा, मेको ग्येरसीशो मुर दुम्ब। मेको मुरुम नाक्त् किंत किंत आं लाप्चो कोव्रशा आं कली रिम्ब। 35 सुम आं कली थिप्बा, मेको ब्रोंइचा ताइब। मिनु परमप्रभु यावेमी मेको कली दाक्ब। 36 आं कली मथिप्बपुकी चहिं आंम कली खतम सेल्नीम। आं कली काइ मदाक्ब नेल्ले बेक्चा दाक्नीम” देंत।

### तुइक्तीके नु मारेइ मतुइक्तीके

9 तुइक्तीकेमी आंम खिं सेल्शा, ७ ओटा थाम खुक्त्तु। 2 मेकोमी भोज सेल्त्तु अङ्गुर शांबु ब्रोव्रपाइश्शा, राडी ब्रशा, जचा कली ठीक पशो बाक्त्त। 3 आ वाइलीम आन कली “सहर डा डांडा रे मुर आन कली ब्रेत्तीन” दे सोइक्ताक्ब। 4 “मारेइ मजोक्ब नेल्ल एक जाक्कीन” देंत। निप्स मपाइश्शो आन कली 5 “जाक्कीन, आं शोब्ले जने। आं ब्रोव्र पा सेल्शो शांबु यो तूडीन” देंत। 6 क्येख मुर आन लां गाक्चा प्रोनीन। मिनु जोक्ब तुइक्ब आन लां गाक्चा, ब्रोंइशा बाक्कीन।

7 सुमी शुक्शी पाइब आन कली “रिम्शो दुमो” देंबा, मेको दिप्चा पुंडसीब। सुमी परमप्रभु यावे आ अरेशो मटीब आन कली हुइक्बा, मेको मरिम्शो पाइक्चा पुंडसीब। 8 सुमी शुक्शी पाइब आन कली हुइक्बा, मेको काइ मदाक्चा पुंडसीब। सुमी चहिं जोक्ब तुइक्ब आन कली हुइक्बा, मेको दाक्चा पुंडसीब। 9 जोक्ब तुइक्ब आन कली अर्ती गेशोनु, डोंइती क्येडा जोक्ब तुइक्ब दुम्नीम। ठीक पाइब आन कली शेंशोनु, मेको क्येडा ठीक पचा शेंसीनीम।

10 परमप्रभु यावे कली मान पा हिंचा जोक्तीक तुइक्तीक गोतीक बाक्ब। मिनु सुमी मेको का ला परमप्रभु यावे कली तुइक्बा, मेको रुपब दुम्ब। हितोपदेस १:७ 11 मारदे हना आं पतीकेमी गे शुश नाक्ती ब्रोंइनेवे। इ ब्रोंइतीक शुश बर्स तेम्चा पुंडसीनेवे। 12 गे जोक्ब तुइक्ब दुम्ते हना, मेको इ कलीन दुम्ब। गे शुक्शी पाइब दुम्ते हना, मेको रे पिशो दोस नेल्ल इ केन बाक्ब।

13 मूर्ख मीश मुर शुश रेयके पाइब। मेको मारेइ मजोक्ब नु मारेइ मतुइक्ब बाक्ब। 14 मेको आ खिं डा लाप्चोमी निप्ब। सहर आ इर डा नित्तीकेमी निप्ब। 15 सु सु आन गेय पा मेको लां गाक्नीमी, मेकोमी मेको आन कली ब्रेप्ब। 16 मिनु “सु सु मारेइ मजोक्ब बाक्नी, एक जाक्कीन” देंब। मिनु मेकोमी निप्स मपाइश्शो आन कली 17 “खुइ पशो ब्वाक्कु ब्रोव्रशो बाक्ब। मिनु खुइश्शा जशो जचा थोव्रक यो थाम्पा ब्रोव्रब” देंब। हितोपदेस २०:१७ 18 मिनु मेको लां गाक्ब मुरपुकीमी “मेको आ खिं बेक्शो मुर आन बाक्तीके बाक्ब” दे मतुइक्नीम। मिनु मेको आ पौनामी आन कली बेक्शो मुर आन बाक्तीकेमी ब्रेश्शो बाक्नीम, दे मतुइक्नीम।

### सोलोमन आ ब्रेक्शो लोव्र

10 जोक्ब तुइक्ब तौमी आ आफ कली ग्येरपाइक्ब। तन्न मूर्ख तौमी चहिं आ ममा कली सुर्ता पपाइक्ब। 2 परमप्रभु यावे कली मटिथु, चेम्शो शोंप शोर गाक्ब। सु ठीक पाइब बाक्मे मेको बेक्तीक रे ब्रोंइब। 3 परमप्रभु यावेमी ठीक पाइब मुर आन कली शोव्रलु बेक्पाइश्शा मवोइक्ब। तन्न आ अरेशो मटीब आन कली आन जत दाक्शो मगेब। भजन संग्रह ३७:१९, २५ 4 सु अल्से बाक्मे, मेको फूडग दुम्ब। शुश गेय पाइब मुर चहिं शोंप पाइश्शो दुम्ब। हितोपदेस ६:६ 5 सु अन्न खुप्ची ना खुप्बा, मेको होस पाइब तौ का बाक्ब। अन्न रुपची ना इप्ब तौमी आ आफ कली मुने तोक्ब। 6 ठीक पाइब मुर आसीक राइनीम। तन्न परमप्रभु यावे आ अरेशो मटीब आन कली आन मरिम्शो पशोमी सुम्ब। 7 ठीक पाइब कली मिम्शा आसीक गेब। परमप्रभु यावे आ अरेशो मटीब आन नें चहिं जाम्शा लाइब। अय्युब १८:१७; भजन संग्रह ९:६ 8 जोक्ब तुइक्ब थुं पाइश्शो मुरुमी शेंशो लोव्र

टीब। तन्न हेंथे लोत्र पाइब मूर्ख खतम दुम्ब।<sup>9</sup> गेना हना यो रिम्शो पाइब मुर कली सुइमी मारेइ मपाइनीम। सु चहिं दूली लां गाक्बा, मेको आ पर्वम नेल्लेमी “मरिम्शो पाइब” दे तुइक्नीम।<sup>10</sup> मिक्च रिक्बपुकीमी मुर आन कली श्येत गेनीम। तन्न सुमी महिंथु हुइक्बा मेकोमी थुं नाइशा बाक्वा गेब। *हितोपदेस ६:१२-१३*<sup>11</sup> ठीक पाइब मुर आन लोत्र पतीकेमी ब्रॉइनीम। तन्न परमप्रभु यावे आ अरेशो मटीब आम आन लोत्र पतीकेमी खतम दुम्नीम।<sup>12</sup> मुर आन कली काइ मदाक्शोनु, जिचा बोक्ब। मुर आन कली दाक्शोनु चहिं, आन मरिम्शो पशो नेल्ल सुम्सीब। *१पत्रुस ४:८*<sup>13</sup> मिम्ब मुर आन लोत्र रुप्चा डा बाक्ब। तन्न ममिम्ब मुरपुकी तुप्चा पुंइसीनीम।<sup>14</sup> जोक्ब तुइक्ब मुर नु जोक्तीक बाक्ब। तन्न हेंथे लोत्र पाइब मूर्खमी खतम दुम्तीक चाक्ब।<sup>15</sup> शोंप पाइश्शो मुर आन शोंप मेको आन बोल्यो दरवार खोदेशो बाक्ब। प्रुडग मुर आन श्येत दुम्तीकेम मेको आन कली खतम सेल्ब। *हितोपदेस १८:११*<sup>16</sup> ठीक पाइब मुर आन गेय पतीकेमी ब्रॉइनीम। परमप्रभु यावे आ अरेशो मटीब आन चेशो नेल्ल मरिम्शो गेय पा नुप्शा लाइब।<sup>17</sup> सु सुमी अर्ती टीनीमी, मेको ब्रॉइचा गेब लां गाक्नीम। हुइश्शो मनैब चहिं हेंथे लां गाक्नीम।<sup>18</sup> सुमी मुर काइ मदाक्बा, तन्न “दाक्नुड” देंबा, मेको मुर जोल्फे बाक्ब। सुम मुर आन पर्वम जोल फ्राइबा, मेको मूर्ख बाक्ब।<sup>19</sup> शुश लोत्र पाइब मुरपुकीमी शुश गल्ती पाइनीम। होस पाइब मुर शुश मब्वाक्नीम।<sup>20</sup> ठीक पाइब मुर आन लोत्र रिम्शो चांदी खोदेशो बाक्ब। परमप्रभु यावे आ अरेशो मटीब आन थुं शोर गाक्शो बाक्ब।<sup>21</sup> ठीक पाइब मुर आन लोत्रमी शुश मुर आन कली रिम्शो दुम्ब। तन्न मूर्ख आन निप्स मपाइक्तीके बेक्शा लाइनीम।<sup>22</sup> परमप्रभु यावे आ आसीकम मुर आन कली शोंप पाइश्शो सेल्ब। मेकोमी मारेइ श्येत मतेम्ब। *भजन संग्रह १२७:२*<sup>23</sup> मूर्ख मरिम्शो पचा कली ग्येरसीनीम। रुक्ब मुर जोक्ब तुइक्ब गेय तशा ग्येरसीनीम।<sup>24</sup> परमप्रभु यावे आ अरेशो मटीब मुर आन हिंशोम श्येत जाइनीम। तन्न ठीक पाइब मुर आन दाक्शो ताइनीम। *हितोपदेस १:२७; भजन संग्रह ३७:४*<sup>25</sup> श्येत फश गिवार खोदेशो पा जाक्मेनु परमप्रभु यावे आ अरेशो मटीबपुकी जाम्शा लाइनीम। तन्न ठीक पाइब मुर गेना हना यो ब्रॉइशा बाक्नीम। *हितोपदेस १२:७*<sup>26</sup> दोपा ग्युरशोमी खूइ ग्रिम्बा नु कुनमी मिक्च दुक्बा, मोपा अल्सी पाइब आन होत्रप आन कली दुम्नीम।<sup>27</sup> परमप्रभु यावे कली मान पा हिंतीकेमी ब्रॉइतीक नाक्त्तेम्सीब। तन्न परमप्रभु यावे आ अरेशो मटीब आन ब्रॉइतीक नाक्ती ख्रॉइसीब।<sup>28</sup> ठीक पाइब आन आस पतीके तशा ग्येरसीनीम। तन्न परमप्रभु यावे आ अरेशो मटीब आन आस पतीके जाम्शा लाइब। *भजन संग्रह ९:१९; अय्युब ८:१३*<sup>29</sup> परमप्रभु यावे आ लां रिम्शो थुं पाइश्शो मुर आन कली खूइशा ब्रॉइशा बाक्तीक बाक्ब। तन्न मरिम्शो पाइब आन कली मेको लां खतम दुम्तीक बाक्ब।<sup>30</sup> ठीक पाइब मुर गेनायो ग्येत्थ लुक्च मद्दुम्नीम। परमप्रभु यावे आ अरेशो मटीबपुकी चहिं रागीमी मलीनीम। *हितोपदेस २:२२*<sup>31</sup> ठीक पाइब मुरुमी तुइक्तीक लोत्र पाइब। तन्न दूली लोत्र पाइब मुर आ लें फेत्वा पुंइसीब। *भजन संग्रह ३७:३०*<sup>32</sup> ठीक पाइब मुरुमी रिम्शो लोत्र पस जोक्ब। तन्न परमप्रभु यावे आ अरेशो मटीबपुकी दूली ला ब्वाक्स जोक्नीम।

गेब मुरुमी तेम्शा गेचा पुंइसीब

**11** परमप्रभु यावेमी जोल पा नाक्तीक तशा, ग्रांग्रा दीब। तन्न ठीक नाक्तीक तशा शुश ग्येरसीब। *लेवी १९:३५-३६*<sup>2</sup> ठेयब लेशो मुर मदाक्चा पुंइसीब। तन्न तुइक्तीक ब्रेश्शो मुर नु बाक्ब। *हितोपदेस १६:१८*<sup>3</sup> रिम्शो थुं पाइश्शो मुर आन कली गेना हना यो आन रिम्शो पतीकेमी लां कोंइब। तन्न थमा सुइक्चा मपुंइसीब मुर आन कली आन मरिम्शो पतीकेमी खतम सेल्ब।<sup>4</sup> गाइश्शो नाक्ती शुश शोंप शोर गाक्शो दुम्ब। तन्न ठीक पतीकेमी बेक्तीक रे प्रॉइब। *लूका १२:२०; हितोपदेस १०:२*<sup>5</sup> दोस मताइब आन ठीक पतीकेमी मेको आन लां थेल्ल। तन्न परमप्रभु यावे आ अरेशो मटीब आन मटितीकेमी खतम दुम्नीम।<sup>6</sup> रिम्शो थुं पाइश्शो मुर आन ठीक पतीकेम ब्रॉइचा ताइनीम। तन्न थमा सुइक्चा मपुंइसीब मुर आन मरिम्शो पतीकेमी ग्याइक्चा पुंइसीनीम।<sup>7</sup> परमप्रभु यावे आ अरेशो मटीब मुर बेक्मानु, आन आस यो जाम्शा लाइब। मेको आन मिम्शो नेल्ल मद्दुम्ब।

*हितोपदेस १०:२८*<sup>8</sup> ठीक पाइब मुर हिंचा डा श्येत रे प्रॉइचा पुंइसीनीम। तन्न परमप्रभु यावे आ अरेशो मटीबपुकी मेको श्येतमी हुम्सीनीम।<sup>9</sup> मरिम्शो मुर आन लोत्रमी आन नेक्था डा मुर आन कली खतम सेल्नीम। तन्न ठीक पाइब मुर मेको आन जोक्तीकेमी प्रॉइचा पुंइसीनीम।<sup>10</sup> ठीक पाइब मुर आन कली रिम्शो दुम्त हना, सहर डा मुर नेल्ल ग्येरसीनीम। परमप्रभु यावे आ अरेशो मटीब खतम दुम्मानु, मुर नेल्ल थाम्पा ग्येरसीनीम।<sup>11</sup> रिम्शो थुं पाइश्शो मुर आसीक तामेनु, सहर कली रिम्शो दुम्ब। तन्न परमप्रभु यावे आ अरेशो मटीब आन लोत्रमी सहर कली मरिम्शो दुम्ब। *हितोपदेस २८:१२*<sup>12</sup> सुमी अरु मुर आन कली आइक्च सेल्बा, मेको निप्स मपाइश्शो बाक्ब। तन्न निप्स पाइश्शो मुर सिक्सी पा बाक्ब। *भजन संग्रह १५:३*<sup>13</sup> लोत्र क्याल्बमी खूइश्शो लोत्र यो फ्राइनीम। तन्न थमा सुइक्चा पुंइसीब मुरुमी मोदेशो लोत्र ख्वाप्पा वोइक्नीम।<sup>14</sup> लां कोंइब मबाक्त्त हना, रागी खतम दुम्ब। तन्न अर्ती गेब शुश बाक्तेक्म हना, मेको लीब।<sup>15</sup> अरु मुर आन जमानी बाक्शोनु, मरिम्शो दुम्ब। तन्न जमानी मबाक्शो रिम्शो दुम्ब। *हितोपदेस ६:१-२*<sup>16</sup> रिम्शो थुं पाइश्शो मीश मुर कली मान पाइनीम। तन्न मरिम्शो पाइब मीश मुनेमी सुम्सीशो बाक्ब। गेय मपाइब मुर प्रुडग दुम्ब। तन्न आंट पा गेय पाइबमी क्येट चेम्ब।<sup>17</sup> रिम्शो पाइब मुरपुकीमी आम कली रिम्शो पाइनीम। तन्न मरिम्शो पाइबपुकी श्येत गेंसीनीम।<sup>18</sup> परमप्रभु यावे आ अरेशो मटीब मुरुमी क्येट चेम्ब, तन्न मलीब। तन्न ठीक पाइब मुरुमी इनाम ताइनीम।<sup>19</sup> सु गेना हना यो ठीक पाइब बाक्बा, मेको ब्रॉइब। तन्न सु मरिम्शो पचा कली चुइक्बा, मेको बेक्ब। *हितोपदेस १९:२३*<sup>20</sup> मरिम्शो थुं परमप्रभु यावे कली ग्रांग्रा बाक्ब। तन्न दोस मताइब रिम्शो थुं पाइश्शो मुर आन लां गाक्शो तशा ग्येरसीब।<sup>21</sup> मरिम्शो पाइब मुर सजाइ मतथु मब्रॉइनीम। मेको थमा बाक्ब। तन्न ठीक पाइब आन चच युइ ब्रॉइचा ताइनीम।<sup>22</sup> निप्स मपाइश्शो दारशो मीश मुर सुन के मुन्द्री पांइशो पोत्र खोदेशो बाक्ब। *हितोपदेस ३१:३०*<sup>23</sup> ठीक पाइब मुर आन दाक्शो थमा पा ताइनीम। परमप्रभु यावे आ अरेशो मटीबम गाइक्पाइक्नीम।<sup>24</sup> का निक्शी मुरुम शुश गेनीम हना यो, आन शोंप मेको क्येडा बारब। का निक्शी चहिं आन गेचा माल्शो मगेथु, प्रुडग दुम्नीम। *मत्ती २५:२९; २कोरिन्थी ९:६*<sup>25</sup> हाइश्शो मुरुमी शुश ताइब। सुम अरु आन कली वारच पाइक्बा, मेकोमी आंमा यो वारच पाइक्चा पुंइसीब।<sup>26</sup> अरु आन कली अन्न मगेथु खेक्शा वोइक्ब मुर सराप पाइक्चा पुंइसीब। तन्न अन्न लेयब मुर आसीक ताइब।<sup>27</sup> सुम रिम्शो पतीके माल्शा पाइबा, मेकोमी शिशी माल्ब। सुम मरिम्शो पतीके माल्बा, मेको मरिम्शो पाइक्चा पुंइसीब।<sup>28</sup> सुमी आ शोंप कली थमा सुइक्बा, मेको रीब पा बेक्ब। ठीक मुर चहिं गिग घांस खोदेशो पा बारशा लाइब। *भजन संग्रह ५२:९-१०*<sup>29</sup> आंम खिं डा मुर आन कली श्येत चाक्बमी मारेइ मथेरब। मिनु मूर्खपुकी जोक्ब तुइक्ब आन वाइल दुम्नीम।<sup>30</sup> ठीक पाइब मुर आन पतीके ब्रॉइचा गेब रवा खोदेशो बाक्ब। तन्न हुश ख्वाक्श पोक्बमी मुर आन कली साइक्ब। *हितोपदेस ३:१८*<sup>31</sup> ठीक पाइब मुरपुकीम रागीम बाक्मानु, आन ठीक पशो डा इनाम ताइनीम। परमप्रभु यावे आ अरेशो मटीब नु मरिम्शो पाइबपुकीमी यो आन मरिम्शो पशो डा इनाम ताइनीम। *१ पत्रुस ४:१७-१८*

परमप्रभु आ अरेशो टिचा माल्शो

**12** सु सुमी शेंसीतीके दाक्नीमी, मेकोमी जोक्तीक दाक्नीम। सुमी हुइक्तीक काइ मदाक्नीमी, मेको निप्स मपाइश्शो बाक्नीम। *हितोपदेस १३:१; हितोपदेस १३:१८*<sup>2</sup> परमप्रभु यावेमी रिम्शो पाइब मुर आन कली दाक्ब। दूली मिम्शा हेंथे पाइब आन कली चहिं दोस गेब।<sup>3</sup> परमप्रभु यावे आ अरेशो मटीब रिम्शो मबाक्नीम। तन्न ठीक पाइब बोल्यो शाक्श पाइश्शो रवा खोदेशो बाक्नीम।<sup>4</sup> रिम्शो मीश आ वोंइश आ सिरपेच खोदेशो बाक्ब। मुने तोक्ब मीश चहिं आ वोंइश कली राक्शो रुश खोदेशो बाक्ब। *हितोपदेस ३१:१०-३१*<sup>5</sup> ठीक पाइब मुर आन मिम्शो ठीक बाक्ब। तन्न परमप्रभु यावे आ अरेशो मटीब आन अर्ती चहिं दूली बाक्ब।<sup>6</sup> परमप्रभु यावे आ अरेशो मटीब आन लोत्र मुर साइक्तीक बाक्ब। तन्न रिम्शो थुं पाइश्शो मुर आन लोत्रमी मेको आन कली प्रॉइब।<sup>7</sup> परमप्रभु यावे आ



अरेशो मटीबपुकी बेक्शा जाम्शा लाइनीम। ठीक पाइब नु मेको आन खिं डा मुर नोले सम्म लीनीम। हितोपदेस १०:२५<sup>८</sup> निप्स पाइश्शो मुरपुकी मान ताइनीम। दूली थुं पाइश्शो मुर आन कली चहिं महिक्नीम।<sup>९</sup> “ठेयब मुर नड” देखु पा जचा मताइब मुर दुम्चा क्येडा महिक्सीशो दुम्शा, वाइल का बाक्शो रिम्शो बाक्ब।<sup>१०</sup> ठीक पाइब मुरपुकीमी आंम बी ब्यफ, क्यारश भेडा आन कली रिम्शो कोवनीम। तन्न परमप्रभु यावे आ अरेशो मटीबपुकीमी शिशी मपाइनीम। प्रस्थान २३:५<sup>११</sup> सु सुमी आंम रूम शोक्नीमी, मेकोमी जचा शुश ताइनीम। तन्न सु सुमी शोर गाक्शो लोत्र पा गाक्नीमी, मेको निप्स मपाइश्शो बाक्नीम। हितोपदेस २८:१९<sup>१२</sup> परमप्रभु यावे आ अरेशो मटीबपुकी रोइश्शो थोवकीम आस पाइनीम। तन्न ठीक पतीके आ शाक्शम फल सिप्पाइक्ब।<sup>१३</sup> मरिम्शो पाइब मुर आंम मरिम्शो लोत्रमी ग्याइक्चा पुंडसीनीम। तन्न ठीक पाइब मुर श्येत रे ब्रॉइचा ताइनीम।<sup>१४</sup> मुरपुकी आंम लोत्रम पतीके मान ताइनीम। मिनु गेय पाइब मुरपुकीमी आन गेय डा इनाम ताइनीमी। हितोपदेस १८:२०<sup>१५</sup> मूर्खपुकी आंम लां नेल्ले “ठीक बाक्ब” दे मिन्नीम। तन्न जोक्ब तुइक्बमी अर्ती नैनीम।<sup>१६</sup> मूर्खपुकीमी आन गाइक्चा रीब पा कोइनीम। तन्न होस पाइश्शो मुर कली मरिम्शो लोत्र पास्तेक्म हना यो, सिक्सी पा बाक्ब।<sup>१७</sup> सुमी थमा लोत्र पाइबा, मेकोमी ठीक पतीके कोइब। तन्न जोल पाइब सांकछीमी गेना हना यो दूली लोत्र पाइब।<sup>१८</sup> मुर आन ममिम्थु पशो लोत्रमी तरवार खोदेशो पा थोक्ब। तन्न जोक्ब तुइक्ब मुर आन लोत्रमी सापाइक्ब। हितोपदेस १३:३<sup>१९</sup> थमा लोत्र पाइब मुर गेना हना यो लीनीम। तन्न जोल पाइब मुर याम का ला लीनीम।<sup>२०</sup> मरिम्शो मिम्ब आन थुंमी जोल ला बाक्ब। तन्न थुं नाइक्तीक अर्ती गेब ग्येरशा बाक्नीम।<sup>२१</sup> ठीक पाइब मुर आन कली श्येत मडुम्ब। तन्न परमप्रभु यावे आ अरेशो मटीब आन कली श्येतम गिल्शो बाक्नीम।<sup>२२</sup> परमप्रभु यावेम जोल पाइब आन कली तशा ग्रांरा दीब। जोल मपथु, आ अरेशो टीब आन कली तशा ग्येरसीब।<sup>२३</sup> निप्स पाइश्शो मुरुमी आ तुइश्शो मकोइब। तन्न मूर्खमी मूर्ख लोत्र पाइब।<sup>२४</sup> शुश गेय पाइब मुर हुकुम पाइब दुम्नीम। तन्न अल्सी पाइब चहिं वाइल दुम्नीम।<sup>२५</sup> सुर्ता पतीकेम मुर आन थुं लुक्च लपाइक्ब। तन्न रिम्शो लोत्रमी मेको आन कली ग्येरपाइक्ब। हितोपदेस १६:२४<sup>२६</sup> ठीक पाइबपुकीमी आन वारच आन कली रिम्शो अर्ती गेनीम। तन्न परमप्रभु यावे आ अरेशो मटीबपुकीमी दूली लां कोइनीम।<sup>२७</sup> अल्से सिखारीम सिखार मताइनीम। तन्न शुश गेय पतीकेमी मुर आन कली शोप पाइश्शो सेल्ब।<sup>२८</sup> ठीक पतीक लांमी ब्रॉइतीक बाक्ब। मेको लां गाक्बपुकी मबेक्नीम।

ब्रॉइचा गेब मार बाक्बा?

13 जोक्ब तुइक्ब तौमी आ आफ आ शेंशो दाक्ब। तन्न शुक्शी पाइबमी हुइश्शो मनेंन। हितोपदेस १:८; १२:३<sup>२</sup> आन लोत्रम पतीके मुरपुकीम मारेइ मारेइ रिम्शो ताइनीम। तन्न थमा मसुइक्चा डा मुरपुकी दूली पचा ला दाक्नीम।<sup>३</sup> मिम्शा लोत्र पाइब मुरुम आंम कली ब्रॉइपाइक्नीम। तन्न ममिम्थु ब्वाक्बपुकीमी आंम कली खतम सेल्नीम। हितोपदेस १२:१८; हितोपदेस २१:२३<sup>४</sup> अल्सेपुकी वाल्नीमी। मिनु मारेइ मताइनीम। तन्न शुश गेय पाइब मुरपुकीमी मारेइ मारेइ ताइनीम।<sup>५</sup> ठीक पाइब मुरुमी जोल मदाक्नीम। तन्न परमप्रभु यावे आ अरेशो मटीब मुरुमी मुने दोक्चा डा नु दोस तचा डा गेय ला पाइनीम।<sup>६</sup> ठीक पतीकेमी रिम्शो थुं पाइश्शो मुर आन कली कोवब। तन्न परमप्रभु यावे आ अरेशो मटीब आन पाप पतीकेमी मेको आन कली खतम सेल्ब।<sup>७</sup> का निक्शी मुर प्रुडग बाक्शा यो “क्येट थीब नड” देखु पाइनीम। का निक्शी मुर चहिं क्येट थीब बाक्शा यो “प्रुडग नड” देखु पाइनीम। प्रकाश २:९; प्रकाश ३:१७<sup>८</sup> शुश शोप बाक्शो मुरुमी आंम कली प्रॉइने चाप्ब। तन्न प्रुडगपुकी हिंच कोइचा मपुंडसीनीम।<sup>९</sup> ठीक पाइब मुर बत्ती खोदेशो छेडछेड पा ब्राइनीम। तन्न परमप्रभु यावे आ अरेशो मटीब आन बत्ती काप्शा लाइब। अय्युब १८:५-६<sup>१०</sup> ठेयब लेशो नु सुइ कली ममिम्ब मुर जिचा पोक्ब बाक्ब। तन्न अर्ती नैब मुर तुइक्तीके नु बाक्ब। हितोपदेस १:५<sup>११</sup> मरिम्शो पा चेम्शो शोप नुष्ठा लाइब। तन्न इक्का इक्का पा चेम्शो शोप बारना बारन लाइब।<sup>१२</sup> शुश आस

पा यो मडुम्ब हना, थुं लुक्च लाइब। तन्न आ मिम्शो गाप्त हना, ब्रॉइचा गेब रवा बाक्ब।<sup>१३</sup> अर्ती डा लोत्र मदाक्ब मुरुम आंम कली श्येत चाक्ब। तन्न अरेशो टीबपुकीमी इनाम ताइनीम।<sup>१४</sup> जोक्ब तुइक्ब मुर आन शेंशो ब्रॉइचा गेब ब्वाक्कु बुक्तीके खोदेशो बाक्ब। मेको रे पा मुर मबेक्नीम।<sup>१५</sup> रिम्शो मिम्ब मुर कली नेल्लेमी दाक्नीम। तन्न खराप मुर आन लां हिंचा डा बाक्ब।<sup>१६</sup> जोक्ब तुइक्ब मुरुमी निप्स खाप्शा नेल्ल गेय पाइब। तन्न मूर्खमी आंम मूर्ख दुम्तीके कोइब।<sup>१७</sup> मरिम्शो लोत्र कुरबमी श्येत चाक्ब। तन्न थमा सुइक्चा डा लोत्र कुरब मुरुम थुं नाइक्चा डा लोत्र चाक्ब।<sup>१८</sup> सुमी अर्ती मनेंन, मेको प्रुडग नु सुइम मदाक्शो मुर दुम्ब। तन्न हुइश्शो नैब मुरुम मान ताइब।<sup>१९</sup> मुर आंम दाक्शो तामेनु, आन थुं कली रिम्शो दुम्ब। तन्न मूर्खमी आन मरिम्शो पतीके रे लेत्वा मदाक्नीम।<sup>२०</sup> सु जोक्ब तुइक्ब नु गाक्बा, मेको जोक्ब तुइक्ब दुम्ब। तन्न मूर्ख नु गाक्ब श्येत जाइब।<sup>२१</sup> मरिम्शो पाइब आन कली श्येतम खोइक्ब। तन्न ठीक पाइब आ माल्शो मारेइ मारेइ जाक्दीक्ब। हितोपदेस २८:८; अय्युब २७:१३-१७; उपदेसक २:२६<sup>२२</sup> रिम्शो मुरुमी आ चच युइ आन कली शोप हेंशा वोइक्ब। तन्न मरिम्शो पाइब आन शोप ठीक पाइबपुकीम ताइनीम।<sup>२३</sup> प्रुडग आन रूमी शुश अन्न खेल्ब। तन्न ठीक मपाइबमी मेको रोइश्शा लाइक्ब। हितोपदेस २२:१५<sup>२४</sup> सुमी आ तौ कली शेंशा मतुष्बा, मेकोमी आ तौ कली मदाक्ब। तन्न सुमी आ तौ कली दाक्बा, मेकोमी आ तौ कली शेंब।<sup>२५</sup> ठीक पाइबमी रूनी जचा ताइनीम। तन्न परमप्रभु यावे आ अरेशो मटीब शोत्रलुन बाक्चा माल्नीम।

ठीक पतीकेमी रागी बारपाइक्ब।

14 जोक्ब तुइक्ब मीश मुरुमी आंम खिं रिम्शो सेल्ब। तन्न मूर्ख मीश मुरुमी आ खिं कली आंम गुइमी प्रेक्ब।<sup>२</sup> सु रिम्शो थुं पाइश्शो मुर बाक्मे, मेकोमी परमप्रभु यावे कली मान पा हिंब। तन्न सु हेंथे गाक्बा, मेको मुरुमी परमप्रभु यावे कली मदाक्ब।<sup>३</sup> मूर्ख आन लोत्रमी आंम आन कली तेक्ब। तन्न जोक्ब तुइक्ब मुर आन लोत्रमी मेको आन कली कोवब।<sup>४</sup> ब्यफ मबाक्त हना, अन्न वोइक्तीके श्येतथ बाक्ब। तन्न बोल्पो ब्यफ पाइश्शो मुर के शुश अन्न बाक्ब।<sup>५</sup> थमा लोत्र पाइब सांकछीमी जोल मपाइब। तन्न जोल पाइब सांकछीमी जोल पना पन बाक्ब। प्रस्थान २०:१६; प्रस्थान २३:१<sup>६</sup> शुक्शी पाइबमी तुइक्तीके माल्ना माल्न बाक्त हना यो, मथिक्ब। रुक्ब मुर मोशा जोक्ब दुम्नीम।<sup>७</sup> मूर्खपुकी नु मगाक्को। मारेदे हना मेकोपुकी नु जोक्तीक लोत्र मबाक्ब।<sup>८</sup> निप्स पाइश्शो मुर आन तुइक्तीकेमी तेको लां गाक्चा माल्नीमी तुइक्नीम। तन्न मूर्ख आन मूर्ख पतीकेमी हेंथे लां कोइब।<sup>९</sup> मूर्खमी पाप आ पबर्म चढेतीके कली शुक्शी पाइनीम। तन्न रिम्शो थुं पाइश्शो मुरुमी परमप्रभु आ दाक्शो तशा ग्येरब।<sup>१०</sup> थुं डा श्येत थुंम ला तुइक्ब। मिनु थुं आ ग्येरसीशो थुंमी ला तुइक्ब। रोमी १२:१५<sup>११</sup> परमप्रभु यावे आ अरेशो मटीब आ खिं प्रेत्वा पुंडसीब। तन्न रिम्शो थुं पाइश्शो मुर आन ताम्बु सोशो बोशो दुम्शा लाइब। हितोपदेस १२:७<sup>१२</sup> मुर आन कली आंम पशो लां ठीक तांइसीब हना यो, नोले मेको बेक्पाइक्ब लां बाक्ब।<sup>१३</sup> मुर आ कुल रिस्साक्व हना यो, आ थुं खाइश्शो बाक्ने चाप्ब। ग्येरसीशो थुं नोले सुर्ता पाइब बाक्ब।<sup>१४</sup> दूली पाइब आन दूली पशो डा ताइनीम। मिनु रिम्शो पाइबमी आन रिम्शो पशो डा ताइनीम।<sup>१५</sup> मारेइ मजोक्ब मुरुमी मारेइ मारेइ लोत्र थमा सुइक्ब। तन्न निप्स पाइश्शो मुरुमी आन पशो नेल्ल मिन्नीम।<sup>१६</sup> जोक्बपुकी होस पा मरिम्शो पतीक रे डोन लाइनीम। तन्न मूर्ख मारेइ ममिम्थु, होस मपाइब।<sup>१७</sup> रीब पा गाइक्ब मुरुमी मूर्ख गेय पाइब। मिनु मुर आन कली दोपा श्येत गेडा, दे मिम्ब। मेको सुइम मदाक्चा पुंडसीब।<sup>१८</sup> मारेइ मजोक्ब मूर्ख गेयम ग्योम्सीशो बाक्नीम। तन्न निप्स पाइश्शो मुर जोक्तीके सिरपेच गुप्शो खोदेशो बाक्नीम।<sup>१९</sup> मरिम्शो पाइब मुरपुकी रिम्शो मुर आन डोंइती बाप्नीम। मिनु परमप्रभु यावे आ अरेशो मटीबपुकी ठीक पाइब आन लाप्चोमी बाप्नीम।<sup>२०</sup> आंम नेक्था डा मुरुमी प्रुडग कली मदाक्नीम। तन्न शोप पाइश्शो मुर आन के वारच शुश बाक्नीम।<sup>२१</sup> सुम आ नेक्था डा मुर कली दिक्बा, मेकोमी पाप पाइब। तन्न सुमी प्रुडग आन कली वारच पाइबा, मेको ग्येरसीशो मुर बाक्ब। भजन संग्रह ४१:२<sup>२२</sup> मार, मरिम्शो मिम्शा पाइब हेंथे लां मगाक्नीमी, डा? रिम्शो पचा मिम्शा पाइबमी

गेना हना यो दाक्शा मप्रौंइचा पुंडसीनीम।<sup>23</sup> गेय पतीक नेल्लेमी दारतीक बाक्ब। तन्न लोत्र पा ला बाक्ब मुर पुडग दुम्ब।<sup>24</sup> जोक्ब मुर आन तुडक्तीके आन सिरपेच खोदेंशो बाक्ब। तन्न मूर्ख आन पशो आन माला खोदेंशो बाक्ब।<sup>25</sup> थमा सांकळीमी मुर आन कली प्रौंइब। तन्न जोल पाइब सांकळीमी जोल ला पाइब।<sup>26</sup> परमप्रभु यावे कली मान पा हिंचा, मेको मुर आ खुइशा ब्रौंइशा बाक्तीक बाक्ब। मेको आ आलपुकीमी यो मेको ताइनीम। *हितोपदेस १८:१०*<sup>27</sup> परमप्रभु यावे कली मान पा हिंचा ब्वाक्कु बुक्तीक खोदेंशो पा ब्रौंइतीक बाक्ब। मेको रे पा मुरपुकी बेक्पाइक्ब आ ब्वारद रे ब्रौंइनीम।<sup>28</sup> पिप आ दारस आ रागी डा शुश मुर बाक्नीम। तन्न मुर नुपेक्म हना, हुकुम पाइब जाम्शा लाइब।<sup>29</sup> रीब पा मगाइक्ब शुश रुष मुर बाक्ब। तन्न रीब पा गाइक्ब मुर मूर्ख दुम्शा लाइब। *हितोपदेस १६:३२; हितोपदेस १९:११*<sup>30</sup> नांडसीशो थुमी मुर आन कली ब्रौंइचा गेब। तन्न गेहेमी मुर आन रुश मुपाइक्ब।<sup>31</sup> सुम पुडग आन कली दिष्वा, मेकोमी पुडग आन कली सेल्ब कली शुक्शी पाइब। तन्न सुमी पुडग आन कली शिशी पाइबा, मेकोमी परमप्रभु यावे कली मान पाइब। *हितोपदेस १७:५; अय्युब ३१:१३-१५; मत्ती २५:४०*<sup>32</sup> परमप्रभु यावे आ अरेशो मटीबपुकी मरिम्शो पतीकेमी जाम्शा लाइनीम। तन्न ठीक पाइब मुर आंम आन गेना हना यो रिम्शो पतीकेमी ब्रौंइशा बाक्चा ताइनीम।<sup>33</sup> रुष मुर नु तुडक्तीक बाक्ब। तन्न मूर्ख आन थुमी तुडक्तीक मथिंसीब।<sup>34</sup> रागीम ठीक पाइब शुश बाक्तेक्म हना, मेकोपुकीम मेको रागी ठेयब नु रिम्शो सेल्नीम। तन्न मरिम्शो पाइब शुश बाक्तेक्म हना, मेको रागी कली महिक्सीशो सेल्नीम।<sup>35</sup> पिपमी जोक्शा गेय पाइब कली दाक्ब। तन्न मुने पचा डा गेय पाइबमी पिप आ गाइश्शो डा सजाइ ताइब। *उत्पत्ती ४१:३७-४०*

#### हाक्शो कुलम ग्येरपाइक्ब

15 ब्रौंइशो पा लोत्र लेश्शोनु, गाइक्तीके तेक्ब। तन्न हुइश्शा पशो लोत्रमी मुर आन कली गाइक्पाइक्ब। *हितोपदेस २५:१५; १राजा १२:१३-१६*<sup>2</sup> जोक्ब तुडक्ब मुरपुकीमी लोत्र पाम्तेक्म हना, नैबपुकी जोक्ब दुम्चा दाक्नीम। तन्न मूर्ख आन लोत्र शोर गाक्शो बाक्ब।<sup>3</sup> परमप्रभु यावेमी नेल्ल ताइब। मेकोमी रिम्शो पाइब नु मरिम्शो पाइब नेल्ल आन कली ताइब। *२इतिहास १६:९*<sup>4</sup> रिम्शो लोत्र मुर आन कली ब्रौंइचा गेब रवा खोदेंशो बाक्ब। तन्न दूली लोत्रमी मुर आन थुं जिक्ब।<sup>5</sup> मूर्खमी आ आम आफ आस शेंशो लोत्र मपाइब। तन्न सुमी शेंशो नेंशा पाइबा, मेको होस पाइब बाक्ब।<sup>6</sup> ठीक पाइब मुर आन खिंमी शुश शॉप बाक्ब। तन्न परमप्रभु यावे आ अरेशो मटीबपुकी श्येत जाइनीम।<sup>7</sup> जोक्ब तुडक्ब मुर आन लोत्रमी जोक्तीक फ्राइब। मूर्ख आन लोत्र मोदेंशो मबाक्ब।<sup>8</sup> परमप्रभु यावे आ अरेशो मटीब आन चदेंशो तशा, परमप्रभु यावे ग्रॉग्रा दीब। तन्न रिम्शो थुं पाइश्शो मुर आन पुंडशो नेंशा ग्येरसीब। *हितोपदेस २१:२७; यसेया १:११,१५; हितोपदेस २८:९; लूका १८:९-१४*<sup>9</sup> परमप्रभु यावे आ अरेशो मटीब मुर आन लां परमप्रभु यावे कली ग्रॉग्रा बाक्ब। तन्न सुमी ठीक पाइबा, मेको कली दाक्ब।<sup>10</sup> नोले शौंइसीशो मुर हिंचा डा सजाइ ताइनीम। तन्न हुइश्शो काइ मदाक्ब मुर बेक्चा माल्ब।<sup>11</sup> दोदेंशो पा परमप्रभु यावेमी बेक्शो मुर आन बाक्तीके नु जाम्शा लतीके तुडक्बा, मोदेंशो पा मुर आन थुं कली यो तुडक्ब। *अय्युब २६:६; भजन संग्रह १३९:८; प्रकाश ९:१,११; येरमीया १७:१०*<sup>12</sup> मुरुम शुक्शी पाइब आन कली “मोदेंशो मपावो” दे अरेशो काइ मदाक्नीम। मेकोपुकी जोक्ब तुडक्ब मुर आन नेक्था मलाइनीम।<sup>13</sup> ग्येरशो थुं पाइश्शो मुर आ कुल हाक्सीशो तांडसीब। तन्न सुर्ता पाइब आन थुं लुक्च लाइब।<sup>14</sup> रुष थुं पाइश्शो मुरुमी जोक्तीके माल्ब। तन्न मूर्खमी मूर्ख पचा ला दाक्नीम।<sup>15</sup> श्येत जाइब आन नाक्ती मरिम्शो बाक्नीम। तन्न ग्येरसीशो थुं पाइश्शो मुर आन नाक्ती नेल्ल चाड खोदेंशो बाक्नीम। *हितोपदेस १७:२२*<sup>16</sup> शुश शॉप नु मेको आ पर्बम श्येत जचा क्येडा इक्का ला शॉप बाक्शा परमप्रभु यावे कली मान पा हिंचा रिम्शो बाक्ब।<sup>17</sup> काइ मदाक्शो मुर नु ब्रौंइशो श्ये खमे जचा क्येडा, दाक्मुशा चूले खमे जशो रिम्शो बाक्ब।<sup>18</sup> शुश गाइक्ब मुरुमी जिचा पोक्ब। तन्न रीब पा मगाइक्ब मुरुमी जितीके तेक्ब।<sup>19</sup> अल्सी आन लां चूम ब्रीशो बाक्ब। तन्न

रिम्शो थुं पाइश्शो मुर आन लां थेल्लशो बाक्ब।<sup>20</sup> जोक्ब तुडक्ब थुं पाइश्शो तौमी आ आफ कली ग्येरपाइक्ब। तन्न मूर्ख तौमी चहिं आ ममा कली महिक्ब। *हितोपदेस १०:१*<sup>21</sup> निप्स मपाइश्शो मुर मूर्ख गेय पचा ग्येरसीनीम। तन्न रुष मुर गेना हना यो आंम लांम गाक्नीम।<sup>22</sup> अर्ती मनेंथु गेय पाइब आन गेय शोर गाक्शो बाक्ब। तन्न अर्ती गेब शुश बाक्तेक्म हना, मेको आन गेय रिम्शो दुम्ब। *हितोपदेस ११:१४*<sup>23</sup> मुरुम ठीक पा लोत्र लेन्ने चाप्तु हना, ग्येरपाइक्ब। माल्ची ना माल्शो लोत्र पचा, गिश रिम्शो बाक्ब।<sup>24</sup> जोक्ब तुडक्ब मुर ब्रौंइचा गेब ग्येथ लां लाइब बाक्नीम। मोपा बेक्शो मुर आन बाक्तीक लतीक लुक्च लां मलाइनीम।<sup>25</sup> परमप्रभु यावेमी ठेयब लेश्शो मुर आन खिं प्रेश्शा गेब। तन्न वौंइश बेक्शो मीश मुर आन के रू डा सांद एर ओंथ दुम्चा मगेब।<sup>26</sup> परमप्रभु यावेमी मरिम्शो मुर आन मिम्शो लोत्र ग्रॉग्रा दीब। तन्न रिम्शो मुर आन लोत्र तशा ग्येरसीब।<sup>27</sup> शिंममी आंम खिं डा मुर आन कली श्येत गेनीम। तन्न घूस मजाइबपुकी ब्रौंइनीम। *भजन संग्रह १५:५*<sup>28</sup> ठीक पाइब मुरपुकीमी लोत्र लेत्वा क्येडा डौंइती मिन्मीम। तन्न परमप्रभु यावे आ अरेशो मटीबपुकीम हेंथे लोत्र पाइनीम।<sup>29</sup> परमप्रभु यावे आ अरेशो मटीब आन क्येडा डोन बाक्ब। तन्न ठीक पाइब आन पुंडशो लोत्र नैब। *हितोपदेस १५:२९; यूहन्ना ९:३१*<sup>30</sup> ब्रशो कुलमी थुं कली ग्येरपाइक्ब। रिम्शो लोत्रमी रं कली बोल्यो सेल्ब।<sup>31</sup> सुमी रिम्शो अर्ती नेंशा पाइबा, मेको जोक्ब तुडक्ब मुर आन दातेम बाक्ब।<sup>32</sup> सुमी रिम्शो अर्ती नेंशा मपाइबा, मेकोमी आंम कली यो मदाक्ब। तन्न अर्ती नैबमी आ रुपतीके बारपाइक्ब।<sup>33</sup> परमप्रभु यावे कली मान पा हिंतीके तुडक्तीक कली शेंसीतीक बाक्ब। मिनु मान तचा क्येडा डौंइती ब्रेम्शो थुं पाइश्शो दुम्चा माल्ब। *हितोपदेस १८:१२; हितोपदेस २२:४*

#### परमप्रभुम मुर आन कली लां कौंइब

16 मुर आन थुंमी मिम्ना मिम्न बाक्नीम। तन्न लोत्र लेत्तीक परमप्रभु यावे रे जाक्ब।<sup>2</sup> आंमा पशो गेय आंमा कली ठीक मिम्सीब। तन्न परमप्रभु यावेमी मुर आन थुं नाक्ब।<sup>3</sup> इन पशो नेल्ल परमप्रभु यावे कली जिम्मा गेन। मिनु इन मिम्शो जाक्दीब्ब। *भजन संग्रह ३७:३*<sup>4</sup> परमप्रभु यावेमी मारेइ मारेइ नेल्ल गेय पचा कली सेल्लु। आ अरेशो मटीब कली यो नोले डा श्येत नाक्त कली सेल्लु। *रोमी ९:२२*<sup>5</sup> परमप्रभु यावे ठेयब लेश्शो आन कली तशा ग्रॉग्रा दीब। मेकोपुकी सजाइ मतथु मब्रौंइनीम।<sup>6</sup> दाक्शा गेनायो मप्रौंइतीकेमी मरिम्शो पतीक क्याम्सीब। मिनु सु परमप्रभु यावे कली मान पा हिंबा, मेको मरिम्शो रे डोन लाइब।<sup>7</sup> परमप्रभु यावेमी मुर आन पशो तशा ग्येरसाक्व हना, मेको कली आ जोरी सत्रु नु यो गारपाइश्शा वोइक्ब। *उत्पत्ती ३१:२४; उत्पत्ती ३३:४*<sup>8</sup> मरिम्शो पा चेम्शो शुश क्येट क्येडा रिम्शो पा चेम्शो इक्का खोइ क्येट ठीक बाक्ब। *हितोपदेस १५:१६*<sup>9</sup> मुरुमी आंम आ लां आंमान मिन्मीम। तन्न परमप्रभु यावेमी मेको आन गाक्तीक लां कौंइब। *हितोपदेस १९:२३; येरमीया १०:२३*<sup>10</sup> परमप्रभु यावेमी पिप कली ब्वाक्पाइक्ब। मेकोमी निसाफ पशोनु, दूली निसाफ मपाइब।<sup>11</sup> ठीक पा नाक्तीक नु पुक्तीक परमप्रभु यावे केन बाक्ब। झोलाम बाक्शो नाक्तीक फुल्लु नेल्ल आ सेल्शो बाक्नीम। *हितोपदेस ११:१*<sup>12</sup> पिपमी मरिम्शो पाइब आन कली तशा ग्रॉग्रा दीब। मारदे हना ठीक पतीकेमी आ राज्य बोल्यो सेल्ब।<sup>13</sup> पिपमी ठीक लोत्र पाइब आन कली तशा ग्येरसीब। थमा लोत्र पाइब आन कली दाक्ब।<sup>14</sup> पिप गाइक्ताक्व हना, मुर साइक्ने चाप्ब। रुष मुरुमी आ गाइक्चा नाइक्पाइक्ने चाप्ब। *हितोपदेस १९:१२; हितोपदेस २०:२*<sup>15</sup> पिप आ कुल हाक्शो बाक्त हना, ब्रौंइचा गेब। मेको आ दाक्शो सोवशो रू कली रेउ खोदेंशो बाक्ब।<sup>16</sup> क्येख सुन तचा क्येडा तुडक्तीक तचा रिम्शो बाक्ब। चांदी तचा क्येडा रुपतीक तचा रिम्शो बाक्ब।<sup>17</sup> रिम्शो थुं पाइश्शो मुर मरिम्शो लां रे डोन बाक्ब। मिनु मरिम्शो मपथु, होस पा बाक्ब ब्रौंइचा ताइनीम।<sup>18</sup> मुर खतम दुम्चा क्येडा डौंइती ठेयब लेत्नीम। नुच्चा क्येडा डौंइती मुर बोरनीम। *हितोपदेस १८:१२*<sup>19</sup> ठेयब लेश्शो आन रोइश्शो थोव्रक योक्सीचा क्येडा ब्रेम्शो दुम्शा, श्येत जशो आइक्व मुरपुकी नु बाक्चा रिम्शो बाक्ब।<sup>20</sup> सुम शेंशो लोत्र नोफा दाइश्शा नैबा, मेको मुर सोशा बोशा ग्येथ लाइब। सु परमप्रभु यावे कली थमा सुइक्बा, मेको ग्येरसीशो

बाकब। 21 जोकब तुडक्ब थुं पाइश्शो मुर कली रुख मुर देंनीम। ब्रोव्रशो लोव्रम शेंतीक कली बारपाइक्ब। 22 सु नु तुडक्तीके बाकबा, मेको ब्रोइचा गेब ब्वाक्कु बुक्तीके खोदेशो बाकब। तन्न मूर्ख आन मूर्ख पतीकेमी सजाइ ताइनीम। 23 जोकब तुडक्ब मुरुमी लोव्र पचा क्येडा डोंइती मिन्नीम। मोपा आन जोक्तीक बारना बारन लाइब। 24 ब्रोव्रशो लोव्र खुदो खोदेशो बाकब। मेकोमी थुं कली ब्रोव्रशो नु रां कली बोल्यो सेल्ब। हितोपदेश १२:२५ 25 मुरुमी का निक्शी लां रिश्शो बाकब, दे मिन्नीम। तन्न नोले मेको लां बेक्तीक लां बाकब। 26 गेय पाइब आन कोव्रजमी मेको कली गेय पपाइक्ब। मेको आ शोव्रलुमी गेय पतीक थुं गेब। 27 हिंचा डा पा मरिश्शो पाइब मुरुमी मरिश्शो ला मिम्ब। मेको आ लोव्र मी खोदेशो पा ब्रशो बाकब। 28 दूली मुरुमी जिचा पोक्ब। मिनु नोफा मुडक्बमी गारशो वारच आन कली फ्राब। 29 हुश खाक्श पोक्ब मुरुमी आ नेक्था डा मुर आन कली यो हेंथे पपाइक्ब। मिनु मेको आन कली मरिश्शो लां खोइक्पाइक्ब। 30 मिक्व रिक्बमी दूली गेय पचा मिश्शो बाक्नीम। मोदेशो मिश्शा सिक्सी पा बाक्बमी मरिश्शो पचा चिक्शो बाक्ब। 31 बोइश्शो चां मान ततीक सिरपेच खोदेशो बाक्ब। मेको ठीक पाइब मुर आन लांम ला थीसीब। हितोपदेश २०:२९ 32 लडाइ पाइब बोल्यो मुर दुम्चा क्येडा फाल्ब मुर दुम्चा रिश्शो बाक्ब। मिनु सहर कली ग्राब क्येडा आंम गाइक्चा कली तेक्ब रिश्शो बाक्ब। हितोपदेश १४:२९ 33 मुरुम फेन्टे आष्ठा, परमप्रभु यावे कली हिल्लो पाइनीम। मिनु परमप्रभु यावेमी लोव्र लेख्ब।

ग्येरशो थुं

17 जिना जिन ब्रोव्रशो जचा क्येडा सिक्सी पा थुं नाइश्शा पोकोतो खमे जचा रिश्शो बाक्ब। हितोपदेश १५:१७ 2 जोकब तुडक्ब वाइलमी आ होव्रप आ मरिश्शो पाइब तौ कली अरेब। मिनु मेको वाइलमी खिं डा तौ खोदेशो पा रू ताइब। 3 सुन चांदी यपाइश्शा नाक्चा कली ग्योब नु मी माल्ब। तन्न परमप्रभु यावेमी मुर आन थुं नाक्ब भजन संग्रह ६६:१० 4 मरिश्शो पाइब मुरुमी परमप्रभु यावे आ अरेशो मटीब आ लोव्र नेंब। जोल पाइबमी खतम सेल्तीक लोव्र नेंचा कली नोफा दाइक्ब। 5 सुम पुडग आन कली शुक्शी पाइबा, मेकोमी आ कली सेल्ब, परमप्रभु यावे कली आइक्च सेल्ब। सु मुर आन कली श्येत जशो तशा ग्येरसीबा, मेको सजाइ मतथु मब्रोंइब। हितोपदेश १४:३१ 6 खाल्पा खाल्पी आन सिरपेच आन चच युइ नमी। मिनु आल आन ग्योम्सीशो आन आम आफ बाक्नीम। 7 मूर्खपुकीमी रिश्शो लोव्र पचा मशिरनीम। मेको क्येडा ठेयब मुरपुकीमी जोल पचा मशिरब। 8 घूस गेबमी आ घूसमी मारेइ मारेइ पने चाख्ब, दे मिम्ब। मेको ते लत हना यो आ देशो खाख्ब। 9 सुमी अरु आन मरिश्शो पशो सुम्बा, मेकोम वारच सेल्ब। तन्न मुर आन मरिश्शो पशो देंना देंन बाक्बमी वारच आन कली फ्राब। 10 मूर्ख मुर कली सहै खेयप तुप्चा क्येडा जोक्ब तुडक्ब मुर खेयप का देशोनु रुख्ब। 11 मरिश्शो मुरपुकीमी गेना हना यो जिचा पोक्नीम। तन्न मेको कली सजाइ गेचा कली शिशी मपाइब मुर सोइश्शो बाक्ब। 12 मूर्ख मुरुमी मूर्ख पवा ना गुम्चा क्येडा आ चाइक्ब रोंइसीशो वां कली गुम्चा रिश्शो बाक्ब। 13 सुमी रिश्शो पाइब आन कली मरिश्शो पाइबा, मेको आ खिं रे मरिश्शो गेनायो मलाइब। 14 दोपा प्रोंइशो ब्वाक्कु बोल पा शाइक्बा, मोपा जिचा पोक्तीक बाक्ब। मोपतीके जिचा ठेयब दुम्चा क्येडा डोंइती मेको कली तेक्कीन। 15 सुमी परमप्रभु यावे आ अरेशो मटीब आ पर्वम “ठीक पाइब बाक्ब” देंबा, मिनु ठीक पाइब आ पर्वम “ठीक पाइब मबाक्ब” देंबा, मेको निम्फा आस कली परमप्रभु यावेमी ग्रांरा दीब। यसैया ५:२३ 16 मूर्ख आ गुइमी तुडक्तीक थुं ग्याप्चा कली क्येट मारदे माल्बा डा?। मेको के शेंसीतीक थुं मबाक्ब। 17 वारचमी गेना हना यो दाक्ब। लोकबपुकी चहिं श्येत जशो ना वारच पचा कली जरमेशो बाक्नीम। 18 सु आ नेक्था डा मुर आ पर्वम जमानी बाक्चा कली सल्ला पाइबा, मेको मरुख्ब मुर बाक्ब। हितोपदेश ६:१-५ 19 जिचा दाक्बमी पाप कली यो दाक्ब। लाइश्शो लाप्चो सेल्बमी मुर आन रुश जिक्पाइक्ब। 20 मरिश्शो थुं पाइश्शो मुर आन कली मारेइम मगाख्ब। दूली पा जोल पाइब मुर हिंचा डा श्येत जाइब। 21 मूर्ख तौमी आ आम आफ आस कली सुर्ता पपाइक्ब। मूर्ख आ आफ गेनायो

ग्येरचा मताइब। 22 ग्येरसीशो थुंमी रां कली सापाइक्ब। तन्न लुक्च लशो थुंमी मुर कली सोव्रपाइक्ब। हितोपदेश १५:१३-१५ 23 परमप्रभु यावे आ अरेशो मटीब मुरुमी निसाफ दूली सेल्चा कली खुइश्शा घूस जाइब। प्रस्थान २३:८ 24 रुख्ब मुरुम आ तुडक्तीके माल्ब। तन्न मूर्खमी रागी आ सुर सम्म कोव्रशो बाक्ब। हितोपदेश ४:२५ 25 मूर्ख तौमी आ आफ कली सुर्ता पपाइक्ब। आ आम कली गेना हना यो डाक्पाइक्ब। 26 दोस मताइब मुर कली सजाइ गेचा क्येडा ठेयब मुर आन कली रिश्शो पचा कली तुप्चा मरिश्शो बाक्ब। 27 जोकब थुं पाइश्शो मुर शुश मब्वाक्नीम। रुख्ब मुर आन गेय पचा डोंइती मिश्शा, बाक्नीम। हितोपदेश १०:१९; याक्ब १:१९ 28 मूर्ख ब्वालेइ पा बाक्त हना, मूर्ख मुर यो रुख्ब मुर खोदेशो तांइसीब। लोव्र मपाप्तेक्म हना निप्स पाइश्शो खोदेशो तांइसीनीम। अय्युब ३३:५

लोव्रमी बेक्तीक नु ब्रोइतीक बाक्ब

18 सु मुर रे ब्राशा बाक्बा, मेकोमी आंम कली ला रिश्शो पचा दाक्ब। मेकोमी रुप्तीक थुं पाइश्शो मुर आन लोव्र काइ मनेंब। 2 मूर्खमी मारेइ लोव्र रुप्चा थुं मपाइब। तन्न “गो जोक्नुड” दे आ मिश्शो लोव्र ला पाइब। 3 परमप्रभु यावे आ अरेशो मटितीक नु महिक्मुतीके यो जाक्ब। मिनु मुने दोक्तीक नु मान मततीके यो जाक्ब। 4 मुर आन लोव्र शुश लुक्च लशो ब्वाक्कु खोदेशो बाक्ब। तुडक्तीके शुश ब्वाक्कु बुक्शा गूशो खोदेशो बाक्ब। 5 दोस ताइब आ कुल कोव्रशा, दोस मताइब कली दूली सेल्चा, ठीक निसाफ ममाइ। व्यवस्था १:१७ 6 मूर्ख आ लोव्रमी जिचा पोक्ब। मिनु मेको तुप्चा पुंइसीब। 7 मूर्ख आ लोव्र पतीकेमी आंमान खतम दुम्ब। आ लोव्रमी मेको कली साइक्ब। 8 नोफा मुडक्ब आन लोव्र शुश ब्रोव्रशो जचा थोव्रक खोदेशो बाक्ब। मेको मुर आन थुं सम्म जाक्दीख्ब। हितोपदेश २६:२२ 9 अल्सी पाइब मुर हेंथे पाइब आ लोकब बाक्ब। हितोपदेश १०:४ 10 परमप्रभु यावे आ नें बोल्यो लाइश्शो खिं खोदेशो बाक्ब। ठीक पाइबपुकी मेकेर दोरशा लशा, ब्रोइशा बाक्नीम। हितोपदेश १४:२६; भजन संग्रह ६१:४ 11 थीब मुर आन शोंप मेको आन कली बोल्यो सहर खोदेशो बाक्ब। मेकोपुकीमी आन शोंप कली ठेयब गारो खोदेशो मिन्नीम। हितोपदेश १०:१५ 12 खतम दुम्चा क्येडा डोंइती मुर ठेयब लेल्नीम। मान तचा क्येडा डोंइती मुर ब्रेश्शो दुम्नीम। हितोपदेश १६:१८ 13 सुमी लोव्र नेंचा क्येडा डोंइती लोव्र लेख्ब, मेको मूर्ख दुम्तीके मुने दोक्ब मुर बाक्ब। 14 मुर आ थुंमी रां डा रोइ फाल्ने चाख्ब। तन्न आ थुं लुक्च लत हना, सुम फाल्ने चाख्बा डा? 15 निप्स पाइश्शो मुर आ जोक्तीके बारना बारन लाइब। जोक्ब तुडक्ब मुरुमी मेको क्येडा जोक्चा कली नोफा दाइक्ब। 16 सुमी कोसेली गेबा, मेकोमी ठेयब मुर नु लोव्र पचा यो ताइब। उत्पत्ती ४३:११ 17 सुमी जितीकेमी डोंइती ब्वाक्बा, मेको कली नोले डा मुर मब्वाक्म सम्म नेल्लेमी ठीक मिश्शा थमा सुइक्नीम। 18 फेन्टे आष्ठा, जिचा खेचा देक्ब। मिनु ठेयब मुर आन जिचा नाइक्पाइक्ब। 19 थुं खाइक्पाइश्शो लोकब कली लेम्चा गारो हिरशो सहर ग्राचा क्येडा श्येत बाक्ब। मुर आन जितीक खेतीके बोल्यो खिं डा आग्लो खोदेशो बाक्ब। 20 मुर आन लोव्रमी ब्रोइनीम। मेको आन रिश्शो लोव्र पशोमी जचा ताइनीम। हितोपदेश १२:१४ 21 मुर आन लोव्रमी बेक्तीक नु ब्रोइतीक बाक्ब। तेको कली दाक्नीनी, मेको आ ततीक ताइनीनी। 22 सुमी मीश ताइबा, मेको कली रिश्शो दुम्ब। मेको मुर परमप्रभु यावे आ दाक्शो मुर दुम्ब। हितोपदेश १९:१४; हितोपदेश ३१:१० 23 पुडग मुरुमी ब्रेश्शो लोव्र पा पुंइनीम। तन्न शुश शोंप पाइश्शो मुरुमी ठेयब लेश्शो लोव्र लेल्नीम। 24 का निक्शी मुरुमी “वारच नड” देंखु पाइनीम। तन्न आंम लोकब क्येडा थमा पा दाक्ब वारच गेना हना यो आ वारच नु काथा बाक्ब। हितोपदेश १७:१७

पुडग आन कली वारच पावो

19 दूली लोव्र पा गाक्ब मूर्ख दुम्चा क्येडा पुडग नु गेना हना यो रिश्शो पाइब मुर दुम्चा रिश्शो बाक्ब। हितोपदेश २८:६ 2 गे मार मार माल्नीनी मेको आ पर्वम मतुडक्ताक्नी हना, मेको शोर गाक्शो बाक्ब। सु रीब पा गाक्बा, मेको आ लां जाख्ब। 3 मुर आन मूर्ख पतीकेमी खतम

दुम्नीम। मो हना यो मेकोपुकीमी परमप्रभु यावे कली दोस गेनीम। बिलाप ३:३९<sup>4</sup> शुश क्येट बाक्ब मुर नु शुश वारच बाक्नीम। तन्न प्रुडग आन कली आन बाक्बो वारचमी यो प्रॉइनीम। हितोपदेस १४:२०<sup>5</sup> जोल पा सांकळी बाक्ब मुर सजाइ मतथु मब्रॉइब। मिनु जोल पाइब यु बुइश्शा प्रोक्ने मचाप्ब। हितोपदेस २१:२८; ब्यवस्था १९:१८-२१<sup>6</sup> शुश मुरुमी ठेयब मुर आन शिशी दाक्नीम। मिनु सुमी अरु कली गेबा, मेको आ वारच शुश बाक्नीम।<sup>7</sup> प्रुडग मुर कली आ लोकबपुकीमी यो पॉइनीम। मेको आन क्येडा आ वारचपुकीमी प्रॉइनीम। मेकोमी मेको आन कली ब्रेप्ब, तन्न सुडम मनैनीम।<sup>8</sup> सुम आंम कली दाक्बा मेकोमी तुइक्तीक माल्ब। रुप्ब मुर सोशा बोशा ग्येत्थ लाइब।<sup>9</sup> जोल पा सांकळी बाक्ब मुर सजाइ मतथु मब्रॉइब। मिनु जोल पाइब मुर खतम दुम्नीम<sup>10</sup> मूर्ख मुर क्येट थीब मुर खोदेशो पा बाक्वा मशिरब। मिनु वाइलमी ठेयब मुर आन कली हुकुम पचा यो मशिरब।<sup>11</sup> निप्स पाइश्शो मुर ऑंखां पा गाइक्नीम। मिनु अरुमी थुं खाइक्तीक लोव्र पाम्तेक्म हना यो, मेको सिक्सी पा बाक्वा आ मान बाक्ब। हितोपदेस १४:२९<sup>12</sup> पिप आ गाइश्शो गुप्स आ ग्रीशो खोदेशो बाक्ब। आ दाक्तीक चहिं हांस तार दोक्बो सुनी डा सीत खोदेशो बाक्ब। हितोपदेस १६:१४-१५<sup>13</sup> निप्स मपाइश्शो तौ आ आफ कली श्येत बाक्ब। मिनु गेना हना यो जिचा पोक्ब मीश, तप तप पा याप्शो ब्वाक्कु खोदेशो बाक्ब। हितोपदेस २७:१५-१६<sup>14</sup> खिं नु शॉप आम आफ रे तांडसीब। तन्न होस पाइब मीश चहिं परमप्रभु यावे रे तांडसीब। हितोपदेस १८:२२<sup>15</sup> अल्सी पतीकेमी निन्द्रा पपाइक्ब। अल्से शोव्रलुन बाक्वा माल्नीम।<sup>16</sup> सुमी परमप्रभु यावे आ शेंशो टीनीमी, मेको ब्रॉइचा ताइनीम। सुमी मटीनीमी मेको बेक्वा माल्नीम। हितोपदेस १६:१७<sup>17</sup> सुमी प्रुडग कली शिशी पा गेबा, मेकोमी परमप्रभु यावे कली गेब। मिनु परमप्रभु यावेमी मेको कली नेल्ल लेप्ब। हितोपदेस १४:३१; भजन संग्रह ४१:२-४; दानीएल ४:२४; मत्ती ५:७; मत्ती २५:४०; २कोरिन्थी ९:६<sup>18</sup> आस बाक्म सम्म इ तौ कली शेंशा तुपो। तन्न मेको कली तुप्शा मसतो। ब्यवस्था २१:१८-२१<sup>19</sup> रीब पा शुश चुरब मुर सजाइ ताइब। गे मेको कली तेक्वा माल्तीवी हना, मेको क्येडा शुश गाइक्ब।<sup>20</sup> नोफा दाइश्शा अर्ती नेंशा, शेंतीक टिने। मो पाइतीनी हना, तुइक्तीक पाइश्शो मुर दुम्नीनी।<sup>21</sup> मुर आ थुंमी शुश मिन्तीक बाक्नीम। तन्न परमप्रभु यावे आ मिम्शो ला दुम्ब। हितोपदेस १६:९<sup>22</sup> शिशी पाइब मुर दुम्बा रिम्शो बाक्ब। जोल पाइब दुम्बा क्येडा प्रुडग दुम्बा रिम्शो बाक्ब।<sup>23</sup> परमप्रभु यावे कली मान पा हिंचा ब्रॉइतीक बाक्ब। मो दुम्त हना, गे महिंथु, श्येत मजथु बाक्नीनी।<sup>24</sup> अल्सेपुकीमी आन गुइ खमेम ख्व्नीम। तन्न आन गुइ शोव्र सम्म मचाक्नीम। हितोपदेस २६:१५<sup>25</sup> शुक्शी पाइब आन कली तुप्शोनु, मारेइ मजोक्बपुकी होस पा बाक्वा शेंसीनीम। निप्स पाइश्शो मुर कली हुइश्शोनु, मेको क्येडा जोक्ब दुम्ब। हितोपदेस २१:११<sup>26</sup> सुमी आ आफ कली श्येत गेबा नु आ आम कली खेरबा, मेको ग्रॉग्रा दिशो नु मुने तोक्ब तौ बाक्ब।<sup>27</sup> आं तौ, गे जोक्ब मुर आन लोव्र रे हेंथे लचा प्रोनो। मो पाप्तीवी हना गे शेंशो लोव्र नेंने चाप्नेवे। याक्ब १:२२<sup>28</sup> शोर गाक्बो सांकळीमी निसाफ पतीक आ पर्बम शुक्शी पाइब। मेकोमी परमप्रभु यावे आ अरेशो मटीब। मरिम्शो पतीके जचा थोव्रक खोदेशो पा दाक्ब।<sup>29</sup> सजाइ शुक्शी पाइब आन कली बाक्ब। तुप्तीके मूर्ख आन ची कली माल्ब। हितोपदेस २६:३

### जोल पा नाक्तीक

**20** अडगुर शांबुमी हेंथे ब्वाक्पाइक्ब। राकसीमी राम्शी पपाइक्ब। सु मेको तूशा दुक्नीमी, मेको जोक्ब तुइक्ब मदुम्नीम। हितोपदेस २३:२९-३५; हितोपदेस ३१:५; होसे ४:११<sup>2</sup> पिप आन शुश गाइश्शो गुप्स आन ग्रीशो खोदेशो बाक्ब। सुम मेको कली गाइक्पाइक्बा, मेको साइक्वा पुंडसीब। हितोपदेस १६:१४<sup>3</sup> राम्शी पतीक रे डोन बाक्ब मुरुमी मान ताइब। तन्न मूर्ख नेल्ल रीब पा राम्शी पाइब बाक्नीम।<sup>4</sup> ग्यू दुम्तीके अल्सेमी ब्यफ मवाक्ब। मिनु अन्न रिक्ची ना मारेइ यो मताइब। हितोपदेस ६:६-११;<sup>5</sup> मुर आन थुं डा मिम्शो लुक्च लशो ब्वाक्कु खोदेशो बाक्ब। तन्न निप्स पाइश्शो मुरुमी ला मेको कीशा गुंइने चाप्ब।<sup>6</sup> शुश मुरुमी “गो रिम्शो मुर नड” दे अरु आन कली तुइक्पाइक्नीम। तन्न थमा सुइक्वा डा मुर सु थिन्ने

चाम्सीबा डा? <sup>7</sup> ठीक पाइब मुर गेना हना यो रिम्शो पाइब बाक्ब। मेको आ आलपुकी ग्येरसीशो बाक्नीम। भजन संग्रह ११२:१२<sup>8</sup> निसाफ पाइब निक्तीकेम निश्शो पिपमी कोव्रशा, रिम्शो नु मरिम्शो नेल्ल तिल्ब। भजन संग्रह १०१:३<sup>9</sup> मिनु सुमी “गो आं थुं रिम्शो सेल्ला। आं पाप क्याम्ताक्ड” देंने चाप्बा डा? हितोपदेस ३०:१२; अय्युब ४:१७; अय्युब ९:२-३<sup>10</sup> जोल पा नाक्तीक नु मगारशो पुक्तीक निम्फा परमप्रभु यावे कली ग्रॉग्रा बाक्ब।<sup>11</sup> मिनु आल यो आन पतीकेमी दोदेशो दुम्नीमी मेको कौंइनीम। ठीक पाइब नु रिम्शो थुं पाइश्शो आल बाक्ब, दे तुंडसीब। हितोपदेस २२:६<sup>12</sup> नेंचा कली नोफा नु कोव्रचा कली मिक्च मेको निम्फा परमप्रभु यावेमी सेल्लु।<sup>13</sup> शुश मइप्पो, मारेदे हना गे प्रुडग दुम्नेवे। सेंसीशा बाक्को। मिनु शुश जचा ताइनेवे।<sup>14</sup> ग्याप्ब मुरुमी “एको मरिम्शो बाक्ब। मरिम्शो बाक्ब” दे इक्का आइक्ची लशा “गो सस्तो ग्याप्ता” दे आ नें बोरपाइक्ब।<sup>15</sup> शुश सुन नु शुश क्येट लाइब हीरा बाक्नीम। तन्न मेको आन क्येडा जोक्तीक लोव्र पाइब मुर रिम्शो बाक्ब।<sup>16</sup> अर्को रागी डा मुर आ पर्बम जमानी दुम्शो मुर, आ वा रोइश्शा लतीन। मुर आ पर्बम जमानी बाक्बो आ मारेइ मारेइ नेल्ले लतीन। हितोपदेस ६:१-२; हितोपदेस २७:१३<sup>17</sup> खुइ पा जशो शोब्ले डौंइती शुश ब्रोव्रब। नोले मेको फुल्लु नाक्बो खोदेशो दुम्ब। हितोपदेस ९:१७<sup>18</sup> अर्ती नेंब मुर आ मिम्शो रिम्शो दुम्ब। जोक्ब तुइक्ब आन लोव्र नेंशा ला लडाइ पावो। हितोपदेस २४:६<sup>19</sup> लोव्र क्याल्ब मुरुमी खुइश्शा पशो लोव्र यो फ्राइब। मोपतीके शुश लोव्र पाइब मुर नु वारच मदुमो।<sup>20</sup> सुम आ आम आफ आस कली सराप पाइबा, मेको आ बत्ती नेल्ल क्येडा छिडछिडमी काप्ब। हितोपदेस ३०:१७; प्रस्थान २१:१७<sup>21</sup> डौंइती रीब पा थेरशो रू नोले आसीक मराइब।<sup>22</sup> गे मरिम्शो पाइब कली क्येक्क लेन्नुड मदेनो। परमप्रभु यावेमी पाइब, दे रिम्दो। मिनु इ कली वारच पाइब। हितोपदेस २४:२९; रोमी १२:१७<sup>23</sup> जोल पा नाक्तीक तशा परमप्रभु यावे ग्रॉग्रा दीब। मिनु दूली नाक्तीक ठीक मबाक्नीम।<sup>24</sup> परमप्रभु यावेमी मुर आन कली लां कौंइब। सुमी आंम लां रुप्ने चाप्बा डा? <sup>25</sup> मुरुमी ममिम्थु “परमप्रभु यावे केन बाक्ब” देंशा, कसम जचा, थम हिंचा डा बाक्ब। मारेदे हना नोले मिम्शा, मार दुम्बा डा? <sup>26</sup> जोक्ब तुइक्ब पिपमी परमप्रभु यावे आ अरेशो मटीब आन कली तिल्ब। मिनु मेको आन कली साइक्ब।<sup>27</sup> मुर आन थुं परमप्रभु यावे आ बत्ती बाक्ब। मिनु मेकोमी रां नेल्ल कली कोव्रब।<sup>१कोरिन्थी २:११</sup><sup>28</sup> गेना हना यो दाक्शा गेनायो मप्रॉइतीकेमी पिप कली खाल पाइब। आ ठीक पतीकेमी आ सासन पतीके मजाम्ब। हितोपदेस १६:१२<sup>29</sup> ठिटा आन दारस आन बोल्यो रां बाक्ब। मिनु खाल्या आन दारस आन बोइश्शो चां बाक्ब।<sup>30</sup> तुप्शो गारमी लेंशा मरिम्शो मपपाइक्ब। मिनु तुप्शोमी यो मुर आन थुं कली रिम्शो पाइब सेल्लेब।

### परमप्रभु कली टीबम रिम्शो पाइब

**21** पिप आ थुं परमप्रभु यावे आ गुइमी खोला डा ब्वाक्कु खोदेशो बाक्ब। दोथ गे लाइक्वा दाक्ता, मोथ गे लाइक्ब। भजन संग्रह ३३:१५<sup>2</sup> मुरुमी आंम कली गेना हना यो “ठीक पाता” दे मिम्नीम। तन्न परमप्रभु यावेमी मुर आन थुं नाक्ब।<sup>3</sup> परमप्रभु यावे आ डौंइती मार मार चढेचा क्येडा ठीक पतीके नु रिम्शो निसाफ पतीके आ दाक्शा ब्रतीक बाक्ब। <sup>१सामुएल १५:२२; होसे ६:६</sup><sup>4</sup> ठेयब लेशो नु बोरशो मुर दुम्बा, परमप्रभु यावे आ अरेशो मटीब आन छेडछेड बाक्ब। मेको पाप बाक्ब।<sup>5</sup> शुश गेय पाइब आन मिम्तीकेमी सोशा बोशा ग्येत्थ लां खोइक्पाइक्ब। तन्न रीब पा ममिम्थु गेय पाइब मुर प्रुडग दुम्ब।<sup>6</sup> जोल पा शुश शॉप चेम्तीके फशेमी योल्शा जाम्शो कुन खोदेशो बाक्ब। मोदेशो पाइबपुकी साइक्वा पुंडसीनीम।<sup>7</sup> परमप्रभु यावे आ अरेशो मटीब आन हुश ख्राक्श पोक्तीकेमी साइक्वा पुंडसीनीम। मारेदे हना मेकोपुकीमी मार ठीक बाक्मे, मेको पचा मबिल्नीम।<sup>8</sup> दोस ताइब मुर आन लां हिरशो बाक्ब। दोस मताइब मुर आन पतीक चहिं ठीक बाक्ब।<sup>9</sup> गेना हना यो जिचा पोक्ब मीश नु ठेयब खिंम बाक्वा क्येडा, तला डा कुना कामी बाक्वा रिम्शो बाक्ब।<sup>10</sup> परमप्रभु यावे आ अरेशो मटीबपुकीमी मरिम्शो ला पचा दाक्नीम। मेकोपुकीमी आन नेक्था डा मुर आन कली यो शिशी मपाइनीम।<sup>11</sup> शुक्शी पाइब कली सजाइ

गेशोन, मारेड मजोक्ब मुर इक्का जोक्ब तुइक्ब दुम्नीम। मिनु जोक्ब तुइक्ब मुर आन कली शंशोन, आन जोक्तीके बारब। *हिंदोपदेस १९:२५* <sup>12</sup> ठीक पाइबमी परमप्रभु यावे आ अरेशो मटीब मुर आन खिं कोवना कोवन बाक्ब। मिनु परमप्रभुमी आ अरेशो मटीब आन कली खतम पोक्ब। <sup>13</sup> सुमी पुडग आन पुंडशो मनैबा, मेकोमी यो पुनानु, सुइमी यो मनैनीम। <sup>14</sup> खुइशोमी मार मार गेशोन, चुरब मुर यो मचुरनीम। मिनु वा आगामी खुइशो गेशोमी ठेयब गाइक्तीक तेक्ब। *१सामुएल २५:१८-३५* <sup>15</sup> निसाफ दुम्मेनु ठीक पाइब ग्येरसीनीम। तन्न मरिश्शो पाइबपुकी हिंनीम। <sup>16</sup> सुइ मुर रुपतीक लां प्रॉइतु हना, मेको बेक्शो मुर आन बाक्तीक लशा नाइक्ब। <sup>17</sup> सुम आंम दाक्शो पना पन बाक्बा, मेको पुडग दुम्ब। सुमी अडगुर शांबु नु तेल दाक्बा, मेको मुर यो पुडग दुम्ब। *हिंदोपदेस २३:२१* <sup>18</sup> ठीक पाइब आन पा डा परमप्रभु यावे आ अरेशो मटीबपुकीम सजाइ ताइनीम। मिनु गेना हना यो रिश्शो पाइब आन पा डा थमा सुइक्वा मपुंडसीब मुर सजाइ ताइनीम। <sup>19</sup> शुश जिचा पोक्ब नु चुरब मीश नु बाक्चा क्येडा गोरशो रागीमी बाक्चा रिश्शो दुम्ब। <sup>20</sup> जोक्ब तुइक्ब मुर आन खिंम शुश क्येट लाइब शॉप नु तेल बाक्ब। तन्न मूर्खमी आ बाक्शो नेल्ल थुम्ब। <sup>21</sup> सु मुरुमी ठीक पतीके नु शिशी पतीके आ नोले खोइक्बा, मेको ब्रॉइशा, सोशा बोशा दुम्शा मान ताइब दुम्ब। <sup>22</sup> जोक्ब तुइक्ब मुर कामी बोल्यो लडाइ पाइब आन सहर कली लडाइ तोपु। मिनु मेकोमी आन बोल्यो, थमा सुइशो, ब्रॉइशा बाक्तीक सहर ग्रात। <sup>23</sup> सुमी मिश्शा ठीक लोव पाइबा, मेकोमी आंम कली श्येत रे प्रॉइब। *हिंदोपदेस १३:३* <sup>24</sup> ठेयब लेशो, बोरशो मुर आ नें शुक्शी पाइब बाक्ब। मेकोमी ठेयब लेशो नु बोरशो गेय ला पाइब। <sup>25</sup> अल्से गेय मपतीके बेक्नीम। मारदे हना अल्से आन गुडम गेय पने मबिप्ब। *हिंदोपदेस १३:४* <sup>26</sup> नाक्त रे अल्सेमी मारेड मारेड माल्ब। तन्न ठीक पाइबमी मखेक्थु, गेब। <sup>27</sup> परमप्रभु यावे आ अरेशो मटीब आन चढेशो ग्रांरा दिशो बाक्ब। मेकोमी मरिश्शो मिश्शा चढेशो शुश ग्रांरा बाक्ब। *हिंदोपदेस १५:८* <sup>28</sup> जोल पाइब सांकछी जाम्शा लाइनीम। तन्न रिश्शो पा नोफा दाइशशा नैब मुर थमा डा सांकछी बाक्ब। *हिंदोपदेस १९:५,९* <sup>29</sup> परमप्रभु यावे आ अरेशो मटीब मुर बोल्यो मुर खोदेंशो पा गाक्नीम। तन्न गेना हना यो रिश्शो थुं पाइशो मुर मिम्ना मिम्न गाक्नीम। <sup>30</sup> मुर आन तुइक्तीक, रुपतीके अर्ती गेतीके परमप्रभु यावे आ डोंइती थम आइक्च बाक्ब। *भजन संग्रह ३३:१०-११* <sup>31</sup> लडाइ पची नाक्त कली शारा ठीक पशो बाक्त। तन्न ग्रातीक परमप्रभु यावे आ गुइमी बाक्ब। *भजन संग्रह ३३:१७*

श्येत गेबम श्येत जाइब

**22** शुश क्येट शॉप क्येडा मान पाइशो रिश्शो बाक्ब। सुन चांदी क्येडा दाक्चा पुंडसीचा रिश्शो बाक्ब। *उपदेसक ७:१* <sup>2</sup> क्येट थीब नु पुडग मुर के गारतीक का बाक्ब। मेको मार बाक्ब देंशा हना, परमप्रभु यावेमी मेको निम्फा आस कली सेल्लु। *हिंदोपदेस २९:१३* <sup>3</sup> निप्स पाइशो मुर श्येत जाक्चा चिक्शो तशा, खुंडसीनीम। तन्न मारेड मजोक्ब मुरुमी मारेड मतुइक्थु श्येत जाइनीम। *हिंदोपदेस २७:१२* <sup>4</sup> ब्रेश्शो थुं पाइशो नु परमप्रभु यावे कली मान पा हिंब मुर आन इनाम शॉप, मान ततीक नु ब्रॉइतीक बाक्ब। *हिंदोपदेस १५:३३* <sup>5</sup> दूली पाइब आन लांम चू नु ग्याइल बाक्नीम। होस पाइबपुकी मेको आन क्येडा डोन बाक्नीम। <sup>6</sup> इ तौ कली गारचा डा पा रिश्शो शेंदो। मेकोमी खाल्पा दुम्चा सम्म मेको लां मप्रॉइब। *हिंदोपदेस २०:११* <sup>7</sup> क्येट थीबमी पुडग कली अधिकार पाइब। जेर ताक्ब मुर जेर गेब आ वाइल बाक्ब। <sup>8</sup> मुरुमी ठीक मपतीके शोक्तेक्म हना, ठेयब श्येत खुप्नीम। मिनु आ गाइक्तीके आ कोक्के जिक्ब। *अय्युब ४:८* <sup>9</sup> हाइशो मुरुमी आसीक ताइब। मारदे हना मेकोमी आ जचा थोवक पुडग नु योक्ब। *हिंदोपदेस १९:१७* <sup>10</sup> शुक्शी पाइब कली खेरो। मिनु जिचा खेचा नुप्ब। जिचा नु तुम्मुचा तेक्सीब। *हिंदोपदेस २६:२०* <sup>11</sup> सु रिश्शो थुं नु ठीक लोव पचा दाक्नीमी, मेको पिप आ वारच दुम्नीम। *कलस्सी ४:६; भजन संग्रह १०१:६* <sup>12</sup> परमप्रभु यावेमी तुइक्ब मुर आन कली कोवब। तन्न हेंथे पाइब आन थमा सुइक्वा मपुंडसीब लोव थुम्पाइक्ब। <sup>13</sup> अल्सेमी "लाडगामी गुप्स का बाक्ब। गो लाडगा लती हना, आं कली साइक्ब" दैब। *हिंदोपदेस*

*२६:१३* <sup>14</sup> हेंथे गाक्ब मीश मुर आ लोव ठेयब खाल्ता खोदेंशो बाक्ब। परमप्रभु यावे आ गाइशो ताइबपुकी मेको खाल्ताम बिक्नीम। *हिंदोपदेस ५:३* <sup>15</sup> वोंइश आल आन थुंमी मरिश्शो पतीक यो बाक्ब। तन्न शंशा इक्का तुप्शोन, आ मरिश्शो पतीके प्रॉइब। *हिंदोपदेस १३:२४; हिंदोपदेस २३:१३-१४; हिंदोपदेस २९:१७* <sup>16</sup> आंम कली शॉप पाइशो सेल्चा कली पुडग आ थोवक लाइक्चा नु क्येट थीब कली कोसेली गेचा, मेको निम्फा पुडग दुम्तीक गेय बाक्ब।

जोक्ब तुइक्ब मुर आ लोव

<sup>17</sup> इ नोफा दाइशशा जोक्ब तुइक्ब दुम्शा, आं लोव नेनो। मिनु आं लोव इ थुंम वोटो! *हिंदोपदेस २४:२३* <sup>18</sup> मारदे हना मेको लोव इ थुंमी वोइक्तीवी हना, इ कली रिश्शो दुम्ब। मिनु गे मेको गेना हना यो शेंने चाप्नेवे। <sup>19</sup> गे परमप्रभु यावे कली थमा सुतो, दे मुलाक्ती गो इ कली एको लोव शेंताक्ड। <sup>20</sup> गो इ कली ३० ओटा दैतीके, अर्ती नु जोक्तीक लोव मब्रेक्तु डा? <sup>21</sup> मारदे ब्रेक्ताक्ड देंशा हना, इ कली मार ठीक बाक्बा नु मार थमा बाक्बा, दे कोंइचा कली ब्रेक्ताक्ड। मोपा गे इ कली सोइक्ब आन कली थमा लोव लेन्ने चाप्नेवे। <sup>22</sup> पुडग आन के मारेड मबाक्ब, दे मेको आन के मारेड मरोइक्तो। मिनु श्येत जाइब कली ठीक निसाफ पावो। *प्रस्थान २३:६* <sup>23</sup> मारदे हना परमप्रभु यावेमी मेको आन कली वारच पाइब। मेकोमी मेको रोइक्ब आन ब्रॉइतीक रोइक्ब। <sup>24</sup> गाइक्ब मुर नु वारच मडुमो। मिनु शुश चुरब नु मगाक्को। *हिंदोपदेस १५:१८* <sup>25</sup> मेको नु गाक्ते हना, मोदेंशोन दुम्शा, ग्याइक्चा पुंडसीनेवे। <sup>26</sup> मुर आन जेर आ पर्वम कसम जशा जमानी मबाक्को। *हिंदोपदेस ६:१* <sup>27</sup> मारदे हना गे थाप्ने मचाप्तीवी हना, इ ब्राख्ये यो रोइक्चा पुंडसीनेवे। <sup>28</sup> इ किकी पिपीमी वोइशो सांद डा फुल्लु गेनायो मयाक्तो। *हिंदोपदेस २३:१०; ब्यक्स्था २७:१७* <sup>29</sup> जोक्ब गेय पाइब आन कली तनी? मेकोपुकी पिप आन कली गेय पाइब दुम्नीम। मेकोपुकीमी आइक्च मुर आन कली गेय मपाइनीम।

आल आन कली रिश्शो पा शेंदीन

**23** सासन पाइब नु जथ बाक्डेनु, इ डोंइती मार बाक्मे, मेको रिश्शो पा कोवडो। <sup>2</sup> गे शुश जचा ब्वचा दाक्ताक्वी हना, इ लाकचामी छूरी वोटो। <sup>3</sup> मेको आ ब्रॉवशो जचा थोवक तशा मवलो। मारदे हना मेकोम इ कली खल्बल सेल्ब। <sup>4</sup> क्येट थीब मुर खोदेंशो दुम्चा कली मिश्शा बोल मपावो। जोक्ब तुइक्ब दुम्शा मोदेंशो मिम्चा प्रोनो। *हिंदोपदेस २८:२२* <sup>5</sup> मेको याम का तशा नोले, चिक्ब खोदेंशो पा बेरशा लाइब। मेको ककाकुली खोदेंशो पा सरीड गे बेरशा लाइब। <sup>6</sup> शिम आ खिंमी भोज जथ मलावो। मेको आन ब्रॉवशो जचा थोवक तशा मवलो। <sup>7</sup> मारदे हना मेकोम इ लाकचामी चांम खोदेंशो पा कारब। मेकोमी इ कली जने तूडीने दैत हना यो, मेको आ थुं गे नु मबाक्ब। <sup>8</sup> इ इक्का जशो नेल्ल मेचा कुइब। मेको कली इ ठेयब सेल्शा देंशो लोव नेल्ल मोशीन लाइब। <sup>9</sup> मूर्ख आ डोंइती लोव मपावो। मारदे हना इ जोक्ब तुइक्ब लोव नेंशा, शुक्शी ला पाइब। <sup>10</sup> गे साइ डोंइती वोइशो सांद डा फुल्लु मयाक्तो। मिनु रोम रोइक्च आन रू मचाइक्तो। *हिंदोपदेस २२:२८* <sup>11</sup> मारदे हना मेको आन कली श्येत रे प्रॉइब बोल्यो बाक्ब। मेकोमी मेको आन पर्वम इ कली श्येत गेब। <sup>12</sup> रिश्शो शेंतीक नेनो। जोक्तीक लोव नेंचा कली इ नोफा दाइक्तो। <sup>13</sup> इ आल आन कली रिश्शो पा शेंचा मप्रोनो। मेको आन कली सजाइ गेशा तुप्तीवी हना, मेको मबेक्नीम। *हिंदोपदेस २२:१५* <sup>14</sup> गे मेको कली इक्का तुप्तीवी हना, मेको आन कली बेक्शो मुर आन बाक्तीक लतीक लां रे प्रॉइनेवे। <sup>15</sup> आं तौ, गे जोक्ब तुइक्ब दुम्ते हना, आं थुं यो ग्येरसीब। <sup>16</sup> गे ठीक लोव पवीनु, गो आं थुं रेन साप्पा ग्येरसीनुड। <sup>17</sup> पापी आन कली गेहे मपावो। तन्न नाक्त किंत किंत परमप्रभु यावे कली मान पा हिंनो। <sup>18</sup> मो पाप्तीवी हना, इ ब्रॉइतीक नु इ मिश्शो नेल्ल जाक्दीप्ब। <sup>19</sup> आं तौ, आं लोव नेनो। जोक्ब तुइक्ब दुमो। मिनु इ थुं कली ठीक लांमी ग्येत्थ गाक्पतो। <sup>20</sup> शांबु तूब नु शुश श्ये ब्वाइबपुकी नु मबाक्को। <sup>21</sup> मारदे हना दुक्ब नु शुश जाइब ब्वाइब मुरपुकी पुडग दुम्नीम। शुश दुक्शा बाक्तीकेमी जेक्शो वा फेक्पाइक्ब। *हिंदोपदेस २१:१७* <sup>22</sup> इ

आफ आ लोव नेनो। इ आम खाल्पी दुम्मेनु, मेको कली आइक्व मसेलो। हितोपदेस १:८<sup>23</sup> थमा पतीक कली ग्यापो। मेको कली गेनायो मलेयडो। तुइक्तीक, शैतीक नु रुप्तीक ग्यापो।<sup>24</sup> ठीक पाइब तौ तशा, आ आफ ग्येरसीब। जोक्ब तुइक्ब थुं पाइश्शो तौ तशा आ आफ शुश ग्येरसीब। हितोपदेस १०:१<sup>25</sup> इ आम आफ ग्येरसीसल। इ कली थीब गेना हना यो ग्येरशा बाक्ल।

<sup>26</sup> आं तौ, इ थुं आं कली गेयी। आं पशो कोव्रडो।<sup>27</sup> तेल्लेम मीश मुर ठेयब खाल्टा खोदेशो बाक्ब। ग्युंवे पा यो हेंथे पाइब मीश मुर लुक्च लशो इनार खोदेशो बाक्ब। हितोपदेस २२:१४; हितोपदेस ७:१०-१४<sup>28</sup> मेको खुइ खोदेशो पा लांमी बाप्शा बाक्ब। मिनु हेंथे गाक्ब वोंडश मुर शुश सेल्ब।

<sup>29</sup> सु श्वेत जाइबा? सु सुर्ता पाइबा? सुम राम्शी पोक्बा? सुम गाली पाइबा? सु बिच्चीम गार दुम्बा? सु का आ मिक्च लल जिशो बाक्बा? हितोपदेस २०:१; यसैया ५६:१२<sup>30</sup> मेको नाक्दो सम्म शुश अडगुर शांबु तूब बाक्नीम। व्वाइश्शो अडगुर शांबु तूब बाक्नीम।<sup>31</sup> गे लल अडगुर शांबु कोव्रस डा कोव्रस मबाक्को। गिश दारशो बाक्मे, दे मकोव्रडो। मेको रिम्शो पा कोव्रजम लाइब।<sup>32</sup> मिनु मेकोमी नोले बुस्सुमी खोदेशो पा कोक्ब। मेको बीस पाइश्शो कोक्ब बुस्स खोदेशो बाक्ब।<sup>33</sup> मिनु इ मिक्चीमी मार मार ताइनेवे। मिनु दूली लोव्र पाइनेवे।<sup>34</sup> मिनु गे समुन्द्र आ दातेमी इश्शो खोदेशो दुम्नेवे। पला आ डल तारी इश्शो खोदेशो दुम्नेवे।<sup>35</sup> मिनु गे मार देंनेवे, देंशा हना “आं कली तुप्तीमी, तन्न मखाइक्ड। तुप्तीमी तन्न मतुइक्नु। मुल गेना सेंसीशा, लेंशा तूनुडा?” देंनेवे।

रुब्ब मुर बोल्यो बाक्नीम

**24** मरिम्शो पाइब मुर आन मार मार तशा, गेहे मपने। मिनु मेको नु मबाक्कीन।<sup>2</sup> मारदे हना मेको आन थुंमी हुश खाक्श पोक्चा ला मिन्मीम। मिनु मेकोपुकीमी मरिम्शो आ पर्वम ला लोव्र पाइनीम।

<sup>3</sup> तुइक्तीकेमी खिं सेल्सीब। रुब्ब मुरुमी आ खिं सेल्शा रिम्शो पा बाक्ब।<sup>4</sup> जोक्तीकेमी मेको खिं डा कोठापुकी शुश क्येट लाइब नु रिम्शो थोव्रकीमी प्रिंब। हितोपदेस ३१:१०-३१<sup>5</sup> बोल्यो लडाइ पाइब आन क्येडा जोक्ब तुइक्ब लडाइ पाइब रिम्शो बाक्नीम। मिनु बोल पाइश्शो मुर आन क्येडा जोक्ब तुइक्ब मुरुमी अधिकार ताइब।<sup>6</sup> मारदे हना रिम्शो लां कोंडिब बाक्त हना, लडाइ पने चाप्नीनी। अर्ती गेब शुश बाक्तेक्म हना, लडाइ ग्रानीनी। हितोपदेस २०:२८; हितोपदेस ११:१४<sup>7</sup> मूर्खपुकीमी तुइक्तीके रुप्ने मचाप्नीम। मेकोपुकीमी ठेयब लाप्चो डा गुम्तीकेमी लोव्र पने मचाप्नीम।

<sup>8</sup> सुमी काइ मरिम्शो पचा मिम्बा, मेको कली मरिम्शो पाइब देंनीम।<sup>9</sup> मूर्ख गेय पाप बाक्ब। मिनु शुक्शी पाइब कली तशा मुर नेल्ल ग्रान्ग्रा दीनीम।<sup>10</sup> श्वेत नाक्ती गोल्चा चिक्ताक्वी हना, इ बोल दोशो बाक्म डा? <sup>11</sup> मुर कली साइक्वा, दे कीशा लाइश्शो ताप्तीवी हना, मेको आन कली प्रोंडथ लावो। मिनु साइक्वा पुंडसीचा चिक्शो कली वारच पावो। भजन संग्रह ८२:४<sup>12</sup> मिनु गे “गो मेको मतुइक्नु” देंते हना, थुं नाक्बम इ मरिम्शो पशो तुइक्ब। इ कली कोव्रबमी नेल्ल तुइक्ब। मेकोमी मुर आ मरिम्शो पशो डा क्येक्क लेप्ब।<sup>13</sup> आं तौ, खुदो जावो। मारदे हना मेको रिम्शो बाक्ब। चाका रे याप्शो खुदो जीजी पा ब्रोव्रब।<sup>14</sup> मार मिम्बा माल्नेवे देंशा हना, जोक्तीक तुइक्तीक इ थुं कली खुदो खोदेशो जिज बाक्ब। मेको ताप्तीवी हना, इ कली नोले सम्म रिम्शो दुम्ब। इ मिम्शो जाक्दीप्ब।

<sup>15</sup> गे परमप्रभु यावे आ अरेशो मटीब ठीक पाइब आन खिं खतम पोक्चा कली बाप्शा मबाक्को। मेको ठीक पाइब आ बाक्तीकेमी हुश खाक्श मपोक्को।<sup>16</sup> ठीक पाइब मुरपुकी ७ खेयप गोल्तेक्म हना यो, लेंशा बोक्नीम। तन्न परमप्रभु यावे आ अरेशो मटीबपुकी मबोक्चा डा पा गोल्नीम। भजन संग्रह ३७:२४<sup>17</sup> इ जोरी सत्रु जाम्शा लाम्तेक्म हना, मायेरसो। मेकोपुकी दाइल पा थिस्साक्म हना, मरिस्सो। अय्युब ३१:२९<sup>18</sup> गे मेको तशा ग्येरसाक्वे हना, परमप्रभु यावेमी इ पशो मदाक्ब। मिनु इ जोरी सत्रु आन पर्वम गाइश्शो नाइश्शा मेको आन कली वारच पाइब।

<sup>19</sup> काइ मरिम्शो पाइब आन पर्वम मगाइक्तो। परमप्रभु यावे आ अरेशो मटीब आन पर्वम गेहे मपावो। भजन संग्रह ३७:१<sup>20</sup> मारदे हना काइ

मरिम्शो पाइब शुश नाक्त मलीनीम। मिनु परमप्रभु यावे आ अरेशो मटीब आन बत्ती काप्शा लाइब। हितोपदेस १३:९<sup>21</sup> आं तौ, परमप्रभु यावे नु पिप कली मान पा हिनो। मेको आस कली मटीब नु मगाक्को। १ पत्रुस २:१७<sup>22</sup> मारदे हना मेको आस पतीके रे गे मतुइक्थु श्वेत जने चाप्नेवे। मिनु मेको आस खतम पोक्तीक सुम तुइक्बा?

अरु अर्ती

<sup>23</sup> एको लोव्र जोक्ब तुइक्ब मुर आन देंशो बाक्ब। निसाफ पतीकेमी कुल कोव्रमुचा मरिम्शो बाक्ब। लेवी १९:१५<sup>24</sup> सुमी पाप पाइब कली “गे ठीक पाइब बाक्नीनी” देंबा, जात जात डा मुरपुकीमी मेको कली सराप पाइनीम। रागी रागी डा मुरपुकी मेको आ पर्वम ग्रान्ग्रा दीनीम।<sup>25</sup> तन्न सुमी मरिम्शो पाइब कली अरेबा, मेको ग्येरसीनीम। मिनु मेको शुश आसीक ताइनीम।<sup>26</sup> थमा लोव्र लेत्वा, मुर कली पुक्पु पशो खोदेशो बाक्ब। हितोपदेस १५:२३<sup>27</sup> डोंइती इ लाडगा डा गेय थुमो। इ रूमी मार मार शोक्को। मिनु नोले इ खिं सेलो।<sup>28</sup> गे इ नेक्था डा मुरुम मारेइ मपथु, मेको आ पर्वम सांक्छी मबाक्को। गे जोल मपावो। प्रस्थान २०:१६<sup>29</sup> गे “मेकोम आं कली मार पवा, मेको कली यो मोदेशो पाइनुड। गो मेको कली क्येक्क लेत्नुड” मदेनो। हितोपदेस २०:२२<sup>30</sup> गो अल्से मुर का आ रू रे पा लती। निप्स मपाइश्शो मुर आ अडगुर रू रे पा कोव्रना कोव्रन लती।<sup>31</sup> मिनु गो मार ताता देंशा हना, मेको रू नेल्ल चूम सुम्शो बाक्त। खप नेल्ल चूले वाशो बाक्तेक्म। मिनु रू एर ओथ डा गारो यो ब्रेश्शो बाक्त।<sup>32</sup> मिनु गो नेल्ल कोव्रशा, मिम्ताक्ड। मिनु शैतीक लोव्र का रुप्ता। मार रुप्ता देंशा हना,<sup>33</sup> याम का डा इप्चा। याम का डा निन्द्रा पचा। याम का गुइ फिम्ला पा बाक्चामी हितोपदेस ६:९-११<sup>34</sup> पुडगा दुम्तीके नु श्वेत जतीके या कुरब मुर खोदेशो पा रीब पा मेको मुर तारी जाक्ब, दे रुप्ता।

सोलोमन आ अरु ब्रेक्शो लोव्र

**25** एको सोलोमन आ अरु देंतीक लोव्र बाक्नीम। मिनु यहूदा डा पिप हिज्कीयाह आ मुरपुकीमी मेको ब्रेक्शो बाक्तेक्म। हितोपदेस १:१; हितोपदेस १०:१<sup>2</sup> परमप्रभुमी का निक्शी लोव्र खुइश्शा आ सक्ति कोंडिब। तन्न पिपमी नेल्ल तुइक्पाइश्शा, आ सक्ति ठेयब सेल्ब।<sup>3</sup> सरीड गिश ग्येथ बाक्बा, रागी गिश लुक्च लाइबा नु पिप आ थुंमी मार मिम्बा, मेको सुइमी यो तुइक्ने मचाप्नीम।<sup>4</sup> चांदी यपाइश्शा, आ कस गुंइताक्म हना, चेम्बमी रिम्शो थोव्रक चेम्ने चाप्ब।<sup>5</sup> मोपा पिप आ डोंइती रे परमप्रभु यावे आ अरेशो मटीब आन कली तिलीन। मिनु पिप आ हुकुम पतीके बोल्यो दुम्ब। हितोपदेस १६:१२<sup>6</sup> पिप आ डोंइती आंम कली ठेयब मसेलो। मिनु पिप आ ठेयब गेय पाइब आन बाक्तीक लचा ममालो।<sup>7</sup> मारदे हना ठेयब आन दातेमी इ कली “याक्सो”, माइक्वा पुंडसीचा क्येडा “एक कुने, निस्सीन” दे ब्रेश्शो रिम्शो बाक्ब।<sup>8</sup> गे मार मरिम्शो ताप्तीवी हना यो, रीब पा निसाफ पतीकेमी मलावो। मारदे हना इ नेक्था डा मुरुम इ कली मुने तोक्ते हना, मार पाइनेवे। लूका १४:७-११

<sup>9</sup> गे इ नेक्था डा मुर नु आंमा रीब पा लोव्र पावो। मेको मुर आ मरिम्शो पशो मफ्रावो। हितोपदेस २०:१९<sup>10</sup> मिनु इ फ्रशो लोव्र नेंबमी इ कली मुने तोक्डे। मिनु इ नें गेना हना यो मरिम्शो लीब।<sup>11</sup> रिम्शो गारचा डा लोव्र पशोनु, चांदी के थालम वोइश्शो सुन के स्याउ खोदेशो बाक्ब। हितोपदेस १५:२३<sup>12</sup> जोक्ब तुइक्ब मुर आ हुइक्तीक लोव्र नेंब मुर कली सुन के औंठी नु गहना खोदेशो बाक्ब।<sup>13</sup> थमा लोव्र कयाक्ब मुर, आ होव्रप कली हुप्शो नाक्त अन्न रुप्ची ना डा फुं खोदेशो पा रिम्शो बाक्ब। मेको लोव्रम आ होव्रप आ थुं बारपाइक्ब।<sup>14</sup> सु मुरुमी मारेइ मगेथु, गेता, दे ठेयब लोव्र पाइबा, मेको मुर रेउ मयिपाइक्ब गोस्स नु फश खोदेशो बाक्ब।<sup>15</sup> फाल्तीकेमी हुकुम कली बिप्पाइक्ने चाप्नीम। ब्रोव्रशो लोव्रमी रुश जिक्ने चाप्ब। हितोपदेस १५:१<sup>16</sup> खुदो थित्तीवी हना, शुश मजावो, इ कली गाप्चा डा पा जावो। मारदे हना शुश जाप्तीवी हना, मेचा कुइक्ब।<sup>17</sup> इ नेक्था डा मुर आ खिं शुश मलावो। मारदे हना मेकोमी इ कली शुश जाक्शो तशा ब्रीब।<sup>18</sup> आंम नेक्था डा मुर कली जोल पा सांक्छी गेब मुर कोक्के तरवार नु

हेशो ब्रा खोदेशो बाक्ब। 19 श्येत जशो ना थमा मसुइक्वा डा मुर कली थमा सुइक्वा खाइशो खूइ नु मदुक्ब खोइल खोदेशो बाक्ब। 20 सुमी थुं खाइशो मुर आन डोंइती कुम्सो पाइबा, मेको ग्यूमी वा रोइशो नु गारमी हिकसी खेक्वो खोदेशो बाक्ब। मिनु वा खोइक्ब तुम्बु नु शी खोइक्ब बुस्स खोदेशो मेको सुर्ता पाइब मुर आ थुं बाक्ब। 21 इ जोरी सत्रु शोत्रलु बेक्तेक्म हना, मेको आन कली थुलो। तूतू दाक्तेक्म हना, मेको आन कली ब्वाक्कु तूचा गेवो। रोमी १२:२० 22 मो पाप्तीवी हना, मेको आन पिया तारी ब्रशो कोइला मोइशो खोदेशो दुम्ब। मिनु परमप्रभु यावेमी इ कली इनाम गेब। 23 उत्तर रे पा फशेमी रेउ यिपाइशो खोदेशो पा, खूइशो लोत्र फ्राइबमी मुर आन कुल राव किक्पाइक्ब। 24 गेना हना यो जिचा पोक्ब मीश नु बाक्वा क्येडा खिं आ तला तारी कुना कामी लशा सिक्सी पा बाक्वा रिम्शो दुम्ब। 25 तूतू दाक्ब मुर कली ब्रौवशो ब्वाक्कु खोदेशो पा डोन रागी रे जाक्वो रिम्शो लोत्र बाक्ब। हितोपदेस १५:२५ 26 ठीक पाइब मुर परमप्रभु यावे आ अरेशो मटीब नु गारत हना, मेको हिलोम बुक्वो ब्वाक्कु नु शुश ग्रोग्रा बाक्वो कुवा खोदेशो बाक्ब। 27 शुश खुदो जचा नु आंम कली ठेयब मिम्शा मान पाइक्वा पुंइसीचा, निम्फा मुर कली मरिम्शो बाक्ब। 28 सुमी आंम कली ठीक पा चलने मचाप्बा, मेको गारो ब्रेशो सहर खोदेशो बाक्ब। हितोपदेस २९:११

मुर आन दाते डा मरिम्शो गेय

26 हुप्शो महिनाम फुं नु अन्न रुप्ची ना रेउ यिशो खोदेशो पा मूर्ख आन कली मान पशो मगारचा डा बाक्ब। 2 फुर फुर पा बेरब भडगोरा नु हुरुर पा बेरब बेल्लुम खोदेशो पा मगारचा डा सराप शोर गाक्वो बाक्ब। 3 शारा कली सिरकाना, गधा कली करेली नु मूर्ख आ ची कली कोक्के माल्ब। हितोपदेस १९:२९ 4 मूर्ख कली मूर्ख खोदेशो पा लोत्र मलेत्तो। मो पाप्तीवी हना, गे यो मूर्ख दुम्बेवे। 5 मूर्ख कली आ मूर्ख खोदेशो पा लोत्र मपाप्तीवी हना, मेकोमी आंम कली निप्स पाइशो मिम्सीब। 6 सुम मूर्ख कली लोत्र चोत्रथ सोइक्वा, मेकोमी आंम खोइली खोइशो नु हुश खाक्वो पोक्वा श्येत जशो खोदेशो बाक्ब। 7 मूर्ख आन देंतीके लोत्र खोरन्डे मुर आ खोइल खोदेशो पा शोर गाक्वो बाक्ब। 8 मूर्ख कली मान पचा, फुल्लु कली श्येलेमी फ्रेंशा आप्वा माल्शो खोदेशो बाक्ब। 9 शांबु दुक्वो मुर आ गुइमी चू ओत्रशो खोदेशो पा मूर्ख कली देंतीक लोत्र बाक्ब। 10 मूर्ख मुर नु लां गाक्ब मुर आन कली गेय पपाइक्वा, हेंथे लिब्रा आप्वा गार सेल्ब मुर खोदेशो बाक्ब। 11 कुचुममी मेशा लेंशा जशो खोदेशो पा, मूर्ख मुरुमी मूर्ख गेय लेंशा पना पन बाक्ब। 2 पत्रुस २:२२ 12 आंम कली “जोक्ब तुइक्ब मुर नड” दे मिम्ब मुर क्येडा मूर्खन रिम्शो बाक्ब। हितोपदेस ३:७ 13 अल्से मुरुमी “लाडगामी गुप्स का बाक्ब। लां मेर गुप्स हिरशो बाक्ब” देंब। हितोपदेस २२:१३ 14 लाप्चो रोक्वो चोक्वो खोदेशो पा, अल्से मुर आ ब्राख्येमी एर ओंथ लोक्सीशा इक्ब। हितोपदेस ६:९-११ 15 अल्से मुरुमी आ गुइ खमेम खूम्ब। मिनु मेको गुइ आ शोत्र सम्म लाइक्वा यो अल्सी पाइब। हितोपदेस १९:२४ 16 शुश रुप्शा लोत्र लेक्ब ७ जना मुर क्येडा मूर्खमी आंम कली “रुक्ब जोक्ब नड” दे मिम्सीब। 17 सु मुर आन जितीक खेतीकेम ओत्रबा, मेको लांम गाक्वो कुचुम आ नोफा ग्याइशो कीशो खोदेशो बाक्ब। 18 दोपा निप्स ग्यशो मुरुमी ब्रशो लिब्रा हेंथे पा आप्वा, 19 मोपा आ नेक्वा डा मुर कली जोल पशा नोले “गो इ कली शाक्ता ला” देंब। 20 शी मबाक्त हना, मी काप्ब। मोदेशो पा नोफा मुइक्ब मुर मबाक्त हना, जिचा खेचा मबोक्ब। हितोपदेस २२:१० 21 दोपा मी मुइक्वा कली कोइला नु ब्रचा कली शी माल्बा, मोपा रीब पा गाइक्ब मुर जिचा पोक्ब बाक्ब। हितोपदेस १५:१८ 22 नोफा मुइक्ब आन लोत्र शुश ब्रौवशो जचा थोत्रक खोदेशो बाक्ब। मेको मुर आन थुं सम्म जाक्दीक्ब। हितोपदेस १८:८ 23 मरिम्शो थुं डा ब्रौवशो लोत्र खप के बोसुम चांदी खेक्वो खोदेशो बाक्ब। 24 जोरी सत्रुमी शोत्रमी रिम्शो लोत्र पाइनीम। तन्न आन थुंमी मरिम्शो मिम्नीम। मत्ती १२:४५ 25 इ जोरी सत्रुमी गे नु ब्रौवशो लोत्र पाप्तु हना यो, मेको कली थमा मसुतो। मारदे हना मेको आ थुंमी ७ ओटा ग्रोग्रा दिचा डा लोत्र खूइशो बाक्नीम। 26 सुमी काइ मदाक्वो मुर कली “गो इ कली दाक्नुड” देंखु पाइबा, मेको आ देंखु

पतीके मुर आन गुम्तीकेमी गूब। 27 सुमी मुर पिक्वा, दे खाल्टा दोइबा, मेको आंमान बिक्ब। सुमी मुर कली चिप्पाइक्वा, दे फुल्लु लोक्वा, मेको आंमा लोक्सीशा थिश्शा लाइब। भजन संग्रह ६:१६; उपदेसक १०:८ 28 जोल पाइबमी सु कली जोल पवा, मेको कली काइ मदाक्ब। मिलो शिलो लोत्र पाइब मुरुमी नेल्ल खतम सेल्ब।

आंम कली ठेयब मसेलो

27 “दीसा पाइनुड” दे ठेयब लेशो लोत्र मपावो। मारदे हना मेको नाक्त मार दुम्बा गे मतुइक्नेवे। याकूब ४:१३, १४ 2 अरु मुरुमी इ कली ठेयब सेल्मेक्ल। गे आंमा आंम कली ठेयब मसेलो। अरु आन शोत्र रे ठेयब देंमल, इ आंम शोत्रमी “गो ठेयब नड” मदेनो। 3 फुल्लु नु बाल्वा हेल्शो बाक्नीम। तन्न मूर्खमी गेशो श्येत मेको निम्फा आस क्येडा हेल्शो बाक्ब। 4 गाइक्वा मरिम्शो बाक्ब। चुरचा मेको क्येडा मरिम्शो बाक्ब। रुश पतीके कली सु फाल्ने चाप्बा डा? 5 खूइशो दाक्वा क्येडा नेल्लेमी तुइक्वा डा पा हुइक्वा रिम्शो बाक्ब। लेवी १९:१७ 6 वारचमी हुइशो रिम्शो पचा कली बाक्ब। तन्न मदाक्ब मुर आन पुक्पु पाइशो हिंचा डा बाक्ब। भजन संग्रह १४१:५; मत्ती २६:४९ 7 साप्पा रूशो कोत्रजमी खुदो यो मदाक्ब। तन्न शोत्रलु बेक्वो मुर कली मब्रौवशो जचा थोत्रक यो ब्रौवब। 8 खिं रे डोन लशो मुर ग्योत्र रे डोन बेरशो चिक्ब खोदेशो बाक्ब। 9 ब्रौवशो रिना पाइशो तेल नु धूपमी मुर आन थुं ग्येरशो सेल्ब। तन्न वारच आ अर्ती मेको क्येडा रिम्शो बाक्ब। 10 इ वारच कली नु इ आफ आ वारच कली मप्रोनो। श्येत जवी ना, इ लोक्ब आ खिं मलावो। मारदे हना डोन बाक्वो लोक्ब क्येडा नेक्वा बाक्ब मुर रिम्शो बाक्ब। हितोपदेस १८:२४ 11 आं तौ, जोक्ब तुइक्ब दुमो। मिनु गो ग्येरनुड। मोपा गो इ पर्वम लोत्र पा आं कली आइक्व सेल्ब आन कली लोत्र लेन्ने चाप्नुड। 12 निप्स पाइशो मुर श्येत जाक्वा चिक्वो तशा, खूइसीनीम। तन्न मारेइ मजोक्ब मुरुमी मारेइ मतुइक्थु श्येत जाइनीम। हितोपदेस २२:३ 13 अर्को रागी डा मुर आन पर्वम जमानी दुम्शो मुर, आ वा रोइशो लतीन। मुर आ पर्वम जमानी बाक्वो आ मारेइ मारेइ नेल्ले लतीन। हितोपदेस २०:१६ 14 सुमी सुनी कना बोक्वा, आ नेक्वा डा मुर कली ठेयब सेंदामी आसीक पाइबा। मेको आसीक ताइबमी “सराप पाइक्ती” देंब। 15 गेना हना यो जिचा पोक्ब मीश रेउ यिमेनु तप तप पा याप्ब ब्वाक्कु खोदेशो बाक्ब। हितोपदेस १९:२३ 16 मेको कली अरेचा फश गिवार कली नाइक्पाइक्वा खोदेशो नु ग्युरा गुइमी तेल गुप्चा खोदेशो बाक्ब। 17 फलाममी फलाम कली शेप्शो खोदेशो पा, मुर कामी अर्को कली शेप्ब। 18 सुमी फोत्रशी रवा खाल पाइबा, मेकोमी फल जचा ताइब। सुम आ होत्रप कली रिम्शो पा कोत्रबा, मेको मान पाइक्वा पुंइसीब। 19 दोपा ब्वाक्कुम कुल तांइसीबा, मोपा मुर आ थुं दोदेशो बाक्वा, मेको अर्कोम तुइक्वा। 20 बेक्वो मुर आन बाक्तीके नु जाम्शा लतीके गेनायो मरूशो खोदेशो पा, मुर आ मिक्च यो गेनायो मरूब। उपदेसक १:८ 21 चांदी यपाइक्वा कली गारचा डा ग्योब नु सुन यपाइक्वा कली यो गारचा डा ग्योब माल्शो खोदेशो पा, मुर आ पतीक अर्को मुर आन ठेयब सेल्तीक रे पा तुंइसीब। 22 मूर्ख कली अन्न नु चुम्लुम वोइशो तूलीमी चुशा हना यो, आ मूर्ख पचा गेनायो मगूब। 23 इ क्यारश भेडा दोदेशो तांइसीनीमी रिम्शो पा कोत्रडो। इ बी ब्यफ आन कली होस पा कोत्रडो। 24 मारदे हना शोप गेना हना यो मलीब। सिरपेच यो नेल्ल पाला कली मलीब। 25 घांस जाम्शा लाइब। मिनु नक कोच्चा दाप्ब। मिनु पहाड रे घांस खुप्नीमी, 26 पाठा आ ऊन इन कली वा फेक्वा दुम्ब। बोका लेयशा रू ग्याप्ने चाप्नीनी। 27 क्यारश आ दूध इ कली, इ खिं डा मुर आन कली नु इ गेय पाइब आन कली तूचा गाप्ब।

परमप्रभु कली टीब ग्येरशो बाक्ब

28 परमप्रभु यावे आ अरेशो मटीब सुइम खेदा मपथु यो प्रोक्नीम। ठीक पाइबपुकी गुप्स खोदेशो पा महिंथु बाक्नीम। यसैया ५७:२१ 2 रागी डा मुरपुकीमी मरिम्शो पाप्तेक्म हना, हुकुम पाइब शुश दुम्नीम। तन्न निप्स पाइशो हुकुम पाइब बाक्त हना, गेना हना यो रिम्शो बाक्ब। 3 हुकुम



पाइब मुरुमी पुडग आन कली दिप्तु हना, मेको बाली नाली बिग्रेब ठेयब रेउ खोदेशो बाक्ब। <sup>4</sup> परमप्रभु यावे आ अरेशो प्रोइबपुकीमी अरु अरेशो मटीब आन कली ठेयब सेल्नीम। तन्न परमप्रभु यावे आ अरेशो टीब मुरपुकीमी मरिश्शो पाइब आन कली तशा, मेको आन पर्वम सुर्ता पाइनीम। <sup>5</sup> मरिश्शो मुरपुकीमी निसाफ पतीके मार बाक्बा, दे मरुज्नीम। तन्न परमप्रभु यावे आ देशो पचा दाक्बपुकीमी नेल्ल रिश्शो पा रुज्नीम। <sup>6</sup> हेंथे गाक्ब, थुं निक्शी पाइश्शो नु शुश क्येट थीब मुर दुम्चा क्येडा रिश्शो थुं पाइश्शो ठीक लां गाक्ब पुडग मुर दुम्चा रिश्शो बाक्ब। *हितोपदेस १९:१* <sup>7</sup> सुमी परमप्रभु यावे आ अरेशो टीबा, मेको जोक्ब तुइक्ब तौ बाक्ब। सु चहिं शुश जाइब नु दुक्ब मुर आ वारच दुम्बा, मेकोमी आ आफ कली मुने तोक्ब। <sup>8</sup> सुम आ क्येट मुर कली शुश चाइक्ब ताक्चा कली गेबा, मेको आ क्येट पुडग आन कली शिशी पाइब मुर कली हेक्ब। <sup>9</sup> सुमी परमप्रभु यावे आ अरेशो लोव्र नेंशा मटीबा, मेको आ परमप्रभु कली पुंडतीक लोव्र यो ग्रांग दिशो बाक्ब। *हितोपदेस १५:८* <sup>10</sup> सुमी रिश्शो थुं पाइश्शो मुर कली मरिश्शो लां हेंथे गाक्पाइक्बा, मेको आंमा दोशो खाल्टामी बिक्ब। तन्न दोस मताइबपुकीमी रिश्शो ताइनीम। <sup>11</sup> शोप पाइश्शो मुरुमी आंम कली “गो जोक्ब तुइक्ब नड” दे मिम्ब। तन्न निप्स पाइश्शो पुडग मुरुमी मेको कली दोदेशो बाक्ब, दे रिश्शो पा तुइक्ब। <sup>12</sup> ठीक पाइबपुकी ग्रामानु, नेल्ल ग्येरसीनीम। तन्न परमप्रभु यावे आ अरेशो मटीबपुकी ठेयब दुम्तेक्म हना, मुरपुकी खूंइसीनीम। *हितोपदेस ११:११* <sup>13</sup> सुमी आंम पशो मरिश्शो पतीके खूंइक्बा, मेको सोशो बोशो मदुम्ब। तन्न सुमी आंम पशो मरिश्शो शोत्रबा नु प्रोइबा, मेको शिशी ताइब। *भजन संग्रह ३२:३-५; १यूहन्ना १:८-९* <sup>14</sup> परमप्रभु यावे कली मान पा हिंभ मुर गेना हना यो ग्येरशा बाक्चा ताइब। तन्न मरिश्शो थुं पाइश्शो मुर श्येत जाइनीम। <sup>15</sup> परमप्रभु यावे आ अरेशो मटीबमी पुडग आन कली सासन पाप्तु हना, मेको ग्रीब गुप्स नु प्रेक्शा ग्राम्ब वां खोदेशो बाक्ब। <sup>16</sup> मरुप्ब हुकुम पाइब मरिश्शो दिप्ब मुर बाक्ब। तन्न जोल पा चेम्शो क्येट काइ मदाक्ब मुर शुश नाक्ती ब्रोंइब। <sup>17</sup> सुमी मुर साइक्बा, मेको मबेक्म सम्म प्रोक्शा गाक्चा माल्ब। सुइमी यो मेको कली वारच मपामेक्त्। *उत्पत्ती ४:१४* <sup>18</sup> सु गेना हना यो रिश्शो पाइब बाक्बा, मेको रिश्शो बाक्ब। तन्न सु लां निक्शी हेंथे पा गाक्बा, मेको कालेम जाम्शा लाइब। <sup>19</sup> सुमी आंम रूमो गेय पाइबा, मेको मुर आ खिमी शुश अन्न बाक्ब। शुश लोव्र पा बाक्ब मुर चहिं पुडग दुम्बा लाइनीम। <sup>20</sup> थमा सुइक्ब मुर शुश आसीक ताइनीम। तन्न सुम रीब पा क्येट चेम्चा दाक्बा, मेको सजाइ मतथु, मब्रोंइब। *हितोपदेस १३:११* <sup>21</sup> कुल कोव्रमुचा मरिश्शो बाक्ब। तन्न मुरुमी आइक्च शोब्ले तचा कली मरिश्शो पाइनीमी कों। *हितोपदेस १८:५; ब्यक्स्था १:१७* <sup>22</sup> कुंडुद मुर रीब पा क्येट थीब दुम्चा दाक्ब। मिनु “नोले थमा पा पुडग दुम्नुड” दे मेकोमी ममिम्ब। *हितोपदेस २३:४; १तिमोथी ६:९* <sup>23</sup> मिलो शिलो पाइब मुर आन क्येडा मुर कली हुइक्ब नोले मान पाइक्चा पुंडसीब। <sup>24</sup> सुमी आ आम आफ आस मार मार रोइश्शा “आं शोप बाक्ब” देंबा, मेको खतम पोक्ब आ वारच बाक्ब। *मत्ती १५:५* <sup>25</sup> शिंम मुरुमी जिचा पोक्ब। तन्न सुमी परमप्रभु यावे कली थमा सुइक्बा मेको आसीक ताइब। <sup>26</sup> सुमी आंम निप्स कली थमा सुइक्बा, मेको मूर्ख बाक्ब। तन्न सु तुइक्तीक थुं डा लां गाक्बा, मेको ब्रोंइचा ताइब। *हितोपदेस ३:५-६* <sup>27</sup> सुमी पुडग कली गेबा, मेको आंमा यो श्येत मजाइब। तन्न सुमी पुडग आन पर्वम शिशी मपाइबा, मेको शुश सराप ताइब। <sup>28</sup> परमप्रभु यावे आ अरेशो मटीबपुकी ठेयब मुर दुम्तेक्म हना, मुरपुकी खूंइसीनीम। मिनु मेको बेक्तेक्म हना, ठीक पाइब मुर सोशा बोशा शुश दुम्नीम।

तुप्शो नु हुइश्शोम वारच पाइनीस

**29** शुश हुइक्चा पुंडसीशा यो, काइ मटीब दुम्तेक्म हना, मेको आन मतुइक्थु वारच पाइक्चा मपुंडसीथु, खतम दुम्नीम। *हितोपदेस १५:१०* <sup>2</sup> ठीक पाइबपुकी सासन पाइब दुम्तेक्म हना, मुर नेल्ल ग्येरसीनीम। तन्न परमप्रभु यावे आ अरेशो मटीब मुरुमी सासन पाप्तु हना, मुर श्येत जाइनीम। *हितोपदेस ११:१०* <sup>3</sup> सुमी तुइक्तीक थुं दाक्बा, मेकोमी आ आफ कली ग्येरपाइक्ब। तन्न तेल्लेम नु गाक्ब मुरुम आ शोप नेल्ल खेरब। *लूका*

*१५:१३, ३०* <sup>4</sup> पिप आ ठीक पतीकेमी आ रागी लीब। तन्न मेकोमी शुश तिरो पोक्त्तु हना, आ रागी खतम सेल्ब। <sup>5</sup> सुमी आ नेक्था डा मुर कली क्युक्शा लोव्र पाइबा, मेकोमी मेको कली ग्याइल दाइश्शो बाक्ब। <sup>6</sup> मरिश्शो पाइब मुर आ मरिश्शो पतीकेमी श्येत जाइब। ठीक पाइब मुर चहिं शुश ग्येरसीशा कुम्सो पाइनीम। <sup>7</sup> ठीक पाइब मुरुम पुडग आन कली दोपा ठीक पचा, दे तुइक्नीम। तन्न परमप्रभु यावे आ अरेशो मटीबपुकीमी मारेइ मरुज्नीम। <sup>8</sup> शुक्शी पाइब मुरपुकीमी सहर खल्लब सेल्नीम। तन्न जोक्ब तुइक्ब मुरपुकीमी जिचा खेचा तेक्नीम। <sup>9</sup> जोक्ब तुइक्ब मुर मूर्ख नु निसाफ पतीकेमी लत हना, मेको मूर्खमी जिचा पोक्शा, रिश्शा मगारब। <sup>10</sup> हुश खाक्श पोक्ब मुरुमी दोस मताइब मुर आन कली काइ मदाक्ब। मेकोमी रिश्शो थुं पाइश्शो मुर कली साइक्चा माल्ब। <sup>11</sup> मूर्ख मुरुमी आ गाइक्चा नेल्ल कोंइब। जोक्ब तुइक्ब मुरुम चहिं आ गाइश्शो तेक्शा, मकोइब। *हितोपदेस १२:२३; हितोपदेस २५:२८* <sup>12</sup> सासन पाइबमी जोल लोव्र नेंतु हना, मेको आ गेय पाइब नेल्ल परमप्रभु यावे आ अरेशो मटीब दुम्नीम। <sup>13</sup> पुडग नु मेको आन कली दिप्ब आन के थोव्रक का गारशो बाक्ब। मेको मार बाक्ब देशा हना, परमप्रभु यावेमी मेको निम्फा आस कली मिक्च ताइब सेल्शो बाक्त्। *हितोपदेस २२:२; अय्युब ३३:३०; भजन संग्रह १३:४* <sup>14</sup> पुडग आन कली ठीक पा निसाफ पाइब पिप आ सासन गेना हना यो लीब। *हितोपदेस १६:१२* <sup>15</sup> वोंइश आल आन कली तुप्शा, हुइश्शोनु, जोक्ब तुइक्ब दुम्नीम। मारेइ मर्शेशो वोंइश आलम चहिं आ आम कली मुने तोक्ब। *हितोपदेस २२:१५; १राजा १:६* <sup>16</sup> परमप्रभु यावे आ अरेशो मटीब मुरपुकी शुश दुम्तेक्म हना, मरिश्शो पतीक बारशा लाइब। तन्न ठीक पाइबपुकीम मेको आन खतम दुम्शो ताइनीम। *भजन संग्रह ३७:३५-३६* <sup>17</sup> इ तौ कली रिश्शो पा शेंदो। मिनु मेकोमी इ थुं नाइक्पाइश्शा इ कली ग्येरपाइक्ब। *हितोपदेस २३:१३* <sup>18</sup> परमप्रभु यावे आ लोव्र पाइब मुर मबाक्तेक्म हना, मुर नेल्ल हेंथे पाइब दुम्नीम। तन्न मेकोपुकीम आन परमप्रभु यावे आ अरेशो टिम्तेक्म हना, ग्येरसीशो मुर दुम्नीम। <sup>19</sup> इ गेय पाइब कली लोव्रम ला शेंने मचाप्नेवे। मारेदे हना मेकोमी इ लोव्र रुप्तु हना यो मटीब। <sup>20</sup> ममिम्थु लोव्र पाइब क्येडा मूर्खन रिश्शो बाक्ब। *उपदेसक १:२; याकूब १:१९* <sup>21</sup> इ वाइल कली आल रे नम पाइश्शा थुल्लतीवी हना, नोले मरिश्शो दुम्ब। <sup>22</sup> चुरब मुरुमी राम्शी पोक्ब। गाइश्शा बाक्ब मुरुमी शुश मरिश्शो पपाइक्ब। *हितोपदेस १५:१८; हितोपदेस २२:२४* <sup>23</sup> मुर आन ठेयब लेश्शोमी मेको कली आइक्च सेल्ब। ब्रेम्शो थुं पाइश्शो मुर चहिं मान ताइब। <sup>24</sup> खुइ नु वारचु दुम्ब मुरुमी आंम आ कली मदाक्ब। खुइ पचा पुंडसीब मुर आ सराप नेंबमी यो मारेइ मर्देब। *लेवी ५:३* <sup>25</sup> मुर क्येडा हिंचा ब्वारद खोदेशो बाक्ब। तन्न परमप्रभु यावे कली थमा सुइक्चा ब्रोंइतीक बाक्ब। *मत्ती १०:२८* <sup>26</sup> शुश मुरुमी सासन पाइब नु गुम्चा दाक्नीम। तन्न परमप्रभु यावे रे मुरपुकीम ठीक निसाफ ताइनीम। <sup>27</sup> ठीक पाइबपुकीमी मरिश्शो पाइब तशा ग्रांग दीनीम। तन्न परमप्रभु यावे आ अरेशो मटीबपुकीमी ठीक पाइब आन कली तशा ग्रांग दीनीम।

आगुर आ लोव्र

**30** एको मास्सा डा याकेह आ तौ आगुर आ देशो लोव्र बाक्ब। मेकोमी इथीएल नु उकल कली एको लोव्र पाप्तु। मेकोमी “गो परमप्रभु कली माल्ना माल्न बाक्ती, तन्न मथिदु। *उत्पत्ती २५:१२-१४* <sup>2</sup> थमा पा गो मुर आन दातेमी निप्स मपाइश्शो मुर दुम्ती। गो नु मुर आन के खोदेशो रुपतीक मबाक्ब। <sup>3</sup> गो जोक्ब तुइक्ब दुम्चा मर्शेसीड। मिनु का ला बाक्शो परमप्रभु यावे कली मतुइक्नुड। <sup>4</sup> सु स्वर्ग लशा, लेश्शा यिशो बाक्बा डा? सुम फश कली आ गुइमी ग्याइक्ने चाप्बा डा? सुम समुन्द्र डा ब्वाक्कु कुम्तो पने चाप्बा डा? सुम रागी आ सुर सेला? मेको आ नें मार बाक्बा? मेको आ तौ आ नें मार बाक्बा? गे तुइक्नेवे हना” देनो। *अय्युब ३८:२८-३४* <sup>5</sup> परमप्रभु आ लोव्र नेल्ल थमा बाक्ब। सु मेकेर लशा खूंइसीबा, मेको कली श्येत रे तेक्ब। *भजन संग्रह १२:७* <sup>6</sup> मेको आ लोव्रमी मारेइ यो मतेम्दो। तेम्ताक्वी हना, इ कली हुइश्शा, गे जोल पाइब मुर देंचा पुंडसीनेवे। *ब्यक्स्था ४:२* <sup>7</sup> मिनु “गो इन कली थोव्रक निक्शी पुंडनुड। आं बेक्चा क्येडा डोंइती



मेको आं कली गेयीनी।<sup>8</sup> हेंथे पतीके नु जोल पतीक आं क्येडा डोन वोतीन। आं कली पुडग मसेल्यीनी नु शुश क्येट थीब यो मसेल्यीनी। आं कली माल्वा डा जचा थोवक गेयीनी। *तिमोथी ६:६-८*<sup>9</sup> मारदे हना गो नु मारेड मारेड बाक्त हना, गो इन कली प्रेनुड। मिनु 'परमप्रभु यावे सु बाक्बा?' देंनुडा कों? मिनु गो पुडग दुम्ती हना, खुइ पा आं परमप्रभु आ नें आइक्च सेल्शा मुने तोक्नुडा कों?" देंती। *प्रस्थान ५:२*

<sup>10</sup> गेय पाइब आ पर्वम आ होवप नु मरिश्शो लोव्र मपावो। मो पाप्तीवी हना, मेकोमी इ कली सराप पाइब। मिनु गे श्येत जाइनेवे। <sup>11</sup> का निक्शी मुरुमी आन आफ कली सराप पाइनीम। मिनु आन आम कली आसीक मगेनीम। <sup>12</sup> का निक्शी मुरुमी आंम कली "गो गेना हना यो रिश्शो पाइब मुर नड" देंनीम। तन्न मेको आन मरिश्शो पशो मक्याम्सीशो बाक्ब। *हितोपदेस २०:९* <sup>13</sup> का निक्शी मुर ठेयब लेशो बाक्नीम। मेको शुश बोरशो बाक्नीम। <sup>14</sup> का निक्शी मुर आन खुइ तरवार नु छूरी खोदेंशो बाक्ब। मेकोपुकीमी पुडग आन कली नाक्शा, श्येत जाइब आन कली ब्वाइनीम।

<sup>15</sup> मिनु याफे आ तमी निक्शी बाक्नीस। मेको निक्शीमी "गेयी, गेयी" देंनीस। मिनु अरु थोवक सां बाक्नीम। मेकोपुकी गेनायो मरूनीम। अकों ४ ओटा थोवक बाक्नीम। मेकोमी गेनायो "मोक्ल" मर्देनीम। <sup>16</sup> बेक्शो मुर आन बाक्तीके, आल मथीब कोव्रज, ब्वाक्कु मतशो सोव्रशो रू नु मी, एको ४ ओटा थोवकमी गेनायो "गाप्ती" मर्देनीम।

<sup>17</sup> आफ कली शुक्शी पाइब नु आम कली मटीब मुर आन मिक्च खदीमी कोक्शा गुंडनीम। मिनु गिदपुकीमी ब्वाइनीम। *हितोपदेस २०:२०* <sup>18</sup> थोवक सां बाक्नीम। मेको तशा गो छक लाक्ती। ४ ओटा थोवक कली यो रुजे मचबु। <sup>19</sup> मेको मार बाक्तेक्म देंशा हना, ककाकुली आ सरीडम बेरतीके, रोंग मेर बुस्स आन गाक्तीके, ठेयब समुन्द्रमी जहाज आन गाक्तीके नु वोंइश मुर नु मीश आल आस लां मेको रुजे मचबु। <sup>20</sup> हेंथे गाक्ब मीश मुरुमी जाइब। मिनु आ शोव्र शोप्शा "गो मारेड मरिश्शो मपड" देंब।

<sup>21</sup> मिनु थोवक सांमी रागी कली खिंखि पपाइक्नीम। ४ ओटा थोवक मेको फाल्ने मचाप्पा डा बाक्नीम। *उपदेसक १०:६-७* <sup>22</sup> मेको ४ ओटा थोवक मार बाक्तेक्म देंशा हना, वाइल पिप दुश्शो, मूर्ख जशा ब्वशा रूशो, <sup>23</sup> मरिश्शो मीश आल कली ग्युबे पशो नु वाइलीम आ होव्रपोक्म आ पा डा मेको खिं डा होव्रपोक्म दुश्शो, एको ४ ओटा फाल्ने मचाप्पा डा थोवक बाक्नीम। *ब्यवस्था २४:१-४* <sup>24</sup> रागीम ४ ओटा आइक्च थोवक बाक्नीम। तन्न मेकोपुकी थम जोक्ब तुइक्ब बाक्नीम। <sup>25</sup> रकमिक्च शुश बोल मपाइश्शो बाक्तेक्म हना यो, आन जचा थोवक खुप्ची ना खुप्शा तेल्लीम। *हितोपदेस ६:६-८* <sup>26</sup> ब्विल्ली खोदेंशो जन्तु शुश बोल मपाइश्शो बाक्नीम। मो हना यो मेकोमी आन खिं रोंगुम सेल्नीम। <sup>27</sup> मिनु माले आन के पिप मबाक्ब। मोदेंशो बाक्तेक्म हना यो, मेकोपुकी लडाइ पाइब खोदेंशो पा तांती खिक्शा गाक्नीम। <sup>28</sup> खोते आन कली गुडम ग्याइक्ने चाम्सीब हना यो, मेकोपुकी पिप आ दरवारमी बाक्नीम। <sup>29</sup> मिनु थोवक सां बाक्नीम। मेको ठेयब मुर खोदेंशो पा गाक्नीम। मिनु ४ ओटा थोवक बाक्नीम। मेको ठेयब लेशा हिरनीम। <sup>30</sup> मेको मार बाक्नीम देंशा हना, गुप्स, जन्तु नेल्ल आन दातेमी नेल्ल क्येडा बोल्यो बाक्ब। मेको सुइ क्येडा महिंब। <sup>31</sup> ठेयब लेशा गाक्ब भाले, बोका नु आ सेना आन डोंइती गाक्ब पिप बाक्नीम। <sup>32</sup> गे मूर्ख दुश्शा, आंम कली ठेयब सेल्लतीवी हना, गे मरिश्शो पचा मिश्शो बाक्ते हना, इ कुल सुम्सो। <sup>33</sup> मिनु दूध ख्वाक्शोनु नौनी घ्यू गूब। नें तुप्शोनु, हुश यीब। मोपान गाइक्चा बोक्त हना, राम्शी बोक्ब।

लेमुएल आ देंशो लोव्र

**31** पिप लेमुएल आ लोव्र। मिनु पिप आ ममामी एको लोव्र पिप कली शेंशो बाक्त। *हितोपदेस ३०:१*<sup>2</sup> मेकोमी "आं तौ, गो इ कली मार देंनुडा डा? गो इ पर्वम परमप्रभु यावे कली पुंडता।<sup>3</sup> इ बोल मीश मुर आन कली मगेवो। मेको हेंथे गाक्बपुकीमी पिप आन कली खतम सेल्नीम। *ब्यवस्था १७:१७; १राजा ११:१,४*<sup>4</sup> लेमुएल, पिप कली अडगुर शांबु तूचा मशिरब। मिनु सासन पाइबमी रकसी काइ तूचा मदुम्ब। *हितोपदेस २०:१*<sup>5</sup> ठेयब मुरपुकी तूशा दुक्तेक्म हना, अरेशो लोव्र प्रेनीम। मिनु श्येत जाइब आन कली निसाफ पतीकेमी दूली पाइनीम। मेको काइ मदुम्ब। <sup>6</sup> खतम दुम्चा चिक्शो मुर आन कली रकसी तूचा गेवो। मिनु अडगुर शांबु थुं लुक्च लशो आन कली गेवो। <sup>7</sup> मोपा तूशा, मेकोपुकीमी आन पुडग दुम्तीके प्रेनीम। मिनु आन श्येत ममिन्नीम। <sup>8</sup> ब्वाक्ने मचाप्प नु मग्येरसीशो नेल्ल आन पर्वम ठीक निसाफ पावो। *अय्युब २४:१२*<sup>9</sup> श्येत जशो नु पुडग आन कली ठीक निसाफ पशा वारच पावो" देंमाक्त।

रिश्शो गेय पाइब मीश मुर

<sup>10</sup> रिश्शो गेय पाइब मीश आल सुम थिन्ने चाप्पा डा? मेको हीरा मोती क्येडा शुश क्येट लाइब बाक्ब। *हितोपदेस १८:२२*<sup>11</sup> मेको आ वोंइशेमी मेको कली रिश्शो पा थमा सुइक्ने चाप्प। मिनु आस माल्शो मारेड मारेड गाप्ब। <sup>12</sup> मेको ब्रोंडम सम्म आ वोंइश कली रिश्शो पाइब। मरिश्शो गेनायो मपाइब। <sup>13</sup> मेकोमी ऊन नु रुवा खुप्शा, पांइशा शुश गेय पाइब। <sup>14</sup> शुश लेयतीक मारेड मारेडमी ब्रीशो जहाज खोदेंशो पा मेकोमी खिंमी जचा थोवक चाक्ब। <sup>15</sup> मेको सुनी कना बोक्शा मार मार जचा तूचा क्येपाइक्ब। आ वाइलीम आन कली मार गेय पचा माल्बा, नेल्ल अरेब। <sup>16</sup> शुश मिश्शा नोले मेकोमी रू का ग्याप्ब। मिनु मेकेर आंमा चेम्शो क्येटीमी अडगुर ख्बुम्ब। <sup>17</sup> मेको आ रिश्शो गेय पतीके आ गुइ बोल्यो बाक्नीम। <sup>18</sup> मेकोमी आ लेयतीक थोवक रिश्शो पा लेयसीशो ताइब। नाक्दो आ बत्ती मकाप्ब। <sup>19</sup> मेकोमी प्यूरी लाइश्शा, पांइतो पांइब। आ वा आंमा प्रोव्रब। <sup>20</sup> मेकोमी पुडग आन कली वारच पाइब। मिनु श्येत जाइब आन कली आन माल्शो गेब। <sup>21</sup> मेको ग्यू पची ना महिंब। मारदे हना आ मुर नेल्लेमी होशो वा फेक्शो बाक्नीमी। <sup>22</sup> मेकोमी आ ब्रतीक रिश्शो पा सेल्ब। मेको आ फेक्तीक प्याजी रड डा रिश्शो पा किरशो सुती वा के बाक्नीम। <sup>23</sup> मेको आ वोंइश ठेयब मुर दुश्शा, सहर डा ठेयब लाप्चोमी बाक्मेनु, रागी डा खाल्पा आन दातेमी बाक्ब। <sup>24</sup> मेकोमी सुती के फेक्तीक वा सेल्शा लेयब। किप्शुर यो ग्याप्ब लेयब आन कली लेयब। <sup>25</sup> मेको नु सक्ति नु मान ततीके बाक्ब। मेकोमी दीसा मार दुम्बा, दे रिश्शा सुर्ता मपाइब। <sup>26</sup> मेकोमी लोव्र पवानु, जोक्ब तुइक्ब लोव्र ला पाइब। मिनु मुर आन कली शिशी पचा कली शेंब। <sup>27</sup> मेकोमी आ खिं डा मुर आन कली रिश्शो पा कोव्रब। गेय मपथु, हेंथे पा मजाइब। <sup>28</sup> मेको आ आलपुकीमी "आंइ आम ग्येरसीशो बाक्ब" देंनीम। आ वोंइशेमी यो मेको कली मान पाइब। <sup>29</sup> मेकोमी "शुश मीश मुरपुकीमी रिश्शो पाइनीम। मेको आन क्येडा गे रिश्शो पाइब बाक्नेवे" देंब। <sup>30</sup> मुर आन दारस जोल बाक्ब। मेको दारस जाम्शा लाइब। तन्न परमप्रभु यावे कली मान पा हिंब मीश मुर मान पाइक्चा पुंडसीब। *हितोपदेस ११:२२*  
<sup>31</sup> मेको मीश मुर कली आ गेय पा चेम्शो गेवो। सहर डा ठेयब लाप्चोमी मुर नेल्लेमी मेको कली मान पामेक्ल।

## उपदेसक

सोलोमनम ब्रेक्शो बाक्ब देंसीब।

सोलोमनमी एको किताब ९३० बि. सी. क्येडा डोंइती, आ सासन पशो थुम्ची ना ब्रेक्शो बाक्ब, दे मिम्नीम।

मारेइ मारेइ जाम्शा लाइब। मुर ब्रोंइशो सम्म परमप्रभु आ गेशोम ग्येरशा बाक्वा माल्ब। थमा पा जोक्तीक तुइक्तीक थुं परमप्रभु कली मान पा हिंशा आ देंशो टिशा पचा माल्ब।

नेल्ल जाम्शा लाइब बाक्नीम

1 एको दाऊद आ तौ, यरूसलेम डा पिप आ शेंशो लोव्र बाक्ब।  
2 मेको शेंबमी “जाम्शा लाइनीम, मारेइ मारेइ जाम्शा लाइब बाक्नीम। जाम्शा लाइनीम, नेल्ल जाम्शा लाइब बाक्नीम। 3 मुरुम रागीम श्येत पा गेय पा, मार ताइनीमी डा? नांम दुष्ठा श्येत पा गेय पा, मार दुम्बा डा? उपदेसक २:२३ 4 पाला का लाइब। मिनु अर्को पाला जाक्ब। तन्न रागी गेना हना यो लीब। भजन संग्रह ९०:३ 5 नां दाप्ब। मिनु नां पेरब। मेको लेंशा आ दाप्तीकेम रीब पा जाक्ब। 6 फश दक्खिन गे पाइब। मिनु उत्तर गे लाइब। मेको गेना हना यो आ हिरतीकेम हिरशा लेप्ब। 7 खोला नेल्ल शाइश्शा समुन्द्रम लाइनीम। तन्न समुन्द्र गेनायो मन्नीब। खोला ते गे शाइक्नीमी, मेक गेन शाइस डा शाइस बाक्नीम। 8 तेकोइ आइदी रे आइक्था सम्म रिम्शो मबाक्नीम। सुइमी देंशा देंने मचाप्नीम। कोव्रशा मिक्च गेनायो मरूब। नेंशा नोफा गेनायो मदाइब। भजन संग्रह ९०:१०; हितोपदेस २७:२० 9 मार मार दुम्शो बाक्मे, मेको लेंशा दुम्ब। मार पशो बाक्मे, मेको लेंशा पांइसीब। रागीम मारेइ नक मबाक्नीम” देंत। 10 मारेइ आ पर्वम सुइमी “कोव्रडीन, एको नक बाक्ब” देंने चाप्नीमी? मेको दा डोंइती रेन मेकेर बाक्त्त। मेको साइ डोंइती रेन बाक्त्त। 11 साइ डोंइती डा मुर आन कली सुइम ममिम्नीम। मिनु मुल जाक्ब मुर कली नोले डा मुरुम यो ममिम्नीम।

जोक्तीक तुइक्तीक जाम्शा लाइब

12 गो, एको लोव्र शेंबमी यरूसलेममी इस्त्राएल डा पिप दुष्ठा सासन पाता। 13 गो आं जोक्तीक तुइक्तीकेम रागीमी मार मार पांइसीबा, मेको नेल्ल तुइक्वा दाक्ताकड। परमप्रभुमी मुर आन कली मोदेंशो तुइक्वा माल्तीक थुं गेशा, श्येत गेप्तु। 14 गो रागीमी पशो गेय नेल्ल ताता। मेको नेल्ल जाम्शा लाइब बाक्नीम। मेको फश कली खेदा पशो खोदेंशो बाक्ब। 15 मार रोम्सीशो बाक्बा, मेको कली दिंपाइक्ने मचाप्सीब। मबाक्शो थोव्रक हिक्ने मचाप्सीब। उपदेसक ७:१३

16 गो आं थुमी “कोव्रडीन, गो आं क्येडा डोंइती यरूसलेममी सासन पाइब नेल्ल आन क्येडा शुश जोक्ब तुइक्ब थुं पाइश्शो मुर दुम्ती। गो मारेइ मारेइ तशा तुइक्ताकड। 17 गो जोक्तीक तुइक्तीक रुप्चा, बौला दुम्तीक नु मूर्ख दुम्तीक तुइक्वा थुं पाता। तन्न मेको दा फश कली खेदा पशो खोदेंशो ला बाक्त्त, दे तुइक्ताकड। उपदेसक २:१२; उपदेसक ७:२५ 18 मारदे हना शुश जोक्तीक तुइक्तीकेम शुश श्येत जपाइक्ब। गे दोशो जोक्ब तुइक्ब दुम्नीनी, मोशो श्येत जाइनीनी” दे तुइक्ताकड।

नेल्ल जाम्शा लाइब बाक्ब

2 मिनु गो आंम कली “मुल गो ग्येरसीनुड। मिनु ग्येरसीशो थुं कली कोव्रशा दाक्नुड। तन्न मेको यो जाम्शा लाइब ला बाक्त्त, दे तुइक्ताकड। 2 रिस्सीचा यो मूर्ख गेय बाक्ब। मिनु ग्येरसीशा बाक्शोनु, मार रिम्शो दुम्बा डा? 3 गो आंम कली ग्येरपाइक्वा कली इक्का अडगुर शांबु तूता। मो पडानु आं थुंम बाक्शो जोक्तीक तुइक्तीक मला। मूर्ख आ गेय

रुप्चा कली मोदेंशो पाता। मिनु गो मुर आन कली इक्का नाक्त्त रागीम ब्रोंइचा कली रिम्शो गेय मार बाक्बा, दे रुप्चा माल्ता। हितोपदेस ३१:४ 4 गो ठेयब गेय पाता। गो आंम कली खिंपुकी सेल्शा, अडगुर रू यो सेल्लामी। 5 गो फल फुल रूपुकी नु बाक्तीकपुकी यो सेल्शा मेकेर नेल्ल खाल डा फल फुल रवापुकी खुम्तामी। 6 रिम्शो पा बारना बारन लशो रवा आन कली ब्वाक्कु लुक्वा कली ठेयब दोम्ली सेल्लामी। 7 गो वाइलीम वाइलपुकी ग्याप्तामी। आं खिंमी जरमेशो वाइलीम वाइल यो बाक्तेक्म। गो शुश बी ब्यफ नु क्यारश भेडा थुल्लामी। गो आं क्येडा डोंइती यरूसलेमम बाक्ब सुइ आन के आं के खोइ बी ब्यफ नु क्यारश भेडा मबाक्म। 8 गो आं कली सुन चांदी नु रागी रागी डा पिप रे शुश शोंप तेल्लामी। गो कुम्सो पाइब मीश मुर नु वोंइश मुर वोइक्ताक्मी। आंम कली ग्येरपाइक्वा कली शुश मीश चाक्तामी।

9 यरूसलेममी आं क्येडा डोंइती डा मुर नेल्ल आन क्येडा गो ठेयब दुम्ती। आं जोक्तीक तुइक्तीके गो नुन लीत। १२ राजा १०:२३ 10 गो मार कोव्रचा दाक्डा, मेकोन कोव्रता। आं दाक्शो नेल्ल पाता। मोपा आं पशो गेय नेल्लेमी आं थुं कली ग्येरपाइक्त्तु। मेको आ श्येत पा पशो गेय रे ताता। 11 मो हना यो मेको आं पशो गेय नेल्ले नु आं मार मार तचा कली श्येत पा पशो गेय नेल्ल कोव्रडुनु, मेको नेल्ल जाम्शा लाइब बाक्तेक्म। मेको नेल्ल फश कली खेदा पशो खोदेंशो शोर गाक्शो गेय ला बाक्तेक्म।

तुइक्तीक नु मूर्ख जाम्शा लाइब

12 मिनु गो जोक्तीक तुइक्तीक, निप्स ग्यशो दुम्तीक नु मूर्ख दुम्तीके रुप्चा थुं पाता। पिपम डोंइती थुम्शो गेय आ क्येडा नोले जाक्बम मार पने चाप्बा डा? डोंइती नेल्ल पशो बाक्त्त। 13 मिनु गो मार ताता देंशा हना, दोपा छिडछिड क्येडा छेडछेड रिम्शो बाक्बा, मोपान मूर्ख दुम्बा क्येडा जोक्तीक तुइक्तीक रिम्शो बाक्ब। 14 रुब्ब मुर मारेइ मारेइ ताइनीम। तन्न मूर्ख चहिं छिडछिडमी गाक्नीम। तन्न नोले मेको नेल्ल खाल का पा लाइनीम। 15 मिनु मूर्ख कली दुम्तीक आं कली यो दुम्ब। गो मारदे जोक्ब तुइक्ब दुम्डा? मिनु गो आंम कली ‘मेको यो जाम्शा लाइब बाक्ब’ ” देंती। 16 मारदे हना जोक्ब तुइक्ब नु मूर्ख निम्फा आस कली नोले सुइम ममिम्नीम। मेको निम्फा आस कली प्रेंसीब। जोक्ब तुइक्ब दोदेंशो पा बेक्बा, मूर्ख यो मोदेंशो पा बेक्ब। भजन संग्रह ४९:११ 17 मोपतीके गो ब्रोंइचा मदाक्त्तु। मारदे हना रागीमी पशो गेय नेल्ल श्येत ला बाक्त्त। मेको नेल्ल जाम्शा लाइब बाक्तेक्म। मेको फश कली खेदा पशो खोदेंशो ला बाक्त्त।

गेय पशो नेल्ल जाम्शा लाइब

18 रागीमी आं श्येत पशो गेय नेल्ल आन कली गो काइ मदाक्त्तु। मारदे हना मेको गो आं नोले जाक्ब आन कली प्रोंइचा माल्नुड। उपदेसक २:२१; भजन संग्रह ३९:७ 19 मिनु मेको आ नोले जाक्ब जोक्ब तुइक्ब बाक्म कों मूर्ख बाक्म, दोपा तुइक्बा? मो हना यो आ श्येत पा पशो गेय नेल्ले मेको केन दुम्ब। मेको यो जाम्शा लाइब बाक्त्त। 20 मिनु आं श्येत पा मिम्शा पशो गेय नेल्लेम आं थुं लुक्च लत। 21 मारदे हना सुइमी जोक्ब तुइक्ब दुष्ठा शुश गेय पाप्तु हना यो, मेको आ पशो नेल्ल अरु मुर आन कली प्रोंइशा वोइक्वा

माल्ब। मेको ताइब मुरुमी मेको आ पर्वम मारेइ श्येत मपशो बाक्ब। एको यो जाम्शा लाइब नु थम मरिश्शो बाक्ब। 22 मुरुमी रागीम बाक्शा शुश श्येत गेय पा, मार ताइनीमी डा? 23 मेको नाक्त किंत किंत श्येत जाइनीम। मिनु नाक्दो यो आन थुं नाइक्का मताइनीम। मेको यो जाम्शा लाइब बाक्ब।

24 मुरुमी जचा, तूचा नु आंम गेयमी ग्येरशा बाक्का क्येडा लाक्शा अरु मारेइ रिश्शो मबाक्ब। मेको यो परमप्रभु रे जाक्शो तशो बाक्नुड। उपदेसक ३:१२,२२; उपदेसक ५:१७; उपदेसक ८:१५; उपदेसक ९:७ 25 मारदे हना परमप्रभु रे मजाक्त हना, सुम जचा नु रिश्शो पा बाक्का ताइबा डा?

26 परमप्रभुमी आ दाक्शो मुर कली जोक्तीक तुइक्तीके नु रुष्णा ग्येरतीक थुं गेब। तन्न मरिश्शो पाइब आन कली खुप्तीक नु तेल्तीक गेय पपाइक्ब। मिनु नोले मेको नेल्ल आ दाक्शो मुर आन कली गेब। मेको यो जाम्शा लाइब नु फश कली खेदा पशो खोदेंशो ला बाक्ब। *हितोपदेस १३:२२; हितोपदेस २८:८*

मारदे मारेइ आन पतीक ना बाक्ब

3 मारेइ मारेइ के पतीक ना बाक्ब। रागीमी मारेइ मारेइ आन के पतीक ना बाक्ब। उपदेसक ८:६; *भजन संग्रह ३१:१६* 2 जरमेतीक ना बाक्ब। मिनु बेक्तीक ना बाक्ब। ख्रुम्तीक ना बाक्ब। मिनु तुल्तीक ना बाक्ब। 3 साइक्तीक ना बाक्ब। मिनु सापाइक्तीक ना बाक्ब। प्रेत्तीक ना बाक्ब। मिनु सेल्तीक ना बाक्ब। 4 डाक्तीक ना बाक्ब। मिनु रिक्तीक ना बाक्ब। रोंका पतीक ना बाक्ब। मिनु सिल पतीक ना बाक्ब। 5 फुल्लु फ्रतीक ना बाक्ब। मिनु मेको खुप्तीक ना बाक्ब। मुप्तीक ना बाक्ब। मिनु ममुप्तीक ना बाक्ब। 6 माल्तीक ना बाक्ब। मिनु साम्तीक ना बाक्ब। वोइक्तीक ना बाक्ब। मिनु ताइक्तीक ना बाक्ब। 7 खाक्तीक ना बाक्ब। मिनु फेरतीक ना बाक्ब। सिक्सी पा बाक्तीक ना बाक्ब। मिनु लोत्र पतीक ना बाक्ब। 8 दाक्तीक ना बाक्ब। मिनु मदाक्तीक ना बाक्ब। लडाइ पतीक ना बाक्ब। मिनु दुशा बाक्तीक ना बाक्ब।

9 गेय पाइबमी आन श्येत पा गेय पशो रे मार ताइनीमी डा? 10 परमप्रभुमी मुर नेल्ल आन कली श्येत डा गेय गेप्तु। गो मुर मेको गेय पस डा पस तातामी। 11 मेकोमी मारेइ मारेइ आन कली गारपाइश्शा सेल्लु। मेकोमी गेना हना यो ब्रॉइशा बाक्तीके मुर आन थुंम वोइक्तु। मो हना यो मेकोपुकीमी परमप्रभुमी डोंइती रे नोले सम्म मार पवा, मेको रुप्ने मचाप्नीम। उपदेसक ८:१७ 12 मुर ब्रॉइमा सम्म ग्येरशा नु रिश्शो पा बाक्का माल्नीम। मेको क्येडा रिश्शो अरु मारेइ यो मबाक्ब, दे तुइक्नुड। उपदेसक २:२४ 13 परमप्रभु आ दाक्शो मार बाक्ब देंशा हना, मुर नेल्लेमी जशा, तूशा आन गेयम ग्येरशा बाक्मल, देंशो बाक्ब। 14 परमप्रभुमी मार पाइबा, मेको गेना हना यो लीब, दे गो तुइश्शो बाक्नुड। मेकेर मारेइ तेम्ने नु गुंइने मचाप्नीम। मुर नेल्लेमी परमप्रभु कली हिंशा मान पामेक्ल, दे मोदेंशो पाप्तु। 15 मार बाक्मे, मेको डोंइती रेन बाक्त। मेको मुल दुम्ब डोंइती रेन बाक्त। मिनु परमप्रभुमी डोंइती दुम्शो लेंशा दुम्पाइक्ब।

रागी डा ठीक निसाफ पतीके

16 मिनु गो रागीम अर्को का यो ताता। मार ताता देंशा हना, ठीक निसाफ पतीक आ पा डा काइ मरिश्शो पतीक बाक्बाक्त। ठीक पतीक आ पा डा जोल पतीक बाक्बाक्त। 17 गो आं थुंमी “परमप्रभुमी ठीक पाइब नु आ अरेशो लोत्र मटीब निम्फा आस कली निसाफ पाइब। मारदे हना मेकोमी मारेइ मारेइ नेल्ल कली नु गेय नेल्ल कली आ पतीक ना सेल्लु। उपदेसक १२:१४ 18 गो आं थुंमी मुरपुकी बस्तु भाव खोदेंशो नकी, दे तुइक्तमेक्ल, दे परमप्रभुमी मेको आन कली नाक्शा कोव्रब” दे यो मिम्ताक्ड। 19 मुर नु बस्तु भाव आन लां खाल का डा बाक्ब। मेको खाल का डा पा बेक्नीम। का दोपा बेक्बा, अर्को यो मोपान बेक्ब। मेको नेल्ल खाल का डा पा सोक्त कीनीम। मुर आन ततीके बस्तु भाव आन क्येडा रिश्शो मबाक्ब। मारदे हना नेल्ल जाम्शा लाइब बाक्नीम। *भजन संग्रह ४९:१३,२१* 20 मेको नेल्ल बेक्नीम। मारदे हना मेको नेल्ल खप रे दुम्शो नम। मोपतीके मेको नेल्ल लेंशा खप दुम्नीम। 21 मिनु मुर आन सोक्त चहिं ग्येत्य नु बस्तु भाव आन सोक्त

चहिं खप लुक्च लाइब, दे सुम तुइश्शो बाक्का डा? 22 मोपतीके मुर नेल्ले आंम गेयमी ग्येरसीशा बाक्कीन। मेको नेल्ल क्येडा रिश्शो बाक्ब। मारदे हना मुरुमी आ नोले मार दुम्बा, दोपा तुइक्ने चाप्बा डा?

दिच्चा पुंइसीब नु श्येत जाइब

4 मिनु गो रागीम कोइडनु, मेकेर थम मरिश्शो पशो ताता। गो दिच्चा पुंइसीशो आन डाक्शो ताता। मेको आन कली लेम्ब सुइ मबाक्म। मेको मरिश्शो पाइब सक्ति पाइश्शो बाक्तेक्म। दिच्चा पुंइसीब आन कली चहिं लेम्ब सुइ मबाक्म। 2 बेक्शो मुर, ब्रॉइशो आन क्येडा ग्येरसीशो बाक्नीम, दे तुइक्ताक्ड। 3 तन्न मेको निम्फा आस क्येडा मुल मजरमेशो मुर ग्येरसीशो बाक्ब। मारदे हना मेकोमी रागीम मरिश्शो दुम्शो मतशो बाक्ब। उपदेसक ६:३

4 मिनु गो मार ताता देंशा हना, मुरपुकी श्येत पा अरु आन कली गेहे पतीके रे जोक्ब दुम्नीम। मेको यो जाम्शा लाइब नु फश कली खेदा पशो खोदेंशो ला बाक्ब। 5 मूर्ख मुर फिम्ला पा बाक्ब। मिनु आ खतम दुम्तीक आंमान चाक्ब। 6 फश कली खेदा पशो खोदेंशो पा, शुश श्येत पा शुश चेम्चा क्येडा, थुं नाइश्शा इक्का खोइ चेम्चा रिश्शो बाक्ब। *हितोपदेस १५:१६*

7 मिनु गो लेंशा रागीम अरु जाम्शा लाइब थोवक तातामी। 8 मेको मार ताता देंशा हना तमी तौ नु सुइ लोक्ब मपाइश्शो मुर का बाक्त। तन्न मेकोमी शुश श्येत पा गेय पाइबाक्त। आ गेय गेनायो मथुम्थु, आ शोंपोम थुं मनुइबाक्त। मिनु काबु मेकोमी आंम कली “गो मारदे मोदेंशो श्येत डा गेय पना पन बाक्नुड? गो मारदे आंम कली मारेइ रिश्शो मपाइनुडा?” देंत। मेको यो जाम्शा लाइब नु श्येत जतीक ला बाक्ब। 9 मिनु का क्येडा निक्शी दुम्शो रिश्शो बाक्ब। मारदे हना मेकोपुकीमी आंम श्येत पा पशो गेय रे पा रिश्शो ततीक ताइनीम। *उत्पत्ती २:१८* 10 दोकका पा का थिस्साक्व हना, मेको आ वारचमी मेको कली पोक्ब। तन्न आबी, का ला दुम्शा थिश्शोनु, पोक्शा वारच पाइब मबाक्त हना, मरिश्शो दुम्ब। 11 मोदेंशो पा मुर निक्शी काथा इप्ताक्स हना, मेको निक्शी जेनीस। तन्न का ला इप्शोनु, दोपा जेचा डा? 12 का कली अरुमी फ्रुइनीम। तन्न निक्शी दुम्ताक्स हना, आंम कली प्रॉइने चाप्नीस। थमा पा पोया सांमी किरशो डोरी रीब पा मब्रोइक्ब।

रिश्शो दुम्चा यो जाम्शा लाइब

13 अर्ती मनेंब खूशो मूर्ख पिप क्येडा जोक्ब तुइक्ब पुडग ठिटा का दुम्चा रिश्शो बाक्ब। 14 मेको जेल्खान रे गूशा पिप दुम्शो बाक्म को? मेको पुडग बाक्त हना यो पिप दुम्ने चाप्ब। 15 गो रागी डा मुर नेल्ल मेको पिप आ गेय पाइब ठिटा आ नोले खोइश्शो तातामी। 16 मेकोमी शुश मुर आन कली वारच पाप्तु। तन्न मेको क्येडा नोले जाक्बपुकी मेको तशा मग्येरसम। मेको थमा पा जाम्शा लाइब नु फश कली खेदा पशो खोदेंशो बाक्ब।

परमप्रभु कली मान पा हिनीन

5 परमप्रभु आ खिं लनीनु, मूर्ख आन क्योरशा चढ़ेशो चढ़ेचा क्येडा परमप्रभु आ लोत्र होस पा नेंचा रिश्शो बाक्ब। मारदे हना मूर्खमी मरिश्शो पचा प्रॉइस मजोक्नीम। *भजन संग्रह १५:१; यसैया ३३:१४-१६; मत्ती ५:२३-२४; १सामुएल १५:२२* 2 ब्वाक्का कली मचुइक्तीन। परमप्रभु आ डोंइती रीब पा लोत्र मपन। परमप्रभु स्वर्गमी बाक्ब। गे चहिं रागीम बाक्नीनी। मोपतीके शुश मबाक्कीन। 3 दोपा शुश सुर्ता पतीकेम डोमु ताइनीमी, मोपा मूर्खमी शुश लोत्र पाइब। *याक्ब १:१९; मत्ती ६:७*

4 गे परमप्रभु आ डोंइती कसम जनीनु, मेको खाप्चा कली देश मपने। परमप्रभु मूर्ख आन कली तशा मग्येरब। गे इन कसम जशो खाप्पीन। *ब्यवस्था २३:२२; १सामुएल १:११,२८; भजन संग्रह ५०:१४* 5 कसम जशा मखाप्चा क्येडा, कसम मजशो रिश्शो दुम्ब। 6 इ लोत्रमी इ कली पाप मपपदल। मिनु परमप्रभु आ खिं डा लोत्र कुरब कली “आं कबल पशो प्रेंदु बाक्त” मदेनीन। इ लोत्रमी पतीके परमप्रभु गाइश्शा इ गेय नेल्ल खतम पोक्ब। 7 शुश लोत्र नु शुश डोमुमी जाम्शा लाइब सेल्ब। मोपतीके परमप्रभु कली मान पा हिनीन। *येरमीया २३:२७-२८*

## शॉप यो जाम्शा लाइब बाक्ब

8 राज्य कामी प्रुडग आन कली दिप्शो नु मेको आन कली ठीक निसाफ मपशो ताइतीनी हना, छक मलाक्कीन। मारदे हना मेको आन क्येडा अधिकार पाइशो का बाक्ब। मिनु मेको नेल्ल आन क्येडा ठेयब अर्को का बाक्ब। प्रस्थान २३:६<sup>9</sup> पिपमी रू डा गेय पाइब आन कली अरेशा रिम्शो कोव्रतु हना, मेको रागी रिम्शो दुम्ब।

10 सुमी क्येट दाक्बा, मेको कली क्येटीमी गेनायो मजाक्दीप्ब। सुम शॉप दाक्बा, मेको मुर आ चेम्शोमी गेनायो मरूब। मेको यो जाम्शा लाइब बाक्ब। हितोपदेस २८:२२; लूका १२:१५

11 शॉप शुश बारमेनु, मेको जाइबपुकी यो बारनीम। मिनु मेको होवप कली कोव्रचा डा लाक्शा, अरु मार रिम्शो दुम्बा डा?

12 शुश गेय पाइब मुर दोशो जापु हना यो, निन्द्रा पचा दाक्ब। तन्न शॉप पाइशो मुर आ शुश शॉपोम पतीके मेको कली निन्द्रा मजाक्ब।

13 गो रागीमी थम श्येत लाक्वा डा मरिम्शो पशो का तशो बाक्नुड। मेको मार बाक्ब देंशा हना मुरुमी आंमा खतम दुम्बा कली शॉप तेल्लो बाक्ब। मत्ती १९:२२<sup>14</sup> मेकोमी दोकका पा आ शॉप थुमा नोले, मेको के आल दुम्ब। मेना मेको आ गुडमी मारेइ मबाक्ब।<sup>15</sup> मुर ममा आ कोव्रज रे पा शिश्रा जाक्ब। मिनु मेको दोपा जाक्मे, मोपान लेशशा लाइब। मेकोमी आ श्येत पा चेम्शो मारेइ लाइक्वा मताइब। अय्युब १:२१; भजन संग्रह ४९:१८; इतिमोथी ६:७<sup>16</sup> एको यो श्येत लाक्वा डा मरिम्शो का बाक्ब। मुर दोपा जाक्बा, मोपान लेशशा लाइब। मिनु मेको कली मार रिम्शो दुम्बा डा? मारदे हना मेको आ पशो श्येत नेल्ल फश खोदेंशो दुम्ब।<sup>17</sup> मुरुमी आन ब्रॉइतीक नाक्त सम्म श्येत पा जशा तूशा, हिंशा, रोइ पा, सुर्ता पाइनीम।

18 मिनु गो मार ताता देंशा हना, परमप्रभुमी गेशो एको इक्का नाक्ती ब्रॉइतीकेमी रागीम जचा, तूचा नु आंम श्येत पा पशो गेयमी ग्येरसीचा मुर कली रिम्शो बाक्त्त। मारदे हना मेकोन, मेको आ भाग बाक्ब।<sup>19</sup> मेको क्येडा लाक्वा परमप्रभुमी मुर आन कली शुश शॉप नु रूपुकी गेब। मिनु मेको कली मेको नेल्ल ताक्वा नु आंम गेयमी ग्येरशा बाक्वा गेब। मेको परमप्रभु आ गेतीक बाक्ब।<sup>20</sup> मेकोमी आ ब्रॉइतीक नाक्त शुश ममिम्ब। मारदे हना परमप्रभुमी मेको कली आ थुंमी ग्येरपाइशा वोइक्ब। भजन संग्रह ७३:२६

## परमप्रभुमी मारेइ मारेइ गेब

6 गो रागीमी अर्को मरिम्शो का यो तशो बाक्नुड। मेकोमी मुर आन कली थाम्पा दिप्शो बाक्ब।<sup>2</sup> परमप्रभुमी मुर आन कली शॉप, रू नु मान ततीक गेब। मोपा मेको कली आ दाक्शो पचा कली मारेइ श्येत मदुम्ब। तन्न परमप्रभुम मेको कली मेको ग्येरशा जचा मगेथु, अर्को मुर कली ग्येरशा जचा गेब। मेको यो जाम्शा लाइब बाक्ब।<sup>3</sup> सुइ मुर का के सहे का जना आल बाक्शा, मेको शुश बर्स ब्रॉइशा यो आ चेम्शो जशा मग्येरसीब, रिम्शो पा थिम्चा यो मपुंडसीब। मेको क्येडा शाम्शा लशो आल कली रिम्शो बाक्ब। उपदेसक ४:३<sup>4</sup> शाम्शा लशो आल जाम्शा लचा कली जरमेसीशो बाक्ब। मिनु मेको छिडछिडमी जाम्शा लाइब। मिनु छिडछिडमीन मेको आ नें सुम्ब।<sup>5</sup> मेकोम गेनायो नां मतशो बाक्ब। मेकोम मारेइ मजोक्शो यो बाक्ब। मो हना यो मेको मुर क्येडा मेको आल आ नाइशो रिम्शो बाक्ब।<sup>6</sup> मेको मुर हजार का बर्स ब्रॉइशा यो आ दाक्शो पने मचापु हना, मेको मार नाइक्वा ताइबा डा? मेको नेल्ल मबेक्नीमी डा?

<sup>7</sup> मुर आ श्येत पशो नेल्ल आ कोव्रज प्रिंचा कली ला बाक्ब। मो हना यो मेको आ शोव्रलु बेक्तीक गेनायो मनुप्ब। उपदेसक १:८<sup>8</sup> मूर्ख मुर क्येडा जोक्ब तुइक्ब मारम रिम्शो बाक्नीमी? प्रुडग मुर अर्को आन डोंइती रिम्शो पस जोक्शा, मार ताइबा डा? <sup>9</sup> मार मार माल्नुड, दे शुश मिम्चा क्येडा आ तशोम ग्येरसीशा बाक्वा रिम्शो बाक्ब। मेको यो जाम्शा लाइब नु फश कली खेदा पशो खोदेंशो बाक्ब।

<sup>10</sup> मार बाक्बा, मेको नेल्ल आन नें वोइक्ने थुम्शो बाक्ब। मिनु मुर आ थुंम मार बाक्बा, मेको तुंडसीब। आंम क्येडा बोल्यो मुर कली सुइमी मारेइ

देंने मचाप्ब। अय्युब ९:२-४,३२<sup>11</sup> मेको शुश लोव्र पापु हना यो, मेको क्येडा शोर गाक्शो बाक्ब। मिनु तेको रिम्शो बाक्बा? <sup>12</sup> मुर इक्का नाक्त ब्रॉइब बाक्ब, मार रिम्शो बाक्मे, मेको सुम तुइक्बा डा? मुर आ नाक्त वांकु खोदेंशो पा लाक्ब। मेको बेक्शा लम नोले मार दुम्बा, दे सुम देंने चाप्बा डा? इतिहास २९:१५; भजन संग्रह १४४:४

## नेल्ल क्येडा ठेयब रुप्तीक

7 शुश क्येट लाइब खेक्तीक क्येडा रिम्शो नें ठेयब बाक्ब। मिनु जरमेशो नाक्त क्येडा बेक्तीक नाक्त रिम्शो बाक्ब। हितोपदेस २२:१<sup>2</sup> भोज जतीक खिम लचा क्येडा रोंका पशो खिम लचा रिम्शो बाक्ब। मारदे हना मुर नेल्ल मोदेंशो पा लाइनीम। मिनु मुल सम्म ब्रॉइशो मुरपुकीमी मेको आ पबर्म मिम्नीम।<sup>3</sup> रिक्वा क्येडा सुर्ता पचा रिम्शो बाक्ब। मारदे हना सुर्ता पतीकेम थुं कली रिम्शो सेल्ब।<sup>4</sup> जोक्ब तुइक्ब मुर आ थुं रोंका पतीक खिम बाक्ब। तन्न मूर्ख आ थुं आंम दला दाक्स पतीक खिम बाक्ब।<sup>5</sup> मूर्ख आ कुम्सो नेंचा क्येडा, जोक्ब तुइक्ब आ हुइशो नेंचा रिम्शो बाक्ब।<sup>6</sup> मूर्ख आ रिम्शो, चू चोशानु बुक्शो मी खोदेंशो बाक्ब। मेको यो जाम्शा लाइब बाक्ब।<sup>7</sup> थमा पा दिप्बपुकीम जोक्ब तुइक्ब मुर आन कली मूर्ख सेल्नीम। घूसमी मुर आन थुं मरिम्शो सेल्ब।<sup>8</sup> गेय पचा गोशो क्येडा थुम्शो रिम्शो दुम्ब। ठेयब लेशो थुं पाइशो दुम्बा क्येडा फाल्तीक थुं पाइशो दुम्बा रिम्शो बाक्ब।<sup>9</sup> रीब पा मगाइक्त्तो। मारदे हना गाइक्तीक मूर्ख आन थुंम बाक्ब। याकूब १:१९<sup>10</sup> गेपुकीम “डोंइती डा नाक्त, मुल डा नाक्त क्येडा मारदे रिम्शो बाक्मा?” दे मदेनीन। मारदे हना जोक्ब तुइक्बपुकीम मोदेंशो लोव्र हिल्लो मपाइनीम।<sup>11</sup> जोक्तीक तुइक्तीके किकी पिपी आन गेशो शॉप खोदेंशो पा रिम्शो बाक्ब। मिनु मेकोमी ब्रॉइब आन कली रिम्शो पाइब।<sup>12</sup> दोपा क्येटीम मुर आन कली वारच पाइबा, मोपा जोक्तीक तुइक्तीकेम यो मुर आन कली वारच पाइब। मिनु जोक्तीक तुइक्तीकेमी मुर आन कली ब्रॉइचा गेब। हितोपदेस ३:१-२<sup>13</sup> परमप्रभु आ गेय मिम्तीन। मेको आ रोप्शो थोव्रक कली सुमी दिंपाइक्ने चाप्बा डा? उपदेसक १:१५

<sup>14</sup> नाक्त रिम्शो दुम्मेनु ग्येरसीन। तन्न नाक्त मरिम्शो दुम्मेनु मिम्तीन। मेको निम्फा परमप्रभुमी सेल्शो बाक्ब। मोपा मुरुमी नोले आंम कली मार दुम्बा, दे मतुइक्नीम।

<sup>15</sup> गो आं इक्का नाक्त ब्रॉइतीकेमी ठीक पाइब मुर आ ठीक पशोमी खतम दुम्शो नु मरिम्शो मुर आ मरिम्शो पशोमी शुश बर्स ब्रॉइशो ताता। उपदेसक ८:१४; भजन संग्रह ७३:१२-१४<sup>16</sup> शुश ठीक पाइब मदुमो। मिनु शुश जोक्ब तुइक्ब यो मदुमो। गे मारदे आंमा खतम सेल्सीनेवे? लूका १८:११-१२<sup>17</sup> गे परमप्रभु आ अरेशो मटीब नु शुश मूर्ख यो मदुमो। गे मारदे बेक्ची मजाक्थु बेक्वा दाक्नेवे? <sup>18</sup> का कली वोतीन नु अर्को कली यो मप्रोनीन। मारदे हना परमप्रभु कली मान पा हिंब, मेको नेल्ल रे डोन बाक्नीम।

<sup>19</sup> जोक्तीक तुइक्तीकेमी जोक्ब तुइक्ब मुर कली सहर डा १० जना हुकुम पाइब आन क्येडा यो सक्ति पाइशो सेल्ब।

<sup>20</sup> थमा पा रागीमी मारेइ मारेइ ठीक पाइब नु गेनायो पाप मपाइब सुइ मबाक्नीम। भजन संग्रह १४:३

<sup>21</sup> मुरपुकीमी देंशो लोव्र नेल्ल मनेनो। मो पाप्तीवी हना इ वाइलीमी इ कली सराप पशो नेंनेवे।<sup>22</sup> मारदे हना गे गिश खेयप अरु आन कली सराप पवी, मेको इ थुंम बाक्ब।

<sup>23</sup> गो मारेइ मारेइ जोक्तीक तुइक्तीकेम नाक्शा कोव्रता। मिनु गो “थमा पा जोक्ब तुइक्ब दुम्नुड” देंती। तन्न रुप्ने मचबु।<sup>24</sup> शुश डोन बाक्ब नु शुश लुक्च लशो थोव्रक सुम तुइक्ने चाप्बा डा? <sup>25</sup> मोपतीके गो जोक्तीक तुइक्तीक नु नेल्ल तुइक्वा थुं पाता। मिनु परमप्रभु आ अरेशो मटिचा मूर्ख गेय बाक्ब। मिनु मूर्ख गेयमी निप्स ग्यशो दुम्शो बाक्ब। भजन संग्रह १४:१<sup>26</sup> मेको बेक्तीक क्येडा मरिम्शो ब्वारद दाइशो खोदेंशो मीश मुर बाक्त्त। मेको आ थुं थेंम्नु नु मेको आ गुइ चहिं पाइक्तीक साडलो बाक्त्त। सुम परमप्रभु कली ग्येरपाइक्बा, मेको रे ब्रॉइब। तन्न मेकोमी पाप पाइब कली चहिं आ ग्याइलीम रेप्ब। हितोपदेस २:१६-२२<sup>27</sup> शेंबमी “गो मार तुइक्त्त,

मेको नेनीन। गो नेल्ल रिम्शो पा तुइक्वा कली नाक्ताकड।<sup>28</sup> गो रिम्शो मुर माल्ना माल्न बाक्डानु हजार का वोंडश मुर आन दातेमी मुर का ला रिम्शो पाइब थित्ता। तन्न मीश मुर आन दातेमी का यो मथिदु।<sup>29</sup> परमप्रभुमी मुर आन कली ठीक पाइब सेल्लु। तन्न मुरपुकीम आन दाक्शो पाइनीम” दैत।  
उत्पत्ती १:२७

### पिप आ दैशो टिने

8 जोक्ब तुइक्ब मुर खोदैशो सु बाक्बा? एको लोत्र आ अर्थ सुम तुइक्बा डा? जोक्तीक तुइक्तीकेमी मुर आन कुल हाक्शो सेल्ल। मिनु मेको आ किक्शो कुल फाइशा रिम्शो सेल्ल।

<sup>2</sup> पिप आ दैशो टिवो। मारदे हना गे परमप्रभु आ डोंडती कसम जाप्तीवी।  
<sup>3</sup> पिप आ बाक्तीक रे गाक्वा कली मचुइक्तो। गे मरिम्शो मपावो। मारदे हना पिपमी मार पचा दाक्बा, मेको पाइब।<sup>4</sup> पिप आ लोत्रमी सक्ति बाक्ब। सुम मेको कली “हजुर, गे मार पनी” दैने चाप्बा? <sup>5</sup> सुम परमप्रभु आ शैशो टीबा, मेको कली मारेइ मरिम्शो मदुम्ब। मिनु जोक्ब तुइक्ब मुरुमी ठीक गेय पची ना गेय पस जोक्ब। <sup>6</sup> मुरुमी मार मार पाइनीमी, मेको पतीके ना नु निसाफ पची ना बाक्ब। मुर आन मरिम्शो पतीकेम मुर आन कली दिक्ब। उपदेसक ३:१<sup>7</sup> नोले डा लोत्र सुइमी मतुइक्नीम। मोपतीके सुइम मुर आन कली नोले मार दुम्बा, मेको दैने मचाप्नीम। उपदेसक १०:१४<sup>8</sup> फश कली तेक्शा वोइक्तीक सक्ति सुइ के मबाक्ब। मोपान आंम बेक्तीक नाक्त कली सुइमी तेक्ने मचाक्ब। दोपा लडाइ पची ना सुइ खिं लचा मताइनीमी, मोपान मरिम्शो पतीकेमी मरिम्शो पाइब कली गेनायो मप्रोंड।<sup>9</sup> गो रागीम पशो नेल्ल कोव्रडनु, नेल्ल ताता। सक्ति पाइशो मुरुमी अरु आन कली दिक्शा वोइक्नीम।

### ठीक पाइब नु ठीक मपाइब

<sup>10</sup> मिनु गो परमप्रभु आ अरेशो मटीब मुर थिम्चा पुंडसीशो ताता। ठीक पाइब चहिं परमप्रभु आ सहर रे गुंड्या पुंडसीशो बाक्तेक्म। मिनु सहरमी सुइमी मेको आन कली ममिम्बाक्तेक्म। मेको यो जाम्शा लाइब बाक्ब।  
<sup>11</sup> मुरुमी मरिम्शो पापु हना, रीब पा सजाइ मतापु हना, मेकोमी मरिम्शो पना पन बाक्ब। अय्युब ३५:१५-१६; मलाकी ३:१४-१५<sup>12</sup> मरिम्शो पाइब मुर सहे का खेयप मरिम्शो पशा यो शुश नाक्त सम्म ब्रोंडशा बाक्नीम। मो हना यो परमप्रभु कली मान पा हिंन नु आ डोंडती बाक्ब आन कली रिम्शो दुम्ब, दे गो तुइक्नुड। भजन संग्रह ३७:१८; भजन संग्रह ७३:१७-२६  
<sup>13</sup> तन्न परमप्रभु यावे आ अरेशो मटीब आन कली गेनायो रिम्शो मदुम्ब। मिनु शुश ब्रोंड्या यो मताइनीम। मारदे हना मेकोपुकीमी परमप्रभु कली मान पा महिनीम।

<sup>14</sup> रागीम अर्को जाम्शा लाइब गेय का यो दुम्ना दुम्न बाक्ब। ठीक पाइब बाक्नीम। मेकोम परमप्रभु आ अरेशो मटीब खोदैशो पा ताइनीम। मिनु परमप्रभु आ अरेशो मटीब बाक्नीम। मेको ठीक पाइब खोदैशो पा बाक्वा ताइनीम। एको यो जाम्शा लाइब बाक्ब। उपदेसक ७:१५<sup>15</sup> मोपतीके गे ग्येरसीशा बाक्कीन। मारदे हना रागीमी मुर आन कली जचा तूचा नु ग्येरशा बाक्वा डा लाक्शा, अरु मारेइ रिम्शो मबाक्ब। परमप्रभुमी गेशो ब्रोंडतीकेमी गिश श्येत बाक्त हना यो, मेको पने चाप्नीम। उपदेसक २:२४

<sup>16</sup> मिनु गो रागीमी मुरपुकीमी मइधु नाक्दो नाक्ती गेय पशो कोव्रचा कली नु जोक्तीक तुइक्तीक मार बाक्मे, मेको तुइक्वा कली आं थुं हिरताकड।<sup>17</sup> मिनु परमप्रभुमी पशो गेय नेल्ल ताता। रागीम मार दुम्बा, मेको सुइमी तुइक्ने मचाप्नीम। मुरपुकीमी मेको तुइक्वा कली शुश श्येत पाक्तेक्म हना यो, मेको नेल्ल रुजे मचाप्नीम। तेकोइ जोक्ब तुइक्ब मुरुमी “गे मेको तुइक्नुड” दैत हना यो, मेकोम थमा पा मतुइशो बाक्ब। उपदेसक ३:११; यसैया ५५:८-९

### मुर आन दुम्तीक का बाक्ब

9 एको लोत्र नेल्ल रे पा गो मार मिम्ताकड देशा हना, ठीक पाइब नु जोक्ब तुइक्ब आन पतीक मारेइ मारेइ परमप्रभु आ गुइमी

बाक्बाक्त। तन्न मुरुमी आंम कली दाक्तीक नु काइ मदाक्तीक ताइनीम। तन्न मेको मतुइक्बाक्तेक्म।<sup>2</sup> मारदे हना जाम्शा लतीक नु मरिम्शो दुम्तीके मुर नेल्ल आन कली दुम्ब। ठीक पाइब नु परमप्रभु आ अरेशो मटीब, रिम्शो पाइब नु मरिम्शो पाइब, ग्रान्ग्रा मदिशो नु ग्रान्ग्रा दिशो, चढेतीक चढेब नु मचढेब, पाप पाइब नु मपाइब नु कसम जाइब नु मजाइब, नेल्ल नोले खाल का डा पा जाम्शा लाइनीम। उपदेसक २:१४; अय्युब ९:२२<sup>3</sup> रागीम दुम्तीक गेय नेल्लेमी मरिम्शो पतीक बाक्ब। मेको नेल्ल बेक्शा लाइनीम। मुर नेल्ल आन थुं मरिम्शो पतीकेमी ब्रीशो बाक्ब। मिनु मेकोपुकी ब्रोंडमा सम्म आन थुं हेंथे पतीकेम ब्रीशो बाक्ब। मिनु मेको नोले मेको बेक्शोपुकी नु बाक्थ लाइनीम। उपदेसक ८:११<sup>4</sup> तन्न ब्रोंडशा बाक्बपुकी नु बाक्ब आन के आस बाक्ब। बेक्शो गुप्स क्येडा ब्रोंडशा बाक्शो कुचुम रिम्शो बाक्ब।<sup>5</sup> ब्रोंडशा बाक्शोपुकीम “गे बेक्नीकी” दे तुइशो बाक्नीम। तन्न बेक्शोपुकीम मारेइ मतुइक्नीम। मेको आन कली मारेइ इनाम मबाक्ब। मेको आन कली मिम्तीक यो जाम्शा लाइब।<sup>6</sup> मेको आन दाक्तीके, काइ मदाक्तीक नु गेहे पतीक नेल्ल जाम्शा लत। मेकोपुकीम रागीम मार दुम्शो बाक्मे, मेको मारेइ ममिम्नीम।

<sup>7</sup> आंम इ लां गाक्को, इ जतीक थोव्रक ग्येरशा जावो। ग्येरशा इ अडगुर शांबु तूडो। मारदे हना परमप्रभुमी इ पशो गेय दाक्ब। उपदेसक २:२४<sup>8</sup> गेना हना यो रिम्शो वा फेक्शा इ ब्रोंडशो तेल खेक्को।<sup>9</sup> परमप्रभुमी गेशो इक्का नाक्त ब्रोंडशा बाक्तीकेमी आंम दाक्शो मीश नु ग्येरशा बाक्को। मारदे हना रागीमी इ श्येत पा पशो गेय डा भाग मेको बाक्ब। हितोपदेस ५:१८-१९  
<sup>10</sup> इ डोंडती मार गेय बाक्मे, मेको इ सक्ति नेल्लेमी पावो। मारदे हना बेक्शो मुर आन बाक्तीकेम मारेइ मिम्तीके, जोक्तीके नु तुइक्तीके मबाक्ब।

<sup>11</sup> गो रागीमी अर्को थोव्रक का यो तशो बाक्नुड। रीब पा दोरब मग्राब। सक्ति पाइशो लडाइ पाइबमी लडाइ मग्राब। जोक्ब तुइक्बमी जचा मताइब। शुश निप्स पाइशो मुरुमी क्येट मचेम्ब। जोक्ब मुरुमी मान मताइब। तन्न नेल्लेमी आन गेय पतीक ना नु रागी दोपा बाक्बा, मुर आन गेय दुम्बा देय मदुम्बा मेको ताइनीम। हितोपदेस १६:९<sup>12</sup> मिनु हिंचा डा श्येत गेना जाक्बा, सुइम मतुइक्नीम। शिशी मपाइब आन ग्याइलीम डांइ रेशो नु व्वारदम चिक्ब रेशो खोदैशो पा मुरपुकी यो ममिम्थु हिंचा डा श्येत जशा बेक्नीम।

### जोक्तीक तुइक्तीक ठेयब बाक्ब

<sup>13</sup> गो रागीमी जोक्तीक तुइक्तीक का यो ताता। मेको थम ठेयब बाक्त।  
<sup>14</sup> साइ डोंडती शुश मुर मबाक्शो आइक्च सहर का बाक्त। मिनु मेको कली शुश सक्ति पाइशो पिपमी लडाइ तोवा बाक्त। मेको सहर कली पुम्शा, गारो डोइक्तीक यो सेला बाक्त।<sup>15</sup> मेको सहरमी जोक्ब तुइक्ब पुडग मुर का बाक्माक्त। मिनु मेकोमी आ जोक्तीक तुइक्तीकेमी मेको सहर कली प्रोना बाक्त। तन्न मेको पुडग मुर कली सुइमी ममिम्तेम बाक्त।<sup>16</sup> मिनु गो “सक्ति क्येडा जोक्तीक तुइक्तीक ठेयब बाक्ब” दैती। तन्न मेको पुडग मुर आ जोक्तीक तुइक्तीक कली आइक्च मिम्ताक्म। मेको आ लोत्र कली सुइमी यो ममिम्तेम।<sup>17</sup> ठेयब सेंदा पा मूर्ख सासन पाइब आ लोत्र क्येडा, जोक्ब तुइक्ब आ ओंखां पा दैशो लोत्र टीनीम।<sup>18</sup> लडाइ पतीक या क्येडा जोक्तीक तुइक्तीक रिम्शो बाक्ब। तन्न पाप पाइब कामी शुश रिम्शो गेय आन कली खतम सेल्ल।

### मूर्ख नु जोक्ब तुइक्ब

10 मिनु दोपा बेक्शो चुरमुमी ब्रोंडशो रिना पाइशो खेक्तीक कली राक्पाइक्बा, मोपा इक्का खोइ मूर्ख दुम्तीकेमी जोक्तीक तुइक्तीक नु मान ततीक नेल्ल खतम पोक्ब।<sup>2</sup> जोक्ब तुइक्ब मुर ठीक लांमी गाक्शो बाक्ब। तन्न मूर्ख मुर दूली लांम गाक्शो बाक्ब।<sup>3</sup> मूर्ख मुर लांम गाक्मेनु, मारेइ ममिम्ब। मिनु नेल्ल आन कली आ मूर्ख दुम्तीके कोइब।<sup>4</sup> इ ठेयब मुर इ तशा गाइक्ताक्व हना यो, इ गेय पचा मप्रोनो। सिक्सी पा बाक्शोनु, ठेयब मरिम्शो पशो यो जाम्शा लाइब।

5 गो रागीमी मरिश्शो का तशो बाक्नुड। मेको ठेयब दूली गेय सासन पाइबम ला पने चाख। 6 मूर्ख आन कली ठेयब मुर सेल्नीम। तन्न शोंप पाइश्शोपुकी आइक्च दुम्शा बाक्नीम। 7 गो वाइलपुकी चहिं शारा डोइश्शा नु सासन पाइब आ तौ चहिं वाइल खोदेंशो पा खोइलीम गाक्शो तशो बाक्नुड। 8 बिक्तीक दोइब मुर मेको आंमान बिक्ने चाख। मिनु गारो प्रेख कली बुस्सुमी कोवने चाख। *हितोपदेस २६:२७* 9 फुल्लु खोइक्च मुर गार दुम्ने चाक्ब। मिनु शी खोइक्च मुर आ गेय रे श्येत जने चाख। 10 खा महेश्शो बाक्त हना, मेको कली शुश बोल माल्ब। तन्न जोक्तीक तुइक्तीकेम मेको कली रिश्शो सेल्ब। 11 बुस्स कली लाटा सेल्चा क्येडा डोंइती कोक्तु हना, बुस्स चलेब कली मारेइ रिश्शो मदुम्ब। *बजन संग्रह ५८:५-६*

12 जोक्ब तुइक्च मुर ब्वाक्मेनु, मान ताइब। तन्न मूर्ख चहिं आ लोवमीन खतम दुम्ब। 13 मेकोमी डोंइती मूर्ख लोव पाइब। मिनु नोले बौला नु निप्स ग्यशो लोव पाइब। 14 मूर्ख मुर ब्वाक्स डा ब्वाक्स पाइब। मार दुम्बा, सुइम मतुइक्नीम। मेको आ नोले मार दुम्बा, मेको सुम देंने चाखा डा? *उपदेसक ५:२; उपदेसक ८:७* 15 मूर्ख आ श्येत पा पशो गेयमी दाइब। मेकोमी सहर लतीक लां यो मतुइक्ब।

16 आबी, तेको रागी डा पिप आल का बाक्बा, तेको रागी डा सासन पाइबपुकीमी सुनी कना भोज जाइनीमी, मेको रागी खतम दुम्शा लाइब। *यसैया ३:४; यसैया ५:११* 17 तेको रागीमी रिश्शो खिं डा मुर पिप दुम्बा, मेको रागी ग्येरसीशो बाक्ब। मेको रागी डा सासन पाइब भोज जची ना जाइनीम। मेकोपुकी दुक्चा कली ममाइ बोल तचा कली जाइनीम। 18 सुइ मुर अल्से बाक्त हना मेको आ खिं ब्रेख। मेको फिम्ला पा बाक्त हना, मेको आ खिं याख। 19 ग्येरसीचा कली भोज सेल्नीम। मिनु अडगुर शांबुमी मुर कली ग्येरपाइक्ब। तन्न मेको नेल्ल पचा कली क्येट माल्ब। *बजन संग्रह १०४:१५* 20 इ मिम्तीकेमी यो पिप कली सराप मपावो। शोंप पाइश्शो मुर कली इ कोठाम सराप मपावो। मारदे हना सरीड डा चिक्बीम इ लोव लद। मिनु बेरशो चिक्बीम इ लोव शेंद।

मार पचा माल्ब

11 इ क्येट डोन सोइक्तो। मिनु शुश नाक्त नोले मेको लेंशा ताइनेवे। 2 गे इं के बाक्शो क्येट ७, ८ जना आन कली वोइक्चा गेमी। मारदे हना रागीम दोदेंशो ठेयब श्येत जाक्बा, मेको गे मतुइक्नेवे। 3 गोस्सुम ब्वाक्कु ब्रीत हना, मेकोमी रागीम रेउ यिपाइक्ब। रवा दक्खिन गे गोल्त हना यो, उत्तर गे गोल्त हना यो, मेको ते गे गोल्मे, मेकेरन लीब। 4 फश कली मिम्बमी गेनायो मशोक्ब। मिनु गोस्स कोवबमी गेनायो मखुक्ब।

5 गे फश ते रे जाक्बा नु ममा आ कोवजमी आल दोपा ब्रोंइतीक सोक्त ताइबा, मेको मतुइक्नेवे। मोपा मारेइ मारेइ सेल्ब परमप्रभु आ गेय रुप्ने मचाप्नेवे। *यूहन्ना ३:८; भजन संग्रह १३९:१३; उपदेसक ८:१७* 6 गे सुनी इ वांचेर शोक्को। मिनु नाक्दो यो गेय पचा मप्रोनो। मारदे हना मुल शोक्को नु आपो शोक्को तेको ग्रेल्बा, मतुइक्नेवे। निम्फा ग्रेल्नीसी कों? मतुइक्नेवे।

ठिटा आन कली अरेशो

7 हाम्सो रिश्शो बाक्ब। मुरुमी नां कली तचा दाक्ब। 8 मुर शुश बर्स ब्रोंइत हना यो, मेको आ ब्रोंइतीकेमी ग्येरसेक्ल। तन्न मेकोमी छिडछिड डा नाक्त

कली यो मिम्तल। मारदे हना मेको शुश बाक्नीम। मुल दुम्ब मारेइ मारेइ जाम्शा लाइब बाक्नीम।

9 ए ठिटा मुर, गे ठिटा बाक्डेनु ग्येरसो। इ थुंमी गे ठिटा बाक्डेनु ग्येरपदल। इ तशो नु इ थुंमी मिम्शो आस नोले खोतो। तन्न परमप्रभुमी मेको नेल्ल तुइश्शा निसाफ पाइब, दे मिम्तो। *उपदेसक २:२४* 10 मोपतीके सुर्ता पतीक कली इ थुं रे पा डोन वोतो। मिनु मरिश्शो नेल्ल इ रां रे डोन वोतो। मारदे हना ठिटा दुम्तीके नु बोल यो जाम्शा लाइब बाक्ब।

डोंइतीन पचा माल्ब देंशो

12 इ ठिटा बाक्ना बाक्न इ कली सेल्ब कली मिम्तो। श्येत जतीक नाक्ती नु इ खुशो दुम्तीक बर्स जाक्मेनु “गो मेको नाक्त मदाक्नुड” देंचा क्येडा डोंइती मिम्तो। 2 नां नु नाक्त डा छेडछेड कली छिडछिडमी सुम्चा क्येडा डोंइती, तास्ला नु सोरुल ब्राब्रा दुम्चा क्येडा डोंइती नु गोस्सुम रेउ यिपाइश्शा लेत्वा क्येडा डोंइती 3 खिं खाल पाइबपुकी खिंखि पाइनीम। बोल्यो मुरपुकी खुशो दुम्नीम। यात हिल्ब मीश मुर शुश मबाक्तीके, आन गेय नाइक्नीम। मिनु झेल रे कोवब आन मिक्च ब्राब्रा दुम्ब। 4 मेना लां डा लाप्चो चोक्सीब। यात हिल्शो सेंदा आइक्च दुम्ना दुम्न लाइब। मुरपुकी चिक्ब आन ग्रीशो नेंशा बोक्नीम। मीश आल आन कुम्सो नेल्ल आइक्च सेंदा पा नेंसीब। 5 मुरपुकी लाइश्शो खिं डोइक्चा नु लांम श्येत दुम्बा कों, दे हिंनीमी। बदाम बोइश्शा सिप्ब। घांस ब्वाइब माले आ कोवजमी ग्रेशा गाक्ब। मारेइ ममाल्ब दुम्चा क्येडा डोंइती इ कली सेल्ब परमप्रभु कली मिम्तो। मारदे हना मुर नेल्ल बेक्नीम। मिनु रोंका पाइब लांम गाक्नीम। 6 चांदी के तार ब्रोंइक्चा क्येडा डोंइती नु सुन के कचौरा ब्रोंल्चा क्येडा डोंइती, खप के गर ब्वाक्कु बुक्तीकेम प्रोल्चा क्येडा डोंइती नु इनार डा गुगील जिक्चा क्येडा डोंइती 7 खप रे बोक्शो फुरक खपीमीन लेत्वा क्येडा डोंइती नु सोक्त गेब परमप्रभु आ बाक्तीकेम सोक्त लेत्वा क्येडा डोंइती परमप्रभु कली मिम्तो। *उपदेसक ३:२०; उत्पत्ती ३:१९* 8 शेंबमी “जाम्शा लाइब! जाम्शा लाइब! नेल्ल जाम्शा लाइब बाक्नीम” देंब।

परमप्रभु कली मान पा हिनीन

9 मेको शेंब जोक्ब तुइक्च मुर ला ममाइ, मेकोमी मुर आन कली जोक्ब तुइक्ब सेल्लु। मेकोमी कोवशा नाक्शा, दोदेंशो लोव बाक्बा, दोपा शुश देंतीक ब्रेक्चा माल्बा, मेको शेंताक्व। 10 मिनु शेंबमी ठीक लोव माल्शा गुंडताक्व। मिनु मेकोम मार ब्रेक्ता, मेको ठीक नु थमा बाक्नीम।

11 जोक्ब तुइक्च आन लोव गोठला आन कोक्के खोदेंशो बाक्ब। मिनु मेको आन खुशो लोवपुकी बोल्यो पा थोक्शो कांटी खोदेंशो बाक्ब। मेको नेल्ल गोठला का रे पान दुम्शो बाक्ब। *यसैया २२:२३* 12 ए आं तौ, मेकेर तेम्शो लोव रे होस पा बाक्को। शुश किताब ब्रेक्तीक गेय गेनायो मनुक्ब। मिनु शुश पढेशोनो रां कली दपाइक्ब। 13 नेनो, नेल्ल क्येडा नोले डा लोव मार बाक्ब देंशा हना, परमप्रभु कली मान पा हिनी। मिनु मेको आ शेंशो टिवो। मारदे हना मुर नेल्ल आन पचा माल्शो एकोन बाक्ब। *ब्यवस्था ६:२* 14 मारदे हना परमप्रभुमी इ पशो रिश्शो नु मरिश्शो गेय नेल्ल नु खुइश्शा पशो नेल्ल निसाफ पाइब। *रोमी २:१६; २कोरिन्थी ५:१०*

## ठेयब कुम्सो

एको कुम्सो सोलोमनमी ब्रेक्शो बाक्ब।

सोलोमनमी ९५६-९२६ बि. सी. आ सासन पची ना ब्रेक्शो बाक्ब।

एको किताबम शुनाम सहर डा गोठाल्नी मीश आल आ कथा बाक्ब। मेको सोलोमन आ दरवार चाक्चा पुंडसीशो बाक्ब। तन्न मेकोमी सोलोमन आ शोंप नु दारस तशा, यो आ दाक्शो नु ग्युंवे पचा चिक्शो गोठला मप्रोंइथु दाक्ना दाक्न बाक्ब। एको किताबम भाग सां बाक्ब:

१. पिप आ दरवारम वोइक्चा पुंडसीशो, मेकेर डा मीश आलम पिप आ ठेयब दुम्तीके कुम्सो पशो, सोलोमनमी शुलामीथ नु लोत्र पशो आ दाक्शो मुर कली मिम्ना मिम्न बाक्शो,
२. आ दाक्शो गोठला हेरा प्रोंइशो, सोलोमनम शुलामीथ कली ग्युंवे पचा मिम्शो शुलामीथम आ दाक्शो गोठला कली मिम्शो सोलोमन आ नोले डा पशो लोत्र
३. आ गोठला कली मप्रोंइथु, आ दाक्तीकेम ग्राशो शुलामीथ खिं लेशशा, दरवार डा शोंप मिम्शो आ दाक्शो गोठलामी शुलामीथ आ सेंदा नेंचा दाक्शो

“पिप ठेयब बाक्ब” दे कुम्सो पशो

१ सोलोमन आ नेल्ल क्येडा ठेयब कुम्सो। २ मेकोमी आं कली पुक्पु पवला। मारदे हना इन दाक्तीके अडगुर शांबु क्येडा यो रिम्शो बाक्ब। ३ इन खेक्तीक तेल ब्रोव्रशो रिना पाइशो बाक्ब। इन नें ब्रोव्रशो रिना पाइशो तेल मोइशो खोदेशो बाक्ब। मोपतीके मीश आलपुकीमी इन कली दाक्नीमी। ४ गे आं कली लाइय्नीनी। गो रीब पा लय। पिपमी आं कली आ बाक्तीकेम लाइक्ती। गो इन कली तशा ग्येरसीनीकी। गोपुकी अडगुर शांबु क्येडा यो, इन दाक्तीक कली ठेयब सेल्नीकी। मेकोपुकीम गे दारशो दुम्तीके इन कली दाक्नीमी।

आं कली आइक्च ममिम्तीन

५ गो क्येर बाक्ती हना यो, दारशो बाक्नुड। ए यरूसलेम डा तमीपुकी, गो केदार आ ताम्बु नु सोलोमन आ फारतीक वा खोदेशो क्येर बाक्नुड। आं कली आइक्च ममिम्तीन। ६ आं कली क्येर तशा, मकोव्रयीनी। मारदे हना चोक्शो नांमी आं कली क्येर सेल्ती। आं ममा आ तौपुकी गो नु गाइक्तीके आं कली अडगुर रू कोव्रब सेल्तीमी। तन्न गो आंम अडगुर रू कली चहिं मकोव्रड। ७ ए आं दाक्शो मुर, इन क्यारश भेडा आन कली ते योव्रनीनी? मिनु नाक्त मेको ते नाइक्नीमी? गो मारदे हेंथे गाक्ब मीश मुर खोदेशो पा इन वारच आन बगाल आ नेक्था लचा माल्नुडा?

सोलोमनम शुलामीथ नु लोत्र पशो

८ मीश आल आन दाते डा नेल्ल क्येडा दारशो मीश आल, गे क्यारश भेडा आन गाक्तीक लां खोइशशा, गोठला आन गोठ आ नेक्था इ पाठा आन कली योव्रडो।

९ आं दाक्शो मीश आल, गो इ कली फाराओ आ बगी डा नेल्ल क्येडा दारशो छाउरी शारा नु थाप्शो बाक्नुड। १० गहना पांडसीशो इ चोव्रचो गिश दारशो बाक्ब। सिक्री पांडसीशो इ शुर थम दारशो बाक्ब। ११ गो इ कली सुन नु चांदी खाक्शा सिक्री सेल्नीकी।

१२ पिप आ इप्तीकेमी बाक्मेनु, आं तेल थम ब्रोव्रशो रिना पाइक्तु। १३ आं दाक्शो मुर आं कुचु आ दातेम ब्रोव्रशो रिना पाइब मूरम ब्रीशो थैली खोदेशो बाक्ब। १४ आं दाक्शो मुर एन-गेदी डा अडगुर रूमी वाशो हेन्ना फू खोदेशो बाक्ब।

१५ ए, आं दाक्शो मीश आल गे दारशो बाक्नेवे? शुश दारशो बाक्नेवे। इ मिक्च दुकुर के खोदेशो बाक्ब। १६ ए आं दाक्शो मुर, गे यो दारशो बाक्नेवे। थमा पा दारशो बाक्नेवे। इस ब्राख्ये गिग बाक्ब। १७ इस खिं डा पैद्रा लेबानोन डा लाइशो रवा के बाक्नीम। सला के फलेकम साप्शो बाक्ब।

गे अर्को खोदेशो मबाक्नीनी

२ गो शारोन डा गुलाफ नु बेंसी डा लिली फू नड। २ चू आन दातेमी लिली फू बोइशो खोदेशो पा आं मीश आल, अरु मीश आल आन दातेम बाक्ब।

३ आं वोंइश मुर अरु ठिटा आन दातेमी ब्वाकीम बाक्शो रवा आन दाते डा स्याउ रवा खोदेशो बाक्ब। गो मेको आ वांकुम थुं नाइशशा बाक्नुड। मेको आ फल ब्रोव्रशो बाक्नीम। ४ मेकोमी आं कली भोज जतीक खिंम लाइक्ती। मेको आ दाक्तीके छेदर खोदेशो पा कोंइताक्यी। ५ आं कली ठीक सेल्चा कली सोव्रपाइशो अडगुर नु स्याउ गेयीनी। मारदे हना गो दाक्तीकेम थशो बाक्नुड। ठेयब कुम्सो ५:८ ६ मेको आ पेरा गुइ आं पिया आगाम बाक्ब। मिनु मेको आ ग्युरा गुइमी आं कली मुप्शो बाक्ब। ७ मेकोमी “ए, यरूसलेम डा तमीपुकी, गो इन कली, किशश नु रोकोश आन नेंमी अरेनुड। आंम दाक्चा क्येडा डोंइती दाक्तीक कली मपोक्कीन” देंत। ठेयब कुम्सो ८:३-४

शुलामीथम आ दाक्शो कली मिम्शो

८ लो आं दाक्शो मुर, आ सेंदा नेनीन। कोव्रडीन, मेको पहाड मेर प्रेक्ना प्रेक्न, डांडा मेर दोरना दोरन जाक्शो बाक्ब। ९ आं दाक्शो मुर किशश नु ठिटा रोकोश खोदेशो बाक्ब। कोव्रडीन, मेको आंइ गारो आ नोले राप्शा बाक्शो बाक्ब। मेकोमी झेल रे आगा कोव्रना कोव्रन बाक्ब। मेकोमी झेल आगा रे कोव्रना कोव्रन बाक्ब। १० आं दाक्शो मुरमी आं कली “आं नेल्ल क्येडा दाक्शो नु आं दारशो मीश आल बोक्को। मिनु गो नु गाक्को” देंत। ठेयब कुम्सो २:१३ ११ मारदे हना मुल हिंउद लाक्तु। मिनु बर्खा यो लाक्ने थुम्तु। १२ रागीम फू बोइक्चा गोम्तेक्म। १३ फोव्रशी रवाम फोव्रशी सिन्ना सिन्न बाक्नीम। अडगुर फू बोइक्नीम। मेको ब्रोव्रशो रिना पाइब। मेकोमी “आं नेल्ल क्येडा दाक्शो नु आं दारशो मीश आल बोक्को। मिनु गो नु गाक्को” देंत। ठेयब कुम्सो २:१०

१४ पहाड मेर डा पोव्रला मेर, सेरथे फुल्लु मेर बाक्ब आं दाक्शो दुकुर, इ कुल कोंइदी। इ सेंदा नेंचा तडल। मारदे हना इ सेंदा रिम्शो बाक्ब। मिनु इ

कुल दारशो बाक्ब। 15 आंइ कली फ्यउरे ग्याइश्शा गेकी। मेको आइक्च फ्यउरेपुकीम अडगुर रू बिप्रेनीम। मारदे हना मुल अडगुर बोइक्नीम।

16 आं दाक्शो वोंइश आल आं केन बाक्ब। मिनु गो मेको के बाक्नुड। मेकोमी आ क्यारश भेडा लिली फू आन दातेम योव्रब। ठेयब कुम्सो २:१६ 17 ग्यू दुम्चा नु वांकु जाम्शा लचा क्येडा डोंइती लेशशा जाक्कीन। आं दाक्शो वोंइश मुर रोगु मेर बाक्ब किश्श नु ठिटा रोकेश खोदेंशो दुमीन। ठेयब कुम्सो ४:६

### आ दाक्शो कली मिम्शो

3 गो नाक्दो रे आं ब्राख्येम आं दाक्शो वोंइश मुर कली माल्ता। गो मेको कली ब्रेत्ताक्ड। तन्न मेकोम लोव्र मलेत्ती। ठेयब कुम्सो ५:६ 2 गो बोक्शा, सहर गे लती। मिनु गो आं दाक्शो वोंइश मुर कली सहर नु लां मेर माल्ता। मोपा माल्ना माल्न बाक्ती, तन्न मथिदु। 3 सहर डा खाल पाइबपुकीम थित्तीमी। मिनु गो “मार, गेपुकीमी आं दाक्शो वोंइश मुर कली थिन्नी?” दे हिल्लो पाता। 4 मिनु गो मेको आन कली प्रोंइशा इच्का आइक्ची ला जाक्दीश्शो नड। गो आं दाक्शो वोंइश मुर कली थित्ता। मिनु गो मेको कली आं ममा आ खिं, आं जरमेसीशो कोठा मचाक्गु सम्म मेको कली ग्याइश्शा मप्रोन। ठेयब कुम्सो ८:२ 5 ए यरूसलेम डा तमीपुकी, गो इन कली, किश्श नु रोकेश आन नैमी अरेनुड आंम दाक्चा क्येडा डोंइती दाक्तीक कली मपोक्कीन।

### सोलोमनम ग्युबे पचा मिम्शो

6 गोरशो रागी रे मार जाक्बा? कुन के थाम खोदेंशो तांडसीब। मिनु मेको मूरे नु धूप खोदेंशो ब्रोवशो रिना पाइब। मेको ग्याप्ब लेयब आन मस्ला खोदेंशो पा रिना पाइव्तु। 7 कोव्रडीन, एको सोलोमन कली कुरतीक बाक्ब। मेको आ एर ऑथ ६० जना इसाएल डा बोल्यो लडाइ पाइबम मेको कली खाल पशो बाक्तेक्म। 8 मेको नेल्लेमी या कुरशो बाक्तेक्म। मेको लडाइ पस जोक्ब बाक्तेक्म। नाक्दो लडाइ दुम्मेनु, आन तरवार पिम्सीशो बाक्तेक्म। 9 पिप सोलोमनम आंम कली कुरतीक का सेल्लु। मेको लेबानोन डा लाइश्शो रवा आ शी के सेल्लो बाक्त। 10 मेकोमी मेको आ गुड वोइक्तीक चांदी के नु आ नोले सुन के सेल्लु। आ नित्तीके प्याजी रड के बाक्त। यरूसलेम डा तमीपुकीमी, मेको आ आगा शुश क्येट लाइब शीम साप्शो बाक्तेक्म। 11 ए सियोन डा तमीपुकी, लाडगा गृशा पिने। मिनु पिप सोलोमनम सिरपेच गुक्शो कोव्रडीन। मेको सिरपेच मेको आ ममामी ग्येरसीशा मेको आं ग्युबे नाक्ती गेशो बाक्त।

### सोलोमन शुलामीथ नु लोव्र पशो

4 आं दाक्शो मीश आल, गे दारशो बाक्नेवे। गे थाम्पा दारशो बाक्नेवे। इ मिक्च इ सुम्तीके आगाम खूइश्शो ढुकुर आ मिक्च खोदेंशो बाक्ब। इ चां गिलाद डांडा रे पा ब्रुशो क्यारश आन हुल खोदेंशो बाक्ब। 2 इ खूइ चां प्रेक्शा चिक्शो भेडा आन हुल खोदेंशो बाक्ब। मेको नेल्ल आन के जौले पाठा बाक्ब। नेल्ल मोदेंशो बाक्नीम। ठेयब कुम्सो ६:५-६ 3 इ शूंडच लल डोरी खोदेंशो बाक्ब। इ शोव्र थम दारशो बाक्ब। इ सुम्तीके आगाम इ चोव्रचो चेशो दारीम खोदेंशो बाक्नीस। ठेयब कुम्सो ६:७ 4 इ शुर दारुद आ लाइश्शो खिं खोदेंशो बाक्ब। मेकेर हजार का तेक्तीक क्युक्शो बाक्नीम। मेको नेल्ल लडाइ पाइब आन तेक्तीक बाक्नीम। 5 इ दूध निकशी क्यारश पाठा खोदेंशो बाक्नीस। मेको लिली फू आन दातेमी जोइब किश्श आ जौले पाठा खोदेंशो बाक्नीस। ठेयब कुम्सो ७:३ 6 ग्यू दुम्चा नु वांकु जाम्शा लचा क्येडा डोंइती, गो ब्रोवशो रिना पाइब डांडा नु धूप बाक्शो डांडा लाइनुड। ठेयब कुम्सो २:१७ 7 आं दाक्शो मीश आल गे नेल्लेम दारशो बाक्नेवे। इ के मारेइ मरिम्शो मबाक्ब।

### आं दारशो मीश आल, आं ग्युम्ली!

8 आं ग्युम्ली, लेबानोन रे पा गो नु गाक्को। लेबानोन रे पा गाक्को। आमाना डांडा रे पा यीवो। सेनीर आ डर नु हेरमोन डांडा रे पा गाक्को। गुप्स

आन पुक्खी नु जोइ आन बाक्तीक डांडा रे पा गाक्को। 9 ए आं समी, आं ग्युम्ली, गे आं कली कोव्रशा, आं थुं खूइ पाप्तीवी। इ माला के गेडा कामीन आं थुं खूइ पाप्तीवी। 10 ए, आं समी, आं ग्युम्ली इ दाक्तीक थम रिम्शो बाक्ब। तेकोइ अडगुर शांबु क्येडा यो, इ दाक्तीक रिम्शो बाक्ब। मस्ला नेल्ल आन क्येडा इ खेक्तीक ब्रोवशो रिना पाइश्शो बाक्ब। 11 इ शोव्र रे फू आ रस खोदेंशो याब्ब। ए आं ग्युम्ली, इ लें आगाम दूध नु खुदो बाक्ब। इ वा डा ब्रोवशो रिना लेबानोन डा रिना खोदेंशो बाक्ब।

12 ए आं समी, आं ग्युम्ली, गे चोक्शा वोइश्शो रू नु सुशा वोइश्शो ब्वाक्कु बुक्तीक खोदेंशो बाक्नेवे। 13 इ रू दारीम रू खोदेंशो बाक्ब। मेकेर नेल्ल क्येडा रिम्शो फल फुल बाक्नीम। हेन्ना बुटा नु ब्रोवशो रिना पाइब तेल बाक्नीम। 14 ब्रोवशो रिना पाइब तेल, हाव सुप्तीके, सुप्तीक बोट, सिन्कौली, शुश खाल डा ब्रोवशो रिना पाइश्शो धूप रवा, मूरे, ब्रोवशो रिना पाइश्शो शी के रवा नु नेल्ल खाल डा ब्रोवशो रिना पाइश्शो मस्ला बाक्नीम। 15 मेको रू डा ब्वाक्कु बुक्तीक ब्रोवशो ब्वाक्कु बुक्तीक बाक्ब। मिनु लेबानोन रे पा शाइश्शो खोला बाक्नीम।

16 उत्तर डा फश, बोक्को। ए दक्खिन डा फश, कुवो। आं रूमी फश पावो। मेको आ ब्रोवशो रिना डोन सम्म जाक्दील्ल। आं दाक्शो वोंइश मुर आ रूमी जाक्ल। मिनु मेकेर डा नेल्ल क्येडा ब्रोवशो फल जवल।

5 ए आं समी, आं ग्युम्ली, गो आं फल फुल रूमी जाक्ती। गो आं ब्रोवशो रिना पाइश्शो मूरे नु मस्ला खुप्ताक्डमी। गो आं सुरबु चाका नु आं खुदो जाइनुड। गो आं अडगुर शांबु नु आं दूध तूनुड। ए वारचपुकी, जने तूडीन। वारचपुकी दाक्तीकेम दुक्शो खोदेंशो दुमीन।

### डोमु पा आ गोठला कली माल्शो

2 गो गोल्ली, तन्न मइम्ड। नेनीन, आं दाक्शो मुरुमी लाप्चो खोकोल पाप्नु। “आं समी, आं दाक्शो मीश आल, आ ढुकुर, मारेइ मारेइम रिम्शो बाक्शो मीश आल लाप्चो रोक्को। आं पिया सीतम जिश्शो बाक्ब। आं चां नाक्दो डा सीतम जिश्शो बाक्ब” देंत। 3 गो आं वा पुइक्ने थुम्ता। मिनु मार मेको लेंशा फेक्नुडा? गो आं खोइल चिक्ने थुम्ता। मिनु मार मुल लेंशा खप दिम्नुडा? ठेयब कुम्सो ३:१ 4 आं दाक्शो वोंइश मुरुमी लाप्चो रोक्का कली गुड पिदानु, मेको तशा आं लुङगीर प्रेक्त। 5 मिनु गो आं दाक्शो वोंइश मुर कली लाप्चो रोक्का कली बोक्ती। आं गुड रे ब्रोवशो रिना पाइश्शो मूरे याप्त। मिनु आं ब्रेप्चो रे ब्रोवशो रिना पाइश्शो मूरे याप्ता आग्लोम लुम्साक्व। 6 मिनु गो आं दाक्शो मुर कली लाप्चो रोक्का, तन्न मेको गाक्ने थुमा बाक्त। मेको मेकेर मबा। मेको गाक्तीके गो सुर्ता पाता। गो मेको कली माल्ता। तन्न मथिदु। गो मेको कली ब्रेत्ताक्ड। तन्न मेकोम लोव्र मलेत्ती। 7 सहरम हिरशा खाल पाइबपुकीम आं कली थित्तीमी। मिनु मेकोपुकीम आं कली तुप्शा गारै गार सेल्लेमी। गारोम बाक्शा खाल पाइबपुकीमी आं फेक्शो वा यो रोइश्शा लाइक्तेक्म। 8 ए यरूसलेम डा तमी “गो इन कली ‘गेपुकीम आं दाक्शो मुर कली ग्युम्तीनी हना, मेको कली इन कली दाक्ब मुर दाक्तीकेम थशो बाक्ब’ देनीन” देंत। ठेयब कुम्सो २:५

9 मिनु मेकोपुकीमी “गे नेल्ल क्येडा दारशो मीश आल, इ दाक्शो वोंइश मुर दोपा अरु आन क्येडा दाक्शो दुम्मे? मारदे मेको इ दाक्शो वोंइश मुर ठेयब दुम्मे? मारदे आंइ कली मोदेंशो पा अरेनेवे?” देंतेक्म।

10 मिनु १० हजार आन दातेम यो आं दाक्शो मुर नेल्ल क्येडा दारशो नु आ कुल हाक्सीशो बाक्ब। 11 मेको आ पिया क्येख सुन के खोदेंशो बाक्ब। मेको आ चां हिरशो नु खद खोदेंशो क्येर बाक्ब। 12 मेको आ मिक्च खोला आ नेक्था बाक्ब ढुकुर आ मिक्च खोदेंशो बाक्ब। मेको दूधमी मुरशा केप्शो हीरा खोदेंशो बाक्ब। 13 मेको आ चोव्रचो ब्रोवशो रिना पाइब मस्ला खोदेंशो बाक्ब। मेको आ शूंडच ब्रोवशो रिना पाइश्शो मूरे याब्ब लिली फू खोदेंशो बाक्ब। 14 मेको आ गुड हीरा केप्शो सुन के खोदेंशो बाक्ब। मेको आ रां हात्ती आ दाराम नीलो हीरा क्येप्शो खोदेंशो बाक्ब। 15 मेको आ खोइल क्येख सुन के नित्तीक पाइश्शो बुश थाम खोदेंशो बाक्ब। मेको कोव्रशोनु, लेबानोन डा लाइश्शो रवा खोदेंशो पा दारशो बाक्ब। 16 ए यरूसलेम डा



मीश आलपुकी, मेको आ शोव ब्रोवशो लोवमी ब्रीशो बाक्ब। मेको थम दारशो बाक्ब। मेकोन आं दाक्शो वोंइश मुर नु आं वारच बाक्ब।

6 ए नेल्ल क्येडा दारशो मीश आल, इ दाक्शो वोंइश मुर ते लमे? गो गारशा मेको कली माल्थ लय?

2 आं दाक्शो वोंइश मुर आंम फल फुल रू लत। मेको आ ब्रोवशो रिना पाइशो मस्ला रू मेर लत। मेको क्यारश भेडा योवचा कली नु लिली फू खुप्चा कली लत। 3 आं दाक्शो वोंइश मुर आं केन बाक्ब। मिनु गो मेको के बाक्नुड। मेकोमी आ क्यारश भेडा लिली फू आन दातेम योवच। *ठेयब कुम्सो २:१६*

सोलोमन आ नोले डा लोव

4 आं दाक्शो मीश आल, गे तिरचा सहर खोदेशो बाक्नेवे। यरूसलेम सहर खोदेशो रिम्शो तांइसीनेवे। गे छेदर क्युकशो लडाइ पाइब खोदेशो सक्ति पाइशो बाक्नेवे। 5 इ मिक्वीम आं कली मकोवयी। मारदे हना इ मिक्वीम आं कली मार पचा ना मार पचा सेल्ब। इ चां गिलाद डांडा रे पा ब्रुशो क्यारश आन हुल खोदेशो बाक्ब। 6 इ खूइ ऊन प्रेक्शा चिक्शो भेडा आन हुल खोदेशो बाक्नीम। मेको नेल्ल आन के जौले पाठा बाक्ब। नेल्ल मोदेशो बाक्नीम। *ठेयब कुम्सो ४:१-२* 7 इ सुम्तीके आगाम इ चोवचो चेशो दारीम खोदेशो बाक्नीस। *ठेयब कुम्सो ४:३* 8 मिनु ६० जना पिपीम बाक्तेक्म हना यो, ८० जना नोले चाक्शो मीश बाक्तेक्म हना यो, नु शुश मीश आल बाक्तेक्म हना यो, 9 आं मीश आल, आं डुकुर, आं नेल्ल क्येडा दारशो मीश आल, आ ममामी दाक्शो तमी बाक्ब। आ ममामी “थम दारशो मीश आल बाक्ब” देंब। मिनु मीश आलपुकीम मेको कली तशा “ग्येरसीशो मीश आल बाक्ब” देंतेक्म। पिपीम नु नोले चाक्शो मीशपुकीम मेको कली ठेयब सेल्लेक्म। 10 सुनी खोदेशो पा दारशो, तास्ला खोदेशो पा दाप्शो, नां खोदेशो पा छेडछेड देंशो, हिंचा डा लडाइ पाइब खोदेशो सु बाक्बा?

आ मीश आल लशो

11 गो फोरो रवा डा रू मेर दोशो कोच्चा दम्मा, दे कोव्रथ लती। अडगुर बोटमी कोच्चा दम्मा कों, दारीम फू बोइशो बाक्मा कों मबाक्मा, दे कोव्रथ लती। 12 मिनु गो आं तुइक्चा क्येडा डोंइती आं मिम्शोमी आं कली आं दाक्शो मुर आ नेक्था बग्गीम लाइक्ती।

13 शुलामीथ लेशशा पिवो! लेशशा पिवो! लेशशा पिवो। मिनु गो इ कली कोवने चाक्कल। गे मारदे शुलामीथ कली लडाइ पाइब आन डोंइती सिल पपाइशो खोदेशो पा कोव्रस डा कोव्रस बाक्चा दाक्नीनी?

गे नेल्लेम दारशो बाक्नेवे देंशो

7 पिप आ तमी, जुत्ता लिक्शो इ खोइल गिश दारशो बाक्ब। इ क्रातो थाम्पा मार मार सेल्स जोक्बमी सेल्शो खोदेशो बाक्ब। मेको हीरा खोदेशो बाक्ब। 2 इ सपु कुल कुल देंशो बोस खोदेशो बाक्ब। मेकेर ब्वाइशो अडगुर शांबुम ब्रीशो बाक्ब। इ कोव्रज लिली फूपुकीमी हिरशो पुक्शो चेरब खोदेशो बाक्ब। 3 इ दूध किश्श आ जौले पाठा खोदेशो बाक्नीस। *ठेयब कुम्सो ४:३* 4 इ शुर हात्ती आ खूइ के सेल्शो लाइशो खिं खोदेशो बाक्ब। इ मिक्च बाथ-राब्बीम डा लाप्चो आ नेक्था बाक्शो हेशबोन डा दोम्ली खोदेशो बाक्नीस। इ नें दमस्कस सहर गे कोव्रशो लेबानोन डा लाइशो खिं खोदेशो बाक्ब। 5 इ पिया कारमेल डांडा खोदेशो बाक्ब। इ चां पिप आ रड खोदेशो बाक्ब। मोपतीके पिपम इ कली दाक्शो बाक्ब।

6 आं दाक्शो मीश आल, गिश दारशो बाक्नेवे। गे नेल्ल क्येडा दारशो बाक्नेवे। 7 इ रां खजूर रवा खोदेशो बाक्ब। इ दूध अडगुर सिश्शो खोदेशो बाक्ब। 8 मिनु गो “गो खजूर रवा डोंइक्नुड। मिनु मेको आ राशी ग्याइक्नुड” देंती। इ दूध अडगुर सिश्शो खोदेशो नु इ सास स्याउ आ रिना खोदेशो बाक्ब। 9 इ पुक्पु पाइशो ब्रोवशो अडगुर शांबु खोदेशो बाक्ब।

अडगुर शांबु शोव नु खूइ रे ऑखां पा शाइशो खोदेशो बाक्ब। 10 गो आं दाक्शो मीश आल के नड। मेकोमी आं कलीन मिम्शा बाक्ब। 11 आं दाक्शो मुर जाक्कीन। मिनु रू मेर हिरथ लस। मिनु नाक्दो गाउं मेर बास बाक्स। 12 गो सुनी कना अडगुर रू लस। अडगुर कोच्चा दाप्शा फू बोइशो बाक्म कों? मिनु दारीम फू बोइशो बाक्म कों। गो मेकेर इ कली आं दाक्तीक गेनन्नी। 13 आल थिपाइक्ब फलम ब्रोवशो रिना फ्रशो बाक्नीम। नेल्ल खाल डा रिम्शो फल आंइ लाप्चो आ तार बाक्नीम। आं दाक्शो मुर, नक नु सोवशो फल इ कली खेक्शा वोइशो बाक्नुड।

गो आं दाक्शो नु बाक्चा दाक्नुड

8 आं ममामी इ कली दूध तुंइशो आं लोकब नवे हना, इ कली लाडगाम गुमुनु, पुक्पु पड वा। मिनु सुइमी आं कली मरिम्शो मर्दम वा। 2 मिनु गो इ कली आं ममा आ खिं, आं जरमेसीशो कोठाम चाक्गु वा। मेकेर लाइशो ब्रोवशो मार मार सुप्शो दारीम शांबु तूचा गेड वा। मेको आं दारीम रे सेल्शो बाक्ब। *ठेयब कुम्सो ३:४* 3 मेको आ पेरा गुइ आं पिया आगाम बाक्ब। मिनु मेको आ ग्युरा गुइमी आं कली मुप्शो बाक्ब। 4 ए यरूसलेम डा तमीपुकी, गो इन कली, अरेनुड। आंम दाक्चा क्येडा डोंइती दाक्तीक कली मपोक्कीन। *ठेयब कुम्सो २:६-७*

आ गोठला कली दाक्तीक सक्ति

5 आंम दाक्शो मुर नु क्येम्सीशा, गोरशो रागी रे जाक्ब सु बाक्बा? गो स्याउ रवा आ पुंमी इन कली सेंताक्ड। मेकेर इन ममामी इन कली कुरतु। मेकेर इन कली थिचा कली आल थितीक रोइ पाप्तु।

6 आं कली इन थुंमी छाप थोक्शो खोदेशो पा वोतीन। इन गुइमी यो छाप थोक्शो खोदेशो पा वोतीन। मारदे हना दाक्तीके, बेक्पाइक्ब खोदेशो पा सक्ति पाइशो बाक्ब। मेको आ दाक्शो तुरस खोदेशो मटीब नु शुश ब्रशो मी क्येडा यो शुश ब्राइब बाक्ब। *मत्ती २२:३०; रोमी ७:२; उत्पत्ती २:२४; मत्ती १९:५-६; एफिस्सी ५:२८-३३* 7 शुश ब्वाक्कुमी दाक्तीक कली क्याम्ने मचाप्ब। बारशो खोलामी यो मेको कली योल्ने मचाप्ब। सुइ मुरुमी आंम दाक्तीक आ पा डा खिं नु आ शोंप नेल्ल गेप्तु हना, मुरुमी मेको कली शुक्शी पाइनीम।

आ खिं लेशो

8 इं के आइक्च समी का बाक्ब। मेको आ दूध मुल सम्म मबाक्ब। मेको कली ग्युबे पचा कली पुंइथ जाक्तेक्म हना, गो मार पय? 9 मेको गारो खोदेशो बाक्त हना, मेको तारी चांदी के दरवार सेल्य वा। मेको लाप्चो खोदेशो बाक्शो हना, मेको कली लेबानोन डा लाइशो रवा आ फलेकमी सुशा वोइ वा।

10 गो गारो खोदेशो नड। मिनु आ दूध लाइशो खिं खोदेशो बाक्ब। मोपतीके गो मेको कली आ थुं नाइक्पाइक्ब दुम्शो बाक्नुड। 11 सोलोमन के बाल-हामोनमी अडगुर रू का बाक्त। मिनु मेकोम आ रू खाल पाइब मुर आन कली गेवा बाक्त। मिनु मेको बुम्था पाइब नेल्लेमी फल फुल आ पा डा हजार का चांदी के शेकेल थाप्चा माल्बाक्मा बाक्त। *शेकेल का ११.५ ग्राम चांदी के क्येट बाक्ब।* 12 तन्न आं के यो अडगुर रू का बाक्ब। ए सोलोमन, मेको हजार का चांदी के शेकेल इन केन बाक्त। मिनु सहे निक्शी शेकेल चहिं मेको फल फुल खाल पाइब आन के बाक्त।

आं कली ला माल्शा ब्रेत्तो

13 अडगुर रूमी बाक्ब आं वारचपुकीम इ सेंदा नेंचा दाक्नीम। इ सेंदा आं कली नेंपाइय्पी। 14 आं दाक्शो मुर गे रीब पा मस्ला बाक्शो डांडा डा किश्श खोदेशो नु ठिटा रोकश खोदेशो दुमो।

## यसैया

एको किताब यसैयामी ब्रेक्शो बाक्त। का निक्शी मुरुम चहिं रे अर्को मुर काम ब्रेक्शो बाक्त देनीम। मारदे हना मस्सीह आ पर्वम ब्रेक्शो लोव बाक्ब। तन्न परमप्रभु यावे आ सोक्तीम मेको लोव पपाइक्ब। मेको ब्रेक्ब यसैया आंमा यो दुम्ने चाप्ब। यसैया पिप उसीजाह ७४०-७३९ बि. सी. परमप्रभु यावे आ लोव पाइब दुम्शा ब्रेक्शो बाक्त। आ नोले डा ब्रेक्स पिप सन्हेरीब आ लडाइ पचा आ पर्वम बाक्ब। मेको ७०१ बि. सी.म बाक्शो बाक्त। यसैया ४० बर्स परमप्रभु यावे आ लोव पाइब बाक्शो बाक्त। मेकोमी पिप उज्जीयाह ७६७-७४०/३९ बि. सी., पिप योथाम ७४०/७३९-७३२/३१ बि. सी., पिप आहास ७३२/३१-७१६/१५ बि. सी. नु पिप हिज्कीयाह ७१६/१५-६८७/८६ बि. सी. आन सासन पची ना गेय पशो बाक्त।

यसैया आ लोव:

१. मेना बाक्शो मुर आन कली बाक्त।
२. मस्सीह, येसु ख्रीस्त आ पर्वम बाक्त।
३. रागी नेल्ल क्येडा नोले मार दुम्बा मेको आ पर्वम लोव।

### डोंइती डा लोव

१ परमप्रभुमी आमोज आ तौ यसैया कली कोंइशो लोव एको बाक्ब। मार लोव कोंइशो बाक्त देंशा हना, यहूदा नु यरूसलेम आस पर्वम तशो कोंइताक्ब। मेना पिप उज्जीयाह, योथाम, आहाज नु हिज्कीयाहमी सासन पशो बाक्तेक्म। *इतिहास २६:२२*

### यहूदाम परमप्रभु आ अरेशो मटिशो

२ सरीड नु रागीम बाक्बपुकी नोफा दाइश्शा नेनीन। मारदे हना परमप्रभु यावेमी “गो आं आल आन कली थुल्शा, कोल्पाइक्तामी। मेकोपुकीम चहिं आं कली मटीयीमी। *ब्यवस्था ३२:१; ब्यवस्था ३२:५-६* ३ ब्यफोमी आ होवप कली तुइक्ब। गधामी आ होवप आ शंगु तुइक्ब। तन्न इस्राएल डा मुर मतुइक्ब बाक्नीम। आं मुर मरुप्ब बाक्नीम।

४ आबी, पापम ब्रीशो रागी, मुरपुकी मरिम्शो पतीकेम ब्रीशो बाक्नीम। मेको आन आल काइ मरिम्शो पाइब दुम्तेक्म। मेकोपुकी शोर गाक्शो बाक्नीम। परमप्रभु यावे कली प्रोंइशो बाक्नीम। इस्राएली आन का ला बाक्शो परमप्रभु आ पर्वम ‘ममाल्नीकी’ देंशो बाक्नीम। मेकोपुकी नोले शोंइसीशो बाक्नीम।

५ मारदे गो इन कली लेंशा, तुप्चा माल्डा? मारदे गे डोंइती क्येडा मटीब दुम्नी। इन पिपा नेल्ल रोइ पशो खोदेंशो बाक्ब। गे थशो खोदेंशो बाक्नीनी। *येरमीया २:३०* ६ पिपा रे खोइल सम्म तेइ सेस मबाक्ब। राक्शो गार नु तुप्शा हुश यिशो गार ला बाक्नीम। मेको नेंने मपुक्शो, मफ्रेंशो नु तेल मख्रेक्शो बाक्नीम। *ब्यवस्था २८:३५*

७ इन रागी गोरशो रागी दुम्ब। इन डोंइती इन सहर मीम क्रोइक्तेक्म। इन डोंइती इन रू डा मारेइ मारेइ अर्को रागी डा मुरपुकीम नेक्तेक्म। मिनु मेकोपुकीम इन रागी लडाइम खोदेंशो पा ग्रांग्ये माग्ये सेल्तेक्म। ८ सियोन आ तमी, यरूसलेम, चहिं अङ्गुर रू खाल पतीक खिं, वोबीस रू खाल पतीक गोठ नु एर ओंथ रे जोरी सन्नुम पुम्चा पुंइसीशो सहर खोदेंशो बाक्ब” दे लोव पात्तु। ९ मुर नेल्ल आन परमप्रभु यावेमी “का निक्शी मुर महेंशो हना, गेपुकी सोदोम नु गोमोररा खोदेंशो दुम्नी वा” देंत। *उत्पत्ती १९:२४-२५; रोमी ९:२९*

१० सोदोम डा सासन पाइबपुकी, परमप्रभु यावे आ लोव नेनीन। गोमोररा डा मुरपुकी आंइ परमप्रभु आ शेंशो लोव नेनीन। ११ परमप्रभु यावेमी “इन शुश चढेशो आं कली शोर गाक्शो बाक्ब। गो चोशा चढेशो सांड नु थुल्शो बस्तु भाव आन बोसोमी रूती। गो ब्यफ, पाठा नु क्यारश आन हुश

मदाक्नुड। *भजन संग्रह ४०:७-९; हितोपदेस १५:८; येरमीया ६:२०; आमोस ५:२२*

१२ गे आं डोंइती जाक्शा, मोदेंशो चढेचा, दे सुम देंम? आं लाडगा मथेक्तीन। १३ इन चढेतीके मचाक्कीन। इन धूप चढेशो तशा, गो ग्रांग्रा दीती। औसी नु नाइक्तीक नाक्ती डा गुम्तीके डा मरिम्शो पाइब आन हुल तचा मदाक्नुड। *गन्ती १०:१०* १४ इन औसी नु अरु चाडपुकी काइ मदाक्नुड। मेको आं थुम ग्रांग्रा दिप्ब। मेको आं कली श्येत बाक्नीम। गो फाल्ने मचाप्नुड। १५ इन गुइ क्युक्शा, गो नु लोव पनीनु, आं कुल खुइक्नुड। गेपुकीम शुश पुंइतीनी हना यो, गो मनेनुड। मारदे हना इन गुइम हुश खाक्श पशो बाक्ब। *हितोपदेस १:२८; हितोपदेस १५:२९; यूहन्ना ९:३१* १६ गेपुकी चिक्सीन। ग्रांग्रा मदिशो दुमीन। मिनु आं डोंइती इन नाक्ती किंत किंत डा मरिम्शो पतीके प्रोनीन। १७ रिम्शो पचा शेंसीन। ठीक निसाफ पतीक मालीन। दिप्चा पुंइसीशो आन कली वारच पने। रोम रोइक्च आन कली वारच पने। वोंइश बेक्शो मीश मुर आन कली वारच पतीन” देंत। *येरमीया ७:५-६*

१८ मिनु परमप्रभु यावेमी “जाक्कीन, गोपुकी बुक्शा, लोवसी पय। इन पाप हुश खोदेंशो लल बाक्त हना यो, फुं खोदेंशो बुश दुम्ब। शुश लल बाक्त हना यो, मेको ऊन खोदेंशो बुश दुम्ब। *यसैया ४४:२२; भजन संग्रह ५१:९* १९ आं लोव नेंशा टीतीनी हना, एको रागी डा ब्रोवब्रोवशो थोवक जचा ताइनीनी। *लेवी २५:१८-१९* २० तन्न आं लोव मनेनीनी नु मटीतीनी हना, तरवारम क्योरचा पुंइसीनीनी” दे परमप्रभु यावेमी देंत। *लेवी २६:२५*

### खतम दुम्शो सहर

२१ परमप्रभु यावेमी “आं थमा सुइश्शो सहर दोपा तेल्लेम दुम्मे? ठीक निसाफ नु ठीक पतीके मेको नु बाक्त। मुल मेको मुर साइक्ब मुरुम ब्रीतेक्म। २२ इ चांदी पुलु खोदेंशो दुम्त। इ ब्रोवशो अङ्गुर शांबुम ब्वाक्कु ब्वाइक्ताक्म। *इजीकीएल २२:१८-२२* २३ इ सासन पाइबपुकी मटीब नु खुइ आन वारच दुम्शा, घूस जशा, क्येट ताक्चा दाक्नीम। मेकोपुकीम रोम रोइक्च आन कली ठीक निसाफ मपाइनीम। वोंइश बेक्शो मीश मुर आन लोव मनेनीम” देंत।

२४ मोपतीके परमप्रभु, मुर नेल्ल आन परमप्रभु यावे, इस्राएली आन सक्ति पाइश्शो परमप्रभु यावेमी “गो आं जोरी सन्नु आन तारी आं गाइश्शो मोइश्शा, क्येक्क लेल्नुडमी। २५ गो इन पर्वम आं गुइ क्युक्नुड। गो इन मरिम्शो पतीके पुलु खोदेंशो पा फिक्शा, इन ग्रांग्रा दिशो नेल्ले गुंइनुड। *भजन संग्रह ११९:१९* २६ मिनु गो इ निसाफ पाइब, सासन पाइब नु अर्ती गेब आन कली डोंइती डा खोदेंशो सेल्नुड। नोले इ कली ‘ठीक पाइब नु परमप्रभु कली मप्रोंइब सहर’ दे नें वोइक्नीम। *जकरिया ८:३*

27 मिनु सियोन ठीक निसाफ पतीकेमी पाप रे प्रॉइचा पुंडसीब। सहरम बाक्ब ठीक पतीकेमी पाप रे प्रॉइचा पुंडसीनीम। यसैया ४६:३३ 28 तन्न परमप्रभु यावे आ देशो लोत्र मटीब, मेको कली प्रॉइबपुकी कालेमीन खतम दुम्नीम। परमप्रभु यावे कली प्रॉइबपुकी क्याम्चा पुंडसीनीम। 29 गे रवा आगाम पूजा पशो आ पबर्म मुने दोक्नीनी। इन दाक्शा योव्रशो रवा रू आ पबर्म शुश मुने दोक्नीनी। यसैया ५७:५; यसैया ६५:३ 30 गे सोव्रशो रवा डा सफा पाइशो नु ब्वाक्कु मतशो रू खोदेशो दुम्नीनी। 31 बोल्यो मुर झुलो खोदेशो दुम्ब। मेको आ गेय मी आ झिल्का खोदेशो दुम्ब। मेको निम्फा कालेमीन ब्रसानु, सुइम मकाप्नीम” देंत।

परमप्रभु आ नोले डा राज्य

2 आमोज आ तौ यसैयामी यहूदा नेल्ल नु यरूसलेम आ पबर्म कौइशो नु तशो लोत्र एको बाक्ब। 2 नोले डा नाक्ती परमप्रभु यावे आ खिं सेल्शो डांडा, डांडा नेल्ल आन क्येडा लाइशो दुम्ब। पहाड नेल्ल आन क्येडा यो लाइशो दुम्ब। मिनु रागी रागी डा मुर नेल्ले मेको डांडाम जाक्नीम। मीका ४:१-३; यसैया १९:२३; येरमीया ३:१७ 3 रागी रागी डा शुश मुर जाक्शा “जाक्कीन, गोपुकी परमप्रभु यावे आ डांडा डोइशा, याक्ब आ परमप्रभु आ खिं लय। मेकोमी इं कली आ लां शेंब। मिनु गोपुकी मेको आ लांम गाक्नय। मारदे हना परमप्रभु यावे आ शेंशो सियोन डांडा रे नु आ लोत्र यरूसलेम रे नेंसीब” देंनीम। ब्यवस्था ४:६; यूहन्ना ४:२२ 4 मिनु मेकोमी रागी रागी डा नु जात जात डा मुर आन कली निसाफ पाइब। मिनु मेकेर डा मुर आन कली अरेब। मेकोपुकीमी आन तरवार चेम्शा, फाली सेल्नीम। आन तूतीक चहिं गुये सेल्नीम। रागी का डा मुर अर्को रागी डा मुर नु लडाइ मपाइनीम। लडाइ पचा मर्शेसीनीम। यसैया ९:४

मूर्ति पूजा पाइबपुकी

5 याक्ब आ खिं डा मुर जाक्कीन। गोपुकी परमप्रभु यावे आ छेडछेडम गाक्नय। 6 याक्ब आ खिं डा मुर, गे इन डोइती डा लां प्रॉइतीनी। गे इन थुं पूर्ब डा मुर आन पतीक गेयम ब्रीशो बाक्ब। गे पलिस्ती खोदेशो पा लिंक्यु कोव्रब दुम्तीनी। अर्को जात डा मुर नु खाल्साक्नी। 7 मेको आन रागी सुन चांदीम ब्रीशो बाक्ब। मेको आन शॉप हिक्ने मचाप्चा डा बाक्ब। मेको आन रागीमी शुश शारा बाक्नीम। मेको आन बग्गीपुकी हिक्ने मचाप्चा डा बाक्नीम। मीका ५:९ 8 मेको आन रागी मूर्तिम ब्रीशो बाक्ब। मेकोपुकी आंमा सेल्शो मूर्ति आ डोइती बाप्नीम। आंमा गुइमी सेल्शो मूर्ति आ डोइती पोक्च थेक्नीम। 9 मोपतीके मुरपुकी ब्रेम्शो सेल्चा पुंडसीनीम। मुर नेल्ल आइक्च दुम्नीम। गे मेको आन कली माफ मगेन। 10 परमप्रभु यावे आ हिंच कौइतीक नु आ छेडछेड रे पुक्खी आगाम खूइसीन। फुरक आगाम खूइसीन। 11 मुर नेल्ल आन ठेयब लेशो आइक्च सेल्चा पुंडसीनीम। बोरशो मुर नेल्ल ब्रेम्शो सेल्चा पुंडसीनीम। मेको नाक्ती परमप्रभु यावे ला ठेयब दुम्ब। यसैया २:११

ठेयब नेल्ल आइक्च सेल्शो

12 मिनु मुर नेल्ल आन परमप्रभु यावेमी काबु नाक्ती ठेयब लेशो, बोरशो मुर नु “गो ठेयब नड” देंब आन कली आइक्च सेल्ब। येरमीया ४६:१०; इजीकीएल ३०:३; योएल १:१५; आमोस ५:१८; सेफन्याह १:१४ 13 लेबानोन डा लाइशो रवापुकी, बाशान डा बोल्यो रवापुकी, 14 लाइशो डांडा नेल्ल नु ठेयब पहाड, 15 लाइशो खिं नु बोल्यो गारो, 16 टारसीस डा जहाज नेल्ल, रिम्शो नु शुश क्येट लाइब सेल्शो थोव्रकपुकी 17 नु मुर नेल्ल आन ठेयब लेशो आइक्च सेल्चा पुंडसीनीम। बोरशो मुर नेल्ल ब्रेम्शो सेल्चा पुंडसीनीम। मेको नाक्ती परमप्रभु यावे ला ठेयब दुम्ब। यसैया २:१ 18 मेना मूर्ति नेल्ल जाम्नीम।

19 परमप्रभु यावेमी शुश रागी डा मुर आन कली हिंच कौइब नु आ छेडछेड डा ठेयब सक्ति जाक्मेनु, गे पुक्खीम नु खपी आगा डा ढोडोडगाम ओव्रशा खूइसीन। 20 मेको नाक्ती मुरपुकीम आन पूजा पचा कली सुन चांदी के सेल्शो मूर्ति थाक्नु नु पकातिक्ती आन डोइती ताइक्नीम। यसैया

३१:७ 21 परमप्रभु यावे रागी डा मुर आन कली हिंच कौइचा कली जाक्मेनु, मुरपुकी आ हिंच कौइतीक छेडछेड डा ठेयब सक्ति मतचा डा पा पुक्खी नु सेरथे फुल्लु डा कापम खूइसीनीम। २थिस्सलोनिकी १:९-१० 22 मोपतीके नेंम सास मुइक्चा पुंडसीशो बेक्शा लाइब मुर रे डोन लने। मेको मारेइ मनम।

यरूसलेम नु यहूदा कली निसाफ

3 मुल परमप्रभु, मुर नेल्ल आन परमप्रभु यावेमी यहूदा नेल्ल नु यरूसलेम रे मारेइ मारेइ लाइक्ब। मारेइ मारेइ जचा थोव्रक नु ब्वाक्कु नेल्ल यो लाइक्ब। लेवी २६:२६; इजीकीएल ४:१६ 2 मिनु बोल्यो मुर, लडाइ पाइब मुर, निसाफ पाइब, परमप्रभु यावे आ लोत्र पाइब, लिंक्यु कोव्रब, खाल्पापुकी, 3 मिनु ५० जना आन कप्तान, मान पाइक्चा पुंडसीब, सल्ला गेब, जोक्ब तुइक्ब, मन्तर तन्तर पाइब नु नेल्ल क्येडा जोक्ब नेल्ल सहर रे योल्ब। 4 मिनु गो वोंइश आल आन कली मेको आन ठेयब मुर सेल्नुड। मिनु आइक्च आलमी मेको आन कली हुकुम पाइनीम। उपदेसक १०:६ 5 मिनु मुरपुकी दिच्चा पुंडसीनीम। दिम्मुइनीम। आन नेक्था डा मुर आन कली दिप्नीम। आलपुकीमी खाल्पी खाल्पा आन कली मान मपाइनीम। महिक्सीशो मुरपुकीमी ठेयब मुर आन कली मान मपाइनीम। 6 मिनु मुर कामी आ खिं डा मुर का कली ग्याइशा “इ के फेक्तीक वा बाक्ब। मोपतीके आंइ हुकुम पाइब दुमो। मिनु मेको ब्रेम्शो खिं नेल्ल इ अधिकारम बाक्नीम” देंब। 7 तन्न मेको मुरुमी “गो वारच पाइब मनड। आं खिंमी जचा फेक्चा थोव्रक मबाक्ब। गे आं कली मुर आन कली हुकुम पाइब मसेल्थीनी” देंब। 8 मिनु यरूसलेम दाइल पाइसीशा गोल्त। यहूदा खतम दुम्त। मारदे हना मेकेर डा मुर आन लोत्र नु आन पतीके परमप्रभु यावे कली काइ मगारचा डा बाक्त। परमप्रभु आंमा मेको आन दातेमी बाक्शा यो, मेकोपुकीम महिंथु मरिम्शो पना पन बाक्नीम।

परमप्रभुमी निसाफ पशो

9 मेको आन कुलमी आन मरिम्शो पशो तुइक्पाइक्ब। सोदोम डा मुर खोदेशो पा मेकोपुकीम आन पाप मखूइक्थु शोव्रनीम। आबी, मेकोपुकीमी आंम कली ग्याइशा लाइक्चा पुंडसीब सेल्सीनीम। उत्पत्ती १९:५-९ 10 दोस मताइब मुर आन कली रिम्शो दुम्ब। मारदे हना मेकोमी आ गेय पशो रे जाइब। 11 आबी, दोस ताइब कली हिंचा डा दुम्ब। मारदे हना दोपा मरिम्शो पवा, मोपा आ मरिम्शो पशो ताइब। 12 मिनु वोंइश आलपुकीमी आं मुर आन कली दिप्नीम। मीश मुरपुकीम मेको आन कली हुकुम पाइनीम। आं मुरपुकी, इन ठेयब मुरपुकीम इन कली दूली लां खोइक्पाइशा, हेंथे गाक्पाइक्नीम।

13 परमप्रभु यावेमी निसाफ पचा चिक्शो बाक्ब। मेकोमी मुर आन कली निसाफ पाइब। 14 मिनु परमप्रभु यावेमी आ मुर आन दाते डा खाल्पापुकी नु हुकुम पाइब आन कली निसाफ पाइब। मेकोमी “गे अडगुर रू नेल्ल आंम के सेल्तीनी। प्रुडग आन के रोइशो मार मार इन खिंम बाक्नीम। यसैया ५:७ 15 दोपा गेपुकीमी आं मुर आन कली मो पने चाप्नी? प्रुडग आन कली चिनु प्रुडग सेल्तीनी” दे परमप्रभु, मुर नेल्ल आन परमप्रभु यावेमी देंत।

मीश मुर आन कली दोस गेशो

16 मिनु परमप्रभु यावेमी “मारदे हना सियोन डा तमीपुकी ठेयब लेशो बाक्नीम। मेको आन पिया पोक्शा, आन मिक्च हिरशा, कल्ली लिक्शा, ग्रीपाइशा गाक्नीम। १तिमोथी २:९ 17 मोपतीके गो सियोन डा तमी आन पिया श्येत्थ सेल्शा, आन खूइशो कौइशा मुने तोक्नुडमी” दे परमप्रभुम देंत।

18 मेना गो मेको आन खोइली डा पांइतीके, मेको आन सुन फू, सुन के गहना, 19 आन नोफा सुन, चुरा, कुल सुम्तीके, 20 कुप्नी, खोइलीम पांइतीके, काम्बरी, ब्रोव्रशो रिना पाइशो खेक्तीके नु आन जन्तर, 21 छाप थोक्तीक औंठी नु मुन्दी, 22 आन शुश क्येट लाइब वा, आ तार फेक्तीक वा, सुम्तीक वा, थैली, 23 पाल्लो वा, रिम्शो सुती वा, आन पियाम गुप्तीक वा नु आन सुम्तीतीक वा नेल्ल लाइक्नुड। 24 मिनु “नोले ब्रोव्रशो रिना पाइशो,

गांग्रा दिशो रिना पाइश्शो दुम्ब। काम्बरी किप्तीकेमी, डोरी किच्वा माल्नीम। मेको आन रिम्शो सेल्शो चां, श्येत्थ पिया दुम्नीम। आन दारशो शुश क्येट लाइब फेक्तीकेमी, रां सुम्चा कली अरन्डी फेक्वा माल्नीम। मेको आन दारस नेल्ले लशा, मीम ग्रीइश्शो खोदेंशो दुम्शा मुने दोक्नीम। <sup>25</sup> इन वोंइश तरवारम साइक्वा पुंइसीनीम। इन लडाइ पाइबपुकी लडाइम बेक्नीम। <sup>26</sup> सहर डा लाप्चो सुर्ता पा रोंका पाइनीम। सहर श्येत्थ दुम्शा, खपीम निश्शो मीश मुर खोदेंशो दुम्ब” दे परमप्रभु यावेमी देंत।

4 मेना ७ जना मीश मुरपुकीमी वोंइश मुर का कली ग्याइश्शा “गो आंइ जचा थोत्रक जाइनीकी। आंइ वा फेक्नीकी। आंइ कली इन नें गेशा, आंइ मुने साम्शा, आल थिपाइक्की” देंनीम।

यरूसलेम लेंशा रिम्शो दुम्शो

2 मेको नाक्ती परमप्रभु यावे आ राशी दारशो नु थम रिम्शो बाक्ब। मिनु रागी आ दारसम ब्रोंइशा लीशो इस्राएली आन कली आन थुं बारपाइश्शा, ग्येरपाइक्ब दुम्ब। *येरमीया ३३:१५* <sup>3</sup> मिनु सु सु सियोन नु यरूसलेमम लीशो बाक्मा, मेकोपुकी “परमप्रभु के बाक्नीम” दे माइक्नीम। मेको आन नें यरूसलेमम ब्रोंइचा कली ब्रेक्सीशो बाक्नीम। *यसैया ६:१३; प्रस्थान ३२:३२; भजन संग्रह ६९:२९; मलाकी ३:१६* <sup>4</sup> परमप्रभु यावेमी सियोन डा तमी नु यरूसलेम डा मुर आन पाप निसाफ पतीक नु क्याम्तीकेमी क्याम्ताक्व हना, <sup>5</sup> मेना परमप्रभु यावेमी सियोन डांडाम आ बाक्तीके खिं नु आ मुर ग्युत्तीक सेल्ब। मेकेर नाक्ती गोस्स नु कुन वोंइश्शा, नाक्दो मी ब्रशो छेडछेड वोंइक्ब। मिनु मेको छेडछेडम रागी नेल्ल कली सुम्ब। *प्रस्थान १३:२१* <sup>6</sup> मेको सुम्तीकेम नाक्ती नांम मनाप्पाइक्तीके, फश गिवार पवानु नु रेउ यिमेनु, फाम्सीतीके दुम्ब।

अडगुर रू डा कुम्सो

5 गो आं दाक्शो कली कुम्सो का पाइनुड। आ अडगुर रू आ पर्वम कुम्सो का पाइनुड। आ दाक्शो के अडगुर रू का बाक्ब। आ अडगुर रू शुश ग्रेल्ब डांडाम बाक्ब। *यसैया ३:१४; येरमीया २:२१; मर्कुस १२:१-९* <sup>2</sup> मिनु मेकोमी रू दोशा, फुल्लु गुप्शा ताइक्ताक्व। मिनु नेल्ल क्येडा रिम्शो अडगुर बोट ख्मुनु। मेकोमी रू आ दातेमी खाल पतीक खिं का सेल्लु। मिनु मेकेर कोल का यो सेल्लु। मिनु अडगुर सिप्ब दे आस पापुतु। तन्न ब्वाकी डा अडगुर कका सिल्लेक्म।

<sup>3</sup> यरूसलेमम बाक्ब नु यहूदा डा मुरपुकी, गो नु आं अडगुर रू आंस दातेमी निसाफ पने। <sup>4</sup> आं अडगुर रू कली गो नेल्ल पाता। गो मार मपडा डा? गो अडगुर सिप्ब, दे आस पा बाक्ती। तन्न मारदे ब्वाकी डा अडगुर कका सिम्मे?

<sup>5</sup> मिनु मुल गो आं अडगुर रू कली मार पाइनुडा, इन कली देंनुड। आ थरपु नेल्ल गुंइनुड। मिनु मार मार ओवनीम। आ गारो नेल्ल प्रेशा ताइक्नुड। मिनु दिम्शा ताइश्शा पाइनीम। <sup>6</sup> गो मेको कली खतम सेल्लुनुड। मेको कली ममुंइनुड, मरोक्नुड। मिनु चू नु चोंक वाशा, सुम्नीम। गो गोस्स कली “रेउ मयिपतो” दे माइक्नुड।

<sup>7</sup> मारदे हना मुर नेल्ल आन परमप्रभु यावे आ दाक्शो अडगुर रू इस्राएल आ खिं डा मुर नु यहूदा डा मुरपुकी बाक्नीम। मिनु मेकोम ठीक निसाफ पतीके रिम्ताक्व। तन्न दूली निसाफ पाम्तेक्म। ठीक पतीके रिम्ताक्व, तन्न मरिम्शो पतीके ला दुम्त।

मुर आन मरिम्शो पशो

8 आबी, गे शुश खिं नु रू ग्याप्ब। नोले सुइ मुर इ नेक्वा मबाक्नीम। मारदे हना रू नु खिं नेल्ल इ के बाक्नीम। *ब्यवस्था ५:२१* <sup>9</sup> मुर नेल्ल आन परमप्रभु यावेमी “थमा पा इन खिं नेल्ल ब्रेल्नीम। मेको ब्रेशो खिं दारशो नु ठेयब बाक्तेक्म हना यो, मुर मबाक्नीम। <sup>10</sup> मिनु ५ बिगा अडगुर रूमी बाथ का अडगुर रस गूब। मिनु होमेर का वांचेरम एफाह का अन्न गूब” देंत। *बाथ का २२ लिटर बाक्ब। होमेर का २२० लिटर बाक्ब। एफाह का २२ लिटर पुक्तीक का बाक्ब।*

11 आबी, गे राकसी तूचा कली सुनी कना बोक्बपुकी, नाक्दो सम्म शांबु तूना तून दुक्शा बाक्नीनी। <sup>12</sup> बीना, तार पाइश्शो ठेयब ताप्तीके, खैजडी नु बांसुरी नेंशा, शांबु दुक्नीनी। तन्न परमप्रभु यावे आ पशो प्रेंशा ममिम्नीनी। आ गुइ डा गेय मताइनीनी। *आमोस ६:५-६; भजन संग्रह ४४:२* <sup>13</sup> मोपतीके आं मुर मारेइ मतुइक्थु आन रागी रे ग्याइश्शा लाइक्वा पुंइसीनीम। मेको आन ठेयब मुरपुकी शोत्रलुम बेक्नीम। आन हुल शुश ब्वाक्कु तूतु दाक्नीम।

<sup>14</sup> बेक्शो मुर आन बाक्तीकेम मेको आन कली दाक्वा कली आ शोत्र पाक्शो बाक्ब। मिनु यरूसलेम डा ठेयब मुर नेल्ल नु मेकेर रेयके पा बाक्ब नेल्ल नरक आ शोत्रम ओवनीम। <sup>15</sup> मुरपुकी बाप्शा, ब्रेम्शो दुम्नीम। ठेयब लेशो मुर आइक्व सेल्वा पुंइसीनीम। <sup>16</sup> तन्न मुर नेल्ल आन परमप्रभु यावे ठीक निसाफ पतीकेम ठेयब बाक्ब। मिनु आ का ला बाक्शो परमप्रभुम आ ठीक पतीके कोंइब। *यसैया २:११, १७* <sup>17</sup> मिनु पाठापुकी आंम रागीम खोदेंशो पा जोइनीम। अर्को रागी डा मुरपुकीमी शोंप नु लीशो मारेइ मारेइ जाइनीम।

18 आबी, गे मरिम्शो पतीके कली जोल के डोरीम नु पाप कली ठेयब डोरीम पाइश्शा, इन नोले कीनीनी। <sup>19</sup> गेपुकीमी “मेकोम आ गेय रीब पा पवल। मिनु गो ताइनय। आंइ तचा डा पा इस्राएली आन का ला बाक्शो परमप्रभु आ पचशो दुम्ल” देंनीनी। *येरमीया १७:१५; २पत्रुस ३:४* <sup>20</sup> आबी, मरिम्शो कली रिम्शो नु रिम्शो कली मरिम्शो देंबपुकी, छिडछिड कली छेडछेड नु छेडछेड कली छिडछिड देंबपुकी नु कशो कली जिज नु जिज कली कशो देंबपुकी श्येत जाइब बाक्नीनी। <sup>21</sup> आबी “गो जोक्ब तुइक्ब नु निप्स पाइश्शो नड” देंबपुकी श्येत जाइनीनी। *हितोपदेस ३:७ रोमी १२:१६* <sup>22</sup> गेपुकी शांबु तूचा कली बोल्यो दुम्बु पाइनीनी। राकसी ब्वाइक्स जोक्ब बाक्नीनी। <sup>23</sup> गेपुकीम घूस जशा, ठीक मपाइब कली “ठीक पाइब बाक्ब” नु ठीक पाइब कली “ठीक मपाइब बाक्ब” देंनीनी। *प्रस्थान २३:८*

<sup>24</sup> मोपतीके दोपा मीम ठुटा नु सोवशो घांस नेक्वा, मोपा मेको आन शाक्श राक्ब। मिनु आन फू फुरक खोदेंशो पा बेरशा लाइब। मारदे हना मेकोपुकीमी मुर नेल्ल आन परमप्रभु यावे आ लोव्र मटीम। मिनु इस्राएली आन का ला बाक्शो परमप्रभु आ लोव्र आ पर्वम शुक्शी पाम्तेक्म।

<sup>25</sup> मोपतीके परमप्रभु यावे आ मुर आन पर्वम गाइक्ताक्व। मिनु आ गुइ क्युक्शा, मेको आन कली तुपुतु। मिनु डांडापुकी खिनु कुशा हिम्साक्म। शुश मुर आन बेक्शो रां लांमी ताइश्शो खोदेंशो दुम्तेक्म। मोपा आ गाइक्वा मबेक्थु, मुल सम्म आ गुइ क्युक्स डा क्युक्स बाक्ब। *यसैया ९:१; यसैया १६:२०; यसैया १०:४*

<sup>26</sup> मेकोमी छेदर क्युक्शा डोन रागी डा मुर आन कली ब्रेप्ब। मिनु रागी आ सुर डा मुर आन कली लाप पा ब्रेप्ब। मिनु मेकोपुकी रीब पा जाक्नीम। <sup>27</sup> मिनु मेको आन दातेमी सुइ मदाइनीम। दाइल मपांइसीनीम। मगोल्नीम। मिनु मइप्नीम। मेको आन किप्शुर मब्रुइक्ब, आन जुता डा डोरी यो मब्रोंइक्नीम। <sup>28</sup> मेको आन ब्रा हेश्शो बाक्नीम। आन लिब्रा आप्चा कली खुक्शो बाक्नीम। आन शारा मी आ झिल्का खोदेंशो बाक्नीम। आन बगी आन गुगील फश गिवार खोदेंशो बाक्नीम। <sup>29</sup> मेको आन रेयके गुप्स आन ग्रीशो खोदेंशो बाक्ब। मेको गुप्स आ चाइक्ब खोदेंशो पा डरर डरर पाइनीम। मेको आन सिखार कली सुइम प्रॉइने मचाप्नीम। <sup>30</sup> मेको नाक्ती समुन्द्र डा ब्वाक्कु ग्रीशो खोदेंशो पा, इस्राएल डा मुर आन तारी रेयके पाइनीम। सुइम मेकेर कोव्रतेक्म हना, छिडछिड नु श्येत ला ताइनीम। गोस्सुमी छेडछेड कली सुम्ब।

परमप्रभुमी यसैया कली ब्रेशो

6 मिनु पिप उज्जीयाह बेक्शो बर्सम, गो परमप्रभु यावे कली इर डा ठेयब निक्तीकेमी निश्शो ताता। आ वा आ सुरमी आ खिं नेल्ल ब्रीशो बाक्त। *२इतिहास २६:२२* <sup>2</sup> मेको आ इर गे स्वर्ग डा गेय पाइब सेराफ बाक्शो बाक्तेक्म। मेको आन के ६, ६ ओटा फ्रां बाक्तेक्म। मिनु फ्रां निक्शीमी आन कुल सुम्शो बाक्तेक्म। फ्रां निक्शीम आन खोइली सुम्शो बाक्तेक्म, फ्रां निक्शीमी बेरबाक्तेक्म। *१राजा २२:१९* <sup>3</sup> मिनु सेराफ कामी

अर्को सेराफ कली “मुर नेल्ल आन परमप्रभु यावे का ला ठेयब सक्ति पाइश्शो बाक्ब। रागी नेल्ले आ छेडछेडम ब्रीशो बाक्ब” दैत। प्रकाश ४:८ 4 मेको आन ब्वाक्शो रेयकेमी परमप्रभु यावे आ खिं डा जग हिम्सीशा, कुनम ब्रीत। 5 मिनु गो “आबी, मुल बेक्ब दुम्ती। मारदे हना गो मरिश्शो लोत्र पाइब बाक्ती। मिनु मरिश्शो लोत्र पाइब आन दातेमी बाक्शो बाक्नुड। मो हना यो गो मुर नेल्ल आन परमप्रभु यावे, पिप कली ताता” दैती। प्रस्थान ३३:२०

6 मिनु सेराफ का थनारोम चढेतीक डा मी गुप्शा, आं नेक्था जाक्त। 7 मिनु मेकोमी आं शोत्र मीम थिपाइश्शा “मुल एको मीम इ शोत्र थिप्टु, इ दोस ततीक लोत्र नु इ पाप क्याम्साक्व” दैत। 8 मिनु परमप्रभु यावेमी “गो सु कली सोइक्नुडा? आंइ पर्वम सु लाइबा?” दे लोत्र पशो नैता। मिनु “गो बाक्ती। आं कली सोइक्तीनी” दैती। 9 मिनु आं कली “लावो। मेको मुर आन कली ‘नोफा दाइश्शा नैशा यो, मरुष्व दुमीन। कोवशा यो, मतुइक्ब दुमीन’ देनो। मत्ती १३:१०-१५; यूहन्ना १२:४०; प्रेरित २८:२६-२७ 10 मेको आन थुं खकटा सेलो। आन नोफा मनैब नु आन मिक्व मताइब सेलो। मोदेशो दुम्शा, मेको आन मिक्व मताइब नु नोफा मनैब दुम्नीम। मोदेशो मदुम्त हना, मेको आं गे लेत्नीम। मिनु गो मेको आन कली सापाइक्वा माल्नुड” दैत। ब्यवस्था २९:३; रोमी ११:८ 11 मिनु गो “परमप्रभु, गेना सम्म मो पचा माल्नुडा?” दैती। मिनु मेकोमी “सहर ब्रेश्शा मुर मबाक्तीके मदुम सम्म, खिं नेल्ल श्येत्थ नु रागी नेल्ल मुर मबाक्शो मदुम सम्म मोदेशो पावो। 12 गो मुर आन कली डोन मखेरुमी सम्म नु सहर शुश प्रोइशो मदुम सम्म मो पचा माल्नुड। 13 मिनु १० भागम भाग का मुर लीतेक्म हना, मेकोपुकी यो चोचा पुंडसीनीम। ठेयब नु बोल्यो रवा तिम्शा हना यो, आन ठुटा लीब। मेको लीशो ठुटा आं मुर, इस्राएल आ वांचेर बाक्नीम” दैत। आमोस ५:३; यसैया ७:३; यसैया १०:२०-२१

यसैयाम आहाज आ थुं बारपाइश्शो

7 आहाज यहूदा डा पिप बाक्त। मेको योथाम आ तौ नु उज्जीयाह आ चच बाक्त। आहाज आ सासन पची ना अराम डा पिप रेसीन नु इस्राएल डा पिप रेमाल्याह आ तौ पेकाह लडाइ पथ यरूसलेम जाक्ताक्स। तन्न ग्राने मचाप्बेम। २राजा १६:५ 2 मिनु मुरपुकीम दाऊद आ खिं डा मुर आहाज कली “अराम डा लडाइ पाइबपुकी एफ्राइम नु गारशा जाक्तेक्म” दे शेंताक्म। मेको नैशा आहाज नु आ मुर, फशेम रवा हिम्शो खोदेशो पा आन थुं हिम्सीमा बाक्त।

3 मिनु परमप्रभु यावेमी यसैया कली “गे नु इ तौ शेआर-याशुब आहाज कली गुम्थ लसे। गे मेको कली आइक्था दोम्ली रे ब्वाक्कु यितीके, वा मुरब आन गेय पतीके डा ठेयब लांम थिन्तीसी। 4 मिनु गे मेको कली ‘होस पा, सिक्सी पा बाक्कीन। महिनीन। इन थुं ग्येत्थ लुक्व मपपतीन। मेको कुन पाइब बुल्सी रेसीन, अराम नु रेमाल्याह आ तौ पेकाह, आन गाइश्शो तशा, महिनीन। इन थुं ग्येत्थ लुक्व मपपतीन। यसैया ३०:१५; 5 मारदे हना अराम, एफ्राइम आ मुर नु रेमाल्याह आ तौ पेकाह नु गारशा, इ कली मरिश्शो पचा कली मिश्शो बाक्नीम। 6 मेकोपुकीमी गोपुकी यहूदा लशा, यरूसलेम कली पुम्शा, ग्राशा ताबेल आ तौ कली मेकेर डा पिप सेल्य’ दैतेक्म। 7 मोपतीके परमप्रभु, परमप्रभु यावेमी मार देब दैशा हना ‘मेको आन मिश्शो मदुम्ब। मो पचा मताइनीम। 8 मारदे हना अराम आ पिया दमस्कस बाक्ब। मिनु दमस्कस आ पिया रेसीन बाक्ब। मिनु ६५ बर्स नोले एफ्राइम खतम दुम्शा, मलीब। 9 एफ्राइम आ पिया सामरीया बाक्ब। सामरीया आ पिया रेमाल्याह आ तौ बाक्ब’ गे थमा मसुइक्तीनी हना, थमा पा मलीनीनी” दे परमप्रभु यावेमी दैत। २इतिहास २०:२०

परमप्रभु आ चिन्ड इम्मानुएल

10 मिनु परमप्रभु यावेमी लेंशा आहाज कली 11 “इन परमप्रभु यावे, इन परमप्रभु कली चिन्ड का पुंडीन। उइ बेक्शो मुर आन बाक्तीक रे हना यो, इर सरीड रे हना यो चिन्ड का पुनीन” दैत। 12 तन्न आहाजमी “गो मपुंडनुड। परमप्रभु यावे आ थुं मथाम्नुड” दैत। 13 मिनु यसैयामी “दाऊद

आ खिं डा मुर नेनीन। मुर आन कली दपाइश्शो खोदेशो पा, आं परमप्रभु कली यो दपाइक्तीनी? 14 मोपतीके परमप्रभुमी इन कली चिन्ड का गेब। मेको चिन्ड मार बाक्ब दैशा हना, कन्ने मीश आलम कोव्रज कुरशा तौ का थीब। मेको आ नें इम्मानुएल वोइक्नीम। मत्ती १:२३ 15 मेको दहि नु खुदो जची ना रेन रिश्शो पचा नु मरिश्शो मपचा तुइक्ब दुम्ब। 16 मिनु मेको वोइश आलम मरिश्शो मपचा, रिश्शो पचा तुइक्वा क्येडा डोंइती, इन कली हिंपाइक्ब पिप आस रागी श्येत्थ दुम्ब। 17 परमप्रभु यावेमी अस्सुर डा पिप आ गुइ रे इन कली, इन मुर आन कली नु इन खिं डा मुर आन कली हिंका डा श्येत गेपाइक्ब। मोदेशो श्येत एफ्राइम यहूदा रे ब्राम रे गेनायो मदुम्शो बाक्ब” दैत।

यहूदा कली श्येत गेशो

18 मेको नाक्ती परमप्रभु यावेमी इजीप्ट डा नील खोला डा चुरमु नु अस्सुर रागी डा सुरब आन कली लाप पा ब्रेब। 19 मेकोपुकी जाक्शा, बेंसीम, रोंगु आ कापम, चू बुटा तारी नु बस्तु भाव योव्रतीक नेल्लेम बाक्नीम। 20 मेको नाक्त परमप्रभुमी युफ्रेटीस खोला आइक्वी हांबु रे क्येट थाप्शा चाक्शो छूराम, अस्सुर डा पिपमी पिया डा चां नु गिरशी प्रेक्पाइक्ब। मेको छूरामी गाल शोक्रे यो प्रेक्पाइक्ब। २राजा १५:२९ 21 मेना मुर कामी बी का नु भेडा निक्शी थुल्ब। 22 मिनु शुश दूध चिम्शा दहि जाइब। मारदे हना मेको रागीमी लीशो मुर नेल्लेमी दहि नु खुदो जाइनीम। 23 मेना हजार का शेकेल चांदी लाइब हजार का अडगुर बोट खुम्शो रूम चू नु चोंक वानीम। शेकेल का ११.५ ग्राम डा चांदी के क्येट बाक्ब। 24 मोपा चू नु चोंक बाक्तीके, मुरपुकी लिब्रा कुरशा मेकेर लाइनीम। 25 डोंइती डांडा डा दोशा खुम्शो रूपुकी मेना चू चोंकम सुम्तीके मुरपुकी हिंशा, मेकेर मलाइनीम। बी ब्यफ नु क्यारश भेडा आन कली दिम्पाइक्वा कली सोइक्नीम।

परमप्रभु आ लोत्र पाइब आ तौ

8 मिनु परमप्रभु यावेमी आं कली “गे ठेयब कागज का चाक्को। मिनु रिश्शो पा रुप्चा डा पा ‘माहेर-शालाल-हाश-बाज’ ब्रेक्तो” दैत। माहेर-शालाल-हाश-बाज आ अर्थ गा पा शुश रोइक्वा बाक्ब। 2 मिनु गो जोल मपाइब सांक्छी निक्शी चढेब उरीयाह नु येबेरेकीयाह आ तौ जकरिया आस कली वोइक्तासी। 3 मिनु गो आं मीश नु बाक्ती। मिनु मेकोमी कोव्रज कुरशा तौ का थिप्टु। मिनु परमप्रभु यावेमी आं कली “मेको आ नें माहेर-शालाल-हाश-बाज वोतो। 4 मारदे हना मेको आलम आम आफ दैस जोक्वा क्येडा डोंइती दमस्कस डा शोंप नु सामरीया डा रोइश्शो नेल्ले अस्सुर डा पिपम लाइक्ब” दैत। यसैया ७:१८; २राजा १६:९ 5 मिनु परमप्रभु यावेमी आं कली लेंशा 6 “मेको मुरपुकीम शीलोआ डा रिश्शो ब्वाक्कु प्रोइनीम। रेसीन नु रेमाल्याह आ तौ आस क्येडा हिंशा, मेको आस नोले खोइक्तेक्म। 7 मोपतीके गो यहूदा डा मुर आन कली श्येत गेपाइक्वा कली युफ्रेटीस खोला डा ब्वाक्कु खोदेशो पा अस्सुर डा पिप नु आ लडाइ पाइब शुश आन कली चाक्नुडमी। मिनु मेको खोला बारशो खोदेशो पा आ एर ऑथ नेल्ल सुम्नीम। 8 मिनु मेको बारशा, यहूदा आ शुर सम्म जाक्दीत्नीम। आ लडाइ पाइबपुकीमी हाम्शो फ्राम खोदेशो पा इन रागी नेल्ल सुम्नीम। तन्न इम्मानुएल, परमप्रभु यावे गे नु बाक्ब” दैत। इम्मानुएल आ अर्थ “परमप्रभु यावे गे नु बाक्ब” दैशो बाक्ब। यसैया ७:१४

यहूदा नु रागी डा मुर आन कली शेंशो

9 गे रागी रागी डा मुर गारशा सुर्ता पने। गे खतम दुम्पाइक्वा पुंडसीनीनी। गे डोन रागी डा मुर नोफा दाइश्शा नेनीने। लडाइ पचा कली किष्पुर् किम्सीन। मिनु हिनीन। लडाइ पचा कली ठीक दुमीन। मिनु सुर्ता पने। 10 गे सल्ला पा लोव्रसी गारपाइक्तीनी, तन्न मेको शोर गाक्शो दुम्ब। लोत्र पने, तन्न इन लोत्र मगाप्ब। मारदे हना परमप्रभु गो नु बाक्ब। 11 मिनु परमप्रभु यावेमी आं गुइ ग्याइश्शा आं कली लोत्र पा “गे मेको मुर आन खोदेशो मपावो। मेको आन लांम मगाक्को। 12 मुरपुकीम अरु आन पर्वम खुइश्शा मरिश्शो गेय पाइनीम। गे मोदेशो मपने। मेको मार तशा हिंनीमी, गे मेको

तशा महिनीन। इन थुं ग्येत्थ लुक्च मपपतीन। <sup>13</sup> मुर नेल्ल आन परमप्रभु यावे ला मिश्शा, मेको क्येडा हिनीन। मेको कली मान पा हिनीन। मत्ती १०:२८ <sup>14</sup> परमप्रभु इन कली नेल्ल क्येडा डोंडती डा मिम्तीके दुम्ब। तन्न इस्राएल आ खिं निक्शी डा मुर आन कली दाइल पाइक्तीके नु लां तेक्तीके फुल्लु दुम्ब। मेको यरूसलेम डा मुर आन कली रेप्पाइक्ब ब्वारद दुम्ब। रोमी ९:३३ <sup>15</sup> मिनु मुर शुश दाइल पाइश्शा गोल्शा, ब्वारदम रेशशा, ग्याइक्वा पुंडसीनीम।

<sup>16</sup> आं दैशो लोत्र आं शेंसीब आन कली ला नेंपाइक्वा कली छाप थोक्शा, वोतो" दे माइक्ती। दानीएल १२:४ <sup>17</sup> मिनु गो याकूब आ खिं डा मुर आन क्येडा आ कुल खूइक्ब परमप्रभु यावे आ लां कोत्रशा, रिश्शा बाक्नुड। <sup>18</sup> मुर नेल्ल आन परमप्रभु यावे सियोन डांडाम बाक्ब। परमप्रभु यावेमी आं कली नु आं कली गेशो आलपुकी इस्राएली आन दातेमी चिन्ड नु कोंडतीक सेल्लतीकी। यसैया ८:३; यसैया ७:३; हिब्रू २:१३ <sup>19</sup> मिनु मुरपुकीमी इ कली "बेक्शो मुर आन कली हिल्लो पावो। लिक्यु कोत्रब चाक्को। वोल आन कली लोत्र पपतो" दे लोत्र पाइनीम। मेको वोल आन रेयके नेंसीब। मिनु मार, सेस मुर आन पर्वम बेक्शो मुर आन कली हिल्लो पचा? मुरपुकीमी आन परमप्रभु कली हिल्लो पचा ममाल्नीमी डा? २राजा १:३ <sup>20</sup> गे शेंतीक नु अरेशो लोत्र आ पर्वम परमप्रभु कली हिल्लो पचा माल्नीनी। अरु लोत्र पाइब मुर काइ मरुब्ब बाक्नीम। <sup>21</sup> मेकोपुकी एको रागीम श्येत जशा, शोत्रलु बेक्शा हिरनीम। मिनु शोत्रलुमी गाइश्शा, ग्येत्थ गे कोत्रशा, आन पिप नु परमप्रभु कली सराप पाइनीम। <sup>22</sup> मेकोपुकीमी खप गे कोत्रशा, आन पिपा खुक्नीम। मिनु मेकेर श्येत नु छिडछिड ताइनीम। हिंचा डा श्येत थम क्येर नाक्दो ला ताइनीम। मेको आन दातेम छेडछेड मबाक्ब। मिनु आन थुं लुक्च लाइब।

### श्येत रे प्रोंडशो

9 शुश हिंबपुकी नोले छिडछिडम मगाक्नीम। डोंडती परमप्रभु यावेमी जबूलन नु नाप्टाली आस रागी महिक्सीशो सेल्लु। तन्न नोले मेकोमी यर्दन आ आइक्वी हांबु, समुन्द्र आ नेक्था डा नु रागी रागी डा मुर आन गालील रागी रिश्शो सेल्ल। भजन संग्रह १०७:१०-१४; २राजा १५:२९; मत्ती ४:१२-१६ <sup>2</sup> छिडछिडम गाक्बपुकीम ठेयब छेडछेड ताइनीम। थम छिडछिड डा रागीम बाक्ब आन तार थम छेडछेड दुम्ब। <sup>3</sup> परमप्रभु, गे रागी रागी डा मुर आन कली सोशा बोशा दुम्पाइक्तीनी। मेको आन कली थाम्पान ग्येरपाइक्तीनी। मेको आन कली इन डोंडती बाली नाली ओंइची ना खोदेंशो पा ग्येरपाइक्तीनी। लडाइ ग्राशा, आन रोइश्शो मार मार योक्सीची ना खोदेंशो पा ग्येरपाइक्तीनी। <sup>4</sup> मेको आन हेल्शो जुवा, मेको आन बला डा भार नु मेको आन कली दिष्व मुर आन कोक्के जिक्ताक्नी। गे मिदयान रागी डा लडाइम खोदेंशो पा मेको आन कली युक्ब आन युक्तीके जिक्तीनी। भजन संग्रह ८१:७; न्यायाधीस ७:१४; न्यायाधीस १५:२२ <sup>5</sup> मारदे हना लडाइ पाइब आन जुत्ता नु आन फेक्तीक वा नेल्ल हुश लुम्सीशो बाक्नीम। मेको मीम चोतीक दुम्नीम। <sup>6</sup> मारदे हना आंइ कली आल का थिशो बाक्ब। तौ का गेशो बाक्ब। मेको आंइ कली रिश्शो पा सासन पाइब दुम्ब। मेको आ नें मार बाक्ब देंशा हना, छक लाक्वा डा गेय पाइब, जोक्तीक तुइक्तीक अर्ती गेब, सक्ति पाइश्शो परमप्रभु, गेना हना यो बाक्ब आफ नु थुं नाइश्शा बाक्वा गेब पिप बाक्ब। यसैया २२:२२; मीका ५:१; मीका ४:३ <sup>7</sup> मेको आ अधिकार गेना हना यो बारब। दाऊद आ राज्य कली गेना हना यो थुं नाइक्तीके दुम्ब। मेको आ राज्य गेना हना यो ठीक निसाफ नु ठीक पतीकेमी बाक्ब। मेको मुर नेल्ल आन परमप्रभु यावेमी पाइब। २सामुएल ७:१२-१३; लूका १:३२; यसैया ११:१-५; भजन संग्रह ७२:३-४

### परमप्रभु इस्राएल आ पर्वम गाइश्शो

<sup>8</sup> परमप्रभुमी याकूब कली लोत्र का सोइश्शो बाक्त। मेको इस्राएल रागी कली दुम्त। <sup>9</sup> मिनु मेको एफ्राइम नु सामरीयाम बाक्ब नेल्लेम तुइक्ताक्म। <sup>10</sup> मेकोपुकीमी ठेयब लेशशा "इंटांम सेल्शो खिं नेल्ल ब्रेत्तेक्म। तन्न गोपुकीम चेम्शो फुल्लुम लेंशा सेल्लतीकी। आइक्च रवा नेल्ल तिम्तेक्म। तन्न

मेकेर ठेयब दुम्ब रवा खुम्नीकी" देंनीम। <sup>11</sup> मोपतीके परमप्रभु यावेमी मेको आन कली श्येत गेब पोक्ब। मिनु मेको आन जोरी सत्रु आन कली "गो लडाइ ग्रानीकी" दे मिम्पाइक्ब। <sup>12</sup> मिनु अराम डा मुर नु रेसीन पूर्व रे नु पलिस्ती डा मुर पच्छिम रे जाक्शा, मेकोपुकीमी शुश पाक्शो शोत्रमी खोदेंशो पा इस्राएली आन कली दाक्नीम। मोपा यो परमप्रभु आ गाइश्शो मनाइक्थु, आ गुइ दिस डा दिस बाक्त।

<sup>13</sup> मो हना यो मुर आन कली तुष्व गे मलेम्म। मिनु मेकोपुकीमी मुर नेल्ल आन परमप्रभु यावे कली ममाल्नीम। यसैया १०:३३ <sup>14</sup> मोपतीके परमप्रभु यावेमी इस्राएल रे पिपा नु मीलु क्योरतु। खजूर रवा आ राशी नु बुदी मीलु घांस काबुमीन क्योरतु। <sup>15</sup> खाल्पा नु हुकुम पाइबपुकी पिपा नम। जोल पा परमप्रभु यावे आ लोत्र पाइबपुकी चहिं मीलु नम। <sup>16</sup> मारदे हना इस्राएल डा मुर आन कली शेंबपुकीमी हेंथे लां गाक्पाइक्तेक्म। मिनु आन शेंशो नेंबपुकी लां मतुइक्ब दुम्तेक्म। <sup>17</sup> मोपतीके परमप्रभु यावेम मेको आन वोंडश आल आन कली तशा, शिशो मपावो। मेको आन रोम रोइक्च नु वोंडश बेक्शो मीश मुर आन कली तशा यो शिशो मपावो। मारदे हना मेको नेल्ल परमप्रभु आ अरेशो मटीब दुम्शा, काइ मरिश्शो पाइब ला बाक्तेक्म। मिनु नेल्लेमी मरिश्शो लोत्र पाम्तेक्म। मोपा यो परमप्रभु आ गाइश्शो मनाइक्थु, आ गुइ दिस डा दिस बाक्त।

<sup>18</sup> परमप्रभु यावे आ अरेशो लोत्र मटीब मी खोदेंशो पा ब्राइब। मिनु मेकोमी चू नु चोंक नेल्ल नेक्ब। मिनु मेको ब्वाकीमी कोक्त बुद पा ब्राइब। आ कुन गोस्स खोदेंशो पा रोम्सीशा सरीड गे लाइब। <sup>19</sup> मुर नेल्ल आन परमप्रभु यावे आ गाइश्शोमी रागी नेल्ल प्रोइश्शो बाक्ब। मिनु मुरपुकी चोतीक शी खोदेंशो दुम्तेक्म। सुइम सुइ आन कली वारच मपामे। <sup>20</sup> मेकोपुकीमी ग्युरा गे डा रोइक्ताक्म। तन्न शोत्रलु बेक्तेक्म। आन पेरा गे डा ब्वाम्तेक्म। तन्न मरुम्। मिनु आंम आन खिं डा मुर आन श्ये ब्वाम्तेक्म। <sup>21</sup> मनस्सेमी एफ्राइम कली ब्वाप्तु। मिनु एफ्राइममी मनस्से कली ब्वाप्तु। मिनु मेको निक्शी यहूदा नु लडाइ पाम्ताक्स। मोपा यो परमप्रभु आ गाइश्शो मनाइक्थु, आ गुइ दिस डा दिस बाक्त।

10 आबी, सु सुमी ठीक मद्दुश्शो ऐन कानुन सेल्लनीमी, मुर आन कली दिघ्चा डा अरेशो लोत्र ब्रेक्नीमी, यसैया ५:८-२३ <sup>2</sup> क्येट मथीब आन कली ठीक निसाफ मपाइनीमी, आन मुर आन दाते डा प्रुडग आन कली ठीक मपाइनीमी, मेकोपुकीम वोंडश बेक्शो मीश मुर आन मार मार योल्नीमी, रोम रोइक्च आन बाक्शो नेल्ल रोइक्नीम। <sup>3</sup> मिनु सजाइ गेतीक नाक्तीमी मार पाइनीनी? डोन रे जाक्शो हिंचा डा श्येतमी मार पाइनीनी? "वारच पाइय्यीनी" दे सु आ बाक्तीके प्रोक्नीनी? इन शोंप ते वोइक्नीनी? <sup>4</sup> मेको नाक्ती पाइश्शो मुर आन दातेमी मबाक्वा नु साइक्वा मपुंडसीचा कली ते प्रोक्नीनी? परमप्रभु आ गाइश्शो मनाइक्थु, आ गुइ दिस डा दिस बाक्त।

### अस्सुर कली सजाइ

<sup>5</sup> आबी, अस्सुर रागी, गे आं गाइक्तीक डा कोर्रा, आं गाइक्तीके कोक्के कुरब दुम्ते। यसैया १०:१५ <sup>6</sup> गो अस्सुर कली आं कली मटीब रागी कली लडाइ पथ सोइक्नुड। अस्सुर कली आं कली गाइक्पाइक्ब मुर नु सोइक्नुड। मारेइ मारेइ रोइक्पाइक्वा कली सोइक्नुड। मिनु मेको आन कली लांम दिम्पाइक्वा कली सोइक्नुड। <sup>7</sup> तन्न अस्सुरम मेको आ थुंम मवोइक्थु, मोदेंशो ममिम्त। आ थुंमी खतम पोक्वा नु रागी रागी क्याम्चा ला बाक्त। <sup>8</sup> मिनु अस्सुरमी "आं कप्तान नेल्ल पिप मनमी डा? <sup>9</sup> मार, काल्नो सहर कारकेमीश खोदेंशो ममाइ? हमाथ, अरपाद खोदेंशो ममाइ? मिनु सामरीया दमस्कस खोदेंशो ममाइ डा? <sup>10</sup> मिनु गो दोपा मूर्तिम ब्रीशो रागी ग्राडा, मोपा गो मेको आन क्येडा आइक्च मूर्ति बाक्शो रागी यरूसलेम नु सामरीया कली ग्रानुड। २राजा १८:३२-३५ <sup>11</sup> मिनु गो सामरीया नु आ मूर्ति आन कली दोदेंशो पडा, मोदेंशो यरूसलेम नु आ मूर्ति आन कली मपाइनुडा डा?" देंत।

<sup>12</sup> मिनु परमप्रभुमी सियोन डांडा नु यरूसलेमम पशो गेय थुमा नोले मेकोमी अस्सुर डा ठेयब लेशशो नु बोरशो पिप कली सजाइ गेब। यसैया

३७:३६<sup>13</sup> मारदे हना मेकोमी “गो आं सक्तिमी पाता। गो आं तुइक्तीके नु रुप्तीक थुंमी मोदेशो पाता। गो रागी रागी डा सांद याक्ताकड। मेकेर डा मुर आन शॉप नु मारेइ मारेइ रोइक्ताकड। गो आं ठेयब सक्तिमी मेको आन पिप आन कली लुक्च सोइक्ताकडमी।<sup>14</sup> मिनु गो प्रॉइशो चिक्ब आन ग्योत्र खोदेशो पा बाक्तीक नु मुर आन शॉप थित्ता। गो चिक्बीम प्रॉइशो व्बोफु खुपशो खोदेशो पा, रागी रागी कली खुप्ताकड। मिनु फ्रां हिक्शा, तेक्ब सुइ मबाक्म। मिनु सुइम मारेइ मर्देम” देंत।

<sup>15</sup> खा क्येडा खा चलेब ठेयब बाक्बा डा?। आरा क्येडा आरा कीब ठेयब बाक्बा डा?। मोदेशो मदुत्त हना कोक्केमी कोक्के गुप्ब कली याम्पाइक्बा डा?। मिनु शीमी शी कली गुप्ने चाप्बा डा?। यसैया १०:५<sup>16</sup> मोपतीके परमप्रभु, मुर नेल्ल आन परमप्रभु यावेमी अस्सुर डा दोम्शो लडाइ पाइब मुर आन कली बेक्तीक रोइ सोइक्नुड। मिनु मेको आन रां चोशो खोदेशो पा जेश्शा नुप्ब।<sup>17</sup> मिनु इस्राएली आन छेडछेड मी दुम्ब। मिनु आन का ला बाक्शो परमप्रभु नाप्पाइक्ब दुम्ब। मिनु मेकोमी आन चू नु चोंक काबुमी नेक्पाइक्ब। *ब्यवस्था* ४:२४<sup>18</sup> मिनु ब्वाकी डा दारस नु फल फुल नेल्ले मुर खोदेशो पा सोत्रना सोत्रन लाइनीम। मेको आन रां नु थुं निम्फा खतम दुम्नीम। रोइ पाइब मुर ऑंखां पा बेक्शा लशो खोदेशो पा बेक्शा लाइनीम।<sup>19</sup> मिनु मेको आ ब्वाकी डा लीशो रवा शुश मबाक्नीम। मेको आल कामी यो हिक्शा ब्रेक्ने चाप्ब।

### मुर का निक्शी ला लेत्नीम

<sup>20</sup> मिनु मेको नाक्ती इस्राएल डा लीशो मुरपुकी नु याक्ब आ खिं डा प्रोक्शा ब्रॉइशो मुरपुकी लेंशा, आंम कली तुप्ब गे मलाइनीम। तन्न मेकोपुकी थमा पा परमप्रभु यावे, इस्राएली आन का ला बाक्शो परमप्रभु आ नोले खोइक्नीम। यसैया ६:१३; यसैया ७:३<sup>21</sup> मिनु का निक्शी याक्ब आ मुरपुकी सक्ति पाइश्शो परमप्रभु गे लेत्नीम।<sup>22</sup> इन इस्राएल डा मुर समुन्द्र डा बाल्वा खोदेशो पा शुश बाक्तेक्म हना यो, का निक्शी ला लेत्नीम। अरु चहिं नेल्ल साइक्चा पुंइसीनीम। मिनु ठीक पतीक ठेयब दुम्ब। *रोमी* ९:२७<sup>23</sup> मारदे हना परमप्रभु, मुर नेल्ल आन परमप्रभु यावेमी डोंइती आ देशो खोदेशो पा रागी नेल्ल खतम सेल्ब। यसैया २८:२७

<sup>24</sup> मोपतीके परमप्रभु, मुर नेल्ल आन परमप्रभु यावेमी “सियोनम बाक्ब, आं मुरपुकी अस्सुर डा मुर क्येडा महिनीन। इन कली इजीप्तम खोदेशो पा कोक्केम तुप्तेक्म हना यो, महिनीन।<sup>25</sup> मारदे हना इक्का नोले इन पर्बम आं गाइश्शो नुप्ब। मिनु अस्सुर डा मुर आन कली गाइश्शा साइक्नुडमी” देंत।<sup>26</sup> मुर नेल्ल आन परमप्रभु यावेमी मेको आन कली कोर्राम युक्ब। मेको ओरेब डा सेरथे फुल्लु आ नेक्था डा लडाइम मिदयान कली फुशो खोदेशो दुम्ब। मेकोम इजीप्तम खोदेशो पा आ कोक्के समुन्द्र तार दिब। *न्यायाधीस* ७:२५; *भजन संग्रह* ८३:१०; *प्रस्थान* १४:२६-२७<sup>27</sup> मेना इन कली गेशो श्येत नुप्ब। मिनु इन शुर डा जुवा दोक्शा जिक्ब।<sup>28</sup> इन जोरी सत्रु रिम्मोन रे जाक्शो आइयाथम जाक्दीत्तेक्म। मिग्रोन लशा, मिकमाश सहरम आन मार मार वोइक्नीम।<sup>29</sup> मिनु डांडा रे पा लशा, गिबाम बास बाक्नीम। रामाह हिंशा खिंखि पाइब। सावल आ सहर गेबा डा मुर प्रोक्नीम।<sup>30</sup> गाल्लीम डा तमीपुकी ठेयब सेंदा पा ग्रीडीन। गे लाइशाह डा मुर नेनीन। अनाथोथ डा मुर मेको आन कली लोत्र लेत्तीन। *१सामुएल* २५:४४<sup>31</sup> मादमेनाह नु गेबीम डा मुर ब्रॉइचा कली प्रोक्नीम।<sup>32</sup> मेकोपुकी मुलाक्ती नोबम बाक्नीम। मिनु मेकोपुकीमी सियोन डांडा डा तमी नु यरूसलेम आ डांडा गे आन गुइ क्युक्शा, हिं चोइनीम। *१सामुएल* २१:२

<sup>33</sup> मिनु परमप्रभु, मुर नेल्ल आन परमप्रभु यावेमी मेको आ राशी हिंचा डा सक्तिम खोइक्ब। नेल्ल क्येडा लाइश्शो रवा तिम्ब। ठेयब लेशो आन कली आइक्च सेल्ब।<sup>34</sup> मेकोमी ब्वाकी डा रवा आन कली खाम तिम्ब। लेबानोन डा ठेयब लाइश्शो रवा नेल्ल दिम्नीम।

### यावे आ सोइश्शो पिप

<sup>11</sup> येस्से आ ठुटा रे ठोसा का दाप्ब। मेको आ शाक्श रे वाशो राशीम फल फुल सिप्ब।<sup>2</sup> मिनु परमप्रभु यावे आ सोक्त मेको तारी

नाइश्शा बाक्ब। मेको जोक्ब तुइक्ब नु रुप्तीक सोक्त बाक्ब। अर्ती गेब नु सक्ति गेब सोक्त बाक्ब। मेको जोक्तीक तुइक्तीक थुं गेब नु परमप्रभु यावे कली मान पा हिं चोक्त बाक्ब।<sup>3</sup> मेको आ दाक्शो परमप्रभु यावे कली मान पा हिंचा बाक्ब। मेकोमी मुर आन थुं कोत्रशा निसाफ पाइब। सुइ आन लोत्र मनेंथु निसाफ पाइब।<sup>4</sup> ठीक पतीकेमी पुइग आन कली निसाफ पाइब। रागी डा आइक्च नु ठेयब मुर नेल्ल आन कली उइक्थ पा निसाफ पाइब। मिनु रागी डा मुर आन कली आ लोत्रमी तुप्ब। परमप्रभु यावे आ अरेशो लोत्र मटीब आन कली मुइश्शा साइक्ब। *२थिस्सलोनिकी* २:८<sup>5</sup> मेको आ ठीक पतीके आ किप्शुर किप्शो खोदेशो बाक्ब। मेको थमा पा थमा सुइक्तीक आ किप्तीक बाक्ब।

<sup>6</sup> मेना फर नु पाठा काथा बाक्नीम। जोइ क्यारथ आ पाठा नु इप्ब। बाछा नु गुप्स आ चाइक्ब काथा जोइनीम। आइक्च आलमी मेको आन कली योत्रब। यसैया ६५:२५<sup>7</sup> बी नु वां काथा जोइनीम। मेको आन चाइक्बपुकी काथा बाक्नीम। गुप्समी ब्यफ खोदेशो पा नल ब्वाइब।<sup>8</sup> मिनु दूध तूब आल बुस्स आन पोत्रलाम ग्यारनीम। दूध प्रॉइशो आलमी बीस पाइश्शो बुस्स आन बाक्तीकेम गुइ शुइक्नीम।<sup>9</sup> आं डांडामी मारेइ श्येत नु खतम दुम्तीके मबाक्ब। मारदे हना दोदेशो पा ब्वाक्कुम समुन्द्र ब्रीबा, मोदेशो पा परमप्रभु यावे कली तुइक्तीकेम रागी नेल्ल ब्रीब।

### इस्राएल नु यहूदा डा लीशो मुर

<sup>10</sup> मिनु मेको नाक्ती येस्से आ शाक्श जात जात डा मुर आन कली चिन्ड दुम्ब। मिनु रागी रागी डा मुर नेल्लेमी मेको कली हिल्लो पाइनीम। मेको आ बाक्तीके छेडछेडम बाक्ब। *रोमी* १५:१२<sup>11</sup> मेना परमप्रभुमी आ लीशो मुर आन कली लेंशा प्रॉइशा चाक्ब। मिनु ते रे प्रॉइशा चाक्ब देंशा हना, अस्सुर, इजीप्त, पत्रोस, एथीयोपीया, एलाम, शिनार, हमथ नु समुन्द्र आ नेक्था रे प्रॉइशा चाक्ब। *इजीकीएल* ३७:२१-२२<sup>12</sup> मेकोमी रागी रागी डा मुर आन कली चिन्ड का वोइक्ब। मिनु इस्राएल डा प्रोक्शो मुर आन कली खुप्ब। यहूदा डा ब्रशो मुर आन कली यो तेइ तेइ रे खुप्ब।<sup>13</sup> एफ्राइम आ गेहे पतीके जाम्शा लाइब। यहूदा कली श्येत गेब साइक्चा पुंइसीनीम। मेना एफ्राइममी यहूदा कली गेहे मपाइब। मिनु यहूदामी यो एफ्राइम कली श्येत मगेब।<sup>14</sup> मिनु मेको निक्शी पलिस्ती नु लडाइ पचा कली पच्छिम गे बारनीस। मेकोपुकी गारशा, पूर्ब डा मुर आन मारेइ मारेइ रोइक्नीम। एदोमी नु मोआबी आन कली लडाइ तोइनीम। अम्मोनीपुकीमी मेको आन देशो टीनीम।<sup>15</sup> मिनु परमप्रभु यावेमी इजीप्त डा समुन्द्र डा ब्वाक्कु नेल्ल सोत्रपाइक्ब। मेकोमी युफ्रेटीस तारी यो आ गुइ क्युक्शा, मेको रे ७ ओटा खोला सेल्ब। मिनु मुरपुकी गाक्शा शोक्शा लाइनीम।<sup>16</sup> अस्सुर डा लीशो आ मुर इस्राएली आन कली जाक्चा कली ठेयब लां का दुम्ब। मेको लां इस्राएली इजीप्त रे गूशा गाक्शो लां खोदेशो दुम्ब। *प्रस्थान* १४:२९

### श्येत रे प्रॉइशोपुकीम कुम्सो पशो

<sup>12</sup> मेको नाक्ती गेपुकीमी “परमप्रभु यावे, गे रिम्शो पाइब बाक्नीनी। गे आंइ पर्बम गाइक्ताक्नी हना यो, इन गाइक्चा नाइक्साक्ब। मुल गे आंइ कली लेम्नीनी।<sup>2</sup> थमा पा, परमप्रभु आं कली पाप रे प्रॉइब बाक्ब। गो मेको कली थमा सुइश्शा महिनुड। मारदे हना परमप्रभु यावे आं कली सक्ति नु बोल गेब बाक्ब। मेको आं कली श्येत रे प्रॉइब बाक्ब” दे कुम्सो पाइनीनी। *प्रस्थान* १५:२

<sup>3</sup> मेको नाक्ती गेपुकी ग्येरशा, पाप रे ब्रॉइतीके इनार रे ब्वाक्कु कीशा प्रिंनीनी। यसैया ५५:१; *जकरिया* १३:१<sup>4</sup> मेको नाक्ती गेपुकीमी “परमप्रभु यावेमी रिम्शो पाप्तु” दे मुर आन कली देनीन। मेकोपुकी नु लोत्र पने। मेको आ गेय रागी रागी डा मुर आन कली तुइक्पतीन। आ नें नेल्ल क्येडा ठेयब बाक्ब, दे शेंदीने। *इइतिहास* १६:८; *भजन संग्रह* १०५:१<sup>5</sup> परमप्रभु यावे कली ठेयब सेल्तीक कुम्सो पने। मारदे हना मेकोमी थम सक्ति पाइश्शो गेय पशो बाक्ब। एको लोत्र रागी नेल्लेमी ब्रपतीन।<sup>6</sup> सियोनम बाक्बपुकी ठेयब सेंदा पा ग्येरशा परमप्रभु कली ठेयब सेल्था कुम्सो पने। मारदे हना इस्राएली आन का ला बाक्शो परमप्रभु इन दातेमी ठेयब बाक्ब।

बेबीलोन सहर कली निसाफ पशो  
यसैया २१:१-१०; यसैया ४७:-; येरमीया ५०:५

13 आमोज आ तौ यसैयामी बेबीलोन आ पर्बम तशो नु तुइश्शो लोव एको बाक्ब। येरमीया २३:३३<sup>2</sup> रवा मबाक्शो डांडामी छेदर का खूक्कीन। मिनु ठेयब सेंदा पा गुड हिकशा, मेको आन कली ठेयब मुर आन लाप्चो रे ओवपतीन।<sup>3</sup> परमप्रभुमी “गो आं मुर आन कली पोक्शा, आं ग्येरसीशो, बोल्यो लडाइ पाइब मुर आन कली आं गाइश्शो कौंइचा कली ब्रेत्ताकडमी” देंत।

<sup>4</sup> नेनीन, शुश रागी डा मुरपुकी डांडामी रेयके पाइनीम। मेको रेयके शुश राज्य डा खुम्सीशो मुर आन रेयके बाक्ब। मुर नेल्ल आन परमप्रभु यावेमी ठेयब हुल लडाइ पाइब पोक्ब।<sup>5</sup> मेकोपुकी डोन रागी रे जाक्नीम। रागी डा सुर रे पा जाक्नीम। मिनु परमप्रभु यावेमी गाइश्शा, या शेशा रागी नेल्ल खतम सेल्पाइक्ब। योएल १:१५

<sup>6</sup> ठेयब सेंदा पा डाक्कीन। मारदे हना परमप्रभु यावे आ नाक्त्त जाक्चशो बाक्ब। नेल्ल क्येडा ठेयब सक्ति पाइश्शो परमप्रभु मेको नाक्ती खतम पोक्च जाक्ब।<sup>7</sup> मोपतीके मुर नेल्ल आन थुं लुक्च लशा, मारदे पने मचाप्नीम।

<sup>8</sup> मिनु मुरपुकी शुश हिंशा, आन थुं लुक्च लशा, शुश सुर्ता पाइनीम। फाल्ने मचाप्चा डा पा खाइश्शा, आल थिचशो मीश मुर खोदेशो पा नकचुर पाइनीम। हिंशा आन कुल कोवमुमानु, ब्रशो मी खोदेशो तमुइनीम।

<sup>9</sup> नेनीन, परमप्रभु यावे आ नाक्ती हिंशा डा श्येतम जाक्ब। आ गाइश्शो चुरशोमी रागी नेल्ल मुर मबाक्तीके सेल्ब। मिनु पाप पाइब आन कली क्याम्ब।<sup>10</sup> सरीड डा सोरुलपुकीम आन छेडछेड साम्नीम। नां दाप्ना दाप्न छिडछिड दुम्ब। तास्लाम छेडछेड मगेब।<sup>11</sup> परमप्रभुमी “गो रागी कली आ मरिश्शो पशो आ पर्बम सजाइ गेनुड। आं अरेशो लोव मटिथु, मरिश्शो पाइब आन कली सजाइ गेनुडमी। मिनु ठेयब लेश्शो आन ठेयब लेत्तीके साम्पाइक्नुडमी। ठेयब श्येत गेशा हुकुम पाइब आन कली ब्रेम्पाइक्नुडमी।<sup>12</sup> गो मुर आन कली क्येख सुन क्येडा यो रिश्शो सेल्नुडमी। मेको आन कली ओफीर डा सुन क्येडा रिश्शो सेल्नुडमी।<sup>13</sup> मिनु आं गाइक्तीक नाक्ती गो सरीड कली हिम्पाइक्नुड। रागी यो आं गाइश्शोमी आ बाक्तीक रे प्रेक्शा गूब” दे मुर नेल्ल आन परमप्रभु यावेमी देंत।<sup>14</sup> मुरपुकी खेदा पचा पुंइसीशो किश्श नु गोठला मबाक्शो भेडा खोदेशो दुम्नीम। मेकोपुकी आंम आंम मुर बाक्तीके लाइनीम। आंम आंम रागी मेर प्रोक्नीम।<sup>15</sup> खेदा पा थित्चा पुंइसीशोपुकी तूशा साइक्चा पुंइसीनीम। मिनु ग्याइक्चा पुंइसीशोपुकी तरवारम क्योरचा पुंइसीनीम।<sup>16</sup> आन आल आन कली आन डौंइती खपीम राप्शा साइश्शो ताइनीम। मेको आन खिं डा मारदे मारदे योल्नीम। मेको आन मीश बिथोलो पाइनीम। भजन संग्रह १३७:८-९<sup>17</sup> मिनु परमप्रभुमी “नेनीन, गो मादी आन कली गेपुकी नु लडाइ पपाइक्चा कली पोक्नुडमी। मेकोपुकीमी सुन चांदी ठेयब ममिन्नीम।<sup>18</sup> वौंइश आल आन कली लिब्राम साइक्नीम। आइक्च आल नु ठेयब आल नेल्ल आन कली शिशो मपथु साइक्नीम।<sup>19</sup> ठेयब लेश्शो कल्दी आन दाक्शो नु राज्य राज्य डा नेल्ल क्येडा दारशो बेबीलोन कली सोदोम नु गोमोररा खोदेशो सेल्नुड। उत्पत्ती १९:२४-२५<sup>20</sup> मिनु मेको सहरम गेनायो लेंशा मुर मबाक्नीम। पाला पाला सम्म मुर मबाक्नीम। मेकेर अराबीपुकीम आन ताम्बु मकीनीम। गोठलापुकीमी आन बस्तु भाव मनाइक्पाइक्नीम।<sup>21</sup> तन्न मेको ब्वाकी डा जन्तु आन बाक्तीक दुम्ब। मेको आन खिंम बुक्स ब्रीशो बाक्नीम। मेकेर ब्वाकी डा ग्रीब जन्तु, ठेयब चिक्ब बाक्नीम। मिनु ब्वाकी डा क्यारश सिल पाइनीम। यसैया २३:१३<sup>22</sup> मेको आन श्येत्थ खिंम फर ग्रीनीम। आन दारशो दरवारमी सिवार ग्रीनीम। मोदेशो दुम्तीक नाक्ती जाक्चशो बाक्ब। मुल रीब पा जाक्ब” देंत।

इसाएली कली ग्येरपाइश्शो

14 मिनु परमप्रभु यावेमी याक्ब कली शिशो पा, इसाएल कली योव्रशा लेंशा मेको आन कली आन रागीमी वोइक्ब। मिनु अर्को रागी डा मुरपुकी याक्ब आ खिं डा मुर नु गारशा बाक्नीम। जकरिया १:१७

2 मेना रागी रागी डा मुरपुकीमी इसाएली आन कली आन रागी चोवदनीम। इसाएलीपुकीमी मेको रागी डा मुर आन कली परमप्रभु यावे आ रागीमी बाक्शा, आन वाइलीम वाइल सेल्नीम। डौंइती आन कली ग्याइश्शा चोक्ब आन कली ग्याइश्शा चोक्नीम। मिनु आन कली दिप्ब आन कली हुकुम पाइनीम। यसैया ४९:२२; लेवी २५:२३

बेबीलोन डा पिप साइश्शो

<sup>3</sup> मिनु परमप्रभु यावेमी इन कली श्येत जतीके, खेदा पचा पुंइसीतीके नु शुश गेय पतीक रे नाइक्चा गेपु हना,<sup>4</sup> गेपुकीमी बेबीलोन डा पिप आ पर्बम “मुर आन कली दिप्ब, दोपा थुम्से? आ श्येत गेशा हुकुम पतीके, दोपा बेक्मे?” दे शुक्शी लोव पाइनीनी।<sup>5</sup> परमप्रभु यावेमी आ अरेशो लोव मटीब आन कोक्के जिक्तु। मिनु श्येत गेब पिप आ सासन पतीक कोक्के रोइक्ताक्ब।<sup>6</sup> डौंइती मेकोमी गाइश्शा, मुर आन कली तुप्ना तुप्न बाक्त्त। मेको पिपपुकीमी रागी रागी कली आन गाइक्तीकेमी मनाइक्थु खेदा पा श्येत गेम्तेक्म।<sup>7</sup> मुल रागी डा मुर नेल्ल सिक्सी पा नाइश्शा बाक्चा ताइनीम। मिनु ग्येरशा कुम्सो पाइनीम।<sup>8</sup> तोव्रशी रवापुकी नु लेबानोन डा लाइश्शो रवापुकीमी यो ग्येरशा “गे खतम दुमे रे आंइ कली क्योरब सुइ मजाक्म” देंनीम।<sup>9</sup> मिनु बेक्शो मुर आन बाक्तीकेमी इ जाक्दीश्शो आ पर्बम ग्रांये माग्ये दुम्नीम। रागी डा मुरपुकीमी “इन कली ताक्चा कली बोक्नीम। रागी रागी नु जात जात डा पिप आन कली आन नित्तीक रे पोक्शा राप्पाइक्नीम।<sup>10</sup> मेको नेल्लेमी इ कली ‘गे यो आंइ खोदेशो पा सक्ति मपाइश्शो दुमे बाक्त्त। गे यो आंइ खोदेशो दुम्ते।<sup>11</sup> इ दारस नु इ ठेयब ताप्तीके नेल्ले यो बेक्शो मुर आन बाक्तीके जाक्तेक्म। लुस्पु इ ब्राख्ये दुम्नीम। बुस्स इ फेक्तीक दुम्ब’। इजीकीएल ३२:१८-१९

<sup>12</sup> गे सुनी आ तौ, सुकुर सोरुल, दोपा सरीड रे दोक्डे? रागी रागी डा मुर आन कली ग्राब, दोपा क्योरचा पुंइसीशा दोक्डे?” देंनीम।<sup>13</sup> गे इ थुंमी “गो स्वर्ग डोइश्शा लाइनुड। परमप्रभु आ सोरुल आन क्येडा आइक्था आं नित्तीके वोइक्नुड। मिनु गो उत्तर डा देवी देवता गुम्तीक डांडाम नित्नुड। भजन संग्रह ४८:३; इजीकीएल २८:१४<sup>14</sup> गो गोस्स क्येडा ग्येत्थ डोइश्शा लाइनुड। मोपा गो नेल्ल क्येडा ठेयब नु उडक्थ दुम्नुड” देंते।<sup>15</sup> तन्न गे बेक्शो मुर आन बाक्तीकेम तोक्चा पुंइसाक्वे। तुरस क्येडा यो उड तोक्चा पुंइसाक्वे।<sup>16</sup> इ कली ताइबपुकीमी “मार, मेरे मुरम रागी हिम्पाइश्शा, राज्यपुकी खिंखि पपदा? <sup>17</sup> मेरेम रागी नेल्ल गोरशो रागी सेल्शा, सहर नेल्ल खतम पोक्गा? चोक्सीशो मुर आन कली आन खिं लेत्चा मगेब मुर मेरेन बाक्बा?” देंनीम।<sup>18</sup> मिनु रागी नेल्ल डा बेक्शो पिपपुकी बेक्शो पिप आन कली वोइक्तीकेम वोइश्शो बाक्नीम।<sup>19</sup> तन्न गे सोव्रशो राशी खोदेशो पा इ तुरस रे डोन ताइक्चा पुंइसाक्वे। तरवारम तूशा साइश्शो मुर बाक्तीके लशो मुरपुकी इ सुम्तीके दुम्तेक्म। गे बेक्शा दिम्शो खोदेशो दुम्ते। यसैया ३४:३<sup>20</sup> गे अरु पिप खोदेशो पा थिम्चा मपुंइसे। मारदे हना गे इ रागी खतम सेल्शा इ मुर आन कली साइक्तीवी। मोपतीके मरिश्शो पाइब आन चच युइ आन नें गेनायो ममिन्सीब।<sup>21</sup> आन आफ आन मरिश्शो पशो आ पर्बम आन तौ आन कली क्योरचा कली ठीक दुमीन। मुर आन रागी कली आंम के सेल्ब नु रागी कली सहरम प्रिंब कली बोक्चा मगेन। प्रस्थान २०:५<sup>22</sup> मुर नेल्ल आन परमप्रभु यावेमी “गो बेबीलोन डा मुर आन नें, लीशो नु आन आल नु खिं डा मुर नेल्ल क्याम्नुड।<sup>23</sup> गो मेको आन सहर काश्श आन बाक्तीके नु ब्वाक्कु देम्तीके सेल्नुड। गो मेको आन कली खतम सेल्ब ब्राक्सुम फिक्नुड” दे मुर नेल्ल आन परमप्रभु यावेम देंत।

अस्सुर आ सक्ति नुप्शो

<sup>24</sup> मिनु मुर नेल्ल आन परमप्रभु यावेमी कसम जशा “थमा पा, आं डौंइती मिम्शो खोदेशो पा दुम्पाइक्नुड। गो आं देशो पाइनुड।<sup>25</sup> गो अस्सुर डा मुर आन कली आं रागीम साइश्शा, आं डांडा दिम्पाइक्नुडमी। मोपा आं जुवा गुंइनुड। मिनु आन श्येत आन बला रे फेल्नुड।<sup>26</sup> एको रागी नेल्ल कली देशो लोव बाक्ब। एको रागी रागी नेल्ल तार दिंशो गुइ बाक्ब।<sup>27</sup> मारदे हना मुर नेल्ल आन परमप्रभु यावेमी मोदेशो पचा कली मिम्शो



बाकब। सुम मेको कली तेक्ने चाप्पा डा? आ दिंशो गुइ सुम लेप्पाइक्ने चाप्पा डा? सुइम मचाप्नीम” देंत।

पलिस्ती आन कली लोव्र पशो  
येरमीया ४७:-

28 मिनु पिप आहाज बेक्शो बर्सम परमप्रभु यावेमी लोव्र पाप्तु। मार लोव्र पाप्तु देंशा हना, २२राजा १६:२० 29 “ए पलिस्तीपुकी, इन कली तुष्व कोक्के जिव्त, दे मग्येरसीन। मारदे हना बुस्स आ चच युइ रे बीस पाइश्शो बुस्स का गूब। मेको रे बीस पाइश्शो बेरब बुस्स का गूब। 30 नेल्ल क्येडा डोंइती जरमेशो, प्रुडग आन दाते डा मुरुम जचा ताइनीम। मारेइ मथीब मुरपुकी यो महिंथु बाक्ने चाप्नीम। तन्न इन खिं डा मुर आन कली अन्कालम बेक्पाइक्नुड। मिनु इन लीशो मुर आन कली साइक्नुड। 31 सहर डा ठेयब लाप्चोपुकी, डाक्कीन। सहर नु पलिस्ती नेल्ल हिंशा खिंखि पने। मारदे हना उत्तर रे कुन कुशा, ठेयब हुल, नेल्ल काथा जाक्नीम।

32 मिनु रागी रागी डा लोव्र कुरब आन कली मार देंनीनी? परमप्रभु यावेमी सियोन सेल्लु। मिनु आ मुर आन दाते डा क्येट मथीब मेकेर रिश्शो पा बाक्नीम” देंत।

मोआबी आन कली श्येत  
येरमीया ४८:-; सेफन्याह २:८-११

15 मिनु परमप्रभु यावेम मोआब आ पर्वम यसैया कली “मारदे हना काबु नाक्दोमी आर-मोआब सहर खतम दुम्त। मिनु मोआब ग्रांग्ये माग्ये दुम्त। काबु नाक्दोमी कीर-मोआब सहर खतम दुम्त। मिनु मोआब ग्रांग्ये माग्ये दुम्त। 2 दीबोन डा मुर देवी देवता आन थान लाम्तेक्म। डांडा डा थानमी डाक्थ लाम्तेक्म। मोआबीपुकीमी नेबो नु मेदेबा सहर आस पर्वम रोंका पाइनीम। मेको नेल्लेम आन चां नु आन गाल शोक्ने प्रेक्शो बाक्नीम। 3 मेकोपुकी सहर डा लाम्ती अरन्डी फेक्शा, खिं तारी नु बजारम गुम्शा रोंका पा डाक्ना डाक्न बाक्नीम। 4 हेश्बोन नु एलेआले सहर डा मुर वाइ ब्रेश्शा डाक्नीम। मेको आन डाक्शो याहास सम्म नेंसीब। मोपतीके मोआब डा लडाइ पाइबपुकी खिंखि पा आन थुं लुक्च लाइब। यसैया १६:९-११ 5 आं थुं मोआब आ पर्वम वाइ ब्रेश्शा डाक्ब। मेकेर डा मुरपुकी सोआर नु एग्लाथ-शेलीशीया प्रोक्नीम। मेकोपुकी डाक्ना डाक्न लुहीथ डा डांडा डोइक्नीम। मेकोपुकीमी होरोनाइम डा लाम्ती खतम दुम्चा आ पर्वम रोंका पाइनीम। 6 निम्मीम डा ब्वाक्कु सोवनीम। घांस नेल्ल सोवनीम, नक ख्रुम्शो मवानीम। गिगी नेल्ल सोवनीम। 7 मोपतीके मेकोपुकीमी आन लीशो मारेइ मारेइ लाइश्शा रवा पाइश्शो खोल्सा आइक्की हांबु लाइक्नीम। 8 मारदे हना मोआब रागी नेल्लेमी मेको आन डाक्शो नेंसीब। मेको आन रोंका पशो एग्लाइम नु बेयर-एलीम सम्म जाक्दीश्शो बाक्ब। 9 मारदे हना दीबोन खोला डा ब्वाक्कु हुशेम ब्रीशो बाक्त। मोपा यो मेको आन कली चिनु श्येत गेनुड। मोआब रे प्रोक्शा ब्रोंइशो नु लीशो मुर आन नोले गुप्स का सोइक्नुड” देंत।

मोआबीम “वारच पने” देंशो

16 गेपुकीम सेला सहर रे पा सियोन डा तमी आ डांडा डा पिप कली पाठा सोइक्तीन। 2 आन ग्योव रे खेरशो एर ऑथ ब्रशा बेरशो चिक्ब खोदेंशो पा मोआब डा तमीपुकी अरनोन खोला आ नेक्था बाक्नीम। 3 गे अर्ती गेशा, ठीक निसाफ पने। नाक्त बाक्त हना यो, इन वांकु नाक्दो डा खोदेंशो सेलीने। गुंइशो मुर आन कली ख्रुइक्तीन। प्रोक्ब आन पर्वम मशेंदीन। 4 मोआब रे प्रोक्शो मुर आन कली गेपुकी नु बाक्चा गेने। मेको आन कली साइक्ब रे प्रोंइशा, वारच पने। मुर आन कली दिष्वपुकी मबाक्तेक्म हना, खतम दुम्तीके नुत्त हना, श्येत गेबपुकी रागी रे फिक्चा पुंइसाक्म हना, 5 गेना हना यो दाक्ब आ निल्लीक वोंइसीब। मेको दाऊद आ ताम्बुम बाक्ब। मिनु मेको निल्लीकेमी थमा सुइक्चा पुंइसीब ठीक निसाफ पा हुकुम पाइब का निस्सीब। मेकोमी रीब पा कुल मकोव्रथु, निसाफ पाइब। 6 गो मोआब आ ठेयब लेश्शा पशो लोव्र नैतय। मेको थम ठेयब लेश्शो बाक्ब। मेको आ ठेयब लेत्तीके नु बोेरशा लोव्र पतीके फश खोदेंशो बाक्ब।

7 मोपतीके मोआबी रोंका पामेक्ल। मोआब आ पर्वम रोंका पामेक्ल। थाम्पा रोंका पने। किर-हारेसेथ डा अडगुर शोब्ले आ पर्वम रोंका पने।

8 हेश्बोन डा रू खतम दुम्तेक्म। सिब्मा डा अडगुर बोट मलीनीम। मेको आ अडगुर शांबुमी रागी रागी डा हुकुम पाइब आन कली दुक्पाइक्तु। मेको आ अडगुर बोट याजेर सम्म लशा, गोरशो रागी सम्म जाक्दीत्त। मेको आन शाक्श ब्रशा, समुन्द्र आ आइक्की हांबु सम्म जाक्दीत्तेक्म। 9 मोपतीके गो सिब्मा डा अडगुर बोट आ पर्वम याजेर खोदेंब पा डाक्नुड। गो इस कली आं प्रेक्कुम जिप्पाइक्नुड। मारदे हना हेश्बोन नु एलेआले, इस अडगुर नु अन्न ओंइची नाक्त मजाक्ब। यसैया १५:४-९ 10 मिनु ग्रेल्शो रू रे ग्येरशो सेंदा मनेंसीब। इस अडगुर रूमी ग्येरशा कुम्सो मपाइनीम। सुइमी अडगुर मखाक्नीम। आन ग्येरशा कुम्सो पतीके जाम्त। येरमीया ४८:३३

11 मोपतीके मोआब आ पर्वम आं थुं डाक्ब। मिनु कीर-हेरेस आ पर्वम आ थुं खाइक्ब। 12 मिनु मोआबी आन देवी देवता बाक्शो डांडा डोइश्शा, शुश प्रार्थना पाम्तेक्म हना यो, मेको शोर गाक्शो दुम्ब।

13 एको परमप्रभु यावेमी मोआब आ पर्वम डोंइती देंशो लोव्र बाक्ब। 14 मुल चहिं परमप्रभु यावेमी “गाल्च ताइबम आ बर्स हिक्शो खोदेंशो पा बर्स सांमी मोआब आ दारस जाम्शा लाइब। मिनु आ ठेयब हुल शुश मलीनीम। मेको आ लीशो मुर शुश मदुम्थु, सक्ति मपाइश्शो दुम्नीम” देंत। यसैया २१:१६

दमस्कस नु इस्राएल कली श्येत  
येरमीया ४९:२३-२७; आमोस १:३-५

17 मिनु परमप्रभु यावेम दमस्कस आ पर्वम यसैया कली “दमस्कस सहर खतम दुम्शा मलीब। मेकेर ब्रेश्शो खिं ला बाक्नीम। 2 आरोएर डा सहरपुकी प्रोंइसीशो दुम्शा, क्यारश भेडा योव्रतीके दुम्ब। मेको काइ महिक्सीशो नाइक्तीक दुम्ब। 3 एफ्राइम डा बोल्यो दरवार नुजीम। दमस्कस डा राज्य मलीब। अराम डा लीशो मुरपुकी इस्राएली आन जाम्शो छेडछेड खोदेंशो दुम्नीम” दे मुर नेल्ल आन परमप्रभु यावेम देंत। २२राजा १६:९

4 मिनु परमप्रभु यावेमी “मेको नाक्ती याक्ब आ मुर आन रिम्स नेल्ल लाइब। मेको नेल्ल गेयनीम। 5 मिनु दोदेंशो पा चेरब रिक्ब मुरुमी गुइ कामी चेरब ग्याइश्शा, अर्को गुइमी रिक्बा, मोदेंशो पा रेफाइम डा बेसीम सिला गुप्तीक बाक्ब। 6 तेल रवा हिक्शा गेडा नेल्ल तोक्शा यो का निक्शी लीशो खोदेंशो पा, मेको आ डल नु राशीमी का निक्शी ला लीनीम” दे परमप्रभु यावे, इस्राएली आन परमप्रभुमी देंत।

7 मेको नाक्ती मुरपुकीमी आंम कली सेल्ब कली मिम्नीम। मिनु इस्राएली आन का ला बाक्शो परमप्रभु यावे गे कोव्रनीम। 8 मेकोपुकीम आंम आन गुइमी सेल्शो देवी देवता आन कली चढेचा ममिम्नीम। आंमा आन सेल्शो मूर्ति पाइश्शो थाम नु धूप चोतीके कली मकोव्रनीम।

9 मेको नाक्ती आन बोल्यो सहरपुकी हिक्वी नु एमोरी आन प्रोंइशो सहर खोदेंशो दुम्नीम। मेको आन सहर इस्राएली आन पर्वम प्रोंइशो बाक्तेक्म। मेकेर डा मारेइ मारेइ नेल्ल खतम दुम्शो बाक्तेक्म।

10 मारदे हना गे इन कली पाप रे प्रोंइब परमप्रभु कली प्रेंताक्नी। मिनु इन ख्रुइक्तीक सेरथे फुल्लु कली मफ्रुक्नी। गे अर्को रागी डा रिश्शो अडगुर ख्रुम्तीनी। यसैया ६:२-३; ब्यवस्था ३२:१५ 11 गे दारशो बोट ख्रुम्तीनी हना यो, मिनु आ दीसा सुनी बोइक्पाइक्तीनी हना यो, मेकेर खुप्चा कली मारेइ मलीब। श्येत जतीके नु खाइश्शो मसातीके नाक्त मोदेंशो दुम्ब।

शुश रागी डा मुर आन हुल

12 आबी, शुश रागी डा मुर आन रेयके, समुन्द्र डा ब्वाक्कु खोदेंशो पा नेंसीब। आबी, रागी रागी डा मुर आन ग्रीशो बारशो खोला आ रेयके खोदेंशो बाक्ब। 13 रागी रागी डा मुरपुकी ठेयब ब्वाक्कु ग्रीशो खोदेंशो पा ग्रीनीम। तन्न परमप्रभुमी मेको आन कली हुइक्ब। मिनु मेकोपुकी डोन प्रोक्नीम। मेको डांडा डा फश गिवारम बेरपाइश्शो भूस फुरक खोदेंशो दुम्नीम। 14 नाक्दो हिंचा डा श्येत जाइनीम। नां सोव्रचा क्येडा डोंइती मेको नेल्ल

बेक्नीम। आंइ मार मार रोइक्वब नु खुइ पाइबपुकी मोदेशो दुम्नीम। यसैया ३७:३६

कूश रागी आ पर्वम लोत्र पशो

18 आबी, शुश बेरशो रेयके नेंसीशो एथीयोपीया खोला आ आइक्वी हंबुम बाक्शो रागी। सेफन्याह ३:१०<sup>2</sup> गे लोत्र कुरब मुर आन कली रीब पा डोंगाम समुन्द्रम सोइक्ताक्वी। गे लोत्र कुरबपुकी, लाइश्शो मुर नु रीब पा गेय पाइब मुर आन रागी लन। डोन नु नेक्था डा मुर नेल्ल मेको आन कली तशा हिंनीम। मेको सक्ति पाइश्शो नु ग्राब रागी डा मुर बाक्नीम। आन रागी शुश खोलाम चेशो बाक्ब।

<sup>3</sup> गे रागी रागीम बाक्ब मुरपुकी, रागी नेल्लेम ब्रोंडबपुकी डांडाम छेदर खूक्शो ताइतीनी हना, कोवडीन। तुराही ताप्शो बाक्त हना, नेनीन। <sup>4</sup> मारदे हना परमप्रभु यावेमी आं कली “गो आं बाक्तीके रे पा सिक्सी पा कोव्रनुड। नाप्शो नां डा नाक्त खोदेशो नु बाली नाली रिक्वी ना हुप्शो नांमी गोस्स का गूशो खोदेशो पा सिक्सी पा कोव्रशा बाक्नुड। <sup>5</sup> अडगुर मीचा क्येडा डोंइती फू बोइश्शा, गेडा सिक्ब, मिनु मीब। मेना मेकोमी अडगुर कली गुयेम मुंडशा, आ बरशो राशी खोइश्शा ताइक्ब। <sup>6</sup> मिनु डांडा डा ठेयब चिक्ब नु रागी डा जन्तु आन कली ब्वचा गेब। होश दुम्तीके ठेयब चिक्ब मेको तारी नित्नीम। मिनु हिंउदम ब्वाकी डा जन्तुपुकीम मेको ब्वशा, मेको आ तारी इन्नीम” देंत।

<sup>7</sup> मेना लाइश्शो नु दारशो मुरपुकीमी मुर नेल्ल आन परमप्रभु यावे कली मार मार चाक्नीम। मिनु मेको आन कली तशा डोन नु नेक्था डा मुरपुकी हिंनीम। मेकोपुकी सक्ति पाइश्शो नु ग्राब रागी डा मुर बाक्नीम। मेको आन रागी खोलाम चेशो बाक्ब। मेको आन मार मार मुर नेल्ल आन परमप्रभु यावे आ बाक्तीके सियोन डांडाम चाक्नीम। भजन संग्रह ६८:३०-३२; प्रेरित ८:२७

इजीप्त कली निसाफ पशो  
येरमीया ४६:-; इजीकीएल २९:-३२:-

19 मिनु परमप्रभु यावेम इजीप्त आ पर्वम यसैया कली “कोव्रडीन, परमप्रभु यावे रीब पा बेरब गोस्सुम इजीप्त रागी जाक्ब। मेकेर डा मूर्तिपुकी हिंशा खिखि पाइनीम। इजीप्त डा मुर आन थुं लुकच लाइब। <sup>2</sup> गो इजीप्त डा मुर आन कली आंम आंमा लडाइ पपाइक्नुडमी। मोपा मेको आन लोक्ब नु लडाइ पाइनीम। आन नेक्था डा मुर लडाइ पमुइनीम। सहर सहर लडाइ तोमुइनीम। राज्य राज्य लडाइ तोमुइनीम। <sup>3</sup> मिनु इजीप्त डा मुर आन थुं लुकच लाइब। गो मेको आन मिम्शो खतम सेल्लुड। मिनु मेकोपुकीमी आन मूर्ति नु बेक्शो मुर आन सल्ला नेंचा माल्नीम। <sup>4</sup> गो इजीप्त डा मुर आन कली शिशो मपथु, सासन पाइब आ गुइमी जिम्मा गेनुडमी। मिनु हिंचा डा पिपमी मेको आन कली सासन पाइब” दे परमप्रभु, मुर नेल्ल आन परमप्रभु यावेमी देंत।

<sup>5</sup> मिनु नील खोला डा ब्वाक्कु सोव्रना सोव्रन लशा, ब्वाक्कु मबाक्शो दुम्ब। <sup>6</sup> मेकेर डा ब्वाक्कु रिना पाइब। मिनु इजीप्त डा नील खोला डा आइक्व खोलापुकी सोव्रशा शुश मलीनीम। <sup>7</sup> नील खोला आ नेक्था दिम दुम्शा, मुरपुकीम रू सेल्लनीम। तन्न आन शोक्शो मारेइ मारेइ सोव्रशा, फशेम योल्ब। <sup>8</sup> मिनु डांड साइक्ब मुर नेल्ल रोंका पाइनीम। बोल्सी ग्यारबपुकी नु ग्याइल आप्बपुकी “मार पचा, दो पचा” देंनीम। <sup>9</sup> श्येले सेल्ब नु वा प्रोव्रबपुकीम सुर्ता पाइनीम। वा प्रोव्रब हिंनीम। <sup>10</sup> प्रोव्रना प्रोव्रन बाक्बपुकी राव किक्नीम। मिनु गाल्च ताक्शा गेय पाइबपुकी रोंका पाइनीम।

<sup>11</sup> सोआन डा ठेयब मुरपुकी मूर्ख बाक्नीम। फाराओ कली अर्ती गेबपुकीम दूली अर्ती गेनीम। गे दोपा फाराओ कली “गो जोक्ब तुइक्ब नड। गो साइ डोंइती डा पिप आ खिं रे पिशो बाक्नुड” देंने चाप्नीनी? <sup>12</sup> गे, निप्स पाइश्शो मुरपुकी ते बाक्नी? गेपुकीम मुर नेल्ल आन परमप्रभु यावेमी इजीप्त कली मार पचशो बाक्मे, मेको लोत्र पा मुर आन कली तुइक्पतीन। <sup>13</sup> सोआन डा ठेयब मुरपुकी मूर्ख दुम्तेक्म। मेम्फीस डा ठेयब मुरपुकीम जोल लोत्र कली थमा सुइक्नीम। मिनु मेको आन नेल्ल क्येडा ठेयब मुरपुकीमी इजीप्त डा मुर आन कली हेंथे लां खोइक्पाइक्नीम। <sup>14</sup> परमप्रभु

यावेमी मेको आन कली ग्रांग्ये माग्ये पोक्तीक सोक्तीम प्रिंताक्मी। मेकोपुकीम इजीप्त रागी कली दुक्शो मुर आन मेशो तार गाक्शो खोदेशो सेल्लेक्म। <sup>15</sup> इजीप्त रागी कली सुइमी वारच पने मचाप्नीम।

<sup>16</sup> मेको नाक्ती इजीप्त डा मुर आन थुं मीश मुर आन थुं खोदेशो दुम्ब। मेकोपुकी मुर नेल्ल आन परमप्रभु यावेमी आ गुइ क्युक्शो तशा खिखि पा हिंनीम। <sup>17</sup> इजीप्त रागी डा मुरपुकी यहूदा डा मुर आन क्येडा हिंनीम। मुर नेल्ल आन परमप्रभु यावेमी इजीप्त रागी कली मार पचशो बाक्बा, मेको लोत्र नेंब नेल्ल हिंनीम।

रागी सां आन कली आसीक

<sup>18</sup> मिनु मेको नाक्त इजीप्त रागी डा ५ ओटा सहरमी कनानी आन लोत्र ब्वाक्नीम। मिनु सहर डा मुरपुकीमी, मुर नेल्ल आन परमप्रभु यावे आ नेंमी कसम जाइनीम। मेको सहर का आ नें इर-हेरेस बाक्ब। इर-हेरेस आ अर्थ नां आ सहर देंसीब। यसैया ६५:१६; येरमीया १२:१६ <sup>19</sup> मेको नाक्ती इजीप्त रागी आ दातेमी परमप्रभु यावे कली चढ़ेतीके का सेल्लनीम। मिनु मेको आ सांदमी परमप्रभु यावे कली थाम का सेल्लनीम। लेवी २६:१ <sup>20</sup> मेको थाम इजीप्त रागीमी मुर नेल्ल आन परमप्रभु यावे कली मिम्तीक चिन्ड का दुम्ब। मारदे हना मेकोपुकीमी श्येत गेचा पुंइसीतीके परमप्रभु यावे कली “वारच पाइक्वी” दे लोत्र पाइनीम। मिनु परमप्रभु यावेमी मेको आन कली आन श्येत रे प्रोंइब का सोइक्ब। मेकोमी लडाइ पा मेको आन कली श्येत रे प्रोंइब। <sup>21</sup> मिनु परमप्रभु यावेमी आंम कली इजीप्त डा मुर आन डोंइती तुइक्पाइसीब। मिनु मेको नाक्त इजीप्त डा मुरपुकीमी परमप्रभु यावे कली थमा सुइक्नीम। मिनु मार मार चोशा चढ़ेतीक चढ़ेशा, कबल पा, आन पशो कबल खाप्नीम। यसैया ६६:१९ <sup>22</sup> परमप्रभु यावेमी इजीप्त डा मुर आन कली तुब्ब। मिनु सापाइक्ब। मिनु मेकोपुकी परमप्रभु यावे आ नोले खोइक्नीम। मिनु मेको आन पुंइशो लोत्र नेंशा। मेको आन कली सापाइक्ब।

<sup>23</sup> मिनु मेको नाक्ती इजीप्त रे अस्सुर सम्म ठेयब लां का दुम्ब। मिनु अस्सुर रागी डा मुरपुकी इजीप्त जाक्नीम। इजीप्त डा मुरपुकी अस्सुर लाइनीम। मिनु इजीप्त नु अस्सुर डा मुर गारशा परमप्रभु यावे कली ठेयब सेल्लनीम।

<sup>24</sup> मिनु मेको नाक्ती इजीप्त, अस्सुर नु इस्स्राएल नेल्ल क्येडा नोले डा इस्स्राएल रागी दुम्ब। मेको रागी रागी आन दातेमी मेको सांफा आसीक ताइब दुम्नीम। ब्यक्स्था ४:२०; रोमी १५:१० <sup>25</sup> मिनु मुर नेल्ल आन परमप्रभु यावेमी आसीक गेशा मेको आन कली “आं इजीप्त डा मुर, आं सेल्लो अस्सुर रागी नु आं योव्रशो इस्स्राएल डा मुरपुकी आसीक रमल” देंब।

अस्सुरमी ग्राशो

20 मिनु अस्सुर डा पिप सारगोन आ सासनमी आ कप्तान लडाइ पथ लशा, अशदोद सहर ग्रात। २राजा १८:१७<sup>2</sup> मेना परमप्रभु यावेमी आमोज आ तौ यसैया कली “इ फेक्शो अरन्डी नु जुत्ता प्रुतो” देंत। मिनु मोपा यसैया जुत्ता मलिकथु, वा मफेक्थु, शिश्रा गाक्चा गोप्नु। <sup>3</sup> मिनु परमप्रभु यावेमी “आं गेय पाइब यसैया दोपा शिश्रा नु जुत्ता मलिकथु बर्स सां सम्म इजीप्त नु एथीयोपीयाम चिन्ड कोंइचा कली गाक्मे, <sup>4</sup> मोपा अस्सुर डा पिपमी इजीप्त रागी नु एथीयोपीया डा मुर आन कली ग्याइश्शा लाइक्ब। ठिटा नु खूशो नेल्ल आन कली शिश्रा, जुत्ता मलिकपाइक्थु नु देल्लो तपाइश्शा लाइश्शा, इजीप्त कली मुने तोक्ब। <sup>5</sup> मिनु सु सुमी “एथीयोपीया डा मुरुम आंइ कली वारच पाइनीम। इजीप्त बोल्यो बाक्ब” देंनीमी, मेको नेल्ल मुने दोक्नीम। <sup>6</sup> मिनु मेको नाक्ती समुन्द्र आ नेक्था बाक्ब मुरपुकीमी “कोव्रडीन, डोंइती वारच पा अस्सुर नु लडाइ पन, दे ब्रेशो रागी आस कली अस्सुर डा पिपम ग्याइश्शा लाइक्नु। गो मुल दोपा ब्रोंइचा” देंनीम” देंत।

बेबीलोन आ पर्वम लोत्र पशो  
यसैया १३:-; यसैया १४:-

21 मिनु परमप्रभु यावेम समुन्द्र आ नेक्था डा गोरशो रागी आ पर्वम यसैया कली “नेगेब रे फश पिना पिन बाक्ब। मेको गोरशो रागी रे

पीब। मेको हिंचा डा रागी बाक्ब। 2 गो हिंचा डा लोव्र का नेंता। श्येत गेबपुकीम श्येत ला गेनीम। खतम पोक्बपुकीमी खतम ला पोक्नीमी। एलाम, गे कुवो। गे लशा, मादी रागी डा मुर पुन्दीने। गो मेको आन हुकयी पचा तेक्नुड" देंत। 3 मोपतीके आं पोक्ब खिखि पाइनीम। गो सुत्केरी रोड पशो आल थिचशो मीश मुर खोदेशो दुम्ती। गो राज्ने मचाप्यु, नेंने नु तने मचाप्या डा श्येत जशो बाक्नुड। 4 गो ग्रांग्ये माग्ये दुम्शो बाक्नुड। आं दाक्शो हाम्सोमी नाइक्वा मलुनु, आं कली खिखि पपाइक्ती। 5 मेकोपुकीमी जचा कली ठीक सेल्नीम। वा ब्राइनीम। जाइनीम, तूनीम। ए, कप्तानपुकी, बोक्कीन इन तेक्तीक तेल खेक्तीन। 6 मारदे हना परमप्रभुमी आं कली "कोव्रब मुर का वोतो। मेकोम मार ताइबा, शोव्रडल। 7 मेकोमी शारा डोइक्ब आन कली जोड जोड पा जाक्ना जाक्न ताइब, गधा डोइक्ब नु दलओंठ डोइक्ब तापु हना, शुश कोव्रशा, नोफा दाइश्शा नेनल" देंत। 8 मिनु कोव्रब मुरुमी गुप्स खोदेशो पा, ठेयब सेंदा पा "परमप्रभु, गो नाक्दो नाक्ती खाल पतीकेमी खाल पा राप्शा बाक्शो बाक्नुड। 9 कोव्रडीन, शारा डोइक्ब जोर जोर पा जाक्ना जाक्न बाक्नीम" देंत। मिनु मेकोमी "बेबीलोन ब्रुत। मेको आन देवी देवता आन मूर्ति नेल्ले खपीम ताइक्वा पुंइसाक्म" देंत। प्रकाश १८:२ 10 गे आं तुप्यो नु क्राप्यो रागी डा मुरपुकी, मुर नेल्ल आन परमप्रभु यावे, इस्राएली आन परमप्रभु रे नेंशो लोव्र गो इन कली देंती।

एदोम आ पर्बम पशो लोव्र  
येरमीया ४९:७-२२, २८-३३

11 मिनु परमप्रभु यावेमी दुमा आ पर्बम यसैया कली व्यवस्था २:५ 12 गो सेइर रे सेंदा का नेंता। मेको सेंदामी "ए, खाल पाइब मुर, नाक्दो दोशो दुम्मे? दोशो लीमे? ए, खाल पाइब नाक्दो दोशो दुम्मे? दोशो लीमे?" देंत। मिनु खाल पाइबमी "नां सोव्रब, मिनु नां रिक्ब। मारेइ हिल्लो पचा बाक्त हना, आं बाक्तीक जाक्कीन। मिनु हिल्लो पयीनी" देंत।

अराब रागी आ पर्बम पशो लोव्र

13 मिनु परमप्रभु यावेमी गोरशो रागी आ यसैया कली "ए, अराब रागी डा मुरपुकी गे अराब डा मुर मबाक्तीकेमी बाक्स बाक्वा माल्नीनी। गे दलओंठ डोइश्शा देदान आ थर डा ग्याप्ब लेयब पिने। 14 तेमा रागी डा मुरपुकी, ब्वाक्कु तूतू दाक्ब आन कली ब्वाक्कु चाक्कीन। प्रोक्शा जाक्ब आन कली शोव्ले कुरशा, गुम्थ लने। 15 मारदे हना मेकोपुकी शोइश्शो तरवार, खुक्शो लिब्रा नु ठेयब लडाइ रे ब्रौइशा जाक्शो बाक्नीम" देंत।

16 मिनु परमप्रभुमी आं कली "गाल्व ताइबम आ बर्स हिव्शो खोदेशो पा बर्स का नोले केदार आ दारस नेल्ल जाम्ब। यसैया १६:१४ 17 मिनु केदार डा लडाइ पाइब लिब्रा आप्ब मुर का निक्शी ला लीनीम। मारदे हना एको परमप्रभु यावे, इस्राएली आन परमप्रभु आ देशो लोव्र बाक्ब" देंत।

यरूसलेम आ पर्बम लोव्र पशो

22 मिनु परमप्रभु यावेमी कौंइतीक बेसी आ पर्बम यसैया कली "गे नेल्ल मार दुम्नी डा मीन, नेल्ल इन खिं तार डौंइसीनी? 2 गे, ग्रांग्ये माग्ये नु रेयकेम ब्रीशो सहर, इ बेक्शो मुरपुकी तरवारम क्योरशा साइश्शो मनम। लडाइम साइश्शो यो मनम। 3 इ सासन पाइब कालेम प्रोक्तेक्म। लिब्रा मआप्यु ग्याइक्वा पुंइसाक्म। डौंइती सु सु डोन प्रोक्तेक्म हना यो, मेको कालेम ग्याइक्वा पुंइसाक्म। 4 मोपतीके गो आं कली मकोव्रयीनी। गो हुइ हुइ पा डाक्नुड। आं कली लेम्वा थुं मपने। मारदे हना आं दाक्शो मुर खतम दुम्तेक्म" देंत। येरमीया ८:२३ 5 मिनु नाक्त काम परमप्रभु, मुर नेल्ल आन परमप्रभु यावेमी कौंइतीक बेसीम दिम्शा ताइश्शा नु ग्रांग्ये माग्ये पपाइक्ब। गारो प्रेश्यो डांडा सम्म "वारच पने" दे वाइ ब्रेश्शो सेंदा नेंसीब। 6 एलाममी ब्रा कुरतीके कुरतु। मुरपुकी बग्गी डोइश्शा गाक्वा गोम्तेक्म। कीर सहर डा मुरपुकीमी तेक्तीके शोल्तेक्म। 7 इ रिम्शो बेसी बग्गीम ब्रीशो बाक्नीम। शारा डोइक्ब सहर डा ठेयब लाप्यो आ डौंइती ठीक दुम्शो बाक्नीम। 8 परमप्रभुमी यहूदा आ सुम्तीके हुक्तु। मेको नाक्ती गेपुकी पिप आ या वोइक्तीके, ब्वाकी डा खिं मिम्ताक्नी। 9 मिनु गेपुकीमी दाऊद आ

सहर डा खिं शुश रेक्शो ताइतीनी। मिनु आइदी दोम्ली डा ब्वाक्कु ताप्तीनी। यसैया ७:३ 10 मिनु गे यरूसलेम डा खिं हिव्शा, प्रेश्या, सहर डा गारो बोल्यो सेल्तीनी। येरमीया ३३:४ 11 मिनु गे सहर डा गारो निक्शी आस दातेमी माइत दोम्ली डा ब्वाक्कु तेम्तीनी। तन्न इन कली मोदेशो पपाइक्ब कली ममिम्तीनी। डौंइती रे नेल्ल सेल्ब कली चहिं मान मपनी।

12 मेको नाक्ती परमप्रभु, मुर नेल्ल आन परमप्रभु यावेमी डाक्वा, रोंका पचा, चां खोइक्वा नु अरन्डी फेक्पाइक्वा कली इन कली ब्रेत्ताक्व। आमोस ८:१० 13 तन्न गेपुकीमी ग्येरशा, ब्यफ नु भेडा क्योरशा, ब्वशा, अडगुर शांबु तूशा "लो, जय ब्वय, तूय, मारदे हना दीसा बेक्नय" देंतीनी। १कोरिन्थी १५:३२ 14 मुर नेल्ल आन परमप्रभु यावेमी आं कली "मेको इन मरिम्शो पशो मबेक्नी सम्म लीब" दे परमप्रभु, मुर नेल्ल आन परमप्रभु यावेमी देंत।

एल्याकीम कली योव्रशो

15 मिनु परमप्रभु, मुर नेल्ल आन परमप्रभु यावेमी "गे खिं नेल्ल कली कोव्रब शेब्ना आ बाक्तीकेम लावो। यसैया ३६:३ 16 मिनु मेको कली 'गे मार पना पन बाक्नीनी? गे इ के एकेर मार बाक्बा डा। एकेर इ मुर सु बाक्नीमी। मारदे डांडामी तुरस मुपदी? मारदे सेरथे फुल्लु आगाम मुर बाक्तीके सेल्ती?' देंत 17 परमप्रभु यावेमी इन कली एक रे मरिम्शो पा डोन ताइक्ब। इन कली बोल्यो पा ग्याइक्ब। 18 इ कली हिरशा हुरद आप्शो खोदेशो पा ठेयब रागीमी ताइक्ब। मिनु गे मेक उइ बेक्नेवे। इ दारशो बग्गी यो मेक उइ लीनीम। गे इ होव्रप आ खिं कली मुने तोक्ब बाक्नेवे 19 गो इ कली इ गेय रे गुंइशा, आइक्च सेल्नन।

20 मेको नाक्ती गो हिल्लीयाह आ तौ आं गेय पाइब एल्याकीम कली ब्रेत्नुड। 21 मिनु गो मेको कली इ वा फेक्पाइक्नुड। इ किप्शुर किप्पाइक्नुड। मिनु इ अधिकार मेको कली गेनुड। मिनु मेको यरूसलेम नु यहूदा डा मुर आन आफ दुम्ब। उत्पत्ती ४५:८ 22 गो दाऊद आ खिं डा सांचो मेको कली गेनुड। मेकोमी रोक्ब, सुइम मचोक्नीम। मेकोमी चोक्ब सुइम मरोक्नीम। प्रकाश ३:७ 23 मिनु गो मेको कली किला खोदेशो पा सारो खपीम ग्युक्नुड। मेको आ किकी पिपी आन खिं डा मान पाइक्वा पुंइसीब दुम्ब। 24 मिनु आ आफ आ खिं डा ठेयब मुर नु आल चच युइ नेल्ले मेको आ अधिकारम बाक्नीम। खिं डा बोस नेल्ल मेको आ अधिकारम बाक्नीम" देंत। 25 मेको नाक्ती मुर नेल्ल आन परमप्रभु यावेमी "मेको सारो खपीम ग्युक्शो किला हिम्पाइक्ब। मेको कली क्योरशा ताइक्नीम। मिनु आ पतीक अधिकार नेल्ल जाम्ब" दे परमप्रभु यावेमी देंत।

टायर आ पर्बम लोव्र पशो  
इजीकीएल २६:-२८:-

23 मिनु परमप्रभु यावेमी टायर आ पर्बम यसैया कली "गे, टारसीस डा जहाजपुकी रोंका पने। मारदे हना टायर खतम दुम्शो बाक्ब। मेकेर खिं नु जहाज नाइक्तीके मलीब। साइप्रस टापु रे जाक्ब आन कली नेंपाइश्शो बाक्तेक्म। इजीकीएल २७:१२ 2 समुन्द्र आ नेक्था बाक्बपुकी रोंका पने। गे सीदोन डा ग्याप्ब लेयबपुकी इन मुर समुन्द्र शोक्साक्म। 3 इन मुर ठेयब ब्वाक्कु शोक्शा, लशो बाक्तेक्म। शीहोरम शोक्शो अन्न नु नील खोला आ एर ओंथ खुप्यो इन ग्याप्तीक लेयतीक बाक्त। मिनु गे रागी रागी डा मुर आन ग्याप्ब लेयब बाक्तीनी। 4 सीदोन, गे मुने पावो। मारदे हना समुन्द्र डा बोल्यो टायर सहरमी 'गो सुत्केरी रोड मपड। गो आल मथिड। गो वौंइश आल नु मीश आल आन कली मथुलु' देंतीनी। 5 इजीप्त रागीम टायर आ पर्बम लोव्र जाक्दीम्मेनु, मेकेर डा मुर हिनीम। 6 गेपुकी टारशीश शोक्शा, लने। समुन्द्र आ नेक्था बाक्ब मुरपुकी रोंका पने। 7 मार, मेको इन ठेयब सहर बाक्बा डा? मेको साइ डौंइती रेन बाक्शो सहर बाक्त। मेकेर डा ग्याप्ब लेयब मुरपुकी डोन डोन सम्म लाम्तेक्म। 8 सुमी टायर कली मोदेशो पचा मिम्ता? डौंइती टायर सिरपेच योक्ब बाक्त। आ ग्याप्ब लेयब मुर पिप आ तौ खोदेशो बाक्तेक्म। आ ग्याप्ब लेयबपुकी रागीम मान पाइक्वा पुंइसीब बाक्तेक्म। 9 मिनु मुर नेल्ल आन परमप्रभु यावेमी मेको मिम्ताक्व। आ शुश दारस आ पर्बम ठेयब लेत्तीके खतम सेल्चा नु आ मान पाइक्वा पुंइसीब

आन कली मुने तोक्वा कली मिम्ताक्व। <sup>10</sup> टारशीश डा जहाजपुकी इन रागी लने। मुल रे मेकेर जहाज नाइक्तीके मबाक्व। *इजीकीएल २७:१२*  
<sup>11</sup> परमप्रभु आ गुड समुन्द्र तार दिंशो बाक्व। मिनु राज्य राज्य आन कली हिम्पाइशो बाक्व। परमप्रभु यावेमी कनान रागी डा बोल्यो दरवार आन कली खतम सेल्चा” दे अरेशो बाक्व। <sup>12</sup> मिनु मेकोमी “गे दिच्चा पुंडसीशो कन्ने तमी सीदोन, मुल रे ठेयब लेशो मबाक्नेवे। बोक्को, साइप्रस टापु गे लावो। गे मेकेर यो इ थुं नाइशा बाक्वा मताइनेवे” देंत।

<sup>13</sup> कल्दी डा मुर आन रागी कोवडीन। अस्सुरम ममाइ, कल्दीपुकीम सहर नेल्ल मुर मबाक्तीके सेल्लेक्म। मेको टायर सहर ब्वाकी डा जन्तु आन बाक्तीक सेल्लेक्म। मेको सहर पुम्चा कली लाइशो खिं सेल्लेक्म। सहर डा दरवार प्रेल्तेक्म। सहर नेल्ल खतम सेल्लेक्म। <sup>14</sup> टारशीश डा जहाजपुकी रॉका पने। मारदे हना इन बोल्यो दुम्तीके प्रेल्तेक्म।

<sup>15</sup> मिनु नोले टायर ७० बर्स, पिप का आ ब्रॉइतीके बर्स खोदेशो, मदुम्म सम्म प्रेंचा पुंडसीब। मिनु मेको ७० बर्स नोले टायर सहर तेल्लेम आ कुम्सो देशो खोदेशो दुम्ब। <sup>16</sup> गे प्रेंसीशो तेल्लेम, इ बीना रिम्शो पा ताप्था, सहरम हिरसो। शुश कुम्सो पावो। मिनु इ कली फ्रुक्नीमी कों? <sup>17</sup> मिनु ७० बर्स नोले परमप्रभु यावेमी टायर सहर कली मिम्ब। मिनु मेकोम लेंशा आ तेल्लेम पशो डा क्येट ताइब। मिनु मेकोमी तेको तेको रागी डा राज्य डा पिपपुकी नु तेल्लेम पाइब। <sup>18</sup> मिनु आ तेल्लेम पा चेम्शो क्येट परमप्रभु यावे के दुम्ब। मेको क्येट महेंनीम। आ चेम्शो क्येट परमप्रभु यावे आ डोंइती बाक्व। मेको क्येट मुर आन कली जचा फेक्वा कली गेनीम।

रागी नेल्ल आन कली निसाफ

**24** परमप्रभु यावेमी रागी नेल्ल मुर मबाक्तीक सेल्ब। नेल्ल श्येत्थ सेल्ब। रागी कली ग्येत्थ लुकच पा मेकेर डा मुर नेल्ल आन कली ब्रपाइक्व। <sup>2</sup> मुर आन कली दोदेशो दुम्बा, चढेब आन कली यो मोदेशो दुम्ब। वाइल आन कली दोदेशो दुम्बा, आन होवप आन कली यो मोदेशो दुम्ब। वाइलीम आन कली दोदेशो दुम्बा, आन होवपोक्म आन कली यो मोदेशो दुम्ब। ग्याप्ब आन कली दोदेशो दुम्बा, लेयब आन कली यो मोदेशो दुम्ब। जेर थुइक्व आन कली दोदेशो दुम्बा, जेर गेब आन कली यो मोदेशो दुम्ब। <sup>3</sup> रागी थमा पा श्येत्थ नु मुर मबाक्तीके दुम्ब। मारदे हना मेको परमप्रभु यावे आ देशो लोव बाक्व।

<sup>4</sup> रागी फू खोदेशो पा सोल सुल बेक्व। रागी नेल्ले मोदेशो दुम्नीम। रागी डा मान पाइक्वा पुंडसीब नेल्ल बेक्नीम। <sup>5</sup> रागीम बाक्व मुरपुकीमी रागी कली खतम सेल्नीम। मारदे हना मेकोपुकीमी परमप्रभु यावे आ अरेशो मटीम। परमप्रभु आ फुल्लुम मुशा ब्रेक्वो लोव कली ममिम्तेम। आ गेना हना यो लीब कबल पशो मखबेम। <sup>6</sup> मोपतीके सरापमी रागी कली खतम सेल्शो बाक्व। मिनु मेकेर बाक्व आन पापम पतीके श्येत जाइनीम। का निक्शी ला लीनीम। <sup>7</sup> अडगुर शांबु ग्युरब। अडगुर बोट सोवनीम। डोंइती ग्येरसीशा बाक्व मुर नेल्ल हुकयी पाइनीम। <sup>8</sup> बाजा ताप्ब आन ग्येरशो रेयके मनंसीब। ग्येरशो मुर आन सेंदा मलीब। बीना ताप्ब आन रेयके जाम्ब। <sup>9</sup> मुल रे अडगुर शांबु तूडमेनु, कुम्सो मपाइनीम। राकसी तूब आन कली राकसी काइब। <sup>10</sup> मेको ग्रांग्ये माग्ये सहर खतम दुम्ब। मेको खिं डा लाप्चो नेल्ल चोक्सीशा, सुइ ओवने मचाप्नीम। <sup>11</sup> लां गाक्व मुरपुकी अडगुर शांबु मबाक्तीके सुर्ता पाइनीम। ग्येरसीतीके नेल्ल नुप्ब। रागी डा ग्येरसीतीके जाम्त। <sup>12</sup> सहर मुर मबाक्तीक दुम्शा, आ गारो डा ठेयब लाप्चो ब्रेल्तेक्म। <sup>13</sup> मोदेशो रागी नु रागी रागी डा मुर आन कली दुम्चा माल्ब। तेल रवा आन फल थेप्था नु अडगुर सेक्शा यो सीला लीशो खोदेशो पा रागी नेल्ल मोदेशो दुम्चा माल्ब।

<sup>14</sup> मिनु मेको लीशो मुरपुकी ग्येरशा ठेयब सेंदा पा “परमप्रभु यावे ठेयब बाक्व” दे पच्छिम रे कुम्सो पाइनीम। <sup>15</sup> मोपतीके पूर्व डा मुर “परमप्रभु यावे ठेयब बाक्व” दे मेको कली ठेयब सेलीन। समुन्द्र आ नेक्था बाक्व आन कली “परमप्रभु यावे, इस्राएली आन परमप्रभु आ नें कली मान पने” देंमानु, मेको कली मान पाइनीम। <sup>16</sup> गो रागी आ सुर रे परमप्रभु कली ठेयब सेल्तीक कुम्सो पशो नेंतय। ठीक पाइब, परमप्रभु कली ठेयब सेल्तीक कुम्सो बाक्नीम। तन्न गो शुश श्येत जाइब दुम्ती। आबी, गो श्येत जाइब

दुम्ती। मारदे हना दूली पाइबम, मुल सम्म दूली पाइनीम। मिनु मेको क्येडा यो दूली पाइनीम।

<sup>17</sup> गे रागी डा मुरपुकी, इन डोंइती शुश हिंचा डा बाक्व। इन डोंइती बिक्तीके नु ब्वारद बाक्नीम। <sup>18</sup> मिनु सु सु शुश हिंचा डा रेयके नेंशा प्रोक्नीमी, मेको बिक्तीकेम बिक्नीम। सु सु बिक्तीके रे गूनीमी, मेको ब्वारदम रेल्नीम। मारदे हना सरीड डा झेल रोक्सीशो बाक्नीम। मिनु रागी आ जग हिम्सीशो बाक्व। *येरमीया ४८:४३-४४; आमास ५:१९; उत्पती ७:११* <sup>19</sup> मिनु रागी एश्शा, ब्रोल्लब। खिनुम हिम्सीब। *२पयूस ३:१०* <sup>20</sup> रागी अडगुर शांबुम दुक्वो मुर खोदेशो पा एर ओथ हिम्सीब। खिनुम हिम्शो कटेरा खोदेशो पा हिम्सीब। मुर आन हेंथे पतीकेमी मेको मोदेशो सेल्लु। मिनु रागी गेनायो मबोक्वा डा पा गोल्ब।

<sup>21</sup> मेको नाक्ती परमप्रभु यावेमी स्वर्गम बाक्व सक्ति पाइशो आन कली सजाइ गेब। मिनु रागी कली सासन पाइब पिप आन कली सजाइ गेब। *दानीएल १०:१३; येरमीया ४६:२५* <sup>22</sup> जेल्खानम खुम्सीशो मुर खोदेशो पा बिक्तीकेमी खुम्सीचा पुंडसीनीम। मेको जेल्खानम चोक्वा पुंडसीशा, शुश नाक्त नोले सजाइ ताइनीम। <sup>23</sup> मेना तास्ला लल जीब, नां आ छेडछेड जाम्ब। मारदे हना मुर नेल्ल आन परमप्रभु यावेमी सियोन डांडा नु यरूसलेमम सासन पाइब। खाल्पा आन डोंइती आ छेडछेड कोंइब।

ग्येरशा कुम्सो पशो

**25** परमप्रभु यावे, आं परमप्रभु बाक्नीनी। गो इन कली मान पशा, इन नें ठेयब बाक्व, दे कुम्सो पाइनुड। मारदे हना गे छक लाक्वा डा गेय पाइतीनी। इन डोंइती मिम्शो मप्रोंइथु, थमा पा थुम्तीनी। <sup>2</sup> मारदे हना गे सहर कली फुल्लु तेल्लीके खोदेशो सेल्तीनी। गारो हिरशो सहर कली प्रेल्तीनी। अर्को रागी डा मुर आन दरवार मुल मली। मिनु मेको गेनायो मसेल्नीम। <sup>3</sup> मोपतीके बोल्यो मुरपुकीम इन कली मान पाइनीम। बोल्यो राज्यपुकी इन क्येडा हिंनीम। <sup>4</sup> मारदे हना गे पुडग नु मारेइ मथीब आन कली वारच पाइब बाक्तीनी। फश गिवार पवानु, फाम्सीतीके नु नां पवानु, सितल थेरतीके बाक्तीनी। मारदे हना मेको शिशी मपाइक्व आन गाइक्वा, फश गिवार गारोम थोक्सीशो खोदेशो बाक्व। *यसैया ४:६* <sup>5</sup> सोवशो रागीमी नांम नाप्पाइशो खोदेशो पा, अर्को रागी डा मुर आन रेयके पतीक साम्तीनी। नां कली गोस्सुम सुम्शो खोदेशो पा, शिशी मपाइब आन ग्राशा ग्येरशा पतीके कुम्सो तेक्तीनी।

परमप्रभु आ गेशो भोज

<sup>6</sup> मिनु मुर नेल्ल आन परमप्रभु यावेमी सियोन डांडामी रागी नेल्ल डा मुर आन कली थम ठेयब भोज का सेल्ब। ब्रोवशो नु चोक्वो अडगुर शांबु नु ब्रोवशो जचा थोवक के भोज गेब। *मत्ती २२:२-४* <sup>7</sup> मिनु मेकोमी मेको डांडामी जात जात डा मुर आन थुं डा सुम्तीके हुक्व। रागी रागी डा मुर आन सुम्तीके हुक्व। मेना मेकोमी मुर आन कली मबेक्पाइक्व। <sup>8</sup> मेना परमप्रभु, परमप्रभु यावेमी मुर नेल्ल आन प्रेक्कु फिक्व। आ मुर आन कली मदाक्तीके रागी नेल्ल रे गुंडब। मारदे हना परमप्रभु यावेमी मेको लोव पापु। *१कोरिन्थी १५:५५; प्रकाश ७:१७* <sup>9</sup> मिनु मेको नाक्ती मुरपुकीमी “कोवडीन, मेको आंइ परमप्रभु बाक्व। गो मेको आ लां कोवतक। मिनु मेकोम आंइ कली श्येत रे प्रोंइतु। मेको आंइ रिम्शा बाक्वो परमप्रभु यावे बाक्व। गोपुकी आ प्रोंइशो तशा ग्येरसाक्व। *भजन संग्रह ४८:१५* <sup>10</sup> मारदे हना परमप्रभु यावे आ गुड मेको डांडा तार बाक्व। मिनु मोआब रागी डा मुर आन बाक्तीके दिम्चा पुंडसीनीम। मेको नेल्ल मोव्रल वोइक्तीके खोदेशो पा दिम्चा पुंडसीनीम। <sup>11</sup> मिनु दोपा दोम्ली ग्यारब मुरपुकीमी आन गुड दिंनीमी, मोपा मेकोपुकीमी आन गुड दिंनीम। मिनु परमप्रभुमी मेको आन ठेयब लेशो नु आन सक्ति आइक्व सेल्ब। <sup>12</sup> मिनु आ बोल्यो नु लाइशो गारो प्रेशा, आइक्व सेल्शा, खप नु उइक्व सेल्ब। मिनु फुरक दुम्पाइक्व” देंनीम।

## परमप्रभु आ मुर आन कुम्सो

26 मेको नाक्ती यहूदा रागी डा मुरपुकीम मार कुम्सो पाइनीम देंशा हना "आंड सहर बोल्यो बाक्ब। परमप्रभुमी आंड कली ग्राचा गेब। लडाइ पाइब आन कली ओवने मचाप्तीके गारो हिरब। 2 मेको सहर डा गारो डा लाचो रोक्कीन। ठीक पाइब नु परमप्रभु यावे कली थमा सुइक्चा मप्रॉइब ओवने चाप्मेक्ल। भजन संग्रह ११८:२० 3 गे ग्येथ लुक्च मदुम्ब थुं पाइश्शो मुर आन कली थुं नाइक्चा गेनीनी। मारदे हना मेकोपुकी इन कली थमा सुइक्ब बाक्नीम। 4 गे परमप्रभु यावे कली गेना हना यो थमा सुतीन। मारदे हना परमप्रभु यावे गेना हना यो बाक्ब, सेरथे फुल्लु का बाक्ब। ब्यवस्था ३२:४ 5 मारदे हना मेकोमी ठेयब लेश्शो मुर ब्रेम्पाइक्तु। आन सहर कली आइक्च सेल्शा, खपीम वोइश्शा, फुरक नु उडक्थ सेल्लु। 6 मुरपुकीम मेको कली दिम्नीम। प्रुडग मुरपुकीमी मेको कली दिम्नीम। क्येट मथीबम यो मेको कली दिम्नीम।

7 ठीक निसाफ पाइब आ लां ग्येथ बाक्ब। गे ठीक पाइब आ लां थेल्लीनी। 8 परमप्रभु यावे, गो इन निसाफ पतीके कली रिम्नीकी। आंड थुं नेल्लेमी इन नें नु इन कली मिश्शा बाक्नीकी। 9 गो नाक्दो इन कली शुश मिम्नुड। गो आं थुंमी इन कली माल्ना माल्न बाक्नुड। मारदे हना गे रागी डा मुर आन कली निसाफ पाइतीनी हना, रागीम बाक्बपुकीमी ठीक पतीके शेंसीनीम। भजन संग्रह ६३:७ 10 परमप्रभु यावे आ अरेशो लोव मटीब मुरपुकीमी शिशो ताम्तेक्म हना यो, ठीक पतीके मशेंसीनीम। मेकोपुकीम ठीक पाइब आन रागीमी दूली पाइनीम। मिनु परमप्रभु यावे कली मान मपाइनीम। 11 परमप्रभु यावे, इन गुइ मेको आन परबम क्युक्शो बाक्तीनी हना यो, मेकोपुकीमी मतुइक्नीम। गे इन मुर आन कली दाक्शो तशा, मेकोपुकी मुने दोक्मल। इन जोरी सत्रु आन कली नेक्ब मीमी मेको आन कली यो नेक्मल। यसैया ३७:३२ 12 परमप्रभु यावे, गे आंड कली थुं नाइक्चा गेनीनी। मारदे हना मार रिश्शो पका, मेको नेल्ल इन रे पा पिशो बाक्ब। यसैया ९:६ 13 आंड परमप्रभु यावे अरु ठेयब मुरुम आंड कली हुकुम पाम्तेक्म। तन्न गे का ला आंड कली अरेब बाक्नीनी। 14 बेक्शो मुर मब्रॉइनीम। वांकु मबोक्नीम। मारदे हना गे मेको आन कली साइश्शा, मेको आन कली मिम्तीक यो क्याम्ताक्नी। 15 तन्न गे रागी डा मुर आन कली सोपाइश्शा बोपाइश्शा शुश सेल्लतीनी। गे मान ताइब बाक्नीनी। गे मेको रागी कली ठेयब सेल्लतीनी। 16 परमप्रभु यावे, मेको मुरपुकीमी श्येत जशा, इन कली माल्तेक्म। इन गेशो सजाइ तशा, आइक्च सेंदाम इन कली पुंडतेक्म। होसे ५:१५ 17 दोपा आल थिचा चिक्शो मीश मुरुम आ आल थिची ना वाइ ब्रेश्शा, रोम्सीबा, मोपा परमप्रभु यावे, गो इन डोंइती बाक्तक। यहन्ना १७:२१; प्रकाश १२:२ 18 मिनु गोपुकी यो कोव्रज कुरशा रोम्साक्क। तन्न फश ला थीतक। गोपुकी आंड रागी कली प्रॉइने मचाप्क। मिनु आल थिशा यो शुश दुम्ने मचाप्क। 19 इन बेक्शो मुरपुकी लेंशा ब्रॉइनीम। आन बेक्शो रं सेंसीनीम। गे फुरकुम बाक्बपुकी, बोक्कीन। ग्येरसीशा कुम्सो पने। मारदे हना इन सुनी डा सीत छेडछेडम ब्रशो बाक्ब। मिनु रागीमी शुश डोंइती बेक्शो मुर आन कली गुंडब। इजीकीएल ३७:१-१४; मत्ती २७:५२-५३

20 आं मुरपुकी जाक्शा, इन खिं ओवडीन। मिनु इन नोले लाच्यो चोक्कीन। गाइक्चा मनुम्म सम्म इक्का नाक्ती खुंडसीन। मत्ती ६:६ 21 मारदे हना परमप्रभु यावे आ बाक्तीके रे जाक्ब। मिनु रागीम बाक्ब मरिश्शो पाइब आन कली सजाइ गेब। मिनु रागी तार देम्शो हुश नु साइश्शो मुर नेल्ल मखुइक्थु कोइब" दे कुम्सो पाइनीम। उत्पत्ती ४:१०-११; प्रकाश १८:२४

## इसाएल कली श्येत रे प्रॉइशो

27 मेको नाक्ती परमप्रभु यावेमी आ हिंचा डा, ठेयब नु सक्ति पाइश्शो तरवारमी खेदा पना पन लेव्याथन माइश्शो बुस्स कली सजाइ गेब। ग्रेशा गाक्ब बुस्स लेव्याथन नु समुन्द्रम बाक्ब ठेयब जन्तु कली साइक्ब। भजन संग्रह ७४:१४

## अडगुर रू आ परबम नक कुम्सो

2 मिनु मेको नाक्ती "नेल्ल क्येडा रिश्शो अडगुर रू का बाक्ब" दे कुम्सो पने। यसैया ५:१-७ 3 गो, परमप्रभु यावेमी मेको कली गेना हना यो कोव्रशा, ब्वाक्कु लुक्नुड। मरिश्शो मदुम्ल, दे गो मेको कली नाक्दो नाक्ती कोव्रनुड। 4 गो मगाइक्नुड। चू चोंक वाम हना, गो मेको आन कली लडाइ तोशो खोदेशो पा, तुल्शा चोडमी वा। 5 मोदेशो मदुम्ल हना, मेको गो नु गारशा, आं कली वारच सेल्ब। आं कली वारच सेल्ब। 6 मिनु नोले डा नाक्तीमी याक्बम आ शाक्श थोक्ब। इस्राएल फू बोइश्शा, नक राशी दाप्ब। मिनु रागी नेल्ल मेको आन फल फुलमी ब्रीब। 7 मार, परमप्रभुमी आ कली तुप्ब आन कली तुप्शो खोदेशो पा मेको आन कली यो तुप्बा? परमप्रभुम आ कली साइक्ब आन कली साइश्शो खोदेशो पा मेको यो साइक्चा पुंडसमा? येरमीया ३०:११ 8 ग्याइश्शा लाइक्चा पुंडसीशो रागी रे गुंडशो मुर नु लडाइ पाइतीनी। परमप्रभुमी मेको आन कली मुइश्शा, पूर्व डा फश पवानु, ठेयब फश गिवारमी योल्पाइक्ब। 9 मोपतीके मेको रे पा याक्ब आ मुर आन दोस क्याम्सीब। मेको आन पाप पशो आ परबम मो पचा पुंडसीशो बाक्तेक्म। मेकोमी चढेतीके डा फुल्लु खरी खोदेशो पा फस सेल्ब। मिनु मूर्ति पाइश्शो थाम नु धूप चोशा चढेतीक काइ मलीपाइक्ब। लेवी २६:३० 10 मारदे हना गारो हिरेशो सहर मुर मबाक्तीके दुम्त। मेकेर गोरशो रागी खोदेशो पा मुर मबाक्नीम। मेकेर बाछा जोशा नाइसीनीम। मिनु आ राशी ब्वाइनीम। 11 मिनु मेको आ राशी सोव्रशा, जिक्नीम। मिनु मीश मुरपुकी जाक्शा, चोचा कली शी खुप्नीम। मारदे हना मेकोपुकी रुप्तीक मपाइश्शो थर डा मुर बाक्नीम। मोपतीके मेको आन कली सेल्बमी मेको आन कली शिशो मपाइब। येरमीया ४:२२; ब्यवस्था ३२:१८

12 मिनु मेको नाक्ती परमप्रभु यावेमी युफ्रेटीस खोला रे इजीप्त डा ब्वाक्कु मबाक्शो खोला सम्म अन्न तुप्ब। गे इस्राएल डा मुरपुकी का का पा खुप्चा पुंडसीनीनी। 13 मेको नाक्ती ठेयब तुराही का ग्रीब। मिनु अस्सुर रागीम जाम्शो नु इजीप्त रागीम खेदा पचा पुंडसीशो मुरपुकी जाक्नीम। मिनु यरूसलेम डा परमप्रभु यावे आ डांडामी आ कली ठेयब सेल्लनीम। यसैया ११:११-१२; योएल ३:५

## सामरीया कली निसाफ

28 आबी, गे एफ्राइम डा दुक्शो ठेयब लेश्शो मुरपुकी, इन दारस फू खोदेशो पा बेक्ब। मेकेर ब्रोंवशो जाइब नु दुक्शो मुर ला बाक्नीम। अडगुर शांबुम मेको आन कली नेक्शो बाक्ब। 2 कोव्रडीन, परमप्रभु नु बोल्यो नु सक्ति पाइश्शो का बाक्ब। मेको मुप्स ब्वाइसीशो फश गिवार खोदेशो बाक्ब। शुश रेउ ब्वाइसीशो फश गिवार खोदेशो बाक्ब। परमप्रभुमी मेको कली रागी तार तोक्ब। २राजा १७:५-६ 3 एफ्राइम डा दुक्शो मुर आन दारशो माला कली दिम्शा ताइश्शा पाइनीम। 4 मिनु मेको आ पिया डा दारस, फू खोदेशो पा बेक्ब। मेकेर ब्रोंवशो जाइब ला बाक्नीम। मेको नेल्ल क्येडा डोंइती मीशो फोव्रशी खोदेशो बाक्नीम। सुम मेको ताइबा, मेकोम सेक्शा ब्वाइब।

5 मेको नाक्ती मुर नेल्ल आन परमप्रभु यावे आ लीशो मुर आन कली छेडछेड पा ब्रशो सिरपेच नु पियाम चुइक्तीके दुम्ब। 6 निसाफ पाइब कली ठीक पतीक सोक्त दुम्ब। मिनु लडाइ पाइब आन कली सहर डा लाच्यो रे खेरतीक सक्ति गेब दुम्ब।

## चढेब नु परमप्रभु आ लोव्र पाइब

7 चढेब नु परमप्रभु यावे आ लोव्र पाइबपुकी यो अडगुर शांबुम दुक्नीम। राकसीम दुक्शा, दिड दाड गोल्चा चिक्शा गाक्शो बाक्नीम। चढेब नु परमप्रभु यावे आ लोव्र पाइबपुकी राकसीम दुक्शा गाक्नीम। अडगुर शांबुम दुक्तीके आन मिम्तीके ग्रांग्ये माग्ये दुम्त। मेकोपुकी राकसीम दुक्शा, दिड दाड गोल्चा चिक्शा गाक्शो बाक्नीम। मेकोपुकीम फश लोव्र ला पाइनीम। मतुइक्थु दूली निसाफ पाइनीम। 8 मेको आन जतीक मेर नेल्ले आन मेशोम ब्रीशो बाक्नीम। नेल्ल ग्रांग्रा दिशो बाक्ब।

9 मेकोपुकीमी सु आन कली जोक्तीक तुइक्तीक लोत्र रूपाइक्नीमी? सु कली आन देंशो लोत्र शेंनीमी डा? मेकोपुकीमी नक दूध प्रॉइशो आल आन कली शेंचा चिक्त्मे? 10 मेकोपुकीमी “परमप्रभु आ ब्रेक्शा अरेशो पावो कि पावो, पावो कि पावो, पावो कि पावो। इच्का एकेर इच्का मेकेर” देंनीमी।

11 थमा पा, मेकोमी अर्को रागी डा मरुप्चा डा लोत्र पा, आ मुर आन कली शेंब। ब्यवस्था २८:४९; येरमीया ५:१५; १कोरिन्थी १४:२१ 12 मिनु परमप्रभुमी मेको आन कली “मेको थुं नाइक्तीक बाक्ब। गे दशो मुर आन कली नाइक्चा गेने। थुं बारपाइक्तीक एकोन बाक्ब” देंत। मो हना यो मेकोपुकीमी मनैथु मटीमे। यसैया ३०:१५; मत्ती ११:२८-२९ 13 मोपतीके परमप्रभु यावे आ लोत्र मेको आन कली यो आन खोदेंशो पा मरुप्चा डा लोत्र दुम्ब। मिनु “ब्रेक्शो, अरेशो पावो कि पावो, पावो कि पावो, पावो कि पावो। इच्का एकेर, इच्का मेकेर” देंशो बाक्ब। मिनु मेकोपुकी लशा, नोले गे गोल्शा आन गुइ खोइली जिवनीम। मिनु ब्वारदम रेशशा, ग्याइक्चा पुंडसीनीम।

14 मोपतीके गे शुक्शी पाइबपुकी, परमप्रभु यावे आ लोत्र नेनीन। गे यरूसलेम डा मुर आन कली हुकुम पाइनीमी। 15 मिनु गेपुकीमी “गोपुकीमी बेक्पाइक्ब नु कबल पमुशो बाक्नीकी। बेक्शो मुर आन बाक्तीके नु सल्ला पाइतक। ठेयब श्येत जाक्त् हना यो, आंइ कली मारेइ मदुम्ब। मारेदे हना जोल पतीके नु गारशा खुइश्शो बाक्नीकी। दूली पतीकेमी फाम्सीशो बाक्नीकी” देंतीनी। 16 मोपतीके परमप्रभु, परमप्रभु यावेमी “कोव्रडीन गो सियोन डांडाम जग फुल्लु का वोइक्नुड। मेको रिश्शो नु बोल्यो सुर डा फुल्लु बाक्ब। मेको शुश क्येट लाइब थम बोल्यो जग डा फुल्लु बाक्ब। सु सु मेको कली थमा सुइक्नीमी, मेको आन थुं लुकच मलाइब। भजन संग्रह ११८:२२; एफिसी २:२०; यसैया ७:९ 17 गो ठीक निसाफ कली गारो प्रोव्रची ना क्युक्तीक डोरी खोदेंशो सेल्लुड। मिनु ठीक पतीके कली घन्टी खोदेंशो सेल्लुड। मिनु मुप्सीम मेको जोल पा खुइक्तीके खतम सेल्लु। ब्वाक्कुमी फाम्सीतीके योल्ब। 18 मेना इन बेक्पाइक्ब नु पशो कबल नुप्ब। इन बेक्शो मुर आन बाक्तीक नु पशो सल्ला जाम्ब। मिनु मेको हिंचा डा श्येत जतीक जाक्शा, इन कली सुम्ब। 19 मेको गिश खेयप जाक्त् हना यो, इन कली सुम्ब। मारेदे हना मेको सुनी कुस कुस जाक्ब। नाक्दो नाक्ती यो जाक्ब। मेको लोत्र रूप्चा चहिं शुश हिंचा डा बाक्ब। 20 मुर दिसामानु ‘इप्तीके आइक्च दुम्ब। फेक्तीक वामी सुम्समानु’ आन रां मसुम्ब” देंत।

21 मारेदे हना परमप्रभु यावे पेराजीम डांडाम बोक्शो खोदेंशो पा बोक्ब। मेको गिबोन डा बेसीम गाइश्शो खोदेंशो पा गाइक्ब। मोपा मेकोम आ गेय पाइब। मेको आ गेय छक लाक्चा डा बाक्ब। मिनु मरुप्चा डा बाक्ब। २सामुएल ५:२०; १इतिहास १४:११; १इतिहास १४:१६ 22 शुक्शी लोत्र मपने। मो पाइतीनी हना इन कली फ्रेंशो डोरी खांडसीब। मारेदे हना परमप्रभु, मुर नेल्ल आन परमप्रभु यावेमी “रागी नेल्ल खतम सेल्लुड” देंशो नेंता। यसैया १०:२२-२३

23 नेनीन, आं लोत्र नेनीन। नोफा दाइश्शा, होस पा बाक्शा आं लोत्र नेनीन। 24 मार, शोक्चा कली ब्यफ वाक्ब मुरुमी गेना हना यो ब्यफ वाक्बा? मार, गेना हना यो कुटीम दोशा, रू थेल्नीनी? 25 डल्ला प्रोल्चा कली लेडको पशा, सोंप नु मस्ला मशोक्नीमी? चेरब मशोक्नीमी? क्योव्रज रूम क्योव्रज शोक्नीम। मिनु मोवल कली भूस फ्राइनीम। 26 मारेदे हना आन परमप्रभुमी मेको आन कली रिश्शो पा शेंताक्व।

27 सोंप कली दांड मपाइनीम। मस्ला कली तूलीमी मतुप्जीम। सोंप कली आइक्च कोक्के नु मस्ला कली सिरकनामी तुप्जीम। 28 शोब्ले चोचा कली चेरब हिल्लीम। तन्न मतुप्जीम। फस सेल्चा कली दांड मपाइनीम। 29 मेको मोदेंशो नेल्ल मुर नेल्ल आन परमप्रभु यावेमी शेंशो बाक्ब। मेको अर्ती गेतीकेम छक लाक्चा डा नु तुइक्तीकेम नेल्ल क्येडा ठेयब बाक्ब।

अरीएल सहर कली श्येत दुम्शो

29 आबी, अरीएल, अरीएल सहर। दाऊद मेकेर बाक्शो बाक्त्। गे मेकेर बर्स बर्स बाक्शा, चाड मानेन मानेन बाक्तीनी। अरीएल चढ़ेतीक बाक्तीके यरूसलेम आ याइनी नें बाक्ब। 2 मो हना यो, गो मेको कली श्येत गेनुड। मेकेर डाक्शा, रौंका पाइनीम। यरूसलेम आं कली

अरीएल का बाक्ब। 3 गो दाऊदम खोदेंशो पा इ कली पुम्पाइक्नुड। गारो डोइक्चा कली लाइश्शो खिं सेल्पाइक्नुड। गो मोदेंशो गेय शुश पपाइक्नुड। लूका १९:४३ 4 गे उइ खप रे लोत्र पाइक्नेवे। मिनु फुरक रे पा ब्वाक्नेवे। इ लोत्र फुरक रे नेंसीब। इ सेंदा वोल आन सेंदा खोदेंशो पा खप आगा रे गूब। इ लोत्र फुरक आगा रे पा आइक्च सेंदा पा नेंसीब।

5 तन्न इ जोरी सनु आन हुल फुरक खोदेंशो पा शुश दुम्नीम। सक्ति पाइश्शोपुकी बेरशो भूस खोदेंशो दुम्नीम। मेको नेल्ल याम कामी दुम्ब। 6 मिनु मुर नेल्ल आन परमप्रभु यावे इ कली गृम्थ जाक्ब। मेको बुंबु, खिनु ठेयब रेयके नु जाक्ब। मेको हिरशो फश गिवार नु ठेयब मी नु जाक्ब। 7 रागी रागी डा शुश मुरुमी अरीएल नु लडाइ पाइनीम। लडाइ पाइब नेल्लेमी मेको आन बोल्यो दरवार प्रेशशा, श्येत गेनीम। मेको डोमु तशो नु नाक्दो कौइतीक तशो खोदेंशो पा दुम्ब। 8 दोदेंशो पा शोवलु बेक्शो मुर आन डोमुम जशो ताइनीमी, मिनु सेंसीमानु शोवलुम बाक्नीमी। दोदेंशो पा तूत दाक्ब मुरुमी डोमुम तूशो ताइनीमी, मिनु सेंसीमानु आन लाक्चा सोव्रशो बाक्बा, मोदेंशो पा सियोन डांडा नु लडाइ पाइब रागी रागी डा मुरपुकी दुम्नीम।

परमप्रभु यावे आ गेय

9 छक लाक्शा कोव्रडीन। मिक्च क्रिप्शा, मिक्च मताइब दुमीन। दुक्शो दुमीन। तन्न अडगुर शांबुम ममाइ। गोल्चा चिक्शा गाक्कीन, तन्न राकसीम ममाइ। 10 मारेदे हना परमप्रभु यावेमी इन तार शुश निन्द्रा पपाइक्ब सोक्ती मोइश्शो बाक्ब। मेकोमी गे परमप्रभु यावे आ लोत्र पाइब इन कली मिक्च मताइब सेल्लु। मिनु इन पिया सुम्तु। 11 मेको इन कली कौइशो लोत्र नेल्ले, इन कली छाप थोक्शो किताब खोदेंशो दुम्त। मेको पढेस जोक्ब कली “पढेवो” दे गेतीनी हना, मेकोमी “गो पढेने मचाप्नुड, मारेदे हना एको छाप थोक्शो किताब बाक्ब” देंब। 12 मेको पढेस मजोक्ब कली गेशा “एको पढेवो” देंतीनी हना, मेकोमी “गो पढेस मजोक्ब” देंब।

13 परमप्रभु यावेमी “एको मुरपुकी लोत्र पशा आं नेक्था जाक्नीम। मिनु आन शोव्रमी आं कली ठेयब सेल्लीम। तन्न आन थुंम चहिं आं क्येडा डोन बाक्नीम। मेको आन आं कली मान पतीके मुर आन शेंशो ला बाक्ब। यसैया १:१५; यसैया ५८:२-३; मत्ती १५:८-९ 14 मोपतीके गो एको मुर आन दातेमी छक लाक्चा डा, हिंचा डा नु मरुप्चा डा गेय पाइनुड। मेको आन जोक्ब तुइक्ब मुर आन तुइक्तीके जाम्शा लाइब। निप्स खाप्शो गेय पाइब आन निप्स खाप्तीके खुइक्चा पुंडसीनीम। १कोरिन्थी १:१९; मत्ती ११:२५

15 गे सु सुमी आंमा मिश्शा पशो गेय परमप्रभु यावे आ डौंइती खुइक्नीनी नु छिडछिडम गेय पशा, इं कली सुम ताइबा डा? इं कली सुम तुइक्बा डा?” देंनीनी। भजन संग्रह १०:११ 16 गे दूली पाइबपुकी, खप के ग्योब सेल्लु मुर खप खोदेंशो मिस्सीबा? मिनु सेल्लो थोव्रकमी आ कली सेल्ल कली “मेकोम आं कली मसेल्लयी” देंबा डा? सेल्लिशोमी सेल्ल कली “मेको मारेइ मरुप्ब बाक्ब” देंने चाप्बा? यसैया ४५:९

नोले रिश्शो दुम्ब, दे आस पशो

17 मिनु इच्का नोले लेबानोन फल फुल रू दुम्ब। फल फुल रू चहिं ब्वाकी खोदेंशो दुम्ब। 18 मेको नाक्ती नोफा मनैबपुकी किताब डा लोत्र नेंनीम। गेना हना यो छिडछिडम बाक्ब, मिक्च मताइबपुकी मिक्च ताइब दुम्नीम। यसैया ३५:५; मत्ती ११:५ 19 मिनु ब्रेश्शो मुर परमप्रभु यावे कली मिश्शा ग्येरसीनीम। मिनु क्येट मथीबपुकी इस्त्राएली आन परमप्रभु यावे कली मिश्शा थाम्पा ग्येरसीनीम। 20 मारेदे हना हिंचा डा मरिश्शो पाइब मलीनीम। शुक्शी पाइबपुकी जाम्शा लाइनीम। मरिश्शो पचा माल्बपुकी साइक्चा पुंडसीनीम। 21 मेकोपुकीमी मुर आन कली निसाफ पतीकेमी ब्रुपाइक्नीम। मिनु ठीक पाइब नु निसाफ पाइब कली ब्वारदम रेप्पाइक्नीम। मारेइ मरिश्शो मपाइब कली मोशा दोस गेपाइक्नीम। आमोस ५:१०

22 मोपतीके अब्राहाम कली प्रॉइब परमप्रभु यावेमी याक्ब आ खिं डा मुर आन कली “मुल रे याक्ब आ खिं डा मुर मुने मदोक्नीम। आन कुल ग्येरसीशो तांडसीनीम। 23 मिनु मेकोमी आन आल आन दातेम, आं पशो गेय, ताइनीम। मिनु आं नें ठेयब सेल्लीम। याक्ब आ का ला बाक्शो

परमप्रभु यावे कली तशा मान पा हिंनीम। इस्राएली आन परमप्रभु कली तशा मान पा हिंनीम।<sup>24</sup> मिनु काइ मरुख मुरपुकी रुख दुम्नीम। मिनु गन गन पाइबपुकी परमप्रभु आ शैतीके लोव नैनीम” दैत।

मुरुम इजीप्त कली थमा सुइश्शो

30 मिनु परमप्रभु यावेमी “आबी, गे काइ मटीब आलपुकी, गे आंम इन मिश्शो पाइनीनी। तन्न आं दैशो मटीनीनी। गे कबल का पाइनीनी। तन्न आं दाकशो मिश्शो कबल ममाइ। पाप तारी पाप तेम्नीनी। यसैया १:२<sup>2</sup> मेकोपुकीमी आं अर्ती आ पर्वम हिल्लो मपथु, इजीप्त रागी लाइनीम। मिनु मेकेर डा पिप फाराओम वारच पपाइसीनीम। मेकोपुकीमी इजीप्त रागीम फाम्सीचा माल्नीम। २राजा १८:२१<sup>3</sup> मिनु फाराओ आ वारच पतीकेम इन कली मुने तोक्ब। मिनु इजीप्त रागीम फाम्सीचा माल्तीके इन कली थम आइक्च सेल्ब।<sup>4</sup> मिनु इजीप्त डा ठेयब मुरपुकी सोआन नु मेको आन सोइश्शोपुकी हानेस जाक्दीश्शो बाक्नीम।<sup>5</sup> मेको नेल्ल मुने दोक्नीम। मारदे हना इन कली वारच पने मचाप्यु, शोर गाक्शो दुम्नीम। तन्न इन कली मुने दोक्ब नु शिशी मताइब सेल्नीम।

<sup>6</sup> मिनु परमप्रभु यावेमी दक्खिन डा नेगेब डा जन्तु आन पर्वम यसैया कली मेको रागी हिंवा डा नु श्येत डा रागी बाक्ब। मेकेर गुप्सनी नु ग्रीब गुप्स, बुस्स नु बीस पाइश्शो बेरब बुस्स बाक्नीम। मिनु मुरपुकीमी आन शोंप गधा आन तारी नु शुश क्येट लाइब थोवक दलओठ आन तारी कुरपाइश्शा गाक्नीम। मेको शोर गाक्शो नु वारच मपाइब आन कली गेचा कली कुरपाइक्नीम। ब्यवस्था ८:१५<sup>7</sup> मारदे हना इजीप्त डा मुर आन वारच पतीके शोर गाक्शो नु थमा पा वारच मपतीके बाक्ब। मोपतीके गो मेको कली लोव मपाइब, राहाब, दे नें वोइक्ता” दैत। भजन संग्रह ८९:११

परमप्रभु कली मटीबपुकी

<sup>8</sup> मिनु परमप्रभु यावेमी यसैया कली “मुल गे लावो, मेको मुर आन डोंइती आं लोव फुल्लु तार ब्रेक्तो। मिनु किताबम ब्रेक्तो। नोले सम्म लील, दे नु गेना हना यो सांकछी दुम्पाइक्वा कली ब्रेक्तो।<sup>9</sup> मारदे हना एको मुर काइ मटीब बाक्नीम। थमा मसुइक्ब आल बाक्नीम। मेको आलपुकीमी परमप्रभु यावे आ शैतीक लोव नैचा मदाक्नीम।<sup>10</sup> मेकोपुकीमी नोले दुम्ब लोव ताइब आन कली ‘मतने। मकोवडीन’ दैनीम। मिनु परमप्रभु यावे आ लोव पाइब आन कली ‘ठीक पचा आ पर्वम आंइ कली लोव मपने। जोल पा हना यो, आंइ दाक्शो लोव ला पने। आमोस २:१२<sup>11</sup> परमप्रभु यावे आ लां प्रोनीन। एर ओंथ लने। इस्राएली आन का ला बाक्शो परमप्रभु आ पर्वम मशेंदीन’ दैनीम” दैत।<sup>12</sup> मोपतीके इस्राएली आन का ला बाक्शो परमप्रभुम “मारदे हना गेपुकीमी आं दैशो नैचा मदाक्नीनी, मुर आन कली दिप्तीके नु दूली पतीके कली ला थमा सुइक्नीनी। मिनु मेको पाइनीनी।<sup>13</sup> मोपा इन मरिश्शो पशो ब्रेत्वा चिक्शो लाइश्शो गारो खोदैशो दुम्शो बाक्ब। मेको इन मतुइक्थु याम काम ब्रेख।<sup>14</sup> दोदैशो पा मुरुमी खप के ग्योब बोल्यो पा प्रोल्नीमी, मेको के चुप्पु रे मी कोइला गुप्चा नु कुवा रे ब्वाक्कु ताप्चा डा टुक्रा का यो मलीबा, मोदैशो पा प्रोल्चा पुंइसीनीनी” दैत।

<sup>15</sup> मिनु परमप्रभु, इस्राएली आन का ला बाक्शो परमप्रभु यावेमी “आं गे लेश्शा, सिक्सी पा बाक्नी हना, ब्रोंइनी वा। सिक्सी पा बाक्तीनी नु थमा सुइक्तीनी हना, गे बोल्यो दुम्नी वा। तन्न गे मटिनी। यसैया ७:४; प्रस्थान १४:१४<sup>16</sup> गेपुकीमी ‘ममाइ, गो शारा डोइश्शा प्रोक्नीकी’ दैनीनी ‘मोपतीके गे प्रोक्वा माल्नीनी’ दैत। मिनु गेपुकीमी ‘रीब पा दोरब शारा डोइक्नीकी’ दैनीनी। मोपतीके इन कली खेदा पाइबपुकी यो दोरनीम।<sup>17</sup> मिनु मुर कामी हिंच कोंइशोमी, हजार का मुर प्रोक्नीम। ५ जना मुरुम हिंच कोंइशोमी नेल्ल प्रोक्शा, डांडा तारी कोक्के का खुक्शो खोदैशो पा लीनीनी। डांडा तार डा छेदर का खोदैशो पा लीनीनी” दैत। ब्यवस्था ३२:३०

परमप्रभुम सियोन नु कबल पशो

<sup>18</sup> मुल सम्म परमप्रभु यावेमी इन कली शिशी पचा कली रिम्ब। इन कली आ दाक्तीके कोंइचा कली बोक्ब। मारदे हना परमप्रभु यावे ठीक निसाफ

पाइब परमप्रभु बाक्ब। सु सुम मेको कली रिम्नीमी, मेको ग्येरसीशो बाक्नीम।<sup>19</sup> यरूसलेमम बाक्ब सियोन डा मुरपुकी, गे लेंशा मडाक्नीनी। मेकोमी इन ब्रेश्शो नैशा, इन कली थमा पा शिशी पाइब। इन लोव नैशा, लोव लेख। यसैया ६५:२४<sup>20</sup> परमप्रभुमी इन कली श्येत डा शोब्ले नु श्येत डा ब्वाक्कु गेप्तु हना यो, मुल रे इन कली शेंब मखुंइसीब। गेपुकीमी इन कली शेंब कली ताइनीनी।<sup>21</sup> मिनु गेपुकीमी “ग्युरा लां लड को, पेरा लां लड” दैनीनु, इन नोले लोव कामी “लां मेकोन बाक्ब, मेको लां गाक्कीन” दैशो नैनीनी। ब्यवस्था ५:३२<sup>22</sup> मेना इन मुशा सेल्शो चांदी नु सुनम गिल्शो मूर्तिपुकी ग्रांरा दीनीनी। गे मेको आन कली ग्रांरा दिचा डा वा खोदैशो पा ताइक्नीनी। मिनु मेको आन कली “डोन लने” दे ताइक्नीनी। यसैया २७:९

<sup>23</sup> मिनु परमप्रभुमी इन शोक्शो रू कली रेउ यिपाइश्शा, अन्न सिप्पाइक्ब। मिनु अन्न ग्रेल्शा, शुश जचा ताइनीनी। मेना इन बी ब्यफ ठेयब दिंममी जोइनीम।<sup>24</sup> इन गेय पपाइश्शो ब्यफ नु गधापुकीमी ग्योलोम क्राप्शा, हिक्सी सुप्शो जचा थोवक जाइनीम।<sup>25</sup> आइक्च नु ठेयब डांडा नेल्ल रे ब्वाक्कु बुक्शा, खोल्सा नु खोला यिशा, ठेयब लडाइ दुम नाक्ती गारो डा लाइश्शो खिं यो ब्रेल्नीम।<sup>26</sup> मिनु तास्ला आ छेडछेड नां आ छेडछेड खोदैशो दुम्ब। नां आ छेडछेड चहिं ७ ओटा नां आ छेडछेड खोदैशो दुम्ब। मेको ७ नाक्त डा छेडछेड दुम्ब। मेना परमप्रभु यावेमी आ मुर आन गार फ्रेंब। तुप्शो गार सापाइक्ब।

अस्सुर कली निसाफ पशो

<sup>27</sup> कोवडीन, परमप्रभु यावे डोन रे जाक्ना जाक्न बाक्ब। आ गाइश्शो मी खोदैशो पा ब्रशा, शुश कुन गूब। आ शोव चुरचामी ब्रीशो नु आ लें ग्राव गु दाक्ब मी खोदैशो बाक्ब।<sup>28</sup> आ सास शुर सम्म खुम्ब बारशो खोला खोदैशो बाक्ब। मिनु मेकोमी रागी रागी डा मुर आन कली खतम सेल्तीक ग्योलोम क्राप्शा, आन शोवमी हेंथे लां कोंइब लगम पाइक्ब।

<sup>29</sup> गेपुकी चाड मानेतीक नाक्दोम कुम्सो पशो खोदैशो पा ग्येरसीनीनी। गेपुकी बांसुरी ताप्बपुकी नु परमप्रभु यावे, इस्राएली आन सेरथे फुल्लु आ डांडा लाइब खोदैशो पा ग्येरसीशो मुर बाक्नीनी। ब्यवस्था १६:१४<sup>30</sup> मिनु परमप्रभु यावेमी आ ठेयब सेंदामी लोव पशा नैपाइक्ब। मेकोमी गाइश्शा चुरशा, आ गुइ याम पाइश्शा, मारेइ मारेइ नेक्ब मी ब्रपाइश्शा, बुंबु पपाइश्शा, रेउ नु मुप्स यिपाइश्शा कोंइब।<sup>31</sup> मिनु परमप्रभु यावेमी अस्सुर डा मुर आन कली कोक्केम तेख। मेको आ सेंदा नैशा, अस्सुर डा मुर साप्पान हिंनीम। २राजा १९:३५-३७<sup>32</sup> मिनु परमप्रभु यावेमी गिश खेयप तुप्बा, मीश खेयप खैजडी नु बीना ताप्शो नैसीब। परमप्रभु आंमा अस्सुर डा मुरपुकी नु लडाइ पाइब।<sup>33</sup> मारदे हना डोंइती रे ठेयब चोतीके का सेल्शो बाक्त। मेको थमा पा पिप कली सेल्शो बाक्त। मेको शुश लुक्च लशो नु ब्रेम्शो बाक्त। मेकेर मी नु शुश शी बाक्त। परमप्रभु यावे आ मुइश्शो गन्धक खोदैशो पा मेको मी ब्राइब।

परमप्रभुमी यरूसलेम कली कोवब

31 आबी, इजीप्त रागी कली “वारच पाइक्की” दे लाइबपुकी, मेकोपुकी शारा कली थमा सुइक्ब बाक्नीम। बग्गी कली थमा सुइक्नीम। मारदे हना मेकेर शुश बाक्नीम। शारा डोइक्ब आन कली थमा सुइक्नीम। मारदे हना मेको शुश बोल्यो बाक्नीम। तन्न मेकोपुकीम इस्राएली आन का ला बाक्शो परमप्रभु यावे कली ममिम्थु, हिल्लो मपाइनीम। यसैया ३०:१-२; भजन संग्रह २०:८<sup>2</sup> मो हना यो परमप्रभु तुइक्ब बाक्ब। मिनु श्येत दुम्पाइक्ब। आ मिश्शो पशा, मरिश्शो पाइब आन खिं नु मेको आन कली वारच पाइब नु लडाइ पाइब। आमोस ३:६; गन्ती २३:१९<sup>3</sup> इजीप्त डा मुर, मुर ला बाक्नीम। मेको परमप्रभु मनम। आन शारा बेक्ब बाक्नीम। सोक्त मनम। परमप्रभु यावेमी आ गुइ दिंदानु, वारच पाइब दाइल पांइसीनीम। मिनु वारच पपाइसीब नेल्ले कालेमी बेक्नीम।

## अस्सुर कली निसाफ

4 मिनु परमप्रभु यावेमी आं कली "गुप्स कि गुप्स आ चाइक्व आन सिखार तारी डरर डरर पाइनीमी। गोठलापुकीमी मेको आन सिखार रोइक्वा, दे जाक्तेक्म हना, गुप्स मेको आन ग्रीशो नेंशा महिनीमी। मेको आन पशो रेयकेमी गुप्स आन कली मप्रोक्पाइक्व। मोपा मुर नेल्ल आन परमप्रभु यावे सियोन डांडा नु आ आइक्व डांडामी लडाइ पथ यीब। 5 दोपा चिक्वपुकीमी आन चाइक्व आन तार फिल फिल पा कोव्रथ बेरनीमी, मोपा मुर नेल्ल आन परमप्रभु यावेमी यरूसलेम कली कोव्रब। मेको कली कोव्रशा, प्रोइशा, आ नेक्था बाक्शा खाल पाइब। मत्ती २३:३७

6 ए इसाएली, गे हेंथे पा शुश डोन लाइबपुकी, परमप्रभु गे लेतीन। येरमीया ७:३-५ 7 मारदे हना मेको नाक्ती गे नेल्लेमी इन सुन नु चांदी के मूर्ति नेल्ल बेरपाइक्वीनी। गे मेको पाप पा इन आंम गुडमी सेल्लतीनी। यसैया २:२० 8 मेना अस्सुर तरवारम साइक्वा पुंडसीब। तन्न मेको तरवार बेक्शा लाइब मुर के ममाइ। मेकोमी नेल्ल आन कली खतम सेल्ब। मेको तरवार तथा मुर नेल्ल प्रोक्नीमी। मिनु आन ठिटापुकी वाइल दुम्नीमी। यसैया ३७:३६ 9 अस्सुर डा पिप, सेरथे फुल्लु खोदेशो बोल्यो बाक्त्त हना यो, हिंशा प्रोक्व। आ कप्तान आन छेदर प्रोइशा प्रोक्नीमी। परमप्रभु यावेमी आं चुप्लु सियोनम नु आं मी यरूसलेमम बाक्व" देंत। ब्यवस्था ३२:३१

## नोले डा राज्य

32 कोव्रडीन, नोले ठीक पाइब पिप काम सासन पाइब। ठेयब मुर नेल्लेमी ठीक निसाफ पाइनीमी। यसैया ३३:१७; येरमीया २३:५ 2 मिनु मेको मुर नेल्ल फश रे खुंडसीतीके, रेउ यिमेनु फाम्सीतीके, सोव्रथो रागीमी ब्वाक्कु यितिके नु थम होश रागीमी ठेयब सेरथे फुल्लु आ वांकु खोदेशो बाक्नीमी। 3 कोव्रब मुर आन मिक्व ब्राब्रा मडुम्नीमी। नैबपुकीमी नोफा दाइश्शा नेंनीमी। 4 रिश्शो पा रुन्ने मचाप्बपुकीमी तुइक्तीक शेंनीमी। लेम्से पाइबपुकी रिश्शो पा ब्वाक्ने चाप्नीमी। यसैया ३५:६ 5 मेना मुरुमी मूर्ख आन कली रिश्शो थुं पाइश्शो मुर मर्देंनीमी। खुइ नु जोल पाइब आन कली हाइश्शो मुर मर्देंनीमी। हितोपदेस २८:१६ 6 मारदे हना मूर्ख मुर मूर्ख लोव्र ला पाइनीमी। मेको आन थुंमी मरिश्शो पचा ला मिश्शा बाक्नीमी। परमप्रभु यावे कली मटीनीमी। मेको आ पर्वम दूली शेंनीमी। शोव्रलु बेक्व आन थुं श्येत्थ लीपाइक्वीमी। मिनु तूतू दाक्व आन कली तूचा मगेनीमी। 7 मोदेशो मरिश्शो पाइब आन गेय मरिश्शो बाक्व। परमप्रभु यावे आ अरेशो मटीबम "दोपा आं दाक्वशो पने चाप्नुडा?" दे प्रुडग आन कली जोल पा नु मारेइ मथीबम ठीक लोव्र पाप्तेक्म हना यो, मेको आन कली खतम सेल्लनीमी। 8 तन्न रिश्शो थुं पाइश्शो मुरपुकीमी रिश्शो गेय ला मिन्नीमी। मिनु गेना हना यो रिश्शो गेय पा बाक्नीमी।

## परमप्रभु आ सोक्त्त जाक्व

9 गे ठेयब लेशो मीश मुरपुकी बोक्कीन। मिनु आं लोव्र नेनीन। गे काइ महिंथु बाक्व तमीपुकी इन नोफा दाइश्शा, आं लोव्र नेनीन। यसैया ३:१६-४:१ 10 गे काइ महिंथुपुकी बर्स का नोले श्येत जशा खिंखि पाइनीनी। मारदे हना अडगुर सेक्वा मताइनीनी। फल फुल मसिल्लीमी। 11 गे ठेयब लेशो मीश मुर खिंखि पने। गे काइ महिंथुपुकी खिंखि पा हिनीन। इन वा प्रुइश्शा अरन्डी फेक्सीन। 12 इन रिश्शो रू नु अडगुर बोट आन पर्वम इन कुचु तुप्शा डाक्कीन। 13 आं मुर आन रूम चू नु चोंक वानीमी। ग्येरसीशो मुर आन खिं नु सहर नेल्ल मोदेशो दुम्ब। 14 मारदे हना दरवार डा मुर नेल्ल प्रोक्नीमी। शुश मुर बाक्वशो सहर श्येत्थ दुम्ब। ओफेल माइश्शो ग्येत्थ लुक्व गाक्तीक लां नु मेकेर खाल पाइब मुर आन बाक्तीक गेना हना यो पुक्खी दुम्नीमी। मेकेर ब्वाकी डा गधा ग्येरसीशा बाक्नीमी। मिनु क्यारश भेडा आन जोतीक दुम्ब। 15 मिनु नोले परमप्रभु यावेमी आ सोक्ती इं तार मोइक्व। मेना मुर मबाक्तीके गोरशो रागी ग्रेल्शो रू दुम्ब। मिनु मेको ग्रेल्शो रू ब्वाकी खोदेशो दुम्ब। यसैया ४४:३; यसैया २९:१७

## थुं नाइश्शा बाक्तीक राज्य

16 मेना मुर मबाक्तीके रागीमी ठीक निसाफ पाइनीमी। ठीक पाइबपुकी ग्रेल्शो रूमी बाक्नीमी। 17 ठीक पतीकेम थुं नाइक्वा गेब। ठीक पतीके आ सित्तीके सिक्सी पा बाक्वा नु गेना हना यो थमा सुइक्वा बाक्व। 18 आं मुरपुकी थुं नाइश्शा, महिंथु बाक्तीकेम बाक्नीमी। लडाइ मडुम्थु, रिश्शो बाक्तीकेमी सिक्सी पा बाक्नीमी। येरमीया ३३:१६ 19 तन्न ब्वाकी नेल्ल जाम्शा लाइब। सहर श्येत्थ दुम्ब। 20 ब्वाक्कु आ नेक्था वांचेर शोक्वपुकी गे ग्येरसीशो मुर बाक्नीनी। गे गधा नु बी ब्यफ आन कली जोथ मो सोइक्ने चाप्नीनी।

## सियोन कली खतम पोक्व रे प्रोइशो

33 आबी, गे खतम पोक्व, मुल सम्म गे खतम पोक्वा मपुंडसीशो बाक्नेवे। गे रोइक्व बाक्नेवे। तन्न सुइमी मारेइ मरोइक्थु, गे खतम पोक्वा पुंडसीनेवे। मिनु इ रोइक्वा नुत्त हना, इ मारेइ मारेइ रोइक्वा पुंडसीनेवे। मत्ती ७:२

2 परमप्रभु यावे, आंइ कली शिशी पाइक्की। गो इन कली रिम्ना रिम्न बाक्नीकी। गे सुनी कुस कुस आंइ सक्ति दुमीन। श्येत जची ना आंइ कली प्रोइब दुमीन। 3 शुश रेयके नेंशा, जात जात डा मुर प्रोक्नीमी। इन सक्ति तथा, रागी रागी डा मुर एर ऑथ ब्राइनीमी। 4 मेकोपुकीमी सल्ला खोदेशो पा शुश मारेइ मारेइ रोइक्नीमी। दोपा सल्ला प्रेक्शा दोरनीमी, मोपा मुरपुकी प्रेक्शा रोइक्वा कली दोरनीमी। 5 परमप्रभु यावे मान ताइब बाक्व। मेको इर, आ बाक्तीकेमी बाक्व। मेकोमी सियोन डा मुर आन कली ठीक निसाफ नु ठीक पतीके पपाइक्व। 6 मिनु सियोन इ नाक्ती नेल्ल रिश्शो दुम्ब। मेना शुश पाप रे प्रोइतीके, तुइक्तीके नु जोक्तीक गे नु बाक्व। सियोन डा मुर आन शोंप परमप्रभु यावे कली मान पा हिंवा बाक्व।

7 नेनीन, मेको आन बोल्यो मुरपुकी लांम ग्रीनीमी। गारपइक्तीक लोव्र चाक्व मुर हुइ हुइ पा डाक्नीमी। यसैया २९:१ 8 ठेयब लां श्येत्थ दुम्शो बाक्नीमी। मुर मेको लांम मगाक्नीमी। गारपाइक्तीक लोव्र क्याम्सीशो बाक्व। सांक्छीपुकी महिक्सीब दुम्शो बाक्नीमी। आन कसम जशो जाम्त। आन पचा माल्शो गेय मपाइनीमी। 9 रागी रोंका पशा, गोरशो दुम्शो बाक्व। लेबानोन मुने दोक्शा, बेक्त्त। शारोन गोरशो रागी खोदेशो दुम्त्त। बाशान नु कारमेलम आस सफा तोक्नीस।

10 परमप्रभु यावेमी "मुल गो बोक्नुड। गो गेय पचा गोइनुड। गो मान पाइक्वा पुंडसीनुड। 11 गेपुकीमी भूस के कोव्रज कुरशा, पराल थीनीनी। इन सास मी बाक्व। मेकोमी इन कली दाक्व। 12 मिनु जात जात डा मुर बुलु खोदेशो पा ब्राइनीमी। मेकोपुकी क्योरशो चू मीम जेशो खोदेशो पा जेत्वा पुंडसीनीमी।

13 गे डोन रागी डा मुरपुकी, गो मार पशो बाक्नुडा, मेको नेनीन। गे आं नेक्था बाक्वपुकी आं सक्ति तुइक्तीन। 14 सियोनम बाक्व पाप पाइबपुकी हिनीमी। परमप्रभु यावे आ अरेशो मटीब खिंखि पाइनीमी। सु खतम पोक्व मी नु ब्रोंइशा बाक्ने चाप्वा? आंइ दातेमी सु गेना हना यो ब्रशो मी नु ब्रोंइशा बाक्ने चाप्वा?" देंत। यसैया १०:१७; येरमीया २३:२९ 15 सु ठीक पाइबा, रिश्शो थुं डा लोव्र पाइबा, गेयी कि गेयी, दे क्येट मताक्वा, सुम घूस मजाइबा नु "हुश ख्वाक्श पोक्व" देंमानु, मेको आन लोव्र मटीबा नु मरिश्शो पाइब आन पशो काइ तचा मदाक्वा। भजन संग्रह १५:-; भजन संग्रह २४:३-४ 16 मेको इर डा मुर बाक्नीमी। मेको आन खुंडसीतीके सेरथे फुल्लु के सेल्शो दरवार बाक्व। मेकोमी आन जचा थोव्रक ताइनीमी। मेको आन ब्वाक्कु बुक्तीके शुश दुम्ब।

## मान ताइब पिप आ रागी

17 गेपुकीमी पिप कली आ दारसम ग्योम्सीशा ताइनीनी। मिनु मेकोपुकीमी ठेयब रागी कली ताइनीमी। 18 मिनु गेपुकी इन डोंइती डा हिंतीके मिन्नीनी। हिक्व मुर ते लमा? क्येट पोक्व मुर ते लाक्वामे? मिनु मेको लाइश्शो खिं हिक्व ते बाक्मा? 19 गेपुकीमी मेको मटीब मुर आन कली



मुल रे मताइनीनी। मरुप्चा डा लोव्र पाइब मुर आन कली लेंशा मताइनीनी। यसैया २८:११; ब्यवस्था २८:४९-५०<sup>20</sup> गो आंइ देंशो ना डा चाड मानेतीक सहर सियोन कली कोव्रडीन। गे सिक्सी पा बाक्ब मुर आन सहर यरूसलेम कली ताइनीनी। यरूसलेम गेनायो मयावसीब ताम्बु खोदेंशो बाक्ब। मेको आ किला गेनायो मतुल्सीब। आ डोरी गेनायो मप्रॉइसीब।<sup>21</sup> मेकेर आंइ मान तशो, परमप्रभु यावे गो नु बाक्ब। मेकेर ठेयब खोला नु नादी बाक्नीम। मेकेर दाप्लोम शाक्तीक डोंगा मगाक्नीम। मेकेर ठेयब जहाजपुकी यो लने मचाप्नीम।<sup>22</sup> मारदे हना परमप्रभु यावे आंइ कली निसाफ पाइब बाक्ब। परमप्रभु यावे आंइ कली सासन पाइब बाक्ब। परमप्रभु यावे आंइ पिप बाक्ब। मेकोमी आंइ कली श्येत रे प्रॉइब।<sup>23</sup> गे इन जहाज डा डोरी शुंडसीशो बाक्नीम। मुरपुकीम मेको डोंगा आ दातेम बाक्शो थाम बोल्यो पा राप्पाइश्शा सेल्ने मचबेम। मेकोपुकीम मेको आ वा क्युक्ने मचबेम। मेना रोइश्शो मार मार शुश योक्सीनीम। खोइल मदुक्बपुकीम यो रोइश्शो मार मार रे आन भाग ताक्नीम।<sup>24</sup> सियोनम बाक्ब सुइमी “गो रोइ पशो बाक्नुड” मदेनीम। मेकेर बाक्ब मुर आन मरिश्शो पशो क्याम्चा पुंडसीशो बाक्नीम। जकरिया १२:८

### एदोम कली निसाफ

**34** गे रागी रागी डा मुर, आं नेक्था जाक्कीने। जात जात डा मुर नोफा दाइश्शा नेनीन। रागी नु रागीम बाक्शो मारेइ मारेइम नेन्मेक्ल।<sup>2</sup> मारदे हना परमप्रभु यावे रागी रागी नेल्ल आन पर्वम गाइक्ब। मेको आन लडाइ पाइब आन पर्वम चुरब। मेको आन कली क्याम्चा कली साइक्ब कली गेशो बाक्ब।<sup>3</sup> मेको साइश्शो मुर आन कली ताइक्नीम। मेको आन रिना कुइब। डांडापुकी मेको आन हुशेम जिन्नीम।<sup>4</sup> सरीड डा मारेइ मारेइ जाम्नीम। सरीड कागज खोदेंशो पा ओल्सीब। सोरुल अडगुर बोट आ सोव्रशो सफा नु फोव्रशी रवा आ सोव्रशो गेडा खोदेंशो दुम्नीम। प्रकाश ६:१३-१४

<sup>5</sup> परमप्रभुमी “आं तरवारम सरीडमी गेय थुम्शा नोले, गो एदोम तारी लाइनुड। गो मेकेर डा मुर आन कली निसाफ पाइनुड” देंत। ब्यवस्था ३२:४१-४२; येरमीया ४९:७-२२<sup>6</sup> परमप्रभु यावे आ तरवार हुशेम गुम्शो बाक्ब। बोंसो लुम्सीशो बाक्ब। मेको क्यारश भेडा आन हुश नु बोका आन चिच डा बोंसो लुम्सीशो बाक्ब। मारदे हना बोज्रामी परमप्रभु यावेमी ठेयब चढेतीक गेय पाइब। एदोम रागीमी शुश मुर आन कली साइक्ब। यसैया ६३:१<sup>7</sup> ब्वाकी डा ब्यफ मुरपुक नु गोल्नीम। बाछापुकी बोल्यो सांटे ब्यफपुक नु गोल्नीम। मेको आन रागी हुशेम जारशो बाक्ब। मेकेर डा खप बोंसोम ब्रीशो बाक्ब।

<sup>8</sup> काबु परमप्रभु यावे आ क्येक्क लेत्तीक नाक्त बाक्ब। सियोन आ पर्वम ठीक सेल्चा कली क्येक्क लेत्तीक बर्स का बाक्ब। यसैया ६३:४<sup>9</sup> मेना एदोम डा खोलापुकी अलकत्रा दुम्नीम। मिनु आ खप चहिं गन्धक दुम्ब। एदोम रागी ब्रशो अलकत्रा दुम्ब। उत्पत्ती १९:२४<sup>10</sup> मेको नाक्दो नाक्त गेनायो मकाप्ब। आ कुन गेना हना यो कुस डा कुस बाक्ब। मेको पाला पाला सम्म गोरशो रागी दुम्शा बाक्ब। मेकेर रे सुइ मगाक्नीम। मलाकी १:४<sup>11</sup> तन्न मेकेर ठेयब चिक्ब नु काइश्श आन बाक्तीके दुम्ब। मेकेर हुहुचील नु खदपुकी बाक्नीम। परमप्रभुमी मेको रागी कली ग्रांग्ये माग्ये सेल्ब। आ ठेयब मुर मार पचा दो पचा दुम्नीम।<sup>12</sup> मेको रागी कली राज्य मदेनीम। मेकेर हुकुम पाइब सुइ मलीम।<sup>13</sup> मेको आन दरवारम चू वानीम। मेको आन बोल्यो दरवारम चूले नु चोंक वानीम। मेकेर सिवार नु ठेयब चिक्ब आन बाक्तीके दुम्ब। यसैया १३:२१-२२<sup>14</sup> मेकेर वां नु फर गुम्नीम। वोल ब्रेम्मुइनीम। ब्वाकी डा वोलम आ वारच कली ब्रेम्ब। नाक्दो डा वोल मेकेर बास बाक्नीम।<sup>15</sup> मेकेर बुक्सुम ग्योत्र सेल्शा, ब्वोफु पा पुक्शा, चाइक्ब गुंडब। मेकेर ब्वारदे गुम्शा, निक्शी निक्शी पा बाक्नीम।<sup>16</sup> परमप्रभु यावे आ किताबम माल्शा पढेने। मेकेर नेल्ल ब्रेक्शो बाक्ब। मेको नेल्ल निक्शी निक्शी बाक्नीमी। मारदे हना परमप्रभु यावेमी लोव्र पा मेको आन कली अरेप्टु। आ सोक्तीमी मोदेंशो दुम्पाइश्शो बाक्ब। प्रस्थान ३२:३२<sup>17</sup> परमप्रभुमी मेको आन कली मेको रागी पुक्शा योक्शा, गेशो बाक्ब।

मेको रागी गेना हना यो मेको आन के दुम्शा, पाला पाला सम्म मेकेर बाक्नीम।

### परमप्रभु आ मुर ग्येरसीशो

**35** मुर मबाक्शो नु ब्वाक्कु मबाक्शो रागी ग्येरसीनीम। गोरशो रागी ग्येरसीशा शुश फू बोइक्पाइक्ब। यसैया ३२:१५<sup>2</sup> मिनु मेको थाम्पा बोइश्शा, ग्येरसीशा कुम्सो पना पन बाक्नीम। लेबानोन, आ दारस मेकोम ताइब। कारमेल नु शारोन आन मान ततीक मेको कली गेशो बाक्ब। मेकोपुकीमी परमप्रभु यावे आ मान ततीके नु आंइ परमप्रभु आ छेडछेड ताइनीम।<sup>3</sup> इन मारेइ पने मचाप्ब गुइ बोल्यो सेलीन। इन ख्रिंख्रि पाइब पोक्च बोल्यो सेलीन। हिब्रू १२:१२<sup>4</sup> हिंभ थुं पाइश्शो मुर आन कली “इन थुं फ्रेंदीन। महिनीन” दे मतीन। इन परमप्रभु एक बाक्ब। मेको क्येक्क लेत्चा कली जाक्ब। परमप्रभुमी हिंचा डा सजाइ गेब। मेको जाक्शा इन कली प्रॉइब।<sup>5</sup> मेना मिक्च मताइबपुकीमी ताइनीम। नोफा मनेबपुकीमी नेनीम। यसैया २९:१८<sup>6</sup> खोइल मदुक्ब मुर किश्श खोदेंशो पा प्रेक्नीम। मब्बाक्बपुकीम ग्येरसीशा कुम्सो पाइनीम। मारदे हना मुर मबाक्तीकेम ब्वाक्कु बुक्नीम। गोरशो रागीमी खोला यीनीम।<sup>7</sup> मिनु थम होश बाल्वा दोम्ली दुम्ब। सोव्रशो खप रे ब्वाक्कु बुक्ब। मिनु सिवार आन बाक्तीकेमी घांस नु बुदी मीलु वानीम। यसैया ४१:१८

<sup>8</sup> मेकेर ठेयब लां का दुम्ब। मेको लां कली “परमप्रभु यावे आ लां बाक्ब” दे नें वोइक्नीम। ग्रांरा दिशो मुर मेको लां लचा मताइनीम। परमप्रभु आ मुर ला मेको लां लचा ताइनीम। सु सु मेको लां लाइनीमी, मेकोपुकी मूर्ख बाक्तेक्म हना यो, मजाम्नीम। यसैया ५६:३-८; येरमीया ३१:८<sup>9</sup> मेकेर गुप्स मबाक्नीमी। मुर ब्वाइब जन्तु यो मलाइनीम, मबाक्नीम। तन्न पाप रे प्रॉइशो मुर ला मेको लां गाक्नीम।<sup>10</sup> परमप्रभु यावेमी श्येत रे प्रॉइशो मुर ला लेश्शा जाक्नीम। मिनु सियोनमी कुम्सो पना पन ओव्रनीम। मेकोपुकी गेना हना यो ग्येरसीशा बाक्नीम। ग्येरसीना सीन बाक्नीम। आन श्येत जशा, हुकयी पतीके लेश्शा मजाक्ब। यसैया ५१:११; प्रकाश २१:४

### सन्हेरीबम यहूदा नु लडाइ पशो

२राजा १८:१३-२राजा १९:३७; २इतिहास ३२:१-२३

**36** पिप हिज्कीयाहम सासनम पवा आ १४ बर्सम, अस्सुर डा पिप सन्हेरीबम यहूदा डा गारो हिरशो सहर आन कली लडाइ पा ग्रात।<sup>2</sup> मिनु अस्सुर डा पिपम लाकीश डा राब्शाके माइश्शो, आ कप्तान नु लडाइ पाइब शुश पिप हिज्कीयाह आ बाक्तीके यरूसलेममी सोइक्ताक्व। मिनु मेको आइक्था दोम्ली डा ब्वाक्कु यितीके वा मुरब आन रू डा लांमी राप्तेक्म। यसैया ७:३<sup>3</sup> मिनु दरवार कोव्रब, हिल्कीयाह आ तौ एल्याकीम, पिप आ ब्रेक्ब शेब्ना नु आसाफ आ तौ योआह लाडगा गूशा मेको आन बाक्तीक लाम्तेक्म। यसैया २२:२०

<sup>4</sup> मिनु राब्शाकेमी मेको आन कली “गे हिज्कीयाह कली अस्सुर डा ठेयब पिपमी इन कली मार देंत देंशा हना, ‘गे मार कली आस पा थमा सुइक्नीनी?’<sup>5</sup> गे इन फश लोव्रम लडाइ दोपा पचा तुइक्तीक नु लडाइ पतीक सक्ति बाक्बा? गे आं कली मटिथु, सु कली आस पा थमा सुइक्नेवे? <sup>6</sup> गे जिक्शो कोक्के खोदेंशो इजीप्त कली थमा सुइक्नेवे? सु सु मेको कोक्के तिक्शा गाक्नीमी, मेको आन गुइ थोक्ब। सु सुमी इजीप्त डा पिप फाराओ कली थमा सुइक्नीमी, मेको कोक्केम थोक्शो खोदेंशो दुम्नीम। इजीप्त डा फाराओ मोदेंशो बाक्ब” दे मतीन। इजीकीएल २९:६-७<sup>7</sup> तन्न गे, आं कली ‘गोपुकी परमप्रभु यावे, आंइ परमप्रभु कली थमा सुइक्नीकी’ देंतीनी हना, हिज्कीयाहमी मेको आ थान नु आ चढेतीकेपुकी मप्रेंदा डा? मिनु यहूदा नु यरूसलेमम बाक्ब आन कली ‘गे एको चढेतीके आ डोंइती चढेचा माल्नीनी’ मदेने? २राजा १८:४<sup>8</sup> गे आं होव्रप, अस्सुर डा पिप नु बाजी पावो। मिनु इ के शारा डोइक्ब मुर बाक्तेक्म हना, गो इ कली हजार निक्शी शारा गेनन।<sup>9</sup> गे बग्गी नु शारा डोइक्ब आन पर्वम इजीप्त कली थमा सुइक्नेवे। गे आं होव्रप आ नेल्ल क्येडा आइक्च कप्तान का कली यो खरेने मचाप्नेवे।

10 मार, गो एको रागी खतम सेल्चा कली परमप्रभु यावे कली हिल्लो मपथु, जाक्डा डा? परमप्रभु यावेम आं कली 'लावो, मेको रागी कली खतम सेलो' दे माइक्ती" दैत।

11 मिनु एल्याकीम, शेब्ना नु योआहमी मेको राब्शाके कली "इन गेय पाइबपुकी नु अरामी लोव्र ब्वाक्कीन। गो मेको लोव्र रुप्की। गारोम बाक्ब मुर नेल्ल आन नेंचा डा पा यहूदी लोव्र पा मब्वाक्कीन" दैतेक्म। 12 तन्न राब्शाकेमी "मार, आं होव्रपमी इन होव्रप नु इन कली ला लोव्र पथ सोइक्ती डा? गारोम बाक्ब मुरपुकीम यो रुप्चा माल्नीमी। मारदे हना मेकोपुकीम यो इन खोदेंशो पा आन ख्री जचा नु आन चारनाक तूचा माल्नीम" दैत।

13 नोले मेको राब्शाकेमी मुर आन नेक्था राप्शा यहूदी आन लोव्रमी ठेयब सेंदा पा "अस्सुर डा ठेयब पिप आ लोव्र नेनीन। 14 मेकोमी मार दैत हना 'हिज्कीयाह आ जोल लोव्र थमा मसुतीन। मेकोम इन कली प्रॉइने मचाप्व।

15 हिज्कीयाहमी इन कली "परमप्रभु यावेम इन कली रिम्शो पाइब। परमप्रभु यावेमी इन कली थमा पा श्येत रे प्रॉइब। एको सहर अस्सुर डा पिप आ गुडमी मदुम्ब" दैंशो लोव्र थमा मसुतीन। 16 हिज्कीयाह आ लोव्र मनेनीन, मारदे हना अस्सुर डा पिपमी इन कली "गो नु गारीन। मेकेर रे गूशा आं बाक्तीके जाक्कीन। मो पाइतीनी हना, गे नेल्ल इन रू डा अडगुर बोट नु इन फोव्रशी रवा ताइनीनी। मिनु इन आंम कुवा डा ब्वाक्कु तूचा ताइनीनी। 17 राजा ५:५; मीका ४:४ 17 मिनु नोले गो इन कली आंम रागी खोदेंशो अर्को रागी काम लाइक्नन्नी। मेको रागीम शुश अन्न नु अडगुर शांबु बाक्ब। मेको शोब्ले नु अडगुर रूम ब्रीशो रागी बाक्ब" दैत। 18 हिज्कीयाहमी इन कली "परमप्रभु यावेमी इं कली श्येत रे प्रॉइब" दैंशा, हेंथे लां कोंइचा मगेने। मार, रागी रागी डा देवी देवता काम यो आन रागी अस्सुर डा पिप आ गुड प्रॉइने चाप्मे डा? यसैया ३६:१२ 19 हमथ नु अरपाद डा देवी देवता ते लाक्गमे? सेफारवाइम डा देवी देवता ते लाक्गमे? मेकोपुकीमी सामरीया कली अस्सुर आ पिप गुड रे प्रॉइने चाप्मे डा? 20 एको रागी नेल्ले डा तेको देवी देवताम आ रागी आं गुड रे प्रॉइने चाप्मा डा? मार, परमप्रभु यावेमी यरूसलेम कली आं गुड रे प्रॉइने चाप्मा डा?" दैत।

21 तन्न मेकोपुकी सिक्सी पा बाक्शा, राब्शाके कली काइ लोव्र मलेत्तेम। मारदे हना पिपमी मेको आन कली "लोव्र मलेत्तीन" दे माइश्शो बाक्त।

22 मिनु दरवार कोव्रब, हिक्कीयाह आ तौ, एल्याकीम, ब्रेक्ब शेब्ना नु इतिहास ब्रेक्ब आसाफ आ तौ, योआहम आन वा खाक्शा हिज्कीयाह आ डॉइती जाक्शा, मेको राब्शाके आ लोव्र नेल्ल शोव्रतेक्म।

यरूसलेम कली प्रॉइशो

37 मिनु पिप हिज्कीयाहमी मेको लोव्र नेंशा, आ वा खाक्शा, अरन्डी फेक्शा परमप्रभु यावे आ खिं लत। 2 मिनु मेकोमी आ दरवार कोव्रब एल्याकीम, ब्रेक्ब शेब्ना नु चढ़ेब आन दाते डा खूशो आन कली अरन्डी फेक्पाइश्शा, आमोज आ तौ यसैया आ बाक्तीक सोइक्ताक्व। 3 मिनु मेकोपुकीमी यसैया कली "हिज्कीयाहमी 'मुलाक्ती श्येत जतीके, तुप्पाइसीतीके नु शुक्शी पाइक्चा पुंडसीतीके नाक्त बाक्ब। आल थिचशो मीश मुरुमी आल थिचावानु, थिचा कली बोल मबाक्शो खोदेंशो दुम्त। 4 इन परमप्रभु यावे, इन परमप्रभुमी राब्शाके आ लोव्र नेंना माइ। अस्सुर डा पिपमी मेको कली गेना हना यो ब्रॉइशा बाक्ब परमप्रभु कली शुक्शी पथ सोइक्ताक्व। मेको आ लोव्र नेंशा, परमप्रभु यावे, इन परमप्रभुमी मेको कली सजाइ गेबा कों? मोपतीके लीशो मुर आन पर्बम पुनीन" दैत" दे मेकोपुकीमी दैतेक्म।

5 मोपा हिज्कीयाह आ मुरपुकी यसैया आ बाक्तीक जाक्मानु, 6 यसैयामी मेको आन कली "गेपुकीमी पिप कली 'परमप्रभु यावेम इन कली मार दैंशो बाक्ब दैंशा हना, इन नेंशो अस्सुर डा पिप आ मुरुमी आं कली शुक्शी पशो लोव्र आ पर्बम महिनीन। 7 गो मेको कली हिंभ थुं का गेनुड। मिनु हिंचा डा लोव्र नेंशा, मेको आ रागी लेशशा लाइब। मिनु गो मेको कली आ रागीम क्योरशा साइक्पाइक्नुड दैत" दे मतीन" दे माइक्तीमी।

8 मिनु राब्शाके आ पिप बाक्तीके लेम्मेनु "पिपम लाकीश प्रॉइतु" दैंशो लोव्र नेना बाक्त। मिनु लमेनु, अस्सुर डा पिप लिब्ना डा मुर नु लडाइ पना

पन बाक्शो थिदा बाक्त। 9 अस्सुर डा पिपमी एथीयोपीया डा पिप तिरहाकाह "गे नु लडाइ पथ जाक्ना जाक्न बाक्ब" दैंशो लोव्र नेना बाक्त। मिनु मेको लोव्र नेंशा, हिज्कीयाह आ बाक्तीकेमी आ मुर आन कली लोव्र कुरब पा सोइक्ताक्व। 10 मार लोव्र सोइक्ताक्व दैंशा हना, यहूदा डा पिप हिज्कीयाह कली "इन थमा सुइश्शो परमप्रभुमी इन कली दूली लां मखोइक्पाइसीन। 'यरूसलेम अस्सुर डा पिप आ गुडमी मदुम्ब' दैनीनी। 11 गे अस्सुर डा पिपपुकीमी रागी नेल्ल आन कली क्याम्शो, लोव्र नेंशो बाक्नीनी। मार गे चहिं ब्रॉइनीनी डा? 12 आं किकी पिपीम क्याम्शो रागी रागी गोजान, हारान, रेचेफ नु तेलास्सारम बाक्शो एदेन डा मुर आन देवी देवतामी मेको रागी प्रॉइने चाप्मे डा? यसैया ३६:१८ 13 हमथ, अरपाद, सेफारवाइम, हेना नु इक्वाह डा पिपपुकी ते लाक्गमे? दे मतीन" दैत।

हिज्कीयाह आ पुंडशो

14 मिनु हिज्कीयाहमी मेको लोव्र कुरब मुर आन गुड रे मेको चिठी ताक्शा, पढेत्तु। मिनु मेको चिठी परमप्रभु यावे आ खिं लाइश्शा, परमप्रभु यावे आ डॉइती प्राक्शा वोइक्तु। 15 मिनु हिज्कीयाहमी परमप्रभु यावे कली 16 "मुर नेल्ल आन परमप्रभु यावे, इस्राएली आन परमप्रभु, गे करूब आस तार बाक्ब बाक्नीनी। गे ला रागी नेल्ल डा राज्य डा परमप्रभु बाक्नीनी। सरीड नु रागी इन सेल्शो बाक्नीस। 17 परमप्रभु यावे, आं लोव्र नेनीन। परमप्रभु यावे, कोव्रडीन। सन्हेरीबमी गेना हना यो ब्रॉइशा बाक्ब परमप्रभु, इन कली शुक्शी पथ सोइश्शो लोव्र नेनीन। 18 परमप्रभु यावे, थमा पा अस्सुर डा पिपपुकीमी रागी रागी नेल्ल क्याम्ताक्म। 19 मेको आन देवी देवता मीम हुम्ताक्म। मारदे हना मेकोपुकी मुर आन गुडमी सेल्शो, शी नु फुल्लु के बाक्नीम। मेकोपुकी इन खोदेंशो मनम। मोपतीके खतम सेल्चा पुंडसाक्म। 20 परमप्रभु यावे, आंइ परमप्रभु, मुल आंइ कली सन्हेरीब आ गुड रे प्रोनीन। रागी नेल्ल डा मुरपुकीम गे ला परमप्रभु यावे बाक्नीनी, दे तुइक्तमेक्ल" दे पुंडशा, लोव्र पाप्नु। यसैया ४०:५; दानीएल ६:२७

यसैयामी पिप कली लोव्र पशो

21 नोले आमोज आ तौ यसैयामी हिज्कीयाह कली "परमप्रभु यावे, इस्राएली आन परमप्रभुमी 'अस्सुर डा पिप सन्हेरीब आ पर्बम इ पशो लोव्र गो नेंता' दैत। 22 परमप्रभु यावेमी सन्हेरीब आ पर्बम मार दैत दैंशा हना 'सियोन डा कन्ने तमी इ पर्बम शुक्शी पा रिश्शो बाक्ब। यरूसलेम डा तमीमी इ नोले कोव्रशा, आ पिया हिक्शो बाक्ब।

23 गे सु कली शुक्शी पवी? सु आ पर्बम गे ठेयब लेशशो लोव्र पवी? गे इस्राएली आन का ला बाक्शो परमप्रभु आ डॉइती ठेयब लेशशो दुमे? 24 मिनु इ सोइश्शो गेय पाइब मुर रे पा परमप्रभु कली शुक्शी लोव्र पपाइक्तीवी" दैत। मिनु गे 'आं शुश बग्गीमी डांडा डॉइसाक्वी। लेबानोन नेल्ल डॉइसाक्वी। गो मेकेर डा लाइश्शो रवा नु रिम्शो रवा नेल्ले आन कली तिम्तामी। गो नेल्ल क्येडा इर नु डोन नु ठेयब ब्वाकी सम्म जाक्दीत्ती। यसैया १४:८

25 गो इनार दोशा ब्वाक्कु तूता। आ खोइलीमी इजीप्त डा ठेयब खोला नेल्ल सोव्रपाइक्ता, दे शुक्शी पपाइक्तीवी।

26 गो आं डॉइती मिम्शो, गे मतुइक्ती? आं डॉइती मिम्शो गो मुल पाइनुड। गे गारो हिरशो सहर आन कली फुल्लु तेल्लीक सेल्चा माल्नेवे। 27 मेकेर डा मुर आन सक्ति जाम्शा, हिंभ दुम्शा, मुने पा, मारदे पने मचबेम। मेकोपुकी रू डा घांस नु खिं तार वाशो घांस खोदेंशो दुम्तेक्म। मेको वाचा क्येडा डॉइती सोव्रब।

28 गो इ बोक्शो, इ निश्शो नेल्ल तुइक्नुड। इ लशो, पिशो तुइक्नुड। मिनु गे आं पर्बम गाइक्ताक्वी। 29 मारदे हना गे आं पर्बम गाइक्तीनु, इ ठेयब लेशशो नेंता। मोपतीके गो इ नेंम बोल्सी का ब्वेक्नुड। मिनु इ शोव्रमी लगम पाइश्शा इ जाक्शो लां लेप्पाइश्शा सोइक्नन" दैत, दे मतीन" दे मुर सोइताक्वी।

30 मिनु परमप्रभु यावेमी हिज्कीयाह कली "इ कली एको चिन्ड दुम्ब। मुलाक्त थोचे आंमा वाशो बाली नाली जाइनीनी। माइक्थी आंमा दोक्शा

वाशो बाली नाली जाइनीनी। तन्न न्युं चहिं आंमा शोक्शा खुप्तीन। अडगुर खुम्शा जने।<sup>31</sup> यहूदा आ खिं डा लीशोपुकी लेंशा, सोशा बोशा, शाक्शा थोक्शा, फल सिल्लीन। शुश दुम्नीम।<sup>32</sup> मारदे हना यरूसलेम रे लीशोपुकी लाइनीमी। सियोन डांडा रे हुल का ब्रॉइशोपुकी गूनीम। मुर नेल्ल आन परमप्रभु यावेमी, गो मेको पाइनुड<sup>33</sup> दैत। यसैया ९:६

<sup>33</sup> मोपतीके परमप्रभु यावेमी अस्सुर डा पिप आ पर्बम “मेको सहरम मजाक्ब। ब्रा का यो मआण्ब। सहर आ डोंइती ब्रा तेक्तीके मकुरनीम। सहर ओव्रचा कली गारो डोइक्तीक मसेलीन।<sup>34</sup> मेको तेको लां जाक्मे, मेको लां लेण्ब। सहर मओव्रब।<sup>35</sup> गो मेको सहर कली आं पर्बम नु आं गेय पाइब दाऊद आ पर्बम आन गुड रे प्रॉइशा, वोइक्नुड<sup>36</sup> दैत।

<sup>36</sup> मिनु परमप्रभु यावे आ स्वर्ग डा गेय पाइब का अस्सुर डा मुर आन बाक्तीकेम लशा, लाख का ८५ हजार जना मुर सदा बाक्त्त। मिनु मुरपुकी सुनी बोक्शा कोव्रडमेनु, बेक्शो मुर ला ताम्नेक्म। यसैया १७:१४; यसैया ३१:८<sup>37</sup> मो दुम्नेनु अस्सुर डा पिप सन्हेरीब लेशशा लशा निनवे सहरम बाक्त्त।<sup>38</sup> मिनु आ देवता निस्कोक आ खिमी बाप्शा पूजा पना पन बाक्मेनु, आ तौ अद्राम्मेलेक नु शरसेरमी मेको कली तरवारमी क्योरशा साइक्ताक्स। मिनु मेको निक्शी प्रोक्शा, आरारात रागी लाम्ताक्स। मिनु मेको आ पा डा आ तौ एसर-हददोन पिप दुम्त।

हिज्कीयाह रोइ पशो  
२राजा २०:१-११; २इतिहास ३२:२४

**38** मेना हिज्कीयाह रोइ पा बेक्चा चिक्ता बाक्त्त। मिनु परमप्रभु यावे आ लोव्र पाइब आमोज आ तौ, यसैया जाक्शा, पिप कली “परमप्रभु यावेमी इन कली ‘गे बेक्नेवे, मब्रॉइनेवे। इ खिं नेल्ल ठीक सेलो’ दैत” दे माइक्त्तु।<sup>2</sup> मिनु हिज्कीयाहमी, आ कुल गारो गे हिरशा, परमप्रभु यावे कली<sup>3</sup> “परमप्रभु यावे, गो इन डोंइती थमा पा थुं निक्शी मपथु, बाक्ती। मेको मिम्तीने। गो इन डोंइती नेल्ल रिम्शो पाता” दैत। मिनु हिज्कीयाह शुश डाक्त्त। २राजा १८:२-६

<sup>4</sup> मिनु परमप्रभु यावेमी यसैया कली<sup>5</sup> “हिज्कीयाह आ बाक्तीक लावो। मेको कली परमप्रभु यावे, इ किकी दाऊद आ परमप्रभुमी इ कली ‘गो इ पुंइशो लोव्र नैता। इ प्रेक्कु ताता। नेनो, गो इ ब्रॉइतीक नाक्ती १५ बर्स तेम्नुड।<sup>6</sup> मिनु गो इ कली नु एको सहर कली अस्सुर डा पिप आ गुड रे प्रॉइनुड। एको सहर कली वारच पाइनुड।

<sup>7</sup> परमप्रभु यावेमी आ दैशो पाइब दे इ कली आ गेशो चिन्ड मार बाक्ब दैशा हना,<sup>8</sup> आहाज आ घरी आ वांकु उड लने थुम्शो बाक्ब। मेको कली परमप्रभु यावेमी १० खेयप नोले लेप्पाइक्ब’ दे मतो” दैत। मिनु नां आ वांकु लाक्ने थुम्शा यो, १० खेयप नोले लेत्त।

हिज्कीयाह आ ब्रेक्शो लोव्र

<sup>9</sup> यहूदा डा पिप हिज्कीयाह रोइ पा साम नोले आ ब्रेक्शो लोव्र मार बाक्त्त दैशा हना,<sup>10</sup> गो थम रिम्शो पा बाक्ना बाक्न, बेक्शो मुर आन बाक्तीके लचा माल्लुड।<sup>11</sup> मिनु गो परमप्रभु यावे कली “गो परमप्रभु यावे, इन कली ब्रॉइशो मुर आन रागी मताइनुड। गो मुल मुर आन कली मताइनुड। रागीम बाक्ब आन कली मताइनुडमी। भजन संग्रह २७:१३<sup>12</sup> आं बाक्तीक खिं, गोठ खोदैशो पा, प्रेशा आं रे डोन याक्ताक्म। तोव्र प्रोव्रबमी वा तोल्शो खोदैशो पा, गो आं ब्रॉइतीक नाक्त्त तोल्शो बाक्नुड। गो तोव्र रे खोइक्चा पुंइसाक्ड। नाक्दो नाक्ती आं कली बेक्पाइक्नीनी” दे परमप्रभु कली लोव्र पाता।<sup>13</sup> सुनी सम्म आं थुं कली रिम्पाइक्ना पाइक्न बाक्ती। गुप्सम खोदैशो पा आं खोइल जिक्ताक्वीनी। काबु नाक्दो नाक्तीमी गे आं कली खतम पोक्तीनी।<sup>14</sup> गो बेल्लुम नु बोकुला खोदैशो पा ग्रीती। ढुकुर खोदैशो पा रोंका पाता। गो शुश ग्येत्थ कोव्रतीके आ मिक्च पारताक्वी। आं थुं लुक्च लत। गो “परमप्रभु, गो श्येत जाइनुड। आं कली वारच पाइक्वीनी।<sup>15</sup> तन्न गो मार दैनुडा डा? मारदे हना गे आं कली लोव्र पाइतीनी। मोदैशो आंमा पाइतीनी। आं निन्द्रा नेल्ल प्रोक्त्त। आं थुं लुक्च लत हना यो गो इन कली ठेयब सेल्लुड।<sup>16</sup> परमप्रभु, मोदैशो श्येत रे मुर ब्रॉइनीम। आं थुं यो मेको रे

ब्रॉइब। गे आं कली सापाइश्शा, ब्रॉइचा गेतीनी।<sup>17</sup> एको श्येत थमा पा आं कली ब्रॉइचा कली बाक्त्त। गे आं कली दाक्शा, श्येत रे गुंइताक्वीनी। मारदे हना गे आं पाप नेल्ल क्याम्ताक्नी। भजन संग्रह ३२:५; मीका ७:१८-१९<sup>18</sup> बेक्शो मुर आन बाक्तीकेमी इन कली ठेयब मसेल्ल। बेक्पाइक्बम इन कली ठेयब सेल्ले मचाण्ब। बेक्शो मुरम इन वारच पाइक्तीक आस मपाइनीम। भजन संग्रह ६:६; भजन संग्रह ११५:१७<sup>19</sup> ब्रॉइशोपुकीम ला इन कली ‘गे रिम्शो पाइब बाक्नीनी’ दैनीमी। मिनु गो मुलाक्ती मोदैशो पाइनुड। आफपुकीमी गे थमा सुइक्चा माल्लो बाक्नीनी, दे आन आल आन कली शेंनीम” दे हिज्कीयाहमी दैत।

<sup>20</sup> परमप्रभु यावेमी आं कली श्येत रे प्रॉइब। मोपतीके गोपुकीमी तार पाइश्शो ताप्तीके ताप्शा कुम्सो पाइनीकी। गो ब्रॉइका सम्म मोदैशो पाइनीकी। परमप्रभु यावे आ खिमी कुम्सो पा ताप्शा बाक्नीकी, दे हिज्कीयाहमी ब्रेक्शो बाक्त्त।

<sup>21</sup> मिनु यसैयामी “सापाइक्चा कली फोव्रशी रवा आ फल रे सेल्शो ओख्ती चाक्शा, एको गार तार खेक्चा माल्लीनी” दैत। यसैया ३८:२१-२२, यसैया ३८:६ नु ७ आन दातेमी वोइक्चा माल्ल। २राजा २०:७-८ मोदैशो बाक्ब।<sup>22</sup> डोंइती हिज्कीयाहमी “गो परमप्रभु यावे आ खिं लचा ताइनुड, दैशो चिन्ड, मार दुम्बा डा?” दे हिल्लो पशो बाक्त्त।

बेबीलोन रे मुर जाक्शो  
२राजा २०:१२-१९; २इतिहास ३२:२७-३१

**39** मेना बेबीलोन डा पिप बालादन आ तौ मेरोदाक-बालादानमी हिज्कीयाह कली चिठी नु कोसेली कुर पाइश्शा, मुर आन कली सोइक्ता बाक्त्त। मारदे हना मेकोमी “हिज्कीयाह रोइ पशा, छक लाक्चा डा पा सात” दैशो लोव्र नेना बाक्त्त।<sup>2</sup> मिनु हिज्कीयाहमी मेको आन कली तशा, ग्येरशा आ शोंप वोइक्तीके खिं नेल्ल कोइदा बाक्त्त। मार कोइदा बाक्त्त दैशा हना, सुन चांदी, मस्लापुकी, रिम्शो शुश क्येट लाइब थोव्रक, तेल, आ या वोइक्तीके नेल्ल नु आ शोंप नेल्ले कोइदा बाक्त्त। आ खिं नु आ रागीमी मेको आन कली मकोइशो मारेइ मलीमाक्त्त।<sup>3</sup> मिनु परमप्रभु यावे आ लोव्र पाइब यसैया, पिप हिज्कीयाह आ बाक्तीके जाक्शा “मेको मुरपुकीम मार दैमा, ते रे जाक्मा?” दैत। मिनु हिज्कीयाहमी “एकोपुकी डोन रागी बेबीलोन रे जाक्शो नम” दैत।<sup>4</sup> मिनु “मेकोपुकीम इन खिमी मार मार तामे?” दे हिल्लो पाप्नु। मिनु हिज्कीयाहमी “आं खिमी बाक्शो मारेइ मारेइ ताम्नेक्म। मेको आन कली मारेइ मारेइ कोइताक्ड” दैत।

<sup>5</sup> मिनु यसैयामी हिज्कीयाह कली “मुर नेल्ल आन परमप्रभु यावे आ लोव्र नेनीन<sup>6</sup> ‘इ खिंम बाक्शो, इ किकी पिपीमी तेल्शा वोइश्शो मुल सम्म बाक्शो मारेइ मारेइ काबु बेबीलोन चाक्दीलीम। मारेइ मलीनीम’ दे परमप्रभु यावेमी दैत। २राजा २४:१३<sup>7</sup> मिनु इ तौ कोइ कोइ आन कली लाइश्शा, बेबीलोन डा पिप आ दरवारमी गेय पाइब सेलीन” दैत।<sup>8</sup> मिनु हिज्कीयाहमी यसैया कली “इ दैशो परमप्रभु यावे आ लोव्र रिम्शो बाक्ब” दैत। मारदे हना मेकोम “गो ब्रॉइडा सम्म लडाइ मदुम्ब रिम्शो दुम्ब” दे मिम्शो बाक्माक्त्त।

इसाएली आन थुं बारपाइश्शो

**40** इन परमप्रभुमी “आं मुर आन कली लेम्दीन, लेम्दीन।<sup>2</sup> यरूसलेम कली आ थुं बारपाइक्तीके लोव्र पने। आ श्येत नुप्त्त। आ मरिम्शो पशो क्याम्शो बाक्ब। मारदे हना परमप्रभु यावे रे पा आ मरिम्शो पशो आ पर्बम निक्शी खेयप सजाइ ताप्त्तु” दैत। होसे २:१६; येरमीया १६:१८

<sup>3</sup> मिनु ब्रेण्ब मुर आ सेंदा कामी “मुर मबाक्तीकेमी परमप्रभु यावे आ लां सेलीन। गोरशो रागीमी इ परमप्रभु कली लां रिम्शो पा फुल्लु ग्रीक्शा थेलीने। लूका ३:४-६; यूहन्ना १:२३<sup>4</sup> बेसी नेल्ले ग्येत्थ पोक्चा पुंइसीनीम। डांडा नु पहाड फ्रेम्चा पुंइसीनीम। दिंम मदुम्शो बाक्तीके दिंम दुम्चा माल्ल। फुल्लु बाक्तीके रिम्शो दुम्चा माल्लीम। यसैया ४९:११<sup>5</sup> मेना परमप्रभु यावे आ छेडछेड गूब। मेको मुर नेल्लेम ताइनीम। मारदे हना परमप्रभु यावेमी एको लोव्र दैशो बाक्ब” दे लोव्र पाप्नु।

6 मिनु लोव्र पाइब कामी आं कली “शेंदो” देंत। मिनु गो “मार शेंनुडा?” दे हिल्लो पाता। मिनु मेकोमी “मुर नेल्ले घांस खोदेंशो बाक्नीम। मेको आन दारस नेल्ल रू डा फू खोदेंशो बाक्ब। भजन संग्रह १०:५-६; याकूब १:१०-११ 7 घांस सोव्रब, मिनु आ फू हेम्ब। मारदे हना परमप्रभु यावेमी मेको आन कली मुइक्ब। मुर थमा पा घांस खोदेंशो बाक्नीम। 8 घांस सोव्रब, आ फू हेम्ब। तन्न आंड परमप्रभु आ लोव्र गेना हना यो लीब” देंत। भजन संग्रह ११९:८५; लूका २१:३३ 9 “गे ठेयब डांडा डोंइसीन। सियोन रिम्शो लोव्र कुरब बाक्ब। ठेयब सेंदा पा शेंदो। यरूसलेम रिम्शो लोव्र कुरब बाक्ब। महिंथु, ठेयब सेंदा पा शेंदो। यहूदा सहर डा मुर आन कली ‘इन परमप्रभु एकेर बाक्ब’ देनो। 10 कोव्रडीन, परमप्रभु, परमप्रभु यावे सक्ति पाइश्शो दुश्शा जाक्ब। मिनु हुकुम पाइब। आ इनाम आ नु बाक्ब। आ गेतीके आ डोंइती बाक्ब। यसैया ६२:११ 11 आ बगाल कली गोठलाम खोदेंशो पा योव्रब। मेकोमी आ पाठा पाठी आन कली मुष्ठा कुरब। दूध तुंडब आन कली आन चाप्चा डा पा गाक्पाइश्शा खुल्ब। यूहन्ना १०:११

परमप्रभु यावे आ पशो

12 सुमी ब्वाक्कु नेल्ल आ योलम पुक्गा? सुमी सरीड बिक्ताम थाप्ता? सुमी रागी डा फुरक पुक्तीकेम पुक्गा? सुमी डांडा आन कली नाक्शा, पहाड आन कली नाक्तीक तारी वोदा? 13 परमप्रभु यावे आ सोक्त कली सुम शेंदा? आ कली अर्ती गेब सु बाक्बा? रोमी ११:३४; १कोरिन्थी २:१६ 14 सुम मेको कली मेको नेल्ल रुप्चा कली अर्ती गेवा? सुम मेको कली ठीक निसाफ पचा कली शेंदा? 15 रागी रागी डा मुर नेल्ले चिरशो गर डा लीशो ब्वाक्कु खोदेंशो नु नाक्तीकेम लीशो फुरक खोदेंशो बाक्नीम। टापु आन कली फुरक खोदेंशो पा बेरपाइक्ब। 16 लेबानोन डा ब्वाकी डा शी मी मुइक्चा कली मगारब। मेकेर डा जन्तुपुकी चोशा चढ़ेचा कली मजावदीलीम। 17 रागी रागी डा मुरपुकी मेको आ डोंइती मारेड मनम। मेको श्येत्थ नु मारेड मबाक्शो बाक्नीम, दे मिम्ब।

18 मिनु गे परमप्रभु कली सु नु थाप्नीनी? मिनु सु आं नेक्था वोइक्ने चाप्नीनी। यसैया ४६:५; प्रस्थान २०:४; प्रेरित १७:२९ 19 मूर्ति का? मूर्ति चेम्बमी मूर्ति कली यपाइक्ब। सुन चेम्बमी मेको सुनम खुम्ब। मेको कली चांदी के साडली सेल्ब। 20 का निक्शीमी कोसेली गेचा कली बोल्यो, मराक्चा डा शी योव्रनीम। शी के गेय पाइब जोक्ब मुर का माल्ब। मिनु मेकोमी महिक्सीचा डा पा मूर्ति सेल्पाइक्ब।

21 गेपुकी मतुइक्तीनी, मनेनी? डोंइती रे इन कली मशेंदमे? रागी सेल्चा रे गे मरुप्नी? 22 एको रागी नेल्ल आन तार बाक्ब, मेकोन बाक्ब। रागीम बाक्बपुकी माले खोदेंशो बाक्नीम। मेकोमी सरीड कली वा खोदेंशो पा प्राक्ब। मिनु मेको मुर आन कली ताम्बु खोदेंशो दुम्ब। 23 मेकोमी सासन पाइब आन कली शोर गाक्शो सेल्ब। हुकुम पाइब जाम्शा लाइनीम।

24 मेकोपुकी का निक्शी ला शोक्सीशो बाक्नीम। का निक्शी ला खुम्सीशो बाक्नीम। शाक्श थोक्वी ना दुम्मेनु, मेको आन तार मुइक्ब। मिनु मेको बेक्नीमी। मिनु फश गिवारमी पराल खोदेंशो पा योल्ब। 25 आं कली सु नु थाप्नीनी। मिनु गो नु उइक्थ सु बाक्बा?” दे का ला बाक्शो परमप्रभुम देंत। 26 गेपुकी ग्येत्थ कोव्रडीन। मेको आन कली सुम सेला? मेकोमी शुश राप्पाइश्शा, मेको आन कली हिक्ब। मेको आन नें थिशा, ब्रेण्ब। मारदे हना मेको आ ठेयब सक्तिम पतीके का यो मजाम्नीम। भजन संग्रह १४७:४; उत्पत्ती १:१४-१८

27 गे मारदे ए याकूब, देंनीनी? इस्राएलीपुकी “मारदे आं लां परमप्रभु यावे, आं परमप्रभु आ डोंइती खुइश्शो बाक्ब देंनीनी?। मारदे आं कली पशो दूली निसाफ मतुइक्ब” देंनीनी? 28 मिनु “मार, गे मतुइक्तीनी, मनेनी? परमप्रभु यावे गेना हना यो बाक्ब परमप्रभु बाक्ब। मेको रागी रागी कली सेल्ब बाक्ब। मेको मथाइब नु मदाइब। आ तुइक्तीके नेल्ल क्येडा ठेयब बाक्ब। 29 मेकोमी दाइब आन कली बोल गेब। मचाण्ब आन कली सक्ति गेब। 30 ठिटापुकी यो दशा थाइनीम। मिनु मचाण्थु गोल्लीम। 31 तन्न परमप्रभु यावे आ लां कोव्रबपुकी नक सक्ति ताइनीम। ककाकुली खोदेंशो पा

आन फ्रां प्राक्शा बेरशा ग्येत्थ लाइनीम। मेकोपुकी दोरशा, मदाइनीम। गाक्शा यो मथाइनीम” देंत। भजन संग्रह १०३:५

परमप्रभुमी मुर आन कली ब्रेश्शो

41 परमप्रभु यावेमी “समुन्द्र आ नेक्था बाक्ब मुरपुकी सिक्सी पा आं लोव्र नेनीन। जात जात डा मुरपुकीम आन सक्ति लेंशा तामेक्ल। मिनु मेकोपुकी आं नेक्था जाक्शा, लोव्र पामेक्ल। गो काथा निसाफ पतीकेम बुक्वा।

2 सुमी पूर्ब रे आ गेय पचा कली ग्राब का कली पोक्गा? मेकोमी रागी रागी डा मुर आन कली आ गुडम गेब। मेकोमी पिप आन कली दिम्शा, आ तरवारम मेको आन कली फुरक खोदेंशो सेल्ब। आ लिब्रामी फशेम बेरशो भूस खोदेंशो सेल्ब। यसैया ४४:२८; यसैया ४५:१, १३; यसैया ४८:१४-१५ 3 मेकोमी मेको आन कली खेदा पवानु, मारेड मदुम्थु आ खोइलीम लां कली हेरा मथीनीम। 4 मेको सुमी पपाइश्शा पवा? सुम साइ डोंइती रे पाला पाला डा मुर आन कली ब्रेत्ता? गो परमप्रभु यावे, नेल्ल क्येडा डोंइती डा नु नेल्ल क्येडा नोले डा नड। यसैया ४४:६; यसैया ४८:१२; प्रकाश १८:१७ 5 समुन्द्र आ नेक्था बाक्ब मुरपुकी मेको तशा, हिंनीम। रागी आ सुर सम्म हिम्सीब। मिनु मेकोपुकी जाक्शा, आं नेक्था पिम्तेक्म। 6 वारच पमुशा, आन थुं बारपाइक्मुशा ‘ठेयब थुं पावो’ देंमुइनीम। 7 मिनु दारशो थोव्रक सेल्स जोक्बमी चेम्ब आ थुं बारपाइक्ब। घन तुण्बमी चेम्ब आ थुं बारपाइश्शा ‘एको रिम्शो दुम्त’ देंशा, महिम्सेक्ल, दे कांटी थोक्ब” देंत।

इसाएली आन कली लोव्र पशो

8 मिनु परमप्रभु यावेमी “आं गेय पाइब इस्राएल, आं योव्रशो याकूब, आं वारच अब्राहाम आ चच युइ बाक्ब। यसैया ४२:१९; यसैया ४३:१०; यसैया ४४:१, २१; यसैया ४५:४; भजन संग्रह १३५:४; याकूब २:२३ 9 इ कली रागी आ सुर रे ब्रेत्ताक्न। नेल्ल क्येडा डोन रे चाक्शा, गो इ कली ‘गे आं गेय पाइब बाक्बेवे’ देंती। गो इ कली योव्रता। मिनु गो गे नु बाक्नुड। 10 महिनो, मारदे हना गो गे नु बाक्नुड। आइक्च थुं मपावो। मारदे हना गो इ परमप्रभु नड। गो इ कली बोल्यो सेल्शा, वारच पाइनुड। गो इ कली आं ग्राब ग्युरा गुडमी वारच पाइनुड। यसैया ४३:१

11 गे नु गाइक्ब नेल्ल मुने दोक्शा, शिशी मताइनीम। इ जोरी सत्रु नेल्ल फश खोदेंशो दुश्शा, जाम्शा लाइनीम। 12 गे मेको आन कली माल्तीवी हना यो, मथित्नेवे। इ कली लडाइ तोइबपुकी फश खोदेंशो दुश्शा, जाम्शा लाइनीम। 13 मिनु गो परमप्रभु यावे, इ परमप्रभुमी इ ग्युरा गुड ग्याइक्नुड। मिनु गो इ कली ‘महिनी’ देंशा, वारच पाइनुड।

14 गे महिक्सीशो याकूब महिनो। इक्कका ला लीशो इस्राएलीपुकी महिनीन। गो इ कली वारच पाइनुड, दे परमप्रभु यावेमी देंत। इ कली पाप रे प्रोंइब इस्राएली आन का ला बाक्शो परमप्रभु, गो नड। यसैया ४३:३ 15 मुल गो इ कली हेल्शो अन्न तुप्तीके सेल्नुड। मेको हेल्शो, नक नु खुइ पाइश्शो बाक्ब। गे डांडा आन कली तुष्ठा, फस सेल्नेवे। पहाड आन कली भूस खोदेंशो सेल्नेवे। 16 गे मेको आन कली हारशा, फशेम योल्पाइक्नेवे। मिनु फश गिवारम मेको आन कली एर औंथ फ्रशा योल्ब। मेना गे परमप्रभु यावे कली तुइश्शा, ग्येरनेवे। इस्राएली आन का ला बाक्शो परमप्रभु आ मुर दुम्शा, ग्येरसीनेवे” देंत।

17 मेकोमी लेंशा “पुडग नु क्येट मथीबम ब्वाक्कु माल्लीम। तन्न मथित्नीम। मेकोपुकी तूतू दाक्शा, आन लाकचा सोव्रब। गो, परमप्रभु यावेमी, मेको आन लोव्र नेंनुड। मिनु गो, इस्राएली आन परमप्रभुमी मेको आन कली मप्रोंइथु, मेको नु बाक्नुड। 18 गो गोरशो डांडामी ब्वाक्कु गूपाइक्नुड। बेंसीमी ब्वाक्कु बुक्पाइक्नुड। गो मुर मबाक्तीकेम ब्वाक्कु देम्शो नु सोव्रशो रागीम ब्वाक्कु बुक्पा गूपाइक्नुड। यसैया ३५:१, ७; यसैया ४३:१९; प्रस्थान १७:६; भजन संग्रह १०७:३५ 19 मुर मबाक्तीकेमी लेबानोन डा लाइश्शो रवा वापाइक्नुड। बोल्यो रवा, तेल रवा नु शुश अरु रवा खुम्नुड। गोरशो रागीमी तोव्रशी नु अरु रवा यो खुम्नुड। 20 मुर नेल्लेमी

परमप्रभु यावे आ पशो बाक्ब, दे तशा, तुइश्शा, मिश्शा रुच्चा माल्नीम। इस्राएली आन का ला बाक्शो परमप्रभुमी मोदेशो सेल्लु” दैत।

मूर्तिमी सक्ति कौइदमेक्ल, देशो

21 परमप्रभु यावेमी “इन लोव मार बाक्बा, देनीन। थमा बाक्ब, दे कौइदीन, दे गो, याकूब आ पिपमी दैनुड। 22 मेको आन कली चाक्मामेक्ल। मिनु मार मार दुम्मे, मेको देनीन। डौइती मार दुम्मे, मेको लोव पने। मे मेको आन कली मिश्शा, नोले मार दुम्बा, तुइक्वा कली शैदीन। यसैया ४३:८, ९; यसैया ४४:७ 23 नोले मार दुम्बा आंइ कली तुइक्वपतीन। मोपा ला गे गेय पने चाप्ब बाक्नीनी, दे तुइक्नीकी। गे रिश्शो पने कि मरिश्शो पने। मोपा गो इन कली तशा तुइश्शा शुश हिंनीकी। 24 गे मारेइ मननी। इन पशो नेल्ल फश बाक्ब। सु सुमी इन कली योवनीमी मेकोपुकी ग्रांरा दिशो बाक्नीम।

25 गो उत्तर रे का कली ब्रेत्ताक्व। मिनु मेको जाक्त। नां दाप्तीके रे आं नैमी लोव पाइब ब्रेत्ताक्व। मेकोम ठेयब मुर आन तारी खप दिश्शो खोदेशो पा दिम्ब। खप के ग्योब सेल्बम दोदेशो पा खप नीबा, मोदेशो पा मेको आन कली नीब। 26 सुमी डौइती रे आंइ कली तुइक्वपदा? मेको गो तुइक्वा माल्नीकी। मिनु सुमी डौइती शेंदा? ‘मेको ठीक बाक्ब’ दैने चाप्नीकी। सुइमी मशेंदेम, सुइमी लोव मपामे। मिनु सुइमी इन पशो लोव मनेनेम। 27 मिनु गो डौइती सियोन कली शेंताक्व। गो यरूसलेम कली ग्येरपाइक्व लोव पाइब का सोइक्ताक्व। यसैया ५२:७ 28 तन्न गो कोवडुनु, सुइ मथिदु। अर्ती गेब सुइ मबाक्म। गो हिल्लो पाता, सुइम लोव मलेत्तीनी। 29 मेको नेल्ल फश बाक्नीम। आन गेय नेल्ल फश बाक्ब। मिनु देवी देवता आन मूर्ति फश बाक्नीम” दैत।

परमप्रभु यावे आ गेय पाइब

42 परमप्रभुमी “आं गेय पाइब कली कोवडीन। गो मेको कली सक्ति गेनुड। आं योवशो गेय पाइब तशा, आं थुं ग्येरसीब। गो मेको कली आं सोक्तीम प्रिताक्व। मेकोमी रागी रागी डा मुर आन कली ठीक निसाफ पाइब। यसैया ४९:१-६; यसैया ५०:४-११; यसैया ५२:१३-यसैया ५३:१२; मत्ती १२:१८-२१; मत्ती ३:१७ 2 मेकोमी जिचा मपोक्ब। शुश रेयके मपाइब। लां पित्थ आ सेंदा मनेसीब। 3 मेकोमी जिक्चशो किन्दा मजिक्ब, काप्चशो मी यो मकाप्ब। मेकोमी थमा पा ठीक निसाफ पाइब। भजन संग्रह ३४:१९ 4 मेकोम रागी नेल्लेम मुर आन कली ठीक निसाफ पतीक लां मकोइदा सम्म ग्युश्शा मगोल्ब। समुन्द्र आ नेक्थाम बाक्ब मुरपुकी आ शेंशो नेंचा दाक्शा, मेको कली रिम्नीम” दैत।

5 मेको परमप्रभु, परमप्रभु यावे आ लोव बाक्ब। मेकोमी सरीड कली सेल्शा प्राक्तु। मिनु रागी खप फ्राशा, मेकेर मार मार वापाइक्तु। मेकोमी मेकेर बाक्शो मुर आन कली आ ब्रौइतीक गेब। मेकेर बाक्ब आन कली यो आ सोक्त गेब। उत्पत्ती १:- 6 मेकोमी “गो, परमप्रभु यावे नड। गो इ कली आं ठीक पतीकेमी ब्रेत्ताक्व। गो इ गुइ ग्याइश्शा, इ कली कोवशा बाक्नुड। गो मुर आन पा डा इ कली आं कबल खाप्ब सेल्लन। रागी रागी डा मुर आन कली छेडछेड दुम्पाइक्वा कली सोइक्ताक्व। यसैया ४९:६, ८ 7 मारदे सोइक्ताक्व दैशा हना, मिक्च मताइब आन कली तपाइक्वा, जेल्खानम बाक्ब आन कली प्रौइचा नु छिडछिड रे गुंइचा कली सोइक्ताक्व। यसैया ३५:५; यसैया ४५:१९; भजन संग्रह १२६:१-४ 8 गो, परमप्रभु यावे नड। आं नें मेकोन बाक्ब। आं मान ततीक अरु आन कली मगेनुडमी। आं ठेयब दुम्तीके मूर्ति आन कली मगेनुडमी। प्रस्थान ३:१५; यसैया ४८:११ 9 कोवडीन, डौइती डा देशो लोव दुम्मे थुम्तु। गो दुम्चा क्येडा डौइती नक लोव शेंनुड। मेको दुम्चा क्येडा डौइती इन कली तुइक्वाइक्नुड” दैत। यसैया ४८:६

रागी डा मुरपुकीम कुम्सो पामेक्ल

10 परमप्रभु यावे कली नक कुम्सो का पने। रागी आ सुर डा मुरपुकी परमप्रभु यावे कली कुम्सो पशा ठेयब सेलीन। समुन्द्र नु समुन्द्रम बाक्बपुकी परमप्रभु कली ठेयब सेलीन। समुन्द्र आ नेक्था बाक्ब नेल्लेमी मेको कली

ठेयब सेलीन। भजन संग्रह ३३:३ 11 गोरशो रागी नु मेकेर डा सहर कुम्सो पने। केदार आ बाक्तीक डा मुर नेल्ले कुम्सो पने। सेला डा मुरपुकी ग्येरशा कुम्सो पने। डांडा तार रे ठेयब सेंदा पा ग्रीडीन। 12 मेकोपुकीमी परमप्रभु यावे कली मान पामेक्ल। मिनु “परमप्रभु यावे गिश ठेयब बाक्बा” दे समुन्द्र आ नेक्था बाक्ब मुर आन कली शेंदमेक्ल। 13 परमप्रभु यावे बोल्यो लडाइ पाइब खोदेशो पा गूब। लडाइ पाइब खोदेशो पा आ जौब बोक्पाइक्ब। मेको ठेयब रेयके पा ग्रीब। मिनु आ जोरी सनु आन कली आ ठेयब सक्ति कौइब।

14 मिनु “गो शुश सिक्सी पा बाक्ती, ब्वालेइ पा आंम कली तेक्शा बाक्ती। मुल आल थिचशो मीश मुर बुदी, वाइ ब्रेत्नुड। आं सोक्त कीनुड। 15 गो डांडा नु पहाड आन कली गोरशो सेल्लुड। गिगी मारेइ मारेइ सोवपाइक्नुड। गो ब्वाक्कु बाक्तीक कली सोवशो रागी सेल्लुड। दोम्ती सोवपाइक्नुड। 16 मिनु मिक्च मताइब आन कली आन मतुइश्शो लांमी खुल्लुडमी। आन मतुइश्शो गाक्तीक लांमी गाक्पाइक्नुडमी। मेको आन डौइती बाक्शो छिडछिड कली छेडछेड सेल्लुड। मिनु फुल्लु बाक्तीक कली दिम सेल्लुड। एको मप्रौइथु पाइनुड। यसैया ४०:४ 17 मुशा सेल्शो मूर्ति नु चेम्शा सेल्शो मूर्ति आन कली थमा सुइश्शा ‘गे आं देवी देवता बाक्नीनी’ दैबपुकी गिम्सीशा, मुने दोक्नीम” दैत।

18 परमप्रभु यावेम “गे नोफा मनेबपुकी नेनीन। गे मिक्च मताइबपुकी एक कोवडीन। यसैया ४३:८ 19 आं गेय पाइब खोदेशो पा मिक्च मताइब सु बाक्नीमी? आं सोइश्शो लोव कुरब खोदेशो नोफा मनेब सु बाक्नीमी? सु आं कली जिम्मा गेंसीशो खोदेशो मिक्च मताइब बाक्नीमी? सु परमप्रभु यावे आ गेय पाइब खोदेशो मिक्च मताइब बाक्नीमी डा? यसैया ४१:८ 20 मेकोमी शुश मार मार ताइब। तन्न मकोवब। मेको नोफा नैब बाक्ब, तन्न मनेब” दैत। यसैया ५३:१

21 परमप्रभु यावेमी आ ठीक पतीके तशा, ग्येरसीशो बाक्त। मेकोमी आ शेंतीके ठेयब सेल्शा नु थम रिश्शो दुम्पाइक्ब। 22 तन्न मेको मुरपुकी रोइश्शो नु खुइ पचा पुंइसीशो बाक्नीम। मेको नेल्ल बिक्तीकेमी बिक्शो नु जेल्खानमी खुइश्शो बाक्नीम। मेको सिखार खोदेशो दुम्शो बाक्नीम। मेको आन कली प्रौइब सुइ मबाक्ब। मेको रोइक्वा पुंइसीब दुम्शो बाक्नीम। मिनु “मेको आन कली लेंशा गेने” दैब सुइ मबाक्ब। 23 इन दातेमी मेको नेंशा वारच पाइब, सु बाक्बा? मुल रे नोफा दाइश्शा, होस पा बाक्ब, सु बाक्बा? 24 सुमी याकूब आ मुर आन कली रोइक्ब आन गुइमी गेवा? सुमी इस्राएली आन कली खुइ आन गुइमी गेवा? मेको पपाइक्ब परमप्रभु यावे ममाइ? मेकोपुकीम मेको कली पाप पाम्तेक्म। मेकोपुकी मेको आ लांम गाक्ने मबिस्सम नु आ अरेशो मटीम। 25 मोपतीके परमप्रभु यावे मेको आन पर्बम शुश गाइक्ताक्व। मेको आन कली लडाइ डा श्येत दुम्पाइक्तु। मेको आन एर आंथ नेल्ल मी जेल्ताक्व। मो हना यो मेकोपुकीमी काइ मरुबेम। मी जेशा यो आन थुं परमप्रभु यावे गे मलेत्तेम।

परमप्रभुमी पाप रे प्रौइशो

43 याकूब, इ कली नु इस्राएल कली सेल्ब परमप्रभु यावेमी “महिनीन। इन कली पाप रे प्रौइता। गो इन नें थिशा ब्रेत्ती। गे आं मुर बाक्नीनी। 2 गे ब्वाक्कु शोक्शा, गाक्वा माल्ते हना यो, गो गे नु बाक्नुड। खोला शोक्साक्वे हना यो, मेकोम इ कली मयोल्ब। मीम गाक्शा लवेनु, मेकोम इ कली मजेप्ब। मेको मीम इ कली मदाक्ब। प्रस्थान १४:२१; भजन संग्रह ६६:१२; दानीएल ३:२५-२७ 3 मारदे हना गो परमप्रभु यावे, इ परमप्रभु नड। गो इस्राएली आन का ला बाक्शो परमप्रभु नड। गो इ कली पाप रे प्रौइब नड। गो इजीप्त रागी इ पा डा गेता। मिनु एथीयोपीया नु सेबा रागी इ कली प्रौइचा कली गेता। यसैया ४१:१४ 4 मारदे हना गे आं योवशो मुर बाक्नीनी। गे मान ताइब दुम्नीनी। गो इन कली दाक्नुड। मोपतीके गो इन पा डा अरु मुर आन कली गेनुड। इन बेक्चा आ पा डा रागी रागी डा मुर आन कली गेतामी। 5 महिनीन, गो गेपुकी नु बाक्नुड। गो इन आल आन कली नां दाप्तीक पूर्व रे चाक्नुड। मिनु नां पेरतीके पच्छिम रे खुष्ठा तेल्लुड। यसैया ११:११-१६; येरमीया ३०:१० 6 गो उत्तर कली ‘प्रौइशा सोइक्तीमी’ माइक्नुड। दक्खिन कली ‘मतेक्मी’ आं तौ आन कली डोन रागी रे

चाक्कीन। मिनू आं तमी आन कली रागी आ सुर रे चाक्कीन। 7 आं नेंम ब्रेत्वा पुंडसीशो मुर नेल्ल चाक्कीन। गो मेको आन कली आं कली ठेयब सेल्चा कली वोइक्तामी। मेको आन कली सेल्ब गो नड। *येरमीया १४:९*  
 8 मेको मिक्च बाक्शा यो मताइब, नोफा बाक्शा यो मनैब आन कली गुंडदीन। 9 रागी रागी डा मुर नेल्ल खुम्समल। जात जात डा मुर नेल्ल बुक्मल। मेको आन दातेमी सुमी एको लोव्र पवा? मुल मार दुम्मे? सुम डोंइती मेको नोले दुम्ब लोव्र पवा? आ सांकळी ब्रेश्शा, चाक्गल। मिनू मुरुमी मेको नेंशा 'थमा बाक्ब' देंमल" देंत। *यसैया ४१:२२, २६* 10 परमप्रभु यावेमी "गेपुकी आं सांकळी बाक्नीनी। मिनू गे आं योव्रशो गेय पाइब बाक्नीनी। गे आं कली तुइश्शा थमा सुइक्ब दुम्शो बाक्नीनी। मिनू गो परमप्रभु नड, दे रुप्नीनी। आं डोंइती सुइ परमप्रभु मबा, आं नोले यो सुइ परमप्रभु मद्दुम्नीम। *यसैया ४४:३* 11 गो परमप्रभु यावे नड। आं क्येडा लाक्शा पाप रे प्रोंइब मबाक्ब। *यसैया ४५:२१; ब्यवस्था ३२:३९* 12 इन दातेमी देवी देवता मबाक्थु, गो इन कली शेंशा, पाप रे प्रोंइशा, लोव्र नेंपाइक्ता। गे आं सांकळी बाक्नीनी। 13 गो परमप्रभु नड। नोले सम्म गो मेको नड। सुइमी आं गुइ रे प्रोंइने मचाप्ब। गो गेय पडानु, सुइमी आं कली तेक्ने मचाप्ब" देंत।

14 मिनू परमप्रभु यावे, इन कली पाप रे प्रोंइब, इस्राएली आन का ला बाक्शो परमप्रभुमी "इन पा डा गो बेबीलोन सहर कली लडाइ पाइब सोइक्नुड। मेको आन ठेयब लाप्चो डा आग्लो जिक्नुड। गो कल्दी आन ग्रीतीक कली रोंका पपाइक्नुड। 15 गो, इन परमप्रभु यावे, इन का ला बाक्शो परमप्रभु नड। गो इस्राएल कली सेल्ब, इन पिप नड" देंत। 16 मिनू परमप्रभु यावेमी "सुमी समुन्द्रमी लां का सेल्बा? सुमी ठेयब ब्वाक्कुमी गाक्तीक लां सेल्बा डा? *प्रस्थान १४:२२; यहोसु ३:१६* 17 सुमी बग्गी नु शारा, लडाइ पाइब नु बोल्यो मुर आन कली मेको लांम सोइक्ता? मेकोपुकी गोल्शा, बोक्ने मचाप्नीम। मेकोपुकी सल्दो खोदेंशो पा ग्याइश्शा काप्चा पुंडसीनीम। *प्रस्थान १४:२३-२८* 18 डोंइती डा दुम्शो ममिम्तीन। साइ डोंइती मार दुम्मे, मेको ममिम्तीन। 19 गो नक गेय का पचा चिक्शो बाक्नुड। मुल मेको दुम्बशो बाक्ब। गे मेको मतुइक्नीनी? गो मुर मबाक्तीकेम लां का सेल्नुड। *यसैया ४१:१८* 20 मिनू ब्वाकी डा जन्तु, सिवार नु ठेयब चिक्बपुकीमी आं कली मान पाइनीम। मारदे हना गो मुर मबाक्तीकेमी रेउ यिपाइक्नुड। गोरशो रागीमी खोला शाइक्पाइक्नुड। आं योव्रशो मुर आन कली तूचा गेचा, दे गो गोरशो रागीमी खोला शाइक्पाइक्नुड। 21 आं कली ठेयब सेल्चा कली मेको मुर आन कली सेल्तामी। *१पत्रुस २:९*

22 तन्न याक्ब, गे आं कली ठेयब मसेली। इस्राएल, गे आं नोले खोइक्चा आ पर्बम मारेइ ममिम्ती। 23 गे इ भेडा आं कली चोशा मचढेयी। इ चढेशोमी आं कली मान मपवी। गो इ कली जचा थोव्रक चढेचा माल्नेवे, दे श्येत मगेड। धूप चोचा माल्नेवे, दे मदेड। *यसैया १:११-१५* 24 गे आं कली ब्रोव्रशो रिना पाइब थोव्रक ग्याप्शा मचाक्गी। इ चढेशो आन बोंसो मगेयी। तन्न इ पाप पतीकेमी गे आं कली श्येत गेप्तीवी। इ मरिम्शो पतीकेमी आं कली श्येत जपाइक्ती। *२कोरिन्थी ५:२१*

25 गो नड, इ हेंथे पशो क्याम्नुड। गो मेको आं पर्बम पाइनुड। गो इ पाप लेंशा ममिम्नुड। *यसैया ४४:२२; येरमीया ३१:३४* 26 आं कली दोस गेयी। निसाफ पथ लय। दोपा गे आं डोंइती ठीक बाक्नेवे, मेको लोव्र पावो। 27 इ डोंइती डा किकीम पाप पापु। गे नु गारशा लोव्र पाइबम आं कली मरिम्शो पाप्तेक्म। *यसैया ४१:८; उत्पत्ती ३५:११-१२* 28 मोपतीके गो आं खिम चढेब आन कली 'गेय पचा मद्दुम्ब' सेल्तामी। गो याक्ब कली खतम सेल्ता। मिनू इस्राएल शुकशी पाइक्चा पुंडसीब सेल्ता" दे परमप्रभुमी देंत।

थमा पा इस्राएली मुर दुम्शो

44 मिनू "याक्ब, आं गेय पाइब, मुल नेनो। आं योव्रशो इस्राएल, नेनो। 2 इ कली कोव्रजीम सेल्शा, वारच पाइब परमप्रभु यावेमी 'आं गेय पाइब याक्ब महिनो। येशुरुन गो इ कली योव्रता। *यशुरुन इस्राएल आ नें का बाक्ब। ब्यवस्था ३२:१५* 3 मारदे हना गो सोव्रशो रागी तारी ब्वाक्कु लुक्नुड। सोव्रशो खपीम खोला शाइक्पाइक्नुड। गो इ चच युइ आन तारी आं सोव्रक मोइक्नुड। इ आल आन कली आसीक गेनुड"। *यसैया*

३२:१५; *योएल ३:१* 4 मेकोपुकी घांस खोदेंशो पा शुश बारनीम। ब्वाक्कु आ नेक्था वाशो रवा खोदेंशो दुम्नीम। 5 मिनू कामी 'गो परमप्रभु यावे आ मुर नड' देंब। अर्कोमी 'आ नें याक्ब बाक्ब' देंब। मिनू अर्कोमी 'गो परमप्रभु यावे आ मुर नड' दे आ गुइम ब्रेक्शा 'आं नें इस्राएल बाक्ब' देंब" देंत।

6 मिनू परमप्रभु यावे, इस्राएली आन पिप नु मेको आन कली पाप रे प्रोंइब, मुर नेल्ल आन परमप्रभु यावेमी "गो नेल्ल क्येडा डोंइती नु नेल्ल क्येडा नोले डा नड। गो आं डा लाक्शा, अरु परमप्रभु मबाक्नीम। *यसैया ४१:४; यसैया ४३:११; प्रकाश १:१७*

7 सु आं खोदेंशो बाक्बा? मेकोमी 'गो परमप्रभु खोदेंशो नड' दे उरदी पवल। मेकोमी आं डोंइती देंल। सुम साइ डोंइती नोले दुम्तीक लोव्र पवा? मुल मार दुम्बा? मेकोमी देंल। *यसैया ४१:२२; ब्यवस्था १८:२२* 8 गे खिंखि पा महिनीन। गो साइ रे इन कली मदेड डा? गेपुकी आं सांकळी बाक्नीनी। गो आं डा लाक्शा अरु परमप्रभु बाक्नीमी? आं क्येडा लाक्शा अरु सेरथे फुल्लु मबाक्ब। गो मेको मतुइक्नुड" देंत। *१सामुएल २:२*

मूर्ति शोर गाक्शो बाक्नीम

9 मिनू "मूर्ति सेल्ब नेल्ल फश खोदेंशो बाक्नीम। मेको आन सेल्चा दाक्शो मूर्ति शोर गाक्शो बाक्नीम। मेको आन पर्बम शेंबपुकी मिक्च मताइब खोदेंशो दुम्शा, मारेइ मतुइक्नीम। मोपतीके मेको मुने दोक्नीम। *यसैया ४५:१६; भजन संग्रह ११५:४-८; येरमीया १०:३-१६* 10 सुम यपाइश्शा मुशा रिम्शो गेय पने मचाप्ब देवता आ मूर्ति सेल्बा? 11 मेको आ नोले खोइक्ब नेल्ल मुने दोक्नीम। मेको मूर्ति सेल्चा जोक्ब मुर ला बाक्नीम। मेकोपुकी बुक्शा, राम्मल। ग्रीचोक पा हिंमल। मिनू गेना हना यो मुने दोक्मल। *यसैया ४२:१७*

12 तुप्तीलमी मूर्ति चेम्ब। मेकोमी मीम गेय पाइब। बोल्यो गुइमी घनमी तुप्शा सेल्ब। मेको शोव्रलु बेक्शा, आ बोल साम्ब। ब्वाक्कु मतूथु, गेय पने मचाप्ब। *यसैया ४०:१८-२०* 13 शी मुइबमी शी कली श्येलेम थाप्शा, ब्रेक्स पा बस्लाम क्योक्शा, लेंशा थाप्शा, कोव्रशा ब्रेक्स पाइब। मिनू मुर खोदेंशो पा सेल्ब। दारशो मुर खोदेंशो पा सेल्ब। मिनू नोले मन्दीरम निप्पाइक्ब। 14 मेकोमी लेबानोन डा लाइश्शो रवा तिम्ब। ब्वाकी डा बोल्यो शी के रवा का योव्रशा ब्वाकी डा अरु रवा नु कोल्पाइक्ब। लेबानोन डा लाइश्शो रवा का खुम्ब। मेको तारी रेउ यिशा, मेको ठेयब दुम्ब। मिनू मेकोमी सला रवा का खुम्ब। रेउम मेको कली कोल्पाइक्ब। 15 मेको रवा आ शी चोचा कली दुम्ब। मेको शी रे मी मुइश्शा थेरब। मेको शी चोशा, शोब्ले चोइब। मेको शी रेन मूर्ति यो सेल्शा, आ डोंइती सेउ पा बाप्ब। 16 मेकोमी आधा शी चोशा, मेको तार श्ये चोइब। मेको ब्वशा रूशा, मी थेरब। मिनू मेकोमी 'गो होती, मी थेरवा ताता' देंत। 17 मिनू आ लीशो शी रे मूर्ति का सेल्ब। मिनू मेको आ डोंइती बाप्शा पूजा पाइब। मिनू मेको कली 'आं कली श्येत रे प्रोंइयीनी। मारदे हना गे आं परमप्रभु बाक्नीनी' दे पुंडब" देंत।

18 मेको मुरपुकीमी मारेइ मतुइक्थु, मरुप्नीम। मारदे हना मेको मिक्च मताइनीमी। आन थुं मरोक्सीशो बाक्ब। मेकोपुकी मारेइ मरुप्ब बाक्नीम। 19 सुइमी मारेइ ममिम्ब कामी "गो मेको शी आधा मीम चोता। मेको मी तारी शोब्ले चोशा, श्ये वाल्शा ब्वाता। मुल गो मेको आ लीशो टुटा रे ग्रान्ना दिशो मूर्ति सेल्चा दुम्बा डा? गो मेको आ डोंइती बाप्शा दुम्बा डा?" देंब सुइ मबाक्ब। 20 सु सुमी पुलु कली सेउ पाइनीमी, मेको आन दूली थुंमी दूली मिप्पाइश्शो बाक्नीम। मेकोमी आंम कली प्रोंइने मचाप्ब। मिनू "आंइ सेल्शो मूर्ति जोल बाक्ब" मदेनीम।

इस्राएली आन कली प्रोंइशो

21 याक्ब गे एको लोव्र मिम्तो। इस्राएल मिम्तो। मारदे हना गे आं गेय पाइब बाक्नेवे। गो इ कली सेल्तन, गे आं गेय पाइब बाक्नेवे। इस्राएल इ कली मप्रेंन। *यसैया ४१:८* 22 गो इ पाप गोस्स खोदेंशो पा जाम्पाइक्ता। इ हेंथे पशो यो क्याम्ताक्ड। गे आं गे लेतो। मारदे हना गो इ कली पाप रे प्रोंइतन। *यसैया ४३:२५*

23 गे सरीड कुम्सो पावो। रागी नेल्ल रेयके पा, शुश कुम्सो पने। गे डांडा, ब्वाकी नु रवा नेल्लेमी कुम्सो पने। मारदे हना परमप्रभु यावेमी याकूब कली श्येत रे प्रॉइतु। इस्राएल रागीमी आं नें ठेयब सेल्शो बाक्ब। यसैया ४९:१३; यसैया ५५:१२; भजन संग्रह ९६:११-१२

पिप कोरेस कली गोठला वोइश्शो

24 मिनु परमप्रभु यावे, इ कली श्येत रे प्रॉइब, इ कली कोव्रजीम सेल्बमी "गो मारेड मारेड सेल्ब परमप्रभु यावे नड। गो आं कामी सरीड प्राक्ता। रागी वोइक्ता। यसैया ४५:१२ 25 गो जोल पाइब आन नोले दुम्ब लोव्र शोर गाक्शो सेल्नुड। लिंक्वु कोव्रब आन निप्स क्यातामी। जोक्ब तुइक्ब आन कली दिप्शा, मेको आन जोक्तीके तुइक्तीके नेल्ल मूर्ख सेल्ता। यसैया २९:१४ 26 गो आं गेय पाइब आ लोव्र थमा बाक्ब। मिनु आं सोइश्शो लोव्र कुरबम आं देंशो पाइब। गो यरूसलेम आ पर्वम 'मेकेर शुश मुर दुम्नीम' देंनुड। मिनु यहूदा डा सहर लेंशा सेल्चा पुंइसीनीम। मेको आन प्रेशो खिं नक सेल्नुड। 27 गो शुश लुक्च लशो ब्वाक्कु सोव्रपाइक्नुड। गो इ खोला आन कली सोव्रपाइक्नुड। यहोसु ४:२३ 28 कोरेस आं गोठला बाक्ब। मेकोमी आं मिश्शो गेय पाइब। मेकोमी 'यरूसलेम लेंशा सेल्चा माल्ब' देंब। आं खिं आ पर्वम 'नक जग सेल्नुड' " देंत। २इतिहास ३६:२३; एज्रा १:१-४

परमप्रभुमी कोरेस कली योव्रशो

45 मिनु परमप्रभु यावेमी कोरेस कली तेल लुक्शा, आ ग्युरा गुड ग्याइक्ता बाक्त्त। मारदे मो पवा बाक्त्त देंशा हना, रागी रागी डा मुर आन कली फ्रुपाइक्वा, रागी रागी डा पिप आन कली मुने तोक्वा नु आ डॉइती लाप्चो रोकशा, मचोक्वा कली बाक्त्त। यसैया ४१:२ 2 परमप्रभु यावेमी मेको कली "गो इ डॉइडॉइती गाक्नुड। डांडा आन कली दिंम सेल्नुड। कांसा के लाप्चो जिक्नुड। फलाम के आग्लो जिक्नुड। 3 गो इ कली हिंवा डा छिडछिडम वोइश्शो शॉप गेनुड। इ कली खुइश्शा वोइश्शो सुन चांदी गेनुड। मिनु गे, परमप्रभु यावेमी इ कली नें थिशा ब्रेब्, इस्राएली आन परमप्रभु, गो नड, दे तुइक्नेवे। 4 आं गेय पाइब, याकूब, आ योव्रशो इस्राएल कली गो इ नें थिशा, ब्रेत्नुड। गो इ कली ठेयब नें गेशा ब्रेत्ताक्ड हना यो, गे आं कली मतुइक्ती। 5 गो परमप्रभु यावे नड। गो आं डा लाक्शा सुइ परमप्रभु मबाक्ब। गे आं कली मतुइक्ताक्पी हना यो, गो इ कली ठीक सेल्तन। प्रस्थान २०:३ 6 इ कली मार पचा कली ठीक सेल्तन देंशा हना, नां दाप्तीक रे नां पेरतीक सम्म गो आं डा लाक्शा अरु सुइ परमप्रभु मबाक्ब, दे मुर नेल्ल आन कली तुइक्पाइक्वा कली ठीक सेल्तन। गो परमप्रभु यावे नड, गो आं डा लाक्शा अरु सुइ परमप्रभु मबाक्ब। 7 गो छेडछेड नु छिडछिड सेल्ब नड। गो थुं नाइक्पाइक्ब नु श्येत जपाइक्ब सेल्ब नड। गो, परमप्रभु यावेमी, मेको नेल्ल पाइनुड। आमोस ३:६

8 सरीड, रेड यिपतो। ठीक पतीके रेड खोर्देशो पा यिल। रागी रोकसेक्ल, पाप रे प्रॉइतीके ठोसा खोर्देशो पा गूब। मेको ठीक पतीके नु कालेमीन कोल्सल। मेको नेल्ल सेल्ब, गो, परमप्रभु यावे नड।

9 आबी, सुमी आ कली सेल्ब कली दोस गेबा, मेको गर आ गम्टे का खोर्देशो बाक्ब। मार, खपीमी खप के ग्योब सेल्ब कली 'मार पवी?' देंबा डा? गेयमी गेय पाइब कली 'मजोक्ब बाक्ते' देंबा डा? अय्युब ४०:२; यसैया २९:१६; येरमीया १८:६; रोमी ९:२० 10 आबी, सुमी आ आफ कली 'मारदे आं कली सेल्पी?' मिनु मीश मुर कली 'गे मारदे आल थितीक रोइ पाइनेवे?' " देंब। 11 मिनु परमप्रभु यावे, इस्राएली आन का ला बाक्शो परमप्रभु यावे नु इस्राएल कली सेल्बमी, मार देंब देंशा हना "गे आं कली 'आं आल ते लाइनीनी' दे हिल्लो पाइनेवे? आं गेय आ पर्वम आं कली अरेचा माल्नेवे? 12 गो रागी नु रागीम बाक्ब मुर आन कली सेल्ता। गो आं गुइमी सरीड प्राक्ता। मिनु मेकेर मार मार बाक्मा, मेको नेल्ल सेल्तामी। यसैया ४४:२४ 13 गो कोरेस कली ठीक पचा कली पोक्ता। गो मेको आ लां नेल्ल दिंम सेल्नुड। मेकोमी आं सहर सेल्चा माल्ब। मिनु मेकोमी ग्याइश्शा लाइश्शो मुर आन कली प्रॉइब। मेकोम क्येट नु मारेड कोसेली मताक्ब" दे मुर नेल्ल आन परमप्रभु यावेमी देंत। यसैया ४१:२

परमप्रभुम श्येत रे प्रॉइब देंशो

14 मिनु परमप्रभु यावेमी "इजीप्त डा शॉप, एथीयोपीया डा मारेड मारेड नु साबा रागी डा लाइश्शो मुरपुकी इ के दुम्नीम। मेको इ नोले खोइक्नीम। मेकोपुकी फ्रेंशो दुम्शा, इ गे जाक्शा, इ डॉइती बाप्शा 'थमा पा परमप्रभु गे नु बाक्ब। मेको डा लाक्शा अरु सुइ परमप्रभु मबाक्ब' दे पुंइनीम" देंत।

15 थमा पा, गे परमप्रभु बाक्नीनी। गे खुइसीशो बाक्नीनी। गे इस्राएली आन परमप्रभु, श्येत रे प्रॉइब बाक्नीनी। रोमी ११:३३; यसैया ४३:११ 16 मूर्ति सेल्ब नेल्ल मुने दोक्शा, कालेम आन कुल राव किक्शा लाइनीम। यसैया ४४:९-११ 17 तन्न परमप्रभु यावेमी इस्राएल कली श्येत रे प्रॉइब। मेको गेना हना यो लीब श्येत रे प्रॉइतीकेमी बाक्ब। गे गेना हना यो मुने मदोक्थु, इन कुल मकिक्पाइक्नीनी।

18 मिनु परमप्रभु यावे सरीड नु रागी सेल्ब बाक्ब। मुर मबाक्तीके मसेल्थु, मुर आन कली बाक्तीक सेल्तु। मेकोमी "गो परमप्रभु यावे नड। आं डा लाक्शा अरु सुइ परमप्रभु मबाक्ब। 19 गो छिडछिड डा रागीमी खुइश्शो लोव्र मपड। गो याकूब आ आल आन कली 'गे आं कली खल्बलम मालीने' मदेंड। गो, परमप्रभु यावेमी थमा नु ठीक लोव्र ला पाइनुड" देंत। यसैया ४८:१६

मूर्तिम बेबीलोन प्रॉइने मचाप्नीम

20 मिनु परमप्रभु यावेमी "गे नेल्ल खुम्सीशा बुक्कीन। गे रागी रागी डा लीशो मुर आं नेक्था जाक्कीन। शी के मूर्ति कुरबपुकी मारेड मतुइक्ब बाक्नीमी। मेकोपुकीमी आन मूर्ति कली पुंइना पुंइन बाक्नीमी। तन्न मेकोपुकीमी श्येत रे प्रॉइने मचाप्नीम। 21 इ लोव्र शेंशा, लोव्र पावो। लोव्र पमुने। साइ डॉइती एको लोव्र सुम देंमे? सुमी तुइक्पदा? मेको नोले दुम्ब लोव्र सुम पवा? गो, परमप्रभु यावे मनडा डा? आं डा लाक्शा, अरु सुइ परमप्रभु मबाक्ब। गो ठीक पाइब नु श्येत रे प्रॉइब परमप्रभु यावे नड। आं डा लाक्शा, अरु सुइ परमप्रभु मबाक्ब।

22 आं गे लेतीन। मिनु पाप रे प्रॉइचा पुंइसीन। रागी डा सुर सम्म मो पने। मारदे हना गो परमप्रभु नड। आं डा लाक्शा अरु सुइ परमप्रभु मबाक्ब। 23 गो आं नेंमी कसम जाता। गो ठीक लोव्र पाता। एको लोव्र मक्वाम्सीब। मुर नेल्ले आं डॉइती पोक्च थक्वा माल्नीम। आं नेंमी कसम जचा माल्नीम। रोमी १४:११; फिलिप्पी २:१०-११

24 'परमप्रभु यावे ला ठीक पतीके नु सुक्ति गेब बाक्ब' दे कसम जाइनीम। परमप्रभु यावे कली मटीब नेल्ल आं बाक्तीकेम जाक्शा मुने दोक्वा माल्नीम। येरमीया २३:६ 25 इस्राएल आ चच युइ नेल्लेम 'परमप्रभु यावेमी इं कली ठीक सेल्ब। गोपुकी आ मुर दुम्तय' दे ग्यरसीनीम" देंत। येरमीया ९:२२-२३

बेबीलोन डा मूर्ति खतम दुम्शो

46 बेल गुर ब्वेत। नेबो दिड गोल्त। मेको आन मूर्तिपुकी बी ब्यफ आन कली कुरपाइक्नीम। इन कुरशो थोव्रक गे दशो बी ब्यफ आन कली कुरपाइक्नीनी। येरमीया ५०:२ 2 मिनु मेकोपुकी कालेम दिड गोल्शा, गुर ब्वेनीम। आन भारी प्रॉइने मचाप्नीम। मिनु आंमा ग्याइश्शा लाइक्वा पुंइसीनीम।

3 "याकूब आ खिं डा मुर, आं लोव्र नेनीन। इस्राएल आ खिं डा लीशो मुरपुकी आं लोव्र नेनीन। गे जरमेसीनी रे इन कली कुरता। गे कोव्रजीम बाक्नी रेन इन कली कुरता। 4 गोपुकी खूशो दुम्नी सम्म गो खाल का डा बाक्नुड। इन चां बोइक्म सम्म यो इन कली कुरनन्नी। गो इन कली सेल्शा, कुरनुड। इन कली कुरशा, पाप रे प्रॉइनन्नी। भजन संग्रह ७१:१८

5 गोपुकी आं कली सु नु थाप्नीनी, सु नु उइक्थ बाक्त्त देंनीनी। आं कली सु खोर्देशो बाक्त्त देंनीनी? यसैया ४४:९-२० 6 मिनु शुश सुन थीब नु चांदी नाक्बपुकीमी चेम्ब कली ब्रेत्नीम। मिनु मेको रे मूर्ति सेल्पाइक्नीम। मेको आ डॉइती बाप्शा पूजा पाइनीम। 7 मिनु मेको कली गुप्शा, बलाम कुरशा, लाइश्शा, आ बाक्तीकेम वोदमेनु, मेकेर मदुक्थु, मगाक्थु बाक्ब। सुइमी

मेको आ डोंइती जाक्शा 'प्रोंइयीनी' दैत हना, मेकोमी लोव्र मलेख्ब। सुइ आन कली श्येत रे प्रोंइने मचाख्ब" दैत। १राजा १८:२६

परमप्रभुम आ मिश्शो पाइब

8 मिनु "गे हेंथे गाक्बपुकी, आं दैशो मिम्तीन। साइ डा लोव्र इन थुंम वोतीन। 9 साइ डोंइती डा माइत लोव्र मिम्तीन। मारदे हना गो परमप्रभु नड, आं डा लाक्शा, अरु सुइ परमप्रभु मबाक्नीम। गो परमप्रभु नड, आं खोदैशो सुइ मबाक्नीम। यसैया ४४:६ 10 गो साइ डोंइती रे नोले सम्म मार दुम्मे, नेल्ल शेंनुड। डोंइती रे मुल सम्म मदुश्शो यो देंनुड। मिनु गो आं मिश्शो मफाइक्थु, नेल्ल पाइनुड। आ मिश्शो नेल्ल खाप्नुड। 11 गो पूर्व रे सिखार ग्यारब चिक्ब का ब्रेत्नुड। मिनु डोन रागी रे आं मिश्शो नेल्ल पाइब मुर का कली ब्रेत्नुड। गो आं दैशो लोव्र खाप्नुड। आं मिश्शो पाइनुड। यसैया ४१:२ 12 गे खकटा थुं पाइश्शोपुकी नेनीन। गे पाप रे प्रोंइतीके रे शुश डोन बाक्नीनी। 13 आं पाप रे प्रोंइतीक चाक्नुड, मेको डोन मबाक्ब। गो इन कली रीब पा पाप रे प्रोंइनुड। गो आं पाप रे प्रोंइतीक सियोनम वोइक्नुड। इस्राएल कली आं छेडछेड गेनुड" दैत।

बेबीलोन सहर खतम दुश्शो

47 मिनु "गे कन्ने तमी बेबीलोन तोइश्शा फुरकुम निस्सो। बेबीलोन डा कल्दी आ तमी, ठेयब नित्तीक मबाक्थु, खपीम निस्सो। मारदे हना मुल रे इन कली 'दारशो नु अरु आन क्येडा शुश दाक्शो तमी' मदेनीम। 2 फस हिल्दो। इ कुल सुम्सीशो वा हाक्सो। इ गुने ग्येत्थ क्युक्सो फिला कोंइशा खोला शोक्सो। 3 इ वा हुक्शा, इ शिश्रा रां कोंइचा माल्नेवे। इ मुने दोक्तीके तांडसीब। गो इ कली क्येक्क लेत्नुड। गो सुइ कली मप्रोंइनुडमी। नहुम ३:५ 4 आंइ कली श्येत रे प्रोंइब, मुर नेल्ल आन परमप्रभु यावे, इस्राएली आन का ला बाक्शो परमप्रभु बाक्ब। 5 कल्दी आ तमी ब्वालेइ पा छिडछिडम लशा निस्सो। मारदे हना गे मुल रे राज्यपुकी डा पिपीम माइक्वा मपुंडसीनेवे। 6 गो आं मुर आन कली तशा गाइश्शा, मेको आन कली 'आं मुर मनम' खोदैशो सेल्लामी। मेना इ गुइमी गेतामी। मिनु गे मेको आन कली काइ शिश्री मपदी। खूशो आन कली यो श्येत गेशा, हेल्शो जवा लाप्ताक्वी। जकरिया १:१५ 7 मिनु गे 'गो गेना हना यो पिपीम बाक्नुड' दैते। गे आं मुर आन कली मरिश्शो पाप्तीवी। नोले मार दुम्बा, मेको ममिम्ती।

8 मोपतीके गे दला दाक्स पाइब, नेनो। गे रिश्शो पा महिंथु बाक्ते। इ थुंमी 'गो ठेयब नड, आं क्येडा लाक्शो अरु सुइ मबाक्ब। गो वोंइश बेक्शो मीश मुर मदुम्नुड। आं आल बेक्शो मताइनुड' दैते। सेफन्याह २:१५; प्रकाश १८:७ 9 वोंइश बेक्शो मीश मुर दुम्तीके श्येत नेल्ल ताइनेवे। इ आल बेक्शो ताइनेवे। नाक्ती का, याम कामीन एको श्येत निक्शी इ कली दुम्नीस। शुश मन्तर तन्तर, ठेयब सक्ति पाइश्शो टुना मुना पाप्तीवी हना यो, मो दुश्शो ताइनेवे।

10 गे, परमप्रभु यावे आ अरेशो मटिथु 'आं कली सुइम मताइब' दे हेम्मा पा बाक्शा, मिम्ताक्वी। मिनु इ शुश तुइक्तीके नु जोक्तीकेम इ कली दूली लां खोइक्पाइक्त्तु। इ थुंमी 'गो नड। आं क्येडा लाक्शो अरु सुइ मबाक्नीम' दैते। भजन संग्रह १०:११ 11 तन्न मुल गे शुश श्येत जाइनेवे। इ मन्तर तन्तरमी तिकने मचाप्नेवे। गे शुश हिंचा डा श्येत जाइनेवे। गे मेको तेक्ने मचाप्नेवे। मुल सम्म मतुइश्शो जाम्तीक नु नुप्तीक इ तारी जाक्ब।

12 गे इ टुना मुना नु मन्तर तन्तर शुश पावो। गे आल रेन मोदैशो पाप्तीवी। मेको पवीनु, ठीक दुम्बा कों? मेको श्येत मजाक्बा कों? दानीएल २:२ 13 गे शुश अर्ती नैशा दशो बाक्नेवे। मिनु कल्दीपुकीमी सरीड कोव्रशा, इ कली पाप रे प्रोन्मेक्ल। मिनु सोरुल कोव्रबमी औसीमी इ कली मार दुम्बा, मेको देंमल।

14 मेकोपुकी ठुटा दुम्नीम। मिनु मीम मेको आन कली नेक्ब। आंमा मेको मी रे प्रोंइसीने मचाप्नीम। मेको मी थेरचा डा मदुम्थु, आ डोंइती बाक्ने मचाप्नीम। 15 गे नु गेय पाइब मुरपुकी मोदैशो मुर बाक्नीमी। गे आल रेन

मेकोपुकी नु ग्याप्तीक लेयती गेय पाप्तीवी। मेको का का पा आन आंम लां खोइक्नीम। मिनु इ कली प्रोंइब सुइ मबाक्नीम" दैत।

परमप्रभुम नोले दुम्ब लोव्र शेंशो

48 मिनु परमप्रभु यावेमी "याक्ब आ खिं डा मुर, नेनीन। इन कली इस्राएल नें वोइश्शो बाक्ब। गे यहूदा आ चच युइ बाक्नीनी। गे परमप्रभु यावे आ नें थिशा, कसम जाइनीनी। गे इस्राएली आन परमप्रभु कली ठेयब सेल्खु पाइनीनी। यसैया ५१:१ 2 मेकोपुकी आंमा 'गोपुकी परमप्रभु आ योव्रशो सहर डा नकी' देंनीम। इस्राएली आन परमप्रभु आ पर्वम मेकोम आंइ कली कोव्रब" दे मिम्नीनी। मेको आ नें मुर नेल्ल आन परमप्रभु यावे बाक्ब।

3 गो इन कली साइ डोंइती डा लोव्र डोंइती रेन शेंताक्नीनी। गो लोव्र पा नेंपाइक्त्तन्नी। नोले गो मेको याम काम पाता। मिनु दुम्तेक्म। 4 गे मटीब बाक्नीनी। इन शुर फलाम खोदैशो बाक्ब। इन कुप्की कांसा खोदैशो बाक्ब। गो मेको तुइश्शो बाक्नुड। 5 मोपतीके गो इन कली मेको दुम्चा क्येडा डोंइती शेंताक्नीनी। मिनु गे "मेको आं मूर्तिम पाप्तु। आं मुशा सेल्थो मूर्तिम नु आं चेम्शा सेल्थो मूर्तिमी मेको पाप्तु" देंने मचाप्नी।

6 गे मेको नेल्ल नेंशो बाक्नीनी। मुल गे नेल्ल कोव्रडीन। मिनु मेको आ पर्वम लोव्र मपाइनीनी? मुल रे गो इन कली नक लोव्र नेंपाइक्त्तन्नी। इन मतुइश्शो खूइश्शो लोव्र शेंनन्नी। 7 मेको डोंइती डा ममाइ, गो मेको मुल पाता। डोंइती मनैशो ननी। मिनु गेपुकीमी "गो डोंइती रे तुइश्शो नकी" देंने मचाप्नीनी। 8 गे मेको मनैशो मतुइश्शो बाक्नीनी। साइ डोंइती रे नोफा मनैब बाक्तीनी। गे जोल पा गेय पाइब बाक्नीनी। मेको गो तुइक्ताक्ड। आल रेन गे काइ मटीब बाक्तीनी, दे तुइक्ताक्ड।

9 आं नें आ पर्वम आं गाइक्तीके तेक्नुड। आं कली ठेयब सेल्लतीके, गो इन पर्वम आं गाइक्तीके तेक्नुड। इन कली मसाइक्वा कली मो पाइनुड। 10 कोव्रडीन, गो इन कली यपाइक्ता, तन्न चांदी खोदैशो पा ममाइ। शुश श्येत जपाइश्शा, नाक्ताक्नी। ब्यक्स्था ४:२० 11 गो आं पर्वम पाइनुड। मारदे आं नें ग्रांरा दिशो सेल्चा गेनुडा? आं छेडछेड नु सक्ति अरु आन कली मगेनुडमी। यसैया ४२:८

इस्राएल कली पाप रे प्रोंइशो

12 याक्ब आं लोव्र नेनो। आं ब्रेश्शो इस्राएल नेनो। "गो, गो नड। गो नेल्ल क्येडा डोंइती नु नेल्ल क्येडा नोले डा नड। 13 गो रागी आ जग वोइक्ता। आं ग्युरा गुइमी सरीड प्राक्ता। मेको आन कली ब्रेत्तुनु नेल्ल गूशा राप्नीम।

14 गे नेल्ले खुम्सीशा, आं लोव्र नेनीन। मेको आन दातेमी सुम मोदैशो शेंदा? परमप्रभु यावेम मेको आन कली दाक्ब। मिनु मेको बेबीलोन आ पर्वम बोक्ब। कल्दी डा मुर आन कली लडाइ तोइब। यसैया ४१:२ 15 गो एको लोव्र पाता। गो मेको कली ब्रेश्शा, चाक्ता। मिनु मेकोमी आं मिश्शो गेय रिश्शो पा पाइब। 16 आं नेक्था जाक्शा, एको लोव्र नेनीन। गो डोंइती रे खूइश्शो लोव्र काइ मपड। एको गोशो रे गो बाक्शो नड। मुल परमप्रभु, परमप्रभु यावेमी आ सोक्त गेशा, आं कली सोइक्ताक्वी" दैत। यसैया ४५:१९

बेबीलोन रे गूडीन दैशो

17 इन कली श्येत रे प्रोंइब इस्राएली आन का ला बाक्शो परमप्रभुमी "गो परमप्रभु यावे, इन परमप्रभु नड। गो इन कली रिश्शो दुम्चा कली शेंनुड। मिनु तेको लां लचा माल्नीनी, मेको कोंइनुड। 18 गेपुकी आं शेंशो टिशो ननी हना, इन सोशा बोशा लतीके ठेयब खोला खोदैशो दुम वा। इन रिश्शो दुम्तीके समुन्द्र खोदैशो दुम वा। ब्यक्स्था ५:२९ 19 मिनु इन आल समुन्द्र डा बाल्वा खोदैशो पा शुश दुम वा। मिनु इन चच युइ अन्न खोदैशो पा शुश दुम वा। आन नें गेनायो मक्याम्स वा। मिनु आं डोंइती रे खतम मदुम वा। उत्पत्ती २२:१७

20 'बेबीलोन रे गूडीन। कल्दी आन रागी रे प्रोक्कीन' दे ठेयब सेंदा पा नेल्ल आन कली नेंपतीन। रागी डा सुर सम्म नेंपतीन। गेपुकीमी 'परमप्रभु



यावेमी आ गेय पाइब याकूब कली पाप रे प्रॉइतु' दे नैपतीन" देंत। *येरमीया* ५१:६; *प्रकाश* १८:४<sup>21</sup> मेकोमी मेको आन कली गोरशो रागीम लदानु, मेकोपुकी ब्वाक्कु तूतू मदाक्म। मारदे हना मेकोमी सेरथे फुल्लु रे ब्वाक्कु बुक्पाइक्नु। सेरथे फुल्लु प्रोलानु, शुश ब्वाक्कु गूत।<sup>22</sup> परमप्रभु यावेमी "आं अरेशो लोव मटीब आन थुं नाइक्वा मताइनीम" देंत। *यसैया* ५७:२१

परमप्रभु यावे आ गेय पाइब  
यसैया ४२:१-४

49 गे समुन्द्र आ नेक्था बाक्बपुकी, होस पने। गे डोन रागी डा मुरपुकी, होस पने। परमप्रभु यावेमी आं कली आ जरमेचा क्येडा डोंइती रेन ब्रेशो बाक्ता। गो आं ममा आ कोव्रजीम बाक्डानु, मेकोमी आं कली नें गेती।<sup>2</sup> मेकोमी आं शोव्र हेश्शो तरवार खोदेंशो सेल्लु। आं कली आ गुडमी सुम्शा, खूइक्ताकयी। मेकोमी आं कली हेश्शो ब्रा खोदेंशो सेल्शा, आ ब्रा कुरतीकेम कुर पा खूइश्शा वोइक्ती। *हिब्रू* ४:१२; *प्रकाश* १:१६; *यसैया* ५१:१६<sup>3</sup> मिनु आं कली "गे आं गेय पाइब बाक्नेवे। गे इस्त्राएल नवे। इ पतीकेमी आं सक्ति कोंइनुड" देंत।<sup>4</sup> मिनु गो "गो मो गेय पाता। आं बोल मो खेरता। गो मार पचा माल्लुडा। मेको परमप्रभु यावे नु बाक्ब। आं परमप्रभुमी आं तचा माल्लो गेब" देंती। *१कोरिन्थी* १५:५८

<sup>5</sup> मुल परमप्रभु यावेम आ गेय पाइब सेल्लती। मिनु गो याकूब कली आ गे लेप्पाइक्वा कली नु इस्त्राएल मेको आ नेक्था खुप्शा वोइक्वा कली मेकोमी आं कली आं ममा आ कोव्रजीम सेल्लती। मारदे हना गो परमप्रभु यावे आ डोंइती मान ताइब दुम्ती। आं परमप्रभु आं सक्ति दुम्त।<sup>6</sup> मिनु मेकोमी "याकूब आ थर डा मुरपुकी नु इस्त्राएल डा लीशो मुर आन कली डोंइती डा खोदेंशो सेल्वा कली इ कली आइक्व गेय का बाक्ब। गो इ कली रागी रागी डा मुर आन कली छेडछेड दुम्पाइक्नुड। मिनु मेको आं पाप रे प्रॉइतीके रागी डा सुर सम्म ब्रल" देंत। *यसैया* ४२:६; *यसैया* ६०:३; *लूका* २:१२; *प्रेरित* १३:४७

<sup>7</sup> परमप्रभु यावेम, इस्त्राएली आन श्येत रे प्रॉइब, इस्त्राएली आन का ला बाक्शो परमप्रभु यावेमी काइ मदाक्शो नु रागी डा मुरुम खेदा पचा पुंडसीशो नु हुकुम पाइब आन वाइल आन कली "पिपपुकी मेको कली तशा, राप्नीम। हुकुम पाइबम आ देंशो पाइब परमप्रभु यावे आ डोंइती बाप्नीम। इ कली योव्रब इस्त्राएली आन का ला बाक्शो परमप्रभु आ डोंइती बाप्नीम" देंत।

इस्त्राएली कली पाप रे प्रॉइब

<sup>8</sup> मिनु परमप्रभु यावेमी "शिशो पतीक नाक्त्त गो इ लोव्र नेंशा, लोव्र लेत्ताक्न। प्रॉइतीके नाक्त्त गो इ कली वारच पाता। गो इ कली कोव्रशा, आं कबल डा मुर सेल्लता। गो रागी लेंशा सेल्वा कली मोदेंशो पाता। इन थेरशो रू लेंशा इन कली गेचा कली मो पाता। *भजन संग्रह* ६९:१४; *२कोरिन्थी* ६:२; *यसैया* ४२:६<sup>9</sup> गो जेल्खानम बाक्ब आन कली 'गूडीन', छिडछिडम बाक्ब आन कली 'छेडछेडम गूडीन' देंचा कली ब्रेत्ताक्न। मेकोपुकी आं भेडा बाक्नीम। लांमी जोचा ताइनीम। गोरशो डांडा मेको आन रिम्शो पा जोतीके बाक्तीके दुम्ब।<sup>10</sup> शोव्रलु मबेक्नीम, तूतू मदाक्नीम। नां नु होश फश नु नांमी मेको आन कली मनाप्ब। मारदे हना मेको आन कली शिशो पाइबमी मेको आन कली खुल्ब। *प्रकाश* ७:१६<sup>11</sup> मिनु गो आं डांडा नेल्ले लां सेल्लनुड। आं ठेयब लां रिम्शो पा सेल्पाइक्नुड। *यसैया* ४०:४<sup>12</sup> नेनीन, मेकोपुकी डोन रे जाक्नीम। मेकोपुकी उत्तर रे पच्छिम रे नु स्येने रागी रे जाक्नीम" देंत। *स्येने रागी इजीप्त आ दक्खिनम यहूदी आन बाक्तीके का बाक्ब। मेको कली आस्वान यो देंनीम। लूका* १३:२९

<sup>13</sup> सरीड, ग्येरसीशा कुम्सो पावो। रागी, ग्येरसो। डांडापुकी ग्येरशा, कुम्सो पने। मारदे हना परमप्रभु यावेमी आ मुर आन कली लेम्ताक्व। मेकोमी श्येत जाइब आन कली शिशो पाइब। *यसैया* ४४:२३

सियोन डा शुश मुर

<sup>14</sup> तन्न सियोनमी "आं परमप्रभु यावे, परमप्रभुम आं कली प्रॉइशा प्रेंताकयी" देंत।<sup>15</sup> मिनु परमप्रभुम "सुइ मीश मुरुम आ दूध तूब आल कली

प्रेंबा डा? आंम आ आल कली शिशो मपाइबा डा? मेकोम आ आल कली प्रेंने चापु हना यो, गो इ कली मप्रेंनुड। *उत्पत्ती* २१:१६; *१राजा* ३:२६; *येरमीया* ३१:२०<sup>16</sup> कोव्रडो, गो इ कली आं गुडमी ब्रेक्ताक्न। इ गारोपुकी गेना हना यो आं डोंइती बाक्नीम।<sup>17</sup> इ तमी तौ रीब पा जाक्नीम। इ कली खतम पोक्ब गूशा लाइनीम" देंत।<sup>18</sup> कोव्रडो, मिक्च हिरशा कोव्रडो। मेको नेल्ल गुम्शा, इ बाक्तीक जाक्नीम। परमप्रभु यावेमी "गो ब्रॉइशा बाक्शो खोदेंशो पा, गे मेको लेश्शा जाक्ब आन कली माला खोदेंशो पा रेल्सीचा माल्लेवे। ग्युम्ली खोदेंशो पा मेकोपुकीमी ग्योम्सीचा माल्लेवे। *यसैया* ६०:४<sup>19</sup> थमा पा इ प्रेशो खिं, मुर मबाक्शो रागी नु इ खतम दुम्शो रागीम मुर मरिक्शी दुम्नीम। इ जोरी सत्रु डोन लाइनीम।<sup>20</sup> इन ब्राची ना डा जरमेशो आलपुकीमी इ कली 'एको रागीम आंइ कली मरिक्त्त, अर्को बाक्तीक रू गेकी' देंनीम। *यसैया* ५४:१<sup>21</sup> मिनु गे इ थुंमी 'एको आलपुकी आं कली सुम थिशा गेयी? गो आल मथीब दुम्शो बाक्ती। आं रागी रे ग्याइश्शा लाइक्वा पुंडसाकयी। सुम मेको आन कली थुल्शा कोल्पदा? गो दा आं का ला लीशो बाक्ती। एको ते रे जाक्मा?' दे मिम्नेवे" देंत।

<sup>22</sup> मिनु परमप्रभु, परमप्रभु यावेमी "गो आं गुड रागी रागी गे दिनुड। गो जात जात डा मुर आन डोंइती आं छेदर खूक्शा कोंइनुड। मिनु मेकोपुकीमी इ तौ आन कली कुचुम मुप्शा नु इ तमी आन कली चीम कुरशा चाक्नीम। *यसैया* ६०:४<sup>23</sup> मिनु पिपपुकी इ कली कोव्रब आफ नु पिपीमपुकी इ कली दूध तुंडब ममा दुम्नीम। मेकोपुकी इ डोंइती बाप्शा, इ फुरक लुम्सीशो खोइली तुक्नीम। मिनु गो परमप्रभु यावे नड, दे तुइक्नेवे। आं लां रिम्शा बाक्बपुकी मुने मदोक्नीम" देंत। *भजन संग्रह* ७२:९; *यसैया* ६०:१६

<sup>24</sup> बोल्यो मुर आन रोइश्शो सिखार सुम रोइक्ने चाप्नीमी डा? हिंचा डा पिपम चोक्शो मुर आन कली सुम प्रॉइने चाप्नीमी डा? <sup>25</sup> तन्न परमप्रभु यावेमी "बोल्यो मुर आन ग्याइश्शो मुरपुकी यो लाइक्वा पुंडसीनीम। हिंचा डा पिपम चोक्शोपुकी प्रॉइचा पुंडसीनी। गे नु लडाइ पाइबपुकी नु गो लडाइ पाइनुड। इ आल आन कली गो कोव्रशा प्रॉइनुड। *मत्ती* १२:२९<sup>26</sup> इ कली श्येत गेब आन कली आंम आन श्ये ब्वपाइक्नुड। मेकोपुकी अडगुर शांबुम दुक्शो खोदेंशो पा आंम आन हुशेम दुक्नीम। मिनु मुर नेल्लेमी 'गो इ कली श्येत रे प्रॉइब, इ परमप्रभु यावे नड। गो इ कली पाप रे प्रॉइब, याकूब आ सक्ति पाइश्शो परमप्रभु नड' दे तुइक्नीम" देंत।

परमप्रभुम इस्त्राएली कली हुइश्शो

50 मिनु परमप्रभु यावेमी "गोम इन ममा कली प्रॉइशा गेशो छोड पत्र ते बाक्म? गो तेको आं कली जेर गेब कली इन कली लेयन्नी? ममाइ, गे इन पापम पतीके लेयसीशो ननी। इन हेंथे पतीकेमी इन ममा प्रॉइचा पुंडसीशो बाक्ब। *यसैया* ५४:६; *ब्यवस्था* २४:१; *यसैया* ५२:३<sup>2</sup> गो जाक्डानु, मारदे सुइ मबाक्मा? गो ब्रेडडानु, मारदे सुइमी लोव्र मलेत्ता? आं गुड इन कली पाप रे प्रॉइने मचाप्चा डा दुम्शो बाक्मे? इन कली प्रॉइने चाप्तीक सक्ति गो नु मबाक्बा? गो हुइक्नुतु, समुन्द्र सोव्रब। खोलापुकी ब्वाक्कु मबाक्शो गोरशो रागी सेल्लनुड। ब्वाक्कु मबाक्तीके डांइपुकी बेक्शा, राक्शा, रिना पाइनीम। *यसैया* ५९:१; *गन्ती* ११:२३; *प्रस्थान* १४:२१<sup>3</sup> गो सरीड कली छिडछिडम गिल्शा, अरन्डी फेक्पाइक्नुड" देंत।

परमप्रभु आ गेय पाइबमी टिश्शो  
यसैया ४२:१-४

<sup>4</sup> परमप्रभु, परमप्रभु यावेमी आं कली शेंब सेल्लती। गो मचाप्शो मुर आन कली लोव्र पा आन थुं बारपाइक्ब दुम्ती। मेकोम आं कली सुनी कुस कुस पोक्ब। आं कली शेंसीब खोदेंशो पा नोफा दाइश्शा नेंब सेल्ब।<sup>5</sup> परमप्रभु, परमप्रभु यावेमी आं कली आ लोव्र नैपाइक्ती। मिनु गो आ लोव्र टिशा, नोले मशॉइसीड। *भजन संग्रह* ४०:७<sup>6</sup> गो आं ची तुप्ब आन कली तुप्चा गेतामी। गाल शोक्त्रे ब्विप्ब आन कली चोव्रचो दाइश्शा गेतामी। गो शुक्शी पाइक्वा नु तोक्चा पुंडसीतीक रे आं कुल मखूइक्नुतु। *यूहन्ना* १९:१; *मत्ती* २६:६७-६८

<sup>7</sup> तन्न परमप्रभु, परमप्रभु यावेमी आं कली वारच पाइक्ती। मोपतीके गो शिशो मताइब मदुम्ड। आं कुल शेराल फुल्लु खोदेंशो सेल्लता। गो मुने

मदोक्नुड, दे तुइश्शो नड। इजीकीएल ३:८-९<sup>८</sup> “गे रिश्शो पाइब बाक्नेवे” देब आं नेक्था बाक्ब। गो नु सु लडाइ पाइबा? कालेमी बोक्शा राय्य। दोस गेब, सु बाक्मा? मेको आं डोंइती जाक्मल। रोमी ८:३३<sup>९</sup> परमप्रभु, परमप्रभु यावेमी आं कली वारच पाइब। आं कली दोस गेब, सु बाक्नीमी? मेको नेल्ले फेक्शो वा खोदेंशो पा माइत दुम्नीम। मिनु तुम्बुम मेको कली नेक्नीम।

<sup>10</sup> इन दातेमी परमप्रभु यावे कली मान पा हिंभ सु बाक्नी? मिनु आं गेय पाइब आं देंशो टीब सु बाक्नी? मेको छिडछिडम गाक्शा, छेडछेड काइ मताइब बाक्त हना यो, परमप्रभु यावेम “आं कली श्येत रे प्रोंइब” दे थमा सुइश्शा, आ परमप्रभु कली जिम्मा गेंसीशो बाक्ब। <sup>11</sup> गे नेल्ल खिं सुइक्ब बाक्नीमी। कोक्त सुइक्ब बाक्नीमी। इन सुइश्शो मीम गाक्कीन। गे आं गुइ रे मार ताइनीमी? गे गोल्शा शुश श्येत जाइनीमी।

सियोन आ थुं बारपाइश्शो

**51** परमप्रभु यावे कली माल्ब नु ठीक पचा दाक्ब आन कली “आं लोव्र नेनीन। तेको सेरथे फुल्लु रे मुचा पुंइसीशो बाक्नी नु तेको खप रे दोशा गुंइचा पुंइसीनी, मेको कली कोव्रडीन। यसैया ४८:१; ब्यवस्था ३३:२८<sup>२</sup> इन किकी पिपी अब्राहाम नु इन कली थीब सारा आस कली कोव्रडीन। मारदे हना गो मेको कली आ का बाक्मेनु, ब्रेत्ताक्ड। मिनु मेको कली आसीक गेशा, आ चच युइ आन कली सोपाइश्शा बोपाइश्शा शुश सेल्ताक्मी” देंत। यसैया ४९:८; उत्पत्ती १२:१-२<sup>३</sup> परमप्रभु यावेमी सियोन आ थुं बारपाइक्ब। आ खतम सेल्शो बाक्तीके नेल्ल नक सेल्ब। आ मुर मबाक्तीके कली एदेन खोदेंशो सेल्ब। आ गोरशो रागी कली परमप्रभु यावे आ रू खोदेंशो सेल्ब। मेकेर शुश ग्येरनीम। “गे रिश्शो पाइब बाक्नीमी” दे कुम्सो पशो नेंसीब। उत्पत्ती २:८

<sup>4</sup> मिनु परमप्रभुमी “आं मुरपुकी, आं लोव्र नेनीन। आं रागी डा मुरपुकी इन नोफा दाइक्तीन। मारदे हना गो आं लोव्र शेंनुड। आं ठीक निसाफ जात जात डा मुर आन कली तुइक्पाइक्नुड। मेको आन कली छेडछेड दुम्ब। <sup>5</sup> गो आं ठीक पतीके रीब पा चाक्नुड। गो ग्राचा चिक्शो बाक्नुड। मिनु गो जात जात डा मुर आन कली निसाफ पाइनुड। समुन्द्र आ नेक्था बाक्ब मुरपुकीम आं लां कोव्रनीम। आं वारच पतीके रिम्नीम। यसैया ४२:४<sup>6</sup> मिनु सरीड गे कोव्रडीन। खप गे कोव्रडीन। मारदे हना सरीड कुन खोदेंशो पा जाम्ब। रागी वा खोदेंशो पा जेक्ब। रागीम बाक्ब मुर नेल्ल भुस्ना खोदेंशो पा बेक्नीम। आं पाप रे प्रोंइतीके चहिं गेना हना यो लीशा बाक्ब। आं ग्रातीके गेनायो मनुप्ब। भजन संग्रह १०२:२६-२७; मत्ती २४:३५

<sup>7</sup> गे ठीक पतीके तुइक्बपुकी आं लोव्र नेनीन। आं शेंशो थुमी वोइक्ब मुर आं लोव्र नेनीन। मुर आन शुक्शी पशो नेंशा महिनीन। मेको आन तोक्शा पशो लोव्र नेंशा सुर्ता मपने। यसैया मत्ती ५:११<sup>८</sup> मारदे हना तुम्बुम वा नेक्थो खोदेंशो पा, मेको आन कली नेक्नीम। बुस्सुम ऊन खोइश्शो खोदेंशो पा खोइक्नीम। आं ग्राचा चहिं गेना हना यो लीशा बाक्ब। आं पाप रे प्रोंइतीके पाला पाला नेल्ल आन कली लीब” देंत।

परमप्रभु यावे आ गेय

<sup>9</sup> परमप्रभु यावे सेंसीन, सेंसीन। सक्ति पाइश्शो दुमीन। साइ डोंइती आंइ किकी पिपी आन कली पशो खोदेंशो पा, पने। साइ गे राहाब माइश्शो समुन्द्र डा जन्तु कली मसाइक्नी डा? ठेयब बुस्स कली मत्तूदीनी डा? भजन संग्रह ८९:११<sup>10</sup> समुन्द्र सोव्रपाइक्ब, गे मननी डा? गे समुन्द्र कली चेशशा आ पुंम लां मसेल्नी डा? इन पाप रे प्रोंइशो, इन मुर आन कली शोक्पाइक्वा कली मोदेंशो पाइतीनी। प्रस्थान १४:२१-२२<sup>11</sup> परमप्रभु यावे आ प्रोंइशोपुकी लेलीम। मेकोपुकी कुम्सो पना पन सियोनम जाक्नीम। मिनु गेना हना यो ग्येरशा बाक्नीम। शुश ग्येरतीके, मेको आन श्येत नु हुकयी पतीके जाम्शा लाइब। यसैया ३५:१०

<sup>12</sup> परमप्रभुमी “गो इन कली थुं बारपाइक्ब नड। गे मुर तशा, मारदे हिंनीनी? मुरपुकी घांस खोदेंशो पा बेक्नीम। भजन संग्रह ५६:५; मत्ती १०:२८; यसैया ४०:१, ६<sup>13</sup> गे इन कली सेल्ब परमप्रभु यावे कली प्रेंताक्नी।

मेकोमी सरीड प्राक्तु। रागी आ जग वोइक्तु। इन कली श्येत गेब मुर गाइक्तमेनु, गे नाक्त किंत किंत हिंनीनी। मेकोमी इन कली खतम सेल्चा चिक्शो बाक्त। तन्न मुल आ गाइश्शो ते लाक्मा? यसैया ४४:२४<sup>14</sup> मिनु चोक्सीशा गु बाप्शो मुर कली रीब पा प्रोंइनीम। मेकोपुकी मबेक्नीम। गेना हना यो जचा ताइनीम। <sup>15</sup> मारदे हना गो परमप्रभु यावे, इन परमप्रभु नड। गो समुन्द्र डा छाल पोक्नुड। आं नें मुर नेल्ल आन परमप्रभु यावे बाक्ब। येरमीया ३१:३५<sup>16</sup> गो इ कली आं लोव्र पपाइक्ता। गो इ कली आं गुइ डा वांकुमी सुम्शा वोइक्तन। सरीड प्राक्ब नु रागी आ जग वोइक्ब गो नड। मिनु सियोन कली ‘गे आं मुर बाक्नीनी’ देंशो बाक्नुड” देंत।

दिप्चा पुंइसीशो यरूसलेम बोक्को

<sup>17</sup> यरूसलेम बोक्को। परमप्रभु यावे इ पर्वम गाइश्शा, श्येत तूचा गेप्तु। गे दिड दाड गोल्पाइक्ब कचौरा तूशा श्येत्थ सेल्तीवी। भजन संग्रह ६०:५; भजन संग्रह ७५:९; येरमीया १३:१२-१३; प्रकाश १६:१९<sup>18</sup> मेको आ थिशो आल आन दातेमी, मुर आन कली शेंब सुइ मबाक्म। आ कोल्शो आल आन दातेमी मेको आन कली लां कोंइब सुइ मबाक्म। <sup>19</sup> इ कली श्येत निक्शी जाक्ताक्स। मेको लां नेल्लेम गोल्शो बाक्नीम। डोंइती डा श्येत इन सहर प्रेशशा, खतम दुम्तीके नु नोले डा श्येत अन्काल नु लडाइम, बेक्तीके बाक्त। सुम इ थुं बारपाइक्बा? <sup>20</sup> इ आलपुकी थाम्तेक्म। मेको लांम गोल्शो बाक्नीम। मेको ब्वारदम रेशशो रोकेश खोदेंशो दुम्शो बाक्नीम। परमप्रभु यावे आ गाइक्तीके नु हुइक्तीके मोदेंशो दुम्शो बाक्नीम। बिलाप २:११, १९

<sup>21</sup> मोपतीके गे गार पाइश्शो मुर नेनीन। गे दुक्शो बाक्नीमी, तन्न अडगुर शांबुम ममाइ। <sup>22</sup> परमप्रभु यावे, इ होव्रप दुम्शा परमप्रभुमी “गो आं मुर आन कली वारच पाइब बाक्नुड। गो इ दिड दाड गोल्पाइक्ब कचौरा इ गुइ रे लाइक्ता। मुल रे गे आं गाइक्तीक कचौरा लेंशा तूचा ममाल्नेवे। <sup>23</sup> मिनु इ कली श्येत गेब आ गुइमी मेको कचौरा गेनुड। डोंइती मेकोपुकीमी इ कली लांम बाप्पो। ‘इ तारी गाक्नीक’ देंतेक्म। मिनु गे इ ची गाक्तीक लां खोदेंशो सेल्तीवी” देंत। भजन संग्रह १२९:३

परमप्रभुम सियोन कली ब्रेश्शो

**52** मिनु परमप्रभुमी “बोक्को। सियोन बोक्को। सक्ति पाइश्शो दुमो। इ दारशो वा फेक्सो। यरूसलेम, गे परमप्रभु यावे आ सहर बाक्नेवे। मुल रे खोइक्तीक चिनु मखोइश्शो नु ग्रांग्रा दिचा डा मुर मेकेर ओव्रने मचाप्नीम। <sup>2</sup> यरूसलेम, इ फुरक थुर थुर पाइसो। बोक्को। गे ग्याइश्शा चोक्वा पुंइसीशो सियोन आ तमी, इ शुर डा साडलो प्तो” देंत।

<sup>3</sup> परमप्रभु यावेमी “गे मोशान लेयसाक्नी। मिनु मोशान प्रोंइचा पुंइसीनीनी। यसैया ५०:१<sup>4</sup> साइ डोंइती आं मुर उइ इजीप्त रागीम अर्को रागी डा मुर दुम्थ लाम्तेक्म। मिनु अस्सुर डा मुरपुकीमी यो मेको आन कली मोशान श्येत गेम्तेक्म” दे परमप्रभु, परमप्रभु यावेमी देंत। उत्पत्ती ४६:५-६; २राजा १७:६<sup>5</sup> मिनु परमप्रभु यावेमी “गो मार पाइनुडा डा? आं मुर आन कली मोशान लाइक्तेक्म। मेको आन कली हुकुम पाइबपुकीमी ठेयब लेश्शो लोव्र पा नाक्ते रे आं नें आ पर्वम शुक्शी पाइनीम। इजीकीएल ३६:२०<sup>6</sup> मोपतीके आं मुर आन कली आं नें तुइक्पाइक्नुडमी। काबु नाक्ती मेकोपुकीमी ‘गो मेको लोव्र पाइब बाक्नुड’ दे तुइक्वा माल्नीम” देंत।

ग्येरपाइक्ब लोव्र

<sup>7</sup> डांडा मेरे ग्येरपाइक्ब लोव्र शेंशा गाक्ब आन खोइली शुश रिश्शो बाक्नीम। मेकोपुकीमी थुं नाइक्वा आ पर्वम लोव्र शेंनीम। मेकोपुकी रिश्शो लोव्र पाइब बाक्नीम। पाप रे प्रोंइतीक शेंनीम। सियोन कली “इ परमप्रभुम सासन पाइब” देंनीम। यसैया ४१:२७; नहुम २:१; रोमी १०:१५<sup>8</sup> नेनीन, इ कली कोव्रब नेल्लेमी ठेयब सेंदा पा ग्येरशा कुम्सो पाइनीम। मारदे हना मेकोमी परमप्रभु यावे सियोन गे लशा लेश्शा पिशो ताइनीम। यसैया ६२:६; इजीकीएल ३:१७<sup>9</sup> यरूसलेम डा ब्रेश्शो खिं ग्येरशा कुम्सो पने। मारदे हना परमप्रभु यावेमी आ मुर आन थुं बारपाइक्तु। मिनु मेकोमी यरूसलेम कली श्येत रे प्रोंइतु। <sup>10</sup> परमप्रभु यावेमी रागी रागी डा मुर आन डोंइती आ सक्ति

कोंइताक्व। मिनु रागी आ सुर सम्म डा मुर नेल्लेमी आंइ परमप्रभुमी दोपा पाप रे प्रॉइबा, मेको ताइनीम।

11 गूडीन, गूडीन, मेकेर रे गूडीन। ग्रांया दिशो थोवक मथिने। मेको आन दाते रे गूडीन। परमप्रभु यावे आ खिं डा मार मार कुरबपुकी परमप्रभु आ डॉइती जाक्शा, इन कली ठीक सेलीन। 12 मारदे हना गे रीब पा लचा ममालनीनी। प्रोक्शा लचा यो ममालनीनी। मारदे हना परमप्रभु यावे इन डॉइती गाक्व। मिनु मेको इस्राएली आन परमप्रभुमी इन कली लां कोंइशा खुल्ब। प्रस्थान १२:११; ब्यवस्था १६:३; प्रस्थान १३:२१

परमप्रभु आ गेय पाइब  
यसैया ४२:१-४

13 कोवडीन, आं गेय पाइबम ग्राना ग्रान गाक्व। मेको मान पा ठेयब सेल्वा पुंडसीशा, थम ठेयब दुम्ब। 14 मिनु शुश मुर मेको कली तशा हितेक्म। मारदे हना मेको काइ मरिश्शो तांडसीशो बाक्त। मुर मोदेंशो मरिश्शो मतांडसीनीम। आ रां यो मुर आन रां क्येडा मरिश्शो बाक्त। मिनु मेको कली तशा, मुरपुकी हितेक्म। 15 मिनु मेकोमी रागी रागी डा शुश मुर आन कली छक लाक्पाइक्व। मिनु पिपपुकी मेको कली तशा, सिक्सी पा बाक्नीम। मारदे हना मेको आन डॉइती गेनायो मर्शेसीशो ताइनीम। मेको आन मनेशो लोव आ पर्वम शुश मिम्चा मालनीमी। यसैया ६५:१; रोमी १५:२१

परमप्रभु यावे आ गेय पाइब

53 आंइ नेंशो लोव सुम थमा सुदमे डा? मिनु परमप्रभु यावे आ सक्ति सुम तामे डा? यूहन्ना १२:३८; रोमी १०:१६; यसैया ५२:१०

2 मेको आ डॉइती बिरवा खोदेंशो पा कोल्त। सोवशो खपीम शाक्श खोदेंशो पा कोल्त। मिनु मुरुम मेको कली कोवचा थुं मपाम। मेको दारशो नु मान ताइब खोदेंशो काइ मतांडसीशो बाक्त। मेको मदारशो ममाल्वा डा मुर खोदेंशो बाक्त। यसैया ११:१ 3 मिनु अरुमी मेको कली ग्रांया दिशा प्रॉइतेक्म। मेको श्येत जाइब नु रोइ पाइक्व बाक्त। मेको कली तशा, मुरुम आन कुल खुइक्ताक्म। मेको ग्रांया दिक्वा पुंडसेनु, सुइम महिक्गोम। भजन संग्रह २२:७-८; मर्कुस ९:१२

4 थमा पा मेकोमी आंइ श्येत कुरतु, आंइ रोइ पतीक नेल्ल लाइक्तु। मो हना यो गोपुकीमी मेको कली परमप्रभुमी सजाइ गेशा, तुप्शा, दिप्शो खोदेंशो लाक्तक। मत्ती ८:१७ 5 तन्न मेको आंइ हेंथे पतीके आ पर्वम तुप्शा गार सेल्वा पुंडसाक्व। आंइ मरिश्शो पशो आ पर्वम साइक्वा पुंडसाक्व। आंइ कली पाप रे प्रॉइचा कली सजाइ ताप्तु। मेको कली तुप्शो गारमी गोपुकी सातक। रोमी ४:२५; १पत्रुस २:२४ 6 गो नेल्ले भेडा खोदेंशो दुम्शा लां साम्तक। गो नेल्ले आंम आंमा लां खोइक्तक। परमप्रभु यावेमी आंइ मरिश्शो पशो नेल्ले मेको आ तारी वोइक्तु। १पत्रुस २:२५; १यूहन्ना ३:५

7 मिनु मुरपुकीमी मेको कली दिप्शा श्येत गेम्तेक्म। मिनु श्येत जशा यो सिक्सी पा मारेइ मदें। साइक्वा चिक्शो पाठा खोदेंशो पा सिक्सी पा बाक्त। मिनु ऊन खोइक्व आन डॉइती बाक्शो भेडा खोदेंशो पा सिक्सी पाप्तु। मेको आन कली लोव का यो मपव। मर्कुस १४:६५; यूहन्ना १:२९; प्रेरित ८:३२

8 मिनु मेको कली दूली निसाफ पा साइक्तेक्म। नोले मेको कली मार दुम्बा, सुम मेको मिम्ने चाप्वा डा? मेको ब्रॉइशो मुर आन बाक्तीक रे साइक्वा पुंडसाक्व। मुर आन हेंथे पतीके मेको सजाइ तशा साइक्वा पुंडसाक्व।

9 मुरपुकीमी मेको कली परमप्रभु यावे आ अरेशो मटीब आन कली थिम्तीकेमी थिम्तेक्म। आ तुरस क्येट थीब नु बाक्त। मेकोमी गेना हना यो ठीक ला पाप्तु। मिनु जौल मपव हना यो मेको कली मो पाप्तेक्म। १पत्रुस २:२२; १यूहन्ना ३:५

10 परमप्रभु यावेमी मेको कली मोदेंशो पा तुप्शा, श्येत गेचा दाक्ताक्व। मेकोमी आ रां पाप क्याम्चा कली चढ़ेप्तु। मो हना यो मेको कली आ आल खोदेंशो शुश थमा सुइक्व आन कली ताइब। मिनु शुश नाक्त सम्म ब्रॉइब। मेको आ पतीके नेल्ल परमप्रभु यावे आ दाक्शो गेय दुम्ब। लेवी ५:१५; मत्ती २०:२८; भजन संग्रह २०:३१ 11 मेको आ श्येत जशो रे मेकोमी छेडछेड ताइब। मेको आ तुइक्तीकेमी शुश मुर आन कली ठीक पतीके तुइक्पाइक्व।

मेकोमी आन मरिश्शो पशो कुरब। १कोरिन्थी १:३०; यूहन्ना १:२९

12 मोपतीके गो मेको कली ठेयब नु सक्ति पाइश्शो नु वोइक्नुड। मेकोमी बोल्यो मुर नु मार मार योक्सीब। मारदे हना मेको साइक्व नु मरिश्शो मुरपुकी नु हिक्सीचा पुंडसाक्व। शुश पापी आन पाप कुरतु। मिनु हेंथे गाक्व मुर आन पर्वम परमप्रभु यावे कली पुंडतु। मर्कुस १५:२८; लूका २२:३७; लूका २३:३३-३४

परमप्रभुम सियोन कली दाक्शो

54 मिनु परमप्रभु यावेमी “गे आल मथीब मीश मुर, कुम्सो पावो। आल थितीक रोइ गेनायो मपशो मीश मुर, कुम्सो पा ग्येरसो।

मारदे हना ग्युंवे पशो मीश मुर आ आल क्येडा, आ का ला बाक्व मीश मुर आ आल शुश दुम्नीम। यसैया ४९:२०; गलाती ४:२७ 2 इ ताम्बु ठेयब सेलो। इ बाक्तीक डा ब्रतीक ब्रावो। शिम मदुमो। इ ताम्बु डा डोरी लाइश्शो सेलो। आ किलापुकी रिश्शो पा खूक्को। 3 मारदे हना गे शुश दुम्शा, ग्युरा पेरा गे ब्राइनीनी। मिनु इ चच युइमी रागी रागी डा मुर आन कली हुकुम पाइनीम। मिनु मुर मबाक्तीके मुर शुश दुम्शा ब्रीनीम।

4 गे महिनो। मारदे हना गे मुने मदोक्नेवे। इ थुं लुक्च लचा मगेवो। गे शिशी ताइनेवे। गे इ ठिटी बाक्डे ना डा मुने प्रेंनेवे। इ वॉइश बेक्शो ना डा श्येत लेंशा ममिम्नेवे। भजन संग्रह २५:७; येरमीया ५१:५ 5 मारदे हना इ कली सेल्ब इ वॉइश बाक्व। मेको आ नें मुर नेल्ल आन परमप्रभु यावे बाक्व। इ कली श्येत रे प्रॉइब इस्राएली आन का ला बाक्शो परमप्रभु बाक्व। मेको आ नें रागी नेल्ल डा परमप्रभु बाक्व। 6 मारदे हना परमप्रभु यावेमी इ कली प्रॉइसीशो नु थुं लुक्च लशो मीश मुर कली खोदेंशो पा ब्रेत्ताक्व। मुल गे ठिटी ना चाक्शा नोले प्रॉइशो मीश आल खोदेंशो बाक्नेवे। यसैया ५०:१ 7 गो इ कली याम का प्रॉइतन। तन्न गो इ कली शुश शिशी पा लेंशा खुप्ताक्न। भजन संग्रह ३०:६ 8 गो शुश गाइश्शा, याम का आं कुल इ डॉइती रे खूइक्ताक्व। तन्न आं गेना हना यो दाक्तीकेमी इ कली शिशी पाइनन” दे इ कली पाप रे प्रॉइब परमप्रभु यावेमी देंत। यसैया ६०:१०; बिलाप ३:३१-३२

9 मिनु लेंशा “मेको आं कली नोआह आ नाक्ती खोदेंशो बाक्व। दोपा गो नोआह आ पाला डा ब्वाक्कुम लेंशा रागी कली मसुम्ब, दे कसम जडा, मोपा गे नु मगाइक्नुड, दे कसम जाता। मिनु गो इ कली महुइक्नुड। उत्पत्ती ९:११-१७ 10 डांडापुकी याक्सीनीम, पहाडपुकी हिम्सीनीम। तन्न आं गेना हना यो दाक्तीक इ क्येडा डोन मलाइब। इ थुं नाइक्वा गेब कबल मक्याम्सीब” दे इ कली शिशी पाइब परमप्रभु यावेमी देंत। इजीकीएल ३७:२६

11 मिनु लेंशा “गे श्येत जाइब, फश गिवारम राप्चा पुंडसीशा, थुं बारपाइक्वा मपुंडसीशो, गो इ गारो बोल्यो सेल्नुड। मिनु इ जग साफीर माइश्शो नीलो हीरा के सेल्नुड। प्रकाश २१:१८-२१ 12 इ खिं रूबीन माइश्शो लल हीराम साप्नुड। इ सहर डा ठेयब लाप्चो सिसा खोदेंशो हीराम सेल्नुड। इ कली हिरशो गारो नेल्ले हीरा के सेल्नुड” देंत। 13 मिनु परमप्रभु यावेमी इ तमी तौ नेल्ल आन कली शेंब। मेको आन थुं नाइश्शा हेम्मा पा बाक्वा ताइनीम। यूहन्ना ६:४५ 14 मिनु ठीक पतीकेमी इ कली बोल्यो सेल्ब। गे श्येत गेब आन क्येडा डोन बाक्नेवे। मिनु गे काइ महिनेवे। मारदे हना हिंचा डा श्येत इ नेक्था मजाक्व। 15 मिनु “सुइ इ कली श्येत गेचा कली खुम्साक्म हना, आं पशो ममाइ। सुमी इ कली लडाइ तोइबा, मेको इ पर्वम साइक्वा पुंडसीनीम। 16 कोवडीन, गो तुप्तीलपुकी सेल्तामी। मेकोपुकीमी मी मुइश्शा, लडाइ पचा कली या सेल्नीम। गो खतम सेल्वा कली खतम सेल्ब कली यो सेल्ता। गो मारेइ मारेइ खतम सेल्ब आन कली यो सेल्तामी। रसामुएल २४:१६ 17 गे नु लडाइ पचा कली सेल्शो यामी मग्रानीम। इ कली सुमी निसाफ पची ना दोस गेबा, मेको नेल्ल फ्रुचा पुंडसीनीम। मोपा ग्रातीके परमप्रभु यावे आं गेय पाइब आन अडस बाक्व। मेको आं गेशो ठीक पतीके बाक्व” दे परमप्रभु यावेमी देंत।

रागी नेल्ल डा मुर आन कली ब्रेशो

55 मिनु परमप्रभु यावेमी "तूत दाक्बपुकी ब्वाक्कु बाक्तीकेम जाक्कीन। क्येट मथीबपुकी यो जाक्कीन। मिनु ग्याप्शा जने। क्येट मथाप्यु, मोशा अडगुर शांबु नु दूध ग्यापीन। *यूहन्ना ७:३७; प्रकाश २२:१७* 2 मारदे जचा मदुशो थोवक कली क्येट थाप्नीनी? मारदे मरूपाइक्व थोवक कली इन चेम्शो क्येट थाप्नीनी? आं लोव्र नोफा दाइश्शा नेनीन। रिम्शो थोवक जने। मिनु ब्रोव्रशो जशा, ग्येरसीने। 3 इन नोफा दाइश्शा, आं गे जाक्कीन। नैशा, ब्रोइनीनी। गे ब्रोइशा बाक्चा कली आं लोव्र नेनीन। मिनु गो गेपुकी नु गेना हना यो लीब कबल का पाइनुड। दाऊद कली खोदेशो पा इन कली यो गेना हना यो दाक्नुड। *२सामुएल ७:८-१६; येरमीया ३१:१-३४; प्रेरित १३:३४* 4 नेनीन, गो मेको कली जात जात डा मुर आन कली सांकछी सेल्ला। जात जात डा मुर आन कली ठेयब मुर नु हुकुम पाइब सेल्ला। 5 नेनीन, गे इन मतुइश्शो रागी रागी डा मुर आन कली ब्रेत्नीनी। मिनु इन कली मतुइश्शो रागी रागी डा मुरपुकी इन गे जाक्कीन। परमप्रभु यावे, इन परमप्रभु, इस्राएली आन का ला बाक्शो परमप्रभु आ पर्वम मेकोपुकी जाक्कीन। मारदे हना मेकोमी इन कली आ खोदेशो रिम्शो पा सेल्थो बाक्त" दैत।

6 परमप्रभु यावे कली मथिन्नी सम्म मालीने। मेको आ नेक्था बाक्मेनु, मेको कली पुनीन। *येरमीया २९:१३-१४; अमोस ५:४* 7 परमप्रभु यावे आ अरेशो मटीबमी आन लां प्रोन्मेक्ल। मिनु ठीक मपाइबमी आन मरिम्शो मिम्शो प्रोन्मेक्ल। परमप्रभु यावे गे लेम्मल। मिनु मेकोमी मेको आन कली शिशी पाइब। मेकोपुकी आंइ परमप्रभु गे लेम्मल। मारदे हना मेकोमी शुश माफ गेब। *इजीकीएल १८:२७; इजीकीएल ३३:१; भजन संग्रह १३०:४* 8 परमप्रभु यावेमी "आं मिम्शो इन मिम्शो खोदेशो ममाइ, इन लां आं लां खोदेशो ममाइ। *रोमी ११:३३* 9 सरीड, रागी क्येडा इर बाक्शो खोदेशो पा आं लां, इन लां क्येडा इर बाक्ब। मिनु आं मिम्शो इन मिम्शो, क्येडा इर बाक्ब। 10 सरीड रे रेउ नु फुं यिशा, मोशीन मलेक्ब। मेकोमी खप जिप्पाइश्शा बाली नाली ग्रेल्पाइक्व। शोक्ब कली वांचेर गेशा, मुर आन कली जचा गेब। 11 आ लोव्र यो मोदेशो बाक्ब। मेको श्येत्थ मलेक्ब। गो मेको कली मार पथ सोइक्व, मेको पाइब। आं दाक्शो थमा पा पाइब। आं मिम्शो पाइब। *मत्ती १३:८*

12 मिनु गेपुकी ग्येरसीशा लाइनीनी। रिम्शो पा लेत्नीनी। इन डोंइती डांडा नु पहाड कुम्सो पाइनीम। मिनु ब्वाकी डा रवा नेल्लेमी गुड फ्रोक्नीम। *यसैया ४४:२३* 13 मिनु चू आन पा डा सला रवा नु चूले आन पा डा दारशो आइक्व फू रवा वानीम" दैत। मेको परमप्रभु यावे कली मिम्तीके नु गेना हना यो मजाम्थु, चिन्ड का दुम्शा बाक्ब। *यसैया ४१:१९-२०*

नाइक्तीक नाक्ती आसीक ताइनीम

56 मिनु परमप्रभु यावेमी "ठीक निसाफ पने। मार ठीक बाक्मे मेको पने। मारदे हना आं पाप रे प्रोंइतीक रीब पा जाक्ब। मेना गो ग्राब बाक्नुड, दे नेल्लेम तुइक्नीम। 2 सु मेको पाइबा, मेको ग्येरसीशो मुर दुम्ब। आं नाइक्तीक नाक्ती नाइक्ब नु अरु नाक्ती खोदेशो पा गेय मपाइब नु मरिम्शो मपाइब, ग्येरसीशो मुर बाक्ब" दैत। *यसैया ५८:१३; उत्पत्ती २:२-३; प्रस्थान १६:२३; प्रस्थान २०:८; येरमीया १७:२१-२२*

3 परमप्रभु यावे आ लोव्र टीब अर्को रागी डा मुरुम "परमप्रभु यावेमी आं कली आ मुर रे तिल्ब" दैचा मगेने। मिनु आल मथीबपुकीमी "गो सोव्रशो रवा खोदेशो नकी" दैचा मगेने। *यसैया १४:१; ब्यक्स्था २३:२* 4 मारदे हना परमप्रभु यावेमी "आल मथीब मुरुमी आं नाइक्तीक नाक्ती नाइश्शा, आं दाक्शो पाक्तेक्म नु आं कबल मप्रोंइथु बाक्तेक्म हना, 5 गो मेको आन कली आं खिंमी नु आ गारोमी मिम्तीके नु ठेयब नें गेनुडमी। आं तमी तौ आन क्येडा मेको आन कली रिम्शो नें गेनुडमी। मेको आन कली गेना हना यो लीब नें गेनुडमी। मेको आन नें मखोंइसीब दुम्ब।

6 मिनु परमप्रभु यावे आ नोले खोइक्व, अर्को रागी डा मुरपुकी, सु सुमी आं कली ठेयब सेल्नीमी, आं कली दाक्नीमी, आं गेय पाइब दुम्नीमी,

नाइक्तीक नाक्ती नाइश्शा, अरु नाक्त खोदेशो गेय मपाइनीमी नु आं कबल पना पन बाक्नीमी। 7 मेको नेल्ल आन कली आं योव्रशो डांडाम चाक्नुडमी। आं प्रार्थना पतीक खिं ओइशा, ग्येरपाइक्नुडमी। मेको आन चोशा चढ़ेशो नु अरु चढ़ेशो आं कली चढ़ेतीकेम ब्राइनुड। मारदे हना आं खिं रागी डा मुर नेल्ल आन कली प्रार्थना पतीक खिं दैनीम" दैत। *मर्कुस ११:१७* 8 मोदेशो लोव्र पाइब परमप्रभु, परमप्रभु यावेमी खेरशो इस्राएली आन कली खुब्ब। मिनु "गो मेको आन कली अरु खुप्शो मुर नु देल्पाइक्नुड। मेकोपुकी नु बाक्पाइक्चा कली तेम्नुडमी" दैत।

कोव्रब आन कली हुइश्शो

9 परमप्रभु यावेमी "गे जन्तु नेल्ल नु ब्वाकीम बाक्ब जन्तु नेल्लेम, जाक्शा ब्वने। *येरमीया १२:९* 10 इस्राएली आन कली कोव्रब मुर मिक्च मताइब खोदेशो बाक्नीम। मेको मारेड मजोक्ब मतुइक्ब बाक्नीम। मेकोपुकी सिक्सी पा बाक्शा, होक्ने मचाप्ब कुचुम खोदेशो बाक्नीम। मेको डोमु तचा, इप्चा नु निन्द्रा पचा ला दाक्नीम। *इजीकीएल ३:१७; इजीकीएल ३३:६-९*

11 कुचुमपुकी शुश जचा ब्वचा दाक्नीम। गेनायो मरूनीम। मेको गोठला यो मोदेशो मरुप्ब बाक्नीम। मेको नेल्ल आंम आन लां खोइक्ब बाक्नीम। मारेड मारेड आंम के सेल्चा दाक्नीम। मेको नेल्ल खाल का डा बाक्नीम। *येरमीया ६:१३* 12 मेकोपुकीमी 'जाक्कीन, अडगुर शांबु ग्याप्य। राकसी तूशा, दुक्क। दीसा यो मुलाक्त डा खोदेशो दुम्ब। मेको क्येडा यो रिम्शो दुम्ब' दैनीम" दैत।

परमप्रभु कली मटीबपुकी

57 ठीक पाइब बेक्नीम। सुइमी मेको आन पर्वम सुर्ता मपाइनीम। परमप्रभु यावे कली मप्रोंइथु, दाक्बपुकी लाइक्चा पुंइसीनीम। मारदे मो पाइनीमी, मेको सुइमी मरुप्नीम। ठीक पाइब हिंचा डा श्येत दुम्चा क्येडा डोंइती लाइक्चा पुंइसीनीम। *मीका ७:२* 2 मेकोपुकी थुं नाइश्शा बाक्तीकेम लाइनीम। रिम्शो थुं पाइश्शो मुर आंम आन बाक्तीकेम नाइश्शा बाक्नीम। *२राजा २२:२०; दानीएल १२:१३*

मूर्ति पूजा पाइबपुकी

3 "तन्न गेपुकी एक जाक्कीन। गे मन्तर तन्तर पाइब आ तमी तौ नु हेंथे गाक्ब वोंइश मुर नु तेल्लेम आ आलपुकी एक जाक्कीन। *होसे २:४* 4 गे सुका आ पर्वम शुक्शी लोव्र पनी। सुका आ पर्वम इन शोव्र रोक्नी? मारदे इन लें गुंइनीनी? मार, गे हेंथे पाइब आन तमी तौ मननी डा? गे जोल पा थिशो आल बाक्नीनी। *२राजा १६:२-४; येरमीया २:२०, २३, २४* 5 गे ठेयब रवा आन पुंमी तेल्लेम खोदेशो पा, मूर्ति पूजा पाइनीनी। गे गिगी रवा नेल्ल आन पुंमी मोदेशो पाइनीनी। गे इन आल आन कली खोल्सा नु सेरथे फुल्लुमी चढ़ेनीनी। 6 बेसी डा खोला डा रिम्शो फुल्लु इन कली वारच पाइब बाक्नीम। मेको आन कली तूचा थोवक चढ़ेतीनी। मिनु अन्न यो चढ़ेतीनी। मार, गो मेको कोव्रशा इन पर्वम सिक्सी पा बाक्नुडा डा? 7 गे लाइश्शो नु ठेयब डांडामी इन ब्राख्ये सेल्तीनी। गे मेकेर चढ़ेथ लाइतीनी। 8 मिनु इन लाप्चो डा शीम नु लाप्चो आ नोलेमी इन देवी देवता आन चिन्ड वोइक्तीनी। गे आं कली प्रोंइशा, इन ब्राख्ये हुक्तीनी। गे मोदेशो पशा, इन ब्राख्ये ठेयब सेल्तीनी। गे इन पर्वम मेको नु कबल पाइतीनी। गे मेकोपुकी नु बाक्चा दाक्ताक्नी। मिनु मेको आन शिश्रा रां कोव्रतीनी। 9 गेपुकी तेल कुरशा मोलेक आ बाक्तीक लाइतीनी। ब्रोव्रशो रिना पाइब तेल शुश सेल्तीनी। गेपुकीमी इन लोव्र कुरब आन कली डोन सम्म सोइक्ताक्नी। बेक्शो मुर आन बाक्तीके सम्म सोइक्ताक्नी। 10 गेपुकी इन लाइश्शो लां गाक्तीके दाइतीनी। मो हना यो मेको शोर गाक्शो दुस्त मर्दनी। गेपुकी नक सक्ति ताइतीनी। मोपतीके मेको आन नोले खोइक्चा मप्रोंइनी। *येरमीया २:२५*

11 गे सु क्येडा शुश हिंशा, जोल पनी? मिनु आं कली मफ्रुकथु ममिम्तीनी। गो सिक्सी पा बाक्शा, आं मिक्च क्रिप्ताक्ड। मिनु गे आं कली तशा महिंनी? *भजन संग्रह ५०:२१* 12 गो इन ठीक पशो नु इन गेय तुइक्पाइक्नन्नी। तन्न मेको इन कली मारेड रिम्शो मदुम्ब। 13 गेपुकी श्येत जशा, थोनीनु, इन खुप्शो मूर्तिपुकीम इन कली प्रोन्मेक्ल। तन्न फशेमी मेको आन कली

बेरपाइशा योल्ब। मुइश्शोमी मेको जाम्शा लाइनीम। तन्न सु सु आं गे जाक्शा पुंडसीनीमी, रागी मेको आन के दुम्ब। मिनु आं डांडा मेको आन के दुम्ब" दैत। भजन संग्रह ३७:९-११

#### परमप्रभुम पाप रे प्रॉइब

14 मिनु परमप्रभुमी "सेलीन, सेलीन। रिम्शो लां सेलीने। आं मुर आन गाक्तीक लां डा दाइल पाइब फुल्लु याक्तीन" दैत। यसैया ४०:३; यसैया ६२:१० 15 मिनु ठेयब नु इर डा, गेना हना यो बाक्ब आ नें का ला बाक्शो परमप्रभुमी "गो नेल्ल क्येडा इर डा आं बाक्तीकेमी बाक्नुड। मिनु गो थुं लुकच लशो नु दिप्चा पुंडसीशो मुर नु बाक्नुड। गो दिप्शो मुर नु आन थुं लुकच लशो आन थुं बारपाइक्वा कली मेकोपुकी नु बाक्नुड। भजन संग्रह ११३:५-९; यसैया ६६:१-२; भजन संग्रह ५०:१९ 16 मिनु गो गेना हना यो दोस मगेनुड। गाइक्स डा गाइक्स मबाक्नुड। मोपा बाक्ती हना, आंम आं सेल्शो मुर आन थुं थाइब। भजन संग्रह १०३:९ 17 मेको आन परमप्रभु यावे आ अरेशो मटिथु, शिम दुम्तीके गाइक्ताक्ड। गो मेको आन कली तुप्शा थाइश्शा गाइक्ताक्ड। तन्न मेकोपुकी नोले शॉइसीशा आंम आन लां लाम्तेक्म। 18 गो मेको आन पशो ताता। तन्न गो मेको आन कली सापाइक्नुडमी। मेको आन कली कुक्शा, आन थुं बारपाइक्नुडमी। मेको आन दाते डा रॉका पाइब आन कली थुं बारपाइक्तीक लोत्र पाइनुड" दैत। प्रस्थान १५:२६ 19 मिनु परमप्रभु यावेमी "डोन नु नेक्था बाक्ब नेल्ल आन थुं नाइश्शा बाक्मल। मिनु गो मेको आन कली सापाइक्नुडमी। गन्ती ६:२६; लूका २:१४; एफिसी २:१७; प्रस्थान १५:२६; येरमीया १७:१४; यहूदा १:१३; यसैया ४८:२२; हितोपदेस २८:१ 20 तन्न आं अरेशो लोत्र मटीबपुकी समुन्द्र डा फशेम क्युक्शो समुन्द्र डा ब्वाक्कु खोदेंशो बाक्नीम। गेना हना यो रेयके पाइब ब्वाक्कु खोदेंशो बाक्नीम। मेको ब्वाक्कुमी ग्रांग्रा दिचा डा थोत्रक नु हिलो गुंडब" दैत। 21 आं परमप्रभुमी "आं अरेशो मटीब आन थुं नाइश्शा बाक्वा मताइनीम" दैत।

#### माइजा बाक्वा आ पर्वम शेंशो

58 मिनु परमप्रभु यावेमी "ठेयब सेंदा पा ग्रीडो। तुराही खोदेंशो पा ठेयब सेंदा पावो। आं मुर आन काइ मटिथो नु याक्ब आ खि डा मुर आन पाप तुइक्पाइक्मी। मीका ३:८ 2 मेकोपुकी मटीब बाक्तेक्म हना यो, आं कली नाक्त् किंत किंत माल्नीम। आं लां तुइक्वा दाक्नीम। मेकोपुकी ठीक पाइब रागी डा मुर खोदेंशो दुम्शा, आन परमप्रभु, आं ठीक पतीक लोत्र मप्रॉइशो खोदेंशो बाक्नीम। मिनु आं कली ठीक निसाफ पुंडनीम। परमप्रभु आ नेक्था जाक्वा दाक्नीम। यसैया २९:१३-१४ 3 मेकोपुकीमी 'गो मारदे माइजा बाक्का? गे मताइनीनी। गो मारदे आंम कली ब्रेम्शो सेल्का? गे मतुइक्तीनी" दैतेक्म। गे इन माइजा बाक्ची ना इन आंम मिम्शो पाइनीनी। मिनु इन गेय पाइब नेल्ल आन कली दिप्नीनी। येरमीया १४:१२ 4 गेपुकी जिशा खेशा तुम्मुचा कली ला माइजा बाक्नीनी। इन मुडकीमी तुप्चा कली ला माइजा बाक्नीनी। मोदेंशो माइजा बाक्शा, इन सेंदा इर सम्म मजाक्दीप्ब। 5 आं योत्रशो माइजा बाक्तीक मोदेंशो बाक्बा डा? मार, आंम कली काबु ला ब्रेम्शो सेल्का? बुदी मीलु घांस गुक्शो खोदेंशो पा इन पिया खुक्शा, अरन्डी फेक्शो नु पुलु तार निश्शो कली माइजा बाक्शो दैनीनी? मेको परमप्रभु यावे आ दाक्शो बाक्ब, दैनीनी? जकरिया ७:५-६; मत्ती ६:१६-१८

6 आं दाक्शो माइजा बाक्तीके मार बाक्ब, देंशा हना, ठीक निसाफ मतशो आन कली प्रॉइचा नु दिप्शा श्येत गेचा पुंडसीशो आन जुवा प्रुइक्वा बाक्ब। 7 आंम जचा थोत्रक शोत्रलु बेक्ब नु योक्वा, खिं मबाक्शो नु प्रुडग आन कली इन खिंम बाक्वा गेचा, शिश्रा बाक्ब आन कली वा फेक्वा गेचा नु इन लोक्ब आन कली वारच पचा, आं दाक्शो माइजा बाक्तीक बाक्ब। ब्यवस्था १५:११; इजीकीएल १८:७; मत्ती २५:३५-३६ 8 गो पाइतीनी हना, गे सुनी डा नां दाप्शो खोदेंशो दुम्नीनी। मिनु गे रीब पा सानीनी। इन कली वारच पाइब इन डॉइती गाक्ब। परमप्रभु यावे आ छेडछेडमी इन नोले खोइक्ब। भजन संग्रह ३७:६; यसैया ५२:१२

9 मेना गे पुंडनीनी। मिनु परमप्रभु यावेमी लोत्र लेब्ब। मिनु गे 'वारच पने' दे थोइनीनी। मिनु मेकोमी 'गो एके बाक्ती' दैब। गे इन दाते रे मरिम्शो पतीक जुवा ताइक्ताक्नी हना, ब्रेप्चो पोक्शा, मरिम्शो लोत्र पचा प्रॉइतीनी हना, रिम्शो दुम्ब। यसैया ३०:१९ 10 गे शोत्रलु बेक्ब आन कली इन जचा थोत्रक गेतीनी हना, श्येत जाइब आन माल्शो गेतीनी हना, इन छेडछेड छिडछिडम ब्राइब। इन नाक्दो डा छिडछिड नाक्ती डा छेडछेड खोदेंशो दुम्ब। 11 मिनु परमप्रभु यावेमी इन कली गेना हना यो लां कोंइब। गे श्येत जनी ना इन माल्शो नेल्ल गेब। मिनु इन रुश बोल्यो सेल्ब। गे ब्वाक्कु लाक्वेशो फल फुल रू खोदेंशो बाक्नीनी। गे गेनायो मसोत्रब ब्वाक्कु बुक्तीके खोदेंशो दुम्नीनी। येरमीया ३१:१२ 12 मिनु गे इन साइ डा ब्रेम्शो खिपुकी लेंशा सेल्नीनी। साइ डॉइती डा सेल्शो जग लेंशा वोइक्नीनी। मिनु इन कली गारो सेल्ब, खिं सेल्ब नु लां लेंशा सेल्ब, दे नें वोइक्नीम। यसैया ६१:४

13 गे नाइक्तीक नाक्ती अर्को नाक्त् खोदेंशो मसेल्तीनी हना, मेको आं नाक्तीमी इन गेय मपाइतीनी हना नु आं योत्रशो नाक्त् कली रिम्शो नाक्त् बाक्ब दैतीनी हना, परमप्रभु यावे आ नाक्त् ठेयब बाक्ब दैतीनी हना, गे मेको नाक्ती कली ठेयब सेल्शा, इन गेय मपाइतीनी हना, इन दला दाक्स मपाइतीनी हना, यसैया ५६:२-४ 14 गेपुकी परमप्रभु यावे कली मिम्शा ग्येरसीनी वा। मिनु गो इन माल्शो नेल्ल गेन्नी वा। मिनु गो इन किकी याक्ब आ शॉप जचा गेनन्नी वा" दे परमप्रभु यावे आ देंशो बाक्ब।

#### परमप्रभुम पाप क्याम्ब

59 कोत्रडीन, परमप्रभु यावे आ मुर आन कली पाप रे प्रॉइतीक सक्ति मपाइश्शो मदुम्शो बाक्ब। आ नोफा मथांइशो बाक्ब। यसैया ५०:२ 2 इन मरिम्शो पतीकेमी इन कली इन परमप्रभु रे फ्राशो बाक्ब। इन पाप आ पर्वम इन डॉइती रे आ कुल खुइश्शो बाक्ब। मोपतीके इन लोत्र मनेंब। 3 इन गुइ हुश लुम्सीशो बाक्नीम। गे नेल्ल मरिम्शो पाइब बाक्नीनी। गे जोल पना पन बाक्तीनी। गे ओल ओल लोत्र पाइनीनी। यसैया १:१५ 4 सुइमी ठीक निसाफ मपाइनीम। सुइमी ठीक निसाफ पाइक्वा मपुंडसीनी। गे जाम्शा लाइब कली थमा सुइश्शा, जोल पाइनीनी। मेकोपुकीम हेंथे पतीकेम ब्रीशा, मरिम्शो पतीके ला थीनीम। भजन संग्रह ७:१५ 5 बीस पाइश्शो बुस्स आ ब्वोफु रे चाइक्ब पुक्नीम। माखा आ जाल प्रोत्रनीम। मेको ब्वोफु जाइब बेक्नीम। ब्वोफु दिम्शा पुक्तेक्म हना, बुस्स गूब। 6 मेको जाल फेक्सीचा नु सुम्सीचा मदुम्ब। मेको आन सेल्शो थोत्रकमी आन रां सुम्ने मचाप्नीम। मेको आन गेय मरिम्शो पतीक गेय बाक्ब। मेको हुश खाक्श पोक्ब बाक्नीम। 7 मेकोपुकी मरिम्शो पचा कली ला दोरनीम। दोस मताइब आन कली साइक्वा कली चुइक्नीम। मेको आन मिम्शो मरिम्शो बाक्ब। आन लॉमी बिग्रेतीक नु खतम पोक्तीक बाक्ब। रोमी ३:१५-१७; हितोपदेस १:१६; येरमीया २:३४ 8 मेकोपुकीम थुं नाइक्पाइक्तीक आ पर्वम मारैड मतुइक्नीम। मेको आन लॉम ठीक निसाफ मबाक्ब। मेकोपुकी हेंथे लां खोइक्नीम। सु सु मेको हेंथे लां गाक्नीमी, मेको यो थुं नाइश्शा बाक्वा मताइनीम।

9 मोपतीके ठीक निसाफ पतीके आंइ क्येडा डोन बाक्ब। गो ठीक पतीके मताइनीकी। गोपुकी छेडछेड डा लां कली कोत्रनीकी, तन्न छिडछिड ला बाक्ब। गो नाक्त् डा हाम्सो माल्नीकी, तन्न छिडछिड ला बाक्ब। 10 मिक्च मताइब खोदेंशो पा गारो सुल्शा गाक्नीकी। मिक्च मपाइश्शो मुर खोदेंशो पा सुल्नीकी। नाक्दो खोदेंशो पा नाक्ती यो दाइल पांडसीनीकी। गो बोल्यो मुर आन दातेम बेक्शो मुर खोदेंशो दुम्त्क। ब्यवस्था २८:२९ 11 गो नेल्ल वां खोदेंशो पा ग्रीनीकी। डुकुर खोदेंशो पा रॉका पाइनीकी। गो ठीक निसाफ माल्ना माल्न बाक्नीकी, तन्न मथिल्नीकी। पाप रे ब्रॉइतीक माल्नीकी, तन्न मेको आंइ क्येडा डोन बाक्ब। 12 इन डॉइती आंइ हेंथे पशो शुश बाक्ब। आंइ पशो पापमी इन कली तुइक्पाइक्ब। गो मरिम्शो पाइब बाक्नीकी, दे तुइक्नीकी। आंइ हेंथे पशो थमा पा गोपुकी नु बाक्ब। गोपुकी आंइ मरिम्शो पशो तुइक्नीकी। येरमीया १४:७ 13 गोपुकी हेंथे गाक्शा, परमप्रभु यावे रे नोले शॉइसाक्क। आंइ परमप्रभु आ नोले खोइक्वा प्रॉइतक। आंइ लोत्र मुर आन कली दिप्चा नु परमप्रभु यावे कली मटिचा डा बाक्ब। गोपुकी जोल

कली थमा सुइशा, ब्रापाइशो बाक्तक। 14 मिनु ठीक निसाफ मबाक्ब। ठीक पतीके डोन बाक्ब। सुइ सुइमी जोल पाइनीम। मिनु रिंशो थुं पाइशो मुर बाक्ने मचाप्नीम। 15 थमा पतीक तेइ मथिंसीब। रिंशो पाइब आन मारेइ मारेइ रोइक्वा पुंडसीनीम। मिनु परमप्रभु यावेमी मेको ताप्तु। मिनु ठीक निसाफ मबा, दे थम गाइशो बाक्त।

16 मिनु वारच पाइब सुइ मबाक्वो तशा, छक लाक्त। मोपतीके मेकोमी आंम आ सक्तिम ग्रात। आ ठीक पतीकेम आ कली वारच पाइक्तु। *इजीकीएल १३:४-५* 17 मेकोमी ठीक पतीके कांसा के फेक्तीके खोदेशो पा फेक्शा, पाप रे प्रॉइतीक ताकी खोदेशो पा गुक्साक्व। क्येक्क लेत्तीक वा खोदेशो पा फेक्साक्व। आ थुंमी थमा पा पाइनुड, दे वा खोदेशो पा रुक्साक्व। 18 परमप्रभुमी मेको आन पशो खोदेशो पा मेको आन कली क्येक्क लेक्ब। आ जोरी आन कली आ गाइशो कौंडब। आ सत्रु आन कली क्येक्क लेक्ब। समुन्द्र आ नेक्था बाक्ब आन कली क्येक्क लेक्ब। 19 मिनु नां पेरतीकेमी बाक्ब मुरपुकीमी परमप्रभु यावे कली मान पा हिंनीम। नां दाप्तीक डा मुरपुकी परमप्रभु यावे आ छेडछेड तशा, मान पा हिंनीम। मारदे हना मेको परमप्रभु यावे बारशो खोला खोदेशो पा जाक्ब। मिनु आ फशेमी मेको आन कली मुइशा खेरब।

20 मिनु सियोनम का जाक्ब। मिनु मेकेर डा मुर आन कली पाप रे प्रॉइब। मेकोमी हेंथे पतीके रे लेक्ब याक्कूब आ खिं डा मुर आन कली *रोमी ११:२६* 21 “गो नु पशो कबल मार बाक्त दैशा हना, आं सोक्त इन तार बाक्ब। गो आं लोव्र इन शोव्रम कुर पाता। मेकेर गेना हना यो बाक्शा इन आलपुकीम मेको लोव्र पना पन बाक्नीमी। मेको लोव्र गेना हना यो इन चच युइम यो पना पन बाक्नीम” दे परमप्रभु यावेमी दैत। *येरमीया १:९*

सियोन आ छेडछेड जाक्वो

60 परमप्रभुम “बोक्को। मिनु ग्येरसो। मारदे हना इ छेडछेड जाक्वो बाक्ब। परमप्रभु यावे आ छेडछेड इ तार जाक्वो बाक्ब।

2 छिडछिडम रागी कली सुम्तु। क्येर नाक्दोमी जात जात डा मुर आन कली सुम्तु। तन्न परमप्रभु यावे इ तारी गूब। आ छेडछेड इ तारी तांडसीब। 3 रागी रागी डा मुरपुकी इ छेडछेडम जाक्नीम। पिपपुकी इ सुनी डा छेडछेडम जाक्नीम। *यसैया २:२-३; प्रकाश २१:२४*

4 इ मिक्च हिरशा, कोव्रडो। इ मुर नेल्ल गुम्शा, इ बाक्तीके जाक्नीम। इ तौपुकी डोन रागी रे जाक्नीम। इ तमी आन कली मुप्था कुरशा चाक्नीम। *यसैया ४९:१८; यसैया ४९:२२; यसैया ६६:१२* 5 गे मेको तशा थाम्पा ग्येरनेवे। इ थुं ग्येरसीशा प्रेक्ब। मारदे हना समुन्द्रम चाक्वो मारेइ मारेइ इ के दुम्ब। रागी रागी डा शॉप नेल्ल इ के दुम्नीम। 6 गे शुश दलऑठ ताइनेवे। मिदयान नु एफाह डा दलऑठ आन चाइक्बपुकीमी इ रागी ब्रीनीम। मिनु शेबा रे यो चाक्नीम। मेकोपुकीमी सुन नु धूप चाक्शा ‘परमप्रभु यावे ठेयब बाक्ब’ दे ग्येरशा आं पर्वम शैनीम। *भजन संग्रह ७२:१०; मत्ती २:१-११* 7 केदार डा क्यारश भेडा नेल्ल इ बाक्तीकेमी देल्नीम। नेबायोथ डा सांडपुकीमी इ गेय पाइनीम। मेकोपुकी आं कली चढ़ेतीकेम गारचा डा बाक्नीम। मिनु गो आं दारशो खिं ग्योम्नुड।

8 गोस्स खोदेशो पा बेरब नु डुकुर आ बाक्तीकेम बेरशा लशो खोदेशो पा बेरबपुकी सु बाक्मा? 9 समुन्द्र आ नेक्था डा मुरपुकीम आं लां कोव्रनीम। डॉइती टारसीस डा जहाजम इ आल आन कली डोन रागी रे चाक्नीम। मेको आन सुन चांदी यो मेकोपुकी नु बाक्ब। मेको परमप्रभु यावे, इ परमप्रभु आ नैमी जाक्नीम। इस्राएली आन का ला बाक्शो परमप्रभु आ पर्वम चाक्ब। मारदे हना मेकोमी इन कली दारशो सेल्शो बाक्ब। *यसैया ४२:४; यसैया ५५:५* 10 मिनु अर्को रागी डा मुरपुकीम इ गारो प्रोव्रशा हिरनीम। मेको आन पिपपुकीमी इ गेय पाइनीम। डॉइती गाइशा, इ कली तुप्तन। तन्न मुल आं दाक्तीकेमी शिशी पाइक्तन। *यसैया ५४:८* 11 इ सहर डा गारो डा लाप्चो रोक्स डा रोक्स बाक्नीम। नाक्दो नाक्ती इ लाप्चो मचोक्वो बाक्नीम। मोपा रागी रागी डा मुरपुकीमी आन शॉप चाक्नीम। मेको आन पिप आन डॉइती गाक्नीम। *प्रकाश २:२५-२६* 12 मिनु तेक तेको रागी नु तेक तेको राज्य डा मुरपुकीमी इ गेय मपाइनीमी, मेकोपुकी खतम दुम्नीम। थमा पा क्याम्चा

पुंडसीनीम। 13 लेबानोन डा दारस इ बाक्तीके चाक्नीम। मेकेर डा लाइशो रवा आन शी आं बाक्तीके दारपाइक्वा कली चाक्नीम। मोपा गो आं बाक्तीके दारपाइक्नुड। 14 इ कली दिप्ब आन चच युइ इ बाक्तीकेम जाक्शा बाप्नीम। इ कली ग्रांरा दीब नेल्ल इ खोइलीम बाप्नीम। मिनु मेकोपुकीमी इ कली ‘परमप्रभु यावे आ सहर नु इस्राएली आन का ला बाक्शो परमप्रभु आ सियोन’ दैनीम। *यसैया १४:२* 15 डॉइती गे प्रॉइचा पुंडसीशो नु काइ मदाक्वा पुंडसीशो बाक्ते। इ रागी रे पा सुइ मगाक्बाक्तेक्म। मुल गो इ कली गेना हना यो मान तपाइशा, पाला पाला सम्म ग्येरसीतीके सेल्नन। *यसैया ४९:१४* 16 गे रागी रागी डा दूध तूनेवे। मिनु गे पिप आन दूध तूनेवे। मिनु गो इ कली श्येत रे प्रॉइब बाक्नुड। याक्कूब आ सक्ति पाइशो परमप्रभु इ कली पाप रे प्रॉइब बाक्नुड, दे तुइक्नेवे। *यसैया ४९:२०*

17 मिनु गो कांसा आ पा डा सुन चाक्नुड। फलाम आ पा डा चांदी चाक्नुड। शी आ पा डा कांसा नु फुल्लु आ पा डा फलाम चाक्नुड। मिनु गो थुं नाइक्तीके इ कली कोव्रब सेल्नुड। ठीक पतीके इ ठेयब मुर सेल्नुड। 18 मो दुम नोले इ रागीमी हुश ख्राक्श पोक्शो आ पर्वम मनैसीब। इ सांदम खतम दुम्शो लोव्र मनैसीब। तन्न गे इ गारो कली पाप रे प्रॉइतीके नें वोइक्नेवे। गारो डा ठेयब लाप्चो आन कली ठेयब सेल्तीक नें वोइक्नेवे।

परमप्रभु सियोन डा छेडछेड बाक्ब

19 मेना इ कली नाक्त डा नां छेडछेड मदुम्ब। नाक्दो तास्ला हाम्सो मदुम्ब। मारदे हना इ परमप्रभु इ कली गेना हना यो छेडछेड बाक्ब। मिनु इ परमप्रभु इ दारस बाक्ब। *यसैया २४:२३; प्रकाश २१:२३; प्रकाश २२:५* 20 मिनु मेना रे इ नां गेनायो मलाक्ब। मिनु इ तास्ला यो मलाक्ब। मारदे हना परमप्रभु यावे गेना हना यो इ छेडछेड बाक्ब। इ रोंका पतीक नाक्ती नुप्ता। *यूहन्ना ८:१२; याक्कूब १:१७* 21 इ रागी डा मुर नेल्ल ठीक पाइब दुम्नीम। मेको आन बाक्तीके रागी गेना हना यो आन के दुम्ब। मेकोपुकी आं खुम्शो बाक्नीम। मेकोपुकी आं सेल्शो मुर दुम्शा, आं कली ठेयब सेल्नीम। 22 मेको नेल्ल क्येडा महिक्सीशो थर का दुम्नीम। मिनु नेल्ल क्येडा आइक्च मुरपुकी ठेयब रागी ब्रीशा, सक्ति पाइशो दुम्नीम। मेना गो, परमप्रभु यावेमी मेको रीब पा पाइनुड” दैत।

सियोन कली श्येत रे प्रॉइतीके

61 “परमप्रभु, परमप्रभु यावे आ सोक्त आं तार बाक्ब। मारदे हना परमप्रभु यावेमी तेल लुक्ताक्वी। मेकोमी आं कली दिप्शो प्रुडग मुर आन कली ग्येरपाइक्ब लोव्र नेंपाइक्वा कली, थुं जिक्शो आन कली आन थुं बारपाइक्वा कली, चोक्वा पुंडसीशो मुर आन कली प्रॉइचा कली नु जेल्खान बाक्ब आन कली ग्युंइचा कली सोइक्ताक्वी। *यसैया १:२; मत्ती ११:५; लूका ४:१८-१९* 2 मिनु आं कली परमप्रभु यावे आ शिशी पाइब बर्स नु आंइ परमप्रभु आ क्येक्क लेत्तीक नाक्त नु रोंका पाइब आन थुं बारपाइक्तीक नाक्त बाक्ब, दे तुइक्पाइक्वा कली यो सोइक्ताक्वी। *लेवी २५:१०,१३; यसैया ६३:४* 3 मेकोमी आं कली सियोनम रोंका पाइब आन कली पुलु आ पा डा दारशो पियाम ग्योम्तीके ग्योम्पाइक्वा कली, हिशेक आ पा डा ब्रोव्रशो रिना पाइब तेल खेक्वा कली नु आइक्च थुं दुम्तीके आ पा डा ठेयब सेल्तीक थुं फेक्तीक खोदेशो पा फेक्पाइक्वा कली सोइक्ताक्वी। मेको मुर आन कली ‘ठीक पतीके रवा’ दे नें वोइक्तेक्म। मेको परमप्रभु यावे आ खुम्शो आ दारस कौइतीके बाक्नीम। 4 मिनु मेकोपुकीमी साइ डॉइती खतम दुम्शो ब्रेशो माइत खिंपुकी लेंशा सेल्नीम। मेकोमी ब्रेशो सहर लेंशा सेल्नीम। मिनु शुश पाला रे मुर मबाक्थु, श्येत्थ दुम्शो सहर लेंशा सेल्नीम। *यसैया ५८:१२*

5 मिनु अर्को रागी डा मुर जाक्शा, इन क्यारश भेडा योव्रनीम। मेकोपुकीमी इन रू दोइनीम। इन अङ्गुर बोट मुंडनीम। *यसैया ६०:१०* 6 तन्न इन कली ‘परमप्रभु यावे कली चढ़ेब नम’ दैनीम। मिनु ‘आंइ परमप्रभु आ गेय पाइब नम’ दे यो दैनीम। गेपुकीमी रागी रागी डा मुर आन शॉप ताइनीनी। मिनु मेको आन शॉपोम ग्येरनीनी। *प्रस्थान १९:६; १पत्रुस*

२:५, ९<sup>7</sup> मारदे हना गे अरु क्येडा निक्शी खेयप मुने दोक्तीनी। मिनु इन कली ग्रांघा दिक्ताक्म। मोपतीके गे इन रागीमी निक्शी खेयप रू ताइनीनी। मिनु गेना हना यो ग्येरसीतीके गे नु बाक्ब।

८ गो, परमप्रभु यावेमी, ठीक पतीके दाक्नुड। रोइक्तीक नु हेंथे पतीक गेय काइ मदाक्नुड। गो मेको आन कली थमा पा आन पशो खोदेशो पा गेनुडमी। गो मेकोपुकी नु गेना हना यो लीब कबल पाइनुड। यसैया ५४:१०; यसैया ५५:३<sup>9</sup> मिनु रागी रागी डा मरुम मेको आन चच युइ आन कली तुइक्नीम। मिनु जात जात डा मरुम मेको आन आल आन कली तुइक्नीम। मेको आन कली ताइब नेल्लेमी 'मेरे परमप्रभु यावे रे पा आसीक तशो मुर बाक्नीम' देंनीम।<sup>10</sup> गो परमप्रभु यावे कली मिम्शा, ग्येरसीनुड। आं थुं नेल्लेमी आं परमप्रभु कली मान पाइनुड। मारदे हना मेकोमी आं कली पाप रे प्रॉइतीके वा खोदेशो पा फेक्पाइशा, ठीक पतीकेमी सुम्ती। दोदेशो पा ग्युम्लेम माहुर चुइक्सीबा नु ग्युम्लीम ग्योम्सीबा, मोदेशो पा परमप्रभु यावेमी आं कली ग्योम्ताक्वी। मत्ती २२:११-१२<sup>11</sup> दोपा रूमी बाली नाली वापाइक्बा नु मेकेर वांचेर वापाइक्बा, मोपा परमप्रभु, परमप्रभु यावेमी ठीक पतीके नु ठेयब सेल्लेकी रागी रागी डा मुर आन डॉइती दुम्पाइक्ब" देंत।

सियोन आ नोले डा दारस

62 परमप्रभु यावेमी "गो सियोन आ पर्वम सिक्सी पा मबाक्नुड। यरूसलेम आ पर्वम गो मनाइसीनुड। मेको आ ठीक पतीके सुनी डा छेडछेड खोदेशो पा मगूम सम्म नु आ पाप रे प्रॉइचा पुंडसीतीके ब्रशो तोव्रशी खोदेशो मदुम सम्म मनाइसीनुड।<sup>2</sup> मिनु रागी रागी डा मरुमी इ ठीक पशो ताइनीम। मिनु पिप नेल्लेमी इ छेडछेड ताइनीमी। मिनु इ कली नक नें थिशा ब्रेलीमी। मेको नें परमप्रभु यावेमी वोइश्शो बाक्ब। यसैया ६५:१५; प्रकाश २:१७<sup>3</sup> गे परमप्रभु यावे आ गुइमी दारशो सिरपेच का दुम्नेवे। मिनु इ परमप्रभु आ गुइमी गे पिपीम आन सुन फू खोदेशो दुम्नेवे। रतिमोथी ४:८<sup>4</sup> मिनु गे मेना रे 'ताइक्वा पुंडसीशो' माइक्वा मपुंडसीनेवे। इ रागी मुर मबाक्तीके रागी माइक्वा मपुंडसीब। 'गो इ कली तशा ग्येरसाक्वी' दे नें वोइक्वा पुंडसीनेवे। इ रागी ग्युंवे पशो खोदेशो दुम्ब। मारदे हना परमप्रभु यावे इ कली तशा ग्येरसीब। इ रागी ग्युंवे पशो खोदेशो दुम्ब। यसैया ५४:६; यसैया ६०:१५; होसे २:२१<sup>5</sup> दोपा ठिटा वॉइश मरुम मीश आल कली ग्युंवे पाइबा, मोपा इ कली सेल्बमी इ कली ग्युंवे पाइब। मिनु दोपा ग्युम्ले आ ग्युम्ली कली तशा ग्येरसीबा, मोपा परमप्रभु इ कली तशा ग्येरसीब।<sup>6</sup> यरूसलेम, गो इ गारो तार खाल पाइब मुर वोइक्ता। मेकोपुकी नाक्दो नाक्ती सिक्सी पा मबाक्नीम। परमप्रभु यावे कली मिम्पाइक्बपुकी, मनाइसीन" देंत। यसैया ५२:८<sup>7</sup> परमप्रभु यावेम यरूसलेम कली बोल्यो नु ठेयब मसेला सम्म मेको कली यो नाइक्वा मगेन। मिनु रागी नेल्ल डा मुर आन डॉइती तुइक्पाइक्वा कली मेको पने।<sup>8</sup> परमप्रभु यावेमी आ ग्युरा गुइ क्युक्शा, कसम जाप्टु। मार कसम जाप्टु देंशा हना "मुल रे गो इ अन्न इ जोरी सत्रु आन कली जचा मगेनुड। मिनु अर्को रागी डा मुर आन कली इ अडगुर शांबु तूचा मगेनुड। मारदे हना गे मेको आ पर्वम शुश श्येत पाप्तीवी। यसैया ६५:२१-२२<sup>9</sup> सु सुमी अन्न ओइनीमी, मेकोपुकीमी जचा ताइनीम। मिनु आं कली ठेयब सेल्लेमी। मिनु सु सुमी खुप्नीमी, मेकोपुकीमी आं खिं डा लाडगाम तूनीम" दे कसम जाप्टु।

<sup>10</sup> ओव्रडीन, ठेयब लाप्चो रे ओव्रडीन। मिनु मुर आन गाक्तीके लां थेल्ला, सेलीन। ठेयब लां रे फुल्लु याक्तीन। जात जात डा मुर आन कली चिन्ड वोतीन। यसैया ५७:१४<sup>11</sup> परमप्रभु यावेमी रागी आ सुर सम्म डा मुर नेल्ल आन कली "सियोन आ तमी कली 'इ कली पाप रे प्रॉइब जाक्ना जाक्न बाक्ब। इ कली गेतीक इनाम मेको नु बाक्ब। मेको इ ततीक इनाम आ डॉइती गाक्ब' देंशो बाक्ब। जकरिया ९:९; यसैया ४०:९-१०<sup>12</sup> मिनु मेको आन कली 'परमप्रभु यावे आ मुर नम। परमप्रभु यावे आ पाप रे प्रॉइशो मुर नम' दे ब्रेलीम। मिनु इ कली 'माल्शा, थिश्शो नु गेनायो मप्रॉइसीब सहर' माइक्वा पुंडसीनेवे" दे कसम जशा, लोव्र पशो बाक्ब। यसैया ३५:१०

परमप्रभुमी एदोम कली सजाइ गेशो

63 एदोम रे सु जाक्ना जाक्न बाक्बा? लल जिशो वा फेक्शा, बोज्रा रे जाक्ब सु बाक्मे? मेको दारशो वा फेक्शा, ठेयब सक्तीमी गाक्ब सु बाक्म। "गो ठीक पतीके लोव्र पाइनुड। गो पाप रे प्रॉइतीक सक्ति पाइश्शो नड" देंत। यसैया ३४:६

<sup>2</sup> मिनु गो "इन फेक्शो वा मारदे लल जिशो बाक्मे? मारदे इन वा अडगुर ख्राक्ब आन के खोदेशो दुम्मे?" देंती। प्रकाश १९:१३<sup>3</sup> मिनु मेकोमी "गो आं कान अडगुर ख्राक्ता। गो नु जात जात डा मुर सुइ मबाक्म। मिनु गो गाइश्शा, मेको आन कली ख्राक्ता। चुरशा मेको आन कली दिम्ताक्डमी। मेको आन रस आं वाम बुंइसाक्व। मिनु आं वा नेल्ल लल दुम्त। योएल ४:१३; प्रकाश १४:२०<sup>4</sup> मारदे हना आं थुंम क्येक्क लेल्लेकी नाक्त बाक्त। मिनु आं मुर आन कली प्रॉइतीके बर्स जाक्शो बाक्ब। यसैया १३:९; यसैया ३४:८; यसैया ६१:२<sup>5</sup> मिनु एर ओंथ कोव्रडुनु, वारच पाइब सुइ मबाक्म। मिनु गो नु गेय पाइब सुइ मबाक्म। मोपतीके गो आं सक्तीमी ग्राती। आं गाइक्तीकेमी आं कली वारच पाइक्ती।<sup>6</sup> मिनु गो गाइश्शा जात जात डा मुर आन कली दिम्ताक्डमी। गो चुरशा मेको आन कली खतम सेल्लामी। गो मेको आन हश खपीम जारताक्ड" देंत। यसैया ५९:१७

परमप्रभु आ शिशी पशो मिम्शो

<sup>7</sup> गो परमप्रभु यावे आ मुर आन कली शिशी पतीक गेय मिम्नुड। मारदे हना मेको आ पर्वम परमप्रभु यावे कली ठेयब सेल्चा माल्नीकी। मिनु आंइ कली मार मार पशो आ पर्वम, इस्राएल आ खिं डा मुर आन कली शुश दाक्ताक्व। मिनु मेको आन कली शिशी कौंइशा, गेना हना यो दाक्शो बाक्त। मोपतीके मेको कली ठेयब सेल्चा माल्नीकी।<sup>8</sup> मेकोमी "मेकोपुकी थमा पा आं मुर बाक्नीम जोल मपाइब आल बाक्नीम" देंत। मोपतीके परमप्रभु यावे मेको आन कली श्येत रे प्रॉइब दुम्त। ब्यवस्था ३२:५, २०<sup>9</sup> मेको आन श्येत तशा, आं सोइश्शो मुर ममाइ, परमप्रभु यावे आ स्वर्ग डा गेय पाइब यो ममाइ, परमप्रभुमी मेको आन कली प्रॉइतु। आ दाक्तीके नु शिशी पतीकेमी मेको आन कली साइ डॉइती रे पाप रे प्रॉइशा, मेको आन कली मुष्शा, कुरशो बाक्त। प्रस्थान ३३:१४-१५<sup>10</sup> तन्न मेकोपुकीमी काइ मटिथु, आ सोक्त कली थुं खाइक्पाइक्तेक्म। मोपतीके परमप्रभु यावे मेको आन जोरी सत्रु दुम्शा, आंमा मेकोपुकी नु लडाइ पाप्टु।<sup>11</sup> मिनु नोले मेकोपुकीमी साइ डॉइती डा नाक्ती मिम्ताक्म। मेको आ गेय पाइब मोसा आ पाला ना डा नाक्ती मिम्ताक्म। मिनु मेकोपुकीमी "समुन्द्र रे पा गोठला नु आ बगाल गुंइब ते बाक्म? मेको आन कली परमप्रभु यावे आ सोक्त वोइक्ब, ते बाक्मे? प्रस्थान २:५; गन्ती ११:१७<sup>12</sup> सुमी आ सक्ति पाइश्शो गुइ मोसा आ ग्युरा गे गाक्वा कली वोदा? सुमी आंम कली गेना हना यो आ नें लीपाइक्वा कली समुन्द्रम लां सेला? प्रस्थान १४:२९<sup>13</sup> सुम मेको आन कली समुन्द्र आगा डा लां रे पा खुला? मेकोमी गोरशो रागीम शारा आन कली गाक्पाइश्शो खोदेशो पा दाइल मपपाइक्थु, गाक्पाइक्तु।<sup>14</sup> बी ब्यफ बेंसी ब्रुप्शो खोदेशो पा परमप्रभु यावे आ सोक्तीम मेको आन कली नाइक्पाइक्तु। इन नें ठेयब सेल्चा कली इन मुर आन कली मोदेशो पा खुल्लेनी।

<sup>15</sup> सरीड डा इन छेडछेड डा बाक्तीके रे उइ कोव्रडीन। इन वारच पचा दाक्तीके नु इन सक्ति ते बाक्मे? इन थुं डा आंइ कली दाक्तीके नु इन शिशी पतीके ते बाक्म? गो मेको मतक। ब्यवस्था २६:१५<sup>16</sup> गे आंइ आफ बाक्नीनी। मिनु अब्राहाममी आंइ कली मतुइश्शो बाक्त। इस्राएलम आंइ कली मतव। गो, परमप्रभु यावे, आंइ आफ, आंइ श्येत रे प्रॉइब बाक्नीनी। मेको साइ रे इन नें बाक्ब। ब्यवस्था ३२:६<sup>17</sup> परमप्रभु यावे, गे मारदे आंइ कली इन लां रे हेंथे गाक्वा गेकी। गे मारदे आंइ कली इन कली मान पा महिब दुम्चा कली आंइ थुं खकटा सेल्लेनी? गे इन गेय पाइब आन पर्वम नु इन जात डा मुर आन पर्वम लेतीन। यसैया ५७:१७<sup>18</sup> इन योव्रशो मुरपुकी इक्का नाक्त सम्म ला एको रागीम बाक्वा ताम्तेक्म। तन्न मुल आंइ जोरी सत्रुमी इन योव्रशो बाक्तीके खतम सेल्लेक्म। बजन संग्रह ७९:१<sup>19</sup> गोपुकी

डोंडती रे इन सासन पशो मुर खोदेंशो मदुम्क। इन नेंमी ब्रेत्वा पुंडसीशो मुर खोदेंशो मदुम्क” देंतेक्म।

64 परमप्रभु यावे, गे सरीड रोक्शा, यिनी हना, रिम्शो दुम वा। इन डोंडती डांडा हिम्सीम वा।<sup>2</sup> मिनु दोपा मीम सोव्रशो राशी जेष्वा, मिनु ब्वाक्कु ब्रुइक्पाइक्वा, मोपा इन जोरी सत्रु आन कली इन नें तुइक्पतीन। मिनु रागी रागी डा मुर इन डोंडती हिंशा खिंखि पाइनीम।<sup>3</sup> मिनु गे आंड ममिम्शो हिंशा डा ठेयब गेय पाइनीनी। गे यिनीनु, इन डोंडती डांडा खिंखि पाइनीम।<sup>4</sup> सु सुमी मेको कली रिम्नीमी, मेकोमी, मेको आन पबर्म गेय पाइब। मारदे हना साइ डोंडती रे गे डा लाक्शा अरु परमप्रभु बाक्ब, दे सुइम मनैशो नु मतशो बाक्तेक्म। प्रस्थान ३२:५-१०<sup>5</sup> गे येरशा ठीक पतीके मिम्शा पाइब आन कली वारच पाइब बाक्नीनी। मेको मुरपुकी इन लांम गाक्शा, इन कली मिम्ब बाक्नीम। गे आंड पाप पशो आ पबर्म गाइक्ताक्नी। मारदे हना गे ख्रुइसाक्नी। मिनु गो हेंथे गाक्तक।<sup>6</sup> गो नेल्ल ग्रान्ग्रा दिशो मुर खोदेंशो दुम्तक। आंड ठीक पतीके नेल्ल ग्रान्ग्रा दिशो लुम्सीशो वा खोदेंशो दुम्त। गो सफा खोदेंशो पा सोल सुल बेक्नीकी। आंड मरिम्शो पशो फश खोदेंशो दुम्शा, आंड कली बेरपाइक्ब।<sup>7</sup> मिनु इन नें थीब सुइ मबाक्नीमी। इन कली थिचा माल्ब सुइ मबाक्नीम। मारदे हना गे आंड डोंडती रे इन कुल ख्रुइक्ताक्नी। आंड मरिम्शो पतीके मतेक्नी। यसैया ६३:१६; यसैया ४५:९; बिलाप ४:२; रोमी ९:२१<sup>8</sup> मो हना यो परमप्रभु यावे, गे आंड आफ बाक्नीनी। गो खप नकी, गे खप के ग्योब सेल्ब बाक्नीनी। गो नेल्ले इन सेल्शो नकी।<sup>9</sup> परमप्रभु यावे, शुश मगाइक्तीने। आंड मरिम्शो पशो गेना हना यो ममिम्तीन। आंड कली कोव्रडीन, गो नेल्ल इन मुर बाक्नीकी।<sup>10</sup> इन योव्रशो सहरपुकी गोरशो रागी दुम्शो बाक्ब। सियोन यो गोरशो रागी दुम्शो बाक्ब। यरूसलेम मुर मबाक्तीके दुम्शो बाक्ब। भजन संग्रह २४:७<sup>11</sup> आंड योव्रशो नु दारशो, आंड किकी पिपपुकीमी इन कली ठेयब सेल्शो खिं मीम ग्रोइक्त। आंड दाक्शो खिं नेल्ले ब्रेन्ने थुम्तेक्म।<sup>12</sup> परमप्रभु यावे, गे मेको तशा यो, सिक्सी पा बाक्नीनी? ब्वालेइ पा बाक्शा, आंड कली सजाइ जपाइक्नीनी?

परमप्रभुमी सजाइ गेशो

65 परमप्रभु यावेमी “गो आं कली मतुइक्ब आन कली माल्ब सेल्लामी। आं कली ममाल्बमी आं कली थित्तीमी। आं नें मथीब रागी डा मुर आन कली गो ‘गो एके बाक्ती। गो एके बाक्ती’ दे माइक्तामी। रोमी १०:२०<sup>2</sup> गो काइ मटीब मुर आन कली नाक्त रे आं गुइ हाम्शा वारच पाइक्वा माल्ता। मेकोपुकी आंम आन दला दाक्स पा मरिम्शो लां ला खोइक्तेक्म। रोमी १०:२१<sup>3</sup> मेको मुरपुकीमी आं कली गेना हना यो गाइक्पाइक्स डा गाइक्पाइक्स पा फू बारीम चढ़ेनीम। इंटा तारी धूप चोइनीम।<sup>4</sup> मेकोपुकी तुरस आगाम बाक्शा, ख्रुइसीशा नां सोंइताम। मेकोपुकीमी पौव श्ये ब्वाइनीम। आन ग्योबुम ग्रान्ग्रा दिशो श्ये क्येनीम। यसैया ६६:१७; लेवी १:७<sup>5</sup> मेकोपुकीमी ‘गे मेके उइ बाक्कीन। आंड नेक्था मपिने। मारदे हना इन थिशो मजाइनुड’ देंनीम। मेकोपुकी आं कली मरिम्शो रिना पाइश्शो कुन खोदेंशो दुम्शा, गेना हना यो ब्रशो मी बाक्नीमी।<sup>6</sup> कोव्रडीन, आं डोंडती मार ब्रेक्शो बाक्त देंशा हना ‘गो सिक्सी पा मबाक्नुड। तन्न गो क्येक्क लेत्नुड। गो थमा पा क्येक्क लेत्नुड’।<sup>7</sup> गो इन मरिम्शो पशो नु इन किकी पिपी आन मरिम्शो पशो कालेमी क्येक्क लेत्नुड। मेकोपुकीमी डांडा तार धूप चोशा, आं कली शुक्शी पाइक्तीमी। मिनु गो इन पशो आ क्येक्क लेत्नन्नी” दे परमप्रभु यावेमी देंत। मारदे हना मेकोपुकीमी डांडाम धूप चोशा, पहाड मेर आं पबर्म शुक्शी लोव्र पाप्तेक्म। मेको आन पशो पाप आन थुकुम प्रिंशा क्येक्क लेत्नुडमी।<sup>8</sup> मिनु परमप्रभु यावेमी “दोपा अडगुर आगाम रस बाक्बा, मिनु ‘मेको कली मताइक्चा, रस बाक्ब’ देंनीमी, मोपा मबिग्रेचा कली आ आगाम आसीक बाक्ब। गो मेको आं गेय पाइब आन पबर्म मोदेंशो पाइनुड। यसैया ६:१३; उत्पत्ती १८:२६-३२<sup>9</sup> मिनु गो याक्ब आ चच युइ रे जाक्पाइक्नुड। मिनु यहूदा आ थर डा आं डांडा ताइब मुर गुंइनुड। मेको आं योव्रशो मुर आन के दुम्शा, आं गेय पाइब आन बाक्तीके दुम्ब।<sup>10</sup> मिनु शारोन आं मुर आन क्यारश भेडा योव्रतीके नु

आकोर माइश्शो दिंमम बी ब्यफ जोपाइक्तीके दुम्ब। मेको आं कली माल्ब आन कली दुम्ब। यसैया ३३:९; यहोसु ७:२६<sup>11</sup> तन्न गे परमप्रभु यावे कली प्रोइबपुकी, आं योव्रशो डांडा प्रेबपुकी गाद देवता कली चढ़ेतीके सेल्नीनी। मिनु गे मेनी देवी कली ब्वाइश्शो तूतीके चढ़ेनीनी।<sup>12</sup> गो इन कली तरवारम साइक्पाइक्चा कली जिम्मा गेनन्नी। गे क्योरपांडसीचा कली गुर ब्वेनीनी। मारदे हना गो इन कली ब्रेत्तुनु, गे आं लोव्र मलेत्तीनी। गो लोव्र पडानु, गे मनैनी। गो आं डोंडती मरिम्शो नु आं मदाक्शो गेय ला योव्रशा, पाइतीनी” देंत। यसैया ६६:४; येरमीया ७:१३<sup>13</sup> मोपतीके परमप्रभु यावेमी “आं गेय पाइबपुकी जचा ताइनीम। गे चहिं शोव्रलु बेक्नीनी। आं गेय पाइब तूचा ताइनीम। गे चहिं तूतू दाक्शा बाक्नीनी। आं गेय पाइबपुकी ग्येरनीमी, गे चहिं मुने दोक्नीनी। यसैया ५५:१<sup>14</sup> आं गेय पाइबपुकी थुंम ग्येरसीशा, कुम्सो पाइनीमी। गेपुकी चहिं श्येत जशा, इन थुं लुक्च लशा खाइश्शा, वाइ ब्रेश्शा डाक्नीनी।<sup>15</sup> आं योव्रशोपुकीमी सराप पची ना इन नें थीनीम। मिनु नोले गो परमप्रभु, परमप्रभु यावेमी इन कली साइक्नन्नी। तन्न आं गेय पाइब आन कली नक नें वोइक्नुडमी। यसैया ६२:२<sup>16</sup> मिनु सु सुम रागीमी आसीक पुंडनीमी, मेकोपुकी थमा सुइक्चा पुंडसीब परमप्रभु आ नेंमी आसीक ताइनीम। मिनु रागीमी सु सुमी कसम जाइनीमी, मेकोपुकीमी थमा सुइक्चा पुंडसीब परमप्रभु आ नेंमी कसम जाइनीमी। मारदे हना डोंडती डा श्येत नुष्ठा, प्रेने थुम्शो बाक्नीम। मिनु आं डोंडती रे ख्रुइसीशो बाक्नीम। यसैया १९:१८; येरमीया ४:२

नक सरीड नु नक रागी

17 मिनु गो नक सरीड नु नक रागी सेल्नुड। डोंडती डा नेल्ल प्रेंशा, लेंशा मारेइ ममिम्सीब। यसैया ६६:२२; २पत्रुस ३:१३; प्रकाश २१:१<sup>18</sup> गेपुकी आं सेल्शोमी शुश ग्येरसीने। मारदे हना गो यरूसलेम कली कुम्सो पपाइश्शा, आ मुर नेल्ल आन कली ग्येरपाइक्नुडमी। यसैया ६६:२२; यसैया ३५:१०; यसैया २५:८; प्रकाश २१:४<sup>19</sup> गो यरूसलेम तशा ग्येरसीनुड, आं मुर आन कली तशा, आं थुं ग्येरशा प्रेक्ब। मेना मेकेर डाक्शो नु श्येत जशा डाक्शो मनैसीब।<sup>20</sup> का निक्शी नाक्त ला ब्रोंइब आल मेकेर मबाक्नीम। मिनु मेकेर सुइ यो ख्रुशो दुम्चा क्येडा डोंडती मबेक्नीम। सहे का बर्स ब्रोंइशा बेक्ब कली ठिटा देंनीम। मिनु सहे का बर्स मगाप्थु, बेक्ब मुर कली ‘सराप रशो मुर का बाक्त’ देंनीम। जकरिया ८:४<sup>21</sup> मेकोपुकी खिं सेल्शा, बाक्नीम। मिनु मेकेर अडगुर ख्रुम्शा, ग्येरशा ब्वाइनीम। यसैया ६२:८<sup>22</sup> आंम आन सेल्शो खिंमी अरु मबाक्नीम। आन ख्रुम्शो अडगुर अरुम म्बाइनीम। आं मुरपुकी रवा खोदेंशो पा शुश बर्स ब्रोंइनीम। आं योव्रशो मुरपुकीम आंम आन गुइ डा गेय ग्येरशा जाइनीम। ब्यवस्था २८:३०; अय्युब १४:७<sup>23</sup> मेकोपुकीमी मोशा गेय मपाइनीम। श्येत जपाइक्चा कली आल मथीनीम। मारदे हना मेकोपुकी परमप्रभु यावे आ आसीक ताइब आन आल बाक्नीम। मिनु आन आल मेको नु बाक्नीम।<sup>24</sup> मिनु गो मेको आन पुंडचा क्येडा डोंडती, लोव्र लेत्नुडमी। आन लोव्र पन पना नेंनुड। यसैया ३०:१९; यसैया ५८:९<sup>25</sup> मेना फर नु पाठा काथ काथा जोइनीसी। गुप्सम चहिं ब्यफोम खोदेंशो पा पराल ब्वाइब। बुस्सुम खप जाइब। आं योव्रशो डांडामी मारेइमी मरिम्शो मपाइनीम” दे परमप्रभु यावेमी देंत। यसैया ११:६-९; उत्पत्ती ३:१४

निसाफ पशो

66 मिनु परमप्रभु यावेमी “स्वर्ग आं नित्तीके नु रागी आं खोइल वोइक्तीक बाक्ब। गे आं कली दोदेंशो खिं सेल्ने चाप्नीनी? तेकेर नाइक्नुडा? १राजा ८:२७; बिलाप २:१; प्रेरित ४:४९; प्रेरित १७:२४<sup>2</sup> मारेइ मारेइ आं सेल्शो मनमी डा? मोपतीके मेको नेल्ल आं के नम” दे परमप्रभु यावेम देंत। मिनु लेंशा “मो हना यो गो आं लोव्र नेंशा, हिंशा, खिंखि पा श्येत जाइब नु आ थुं जिक्शो मुर आन कली कोव्रनुड।

<sup>3</sup> मिनु सुमी ब्यफ साइक्बा, मेको मुर साइक्ब खोदेंशो बाक्ब। सुमी पाठा का चढ़ेबा, मेको कुचुम आ शुर जिक्ब खोदेंशो बाक्ब। सुमी अन्न चढ़ेबा, मेको पौव आ हुश चढ़ेब खोदेंशो बाक्ब। सुमी मिम्शा चढ़ेतीके धूप चोइबा, मेको मूर्ति पूजा पाइब खोदेंशो बाक्ब। मेको आन दला दाक्स पाइनीमी।



आन ग्रांग्रा दिशो गेयमी ग्येरसीनीमी। १सामुएल १५:२२-२३<sup>४</sup> गो मेको आन कली शुक्शी पाइनुड। मिनु आन हिंशो श्येत आन तार मोइक्नुड। मारदे हना गो मेको आन कली ब्रेडडानु, लोव्र मलेतेम। गो लोव्र पाता। तन्न मेकोपुकीम आं लोव्र मनेनेम। आं डोंइती मरिम्शो पाम्तेक्म। आं मदाक्शो ला पाम्तेक्म” देंत। यसैया ६५:१२

परमप्रभुम सियोन कली ठीक सेल्शो

५ परमप्रभु यावे आ लोव्र क्येडा हिंशा, खिंखि पाइबपुकीम “आं लोव्र नेनीन। इन लोकबपुकीमी गेपुकी आं मुर दुम्तीके इन कली काइ मदाक्थु, तिल्नीम। मेकोपुकीमी ‘परमप्रभु यावे कली ठेयब सेलल। मिनु गो इन ग्येरशा बाक्शो तकल’ देंनीम। तन्न मेकोपुकी मुने दोक्नीम। लूका ६:२२

६ नेनीने, सहर रे ठेयब रेयके नेंसीब। परमप्रभु यावे आ खिं रे सेंदा का नेंसीब। मेको परमप्रभु यावे आ सेंदा बाक्ब। आ जोरी सत्रु आन कली क्येक्क लेत्चा कली ठेयब सेंदा पा लोव्र पाइब” देंतेक्म।

७ मिनु परमप्रभु यावेमी “सियोनमी सुत्केरी रोइ पचा क्येडा डोंइती आल थिप्तु। सुत्केरी रोइ पचा क्येडा डोंइती तौ का थिप्तु।<sup>८</sup> मोदेंशो लोव्र सुम नेन्मे, सुम तामे? मार, नाक्त कामी रागी का दुम्बा डा? याम कामी रागी का जरमेसीबा डा? सियोनमी सुत्केरी रोइ पचा चिक्तानु, आलपुकी थिप्तु।<sup>९</sup> गो आल थिचा चिक्पाइश्शा डा मीन, थिचा मगेनुडा डा? गो आल थिचा गेबमी, तेक्नुडा डा?” दे इन परमप्रभुमी देंत। यसैया ३७:३

१० मिनु गे यरूसलेम कली दाक्ब नेल्लेमी मेको नु ग्येरसीन। गे मेको आ पर्बम रोंका पाइब नेल्ल ग्येरसीन।<sup>११</sup> गेपुकी मेको आ दूध युप्शा, रूशा, इन थुं बारपतीन। मेको आ रिम्स तशा ग्येरसीने। यसैया ६०:१६

१२ मारदे हना परमप्रभु यावेमी “गो ठेयब खोला खोदेंशो पा मार मार गेनुड। मिनु बारशो खोला खोदेंशो पा रागी रागी डा मुर आन शोंप गेनुड। मिनु गे जाइनीनी। गेपुकी मुप्शा, कुरचा पुंइसीनीनी। थुकुम ग्यारपाइक्चा पुंइसीनीनी। यसैया ६०:४<sup>१३</sup> दोपा आल आ ममामी आल आ थुं बारपाइक्चा, मोपा गो इन कली इन थुं बारपाइक्चन्नी। गे यरूसलेम सहरमी इन थुं बारपाइक्चा पुंइसीनीनी। बजन संग्रह १३१:२

१४ गेपुकी मेको कली तशा, शुश ग्येरशा, इन थुं बारपाइक्चीनी। गे घांस बारशो खोदेंशो पा बारनीनी” देंत। परमप्रभु यावेमी आ गेय पाइब आन कली वारच पाइब, दे मुर नेल्लेमी तुइक्नीम। मेको आ जोरी सत्रु आन पर्बम गाइक्ब।<sup>१५</sup> परमप्रभु यावे मी नु जाक्ब। आ बगीपुकी फश गिवार खोदेंशो

पा गाक्नीम। आ गाइश्शो चुरशोमी क्येक्क लेप्ब। आ हुइक्तीके हुरुर पा ब्रशो मी खोदेंशो बाक्ब। बजन संग्रह ५०:३; प्रकाश १९:११-१५<sup>१६</sup> मारदे हना परमप्रभु यावेमी मीमी निसाफ पाइब। मुर नेल्ल आन कली आ तरवारम निसाफ पाइब। मिनु परमप्रभु यावेमी मोपा साइश्शो शुश दुम्नीम।<sup>१७</sup> मिनु “सु सु देवी देवता आन डोंइती जाक्चा कली चोव्रखेसीशा, आंम कली ठीक सेल्नीमी, फू रू लशा, मेको रू आ दातेमी बाक्ब पोव्र श्ये ब्वाइब आ नोले खोइश्शा, मेको यो पोव्र श्ये ब्वशा, ग्रांग्रा दिचा डा थोव्रकपुकी नु यिच ब्वाइनीमी, मेकोपुकी कालेमी साइक्चा पुंइसीनीम” देंत। यसैया ६५:३-५; इजीकीएल ८:११

१८ परमप्रभु यावेमी “गो मेको आन पतीके नु आन मिम्तीके तुइक्नुड। मिनु रागी रागी डा मुर नेल्ल नु नेल्ल खाल डा लोव्र पाइब मुर आन कली खुप्नुड। मिनु मेको मुर जाक्शा, आं छेडछेड ताइनीम।<sup>१९</sup> मिनु गो मेको आन दातेमी चिन्ड का वोइक्नुड। मिनु मेको आन दाते डा प्रोंइशो आन कली रागी रागीम सोइक्नुडमी। गो मेको आन कली टारशीश, पूत नु लूद सोइक्नुडमी। लूद डा मुर चहिं लिब्रा आप्ब बाक्नीम। गो तूबल, यावान नु समुन्द्र आ नेक्था डा रागी मेर सोइक्नुडमी। मेकोपुकीमी आं नें मतुइक्ब आं छेडछेड मताइब रागी रागी डा मुर आन कली आं पर्बम शेंनीम। मत्ती १८:१९ तूबल नु यवान ग्रीस रागी बाक्ब।<sup>२०</sup> मिनु इन लोकब नेल्ल आन कली रागी रागी रे परमप्रभु यावे आ डोंइती चढेंशो खोदेंशो पा यरूसलेमम चाक्नीम। मेकोपुकी शारा, बगी, कुरतीके, गधा नु दलऑठम डोइक्पाइश्शा, आं योव्रशो डांडाम चाक्चा पुंइसीनीम। दोपा इसाएलीपुकीमी आन अन्न चढेतीके सफा ग्योबुम परमप्रभु यावे आ खिं चाक्नीमी, मोपा मेकोपुकीमी पाइनीम। यसैया ६०:३-७<sup>२१</sup> गो मेको आन दाते रे चढेब नु लेवी योव्रनुडमी” दे परमप्रभु यावेमी देंत।

२२ मिनु “दोपा आं सेल्शो नक सरीड नु नक रागी आं डोंइती गेना हना यो बाक्बा, मोपा इन नें नु इन चच युइ आन नें गेना हना यो लीनीम। यसैया ६५:१७<sup>२३</sup> मिनु नोले औंसी रे औंसी सम्म नु नाइक्तीक नाक्ती रे नाइक्तीक नाक्ती सम्म मुर नेल्ले आं कली ठेयब सेल्चा कली आं डोंइती जाक्नीम। गन्ती १०:१०

२४ मिनु मेकोपुकी गूशा आं कली काइ मटीब आन बेक्शो रां कोव्रथ लाइनीम। मेको आन लुस्पु मबेक्नीम, आन मी यो मकाप्ब। मेको मुर नेल्ल आन कली ग्रांग्रा दितीके दुम्नीम” दे परमप्रभु यावेमी देंत। मर्कूस ९:४८

## येरमीया

एको किताब येरमीयाम ब्रेक्शो बाक्ब। पिप योयाकीमम आ हुकुम पची ना येरमीयामी आ लोव नेल्ल आ ब्रेक्ब मुर बारुक कली ब्रेक्पाइक्नु। साइ डोंइती रे यहूदी नु ख्रीस्तीयन नेल्लेम मेको किताब येरमीया आ ब्रेक्शो बाक्ब, दे तुइक्नीम। मेना अस्सुर रागी खतम दुम्त। मेदी नु कल्दी डा मुरपुकीमी अस्सुर डा ठेयब सहर निनवे कली लडाइ पा ग्रातेक्म। मिनु मेको रागी आस दातेमी योक्साक्स। ६०९-६०६ बि. सी. मेर पिप नेबुकदनेसरमी इजीप्त कली लडाइ पा ग्रात। नोले डोंइती डा यहूदी आन कली ग्याइश्शा लाइक्तीके बाक्त। मेको ६०६ बि. सी.म बाक्त। मेको आ नोले डा ग्याइश्शा लाइक्तीके ५९८ बि. सी.म बाक्त। मिनु नेल्ल क्येडा नोले डा ग्याइश्शा लाइक्तीके ५८६ बि. सी.म बाक्त। यहूदा डा मुर परमप्रभु गे मलेत्तेम हना, निसाफ पचा पुंडसीनीम। यरूसलेम सहर फ्रुचा पुंडसीब। मिनु नोले थुं बारपाइक्तीके लोव शुश ताइब। मिनु इस्राएली मदुश्शो अर्को रागी डा मुर यो मेको नक कबल डा शिशी ताइब दुम्ने चान्नीम।

### येरमीया सु बाक्म

1 एको चढेब हिल्कीयाह आ तौ येरमीया आ लोव बाक्ब। मेको बेन्यामीन आ रागी अनाथोथ सहरम बाक्शो बाक्त। *येरमीया ११:२१; यहोसु २१:१८; ब्यवस्था ३३:३२* 2 यहूदा डा आमोन आ तौ पिप योसीयाहम सासन पवा आ १३ बर्समी परमप्रभु यावेमी येरमीया कली लोव पाप्नु। *२राजा २१:२४; २राजा २२:१* 3 मिनु यहूदा डा योसीयाह आ तौ येहो-याकीम आ पाला नेल्ले नु यहूदा डा योसीयाह आ तौ सिदकीयाहम सासन पवा आ ११ बर्स डा ५ महिनाम परमप्रभु यावेम येरमीया कली लोव पना पन बाक्त। मेना यरूसलेम डा मुर ग्याइश्शा लाइक्चा पुंडसीशो बाक्तेक्म। *२राजा २३:३४; २राजा २४:१७; २राजा २५:२-२१; येरमीया ३९:९*

### येरमीया कली ब्रेश्शो

4 मिनु परमप्रभु यावेमी आं कली मार लोव पाप्नु देंशा हना, 5 “गो इ कली कोव्रजीम जोल्चा क्येडा डोंइती तुइक्ताक्ड। गो इ कली जरमेचा क्येडा डोंइती योव्रशा लित्तन। मिनु इ कली रागी रागी डा मुर आन कली आं लोव पाइब सेल्लन” देंत। *यसैया ४९:१; गलाती १:१५*

6 मिनु गो “परमप्रभु, परमप्रभु यावे, गो दोपा ब्वाक्चा माल्नुडा, मजोक्नुड। गो आलन बाक्नुड” देंती। *प्रस्थान ४:१०; यसैया ६:५-७* 7 तन्न परमप्रभु यावेमी आं कली “गो आल बाक्नुड मदेनो। गो इ कली सु सु आन बाक्तीक सोइक्नना, मेकेर लचान माल्नेवे। मिनु गो इ कली मार अरेडा, मेको देंचा माल्नेवे। 8 गे मेको आन क्येडा महिनो। मारदे हना गो इ कली प्रॉइचा कली गे नु बाक्नुड” दे परमप्रभु यावेमी देंत। *प्रस्थान ३:१२* 9 मिनु नोले परमप्रभु यावेम आ गुइ दिंशा, आं शोव्र थिप्नु। मिनु आं कली “मुल आं लोव इ शोव्रम कुर पाता। *प्रस्थान ४:१२* 10 नेनो, मुलाक्ती गो इ कली रागी रागी नु राज्य आन पर्वम लोव पाइब सेल्लन। तुल्चा नु प्रेट्वा कली, खतम पोक्चा, ग्रंग्ये माग्ये पपाइक्चा नु सेल्चा नु ख्रुम्चा कली वोइक्त्तन” देंत। *येरमीया १८:७-१०*

11 मिनु परमप्रभु यावेमी आं कली “येरमीया, गे मार, तवी?” देंत। मिनु गो “देसी बदाम रवा आ राशी का ताता” देंती। 12 मिनु परमप्रभु यावेमी “गे ठीक ताप्तीवी। मारदे हना गो आं लोव नेल्ल दुम्ल, दे योव्रकी पा बाक्ती” देंत। *येरमीया ३१:२८* 13 मिनु परमप्रभु यावेमी लेंशा आं कली “गे मार, तवी?” दे हिल्लो पाप्नु। मिनु गो “बुइश्शो मार, मार बाक्शो ग्योब का उत्तर रे याक्सीशा यिशो ताता” देंती।

14 मिनु परमप्रभु यावेमी आं कली “उत्तर रे एको रागीम बाक्ब मुर नेल्ल आन कली श्येत जाक्ब। *येरमीया ४:६; येरमीया ६:१, २२; येरमीया १०:२२; येरमीया २५:९; येरमीया ५०:४१* 15 गो उत्तर डा राज्य डा जात जात डा मुर आन कली ब्रेल्लुड। मिनु मेको नेल्ल जाक्शा, यरूसलेम डा ठेयब लाप्चो

ओव्रतीक लांमी, एर ओंथ डा गारो नेल्ल नु यहूदा डा सहर आ डोंइती आन पिप आन नित्तीक वोइक्नीम। मेकोपुकी मेको आन पर्वम लडाइ पचा कली जाक्नीम। 16 मेकोपुकीमी आं कली प्रॉइशा, आं अरेशो मटितीके, गो मेको आन पर्वम आं निसाफ नेंपाइक्नुडमी। मेकोपुकीमी अरु देवी देवता आन कली धूप चोम्तेक्म। मिनु आन गुइमी सेल्शो देवी देवता आन कली पूजा पाप्तेक्म। 17 गे चहिं बोक्शा, ठीक दुमो। मिनु गो इ कली मार, मार, अरेडा, मेको आन कली माइक्मी। गे मेको आन क्येडा महिनो। मो पाप्तीवी हना, गो इ कली मेको आन डोंइती हिंपाइक्नन। 18 मुलाक्ती गो इ कली गारो हिरशो बोल्यो सहर, फलाम के थाम नु कांसा के थरपु खोदेंशो सेल्लन। मोपा गे यहूदा डा पिपी, हुकुम पाइबपुकी, चढेबपुकी नु रागी डा मुर नेल्ले आन मरिश्शो पशो आ पर्वम लोव पने चाप्नेवे। *येरमीया १५:२०; इजीकीएल ३:८-९* 19 मेकोपुकीमी इ कली लडाइ तोइनीम। तन्न इ क्येडा ग्राने मचाप्नीम। मारदे हना इ कली प्रॉइचा कली गो गे नु बाक्नुड” दे परमप्रभु यावेमी देंत।

### इस्राएली आन कली प्रॉइशो

2 मिनु परमप्रभु यावेमी आं कली 2 “लावो, परमप्रभु यावेमी यरूसलेम कली मार देंत देंशा हना ‘गे इ ठिटी बाक्ची ना आं कली ग्युम्लीम खोदेंशो पा दाक्ताक्यी। गे आं कली मारदे मशोक्शो गोरशो रागीमी आं नोले खोइक्ती। गो मेको मिम्नुड। *होसे २:१६; होसे १३:५* 3 इस्राएल आंम परमप्रभु यावे कली आ का ला बाक्शो ग्युम्ली खोदेंशो बाक्त। मेको, आ गेय डा डोंइती डा फल खोदेंशो बाक्त। मेको कली नेक्ब नेल्ल दोस ताइब दुम्तेक्म। मेको श्येत जाप्तेक्म’ देनो” दे माइक्ती। *प्रस्थान २८:३६; आमोस ६:१; याकूब १:१८*

4 गे याकूब आ खिं डा मुर नु इस्राएल आ खिं डा मुर नेल्ले, परमप्रभु यावे आ लोव नेनीन। 5 परमप्रभु यावेमी मार देंत देंशा हना “इन किक्की पिपीम आं कली मार, दोस गेयीमी? मारदे आं कली प्रॉइशा, डोन लमा? मेकोपुकी शोर गाक्शो मूर्ति आन नोले खोइक्तेक्म। मिनु मेको यो शोर गाक्शो दुम्तेक्म। *मीका ६:३* 6 मेकोपुकीमी ‘आंइ कली इजीप्त रागी रे गुंडब परमप्रभु यावे ते बाक्बा? मेकोमी आंइ कली गोरशो रागीम लां कोंइशा गाक्पाइक्नु। मेको मुर मबाक्तीक गोरशो रागी नु शुश खाल्टा बाक्शो रागी बाक्त। ब्वाक्कु मबाक्शो नु छिडछिड डा रागी बाक्त। मेको सुइ मगाक्तीक नु सुइ मुर मबाक्तीक रागी बाक्त’ देंतेक्म। *ब्यवस्था ८:१५* 7 गो इन कली रिश्शो रागीम चाक्त्तन्नी। मेकेर डा फल नु रिश्शो थोव्रक जपाइक्चा कली चाक्त्तन्नी। तन्न गेपुकी जाक्शा, आं रागी मरिश्शो सेल्लतीनी। आं रागी कली ग्रंग्रा दिशो सेल्लतीनी। *ब्यवस्था १:२५; न्यायाधीस २:१-२* 8 चढेबपुकीम ‘परमप्रभु यावे ते बाक्बा?’ मर्दम। आं अरेशो लोव शेंबपुकीम आं कली मलुइक्तीमी। सासन पाइबपुकी आं कली ममिम्थु, हेंथे गाक्तेक्म। आं लोव पाइबपुकीम बाल देवता आ नेंम नोले दुम्ब लोव पाप्तेक्म। मिनु शोर गाक्शो मूर्ति आन नोले खोइक्तेक्म” देंत।

9 मोपतीके परमप्रभु यावेमी “गो इन कली लेंशा दोस गेचा माल्नुड। गो इन चच युइ आन कली दोस गेनुड।<sup>10</sup> किक्तीम माइश्शो साइप्रस डा समुन्द्र आ नेक्था बाक्ब आन कली कोव्रडीन। केदारमी क्यारी पाइब मुर सोइश्शा कोव्रडीन। मार, मेकेर मोदेशो गेय दुश्शो बाक्बा? <sup>11</sup> मार, तेकोइ रागी डा मुरुम आन देवी देवता फाइश्शो बाक्नीमी डा? मेको परमप्रभु मनम हना यो, मफाइक्नीम। तन्न आं मुरपुकीम आन ठेयब सक्ति पाइश्शो कली शोर गाक्शो मूर्तिपुकी नु फाइक्तेक्म। *येरमीया १:२३*<sup>12</sup> गे सरीडम बाक्बपुकी एको लोव्र नेंशा हिंशा, छक लाक्कीन। मिनु थाम्पा हिंशा थिर थिर पा खिंखि पने। <sup>13</sup> मारदे हना आं मुरपुकीम निक्शी खेयप मरिश्शो पाम्तेक्म। मेकोपुकीमी, ब्रॉइतीक ब्वाक्कु बुक्तीके, आं कली प्रॉइतेक्म। मिनु आंम कली सोव्रशो रागीमी ब्वाक्कु मदेंतीक इनार दोम्तेक्म। *येरमीया १७:१३; भजन संग्रह ३६:१०; यूहन्ना ७:३८*

<sup>14</sup> मार, इस्राएल वाइल का बाक्बा? आ होव्रप आ खिंम जरमेशो वाइल का बाक्बा डा? मेको मारदे रोइक्चा पुंडसे? <sup>15</sup> गुप्सपुकी मेको कली तशा ग्रीनीम। ठेयब सेंदा पा ग्रीनीम। मेकोपुकीमी आ रागी कली मुर मबाक्तीके सेल्लेक्म। मेको आ सहर नेल्ल ब्रेत्तेक्म। मिनु मेकेर मुर मबाक्नीम। *येरमीया ४:७*<sup>16</sup> मेम्फीस नु ताहपनेस डा मुरपुकीम इन पिया डा सिरपेच पुइक्तेक्म। *येरमीया ४४:१*<sup>17</sup> इन कली लां कौइब, इन परमप्रभु यावे कली प्रॉइशा, गे मोदेशो श्येत आंमा इन कली मचाक्नी डा? <sup>18</sup> गे मारदे इजीप्त रागी लाइनीनी? नील खोला डा ब्वाक्कु तूथ लाइनीनी? गे अस्सुर रागी लनीनु, मार रिश्शो दुम्बा डा? गे युफ्रेटीस खोला डा ब्वाक्कु तूथ लाइनीनी? <sup>19</sup> इन परमप्रभु यावे आ अरेशो लोव्र मटितीकेमी इन कली सजाइ गेब। इन प्रॉइशोमी इन कली हुइक्ब। गेपुकीम इन परमप्रभु यावे कली प्रॉइशो थम मरिश्शो नु इन थुं कशो दुश्शो बाक्ब, दे तुइक्तीन। मिनु आं कली मान पा हिंतीके गे नु मबाक्ब” दे परमप्रभु, मुर नेल्ल आन परमप्रभु यावेमी देंत।

<sup>20</sup> परमप्रभु यावेमी “साइ डौइती रे गे इ जुवा जिक्तीवी। मिनु इ डोरी प्रॉइक्तीवी। मिनु गे ‘गो इ गेय मपाइनुड’ देंते। गे डांडा नु रवा नेल्ल आन पुंम तेल्लेम पाप्तीवी। *यसैया ५७:५५; इजीकीएल ६:१३*<sup>21</sup> गो इ कली नेल्ल क्येडा रिश्शो अडगुर बोट ख्रुम्ता। गे दोपा मरिश्शो दुश्शा ब्वाकी डा अडगुर बोट खोदेशो दुमे? *भजन संग्रह ८०:९; यसैया ५:१-४*<sup>22</sup> गे इ कली मार, मार, हिक्सी नु शुश साबुनम चिक्साक्वे हना यो, इ दोस ततीके लुम्सीशो आं डौइती बाक्ब” दे परमप्रभु, परमप्रभु यावेमी देंत। <sup>23</sup> मिनु “गे ‘गो ग्रॉग्रा मदिशो नड’ दे दोपा देंने चाप्नेवे? ‘गो बाल देवता आ नोले मखोइश्शो बाक्नुड’ दे गे दोपा देंने चाप्नेवे? गे बेंसीम मार, पवी? मेको मिम्तो। गे थाम्पा एर ओंथ दोरशा गाक्ब दलओँठ बाक्नेवे। <sup>24</sup> गे गोरशो रागीम बाक्चा दाक्ब, फश नाम्शा गाक्ब ब्वाकी डा गधैनी बाक्नेवे। मेको आ डागो माल्तीके सुम तेक्ने चाप्बा डा? सु सुमी मेको कली माल्नीमी, मेको मदाइनीम। मारदे हना ब्वाइसीतीक महिनाम मेको कली थिल्नीम। <sup>25</sup> इ खोइल शिश्रा मगाक्को। गे तूतू दाक्शा खिं रे मलावो। तन्न गे ‘एको मोशा बाक्ब। मारदे हना गो अर्को रागी डा देवता आन कली दाक्ताक्ड। मिनु मेको आन नोले खोइक्नुड’ देंते।

<sup>26</sup> दोपा खुइ ग्याइक्चा पुंडसेनु, मुने दोक्बा, मोपा इस्राएल आ खिं डा मुरपुकी मुने दोक्नीम। मेकोपुकी, आन पिपी, आन ठेयब मुरपुकी, आन चढेबपुकी नु मेको आन जोल पा परमप्रभु यावे आ लोव्र पाइबपुकी मुने दोक्नीम। <sup>27</sup> मेकोपुकीमी रवा कली ‘गे आं आफ नवे’ मिनु फुल्लु कली ‘गे आं कली जरमेब नवे’ देंनीम। मेकोपुकीमी आं कली आन ची हिरशा कौइशो बाक्नीम। आन कुल ममाइ। मो हना यो मेको श्येत जामे नाक्ती जाक्शा ‘आंइ कली प्रॉइकी’ देंनीम। *येरमीया ७:२४; येरमीया १८:१७; येरमीया ३२:३३*<sup>28</sup> तन्न आंम इन सेल्शो देवी देवता ते लाक्गामे? मेकोपुकीमी इन कली प्रॉइने चाप्तेक्म हना, इन श्येत जची ना मेको आन कली जाक्पतीन। मारदे हना यहूदा, गे इ के गिश सहर बाक्मा, मिश देवी देवता बाक्नीम। *ब्यवस्था ३२:३७-३८; न्यायाधीस १०:१४; येरमीया ११:१३*

<sup>29</sup> गेपुकीम मारदे आं कली गन गन पाइनीनी? गे नेल्ल आं कली काइ मटीब दुश्शो बाक्नीनी। <sup>30</sup> गो इन आल आन कली मोशा तुप्तामी। गो मेको आन कली शेंचा दाक्ताक्ड। तन्न मबिस्सम। इन कली सोइश्शो आं लोव्र पाइब इन तरवारमी साइक्चा पुंडसाक्म। गेपुकी ग्यु दाक्ब गुप्स खोदेशो बाक्नीनी। *यसैया १:५; मत्ती ५:१२; मत्ती २२:६; मत्ती २३:३७; मर्कूस १२:५*

<sup>31</sup> मिनु गे, मुल डा पाला डा मुरपुकी, परमप्रभु यावे आ लोव्र मिम्तीन। मार, गो इस्राएली आन कली मुर मबाक्शो रागी नु थम छिडछिड डा रागी दुम्डा डा? मारदे आं मुरपुकीम ‘गो आंइ कली हिरचा कली सुइम तेक्ने मचाप्ब। गो इन डौइती गेनायो लेंशा मजाक्नीकी’ देंमा? <sup>32</sup> मार, मीश आलम आ सुन चांदी नु ग्युम्लीम आ ग्युंवे पशो दारशो वा प्रेंने चाप्नीमी डा? तन्न आं मुरपुकीम दा आं कली शुश नाक्ती रे प्रेंताक्यीमी।

<sup>33</sup> गे दाक्मुतीक माल्शा गाक्चा कली शुश जोक्ब बाक्नेवे? मिनु गे परमप्रभु यावे आ अरेशो लोव्र मटीब मीश मुर अरु लां शेंशा गाक्पाइक्तीवी। <sup>34</sup> इ फेक्शो वाम दोस मताइब नु पुडग आन हुश लुम्सीशो बाक्ब। मिनु गेमी मेको आन कली खिं प्रोल्शा खिं ओव्रशो मथिदी। मेको मोदेशो नेल्ल दुम्ना दुम्न यो, *येरमीया २६:२०-२३; प्रस्थान २३:७*<sup>35</sup> गे ‘गो दोस मताइब बाक्नुड। मेको थमा पा गो नु मगाइक्ब’ देंनेवे। मारदे हना गेमी ‘गो पाप मपड’ देंतीके गो इ कली निसाफ पाइनुड। *यसैया ४३:२५-२६*<sup>36</sup> गे इ गाक्तीक लां फाइक्ना फाइक्न एर ओंथ पाइक्नेवे? दोपा अस्सुरम इ कली मुने दोक्पदा। मोपान इजीप्तमी यो इ मुने तोक्ब। *२राजा २२:३३-३५; यसैया ३०:३*<sup>37</sup> गे मेकेर रे यो हिंचा डा पा प्रोक्चा माल्नेवे। मारदे हना परमप्रभु यावेमी थमा सुइक्चा कली योव्रशो आन कली आ नेक्था मजाक्चा डा पा तिल्लु। मेको आन वारच पतीके इ कली शोर गाक्शो बाक्ब” दे परमप्रभुम देंत।

नाता खोइश्शो

**3** मिनु परमप्रभु यावेमी “वोंइश मुरुमी आ मीश कली प्रॉइशा, छोड पत्र गेपु हना, मेको मीश मुर अर्को वोंइश मुर आ मीश दुम्त हना, मेको वोंइश मुरुम लेंशा आ मीश कली चाक्बा कौ? मो दुम्त हना मेको रागी ग्रॉग्रा दिशो मडुम्बा डा? गे चहिं तेल्लेम का खोदेशो पा शुश आन बाक्तीके जाक्दीश्शो बाक्ते। मिनु मार, गे आं गे लेश्शा जाक्नेवे?” दे परमप्रभु यावेमी देंत। *ब्यवस्था २४:१-४*<sup>2</sup> परमप्रभु यावेम “इर कोव्रडो। गोरशो डांडा मेर कोव्रडो। गे सु नु मडमे? गे मुर मबाक्तीके अराब खोदेशो पा लांमी बाक्शा, गे नु इक्ब मुर आन कली रिम्ना रिम्न बाक्ते। गे इ तेल्लेम पतीके नु आं अरेशो मटितीकेम मेको रागी ग्रॉग्रा दिशो सेल्लितीवी। *होसे ४:१३*<sup>3</sup> मोपतीके रेड मयिथो बाक्त। मिनु बर्खा डा रेड मयी। मो हना यो गे मुने मपाइश्शो बाक्नेवे। गे इ मुनेम लल मजिनेवे। *येरमीया ३:१९; येरमीया ३१:९; यसैया ६३:१६*<sup>4</sup> मार, गे मुल नक आं कली ‘आं आफ, आं ठिटी रे डा वारच, देंते। <sup>5</sup> मार, मेको गेना हना यो गाइक्स डा गाइक्स बाक्बा डा? मार, इन गाइक्चा गेना हना यो बाक्बा डा? दे आं कली ब्रेत्ते। मिनु गे ओदेशो लोव्र पाइनेवे। तन्न मार मरिश्शो बाक्मे, मेको नेल्ल पाप्तीवी” दे परमप्रभु यावेमी देंत।

थमा मसुइक्ब इस्राएली

<sup>6</sup> योसीयाहम सासन पची ना परमप्रभु यावेमी आं कली “थमा सुइक्ने मचाप्ब इस्राएलम मार, पवा, मतवी? मेकोमी डांडा नेल्ल डोइश्शा, गिगी रवा नेल्ल आन पुंम तेल्लेम पाप्तु। *येरमीया २:२०*<sup>7</sup> मेकोमी मोदेशो नेल्ल पा आं गे लेक्ब, दे मिम्ताक्ड। तन्न मेको मले। मिनु मेको नेल्ले जोल पाइब आ लोक्ब यहूदाम ताप्तु। *२कोरिन्थी ७:८-९; इजीकीएल २३:२,४*<sup>8</sup> मेको थमा सुइक्ने मचाप्ब इस्राएल कली आ शुश तेल्लेम पतीके, गो छोड पत्र गेशा, सोइक्ताक्ड, दे तुइश्शो बाक्त। मो हना यो आ लोक्ब देंखु पशो यहूदामी मेको तशा महिंधु। मेकोमी यो तेल्लेम पाप्तु। <sup>9</sup> इस्राएलमी आ तेल्लेम पतीके थम आइक्च मिम्ताक्व। मेकोमी फुल्लु नु रवापुकी नु यो लशा तेल्लेम पा रागी ग्रॉग्रा दिशो सेल्लु। <sup>10</sup> मेको नेल्ल दुम्त हना यो, मेको आ लोक्ब देंखु पशो यहूदा आ थुं नेल्लेमी आं गे मले। आं गे लेश्शो खोदेशो ला पखु पाप्तु” दे परमप्रभु यावेम देंत।

<sup>11</sup> मिनु नोले परमप्रभु यावेमी आं कली “थमा सुइक्ने मचाप्ब इस्राएल, जोल पा मरिश्शो पाइब यहूदा क्येडा ठीक पाइब दुम्त। <sup>12</sup> ‘गे लावो। मिनु एको लोव्र उत्तर गे शेंदीमी। थमा सुइक्ने मचाप्ब इस्राएल, परमप्रभु यावेम लेतो। गो इ कली तशा मगाइक्नुड। मारदे हना गो शिशी पाइब नड। गो गेना हना यो मगाइक्नुड’। *प्रस्थान ३४:६; 13* गे ‘गो पापी नड। गो आं परमप्रभु

यावे कली काइ मटीब दुस्ती। मिनु गिगी रवा नेल्ल आन पुंमी अरु देवी देवता आन कली दाक्ताक्ड' देंते। मिनु आं देंशो मटिवी। इ पाप शोवडो, दे मतो" देंते।<sup>14</sup> मिनु परमप्रभु यावेम मेको आन कली "लेतीन। थमा सुइवने मचाप्ब आलपुकी लेतीन। मारदे हना गो इन होवप नड। गो सहर रे मुर का कली नु खिं रे मुर निक्शी आस कली योवनुडमी। मिनु इन कली सियोनम चाक्नन्नी।  
यसैया ६:१३

<sup>15</sup> मिनु गो इन कली आं थुं नु गारब गोठलापुकी गेनुड। मिनु मेको जोक्ब नु रुक्ब दुश्शा, इन कली थुल्नीम। येरमीया २३:३-४; यसैया ४४:२८; इजीकीएल ३४:२३<sup>16</sup> गे रागीम सोशा बोशा शुश दुस्तीनी हना, मुरपुकीम गेनायो 'परमप्रभु यावे आ कबल पशो सन्दोस' मदेनीम" देंते। मिनु परमप्रभु यावेम "मेकोपुकीमी मेको कली ममिन्नीम। मेको कली सुइमी ममाल्नीम। मेको खोदेंशो लेंशा अर्को यो मसेल्नीम। गन्ती १०:३३-३६; २राजा २५:८-९; हिब्रू ४:१४-१६<sup>17</sup> मेना यरूसलेम कली 'परमप्रभु यावे आ ठेयब निल्तीके' देनीम। मिनु रागी रागी डा मुर नेल्ल मेकेर देल्नीम। मुर नेल्ल परमप्रभु यावे आ नेक्था यरूसलेमम देल्नीम। मेना रे आन थुं डा मरिश्शो लोव्र मपाइनीम। प्रस्थान १७:१६; यसैया २:२-४; मत्ती ४:२<sup>18</sup> मेको नाक्ती यहूदा आ खिं डा मुर, इस्राएल आ खिं डा मुरपुकी नु गारनीम। मिनु मेकोपुकी कालेम उत्तर रे पा इन किकी पिपी आन कली गेशो रागीम जाक्नीम। यसैया १:१-१३

<sup>19</sup> मिनु गो इन कली आंम आल आन दातेमी बाक्चा गेनुड। गो इन कली रिश्शो रागी का गेनुड। मेको रागी नेल्ल आन दाते डा नेल्ल क्येडा दारशो रिश्शो रागी बाक्ब। मिनु गे आं कली 'आं आफ' देनीनी। गे नोले मशोइक्ब दुस्तीनी, दे मिम्ताक्ड। ब्यवस्था ७:६; ब्यवस्था ३२:६; ब्यवस्था ८:७; येरमीया ३:४<sup>20</sup> तन्न दोपा थमा सुइवने मचाप्ब मीश मुरुम आ वोंइश कली प्रोंइबा, मोपा गे थमा सुइवने मचाप्ब, इस्राएल, गे आं कली प्रोंइती" दे परमप्रभु यावेम देंते।

<sup>21</sup> गोरशो डांडाम वाइ ब्रेश्शो सेंदा का नेंसीब। मेको इस्राएल आ आल आन शुश डाक्शो सेंदा बाक्ब। मारदे हना मेकोपुकी दूली लांम गाक्शो बाक्तेक्म। मेकोपुकीमी परमप्रभु यावे, आन परमप्रभु कली प्रेंशो बाक्तेक्म। येरमीया ३:२<sup>22</sup> मिनु मेकोमी "थमा सुइवने मचाप्ब आलपुकी लेतीन। इन थमा सुइवने मचाप्तीके सापाइक्नन्नी" देंते। मिनु मेकोपुकीमी "दुम्ब, गो इन गे लेशशा, जाक्नीकी। मारदे हना गे परमप्रभु यावे, आंइ परमप्रभु बाक्नीनी।<sup>23</sup> थमा पा, पहाड डा देवी देवता आन थान जौल बाक्नीम। डांडा मेर ठेयब चाड सेल्तीके नेल्ल जौल बाक्नीम। थमा पा परमप्रभु यावे, आंइ परमप्रभु इस्राएल कली पाप रे प्रोंइब बाक्ब।<sup>24</sup> गोपुकी आंइ ठिटा ठिटी रेन मेको मुने तोक्ब गेयमी आंइ किकी पिपी रे श्येत पा गेय पशो नेल्ल नेक्तु। मेको आन क्यारश भेडा, आन बी ब्यफ नु आन तमी तौ आन कली नेक्तु।<sup>25</sup> मुल गो इं मुनेम गुम्या। मिनु इं दोस ततीकेमी इं कली सुमल। मारदे हना गो परमप्रभु यावे, इं परमप्रभु कली पाप पाइतया। इं किकी पिपी नु गो इं ठिटा ठिटी रेन मुल सम्म परमप्रभु यावे, इं परमप्रभु आ देंशो मटिशो बाक्तय" देंतेक्म।  
येरमीया १४:७,२०

परमप्रभुमी इस्राएल कली ब्रेश्शो

<sup>4</sup> परमप्रभु यावेम "गे इस्राएलीपुकी, आं गे लेशशा जाक्तीनी हना, गेपुकीम इन ग्रांया दिशो थोव्रक आं डोंइती रे ताइक्ताक्नी हना, गेपुकी हेंथे मगाक्ब दुस्तीनी।<sup>2</sup> कसम जची ना गेपुकीम 'परमप्रभु यावे ब्रोंइशा बाक्शो खोदेंशो पा' दे कसम जाइतीनी हना, गे थमा लोव्र पा, ठीक निसाफ पाइब नु रिश्शो थुं पाइब मुर दुस्तीनी हना, रागी रागी डा मुर परमप्रभु आ नें थिशा आसीक पमुइनीम। मिनु मेकोपुकी आ आल दुस्तीके ग्येरसीनीम" देंते। ब्यवस्था १०:२०; यसैया ६५:१६<sup>3</sup> मिनु परमप्रभु यावेमी यहूदा डा मुर नु यरूसलेमम बाक्ब आन कली "इन कोक्त रूमी डल्ला थोक्तीन। चू आन दातेमी मशोक्कीन। इजीकीएल १०:१२<sup>4</sup> परमप्रभु यावे आ पर्वम खोइक्तीक चिनु खोंइसीन। तन्न इन थुंम खोइक्तीक चिनु खोंइसीन। गे यहूदा डा मुरपुकी नु यरूसलेममी बाक्ब वोंइशमुरपुकी, मो मपाइतीनी हना, इन मरिश्शो पतीके आं गाइक्चा मी खोदेंशो पा ब्रशा गूब।

मिनु सुइम काप्ने मचाप्चा डा पा मेकोमी जेक्ब" देंते। येरमीया ९:२५; ब्यवस्था १०:१६; रोमी २:२९; कलस्सी २:११; येरमीया ६:७,१०

उत्तर रे श्येत जाक्शो

<sup>5</sup> परमप्रभु यावेमी "यहूदामी शेंदीन। मिनु यरूसलेमम उरदी पने। गे रागी नेल्लेमी तुराही तपीन। ठेयब सेंदा पा 'नेल्ल गुम्या। मिनु गो ठेयब गारो हिरशो सहरमी प्रोक्व'<sup>6</sup> सियोन गे लचा कली छेदर क्युक्कीन। ब्रोंइचा आ पर्वम देश मपथु रीब पा प्रोक्शा लने। मारदे हना गो उत्तर रे ठेयब श्येत नु खतम दुस्तीके चाक्नुड। येरमीया १:१४<sup>7</sup> गुप्स का आ पुक्खी रे गूशा, जाक्शो बाक्ब। रागी रागी कली खतम पोक्ब का गूब। मेको आ बाक्तीके रे गूशा, इन रागी कली मुर मबाक्तीके सेल्ब। इन सहर डा खिं नेल्ल ब्रेल्नीम। मेकेर मुर बाक्ने मचाप्तीम। येरमीया २:१५; येरमीया ५:६; येरमीया २५:३८; येरमीया ४९:१९; येरमीया ५०:४४<sup>8</sup> मोपतीके अरन्डी फेक्शा रोंका पने। मिनु डाक्कीन" देंते। मारदे हना परमप्रभु यावे आ हिंचा डा पा गाइश्शो इं रे मयाक्सीशो बाक्ब। येरमीया ६:२६

<sup>9</sup> मिनु परमप्रभु यावेम "मेको नाक्ती पिप नु हुकुम पाइब नेल्ल आन थुं लुक्च लाइब। चढेबपुकी हिंशा ग्येथ लुक्च दुस्तीम। मिनु परमप्रभु यावे आ लोव्र पाइबपुकी ग्रीचोक पा हिंनीम" देंते।<sup>10</sup> मिनु गो "परमप्रभु, ए परमप्रभु यावे, गो आंइ शुरमी तरवार जाक्मेनु यो, गे 'इन थुं नाइश्शा बाक्कीन' दे गे एको मुर नु यरूसलेम कली मरिश्शो पा जौल पाइश्शो बाक्तीनी" देंती।  
येरमीया ६:१४

<sup>11</sup> परमप्रभुमी "मेना मार लोव्र पाइनीम देंशा हना 'एको मुर नु यरूसलेम कली गोरशो रागी डा डांडा रे होश फश आं प्रुडग मुर आन बाक्तीक जाक्ब। तन्न मेको फशेम क्राप्चा यो मदुम्ब, हारचा यो मदुम्ब।<sup>12</sup> मेको फशेम मेको पने मचाप्ब। मारदे हना मेको शुश बोल्यो फश गिवार बाक्ब। मिनु गो मेको आन कली निसाफ पतीक लोव्र पाइनुडमी।<sup>13</sup> कोव्रडीन, मेको गोस्स खोदेंशो पा गाक्शो बाक्ब। मेको आ बग्गी फश गिवार खोदेंशो पा जाक्नीम। मेको आ शारा ककाकुली आन क्येडा रीब पा दोरनीम। आबी, गो खतम दुस्तय' दे लोव्र पाइनीमी" देंते।<sup>14</sup> मिनु परमप्रभु यावेम "ए यरूसलेम, गे पाप रे ब्रोंइचा तचा कली इ थुं इ परमप्रभु यावे कली मटितीके रे चिक्सो। गेना सम्म इ मरिश्शो मिम्तीक इ थुंम बाक्चा गेनेवे? येरमीया ६:८; यसैया १:१४<sup>15</sup> दान रे सेंदा कामी 'एफ्राइम डांडा रे खतम दुस्तीके जाक्ब'।<sup>16</sup> रागी रागी डा मुर आन कली एको लोव्र पावो। एक जाक्तेक्म। यरूसलेम कली डोन रागी रे सहर पुम्चा कली लडाइ पाइब जाक्शो बाक्नीम। मिनु यहूदा डा सहर आन पर्वम लडाइ पा ग्रीनीमी।<sup>17</sup> मेकोपुकी रू खाल पाइक्बपुकी खोदेंशो पा, एर ओथ नेल्ल हिरशा बाक्शो बाक्नीम। मारदे हना मेकेर डा मुरपुकी आं कली काइ मटीब बाक्नीम" दे परमप्रभु यावेमी देंते। येरमीया १:१५; येरमीया ६:३<sup>18</sup> मिनु परमप्रभु यावेमी "इ दूली लां गाक्तीके नु इ पतीके इ कली मोदेंशो दुश्शो बाक्त। इ सजाइ मेकोन बाक्ब। मेको शुश कशो बाक्ब। मिनु मेकोमी इ थुं खाइक्पाइक्नु" देंते।

<sup>19</sup> मिनु गो हिंती, हिंती। गो श्येत जशा हुकयी पाइनुड। आं लुडगीर खाइश्शा, तुक तुक पाप्नु। गो सिक्सी पा बाक्ने मचाप्नुड। मारदे हना गो तुराही ताप्शो नेंता। मेको लडाइ डा रेयके बाक्ब।<sup>20</sup> खतम दुस्तीक तार खतम दुस्तीक जाक्ब। रागी नेल्ल मुर मबाक्तीक दुस्त। आं ताम्बु नु फारतीक वा नेल्ल याम काम खतम दुस्तेक्म।<sup>21</sup> गो गेना सम्म लडाइ डा छेदर तचा माल्नुडा? मिनु गेना सम्म तुराही ताप्शो नेंचा माल्नुडा? <sup>22</sup> आं मुर मूर्ख बाक्नीम। मेकोपुकीमी आं कली मतुइक्नीम। मेको निप्स मपाइश्शो आल बाक्नीम। मेको आन के रुपतीक मबाक्ब। मेको मरिश्शो पचा कली जोक्ब बाक्नीम। तन्न रिश्शो पस मजोक्नीम। यसैया २७:११

<sup>23</sup> मिनु "गो रागी कली कोव्रता। मेको मारेइ मबा। मिनु मेकेर नेल्ल श्येतथ बाक्त। मिनु सरीड गे कोव्रडनु, मेकेर मारेइ छेडछेड मबाक्म। उत्पत्ती १:२<sup>24</sup> मिनु गो डांडा आन कली कोव्रडनु, मेकोपुकी खिंखि पशो बाक्तेक्म। पहाड नेल्ल एर ओथ हिम्सीशो बाक्तेक्म।<sup>25</sup> मिनु गो कोव्रडनु, सुइ मबाक्शो बाक्त। सरीड डा चिक्ब नेल्ल बेरशा प्रोक्ने थुम्शो बाक्तेक्म।<sup>26</sup> मिनु कोव्रडनु, रिश्शो खप बाक्शो रू नेल्ल गोरशो रागी दुस्तेक्म। मिनु

मेकेर डा सहर नेल्ल ब्रेशो बाक्तेक्म। मोदेशो पा परमप्रभु यावेमी आ शुश गाइक्तीकेमी पाप्तु” देंती। 27 मिनु परमप्रभु यावेम मार, देंत देंशा हना “रागी नेल्ल मुर मबाक्तीके दुस्त हना यो, गो मेको नेल्ल मक्याम्नुडमी। *येरमीया ५:१८; येरमीया १०:२४; येरमीया १८:३-८; आमोस ९:८* 28 मोपतीके रागीम रोंका पचा माल्ब। मिनु सरीड छिडछिड दुम्चा माल्ब। मारदे हना गो लोव्र पाता। गो डोंइती मिम्ताक्ड। आं थुं मलेप्ब। आं थुं महिरब।

29 शारा डोइक्बपुकी नु लिब्रा आण्ब आन सेंदा नेंशा, सहर नेल्ल डा मुरपुकी प्रोक्शो बाक्नीम। मिनु मेको ब्वाकीम प्रोक्शा खुइक्नीम। का निक्शी फुल्लु तार डोइश्शा लाइनीम। सहर नेल्ल प्रॉइशो बाक्नीम। मेकेर सुइ मबाक्नीम। 30 गे गोरशो सेल्चा पुंडसीशो रागी मार, पना पन बाक्डे? गे लल वाम ग्योम्सीशा, सुन के गहना पांडसीशा, आंम कली ग्योम्सीशा आ अर्थ मार, बाक्बा? गे मारदे गाजल खेक्सीशा इ मिक्च ठेयब सेल्नेवे? आंम कली दारशो सेल्चा मोशान बाक्ब। इ कली दाक्ब मुरपुकीम इ कली ग्रांरा दिश्शो बाक्नीम। इ कली साइक्वा माल्शो बाक्नीम। 31 गो सुत्केरी रोइ पशो मीश मुर आ सेंदा खोदेशो नेंता। मेको डोंइती डा आल थिचा चिक्शो मीश मुर आ सेंदा खोदेशो बाक्त। सियोन आ तमीमी आ गुइ दिंशा आ सास कीशा ‘आबी, आं कली साइक्ब आन डोंइती थाइनुड’ देंत” दे परमप्रभु देंत।

मुर का यो रिश्शो मबाक्नीम देंशो

5 परमप्रभुमी “यरूसलेम डा लां आ एर ऑथ कोव्रशा गाक्को। नेल्ल कोव्रशा इ तशो नेल्ल ब्रेक्तो। आ लाडगा मेर माल्शा कोव्रडो। मिनु मेकेर ठीक गेय पाइब नु थमा लोव्र माल्ब मुर का यो थिल्लीवी हना, गो यरूसलेम कली माफ गेनुड। *उत्पत्ती १८:२२-३२* 2 मेकोपुकीमी ‘परमप्रभु यावे ब्रॉइशा बाक्शो खोदेशो पा’ दे कसम जाइनीम। मो हना यो मेकोपुकीमी जोल लोव्र पाइनीम” देंत। *येरमीया ४:२* 3 मिनु “परमप्रभु यावे, गे थमा लोव्र तचा ममाल्नीनी डा? गे मेको आन कली तुप्तीनी। तन्न मेकोपुकी मखाइक्म। गे मेको आन कली खतम सेल्तीनी। तन्न मेकोपुकीमी इन देंशो पचा मबिल्लीम। मेकोपुकीम आन कुल फुल्लु क्येडा यो खकटा सेल्तेक्म। मेकोपुकी लेशा जाक्ने मबिस्सम। *येरमीया २:३०; येरमीया ७:२८; येरमीया ९:२; यसैया ४८:४* 4 मेकोपुकी दा प्रुडग ला बाक्नीम। मेकोपुकी मूर्ख बाक्नीम। मारदे हना मेकोपुकीम परमप्रभु यावे आ लां मतुइक्नीम। आन परमप्रभु आ अरेशो मतुइक्नीम। 5 गो शुश क्येट थीब मुर आन बाक्तीके लशा, मेको आन कली लोव्र पाइनुड। मेकोपुकीम थमा पा परमप्रभु यावे आ लां, आन परमप्रभु आ अरेशो यो तुइक्नीम” देंती। तन्न मेकोपुकी खाल का डा दुम्शा, जुवा जिक्शो बाक्तेक्म। मिनु डोरी यो प्रोइश्शो बाक्तेक्म। *येरमीया २:२०*

6 मोपतीके परमप्रभुमी “ब्वाकी डा गुप्स कामी मेको आन कली ग्रांशा साइक्ब। गोरशो रागी डा फर कामी मेको आन कली खतम सेल्ब। जोइ का मेको आन सहर कोव्रना कोव्रन बाक्शो बाक्ब। सु मेकेर रे गूबा, मेकोमी मेको कली क्राइश्शा चोकटा लाम्टा सेल्ब। मारदे हना मेकोपुकी शुश हेंथे गाक्ब बाक्नीम। मेको आन मटितीके ठेयब बाक्ब” देंत। *येरमीया ४:७*

7 मिनु परमप्रभु यावेम “गो इन कली दोपा माफ गेने चाप्नुडा डा? इन आलपुकीम आं कली प्रॉइतेक्म। मिनु परमप्रभु आ नेंम ममाइ, अर्को देवी देवता आन नेंमी कसम जाप्तेक्म। गो मेको आन माल्शो नेल्ल खाप्ता हना यो, मेकोपुकीम तेल्लेम पाप्तेक्म। मिनु तेल्लेम आन खिंम क्राक्थी चोक्थी दुप्तेक्म। 8 मेकोपुकी थाम्पा दोम्शो, गेय मपाइब शारा खोदेशो बाक्नीम। मेको आंम नेक्था डा मुर आन मीश आन पर्वम ग्रीनीम। *इजीकीएल २२:११* 9 मार, गो एको आ पर्वम मेको आन कली सजाइ मगेनुडमी डा? मार, गो ओदेशो रागी डा मुर आन कली क्येक्क मलेत्नुडमी?” दे परमप्रभु यावेम देंत। *येरमीया ५:२९; येरमीया ९:८*

10 परमप्रभु यावेम आं कली “गे मेको आन अडगुर बोट दिंशा ताइश्शा पावो। तन्न नेल्ल श्येत्य मपोक्को। मेको आ राशी इल्तो। मारदे हना मेको परमप्रभु यावे आ मुर मनम। 11 मारदे हना इस्राएल नु यहूदा डा मुरपुकीम थमा पा प्रॉइतीमी” देंत। 12 मेकोपुकीमी परमप्रभु यावे आ पर्वम “मेको

मतुइक्नीकी। मेकोमी मारेइ मपाइब। गो मारेइ मरिश्शो मताइनीक। गो लडाइ नु अन्काल मताइनीक। 13 परमप्रभु यावे आ लोव्र पाइबपुकी फश बाक्नीम। मारदे हना परमप्रभु यावे आ लोव्र मेकोपुकी नु मबा। तन्न मेको लोव्र मेको मो देंब आन कली दुम्ब” देंतेक्म।

14 मोपतीके परमप्रभु यावे, मुर नेल्ल आन परमप्रभुमी मार देंत देंशा हना “मेकोपुकीमी मोदेशो लोव्र पतीके, गो आं लोव्र इ शोव्रम मी खोदेशो सेल्नुड। मेको मुर आन कली शी सेल्नुड। मिनु मेको मीम नेल्ल आन कली दाक्ब सेल्नुडमी। 15 ए इस्राएल, इन कली खतम सेल्चा कली डोन रागी डा मुर चाक्नुड। मेको रागी डा मुरपुकी शुश बोल पाइश्शो बाक्नीम। आन रागी साइ डोंइती डा बाक्ब। गे मेको मुर आन लोव्र मतुइक्नीनी। आन ब्वाक्शो मरुजीनी। *येरमीया ६:२२; यसैया २८:१* 16 मेको आन ब्रा कुरतीके रोकशो तुरस खोदेशो बाक्नीम। मेको मुर नेल्ल थम सक्ति पाइश्शो लडाइ पाइब बाक्नीम। 17 मेकोपुकीमी इन खुप्शो अन्न नु जचा थोव्रक नेल्ल नेक्नीम। मिनु इन तमी तौ नेल्ल आन कली यो लाइक्नीम। मेकोपुकीमी इन क्यारश भेडा नु बी ब्यफ नेल्ल नेक्नीम। मेकोपुकीमी इन अडगुर नु फोव्रशी नेल्ल नेक्नीम। मिनु इन थमा सुइश्शो बोल्यो गारो हिरशो सहर नेल्ल तरवारम क्याम्नीम।

18 मो हना यो, गो मेको नाक्ती इन कली नेल्ल मसाइक्पाइक्नुड। *येरमीया ४:२७* 19 मिनु इन मुरपुकीम ‘मारदे इं परमप्रभु यावे, इं परमप्रभुमी इं कली ओदेशो पवा?’ दे हिलो पाप्तेक्म हना, गे मेको आन कली ‘गेपुकीम दोपा आं कली प्रॉइशा, आंम रागीम अरु देवी देवता आन कली पूजा पनी, मोपा मुल गेपुकीम इन मतुइश्शो रागीम अर्को रागी डा मुर आन गेय पाइनीनी’ देंशो बाक्ब माइक्मी। *येरमीया १६:१०-१४*

20 याक्ब आ मुर आन कली एको लोव्र माइक्मी। यहूदामी एको लोव्र ठेयब सेंदा पा नेल्ल आन कली नेंपाइक्मी। *यसैया ६:९-१०; मत्ती ८:१८* 21 गे मूर्ख नु मिम्तीक मपाइश्शो मुरपुकी, एको लोव्र नेनीन। इन मिक्वी बाक्ब, तन्न मताइनीनी। इन नोफा बाक्ब, तन्न मनेनीनी। 22 मार, गे आं कली मान पा हिंचा ममाल्नीनी डा? गे आं डोंइती खिंखि मपाइनीनी? गो समुन्द्र आ सांद कली बाल्वा वोइक्ता। आ छाल बोक्तेक्म हना यो, मेको कली ख्वाक्ने मचाप्नीम। मेकोपुकी शुश बोल पाप्तेक्म हना यो, मेको कली लाक्ने मचाप्नीम। ठेयब रेयके पाप्तेक्म हना यो, लाक्ने मचाप्नीम। *बजन संग्रह १०४:९* 23 तन्न मेको मुर आन थुं खकटा नु काइ मटीब बाक्ब। मेकोपुकी हिरशा लाम्तेक्म। 24 मेकोपुकीमी ‘गेपुकी परमप्रभु यावे, इं परमप्रभु कली मान पा हिंच। मेकोमी माल्ची ना रेउ गेब। मेकोम बर्खा नु हिंउद डा रेउ गेब। मिनु अन्न रिक्शा खुप्ची ना डा नाक्ती गेब’ मर्देम” देंत। *ब्यक्स्था ११:१४* 25 परमप्रभु यावेमी “इन मरिश्शो पशोम एको नेल्ल मरिश्शो दुस्त। इन पाप आ पर्वम गे मेको रिश्शो मताइनीनी। *यसैया ५९:२* 26 आं मुर आन दातेमी मरिश्शो पाइब मुर बाक्नीम। मेकोपुकी चिक्ब साइक्ब मुर खोदेशो पा, बाप्शा बाक्शो बाक्नीम। मेकोपुकीम मुर आन कली ग्याइक्चा कली ब्वारद दाइक्नीम। 27 चिक्बीम ब्रीशो ओगील खोदेशो पा, मेको आन खिं खुइ पशो थोव्रकम ब्रीशो बाक्ब। मोपतीके मेको ठेयब मुर नु शुश क्येट थीब दुप्तेक्म। 28 मेकोपुकी दोम्शा लल जिशो नु शॉप पाइश्शो दुम्शो बाक्नीम। मेको आन परमप्रभु यावे आ अरेशो मटितीके कली तेक्तीक मारेइ मबाक्ब। मेकोपुकीम रोम रोइक्च आन कली रिश्शो दुम्ल, दे मेको आन कली ठीक निसाफ मगेनीम। मेकोपुकीमी क्येट मथीब आन कली वारच पा ठीक निसाफ मपाइनीम। *प्रस्थान २२:२१; यसैया १:१७* 29 मार, एको आ पर्वम, गो मेको आन कली सजाइ मगेनुडमी? मिनु गो एको रागी डा मुर आन कली क्येक्क मलेत्नुडमी?” दे परमप्रभु यावेमी देंत। *येरमीया ५:९*

30 मिनु परमप्रभु यावेम “एको रागीम ग्रांरा दिचा डा नु शुश हिंचा डा श्येत दुस्त। 31 परमप्रभु यावे आ लोव्र पाइबपुकीम जोल पा लोव्र पाइनीम। दोपा परमप्रभु यावे आ लोव्र पाइबपुकीम जोल पा लोव्र पाइनीमी, मोपा चढेबपुकीम मुर आन कली हुकुम पाइनीम। मिनु आं मुरपुकी चहिं मोदेशो न दुम्चा दाक्नीम। तन्न नोले डा नाक्ती मार, पाइनीनी?” देंत। *इजीकीएल १३:६*

## यरूसलेम कली पुश्तो

6 परमप्रभु यावेमी “बेन्यामीन आ आलपुकी ब्रॉइशा बाक्वा कली यरूसलेम रे प्रोक्कीन। तेकोहा सहरमी तुराही ताप्पीन। बेथ-हक्केरेम तार चिन्ड कौंइशा वोतीन। मारदे हना उत्तर रे मरिश्शो पतीक नु खतम दुम्तीके यिंशो बाक्ब। *आमोस १:१; येरमीया १:१४* 2 सियोन सहर दारशो योव्रतीके खोदेंशो बाक्ब। तन्न सियोन आ तमी क्याम्चा पुंडसीब। 3 गोठला आन हुल सुन्दा मेको नु लडाइ पचा कली जाक्नीम। मेकोपुकीमी आन ताम्बु आ एर ओथ कीनीम। मिनु नेल्लेम मेको आन हुल योव्रशा खतम सेल्नीम” देंशो बाक्ब। *येरमीया ४:१७* 4 मिनु मेकोपुकीमी “मेको नु लडाइ पचा कली ठीक दुमीन। बोक्कीन। गोपुकीम नाक्त उइक्थ दुम्मेनु, मेको कली लडाइ तोय। नाक्ती लाक्ना लाक्न बाक्ब। नाक्दो डा वांकु लाइश्शो दुम्ना दुम्न बाक्ब। 5 बोक्कीन। गो नाक्दो मेको कली लडाइ तोय। मिनु मेको आ दरवार प्रेय्य” देंनीम। 6 मुर नेल्ल आन परमप्रभु यावेम “मेको आ रवापुकी क्योरशा तिमीन। मिनु यरूसलेम डा गारो डोइक्तीक सेलीन। मेको सहर कली सजाइ गेचा माल्ब। मेको सहर मरिश्शो पतीकेम ब्रीशो बाक्ब। 7 इनारम दोपा आ ब्वाक्कु बारपाइक्बा, मोपा मेकोमी आ परमप्रभु यावे आ अरेशो मटितीके बारपाइक्ब। मेको आ आगाम काइ मरिश्शो पतीक नु मारेइ मारेइ खतम पोक्तीक आ पर्बम लोव्र नेंसीब। मेको आ रोइ नु आ सेल्शो गार गेना हना यो आं डोंइती बाक्नीम। 8 गो यरूसलेम, एको इ कली अरेशो मपाप्तीवी हना, गो इ कली तशा ग्रांघा दिशा प्रॉइनुड। गो इ कली गोरशो नु मुर मबाक्वशो सेल्नुड” दैत। 9 मुर नेल्ल आन परमप्रभु यावेमी मार दैत, देंशा हना “गे अडगुर रिश्शो पा सिला पशो खोदेंशो पा इस्त्राएल डा लीशो मुर आन कली सिला पने। अडगुर सेक्ब मुर खोदेंशो पा राशी ग्याइश्शा, फल सिला पने। 10 गो सु कली लोव्र पा हिंच कौंइडु? आं लोव्र सुम नेंबा? मेकोपुकीम नेंने मचाप्पीम। मेको आन नोफा सुशो बाक्नीम। परमप्रभु यावे आ लोव्र आ पर्बम गाइक्नीम। मेको नेंचा मदाक्नीम” दैत। *येरमीया ४:४; प्रेरित ७:५१* 11 तन्न गो परमप्रभु यावे आ गाइक्तीकेम ब्रीशो बाक्नुड। गो मेको हेरा तेक्ने मचाप्नुड। मिनु मेकोमी “मेको लां मेर गाक्ब आल आन तार मोतो। बुक्शा बाक्वशो ठिटा आन तार मोतो। मीश वोंइश निम्फा लाइक्वा पुंडसीनीस। खाल्पा नु खूशो लाइक्वा पुंडसीनीम। 12 मारदे हना गो आं गुड मेको रागीम बाक्ब आन तार दिनुड, मेको आन खिं अर्को आन के दुम्नीम। आन रू नु आन मीश यो अरु आन के दुम्नीम” दे परमप्रभु यावेम दैत। 13 परमप्रभु यावेमी “नेल्ल क्येडा आइक्व मुर रे नेल्ल क्येडा ठेयब सम्म ठीक पा मचेश्शो क्येट तचा कली शिंम दुश्शो बाक्नीम। परमप्रभु यावे आ लोव्र पाइब रे चढ़ेब सम्म नेल्ल जोल पाइब दुश्शो बाक्नीम। *येरमीया ८:१०-१२; इजीकीएल १३:१०-१६; शिथिस्सलोनिकी ५:३* 14 मेकोपुकीमी आं मुर आन कली ममिम्थु, आन गार सापाइक्वु पशो बाक्नीम। मेकोपुकीमी थुं नाइक्तीक मबाक्त हना यो ‘नांइसीन, नांइसीन’ देंनीम। 15 मेकोपुकीमी मुने दोक्वा डा गेय पाम्तेक्म। ग्रांघा दिशो गेय पाम्तेक्म। तन्न मेकोपुकी मुने मदोक्म। मुनेम लल जिचा देंशो मार, बाक्बा, दे मतुइक्तेम। मोपतीके साइक्वा पुंडसीशो आन दातेमी साइक्वा पुंडसीनीम। गो मेको आन कली सजाइ गेडानु, मेको खतम दुम्नीम” दे परमप्रभु यावेमी दैत। 16 मिनु परमप्रभु यावेम मार, दैत देंशा हना “लां ब्रातीकेम राष्ठा कोव्रडीन। माइत लां आ पर्बम हिल्लो पने। मेको रिश्शो लां ते बाक्बा, दे हिल्लो पने। मिनु मेको लांमीन गाक्कीन। मिनु इन थुं नाइक्वा ताइनीनी। तन्न मेकोपुकीमी ‘गो मेक मगाक्नीकी’ देंनीम। *मत्ती ११:२९* 17 गो इन कली खाल पाइबपुकी योव्रतामी। मिनु गो इन कली ‘तुराही ताप्पो नोफा दाइश्शा नेनीन’ दैती। तन्न मेकोपुकीमी ‘गो मनेनीकी’ दैतेक्म। 18 मोपतीके गे रागी रागी डा मुर नेनीन। बुक्तीक डा मुर नेल्लेमी मेको आन कली मार, दुम्बा, दे तुइक्तीन। 19 रागी नेल्ल नेनीन। गो एको मुर आन कली ठेयब श्येत चाक्नुड। मेको श्येत आन पशो आ पा डा बाक्ब। मारदे हना मेकोपुकीमी आं पचा देंशो लोव्र मपामे। मिनु आं शेंशो लोव्र काइ मटीम। *यसैया १:२* 20 गो शेबा रे चाक्वो धूप ममाल्नुड। डोन रागी रे चाक्वो बिक्च यो ममाल्नुड। गो इन चोशा चढ़ेशो

मबाइनुड। गो इन क्योरशा चढ़ेशोम मग्येरनुड” दैत। *भजन संग्रह ४०:७; यसैया १:११-१५* 21 मोपतीके परमप्रभु यावेम मार, दैत देंशा हना “कोव्रडीन, गो एको मुर आन डोंइती दाइल पाइक्तीके थोव्रक वोइक्नुड। मिनु आम आफ, आलपुकी कालेम नु आन नेक्वा डा मुर नु आन वारच कालेम खतम दुम्नीम” दैत।

22 परमप्रभु यावेमी “कोव्रडीन, उत्तर डा रागी रे हुल का मुर जाक्नीम। रागी आ सुर रे ठेयब रागी डा मुर बारशा जाक्नीम। *येरमीया ५:१५; ब्यक्था २८:४९* 23 मेकोपुकी लिब्रा नु तरवार शेशा ठीक दुश्शो बाक्नीम। मेकोपुकी मरिश्शो पाइब नु काइ शिशी मपाइब बाक्नीम। आन रेयके समुन्द्र ग्रीशो खोदेंशो बाक्ब। मेकोपुकी शारा डोइश्शा सियोन आ तमी, इ कली लडाइ तोचा कली ठीक दुश्शो बाक्नीम” दैत। *येरमीया ५०:४२*

24 गोपुकीमी मेको आन पर्बम मारेइ मारेइ लोव्र नैतक। मिनु आंइ गुड खोइली योक्त। गो शुश हिंतक। गो सुक्केरी रोइ पशो मीश मुर खोदेंशो दुम्तक। 25 “रू मेर मलने। लां मेर मगाक्कीन। मारदे हना इन जोरी सनु आन गुडमी तरवार बाक्ब। मिनु एर ओथ नेल्ल शुश हितीक बाक्ब” देंशो नैतक। *येरमीया २०:३*

26 मिनु “आं श्येत जाइब मुरपुकी अरन्डी फेक्सीन। मिनु इन पिया तारी पुलु फुंडसीन। का ला बाक्वशो आल बेक्वशो आ पर्बम खोदेंशो पा रोंका पने। मारदे हना आंइ कली साइक्ब याम काम जाक्ब” दैत। *येरमीया ४:८; आमोस ८:१०*

27 परमप्रभु यावेमी “गो इ कली आं मुर आन पशो नाक्ब नु रिश्शो सेल्ब सेल्तन। मोपा गे मेको आन पशो तुइश्शा, मार, पाइनीमी, दे नाक्ने चाप्नेवे।

28 मेको नेल्ल आन थुं खकटा बाक्शा, काइ मटीब बाक्नीम। मेकोपुकी जोल पा सांकछी बाक्ब नु गाक्नीमी। मेकोपुकी कांसा नु फलाम खोदेंशो खकटा बाक्नीम। मेको नेल्ल मरिश्शो बाक्नीम। *इजीकीएल २२:१८*

29 मुरुमी यपाइक्वा कली भाटी कीना कीन मी ठेयब सेल्नीम। तन्न यपाइक्तीक गेय मोशा दुम्त। मारदे हना परमप्रभु यावे आ अरेशो मटीब आन कली तिल्शो बाक्नीम। 30 तन्न मेको आन कली मरिश्शो तिल्शो चांदी, दे नें वोइक्नीम। मारदे हना परमप्रभु यावेम मेको आन कली तिल्शो बाक्त” दैत। *१राजा ९:७*

येरमीया कली लोव्र पपाइश्शो  
येरमीया २६:-

7 परमप्रभु यावेम येरमीया कली, 2 “गे आं खिं डा लाप्चोम राष्ठा ‘गे यहूदा डा मुर नेल्ल परमप्रभु यावे आ लोव्र नेनीन। गे परमप्रभु यावे कली ठेयब सेल्चा कली एक जाक्ब यहूदा डा मुर परमप्रभु यावे आ लोव्र नेनीन’ दैतो” दैत। 3 मुर नेल्ल परमप्रभु यावे, इस्त्राएली आन परमप्रभुमी मार, दैत देंशा हना “इन गाक्तीक लां नु इन पशो नेल्ल रिश्शो सेलीन। मो पाइतीनी हना, गो गेपुकी नु एकेर बाक्नुड। *येरमीया १८:११; येरमीया २५:५; येरमीया २६:१३; यसैया १:१६* 4 मिनु ‘एको परमप्रभु यावे आ खिं बाक्ब। एको परमप्रभु यावे आ खिं बाक्ब। एको परमप्रभु यावे आ खिं बाक्ब’ देंशो जोल लोव्र थमा मसुतीन।

5 गेपुकीमी थमा पा इन गाक्तीक लां नु इन पशो रिश्शो सेल्तीनी हना, गे थमा पा अरु मुर आन कली ठीक नु रिश्शो पाइतीनी हना, 6 गेपुकीमी अर्को रागी डा मुर आन कली, रोम रोइक्च नु आन वोंइश बेक्वशो मीश मुर आन कली मदिप्तीनी हना, दोस मताइब मुर आन कली मसाइक्तीनी हना नु आंम इन कली श्येत सेल्चा, दे देवी देवता आन नोले मखोइक्तीनी हना, *येरमीया ५:२८* 7 गो गेपुकी नु एक बाक्नुड। साइ डोंइती इन किकी पिपी आन कली गेशो रागीम गेना हना यो गेपुकी नु बाक्नुड।

8 तन्न गेपुकी दा जोल लोव्र कली थमा सुइक्नीनी। मेको नेल्ल मोशा बाक्नीम। 9 गेपुकीमी खुइ पाइनीनी, मुर साइक्नीनी, मुर आन मीश नु इप्नीनी, जोल पा कसम जाइनीनी, बाल देवता कली पूजा पाइनीनी नु इन मतुइश्शो देवी देवता आन नोले खोइक्नीनी। *होसे ४:२* 10 मो हना यो आं डोंइती आं नें बाक्वशो खिंम राष्ठा बाक्नीनी। आं डोंइती राष्ठा ‘गो रिश्शो बाक्नीकी’ देंनीनी। मेकेर रे लेश्शा इन ग्रांघा दिचा डा गेय लेंशा पाइनीनी। 11 मार, आं नेंमी बाक्वशो आं खिं इन डोंइती रोइक्ब आन बाक्तीक खिं

दुम्मे? गो यो इन कली कोव्रना कोव्रन बाव्नुड। मत्ती २१:१३<sup>12</sup> मुल आं बाक्तीक शिलो लने। गो मेकेर डोंइती आं नेंमी बाक्तीक सेल्शो नड। मिनु गो इस्राएल डा मुर आन कली आं अरेशो मटितीके मार पदु? मेकेर लशा कोव्रडीन। यहोसु १८:१; १सामुएल ४:४, १२; भजन संग्रह ७८:६०<sup>13</sup> मिनु गेपुकीम एको नेल्ल पना पन बाक्तीनु, गो इन कली गेना हना यो लोव्र पाता। तन्न गेपुकीम मननेनी। गो इन कली ब्रेत्ताक्नी, तन्न गेपुकीम लोव्र मलेत्तीनी। येरमीया २५:३; यसैया ६५:१२<sup>14</sup> मोपतीके गो मेको आं नेंम सेल्शो खिं कली नु इन किकी पिपी नु इन कली गेशो रागी कली शिलो खोदेशो सेल्नुड। गे मेको खिं कली थमा सुइक्तीनी।<sup>15</sup> मिनु गो इन कली आं डोंइती रे गुंइन्ननी। गो इन कली, इन लोव्ब एफ्राइम आ आल नेल्ल आन कली खोदेशो पा खेरनन्नी” दे परमप्रभु यावेमी देंत। २राजा १७:१८, २०, २३

<sup>16</sup> परमप्रभु यावेम आं कली “गे मेको मुर आन पर्वम मपुनो। मेको मुर आन पर्वम मारेइ मपुनो। मेको आन पर्वम आं कली लोव्र मपावो। मारदे हना गो इ पुंइशो मननेनुड। येरमीया ११:१४; येरमीया १४:११; येरमीया ३७:३; येरमीया ४२:२; प्रस्थान ३२:१-११; १सामुएल १२:२३<sup>17</sup> गे मेको यहूदा डा सहर नु यरूसलेम डा लां मेर पशो मतवी? येरमीया १९:१३; येरमीया ४४:१७-१९; यसैया ६:५, ११<sup>18</sup> मेको आन आलपुकीम शी खुन्नीम। आन आफपुकीम मी मुइक्नीम। मिनु मीश मुरपुकीम सरीड डा पिपीम कली बटुक चोचा कली फस नीनीम। अरु देवी देवता आन कली तूचा थोव्रक चढेनीम। आं कली गाइक्पाइक्वा कली मो पाइनीम।<sup>19</sup> मिनु मार, मेकोपुकीमी आं कली गाइक्पाइक्वा कली मो पशो मनमी डा? मिनु मार, मेकोपुकीमी श्येत जचा कली मो पशो मनमी डा?” देंत<sup>20</sup> मोपतीके परमप्रभु, परमप्रभु यावेम “आं गाइश्शो नु आं चुरशो मेकेर मोइक्वा माल्ब। मुर, बी ब्यफ, क्यारश भेडा, रू डा रवा नु रागी डा मारेइ मारेइ आन तारी मोइक्वा माल्ब। मेको मकाप्व मीम नेल्ल दाक्ब” दे परमप्रभु यावेमी देंत।

<sup>21</sup> मिनु मुर नेल्ल आन परमप्रभु यावे, इस्राएली आन परमप्रभुमी मार देंत देंशा हना “इन चोशा चढेतीकेम क्योरशा चढेतीके तेम्दीन। मिनु मेको श्ये ब्बने। १सामुएल १५:२२; भजन संग्रह ५०:७-१५; होसे ८:१३; मीका ६:६-८<sup>22</sup> मारदे हना इन किकी पिपी आन कली इजीप्त रे गुंइशा चाक्शो नाक्ती, गो मेको आन कली चोशा चढेतीक नु क्योरशा चढेतीक आ पर्वम लोव्र मपड। मिनु मेको आन कली मअरेडमी।<sup>23</sup> तन्न गो मेको आन कली मार अरेतीक का गेतामी देंशा हना ‘आं देंशो टिने। मिनु गो इन परमप्रभु नड। मिनु गे आं मुर दुम्नीनी। गो इन कली तेको लां लचा, दे अरेनुडा, मेको लां गाक्कीन। मो पाइतीनी हना, इन कली रिम्शो दुम्ब’ देंती। येरमीया ११:४; येरमीया २४:७; येरमीया ३०:२२; येरमीया ३१:१, ३३; येरमीया ३२:३८; लेवी २६:१२; इजीकीएल ११:२०; इजीकीएल १४:११; इजीकीएल ३४:३०; इजीकीएल ३७:२७<sup>24</sup> तन्न मेकोपुकीमी आं अरेशो मटीम। आं लोव्र मननेम। मेको आन खकटा थुं डा मरिम्शो पतीकेमी आंम दला दाक्स पास्तेक्म। आन ची हिरताक्म, आं कुल गे मकोव्रयीमी। येरमीया ११:८; यसैया ६५:२<sup>25</sup> इन किकी पिपी इजीप्त रे गूशा जाक्मा रे मुल सम्म नाक्त किंत किंत आं गेय पाइब, आं लोव्र पाइब नेल्ल आन कली मेको आन बाक्तीके सोइक्ताक्डमी। येरमीया २५:४<sup>26</sup> तन्न मेकोपुकीमी आं लोव्र मननेम। आं लोव्रमी आन नोफा मदाइक्तेम। मटीब ला दुम्तेक्म। मिनु मेकोपुकीमी आन किकी पिपी आन क्येडा यो शुश मरिम्शो पास्तेक्म। येरमीया १६:१२

<sup>27</sup> मिनु गे मेको आन कली एको लोव्र नेल्ल देंचा माल्नेवे। तन्न मेकोपुकीमी इ लोव्र मननेनीम। गे मेको आन कली ब्रेत्तीनु, यो मेकोपुकीमी इ लोव्र मलेत्तीम।<sup>28</sup> गे मेको आन कली ‘एको परमप्रभु यावे, आन परमप्रभु आ लोव्र मटीब रागी डा मुर बाक्तीम। सजाइ ताम्तेक्म हना यो, मरुबेम। मिनु मेको आ पचा माल्ब देंशो मपामे। थमा लोव्र जाम्त। मेकोपुकीम जोल ला पाइनीम। येरमीया ५:१<sup>29</sup> गे इ चां प्रेक्शा ताइक्तो। मिनु गोरशो डांडा मेर रोंका पा गाक्को। मारदे हना परमप्रभु यावेमी आ कली गाइक्पाइक्ब आन पाला डा मुर आन कली प्रोंइशा तिल्लु’ देनो” देंत। मीका १:३६

## मुर साइक्तीक बेंसी

<sup>30</sup> परमप्रभु यावेम “यहूदा डा मुरपुकीम आं डोंइती मरिम्शो पशो बाक्तीम। मेकोपुकीमी आं नेंम सेल्शो खिंम आन ग्रांरा दिशो थोव्रक वोइक्तेक्म। मोपा आं खिं ग्रांरा दिशो दुम्त। येरमीया ३४:३२; २राजा २१:४-५<sup>31</sup> मिनु मेकोपुकीमी तोफेथम आन थान सेल्तेक्म। मेको हिन्नोम आ तौ आ बेंसी बाक्ब। मेकेर आंम तमी तौ आन कली मीम चोशा चढेम्तेक्म। गो मोदेशो गेनायो ममिम्तु, मेको आन कली यो मअरेडमी। येरमीया १९:५-७; येरमीया ३२:३६; लेवी १८:२१<sup>32</sup> मोपतीके होस पा बाक्कीन। मेको बेंसी कली तोफेथ नु हिन्नोम आ तौ आ बेंसी देंचा प्रोंइनीम। शुश नाक्त रिम्चा ममाल्नीनी। तन्न मुर साइक्तीक बेंसी, दे नें वोइक्नीम। मारदे हना तोफेथमी आन बेक्शो मुर मरिक्शी थिम्नीम। येरमीया १९:६<sup>33</sup> मिनु मेको मुर आन बेक्शो रां सरीड डा चिक्बपुकी नु रागी डा जन्तु आन कली व्वतीक दुम्ब। मेको आन कली हिंच कोंइशा, प्रोक्पाइक्ब सुइ मबाक्तीम। येरमीया ९:२१<sup>34</sup> मिनु गो यहूदा डा सहर नु यरूसलेम डा लां रे थुं नाइश्शा बाक्तीक, ग्येरशो सेंदा नु ग्युम्ली ग्युम्ले आन सेंदा क्याम्नुड। मारदे हना रागी मुर मबाक्तीके दुम्ब” दे परमप्रभु यावेमी देंत। येरमीया १६:९; येरमीया २५:१०; येरमीया ३३:११

“मारदे मारेइ मोशा दुम्नीम” देंशो

**8** परमप्रभु यावेम “मेना यहूदा डा पिप आन रुश, सरकार आ गेय पाइब आन रुश, चढेब आन रुश, परमप्रभु यावे आ लोव्र पाइब आन रुश नु यरूसलेममी बाक्ब मुर आन रुश मेको आन तुरस रे याक्नीम।<sup>2</sup> मिनु मेको रुश नेल्ल, नां, तास्ला नु सोरुल आन डोंइती फ्रचा माल्नीम। मारदे हना मेको मुरपुकीमी मेको आन कली गेय पा शुश दाक्ताक्म। मेको आन नोले खोइक्ब दुम्तेक्म। मेको आन कली लां कोंइब सेल्शा पूजा पास्तेक्म। मेको रुश आन कली खुप्शा थिम्चा मदुम्ब। मेको खप कली मोव्रल दुम्चा माल्नीम। ब्यवस्था ४:१९<sup>3</sup> एको मरिम्शो खिं डा लीशो मुर नेल्लेमी, ते प्रोक्पाइक्तामी हना यो, मार देंनीम देंशा हना ‘गो ब्रोंइचा क्येडा यो बेक्चा दाक्तीकी’ देंनीम” दे मुर नेल्ल आन परमप्रभु यावेमी देंत।

पाप कली सजाइ

<sup>4</sup> गे मेको आन कली परमप्रभु यावेमी मार देंत, देंशा हना “मुरपुकी गोल्लीमी। मिनु मार, मेको लेंशा मबोक्नीमी डा? मिनु सुइ लां जाम्शा ग्युरा पेरा गे लमानु, मेकोपुकी लेशशा मजाक्नीमी डा? <sup>5</sup> मो हना यो एको मुरपुकी मारदे ची हिरशा गाक्मा? मारदे मेको नोले शोंइसीना सीन बाक्तीमी? आन मरिम्शो पतीके मप्रोंइथु, लेशशा जाक्ने मबिल्लीम। <sup>6</sup> गो, आं नोफा दाइश्शा नेंनु, मेकोपुकीम आं कली ठीक लोव्र मपाइनीम। आन मटिशो आ पर्वम माफ मपुंइनीम। मेकोपुकीमी ‘गो मरिम्शो पाता’ मर्देनीम। नेल्ल आन दला दाक्स पाइनीम। मेकोपुकी शारा खोदेशो पा लडाइम दोरनीम। <sup>7</sup> सरीडम बेरब सारसम आ लची ना नु लेत्वी ना तुइक्ब। मिनु डुकुर, बेल्लुम नु बोकुला आन लची ना नु लेत्वी ना तुइक्नीम। तन्न आं मुरपुकीमी आंम परमप्रभु यावे आ देंशो पतीक लोव्र मतुइक्नीम। यसैया १:३

<sup>8</sup> मिनु गेपुकीम दोपा ‘गो जोक्ब तुइक्ब बाक्तीकी। मिनु परमप्रभु यावे आ अरेशो लोव्र गो नु बाक्ब’ देंने चाप्नीनी? थमा पा देंशा हना, सास्त्री आन जोल पा ब्रेक्शोम मेको आन कली जोल सेल्शो बाक्ब। सास्त्री ब्रेक्चा जोक्ब मुर बाक्तीम<sup>9</sup> जोक्ब तुइक्ब मुरपुकी मुने तोक्वा पुंइसीनीम। मेकोपुकी हिनीम। मेकोपुकी लाइक्वा पुंइसीनीम। मारदे हना मेकोपुकी परमप्रभु यावे आ लोव्र मटीनीम। मेको आन जोक्तीक तुइक्तीक मार बाक्म माइ?

<sup>10</sup> मोपतीके गो मेको आन मीश अरु आन कली नु मेको आन रू लडाइ ग्राब आन कली गेनुडमी। नेल्ल क्येडा आइक्ब मुर रे नेल्ल क्येडा ठेयब सम्म ठीक पा मचेम्शो क्येट तचा कली शिम बाक्तीम। परमप्रभु यावे आ लोव्र पाइब रे चढेब सम्म नेल्ल जोल पाइब दुम्शो बाक्तीम। येरमीया ६:१३-१५; यसैया ५६:११<sup>11</sup> मेकोपुकीमी आं मुर आन कली ममिम्तु, आन गार सापाइक्बु पशो बाक्तीम। मेकोपुकीमी थुं नाइक्तीक मबाक्त हना यो

'नाइसीन, नाइसीन' देंनीम। 12 मेकोपुकीमी मुने दोक्चा डा गेय पास्तेक्म। ग्रांरा दिशो गेय पास्तेक्म। तन्न मेकोपुकी मुने मदोक्म। मुनेम लल जिचा देंशो मार, बाक्बा, दे मतुइक्तेम। मोपतीके साइक्चा पुंडसीशो आन दातेमी साइक्चा पुंडसीनीम। गो मेको आन कली सजाइ गेनुड। मिनु मेको खतम दुम्नीम" दे परमप्रभु यावेमी देंत। 13 परमप्रभु यावेम "गो, अडगुर सेक्नुड देंडानु बोटम अडगुर मबाक्म। फोवशी रवाम फोवशी मबाक्म। मेको आन सफा यो सोवतेक्म। मेकोपुकी आं गेशो यो रोइक्चा पुंडसीनीम" दे परमप्रभु यावेमी देंत।

14 मुरुमी "गो मारदे एकेर निश्शा बाक्चा। मुर आन कली पुक्शा, गो गारो हिरशो सहर आ आगा मेर प्रोक्य। मिनु मेकेरेन बेक्च। मारदे हना परमप्रभु इं परमप्रभु यावेम इं कली बेक्पाइक्चा कली सोइश्शो बाक्ब। मिनु इं कली बीस ब्वाइश्शो ब्वाक्कु तूचा गेपु। मारदे हना गो परमप्रभु यावे कली पाप पाइतय। येरमीया ९:१४ 15 गोपुकीम थुं नाइश्शा बाक्तीक आस पाइतय। तन्न मारैड रिश्शो मदुम। साचा आ पर्वम रिम्ताक्च। तन्न शुश हिंतीक ला दुम्त" देंतेक्म। येरमीया १४:१९

16 मिनु "दान रे जोरी सत्रु आन शारा आन सोंव सोंव पशो नेंसाक्व। मेको आन शारा आन ग्रीशो आ पर्वम रागी नेल्ल खिंखि पाइब। मेकोपुकी रागी नु मेकेर बाक्शो मारेइ मारेइ, सहर नु मेकेर बाक्ब नेल्ल आन कली दाक्चा कली जाक्शो बाक्नीम। येरमीया ४:१५ 17 कोव्रडीन, गो इन दातेम बीस पाइश्शो बुस्सपुकी सोइक्नुडमी। मेको बुस्स आन कली मारेइ मन्तर तन्तर मराइब। मिनु मेकोपुकीमी इन कली कोक्नीम" दे परमप्रभु यावेम देंत।

18 मिनु "गो आं ग्येरसीतीक नेल्ल जाम्त। गो आं थुं खाइक्ती। येरमीया ४:१९ 19 श्येत जशो आं मुर आन डाक्शो नेनीन। डोन रागी रे नेनीन। मार, परमप्रभु यावे सियोनम मबाक्शो बाक्बा डा? मेको आ पिप मेकेर मबाक्शो बाक्बा? मारदे मेकोपुकीमी आं कली आन मूर्ति नु आन शोर गाक्शो अर्को रागी डा देवी देवता आन पर्वम गाइक्पाइक्पीमी? 20 बाली नाली रिक्ची ना लाक्तु। बर्खा नुप्त। मो हना यो इं श्येत रे ब्रॉइची ना मजा। 21 आं श्येत जशो मुर आ पर्वम गो रोंका पा थुं खाइक्ती। 22 मिनु गिलादमी मारेइ खेक्तीक मबाक्बा? मार, मेकेर इ कली ओख्ती पाइब मबाक्बा? मारदे आं श्येत जशो मुर मसामा?" देंत। येरमीया ४६:११

#### परमप्रभुमी लोव्र पशो

9 परमप्रभुमी "आं पिया ब्वाक्कु बुक्तीक दुम्शो हना, नु आं मिक्ची प्रेक्कु बुक्तीक दुम्शो हना, गो नाक्दो नाक्ती डाक्ड वा। श्येत जशो साइश्शो आं मुर आन पर्वम डाक्ड वा। येरमीया १३:१७; लूका १९:४१

2 गोरशो रागीम मुर आन कली बास बाक्तीक बाक्शो हना, गो आं मुर आन कली प्रॉइशा, मेकेर लशा बाक्ड वा। मिनु मेको आन रे डोन लड वा। मारदे हना मेको नेल्ल आन नाता खोइश्शा अरु नु इप्नीम। मेको नेल्ल मरिश्शो हुल का बाक्नीम। 3 मेकोपुकीम जोल पस ला जोक्नीम। मोपा जोल पतीकेमी रागी डा ठेयब मुर दुम्तेक्म। थमा लोव्र पतीकेमी ममाइ। मेकोपुकी मरिश्शो पशो का रे अर्को मरिश्शो पाइनीम। मिनु आं कली मतुइक्नीम। येरमीया ५:१

4 आंम नेक्था डा मुरपुकी रे होस पा बाक्कीन। आंम लोक्ब आन कली यो थमा मसुतीन। मारदे हना इन लोक्ब नेल्ल मिक्च सिल्ब बाक्नीम। मिनु इन नेक्था डा मुरपुकी हिरशा, इन पर्वम जोल पा दोस गेना गेन बाक्नीम। येरमीया १२:६; भजन संग्रह ४१:१०; मीका ७:५-६ 5 मेको नेल्लेम आन नेक्था डा मुर आन कली जोल पाइनीम। सुइमी थमा लोव्र मपाइनीम। मेकोपुकीम जोल पचा शेंसीशो बाक्नीम। मेकोपुकीम मरिश्शो ला पाइनीम। 6 मेकेर दिम्तुतीके नु जोल पमुतीके ला बाक्ब। मेकोपुकीमी आं कली तुइक्चा मदाक्नीम" दे परमप्रभुमी यावे, मुर नेल्ल आन परमप्रभुमी देंत।

7 मोपतीके मुर नेल्ल आन परमप्रभु यावेम "गो मेको आन कली यपाइश्शा नाक्नुडमी। पाप पाइब आं मुर आन कली गो अरु मार पने चाप्नुडा डा?

8 मेको आन लें बीस पाइश्शो ब्रा खोदेंशो बाक्ब। मेकोपुकीम जोल लोव्र ला पाइनीम। मुर नेल्लेम आन नेक्था डा मुर नु रिश्शो लोव्र पखु पाइनीम। तन्न आन थुमी दोपा मेको कली ब्वारद दाइक्चा, दे मिम्नीम। बजन संग्रह १२:३ 9 मार, मोदेंशो पशो आ पर्वम गो मेको आन कली सजाइ मगेनुडमी?

ओदेंशो रागी डा मुर आन कली गो सजाइ गेचा माल्नुड" दे परमप्रभु यावेम देंत। येरमीया ५:९, २९

10 गे डांडा आन पर्वम डाक्शा रोंका पने। मिनु गोरशो रागी डा योव्रतीक आन पर्वम बिलाना पने। मेको गोरशो सेल्शो बाक्नीम। मेकेर सुइ मगाक्नीम। मिनु मेकेर बी ब्यफ क्यारश भेडा आन ग्रीशो मनेसीब। सरीड डा चिक्ब नु जन्नु नेल्ल प्रोक्शा लाम्तेक्म। येरमीया ४:२५; येरमीया १२:४

11 गो यरूसलेम कली खिं ब्रेश्शा देल्टीके सेल्नुड। सिवार आन बाक्तीके सेल्नुड। गो यहूदा डा सहर आन कली मुर मबाक्तीके सेल्नुडमी। मिनु मेकेर सुइ मबाक्नीम। येरमीया २६:१८

12 मेको लोव्र रुक्चा कली जोक्ब तुइक्ब सु बाक्बा डा? परमप्रभु यावेम सु कली लोव्र पवा, मेकोमी एको शेंने चाप्ब। मारदे मेको रागीम ब्रेश्शो खिं ला बाक्नीमी? मारदे मेको मुर मबाक्तीके खोदेंशो दुम्शा, सुइ लने मचाप्चा डा पा, श्येत्य दुम्शो बाक्बा? लूका १९:४२ 13 मारदे हना मेकोपुकीमी आन डोंइती वोइश्शो आं अरेशो लोव्र प्रॉइतेक्म। आं देंशो मटिथु आन दला दाक्स पास्तेक्म। 14 मेको आन खकटा थुमी आन दला दाक्स पा बाल देवता आ नोले खोइक्तेक्म। मेको आन किकी पिपी शेंशो लांम गाक्तेक्म। येरमीया ७:२४ 15 मोपतीके परमप्रभु यावे, मुर नेल्ल आन परमप्रभु, इस्राएली आन परमप्रभुमी "गो एको मुर आन कली कशो थोव्रक उम्नुडमी। मिनु तूचा कली बीस ब्वाइश्शो ब्वाक्कु तूपाइक्नुडमी। येरमीया २३:१५; येरमीया ८:१४

16 गो मेको आन कली रागी रागी डा मुर आन दातेमी फ्राइनुडमी। मेकेर आन मतुइश्शो नु आन किकी पिपी आन मतुइश्शो मुर बाक्नीम। मिनु गो मेको आन कली मसदुमी सम्म मेको आन नोनोले तरवार सोइक्नुड" देंत। लेवी २६:३३

17 मिनु मुर नेल्ल आन परमप्रभु यावेमी "मुल मिम्तीन। रोंका पाइब मीश मुर आन कली ब्रेत्तीन। मेको आन दाते डा नेल्ल क्येडा रोंका पस जोक्ब कली ब्रेत्थ सोइक्तीन" देंत 18 मेकोपुकीमी "रीब पा जाक्मल। मिनु आंइ पर्वम रोंका पामेक्ल। इं मिक्च नेल्ल प्रेक्कु मदुम सम्म नु इं मिक्च आ पारला रे ब्वाक्कु खोदेंशो पा प्रेक्कु मदोक्म सम्म, मेकोपुकीमी रोंका पामेक्ल। 19 सियोन रे रोंका पशो नेंसाक्व। गोपुकी खतम दुम्तय। गोपुकी मुनेम सुम्सीशो बाक्नय। गोपुकीम आंइ रागी प्रॉइचा माल्नीकी। मारदे हना मेकोपुकीम आंइ खिं प्रेत्तेक्म" देंतेक्म।

20 मिनु गे मीश मुरपुकी परमप्रभु यावे आ लोव्र नेनीन। मेको आ लोव्र नेंचा कली इन नोफा दाइक्तीन। इन तमी आन कली रोंका पचा शेंदीन। आंम नेक्था डा मुर नु रोंका पतीक शेंमुने। 21 बेक्पाइक्ब झेल रे डोइश्शा आंइ बाक्तीकेम ओव्रत। मेको आंइ आल आन कली लां रे नु आंइ ठिटा आन कली बुक्शा बाक्तीक रे साइक्चा कली जाक्त। 22 परमप्रभु यावेमी "गे मुर आन कली मोदेंशो लोव्र पावो 'मुर आन बेक्शो रां रूम मोव्रल खोदेंशो पा दोक्नीम। अन्न खुप्ब मुर आन नोले प्रॉइशो अन्न खोदेंशो पा, गोल्शा लीशो बाक्नीम। मिनु मेको आन कली सुइम सिला मपाइनीम' देनो" देंत। येरमीया ७:३३; येरमीया १४:१६; येरमीया १६:४; येरमीया २५:३३; भजन संग्रह ७९:२

#### मार आ पर्वम नें बोरपाइक्चा

23 परमप्रभु यावेम "जोक्ब तुइक्ब मुरपुकी आन जोक्तीक तुइक्तीक आ पर्वम ठेयब मलेम्मल। सक्ति पाइश्शो मुरपुकी आन सक्ति आ पर्वम ठेयब मलेम्मल। शुश शोंप पाइश्शो मुरपुकी आन शुश शोंपोम ठेयब मलेम्मल। 24 तन्न सु ठेयब लेत्नीमी, मेकोपुकीम 'गो परमप्रभु यावे कली तुइक्नुड' देंमल 'मेको थमा पा परमप्रभु यावे बाक्ब, दे तुइक्नुड, दे नें बोरपाइक्ने चाप्नीम। परमप्रभु यावेमी रागी कली शिशी पाइब, ठीक निसाफ नु ठीक पाइब बाक्ब' देंमल। मारदे हना मेको आं दाक्शो बाक्ब, दे ग्येरसीनुड" दे परमप्रभु यावेम देंत। १कोरिन्थी १:३१; २कोरिन्थी १०:१७

#### चिनु मखोइश्शो खोदेंशो दुम्शो

25 परमप्रभु यावेम "रंम ला खोइक्तीक चिनु खोइश्शो मुर आन ग्रुम्तीक नाक्ती थमा पा जाक्ब। 26 गो इजीप्त, यहूदा, एदोम, अम्मोन, मोआब नु



गोरशो रागीम बाक्ब, आन चां एर ऑथ खोइक्ब मुर नेल्ल आन कली गुम्नुड। मारदे हना मेको नेल्ल खोइक्तीक चिनु मखोइश्शो बाक्नीम। मिनु इस्राएल आ खिं डा मुर नेल्ल यो आन थुंम खोइक्तीक चिनु मखोइश्शो बाक्नीम” दैत। *लेवी १९:२७; येरमीया ४:४; लेवी २६:४१; व्यवस्था ३०:६*

### परमप्रभु नु मूर्ति

10 गे इस्राएल आ खिं डा मुरपुकी, परमप्रभु यावेम इन कली मार, देमे, मेको नेनीन। <sup>2</sup> परमप्रभु यावेम “रागी रागी डा मुर आन पतीक मर्शेसीने। सरीड डा चिन्ड तशा, महिनीन। रागी रागी डा मुरपुकी मेको तशा हिंनीम। *प्रस्थान २३:२४; २राजा २१:६* <sup>3</sup> मारदे हना जात जात डा मुर आन पतीक जोल बाक्ब। मेकोपुकीमी ब्वाकी डा रवा का तिम्नीम। मिनु शी के मार, मार, सेल्ब जोक्बमी मुशा मूर्ति सेल्नीम। *यसैया ४४:१३-१७* <sup>4</sup> मिनु मुरपुकीमी, मेको कली सुन नु चांदीम गिल्लीम। मिनु मेको महिम्सेक्ल दे घनमी कांटी थोक्नीम। मिनु मेको महिम्सीब। <sup>5</sup> मेको आन मूर्ति वोबीस रूम वोइश्शो खेरख खोदेशो बाक्नीम। मेको ब्वाक्ने मचाप्नीम। मेको आन कली कुरचा माल्लीम। मारदे हना मेकोपुकी गाक्ने मचाप्नीम। मेको तशा महिनीन। मारदे हना मेकोपुकीमी मारेइ मरिश्शो पने मचाप्नीम। मारेइ रिश्शो यो पने मचाप्नीम” दैत। *भजन संग्रह ११५:७; यसैया ४६:७*

<sup>6</sup> परमप्रभु यावे, इन खोदेशो सुइ मबाक्नीम। गे ठेयब बाक्नीनी। मिनु इन सक्तिमी इन नें ठेयब सेल्तीनी। *भजन संग्रह ८६:८* <sup>7</sup> गे रागी रागी डा पिप, इन कली सुम मान पा महिनीमी डा? गे मान पाइक्वा शिरशो बाक्नीनी। रागी रागी डा मुर आन जोक्ब तुइक्ब नु मेको आन राज्य नेल्लेमी इन खोदेशो सुइ मबाक्नीम।

<sup>8</sup> मूर्ति आन शेंतीक निप्स मपाइश्शो नु मूर्ख लोव बाक्ब। मेको शी क्येडा रिश्शो मबाक्ब। <sup>9</sup> टारशीश रे तुश्शो चांदी चाक्नीम। मिनु उफाज रागी रे सुन चाक्नीम। मेको मार मार सेल्स जोक्ब नु सुन चेम्बपुकी आन गेय बाक्ब। मिनु मेको आन कली नीलो नु प्याजी रड डा वा फेक्पाइक्नीम। मेको नेल्ल मार मार सेल्स जोक्ब मुर आन गेय बाक्नीम। <sup>10</sup> तन्न परमप्रभु यावे थमा डा परमप्रभु बाक्ब। मेको ब्रोंइशा बाक्ब परमप्रभु नु गेना हना यो लीब पिप बाक्ब। मेको गाइक्तानु, रागीम खिनु कुइब। मिनु रागी रागी डा मुरपुकीम मेको आ गाइश्शो फाल्ले मचाप्नीम। *येरमीया ५:२*

<sup>11</sup> गे मेको आन कली “मेको सरीड नु रागी मसेल्ब देवी देवता रागी नु सरीड आगा रे क्याम्चा पुंडसीनीम। <sup>12</sup> तन्न मेकोमी आ सक्तिमी रागी सेल्लु। मेकोमी आ जोक्तीक तुइक्तीकेमी रागी रागी कली वोइक्तु। मिनु मेकोमी आ रुप्तीकेम सरीड प्राक्तु। *येरमीया ५१:१५-१९* <sup>13</sup> मेकोमी लोव पवानु, सरीड रे रेउ यीब। मेकोमी रागी आ सुर रे गोस्स आन कली पोक्ब। मेकोमी रेउ नु चिला पपाइक्ब। मिनु फश आ बाक्तीक रे फश पपाइक्ब। *भजन संग्रह १३५:७* <sup>14</sup> मुर नेल्ल निप्स मपाइश्शो नु मारेइ मतुइक्ब बाक्नीम। सुन चेम्ब नेल्ल आन मूर्तिम पतीके मुने दोक्नीम। मेको आन मूर्तिपुकी जोल बाक्नीम। मेको आन के सोक्त मबाक्ब। *यसैया ४५:१६* <sup>15</sup> मेको शोर गाक्शो ला बाक्नीम। मुर आन मिश्शो ला बाक्नीम। मेको आन कली सजाइ गेशोनु, जाम्नीम। <sup>16</sup> परमप्रभु यावे, याक्ब आ भाग बाक्ब। मेको मारेइ मारेइ सेल्ब बाक्ब। मिनु इस्राएल मेको आ शोप बाक्ब। मेको आ नें मुर नेल्ल आन परमप्रभु यावे बाक्ब” दैतो। *ब्यवस्था ३२:९*

### सजाइ जाक्ब दैशो

<sup>17</sup> गे पुम्चा पुंडसीशो सहर इ कुम्लो खप रे गुपो। <sup>18</sup> मारदे हना परमप्रभु यावेम “गे मेको रागी डा मुर आन कली ताइक्नुडमी। मेको आन कली शुश श्येत गेनुडमी। मिनु मेकोपुकीम तुइक्नीम” दैत।

<sup>19</sup> आबी, तन्न आं गार आ पर्वम हिंती। आं गार मसाब। तन्न गो आंम कली “थमा पा, एको आं सजाइ बाक्ब। गो एको फाल्चा माल्लुड” दैती। <sup>20</sup> आं ताम्बु ब्रेत्त। मेको आ डोरी नेल्ल ब्रोंइक्तेक्म। आं आलपुकी गाक्तेक्म। मुल मेकोपुकी मबाक्नीम। मुल आं ताम्बु कीशा गेब नु आं बाक्तीकेम फारतीक वा वोइश्शा गेब सुइ मबाक्नीम। <sup>21</sup> गोठलापुकी निप्स मपाइश्शो बाक्नीम। मेकोपुकीमी परमप्रभु यावे कली हिल्लो मपाइनीम।

मोपतीके मेकोपुकी रिश्शो मटुम्नीम। मेको आन क्यारश भेडा नेल्ल ब्राम्तेक्म। *येरमीया २३:१*

<sup>22</sup> रेयके का जाक्शो बाक्ब। मेको नेनीन। उत्तर रागी रे ठेयब ग्रांगेय माये दुम्शो बाक्ब। मेकोमी यहूदा इन सहरपुकी मुर मबाक्तीके सेल्ब। मेको सिवार आन बाक्तीक दुम्नीम। *येरमीया १:१४*

### येरमीया आ पुंडशो लोव

<sup>23</sup> परमप्रभु यावे, मुर आन ब्रोंइतीक आंम आन गुइम मबाक्ब, गो मेको तुइक्नुड। बेक्शा लाइब मुरपुकीम आंम लां आंमा सेल्ने मचाप्नीम। *हितोपदेस १६:९* <sup>24</sup> परमप्रभु यावे, आं कली रिश्शो सेल्पीनी। तन्न ठीक निसाफ पतीकेम ला रिश्शो सेल्पीनी। इन गाइक्तीकेम ममाइ। मो दुम्त हना, गे आं कली साइक्नीनी। *येरमीया ३०:११; येरमीया ४६:२८; भजन संग्रह ६:२; हबकुक् १:१२*

<sup>25</sup> इन कली मतुइक्ब रागी रागी डा मुर नु इन नें थिचा मदाक्ब जात जात डा मुर आन तार इन गाइक्तीक मोतीन। मारदे हना मेकोपुकीमी याक्ब कली नेक्शा दाक्शा पशो बाक्नीम। मेकोपुकीमी मेको कली थमा पा दाक्शो बाक्नीम। मिनु मेको आ बाक्तीक मुर मबाक्तीके सेल्शो बाक्नीम।

### कबल क्याम्शो

11 परमप्रभु यावेम येरमीया कली, <sup>2</sup> “गे एको कबल डा लोव नेनो। मिनु यहूदा डा मुरपुकी नु यरूसलेममी बाक्ब आन कली लोव पावो। <sup>3</sup> गे मेको आन कली ‘इस्राएली आन परमप्रभु यावेम मार दैत दैशा हना, सु सुमी एको कबल मखाप्नीमी, मेको सराप राइनीम। *ब्यवस्था २७:२६*; <sup>4</sup> गो मेको कबल डा पचा माल्लो गेय इन किकी पिपी आन कली श्येत जतीक इजीप्त रागी रे गुंडची ना अरेशो नडमी। गो मेको आन कली आं अरेशो यो टिने। इन कली अरेशो लोव नेल्ल पा आं मुर दुम्नीनी। मिनु गो इन परमप्रभु दुम्नुड। *येरमीया ७:२३* <sup>5</sup> गो इन किकी पिपी आन कली दूध नु खुदो शुश बाक्शो रागी का गेनन्नी, दे कसम जशो खाप्नुड। मिनु मेको रागी मुल इन अधिकारम बाक्ब’ दैतो। मिनु गो “परमप्रभु यावे, मोदेशो दुम्ल” दे लोव लेत्ताक्ड। *प्रस्थान ३:८*

<sup>6</sup> मिनु परमप्रभु यावेम आं कली “यहूदा डा सहर नेल्लेम नु यरूसलेम डा लां मेर एको कबल डा लोव उरदी पा, मेको कबल डा लोव नैशा पने। <sup>7</sup> गो इन किकी पिपी आन कली इजीप्त रे प्रोंइशा चाक्मुमी रे मुल सम्म ‘आं लोव टिने’ दे अरेना अरेन बाक्ती। *येरमीया २५:४* <sup>8</sup> तन्न मेकोपुकीमी आन नोफा मदाइक्तेम। आं दैशो लोव मटीमे। मेको आ पा डा मेकोपुकीमी आन खकटा थुंमी मरिश्शो पा काइ मटीमे। गो मेको आन कली आं कबल डा लोव नेल्ल पने, दे अरेता। तन्न मेको पने मबिस्सम” दैत। *येरमीया ३:१७; येरमीया ७:२६; येरमीया १३:१०; येरमीया १८:१२; ब्यवस्था २८:१५-६८*

<sup>9</sup> मिनु परमप्रभु यावेम आं कली “यहूदा डा मुरपुकी नु यरूसलेममी बाक्बपुकीम मरिश्शो पचा मिम्नीम। <sup>10</sup> मेको आन किकी पिपी आन मरिश्शो पतीक गे लेश्शा लाम्तेक्म। आं अरेशो मटीम। पाप गे लेश्शा लाम्तेक्म। अरु देवी देवता आन कली पूजा पा, मेको आन नोले खोइक्तेक्म। गो मेको आन किकी पिपी नु पशो कबल इस्राएल आ खिं डा मुर नु यहूदा आ खिं डा मुर नेल्लेमी क्याम्ताक्म” दैत। <sup>11</sup> मोपतीके परमप्रभु यावेमी “गो थमा पा, मेको आन कली ठेयब श्येत गेनुडमी। मिनु मेको रे प्रोक्ने मचाप्नीम। आं कली पुंडतेक्म हना यो, गो मेको आन लोव मनेनुड। *भजन संग्रह १८:४२; यसैया १:१५; इजीकीएल ८:१८* <sup>12</sup> मिनु नोले यहूदा सहर डा मुरपुकी नु यरूसलेमम बाक्ब मुरपुकीमी लशा, मेको आन पूजा पशो देवी देवता आन कली पुंडनीम। तन्न मेकोपुकीमी मेको आन कली आन श्येत रे गेनायो मप्रोंइनीम। *येरमीया २:२८; ब्यवस्था ३२:३७-३८* <sup>13</sup> यहूदा, इ के दोशो सहर बाक्मा, मोशो इ देवी देवता दुम्तेक्म। यरूसलेममी गिश लां बाक्मा, मीश मुने दोक्तीक बाल देवता कली चढ़ेतीक सेल्तेक्म।

<sup>14</sup> येरमीया, गे मेको जात डा मुर आन पर्वम मपुनो। मेको आन पर्वम डाक्शा प्रार्थना पा मपुनो। मारदे हना मेकोपुकी श्येत जामे ना मेको आन पुंडशो मनेनुड। *येरमीया ७:१६* <sup>15</sup> आं दाक्शो मुरपुकी आं खिं ओव्रचा मार

अधिकार बाक्बा? मेको नेल्ल मरिश्शो पाइब बाक्नीम। आं कली चढेशो श्येम इन कली सजाइ गेतीक रे तेक्ने चाप्बा डा? मिनु गे ग्येरने चाप्नीनी” दे परमप्रभु यावेमी देंत। *रोमी ११:२८; होसे ८:१३* 16 परमप्रभु यावेम इन कली रिश्शो फल सिब्ब दारशो गिगी तेल रवा, दे नें वोइक्त्तु। तन्न मेकोम ठेयब फश गिवार पपाइश्शा, मेको कली मी सुइक्ब। मिनु मेकोम आ राशी आन कली दाक्ब। 17 मुर नेल्ल आन परमप्रभु यावेम इन कली खुम्तु। मिनु मेकोमी इन कली मरिश्शो पचशो बाक्ब। मारदे हना इस्राएल आ खिं डा मुर नु यहूदा आ खिं डा मुरुम मरिश्शो पाम्तेक्म। परमप्रभुमी “मेकोपुकीमी बाल देवता कली मार मार चढेशा आं कली गाइक्पाइक्तीमी” देंत।

### येरमीया कली साइक्वा माल्शो

18 परमप्रभु यावेम आं कली मेको मुरपुकीम मार पचा माल्शो बाक्मा, मेको कौइशा तुइक्पाइक्ती। गे आं कली, आन मरिश्शो पचशो कौइताक्वीनी। 19 गो साइक्वा कली लाइश्शो मारेइ पने मचाप्ब पाठा का खोदेशो बाक्ती। मेकोपुकीमी आं पर्वम “एको रवा कली आ फल सुन्दा तिम्य। एको कली ब्रौइशा बाक्ब आन रागी रे क्योरशा ताइक्त्तय। मिनु एको आ नें गेनायो ममिस्सेक्त्” देंशा मरिश्शो पशो गो मतुइक्त्तु। *यसैया ५३:७* 20 तन्न गे, मुर नेल्ल आन परमप्रभु यावे, ठीक पा निसाफ पाइनीनी। मिनु थुं नु सोक्त्त नाक्शा कोवनीनी। गेमी मेको आन कली क्येक्क लेश्शो गो कोव्रचा तडल। मारदे हना गो इन कली आं निसाफ पतीक जिम्मा गेशो बाक्नुड। *भजन संग्रह ७:१०; येरमीया १७:१०; येरमीया २०:१२*

21 मोपतीके आं कली साइक्वा माल्ब अनाथोथ डा मुर आन पर्वम परमप्रभु यावेम “मेको मुरपुकीम इ कली ‘परमप्रभु यावे आ नेंमी लोव्र मपावो। लोव्र पाप्तीवी हना, गे आंइ गुइ रे बेक्नेवे’ देंनीम। *येरमीया १:१* 22 मोपतीके मुर नेल्ल आन परमप्रभु यावेम ‘गो मेको आन कली सजाइ गेनुडमी। मेको आन ठिटा मुरपुकी तरवारम क्योरशा साइक्वा पुंइसीनीम। मिनु मेको आन तमी तौ चहिं अन्कालम बेक्नीम। 23 मेकोपुकी सुइ मब्रौइनीम। मारदे हना मेको आन कली सजाइ गेतीक बर्सम गो अनाथोथ डा मुर आन तार ठेयब श्येत चाक्नुड’ ” देंशो बाक्ब।

### येरमीयामी लोव्र पशो

12 परमप्रभु यावे, गो इन कली दोस गेता हना, गे ठीक पाइब बाक्नीनी। तन्न गो आं निसाफ इन डौइती वोइक्नुड। दोस ताइबपुकी मारदे सोशा बोशा लाइनीमी? थमा मसुइक्ब मुर मारदे रिश्शो दुम्ना दुम्न बाक्नीमी? *भजन संग्रह ७३:३* 2 गे मेको आन कली खुम्तीनी। मिनु मेकोपुकीमी शाक्श थोक्शा, बारशा, फल गेनीम। मेको आन लोव्रम ला इन नेक्था बाक्नीम। तन्न मेको आन थुंमी इन क्येडा डोन बाक्नीम। 3 मो हना यो परमप्रभु यावे, गे आं कली तुइक्नीनी। गे आं कली कोव्रशा, नाक्नीनी। आं थुं गे नु बाक्ब। मेको आन कली साइक्वा कली लाइश्शो भेडा खोदेशो पा, कीशा लतीन। मिनु साइक्तीक नाक्त्त कली तिल्शा वोतीन। *भजन संग्रह १३९:१* 4 रागीम गेना सम्म रोंका पाइबा? मिनु रू डा घांस गेना सम्म सोल सुल बेक्नीमी? मेकेर बाक्बपुकीम परमप्रभु यावे आ अरेशो लोव्र मटितीके, मेकेर डा जन्तु नु चिक्ब नेल्ल बेक्तेक्म। मोपा मेकोपुकीमी “आंइ कली मार, दुश्शो बाक्बा, मेकोमी मारेइ मतुइक्ब” देंनीम। *येरमीया ९:९*

### परमप्रभुम लोव्र लेश्शो

5 परमप्रभु यावेम “गे दोरब मुरपुकी नु दोरते हना, मेकोपुकीमी इ कली दपाइक्तेक्मी हना, गे शारा नु दोपा दोरने चाप्नेवे? गे मारेइ मडुम्तीकेमी गोल्ते हना, यर्दन खोला डा ब्वाकीम मार पाइनेवे? 6 इ लोक्बपुकी नु इ खिं डा मुरपुकीमी इ कली मरिश्शो पाम्तेक्म हना, मेकोपुकी इ पर्वम ठेयब सेंदा पा रेयके पा जाक्नीम। मेकोपुकीमी गे नु रिश्शो लोव्र पाम्तेक्म हना यो, मेको आन कली थमा मसुइक्मी।

7 गो आं खिं प्रौइता। आं थेरशो रू प्रौइता। मिनु आं दाक्शो कली आ जोरी सन्तु आन गुइमी गेता। 8 आ थेरशो रू ब्वाकी डा गुप्स खोदेशो दुम्त। मेको आं कली कोव्रशा ग्रीब। मोपतीके गो मेको कली काइ मदाक्नुड।

9 मार, मेको सिवार आं थेरशो रू तशा गेहे पाइबा डा? आं डौइती छिर छिर पाइश्शो सिखारी चिक्ब खोदेशो मडुम डा? मेको कली अर्को सिखारी चिक्बपुकीम पुम्शा राम्शी तोव्रमेक्त्। लावो, लशा ब्वाकी डा जन्तु नेल्ल आन कली पुक्मी। मिनु मेको कली ब्वापाइक्वा कली चाक्मी। *यसैया ५६:९* 10 शुश गोठलापुकीम आं अङ्गुर रू खतम सेल्लेक्म। मेकोपुकीमी आं भाग दिम्शा ताइश्शा पाम्तेक्म। मेकोपुकीमी आं दारशो भाग कली गोरशो रागी खोदेशो पा मुर मबाक्तीक सेल्लेक्म। *येरमीया ६:३* 11 मेकोपुकीम रागी गोरशो सेल्लेक्म। मेको रागी कली आं डौइती सोव्रशो नु सुइ मबाक्तीक सेल्लेक्म। रागी नेल्ल गोरशो सेल्लेक्म। मिनु सुइ आन थुं मखाइ” देंत। 12 गोरशो रागी डा डांडा मेर नेल्ल श्येत्थ पोक्बपुकी क्राक्श्री चोक्श्री पा जाक्शो बाक्नीम। मारदे हना परमप्रभु यावे आ तरवारम रागी आ सुर का रे अर्को सुर सम्म क्योरब। मिनु सुइ मब्रौइनीम। 13 मेकोपुकीमी चेरब शोक्नीम। मिनु चू सिप्पाइक्नीम। मेकोपुकीमी श्येत पा गेय पाइनीम, तन्न नेल्ल शोर गाक्ब। मोपतीके मेको आन खुम्शा मुने दोक्शो आंमा फाल्मेक्त्। मारदे हना परमप्रभु यावे आ ठेयब पा गाइश्शो इन तार जुक्शो बाक्ब। *होसे ८:७*

14 परमप्रभु यावेमी आं कली मरिश्शो पाइब आं नेक्था डा मुर आन पर्वम “गो आं मुर इस्राएली आन कली गेशो, मेको आन किकी पिपी आन शौप रोइश्शो बाक्नीम। मोपतीके गो मेको आन कली आन रागी रे तुल्शा ताइक्नुडमी। मिनु गो यहूदा आ खिं डा आ मुर आन कली मेको आन दाते रे तिल्नुडमी। 15 तन्न गो मेको आन कली तुलुमी नोले लेंशा शिशो पाइक्नुडमी। मिनु मेको नेल्ल आन कली आन आन किकी पिपी आन शौप गेशा, आन रागीम लेंशा चाक्नुडमी। 16 मिनु मेकोपुकीमी मोपा बाल आ नेंम कसम जाम्तेक्म, मोपा आं मुर आन लां थमा पा शेंताक्म हना, मेकोपुकीम परमप्रभु यावे ब्रौइशा बाक्शो खोदेशो पा, आं नेंम कसम जाइनीम। आं मुर आन पतीके रिश्शो पा शेंसाक्म हना, मेकोपुकी आं मुर आन दातेमी बाक्वा ताइनीम। *ब्यवस्था ६:१८; येरमीया ४:२* 17 तन्न तेकोइ जात डा मुरुम मेको लोव्र मनतेक्म हना, गो मेको आन कली तुल्शा ताइक्नुडमी” दे परमप्रभु यावेम देंशो बाक्ब।

### सुती के धोती

13 परमप्रभु यावेम आं कली “लशा सुती के धोती का ग्यापो। मिनु मेको पांइसो। तन्न मेको कली ब्वाक्कुम जित्वा मगेवो” दे माइक्ती। 2 मोपतीके गो परमप्रभु यावेम देंशो खोदेशो पा, सुती के धोती का ग्याप्था पांइसाक्वी। 3 मिनु लेंशा परमप्रभु यावेम आं कली 4 “बोक्को, इ ग्याप्था पांइसीशो धोती कुरशा मुल युफ्रेटीस लावो। मिनु सेरथे फुल्लु आ आगाम बाक्शो जेश्शो फुल्लुम मेको खूइश्शा वोतो” दे माइक्ती। 5 मोपतीके गो परमप्रभु यावेम देंशो खोदेशो पा, मेको युफ्रेटीसम खूइश्शा वोइक्त्ता। 6 मिनु शुश नाक्त्त नोले परमप्रभु यावेम आं कली “बोक्को, युफ्रेटीस लावो। मिनु मेकेर गो डौइती इ कली खूइश्शा वोतो देंशो धोती चाक्को” दे माइक्ती। 7 मिनु गो युफ्रेटीसम लती। मिनु आं खूइश्शा वोइक्तीक रे मेको धोती दोशा गुंइताक्ड। तन्न मेको धोती नेल्ल मुक्ने थुमा बाक्त्त। मेको थमा पा, शोर गाक्शो दुम्माक्त्त।

8 मिनु परमप्रभु यावेम आं कली मार देंत देंशा हना, 9 “ओदेशो पा गो यहूदा आ ठेयब लेत्तीक नु यरूसलेम आ थाम्पा ठेयब लेत्तीक खतम पोक्नुड। 10 मेको मरिश्शो पाइब मुरपुकीम आं लोव्र नेंने मबिस्सम। मेकोपुकीमी आन खकटा थुंमी आन दला दाक्स पतीकेमी अरु देवी देवता आन कली पूजा पचा कली नु मेको आन गेय पचा कली लाम्तेक्म। मिनु मेकोपुकी एको धोती खोदेशो दुम्नीम। मेको थमा पा शोर गाक्शो बाक्ब। *येरमीया ११:८* 11 मारदे हना दोपा मुरुम आ धोती रॉम पांइसीशो बाक्बा, मोपा गो इस्राएल आ खिं डा मुर नेल्ल नु यहूदा आ खिं डा मुर नेल्ल आन कली आं मुर दुम्मल, दे आं नेक्था वोइक्तामी। आं कली मान पामेक्त्, आं कली ठेयब सेल्मेक्त्, आं दारसम ग्योम्सीमल, दे पांइसाक्वी। तन्न मेकोपुकीमी आं देंशो लोव्र आन नोफा मदाइक्तेम” दे परमप्रभु यावेम देंत।

## अडगुर शांबुम ब्रीशो गर

12 परमप्रभु यावे, इस्राएली आन परमप्रभुमी “गर नेल्ल अडगुर शांबुम ब्रीचा माल्नीम देंशो बाक्ब” दे माइक्मी। मिनु मेकोपुकीम “गर नेल्ल अडगुर शांबुम ब्रीचा माल्ब, दे गो मतुइक्नीकी डा?” देंतेक्म हना, 13 गे मेको आन कली परमप्रभु यावेम इन कली मार देंत देंशा हना “गो एको रागी नेल्ल डा मुर आन कली, दाऊद पिप आ बाक्तीकेम बाक्ब पिप आन कली, चढेबपुकी, परमप्रभु यावे आ लोव पाइबपुकी नु यरूसलेममी बाक्ब नेल्ल आन कली दुक्पाइक्नुडमी। येरमीया २५:१५-२८; यसैया ५१:१७ 14 गो मुर आन कली जिपाइक्नुडमी। गो आम आफ नु आन तमी तौ आन दातेमी जिपाइक्नुडमी। गो मेको आन कली दाक्शा, शिशी पा साइक्तीक रे आं थुं मलेत्नुड, दे परमप्रभु यावेम” देंत। 15 नोफा दाइशा नेनीन। ठेयब लेशो मदुमीन। मारदे हना परमप्रभु यावेम लोव पाप्तु। 16 मिनु “गे परमप्रभु यावे, इन परमप्रभुम छिडछिड चाक्वा क्येडा डोंइती मेको कली ‘ठेयब सेलीन’। नां रिक्वा क्येडा डोंइती डांडा मेर इन खोइल दाइल पाइक्वा क्येडा डोंइती मेको कली ‘परमप्रभु यावे ठेयब बाक्ब’ देनीन। गे हाम्सो आस पाइनीनी, तन्न मेकोमी छिडछिड सेल्शा थम क्येर सेल्ब। 17 तन्न गेपुकीम मेको मनेंतीनी हना, गो इन ठेयब लेशो आ पतीके, गो आं थुंम सुइ आन मतुइक्वा डा पा डाक्नुड। परमप्रभु यावे आ हुल ग्याइशा लाइक्वा पुंडसीतीके गो हुइ हुइ पा डाक्नुड। मिनु आं मिक्च रे प्रेक्कु दोक्ब। येरमीया ८:२३; येरमीया १४:१७; लूका १९:४१

18 पिप नु पिप आ ममा आस कली ‘इन नित्तीक रे उइ तोंइसीन। मारदे हना इन पिपा रे इन ठेयब दुम्तीक सिरपेच दोक्ब’ माइक्सी” देंत। २राजा २४:१-१६; यसैया ६२:३; बिलाप ५:१६ 19 नेगेब रागी डा सहर आन लाप्चो चोक्सीनीम। मिनु मेको आन कली रोक्ब सुइ मबाक्नीम। यहूदा डा मुर नेल्ल ग्याइशा लाइक्वा पुंडसीती बाक्नीम। मेको आन कली थमा पा ग्याइशा लाइक्तेक्म।

20 ए यरूसलेम, उत्तर रे जाक्ब जोरी सत्रु आन कली कोव्रडो। इ कली गेशो बगाल, इ दारशो भेडा ते बाक्नीमी? 21 गेमी आंम मुर सेल्चा कली इ लेम्शो मुर आन कली परमप्रभु यावेम इ कली हुकुम पाइब सेल्ब। मिनु गे मार, देंनेवे? मार, सुत्केरी दुम्चशो मीश मुर खोदेंशो पा, इ कली श्येत मदुम्बा डा? 22 “मिनु गे इ थुंम ‘आं कली मारदे ओदेंशो श्येत दुम्मे’ देंनेवे। गेमी शुश मरिम्शो पतीके इ गुने क्युक्साक्वे। मिनु इ रांमी मरिम्शो पाइक्वा पुंडसाक्वे। यसैया ४७:२-३; इजीकीएल १६:३७ 23 मार, एथीयोपीयामी आ कुशुल डा रड फाइक्ने चाप्पा डा? मार, जोइमी आ चां डा थोप्ला फाइक्ने चाप्पा डा? गे मरिम्शो पचा बानी दुम्तीके रिम्शो पने मचाप्नेवे। 24 गो इ कली गोरशो रागी रे जाक्शो फशेम योल्शो भूस खोदेंशो पा फ्राइनन। 25 इ कली वोइश्शो आं गेशो भाग मेकोन बाक्ब” देंशो बाक्ब। परमप्रभु यावेम “गेमी आं कली प्रेंशो बाक्नेवे। मिनु जोल आन कली थमा सुइश्शो बाक्नेवे। 26 गो आंमा इ गुने इ शोव सम्मन क्युक्नुड। मिनु मोपा इ मुने नेल्ल तांडसीब। 27 गो पहाडीम नु रू मेर इ पशो ग्रांरा दिशो गेय ताता। इ मुरपुकी नु इप्शो, इ रेयके पशो नु इ मुने मपथु, तेल्लेम दुम्शो तशो बाक्नुड। आबी आबी, यरूसलेम गे ग्रांरा दिशो दुम्नेवे। गेना सम्म मोदेंशो बाक्नेवे?” देंत।

## रागी नेल्ल सोव्रशो

14 परमप्रभु यावेमी रेउ मयिचा आ पर्वम येरमीया कली मार, लोव पाप्तु देंशा हना, 2 “यहूदा रोंका पाइब। मेको आ सहर डा ठेयब लाप्चोपुकी सक्ति मपाइश्शो दुम्शो बाक्नीम। मेकोपुकी रू आ पर्वम सुर्ता पाइनीम। मिनु यरूसलेम आ वाइ ब्रेश्शो सरीड सम्म जाक्दीश्शो बाक्ब। 3 मेकेर डा ठेयब मुरपुकीम आन वाइल आन कली ब्वाक्कु ब्रथ सोइक्नीम। मिनु मेकोपुकी कुवाम लमानु ब्वाक्कु मथित्नीम। मिनु मेकोपुकी श्येतथ ग्योब कुरशा लेशा जाक्नीम। मिनु मेकोपुकी मुने दोक्शा मारेइ पने मचाप्ब दुम्शा, आमाम्ब, दे हिंशा आन पिपा सुम्सीनीम। 4 रागीम रेउ मयितीके रागी नेल्ल सोव्रशा जेशो बाक्ब। रू डा गेय पाइबपुकी मारेइ पने मचाप्ब दुम्शा, आमाम्ब, दे आन कुल सुम्सीनीम। योएल १:११ 5 घांस मबाक्तीके ब्वाकी डा

किश्शोमी यो आ नक जरमेशो पाठा प्रॉइशा गाक्ब। 6 ब्वाकी डा गधापुकी गोरशो डांडाम राप्शा सिवार खोदेंशो पा ग्रीनीम। गिगी जोतीक ठाउं मबाक्तीके मेको आन मिक्वी ब्रा ब्रा दुम्नीम।

7 मिनु आंइ मरिम्शो पशोम आंइ पर्वम सांक्छी गेम्तेक्म हना, परमप्रभु यावे, गे इन नें आ पर्वम शिशी पने। मारदे हना गो इन कली प्रॉइशा, थम मरिम्शो दुम्तक। गोपुकीम इन पर्वम पाप पशो बाक्तक। दानीएल ९:४-९ 8 ए इस्राएल आ आस पतीके, श्येत जवानु मेको कली प्रॉइब, गे एको रागीम मारदे अर्को रागी डा मुर खोदेंशो दुम्नीनी? गे मारदे नाक्दो का ला बाक्ब, लां गाक्ब मुर खोदेंशो दुम्नीनी? 9 गे मारदे इन थुं ग्येतथ लुक्च दुम्शा बाक्शो मुर खोदेंशो दुम्नीनी? मारदे प्रॉइने मचाप्ब सक्ति मबाक्शो लडाइ पाइब खोदेंशो दुम्नीनी? परमप्रभु यावे, गे आंइ दातेम बाक्शो बाक्नीनी। गो इन नेंमी ब्रेत्वा पुंडसीती बाक्नीकी। आंइ कली मप्रोनीन” देंनीम। येरमीया १५:१६; यसैया ४३:७

10 परमप्रभु यावेमी मेको मुर आन पर्वम “मेकोपुकी थमा पा हिरना हिरन बाक्नीम। हेंथे गाक्वा दाक्नीमी। थमा पा ठीक लां मगाक्नीम। मोपतीके परमप्रभु यावेम मेको आन कली मब्राइब। मुल मेकोमी आन मरिम्शो पशो आ पर्वम मिम्ब। मिनु मेको आन कली आन पाप आ पर्वम सजाइ गेब” देंत।

11 मिनु परमप्रभु यावेम आं कली “एको जात डा मुर आन कली रिम्शो दुम्पाइक्वा कली मपुनो। येरमीया ११:१४; येरमीया ७:१६ 12 मेकोपुकी माइजा बाक्तेक्म हना यो, गो मेको आन पुंडशो मनेंनुड। मेकोपुकीमी चोशा चढेतीके, अन्न चढेतीके चढेम्तेक्म हना यो, गो मेको आन कली मब्राइनुडमी। मेको आ पा डा गो मेको आन कली, तरवार, अन्काल नु बेक्तीक रोइम साइक्नुडमी” दे माइक्ती। यसैया ५८:३; येरमीया ६:२०

## परमप्रभु आ लोव जोल पाइबपुकी

13 मिनु गो “परमप्रभु यावे, कोव्रडीन। इन लोव पाइबपुकीम दा मेको आन कली ‘गे तरवारम साइक्वा मपुंडसीनीनी। अन्काल मपाइनीनी। मिनु शुश नाक्ती सम्म एको रागीम थुं नाइश्शा बाक्वा ताइनीनी’ देंशो बाक्नीम” देंती। 14 मिनु परमप्रभु यावेम आं कली “आं लोव पाइबपुकीम दा आं नेंम जोल पा लोव पशो बाक्नीम। गो मेको आन कली मसोइक्तुमी। गो मेको आन कली लोव मपड। मेकोपुकीमी इन कली जोल पा, लिक्वु कोव्रशा, फश लोव पाइनीम। आन थुं डा जोल लोव पाइनीम। येरमीया २३:२१-२२; येरमीया २७:९, १४, १५; येरमीया २९:८-९; इजीकीएल १३:६ 15 मोपतीके परमप्रभु यावेम मेको आ लोव पाइब आन पर्वम, सुम आ नेंम लोव पाइनीमी, मेको आन कली सोइश्शो मनड। मो हना यो मेकोपुकीम ‘तरवार नु अन्कालम एको रागी कली मताइब’ देंशो बाक्नीम। मुल तरवार नु अन्कालमीन जोल पा आं लोव पाइबपुकी साइक्वा पुंडसीनीम। ब्यवस्था १८:२० 16 मिनु जोल पा आं लोव नेंपाइक्वा पुंडसीबपुकी चहिं तरवार नु अन्कालम पतीके यरूसलेम डा लां मेर ताइक्वा पुंडसीनीम। मेको, मेको आन मीश नु मेको आन तमी तौ आन कली थिम्ब सुइ मबाक्नीम। मारदे हना गो मेको आन तचा डा श्येत मेको आन तारी मोइक्नुड” दे माइक्ती। येरमीया ९:२१

17 गे मेको आन कली “आं मिक्च रे नाक्दो नाक्ती प्रेक्कु यिशा बाक्ल। मारदे हना आं मुर, ग्युंवे मपशो तमी थाम्पा श्येत जशो बाक्ब। ठेयब गार दुम्बा डा पा मेको तुप्चा पुंडसीती बाक्ब। येरमीया १३:१७ 18 गो मेको रागी लती हना, तरवारम साइक्वा पुंडसीतीपुकी ताइक्नुडमी। गो मेकेर डा सहरम ओव्रती हना, मेकेर अन्काल पशो मुरपुकी ताइनुडमी। परमप्रभु यावे आ लोव पाइबपुकी नु चढेब नेल्ल मारेइ मतुइक्थु, आन गेय पना पन बाक्नीम” दे माइक्ती।

19 मिनु गो “मार, गे यहूदा कली थमा पा प्रॉइने थुम्शो बाक्नीनी? मार, गे सियोन कली ग्रांरा दिश्शो बाक्नीनी? गे आंइ कली मारदे मसापाइक्वा डा पा तुप्नी? गोपुकी थुं नाइश्शा बाक्तीक आस पाइतक, तन्न मारेइ रिम्शो मदुम। सानीकी को दे आंस पाइतक, तन्न हिंतीक कका जाक्त। येरमीया ८:१५ 20 परमप्रभु यावे, गोपुकीम इन अरेशो लोव मतिशो नु आंइ किकी पिपी आन मरिम्शो पशो शोवनीकी। गोपुकीम थमा पा इन डोंइती पाप पशो

बावनीकी। येरमीया ३:२५; भजन संग्रह ५१:५-७; भजन संग्रह १०६:६  
21 इन नें आ पर्वम आंइ कली शोर गाक्शो ममिम्तीन। गो इन सक्ति पाइश्शो  
नितीक कली आइक्च मसेल्पाइक्नीकी। इन पशो कबल मिम्तीन। गे मेको  
मक्याम्दीन। 22 रागी रागी डा मुर आन देवी देवता आन दाते डा तेकोइमी  
रेउ यिपाइक्ने चाप्नीमी डा? मार, सरीड आमा रेउ यिपाइक्ने चाप्ना डा?  
मेको पाइब गे परमप्रभु यावे, आंइ परमप्रभु मननी डा? मोपतीके गो इन  
कली आस पाइनीकी। मारदे हना गे ला एको नेल्ल पने चाप्नीनी” देंती।

परमप्रभुम लोत्र लेश्शो

15 मिनु परमप्रभु यावेमी आं कली “मोसा नु सामुएलमी आं डोंइती  
जाक्शा पुंइताक्स हना यो, आं थुं एको जात डा मुर आन गे  
मलेप्ब। मेको आन कली आं डोंइती रे गुंइदीमी। मेको आन कली लचा गेमी।  
प्रस्थान ३२:११; १सामुएल ७:९; इजीकीएल १४:१४ 2 मिनु मेकोपुकीमी  
‘गे ते लाइनीकी?’ दे इ कली हिल्लो पास्तेक्म हना, गे मेको आन कली  
परमप्रभु यावेमी ‘बेक्तीक रोइ पा बेक्चा ब्रेक्सीशो बाक्तीनी हना, बेक्तीक  
गेन लने। तरवारम साइक्चा पुंइसीचा ब्रेक्सीशो बाक्तीनी हना, तरवार गेन  
लने। शोव्रलुम बेक्चा ब्रेक्सीशो बाक्तीनी हना, शोव्रलुमीन बेक्कीन। ग्याइश्शा  
लाइक्चा पुंइसीचा ब्रेक्सीशो बाक्तीनी हना, ग्याइश्शा लाइक्चा पुंइसीन’  
देनो। येरमीया ४३:११; जकरिया ११:९ 3 गो मेको आन कली ४ ओटा  
साइक्तीक श्येत सोइक्नुडमी। गो साइक्चा कली तरवार, कीशा लाइक्चा  
कली कुचुम, दाक्पाइक्चा कली नु खतम सेल्चा कली सरीड डा चिक्ब नु  
रागी डा जन्तु सोइक्नुडमी। इजीकीएल १४:२१; येरमीया ७:३३ 4 यहूदा डा  
पिप हिज्कीयाह आ तौ मनस्सेम यरूसलेममी मार पशो बाक्मे, मेको आ  
पर्वम गो मेको कली खतम पोक्नुड। मिनु मेको तशा रागी डा राज्य नेल्लेम  
‘आबी, आबी’ दे हिंनीम। २राजा २१:११-१६; २राजा २३:२६ 5 गे  
यरूसलेम, सुमी इ कली शिशी पाइबा? इ पर्वम सुम रोंका पाइबा? गे दोदेशो  
बाक्नी? दे हिल्लो पचा कली सु दिक्बा? 6 गे आं कली प्रॉइशो बाक्नेवे। गे  
नोले शॉइसीन सीन बाक्नेवे। मोपतीके गो आं गुइ क्युक्शा इ कली  
साइक्नुड। मुल गो आं गाइश्शो मतेक्नुड। 7 गो मेको आन कली राज्य डा  
सहर डा ठेयब लाप्चोमी ग्योलोम हारशो खोदेशो हारताक्ड। गो आं मुर आन  
कली शुश श्येत गेशा खतम सेल्ता। मारदे हना मेको आन मरिश्शो पतीक रे  
मलेम्मा। मती ३:१२ 8 मेको आन वोंइश बेक्शो मीश मुरपुकी समुन्द्र डा  
बाल्चा क्येडा शुश दुम्तेक्म। नाक्ती उडक्थ दुम्नेनु, तौ नु आन ममा आन  
पर्वम साइक्ब का चाक्नुड। गो कालेम मेको आन तार सुर्ता पतीक नु  
ग्रीचोक पा हिंतीके चाक्नुड। 9 मिनु ७ जना बेक्शो तौ आन ममा थत।  
नाक्ती बाक्ना बाक्न मेको आ नां लाक्तु। मिनु मेको मुने दोक्शा शुक्शी  
पाइक्चा पुंइसाक्व। मेको क्येडा यो ब्रॉइशो आन कली आन जोरी सत्रुम  
तरवारम क्योरपाइश्शा, साइक्पाइक्नुडमी” दे परमप्रभु यावेम देंत। आमोस  
८:९

10 आं ममा, मारदे आं कली जरमेनी। गो आं कली रागी नेल्लेम सुइ सुइम  
जिचा पोक्शा, गो नु सुइ मडुइनीम। गो मेको आन कली ना जेर गेशो  
बाक्नुडा, ना मेको आन रे जेर जशो बाक्नुडा। मो हना यो मुर नेल्लेम आं  
कली सराप पाइनीम। येरमीया २०:१४ 11 परमप्रभु यावेम आं कली “थमा  
पा, गो इ कली रिश्शो पा, प्रॉइनन। गो थमा पा श्येत नु मरिश्शो दुम्नेनु इ  
जोरी सत्रु आन कली, इ गेय पपाइक्नुडमी। 12 मार, मुरुमी उत्तर डा फलाम  
नु कांसा जिक्ने चाप्ना डा? 13 इन पापम पतीके इन रागी नेल्लेम इन शोंप  
नु इन मारेड मारेड गो मोशान रोइश्शो मार मार खोदेशो पा योक्शा गेनुडमी।  
येरमीया १७:३ 14 गो इन कली आंम इन मतुइश्शो रागीम इन जोरी सत्रु  
आन वाइल सेल्नुड। मारदे हना आं गाइश्शोम मी का जेप्ब। मेको गेना हना  
यो ब्रशा बाक्ब” दे परमप्रभु यावेमी देंत। 15 मिनु गो “परमप्रभु यावे, गे  
नेल्ल तुइश्शो बाक्नीनी। आं कली मिम्तीन। मिनु आं कली कोव्रडीन। आं  
कली श्येत गेब आन कली क्येक्क लेत्तीन। गे मेको आन पर्वम शुश फाल्शा  
बाक्नीनी। आं कली मसाइय्थीनी। गो इन पर्वम शुक्शी पाइक्चा पुंइसाक्वी,  
गे मेको तुइक्नीनी। 16 इन लोत्र बाक्त हना, गो नोफा दाइश्शा नेंता। मेको  
आं कली ग्येरतीक नु आं थुं कली नाइक्पाइक्ब दुम्त। मारदे हना परमप्रभु

यावे, मुर नेल्ल आन परमप्रभु, गो इन के नड। ब्यक्स्था ८:३; ब्यक्स्था  
३२:४६-४७; इजीकीएल ३:१-३; प्रकाश १०:८-९ 17 गो दला दाक्स पा  
बाक्ब आन हुलम गेनायो मलड। गो मेकोपुकी नु मग्येरसीड। गो आं कान  
बाक्ती। मारदे हना इन गुइ आं तार बाक्त। मिनु गे आं कली गाइक्तीकेम  
प्रिंशो बाक्तीनी। 18 आं श्येत जतीक मारदे मनुम्मे? मिनु आं गार मारदे  
मसाब दुम्मे? गे आं कली मरिश्शो नु ब्वाक्कु मबाक्शो खोला खोदेशो  
दुम्तीनी” देंती।

19 मोपतीके परमप्रभु यावेम “गे थमा पा लेत्ते हना, गो इ कली लेंशा  
ब्राइनुड। गे आं डोंइती रपो। रिश्शो लोत्र ला पाप्तीवी हना नु फश लोत्र  
मपाप्तीवी हना, गे आं लोत्र पाइब दुम्नेवे। मिनु एको मुरपुकी इ गे लेत्तीम।  
तन्न गे मेको आन गे मलेतो। 20 गो इ कली, एको मुर आन डोंइती कांसा के  
बोल्यो गारो सेल्नन। मेकोपुकीमी इ कली लडाइ तोइनीम। तन्न इ क्येडा  
मग्रानीम। मारदे हना गो इ कली प्रॉइचा कली नु वारच पाइक्चा कली गे नु  
बाक्नुड। येरमीया १:१८-१९ 21 गो इ कली आं अरेशो मटीब आन गुइ रे  
प्रॉइनन। मिनु शिशी मपाइक्ब आन गुइ रे यो प्रॉइनन” दे परमप्रभु यावेमी  
देत।

परमप्रभुम निसाफ पशो

16 मिनु परमप्रभु यावेमी आं कली मार देंत देंशा हना 2 “गेमी एको  
रागीम ग्युंबे पचा नु तमी तौ थिचा मडुम्नेवे” देंत। 3 मारदे हना  
एको रागीम जरमेशो तमी तौपुकी नु आन आंम आफ आन पर्वम परमप्रभु  
यावेम 4 “मेकोपुकी मसाब रोइम बेक्नीम। मेको आन पर्वम सुइम रोंका  
मपाइनीम। मेको आन कली सुइम मथिम्नीम। मेकोपुकी खपीम मोव्रल  
खोदेशो पा बाक्नीम। मेको तरवार नु अन्कालम बेक्नीम। आन बेक्शो रां  
सरीड डा चिक्ब नु रागी डा जन्तु आन ब्वतीक थोव्रक दुम्नीम” देंत।  
येरमीया ९:२१

5 मारदे हना परमप्रभु यावेम “गे मुर बेक्शो खिंमी रोंका पथ नु रोंका  
पाइब आन कली लेम्थ मलावो। मारदे हना गो मेको जात डा मुर रे थुं  
नाइक्तीक, गेना हना यो दाक्तीके नु शिशी पतीके लाइक्ने थुम्ता। 6 एको  
रागीम आइक्च नु ठेयब नेल्ल बेक्नीम। मेको आन कली सुइम मथिम्नीम।  
मेको आन पर्वम सुइम रोंका मपाइनीम। आंम रां रिक्सीब नु चां प्रेक्ब सुइ  
मबाक्नीम। येरमीया ४१:५; येरमीया ४७:५; येरमीया ४८:३७८; लेवी  
१९:२७-२८; ब्यक्स्था १४:१ 7 मिनु बेक्ब आन पर्वम रोंका पाइब नु आम  
आफ आस कली लेम्चा कली सुइम तूचा थोव्रक मगेनीम। 8 गे भोज पशो  
खिंम मओव्रडो। मिनु मेकोपुकी नु जचा तूचा कली मनिस्सो। 9 मारदे हना  
मुर नेल्ल आन परमप्रभु यावे, इस्राएली आन परमप्रभुमी ‘गो एको रागी रे  
इन पालाम, इन डोंइती रे थुं नाइश्शा बाक्तीक, ग्येरेशो सेंदा नु ग्युम्ली ग्युम्ले  
आस सेंदा क्याम्नुड’। येरमीया ७:३४ 10 मिनु गे एको मुर आन कली एको  
लोत्र नेल्ल देंनेनु, मेकोपुकीमी इ कली ‘मारदे परमप्रभु यावेम आंइ कली  
ओदेशो ठेयब मरिश्शो दुम्तीक देंमे? आंइ मरिश्शो पशो मार बाक्बा? गो  
परमप्रभु यावे, आंइ परमप्रभु कली मार पाप पका डा?’ देंनीम। येरमीया  
५:१९ 11 मिनु गे मेको आन कली ‘इन किकी पिपीमी आं कली प्रॉइशा, देवी  
देवता आन नोले खोइश्शा, मेको आन कली पूजा पा ठेयब सेल्तेक्म। मोपा  
आं कली प्रॉइशा आं अरेशो मपामे। 12 गेपुकीमी इन किकी पिपी आन  
क्येडा शुश मरिश्शो पाइतीनी। नेनीन, गे एकेर बाक्ब नेल्लेमी इन खकटा  
थुंमी इन दला दाक्स पाइनीनी। मिनु गे आं लोत्र नेंचा मदाक्नीनी। येरमीया  
७:२६ 13 मोपतीके गो इन कली इन मतुइश्शो रागी नु इन किकी पिपी आन  
मतुइश्शो रागीम ताइक्नन्नी। मिनु गेपुकीम मेकेर नाक्दो नाक्ती देवी देवता  
आन कली पूजा पाइनीनी। मारदे हना गो इन कली शिशी मपाइनुड’ देनो” दे  
परमप्रभुमी आं कली देंत। ब्यक्स्था २८:६४

14 मिनु परमप्रभु यावेमी “परमप्रभु यावे ब्रॉइशा बाक्शो नु मुर आन कली  
इजीप्त रागी रे गुंइशा एक चाक्शो खोदेशो पा मर्देतीक नाक्ती थमा पा  
जाक्नीम। 15 तन्न मार देंनीम देंशा हना, मेकोपुकीमी ‘परमप्रभु यावे ब्रॉइशा  
बाक्शो नु इस्राएली आन कली उत्तर डा रागी नु तेको तेको रागी रे चाक्शो  
खोदेशो पा’ देंनीम। मारदे हना गो मेको आन कली आन किकी पिपी आन

कली गेशो रागीम चाक्नुडमी। *येरमीया २३:७-८* 16 मुल गो शुश ग्याइल आख आन कली ब्रेशा सोइक्नुडमी। मिनु मेकोपुकीमी मेको आन कली ग्याइक्नीम। नोले गो लेशा शुश सिखारी आन कली ब्रेशा सोइक्नुडमी। मिनु मेकोपुकीमी, मेको आन कली तेकोइ डांडा नु तेकोइ पहाड नु सेरथे फुल्लु डा काक्पे रे माल्शा गुंइनीम। 17 मारदे हना गो मेको आन लां नेल्ल तुइक्नुड। मेको आं डोंइती मखुइश्शो बाक्नीम। मेको आन मरिश्शो पशो यो आं डोंइती मखुइश्शो बाक्ब। *अय्युब ३४:२१* 18 गो मेको आन मरिश्शो पशो नु आन पाप आ पबर्म मेको आन कली निक्शी खेयप सजाइ गेनुडमी। मारदे हना मेकोपुकीमी सोक्ती मपाइश्शो मूर्तिपुकीम आं रागी ग्रांग दिशो सेल्लेक्म। मिनु आं थेरशो रू आन ग्रांग दिशो देवी देवताम प्रिताक्म” देंत। *यसैया ४०:२* 19 मिनु मेकोपुकीमी “परमप्रभु यावे, गे आं सक्ति नु आं खुइश्शा, ब्रोंइशा बाक्तीक बाक्नीनी। गे श्येत जची ना आं खुइक्तीके बाक्नीनी। रागी रागी डा मुर रागी डा सुर रे इन डोंइती जाक्नीम। मिनु मेकोपुकीमी ‘आंइ किकी पिपी आन देवी देवता जोल ला बाक्तेक्म। मेको शोर गाक्शो बाक्तेक्म। *भजन संग्रह ३६:७* 20 मार, बेक्शा लाइब मुरपुकीम आंम देवी देवता सेल्ले चाप्नीमी डा? तन्न मेकोपुकी देवी देवता मनम’ देंनीम। 21 मोपतीके गो मेको आन कली थमा पा रूप्पाइक्नुडमी। गो मेको आन कली आं सक्ति नु आं ठेयब दुम्तीके आ पबर्म शंनुडमी। मिनु मेकोपुकीमी आं नें यावे बाक्ब, दे तुइक्नीम” दे परमप्रभु यावेमी देंत। *प्रस्थान ३:१२*

पाप रे प्रोंइतीके नु निसाफ

17 परमप्रभु यावेमी “यहूदा आ पाप फलाम के मुतीकेम मुशा ब्रेक्शो बाक्ब। मेको हीरा पाइश्शो मुतीकेमी आन थुं नु आन चढेतीक डा ग्रीवपुकीम मुशा ब्रेक्शो बाक्ब। *२राजा २३:४-१८* 2 मेको आन आलपुकीमी यो आन चढेतीक नु आन मूर्ति पाइश्शो थाम आन कली मिन्नीम। मेको नेल्ल गिगी रवा आन पुंम नु लाइश्शो पहाड तार बाक्तेक्म। 3 मेको डांडा तार नु रूम बाक्तेक्म। मिनु इन रागी डा शोंप नु इन रिश्शो मारेइ मारेइ थोवक नेल्ल इन पाप पतीकेम रोइक्पाइक्नुड। *येरमीया १५:१३* 4 इन पाप पतीकेम गो इन कली गेशो, इन थेरशो रू साम्नीनी। मिनु गो इन कली इन मतुइश्शो रागीम इन जोरी सत्रु आन वाइल दुम्पाइक्नन्नी। मारदे हना आं गाइक्तीके मी ब्रेशो खोदेशो बाक्ब। मिनु मेको गेना हना यो ब्रस डा ब्रस बाक्ब” देंत। 5 परमप्रभु यावेम मार देंत देंशा हना “सु सुमी मुर आन कली थमा सुइक्नीमी, मेको सराप राइनीम। आन रां डा सक्तिम थमा सुइक्ब यो सराप राइनीम। मारदे हना मेको आन थुं परमप्रभु यावे रे डोन लशो बाक्ब। *भजन संग्रह ११८:८; भजन संग्रह १४६:३; २इतिहास ३२:८* 6 मेको गोरशो रागी डा पोथ्रा रवा खोदेशो बाक्नीम। मेकोमी रिश्शो दुम्मेनु यो, मारेइ मताइनीम। मेको मुर मबाक्तीक रागी डा नेल्ल क्येडा सोवशो खपीम नु हिक्सी बाक्शो रागीम बाक्नीम। *येरमीया ४८:६*

7 परमप्रभु यावे कली थमा सुइक्ब मुर आसीक रशो बाक्नीम। मेकोपुकीम परमप्रभु यावे कली आस पशो बाक्नीम। *भजन संग्रह १४६:५* 8 मेको ब्वाक्कु आ नेक्था खूश्शो रवा खोदेशो बाक्नीम। मेकोमी आन शाक्श खोला आ सुर सम्म चाक्दील्नीम। मेको हुप्टानु, महिनीम। मेको आन सफापुकी गेना हना यो गिगी बाक्नीम। नां पवानु मेको मारेइ सुर्ता मपाइनीम। मेको गेना हना यो फल सिख बाक्नीम” देंत। *भजन संग्रह १:३* 9 मुर आन थुं नेल्ल क्येडा जोल पाइब बाक्ब। गेना हना यो दूली पाइब बाक्ब। मेको कली सुम रुप्ते चाप्पा डा? *१सामुएल १६:७; भजन संग्रह ७:१०; हितोपदेश १५:११; रोमी २:६* 10 गो, परमप्रभु यावेमी मुर आन कली नाक्नुड। आन थुंम मार बाक्मे, मेको कोव्रनुड। आन गाक्शो लां नु आन पशो कोव्रशा, इनाम गेनुडमी।

11 मुर, आंम आ मपशो ब्वोफु पुख क्येन्ने खोदेशो बाक्ब। मेकोमी हेंथे पा शोंप चेम्ब। मेको आ ब्रोंइतीक नाक्ती उइक्थ दुम्मेनु, मेको आ शोंपोम मेको मुर कली प्रोंइब। मिनु आ बेक्ची ना मेको कली मूर्ख मिम्सीब। *लूका १२:२०*

12 डोंइती रे मान तशा बाक्शो इन सक्ति पाइश्शो नित्तीके आंइ ब्रोंइशा बाक्तीक बाक्ब। *येरमीया ३:१७* 13 गे इस्त्राएली आन आस पशो परमप्रभु

यावे, इन कली प्रोंइब नेल्ल मुने दोक्नीम। इन कली प्रोंइशा गाक्ब मुर नेल्ल फुरकुम नें ब्रेक्शो खोदेशो ला बाक्नीम। मारदे हना मेकोपुकीमी गेना हना यो ब्रोंइचा गेब ब्वाक्कु, परमप्रभु यावे कली प्रोंइशो बाक्नीम। *येरमीया २:१३*

येरमीया आ पुंइशो

14 मिनु गो “परमप्रभु यावे आं कली सापाइय्थीनी। मिनु गो सानुड। आं कली प्रोंइथीनी। मिनु गो ब्रोंइनुड। मारदे हना गे आं सक्ति बाक्नीनी। *प्रस्थान १५:२६; बजन संग्रह ६:३* 15 मेकोपुकीमी आं कली ‘परमप्रभु यावे आ लोव ते बाक्म? मुल मेको नेल्ल गाप्ल’ देंतेक्म। *भजन संग्रह ५:१९* 16 तन्न गो इन गोठला दुम्तीक रे मप्रोक्ड। गे तुइक्नीनी। गो नोले डा नाक्ती सुर्ता पचा ममाल्नुड, दे मिश्शो बाक्नुड। गो मार देंडा, मेको इन डोंइती बाक्ब। 17 गे आं कली हिंपाइक्ब मटुमीन। गो खतम दुम्चा डा नाक्ती गेन आं खुंइसीतीके बाक्नीनी। 18 आं कली खेदा पाइब आन कली मुने तोक्कीन। तन्न आं कली चहिं मुने मतोक्थीनी। मेकोपुकी हिंमल। तन्न आं कली चहिं हिंतीक रे प्रोंइथीनी। मेको आन ठेयब श्येत डा नाक्त् चाक्कीन। मेको आन कली निक्शी खेयप डा श्येतम सतीन” देंती। *भजन संग्रह ३५:४*

नाइक्तीक नाक्त् आ पबर्म लोव

19 परमप्रभु यावेम आं कली “गे मुर आन ओवतीक ठेयब लाप्चो आ नेक्था रपो। मेको लाप्चो रे यहूदा डा पिप लाडगा खिडगा पाइब। यरूसलेम डा गारो डा लाप्चो नेल्ल आन डोंइती लशा रपो। *नेहेम्याह १३:१५-२२* 20 मिनु मेको आन कली ‘एको ठेयब लाप्चो रे पा आगा ओव्रब यहूदा डा पिप, मेकर डा मुर नेल्ल नु यरूसलेममी बाक्ब मुर नेल्ल परमप्रभु यावे आ लोव नेनीन’ देनो” देंत। 21 परमप्रभु यावेमी “गेपुकी होस पा बाक्कीन। मिनु गे नाइक्तीक नाक्त् ठेयब लाप्चो आगाम मारेइ भारी मकुरीन। यरूसलेम डा गारो डा ठेयब लाप्चो रे पा आगा मारेइ मअँइदीन। *प्रस्थान २०:८-१०* 22 ‘गेपुकी नाइक्तीक नाक्ती इन खिं रे भारी मकुरीन। मेको नाक्ती मारेइ गेय मपने। गो इन किकी पिपी आन कली शेंशो खोदेशो पा नाइक्तीक नाक्त् कली अरु नाक्ती खोदेशो मपने। मारदे हना मेको आं नाक्त् बाक्ब’ देंती। *यसैया ५६:२* 23 तन्न मेकोपुकीमी मनेनेम। आन नोफा मदाइक्तेम। मिनु मेको आन थुं खकटा दुम्तीके मटीमे नु शेंशो नेंने मबिस्सम। *येरमीया ११:८* 24 तन्न गेपुकीम आं लोव नेंतीनी हना, नाइक्तीक नाक्ती सहर नु ठेयब लाप्चो रे मारेइ भारी आगा मअँइताक्नी हना नु नाइक्तीक नाक्त् आं नाक्त् मिश्शा, मारेइ गेय मपाइतीनी हना, 25 दाऊद आ नित्तीकेम निख पिप, आन गेय पाइब मुरपुकी एको सहर डा ठेयब लाप्चो रे शाराम केशो बगीम डोइश्शा ओव्रनीम। यहूदा डा मुर नु यरूसलेममी बाक्ब जाक्नीम। मिनु एको सहरमी गेना हना यो मुर शुश बाक्नीम। *येरमीया २२:४* 26 मिनु यहूदा डा सहर रे नु यरूसलेम आ एर ओंथ डा गाउं रे, बेन्यामीन आ रागी रे, शेफेलाह डा दिंम रे, पहाड रे नु नेगेब रे चोशा चढेतीके, क्योरशा चढेतीके, अन्न चढेतीके, धूप चढेतीक नु ‘गे रिश्शो पाइब बाक्नीनी’ दे चढेतीके चाक्शा, परमप्रभु यावे आ खिंम जाक्नीम। 27 तन्न गेपुकीम आं लोव मनेतीनी हना, नाइक्तीक नाक्ती आं नाक्त् बाक्ब, दे ममिम्ताक्नी हना नु नाइक्तीक नाक्त् भारी कुरशा यरूसलेम डा ठेयब लाप्चो आगा ओव्रतीनी हना, आं देंशो मबिस्साक्नी हना, गो यरूसलेम डा ठेयब लाप्चोमी गेनायो मकाप्ब मी जेतनुड। मिनु मेकोमी यरूसलेम डा दरवार दाक्ब” दे परमप्रभु यावेमी देंत। *इजीकीएल २०:१२-१३*

खप के ग्योब सेल्ब

18 परमप्रभु यावेमी आं कली मार लोव पाप्तु देंशा हना 2 मेकोमी “उइ खप के ग्योब सेल्ब आ खिं लावो। मिनु गो इ कली आं लोव नेंपाइक्नुड” देंत। 3 मोपतीके गो उइ खप के ग्योब सेल्ब आ खिं लती। मिनु मेकर मेकोमी आ गुगील हिश्शा गेय पाप्तु। 4 मिनु मेको आ सेल्शो खप के ग्योब आ गुडम वारसाक्व। मिनु मेकोमी मेको खप के आ दाक्शो अर्को ग्योब का सेल्लु।

5 मिनू परमप्रभु यावेमी आं कली 6 “इसाएल आ खिं डा मुर, एको खप के ग्योब सेल्बमी खोदेशो पा गो इन कली पाइवने मचापुडा डा? इसाएल आ खिं डा मुर, मेको खप के ग्योब सेल्ब आ गुडम खप बाक्शो खोदेशो पा, गो यो आं गुडम खप खोदेशो बाक्नीनी। *यसैया ४५:९; रोमी ९:२१* 7 गो याम कामीन तेकोइ रागी, तेकोइ राज्य आन कली तुल्शा ताइश्शा, जिक्शा खतम सेल्लुड। गो मेको पने चापुड। *येरमीया १:१०* 8 तन्न मेको आ देशो रागी डा मुर आन मरिश्शो पतीक रे आं गे लेत्तेक्म हना, गो आं मिश्शो मेको आन कली ठेयब श्येत गेतीक रे फाइवकुड। श्येत मगेनुडमी। *येरमीया २६:३; इजीकीएल ३३:११; जोना ३:१०* 9 मिनू अर्को याम काम गो तेकोइ रागी, तेकोइ राज्य आन कली सेल्शा वोइवने चापुड। 10 तन्न मेकोपुकीम आं लोव्र मनैथु, आं डोंइती मरिश्शो पाम्तेक्म हना, गो मेको आन कली रिश्शो मसेल्लुडमी। 11 मोपतीके गे यहूदा डा मुर आन कली नु यरूसलेममी बाक्ब मुर आन कली परमप्रभु यावेम इन कली मार दैत देशा हना ‘नेनीन, गो इन कली मरिश्शो पाइनुड। गो इन कली श्येत गेनुड। मोपतीके गे इन मरिश्शो लां रे लेतीन। मिनू इन लां नु इन पतीके रिश्शो सेलीन’ देंनो। *येरमीया ७:३* 12 तन्न मेकोपुकीमी ‘मो पचा मोशा बाक्ब। गो आंइ मिश्शो पाइनीकी। गो आंइ थुं खकटा सेलीनीकी, दे लोव्र लेत्ताक्म’ देंनीम” दैत। *येरमीया ६:६; येरमीया ११:८*

13 मोपतीके परमप्रभु यावेम “रागी रागी डा मुर आन दातेम लशा हिल्लो पावो। ओदेशो लोव्र सुम नेशो बाक्नीमी? ग्युंवे मपशो मीश आल इसाएलम थम ग्रांरा दिशो गेय पशो बाक्ब। 14 मार, लेबानोन डा फुं सिरीयोन रोंगु आ काक्पे रे जाम्बा?। मार, आ बुक्तीके पहाड रे गूशा यिशो खोला डा शाइश्शो ब्वाक्कु सोव्रबा डा?। 15 तन्न आं मुरपुकीम आं कली प्रैताक्म। मेकोपुकीमी शोर गाक्शो मूर्ति आन कली चोशा चढ़ेक्म। मेको माइत लांम दाइल पपांइसाक्म। मिनू मेकोपुकी मेको माइत ठेयब लां प्रोंइशा, आइक्च लां मेर गाक्तेक्म। 16 मेकोपुकीम आन रागी हिंचा डा सेल्लेक्म। मिनू मेको रागी गेना हना यो शुक्शी पतीक दुम्त। मेकेर रे सु सु गाक्मा मेको ग्रीचोक पा हिंनीम। मिनू ‘आबी, आबी’ देंनीम। *येरमीया १९:८* 17 गो मेको आन कली पूर्व डा फशेम खोदेशो पा आन जोरी सत्रु आन डोंइती एर ओंथ ब्रपाइवकुडमी। मेको आन हिंचा डा नाक्ती गो मेको आन कली आं ची कोंइनुडमी। आं कुल मकोंइनुडमी” दैत। *येरमीया २:२७*

18 मिनू मेकोपुकीम “मुल गोपुकीम येरमीया कली दोस गेय। मारदे हना चढ़ेब आन शेंशो लोव्र मग्याम्ब। जोक्ब तुइक्ब आन अर्ती यो मग्याम्ब। मिनू परमप्रभु यावे आ लोव्र पाइब आन देशो लोव्र यो मजाम्ब। मोपतीके मुल गो येरमीया कली दोस गेय। मिनू मेको आ देशो तेकोइ लोव्र मनैथु” देंतेक्म।

19 मिनू येरमीयामी “परमप्रभु यावे आं लोव्र नेनीन। आं कली दोस गेबपुकीम मार देंनीमी, मेको नेनीन। 20 मार, रिश्शो आ पा डा मरिश्शो पांइसीबा डा? मो हना यो आं कली खाल्टा दोशो बाक्तेक्म। गो मेको आन पर्वम पुंइना पुंइन बाक्ती, मेको मिम्तीन। मेको आन कली वारच पचा कली नु इन गाइश्शो तेक्वा कली पुंइता। 21 मोपतीके मेको आन आल आन कली अन्काल पपतीन। मेको आन कली तरवारम साइक्पतीन। मेको आन मीश आल मबाक्शो नु आन वोंइश बेक्शो मीश मुर दुम्मल। मेको आन वोंइश मुर बेक्तीक रोइम बेक्मल। मेको आन ठिटा वोंइश मुरपुकी लडाइम तरवारम साइक्वा पुंइसमल। 22 गेमी मेको आन कली आन मतुइक्थु साइक्ब चाक्नीनु, मेको आन खिं रे डाक्शो ब्रेश्शो नैसेक्ल। मारदे हना मेकोपुकीमी आं कली ग्याइक्वा कली खाल्टा दोशो बाक्तेक्म। मिनू आं खोइल फ्रिन्चा कली खुइश्शा ब्वारद दाइश्शो बाक्तेक्म। 23 मिनू परमप्रभु यावे, आं कली साइक्वा माल्शो नु मरिश्शो पाइब नेल्ल आन कली तुइक्ताक्नी। मेको आन मरिश्शो पशो माफ मगेने। इन डोंइती रे मेको आन पाप मतिलीन। मेको इन डोंइती दाइल पांइसीमल। गे गाइक्तीनीनु, मेको आन कली मार पचा माल्बा, मेको पने” दैत। *मत्ती ६:१५*

ब्रोल्लो गर

19 परमप्रभु यावेमी “लशा खप के ग्योब सेल्ब रे ब्वाक्कु कुर पतीक ग्योब का ग्यापो। मिनू का निक्शी मुर आन दाते डा खाल्पा नु का

निक्शी चढ़ेब आन कली लाइक्मी। 2 मिनू गे हिन्नोम आ तौ आ बेंसीम बाक्शो गम्टे लाप्चोम लावो। गो इ कली मार शेंदु, मेको लोव्र मेकेर ठेयब सेंदा पा नैपाइक्मी। *येरमीया ७:३१* 3 यहूदा डा पिप नु यरूसलेमम बाक्ब मुरपुकी परमप्रभु यावे आ लोव्र नेनीन। मुर नेल्ल आन परमप्रभु यावे, इसाएली आन परमप्रभुमी ‘आं लोव्र नेनीन। गो एको रागीम थम मरिश्शो दुम्पाइक्नुड’ मेको आ पर्वम लोव्र नैब नेल्ल आन नोफा दाइक्नीम। *२राजा २१:१२* 4 मेको मुरपुकीमी आं कली प्रोंइतीमी। मिनू एकेर अर्को रागी डा देवी देवता आन कली चढ़ेशा, एको रागी ग्रांरा दिशो सेल्लेक्म। मेको देवी देवता आन किकी पिपी नु यहूदा डा पिपम यो मतुइश्शो बाक्तेक्म। मिनू मेकोपुकीम रागी कली दोस मताइब आन हुशेम प्रिताक्म। 5 मेकोपुकीमी आंम आल आन कली बाल देवता कली मीम चोशा चढ़ेचा कली डांडाम थान सेल्ला सेल्लन बाक्तेक्म। मेको मो पन, दे गो मअरेडमी। गो मेको मशेंदुमी। मोदेशो गेनायो ममिम्तु। *येरमीया ७:३१-३३; लेवी १८:२१* 6 मोपतीके होस पा बाक्कीन। मेको बेंसी कली तोफेथ नु हिन्नोम आ तौ आ बेंसी, दे वोइश्शो नें प्रोंइनीम। मेको शुश नाक्त रिम्चा ममाल्नीनी। तन्न मेको कली मुर साइक्तीक बेंसी, दे नें वोइक्नीम। *येरमीया ७:३२* 7 गो एको रागीमी यहूदा नु यरूसलेम आस मिश्शो मदुम्पाइक्नुड। गो मेको आन कली आन जोरी सत्रु आन डोंइती तरवारम साइक्पाइक्नुडमी। सु सुम मेको आन कली साइक्वा दाक्नीमी, मेको आन गुडम गेनुडमी। आन बेक्शो रां चहिं सरीड डा चिक्ब नु रागीम बाक्ब ब्वाकी डा जन्तु आन कली ब्वाचा गेनुडमी। 8 मिनू गो मेको सहर कली हिंचा डा सेल्लुड। मिनू मेको सहर गेना हना यो शुक्शी पतीक दुम्ब। मेकेर रे सु सु गाक्मा, मेको ग्रीचोक पा हिंनीम। मिनू आ खतम दुम्तीके आ पर्वम आबी, आबी देंनीम। *येरमीया १८:१६* 9 मेको आन कली आन तमी तौ आन श्ये ब्वापाइक्नुडमी। सहर पुम्तीके मुर नेल्ल आन नेक्वा डा मुर आन श्ये ब्वाइनीम। आन जोरी सत्रु नु मेको आन कली साइक्वा माल्ब आन गेशो श्येतम मोदेशो पाइनीम। *लेवी २६:२९; ब्यवस्था २८:५३*

10 मिनू नोले गे मेको ब्वाक्कु कुर पतीक खप के ग्योब, गे नु लाइब आन डोंइती प्रोलो। 11 मिनू गे मेको आन कली मुर नेल्ल आन परमप्रभु यावेमी ‘दोपा खप के ग्योब सेल्ब आ ग्योब गेनायो मबोंइसीचा डा पा ब्रोल्ले, मोपा गो मेको मुर आन कली नु एको सहर आन कली प्रोल्लुड। तोफेथमी मुर थिम्तीक मनुम्म सम्म बेक्शो मुर थिम्नीम। *यसैया ३०:१२-१४; येरमीया ७:३२* 12 गो एको सहर नु एकेर बाक्ब मुर आन कली मो पाइक्नुडमी। गो एको सहर कली तोफेथ खोदेशो सेल्लुड। 13 यरूसलेम डा खिंपुकी नु यहूदा डा पिप आन खिंपुकी तोफेथ खोदेशो पा ग्रांरा दिचा डा दुम्नीम। तेको तेको खिं तारी सरीड डा नां, तास्ला नु सोरुल आन कली चढ़ेशा, अरु देवी देवता आन कली तूचा थोव्रक चढ़ेमे, मेको खिं नेल्ल ग्रांरा दिचा डा दुम्नीम’ देंनो” दे परमप्रभु यावेमी देंत। *येरमीया ३२:२९; २राजा २३:१२; सेफन्याह १:३*

14 मिनू परमप्रभु यावेमी येरमीया कली लोव्र पथ, तोफेथ सोइक्ताक्व। मिनू येरमीया मेकेर रे जाक्शा, परमप्रभु यावे आ खिं डा लाडगाम बाक्शा, मुर नेल्ल आन कली 15 मुर नेल्ल आन परमप्रभु यावे, इसाएली आन परमप्रभुमी मार दैत देशा हना “गो एको सहर नु आ नेक्वा डा सहर डा मुर नेल्ल आन कली आं डोंइती देशो ठेयब श्येत जपाइक्नुडमी। मारदे हना मेको आन थुं खकटा बाक्ब। मिनू आं लोव्र नैचा मदाक्नीम” दे माइक्तीमी।

येरमीया नु चढ़ेब पशुहर

20 मिनू इम्मेर आ तौ चढ़ेब पशुहर परमप्रभु यावे आ खिंम गेय पाइब आन ठेयब मुर बाक्त। मेकोमी येरमीया आ लोव्र पशो नेंतु। 2 मिनू पशुहरमी परमप्रभु यावे आ लोव्र पाइब येरमीया कली तुपु। मिनू परमप्रभु यावे आ खिंम बाक्शो बेन्यामीन आ इर तला डा लाप्चोम बाक्शो ठेंडरो थोक्ताक्व। *प्रेरित १६:२४* 3 मिनू आ दीसा पशुहरमी येरमीया कली ठेंडरो रे गुंडदानु, येरमीयामी मेको कली “परमप्रभु यावेम इ नें पशुहर मवोइक्थु ‘एर ओंथ नेल्ल रे हिंतीक’ दे इ नें वोइक्तु। *येरमीया २०:१०; येरमीया ६:२५; येरमीया ४६:५; येरमीया ४९:२९; बजन संग्रह ३१:१४* 4 मारदे हना परमप्रभु यावेमी गो इ कली नु इ वारच नेल्ल आन कली शुश हिंचा डा सेल्लुड। मेकोपुकी इ डोंइती आन जोरी सत्रु आन तरवारम साइक्वा पुंइसीनीम। गो

यहूदा नु मेको आ मुर नेल्ल आन कली बेबीलोन डा पिप आ गुडम गेनुडमी। मेकोमी मेको आन कली ग्याइश्शा बेबीलोन लाइक्व। मिनु तरवारम साइक्व।<sup>5</sup> गो एको सहर डा शॉप नेल्ल, आ चेशो क्येट नेल्ल, आ शुश क्येट लाइब थोवक नेल्ल नु यहूदा डा पिप आन शॉप नेल्ल आन जोरी सत्रु आन कली गेनुडमी। मेकोपुकीमी आन मारेइ मारेइ रोइश्शा, मेको आन कली ग्याइश्शा बेबीलोन लाइक्नीम। यहोसु ३९:६<sup>6</sup> पशुर, गे नु इ खिम बाक्व नेल्ल ग्याइक्वा पुंडसीशा बेबीलोनम लाइनीनी। गे बेबीलोन लशा, मेकेर बेक्नीनी। इन कली मेकेर थिम्नीम। गे परमप्रभु आ लोव दूली सेल्शा, शंताक्वी। इ लोव नैब इ वारच नेल्ल इ खोदेशो पा थिम्चा पुंडसीनीम” दैत।

### येरमीयाम उजुर पशो

<sup>7</sup> मिनु येरमीयाम “परमप्रभु यावे, गे आं कली लेम्शा, इन लोव पाइब सेल्तीनी। मिनु गो इन लेम्शो लोव नैशा बिस्साक्वी। इन सक्तिमी आं कली ग्रातीनी। मुल नाक्त् रेन मुरुम आं कली शुक्शी पाइनीम। मुर नेल्लेमी आं कली शुक्शी पाइनीमी। येरमीया १:५-७<sup>8</sup> गो लोव पची ना ठेयब सेंदा पा लोव पचा माल्लुड। गो हुश ख्राक्व बोक्वा नु खतम दुम्चा आ पर्वम ला ग्रीनुड। परमप्रभु यावे आ लोव नाक्त् रेन आं कली शुक्शी पाइक्तीक नु मरिम्शो पाइक्तीके दुम्त्।<sup>9</sup> गो मेको आ पर्वम लोव मपाइनुड। आ नें थिशा लेंशा लोव मपाइनुड दैती हना यो, आ थुमी ब्रशो मी खोदेशो दुम्त्। आं रुशपुकीम तेक्शा वोदुनु, मी खोदेशो दुम्त्। गो मेको कली तेक्शा दती। गो थमा पा, मेको कली तेक्ने मचाप्नुड। इकोरिन्थी ९:१६<sup>10</sup> गो शुश मुरपुकीम नोफा मुइक्मुशा लोव पशो नैता। मेकोपुकीमी ‘एर ओथ नेल्ल हिंचा डा श्येत बाक्व। येरमीया कली दोस गेय। मेको आ पर्वम उजुर पय’ दैनीम। आं नेक्था डा वारच नेल्लेमी ‘गेना दाइल पांडसीबा’ दे आं कली कोवनीम। मिनु लेंशा ‘गो मेको आ पर्वम लोव पा मेको कली ग्राने चाप्नीकी। गो मेको क्येडा ग्राशा क्येक्क लेत्नय’ दैतेक्म” दैत। येरमीया २०:३; येरमीया १८:१८<sup>11</sup> तन्न परमप्रभु यावे बोल्यो लडाइ पाइब का खोदेशो पा गो नु बाक्व। मोपतीके आं कली खेदा पाइबपुकी दाइल पांडसीशा, गोल्नीम। मिनु मेकोपुकीम आं कली मग्रानीम। मेको थाम्पा मुने दोक्नीम। मारदे हना मेको आन मरिम्शो पशो गेनायो मप्रेंसीबा। येरमीया १८:१९<sup>12</sup> मुर नेल्ल आन परमप्रभु यावे, गे ठीक पाइब आन कली नाक्शा कोवनीनी। गे मुर आन थुं नु आन मिम्तीके कोवनीनी। आं कली मेको आन कली क्येक्क लेश्शो तचा गेयीनी। मारदे हना गो आं निसाफ पतीके इन कली जिम्मा गेता। येरमीया ११:२०

<sup>13</sup> मिनु “परमप्रभु यावे कली कुम्सो पने। परमप्रभु यावे ठेयब बाक्व” दे कुम्सो पने। मेकोमी क्येट मथीब आन कली मरिम्शो पाइब आन गुइ रे प्रौइत्तु।

<sup>14</sup> गो आं जरमेशो नाक्त् सराप रल। आं ममाम आं कली जरमेशो नाक्त् आसीक मतवल। येरमीया १५:१०; अय्युब ३:३-११; अय्युब १०:१८<sup>15</sup> आं आफ कली “इ के आल का जरमेसाक्व। तौ का जरमेसाक्व” दे लोव शेंब सराप रल। मेकोमी आं आफ कली ग्येरपाइक्त्तु।<sup>16</sup> परमप्रभु यावेमी मेको मुर कली शिशी मपथु, मेको मुर खतम पोक्शो सहर खोदेशो दुम्त्। मेकोमी सुनी डाक्शो ब्रेश्शो नु नाक्ती लडाइ डा तुराही ताप्शो नेनल। उत्पत्ती १९:२४-२८<sup>17</sup> मारदे हना मेकोमी आं कली आं ममा आ कोवज उइ मसाइय्यी। मो दुम्शो हना, आं ममा, आं तुरस दुम वा। मिनु आ कोवज गेना हना यो ठेयब दुम वा।<sup>18</sup> गो मारदे कोवज रे गूडा? गो शुश गेय नु सुर्ता पचा कली जरमेसाक्वी। मिनु नाक्त् किंत किंत मुने दोक्वा कली जरमेसाक्वी।

### पिप सिदकीयाह आ पुंडशो मनैशो

<sup>21</sup> मिनु पिप सिदकीयाहम माल्कीयाह आ तौ पशुर नु मासेयाह आ तौ चढेब सेफन्याह आस कली लोव कुर पा येरमीया आ बाक्तीकेम सोइक्ताक्सी। मेना परमप्रभु यावेमी येरमीया कली लोव पाप्त्तु। येरमीया ३९:१-१०; येरमीया २९:२५-२६; येरमीया ३७:३; येरमीया ५२:२४<sup>2</sup> मेको निक्शीमी “हजुर, परमप्रभु यावे कली आंइ पर्वम हिल्लो पने। मारदे हना बेबीलोन डा पिप नेबुकदरेसरमी आंइ कली लडाइ तोन तोन बाक्व।

साइ डोंइती शुश खेयप पशो खोदेशो पा परमप्रभु यावेमी आंइ पर्वम छक लाक्वा डा गेय पाइबा को? मिनु मोपा मेकोपुकी आंइ रे पा लेश्शा लाइनीमी को?” दैताक्से।<sup>3</sup> मिनु येरमीयामी मेको आस कली<sup>4</sup> “परमप्रभु यावे, इस्त्राएली आन परमप्रभुमी मार लोव पाप्त्तु दैशा हना, गे सिदकीयाह कली ‘गारो आ लाडगाम बाक्शो इन कली पुम्ब बेबीलोन डा पिप नु कल्दी नु लडाइ पशो इन गुइ डा यापुकी इन गे लेप्पाइक्नुड। मिनु गो मेको आन कली खुप्शा, एको सहर आगाम ओइनुडमी।<sup>5</sup> गो आं दिंशो गुइ, सक्ति नु आं थाम्पा गाइश्शा, चुरशा नु ग्युश्रा बोक्शा, गे नु लडाइ पाइनुड।<sup>6</sup> गो एको सहरम बाक्व मुर नु बस्तु भाव नेल्ल आन कली साइक्नुडमी। मिनु मेकोपुकी ठेयब बेक्तीक रोइम बेक्नीम” दैत, दे मतीस।<sup>7</sup> मिनु नोले परमप्रभु यावेमी ‘गो यहूदा डा पिप सिदकीयाह, मेको आ गेय पाइबपुकी नु मेको सहर डा बेक्तीक रोइ, तरवार नु अन्काल रे ब्रोंइशो मुर आन कली बेबीलोन डा पिप नेबुकदरेसर आ गुडम गेनुडमी। गो मेको आन कली साइक्वा माल्ब आन जोरी सत्रु आन गुडम जिम्मा गेनुडमी। मिनु मेकोमी मेको आन कली तरवारम साइक्पाइक्व। मेकोमी मेको आन कली शिशी मपथु, मप्रोंइब नु दाक्तीके मकोइथु, साइक्पाइक्व’ मतीस” दे माइक्तीम्सी।

<sup>8</sup> मेकोमी “गेमी मेको मुर आन कली ‘परमप्रभु यावेमी “गो इन डोंइती ब्रोंइशा बाक्तीक नु बेक्तीक लां वोइक्ता। ब्यवस्था ३०:१५<sup>9</sup> मेको सहरम बाक्व मुर तरवार, अन्काल नु मुर बेक्तीक रोइम बेक्वा माल्नीम। तन्न सु लाडगा गूशा, इन कली पुम्ब कल्दी आन कली जिम्मा गेंसीबा, मेको ब्रोंइब। मेकोम आ सोक्त् ला प्रोंइब। येरमीया ३८:२<sup>10</sup> गो एको सहर कली थमा पा क्याम्नुड। रिम्शो पचा कली ममिम्नुड। एको सहर बेबीलोन डा पिप आ गुडम गेनुड। मेकोमी एको सहर कली मीम क्रोइक्व” दैत’ देनो” दैत। येरमीया ३४:२

<sup>11</sup> परमप्रभु यावेम “यहूदा डा पिप आ खिं डा मुर आन कली ‘परमप्रभु यावे आ लोव नेनीन।<sup>12</sup> गे दाऊद आ खिं डा मुर सुनी कुस कुस ठीक निसाफ पने। रोइक्वा पुंडसीशो आन कली मरिम्शो पाइब आन गुइ रे प्रोनीन। मो मपाइतीनी हना, इन मरिम्शो पतीके आं गाइक्तीके मी खोदेशो पा ब्राइब। मेको सुइम काप्ने मचाप्वा डा पा ब्राइब। येरमीया २२:३; येरमीया ७:२०<sup>13</sup> एको दिमम बाक्वपुकी रोगु तार सेल्शो सहर गो इन कली लडाइ तोइनुड। गे आंइ कली जाक्शा, सुम लडाइ तोइबा डा? “आंइ खुइक्तीके सु ओवने चाप्वा डा? आंइ बाक्तीकेम सु ओवने चाप्वा डा?” दैनीनी।<sup>14</sup> गो इन कली इन पशो खोदेशो पा कोवशा, सजाइ गेनन्नी। गो इन ब्वाकीम मी सुइक्नुड। मिनु मेकोमी इन एर ओथ बाक्शो मारेइ मारेइ नेक्व, दे परमप्रभु यावेमी दैत’ देनो” दैत। गलाती ६:७; इजीकीएल २१:३

### पिप शाल्लुम येहो-याकीम नु कोन्याह

<sup>22</sup> परमप्रभु यावेम “उइ यहूदा डा पिप आ दरवारम लशा, मेकेर मार लोव पचा माल्नेवे दैशा हना,<sup>2</sup> ‘दाऊद आ नित्तीकेम निष्ब, यहूदा डा पिप, इन गेय पाइबपुकी नु मेको ठेयब लाप्चो रे ओव्रबपुकी परमप्रभु यावे आ लोव नेनीन।<sup>3</sup> परमप्रभु यावेमी मार दैत दैशा हना “गे ठीक निसाफ पने। ठीक गेय पने। रोइक्वा पुंडसीशो आन कली मरिम्शो पाइब आन गुइ रे प्रोनीन। अर्को रागी डा मुर, रोम रोइक्व नु आन वोंइश बेक्शो मीश मुर आन कली मरिम्शो मपने। मिनु एको रागीम मारेइ दोस मताइब आन हुश मशाइक्पतीन। येरमीया २१:१२<sup>4</sup> मारदे हना गेपुकीम थमा पा एको आं लोव पाइतीनी हना, एको दरवार डा ठेयब लाप्चो रे पा ओव्रशा, दाऊद आ नित्तीकेम निष्ब पिप गेना हना यो बाक्व। मेको बग्गी नु शाराम जाक्शा, मेको आ गेय पाइब मुरपुकी नु अरु मुरपुकी नु ओव्रब”। येरमीया १७:२३<sup>5</sup> तन्न गेपुकीम एको आं लोव मपाइतीनी हना, परमप्रभु यावेम “गो आं नैमी कसम जशा, एको दरवार क्याम्नुड” दे मतो’ ” दैत। इराजा ९:८<sup>6</sup> मारदे हना यहूदा डा पिप आ दरवार आ पर्वम परमप्रभु यावेमी “गे आं कली गिलाद नु लेबानोन डा डांडा खोदेशो बाक्नेवे। गो इ कली गोरशो रागी नु मुर मबाक्शो सहर खोदेशो सेल्नुड, दे कसम जाता।<sup>7</sup> गो इ कली या कुरशा, खतम सेल्ब आन कली ठीक पाइनुड। मेकोपुकीम इ नेल्ल क्येडा रिम्शो लाइश्शो लेबानोन डा रवा तिम्नीम। मिनु मीम हुम्नीम।<sup>8</sup> मिनु शुश रागी रागी

डा मुरपुकी एको सहर रे पा लाइनीम। मिनु मेको नेल्लेमी 'परमप्रभु यावेम, मारदे एको ठेयब सहर कली ओदेशो पवा?' देमुइनीम।<sup>9</sup> मिनु मेको आन कली 'मारदे हना मेकोपुकीमी परमप्रभु यावे, आन परमप्रभु आ कबल पशो प्रोइशा, देवी देवता आन कली पूजा पा, मेको आन कली गेय पाम्तेक्म' देशा लोत्र लेत्वा पुंइसीनी" देनीम।<sup>10</sup> बेक्शा लशो आन परबम मडाक्कीन। मेको आन परबम रोंका मपने। मेको क्येडा यो ग्याइशा लाइशो मुर आन परबम डाक्कीन। मारदे हना मेको गेनायो मलेक्ब। मेकोमी आ रागी गेनायो मताइब। २राजा २३:२९-३४

पिप शाल्लुम आ परबम लोत्र

11 परमप्रभु यावेम यहूदा डा पिप योसीयाह आ तौ शाल्लुम आ परबम लोत्र पाइब। मेको आ आफ आ पा डा यहूदा डा पिप दुम्त। मिनु मुल मेको एक रे लत। मेको एक लेशा मजाक्ब। शाल्लुम कली योआहास यो देनीम। इतिहास ३:१५; २इतिहास ३६:१-४<sup>12</sup> मेको कली तेको रागीम ग्याइशा लदमे। मेको मेक उड बेक्ब। मेकोमी एको रागी लेंशा गेनायो मताइब।<sup>13</sup> "आबी, आबी, सुमी पाप पतीकेमी आ खिं सेल्बा, सुम आ खिं डा आइक्वा डा कोठा ठीक मपतीकेमी सेल्बा, मेकोमी आ नेक्था डा मुर आन कली मोशा गेय पपाइक्ब। मिनु मेको आन कली आन गेय पशो डा गाल्च मगेब। २राजा २४:१४; मीका ३:१०; लेवी १९:१३; याकूब ५:४<sup>14</sup> मेकोमी 'गो आं कली तला तार शुश ठेयब कोठा पाइशो खिं का सेल्लुड' देब। मेकोमी झेलपुकी सेल्ब। मेको कली लेबानोन डा लाइशो रवा आ शीम क्येष्ठा, मेको कली लल रड खेक्ब।<sup>15</sup> मार, गे पिप नवे? मारदे हना गे गारो नेल्ल बोल्यो शीम क्येजेवे? इ आफ नु जचा तूचा थोत्रक बाक्त। मेकोमी ठीक निसाफ नु ठीक गेय पाप्तु। मिनु मेको कली रिम्शोन दुम्त।<sup>16</sup> मेकोमी प्रुडग नु मारेइ मथीब आन कली ठीक निसाफ पाप्तु। मिनु मेको कली रिम्शोन दुम्त। मेको आं कली तुइक्ब मुरुम पाइनीम" दे परमप्रभु यावेम देत।<sup>17</sup> तन्न इ मिक्च नु इ थुंम ठीक पा मचेम्शो क्येट ला बाक्ब। गे दोस मताइब आन हुश शाइक्वाइक्नेवे। गे मुर आन कली दिष्ठा हुश खाक्श पोक्नेवे। मरिम्शो पचा नु रोइक्वा ला दाक्नेवे।<sup>18</sup> मोपतीके परमप्रभु यावेम "यहूदा डा पिप योसीयाह आ तौ येहो-याकीम आ परबम 'आबी, मुरपुकीमी मेको आ परबम रोंका पची ना आं लोक्ब, आबी, आ समी मदेनीम" मेको आ परबम मडाक्कीम। मिनु 'आबी, आं प्रभु, आबी, मान ताइब पिप' दे मेको आ परबम मडाक्कीमी। २राजा २३:३४<sup>19</sup> मेको कली गधा का थिम्शो खोदेशो पा, कीशा लाइशा यरूसलेम डा ठेयब लाप्चो आ डोंइती गुंइशा ताइक्कीम" देत। येरमीया ३६:३०

<sup>20</sup> लेबानोनम लशा ठेयब सेंदा पा ग्रीडो। इ सेंदा बाशानम नेंपाइक्कीम। अबारीम पहाड रे ठेयब सेंदा पा ग्रीडो। मारदे हना इ दाक्शो मुर नेल्ल बेक्तेक्म।<sup>21</sup> गे रिम्शो पा बाक्डेनु, गो इ कली लोत्र पाता। तन्न गे "गो मेको मनेनुड" देते। गे ठिटा बाक्डे ना रेन मोदेशो बाक्ते। गे आं देशो मटिटी।<sup>22</sup> इ गोठला नेल्ल आन कली फशेम बेर पाइशा योल्ब। मिनु इ वारच नेल्ल ग्याइशा लाइक्वा पुंइसीनीम। मेना गे इ मरिम्शो गेयम पतीके मुने दोक्शा, आमाइ, मेको श्येत नेल्ल परमप्रभु यावे आ अरेशो मटिटीके दुम्शो बाक्ब।<sup>23</sup> लेबानोनम बाक्ब मुर, लेबानोन डा लाइशो रवा आन दातेमी खिं सेल्ब मुरपुकी, श्येत नु सुत्केरी रोइ पशो खोदेशो दुम्तीनी हना, दोपा हुकयी पाइनीनी।

<sup>24</sup> परमप्रभु यावेम "गो दोपा ब्रोंइशा बाक्डा, मोपा यहूदा डा पिप येहो-याकीम आ तौ कोन्याह माइशो येहो-याकीम कली 'गे आं ग्युरा गुड डा छाप थोक्तीक औंठी नवे हना, गो इ कली गुंइशा ताइक्तन वा। कोन्याह कली योयाकीम यो देनीम। २राजा २४:८-१६; येरमीया २४:१<sup>25</sup> गो इ कली साइक्वा माल्ब मुर आन गुडम गेनन। गे मेको आन कली तशा हिंनेवे। गो इ कली मेको बेबीलोन डा पिप नेबुकदरेसर नु कल्दी आन गुडम गेनन।<sup>26</sup> गो गे नु इ कली जरमेब इ ममा इस कली अर्को रागीम ताइक्नन्सी। मिनु गे निम्फा मेकेर बेक्नीसी।<sup>27</sup> तन्न मेको आस लेत्वा माल्शो रागीम, लेत्वा मताइनीस।<sup>28</sup> मार, एको कोन्याह माइशो मुर सुडम मदाक्शो ब्रोल्लो ग्योब खोदेशो बाक्बा डा? मेको मोदेशो ग्योब कली सुडम ममाल्नीम। मोपतीके

मेको नु मेको आ आल आन मतुइशो रागीम ताइक्वा पुंइसीनीमी?" देत। कोन्याह माइशो येहो-याकीम आ तौ कली येकोन्याह यो देनीम। येरमीया २४:१<sup>29</sup> ए रागी, रागी डा मुर नेल्ल, परमप्रभु यावे आ लोत्र नेनीन।<sup>30</sup> परमप्रभु यावेमी "मेको मुर आ नें क्याम्सीब, दे ब्रेक्शा वोतो। मेको मुर बाक्म सम्म मारेइ पने मचाप्ब। मेको आल मपाइशो मुर दुम्ब। मारदे हना मेको के तेकोइ मुर रिम्शो मदुम्नीम। मेको आ चच युड दाऊद आ निल्लीकेम नित्वा मताइनीम। मेकोपुकीमी यहूदा आ निल्लीकेम निश्शा हुकुम पचा मताइनीम" देत। इतिहास ३:१७-२४

मरिम्शो गोठला आन परबम लोत्र

23 परमप्रभु यावेमी "आबी, गे आं भेडा आन कली एर ओंथ ब्राइक्ब गोठला" देत। इजीकीएल १४:-; येरमीया १०:२१; जकरिया ११:५<sup>2</sup> मोपतीके परमप्रभु यावे, इस्राएली आन परमप्रभुमी आ मुर आन कली योत्रब गोठला आन परबम "गेपुकीम आं बगाल आन कली फ्राइतीनी। मिनु मेको आन कली खेरतीनी। मेको आन कली मकोवनी। मोपतीके गो इन मरिम्शो पशो आ परबम कोव्रनुड। इन कली सजाइ गेनुड" दे परमप्रभु यावेमी देत।<sup>3</sup> परमप्रभु यावेमी "गो आं लीशो बगाल नेल्ल आन कली इन खेरशो रागी रे खुप्शा लेशा, आन बगालम चाक्नुडमी। मिनु मेकोपुकी मेकेर सोशा बोशा शुश दुम्नीम।<sup>4</sup> गो मेको आन कली योत्रब गोठलापुकी वोइक्नुडमी। मिनु मेको आन कली योत्रनीम। मेना भेडा महिनीम। सुर्ता मपाइनीम। मेको आन दाते डा का यो मजाम्नीम" दे परमप्रभु यावेमी देत। येरमीया ३:१५

<sup>5</sup> परमप्रभु यावेम "गो दाऊद आ मुर रे ठीक पाइब राशी का वापाइक्नुड। मेको नाक्त थमा पा जाक्ना जाक्न बाक्ब। पिप कामी आ जोक्तीक तुइक्तीकेम सासन पाइब। मिनु मेकोमी आ रागीमी ठीक निसाफ नु ठीक गेय पाइब। जकरिया ३:८; यसैया ३२:१<sup>6</sup> मेकोम सासन पवा ना यहूदा श्येत रे प्रोइचा पुंइसीब। मिनु इस्राएल मारेइ मदुम्शु बाक्ब। मेको आ नेंम मेकोपुकी तुइक्वा पुंइसीनीमी। मेको आ नें 'परमप्रभु यावे आंइ कली ठीक पाइब बाक्ब' देनीम" देत। ब्यवस्था ३३:२८; येरमीया ३३:१६; यसैया ४५:२४

<sup>7</sup> मिनु परमप्रभु यावेमी "परमप्रभु यावे ब्रोंइशा बाक्शो खोदेशो नु मुर आन कली इजीप्त रागी रे गुंइशा एक चाक्शो मदेतीक नाक्ती थमा पा जाक्नीम।<sup>8</sup> तन्न मार देनीम देशा हना, मेकोपुकीमी 'परमप्रभु यावे ब्रोंइशा बाक्शो खोदेशो नु इस्राएली आन चच युड आन कली उत्तर डा रागी नु तेको तेको रागी रे चाक्शो' देनीम। मारदे हना मेको आन रागीम बाक्वा ताइनीम" देत। येरमीया १६:१४-१५

दूली लोत्र पाइब  
इजीकीएल १३:२-१६

<sup>9</sup> परमप्रभु यावेम आ लोत्र पाइब आन परबम लोत्र पशो बाक्ब। मेको नेंशा आं थुं जिक्त। आं रुश नेल्ल खिंखि पाइनीम। गो दुक्शो मुर खोदेशो दुम्ती। गो अडगुर शांबु शुश तूशा दुक्शो खोदेशो दुम्ती। गो परमप्रभु यावे आ परबम नु आ लोत्र आ परबम मोदेशो दुम्ती।<sup>10</sup> मारदे हना एको रागी तेल्लेम पतीकेम ब्रीशो बाक्ब। सराप रतीके, रागीम रोंका पाइब। मुर मबाक्तीके बस्तु योत्रतीके सोवतेक्म। परमप्रभु यावे आ लोत्र पाइब आन पतीके काइ मरिम्शो बाक्ब। आन सक्ति दूली पा चलेनीम। येरमीया १२:४<sup>11</sup> परमप्रभु यावेमी "आं लोत्र पाइब नु चढ़ेब नेल्ल आं कली ममानेब दुम्तेक्म। मेकोपुकीमी आं खिंमी यो आं अरेशो लोत्र मटीनीम। येरमीया ५:३१<sup>12</sup> मोपतीके मेको आन लां छिडछिड दुम्शा ग्रेक्ब दुम्ब। मिनु मेकोपुकी मेकेर गाक्मानु, ग्रेक्शा गोल्नीम। मारदे हना गो मेको आन कली सजाइ ततीक बर्सम ठेयब श्येत गेनुड। येरमीया १३:१६; बजन संग्रह ३५:६<sup>13</sup> गो सामरीया डा आं लोत्र पाइब आन दातेमी ग्रांरा दिशो गेय ताता। मेकोपुकीमी बाल देवता आ नेंम नोले दुम्ब लोत्र पाम्तेक्म। मिनु आं मुर इस्राएली आन कली हेंथे लां खोइक्वाइक्तेक्म। ब्यवस्था १८:२०-२२; यसैया १:१०; इजीकीएल १३:२३<sup>14</sup> तन्न यरूसलेम डा आं लोत्र पाइब आन दातेम



सामरीया क्येडा यो ग्रांरा दिचा डा गेय ताता। मेकोपुकीम तेल्लेम पशा जोल ला पाइनीम। मरिश्शो पाइब आन कली बोल्यो सेल्नीम। मोपतीके सुइ मुर परमप्रभु यावे आ अरेशो मटितीक रे मलेत्नीम। मेको नेल्ल आं कली सोदोम खोदेशो नु यरूसलेम डा मुरपुकी चहिं गोमोररा खोदेशो दुम्तेक्म” दे परमप्रभु यावेमी देंत। 15 मोपतीके मुर नेल्ल आन परमप्रभु यावेम आ लोव्र पाइब आन परबम “गो मेको आन कली कशो थोवक उम्नुडमी। मिनु तुचा कली बीस ब्वाइश्शो ब्वाक्कु तुचा गेनुडमी। मारदे हना यरूसलेम डा परमप्रभु यावे आ लोव्र पाइब रेन रागी नेल्लेम परमप्रभु यावे कली थमा मसुइश्शो बाक्नीम” देंत। *येरमीया ९:१५*

16 मुर नेल्ल आन परमप्रभु यावेम “गेपुकी आं लोव्र पाइब आन लोव्र मनेनीन। मेकोपुकीमी जोल लोव्र पा इन कली हेंथे गाकपाइक्नीम। परमप्रभु यावे आ लोव्र ममाइ, तन्न आन थुंम मिश्शो लोव्र नु आन डोमु तशो ना डा लोव्र शेंनीम। आन खकटा थुं कली खोइश्शा गाक्ब आन कली ‘गे ठेयब श्येत मताइनीनी’ देंनीम। *येरमीया ६:१३-१४; येरमीया १४:१४* 17 मेकोपुकीम आं लोव्र मदाक्ब आन कली गेना हना यो ‘परमप्रभु यावे इन कली थुं नाइश्शा बाक्तीक दुम्ब’ देंनीम। मिनु मेकोपुकीम मटिथु आन थुं डा मिश्शोम गाक्ब आन कली ‘इन कली मारेइ हिंचा डा श्येत मदुम्ब’ देंनीम। 18 तन्न सु परमप्रभु यावे आ लोव्र नेंचा नु रुच्चा कली मेको आ अर्ती गेतीकेम बाक्म डा? सुम मेको आ लोव्र शेंचा कली नोफा दाइश्शा नेंशो बाक्म डा?

19 कोव्रडीन परमप्रभु यावे आ गाइश्शो फश गिवार खोदेशो पा बोक्ब। परमप्रभु यावे आ अरेशो लोव्र मटीब आन पियामी फश गिवार जुक्ब। 20 परमप्रभु यावे आ गाइश्शो मलेप्ब। आ मिश्शो नेल्ल पने थुमा नोले ला लेप्ब। नोले डा नाक्ती एको लोव्र रिश्शो पा रुप्नीनी। 21 मेको आं लोव्र पाइब आन कली गो मसोइक्तुमी। मो हना यो मेकोपुकी आन लोव्र कुरशा दोरशा लाम्तेक्म। गो मेकोपुकी नु लोव्र मपड। मो हना यो मेकोपुकीमी लोव्र पास्तेक्म। *येरमीया १४:१४* 22 मेकोपुकी आं अर्ती गेतीकेमी बाक्शो हना, मेकोपुकीमी आं मुर आन कली आं लोव्र नेंचा डा पा देंम वा। मिनु मेको आन कली आन मरिश्शो लां नु आन मरिश्शो गेय रे लेत्तेक्म वा” देंत।

23 परमप्रभु यावेम “मार, गो नेक्था डा ला परमप्रभु यावे नडा डा? डोन डा चहिं परमप्रभु मनडा डा? 24 मिनु मुर आं डोंइती रे खूइश्शा बाक्ने चाप्नीमी डा? मिनु गो मेको आन कली तने मचाप्नुडमी डा? मार, सर्रीड नु रागी निम्फा कली गो प्रिने मचाप्नुडा डा?” दे परमप्रभु यावेमी देंत। *बजन संग्रह १३९:७-१६* 25 मिनु मेकोमी “गो आं नेंमी जोल पाइब आन लोव्र नेंता। गो डोमु ताता। गो डोमु ताता। 26 गेना सम्म मोदेशो दुम्बा? मेको आं लोव्र पाइब आन थुं गेना आं गे लेप्बा? मेको जोल पाइब आंम थुं डा दूली लोव्र पाइबपुकी गेना आं गे लेत्नीमी। 27 मेकोपुकीमी आन डोमु आन परबम लोव्र पा आं नें प्रेंपाइक्चा माल्नीम। आन किकी पिपी खोदेशो पा आं नें आ पा डा बाल आ नें ठेयब सेल्शा, आन डोमु डा लोव्र शेंमुम्तेक्म। *न्यायाधीस ३:७* 28 सुइ आं लोव्र पाइबम डोमु ताप्तु हना, आ डोमु शोवडल। तन्न सुइ नु आं लोव्र बाक्त हना, मेकोमी थमा पा आं लोव्र शेंदल। पराल नु चेरब मगारनीस” देंत। 29 परमप्रभु यावेमी “मार, आं लोव्र मी खोदेशो मबाक्बा डा? मेको सेरथे फुल्लु कली प्रोल्ब घन खोदेशो मबाक्बा डा?” दे परमप्रभु यावेमी देंत। *हिब्रू ४:१२* 30 मिनु परमप्रभु यावेमी “कोव्रडीन, गो मेको आन कली देंशो लोव्र खोदेशो पा, मेकोपुकीमी अरु आन कली देंशो आं लोव्र आंम के सेल्शा, खुइ पा शेंनीम। मोदेशो पा आं लोव्र पाइब आन कली काइ मदाक्नुड। 31 कोव्रडीन, मेकोपुकीमी आंम थुं डा लोव्र पशा ‘परमप्रभु यावे आ लोव्र बाक्ब’ देंनीम। गो मोदेशो लोव्र पाइब आन कली काइ मदाक्नुड। 32 कोव्रडीन, मेकोपुकीमी जोल पा डोमु डा लोव्र पाइब बाक्नीम। गो मोदेशो पा आं लोव्र पाइब आन कली काइ मदाक्नुड। मेको आन जोल शेंतीकेमी आं मुर आन कली हेंथे लां खोइक्पाइक्नीम। मेकोपुकीमी काइ महिंब बाक्नीम। गो मेको आन कली मसोइक्तुमी। गो मेको आन कली मयोव्रडुमी। मोपतीके मेको आन लोव्र मुर आन कली शोर गाक्शो बाक्ब” दे परमप्रभु यावेमी देंत। *येरमीया १४:१४*

### जोल पाइब आन लोव्र

33 मिनु मुर का, आं लोव्र पाइब का कि चढेब काम इ कली “परमप्रभु यावे आ देंशो श्येत लोव्र मार बाक्बा?” दे इ कली हिल्लो पाप्तु हना, गे मेको कली “मेको श्येत गे बाक्नीनी” देनो। मिनु परमप्रभु यावेमी “गो इन कली ताइक्नन्नी, देंत, माइक्मी” देंत। *२राजा ९:५५; यसैया १३:१* 34 परमप्रभु यावेम “तेकोइ आं लोव्र पाइब, तेकोइ चढेब नु अरु सुइमी ‘एको परमप्रभु यावे आ देंशो श्येत बाक्ब’ देंतेक्म हना, गो मेको आन कली नु मेको आन खिं डा मुर आन कली सजाइ गेनुडमी” देंत, दे माइक्मी। 35 मिनु इन दातेम अर्को कली “परमप्रभु यावेम मार लोव्र पवा? दे हिल्लो पचा माल्नीनी। 36 तन्न गे लेंशा ‘परमप्रभु यावे आ देंशो श्येत लोव्र बाक्ब’ मदेनीन। मारदे हना मुर नेल्ल आन पशो लोव्र श्येत दुम्ब। मोपा गेपुकीम ब्रोंइशा बाक्ब परमप्रभु, मुर नेल्ल आन परमप्रभु यावे, इं परमप्रभु आ लोव्र दूली सेल्नीनी। 37 मिनु गे आं लोव्र पाइब नेल्ल आन कली ‘परमप्रभु यावेम इन कली मार, लोव्र लेत्ता? परमप्रभु यावेम मार लोव्र पवा?’ दे हिल्लो पचा माल्नेवे। 38 तन्न गेपुकीमी ‘एको परमप्रभु यावे आ देंशो श्येत डा लोव्र बाक्ब’ देंनीनी। मोपतीके परमप्रभु यावेमी ‘मारदे हना गे परमप्रभु यावे आ देंशो श्येत डा लोव्र बाक्ब’ देंतीनी। तन्न गो इन कली ‘एको परमप्रभु यावे आ देंशो श्येत बाक्ब, मदेनीन’ देंती। 39 मोपतीके गो थमा पा इन कली क्युक्शा, आं डोंइती रे ताइक्नुड। इन कली नु इन किकी पिपी आन कली गेशो सहर पोक्शा ताइक्नुड। 40 मिनु गो इन कली गेना हना यो शिशी मपथु, गेना हना यो मुने दोक्पाइक्नन्नी। मेको गेना यो मप्रेंसीब” दे परमप्रभु यावेमी देंत। *येरमीया २०:११*

### रिश्शो नु मरिश्शो फोव्रशी गेडा

24 बेबीलोन डा पिप नेबुकदरेसरमी यहूदा डा पिप येहो-याकीम आ तौ येकोन्याह, यहूदा डा पिप आ गेय पाइब, मार मार सेल्स जोक्ब नु तुप्तील आन कली यरूसलेमम ग्याइश्शा बेबीलोन लदा बाक्त। मेको नोले परमप्रभु यावेमी आं कली आ खिं आ डोंइती डालो निक्शी फोव्रशी गेडा कोंइताक्वी। *येहो-याकीम आ नें २राजा २४:६ योयाकीन बाक्ब। तन्न येरमीया किताबम २२:२४ आ नें कोन्याह बाक्ब। मिनु येरमीया २४:१ येकोन्याह यो देंनीम। २राजा २४:१४-१६* 2 मिनु डालो कामी डोंइती डा थम रिश्शो मीशो फोव्रशी गेडा बाक्तेक्म। तन्न अर्को डालोम काइ मरिश्शो फोव्रशी गेडा बाक्तेक्म। मेको जचा यो मदुम्बा डा थम मरिश्शो बाक्तेक्म। 3 मिनु परमप्रभु यावेम आं कली “येरमीया गे मार, तवी” दे माइक्ती। मिनु गो “फोव्रशी गेडा तातामी। थम रिश्शो फोव्रशी गेडा नु थम मरिश्शो फोव्रशी गेडा बाक्तेक्म। मेको मरिश्शो फोव्रशी गेडा जचा यो मदुम्बा डा बाक्नीम” देंती।

4 मिनु परमप्रभु यावेमी आं कली *इजीकीएल ११:१४-२१* 5 परमप्रभु यावे, इस्त्राएली आन परमप्रभुमी “मेको रिश्शो फोव्रशी गेडा खोदेशो पा, गो यहूदा रे बेबीलोन रागीम ग्याइश्शा लाइक्चा पुंडसीशो आन कली मिम्नुड। गो मेको आन कली एकेर रे कल्दी आन रागीम सोइक्ताक्वड। 6 गो मेको आन कली रिश्शो दुम्पाइक्चा कली कोव्रनुड। मिनु गो मेको आन कली एको रागीम लेशशा चाक्नुडमी। गो मेको आन थुं बारपाइक्नुडमी। आन थुं लुक्च मलपाइक्नुडमी। गो मेको आन कली खुम्नुडमी। मतुल्लुडमी। *येरमीया १:१०; येरमीया ३१:२८* 7 मिनु गो मेको आन कली ‘गो परमप्रभु यावे नड’ दे आं कली तुइक्तीक थुं गेनुडमी। मेकोपुकीमी आं मुर दुम्नीम। मिनु गो मेको आन परमप्रभु दुम्नुड। मारदे हना मेको आन थुं नेल्लेमी आं गे लेत्नीम। *येरमीया ३१:३३-३४; येरमीया ७:२३*

8 तन्न गो मेको जचान मदुम्बा डा काइ मदारशो फोव्रशी गेडा खोदेशो पा यहूदा डा पिप सिदकीयाह, मेको आ सरकार डा गेय पाइब, यरूसलेम डा लीशो मुरपुकी नु इजीप्त रागीमी बाक्ब आन कली मरिश्शो पाइनुड। *२राजा २४:१७-२०; ब्यक्स्था २:३१; येरमीया २९:१६-१९* 9 गो मेको आन कली रागी डा राज्य नेल्लेमी शुश हिंचा डा नु काइ मरिश्शो सेल्नुड। मेको आन कली शिशी मताइब, शुक्शी लोव्र नु सराप पाइक्चा पुंडसीब सेल्नुडमी।

मेको आन कली खेरशो रागी नेल्लेम मोदेशो पाइनुडमी। १ राजा ९:७ 10 गो मेको आन कली तरवार, अन्काल नु मुर बेक्तीक रोड सोइक्नुड। मेको आन कली नु आन किकी पिपी आन कली गेशो रागी रे मेको नेल्ल मबेक्मा सम्म मो पाइनुड” दे परमप्रभु यावेमी देंत।

### ग्याइश्शा लाइक्वा पुंडसीब

25 मिनु परमप्रभु यावेमी येरमीया कली यहूदा डा मुर आन पर्बम लोत्र पाप्नु। मेना यहूदा डा पिप योसीयाह आ तौ येहो-याकीमपिप दुश्शो ४ बर्स दुम्मेनु, बेबीलोन डा पिप नेबुकदरेसर पिप दुश्शो बर्स का दुश्शो बाक्त। येरमीया ३६:१ 2 मिनु परमप्रभु यावे आ लोत्र पाइब येरमीयामी यहूदा डा मुर नेल्ल नु यरूसलेममी बाक्ब मुर नेल्ल आन कली मेको लोत्र पाप्नु। 3 यहूदा डा पिप आमोन आ तौ योसीयाह पिप दुश्शो १३ बर्स रे मुल २३ बर्स सम्म परमप्रभु यावेमी आं कली लोत्र पना पन बाक्त। मिनु गो मेको लोत्र इन कली शेंस डा शेंस बाक्बशो बाक्ती। तन्न गेपुकीम इन नोफा मदाइक्तीनी। येरमीया १:२; येरमीया ३६:२ 4 मिनु परमप्रभु यावेम आ लोत्र पाइब आन कली मोदें लोत्र पथ सोइक्स डा सोइक्स पाप्नु हना यो, गेपुकीम मेको आन लोत्र मनेंनी। इन नोफा मदाइक्तीनी। येरमीया ७:२५-२६; येरमीया ११:७; येरमीया २६:५; येरमीया २८:८; येरमीया २९:१९; येरमीया ४४:४; २इतिहास ३६:१५-१६ 5 मेकोमी “गे नेल्ल इन मरिश्शो पशो नु परमप्रभु यावे आ अरेशो मटितीके रे लेतीन। मिनु परमप्रभु यावेम इन कली नु इन किकी पिपी आन कली गेना हना यो कली गेशो रागीम बाक्वा ताइनीनी। येरमीया ७:३ 6 अर्को रागी डा देवी देवता आन कली पूजा पशा, ठेयब सेल्वा कली मेको आन नोले मखोतीन। इन गुडम सेल्शोमी आं कली मगाइक्पाइय्नीनी। मिनु गो इन कली मारेइ श्येत मगेनुड” देंशो बाक्त। 7 परमप्रभु यावेमी “तन्न गेपुकीम आं लोत्रमी नोफा मदाइक्तीनी। इन गुडम सेल्शोमी आं कली गाइक्पाइक्तीनी। मिनु गेपुकी आंमान सजाइ ताइब सेल्सीशो बाक्नीनी” देंत।

8 मोपतीके मुर नेल्ल आन परमप्रभु यावेमी “मारदे हना गेपुकीम आं लोत्र मटिनी। 9 गो उत्तर डा जात नेल्ल नु आं गेय पाइब बेबीलोन डा पिप नेबुकदरेसर कली ब्रेश्शा चाक्नुडमी। गो मेको आन कली एको रागी डा मुर नु एर ओंथ डा जात नेल्ल आन पर्बम चाक्नुडमी। मिनु गो मेको नेल्ल आन कली साइक्पाइक्नुडमी। गो मेको आन कली शुश हिंचा डा, शुक्शी पाइक्वा पुंडसीब नु शिशी मताइब सेल्नुडमी। दानीएल ३:३१-३३ 10 मिनु गो मेको आन रे थु नाइश्शा बाक्तीके, ग्येरशो सेंदा नु ग्युम्ली ग्युम्ले आन सेंदा क्याम्नुड। यात ग्रीशो नु बत्ती आ हाम्सो नेल्ल योल्नुड। येरमीया ७:३४ 11 एको रागी डा खिं नेल्ल ब्रेश्शो नु मुर मबाक्बशो दुम्नीम। मिनु एको जात डा मुरपुकी ७० बर्स सम्म बेबीलोन डा पिप आ वाइल दुम्नीम। २इतिहास ३६:२१; येरमीया २९:१०; एजा १:१-२ 12 तन्न ७० बर्स गाम नोले, गो बेबीलोन डा पिप नु कल्दी आन रागी कली मेको आन मरिश्शो पशो डा सजाइ गेनुड। मेको आन रागी गेना हना यो मुर मबाक्तीके सेल्नुडमी” दे परमप्रभु यावेमी देंत। 13 परमप्रभु यावेमी “मेको रागी कली आं देंशो लोत्र नेल्ल, एको किताबम ब्रेक्बो लोत्र नु आं लोत्र पाइब येरमीयामी रागी रागी नेल्ल डा मुर आन कली पशो नोले दुम्ब लोत्र नेल्ल मेको रागीम मोइक्नुड। 14 मिनु रागी रागी डा मुर नु ठेयब पिपमी यहूदा डा मुर आन कली वाइल सेल्नीम। गो मेको आन पशो नु आन गुडमी सेल्शो कोत्रशा, मेको आन कली क्येक्क लेल्नुडमी” देंत। येरमीया २७:७

### परमप्रभु आ गाइश्शो कचौरा

15 मिनु परमप्रभु यावे, इस्राएली आन परमप्रभुमी आं कली “आं गुड रे आं गाइश्शोमी ब्रीशो अडगुर शांबु बाक्बो कचौरा ताक्को। मिनु इ कली सोइश्शो रागी रागी डा मुर नेल्ल आन कली तूपाइक्मी। येरमीया ५१:७; यसैया ५१:१७; प्रकाश १४:१० 16 मेकोपुकीमी मेको तूशा, दिड दाड गोल्शा, मारेइ मिम्ने मचाप्नीम। मारदे हना गो मेको आन दातेमी तरवार सोइक्नुड” देंत।

17 मोपतीके गो मेको कचौरा परमप्रभु यावे आ गुड रे ताक्ता। मिनु गो परमप्रभु यावेमी सोइश्शो रागी नेल्ल नु मुर नेल्ल आन कली तूपाइक्तामी। 18 मिनु मुलाक्ती तशो खोदेशो पा यरूसलेम नु यहूदा डा सहर नेल्ल आन कली श्येत नु मुर मबाक्तीके सेलो। मेकेर डा पिप नु आन सरकार आ गेय पाइब मुर खतम दुम्नीम। मेको सहर शुक्शी पाइक्वा नु सराप पाइक्वा पुंडसीब दुम्त। 19 मेको प्रोइशा यो इजीप्त डा पिप फाराओ, मेको आ गेय पाइब मुर नेल्ले, मेको आ सरकार डा मुरपुकी नु मेको आ मुर नेल्ल आन कली, 20 मेकेर बाक्ब अर्को रागी डा मुर नेल्ले, ऊज रागी डा पिप नेल्ले, पलिस्ती आन पिप नेल्ले, अश्कलोन, गाजा, एक्रोन नु अश्दोद सहरम लीशा बाक्बो मुर नेल्ल आन कली, 21 एदोम, मोआब नु अम्मोन डा मुर नेल्ल आन कली, 22 टायर नु सीदोन डा पिप नेल्ले, समुन्द्र आइक्वी हांबु डा पिप नेल्ल आन कली, 23 देदान, तेमा, बूज नु आन चां एर ओंथ खोइक्ब नेल्ल आन कली, येरमीया ९:२५ 24 अराब रागी डा पिप नेल्ल, गोरशो रागीम बाक्ब अर्को रागी डा मुर आन पिप नेल्ल आन कली, 25 जिम्नी डा पिप, एलाम डा पिप नु मादी डा पिप नेल्ल आन कली, 26 मिनु उत्तर गे आ नेक्वा नु डोन बाक्ब पिप नेल्ल आन कली का का पा तूपाइक्तामी। मिनु नोले अर्को रागीम बाक्बो राज्य नेल्ल डा मुर आन कली तूपाइक्तामी। मिनु मेको नेल्ल आन नोले शेशाक डा पिपमी यो मेको तूचा माल्ब। शेशाक बेबीलोन आ अर्को नें बाक्ब। येरमीया ५१:४१

27 मिनु नोले गे मेको आन कली “मुर नेल्ल आन परमप्रभु यावे, इस्राएली आन परमप्रभुमी मार देंत देंशा हना ‘गे मेको तूशा दुक्वा मेने। मिनु गेना यो मबोक्वा डा पा गोलीन। गो इन दातेम सोइश्शो तरवार आ पर्बम मो दुम्ब’ दे माइक्मी।

28 तन्न मेकोपुकीमी इ गुड रे मेको कचौरा तूने मबिस्साक्म हना, गे मेको आन कली मुर नेल्ल आन परमप्रभु यावेमी ‘गेपुकीम मेको तूचान माल्नीनी’ देंशो बाक्ब” दे माइक्मी। 29 मेकोमी “कोत्रडीन, मुल गो आं नेंम वोइश्शो सहर कली श्येत गेचा चिक्बो बाक्नुड। मिनु मार, गेपुकी चिहं सजाइ मतथु ब्रॉइनीनी डा? इन कली सजाइ मगेथु मप्रोइसीब। मारदे हना गो रागीम बाक्ब मुर नेल्ल आन पर्बम तरवार का ठीक पशो बाक्ती, दे मुर नेल्ल आन परमप्रभु यावेमी देंत” दे माइक्मी। इजीकीएल ९:६; १पत्रुस ४:१७; येरमीया ४९:१२ 30 परमप्रभु यावेमी “मुल गे मेको नेल्ल आन पर्बम एको आं लोत्र पावो। मेको आन कली ‘परमप्रभु यावे इर आ बाक्तीक रे ब्वाक्ब। आ बाक्तीक रे आ सेंदा गुंडब। मिनु आंम रागी आ पर्बम मेको ठेयब सेंदा पा ब्वाक्ब। रागीम बाक्ब नेल्ल आन पर्बम अडगुर खाक्ब खोदेशो पा ग्रीब। होसे ११:१०; योएल ४:१६; आमोस १:२ 31 मेको रेयके पा, थोप्ला दाइश्शो, रागी डा सुर सम्म नेंसीब। मारदे हना परमप्रभु यावेम रागी रागी आन कली दोस गेब। मिनु मेकोमी मुर नेल्ल आन कली निसाफ पाइब। मिनु दोस ताइब तरवारम क्योरचा पुंडसीनीम” दे माइक्मी” देंत। 32 मुर नेल्ल आन परमप्रभु यावेमी “कोत्रडीन शुश श्येत दुम्तीक रागी का रे अर्को रागी सम्म ब्रना ब्रन लाइब। रागी आ सुर रे हिंचा डा फश गिवार जाक्ना जाक्न बाक्ब” देंत। 33 मेको नाक्ती परमप्रभु यावे आ साइश्शोपुकी रागी आ सुर का रे अर्को सुर सम्म बाक्नीम। मेको आन पर्बम सुड रॉका मपाइनीम। मेको बेक्बो मुर आन कली सुडमी खुप्शा मथिम्नीम। मेको आन कली सुडम मथिम्नीम। मेकोपुकी खपीम मोत्रल खोदेशो दुम्नीम। येरमीया ९:२१ 34 गे गोठलापुकी रॉका पने। मिनु वाइ ब्रेश्शा डाक्कीन। गे मेको बगाल डा लां कोइबपुकी पुलुम दिड दाड गोलीन। मारदे हना इन कली क्योरशा साइक्तीक नाक्त जाक्बो बाक्ब। गेपुकी गोल्नीनी। मिनु शुश क्येट लाइब ग्योब खोदेशो पा प्रोल्वा पुंडसीनीनी। येरमीया २३:१ 35 गोठला आन कली प्रोक्तीक तेइ मबाक्ब। बगाल डा लां कोइब आन ब्रॉइतीक लां तेइ मबाक्ब। 36 गोठला आन डाक्बो नेनीन। बगाल आन कली लां कोइब आन हिंमा क्येम्स पशो नेनीन। मारदे हना परमप्रभु यावेम मेको आन बस्तु योत्रतीके क्याम्बा चिक्बो बाक्ब। 37 परमप्रभु यावे आ ठेयब पा गाइश्शोम मेको रिश्शो बस्तु योत्रतीके खतम दुम्नीम। 38 गुप्सम खोदेशो पा मेकोमी आ बाक्तीके प्रोइतु। मारदे हना मेको आन रागी साइक्ब तरवार नु परमप्रभु आ गाइक्तीक आ पर्बम मुर मबाक्तीके दुम्त। येरमीया ४:७

येरमीया कली हिंच कोंइशो  
येरमीया ७:-

26 यहूदा डा पिप योसीयाह आ तौ येहो-याकीममी सासन पवा आ डोंइती डा बर्सम परमप्रभु यावेमी आं कली लोव्र पाप्तु। २राजा २३:३४-३७<sup>2</sup> परमप्रभु यावेमी मार देंत, देंशा हना “आं खिं डा लाडगाम रपो। मिनु आं कली ठेयब सेल्चा कली जाकब यहूदा सहर डा मुर नेल्ल आन कली गो इ कली देंशो लोव्र नेल्ल मेको आन कली देनो। लोव्र का यो मफेवो।<sup>3</sup> मिनु मेको नेंशा, मेको नेल्ल आन मरिश्शो लां रे लेलीमी, कों? मिनु मेको आन मरिश्शो पशो आ पर्वम मेको आन कली ठेयब श्येत चाक्तीक रे आं थुं फाइव्नुडा, कों? गो मेको आन तार चाक्चशो खतम दुम्तीक मचाक्नुडा, कों? येरमीया १८:८; येरमीया ३६:३<sup>4</sup> गेमी मेको आन कली ‘परमप्रभु यावेम आं लोव्र मार बाक्ब देंशा हना, गे आं लोव्र पशो नोफा दाइश्शा मनेंतीनी हना, गो इन डोंइती वोइश्शो आं अरेशो मपाइतीनी हना,<sup>5</sup> गो गेना हना यो इन बाक्तीकेम सोइश्शो आं गेय पाइब, आं लोव्र पाइब आन लोव्र नोफा दाइश्शा मनेंतीनी हना, गेपुकीम मेको रिश्शो पा मनेंशो बाक्तीनी हना, येरमीया २५:४<sup>6</sup> गो मेको खिं कली शिलो खोदेंशो सेल्लुड। मिनु मेको सहर कली रागी नेल्ल डा मुर नेल्ल आन दातेमी सराप राइब सेल्लुड’ देनो” देंत। २राजा २५:९; येरमीया ७:१२

<sup>7</sup> मिनु चढेबपुकी, परमप्रभु यावे आ लोव्र पाइबपुकी नु मुर नेल्लेमी परमप्रभु यावे आ खिं येरमीयामी देंशो लोव्र नेंतेक्म।<sup>8</sup> मिनु परमप्रभु यावे आ अरेशो लोव्र नेल्ल, येरमीयाम मुर नेल्ल आन कली नेंपाइक्ने थुमा चोटी चढेबपुकी, परमप्रभु यावे आ लोव्र पाइबपुकी नु मुर नेल्लेम मेको कली ग्याइश्शा “गे साइक्चान पुंडसीनेवे।<sup>9</sup> गे मारदे परमप्रभु यावे आ नेंम लोव्र पा ‘एको खिं शिलो खोदेंशो दुम्ब। मिनु एको सहर चहिं श्येल्थ नु मुर मबाक्तीके दुम्ब’ देने” देंशा, परमप्रभु यावे आ खिं येरमीया आ एर आंथ मरिक्थी पा मुर देल्लेक्म।

<sup>10</sup> मिनु यहूदा डा सरकार आ गेय पाइब मुरपुकीम मेको लोव्र नेंशा, मेकोपुकी पिप आ खिं रे परमप्रभु यावे आ खिंम जाक्तेक्म। मिनु परमप्रभु यावे आ खिं डा नक लाप्चो आ डोंइती बाक्तेक्म।<sup>11</sup> मिनु चढेबपुकी नु परमप्रभु यावे आ लोव्र पाइबपुकीम, सरकार आ गेय पाइब मुरपुकी नु मुर नेल्ल आन कली “एको मुर कली साइक्चान माल्ब। मारदे हना एकोमी एको सहर आ पर्वम मरिश्शो पा परमप्रभु यावे आ लोव्र पाप्तु। मेको गेपुकीम आंमा यो नेंतीनी” देंतेक्म। प्रेरित ६:१३

<sup>12</sup> मिनु येरमीयामी सरकार आ गेय पाइब नु अरु मुर नेल्ल आन कली “परमप्रभु यावेम आं कली एको खिं नु एको सहर आ पर्वम इन नेंशो लोव्र पचा कली सोइश्शो बाक्ब।<sup>13</sup> मुल गेपुकीम इन पतीक नु इन गेय रिश्शो सेलीन। मिनु आंम परमप्रभु यावे, इन परमप्रभु आ अरेशो टिने। मिनु परमप्रभु यावेम इन कली खतम पोक्तीक रे आ थुं लेज्ब। येरमीया ७:३

<sup>14</sup> गो इन गुडम बाक्शो बाक्नुड। इन कली मार रिश्शो नु ठीक दुम्बा, मेको पाइय्यीनी।<sup>15</sup> तन्न गे एको तुइक्तीन। गेपुकीम आं कली साइक्तीनी हना, आंम इन तारी, एको सहर तारी नु एकेर बाक्ब आन तारी दोस मताइब मुर का आ हुश शाइक्पाइश्शो दोस चाक्नीनी। मारदे हना परमप्रभु यावेम इन कली एको लोव्र नेल्ल नेंपाइक्चा कली आं कली सोइश्शो बाक्त्” देंत। प्रस्थान २३:७; मत्ती २७:४,२५

<sup>16</sup> मिनु सरकार आ गेय पाइब मुर नु अरु मुर नेल्लेम, चढेबपुकी नु परमप्रभु यावे आ लोव्र पाइब आन कली “एको मुर साइक्चा पुंडसीचा डा मुर ममाइ। एको मुरुम इं कली परमप्रभु यावे, इं परमप्रभु आ नेंम एको लोव्र नेंपाइक्त्” देंतेक्म।<sup>17</sup> मिनु मेको रागी डा शेंब खाल्पा का निक्शी बोक्शा, मेको देल्शा बाक्शो मुर आन कली<sup>18</sup> “यहूदा डा पिप हिज्कीयाह आ पालाम मोरेशेथ डा मीकाहम परमप्रभु यावे आ लोव्र पशो बाक्त्। मेकोमी यहूदा डा मुर नेल्ल आन कली ‘मुर नेल्ल आन परमप्रभु यावेम सियोन कली रू खोदेंशो पा वाक्सीब। यरूसेलेम चहिं फुल्लु तेल्लो खोदेंशो दुम्ब। परमप्रभु यावे आ खिं चहिं रवापुकी वाशा सुम्शो डांडा खोदेंशो दुम्ब’ देंशो बाक्त्” देंतेक्म। मीका १:१; मीका ३:१२; येरमीया ९:१०<sup>19</sup> मिनु मेकोपुकीमी “मार, यहूदा डा पिप हिज्कीयाह नु यहूदा डा अरु सुइ मुरुम

मेको कली सदमे डा? मिनु मार, परमप्रभु यावे क्येडा हिंशा हिज्कीयाहम मेको आ शिशी ममला डा? मिनु परमप्रभु यावेम मेको आन तार चाक्चशो खतम पोक्तीक रे आ थुं मलेत्ता डा? तन्न गोपुकीम आंम इं तार ठेयब खतम दुम्तीक चाक्चा चिक्चो बाक्त्तय” देंतेक्म। येरमीया १८:८

<sup>20</sup> मेकोपुकी नु अर्को मुर का यो बाक्त्। मेकोमी परमप्रभु यावे आ नेंमी लोव्र पाप्तु। मेको किरयथ-यारीमम बाक्ब शेमायाह आ तौ उरीयाह बाक्त्। मेकोमी यो मेको रागी नु मेको सहर आस पर्वम येरमीयामी खोदेंशो पा परमप्रभु यावेम मरिश्शो पचशो आ पर्वम लोव्र पाप्तु। यहोसु १:५९<sup>21</sup> मिनु पिप येहो-याकीम नु मेको आ ठेयब मुरपुकी, आ कप्तान नेल्लेम उरीयाह आ पशो लोव्र नेंतेक्म। मिनु पिपम मेको कली साइक्चा माल्लु। तन्न मेको लोव्र नेंशा उरीयाह हिंत। मिनु प्रोक्शा इजीप्त रागी लत।<sup>22</sup> मो हना यो येहो-याकीममी आकबोर आ तौ एल्नाथान नु मेको नु अर्को मुरपुकी इजीप्त रागीम सोइक्ताक्व।<sup>23</sup> मिनु मेकोपुकीमी उरीयाह कली इजीप्त रे चाक्तेक्म। मिनु पिप येहो-याकीम आ डोंइती राप्पाइक्तेक्म। मिनु पिपम मेको कली साइक्चा कली तरवार आप्पाइक्त्। मिनु मेको आ बेक्शो रां आइक्च आइक्च मुर आन कली ताइक्तीकेम ताइक्पाइक्त्।

<sup>24</sup> तन्न शाफान आ तौ अहीकामम मुल यो येरमीया आ पो न बोक्शा लोव्र पाप्तु। मोपतीके येरमीया साइक्पाइसीचा कली मुर आन गुडम जिम्मा गेचा मपुंडसे। २राजा २२:१२

यहूदामी नेबुकदनेसर आ गेय पशो

27 यहूदा डा पिप योसीयाह आ तौ सिदकीयाहम सासन पवा आ डोंइती डा बर्सम परमप्रभु यावेम आं कली लोव्र पाप्तु। २राजा २४:१७-१८<sup>2</sup> परमप्रभु यावेमी मार लोव्र पाप्तु देंशा हना “कुशुल के डोरी नु थरपु डा शी के जुवा का सेलो। मिनु मेको इ शुरम लाम्सो। येरमीया २८:१०<sup>3</sup> मिनु यहूदा डा पिप सिदकीयाह आ बाक्तीके यरूसेलेममी जाक्ब लोव्र कुरब आन कली एदोम, मोआब, अम्मोन, टायर नु सीदोन डा पिप आन बाक्तीकेम मेको लोव्र सोइक्तीमी। येरमीया २५:२१-२२<sup>4</sup> मेको आन होव्रप आन कली एको लोव्र पा ‘मुर नेल्ल आन परमप्रभु यावे इस्राएली आन परमप्रभुम गेपुकीम इन होव्रप आन कली<sup>5</sup> एको रागी, एको रागीम बाक्ब मुरपुकी, बस्तु भाव नु जन्तु नेल्ल आन कली आं ठेयब सक्ति नु आं बोलम सेल्शो नड। मिनु गो सु कली गेचा दाक्नुड, मेको कली गेनुड। येरमीया १२:१७<sup>6</sup> मुल गेपुकी नु इन रागी नेल्ल आं गेय पाइब बेबीलोन डा पिप नेबुकदनेसर आ गुडम गेता। ब्वाकी डा जन्तु आन कली यो सासन पाइब सेल्ला। येरमीया २५:९; यसैया ४५:१,८; इजीकीएल २६:७; दानीएल २:३८<sup>7</sup> मेको आंम इन रागी आ रिश्शो दुम्ची मजाक्म सम्म रागी रागी नेल्ल डा मुरपुकीम मेको आ तौ नु मेको आ चच आन गेय पचा माल्नीम। मेको नोले शुश रागी नु ठेयब पिपपुकीमी मेको कली आन वाइल सेल्लीम।

<sup>8</sup> तन्न तेकोइ रागी तेकोइ राज्य नु पिपम बेबीलोन डा पिप नेबुकदनेसर आ वाइल दुम्चा नु मेको आ जुवा आन शुरम वोइक्ने मबिस्साक्म हना, गो मेको रागी डा मुर आन कली तरवार, अन्काल नु मुर बेक्तीक रोइम सजाइ गेनुडमी। गो मेको आन कली मसाइक्पदुमी सम्म मो पाइनुड’ दे परमप्रभु यावेम देंत।<sup>9</sup> मोपतीके गेपुकी ‘बेबीलोन डा पिप आ वाइल दुम्चा माल्नीनी’ देंब, इन नोले दुम्ब लोव्र पाइबपुकी, लिक्वु कोव्रबपुकी, डोमु डा लोव्र शेंबपुकी, टुना मुना नु मन्तर तन्तर पाइक्ब आन लोव्र मनेनीन। येरमीया १४:१३-१४<sup>10</sup> मारदे हना मेकोपुकीमी इन कली देंशो नोले दुम्ब लोव्र जोल बाक्ब। मेको लोव्र पतीके इन रागी रे डोन खेरचा पुंडसीनीनी। गो इन कली खेरनुड। मिनु गेपुकी बेक्नीनी।<sup>11</sup> तन्न तेको रागी आ शुर बेबीलोन डा पिप आ जुवा आगाम वोइक्बा, मेको आ वाइल दुम्बा, मेको रागी डा मुर आन कली गो आन रागीमीन दोचा कोक्चा नु बाक्चा गेनुडमी” दे परमप्रभु यावेम देंत।

<sup>12</sup> मिनु गो मेको लोव्र यहूदा डा पिप सिदकीयाह कली देंती। मेको कली “बेबीलोन डा पिप आ जुवा इन शुरम वोतीन। मिनु मेको नु मेको आ मुर आन वाइल दुमीन। मिनु गे ब्रॉइनीनी।<sup>13</sup> परमप्रभु यावेम बेबीलोन डा पिप आ वाइल मडुम्ब, रागी डा मुर आन कली गे तरवार, अन्काल नु मुर बेक्तीक

रोडम बेक्चा माल्नीनी। मारदे गे नु इन मुर बेक्चा दाक्नीनी? 14 गेपुकीम 'बेबीलोन डा पिप आ वाइल दुम्चा ममाल्नीनी देंब जोल पा परमप्रभु यावे आ लोत्र पाइब आन लोत्र मनेनीन। मारदे हना मेकोपुकीमी इन कली जोल पना पन बाक्नीम' देंनीनी। येरमीया १४:१४ 15 परमप्रभु यावेम 'गो मेको आन कली मसोइक्तुमी। तन्न मेकोपुकीम आं नैम जोल पा लोत्र पाइनीम। मेको आन लोत्र नैतीनी हना, गो इन कली एको रागी रे खेरनन्नी। मिनु गे बेक्नीनी। गेपुकी नु इन कली जोल पा लोत्र पाइब मो दुम्नीनी' देंती" देंत।

16 मिनु गो चढेब नु मेको मुर नेल्ल आन कली "परमप्रभु यावेमी 'गेपुकी इन कली जोल पा आं लोत्र पाइब आन लोत्र मनेनीन। मेकोपुकीमी परमप्रभु यावे आ खिं डा ग्योब नु बोसपुकी रीब पा बेबीलोन रे चाक्सीब' देंनीम। मेकोपुकीमी इन कली जोल पा नोले दुम्ब लोत्र पाइनीम। येरमीया २८:३; २इतिहास ३६:१० 17 मेको आन लोत्र मनेनीन। बेबीलोन डा पिप आ वाइल दुमीने। मिनु गेपुकी ब्रॉइनीनी। मारदे गेपुकीम एको सहर कली मुर मबाक्तीके दुम्पाइक्नीनी? 18 मेकोपुकी थमा पा परमप्रभु यावे आ लोत्र पाइब बाक्तेक्म हना नु मेकोपुकी नु परमप्रभु यावे आ लोत्र बाक्त हना, परमप्रभु यावे आ खिंम बाक्शो, यहूदा डा पिप आ खिंम बाक्शो नु यरूसलेममी बाक्शो मार मार बेबीलोन मलदमेक्ल, दे मुर नेल्ल आन परमप्रभु यावे कली पुन्मेक्ल। 19 मारदे हना मुर नेल्ल आन परमप्रभु यावेमी थाम, कांसा के ठेयब चिक्तीके बोस, मेको आ कांसा के नित्तीके नु सहरम लीशो बोस आन पर्वम लोत्र पाप्नु। १राजा ७:१५-३९; २राजा २५:१३-१७ 20 मेको बेबीलोन डा पिप नेबुकदनेसरमी यहूदा डा पिप येहो-याकीम आ तौ येकोन्याह माइश्शो येकोन्याह नु यहूदा नु यरूसलेम डा ठेयब मुर नेल्ल आन कली यरूसलेम रे ग्याइश्शा लदमेनु, मेको बोस मलद। येहो-याकीम आ नें २राजा २४:६ योयाकीन बाक्ब। तन्न येरमीया किताबम २२:२४ आ नें कोन्याह बाक्ब। मिनु येरमीया २४:१ येकोन्याह यो देंनीम। 21 मिनु मुर नेल्ल आन परमप्रभु यावे, इस्राएली आन परमप्रभुमी 'आं खिंमी लीशो बोसपुकी, यहूदा डा पिप आ दरवारमी वोइश्शो बोसपुकी नु यरूसलेममी प्रॉइशो ग्योबपुकी बाक्नीम। 22 मेको नेल्ल आन कली बेबीलोनम चाक्दीन्नीम। मिनु गो मेको आन पर्वम मकोव्रडु सम्म मेको मेकेर बाक्चा माल्नीम' देंशो बाक्ब। मिनु 'गो मेको आन कली लेंशा लेश्शा चाक्नुडमी। मिनु लेंशा आन बाक्तीकेमी वोइक्नुडमी' दे परमप्रभु यावेमी देंत" दे माइक्ती। एज्रा १:१,११

हनन्याहम जोल पशो

28 मेको बर्समीन यहूदा डा पिप सिदकीयाहम सासन पशो ४ बर्स ५ महिनाम गिबोनम बाक्ब अज्जुर आ तौ परमप्रभु यावे आ लोत्र पाइब हनान्याहम परमप्रभु यावे आ खिंम चढेब नु मुर नेल्ल आन डॉइती लोत्र पा, आं कली २इतिहास १:३,१३ 2 "मुर नेल्ल आन परमप्रभु यावे, इस्राएली आन परमप्रभुमी 'गो बेबीलोन डा पिप आ जुवा जिक्ता। 3 बेबीलोन डा पिप नेबुकदनेसरमी आं खिं डा मार मार नु ग्योब एकेर रे बेबीलोनम लाइश्शो बाक्मे, मेको नेल्ल बर्स निक्शी व्येडा डॉइती गो लेश्शा एक चाक्नुडमी। येरमीया २७:१६ 4 मिनु गो यहूदा डा पिप येहो-याकीम आ तौ येकोन्याह नु यहूदा रे ग्याइश्शा लाइक्चा पुंडसीशो नेल्ल आन कली बेबीलोन रे चाक्नुडमी। मारदे हना गो बेबीलोन डा पिप आ जुवा जिक्शा गेनुड' " दे परमप्रभु यावेमी देंत। येरमीया २७:२०

5 मिनु नोले परमप्रभु यावे आ लोत्र पाइब येरमीयाम परमप्रभु यावे आ खिंम राप्शा बाक्शो चढेब नु मुर नेल्ल आन डॉइती मेको परमप्रभु यावे आ लोत्र पाइब हनान्याह कली 6 "आमेन, परमप्रभु यावेम मो पवल। परमप्रभु यावेमी इ पशो लोत्र खबल। परमप्रभु यावे आ खिं डा मार मार ग्योबपुकी नु ग्याइश्शा लाइक्चा पुंडसीशो नेल्ल आन कली बेबीलोन रे लेश्शा चाक्गल। 7 तन्न इ डॉइती नु मुर नेल्ल आन डॉइती नेंचा डा पा आं देंशो लोत्र नेनो। 8 गे नु गो इस डॉइती जाक्ब साइ डा परमप्रभु यावे आ लोत्र पाइबपुकीमी शुश रागी नु ठेयब राज्य आन पर्वम लडाइ, अन्काल नु मुर बेक्तीक रोइ आन पर्वम लोत्र पामे बाक्त। 9 तेको परमप्रभु यावे आ लोत्र पाइबम थुं नाइश्शा बाक्तीक आ पर्वम लोत्र पवा, मेको आ लोत्र गात्त हना ला, मेको थमा पा

परमप्रभु यावेम सोइश्शो आ लोत्र पाइब बाक्ब, दे तुंडसीब" दे माइक्तु।

ब्यवस्था १८:२१-२२

10 मिनु नोले परमप्रभु यावे आ लोत्र पाइब हनान्याहम परमप्रभु यावे आ लोत्र पाइब येरमीया आ शुर रे मेको जुवा शोल्शा जिक्तु। 11 मिनु हनान्याहम मुर नेल्ल आन डॉइती "परमप्रभु यावेमी मार देंत देंशा हना 'गो मोपा बर्स निक्शी व्येडा डॉइती रागी रागी डा मुर नेल्ल आन शुर रे बेबीलोन डा पिप नेबुकदनेसर आ जुवा जिक्शा गेनुड' " देंत। मेना परमप्रभु यावे आ लोत्र पाइब येरमीया आ लां खोइक्तु। येरमीया २९:१०

12 मिनु परमप्रभु यावे आ लोत्र पाइब हनान्याहम, परमप्रभु यावे आ लोत्र पाइब येरमीया आ शुर डा जुवा जिक्शा गेवा आ इक्का नोले परमप्रभु यावेम येरमीया कली लोत्र पाप्नु। 13 मार लोत्र पाप्नु देंशा हना "लशा, हनान्याह कली परमप्रभु यावेमी इ कली मार देंत देंशा हना 'गे शी के जुवा जिक्तीवी। तन्न गो मेको आ पा डा फलाम के जुवा चाक्नुड' देंशो बाक्ब मतो" देंत। 14 मिनु मुर नेल्ल आन परमप्रभु यावे, इस्राएली आन परमप्रभुमी "बेबीलोन डा पिप नेबुकदनेसर आ वाइलीम वाइल दुम्पाइक्चा कली गो रागी नेल्ल डा मुर नेल्ल आन शुरम फलाम के जुवा लाप्नुडमी। थमा पा, मेको आ वाइलीम वाइल दुम्नीम। गो ब्वाकी डा जन्तु आन कली यो आ सासनमी गेतामी, देंशो बाक्ब, देनो" देंत। ब्यवस्था २८:४८; येरमीया २७:६ 15 मिनु परमप्रभु यावे आ लोत्र पाइब येरमीयाम, परमप्रभु यावे आ लोत्र पाइब हनान्याह कली "ए हनान्याह, नेनो। परमप्रभु यावेमी इ कली मसोइक्त। मिनु गे एको मुर आन कली जोल लोत्र पा थमा सुइक्पाइश्शो बाक्नेवे। 16 मोपतीके परमप्रभु यावेम 'गो इ कली एको रागी रे तिल्चा चिक्शो बाक्नुड। गे एको बर्सम बेक्नेवे। मारदे हना गे परमप्रभु यावे कली काइ मटिथु जोल लोत्र पाप्तीवी' देंत" देंत।

17 मिनु मेको बर्स डा ७ महिनाम जोल पा परमप्रभु यावे आ लोत्र पाइब हनान्याह बेक्त।

येरमीया आ ब्रेक्स

29 परमप्रभु यावे आ लोत्र पाइब येरमीयामी, यरूसलेम डा ग्याइश्शा लाइक्चा पुंडसीशो आन दाते डा ब्रॉइशा लीशो खाल्पा आन कली एको चिठी ब्रेक्शा सोइक्ताक्व। बेबीलोन डा पिप नेबुकदनेसरम यरूसलेम रे चढेब, परमप्रभु यावे आ लोत्र पाइब नु मुर नेल्ल आन कली ग्याइश्शा बेबीलोन लाइश्शो बाक्त। 2 पिप येकोन्याह आ ममा, दरवार डा ठेयब मुरपुकी, यहूदा नु यरूसलेम डा सरकार आ गेय पाइब, रिश्शो पा मारेइ मारेइ सेल्स जोल्ब मुर नु तुप्तीलपुकी यरूसलेम रे ग्याइश्शा लाइक्चा पुंडसीमा नोले मेको चिठी ब्रेक्शो बाक्ब। येहो-याकीम आ नें २राजा २४:६ योयाकीन बाक्ब। तन्न येरमीया २२:२४ आ नें कोन्याह बाक्ब। मिनु येरमीया २४:१ येकोन्याह यो देंनीम। २राजा २४:१४-१५ 3 मेकोमी मेको चिठी शाफान आ तौ एलासाह नु हिल्कीयाह आ तौ गेमारायाह आस गुडम सोइक्ताक्व। मेको यहूदा डा पिप सिदकीयाहम पिप नेबुकदनेसर कली गेन, दे बेबीलोनम सोइश्शो बाक्त। मेको चिठीम मार ब्रेक्शो बाक्त देंशा हना, 4 मुर नेल्ल आन परमप्रभु यावे, इस्राएली आन परमप्रभुमी मार ब्रेक्पाइश्शो बाक्त, देंशा हना "यरूसलेम रे बेबीलोनम ग्याइश्शा लाइक्चा पुंडसीशो नेल्ल आन कली 5 गेपुकी मेकेर खिं सेल्शा बाक्कीन। रूम मार मार शोक्शा जने। 6 ग्युंवे पा, तमी तौ थिने। इन तौ आन कली चाइमी चाक्कीन। इन तमी आन कली ग्युंवे पा गेने। मिनु मेकोपुकीमी तमी तौ थीमेक्ल। मेकेर गेपुकी सोशा बोशा शुश दुमीन। जाम्शा मलने। 7 गो इन कली ग्याइश्शा लाइक्पाइश्शो सहर कली रिश्शो मिन्तीन। मिनु मेको आ पर्वम परमप्रभु यावे कली पुनीन। मारदे हना मेको कली रिश्शो दुम्चा इन कली यो रिश्शो दुम्चा बाक्ब" देंशो बाक्त। 8 मुर नेल्ल आन परमप्रभु यावे, इस्राएली आन परमप्रभुमी "इन दातेम बाक्ब परमप्रभु यावे आ लोत्र पाइबपुकी नु लिंक्कु कोत्रबपुकीम इन कली जोल पा थमा मसुइक्पदमेक्ल। आन डोमु डा लोत्र मनेनीन। येरमीया १४:१४ 9 मेकोपुकीमी जोल पा आं नैमी नोले दुम्ब लोत्र पाइनीम। मेको आन कली गो मसोइक्तुमी" दे परमप्रभु यावेम देंशो बाक्ब।

10 परमप्रभु यावेमी “बेबीलोनम मो पशो ७० बर्स गाम नोले गो इन बाक्तीक जाक्नुड। मिनु इन कली एको रागीम लेशशा चाक्नुड, दे आं शिशी पा देशो लोत्र खाप्नुड। येरमीया २५:११-१३ 11 मारदे हना गो इन पर्बम शुश मिशो बाक्नुड। गो मेको मिशो तुडक्नुड। आं मिशो इन कली रिशो दुम्चा कली बाक्ब। मरिशो दुम्पाइक्चा कली ममाइ। 12 गेपुकीम आं नेक्था जाक्शा पुंडनीनु, गो इन पुंडशो नैनुड। 13 गेपुकीम इन थुं नेल्लेमी आं कली माल्तीनी हना, थिल्लीनी। येरमीया ३०:३; ब्यवस्था ४:२९; यसैया ५५:६ 14 मिनु गो इन कली थिप्पांडसीनुड। इन जाम्शो शोंप इन कली गेनुड। गो इन कली ग्याइश्शा लाइक्पाइश्शो रागी नेल्ल रे खुप्नुड। तेको रागी रे इन कली ग्याइक्पदु, मेको रागीमी लेशशा चाक्नन्नी” देंत। येरमीया ३०:३; येरमीया ३३:२६

15 गेपुकीम “परमप्रभु यावेम आंइ पर्बम बेबीलोनमी आ लोत्र पाइबपुकी योव्रतु” देंतीनी। 16 परमप्रभु यावेमी दाऊद आ निल्लीकेम निख पिप नु एको सहरम बाक्ब मुर नेल्ल, इन नेक्था डा मुरपुकी नु ग्याइश्शा लाइक्चा मपुंडसीशो आन पर्बम मार देंत देशा हना, 17 मुर नेल्ल आन परमप्रभु यावेमी “गो मेको आन पर्बम तरवार, अन्काल नु मुर बेक्तीक रोइ सोइक्नुड। मिनु गो मेको आन कली राक्शो फोव्रशी गेडा खोदेशो सेल्लुडमी। मिनु मेको थाम्पा राक्शा ब्वचा मदुम्चा डा बाक्नीम। येरमीया २४:८-१० 18 गो मेको आन कली तरवार, अन्काल नु बेक्चा डा रोइमी खेदा पाइनुडमी। मिनु गो मेको आन कली राज्य नेल्लेमी शुश हिंचा डा सेल्लुडमी। मेकोपुकी आं खेरशो रागी नेल्ल आन दातेमी, सराप पाइक्तीके, शुश हिंतीके, शुक्शी पाइक्तीके नु मुने तोक्तीके सेल्लुडमी। ब्यवस्था २८:३७ 19 मारदे हना मेकोपुकीमी आं लोत्र मनेनेम। गो आं गेय नु आं लोत्र पाइब आन कली सोइक्ना सोइक्न बाक्ती हना यो मेको आन लोत्र मनेनेम” दे परमप्रभु यावेमी देंत। येरमीया २५:४ 20 मोपतीके गे यरूसलेम रे बेबीलोनम सोइश्शो ग्याइश्शा लाइक्चा पुंडसीशो मुल परमप्रभु यावे आ लोत्र नेनीन। 21 मुर नेल्ल आन परमप्रभु यावे, इस्राएली आन परमप्रभुमी “कोलायाह आ तौ आहाब नु मासेयाह आ तौ सिदकीयाहम आं नैमी जोल पाम्ताक्स। ‘गो मेको आस कली बेबीलोन डा पिप नेबुकदरेसर आ गुडमी गेनुडसी। मिनु मेकोमी इन डॉइती मेको आस कली साइक्ब। 22 मेको आस पतीकेन यहूदा रे बेबीलोनम ग्याइश्शा लाइक्चा पुंडसीशो आन दातेमी सराप पाइनीम। परमप्रभु यावेम इ कली सिदकीयाह नु आहाब आस कली खोदेशो सेलल। बेबीलोन डा पिप नेबुकदनेसरमी मेको आस कली मीम हुम्शो बाक्त” देंनीम। 23 मारदे हना मेको निक्शीमी इस्राएलम थम ग्रांरा दिशो गेय पशो बाक्ताक्स। मेको निक्शी आस नेक्था डा मुर आन मीश नु इप्शो बाक्ताक्स। मिनु मेकोम आं मअरेशो लोत्र पाम्ताक्स। गो मेको नेल्ल तुडक्नुड। मिनु गो मेको आ सांकछी बाक्नुड” दे परमप्रभु यावेम देंत।

शेमायाह कली लोत्र सोइश्शो

24 मिनु गे नेहेलाम डा शेमायाह कली 25 “मुर नेल्ल आन परमप्रभु यावे, इस्राएली आन परमप्रभुमी ‘गे इ नैमी यरूसलेम डा मुर नेल्ल आन कली, मासेयाह, चढेब आ तौ सेफन्याह नु अरु चढेब नेल्ल आन कली चिठी ब्रेक्ताक्वी। गे सेफन्याह कली येरमीया २१:१ 26 परमप्रभु यावेम इ कली चढेब येहो-यादा आ पा डा चढेब सेल्लु” मोपतीके गे परमप्रभु यावे आ खिं डा ठेयब मुर दुम्शा, मेको जिम्मा ताक्नेवे। गे मेकेर आन निप्स ग्राइश्शो नु जोल पा परमप्रभु यावे आ लोत्र पखु पाइब आन कली ठेंडरो थोक्शा, आन शुम फलाम व्युक्शा वोतो। येहो-यादा कली यो-यादा यो ब्रेक्शो बाक्ब। इजीकीएल ९:७; येरमीया २०:२ 27 मिनु गे ‘इन दाते डा परमप्रभु यावे आ लोत्र पखु पाइब अनाथोथ डा येरमीया कली मारदे महुइक्तीनी?’ 28 मेकोमी बेबीलोनम आंइ कली ओदेशो लोत्र सोइक्ताक्व। गे शुश बर्स मेकेर बाक्चा माल्तीनी। मोपतीके खिं सेल्लशा बाक्कीन। मिनु रूम मार मार शोक्शा जने” दे ब्रेक्शो बाक्त।

29 मिनु चढेब सेफन्याहम मेको चिठी पढेशा परमप्रभु यावे आ लोत्र पाइब येरमीया कली नैपाइक्नु। 30 मिनु मेना परमप्रभु यावेम येरमीया कली लोत्र पाप्नु। 31 नेहेलाम डा शेमायाह आ पर्बम मार लोत्र पाप्नु देशा हना

“ग्याइश्शा लाइक्चा पुंडसीशो नेल्ल आन कली एको लोत्र सोइक्तो। शेमायाहम इन कली नोले दुम्ब लोत्र पाप्नु। तन्न गो मेको कली मसोइक्नु। मेकोमी आं लोत्र पा, इन कली जोल लोत्रमी थमा सुइक्पाइक्नु। 32 मोपतीके गो नेहेलाम डा शेमायाह नु मेको आ चच युइ आन कली सजाइ गेनुडमी। मेको आ मुर सुइमी आं मुर रिशो दुम्शो तचा मताइनीम। मारदे हना मेकोमी आं कली मटिथु आं पर्बम दूली लोत्र पाप्नु” दे परमप्रभु यावेमी येरमीया कली देंत।

इस्राएल कली लेंशा सेल्लशो

30 मिनु परमप्रभु यावेम येरमीया कली लोत्र पाप्नु। 2 परमप्रभु यावे, इस्राएली आन परमप्रभुमी येरमीया कली मार लोत्र पाप्नु देशा हना “गो इ कली देशो लोत्र नेल्ल किताबमी ब्रेक्तो। 3 आं मुर इस्राएली नु यहूदा डा मुर आन थुं लेशशा नाइक्चा गेतीक नाक्त थमा पा जाक्ब। मिनु गो मेको आन किकी पिपी आन कली गेशो रागीम लेंशा लाइक्नुडमी। मिनु मेकोपुकीमी मेको रागी आंम के सेल्लीम” देंत। येरमीया २९:१४

4 इस्राएल नु यहूदा आस पर्बम परमप्रभु यावे आ लोत्र मार बाक्त देशा हना 5 “शुश हिंच नु ग्रीब आन सेंदा नैसीब। थुं नाइश्शा बाक्तीक जाम्त। 6 मार, वोंइश मुरुम आल थिने चाप्नीमी डा? दे हिल्लो पने। मारदे वोंइश मुर नेल्ल सुक्तेरी रोइ पशो खोदेशो पा आन गुडम आन क्रातो दिप्शो ताइनुडमी? मारदे मुर नेल्ल आन कुल बुश दुम्शो बाक्नीमी? 7 आबी, मेको नाक्त दोदेशो हिंचा डा नाक्त दुम्बा। मेको नाक्ती खोदेशो अर्को तेकोइ नाक्ती मदुम्नीम। मेको नाक्ती याकूब कली शुश हिंचा डा श्येत जतीक नाक्ती दुम्ब। तन्न मेको श्येत रे प्रॉइचा पुंडसीब” देंत। योएल २:११; सेफन्याह १:१४-१५

8 मुर नेल्ल आन परमप्रभु यावेमी “गो मेको नाक्ती मेको आन बला रे जुवा जिकनुड। मिनु गो मेको आन कली फ्रेशो रे प्रॉइनुडमी। मिनु अर्को रागी डा मुरपुकीम मेको आन कली गेनायो वाइल मसेल्लनीम। येरमीया २३:५; येरमीया २७:१२; इजीकीएल ३४:२३; होसे ३:५ 9 तन्न मेकोपुकीम परमप्रभु यावे, आन परमप्रभु, आं कली नु आं सेल्लो पिप दाऊद आ गेय पाइनीम। 10 गे आं गेय पाइब याकूब महिनो। गे इस्राएल सुर्ता मपावो। गो इ कली डोन रागी रे चाक्नुड। इ आल आन कली ग्याइश्शा लाइश्शो रागी रे प्रॉइशा चाक्नुड। याकूब कली लेंशा थुं नाइश्शा, हेम्मा पा बाक्तीक दुम्ब। मेको कली सुइम हिंच कौंइने मचाप्नीम। येरमीया ४६:२७; यसैया ४३:५-६ 11 मारदे हना गो इ कली प्रॉइचा कली गे नु बाक्नुड। इन कली फ्रशा वोइश्शो रागी रागी डा मुर नेल्ल आन कली साइक्नुडमी। तन्न गो इ कली गेनायो मक्वाम्नुड। गो इ कली ठीक सजाइ गेनुड। गो इ कली थमा पा सजाइ मगेथु, मप्रॉइनुड” दे परमप्रभु यावेमी देंत। येरमीया १०:२४; ब्यवस्था ८:५

12 मिनु परमप्रभु यावेम “इ गार मसाब। मेको मरिशो बाक्ब। येरमीया १५:१८ 13 सुइ इ पोन मबाक्ब। इ गार सापाइक्तीक ओख्ती मबाक्ब। इ कली सापाइक्तीक मारेइ मबाक्ब। 14 इ वारच नेल्लेम इ कली प्रेंने थुम्नेक्म। मेकोपुकीमी इ कली गेनायो ममिम्नीम। गो इ ठेयब दोस तशो नु इ शुश पाप आ पर्बम पतीके जोरी सत्रुम खोदेशो पा तुप्तन। मिनु शिशी मपाइक्बम खोदेशो पा गो इ कली सजाइ गेतन। 15 मारदे गे इ मसाब गार आ पर्बम वाइ ब्रेश्शा डाक्नेवे? इ खाइश्शो मसाब। मारदे हना इ दोस तशो नु इ शुश पाप पशो आ पर्बम गो इ कली मो पाइश्शो बाक्नुड। 16 मोपतीके गे इ कली दाक्ब नेल्ल दाक्चा पुंडसीनीम। इ जोरी सत्रु नेल्ल ग्याइश्शा लाइक्चा पुंडसीनीम। इ कली रोइक्बपुकी रोइक्चा पुंडसीनीम। इ कली खतम पोक्ब आन कली गो खतम पोक्नुडमी। यसैया ३३:१; इजीकीएल ३९:१० 17 गो इ कली लेंशा डॉइती डा खोदेशो मारेइ मदुम्शो सेल्लुड। मिनु इ गारपुकी सापाइक्नुडमी। मारदे हना इ कली ‘प्रॉइचा पुंडसीशो नु सुइम मिम्चा मपुंडसीशो सियोन’ देंनीम” दे परमप्रभु यावेमी देंत। येरमीया ३३:६; यसैया ५७:१८-१९

18 परमप्रभु यावेमी “गो याकूब आ ताम्बु डा शोंप लेंशा गेनुड। मिनु मेको आ बाक्तीक रागी कली शिशी पाइनुड। मेको सहर डा ब्रेश्शो नेल्ल आ डांडामी लेंशा सेल्लीब। मिनु आ दरवार लेंशा डॉइती डा आ बाक्तीकेमी

सेल्सीब। 19 मेकेर 'गे रिश्शो पाइब बाक्नीनी' दे कुम्सो पशो नु थुं नाइश्शा बाक्शो ग्येरशो सेंदा नेंसीब। गो मेको आन कली शुश सेल्लुडमी। मिनु मेकोपुकी इक्का का ला मदुम्नीम। गो मेको आन कली मान ताइब सेल्लुडमी। मिनु मेको आन कली सुइम शुक्शी मपाइनीम। 20 मेको आन आलपुकी डोंइती डा खोदेशोन दुम्नीम। मिनु मेको आन गुम्तीके आं डोंइती बाक्ब। मेको आन कली दिष्व नेल्ल आन कली गो सजाइ गेनुडमी। 21 मेको आन कली हुकुम पाइब मेको आन दाते डा का दुम्ब। मेको आन कली सासन पाइब आंम आन मुर बाक्ब। गो मेको कली आं नेक्था चाक्नुड। मिनु मेको आं नेक्था जाक्ब। मारदे हना आं नेक्था आंमा सु जाक्बा डा?" दे परमप्रभु यावेमी देंत। येरमीया ३०:९ 22 परमप्रभु यावेमी "गे आं मुर दुम्नीनी। मिनु गो इन परमप्रभु दुम्नुड" देंत। येरमीया ७:२३

23 नेनीन, परमप्रभु यावे आ गाइश्शोम फश गिवार बोक्ब। मेको आ अरेशो मटीब आन पियाम जुक्ब। येरमीया २३:१९-२० 24 परमप्रभु यावे आ थुंम मिश्शो मगाम्म सम्म मेको आ चुरशो मनाइसीब। गेपुकीमी नोले डा नाक्ती मेको रुन्नीनी।

### परमप्रभुम इस्राएल कली दाक्शो

31 परमप्रभु यावेमी "गो इस्राएली आन खिं नेल्ल डा मुर आन परमप्रभु दुम्नुड। मिनु मेकोपुकी आं मुर दुम्नीम" देंशो बाक्ब। येरमीया ७:२३ 2 परमप्रभु यावेमी "तरवार रे ब्रोंइशो मुरपुकीम गोरशो रागीम शिशी ताम्नेक्म। इस्राएल कली नाइक्पाइक्वा दाक्ताक्व हना, 3 परमप्रभु यावे डोन आ बाक्तीके रे जाक्ब। मिनु मेकोमी 'गो इ कली गेना हना यो लीब दाक्तीकेम दाक्ताक्व। मोपतीके गो इ कली दाक्वा मप्रोंइनुड। 4 गो इ कली लेंशा सेल्लुड। गे लेंशा सेल्ला पुंडसीनेवे। मिनु गे कन्ने मीश आल, इस्राएल, गे लेंशा इ खैजडी शेशा, ग्येरसीशोपुकी नु सिल पथ लाइनेवे। 5 गे सामरीया डा डांडा मेर लेंशा अडगुर खुम्नेवे। मेको रू डा गेय पाइबपुकीम खुम्नीम। मिनु मेको आ फल जशा ग्येरसीनीम। 6 मेना एफ्राइम पहाड डा खाल पाइबपुकीम जाक्कीन, गोपुकी सियोनम बाक्ब परमप्रभु यावे, इं परमप्रभु आ बाक्तीक लय" दे ब्रेत्तीक नाक्त्त जाक्ब" देंत।

7 परमप्रभु यावेमी "याक्ब आ पर्बम ग्येरशा ठेयब सेंदा पा कुम्सो पने। मिनु रागी रागी डा नेल्ल क्येडा ठेयब रागी आ पर्बम ठेयब सेंदा पा ग्रीडीन। मिनु परमप्रभु यावेम आ मुर आन कली श्येत रे प्रोंइतु। इस्राएल डा लीशो आन कली प्रोंइतु। 8 नेनीन, गो मेको आन कली उत्तर डा रागी रे चाक्नुडमी। मिनु गो मेको आन कली रागी डा सुर रे खुप्नुडमी। मेकोपुकी आन दातेमी मिक्च मताइब, गुइ खोइल मदुक्ब, कोव्रज कुरशो मीश मुर नु सुत्केरी रोइ पशो मीश मुर यो बाक्नीम। मेको आन ठेयब हुल लेशशा एकेर जाक्वा माल्नीम। यसैया ३५:८-१०; इजीकीएल ३४:१६ 9 मेकोपुकी डाक्ना डाक्न जाक्नीम। गो मेको आन कली शिशी पा लेशशा चाक्नुडमी। गो मेको आन कली खोला आ नेक्था गाक्पाइक्नुडमी। दाइल मपाइसीचा डा पित्थ लांम खुल्लुडमी। मारदे हना गो इस्राएल आ आफ दुम्शो बाक्नुड। मिनु एफ्राइम आं डोंइती जरमेशो तौ बाक्ब।

10 गे रागी रागी डा मुरपुकी, परमप्रभु यावे आ लोव्र नेनीन। डोन डा समुन्द्र आ नेक्था डा रागी नेल्ल आन कली नेंपतीन। मेको आन कली 'इस्राएल कली ब्रपाइक्बम मेको आन कली गुम्पाइक्ब। मिनु गोठलाम आन बगाल आन कली खाल पशो खोदेशो पा, मेकोमी इस्राएली आन कली कोव्रब' देंत। 11 मारदे हना परमप्रभु यावेम याक्ब आ मुर आन कली प्रोंइतु। मिनु मेकोम आन कली आन क्येडा बोल्यो मुर आन गुइ रे प्रोंइतु। 12 मेकोपुकी जाक्वा इर सियोनम ठेयब सेंदा पा कुम्सो पाइनीम। मेकोपुकीम परमप्रभु यावे आ रिश्शो पशो आ पर्बम ग्येरनीम। अन्न, अडगुर शांबु नु तेल तशा, क्यारश भेडा आन पाठा नु बी ब्यफ आन कली तशा ग्येरनीम। मेको ब्वाक्कुम जिश्शो फल फुल रू खोदेशो दुम्नीम। मेकोपुकी लेंशा गेनायो सुर्ता मपाइनीम। येरमीया ५८:१ 13 मेना ठिटी मीश मुर ग्येरशा सिल पाइनीम। ठिटा नु खाल्पा ग्येरनीम। गो मेको आन रोंका पतीके ग्येरतीकेम फाइक्नुड। गो मेको आन थुं बार पाइश्शा, सुर्ता पतीक आ पा डा

ग्येरतीक थुं गेनुडमी। 14 गो चढेब आन कली शुश गेशा रूपाइक्नुडमी। मिनु आं मुरपुकी आं शुश गेशोम रूशा ग्येरनीम" दे परमप्रभु यावेम देंत।

15 परमप्रभु यावेम "रामाम सेंदा का नेंसाक्व। मेको रोंका पशो नु हिशेक पा डाक्शो बाक्ब। राहेल आ आल आन पर्बम डाक्ब। मेको लेम्शोन, मबिस्से। मारदे हना मेको आ आल बेक्तेक्म" देंत। उत्पत्ती ३५:१६-२०; १सामुएल १०:२; मत्ती २:१८ 16 परमप्रभु यावेमी "डाक्वा नाइक्तीन। इन मिक्च रे प्रेक्कु मतोक्कीन। मारदे हना इन गेय डा इनाम ताइनीनी। मेको आन जोरी सत्रु आन रागी रे लेशशा जाक्नीम। 17 नोले इन रिश्शो दुम्तीक लां कोव्रनीनी। इन तमी तौ आंम आन रागीम लेशशा जाक्नीम" देंत।

18 परमप्रभु यावेम "गो एफ्राइम आ डाक्वा पुंडशो नेंता" देंत। मिनु एफ्राइममी "गे आं कली शेंताक्वीनी। गो इन शेंशो रुप्ता। गो मटीब बोहोर खोदेशो बाक्ती। आं कली लेत्वा गेयीनी। गो लेत्वा ताइनुड। मारदे हना गे परमप्रभु यावे, गे आं परमप्रभु बाक्नीनी। 19 गो नोले शोंइसीशा, इन गे लेत्ती। आं हेंथे पशो तुइक्त्तु नोले आं कुचु तुप्ता। गो मुने दोक्ती। मारदे हना गो आं ठिटा ना डा पाप कुरशो बाक्ती" दे डाक्वा देंत। 20 मिनु "मार, एफ्राइम आं दाक्शो तौ ममाइ डा? मेको आ पर्बम गो मग्येरनुडा? गो मेको कली हुइक्ताक्व हना यो, मेको कली मिम्ना मिम्न बाक्ती। मोपतीके गो मेको कली मुल सम्म दाक्नुड। गो मेको कली थमा पा शिशी पाइक्नुड" दे परमप्रभु यावेम देंत। यसैया ४९:१५; होसे ११:८

21 लां तुइक्तीक चिन्ड वोतो। लां कोंइतीक थाम खुक्को। गे तेको ठेयब लां रे लाइनेवे, मेको लां रिश्शो पा मिम्तो। गे कन्ने मीश आल इस्राएल, लेतो। इ सहरम लेतो। 22 गे काइ मटीब तमी, गे गेना सम्म रिम्नेवे? मारदे हना परमप्रभु यावेम मेको रागी डा मुर आन पशो नक सेल्लु। मेको मीश मुरुम वोंइश मुर कली दाक्ब।

23 मुर नेल्ल आन परमप्रभु यावे, इस्राएली आन परमप्रभुमी "गो मेको आन शोंप लेशशा गेता हना, मेकोपुकीमी लेंशा यहूदा रागी नु मेको आ सहरपुकीम 'गे ठीक पाइब नु परमप्रभु यावे आ डांडा, परमप्रभु यावेमी इ कली आसीक गेवल' देंनीम। जकरिया ८:३ 24 यहूदा नु मेको आ सहर नेल्ले काथा बाक्नीम। रू डा गेय पाइब नु आन बगाल नु हिरब गोठला नेल्ल काथा बाक्नीम। 25 गो दशो आन कली लेंशा बोल्यो सेल्लुडमी। मिनु थशो आन कली लेंशा बोल गेनुडमी" देंत। 26 गो ओशोमीन सेंसाक्वी। मिनु एर ऑथ कोव्रशा, गो रिश्शो पा इप्ती, दे तुइक्ताक्व। 27 मिनु परमप्रभु यावेमी "गो इस्राएल आ खिं डा मुर, यहूदा आ खिं डा मुर नु क्यारश भेडा, बी ब्यफ आन कली सोशा बोशा दुम्पाइक्तीक नाक्त्त थमा पा चाक्नुड। 28 गो दोपा मेको आन कली तुल्चा, प्रेत्वा, ताइक्वा नु खतम पोक्वा कली मरिश्शो पडा, मोपा गो मेको आन कली सेल्ला नु खुम्चा कली कोव्रनुड। येरमीया १:१० 29 मेको नाक्ती मुरपुकीम लेंशा 'आम आफोम ग्युरशो अडगुर ब्वाम्तेक्म। मिनु आन आल आन ख्रुइ ग्रिम्तेक्म' मदेनीम। इजीकीएल १८:२; प्रस्थान २०:५; बिलाना ५:७ 30 तन्न मुर नेल्ल आन पाप आ पर्बम बेक्नीम। सुम ग्युरशो अडगुर ब्वाइबा, मेको आ ख्रुइ ग्रिम्ब" देंत।

31 परमप्रभु यावेमी "गो इस्राएल आ खिं डा मुर नु यहूदा आ खिं डा मुर नु नक कबल का पाइनुड। मेको नाक्ती थमा पा जाक्ना जाक्न बाक्नीम। हिब्रू ८:८-१२ 32 मेको कबल मेको आन किकी पिपी आन कली इजीप्त्त रे गुंडची ना पशो कबल खोदेशो ममाइ। गो मेको आन वोंइश खोदेशो बाक्ती हना यो, मेकोपुकीमी मेको कबल मखबेम। 33 तन्न इस्राएल आ खिं डा मुर नोले डा नाक्ती डा कबल मार बाक्त्त देंशा हना, गो आं अरेशो मेको आन थुंम वोइक्नुड। मिनु आन थुंम मेको ब्रेक्वा गेनुडमी। मिनु गो मेको आन परमप्रभु दुम्नुड। मिनु मेकोपुकी आं मुर दुम्नीम। इजीकीएल ११:१९; हिब्रू १०:१६-१७; येरमीया ७:२३ 34 मेना रे परमप्रभु यावे कली तुइक्तीन, दे मुर कामी अर्को कली मशेंनीम। मारदे हना आइक्च रे ठेयब नेल्लेम आं कली तुइक्नीम। गो मेको आन मरिश्शो पशो माफ गेनुडमी। मिनु लेंशा गेनायो मेको आन पाप ममिम्नुड" दे परमप्रभु यावेमी देंत। येरमीया ३३:८; यसैया ४३:२५; रोमी ११:२६-२७

35 मेको परमप्रभु यावेम नाक्ती हाम्सो सेल्ला कली नां वोइक्त्तु। मिनु तास्ला आ लां कोंइताक्व। नाक्दो हाम्सो सेल्ला कली सोरुल वोइक्त्तु। मेकोमी समुन्द्र आ छाल पोक्वा कली शाक्त्तु। मेको आ नें मुर नेल्ल आन

परमप्रभु यावे बाक्ब।<sup>36</sup> मिनू परमप्रभु यावेमी “आं डोंइती नां, तास्ला नु सोरुल जाम्तेक्म हना ला, इस्राएली यो आं डोंइती रागी का मदुन्मीम” दैत। *येरमीया ३३:२५; रोमी ११:१*

<sup>37</sup> परमप्रभु यावेमी “सरीड कली पुक्ने जाप्त हना, रागी आ जग माल्शा गुंडने चाम्साक्व हना, ला गो इस्राएल आ आल आन कली तिल्लुडमी” दैत।

<sup>38</sup> परमप्रभु यावेमी “हानानेल आ लाइश्शो खिं रे सुर डा ठेयब लाप्चो सम्म आं नैम लेंशा सहर सेल्लिक नाक्ती थमा पा जाक्ना जाक्न बाक्नीम।  
<sup>39</sup> पुक्तीक डोरी मेको रे पा गारेब डा डांडा सम्म जाक्दीप्ब। मिनू मेको रे हिरशा गोआह सम्म जाक्दीप्ब।<sup>40</sup> बेक्शो मुर आन बेसी नेल्ल पुलु ताइक्तीक दिंम नु किद्रोन कोल्सा सम्म डा रू नेल्ल नु शारा लाप्चो डा कुना सम्म परमप्रभु यावे के दुम्ब। मिनू मेको गेनायो तुल्शा खतम मपोक्सीब” दैत।

येरमीयामी रू ग्याप्शो

**32** परमप्रभु यावेम येरमीया कली लोव्र पाप्तु। मेना यहूदा डा पिप सिदकीयाहम सासन पशो १० बर्स दुम्मेनु, नेबुकदरेसर आ सासन पशो १८ बर्स दुम्शो बाक्ता।<sup>2</sup> मेना बेबीलोन डा पिप आ लडाइ पाइबपुकीम यरूसलेम पुन्ताक्म। परमप्रभु यावे आ लोव्र पाइब येरमीया चिहं यहूदा डा पिप आ दरवार खाल पाइब मुर आ जेल्खानम बाक्ता। मेको यहूदा डा पिप आ लाडगाम बाक्ता। *२राजा २५:१-२*<sup>3</sup> यहूदा डा पिप सिदकीयाहम मेको कली मेकेर चोक्शो बाक्ता। मिनू मेकोमी “गे मारदे मोदेशो पा परमप्रभु यावे आ लोव्र पाइनेवे? परमप्रभु यावेमी ‘गे एको सहर बेबीलोन डा पिप आ गुडम गेचशो बाक्नुड। मिनू मेकोमी एको आंम के सेल्ब। *येरमीया २१:७; येरमीया ३४:२*<sup>4</sup> यहूदा डा पिप सिदकीयाह कल्दी आन गुड रे मब्रोंइब। मेको थमा पा बेबीलोन डा पिप आ गुडम गेचा पुंडसीब। मिनू मेको नु कोव्रमुशा, लोव्र पाइब।<sup>5</sup> मेकोमी सिदकीयाह कली बेबीलोन लाइक्ब। मिनू गो मेको कली मकोव्रडु सम्म मेकेर बाक्ब। गे कल्दी नु लडाइ पाप्तीवी हना मग्रानेवे’ दे परमप्रभु यावे आ लोव्र पवी” दैशा चोक्शो बाक्ता। *येरमीया ५२:११*

<sup>6</sup> मिनू येरमीयामी परमप्रभु यावेम आं कली लोव्र पाप्तु। मार लोव्र पाप्तु दैशा हना,<sup>7</sup> “इ बकान्छा शाल्लुम आ तौ हनामेल इ बाक्तीक जाक्शा, इ कली ‘अनाथोथम बाक्शो आं रू ग्यापीन। मारदे हना ग्याप्चा अधिकार इन के बाक्ब’ दैब” दैत। *लेवी २५:२५; रूथ ४:३-४*<sup>8</sup> मिनू नोले परमप्रभु यावेम दैशो खोदेशो पा आं बकान्छा आ तौ हनामेल पिप आ खिं खाल पाइब आन लाडगा जाक्शा, मेकोमी “बेन्यामीन आ रागी अनाथोथम बाक्शो आं रू ग्यापीन। मेको ग्याप्चा अधिकार इन केन बाक्ब। मोपतीके गे मेको ग्याप्सीन” दैत। मिनू गो एको परमप्रभु यावे आ लोव्र बाक्माक्ता, दे तुइक्ताक्ड।

<sup>9</sup> मोपतीके गो आं बकान्छा आ तौ हनामेल आ अनाथोथम बाक्शो रू ग्याप्ता। मिनू गो मेको कली चांदी के १७ शेकेल नाक्शा गेता। *शेकेल का ११.५ ग्राम डा चांदी के क्येट बाक्ब।*<sup>10</sup> मिनू गो कागज ब्रेक्शा, छाप थोक्शा सांकळीपुकी वोइश्शा चांदी के शेकेल नाक्शा गेता।<sup>11</sup> मिनू गो आं रू ग्याप्शो ब्रेक्शो छाप थोक्शो कागज ताक्ता। छाप थोक्शो नु छाप मथोक्शो कागज यो ताक्ता।<sup>12</sup> मिनू गो मेको रू ग्याप्शो ब्रेक्शो कागज आं बकान्छा आ तौ हनामेलम आ डोंइती, सांकळी नु पिप कली खाल पाइब आ लाडगाम बाक्शो यहूदी आन डोंइती माहसेयाह आ चच, नेरीयाह आ तौ बारुक कली गेता। मेको सांकळी नेल्ल आन नें यो कागजम ब्रेक्शो बाक्तेक्म।<sup>13</sup> गो मेको नेल्ल आन डोंइती बारुक कली<sup>14</sup> “मुर नेल्ल आन परमप्रभु यावे, इस्राएली आन परमप्रभुमी मार दैत दैशा हना, मेको शुश नाक्ता सम्म लील, दे मेको रू ग्याप्शो कागज, छाप थोक्शो नु मथोक्शो, निम्फा खप के ग्योब कामी कुर पावो” दैत।<sup>15</sup> मारदे हना मुर नेल्ल आन परमप्रभु यावे, इस्राएली आन परमप्रभुमी “मेको रागीमी खिं, रू नु अडगुर रू ग्याप्सीम” दैत। *येरमीया ३२:१५*

<sup>16</sup> मिनू गो नेरीयाह आ तौ बारुक कली मेको रू ग्याप्शो कागज गेडा नोले, गो परमप्रभु यावे कली एको लोव्र पा<sup>17</sup> “परमप्रभु, परमप्रभु यावे, इन

ठेयब सक्ति नु दिंशो गुडम गे सरीड नु रागी सेल्लिनी। इन कली मारेड गेय मचाप्चा डा मबाक्ब। *येरमीया २७:५; उत्पत्ती १८:१४; लूका १:३७*

<sup>18</sup> हजार हजार पाला सम्म इन गेना हना यो दाक्तीक कोंइनीनी। तन्न आम आफ आन हेंथे पशो आन नोले जाक्ब आन आल आन कली रपाइक्नीनी। गे ठेयब नु सक्ति पाइश्शो परमप्रभु बाक्नीनी। इन नें मुर नेल्ल आन परमप्रभु यावे बाक्ब। *प्रस्थान २०:५-६*<sup>19</sup> इन अर्ती ठेयब नु इन गेय नेल्ल क्येडा सक्ति पाइश्शो बाक्नीम। मुर आन पशो मारेड मारेड इन डोंइती तचा डा पा बाक्नीम। गे मुर नेल्ल आन कली कोव्रनीनी। गे नेल्ल आन लां नु आन पशो तशा इनाम गेनीनी। *रोमी २:६*<sup>20</sup> गे इजीप्त रागीमी चिन्ड नु छक लाक्चा डा गेय कोंइताक्नी। मिनू मुल सम्म इस्राएल नु मुर नेल्ल आन दातेमी इन नें ठेयब सेल्लिनी।<sup>21</sup> गे इन मुर इस्राएली आन कली इजीप्त रे चिन्ड नु छक लाक्चा डा गेय इन सक्ति नु बोल नु शुश हिंचा डा श्येत कोंइशा गुंडलाक्नी।<sup>22</sup> मिनू गे मेको आन किकी पिपी आन कली कसम जशो, मेको दूध नु खुदो शुश बाक्शो रागी गेतीनी।<sup>23</sup> मिनू मेकोपुकी ओव्रशा, मेको रागी आन के सेल्लेक्म। तन्न मेकोपुकीमी इन दैशो, इन अरेशो नु मार पचा माल्बा शेंशो मबिस्सम। गे मेको आन कली पन दैशा शेंशो लोव्र मेकोपुकीमी मटीमे। मोपतीके गे एको ठेयब श्येत नेल्ल मेको आन तार चाक्तीनी।<sup>24</sup> कोव्रडीन, एको सहर आन के सेल्चा कली नु गारो डोइक्चा कली लां सेल्चा कली मार मार तेल्लेक्म। मेको सहर कली तरवार, अन्काल नु मुर बेक्तीक रोइम पतीके, मेको लडाइ तोइब कल्दी आन गुडम दुम्त। गे मार दैनी, मेको दुम्त। गे आंमा ताइनीनी।<sup>25</sup> मो हना यो परमप्रभु, परमप्रभु यावे, गे आं कली ‘एको सहर कल्दी आन गुडम दुम्त हना यो, क्येट गेशा, सांकळी आन कली ब्रेक्शा, रू ग्यापो’ दैतीनी” दे येरमीया दैत।

<sup>26</sup> मिनू परमप्रभु यावेम येरमीया कली लोव्र पाप्तु।<sup>27</sup> मार, लोव्र पाप्तु दैशा हना “गो परमप्रभु यावे, ब्रोंइशो नेल्ल आन परमप्रभु नड। मार, तेकोइ गेय आं पने मचाप्चा डा बाक्बा डा?” दैत। *गन्ती १६:२२; येरमीया ३२:१७*<sup>28</sup> मोपतीके परमप्रभु यावेमी “गे एको सहर कल्दी आन गुड नु बेबीलोन डा पिप नेबुकदरेसर आ गुडम गेचा चिक्ताक्ड। मिनू मेकोमी एको सहर ग्राब।<sup>29</sup> एको सहर कली लडाइ तोइब कल्दी जाक्शा मी सुइक्नीम। तेको खिं तारी आं कली गाइक्पाइक्चा कली बाल देवता कली चढेमे नु देवी देवता आन कली तूचा थोव्रक चढेशा लुक्तेमे, मेको नेल्ल क्रोइक्नीम। *येरमीया १७:१३*<sup>30</sup> मारदे हना इस्राएल डा मुर नु यहूदा डा मुरुम आन ठिटा रेन आं डोंइती मरिश्शो गेय डा लाक्शा अरु मारेड मपामे। थमा पा इस्राएल डा मुरपुकीम आन गुड डा गेयम आं कली गाइक्पाइक्चा डा लाक्शा, अरु मारेड मपामे।<sup>31</sup> एको सहर सेल्मे नाक्ता रे मुल सम्म आं कली गाइक्पाइश्शा, चुरपाइश्शा पतीमी। मोपा गो एको कली आं डोंइती रे तिल्लुड।<sup>32</sup> मेको इस्राएल नु यहूदा डा मुरपुकीमी आं कली गाइक्पाइक्चा कली आन मरिश्शो पशो आन पबर्म पाइनुड। मेको आन पिप, आन सरकार डा गेय पाइब, आन चढेब, आं लोव्र पाइबपुकी, यहूदा डा मुरपुकी नु यरूसलेममी बाक्बपुकी नेल्लेम मोदेशो पाक्तेक्म।<sup>33</sup> मेकोपुकीमी आं कली आन ची हिरशा कोंइशो बाक्नीम। आन कुल ममाइ। गो मेको आन कली शेंना शेंन बाक्ती हना यो, मनेनेम रिश्शो पचा कली ममिम्तेम। *येरमीया २:२७*<sup>34</sup> मेकोपुकीमी आं नें वोइश्शो खिंम आन ग्रांरा दिशो देवी देवता वोइक्तेक्म। मिनू आं खिं कली ग्रांरा दिशो सेल्लेक्म।<sup>35</sup> मेकोपुकीम हिन्नोम आ तौ आ बेसीम बाल देवता आन थान सेल्लेक्म। मिनू मेकोपुकीमी मेकेर आन तमी तौ आन कली मोलेक कली चोशा चढेक्तेक्म। गो मेको आन कली मेको मअरेडमी। गो मेको गेनायो ममिम्तु। मोदेशो ग्रांरा दिशो गेय पशा, यहूदा डा मुर आन कली पाप पपाइक्तेक्म” दैत। *येरमीया ७:३१; येरमीया १९:५; इजीकीएल २०:२५-२६*

<sup>36</sup> मोपतीके परमप्रभु यावे, इस्राएली आन परमप्रभुमी “गेपुकीमी एको सहर आ पबर्म ‘तरवार, अन्काल नु मुर बेक्तीक रोइम बेबीलोन डा पिप आ गुडम गेशो बाक्ब’ दैनीनी।<sup>37</sup> कोव्रडीन, गो मेको आन कली आं गाइश्शो, चुरशो नु ठेयब ग्युश्शा बोक्तीकेमी तेको रागीम खेरुमी, मेको रागी नेल्ल रे गुम्पाइक्नुडमी। गो मेको आन कली लेंशा एको रागीम लेश्शा चाक्नुडमी। मिनू मेको आन कली रिश्शो पा मारेड मदुम्थु बाक्पाइक्नुडमी। *ब्यक्स्था ३०:३*<sup>38</sup> मिनू मेकोपुकी आं मुर दुम्नीम। मिनू गो मेको आन परमप्रभु

दुम्नुड। येरमीया ७:२३<sup>39</sup> गो मेको आन कली थुं का दुम्तीक नु गाक्तीक लां का गेनुडमी। मेकोपुकी गेना हना यो आं कली मान पा हिंनीम। मेको आंम आन कली नु आन आल आन कली रिम्शो दुम्ब। इजीकीएल ३६:२७<sup>40</sup> गो मेकोपुकी नु गेना हना यो लीब कबल का पाइनुड। गो मेको आन कली रिम्शो पचा कली गेनायो मप्रॉइनुड। मिनु गो मेको आन थुंमी आं कली मान पा हिंतीके वोइक्नुड। मोपा मेकोपुकीम आं कली मप्रॉइनीम। येरमीया ३१:३१-३४<sup>41</sup> गो मेको आन कली रिम्शो पना पन ग्येरसीनुड। मिनु थमा पा गो आं थुं नु आं सोक्त नेल्लेम मेको आन कली एको रागीम वोइक्नुडमी” दैत। ब्यवस्था २८:६३; आमोस ९:१५

<sup>42</sup> परमप्रभु यावेमी “दोपा गो एको मुर आन कली ओं पा शुश श्येत गेडा, मोपा गो मुल आं दैशो रिम्शो पतीक नेल्लेम, मेको आन कली रिम्शो पाइक्नुडमी।<sup>43</sup> एको रागीम रू ग्याप्नीम। मेको आ पबर्म गेपुकीम ‘एको मुर नु बस्तु भाव मारेड मबाक्शो रागी बाक्ब। मारदे हना एको कल्दी आन गुडम गेशो बाक्ब’ दैनीनी।<sup>44</sup> मेकोपुकीम क्येटीम रू ग्याप्नीम। मेको आन नें ब्रेक्शो ग्याप्शो कागज, सांकछी वोइश्शा, छाप थोक्नीम। मोदैशो बेन्यामीन आ रागी, यरूसलेम आ एर ओंथ, यहूदा डा सहरम, पहाडीम, शेफेलाहम नु नेगेबम मोदैशो पाइनीम। मारदे हना गो मेको आन शोप लेशशा गेनुड” दे परमप्रभु यावेम दैत। येरमीया ३२:१५; येरमीया २९:१४,३०

“यरूसलेम लेंशा सेल्लुड” दैशो

**33** परमप्रभु यावेमी येरमीया कली पिप आ दरवार खाल पाइब मुर आ जेल्खानम बाक्मेनु निक्शी खेयप लोत्र पाप्तु। येरमीया ३२:२<sup>2</sup> मिनु रागी सेल्ब परमप्रभु यावेमी लोत्र पाप्तु। मेको रागी बोल्यो सेल्ब आं नें यावे बाक्ब।<sup>3</sup> मेकोमी “आं कली ब्रेत्ती। मिनु गो इ कली लोत्र लेल्लुड। मिनु गो इ मतुइश्शो ठेयब नु खुइश्शो थोत्रक शैनुड” दैत।<sup>4</sup> इस्राएली आन परमप्रभु यावेमी “एको सहर डा खिं नु यहूदा डा पिप आन खिं प्रेशशा, कल्दी नु लडाइ पचा कली सहर आगा रे यो गारो डोइक्तीक लां सेल्नीम। यसैया २२:१०<sup>5</sup> कल्दी सहर ओत्रशा लडाइ पाइनीम। मेकोपुकीमी मेको खिं कली बेक्शो मुर आन रांमी प्रिंनीम। गो आं गाइश्शो नु चुरशोम साइश्शो मुर आन बेक्शो रांम प्रिंनीम। मारदे हना आं अरेशो लोत्र मटीब आन पतीके एको सहर रे आं कुल खुइक्ताक्ड।<sup>6</sup> गो आं मुर आन कली सापाइक्नुडमी। मिनु गो मेको आन कली सापाइश्शा, आन माल्शो गेशा मारेड मद्रुम्थु रिम्शो पा बाक्वा गेनुडमी। येरमीया ३०:१७<sup>7</sup> गो यहूदा नु इस्राएल डा मुर आन शोप लेशशा गेनुडमी। मिनु मेको आन कली डोइती डा खोदैशो सेल्लुडमी। येरमीया २९:१४; येरमीया २४:६<sup>8</sup> गो आं पबर्म पशो आन हेंथे पतीके नु पाप नेल्ल रे मेको आन कली ठीक सेल्लुडमी। मिनु गो मेको आन हेंथे पशो नु पाप पशो माफ गेनुडमी। येरमीया ३१:३४; येरमीया ५०:२०<sup>9</sup> मिनु एको सहर आं डोइती ग्येरपाइक्तीक, ठेयब सेल्लुडमी नु आं कली मान पतीके दुम्ब। मिनु रागी रागी डा मुरुम गो इस्राएली आन कली मार मार रिम्शो पशो नैनीम। मिनु मेको आन कली रिम्शो नु आन माल्शो क्येडा शुश गेशो तशा आं पबर्म हिंशा खिंखि पाइनीम” दैत।

<sup>10</sup> परमप्रभु यावेमी “मेको सहर आ पबर्म गेपुकीम ‘एको मुर नु बस्तु भाव मारेड मबाक्शो रागी बाक्ब। यहूदा डा सहर नु यरूसलेम डा लां गाक्ब मुर नु बस्तु भाव, जन्तु मबाक्थु, श्येथ दुम्शो बाक्ब। मेको मारेड मबाक्शो सहरम लेंशा, येरमीया ३२:४३<sup>11</sup> थुं नाइश्शा बाक्तीक, ग्येरशो सेंदा, ग्युम्ती ग्युम्ले आन सेंदा, कुम्सो पशो सेंदा नु परमप्रभु यावे आ खिंम, गे रिम्शो पाइब बाक्नीनी” दैशा सेंदा लेंशा नैसीब। मुर नेल्ल आन परमप्रभु यावे कली ‘परमप्रभु यावे, गे शिशी पाइब बाक्नीनी’ दैनीन। मारदे हना मेको रिम्शो पाइब बाक्ब। मेको आ दाक्तीक गेना हना यो बाक्ब। गो रागी डा मुर आन कली डोइती डा खोदैशो पा थुं नाइक्वा गेनुड” दे परमप्रभु यावेम दैत। येरमीया ७:३४; एज्रा ३:११; बजन संग्रह १०६:१

<sup>12</sup> मुर नेल्ल आन परमप्रभु यावेमी “मुर नु क्यारश भेडा, बी ब्यफ मबाक्शो रागीम लेंशा सहर नेल्लेमी गोठला आन क्यारश भेडा नाइक्तीक नु योव्रतीक दुम्ब।<sup>13</sup> मिनु पहाड डा सहर, शेफेलाह, नेगेब बेन्यामीन आ रागी

यरूसलेम आ एर ओंथ नु यहूदा डा सहरम गोठलापुकीमी क्यारश भेडा लेंशा हिक्शा ओइनीम” दे परमप्रभु यावेम दैत। येरमीया ३२:४४

दाऊद नु लेवी कली पशो कबल

<sup>14</sup> परमप्रभु यावेम “इस्राएल आ खिं डा मुर नु यहूदा आ खिं डा मुर आन कली आं थोक्शा पशो लोत्र खाप्तीक नाक्त थमा पा जाक्ना जाक्न बाक्नीम। येरमीया २३:५-६; जकरिया ३:८<sup>15</sup> मेको नाक्ती, मेना गो दाऊद आ खिं रे ठीक पाइब राशी का दाप्पाइक्नुड। मिनु मेकोमी रागीम ठीक निसाफ नु ठीक गेय पाइब।<sup>16</sup> मेको नाक्ती यहूदा श्येत रे प्रोइचा पुंइसीब। मिनु यरूसलेम मारेड मद्रुम्थु बाक्ब। मिनु मेको आ नें आंइ कली ठीक सेल्ब परमप्रभु यावे” दैनीम। ब्यवस्था ३३:२८

<sup>17</sup> मारदे हना परमप्रभु यावेम “गेना हना यो दाऊद आ खिं डा मुर का इस्राएलमी पिप दुम्ब। २सामुएल ७:१२-१३; १राजा ९:५; भजन संग्रह ८९:३०<sup>18</sup> गेना हना यो लेवी आ थर डा चढेब का आं डोइती चोशा चढेचा कली, अन्न चढेचा कली नु क्योरशा चढेचा कली बाक्ब” दैत। गन्ती २५:१२-१३; नेहेम्याह १३:२९

<sup>19</sup> परमप्रभु यावेम येरमीया कली लोत्र पाप्तु।<sup>20</sup> मार, लोत्र पाप्तु दैशा हना “गेपुकीमी गो नु नाक्दो पशो कबल नु नाक्त पशो कबल क्याम्ने चाप्तीनी हना, नाक्दो नु नाक्ती आं दैशो ना मद्रुम्तेक्म हना, येरमीया ३१:३५-३६; उत्पत्ती ८:२२<sup>21</sup> ला आं गेय पाइब दाऊद नु आ तौ का पिप दुम्ब, दैशो कबल क्याम्ने चाप्तीनी। मिनु गो आं लेवी थर डा मुर चढेब नु पशो कबल यो क्याम्ने चाप्तीनी। गन्ती २५:१२-१३; हिब्रू ९:११-१४<sup>22</sup> दोपा सरीड डा सोरुल हिक्ने मचाप्चा डा बाक्नीमी नु समुन्द्र डा बाल्वा पुक्ने मचाप्चा डा बाक्बा, मोपा गो आं गेय पाइब दाऊद आ चच युइ नु आं कली गेय पाइब लेवी आ थर डा मुर आन कली सोपाइश्शा बोपाइश्शा शुश सेल्लुडमी” दैत। उत्पत्ती १५:५

<sup>23</sup> परमप्रभु यावेम येरमीया कली लोत्र पाप्तु।<sup>24</sup> मार लोत्र पाप्तु दैशा हना “मेको मुरपुकी मार, दैना दैन बाक्मा, मार, गे मनेनी? मेकोपुकीमी ‘परमप्रभु यावे आ योव्रशो खिं निक्शी डा मुर आन कली प्रोइशा तिल्शो बाक्ब’ दैतेक्म। मो दैतीके मेको मुरपुकीमी आं मुर आन कली आइक्च सेल्शा, मुल रे रागी का यो मनम, दे मिन्मीम” दैत।<sup>25</sup> परमप्रभु यावेमी “गो नाक्दो नु नाक्त नु आं कबल मपाता हना, सरीड, रागीम आं दैशो मपातेक्म हना,<sup>26</sup> गो याक्ब आ आल नु आं गेय पाइब दाऊद आ चच युइ आन कली तिल्नुडमी। मोपा मेको अब्राहाम, इसहाक नु याक्ब आन मुर आन कली पिप दुम्बा कली मयोव्रनुडमी। तन्न गो मेको डोइती खोदैशो पा, मेको आन थुं नाइक्वा गेनुडमी। मिनु मेको आन कली शिशी पाइनुडमी” दैत।

सिदकीयाह कली हिं च कोइशो

**34** परमप्रभु यावेम येरमीया कली बेबीलोन डा पिप नेबुकदरेसर, मेको आ लडाइ पाइब नेल्ल, रागी डा राज्य नेल्ल नु मेको आ सासन पशो रागी डा मुर नेल्लेम यरूसलेम नु आ एर ओंथ डा सहर नेल्ल आन कली लडाइ तोम्तेक्म। मेना इस्राएली आन परमप्रभु यावेमी येरमीया आं कली लोत्र पाप्तु। येरमीया ५२:४; २राजा २५:१-२<sup>2</sup> मिनु परमप्रभु यावे, इस्राएली आन परमप्रभुमी आं कली “यहूदा डा पिप सिदकीयाह आ बाक्तीक लावो। मिनु मेको कली परमप्रभु यावेमी ‘गो एको सहर बेबीलोन डा पिप आ गुडम गेनुड। मिनु मेकोमी एको सहर कली मीम क्रोइक्ब। येरमीया २१:१०<sup>3</sup> गे मेको आ गुइ रे ब्रॉइचा मताइनेवे। गे थमा पा ग्याइक्वा पुंइसीशा मेको आ गुडम दुम्नेवे। गे बेबीलोन डा पिप कली तशा, मेको नु कोव्रमुशा लोत्र पाइनेवे’ दे बेबीलोन लचा माल्लेवे” दैत। येरमीया ३२:४<sup>4</sup> गो हना यो ए यहूदा डा पिप सिदकीयाह, परमप्रभु यावे आ लोत्र नेनीन “गे तरवारम साइक्वा मपुंइसीनीनी। येरमीया ५२:११<sup>5</sup> गे इन थुं नाइश्शा बेक्नीनी। मिनु दोपा इन किकी पिपी इन डोइती डा पिप आन कली मुरपुकीमी ब्रोव्रशो रिना पाइब थोत्रक चोशा थिम्मे, मोपा मेकोपुकीमी इन कली यो थिन्मीम। इन पबर्म ‘आंइ प्रभु’ दे रोंका पाइनीम। गो मेको लोत्र



पाता, दे नेल्लेम नेंचा डा पा देनो” दे परमप्रभु यावेमी देंत। २इतिहास १६:१४; येरमीया २२:१८

६ मिनू येरमीयामी मेको लोव्र नेल्ल यरूसलेममी यहूदा डा पिप सिदकीयाह कली देंत। ७ बेबीलोन डा पिप आ लडाइ पाइब मुरपुकी यरूसलेम नु यहूदा डा अरु सहर नु लडाइ पना पन बाक्शो बाक्तेक्म। लाकीश नु आजका नु यो मेकोपुकीमी लडाइ पचा मप्रॉइशो बाक्तेक्म। मेको यहूदा डा गारो हिरशो सहर निक्शी ला लीशो बाक्ताक्स।

वाइल आन कली प्रॉइतीक बर्स

८ मेना परमप्रभु यावेम येरमीया कली लोव्र पाप्तु। मेना यहूदा डा पिप सिदकीयाहम यरूसलेम डा मुर नेल्ल नु वाइलीम वाइल नेल्ल आन कली प्रॉइचा माल्नीम, दे कबल पशो बाक्त। येरमीया ३४:१४ ९ मेना मुर नेल्लेम आंम हिब्रू वाइलीम वाइल आन कली प्रॉइचा माल्तेक्म। सुइम यो आंम हिब्रू लोक्ब आन कली वाइलीम वाइल सेल्चा मदुम। १० मिनू मेको लोव्र टीब ठेयब मुर नु कबल टीब मुर नेल्लेमी आंम आन वाइलीम वाइल आन कली प्रॉइचा नु लेंशा अर्को वाइलीम वाइल मवोइक्चा नम, देंशो बिस्साक्म। मिनू मेकोपुकी गारशा, मेको आन कली प्रॉइतेक्म। ११ मिनू नोले लेंशा मेकोपुकीमी आन थुं लेशशा आन प्रॉइशो वाइलीम वाइल आन कली लेंशा चाक्शा वाइलीम वाइल सेल्तेक्म। १२ मिनू परमप्रभु यावेम येरमीया कली लोव्र पाप्तु। १३ मार, लोव्र पाप्तु देंशा हना “परमप्रभु यावे, इस्राएली आन परमप्रभुमी ‘गो मेको आन किकी पिपी आन कली इजीप्त रागी डा वाइलीम वाइल दुम्तीक खिं रे प्रॉइशा चाक्तामी। मिनू गो मेकोपुकी नु कबल पाता। १४ तेकोइ ७ बर्सम इन कली लेयसीशो मुर इन हिब्रू लोक्बम इन कली ६ बर्स गेय पवा नोले, ७ बर्सम मेको कली प्रॉइचा माल्ब’ देंती। तन्न इन किकी पिपीम आं लोव्र मटीम। आन नोफान मदाइक्तेम। प्रस्थान २१:२; लेवी २५:३९-४१; ब्यक्स्था १५:१२ १५ गोपुकीम चहिं नक माफ पुंइशा आं डोंइती नेल्ल आन कली प्रॉइचा नम, देंशो लोव्र ठीक पाइतीनी। मिनू गोपुकीमी आं नें बाक्तीक खिंम आं डोंइती कबल का पाइतीनी। लेवी २५:१० १६ तन्न नोले इन थुं फाइशा आं नें ग्रांरा दिशो सेल्तीनी। गे नेल्लेम इन डोंइती प्रॉइशो वाइलीम वाइल आन कली लेशशा चाक्तीनी, देंशो बाक्ब” देंत। १७ मोपतीके परमप्रभु यावेमी “गोपुकीम आं देंशो मटिनी। मिनू आंम रागी डा आंम नेक्था डा मुर नु आंम वारच आन कली वाइलीम वाइल दुम्तीक रे मप्रॉइनी। मोपतीके गो मुल इन कली प्रॉइन्ननी। गो इन कली तरवार, मुर बेक्तीक रोइ नु अन्कालम साइक्पाइक्चा कली प्रॉइन्ननी। गो इन कली राज्य नेल्लेम शुश हिंचा डा सेल्न्ननी। १८ आं कबल क्याम्ब नु आं डोंइती पशो कबल डा पतीके मपाइब मुर आन कली बाछा खोदेंशो सेल्नुडमी। मेको कली फेके निक्शी सेल्तेक्म। मिनू मेको आ दाते रे गाक्तेक्म। १९ मिनू मेको बाछा आ फेके निक्शी आस दाते रे गाक्ब यहूदा नु यरूसलेम डा सरकार आ गेय पाइब, दरवार डा ठेयब मुरपुकी, चढेबपुकी नु रागी डा मुर नेल्ल २० आन जोरी सनु आन गुइम नु आन कली साइक्चा माल्ब आन गुइम गेचा पुंइसीनीम। मेको आन बेक्शो रां सरीड डा चिक्ब नु रागी डा जन्नु आन ब्वतीक दुम्ब। येरमीया ७:३३ २१ यहूदा डा पिप सिदकीयाह नु मेको आ सरकार डा गेय पाइब आन कली साइक्चा माल्ब, आन जोरी सनु आन गुइम नु बेबीलोन डा पिप आ लडाइ पाइब आन गुइम गेनुडमी। मेको लडाइ पाइबपुकी इन रे लेशशा लशो बाक्तेक्म” देंत। येरमीया ३७:५ २२ परमप्रभु यावेमी “गो मेको आन कली अरेनुडमी। मिनू गो मेको आन कली एको सहरमी लेशशा चाक्नुडमी। मेकोपुकीमी एको सहर नु लडाइ पा ग्रानीम। मिनू एको कली क्रोइक्नीम। मिनू गो यहूदा डा सहर कली मुर मबाक्शो सेल्नुड” देंत। येरमीया ३७:८

येरमीया नु रेकाबी

३५ यहूदा डा पिप योसीयाह आ तौ येहो-याकीमम सासन पवा ना परमप्रभु यावेम येरमीया कली लोव्र पाप्तु। २राजा २३:३४ २ मार, लोव्र पाप्तु देंशा हना “गे रेकाबी आन खिं लशा, मेकोपुकी नु लोव्र पावो। मेको आन कली परमप्रभु यावे आ खिं डा कोठा कामी ऑइदीमी। मिनू मेको

आन कली अडगुर शांबु खेत्तीमी” देंत। १इतिहास २:५५ ३ मोपतीके गो हाबासीन्याह आ तौ येरमीया, आ तौ याजन्त्याह नु मेको आ लोक्बपुकी, मेको आ तौ नेल्ल नु रेकाबी आन खिं डा मुर नेल्ल आन कली लाइक्तामी। ४ मिनू गो मेको आन कली परमप्रभु यावे आ खिंम परमप्रभु आ मुर हानान आ तौ आन कोठाम चाक्तामी। हानान परमप्रभु आ मुर यिगदाल्याह आ तौ बाक्त। मेको कोठा चहिं ठेयब मुर आन कोठा आ नेक्था बाक्त। मेको शाल्लुम आ तौ लाप्चो खाल पाइब, मासेयाह आ कोठा आ तार बाक्त। ५ मेको नोले गो अडगुर शांबु आ गर नु बोटकोपुकी रेकाबी आन डोंइती वोइक्ता। मिनू मेको आन कली “अडगुर शांबु तूडीन” दे माइक्तामी। ६ तन्न मेकोपुकीमी “गो अडगुर शांबु मतूनीकी। मारदे हना रेकाब आ तौ आंइ किकी योनादाबम आंइ कली ‘गोपुकी नु इन आलपुकीम गेनायो अडगुर शांबु मतूडीन। २राजा १०:१५ ७ मेको प्रॉइशा यो गोपुकीम गेनायो खिं मसेलीन। वांचेर मशोक्कीन। अडगुर मख्खुमीन। गोपुकीम मोदेंशो गेय गेनायो मपने। तन्न इन बाक्शो रागीम शुश सम्म ब्रॉइमल, दे गेना हना यो ताम्बुपुकीम बाक्शा हिरशा गाक्कीन’ दे शेंशो बाक्त। ८ मिनू गो आंइ किकी रेकाब आ तौ योनादाब आ शेंशो नेल्ल पाइतक। गोपुकी आंमा नु आंइ मीशपुकी नु आंइ तमी तौ नेल्लेम गेनायो अडगुर शांबु मतूक। ९ गो बाक्चा कली खिं यो मसेलीनीकी। अडगुर रू, अरु रू नु वांचेर गोपुकी नु मबाक्ब। १० गो ताम्बुम बाक्शा, आंइ किकी योनादाबम शेंशो नेल्ल पाइतक। ११ तन्न बेबीलोन डा पिप नेबुकदरेसरमी एको रागी कली लडाइ तोप्तु। मिनू गोपुकीम ‘कल्दी नु अरामी आन लडाइ पाइबपुकी रे प्रोक्चा कली यरूसलेम लय’ देंतक। मोपतीके गो यरूसलेममी बाक्शो बाक्नीकी” देंतेक्म।

१२ मिनू नोले परमप्रभु यावेम येरमीया कली लोव्र पाप्तु। १३ मुर नेल्ल आन परमप्रभु यावे, इस्राएली आन परमप्रभुमी मार लोव्र पाप्तु देंशा हना “गे यहूदा डा मुर नु यरूसलेममी बाक्ब आन कली लशा ‘मार, गे आं देंशो मपाइनीनी? मिनू आं लोव्र मटीनीनी?’ देंत” दे माइक्मी। १४ परमप्रभु यावेमी “मार, रेकाब आ तौ योनादाबम आ चच युइ आन कली ‘गोपुकीम अडगुर शांबु मतूडीन’ दे शेंशो लोव्र मेकोपुकी टीनीमी। मोपतीके मेकोपुकीमी मुल सम्म अडगुर शांबु मतूनीम। मारदे हना मेकोपुकीमी आन किकी पिपीम शेंशो टिशो बाक्नीम। तन्न गो इन कली लोव्र पना पन बाक्ती। मो हना यो गोपुकीम आं लोव्र मटिनी। येरमीया २५:४ १५ गो इन कली आं गेय नु आं लोव्र पाइब आन कली सोइक्ना सोइक्न बाक्ती। मेकोपुकीमी इन कली ‘गे नेल्ल इन मरिश्शो लां रे लेतीन। मिनू इन मरिश्शो गेय रिश्शो सेलीन। मिनू देवी देवता आन कली पूजा पचा नु आन नोले खोइक्चा प्रोनीन। मिनू गो इन किकी पिपी आन कली गेशो रागीम बाक्चा ताइनीनी’ देंती। तन्न गोपुकीम आं देंशो लोव्र मनेनी नु मटिनी। मत्ती २३:३७ १६ रेकाब आ तौ योनादाब आ चच युइमी आन किकी पिपीमी अरेशो टीनीम। तन्न एको मुरपुकीम आं देंशो मटिशो बाक्नीम” देंत। १७ मोपतीके मुर नेल्ल आन परमप्रभु यावे, इस्राएली आन परमप्रभुमी “नेनीन, गो यहूदा नु यरूसलेमम बाक्ब मुर आन कली आं देंशो ठेयब श्येत नेल्ल चाक्नुड। मारदे हना गो मेको आन कली लोव्र पाता, तन्न मेकोपुकीमी मनेनेम। गो मेको आन कली ब्रेत्ताक्डमी, तन्न मेकोपुकीमी लोव्र मलेत्तीमी” देंत। येरमीया ७:१३-१५ १८ मिनू येरमीयामी रेकाबी आन चच युइ आन कली “मुर नेल्ल आन परमप्रभु यावे, इस्राएली आन परमप्रभुमी गोपुकीम इन किकी योनादाब आ देंशो टिना टिन नु मेको आ शेंशो नेल्ल नु इन कली अरेशो नेल्ल पाइतीनी। १९ मोपतीके रेकाब आ तौ योनादाब आ चच युइ का गेना हना यो आं डोंइती बाक्चा ताइब” दे मुर नेल्ल आन परमप्रभु यावे, इस्राएली आन परमप्रभुम देंत।

येहो-याकीमम तोल्शो कागज चोशो

३६ यहूदा डा पिप योसीयाह आ तौ येहो-याकीममी सासन पवा आ ४ बर्सम परमप्रभु यावेम येरमीया कली लोव्र पाप्तु। येरमीया २५:१ २ मार लोव्र पाप्तु देंशा हना “गो योसीयाहम सासन पवा रे मुल सम्म इ कली इस्राएल, यहूदा नु रागी नेल्ल डा मुर आन पर्वम देंशो लोव्र नेल्ल कागजम ब्रेक्तो। येरमीया २५:३ ३ मो दुम्मेनु, गो मेको आन कली गेचशो ठेयब श्येत

दुस्तीके आ पर्वम यहूदा डा मुरपुकीम तुइश्शा, आन मरिम्शो पतीके रे लेत्नीमी कों? मिनु गो मेको आन मरिम्शो पशो नु आन पाप पशो क्याम्शा गेनुडमी” दैत। *येरमीया २६:३*

4 मिनु येरमीयामी नेरीयाह आ तौ बारुक कली ब्रेप्पाइक्तु। मिनु बारुकम येरमीयामी ब्रेक्पाइश्शो परमप्रभु यावेम दैशो लोव्र नेल्ल कागजम ब्रेक्ताक्व। *येरमीया ३२:१२; येरमीया ४५:१* 5 मिनु येरमीयामी बारुक कली “गो परमप्रभु यावे आ खिं लने मचाप्नुड। 6 मोपतीके गे तेकोइ माइजा बाक्तीक नाक्त परमप्रभु यावे आ खिं लशा, आं इ कली ब्रेक्पाइश्शो कागजम बाक्शो लोव्र मुरपुकीम नैचा डा पा पढेशा नैपाइक्मी। यहूदा डा सहर रे जाक्शो मुर नेल्लेम नैचा डा पा पढेशा नैपाइक्मी। 7 मो दुम्मेनु मेकोपुकीमी आन पुंइशो लोव्र परमप्रभु यावे आ नेक्था चाक्नीमी, कों? मिनु मेको नेल्लेम आन मरिम्शो लां प्रॉइनीमी, कों? मारदे हना परमप्रभु यावेम आ मुर आन पर्वम गाइश्शा चुरशा दैशो लोव्र ठेयब बाक्ब” दैत। 8 मिनु नेरीयाह आ तौ बारुकम परमप्रभु यावे आ लोव्र पाइब येरमीया आ दैशो नेल्ल पाप्तु। मेकोमी मेको परमप्रभु यावे आ लोव्र ब्रेक्शो कागज परमप्रभु यावे आ खिम पढेशा नैपाइक्तीमी।

9 यहूदा डा पिप योसीयाह आ तौ येहो-याकीम आ सासन पशो ५ बर्स ९ महिनाम यरूसलेममी बाक्शो मुर नेल्ल नु यहूदा डा सहर रे जाक्शो मुर आन कली यरूसलेमम परमप्रभु यावे आ डोंइती नेल्ल आन कली नैपाइश्शा माइजा बाक्तीक लोव्र पाप्तेक्म। 10 मिनु बारुकमी येरमीया आ ब्रेक्पाइश्शो लोव्र परमप्रभु यावे आ खिम मुर नेल्लेमी नैचा डा पा पढेप्तु। मेकोमी मेको लोव्र ब्रेक्ब शाफान आ तौ गेमारयाह आ बाक्तीके परमप्रभु यावे आ खिं डा नक लाप्चो आ नेक्था डा कोठाम बाक्शा, पढेप्तु। *२राजा २२:३*

11 मिनु गेमारयाह आ तौ शाफान आ चच मीकायामी मेको कागजम ब्रेक्शो परमप्रभु यावे आ लोव्र नेल्ल नैतु। 12 मिनु मेको तोइश्शा, पिप आ खिम ब्रेक्ब आ बाक्तीके ओव्रदीत्त। मेकेर ठेयब मुर नेल्ल बाक्तेक्म। मेकेर सु सु बाक्तेक्म दैशा हना, ब्रेक्ब एली-शामा, शेमायाह आ तौ देलायाह, आकबोर आ तौ एल्नाथान, शाफान आ तौ गेमारयाह नु हनान्याह आ तौ सिदकीयाह बाक्तेक्म। *येरमीया २६:२२* 13 मिनु मीकायामी बारुकम मुर नेल्लेम नैचा डा पा पढेशो लोव्र नेल्ल नैतु। मिनु मेको लोव्र नेल्ल मेको आन कली शैताक्मी। 14 मिनु ठेयब मुर नेल्ल गारशा, नेथन्याह आ तौ शेलेम्याह आ चच कूशी आ युइ येहूदी कली “लशा, नेरीयाह आ तौ बारुक कली मुर आन कली पढेशा नैपाइश्शो कागज कुरशा एक जाक्को मतो” दे सोइक्ताक्मे। मोपतीके गेदाल्याह आ तौ बारुक मेको कुरशा, आन बाक्तीके जाक्त। *२राजा २२:११* 15 मिनु मेकोपुकीमी मेको कली “निश्शा, मेको आंइ कली पढेशा नैपाइक्की” दैतेक्म। मोपतीके बारुकम मेको आन कली, मेको पढेशा नैपाइक्तीमी। 16 मिनु मेकोपुकीमी मेको पढेशो नेल्ल नैशा हिंशा आन कुल कोव्रमुक्तेक्म। मिनु मेकोपुकीमी बारुक कली “गोपुकीम एको लोव्र नेल्ल पिप कली नैपाइक्चा माल्नीकी” दैतेक्म। 17 मिनु मेकोपुकीमी बारुक कली “गे एको लोव्र नेल्ल दोपा ब्रेक्ती? आंइ कली शैदीकी। येरमीयामी इ कली ब्रेक्पदा?” दे हिल्लो पाप्तेक्म। 18 मिनु बारुकम “मेकोमी आं कली एको लोव्र नेल्ल ब्रेक्पाइक्ती। मिनु गो एको कागज मसीम ब्रेक्ताक्ड” दे माइक्तीमी। 19 मिनु मेको ठेयब मुरपुकीम बारुक कली “गे नु येरमीया निम्फा लशा, खूइसीस। गे निक्शी ते बाक्सी, दे सुइम मतुइक्तामेक्ल” दे माइक्तेक्म। *येरमीया २५:८-११; येरमीया ७:२०; येरमीया ९:९-१०*

20 मिनु मेकोपुकीमी मेको कागज ब्रेक्ब एली-शामा आ कोठाम वोइश्शा, पिप आ बाक्तीक लशा, पिप कली मेको लोव्र नेल्ल शैताक्मे। 21 मिनु पिपमी मेको कली “कागज चाक्को” दे येहूदी कली सोइक्ताक्व। मिनु मेकोमी ब्रेक्ब एली-शामा आ कोठा रे गुंइशा चाक्तु। मिनु येहूदीम पिप नु पिप आ नेक्था बाक्ब ठेयब मुर आन कली मेको पढेशा नैपाइक्तु। 22 मेना मेको बर्स डा ९ महिना बाक्तीके, पिप हिंउदम बाक्तीके, खिम बाक्शो बाक्त। मेको आ डोंइती मी ब्रशो बाक्त। 23 मिनु येहूदीम सां नु ४ हरप पढेने थुमानु, पिपम कागज खोइक्तीकेम खोइश्शा, मीम हुम्ताक्व। मेको तोल्शो कागज नेल्ल मनुम्म सम्म पिपम मो पना पन बाक्त। 24 पिप नु मेको आ गेय पाइबपुकी मेको लोव्र नैशा महिम। मेकोपुकीमी आन वा यो मखाक्गेम।

25 एल्नाथान, देलायाह नु गेमारयाहम पिप कली “मेको कागज मचोने” दे पुन्नेनु यो, पिपमी मेको आन लोव्र मनेन। 26 मेको आ पा डा पिपमी आ तौ येराहमेल, अज्रीएल आ तौ सेरायाह नु अब्देल आ तौ शेलेम्याह आन कली मेको ब्रेक्ब बारुक नु परमप्रभु यावे आ लोव्र पाइब येरमीया कली फ्रेंशा चाक्चा नस, दे हुकुम गेम्तीमी। तन्न परमप्रभु यावेम मेको आस कली खूइक्ने थुम्शो बाक्त।

27 मिनु येरमीयामी ब्रेक्पाइश्शो बारुकम ब्रेक्शो मेको तोल्शो कागज पिपम चोने थुमा नोले, परमप्रभु यावेमी येरमीया कली 28 “अर्को कागज काम यहूदा डा पिप येहो-याकीममी चोशो डोंइती डा कागजम बाक्शो लोव्र नेल्ल लैशा ब्रेक्तो” दैत। 29 मिनु गे यहूदा डा पिप येहो-याकीम आ पर्वम परमप्रभु यावेम “गे मेको तोल्शो कागज चोप्तीवी। मिनु गे बारुक कली गे मारदे बेबीलोन डा पिप थमा पा जाक्शा, एको रागी श्येत्थ पोक्ब। मिनु मेकोमी मुर नु बस्तु भाव नेल्ल आन कली साइक्ब, दे कागजम ब्रेक्ती?” दैते। 30 मोपतीके परमप्रभु यावेमी यहूदा डा पिप येहो-याकीम आ पर्वम “मुल रे दाऊद आ निल्लीकेम मेको आ चच युइ तेकोइ मनिल्लीम। मेको पिप आ बेक्शो रां नाक्त नांम नु नाक्दो फुरशेम जिप्पाइक्चा डा पा तांइसीब। *येरमीया २२:३०; येरमीया २२:१९* 31 गो मेको कली, मेको आ आल आन कली नु आ गेय पाइब आन कली आन मरिम्शो पशो आ पर्वम सजाइ गेनुडमी। गो मेको आन कली, यरूसलेममी बाक्ब आन कली नु यहूदामी बाक्ब नेल्ल आन कली आं दैशो ठेयब श्येत नेल्ल गेनुड। मारदे हना मेकोपुकीमी आं दैशो लोव्र मनेनेम” दैत।

32 मिनु येरमीयामी अर्को कागज का चाक्शा नेरीयाह आ तौ ब्रेक्ब बारुक कली गेप्तु। मिनु मेकोमी येरमीयाम दैशो खोदैशो पा यहूदा डा पिप येहो-याकीममी मीम चोशो कागज डा लोव्र नेल्ल मेको कागजम ब्रेक्ताक्व। मिनु येरमीयामी अरु शुश लोव्र यो मेकेर तेम्ताक्व।

#### येरमीया कली चोक्शो

37 बेबीलोन डा पिप नेबुकदरेसरमी योसीयाह आ तौ सिदकीयाह कली यहूदा डा पिप सेल्शो बाक्त। मिनु येहो-याकीम आ तौ कोन्याह आ पा डा मेकोमी सासन पचा गोप्तु। *येहो-याकीम आ अर्को नें कोन्याह बाक्ब। २राजा २४:१७* 2 मिनु मेको, मेको आ गेय पाइबपुकी नु मेको रागी डा मुर नेल्लेम परमप्रभु यावे आ लोव्र पाइब येरमीया आ दैशो परमप्रभु यावे आ लोव्र मनेनेम।

3 मो हना यो पिप सिदकीयाहम शेलेम्याह आ तौ येहुकल नु मासेयाह आ तौ चढेब सेफन्याह आस कली परमप्रभु यावे आ लोव्र पाइब येरमीया आ बाक्तीकेम “आंइ पर्वम इं परमप्रभु यावे नु पुंइशा गेने” दैथ, मुर सोइक्ताक्व। *येरमीया ७:१६; येरमीया ४२:२* 4 मेना सम्म येरमीया मुर आन दातेमी एर आंथ गाक्ना गाक्न बाक्त। मारदे हना मेना सम्म मचोक्सीशो बाक्त। 5 मेना फाराओ आ लडाइ पाइबपुकी इजीप्तर रे जाक्शो बाक्तेक्म। मिनु कल्दी डा मुरपुकीमी यरूसलेम कली एर आंथ नेल्ल रे पुशो लोव्र नैतेक्म। मिनु मेकोपुकी यरूसलेम रे नोले शोइसाक्म।

6 मिनु परमप्रभु यावेम येरमीया कली लोव्र पाप्तु। 7 मार लोव्र पाप्तु दैशा हना “परमप्रभु यावे, इस्राएली आन परमप्रभुमी ‘यहूदा डा पिपम आं कली हिल्लो पथ इ बाक्तीक सोइक्ताक्व। मेको कली इ कली वारच पाइक्थ जाक्ब फाराओ आ लडाइ पाइब आन रागी इजीप्तर लेशशा लाइनीम, दे मतो। 8 मिनु कल्दी लेशशा जाक्नीम। मिनु एको सहर कली लडाइ तोइनीम। मिनु मेकोपुकीमी एको सहर ग्राशा, मीम क्रोइक्नीम” दैशो बाक्ब, दैत, मतो” दैत। *येरमीया ३४:२२* 9 परमप्रभु यावेमी “गेपुकीमी कल्दीम थमा पा आंइ कली लडाइ तोइनीम, दे मिप्तीन। मारदे हना मो पाइनीम। 10 गेपुकी नु लडाइ पाइब कल्दी नेल्ल आन कली गे ग्रातीनी हना, मेको आन गार दुम्शोपुकी ला आन ताम्बुम लीतेक्म हना यो, मेकोपुकी जाक्शा एको सहर कली मी सुइक्नीम” दैत।

11 फाराओ आ लडाइ पाइबपुकीम पतीके कल्दी यरूसलेम रे नोले शोइसीची ना 12 येरमीया आं रू डा भाग ताक्चा कली यरूसलेम रे गूशा बेन्यामीन आ रागी गे लचा गोप्तु। *येरमीया ३२:८-९* 13 मिनु मेको बेन्यामीन

लाचोमी जाकदीम्मेनु, हनान्याह आ चच शेलेम्याह आ तौ खाल पाइब आन ठेयब मुर इरीयाहम येरमीया कली ग्याइश्शा “गे प्रोक्शा कल्दी आन बाक्तीकेम लशो बाक्नेवे” दंत। 14 मिनू येरमीयामी “एको लोव्र थमा ममाइ। गो कल्दी आन बाक्तीके प्रोक्शा लशो मनड” दंत। तन्न इरीयाहम मेको आ लोव्र मनने। मिनू मेकोमी येरमीया कली ग्याइश्शा ठेयब मुर आन बाक्तीके चाव्तु। 15 मिनू मेकोपुकी येरमीया तशा गाइक्ताकम। मिनू मेको कली तुष्णा, ब्रेक्ब योनाथन आ खिम चोक्शा वोइक्तेकम। मारदे हना मेको खिं जेल्खान सेल्शो बाक्तेकम। *येरमीया २०:२* 16 मेकोपुकीमी येरमीया कली जेल्खानम चोक्तेकम। मिनू येरमीया थम छिडछिडम शुश नाक्त सम्म बाक्त। 17 मिनू पिप सिदकीयाहम मेको कली गुंडथ सोइक्ताकव। मिनू मेको कली दरवारम चाक्शा सुइम मतुइक्वा डा पा “मार, परमप्रभु यावे रे पा मारेइ लोव्र बाकमे?” दे हिल्लो पाप्तु। मिनू येरमीयामी “ओं, बाक्ब। गे बेबीलोन डा पिप आ गुइम गेचा पुंडसीनीनी, देंशो बाक्ब” दंत। 18 मिनू येरमीयामी पिप सिदकीयाह कली “गो इन कली, इन गेय पाइब ठेयब मुर आन कली नु एको मुर आन कली मार पडा डा? गे मारदे आं कली जेल्खानम चोक्थीनी? 19 इन कली नु एको रागी कली लडाइ तोचा कली बेबीलोन डा पिप मजाक्ब, दे इन कली देंब, परमप्रभु यावे आ लोव्र पाइबपुकी ते बाक्मा? 20 तन्न मुल आं प्रभु, पिप गो इन कली पुंडनुड। आं पुंडशो लोव्र नेनीन। आं देंचा माल्शो लोव्र इन डॉइती देंचा तडल। गो आं कली ब्रेक्ब योनाथन आ खिम मसोइक्तीनी। मो दुम्त हना, गो मेकेर बेक्नुड” दंत। 21 मिनू पिप सिदकीयाह आ हुकुममी येरमीया पिप आ दरवार खाल पाइब मुर आ जेल्खानम वोइक्वा पुंडसाकव। मिनू सहर डा शोब्ले चोतीक रे मनुम् सम्म, नाक्त किंत किंत मेको कली शोब्ले चाक्शा गेम्तेकम। मोपा येरमीया पिप आ दरवार खाल पाइब आ जेल्खान डा लाडगाम बाक्त। *येरमीया ३२:२*

येरमीया कली इनारमी तोक्शो

38 मिनू मत्तान आ तौ शेफत्याह, पशुहुर आ तौ गेदाल्याह, शेलेम्याह आ तौ युक्ल नु माल्कीयाह आ तौ पशुहुरमी येरमीयामी मुर नेल्ल आन कली देंशो लोव्र नेंतेकम। मेको आ लोव्र मार बाक्त देंशा हना, *येरमीया २१:१* 2 परमप्रभु यावेम “सु सु एको सहरमी बाक्नीमी, मेकोपुकी तरवार, अन्काल नु मुर बेक्तीक रोइम बेक्नीम। तन्न सु सु गुइ पोक्शा, कल्दी आन बाक्तीके जाकदील्नीमी, मेकोपुकी चहिं ब्रॉइनीम। मेको आन गिम प्रॉइशा लडाइ रे ब्रॉइनीम” देंशो बाक्त। *येरमीया २१:९* 3 मिनू परमप्रभु यावेमी “एको सहर थमा पा बेबीलोन डा पिप आ लडाइ पाइब आन गुइम दुम्ब। मिनू मेकोपुकीमी एको सहर आन के सेल्नीम” दंत, दे येरमीयाम देंशो बाक्त। 4 मिनू ठेयब मुरपुकीम पिप कली “एको मुर कली साइक्वा माल्ब। मारदे हना एकोमी ओदेंशो लोव्र पा, एको सहरमी लीशो लडाइ पाइब नु मुर नेल्ल आन थुं लुक्च लपाइश्शो बाक्ब। एको मुरुम मुर आन कली रिम्शो ममाइ मरिम्शो पचा दाक्ब” देंतेकम। 5 मिनू पिप सिदकीयाहम “मेको इन गुइमीन बाक्ब। गो इन कली मारेइ पने मचाप्नुड” दे माइक्तीमी। 6 मोपतीके मेकोपुकीमी येरमीया कली लाइश्शा, पिप आ तौ माल्कीयाह आ इनारम तोक्तेकम। मेको इनार पिप आ दरवार खाल पाइब आ लाडगाम बाक्त। मिनू मेकेर डोरीम फ्रेंशा इनारम तोक्तेकम। मेको इनारमी ब्वाक्कु मबाक्माक्त। हिलो ला बाक्माक्त। मिनू येरमीया मेको हिलोम गुम्त। 7 मेकेर पिप आ खिम गेय पाइब एबेद-मेलेक नें पाइश्शो मुर का बाक्त। मेको एथीयोपीया डा बाक्त। मेकोमी येरमीया कली इनारम तोक्शो नेंतु। मेना पिप बेन्यामीन लाचोमी बाक्शो बाक्त। *येरमीया ३९:१५-१८* 8 मिनू एबेद-मेलेक पिप आ खिं रे लशा पिप कली 9 “आं प्रभु, आं पिप, एको मुरपुकीम परमप्रभु यावे आ लोव्र पाइब येरमीया कली इनारम तोक्शा मरिम्शो पाम्तेकम। सहरम शोब्ले नुम नोले मेको मेकेर शोव्रलुम बेक्ब” दंत। 10 मिनू पिपम कूशी, एथीयोपीया डा एबेद-मेलेक कली “एक रे मुर सां आन कली लाइश्शा, मेको परमप्रभु यावे आ लोव्र पाइब येरमीया कली बेक्वा क्येडा डॉइती इनार रे गुंडीन” दे अरेप्तु। *का निक्शी मुरुमी ३० जना मुर ब्रेश्शो बाक्ब।* 11 मोपतीके एबेद-मेलेकम मेको मुर आन कली लाइक्तु। मिनू पिप आ खिं डा मार मार वोइक्तीक आगा डा कोठाम लत। मिनू मेकेर

रे माइत जेक्शो वासी गुंडताकव। मिनू मेकोमी येरमीया कली मेको वासी डोरीम फ्रेंशा तोक्तु। 12 मिनू एथीयोपीया डा एबेद-मेलेकमी येरमीया कली “इ बला आगा नु डोरी आन दातेमी एको माइत जेक्शो वासी वोतो” दंत। मिनू येरमीयामी मो पाप्तु। 13 मिनू मेकोपुकीमी डोरीम येरमीया कली इनार रे गुंडताकमे। मेको नोले येरमीया पिप आ दरवार खाल पाइब मुर आ जेल्खान डा लाडगाम बाक्त।

सिदकीयाहम लेंशा हिल्लो पशो

14 मिनू पिप सिदकीयाहम परमप्रभु यावे आ लोव्र पाइब येरमीया कली ब्रेथ सोइक्ताकव। मिनू परमप्रभु यावे आ खिं डा निक्शी लाचो नोले डा ठेयब लाचो आ डॉइती चाक्पाइक्तीमी। मिनू पिपम येरमीया कली “गो इ कली लोव्र का निक्शी हिल्लो पाइनुड। आं डॉइती गे मारेइ लोव्र मखुइक्तो” दे माइक्तु। 15 मिनू येरमीयामी सिदकीयाह कली “गो इन कली लोव्र पाता हना, गे आं कली साइक्नीनी। गो इन कली अर्ती गेतन्नी हना, गे मेको मनेनीनी” दंत। 16 मिनू पिप सिदकीयाहम सुइ आन मतुइक्वा डा पा, येरमीया नु कसम जशा “परमप्रभु यावे ब्रॉइशा बाक्शो खोदेंशो पा, गो इ कली सोक्त गेप्तु। गो मेको आ नेंमी कसम जशा देंनुड। गो इ कली मसाइक्नुड। गो इ कली साइक्वा माल्ब मुर आन गुइम मगेनन” दंत। *येरमीया ३८:४-५*

17 मिनू येरमीयामी सिदकीयाह कली “मुर नेल्ल आन परमप्रभु यावे, इस्राएली आन परमप्रभुमी ‘गे बेबीलोन डा पिप आ ठेयब मुर आन कली आंमान जिम्मा गेसाक्नी हना, इन सोक्त ब्रॉइब। मिनू एको सहर क्रोइक्वा मपुंडसीब। मिनू इन खिं डा मुरपुकी यो ब्रॉइनीमी। 18 तन्न गे आंमान बेबीलोन डा पिप आ ठेयब मुर आन गुइम जिम्मा मगेसाक्नी हना, एको सहर कल्दी आन गुइम गेंसीब। मिनू मेकोपुकीमी एको कली क्रोइक्नीम। मिनू गे मेको आन गुइ रे मब्रॉइनीनी’ देंशो बाक्ब” दंत। 19 मिनू पिप सिदकीयाहम येरमीया कली “कल्दी आन बाक्तीकेम प्रोक्शा लशो यहूदीपुकी तशा, गो हिंशो बाक्नुड। मारदे हना कल्दीपुकीम आं कली मेको आन गुइम जिम्मा गेतीमी हना, मेकोपुकीमी आं कली मरिम्शो पाइक्नीम” दंत। 20 मिनू येरमीयामी “मेकोपुकीमी इन कली मेको आन गुइम जिम्मा मगेनीम। गो इन कली देंशो परमप्रभु यावे आ लोव्र टिने। मिनू इन कली रिम्शो दुम्ब। इन सोक्ती यो ब्रॉइब। 21 तन्न गे मेको आन गुइम जिम्मा गेंसीने मबिस्साक्नी हना, परमप्रभु यावेम आं कली कोंइशो एकोन बाक्ब। 22 यहूदा डा पिप आ दरवारम प्रॉइसीशो मीश मुर नेल्ल बेबीलोन डा पिप आ ठेयब मुर आन बाक्तीके लाइक्नीम। मिनू मेको मीश मुरपुकीम इन कली ‘इन थमा सुइश्शो इन वारचपुकीम इन कली जोल पाम्तेकम। मुल इन खोइली हिलोम गुम्शो बाक्ब। इन वारचपुकीम इन कली प्रॉइशो बाक्नीम’ देंनीम। 23 इन मीशपुकी नु इन आल नेल्ल कल्दी आन बाक्तीके चाक्दील्नीम। गे आंमा यो कल्दी आन गुइ रे ब्रॉइचा मताइनीनी। बेबीलोन डा पिपम इन कली ग्याइक्ब। मिनू एको सहर चहिं क्रोइक्नीम, देंशो बाक्ब” दंत। *येरमीया ३२:४; येरमीया ३४:३*

24 मिनू सिदकीयाहम येरमीया कली “एको लोव्रसी पशो सुइम मतुइक्तेकम। मो मद्रुम्त हना, गे साइक्वा पुंडसीनेवे। 25 गो गे नु लोव्र पशो ठेयब मुरपुकीम तुइक्ताकम हना, मिनू इ बाक्तीक जाक्शा ‘पिप कली मार, देंनी? मिनू पिपम मार, देंमे? आंइ रे मारेइ लोव्र मखुइक्तीन। मो पाइतीनी हना गो इन कली साइक्नीकी, दे इ कली हिल्लो पाम्तेकम हना, 26 गेमी मेको आन कली “गो आं कली साइक्वा कली योनाथन आ खिम मसोइक्तीनी” दे गो पिप नु लोव्र का ला पाता’ देनो” दे माइक्तु। 27 मिनू ठेयब मुर नेल्ल येरमीया आ बाक्तीक जाक्शा, हिल्लो पाम्तेकम। मिनू मेकोमी पिपम देंशो खोदेंशो पा, मेको आन कली माइक्तीमी। मोपतीके मेकोपुकीमी मेको कली अरु मारेइ हिल्लो मपामे। मारदे हना पिप नु येरमीया आस दातेम पशो लोव्र सुइम मतुइक्तेकम। 28 मिनू यरूसलेम ग्रातीक नाक्त सम्म येरमीया पिप आ दरवार खाल पाइब मुर आ लाडगा डा जेल्खानम बाक्शो बाक्त। *येरमीया ३७:२१*

## यरूसलेम क्याम्चा पुंडसीशो

39 यहूदा डा पिप सिदकीयाहम सासन पवा आ ९ बर्स १० महिनाम बेबीलोन डा पिप नेबुकदरेसर नु मेको आ लडाइ पाइब नेल्ल जाक्शा, यरूसलेम कली लडाइ तोशा एर ऑथ नेल्ल रे पुम्ताक्म। *येरमीया* ५२:४-१६; २२:१-१२ २ मिनु सिदकीयाहम सासन पशो ११ बर्स ४ महिना ९ नाक्ती मेको सहर डा गारो प्रेशा ओव्रतेक्म। ३ मिनु यरूसलेम ग्राशा, बेबीलोन डा पिप आ ठेयब मुर नेल्ल जाक्शा दाते डा लाप्चोमी बाक्तेक्म। नेरगल-शरेसेर, साम्गार-नेबो, सारसेकीम नेल्ल क्येडा ठेयब निसाफ पाइब नेरगल-शरेसेर नु बेबीलोन डा पिप आ ठेयब गेय पाइब मुर नेल्ल जाक्शा बाक्तेक्म। ४ मिनु यहूदा डा पिप सिदकीयाह नु आ लडाइ पाइब नेल्लेम मेको आन कली ताम्तेक्म। मिनु मेकोपुकी गारो निक्शी आस दातेम बाक्शो लाप्चो, पिप आ फल फुल रू रे पा नाक्दोन सहर रे प्रोक्शा, अराबाह गे लाम्तेक्म। ५ तन्न कल्दी आन लडाइ पाइबपुकीम मेको आन कली खेदा पाम्तेक्म। मिनु सिदकीयाह कली यरीको डा दिंमम थित्तेक्म। मिनु मेकोपुकीमी मेको कली ग्याइश्शा, हमाथ रागी डा रिब्ला देंशो सहरमी बेबीलोन डा पिप नेबुकदरेसर आ बाक्तीके चाक्दील्तेक्म। मिनु मेकोमी सिदकीयाह कली सजाइ गेतीक देंत। ६ मेको रिब्लामी बेबीलोन डा पिपम सिदकीयाह आ तौ आन कली आ डोंइतीन साइक्तीमी। मिनु यहूदा डा ठेयब मुर आन कली यो साइक्तीमी। ७ मेकोमी सिदकीयाह आ मिक्ची फेत्ताक्व। मिनु बेबीलोन लाइक्चा कली साडलोमी फ्रेपाइक्तु। ८ कल्दीपुकीम पिप आ दरवार नु मुर आन खिम मी सुइक्ताक्मे। मिनु यरूसलेम डा गारो प्रेत्तेक्म। ९ मिनु पिप कली कोव्रब आन कप्तानम नेबुजरादानमी सहरमी प्रोंइचा पुंडसीशो लीशो मुरपुकी, मेको आन बाक्तीक प्रोक्शा जाक्ब नु अरु लीशो मुर आन कली फ्रेशा बेबीलोन लाइक्तीमी। १० तन्न पिप कली कोव्रब आन कप्तान नेबुजरादानमी मारेइ मपाइश्शो पुडग आन कली यहूदा रागीमी प्रोंइशा वोइक्तीमी। मिनु मेको आन कली मेकोमी अडगुर रू नु अरु रूपुकी गेम्तीमी।

११ मिनु बेबीलोन डा पिप नेबुकदरेसरमी आ कली कोव्रब आन कप्तान नेबुजरादान कली येरमीया आ परबम १२ “मेको कली लाइश्शा, रिश्शो पा कोव्रशा वोतीन। मेको कली मारेइ मरिश्शो मपावो। मेकोमी इ कली देंशो खोदेंशो पा, गे मेको कली पावो” दे माइक्तु। *येरमीया* ४०:४ १३ मोपतीके पिप कली कोव्रब आन कप्तान नेबुजरादान, नेल्ल क्येडा ठेयब मुर नेबुशाज्बान, निसाफ पाइब ठेयब मुर नेरगल-शरेसेर नु बेबीलोन डा पिप आ अरु ठेयब मुरपुकीम १४ मुर सोइश्शा, येरमीया कली जेल्खान डा लाडगा रे चाक्पाइक्तेक्म। मेको कली आ खिम लाइक्तीक जिम्मा शाफान आ चच अहीकाम आ तौ गेदाल्याह कली गेम्तेक्म। मोपा येरमीया आ मुरपुकी नु बाक्त। *येरमीया* ३८:२८; *येरमीया* ४०:५-६, १४-१६

१५ मिनु येरमीया जेल्खान डा लाडगाम बाक्मेनु, परमप्रभु यावेम *येरमीया* ३८:७ १६ मार, लोव्र पशो बाक्त देंशा हना “लशा, कूशी एथीयोपीया डा मुर एबेद-मेलेक कली ‘मुर नेल्ल आन परमप्रभु यावे, इस्राएली आन परमप्रभुमी रिश्शो पा ममाइ, तन्न श्येत गेशा, एको सहर आ परबम गो मार पाइनुड देंशो बाक्डा, मेको खाप्चा चिक्शो बाक्नुड। मेको इ डोंइतीन मेको नाक्ती दुम्ब। १७ तन्न गो इ कली मेको नाक्ती प्रोंइनन। मिनु गे तेको मुर आन क्येडा हिंनेवे मेको आन गुडम मदुम्नेवे” देंत मतो। १८ परमप्रभु यावेमी ‘गो इ कली थमा पा प्रोंइनन। गे तरवारम साइक्चा मपुंडसीनेवे। गे लडाइ रे इ गिम प्रोंइशा प्रोक्नेवे। मारदे हना गे आं कली थमा सुइश्शो बाक्नेवे देंशो बाक्ब’ दे मतो” दे परमप्रभु यावेमी देंत।

## येरमीया कली प्रोंइशो

४० मिनु पिप कली कोव्रब आन कप्तान नेबुजरादानमी, येरमीया कली साडलोमी फ्रेशा यरूसलेम नु यहूदा डा फ्रेशो मुरपुकी नु बेबीलोन लाइक्चा चिक्शो थिदा बाक्त। मिनु येरमीयामी रामाह प्रोना नोले परमप्रभु यावेमी मेको कली लोव्र पाप्तु। *येरमीया* ३९:११-१४ २ मिनु पिप कली कोव्रब आन कप्तानमी येरमीया कली थिश्शा, मेको कली “परमप्रभु

यावे, इ परमप्रभुम एको रागीम ठेयब श्येत गेतीक आ परबम लोव्र पशो बाक्त। ३ मूल परमप्रभु यावेम एको रागी क्याम्ताक्व। मिनु मेकोमी आ देंशो खोदेंशो पाप्तु। मारदे हना गेपुकीम परमप्रभु यावे कली पाप पाइतीनी। मिनु मेको आ देंशो मटिनी। मोपतीके इन कली ओदेंशो दुम्त। ४ तन्न मुलाक्ती गो इ गुइ डा साडलो प्रुइक्ताक्म। गे गो नु बेबीलोन लचा दाक्नेवे हना, गाक्को। गो इ कली रिश्शो पा कोव्रनुड। तन्न गे गो नु बेबीलोन लल मदाक्ते हना, बाक्को। कोव्रडो, एको रागी नेल्ल इ डोंइती बाक्ब। गे ते लल दाक्नेवे, मेक लने चाप्नेवे” दे माइक्तु। *येरमीया* ३९:१२ ५ मो हना यो येरमीया लचा चिक्तानु नेबुजरादानमी लेश्शा कोव्रशा “शाफान आ तौ अहीकाम आ चच गेदाल्याह आ बाक्तीक लावो। मेको कली बेबीलोन डा पिपम यहूदा राज्य डा हुकुम पाइब सेल्शो बाक्ब। मेकेर मेको नु अरु मुरपुकी नु बाक्को। गे ते लत दाक्डे, मेक लावो” माइक्तु। मिनु मेको पिप कली कोव्रब कप्तानमी मेको कली जचा थोव्रक नु अरु कोसेलीपुकी गेप्तु। मिनु मेको कली प्रोंइतु। *येरमीया* ३९:१४ ६ मोपतीके येरमीया अहीकाम आ तौ गेदाल्याह आ बाक्तीके मिस्या सहर लत। मिनु मेको नु रागीम प्रोंइशा वोइश्शो मुरपुकी नु बाक्त।

## गेदाल्याह यहूदाम हुकुम पशो

७ मिनु लडाइ पाइब आन ठेयब मुर नेल्ल नु आन मुरपुकीमी “बेबीलोन डा पिपमी अहीकाम आ तौ गेदाल्याह कली मेको रागी डा हुकुम पाइब सेल्तु। मिनु मेको रागी डा नेल्ल आन क्येडा पुडग मीश मुर, आल नु पुडग मुर आन कली फ्रेशा बेबीलोन मलाइश्शो मेको गेदाल्याह नु बाक्नीम” देंशो नेंतेक्म। २२:२५-२४ ८ मिनु मेको नेल्ल मिस्या सहरम गेदाल्याह आ बाक्तीकेम लाम्तेक्म। नेथन्याह आ तौ इश्माएल, कारेआह आ तौ योहानान नु योनाथन, तन्हुमेथ आ तौ सेरायाह, नेतोफाह आ मुर एफाइ आ तौपुकी, माकाथी आ तौ येजन्याह नु मेको आन मुर नेल्ल लाम्तेक्म। *येरमीया* ४१:१, ११ ९ मिनु शाफान आ चच अहीकाम आ तौ गेदाल्याहम मेकोपुकी नु मेको आन मुर नु कसम जशा “कल्दी आन गेय पचा कली महिनीन। रागीम बाक्शा बेबीलोन डा पिप आ गेय पने। मिनु इन कली रिश्शो दुम्ब। १० गो इ बाक्तीक जाक्ब कल्दी आन डोंइती इन ठेयब मुर दुम्शा लोव्र पचा कली मिस्या सहरमी बाक्नुड। गेपुकीम चहिं अडगुर, बर्खाम सिप्ब फल फुल नु तेल इन ग्योबुम वोतीन। मिनु इन योव्रशो सहरमी बाक्कीन” दे माइक्तीमी। ११ मिनु मोआब, अम्मोन, एदोम नु अर्को रागीपुकीम बाक्ब यहूदी नेल्लेम मेको लोव्र नेंतेक्म। बेबीलोन डा पिपम का निक्शी मुर आन कली यहूदामी प्रोंइशा वोइश्शो बाक्ब, दे नेंतेक्म। मिनु शाफान आ चच अहीकाम आ तौ गेदाल्याह कली मेकेर डा हुकुम पाइब सेल्शा वोइश्शो बाक्ब, दे यो नेंतेक्म। १२ मिनु नोले यहूदी नेल्ल ते ते ब्रशो बाक्मा, मेक मेक रे लेश्शा, यहूदा रागी मिस्याम गेदाल्याह आ बाक्तीकेम जाक्तेक्म। मिनु मेकोपुकीम शुश फल फुल नु अडगुर नु पोव्रशी खुप्ताक्मे।

१३ मिनु कारेआह आ तौ योहानान नु गाउं गाउंम बाक्शो लडाइ पाइब मुर आन ठेयब मुर गेदाल्याह आ बाक्तीके मिस्याम जाक्तेक्म। १४ मिनु मेको कली “अम्मोनी आन पिप बालीसमी नेथन्याह आ तौ इश्माएल कली इन कली साइक्चा कली सोइश्शो बाक्ब, दे तुइक्नीनी?” देंतेक्म। तन्न अहीकाम आ तौ गेदाल्याहम मेको आन लोव्र थमा मसुद। १५ मिनु कारेआह आ तौ योहानानम मिस्याम गेदाल्याह कली “सुडम मतुइक्चा डा पा नेथन्याह आ तौ इश्माएल कली साइक्चा कली आं कली हुकुम गेयीनी। एको लोव्र सुडम मतुइक्नीम। इन एर ऑथ नेल्ल देल्शो यहूदी आन कली ब्रपाइक्चा कली नु यहूदामी लीशो आन कली साइक्चा कली मेकोमी मारदे इन कली साइक्चा मला?” देंत। १६ तन्न अहीकाम आ तौ गेदाल्याहम कारेआह आ तौ योहानान कली “गे मोदेंशो गेय मपावो। मारदे हना इश्माएल आ परबम इ पशो लोव्र थमा ममाइ” दे माइक्तु।

## गेदाल्याह कली साइशो

२राजा २५:२५

## इजीप्त लशो

41 मिनु मेको ७ महिनाम पिप आ खिं डा मुर एली-शामा आ चच नेथन्याह आ तौ इश्माएल नु पिप आ नेल्ल क्येडा ठेयब गेय पाइब अरु १० जना मुर मिस्या सहरम अहीकाम आ तौ गेदाल्याह आ बाक्तीके जाक्तेक्म। मेको नेल्ल मेकेर काथा शोब्ले जन जन बाक्तेक्म। *येरमीया ४०:८* 2 मेना नेथन्याह आ तौ इश्माएल नु मेको १० जना मुर बोक्शा, बेबीलोन डा पिपम हुकुम पाइब सेल्शा वोइशो शाफान आ चच अहीकाम आ तौ गेदाल्याह कली तरवारम क्योरशा साइक्तेक्म। *येरमीया ४०:५* 3 मिनु इश्माएलमी मिस्याम गेदाल्याह नु बाक्शो यहूदी नेल्ल नु मेकेर बाक्शो लडाइ पाइब कल्दी आन कली यो साइक्तीमी।

4 मिनु मुरपुकीमी गेदाल्याह साइशो लोत्र तुइक्चा क्येडा डोंइती आ दीसा सुनी, 5 शेकेम, शिलो नु सामरीया रे आन गाल शोके प्रेक्शो, आन वा खाक्शो नु आन रां चेशो ८० जना मुरपुकी परमप्रभु यावे आ खिम अन्न चढेचा कली नु धूप चोचा कली जाक्तेक्म। *येरमीया १६:६* 6 नेथन्याह आ तौ इश्माएल मिस्या रे डाक्ना डाक्न, मेको आन कली गुम्थ जाक्त। मिनु मेको आन कली गुम्था मेकोमी “अहीकाम आ तौ गेदाल्याह आ बाक्तीक जाक्कीन” देंत। 7 मिनु मेकोपुकी सहर आ आगा ओव्रतेक्म। मिनु नेथन्याह आ तौ इश्माएल नु मेको आ मुरपुकीमी मेको आन कली साइक्तेक्म। मिनु मेको आन बेक्शो रां इनार काम ताइक्ताक्म। 8 तन्न मेको आन दाते डा १० जना मुरपुकीमी इश्माएल कली “आंइ कली मसाइक्की। गोपुकी नु रू कामी खुइश्शा, वोइशो चेरब क्योव्रजी तेल नु खुदो बाक्नीम” देंतेक्म। मोपतीके मेकोमी मेको आन कली प्रॉइतीमी। मेको आन कली अरु नु मसद।

9 मेको इनारम इश्माएलमी मुर आन कली साइशो ताइशो बाक्त। मेको इनार पिप आसाम इसाएल डा पिप बाशा क्येडा हिंशा ब्रॉइचा कली दोशो बाक्त। नेथन्याह आ तौ इश्माएलमी मेको इनार आ साइशो मुरपुकीमी प्रिताक्व। *१राजा १५:१६-२४* 10 मेको नोले इश्माएलमी, मिस्याम बाक्शो लीशो मुर नेल्ल, पिप आ तमीपुकी नु अरु मुर नेल्ल आन कली ग्याइक्ताक्मी। मेको आन कली पिप कली कोव्रब आन कप्तान नेबुजरादानमी अहीकाम आ तौ गेदाल्याह आ गुइम गेशो बाक्त। मिनु नेथन्याह आ तौ इश्माएलमे मेको नेल्ल आन कली ग्याइश्शा खोला आइक्की हांबु अम्मोनी आन रागीम लाइक्चा कली गाक्त।

11 मिनु कारेआह आ तौ योहानान नु मेको नु बाक्शो लडाइ पाइब आन ठेयब मुर नेल्लेम नेथन्याह आ तौ इश्माएलमी मरिश्शो पशो नेल्ल नेंतेक्म। *येरमीया ४०:८, १३-१६* 12 मिनु मेको नेल्लेम आन मुर नेल्ल आन कली लाइश्शा नेथन्याह आ तौ इश्माएल नु लडाइ पथ गाक्तेक्म। मिनु मेकोपुकीमी मेको कली गिबोन डा ठेयब दोम्ली आ नेक्था थित्तेक्म। *२सामुएल २:१३* 13 मिनु इश्माएलमे ग्याइश्शा लाइश्शो मेको नु बाक्शो मुरपुकीमी, कारेआह आ तौ योहानान नु मेको नु बाक्शो लडाइ पाइब आन ठेयब मुर नेल्ल आन कली तशा, ग्येरसाक्म। 14 मिनु इश्माएलमी मिस्या रे ग्याइश्शा लाइश्शो मुर नेल्ल कारेआह आ तौ योहानान आ बाक्तीके लेश्शा जाक्तेक्म। 15 तन्न नेथन्याह आ तौ इश्माएल नु ८ जना अरु मुर योहानान रे प्रोक्शा अम्मोनी आन रागी लाम्तेक्म।

16 मिनु अहीकाम आ तौ गेदाल्याह कली सदमे नोले, नेथन्याह आ तौ इश्माएलमी गिबोन रे चाक्शो ब्रॉइशो आन कली लडाइ पाइबपुकी, मीश मुरपुकी, आलपुकी नु दरवारम गेय पाइब मुर आन कली, कारेआह आ तौ योहानान नु मेको नु बाक्शो लडाइ पाइब आन ठेयब मुरपुकीमी गिबोन रे लेत्ताक्म। 17 मिनु मेकोपुकी इजीप्त लचा कली मिग्शा बेथलेहेम डा गेरुथ-किम्हामम बास बाक्तेक्म। *२सामुएल १९:३८; येरमीया ४३:७* 18 मेकोपुकी कल्दी आन क्येडा हिंशो बाक्तेक्म। मारदे हना बेबीलोन डा पिपमी मेको रागी कली योव्रशा वोइशो हुकुम पाइब अहीकाम आ तौ गेदाल्याह कली नेथन्याह आ तौ इश्माएलमी साइशो बाक्त।

42 मिनु लडाइ पाइब आन ठेयब मुर नेल्ले, कारेआह आ तौ योहानान, होशयाह आ तौ येजन्याह नु आइक्च ठेयब मुर नेल्ले *येजन्याह कली अजारयाह यो ब्रेक्नीम*। 2 परमप्रभु यावे आ लोत्र पाइब येरमीया आ बाक्तीके जाक्तेक्म। मिनु मेको कली “गो आंइ पुंइशो नेनीन। मिनु परमप्रभु यावे, इन परमप्रभु कली आंइ पर्वम नु लीशो मुर नेल्ल आन पर्वम पुनीन। मारदे हना शुश मुर रे का निक्शी ला लीतक। मेको गे आंमा ताइतीनी। *येरमीया ३७:३* 3 मिनु परमप्रभु यावे, इन परमप्रभुम गो ते लचा माल्नीकी, मार पचा माल्नीकी, मेको कोंइदल, दे पुनीन” देंतेक्म। 4 मिनु परमप्रभु यावे आ लोत्र पाइब येरमीयामी मेको आन कली “दुम्ब। गो इन पर्वम इन देंशो खोदेंशो पा परमप्रभु यावे इन परमप्रभु कली पुंइनुड। मिनु परमप्रभु यावेम मार देंमे, मेको नेल्ल इन कली शेंनुड। गो इन डोंइती मारदे लोत्र मखुइक्नुड” देंत। 5 मिनु मेकोपुकीमी येरमीया कली “परमप्रभु यावे, इन परमप्रभुमी कोंइशो नु आंइ कली देंशो लोत्र गोपुकीमी मपाइतक हना, परमप्रभु यावे आंइ पर्वम थमा नु ठीक लोत्र पाइब सांकछी दुम्ल। 6 मेको रिश्शो दुम्ल कि मरिश्शो दुम्ल। गो परमप्रभु यावे, इं परमप्रभु आ बाक्तीक इन कली सोइक्ताक्क। गोपुकीमी मेको आ अरेशो टीनीकी। मिनु परमप्रभु यावे, इं परमप्रभु आ लोत्र टितीके, गो आंइ कली रिश्शो दुम्ल” देंतेक्म।

7 मिनु १० नाक्त नोले परमप्रभु यावेम येरमीया कली लोत्र पात्तु। 8 मिनु येरमीयामी कारेआह आ तौ योहानान नु मेको नु बाक्शो लडाइ पाइब आन ठेयब मुर नेल्ल, आइक्की नु ठेयब मुर नेल्ल आन कली ब्रेत्ताक्मी। 9 मिनु येरमीयामी मेको आन कली “गे आं कली परमप्रभु यावे, इस्राएली आन परमप्रभु आ डोंइती पुंइथ सोइक्ताक्वीनी। 10 मिनु परमप्रभु यावेमी इन कली ‘एको रागीमीन बाक्तीनी हना, गो इन कली रिश्शो सेल्नन्नी, मप्रेलनन्नी। गो इन कली खुम्नन्नी, मतुल्लन्नी। मारदे हना गो इन कली खतम पोक्शो आ पर्वम आं थुं खाइश्शो बाक्नुड। *येरमीया १:१०* 11 मुल गे बेबीलोन डा पिप क्येडा महिनीन। मारदे हना गो इन कली मेको आ गुइ रे प्रॉइचा नु श्येत मगोपाइक्चा कली गोपुकी नु बाक्शो बाक्नुड। 12 गो इन कली शिशी पाइक्नन्नी। मिनु मेकोमी इन कली शिशी पा इन बाक्शो रागीमीन वोइक्ब” देंशो बाक्ब। 13 तन्न गोपुकीमी परमप्रभु यावे, इन परमप्रभु आ लोत्र मटीतीनी हना ‘गोपुकी एको रागीम मबाक्नीकी’ देंतीनी हना, *येरमीया २९:१७-१८* 14 गोपुकी इजीप्त लशा बाक्नीकी। मारदे हना मेकेर लडाइ मतांइसीब, तुराही ताप्शो सेंदा मनेंसीब, शोब्ले जचा मतथु शोवलुम मबेक्सीब। गो मेकेन बाक्नीकी देंतीनी हना, 15 यहूदा डा लीशोपुकी, परमप्रभु यावे आ लोत्र नेनीन। मुर नेल्ल आन परमप्रभु यावे, इस्राएली आन परमप्रभुम ‘गोपुकी इजीप्त लशा मेकेर बाक्चा कली थमा पा मिग्शो बाक्तीनी हना, 16 तेको तरवार रे पा गे हिंशा प्रोक्शो बाक्नी, मेको तरवारमी इन कली इजीप्तमी साइक्ब। मिनु तेको अन्काल रे पा, गे हिंशो बाक्नी, मेको इजीप्तमी इन नोनोले जाक्ब। मिनु गे मेकेर बेक्नीनी। 17 सु सु इजीप्त लशा बाक्नीमी, मेको नेल्ल तरवार, अन्काल नु मुर बेक्ती रोइम बेक्नीम। गो इन कली खतम पोक्तीक रे का यो मब्रॉइनीनी” देंशो बाक्ब” देंत।

18 मुर नेल्ल आन परमप्रभु यावे, इस्राएली आन परमप्रभुम “दोपा आं गाइश्शो नु चुरशो यरूसलेमम बाक्ब मुर आन तार मोंइसे, मोपान गोपुकी इजीप्त लाइतीनी हना, आं चुरतीके इन तार मोंइसीब। इन श्येत जशो तशा मुर हिंनीम। गोपुकी सराप राइब नु शुक्शी पाइक्चा पुंइसीब दुम्नीनी। गोपुकीमी लेंशा एको रागी गेनायो कोव्रचा मताइनीनी” देंशो बाक्ब। *येरमीया २५:९; येरमीया ४४:१२* 19 ए यहूदा डा लीशोपुकी, परमप्रभु यावेमी इन कली “गोपुकी इजीप्त मलने, देंशो लोत्र तुइश्शा वोतीन। मुलाक्ती गो इन कली हिंच कोंइशा लोत्र पाता। 20 गोपुकीमी ठेयब मरिश्शो का पाइतीनी। गोपुकीमी आं कली परमप्रभु यावे, इन परमप्रभु आ डोंइती परमप्रभु यावेम, आंइ परमप्रभु मार देंबा, मेको नेल्ल आंइ कली शेंदीकी। मिनु गो मेको नेल्ल पाइनीकी देंतीनी। 21 मुलाक्ती गो मेको नेल्ल इन कली शेंताक्नीनी। परमप्रभु यावे, इन परमप्रभुम मार देंचा, दे सोइक्ती, मेको लोत्र इन कली देंती, तन्न मुल सम्म मटिशो बाक्नीनी। 22 मोपतीके मुल एको लोत्र थमा पा तुइश्शा

वोतीन। इन बाक्चा कली लचा दाक्शो रागीमीन गेपुकी तरवार, अन्काल नु मुर बेक्तीक रोडम बेक्नीनी दॅशो बाक्ब" दॅत।

येरमीया इजीप्त लाइक्चा पुंडसीशो

43 मिनू येरमीयामी परमप्रभु यावे, आन परमप्रभु आ पशो लोव्र नेल्ल मेको आन कली दॅने थुम्तु। परमप्रभु यावे, आन परमप्रभुमी येरमीया कली मेको आन कली मेको लोव्र पथ सोइश्शो बाक्त्त।<sup>2</sup> मिनू होशयाह आ तौ अजारयाह कारेआह आ तौ योहानान नु मटीब मुर नेल्लेम् येरमीया कली "गे जोल पाइतीनी। गेपुकी इजीप्तम बाक्थ लचा मडुम्नीनी दॅचा कली परमप्रभु यावे, आंइ परमप्रभुमी इन कली सोइश्शो ममाइ। येरमीया ४२:१९<sup>3</sup> तन्न कल्दीपुकीम आंइ कली सदमेक्ल कि ग्याइश्शा बेबीलोनमी लदमेक्ल, दे मिश्शा, नेरीयाह आ तौ बारुकमी इन कली आंइ पर्बम मरिश्शो पचा कली क्युक्शो बाक्ब" दॅतेक्म। येरमीया ३६:३२<sup>4</sup> मोपतीके कारेआह आ तौ योहानान, लडाइ पाइब आन ठेयब मुर नेल्ले नु अरु मुर नेल्लेम् यहूदामी बाक्चा माल्ब, दॅशो परमप्रभु यावे आ लोव्र मटीम।<sup>5</sup> मेको आ पा डा कारेआह आ तौ योहानान नु लडाइ पाइब आन ठेयब मुर नेल्लेम् यहूदामी बाक्शो मुर नेल्ल आन कली, जात जात डा मुर आन दातेम् ब्रशा लॅशा यहूदामी बाक्थ जाक्शो मुर नेल्ल आन कली खुप्शा लाइक्तेक्म।<sup>6</sup> मेकोपुकीम पिप कली कोव्रब आन कप्तान नेबुजरादानमी शाफान आ चच अहीकाम आ तौ गोदाल्याह आ गुडम गेशो, मीश मुरपुकी, वॉइश मुरपुकी, आल ब्रेचपुकी, पिप आ तमीपुकी, येरमीया नु नेरीयाह आ तौ बारुक कली यो लाइक्तेक्म।<sup>7</sup> मोपा परमप्रभु यावे आ अरेशो मटिथु, मेकोपुकी इजीप्त लाम्तेक्म। मिनू ताहपनेसम जाक्दीत्तेक्म। येरमीया ४२:१४-१७; २२राजा २५:२६<sup>8</sup> मिनू परमप्रभु यावेम् ताहपनेसम येरमीया कली लोव्र पात्तु।<sup>9</sup> मार लोव्र पात्तु दॅशा हना "इ गुडमी ठेयब ठेयब फुल्लु क्युक्को। मिनू यहूदीपुकीम कोव्रना कोव्रन बाक्मानु, ताहपनेसम बाक्शो फाराओ, आ दरवार डा आगा ओव्रतीक लाम्मी खुइश्शा थिश्शा वोतो।<sup>10</sup> मिनू मेको आन कली मुर नेल्ल आन परमप्रभु यावे, इस्राएली आन परमप्रभुमी 'गो आं गेय पाइब बेबीलोन डा पिप नेबुकदरेसर कली ब्रेल्लुड। मिनू आं खुइश्शा वोइश्शो एको फुल्लु तार गो मेको आ नित्तीके सेल्लुड। मेकोमी मेको तार आ बाक्तीक ताम्बु कीब। येरमीया २५:९<sup>11</sup> मेको जाक्शा इजीप्त कली लडाइ तोइब। मिनू बेक्तीक रोडम बेक्चा ब्रेक्शो, बेक्तीक रोड पा बेक्नीम। ग्याइश्शा लाइक्चा पुंडसीचा ब्रेक्शो, ग्याइश्शा लाइक्चा पुंडसीनीम। मिनू तरवारम साइक्चा पुंडसीचा ब्रेक्शो, तरवार साइक्चा पुंडसीनीम। येरमीया १५:२<sup>12</sup> मेकोमी इजीप्त डा मूर्ति आन खिंम मी सुइक्ब। मेकोमी मेको आन खिं आन कली क्रोइक्ब। मिनू मेको देवी देवता आन कली लाइक्ब। मिनू गोठलापुकीम दोपा आन वा रे नेक्स गुप्नीमी, मोपा मेकोमी इजीप्त रागी डा मूर्ति आन कली गुप्शा ताइब। मिनू मारेइ मडुम्थु आ रागी लेख। येरमीया ४६:२५<sup>13</sup> मेकोमी इजीप्त डा हेल्योपोलीस सहरम बाक्शो नां आ मूर्ति बाक्शो थामपुकी प्रेख। मिनू इजीप्त डा देवी देवता आन खिंम मी सुइक्ब" दॅशो बाक्ब" दॅत।

मूर्ति पूजा पतीके जाश्शो

44 परमप्रभु यावेमी येरमीया कली इजीप्त मिगदोल, ताहपनेस, मेम्फीस नु पश्रोस रागीम बाक्ब यहूदी नेल्ल आन पर्बम लोव्र पात्तु। येरमीया ४३:७<sup>2</sup> मुर नेल्ल आन परमप्रभु यावे, इस्राएली आन परमप्रभुमी मार लोव्र पात्तु दॅशा हना "गो यरूसलेम नु यहूदा डा सहर नेल्ल आन कली शुश श्येत गेता। गेपुकीमी मेको आंमा ताइतीनी। मेको सहर कोव्रडीन। मुर मबाक्तीके श्येत्थ दुश्शो बाक्नीम।<sup>3</sup> मारदे मोदॅशो दुम्त दॅशा हना, मेकेर डा मुरुमी आं अरेशो मटिथु, गाइक्पाइक्तीमी। मेकोपुकीमी देवी देवता आन कली चढेशा मेको आन नोले खोइक्तेक्म। डॉइती मेकोपुकी, गेपुकी नु इन किकी पिपीमी यो मेको आन कली मतुइश्शो बाक्तेक्म।<sup>4</sup> मो हना यो गो आं गेय पाइब आं लोव्र पाइब आन कली मेको आन बाक्तीके सोइक्ना सोइक्न "गो इन कली मेको आं काइ मदाक्शो ग्रान्ना दिशो गेय मपन" दॅपाइक्तामी। येरमीया २५:४<sup>5</sup> तन्न मेकोपुकीमी मनेनेम। आन

नोफान मदाइक्तेम। मेको आं अरेशो मटितीक रे मलेम्। मेकोपुकीमी देवी देवता आन कली चढेशा मप्रोनेम।<sup>6</sup> मोपतीके गो यहूदा डा सहर नु यरूसलेम डा लाम् आं शुश गाइश्शो नु चुरशो मोइक्ता। मिनू मेको सहर ब्रेश्शो नु मुर मबाक्तीके दुम्तेक्म। मुलाक्ती मोदॅशो बाक्ब" दॅत।<sup>7</sup> मिनू मुल मुर नेल्ल आन परमप्रभु यावे, इस्राएली आन परमप्रभुमी "मारदे गेपुकीम आंम इन कली मोदॅशो श्येत गेनीनी? यहूदा आ दाते रे मीश मुर, वॉइश मुर, आल नु दूध तूब आल नेल्ल आन कली तिल्पाइश्शा, सुइ इन कली मलीपाइक्नी। येरमीया ४२:२२<sup>8</sup> मारदे गेपुकीमी इन गेयमी आं कली गाइक्पाइक्नीनी? मारदे गे इजीप्तमी बाक्शा, देवी देवता आन कली चढेशा आं कली गाइक्पाइक्नीनी? गेपुकी क्याम्चा पुंडसीशा, रागी डा मुर नेल्ल आन दातेमी सराप चीले राइब नु शुक्शी पाइक्चा पुंडसीब दुम्नीनी।<sup>9</sup> गे इन किकी पिपी आन मरिश्शो पशो प्रॅदीनी? यहूदा डा पिप नु आन पिपीम आन मरिश्शो पशो, इन आंम मरिश्शो पशो, इन मीशेमी यहूदा रागीम नु यरूसलेम डा लाम्मी मरिश्शो पशो प्रॅदीनी? येरमीया ७:१७-१८<sup>10</sup> मुल सम्म मेकोपुकीमी आंम कली ब्रेश्शो मसेल्सम। आं कली मान पा महिंम। गो आं अरेशो नु आं फुल्लुम मुशा ब्रेक्शो लोव्र इन डॉइती नु इन किकी पिपी आन डॉइती वोइक्ता। मिनू मेको, गेपुकी नु इन किकी पिपीमी मटिनी" दॅत।

<sup>11</sup> मोपतीके मुर नेल्ल आन परमप्रभु यावे, इस्राएली आन परमप्रभुमी "गो इन कली ठेयब श्येत गेशा, यहूदा डा मुर नेल्ल आन कली क्याम्नुड। आमोस ९:४<sup>12</sup> इजीप्त लशा बाक्चा कली मिम्ब यहूदा डा लीशो मुर नेल्ल थमा पा जाश्शा लाइनीम। मेको नेल्ल इजीप्तमी साइक्चा पुंडसीनीमी। तरवार नु अन्कालमी बेक्नीम। ठेयब नु आइक्च नेल्ल तरवार नु अन्कालमी बेक्नीम। इन श्येत जशो तशा मुर हिंनीम। गेपुकी सराप राइब नु शुक्शी पाइक्चा पुंडसीब दुम्नीनी। येरमीया ४२:१४-१७<sup>13</sup> गो दोपा यरूसलेम कली तरवार, अन्काल नु मुर बेक्तीक रोडम सजाइ गेडा, मोपा इजीप्तम बाक्ब आन कली यो सजाइ गेनुडमी।<sup>14</sup> मोपा इजीप्तम बाक्शो यहूदा डा लीशो मुर सुइ प्रोक्चा मताइनीम। सुइ मब्रॉइनीम। मिनू सुइ यहूदा रागी लेत्चा मताइनीम। मो हना यो मेकेर बाक्चा कली लचा दाक्नीम। डॉइती प्रोक्शा लशो का निक्शी ला लेत्चा ताइनीमी" दॅत।

<sup>15</sup> मिनू आन मीशेम देवी देवता आन कली चढेशो तुइक्ब वॉइश मुर नेल्ल, ठेयब हुल मीश मुर नु इजीप्त रागी डा पश्रोस रागीमी बाक्ब नेल्लेमी येरमीया कली यसैया ११:१<sup>16</sup> "गे परमप्रभु यावे आ नॅमी आंइ कली पशो लोव्र गो मनेनीकी।<sup>17</sup> मेको आ पा डा आंइ कसम जशो खाप्नीकी। गोपुकी सरीड डा पिपीम कली चढेशा, मेको कली तूचा थोव्रक लुक्नीकी। गोपुकी, आंइ किकी पिपी, आंइ पिपीपुकी नु आंइ ठेयब मुरपुकीम यहूदा डा सहर नु यरूसलेम डा लाम् मोदॅशो पाम्तेक्म। मेना गोपुकी शुश जचा ताइतक। मिनू आंइ माल्लो क्येडा शुश तशा, श्येत मजक। येरमीया ७:१७-१८; होसे २:७<sup>18</sup> तन्न गोपुकीम सरीड डा पिपीम कली चढेशा प्रॉइशो रे नु तूचा थोव्रक लुक्चा प्रॉइशो रे मारेइ मतक। तरवार नु अन्कालम जाम्ना जाम्न लाइतक" दॅतेक्म।<sup>19</sup> मिनू मीश मुरपुकीम "गो थमा पा सरीड डा पिपीम कली चढेशा ढेन बाक्नीकी। मिनू मेको कली तूचा थोव्रक लुक्नीकी। आंइ वॉइशेम वारच मपथु, मेको कली बटुक चोका नु तूचा थोव्रक लुक्ताका डा?" दे लोव्र पाम्तेक्म। गन्ती ११-१३

<sup>20</sup> मिनू येरमीयामी आ कली लोव्र लेख वॉइश मुर नु मीश मुर नेल्ल आन कली<sup>21</sup> "गेपुकी, इन किकी पिपी, इन पिप, इन ठेयब मुर नु एको रागी डा मुरपुकीम यहूदा डा सहर नु यरूसलेम डा लाम् चढेशो परमप्रभु यावेम मतुइक्बा डा? मार, मेकोमी ममिम्ता डा? <sup>22</sup> परमप्रभु यावेम इन मरिश्शो पशो नु इन पशो ग्रान्ना दिशो गेय तशा फाल्ले मचब। मोपतीके इन रागी श्येत्थ नु मुर मबाक्तीके दुम्त। सराप चीले रशा, मुर मबाक्शो रागी दुम्त। मेको मुल सम्म मोदॅशोन बाक्ब।<sup>23</sup> इन चौशा चढेतीके, इन परमप्रभु यावे कली पाप पशो, आ दॅशो मटिशो नु आ अरेशो, आ फुल्लुम मुशा ब्रेक्शो लोव्र नु आ शॅशो मटितीके इन कली ठेयब श्येत दुम्त। मेको आ पर्बम श्येत जाइनीनी" दे माइक्तीमी।

<sup>24</sup> मिनू येरमीयामी मेको मुर नेल्ल नु मीश मुर नेल्ल आन कली "गे इजीप्तम बाक्ब यहूदा डा मुर नेल्ल परमप्रभु यावे आ लोव्र नेनीन।<sup>25</sup> मुर नेल्ल आन परमप्रभु यावे, इस्राएली आन परमप्रभुमी 'गे नु इन मीश, इन

देंशो, गोपुकीमी आंइ कसम जशो खाप्नीकी। गो सरीड डा पिपीम कली धूप चढेशा, मेको कली तूचा थोवक लुक्नीकी' दे इन कसम जशो थमा पा खपीन। 26 मोपतीके गे इजीप्तम बाक्ब यहूदी नेल्ल परमप्रभु यावे आ लोव्र नेनीन। परमप्रभु यावेमी गो आं ठेयब नैमी कसम जाइनुड। मुल मेको इजीप्त रागीम बाक्ब यहूदा डा मुर आन शोव्र रे 'परमप्रभु, परमप्रभु यावे ब्रॉइशा बाक्बो खोदेंशो पा' दे देंतीकेमी आं नें गेनायो मर्देनीम। 27 मारदे हना गो मेको आन कली रिम्शो पचा कली ममाइ, मरिम्शो पचा कली कोव्रना कोव्रन बाक्बनुड। इजीप्तम बाक्ब यहूदी नेल्ल मनुम्मा सम्म तरवार नु अन्कालम बेक्नीम। *आमोस ९:४* 28 तरवार रे ब्रॉइशोपुकी इजीप्त रे यहूदा रागीमी का निकशी ला लेत्चा ताइनीम। मिनु इजीप्तम बाक्ब यहूदा डा मुर नेल्लेमी 'आं देंशो थमा बाक्म देय मेको आन लोव्र थमा बाक्ब' दे नोले तुइक्नीम" देंत। 29 मिनु परमप्रभु यावेम "आं देंशो थमा पा पाइनुड। मेको आ चिन्ड मार बाक्ब देंशा हना, गो इन कली मेको रागीमी सजाइ गेनुड। मेको नोले गो आ देंशो पाइनुड, दे इन कली तुइक्तीके बाक्ब" देंत। 30 परमप्रभु यावेम "गो इजीप्त डा पिप फाराओ होफ्रा कली आ जोरी सत्रु नु मेको कली साइक्चा माल्ब आन गुइमी गेनुड। दोपा गो यहूदा डा पिप सिदकीयाह कली आ जोरी सत्रु बेबीलोन डा पिप नेबुकदरेसर आ गुइमी गेडा, मोपा इजीप्त डा पिप कली साइक्ब आन गुइमी गेनुड" दे परमप्रभु यावेमी देंत। *इजीकीएल २९:१९*

बारुक कली अरेशो

45 यहूदा डा पिप योसीयाह आ तौ येहो-याकीममी सासन पवा आ ४ बर्सम नेरीयाह आ तौ बारुकमी परमप्रभु यावे आ लोव्र पाइब येरमीया आ ब्रेक्पाइश्शो लोव्र कागजम ब्रेक्ना ब्रेक्न बाक्मेनु, येरमीयामी बारुक कली *येरमीया ३६:४* 2 परमप्रभु यावे, इस्राएली आन परमप्रभुमी इ कली मार देंब देंशा हना, 3 गे "आबी, आबी, आं कली मार दुम्बा। परमप्रभु यावेमी आं श्येतम सुर्ता पतीक तेम्ताक्व। गो हुकयी पना पन दती। गो तेइ नाइक्चा मतड" देंते। 4 गे मेको कली "परमप्रभु यावेमी 'आं डोंइती सेल्शो मुल प्रेतनुड। गो मार ख्रुमु मेको नेल्ल तुल्शा ताइक्नुड। मेको रागी नेल्ल कली दुम्ब। 5 मिनु गे आंम इ कली मारेइ मारेइ ठेयब थोवक माल्लेवे? गे मेको ममालो। मारदे हना गो मुर नेल्ल आन कली ठेयब श्येत जपाइक्नुडमी। तन्न गे ते लाइनेवे, मेके गो इ कली लडाइ रे ब्रॉइचा गेनुड" " दे परमप्रभु यावेमी बारुक आ पर्वम देंत। *येरमीया ३९:१८; येरमीया ४३:४-६*

इजीप्त रागी आ पर्वम शेंशो

येरमीया ४६:-; येरमीया ५९:-; यसैया १९:-; इजीकीएल २९:- ३२:-

46 परमप्रभु यावेम रागी रागी आन पर्वम आ लोव्र पाइब येरमीया कली लोव्र पाप्नु। 2 मार लोव्र पाप्नु देंशा हना "इजीप्त रागी आ पर्वम, इजीप्त डा पिप फाराओ नेको आ लडाइ पाइबपुकी युफ्रेटीस खोला आ नेक्था कारकेमीश सहरमी बाक्बो बाक्तेक्म। यहूदा डा पिप योसीयाह आ तौ येहो-याकीममी सासन पवा आ ४ बर्सम बेबीलोन डा पिप नेबुकदनेसरमी लडाइ तोशा ग्रात। *२राजा २३:२९* 3 आइक्च नु ठेयब तेक्तीक ठीक पने। लडाइ पचा कली डोंइती बारीन। 4 शाराम लगम पाइक्तीन। शारा डोंइसीन। कांसा के ताकी गुक्शा इन तूतीक शेप्पीन। इन कांसा के फेक्तीक फेक्सीन। 5 गो मारदे मेको आन कली हिंशो तडमी? मेकोपुकी नोले शॉइसीशो बाक्नीम। मेको आन लडाइ पाइबपुकी आन थुं लुक्च लत। मेकोपुकी रीब पा प्रोक्तेक्म। मेकोपुकीमी नोले लेशशा मकोव्रनीम। तेइ तेइ हिंतीकेइ हिंतीके बाक्ब" दे परमप्रभु यावेम देंत। *येरमीया २०:३*

6 परमप्रभु यावेमी "रीब पा प्रोक्ब यो प्रोक्ने मचाप्नीम। लडाइ पाइबपुकी यो ब्रॉइचा मताइनीम। मेकोपुकी उत्तर गे डा युफ्रेटीस खोलाम दाइल पांइसीशा गोल्नीम।

7 एको नील खोला खोदेंशो पा बारशा जाक्ब, अरु ठेयब खोला बोक्शा कुशो खोदेंशो पा जाक्ब, सु बाक्मे? 8 इजीप्त रागी नील खोला खोदेंशो पा बारशा जाक्ब। ठेयब खोला बोक्शा कुशो खोदेंशो पा जाक्ब। मेकोमी 'आं

कली बारशा रागी कली सुम्चा गेने। सहर नु मेकेर डा मुर आन कली साइक्चा गेयीनी। 9 शारापुकी दोरशा डोंइती लने। बग्गी खुल्बपुकी थाम्पा दोरपतीन। लडाइ पाइबपुकी बारीने। कूश एथीयोपीया नु पूत डा मुरपुकीमी तेक्तीक कुरनीम। लूद डा मुरपुकीमी लिब्रा आपनीम। 10 मेको नाक्ती परमप्रभु, मुर नेल्ल आन परमप्रभु यावे आ नाक्ब बाक्ब। मेको क्येक्क लेक्तीक नाक्ती बाक्ब। आंम जोरी सत्रु आन कली क्येक्क लेक्तीक नाक्ती बाक्ब। मुरुम तरवारम साइक्नीम। तरवार हुश तूशा, आ तूत दाक्बो रूब। मारदे हना मुर नेल्ल आन परमप्रभु यावेमी उत्तर गे डा रागीमी, युफ्रेटीस खोला आ नेक्था क्योरशा चढेब। *यसैया २:१२; ब्यवस्था ३२:४१-४२* 11 गे कन्ने मीश आल इजीप्त, इर गिलादम लशा खेक्तीके चाक्को। गे शोर गाक्बो शुश खाल डा ओख्ती खेक्साक्वे। तन्न गे मसानेवे। *येरमीया ८:२२* 12 रागी रागी डा मुरपुकीम इ मुने दोक्बो लोव्र नेंतेक्म। इ वाइ ब्रेश्शोम रागी नेल्ल ब्रीब। मारदे हना लडाइ पाइब, लडाइ पाइब नु थोक्मुइनीम। मिनु मेको नेल्ल कालेमी गोल्नीम" " दे परमप्रभु यावेमी देंत।

13 परमप्रभु यावेम बेबीलोन डा पिप नेबुकदरेसरम इजीप्त कली लडाइ तोथ जाक्चा आ पर्वम येरमीया कली लोव्र पाप्नु। 14 मार लोव्र पाप्नु देंशा हना "इजीप्तमी एको लोव्र नेंपतो। मिग्दोलमी एको लोव्र नेंपतो। मेम्फीस नु ताहपनेसमी यो एको लोव्र नेंपतो। गे नेल्ल ठीक दुम्शा आंम आंम राप्तीकेम रपीन। मारदे हना तरवारम इन एर ऑथ नेल्ल साइक्नु। 15 मारदे इ बोल्यो लडाइ पाइब प्रोक्नीमी। मारदे बोक्शा मराप्नीमी? मारदे हना परमप्रभु यावेम मेको आन कली साइक्नु। 16 इ लडाइ पाइबपुकी थोक्मुशा गोल्नीम। मिनु मेकोपुकीमी 'लो, इं मुर आन बाक्तीक लय। इं जरमेशो रागी लेशशा लय' दे साइक्ब तरवार आ पर्वम मो देंमुइनीम। 17 इजीप्त डा पिप फाराओ कली फश लोव्र पाइब, दे नें वोतीन। मेकोम आ गेय पतीक नाक्ती साम्तु" देंत।

18 परमप्रभु, पिपमी "आं ब्रॉइशा बाक्बो खोदेंशो पा" देंत। मेको पिप आ नें मुर नेल्ल आन परमप्रभु यावे बाक्ब। पहाड आन दाते डा ताबोर पहाड खोदेंशो पा का जाक्ब। मेको समुन्द्र आ नेक्था डा कारमेल खोदेंशो पा जाक्ब। 19 गे इजीप्त डा दारशो तमी ग्याइश्शा लाइक्चा पुंइसीचा कली इ मार मार कुम्लो पावो। मारदे हना मेम्फीस श्येत्य दुम्ब। मेको खिं नेल्ल ब्रेश्शा, मुर मबाक्तीके दुम्ब।

20 इजीप्त रागी दारशो मगिक्बो बी का खोदेंशो बाक्ब। तन्न उत्तर रे डांस का जाक्ब। 21 मेको आ गाल्च ताक्शा लडाइ पाइबपुकी यो दोम्शो बाछा खोदेंशो बाक्नीम। मेको यो नेल्ल हिरशा लशा काथा प्रोक्तेक्म। मेको राप्था मदिकनीम। मारदे हना मेको आन हिंचा डा श्येत जतीक नाक्ती जाक्बो बाक्ब। मेको आन सजाइ तची ना जाक्त।

22 मेकोमी ग्रेशा गाक्शा, प्रोक्बो बुस्सुम खोदेंशो पा रेयके पाइब। मारदे हना आ जोरी सत्रु डोंइती बारशा, खा कुरशा रवा तिम्ब मुर खोदेंशो पा जाक्नीम। 23 परमप्रभु यावेमी "मेकोपुकीमी आ ब्वाकी नेल्ल तिम्चा माल्नीम। मारदे हना हिक्ने मचाप्चा डा बाक्नीम। मेकोपुकी सल्हा क्येडा शुश बाक्नीम" देंत। 24 मिनु इजीप्त आ तमी मुने तोक्चा पुंइसीब। मेको उत्तर रे जाक्ब मुर आन गुइम जिम्मा गेचा पुंइसीब।

25 मुर नेल्ल आन परमप्रभु यावे, इस्राएली आन परमप्रभुम "गो थेबेस सहर डा आमोन फाराओ, इजीप्त रागी नु आ देवी देवता नु आ पिप आन कली सजाइ गेनुड। गो फाराओ नु मेको आ सक्ति कली थमा सुइक्ब नेल्ल आन कली सजाइ गेनुड। *येरमीया ४३:१२-१३; यसैया २४:२१* 26 गो मेको आन कली साइक्चा माल्ब बेबीलोन डा पिप नेबुकदरेसर नु आ लडाइ पाइब आन ठेयब मुर आन गुइमी गेनुडमी। मेको नोले इजीप्त रागी डोंइती डा खोदेंशो पा मुर बाक्तीक रागी दुम्ब" दे परमप्रभु यावेम देंत। *इजीकीएल २९:१४*

27 मेकोमी "आं गेय पाइब याक्ब, गे महिनो। इस्राएल गे सुर्ता मपावो। गो इ कली डोन रागी रे प्रॉइनुड। इ चंच युइ आन कली ग्याइश्शा लाइश्शा, वोइश्शो रागी रे प्रॉइशा चाक्नुडमी। याक्ब लेशशा श्येत मजथु, थुं नाइश्शा बाक्ब। मिनु मेको कली सुइम हिंच मकोइनीम। *येरमीया ३०:१०* 28 आं गेय पाइब याक्ब गे महिनो। मारदे हना गो गे नु बाक्बो बाक्नुड। गो इ कली तेको रागी डा मुर आन दातेमी ब्रपदु, मेको रागी डा मुर नेल्ल आन कली

क्याम्नुडमी। तन्न गो इ कली मक्याम्नुड। गो इ कली ठीक सजाइ गेनुड। गो इ कली सजाइ मगेथु मप्रॉइनुड” देंत। *येरमीया १०:२४; येरमीया ३०:११*

पलिस्ती आन पर्बम देंशो लोव  
यसैया १४:२९-३२; इजीकीएल २५:१५-१७

47 फाराओमी गाजा कली लडाइ तोचा क्येडा डोंइती, पलिस्ती आन पर्बम परमप्रभु यावेम आ लोव पाइब येरमीया कली लोव पाप्तु। 2 परमप्रभु यावेमी मार लोव पाप्तु देंशा हना “कोव्रडीन उत्तर रे ब्वाक्कु बारशा यिशो बाक्ब। मेकोमी रागी नु मेकेर बाक्शो मारेइ मारेइ आन कली सुम्ब। सहरपुकी नु मेकेर बाक्शो नेल्ल आन कली खुम्ब। मिनु मुर नेल्ल वाइ ब्रेन्नीम। मेको रागीम बाक्ब मुर नेल्ल डाक्नीम। 3 प्रेक्शा दोरशा गाक्ब शारा आन खोइली आ रेयके नु जोरी सत्रु आन बग्गी आन रेयकेमी आफपुकीम आन आल आन कली वारच पाइक्वा कली मलेत्नीम। मेको आन गुइ तिकने मचाप्ब दुम्शा ग्युक्शो बाक्नीम। 4 मारदे हना पलिस्ती नेल्ल आन कली खतम पोक्शा साइक्तीक नाक्ती जाक्शो बाक्ब। टायर नु सीदोन आस कली वारच पाइक्वे चाप्ब नेल्ल बेक्नीम। मारदे हना परमप्रभु यावेम पलिस्ती आन कली साइक्वा चिक्शो बाक्ब। काफ्तोर डा टापु आ शुंइचीम रे जाक्शो लीशो नेल्ल आन कली साइक्वा चिक्शो बाक्ब। *आमोस १:६-७; सेफन्याह २:४; जकरिया ९:५; यूहन्ना १:२२; येरमीया १६:६; येरमीया ४८:३७; आमोस ९:७* 5 गाजाम रोंका पचा कली आ चां प्रेक्शो बाक्ब। अशकलोन खतम दुम्शा, सिक्सी पाइब। गे लीशो अनाकीमपुकी गेना सम्म इन रां चेंइसीनीनी?” देंशो बाक्ब। 6 “परमप्रभु यावे आ तरवार, गे ग्रीचा गेना नाइक्वेवे? इन तरवार खोतम पिप्तीन। गे नाइश्शा सिक्सी पा बाक्कीन। 7 गे दोपा सिक्सी पा बाक्ने चाप्नीनी? मारदे हना परमप्रभु यावेमी मेको कली अरेशो बाक्ब। मेकोमी मेको कली अशकलोन नु समुन्द्र आ शुंइच डा रागी आन कली गेय पचा कली अरेशो बाक्ब?” देंत।

मोआब आ पर्बम लोव

यसैया १५:-; यसैया १६:-; इजीकीएल २५:८-११; आमोस २:१-३; सेफन्याह २:८-११

48 मुर नेल्ल आन परमप्रभु यावे, इस्राएली आन परमप्रभुमी मोआब आ पर्बम मार लोव पाप्तु देंशा हना “नेबो सहर मुर मबाक्तीके दुम्ब। किरयथ-थाइम मुने दोक्ब। मेको ब्रुत। मेको आ बोल्यो दरवार नेल्ल मुने तोक्शा प्रेशशा ताइक्वा पुंइसाक्म। 2 मुल रे मोआब कली ठेयब मसेल्नीम। मुरपुकीम हेशबोनम लोव गारपाइक्तेक्म। मेकोपुकीमी ‘जाक्कीन, गे मेको कली रागी का मदुम्चा डा सेल्य। ए मादमेन सहर, इ कली यो सिक्सी पपाइक्नीम। इ कली तरवार शेशा खेदा पाइनीम’ देंतेक्म। 3 नेनीन, होरोनाइम रे वाइ ब्रेश्शो नेंसीब। खतम दुम्तीके नु क्याम्तीके आ पर्बम डाक्शो नेंसीब। 4 मोआब आ आलपुकीमी ‘मोआब खतम पोक्वा पुंइसाक्व’ दे वाइ ब्रेश्शा डाक्नीम। 5 मेकोपुकी लुहीथ डा ग्येत्थ लांमी हिशेक पा डाक्ना डाक्न डोइक्नीम। मारदे हना होरोनाइम डा लुक्व लतीक लांमी श्येत जशा डाक्शो नेंसीब। 6 प्रोक्कीन, आंम कली प्रॉइचा कली दोरीन। गोरशो रागी डा गधा खोदेंशो दुमीन। *येरमीया १७:६* 7 गेपुकीम इन गेय नु इन शॉपोम थमा सुइक्तीनी। गेपुकी यो ग्याइश्शा लाइक्वा पुंइसीनीनी। केमोश देवता आ चढेब नु आ नोले खोइक्ब मुरपुकी नु ग्याइश्शा लाइक्वा पुंइसीब। *गन्ती २१:२९; न्यायाधीस ११:२४; १राजा ११:७* 8 खतम पोक्ब सहर नेल्लेम जाक्ब। मिनु सहर का यो मप्रॉइसीब। बेंसी क्याम्सीब। मिनु दिम खतम दुम्ब। परमप्रभु यावे आ देंशो मोदेंशो बाक्त।

9 मोआब कली फ्रां गेन। मारदे हना मेको थमा पा ब्रुइब। मेको आ सहर श्येत्थ दुम्शा, मुर मबाक्तीके दुम्नीम” देंत।

10 सु सुमी परमप्रभु यावे आ गेय देश पा पाइनीमी, मेको सराप राइनीम। आंम तरवार कली हुश ख्राक्श पोक्तीके रे तेक्ब सराप राइनीमी। 11 मोआब आ ठिटा रेन नाइसीशा बाक्शो बाक्ब। मेको गरमी कुर पा वोइश्शो अडगुर शांबु खोदेंशो बाक्ब। मेको ग्योब का रे अर्को ग्योबुम मलेशो बाक्ब। मेको ग्याइश्शा लाइक्वा मपुंइसीशो बाक्ब। मोपतीके मेको डोंइती डा खोदेंशोन बाक्ब। मेको आ ब्रोव्रशो रिना मजांशो बाक्ब। *सेफन्याह १:१२*

12 मोपतीके परमप्रभु यावेमी “गो गर रे मोइक्ब आन कली मेको आ बाक्तीके सोइक्नुडमी। मिनु मेकोपुकीमी मेको मोइश्शा, गर श्येत्थ सेल्शा प्रोल्नीम। मेको नाक्त थमा पा जाक्ना जाक्न बाक्ब। 13 दोपा इस्राएल आ मुर आंम थमा सुइश्शो बेथेल रे पा मुने तोक्वा पुंइसमा, मोपा मोआब यो केमोश रे पा मुने तोक्वा पुंइसीब।

14 गेपुकीम ‘गेपुकी बोल्यो नु सक्ति पाइश्शो लडाइ पाइब बाक्नीकी’ दे दोपा देंने चाप्नीनी? 15 मोआब नु आ सहर आन कली खतम पोक्ब जाक्त। मेको आ नेल्ल क्येडा रिम्शो ठिटा मुर नेल्ल साइक्वा पुंइसीचा कली लाम्तेक्म” दे पिपम देंत। मेको आ नें मुर नेल्ल आन परमप्रभु यावे बाक्ब। 16 मेकोमी “हिंचा डा श्येत जतीक नाक्ती मोआब आ नेक्था जाक्शो बाक्ब। मेको आ श्येत जतीके रीब पा जाक्ब। 17 मेको आ एर ऑथ बाक्ब नेल्ल नु मेको आ पशो तुइक्ब नेल्ल मेको आ पर्बम रोंका पने। मिनु ‘दोपा सक्ति पाइश्शो राज्य क्याम्चा पुंइसे। पिप आ कोक्के दोपा जिक्मे’ देनीन।

18 ए दीबोन डा तमी, गे ठेयब नित्तीके रे तोइश्शा, सोव्रशो रागीम निस्सो। मारदे हना मोआब कली खतम पोक्ब इ कली लडाइ तोचा कली जाक्त। मेकोमी इ गारो हिरशो सहर नेल्ल खतम पोक्त्तु। 19 आरोएर सहरम बाक्बपुकी लांमी राप्शा कोव्रडीन। प्रोक्शो वोंइश मुर नु मीश मुर आन कली ‘मार, दुम्मे’ दे हिल्लो पने। 20 मोआब ब्रुत। मेको मुने दोक्त। रोंका पा डाक्कीन। ‘मोआब मुर मबाक्तीक दुम्त’ दे अरनोन खोला आ शुंइचीम लशा देनीन। 21 डांडा तार डा दिंमम निसाफ पतीके नाक्ती जाक्शो बाक्ब। होलोन, याहसाह नु मेफा-आथ, 22 दीबोन, नेबो नु बेथ-दिब्बलाथाइम आन तारी, 23 किरयथ-थाइम बेथ-गामुल नु बेथ-मेओन, 24 केरयोथ, बोज्रा नु मोआब आ नेक्था नु डोन डा सहर नेल्ल आन तारी निसाफ पतीके जाक्शो बाक्ब। 25 मोआब आ ग्रोव्र खोइक्साक्व। मिनु मेको आ गुइ जिक्त” दे परमप्रभु यावेमी देंत। 26 मिनु लेंशा “मेको कली दुक्पतीन। मारदे हना मेको ठेयब लेशो बाक्ब। मोआब आ मेशोमी दिड दाड गोल्ल। मिनु मेको शुक्शी पाइक्वा पुंइसीब दुम्ल। *येरमीया २५:१५* 27 मार, गे इस्राएल कली शुक्शी पशो मनवे? मेको खुइ आन दातेमी ग्याइक्वा पुंइसे डा, मेको आ पर्बम लोव पामेनु, इ पिया हिक्शा शुक्शी पवी?

28 मोआबम बाक्बपुकी, इन सहर प्रॉइशा, फुल्लु मेर लशा बाक्कीन। रोंगु डा ढोडोडगा आ शोव्रम ग्योव्र सेल्ब दुक्कुर खोदेंशो दुमीन। 29 गो मोआब आ ठेयब लेशो आ पर्बम लोव नेंतक। मेको आ ठेयब दुम्तीके, बोरतीके, ठेयब लेत्तीके नु थुं डा ठेयब दुम्तीके आ पर्बम नेंतक। 30 गो मेको आ ठेयब लेशो तुइक्नुड। तन्न मेको आ ठेयब लेशो मारेइ मबाक्ब। मिनु मेको आ गेय जाम्शा लाइब बाक्ब। 31 मोपतीके गो मोआब आ पर्बम रोंका पाइनुड। गो मोआब नेल्ल आन पर्बम डाक्नुड। गो कीर-हेरेस डा मुर आन पर्बम हिशेक पाइनुड। 32 गो याजेर डाक्शो क्येडा इ पर्बम शुश डाक्नुड। ए सिब्मा डा अडगुर बोटपुकी, इन राशी समुन्द्र आ आइक्वी हांबु जाक्दीत्तेक्म। मेकोपुकी याजेर डा समुन्द्र सम्म जाक्दीत्तेक्म। इ मीशो फल फुल नु इ अडगुर खतम पोक्ब जाक्तेक्म। 33 मोआब डा फल फुल रू रे ग्येरतीक नु थुं नाइश्शा बाक्तीके जाम्ने थुम्तु। गो अडगुर खाक्तीक तेक्ता। सुइमी ग्येरशा ग्रीशा, मखाक्नीम। मेको आन वाइ ब्रेश्शो ग्येरशा वाइ ब्रेश्शो ममाइ।

34 हेशबोन नु एलेआले वाइ ब्रेन्नीस। मेको याहास सम्म नेंसीब। सोआर रे होरोनाइम, एग्लथ-शेलीशीया सम्म वाइ ब्रेश्शो नेंसीब। मारदे हना निम्नीम डा ब्वाक्कु यो सोव्रने थुम्शो बाक्ब। 35 गो मोआब कली खतम सेल्नुड। डांडा डा थानम चढेब नु देवी देवता आन कली धूप चोइब आन कली खतम सेल्नुडमी” दे परमप्रभु यावेमी देंत। 36 मिनु परमप्रभु यावेमी “मोपतीके आं थुं बांसुरीम खोदेंशो पा मोआब आ पर्बम रोंका पाइब। आं थुं कीर-हेरेस डा मुर आन पर्बम बांसुरीम खोदेंशो पा रोंका पाइब। मेको आन चेम्शो शॉप नेल्ल जाम्त। *यसैया १५:७*

37 मेको नेल्लेम आन चां प्रेक्शो बाक्नीम। मिनु आन गल शोक्के यो खोइश्शो बाक्नीम। मेको नेल्ल आन गुइ चेश्शो बाक्नीम। मिनु आन क्रातो भाडग्रामी गिल्लीशो बाक्नीम। *येरमीया १६:६* 38 मोआबी आन खिं तारी नु लां मेर रोंका पशो डा लाक्शा अर्को मारेइ मनेसीब। मारदे हना गो मोआब कली सुइम ममाल्वा डा ग्योब खोदेंशो पा प्रोल्ला” दे परमप्रभु यावेमी देंत।



39 मेको दोपा ब्रोल्मे, मोपा रोंका पाइनीम। मोआब दोपा मुने दोक्शा आ कुल खूइक्ता, मोपा मोआब आ एर ओंथ बाक्ब नेल्लेमे मेको आन पर्बम शुक्शी पा हिंशा कोव्रचा डा दुम्शो बाक्ब।<sup>40</sup> मिनु परमप्रभु यावेमी “कोव्रडीन, मेको ककाकुली खोदेशो पा जुक्ब। मेको आ फ्रां हाम्शा, मोआब तारी जुक्ब। येरमीया ४९:२२<sup>41</sup> केरयोथ नु अरु सहर ब्रुइनीम। आन जोरी सनुमी मेको आन हिरशो सहर आन के सेल्नीम। मेको नाक्ती मोआब डा लडाइ पाइब आन थुं सुत्केरी रोइ पशो मीश मुर आन थुं खोदेशो दुम्नीम।<sup>42</sup> मोआब रागी का दुम्शा मलीचा डा पा खतम दुम्त। मारदे हना मेको परमप्रभु यावे आ डोंइती ठेयब लेशो बाक्त।<sup>43</sup> मोआबम बाक्बपुकी इन डोंइती हिंचा डा बिक्तीके नु ब्वारद बाक्नीम। यसैया २४:१७-१८<sup>44</sup> हिंचा डा श्येत रे प्रोक्ब बिक्तीकेम बिक्नीम। मिनु बिक्तीके रे डोइश्शा गूब ब्वारदम रेत्चा पुंइसीनीम। मारदे हना गो मोआब कली आ सजाइ गेतीक बर्सम मोदेशो पाइनुड” दे परमप्रभु यावेमी दैत।

<sup>45</sup> परमप्रभु यावेमी “प्रोक्बपुकी हेश्बोन आ वांकुमी दिक्नीम। मारदे हना हेश्बोन रे मी का गूत। सीहोन आ खि रे मी गूत। मेकोमी मोआब आ कुप्फ नु जीब नु मरिश्शो पाइब आन पिया जेक्ब। गन्ती २१:२८-२९<sup>46</sup> आबी, आबी, मोआब, केमोश देवता आ मुर बेक्तेक्म। इ तौपुकी ग्याइश्शा लाइक्चा पुंइसाक्म। इ तमी ग्याइश्शा लाइक्चा पुंइसाक्म।<sup>47</sup> मो हना यो गो नोले डा नाक्ती मोआब आ शोंप लेशशा गेनुड। मोपा मोआब आ निसाफ नुत्त” दे परमप्रभु यावेमी दैत।

अम्मोन आ पर्बम लोव

इजीकीएल २५:३-७; आमोस १:१३-१५; सेफन्याह २:८-११

49 अम्मोनी आन पर्बम परमप्रभु यावेमी “मार, इस्राएल आ तौपुकी मबाक्नीमी? मार, मेको आ हक ताइब सुइ मबाक्नीमी? मारदे मिल्कोम देवता आ मुरपुकीमी गाद आ बाक्तीके आन के सेल्मे? मिनु मारदे मिल्कोम आ मुर सहरम बाक्थ लमा?” दैत। *मिल्कोम देवता मोलेक यो देंनीम। १राजा ११:५*<sup>2</sup> मोपतीके परमप्रभु यावेमी “गो अम्मोनी आन रब्बाह कली लडाइ डा तुराही ताश्शो नेंपाइक्नुड। मेको श्येत्य डांडा खोदेशो दुम्ब। मिनु मेको आ एर ओंथ डा गाउं मीम क्रोइक्चा पुंइसीनीम। मेना इस्राएलमी आ कली रोइक्ब आन कली रोइक्ब” दे परमप्रभु यावेमी दैत।

<sup>3</sup> परमप्रभु यावेमी “हेश्बोन रोंका पावो। मारदे हना ऐ सहर खतम पोक्शो बाक्ब। गे रब्बाह डा तमी, वाइ ब्रेश्शा डाक्कीन। भाइया फेंसीशा रोंका पने। वाम ग्याम दुम्शा एर ओंथ दोरीन। मारदे हना मिल्कोम, आ चढ़ेबपुकी नु आ नोले खोइक्ब ग्याइश्शा लाइक्चा पुंइसाक्म।<sup>4</sup> गे मारदे इ सक्ति ठेयब लेशशा बाक्नेवे? इ सक्ति ग्युम्ब। गे हेंथे गाक्ब तमी, गे इ शोंप कली थमा सुइश्शा ‘सुमी आं कली लडाइ तोइबा डा’ देंनेवे।<sup>5</sup> गो परमप्रभु, मुर नेल्ल आन परमप्रभु यावे नड। गो इ नेक्था बाक्ब मुर रे हिंतीक श्येत गेपाइक्नुड। गे नेल्ल एर ओंथ फ्रचा पुंइसीनीनी। मिनु प्रोक्शो आन कली खुप्ब सुइ मबाक्नीम।<sup>6</sup> मो हना यो गो नोले अम्मोनी आन शोंप लेशशा गेनुड” दे परमप्रभु यावेमी दैत। येरमीया ४८:४७

एदोम आ पर्बम लोव

यसैया २१:११; यसैया ३४:५-१५; इजीकीएल २५:१२-१४; आमोस १:११-१२

<sup>7</sup> मुर नेल्ल आन परमप्रभु यावेमी एदोम आ पर्बम “मुल तेमान सहरम तुइक्तीक मबाक्बा डा? मार, रुप्ब मुर आन अर्ती जाग्शा लमे? मार, मेको आन रुप्तीक योल्मे? <sup>8</sup> ए देदानम बाक्बपुकी, लेशशा प्रोक्कीन। लुक्च लने। मारदे हना गो एसाव कली सजाइ गेची ना मेको कली हिंचा डा श्येत गेनुड।<sup>9</sup> अडगुर सेक्बपुकी इ बाक्तीके जाक्तेक्म हना, मार, मेकोपुकीम अरु सीला गुप्तीके मप्रॉइनीमी डा? मार, नाक्दो खुइ जाक्शो नम हना, मेकोपुकीमी आन कली माल्शो थोव्रक ला मलाइक्नीमी डा? <sup>10</sup> तन्न गो एसाव कली शिश्रा सेल्ला। गो मेको आ खूइक्तीक नेल्ल तांइसीतीके सेल्ला। मिनु मेको खूइक्चा मताइब। मेको आ आल, आ खिं डा मुर, आ नेक्था बाक्ब नु आंमा यो मली।<sup>11</sup> इ रोम रोइक्च आन कली प्रॉइशा वोतो। गो मेको आन कली कोव्रनुडमी। मिनु वॉइश बेक्शो मीश मुरपुकीमी यो आं कली थमा सुइक्चा तामेक्ल” दैत।

<sup>12</sup> परमप्रभु यावेमी “श्येत डा कचौरा तूचा ममाल्शोमी यो मेको तूचा माल्ताक्व हना, मार, गे सजाइ मतथु ब्रॉइचा ताइनेवे? गे सजाइ तचा माल्नेवे। गे मेको तूचा माल्नेवे। येरमीया २५:१५, २८, २९; भजन संग्रह १३७:७<sup>13</sup> मारदे हना बोच्चा ब्रेश्शा हिंचा डा, शुक्शी पाइक्चा पुंइसीब, श्येत्य नु सराप पाइक्तीके दुम्ब, दे आं नेंम कसम जाता। मिनु आ सहर नेल्ले गेना हना यो कली ब्रेश्शा लीनीम” दैत।<sup>14</sup> गो परमप्रभु यावे आ लोव कुरब रे पा लोव का नेंता। लोव कुरब का रागी रागी डा मुर आन पर्बम सोइश्शो बाक्ब। मेकोमी “लडाइ तोचा कली बुक्कीन। लडाइ पचा कली सासीन” दैत।<sup>15</sup> परमप्रभु यावेम “मुल गो इ कली रागी रागी आन दाते डा नेल्ल क्येडा आइक्च सेल्नन। मुरपुकीमी इ कली महिक्नीम।<sup>16</sup> गे सेरथे फुल्लु आ पुक्खीम बाक्नेवे। इ हिंच कोंइतीके नु इ थुं डा ठेयब लेत्तीकेमी इ कली जोल पाम्ताक्स। गे डांडा डा बाक्तीक आंम के सेल्तीवी। गेमी इ बाक्तीक ककाकुली आ ग्योव्र खोदेशो पा इर सेल्तीवी हना यो, गो इ कली मेकेर रे उइ तोक्नन” दे परमप्रभु यावेम देंशो बाक्ब।<sup>17</sup> परमप्रभु यावेम “एदोम थम हिंचा डा दुम्ब। सु सु मेकेर लाइनीमी, मेको एदोम आ शुश श्येत तशा हिंनीमी। मिनु शुक्शी पाइनीम।<sup>18</sup> दोपा सोदोम, गोमोररा नु मेको आस एर ओंथ डा सहर नेल्ल श्येत्य दुम्मा, मोपा मेकेर सुइ मलीनीम। सुइ मबाक्नीम। येरमीया ५०:४०; यसैया १:९<sup>19</sup> यर्दन आ नेक्था डा ठेयब ब्वाकी रे बस्तु भाव योव्रतीकेम गुप्स जाक्शो खोदेशो पा गो एदोम कली याम कामी मेको आ रागी रे गुंइनुड। गो सु कली सासन पचा कली योव्रडु, मेको कली गेनुड। आं खोदेशो सु बाक्बा? आं कली सुम अरेने चाप्बा डा? तेको गोठला आं डोंइती राप्ने चाप्बा डा?” दे परमप्रभु यावेमी दैत येरमीया ५०:४४-४६<sup>20</sup> मोपतीके परमप्रभु यावेम एदोम आ पर्बम पचा चिक्शो गेय नु तेमान सहरम बाक्ब आन पर्बम मेको आ मिश्शो दोदेशो बाक्बा, मेको नेनीन। थमा पा बगाल डा आइक्च कीशा लाइक्चा पुंइसीनीम। मेको आन पतीके आन योव्रतीक खतम दुम्ब।<sup>21</sup> मेको आन गोल्शो रेयकेमी रागी खिंखि पाइब। मेको आन वाइ ब्रेश्शो लल समुन्द्र सम्म नेंसीब।<sup>22</sup> कोव्रडीन, मेको ककाकुली खोदेशो पा बेरशा जाक्ब। मिनु मेको जुक्शा बोच्चा तार मेको आ फ्रां हाम्ब। मेको नाक्ती एदोम डा लडाइ पाइब आन थुं सुत्केरी रोइ पशो मीश मुर आन थुं खोदेशो दुम्ब। येरमीया ४८:४०

दमस्कस आ पर्बम लोव

यसैया १७:१-३; आमोस १:३-५

<sup>23</sup> परमप्रभु यावेमी दमस्कस आ पर्बम “हमाथ नु अरपाद वाम ग्याम दुम्शो बाक्नीस। मारदे हना मेको निक्शीमी मरिश्शो लोव नेंताक्स। मेको हिंशा आस थुं ग्येत्य लुक्च दुम्शो बाक्नीस। मिनु समुन्द्र खोदेशो पा सिक्सी पा बाक्ने मचाप्नीस।<sup>24</sup> दमस्कस मचाप्ब दुम्शो बाक्ब। मेको प्रोक्त। मेको शुश हिंब। मेको सुत्केरी रोइ पशो मीश मुर खोदेशो पा सुर्ता पा हिंब।<sup>25</sup> दोपा मेको नें चलेशो सहर प्रॉइचा पुंइसे? मेको सहर डा मुर शुश ग्येरसाक्म।<sup>26</sup> मुल मेको आ ठिटा मुरपुकी लां मेर गोल्नीम। मिनु मेको नाक्ती मेको आ लडाइ पाइब नेल्ल खतम दुम्नीम।<sup>27</sup> गो दमस्कस डा गारोपुकीमी सुइक्नुडमी। मेकोमी बेन-हादाद आ गारो हिरशो सहर खतम सेल्ब” दे मुर नेल्ल आन परमप्रभु यावेम दैत।

केदार नु हासोर आस पर्बम लोव

<sup>28</sup> बेबीलोन डा पिप नेबुकदरेसरम केदार नु हासोर आस कली ग्रात। एको केदार नु हासोर आस पर्बम पशो लोव बाक्ब। मिनु परमप्रभु यावेमी “बोक्कीन। केदार मेर लने। पूर्ब डा मुर आन कली खतम पोक्कीन। यसैया २१:१६-१७; यहोसु ११:१०<sup>29</sup> मेको आन ताम्बु, मेको आन क्यारश भेडा, मेको आन वासी नु आन मारेइ मारेइ लतीन। आन दलओंठ रोइश्शा आंम के सेल्सीन। मिनु मुरपुकीम ‘एर ओंथ नेल्ल हिंचा डा श्येत बाक्ब’ दे ग्रीचा माल्नीम। येरमीया २०:३<sup>30</sup> ए, हासोरम बाक्बपुकी, रीब पा प्रोक्कीन। लुक्च लशा खूइश्शा बाक्कीन। बेबीलोन डा पिप नेबुकदरेसरमी इन कली मरिश्शो पचा मिश्शो बाक्ब। मेकोम इन कली मरिश्शो पचा कली गेय का पशो बाक्ब” दे परमप्रभु यावेमी दैत।<sup>31</sup> मिनु “बेबीलोन डा पिप

नेबुकदनेसरमी इन कली श्येत गेचा मिम्ब। इन कली मरिम्शो पचा मिम्ताक्व। बोक्कीन, थुं नाइश्शा रिम्शो पा बाक्ब मुर गे बारीन। मेको रागी डा मुर आन के ठेयब लाप्चो नु चोक्तीके मबाक्नीम। मेको रागी डा मुर अरु क्येडा डोन बाक्नीम। <sup>32</sup> मेको आन दलओँठ रोइक्वा पुंडसीनीम। आन बी ब्यफ यो रोइक्वा पुंडसीनीम। मेको चां प्रेक्शो मुर आन कली तेइ तेइ ब्रपाइक्नुडमी। मिनु मेको आन कली हिंचा डा श्येत गेनुड। *येरमीया २५:२३* <sup>33</sup> हासोर सिवार आन बाक्तीके दुम्ब। मेको गेना हना यो कली मुर मबाक्तीक रागी दुम्ब। मेकेर सुइ मबाक्नीम, मेकेर सुइ मुर बाक्थ मलाइनीम” दे परमप्रभु यावेम देंत। *येरमीया ४९:१३*

### एलाम आ पर्वम लोव

<sup>34</sup> यहूदा डा पिप सिदकीयाहम सासन पचा गोवा ना परमप्रभु यावेम आ लोव पाइब येरमीया कली एलाम आ पर्वम लोव पाप्तु। *येरमीया २५:२५* <sup>35</sup> मुर नेल्ल आन परमप्रभु यावेम मार लोव पाप्तु देंशा हना “गो एलाम आ लिब्रा जिक्नुड। मेको आन लिब्रा आन ठेयब सक्ति बाक्ब। *यसैया २२:६* <sup>36</sup> गो एलाम डा मुर आन कली सरीड आ एर ओँथ नेल्ल रे फश गिवार पपाइश्शा एर ओँथ ब्रपाइक्नुडमी। एलाम डा ग्याइश्शा लाइक्वा पुंडसीशो नेल्ल रागी रागीम ब्राइनीम। <sup>37</sup> मेको एलाम डा मुर आन कली, आन जोरी सत्रु नु मेको आन कली साइक्वा माल्ब आन डोंइती शुश हिंब सेल्लुडमी। गो मेको आन कली ठेयब श्येत गेनुड। गो मेको आन कली साइक्वे मथुमु सम्म मेको आन नोले तरवार सोइक्नुड। *इजीकीएल ३२:२४* <sup>38</sup> गो आं नित्तीके एलामम सेल्लुड। मिनु मेकेर डा पिपी नु मेको आन ठेयब मुर आन कली साइक्नुडमी” दे परमप्रभु यावेमी देंत। <sup>39</sup> परमप्रभु यावेमी “मो हना यो गो मुल नोले डा नाक्ती एलाम डा मुर आन शोंप लेशशा गेनुडमी” दे परमप्रभु यावेमी देंत।

बेबीलोन आ पर्वम लोव  
यसैया १३:-; यसैया १४:-

**50** परमप्रभु यावेम बेबीलोन नु कल्दी आन रागी आ पर्वम येरमीया कली लोव पाप्तु। *यसैया ४६:१* <sup>2</sup> मार लोव पाप्तु देंशा हना “रागी रागी डा मुर आन दातेमी एको लोव नेंपतो। छेदर पोक्शा नेल्ल आन कली नेंपाइश्शा ठेयब सेंदा पा देनो। लोव का यो मखुइक्तो। बेबीलोन ब्रुत। बेल देवता मुने दोक्त। मेरोदक देवता सुर्ता पाइब। मेको आन मूर्ति मुने दोक्नीम। मेको सुर्ता पाइनीम। *बेल बेबीलोन सहर डा देवता बाक्ब।* <sup>3</sup> उत्तर रे रागी का डा मुरपुकीम मेको कली लडाइ तोइनीम। मिनु मेको आ रागी श्येथ सेल्लनीम। मेकेर सुइ मबाक्नीम। मुर नु जन्तु नेल्ल प्रोक्नीम।

<sup>4</sup> मेको नाक्ती इस्त्राएल डा मुरपुकी नु यहूदा डा मुरपुकी काथा डाक्ना डाक्न परमप्रभु यावे, आन परमप्रभु कली माल्थ गाक्नीम। *येरमीया ३१:९* <sup>5</sup> मेकोपुकीमी ‘सियोन गे लतीक लां ते बाक्बा?’ दे हिल्लो पाइनीम। मिनु ‘इन गाक्शो लांन बाक्ब’ देंनीम। मेकोपुकीमी गेना हना यो लीब मप्रेंतीके कबल पा परमप्रभु यावे कली जिम्मा गेंसीनीम। *येरमीया ३२:४०* <sup>6</sup> आं मुरपुकी जाम्शो भेडा खोदेंशो बाक्तेक्म। मेको आन गोठलापुकीम मेको आन कली हेंथे गाक्पाइश्शो बाक्तेक्म। मिनु मेको आन कली डांडा मेर हिरपाइश्शो बाक्तेक्म। मेकोपुकी डांडा पहाड सम्म हिरसाक्म। मिनु आन गोठ प्रेंताक्मे। *येरमीया २३:१* <sup>7</sup> मेको आन कली थिप्बपुकीम मेको आन कली नेक्तेक्म। मिनु मेको आन जोरी सत्रुमी ‘गो दोसी मनकी। मारदे हना मेकोपुकीमी परमप्रभु यावे कली पाप पाप्तेक्म। मेको आन ठीक पा जोतीके नु आन किकी पिपी आन आस पशो, परमप्रभु यावे बाक्त’ देंतेक्म।

<sup>8</sup> बेबीलोन रे प्रोक्कीन। कल्दी आन रागी प्रोनीन। मिनु क्यारश भेडा आन कली लां कोंइब बोका खोदेंशो दुमीन। *येरमीया ५१:६; यसैया ४८:२०* <sup>9</sup> मारदे हना गो उत्तर रे ठेयब रागी रागी डा लडाइ पाइब आन कली बेबीलोन आ पर्वम क्युक्शो बाक्नुड। मेकोपुकी लडाइ पचा कली सासीनीम। मिनु मेको कली लडाइ तोइनीम। मेको आन ब्रा थाम्पा लडाइ पस जोक्ब मुर खोदेंशो बाक्नीम। मेकोपुकी मोशा मलेत्नीम। <sup>10</sup> मोपा कल्दी रागी रोइक्वा पुंडसीब। मिनु मेको कली रोइक्ब नेल्ल रूनीम” दे परमप्रभु यावेम देंत।

<sup>11</sup> परमप्रभु यावेम “गे ग्येरसीनीनी। शुश ग्येरसीने। गे आं शोंप रोइक्ब बाक्नीनी। दांड पाइब मगिक्शो बी खोदेंशो पा प्रेनीनी। गे शारा खोदेंशो पा ग्रीनीनी। <sup>12</sup> इन ममा थाम्पा मुने दोक्ब। इन कली जरमेब शिशी मताइब। मेको इन रागी रागी आन दातेमी नेल्ल क्येडा आइक्च दुम्ब। मेको मुर मबाक्तीके सोवशो रागी नु गोरशो रागी दुम्ब। <sup>13</sup> परमप्रभु यावे आ चुरतीकेमी मेकेर सुइ मबाक्नीम। मेको थम श्येथ रागी दुम्ब। बेबीलोन रे पा गाक्ब मेको तशा हिंनीम। मिनु मेको आ श्येत तशा शुक्शी पाइनीम। *येरमीया ५१:३७* <sup>14</sup> गे लिब्रा आप्बपुकी, बेबीलोन आ एर ओँथ इन बाक्तीकेम राप्शा बाक्कीन। ब्रा कली का यो महेक्थु आप्पीन। मारदे हना मेकोमी परमप्रभु यावे कली पाप पाप्तु। <sup>15</sup> मेको आ एर ओँथ नेल्ल बाक्शा, ठेयब सेंदा पा ग्रीडीन। मेको इन कली जिम्मा गेंसीब। मेको आ बोल्यो दरवार एल्तेक्म। मेको आ गारो प्रेत्वा पुंडसीशा दोक्तेक्म। मारदे हना मेको परमप्रभु यावे आ क्येक्क लेशशो बाक्ब। मेको कली क्येक्क लेत्तीन। मेकोमी अरु आन कली पाइश्शो खोदेंशो पा मेको कली यो पतीन। *प्रकाश १८:६* <sup>16</sup> गे बेबीलोनम वांचेर शोक्ब आन कली खेरीन। मीशो अन्न रिक्ब आन कली खेरीन। खतम पोक्ब तरवारम पतीके नेल्ल आन कली आन आन खिं डा मुर आन बाक्तीके लेशशा लचा गेने। मेको नेल्ल आन आन रागी प्रोक्वा माल्नीम।

<sup>17</sup> इस्त्राएल गुप्सपुकीम खेदा पा एर ओँथ ब्रपाइश्शो भेडा खोदेंशो दुम्शो बाक्ब। मेको कली डोंइती अस्सुर डा पिपम दाक्तु। मिनु नेल्ल क्येडा नोले बेबीलोन डा पिप नेबुकदरेसरमी मेको आ रुश नेल्ल नेक्तु” देंत। <sup>18</sup> मोपतीके मुर नेल्ल आन परमप्रभु यावे, इस्त्राएली आन परमप्रभुमी “गो बेबीलोन डा पिप नु मेको आ रागी कली अस्सुर डा पिप कली सजाइ गेशो खोदेंशो पा, सजाइ गेनुड। *२राजा १९:३५* <sup>19</sup> गो इस्त्राएल कली आं कली योवतीकेम लेशशा चाक्नुड। मिनु मेको कारमेल नु बाशान मेर जोइब। एफ्राइम नु गिलाद डा पहाड मेर मेको आ शोवलु बेक्शो रूब। <sup>20</sup> मेको नाक्ती इस्त्राएल आ मरिम्शो पशो माल्शा कोवशा हना यो, मथिंसीब। यहूदा आ पाप माल्शा हना यो, मथिंसीब। मारदे हना गो आं प्रोंइशा वोइश्शो लीशो आन कली आन पाप माफ गेतामी। *येरमीया ३३:७-८*

<sup>21</sup> मेराथाइम रागी कली लडाइ तोने। पेकोद आ मुर आन कली लडाइ तोने। मिनु नेल्ल खतम पोक्कीन। गो इन कली अरेशो खोदेंशो पा, नेल्ल पने” दे परमप्रभु यावेमी देंत। <sup>22</sup> लडाइ डा रेयके नु ठेयब खतम दुम्तीके आन नेक्था बाक्ब। <sup>23</sup> दोपा रागी नेल्ल डा घन जिक्शा फस दुम्मे, मोपा बेबीलोन रागी रागी आन दातेमी शुश हिंचा डा दुम्ब। *येरमीया ५१:२०* <sup>24</sup> बेबीलोन, गो इ कली ब्वारद का दाइक्ताक्ड। गे मतुइक्थु ग्याइक्वा पुंडसीनेवे। मिनु इ कली थिश्शा, ग्याइक्वा ताइतक। मारदे हना गे परमप्रभु यावे कली मरिम्शो पशो बाक्ते। <sup>25</sup> परमप्रभु यावेम आ या वोइक्तीक खिं रोक्तु। मिनु आ चुरशो डा या थुंइताक्व। मारदे हना मुर नेल्ल आन परमप्रभु यावेमी कल्दी आन रागीम गेय का पचा माल्ब। <sup>26</sup> मेको आ एर ओँथ नेल्ल रे लडाइ पथ जाक्कीन। मेको आ अन्न वोइक्तीक खिं रोक्कीन। मेको कली अन्न खोदेंशो पा तेलीन। मेको कली मारदेइ मलीशो खतम सेलीन। मेको के मारदेइ मलील। <sup>27</sup> मेको आ सांठे ब्यफ नेल्ल सतीन। मेको आन कली क्योरचा कली लतीन। आबी, आबी, मेको आन नाक्ती जाक्त। मेको आन कली सजाइ गेतीक नाक्ती जाक्त।

<sup>28</sup> मिनु परमप्रभुमी “नेनीन, बेबीलोन रे प्रोक्ब मुर नु मेकेर बाक्ब अर्को रागी रे प्रोक्शो मुरुम सियोनम ‘परमप्रभु यावे, आंइ परमप्रभुमी क्येक्क लेप्ब। आ खिं आ पर्वम क्येक्क लेप्ब’ दे नेल्लेम नेंचा डा पा शेंनीम।

<sup>29</sup> बेबीलोनी आन कली लिब्रा आप्बपुकी ब्रेत्तीन। लिब्रा आप्ब नेल्ल आन कली ब्रेत्तीन। मेको आ एर ओँथ नेल्ल ताम्बु कीशा मुर आन कली तेक्कीन। मेकेर रे सुइ ब्रोंइचा मतामेक्ल। मेको आ पशो खोदेंशो पा मेको कली क्येक्क लेत्तीन। मेकोमी पशो खोदेंशो पा, मेको कली यो पतीन। मारदे हना मेकोमी इस्त्राएली आन का ला बाक्शो परमप्रभु यावे कली शुक्शी पाप्तु। *येरमीया ५०:१५* <sup>30</sup> मोपतीके मेको आ ठिटा मुरपुकी लां मेर गोल्नीम। मिनु मेको आ लडाइ पाइब नेल्ल खतम दुम्नीम” दे परमप्रभु यावेम देंत।

<sup>31</sup> परमप्रभु, मुर नेल्ल आन परमप्रभु यावेमी “गो इ कली ठेयब लेशशो दुम्तीके काइ मदाक्नुड। इ नाक्ती जाक्त। इ कली सजाइ गेतीक नाक्ती

जावत। 32 ठेयब लेशशो मुर दाइल पा गोल्ब। मेको कली पोक्ब सुइ मबाक्नीम। मिनु गो मेको आ सहरम मी सुइक्नुड। मेको मीम मेको आ एर ओंथ बाक्ब नेल्ल आन कली दाक्ब” देंत।

33 मुर नेल्ल आन परमप्रभु यावेमी “इसाएल डा मुर नु यहूदा डा मुर श्येत गेचा नु दिप्चा पुंडसीनीम। मेको आन कली ग्याइशा लाइक्बपुकीम मेको आन कली लचा मगेनीम। 34 मो हना यो मेको आन कली श्येत रे प्रॉइब सक्ति पाइशो बाक्ब। मेको आ नें मुर नेल्ल आन परमप्रभु यावे बाक्ब। मेकोमी मेको आन कली आ सक्तिमी थमा पा वारच पाइब। मिनु रागी कली रिम्शो दुम्पाइक्ने चाप्ब। तन्न बेबीलोनम बाक्ब आन कली चहिं थुं नाइक्चा मगेब” दे परमप्रभु यावेमी देंत।

35 मिनु परमप्रभु यावेमी “कल्दी आन कली तरवार का जावत। बेबीलोनम बाक्ब नेल्ल आन कली, आन ठेयब मुर आन कली नु आन जोक्ब तुइक्ब मुर आन कली यो तरवार जावत। 36 मेको आ जादू कली यो तरवार का जावत। मोपतीके मेकोपुकी मूर्ख दुम्नीम। मेको आ लडाइ पाइब आन कली यो तरवार का जावत। मिनु मेको खतम दुम्नीम। 37 मेको आ शारा, आ बग्गी नु मेको आन दातेम बाक्ब अर्को रागी डा लडाइ पाइब आन कली साइक्चा कली तरवार जावत। मोपतीके मेकोपुकी मीश मुर खोदेंशो दुम्नीम। मेको आ शॉप नेल्ल आन कली तरवार जावत। मेको नेल्ल रोइक्तीक दुम्ब। येरमीया ५१:३० 38 मेको आ ब्वाक्कु सोत्रचा कली काइ रेउ मयी। मारदे हना मेको शुश मूर्ति आन रागी बाक्ब। मिनु मेको आ देवी देवता आन पर्वम निप्स ग्राइशो खोदेंशो दुम्ब।

39 मोपतीके बेबीलोन सहरम ब्वाकी डा जन्तु नु फरपुकी बाक्नीम। मिनु मेकेर ठेयब चिक्ब बास बाक्नीम। मेकेर मुल लेंशा नेल्ल पाला सम्म मुर मबाक्नीम। 40 मिनु सोदोम, गोमोररा नु मेको आस एर ओंथ डा गाउं आन कली लोकशो खोदेंशो पा बेबीलोन सहरमी सुइ मबाक्नीम। मेकेर मुर मबाक्तीके दुम्ब” दे परमप्रभु यावेमी देंत। येरमीया ४९:१८; उत्पत्ती १९:२४-२५

41 कोत्रडीन, मुरपुकी उत्तर रे जाक्ना जाक्न बाक्नीम। शुश जात डा नु शुश पिप आन जोब बोक्शा डोन रागी रे जाक्नीम। येरमीया १:१४ 42 मेकोपुकी लिब्रा नु तूतीक कुरशो, थम मरिम्शो पाइब नु शिशी मपाइक्ब बाक्नीम। मेको आन रेयके समुन्द्र ग्रीशो खोदेंशो बाक्ब। मेकोपुकी शारा डोइशा जाक्नीम। मेको लडाइ तोचा कली आन बाक्तीकेम राप्नीम। बेबीलोन आ तमी, इ कली लडाइ तोचा कली जाक्नीम। येरमीया ६:२३ 43 मिनु बेबीलोन डा पिपम मेको आन पर्वम लोत्र नेंतु। मिनु आ थुं लुक्च लत। मेको सुत्केरी रोइ पशो मीश मुर खोदेंशो पा सुर्ता पा हिंत।

44 यर्दन आ नेक्था डा ठेयब ब्वाकी रे बस्तु योवतीकेम गुप्स जाक्शो खोदेंशो पा गो मेको कली याम कामी मेको आ रागी रे गुंइनुड। गो सु कली सासन पचा कली योवडु, मेको कली गेनुड। आं खोदेंशो सु बाक्बा? आं कली सुम अरेने चाप्बा डा? तेको गोठला आं डोंइती राप्ने चाप्बा डा? येरमीया ४९:१९ 45 मोपतीके परमप्रभु यावेम बेबीलोन आ पर्वम पचा चिक्शो गेय नु कल्दी रागी डा मुर आन पर्वम मिम्शो दोदेंशो बाक्बा, मेको नेनीन। थमा पा लाइक्चा पुंडसीनीम। बेबीलोन डा प्रुडग मुर आन कली यो कीशा लाइक्चा पुंडसीनीम। मेको आन बाक्तीक मेको तथा हिंब।

46 बेबीलोन कली ग्रामानु, मेको आन रेयकेम रागी खिंखि पाइब। मेको आन वाइ ब्रेशो रागी रागी डा मुर आन दातेमी नेंसीब।

### बेबीलोन खतम दुम्शो

51 मिनु परमप्रभु यावेमी “गो बेबीलोन नु लेब-कमाइ डा मुर आन पर्वम खतम सेल्ब फश गिवार कली सोइक्नुड। खतम सेल्ब फश गिवार कली यो खतम सेल्ब सोक्त देंसीब। 2 गो बेबीलोन कली क्राप्ब मुर सोइक्नुडमी। मेकोपुकीम बेबीलोन आ श्येत जतीक नाक्ती आ एर ओंथ नेल्ल रे जाक्शा, मेको आ रागी श्येत्य सेल्नीम। येरमीया १५:७ 3 लिब्रा आप्बम आ लिब्रामी ब्रा मचुइक्तल। मिनु लडाइ पाइबमी आ लडाइ डा वा मफेक्सेक्ल। मेको आ ठिटा मुर आन कली मप्रोनीन। मेको आ लडाइ पाइब नेल्ल आन कली सतीन। 4 मेकोपुकी कल्दी आन रागीम साइक्चा

पुंडसीनीम। मेकोपुकी आ लां मेर गार दुम्शा गोल्नीम। 5 मिनु इस्राएल नु यहूदा परमप्रभु, मुर नेल्ल आन परमप्रभु यावे रे मप्रॉइसीशो बाक्ब। मेको आन रागी इस्राएली आन का ला बाक्शो परमप्रभु यावे कली पापम ब्रीशो बाक्ब। यसैया ५४:४; येरमीया ५०:२९

6 बेबीलोन आ दाते रे प्रोक्कीन। मुर नेल्ल आंम आंम गिंग प्रॉइचा कली प्रोक्कीन। मेको आ दोसम पतीकेम गे मबेक्कीन। मारदे हना मेको परमप्रभु यावे आ क्येक्क लेत्तीक नाक्ती बाक्ब। मेकोमी मेको कली आ तचा माल्शो सजाइ गेब। येरमीया ५०:८; प्रकाश १८:४ 7 बेबीलोन परमप्रभु यावे आ गुडम सुन के कचौरा का बाक्त। मेकोमी रागी नेल्ल डा मुर आन कली दुक्पाइक्तु। रागी रागी डा मुरपुकीम मेको आ अडगुर शांबु तूतेक्म। मोपतीके मेको रागी डा मुर निप्स ग्यशो दुम्तेक्म। प्रकाश १७:४; येरमीया २५:१५; प्रकाश १८:३ 8 बेबीलोन याम कामी गोल्त। मिनु टुक्रा टुक्रा सेल्चा पुंडसाक्व। मेको आ पर्वम रोंका पने। मेको आ गारम खेक्चा कली खेक्तीक चाक्कीन। मो पशोनु, मेको साबा कों। यसैया २१:९ 9 गोपुकीम बेबीलोन कली सापाइय्य वा। तन्न मेको मसाब। गो मेको कली प्रॉइतक। मिनु आंम आंम रागी लेत्तक। मारदे हना मेको आ निसाफ पशो सजाइ स्वर्ग सम्म जाक्दीशो बाक्ब। मेको सरीड सम्म बोक्शो बाक्ब। 10 परमप्रभु यावेमी आंइ ठीक पतीके कोंइताक्व। जाक्कीन, मिनु इं परमप्रभु यावेमी मार पवा, मेको सियोनमी नेंपाइशा देंय।

11 इन ब्रा शेप्पीन। मिनु ब्रा कुरतीक प्रिंटीन। परमप्रभु यावेम मादी आन पिप कली लडाइ पपाइक्तु। मारदे हना मेकोमी बेबीलोन कली खतम सेल्चा कली मिम्ताक्व। मेको आ खिं आ पर्वम क्येक्क लेत्तीके बाक्ब। यसैया १३:१७; येरमीया ५०:२८ 12 बेबीलोन डा गारो आ डोंइती छेदर खूक्कीन। शुश कोत्रब वोतीन। खाल पाइब वोतीन। बाप्ब आन कली ठीक पा वोतीन। परमप्रभु यावेमी बेबीलोन डा मुर आन पर्वम आ मिम्शो पाप्तु। 13 गे शुश ब्वाक्कु आ नेक्था बाक्नेवे। इ शॉप शुश बाक्नीम। मुल इ नाक्ती जाक्त। इ ब्रॉइतीक नाक्त नुप्त। प्रकाश १७:१ 14 मुर नेल्ल आन परमप्रभु यावेम आ नेंम कसम जाप्तु। गो थमा पा सल्हा खोदेंशो पा लडाइ पाइब मुर जाक्पाइशा, इ रागी प्रिंनुडमी। मिनु मेकोपुकीमी इ क्येडा ग्राशो आ पर्वम ठेयब सेंदा पा रेयके पाइनीम।

15 मेकोमी रागी कली आ सक्ति सेल्तु। मेकोमी आ तुइक्तीकेम रागी कली वोइक्तु। मेकोमी आ रुप्तीकेम सरीड प्राक्तु। येरमीया १०:१२-१६ 16 मेकोमी लोत्र पवानु, सरीडमी रेउ यिशा, गरड गुरुड पाइब। मेकोमी रागी आ सुर रे गोस्स पोक्ब। रेउ नु काथ काथा चिला दाप्पाइक्ब। मिनु फश आ बाक्तीक रे गुंइशा, फश पपाइक्ब। बजन संग्रह १३५:७ 17 मुर नेल्ल मूर्ख नु मजोक्ब मतुइक्ब बाक्नीम। सुन चेम्ब नेल्ल आन मूर्तिम पतीके मुने दोक्नीम। मारदे हना मेको आन सेल्शो मूर्ति सोक्त मपाइशो जोल बाक्नीम। 18 मेको शोर गाक्शो बाक्नीम। मेको मुर आन मिम्शो ला बाक्नीम। मेको आन कली सजाइ गेशोनु, मेकोपुकी खतम दुम्नीम। 19 परमप्रभु यावे मेको खोदेंशो ममाइ। परमप्रभु यावे याक्ब आ भाग बाक्ब। मेको आन खोदेंशो ममाइ। मारदे हना परमप्रभु यावे मारेइ मारेइ सेल्ब बाक्ब। मिनु इस्राएली मेको आ मुर बाक्नीम। मेको आ नें मुर नेल्ल आन यावे बाक्ब।

20 बेबीलोन, गे लडाइ पचा कली आं तुप्तीके नु लडाइ पतीक या बाक्नेवे। गो इ रे पा रागी रागी डा मुर आन कली तुप्तामी। गो इ रे पा राज्य आन कली खतम पोक्तामी। येरमीया ५०:२३ 21 गो इ रे पा शारा नु शारा डोइक्ब आन कली तुप्तामी। गो इ रे पा बग्गी नु बग्गी चलेब आन कली तुप्तामी। 22 गो इ रे पा वॉइश मुर नु मीश मुर आन कली तुप्तामी। गो इ रे पा खूशो नु ठिटा आन कली तुप्तामी। गो इ रे पा ठिटी नु ठिटा आन कली तुप्तामी। 23 गो इ रे पा गोठला नु मेको आ बगाल कली तुप्तामी। गो इ रे पा रू दोइब नु आन ब्यफ आन कली तुप्तामी। गो इ रे पा सरकार आ गेय पाइब नु हुकुम पाइब आन कली तुप्तामी। 24 गो इ डोंइती बेबीलोन नु कल्दी रागीम बाक्ब मुर नेल्लेम सियोनम मरिम्शो पशो आ पर्वम क्येक्क लेत्तुड” दे परमप्रभु यावेम देंत। येरमीया ५०:२९; अय्युब १:१७

25 परमप्रभु यावेमी “गे मारेइ मारेइ आन कली साइक्ब डांडा, गो इ कली काइ मदाक्नुड। गे रागी नेल्ल खतम सेल्नेवे। गो आं गुइ दिशा, इ कली रोंगु रे उइ तोक्नन। मिनु कोक्त जेशो डांडा सेल्नन। 26 खिं डा सुर वोइक्चा

कली इ रे पा फुल्लु का यो मलाइक्नीम। जग वोइक्का कली यो इ फुल्लु मलाइक्नीम। तन्न गे गेना हना यो कली श्येत्थ रागी दुम्चा माल्नेवे" दे परमप्रभु यावेम देंत।

27 मिनु परमप्रभु यावेमी "गे रागीम छेदर का खूक्कीन। रागी रागी आन दातेमी तुराही तपीन। मेको नु लडाइ पचा कली रागी रागी डा मुर आन कली ठीक सेलीन। राज्य आन कली बेबीलोन नु लडाइ पचा कली पोक्कीन। आरारात, मिन्नी नु अश्केनजमी बेबीलोन नु लडाइ पाइब आन ठेयब मुर का योव्रडीन। सल्ला आन हुल खोदेंशो पा शुश शारा चाक्कीन। *यसैया १३:३ उत्पत्ती १०:३* 28 मेको नु लडाइ पचा कली रागी रागी डा मुर आन कली पोक्कीन। मादी आन पिप, मेको आन हुकुम पाइब, मेको आन ठेयब मुर नु मेको आन हुकुम पशो रागी नेल्ल डा मुर आन कली पोक्कीन" देंत। 29 खिनु कुशा रागी खिंखि पाइब। मारदे हना परमप्रभु यावेम बेबीलोन कली श्येत्थ नु मुर मबाक्तीके सेल्लुड देंशो लोव्र गाप्ब। 30 बेबीलोन डा लडाइ पाइबपुकीम लडाइ पचा प्रॉइतेक्म। मेको आन बोल्यो दरवारम बाक्नीम। मेको आन सक्ति जाम्त। मेकोपुकी मीश मुर खोदेंशो दुम्तेक्म। मेको आन खिंम मी सुइक्ने थुम्तेक्म। मेको आन लाप्चो डा आग्लो जिवशो बाक्नीम। *येरमीया ५०:३७* 31 लोव्र कुरबम अर्को लोव्र कुरब आन कली लांम गुम्नीम। मेकोपुकीमी बेबीलोन डा पिप कली "मेको सहर नेल्ल ग्रातेक्म। 32 मिनु खोला शोक्तीके ग्रातेक्म। जोरी सत्रु आन कली ओव्रचा मगेचा कली सेल्शो तेक्तीक नेल्ल मी सुइक्ताक्मे। मिनु लडाइ पाइबपुकी शुश हिंशा वाम ग्याम दुम्तेक्म" देंशा पिप कली लोव्र नेंपाइक्नीम। 33 मिनु मुर नेल्ल आन परमप्रभु यावे, इस्राएली आन परमप्रभुमी "बेबीलोन आ तमी दांइ पतीक खला का खोदेंशो दुम्ब। मेको दिप्चा पुंडसीब। इच्का नोले रिक्वी नाक्ती रीब पा जाक्ब" देंत।

34 सियोनमी "बेबीलोन डा पिप नेबुकदरेसरमी आं कली दाक्ती। आं कली खतम सेल्लती। आं कली श्येत्थ गर खोदेंशो सेल्लती। आं कली अजीडगरम खोदेंशो पा दाक्ती। मिनु ब्रोव्रशो जचा थोव्रकम खोदेंशो पा आ कोव्रज प्रिताक्व। मिनु नोले आं कली ताइक्ताक्वी। 35 आं मुर आन कली साइश्शो आ पर्बम बेबीलोन क्येक्क लेत्वा पुंडसीब" देंत। सियोन डा यरूसलेममी "कल्दी रागीम बाक्ब मुरपुकीम 'आं हुश आ क्येक्क लेत्वा पुंडसीनीम' देंचा माल्नीम" देंत। 36 मोपतीके परमप्रभु यावेमी "गो इ पो न बोक्नुड। गो इ कली गेशो श्येत आ क्येक्क लेत्नुड। गो मेको आ समुन्द्र सोव्रपाइक्नुड। आ ब्वाक्कु बुक्तीके यो सोव्रपाइक्नुड। 37 मिनु बेबीलोन खिं ब्रेश्शा देल्शो, सिवार आन बाक्तीके, हिंचा डा नु शुक्शी पाइक्का पुंडसीतीके नु मुर मबाक्तीक दुम्ब। *येरमीया ५०:१३*

38 मेकेर डा मुर नेल्ल गुप्स खोदेंशो पा ग्रीनीम। मेकोपुकी गुप्स आन चाइक्ब खोदेंशो पा डरर डरर पाइनीम। 39 नोले मेकोपुकी बोक्शा, मार मार माल्मेनु, गो मेको आन कली तूतीक खेत्नुड। मिनु गो मेको आन कली रिश्शा ग्यारशा मपामे सम्म दुक्पाइक्नुडमी। मिनु गेना हना यो कली इप्नीम। मिनु गेनायो मसंसीनीम" दे परमप्रभु यावेमी देंत। 40 मिनु परमप्रभु यावेमी "गो मेको आन कली क्योरचा कली कीशा लाइश्शो पाठा, सांड नु क्यारश खोदेंशो पा चाक्नुडमी।

41 शेशाक सहर कली दोपा ग्राने चाप्मे? रागी नेल्ल डा ठेयब नु दारशो सहर ब्रुत। बेबीलोन दोपा रागी रागी आन दातेमी शुश हिंचा डा दुम्मे? *शेशाक बेबीलोन कली अरु नें का बाक्ब। येरमीया २५:२६* 42 समुन्द्र डोइश्शा बेबीलोन कली सुम्तु। समुन्द्र आ ग्रीशो छालम मेको कली सुम्तु। 43 मेको आ सहरपुकी हिंचा डा दुम्तेक्म। सोव्रशो, गोरशो नु मुर मबाक्तीके दुम्तेक्म। मेको रे पा सुइ मगाक्नीम। 44 गो बेबीलोन डा बेल देवता कली सजाइ गेनुड। मिनु आ दाक्शो थोव्रक मेपाइक्नुड। मुल रागी रागी डा मुर मेकेर चोक्शी क्राक्शी पा मलाइक्नीम। बेबीलोन आ गारो ब्रेत्त। *येरमीया ५०:२; यसैया ४६:१*

45 आं मुरपुकी मेकेर रे गूशा पिने। गे नेल्ल ब्रॉइचा कली प्रोक्कीन। परमप्रभु यावे आ ठेयब पा गाइश्शो रे प्रोक्कीन। 46 रागीम मारेइ रेयके नेंनीनु, इन थुं ग्येत्थ लुक्च मदुमीन। महिनीन। एको बर्सम खाल का डा रेयके नु अर्को बर्सम अर्को खाल डा रेयके नेंसीब। मेको रागीम हुश ख्राक्श

पोक्शोनु, सासन पाइब कामी अर्को सासन पाइब कली जिचा तोशो रेयके बाक्ब।

47 गो बेबीलोन डा मूर्ति आन कली सजाइ गेनुडमी। मेको आ रागी नेल्ल मुने दोक्नीम। मिनु मेको आ मुर नेल्ल मेको आ दातेमी साइक्का पुंडसीनीम। मोदेंशो नाक्ती थमा पा जाक्ब। 48 मिनु नोले सरीड, रागी नु मेकेर बाक्ब नेल्लेमी बेबीलोन ब्रुशो आ पर्बम ग्येरशा वाइ ब्रेत्नीम। मारदे हना मेको आन कली क्येक्क लेप्ब उत्तर रे जाक्नीम" दे परमप्रभु यावेम देंत। *प्रकाश १८:२०* 49 परमप्रभु यावेमी "इस्राएली आन कली साइक्तीके बेबीलोन ब्रुचा माल्ब। बेबीलोनम रागी डा मुर आन कली साइक्तीके बेबीलोन यो साइक्का पुंडसीब।

50 गे तरवार रे ब्रॉइशा प्रोक्कीन। देश मपने। डोन रागीम बाक्शा, परमप्रभु यावे कली मिम्तीन। यरूसलेम इन थुंम वोतीन" देंत। *भजन संग्रह १३७:५* 51 मेकोपुकीमी "आंइ कली शुक्शी पाइश्शो नेंशा, गो मुने दोक्ताक। गो आंइ कुल सुम्ताक। मारदे हना परमप्रभु यावे आ खिंम अर्को रागी डा मुर जाक्शा ओव्रतेक्म" देंतेक्म।

52 परमप्रभु यावेमी "गो मेको आ रागी नेल्लेमी आन मूर्ति आन कली सजाइ गेनुडमी। मिनु मेकेर गार दुम्शो मुर हुकयी पाइनीम। मेको नाक्ती थमा पा जाक्ब। 53 बेबीलोन इर सरीड सम्म बोक्त हना यो, आ इर डा सहर बोल्यो सेल्लु हना यो, गो मेको कली खतम सेल्बपुकी सोइक्नुडमी" दे परमप्रभु यावेमी देंत। *उत्पत्ती ११:४; यसैया १४:१३*

54 परमप्रभु यावेम "बेबीलोन रे वाइ ब्रेश्शो सेंदा नेंसीब। कल्दी डा मुर आन रागी रे मारेइ मारेइ प्रेशो रेयके नेंसीब। 55 परमप्रभु यावेम बेबीलोन कली श्येत्थ सेल्ब। मिनु मेको आ ठेयब सेंदा सिक्सी पपाइक्ब। मेको आ छाल समुन्द्र खोदेंशो पा रेयके पाइब। 56 बेबीलोन कली खतम पोक्ब जाक्ब। बेबीलोन डा लडाइ पाइबपुकी ग्याइक्का पुंडसीनीम। मेको आन लिब्रा जिक्नीम। मारदे हना परमप्रभु यावे क्येक्क लेप्ब बाक्ब। मेकोमी आ पशो आ पा डा नेल्ल गेब। *ब्यवस्था ३२:३९-४१* 57 गो मेको आ सरकार डा गेय पाइब, जोक्ब तुइक्ब, मेको आ हुकुम पाइब, नु आ लडाइ पाइब नेल्ल आन कली दुक्पाइक्नुडमी। मिनु मेकोपुकी गेना हना यो कली इप्नीम। लेंशा मबोक्नीम" दे पिपम देंत। मेको पिप आ नें मुर नेल्ल आन परमप्रभु यावे बाक्ब।

58 मुर नेल्ल आन परमप्रभु यावेम "बेबीलोन डा ब्रेश्शो गारो दिंम दुम्ब। मिनु मेको आ लाइश्शो ठेयब लाप्चोपुकी मीम नेक्ब। मुरपुकी मोशा गेय पाइनीम। रागी रागी डा मुर आन श्येत पा पशो गेय नेल्ल मी कली ला दुम्ब" दे परमप्रभु यावेमी देंत। *हबकुक २:१३*

59 परमप्रभु यावे आ लोव्र पाइब येरमीयामी माहसेयाह आ चच नेरीयाह आ तौ सेरायाह पिप आ गेय पाइब कली अरेप्तु। मिनु मेको यहूदा डा पिप सिदकीयाहम सासन पवा आ ४ बर्सम पिप नु बेबीलोन लशो बाक्त। *येरमीया ३६:४* 60 येरमीयामी बेबीलोनम जाक्का चिक्शो श्येत आ पर्बम डा लोव्र कागज काम ब्रेक्ताक्व। बेबीलोन आ पर्बम नेल्ल ब्रेक्ताक्व। *येरमीया ५०:१-५०,५८* 61 मिनु येरमीयाम सेरायाह कली "गे बेबीलोनम जाक्कीनेनु, एको लोव्र नेल्ल पढेवो। 62 'परमप्रभु यावे, गे एको रागी कली खतम पोक्नुड' देंतीनी। 'एकेर मुर नु बी ब्यफ, क्यारश भेडा, मारेइ बास मबाक्का डा पा श्येत्थ रागी सेल्लुड। एको गेना हना यो मुर मबाक्तीके दुम्ब' देंतीनी" देनो। 63 मोपा एको कागज पढेने थुम्शा, फुल्लु काम फ्रेंशा युफ्रेंटीस खोलाम ताइक्तो। *प्रकाश १८:२१* 64 मिनु "कागज ब्वाक्कुम गुम्शो खोदेंशो पा बेबीलोन आं चाक्शो श्येत आ पर्बम गुम्ब। मेको गेनायो गूने मचाप्ब, देंचा माल्नेवे" देंत। मोपा येरमीया आ लोव्र नुप्त।

यरूसलेम खतम दुम्शो

येरमीया ३९:१-१०; २राजा २४:१८-२५-७; २इतिहास ३६:११-२१

52 सिदकीयाह पिप दुम्मेनु, २१ बर्स दुम्शो बाक्त। मिनु मेकोम यरूसलेममी ११ बर्स सासन पाप्तु। मेको आ ममा आ नें हामुतल बाक्त। मेको लिब्ना डा येरमीया आ तमी बाक्त। 2 मिनु मेकोम येहो-याकीममी खोदेंशो पा परमप्रभु यावे आ डोंइती मार मरिश्शो बाक्मे, मेको पाप्तु। 3 मिनु यरूसलेम नु यहूदा डा मुरपुकीमी परमप्रभु यावे कली शुश

गाइक्पाइक्तेक्म। मोपतीके मेकोमी मेको आन कली आ डोंइती रे तिल्लु। मिनु बेबीलोन डा पिप सिदकीयाहम कली मटीव।<sup>4</sup> सिदकीयाहम सासन पवा आ ९ बर्स, १० महिना, १० नाक्त बेबीलोन डा पिप नेबुकदरेसरमी आ लडाइ पाइब नेल्ल कुरशा, यरूसलेम नु लडाइ पथ जाक्त। मिनु मेकोपुकीमी सहर आ लाडगा रे पुम्ताक्म। सहर डा गारो डोइक्वा कली एर ओंथ डोइक्तीक सेल्लेक्म।<sup>5</sup> मोपा पिप सिदकीयाहम सासन पवा आ ११ बर्सम सहर आ एर ओंथ नेल्ल रे पुम्ताक्म।<sup>6</sup> मिनु ४ महिना डा ९ नाक्ती सहरम थम ठेयब अन्काल दुम्त। मिनु मेको सहर आ आगामी जचा कली मारेड मबा।<sup>7</sup> मिनु सहर डा गारो प्रेत्तेक्म। मिनु लडाइ पाइब नेल्ल प्रोक्तेक्म। कल्दी डा मुरपुकी सहर आ एर ओंथ बाक्तेक्म। मो हना यो मेकोपुकी पिप आ फल फुल रू डा गारो निक्शी आस दाते डा लाप्चो रे पा गूशा प्रोक्तेक्म। मिनु मेकोपुकी अराबाह रागी गे लाम्तेक्म।<sup>8</sup> तन्न कल्दी डा लडाइ पाइबपुकीमी पिप सिदकीयाह कली खेदा पाम्तेक्म। मिनु मेको कली यरीको डा दिंम थित्तेक्म। मेको आ लडाइ पाइब नेल्ल ब्रशा एर ओंथ दुम्तेक्म।<sup>9</sup> मिनु मेको ग्याइक्वा पुंडसाक्व। मिनु मेकोपुकीमी पिप कली हमाथ रागी डा रिब्लामी बेबीलोन डा पिप आ डोंइती चाक्तेक्म। मिनु मेकेर बेबीलोन डा पिपमी मेको कली आ सजाइ नेंपाइक्तु।<sup>10</sup> मेको रिब्लामी बेबीलोन डा पिपमी सिदकीयाह आ तौ आन कली मेको आ डोंइतीन साइक्तीमी। मिनु यहूदा डा ठेयब मुर नेल्ल आन कली यो रिब्लाम साइक्तीमी।<sup>11</sup> मिनु मेकोमी पिप सिदकीयाह आ मिक्च फेत्ताक्व। मिनु मेको कली कांसा के साडलोमी पाइक्ताक्म। मिनु मेको कली बेबीलोनमी लाइश्शा मबेक्म सम्म चोक्शा वोइक्तु। *येरमीया ३२:५*

<sup>12</sup> बेबीलोन डा पिप नेबुकदरेसरमी सासन पवा आ १९ बर्स ५ महिना १० नाक्ती पिप कली खाल पाइब आन कप्तान नेबुजरादान यरूसलेममी जाक्त।<sup>13</sup> मिनु मेकोमी परमप्रभु यावे आ खिं, पिप आ दरवार नु यरूसलेम डा खिं नेल्लेम मी सुइक्ताक्व। मेकोमी ठेयब खिं नेल्लेम मी सुइक्ताक्व।<sup>14</sup> मिनु पिप कली खाल पाइब आन कप्तान नु बाक्शो कल्दी डा लडाइ पाइब नेल्लेम यरूसलेम आ एर ओंथ बाक्शो गारो नेल्ल प्रेत्तेक्म।<sup>15</sup> मिनु पिप कली खाल पाइब आन कप्तान नेबुजरादानमी नेल्ल आन क्येडा प्रुडग, सहरम प्रोंइशा वोइश्शो मुरपुकी बेबीलोन डा पिप आ बाक्तीके प्रोक्शा जाक्दीश्शो मुरपुकी नु लीशो मार, मार, सेल्स जोक्ब मुर आन कली ग्याइश्शा लाइक्तीमी।<sup>16</sup> तन्न पिप कली खाल पाइब आन कप्तान नेबुजरादानमी रागी डा अडगुर रू नु अरु रूम गेय पचा कली, थम प्रुडग आन कली ला प्रोंइशा वोइक्तीमी।

<sup>17</sup> कल्दीपुकीमी परमप्रभु यावे आ खिंम बाक्शो कांसा के थामपुकी, कांसा के ठेयब चिक्तीके बोस, मेको आ कांसा के नित्तीके लाइक्तेक्म। कल्दीपुकीमी मेको नेल्ल प्रोल्शा, बेबीलोन लाइक्तेक्म। *येरमीया २७:१९-२२; १राजा ७:१५-३९; २राजा २५:१३-१७*<sup>18</sup> मेकोपुकीमी बोसपुकी, बेल्यापुकी, सल्दो खोइक्तीक कांडची, अरु बोसपुकी, डाडु नु कांसा के बोस नेल्ल नु चढ़ेचा कली माल्शो मारेड मारेड लाइक्तेक्म।<sup>19</sup> पिप कली खाल पाइब आन कप्तानम सुन नु चांदीम सेल्शो आइक्च लोटापुकी, कोइला कुर

पतीक, बोसपुकी, बत्ती दातीकपुकी, डाडु, तूचा थोव्रक चढ़ेशोनु माल्तीक बोसपुकी नेल्ल लाइक्तु। *१राजा ७:१५-३७*<sup>20</sup> पिप सोलोमनम परमप्रभु यावे आ खिं कली सेल्पाइश्शो ठेयब थाम निक्शी, कांसा के ठेयब चिक्तीके बोस मेको आगाम बाक्शो १२ ओटा कांसा के ब्यफ नु मेको आगाम बाक्शो नित्तीके बाक्तेक्म। मेको आन कांसा नाक्ने मचाप्चा डा शुश बाक्त।<sup>21</sup> मेको थाम निम्फा १८, १८ कुबीत लाइश्शो, १२, १२ कुबीत ब्रेम्शो नु आस थांइशो ४, ४ अडगुल बाक्ताक्स। मिनु आस आगा चिं श्येथ बाक्ताक्स। *कुबीत का ०.५ मिटर खोदेंशो बाक्व*।<sup>22</sup> मेको आ तार कांसा के पिया पाइश्शो बाक्त। मेको आ पिया ५ कुबीत लाइश्शो बाक्त। मेको आ पिया कांसा के जाली नु दारीम आ बुटामी एर ओंथ नेल्ल हिरशो बाक्त। मिनु अर्को थाम यो डोंइती डा खोदेंशो पा सेल्शो बाक्त।<sup>23</sup> मेको आस एर ओंथ नेल्ल ९६ ओटा दारीम बाक्तेक्म। मेको आस एर ओंथ नेल्ल डा जाली कली हिरशो दारीम सहे का बाक्तेक्म।

<sup>24</sup> मिनु पिप कली खाल पाइब आन कप्तानमी ठेयब चढ़ेब सेरायाह, मेको आ नोले डा चढ़ेब सेफन्याह नु लाप्चो खाल पाइब सां आन कली ग्याइश्शा लाइक्तीमी।<sup>25</sup> मिनु मेकोमी सहरम मेना सम्म लीशो लडाइ पाइब आन कली कोव्रब कप्तान का नु पिप कली अर्ती गेब ७ जना मुर आन कली ग्याइश्शा लाइक्तीमी। मेको रागीम लडाइ पाइब आन कली पुक्ब आन कप्तान आ ब्रेक्ब मुर नु सहरमी थिश्शो अरु ६० जना वोंइश मुर आन कली यो ग्याइश्शा लाइक्तीमी।<sup>26</sup> मिनु मेको पिप कली खाल पाइब कप्तान नेबुजरादानमी मेको आन कली लाइश्शा रिब्लामी बेबीलोन डा पिप आ बाक्तीकेम चाक्तीमी।<sup>27</sup> मिनु बेबीलोन डा पिपम मेको आन कली हमाथ रागी रिब्ला सहरम साइक्तु। मोपा मेकोपुकी यहूदा आ रागी रे ग्याइश्शा लाइक्वा पुंडसाक्म।

<sup>28</sup> मिनु नेबुकदरेसरमी सासन पवा आ ७ बर्सम ग्याइश्शा लाइश्शो मुरपुकी हिक्शोनु, हजार सां २३ जना यहूदी बाक्तेक्म।<sup>29</sup> मेकोमी सासन पवा आ १८ बर्सम यरूसलेम रे ८ सहे ३२ जना आन कली ग्याइश्शा लाइक्तु।<sup>30</sup> मेकोम सासन पशो २३ बर्स दुम्मेनु, पिप कली खाल पाइब आन कप्तान नेबुजरादानमी ७ सहे ४५ जना यहूदी आन कली ग्याइश्शा लाइक्तीमी। मिनु मेको मुर नेल्ल पा ४ हजार ६ सहे जना बाक्तेक्म।

येहो-याकीन कली प्रोंइशो

२राजा २५:२७-३०

<sup>31</sup> यहूदा डा पिप येहो-याकीन कली ग्याइश्शा लाइश्शो ३७ बर्समी एवील-मेरोदक बेबीलोन डा पिप दुम्त। मेको आ सासन पशो १२ महिना २५ नाक्ती दुम्मेनु, मेकोमी यहूदा डा पिप येहो-याकीन कली चोक्तीक रे प्रोंइपाइक्तु।<sup>32</sup> मेकोमी मेको नु रिम्शो पा लोव्र पा बेबीलोनम आं नु बाक्शो पिप नेल्ल आन क्येडा ठेयब सेल्शा, मेको कली मान गेशा वोइक्तु।<sup>33</sup> मोपा येहो-याकीनमी आ जेल्खानम फेक्तीक वा प्रुइश्शा, आ लीशो नाक्ती नेल्ल पिप नु जशा बाक्शा पाप्तु।<sup>34</sup> बेबीलोन डा पिपमी येहो-याकीन कली नाक्त किंत किंत मेको मबेक्म सम्म आ माल्शो मारेड मारेड गेप्तु।

## बिलाप

एको किताब येरमीयामी ब्रेक्शो बाक्ब।

एको किताब ५८७-५८६ बि. सी. परमप्रभु यावे आ खिं नु यरूसलेम खतम दुम नोले ब्रेक्शो बाक्ब।

येरमीया आ सेल्शो बिलाप ५ ओटा कुम्सो बाक्नीम। मेको कुम्सोपुकीम मार लोत्र बाक्ब देशा हना:

१. डोंइती डा लोत्र यरूसलेम सहर वोंइश बेक्शो मीश खोदेंशो दुम्शो बाक्ब।
२. आ नोले डा लोत्र परमप्रभु यावे आ निसाफ पचा आ पर्बम बाक्ब।
३. नोले डा लोत्र ब्रेक्बमी आम आ पर्बम ब्रेक्ब।
४. नोले डा लोत्र लेंशा ठेयब श्येत आ पर्बम बाक्ब।
५. मिनु नेल्ल क्येडा नोले डा लोत्र “परमप्रभु, गे लेत्वा गेयीनी” दे पुंइतीक बाक्ब।

यरूसलेममी “वारच पने” दे पुंइशो

१ मेको सहरम गिश श्येत्थ दुम्मे। डोंइती मेकेर शुश मुर बाक्तेक्म। मेको आ वोंइश बेक्शो मीश मुर खोदेंशो दुम्त। मेको डोंइती रागी रागी आन दातेमी ठेयब बाक्त। मेको रागी पिप आ तमी खोदेंशो बाक्त। मुल मेको सहर वाइल खोदेंशो दुम्त। *येरमीया* ५१:५<sup>२</sup> मेको नाक्दो हिशेक पा डाक्ब। आ प्रेक्क यिना यिन बाक्नीम। मेको आ दाक्शो मुर आन दाते डा सुइम मेको कली आ थुं बारपाइक्वा डा लोत्र मपाइनीम। आ वारच नेल्लेम मेको कली प्रोंइतेक्म। मुल मेको आ जोरी सत्रु दुम्तेक्म। *भजन संग्रह* ६९:२१<sup>३</sup> यहूदा श्येत जशा, ग्याइश्शा लाइक्वा पुंइसाक्व। मुल श्येत पा गेय पाइब दुम्त। मुल मेको रागी रागी डा मुर आन दातेमी बाक्ब। नाइक्वा कली बाक्तीक मबा। आ कली खेदा पाइबपुकीमी मेको कली श्येतमी ग्याइश्शा लाइक्तेक्म।<sup>४</sup> सियोन लतीक लां रोंका पाइनीम। मारदे हना सुइमी चाड मानेचा कली मेकेर रे मगाक्नीम। सहर डा ठेयब लाप्चो नेल्ल श्येत्थ बाक्नीम। आ चढेबपुकी हुकयी पाइनीम। आ मीश आल सुर्ता पाइनीम। मिनु सहरम श्येत जशो बाक्ब।<sup>५</sup> मेको आ जोरी सत्रु आ होत्रप दुम्तेक्म। मेको आन माल्शो शुश ताइनीम। मारदे हना परमप्रभु यावेमी मेको आ शुश हेंथे पशो तशा, यरूसलेम कली श्येत गेप्तु। मेको आ आल ग्याइश्शा लाइक्वा पुंइसीशा, आन जोरी सत्रु आन डोंइती लाम्तेक्म।<sup>६</sup> सियोन आ तमी रे पा आ मान पचा पुंइसीतीके नेल्ल लने थुम्तु। आ पिप आ तौपुकी जोतीकेम थिश्शो रोकेश खोदेंशो दुम्तेक्म। मेको बोल मपाइश्शो दुम्शा, आन कली खेदा पाइब आन डोंइती प्रोक्ना प्रोक्न बाक्नीम।

<sup>७</sup> यरूसलेममी ठेयब श्येत जतीक नु सुर्ता पतीक नाक्ती जाक्वा क्येडा डोंइती आम के बाक्शो शोंप नेल्ल मिम्ब। मेको आ मुर आन जोरी सत्रु आन गुइमी गेचा पुंइसीची ना सुइमी मेको कली वारच मपाम। आ जोरी सत्रुम मेको आ श्येत तशा शुक्शी पाम्तेक्म।<sup>८</sup> यरूसलेममी ठेयब पाप पाप्तु। मोपतीके मेको शुक्शी पाइक्वा पुंइसाक्व। डोंइती मेको कली मान पाइब नेल्ले मुल महिक्नीम। मारदे हना मेकोपुकीमी मेको कली शिश्रा ताम्तेक्म। मेको आंमान हुकयी पा आ कुल खूइक्ब।<sup>९</sup> मेको आ ग्रंग्रा दितीके आ गुनेमी केम्साक्व। मेकोमी नोले डा नाक्त ममिम्त। मेको आ तशो श्येत हिंचा डा बाक्त। आ थुं बारपाइक्ब सुइ मबाक्म। मेकोमी “परमप्रभु यावे, आं श्येत कोवडीन। आं जोरी सत्रुमी आं कली ग्रातेक्म।

<sup>१०</sup> आ जोरी सत्रुमी आ शोंप नेल्ल रोइक्ताक्वीमी। गे मेको आन कली इन बाक्तीके खिंम ओव्रचा मगेतीनी हना यो, यरूसलेममी रागी रागी डा मुर इन खिं ओव्रचा ताम्तेक्म। *येरमीया* ५२:१७-१९; *ब्यवस्था* २३:४<sup>११</sup> मेको आ मुर नेल्ल हुकयी पा, अन्न माल्ना माल्न गाक्नीम। लेंशा बोल्यो दुम्चा कली आन शोंप लेयनीम। परमप्रभु यावे, मुल आं कली कोवडीन। गो महिक्वीशो दुम्ती” देंती।

<sup>१२</sup> गे एको लां रे पा लाइब तशा, आन पर्बम मारेइ ममिम्नीनी? एर ऑथ नेल्ल कोवडीन। आं श्येत क्येडा यो अरु हिंचा डा श्येत बाक्वा? परमप्रभु यावेमी आ शुश गाइक्तीकेमी आं कली मेको श्येत गेती।<sup>१३</sup> मेकोमी इर रे मी सोइक्ताक्व। मिनु आं रुश आगा ओव्रपाइक्ती। आं खोइल कली ग्याइल दाइश्शा रेप्पाइक्ती। आं कली आ डोंइती रे तिल्ली। मेकोमी नेल्ल नाक्त आं कली मुर मबाक्तीके नु बोल मपाइश्शो सेल्ली।<sup>१४</sup> मेकोमी आं हेंथे पतीके जुवा खोदेंशो सेल्लु। मिनु मेको आ गुइमी फ्रेंसाक्व। मेको आं बला तारी शुश हेल्शो बाक्ब। मोपा आं बोल ग्युम्त। मिनु परमप्रभुमी आं कली आं ग्राने मचाप्चा डा मुर आन गुइमी गेती।<sup>१५</sup> परमप्रभुमी आं दाते डा लडाइ पाइब नेल्ल आन कली प्रोंइतु। मुल मेकोमी आं कली वारच मपथु, आ ठिटा वोंइश मुर नेल्ल आन कली साइक्तु। परमप्रभुम अडगुर खाक्शो खोदेंशो पा यहूदा डा कन्ने मीश आल, यरूसलेम कली खाक्शो बाक्ब। *यसैया* ६३:३<sup>१६</sup> गो मार कली डाक्नुडा, मार कली आं प्रेक्क यीनीम देंशा हना, आं कली लेम्ब नु आं थुं बारपाइक्ब आ क्येडा डोन बाक्नीम। आं आल लने थुम्तेक्म। मारदे हना आं जोरी सत्रु आं क्येडा बोल्यो बाक्तेक्म।

<sup>१७</sup> सियोनमी पुंइचा कली आ गुइ दिंताक्व। तन्न आ थुं बारपाइक्ब सुइ मबाक्म। परमप्रभु यावेमी “याक्ब आ नेक्था डा मुर आ जोरी सत्रु दुम्चा माल्नीम” दे अरेप्तु। मिनु मेको आन दातेम यरूसलेम ग्रंग्रा दिचा डा दुम्त। *येरमीया* १:८

<sup>१८</sup> परमप्रभु यावे ठीक पाइब बाक्ब। मारदे हना गो आ लोत्र काइ मटीब दुम्ती। तन्न गे जात जात डा मुर नेल्ल नेनीन। आं श्येत कोवडीन। आं मीश आल नु ठिटा वोंइश आल नेल्ल ग्याइश्शा लाइक्वा पुंइसाक्म। *येरमीया* ३:४२; *येरमीया* ५:१६<sup>१९</sup> गो आं दाक्शो मुर आन कली ब्रेत्ताक्ड। तन्न मेकोपुकीमी आं कली प्रोंइतीमी। आं चढेब नु खाल्पा आन बोल लेप्पाइक्वा कली जचा थोत्रक माल्न माल्ना सहरम बेक्तेक्म।<sup>२०</sup> “परमप्रभु यावे कोवडीन, गो शुश श्येत जाता। गो इन देंशो मटीब दुम्तीके आं थुं चोती। आं थुं साप्पा सेक्बेर पाइब। लाडगाम तरवारमी साइक्ब। मिनु खिं आगाम बेक्तीक बाक्ब।<sup>२१</sup> मुरपुकीमी आं हुकयी पशो नेंतेक्म। आं कली थुं बारपाइक्ब सुइ मबाक्नीम। आं जोरी सत्रु नेल्लेमी आं श्येत जशो आ पर्बम नेंतेक्म। आं कली मोदेंशो दुम्शो तशा ग्येरसाक्म। गे इन देंशो नाक्त जाक्ल। मेकोपुकी यो आं खोदेंशो पा श्येत जामेक्ल। *येरमीया* ४:२१<sup>२२</sup> मेको आन मरिश्शो पशो नेल्ल इन डोंइती बाक्ल। मिनु गे आं हेंथे पशो आ पर्बम आं कली पशो खोदेंशो पा मेको आन कली यो पतीन। गो शुश हुकयी पाइक्नुड। आं थुं लुक्च लत” देंत।

सियोन सुर्ता पशो

<sup>२</sup> परमप्रभु गाइश्शा, सियोन आ तमी कली मुने तोक्तु। इस्राएल आ दारस कली सरीड रे पा रागीमी तोक्तु। आ गाइश्शो नाक्ती आंम खोइल वोइक्तीक सियोन कली यो प्रेंताक्व। *भजन संग्रह* १३२:७-८

2 परमप्रभुमी शिशी मपथु याकूब आ बाक्तीक नेल्ल खतम सेल्लु। मोपा चुरशा यहूदा आ तमी आ गारो हिरशो सहर नेल्ल खतम सेल्लु। मेकोमी मेको राज्य नु आ सासन पाइब आन कली मान मताइब, आइक्च सेल्लु।<sup>3</sup> मेकोमी शुश चुरशा, इस्राएल डा सक्ति नेल्ल खतम सेल्लु। मेकोमी आ जोरी सत्रु आन डॉइती सियोन कली वारच पचा प्रॉइतु। मेको याकूब आ बाक्तीके आ एर ओंथ नेल्ल ग्राव ग्यु दाक्ब मी खोदेशो दुम्त।<sup>4</sup> परमप्रभुमी सियोन आ जोरी सत्रु खोदेशो दुम्शा, आ लिब्रा कीतु। आ जोरी सत्रु खोदेशो दुम्त। आंइ दाक्वशो नेल्ल आन कली साइक्तु। परमप्रभुमी आ चुरशो मी खोदेशो पा सियोन आ तमी आ ताम्बु तारी मोइक्तु।<sup>5</sup> मुल परमप्रभु सियोन आ जोरी सत्रु खोदेशो दुम्त। मेकोमी इस्राएल कली खतम सेल्लु। आ दरवार नेल्ल आन कली खतम पोक्तु। आ गारो डा लाइशो खिं नेल्ल प्रेतु। मिनु यहूदा आ तमी कली शुश रोंका नु हिशेक पपाइक्तु।<sup>6</sup> मेकोमी आंम ताम्बु कली रू डा कटेरा खोदेशो पा प्रेतु। मेकोमी आ बाक्तीके खतम सेल्लु। परमप्रभु यावेमी सियोनम चाड नु नाइक्तीक नाक्ती मानेतीक प्रॉइतु। आ शुश गाइशोम पिप नु चढेब नेल्ल आन कली मुने तोक्तु। *अय्युब २:१३; येरमीया ५:१२*<sup>7</sup> परमप्रभुम आंम कली चढेतीक नु आ बाक्तीके निम्फा प्रॉइतु। मेको आन दरवार डा गारो जोरी सत्रु आन गुइमी गेपु। मोपा मेकोपुकीमी परमप्रभु यावे आ खिंमी चाड डा नाक्त खोदेशो पा रेयके पास्तेक्म।<sup>8</sup> परमप्रभु यावेमी सियोन आ तमी आ गारो प्रेत्या कली मिन्ताक्व। मेको आ तारी पुक्तीके कीतु। मेकोमी खतम सेल्चा कली आ गुइ मतेक्म। मेकोमी गारो नु आ बोल्यो सेल्तीके निक्शी कली रोंका पपाइक्तु। मिनु मेको कालेक्म ब्रेत्ताक्स। *२राजा २१:१३*<sup>9</sup> मेको आ ठेयब लाप्चो खपीम दोक्तेक्म। मेकोमी आ आग्लो जिक्शा खतम पोक्तु। मेकेर डा पिप नु आन तौ नेल्ल रागी रागी डा मुर आन दातेमी बाक्नीम। मेकेर लां कोंइब परमप्रभु यावे आ अरेशो मबाक्ब। मिनु परमप्रभु यावे आ लोव्र पाइबपुकीमी परमप्रभु यावे रे पा मारेइ लोव्र मताइनीम।<sup>10</sup> सियोन डा खाल्या खपीम निश्शा, सिक्सी पा बाक्नीम। मेकोपुकीमी आन पियामी फुरक फुंडसीनीम। मिनु भाडग्रा फेक्शा बाक्नीम। यरूसलेम डा मीश आलपुकीमी आन पिया खप सम्म बाप्पाइशो बाक्नीम।<sup>11</sup> गो डाक्ना डाक्न बाक्नुड। आं थुं चोइब। आं थुं खाइक्ब। मारदे हना आं मुर खतम दुम्तेक्म। आल नु दूध तूब आलपुकी सहर डा लांम शोव्रलु बेक्नीम।<sup>12</sup> मेकोपुकीमी आन ममा आन कली “जचा तूचा थोव्रक ते बाक्म” दे हिल्लो पाइनीम। मेकोपुकी सहर डा लांम गार दुम्शो लडाइ पाइब खोदेशो पा थाइनीम। मिनु आन ममा आन थुकुम बेक्नीम।<sup>13</sup> ए यरूसलेम आ तमी, गो इ पर्वम मार देंडा? गो इ कली मार नु थापु? ए सियोन आ कन्ने तमी इ थुं बारपाइक्चा कली इ कली मार नु थापु? इ श्येत समुन्द्र खोदेशो पा ठेयब बाक्ब। सुइम इ कली सापाइक्ने मचब।<sup>14</sup> इ परमप्रभु यावे आ लोव्र पाइब आन लोव्र नेल्ल जोल नु शोर गाक्वशो बाक्तेक्म। मेकोपुकीमी इ कली रिम्शो दुम्ल, दे इ मरिम्शो पशो आ पर्वम लोव्र मपाम। तन्न मेकोपुकीमी इ पर्वम पशो लोव्र नेल्ल जोल नु दूली लां कोंइब बाक्त। *येरमीया १४:१४-१६; येरमीया २३:१६-२२*<sup>15</sup> इ नेक्था रे पा लाइब नेल्लेमी इ कली तशा शुक्शी पाइनीम। यरूसलेम आ तमी तशा शुक्शी पा आन पिया हिम्नीम। मेकोपुकीमी “एको सहर कली नेल्ल क्येडा दारशो नु रागी डा नेल्ल क्येडा दाक्वशो सहर देंनीमी, ममाइ डा?” देंनीम। *भजन संग्रह ४८:३; इजीकीएल १६:१४*<sup>16</sup> इ जोरी सत्रु नेल्लेमी इ पर्वम मरिम्शो लोव्र पा शुक्शी पाइनीम। मेकोपुकीमी आन गाइक्तीकेमी “गो मेको कली खतम सेल्लक। एको नाक्ती कोव्रचा कली रिम्ताक्क। मुल गो ताइतक” देंनीम।<sup>17</sup> परमप्रभु यावेमी मार मिन्ता नु डॉइती मार पाइनुड देंमे, मेको पापु। साइ डॉइती हिंच कोइशा देंशो लोव्र मुल पापु। मेकोमी शिशी मपथु, नेल्ल खतम सेल्लु। मिनु इ जोरी सत्रु आन कली इ पर्वम ग्येरपाइक्तु। इ जोरी सत्रु आन सक्ति ठेयब सेल्लु।<sup>18</sup> गे सियोन आ तमी, आ गारो परमप्रभु कली ठेयब सेंदा पा पुनो। इ प्रेक्क खोला खोदेशो पा नाक्दो नाक्त यिपतो। याम का यो मनाइसो। शुश डाक्को।<sup>19</sup> बोक्को। नाक्दो डाक्शा पुनो। खाल पाइब आन गेय पची ना यो मो पावो। इ थुं डा श्येत परमप्रभु आ डॉइती ब्वाक्कु खोदेशो पा लुक्तो। लांमी बाक्ब इ शोव्रलु बेक्वशो आल आन पर्वम इ गुइ परमप्रभु गे पोक्शा पुनो।

20 “परमप्रभु यावे कोव्रडीन। गे सु कली ओदेशो पा श्येत गेनी। मार मीश मुरपुकीमी आंम आल आन कली ब्बचा माल्नीमी? मार इन कली चढेब नु इन लोव्र पाइबपुकी इन बाक्तीकेमी साइक्चा पुंडसीचा माल्नीमी? *ब्यक्स्था २८:५३-५७; येरमीया १९:९*<sup>21</sup> ठिटा नु खाल्यापुकी लांम गोल्लो बाक्नीम। आ ठिटी मीश मुर नु ठिटा वोंइश मुर तरवारमी साइक्चा पुंडसाक्म। गे इन गाइशो नाक्ती मेको आन कली शिशी मपाइक्थु साइक्तीनी।<sup>22</sup> गे एर ओंथ डा आं जोरी सत्रु आन कली चाड मानेचा कली खोदेशो पा ब्रेत्ताक्नी। परमप्रभु यावे आ गाइशो नाक्तीमी सुइ मुर प्रोक्शा ब्रोंइचा मताइनीम। गो आं थिशो नु कोल्पाइशो आल आन कली आं जोरी सत्रुमी साइक्तेक्म” देंती।

मुर आन पर्वम रोंका पशो

3 परमप्रभु आ चुरशोमी आं कली कोक्केम तुप्ती।<sup>2</sup> मेकोमी आं कली खेदा पा छेडछेड रे छिडछिडमी गाक्पाइक्ती।<sup>3</sup> मेकोमी नाक्त किंत किंत आं कली श्येत गेना गेन बाक्ब।

4 आं रां नु कुशुल नेल्ल सोव्रपाइक्ती। मिनु आं रुश जिक्तु।<sup>5</sup> मेकोमी आं कली सुर्ता पतीक नु श्येत जतीकेम पुम्शा गिल्पाइक्ती।<sup>6</sup> मेकोमी साइ नेसी डा बेक्वशो मुर आन कली खोदेशो पा आं कली छिडछिडमी बाक्पाइक्ती।

7 मेकोमी आं कली प्रोक्ने मचबल, दे चोक्ती। आं कली हेल्शो साडलोमी पाइक्ताक्की।<sup>8</sup> गो “वारच पाइय्नीनी” दे शुश ब्रेत्ती। तन्न आं ब्रेश्शो नेंशा यो सिक्सी पा बाक्त। *भजन संग्रह २२:३; भजन संग्रह ६९:४*<sup>9</sup> मेकोमी आं लां ठेयब फुल्लुमी तेक्तु। मिनु आं लां हिरशो सेल्लु।

10 मेको ग्राम्चा कली बाप्शा बाक्वशो वां खोदेशो बाक्ब। मिनु खुइइशा बाप्शा बाक्वशो गुप्स खोदेशो बाक्ब।<sup>11</sup> मेकोमी आं कली आं लां रे पा लाइशशा, बेदर किदर पोक्ती। मेकोमी आं कली सुइ मपाइशो सेल्ली।

12 मेकोमी आ लिब्रा कीशा, आं कली आप्ती।<sup>13</sup> मेको आ ब्रामी आं लुडगीर खिल्लेक्की।<sup>14</sup> आं मुर नेल्ले आं पर्वम रिन्नीम। मेकोपुकी नाक्त किंत किंत आं पर्वम शुक्शी पा कुम्सो पाइनीम। *अय्युब ३०:९*<sup>15</sup> मेकोमी आं थुं खाइक्पाइशशा, आं कली कशो तूचा थोव्रक तूपाइक्ती।

16 मेकोमी आं कली फुल्लु जपाइशशा, पुलुमी निप्पाइक्ती।<sup>17</sup> गो थुं नाइशशा बाक्चा मताइक्नुड। ग्येरशा बाक्चा मार बाक्मे, मेको प्रेंताक्ड।<sup>18</sup> मोपतीके गो “आं दारस नेल्ल जाम्शा लत। गो परमप्रभु यावे रे ताइनुड, दे आस पशो यो नेल्ल जाम्शा लत” देंती।

19 आं श्येत आ पर्वम मिन्तीके नु आं खिं मबाक्तीके खाइल खोदेशो पा कशो दुम्ती।<sup>20</sup> गो मेको गेना हना यो मिम्नुड। मोपतीके आं थुं लुक्च लत।<sup>21</sup> तन्न गो परमप्रभु आ लोव्र फ्रुक्शा, आ लां कोव्रनुड।<sup>22</sup> परमप्रभु यावे आ गेना हना यो दाक्तीक गेनायो मनुक्ब। आ शिशी गेनायो मनुक्ब। *नेहेम्याह ९:३१*

23 मेको सुनी कुस कुस नक दुम्शो बाक्ब। इन देंशो गेना हना यो थमा बाक्ब।<sup>24</sup> आं थुमी “परमप्रभु यावे आं भाग बाक्ब। मोपतीके गो मेको कली आस पाइनुड” देंती। *भजन संग्रह १६:५; भजन संग्रह ३:२६*

25 परमप्रभु यावेमी आ कली रिम्ब आन कली रिम्शो पाइब। सुमी मेको कली माल्नीमी, मेको आन कली रिम्शो पाइब।<sup>26</sup> सिक्सी पा परमप्रभु यावे आ श्येत रे प्रॉइतीके रिम्चा रिम्शो दुम्ब। *रोमी ८:२५*<sup>27</sup> ठिटा बाक्वशो ना आंम जुवा कुरचा रिम्शो दुम्ब।<sup>28</sup> परमप्रभुमी मुर कली आ का ला सिक्सी पा बाक्चा गेपु हना, मेको कली रिम्शो दुम्ब।<sup>29</sup> मुरुमी आ शोव्र खपीम वोदल। मोपा मेको के आस बाक्चा कों? <sup>30</sup> मेको आ चोव्रचो राप्चा गेशा, शुश शुक्शी पाइक्चा पुंडसीब दुम्ब। *मत्ती ५:३९*

31 परमप्रभुमी मुर आन कली आ डॉइती रे गेना हना यो मतिल्ब। *यसैया ५४:८*<sup>32</sup> मेकोमी श्येत गेपु हना यो, लेंशा शिशी पाइब। मेको आ गेना हना यो दाक्तीक थम ठेयब बाक्ब।<sup>33</sup> मारदे हना मेकोमी सुइ मुर आन कली श्येत गेचा मदाक्ब।

34 रागी डा जेल्लखानम चोक्चा पुंडसीशो नेल्ल आन कली खोइलीमी दिम्नीम।<sup>35</sup> नेल्ल क्येडा ठेयब आ डॉइती मुर आन कली ठीक निसाफ

मगेथु, दूली पाइनीम।<sup>36</sup> मुर आन कली दूली निसाफ पाइनीम। परमप्रभुमी मेको नेल्ल मताइबा डा?

<sup>37</sup> परमप्रभुम मअरेशो गेय सुमी अरेने नु पपाइवने चाप्पा डा? *यसैया ४५:७; आमोस ३:६*<sup>38</sup> मार नेल्ल क्येडा ठेयब आ शोत्र रे रिम्शो नु मरिम्शो लोत्र मगूबा डा? <sup>39</sup> मारदे मुरुमी आंम पाप आन पबंम सजाइ तामेनु, गन गन पाइनीमी?

<sup>40</sup> गो आंम कली नाक्शा कोत्रशा, परमप्रभु यावे गे लेल्य। <sup>41</sup> गो आंइ थुं नु गुइ स्वर्ग डा परमप्रभु गे पोव्य। <sup>42</sup> गोपुकीमी हेंथे गाक्शा, इन देंशो काइ मटिक। मिनु गे आंइ कली माफ मगेनी। *भजन संग्रह १०६:६*

<sup>43</sup> गे चुरशा आंइ कली खेदा पाइतीनी। काइ शिशी मपथु साइक्तीनी। <sup>44</sup> आंइ पुंइशो इन बाक्तीक मजाक्वा डा पा, गे गोस्सुमी गिल्साक्नी। <sup>45</sup> गे आंइ कली शुश जात डा मुर आन दातेमी ग्रांरा दिशो सेल्टीनी।

<sup>46</sup> आंइ जोरी सत्रु नेल्लेम आन शोत्र रोक्शा शुक्शी पास्तेक्म। <sup>47</sup> शुश हिंचा डा मरिम्शो दुम्तीक आंइ तार जाक्ता। <sup>48</sup> आं मुर नेल्ल खतम दुम्शो तशा, गो शुश डाक्ती।

<sup>49</sup> गो डाक्स डा डाक्स बाक्नुड। नाइक्वा मताइनुड। <sup>50</sup> परमप्रभु यावेमी स्वर्ग रे पा उइ मकोवडा सम्म मो पाइनुड। *भजन संग्रह १०२:२०-२१*<sup>51</sup> आं सहर डा मीश आल आन कली मरिम्शो दुम्शो तशा आं थुं खाइक्ती।

<sup>52</sup> आं जोरी सत्रुमी आं कली मोशीन चिक्ब कली खोदेंशो पा सिखार ग्यारतेक्म। <sup>53</sup> मेकोपुकीमी आं कली सेसीन खाल्टामी ताइक्ताक्कीमी। आं कली फुल्लुमी यो आप्तीमी। <sup>54</sup> ब्वाक्कुम आं पिया सम्म सुम्ती। मिनु गो “मुल आं ब्रॉइस ओशोन बाक्माक्ता।

<sup>55</sup> परमप्रभु यावे, शुश लुक्च लशो खाल्टा रे पा गो इन नें थोव्रता। <sup>56</sup> गे आं थोशो लोत्र नेंतीनी। आं कली प्रॉइचा कली आ थोशो लोत्र नेनीन। इन नोफा मसुने। तन्न आं कली श्येत रे प्रोनीन। <sup>57</sup> गो इन कली थोडानु, गे आं नेक्था जाक्तीनी। मिनु आं कली ‘महिने’ देंतीनी। <sup>58</sup> परमप्रभु गे आं कली वारच पाइक्तीनी। मिनु बेक्वा रे प्रॉइतीनी। <sup>59</sup> परमप्रभु यावे, गे आं कली पशो मरिम्शो नेल्ल ताइतीनी। आं कली निसाफ गेयीनी। <sup>60</sup> मेकोपुकीमी आं कली मरिम्शो पचा कली सल्ला पशो नेल्ल ताइतीनी।

<sup>61</sup> परमप्रभु यावे, गे मेको आन आं कली हिंच कोंइशा पशो लोत्र नेल्ल नेंतीनी। <sup>62</sup> मेकोपुकी नेल्ल नाक्ता आं पबंम खूइशो लोत्र पा, नोफा मुइक्मुस्तेक्मे। <sup>63</sup> मेकोपुकी निस्सामानु, बोक्मानु, आं पबंम शुक्शी पा कुम्सो पाइनीम। *येरमीया ३:१४*

<sup>64</sup> परमप्रभु यावे, मेको आन पशो कोत्रशा, मेको आन कली क्येक्क लेल्टीन। *येरमीया १:२१; भजन संग्रह १३७:८; १पत्रुस २:२३; १पत्रुस ३:९*  
<sup>65</sup> मेको आन थुं सुष्ठा गेन। इन सराप मेको आन कली रल। <sup>66</sup> मेको आन कली गाइशा खेदा पन। परमप्रभु यावे, सरीड आगा रे मेको आन कली खतम पोक्कीन” देंती।

#### सियोन कली सजाइ

**4** सुनमी आं दारस नेल्ल साम्तु। क्येख सुन मदारशो दुम्ता। शुश क्येट लाइब हीरा नेल्ल लां मेर फ्राइसीशो बाक्नीम। <sup>2</sup> सियोन आ दाक्शो आलपुकी, डोंइती सुन खोदेंशो मिम्शो बाक्तेक्म। मुल खप के ग्योब खोदेंशो दुम्तेक्म। <sup>3</sup> सिवारेम आन चाइक्ब आन कली दूध तुंइनीम। तन्न आं मुरपुकी काइ मरिम्शो दुम्तेक्म। मेकोपुकी गोरशो रागीम बाक्ब ठेयब चिक्ब खोदेंशो दुम्तेक्म। *अय्युब ३०:१४-१६*<sup>4</sup> दूध तूब आल आन लें शुश तूत दाक्शा, आन कुंकुमी खोक्ताक्व। आलपुकीमी जचा थोत्रक पुंइनीम। तन्न सुइमी मेको आन कली मारेड मगेनीम। <sup>5</sup> ब्रॉवशो ब्रॉवशो जाइबपुकी मुल लां मेर बेक्नीम। दारशो वासी फेक्शा कोल्शो मुल पुलु ताइक्तीकेम बाक्नीम। <sup>6</sup> मारदे हना आं मुर आन कली गेशो सजाइ सोदोम कली गेशो सजाइ क्येडा ठेयब बाक्ता। मेको कली याम कामीन लोक्वा पुंइसाक्व। *उत्पत्ती १८:२०; उत्पत्ती १९:२४-२५*

<sup>7</sup> मेकेर पिप आ तौपुकी फुं नु दूध क्येडा बुश बाक्तेक्म। मेको आन रां मानीक हीरा क्येडा लल बाक्तेक्म। मेको आन चां नीर हीरा खोदेंशो बाक्तेक्म। <sup>8</sup> मुल मेको आन रां कुंकी क्येडा क्येर दुम्तेक्म। मेको आन कली

लां मेर यो सुइमी मतुइक्नीम। मेको आन कुशुल रुशेम केषो बाक्ब। मेकोपुकी शी खोदेंशो पा सोत्रशो बाक्नीम। <sup>9</sup> जचा मतथु शोत्रलु पा बेक्बपुकी क्येडा तरवारमी क्योरशा साइक्वा पुंइसीबपुकी ग्येरसीशो बाक्नीम। रू डा फल मथित्थु, मेकोपुकी सोत्रशा लाइनीम। <sup>10</sup> ब्रेम्शो थुं पाइशो मीश मुरपुकीमी आंम आन आल क्येम्तेक्म। मेको आन जचा थोत्रक दुम्ता। गो आ मुर आन कली खतम सेल्टीके मोदेंशो दुम्ता। *येरमीया २:२०*<sup>11</sup> परमप्रभु यावेमी आ चुरशो नेल्ल कोंइताक्व। मेकोमी आ हिंचा डा पा गाइशो नेल्ल कोंइताक्व। मोपा सियोनमी सुइक्ताक्व। मिनु मेकेर डा जग नेल्ल दाक्ता।

<sup>12</sup> आ जोरी सत्रु यरूसलेम डा ठेयब लाप्चो रे पा ओव्रनीम, देंशो रागी नेल्ल डा पिप नु मेकेर बाक्ब मुर सुइमी यो थमा सुइवने मचबेम। <sup>13</sup> परमप्रभु यावे आ लोत्र पाइब आन पाप नु चढेब आन मरिम्शो पशो आन पबंम मो दुम्शो बाक्ता। मेकोपुकीमी सहर आ दातेम ठीक पाइब मुर आन कली हुश खाक्श पोक्तेक्म। <sup>14</sup> मेकोपुकी मिक्च मताइब खोदेंशो पा लां मेर हिरसाक्म। मेकोपुकी हुश लुम्सीशो बाक्तेक्म। मेको आन वा सुइम मथिचा डा बाक्ता। <sup>15</sup> मुरपुकीमी मेको आन कली “लने, ए ग्रांरा दिशो मुर आंइ कली मथिने” दे ग्रीनीम। मोपतीके मेकोपुकी प्रोक्ब नु हिरब मुर दुम्तेक्म। रागी रागी डा मुरपुकीमी “मुल मेको गोपुकी नु बाक्वा मताइनीम” देंतेक्म। *लेवी १३:४५*<sup>16</sup> परमप्रभु यावेमी मेको आन कली मोपा ब्रपाइक्तीमी। मुल लेंशा मेको आन कली शिशी मपाइक्ब। सुइमी चढेब आन कली मान मपामे। खाल्पा आन कली यो महिक्गेम। *येरमीया २:६; येरमीया ५:१२; लेवी १९:३२*

<sup>17</sup> वारच पाइब जाक्वा, कों देंशा लां कोत्रशा मिक्च चोप्ता। रागी कामी आंइ कली वारच पाइबा कों, दे कोत्रशा बाक्ताक। तन्न मेकोमी आंइ कली प्रॉइने मचब। <sup>18</sup> मुरपुकीमी आंइ नोले खोइक्तेक्म। मोपतीके गो आंइ लांमी गाक्ने मचाप्क। आंइ बेक्तीक नाक्ती जाक्ता। आंइ नाक्ता नुप्शो बाक्तेक्म। गो बेक्वा चिक्ताक। <sup>19</sup> आंइ कली खेदा पाइबपुकी सरीडम बेरब ककाकुली क्येडा यो रीब पा जाक्तेक्म। मेकोपुकीमी आंइ कली पहाडम खेदा पास्तेक्म। गोरशो रागीमी बाप्शा बाक्तेक्म। <sup>20</sup> मेकोपुकीमी परमप्रभु यावे आ तेल लुक्शो, आंइ कली ब्रॉइचा गेब कली ग्याइक्ताक्म। मेको आ पबंम गोपुकीमी “मेको आ वांकुम रागी रागी डा मुर आन दातेम बाक्नीकी” दे मिम्शो नकी। <sup>21</sup> एदोम आ तमी ग्येरसो। गे ऊज रागीम बाक्नेवे। तन्न गे यो मेको श्येत डा कचौरा तूचा माल्नेवे। गे दुक्नेवे। मिनु शिश्रा सेल्सीनेवे। *येरमीया ३:६४; भजन संग्रह १३७:७; येरमीया २५:१५, २१*<sup>22</sup> सियोन आ तमी इ हेंथे गाक्शो डा सजाइ नुप्ता। मेकोमी इ कली ग्याइशा लाइशो रागी रे गुंइब। तन्न एदोम आ तमी, इ हेंथे गाक्शो डा सजाइ ताइनेवे। मेकोमी इ पाप कोंइब। *यसैया ४०:२; यसैया ३४:८-१०; इजीकीएल ३५:१४-१५*

#### शिशी पन, दे प्रार्थना पशो

**5** मिनु “परमप्रभु यावे, गो आंइ कली मार दुम्शो बाक्बा, मेको मिम्तीन। आंइ कली मरिम्शो पशो कोत्रडीन। <sup>2</sup> आंइ थेरशो रू अर्को रागी डा मुर आन के दुम्ता। आंइ खिं यो अर्को रागी डा मुर आन के दुम्तेक्म। <sup>3</sup> गोपुकी रोम रोइक्च दुम्ताक। आंइ ममा वोंइश बेक्शो मीश मुर खोदेंशो दुम्तेक्म। <sup>4</sup> गोपुकीमी तूचा ब्वाक्कु यो ग्याप्चा माल्नीकी। शी यो ग्याप्चा माल्नीकी। <sup>5</sup> गोपुकी जुवा लाप्शो खोदेंशो पा आंइ कली खेदा पाइनीम। गोपुकी दशो बाक्नीकी। तन्न नाइक्वा मताइनीकी। *प्रस्थान २०:५; येरमीया ३१:२९*<sup>6</sup> गो इजीप्त नु अस्सुर रागी नु जचा थोत्रक तचा कली सल्ला पाइताक। <sup>7</sup> आंइ किकी पिपीमी पाप पास्तेक्म। मिनु बेक्तेक्म। गोपुकी मेको आन हेंथे पशो राइताक। <sup>8</sup> वाइलपुकीमी आंइ कली हुकुम पाइनीम। आंइ कली मेको आन गुइ रे पा प्रॉइब सुइ मबाक्नीम। <sup>9</sup> गोपुकीमी आंइ जचा थोत्रक बेक्वा डा गोरशो रागीम लशा, चाक्वा माल्नीकी। <sup>10</sup> गो शोत्रलु बेक्तीके आंइ कुशुल चुप्लु खोदेंशो पा होश दुम्ता। <sup>11</sup> सियोनम मीश मुर आन कली बिथोलो पाइनीम। यहूदा सहरम कन्ने मीश आल आन कली बिथोलो पाइनीम। <sup>12</sup> मेकोपुकीमी सासन पाइब आन कली क्युक्शा साइक्तेक्म। खाल्पा आन कली मान मपामे। *२राजा २५:१९-२१*<sup>13</sup> ठिटापुकीमी श्येत पा



यात हिल्या माल्नीम। वोंइश आलपुकीमी शी कुरशा गोल्चा चिक्शा गाक्नीम। <sup>14</sup> खाल्यापुकी सहर डा ठेयब लाप्चोमी गुम्शा बाक्चा प्रोंइतेक्म। मिनु ठिटापुकीमी बाजा ताप्चा प्रोंइतेक्म। <sup>15</sup> आंइ थुं रे पा ग्येरशा बाक्तीक जाम्त। गो आंइ सिल पतीक नेल्ल रोंका पतीके दुम्त। <sup>16</sup> सिरपेच आंइ पिया रे दोक्त। आबी, गो पाप पाइतक। *येरमीया १३:१८* <sup>17</sup> मोपतीके आंइ थुं खाइक्त। मिनु आंइ मिक्च ब्रा ब्रा दुम्त। <sup>18</sup> सियोन डांडाम श्येत दुम्त। मेको सिवार आन बाक्तीके दुम्त। <sup>19</sup> तन्न गे, परमप्रभु यावे गेना हना यो सासन

पाइनीनी। इन सासन पतीके नेल्ल पाला सम्म लीब। <sup>20</sup> गे मारदे आंइ कली प्रेंदीनी? गे मारदे आंइ कली इश डा नाक्त सम्म प्रोंइनी? <sup>21</sup> परमप्रभु यावे, आंइ कली इन गे लेप्पाइक्की। मिनु गो थमा पा इन गे लेलीकी। आंइ नाक्त डोंइती डा खोदेशो सेलीन। *भजन संग्रह १२६: 22* गे आंइ कली थमा पा मप्रोंइशो बाक्तीनी हना नु आंइ तशा शुश मगाइश्शो बाक्तीनी हना, मोदेशो दुम्ल" दे पुंइतक।

# इजीकीएल

साइ रे एको किताब इजीकीएल आ ब्रेक्शो बाकब देंनीम।

६२० रे ६०० बि. सी. आस दातेम ब्रेक्शो बाकब।

१. परमप्रभुमी यरूसलेम खतम दुम्चा क्येडा डोंइती लोत्र पशो
२. परमप्रभुमी यरूसलेम आ नेक्था डा रागी आन पर्बम लोत्र पशो
३. परमप्रभुमी यरूसलेम खतम दुम नोले लेम्शा लोत्र पशो

इजीकीएलम छेडछेड तशो

इजीकीएल १०:-

१ मिनू ३० बर्स डा ४ महिना डा ५ नाक्ती ग्याइश्शा लाइक्चा पुंडसीशोपुकी नु गो केबार खोला आ नेक्था बाक्शो नड। मिनू मेना सरीड रोक्साक्व। मिनू गो परमप्रभु आ कोंइशो तातामी। *इजीकीएल १:३; इजीकीएल ३:२३; इजीकीएल १०:१५, २०, २२; इजीकीएल ४३:३* <sup>२</sup> मेको महिना डा ५ नाक्ती पिप येहो-याकीन ग्याइश्शा लाइक्चा पुंडसीशो ५ बर्स दुम्शो बाक्त। *२राजा २४:१५* <sup>३</sup> मिनू परमप्रभु यावेमी बूजी आ तौ चढेब इजीकीएल, आं कली लोत्र पाप्तु। मेना गो कल्दी आन रागी, केबार खोला आ नेक्थाम बाक्ती। मेना परमप्रभु यावेमी आं कली थिती। *इजीकीएल ३:२२-२३; इजीकीएल ८:१; इजीकीएल ३३:२२; इजीकीएल ३७:१; इजीकीएल ४०:१*

४ मिनू गो कोवडुनु, उत्तर रे फथ गिवार यिशो ताता। ठेयब छेडछेड पाइश्शो गोस्स ताता। मेको आ दाते रे चिला दाप्शो खोदेंशो पा आ एर ओंथ नेल्ल छेडछेड दुम्शो बाक्त। मिनू चिला खोदेंशो पा एर ओंथ दोरत। मिनू मेको मी आगा रे कांसा खोदेंशो जिल जिल पा ब्रशो तांडसाक्व। *प्रकाश ४:-* ५ मिनू मेको आ दातेमी ४ ओटा सोक्त पाइश्शोपुकी तांडसाक्व। मेको मार खोदेंशो तांडसाक्व देंशा हना, <sup>६</sup> मेको आन के ४, ४ ओटा कुल नु ४, ४ ओटा फ्रां बाक्तेक्म। <sup>७</sup> मेको आन खोइल दिंसीशो बाक्तेक्म। बाछा आन गेंच खोदेंशो बाक्तेक्म। मेको आन खोइल खुइश्शो कांसा खोदेंशो पा टल्केशो बाक्तेक्म। <sup>८</sup> मेको आन फ्रां आगा एर ओंथ नेल्ल मुर आन गुइ खोदेंशो बाक्तेक्म। मेको ४ ओटा सोक्त पाइश्शो आन कुल नु आन फ्रां दोदेंशो बाक्तेक्म देंशा हना, <sup>९</sup> मेको आन फ्रां थिमुशो बाक्तेक्म। मेकोपुकी तेइ लमानु डोंइती गे पा गाक्बाक्तेक्म। आन कुल एर ओंथ महिरथु ग्येत्थ गाक्बाक्तेक्म। <sup>१०</sup> मेको आन कुल दोदेंशो बाक्तेक्म देंशा हना, मेको नेल्ल का का पा ४ ओटा कुल बाक्तेक्म। डोंइती डा कुल मुर आ कुल खोदेंशो बाक्त। आ ग्युरा गे डा कुल गुप्स आ कुल खोदेंशो बाक्त। पेरा गे डा कुल ब्यफ के खोदेंशो बाक्त। मिनू आन नोले गे डा कुल ककाकुली के खोदेंशो बाक्त। <sup>११</sup> मेको आन कुल मोदेंशो बाक्तेक्म। मेको आन फ्रां इर गे प्राक्शो बाक्तेक्म। मेको आन फ्रां निक्शीमी अर्को आन फ्रांम थिमुशो बाक्तेक्म। मिनू फ्रां निक्शीमी आन आन रां सुम्सीशो बाक्तेक्म। <sup>१२</sup> मेको नेल्ल ग्येत्थ डोंइती गे गाक्बाक्तेक्म। सोक्त ते ते लमे, मेक मेक लाइबाक्तेक्म। मेको आन कुल महिरथु गाक्बाक्तेक्म। <sup>१३</sup> मेको सोक्त पाइश्शो आन दातेमी ब्रशो कोइला खोदेंशो बाक्त। मेको एर ओंथ गाक्शो तोवशी खोदेंशो तांडसीबाक्त। मेको मी थम छेडछेड पा ब्रशो बाक्त। मिनू मेको रे चिला दाप्बाक्त। <sup>१४</sup> मेको सोक्त पाइश्शोपुकी चिला आप्शो खोदेंशो पा एर ओंथ बेरबाक्तेक्म।

<sup>१५</sup> मिनू गो मेको सोक्त पाइश्शोपुकी कोवडुनु, मेको ४ ओटा सोक्त पाइश्शो आन नेक्था खपीम गुगील तातामी। मेको नेल्ल आन गुगील का का बाक्त। <sup>१६</sup> मेको गुगील दोदेंशो बाक्तेक्म देंशा हना, मेको जिल जिल पाइब पीत मनी माइश्शो हीरा खोदेंशो बाक्तेक्म। मेको गुगील आगाम अर्को गुगील बाक्तेक्म। <sup>१७</sup> मेकोपुकी गाक्मानु, तेइ महिरथु गाक्बाक्तेक्म। मेको सोक्त ते

ते गाक्मे, मेको गुगील मेक मेक गाक्बाक्तेक्म। <sup>१८</sup> मेको गुगील लाइश्शो नु हिंचा डा बाक्तेक्म। मिनू मेको कली कोवडुनु, नेल्ल मिक्ची मिक्च पाइश्शो बाक्तेक्म। <sup>१९</sup> मिनू मेको सोक्त पाइश्शोपुकी गाक्मानु, मेको ग्येत्थ क्युक्सीमानु, मेको गुगील यो ग्येत्थ क्युक्सीबाक्तेक्म। <sup>२०</sup> मिनू सोक्त ते ते गाक्मे, मेको सोक्त पाइश्शोपुकी यो मेक मेक गाक्बाक्तेक्म। मिनू मेको गुगील मेकोपुकी नु बोक्बाक्तेक्म। मारदे हना मेको सोक्त पाइश्शो आन सोक्त मेको गुगीलम बाक्त। <sup>२१</sup> मेको सोक्त पाइश्शोपुकी गाक्मानु, मेकोपुकी यो गाक्बाक्तेक्म। मेको दिक्मानु, मेकोपुकी यो दिक्बाक्तेक्म। मेको रागी रे क्युक्समानु, मेको गुगील क्युक्सीबाक्तेक्म। मारदे हना मेको सोक्त पाइश्शो आन सोक्त मेको गुगीलम बाक्त।

<sup>२२</sup> मेको सोक्त पाइश्शो आन पिया इर गे जिल जिल सिसा खोदेंशो बाक्तीक बाक्त। <sup>२३</sup> मेको बाक्तीके आ दी गे आन फ्रां हाम्शो बाक्तेक्म। मेकोपुकी थिमुशो बाक्तेक्म। मेको सोक्त पाइश्शो आन फ्रां निक्शीम आन रां सुम्शो बाक्तेक्म। <sup>२४</sup> मेको गाक्मानु, गो मेको आन फ्रां आन रेयके, ठेयब समुन्द्र आ रेयके खोदेंशो नेंता। मेको रेयके नेल्ल क्येडा सक्ति पाइश्शो बुंबु पाइब नु लडाइ पाइब आन ग्रांग्ये माग्ये पोक्शो रेयके खोदेंशो नेंता। मेको सोक्त पाइश्शोपुकी राम्मानु, आन फ्रां लुक्च तोक्बाक्तेक्म। <sup>२५</sup> मेको आन फ्रां लुक्च तोक्शा दिक्मानु, मेको आन पिया इर गे बाक्तीके रे सेंदा का गूत। मेको सोक्त पाइश्शोपुकी राम्मानु, आन फ्रां लुक्च तोक्बाक्तेक्म।

<sup>२६</sup> मेको आन पिया इर गे बाक्तीकेमी ठेयब निक्तीक का खोदेंशो बाक्त। मेको कोवडुनु नीर हीरा खोदेंशो तांडसाक्व। मिनू मेको ठेयब निक्तीकेम निख आ रां मुर आ खोदेंशो बाक्त। *प्रस्थान २४:१०; प्रकाश ४:२-३; यसैया ६:१* <sup>२७</sup> मिनू मेको आ क्रातो डा ग्येत्थ ब्रशो जिलजिल पाइश्शो कांसा चुप्लुम ब्रशो मी खोदेंशो ताता। आ क्रातो डा लुक्चु मी खोदेंशो पा ब्रशा शुश छेडछेड बाक्त। <sup>२८</sup> रेउ यिमेनु, गोस्सुम वाक्श दाप्शो खोदेंशो पा, मेको आ एर ओंथ नेल्ल छेडछेड बाक्त। मेको परमप्रभु यावे आ छेडछेड बाक्त। मिनू गो मेको तशा, खुम्की पा बाप्ती। मिनू मुर ब्वाक्शो खोदेंशो सेंदा नेंता। *इजीकीएल ३:२३; इजीकीएल ८:४; इजीकीएल ९:३; इजीकीएल १०:४, १८; इजीकीएल ११:२३; इजीकीएल ४३:४; इजीकीएल ४४:४*

इजीकीएल कली ब्रेश्शो

२ मिनू मेकोमी आं कली “ए मुर, बोक्शा रपो। मिनू गो गे नु लोत्र पाइनुड” देंत। <sup>२</sup> मिनू आं कली लोत्र पवानु, परमप्रभु यावे आ सोक्त आं आगाम ओवशा, आं कली राप्पाइक्ती। मिनू आं कली लोत्र पशो नेंता। <sup>३</sup> मिनू मेकोमी आं कली “ए मुर, गो इ कली इस्राएल जात डा मुर आन बाक्तीक सोइक्नन। मटीब रागी डा मुर आन बाक्तीक सोइक्नन। मेकोपुकीम आं कली मटिशो बाक्नीम। मेको आन किकी पिपी नु मेकोपुकीम मुल सम्म हेंथे पा आं कली मटिशो बाक्नीम। <sup>४</sup> मेको आन चच युइ आं कली मटीब नु खकटा थुं पाइश्शो बाक्नीम। गो इ कली मेको आन बाक्तीक सोइक्नन। मिनू गे मेको आन कली ‘परमप्रभु, परमप्रभु यावेमी इन कली लोत्र पाइब’ देंत। <sup>५</sup> मेकोपुकीम नेन्मेक्ल कि मनेन्मेक्ल, मेकोपुकी नु लोत्र पावो। मारदे हना मेको मटीब आन खिं डा मुर बाक्नीम। मिनू मेको

आन दातेम परमप्रभु यावे आ लोव पाइब मुर का बाक्माक्त, दे तुइक्नीम। इजीकीएल २:७; इजीकीएल ५:११, २७<sup>६</sup> मिनु गे मेकोपुकी नु मेको आन लोव नेशा महिनो। गे इ एर ओंथ चू नु चोंक बाक्तेक्म नु गे बिच्छी आन दातेम बाक्ते हना यो, महिनो। मेकोपुकीम मार दैतेक्म हना यो, मेको आन लोव क्येडा महिनो। मेको आन कोव्रशोम ग्येत्थ लुक्च मदुमो। मारदे हना मेको मटीब आन खिं डा मुर बाक्नीम। *येरमीया १:८*<sup>७</sup> गे मेको आन कली आं लोव पचा माल्नेवे। मेकोपुकीम नेन्मेक्ल कि मनेन्मेक्ल। मारदे हना मेकोपुकी मटीब आन खिं डा मुर बाक्नीम।

<sup>८</sup> तन्न गे आं लोव नेनो। गे मेको मटीब आन खिं डा मुर खोदेंशो मदुमो। इ शोव पाक्को। मिनु गो मार गेना, मेको जावो” दैत। <sup>९</sup> मिनु गो कोव्रडुनु, गुड का आं गे दिंशो ताता। मेकेर ब्रेक्शा ओल्शो कागज का बाक्त। *प्रकाश १०:८*<sup>१०</sup> मिनु मेकोम, मेको आं डोंइती प्राक्शा कोंइताक्वी। मेको आ डोंइती नु नोले, निम्फा पटटी ब्रेक्शा बाक्त। मेकेर हिशेक पतीके, रोंका पतीके नु आबी आबी, दे हिंतीके लोव ब्रेक्शा बाक्त।

### इजीकीएलमी कागज जशो

**३** मिनु मेकोमी आं कली “ए मुर, मेको इ डोंइती बाक्शो ओल्शो कागज जावो। मिनु लशा इस्त्राएल आ खिं डा मुर आन कली लोव पावो” दैत। *येरमीया १५:१६; येरमीया १:९; प्रकाश १०:९-११*<sup>२</sup> मोपतीके गो आं शोव पाक्ता। मिनु मेकोमी मेको ओल्शो कागज आं कली जचा गेती। <sup>३</sup> मिनु मेकोमी आं कली “ए मुर, आं गेशो ओल्शो कागज जावो। मिनु इ कोव्रज प्रिंदो” दैत। मोपतीके गो मेको जाता। मिनु मेको आं शोव्रम खुदो खोदेंशो पा जिज दुस्त। *भजन संग्रह ११९:१०३*

<sup>४</sup> मिनु मेकोमी आं कली “ए मुर, इस्त्राएली आन खिं लावो। मिनु मेको आन कली आं देंशो लोव नेल्ल नैपाइक्मी। <sup>५</sup> मारदे हना गो इ कली मतुइक्वा डा नु मरुप्चा डा लोव ब्वाक्ब मुर आन बाक्तीक मसोइक्तन। तन्न इस्त्राएली आन खिं डा मुर आन बाक्तीक सोइक्ताक्म। <sup>६</sup> गो इ कली मतुइक्वा डा नु मरुप्चा डा लोव ब्वाक्ब मुर आन दातेमी, मरुप्ब लोव पाइब मुर आन बाक्तीक मसोइक्तन। गो इ कली मोदेंशो मुर आन बाक्तीके सोइश्शो नड हना, मेकोपुकीम इ लोव नेनेम वा। <sup>७</sup> तन्न इस्त्राएली आन खिं डा मुरम इ लोव मनेनीम। मारदे हना मेकोपुकीम आं लोव नेंचा मदाक्नीम। इस्त्राएली आन खिं डा मुर नेल्ले काइ मटीब नु खकटा थुं पाइश्शो बाक्नीम। <sup>८</sup> गो इ कुल मेको आन कुल क्येडा बोल्यो सेल्ला। इ थुं मेको आन थुं क्येडा बोल्यो सेल्ला। *यसैया ५०:७; येरमीया १:१८*<sup>९</sup> गो इ थुं बोल्यो फुल्लु क्येडा बोल्यो चकमक खोदेंशो सेल्ला। गे मेको आन क्येडा महिनो। मेको आन कोव्रशोम ग्येत्थ लुक्च मदुमो। मारदे हना मेको मटीब आन खिं डा मुर बाक्नीम” दैत। <sup>१०</sup> मिनु मेकोम आं कली “ए मुर, गो इ कली देंशो लोव नेल्ल इ थुंम वोतो। मिनु नेनो। <sup>११</sup> मिनु मेको ग्याइश्शा लाइक्वा पुंइसीशो इ मुर आन बाक्तीक लावो। मिनु मेको आन कली लोव पावो। ‘परमप्रभु यावेमी इन कली लोव पाप्तु’ देनो। मेकोपुकीम नेन्मेक्ल कि मनेन्मेक्ल” दैत। *इजीकीएल २:५, ७*

### इजीकीएल खाल पाइब दुश्शो

इजीकीएल ३३:१-९

<sup>१२</sup> मिनु परमप्रभु यावे आ सोक्तीम आं कली इर क्युक्ती। मिनु गो “परमप्रभु यावे आ छेडछेड ठेयब बाक्ब” देंशो नैता। मिनु गो आं नोले गे ठेयब रेयके पशो नैता। *इजीकीएल १:२८*<sup>१३</sup> मेको रेयके सोक्त पाइश्शो आन फ्रां थिमुशो रेयके मेको आन नेक्था डा गुगील रे गूशो रेयके नु खिनु कुशो रेयके बाक्त। <sup>१४</sup> मिनु सोक्तीम आं कली क्युक्था लाइक्ती। मिनु गो कशो थुं दुश्शा, गाइश्शा लती। मेना परमप्रभु यावे आ बोल्यो गुडम आं कली दिप्ती। <sup>१५</sup> मिनु गो मेको केबार खोला आ नेक्था बाक्ब रागी रे ग्याइश्शा लाइक्वा पुंइसीशो आन बाक्तीक तेल-अबीब सहरम जाक्ती। मिनु गो ७ नाक्ती सम्म मेको आन दातेम ब्रिथी बाक्ती।

<sup>१६</sup> मिनु ७ नाक्त नोले परमप्रभु यावेमी आं कली लोव पाप्तु। <sup>१७</sup> मार लोव पाप्तु देंशा हना “ए मुर, गो इ कली इस्त्राएली आन खिं डा मुर आन कली

खाल पाइब सेल्लन। गे आं देंशो लोव नैतीवी हना, मेको आन कली आं लोव रे पा हिंच कोंइदीमी। *इजीकीएल ३३:७; यसैया ५२:८; हिब्रू १३:१७*<sup>१८</sup> मिनु गो आं अरेशो लोव मटीब मुर का कली ‘गे थमा पा इ मटितीके आ पर्वम बेक्नेवे’ दे माइक्नुड। मिनु गे मेको कली ब्रोंइचा कली हिंच मकोइताक्वी हना, मेको आं अरेशो मटीब आ मरिश्शो पशो आ पर्वम बेक्ब। मेको मुर आ हुश आ क्येक्क इ रे पा ताक्नुड। *इजीकीएल १४:१०*<sup>१९</sup> तन्न गे मेको आं अरेशो लोव मटीब मुर कली हिंच कोंइताक्वी हना, नु मेको मुर आं अरेशो लोव मपतीक रे मलेत्त हना, मेको आं अरेशो मटिशो नु आ मरिश्शो पशो आ पर्वम बेक्ब। तन्न गे ब्रोंइनेवे। <sup>२०</sup> मिनु ठीक पाइब मुर काम आ ठीक पतीक रे लेशशा मरिश्शो पाप्तु हना, गो मेको आ डोंइती दाइल पाइक्तीक फुल्लु वोइक्ता हना, मेको बेक्ब। गे मेको कली हिंच मकोइतीके, मेको आ पापम पतीके बेक्ब। मेको आ डोंइती ठीक पशो मारेइ ममिस्सीब। मिनु गो मेको आ हुश आ क्येक्क इ रे पा ताक्नुड। *इजीकीएल १८:२४*<sup>२१</sup> तन्न गे मेको ठीक पाइब मुर कली ‘पाप मपावो’ दे हिंच कोंइताक्वी हना नु मेकोमी पाप मपाप्तु हना, मेको थमा पा ब्रोंइब। मारदे हना मेकोम हिंच कोंइशो टिशो बाक्ब। मिनु गे ब्रोंइनेवे” दैत।

<sup>२२</sup> मेना परमप्रभु यावे आ गुडम आं कली थिती। मेकोमी आं कली “बोक्को, बेंसीम लावो। मिनु गो मेकेर गे नु लोव पाइनुड” दैत। *इजीकीएल १:३*<sup>२३</sup> मोपतीके गो बोक्शा बेंसीम लती। मिनु गो केबार खोला आ नेक्थाम तशो परमप्रभु यावे आ छेडछेड मेकेर यो बाक्त। मिनु गो खुम्की पा बाप्ती। *इजीकीएल १:२८*<sup>२४</sup> मिनु सोक्त आं थुंम ओव्रत। मिनु मेकोम आं कली राप्पाइक्ती। मिनु आं कली लोव पा “लावो, इ खिं लशा, लाप्चो चोक्शा बाक्को। *इजीकीएल २:२*<sup>२५</sup> ए मुर, मेकोपुकीम इ कली डोरीम फ्रेंनीम। मिनु गे फ्रेंचा पुंइसीशा, मुर आन दातेम लचा मताइनेवे। <sup>२६</sup> मिनु गो इ लें इ कुंकुम खोक्पाइक्नुड। मिनु गे मब्वाक्ब दुश्शा, मेको आन कली हुइक्ने मचाप्नेवे। मारदे हना मेकोपुकी मटीब आन खिं डा मुर बाक्नीम। <sup>२७</sup> तन्न गो, गे नु लोव पडानु, इ कली ब्वाक्ने चाप्ब सेल्लन। मिनु गे मेको आन कली ‘परमप्रभु, परमप्रभु यावेमी इन कली लोव पाइब। नेंने दाक्बम नेन्मेक्ल। नेंने मदाक्बमी मनेन्मेक्ल’ देनो। मारदे हना मेकोपुकी मटीब मुर आन खिं डा मुर बाक्नीम” दैत।

### यरूसलेम आ पर्वम लोव

**४** मिनु परमप्रभु यावेमी “ए मुर, गे इंटा का चाक्शा इ डोंइती वोतो। मिनु मेको तारी यरूसलेम सहर आ नकसा सेलो। <sup>२</sup> मिनु मेको कली पुश्शो कोंइदो। मेको आ एर ओंथ लडाइ पचा कली लाइश्शो खिं सेलो। मिनु मेको आ गारो डोइक्वा कली खप तेलो। एर ओंथ लडाइ पाइब आन बाक्तीक सेलो। मिनु आ एर ओंथ मेको गारो प्रेत्वा कली मुडा ठीक सेलो। <sup>३</sup> मिनु नोले फलाम के ग्योब का चाक्शा, सहर नु इ दातेम फलाम के गारो खोदेंशो पा वोतो। मिनु गे सहर गे कोव्रडो। मिनु मेको सहर कली पुश्शो सेल्शा कोंइदो। शुश पुश्शो कोंइदो। मेको इस्त्राएली आन खिं डा मुर आन कली चिन्ड का दुम्ब।

<sup>४</sup> मिनु नोले गे पेरा गे हिरशा इपो। मिनु इस्त्राएली आन खिं डा मुर आन सजाइ ततीक इ तार वोतो। गे गिश नाक्ती सम्म मेक गे हिरशा बाक्नेवे, मिश नाक्ती सम्म मेको आन सजाइ ततीक कुरचा माल्नेवे। <sup>५</sup> मारदे हना गो इ कली गिश नाक्त मोपा बाक्वा माल्नेवे, मेको देंनुड। मेको सहे सां ९० नाक्त दुम्चा माल्ब। नाक्त का के बर्स का बाक्ब। मोपा गे इस्त्राएली आन खिं डा मुर आन सजाइ कुरचा माल्नेवे। <sup>६</sup> मिनु मेको नाक्त नेल्ल नुम नोले, लेंशा ग्युरा गे हिरशा इपो। मिनु मेना यहूदा आ खिं डा मुर आन सजाइ कुरचा माल्नेवे। मिनु मेको आ पर्वम गो इ कली ४० नाक्त बाक्पाइक्नुड। नाक्त का के बर्स का बाक्ब। <sup>७</sup> मिनु गे पुश्शो यरूसलेम गे कोव्रशा, इ गुड डा वा तिल्शा, मेको सहर आ पर्वम नोले दुम्तीक लोव पावो। <sup>८</sup> कोव्रडो, गो इ कली डोरीम फ्रेंशा वोइक्नन। मोपा गे एको पुम्तीक नाक्ती नुप्चा क्येडा डोंइती एर ओंथ लोक्सीने मचाप्नेवे।

<sup>९</sup> मिनु मेको चेरब, क्योव्रज, सिबी, दाल, चिरस नु उवा चाक्शा ग्योब काम कुर पा इ कली शोब्ले चोंइसो। गे मेको सहे सां ९० नाक्त सम्म मलोक्सीथु

बाकडेनु, मेको जचा माल्नेवे। <sup>10</sup> इ नाक्ती डा जचा थोवक नाक्शा २० शेकेल डा दुम्बा माल्ब। गे गेना हना यो गो देंडा ना जचा माल्नेवे। शेकेल का ११.५ ग्राम चांदी के क्येट बाक्ब। <sup>11</sup> गे तूचा कली ब्वाक्कु यो पुक्चा माल्नेवे। हिन का ६ भाग डा भाग का तूचा माल्नेवे। मेको गेना तूचा माल्नेवे, इ कली देंनुड। हिन का ४ लिटर खोदेशो बाक्ब। <sup>12</sup> गे क्योवज के बटुक खोदेशो सेल्शा जावो। गे मुर आन डॉइती मुर आन खी चोशा, मेको चोचा माल्नेवे” देंत। <sup>13</sup> मिनु परमप्रभु यावेमी “मोपा इस्राएल डा मुर आन शोब्ले जचा माल्नीम। गो मेको आन कली रागी रागी डा मुर आन बाक्तीक खेरनुडमी। मेको आन दातेम मोदेशो ग्रांरा दिशो शोब्ले जचा माल्नीम” देंत। होसे ९:३ <sup>14</sup> मिनु गो “परमप्रभु, परमप्रभु यावे, गो आल रेन मोदेशो ग्रांरा दिशो मदुश्शो नड। गो गेनायो आंमा बेक्शो नु ब्वाकी डा जन्तुम साइश्शो ये मब्बड। ग्रांरा दिशो गेनायो मजड” देंती। प्रस्थान २२:३०; प्रेरित १०:१४ <sup>15</sup> मिनु मेकोम आं कली “दुम्ब, गो इ कली मुर आन खी आ पा डा, इ शोब्ले चोचा कली गोबर गेनुड” देंत।

<sup>16</sup> मिनु मेकोमी आं कली “ए मुर, गो यरूसलेम रे अन्न तेक्नुड। मेकोपुकीम हिंशा शोब्ले नाक्ना नाक्न जाइनीम। मिनु पुक्ना पुक्न सुर्ता पन पन ब्वाक्कु तूनीम। इजीकीएल ५:१६; लेवी २६:२६ <sup>17</sup> मेकोपुकीम शोब्ले नु ब्वाक्कु मताइनीम। मुर काम अर्को कली तवानु ग्रीचोक पा हिंनीम। मिनु मेकोपुकी सजाइ ततीके सोवना सोवन लाइनीम” देंत।

#### यरूसलेम सजाइ तशो

<sup>5</sup> मिनु मेकोमी “ए मुर, हेश्शो तरवार का शेवो। मिनु मेकोम चां प्रेक्ब आन छूरा खोदेशो पा इ चां नु इ गल शोके प्रेक्को। मिनु मेको नाक्चा कली नाक्तीक चाक्को। मिनु मेको चां आन कली भाग सां पा योक्को। <sup>2</sup> मिनु मेको चां के भाग का सहर पुक्चा नुप्ची ना सहरम चोवो। मिनु अर्को भाग तरवारम सहर आ एर ओंथ फ्रावो। मिनु नोले डा भाग फशेम बेरपतो। मारदे हना गो मेको आन कली तरवारम खेदा पाइनुडमी। इजीकीएल ५:२ <sup>3</sup> तन्न गे मेको चां इक्का इ वाम तोल्शा वोइक्मी। <sup>4</sup> मिनु मेको रे यो इक्का गुंडशा मीम चोवो। मेको रे पा इस्राएल डा खिं नेल्लेम मी का ब्रशा गूब” देंत। <sup>5</sup> मिनु परमप्रभु यावेमी “यरूसलेम एको बाक्ब। गो मेको कली रागी रागी आन दातेम वोइक्ता। मेको आ एर ओंथ नेल्ल रागी बाक्नीम। <sup>6</sup> तन्न मेकोम आं निसाफ पतीक लोव्र नु आं फुल्लुम मुशा ब्रेक्शो लोव्र मटीव। आ एर ओंथ बाक्शो रागी रागी नु जात जात डा मुर आन क्येडा यो आं निसाफ पतीक लोव्र नु आं फुल्लुम मुशा ब्रेक्शो लोव्र मटीब बाक्ब” देंत। <sup>7</sup> मोपतीके परमप्रभु यावेमी “गे इ एर ओंथ रागी रागी डा मुर आन क्येडा मरिश्शो पाइब बाक्नेवे। गे आं फुल्लुम मुशा ब्रेक्शो लोव्र नु आं निसाफ पतीके लोव्र मेको आन क्येडा मटीब बाक्नेवे। तन्न इ एर ओंथ डा मुर आ निसाफ पतीक लोव्र पाइनेवे। <sup>8</sup> गो इ कली आंमा सजाइ गेनुड। गो रागी रागी डा मुर आन डॉइती इ कली निसाफ पाइनुड। <sup>9</sup> गो इ ग्रांरा दिशो मूर्ति आन कली पूजा पतीके गो इ कली डॉइती गेनायो मगेशो सजाइ गेनन। मिनु नोले मोदेशो सजाइ मगेनन। <sup>10</sup> थमा पा, इ दातेमी आम आफोम आन आल आन कली ब्वाइनीम। मिनु आलम यो आन आंम आफ आन कली ब्वाइनीम। गो इ कली सजाइ गेनन। मिनु इ लीशो मुर आन कली फशेम एर ओंथ बेरपाइक्नुडमी। ब्यवस्था २८:५३-५५ <sup>11</sup> मोपतीके परमप्रभु, परमप्रभु यावेमी ‘गो ब्रॉइशा बाक्शो खोदेशो पा, मो पाइनुड। मारदे हना इ मूर्ति नु इ ग्रांरा दिशो गेयम आं बाक्तीक ग्रांरा दिशो सेल्लेके, गो इ कली खतम सेल्लुड। गो इ कली शिशी मपथु सुइ आन कली ब्रॉइचा मगेनुड। इजीकीएल ७:४; इजीकीएल ८:७-१८ <sup>12</sup> इ दातेमी, भाग सांम भाग का मुर बेक्तीक रोइम नु अन्कालम बेक्नीम। मिनु अर्को भाग तरवारम बेक्नीम। मिनु नोले डा भाग फशेम ते ते फ्राइनुडमी। मिनु गो मेको आन कली तरवारम खेदा पाइनुडमी। इजीकीएल ५:२

<sup>13</sup> मिनु गो गाइक्ना गाइक्न, मेको आन कली आं चुरशो कौंइशा, आं थुं नाइक्पाइक्नुड। मिनु गो, परमप्रभु यावेमी आं रुश पतीकेमी मेको आन कली लोव्र पाता, दे तुइक्नीम। इजीकीएल १६:४२ <sup>14</sup> गो इ कली श्येत्थ सेल्लुड। गे रागी रागी डा मुर आन दातेम नु इ नेक्था रे पा लाइब नेल्ल आन डॉइती इ

कली शुक्शी पाइक्चा पुंडसीब सेल्लन। ब्यवस्था २८:३७; येरमीया २४:९ <sup>15</sup> गो आं गाइक्तीक नु चुरतीकेम इ कली निसाफ पाइनुड। मिनु गे शुक्शी पाइक्चा पुंडसीतीके, मुने दोक्तीके नु हिंच कौंइतीके नु शुश हिंचा डा दुम्नेवे। गो परमप्रभु यावेमी, एको लोव्र देंती। <sup>16</sup> मिनु गो इ कली साइक्ब अन्काल नु खतम दुम्तीके ब्रा खोदेशो पा सोइक्नुड, साइक्ब नु खतम दुम्तीक चाक्नुड। मिनु मेको क्येडा अन्काल दुम्पाइक्नुड। गो इ अन्न नेल्ल तेक्शा, ब्यवस्था ३२:२३-२४; इजीकीएल ४:१६ <sup>17</sup> गो इ दातेमी अन्काल नु ब्वाकी डा जन्तुपुकी सोइक्ताक्ड हना, मेकोपुकीम इ आल रोइक्नीम। इ दातेम मुर बेक्तीक रोइ नु हुश खाक्श पोक्तीक दुम्शा बाक्ब। मिनु गो इ कली तरवारम साइक्नुड” गो परमप्रभु यावेमी, एको देंती” देंत।

#### इस्राएली आन थान खतम सेल्शो

<sup>6</sup> मिनु परमप्रभु यावेमी आं कली लोव्र पाप्तु। <sup>2</sup> मार लोव्र पाप्तु देंशा हना “ए मुर, गे इस्राएल डा पहाड गे कोव्रशा, मेको आन परबम नोले दुम्ब लोव्र पावो। इजीकीएल ३६:१; मीका ६:१ <sup>3</sup> गे ‘ए इस्राएल डा पहाड परमप्रभु, परमप्रभु यावे आ लोव्र नेनीन। पहाड नु डांडा खोल्सा नु बेसी आन कली परमप्रभु यावेमी, गो इन तार तरवार का चाक्नुड। मिनु गो इन डांडा डा थान आन कली खतम पोक्नुडमी। <sup>4</sup> इन थान श्येत्थ दुम्नीम। मिनु इन धूप चोतीक ब्रोल्लीम। मिनु गो इन साइश्शो मुर आन कली आन मूर्ति आन डॉइती ताइक्नुडमी। लेवी २६:३० <sup>5</sup> गो इस्राएल डा मुर आन बेक्शो रां मेको आन मूर्ति आन डॉइती वोइक्नुड। मिनु इन रुश इन चढेतीक आन डॉइती एर ओंथ फ्राइनुडमी। २राजा २३:२४ <sup>6</sup> गेपुकी ते बाक्तीनी हना यो, इन सहर श्येत्थ दुम्नीम। इन डांडा डा थान नेल्ल खतम दुम्नीम। मोपा इन चढेतीक श्येत्थ दुम्शा नु इन मूर्ति ब्रोल्ला खतम दुम्नीम। इन धूप चोतीक जिक्नीम नु इन गेय जाप्शा लाइब। <sup>7</sup> इन दातेमी मुर साइक्चा पुंडसीशा गोल्नीम। मिनु गेपुकीमी गो परमप्रभु यावे नड, दे तुइक्नीनी।

<sup>8</sup> तन्न गो गे इन दाते डा का निक्शी आन कली ब्रॉइचा गेनुडमी। रागी रागी आन दाते डा का निक्शी साइक्चा मपुंडसीनीम। मेकोपुकी रागी रागीम ब्रशा लाइनीम। यसैया ६:१३ <sup>9</sup> मिनु मोदेशो रागी रागीम ब्रॉइशा लीशोपुकी ग्याइश्शा लाइक्चा पुंडसीशो रागीम आं कली मिन्नीम। मिनु मेकोपुकीम आन दला दाक्स पशा, आं रे दिल्ला लशा, आन मूर्ति आन नोले खोइक्नीम। मेको आन पशो मरिश्शो नु ग्रांरा दिशो गेयम आंमा मुने दोक्नीम। <sup>10</sup> मिनु मेकोपुकीम गो परमप्रभु यावे नड, दे तुइक्नीम” देंचा माल्नेवे। गो मेको आन कली मोदेशो श्येत मोशा मगेडमी” देंत।

<sup>11</sup> मिनु परमप्रभु, परमप्रभु यावेमी “इन गुइ पोक्कीन। मिनु इन खोइल थाइक्तीन। इस्राएल आ खिं डा मुर आन ग्रांरा दिशो गेय आ परबम ‘आबी आबी’ देनीन। मारदे हना मेकोपुकी तरवार, अन्काल नु मुर बेक्तीक रोइम बेक्नीम। <sup>12</sup> मेको डोन बाक्बपुकी मुर बेक्तीक रोइम बेक्नीम। मिनु मेको आन नेक्था बाक्बपुकी तरवारम साइक्चा पुंडसीनीम। मिनु लीशो प्रॉइचा पुंडसीशोपुकी अन्कालम बेक्नीम। मोपा गो आं गाइश्शो मेको आन तार मोइक्नुड। <sup>13</sup> मेको आन साइश्शो मुर आन मूर्ति आन दाते आन चढेतीक आन एर ओंथ बाक्नीम। नेल्ल डांडा डा थानम, नेल्ले पहाडम, नेल्ल रवा आन पुंम, शुश गिग रवा आन पुंम, नु मूर्ति आन कली धूप चोतीके नेल्लेम मोदेशो बाक्ब। १राजा १४:२३ <sup>14</sup> गो आं गुइ मेको आन परबम क्युक्नुड। मिनु आन रागी रे श्येत्थ नु मुर मबाक्तीक सेल्लुड। मेको गोरशो रागी रे रिब्ला सम्म मोदेशो पाइनुड। मेना मेकोपुकीमी गो परमप्रभु यावे नड, दे तुइक्नीम” देंत। २राजा २५:२१

#### इस्राएल आ खतम दुम्तीक जाक्ब

<sup>7</sup> मिनु परमप्रभु यावेमी आं कली लोव्र पाप्तु। <sup>2</sup> मार लोव्र पाप्तु देंशा हना “ए मुर, परमप्रभु यावेमी इस्राएल रागी कली मार देंब देंशा हना ‘रागी नुप्तीके, एर ओंथ डा सुर नेल्लेम जाक्ब। <sup>3</sup> मुल गे नुप्जेवे। गो इ कली तशा गाइक्ताक्ड। गो इ पशो खोदेशो पा इ कली निसाफ पाइक्नुड। गो इ कली इ मूर्ति पूजा पशो आन परबम सजाइ गेनुड। <sup>4</sup> गो इ कली शिशी मपथु, सुइ आन कली ब्रॉइचा मगेनुड। गो इ कली इ गेय आ परबम नु इ मूर्ति पूजा

आ पर्वम सजाइ गेनुड। मिनु गो, गो परमप्रभु यावे नड, दे तुइवनेवे" " देंत। इजीकीएल ५:११; इजीकीएल ८:१८; इजीकीएल ९:१०<sup>5</sup> परमप्रभु, परमप्रभु यावेमी "हिंचा डा श्येत, आ तार हिंचा डा श्येत दुम्ब। कोव्रडो, मेको जाकब।<sup>6</sup> नुप्तीक नाक्ती जाकब। मेको इन पर्वम बोक्शा जाकब।<sup>7</sup> गे रागीम बाकब इन खतम दुम्तीके जाकब। नुप्तीक नाक्ती जाकशा, इन नेक्था बाकब। डांडापुकीम कुम्सो पतीके ममाइ, प्रांग्ये माग्ये दुम्शो बाकब।<sup>8</sup> मुल गो रीब पा गाइवकुड। मिनु आं चुरशो इ तार मोइवकुड। गो इ पशो खोदेंशो पा इ कली निसाफ पाइनुड। मिनु इ मूर्ति पूजा पशो नेल्ल आन पर्वम सजाइ गेनन।<sup>9</sup> गो इ कली शिशी मपथु, सुइ आन कली ब्रोंडचा मगेनुड। गो इ कली इ पशो खोदेंशो पा सजाइ गेनुड। इ मूर्ति पूजा पशो इ दातेम बाकब। मिनु गो इ कली तुष्व, परमप्रभु यावे नड, दे तुइवनेवे।<sup>10</sup> मेको नाक्ती मुल बाकब। इ खतम दुम्तीके जाकना जाकन बाकब। कोक्के आ कोच्चा दाप्त। ठेयब लेत्तीक फू खोदेंशो पा बोइवक्त। यसैया २:१२<sup>11</sup> हुश खाक्श पोक्तीके परमप्रभु यावे आ अरेशो मटीब आन कोक्के दुम्त। मेको आन दाते डा मारेइ मलीब। मेको आन बाक्शो मारेइ मारेइ, आन शौप नु आन ठेयब दुम्तीके मारेइ मलीब।<sup>12</sup> मेको खतम दुम्तीके जाकवा चिक्शो बाकब। ग्याप्बपुकी मग्येरसमल। लेयबपुकी रौंका मपामेक्ल। मारदे हना मेको नेल्लेम परमप्रभु आ गाइश्शो ताइनीम।<sup>13</sup> मारदे हना मेको ब्रोंडम सम्म लेयचा मताइब। मारदे हना मेको तशो नेल्ल आन कली दुम्ब। मिनु आन मरिश्शो पतीके नेल्ल बेक्नीम।<sup>14</sup> मेकोपुकीम ग्रोव ताप्शा, मारेइ मारेइ ठीक पाप्तेक्म हना यो, का यो लडाइ पथ मलाइनीम। मारदे हना आं गाइश्शो मेको नेल्ल आन तार जुक्शो बाकब।<sup>15</sup> लाडगाम तरवारम साइक्ब। आगाम मुर बेक्तीक रोइ नु अन्कालम बेक्नीम। मिनु रूम बाकब आन कली तरवारम साइक्ब। सहरम बाकब अन्काल नु मुर बेक्तीक रोइम साइक्वा पुंडसीनीम।<sup>16</sup> मिनु ब्रोंडशा प्रोक्शो नेल्ल बेसी डा ढुकुर खोदेंशो पा पहाडम बाक्नीम। मेको आन मरिश्शो पशो आ पर्वम रौंका पा बाक्नीम।<sup>17</sup> मुर आन गुड नेल्ल सक्ति मपाइश्शो दुम्नीम। आन पोक्च बोल मपाइश्शो दुम्नीम। यसैया १३:७<sup>18</sup> मेकोपुकीम अरन्डी फेक्वा माल्नीम। शुश हितीकेमी मेको आन कली सुम्ब। मेको नेल्ल आन कुल मुनेम सुम्सीचा माल्नीम। मेको नेल्ल आन पिया प्रेक्सीचा माल्नीम। येरमीया ४८:३७<sup>19</sup> मेकोपुकीम आन चांदी लांम ताइक्वा माल्नीम। मिनु आन सुन ग्रांरा दिशो थोव्रक खोदेंशो दुम्वा माल्ब। मेको आन सुन चांदीम परमप्रभु यावे आ गाइश्शो नाक्ती मेको आन कली प्रॉइने मचाप्ब। मेको आन सुन चांदीम आन शोव्रलु साइक्ने मचाप्ब। मेकोमी आन कोव्रज प्रिंने मचाप्नीम। मारदे हना मेको आन कली मरिश्शो पपाइक्ब मेकोन बाक्त। हिलोपदेस ११:४; सेफन्याह १:१८<sup>20</sup> मारदे हना आन दारशो गहनामी ठेयब लेश्शा, आन ग्रांरा दिशो मूर्ति सेल्लेक्म। मोपतीके गो मेको आन सुन चांदी मेको आन कली ग्रांरा दिशो सेल्लुड।<sup>21</sup> गो मेको नेल्ल अर्को रागी डा मुर आन कली रोइक्पाइवकुडमी। गो रागीम बाकब परमप्रभु यावे आ अरेशो मटीब आन कली रोइक्पाइवकुड। मिनु मेकोपुकीम मेको ग्रांरा दिशो सेल्लनीम।<sup>22</sup> गो आं कुल मेको आन रे खूइवकुड। मिनु मेकोपुकीम आं दाक्शो बाक्तीके ग्रांरा दिशो सेल्लनीम। हुश खाक्श पोक्बपुकी मेकेर ओव्रशा, ग्रांरा दिशो सेल्लनीम।<sup>23</sup> साडलो का सेलीन। मारदे हना रागी हुश खाक्शेम ब्रीशो बाक्ब। मिनु सहर हुश खाक्श पोक्बपुकीम ब्रीशो बाक्ब।<sup>24</sup> गो रागी रागी डा नेल्ल आन क्येडा मरिश्शो पाइब मुर आन कली मेको आन खि रोइक्पाइवकुड। गो बोल्यो मुर आन ठेयब लेत्तीक नुप्पाइवकुड। मिनु मेको आन चोव्रखो बाक्तीके ग्रांरा दिशो दुम्नीम।<sup>25</sup> शुश श्येत जाक्मेनु, मेकोपुकीम थुं नाइश्शा बाक्वा माल्नीम। तन्न मथिल्लीम।<sup>26</sup> हिंचा डा श्येत क्येडा हिंचा डा श्येत जाकब। हिंचा डा लोव्र क्येडा हिंचा डा लोव्र नैसीब। मेकोपुकीम परमप्रभु यावे आ लोव्र पाइबपुकी रे 'मुल मार दुम्ब' दे तुइक्वा माल्नीम। चढेबपुकीमी मुर आन कली मर्शनीम। खाल्पा आन अर्ती गेतीक जाग्शा लने थुम्शो बाक्ब।<sup>27</sup> पिपम रौंका पाइब। पिप आ तौ आन थुं लुक्च लाइब। रागी डा मुर आन गुड खिंखि पाइनीम। मेको आन पशो खोदेंशो पन, गो मेकोपुकी नु पाइनुड। गो मेको आन पशो कोव्रशा, मेको आन कली निसाफ पाइनुड। गो मेको आन आंम कानुन आ पर्वम निसाफ पाइनुड। मिनु मेकोपुकीमी गो परमप्रभु यावे नड, दे तुइक्नीम" देंत।

परमप्रभु आ खिंम मूर्ति पूजा पशो

- 8 मिनु ग्याइश्शा लाइक्वा पुंडसीशो ६ बर्स डा ६ महिना डा ५ नाक्त गो आं खिंम बाक्शो नड। मेना यहूदा डा खाल्पापुकी आं डोंइती बाक्शो बाक्तेक्म। मिनु मेकेर बाक्शोनु, परमप्रभु, परमप्रभु यावेमी आं कली थिती। इजीकीएल १४:१<sup>2</sup> मिनु गो कोव्रडुनु, मुर खोदेंशो का ताता। मिनु मेको आ क्रातो डा लुक्चु ब्रशो मी खोदेंशो नु आ क्रातो डा ग्येत्थ जिलजिल पा टल्केशो कांसा खोदेंशो बाक्त। इजीकीएल १:२७; इजीकीएल १:४<sup>3</sup> मेकोम आ गुड दिंशा आं चांम ग्याइश्शा छुल पोक्ती। मिनु सोक्तीम आं कली सरीड नु रागी आस दातेम लाइक्ती। मिनु परमप्रभु यावे आ सोक्तीम आं कली यरूसलेमम लाइक्ती। मेकोमी आं कली परमप्रभु यावे आ खिं डा उत्तर गे डा आगा डा लाडगा आ ओव्रतीकेम चाक्ती। मेकेर रुश पपाइक्ब मूर्ति आन बाक्तीके बाक्त। मेकोमी रुश पपाइक्बाक्त। इजीकीएल ३:१२<sup>4</sup> मिनु इस्राएली आन परमप्रभु यावे आ छेडछेड मेकेर बाक्त। गो मेको मोदेंशो छेडछेड डोंइती बेसीम कोंइतीकेम ताता।<sup>5</sup> मिनु परमप्रभु यावेमी आं कली "ए मुर, मुल गे उत्तर गे कोव्रडो" देंत। मिनु गो उत्तर गे कोव्रडुनु, चढेतीक आ उत्तर गे डा लाप्चोम मेको रुश पपाइक्ब आ मूर्ति ताता।<sup>6</sup> मिनु मेकोमी आं कली "ए मुर, मेको आन पशो तवी? मार पन पन बाक्मा, गे मेको तवी? इस्राएली आन खिं डा मुरपुकीम आं कली आं बाक्तीक रे खेरचा कली मेको ग्रांरा दिशो गेय पना पन बाक्नीम। तन्न गे मेको क्येडा यो शुश ग्रांरा दिशो गेय ताइनेवे" देंत।<sup>7</sup> मिनु मेकोम आं कली लाडगा डा ओव्रतीकेम चाक्दीत्ती। मिनु गो मेकेर डा गारोम पोव्रला का ताता।<sup>8</sup> मिनु मेकोम आं कली "ए मुर, मेको गारो डा पोव्रला प्रेतो" दे माइक्ती। मिनु गो मेको गारो डा पोव्रला प्रेतता। मिनु मेकेर ओव्रतीक का बाक्त।<sup>9</sup> मिनु मेकोम आं कली "आगा ओव्रशा, मेकोपुकीम पशो थम मरिश्शो नु ग्रांरा दिशो गेय कोव्रडो" देंत।<sup>10</sup> मोपतीके गो आगा ओव्रशा कोव्रता। मिनु एर ओंथ नेल्ल गारोमी नेल्ल खाल डा ग्रेशा गाक्ब जन्तु, ग्रांरा दिशो जन्तु, इस्राएली आन खिं डा मूर्ति नेल्ल मेकेर ब्रेक्स पा सेल्शो ताता। रोमी १:२३<sup>11</sup> मिनु मेको आन डोंइती इस्राएल डा ७० जना खाल्पा राप्शो बाक्तेक्म। मिनु शाफान आ तौ याजन्त्याह मेको आन दातेम राप्शो बाक्त। मेको नेल्ल आन गुडम आन आन थनौरो बाक्तेक्म। मिनु धूप चोशो आ ब्रोव्रशो रिना इर गे बोक्शो बाक्त। प्रस्थान २४:१; गन्ती ११:१६; लूका १०:१७; यसैया ६६:१७<sup>12</sup> नोले मेकोमी आं कली "ए मुर, इस्राएल आ खिं डा खाल्पा छिडछिडम मार पाइनीमी, मेको आन आन मूर्ति कोठाम मार पना पन बाक्मा, तवी? मेकोपुकीम 'परमप्रभु यावेमी आंइ कली मताइब। परमप्रभु यावेमी एको रागी प्रॉइने थुम्शो बाक्ब' देंशो बाक्नीम" देंत। इजीकीएल ९:९<sup>13</sup> मिनु लेंशा मेकोम आं कली "गे मेको क्येडा यो शुश ग्रांरा दिशो गेय पना पन बाक्शो ताइनेवे" देंत।<sup>14</sup> नोले मेकोमी आं कली परमप्रभु यावे आ खिं डा उत्तर गे डा ओव्रतीकेम चाक्दीत्ती। मिनु गो मेकेर तम्मज देवता आ पर्वम डाक्शो मीश मुरपुकी तातामी।<sup>15</sup> मिनु परमप्रभुमी आं कली "ए मुर, गे मेको तवी? गे मेको क्येडा यो शुश ग्रांरा दिशो गेय ताइनेवे" देंत।<sup>16</sup> मिनु मेकोम आं कली परमप्रभु यावे आ खिं डा आगा डा लाडगा चाक्दीत्ती। मिनु मेकेर परमप्रभु यावे आ खिं नु चढेतीक आस दातेम २५ जना खोइ वोंइश मुर बाक्तेक्म। मेकोपुकीम आन ची परमप्रभु यावे आ खिं गे हिरशो बाक्तेक्म। आन कुल चहिं पूर्ब गे कोव्रशा नां आ डोंइती बाप्शो बाक्तेक्म। ब्यवस्था ४:१९; ब्यवस्था १७:३; २राजा २३:५, ११; येरमीया ८:२<sup>17</sup> मिनु मेकोम आं कली "ए मुर, गे मेको तवी? मार, यहूदा आ खिं डा मुर आन ग्रांरा दिशो गेय एकेर पचा माल्नीमी? मार, मेकोपुकीम रागी कली हुश खाक्श पोक्तीकेम प्रिंशा, आं कली मेको क्येडा गाइक्पाइक्वा माल्नीमी? कोव्रडो, मेको आन नैम राशी वोइक्नीम। आन नैम राशी वोइक्तीके थम मरिश्शो पतीके बाक्ब।<sup>18</sup> मोपतीके गो मेको आन कली आं गाइक्तीकेम गेय पाइनुड। गो मेको आन कली शिशी मपथु, सुइ आन कली ब्रोंडचा मगेनुड। मेकोपुकीम ठेयब सेंदा पा पुंडशा ग्रीतेक्म हना यो, मेको आन लोव्र मनैनुड" देंत। इजीकीएल ७:४; यसैया १:१५

## यरूसलेम खतम दुश्तो

## परमप्रभु आ छेडछेड लशो

9 मिनू परमप्रभुमी ठेयब सेंदा पा "सहर डा सजाइ गेब मुर आन नेक्था जाक्कीन। इन साइक्तीक या कुरशा जाक्कीन" दे ग्रीत।  
 2 मिनू गो ६ जना वोंइश मुर आइक्था डा उत्तर गे डा लाप्चो रे जाक्शो ताता। मेको नेल्लेमी साइक्चा कली या कुरशो बाक्तेक्म। मेको आन दातेमी बुश सुती वा फेक्शो ब्रेक्तीक कुरशो मुर का बाक्त। मेकोपुकी आगा ओव्रशा कांसा के चढेतीक आ नेक्था राप्तेक्म। इजीकीएल १०:२; दानीएल १०:५  
 3 मेना इस्राएली आन परमप्रभु आ छेडछेड करूब आन दाते रे इर गे याक्सीशा परमप्रभु यावे आ खिं आ लाप्चोम जाक्दीन्ने थुम्शो बाक्त। मिनू मेकोमी मेको सुती के वा फेक्शो ब्रेक्तीक कुरशो मुर कली 4 "यरूसलेम सहर आ एर ओंथ नेल्ल हिरशा मेकेर पशो मूर्ति पूजा नेल्ल आन पर्वम सुर्ता नु रोंका पाइब मुर नेल्ल आन कुप्फीम चिन्ड का वोतो" दे माइक्तु। प्रकाश ७:३ 5 मिनू मेकोमी आं नेंचा डा पा अरु आन कली "गेपुकी मेको आ नोले लशा, सहर एर ओंथ गाक्शा मुर आन कली सतीन। मेको आन कली शिशी मपथु, सुइ आन कली ब्रोंइचा मगने। 6 खूशो, ठिटा ठिटी, मीश मुर नु आल ब्रेच्व नेल्ल आन कली सतीन। तन्न आन कुप्फीम मेको चिन्ड पाइश्शो आन कली मथिने। आं बाक्तीक रे मेको मो पचा गोने" दे माइक्तीमी। मिनू मेकोपुकीम मेको परमप्रभु यावे आ खिं आ डोंइती बाक्शो खाल्पा आन रेन मो पचा गोम्तेक्म। येरमीया २५:२९ 7 मिनू मेकोमी मेको आन कली "आं खिं ग्रांरा दिशो सेलीन। साइश्शो मुर आन कली लाडगाम प्रिदीने, लने" दे माइक्तीमी। मोपतीके मेकोपुकी सहरम लशा, मुर आन कली साइक्तेक्म। 8 मेकोपुकीम साइक्ना साइक्न लाम्तेक्म। गो चहिं आं का ला बाक्ती। मिनू गो खुम्की पा बाप्था ठेयब सेंदा पा "परमप्रभु, परमप्रभु यावे, इन गाइश्शो यरूसलेम कली मोइक्नीनु, इस्राएल डा लीशो नेल्ल आन कली यो साइक्नीनी?" देंती। इजीकीएल ११:१३ 9 मिनू मेकोमी आं कली "इस्राएल नु यहूदा डा मुर आन खिं डा मुर आन दोस थम ठेयब बाक्ब। रागी नेल्ल हुश खाक्शेम ब्रीशो बाक्ब। मिनू सहर दूली पतीकेम ब्रीशो बाक्ब। मारदे हना मेकोपुकीम 'परमप्रभु यावेमी एको रागी प्रोंइशो बाक्ब। मिनू परमप्रभु यावेमी मारदे मताइब' देंनीम। इजीकीएल ८:१२ 10 मोपतीके गो मेको आन कली शिशी मपथु सुइ आन कली ब्रोंइचा मगनुड। मेको आन पशो खोदेशो पा सजाइ गेनुडमी" देंत। इजीकीएल ७:४  
 11 मिनू मेको सुती वा फेक्शो ब्रेक्तीक कुरशो मुरम "गो इन अरेशो खोदेशो पाता" देंत।

## परमप्रभु आ छेडछेड

इजीकीएल १:४-२८

10 मिनू कोव्रडनु, मेको करूब आन पिया आन तारी डा बाक्तीके आ इर नीर माइश्शो हीरा खोदेशो बाक्त। मेको ठेयब नित्तीक का खोदेशो बाक्त। 2 मिनू परमप्रभु यावेमी मेको सुती के वा फेक्शो मुर कली "करूब आन दी गे बाक्शो गुगील आन दातेम लावो। मिनू मेको करूब आन दातेम बाक्शो मी आ कोइला हुइश्शा, सहर आन तार फ्रावो" दे माइक्तु। मिनू आं कोव्रना कोव्रन, मेको आगा ओव्रत। इजीकीएल ९:२; प्रकाश ८:५  
 3 मिनू मेको मुर आगा ओव्रमेनु, करूब परमप्रभु यावे आ खिं आ दक्खिन गे बाक्तेक्म। मिनू गोस्स काम परमप्रभु यावे आ खिं डा आगा डा लाडगा ब्रीत। 4 मिनू परमप्रभु यावे आ छेडछेड करूब आन रे परमप्रभु यावे आ खिं आ लाप्चो गे लत। मिनू गोस्सुम खिं ब्रीत। मिनू आ लाडगा परमप्रभु यावे आ छेडछेड डा हाम्सोम ब्रीत। इजीकीएल १:२८; प्रस्थान ४०:३४; यसेया ६:४  
 5 मेको करूब आन फ्रां आन रेयके लाडगा सम्म नेंसी बाक्त। मेको परमप्रभु यावे ब्वाक्शो खोदेशो पा नेंसी बाक्त।  
 6 मिनू परमप्रभु यावेमी मेको सुती के वा फेक्शो मुर कली "मेको गुगील आन दातेम लशा करूब आन दाते डा मी पितो" दे अरेवानु, मेको गुगील आ नेक्था राप्त। 7 मिनू करूब काम आ गुइ करूब आन बाक्तीक डा मी गे दिताक्व। मिनू मेकोमी मी आ कोइला हुइश्शा, मेको सुती के वा फेक्सीशो मुर आ गुइम कुर पाप्तु। मिनू मेको मी कुरशा लाडगा गूत।

8 मेको करूब आन फ्रां आगाम मुर आन गुइ खोदेशो तांडसाक्व। 9 मिनू कोव्रडनु, मेकेर ४ ओटा गुगील करूब आन नेक्था बाक्तेक्म। करूब का आ नेक्था गुगील का बाक्त। मेको गुगीलपुकी टल्केशो पित मनी माइश्शो हीरा खोदेशो बाक्तेक्म। 10 मिनू मेको गुगील नेल्ल खाल का डा बाक्तेक्म। गुगील का आगाम अर्को गुगील बाक्शो खोदेशो तांडसाक्म। 11 मेकोपुकी गाक्मानु, तेइ महिरथु ग्येत्थ गे उत्तर, दक्खिन, पूर्व नु पच्छिम गे गाक्बाक्तेक्म। मेको डोंइती डा गुगील ते ते लमे, अर्को यो मेक मेक गे लाइबाक्तेक्म। 12 मेको आन रां नेल्ल, मेको आन ची, मेको आन गुइ, फ्रां नु मेको ४ ओटा करूब आन गुगील नेल्ल मिक्ची मिक्च पाइश्शो बाक्तेक्म। 13 गो मेको आन कली "गेय पाइब गुगील" देंशो नेंता। 14 मेको करूब नेल्ल आन के ४ ओटा कुल बाक्तेक्म। डोंइती डा कुल करूब के, मेको आ नोले डा कुल मुर के, मेको आ नोले डा कुल गुप्स के नु नेल्ल क्येडा नोले डा कुल ककाकुली के खोदेशो बाक्तेक्म। इजीकीएल १:१० 15 मिनू मेको करूबपुकी इर गे लाम्तेक्म। मेको डोंइती डा सोक्त पाइश्शोपुकी बाक्तेक्म। डोंइती गो मेको आन कली केबार खोला आ नेक्था तशो नडमी। इजीकीएल १:१ 16 मिनू मेको करूब गाक्मानु, मेको गुगील आन नेक्था गाक्बाक्तेक्म। करूब इर लचा कली आन फ्रां ग्येत्थ क्युकामेनु, मेको आन नेक्था बाक्शो गुगील महिरथु, गाक्बाक्तेक्म। इजीकीएल १:१९ 17 मिनू मेको करूब दिक्मानु, मेको गुगील यो दिक्बाक्तेक्म। मेको करूब इर गे बोक्मानु मेको गुगील यो मेको नु बोक्बाक्तेक्म। मारदे हना मेको सोक्त पाइश्शो आन सोक्त मेको गुगीलमीन बाक्त।

18 मिनू परमप्रभु यावे आ छेडछेड आ खिं डा लाप्चो रे गूशा, करूब आन तार गे दिक्त। इजीकीएल १:२८ 19 मिनू मेको करूबम आन आन फ्रां क्युक्तेक्म। मिनू आं डोंइती खप रे इर गे लाम्तेक्म। मिनू मेको लमानु, मेको गुगील यो मेको नु इर गे लाम्तेक्म। मिनू मेकोपुकी परमप्रभु यावे आ खिं आ पूर्व गे डा लाप्चो आ नेक्था दिक्तेक्म। मिनू इस्राएल डा परमप्रभु आ छेडछेड मेको आन तार गे बाक्त।

20 मेको केबार खोला आ नेक्था इस्राएली आन परमप्रभु आ आगाम बाक्शो आं तशो सोक्त पाइश्शो बाक्तेक्म। मिनू गो मेको करूब बाक्मा बाक्त, दे तुइक्ताक्ड। 21 मेको नेल्ल आन के ४ ओटा कुल नु ४ ओटा फ्रां बाक्तेक्म। मिनू मेको आन फ्रां आगाम मुर आन गुइ खोदेशो बाक्तेक्म। 22 मेको आन कुल केबार खोला आ नेक्था आं तशो सोक्त पाइश्शो आन कुल खोदेशो बाक्तेक्म। मेकोपुकी तेइ लमानु, डोंइती गे पा गाक्बाक्तेक्म।

## ठेयब मुर आन कली सजाइ

11 मिनू सोक्तीम आं कली क्युक्शा, परमप्रभु यावे आ खिं डा पूर्व गे डा लाप्चोम चाक्ती। मेको पूर्व गे कोव्रशो बाक्त। मिनू मेको आगा ओव्रतीकेमी २५ जना मुर बाक्तेक्म। गो मेको आन दातेम इस्राएल डा ठेयब मुर अज्जुर आ तौ याजन्याह नु बेनायाह आ तौ पेलात्याह आस कली यो तातासी। इजीकीएल ३:१२ 2 मिनू परमप्रभु यावेमी आं कली "ए मुर, मेकोपुकीम एको सहरम मरिश्शो पचा कली नु परमप्रभु यावे आ अरेशो लोव्र मटिचा कली अर्ती गेशा शेंशो बाक्तेक्म। 3 मेकोपुकीम 'खिं सेल्लिक नाक्ती रीब पा मजाक्बा कौं? एको सहर कराइ खोदेशो बाक्ब। मिनू गो चहिं श्ये बाक्नय' देंनीम। इजीकीएल २४:३-१४ 4 मोपतीके ए मुर, मेको आन पर्वम नोले दुम्ब लोव्र पावो। आं देंशो लोव्र पावो" देंत।

5 मिनू परमप्रभु यावे आ सोक्त आं तार जाक्त। मिनू मेकोम आं कली "परमप्रभु यावेमी 'ए इस्राएल आ खिं डा मुर, गे मार मिश्शो बाक्नीनी, गो मेको नेल्ल तुइक्नुड। 6 गेपुकीम एको सहरम शुश मुर आन कली साइश्शा, आ लां नेल्ल बेक्शो मुरम प्रिपाइक्तीनी" देंत। 7 मोपतीके परमप्रभु, परमप्रभु यावेमी 'गे सहरम साइश्शा इन ताइश्शो मुर श्ये बाक्नीम। मिनू एको सहर कराइ बाक्ब। तन्न गो इन कली सहर रे गुंइनुड। 8 गेपुकी तरवार तशा हिंतीनी। तन्न गो इन पर्वम तरवार चाक्शा साइक्पाइक्नन्नी। 9 गो इन कली सहर रे गुंइन्नी। मिनू अर्को रागी डा मुर आन गुइम गेनन्नी। मिनू इन कली

निसाफ पाइव्नुड। <sup>10</sup> गेपुकी तरवारम साइक्वा पुंडसीशा गोलनीनी। गो इन कली इस्राएल आ सांदम निसाफ पाइनुड। मिनु गेपुकीम गोन परमप्रभु यावे नड, दे तुइक्नीनी। <sup>२२</sup>राजा २५:२०-२१ <sup>११</sup> एको सहर इन कली कराइ मदुम्ब। मिनु गे मेको कराइ डा श्ये मदुम्नीनी। गो इन कली इस्राएल आ सांदम निसाफ पाइनुड। <sup>१२</sup> मेना गेपुकीम गो परमप्रभु यावे नड, दे तुइक्नीनी। गेपुकीम आं फुल्लु मुशा ब्रेक्शो लोव मटिनी। आं निसाफ पतीक लोव यो मटिनी। तन्न गे इन एर ओंथ बाक्ब रागी रागी डा मुर आन पतीक लोव पाइतीनी” “ दे परमप्रभु यावेमी देंत।

<sup>१३</sup> गो परमप्रभु यावे आ लोव पना पन बाक्डानु, बेनायाह आ तौ पेलात्याह बेक्त। मिनु गो खुम्की पा बाप्शा ठेयब सेंदा पा “परमप्रभु, परमप्रभु यावे, मार, गे इस्राएल डा लीशो नेल्ल आन कली साइक्नीनी?” देंती। *इजीकीएल ९:८*

ग्याइक्वा पुंडसीशो आन कली लोव

<sup>१४</sup> मिनु परमप्रभु यावेमी आं कली लोव पाप्तु। <sup>१५</sup> मार लोव पाप्तु देंशा हना “ए मुर, इ लोकबपुकी, इ खिं डा मुर, ग्याइक्वा लाइक्वा पुंडसीशो इ लोकबपुकी, इस्राएल आ खिं डा मुर नेल्ल आन पर्वम यरूसलेमम बाक्ब मुरपुकीमी ‘मेकोपुकी परमप्रभु यावे रे डोन लाम्तेक्म। मोपा एको रागी इं कली अधिकार पचा कली गेशो बाक्त’ देंशो बाक्तेक्म” देंत। <sup>१६</sup> मोपतीके परमप्रभु, परमप्रभु यावेमी “गो मेको आन कली डोन रागी रागी डा मुर आन दातेम सोइक्ताक्डमी। गो मेको आन कली राज्य राज्य आन दातेमी फ्रात हना यो, इक्का नाक्ती सम्म मेको आन परमप्रभु दुम्ती। *इजीकीएल ६:८-१०* <sup>१७</sup> मोपतीके गे मेको आन कली ‘गो इन कली जात जात डा मुर आन दाते रे खुप्ननी। मिनु ब्रशा लशो रागी नेल्ले रे पा खुप्ननी। मिनु गो इन कली इस्राएल रागी गेनन्नी। *येरमीया २४:५-६; येरमीया २९:२४* <sup>१८</sup> मिनु मेकोपुकी लेशशा जाक्शा, मेकेर डा ग्रांरा दिशो थोव्रक नु मूर्ति नेल्ल गुंइशा ताइक्नीम। <sup>१९</sup> मिनु गो मेको आन कली थुं का डा दुम्पाइव्नुडमी। मिनु मेको आन आगामी नक सोक्त का कुरपाइनुड। मिनु गो मेको आन फुल्लु खोदेंशो थुं गुंइशा, श्ये के थुं कुरपाइनुडमी। *इजीकीएल ३६:२६; येरमीया २४:७* <sup>२०</sup> मिनु मेकोपुकीमी आं फुल्लुमुशा ब्रेक्शो लोव पशा, आं निसाफ पतीक लोव टीनीम। मिनु मेकोपुकी आं मुर दुम्नीम। मिनु गो मेको आन परमप्रभु दुम्नुड। *इजीकीएल १४:११; येरमीया ७:२३* <sup>२१</sup> तन्न मेको आन ग्रांरा दिशो मारेइ मारेइ मूर्ति आन नोले खोइक्ब आन कली आन पशो नेल्ल आन पियामीन मोइव्नुडमी, दे परमप्रभु, परमप्रभु यावेमी देंत’ दे मतो” देंत।

परमप्रभु आ छेडछेड इर गे लशो

<sup>२२</sup> मिनु नोले आ नेक्था गुगील बाक्शो करूबमी आन फ्रां प्राक्तेक्म। मेना इस्राएली आन परमप्रभु आ छेडछेड मेको आन तार बाक्त। *इजीकीएल १:२८* <sup>२३</sup> मिनु परमप्रभु यावे आ छेडछेड सहर आ दाते रे क्युक्सीशा इर गे लत। मिनु सहर डा पूर्व गे बाक्शो पहाड तार दिक्त। <sup>२४</sup> मिनु परमप्रभु यावे आ सोक्तीम आं कली इर क्युक्ती। मिनु कौइतीके कौइशोमी आं कली कल्दी रागीम ग्याइक्वा लाइक्वा पुंडसीशो आन बाक्तीकेम चाक्दीत्ती। मिनु नोले मेको कौइतीके आं रे इर गे लाक्तु। *इजीकीएल ३:१२* <sup>२५</sup> मिनु गो ग्याइक्वा लाइक्वा पुंडसीशो आन कली परमप्रभु यावे आ लोव नेल्ल शेंताक्डमी।

ग्याइक्वा लाइक्वा पुंडसीशो लेशशो

<sup>१२</sup> परमप्रभु यावेमी आं कली लोव पाप्तु। <sup>२</sup> मार लोव पाप्तु देंशा हना “ए मुर, गे काइ मटीब खिं डा मुर आन दातेम बाक्शो बाक्नेवे। मेको आन के मिक्च बाक्त हना यो, मताइनीम। मेको आन के नोफा बाक्त हना यो, मनेनीम। *येरमीया ५:२१* <sup>३</sup> मारदे हना मेकोपुकी मटीब मुर आन खिं डा बाक्नीम। मोपतीके गे रागी रे ग्याइक्वा लाइक्वा पुंडसीशो मुर खोदेंशो पा इ कुम्लो खिक्सो। मिनु नाक्तीन मेको आन डौइती इ बाक्तीक रे ग्याइक्वा लाइक्वा पुंडसीशो खोदेंशो पा अर्को ठाउं लावो। मेकोपुकी मटीब खिं डा मुर बाक्तेक्म हना यो, रुप्नीमी कौं? <sup>४</sup> गे ग्याइक्वा

लाइक्वा पुंडसीशो दुम्चा कली, मेको आन डौइती नाक्तीन इ मार मार फ्रेंदो। मिनु मेको आन डौइती रे ग्याइक्वा लाइक्वा पुंडसीशो मुर खोदेंशो पा नाक्दो लावो। <sup>५</sup> मेकोपुकीम तचा डा पा गारोम पोव्रला खितो। मिनु इ कुम्लो मेकेर रे पा ख्रीडो। <sup>६</sup> मेकोपुकीम कोवन कोवना गे इ कुम्लो इ बलाम कुरो। मिनु नां रिक्मेनु कुरशा गाक्को। रागी मतचा डा पा इ कुल सुम्सो। मारदे हना गो इ कली इस्राएल आ खिं डा मुर आन पर्वम चिन्ड का सेल्शो बाक्नुड” देंत। *इजीकीएल २४:२४,२७*

<sup>७</sup> गो मेको आ अरेशो खोदेंशो पाता। मिनु ग्याइक्वा लाइक्वा पुंडसीशो दुम्चा कली नाक्तीन आं कुम्लो फ्रेंशा गुंइताक्ड। मिनु नाक्दो गारोम पोव्रला खित्ता। मिनु मेको आन तन तना आं कुम्लो बलाम कुरशा नाक्दो गाक्ती।

<sup>८</sup> मिनु आ सुनी परमप्रभु यावेमी आं कली लोव पाप्तु। <sup>९</sup> मार लोव पाप्तु देंशा हना “ए मुर, मार, मेको इस्राएल डा मटीब खिं डा मुरपुकीम ‘गे मार पवी’ दे इ कली हिल्लो मपामे?” देंत। <sup>१०</sup> मेको आन कली “परमप्रभु, परमप्रभु यावेमी मार देंत देंशा हना ‘एको लोव यरूसलेम डा सासन पाइब नु इस्राएल डा मुर नेल्ल आन पर्वम बाक्ब’ दे माइक्मी। <sup>११</sup> मेको आन कली ‘गो गे इन कली चिन्ड का दुम्ती। गो मार पडा, मेको आन कली पाइनीमी। मेकोपुकी रागी रे ग्याइक्वा लाइक्वा पुंडसीनीम’ देंत। <sup>१२</sup> मेको आन दातेम बाक्शो सासन पाइबमी नाक्दो आ बलाम मार मार कुरशा गाक्ब। मिनु लाडगा गूचा कली गारोम पोव्रला खिक्ब। मिनु मेकोम आ रागी मकोव्रचा कली आ कुल सुम्ब। *२२*राजा २५:४ <sup>१३</sup> गो मेको आ तार आं ग्याइल आप्नुड। मिनु मेको आं ग्याइलीम बिक्ब। मिनु गो मेको कली कल्दी आन रागी बेबीलोनम चाक्नुड। तन्न मेकोम, मेको रागी मताइब। मिनु मेकेरन बेक्ब। *इजीकीएल १७:२०; येरमीया ३९:७* <sup>१४</sup> मेको आ एर ओंथ बाक्ब आ गेय पाइबपुकी नु आ लडाइ पाइब नेल्ल आन कली फशेम एर ओंथ ब्रपाइव्नुडमी। मिनु तरवार शोइक्शा खेदा पाइनुडमी। <sup>१५</sup> मिनु गो मेको आन कली रागी रागी डा मुर आन दातेम फ्राइनुडमी। राज्य राज्यम एर ओंथ ब्रपाइव्नुडमी। मिनु मेकोपुकीम गोन परमप्रभु यावे नड, दे तुइक्नीम। <sup>१६</sup> तन्न गो मेको आन दाते डा का निक्शी आन कली तरवार, अन्काल नु मुर बेक्तीक रोइ रे प्रौइनुडमी। मिनु मेकोपुकी ते ते बाक्नीमी, मेक मेक डा रागी रागी डा मुर आन दातेम आन ग्रांरा दिशो गेय पशो आ पर्वम बिक्चीम ला मो पका बाक्त देंमल। मिनु मेकोपुकीम गोन परमप्रभु यावे नड, दे तुइक्नीम” दे परमप्रभुम देंत। *इजीकीएल ६:८*

इजीकीएल चिन्ड दुम्शो

<sup>१७</sup> मिनु लेंशा परमप्रभु यावेम आं कली लोव पाप्तु। <sup>१८</sup> मार लोव पाप्तु देंशा हना “ए मुर, गे इ जचा थोव्रक जवीनु खिंखि पा जावो। मिनु ब्वाक्कु तूडीनु, हिंशा गिक गिक पा खिंखि पा तूडो। <sup>१९</sup> मिनु रागी डा मुर नु यरूसलेम नु इस्राएल रागीम बाक्ब मुर आन कली परमप्रभु, परमप्रभु यावेमी ‘मेको आन जचा थोव्रक हिंशा जाइनीम। मिनु सुर्ता पा ब्वाक्कु तूनीम। मारदे हना मेकेर बाक्ब आन मरिश्शो पतीके, मेको रागी नु मेकेर बाक्शो मारेइ मारेइ गोरशो सेल्लुड। <sup>२०</sup> मुर बाक्शो सहर नेल्ल श्येत्थ दुम्नीम। मिनु रागी नुक्ब। मिनु गेपुकीम गो परमप्रभु यावे नड, दे तुइक्नीनी’ देंशो बाक्ब” देंत।

<sup>२१</sup> मिनु लेंशा परमप्रभु यावेमी आं कली लोव पाप्तु। <sup>२२</sup> “ए मुर, इस्राएल रागी आ पर्वम मार लोव बाक्बा? नाक्ती लाक्ना लाक्न बाक्नीम। मिनु परमप्रभु यावे आ कौइतीके मखाप्नीम। *२*पत्रुस ३:४ <sup>२३</sup> मोपतीके मेको आन कली ‘परमप्रभु, परमप्रभु यावेमी, गो मेको मो देंतीक लोव आ अर्थ साम्नुड। मिनु मेकोपुकीम इस्राएलम मेको देंतीक लोव गेनायो मर्देनीम’ दे माइक्मी। मेको आन कली ‘नाक्त नेक्थान जाक्शो बाक्नीम। कौइतीक नेल्ल गाक्ब। *हबक्कु २:३* <sup>२४</sup> मारदे हना मुल लेंशा गेनायो इस्राएली आन दातेम जोल पा कौइतीके नु लेम्शा लिक्वु कोव्रब मदुम्नीम। <sup>२५</sup> मारदे हना गो, परमप्रभु यावे आं देंशो लोव पशा, खाप्नुड। मेको देश मपाइब रीब पा दुम्ब। ए मटीब खिं डा मुर, इन पालामीन गो आं देंशो लोव खाप्नुड’ दे परमप्रभु, परमप्रभु यावेमी देंशो बाक्ब” देंत।

26 मिनु लेंशा परमप्रभु यावेमी आं कली लोव्र पाप्तु। 27 मेकोमी “ए मुर, इस्राएल आ खिं डा मुरपुकी, मेको आ कौइतीकेमी कौइशो लोव्र शुश बर्स नोले ला दुम्ब। मेको नोले दुम्ब लोव्र बाक्ब। 28 मोपतीके मेको आन कली ‘परमप्रभु, परमप्रभु यावेमी आ देशो लोव्र खाप्ब। लोव्र का यो मजाम्ब। मार देंबा, मेको पाइब’ दे माइक्मी, दे परमप्रभु, परमप्रभु यावेमी” देंत।

जोल पा परमप्रभु आ लोव्र पाइब

13 परमप्रभु यावेमी आं कली लोव्र पाप्तु। 2 मार, लोव्र पाप्तु देंशा हना “ए मुर, इस्राएल डा आं लोव्र पाइब आन कली नु आंम आन मिशो लोव्र पाइब आन कली ‘परमप्रभु यावे आ लोव्र नेनीन’ देनो। 3 मेको निप्स मपाइशो आं लोव्र पाइब आन कली ‘आबी, मेको आंमा आन थुं डा लोव्र, आं कौइतीके मतथु, लोव्र पाइनीम। *येरमीया १४:१४* 4 ए इस्राएल, जोल पा आं लोव्र पाइब ब्रेशो खिंम बाक्ब सिवार खोदेशो बाक्नीम। 5 गे ब्रेशो गारो लेंशा मसेली। गे इस्राएल कली वारच मपनी। मोपतीके परमप्रभु यावे, आं नाक्त मेको ब्रुइनीम’ देंत। *यसैया २:१२* 6 मेको आन तशो लोव्र जोल बाक्शा, आन लिंक्वु कोव्रतीक जोल बाक्ब। मेकोपुकीम ‘परमप्रभु यावेमी देशो बाक्ब’ देंनीम। तन्न मेको परमप्रभु यावेमी सोइशो मनम। मो हना यो मेकोम आन लोव्र गाप्, दे आस पाइनीम। *इजीकीएल २२:२८; येरमीया ५:३१* 7 गेपुकीम जोल पा कौइतीके तशा, लिंक्वु कोव्रशा, जोल लोव्र ला पाइब दुम्तीनी। तन्न गो इन कली काइ लोव्र मपथु, गेपुकीमी ‘परमप्रभु यावे आ लोव्र बाक्ब देंतीनी’ दे माइक्मी” देंत।

8 मोपतीके परमप्रभु, परमप्रभु यावेमी “गेपुकीम फश लोव्र पा, जोल पा कौइतीक आ पर्वम लोव्र पतीके, गो इन कली मरिश्शो पाइनुड। 9 ‘मेको दूली पा कौइतीक लोव्र पाइब आन पर्वम नु जोल पा लिंक्वु कोव्रब आन पर्वम, गो आं गुइ इन गे क्युक्नुड। मेकोपुकी आं मुर आन दातेमी बाक्चा मताइनीम। मेको आन नें इस्राएली आन खिं डा मुर आन नें ब्रेक्तीकेम ब्रेक्चा मताइनीम। मेकोपुकी इस्राएल रागीम ओव्रचा मताइनीम। मिनु गेपुकीम गोन परमप्रभु यावे नड, दे तुइक्नीनी, देशो बाक्ब’ दे माइक्मी” देंत। *इजीकीएल १४:९* 10 थमा पा, मेकोपुकीम आं मुर आन कली दूली लां खोइक्पाइशशा, थुं नाइक्तीके मबाक्थु, यो “थुं नाइशशा बाक्कीन” देंनीम। मिनु मुरपुकीम ब्रेत्वा चिक्शो गारो प्रोव्रनीमी, मेको जोल पा लोव्र पाइबम बुलु ब्रुइशशा सुम्नीम। *येरमीया ६:१४* 11 गे मेको बुलु ब्रुइक्ब आन कली “थाम्पा ठेयब रेउ यीब। मिनु ठेयब मुप्स यीनीम। मिनु फश गिवार जाक्ब। 12 मिनु मेको गारो ब्रेब्। मार, मुरपुकीम इन कली ‘गे इन ब्रुइशशा बुलु ते लाक्गा, दे हिल्लो मपाइनीमी? देशो बाक्ब’ दे माइक्मी” देंत। 13 मोपतीके परमप्रभु, परमप्रभु यावेमी “गो आं गाइशशोम थम हिंवा डा फश गिवार पपाइक्नुड। मिनु आं चुरशोम खतम पोक्चा कली रेउ नु मुप्स जाक्ब। 14 मिनु मेकोमी इन बुलु ब्रुइशशा गारो नेल्ल ब्रेप्पाइक्ब। आ जग यो तांइसीब। मेको प्रेदुनु, गे गारो आगाम बेक्नीनी। मिनु गेपुकीम ‘गोन परमप्रभु यावे नड’ दे तुइक्नीनी।

15 मोपा गो आं गाइशशो मेको गारो नु मेको बुलु ब्रुइक्ब आन तारी मोइक्नुड। मिनु गो इन कली ‘मुल मेको गारो मबा, मेको आन कली बुलु ब्रुइक्ब यो मबाक्म’ देंनुड। 16 इस्राएल डा मेको जोल पा परमप्रभु यावे आ लोव्र पाइबपुकीम यरूसलेम आ पर्वम लोव्र पाम्तेक्म। मिनु मेकेर थुं नाइशशा बाक्तीक मद्मुथु यो ‘थुं नाइशशा बाक्तीक ताइतक’ देंतेक्म। 17 मेकोमी ‘मुल ए मुर, इ मुर आन तमी आन कली हुइक्तो। मेकोपुकीम आन थुंम मिश्शा लोव्र पाइनीम। गे परमप्रभु यावे आ लोव्र मेको आन कली पावो’ देंत।

18 ‘आबी आबी, गुइ कली फ्रेंतीक सेल्ब मीश मुर आन कली श्येत बाक्ब। मुर आन कली साइक्चा कली लाइशशो कोव्रशा, कुल सुम्तीक वा सेल्ब मीश मुर आन पर्वम आबी आबी। मार, गेपुकीम आं मुर आन कली साइक्नीनी? मिनु गे ब्रौइचा ताइनीनी डा? मताइनीनी। 19 मुठी का निक्शी क्योव्रज, नु टुक्रा का निक्शी शोब्ले आ पर्वम साइक्चा ममाल्शो मुर आन कली साइक्तीनी। मिनु ब्रौइचा मगेचा माल्शो मुर आन कली ब्रौइचा गेतीनी। मिनु आं मुर आन कली जोल पा मोदेशो पाइतीनी’ दे परमप्रभु, परमप्रभु यावेमी मेको आन कली माइक्मी” देंत।

20 मोपतीके परमप्रभु, परमप्रभु यावेमी “गो इन फ्रेंतीक आ पर्वम इन कली मरिश्शो पाइनुड। गो इन गुइ रे चिक्ब खोदेशो पा साइक्चा चिक्शो मुर आन कली इन गुइ रे प्रौइनुड। 21 गो मेको आन कुल सुम्तीक वा शोल्शा, आं मुर आन कली प्रौइनुडमी। मेकोपुकी मुल रे इन गुइ डा सिखार मद्मुनीम। मिनु गेपुकीम गोन परमप्रभु यावे नड, दे तुइक्नीनी। 22 मारदे हना गे जोल पा दोस गेशा ठीक पाइब मुर आन कली आन थुं लुक्च लपाइक्तीनी। गो मोदेशो मपड। मिनु आं अरेशो लोव्र मटीब आन कली टीब मद्मुनीम, देशा ब्रौइचा मगेनी। *येरमीया २३:१४* 23 मोपतीके गेपुकीम मुल रे जोल पा कौइतीक मताइनीनी। गे लिंक्वु मकोव्रनीनी। गो आं मुर आन कली इन गुइ रे प्रौइनुडमी। मिनु गेपुकीम गोन परमप्रभु यावे नड, दे तुइक्नीनी” दे परमप्रभुम देंत।

मूर्ति पूजा पाइब आन कली दोस

14 इस्राएल डा खाल्पा का निक्शी जाक्शा, आं डौइती निस्साकम। *इजीकीएल २०:१* 2 मिनु मेना परमप्रभु यावेमी आं कली लोव्र पाप्तु। 3 मार लोव्र पाप्तु देंशा हना “ए मुर, एको खाल्पापुकीम आन मूर्ति आन आन थुंम वोइशशो बाक्तेक्म। मिनु मरिश्शो पा दाइल पांइसीतीक फुल्लु यो आन डौइती वोइशशो बाक्नीम। मार, आन हिल्लो पशो लोव्र गो लेत्वा माल्नुडा, डा? 4 मोपतीके गे मेको आन कली ‘परमप्रभु, परमप्रभु यावेमी इस्राएल आ खिं डा मुर सुइमी मूर्ति आन थुंम वोइशशा, आन मरिश्शो पा दाइल पांइसीतीक फुल्लु, आन डौइती वोइशशा, आं लोव्र पाइब आन बाक्तीक जाक्तेक्म हना, गो, परमप्रभु यावेमी, मेको आन थुंम मूर्ति वोइशशा जाक्शो मुर आन कली लोव्र लेल्नुडमी। 5 मिनु मेको मूर्तिम पतीके इस्राएल आ खिं डा मुरपुकीम आं कली प्रौइतेक्म। मो हना यो आन थुंम फाइशशा, आं गे लेत्ने चाप्नुडा, कौं?’

6 मोपतीके इस्राएल आ खिं डा मुर आन कली ‘परमप्रभु, परमप्रभु यावेमी इन ग्रोग्रा दिशो गेय नेल्ल प्रौइशा, इन मूर्ति रे पा लेशशा आं गे जाक्कीन’ देशो बाक्ब, दे माइक्मी। 7 इस्राएल आ खिं डा मुर सुइ नु मेकेर बाक्ब अर्को रागी डा मुर सुइमी आं कली प्रौइशा, मूर्ति आन थुंम वोइशशा, आन मरिश्शो पा दाइल पांइसीतीक फुल्लु आन डौइती वोइशशा, आं लोव्र पाइब आन बाक्तीक जाक्तेक्म हना, गो, परमप्रभु यावेमी, मेको आन थुंम मूर्ति वोइशशा जाक्शो मुर आन कली लोव्र लेल्नुडमी। 8 गो मेको आन कली सजाइ गेनुडमी। मिनु गो मेको मुर कली कौइतीक नु शुक्शी पाइक्तीक सेल्नुड। गो मेको कली आं मुर आन दाते रे तिल्लुड। मिनु गोन परमप्रभु यावे नड, दे तुइक्चा माल्नीनी।

9 मिनु सुइ परमप्रभु यावे आ लोव्र पाइबम आ लोव्र मार बाक्बा, दे हिल्लो पाइब आन कली आंमा थुंम मिश्शा लोव्र पाप्तु हना, गो मेको कली मोदेशो पपाइक्ता। मिनु गो मेको कली आं गुइ दिंशा, सजाइ गेशा आं मुर इस्राएली आन दाते रे क्याम्नुड। *१राजा २२:२०-२३* 10 मेको निम्फाम आस मरिश्शो पशो आ पर्वम सजाइ ताइनीस। आं लोव्र पाइब नु आं लोव्र हिल्लो पाइब, निम्फा आस सजाइ उइक्थ उइक्थ दुम्ब। *इजीकीएल ३:१७-२०* 11 मिनु इस्राएल आ खिं डा मुर गेनायो आं रे पा बरलेशा मलाइनीम। मिनु मेकोपुकीम गेनायो हेंथे पा आंम कली ग्रोग्रा दिशो मसेल्सीनीम। मिनु मेकोपुकी आं मुर दुम्नीम। गो मेको आन परमप्रभु दुम्नुड, दे परमप्रभु, परमप्रभु यावेमी देशो बाक्ब” देंत। *इजीकीएल ११:२०*

परमप्रभुम गेशो सजाइ ठीक बाक्ब

12 मिनु परमप्रभु यावेमी आं कली लोव्र पाप्तु। 13 मार लोव्र पाप्तु देंशा हना “ए मुर, तेकोइ रागी डा मुर आन थुंम फाइशशा आं कली प्रौइशा अर्को आ नोले खोइक्तेक्म हना, गो मेको आन पर्वम आं गुइ दिंशा आन जचा थोव्रक खतम पोक्नुड। अन्काल चाक्शा, मेकेर डा मुर नु बी ब्यफ, क्यारश भेडा नेल्ल आन कली साइक्नुडमी। *इजीकीएल ४:१६* 14 मेकेर नोआह, दानीएल नु अय्युब सांफा बाक्तेक्म हना यो, मेकोम आन ठीक पतीकेम आंमा ला ब्रौइचा ताम वा, दे परमप्रभु, परमप्रभु यावेमी देशो बाक्ब” देंत। *येरमीया १५:१* 15 गो मोदेशो रागी कली खतम सेल्चा कली ब्वाकी डा जन्तु



सोइक्ताकडमी हना, जन्तुपुकीम पतीके मेको रागी रे सुइ एर ऑथ पने मचाप्लेक्म हना, <sup>16</sup> मिनु मेको मुर सां मेकेर बाक्तेक्म हना, गो आं ब्रॉइशा बाक्शो खोदेंशो पा, मेकोम आन तमी तौ आन कली प्रॉइने मचबेम वा। मेकोपुकी आंमा ला ब्रॉइम वा। मिनु मेको रागी गोरशो रागी दुम वा। <sup>17</sup> मिनु परमप्रभु, परमप्रभु यावेमी “गो रागी आ पबर्म तरवार सोइशा, मेको तरवार कली ‘मुर नु बी ब्यफ, क्यारश भेडा नेल्ल साइक्मी’ देंती हना, <sup>18</sup> मिनु मेको मुर सां मेकेर बाक्तेक्म हना यो, गो आं ब्रॉइशा बाक्शो खोदेंशो पा मेकोम आन तमी तौ आन कली प्रॉइने मचबेम वा। मेकोपुकी आंमा ला ब्रॉइम वा। <sup>19</sup> मिनु गो मेको रागीम मुर बेक्तीक रोइ सोइशा, हुश खाक्श पोक्शा, मेकेर डा मुर नु बी ब्यफ, क्यारश भेडा साइशा आं गाइशा मोइक्ता हना, <sup>20</sup> मिनु मेकेर नोआह, दानीएल नु अय्युब बाक्तेक्म हना यो, गो आं ब्रॉइशा बाक्शो खोदेंशो पा मेकोम आन तमी तौ आन कली प्रॉइने मचबेम वा। मेको आन ठीक पतीकेम आंमा ला ब्रॉइम वा” देंत।

<sup>21</sup> परमप्रभु, परमप्रभु यावेमी “गो यरूसलेम आं ४ ओटा हिंचा डा श्येत तरवार, अन्काल, ब्वाकी डा जन्तुपुकी नु मुर बेक्तीक रोइ सोइशा मेकेर डा मुर नु बी ब्यफ, क्यारश भेडा आन कली साइक्तामी हना, सुइ मब्रॉइम वा। *इजीकीएल ५:१७; लेवी २६:१६-२५; येरमीया १५:३; प्रकाश ६:८* <sup>22</sup> मो हना यो मुर आन दाते डा का निक्शी ब्रॉइशा बाक्नीम। मेको आं तमी तौ गूशा इ बाक्तीक जाक्नीम। मिनु गो मेको आन मिश्शो नु आन पशो ताइनेवे। मिनु गो यरूसलेम कली श्येत गेशो नु क्याश्शो आ पबर्म इ थुं नाइक्नेवे। <sup>23</sup> मेको आन मिश्शो नु आन पशो तशा, मेकोपुकीम इ थुं नाइक्पाइक्नीम। मिनु गो मेकेर मार मार पडा, मेको नेल्ल मोशीन मपड, दे तुइक्नेवे” दे परमप्रभु, परमप्रभु यावेमी देंत।

#### शोर गाक्शो अडगुर बोट

**15** मिनु परमप्रभु यावेमी आं कली लोव्र पाप्नु। <sup>2</sup> मार लोव्र पाप्नु देंशा हना “ए मुर, मार, ब्वाकीम बाक्ब अडगुर बोट आ शी ब्वाकी डा अरु तेकोइ रवा आन शी क्येडा रिश्शो बाक्बा डा? *येरमीया २:२१* <sup>3</sup> मेको रे मारेइ थोव्रक सेल्चा दुम्बा डा? मुरपुकीम मार मार क्युक्चा कली मेको के कोडग सेल्नीमी डा? <sup>4</sup> मेको मीम चोइनीम। मेको मीम आ सुर निक्शी नेक्शा, आ दाते डा कोइला दुम्बा लीमेनु, मार दुम्बा डा? *यूहन्ना १५:६* <sup>5</sup> मेको सेसीन बाक्मेनु ला यो मारेइ मद्दुम्ता हना, मीम नेक्शा क्येर दुम्मेनु, मारेइ दुम्बा, डा?” देंशो बाक्ब।

<sup>6</sup> मोपतीके परमप्रभु, परमप्रभु यावेमी “दोपा ब्वाकी डा रवा आन दाते डा अडगुर बोट कली मीम चोचा कली गेडा, मोपा गो यरूसलेम डा मुर आन कली यो पाइक्नुडमी। <sup>7</sup> गो मेको आन कली सजाइ गेनुड। मेकोपुकी मी रे ब्रॉइतेक्म हना यो, मीम मेको आन कली दाक्ब। गो मेको आन कली सजाइ गेडानु, गोन परमप्रभु यावे नड, दे तुइक्चा माल्नीनी। <sup>8</sup> मिनु आन थुं फाइश्शो अरु आन नोले खोइक्तीके मेको आन रागी मुर मबाक्तीके सेल्लुड” दे परमप्रभु, परमप्रभु यावेमी देंत।

#### यरूसलेम तेल्लेम खोदेंशो दुम्शो

*इजीकीएल २३:-*

**16** परमप्रभु यावेमी आं कली लोव्र पाप्नु। <sup>2</sup> मार लोव्र पाप्नु देंशा हना “ए मुर, यरूसलेम कली मूर्ति पूजा पचा मद्दुम्ब, दे तुइक्पतो। <sup>3</sup> मिनु मेको कली परमप्रभु, परमप्रभु यावेमी यरूसलेम कली ‘इ गोतीके नु इ जरमेतीक रागी कनानी आन रागी बाक्ब। इ आफ एमोरी का बाक्त। इ ममा हिंती बाक्त। <sup>4</sup> गे जरमेसेनु सुइम इ सपु मख्रोदेम। इ कली ब्वाक्कुम मचिक्तेम। सुइम इ रांम हिक्सी मखेक्तेम। इ कली सुइम वाम मगिलेम। <sup>5</sup> सुइम मेको नेल्ल पचा कली इ कली शिशी मकोइदेम। तन्न गे जरमेसेनु, इ कली रूम ताइक्ताक्म। मारदे हना इ कली ग्रॉग्रा दिक्ताक्म।

<sup>6</sup> मिनु गो इ नेक्था रे पा लडानु, इ कली हुश लुम्सीशा बाक्शो ताइतन। मिनु गो मोपा लुम्सीशा बाक्डेनु, गो इ कली रू डा बोट खोदेंशो पा कोल्शा, ब्रॉइशा, बाक्को’ देंती। <sup>7</sup> मिनु गो कोल्शा ठेयब दुम्ते। मिनु इ कुकु कोल्शा इ चां लाइश्शो दुम्त। तन्न गे वा मफेक्शो शिश्रा बाक्ते।

<sup>8</sup> गो लेंशा इ नेक्था रे पा लडानु, गे ग्युबे पची ना दुम्शो बाक्ते। मिनु गो आं वा आ सुरमी इ शिश्रा रां सुम्ता। गो गे नु कबल का पाता। मिनु गे आं के दुम्ते। *रूथ ३:९; प्रस्थान १९:५* <sup>9</sup> नोले गो इ कली ब्वाक्कुम चिक्शा इ हुश नेल्ले चिक्ताक्न। मिनु इ कली तेल खेक्ताक्न। <sup>10</sup> नोले गो इ कली बुटा आप्शो वाम ग्योम्ताक्न। मिनु इ खोइलीम रिश्शो कुशुल के जुत्ता लिक्ताक्न। गो इ कली रिश्शो पा किरशो सुती श्येले के वा फेक्ताक्न। मिनु शुश क्येट लाइब वाम इ कली ग्योम्ताक्न। <sup>11</sup> गो इ कली गहना पांइताक्न। इ गुडम चुरा लिक्ताक्न। इ शुरम सुन के माला रेल्ताक्न। <sup>12</sup> गो इ नैम मुन्दी लिक्ताक्न। मिनु इ नोफाम माडवडी क्युक्ताक्न। इ पियाम दारशो सुन फू चुइक्ताक्न। <sup>13</sup> मोपा गे सुन चांदीम ग्योम्साक्वे। इ वा रिश्शो पा किरशो सुती श्येले के वा, शुश क्येट लाइब वा नु बुटा आप्शो दारशो वा दुम्तेक्म। इ जचा थोव्रक रिश्शो फस, खुदो नु रिश्शो तेल बाक्तेक्म। गे थम दारशो दुम्शा कोल्ते। मिनु गे पिपीम दुम्चा शिरते। <sup>14</sup> गे दारशो दुम्तीके इ नें रागी रागी डा मुर आन दातेम ब्रत। मारदे हना इ दारस मारेइ मद्दुम्शो रिश्शो बाक्त। मेको नेल्ल आं इ कली गेशो ग्योम्तीके रे मोदेंशो दुम्त, दे परमप्रभु, परमप्रभु यावेमी देंशो बाक्ब” देंत।

<sup>15</sup> मिनु परमप्रभुमी “तन्न गे इ दारसम थमा सुइक्तीवी। मिनु गे इ नें चेम्शा तेल्लेम का दुम्ते। इ नेक्था रे पा लाइब सु बाक्तेक्म हना यो, गे मेको नु तेल्लेम पाप्तीवी। *येरमीया २:२०* <sup>16</sup> गे इ वा रे लाइशा, इ कली दारशो थान सेल्तीवी। मिनु मेकेर गे तेल्लेम पाप्तीवी। मेको मोदेंशो डोंइती गेनायो मद्दुम्शो बाक्त। मिनु नोले यो गेनायो मद्दुम्ब। <sup>17</sup> गो इ कली गेशो दारशो गहना लाइशा, मेको आं सुन चांदी के बाक्तेक्म। मिनु मेको रे वोंइश मुर मूर्ति सेल्साक्वे। मिनु मेको नु तेल्लेम पाप्तीवी। *होसे ८:४* <sup>18</sup> गे इ बुटा आप्शो वा लाइशा, मेको आन कली सुम्तीवी। मिनु गे आं तेल नु धूप मेको आन डोंइती चढ़ेप्तीवी। <sup>19</sup> गो इ कली जचा थोव्रक यो गेतन। गो इ कली रिश्शो फस, खुदो नु रिश्शो तेल जचा गेतन। तन्न गे मेको जचा थोव्रक मेको आन डोंइती ब्रॉवशो रिना पपाइक्चा कली चढ़ेप्तीवी। मोदेंशो दुम्त। <sup>20</sup> मिनु गे आं कली थिशो तमी तौ आन कली लाइशा, मूर्ति आन कली जचा थोव्रक सेल्शा क्योरशा चढ़ेप्तीवी। मार इ तेल्लेम पशोमीन मगाम डा? *इजीकीएल २०:२६; इजीकीएल २३:३७; ब्यक्स्था १२:३१; २राजा १६:३; येरमीया ७:३१* <sup>21</sup> गे आं आल आन कली क्योरशा, मूर्ति आन कली चढ़ेप्तीवी। <sup>22</sup> मिनु इ मूर्ति पूजा नु इ तेल्लेम पशो नेल्लेम ठिठी दुम्शो डा नाक्त ममिम्ती। मेना गे वा मफेक्सीशो शिश्रा नु हुश लुम्सीशो बाक्ते।

<sup>23</sup> इ आं अरेशो मटिशो आ पबर्म परमप्रभु, परमप्रभु यावेमी इ पबर्म ‘आबी आबी’ देंत। *येरमीया ११:१३* <sup>24</sup> गे इ कली चोक चोकम मूर्ति पूजा पतीके सेल्साक्वे। <sup>25</sup> मिनु गे लां गुम्तीक नेल्लेम इ कली लाइशा बाक्तीके सेल्शा, इ दारसम तेल्लेम पाप्तीवी। मिनु मेको रे पा लाइब नेल्ल आन कली गे इ रां गेशा इ तेल्लेम पतीक बारपाइक्तीवी। <sup>26</sup> गे इ माल्शो, इ नेक्था बाक्ब इजीप्त डा मुर नु तेल्लेम पाप्तीवी। मोपा इ तेल्लेम पतीक बारपाइशा, आं कली थाम्पा गाइक्पाइक्ती। <sup>27</sup> मोपतीके गो इ कली सजाइ गेतन। गो इ कली शुश जचा थोव्रक मगेथु, इ जोरी सत्रु आन गुडम गेतन। गो इ कली पलिस्ती आन दाक्शो सिखार दुम्पाइक्चा कली गेतामी। पलिस्ती आन तमीपुकी इ मरिश्शो पशो तशा मुने पाप्तेक्म। <sup>28</sup> गे अस्सुर डा मुर नु यो तेल्लेम पाप्तीवी। मारदे हना गे मोपा मरूशो बाक्ते। तेल्लेम पशा नोले यो मरूडे। *इजीकीएल २३:१२* <sup>29</sup> गे मार मार ग्याब लेयब रागी कल्दी नु यो इ तेल्लेम पतीक बारपाइक्तीवी। मेको मो पशा यो मरूडे” देंत।

<sup>30</sup> मिनु परमप्रभु, परमप्रभु यावेमी “गे मोदेंशो पचा कली इ थुंम दोदेंशो पा रोइ पचा माल्दा? गे एको गेय नेल्ल मुने मपाइश्शो तेल्लेममी खोदेंशो पा पाप्तीवी। <sup>31</sup> गे गुम्तीक लां नेल्ल नु इ चोक चोकम इ लाइशा बाक्तीके सेल्तीवी। तन्न गे तेल्लेम खोदेंशो मद्दुमे। मारदे हना गे इ गाल्च मताक्गी। <sup>32</sup> गे हेंथे पाइब मीश, इ वोंइश आ पा डा अर्को नु बाक्नेवे। <sup>33</sup> मुरपुकीम तेल्लेम नेल्ल आन कली गाल्च गेनीम। तन्न गे चहिं दूली पा इ कली दाक्ब आन कली कका गाल्च गेप्तीवी। गे मेको आन कली एर ऑथ नेल्ल रे चाक्शा, गे नु इप्पाइक्चा कली घूस गेप्तीवी। <sup>34</sup> मोपा गे इ तेल्लेम पतीकेम अरु मीश मुर खोदेंशो मद्दुमे। इ कली सुइम मयोव्रडेम। मोपतीके गे गाल्च गेप्तीवी। गे इ गाल्च मतगी। मोपा गे अरु तेल्लेम खोदेंशो मद्दुमे” देंत।

35 मोपतीके ए तेल्लेम, परमप्रभु यावे आ लोव्र नेनो। 36 परमप्रभु, परमप्रभु यावेमी “मारदे हना माल्तीके थम ठेयब बाक्त, इ तेल्लेम पचा कली इ कली माल्शो मुर आन कली इ शिश्रा रां कोइताक्वी। मेको नेल्ल इ ग्रांरा दिशो मूर्ति नु इ आल आन हुश जारशो आ पर्वम बाक्ब। 37 मोपतीके गो इ तेल्लेम पशो नु ग्येरसीशा बाक्शो इ दाक्शो मुर नेल्ल आन कली इ एर ऑथ रे खुप्नुडमी। इ कली दाक्ब नु मदाक्ब नेल्ल आन कली खुप्नुडमी। गो मेको नेल्ल एर ऑं रे खुप्नुडमी। मिनु गो मेको आन डोंइती इ कली शिश्रा सेल्लन। *येरमीया १३:२२* 38 गो इ कली हेंथे गाक्ब हुश खाक्श पोक्ब मीश मुर खोदेशो पा आं निसाफ पतीक लोव्र कोवशा निसाफ पाइनुड। गो आं गाइशो नु रुश पशोमी सजाइ गेनुड। *लेवी २:१०* 39 मिनु गो इ कली इ मदाक्शो मुर आन गुडम जिम्मा गेनुड। मिनु मेकोपुकीम इ लाइशो बाक्तीके नु लां डा बाक्तीके प्रेत्नीम। मेकोपुकीमी इ वा प्रुइशा इ दारशो थोवक रोइशा, इ कली शिश्रा सेल्शा प्रॉइनीम। 40 मेकोपुकीम इ कली ग्रांग्ये माग्ये पोक्ब मुरपुकी चाक्नीम। मिनु फुल्लु आप्नीम। मिनु इ कली आन तरवारम चक्शा चोकटा लाम्ता सेल्नीम। *ब्यवस्था २२:२३-२४* 41 मेकोपुकीम इ खिम मी सुइक्नीम। मिनु शुश मीश मुर आन डोंइती इ कली सजाइ गेनीम। गो इ तेल्लेम पतीक तेक्नुड। मिनु इ मुर आन कली गाल्च गेतीक तेक्नुड। *२राजा २५:९* 42 मिनु आं गाइशो नु आं रुश पशो, इ रे डोन नाइक्पाइक्नुड। मिनु गो सिक्सी पा बाक्शा मगाइक्नुड। 43 मारदे हना गे इ ठिटी बाक्डे ना डा नाक्त ममिम्ती। तन्न एको गेय नेल्लेमी आं कली गाइक्पाइक्ती। मोपतीके गो इ पशो इ पियामीन मोइक्ता। गे इ अरु ग्रांरा दिशो गेय नेल्ल प्रॉइशा यो इ पतीक नेल्ल मरिश्शो सेल्शा, इ गेय मतेम्दी डा? गे मूर्ति पूजा पाइब क्येडा मरिश्शो पाइब मनवे डा?” दैत। 44 मेकोम “कथा पाइब नेल्लेम इ पर्वम कथा पा ‘दोदेशो ममा मोदेशो तमी’ दैनीम। 45 गे इ ममा आ तमी बाक्नेवे। मेकोम आ वोंइश नु आ आल आन कली प्रॉइतु। मिनु गे इ दिदी आ लोकब यो बाक्नेवे। मेकोम आ वोंइश नु आ आल आन कली प्रॉइतु। इ ममा हिती का बाक्ब। इ आफ एमोरी का बाक्ब। *इजीकीएल १६:३* 46 मिनु इ दिदी सामरीया बाक्ब। मेको इ उत्तर गे आ तमीपुकी नु बाक्शो बाक्त। इ लोकब नु आ तमी चहिं दक्खिन गे सोदोम सहरम बाक्नीम। मेको आ तमीपुकी नु बाक्शो बाक्ब। 47 गे मेको आन गाक्शो लांम ला मगाक्डे। मिनु मेको आन मूर्ति पूजा पशो आ नोले यो खोइक्तीवी। मिनु इक्का नाक्तीमीन इ पतीक नेल्लेम मेको आन क्येडा यो शुश मरिश्शो पाप्तीवी” दैत। 48 परमप्रभु, परमप्रभु यावेमी “गो आं ब्रोंइशा बाक्शो खोदेशो पा, इ लोकब सोदोम नु मेको आ तमीपुकीम इ मरिश्शो पशो खोदेशो गेनायो मपाम। *मत्ती १०:१५* 49 इ लोकब सोदोम आ दोस मार बाक्त दैशा हना, मेको नु आ तमीपुकी ठेयब लेशशा, शुश जशा ब्वशा, शोंप पाइशो दुश्शा बाक्तेक्म। मेकोपुकीम प्रुडग नु मारेइ मथीब आन कली वारच मपदेम। 50 मेकोपुकी ठेयब लेशशा, आं डोंइती ग्रांरा दिशो गेय पाक्तेक्म। मोपतीके गो मोदेशो तशा मेको आन कली तिल्लामी। *उत्पत्ती १९:२४* 51 सामरीयामी इ पशो पाप क्येडा उइक्थ यो मपावो। गे मेको आन क्येडा शुश मूर्ति पूजा पाप्तीवी। मिनु गे इ पशो गेय नेल्ल रे पा, इ लोकब आस कली ठीक पाइब तांइसीब खोदेशो सेल्शो बाक्नेवे। *येरमीया ३:११* 52 गे इ मरिश्शो पशो रावो। मारदे हना गे इ लोकब आस कली इ क्येडा आइक्च सजाइ ताइब सेल्तीवी। मारदे हना गे मेको आस पाप पशो क्येडा इ पशो मूर्ति पूजा शुश बाक्त। गे इ क्येडा मेको आस कली ठीक पाइब खोदेशो सेल्तीवी। मोपतीके मुने पावो, इ मरिश्शो पशो राव। मारदे हना गे इ लोकब आस कली ठीक पाइब खोदेशो सेल्शो बाक्ते।

परमप्रभुमी आ मुर आन कली दाक्ब

53 मिनु गो सोदोम नु आ तमी आन कली रिश्शो दुम्तीक नाक्ती लेशशा गेनुडमी। मिनु सामरीया नु आ तमी आन कली यो मोदेशो पाइनुड। मिनु इ रिश्शो दुम्तीके नाक्ती यो लेशशा गेनन। *ब्यवस्था ३०:३* 54 मोपा गे इ मरिश्शो पशो राइनेवे। मिनु इ पशो नेल्ल आन पर्वम गे मुने दोक्चा माल्नेवे। मिनु मेको आस कली थुं नाइक्तीके दुम्नेवे। 55 इ लोकब सोदोम नु आ तमीपुकी डोंइती डा खोदेशो पा रिश्शो दुम्नीम। मिनु सामरीया नु आ तमीपुकी यो डोंइती डा खोदेशो पा रिश्शो दुम्नीम। मिनु गे नु इ तमीपुकी यो डोंइती डा

खोदेशो पा रिश्शो दुम्नीमी। 56 डोंइती इ ठेयब लेत्तीक नाक्ती गे इ लोकब सोदोम आ पर्वम शुक्शी मपवी डा? 57 मेना मेकोपुकीम इ परमप्रभु यावे आ अरेशो मरिश्शो मतुइशो बाक्तेक्म। मुल अराम डा तमीपुकीमी इ कली शुक्शी पाइनीम। मेको आ नेक्था डा मुर, पलिस्ती आ तमीपुकीमी नु एर ऑथ डा मुर नेल्लेमी शुक्शी पा आइक्च मिम्नीम। *अराम आ तमी एदोम यो बाक्ब।* 58 गे इ मुने दोक्चा डा गेय नु इ मूर्ति पूजा पशो डा सजाइ तचा माल्नेवे” दे परमप्रभु यावेमी दैत।

गेना हना यो लीब कबल

59 परमप्रभु, परमप्रभु यावेमी “गे इ पशो खोदेशो पा गो इ कली पाइनुड। गे आं कसम जशो ममिम्ती। इस पशो कबल यो क्याम्ताक्वी। 60 मो हना यो गो इ ठिटी बाक्डे नाक्त डा गे नु पशो कबल मिम्नुड। गो गे नु गेना हना यो लीब कबल पाइनुड। *लेवी २६:४५; होसे २:१७; इजीकीएल ३७:२६; येरमीया ३१:३१-३४* 61 मेना गे इ पशो नेल्ल मिश्शा, मुने दोक्शा, इ लोकब आस कली ब्राइनेवे। गो मेको आस कली इ तमी खोदेशो पा गेनन। तन्न मेको गे नु पशो कबलम पतीके पशो ममाइ। *इजीकीएल २०:४३* 62 मिनु गो गे नु ग्येथ लुक्च मपाइब कबल पाइनुड। मिनु गे गोन परमप्रभु यावे नड, दे तुइक्नेवे। 63 मिनु गे इ डोंइती पशो मिश्शा मुने दोक्नेवे। गो इ पशो गेय नेल्ल आन पर्वम माफ गेनन। मिनु गे इ मुने आ पर्वम गे ठेयब लेशशो लोव्र पने मचाप्नेवे” दे परमप्रभु, परमप्रभु यावेमी दैत। *इजीकीएल ३६:३१-३२*

अडगुर बोट नु ककाकुली आस कथा

17 मिनु परमप्रभु यावेमी आं कली लोव्र पाप्तु। 2 मार लोव्र पाप्तु हना “ए मुर, कथा का देनो। गे इस्राएल आ खि डा मुर आन कली लोव्र पावो। 3 मिनु परमप्रभु यावेमी मेको आन कली ‘लाइशो, ठेयब फ्रां पाइशो ठेयब ककाकुली का बाक्त। मेको आ शुश ओफ्ला शुश रड डा बाक्तेक्म। मेको लेबानीनम जाक्शा, लाइशो रवा आ डर प्रॉइक्तु। 4 मेकोमी मेको रवा आ डर लाइशो, ग्याप्तीक लेयतीक रागीम चाक्दीत्तु। मिनु मेको ग्याप्ब लेयब आन सहर काम खुम्तु। *इजीकीएल १६:२९* 5 मिनु नोले मेकोमी रागी डा वांचेर लाइशो, रिश्शो खपीम खुम्तु। मेकोम मेको वांचेर शुश ब्वाक्कु बाक्तीकेम खुम्तु। 6 मिनु मेको वाशा एर ऑथ नेल्ल गे ब्राइब लहारा का दुम्त। मिनु मेको आ राशी मेको ककाकुली गे लेक्तेक्म। तन्न मेको आ शाक्श चहिं आगामीन लीतेक्म। मोपा मेको लहारा का दुम्त। मिनु मेको आ राशी दाप्तेक्म। मिनु मेकेर रे शुश सफा यूतेक्म। *इजीकीएल १९:१०* 7 मिनु मेकेर अर्को ठेयब फ्रां पाइशो नु शुश ओफ्ला पाइशो ठेयब ककाकुली का बाक्त। मिनु मेको लहाराम आ शाक्श मेको गे ब्रापाइक्तु। ब्वाक्कु तचा कली मेको आ राशी यो मेको ककाकुली गे ब्रापाइक्तु। मेको डोंइती डा खुम्तीके रे याक्शो बाक्त। 8 मेको के राशी दाम्मल। फल सिम्मल। मिनु मेको रिश्शो लहारा का दुम्त, दे शुश ब्वाक्कु बाक्शो नु रिश्शो खपीम खुम्शो बाक्त’ दैशो बाक्ब। 9 मिनु परमप्रभु, परमप्रभु यावेमी ‘मार, मेको ग्रेल्बा डा? मार, मेको आ शाक्श तुल्चा मपुंइसीबा डा? मिनु मेको आ फल मसोव्रनीमी डा? मिनु मेको मबेक्बा डा? मेको आ नक वाशो कोच्चा नेल्ल बेक्नीम। मेको आ शाक्श तुल्चा कली शुश बोल्यो गुड नु शुश मुर ममाल्नीम। 10 मेको कली याक्शा ला हना यो मेको ग्रेल्बा डा? पूर्ब डा फशेम आबानु मेको नेल्ल मसोव्रबा डा? रिश्शो खपीम खुम्शो बाक्त हना यो, फशेम आबानु मेको मसोव्रबा?’ दे मेको आन कली दैचा माल्नेवे” दैत।

कथा आ अर्थ शेंशो

11 मिनु परमप्रभु यावेमी आं कली लोव्र पाप्तु। 12 मार लोव्र पाप्तु दैशा हना “एको मटीब खिं डा मुर आन कली ‘एको लोव्र आ अर्थ मार बाक्बा, मेको मतुइक्नीनी?’ दे हिल्लो पामी। मेको आन कली ‘बेबीलोन डा पिप यरूसलेमम जाक्त। मिनु मेकोमी यरूसलेम डा पिप नु आ ठेयब गेय पाइब आन कली बेबीलोनम लाइक्तीमी। *२राजा २४:१०, १५, १६* 13 मिनु मेकोम पिप आ खिं डा मुर का कली लाइशो, कसम जपाइशो, मेको नु कबल का पाप्तु। मिनु मेकोमी मेको रागी डा ठेयब मुर आन कली लाइक्तु। *२राजा*

२४:१७; २इतिहास ३६:१३<sup>14</sup> मेको रागी बोल्यो मदुम्ल। लेंशा बोक्ने मचबल नु मेकोम आ पशो कबल ला खाप्ने चाप्शा बाक्ल, दे मोदेशो पाप्तु' देंत।<sup>15</sup> तन्न यरूसलेम डा पिपमी मेको बेबीलोन डा पिप कली मटिथु, इजीप्त रागीम शारा नु ठेयब हुल का लडाइ पाइब गेयीनी, दे मुर सोइक्ताक्व। मार, मेको कली रिम्शो दुम्बा डा? मार मोदेशो गेय पाइब मुर ब्रॉइने चाप्शा डा? कबल पशो प्रॉइशा यो, मेको ब्रॉइने चाप्शा डा?" देंत।<sup>16</sup> परमप्रभु, परमप्रभु यावेमी "गो आं ब्रॉइशा बाक्शो खोदेशो पा, मेकोमी मेको कली पिप सेल्ब पिप नु जशो कसम प्रेंशा, आ पशो कबल प्रॉइशा, बेबीलोन डा पिप आ बाक्तीक सहरम बेक्ब।<sup>17</sup> फाराओ आ सक्ति पाइश्शो लडाइ पाइब नु मेको आ मार मारमी मेको कली वारच पने मचाप्मी। यरूसलेम कली पुम्ची ना नु गारो डोइक्तीक सेल्शा शुश मुर साइक्वी ना वारच मपाइब।<sup>18</sup> मारदे हना मेकोम आ जशो कसम ममिम्थु, आ पशो कबल प्रॉइशा, सल्ला पा यो, मोदेशो मरिम्शो पतीके मेको ब्रॉइने मचाप्ब" देशो बाक्ब।<sup>19</sup> मोपतीके परमप्रभु, परमप्रभु यावेमी "गो आं ब्रॉइशा बाक्शो खोदेशो पा, मेकोम आ कसम जशो प्रेंशा, आं कबल प्रॉइशो नेल्ल मेको आ पियामीन मोइक्नुड।<sup>20</sup> गो आं ग्याइल मेको तार ब्वारनुड। मिनु मेको आं ग्याइलीम रेक्ब। मिनु गो मेको कली बेबीलोनम चाक्नुड। मिनु मेकोम आं थुं फाइक्तीके गो मेको कली निसाफ पाइनुड। इजीकीएल १२:१३<sup>21</sup> मेको आ प्रोक्शा लशो लडाइ पाइब नेल्ल तरवारम साइक्वा पुंइसीनीम। मिनु ब्रॉइशो नेल्ल एर ऑथ ब्राइनीम। मिनु गो परमप्रभु यावेमीन एको लोत्र पशो नड, दे तुइक्नीनी" देशो बाक्ब।

<sup>22</sup> परमप्रभु, परमप्रभु यावेमी "गो लेबानोन डा लाइश्शो रवा आ डर डा आइक्च राशी का प्रोइश्शा लाइक्नुड। मिनु गो मेको कली नेल्ल क्येडा लाइश्शो डांडाम ख्वुम्नुड। यसैया ११:१<sup>23</sup> गो मेको इस्राएल डा लाइश्शो पहाड मेर ख्वुम्नुड। मिनु मेकोम शुश राशी दाप्पाइश्शा फल सिप्पाइश्शा, थम दारशो लेबानोन डा लाइश्शो रवा का दुम्ब। मिनु नेल्ल खाल डा चिक्ब आ राशीम बाक्नीम। मिनु मेकेर ठेयब चिक्बपुकीम ग्योत्र सेल्शा, मेको आ वांकुम बाक्नीम। इजीकीएल २०:४०; १सामुएल २:७०८<sup>24</sup> मिनु रू डा रवा नेल्लेम गो, परमप्रभु यावे नड, दे तुइक्चा माल्नीम। गो लाइश्शो रवा आन कली आइक्च सेल्नुड। आइक्च रवा आन कली लाइश्शो सेल्नुड। गो गिगी रवा आन कली सोत्रपाइक्नुड। मिनु सोत्रशो रवा आन कली गिगी दुम्पाइक्नुड। गो, परमप्रभु यावेमी एको लोत्र पाता। मिनु गो एको थमा पा पाइनुड" देंत।

बेक्चा नु ब्रॉइचा आंम गुइम बाक्ब

**18** परमप्रभु यावेमी आं कली लोत्र पाप्तु।<sup>2</sup> मार लोत्र पाप्तु देशो हना "इस्राएल रागी आ पर्बम लेंशा पशो कथा आ अर्थ मार बाक्बा, दे मिम्नीनी? 'आम आफोम ग्युरशो अडगुर ब्वाम्तेक्म हना, आन आल आन खुइ ग्रिम्बा डा?' " दे हिल्लो पाप्तु। यरमीया ३१:२९<sup>3</sup> लेंशा परमप्रभु, परमप्रभु यावेमी "गो आं ब्रॉइशा बाक्शो खोदेशो पा, मुल रे गेपुकीम एको कथा इस्राएलम लेंशा काइ मदेनीन।<sup>4</sup> मारदे हना ब्रॉइशा बाक्ब नेल्ल आं केन नम, दे तुइक्चा माल्नीनी। आम आफ नु आल नेल्ल आं केन नम। सुम पाप पाइबा, मेको ला बेक्ब।

<sup>5</sup> ठीक पाइब मुर का बाक्ल हना, आं अरेशो टीब नु रिम्शो पाइब।<sup>6</sup> मेको डांडा मेर मजाइब नु इस्राएल आ खिं डा मुर आन मूर्ति आन कली पूजा मपाइब, मेको आ नेक्था डा मुर आन मीश नु मइप्ब, रां ब्रोल्लो मीश मुर नु मइप्ब। लेवी १८:१९; लेवी १८:२०<sup>7</sup> मेकोम सुइ आन कली मदिप्ब, जाकटी वोइश्शो मार मार लेशशा गेब, मेकोम खुइ मपाइब, शोत्रलु बेक्शो आन कली आ जचा थोत्रक गेब। मिनु शिश्रा बाक्शो आन कली वा फेक्पाइक्ब। ब्यवस्था २४:१०-१३; यसैया ५८:७<sup>8</sup> मेकोम जेर गेशा चाइक्ब मताक्ब, मेको मरिम्शो पतीके रे डोन बाक्ब नु मुर आन दातेम कुल मकोत्रथु ठीक निसाफ पाइब। प्रस्थान २२:२४; भजन संग्रह १५:५<sup>9</sup> मेकोम आं फुल्लुम मुशा ब्रेक्शो लोत्र नु आं निसाफ पतीके लोत्र थुं मफाइक्थु पाइब। मोदेशो मुर ठीक पाइब मुर बाक्ब। मिनु मेको थमा पा ब्रॉइचा माल्ब" दे परमप्रभु, परमप्रभु यावेमी देशो बाक्ब।

<sup>10</sup> मिनु "मेको मुर के तौ का बाक्ब। मेकोम हुश खाक्श पोक्ब नु मुर आन कली साइक्ब,<sup>11</sup> मेको आ आफोम मपशो गेय नेल्ले मेकोम पाइब, मेकोमी डांडा मेर जाइब, मेको आ नेक्था डा मुर आन मीश नु इप्ब।<sup>12</sup> पुडग नु मारेइ मथीब आन कली दिप्ब, मुर आन मार मार रोइक्ब। जाकटी वोइश्शो थोत्रक मलेप्ब, मूर्ति आन कली पूजा पाइब नु ग्रांरा दिशो गेय पाइब।<sup>13</sup> मेकोम आ चाइक्ब ताक्शा ला जेर गेब, मार मोदेशो मुर ब्रॉइचा ताइबा डा? मेको ब्रॉइचा मताइब। मोदेशो ग्रांरा दिशो गेय नेल्ल पतीके, मेको थमा पा बेक्चान माल्ब। मेको आ हुश आ दोस मेको आंमा राइब।

<sup>14</sup> तन्न मेको मुर आ तौमी आ आफोम पशो पाप नेल्ल ताइब। मेको नेल्ल तशा, मोदेशो गेय मपाइब। ब्यवस्था २४:१६<sup>15</sup> मेकोम डांडा मेर मजाइब। इस्राएल आ खिं डा मुर आन मूर्ति आन कली पूजा मपाइब, मेको आ नेक्था डा मुर आन मीश नु मइप्ब।<sup>16</sup> मेकोम सुइ आन कली मरिम्शो मपाइब, मेकोमी जाकटी मताक्ब। मेकोम सुइ के मारेइ मरोइक्ब। तन्न शोत्रलु बेक्शो आन कली आ जचा थोत्रक गेब। शिश्रा बाक्शो आन कली वा फेक्पाइक्ब।<sup>17</sup> मेको मरिम्शो पतीके रे डोन बाक्ब, जेर गेशा आ चाइक्ब मताक्ब। मेकोम आं निसाफ पतीक लोत्र नेल्ल पाइब। मिनु आं फुल्लुम मुशा ब्रेक्शो लोत्र नेल्ल खाप्ब। मेको मुर आ आफ आ मरिम्शो पशो आ पर्बम बेक्चा ममाल्ब। मेको थमा पा ब्रॉइब।<sup>18</sup> तन्न मेको आ आफोम चहिं आ दला दाक्स पशा, आ लोक्ब आन कली रोइक्ताक्व। आ मुर आन दातेम मरिम्शो पाप्तु। मेको आ मरिम्शो पशो आ पर्बम बेक्ब।

<sup>19</sup> मो हना यो गेपुकीम मारदे आ आफ आ मरिम्शो पशो आ तौम कुरचा ममाल्दा? देंनीनी। आ तौम आं अरेशो टिशा, ठीक गेय पशो बाक्ब, मेकोम आं फुल्लुम मुशा ब्रेक्शो लोत्र होस पा टिशो बाक्ब। मोपतीके मेको थमा पा ब्रॉइब। प्रस्थान २०:५<sup>20</sup> सुम पाप पाइबा, मेको ला बेक्ब। आलमी आ आम आफ आस मरिम्शो पशो आ पर्बम श्येत जचा ममाल्ब। आ आम आफोम यो आस आल आन मरिम्शो पशो आ पर्बम श्येत जचा ममाल्नीस। ठीक पाइब आ ठीक पशो आ कली दुम्ब। मिनु परमप्रभु यावे आ अरेशो मटीबमी आ मटिशो आ कलीन दुम्ब। २राजा १४:६

<sup>21</sup> तन्न परमप्रभु यावे आ अरेशो लोत्र मटीब मुर कामी आ पशो पाप नेल्ल प्रॉइशा, आं फुल्लुम मुशा ब्रेक्शो लोत्र नेल्ल पाप्तु हना, आं अरेशो नु ठीक गेय पाप्तु हना, मेको थमा पा ब्रॉइब। मेको मबेक्ब। इजीकीएल ३३:१०-२०<sup>22</sup> मेको आ हेंथे पशो आ पर्बम लेंशा ममिम्सीब। मेको आ ठीक पतीकेम ब्रॉइब। यसैया ४३:२५<sup>23</sup> मार, गो आं अरेशो लोत्र मटीब मुर बेक्मेनु ग्येरनुडा डा? मेको क्येडा यो गो मेको आन मरिम्शो पशो प्रॉइशा ब्रॉइशा बाक्शो तचा मदाक्नुडा डा? श्तिमोथी २:४<sup>24</sup> तन्न ठीक पाइब मुरुम आ ठीक पतीक प्रॉइशा, मरिम्शो पाप्तु हना, आं अरेशो लोत्र मटीबपुकीम खोदेशो पा ग्रांरा दिशो गेय पाप्तु हना, मार मेको ब्रॉइबा डा? मेको आ डोंइती पशो ठीक गेय मारेइ ममिम्सीब। मेको आ मरिम्शो पशो नु आ पाप आ पर्बम बेक्चा माल्ब। इजीकीएल ३:२०

<sup>25</sup> मो हना यो गेपुकीम 'परमप्रभु आ पशो ठीक मबाक्ब' देंनीनी। इस्राएल आ खिं डा मुर नेनीन, मार, आं पशो ठीक मबाक्बा डा? मार, इन पशो कका ठीक बाक्बा डा? <sup>26</sup> ठीक पाइब मुरुम आ ठीक पतीक प्रॉइशा मरिम्शो पाप्तु हना, मेको आ ठीक मपतीकेम बेक्ब। मेको आ मरिम्शो पशो आ पर्बम बेक्चा माल्ब। <sup>27</sup> तन्न परमप्रभु यावे आ अरेशो मटीब मुरुम आ मटितीके प्रॉइशा, आं अरेशो ठीक गेय पाप्तु हना, मेको ब्रॉइब। <sup>28</sup> मारदे हना मेकोम मिम्शा, आ पशो मरिम्शो नेल्ल रे लेत्त हना, मेको थमा पा ब्रॉइब। मेको बेक्चा ममाल्ब। <sup>29</sup> मो हना यो इस्राएल आ खिं डा मुरपुकीमी 'परमप्रभु यावे आ पशो ठीक मबाक्ब' देंनीम। ए इस्राएल आ खिं डा मुर, मार, आं पशो ठीक मबाक्बा डा? मार, इन पशो कका ठीक बाक्बा डा?

<sup>30</sup> मोपतीके ए इस्राएल आ खिं डा मुर, गो नेल्ल इन कली इन पशो कोत्रशा निसाफ पाइनुड। मिनु इन हेंथे पशो नेल्ल रे लेतीन। मो मपाइतीनी हना, इन मरिम्शो पशोम इन कली साइक्ब। <sup>31</sup> गो इन आं कली हेंथे पशो नेल्ल प्रॉइशा, गे नक थुं नु नक सोक्ती ताक्कीन। ए इस्राएल आ खिं डा मुर, गे मारदे बेक्चा दाक्नीनी? इजीकीएल ११:१९<sup>32</sup> मारदे हना गो सुइ मुर

बेक्शोम मयेरसीनुड। मरिश्शो पतीक रे लेशशा, ब्रॉइशा बाक्कीन” दे परमप्रभु, परमप्रभु यावेमी देंत।

### रोंका पतीक कुम्सो

19 गे इस्राएल डा पिप आ खिं डा मुर आन पर्वम रोंका पने। 2 इ ममा गुप्स आन दातेम ठेयब छाउरी गुप्स दुम्शा बाक्त। मेको आ चाइक्ब आन कली कोल्पाइक्ना पाइक्न ठिटा गुप्स आन दातेम गोलशा बाक्बाक्त। उत्पत्ती ४९:९<sup>3</sup> मिनु मेकोम आ चाइक्ब आन दाते डा का कली कोल्पाइश्शा, ठेयब सेल्लु। मिनु मेको ठेयब बोल्यो ठिटा गुप्स का दुम्त। मेकोम सिखार पचा शेंसाक्व। मिनु मुर आन कली ब्वाप्तु। 4 मिनु रागी रागी डा मुरपुकीम मेको आ पर्वम लोव्र नेंतेक्म। मिनु मेकोपुकीम मेको कली बिक्तीकेम पिक्शा ग्याइक्ताक्म। मिनु मुरपुकीम मेको कली कोंडगुम कीशा, इजीप्ट रागी लाइक्तेक्म। २राजा २३:३१-३३; येरमीया २२:११-१२<sup>5</sup> मिनु मेको छाउरी गुप्सम आ देंशो मदुम्शो नु आ मिश्शो मगाप्शो तशा, आ चाइक्ब आन दाते डा का कली योव्रतु। मिनु मेको कली बोल्यो ठिटा गुप्स का सेल्लु। २राजा २४:६,८,९<sup>6</sup> मिनु मेको गुप्स आन दातेम एर ओंथ पचा गोप्तु। मारदे हना मेको ठेयब नु बोल्यो ठिटा गुप्स दुम्शो बाक्त। मिनु मेकोम सिखार पचा शेंसाक्व। मिनु मुर आन कली ब्वाप्तु। 7 मेकोम मुर आन बोल्यो दरवार प्रेतु। मिनु मेको आन सहर खतम सेल्लु। मेको आ डोरशो नेंशा, रागी नु मेकेर बाक्ब नेल्ल हितेक्म। 8 मिनु आ एर ओंथ डा रागी रागी रे मुरपुकी जाक्तेक्म। मिनु मेको कली ब्वारद दाइक्ताक्म। मेको कली बिक्तीकेम पिक्शा ग्याइक्ताक्म। 9 मिनु मेकोपुकीम मेको कली कोंडगुम कीशा ग्याइश्शा खोरम चोक्तेक्म। मिनु बेबीलोन डा पिप आ बाक्तीकेम लाइक्तेक्म। मेकोपुकीम इस्राएल डा डांडा मेर आ सेंदा गेनायो मनंसेक्ल, दे मेको कली चोक्शा वोइक्तेक्म। २राजा २४:१५<sup>10</sup> इ ममा ब्वाक्कु आ नेक्था ख्रुम्शो अडगुर बोट खोदेंशो बाक्त। शुश ब्वाक्कु बाक्तीके, मेको शुश राशी पाइश्शा शुश गेडा सिश्शो बाक्त। इजीकीएल १७:६<sup>11</sup> मेको आ बोल्यो राशी का पिप आन हुकुम पतीक कोक्के दुम्चा डा बाक्त। मेको शुश राशी आन दातेमी लाइश्शो नु कोल्शो दुम्शा, शुश राशी दाप्पाइश्शा लत। 12 तन्न मेको गाइश्शा चुरशा तुल्चा पुंडसाक्व। मिनु खपीम ताइक्चा पुंडसाक्व। मिनु पूर्व डा फशेम मेको कली सोव्रपाइक्तु। मिनु मेको आ गेडा नेल्ल हेम्तेक्म। आ बोल्यो राशी सोव्रशा, मेको कली मीम नेक्तु। 13 मिनु मुल मेको सोव्रशो ब्वाक्कु मबाक्शो गोरशो रागीम ख्रुम्चा पुंडसाक्व। 14 मिनु मेको आ ठेयब राशी रे मी गूत। मिनु मेको आ फल नु आ आइक्च राशी नेल्ल नेक्तु। मोपा मेकेर हुकुम पतीक कोक्के दुम्चा डा बोल्यो राशी का यो मली। मिनु एको रोंका पतीक कुम्सो नेल्लेम तुइश्शा, पना पन बाक्तेक्म।

### इस्राएली हेंथे गाक्शो

20 मिनु ७ बर्स डा ५ महिना डा १० नाक्ती इस्राएल डा खाल्पापुकी परमप्रभु यावे कली हिल्लो पचा कली जाक्शा आं डोंइती बाक्तेक्म। इजीकीएल १४:१<sup>2</sup> मेना परमप्रभु यावेमी आं कली लोव्र पाप्तु। 3 मेकोमी “ए मुर, इस्राएल डा खाल्पा आन कली लोव्र पावो। गो, परमप्रभु, परमप्रभु यावेमी, मारदे गेपुकी आं कली हिल्लो पथ जाक्नी? गो आं ब्रॉइशा बाक्शो खोदेंशो पा, इन कली लोव्र मलेत्नुड। इजीकीएल १४:३<sup>4</sup> ए मुर, गे मेको आन कली निसाफ पाइनेवे? गे मेको आन कली निसाफ पाइनेवे? मो हना मेको आन किकी पिपी आन ग्रॉग्रा दिशो गेय आन पर्वम मेको आन कली तुइक्पतो। इजीकीएल २२:२; इजीकीएल २३:३६<sup>5</sup> गो इस्राएल कली योव्रडु नाक्ती याक्ब आ खिं डा आ चच युइ नु कसम जाता। इजीप्ट रागीमी गो मेको आन दातेम तुइक्पाइसाक्वी। मेको आन कली गो परमप्रभु यावे, इन परमप्रभु नड, दे कसम जाता। प्रस्थान ६:७-८<sup>6</sup> गो मेको नाक्ती मेको आन कली इजीप्ट रे गुंडशा, आन माल्शो रागीम चाक्नुडमी। मेको रागीम दूध नु खुदो शाइश्शो बाक्ब। मिनु मेको रागी, रागी नेल्ल आन क्येडा रिश्शो बाक्ब, दे कसम जशा देंशो नड। प्रस्थान ३:८<sup>7</sup> मिनु गो मेको आन कली इन कोव्रत दाक्शो ग्रॉग्रा दिक्चा डा थोव्रक ताइक्तीन। गे आंम कली इजीप्ट डा मूर्तिपुकीम ग्रॉग्रा दिशो मसेल्सीन। गो परमप्रभु यावे, इन परमप्रभु नड।

यहोसु २४:१४,२३<sup>8</sup> तन्न मेकोपुकीमी आं कली मटिथु, आं लोव्र मनेनेम। सुइम आन कोव्रत दाक्शो ग्रॉग्रा दिक्चा डा थोव्रक मताइक्तेक्म। सुइमी इजीप्ट डा मूर्तिपुकी यो मप्रोनेम। मिनु गे इजीप्ट रागीम बाक्नीनु, आं गाइश्शो नेल्ले इन तारी मोइक्नुड, दे मिम्ताक्ड। 9 तन्न गो आं नें रागी रागी डा मुर आन डोंइती मरिश्शो मदुम्ल, दे गो इन कली इजीप्ट रागी रे गुंडताक्ड। इन बाक्शो रागी डा मुर आन कली यो आं नें तुइक्पाइक्ताक्मी। इजीकीएल २०:१४; इजीकीएल ३६:२१-२२; प्रस्थान ३२:१२<sup>10</sup> मोपतीके गो मेको आन कली इजीप्ट रागी रे गुंडशा गोरशो रागीम चाक्तामी। 11 गो मेको आन कली आं फुल्लुम मुशा ब्रेक्शो लोव्र तुइक्पाइक्तामी। मिनु आं निसाफ पतीक लोव्र कोंइताक्डमी। सुम मेको टिशा पाइबा, मेको ब्रॉइब। लेवी १८:५; लूका १०:२८<sup>12</sup> मेको प्रॉइशा मेको आन कली नाइक्तीक नाक्त गेतामी। मेको गो नु मेको आन दातेमी चिन्ड का बाक्ब। मिनु गो, परमप्रभु यावेमी मेको आन कली आं मुर सेल्ताक्मी, दे तुइक्तामेक्ल। प्रस्थान ३१:१३-१७<sup>13</sup> तन्न इस्राएल आ खिं डा मुरपुकीमी गोरशो रागीम आं कली मटीयीमी। मेकोपुकीम आं फुल्लुम मुशा ब्रेक्शो लोव्र नु आं निसाफ पतीक लोव्र मपामे। मेको टिशा पाइब मुर मेको रे ब्रॉइनीम। मेकोपुकीमी आं नाइक्तीक नाक्त ग्रॉग्रा दिशो सेल्तेक्म। मिनु गो एको गोरशो रागीमीन आं चुरशो मोइश्शा मेको आन कली साइक्नुडमी, दे मिम्ताक्ड। प्रस्थान ३२:१०-१२<sup>14</sup> मिनु गो रागी डा मुर आन डोंइती मेको आन कली इजीप्ट रागी रे गुंडताक्ड। गो आं नें मेको रागी रागी डा मुर आन डोंइती मरिश्शो मदुम्ल, दे मोदेंशो पाता। 15 मिनु गो मेको आन कली गोरशो रागीमी गो इन कली गेशो, दूध नु खुदो शुश बाक्शो नेल्ल क्येडा दारशो रागीमी मलाइक्नुड, दे कसम जाता। गन्ती १४:३०<sup>16</sup> मारदे हना मेकोपुकीम आं निसाफ पतीक लोव्र होस पा मपाम। मिनु फुल्लुम मुशा ब्रेक्शो लोव्र मटीम। मिनु आं नाइक्तीक नाक्ती ग्रॉग्रा दिशो सेल्तेक्म। मारदे हना मेको आन थुं आन मूर्ति गे हिरशो बाक्तेक्म। 17 मो हना यो गो मेको आन कली शिशी पा, गोरशो रागीम मसदुमी। मेको आन कली मक्यामदुमी।

18 गो गोरशो रागीम मेको आन आल आन कली ‘गे इन आम आफ आन शेंशो फुल्लुम मुशा ब्रेक्शो लोव्र मटिने। मेको आन निसाफ पतीक मपने। मेको आन मूर्तिम आंम इन कली ग्रॉग्रा दिशो मसेल्सीन। 19 गो परमप्रभु यावे, इन परमप्रभु नड। गेपुकीम आं फुल्लुम मुशा ब्रेक्शो लोव्र टिशा, आं निसाफ पतीक लोव्र होस पा पने। 20 आं नाइक्तीक नाक्ती गेय मपने। मिनु मेको गे नु गो इं दातेम चिन्ड दुम्ल। मिनु गेपुकीम गो परमप्रभु यावे, इन परमप्रभु नड, दे तुइक्नीनी’ देंती। 21 तन्न मेको आलपुकी आं कली मटीब दुम्तेक्म। मेकोपुकीम आं फुल्लुम मुशा ब्रेक्शो लोव्र मटीम। मिनु आं निसाफ पतीक लोव्र होस पा मपाम। मेको टिशा पाइब मुर मेको रे ब्रॉइनीम। मेकोपुकीम आं नाइक्तीक नाक्ती ग्रॉग्रा दिशो सेल्तेक्म। मिनु एको गोरशो रागीमीन आं चुरशो आन तारी मोइश्शा, मेको आं गाइश्शा पशो गेय कोंइनुड। 22 तन्न गो आं गुइ तेक्ता। मिनु गो रागी डा मुर आन डोंइती मेको आन कली इजीप्ट रागी रे गुंडताक्ड। गो आं नें मेको रागी रागी डा मुर आन डोंइती मरिश्शो मदुम्ल, दे मोदेंशो पाता। 23 मेको प्रॉइशा यो, गो गोरशो रागीम मेको आन कली गो इन कली रागी रागी डा मुर आन दातेम एर ओंथ ब्रपाइक्नुडमी। मिनु राज्य राज्यम एर ओंथ ब्रपाइक्नुडमी, दे कसम जाता। लेवी २६:३३<sup>24</sup> मारदे हना मेकोपुकीम आं निसाफ पतीक लोव्र मपामे। मिनु आं फुल्लुम मुशा ब्रेक्शो लोव्र मटीम। आं नाइक्तीक नाक्त ग्रॉग्रा दिशो सेल्तेक्म। मिनु मेकोम आन किकी पिप आन मूर्ति पूजा पास्तेक्म। 25 गो मेको आन कली फुल्लुम मुशा ब्रेक्शो मरिश्शो लोव्र यो गेतामी। मिनु आं निसाफ पतीक लोव्रम यो मेकोपुकी ब्रॉइने मचाप्बाक्तेक्म। 26 गो मेको आन कली आन चढ़ेशो रे पा ग्रॉग्रा दिशो दुम्चा गेतामी। आन डोंइती जरमेशो मारेइ मारेइ आन रे आं कली चढ़ेचा आ पर्वम मेको आन कली ग्रॉग्रा दिशो दुम्पाइक्तामी। मेकोपुकी हिंशा ग्येत्थ लुक्च दुम्मल, दे मो पाता। मिनु मेकोपुकीम गो परमप्रभु यावे नड, दे तुइक्तामेक्ल, दे मो पाता” देंत।

इजीकीएल १६:२०; प्रस्थान १३:२,१३; प्रस्थान २२:२८

27 मोपतीके ए मुर, इस्राएल आ खिं डा मुरपुकी नु लोव्र पावो। मिनु मेको आन कली “परमप्रभु, परमप्रभु यावेमी इन कली मार देंत देंशा हना, इन किकी पिपीम आं कली जोल पा शुक्शी पाइक्तीमी। 28 गो कसम जशा

मेको आन कली गेनुड दॅशो रागीम चाक्तामी। मेकोपुकीम मेकेर लाइश्शो डांडा नु शुश सफा पाइश्शो रवा तास्तेक्म। मेकेर आन मार मार चढेस्तेक्म। आं कली गाइक्पाइक्चा कली आन पोक्शो मार मार चढेस्तेक्म। मेकेर आन ब्रोव्रशो रिना पाइश्शो धूप चोशा, आन तूचा थोव्रक चढेतीक चढेस्तेक्म।  
29 मिनू गो मेको आन कली गे इन लशो लाइश्शो डांडा मार बाक्बा? दे हिल्लो पातामी। मुल सम्म यो मेको ठाउं आ नें बामाह दॅसीब” दे परमप्रभु यावेमी दॅत। *बामाह दॅशो लाइश्शो डांडा डा थान रुस्सीब।*

परमप्रभु आ मुर आन कली पतीके

30 मोपतीके परमप्रभु, परमप्रभु यावेमी इस्राएल आ खिं डा मुर आन कली “गे यो इन किकी पिपी आन खोदॅशो पा इन कली ग्रांरा दिशो सेल्सीनीनी? मिनू मेको आन ग्रांरा दिशो मूर्ति आन नोले खोइक्नीनी?  
31 गेपुकीम मेको आन कली चढेनीनी। गे इन आल आन कली चोशा चढेनीनी। मिनू मुलाक्ती सम्म यो गे इन मूर्ति पूजा पतीकेम आंम इन कली ग्रांरा दिशो सेल्सीशो बाक्नीनी। ए इस्राएल आ खिं डा मुरपुकी, गो ब्रोइशा बाक्शो खोदॅशो पा, गे आं कली हिल्लो पचा मताइनीनी” दे परमप्रभु, परमप्रभु यावेमी दॅत।

32 मिनू परमप्रभुमी “इन थुंम ‘गेपुकी अर्को रागी डा मुर नु अर्को जात डा मुर खोदॅशो दुम्चा दाक्नीक’ दॅतीनी। गेपुकीमी ‘रागी डा जात जात डा मुर खोदॅशो पा शी नु फुल्लु आन कली पूजा पाइब बाक्नीकी’ दॅतीनी। तन्न इन मिम्शो गेनायो मजाक्दीज्” दॅत। *प्रस्थान २३:२४*

33 परमप्रभु, परमप्रभु यावेमी “गे ब्रोइशा बाक्शो खोदॅशो पा, सक्ति पाइश्शो गुइ दिंशा चुरशा गो इन कली सासन पाइनुड। 34 गो इन कली सक्ति पाइश्शो गुइ दिंशा चुरशा इन ब्रशा बाक्शो रागी रागी डा मुर आन दाते रे गुंइशा चाक्नन्नी। मिनू गे इन ब्रशो रागी रे इन कली गुम्पाइक्नन्नी। 35 गो इन कली रागी रागी डा मुर आन गोरशो रागीम चाक्नन्नी। मिनू मेकेर इन कली निसाफ पाइनुड। *होसे २:१६* 36 डोंइती गो दोपा इजीप्त डा गोरशो रागीम इन किकी पिपी आन कली निसाफ पडा, मोपा इन कली यो निसाफ पाइनुड। *गन्ती १४:२२-२३* 37 गो इन कली हिक्शा आं कबल पपाइक्नन्नी। *लेवी २७:३२; येरमीया ३३:१३* 38 इन दाते डा आं कली मटीब नु मरिम्शो पाइब आन कली तिल्लुडमी। गो मेको आन कली अर्को रागी डा मुर दुश्शा बाक्शो रागी रे गुंइनुडमी। तन्न मेको इस्राएल रागी ओव्रचा मताइनीम। मिनू गेपुकीम गो परमप्रभु यावे नड, दे तुइक्नीनी। 39 ए इस्राएल आ खिं डा मुरपुकी, परमप्रभु यावेमी इन कली ‘लन। गे आं दॅशो टिचा मदाक्नीनी हना, मुल रे गे नेल्लेम इन इन मूर्ति आन कली पूजा पने। तन्न इन मूर्ति पूजा पतीकेमी आं नें कली गेनायो ग्रांरा दिशो मसेलीन।

40 मारदे हना आं डांडा, इस्राएल डा डांडामी इस्राएल आ खिं डा मुर नेल्लेम आं कली ठेयब सेल्नीम। मिनू गो मेकेर मेको आन कली ब्राइनुडमी। गो मेकेर इन गेशो, इन गेशो नेल्ल क्येडा रिम्शो थोव्रक नु इन चढेशो नेल्ल ताक्नुड। *इजीकीएल १७:२३* 41 गो इन कली रागी रागी डा मुर आन दाते रे गुंइशा नु इन कली इन ब्रशो रागी रे खुष्शा, ब्रोव्रशो रिना पाइश्शो धूप खोदॅशो पा ब्राइन्नी। मिनू रागी रागी डा मुर आन डोंइती आं कली तुइक्पाइसीनुड। 42 मिनू गो इन किकी पिपी आन कली गेनुड दॅशो इस्राएल रागीम इन कली चाक्नन्नी। मेना गेपुकीम गो परमप्रभु यावे नड, दे तुइक्नीनी। 43 मेकेर गे इन कली ग्रांरा दिशो सेल्ब थोव्रक नु मरिम्शो गेय नेल्ल मिम्नीनी। मिनू इन पशो मरिम्शो गेय नेल्ल आन पर्बम मिम्शा आंम इन कली ग्रांरा दीनीनी। *इजीकीएल ३६:३१-३२* 44 ए इस्राएल आ खिं डा मुरपुकी, गे इन मरिम्शो पतीक नु इन हेंथे पशोम ममाइ, तन्न आं नें आ पर्बम गो इन कली रिम्शो पाइनुड। मिनू गेपुकीम गो नु परमप्रभु यावे नड, दे तुइक्नीनी” देनो” दे परमप्रभु, परमप्रभु यावेमी दॅत।

दक्खिन आ पर्बम लोव्र

45 परमप्रभु यावेमी आं कली लोव्र पाप्तु। 46 मार लोव्र पाप्तु दॅशा हना “ए मुर, दक्खिन गे कोव्रशा दक्खिन आ पर्बम आं लोव्र पावो। मेको दक्खिन नेगेब डा ब्वाकी आ पर्बम आं लोव्र पावो। 47 नेगेब डा ब्वाकी कली

‘परमप्रभु यावे आ लोव्र नेनो। परमप्रभु, परमप्रभु यावेमी गो इ कली मी सुइक्चा चिक्शो बाक्नुड। मिनू इ गिगी रवा नु सोव्रशो रवा आन कली मेकोम नेक्ब। मेको आ ब्रशो मकाप्ब। मिनू मेकोम पतीके दक्खिन रे उत्तर सम्म डा नेल्ल आन कुल किकब। 48 मिनू मुर नेल्लेमी गो, परमप्रभु यावेमी मेको जेत्ताक्ड, दे तुइक्नीम। मेको काप्चा मदुम्ब’ देनो” दॅत। 49 मिनू गो “परमप्रभु, परमप्रभु यावे, मेकोपुकीम आं पर्बम ‘मेकोमी कथा ला दॅशो बाक्ब, ममाइ डा?’ दॅनीम” दॅती।

परमप्रभु आ तरवार हेश्शो सेल्शो

21 परमप्रभु यावेमी आं कली लोव्र पाप्तु। 2 मार लोव्र पाप्तु दॅशा हना “ए मुर, यरूसलेम गे कोव्रशा, आं बाक्तीक आ पर्बम आं लोव्र पावो। इस्राएल रागी आ पर्बम आं लोव्र पावो। 3 मिनू इस्राएल डा खाल्पा आन कली परमप्रभु यावेमी मार लोव्र पाप्तु दॅशा हना ‘गो बारशा, आं तरवार खोत रे शोइश्शा, इन दाते डा ठीक पाइब नु आं अरेशो लोव्र मटीब नेल्ल आन कली साइक्नुडमी। 4 मिनू गो इन दाते डा ठीक पाइब नु आं अरेशो लोव्र मटीब नेल्ल आन कली साइक्नुडमी। मोपतीके दक्खिन रे उत्तर सम्म डा मुर नेल्ल आन पर्बम आं तरवार खोत रे गूशो बाक्ब। 5 मिनू मुर नेल्लेम गो, परमप्रभु यावेमीन आं तरवार शोइश्शो बाक्नुड’ दे तुइक्नीम। मेको लॅशा मपिम्सीब। 6 मोपतीके ए मुर, हुकयी पावो। जिक्शो थुंम थम श्येत जशा, मेको आन डोंइती हुकयी पावो। 7 मिनू मेकोपुकीम इ कली ‘गे मारदे हुकयी पवी’ दॅतेक्म हना, मेको आन कली ‘लोव्र नॅतीके हुकयी पाता। मुर नेल्ल आन थुं बेक्शा लाइब। आन गुइ योक्ब। आन थुं ग्येत्थ लुक्च दुम्ब। मिनू मुर नेल्ल आन पोक्च बोल मपाइश्शो दुम्ब। मेको नाक्ती जाक्ना जाक्न बाक्ब। मेको थमा पा दुम्ब, दे परमप्रभु यावेमी दॅशो बाक्ब’ दे माइक्मी” दे परमप्रभु यावेमी दॅत। *इजीकीएल ७:१७*

8 परमप्रभु यावेमी आं कली लोव्र पाप्तु। 9 मार लोव्र पाप्तु दॅशा हना “ए मुर, परमप्रभु यावे आ लोव्र पा, परमप्रभु यावेमी ‘तरवार का, तरवार का शेषा, हेश्शो सेल्शो बाक्ब। मेको टल्केशो बाक्ब। 10 मेको मुर साइक्चा कली शेषो बाक्ब। चिला दाप्शो खोदॅशो पा टल्केपपाइक्चा कली शेषो बाक्ब। दोपा ग्येरीने चाप्नीनी? आं मुरपुकीम आं सजाइ गेतीके ममिम्तेक्म। 11 तरवार टल्केपपाइक्चा कली गेशो बाक्ब। मिनू गुइम शेशा, मेको शेषा टल्केपपाइश्शो बाक्ब। मेको साइक्ब कली गेशो बाक्ब। 12 ए मुर, डाक्शा रॅका पावो। मारदे हना मेकोम आं मुर आन कली साइक्ब। मेकोम इस्राएल डा पिप आ खिं डा मुर नेल्ल आन कली साइक्ब। मेको नु आं मुरपुकी यो तरवारम साइक्चा पुंइसीनीम। मोपतीके गे इ कुचु तुपो। 13 गे आं गेशो सजाइ ममिम्थु, मेको श्येत मजाक्ब, दे मिम्नीनी’ देनो” दे परमप्रभु यावेमी दॅत। *यसैया १:५* 14 मिनू परमप्रभुमी “ए मुर, आं लोव्र पावो। तरवारम खेयप निक्शी खेयप सां सम्म क्योरब। मेको तरवार मारेइ मारेइ आन कली साइक्चा कली बाक्ब। मेको बोल्यो पा क्योरचा कली बाक्ब। मेकोम एर ओंथ नेल्ल रे क्योरब। 15 मोपतीके थुं लुक्च लाइनीम। मिनू शुश गोल्लीम। मेको आन ठेयब लाप्चो नेल्लेमी हुश खाक्श पोक्चा कली तरवार वोइश्शो बाक्ती। मेको चिला दाप्शो खोदॅशो पा साइक्चा कली शेषो बाक्ब। 16 तरवार, पेरा गे क्योरो। ग्युरा गे क्योरो। तेइ तेइ लावो। 17 मिनू गो यो साइक्ना साइक्न लाइनुड। मिनू आं चुरशो नाइक्नुड। गो, परमप्रभु यावेमीन लोव्र पाता” दॅत।

18 परमप्रभु यावेमी आं कली लोव्र पाप्तु। 19 मार लोव्र पाप्तु दॅशा हना “ए मुर, बेबीलोन डा पिप आ तरवार चाक्चा कली लां निक्शी योव्रडो। मेको लां निक्शी रागी का रे जाक्चा माल्लीस। सहर गे लतीक लां आस डोंइती लां कोंइतीक का वोतो। 20 मेको तरवार जाक्चा कली अम्मोनी आन रब्बाह सहर, यहूदा नु गारो हिरशो यरूसलेम कली लां सेलीन। 21 मारदे हना बेबीलोन डा पिप मेको लां निक्शी गुम्तीकेम राप्ब। तेको लां लचा, दे मेकोमी लिक्चु कोव्रब, ब्रा कली हिम्पाइक्ब। आ खिं डा मूर्ति आन कली हिल्लो पा आ आइदी कोव्रब। 22 मेको आ ग्युरा गुइम यरूसलेम कली बाजी दुम्त। मेकेर गारो डोंइक्चा कली शी फुल्लु तेल्शा, लडाइ पचा कली, ग्रीचा कली ठेयब लाप्चो गे शी फुल्लु तेल्शा सहर पुम्चा कली, लाइश्शो खिं सेल्चा

माल्नीम। इजीकीएल ४:२<sup>23</sup> तन्न यरूसलेम डा मुर आन कली मेको लिक्यु कोव्रतीक दूली बाक्त, दे मिन्मीम। मारदे हना मोदेशो मदुम्ब, दे कसम जशो लोव्र नेशो बाक्तेकम। तन्न परमप्रभुम मेको आन मरिश्शो पशो मिम्पाइक्व। मिनु मेको आन कली ग्याइक्पाइक्व।

<sup>24</sup> मोपतीके परमप्रभु, परमप्रभु यावेमी मारदे हना इन मरिश्शो पशो मिम्पाइक्तीनी। इन हेंथे पशो नेल्ल तुइक्नीम। इन पशो पाप नेल्ल तांडसीब। गे ग्याइश्शा लाइक्वा पुंडसीनीनी। <sup>25</sup> गे काइ मरिश्शो नु आं अरेशो लोव्र मटीब इसाएल डा सासन पाइब इ नाक्त जाक्त। इ नोले डा सजाइ ततीक नाक्त जाक्त। <sup>26</sup> मेको आ पिया रे गुप्तीक पुतीन। मेको आ सिरपेच पुतीन। मुल दुश्शो खोदेशो पा, लेंशा मदुम्ब। आइक्व आन कली ठेयब सेलीन। मिनु ठेयब आन कली आइक्व सेलीन। प्रस्थान २८:४; लूका १८:१४ <sup>27</sup> मारेइ मारेइ ब्रेश्शो बाक्व। मेको गो पाता। मेको मोदेशो गेनायो मदुश्शो बाक्त। मेको सासन पचा कली शिरशो दुश्शा जाक्त हना, मेको कली गेनुड" देंत। उत्पत्ती ४९:१०

<sup>28</sup> ए मुर, गे चहिं आं लोव्र पावो। गो, परमप्रभु, परमप्रभु यावेमी अम्मोनी नु मेको आन शुक्शी पशो आ पर्वम मार देनुड देशा हना "साइक्वा कली तरवार शोइश्शो बाक्व। साइक्वा कली शेषा टल्केशो बाक्व। मेको चिला खोदेशो पा दाख बाक्व। इजीकीएल २५:२-७ <sup>29</sup> इन पर्वम जोल पा कोइतीके ताम्तेकम। इन पर्वम दूली पा लिक्यु कोव्रतेकम। मेको मरिश्शो पाइब नु परमप्रभु यावे आ अरेशो लोव्र मटीब नु साइक्वा पुंडसीनीम। मेको आन नाक्त जाक्शो मुर आन कली मोदेशो पशो बाक्व। मेको आन नोले डा सजाइ ततीक नाक्त जाक्शो बाक्व। <sup>30</sup> मेको तरवार आ खोतम पिप्तीन। गो इन कली इन जरमेशो रागीम निसाफ पाइनुड। <sup>31</sup> गो आं गाइश्शो इन तार मोइक्नुड। आं चुरशो मी मुइश्शो खोदेशो पा गो इन तारी मोइक्नुड। गो इन कली साइक्वा कली हुश खाक्व पोक्व नु सांडस जोक्व आन गुडम जिम्मा गेनन्नी। <sup>32</sup> गे मी कली शी दुम्नीनी। इन हुश खपीम शाइक्व। इन कली लेंशा गेनायो ममिन्मीम। मारदे हना गो, परमप्रभु यावेमी एको लोव्र पाता" देंत।

यरूसलेम आ पाप नु सजाइ

**22** परमप्रभु यावेमी आं कली लोव्र पापु। <sup>2</sup> मार लोव्र पापु देशा हना "ए मुर, मार गे मेको निसाफ पाइनेवे? गे मेको हुश खाक्व पोक्व सहर कली निसाफ पाइनेवे? मो हना मेको आ ग्रांग्रा दिशो गेय नेल्ल आन पर्वम मेको कली शेंदो। इजीकीएल २४:६; इजीकीएल २०:४ <sup>3</sup> गे मेको कली 'परमप्रभु, परमप्रभु यावेमी इ पर्वम मार देंत देशा हना "ए सहर, गे इ दातेमी हुश खाक्व पोक्तीवी। इ खतम दुम्तीक नाक्त जाक्त। गे मूर्ति सेल्सीशा, ग्रांग्रा दिशो दुम्ते। <sup>4</sup> गे हुश शाइक्पाइश्शा, दोस तशो बाक्नेवे। गे इ सेल्शो देवी देवता रे पा ग्रांग्रा दिशो दुम्नेवे। इ निसाफ नाक्त जाक्त। मिनु इ बर्स नुप्शो बाक्नीम। मोपतीके गो इ कली रागी रागी डा मुर आन दातेम शिशी मताइब नु शुक्शी पाइक्तीक मुर सेल्लन। २राजा २१:१६; इजीकीएल ५:१५ <sup>5</sup> ए, हिक्वा मपुंडसीशो नु ग्रांग्ये माग्येम ब्रीशो सहर, इ नेक्वा नु डोन बाक्व मुरपुकीम इ कली शुक्शी पाइनीम।

<sup>6</sup> मेकेर बाक्शो इसाएल डा पिप आ तौ नेल्लेम आन सक्तिम हुश खाक्व पोक्शो बाक्तेकम। <sup>7</sup> मिनु मेकेरन आल आन आम आफ तशा महिक्नीम। मेकेरन अर्को रागी डा मुर आन कली दिप्नीम। मिनु रोम रोइक्व नु आन वॉइश बेक्शो मीश मुर आन कली मरिश्शो पाइनीम। प्रस्थान २२:२०-२१ <sup>8</sup> गे आं थोव्रक आन कली आइक्व मिश्शा, आं नाइक्तीक नाक्त कली ग्रांग्रा दिशो सेल्लतीवी। <sup>9</sup> मेकेर मुर आन पर्वम जोल लोव्र पा साइक्पाइक्व मुर बाक्नीम। मिनु डांडा डा थानम चदेशो मार मार जाइब मुर यो बाक्नीम। मेकोपुकीम थम मरिश्शो गेय पाइनीम। <sup>10</sup> मेकेर मुरपुकी आन आफ आन मीश नु इप्नीम। मेकेर मुरपुकी रां ब्रोल्शो मीश मुर नु इप्नीम। लेवी १८:७-८; लेवी १८:१९ <sup>11</sup> मेकेर मुरुम आन नेक्वा डा मुर आन मीश नु इप्शा ग्रांग्रा दिशो गेय पाइनीम। मिनु का निक्शीमी आन चाइमी कली बिथोलो पाइनीम। का निक्शीमी आंम आफ आ तमी कली बिथोलो पाइनीम। लेवी १८:२०; लेवी १८:१५; लेवी १८:९ <sup>12</sup> मेकेर मुरपुकीम मुर साइक्वा कली घूस

ताक्नीम। गे मुर आन कली जेर गेशा आ चाइक्व के यो चाइक्व ताक्नेवे। आंम नेक्वा डा मुर आन कली दिप्शा आंम कली रिश्शो दुम्तीक गेय पाइनेवे। गे आं कली प्रेंताक्यी" ' दे परमप्रभु, परमप्रभु यावेमी" देंत। प्रस्थान २२:२४

<sup>13</sup> मिनु मेकोमी "गे जोल पा मरिश्शो पा क्येट चेशो तशा नु इ दातेम मुर साइश्शा हुश खाक्व पोक्शो आ पर्वम गो छक लाक्वा थाम्पा ग्रांग्रा दीती। <sup>14</sup> गो तेको नाक्ती इ कली निसाफ पाइनुडा, मेको नाक्ती गे इ सक्ति महिक्शीथु बाक्वा डा? मार इ गुड बोल्यो लीनीमी डा? गो, परमप्रभु यावेमी मेको लोव्र पाता। गो मेको पाइनुड। <sup>15</sup> गो इ कली रागी रागी डा मुर आन दातेम एर ऑथ फ्राइनन। मिनु राज्य राज्यम ब्रपाइक्वनन। मिनु गो इ आगाम दुश्शो ग्रांग्रा दिशो गेय नेल्ल क्याम्नुड। <sup>16</sup> मिनु गे रागी रागी डा मुर आन डॉइती महिक्शीशो दुम्नेवे। मिनु गोन परमप्रभु यावे नड, दे तुइक्नेवे" दे परमप्रभु यावेमी देंत।

परमप्रभुमी यपाइक्व

<sup>17</sup> परमप्रभु यावेमी आं कली लोव्र पापु। <sup>18</sup> मार लोव्र पापु देशा हना "ए मुर, इसाएल आ खिं डा मुरपुकी आं पर्वम कस खोदेशो दुश्शो बाक्नीम। मेको नेल्ल मार मार यपाइक्तीकेम बाक्शो तांबा, टिन, फलाम नु सिसा रे गूशो कस खोदेशो दुश्शो बाक्नीम। मेकोपुकी कस खोदेशो ला बाक्नीम। यसैया १:२२-२५; येरमीया ६:२८ <sup>19</sup> मोपतीके परमप्रभु, परमप्रभु यावेमी 'गे नेल्ल कस खोदेशो दुम्तीके गो इन कली यरूसलेममी पुक्नन्नी। <sup>20</sup> मिनु मुरपुकीम मी फ्रशा यपाइक्वा कली दोपा चांदी, तांबा, फलाम सिसा नु टिन यपाइक्तीकेम कुर पाइनीमी, मोपा गो यो आं गाइश्शो नु चुरशोम इन कली पुक्नन्नी। मिनु कुर पा यपाइक्नन्नी। <sup>21</sup> गो इन कली पुक्शा, आं चुरशो मी खोदेशो पा इन तार मोइक्नुड। मिनु गे मेकेर याइनीनी। <sup>22</sup> दोपा चांदी यपाइक्तीकेम यपाइक्नीमी, मोपा गो इन कली यपाइक्नुड। मिनु गोपुकीम गो परमप्रभु यावेमीन आं चुरशो इन तार मोइक्ता, दे तुइक्नीनी" देनो" देंत।

इसाएल डा ठेयब मुर आन पाप

<sup>23</sup> मिनु परमप्रभु यावेमी आं कली लोव्र पापु। <sup>24</sup> मार लोव्र पापु देशा हना "ए मुर, एको रागी कली गे आं गाइक्तीक नाक्त रेउम मशेक्शो, ग्रांग्रा दिशो रागी बाक्नेवे। <sup>25</sup> मेकेर बाक्व पिप आ तौ आन सिखार ग्याइश्शो डरर डरर पाइब गुप्स खोदेशो बाक्नीम। मेकोपुकीम मुर आन कली नेक्तेकम। शोप नु शुश क्येट लाइब, मार मार रोइक्ताकम। मिनु मेको आन दाते डा शुश मीश मुर आन कली वॉइश बेक्शो मीश मुर सेल्लेकम। इजीकीएल ३४:३,८; सेफन्याह ३:३; भजन संग्रह १४:४ <sup>26</sup> मेको आ चढेबपुकीम आं शेंशो लोव्र प्रॉइतेकम। आं थोव्रकपुकी ग्रांग्रा दिशो सेल्लेकम। मेकोपुकीम आं मार मार मुर आन थोव्रक खोदेशो सेल्लेकम। मेकोपुकीमी मार ग्रांग्रा दिशो नु मार ग्रांग्रा मदिशो बाक्नीमी, मेको मशेंदेम। मेकोपुकीम आं नाइक्तीक नाक्त प्रेंताकम। मोपा गो मेको आन दातेम महिक्शीशो दुश्शो बाक्नुड। सेफन्याह ३:४; इजीकीएल ४४:२३; मत्ती २३:२५; लेवी १०:१० <sup>27</sup> मेकेर बाक्व आन ठेयब मुर नेल्ल फर खोदेशो बाक्नीम। मेकोपुकीम सिखार ग्यारनीम। मुर आन कली साइक्नीम नु क्येट तचा कली मुर आन कली खतम सेल्लनीम। <sup>28</sup> मेको आं लोव्र पाइबपुकीम 'गो कोइतीक ताता' देंखु पा, जोल पा शेंनीम। मेको आन पशो मरिश्शो नेल्ल बुलु बुइश्शो खोदेशो पा सुम्नीम। मेकोपुकीम गो मारेइ मदेंथु 'परमप्रभु, परमप्रभु यावेमी ऑ देंत' दे फश लोव्र पाइनीम। <sup>29</sup> मिनु मेको रागी डा मुरपुकीम गेन कि गेन, दे क्येट लाइक्नीम। मेकोपुकीमी मार मार रोइक्नीम। मेकोपुकीम प्रुडग नु मारेइ मथीब आन कली दिप्नीम। मिनु अर्को रागी डा मुर आन कली दला दाक्स पाइनीम। <sup>30</sup> मिनु गो मेको आन दातेम गारो प्रोव्रशा गेब नु रागी मक्वाम्दुल, दे रागी आ पर्वम आं डॉइती राक्व मुर का माल्ला, तन्न मथिदु। इजीकीएल १३:५ <sup>31</sup> मोपतीके गो आ गाइश्शो मेको आन तार मोइक्नुड। आं चुरशो मीमी मेको आन कली खतम सेल्लुडमी" दे परमप्रभु, परमप्रभु यावेमी देंत। इजीकीएल २१:३६

## मरिम्शो पाइब वोबु निक्शी

23 परमप्रभु यावेमी आं कली लोव्र पाप्नु।<sup>2</sup> मार लोव्र पाप्नु देंशा हना “ए मुर, रागी काम मीश मुर निक्शी बाक्ताक्स। मेको ममा का आ तमी बाक्ताक्स।<sup>3</sup> मेको निक्शी इजीप्त रागीम तेल्लेम दुम्ताक्स। मेको निक्शी ठिटी दुम्सानु, तेल्लेम पचा गोम्ताक्स। मेको रागीम मेको आस कुचु थिम्तेक्स। मिनु मेको निक्शी कन्ने बाक्सानु, आस दूध थिचा पुंइसाक्स।<sup>4</sup> मिनु दिदी आ नें ओहोला नु आ लोक्ब आ नें ओहोलीबा बाक्ता। मेको निक्शी आं के दुम्शो बाक्ताक्स। मिनु मेको निक्शीमी तमी तौ थिम्ताक्स। मेको आस नें आ अर्थ मार बाक्ता देंशा हना, ओहोला सामरीया नु ओहोलीबा यरूसलेम बाक्ता।

<sup>5</sup> मिनु ओहोला आं के दुम्शा, यो तेल्लेम पाप्नु। मेकोमी अस्सुर डा लडाइ पाइब आन कली खोइक्तु।<sup>6</sup> मेको नीलो वा फेक्शो लडाइ पाइबपुकी, हुकुम पाइबपुकी, लडाइ पाइब आन कप्तानपुकी, मेको नेल्ल दारशो ठिटा शारा डोइश्शा गाक्बपुकी बाक्तेक्स।<sup>7</sup> मेकोमी मेको आन कली दाक्शा, मेकोपुकी नु तेल्लेम पाप्नु। मेको अस्सुर डा योव्रशो नु दारशो मुर बाक्तेक्स। मिनु मेकोपुकी नु इप्शा, मेको आ माल्शो वोंइश मुर आन मूर्ति नेल्लेम आंम कली ग्रांरा दिशो सेल्साक्व।<sup>8</sup> मेकोम इजीप्त रागीम पशो तेल्लेम गेय मप्रोन। मारदे हना मेको ठिटी बाक्मेनु, मुरपुकी मेको नु इप्तेक्स। मिनु मेकोपुकीमी आ कुचु थिम्तेक्स। मिनु आन दाक्शो मेको नु पाम्तेक्स। २२राजा १७:४<sup>9</sup> मोपतीके गो मेको कली आ दाक्शो अस्सुर डा मुर आन गुडम गेता। मेको, मेकोपुकी नु दाक्मुशो बाक्ता।<sup>10</sup> मिनु मेकोपुकीमी मेको कली शिश्रा सेल्तेक्स। मिनु मेको आ तमी तौ आन कली ग्याइक्ताक्स। मिनु मेको कली तरवारम साइक्तेक्स। मेकोम सजाइ ताप्नु। मेको मीश मुर आन दातेम शुक्शी पाइक्चा पुंइसीब दुम्त।

<sup>11</sup> मिनु मेको आ लोक्ब ओहोलीबामी मेको ताप्नु। तन्न मेकोम आ तेल्लेम पतीक नु खोइक्तीकेम आ दिदी क्येडा यो लाक्तु।<sup>12</sup> मेको यो अस्सुर डा मुर आन कली हुकुम पाइब, कप्तान, या कुरशा लडाइ पाइब नु शारा डोइक्ब बाक्तेक्स। मेको दारशो ठिटा आन नोले खोइक्तु।<sup>13</sup> मिनु गो मेको यो ग्रांरा दिशो दुम्शो ताता। मेको निम्फा लां कामीन गाक्ताक्स।<sup>14</sup> तन्न मेकोम आ तेल्लेम पतीक डोंइती क्येडा शुश बारपाइक्तु। मेकोम गारोम मुशा सेल्शो वोंइश मुर आन नकसा ताप्नु। मेको लल रडम सेल्शो कल्दी आन नकसा बाक्तेक्स।<sup>15</sup> आन क्रातोम किप्शुर क्यिप्शो नु आन पियाम रोम्सीशो फेटा रुक्शो, नेल्ल ठेयब मुर खोदेंशो तांइसीशो बाक्तेक्स। मेको बेबीलोनम बाक्शो कल्दी डा मुर बाक्तेक्स।<sup>16</sup> मिनु मेकोम मेको आन कली तशा, मेको आन कली दाक्शा कल्दी रागीम लोव्र कुरब मुर सोइक्ताक्व।<sup>17</sup> मिनु बेबीलोन डा मुरपुकी मेको आ बाक्तीकेम मेको नु इप्थ जाक्तेक्स। मिनु आन दाक्तीकेम मेको कली ग्रांरा दिशो सेल्तेक्स। मिनु मेकोपुकी रे ग्रांरा दिशो दुम नोले, मेको आन क्येडा रूशा, आ थुं लेत्ताक्व।<sup>18</sup> मोपा मेकोम नेल्लेम तचा डा पा तेल्लेम पा, आ शिश्रा रं नेल्ल आन कली कोंइताक्व। मिनु गो मेको आ दिदी कली खोदेंशो पा, मेको कली यो ग्रांरा दिशा प्रोंइता।<sup>19</sup> मो हना यो मेकोम इजीप्त रागीम ठिटी बाक्म ना डा तेल्लेम पशो मिम्शा आ तेल्लेम पतीके शुश बारपाइक्तु।<sup>20</sup> मेको मेकेर डा आ माल्शो मुर आन कली दाक्ताक्मी। मेको आन माल्शो मुरपुकी गधा नु शारा खोदेंशो बाक्तेक्स।<sup>21</sup> मो हना यो गे इजीप्त रागीम इ कुचु थिश्शो इ ठिटी ना डा मरिम्शो पशो नाक्ती मिम्ताक्वी” देंत।

## ओहोलीबामी सजाइ तशो

<sup>22</sup> मोपतीके ए ओहोलीबा, परमप्रभु, परमप्रभु यावेमी “डोंइती गो इ कली सजाइ गेनुड। मिनु इ कली दाक्शा, ब्रीशो मुर आन कली सजाइ गेनुड। मिनु मेको मुर आन कली इ पर्वम एर ऑथ रे पोक्नुड।<sup>23</sup> मेको बेबीलोन डा मुर नु कल्दी डा मुर नेल्ले, पेकोद, शोआ नु कोआ डा मुर, अस्सुर डा मुर नेल्ल, मेको नु बाक्शो दारशो ठिटा, हुकुम पाइब, कप्तान नु लडाइ पाइब, मेको नेल्ल नु शारा डोइक्ब नेल्ल आन कली इ पर्वम पोक्नुडमी।<sup>24</sup> मेकोपुकी गे नु लडाइ पचा कली उत्तर रे पा बग्गी नु शुश लडाइ पाइब नु

जाक्नीम। मेकोपुकीमी ठेयब नु आइक्च तेक्तीक कुरशा, फलाम के गुक्तीक गुक्शा, इ कली पुम्नीम। मिनु गो इ कली सजाइ गेपाइक्चा कली मेको आन गुडम गेनन। मिनु मेकोम आन कानुन कोव्रशा इ कली सजाइ गेनीम।<sup>25</sup> गो आं गाइश्शोमी इ कली सजाइ गेपाइक्नुड। मिनु मेकोपुकी गे नु गाइश्शा चुरशा इ कली खतम पोक्नीम। मिनु मेकोपुकीम इ नें नु इ नोफा खोइक्नीम। मिनु इ लीशो मुर तरवारम साइक्चा पुंइसीनीम। मेकोपुकीम इ तमी तौ आन कली ग्याइश्शा लाइक्नीम। इ लीशो मुर मीम दुप्शा बेक्नीम।<sup>26</sup> मेकोपुकीम इ वा प्रुइश्शा शिश्रा सेल्नीम। मिनु इ दारशो गहनापुकी रोइश्शा लाइक्नीम।<sup>27</sup> मोपा गो इ इजीप्त रागीम गोशो तेल्लेम पतीक थुम्पाइक्नुड। गे मेको आन कली ममाल्थु, इजीप्त रागी कली ममिम्नेवे” दे परमप्रभु यावेमी देंत।<sup>28</sup> मिनु परमप्रभु, परमप्रभु यावेमी “गो इ कली इ काइ मदाक्शो मुर आन गुडमी गेनुड। गे डोंइती मेको आन क्येडा रूशा, इ थुं लेश्शो बाक्ते।<sup>29</sup> मिनु मेकोपुकीमी इ काइ मदाक्शो गेय पाइनीम। इ गेय पा तशो मारेइ मारेइ योल्शा, इ कली शिश्रा सेल्शा प्रोंइनीम। मिनु शिश्रा दुम्तीके इ तेल्लेम पशो नेल्ल तुंइसीब। इ ग्रांरा दिशो पशा, तेल्लेम पतीके गे मोदेंशो दुम्नेवे।<sup>30</sup> मारदे हना गे रागी रागी नु तेल्लेम पा, गे मेको आन मूर्ति रे पा ग्रांरा दिशो सेल्साक्वे।<sup>31</sup> गे इ लोक्ब खोदेंशो पाप्तीवी। मोपतीके गो मेको कली गेशो श्येत इ कली गेनन” दे परमप्रभु यावेमी देंत।<sup>32</sup> परमप्रभु, परमप्रभु यावेमी “गे इ लोक्ब आ कचौरा तूचा माल्नेवे। मेको ठेयब श्येत जतीक बाक्ब। गे फाल्ने मचाप्चा डा शुक्शी पाइक्चा पुंइसीब दुम्नेवे। मारदे हना इ श्येत ठेयब दुम्ब।<sup>33</sup> गे दुक्शो दुम्शा सुर्ता पतीकेमी ब्रीनेवे। मेको इ लोक्ब सामरीया आ कचौरा शुश हिंतीक नु मुर मबाक्तीक बाक्ब। यसैया ५१:१७<sup>34</sup> मिनु इ लोक्ब खोदेंशो दुम्नेवे, गे मेको श्येतथ मदुम सम्म तूनेवे। मिनु मेको कचौरा आ टुक्रा नाक्नेवे। मिनु गे इ दूध रेत्नेवे। मारदे हना गो एको लोव्र पाता” दे परमप्रभु, परमप्रभु यावेम देंत।<sup>35</sup> मोपतीके परमप्रभु, परमप्रभु यावेमी “गे आं कली प्रेंताक्वी। मिनु आं कली प्रोंइती। मोपतीके गे इ ग्रांरा दिशो गेय नु तेल्लेम पशो आ पर्वम सजाइ ताइक्नेवे” देंत। येरमीया २:३२

## वोबु निम्फामी सजाइ तशो

<sup>36</sup> मिनु परमप्रभु यावेमी आं कली “ए मुर, गे ओहोला नु ओहोलीबा आस कली निसाफ पाइनेवे? मो हना मेको निक्शी आस पशो ग्रांरा दिशो गेय आन पर्वम मेको आस कली तुइक्पतो। इजीकीएल २०:४ इजीकीएल २०:४<sup>37</sup> मारदे हना मेको निक्शीम हेंथे पाम्ताक्स। मिनु मेको आस गुडम हुश खाक्श पोक्ताक्स। मेकोमी आस मूर्ति नु हेंथे पाम्ताक्स। मेको निक्शीम आं कली जरमेशो आस तमी तौ आन कली, मूर्ति आन कली ब्वा गेचा कली क्योरशा चढ़ेम्ताक्स। इजीकीएल १६:२०<sup>38</sup> मेको निक्शीम आं कली मार पाम्ताक्स देंशा हना, आं बाक्तीक ग्रांरा दिशो सेल्ताक्स। मिनु आं नाइक्तीक नाक्त कली अर्का नाक्त खोदेंशो पा सेल्ताक्स। इजीकीएल ८:५-१८<sup>39</sup> तेको नाक्ती मेको आस आल आन कली मूर्ति आन कली क्योरशा चढ़ेम्से, मेको नाक्तीन आं बाक्तीकेम ओव्रताक्स। मिनु ग्रांरा दिशो सेल्ताक्स। मेको निक्शीम आं खिम मोदेंशो गेय पाम्ताक्स।

<sup>40</sup> मेको निक्शीम डोन डा मुर आन कली लोव्र कुरब मुर सोइश्शा, ब्रेत्ताक्से। मिनु मेकोपुकी जाक्तेक्स। मिनु गे मेको आन पर्वम चिक्शा शोप्शा इ मिक्चीम गाजल खेक्साक्वे। मिनु गहना पांइशा आंम कली ग्योम्साक्वे।<sup>41</sup> गे आंम दारशो खाटम बाक्ते। मिनु मेको आ डोंइती आं धूप नु तेल वोइक्तीवी।<sup>42</sup> मिनु सहरम ठेयब ग्येरसीशो रेयके दुम्त। मिनु गोरशो रागी रे चाक्शो दुक्शो मुरपुकीमी मेकेर डा मीश मुर आन कली चुरा लिक्ताक्स। मिनु आन पियाम दारशो सुन फू चुइक्ताक्स।

<sup>43</sup> मिनु गोरशो रागी रे जाक्शो मुरपुकी मेको तेल्लेम पचा रूशो मीश मुर नु इप्तेक्स।<sup>44</sup> मारदे हना मेकोपुकी तेल्लेम का नु इप्थो खोदेंशो पा इप्तेक्स। ओहोला नु ओहोलीबा नु इप्थो मुर खोदेंशो पा जाक्तेक्स।<sup>45</sup> तन्न ठीक निसाफ पाइबम मेको आस कली ‘नाता खोइक्ब, हुश खाक्श पोक्शो आ पर्वम दोस ताइनीस’ मारदे हना मेकोम हेंथे पा आस गुडम मुर साइश्शो हुश बाक्ब” देंत। इजीकीएल १६:३८,४०

46 मिनु परमप्रभु, परमप्रभु यावेमी “मेको आस पर्वम ग्रांगये माय्ये पोक्ब हुल का पोक्कीन। मिनु मेको आस कली शुश हिंपाइश्शा मारेइ मारेइ रोइश्शा लतीन। 47 मिनु मेको ग्रांगये माय्ये पोक्ब हुलपुकीम मेको आस कली फुल्लु आजीम। मिनु तरवारम क्योरशा साइक्नीम। मिनु मेकोपुकीम मेको आस तमी तौ आन कली साइक्नीम। मिनु मेको आन खिम मी सुइक्नीम। 48 मोपा गो रागीम मेको ग्रांग्रा दिशो गेय थुम्पाइक्नुड। एको इ खोदेशो मपामेक्ल। मीश मुर नेल्ल आन कली हिंच कौइतीक दुम्ब। 49 गे इ ग्रांग्रा दिशो गेय आ पर्वम सजाइ ताइनेवे। मिनु इ मूर्ति पूजा पशो पाप राइनेवे। मिनु गोन परमप्रभु यावे नड, दे तुइक्नेवे” दैत।

यरूसलेम खिया जोशो ग्योब दुम्शो

24 मिनु ग्याइश्शा लाइक्वा पुंडसीशो आ ९ बर्स डा १० महिना डा १० नाक्ती परमप्रभु यावेमी आं कली लोत्र पाप्तु। २राजा २५:१ 2 मार लोत्र पाप्तु दैशा हना “ए मुर, मुलाक्ती तेको बर्स नु तेको नाक्ती बाक्बा, मेको ब्रेक्शा वोतो। मारदे हना मुलाक्ती बेबीलोन डा पिपम यरूसलेम कली पुम्शो बाक्ब। 3 एको मटीब खिं डा मुर आन कली, एको कथा नैपाइक्मी। परमप्रभु, परमप्रभु यावेमी मार दैब दैशा हना ‘मी तार ग्योब कादीन। मिनु मेकेर ब्वाक्कु लुक्तीन। इजीकीएल ११:३ 4 मिनु मेकेर श्ये कुर पने। रिम्शो रिम्शो श्ये, आ फिला डा नु कुथु डा श्ये कुर पने। रिम्शो रुश्म प्रिंदिने। 5 बगाल डा नेल्ल क्येडा रिम्शो क्यारश भेडा योत्रशा चाक्कीन। मेको आ आगाम शी प्रोवडीन। मिनु मेकेर ब्रुइक्पाइश्शा रुश क्येने’ दैत।

6 मोपतीके ‘आबी आबी, एको हुश ख्राक्श पोक्ब सहर, मेको आ खिया ग्योब आगाम बाक्ब। मेको आ खिया मेकेर रे मलशो बाक्ब। मेको कली फेन्टे मआप्यु, श्येत्थ पोक्कीन। इजीकीएल २२:२; नहुम ३:१ 7 मारदे हना मेको आ हुश शाइक्पाइश्शो मेको आ दातेमीन बाक्ब। मेकोम मेको हुश श्येत्थ फुल्लु तार शाइक्पाइश्शो बाक्त्। मिनु खपीम मसुम्शो बाक्त्। 8 गो चुरशा क्येक्क लेत्वा कली, मेको आ शाइक्पाइश्शो हुश मसुमल, दे श्येत्थ फुल्लु तार शाइक्पाइक्त्। दे परमप्रभु, परमप्रभु यावेमी दैत। 9 मिनु ‘आबी आबी, मेको हुश ख्राक्श पोक्ब सहर, गो यो शी शुश तेल्लुड। 10 मोपतीके शी तेल्ला मी सुइक्तीन। मस्ला सुप्शा रिम्शो पा ब्रुइक्पाइश्शा श्ये क्येने। मिनु रुश नेल्ल किक्मल। 11 मेको नोले मेको ग्योब श्येत्थ सेल्शा मी तार कादीन। मिनु मेको होल। मिनु मेको आ तांबा लल दुम्ल। मेको आ आगा डा ग्रांग्रा दिशो नु खिया यशा लल। मिनु मीम नेक्गल। 12 आं सुर्ता पशो नेल्ल मोशीन दुम्त्। मेको आ थांइशो खिया मीम यो मला। 13 मिनु गो इ कली इ ग्रांग्रा दिशो गेय रे गुंइशा ग्रांग्रा मदिशो सेल्वा माल्ता। तन्न गे ग्रांग्रा मदिशो मदुमे। मोपतीके गो गेना सम्म आं गाइश्शो नेल्ल इ तार मोइश्शा, आं थुं मनाइक्पाइक्नुडा, मेना सम्म गे ग्रांग्रा मदिशो सेल्वा मपुंडसीनेवे। इजीकीएल ५:१३ 14 गो, परमप्रभु यावेमी एको लोत्र पाता। गो आं गेय पतीक नाक्ती जाक्शो बाक्ब। गो नोले मशोइसीनुड। गो इ कली सुर्ता मपथु, शिशी मपाइक्नुड। इ पशो खोदेशो पा इ कली निसाफ पाइनुड” दे परमप्रभु, परमप्रभु यावेमी दैत। येरमीया १३:१४

इजीकीएल आ मीश बेक्शो

15 परमप्रभु यावेमी आं कली लोत्र पाप्तु। 16 मार लोत्र पाप्तु दैशा हना “ए मुर, गो याम काम इ नेल्ल क्येडा दाक्शो मुर लाइक्वा चिक्शो बाक्नुड। मो हना यो गे रौका मपावो। मडाक्को। मिनु इ मिक्च रे प्रेक्कु यो मतोकको। 17 सिक्सी पा बाक्शा हुकयी पावो। बेक्शो मुर आ पर्वम रौका मपावो। इ पियाम फेटा रुक्सो। खोइलीम जुत्ता लिक्सो। इ कुल मसुम्सो। मलामी आन जचा थोत्रक मजावो” दैत। मीका ३:७; होसे ९:४ 18 मोपतीके गो मेको लोत्र सुनी कना मुर आन कली माइक्तामी। मिनु मेको नाक्दो आं मीश बेक्त्। मिनु आ दीसा सुनी गो मार माइक्वा पुंडसीशो बाक्डा, मेकोन पाता।

19 मिनु मुरपुकीम आं कली “एको आ अर्थ मार बाक्बा? मार गे आंइ कली मशेनीनी?” दैतेक्म। 20 मिनु गो मेको आन कली “परमप्रभु यावेमी आं कली लोत्र पाप्तु। 21 मार लोत्र पाप्तु दैशा हना ‘इसाएल आ खिं डा मुर

आन नेल्ल क्येडा दाक्शो, इन सक्ति, इन कोव्रत दाक्शो नु थुंम दाक्शो आं बाक्तीक गो ग्रांग्रा दिशो सेल्नुड। मिनु इन प्रौइशा वोइश्शो इन तमी तौ तरवारम साइक्वा पुंडसीनीम 22 मिनु आं पशो खोदेशो पा गेपुकीम यो पचा माल्नीनी। गे इन कुल मसुमीन। मिनु मलामी आन जचा थोत्रक मजने। 23 गे इन फेटा रुक्वा माल्नीनी। मिनु इन जुत्ता लिक्वा माल्नीनी। गेपुकीम रौका मपने। मडाक्कीने, तन्न इन मरिम्शो पतीकेम इन रां सोव्रशा लाइनीम। मिनु इन दातेम हुकयी पचा माल्नीनी। ब्यवस्था २६:३९-४० 24 मोपा इजीकीएल गे इन कली चिन्ड का दुम्ब। मेकोम पशो खोदेशो पा गे यो पचा माल्नीनी। मिनु एको लोत्र गाम्मेनु, गोन परमप्रभु, परमप्रभु यावे नड, दे तुइक्नीनी” दैशो बाक्ब” दैत। इजीकीएल १२:६,११

25 मिनु “ए मुर, मेको नाक्ती गो मेको आन खुइश्शा बाक्तीक, आन नेल्ल क्येडा दाक्शो, आन सक्ति, आन कोव्रत दाक्शो नु आन थुंम दाक्शो नु आन तमी तौ नेल्ल आन कली लाइनुडमी। 26 मेको नाक्ती प्रोक्शो मुर का इ बाक्तीक जाक्शा इ कली एको लोत्र नेल्ल नैपाइक्ब। इजीकीएल ३३:२१ 27 मेना गे ब्वाक्ने चाप्नेवे। मिनु गे मेको नु लोत्र पाइनेवे। मिनु गे सिक्सी पा मबाक्नेवे। मोपा गे मेको आन कली चिन्ड का दुम्नेवे। मिनु मेकोपुकीम गोन परमप्रभु यावे नड, दे तुइक्नीम” दैत।

अम्मोनी आन कली लोत्र पशो

25 परमप्रभु यावेमी आं कली लोत्र पाप्तु। 2 मार लोत्र पाप्तु दैशा हना “ए मुर, अम्मोनी गे कोव्रशा, मेको आन पर्वम आं लोत्र पावो। 3 अम्मोनी आन कली ‘परमप्रभु यावे आ लोत्र नेनीन। परमप्रभु, परमप्रभु यावेमी इन कली मार दैब दैशा हना, आं बाक्तीक ग्रांग्रा दिशो सेल्मेनु, इस्राएल रागी मुर मबाक्तीके सेल्मेनु नु यहूदा आ खिं डा मुर ग्याइश्शा लाइक्वा पुंडसमानु, गेपुकी ग्येरसाक्नी। इजीकीएल ३६:२; बिलाप २:१६ 4 मोपतीके गो इन कली पूर्व डा मुर आन कली गेनन्नी। मिनु मेकोपुकीम इन दातेम आन लडाइ पाइब आन बाक्तीक सेल्नीम। मिनु इन दातेमीन आन ताम्बु कीनीम। मेकोपुकीम इन फल फुल जाइनीम। मिनु इन दूथ तूनीम। 5 गो रब्बाह सहर कली दलओठ जोतीक नु अम्मोन कली क्यारश भेडा आन गोठ सेल्नुड। मेना गेपुकीम गोन परमप्रभु यावे नड, दे तुइक्नीनी” दैत। 6 मारदे हना परमप्रभु यावेमी “गेपुकी इस्राएल रागी आ पर्वम इन गुइ प्रोक्शा, खोइल थाइश्शो बाक्तीनी। मिनु इन थुंम ईख कुरशो नेल्ल गुंइशा ग्येरसाक्नी। 7 मोपतीके गो आं गुइ गे इन पर्वम क्युक्नुड। मिनु गो इन कली रागी रागी डा मुर आन गुइम गेनुड। मिनु गो जात जात डा मुर आन दाते रे इन नै क्याम्नुड। मिनु गो इन कली रागी नेल्ल रे क्याम्नुड। गो इन कली खतम पोक्नन्नी। मेना गेपुकीम गोन परमप्रभु यावे नड, दे तुइक्नीनी” दैत।

मोआबी आन कली लोत्र पशो

8 मिनु परमप्रभु, परमप्रभु यावेमी “मारदे हना मोआब रागीम ‘यहूदा आ खिं दा अर्को जात डा मुर आन खिं खोदेशो दुम्शो बाक्ब। यसैया १५:-; १६:-; येरमीया ४८:- 9 मोपतीके गो मोआब रागी डा सांद डा सहर रे गोशा बेथ-येशीमोथ, बाल-मेओन नु किरयथ-थाइम रागी रोकसीशो सेल्नुड। 10 गो मोआबी, अम्मोनी नु पूर्व डा मुर आन गुइम गेनुडमी। मिनु रागी रागी डा मुर आन दातेम अम्मोन कली सुइम ममिन्नीम। 11 मिनु गो मोआब कली निसाफ पा सजाइ गेनुड। मेना मेकोपुकीम गोन परमप्रभु यावे नड, दे तुइक्नीम” दैशो बाक्ब” दैत।

एदोमी आन कली लोत्र पशो

12 परमप्रभु, परमप्रभु यावेमी “एदोम रागीम यहूदा आ खिं डा मुर आन कली क्येक्क लेत्ताक्व। मोपतीके मेको थाम्पा दोस ताइब दुम्त्। इजीकीएल ३५:-; येरमीया ४९:७-२२; आमोस १:११-१२; ओबदिया १:-; भजन संग्रह १३७:७ 13 गो आं गुइ एदोम आ पर्वम क्युक्नुड। मिनु मेकेर डा मुर नु बी ब्यफ, क्यारश भेडा नेल्ल आन कली साइक्नुडमी। मिनु गो मेको कली मुर मबाक्तीके सेल्नुड। मिनु तेमान रे देदान सम्म डा मुर नेल्ल तरवारम साइक्वा पुंडसीनीम। 14 गो आं मुर इस्राएल रे पा एदोम कली क्येक्क लेत्नुड। मिनु



मेकोपुकीम आं गाइश्शो नु आं चुरशो खोदेशो पा एदोम कली पाइक्नीम। मिनु मेकोपुकीम आं गाइश्शो नु चुरशो खोदेशो पा क्येक्क लेत्नीम। मिनु मेकोपुकीमी परमप्रभु, परमप्रभु यावेमी क्येक्क लेशो बाक्ब, दे तुइक्नीम” देंत।

पलिस्ती आन कली लोव्र पशो

15 परमप्रभु, परमप्रभु, यावेमी “मारदे हना पलिस्तीपुकीम गेना हना यो जोरी सत्रु दुम्शा, क्येक्क लेत्ताक्म। आन थुंम ईख कुरशा, क्येक्क लेशशा खतम सेल्तेक्म। *यसैया १४:२९-३२; येरमीया ४७:-; आमोस १:६-८; सेफन्याह २:४-५* 16 मोपतीके गो पलिस्ती आन पर्बम आं गुड क्युक्नुड। मिनु गो केरेथी आन कली साइक्नुडमी। मिनु समुन्द्र आ नेक्था डा बाक्तीक नेल्ल खतम सेल्नुड। 17 गो मेको आन कली आं चुरशोम ठेयब सजाइ गेशा थाम्पा क्येक्क लेत्नुडमी। मिनु गो मेको आन कली क्येक्क लेत्नु, मेकोपुकीम गोन परमप्रभु यावे नड, दे तुइक्नीम, देशो बाक्ब” देंत।

टायर सहर कली निसाफ पशो

आमोस १:९-१०; यसैया २३:-

26 मिनु ग्याइश्शा लाइक्वा पुंडसीशो ११ बर्स डा महिना डा डोंइती डा नाक्ती परमप्रभु यावेमी आं कली लोव्र पाप्नु। 2 मार लोव्र पाप्नु देंशा हना “ए मुर, यरूसलेम श्येत जशो तशा, टायर सहर ग्येरसीशो बाक्त। मेकोमी ‘आं डोंइती ठेयब लाप्चो ब्रेश्शो बाक्ब। मेको लाप्चो आं कली रोक्सीशो बाक्ब। मुल मेको जाम्शा लत। मुल आं कली रिम्शो दुम्ब’ ” देंत। *इजीकीएल २५:३* 3 मोपतीके परमप्रभु, परमप्रभु यावेमी “कोव्रडो, ए टायर सहर गो इ कली सजाइ गेनुड। इ कली समुन्द्रम आ छाल पोक्शो खोदेशो पा गो शुश रागी डा मुर इ पर्बम पोक्नुडमी। 4 मेकोपुकीम टायर डा गारो प्रेन्नीम। मिनु मेको आ लाइश्शो खिं खोल्नीम। गो मेको आ खप खोरशा श्येत्थ फुल्लु खोदेशो सेल्नुड। 5 टायर सहर समुन्द्र आ दातेम ग्याइल आप्तीक दुम्चा माल्ब, दे गो, परमप्रभु, परमप्रभु यावेमी एको लोव्र पाता। मेको सहर रागी रागी डा मुर आन रोइक्तीक दुम्ब। 6 मिनु मेको आ एर ओंथ डा सहर डा मुर तरवारम साइक्वा पुंडसीनीम। मेना मेकोपुकीम गोन परमप्रभु यावे नड, दे तुइक्नीम” देंत।

7 मिनु परमप्रभु, परमप्रभु यावेमी “गो उत्तर रे बेबीलोन डा पिप नेबुकदनेसर कली शारा, बग्गी, शारा डोइक्ब लडाइ पाइब नु ठेयब हुल बोल्यो लडाइ पाइब, टायर नु लडाइ पपाइक्थ चाक्नुड। *येरमीया २७:६; दानीएल २:३७* 8 मिनु एर ओंथ डा सहर डा मुर नेल्ल तरवारम साइक्वा पुंडसीनीम। मेको बेबीलोन डा लडाइ पाइबपुकीमी सहर कली पुम्नीम। गारो डोइक्तीक सेल्नीम। मिनु तेक्तीक कुरशो शुश लडाइ पाइब इ गे बारनीम। 9 मिनु पिप नेबुकदनेसरमी मुडाम गारो ब्रेण्ड आन कली अरेब। मिनु इ लाइश्शो खिं आ खापुकीम प्रेन्नीम। 10 मेको आन शुश शाराम पोक्शो फुरकुम इ कली सुम्ब। शारा डोइक्ब नु बग्गी आन गुगील आन रेयकेम इ गारो हिम्पाइक्ब। नेबुकदनेसर इ लाप्चो रे ओव्रमेनु, प्रेशो गारोम हिरशो सहर खोदेशो पा ओव्रब। 11 मेको आ शारा आन गेंचम इ सहर डा लां नेल्ल दिम्शा ताइश्शा पाइनीम। मिनु मेकोमी इ मुर आन कली तरवारम साइक्ब। मिनु इ बोल्यो थाम खपीम गोल्नीम। 12 मेकोपुकीम इ शॉप रोइश्शा योल्नीम। इ लेयचा कली वोइश्शो थोव्रक रोइश्शा लाइक्नीम। मेकोपुकीम इ गारो नु इ दारदारशो खिं प्रेशा खतम पोक्नीम। मिनु इ फुल्लु, खिं सेल्तीक शी नु खप समुन्द्रम ताइक्नीम। 13 गो इ कुम्सो थुम्पाइक्नुड। इ बीना ताप्शो लेंशा मनैसीब। *आमोस ५:२३* 14 गो इ कली श्येत्थ फुल्लु सेल्नुड। गो ग्याइल आप्तीक दुम्नेवे। इ कली लेंशा गेनायो मसेल्नीम। मारदे हना गो, परमप्रभु यावेमी एको लोव्र पाता” दे परमप्रभु, परमप्रभु यावेमी देंत।

15 परमप्रभु, परमप्रभु यावेमी टायर सहर कली “लडाइ पा, गार दुम्शो आन हुकयी पशो इ गोल्शो रेयकेम समुन्द्र आ नेक्था डा सहर आन कली हिम्पाइक्ब। 16 मेना समुन्द्र आ नेक्था डा सहर आन कली सासन पाइब आन ठेयब निक्तीक रे बोक्शा तोइश्शा, बुटा आप्शो वा प्रुइक्नीम। मेकोपुकी हिंशा खिंखि पशा, खपीम निश्शा, हिम्सीनीम। मिनु इ कली तशा हिंनीम।

17 मिनु मेकोपुकीम सहर आ पर्बम रोंका पाइनीम। मिनु सहर कली ‘गे समुन्द्र रे क्याम्चा पुंडसाक्वे। ए दारशो सहर, गे नु इ मुरपुकी समुन्द्र डा सक्ति पाइश्शो बाक्तीनी। मेकेर बाक्ब नेल्ल आन कली गे हिंपाइश्शा थिर थिर पपाइश्शो बाक्ते। 18 मुल गे जाम्शा लवे नाक्ती समुन्द्र आ नेक्था डा रागी डा मुरपुकी खिंखि पाइनीम। इ गोल्शा लशो खतम दुम्शो तशा समुन्द्र आ नेक्था डा रागी हिंनीम’ ” देंत।

19 मिनु परमप्रभु, परमप्रभु यावेमी “गो इ कली श्येत्थ सहर का सेल्नुड। गो इ कली मुर मबाक्शो सहर खोदेशो दुम्पाइक्नुड। मिनु गो इ कली समुन्द्र डा ब्वाक्कुम सुम्पाइक्नुड। 20 गे इ कली बेक्शा लशो मुर नु साइ डोंइती बेक्शो मुर आन बाक्तीके उइ तोक्नन। गो इ कली उइ डा रागीम साइ नेसी ब्रेश्शो खिं आन दातेमी बाक्पाइक्नुड। गे नरक लाइब नु बाक्नेवे। मिनु गे ब्रोंइशा बाक्ब आन बाक्तीकेम बाक्चा मताइनेवे। *यसैया १४:११, १५; एफिसी ४:९; १पत्रुस ३:१९* 21 गो इ जाम्तीक हिंचा डा सेल्नुड। मिनु गे जाम्शा लाइनेवे। इ कली माल्नीम, तन्न सुइम मथिन्नीम” दे परमप्रभु यावेमी देंत।

टायर सहर आ पर्बम रोंका पशो

यसैया २३:-

27 परमप्रभु यावेमी आं कली लोव्र पाप्नु। 2 मार लोव्र पाप्नु देंशा हना “ए मुर, टायर सहर आ पर्बम रोंका पावो। 3 मेको समुन्द्र आ ओव्रतीक बाक्ब। मेको टायर सहर शुश मुर आन ग्याप्तीक लेयतीक बाक्ब। मिनु परमप्रभु, परमप्रभु यावेमी ए टायर, गे ‘गो नेल्ल क्येडा दारशो बाक्नुड’ देंते। *होसे ९:१३* 4 इ सांद समुन्द्र आ आगाम बाक्त। इ कली सेल्बपुकीमी नेल्ल आन क्येडा दारशो पा सेल्तेमी। 5 मेकोपुकीम इ डोंगा नेल्ल सेनीर डा शी के सेल्तेक्म। आ दाते डा थाम लेबानोन डा लाइश्शो रवा आ शी के सेल्तेक्म। *ब्यवस्था ३:८-९* 6 मेकोपुकीम इ ब्वाक्क शाक्तीके बाशान डा बोल्यो शी के सेल्तेक्म। इ थेक्शा गाक्तीक साइप्रस डा समुन्द्र आ शुंडच रे चाक्शो तोव्रशी रवा आ शी के सेल्शा हात्ती आ दारा के बुटा आप्शा सेल्तेक्म। 7 इ जहाज डा वापुकी इजीप्त रागी डा दारशो बुटा आप्शा सेल्शो रिम्शो किरशो सुती वा के बाक्तेक्म। मेको इ छेदर दुम्शो बाक्तेक्म। मेको एलीशाह रागी डा समुन्द्र आ शुंडच डा नीलो नु प्याजी रड डा चाक्शो बाक्त। *उत्पत्ती १०:४* 8 सीदोन नु अरवाद डा मुरपुकी इ जहाजम गेय पाइब बाक्तेक्म। टायर, इन जोक्ब तुइक्ब मेकेर बाक्तेक्म। सेमेर सहर डा मुर इ जहाज चलेब बाक्तेक्म। 9 गेबाल डा खाल्पा नु दारशो थोव्रक सेल्स जोक्ब तुइक्ब इ आगाम बाक्तेक्म। मेकोपुकी जहाज डा बिग्रेशो मार मार सेल्ब बाक्तेक्म। जहाज नु आ गेय पाइब नेल्ल इ आगाम बाक्तेक्म। मेकोपुकीमी लेयतीक नु ग्याप्तीक गेय यो पाम्तेक्म। *यहोसु १३:५; १राजा ५:३२* 10 पारसी, लूद नु पूत रागी डा मुरपुकी इ लडाइ पाइब बाक्तेक्म। मेकोपुकी बोल्यो लडाइ पाइब बाक्तेक्म। मेको आन तेक्तीक नु ताकी इ आगामीन क्युक्शा इ दारस बारपाइक्तेक्म। 11 अरवाद नु हेलेक डा मुरपुकी इ गारो आ एर ओंथ खाल पाइब बाक्तेक्म। गमाद डा मुरपुकी इ लाइश्शो खिं खाल पाइब बाक्तेक्म। मेकोपुकीम आन तेक्तीक नु ब्रा कुरतीक इ एर ओंथ डा गारोम क्युक्बाक्तेक्म। मिनु मोपा इ दारस बारपाइक्तेक्म।

12 गे नु शुश शॉप नु शुश मार मार बाक्तीके टारशीश डा मुरपुकीम गे नु ग्याप्तीक लेयतीक गेय पा चांदी, फलाम, टिन नु सिसा चाक्शा फाइक्तेक्म। 13 यावान तूबल नु मेशेक डा मुरपुकीम गे नु ग्याप्तीक लेयतीक गेय पाम्तेक्म। मेकोपुकीम वाइलीम वाइल नु कांसा के ग्योब चाक्शा इ मार मार नु फाइक्तेक्म। *इजीकीएल ३८:२* 14 मिनु बेथ-तोगारमाह डा मुरपुकीम शारा, लडाइ पाइब शारा नु खच्चर चाक्शा इ मार मार नु फाइक्तेक्म। 15 रोडोस डा मुरपुकीम गे नु ग्याप्तीक लेयतीक गेय पाम्तेक्म। मिनु समुन्द्र आ नेक्था डा शुश रागी इ मार मार ग्याप्ब लेयब दुम्तेक्म। मेकोपुकीम इ कली हात्ती आ दारा नु शुश क्येट लाइब क्येर शी चाक्शा इ मार मार नु फाइक्तेक्म। 16 इ शुश मार मार बाक्तीके एदोम डा मुरपुकीमी गे नु ग्याप्तीक लेयतीक गेय पाम्तेक्म। मेकोपुकीम फिरोजा माइश्शो हीरा, प्याजी रड नुप्शा प्रोव्रशो वा, बुटा आप्शो वा, रिम्शो किरशो सुती वा, लल मूगा नु हीरा चाक्शा इ मार मार नु फाइक्तेक्म। 17 यहूदा नु इस्त्राएल डा मुरपुकीम

गे नु ग्याप्तीक लेयतीक गेय पास्तेक्म। मेकोपुकीम मिन्नीथ डा चेरब, फोव्रशी रवा आन फल, खुदो, तेल नु खेक्तीक चाक्शा इ मार मार नु फाइक्तेक्म।<sup>18</sup> मिनु इ शुश मार मार बाक्तीके नु इ शुश शॉप बाक्तीके दमस्कस डा मुरपुकीम गे नु मार मार ग्याप्तीक लेयतीक गेय पास्तेक्म। मेकोपुकीम हेल्बोन डा अडगुर शांबु नु बुश ऊन चाक्शा इ मार मार नु फाइक्तेक्म।<sup>19</sup> उजाल डा वेदान नु यावान डा मुरपुकीम गे नु ग्याप्तीक लेयतीक गेय पास्तेक्म। मेकोपुकीम चेम्शो फलाम, सिन्कौली नु बच चाक्शा इ मार मार नु फाइक्तेक्म।<sup>20</sup> देदान डा मुरपुकीम शारा आ लगम कली जीन वा चाक्शा इ मार मार नु फाइक्तेक्म।<sup>21</sup> अराब रागी नु केदार डा पिप आन तौ नेल्ल इ मार मार ग्याप्ब मुर बाक्तेक्म। मेकोपुकीम भेडा पाठा, सांड, क्यारश चाक्शा इ मार मार नु फाइक्तेक्म।<sup>22</sup> शेबा नु रामाह डा ग्याप्ब लेयब मुरपुकीम गे नु ग्याप्तीक लेयतीक गेय पास्तेक्म। मेकोपुकीम सुप्तीक, नेल्ल खाल डा हीरा नु सुन चाक्शा इ मार मार नु फाइक्तेक्म।<sup>23</sup> उत्पत्ती १०:७<sup>23</sup> हारान, कन्नेह, एदेन, शेबा, अश्शुर नु किल्मद डा ग्याप्ब लेयबपुकीम गे नु ग्याप्तीक लेयतीक गेय पास्तेक्म।<sup>24</sup> मेकोपुकीमी दारशो वा, नीलो श्येलेम प्रोव्रशो वा, बुटा आथो वा, शुश रड पाइश्शो गलैचा चाक्शा, इ मार मार नु फाइक्तेक्म।<sup>25</sup> टारसीस डा जहाजपुकीम इ ग्याप्तीक लेयतीक गेय पास्तेक्म। गे हेल्शो ग्याप्तीक लेयतीक मार मारमी ब्रीशो समुन्द्र बाक्ते।<sup>26</sup> मिनु इ कली शाक्बपुकीमी इ कली समुन्द्र आ दातेम लाइक्तेक्म। तन्न पूर्व डा फशेम इ कली समुन्द्र आ दातेमीन खतम पोक्तु।<sup>27</sup> मिनु इ खतम दुम्तीक नाक्ती इ शॉप, इ ग्याप्तीक लेयतीक मार मार, इ गेय पाइब, इ कली चलेब, इ जहाज कली सेल्ब, इ ग्याप्ब लेयब, इ लडाइ पाइब नु गे नु बाक्ब मुर नेल्ले समुन्द्र आ दातेमी ग्युम्शा खतम दुम्नीम।<sup>28</sup> मेको इ जहाज चलेब आन वाइ ब्रेश्शोम रागी खिंखि पाइब।<sup>29</sup> मिनु ब्वाक्कु शाक्ब नेल्ले आन जहाज प्रॉइशा प्रोक्नीम। मिनु जहाजम गेय पाइब नु चलेबपुकी समुन्द्र आ नेक्थाम राप्नीम।<sup>30</sup> मिनु मेकोपुकी इ पर्बम ठेयब सँदा पा रोंका पा डाक्नीम। आन पियाम फुरक फुंडसीनीम। मिनु पुलुम लोकसीनीम।<sup>31</sup> गे इ पतीके मेकोपुकीम आन पिया डा चां प्रेक्नीम। मिनु अरन्डी फेक्सीनीम। मिनु इ पर्बम आन थुं कशो दुम्शा डाक्नीम। शुश रोंका पाइनीम।<sup>32</sup> मेकोपुकीम इ पर्बम रोंका पा बिलाना पतीक कुम्सो पाइनीम 'समुन्द्र आ दातेमी टायर खोदेंशो पा अर्को तेको सहर खतम दुम्शो बाक्मे' दे रोंका पाइनीम।<sup>33</sup> समुन्द्रम इ ग्याप्तीक लेयतीक मार मार चाक्गमेनु, गे शुश मुर आन कली आन थुं ग्येरपाइक्तीवी। गे इ शुश शॉप नु इ ग्याप्तीक लेयतीक मार मारम रागी डा पिप आन कली शॉप पाइश्शो सेल्लतीवी।<sup>34</sup> मुल समुन्द्रम ख्रुम्चा पुंडसाक्वे। इ ग्याप्तीक लेयतीक मार मार नु इ मुर नेल्ल गे नु युम्तेक्म।<sup>35</sup> मिनु समुन्द्र आ नेक्थाम बाक्ब नेल्ल इ कली तशा हिंशो बाक्नीम। मेको आन पिप थाम्पा हिंशा खिंखि पाइनीम। मेको आन कुल हिंशा किक्पाइश्शो बाक्नीम।<sup>36</sup> मिनु रागी रागी डा ग्याप्तीक लेयतीक गेय पाइबपुकीम इ कली शुक्शी पाइनीम। इ हिंचा डा नुप्तीक नाक्त् जाक्शो बाक्त्" देंत। इजीकीएल २८:१९

टायर डा पिप कली निसाफ पशो

**28** परमप्रभु यावेमी आं कली लोव्र पाप्तु।<sup>2</sup> मार लोव्र पाप्तु देंशा हना "ए मुर, टायर डा पिप आ तौ कली परमप्रभु, परमप्रभु यावेमी 'गे इ थुं डा ठेयब लेत्तीकेम, गो परमप्रभु नड। गो समुन्द्र आ दातेम देवी देवता आन बाक्तीकेम बाक्नुड' देंते। तन्न गे मुर ला बाक्नेवे। परमप्रभु मनवे। गे ठेयब लेशशा, इ थुंम 'परमप्रभु खोदेंशो जोक्ब तुइक्ब बाक्नुड' दे मिस्साक्वे। यसैया ३१:३; दानीएल ५:२०; प्रेरित १२:२३<sup>3</sup> गे दानीएल क्येडा यो जोक्ब तुइक्ब बाक्नेवे। मारेइ ख्रुइक्तीक लोव्र इ रे मख्रुइसीशो बाक्ब। इजीकीएल १४:१४; दानीएल १:१७<sup>4</sup> गे इ रुप्तीक थुं नु मिम्तीकेम शुश शॉप चेम्शो बाक्नेवे। मिनु गे इ मार मार वोइक्तीकेम सुन नु चांदी तेल्लशो बाक्नेवे।<sup>5</sup> गे इ रुप्तीक थुंम ग्याप्तीक लेयतीक गेय पा इ शॉप बारपाइश्शो बाक्नेवे। मिनु इ शॉपोम पतीके गे बोरशा ठेयब लेशशा बाक्नेवे, देंशो बाक्ब" देंत।<sup>6</sup> मोपतीके परमप्रभु, परमप्रभु यावेमी "गे आंम इ कली परमप्रभु खोदेंशो सुंडसीनेवे।<sup>7</sup> मोपतीके गो रागी रागी डा नेल्ल क्येडा मरिश्शो पाइब

मुर आन कली चाक्नुड। मिनु मेकोमी आन तरवार इ दारस नु इ जोक्ब तुइक्ब थुं आ पर्बम शोइक्नीम। मिनु इ दारस ग्रांरा दिशो सेल्लनीम।<sup>8</sup> मेकोपुकीम इ कली तुरसुम चाक्दील्लनीम। मिनु गे समुन्द्र आ दातेम हिंचा डा दुम्शा बेक्नेवे। इजीकीएल २६:२०<sup>9</sup> मिनु मार, इ कली साइक्ब आन डोंइती गे मुर दुम्शा यो 'गो देवता का नड' देंनेवे डा? 'इ कली साइक्ब आन गुडमी बाक्शा यो मोदेंशो लोव्र पाइनेवे?'<sup>10</sup> गे अर्को रागी डा मुर आन गुडम खोइक्तीक चिनु मखोइश्शो मुर खोदेंशो पा बेक्वा माल्लेवे' दे गो, परमप्रभु, परमप्रभु यावेमी लोव्र पाता" देंत।

<sup>11</sup> परमप्रभु यावेमी लेंशा आं कली लोव्र पाप्तु।<sup>12</sup> मार लोव्र पाप्तु देंशा हना "ए मुर, टायर डा पिप आ पर्बम रोंका पावो। मिनु मेको कली परमप्रभु, परमप्रभु यावेमी इ कली 'गे रिम्शो पा थोक्शो छाप खोदेंशो बाक्ते। मिनु रुप्तीक थुंम ब्रीशो नु थम दारशो बाक्ते। इजीकीएल २७:२<sup>13</sup> गे परमप्रभु आ रू एदेनम खोदेंशो बाक्ते। गे हीराम ग्योम्सीशो बाक्ते। लल मानीक, हाव पुशपराज, बुश नु नीलो पन्ना, पीतमनी, लल रड डा ओनीक्स, नीलो बिलौरा, बुश नीर, लल फिरोजा नु गिगी बेरूज माइश्शो हीराम ग्योम्सीशो बाक्ते। मिनु मेको हीरा ग्याइक्तीके नु आप्तीके सुन के बाक्तेक्म। गे दुमे नाक्तीन मेको नेल्ल ठीक पशो बाक्तेक्म। प्रस्थान २८:१७-२०; इजीकीएल ३१:८-९; उत्पत्ती २:८<sup>14</sup> गो तेल लुक्शो करूब इ कली खाल पाइब सेल्ला। गे आं डांडाम बाक्शो नवे। गे मी ब्रशो फुल्लु आन दातेम गाक्बाक्ते।<sup>15</sup> गे सेल्चा पुंडसे नाक्त् रे दोस मताइब बाक्ते। तन्न नोले मरिश्शो पाइब दुम्शो, बाक्ते।<sup>16</sup> मिनु इ एर ऑथ नेल्ल डा ग्याप्तीक लेयतीक आ पर्बम हुश ख्राक्श पोक्शा, पाप पाप्तीवी। मोपतीके गो इ कली ताइक्तीक थोव्रक खोदेंशो पा आं डांडा रे ताइक्ताक्ड। मिनु इ कली खाल पाइब करूबम इ कली मी ब्रशो फुल्लु आन दाते रे खेरते।<sup>17</sup> गे इ दारसम पतीके इ थुं ठेयब लेशशा बोरत। इ शुश शॉप दुम्तीके इ जोक्ब तुइक्ब थुं मरिश्शो सेल्लतीवी। मोपतीके गो इ कली खपीम ताइक्ताक्न। मिनु इ कली पिप आन डोंइती शुक्शी पतीक सेल्लन।<sup>18</sup> गे इ शुश मरिश्शो पशो नु इ जोल पा ग्याप्तीक लेयतीकेम इ आं कली ठेयब सेल्लतीके ग्रांरा दिशो सेल्लतीवी। मोपतीके गो इ आगा रे मी का गुंइताक्ड। मिनु मेकोमी इ कली नेक्तु। मिनु गो इ कली मुर आन डोंइती पुलु सेल्लन।<sup>19</sup> मिनु इ कली तुइक्ब मुर नेल्ल इ कली तशा हिंतेक्म। गे हिंचा डा दुम्शा बेक्ते। मिनु गे गेना हना यो बेक्शा लाइनेवे' देनो" देंत। इजीकीएल २७:३६

सीदोन सहर कली निसाफ पशो

<sup>20</sup> परमप्रभु यावेमी आं कली लोव्र पाप्तु।<sup>21</sup> मार लोव्र पाप्तु देंशा हना "ए मुर, सीदोन गे कोव्रडो। मिनु मेको आ पर्बम आं लोव्र पावो। यसैया २३:२-४<sup>22</sup> परमप्रभु, परमप्रभु यावेमी 'ए सीदोन, गो इ कली सजाइ गेनुड। गो इ दातेमी आं सक्ति कोंडनुड। गो इ दातेमी आं सक्ति कोंडशा, निसाफ पाता हना, मेकोपुकीमी गोन परमप्रभु यावे नड' दे तुइक्नीम<sup>23</sup> गो मेको आ आगाम मुर बेक्तीक रोइ का सोइक्नुड। मिनु मेको आ लां मेर हुश शाइक्पाइक्नुड। मेको आन दाते डा मुर तेइ तेइ तरवारम साइक्वा पुंडसीनीम। मिनु मेकोपुकीम 'गोन परमप्रभु यावे नड' दे तुइक्नीम।

इसाएली आन रागी लेल्लनीम

<sup>24</sup> इसाएल आ खिं डा मुर नु मेको आन नेक्था डा मुर आन दातेमी मुल श्येत गेब मुर मुल मबाक्नीम। मेकोपुकीम 'गोन परमप्रभु, परमप्रभु यावे नड' दे तुइक्नीम" देंशो बाक्ब।<sup>25</sup> परमप्रभु, परमप्रभु यावेमी "गो इसाएल आ खिं डा मुर आन कली मेको आन ब्रशा बाक्शो रागी रागी डा मुर आन दाते रे गुम्पाइक्नुडमी। मिनु गो परमप्रभु यावे नड, दे रागी रागी डा मुर आन डोंइती तुइक्पाइसीनुड। मेना मेकोपुकी आं गेय पाइब याक्ब कली गेशो रागीम बाक्वा ताइनीम।<sup>26</sup> मेकोपुकी मेकेर मारेइ मदुम्थु बाक्नीम। मेकोपुकीम खिं सेल्लनीम। मिनु अडगुर ख्रुम्नीम। मिनु गो मेको आन कली तशा, ग्रांरा दीब नेल्ल आन कली सजाइ गेनुडमी। गो मेको आन नेक्था बाक्ब मेको आन कली मदाक्ब आन कली निसाफ पडानु, मेकोपुकी रिम्शो

पा बाक्नीम। मिनु मेकोपुकीम 'गोन परमप्रभु यावे, आन परमप्रभु नड' दे तुइक्नीम" देंत।

इजीप्त कली निसाफ पशो  
यसैया १९:-; यसैया २०:-; येरमीया ४६:-

29 मिनु ग्याइश्शा लाइक्चा पुंडसीशो १० बर्स डा १० महिना डा १२ नाक्त परमप्रभु यावेमी आं कली लोत्र पाप्तु।<sup>2</sup> मार लोत्र पाप्तु देंशा हना "ए मुर, गे इजीप्त डा पिप फाराओ गे कोवडो। मेको आ परबम नु इजीप्त रागी नेल्ल आन परबम आं लोत्र पावो।<sup>3</sup> मिनु परमप्रभु, परमप्रभु यावेमी मेको कली 'ए इजीप्त डा पिप फाराओ, गो इ कली सजाइ गेनुड। गे खोला आन दातेम बाक्ब समुन्द्र डा ठेयब जन्तु खोदेंशो बाक्नेवे। मिनु नील खोला आं केन बाक्ब। मेको आं सेल्शो बाक्ब' देंते। इजीकीएल ३२:२<sup>4</sup> गो इ शांपेम बोल्सी ब्वेक्नुड। मिनु गो इ खोला डा डांइ इ कल्लापुकीमीन क्येप्पाइक्नुडमी। गो खोला डा डांइ इ कल्ला क्येप्पाइश्शा, इ कली खोला रे कीशा गुंइनन।<sup>5</sup> मिनु गो इ कली नु इ खोला डा डांइ नेल्ल आन कली गोरशो रागीम ताइक्नन्नी। मिनु गे दिमम गोल्नेवे। इन कली सुइम खुप्शा मथिन्नीम। गो इ कली रागी डा जन्तु नु सरीड डा चिक्ब आन कली ब्वचा कली गेनुड।<sup>6</sup> मेना इजीप्त रागीम बाक्ब नेल्लेम गोन परमप्रभु यावे नड, दे तुइक्नीम। गे इस्राएल आ खिं डा मुर आन कली बुदी मीलु के कोक्के खोदेंशो दुम्शो बाक्नेवे। २राजा १८:२१<sup>7</sup> मिनु मेकोपुकीम इ कली गुइम ग्याइक्त्तमेनु, गे जिक्बाक्ते। मिनु मेकोपुकीमी इ कली तिक्सीमानु, गे जिक्शा, मेको आन खोइल रोप्पाइक्बाक्ते" देंत।

<sup>8</sup> मोपतीके परमप्रभु, परमप्रभु यावेमी "गो इ परबम तरवार सोइक्नुड। गो इ मुर नु इ बी ब्यफ, क्यारश भेडा नेल्ल आन कली साइक्नुडमी।<sup>9</sup> मिनु इजीप्त रागी मुर मबाक्तीके नु गोरशो रागी दुम्ब। मेना मेकोपुकीम गोन परमप्रभु यावे नड, दे तुइक्नीम। गे 'नील खोला आं केन बाक्ब। गो मेको सेल्ता' देंते।<sup>10</sup> मोपतीके गो इ परबम नु इ खोला आन परबम बोक्नुड। मिनु गो मिग्दोल रे स्येने सम्म नु एथीयोपीया रागी आ सांद सम्म इजीप्त रागी कली गोरशो नु मुर मबाक्तीके सेल्नुड। इजीकीएल ३०:६<sup>11</sup> मेकेर सुइ मुर नु जन्तु मगाक्नीम। मेकेर ४० बर्स सम्म सुइ मबाक्नीम। गन्ती १४:३३-३४<sup>12</sup> गो इजीप्त रागी कली मुर मबाक्शो रागी आन दातेमी मेको क्येडा मुर मबाक्शो रागी सेल्नुड। मिनु मेको आ सहरपुकीम ४० बर्स सम्म मुर मबाक्नीम। मिनु गो इजीप्त रागी डा मुर आन कली रागी रागी नु राज्य राज्य डा मुर आन दातेम ब्रपाइक्नुडमी" देंत।

<sup>13</sup> मो हना यो परमप्रभु, परमप्रभु यावेमी "मेको ४० बर्स नोले गो इजीप्त डा मुर आन कली मेको आन ब्रशा बाक्तीक रागी रागी डा मुर आन दाते रे खुप्नुडमी।<sup>14</sup> गो मेको आन कली लेंशा रिम्शो पाइनुड। मिनु मेको आन कली आन किकी पिपी आन रागी पधोसम चाक्नुडमी। मिनु मेको मेकेर महिक्सीशो आइक्च राज्य का दुम्शा बाक्ब। पधोस रागी इजीप्त डा दक्खिन बाक्त्त।<sup>15</sup> मेको राज्य नेल्ल आन दातेमी नेल्ल क्येडा आइक्च राज्य दुम्ब। मेको अर्को रागी आन क्येडा गेनायो ठेयब मदुम्ब। गो मेको कली थम आइक्च सेल्नुड। मिनु मेकोम गेनायो अर्को रागी रागी आन कली सासन मपाइब।<sup>16</sup> मिनु इस्राएल आ खिं डा मुरपुकीमी इजीप्त रागी कली लेंशा गेनायो थमा मसुइक्नीम। तन्न इस्राएलम इजीप्त कली 'वारच पाइक्की' दे पुंइथ लशा आन पाप मिम्पाइक्नीम। मेना मेकोपुकीम गोन परमप्रभु, परमप्रभु यावे नड, दे तुइक्नीम" देंशो बाक्ब।

इजीप्त रागी नेबुकदनेसर के दुम्शो

<sup>17</sup> मिनु ग्याइश्शा लाइक्चा पुंडसीशो २७ बर्स डा डोंइती डा महिना डा डोंइती डा नाक्ती परमप्रभु यावेमी आं कली लोत्र पाप्तु।<sup>18</sup> मार लोत्र पाप्तु देंशा हना "ए मुर, बेबीलोन डा पिप नेबुकदनेसरम टायर कली लडाइ पाइब आन कली शुश श्येत पपाइक्त्तु। मिनु मुर नेल्ल आन पिपा डा चां दुल्ल। आन बला खोरसीशा, गार दुम्त। मो हना यो टायर आ परबम पशो गेय आ परबम मेको नु मेको आ लडाइ पाइबम मारेइ मतामे।<sup>19</sup> मोपतीके परमप्रभु, परमप्रभु यावेमी 'गो इजीप्त रागी कली बेबीलोन डा पिप नेबुकदनेसर आ

गुइम गेनुड' देंत। मिनु मेकोम मेको आ शॉप नेल्ल लाइक्ब। मेकोम मारेइ मारेइ रोइश्शा, मेको रागी कली श्येत्थ पोक्ब। मिनु मेको आ रोइश्शो शॉप मेको आ लडाइ पाइब आन गाल्च दुम्ब।<sup>20</sup> गो मेको आ पशो गेय आ परबम इजीप्त रागी कली मेको आ गाल्च सेल्शा गेता। मारदे हना मेकोपुकीम आं परबम शुश गेय पाम्तेक्म। इजीकीएल ३०:२४<sup>21</sup> मेको नाक्ती गो इस्राएल आ खिं डा मुर रे गोर का वापाइक्नुड। मिनु गो इ कली मेको आन दातेमी ब्वाक्पाइक्नन। मेना मेकोपुकीम गोन परमप्रभु यावे नड, दे तुइक्नीम" देंत।

इजीप्त रागीम सजाइ तशो

30 परमप्रभु यावेमी आं कली लोत्र पाप्तु।<sup>2</sup> परमप्रभु, परमप्रभु यावेमी मार लोत्र पाप्तु देंशा हना "ए मुर, आं लोत्र पावो। मेको नाक्त आ परबम रोंका पावो।<sup>3</sup> मारदे हना मेको नाक्त नेक्थान जाक्ना जाक्न बाक्ब। परमप्रभु यावे आ नाक्त नेक्थान जाक्शो बाक्ब। मेको गोस्सुम सुम्शो नाक्त बाक्ब। मेको रागी रागी डा मुर आन कली हिंचा डा नाक्त दुम्ब। योएल १:१५; सेफन्याह १:१४<sup>4</sup> इजीप्त रागी तार तरवार का जाक्ब। मिनु एथीयोपीया रागीम यो श्येत दुम्ब। इजीप्त रागीम साइक्चा पुंडसीशो मुरपुकी खपीम गोल्नीम। मिनु मेको रागी डा शॉप लाइक्नीम। मिनु मेको आ जग प्रेत्नीम।<sup>5</sup> एथीयोपीया, पूत, लूद नु अराब रागी नेल्ल नु लिबीया नु अर्को आ नेक्था डा रागी डा मुर तरवारम साइक्चा पुंडसीनीम" देंत। येरमीया ४६:९

<sup>6</sup> मिनु परमप्रभु यावेमी "मेको इजीप्त रागी कली वारच पतीके क्याम्चा पुंडसीनीम। मेको आ ठेयब लेशो जाम्ब। मिग्दोल रे स्येने सम्म बाक्ब मुर नेल्ल तरवारम साइक्चा पुंडसीनीम। इजीकीएल २९:१०<sup>7</sup> मेकोपुकी मुर मबाक्शो रागी आन दातेम मुर मबाक्तीके दुम्नीम। मिनु मेको आन सहर ब्रेशशा, मुर मबाक्तीक सहर आन दातेम ब्रेशशा सहर दुम्नीम।<sup>8</sup> गो इजीप्त रागीम मी सुइश्शा, मेको आ वारच नेल्ल फस सेल्नुड। मेना मेकोपुकीम गोन परमप्रभु यावे नड, दे तुइक्नीम।<sup>9</sup> मेको नाक्ती लोत्र कुरब मुर जहाजम डोइक्पा सोइक्नुड। मेको आन थुं नाइश्शा बाक्शो एथीयोपीया डा मुर आन कली हिंचा कोइंचा कली लोत्र सोइक्नुड। इजीप्त रागी आ नुप्ची नाक्ती मेकोपुकी शुश हिंनीम। मेको नाक्त थमा पा जाक्ब" देंत। यसैया २०:३-४

<sup>10</sup> परमप्रभु, परमप्रभु यावेमी "गो बेबीलोन डा पिप नेबुकदनेसर आ गुइ रे पा इजीप्त रागी डा लडाइ पाइब आन कली साइक्नुडमी।<sup>11</sup> नेबुकदनेसर नु आ लडाइ पाइब रागी डा नेल्ल क्येडा मरिम्शो पाइब बाक्नीम। मेको आन कली खतम सेल्चा कली चाक्नुडमी। मेकोम आन तरवार इजीप्त रागी आ परबम शोइक्नीम। मिनु साइश्शो मुरपुकीम रागी ब्रीनीम। इजीकीएल २८:७<sup>12</sup> गो नील खोला डा ब्राशो ब्वाक्कु सोत्रपाइक्नुड। मेको रागी कली मरिम्शो पाइब आन गुइम लेयनुड। गो मेको रागी नु मेकेर बाक्शो मारेइ मारेइ आन कली अर्को रागी डा मुर आन गुइ रे खतम पोक्नुड। गो, परमप्रभु यावेमी एको लोत्र पाता" देंत। यसैया १९:५

<sup>13</sup> मिनु परमप्रभु, परमप्रभु यावेमी "गो देवी देवता आन कली खतम पोक्नुडमी। मिनु मेम्फीसम बाक्शो देवी देवता आन कली खतम पोक्नुडमी। इजीप्त रागीम गेनायो सासन पाइब मदुम्नीम। मोपा गो इजीप्त रागी डा मुर आन कली हिंतीक थुं गेनुडमी। मेम्फीस सहर कली नोफ यो देंनीम<sup>14</sup> गो पधोस कली मुर मबाक्तीके सेल्नुड। सोआन सहरम मी सुइक्नुड। गो थेबेस सहर कली निसाफ पा सजाइ गेनुड। नहुम ३:८-९<sup>15</sup> गो इजीप्त रागी डा बोल्यो दरवार पेलुसीयम तार आं गाइश्शो मोइक्नुड। मिनु थेबेस सहर डा शॉप नेल्ल खतम पोक्नुड।<sup>16</sup> गो इजीप्त रागी कली मी सुइक्नुड। मिनु पेलुसीयम श्येत जशा ग्येत्थ लुक्च दुम्ब। थेबेस सहर डा गारो ब्रेत्नीम। मेम्फीस सहरम चहिं नाक्ती लडाइ दुम्ब।<sup>17</sup> ओन नु पी-बेसेथ डा ठिटापुकी तरवारम साइक्चा पुंडसीनीम। मिनु मेको सहर डा मुर ग्याइश्शा लाइक्चा पुंडसीनीम।<sup>18</sup> मेको नाक्त तेहाफ-नेहेस सहर छिडछिड दुम्ब। गो मेकेर इजीप्त रागी आ जुवा जिक्नुड। मिनु मेको आ ठेयब लेशो क्याम्नुड। गोस्सुमी मेको सहर कली सुम्ब। मिनु मेको आ एर आँथ डा सहर डा मुर ग्याइश्शा लाइक्चा पुंडसीनीम। येरमीया ४३:९<sup>19</sup> मोपा गो इजीप्त रागी

कली निसाफ पा सजाइ गेनुड। मिनु मेकोपुकीम गोन परमप्रभु यावे नड, दे तुइक्नीम” देंत।

### इजीप्त डा पिप आ सक्ति जाश्शो

20 मिनु ग्याइश्शा लाइक्का पुंडसीशो ११ बर्स डा डोंइती डा महिना डा ७ नाक्ती परमप्रभु यावेमी आं कली लोत्र पाप्तु। 21 मार लोत्र पाप्तु देंशा हना “ए मुर, गो इजीप्त रागी डा पिप फाराओ आ गुइ जिकशा गेता। मेको साचा कली मारेइ मफ्रेंसीशो बाक्ब। मोपा बोल्यो मदुम्ब। तरवार चलेने मचाब्। 22 मोपतीके परमप्रभु, परमप्रभु यावेमी गो इजीप्त रागी डा पिप फाराओ कली लोत्र का पाइनुड। गो मेको आ गुइ निम्फा जिकनुड। आ बोल्यो गुइ नु आ डोंइती जिकशो गुइ जिकनुड। आ गुइ रे तरवार तोक्नुड। 23 गो इजीप्त डा मुर आन कली रागी रागी डा मुर आन दातेम फ्राइनुडमी। मिनु मेको आन कली रागी रागीम ब्रपाइक्नुडमी। 24 गो बेबीलोन डा पिप आ गुइ सक्ति पाइश्शो सेल्लुड। मिनु आं तरवार मेको कली गेनुड। तन्न गो फाराओ आ गुइ जिकनुड। मिनु मेको, मेको आ डोंइती बेक्का डा पा गार दुश्शो मुर खोदेंशो पा, नक्सुर पाइब। इजीकीएल २९:२० 25 गो बेबीलोन डा पिप आ गुइ सक्ति पाइश्शो सेल्लुड। तन्न फाराओ आ गुइ सक्ति मपाइश्शो दुम्ब। गो बेबीलोन डा पिप कली आं तरवार गेनुड। मिनु मेकोमी इजीप्त रागी आ पर्बम हिरब। मेना मेकोपुकीम गोन परमप्रभु यावे नड, दे तुइक्नीम। 26 गो इजीप्ती आन कली रागी रागी डा मुर आन दातेम फ्राइनुडमी। मिनु मेको आन कली रागी रागीम ब्रपाइक्नुडमी। मेना मेकोपुकीम गोन परमप्रभु यावे नड, दे तुइक्नीम” देंत।

### लाइश्शो रवा आ चिन्द

31 मिनु ग्याइश्शा लाइक्का पुंडसीशो ११ बर्स डा महिना सां डा डोंइती डा नाक्ती, परमप्रभु यावेमी आं कली लोत्र पाप्तु। 2 मार लोत्र पाप्तु देंशा हना “ए मुर, इजीप्त डा पिप फाराओ नु मेको आ लडाइ पाइब आन कली ‘इन ठेयब दुम्तीके सु नु थाप्ने चाम्सीबा?’ 3 अस्सुर रागी कली मिम्तीन। मेको लेबानोन डा लाइश्शो रवा खोदेंशो बाक्त्। मेको आ दारशो राशीम ब्वाकी आन कली सुम्शो बाक्त्। मेको आ डर लाइश्शो दुम्शा गोस्स सम्म जाक्दीश्शो बाक्त्। 4 मिनु मेको कली ब्वाक्कुम जिश्शा कोल्पाइक्त्। ब्वाक्कुम मेको कली लाइश्शो सेल्लु। मेको आ एर ओंथ डा खोलापुकीम मेको कली जिप्पाइक्त्केम। मिनु मेको खोलाम दिंम डा रवा नेल्ल आन कली जिप्पाइक्त्। 5 मोपा मेको दिंम डा रवा नेल्ल आन क्येडा लाइश्शो दुम्त्। शुश ब्वाक्कु बाक्तीके मेको आ राशी शुश दुम्तेक्म। मिनु शुश ब्वाक्कु रे मेको कोल्ल। 6 सरीड डा चिक्बपुकीम मेको आ राशीम आन ग्योत्र सेल्लेक्म। मेको आ राशी आगाम ब्वाकी डा जन्तु नेल्लेम आन चाइक्ब जरमेक्त्केम। मिनु मेको आ वांकु आगाम रागी रागी डा मुर जाक्शा बाक्त्केम। 7 मेको एर ओंथ ब्रशा लाइश्शो राशी पाइश्शो दारशो रवा का दुम्त्। मारदे हना मेको आ शाक्श शुश ब्वाक्कु बाक्तीकेम बाक्त्केम। 8 परमप्रभु आ रू डा लाइश्शो रवापुकीम यो मेको कली ग्राने मचबेम। तेकोइ तोव्रशी रवापुकीम यो मेको आन राशी कली ग्राने मचबेम। परमप्रभु आ रू डा तेकोइ रवा मेको खोइ दारशो मबाक्म। 9 गो मेको कली एर ओंथ लशो राशीपुकीम ग्योम्शा, दारशो सेल्ल। मिनु परमप्रभु आ रू एदेन डा रवा नेल्लेम मेको कली गेहे पास्तेक्म’ देनो” देंत।

10 मोपतीके परमप्रभु, परमप्रभु यावेमी “मेको मिश लाइश्शो दुम्तीके नु मेको आ डरम आ राशी आन कली गोस्स आन दाते रे ख्रिश्शा लपाइक्तीके आ लाइश्शोम मेको ठेयब लेल्ल। 11 मोपतीके गो मेको कली रागी रागी डा सासन पाइब आ गुइम गेता। मिनु मेको लाइश्शो रवाम दोपा आं अरेशो मटिवा, मोपा सजाइ ताप्तु। गो मेको कली तिल्ल। 12 मिनु अर्को रागी डा थम मरिश्शो मुरपुकीम मेको कली तिम्शा प्रोंइतेक्म। मेको आ राशीपुकी बेंसी नेल्ल नु पहाड मेर गोल्शा बाक्त्केम। मिनु मेको आ ठेयब राशी रागी डा खोला नेल्लेम जिकशा लीतेक्म। मिनु रागी डा मुर नेल्ले मेको आ वांकु रे गूशा मेको कली प्रोंइतेक्म। 13 मिनु मेको दिम्शो रवाम सरीड डा चिक्ब नेल्ल बाक्त्केम। मिनु मेको आ राशी आगाम ब्वाकी डा जन्तु नेल्ल जाक्शा

बाक्त्केम। 14 मोदेंशो दुम्तीके ब्वाक्कु आ नेक्था वाशो रवा मेको मिश लाइश्शो पा मकोल्नीम। मिनु आन डर गोस्स सम्म मजाक्दीत्लीम। मारदे हना मेको नेल्ल बेक्का माल्नीम। नेल्ल मुर खोदेंशो पा बेक्का माल्नीम। बेक्शो मुर आन बाक्तीके तुरसुम लाइनीम” देंत।

15 परमप्रभु, परमप्रभु यावेमी “गो मेको लेबानोन डा ठेयब रवा कली बेक्शो मुर आन बाक्तीकेम तोक्नुड। मेको नाक्ती समुन्द्र रोंका पा खोला मशाइक्नीम। ब्वाक्कु बुक्तीके सोवनीम। मिनु गो लेबानोन डा रवा आन कली रोंका पपाइक्नुड। मिनु ब्वाकी डा रवा नेल्ल ख्रिखि पा हिम्पाइक्नुडमी। 16 गो मेको कली तुरस नु बेक्शो मुर आ बाक्तीके सोइश्शा, रागी रागी आन कली आ गोल्शो रेयकेमी हिम्पाइक्नुड। मिनु एदेन डा रवा नेल्ले, लेबानोन डा नेल्ल क्येडा दारशो रवा नु शुश ब्वाक्कु तशो रवा नेल्लेमी रागी आगाम आन थुं नाइक्ताक्म। इजीकीएल २८:८ 17 मेको तरवारम साइक्का पुंडसीशो नु मेको रागी कली वारच पा अर्को रागी डा मुर आ वांकुम बाक्ब नेल्ल बेक्शो मुर आन बाक्तीक लाम्तेक्म।

18 एदेन डा रवा आन दाते डा तेको रवा इ खोदेंशो पा सक्ति पाइश्शो नु ठेयब बाक्बा डा? मो हना यो गे यो एदेन डा रवापुकी नुन रागी आगा तोक्का पुंडसीनेवे। गे खोइक्तीक चिनु मखोइश्शो तरवारम साइक्का पुंडसीशो आन दातेमी बाक्नेवे। मेकोपुकी फाराओ नु मेको आ लडाइ पाइब बाक्नीम, देनो” दे परमप्रभु, परमप्रभु यावेमी देंत।

### फाराओ आ पर्बम रोंका पशो

32 मिनु ग्याइश्शा लाइक्का पुंडसीशो १२ बर्स डा १२ महिना डा डोंइती डा नाक्त् परमप्रभु यावेमी आं कली लोत्र पाप्तु। 2 मार लोत्र पाप्तु देंशा हना “ए मुर, इजीप्त डा पिप फाराओ आ पर्बम रोंका पावो। मिनु मेको कली ‘गे रागी रागी डा मुर आन दातेम गुप्स का खोदेंशो मिम्साक्वे। गे समुन्द्र डा ठेयब जन्तु का खोदेंशो बाक्त्। गे खोला डा ब्वाक्कुम एर ओंथ पवीनु ब्वाक्कु कली पोक्ना पोक्न नु खोइलीम ब्वाक्कु कली खाक्ना खाक्न गाक्बाक्त्। मिनु खोला कली ग्रोग्रा दिशो सेल्बाक्त्’ देनो” देंत। इजीकीएल २९:३ 3 मिनु परमप्रभु यावेमी “गो मुर आन ठेयब हुल चाक्नुड। मिनु आं ग्याइल इ तार ब्वारनुड। मेकोपुकीम आं ग्याइलीम इ कली कीशा रागीम गुंडनीम। इजीकीएल १२:१३ 4 मिनु गो इ कली खपीम ताइक्नन। गो इ कली रागीम नेप्शा सोइक्नन। गो सरीड डा चिक्ब नेल्ल आन कली इ तार जुक्पाइक्नुडमी। मिनु गो रागी डा जन्तु नेल्ल आन कली इ श्ये प्रोइक्पाइक्नुडमी। इजीकीएल २९:५ 5 गो इ श्ये डांडा मेर फ्राइनुड। मिनु इ बेक्शो रॉम बेंसी नेल्ल प्रिनुड। 6 मिनु गो इ हुशेम रागी जिप्पाइक्नुड। डांडा सम्म जिप्पाइक्नुड। मिनु खोल्सा नेल्ल इ श्येम प्रिनुड। 7 गो इ कली क्याम्दुनु, सरीड नेल्ल सुम्नुड। मिनु सौरुल आन कली छिडछिड सेल्लुडमी। गो नां कली गोस्सुम सुम्नुड। मिनु तास्लाम हाम्सो मगेब। यसैया १३:१० 8 गो सरीड डा छेडछेड नेल्ल आन कली इ तार छिडछिड सेल्लुडमी। मिनु गो इ रागी छिडछिड सेल्लुड” दे परमप्रभु यावेमी देंत। 9 मिनु “गो इ कली रागी रागी डा मुर आन दाते, इ मतुइश्शो रागीम ग्याइश्शा लाइक्पाइक्नन। गो शुश मुर आन थुं ग्येत्थ लुक्च पपाइक्नुड। 10 गो शुश मुर आन कली इ कली तशा हिंभ सेल्लुडमी। मेको आन पिप इ कली तशा शुश हिंनीम। गो आं तरवार मेको आन डोंइती हिरदुनु, मेको पिपपुकी बेक्का कली हिंशा ख्रिखि पस डा पस बाक्नीम। इ बेक्तीक नाक्ती मेको नेल्ल बेक्का कली ख्रिखि पना पन बाक्नीम” देंत। 11 मारदे हना परमप्रभु, परमप्रभु यावेमी “बेबीलोन डा पिप आ तरवारम इ तार जाक्ब। 12 गो थम सक्ति पाइश्शो मुर आन तरवार रे इ लडाइ पाइब आन कली साइक्पाइक्नुडमी। मेको सक्ति पाइश्शो मुर रागी नेल्ल डा मुर आन क्येडा मरिश्शो पाइब बाक्नीम। मेकोपुकीम इजीप्त रागी आ ठेयब लेश्शो खतम पोक्नीम। मिनु मेको आ लडाइ पाइब नेल्ल आन कली साइक्नीम। 13 गो मेको आ शुश ब्वाक्कु बाक्तीक आ नेक्था योव्रशो बी ब्यफ, क्यारश भेडा नेल्ल आन कली साइक्नुडमी। मिनु मुर नु बी ब्यफोम, मेको ब्वाक्कु मदिम्नीम। 14 मिनु नीले गो मेको ब्वाक्कु रिम्शो सेल्लुड। मिनु मेको आ खोलापुकी तेल खोदेंशो पा शाइक्पाइक्नुडमी” दे परमप्रभु, परमप्रभु यावेमी देंत। 15 मेकोम “गो इजीप्त रागी कली मुर

मबाक्शो रागी सेलुनु, मेको रागी श्येत्थ दुम्मेनु, मेकेर बाक्ब नेल्ल आन कली सदुमीनु, मेकोपुकीम गोन परमप्रभु यावे नड, दे तुइक्नीम।<sup>16</sup> मेको रोंका पतीक कुम्सो का बाक्ब। मेकोन पचा माल्नीम। रागी रागी डा मीश मुरपुकीम एको कुम्सो पचा माल्नीम। मेकोपुकीम इजीप्त रागी नु मेको आ लडाइ पाइब नेल्ल आन परबम एको कुम्सो पचा माल्नीम” दे परमप्रभु, परमप्रभु यावेमी देंत।

### बेक्शो मुर आन बाक्तीक

17 मिनु ग्याइश्शा लाइक्चा पुंडसीशो १२ बर्स डा डोंइती डा महिना डा १५ नाक्त परमप्रभु यावेमी आं कली लोव्र पाप्तु।<sup>18</sup> मार लोव्र पाप्तु देंशा हना “ए मुर, इजीप्त रागी डा लडाइ पाइब आन परबम रोंका पावो। मिनु मेको आन कली तुरसुम सोइक्तो। मिनु इजीप्त नु सक्ति पाइश्शो रागी रागी डा मुर आन तमी आन कली बेक्शो मुर आन बाक्तीक सोइक्तो। तुरसुम लाइबपुकी नु सोइक्तो। *इजीकीएल ३१:१६*<sup>19</sup> मार, गे अर्को जात आन क्येडा शुश शिशी ताइब बाक्नेवे डा? उइ लावो। मिनु खोइक्तीक चिनु मखोइश्शोपुकी नु गोल्शा बाक्को। *यसैया १४:११, १५*<sup>20</sup> मेकोपुकी तरवारम साइश्शो आन दातेम गोल्नीम। इजीप्त तरवारम साइक्चा पुंडसीचा कली गेशो बाक्ब। आ लडाइ पाइब नु आ शोंप निम्फा लतीन।<sup>21</sup> मिनु ठेयब सक्ति पाइश्शोपुकी नु आन वारच पाइबपुकीमी बेक्शो मुर आन बाक्तीकेम ‘मेकोपुकी उइ यिंशो बाक्नीम। मेको गोल्शो बाक्नीम। खोइक्तीक चिनु मखोइश्शोपुकी तरवारम साइक्चा पुंडसीशो बाक्नीम’ देंनीम।

<sup>22</sup> अस्सुर नु आ मुर नेल्ल मेकेर बाक्नीम। आ लडाइ पाइब नेल्ल आ तुरस आ एर ओंथ बाक्नीम। मेको नेल्ल तरवारम साइक्चा पुंडसीशो बाक्नीम।<sup>23</sup> मेको आन तुरस बेक्शो मुर आन बाक्तीके क्येडा दी गे वोइश्शो बाक्ब। मेको आ लडाइ पाइबपुकी मेको आ तुरस आ एर ओंथ बाक्नीम। मेको नेल्ल तरवारम साइक्चा पुंडसीशो बाक्नीम। मेकोम ब्रोंइशा बाक्ब आन रागीम मुर आन कली शुश हिंपाइश्शो बाक्तेक्म।

<sup>24</sup> एलाम मेकेर बाक्ब। आ लडाइ पाइब नेल्ल आ तुरस आ एर ओंथ बाक्नीम। मेको नेल्ल तरवारम क्योरशा साइक्चा पुंडसीशो बाक्नीम। मेकोपुकी खोइक्तीक चिनु मखोइक्थु, उइ बेक्शो मुर आन बाक्तीक लाम्तेक्म। मेकोम ब्रोंइशा बाक्ब आन रागीम मुर आन कली शुश हिंपाइश्शो बाक्तेक्म। मेकोपुकी बेक्शो मुर आन बाक्तीकेम लशो खोदेंशो पा मुने दोक्नीम। *येरमीया ४९:३७*<sup>25</sup> मेकोपुकीमी एलाम कली आ साइश्शो लडाइ पाइब आन दातेमी तुरस सेल्शो बाक्नीम। आ लडाइ पाइब आन तुरस मेको आ एर ओंथ बाक्नीम। मेको नेल्ल खोइक्तीक चिनु मखोइक्थु तरवारम साइक्चा पुंडसीशो बाक्नीम। मारदे हना मेकोम ब्रोंइशा बाक्ब आन रागीम मुर आन कली शुश हिंपाइश्शो बाक्तेक्म। मेकोपुकी बेक्शो मुर आन बाक्तीके लाइब खोदेंशो पा मुने दोक्नीम। मेको साइक्चा पुंडसीशो मुर आन दातेमी बाक्नीम।

<sup>26</sup> मेशेक, तूबल नु आस शुश मुर मेकेर बाक्नीम। आस मुर आस तुरस आस एर ओंथ बाक्नीम। मेको नेल्ल खोइक्तीक चिनु मखोइक्थु तरवारम साइक्चा पुंडसीशो बाक्नीम। मारदे हना मेकोम ब्रोंइशा बाक्ब आन रागीम मुर आन कली शुश हिंपाइश्शो बाक्तेक्म। *इजीकीएल २७:१३; इजीकीएल ३८:२*<sup>27</sup> मेकोपुकी साइ डोंइती साइश्शो अरु लडाइ पाइब नु मबाक्नीम। मिनु मेको आन या सुन्दा बेक्शो मुर आन बाक्तीकेम लशो बाक्नीम। मेको आन तरवार आन पिया आगाम वोइश्शो बाक्ब। मिनु आन तेक्तीके आन रुश तार वोइश्शो बाक्नीम। मारदे हना मेको लडाइ पाइबम ब्रोंइशा बाक्ब आन रागी डा मुर आन कली शुश हिंपाइक्तेक्म।<sup>28</sup> इजीप्त गे यो खतम दुश्शा खोइक्तीक चिनु मखोइक्थु तरवारम साइक्चा पुंडसीशा गोल्चा माल्नेवे।

<sup>29</sup> एदोम मेकेर बाक्ब। मेको आ पिप नु आ तौ नेल्ल मेकेर बाक्शो बाक्नीम। मेको आन के सक्ति बाक्त्त हना यो, मेको तरवारम साइक्चा पुंडसीशा गोल्शा बाक्शो बाक्नीम। मेकोपुकी खोइक्तीक चिनु मखोइश्शो नु तुरसुम गोल्शा बाक्नीम। *इजीकीएल २५:१२-१४*

<sup>30</sup> उत्तर रागी डा सासन पाइब नु सीदोन डा मुर नेल्ल मेकेर बाक्नीम। मेको आन सक्तिम मुर नेल्ल आन कली शुश हिंपाइक्तेक्म। मोपतीके मेकोपुकी तरवारम साइक्चा पुंडसीशो मुरपुकी नु मुने दोक्शा उइ लाम्तेक्म। मेकोपुकी खोइक्तीक चिनु मखोइक्थु तरवारम साइक्चा पुंडसीशो नु मुने दोक्शा तुरसुम बाक्शो बाक्नीम। *इजीकीएल २८:२१-२३*

<sup>31</sup> फाराओमी मेको कली तशा, आ लडाइ पाइब नेल्ल तरवारम साइक्चा पुंडसीशो तुइश्शा, आ थुं नाइक्ब।<sup>32</sup> मारदे हना मेकोमी ब्रोंइशा बाक्ब आन रागी डा मुर आन कली शुश हिंपाइक्त्तु। मोपतीके फाराओ खोइक्तीक चिनु मखोइक्थु तरवारम साइश्शो मुर आन दातेमी बाक्ब” दे परमप्रभु, परमप्रभु यावेमी देंत।

### इजीकीएल खाल पाइब दुश्शो

*इजीकीएल ३:१६-२१*

**33** परमप्रभु यावेमी आं कली लोव्र पाप्तु।<sup>2</sup> मार लोव्र पाप्तु देंशा हना “ए मुर, इ मुर आन कली ‘गो रागी का कली तरवार चाक्ता हना, मेको रागी डा मुरपुकीम आन रागी डा मुर का कली आन कली खाल पाइब का योव्रशा वोइक्नीम,<sup>3</sup> मिनु मेकोम आ रागीम तरवार कुरशा आ जोरी सनु जाक्शो तशा, आ मुर आन कली तुइक्पाइक्चा कली तुराही ताप्ब।<sup>4</sup> मिनु सुम मेको तुराही ताप्शो नेंशा मटीबा, मेको तरवारम साइक्चा पुंडसाक्व हना, मेको आ हुश आ दोस आंमा राइब।<sup>5</sup> मेकोम तुराही ताप्शो नेंशा यो, मटितीके, मेको आ हुश आ दोस आंमा राइब। तन्न मेकोम टिशो हना, ब्रोंइ वा।<sup>6</sup> तन्न मेको खाल पाइबम तरवार कुरशा लडाइ पाइब जाक्शो तशा यो, मुर आन कली नेंपाइक्चा कली तुराही मताप्तु नु तरवार जाक्शा सुइ मुर का कली साइक्त्तु हना, मेको मुर आ मरिश्शो पशो आ परबम बेक्ब। तन्न गो मेको खाल पाइब कली मेको आ हुश आ क्येक्क ताक्नुड।

<sup>7</sup> ए मुर, गो इ कली इस्राएल आ खिं डा मुर आन कली खाल पाइब सेल्तान। मोपतीके गेना इ कली लोव्र पडा, मेना गे मेको आन कली मेको आं लोव्र नेंशा, होस पा बाक्कीन’ देंचा माल्नेवे। *हिब्रू १३:१७*<sup>8</sup> मिनु गो आं अरेशो मटीब मुर आन कली ‘ए आं अरेशो मटीब मुरपुकी गे थमा पा बेक्नीनी’ देंनुड, मिनु गे मेको आं अरेशो लोव्र मटीब मुर आन कली ‘इन मरिश्शो पशो प्रोनीन’ दे महिंपाइक्तीवी हना, मेको मरिश्शो पाइब मुर आन मरिश्शो पशो आ परबम बेक्नीम। तन्न गो मेको आन हुश आ क्येक्क इ रे पा ताक्नुड।<sup>9</sup> तन्न गे मेको परमप्रभु यावे आं अरेशो लोव्र मटीब आन कली इन मटितीके प्रोनीन, दे हिंच कोंइताक्वी हना, मिनु मेकोपुकीम आं अरेशो लोव्र मटिम्तेक्म हना, मेको आन मटिशो आ परबम बेक्नीम। मिनु गे आंम कली प्रोंइनेवे” देंत।

### परमप्रभुम निसाफ पाइब

*इजीकीएल १८:२१-३२*

<sup>10</sup> मेकोम “ए मुर, गे इस्राएल आ खिं डा मुर आन कली ‘गेपुकीम आंइ हेंथे पशो नु पाप पशोम दिच्चा पुंडसीशो बाक्नीकी। मिनु मेको आ परबम आंइ बोल नुम्ना नुम्न लशो बाक्ब। गो दोपा ब्रोंइनीकी?’ देंनीनी” देनो।

<sup>11</sup> मोपतीके गे मेको आन कली परमप्रभु, परमप्रभु यावेमी “गो आ ब्रोंइशा बाक्शो खोदेंशो पा आं अरेशो लोव्र मटीब मुर बेक्मानु मगयेरसीनुड। तन्न मेकोपुकीम आं अरेशो लोव्र टिशा ब्रोंइमल। गे इन मरिश्शो लां रे लेतीन। ए इस्राएल आ खिं डा मुरपुकी, गे मारदे बेक्चा दाक्नीनी? *व्यक्स्था ३२:४०; यसैया ५५:७; योएल २:१२-१३*<sup>12</sup> मिनु ए मुर, गे इ मुर आन कली ठीक पाइब मुर हेंथे गाक्त्त हना, आ डोंइती ठीक पशोमी मेको कली प्रोंइने मचाप्ब। डोंइती आं अरेशो मटीब मुर, ठीक पाइब दुम्त हना, आं डोंइती मटिशो आ परबम मबेक्ब। मिनु ठीक पाइब मुरुम पाप पाप्तु हना, मेको आ डोंइती ठीक पशो आ परबम ब्रोंइचा मताइब। *इजीकीएल ३:२०*<sup>13</sup> गो मेको ठीक पाइब मुर कली ‘गे थमा पा ब्रोंइनेवे’ देंडानु, मेकोम आ ठीक पतीकेम थमा सुइश्शा, मरिश्शो पाप्तु हना, मेको आ डोंइती ठीक पशो मारेइ ममिम्सीब। मेको आ मरिश्शो पशो आ परबम बेक्ब।<sup>14</sup> तन्न गो मेको आं अरेशो लोव्र मटीब मुर कली ‘गे थमा पा बेक्नेवे’ देंती हना, मेकोम आ पाप पतीक प्रोंइशा आं अरेशो नु ठीक पाप्तु हना,<sup>15</sup> मिनु मेकोम आ जाकटी

वोइश्शो थोव्रक लेत्ताक्व हना, आ रोइश्शो थोव्रक लेश्शा गेप्टु हना, ब्रॉइचा कली आं फुल्लुम मुशा ब्रेव्शो लोव्र पशा, मरिश्शो मपाप्टु हना, मेको थमा पा ब्रॉइब। मेको मबेक्व। *ब्यवस्था २४:१०-१३; इजीकीएल १८:७; लूका १९:८* 16 मेको आ पशो तेकोइ पाप ममिस्सीब। मेकोमी आं अरेशो लोव्र नु ठीक गेय पाप्टु। मेको थमा पा ब्रॉइब।

17 मो हना यो इ मुरपुकीम 'परमप्रभु आ पशो ठीक मबाक्व' देंनीम। तन्न थमा पा, मेको आन पशो कका ठीक मबाक्व। 18 सुइ ठीक पाइब मुरुम मेको आ ठीक पतीके प्रॉइशा, मरिश्शो पाप्टु हना, मेको आ मरिश्शो पशो आ पर्वम बेक्व। 19 मिनु सुइ आं अरेशो लोव्र मटीब मुरुम आं अरेशो लोव्र मटितीक प्रॉइशा, आं अरेशो नु ठीक पाप्टु हना, मेको मो पशो आ पर्वम ब्रॉइब। 20 मो हना यो गे 'परमप्रभु आ पशो ठीक मबाक्व' देंनीनी। ए इसाएल आ खिं डा मुर, गो इन कली इन पशो खोदेंशो पा निसाफ पाइनुड" देंत।

### यरूसलेम ब्रुशो

21 गो आंइ ग्याइश्शा लाइक्वा पुंडुसीशो १२ बर्स डा १० महिना ५ नाक्त दुम्नेनु, यरूसलेम रे प्रोक्शा जाक्शो मुर का आं बाक्तीकेम जाक्शा "आंइ सहर ब्रुत" देंत। *इजीकीएल १:२; इजीकीएल २४:२६; २राजा २५:२-४* 22 मेको मुर जाक्वा क्येडा डोंइती नाक्दो परमप्रभु यावे आ गुडम आं कली थिशो बाक्त। मिनु सुनी मेको मुर जाक्वा क्येडा डोंइती आं कली ब्वाक्व सेल्ने थुश्शो बाक्त। मोपा गो ब्वाक्व दुम्ती।

### लीशो मुर आन पाप

23 मिनु परमप्रभु यावेमी आं कली लोव्र पाप्टु। 24 मार लोव्र पाप्टु देंशा हना "ए मुर, इसाएल रागीम बाक्शो मेको ब्रेश्शो खिंम बाक्व मुरपुकीम 'अब्राहाम दा मुर का ला बाक्त। मो हना यो मेको रागी मेको के दुम्त। तन्न गो शुश बाक्नय। मेको रागी थमा पा इं कली गेशो बाक्व' देंनीम। *यसैया ५१:२* 25 मोपतीके गे मेको आन कली 'परमप्रभु, परमप्रभु यावेमी इन कली गेपुकी हुश सुन्दा श्ये ब्वाइनीनी। गे इन मूर्ति पूजा पाइनीनी। गेपुकीम हुश खाक्व पोक्नीनी। मिनु मार, एको रागी इन के दुम्बा डा? *१सामुएल १४:३२-३४* 26 गे इन तरवार कली थमा सुइक्नीनी। गेपुकीम मूर्ति पूजा पाइनीनी। गे नेल्लेम इन नेक्था डा मुर आन मीश कली ग्रांग्रा दिशो सेल्नीनी। मिनु मार, एको रागी इन के दुम्बा डा?' देनो" देंत। *इजीकीएल ११:१४-२१* 27 मिनु गे मेको आन कली "परमप्रभु, परमप्रभु यावेमी 'गो आं ब्रॉइशा बाक्शो खोदेंशो पा ब्रेश्शो खिंम बाक्वपुकी तरवारम साइक्वा पुंडुसीनीम। मिनु गो दिंमम बाक्व आन कली ब्वाकी डा जन्तु आन कली ब्वाचा गेनुडमी। बोल्यो दरवार नु पुक्खीम बाक्वपुकी मुर बेक्तीक रोइम बेक्नीम। 28 गो मेको रागी कली मुर मबाक्वशो नु श्येत्थ सेल्नुड। मिनु मेको आ ठेयब लेत्तीक जाम्ब। मिनु इसाएल डा डांडाम सुइ एर ऑथ पने मचाप्चा डा पा मुर मबाक्तीके दुम्ब। 29 गो मेको आन मूर्ति पूजा पशो आन पर्वम मेको रागी कली मुर मबाक्वशो नु श्येत्थ सेल्नुड। मेना मेकोपुकीम गोन परमप्रभु यावे नड, दे तुइक्नीम' देंशो बाक्व" देंत।

30 मेकोम "ए मुर, इ पर्वम बुक्शो मुरपुकी काथा बुक्शा, गारो नु खिं डा लाप्चोम राप्शा 'जाक्कीन परमप्रभु यावे आ लोव्र मार बाक्मे नैय' देंमुइनीम। 31 मेकोपुकीम आं मुर खोदेंशो पा इ बाक्तीक जाक्शा इ डोंइती निल्लीम। मिनु इ लोव्र नोफा दाइश्शा नैनीम। तन्न मेकोम इ लोव्र मटीनीम। मेकोम रिश्शो लोव्र पखु पा, आन थुंम चहिं दोपा क्येट चेम्वा, दे मिन्नीम। *यसैया ५३:१* 32 मेकोपुकीम इ कली तशा रिश्शो ताप्तीक ताप्शा, रिश्शो सेंदामी रिश्शो कुम्सो पाइब मुर का बाक्व, दे मिन्नीम। इ देंशो नैनीम, तन्न मपाइनीम। 33 मेको नेल्ल थमा दुम्ब। मेको थमा पा थमा दुम्ब। मेना मेकोपुकीम आन दातेम परमप्रभु यावे आ लोव्र पाइब का जाक्शो बाक्माक्त, दे तुइक्नीम" देंत। *इजीकीएल २:५*

### इसाएली आन मरिश्शो गोठलापुकी

इजीकीएल ३०:२४-२८

34 परमप्रभु यावेमी आं कली लोव्र पाप्टु। 2 मार लोव्र पाप्टु देंशा हना "ए मुर, इसाएल डा गोठला आन कली आं लोव्र पावो। परमप्रभु, परमप्रभु यावेमी इन कली मार देंब देंशा हना 'इसाएल डा गोठलापुकी गे आंमा जशा ब्वशा बाक्तीनी। मार, गोठलापुकीम भेडा आन कली रिश्शो पा कोव्रचा ममाल्नीमी डा? *येरमीया २३:१-४* 3 गे दोम्शो बोंसो ब्वाइनीनी। मिनु ऊन के वा फेक्नीनी। मिनु दोम्शो भेडा आन कली क्योरनीनी। तन्न गे भेडा आन कली रिश्शो पा मकोव्रनीनी। 4 गेपुकीम मचाप्शो आन कली बोल्यो मसेल्नी। रोइ पशो आन कली मसापाइक्नी। गार दुम्शो आन कली आन गारमी ओख्ती मखेक्तीनी। गेपुकीम लां जाम्शो आन कली माल्थ लशा मलेत्तीनी। गे जाम्शो आन कली ममाल्थु, मरिश्शो पा सासन पशो बाक्तीनी। *जकरिया ११:१५-१६; यूहन्ना १०:११* 5 मोपतीके मेकोपुकी ब्राम्तेक्म। मारदे हना मेको आन के गोठला मबाक्म। मेको मोपा ब्रशा ब्वाकी डा जन्तु आन जचा थोव्रक दुम्तेक्म" दे 6 आं भेडा लां प्रेंशा, पहाड मेर नु लाइश्शो डांडा मेर हिरसाक्म। आं भेडा रागी नेल्लेम ब्राम्तेक्म। मिनु सुइम मेको आन कली ममलेम। मेको आन पर्वम हिल्लो यो मपाम" देंशो बाक्व। *मत्ती ९:३६*

7 मोपतीके ए गोठलापुकी परमप्रभु यावे आ लोव्र नेनीन। 8 परमप्रभु, परमप्रभु यावेमी "गो आं ब्रॉइशा बाक्शो खोदेंशो पा, आं भेडा सिखार दुम्तेक्म। गोठला मबाक्तीके ब्वाकी डा जन्तु आन जचा थोव्रक दुम्तेक्म। मिनु आं गोठलापुकीम आं भेडा आन कली ममलेम। तन्न आंम कली ला कोव्रसाक्म। आं भेडा आन कली चहिं मकोव्रडेम। 9 मोपतीके गे गोठलापुकी परमप्रभु यावे आ लोव्र नेनीन। 10 परमप्रभु, परमप्रभु यावेमी इन कली 'गो गोठला आन पर्वम लोव्र का पाइनुड। गो आं भेडा मेको आन गुइ रे गुंनुड। मेको आन कली आं भेडा योव्रतीक रे गुंनुड। मिनु मेकोपुकीम जशा ब्वशा दोम्वा मताइनीम। गो आं भेडा मेको गोठला आन शोव्र रे प्रॉइनुडमी। मोपा आं भेडापुकी मेको आन ब्वाचा थोव्रक मदुम्नीम" देंत। *येरमीया २३:२*

### इसाएली आन रिश्शो गोठला

11 मिनु परमप्रभु, परमप्रभु यावेमी "मुल गो आंमान आं भेडा आन कली माल्थ लाइनुड। गो मेको आन कली कोव्रनुड। *येरमीया २३:२* 12 दोपा गोठलापुकीमी एर ऑथ ब्रशो क्यारश भेडा आन दातेमी आंम क्यारश भेडा माल्दीनीमी, मोपान गो आं भेडा आन कली माल्थ लाइनुड। क्येर गोस्सुम सुम्शो नाक्त ते ते ब्रशो आं भेडा आन कली श्येत रे प्रॉइनुडमी। *लूका १५:४* 13 गो मेको आन कली रागी रागी डा मुर आन दाते रे गुंइशा, आंम आन रागीम चाक्नुडमी। गो मेको आन कली इसाएल डा पहाड मेर, मेको आ खोला आ नेक्था नु मुर बाक्शो रागी मेर योव्रनुडमी। 14 गो मेको आन कली रिश्शो पा योव्रनुडमी। मिनु इसाएल डा पहाड मेको आन योव्रतीके दुम्ब। मेकोपुकी रिश्शो घांस बाक्तीकेम गोल्शा बाक्नीम। मिनु इसाएल डा पहाड मेको आन रिश्शो पा जोतीक दुम्ब। *भजन संग्रह २३:२* 15 गो आंमान आं भेडा आन कली कोव्रनुड। मिनु मेको आन कली नाइक्वा गेनुडमी। 16 गो जाम्शो आन कली माल्नुडमी। हेंथे गाक्शो आन कली माल्शा थिश्शा चाक्नुडमी। गो गार दुम्शो आन कली ओख्ती खेक्नुडमी। मचाप्शो आन कली बोल्यो सेल्नुडमी। तन्न गो दोम्शो नु सक्ति पाइश्शो आन कली साइक्नुडमी। गो मेको आन कली ठीक पा योव्रनुडमी" देंत।

17 मिनु परमप्रभु, परमप्रभु यावेमी "ए गे आं क्यारश भेडा, गो भेडा नु भेडा आन दातेमी निसाफ पाइनुड। गो सांड नु क्यारश आन दातेम निसाफ पाइनुड। *मत्ती २५:३२* 18 मार, रिश्शो जोतीकेम जोशा यो, गे इन कली मगाम्मे? गे मारदे लीशो जोतीक कली इन खोइलीम दिम्नीनी? मार, रिश्शो सिक्स ब्वाक्कु तूशा यो, लीशो कली इन खोइलीम हिलो सेल्चा माल्नीनी? 19 मार, आं भेडा, इन दिम्शो जोतीकेम जोचा माल्नीमी? इन खोइलीम हिलो सेल्शो ब्वाक्कु तूचा माल्नीमी?" देंत।

20 मोपतीके परमप्रभु, परमप्रभु यावेमी मेको आन कली “गो आंमान दोम्शो नु ग्येशो भेडा आन दातेम निसाफ पाइनुड। 21 मारदे हना गेपुकीम दा ग्येशो आन कली इन फिलाम नु बलाम नेम्ना नेम्न नु मचाप्यो आन कली खुना खुन एर ओंथ ब्रपाइक्नीनी। 22 गो आं क्यारश भेडा नेल्ल आन कली प्रॉइनुडमी। मिनु मेको मुल रे रोइक्वा मपुंडसीनीम। मिनु गो भेडा आन दातेम निसाफ पाइनुड।

23 गो मेको आन कली गोठला का वोइक्नुड। आं गेय पाइब दाऊद कली वोइक्नुड। मिनु मेकोम मेको आन कली कोव्रब। मेको आन कली योव्रशा मेको आन गोठला दुम्ब। इजीकीएल ३७:२४; येरमीया ३०:९; होसे ३:५; यूहन्ना १०:१४-१६ 24 मिनु गो, परमप्रभु यावे मेको आन परमप्रभु दुम्नुड। मिनु आं गेय पाइब दाऊद चहिं मेको आन दातेम सासन पाइब दुम्ब। गो, परमप्रभु यावेमी एको लोव्र पाता” देंत।

25 मेकोमी “गो मेकोपुकी नु थुं नाइश्शा बाक्तीक कबल का पाइनुड। मिनु गो रागी कली ब्वाकी डा जन्तु रे प्रॉइनुड। मिनु मेकोपुकी महिंथु थुं नाइश्शा गोरशो रागी नु ब्वाकीम इच्वा ताइनीम। इजीकीएल ३७:२६; लेवी २६:६; होसे २:२० 26 गो मेको आन कली नु आं डांडा आ एर ओंथ नेल्ल डा रागी कली अरु आन कली आसीक गेब सेल्लुडमी। गो रेउ यिची ना मेको आन कली रेउ यिपाइक्नुड। मेको रेउ आसीक खोदेशो पा यीब। लेवी २६:४ 27 मिनु रूम बाक्शो रवाम फल सिल्लीम। खपीम मारेइ मारेइ ग्रेल्लीम। मिनु मुरपुकी आंम रूमी रिश्शो बाक्ने चाप्नीम। गो मेको आन जुवा जिक्शा, मेको आन कली वाइल सेल्ब आन गुइ रे प्रॉइनुडमी। मेना गोन परमप्रभु यावे नड, दे तुइक्नीम। 28 मिनु रागी रागी डा मुरपुकीमी मेको आन कली रोइक्ने मचाप्नीम। ब्वाकी डा जन्तुपुकीम यो मेको आन कली मब्वाइनीम। मेकोपुकी रिश्शो बाक्नीमी। मिनु सुइम मेको आन कली महिंपाइक्नीम। येरमीया ३०:१० 29 गो मेको आन कली शुश अन्न ग्रेल्लीक रू गेनुडमी। मोपा मेकोपुकी रागीम लेंशा गेनायो शोवलु मबेक्नीम। मिनु रागी रागी डा मुर आन शुक्शी पाइश्शो फाल्चा ममाल्लीम। इजीकीएल ३६:३० 30 मिनु मुरपुकीमी गो, परमप्रभु यावे मेको आन परमप्रभु नड, दे तुइक्नीम। गो मेकोपुकी नु बाक्नुड, दे तुइक्नीम। मिनु मेकोपुकीम इस्राएल आ खिं डा मुर आं मुर नम, दे तुइक्नीम। इजीकीएल ११:२० 31 गो आं भेडा खोदेशो ननी। आं योव्रतीके डा भेडा बाक्नीनी। मिनु गो इन परमप्रभु नड” दे परमप्रभु, परमप्रभु यावेमी देंत। भजन संग्रह १००:३

एदोम गोरशो रागी दुम्बशो

35 मिनु परमप्रभु यावेमी आं कली लोव्र पाप्तु। 2 मार लोव्र पाप्तु देंशा हना “ए मुर, गे सेइर पहाड गे कोव्रडो। मिनु मेको कली आं लोव्र पावो। इजीकीएल २५:१२-१४ 3 परमप्रभु, परमप्रभु यावेमी ‘ए सेइर पहाड, गो इ कली लोव्र का पचा माल्लुड। आं गुइ इ गे क्युक्नुड। मिनु इ कली मुर मबाक्तीके नु श्येत्थ सेल्लन। 4 गो इ सहर प्रेल्लुड। मिनु गे मुर मबाक्तीक दुम्नेवे। मिनु गोन परमप्रभु यावे नड, दे तुइक्नेवे। 5 गे साइ इस्राएल कली ईख कुरतीवी। मिनु इस्राएली आन श्येत जची ना नु आन नोले डा सजाइ तची ना तरवारम क्योरचा कली जिम्मा गेपतीवी। भजन संग्रह १३७:७ 6 मोपतीके परमप्रभु, परमप्रभु यावेमी, गो आं ब्रॉइशा बाक्शो खोदेशो पा, गो इ कली हुश ख्राक्श पोक्ब आन गुइमी जिम्मा गेनन। मारदे हना गे हुश ख्राक्श पोक्चा दाक्तावी। हुश ख्राक्श पोक्तीकेम इ कली खेदा पाइब। 7 गो सेइर पहाड कली श्येत्थ नु मुर मबाक्शो पहाड सेल्लुड। मेको रे पा एर ओंथ पाइब नेल्ल आन कली खतम सेल्लुडमी। 8 गो इ पहाड नेल्ल साइश्शो मुरपुकीम प्रिनुड। तरवारम साइश्शोपुकी इ डांडा मेर, इ बेंसी मेर नु इ खोल्सा मेर गोल्लीम। 9 गो इ कली गेना हना यो कली श्येत्थ सेल्लन। इ सहर मुर मबाक्तीक दुम्नीम। मिनु गोन परमप्रभु यावे नड, दे तुइक्नेवे।

10 गो परमप्रभु यावे मेक बाक्ती हना यो, गे ‘मेको रागी निक्शी नु राज्य निक्शी आं के दुम्ब। मिनु गो मेको आन कली हुकुम पाइनुड’ देंत। 11 मोपतीके परमप्रभु, परमप्रभु यावेमी गो आं ब्रॉइशा बाक्शो खोदेशो पा गे इ गाइश्शो नु गेहे पतीक कोइताक्यी। मारदे हना गे इस्राएल कली काइ मदाक्ती। गो इ कली मोदेशोन पाइनुड। गो इ कली निसाफ पडानु, इन

दातेमी आं कली तुइक्पाइक्नुड। 12 मिनु गे गो परमप्रभु यावे नड, दे तुइक्नेवे। मिनु गो इस्राएल डा पहाड आन पबर्म इ शुक्शी पा पशो लोव्र नेल्ल नेंता। गे मार देंते देंशा हना ‘इस्राएल डा पहाड नेल्ल मुर मबाक्तीके दुम्शो बाक्नीम। मिनु मेको आं कली गेशो बाक्ब’ देंते। 13 गो आं कली ठेयब लेशशा कोइताक्यी। मिनु गे आं पबर्म शुश मरिश्शो लोव्र पाप्तीवी। गो मेको नेल्ल नेंता। 14 रागी नेल्ल ग्येरसीशा बाक्मानु, गो इ कली चहिं मुर मबाक्तीक रागी सेल्लुड। 15 मारदे हना गे इस्राएल मुर मबाक्तीके दुम्नेनु, आं के दुम्त, दे ग्येरसीशो बाक्ते। मोपतीके, गो यो इ कली मोदेशोन पाइनुड। गे सेइर पहाड नु एदोम नेल्ल मुर मबाक्तीके दुम्नीनी। मिनु गोन परमप्रभु यावे नड, दे तुइक्नीनी” देंत।

इस्राएली आन रागी लेत्नीम

36 परमप्रभु यावेमी “ए मुर, इस्राएल डा पहाड आन कली आं लोव्र पावो। मेको आन कली ए इस्राएल डा पहाड, परमप्रभु यावे आ लोव्र नेनीन। इजीकीएल ६:२ 2 मिनु परमप्रभु, परमप्रभु यावेमी इन जोरी सत्रुपुकीमी ‘मुल मेको माइत पहाड नेल्ल इं के दुम्तेक्म’ देंतेक्म। इजीकीएल २५:३ 3 मोपतीके आं लोव्र पावो, परमप्रभु, परमप्रभु यावेमी ‘मारदे हना मेकोपुकीम इन कली नेल्ल मुर मबाक्तीके सेल्शा, एर ओंथ रे श्येत गेम्तेक्म। मिनु गे रागी रागी डा लीशो मुर आन रागी दुम्तीनी। मिनु गे मुर आन दातेम शुक्शी पाइक्तीक दुम्शो बाक्तीनी। 4 मोपतीके गे इस्राएल डा पहाडपुकी, परमप्रभु, परमप्रभु यावे आ लोव्र नेनीन। परमप्रभु यावेमी डांडा, पहाड, खोल्सा, बेंसी, ब्रेश्शो सहर नु मुर मबाक्शो सहर गे इन कली इन एर ओंथ बाक्शो मुरपुकीमी रोइक्ताक्म। मिनु रिश्शा इन कली आइक्च सेल्लेक्म। 5 मोपतीके परमप्रभु, परमप्रभु यावे आं लोव्र नेनीन। गो थाम्पा रुश पा, अर्को रागी नु एदोम रागी नेल्ल आन कली लोव्र पाइनुड। मारदे हना मेकोपुकीम आन थुं नेल्लेम ग्येरसीशा आं रागी आन के सेल्लेक्म। मारदे हना रिश्शो योव्रतीक जोतीक बाक्शा, मेको आंम कली रॉइसाक्म’ देंत। इजीकीएल ३५:१५ 6 मोपतीके इस्राएल रागी आ पबर्म आं लोव्र पावो। मिनु डांडा, पहाड, खोल्सा नु बेंसी आन कली परमप्रभु, परमप्रभु यावेमी ‘गो रुश पा शुश चुरशा लोव्र पाइनुड। गेपुकीम रागी रागी डा मुर आन शुक्शी पशो फाल्चा माल्लीनी’ देंत। 7 मोपतीके परमप्रभु, परमप्रभु यावेमी ‘गो गे इन एर ओंथ बाक्ब रागी रागी डा मुरपुकीम यो शुक्शी पाइक्चा पुंडसीनीम’ दे कसम जाइनुड।

8 तन्न गे इस्राएल डा डांडापुकी, गेपुकीम चहिं इन राशी डोन सम्म हाम्शा, आं मुर इस्राएली आन कली फल सिप्पाइक्नीनी। मारदे हना मेकोपुकी रीब पा आन खिं लेत्नीम। 9 कोव्रडीन मुल गो इन कली कोव्रनुड। गो इन गे लेशशा, इन कली दोपाइश्शा, वांचेर शोक्पाइक्नुड। 10 गो इ मुर आन कली सोपाइश्शा बोपाइश्शा शुश सेल्लुड। इस्राएल आ खिं डा मुर नेल्ल आन कली मोदेशो पाइनुड। मिनु सहरम लेंशा मुर बाक्नीम। मिनु ब्रेश्शो खिं नेल्ल लेंशा सेल्सीब। 11 गो इन मुर नु इन बी ब्यफ, क्यारश भेडा शुश सेल्लुडमी। मिनु मेको शुश दुम्शा, शुश गिक्नीम। गो डोंइती डा खोदेशो पा इन बाक्तीकेम मुर बाक्पाइक्नुडमी। मिनु गो इन कली डोंइती डा क्येडा रिश्शो पाइनुड। मिनु गोन परमप्रभु यावे नड, दे तुइक्नीनी। लेवी २६:९ 12 गो आं मुर इस्राएली आन कली इ तार गाक्पाइक्नुड। गे मेको आन के दुम्नीनी। मिनु गे मेको आन शॉप दुम्नीनी। गेपुकीम गेनायो मेको आन तमी तौ रोइश्शा मलाइक्नीनी” देंत।

13 मिनु परमप्रभु, परमप्रभु यावेमी “मुरपुकीम इन पबर्म ‘गे मुर ब्वाइनीनी। मिनु आंम इन रागी डा आल आन कली साइक्नीनी’ देंशो बाक्नीम” देंत। 14 मोपतीके परमप्रभु, परमप्रभु यावेमी “गेपुकीम मुल रे लेंशा गेनायो मुर मब्वाइनीनी। मिनु आंम रागी डा तमी तौ मसाइक्नीनी। 15 गो रागी रागी डा मुरपुकीम इन कली शुक्शी पचा मगेनन्नी। मिनु मुरपुकीम इन कली दिप्शो फाल्चा ममाल्लीनी। मिनु इन रागी डा मुर आन कली दाइल मपपाइक्नीनी” दे परमप्रभु, परमप्रभु यावेमी देंत।

### मुरुम परमप्रभु आ सोक्त ताइनीम

16 मिनु लेंशा परमप्रभु यावेमी आं कली लोव पाप्तु। 17 मार लोव पाप्तु देंशा हना “ए मुर, इस्राएली आंम आन रागीमी बाक्शो बाक्मानु, मेकोपुकीम मेको रागी कली आन पतीक नु आन गेयम ग्रांरा दिशो सेल्लेक्म। मेको आन मरिश्शो पशो मीश मुर आ रां ब्रोल्लो ग्रांरा खोदेंशो बाक्त। मेकोपुकीम रागीम हुश शाइक्पाइक्तीके नु आन मूर्तिम मेको रागी ग्रांरा दिशो सेल्लेक्म। मेको आन पतीके आं डोंइती रां ब्रोल्लो मीश मुर खोदेंशो ग्रांरा बाक्त। *लेवी १८:२४-२५* 18 मारदे हना मेकोपुकी हुश खाक्श पोक्तीके नु मूर्ति रे पा मेको रागी ग्रांरा दिशो सेल्लेक्तीके गो आं चुरशो मेको आन तारी मोइक्ता। 19 गो मेको आन कली रागी रागी डा मुर आन दातेम ब्रपाइक्तामी। मिनु मेकोपुकी राज्य राज्यम एर ओंथ दुश्शा ब्राम्तेक्म। गो मेको आन पतीक नु मेको आन गेय खोदेंशो पा निसाफ पाता। 20 मिनु मेकोपुकी रागी रागी डा मुर आन दातेम जाक्शा, आं नें मरिश्शो सेल्लेक्म। मारदे हना मेको आन पर्वम ‘एकोपुकी दा परमप्रभु यावे आ मुर नम। मो हना यो आन रागी प्रोंइचा माल्लेक्म’ देंतेक्म। *यसैया ५२:५* 21 तन्न गो आं का ला बाक्शो नें आ पर्वम मिस्ताक्ड। मेको आं नें रागी रागी डा मुर आन दातेम मरिश्शो सेल्लो बाक्तेक्म” देंत। *इजीकीएल २०:९*

22 परमप्रभु, परमप्रभु यावेमी “मोपतीके इस्राएल आ खिं डा मुर आन कली ‘ए इस्राएल आ खिं डा मुर, गो इन पर्वम एको गेय मपाइनुड। तन्न गो आं नें आ पर्वम गेय पाइनुड। गे इन लतीक रागी रागी डा मुर आन दातेम आं नें मरिश्शो सेल्लेक्तीनी। *यसैया ४८:११; येरमीया १४:७* 23 गो आं ठेयब नें लेंशा रिश्शो सेल्लुड। मेको रागी डा मुर आन दातेम मरिश्शो सेल्लो बाक्त। मिनु रागी रागी डा मुरपुकीम गोन परमप्रभु, परमप्रभु यावे नड, दे तुइक्नीम। *मत्ती ६:९; इजीकीएल ३७:२८* 24 गो इन कली रागी रागी डा मुर आन दाते रे गुंइनुड। मिनु राज्य नेल्ल रे इन कली खुष्शा, इन आंम रागीम चाक्नुड। 25 गो इन तार रिश्शो ब्वाक्कु ब्रुइक्नुड। मिनु गे इन ग्रांरा दिशो गेय नु इन मूर्ति पूजा पतीक ताइश्शा रिश्शो दुम्नीनी। इन ग्रांरा दिशो दुश्शो नेल्ल रे ग्रांरा मदिशो सेल्लन्नी। *जकरिया १३:१; हिल्लू १०:२२* 26 गो इन कली नक थुं का गेनुड। मिनु गो इन थुंम नक सोक्त का कुर पाइनुड। गो इन आगा रे फुल्लु के थुं गुंइशा, मेको आ पा डा श्ये के थुं कुर पाइनुड। *इजीकीएल ११:१९-२०; येरमीया ३१:३३* 27 गो आं सोक्ती इन आगाम वोइक्नुड। मिनु आं फुल्लुम मुशा ब्रेक्शो लोव नु आं निसाफ पतीक लोव होस पा पाइब सेल्लुड। *इजीकीएल ३९:२९; यसैया ४४:३; इजीकीएल ३७:२४* 28 मेना गेपुकी गो इन किकी पिपी आन कली गेशो रागीम बाक्नीनी। मिनु गे आं मुर दुम्नीनी। मिनु गो इन परमप्रभु दुम्नुड। *इजीकीएल ११:२०* 29 गो गे इन कली ग्रांरा दितीक रे प्रोंइन्नी। गो शुश अन्न ग्रेल्पाइक्नुड। मिनु गो गे इन कली अन्काल मपपाइक्नुड। 30 गो रवा आन फल नु रू डा मारेइ मारेइ आन कली शुश सेल्लुड। मोपा गेपुकी गेनायो रागी रागी डा मुर आन दातेम अन्काल पा मुने मदोक्नीनी। *इजीकीएल ३४:२९; योएल २:१९* 31 मेना गे इन मरिश्शो पशो गेय नु मरिश्शो पशो आ पर्वम मिम्नीनी। मिनु गे इन मरिश्शो पशो नु मूर्ति पूजा पतीके आन आन पर्वम आंमान ग्रांरा दीसीनीनी। *इजीकीएल २०:४३* 32 गो इन पर्वम एको गेय पशो मनड। मेको तुइक्वा माल्लेक्तीनी। ए इस्राएल आ खिं डा मुर इन पशो गेयम पतीके मुने दोक्शा सुर्ता पन’ ” देंत।

33 परमप्रभु, परमप्रभु यावेमी “मेको नाक्ती गो इन कली इन मरिश्शो पशो नेल्ल रे लेंशा रिश्शो सेल्लुड। गो इन सहर आन कली लेंशा मुर बाक्तीक सेल्लुड। मिनु ब्रेश्शो नेल्ल लेंशा सेल्पाइक्नुड। 34 लां गाक्ब मुरपुकीमी इन मशोक्शो रू तचा क्येडा डोंइती मेकेर मार मार शोक्वा कली लेंशा दोइनीम। 35 मिनु मेकोपुकीम ‘एको श्येत्थ रू एदेन आ फल फल रू खोदेंशो दुश्शो बाक्ब। एको श्येत्थ दुश्शो मुर मबाक्शो नु ब्रेश्शो सहर मुल मुरपुकीम ब्रीशा गारो हिरशो बाक्नीम’ देंनीम। 36 मेना इन एर ओंथ लीशो रागी डा मुरपुकीम परमप्रभु यावेमी मेको ब्रेश्शो सहर कली लेंशा सेल्लु। मिनु श्येत्थ दुश्शो रागीम लेंशा मार मार वापाइक्तु, दे तुइक्नीम। गो परमप्रभु यावेमी मेको

पाता। गो मेको यो पाइनुड” देंत। *इजीकीएल १७:२४; येरमीया १:१०; येरमीया १८:७-८*

37 मिनु परमप्रभु, परमप्रभु यावेमी “गो इस्राएल आ खिं डा मुर आन पुंइशो नेंशा, मेको आन मुर आन कली क्यारश भेडा खोदेंशो पा शुश सेल्लुडमी। *मीका २:१२* 38 गो मेको आन कली यरूसेलेम डा चाडम चढेतीक भेडा खोदेंशो पा शुश सेल्लुडमी। मोपा सहर लेंशा शुश मुरपुकीम ब्रीनीम। मिनु मेकोपुकीम गोन परमप्रभु यावे नड, दे तुइक्नीम” देंत।

### सोव्रशो रुश बाक्शो बेंसी

37 परमप्रभु यावेमी आं कली थिती। मिनु परमप्रभु यावे आ सोक्तीम आं कली बेंसी आ दातेमी चाक्ती। मेको बेंसी रुशेइ रुशेम ब्रीशो बाक्त। *इजीकीएल १:३* 2 मेकोम आं कली मेको रुश बाक्तीकेम एर ओंथ पपाइक्ती। मेको बेंसीम शुश रुश बाक्तेक्म। मेको थाम्पा सोव्रशो बाक्तेक्म। 3 मिनु मेकोम आं कली “ए मुर, मार, एको रुश लेंशा ब्रोंइने चाप्नीमी डा?” देंत। मिनु गो “परमप्रभु, परमप्रभु यावे, गे ला मेको तुइक्नीनी” देंती। 4 मिनु मेकोम आं कली “एको रुश आन कली आं लोव पा ‘ए सोव्रशो रुश परमप्रभु यावे आ लोव नेनीन’ देनो” देंत। 5 मिनु परमप्रभु, परमप्रभु यावेमी “मेको रुश आन कली ‘गो इन आगाम सोक्त ओवपाइक्नुड। मिनु गे ब्रोंइनीनी। *भजन संग्रह १०४:३०* 6 गो इन कली नारीम बोइक्नन्नी। इन श्ये वापाइक्नुड, कुशुलम गिल्लन्नी। मिनु गो इन आगाम सोक्त कुर पाइक्नुड। मिनु गे ब्रोंइनीनी। मिनु गेपुकीम गोन परमप्रभु यावे नड, दे तुइक्नीनी” ” देंत। *यसैया २६:१९*

7 मोपतीके गो मेकोमी देंशो खोदेंशो पा परमप्रभु यावे आ लोव पाता। मिनु गो मेको परमप्रभु यावे आ लोव पन पन बाक्डानु, मेकेर करक कुरूक पशो नेंता। मिनु मेको रुशपुकी का नु अर्को बोंइसीचा गोम्तेक्म। 8 मिनु गो आं कोव्रन कोव्रना मेको आन नारी बोंइसीशा, श्ये गूत। मिनु मेको कुशुलम गिल्लाक्म। तन्न मेकोपुकी नु सोक्त मबा। 9 मिनु मेकोमी आं कली “ए मुर, सोक्त कली आं लोव पावो। गे मुर, आं लोव पावो। मेको आन कली परमप्रभु, परमप्रभु यावेमी ‘ए सोक्त, पूर्व, पच्छिम, उत्तर दक्खिन रे जाक्कीन। मिनु एको बेक्शो आन कली मुइक्तीन। मिनु ब्रोंइमल’ देनो” देंत। 10 मिनु गो परमप्रभु यावे आ अरेशो पाता। मिनु मेको ब्रोंइतीक सोक्त मेको आन आगाम ओव्रत। मिनु मेकोपुकी ब्रोंइशा राप्तेक्म। मिनु थम ठेयब हुल का दुम्त।

11 मिनु मेकोम आं कली “ए मुर, एको रुश नेल्ल इस्राएल आ खिं डा मुर बाक्नीम। मेकोपुकीम ‘आंइ रुश नेल्ल सोव्रने थुम्तेक्म। मिनु आंइ आस नेल्ल जाम्त। गो थमा पा ताइक्वा पुंइसाक्क’ देंतेक्म। *इजीकीएल ३७:१* 12 मोपतीके मेको नेल्ल आन कली आं लोव पा ‘गो, परमप्रभु, परमप्रभु यावेमी तुरस रोक्शा, इन कली गुंइनुड। आं मुरपुकी, गो इन कली लेंशा इस्राएल रागीम चाक्नन्नी। 13 ए आं मुरपुकी, गो इन तुरस रोक्शा गुंइदुनु, गेपुकीम गोन परमप्रभु यावे नड, दे तुइक्नीनी। 14 गो आं सोक्त इन कली कुर पाइक्नन्नी। मिनु गे ब्रोंइनीनी। मिनु गो इन कली आंम इन रूम बाक्पाइक्नुड। मिनु गेपुकीम गो परमप्रभु यावेमीन एको लोव पाता। मिनु मेको पाइनुड, दे तुइक्नीनी’ देनो” दे परमप्रभु, यावेमी देंत।

### यहूदा नु इस्राएल रागी का दुश्शो

15 परमप्रभु यावेमी आं कली लोव पाप्तु। 16 मार लोव पाप्तु देंशा हना “ए मुर, कोक्के का चाक्शा ‘यहूदा नु इस्राएल डा मुर’ दे ब्रेक्ती। मिनु नोले अर्को कोक्के का चाक्शा ‘योसेफ, एफ्राइम नु मेको नु बाक्ब इस्राएल आ खिं नेल्ल’ दे ब्रेक्ती। 17 मिनु मेको निम्फा फ्रिष्शा कान सेल्लेक्ती। मोपा मेको इ गुडम कोक्के कान दुम्ब। 18 मिनु इ मुरपुकीम इ कली ‘मेको आ अर्थ मार बाक्बा गे आंइ कली मशेंनीनी?’ दे हिल्लो पाइनीम। 19 गे मेको आन कली परमप्रभु, परमप्रभु यावेमी गो एफ्राइम आ गुडम बाक्शो योसेफ आ कोक्के, इस्राएली आन थर डा यहूदा आ कोक्के नु फ्रिप्नुड। मोपा गो मेको आस कली कोक्के कान सेल्लुड। मिनु मेको आं गुडम कान दुम्नीस। 20 मिनु मेको इन ब्रेक्शो कोक्के इन डोंइती इन गुडम ग्याइश्शा बाक्नीस” देंत। 21 मेना



परमप्रभु, परमप्रभु यावेमी मेको आन कली “इसाएल डा मुर तेको तेको रागीम लमा, गो मेको आन कली रागी नेल्ल रे खुज्नुडमी। मिनु मेको आन कली आंम आन रागीम चाक्नुडमी। यसैया ११:१२-१३ 22 गो मेको आन कली इसाएल रागी डा पहाडम रागी कान सेल्लुडमी। मिनु मेको नेल्ल आन के पिप कान दुम्ब। मिनु गेनायो रागी निक्शी मटुम्नीस। मिनु राज्य निक्शी मटुम्नीस। इजीकीएल ३४:२३; येरमीया ३:१८; होसे २:२ 23 मिनु मेकोपुकीम लेंशा गेनायो आन मूर्ति नु अरु गांग्रा दिशो थोवक नु हेंथे मपाइनीम। मारदे हना गो मेको आन कली नेल्ल आन हेंथे पतीक रे प्रॉइनुडमी। मिनु मेको आन कली आं मुर सेल्लुडमी। मिनु मेकोपुकी आं मुर दुम्नीम। मिनु गो मेको आन परमप्रभु दुम्नुड। इजीकीएल ११:२०

24 आं गेय पाइब दाऊद मेको आन पिप दुम्ब। मिनु मेको आन गोठला कान दुम्ब। मिनु मेकोपुकीम आं निसाफ पतीक लोव टीनीम। मिनु मेकोपुकीम आं फुल्लुम मुशा ब्रेक्शो लोव होस पा पाइनीम। इजीकीएल ३४:२३; इजीकीएल ३६:२७ 25 मिनु मेकोपुकी आं गेय पाइब याकूब कली गेशो रागीम बाक्नीम। मेकेर आन किंकी पिपी बाक्शो बाक्तेक्म। मिनु मेकेर मेको आन आल, चच युइ गेना हना यो बाक्नीम। मिनु आं गेय पाइब दाऊद गेना हना यो मेको आन कली सासन पाइब दुम्ब। लूका १:३२-३३ 26 गो मेकोपुकी नु थुं नाइश्शा बाक्तीक कबल का पाइनुड। मेको गेना हना यो लीब कबल बाक्ब। गो मेको आन कली आसीक गेशा शुश दुम्पाइक्नुडमी। मिनु गो मेको आन दातेम गेना हना यो कली आं बाक्तीक सेल्लुड। प्रस्थान २५:८; इजीकीएल ३४:२५; यसैया ५४:३० 27 आं बाक्तीक मेकोपुकी नुन दुम्ब। मिनु गो मेको आन परमप्रभु दुम्नुड। मिनु मेकोपुकी आं मुर दुम्नीम। इजीकीएल ११:२० 28 मेना रागी रागी डा मुरपुकीम गो, परमप्रभु यावेमीन इसाएली आन कली आं मुर सेल्ला। मिनु आं बाक्तीके मेको आन दातेम गेना हना यो बाक्ब, दे यो तुइक्नीम” दे परमप्रभु यावेमी देंत। इजीकीएल ३६:२३

#### गोग आ पर्वम लोव पशो

38 परमप्रभु यावेमी आं कली लोव पाप्नु। 2 मार लोव पाप्नु देंशा हना “ए मुर, मागोग रागी डा ठेयब मुर, गोग आ बाक्तीक लावो। मेशेक नु तूबल डा सासन पाइब कली आं लोव पावो। इजीकीएल ३९:६; इजीकीएल २७:१३; इजीकीएल ३२:२६; उत्पत्ती १०:२ 3 मिनु परमप्रभु, परमप्रभु यावेमी मेको कली “ए मेशेक नु तूबल डा सासन पाइब गोग, गो इ कली लोव का पाइनुड। 4 गो इ कली हिरनुड। गो इ शांपेम बोल्सी ब्वेक्नुड। गो इ कली, इ लडाइ पाइब नेल्ल, इ शारा नु इ शारा डोइक्ब, या कुरब नेल्ल आन गुंडनुड। ठेयब नु आइक्च तेक्तीक कुरब, आन तरवार शेशा बाक्नीम। 5 पारसी, एथीयोपीया नु पूत डा मुरपुकी, मेकोपुकी नु बाक्नीम। मिनु मेको नेल्लेम आन तेक्तीक शेशा, लडाइ डा ताकी गुक्शो बाक्नीम। 6 गोमेर नु आ लडाइ पाइब नेल्ल, उत्तर डा बेथ-तोगारमाह नु आ लडाइ पाइब नेल्ले शुश मुरपुकी गे नु बाक्शो बाक्नीम। इजीकीएल २७:१४

7 गे सासीशा बाक्को। मिनु गे नु गारशा लडाइ पचा कली जाक्शो लडाइ पाइब नेल्ल आन कली सासीशा बाक्पतो। मिनु गे मेको नेल्ल आन ठेयब मुर दुम्शा, सासीशा बाक्को। 8 शुश नाक्त् नोले लडाइ पचा कली इन कली ब्रेन्नीम। गेपुकीम लडाइम श्येत्थ दुम्शा लेंशा सेल्लो रागी कली लडाइ तोइनीनी। मेको मुर शुश रागी रे खुप्शा, इसाएल डा पहाडम चाक्शो बाक्नीम। मेकेर शुश बर्स रे मुर मबाक्म। मेकोपुकी रागी रागी रे चाक्शो बाक्तेक्म। मिनु मुल मेको नेल्ल मारेइ मटुम्थु रिम्शो पा बाक्शो बाक्नीम। 9 गे फश गिवार खोदेंशो पा बारचा माल्नेवे। गे गोस्स खोदेंशो पा मेको रागी कली सुम्चा माल्नेवे। गे नु इ लडाइ पाइब नेल्ल नु गे नु बाक्ब नेल्लेम मोदेंशो पचा माल्नीनी’ देनो” देंत।

10 परमप्रभु, परमप्रभु यावेमी “मेको नाक्ती इ थुंम मार मार मिम्नेवे। मिनु गे थम मरिम्शो पचा मिम्नेवे। 11 मिनु गेम ‘गो गारो महिरशो सहर कली लडाइ तोइनुड। गो सिक्सी पा रिम्शो पा गारो महिरशो, ठेयब लाप्चो मपाइश्शो नु आग्लो मपाइश्शो सहरम बाक्ब मुर आन रागी कली लडाइ तोइनुड। 12 मुल गो मेको रागी डा मार मार रोइश्शा लाइक्वा कली लडाइ पाइनुड। मेकोपुकी श्येत्थ दुम्शो रागीम लेंशा खुम्सीशा बाक्शो बाक्तेक्म।

मेकोपुकीम शुश बी ब्यफ, क्यारश भेडा थुल्शा शॉप चेम्शा रागी आ दातेम बाक्शो बाक्नीम” देंते। न्यायाधीस ९:३७ 13 शेबा नु देदान, टारशीश डा ग्याप्ब लेयबपुकी नु मेको आन ठिटा लडाइ पाइब नेल्लेम इ कली ‘मार, गे रोइक्थ जाक्शो नवे? मार गे रोइश्शो मार मार तचा कली, सुन चांदी लाइक्वा कली, बी ब्यफ, क्यारश भेडा नु शुश मार मार रोइक्वा कली, जाक्नी?’ ” देंशो बाक्नीम।

14 मोपतीके “ए मुर, गोग कली आं लोव पावो। मेको कली ‘परमप्रभु, परमप्रभु यावेमी इ कली आं मुर इसाएली मारेइ मटुम्थु रिम्शो पा बाक्मानु, गे मेक मलाइनेवे? 15 डोन इ बाक्तीक उत्तर रागी रे ठेयब हुल, सक्ति पाइश्शो लडाइ पाइब नु शुश जात डा मुर शारा डोइश्शा, गो नु जाक्नीम। 16 गे आं मुर इसाएली नु लडाइ पचा कली रागी कली सुम्ब गोस्स खोदेंशो पा जाक्नेवे। ए गोग, नोले डा नाक्ती गो इ कली आं रागी नु लडाइ पपाइक्नुड। रागी रागी डा मुरम आं कली तुइक्त्मेक्त्, दे मोदेंशो पाइनुड। मेको रागी रागी डा मुर आन डोंइती गो का ला परमप्रभु यावे नड’ दे कोंइनुड” देंत। 17 मिनु परमप्रभु, परमप्रभु यावेमी “साइ आं गेय पाइब, इसाएल डा आं लोव पाइबम इ पर्वम लोव मपामे डा? मेना मेकोपुकीम शुश बर्स सम्म ‘गो इ कली इसाएली नु लडाइ पथ सोइक्नुड’ दे आं लोव पाम्तेक्म” देंत। सेफन्याह ३:८

#### गोग कली सजाइ गेशो

18 परमप्रभु यावेमी “मेको नाक्त् मार दुम्ब देंशा हना, गोगम इसाएल कली लडाइ तोइब। मिनु गो थाम्पा चुरनुड। 19 मेको नाक्ती गो आं जौब बोक्शा, गाइश्शो चुरशोम इसाएल रागीम ठेयब खिनु कुइब। 20 मेको नाक्ती समुन्द्र डा डांड, सरीड डा चिक्ब, रागी डा जन्तु, खपीम ग्रेशा गाक्ब जन्तु नेल्ल नु रागी डा मुर नेल्ल आं डोंइती खिंखि पाइनीम। पहाड नेल्ल ब्रेन्नीम, रोंगु नेल्ल दोक्नीम। मिनु गारो नेल्ल गोल्नीम। 21 गो आं पहाड नेल्लेम गोग आ पर्वम तरवार का क्युक्नुड। मिनु मेको आ मुर नेल्लेम आन तरवार आन लोक्ब आन पर्वम शोइक्नीम। प्रकाश २०:८-९ 22 गो मुर बेक्तीक रोइम नु हुश खाक्श पोक्तीकेम मेको कली निसाफ पाइनुड। गो मेको आ लडाइ पाइब आन तार, मेको नु बाक्शो जात जात डा मुर आन हुल तार थम हिंचा डा रेउ, मुप्स, मी नु गन्धक यिपाइक्नुड। 23 मोपा गो आं ठेयब दुक्तीक नु गो आं बाक्शो परमप्रभु बाक्नुड, दे कोंइनुडमी। मिनु शुश रागी डा मुर आन डोंइती आं कली तुइक्पांइसीनुड। मेना मेकोपुकीम गोन परमप्रभु यावे नड, दे तुइक्नीम” देंत।

#### गोग नु आ लडाइ पाइबपुकी ब्रुशो

39 मिनु परमप्रभु यावेमी आं कली “ए मुर, गोग आ मुर आन कली आं लोव पावो। मिनु परमप्रभु, परमप्रभु यावेमी इ कली ‘गो इ कली लोव का पचा माल्नुड। गे मेशेक नु तूबल डा सासन पाइब बाक्नेवे। इजीकीएल ३८:२ 2 गो इ कली हिरशा, ग्येत्थ गे सोइक्नन। गो इ कली डोन उत्तर रे इसाएल डा पहाड गे सोइक्नन। 3 गो इ पेरा गुइम बाक्शो लिब्रा तुप्शा तोक्नुड। मिनु इ ग्युरा गुइम बाक्शो ब्रा तोक्नुड। 4 गे इसाएल डा पहाडमीन साइक्वा पुंइसीनेवे। इ लडाइ पाइब नेल्ल नु गे नु बाक्शो मुर नेल्ल मेकेर साइक्वा पुंइसीनीम। गो इ कली चिक्ब नु ब्वाकी डा जन्तु आन ब्वतीक सेल्लुड। 5 गे दिंमम गोल्नेवे। मारदे हना गो एको लोव पाता’ देंत। 6 गो मागोग डा मुर नु समुन्द्र आ नेक्था रिम्शो पा बाक्शो आन तार मी सोइक्नुड। मिनु मेकोपुकीम गोन परमप्रभु यावे नड, दे तुइक्नीम।

7 गो आं नें आं मुर इसाएली आन दातेम तुइक्पाइक्नुडमी। मिनु आं नें कली मरिम्शो सेल्चा मगेनुड। मिनु रागी रागी डा मुरपुकीम गोन परमप्रभु यावे, इसाएली आन बाक्शो परमप्रभु नड, दे तुइक्नीम। 8 मेको थमा पा दुम्ब। मेको थमा पा जाक्ब। आं देंशो नाक्ती मेकोन बाक्ब” दे परमप्रभु, परमप्रभु यावेमी देंत। 9 मिनु परमप्रभु यावेमी “ले इसाएल डा सहरम बाक्ब मुरपुकीमी या, आइक्च नु ठेयब तेक्तीके, लिब्रा नु ब्रा, कोक्के नु तूतीके नेल्ल खुप्शा चोइनीम। मेकोपुकीमी मेको ७ बर्स सम्म चोइनीम। यसैया ९:४ 10 मेकोपुकीमी रू रे शी खुप्चा ममाल्नीम। ब्वाकी डा रवा तिम्चा ममाल्नीम।

मारदे हना मेकोपुकीम मेको यामीन आन मी मुइक्नीम। मेकोपुकीम आन मार मार गुंडशा लाइक्ब आन के मार मार गुंडशा चाक्नीम। आन कली रोइक्ब आन कली रोइक्नीम" दे परमप्रभु, परमप्रभु यावेमी देंत। *येरमीया ३०:१६*

### गोग कली थिम्शो

11 मिनु परमप्रभु यावेमी "मेको नाक्ती गो गोग आ मुर आन कली इस्राएल रागीम तुरस का गेनुड। मेको इस्राएल डा समुन्द्र आ पूर्व गे मुर आन लतीक बेंसी डा लांम बाक्ब। मेकेर गोग आ लडाइ पाइब नु मेको आन कली वारच पाइब हुल नेल्ल थिम्चा पुंडसीनीम। मोपतीके मेको बाक्तीक कली हामोन-गोग आ बेंसी देंनीम। 12 इस्राएल आ खिं डा मुरपुकीम मेको आन कली ७ महिना सम्म थिम्ना थिम्न बाक्नीम। मिनु मोपा रागी कली ग्रांरा मदिशो सेल्नीम। 13 मिनु रागी डा मुर नेल्लेमी मेको आन कली थिम्नीम। गो आं सक्ति कौंडु नाक्ती मेको आन कली ठेयब मिम्तीक का दुम्ब। 14 मेको रागी ग्रांरा मदिशो सेल्चा कली मुर वोइक्नीम। मेकोपुकीम नाक्त किंत किंत कोव्रशा माल्शा, थिम्शा थिम्नीम। मिनु आन माल्तीक गेय ७ महिना सम्म पचा माल्नीम। 15 मेकोपुकी रागी आ एर ओंथ नेल्ल लमानु, सुइमी मुर आन रुश का थित्तेक्म हना, मेकेर चिन्ड वोइक्चा माल्बाक्तेक्म। मिनु तुरस दोइबपुकीम मेको कली हामोन-गोग डा बेंसीम लाइश्शा, थिम्बाक्तेक्म। 16 मेकेर हामोनाह देशो सहर का यो बाक्ब। मोपा मेकोपुकीम रागी कली ग्रांरा मदिशो सेल्नीम" दे परमप्रभु यावेम देंत। *हामोनाह आ अर्थ "ठेयब हुल" देशो बाक्ब।*

17 मिनु परमप्रभु, परमप्रभु यावेमी "ए मुर, नेल्ल खाल डा चिक्ब नु ब्वाकी डा जन्तु नेल्ल आन कली 'एर ओंथ नेल्ल रे जाक्कीन। गो इस्राएल डा पहाडम इन कली ठेयब चढेतीक भोज का सेल्लुड। गेपुकीम मेकेर श्ये ब्वाइनीनी। मिनु हुश तूनीनी। *प्रकाश १९:१७-१८* 18 गेपुकीम शुश सक्ति पाइश्शो मुर आन श्ये ब्वाइनीनी। मिनु रागी डा पिप आन सासन पाइब, बाशान डा सांड, पाठा, बोका नु ब्यफ आन हुश तूनीनी। 19 गो इन कली चढेतीक भोज का गेडानु, गे रूथ्री बोंसो ब्वने चाप्नीनी। गे मदुक्नी सम्म हुश तूने चाप्नीनी। 20 गेपुकी आं भोजम शारा, बगी डोइक्ब, सक्ति पाइश्शो मुर नु नेल्ल खाल डा लडाइ पाइब ब्वशा रूनीनी" " दे परमप्रभु, परमप्रभु यावेमी देंत।

### इस्राएल लेंशा रागी का दुम्शो

21 मिनु परमप्रभु, परमप्रभु यावेमी "गो रागी रागी डा मुर आन डौंइती आं सक्ति कौंडुनुड। मिनु रागी रागी नेल्लेम आं निसाफ पशो ताइनीम। आं सजाइ गेशो ताइनीम। 22 मिनु मेको नाक्त रे इस्राएल आ खिं डा मुरपुकीम गोन परमप्रभु यावे, मेको आन परमप्रभु नड, दे तुइक्नीम। 23 मिनु रागी रागी डा मुरपुकीम इस्राएल आ खिं डा मुर आन मरिम्शो पतीके ग्याइश्शा लाइक्चा पुंडसीशो बाक्तेक्म, दे तुइक्नीम। मारदे हना मेकोपुकीम आं कली मरिम्शो पाप्तेक्म। मोपतीके गो आं कुल मेको आन रे खूइक्ताक्ड। मिनु मेको आन कली आन जोरी सत्रु आन गुइम गेतामी। मिनु मेको नेल्ल तरवारम साइक्चा पुंडसाक्म। *यसैया ५४:८* 24 मेको आन ग्रांरा दिशो नु आन हेंथे पशो आ पबंम गो मेको आन कली सजाइ गेतामी। मिनु गो आं कुल मेको आन रे खूइक्ताक्ड" देंत।

25 मोपतीके परमप्रभु, परमप्रभु यावेमी "गो याक्ब आ खिं डा मुर आन कली डौंइती डा खोदेशो पा रिम्शो सेल्लुड। मिनु इस्राएल आ खिं डा मुर नेल्ल आन कली शिशी पाइक्नुडमी। गो आं का ला बाक्शो नें आ पबंम रुश पाइनुड। 26 मेकोपुकी रिम्शो पा महिंथु आन रागीम बाक्ची ना, आन मुने नु आं कली मरिम्शो पशो नेल्ल प्रेंनीम। 27 मिनु गो मेको आन कली रागी रागी डा मुर आन दाते रे चाक्नुडमी। मिनु मेको आन कली आन जोरी सत्रु आन रागी रे खुप्नुडमी। मिनु गो शुश रागी डा मुर आन डौंइती मेको आन रे पा गो का ला परमप्रभु नड, दे कौंडुनुडमी। 28 मेना मेकोपुकीम गोन परमप्रभु यावे, आन परमप्रभु नड, दे तुइक्नीम। मारदे हना गो मेको आन कली रागी रागी डा मुर आन दातेम ग्याइश्शा लाइक्पाइक्तामी। मिनु का यो मजाम्चा डा पा

खुप्शा आन रागीम चाक्नुडमी। 29 मुल रे गो आं कुल मेको आन डौंइती रे गेनायो मखूइक्नुड। मारदे हना गो आं सोक्त इस्राएल आ खिं डा मुर आन तार मोइक्नुड" दे परमप्रभु, परमप्रभु यावेमी देंत। *इजीकीएल ३६:२६-२७; योएल ३:१*

### परमप्रभु आ खिं कली कौंडिशो

40 गोपुकी ग्याइश्शा लाइक्चा पुंडसीशो २५ बर्स दुम्मेनु, डौंइती डा महिना डा १० नाक्त बाक्त। मेना यरूसलेम सहर फ्रुचा पुंडसीशो १४ बर्स दुम्शो बाक्त। मेको नाक्तीन परमप्रभु यावेमी आं कली थिती। मिनु मेकोम आं कली मेकेर लाइक्ती। *इजीकीएल १:३* 2 परमप्रभुमी आ कौंडीकेम आं कली इस्राएल रागी लाइक्ती। मिनु आं कली थम ठेयब लाइश्शो डांडा काम वोइक्ती। मेको आ दक्खिन गे सहर का खोदेशो तांडसीशो बाक्त। *जकरिया १४:१०* 3 मिनु मेकोम आं कली मेकेर लदानु, गो मेकेर मुर का ताता। मेकेर कांसा खोदेशो टल्केशो मुर का बाक्त। मेको आ गुइम सुती के डोरी नु पुक्तीक कोक्के का बाक्त। मेको ठेयब लाप्चो आ नेक्था राप्शो बाक्त। *इजीकीएल ४७:३; जकरिया २:५ प्रकाश २१:१५* 4 मिनु मेकोम आं कली "ए मुर, कोव्रडो। मिनु नोफा दाइश्शा नेनो। गो इ कली मार मार कौंडुनुड, मेको रिम्शो पा कोव्रशा, इ थुंम वोतो। मारदे हना गे मो पचा कली एक चाक्शो बाक्ते। मिनु गे मार ताइक्नेवे, मेको नेल्ल इस्राएल आ खिं डा मुर आन कली शेंदीमी" देंत।

### पूर्ब डा ठेयब लाप्चो

5 मिनु गो मेकेर परमप्रभु यावे आ खिं आ एर ओंथ नेल्ल हिरशो गारो का ताता। मिनु मेको मुर आ गुइम बाक्शो पुक्तीक कोक्के ६ ठेयब कुबीत लाइश्शो बाक्त। मिनु मेकोम गारो पुक्गानु, ३ कुबीत ग्येत्थु नु ६ कुबीत थांइशो बाक्त। *ठेयब कुबीत ०.५ मिटर बाक्ब। १राजा ६:-* 6 मिनु मेको नोले लेंशा पूर्ब गे डा ठेयब लाप्चोम लत। मिनु मेको आ थेंका रे पा डौंइश्शा लाप्चो ओव्रतीक पिंडी पुक्तु। मिनु मेको पुक्तीक कोक्के का लाइश्शो बाक्त। *पुक्तीक कोक्के ३.२५ मिटर लाइश्शो बाक्ब।* 7 मेकेर बाक्तीके कोठा बाक्तेक्म। मेको नेल्ल पुक्तीक कोक्के का ब्रेम्शो नु पुक्तीक कोक्के का लाइश्शो बाक्तेक्म। मेको कोठा आन दातेम गेय पतीक कोठा बाक्तेक्म। मिनु आन दाते डा बाक्तीके ५ कुबीत ब्रेम्शो बाक्त। मिनु परमप्रभु यावे आ खिं डा पिंडी डा लाप्चो लतीक लां पुक्तीक कोक्के का ब्रेम्शो बाक्त। *कुबीत का आधा मिटर बाक्ब।* 8 मिनु मेकोमी ठेयब लाप्चो आ आगा डा पिंडी पुक्गानु, मेको पुक्तीक कोक्के का लाइश्शो बाक्त। 9 मिनु मेको लतीक लां डा पिंडी पुक्गानु, ८ कुबीत लाइश्शो बाक्त। मेको आ थाम कुबीत निक्शी थांइशो बाक्तेक्म। मेको लाप्चो आ पिंडी चहिं परमप्रभु यावे आ खिं गे बाक्त। 10 मिनु पूर्ब डा लाप्चो आ एर गे नु ओंथ गे सां सां गेय पतीक कोठा बाक्तेक्म। मेको सांफान उइक्थ उइक्थ बाक्तेक्म। मेको एर नु ओंथ बाक्शो थाम उइक्थ उइक्थ बाक्तेक्म। 11 मिनु नोले मेकोमी लाप्चो ओव्रतीक आ ब्रेम्शो पुक्तु। मेको १० कुबीत ब्रेम्शो बाक्त। मेको लाप्चो नेल्ल १३ कुबीत लाइश्शो बाक्त। 12 गेय पतीक कोठा आन डौंइती आ दी गे कुबीत का डा आइक्च गारो बाक्तेक्म। कोठा नेल्ल ६ कुबीत लाइश्शो नु ६ कुबीत ब्रेम्शो बाक्तेक्म। 13 मिनु नोले मेकोमी गेय पतीक कोठा का डा लाप्चो रे अर्को गेय पतीक कोठा सम्म पुक्गानु, गारो का रे अर्को गारो सम्म २५ कुबीत बाक्त। 14 मिनु साप्शो लतीक लां २० कुबीत ब्रेम्शो बाक्त। थाम आ नेक्था रे लाडगा लतीक लां यो बाक्त। 15 मिनु ओव्रतीक लाप्चो डा खिं नेल्ल लाप्चो रे लाडगा लतीक लां डा पिंडी सम्म ५० कुबीत लाइश्शो बाक्त। 16 गेय पतीक कोठा थाम आ नेक्था डा झेल डा गारो आ आइक्थ मेरे थरपु हिरशो बाक्तेक्म। एर ओंथ हिरशो साप्शो लतीक लां नेल्ल झेल बाक्तेक्म। मिनु पिंडीम यो मोदेशो झेल बाक्तेक्म। मेको थामपुकीम खजूर रवा आ बुटा आप्शो बाक्तेक्म।

## लाडगा गे डा अर्को लाडगा

17 मिनु मेकोमी आं कली परमप्रभु यावे आ खिं डा लाडगा गे डा अर्को लाडगाम चाक्ती। मेकेर कोठा बाक्तेक्म। लाडगा आ एर ओंथ फुल्लु ब्रशो बाक्तेक्म। मिनु मेको फुल्लु ब्रशो खपीम ३० ओटा कोठा बाक्तेक्म। 18 मेको फुल्लु ब्रशो लां ओव्रतीक लाच्यो आ नेक्था बाक्त। मिनु मेको लाच्यो सम्म बाक्त। मेको उड डा फुल्लु ब्रशो लां बाक्त। 19 मिनु मेकोम आइदी डा लाच्यो आ आगा गे लाडगा डा ब्रेम्शो पुक्गानु, मेको सहे का कुबीत बाक्त।

## उत्तर गे डा ठेयब लाच्यो

20 मिनु मेकोम उत्तर गे डा परमप्रभु यावे आ खिं डा लाडगा गे डा लाडगा आ लाइश्शो नु आ ब्रेम्शो पुक्तु। 21 मिनु मेकेर अर्को ठेयब लाच्यो खोदेंशो एर ओंथ कोठा सां सां बाक्तेक्म। मेको आ थाम नु आ पिंडी डोंइती डा लाच्यो खोदेंशो बाक्तेक्म। मेको आ लाइश्शो ५० कुबीत नु आ ब्रेम्शो २५ कुबीत बाक्त। *कुबीत का ०.५ मिटर बाक्ब।* 22 मेको आ झेल, आ पिंडी नु मेको खजूर रवा आ बुटा आष्यो थाम नु पूर्ब गे कोव्रशो लाच्यो नेल्ल अर्को खोदेंशो बाक्तेक्म। मेकेर लचा कली ७ ओटा थेंका बाक्तेक्म। मिनु मेको पिंडी आगाम बाक्त। 23 पूर्ब डा ठेयब लाच्यो आ डोंइती गे परमप्रभु यावे आ खिं डा लाडगाम लाच्यो का बाक्त। उत्तर डा ठेयब लाच्यो आ डोंइती गे यो परमप्रभु यावे आ खिं डा लाडगाम लाच्यो का बाक्त। मेको लाच्यो रे अर्को लाच्यो सम्म पुक्गानु, सहे का कुबीत लाइश्शो बाक्त। *कुबीत का ०.५ मिटर बाक्ब।*

## दक्खिन गे डा ठेयब लाच्यो

24 मिनु मेकोम आं कली दक्खिन गे लाइक्ती। मिनु मेकेर ठेयब लाच्यो का बाक्त। मिनु मेकोम आ थामपुकी नु आ पिंडी पुक्तु। मिनु मेकोपुकी यो अर्को ठेयब लाच्यो खोदेंशो पा उडक्थ उडक्थ बाक्तेक्म। 25 मिनु मेकेर एर ओंथ नेल्ल नु पिंडीम झेल बाक्तेक्म। मेको अर्को ठेयब लाच्यो खोदेंशो बाक्तेक्म। मेकोपुकी ५० कुबीत लाइश्शो नु २५ कुबीत ब्रेम्शो बाक्तेक्म। 26 मेकेर लतीक ७ ओटा थेंका बाक्तेक्म। मेको आ पिंडी आगा गे बाक्त। निम्फा पटटी थाम बाक्तेक्म। मिनु थाम खजूर रवा आ बुटा आष्यो बाक्तेक्म। 27 मेको आ आगा डा लाडगाम यो दक्खिन गे लाच्यो का बाक्त। मेकोम मेको लाच्यो रे ठेयब लाच्यो सम्म पुक्गानु, मेको सहे का कुबीत बाक्त।

## आगा डा लाडगा डा लाच्यो

28 मिनु मेकोम आं कली दक्खिन गे डा ठेयब लाच्यो रे पा आगा डा लाडगाम चाक्ती। मिनु मेकोम दक्खिन डा लाच्यो पुक्तु। मिनु मेको ठेयब लाच्यो यो अर्को ठेयब लाच्यो खोदेंशो बाक्त। 29 मेको आ कोठा, आ थाम नु आ पिंडी अर्को खोदेंशो बाक्तेक्म। मेको आ पिंडी आ एर ओंथ नेल्ल झेल बाक्तेक्म। मेको ५० कुबीत लाइश्शो नु २५ कुबीत ब्रेम्शो बाक्त। 30 मेकेर एर ओंथ नेल्ल पिंडी बाक्तेक्म। मेको २५ कुबीत लाइश्शो नु २५ कुबीत ब्रेम्शो बाक्तेक्म। *कुबीत का ०.५ मिटर बाक्ब।* 31 मेको आ पिंडी लाडगा गे कोव्रशो बाक्त। मिनु मेको आ थामपुकीम खजूर रवा आ बुटा आष्यो बाक्तेक्म। मिनु मेकेर लचा कली ८ ओटा थेंका बाक्तेक्म।

## आगा लाडगा डा पूर्ब डा लाच्यो

32 मिनु मेकोम आं कली पूर्ब गे डा आगा डा लाडगाम चाक्ती। मिनु मेको आ ओव्रतीक लाच्यो पुक्तु। मिनु मेको अर्को ठेयब लाच्यो खोदेंशो बाक्त। 33 मेको आ कोठा, आ थाम नु आ पिंडी अर्को खोदेंशो बाक्तेक्म। मेको आ पिंडी आ एर ओंथ नेल्ल झेल बाक्तेक्म। मेको ५० कुबीत लाइश्शो नु २५ कुबीत ब्रेम्शो बाक्त। 34 मेको आ पिंडी लाडगा गे कोव्रशो बाक्त। मिनु मेको

आ थामपुकीम खजूर रवा आ बुटा आष्यो बाक्तेक्म। मिनु मेकेर लचा कली ८ ओटा थेंका बाक्तेक्म।

## आगा लाडगा डा उत्तर डा लाच्यो

35 मिनु मेकोम आं कली उत्तर गे डा ठेयब लाच्यो रे पा आगा डा लाडगाम चाक्ती। मिनु मेको ठेयब लाच्यो यो अर्को ठेयब लाच्यो खोदेंशो बाक्त। 36 मेको आ कोठा, आ थाम नु आ पिंडी अरु खोदेंशो बाक्तेक्म। मेको आ पिंडी आ एर ओंथ नेल्ल झेल बाक्तेक्म। मेको ५० कुबीत लाइश्शो नु २५ कुबीत ब्रेम्शो बाक्त। 37 मेको आ पिंडी लाडगा गे कोव्रशो बाक्त। मिनु मेको आ थामपुकीम खजूर रवा आ बुटा आष्यो बाक्तेक्म। मिनु मेकेर लचा कली ८ ओटा थेंका बाक्तेक्म।

## चोशा चढ़ेतीक श्ये क्येतीक कोठा

38 पिंडी आ नेक्था लाच्यो पाइश्शो कोठा का बाक्त। मेकेर चोशा चढ़ेतीक ब्वाक्कुम मुरबाक्तेक्म। 39 आगा ओव्रतीक लाच्यो आ पिंडीम का पटटी गे टेबल निक्शी बाक्ताक्स। अर्को पटटी गे यो टेबल निक्शी बाक्ताक्स। मेकेर चोशा चढ़ेतीके, पाप आ पर्बम चढ़ेतीके नु दोस आ पर्बम चढ़ेतीके क्योरचा माल्बाक्तेक्म। 40 पूर्ब डा ओव्रतीक लां डा पिंडी आ डोंइती टेबल निक्शी बाक्ताक्स। मिनु अर्को पटटी डा पिंडी आ डोंइती यो टेबल निक्शी बाक्ताक्स। 41 मोपा आगा ओव्रतीक का पटटी ४ ओटा टेबल नु अर्को पटटी ४ ओटा टेबल बाक्तेक्म। मिनु नेल्ल पा ८ ओटा टेबल बाक्तेक्म। मेको टेबल तार चढ़ेतीक क्योरचा माल्तेक्म। 42 मेकेर यो चोशा चढ़ेतीक कली चेश्यो फुल्लु के ४ ओटा टेबल बाक्तेक्म। मेको कुबीत का नु आधा लाइश्शो नु कुबीत का नु आधा ब्रेम्शो बाक्तेक्म। मेको कुबीत का ग्येत्थ लाइश्शो बाक्तेक्म। मेको आन तारी चोशा चढ़ेतीक नु अरु चढ़ेतीक क्योरचा कली मार मार माल्मा, मेको नेल्ल बाक्त। *कुबीत का आधा मिटर खोदेंशो बाक्ब।* 43 मिनु श्ये क्युक्तीक अडगुल का ब्रेम्शो ओव्रतीक आ एर ओंथ क्युक्शो बाक्तेक्म। मेकेर चढ़ेतीक श्ये वोइक्वा कली टेबल बाक्तेक्म।

## चढ़ेब आन कोठा

44 मिनु आगा डा ठेयब लाच्यो आ लाडगा गे कोठा निक्शी बाक्ताक्स। कोठा का उत्तर गे डा ठेयब लाच्यो आ लाडगाम बाक्त। मेको दक्खिन गे कोव्रशो बाक्त। अर्को कोठा दक्खिन डा ठेयब लाच्यो आ लाडगा गे बाक्त। मेको उत्तर गे कोव्रशो बाक्त। 45 मिनु मेकोम आं कली “एको दक्खिन गे कोव्रशो कोठा चढ़ेब आन कली बाक्ब। मेको परमप्रभु यावे आ खिंम गेय पाइब आन के बाक्ब। 46 मिनु मेको उत्तर गे कोव्रशो कोठा चहिं मेको चढ़ेतीकेम गेय पाइब आन कली बाक्ब। मेकेर सादोक आ चच युड बाक्नीम। मेको लेवी आन दाते डा मेकोपुकी ला परमप्रभु यावे आ डोंइती जाक्ने चाप्नीम” देंत। *इजीकीएल ४३:१९; इजीकीएल ४४:१५; इजीकीएल ४८:११; १राजा १:८, ३९; १इतिहास ५:३४-४१* 47 मिनु मेकोम मेको लाडगा पुक्तु। मेको सहे का कुबीत लाइश्शो नु सहे का कुबीत ब्रेम्शो बाक्त। मेको ४ पाटे बाक्त। मिनु मेको चढ़ेतीक परमप्रभु यावे आ खिं आ डोंइती बाक्त। *इजीकीएल ४३:१३*

## परमप्रभु यावे आ खिं

48 मिनु मेकोम आं कली परमप्रभु यावे आ खिं डा पिंडीम चाक्ती। मिनु मेकोम पिंडी डा थामपुकी पुक्तु। मेको निम्फा गे ५ कुबीत ब्रेम्शो बाक्तेक्म। आगा ओव्रतीक ठेयब लाच्यो ३ कुबीत ब्रेम्शो बाक्त। मिनु मेको आ आगा डा गारो ३ कुबीत ब्रेम्शो बाक्ताक्स। 49 मेको पिंडी २० कुबीत लाइश्शो नु १२ कुबीत ब्रेम्शो बाक्त। मेकेर लचा कली १० ओटा थेंका बाक्तेक्म। मिनु निम्फा गे थाम का का बाक्त। *१राजा ७:२१*

## परमप्रभु आ खिं पुक्शो

41 मिनु नोले मेकोम आं कली परमप्रभु यावे आ खिं आ नेक्था चाक्ती। मिनु मेको आ लाप्चो निक्शी पटटी डा थाम पुक्तु। मेको ६ कुबीत ब्रेम्शो बाक्तेक्म। *कुबीत का ०.५ मिटर बाक्ब।* 2 आगा ओव्रतीक १० कुबीत ब्रेम्शो बाक्त। मिनु मेको आ एर ओंथ गे डा गारो निक्शी ५ कुबीत ब्रेम्शो बाक्ताक्से। मिनु मेकोम परमप्रभु यावे आ खिं पुक्गानु, मेको ४० कुबीत लाइश्शो नु २० कुबीत ब्रेम्शो बाक्त। 3 मिनु मेको आगा डा कोठा ओव्रत। मिनु मेको आ आगा ओव्रतीक लाप्चो डा थाम पुक्गानु, मेको कुबीत निक्शी ब्रेम्शो बाक्ताक्स। मेको आगा ओव्रतीक ६ कुबीत ब्रेम्शो बाक्त। मेको आगा ओव्रतीक आ एर ओंथ डा गारो निम्फा ७ कुबीत ब्रेम्शो बाक्ताक्स। 4 मिनु मेकोम आगा डा कोठा पुक्गानु, आ लाइश्शो २० कुबीत नु आ ब्रेम्शो २० कुबीत बाक्त। मिनु मेकोमी आं कली “एको चहिं नेल्ल क्येडा चोव्रखो बाक्तीके बाक्ब” देंत।

## गारोम सेल्शो कोठापुकी

5 मिनु नोले मेकोम परमप्रभु यावे आ खिं डा गारो पुक्तु। मेको ६ कुबीत थांइशो बाक्त। मिनु मेको खिं आ लाडगा डा कोठा ४ कुबीत ब्रेम्शो बाक्तेक्म। मेको खिं आ एर ओंथ नेल्ल मोर्देशो पा सेल्शो बाक्तेक्म। 6 मेको लाडगा डा कोठा तला सां पा सेल्शो बाक्तेक्म। का आ तारी अर्को पा सेल्शो बाक्त। मिनु मेको तला नेल्लेमी ३०, ३० कोठा बाक्तेक्म। मिनु मेको परमप्रभु यावे आ खिं आ एर ओंथ नेल्ल डा गारोम कोठा तिक्चा कली तिक्तीक सेल्शो बाक्तेक्म। मेको तिक्शोपुकी परमप्रभु यावे आ खिं आ आगा मओव्रचा डा पा सेल्शो बाक्तेक्म। 7 मिनु परमप्रभु यावे आ खिं आ एर ओंथ डा कोठा ओव्रतीक लां आगा डा तला क्येडा आ तार डा तला ठेयब बाक्त। मुरपुकी उइ रे इर सम्म लचा कली दाते डा लतीक रे लचा माल्बाक्तेक्म। मेकेर एर ओंथ क्रेसी सेल्शो बाक्तेक्म। 8 मेको नोले गो परमप्रभु यावे आ खिं आ एर ओंथ नेल्ल रे पा पेट्टी सेल्शो बाक्त। मेको लाडगा डा कोठा आन जग ६ कुबीत ग्येथ लाइश्शो बाक्तेक्म। 9 मेको कोठा आन लाडगा गे डा गारो ५ कुबीत ब्रेम्शो बाक्त। मेको परमप्रभु यावे आ खिं डा कोठा *इजीकीएल ४२:१-३* 10 नु गारो डा कोठा आन दातेमी २० कुबीत ब्रेम्शो लां बाक्त। मेको खिं नेल्ल एर ओंथ मोर्देशो बाक्त। 11 मेको कोठा आन ओव्रतीक ब्रेम्शो लां आगाम लाम्तेक्म। लाप्चो का उत्तर गे बाक्त, अर्को दक्खिन गे बाक्त। मेको आन दाते डा श्येथ लां ५ कुबीत ब्रेम्शो बाक्त। जग आ एर ओंथ नेल्ल ५ कुबीत ब्रेम्शो बाक्तेक्म।

12 मेको परमप्रभु यावे आ खिं आ लाडगा गे हिरशो पच्छिम गे डा खिं ७० कुबीत ब्रेम्शो बाक्त। मेको खिं आ एर ओंथ डा गारो ५ कुबीत थांइशो बाक्त। मिनु मेको आ लाइश्शो ९० कुबीत बाक्त। *कुबीत का ०.५ मिटर बाक्ब।*

13 मिनु परमप्रभु यावे आ खिं पुक्गानु, मेको सहे का कुबीत लाइश्शो नु सहे का कुबीत ब्रेम्शो बाक्त। आ आगा डा लाडगा नु खिं आ गारो नु मेको आ गारो सहे का कुबीत ब्रेम्शो बाक्त। 14 परमप्रभु यावे आ खिं आ पूर्व गे डा लाडगा यो सहे का कुबीत बाक्त।

15 मिनु नोले मेकोमी परमप्रभु यावे आ खिं डा लाडगा पच्छिम गे पुक्गानु, निम्फा पटटी डा लतीक लां सहे का कुबीत बाक्त। मिनु परमप्रभु यावे आ खिं, आ चोव्रखो बाक्तीके नु आ डोंइती डा पिंडी डा गारो नेल्ल शीम क्येष्शो बाक्तेक्म। 16 मिनु मेको सांफा आन एर ओंथ नेल्ल गे झेल बाक्तेक्म। लाप्चो गे कोव्रचा कली नेल्ल शीम क्येष्शो बाक्त। उइ खप रे झेल सम्म शीम क्येष्शो बाक्तेक्म। 17 लाप्चो आ इर गे, चोव्रखो बाक्तीके नु परमप्रभु यावे आ बाक्तीके आगाम लतीक लाप्चोम फारतीक वा बाक्तेक्म। मिनु खिं आ एर ओंथ डा गारो, चोव्रखो बाक्तीके नु खिं डा ठेयब कोठा नेल्ल बुटा आप्शो बाक्तेक्म। 18 मेकेर करूब नु खजूर रवा आन बुटा आप्शो बाक्तेक्म। मेको करूब का खजूर रवा का नु करूब का पा आप्शो बाक्त। मेको करूब नेल्ल आन के कुल निक्शी बाक्तेक्म। 19 मेको करूब आ मुर आ कुल खजूर रवा का गे कोव्रशो, नु अर्को ठिटा गुप्स आ कुल खोर्देशो

अर्को खजूर रवा गे कोव्रशो बाक्त। मेको परमप्रभु यावे आ खिं डा गारो नेल्लेम मुशा बुटा आप्शो बाक्तेक्म। 20 उइ खप रे लाप्चो इर सम्म करूब नु खजूर रवा आन बुटा मुशा आप्शो बाक्तेक्म।

21 परमप्रभु यावे आ खिं डा ओव्रतीक डा लाप्चो डा शी दारपाइक्चा कली ४ ओटा खोष्शो बाक्त। मिनु चोव्रखो बाक्तीके आ डोंइती यो मेको खोर्देशो पा बाक्त। मिनु लाडगा डा चोव्रखो बाक्तीक ओव्रतीक लाप्चो डा शी नेल्ल उइक्थ उइक्थ पा ४ पाटे बाक्तेक्म। मिनु थम चोव्रखो बाक्तीक आ डोंइती गे डा लाप्चो डा शी यो मोर्देशो बाक्तेक्म। *प्रस्थान २५:२३-३०; प्रस्थान ४०:२२-२३* 22 मेकेर शी के चढ़ेतीक का बाक्त। मेको कुबीत सां ग्येथ लाइश्शो, कुबीत निक्शी पित्थ लाइश्शो नु कुबीत निक्शी ब्रेम्शो बाक्त। मेको आ सुर, मेको आ तार नु आ एर ओंथ नेल्ल शी के बाक्त। मिनु मेकोमी आं कली “एको टेबल परमप्रभु यावे आ डोंइती बाक्ब” देंत। 23 परमप्रभु यावे आ खिं नु आ चोव्रखो बाक्तीक निक्शी के लाप्चो निक्शी बाक्तेक्म। 24 मेको लाप्चो आन के चोक्तीक निक्शी पाइश्शो बाक्तेक्म। 25 मिनु परमप्रभु यावे आ खिं डा लाप्चोम गारो डा खोर्देशो पा करूब नु खजूर रवा आन बुटा मुशो बाक्तेक्म। पिंडी आ डोंइतीम शी के खाट बाक्शो बाक्त। 26 पिंडी डा गारो आ निम्फा पटटी खजूर रवा आ बुटा मुशा आप्शो बाक्तेक्म।

## चढ़ेब आन कोठा

42 मिनु मेकोमी आं कली लाडगा गे डा लाडगा उत्तर गे चाक्ती। मिनु मेकोमी आं कली परमप्रभु यावे आ खिं नु उत्तर गे डा खिं आ आइक्ची डा कोठा गे लाइक्ती। *इजीकीएल ४०:१७; इजीकीएल ४१:९, १०, १३* 2 मेको खिं उत्तर गे सहे का कुबीत लाइश्शो नु ५० कुबीत ब्रेम्शो बाक्त। *कुबीत का ०.५ मिटर बाक्ब।* 3 आगा डा लाडगा २० कुबीत बाक्त। लाडगा गे डा लाडगा डा फुल्लु ब्रशो लां गे कोव्रशो कोठा तारी अर्को तला सां बाक्तेक्म। 4 कोठा आन डोंइती आन आगा गे १० कुबीत ब्रेम्शो नु सहे का कुबीत लाइश्शो लां का बाक्त। मेको आन लाप्चो उत्तर गे कोव्रशो बाक्तेक्म। *कुबीत का ०.५ मिटर बाक्ब।* 5 आ तार डा कोठा ठेयब लां बाक्तीके आगा नु दाते डा कोठा आन क्येडा आइक्च बाक्तेक्म। 6 मारदे हना मेको तला सां बाक्तेक्म। मेको आन के लाडगा डा थाम खोर्देशो पा थाम मबाक्म। मोपतीके आइदी डा नु दाते डा कोठा आन क्येडा, मेको आ तार डा कोठा आइक्च बाक्तेक्म। 7 मेकेर कोठा आन डोंइती गारो का बाक्त। मेको गारो ५० कुबीत लाइश्शो बाक्त। 8 लाडगा गे डा लाडगा डा कोठा आन लहर ५० कुबीत लाइश्शो बाक्त। तन्न परमप्रभु यावे आ खिं आ आइक्चा डा सहे का कुबीत लाइश्शो बाक्त। 9 पूर्व रे आगा डा कोठापुकी ओव्रचा कली लां का बाक्त। मोपा लाडगा गे डा लाडगा ओव्रने चाप्शो बाक्तेक्म। 10 मेको लां आ ब्रेम्शो गारो सम्म थिशो बाक्त। परमप्रभु यावे आ खिं आ आइक्ची दक्खिन गे यो कोठा बाक्तेक्म। 11 मेको आन डोंइती गाक्तीक लां का बाक्त। मेको कोठा उत्तर डा खोर्देशो बाक्तेक्म। मेको आन खोर्देशो लाइश्शो नु ब्रेम्शो बाक्तेक्म। लाडगा लतीके लाप्चो नु मेको आ एर ओंथ नेल्ल खाल का डा बाक्तेक्म। 12 दक्खिन डा कोठा ओव्रतीक लां आ डोंइती अर्को लां ब्राशो बाक्त। मेको लां पूर्व गे लत।

13 मिनु मेकोमी आं कली “परमप्रभु यावे आ खिं डा श्येथ बाक्तीके आइक्ची उत्तर गे नु दक्खिन गे डा कोठापुकी चढ़ेब आन कोठा बाक्नीम। मेकेर परमप्रभु यावे आ डोंइती बाक्शो चढ़ेबपुकीमी नेल्ल क्येडा चोव्रखो चढ़ेशो ब्वाइनीम। मेकेर नेल्ल क्येडा चोव्रखो चढ़ेशो, अन्न चढ़ेशो, पाप आ पर्वम चढ़ेशो नु दोस आ पर्वम चढ़ेशो वोइक्नीम। मारदे हना मेको चोव्रखो बाक्तीके बाक्ब। 14 मिनु चढ़ेबपुकी चोव्रखो बाक्तीकेम ओव्रमानु, आन फेक्शो गेय पतीक वा मप्रुइक्थु, लाडगा गूचा मडुन्नीम। मारदे हना मेको चोव्रखो वा बाक्नीम। मेकोपुकी मुर आन दातेम लचा क्येडा डोंइती अर्को वा फेक्चा माल्नीम” देंत। *इजीकीएल ४४:१९*

## परमप्रभु आ खिं पुक्शो

15 मिनु मेकोम परमप्रभु यावे आ खिं आगा पुक्ने थुम्तु। मिनु आं कली पूर्व डा लाचो रे पा लाडगा गुंडताक्यी। मिनु परमप्रभु यावे आ खिं आ एर ओंथ लाडगा गे डा लाडगा नेल्ल पुक्तु। 16 मेकोमी आ पुक्तीकेम पूर्व गे पुक्तु। मेको ५ सहे कुबीत बाक्त। 17 मिनु मेकोम आ पुक्तीकेमी उत्तर गे पुक्तु। मेको यो ५ सहे कुबीत बाक्त। 18 मिनु मेकोम आ पुक्तीकेमी दक्खिन गे पुक्तु। मेको यो ५ सहे कुबीत बाक्त। 19 मिनु मेकोम आ पुक्तीकेमी पच्छिम गे पुक्तु। मेको यो ५ सहे कुबीत बाक्त। 20 मोपा मेकोमी पूर्व, उत्तर, दक्खिन नु पच्छिम नेल्ल पुक्तु। मेको आ एर ओंथ गारो का बाक्त। मेको ५ सहे कुबीत लाडशो नु ५ सहे कुबीत ब्रेमशो बाक्त। परमप्रभु यावे आ बाक्तीके नु मुर आन बाक्तीके तिल्चा कली मोदेशो पशो बाक्त।

## परमप्रभु आ छेडछेड लेशो

43 मिनु मेकोमी आं कली पूर्व डा लाचो आ नेक्था चाक्ती। 2 मिनु इस्राएली आन परमप्रभु आ छेडछेड पूर्व रे जाक्त। मेको आ रेयके ठेयब समुन्द्र आ रेयके खोदेशो नेंसाक्व। मिनु रागी नेल्ल मेको आ छेडछेडम हाम्सो दुम्त। इजीकीएल १:२८ 3 मेको आं डोंइती तशो परमप्रभु यावेमी सहर कली खतम सेल्ची ना जाक्मेनु, कोंइतीक खोदेशो बाक्त। मेको केबार खोला आ नेक्थाम तशो कोंइतीके खोदेशो बाक्त। मिनु गो खुम्की पा बाप्ती। इजीकीएल ८:-११:-; इजीकीएल १:- 4 मिनु परमप्रभु यावे आ छेडछेड मेको पूर्व डा लाचो रे पा आ खिं ओव्रत। इजीकीएल १०:१९ 5 मिनु सोक्तीम आं कली क्युक्शा, आगा डा लाडगाम ओंइताक्यी। मिनु परमप्रभु यावे आ खिं छेडछेडम ब्रीत। इजीकीएल १:२८; प्रस्थान ४०:३४; १राजा ८:१०-११

6 मिनु मेको मुर आं नेक्था राप्था बाक्मेनु, गो परमप्रभु यावे आ खिं रे आं कली लोव्र पशो नेंता। 7 मार लोव्र पापु देंशा हना "ए मुर, एको दा आं ठेयब नित्तीक बाक्ब। मिनु एको आं खोइल नाइक्तीक यो बाक्ब। गो इस्राएल डा मुर आन दातेम गेना हना यो बाक्नुड। मुल रे इस्राएल आ खिं डा मुरुम आं नें कली मरिश्शो मसेल्नीम। मेको नु आन पिपम आन मूर्ति पूजा नु आन बेक्शो पिप आन पर्वम पतीके आं नें मरिश्शो मसेल्नीम। भजन संग्रह १३२:७-८ 8 मेकोपुकीम आं खिं आ नेक्था आन खिं सेल्लेक्म। आं लाचो आ डोंइती आन लाचो सेल्लेक्म। मिनु गो नु मेको आन दातेमी गारो का ला लीत। मिनु मेको आन ग्रांग्रा दिशो गेयम, आं नें ग्रांग्रा दिशो सेल्लेक्म। मोपतीके गो गाइशा मेको आन कली साइक्तामी। इजीकीएल ८:७-१८ 9 मुल मेकोपुकीम आन मूर्ति पूजा पतीक प्रोन्मेक्ल। मेको आन बेक्शो पिप आन पर्वम पतीके प्रोन्मेक्ल। मिनु गो मेको आन दातेमी गेना हना यो बाक्नुड।

10 ए मुर, इस्राएल आ खिं डा मुर आन कली आं खिं आ पर्वम शेंदीमी। मिनु मेको दोपा सेल्सीशो बाक्मे, मेको पुक्पतो। मिनु मेको आन मरिश्शो पशो आ पर्वम मुने दोक्मल। इजीकीएल ३६:३२ 11 मिनु मेकोपुकीम आन पशो आ पर्वम मुने पाप्तेक्म हना, मेको आन कली आं खिं दोपा सेल्सीशो बाक्मे, मेको तुइक्पतो। मेको आ लाडगा लतीके, खिंडगा ओव्रतीके, मेको दोदेशो तांडसीबा, आं देंशो पतीक लोव्र, आं अरेशो लोव्र नु शेंतीक नेल्ले मेको आन डोंइती ब्रेक्तो। मोपा मेको नेल्ले अरेशो होस पा टीब दुम्मल। 12 परमप्रभु यावे आ खिं आ पर्वम आ अरेशो लोव्र मार बाक्त देंशा हना, मेको डांडा आ एर ओंथ नेल्ल आं के बाक्तीक बाक्ब। मेको परमप्रभु यावे आ खिं आ पर्वम आ अरेशो लोव्र बाक्ब" देंत।

## चढ़ेतीक

13 चढ़ेतीके गिश ठेयब बाक्त देंशा हना, मेको नेल्ल पा कुबीतम पुक्शोनु, कुबीत का नु गुड का ब्रेमशो बाक्त। मेको आ एर ओंथ दोशो जग कुबीत का लुक्च नु कुबीत का ब्रेमशो बाक्त। मिनु आ एर ओंथ नेल्ल डा सुर बित्ता का ब्रेमशो बाक्त। मिनु मेको चढ़ेतीक आ राप्तीके दोदेशो बाक्त देंशा हना, कुबीत का ०.५ मिटर बाक्ब। इजीकीएल ४०:४७; प्रस्थान ४७:१-८ 14 मेको चढ़ेतीक खपीम बाक्शो जग रे आइदी डा सुर सम्म कुबीत निक्शी लाडशो

नु कुबीत का ब्रेमशो बाक्त। मेको आ आइक्च सुर रे ठेयब सुर सम्म ४ कुबीत लाडशो नु कुबीत का ब्रेमशो बाक्त। 15 मिनु मेको चढ़ेतीक चोतीक ४ कुबीत ग्येत्थ लाडशो बाक्त। मेकेर रे मेको आ ४ सुर रे ४ ओटा ग्राव्र सेल्शो बाक्तेक्म। 16 मेको चढ़ेतीक थोव्रक चोतीक १२ कुबीत लाडशो नु १२ कुबीत ब्रेमशो, ४ पाटे बाक्त। 17 मेको चढ़ेतीक आ ठेयब सुर १४ कुबीत लाडशो नु १४ कुबीत ब्रेमशो बाक्त। मेको ४ पाटे बाक्त। मेको आ सुर एर ओंथ आधा कुबीत बाक्त। मिनु आ एर ओंथ दोशो जग कुबीत का ब्रेमशो बाक्त। मेको चढ़ेतीक आ क्रेसी पूर्व गे कोव्रशो बाक्त।

## चढ़ेतीक गेय पचा गोशो

18 मिनु मेकोम आं कली "ए मुर, परमप्रभु, परमप्रभु यावेमी 'मेको चढ़ेतीके सेल्ले थुम्शो नाक्ती चोशा चढ़ेतीके चढ़ेचा नु हुश ब्रुइक्चा कली मेको चढ़ेतीके आ पर्वम पचा माल्लो गेय मार बाक्त देंशा हना, 19 गेपुकीम आं कली चढ़ेब सादोक आ खिं डा लेवी आन कली पाप आ पर्वम चढ़ेचा कली बोहोर का गेचा माल्लीनी। मेकोपुकी आं गेय पचा कली आं नेक्था जाक्नीम' दे परमप्रभु, परमप्रभु यावेमी देंशो बाक्ब। इजीकीएल ४०:४६; लेवी ४:१-१२ 20 मेकोपुकीमी मेको आ हुश इक्का चाक्शा चढ़ेतीक आ ४ ओटा ग्राव्र नु आइक्था डा सुर आन ४ कुना नेल्लेम खेक्तमेक्ल। मोपा गे चढ़ेतीक ग्रांग्रा मदिशो सेल्शा पाप क्याम्तीक गेय पचा माल्लीनी। 21 मिनु नोले गेपुकीम मेको पाप आ पर्वम चढ़ेतीक बोहोर चाक्शा, परमप्रभु यावे आ खिं डा देंशो बाक्तीकेम चोने।

22 मिनु गेपुकीम आ दीसा नाक्ती मारेइ मदुम्शो बोका का पाप आ पर्वम चढ़ेने। गेपुकीम बोहोर चढ़ेशोम चढ़ेतीक ग्रांग्रा मदिशो सेल्शो खोदेशो पा मेकोम यो चढ़ेतीक कली ग्रांग्रा मदिशो सेलल। 23 मिनु गेपुकीम चढ़ेतीक नेल्ल ग्रांग्रा मदिशो सेल्ले थुम्तीनी हना, मारेइ मदुम्शो बोहोर का नु बगाल रे मारेइ मदुम्शो सांड का चढ़ेने। 24 गेपुकीम मेको आस कली परमप्रभु यावे आ डोंइती वोइक्चा माल्लीनी। मिनु चढ़ेबपुकीम मेको तारी हिक्सी वोइश्शा, परमप्रभु यावे आ डोंइती चोशा चढ़ेतीक सेल्शा चढ़ेचा माल्लीम। 25 गेपुकीम पाप आ पर्वम चढ़ेचा कली ७ नाक्त सम्म नाक्त किंत किंत क्यारश का, बोहोर का नु बगाल रे मारेइ मदुम्शो सांड का चाक्चा माल्लीनी। 26 मिनु मेकोपुकी ७ नाक्त सम्म चढ़ेतीक कली पाप क्याम्तीक गेय पचा नु ग्रांग्रा मदिशो सेल्शा माल्लीम। मो पशा मेको चढ़ेतीके चढ़ेचा कली जिम्मा गेचा माल्लीम। 27 मिनु मेको नाक्त नुम्मेनु, ८ नाक्त रे चढ़ेबपुकीम इन चोशा चढ़ेतीक नु दुशा बाक्चा आ पर्वम चढ़ेतीक चढ़ेचा माल्लीम। मिनु गो इन कली ब्राइनुड" दे परमप्रभु, परमप्रभु यावेमी देंत।

## चोक्शो पूर्व डा ठेयब लाचो

44 मिनु नोले मेकोमी आं कली परमप्रभु यावे आ खिं डा पूर्व गे कोव्रशो लाडगा गे डा लाचोम चाक्ती। मिनु मेको चोक्शो बाक्त। इजीकीएल ४३:४ 2 मिनु परमप्रभु यावेमी आं कली "एको लाचो चोक्स डा चोक्स बाक्चा माल्ल। एको रोकचा मदुम्ब। मेकेर रे सुइ ओव्रचा मताइनीम। मारदे हना परमप्रभु यावे, इस्राएली आन परमप्रभु एकेर रे ओव्रशो बाक्ब। मोपतीके एको चोक्स डा चोक्स बाक्चा माल्ल। इजीकीएल ४६:२ 3 सासन पाइब ला एको लाचो आगा डा बाक्तीक परमप्रभु यावे आ डोंइती जचा कली लने चाप्ब। मेको एको लाचो आ पिंडी रे ओव्रचा माल्ल। मिनु मेको खाल का डा लां रे लेत्चा माल्ल" देंत।

## सासन पाइब, लेवी नु चढ़ेब

4 मिनु नोले मेकोमी आं कली उत्तर गे डा ठेयब लाचो रे पा परमप्रभु यावे आ खिं आ डोंइती चाक्ती। मिनु मेको कोव्रडुनु, परमप्रभु यावे आ छेडछेडम मेको आ खिं ब्रीशो बाक्त। मिनु गो खुम्की पा बाप्ती। 5 मिनु परमप्रभु यावेम आं कली "ए मुर, आं नेक्था जाक्शा, कोव्रडो। आं खिं आ पर्वम पचा माल्लो गेय नु मेको आ पर्वम अरेशो लोव्र नेल्ल इ नोफा दाइश्शा रिश्शो पा नेनो। सु सु आं खिं ओव्रचा ताइनीमी नु सु सु मताइनीम, दे रिश्शो पा कोव्रशा अरेवो। 6 मेको मटीब मुर, इस्राएल आ खिं डा मुर आन कली परमप्रभु,

परमप्रभु यावेमी इन कली 'ए इस्राएल आ खिं डा मुरपुकी, गो इन ग्रांघ्रा दिशो गेय नेल्ल प्रोनीन। 7 गेपुकी आं कली आं जचा थोव्रक बॉसो नु हुश चढेची ना आन थुं नु रांम खोइक्तीक चिनु मख्रोइश्शो अर्को रागी डा मुर आन कली आं बाक्तीकेम ओव्रचा गेतीनी। मोपा गे आं खिं, मुर आ खिं खोदेंशो सेल्लतीनी। मिनु इन ग्रांघ्रा दिशो गेयम आं कबल प्रॉइतीनी। यसैया ५२:१; येरमीया ९:२५ 8 गेपुकीम आं कली चढेशो आ पबर्म होस मपनी। आं बाक्तीकेम इन गेय पचा कली गे अर्को रागी डा मुर आन कली वोइश्शा आं खिं कोव्रब सेल्लतीनी' " देंत।

9 मिनु परमप्रभु, परमप्रभु यावेमी "इस्राएली आन दातेम बाक्शो अर्को रागी डा आन थुं नु रांम खोइक्तीक चिनु मख्रोइश्शो मुर आं बाक्तीकेम ओव्रचा मताइनीम। 10 तन्न इस्राएली हेंथे गाक्मानु, लेवीपुकी हेंथे गाक्शा, आं कली प्रॉइशा, आन मूर्ति कली पूजा पशो बाक्तेक्म। मेकोपुकीम आन पाप आ सजाइ तचा माल्नीम। 11 मिनु मेको लेवीपुकी आं बाक्तीकेम गेय पचा माल्नीम। मिनु आं खिं डा लाप्चो खाल पाइब दुम्चा माल्नीम। मिनु आं खिम गेय पचा माल्नीम। मेकोपुकीम मुर आन पबर्म चोशा चढेतीक क्योरचा माल्नीम। मेकोपुकीम मुर आन कली वारच पा गेय पचा माल्नीम। 12 तन्न लेवीपुकीम मुर आन कली आन मूर्ति पूजा पतीकेम वारच पाप्तेक्म। मोपा मेकोपुकी इस्राएल आ खिं डा मुर आन कली मरिश्शो पपाइक्तेक्म। मोपातीके मेकोपुकी सजाइ तचा माल्नीम, दे कसम जाता। 13 मेकोपुकी चढेब आ गेय पचा कली आं नेक्था जाक्चा मताइनीम। मेकोपुकी तेकोइ आं कली चढेशो आ नेक्था जाक्चा मताइनीम। मारदे हना मेको चढेशो नेल्ल क्येडा चोव्रखो बाक्ब। तन्न मेको मुने दोक्चा माल्नीम। मिनु मेकोपुकीम आन मूर्ति पूजा पशो डा सजाइ तचा माल्नीम। 14 मो हना यो गो मेको आन कली आं खिं कली कोव्रशा नु मार मार पचा माल्शो गेय पपाइक्नुड।

#### चढेब आन गेय

15 तन्न चढेब लेवी आ थर डा सादोक आ चच युइ, इस्राएली आं रे हेंथे गाक्तेक्म हना यो, मेकोपुकीम आं खिं डा पचा माल्शो गेय रिश्शो पा कोव्रतेक्म। मेकोपुकी आं गेय पचा कली आं नेक्था जाक्चा ताइनीम। मेकोपुकी आं डोंइती बॉसो नु हुश चढेथ जाक्चा ताइनीम। इजीकीएल ४०:४६ 16 मेकोपुकी ला आं बाक्तीकेम ओव्रने चाप्नीम। मिनु आं टेबल आ नेक्था जाक्शा, आं गेय पचा ताइनीम। 17 मेकोपुकी आगा डा लाडगा डा लाप्चो रे ओव्रमानु, सुती के वा फेक्शो बाक्चा माल्नीम। मेकोपुकीम आगा डा लाडगा डा लाप्चो नु आं खिं आगाम गेय पामेनु, ऊन के मारेइ वा फेक्चा मदुम्नीम। लेवी १६:४ 18 मेकोपुकीम पियाम सुती के गुप्तीक गुप्चा माल्नीम। मिनु सुती के आगाम फेक्तीक वा फेक्चा माल्नीम। मेकोपुकीम गल शाइक्ब तेकोइ वा फेक्चा मदुम्नीम। 19 मेकोपुकी लाडगा गे डा लाडगा, मुर आन बाक्तीक लमानु, आगाम गेय पामेनु, फेक्शो वा प्रुइक्चा माल्नीम। मिनु मेको चोव्रखो कोठाम वोइश्शा, अर्को वा फेक्चा माल्नीम। मोपा परमप्रभु आ थोव्रक नु मुर आ थोव्रक मखाल्दमेक्ल। इजीकीएल ४२:१४ 20 मेकोपुकीम आन चां प्रेक्चा मदुम्नीम। मेको शुश लाइश्शो दुम्चा गेचा यो मदुम्ब। मेकोपुकीम आन चां खोइक्चा ला दुम्नीम। लेवी १९:२७ 21 चढेबपुकीम आगा डा लाडगा लमानु, अडगुर शांबु तूचा मदुम्नीम। लेवी १०:९ 22 मेको चढेबपुकीमी आन वोंइश बेक्शो नु प्रॉइचा पुंइसीशो मीश मुर ग्युंवे पचा मदुम्नीम। मेकोपुकीम इस्राएल आ खिं मुर रे जरमेशो कन्ने मीश आल नु आन वोंइश बेक्शो चढेब आन मीश कली ला ग्युंवे पने चाप्नीम। 23 मेकोपुकीम आं मुर आन कली आं मार मार नु मुर आन मार मार खाल का डा मबाक्नीम, दे शेंचा माल्नीम। मिनु मेको आन कली ग्रांघ्रा दिशो नु मदिशो थोव्रक खाल का डा मबाक्नीम, दे कोंइचा माल्नीम। इजीकीएल २२:२६; लेवी १०:१० 24 मारेइ जितीक खेतीक दुम्मेनु, चढेबपुकीमीन निसाफ पाइब आन गेय पचा माल्नीम। मिनु आं निसाफ पतीक लोव्र खोदेंशो पा मेकोपुकीम निसाफ पचा माल्नीम। मेकोपुकीम चाड मानेचा आ पबर्म आं अरेशो नु आं फुल्लुम मुशा ब्रेक्शो लोव्र खोदेंशो पा पचा माल्नीम। मेकोपुकीम आं नाइक्तीक नाक्ती मानेचा माल्नीम। ब्यवस्था १७:८-९ 25 मेकोपुकीम बेक्शो मुर आ नेक्था लशा, आंम कली ग्रांघ्रा दिशो सेल्लीचा

मदुम्नीम। मो हना यो आन आम आफ, तमी तौ, आन लोक्ब नु ग्युंवे मपशो आंम समी आन बेक्शो रं आ नेक्था लशा ग्रांघ्रा दिशो दुम्मे चाप्नीम। गन्ती १९:११; लेवी २१:१-४ 26 मिनु मेको ग्रांघ्रा मदिशो दुम्मा नोले, ७ नाक्त सम्म रिम्चा माल्नीम। 27 मेकोपुकी आं खिं डा आगा डा लाडगा गेय पचा कली ओव्रतीक नाक्त मेकोपुकीमी पाप आ पबर्म चढेचा माल्नीम" दे परमप्रभु, परमप्रभु यावेमी देंत।

28 मिनु परमप्रभुमी "चढेब आन शॉप गो नड। मेको आन कली इस्राएलम रू गेचा मदुम्ब। गो मेको आन शॉप नड। गन्ती १८:२० 29 मेकोपुकीम अन्न चढेशो, पाप आ पबर्म चढेशो नु दोस आ पबर्म चढेशो जचा माल्नीम। इस्राएलम परमप्रभु यावे कली गेचा माल्शो थोव्रक नेल्ल मेको आन के दुम्ब। गन्ती १८:१४ 30 डोंइती मीशो फल आन नेल्ल क्येडा रिश्शो फल नु इन चढेशो मारेइ मारेइ नेल्ल चढेब आन केन दुम्ब। गे इन खिम आसीक तचा कली इन निशो फस नेल्ल क्येडा डोंइती डा डल्ला यो चढेब आन कली गेचा माल्नीनी। प्रस्थान २५:२; गन्ती १५:२०; नेहम्याह १०:३८ 31 चढेबपुकीम आंम बेक्शो चिक्ब नु बी ब्यफ, क्यारश भेडा कि जन्तुपुकीम साइश्शो, मारेइ ब्वचा मदुम्नीम" दे परमप्रभु यावेमी देंत। लेवी २२:८

#### परमप्रभु कली रू गेशो

45 मिनु गेपुकीम आंम इन शॉप सेल्चा कली रागी योक्शा गेनीनु, मेको रे परमप्रभु यावे कली १५ हजार कुबीत लाइश्शो नु २० हजार कुबीत ब्रेम्शो रू का तिल्चा माल्नीनी। मिनु मेको रू नेल्ल परमप्रभु यावे केन दुम्ब। कुबीत का ०.५ मिटर बाक्ब। 2 मेको रे पा ५ हजार कुबीत लाइश्शो नु ५ हजार कुबीत ब्रेम्शो रू का परमप्रभु यावे आ बाक्तीके दुम्ब। मेको आ एर ऑथ नेल्ल ५० कुबीत ब्रेम्शो श्येत्थ लां बाक्चा माल्ब। 3 मिनु मेको परमप्रभु यावे आ बाक्तीकेम २५ हजार कुबीत लाइश्शो नु १० हजार कुबीत ब्रेम्शो पुक्चा माल्नीनी। मेकेर परमप्रभु यावे आ खिं डा नेल्ल क्येडा चोव्रखो बाक्तीक दुम्चा माल्ब। 4 मेको बाक्तीक चिं परमप्रभु यावे के बाक्ब। मेको परमप्रभु यावे आ खिम गेय पाइब नु परमप्रभु आ नेक्था जाक्ब आन खिं कली नु परमप्रभु यावे आ खिं कली दुम्ब। 5 मेको अर्को २५ हजार कुबीत लाइश्शो नु १० हजार कुबीत ब्रेम्शो रू का परमप्रभु यावे आ खिम गेय पाइब लेवी आन के दुम्ब। मेको आन बाक्तीक सहर कली दुम्ब। 6 गेपुकीम परमप्रभु आ रू प्रॉइशा अर्को ५ हजार कुबीत ब्रेम्शो नु २५ हजार कुबीत लाइश्शो रू का सहर कली वोइक्चा माल्नीनी। मेको इस्राएल डा मुर नेल्ल आन कली दुम्ब। इजीकीएल ४८:१५-२०

#### सासन पाइब आन भाग

7 मेको परमप्रभु यावे आ रू आ निम्फा पटटी सासन पाइब आन के दुम्ब। मेको आ नेक्था डा सहर डा रू आन पूर्व गे नु पच्छिम गे सासन पाइब आन के दुम्ब। मेको थर का डा रू खोदेंशो पा लाइश्शो दुम्ब। मेको पच्छिम डा सांद रे पूर्व डा सांद सम्म दुम्ब। इजीकीएल ४८:२१-२२ 8 मेको रू चिं इस्राएलम सासन पाइब आन रू दुम्ब। मिनु मुल रे आं सासन पाइबपुकीम आं मुर आन कली दिप्चा मदुम्नीम। तन्न मेकोपुकीम इस्राएल आ खिं डा मुर आन कली, मेको आन थर थर खोदेंशो पा आन रू आन के दुम्ब, दे रोइक्चा मताइनीम। इजीकीएल ४६:१८

9 मिनु परमप्रभु, परमप्रभु यावेमी "ए इस्राएल डा सासन पाइबपुकी। गेपुकीम हुश खाक्श पोक्तीनी। दिप्चा प्रोनीन। गेपुकीम थम रिश्शो नु ठीक गेय पने। आं मुर आन कली आन खिं रू रे मखेरीन। १राजा १२:४, ११; १राजा २१; येरमीया २१:११-१२; मीका ३:१-३

10 गेपुकीम ठीक नाक्तीक नु पुक्तीकपुकी चलेचा माल्नीनी। लेवी १९:३६; ब्यवस्था २५:१५ 11 एफाह नु बाथ माइश्शो पुक्तीक खाल का डा दुम्चा माल्नीम। होमेर का १० बाथ दुम्चा माल्ब। मिनु १० एफाह यो होमेर का बाक्ब। होमेर चिं थाप्तीक दुम्चा माल्ब। एफाह का २२ लिटर रिक्ब ठेयब अन्न पुक्तीक बोस बाक्ब। बाथ का २२ लिटर रिक्ब बोस बाक्ब। होमेर का २२० लिटर रिक्ब बोस ताप्तीक बाक्ब। 12 शेकेल का २० गेराह दुम्चा माल्ब। २० शेकेल, २५ शेकेल नु १५ शेकेल नेल्ल पा मीना का दुम्चा

माल्ब" देंत। शेकेल का ११.५ ग्राम बाक्ब। गेराह का ०.६ ग्राम बाक्ब। मीना का ६०० ग्राम खोदेंशो बाक्ब।

### सासन पाइब आन चढ़ेचा माल्शो

13 मिनु परमप्रभु यावेमी "गेपुकीम चढ़ेचा माल्शो अन्न गिश बाक्ब देंशा हना, होमेर का का चेरब रे एफाह डा भाग डा भाग का चढ़ेचा माल्नीनी। होमेर का का क्योव्रज रे एफाह डा ६ भाग डा भाग का चढ़ेचा माल्नीनी। 14 गेपुकीम चढ़ेचा माल्शो तेल कोर का बाथ डा १० भाग डा भाग का बाक्ब। मेको ४ माना खोदेंशो बाक्ब। कोर नु होमेर उडक्थ उडक्थ बाक्नीम। मिनु होमेर का के १० बाथ बाक्नीम। कोर नु होमेर खाल का डा २२० लिटर बाक्ब। बाथ का एफाह का खोदेंशो बाक्ब, मेको २२ लिटर बाक्ब। 15 गेपुकीम सहे निक्शी भेडा रे का चढ़ेचा माल्नीनी। मेको इस्राएली आन योव्रतीके रे चाक्चा माल्नीनी। मेको अन्न चढ़ेशो, चोशा चढ़ेशो नु दुशा बाक्चा आ पर्वम चढ़ेशो बाक्ब। मेको पाप क्याम्चा कली बाक्ब" दे परमप्रभु यावेमी देंत। 16 मिनु मेकोमी लेंशा "इस्राएल डा मुर नेल्लेमी मेको सासन पाइब कली मोदेंशो गेचा माल्नीम। 17 तन्न सासन पाइबमी मेको चोशा चढ़ेतीक, अन्न चढ़ेतीक नु तूचा थोव्रक चढ़ेतीक आं देंशो चाडम चढ़ेचा माल्ब। मेकोमी औंसी, नाइक्तीक नाक्ती नु इस्राएल आ खिं डा मुर आन चाड नेल्लेमी चढ़ेचा माल्ब। मेकोमी पाप आ पर्वम चढ़ेतीक, अन्न चढ़ेतीक, चोशा चढ़ेतीक नु दुशा बाक्चा आ पर्वम चढ़ेतीक इस्राएली आन पाप क्याम्चा कली चाक्चा माल्ब" दे परमप्रभु यावेमी देंत। २सामुएल ६:१७-१८

### परमप्रभु आ चाडपुकी

18 मिनु परमप्रभु, परमप्रभु यावेमी "डोंइती डा महिना नु डोंइती डा नाक्त, गेपुकीम मारेइ मद्दुशो बोहोर का चाक्चा, परमप्रभु यावे आ बाक्तीक ग्रांग्रा मदिशो सेल्चा माल्नीनी। 19 मिनु चढ़ेबमी पाप आ पर्वम चढ़ेशो आ हुश इक्का लाइश्शा, परमप्रभु यावे आ खिं डा लाप्चो डा शीमी, चढ़ेतीक आ ४ कुना नु आ सुर नेल्लेम नु आगा लाडगा डा लाप्चो डा शीमी ब्रुइक्चा माल्ब। 20 मिनु सुइम ममिन्थु मतुइक्थु पाप पशो बाक्त हना, महिना डा ७ नाक्त गेपुकीम मो पचा माल्नीनी। मोपा गे परमप्रभु यावे आ खिं कली यो पाप क्याम्तीक गेय पचा माल्नीनी। लेवी ४:२२; लेवी ५:१७-१८

21 मिनु डोंइती डा महिना डा १४ नाक्ती गेपुकीम पास्सा चाड मानेचा माल्नीनी। मेना गे ७ नाक्त सम्म बोरेब ओख्ती मसुप्शो शोब्ले जचा माल्नीनी। 22 मेको नाक्त सासन पाइबमी आंम कली नु रागी डा मुर नेल्ल आन कली पाप आ पर्वम बोहोर का चढ़ेचा माल्ब। 23 मिनु मेकोमी मेको चाड डा ७ नाक्त नेल्लेम मारेइ मद्दुशो ७ ओटा बोहोर नु ७ ओटा सांड नाक्त किंत किंत चोशा चढ़ेचा माल्ब। मिनु चाड डा नाक्त किंत किंत पाप आ पर्वम बोका का का यो चढ़ेचा माल्ब। गन्ती २८:१७-२५ 24 मेको बोहोर का नु एफाह का अन्न चढ़ेचा माल्ब। सांड का नु एफाह का अन्न चढ़ेचा माल्ब। मिनु मेको का का पा, एफाह का कली हिन का तेल चढ़ेचा माल्ब। एफाह का २२ लिटर पुक्तीके बाक्ब। हिन का ४ लिटर बाक्ब। इजीकीएल ४६:५; गन्ती १५:४-१२ 25 मेकोम ७ महिना डा १५ नाक्त रे मेको ७ नाक्त डा चाड सम्म मेको मोदेंशो चढ़ेचा माल्ब। मेको पाप आ पर्वम चढ़ेतीके, चोशा चढ़ेतीके नु अन्न चढ़ेतीक बाक्ब। मेको नु तेल यो चढ़ेचा माल्ब" देंत। लेवी २३:३४

### नाक्त किंत किंत डा चढ़ेतीक

46 मिनु परमप्रभु, परमप्रभु यावेमी "मेको आगा लाडगा डा पूर्व गे कोव्रशो ठेयब लाप्चो मेको गेय पतीक ६ नाक्त चोक्चा वोइक्चा माल्नीम। तन्न नाइक्तीक नाक्त नु औंसी नाक्त रोक्चा माल्नीम। 2 सासन पाइब मेको पिंडी रे लाडगा डा लाप्चो रे पा ओव्रचा माल्ब। मिनु लाप्चो आ नेक्था राष्ठा बाक्चा माल्ब। मिनु चढ़ेबपुकीम सासन पाइब आ चोशा चढ़ेतीक नु दुशा बाक्तीक आ पर्वम चढ़ेतीक चढ़ेचा माल्नीम। मिनु सासन पाइबमी लाप्चो आ नेक्था राष्ठा, खुम्की पा परमप्रभु यावे कली ठेयब सेल्चा माल्ब। मिनु नोले मेको लाडगा रे गूचा माल्ब। तन्न मेको लाप्चो नां

मरिक्म सम्म रोक्स डा रोक्स बाक्चा माल्ब। इजीकीएल ४४:३ 3 मिनु रागी डा मुरपुकीम मेको ठेयब लाप्चो आ नेक्था नाइक्तीक नाक्ती नु औंसी नाक्ती खुम्की पा बाप्चा माल्नीम। 4 मेको सासन पाइबमी परमप्रभु यावे कली नाइक्तीक नाक्ती मार चढ़ेचा माल्ब देंशा हना, चोशा चढ़ेचा कली मारेइ मद्दुशो ६ ओटा पाठा नु सांड का चढ़ेचा माल्ब। गन्ती २८:९-१० 5 मेको जचा थोव्रक चढ़ेचा कली सांड नु एफाह का अन्न चढ़ेचा माल्ब। मिनु पाठा नु अन्न गिश चढ़ेचा दाक्बा, मिश चढ़ेने चाप्ब। मिनु एफाह का का अन्न कली तेल चढ़ेचा माल्ब। एफाह का २२ लिटर पुक्तीक बाक्ब। हिन का ४ लिटर खोदेंशो बाक्ब। इजीकीएल ४५:२४ 6 मिनु मेकोम औंसी नाक्त कली मार चढ़ेचा माल्ब देंशा हना, मारेइ मद्दुशो बोहोर का ६ ओटा पाठा नु सांड का चढ़ेचा माल्ब। 7 मिनु जचा थोव्रक चढ़ेचा कली बोहोर नु एफाह का अन्न नु सांड नु एफाह का अन्न चढ़ेचा माल्ब। मिनु पाठा नु अन्न गिश चढ़ेचा दाक्बा, मिश चढ़ेने चाप्ब। मिनु एफाह का का अन्न कली हिन का का तेल चढ़ेचा माल्ब। 8 मिनु सासन पाइब ओव्रमेनु, मेको ठेयब लाप्चो डा पिंडी रे पा ओव्रचा माल्ब। नोले मेको आ ओव्रशो लां रेन लाडगा गूचा माल्ब।

### सासन पाइब आन चढ़ेशो

9 मिनु रागी डा मुरपुकी देंशो नाक्त डा चाडम परमप्रभु यावे कली ठेयब सेल्चा कली आ डोंइती जाक्तेक्म हना, मेको उत्तर डा ठेयब लाप्चो रे ओव्रचा माल्नीम। नोले दक्खिन डा ठेयब लाप्चो रे पा गूचा माल्नीम। सु चहिं दक्खिन डा ठेयब लाप्चो रे ओव्रनीमी, मेकोपुकी उत्तर डा ठेयब लाप्चो रे गूचा माल्नीम। मेकोपुकी आगा ओव्रशो ठेयब लाप्चो रे लाडगा गूचा मद्दुम्नीम। आन ओव्रशो लाप्चो रे गूचा मद्दुम्नीम। ग्येथ पा अर्को ठेयब लाप्चो रे पा गूचा माल्नीम। 10 मेकोपुकी ओव्रमानु, सासन पाइब मेको नु ओव्रचा माल्ब। मिनु मेकोपुकी लाडगा गूमानु, मेको यो गूचा माल्ब।

11 मिनु चाडपुकी नु देंशो नाक्त कली जचा थोव्रक चढ़ेचा कली बोहोर नु एफाह का अन्न नु सांड नु एफाह का अन्न चढ़ेचा माल्ब। मिनु पाठा नु अन्न गिश चढ़ेचा दाक्बा, मिश चढ़ेने चाप्ब। मिनु एफाह का का अन्न कली हिन का का तेल चढ़ेचा माल्ब। एफाह का २२ लिटर पुक्तीक बाक्ब। मेको ५ पाथी आधा खोदेंशो बाक्ब। 12 मिनु सासन पाइबमी परमप्रभु यावे कली आ थुंम ग्येरशा चढ़ेतीक चढ़ेचा दाक्ताक्व हना, चोशा चढ़ेतीक कि दुशा बाक्तीक आ पर्वम चढ़ेतीक चढ़ेचा दाक्ताक्व हना, मेको ओव्रचा कली पूर्व डा ठेयब लाप्चो रोक्चा गेचा माल्नीम। मिनु मेकोमी आ चोशा चढ़ेतीक नु दुशा बाक्चा आ पर्वम चढ़ेतीक, नाइक्तीक नाक्ती चढ़ेशो खोदेंशो पा चढ़ेचा माल्ब। मिनु नोले मेको लाडगा लचा माल्ब। मिनु लम नोले मेको ठेयब लाप्चो चोक्चा माल्नीम।

13 मेकोमी परमप्रभु यावे कली नाक्त किंत किंत मारेइ मद्दुशो बर्स का गाप्शो पाठा का का सुनी कुस कुस चोशा चढ़ेचा कली गेचा माल्ब। प्रस्थान २८:३८-४२; गन्ती २८:३ 14 मेको नु सुनी कुस कुस चढ़ेतीक नु एफाह डा ६ भाग डा भाग का अन्न, हिन का डा ३ भाग डा भाग का तेल रिश्शो फस ब्वाइक्चा कली चढ़ेचा माल्ब। एको परमप्रभु यावे कली अन्न चढ़ेतीक बाक्ब। मिनु मेको गेना हना यो परमप्रभु यावे कली अन्न चढ़ेतीक बाक्ब। एफाह का २२ लिटर पुक्तीक बाक्ब। हिन का ४ लिटर खोदेंशो बाक्ब। 15 मिनु मेको पाठा, अन्न चढ़ेतीक नु तेल सुनी कुस कुस चाक्चा, चोशा चढ़ेचा माल्ब" देंशो बाक्ब।

### सासन पाइब आ थेरशो रू

16 मिनु परमप्रभु, परमप्रभु यावेमी "सासन पाइबमी आ तौ का कली आ शोप रे रू गेप्तु हना, मेको आ तौ चच युइ आन के दुम्ब। 17 तन्न मेकोम आ थेरशो रू रे आ गेय पाइब कली गेप्तु हना, मेको प्रोंइतीक बर्स सम्म ला मेको गेय पाइब आ शोप दुम्ब। नोले मेको लेंशा सासन पाइब केन दुम्ब। आ तौ कली गेशो रू चहिं मेको केन दुम्बा लीब। लेवी २५:१०; येरमीया ३४:८ 18 सासन पाइबमी मुर आन थेरशो रू रे गुंइशा आ शोप सेल्ने मचाप्ब। मेकोम आ तौ आन कली रू गेचा दाक्ब हना, आ शोप रे गेचा माल्ब। मोपा सुइ आं मुर रू रोइक्चा मपुंडसीनीम" देंत। इजीकीएल ४५:८-९

## चढ़ेशो श्ये क्येतीक कोठा

19 मिनु नोले मेकोमी आं कली उत्तर गे डा ठेयब लाप्चो डा ओव्रतीक आ नेक्था रे पा, चढ़ेब आन कली तिल्शा वोइश्शो कोठाम लाइक्ती। मिनु मेकेर बाक्तीक आ पच्छिम गे बाक्तीक का ताता। 20 मिनु मेकोम आं कली “एकेर चढ़ेबपुकीम दोस आ पर्वम चढ़ेतीक नु पाप आ पर्वम चढ़ेतीक आन श्ये लोप्नीम। मिनु चढ़ेशो अन्न के मार मार चोइनीम। मोपा मेकोपुकीम चढ़ेशो थोव्रक लाडगा गे डा लाडगाम मगुंइनीम। मारदे हना मुर आन कली मरिश्शो मदुम्ल” देंत।

21 मिनु नोले मेकोमी आं कली लाडगा गे डा लाडगा डा ४ सुर कोइताक्यी। 22 मेको लाडगा गे डा लाडगा डा ४ सुरम ४ ओटा आइक्च लाडगा बाक्तेक्म। मेको नेल्ल खाल का डा ४० कुबीत लाइश्शो नु ३० कुबीत ब्रेश्शो बाक्तेक्म। 23 मेको नेल्ल आन एर ओंथ गारो हिरशो बाक्तेक्म। मेको ४ ओटा लाडगामी आन सुर सुरम लहर पा चुप्लु बाक्तेक्म। 24 मिनु मेकोमी आं कली “एको क्येतीक बाक्नीम। एकेर परमप्रभु यावे आ खिंम गेय पाइबपुकीमी मुर आन चढ़ेशो मार मार लोप्नीम” देंत।

## परमप्रभु आ खिं रे गूशो खोला

47 मिनु नोले मेकोमी आं कली परमप्रभु यावे आ खिं आ ओव्रतीक लाप्चोम लेशशा चाक्ती। मिनु गो मेको लाप्चो आ थेंका रे ब्वाक्कु यिशा, पूर्व गे शाइश्शो ताता। मारदे हना मेको परमप्रभु यावे आ खिं पूर्व गे कोव्रशो बाक्त। मिनु मेको ब्वाक्कु परमप्रभु यावे आ खिं आ दक्खिन चढ़ेतीक आ दक्खिन रे शाइश्शो बाक्त। *उत्पत्ती २:१०-१४; योएल ४:१८; प्रकाश २२:१२* नोले मेकोमी आं कली उत्तर गे डा ठेयब लाप्चो रे पा लाडगा गुंइताक्यी। मिनु पूर्व गे लेशशा लाडगा डा लाप्चो रे पा हिरशा चाक्ती। मेको ब्वाक्कु दक्खिन गे शाइश्शो बाक्त।

3 मिनु मेको पुक्तीक डोरी का शेशा पूर्व गे लत। मिनु मेकोम हजार का कुबीत पुक्तु। मिनु नोले मेकोमी आं कली ब्वाक्कु शोक्पाइक्ती। मेको ब्वाक्कु दिम्ला सम्म जाक्शो बाक्त। *कुबीत का ०.५ मिटर बाक्ब। इजीकीएल ४०:३* 4 मिनु लेशा अर्को हजार का कुबीत पुक्तु। मिनु मेको ब्वाक्कुम शोक्पाइक्ती। मेको ब्वाक्कु पोक्च सम्म जाक्शो बाक्त। मिनु मेकोम लेशा अर्को हजार का कुबीत पुक्तु। मिनु मेकोमी आं कली मेको ब्वाक्कुम शोक्पाइक्ती। मेको ब्वाक्कु क्रातो सम्म जाक्शो बाक्त। 5 मिनु मेकोम लेशा अर्को हजार का कुबीत पुक्तु। मिनु गो मेको खोला शोक्ने मचबु। मारदे हना ब्वाक्कु बारशो बाक्त। मेको दोम्ली ग्यारचा डा दुश्शो बाक्त हना यो, शोक्ने मचाप्चा डा बाक्त। 6 मिनु मेकोम आं कली “ए मुर, गे एको तवी” देंत। मिनु लेशा खोला आ नेक्था लेप्पाइक्ती। 7 मिनु गो मेकेर जाक्डानु, मेको समुन्द्र आ ओंथ हांबु नु आइक्वी हांबु नेल्ल शुश रवा तातामी। 8 मिनु मेकोम आं कली “एको ब्वाक्कु पूर्व रागी गे लशा, उइ अराबाह गे लशो बाक्ब। मिनु मेको हिक्सी समुन्द्रम ब्वाइसीब। मिनु मेकेर डा ब्वाक्कु रिश्शो दुम्ब। 9 मेको ब्वाक्कु शाइक्तीकेमी शुश खाल डा जन्तु बाक्नीम। मेकेर हिक्ने मचाप्चा डा पा, डाइ बाक्नीम। मारदे हना मेको ब्वाक्कु मेकेर जाक्दीश्शो बाक्ब। मेको ब्वाक्कु रिश्शो दुम्तीके मेकेर मारेइ मारेइ ब्रौइनीम। *प्रस्थान १५:२३* 10 मेको आ एर ओंथ नेल्लेम ग्याइल आण्बपुकी राज्नीम। एन-गेदी रे एन-एग्लै सम्म ग्याइल आप्तीक दुम्नीम। मेकेर ठेयब समुन्द्र खोदेशो पा शुश खाल डा डाइ बाक्नीम। 11 तन्न मेको समुन्द्र आ सिम नु हिलो बाक्तीके डा ब्वाक्कु रिश्शो मदुम्ब। मेको हिक्सी गुंइचा कली बाक्नीम। 12 मेको समुन्द्र आ एर ओंथ नेल्ल शुश खाल डा फल फुल रवा वानीम। मेको आन सफा मसोव्रनीम। मेको आन फल गेनायो मनुप्नीम। मेको महिना महिनाम सिन्नीम। मारदे हना मेको आन कली माल्शो ब्वाक्कु परमप्रभु यावे आ बाक्तीक रे लशो बाक्ब। मेको आन फल रूचा कली नु मेको आन सफा सापाइक्चा कली दुम्नीम” देंत। *यसैया ३२:१५; प्रकाश २२:२*

## इसाएल रागी डा सांद

13 मिनु परमप्रभु, परमप्रभु यावेमी “इसाएल डा सांद आगा डा १२ थर आन थेरशो रू दोपा योक्चा माल्नीनी दंशा हना, योसेफ कली भाग निक्शी गेचा माल्नीनी। *उत्पत्ती ४८:५; यहोसु १७:१७* 14 मेको लीशो रागी इन दातेम उइक्थ उइक्थ पा योक्चा माल्नीनी। मिनु गो इन किकी पिपी आन कली गेनुड, दे कसम जतीके मेको रागी इन शोप दुम्ब। *उत्पत्ती १२:७*

15 मेको रागी आ सांद ते बाक्चा माल्नीम दंशा हना, उत्तर गे डा सांद ठेयब समुन्द्र रे हेथ्लोन डा लां, लेबो-हमाथ रे सेदाद सम्म दुम्चा माल्ब। *गन्ती ३४:२-१२* 16 मेको सांद बेरोथाह नु सिब्रैम सम्म दुम्चा माल्ब। मेको दमस्कस नु हमाथ आस दातेम बाक्शो बाक्नीस। मेको सांद हासेर-हात्तीकोन सम्म जाक्दीप्ब। मेको हौरान डा सांद आ नेक्था बाक्ब। 17 मिनु ठेयब समुन्द्र रे हासर-एनोन सम्म बाक्ब। मेको दमस्कस आ उत्तर गे बाक्ब। मेको आ उत्तर गे हमाथ आ सांद बाक्ब। मेको उत्तर डा सांद बाक्ब।

18 पूर्व गे डा सांद हौरान नु दमस्कस आस दातेम, यर्दन खोला आ नेक्था गिलाद नु इसाएल रागी आस दातेमी बाक्ब। मेको पूर्व डा समुन्द्र नु तामार सम्म बाक्ब। मेको पूर्व डा सांद बाक्ब।

19 दक्खिन गे डा सांद तामार रे मेरीबाथ-कादेश डा ब्वाक्कु बाक्तीके सम्म दुम्चा माल्ब। मिनु मेकेर रे इजीप्त डा खोल्सा रे ठेयब समुन्द्र सम्म जाक्दीप्ब। मेको दक्खिन डा सांद बाक्ब। *गन्ती २०:१३; गन्ती ३४:५*

20 पच्छिम गे डा सांद ठेयब समुन्द्र लेबो-हमाथ आ डौंइती सम्म दुम्चा माल्ब। मेको पच्छिम डा सांद बाक्ब।

21 गे मेको रागी इन दातेम इसाएल आ थर डा मुर आन कली योक्शा गेचा माल्नीनी। 22 गेपुकीम आंम इन थेरशो रू वोइक्चा माल्नीनी। इन दातेमी बाक्ब तमी तौ थिशो अर्को रागी डा मुर आन कली यो आन भाग योक्शा, गेचा माल्नीनी। गेपुकीम मेको आन कली इसाएल रागीम जरमेशो आंम रागी डा मुर खोदेशो मिम्चा माल्नीनी। मिनु गेपुकी नु इसाएल आ थर आन दातेम मेकोपुकीम आन थेरशो रू तचा माल्नीम। *लेवी १९:३३-३४* 23 मेको अर्को रागी डा मुरपुकी तेको थर डा बाक्तीकेम बाक्नीमी, मेकेर मेको आन कली आन थेरशो रू गेचा माल्नीनी” दे परमप्रभु, परमप्रभु यावेम देंत।

## इसाएली आन कली रागी योक्शो

48 मिनु “मेको आन थर आन नें मार बाक्नीम दंशा हना, उत्तर गे डा सांद हेथ्लोन डा लां रे पा लेबो-हमाथ रे हासर-एनोन सम्म बाक्ब। हासर-एनान दमस्कस आ सांदम बाक्ब। मिनु हमाथ मेको आ उत्तर गे बाक्ब। मिनु मेको पूर्व रे पच्छिम सम्म बाक्ब। मेको दान आ थेरशो रू दुम्ब। *इजीकीएल ४७:१५-१७* 2 मिनु पूर्व रे पच्छिम दान आ सांद थिशो रू आशेर आ थेरशो रू दुम्ब। 3 मिनु पूर्व रे पच्छिम आशेर आ सांद थिशो रू नाप्ताली आ थेरशो रू दुम्ब। 4 मिनु पूर्व रे पच्छिम नाप्ताली आ सांद थिशो रू मनस्से आ थेरशो रू दुम्ब। 5 मिनु पूर्व रे पच्छिम मनस्से आ सांद थिशो रू एफ्राइम आ थेरशो रू दुम्ब। 6 मिनु पूर्व रे पच्छिम एफ्राइम आ सांद थिशो रू रूबेन आ थेरशो रू दुम्ब। 7 मिनु पूर्व रे पच्छिम रूबेन आ सांद थिशो रू यहूदा आ थेरशो रू दुम्ब।

8 मिनु पूर्व रे पच्छिम गे यहूदा आ सांद सम्म थिशो भाग का तिल्शा माल्नीनी। मेको २५ हजार कुबीत ब्रेश्शो नु आ लाइश्शो पूर्व रे पच्छिम सम्म थर थर आन कली गेशो थेरशो रू खोदेशो लाइश्शो दुम्चा माल्ब। मिनु परमप्रभु यावे आ बाक्तीक मेको आ दातेम दुम्चा माल्ब। *कुबीत का ०.५ मिटर बाक्ब। इजीकीएल ४५:१-८* 9 परमप्रभु यावे कली गेशो तिल्शो भाग चहिं २५ हजार कुबीत लाइश्शो नु २० हजार कुबीत ब्रेश्शो दुम्चा माल्ब। 10 मिनु मेको परमप्रभु यावे कली गेशो तिल्शो भाग चढ़ेब आन कली दुम्ब। मेको भाग उत्तर गे २५ हजार कुबीत लाइश्शो, पच्छिम गे १० हजार कुबीत ब्रेश्शो, पूर्व गे १० हजार कुबीत ब्रेश्शो नु दक्खिन गे २५ हजार कुबीत लाइश्शो दुम्चा माल्ब। मिनु परमप्रभु यावे आ बाक्तीक मेको आ दातेम दुम्चा माल्ब। 11 मिनु मेको परमप्रभु यावे कली चढ़ेब आन भाग दुम्चा माल्ब। आं



गेय पाइब सादोक आ चच युइ आन के दुम्ब। मेकोपुकी इस्राएली नु लेवीपुकी हेंथे गाक्तेक्म हना यो, मेकोपुकी हेंथे मगाक्थु, आं गेय पाम्तेक्म। इजीकीएल ४०:४६<sup>12</sup> मिनु मेको आन कली परमप्रभु यावे कली तिल्शो रागी रे आन भाग दुम्ब। मेको आन नेल्ल क्येडा चोव्रखो बाक्तीक भाग, लेवी आन थेरशो रू थिशो बाक्ब।<sup>13</sup> चढेब आन थेरशो रू आ नेक्था लेवी आन थेरशो रू दुम्चा माल्ब। मेको २५ हजार कुबीत लाइश्शो नु २० हजार कुबीत ब्रेम्शो दुम्चा माल्ब। मेको आ लाइश्शो नेल्ल २५ हजार कुबीत नु आ ब्रेम्शो नेल्ल १० हजार कुबीत दुम्चा माल्ब।<sup>14</sup> मिनु मेकोपुकीमी मेको थेरशो रू लेयचा नु फाइक्वा मदुम्नीम। मेको रू नेल्ल क्येडा रिम्शो बाक्ब। मिनु मेको सुइ आन कली गेने मचाप्नीम। मारदे हना मेको परमप्रभु यावे आ रू बाक्ब।

<sup>15</sup> मिनु मेको लीशो ५ हजार कुबीत ब्रेम्शो नु २५ हजार कुबीत लाइश्शो रू सहर कली बाक्ब। मेको मुर बाक्तीके नु सहर आ दाते डा रू दुम्चा माल्ब।<sup>16</sup> मेको लीशो रू उत्तर गे ४ हजार ५ सहे कुबीत, दक्खिन गे ४ हजार ५ सहे कुबीत, पूर्व गे ४ हजार ५ सहे कुबीत नु पच्छिम गे ४ हजार ५ सहे कुबीत दुम्चा माल्ब। प्रकाश २१:१६<sup>17</sup> मिनु मेको सहर डा रू दुम्चा माल्ब। मिनु मेको लीशो सहर डा रू उत्तर गे सहे निक्शी ५० कुबीत, दक्खिन गे सहे निक्शी ५० कुबीत, पूर्व गे सहे निक्शी ५० कुबीत नु पच्छिम गे सहे निक्शी ५० कुबीत दुम्चा माल्ब।<sup>18</sup> मेको परमप्रभु यावे आ बाक्तीक आ सांद थिशा लीशो रू पूर्व गे १० हजार कुबीत नु पच्छिम गे १० हजार कुबीत दुम्चा माल्ब। मेको परमप्रभु यावे आ खिं आ का पटटी गे बाक्चा माल्ब। मेकेर सहरम गेय पाइब आन कली जचा थोव्रक लेयतीक दुम्चा माल्ब।<sup>19</sup> सहरम गेय पाइब इस्राएल आ थर डा मुर नेल्लेमी मेकेर बाक्शा, गेय पाइनीम।<sup>20</sup> गेपुकीमी तिल्शो बाक्तीक रू नेल्ल २५ हजार कुबीत ब्रेम्शो नु २५ हजार कुबीत लाइश्शो दुम्चा माल्ब। मेको ४ पाटे दुम्ब। मेको परमप्रभु आ भाग नु सहर डा बाक्तीके बाक्ब।

<sup>21</sup> मेको परमप्रभु यावे आ भाग नु सहर डा का पटटी गे लीत हना, सासन पाइब के दुम्चा माल्ब। मेको पूर्व गे परमप्रभु यावे कली तिल्शो २५ हजार कुबीत पूर्व डा सांद गे नु पच्छिम गे बाक्शो २५ हजार कुबीत पच्छिम डा सांद गे बाक्ब। मेको आ लाइश्शो थर थर आन रू रू गे लाइब। मेको सासन पाइब के दुम्ब। मिनु परमप्रभु यावे आ खिं मेको आ दातेम बाक्ब। इजीकीएल ४५:७<sup>22</sup> मिनु लेवी आन रू नु सहर डा रू आन दातेमी मेको

सासन पाइब आन रू बाक्ब। यहूदा नु बेन्यामीन आस दातेमी बाक्शो रू यो सासन पाइब आन के बाक्ब।

अरु थर आन थेरशो रू

<sup>23</sup> मिनु लीशो थर आन कली पूर्व रे पच्छिम सम्म बेन्यामीन आ थेरशो रू, <sup>24</sup> पूर्व रे पच्छिम सम्म बेन्यामीन आ सांद थिशो सिमियोन आ थेरशो रू, <sup>25</sup> पूर्व रे पच्छिम सम्म सिमियोन आ सांद थिशो इस्साकार आ थेरशो रू, <sup>26</sup> पूर्व रे पच्छिम सम्म इस्साकार आ सांद थिशो जबूलून आ थेरशो रू, <sup>27</sup> पूर्व रे पच्छिम सम्म जबूलून आ सांद थिशो गाद आ थेरशो रू, <sup>28</sup> मिनु दक्खिन गे गाद आ थेरशो रू डा सांद तामार रे मेरीबाथ-कादेश डा ब्वाक्कु बाक्तीक सम्म नु इजीप्त डा खोल्सा आ नेक्था रे पा ठेयब समुद्र सम्म दुम्चा माल्ब। इजीकीएल ४७:१९<sup>29</sup> गेपुकीमी मेको रागी डा रू इस्राएल आ थर डा मुर आन कली आन थेरशो रू दुम्पाइश्शा योक्शा गेचा माल्नीनी। मिनु मेकोन मेको आन भाग दुम्ब” दे परमप्रभु, परमप्रभु यावेमी देंत।

यरूसलेम सहर डा ठेयब लाप्चो

<sup>30</sup> परमप्रभु यावेमी “सहर डा गारो रे लाडगा गूतीक ते दुम्चा माल्नीम देंशा हना, उत्तर गे डा गारो पुक्शा ४ हजार ५ सहे कुबीत लाइश्शो दुम्चा माल्ब। कुबीत का ०.५ मिटर बाक्ब।<sup>31</sup> ठेयब लाप्चो आन नें इस्राएल आ थर आन नें खोदेंशो दुम्चा माल्नीम। उत्तर गे डा गारो डा ठेयब लाप्चो सां, रूबेन आ लाप्चो, यहूदा आ लाप्चो नु लेवी आ लाप्चो दुम्नीम।<sup>32</sup> मिनु पूर्व गे डा गारो ४ हजार ५ सहे कुबीत लाइश्शो दुम्चा माल्ब। पूर्व गे डा गारो डा ठेयब लाप्चो सां, योसेफ आ लाप्चो, बेन्यामीन आ लाप्चो नु दान आ लाप्चो दुम्नीम।<sup>33</sup> मेको दक्खिन गे डा गारो ४ हजार ५ सहे कुबीत लाइश्शो दुम्चा माल्ब। दक्खिन गे डा गारो डा ठेयब लाप्चो सां, सिमियोन आ लाप्चो, इस्साकार आ लाप्चो नु जबूलून आ लाप्चो दुम्नीम।<sup>34</sup> मेको पच्छिम गे डा गारो ४ हजार ५ सहे कुबीत लाइश्शो दुम्चा माल्ब। पच्छिम गे डा गारो डा ठेयब लाप्चो सां, गाद आ लाप्चो, आशेर आ लाप्चो नु नाप्ताली आ लाप्चो दुम्नीम।<sup>35</sup> मिनु सहर आ एर ओथ हिरशो गारो १८ हजार कुबीत दुम्ब। मेना रे मेको सहर आ नें ‘परमप्रभु यावे मेकेर बाक्ब’ देंशो नें वोइक्चा माल्ब” दे परमप्रभु यावेमी देंत। इजीकीएल ४३:७; यसैया ६०:१४; प्रकाश २१:३

## दानीएल

दानीएल यरूसलेम सहरम जरमेशो बाक्त। मेको रिम्शो पिप योसीयाहम सासन पवा ना कोल्लत। दानीएलमी परमप्रभु यावे आ लोत्र पाइब येरमीया नु सेफन्याह आस लोत्र नेशो बाक्त। मेको २० बर्स खोदेशो दुम्मेनु, आ वारच नु ग्याइश्शा बेबीलोन रागी लाइक्चा पुंडसीशो बाक्त। माइत किताबपुकीमी एको किताब ब्रेक्ब दानीएल बाक्ब, दे नेल्लेम ब्रेक्शो बाक्नीम। एको किताब डा लोत्र कोइ हिब्रू नु कोइ आरामेइक लोत्रमी ब्रेक्शो बाक्ब। दानीएलमी मुर कली ब्रेक्पाइश्शो बाक्म कों आंमा ब्रेक्शो बाक्म मेको मतुंडसीब।

दानीएल नेबुकदनेसर पिप दुम्शो ६०४-५६१ बि. सी. रे कोरेस पिप दुम्शो बर्स सां सम्म बाक्शो बाक्त। मेको बेबीलोनम बाक्ची ना ७० बर्स खोदेशो दुम्शो बाक्त। एको किताब ६०६-५३५ बि. सी.म ब्रेक्शो बाक्त।

दानीएलमी पिप आन राज्य नु परमप्रभु यावे आ राज्य कोंइचा कली ब्रेक्शो बाक्त।

परमप्रभु यावेमी सु सु कली रागी कली सासन पाइब सेल्वा दाक्बा, मेको पाइब।

१. दानीएल नु आ वारच आन पबर्म लोत्र बाक्ब।

२. दानीएल कली कोंइशो आ पबर्म लोत्र बाक्ब।

### दानीएल बेबीलोनम बाक्शो

१ यहूदा रागीमी येहो-याकीम पिप दुम्शो बर्स सां दुम्शो बाक्माक्त।

मेना बेबीलोन डा पिप नेबुकदनेसर जाक्शा, यरूसलेम सहर कली पुम्ताक्मे। २राजा २४:१-२ २ मिनु परमप्रभुमी यहूदा डा पिप येहो-याकीम कली ब्रुपाइक्तु। मिनु परमप्रभुमी आ खिं डा बोस का निकशी यो मेको कली गेपु। मिनु नेबुकदनेसरमी मेको बोसपुकी शिनार रागीमी लाइश्शा, आ देवता आ खिं डा मार मार शोंप वोइक्तीके कोठाम वोइक्तु। शिनार रागी बेबीलोन रागी बाक्ब। उत्पत्ती ११:२ ३ मिनु पिपमी आ दरवार डा ठेयब गेय पाइब अशेनास कली “ग्याइश्शा लाइक्चा पुंडसीशो इस्त्राएली, पिप आ खिं डा नु ठेयब मुर आन खिं डा मुर आन कली योत्रशा एक चाक्को। २राजा २०:१८ ४ गे ठिटा वोंइश मुर, मारेइ मद्दुश्शो रिम्शो रां पाइश्शो, दारशो, शुश निप्स पाइश्शो, जोक्ब तुइक्ब, रुप्तीके थुं पाइश्शो नु पिप आ दरवारमी गेय पने चाप्ब आन कली योत्रडो” दे अरेवा बाक्त। मिनु मेको आन कली कल्दी आन ब्रेक्स नु लोत्र शेंचा माल्बाक्माक्त। ५ मिनु पिपमी “मेको आन कली पिप आ खिं डा जचा थोत्रक नु अडगुर शांबु गेचा माल्ब” दे अरेशो बाक्माक्त। मिनु मेको आन कली बर्स सां सम्म शेंशा, पिप आ खिंम गेय पपाइक्चा कली चाक्चा माल्बाक्माक्त। ६ मिनु मेको योत्रचा पुंडसीशो आन दातेमी यहूदा आ थर डा दानीएल, हनान्याह, मीशाएल नु अजारयाह बाक्तेक्म। ७ मिनु दरवार डा ठेयब गेय पाइबमी मेको आन नें फाइश्शा, दानीएल कली बेल्ल-शजर, हनान्याह कली शद्रक, मीशाएल कली मेशक नु अजारयाह कली अबेद-नेगो वोदा बाक्त।

८ मिनु दानीएलमी पिप आ गेशो जचा नु तूचा थोत्रक जशा तूशा आंम कली ग्रांरा दिशो मसेल्सीनुड, दे मिम्ता बाक्त। मोपतीके दानीएलमी पिप आ ठेयब गेय पाइब कली “आं कली मोदेशो जचा तूचा गेशा, ग्रांरा दिशो दुम्चा मगेयीनी” दे पुंडतु। लेवी ११:- ९ मिनु परमप्रभुमी पिप आ ठेयब गेय पाइब आ थुंमी दानीएल कली शिशी पा दाक्तीकेमी प्रिदा बाक्त। उत्पत्ती ३९:२१ १० मिनु पिप आ ठेयब गेय पाइबमी दानीएल कली “गो आं प्रभु, आं पिप नु शुश हिनुड। मेकोमी इन कली मार मार जचा तूचा थोत्रक गेचा, दे अरेशो बाक्त। मेकोमी इन वारच क्येडा इन कली गेयशो तापु हना, आं कली साइक्ब” देंत। ११ मिनु नोले दानीएलमी पिपमी आ दरवार डा ठेयब गेय पाइब आन कली कोत्रब मुर कली, आंम आ पबर्म नु हनान्याह, मीशाएल नु अजारयाह आन पबर्म लोत्र पापु। १२ मिनु दानीएलमी “गे इन गेय पाइब आंइ कली १० नाक्त सम्म कोत्रडीन। जचा कली गिग खाइ नु तूचा कली ब्वाक्कु ला गेकी। १३ मिनु नोले गो आंइ कली पिप आ गेशो, आ खिं डा जचा थोत्रक जाइब तूबपुकी नु थाप्शा कोत्रकी। मिनु दोदेशो ताइनीनी मोदेशो पाइक्की” दे माइक्तु। १४ मिनु कोत्रबमी मेको लोत्र बिश्शा,

१० नाक्त सम्म आन देशो खोदेशो पापु। १५ मिनु १० नाक्त जाक्दीम्मेनु, पिप आ गेशो जचा थोत्रक जाइब ठिटा नेल्ल आन क्येडा दानीएल नु आ वारच रिम्शो नु दोम्शो तांइसाक्म। १६ मोपतीके मेको कोत्रबमी मेको आन कली गेचा देशो पिप आ जचा तूचा थोत्रक प्रोंइशा, गिग खाइ ला गेम्तीमी। १७ मिनु परमप्रभुमी मेको ४ जना आन कली नेल्ल ब्रेक्तीकेमी नु तुइक्तीकेमी जोक्ब तुइक्ब सेला बाक्त। मिनु दानीएल कली मार पचा, दे ततीके नु डोमु रुप्तीक थुं यो गेपु। इजीकीएल २८:३

दानीएल नु आ वारच योत्रसीशो

१८ मिनु पिप आ देशो नाक्ती आ दरवार डा ठेयब गेय पाइबमी मेको ठिटा नेल्ल आन कली पिप नेबुकदनेसर आ डोंइती राप्पाइक्तीमी। १९ मिनु पिपमी मेकोपुकी नु लोत्र पापु। मिनु दानीएल, हनान्याह, मीशाएल नु अजारयाह खोदेशो जोक्ब तुइक्ब आ रागीमी अरु सुइ मथिद। मोपतीके मेको ४ जना पिप आ दरवारम गेय पचा कली योत्रचा पुंडसाक्म। २० मिनु पिपमी आ माल्शो रुप्तीके नु तुइक्तीके आ पबर्म हिल्लो पवानु, आ रागी डा जादू नु मन्तर तन्तर पाइब नेल्ल आन क्येडा मेको ४ जना आन कली १० खेयप शुश जोक्ब तुइक्ब तापु। २१ मिनु दानीएलमी पिप कोरेस आ सासन पशो आ डोंइती डा बर्स सम्म मेकेर गेय पापु। एज्रा १:१

पिप नेबुकदनेसरमी डोमु तशो

२ मिनु पिप नेबुकदनेसर आ सासन पशो बर्स निकशी जाक्दीम्मेनु, मेको पिपमी डोमु का तवा बाक्त। मिनु डोमु तशा नोले मेको मार पड, दो पड दुम्शा, आं थुं ग्येत्थ लुक्च दुम्शा, लेंशा इप्ने मचबा बाक्त। २ मिनु मेको पिपमी आ डोमु मार बाक्मे, दे तुइक्चा कली “जादू, मन्तर तन्तर पाइब, टुना मुना पाइब नु सोरुल कोत्रब कल्दी आन कली चाक्चा माल्नीनी” दे हुकुम पापु। मिनु मेकोपुकी पिप आ डोंइती जाक्शा राप्तेक्म। यसैया ४७:१२-१३ ३ मिनु पिपमी मेको आन कली “गो डोमु का ताता। मेको तशा, आं थुं ग्येत्थ लुक्च दुम्स्त” देंत। ४ मिनु सोरुल कोत्रब कल्दीपुकीमी आरामेइक लोत्र पा पिप कली “पिप, शुश ब्रोंइशा बाक्कीन। इन वाइल आन कली इन तशो डोमु शोवडीन। मिनु गो, इन वाइलपुकीमी, मेको रे मार रुम्सीबा मेको शेंनीकी” देंतेक्म। ५ मिनु पिपमी सोरुल कोत्रब कल्दी आन कली “गो मेको आ पबर्म हुकुम पाता। गेपुकीमी आं डोमु नु मेको रे मार रुम्सीबा, मेको शोवने मचाप्तीनी हना, इन गुइ खोइल खोइश्शा, साइक्नन्नी। मिनु इन खिं प्रेशा गेनन्नी। ६ तन्न आं तशो डोमु नु मेको रे मार रुम्सीबा, मेको शोवतीनी हना, गो इन कली मार मार रिम्शो थोत्रक, इनाम नु ठेयब मान गेनुड। मोपतीके आं तशो डोमु शोवशा, मेको रे मार रुम्सीबा, शेंदीनी”

दे माइक्तीमी।<sup>7</sup> मिनु मेकोपुकीमी लेंशा पिप कली “पिपमी इन वाइल, आंइ कली डोंइती इन तशो डोमु शोवडीने। मिनु नोले गोपुकीमी मेको रे मार रुम्सीबा इन कली शेंनीकी” दैतेकम।<sup>8</sup> मिनु पिपमी “गो थमा पा तुइक्नुड, गोपुकीमी आं कली क्योल्नीनी। मारदे हना इन कली साइक्तीक हुकुम थमा बाक्ब।<sup>9</sup> गोपुकीमी आं कली आं तशो डोमु शोवने मचाप्तीनी हना, गे साइक्चा पुंडसीनीनी। गे आं कली जोल पा, शेंखु पतीक आ पबंम गारशो बाक्नीनी। मोपतीके आं कली आं तशो डोमु मशोवतीनी हना, आ अर्थ मार बाक्बा, दे शेंने मचाप्तीनी, दे तुइक्नुड” दे माइक्तीमी।<sup>10</sup> मिनु सोरुल कोवब कल्दीपुकीमी पिप कली “एको रागी नेल्लेमी पिप आ हिल्लो पशो लोव शोवने चाख सुइ मबाक्नीम। ठेयब नु सक्ति पाइश्शो पिपमी जादू, मन्तर तन्तर पाइब नु सोरुल कोवब कल्दी आन कली सुइम मोदेंशो लोव गेनायो हिल्लो मपाम।<sup>11</sup> पिपमी हिल्लो पशो लोव सुइमी शोवने मचाप्चा डा बाक्ब। देवी देवतामी ला तुइक्पाइक्ने चाप्नीम। तन्न मेको देवी देवता मुर आन दातेमी मबाक्नीम” दैतेकम।<sup>12</sup> मिनु मेको लोव नेंशा, पिप शुश गाइश्शा, बेबीलोन रागीम बाक्ब जोक्ब तुइक्ब नेल्ल आन कली साइक्चा नम, दे हुकुम पाप्तु।<sup>13</sup> मिनु पिपमी जोक्ब तुइक्ब मुर नेल्ल आन कली साइक्चा माल्ब देंशो लोव ब्रेक्शा गुंइताक्व। मिनु मेको देंशो खोदेंशो पा दानीएल नु आ वारच आन कली यो साइक्चा कली माल्लेकम।

दानीएल नु आ वारच साइक्चशो

<sup>14</sup> मिनु दानीएलमी मेको नेंशा, शुश मिश्शा, पिप आ साइक्तीक गेय पाइब अरयोक् नु लोव पाप्तु। मेको बेबीलोन डा जोक्ब तुइक्ब मुर आन कली साइक्चा कली लशो बाक्त। *दानीएल १:२०*<sup>15</sup> मिनु दानीएलमी मेको पिप आ गेय पाइब कली “मारदे पिप आ हुकुम मोदेंशो रीब पा पचा माल्नीमी? दे हिल्लो पाप्तु। मिनु अरयोक्मी दानीएल कली नेल्ल शेंताक्व।<sup>16</sup> मिनु मेको तुइक्ता नोले दानीएल पिप आ बाक्तीकेम लशा ‘इक्का नाक्त् रिम्दीन। मिनु गो मेको डोमु नु मेको आ अर्थ इन कली शोवन्ननी’ ” दे पुंडतु।

दानीएल नु आ वारचपुकी

<sup>17</sup> मिनु नोले दानीएल आ खिं लशा, आ वारच हनान्याह, मीशाएल नु अजारयाह आन कली मेको लोव नेंपाइक्तु।<sup>18</sup> दानीएलमी मेको आन कली “गोपुकी नु बेबीलोन डा जोक्ब तुइक्ब नेल्ल साइक्चा मपुंडसीचा कली स्वर्ग डा परमप्रभु कली मेको खूइश्शो डोमु तुइक्पाइसीचा कली आ शिशी पुंडय” दैत।<sup>19</sup> मिनु मेको नाक्दो परमप्रभुमी दानीएल कली कोंइतीकेमी मेको खूइश्शो डोमु नु आ अर्थ कोंइताक्व। मिनु दानीएलमी स्वर्ग डा परमप्रभु कली<sup>20</sup> “परमप्रभु, इन नें गेना हना यो ठेयब बाक्ब। मारदे हना सक्ति नु जोक्ब तुइक्ब थुं इन केन बाक्ब।<sup>21</sup> गे हिउंद नु बर्खा फाइक्ब, पिप आन कली वोइक्ब नु तिल्ल बाक्नीनी। गे जोक्ब तुइक्ब आन कली तुइक्तीक थुं गेनीनी। मिनु रुक्ब थुं पाइश्शो मुर आन कली जोक्तीक थुं गेनीनी। *दानीएल ४:१४, २२, २९*<sup>22</sup> गे ठेयब नु खूइश्शो लोव तुइक्पाइक्नीनी। छिडछिडम बाक्शो मारेइ मारेइ नेल्ल तुइक्नीनी। मारदे हना गे छेडछेडम बाक्नीनी।<sup>23</sup> आं किकी पिपी आन परमप्रभु, गो इन कली ‘गे रिश्शो पाइब बाक्नीनी। गे नेल्ल क्येडा ठेयब बाक्नीनी। मारदे हना गे आं कली तुइक्तीक थुं नु सक्ति गेतीनी। मिनु आंइ पुंडशो नेल्ल गेतीनी। पिप आ तुइक्चा माल्शो नेल्ल आंइ कली तुइक्पाइक्तीनी’ ” दे परमप्रभु कली ठेयब सेल्शा, दैत।

दानीएल पिप आ बाक्तीक लशो

<sup>24</sup> मिनु दानीएल बेबीलोन रागी डा जोक्ब तुइक्ब मुर नेल्ल आन कली साइक्चा, दे योव्रचा पुंडसीशो मुर अरयोक् आ बाक्तीकेमी लशा, मेको कली “बेबीलोन रागी डा जोक्ब तुइक्ब मुर आन कली मसतीन। आं कली पिप आ डोंइती चाक्दीय्यीनी। मिनु गो पिप कली आ डोमु शोवनुड। मिनु मेको रे मार रुम्सीबा नेल्ल शेंनुड” दैत।<sup>25</sup> मिनु अरयोक्मी दानीएल कली दोरोर पा पिप आ डोंइती चाक्दीश्शा, पिप कली “गो यहूदा रागी रे ग्याइश्शा चाक्चा पुंडसीशो मुर आन दातेमी इन डोमु आ अर्थ शोवने चाख मुर का थित्ता” दैत।<sup>26</sup> मिनु पिपमी बेल्त-शजर नें वोइश्शो दानीएल कली “गे आं तशो

डोमु शोवशा, मेको आ अर्थ मार बाक्बा मेको शेंने चाप्नेवे?” दे हिल्लो पाप्तु।<sup>27</sup> मिनु दानीएलमी पिप कली “पिप, इन हिल्लो पशो खूइश्शो लोव जोक्ब तुइक्ब, मन्तर तन्तर पाइब जादू नु चिन्ड आ अर्थ तुइक्ब सुइमी यो देंने मचाप्तीम।<sup>28</sup> तन्न स्वर्गमी परमप्रभु का बाक्ब। मेकोमी खूइश्शो लोव कोंइब। मिनु मेकोमी पिप नेबुकदनेसर, इन कली रागी नुप्ची ना मार दुम्बा, दे कोंइशो बाक्ब। मिनु इन इप्ची ना तशो डोमु मार बाक्त् देंशा हना, *उत्पत्ती ४१:१६*<sup>29</sup> गे इन इप्ची ना नोले ‘मार दुम्बा?’ दे मिम्ताक्नी। मिनु नोले मार दुम्बा, दे कोंइबमी मेको इन कली तुइक्पाइक्तु।<sup>30</sup> गो मुर नेल्ल आन क्येडा शुश रुप्ने मचाप्नुड। तन्न इन डोमु आ अर्थ तुइक्पाइक्चा नु इन थुं डा लोव रुप्पाइक्चा कली परमप्रभुमी मेको आं कली तुइक्पाइश्शो बाक्त्। *उत्पत्ती ४१:३९*

पिप आ तशो डोमु

<sup>31</sup> हजुर, गे कोवशा बाक्नीनु, इन डोंइती ठेयब मूर्ति का राप्शो ताइतीनी। मेको मूर्ति थम ठेयब नु थाम्पान टल्केशो बाक्त्। मिनु इन डोंइती शुश हिंचा डा मूर्ति का राप्शो ताइतीनी।<sup>32</sup> मेको आ पिया क्येख सुन के बाक्त्। आ कुचु नु गुड चांदी के नु आ कोवज नु फिला कांसा के बाक्तेकम।<sup>33</sup> मेको आ पोक्च फलाम के बाक्त्। मिनु आ खोइली फलाम नु खप ब्वाइसीशो बाक्त्।<sup>34</sup> गे मेको कली कोवशा बाक्नीनु, फुल्लु का यित। तन्न मेको फुल्लु मुर आन गुडम मख्रोइश्शो बाक्त्। मेकोमी मूर्ति आ फलाम नु खप ब्वाइसीशो खोइलीमी ख्राप्तु। मिनु मेको मूर्ति कली प्रोल्शा, रोब चिब सेल्लु<sup>35</sup> मिनु मेको फलाम, खप, कांसा, चांदी नु सुन नेल्ल ब्रोल चिल दुम्तेकम। मिनु फशेमी खला डा भूस हुरशा लाइश्शो खोदेंशो पा मारेइ मवोइक्थु, ग्यौ फिक्शा योल्ताक्व। मिनु मेको मूर्ति कली ख्रशो फुल्लु बारना बारन लशा, ठेयब डांडा दुम्शा, रागी नेल्ल ब्रीत।

डोमु आ अर्थ

<sup>36</sup> इन तशो डोमु एकोन बाक्त्। मुल पिप इन कली मेको डोमु आ अर्थ शेंनुड।<sup>37</sup> हजुर, गे पिप आन पिप बाक्नीनी। स्वर्ग डा परमप्रभुमी इन कली राज्य, सक्ति, अधिकार नु शुश मान गेशो बाक्ब। *इजीकीएल २६:७*<sup>38</sup> मिनु मेकोमी तेइ तेइ बाक्ब मुर, ब्वाकी डा जन्तु नु सरीडम बेरब चिक्ब नेल्ल आन कली इन कली गेशो बाक्ब। मिनु गे मेको नेल्ल आन कली सासन पाइनीनी। गे मेको मूर्ति आ सुन के पिया बाक्नीनी। *येरमीया २७:६; येरमीया २८:१४*<sup>39</sup> मिनु इन नोले इन क्येडा ग्युम्शो राज्य का जाक्ब। मिनु मेको आ नोले डा अरु कांसा के खोदेंशो राज्य का जाक्ब। मिनु मेकोमी रागी नेल्ल आन कली अधिकार पाइब।<sup>40</sup> मिनु मेको आ नोले फलाम खोदेंशो बोल्यो अर्को राज्य का जाक्ब। दोपा फलाममी मारेइ मारेइ रोबल चिबल सेल्बा, मोपान मेको राज्यमी अर्को राज्य नेल्ल आन कली ब्रोले चीले पा तेइ तेइ फ्राइब।<sup>41</sup> मिनु इन तशो फलाम नु खप ब्वाइसीशो खोइली नु ब्रेप्चोपुकी खोदेंशो पा ब्राशो राज्य का यो जाक्ब। तन्न मेको राज्य फलाम खोदेंशो इक्का बोल्यो बाक्ब। मेको फलाम खप ब्वाइसीशो बाक्त् हना यो, मेको फलाम खोदेंशो पा इक्का बोल्यो बाक्ब।<sup>42</sup> मिनु खोइली डा ब्रेप्चोपुकी फलाम नु खप ब्वाइसीशो बुद पा मेको राज्य सक्ति पाइश्शो बोल्यो नु सक्ति मपाइश्शो बाक्ब।<sup>43</sup> इन तशो फलाम नु खप ब्वाइसीशो खोदेंशो पा मेको राज्य डा मुरपुकी ग्युंबे पा ब्वाइसीनीम। मिनु फलाम नु खप मगारशो बुद पा मेको राज्य यो का दुम्शा, लीने मचाप्ब।<sup>44</sup> मेको पिप आन पालामी स्वर्ग डा परमप्रभुमी अर्को राज्य का सेल्ब। मेको राज्य गेनायो ब्रोल चिल मदुम्ब। मेको राज्य डा मुर खाल का डा बाक्नीम। मेकोमी अरु राज्य नेल्ल आन कली रोब चिब पा थुम्पाइक्ब। तन्न मेको आ राज्य गेना हना यो लीब। *दानीएल १४:२७; यसैया ९:६; इकोरिन्थी १५:२४; प्रकाश ११:१५*<sup>45</sup> मिनु गे दोदेंशो पा मुरुमी मख्रोइक्थु डांडा रे फुल्लु का यिशो ताइतीनी। मिनु मेकोम फलाम, कांसा, खप चांदी नु सुन नेल्ल कली रोबल चिबल पोक्गा, मोदेंशो पा ठेयब परमप्रभुमी ‘नोले मार दुम्बा’ दे पिप, इन कली कोंइशो बाक्ब। एको डोमु नु आ अर्थ यो थमा बाक्ब” दैत।

## दानीएलमी मान तशो

46 मिनु पिप नेबुकदनेसरमी खुम्की पा दानीएल आ डोंइती बाप्शा, मेको कली ठेयब सेल्लु। मिनु “दानीएल कली अन्न नु धूप चढेचा” दे हुकुम पाप्नु। 47 मिनु पिपमी दानीएल कली “थमान, इन परमप्रभु देवी देवता आन परमप्रभु नु पिप आन परमप्रभु बाक्ब। मिनु खुइश्शो लोव्र तुइक्पाइक्ब बाक्ब। मोपतीके गे एको खुइश्शो लोव्र रुप्पाइक्ने चाप्तीनी” दैत। दानीएल ३:२९; यहीसु २:११; भजन संग्रह ८६:८; यसैया ४२:८ 48 मिनु पिपमी दानीएल आ मान बारपाइक्नु। मिनु शुश शोंप गेप्नु। मिनु बेबीलोन रागी नेल्ल कली हुकुम पाइब नु जोक्ब तुइक्ब मुर नेल्ल आन ठेयब मुर सेल्लु। 49 मिनु दानीएलमी “शद्रक, मेशक नु अबेद-नेगो आन कली बेबीलोन रागी डा सासन पतीक गेय गेचा” दे पिप नु लोव्र पा पुंइनु। दानीएल चहिं पिप आ दरवारमीन बाक्त। दानीएल ३:१२

## नेबुकदनेसर आ सुन के मूर्ति

3 मिनु पिप नेबुकदनेसरमी सुन के मूर्ति का सेल्लु। मेको मूर्ति ६० कुबीत ग्येथ लाइश्शो नु ६ कुबीत पित्थ ब्रेम्शो बाक्त। मिनु मेको कली बेबीलोन डा दुरा माइश्शो दिंममी राप्पाइश्शा वोइक्नु। कुबीत का आधा मिटर खोदेशो बाक्ब। 2 मिनु पिप नेबुकदनेसरमी मेको मूर्ति सेल्ले थुम्शा, पूजा गोतीके नाक्त मानेचा कली पारसी रागी डा हुकुम पाइब नेल्ल, अर्ती गेब, क्येट कोव्रशा हिक्ब, निसाफ पाइब, लल पिया आन ठेयब मुर नु सरकार डा अधिकार ताइब नेल्ल आन कली ब्रेत्ताक्व। 3 मिनु मेको पारसी रागी डा हुकुम पाइब नेल्ल, अर्ती गेब, क्येट कोव्रशा हिक्ब, निसाफ पाइब, लल पिया आन ठेयब मुर नु सरकार डा अधिकार ताइब नेल्ल पिप नेबुकदनेसर आ राप्पाइश्शो मूर्ति कली पूजा गोतीक नाक्ती बुक्तेक्म। मिनु मेकोपुकी मेको मूर्ति आ डोंइती राप्शा बाक्मानु, 4 लोव्र पाइब मुर कामी ठेयब सेंदा पा “नेनीन, जात जात डा, रागी रागी डा नु आंम आंम लोव्र पाइब मुर नेल्ल, इन कली अरेतीके लोव्र का बाक्ब। 5 गे ग्रोव्र, मुराली, ठेयब नु आइक्च तार पाइश्शो नु मार मार ताप्तीक ताप्शो नैनीनु, पिप नेबुकदनेसरमी राप्पाइश्शो सुन के मूर्ति आ डोंइती खुम्की पा बाप्शा, सेउ पचा माल्नीनी। 6 मिनु सु सुमी मोदेशो मपाइनीमी, मेको ठेयब मी ब्रतीकेमी हुम्चा पुंइसीनीम” दे ठेयब सेंदामी तुइक्पाइश्शा दैत। 7 मोपतीके मुर नेल्लेमी ग्रोव्र, मुराली, तार पाइश्शो ठेयब, आइक्च नु मार मार ताप्तीके ताप्शो नेन्मे चोटीन नेबुकदनेसर आ राप्पाइश्शो सुन के मूर्ति आ डोंइती जात जात डा, रागी रागी डा नु आंम आंम लोव्र पाइब मुर नेल्लेमी खुम्की पा बाप्शा सेउ पास्तेक्म।

## यहूदी आन कली दोस गेशो

8 मिनु मेना कल्दी का निक्शी पिप आ बाक्तीकेमी जाक्शा, यहूदी आन पर्बम लोव्र पा मेको आन कली दोस गेम्तेक्म। 9 मिनु मेकोपुकीमी पिप नेबुकदनेसर कली “पिप, गे गेना हना यो ब्रोंइशा बाक्कीन। 10 हजुर, गे डोंइती ‘सुइ सुइमी ग्रोव्र, मुराली, ठेयब नु आइक्च तार पाइश्शो नु मार मार ताप्तीक ताप्शो नैनीनु, सुन के मूर्ति आ डोंइती खुम्की पा बाप्शा, सेउ पचा माल्नीम। दानीएल ६:१३ 11 मिनु सु सुमी खुम्की पा सेउ मपाइनीमी, मेको ठेयब मी ब्रतीकेमी हुम्चा पुंइसीनीम’ दे हुकुम पाइतीनी। 12 मिनु इन वोइश्शो बेबीलोन रागी कली सासन पाइब का निक्शी यहूदी बाक्नीमी। मेको आन नें शद्रक, मेशक नु अबेद-नेगो बाक्ब। मेकोपुकी इन कली काइ मटीब बाक्नीम। मिनु इन देवी देवता आन कली पूजा मपाइनीम। मिनु इन राप्पाइश्शो सुन के मूर्ति आ डोंइती यो खुम्की पा बाप्शा सेउ मपामे” दैतेक्म। 13 मिनु मेको नेंशा, पिप नेबुकदनेसर शुश गाइश्शा, चुरशा “शद्रक, मेशक नु अबेद-नेगो आन कली आं डोंइती चाक्कीन” दे हुकुम पाप्नु। मिनु मेको आन कली चाक्शा, पिप आ डोंइती राप्पाइक्तेक्म। 14 मिनु नेबुकदनेसरमी मेको आन कली “शद्रक, मेशक, नु अबेद-नेगो, गेपुकीमी आं देवी देवता आन कली सेउ मपाइनीनी? मिनु आं सेल्शो सुन के मूर्ति कली यो सेउ मपनी देंशो लोव्र थमा बाक्बा? 15 गेपुकीमी मुल ग्रोव्र, मुराली, ठेयब नु

आइक्च तार पाइश्शो नु मार मार ताप्तीक ताप्शो नैनीनु, आं सेल्शो मूर्ति आ डोंइती खुम्की पा बाप्शा, सेउ पाइतीनी हना, मेको इन कली रिम्शो दुम्ब। तन्न खुम्की पा बाप्शा, सेउ मपाइतीनी हना, इन कली ठेयब मी ब्रतीकेमी बो हुम्चा पुंइसीनीनी। मिनु इन कली आं गुइ रे तेको परमप्रभुम प्रॉइबाक्म?” दे माइक्तीमी। प्रस्थान ५:२; २राजा १८:३५ 16 मिनु शद्रक, मेशक नु अबेद-नेगोमी पिप कली “हजुर, पिप नेबुकदनेसर, गो मेको आ पर्बम इन कली मारेइ लोव्र पचा ममाल्नीकी। 17 गो आंइ परमप्रभु कली ठेयब सेल्नीकी। मेकोमी आंइ कली मेको ठेयब मी ब्रतीके रे प्रॉइने चाप्बा कों, मचाप्बा। तन्न इन गुइ रे प्रोनल। ब्यवस्था ४:२०; भजन संग्रह ६६:१२ 18 तन्न आंइ कली मप्रॉइनु हना यो, हजुर, इन कली एको लोव्र तुइक्पाइक्चा दाक्नीकी ‘गोपुकी इन देवी देवता आन कली सेउ मपाइनीकी। मिनु इन राप्पाइश्शो सुन के मूर्ति आ डोंइती खुम्की पा मबाप्नीकी’ दैतेक्म” दे पिप कली माइक्तेक्म। प्रस्थान २०:३-५

## दानीएल आ वारच मीम हुम्शो

19 मिनु मेको नेंशा नेबुकदनेसर शद्रक, मेशक नु अबेद-नेगो आन कली तशा, थाम्पान गाइश्शा, आ कुल राव किक्पाइक्नु। मिनु मेकोमी “ब्रशो मी कली डोंइती क्येडा ७ खेयप नाप्शो सेल्चा माल्ब” दे हुकुम पाप्नु। 20 मिनु मेकोमी आ लडाइ पाइब आन नेल्ल क्येडा बोल्यो मुर आन कली “शद्रक, मेशक नु अबेद-नेगो आन कली फ्रेंशा, मेको ठेयब मी ब्रतीकेमी हुम्चा” दे हुकुम पाप्नु। 21 मिनु मेकोपुकीमी मेको आन कली आन फेक्शो वा नु ताकी सुन्दा फ्रेंशा, ठेयब मी ब्रतीकेमी हुम्ताक्म। 22 मारदे हना पिपमी “रीब पा पने” दे हुकुम पाप्नु। मिनु मेको मीम शद्रक, मेशक नु अबेद-नेगो आन कली हुम्थ लाइक्ब आन कली गु दाक्नु। 23 मिनु मेको शद्रक, मेशक नु अबेद-नेगो सांफा फ्रेंसीशा, ठेयब मी ब्रतीकेमी दोक्तेक्म।

## परमप्रभु नु मीम काथा बाक्शो

24 मिनु पिप नेबुकदनेसर थाम्पान छक लाक्शा, छुल बोक्शा, आ अर्ती गेब आन कली “गोपुकीमी मुर सां आन कली फ्रेंशा, मीम हुम्शो मनकी डा?” दे हिल्लो पाप्नु। मिनु मेकोपुकीमी “हुम्ताक्क, हजुर” देंशा, लोव्र लेत्ताक्म। 25 मिनु पिपमी मेको आन कली “तन्न कोव्रडीन, मफ्रेंसीशो ४ जना मुर मी ब्रतीकेमी एर ओंथ हिरना हिरन बाक्नीम। मीम मेको आन कली मद्रुप्शो तांइसीनीम। मिनु का आ कुल देवी देवता आस तौ आ कुल खोदेशो तांइसाक्व” दैत। यसैया ४३:२ 26 मिनु पिप नेबुकदनेसर मेको ठेयब मी ब्रतीके आ लाप्शो आ नेक्था लशा, मेकोमी “शद्रक, मेशक नु अबेद-नेगो नेल्ल क्येडा ठेयब परमप्रभु आ मुर गूशा, एक पिन” दे ब्रेत्ताक्मी। मिनु शद्रक, मेशक नु अबेद-नेगो मेको मी रे गूतेक्म। 27 मिनु मेको पारसी रागी डा हुकुम पाइब नेल्ल नु पिप कली अर्ती गेब नेल्ल बुक्शा “मीम एको सां आन कली मारेइ मपव। आन चां यो मप्रॉइश्शो बाक्त। मिनु आन वा यो मप्रॉइक्थु, मी आ रिना यो मबाक्शो बाक्त” दैतेक्म। हिब्रू ११:३३-३४ 28 मिनु नेबुकदनेसरमी “शद्रक, मेशक नु अबेद-नेगो आन परमप्रभु नेल्ल क्येडा ठेयब बाक्ब। मेकोमी आ स्वर्ग डा गेय पाइब सोइश्शा, आ कली थमा सुइक्ब आन कली प्रॉइनु। मारदे हना मेकोपुकीमी पिप, आं देंशो मबित्थु, साइक्चा पुंइसीब दुम्शा यो, आंम परमप्रभु कली डा लाक्शा, अर्को तेकोइ देवी देवता आन डोंइती बाप्शा सेउ मपामे। दानीएल ६:२३ 29 मोपतीके गो ‘जात जात डा, रागी रागी डा नु आंम आंम लोव्र पाइब मुर नेल्ल, सु सुमी शद्रक, मेशक नु अबेद-नेगो आन परमप्रभु आ पर्बम मरिम्शो लोव्र पा शुक्शी पाइनीमी, मेको आन गुइ खोइल खोइश्शा साइक्चा पुंइसीनीम। मिनु मेको आन खिं यो प्रेशा गेचा पुंइसीनीम’ दे हुकुम पाइनुड। मारदे हना मेको आन परमप्रभु का ला बाक्ब। देवी देवताम मोदेशो पा प्रॉइने मचाप्नीम” दैत। दानीएल २:४७ 30 मिनु पिपमी शद्रक, मेशक नु अबेद-नेगो आन कली बेबीलोन रागी डा डोंइती क्येडा ठेयब मुर सेल्लु।

## पिपमी लेंशा डोमु तशो

4 मिनू पिप नेबुकदनेसरमी जात जात नु रागी रागी डा आंम आंम लोत्र पाइब नेल्ल आन कली “गे थुं नाइश्शा बाक्कीन। *दानीएल* ६:२५<sup>2</sup> नेल्ल क्येडा ठेयब परमप्रभुमी आं कली चिन्ड नु छक लाक्चा डा गेय कौंइताक्पी। मिनू मेको लोत्र इन कली शेंचा रिश्शो लाक्ती।<sup>3</sup> मेको आ कौंइशो चिन्ड गिश ठेयब बाक्नीमी। मिनू आ छक लाक्चा डा गेय गिश सक्ति पाइश्शो बाक्नीमी। आ राज्य गेना हना यो लीब। मिनू आ अधिकार यो गेना हना यो लीब। *दानीएल* २:४४; *दानीएल* ४:३१; *दानीएल* ६:२७; *दानीएल* ७:१४, २७; *भजन संग्रह* १४५:१३<sup>4</sup> गो, नेबुकदनेसर, आं खिमी मारेइ मारेइमी गाप्शा, आं दरवारमी थुं नाइश्शा बाक्शो नड।<sup>5</sup> मिनू गो आं दरवारम बाक्डानु, डोमु का ताता। मेको तशा, थाम्पा हिंती। आं थुंमी मार मार मिश्शा, मेको कौंइतीके तशा, खिंखि पाता।<sup>6</sup> मिनू गो बेबीलोन रागी डा जोक्ब तुइक्ब मुर नेल्ल आन कली ‘आं डोमु रे मार रुस्सीबा’? मेको तुइक्पाइसीचा कली आं बाक्तीकेमी ब्रेत्ताक्डमी।<sup>7</sup> मिनू जादू, मन्तर तन्तर पाइब, सोरुल कोत्रब कल्दी नु चिन्ड आ अर्थ तुइक्ब जाक्तेक्म। मिनू गो मेको आन कली ‘गो डोमु का ताता’ दे शोवता। तन्न मेकोपुकीमी आं कली आं डोमु रे मार रुस्सीबा, मेको शेंने मचबेम।<sup>8</sup> मिनू नेल्ल क्येडा नोले दानीएल आं डौंइती जाक्ता। मेको आ नें आं देवता आ नें खोदेंशो पा बेल्ल-शजर बाक्ता। मिनू मेको आ आगाम नेल्ल क्येडा ठेयब देवता आ सोक्त बाक्ता। मिनू मेको कली गो डोमु का ताता” दे शोवता। *दानीएल* ५:११, १४<sup>9</sup> मिनू गो मेको कली “बेल्ल-शजर, जादू पाइब आन ठेयब मुर, इ आगाम नेल्ल क्येडा ठेयब देवी देवता आन सोक्त बाक्ता। मिनू खुइश्शो लोत्र मारेइ मारेइ शेंने चाप्ब बाक्नेवे। मोपतीके आं तशो डोमु आ कौंइतीक देनो। मिनू मेको रे मार रुस्सीबा शेंदी” दे माइक्ता।

<sup>10</sup> गो इप्शा बाक्डानु, डोमु का ताता। मेको दोदेंशो बाक्ता देंशा हना, रागी आ दातेमी सरीड थिचशो थम लाइश्शो रवा का बाक्ता।<sup>11</sup> मिनू मेको रवा थम लाइश्शो बाक्ता। मेको रवा ठेयब नु बोल्यो दुम्ता। आ डरीमी सरीड थिप्तु। मिनू मेको रवा रागी रागी रे तांइसीबाक्ता।<sup>12</sup> मेको आ सफा थम दारशो बाक्तेक्म। मिनू मेको रवाम शुश फल सिश्शो बाक्ता। मिनू मेको रे नेल्लेमी जाइबाक्तेक्म। मिनू जन्तु मेको रवा आ पुंमी बाक्बाक्तेक्म। मिनू चिक्ब आ राशीम ग्योत्र सेल्बाक्तेक्म। मिनू ब्रौंइशा बाक्ब नेल्लेमी मेकेर रे जचा ताइबाक्तेक्म।<sup>13</sup> मिनू कौंइतीके कोत्रना कोत्रन बाक्डानु, स्वर्ग डा कोत्रब इर रे यिशो ताता।<sup>14</sup> मेकोमी ठेयब शेंदा पा “एको रवा कली तिमीन। आ राशी नेल्ल क्योरीन, आ सफा हेमीन। मिनू आ फल फ्रशा गेने। मिनू जन्तु आन कली आ पुं रे प्रोक्पतीन। मिनू चिक्ब आन कली मेको आ राशी रे खेरीन।<sup>15</sup> तन्न मेको आ ठुटा नु शाक्श खपीम लीचा माल्नीम। मेको फलाम नु कांसा के पातामी फ्रेंशा, खपीमी लीचा माल्नीम। मिनू नाक्दो यिशो सीतमी जिश्शा बाक्ता। मिनू मेको जन्तुपुकी नु बाक्ता। जन्तु खोदेंशो पा घांसम बाक्चा माल्दल।<sup>16</sup> मेको ७ बर्स मोदेंशो दुम्चा माल्ब। मिनू मेको मुर आ थुं फांइसीशा, जन्तु आन थुं खोदेंशो दुम्ब।<sup>17</sup> स्वर्ग डा कोत्रबपुकीमी ‘नेल्ल क्येडा ठेयब परमप्रभुमी राज्य नेल्ल कली सासन पाइब। मेकोमी आ दाक्शो मुर कली सासन पतीक गेय गेब। मेको नेल्ल क्येडा ब्रेश्शो मुर आ गुइमी गेब। मेको मुर नेल्लेमी तुइक्चा माल्नीम’ दे लोत्र पाक्तेक्म। *दानीएल* २:२१

## दानीएलमी डोमु आ अर्थ शेंशो

<sup>18</sup> मोपा गो पिप, नेबुकदनेसरमी डोमु का ताता। मुल बेल्ल-शजर, गे एको डोमु रे मार रुस्सीबा, मेको शेंदी। आं राज्यम बाक्ब जोक्ब तुइक्ब नेल्लेमी मेको शेंने मचबेम। गे चहिं मेको शेंने चाप्नेवे। मारदे हना इ आगाम ठेयब देवता आ सोक्त बाक्ब” दे माइक्ता।

<sup>19</sup> मिनू मेको नेंशा, बेल्ल-शजर माइश्शो दानीएल आ थुं लुकच लत। आ मिस्तीकेमी मेको कली शुश हिंपाइक्तु। मिनू गो, पिपमी मेको कली “बेल्ल-शजर, आं डोमु नु मेको आ रुप्तीकेमी इ कली हिंपाइक्चा मगोवो” देंती। मिनू दानीएलमी “हजुर, आं पिप, एको डोमु इन जोरी सत्रु आन कली दुम्ता। मिनू

मेको आ रुप्तीक लोत्र इन जोरी सत्रुम राम हना, दुम वा।<sup>20</sup> इन डोमुम तशो रवा ठेयब नु बोल्यो दुम्शा, आ डरीमी सरीड थिप्तु। मिनू मेको रवा कली रागी रागी रे तांइसीबाक्ता। *इजीकीएल* ३१:३-१४<sup>21</sup> मेको आ सफा थम दारशो बाक्तेक्म। मेको रवाम शुश फल सिश्शो बाक्ता। मिनू मेको रे नेल्लेमी जाइबाक्तेक्म। मिनू जन्तुपुकी मेको रवा आ पुंमी बाक्बाक्तेक्म। मिनू चिक्ब आ राशीम बास बाक्बाक्तेक्म।<sup>22</sup> हजुर, पिप, गे मेको रवा बाक्नीनी। गे ठेयब नु सक्ति पाइश्शो दुम्तीनी। इन सक्ति बारशा, सरीड सम्म जाक्दीश्शो बाक्ता। मिनू इन अधिकार बारशा, रागी नेल्ल आन कली हुकुम पाइतीनी।<sup>23</sup> हजुर, पिप, गे स्वर्ग डा कोत्रब यिशो ताइतीनी। मिनू मेकोमी ‘एको रवा कली तिमीन। खतम पोक्कीन। तन्न मेको आ ठुटा नु शाक्श खपीम लीचा माल्नीम। मेको फलाम नु कांसा के पातामी फ्रेंशा, खपीमी लीचा माल्नीनी। मिनू नाक्दो यिशो सीतमी जिश्शा बाक्ता। मिनू मेको जन्तुपुकी नु बाक्ता। ७ बर्स मलाक्गा सम्म मोदेंशो दुम्चा माल्ब’ देंत।<sup>24</sup> मिनू हजुर, पिप, मेको डोमु डा रुप्तीक नु इन पर्वम नेल्ल क्येडा ठेयब परमप्रभु आ हुकुम मार बाक्ता देंशा हना,<sup>25</sup> गे मुर आन बाक्तीके रे खेरचा पुंइसीनीनी। मिनू गे जन्तुपुकी नु बाक्नीनी। बी ब्यफोमी खोदेंशो पा घांस ब्वाइनीनी। मिनू नाक्दो डा सीतम जिल्नीनी। मिनू ७ बर्स सम्म मोदेंशो दुम्नीनी। नेल्ल क्येडा ठेयब परमप्रभुमी मुर आन राज्यम सासन पाइब। मिनू परमप्रभुमी मेको राज्य आ दाक्शो मुर आ गुइमी गेब, दे इन कली तुइक्पाइक्चा कली मोदेंशो पाप्तु।<sup>26</sup> मिनू रवा आ ठुटा नु शाक्श खप उइ प्रौंइचा देंशो हुकुम दुम्ता। मिनू मेको रे मार रुस्सीब देंशा हना, स्वर्ग डा परमप्रभु नेल्ल आन कली सासन पाइब बाक्ब, दे रुम्नी नोले इन राज्य लेंशा ताइनीनी।<sup>27</sup> हजुर पिप, मोपतीके आं गेशो अर्ती इन कली दुम्ता। इन पाप कली ठीक पतीकेमी क्याम्दीन। मिनू इन मरिश्शो पशो, श्येत जाइब आन कली शिशो पतीकेमी क्याम्दीन। मो पाइतीनी हना, इन रिश्शो बाक्तीक शुश नाक्ता सम्म लीब” देंत। *हितोपदेस* १९:१७; *मत्ती* ५:७

## पिप आ डोमु गाप्शो

<sup>28</sup> मिनू पिप नेबुकदनेसरमी दोदेंशो डोमु तवा, मोदेंशोन दुम्ता।<sup>29</sup> मिनू १२ महिना नोले मेको पिप बेबीलोन आ दरवार आ कौसीमी हिरना हिरन बाक्शा,<sup>30</sup> मेकोमी “मार, एको बेबीलोन थम रिश्शो मबाक्बा डा? गो एको आं ठेयब सक्तिमी आं शुश शॉप वोइश्शा, बाक्चा कली सेल्ता” देंत। *हितोपदेस* १६:१८<sup>31</sup> मिनू पिपमी मेको लोत्र देंमेनु, स्वर्ग रे सेंदा कामी “पिप नेबुकदनेसर इ कली मार लोत्र देंशो बाक्ता देंशा हना, एको राज्य इ गुइ रे रोइक्ने थुम्शो बाक्ब।<sup>32</sup> गे मुर आन बाक्तीके रे खेरचा पुंइसीनेवे। मिनू गे जन्तुपुकी नु बाक्नेवे। बी ब्यफोमी खोदेंशो पा घांस ब्वाइनेवे। मिनू नाक्दो डा सीतम जिल्नेवे। मिनू ७ बर्स सम्म मोदेंशो दुम्नेवे। नेल्ल क्येडा ठेयब परमप्रभुमी मुर आन राज्य कली सासन पाइब। मिनू परमप्रभुमी मेको राज्य आ दाक्शो मुर आ गुइमी गेब, दे इन कली तुइक्पाइक्चा कली मोदेंशो पाइब” देंत। *दानीएल* ५:२१<sup>33</sup> मिनू मेको लोत्र पशो नेना चोटीन नेबुकदनेसर थमा पा मोदेंशो दुम्ता। मेको मुर आन दाते रे खेरचा पुंइसाक्ता। मिनू बी ब्यफोम खोदेंशो पा घांस ब्बचा गोप्तु। मिनू मेको आ रां नाक्दो डा सीतमी जित्त। मिनू मेको आ चां ककाकुली आ ओप्ला खोदेंशो पा लाइश्शो नु आ गेय चिक्ब आ नडग्रा खोदेंशो दुम्ता।

## पिपमी परमप्रभु कली मान पशो

<sup>34</sup> मिनू पिपमी “मेको देंशो नेल्ल जाक्दीम नोले, गो आं पिया पोक्शा सरीड गे कोवता। मिनू आं निप्स लेंशा रिश्शो दुम्ता। मिनू गो नेल्ल क्येडा ठेयब नु गेना हना यो ब्रौंइशा बाक्ब परमप्रभु कली ठेयब सेल्शा, मान पाता। मेको आ सासन पतीके गेना हना यो लीब। मेको आ राज्य पाला पाला सम्म लीब। *दानीएल* ३:३३<sup>35</sup> रागी डा मुरपुकी नेल्ल मेको आ डौंइती मारेइ मबाक्नीम। मेकोमी स्वर्ग डा गेय पाइब नु रागी डा मुर आन कली मार पचा दाक्बा, मेकोन पने चाप्ब। सुइमी मेको कली तेक्ने मचाप्नीम। मिनू सुइमी ‘गे मार पनी?’ देंने मचाप्नीम। *यसैया* ४०:१७; *अय्युब* ९:१२<sup>36</sup> मेना आं निप्स लेंशा रिश्शो दुम्ता। मिनू आं राज्य डा छेडछेड आं कली लेत्ताक्पी। आं

कली अर्ती गेब नु आं ठेयब गेय पाइबपुकी आं कली गुम्थ जाक्तेक्म। मिनु गो लेंशा पिप दुम्ती। मिनु गो डोंइती क्येडा शुश सक्ति नु मान ताता।<sup>37</sup> मुल गो, नेबुकदनेसरमी 'स्वर्ग डा पिप ठेयब बाक्ब' दे मान पाइनुड। मारदे हना आ पशो नेल्ल थमा बाक्ब। आ पतीके नेल्ल ठीक बाक्नीम। मेकोमी ठेयब लेशो मुर आन कली ब्रेव्शो सेल्ले चाप्ब" दे पिपमी देंत। लूका १:५१; लूका १८:१४

### पिप बेल-शजर आ भोज

5 मिनु पिप बेल-शजरमी आ राज्य डा ठेयब अधिकार ताइब हजार का मुर आन कली भोज का सेल्लु। मिनु मेकोमी मेको आन डोंइती अडगुर शांबु तूतु।<sup>2</sup> मिनु मेको पिप शांबुमी दुक्शा "आं आफ नेबुकदनेसरमी यरूसलेम सहर डा परमप्रभु आ खिं रे चाक्शो सुन नु चांदी के बोसपुकी एक चाक्कीन। गो, आं राज्य डा ठेयब अधिकार ताइबपुकी, आं ग्युंवे पशो मीशपुकी नु आं अरु चाक्शो मीशपुकी गारशा, मेको बोसम तूनीकी" देंत। दानीएल १:२; २इतिहास ३६:१०; एज्रा १:७-११<sup>3</sup> मिनु परमप्रभु आ खिं यरूसलेम रे चाक्शो सुन नु चांदी के बोसपुकी मेकेर चाक्तेक्म। मिनु पिप, आ राज्य डा ठेयब अधिकार ताइबपुकी, आ ग्युंवे पशो मीशपुकी नु आं अरु चाक्शो मीशपुकी गारशा, मेको बोसम तूतेक्म।<sup>4</sup> मिनु मेकोपुकीमी अडगुर शांबु तूशा, सुन, चांदी, कांसा, फलाम, शी नु फुल्लु के सेल्लो देवी देवता आन कली सेउ पाक्तेक्म।

5 मिनु मेना मुर आ गुड का फो गूशा, बत्ती आ नेक्था दरवार डा सिल्लो गारोमी ब्रेक्ताक्व। मिनु पिपमी मेको गुडमी ब्रेक्ना ब्रेक्न पशो ताप्तु।<sup>6</sup> मिनु मेको तशा, पिप आ कुल लल गिग दुम्शा, शुश हित। आ खोइल खिंखि पा आ पोक्च थोक्सीशा, खोइल ललाक लुलुक दुम्त।<sup>7</sup> मिनु पिपमी "बेबीलोन रागी डा मन्तर तन्तर पाइब, सौरुल कोव्रब कल्दी नु चिन्ड आ अर्थ जोक्ब चाक्कीन" दे हुकुम पाप्तु। मिनु पिपमी मेको बेबीलोन रागी डा जोक्ब तुइक्ब आन कली "सुमी एको ब्रेक्शो पडेशा, आं अर्थ आं कली शेंने चाप्बा, मेको प्याजी रड डा वा फेक्पाइश्शा, सुन के माला रेल्ला पुंडसीब। मिनु गो नु आं राज्य डा ठेयब गेय पाइब आ नोले डा हुकुम पाइब सेल्लुड" देंत।<sup>8</sup> मिनु पिप आ जोक्ब तुइक्ब मुर नेल्ल दरवारम जाक्तेक्म। तन्न मेकोपुकीमी मेको ब्रेक्स पडने मचबेम। मिनु मार रुम्सीबा, मेको यो देंने मचबेम।<sup>9</sup> मिनु पिप बेल-शजर शुश हिंशा, आ कुल लल गिगी जीत। मिनु आ राज्य डा ठेयब अधिकार ताइबपुकी मार पचा ना, मार पचा दुम्तेक्म।<sup>10</sup> मिनु पिपमी पिप नु आ राज्य डा ठेयब अधिकार ताइबपुकी लोव्र पशो नेंशा, भोज जतीक कोठामी ओव्रत। मिनु मेकोमी "पिप, गे गेना हना यो ब्रोंइशा बाक्कीन। गे हिंशा इन थुं ग्येथ लुक्च मपने। इन कुल लल गिगी मडुम्पतीन।<sup>11</sup> इन राज्यमी ठेयब देवता आन सोक्त पाइश्शो मुर का बाक्ब। इन आफ आ पालामी मेको नु देवी देवता के खोदेंशो पा सोक्त आ मिश्शो रुप्तीके तुइक्तीके नु जोक्ब तुइक्ब थुं बाक्त। मोपतीके इन आफ पिप नेबुकदनेसर मी मेको कली जादू, मन्तर तन्तर पाइब, सौरुल कोव्रब कल्दी नु चिन्ड आ अर्थ जोक्ब आन ठेयब मुर सेल्लो बाक्त। दानीएल ४:५; दानीएल २:४८<sup>12</sup> मिनु पिपमी मेको कली बेल-शजर, दे नें वोइश्शो बाक्त। मारदे हना मेको बेल-शजर माइश्शो दानीएल तुइक्तीक नु डोमु आ अर्थ शेंतीक, खुइश्शो लोव्र तुइक्ब नु मारेइ मारेइ ठेयब श्येत रे गुंइने चाप्ब बाक्ब। मिनु मुल मेको दानीएल कली ब्रथ सोइक्तीन। मिनु मेकोमी मेको ब्रेक्स पडेशा, रूप्पाइक्ने चाप्ब" देंत। दानीएल १:१७

13 मिनु नोले दानीएल कली पिप आ डोंइती चाक्तेक्म। मिनु पिपमी दानीएल कली "गे दानीएल नवे? आं आफोमी इ कली चाक्डे? गे यहूदा रागी रे ग्याइश्शा चाक्वा पुंडसीशो नवे? 14 गो इ आगाम ठेयब देवता आन मिश्शो तुइक्तीक, रुप्तीक नु शुश जोक्ब तुइक्ब थुं बाक्ब, देंशो लोव्र नेंता। 15 गो एको ब्रेक्स पडेशा मार रुम्सीबा, आं कली देंमल, दे शुश जोक्ब तुइक्ब नु मन्तर तन्तर पाइब आन कली एक चाक्पाइक्ता, तन्न मेकोपुकीमी एको ब्रेक्स आ अर्थ शेंने मचबेम। 16 मिनु गे एको चिन्ड आ अर्थ मार रुम्सीबा, दे शेंने चाप्ब नु मारेइ मारेइ श्येत रे गुंइने चाप्ब बाक्नेवे, देंशो लोव्र नेंता। मिनु मुल एको ब्रेक्स पडेशा, मार रुम्सीबा मेको आं कली शेंने चाप्तीवी

हना, गे प्याजी रड डा वा फेक्पाइश्शा, सुन के माला रेल्ला पुंडसीनेवे। मिनु गे आं राज्य डा आं क्येडा नु आं ठेयब गेय पाइब आ नोले डा ठेयब हुकुम पाइब दुम्नेवे" देंत।

### ब्रेक्स आ अर्थ शेंशो

17 मिनु दानीएलमी पिप कली "इन कोसेली आंमान वोंइसीन। मिनु अरु सुइ आन कली गेने। तन्न गो एको ब्रेक्स पडेशा, मार रुम्सीबा इन कली शेंनन्नी।<sup>18</sup> हजुर, नेल्ल क्येडा ठेयब परमप्रभुमी इन आफ पिप नेबुकदनेसर कली राज्य, ठेयब दुम्तीके, मान ततीके नु शुश शॉप गेशो बाक्त। दानीएल २:३७<sup>19</sup> मोपा परमप्रभुमी मेको कली ठेयब दुम्तीके गेतीके जात जात नु रागी रागी डा आंम आंम लोव्र पाइब मुर नेल्ल मेको क्येडा हिंशा, खिंखि पाक्तेक्म। मिनु मेकोमी सु कली साइक्वा दाक्ता, मेको कली साइक्वु। सु कली ब्रोंइचा गेचा दाक्ता, मेको कली ब्रोंइचा गेप्तु। मिनु मान बारपाइक्वा दाक्शो कली मान बारपाइक्वु। सु कली दिप्चा दाक्ता, मेको कली दिप्तु।<sup>20</sup> तन्न मेको ठेयब लेत्तीके नु आ थुं खकटा दुम्पाइक्तीके पिप आ नित्तीके रे खेरचा नु आ छेडछेड रोइक्वा पुंडसाक्व।<sup>21</sup> मिनु मुर आन बाक्तीके रे खेरचा पुंडसीशा, आ थुं जन्तु आन थुं खोदेंशो दुम्त। मेको ब्वाकी डा गथा नु बाक्शा, ब्यफोम खोदेंशो पा घांस ब्वशो बाक्त। मिनु मेको नाक्दो डा सीतमी जित्त। नेल्ल क्येडा ठेयब परमप्रभु मुर आन राज्य कली सासन पाइब बाक्ब नु मेको राज्य आ दाक्शो मुर आन गुडमी गेब, दे तुइक्पाइक्वा कली मोदेंशो दुम्शो बाक्त। दानीएल ४:२९<sup>22</sup> मिनु गे, मेको आ तौ, बेल-शजरमी, मेको लोव्र नेल्ल तुइश्शा यो, इन थुं मब्रेम्पाइक्नी।<sup>23</sup> 'गो स्वर्ग डा परमप्रभु क्येडा ठेयब नड' दे आंम कली ठेयब सेल्लनी। मिनु गे परमप्रभु आ खिं डा बोसपुकी चाक्पाइश्शा, गे नु इन राज्यम अधिकार ताइब, इन ग्युंवे पशो मीशपुकी नु इन अरु चाक्शो मीशपुकीमी मेको बोसम अडगुर शांबु तूतीनी। मिनु सुन, चांदी, कांसा, फलाम, शी नु फुल्लु के सेल्लो मिक्च मताइब, मनंभे, मरुब्ब देवी देवता आन कली सेउ पाइतीनी। तन्न इन कली ब्रोंइतीक सोक्त गेब नु इन लां कोंइब परमप्रभु कली मान मपनी।<sup>24</sup> मोपतीके मेकोमी मेको गुड सोइश्शा, मेको ब्रेक्स ब्रेक्पाइक्वु।<sup>25</sup> मिनु मेको ब्रेक्शो मार बाक्ब देंशा हना 'मेने मेने टेकेल पेरेस' दे ब्रेक्शो बाक्ब। यसैया ४७:११<sup>26</sup> मेको आ अर्थ मार बाक्ब देंशा हना, मेने आ अर्थ 'परमप्रभुमी इन सासन पतीक नाक्त हिक्शा, थुम्तु' देंशो बाक्ब।<sup>27</sup> टेकेल आ अर्थ 'गे नाक्तीकेम नाक्चा पुंडसीशा, सोपी दुम्तीनी' देंशो बाक्ब।<sup>28</sup> पेरेस आ अर्थ, इन राज्य निक्शी दुम्शा, मादी नु पारसी आन कली गेशो बाक्ब, देंशो रुम्सीबा। मेको आ अर्थ एको बाक्ब" दे दानीएलमी देंत।<sup>29</sup> मिनु पिप बेल-शजरमी "दानीएल कली प्याजी वा फेक्तीन। सुन के माला रेल्लीन। मिनु मुर नेल्ल आन कली 'मेको राज्य डा पिप, आं क्येडा नु आं ठेयब गेय पाइब क्येडा नोले डा हुकुम पाइब बाक्ब' दे मुर नेल्ल आन कली शेंदीन" देंत। दानीएल २:२८; उत्पत्ती ४१:४२-४३

30 मिनु मेको नाक्दोन कल्दी आन पिप बेल-शजर साइक्वा पुंडसाक्व।  
31 मिनु मादी रागी डा पिप दारामी राज्य ताप्तु। मेना पिप दारा ६२ बर्स दुम्शो बाक्माक्त। दानीएल १:१; यसैया १३:१७

### दानीएल रिम्शो पाइब दुम्शो

6 पिप दारामी आ राज्य कली सहे का २० जना हुकुम पाइब मुर वोइश्शो बाक्त। मेको पारसी रागीमी ब्राशा बाक्शो बाक्तेक्म। दानीएल ५:१२<sup>2</sup> मिनु पिप दाराम मारेइ मजाम्ल, दे मेको नेल्ल आन कली ठेयब कोव्रब मुर सां वोइश्शो बाक्त। मिनु मेको सां आन दातेमी का दानीएल बाक्त। मेको हुकुम पाइबपुकीमी ठेयब कोव्रब मुर सां आन कली रागीम मार दुम्मे, मेको शोव्रचा माल्शो बाक्तेक्म।<sup>3</sup> मिनु दानीएल अरु ठेयब कोव्रब मुर नु पारसी रागी डा सहे का २० जना हुकुम पाइब नेल्ल आन दातेमी नेल्ल आन क्येडा निप्स पाइश्शो नु रिम्शो थुं पाइश्शो बाक्त। मोपतीके पिपमी "गो मेको कली रागी नेल्ल कली हुकुम पाइब सेल्लुड" दे मिम्ता बाक्त।<sup>4</sup> मिनु मेको ठेयब कोव्रब मुर नु सहे का २० जना पारसी रागी कली हुकुम पाइबपुकीमी गेहे पा दानीएल कली दोस गेचा, दे क्यारी पचा गोव्रमे बाक्त।

तन्न मरिश्शो नु दोस गेतीक मारेइ मथिदमे बाक्त। मारदे हना दानीएल रिश्शो, मारेइ दोस मपाइश्शो गेय पाइब मुर बाक्त।<sup>5</sup> मिनु मेकोपुकीमी “दानीएल कली आ परमप्रभु आ अरेशो लोत्र थमा सुइक्तीक क्येडा लाक्शा, अरु मारेइमी यो दोस गेने मचाप्रय” देंमुमा बाक्त।<sup>6</sup> मिनु मेको ठेयब कोत्रब निक्शी नु पारसी रागी कली हुकुम पाइब नेल्ल लोत्रसी पा गारशा, पिप आ दरवारमी जाक्शा पिप कली “हजुर, पिप दारा, गे गेना हना यो ब्रॉइशा बाक्कीन।<sup>7</sup> गो इन राज्य डा ठेयब कोत्रब, आइक्च नु ठेयब हुकुम पाइब, अर्ती गेब नु इन रागी डा ठेयब मुर नेल्ल नु गारशा, गे पिपमी, कानुन का सेल्चा माल्नीनी। मार कानुन सेल्चा माल्नीनी देंशा हना, मुल ३० नाक्त सम्म इन क्येडा लाक्शा, सुइ मुरपुकीम आंम देवी देवता नु मुर आन कली मारेइ पुंइने मचापनीम। इन क्येडा लाक्शा अरु सुइ कली पुंइतेक्म हना, मेको मुर गुप्स वोइक्तीकेमी ताइक्चा पुंइसीब, दे ब्रेक्शा छाप थोक्शा वोतीन।<sup>8</sup> हजुर पिप, मोपा कानुन का सेलीन। मिनु छाप थोक्तीन। मादी नु पारसी आन कानुन मफांडसीब” देंमा बाक्त। एस्तर १:१९; एस्तर ८:८<sup>9</sup> मिनु पिप दारामी मेको कानुन ब्रेक्चा छाप थोक्शा गुंइताक्व।

### दानीएल ग्याइक्चा पुंइसीशो

<sup>10</sup> मिनु दानीएलमी पिप दारामी मोपा ब्रेक्शा छाप थोक्शा गुंइशो तुइश्शा, यरूस्लेम गे कोत्रशा सेल्शो खिं आ तला तारी लशा, पोक्च थेक्शा आ परमप्रभु कली प्रार्थना पाप्नु। मोपा नाक्त किंत किंत सां खेयप पार्थना पाप्नु। मिनु डोंइती खोदेशो पा परमप्रभु कली ठेयब सेल्लु।<sup>11</sup> एरजा ८:४८<sup>12</sup> मिनु दानीएल कली गेहे पाइबपुकी मेकेर जाक्शा, दानीएलमी प्रार्थना पा आ परमप्रभु कली ठेयब सेल्शा पुंइशो थित्तेक्म।<sup>12</sup> मिनु नोले मेकोपुकी पिप आ दरवार लशा, मेको ब्रेक्शो कानुन आ पर्बम “हजुर पिप, गे ३० नाक्त सम्म सुइमी इन क्येडा लाक्शा, अरु देवी देवता नु मुर आन कली मारेइ यो मपुंइचा, मो पाम्तेक्म हना, मेको आन कली गुप्स वोइक्तीकेमी पिक्चा, दे कानुन सेल्नी ममाइ?” देंतेक्म। मिनु पिपमी “एको लोत्र थमा बाक्ब। मादी नु पारसी आन कानुन गेनायो मफांडसीब” दे लोत्र पाप्नु।<sup>13</sup> दानीएल ३:१०<sup>14</sup> मिनु मेकोपुकीमी पिप कली “आ रागी रे ग्याइश्शा चाक्चा पुंइसीशो यहूदी दानीएलमी इन लोत्र लाक्शा, इन गुंइशो कानुन मटीव। मेकोमी नाक्त किंत किंत खेयप सां प्रार्थना पा पुंइब” देंतेक्म।<sup>14</sup> मिनु पिपमी मेको लोत्र नेंशा, आ थुं शुश लुक्च लत। मिनु दानीएल कली “दोपा प्रॉइनुडा?” दे नां मलाक्गा सम्म शुश मिश्शा बाक्माक्त।<sup>15</sup> मेको दानीएल कली गेहे पाइबपुकी पिप आ डोंइती जाक्शा “हजुर पिप, मादी नु पारसी आन पिपमी हुकुम पशो नु छाप थोक्शो कानुन मफांडसीब, दे एको लोत्र तुइक्नीनी” देंतेक्म।

### दानीएल कली गुप्स खोरम तोक्शो

<sup>16</sup> मिनु नोले पिपमी “दानीएल कली चाक्कीन। मिनु गुप्स आन कली वोइक्तीकेमी तोक्कीन” दे हुकुम पाप्नु। मिनु मेकोपुकीम दानीएल कली गुप्स आन बाक्तीकेम तोक्तेक्म। मिनु पिपमी दानीएल कली “इ मप्रॉइथु, ठेयब सेल्शो परमप्रभुमी इ कली प्रोनल” देंत। दानीएल ३:१५<sup>17</sup> मिनु नोले गेय पाइबपुकीमी फुल्लु का चाक्शा, मेको गुप्स बाक्तीक आ ओव्रतीक चोक्तेक्म। सुइमी दानीएल कली मारेइ पने मचाप्मेक्ल, दे पिपमी आ छाप पाइश्शो औंठीम थोक्शा, आ राज्य डा ठेयब अधिकार ताइब आन छाप यो थोक्पाइक्तु।<sup>18</sup> मिनु पिप आ दरवारम लेश्शा लशा, मेको नाक्दो माइजा बाक्शा, मारेइ जचा थोत्रक आ बाक्तीकेम मचाक्पद। मिनु मइथु, नां सोंइताक्व।

### परमप्रभुम दानीएल कली प्रॉइशो

<sup>19</sup> मिनु पिप नां मसोथु, सुनी कना बोक्शा, मेको गुप्स आन कली वोइक्तीकेम दोरशा लत।<sup>20</sup> मिनु गुप्स आन बाक्तीके आ नेक्था जाक्दीश्शा, शुश हिंशा दानीएल कली “दानीएल, ब्रॉइशा बाक्ब परमप्रभु आ गेय पाइब, इ गेना हना यो ठेयब सेल्ना सेल्न बाक्शो परमप्रभुमी इ कली गुप्स रे प्रोना?” दे हिल्लो पा ब्रेक्ताक्व। दानीएल ३:१७<sup>21</sup> मिनु दानीएलमी

पिप कली “हजुर पिप, गे गेना हना यो ब्रॉइशा बाक्कीन।<sup>22</sup> आं परमप्रभुमी आ स्वर्ग डा गेय पाइब सोइश्शा, आं कली मारेइ मपाइक्पाइक्चा कली गुप्स आन शोत्र चोक्पाइक्तु। मारदे हना आं दोस मबा। हजुर पिप, इन डोंइती यो मारेइ मरिश्शो मपड” देंत। दानीएल ३:२८; भजन संग्रह २२:२२; हिब्रू ११:३३<sup>23</sup> मिनु पिप थाम्पा ग्येरसीशा “दानीएल कली गुप्स वोइक्तीके रे गुंइदीन” दे हुकुम पाप्नु। मिनु दानीएल कली कीशा गुंइताक्म। मिनु मेको मारेइ मरिश्शो बाक्त। मारदे हना मेकोमी आ परमप्रभु कली थमा सुइश्शो बाक्त।<sup>24</sup> मिनु पिपमी “दानीएल कली दोस गेब, आन मीश नु आन तमी ती नेल्ल आन कली गुप्स वोइक्तीकेमी तोक्कीन” दे हुकुम पाप्नु। मिनु मेको आन कली मेकेर तोक्तेक्म। मिनु मेकोपुकी गुप्स आन बाक्तीके मजाक्दीत्थु, गुप्सपुकी प्रेक्शा ग्राम्शा मेको आन रुश का यो मवोइक्चु नेक्तेक्म।

### पिपम परमप्रभु कली मान पशो

<sup>25</sup> मिनु नोले पिप दारामी जात जात नु रागी रागी डा आंम आंम लोत्र पाइब नेल्ल आन कली “गे थुं नाइश्शा बाक्कीन। दानीएल ४:१<sup>26</sup> आं राज्य डा मुर नेल्लेमी दानीएल आ परमप्रभु कली मान पा हिंचा माल्नीम। मारदे हना मेको गेना हना यो ब्रॉइशा बाक्ब परमप्रभु बाक्ब। मेको आ राज्य गेना हना यो लीब। मिनु आ अधिकार गेनायो मनुज्ब।<sup>27</sup> मेकोमी आ मुर आन कली प्रॉइशा, श्येत रे गुंइने चाप्ब। मेको सरीड नु रागीमी चिन्ड नु छक लाक्चा डा गेय पाइब बाक्ब। मेकोमी दानीएल कली गुप्स आन सक्ति रे प्रॉइतु” दे हुकुम पा ब्रेक्ताक्व।<sup>28</sup> मिनु दानीएल पिप दारा नु पारसी आन पिप कोरेस आस पालामी शुश मान तशा, सक्ति पाइश्शो दुस्त।

### दानीएलमी कोंइतीके तशो

दानीएल २:-

**7** मिनु बेबीलोन डा बेल-शजर पिप दुश्शो डोंइती डा बर्समी दानीएल इम्मेनु, डोमु पा, कोंइतीके का ताप्नु। मिनु मेकोमी आ तशो डोमु ब्रेक्ताक्व। दानीएल ५:१<sup>2</sup> मिनु दानीएलमी गो, दानीएल, इप्शा डोमु पा, कोंइतीक का ताता, सरीड पूर्व, पच्छिम, उत्तर, दक्खिन रे फश पा ठेयब समुन्द्र कली छाल पोक्पाइश्शो ताता।<sup>3</sup> मिनु समुन्द्र रे ४ ओटा ठेयब जन्तु गूतेक्म। मेको दोदेशो तांइसाक्म देंशा हना, प्रकाश १३:१-२<sup>4</sup> मेको डोंइती डा जन्तु गुप्स खोदेशो बाक्शा, ककाकुली आ फ्रां खोदेशो फ्रां पाइश्शो बाक्त। मिनु गो कोत्रशा बाक्डानु, मेको आ फ्रां तुल्चा पुंइसाक्व। मिनु मेको खप रे बोक्पाइश्शा, मुर खोदेशो पा आ खोइल निक्शीमी राप्पाइक्चा पुंइसाक्व। मिनु मेकोमी मुर आ थुं ताप्नु।<sup>5</sup> मिनु मेको आ नोले अर्को जन्तु का गूत। मेको वां खोदेशो बाक्त। मेकोमी का पटटी रे बोक्शा, जेरी सां आ शोत्रम काम्शो बाक्त। मिनु मेको कली “बोक्को, श्ये शुश ब्वावो” देंशो नेंता।<sup>6</sup> मिनु गो कोत्रशा बाक्डानु, नोले अर्को जन्तु का गूत। मेको जोइ खोदेशो बाक्त। मेको आ चीमी ४ ओटा चिक्ब आ फ्रां खोदेशो फ्रां बाक्तेक्म। मिनु मेको के ४ ओटा पिया बाक्तेक्म। मिनु मेकोमी सासन पतीक अधिकार ताप्नु।<sup>7</sup> मिनु नोले गो नाक्दो डा कोंइतीकेमी नेल्ल क्येडा नोले डा जन्तु गूशो ताता। मेको शुश हिंचा डा, अर्को आन क्येडा बोल्थो बाक्त। मेको के फलाम के ठेयब खूइ बाक्तेक्म। मिनु श्ये ब्वना ब्वन बाक्शा, लीशो श्ये आ खोइलीमी दिम्ताक्व। मेको डोंइती डा जन्तु आन खोदेशो मबा। मारदे हना मेको के १० ओटा ग्रोत्र बाक्तेक्म।<sup>8</sup> मिनु गो मेको ग्रोत्र आन कली रिश्शो पा कोत्रडनु, मेको आन दातेमी अर्को आइक्च ग्रोत्र का गूशो ताता। मेको आइक्च ग्रोत्र कली बाक्तीक गेचा कली डोंइती डा ग्रोत्र सां आन शाक्श सुन्दा एत्तेक्म। मेको नक् गूशो ग्रोत्रमी मिक्च बाक्तेक्म। मेको मुर आ मिक्च खोदेशो बाक्तेक्म। मिनु मेको के ठेयब लेश्शा लोत्र पाइब शोत्र का बाक्त। दानीएल ११:३६<sup>9</sup> मिनु गो कोत्रना कोत्रन बाक्डानु, पिप आन शुश नित्तीक वोइश्शो ताता। मिनु मेको शुश बर्स दुश्शो का ठेयब नित्तीकेमी निस्साक्व। मेको आ वा फुं खोदेशो बुश बाक्त। मिनु आ पिया डा चां रिश्शो ऊन खोदेशो पा बुश बाक्त। मिनु मेको आ ठेयब नित्तीके ठेयब ब्रशो मी खोदेशो बाक्त। मेको ठेयब नित्तीक आ गुगीलपुकी बाक्तेक्म। मेको के यो थम ठेयब मी

खोदेंशो बाक्तेकम। *इजीकीएल १:२६; प्रकाश ४:२; भजन संग्रह ९०:२*  
 10 मिनु मेको शुश बर्स दुश्शो का आ डोंइती रे मी के खोला खोदेंशो पा गूत।  
 मिनु हजार हजार आ स्वर्ग डा गेय पाइबमी मेको कली गेय पांमेकम। मिनु  
 १०, १० हजार मेको आ डोंइती बाक्तेकम। मिनु मेको निसाफ पचा कली  
 निस्साकम। मिनु किताबपुकी प्राक्शा वोइक्तेकम। *प्रकाश ५:११; भजन*  
*संग्रह ६९:२९; प्रकाश २०:१२* 11 मिनु गो मेको ठेयब लेशो लोव पाइब  
 ग्रोव कली कोवना कोवन बाक्ती। मिनु गो कोवना कोवन बाकडानु, मेको  
 जन्तु कली साइक्तेकम। मिनु मेको आ रां खतम सेल्शा, ठेयब मीमी  
 हुम्ताकम। *प्रकाश १९:२०* 12 मिनु लीशो जन्तु आन सासन पतीक अधिकार  
 रोइक्चा पुंडसाकम। तन्न मेको आन कली इक्का नोले सम्म ब्रोंइचा गेम्तेकम।  
*दानीएल २:२१* 13 मिनु नोले गो नाक्दो डा कोंइतीकेमी मुर खोदेंशो का  
 ताता। मेको गोस्सुम गिल्सीशा पिना पिन पशो ताता। मिनु मेको कली शुश  
 बर्स दुश्शो का आ डोंइती राप्पाइश्शो ताता। *लूका २१:२७; प्रकाश १:१३;*  
*प्रकाश १४:१४* 14 मिनु मेको कली सासन पतीक अधिकार, मान ततीक नु  
 पिप सेल्शा राज्य गेशो ताता। मिनु जात जात नु रागी रागी डा आंम आंम  
 लोव पाइब मुर नेल्लेमी मेको कली गेय पशो ताता। आ सासन पतीके  
 अधिकार गेना हना यो लीबाक्त। आ पिप दुश्शो राज्य गेनायो खतम  
 मदुम्बाक्त।

15 मिनु गो, दानीएल, मेको कोंइतीके तशा, आं थुं लुक्च लत। मिनु गो  
 हिंती।

16 मिनु गो मेकेर राप्शा बाक्ब का कली “एको लोव रे मार रुस्सीबा?” दे  
 हिल्लो पाता। मिनु मेकोमी “गो इ कली नेल्ल रुप्पाइक्नुड। 17 मेको ४ ओटा  
 ठेयब जन्तु रागी डा ४ जना पिप बाक्नीम। 18 तन्न मेको नेल्ल क्येडा ठेयब  
 आ मुरपुकीम मेको राज्य ताक्शा, गेनायो मनुप्चा डा पा, गेना हना यो सासन  
 पाइनीम” देंत।

19 मिनु गो मेको नेल्ल आन क्येडा नोले डा जन्तु रे मार रुस्सीबा, दे रुप्चा  
 थुं पाता। मेको अरु जन्तु खोदेंशो मबा। मेको थम हिंचा डा बाक्त। मेको आ  
 खूइ फलाम के नु नडग्रा कांसा के बाक्तेकम। मेकोमी मारेइ मारेइ ब्वशा  
 नाक्शा, लीशो श्ये चहिं आ खोइलीम दिम्ताक्व। *दानीएल ७:७* 20 मिनु मेको  
 आ पियामी बाक्शो १० ओटा ग्रोव नु अर्को ग्रोव का आ पर्वम रुप्चा थुं  
 पाता। मेको ग्रोव का गूमैनु, डोंइती डा ग्रोव सां एत्तेकम। मेको गूशो ग्रोव के  
 मिक्च नु ठेयब लेशो लोव पतीक शोव बाक्त। मिनु मेको अरु ग्रोव आन  
 क्येडा ठेयब बाक्त। मेको आ पर्वम यो रुप्चा थुं पाता। 21 मिनु गो कोवना  
 कोवन बाकडानु, मेको ग्रोवमी नेल्ल क्येडा ठेयब आ मुर नु लडाइ पा ग्रात।  
*प्रकाश १३:७* 22 मिनु मेको शुश बर्स दुश्शो का मजाकम सम्म लडाइ ग्राना  
 ग्रान बाक्त। मिनु नेल्ल क्येडा ठेयबमी आ मुर आन कली निसाफ पतीक  
 अधिकार गेपु। मेना नेल्ल क्येडा ठेयब आ मुरुम मेको राज्य आंम के  
 सेल्लेकम। 23 मिनु आं कली रुप्पाइक्बमी नेल्ल आन क्येडा नोले डा जन्तु  
 “रागीमी मेको नेल्ल आन क्येडा नोले डा जन्तु राज्य का बाक्ब। मेको अरु  
 राज्य खोदेंशो मबाक्ब। मिनु मेकोमी रागी नेल्ल आन कली गू दाक्ब। आ  
 खोइलीमी दिम्शा नेल्ल आन कली रोबल चिबल पोक्ब। 24 मिनु मेको १०  
 ओटा ग्रोव आ अर्थ मार बाक्ब देंशा हना, मेको राज्य रे १० जना पिप  
 गूनीम। मिनु मेको आन नोले अर्को पिप का गूब। मेको डोंइती डा पिप  
 खोदेंशो मदुम्ब। मिनु मेकोमी पिप सां आन कली फ्रुइक्ब। *प्रकाश १७:१२*  
 25 मिनु मेकोमी नेल्ल क्येडा ठेयब आ पर्वम मरिश्शो लोव पा, नेल्ल क्येडा  
 ठेयब आ मुर आन कली यो खतम सेल्ब। मिनु मेकोमी परमप्रभु आ देंशो  
 चाड नु आ अरेशो लोव कली फाइक्चा दाक्ब। मिनु परमप्रभु आ मुर आन  
 पाला का, पाला निक्शी नु आधा पाला मेको आ अधिकारमी गेचा  
 पुंडसीनीमी। *प्रकाश १३:५-६; दानीएल १२:७* 26 मिनु नोले निसाफ पची ना  
 जाक्ब। मेको आ सासन पतीक अधिकार लेंशा गेनायो मतचा डा पा आ गुड  
 रे रोइक्नीम। मिनु मेको कली साइश्शा खतम पोक्नीम। 27 मिनु राज्य,  
 सासन पतीक अधिकार नु राज्य नेल्ल आन ठेयब दुम्तीके नेल्ल क्येडा ठेयब  
 आ मुर आन कली गेचा पुंडसीनीम। मेको आन राज्य गेना हना यो लीब राज्य  
 दुम्ब। मिनु सक्ति पाइश्शो नेल्लेमी मेको आ गेय पा, मेको कली टीनीम” देंत।  
 28 मेको आं डोमु तशो आ लोव बाक्ब। गो दानीएल, एको मिम्शा थाम्पा

हिंती। मिनु आं कुल क्येर दुम्त। मिनु गो एको लोव नेल्ल आं थुंम वोइक्ता।  
*दानीएल ८:१८; दानीएल १०:८, १६-१८*

सांड नु बोका कोंइशो

8 मिनु बेल-शजर पिप दुश्शो बर्स सां जाक्दीमेनु, गो, दानीएलमी लेंशा  
 कोंइतीके ताता। *दानीएल ७:१* 2 मिनु मेको कोंइतीकेमी गो एलाम  
 रागी डा सुसा माइश्शो ठेयब सहर डा उलाइ खोला आ नेक्था बाक्शो  
 बाक्ती। 3 मिनु गो कोवशा बाकडानु, ग्रोव निक्शी पाइश्शो सांड का ताता।  
 मेको आ ग्रोव निम्फा दुइश्शो बाक्ताक्स। का चहिं अर्को क्येडा दुइश्शो  
 बाक्त। मेको दुइश्शो ग्रोव नोले गूशो बाक्त। 4 मिनु गो मेको सांडम पच्छिम,  
 उत्तर नु दक्खिन गे खूना खून पशो ताता। अरु जन्तु नेल्ल मेको आ डोंइती  
 राप्ने मचाप्बाक्तेकम। मिनु सुइमी मेको आ सक्ति रे प्रोंइने मचाप्बाक्तेकम।  
 मेकोमी आ दाक्शो पशा, आ सक्ति बारत। *दानीएल ८:४* 5 मिनु गो मेको  
 कोवशा बाकडानु, पच्छिम रे बोका का फो गूत। मेकोमी आ खोइल खप  
 मथिथु, रागी नेल्ल लाक्तु। मिनु मेको बोका आ मिक्च आस दातेमी ग्रोव का  
 बाक्त। *दानीएल ८:२१* 6 मिनु मेको बोका मेको खोला आ नेक्था बाक्शो  
 ग्रोव निक्शी पाइश्शो सांड आ बाक्तीक जाक्त। मिनु मेको सांड कली खूचा,  
 दे शुश बोल पा दोरत। 7 मिनु गो मेको सांड गे दोरशो ताता। मेको थाम्पा  
 गाइश्शा, मेको सांड कली खूशा, आ ग्रोव निम्फा जिव्ताक्व। मेको सांड  
 बोल मपाइश्शो दुम्शा, मेको बोका कली मारेइ पने मचब। मेको बोकामी  
 मेको सांड कली खपीम तोक्शा, आ खोइलीमी दिम्ताक्व। मिनु सुइमी मेको  
 सांड कली बोका आ सक्ति रे प्रोंइने मचबेम। 8 मिनु नोले मेको बोकामी  
 ठेयब सक्ति तापु। मिनु मेको नेल्ल क्येडा सक्ति पाइश्शो दुम्तीके मेको आ  
 दुइश्शो ग्रोव जिव्ताक्व। मिनु मेको जिव्शो ग्रोव आ पा डा अर्को ४ ओटा ग्रोव  
 रागी आ पूर्व, पच्छिम, उत्तर, दक्खिन गे हिरशा गूतेकम। *दानीएल ११:४*  
 9 मिनु मेको ४ ओटा ग्रोव आन दाते डा का रे अर्को इम्चीली ग्रोव का गूत।  
 मिनु मेको नक गूशो ग्रोव दक्खिन, पूर्व गे नु दारशो रागी गे कोवशा थाम्पा  
 ठेयब दुम्शा कोल्ल। *दानीएल ७:८* 10 मिनु मेको कोल्ला, स्वर्ग डा लडाइ  
 पाइब आन हुल बाक्तीक सम्म जाक्दीश्शा, लडाइ पाइब का निक्शी नु  
 सोरुल का निक्शी आन कली तोक्शा खोइलीमी दिम्ताक्व। 11 मेकोमी  
 लडाइ पाइब आन नेल्ल क्येडा ठेयब कली यो ठेयब लेशो लोव पा, नाक्त  
 किंत किंत डा चोशा चढेतीक रोइश्शा, परमप्रभु यावे आ बाक्तीके खिं प्रेश्शा  
 गेपु। *दानीएल ९:२७* 12 मिनु आ परमप्रभु कली काइ मटितीकेमी नाक्त  
 किंत किंत डा चढेतीक मचढेचा डा पा गेय पाइब वोइक्तु। मिनु मेकोमी थमा  
 पा शेंतीक कली खतम पोक्शा, आ मरिश्शो पतीक चहिं बारना बारन  
 लपाइक्तु। 13 मिनु नोले गो स्वर्गम बाक्ब कामी लोव पशो नेंता। मिनु अरु  
 स्वर्गम बाक्बमी मेको कली “नाक्त किंत किंत डा चोशा चढेतीक रोइक्तीके,  
 आ मरिश्शो पतीकेमी परमप्रभु आ खिं श्येत्थ नु खतम सेल्लीक नु परमप्रभु  
 आ लडाइ पाइब आन कली खोइलीमी दिष्शा, कोंइतीके गेना नुष्बा?” दे  
 हिल्लो पशो नेंता। 14 मिनु अर्कोमी आं कली “हजार निक्शी सहे सां नाक्दो  
 नाक्त सम्म मोदेंशो दुम्ब। मिनु नोले परमप्रभु आ खिं लेंशा सेल्लनीम” देंत।

परमप्रभुमी कोंइशो आ अर्थ शेंशो

15 गो, दानीएलमी, एको कोंइतीके रे मार रुस्सीबा, दे तुइक्चा माल्ता।  
 मिनु वोंइश मुर खोदेंशो का आं डोंइती गूशा, दोक राप्शो ताता। 16 मिनु गो  
 उलाइ खोला रे “गाब्रीएल, एको मुर कली एको कोंइतीके रे मार रुस्सीबा,  
 मेको शेंदो” देंशो मुर आ सेंदा का नेंता। *दानीएल ८:२; दानीएल ९:२१;*  
*लूका १:१९, २६* 17 मिनु मेको परमप्रभु यावे आ स्वर्ग डा गेय पाइब आं  
 राप्शा बाक्तीके आं नेक्था जाक्त। मिनु गो थाम्पा हिंशा खुम्की पा बाप्ती।  
 मिनु मेकोमी आं कली “ए मुर, एको कोंइतीके नेल्ल क्येडा नोले डा नाक्त  
 आ पर्वम बाक्ब, दे रुपो” देंत। *प्रकाश १०:६* 18 मिनु मेकोमी आं कली लोव  
 पवानु, गो खपीमी दिड गोल्शा बाप्शा, थशो खोदेंशो दुम्ती। मिनु मेकोमी आं  
 कली थिशा, पोक्शा राप्पाइक्ती। 19 मिनु मेकोमी “गो इ कली नोले डा  
 गाइक्तीक नाक्ती मार दुम्बा, तुइक्पाइक्नन। मारदे हना एको कोंइतीके नेल्ल  
 क्येडा नोले डा नाक्त कली बाक्ब। 20 इ तशो ग्रोव निक्शी पाइश्शो सांड



मादी नु पारसी रागी डा पिप बाक्नीस। 21 मिनु मेको बोका चहिं ग्रीस रागी डा पिप बाक्ब। मेको आ मिक्च आन दाते डा ठेयब ग्राव, मेकेर डा नेल्ल क्येडा डोंइती डा पिप बाक्ब। *दानीएल ११:३* 22 मिनु गे मेको ग्राव जिक्शा मेको आ पा डा ४ ओटा ग्राव गूशो ताप्तीवी। मेको आ रागी ४ ओटा राज्य दुम्नीम। तन्न मेकोपुकी डोंइती डा राज्य खोदेंशो सक्ति पाइश्शो मद्दुम्नीम। 23 मिनु मेको आन सासन पतीक अधिकार नुच्ची ना मेको आन मरिश्शो पतीकेम ब्रीतीके खकटा थुं पाइश्शो, शुश मरिश्शो पाइब पिप का जाक्ब। *दानीएल ११:२१* 24 मेको शुश बोल्यो दुम्ब। मिनु मेकोमी मारेड मारेड खतम पोक्ब। आ पतीक मारेड मारेडमी ग्राब। मिनु मेकोमी सक्ति पाइश्शो मुर नु थमा सुइक्ब आन कली खतम पोक्ब। 25 मेको आ निप्समी मुरुम मतुइक्वा डा पा जोल पतीकेमी ग्राब। मिनु आंम थुंमी 'गो नेल्ल क्येडा ठेयब नड' दे मिश्शा, शुश मुर आन कली साइक्ब। मिनु मेकोमी पिप आन पिप कली यो मरिश्शो पा बोक्ब। मिनु मेको खतम सेल्चा पुंडसीब। तन्न मुर आन गुड रे ममाइ। 26 मिनु मेको इ कली कोंइशो नाक्दो नाक्त आ पर्वम कोंइतीके कोंइशो थमा बाक्ब। तन्न गे एको कोंइतीके कली इ थुंमी खूइश्शा वोइक्वा माल्नेवे। मारदे हना एको शुश नोले दुम्ब लोव बाक्ब" दे माइक्ती। *दानीएल ८:१४; दानीएल १२:४*

27 मिनु नोले गो, दानीएल, काइ सोक्त मपाइश्शो खोदेंशो दुम्ती। मिनु का निक्शी नाक्त रोड पा बाक्ती। मिनु नोले बोक्शा, पिप आ गेय पथ लती। मिनु मेको आं तशो कोंइतीके आ पर्वम हिंती। मारदे हना मेको कोंइतीके रुख सुइ मबाक्ब।

दानीएलम परमप्रभु कली पुंडशो

9 मिनु पिप अहासूरस आ तौ दारा डोंइती डा बर्समी कल्दी रागी डा पिप दुम्त। पिप दारा मादी जात डा बाक्माक्त। *दानीएल ६:१* 2 मिनु पिप दारा आ सासन पशो डोंइती डा बर्समी गो, दानीएलमी परमप्रभु यावेमी आ लोव पाइब येरमीया कली ब्रेक्पाइश्शो लोव डा किताब पढेशा, यरूसलेम खतम दुम्चा कली ७० बर्स लीनीम, दे रुप्ता। *येरमीया २५:११-१२; येरमीया २९:१०* 3 मिनु गो माइजा बाक्शा, अरन्डी फेक्शा नु पुलु मोंइसीशा परमप्रभु, आं होवप कली लोव पा पुंडशा, मार लोव लेष्वा, दे रिश्शा बाक्ती। 4 मिनु गो परमप्रभु यावे, आं परमप्रभु कली लोव पा, गो मार मार मरिश्शो पडा, मेको नेल्ल शोवशा "परमप्रभु, गे ठेयब नु हिंचा डा परमप्रभु बाक्नीनी। गे इन कली दाक्ब नु इन शेंशो लोव टीब आन कली गेना हना यो दाक्नीनी। मिनु इन कबल मप्रॉइनीनी। *येरमीया १४:७; ब्यवस्था ७:९; नेहेम्याह १:५* 5 गोपुकीमी पाप पशा, मरिश्शो पाइतक। मिनु इन अरेशो मटिथु नु इन कली गन गन पा, इन शेंशो नु निसाफ पतीके लोव प्रॉइतक। 6 गोपुकीमी इन गेय पाइब, इन लोव पाइब आन लोव मनैक। मेकोपुकीमी इन नैमी आंइ पिप, आंइ ठेयब मुर, आंइ किकी पिपी नु आंइ रागी डा मुर नेल्ल आन कली लोव पास्तेक्म। 7 परमप्रभु, गे ठीक पाइब बाक्नीनी। गो चहिं मुने दोक्शो बाक्नीकी। मुलाक्ती यहूदा डा मुर, यरूसलेममी बाक्ब, इस्राएली नेल्ल आन नेक्था नु डोन रागीम खेरचा पुंडसीशो मुर नेल्ल इन कली प्रॉइशो आ पर्वम दोस ताइब दुम्तेक्म। 8 परमप्रभु यावे, आंइ पिपपुकी, आंइ ठेयब मुरपुकी, आंइ किकी पिपी नु गो नेल्लेमी इन डोंइती पाप पाइतक। *एज्रा ९:७; यसैया ४३:२७* 9 गोपुकी इन देंशो गन गन पा मटीतक हना यो, परमप्रभु, आंइ होवप, गे शिशी पाइब नु पाप क्याम्ब बाक्नीनी। *भजन संग्रह १३०:४* 10 गोपुकीमी परमप्रभु यावे, आंइ परमप्रभु कली मटीब बाक्तक। इन लोव पाइबपुकीमी इन अरेशो लोव आंइ कली नैपाइश्शो बाक्तेक्म। तन्न गो मपक। 11 इस्राएली नेल्लेमी इन क्येडा डोन लशा, इन अरेशो मटिथु, इन देंशो मपामे। मोपतीके गो इन गेय पाइब मोसामी ब्रेक्शो इन अरेशो लोवमी सराप नु कसम आंइ तारी मोइक्वा पुंडसीशो बाक्नीक। मारदे हना गोपुकीमी इन कली पाप पाइतक। *लेवी २६:१४-३९; ब्यवस्था २८:१५-६८* 12 मिनु गे आंइ पर्वम नु आंइ निसाफ पाइब आन पर्वम इन देंशो लोव खाप्तीनी। यरूसलेम कली गेशो खोदेंशो श्येत रागी नेल्ल आन कली गेनायो मद्दुम्शो बाक्त। 13 मोसामी इन अरेशो लोवम 'मेको कली मटीब श्येत जाइनीम' दे ब्रेक्शो खोदेंशो पा, मेको श्येत नेल्ल आंइ कली दुम्त। मिनु गोपुकीमी

परमप्रभु यावे, आंइ परमप्रभु कली 'इन थमा लोव कली रुप्तीक थुं गेकी' दे मपुंडक। मिनु आंइ मरिश्शो पशो मप्रॉइक। इन कली दाक्शा मप्रॉइतीके ममिम्तक। 14 मोपतीके परमप्रभु यावेमी आंइ कली गेतीक, मेको ठेयब श्येत तेक्तु। थमा पा परमप्रभु यावे, आंइ परमप्रभु आ पशो नेल्ल ठीक बाक्ब। मारदे हना गोपुकीमी आ देंशो मपक। 15 मिनु परमप्रभु यावे, आंइ परमप्रभु गे इन मुर आन कली इजीप्त रागी रे गुंडशा चाक्तीनी। मेको इन सक्ति नु इन ठेयब नें आ पर्वम मोदेंशो पाइतीनी। गोपुकी पाप पा, इन अरेशो लोव मटीब दुम्तक। 16 परमप्रभु, इन ठीक पतीकेमी इन सहर यरूसलेम नु इन योव्रशो डांडा आ पर्वम मगाइक्तीन, मचुरीन। आंइ पशो पाप नु आंइ किकी पिप आन मरिश्शो पशो आ पर्वम यरूसलेम नु इन योव्रशो मुर आन नेक्था बाक्ब मुर रे पा शुक्शी पाइक्वा पुंडसीब दुम्तेक्म। 17 मोपतीके आंइ परमप्रभु, इन गेय पाइब, आं देंशो नु पुंडशो लोव नेनीने। मिनु इन नें आ पर्वम इन ब्रेश्शो बाक्तीके कली लेंशा शिशी पा कोवडीन। 18 आं परमप्रभु इन नोफा दाइश्शा नेनीन। मिनु आंइ कली दुम्शो श्येत नु इन नैम सेल्शो सहर यरूसलेम कली कोवडीन। आंइ ठीक पतीके आ पर्वम ममाइ, तन्न इन शुश शिशी पतीके आ पर्वम पुंडनीकी। 19 आं परमप्रभु, नेनीन। परमप्रभु, आंइ पाप क्याम्दीन। परमप्रभु, नेनीन। मिनु इन नें आ पर्वम मरिश्शु गेय पने। मारदे हना इन सहर नु इन मुर इन नें रे ब्रेत्वा पुंडसीशो बाक्नीम" दे गो दानीएलमी परमप्रभु कली देंती। *येरमीया १४:९*

गाब्रीएल शेंथ जाक्शो

20 मिनु गो मो देंशा परमप्रभु यावे, आं परमप्रभु आ डोंइती लोव पना पन, प्रार्थना पा, आं पाप नु आं मुर इस्राएली आन पशो पाप नेल्ल शोवशा, आं परमप्रभु आ डांडा, आ मुर आन पर्वम पुंडना पुंडन, बाक्डानु, 21 प्रार्थना पना पन, गो आं डोंइती आं कोंइतीकेमी तशो मुर गाब्रीएल बेरशा आं नेक्था जाक्त। मेना नाक्दो डा चढेची ना जाक्शो बाक्त। *दानीएल ८:१६* 22 मिनु मेकोमी आं कली "दानीएल, मुल गो इ कली जोक्तीक तुइक्तीक नु रुप्तीक थुं गेथ जाक्ती। 23 मिनु गे गेना पुंडचा गोवी, मेना गो लोव का नेंता। मिनु गो इ कली मेको लोव शेंथ जाक्ती। मारदे हना गे शुश दाक्वा पुंडसीशो मुर बाक्नेवे। मेको लोव मिश्शा, मेको कोंइतीक रुपो।

24 इ मुर नु परमप्रभु आ सहर ७० हप्ता सम्म श्येत जचा माल्नीम। मिनु मे नोले मरिश्शो नु पाप पतीके नुष्ब। मेना अरेशो मटितीके क्याम्तीके गेय पशो बाक्ब। मिनु ठीक पतीके गेना हना यो लीब। मिनु मेको कोंइतीक नु परमप्रभु यावे आ लोव पाइब कली छाप थोक्शा नोले परमप्रभु आ बाक्तीक लेंशा सेल्शा तेल खेक्नीम। 25 मोपतीके यरूसलेम लेंशा सेल्तीक लोव तेल लुक्शो पिप मजाक्म सम्म ७ हप्ता बाक्नीम। मिनु ६२ हप्ता लां नु खिं आ एर आंथ लेंशा सेल्चा कली माल्ब, दे रुप्शा तुइक्ती। मेना श्येत जतीक ना बाक्ब। 26 मिनु ६२ हप्ता नोले मेको तेल लुक्शो का मारेड मद्दुम्शु यो तिल्चा पुंडसीब। मिनु मेको जाक्वा चिक्शो पिप आ लडाइ पाइब नु जाक्शा, मेको सहर नु परमप्रभु यावे आ बाक्तीक खतम पोक्ब। मिनु मेको आ नुच्ची ना ठेयब भोल यिशा, नोले सम्म लडाइ दुम्ब। डोंइती मोदेंशो खतम दुम्तीक श्येत आ पर्वम देंशो बाक्ब। *यसैया २८:२२; लूका २१:२३-२४* 27 मेकोमी हप्ता का सम्म शुश मुर नु कबल पाइब। मिनु आधा हप्तामी चढेतीक नेल्ल तेक्ब। मिनु मेकोमी चढेतीक आ पा डा शुश ग्रांरा दिचा डा गेय पाइब। मेको कली खतम सेल्तीक लोव मप्रूम सम्म मोदेंशो पाइब" देंत। *दानीएल ८:११; दानीएल ११:३१; दानीएल १२:११; मत्ती २४:१५; यसैया १०:२२-२३*

दानीएलम नोले डा कोंइतीके तशो

10 मिनु पारसी रागी डा कोरेस पिप दुम्शो बर्स सां दुम्मेनु, परमप्रभुमी बेल्त-शजर माइश्शो दानीएल कली लोव का तुइक्वाइक्तु। मेको लोव थमा बाक्त। ठेयब श्येत आ पर्वम बाक्त। मेको दानीएलमी मेको कोंइतीक तशा, रुप्तीक थुं यो ताप्तु। *दानीएल १:२१; दानीएल १:७* 2 मेना गो, दानीएल, हप्ता सां सम्म रौंका पाता। 3 मेको हप्ता सां सम्म गो ब्रोवशो मारेड जचा थोवक मजड। श्ये मब्बड। अडगुर शांबु यो मत्तुड। मिनु तेल यो मखेक्सीड। 4 मिनु डोंइती डा महिना डा २४ नाक्त

टाइग्रीस माइश्शो ठेयब खोला आ नेक्था राष्थो बाक्ती।<sup>5</sup> मिनु गो इर गे कोव्रडनु, सुती वा फेक्शो मुर का ताता। मेकोमी थम रिम्शो ओफीर डा सुन के किष्पुर् किष्थो बाक्त्त। *दानीएल ८:१५; दानीएल १२:६; इजीकीएल ९:२; प्रकाश १:१३-१५*<sup>6</sup> मिनु मेको आ रां बेरील माइश्शो हीरा खोदेंशो बाक्त्त। आ कुल चिला खोदेंशो बाक्त्त। आ मिक्च ब्रशो तोव्रशी खोदेंशो बाक्त्त। मेको आ गुड खोइली थाम्पा खुइश्शो कांसा खोदेंशो पा टल्केशो बाक्तेक्म। मेको आ सेंदा शुश मुर आन लोव्र पशो खोदेंशो नेंसाक्ब। *इजीकीएल १:२७-२८*<sup>7</sup> गो, दानीएलमी मेको कोंइतीक ताता। गो नु बाक्ब मुर सुइमी मतामे। तन्न मेकोपुकी हिंशा खिंखि पा प्रोक्शा खुंडसाक्म।<sup>8</sup> मिनु मेको ठेयब कोंइतीक तचा कली गो का ला बाक्ती। मिनु मारेइ पने मचाप्ब दुम्ती। मिनु आं कुल बेक्चा चिक्शो मुर के खोदेंशो दुम्शा, मारेइ बोल मपाइश्शो दुम्ती।<sup>9</sup> मिनु नोले मेकोमी लोव्र पशो नेंता। मिनु मेको लोव्र नेंनु चोटीन, गो खपीमी दिड गोल्शा, थती।

<sup>10</sup> मिनु गुड काम आं कली थिती। मिनु गो गुड नु पोक्च थेक्शा, बोक्ती।<sup>11</sup> मिनु मेकोमी आं कली “दानीएल, गे शुश दाक्चा पुंडसीशो मुर बाक्नेवे। आं देंशो लोव्र नोफा दाइश्शा नेनो। बोक्शा बाक्को। मारदे हना गो इ बाक्तीकेमी सोइक्चा पुंडसीशो बाक्नुड” दे माइक्ती। मिनु मेकोमी लोव्र पवानु, गो आ डोंइती खिंखि पा राप्ती।<sup>12</sup> मिनु मेकोमी आं कली “दानीएल, महिनो, गे रुप्चा माल्शा डोंइती डा नाक्ती रे इ परमप्रभु आ डोंइती आंम कली ब्रेम्शो सेल्साक्वे, इ पुंडशो नेंतीके गो एक जाक्ती।<sup>13</sup> तन्न पारसी राज्य कली कोव्रब सैतान आ गेय पाइबमी गो नु २१ नाक्त्त सम्म लडाइ पा तेक्ती। मिनु परमप्रभु यावे आ स्वर्ग डा ठेयब गेय पाइब मिकाएल जाक्शा, आं कली वारच पाइक्ती। मिनु गो जाक्चा ताता। *यसैया २४:२१*<sup>14</sup> नोले डा नाक्त्त इ मुर आन कली मार दुम्बा, दे गो इ कली रुप्पाइक्च जाक्ती। मारदे हना इ तशो कोंइतीक क्येडा नोले डा नाक्त्त कली अर्को कोंइतीक का यो बाक्ब” दे माइक्ती।

<sup>15</sup> मिनु मेकोमी आं कली लोव्र पवानु, गो आं पिया खुक्शा मारेइ लोव्र पने मचाप्ब दुम्शा बाक्ती।<sup>16</sup> गो दुम्मेनु, मुर खोदेंशो काम आं शोव्र थिप्तु। मिनु गो लोव्र पने चाप्ता। मिनु गो आं डोंइती राष्था बाक्ब कली “आं प्रभु, एको कोंइतीके आ पबंम खाइक्ती। मिनु आं के मारेइ बोल मली। *यसैया ६:७; येरमीया १:९*<sup>17</sup> गो, इन वाइलम, गे नु दोपा लोव्र पने चाप्नुडा? मारदे हना गो खिंखि पा, आं बोल नेल्ल लशा, आ सोक्त्त हेररा मली” देंती।

<sup>18</sup> मिनु मेको मुर खोदेंशोमी आं कली लेंशा थिशा, बोल्यो सेल्लती। *दानीएल ८:१८*<sup>19</sup> मिनु मेकोमी आं कली “नेल्ल क्येडा दाक्चा पुंडसीशो, महिनो। इ कली मारेइ मडुम्ब। बोल्यो नु महिंब दुमो” दे माइक्ती। मेकोमी गो नु लोव्र पवा नोले, गो बोल्यो दुम्ती। मिनु गो “आं प्रभु, लोव्र पने। मारदे हना गे आं कली बोल्यो सेल्लतीनी” देंती। *प्रकाश १:१७*<sup>20</sup> मिनु मेकोमी “गो इ बाक्तीकेम मारदे जाक्डा, तुइक्नेवे? गो पारसी राज्य कली कोव्रब सैतान आ गेय पाइब नु लडाइ पचा कली लेत्चा माल्नुड। गो ग्राडा नोले ग्रीस रागी डा सैतान आ गेय पाइब जाक्ब।<sup>21</sup> मिनु गो थमा लोव्र डा किताबमी मार ब्रेक्शो बाक्मे, मेको इ कली शोव्रथ जाक्ती। मेकेर मिकाएल क्येडा लाक्शा, अरु वारच पाइब सैतान आ गेय पाइब नु लडाइ पचा कली सुइ मबाक्नीम। परमप्रभु यावे आ स्वर्ग डा गेय पाइब, मिकाएल चहिं इसाएली इन कली कोव्रब बाक्ब।

**11** गो दारा मादी डा पिप दुम्शो डोंइती डा बर्समी मिकाएल कली वारच पाइक्चा नु अरु रे पा प्रोंइचा कली बाक्ती” देंत।

लडाइ आ पबंम नोले दुम्ब लोव्र

<sup>2</sup> मेकोमी लेंशा परमप्रभु यावे आ स्वर्ग डा गेय पाइबमी “मुल गो इ कली मेको थमा लोव्र पाइनुड। पिप दारा आ नोले पारसी रागीमी पिप सां दुम्नीम। मिनु मेको सांमी नोले जाक्ब पिप मेको डोंइती डा सां आन क्येडा शुश शोंप पाइश्शो दुम्ब। मिनु मेको पिपमी आ शोंपोमी आ सक्ति बारपाइक्ना पाइक्न लशा, रागी नेल्ल आन कली ग्रीस राज्य नु लडाइ पचा कली पोक्ब। *दानीएल १०:२१*<sup>3</sup> मिनु नोले शुश लडाइ पाइब पिप का जाक्ब। मेकोमी शुश रागी कली सासन पाइब। मिनु मेकोमी मार दाक्बा, मेको पाइब। *दानीएल ८:२१*

<sup>4</sup> मिनु आ सक्ति बारना बारन लमेनु, आ राज्य पूर्व पच्छिम, उत्तर दक्खिन गे योक्सीब। मोपा योक्सीशा, आ तौ चचपुकीम मारेइ मताइनीम। मिनु मेको खोदेंशो पा सुइमी लेंशा सासन मपाइनीम। मारदे हना मेको आ राज्य नेल्ल खतम दुम्मेनु, अरु आन कली दुम्ब। *दानीएल ८:८, २२*<sup>5</sup> मिनु नोले दक्खिन डा पिप शुश सक्ति पाइश्शो दुम्ब। तन्न आ कप्तान आन दाते डा का मेको पिप क्येडा बोल्यो दुम्ब। मिनु मेकोमी पिप आ शुश रागी रोइश्शा, हुकुम पाइब।<sup>6</sup> मिनु बर्स का निक्शी नोले मेको निक्शी गारशा, दक्खिन डा पिपम आ तमी मेको उत्तर डा पिप कली ग्युंवे पा गेब। तन्न मेको आ सक्ति मलीब। मिनु मेको आ तौ चच यो मलीनीम। मेको पिप आ तमी, आ गेय पाइब, आ आल नु मेको कली दाक्ब नेल्ल खतम पोक्चा पुंडसीनीम।<sup>7</sup> मिनु नोले मेको पिप आ तमी आ खिं डा मुर का गूब। मेकोमी उत्तर डा पिप नु मेको आ मुर नु लडाइ पा, आ गारो हिरशो सहर नु दरवार ओव्रनीम। मिनु मेकेर लडाइ पा ग्रानीम।<sup>8</sup> मेकोमी मेको आन देवी देवता आन मूर्तिपुकी नु सुन चांदी के बोसपुकी रोइश्शा, इजीप्त रागीमी लाइक्ब। मिनु मे नोले उत्तर डा पिप नु बर्स का निक्शी सम्म लडाइ मपाइब।<sup>9</sup> मिनु नोले उत्तर डा पिपमी दक्खिन डा पिप कली लडाइ तोइब। तन्न मेको आंम आ रागीमी लेंशा लाइब।

<sup>10</sup> मिनु मेको उत्तर डा पिप आ तौपुकीमी शुश लडाइ पाइब मुर खुप्नीम। मिनु मेको तेक्ने मचाप्चा डा भोल बुद पा ग्राना ग्रान लाइनीम। मेको लेंशा गारो हिरशो सहर डा दरवार सम्म लाइनीम।<sup>11</sup> मिनु दक्खिन डा पिप गाइश्शा, उत्तर डा पिप नु लडाइ पचा कली बोक्ब। उत्तर डा पिपमी चहिं लडाइ पचा कली शुश लडाइ पाइब आन कली खुप्ब। तन्न मेको आन जोरी सत्रु रे पा ब्रुइनीम।<sup>12</sup> मिनु उत्तर डा लडाइ पाइब ग्याइक्चा पुंडसीमानु, दक्खिन डा पिप ठेयब लेंशा हजार हजार मुर आन कली साइक्ब। तन्न मोदेंशो पशा यो, ब्रुना ब्रुन लाइब।<sup>13</sup> मिनु उत्तर डा पिपमी डोंइती क्येडा शुश लडाइ पाइब खुप्ब। मिनु बर्स का निक्शी नोले लडाइ पचा कली शुश या कुरशा शुश लडाइ पाइब नु बारब।<sup>14</sup> मेना शुश रागी डा मुरपुकी यो दक्खिन डा पिप नु लडाइ पचा कली बोक्नीम। मिनु आ मुर आन दाते डा रोइक्ब नु साइक्ब यो बोक्नीम, दे कोंइतीके कोंइशो गाप्चा कली बाक्ब। तन्न मेकोपुकी मग्रानीम।<sup>15</sup> मिनु नोले उत्तर डा पिप जाक्शा, दक्खिन डा राज्य इन गारो हिरशो सहर पुम्शा, आंम के सेल्ब। दक्खिन डा लडाइ पाइब ब्रुइनीम। मिनु मेको आन नेल्ल क्येडा बोल्यो लडाइ पाइब आन सक्ति यो जाम्शा लाइब।<sup>16</sup> मिनु उत्तर डा पिपम मार पचा दाक्बा, मेको पाइब। मिनु सुइमी मेको कली तेक्ने मचाप्नीम। मिनु मेकोम नेल्ल क्येडा दारशो रागी आंम के सेल्शा, मारेइ मारेइ खतम सेल्ब। *दानीएल ८:९*<sup>17</sup> मेकोमी कबल पा ‘गो दक्खिन डा पिप आ राज्य नेल्ल आंम के सेल्नुडमी’ दे मिम्ब। मिनु मेको कली खतम सेल्चा कली गारचा देखु पा, आ तमी कली ग्युंवे पा गेब। तन्न मेको आ मिम्शो खोदेंशो मडुम्ब।<sup>18</sup> मिनु नोले मेकोमी समुन्द्र आ नेक्था बाक्शो रागी नु लडाइ पा, शुश रागी आंम के सेल्ब। तन्न आ लडाइ पाइब आन ठेयब मुर कामी मेको आ ठेयब लेंशो थुं थमा पा खतम पोक्शा गेब।<sup>19</sup> मिनु नोले मेको पिप आ रागी डा दरवारम लेत्चा थुं पाइब, तन्न साइक्चा पुंडसीब।

<sup>20</sup> मिनु मेको आ नोले अर्को मुर का पिप दुम्ब। मेकोमी आ राज्य कली शोंप तेल्चा कली ठेयब मुर का कली तिरो पोक्थ सोइक्ब। तन्न इक्का नाक्त्त नोले मेको पिप यो गाइक्चा मपुंडसीथु, लडाइ मपथु, बेक्ब।<sup>21</sup> मिनु मेको पिप आ नोले मारेइ मान मपाइश्शो मुर का जाक्शा, सुइमी मतुइक्चा डा पा, रिम्शो लोव्र पखु पा मेको राज्य आंम के सेल्ब। *दानीएल ८:२३-२४*<sup>22</sup> मिनु मेको आ सक्ति बारना बारन लशा, नेल्ल आन कली ग्राब। मेकोमी परमप्रभु यावे आ कबल पशो का कली यो खतम पोक्ब।<sup>23</sup> मिनु मेकोमी लोव्र गारपाइश्शा दुशा बाक्शो देखु पा, जोल पाइब। मिनु आ मुर का निक्शी ला बाक्तेक्म हना यो, मेको सक्ति पाइश्शो दुम्ब।<sup>24</sup> मिनु सुइमी मारेइ मतुइक्चु, मेको नेल्ल क्येडा शोंप पाइश्शो रागी लशा, लडाइ तोइब। मेकोम आ किकी पिपीपुकीम गेनायो मपशो गेय पाइब। आ नोले खोइक्ब आन कली आ रोइश्शो शोंप नु रू योव्रशा गेब। मेकोमी अरु गारो हिरशो सहर आन कली दोपा ग्राचा, दे मिम्शा बाक्ब। तन्न मोदेंशो मिम्शो नाक्त्त का निक्शी कली ला दुम्ब।<sup>25</sup> मिनु उत्तर डा पिपमी आ बोल्यो लडाइ पाइब आन कली लाइश्शा, आ सक्ति नेल्लेमी दक्खिन डा पिप नु लडाइ पाइब। मिनु दक्खिन डा पिपमी

यो ठेयब हिवने मचाप्चा डा लडाइ पाइब लाइशा, मेको नु लडाइ पाइब। तन्न मेको पिप ब्रुइब। मारदे हना आ मुरुमी मेको कली जोल पा मग्रापाइवनीम।<sup>26</sup> मोदेशो पाइब आ नु जाइब बावनीम। मिनु मेको आ लडाइ पाइब ब्राशा, शुश साइक्चा पुंडसीनीम।<sup>27</sup> मेको पिप निक्शी मरिम्शो थुं पाइश्शो बावनीस। काथा जाम्ताक्स हना यो, जोल पमुइनीस। तन्न मेको रे मारेइ रिम्शो मद्रुम्ब। मारदे हना नोले डा नाक्त मजाक्शो बाक्ब।<sup>28</sup> मिनु उत्तर डा पिप शुश शॉप लाइशा, आ रागी लेशशा लाइब। तन्न मेकोमी परमप्रभु यावे आ कबल पशो आ पर्बम शुश गाइश्शो बाक्ब। मिनु मेको पिपमी मार दाक्ता, मेको पाइब। मिनु आ रागीम लेशशा लाइब।

<sup>29</sup> मिनु डोंइती देंशो नाक्त गाम्मेनु, मेको उत्तर डा पिप लेंशा दक्खिन डा पिप नु लडाइ पथ लाइब। तन्न डोंइती डा खोदेशो पा ग्राने मचाप्ब।<sup>30</sup> कितीम रे पा मेको नु लडाइ पचा कली जहाजपुकी जाक्नीम। मिनु मेको पिप आ थुं लुक्च लशा, आ रागी लेप्ब। मेकोमी परमप्रभु यावे आ कबल पशो आ पर्बम गाइश्शा, थमा सुइक्ब आन कली खेदा पाइब। मिनु परमप्रभु यावे आ कबल प्रॉइशो मुर नु गारब।<sup>31</sup> मिनु मेको पिप आ सोइश्शो लडाइ पाइबपुकीमी परमप्रभु यावे आ खिं नु दरवार कली ग्रॉग्रा दिशो सेल्नीम। मिनु मेकोपुकीमी नाक्त कित कित चोशा चढेतीक गेय तेक्नीम। मिनु मेकेर ग्रॉग्रा दिचा डा मार मार थोवक वोइक्नीम। *दानीएल ९:२७*<sup>32</sup> मिनु मेको पिपमी परमप्रभु यावे आ कबल पशो मटीब मुर आन कली जोल पा आ नोले खोइक्ब सेल्ब। तन्न आन परमप्रभु कली तुइक्ब मुरपुकी बोल्यो दुम्शा, मेको कबल काइ मप्रॉइनीम।<sup>33</sup> मिनु मेको आन दाते डा जोक्ब तुइक्बपुकीमी शुश मुर आन कली रुब्ब सेल्नीम। मोपतीके नाक्त का निक्शी सम्म मेको तरवारम क्योरचा, मीम हुम्चा, ग्याइश्शा चोक्चा नु आन मार मार रोइक्चा पुंडसीनीम।<sup>34</sup> मिनु मोदेशो दुम्मेनु, इक्का वारच पाइक्चा पुंडसीनीम। मिनु शुश मुर मेको आन नोले खोइक्नीम। तन्न थुं पाइश्शो मुर ला मेको आन नोले खोइक्नीम।<sup>35</sup> मिनु मुरुम जोक्ब तुइक्ब आन कली मोदेशो खेदा पतीके रागीम नोले डा नाक्ती सम्म मेको आन कली सुन खोदेशो पा यपाइक्चा, नाक्चा नु रिम्शो दुम्पाइक्चा कली बाक्ब। मेको मुल सम्म मजाक्शो बाक्ब।

### ठेयब लेशशो पिप

<sup>36</sup> पिपमी मार दाक्बा, मेको पाइब। मिनु मेकोमी 'देवी देवता नेल्ल आन क्येडा ठेयब नड' देंब। मिनु परमप्रभु नेल्ल आन क्येडा ठेयब परमप्रभु आ पर्बम गेनायो मनैसीशो मरिम्शो लोव पाइब। मेको आ नोले डा नाक्त मजाक्म सम्म आ माल्शो ताइब। परमप्रभुमी मेको कली सजाइ मगेवा सम्म मोदेशो दुम्ब। मारदे हना परमप्रभुमी मार पचा मिम्बा, मेको पाइब। *२थिस्सलोनिकी २:४; दानीएल ७:८,२५; प्रकाश १३:५-६*<sup>37</sup> मिनु मेको पिपमी आ किकी पिपी आन देवी देवता आन कली सेउ मपाइब। मिनु मीश मुर आन दाक्शो देवी देवता आन कली यो सेउ मपाइब। मारदे हना 'गो देवी देवता नेल्ल आन क्येडा ठेयब नड' दे मिम्सीब। *इजीकीएल ८:१४*<sup>38</sup> तन्न बोल्यो दरवार डा देवता कली सेउ पाइब। आ किकी पिपीमी मेको कली मतुइश्शो बाक्तेक्म। मेको आन कली सुन, चांदी, हीरा नु शुश क्येट लाइब थोवक गेशा ठेयब सेल्ब।<sup>39</sup> मेकोमी अर्को रागी डा देवी देवता आन कली सेउ पशा, नेल्ल क्येडा बोल्यो दरवार कली ग्राब। सुमी मेको कली मान पाइबा, मेको शुश शॉप पाइश्शो दुम्ब। मिनु मेको आन कली रू शुश गेशा, शुश मुर आन कली हुकुम पाइब सेल्ब।

<sup>40</sup> मिनु नोले डा नाक्ती दक्खिन डा पिपमी मेको कली लडाइ तोइब। मिनु उत्तर डा पिपमी फश गिवार खोदेशो पा मेको नु लडाइ पाइब। मेकोमी बग्गी, शारा डोइक्ब नु लडाइ पाइब जहाज शुश चाक्शा लडाइ पाइब।<sup>41</sup> मिनु मेको रागी रागी नु लडाइ पा, ठेयब खोला खोदेशो पा बारब। मिनु मेको दारशो रागी ओवशा, हजार हजार मुर आन कली साइक्ब। तन्न

एदोम, मोआब रागी नु अम्मोनी आन रागी डा नेल्ल क्येडा ठेयब बाक्तीके मेको आ गुइमी मद्रुम्नीम। *दानीएल ११:१६*<sup>42</sup> मेकोमी रागी रागी आन कली ग्राना ग्रान लाइब। मिनु इजीप्त रागी कली यो ग्राब।<sup>43</sup> मिनु मेकोमी इजीप्त डा सुन चांदी नु शॉप नेल्ल आंम के सेल्ब। लिबीया नु एथीयोपीया डा मुर आ गेय पाइब दुम्नीम।<sup>44</sup> मिनु मेकोमी पूर्व नु उत्तर रे जाक्शो लडाइ पतीक लोव नेंशा, मेको शुश गाइश्शा, मुर आन कली शुश साइश्शा, रागी नेल्ल रोबल चिबल पोक्ब।<sup>45</sup> मिनु मेकोमी ठेयब समुन्द्र नु नेल्ल क्येडा दारशो परमप्रभु आ सहर डा डांडा आस दातेमी आ बाक्तीक ताम्बु कीब। मो पाप्तु हना यो, मेको बेक्ब। सुइमी मेको कली वारच मपाइनीम" दे स्वर्ग डा गेय पाइबम देंत।

### बेक्शो मुर सेंसीशो

**12** मिनु परमप्रभु यावे आ स्वर्ग डा गेय पाइबमी "मेना नेल्ल क्येडा ठेयब स्वर्ग डा गेय पाइब मिकाएल जाक्ब। मिनु मेकोमी इ रागी डा मुर आन कली कोवब। मेना रागी दुम नोले गेनायो मद्रुम्शो श्येत जाक्ब। तन्न इ मुर श्येत रे प्रॉइचा पुंडसीनीम। सु सु आन नें किताबम ब्रेक्शो बाक्मे, मेको ब्रॉइचा ताइनीम। *दानीएल १०:१३; प्रकाश १२:७; मत्ती २४:२१; दानीएल ७:१०*<sup>2</sup> मिनु खपीमी बेक्शा इप्शो नेल्ल बोक्नीम। का निक्शी गेना हना यो ब्रॉइचा कली बोक्नीम। का निक्शी चहिं गेना हना यो शुश मुने दोक्चा कली बोक्नीम। *यूहन्ना ५:२९*<sup>3</sup> मिनु जोक्ब तुइक्बपुकी सरीड डा छेडछेड खोदेशो दुम्नीम। मिनु सु सुमी मुर आन कली ठीक लांमी गाक्पदमे, मेकोपुकी गेना हना यो सौरुल आ छेडछेड खोदेशो दुम्नीम। *दानीएल ११:३३; हितोपदेस ४:१८; मत्ती १३:४३*

<sup>4</sup> तन्न गे दानीएलमी, एको लोव सुइ आन कली मदेनो। एको नोले डा नाक्त कली ब्रेक्शो किताब मप्रक्थु, छाप थोक्शा वोतो। नोले डा नाक्तीम शुश मुर आन थुं मनाइक्थु, थमा लोव माल्शा शुश तुइक्ब दुम्नीम" देंत। *प्रकाश १०:४*

### नोले डा नाक्त

<sup>5</sup> मिनु गो, दानीएलमी, अर्को मुर निक्शी तातासी। का खोला आ ऑथ हांबु नु अर्को खोला आ आइक्वी हांबुम बाक्ताक्स।<sup>6</sup> मिनु कामी सुती वा फेक्शा आइक्वी हांबुम बाक्ब कली "एको लोव गाप्चा कली गिश नाक्त बाक्नीमी?" दे हिल्लो पाप्तु।<sup>7</sup> मिनु मेको आइक्वी हांबु बाक्ब बुश सुती वा फेक्शोमी आ गुइ निम्फा सरीड गे पोक्तु। मिनु गेना हना यो ब्रॉइशा बाक्ब आ नें थिशा कसम जशो नेंता। मिनु मेकोमी "एको पाला का बाक्शो ना, पाला निक्शी बाक्शो ना नु आधा पाला बाक्शो ना कली दुम्ब। मिनु परमप्रभु यावे आ मुर आन कली श्येत जची ना नुम्मेनु, मेको देंशो लोव नेल्ल गाप्ब" दे गेना हना यो ब्रॉइशा बाक्ब आ नेंमी कसम जाप्तु। *दानीएल ७:२५; प्रकाश १०:५-६*<sup>8</sup> गो मेको लोव नेंता, तन्न मरुबु। मोपतीके गो "आं प्रभु, एको नेल्ल रे मार दुम्बा?" दे हिल्लो पाता।<sup>9</sup> मिनु मेकोमी "दानीएल, गे इ लां खोतो। मारदे हना एको लोव नोले डा नाक्त सम्म खुइश्शा छाप थोक्शा वोइक्चा माल्ब।<sup>10</sup> मिनु शुश मुर नाक्चा, रिम्शो सेल्चा नु सुन यपाइश्शो खोदेशो पा रिम्शो सेल्चा पुंडसीनीम। तन्न परमप्रभु कली मटीब, मटिना टिन बाक्शा, मारेइ मरुप्नीम। तन्न जोक्ब तुइक्बपुकीमी एको लोव रुप्नीम।<sup>11</sup> मिनु नाक्त कित कित डा चोशा चढेतीक चढेचा नाइक्तमे नोले नु ग्रॉग्रा दिशो थोवक चढेमे सम्म हजार का, सहे निक्शी ९० नाक्त दुम्नीम। *दानीएल ९:२७*<sup>12</sup> सु सु हजार का सहे सां ३५ नाक्त सम्म फाल्शा बाक्नीमी, मेको ग्येरसीशो मुर बाक्नीम।<sup>13</sup> तन्न गे, दानीएल, इ लां लशा, थुं नांइसो। मिनु नोले डा नाक्ती इ इनाम तचा कली बेक्चा रे सेंचा पुंडसीनेवे" देंत।

# होसे

एको किताब होसेमी ब्रेक्शो बाक्ब। होसे आ अर्थ “परमप्रभु, वारच पाइय्नीनी” दॅशो बाक्ब।

होसेमी परमप्रभु यावे आ लोत्र इस्राएल डा उत्तर रागी डा पिप योआश आ तौ येरोबोआम आ सासन ७८२-७५३ बि. सी. रे हिज्कीयाह आ सासन ७२९/७१६-६८६ बि. सी. सम्म पशो बाक्ब। मेना परमप्रभु यावे आ लोत्र पाइब आमोस, यसैया नु मीका यो बाक्मा बाक्ब। गोत्ये माइश्शो ठेयब जोक्ब तुइक्ब मुर कामी “मेको किताब ८०० बि. सी.म हिब्रू लोत्र रे पा ब्रेक्शो बाक्ब” दे ब्रेक्शो बाक्ब।

१. होसे आ ग्युंभे इस्राएली आन परमप्रभु यावे कली प्रॉइशो कौंइचा कली बाक्ब।
२. परमप्रभुमी इस्राएली आन कली दाक्शा, मप्रॉइतीके आ कौंइतीक यो बाक्ब।
३. चढेब नु पिप आन कली मरिश्शो पचा कली दोस गेतीके यो बाक्ब।
४. नोले परमप्रभु आ शिशी कौंइतीके बाक्ब।

## डौंइती डा लोत्र

१ परमप्रभु यावेमी बेयरी आ तौ होसे नु लोत्र पाप्टु। मेना यहूदा डा पिप उज्जीयाह, योथाम, आहाज नु हिज्कीयाह बाक्तेक्म। मिनु इस्राएल डा पिप योआश आ तौ येरोबाम बाक्ब। यसैया १:१; २राजा १४:२३; आमोस १:१

## नोले शौंइसीतीके आ चिन्ड

२ मिनु परमप्रभु यावेमी होसे नु लोत्र पचा गोप्टु। मेकोमी होसे कली “लावो, मिनु तेल्लेम मीश मुर कली ग्युंभे पावो। मिनु मेको नु आल थिवो। मारदे हना एको रागी परमप्रभु यावे कली प्रॉइशा, तेल्लेम खौदॅशो दुश्शो बाक्ब” दॅत। होसे ३:१; ब्यवस्था २३:१८<sup>३</sup> मिनु होसे लशा दिब्लैम आ तमी गोमेर कली ग्युंभे पाप्टु। मिनु मेको मीशमी आल कुरशा, तौ का थिप्टु।

४ मिनु परमप्रभु यावेमी होसे कली “मेको तौ आ नें येजेल वोतो। मारदे हना गो रीब पा येहू आ खिं कली येजेलमी पशो हुश खाक्श आ पर्वम क्येक्क लेत्नुड। मिनु इस्राएल राज्य खतम पोक्नुड। २राजा १०:१-१४<sup>५</sup> गो मेको नाक्ती इस्राएल कली येजेल डा दिंममी खतम सेल्नुड” दॅत।

६ मिनु गोमेरमी लॅशा आल कुरशा, तमी का थिप्टु। मिनु परमप्रभुमी होसे कली “मेको आ नें लो-रूहामा वोतो। मारदे हना गो इस्राएल कली लॅशा शिशी मपाइनुड। मिनु मेको आन पाप मक्याम्नुड। होसे २:३, २५<sup>७</sup> मिनु गो यहूदा आ खिं कली शिशी कौंइनुड। मिनु मेको आन कली जोरी सन्नु आन गुइ रे पा प्रॉइनुड। लिब्रा, तरवार नु लडाइ पाइब शारा नु शारा डोइक्बपुकी रे ममाइ, तन्न गो मेको आन कली आंमान प्रॉइनुडमी” दे परमप्रभु यावे, आन परमप्रभुमी दॅत। लो-रूहामा आ अर्थ “मदाक्नुड” दॅशो बाक्ब।

८ मिनु गोमेरमी लो-रूहामा कली दूध तुंइचा प्रोना नोले, आल कुरशा, अर्को तौ का थिप्टु।<sup>९</sup> मिनु परमप्रभुमी होसे कली “मेको आ नें लो-अम्मी वोतो। मारदे हना गेपुकी आं मुर मननी। गो इन परमप्रभु मनड। लो-अम्मी आ अर्थ ‘गे आं मुर मनवे नु गो इ परमप्रभु मनड’ दॅशो बाक्ब।

१० इस्राएलीपुकी समुन्द्र डा बाल्वा खौदॅशो पा शुश दुन्मीम। मिनु सुइमी मेको आन कली पुक्ने नु हिक्ने मचाप्नीम। ते मेको आन कली ‘गेपुकी आं मुर मननी’ दॅशो बाक्मे मेकेर मेको आन कली ‘गेना हना यो ब्रॉइशा बाक्ब परमप्रभु आ मुर’ दॅनीम। उत्पत्ती २२:१७; रोमी ९:२६<sup>११</sup> मिनु यहूदा आ मुर नु इस्राएल आ मुर लॅशा गारशा का दुन्मीम। मिनु मेकोपुकीमी मुर का कली सासन पाइब सेल्नीम। मिनु मेको रागी रे गूनीम। मारदे हना येजेल आ नाक्त ठेयब दुम्ब” दॅत। यसैया ११:११-१३; येरमीया ३:१८; इजीकीएल ३७:२२

## लॅशा रिश्शो पशो

२ मिनु परमप्रभुमी “गेपुकी आंम लोक्ब आन कली ‘गे आं मुर बाक्नीनी’ देनीन। मिनु इन समी आन कली ‘आं दाक्शो समी’ देनीन। होसे १:१९; होसे १:६<sup>२</sup> इन ममा कली हुइक्तीन। मेको कली शुश हुइक्तीन। मारदे हना मेको आं मीश मबाक्ब। मिनु गो मेको आ वॉइश मनड। मेकोमी आ मिक्च वॉइश मुर गे हिरचा प्रोनल। मिनु आ दूध आस दाते डा नाता खोइश्शा, ग्रांरा दिशो गेय प्रोनल। इजीकीएल १६:२३;<sup>३</sup> मो मपाप्टु हना, गो मेको आ वा प्रुइश्शा, मेको जरमेशो नाक्ती खौदॅशो पा शिश्रा पोक्नुड। गो मेको कली गोरशो रागी खौदॅशो सेल्नुड। सोवशो रागी खौदॅशो पा ब्वाक्कु मबाक्शो सेल्नुड।

## परमप्रभु रे नोले शौंइसीशो

४ गो मेको आ तमी तौ आन कली आं दाक्स मकौंइक्नुड। मारदे हना मेकोपुकी तेल्लेम पा थिशो आल बाक्नीम।<sup>५</sup> मेको आन ममा जोल पा अर्को मुर नु गाक्त। मेको आन कली मुने पा थिशो बाक्त। मेकोमी ‘गो आं कली दाक्ब वॉइश खोइक्नुड। मिनु मेकोमी आं कली जचा तूचा, ऊन नु सुती वा, तेल नु अडगुर शांबु गेब’ दॅत। येरमीया ४४:१७<sup>६</sup> मोपतीके गो मेको आ लां चूमी तेक्नुड। मेको आ लांम गारो सेल्शा, आ लां तेक्शा वोइक्नुड। मिनु मेकोमी तेइ लां मताइब।<sup>७</sup> मेकोमी आ दाक्शो मुर आन कली माल्थ लाइब। तन्न मेको आन कली ग्याइक्ने मचाप्ब। मेकोमी आ दाक्शो मुर आन कली कोवब। तन्न मथिप्ब। मिनु मेकोमी ‘मुल गो डौंइती डा खौदॅशो पा आं वॉइश आ बाक्तीक लाइनुड। मारदे हना गो मुल क्येडा मेना ठीक बाक्ती’ दॅब।<sup>८</sup> गो मेको कली अन्न, नक अडगुर शांबु नु तेल गेता हना यो मेकोमी मतुइक्त। गोम मेको कली सुन चांदीम ग्योम्ताक्ड। तन्न मेकोमी आं गेशो नेल्ल बाल देवता कली गोप्टु। ब्यवस्था ७:१२-१३

<sup>९</sup> मोपतीके बाली मीमेनु नु नक अडगुर शांबु बोक्मेनु, मेको गो लांइसीनुड। मिनु मेकोमी फेक्शो आं ऊन नु सुती वा यो लांइसीनुड।<sup>१०</sup> गो मेको आ दाक्शो मुर आन डौंइती मेको कली शिश्रा पा आ मुने कौंइक्नुड। मिनु सुइमी यो मेको कली आं गुइ रे मलाइक्नीम। येरमीया १३:२२<sup>११</sup> गो मेको आ चाड नेल्ले मानेचा मगेनुड। मेको आ बर्स बर्स डा चाडपुकी नु औंसी डा चाड, मेको आ नाइक्तीक नाक्तपुकी नु मेको आ अरु चाड नेल्ल मानेचा मगेनुड।<sup>१२</sup> गो मेको आ अडगुर बोटपुकी नु फोवशी रवापुकी खतम सेल्नुड। मेको आ पर्वम मेकोमी ‘एको आं तेल्लेम पशो डा गाल्च नमी’ दॅशो बाक्त। गो मेको रवा रे ठेयब ब्वाकी सेल्नुड। मिनु ब्वाकी डा जन्तुपुकीमी मेको ब्वाइनीम।<sup>१३</sup> गो मेको कली बाल देवता कली धूप चोशो नाक्ती सजाइ गेनुड। मेको नाक्त मेको ग्योम्सीशा वॉइश खोइक्नु। आं कली चहिं प्रॅताक्यी।

14 मोपतीके मुल गो मेको कली लेम्शा, गोरशो रागीमी लाइक्नुड। मिनु मेको नु आ दाक्शो लोत्र पाइनुड। *यसैया ४०:२* 15 मेकेर गो मेको कली आ अडगुर रू लेश्शा गेनुड। गो आकोर माइश्शो दिम कली चहिं आस पतीक रागी सेल्नुड। मेकेर मेकोमी आ ठिटी बाक्ची ना डा खोदेशो नु इजीप्त रागी रे जाक्शो खोदेशो पा कुम्सो पाइब" देंत। *यहोसु ७:२४-२६*

#### परमप्रभुमी लेंशा दाक्ब

16 मिनु परमप्रभु यावेमी "मेको नाक्त गे आं कली 'आं वोंइश' देंनेवे। मिनु 'आं बाल देवता' मदेनेवे। *यसैया ५४:५* 17 गो बाल देवता आन नें यो मेको आ शोत्र रे गुंइनुड। मिनु लेंशा मेकोमी मेको आन नें गेनायो मथोइब। 18 गो मेको नाक्त मेकोपुकी, ब्वाकी डा जन्तुपुकी, सरीड डा चिक्बपुकी नु खपीम ग्रेशा गाक्ब जन्तुपुकी नु कबल का पाइनुड। मिनु मेको रागी डा मुरपुकीमी मेना रे लिब्रा, तरवार नु लडाइ मताइनीम। मिनु मुर नेल्ल हेम्म पा बाक्चा ताइनीम। *उत्पत्ती ९:९-१०; इजीकीएल ३४:२५* 19 गो इ कली गेना हना यो आं मीश सेल्लन। गो इ कली थमा पा दाक्शा शिशी पा नु ठीक पा आं मीश सेल्लन। *प्रकाश १९:७* 20 गो इ कली मप्रोंइथु आं मीश सेल्लन। मिनु परमप्रभु यावे कली रिश्शो पा तुइक्नेवे" दे परमप्रभु यावेमी देंत। *येरमीया ३१:३४* 21 परमप्रभु यावेमी "मेको नाक्त गो सरीड कली लोत्र लेत्नुड। सरीडमी रागी कली लोत्र लेज्ब। 22 मिनु रागीमी अन्न, नक अडगुर शांबु नु तेलमी येजेल कली लोत्र लेत्नीम। 23 गो मेको कली आं पर्वम आं रागीमी बाक्पाइक्नुड। गो मेको कली 'मदाक्नुड' देंशो कली आं शिशी कोंइनुड। मिनु गो 'गेपुकी आं मुर मननी' देंशो नड। मुल गो 'आं मुर ननी' देंनुड। मिनु मेकोपुकीमी आं कली 'गे आंइ परमप्रभु बाक्नीनी' देंनीम" दे परमप्रभुमी देंत। *होसे १:६; होसे १:९; रोमी ९:२५; १पत्रुस २:१०*

#### इसाएलम शिशी तशो

3 मिनु परमप्रभु यावेमी आं कली "इ मीशमी अर्को वोंइश खोइश्शा, इ कली प्रोंइतु हना यो, मुल लशा, इ मीश कली लेंशा इ दाक्तीक कोंइदो। इसाएलीपुकीमी अर्को देवी देवता आन कली दाक्शा आन चढ़ेशो थोत्रक जचा दाक्ताक्म हना यो, परमप्रभु यावेमी इसाएली आन कली दाक्ब" देंत। *होसे १:२* 2 मोपतीके गो मेको मुर कली १५ शेकेल चांदी, होमेर का नु लेतेक का क्योत्रज गेशा आं मीश लेंशा ग्याप्ता। *शकेल का ११.५ ग्राम चांदी के क्येट बाक्ब। होमेर का २२० लिटर बाक्ब। लेतेक का ११० लिटर बाक्ब।* 3 मिनु गोमी आं मीश कली "गे मुल शुश नाक्त सम्म गो नु बाक्चा माल्नेवे। गे मुल तेल्लेम मपावो। अरु वोंइश मखोतो। गो गे नु बाक्नुड" देंती। 4 मारदे हना इसाएलीपुकी शुश नाक्त सम्म पिप नु सासन पाइब मबाक्थु, बाक्चा माल्नीम। मेकोपुकीमी चढ़ेचा कली मिम्तीक फुल्लु, एफोद माइश्शो चढ़ेब आ पांइतीक वा नु आन खिं डा मूर्ति यो मताइनीम। *२इतिहास १५:३* 5 मिनु नोले डा नाक्तीमी इसाएलीपुकी लेश्शा, परमप्रभु यावे, आन परमप्रभु कली नु आन पिप दाऊद कली माल्नीम। मेकोपुकी खिंखि पा आन परमप्रभु यावे गे लेश्शा, आसीक ताइनीम। *येरमीया ३०:९; इजीकीएल ३४:२३-२४*

#### चढ़ेबपुकीमी मरिश्शो पशो

4 गे इसाएली, परमप्रभु यावे आ लोत्र नेनीन। मारदे हना परमप्रभु यावेमी रागीम बाक्ब इन कली दोस गेब। मार दोस गेब देंशा हना "एको रागी डा मुरुमी आं कली प्रोंइतीमी, आं कली मदाक्थु, आं कली मटीनीम। 2 एकेर कसम जचा, जोल पचा, मुर साइक्चा, खुइ पचा नु तेल्लेम पचा डा लाक्शा, अर्को मारेइ मबाक्ब। नेल्लेमी मरिश्शो ला पाइनीम। मेकोपुकीमी मुर साइश्शा, हुश ख्राक्श पोक्नीम। 3 मोपतीके एको रागीमी रोंका पाइब। एकेर बाक्ब नेल्ले ओंखां पा जाश्शा लाइनीम। बस्तु भाव, चिक्ब नु समुन्द्र डा डांइ बेक्शा, जाश्शा लाइनीम।

4 तन्न सुइमी सुइ कली दोस मगेमेक्ल। मुरुमी मुर आन कली 'मरिश्शो पाइतीनी' मदेमल। मारदे हना गो गे चढ़ेबपुकी नु लोत्र का पचा माल्नुड। 5 गेपुकी काबु नाक्ती खतम दुम्नीनी। मिनु आं लोत्र पाइबपुकी यो गेपुकी नु

काथा खतम दुम्नीम। मोपतीके गो इन खिं डा मुर नेल्ल गे नु खतम सेल्नुडमी। 6 आं मुर मारेइ मतुइक्तीके खतम दुम्नीम। मारदे हना गेपुकीमी तुइक्तीक कली ताइक्ताक्नी। मोपतीके गो यो इन कली आं कली चढ़ेब दुम्तीक रे ताइक्नन्नी। मारदे हना गेपुकीमी इन परमप्रभु, आं अरेशो लोत्र कली क्यारी मपनी। मोपतीके गो यो इन आल आन कली क्यारी मपाइनुड। 7 चढ़ेबपुकी दोशो बारमा, मोशोन आं कली मरिश्शो पाम्तेक्म। मेको आन ठेयब दुम्तीके ताइश्शा, मुने दोक्तीक गेय पाम्तेक्म। 8 मेकोपुकी आं मुर आन पाप आ पर्वम चढ़ेशो ब्वशा दोम्नीम। मिनु मुरपुकीम पाप पशो दाक्नीम। *लेवी ४:१३-२१, २७-३५; लेवी ६:१९* 9 मिनु मुरपुकी दोदेशो बाक्मा, मोदेशो चढ़ेबपुकी बाक्नीम। गो मुरपुकी नु चढ़ेब नेल्ल आन कली सजाइ गेनुड। मेकोपुकीमी दोदेशो पामे, मोदेशोन सजाइ गेनुड। 10 मेकोपुकीमी जाइनीम ब्वाइनीम, तन्न मरूनीम। मेकोपुकीमी तेल्लेम पशा, सौशा बोशा मलाइनीम। मारदे हना मेकोपुकीमी तेल्लेम पचा कली परमप्रभु यावे कली प्रोंइतेक्म।

#### इसाएली आन मूर्ति पूजा

11 माइत अडगुर शांबु नु नक अडगुर शांबुम मुर आन रुप्तीके कली साम्ब। 12 आं मुरपुकीमी शी के मूर्ति कली हिल्लो पाइनीम। मिनु मेकोपुकीमी कोक्केमी साहीत कोवनीम। मारदे हना तेल्लेम पतीक थुंमी मेको आन कली हेंथे गाक्पाइश्शो बाक्ब। मेकोपुकीमी तेल्लेम पचा कली परमप्रभु कली प्रोंइतेक्म। *येरमीया २:२७; होसे ५:४* 13 मेकोपुकीमी डांडामी चढ़ेनीम। मिनु पहाडमी तुल्च, पिपल नु सेक्ल रवा आन वांकुम धूप चोइनीम। मोपतीके इन तमी तेल्लेम दुम्नीम। मिनु इन चाइमीपुकी अरु आन वोंइश नु बाक्नीम। *इजीकीएल ६:१३* 14 गो इन तमी आन तेल्लेम पशो नु इन चाइमी अरु आन वोंइश नु बाक्शो आ पर्वम सजाइ मगेनुड। मारदे हना मेको वोंइश मुर यो सुइ मबाक्तीकेमी तेल्लेम नु लशा देवी देवता आन कली चढ़ेनीम। मोदेशो मरुप्ब मुरपुकी जाश्शा लाइनीम। *होसे १:२*

15 गे इसाएलीपुकी, तेल्लेम पाइतीनी हना यो, यहूदा डा मुर आन कली हेंथे मगाक्पतीन। गेपुकी गिल्गालमी नु बेथ-आवेनमी मलन। मिनु 'परमप्रभु यावे ब्रोंइशा बाक्शो खोदेशो पा' दे कसम मजने" दे परमप्रभुमी देंत। *आमोस ५:५; होसे १०:५; आमोस ८:१४* 16 इसाएलीपुकी मटीब बी खोदेशो बाक्नीम। दोपा परमप्रभु यावेमी भेडा कली योत्रशो खोदेशो पा योत्रने चाक्बा? 17 एफ्राइम मूर्ति आन वारच दुम्शो बाक्ब। मोपतीके मेको कली प्रोनीन। 18 मेकोपुकीमी शांबु थुश्शा यो तेल्लेम पना पन बाक्नीम। मेको आन सासन पाइब यो मुने दोक्नीम। 19 ठेयब फश गिवार पशा, मेको आन कली योल्ब। मिनु मेको आन चढ़ेशो आ पर्वम मुने दोक्नीम।

#### चढ़ेब आन कली सजाइ

5 मिनु परमप्रभुमी "चढ़ेबपुकी, एको लोत्र नेनीन। इसाएलीपुकी इन नोफा दाइश्शा नेनीन। पिप आ खिं डा मुरपुकी, नेनीन। एको निसाफ इन मरिश्शो पशो आ पर्वम बाक्ब। गेपुकी मिसपा सहरमी दाइश्शो ब्वाइद नु ताबोर सहरमी ब्रशो ग्याइल खोदेशो दुम्शो बाक्नीनी। 2 मेकोपुकीमी शिक्तीममी मुर बिक्शा बेक्तीक सेल्लेक्म। गो मेको नेल्ल आन कली सजाइ गेनुड।

#### इसाएलीपुकीमी सजाइ तशो

3 गो एफ्राइम आ पर्वम नेल्ल तुइक्नुड। मिनु इसाएल यो गो नु खूइक्ने मचाप्ब। एफ्राइम, गे तेल्लेम पतीकेमी गुश्शो बाक्नेवे। इसाएल ग्रान्रा दिचा डा दुम्शो बाक्ब। *होसे १:२; होसे ६:१०* 4 मेको आन गेय आ पर्वम आन परमप्रभु गे लेत्ने मचाप्नीम। तेल्लेम पचा मेको आन थुंमी बाक्ब। मिनु मेकोपुकीमी परमप्रभु यावे कली मतुइक्नीम। *होसे ४:१२* 5 इसाएली आन ठेयब लेत्तीकेमी मरिश्शो पाइब बाक्नीम, दे आन सांक्छी बाक्ब। एफ्राइम डा मुरपुकी आंम पाप पतीकेमी खतम दुम्नीम। यहूदा डा मुरपुकी यो मेकोपुकी नु खतम दुम्नीम। 6 मिनु मेको आन क्यारश भेडा नु बी ब्यफ लाइश्शा, परमप्रभु यावे कली माल्थ लाइनीमी। तन्न मेकोपुकीमी मेको कली

मथिल्लीम। मारदे हना मेको आन क्येडा डोन लत। *यसैया १:११-१५*  
7 मेकोपुकी परमप्रभु यावे रे नोले शोइसीशो बाक्नीम। मेकोपुकीमी हेंथे पा आल थिशो बाक्नीम। मेको आन औसी डा चाडमी आन बाली नाली नु मेको आन कली खतम सेल्ब। *होसे २:१३*

थर निक्शी आस कली सजाइ

8 गिबामी तुराही नु रामाह सहरमी ग्रोत्र ताप्पीन। बेथ-आवेनमी लडाइ डा तुराही ताप्पीन। बेन्यामीन डा मुरपुकी डोंइती बारीन। *२राजा १५:३७; यसैया ७:१-९; होसे ४:१५* 9 सजाइ डा नाक्ती एफ्राइम गोरशो रागी खोदेशो दुम्ब। मुल मार मार दुम्बा, मेको इस्राएली आन कली देंने थुम्ता। 10 यहूदा थर डा ठेयब मुरपुकी सांद डा फुल्लु याक्ब खोदेशो दुम्तेक्म। गो आं गाइक्तीक मेको आन तारी ब्वाक्कु खोदेशो पा मोइक्नुडमी। *ब्यवस्था १९:१४*  
11 एफ्राइम डा मुरपुकी सजाइ तशा, आन थुं लुक्च लत। मारदे हना मेकोपुकी जाम्शा लाइब मूर्ति आन नोले खोइक्तेक्म। 12 मिनु गो एफ्राइम डा मुर आन कली तुम्ब नु यहूदा डा मुर आन कली राक्शो खोदेशो दुम्शो बाक्नुड।

13 एफ्राइम नु यहूदामी आस श्येत तुइक्तेसे नोले, एफ्राइममी अस्सुर डा ठेयब पिप कली 'वारच पने' दे पुंइथ मुर सोइक्ताक्व। तन्न मेकोमी इ कली वारच पने मचाप्ब। *होसे ७:११; होसे १०:६; होसे १२:२* 14 मारदे हना गो एफ्राइम कली गुप्स खोदेशो नु यहूदा कली ठिटा गुप्स खोदेशो दुम्शो बाक्नुड। गो मेको आन कली खतम सेल्शा, आं लां खोइक्नुड। गो मेको आन कली कुरशा लाइक्नुड। मिनु मेको आन कली आं रे रोइक्ने मचाप्पीम। *होसे १३:७; होसे ६:१*

15 मिनु गो आं बाक्तीकेमी लेशशा बाक्नुड। मेकोपुकीमी आन मरिश्शो पशो तुइश्शा, आं कली ममाल्मे सम्म बाक्नुड। मिनु मेकोपुकीमी शुश श्येत जशा, आं कली माल्नीम" दे परमप्रभुमी देंत। *यसैया २६:१६*

परमप्रभु गे लेशशा, कुम्सो पशो

6 मिनु मार लोत्र पाइनीम देंशा हना "पिन, गोपुकी परमप्रभु यावे गे लेय्य। मेकोमी आंइ कली टुक्रा टुक्रा पशो बाक्त। मिनु आंइ कली सापाइक्ब। मेकोमी आंइ कली तुप्तु। मिनु मेकोमी आंइ कली ओख्ती पाइक्ब। *होसे ५:१४* 2 नाक्त निक्शी नोले परमप्रभुमी आंइ कली लेंशा ब्रोंइचा गेब। मिनु नाक्त सां नोले आंइ कली आ डोंइती राप्पाइक्ब। मिनु मोपा गोपुकी मेको आ डोंइती ब्रोंइनीकी। *ब्यवस्था ३२:३९* 3 गोपुकी परमप्रभु यावे कली तुइश्शा, ठेयब सेल्य। मेको कली शुश तुइश्शा मान पय। मेको नां दाप्शो बुद पा जाक्ब। हिंउद डा रेउ खोदेशो पा जाक्ब। बर्खा डा रू कली रिश्शो पा जिप्ब रेउ खोदेशो पा जाक्ब" दे लोत्र पाप्तेक्म।

4 मिनु परमप्रभुमी "एफ्राइम, गो इ कली मार पड? यहूदा इ कली मार पड? इस दाक्वा सुनी डा गोस्स खोदेशो नु रीब पा जाम्शा लाइब सीत खोदेशो बाक्ब। *होसे ७:१६* 5 मोपतीके गो इस कली आं लोत्र पाइब रे पा टुक्रा टुक्रा पाता। आं लोत्रमी इस कली साइक्ता। आं निसाफ इस तारी चिला आप्शो खोदेशो बाक्ब। *येरमीया २३:२९* 6 मारदे हना गो क्योरशा चढ़ेशो क्येडा दाक्मुतीक दाक्नुड। मिनु चोशा चढ़ेशो क्येडा आं कली तुइश्शा ठेयब सेल्शो दाक्नुड। *१सामुएल १५:२२; हितोपदेस २१:३; मत्ती ९:१३; १२:७*

रागीम मरिश्शो पशो

7 मेकोपुकीमी आदम सहर डा मुर खोदेशो पा गो नु पशो कबल प्रोंइतेक्म। मेकोपुकीमी आं कली थमा मसुइक्थु प्रोंइतेक्म। *यहोसु ३:१६*  
8 गिलाद मरिश्शो मुर आन सहर बाक्ब। मेको सहर डा लां हुशेम ख्मुशो खोइल आ छापम ब्रीशो बाक्त। 9 दोपा रोइक्बपुकी बाप्शा बाक्नीमी, मोपा चढ़ेबपुकी यो बुक्शा बाक्शो बाक्नीम। मेकोपुकीमी शेकेम लतीक लांमी मुर साइक्नीम। मेकोपुकीमी ठेयब मुने डा गेय पाइनीम। 10 गो इस्राएली आन खिंमी हिंचा डा गेय का ताता। एफ्राइममी तेल्लेम पना पन नु इस्राएल ग्रांग्रा दित्वा डा दुम्शो बाक्त। *होसे ५:३* 11 यहूदा, इ कली यो सजाइ गेतीक नाक्त जाक्ब" दे परमप्रभुमी देंत।

7 "गो इस्राएल डा मुर आन कली सापाइक्वा मिम्ताक्ड हना, एफ्राइम आ मरिश्शो पशो नु सामरीया आ पाप तांइसीब। मेकोपुकी जोल पना पन बाक्नीम। खुइपुकी खिं ओइशा खुइ पाइनीम। रोइक्बपुकीम लांमी मुर आन कली रोइक्नीम। *योएल ४:१* 2 गो मेको आन मरिश्शो पशो नेल्ल तुइश्शा मिम्नुड। मेकोपुकीम मतुइक्नीम। मेकोपुकीमी मरिश्शो ला पाइनीम। मिनु मेको आन पाप गेना हना यो आं डोंइती बाक्नीम" देंत।

नक पिप साइश्शो

3 परमप्रभुमी "मेको आन मरिश्शो पशोमी पिप कली ग्येरपाइक्नीम। मिनु आन जोल पतीकेमी सासन पाइब आन कली ग्येरपाइक्नीम। 4 मेको नेल्ल तेल्लेम बाक्नीम। मेकोपुकी शोब्ले चोचा कली होइश्शो चुप्लु खोदेशो बाक्नीम। मेको शोब्ले चोइबमी फस निवा रे मबोरम सम्म मी थुक्वा ममाल्ब। 5 आंइ पिप आ भोजम आ सासन पाइब अडगुर शांबु तूशा दुक्नीम। मिनु पिपमी शुक्शी पाइबपुकी नु गुइ गारपाइक्ब। 6 मेको शुक्शी पाइब आन थुं मी खोदेशो पा ब्रशो बाक्ब। मेकोपुकी नमो सिमो पा पिप आ नेक्वा जाक्नीम। मेको आन थुंम बाक्शो पतीक नेल्ल नाक्दो मी पुम्शो खोदेशो पा बाक्ब। मिनु मेको सुनी ठेयब मी खोदेशो पा ब्राइब। 7 मेको नेल्ले मी खोदेशो पा ब्रशो बाक्नीम। मिनु आन सासन पाइब आन कली साइक्नीम। मेको आन पिप नेल्ल आन कली साइक्तेक्म। मिनु मेकेर डा सुइमी यो आं कली मथोइनीम" देंत।

इजीप्त कली ब्रेश्शो

8 "एफ्राइम थर डा मुरपुकी रागी डा मुर नु ब्वांइसीनीम। एफ्राइम मलोक्शो शोब्ले खोदेशो बाक्ब। 9 अर्को रागी डा मुरपुकीमी मेको आ बोल नुप्पाइक्नीम। तन्न मेकोमी मतुइक्ब। मेको आ चां का निक्शी बोइश्शो बाक्ब। तन्न मेकोमी मतुइक्ब। 10 इस्राएल आ ठेयब लेल्लेकेमी 'मरिश्शो पाइब बाक्ब' दे आन साकछी बाक्ब। तन्न मेकोपुकी परमप्रभु यावे, आन परमप्रभु गे मलेत्नीम। मिनु मेको कली ममाल्नीम" देंत।

11 "एफ्राइम निप्स मपाइश्शो टुकुर खोदेशो बाक्ब। मेको कली निप्स मपाइश्शो आन कली खोदेशो पा जोल पने चाम्सीब। मुल मेकोपुकीमी इजीप्त रागी कली 'वारच पने' दे ब्रेत्नीम। इक्का नोले मेकोपुकीमी अस्सुर रागी कली ब्रेत्नीम। *होसे ५:१३* 12 मिनु मेकोपुकी लची ना, गो मेको आन तारी आं ग्याइल ब्वारनुड। गो मेको आन कली सरीड डा चिक्ब आन कली खोदेशो पा उइ तोक्नुडमी। गो मेको आन मरिश्शो पतीके कली सजाइ गेनुड। 13 आबी आबी, मेकोपुकी गो रे पा डोन लाम्तेक्म। मेकोपुकी खतम दुम्मल। मारदे हना मेकोपुकी आं कली मटीब दुम्शो बाक्नीम। गो मेको आन कली श्येत रे प्रोंइचा दाक्नुड। तन्न मेकोपुकीमी आं पर्बम जोल पाइनीम। *भजन संग्रह ८१:१४-१५*

14 मेकोपुकीमी आन थुं नेल्लेमी आं कली मब्रेत्नीम। तन्न आन ब्राख्येमी रोंका पाइनीम। अन्न नु नक अडगुर शांबु आ पर्बम बुक्नीम। तन्न आं रे पा आन कुल हिरनीम। 15 गो मेको आन कली शेंशा, बोल्यो सेल्ला। तन्न मेकोपुकीमी आं कली मरिश्शो पचा मिम्नीम। 16 मेको नेल्ल क्येडा ठेयब गे मलेत्नीम। मेकोपुकी जिक्शो लिब्रा खोदेशो बाक्नीम। मेको आन ठेयब मुर आन मरिश्शो पशो लोत्र आ पर्बम तरवारमी साइक्वा पुंइसीनीम। इजीप्त रागीमी मेको आन पर्बम शुक्शी पाइनीम" देंत। *भजन संग्रह ७८:५७*

इस्राएलीपुकीम सजाइ तशो

8 मिनु "तुराही तापो। ककाकुली का परमप्रभु यावे आ खिं तारी बेरना बेरन बाक्ब। मारदे हना मुरपुकीमी आं पशो कबल प्रोंइतेक्म। आं अरेशो लोत्र मटीम। *यसैया ५८:१; ब्यवस्था २८:४९; होसे ६:७* 2 मिनु इस्राएलमी आं कली 'आंइ परमप्रभु, गो इन कली तुइक्नीकी' दे देंनीम। 3 तन्न इस्राएलीपुकीमी रिश्शो पचा प्रोंइतेक्म। मिनु जोरी सत्रु काम मेको कली खेदा पाइब। 4 मेकोपुकीमी आं कली हिल्लो मपथु पिप योवनीम। मेकोपुकीमी गो आं मर्देंथु सासन पाइबपुकी योवनीम। मेकोपुकीमी खतम दुम्चा कली आन सुन चांदी रे पा आंम कली मूर्ति सेल्लनीम। *२राजा*

१५:१०, १४, २५, ३०<sup>5</sup> सामरीया डा मुरपुकी, इन बाछा आ मूर्ति ताइक्तीन। गो मेकोपुकी नु गाइश्शो बाक्नुड। गेना सम्म मेकोपुकी आं मुर दुम्चा मदाक्नीमी? प्रस्थान ३२:२०; १राजा १२:२८<sup>6</sup> मेको बाछा इस्राएल रागी रे चाक्शो बाक्त। मूर्ति सेल्बम मेको कली सेल्लु। मेको परमप्रभु मबाक्ब। काबु नाक्ती मेको सामरीया डा बाछा टुक्रा टुक्रा दुम्ब।

<sup>7</sup> मेकोपुकीमी फश शोक्नीम। मिनु ठेयब फश गिवार खुप्नीम। मेको आन चेरब बोटमी बाला मबाक्नीम। मिनु मेकोपुकीमी फस सेल्ले मचाप्नीम। आन बाला बाक्तेक्म हना यो, रागी रागी डा मुरपुकीमी मेको खुप्शा जाइनीम। येरमीया १२:१३<sup>8</sup> इस्राएल खतम पोक्वा पुंडसाक्व। मुल मेकोपुकी रागी रागी डा मुर आन दातेमी शोर गाक्शो मुर खोदेशो दुम्शो बाक्नीम। येरमीया २२:२८<sup>9</sup> ब्वाकी डा गधा हेंथे गाक्शो खोदेशो पा मेकोपुकी अस्सुरमी लाम्तेक्म। एफ्राइम डा मुरपुकी आंम कली दाक्बपुकी कली लेयसीशो बाक्नीम। होसे ५:१३<sup>10</sup> मेकोपुकी आंम कली लेयसाक्म हना यो, मुल गो मेको आन कली खुज्नुडमी। मिनु मेकोपुकी सक्ति पाइश्शो पिप आ गुइ रे क्याम्चा पुंडसीनीम।

<sup>11</sup> एफ्राइममी आ पाप पतीके चढेतीक शुश सेल्लु। मेको चढेतीके शुश सेल्लुके मेको कली पाप दुम्शो बाक्ब। <sup>12</sup> मिनु गो मेको आन कली आ अरेशो शुश ब्रेक्ताक्ड। तन्न मेकोपुकीमी आं लोव्र थमा मसुदेम। <sup>13</sup> मेकोपुकीमी आं कली चढेनीम। मिनु श्ये ब्वाइनीम। तन्न परमप्रभु यावे मेकोपुकी नु मग्येरसीशो बाक्ब। मुल परमप्रभु यावेमी मेको आन मरिश्शो पशो मिश्शा, मेको आन कली सजाइ गेब। मिनु मेकोपुकी इजीप्त रागीमी लेश्शा लाइनीम। <sup>14</sup> इस्राएलीपुकीमी आंम कली सेल्ब कली प्रेंशा, ठेयब दरवार सेल्शो बाक्नीम। यहूदा डा मुरपुकीमी शुश सहर एर ओंथ गारो सेल्शो बाक्नीम। तन्न गो मेको आन सहरमी मी सुइश्शा दरवार नेल्ल क्रोइक्नुड” दे परमप्रभुम देंत। येरमीया १७:२७; आमोस २:५

होसेमी लोव्र पशो

<sup>9</sup> इस्राएली, मग्येरसीन। अर्को रागी रागी डा मुर खोदेशो पा, सोम्शा मग्येरसीन। मारदे हना गे इन परमप्रभु क्येडा नोले शोइसाक्नी। गे अन्न ओइतीक चाडमी तेल्लेम पशो आ पर्वम क्येट ताक्चा दाक्नीनी। होसे १:२<sup>2</sup> मुल अन्न आ खला डा अन्नम नु अडगुर कोल डा अडगुर शांबुम मुर आन कली मरूपाइक्ब। नक अडगुर शांबु मेको आन कली मजाक्दीप्ब। <sup>3</sup> मेकोपुकी परमप्रभु यावे आ रागीमी बाक्चा मताइनीम। एफ्राइम इजीप्त रागीमी लेश्शा लाइब। मिनु मेकोपुकीमी अस्सुरमी ग्रांरा दिचा डा थोव्रकी जाइनीम। होसे ८:१३

<sup>4</sup> मेकोपुकीमी परमप्रभु यावे कली अडगुर शांबु चढेनीम। क्योरशा चढेतीक मचढेनीम। आन जचा थोव्रक मोन खमे खोदेशो पा जाइनीम। मेको जाइब नेल्ल ग्रांरा दिशो दुम्नीम। मेको आन जचा थोव्रकीम मेको आन शोव्रलु साइक्चा ला दुम्ब। परमप्रभु यावे आ खिमी चाक्ने मचाप्नीम।

<sup>5</sup> गेपुकी इन ठेयब चाड नु परमप्रभु आ चाडमी मार पाइनीनी?  
<sup>6</sup> मेकोपुकी खतम दुम्चा कली प्रोक्तेक्म हना यो, इजीप्त रागीमी मेको आन कली खुप्ब। मिनु मेम्फीस डा मुरपुकीमी मेको आन कली थिम्नीम। मेको आन चांदी के सेल्शो थोव्रकपुकी चू नु चोंकम सुम्ब। मिनु आन ताम्बुमी चू वानीम। होसे १०:८

<sup>7</sup> मिनु सजाइ गेतीक नाक्त जाक्शो बाक्ब। क्येक्क लेत्तीक नाक्त यो जाक्शो बाक्ब। इस्राएल डा मुरपुकीमी मेको तुइक्नीम। परमप्रभु यावे आ लोव्र पाइब गुक्शो खोदेशो पा बाक्नीम। मेकोपुकी गशो दुम्तेक्म। मारदे हना इन मरिश्शो पचा नु मदाक्चा आ पर्वम मोदेशो दुम्त। <sup>8</sup> परमप्रभु यावेमी आ लोव्र पाइब कली एफ्राइम कली कोव्रब सेल्लु। मेको आ लां नेल्लेमी चिक्ब रेत्तीक ब्वारद खोदेशो बाक्नीम। आ परमप्रभु आ खिमी यो मेको कली काइ मदाक्नीम। <sup>9</sup> गिबा डा नाक्त खोदेशो पा मेकोपुकी काइ मरिश्शो गेय पाम्तेक्म। परमप्रभु यावेमी मेको आन मरिश्शो पशो मिश्शा सजाइ गेब। होसे १०:९; न्यायाधीस १९:२२-३०; न्यायाधीस २०:१३

डोइती नु नोले डा इस्राएल

<sup>10</sup> दोदेशो पा गोरशो रागीमी अडगुर थिन्नीमी, मोदेशो पा गो इस्राएल कली थित्ता। फोव्रशी रवामी नेल्ल क्येडा डोइती डा फोव्रशी फल सिश्शो खोदेशो पा गो इन किकी पिपी आन कली थित्तामी। तन्न मेकोपुकी बाल-पेओर गे लाम्तेक्म। मिनु मेकोपुकी आंम कली बाल कली जिम्मा गेसाक्म। मिनु मेको आन दाक्शो मूर्ति खोदेशो पा ग्रांरा दिक्चा डा दुम्तेक्म। ब्यवस्था ३२:१०; गन्ती २५:३<sup>11</sup> एफ्राइम आ सक्ति चिक्ब खोदेशो पा बेरशा लाइब। मेको आन दातेमी सुइ यो आल थीब मद्रुम्नीम। <sup>12</sup> मेकोपुकीमी आल थिशा कोल्पाइक्तेक्म हना यो, गो का सम्म यो मप्रोइथु लाइक्नुड। मिनु गो मेको आन कली प्रोइशा डोन लाइक्नुड। मिनु मेको आन कली ठेयब श्येत दुम्ब। <sup>13</sup> एफ्राइम आ तौपुकी साइक्चा पुंडसीनीम। एफ्राइममी आ तौ आन कली क्योरचा कली लाइक्चा माल्ब। इजीकीएल २७:३<sup>14</sup> परमप्रभु यावे, गे मेको आन कली मार गेनीनी? मेको आन आल शाम्सेक्ल। मिनु मेको आन दूध सोव्रल। <sup>15</sup> मेको आन मरिश्शो पतीके नेल्ल गिल्गालम पाम्तेक्म। मेक रे गो मेको आन कली तथा ग्रांरा दिचा गोव्रता। मेको आन काइ मरिश्शो पतीके, गो आं खिं रे खेरनुडमी। मेको आन ठेयब मुर नेल्ल मटीब बाक्नीम। <sup>16</sup> एफ्राइम आप्चा पुंडसीशो बाक्ब। मेको आन शाक्श सोव्रशो बाक्ब। मेकोपुकी मसिन्नीम। मेकोपुकीमी आल थिम्तेक्म हना यो, गो मेको आन दाक्शो आल आन कली साइक्नुड। <sup>17</sup> आं परमप्रभुमी मेको आन कली प्रोइब। मारदे हना मेकोपुकीमी आ देशो मटीम। मोपतीके मेकोपुकी रागी रागी डा मुर आन दातेमी हिरशा गाक्ब दुम्नीम।

चढेनीम तन्न दूली पाइनीम

<sup>10</sup> डोइती इस्राएल ब्राक्शो नु शुश फल सिप्ब अडगुर बोट का बाक्त। मिनु इस्राएल डा मुरपुकी शुश क्येट थीब दुम्तेक्म। मिनु मोपा मेकोपुकीमी फुल्लु के चढेतीक यो शुश सेल्लेक्म। मिनु मेको रागीमी दोशो क्येट चेम्मे, मोशोन मे कोपुकीमी आन थाम डा मूर्ति दारपाइक्तेक्म। येरमीया २:२१; लेवी २६:१<sup>2</sup> मेको आन थुं दूली बाक्ब। मुल मेकोपुकीमी आन मरिश्शो पशो आ सजाइ तचा माल्नीम। परमप्रभुमी मेको आन चढेतीक नु आन खूक्शो फुल्लु प्रेक्ब। मेको आन थाम डा मूर्ति यो खतम सेल्ब।

श्येत जशा, थुं लेश्शो

<sup>3</sup> मिनु मुल मेकोपुकीमी “गो परमप्रभु यावे कली मान पा महितीके गो आंइ के पिप मबाक्ब। मिनु पिप बाक्त हना यो मेकोमी आंइ कली मार पने चाप्चा डा?” देंनीम। <sup>4</sup> मेकोपुकीमी शुश फश लोव्र पाइनीम। मार फश लोव्र पाइनीम देशा हना, जोल पा कसम जशा कबल पाइनीम। मोपतीके वाक्शो रूमी ओशेर पाइश्शो सुवा वाशो खोदेशो पा मुददा बारनीम।

मूर्ति पूजा पचा थुम्शो

<sup>5</sup> सामरीयामी बाक्ब मुरपुकी बेथ-आवेन डा बाछा आ मूर्ति आ पर्वम हिंनीम। डोइती मेको मूर्ति आ दारस तथा, ग्येरसीशो मुरपुकी मेको आ पर्वम रोंका पाइनीम। चढेबपुकी यो मेको आ पर्वम रोंका पाइनीम। मारदे हना मेको मूर्ति डोन लाइक्सीशो बाक्ब। होसे ४:१५<sup>6</sup> मेको मूर्ति कली अस्सुर लाइक्नीम। मिनु ठेयब पिप कली सोइक्नीम। एफ्राइम मुने दोक्ब, इस्राएल चहिं आ मिश्शो आ पर्वम मुने दोक्ब। होसे ५:१३

<sup>7</sup> सामरीया डा पिप ब्वाक्कुम बाक्शो जिक्शो राशी खोदेशो पा योल्सीब। <sup>8</sup> मिनु आन मरिश्शो पतीक मूर्ति बाक्शो आवेन डांडा खतम पोक्नीम। मेको इस्राएल डा मुर आन पाप पशो बाक्ब। मेको आन फुल्लु के चढेतीकेमी चूं नु चोंक वाशा सुम्नीम। मिनु मेकोपुकीमी पहाड कली “आंइ कली सुम्की” दे डांडा कली “आंइ तारी दोक्कीन” देंनीम। होसे ९:६; लूका २३:३०; प्रकाश ६:१६

<sup>9</sup> गो इस्राएलीपुकीमी गिबा आ नाक्त रे पाप पाइतीनी। मिनु मुल सम्म पाप पना पन बाक्नीनी। गिबा डा मरिश्शो पाइब मुर आन कली मार,

लडाइमी मसदमे डा? होसे ९:१० गो गेना दाक्नुडा, मेना मेको आन कली सजाइ गेनुड। मेको आन साप्पा मरिश्शो पशो आ पर्वम रागी रागी डा मुर आन हुलमी मेको आन कली फ्रेशा लाइक्नीम।

आन दला दाक्स पशो

11 मिनु एफ्राइम मगिक्शो बी का खोदेशो बाक्ब। मिनु दांड पशोनु, मेको येरसीब। मोपतीके मेको आ दारशो बलामी गो जुवा लाप्नुड। गो एफ्राइम कली दोरपाइक्नुड। यहूदामी ब्यफ वाक्चा माल्ब। मिनु याकूबमी डल्ला प्रोल्चा माल्ब। 12 ठीक पतीक शोक्कीन। मिनु मप्रॉइचा डा दाक्तीक अन्न खोदेशो पा खुप्तीन। गे इन मवाक्शो रू वाक्तीन। मारदे हना इन परमप्रभु यावे कली माल्ची नाक्त् जाक्त्। मिनु मेको जाक्शा, गे इन कली पाप रे प्रॉइब। *येरमीया ४:३; यसैया ५५:६*

13 तन्न गेपुकी परमप्रभु यावेमी अरेशो मटितीकेम गुम्शा बाक्तीनी। मिनु ठीक मदुम्तीके खुप्शा बाक्तीनी। गेपुकी जोल आ फल जाइब बाक्तीनी। मारदे हना गे आंम बोल नु इन लडाइ पाइब आन कली थमा सुइक्तीनी। *अय्युब ४:८* 14 मोपतीके इन मुर आन कली लडाइ तोइनीम। मिनु शात्मनमी बेथ-आरबेल कली खतम पोक्शो खोदेशो पा इन दरवार नेल्ल खतम पोक्शा गेनीम। मेना आल नु आ ममा कली यो साइक्नीम। 15 मारदे हना इन मरिश्शो पतीके मोदेशो ठेयब बाक्ब। मोपतीके मोदेशो दुम्ब। मेको नाक्त् सुनी नां दाम चोटीन इस्राएल डा पिप आन कली खतम पोक्नीम।

परमप्रभुमी इस्राएल कली दाक्शो

11 मिनु परमप्रभुमी “इस्राएल आल बाक्मेनु, गो मेको कली दाक्ताक्ड। मिनु गो आं तौ कली इजीप्त रागी रे ब्रेत्ताक्ड।

*ब्यवस्था ७:८; प्रस्थान ४:२२-२३; मत्ती २:१५* 2 मिनु गो दोशो इस्राएली आन कली ब्रेत्तु, मोशोन आं क्येडा डोन लाम्तेक्म। मेकोपुकीमी बाल देवता कली चढेम्तेक्म। मिनु मूर्ति आन कली धूप चोम्तेक्म।

3 एफ्राइम कली गुड ग्याइश्शा गाक्चा शेंब गो नड। गो मेको आन कली आल आन कली खोदेशो पा कुरता। तन्न गो मेको आन कली सापाइक्ता हना यो, मेकोपुकीमी मतुइक्तेम। 4 गोमी मेको आन कली मुर आन शिशी पशो खोदेशो पा खुल्ताक्मी। गो मेको आन कली शुश दाक्ताक्ड। गो मेको आन बलामी लाम्सीशो जुवा गुंइशा गेतामी। गो मेको आन डोंइती बाप्शा, मेको आन कली थुल्तामी।

5 मार, मेकोपुकी इजीप्त रागी लेत्वा माल्नीमी? मिनु अस्सुर मेको आन पिप दुम्चा माल्ब। मारदे हना मेकोपुकी आं गे लेत्वा मबिस्सम। 6 मेको आन सहरपुकीमी लडाइ दुम्नीम। मिनु मेको आन लाप्चो डा थाम मीम दुप्नीम। मेको आन मिश्शो नेल्ल खतम दुम्नीम। 7 आं मुरपुकी गेना हना यो, आं क्येडा डोन लाइनीम। मोपतीके मेकोपुकीमी जुवा कुरशो खोदेशो पा श्येत जचा माल्नीम। मिनु सुइमी मेको आन कली आन श्येत रे मप्रॉइब।

8 एफ्राइम, गो इ कली दोपा प्रॉइने चाप्नुडा? इस्राएल, गो इ कली दोपा इ जोरी सत्रु आन गुइमी गेने चाप्नुडा डा? गो इ कली दोपा अदमाह कली पाइश्शो खोदेशो पाइनुडा डा? गो इ कली दोपा सेबोयीम खोदेशो सेल्नुडा डा? मुल आं थुं फांडसाक्व। गो गाइक्चा रे लेश्शा, शिशी पाइब दुम्ती। *ब्यवस्था २९:२२; येरमीया ३१:२०* 9 गो आं ग्याइश्शो कुरशा मगाक्नुड। गो एफ्राइम कली लेंशा खतम मपाइनुड। मारदे हना गो परमप्रभु नड। गो मुर मनड। गो इन दातेमी नेल्ल क्येडा सक्ति पाइश्शो दुम्शा, गाइश्शा मजाक्नुड। 10 मेकोपुकी परमप्रभु यावे आ नोले खोइक्नीम। मेको चहिं गुप्स खोदेशो पा ग्रीब। मिनु मोपा ग्रीमेनु, आ आलपुकी पच्छिम रे पा खिंखि पना पन जाक्नीम। *येरमीया २५:३०; होसे २:१* 11 मेकोपुकी इजीप्त रागी रे चिक्ब खोदेशो पा बेरशा जाक्नीम। अस्सुर रे पा टुकुर खोदेशो पा खिंखि पना पन जाक्नीम। गो मेको आन कली आन खिंमी बाक्चा गेनुड” दे परमप्रभु यावेमी देंत। 12 एफ्राइममी आं कली जोल पना पन बाक्ब। मिनु इस्राएलीमी यो खाल का डा पा आं कली जोल पाइनीम। मिनु यहूदा आ का ला परमप्रभु आ नोले खोइक्चा कली थुं निक्शी पशो बाक्ब। तन्न मेकोमी मेको आन कली दाक्शा मप्रॉइब।

इस्राएलीम पाप पशो

12 एफ्राइममी आं कली लोत्र पाइब। मेकोमी नेल्ल नाक्त् पूर्ब डा फश कली खेदा पाइब। मेकोमी जोल नु हुश ख्वाक्श पोक्चा बारपाइक्ब। मेको अस्सुर नु गारब। मिनु इजीप्त रागी कली तेल सोइक्ब। *होसे ५:१३*

2 परमप्रभु यावेमी यहूदा आ मरिश्शो पशो डा सजाइ गेप्तु। मेकोमी याकूब आ मरिश्शो पशो आ पर्वम सजाइ गेब। मेकोपुकीमी दोदेशो पामे, मोदेशो पा सजाइ गेब। 3 मेकोमी आ ममा आ कोंवजीम आ लोक्ब आ गेंगे ग्याइक्ताक्व। मिनु ठेयब दुम्शा, परमप्रभु यावे नु राम्शी पाप्तु। *उत्पत्ती २५:२२, २६; उत्पत्ती ३२:२५-२९* 4 मेको परमप्रभु आ स्वर्ग डा गेय पाइब नु राम्शी पा ग्रात। मेकोमी डाक्शा “शिशी पाइय्ची” दे पुंड्तु। मेकोमी परमप्रभु कली बेथेल सहरमी गुमानु, परमप्रभुमी मेको नु लोत्र पाप्तु। *उत्पत्ती ३५:१५* 5 मिनु परमप्रभु यावे, मुर नेल्ल आन परमप्रभु आ नें यावे बाक्ब। *भजन संग्रह ८३:१९* 6 मिनु मेकोमी “गे परमप्रभु गे लेत्वा माल्नेवे। गे दाक्चा नु ठीक पचा मप्रोनीन। परमप्रभु यावे कली रिम्शा बाक्कीन” देंत।

7 मिनु जोल पा नाक्तीक चलेब ग्याप्ब लेयब मुरुमी जोल पचा दाक्नीम। 8 एफ्राइममी “गो शुश क्येट थीब दुम्ती। गो शोंप पाइश्शो बाक्नुड। आं शुश क्येट चेम्तीके ‘गे पाप पाप्तीवी’ दे दोस गेने मचाप्नीम” देंत। *प्रकाश ३:१७* 9 मिनु “गो परमप्रभु यावे, इन परमप्रभु नड। गो इन कली इजीप्त रागी रे चाक्शो नड। गो डोंइती डा चाड नाक्ती खोदेशो पा इन कली लेंशा इन ताम्बुमी बाक्चा गेनुड” देंत। *होसे १३:४*

10 मिनु मेकोमी “गो नोले दुम्ब लोत्र पाइबपुकी नु लोत्र पाता। गो मेको आन कली कोंइतीके कोंइताक्ड। गो मेको आन कली कथा शेंपाइक्ता। 11 गिलाद मरिश्शो पाइब बाक्ब। मेको आ मुरपुकी शोर गाक्शो बाक्नीम। मेकोपुकीमी गिल्गालमी ब्यफ चढेम्तेक्म हना, आन फुल्लु के चढेतीक ब्रेश्शा, फुल्लु देल्शो खोदेशो दुम्ब। *होसे ६:८; होसे ९:१५* 12 मिनु याकूब प्रोक्शा, अराम रागीमी लत। मेकेर इस्राएलमी मीश चाक्चा आ पर्वम गेय पाप्तु। मेकोम मेकेर भेडा योव्रतु। *उत्पत्ती २७:४३; उत्पत्ती २८:५; उत्पत्ती २९:२०* 13 मिनु परमप्रभु यावेमी आ लोत्र पाइब आ पतीके इस्राएली आन कली इजीप्त रागी रे गुंइताक्व। मिनु आ लोत्र पाइब रे पा मेको आन कली कोव्रतु। *प्रस्थान ३:१०* 14 तन्न एफ्राइममी परमप्रभु कली चुरपाइश्शो बाक्ब। मोपतीके परमप्रभुमी आ पशो हुश ख्वाक्श पोक्तीके आ पर्वम सजाइ गेब। मेकोमी दोदेशो पवा, मोदेशो पा क्येक्क लेत्वा पुंडसीब” दे परमप्रभुम देंत।

परमप्रभु इस्राएल नु गाइश्शो

13 मिनु परमप्रभुमी “एफ्राइममी लोत्र पवानु, मुरपुकी खिंखि पाम्तेक्म। इस्राएलमी मेको कली मान पाम्तेक्म। तन्न मेको बाल देवता कली पूजा पतीके बेक्त्। 2 मिनु मुल मेको क्येडा शुश पाप पाइनीम। मेकोपुकीमी आंम कली चांदी के मूर्ति सेल्नीम। मेको मूर्ति नेल्ल मुरुमी सेल्शो बाक्नीम। मिनु मुरुमी ‘मेको आन कली चढेन। बाछा कली पुक्पु पने’ देंनीम। *यसैया ४४:१०* 3 मोपतीके मेकोपुकी सुनी डा गोस्स, सुनी डा जाम्शा लाइब सीत, फशेमी योल्ब खला डा भूस नु झेल रे पा गूब कुन खोदेशो दुम्नीम” देंत। *होसे ६:४; भजन संग्रह १:४*

4 मिनु “गो परमप्रभु यावे, इन परमप्रभु नड। गो इन कली इजीप्त रागी रे गुंइताक्ड। गे गो आं डा लाक्शा अरु परमप्रभु मतुइक्नीनी। मिनु गो आं डा लाक्शा अरुमी पाप रे प्रॉइने मचाप्नीम। 5 मिनु गो गोरशो रागी नु शुश सोव्रशो रागीमी इन कली कोव्रता। *होसे ९:१०* 6 गो मेको आन कली रूपाइक्ता। मिनु मेकोपुकी ठेयब लेश्शा, आं कली प्रेंताक्म। *ब्यवस्था ३२:१५* 7 मोपतीके गो मेको आन कली गुप्स खोदेशो पा नु जोइ खोदेशो पा आन लांम बाप्शा बाक्नुड। *होसे ५:१४* 8 चाइक्ब रॉइसीशो वां खोदेशो पा मेको आन कली ग्याइश्शा आन रां चेल्तुड। मिनु गुप्सुमी खोदेशो पा मेको आन कली ब्वाइनुड। मिनु ब्वाकी डा जन्तुमी साइश्शो खोदेशो पा साइक्नुड।



9 इस्राएलीपुकी, गो इन कली खतम सेल्लुड। इन कली सुम वारच पाइबा? येरमीया २:१७ 10 इन कली प्रॉइने चाख ते बाक्मा? इन कली वारच पाइब सासन पाइब, ते लाक्गमे? मेको आ पर्बम गोपुकीमी 'गो आंड कली पिप नु सासन पाइब गेकी' देंतीनी। १सामुएल ८:५-९ 11 मोपतीके गो गाइश्शा इन कली पिप का गेता। मिनु गो चुरशा मेको कली पोक्शा लाइक्ता।

12 एफ्राइम आ पाप खुइश्शा वोइश्शो बाक्ब। मेको आ पापपुकी ब्रेक्शा वोइश्शो बाक्नीम। 13 मीश मुर आल थितीक रोइ पशो खोदेंशो पा मेको कली श्येत दुम्ब। तन्न मेको मारेइ यो मतुइक्ब आल खोदेंशो बाक्ब। मेको दूली पा जरमेशो बाक्ब।

14 गो मेको आन कली तुरस रे प्रॉइनुडा डा? गो मेको आन कली बेक्वा रे पा प्रॉइनुडा डा? साइक्ब, इ साइक्तीक ते बाक्बा? तुरस, इ खतम सेल्लिक ते बाक्बा? गो शिशी मपाइनुड। २तिमोथी १:१०; प्रकाश २०:१४; १कोरिन्थी १५:५४-५५

15 मेको आ लोक्ब आन दातेमी रिम्शो दुम्शा सोशा बोशा लत हना यो, गो मेको कली शिशी मपाइनुड। परमप्रभु यावे रे पा पूर्ब डा फश गोरशो रागी रे पा जाक्ब। मिनु आ ब्वाक्कु बुक्तीक सोव्रब। मेको आ इनार यो सोव्रनीम। मोपा मेको आ शुश क्येट लाइब मारेइ मारेइ नेल्ल नुजीम। 16 सामरीया डा मुरपुकीमी आन पाप पशो डा श्येत जचा माल्नीम। मारदे हना मेकोपुकीम आंम परमप्रभु कली मटीम। मेकोपुकी तरवारमी साइक्वा पुंडसीनीम। मेको आन आलपुकी खपीमी ताइश्शा साइक्वा पुंडसीनीम। मेको आन कोव्रज कुरशो मीश मुर आन कोव्रज चेट्वा पुंडसीनीम" देंत। २राजा १५:१६

परमप्रभु गे लेत्तीन, दे ब्रेश्शो

14 गे इस्राएली, परमप्रभु यावे, इन परमप्रभु गे लेश्शा जाक्कीन। मारदे हना गे इन मरिम्शो पतीके रे खतम दुम्तीनी। 2 परमप्रभु आ लोव्र मेको कली देंशा, परमप्रभु यावे गे लेतीन। मिनु गोपुकीमी मेको कली "आंड पाप नेल्ल क्याम्दीने! आंड कली शिशी पा ब्रने। गो इन नें ठेयब सेल्लनीकी। हिब्रू १३:१५ 3 अस्सुर डा मुरपुकीमी आंड कली प्रॉइने मचाप्नीम। गोपुकी लडाइ पथ शारा डोइश्शा मगाक्नीकी। मिनु गो आंम सेल्लो थोव्रक कली 'इं परमप्रभु' दे गेनायो मदेनीकी। मारदे हना रोम रोइक्चपुकीमी इन शिशी ताइनीम" दे परमप्रभु कली देंनीन।

4 मिनु परमप्रभुमी "गो इन नोले शॉइसीशो माफ गेनुड। गो इन कली शुश शिशी पा दाक्नुड। मारदे हना मुल इन कली तशा मगाइक्नुड। 5 गो इस्राएल कली सीत खोदेंशो दुम्नुड। मेको लिली फू खोदेंशो पा बोइक्ब। लेबानोन डा लाइश्शो रवा खोदेंशो पा मेकोमी शाक्श थोक्ब। 6 मेको आ राशी लाइश्शो दुम्नीम। मेको आ दारस तेल रवा खोदेंशो दुम्ब। मेको आ ब्रोव्रशो रिना लेबानोन डा लाइश्शो रवा खोदेंशो दुम्ब। 7 मुरपुकी लेंशा मेको आं वांकुमी बाक्नीम। मेकोपुकीमी लेंशा अन्न ख्व्नीम। मिनु अडगुर खोदेंशो पा बोइक्नीम। मिनु मेको आन नें लेबानोन डा अडगुर शांबु खोदेंशो पा ठेयब दुम्ब। 8 एफ्राइम डा मुरपुकी, मूर्तिपुकी नु गो आं के मार गेय बाक्बा डा? गो इन कली लोव्र लेत्नुड। मिनु इन कली कोव्रनुड। गो तोव्रशी रवा खोदेंशो पा गिग बाक्नुड। इ फल फुल सित्वा आं सक्ति रे जाक्ब।

9 सु जोक्ब तुइक्ब बाक्बा, मेकोमी एको लोव्र तुइक्त्तल। सु के रुब् थुं बाक्मे, मेकोमी एको लोव्र रुबल। परमप्रभु यावे आ लां ठीक बाक्नीम। मिनु ठीक पाइबपुकी मेको आ लांमी गाक्नीम। तन्न आ देंशो मटीबपुकी मेको आ लांमी दाइल पाइसीनीम" दे परमप्रभुम देंत।

# योएल

योएल आ नें आ अर्थ “परमप्रभु यावे, परमप्रभु बाक्ब” दॅशो बाक्ब। मेको आ आफ पेथुएल आ पर्वम मारेइ मतुंडसीब। योएलम यहूदा राज्यमी परमप्रभु आ लोव्र पशो बाक्ब।  
 मुर काम अथाल्याहम आंम कली पिपीम सेल्सेनु, पिप आ तौ योआश चढेब येहो-यादाम परमप्रभु आ खिम खुइश्शा वोइश्शो ना, ८०० बि. सी.म खोदेंशो एको किताब ब्रेक्शो बाक्ब, दे मिन्नीम।  
 मालेपुकीमी इस्राएल रागी कली निक्शी खेयप रागी नेल्ल खतम सेल्लेक्म। रेउ मयितीके परमप्रभु यावे आ गेशो सजाइ बाक्ब। मोपतीके योएलम मुर आन कली परमप्रभु यावे गे लेतीन। परमप्रभु यावेम आ गे लेश्शो मुर आन कली माफ गेब। आन साम्शो नेल्ल लेख्ब। योएलमी “इस्राएली ला ममाइ, अर्को रागी डा मुरपुकीमी यो, परमप्रभु यावे आ श्येत रे प्रॉइशो तने चाप्नीम” दॅशो बाक्ब।

## सल्हा मालेमी श्येत गेशो

1 परमप्रभु यावेमी पेथुएल आ तौ योएल कली दॅशो लोव्र एको बाक्ब।  
 2 मिनू मेको लोव्र मार बाक्ब दॅशा हना “गे खाल्पापुकी, एको लोव्र नेनीन। रागीम बाक्ब मुर नेल्ल इन नोफा दाइश्शा नेनीन। मार, इन ब्रॉइतीक नाक्ती नु इन किकी पिपी आन ब्रॉइतीक नाक्तीम ओदेंशो दुश्शो बाक्मे?  
 3 गे एको लोव्र इन तमी तौ आन कली देनीन। मिनू इन तमी तौपुकीमी आन तमी तौ आन कली देंपतीन। मिनू मेकोपुकीमी आन चच युइ आन कली देंमल।  
 4 घांस खोइश्शा ब्वाइब मालेपुकीमी मार मार प्रोन्मे, मेको लेस्वा मालेपुकीमी नेक्तेक्म। मिनू लेस्वा मालेपुकीमी मार मार प्रोन्मे, मेको तोडले मालेपुकीमी नेक्तेक्म। मिनू तोडले मालेपुकीमी मार मार प्रोन्मे, मेको सल्हा मालेपुकीमी नेक्तेक्म। योएल २:२५ 5 मिनू गे दुक्शा बाक्बपुकी सेंसीशा, डाक्कीन। मिनू अडगुर शांबु तूशा दुक्ब नेल्ल नक अडगुर शांबु आ पर्वम रोंका पने। मारदे हना मेको इन शोव रे रॉइसीशो बाक्ब। 6 ठेयब रागी डा मुरपुकी आं रागीम ओव्रतेक्म। मेको सक्ति पाइश्शो नु हिकने मचाप्चा डा पा शुश बाक्नीम। मेको आ खुइ गुप्स आन खुइ खोदेंशो बाक्नीम। मिनू मेको आन लाइश्शो खुइ, छाउरी गुप्स आ खुइ खोदेंशो बाक्नीम। योएल २:२ 7 मेकोपुकीमी आं अडगुर रू खतम पोक्शा, आं फोव्रशी रवा नेल्ल तिश्शा चेततेक्म। मेकोपुकीमी मेको आन कोक्ते नेल्ल थुरशा, ताइक्ताक्म। मेको आन राशी नेल्ल बुश दुम्तेक्म।

8 मिनू कन्ने मीश आलमी अरन्डी फेक्शा, आ ग्युंबे पचशो वॉइश आल आ पर्वम दोपा रोंका पाइबा, मोपा रोंका पने। 9 अन्न चढेतीके नु तूचा थोव्रक चढेतीके परमप्रभु यावे आ खिमि चढेचा देक्शो बाक्ब। परमप्रभु यावे आ डॉइती गेय पाइब चढेबपुकी रोंका पाइनीम। योएल २:१४ 10 मिनू रू नेल्ल श्येत्थ दुश्शो बाक्नीम। खप रोंका पाइब। मारदे हना अन्न नेल्ल खतम दुश्शो बाक्ब। अडगुर आ रस सोव्रत। तेल रवा आन फल सोव्रतेक्म।

11 गे रूम गेय पाइबपुकी सुर्ता पने। अडगुर खुम्बपुकी रोंका पने। क्योव्रज चेरब आ पर्वम यो रोंका पने। मारदे हना बाली नाली खतम दुश्शो बाक्नीम। 12 अडगुर बोट सोल सुल बेक्तेक्म। फोव्रशी रवा यो सोव्रतेक्म। अनार, खजूर, स्याउ रवा नु रू डा रवा नेल्ल सोव्रतेक्म। थमा पा, मुर आन दातेमी मुर आन ग्येरीक थुं यो मेको खोदेंशो पा नुप्शो बाक्ब।

13 चढेबपुकी, सुर्ता पा अरन्डी फेक्शा रोंका पने। चढेतीकेमी गेय पाइबपुकी रोंका पने। आं परमप्रभु आ गेय पाइबपुकी, नाक्दो यो सुर्ता पा अरन्डी फेक्शा बाक्कीन। मारदे हना इन परमप्रभु आ खिमि अन्न चढेतीके नु तूचा थोव्रक चढेतीके देक्शो बाक्ब।

14 मिनू माइजा बाक्चा कली मुर आन कली खुप्तीन। परमप्रभु यावे आ खिमि रागीम बाक्ब मुर नेल्ल बुक्शा, खाल्पा आन कली ब्रेत्तीन। गे खाल्पा नु मुर आन कली परमप्रभु यावे, इन परमप्रभु आ खिमि पुक्कीन। मिनू परमप्रभु यावे कली ठेयब सेंदा पा ‘वारच पाइक्की’ दे पुनीन” देंत। भजन संग्रह १०४:१०, ११; योएल २:१५

## योएलमी रोंका पशो

15 मिनू योएलमी “परमप्रभु यावे आ जाक्चा चिक्शो नाक्त आ पर्वम आबी आबी, मारदे हना मुल मेको नाक्त जाक्ब। नेल्ल क्येडा सक्ति पाइश्शो खतम पोक्तीके जाक्ब। योएल २:१; यसैया १३:६ 16 मार, इं जचा थोव्रक इं डॉइती रे मरोइक्से डा? मार, ग्येरशा सोम्शा बाक्तीके आंइ परमप्रभु आ खिं रे मयोल्म डा? ब्यवस्था १६:३१

17 वांचेर नेल्ल खप आगाम सोव्रशा रोम्शा लीतेक्म। अन्न वोइक्तीक खिं ब्रेश्शो बाक्नीम। अन्न वोइक्तीक श्येत्थ दुम्तेक्म। मारदे हना अन्न मदुम। 18 मिनू बस्तु भाव रोंका पाइनीमी। बी ब्यफ जोतीक मबाक्तीके हिरना हिरन बाक्नीम। क्यारश भेडा आन हुल यो श्येत जशो बाक्नीम।

19 परमप्रभु यावे, गो इन कली वाइ ब्रेश्शा थोइनुड। मारदे हना बी ब्यफ नु क्यारश भेडा आन जोतीके मीम नेक्शो बाक्ब। मिनू मीम रू डा रवा नेल्ल नेक्शो बाक्ब। योएल २:३ 20 मिनू ब्वाकी डा जन्तुपुकीमी यो इन कली थोशो बाक्नीम। मारदे हना खोला सोव्रशो बाक्नीम। मिनू मीम गोरशो रागी डा बस्तु भाव योव्रतीक डा घांस नेल्ल नेक्शो बाक्ब” देंत। भजन संग्रह १०४:१०-११

## परमप्रभुम निसाफ पचा चिक्शो

2 सियोनमी तुराही ताप्पीन। आं डांडामी शुश ग्रीब ताप्तीक ग्रोव्र ताप्पीन। रागीम बाक्ब मुर नेल्ल गिक गिक पा खिंखि पामेक्ल। मारदे हना परमप्रभु यावे आ जाक्शो नाक्त नेक्था जाक्शो बाक्ब। मेको जाक्चा चिक्शो बाक्ब। योएल १:१५ 2 मेको नाक्ती छिडछिड नु हिंचा डा बाक्ब। मेको थम ठेयब गोस्स नु छिडछिडमी सुम्शो बाक्ब। मिनू ठेयब सक्ति पाइश्शो लडाइ पाइब आन हुलमी डांडा आन कली क्येर गोस्सुम सुम्शो खोदेंशो पा सुम्शो बाक्नीम। मेको मोदेंशो डॉइती गेनायो मदुम्शो बाक्ब। मिनू नोले डा मुर आन पालाम यो मोदेंशो गेनायो मदुम्ब। योएल १:६; प्रस्थान १०:१३-१५

3 मेको आन डॉइडॉइती मीम मारेइ मारेइ नेक्ब। मिनू मेको आन नोनोले मी ब्राइब। मेको आन डॉइती रूपुकी एदेन डा फल फुल रू खोदेंशो बाक्नीम। मेको आन नोले गोरशो रागी खोदेंशो दुम्नीम। मेकोपुकी रे मारेइ मब्रॉइनीम। योएल १:१९

4 मेको आन कुल शारा आन कुल खोदेंशो बाक्नीम। लडाइ पाइब शारा डोइक्ब खोदेंशो पा बारनीम। 5 मेकोपुकी बग्गी दोरशो रेयके खोदेंशो पा पहाड तार दोरनीम। मीम आइक्च शी दाक्शो खोदेंशो पा रेयके पाइनीम। मेकोपुकी सक्ति पाइश्शो लडाइ पाइब आन हुलमी लडाइ पचा चिक्शो खोदेंशो बाक्नीम।

6 मिनू जात जात डा मुर मेको आन कली तशा हिंशा, आन कुल राव किकपाइक्नीम। 7 मेकोपुकी लडाइ पाइबपुकी खोदेंशो पा बारशा, गारो

डोंइसीनीम। मेको का का पा आन गावशो लां मप्रॉइथु, आन लांम गावनीम।  
8 मेकोपुकी मचुमुथु गावशा, लां का खोइवनीम। मिनु या कुरशो आन जोरी सत्रु आन हुलम ओवनीम। मिनु सुइमी मेको आन कली तेवने मचाप्नीम।  
9 मेकोपुकी सहर कली लडाइ तोचा कली गारो तार दोरनीम। मेकोपुकी खिं डा झेले रे खुइ खोदेंशो पा ओवनीम।

10 मिनु मेको आन डोंइती रागीम खिनु कुइब। सरीड हिम्सीब। नां नु तास्ला छिडछिड दुम्नीस। मिनु सोरुलमी आन हाम्सो मकोइनीम। योएल ३:४; यसैया १३:१० 11 मिनु परमप्रभु यावे आ लडाइ पाइब आन डोंइती ठेयब सेंदा पा लोत्र पाइब। मेको आ लडाइ पाइब सक्ति पाइशो नु शुश बावनीम। मिनु मेको आ देंशो टीब हिवने मचाप्चा डा बावनीम। परमप्रभु यावे आ निसाफ पतीक नाक्ती ठेयब नु थम हिंचा डा बाक्ब। मेको सुम फालने चाप्नीमी डा?

परमप्रभुमी “आं गे लेतीन” देंशो

12 परमप्रभु यावेमी “इन थुं नेल्लेमी आं गे लेतीन। गे माइजा बाक्शा, डाक्शा नु रोंका पा आं गे लेतीन। इजीकीएल ३३:११ 13 गे रोंका पा इन वा मखाक्कीन। इन थुं खाक्कीन। गेपुकी परमप्रभु यावे, इन परमप्रभु गे लेतीन मारदे हना मेकोमी शिशी पा दाक्ब। मेको रीब पा मगाइक्ब। गेना हना यो दाक्ब नु रीब पा सजाइ मगेब बाक्ब। प्रस्थान ३४:६ 14 मिनु परमप्रभु यावेमी आ थुं लेश्शा, सजाइ मगेथु, आसीक गेबा कों? मेको सुम तुइक्बा डा? मिनु गेपुकीम परमप्रभु यावे, इन परमप्रभु कली अन्न चढ़ेतीक नु तूचा थोव्रक चढ़ेतीके चढ़ेने। योना ३:९

15 सियोनमी तुराही ताप्पीन। माइजा बाक्चा कली मुर आन कली खुप्तीन। मिनु चाड मानेचा कली मुर आन कली ब्रेत्तीन। योएल १:१४ 16 मुर नेल्ल आन कली खुप्तीन। बुक्शो मुर नेल्ल आन कली परमप्रभु यावे आ डोंइती ठीक सेलीन। खाल्पा आन कली खुप्तीन। आल आन कली खुप्तीन। दूध तूब आल आन कली यो खुप्तीन। ग्युम्ले आ कोठा रे गूल। मिनु ग्युम्ली आ बाक्तीक रे जाक्ल।

17 परमप्रभु यावे आ डोंइती गेय पाइब चढ़ेबपुकी परमप्रभु यावे आ खिं डा पिंडी नु चढ़ेतीक आ दातेम डाक्मल” देंत। मेकोपुकीमी “परमप्रभु यावे इन मुर आन कली सजाइ मगेने। रागी रागी डा मुर आन डोंइती इन मुर आन कली शुक्शी नु तोक्शा लोत्र पाइक्तीक दुम्चा मगेने। मिनु जात जात डा मुरपुकीमी ‘मार, मेको आन परमप्रभु ते बाक्म?’ देंचा मतामेक्ल” देंतेक्म। भजन संग्रह ७९:१०

परमप्रभुमी लोत्र लेश्शो

18 मिनु परमप्रभु यावेमी आ रागी आ पर्वम रुश पा, आ मुर आन कली शिशी पाप्तु। 19 मिनु परमप्रभु यावेमी आ मुर आन कली मिम्शा “गो इन कली अन्न, अडगुर शांबु नु तेल सोइक्नन्नी। मिनु गे रूनीनी। मिनु गो इन कली रागी रागी डा मुर आन दातेमी गेनायो शुक्शी पाइक्तीक दुम्चा मगेनन्नी। योएल २६:२७

20 गो उत्तर रे जाक्शो लडाइ पाइब आन कली इन क्येडा डोन खेरनुडमी। गो मेको आन कली कोक्त। मुल गोरशो रागीमी खेरनुडमी। मेको आन डोंइती डा हुल आन कली पूर्व डा समुन्द्र गे नु मेको आन नोले डा हुल आन कली पच्छिम डा समुन्द्र गे खेरनुडमी। मिनु मेको आन राक्शो रिना इर गे लाइब” दे परमप्रभुमी देंत। मेकोमी थमा पा ठेयब गेय पशो बाक्ब।

21 रागी डा मुर महिनीन। गे ग्येरशा सोम्सीशा बाक्कीन। परमप्रभु यावेमी ठेयब गेय पशो बाक्ब। 22 गे ब्वाकी डा जन्तु महिनीन। मारदे हना गोरशो रागी डा योव्रतीक गिगी दुम्शो बाक्ब। रवाम फल सिल्नीम। फोव्रशी रवा नु अडगुर आ बोटीमी शुश फल सिल्नीम।

23 गे सियोन डा मुरपुकी ग्येरसीन। गेपुकी परमप्रभु यावे, इन परमप्रभु आ पर्वम शुश ग्येरसीन। मारदे हना मेकोमी आ ठीक पतीकेम इन कली डोंइती डा रेउ गेशो बाक्त। मेकोमी इन कली शुश रेउ गेशो बाक्त। डोंइती नु नोले डा रेउ डोंइती खोदेंशो पा गेशो बाक्त। येरमीया ५:२४ 24 मिनु

खलापुकी अन्नमी ब्रीनीम। गरपुकी नक अडगुर शांबु नु तेलम ब्रीशा क्युप्नीम।

25 परमप्रभु यावेमी “गो इन कली लेस्वा माले, तोडले माले, सल्हा माले नु घांस खोइश्शा ब्वाइब माले आन नेक्शो नेल्ल लेश्शा गेनन्नी। मेको आं सोइश्शो लडाइ पाइबपुकी बाक्तेक्म। गो मेको आन कली इन दातेमी सोइक्ताक्डमी। योएल १:४

26 मिनु गे शुश जचा तशा रूनीनी। मिनु इन पर्वम छक लाक्चा डा गेय पाइब परमप्रभु यावे, इन परमप्रभु आ नें ठेयब सेल्चा माल्नीनी। मिनु आं मुरपुकी लेंशा गेनायो मुने मदोक्नीम। ब्यवस्था ८:१० 27 गो इस्त्राएली आन दातेमी बाक्शो बाक्नुड। गो परमप्रभु यावे, इन परमप्रभु नड। आं क्येडा लाक्शा, अर्को परमप्रभु मबाक्ब, दे गे तुइक्चा माल्नीनी। मिनु आं मुरपुकी लेंशा गेनायो मुने मदोक्नीम।

परमप्रभु आ सोक्त मोइक्तीके

प्रेरित २:१६-२९

28 मिनु नोले गो आं सोक्त मुर नेल्ल आन तार मोइक्नुड। मिनु इन तमी तौपुकीमी आं लोत्र पाइनीम। इन खाल्पापुकीमी डोमु ताइनीम। मिनु इन वोंइश आलपुकीमी आं कोंइशो ताइनीम। गन्ती ११:२९; यसैया ४४:३; इजीकीएल ३९:२९; तीतस ३:५-६ 29 मेको नाक्ती गो वाइलीम वाइल आन तारी यो आं सोक्त मोइक्नुड।

30 गो सरीड नु रागीम चिन्ड कोंइनुडमी। हुश, मी नु कुन के थाम कोंइनुडमी। होसे ७:१ 31 परमप्रभु यावे आ ठेयब हिंचा डा नाक्त जाक्चा क्येडा डोंइती नां छिडछिड दुम्ब। मिनु तास्ला हुश दुम्ब” देंशो बाक्ब। योएल २:२,१०,११; मत्ती २४:२९; प्रकाश ६:१२ 32 मेना परमप्रभु यावे आ नें थोइब नेल्ल ब्रोंइचा ताइनीम। मारदे हना परमप्रभु यावेमी देंशो खोदेंशो पा सियोन डांडा नु यरूसलेममी परमप्रभु यावेमी ब्रेश्शोपुकी ब्रोंइचा ताइनीम। मिनु मेको प्रॉइशो आन दातेमी परमप्रभु यावे आ योव्रशो मुर बाक्नीम। रोमी १०:१३; ओबदिया १७

मुर आन कली निसाफ पशो

3 परमप्रभु यावेमी “मेको नाक्ती गो यहूदा नु यरूसलेम आस रिम्शो दुम्तीक नाक्ती लेश्शा चाक्नुड। होसे ७:१ 2 मिनु गो रागी रागी डा मुर नेल्ल आन कली खुप्शा, येहो-शाफात आ दिंममी चाक्नुडमी। मिनु मेकेर मेको आन कली निसाफ पाइनुड। मारदे हना मेकोपुकीमी आं मुर आन कली रागी रागी डा मुर आन दातेमी ब्रपाइक्तेक्म। मिनु आं रागी भाग भाग सेल्लेक्म। 3 मेकोपुकीमी आं मुर आन पर्वम फेन्टे ग्यारतेक्म। मिनु वोंइश आल लेयशा, तेल्लेम नु लाम्तेक्म। मीश आल आन कली लेयशा, अडगुर शांबु तूतेक्म।

4 टायर, सीदोन नु पलिस्ती आन रागी डा मुरपुकी आं कली मार पाइनीनी डा? मार, आं पशो आ पर्वम आं कली क्येक्क लेल्नीनी? गेपुकीमी आं कली क्येक्क लेत्ताक्नी हना, गो मेको रीब पा इन पिया तार मोइक्नुड। 5 मारदे हना गे आं सुन, चांदी नु थम रिम्शो थोव्रक नेल्ल इन दरवारम लाइक्तीनी। 6 मिनु गे यहूदा नु यरूसलेम डा मुर आन कली मेको आन रागी रे लाइश्शा, ग्रीस डा मुर आन कली लेयतीनी। 7 मुल गो मेको आन कली लेयशो रागी रे गुंडशा, चाक्नुडमी। मिनु गो इन श्येत गेशो लेंशा इन पिया तार मोइक्नुड। 8 मुल गो इन तमी तौ आन कली यहूदा डा मुर आन कली लेयनुडमी। मिनु मेकोपुकीमी मेको आन कली डोन साबा रागी डा मुर आन कली लेयनीम” दे परमप्रभु यावेमी देंशो बाक्ब।

9 मिनु परमप्रभुमी “एको लोत्र रागी रागी डा मुर आन दातेम नेंपतीन। लडाइ पचा कली ठीक दुम्नीन। लडाइ पाइब आन कली ब्रेत्तीन। बुक्तीक आ नेक्था जाक्चा माल्नीम। 10 गे इन फाली शोल्शा, तुप्शा तरवार सेलीन। मिनु इन गुये तुप्शा, तूतीक भाला सेलीन। मिनु गे हिंब मुरपुकीमी ‘गो बोल्यो लडाइ पाइब नकी’ देनीन। यसैया २:४

11 एर ओंथ बाक्शो रागी रागी डा मुर नेल्ल रीब पा जाक्कीन। गे नेल्ल मेकेर खुम्सीन। परमप्रभु यावे, इन बोल्यो लडाइ पाइब आन कली उड

यितीन। 12 मिनु रागी रागी डा मुर नेल्ल जॉब बोक्शा, खुम्सीशा येहो-शाफात आ दिंममी लमल। मारदे हना गो एर ऑथ डा रागी डा मुर नेल्ल आन कली निसाफ पाइनुड।

13 मिनु इन गुयेमी रिक्चा ठीक दुमीन। मारदे हना बाली नाली खुपची जाक्शो बाक्ब। मिनु ओव्रशा अडगुर ख्राक्कीन। मारदे हना कोल ब्रीशो बाक्त्त। गर ब्रीशा क्युप्शो बाक्नीम। मेको खोर्देशो पा आन मरिम्शो पशो शुश दुम्त। प्रकाश १४:१५; यसैया ६३:३, ६; प्रकाश १४:१८

14 मिनु निसाफ पतीक दिंममी शुश मुर जाक्स डा जाक्स बाक्नीम। मारदे हना मेको दिंममी परमप्रभु यावे आ निसाफ पतीक नाक्ती जाक्चा चिक्शो बाक्ब। 15 नां नु तास्ला छिडछिड दुम्नीस। मिनु सोरुलपुकीमी आन छेडछेड मर्कोइनीम" देंत। योएल २:१०; योएल ३:४

16 परमप्रभु यावेम सियोन रे ठेयब सेंदा पा लोत्र पाइब। यरूसलेम रे पा आ सेंदा नेंपाइक्ब। सरीड नु रागी खिंखि पाइनीस। तन्न परमप्रभु यावे आ मुर आन कली ख्रुइशा बाक्तीक नु इस्राएल डा मुर आन कली बोल्यो ब्राँइशा बाक्तीक दरवार दुम्ब। आमोस १:२

### परमप्रभु सियोनम बाक्ब

17 "गो, परमप्रभु यावे, इन परमप्रभु आं डांडा सियोनम बाक्नुड, दे गे तुइक्नीनी। मिनु यरूसलेम आं के दुम्ब। मिनु रागी रागी डा मुर मेको सहर डा लां रे पा मलाक्नीम। इजीकीएल ३४:३०

18 मेको नाक्ती डांडाम शुश अडगुर सित्नीम। मिनु पहाडम दूध शुश बाक्ब। यहूदा डा खोला नेल्लेमी ब्वाक्कु शाइक्नीम। मिनु परमप्रभु यावे आ खिं रे पा ब्वाक्कु बुक्तीके शित्तीम डा दिंम जिप्पाइक्ब। आमोस ९:१३; इजीकीएल ४७:१

19 मिनु यहूदा डा दोस मताइब मुर आन कली मरिम्शो पतीके नु हुश ख्राक्श पोक्तीके इजीप्त रागी मुर मबाक्तीके दुम्ब। मिनु एदोम चहिं कोक्त्त रागी दुम्ब। 20 तन्न यहूदा रागीम गेना हना यो मुर बाक्नीम। मिनु यरूसलेम नेल्ल पाला डा मुर आन कली दुम्ब। ओबदिया १०:- 21 गो मेको आन हुश ख्राक्श पोक्शो क्येक्क लेत्नुडमी। मिनु आन पाप मक्याम्नुड" दे परमप्रभुमी देंत। परमप्रभु यावे सियोनम बाक्ब। ब्यवस्था ३२:४३; इजीकीएल ४८:३५

# आमोस

आमोस आ नें आ अर्थ “कुरब मुर” बाकब। एको किताब मेकोमीन ब्रेक्शो बाकब।

आमोस यहूदा रागी डा बाकत हना यो, उत्तर रागी, इस्राएल डा मुर आन कली “होस पा बाक्कीन” देंत। परमप्रभु यावेमी मेको कली सोइश्शो बाकत। मेकोमी यहूदा डा पिप उज्जीयाह ७९२-७४० बि. सी. नु इस्राएल, उत्तर रागी डा पिप येरोबाम ७९३-७५३ बि. सी. क्येडा डोंइती ब्रेक्शो बाकत। मेको उत्तर रागी रे खेरचा पुंइसे नोले ब्रेक्शो बाकब, देंनीम। आमोसमी मुर आन मरिश्शो पतीके आ पर्बम ब्रेक्शो बाकब। मेना शोंप पाइश्शो वोंइश मुर नु मीश मुर आन शुश जचा तूचा, दूली निसाफ पचा नु प्रुडग आन कली दिप्चा आ पर्बम ब्रेक्शो बाकब। आमोसमी मेको आन कली हिंचा डा सजाइ ताइनीम, दे ब्रेक्शो बाकब। मिनु मेको सजाइ मार बाकब, दे यो ब्रेक्शो बाकब। तन्न नोले श्येत रे प्रोंइतीक आ पर्बम यो ब्रेक्शो बाकब।

## सजाइ ताइब रागी

1 एको आमोस आ लोव्र बाकब। आमोस तेकोहा सहरमी बाकब गोठला आन दाते डा का बाकत। परमप्रभु यावेमी मेको कली इस्राएल आ पर्बम लोव्र कोंइताकब। मेना यहूदा डा पिप उज्जीयाह नु इस्राएल डा पिप योआश आ तौ येरोबाम बाक्ताक्स। एको ख्रिनु कुचा क्येडा बर्स निक्शी डोंइती डा लोव्र बाकब। *आमोस ७:१४; २राजा १५:१; जकरिया १४:५; २राजा १४:२३* 2 मिनु मेकोमी “परमप्रभु यावे सियोन रे ठेयब सेंदा पा ग्रीब। मेकोम यरूसलेम रे पा ठेयब सेंदाम लोव्र पाइब। गोठला आन बी ब्यफ आन जोतीक रू नेल्ल सोव्रब। मिनु कारमेल डांडा आ डर यो सोव्रब” देंत। *येरमीया २५:३०; योएल ४:१६*

## दमस्कस कली सजाइ गेशो

3 मिनु परमप्रभु यावेमी मार देंत देंशा हना “गो दमस्कस आ ३ खेयप नु ४ खेयप मरिश्शो पशो आ पर्बम ततीके सजाइ मतेक्नुड। मारदे हना मेकोपुकीमी गिलाद डा मुर आन कली फलाम के खूइ पाइश्शो दांदिमी दांइ पास्तेक्म। *यसैया १७:१-३* 4 मोपतीके गो हजाएल आ खिमी मी सुइक्नुड। मेकोमी बेन-हादाद आ बोल्यो दरवार नेल्ल खतम पोक्ब। 5 गो दमस्कस डा ठेयब लाचो डा आग्लो जिक्नुड। मिनु आवेन माइश्शो दिंमम बाकब मुर नेल्ल आन कली नु बेथ-एदेन डा पिप कली क्याम्नुडमी। अराम डा मुर आन कली ग्याइक्पाइश्शा कीर सहरमी लाइक्पाइक्नुडमी” दे परमप्रभु यावेमी देंत। *२राजा १६:९*

## गाजा कली सजाइ गेशो

6 मिनु परमप्रभु यावेमी “गो गाजा आ ३ खेयप नु ४ खेयप मरिश्शो पशो आ पर्बम ततीके सजाइ मतेक्नुड। मारदे हना मेकोमी शुश मुर आन कली ग्याइश्शा लाइश्शा एदोम आ गुइमी लेयतु। *२इतिहास २१:१६-१७; २इतिहास २८:१८; येरमीया ४७:१* 7 मोपतीके गो गाजा डा गारोम मी सुइक्नुड। मेकोमी मेको आ बोल्यो दरवार खतम पोक्ब। 8 गो अश्दोद सहरम बाकब मुर आन कली नु अश्कलोन डा पिप कली क्याम्नुडमी। गो एक्रोन कली युक्नुड। मिनु लीशो पलिस्ती नेल्ल जाम्शा लाइनीम” दे परमप्रभु यावेमी देंत।

## टायर कली सजाइ गेशो

9 मिनु परमप्रभु यावेमी “गो टायर आ ३ खेयप नु ४ खेयप मरिश्शो पशो आ पर्बम ततीके सजाइ मतेक्नुड। मारदे हना मेकोमी शुश मुर आन कली एदोम आ गुइमी गोप्तु। मिनु आम लोक्ब आन दातेम पशो कबल प्रेंताक्व। *यसैया २३:-; योएल ४:४; १राजा ५:२६* 10 मोपतीके गो टायर डा गारोम मी

सुइक्नुड। मिनु मेकोमी मेको आ बोल्यो दरवार खतम पोक्ब” दे परमप्रभु यावेमी देंत।

## एदोम कली सजाइ गेशो

11 मिनु परमप्रभु यावेमी “गो एदोम आ ३ खेयप नु ४ खेयप मरिश्शो पशो आ पर्बम ततीके सजाइ मतेक्नुड। मारदे हना मेकोमी शिशी मपथु, आ लोक्ब आन कली तरवार शेशा, खेदा पाप्तु। मेको आ गाइश्शो गेना हना यो लीशा, ईख कुरशा बाकत। *ओबदिया १०:-; ब्यवस्था २३:८; येरमीया ४९:७* 12 मोपतीके गो तेमानम मी सुइक्नुड। मेकोमी बोज्रा डा बोल्यो दरवार खतम पोक्ब” दे परमप्रभु यावेमी देंत।

## अम्मोन कली सजाइ गेशो

13 मिनु परमप्रभु यावेमी “गो अम्मोन आ ३ खेयप नु ४ खेयप मरिश्शो पशो आ पर्बम ततीके सजाइ मतेक्नुड। मारदे हना मेकोपुकीम गिलाद डा आल कुरशो मीश मुर आन कोव्रज तरवारम चेततेक्म। मेको आन रागी ठेयब सेल्चा कली मो पास्तेक्म। *येरमीया ४९:१-६* 14 मोपतीके गो रब्बाह डा गारोम मी सुइक्नुड। मेकोम आन बोल्यो दरवार खतम पोक्ब। मिनु लडाइ पाइबपुकी शुश रेयके पा, फश गिवार खोर्देशो पा जाक्शा, मेको आन कली खतम पोक्नीम। 15 मेकेर डा पिप नु मेको आ ठेयब गेय पाइब मुर नेल्ल ग्याइश्शा लाइक्चा पुंइसीनीम” दे परमप्रभु यावेमी देंत।

## मोआब कली सजाइ गेशो

2 परमप्रभु यावेमी “गो मोआब आ ३ खेयप नु ४ खेयप मरिश्शो पशो आ पर्बम ततीके सजाइ मतेक्नुड। मारदे हना मेकोमी एदोम डा पिप आन रुश चोप्तु। *यसैया १५:-; येरमीया ४८:-* 2 मोपतीके गो मोआब रागीम मी सुइक्नुड। मेकोमी गारो हिरशो केरयोथ डा बोल्यो दरवार खतम पोक्ब। मिनु मोआब डा मुर लडाइ, शुश रेयके नु तुराही ग्रीशोम बेक्नीम। 3 गो मेको आ सासन पाइब नु मेको आ ठेयब गेय पाइब नेल्ल आन कली मेको नु काथा साइक्नुडमी” दे परमप्रभु यावेमी देंत। *गन्ती २४:१७*

## यहूदा कली सजाइ गेशो

4 मिनु परमप्रभु यावेमी “गो यहूदा आ ३ खेयप नु ४ खेयप मरिश्शो पशो आ पर्बम ततीके सजाइ मतेक्नुड। मारदे हना मेकोपुकीमी परमप्रभु यावे आ अरेशो लोव्र मटीम। आ फुल्लुम मुशा ब्रेक्शो लोव्र मपाम। मेकोपुकीम आन किकी पिपीम खोर्देशो पा जोल लोव्र थमा सुइश्शा हेंथे गाक्तेक्म। 5 मोपतीके गो यहूदा रागीम मी सुइक्नुड। मेकोमी यरूसलेम डा बोल्यो दरवार खतम पोक्ब” दे परमप्रभु यावेमी देंत। *होसे ८:१४*

## इसाएल कली सजाइ गेशो

6 मिनु परमप्रभु यावेमी “गो इस्राएल आ ३ खेयप नु ४ खेयप मरिम्शो पशो आ पर्बम ततीके सजाइ मतेकुण्ड। मारदे हना मेकोपुकीमी ठीक पाइब आन कली चांदी के क्येटीम नु मारेइ मथीब आन कली जोर का चेपल ताक्शा लेयतेक्म। *आमोस ८:६* 7 मिनु पुडग आन पिया फुरकुम खोल्शा दिम्नीम। श्येत जाइब आन कली नेष्ठा गुंडनीम। पोबु निम्फा मीश आल का नु बाक्शा, आं नें ग्रांग्रा दिशो सेल्नीम। *आमोस ८:४* 8 मेको आन देवता थानम जाकटी वोइश्शो वा तार बाक्शा, सजाइ आ पा डा थाप्शो क्येटीम, अडगुर शांबु ग्याप्शा तूनीम। *प्रस्थान २२:२५*

9 गो मेको आन डोंइती रे एमोरी आन कली साइक्तामी। मेकोपुकी लेबानोन डा लाइश्शो रवा खोदेंशो लाइश्शो नु बोल्यो बाक्तेक्म। गो मेको आन इर डा फल नु उड आगा डा शाक्श नेल्ल खतम सेल्ता। *गन्ती २१:२१-२८* 10 मिनु गो इन कली एमोरी आन रागी गेचा कली इजीप्त रागी रे गुंडशा ४० बर्स सम्म गोरशो रागीमी लां कोंइशा गाक्पाइक्तन्नी। 11 गो इन वोंइश आल आन दाते डा का निक्शी आन कली आं लोत्र पाइब सेल्चा कली कोल्पाइक्तामी। इन तौ आन दाते डा का निक्शी आन कली नाजिरी दुम्पाइक्वा कली कोल्पाइक्तामी। ए इस्राएल डा मुरपुकी, मार एको लोत्र थमा ममाइ डा?” दे परमप्रभु यावेमी देंत। *गन्ती ६:२-१३*

12 मिनु परमप्रभु यावेमी “तन्न गे मेको नाजिरी दुम्शो मुर आन कली अडगुर शांबु तूपाइक्तीनी। आं लोत्र पाइब आन कली ‘परमप्रभु यावे आ लोत्र मपने’ दे माइक्तीनी। *आमोस ७:१३, १६; येरमीया ११:२१*

13 मोपतीके गे इन बाक्तीकेमी बाक्शा, इन कली बाला सुन्दा नलम ब्रीशो बगी दोपा हिम्बा, मोपा हिम्पाइक्नन्नी। 14 थाम्पा दोरबपुकी प्रोक्वा मताइनीम। मिनु बोल्यो मुर आन बोल जाम्शा लाइब। सक्ति पाइश्शोपुकीम यो आंम कली प्रोंइने मचाप्नीम। 15 लिब्रा आप्बपुकी राजे मचाप्नीम। फेरेर पा दोरबपुकीमी यो आंम कली प्रोंइने मचाप्नीम। मिनु शारा डोइक्बपुकीम यो आंम कली प्रोंइने मचाप्नीम। 16 मेको नाक्त नेल्ल क्येडा सक्ति पाइश्शो आन दाते डा ठेयब थुं पाइश्शोपुकी शिश्रा प्रोक्नीम” दे परमप्रभु यावेमी देंत।

## इसाएल कली सजाइ

3 इस्राएल डा मुरपुकी, परमप्रभु यावेमी इन पर्बम लोत्र का पाप्नु। मेको लोत्र नेनीन। मेकोमी “एको लोत्र इजीप्त रागी रे आं चाक्शो खिं डा मुर नेल्ल आन पर्बम बाक्ब। 2 रागी डा खिं खिं डा मुर नेल्ल रे गो इन कली ला योवतन्नी। मोपतीके गो इन मरिम्शो पशो आ पर्बम सजाइ गेनुड। *ब्यवस्था ४:३४* 3 मार, मुर निक्शी मगारसा सम्म काथ काथा गाक्नीसी डा? 4 मार, सिखार मथित्तु हना, ब्वाकीम गुप्स ग्रीबा डा? मार, गुप्स आ चाइक्बम मारेइ मथित्तु मेको आ पुक्खीमी डरर डरर पाइबा डा? 5 मार, खपीम ब्वारद मदाइक्थु, चिक्ब रेखा डा? मार, ग्याइक्वा कली मारेइ मबाक्थु, थेम्लु खप रे ग्येत्थ बोक्नीमी डा? 6 मार, तेकोइ सहरमी तुराही ताप्शोनु, मुर महिनीमी डा? मार, सहरम श्येत दुम्मेनु, मेको परमप्रभु यावे आ सोइश्शो ममाइ डा? *यसैया ४५:७; बिलाप ३:३७* 7 थमा पा, परमप्रभु यावेमी आ लोत्र पाइब आन कली मदेंथु, मारेइ मपाइब। *उत्पत्ती १८:१७* 8 गुप्स ग्रीशो नैशा, सु महिबा? परमप्रभु यावे ब्वाक्मेनु, सुम आ लोत्र मपाइबा डा?

## सामरीया कली सजाइ

9 ‘अशदोद डा बोल्यो दरवार नु इजीप्त रागी डा बोल्यो दरवार डा मुर आन कली गेपुकी सामरीया डा पहाडमी बुक्कीन। मिनु मेको सहरम दुम्शो ठेयब रेयके नु मुर आन कली श्येत गेशा, दिष्शो कोव्रडीन’ दे मुर आन कली देनीन। 10 मेकोपुकी ठीक गेय पस मजोक्नीम। हुश खाक्श पोक्शा नु मार मार रोइश्शा खुड पशो आन बोल्यो दरवारम खेक्शा वोइक्नीम” दे परमप्रभु यावेमी देंत। 11 मोपतीके परमप्रभु यावेमी “इ जोरी सत्रुमी इ रागी पुनीम। मेकोपुकीमी लडाइ तोव्रमेनु, गे ब्रुइनीनी। मेकोमी इ बोल्यो दरवार नेल्ल रोइक्नीम” दे परमप्रभु यावेमी देंत। 12 मिनु परमप्रभु यावेमी “दोपा

गोठलामी गुप्स आ शोव रे भेडा आ खोइल निक्शी कि नोफा आ टुक्रा का ला हना यो रोइक्बा, मोपा सामरीयाम नित्तीक आ कुना नु खाटम बाक्शा यो इस्राएल डा मुर प्रोंइचा पुंडसीनीम” देंत।

13 मुर नेल्ल आन परमप्रभु यावेमी “नेनीन, याक्ब आ खिं डा मुर आन पर्बम सांक्छी गेन। 14 गो तेको नाक्त इस्राएल कली आ मरिम्शो पशो आ पर्बम सजाइ गेनुडा, मेको नाक्त गो बेथेल डा चढेतीक कली यो सजाइ गेनुडा। मिनु चढेतीक डा ग्रोवपुकी बेल्शा खपीम दोक्नीम। 15 गो हिंउदमी बाक्तीक खिं नु हुप्शोमी बाक्तीक खिं निम्फा प्रेल्नुड। मिनु हात्ती आ दाराम दारशो सेल्शो खिं ब्रेल्नीम। मिनु ठेयब खिंपुकी यो खतम सेल्नुड” दे परमप्रभु यावेमी देंत। *१राजा २२:३९; भजन संग्रह ४५:९*

## परमप्रभु गे मलेश्शो

4 सामरीया डा डांडाम बाक्ब, बाशान डा बी खोदेंशो दोम्शो मीश मुर, गे पुडग आन कली दिप्नीनी। मारेइ मथीब आन कली फस पोक्नीनी। मिनु इन वोंइश आन कली “आंइ कली तूचा कली मार मार चाक्कीन” देंनीनी। 2 परमप्रभु यावेमी आ नेंम कसम जशो बाक्ब। मेकोमी “नेनीन, इन कली कोंडगुम कीशा लाइक्नीम। इन लीशो आन कली बोल्सीमी ब्वेक्शा लाइक्तीक नाक्त जाक्ब। 3 गे नेल्ल का का पा एर ऑथ मकोव्रथु, गारो आ पोव्रला रे पा लाइनीनी। मिनु गे हारमोन मेर ताइक्वा पुंडसीनीनी” दे परमप्रभु यावेमी देंत। *हारमोन हिब्रू लोत्र मार बाक्ब, दे मतुइक्नीम।* 4 मिनु परमप्रभु यावेमी “बेथेल सहरम लशा, मरिम्शो पने। गिलगालमी लशा, मेको क्येडा यो शुश मरिम्शो पने। सुनी कुस कुस इन चढेतीक चाक्कीन। नाक्त सां सांमी इन १० भाग डा भाग का चाक्कीन। *होसे १२:१२; ब्यवस्था १४:२८* 5 आं कली ‘गे इस्राएल डा मुर, रिम्शो पाइब बाक्नीनी’ दे बोर्ब ओख्ती सुप्शो शोब्ले चढेपने। मिनु थुंम ग्येरशा चढेतीक आ पर्बम ठेयब लोत्र पना पन गाक्कीन। मारदे हना गे मोदेंशो पचा दाक्नीनी” दे परमप्रभु यावेमी देंत। *लेवी २:११*

6 मिनु परमप्रभु यावेमी “इन कली, सहर नेल्लेमी श्येत्थ कोव्रज नु शोब्ले जचा मतशो सेल्लन्नी। मो हना यो गेपुकी आं गे मलेन्नी” दे परमप्रभु यावेमी देंत।

7 मिनु “गो इन अन्न खुप्चा क्येडा महिना सां डोंइती रेउ मयिपदु। गो सहर का कली रेउ यिपाइक्ता, अर्को सहर कली मयिपदु। मिनु रू कामी रेउ यिपाइक्ता, अर्को रूम मयिपदु। मिनु मेको सोव्रत। *१राजा १७:१* 8 मोपतीके मुरपुकी सहर सहर रे ब्वाक्कु तूचा कली सहर काम जाक्तेक्म। तन्न रूथ्री तूचा मताम। मो हना यो गेपुकी आं गे मलेन्नी” दे परमप्रभु यावेमी देंत।

9 मिनु परमप्रभु यावेमी “गो इन फल फुल रू नु अडगुर रूम सोव्रतीक नु बुक्खी डाइक्तीक रोइ सोइक्ताक्ड। सल्ला मालेमी इन फोव्रशी रवा नु तेल रवा आन कली नेक्पाइक्तामी। मो हना यो गेपुकी आं गे मलेन्नी। *हागै १:११; योएल १:४* 10 गो इन दातेम इजीप्त रागी कली खोदेंशो पा बेक्वा डा रोइ सोइक्ताक्ड। गो इन ठिटा आन कली तरवारमी क्योरशा साइक्पाइक्तामी। इन शारा रोइक्पाइक्तामी। इन बाक्तीक डा मरिम्शो रिना इन नें आगाम प्रिंताक्ड। मो हना यो गेपुकी आं गे मलेन्नी” दे परमप्रभु यावेमी देंत। *प्रस्थान ९:३*

11 मिनु परमप्रभु यावेमी “गो इन दाते डा का निक्शी आन कली सोदोम नु गोमोररा कली खोदेंशो पा खतम सेल्ता। गे ब्रशो मी रे पा गुंडशो बुल्सी खोदेंशो बाक्तीनी। मो हना यो गेपुकी आं गे मलेन्नी” दे परमप्रभु यावेमी देंत। *उत्पत्ती १९:२४-२५; जकरिया ३:२* 12 मोपतीके परमप्रभु यावेमी “ए इस्राएल डा मुरपुकी, गो इन कली मार पाइनुड देंशा हना, गे इन परमप्रभु, आं कली गुम्वा माल्नीनी। 13 सुमी डांडा आन कली सेला, मेकोमी फश यो सेल्शो बाक्ब। मेकोमी मुर आन कली आ मिम्शो तुइक्पाइक्ब। मेकोमी सुनी कली छिडछिड सेल्ब। मिनु रागी डा लाइश्शो डांडा मेर गाक्ब। मेको आ नें मुर नेल्ल आन परमप्रभु यावे बाक्ब” देंत। *मीका १:३*

## इस्राएली आन पर्वम रोंका पशो

5 मिनू आमोसमी “ए इस्राएल आ खिं डा मुरपुकी, इन पर्वम आं रोंका पशो नेनीन।<sup>2</sup> आं मीश आल इस्राएल लेंशा गेनायो मबोक्वा डा पा गोल्त। मेको आ रागीमीन प्रॉइचा पुंडसीशो बाक्ब। मेको कली पोक्ब सुइ मबाक्नीम” देंत।<sup>3</sup> मिनू परमप्रभु यावेमी “तेकोइ सहर रे इस्राएल आ पर्वम हजार का जना मुर यूतेक्म हना, सहे का जना ला लीनीम। सहे का जना यूतेक्म हना, १० जना मुर ला लीनीम” देंत।

## दिष्व आन पर्वम लोत्र पशो

4 मिनू परमप्रभु यावेमी इस्राएल आ खिं डा मुर आन कली “आं कली मालीन। मिनू ब्रोनीन।<sup>5</sup> बेथेल कली ममालीन। मिनू गिल्गाल मलने। बेयर-शेबामी मगाक्कीन। मारदे हना गिल्गाल डा मुर थमा पा ग्याइश्शा लाइक्वा पुंडसीनीम। मिनू बेथेल खतम दुम्ब। *आमोस ४:४; होसे ४:१५*

6 परमप्रभु यावे कली मालीने। मिनू ब्रॉइचा ताइनीनी। मो मपाइतीनी हना, मेको मी खोदेशो पा गाइश्शा योसेफ आ खिम मी सुइक्ब। बेथेल कली खतम पोक्ब। मेको मी कली काप्ब सुइ मबाक्नीम। *आमोस ६:१२; यसैया ५:२०*<sup>7</sup> गेपुकी ठीक निसाफ कली दूली सेल्नीनी। ठीक पतीक कली खतम सेल्नीनी।<sup>8</sup> सोरुल आन कली सेल्ब, हिंका डा छिडछिड रे सुनी डा हाम्सो सेल्ब, नाक्ती कली छिडछिड सेल्ब नु समुन्द्र डा ब्वाक्कु कली ब्रेश्शा रागीमी मोइक्ब। आं नें परमप्रभु यावे बाक्ब। *अय्युब ३८:३१; आमोस ९:६*  
9 मेकोमी बोल्यो आन कली रीब पा खतम सेल्ब। मिनू आन बोल्यो दरवार खतम दुम्नीम।

10 मेकोपुकीम निसाफ पतीके लाप्चोम निश्शा अरेब कली काइ मदाक्नीम। मिनू थमा लोत्र पाइब आन कली ग्रांग्रा दिलीम। *यसैया २९:२१*  
11 मारदे हना गे प्रुडग आन कली दिम्नीनी। मेको आन कली गेन कि गेन, दे शुश अन्न थाप्पाइक्नीनी। गे खोइश्शो फुल्लु के खिं सेल्तीनी। तन्न मेकेर बाक्वा मताइनीनी। रिश्शो अडगुर रू सेल्तीनी। तन्न अडगुर शांबु तूचा मताइनीनी। *सेफन्याह १:१३*<sup>12</sup> मारदे हना गो इन शुश मरिश्शो पशो तुइक्नुड। गो इन पाप गिश ठेयब बाक्बा, मेको तुइक्नुड। गे ठीक पाइब आन कली श्येत गेनीनी। घूस ताक्नीनी। निसाफ पतीकेमी मारेइ मथीब आन कली नेष्ठा गुंडनीनी।<sup>13</sup> मोपतीके निप्स पाइश्शो मुर सिक्सी पा बाक्नीम। मारदे हना इस्राएलम काइ मरिश्शो दुश्शो बाक्ब।

14 गे ब्रॉइशा बाक्वा कली रिश्शो पचा मालीन। मरिश्शो पचा ममालीन। मिनू मुर नेल्ल आन परमप्रभु यावे गे नु बाक्ब।<sup>15</sup> मरिश्शो पतीक कली काइ मदाक्तीन। रिश्शो पतीक कली दाक्तीन। ठेयब लाप्चोमी ठीक निसाफ पने। मिनू मुर नेल्ल आन परमप्रभु यावेमी योसेफ आ लीशो मुर आन कली शिशी पाइबा कौं?” दे परमप्रभु यावेमी देंत। *भजन संग्रह ३४:१५; रोमी १२:९*

16 मोपतीके मुर नेल्ल आन परमप्रभु यावेमी “लां डा मुर नेल्ल डाक्शा, रोंका पचा मालनीम। आबी आबी, देंचा मालनीम। रूम गेय पाइब आन कली रोंका पचा कली ब्रेत्तीन। रोंका पस जोक्ब आन कली यो ब्रेत्तीन।

17 अडगुर रू नेल्लेमी रोंका पचा मालनीम। मारदे हना गो इन दाते रे पा गाक्शा लाइनुड” दे परमप्रभु यावेमी देंत।

## परमप्रभु आ निसाफ पतीके नाक्त

18 मिनू परमप्रभु यावेमी “मारदे गे परमप्रभु यावे आ नाक्त जाक्शो दाक्नीनी? मारदे परमप्रभु यावे आ निसाफ पतीक नाक्त मालनीनी? मेको नाक्त छिडछिड दुम्ब, छेडछेड मदुम्ब। *योएल २:११*<sup>19</sup> मेको नाक्ती मुर का गुप्स रे प्रोक्शा, वां कली गुम्शो खोदेशो बाक्ब। खिं लशा बाक्वा कली आ गुइ गारोम वोदानु, बुस्सुम कोक्शो खोदेशो दुम्ब।<sup>20</sup> परमप्रभु यावे आ नाक्त छिडछिड दुम्ब। छेडछेड मदुम्ब। मेको छिडछिडमी छेडछेड काइ मबाक्ब।

21 गो इन चाड नु इन गुम्तीक आन कली काइ मदाक्नुड। *यसैया १:११-१५*<sup>22</sup> गे आं कली चोशा चढेतीक नु अन्न चढेतीक चढेतीनी हना यो, गो मेको मब्राइनुड। मिनू इन नेल्ल क्येडा दोम्शो बस्तु दुशा बाक्वा आ पर्वम चढेती यो मकोवनुड। *मीका ६:६-७*<sup>23</sup> इन कुम्सो आन रेयके आं क्येडा

डोन वोतीन। इन तार पाइश्शो ठेयब ताप्तीके ताप्शो नेंचा मदाक्नुड।

24 तन्न ठीक निसाफ पतीक ब्वाक्क खोदेशो पा शाइक्पतीन। ठीक पतीक गेनायो मसोवब खोला खोदेशो पा शाइक्पतीन।

25 गे इस्राएल आ खिं डा मुरपुकी गोरशो रागीम ४० बर्स गाक्नीनु, आं कली चढेतीनी डा? *येरमीया ७:२२-२४; प्रेरित ७:४२-४३*<sup>26</sup> गेपुकीमी इन पिप देवता साकुथ नु इन सोरुल देवता काइवान आस कली कुरशा लतीन। मेको आंमा इन कली सेल्शो मूर्ति बाक्नीसी।<sup>27</sup> मोपतीके गो इन कली ग्याइश्शा, दमस्कस क्येडा डोन लाइक्पाइक्नन्नी” दे परमप्रभु यावेम देंत। मेको आ नें मुर नेल्ल आन परमप्रभु यावे बाक्ब।

## ठेयब लेशो आन कली हुइश्शो

6 मिनू “आबी, सिघोन डा ठेयब मुर, मेकोपुकीमी सामरीया डा डांडामी ‘गो रिश्शो बाक्नीकी’ दे मिम्नीम। इस्राएल डा मुरपुकीमी मेको आन कली थमा सुइश्शा, जाक्नीम।<sup>2</sup> गे आइक्वी हांबु काल्नेह सहर लशा, कोवडीन। मिनू मेकेर रे ठेयब हमथ रागी लन। मेको नोले पलिस्ती आन गाथ सहरमी लने। इन राज्य मेको आन राज्य क्येडा रिश्शो बाक्बा डा? मार, मेको इन रागी मेको आन रागी क्येडा ठेयब बाक्बा डा? *उत्पत्ती १०:१०*<sup>3</sup> गे ‘श्येत जतीक नाक्त मजाक्ब’ दे मिम्नीनी। मिनू गे हुश खाक्श पोक्ब सासन पाइब चाक्नीनी। *भजन संग्रह १०:५*

4 आबी, मेको हाती आ दारा के सेल्शो खाटमी इप्नीमी। आन इप्तीकेमी गोल्शा बाक्नीमी। मेकोपुकीम क्यारश भेडा आन पाठा नु गोठ डा बाछा ब्वाइनीमी।<sup>5</sup> मेकोपुकीम हेंथे कुम्सो पा तार पाइश्शो ठेयब ताप्तीक ताप्तीमी। मिनू ‘गो दाऊद खोदेशो पा ताप्तीक सेल्नुड’ दे मिम्नीम। *यसैया ५:१२*<sup>6</sup> मेकोपुकीम डाक्काम अडगुर शांबु तूनीमी। नेल्ल क्येडा रिश्शो तेल खेक्सीनीमी। तन्न योसेफ आ खिं डा मुरुम श्येत जामेनु, सुर्ता मपाइनीम।<sup>7</sup> मोपतीके मेको नेल्ल क्येडा डोंइती ग्याइश्शा लाइक्वा पुंडसीनीम। मोपा मेको आन चाड पतीके, ग्येरशा बाक्तीक नाक्त नुप्ब” देंत।

## इस्राएल डा मुर आन ठेयब लेशो

8 परमप्रभु यावेमी आ नेंमी कसम जशो बाक्ब। मिनू मुर नेल्ल आन परमप्रभु यावेमी “गो याक्ब आ ठेयब लेशो तशा ग्रांग्रा दीनुड। मेको आ बोल्यो दरवार आन कली काइ मदाक्नुड। गो एको सहर नु आ मार मार नेल्ल आन जोरी सनु आन गुइमी गेनुडमी” देंशो बाक्ब।

9 खिं काम १० जना मुर लीतेक्म हना यो, मेको नेल्ल बेक्नीम।<sup>10</sup> मिनू खिं डा मुर कामी मेको आन बेक्शो रां चोइब, खिं आगा रे बेक्शो मुर गुंडचा कली जाक्शा, मेकेर खूइक्ब का कली “गेपुकी नु अरु सुइ बाक्नीमी?” दे हिल्लो पाइब। मिनू मेकोमी “मबाक्ब” देंब। मिनू खिं डा मुरुमी “सिक्सी पावो। गोपुकीमी परमप्रभु यावे आ नें थिचा मदुम्ब” देंब। *आमोस ८:३*  
11 मारदे हना परमप्रभु यावेमी हुकुम पाइब। मिनू ठेयब खिं कली प्रेक्ब। मिनू आइक्च खिं यो प्रेक्ब।<sup>12</sup> मेकोमी “मार, शारा रोगुम दोरनीमी डा? मार, मेकेर ब्यफ वाक्नीमी डा? तन्न गोपुकीम ठीक निसाफ कली दूली सेल्तीनी। ठीक पतीक कली कशो सेल्तीनी। *आमोस ५:७*<sup>13</sup> गोपुकी लो-देबार सहर आ पर्वम ग्येरसाक्नी। मिनू ‘मार, गोपुकीमी इं सक्तिम कारनाइम सहर मग्रासे डा?’ देंनीनी।<sup>14</sup> ए इस्राएल आ खिं डा मुरपुकी, गो इन पर्वम रागी का डा मुर आन कली पोक्नुडमी। मिनू मेकोपुकीमी इन कली लेबो-हेमाथ रे अराबाह डा खोला सम्म श्येत गेशा खेदा पाइनीम” दे मुर नेल्ल आन परमप्रभु यावेमी देंत।

## सल्हा माले कौंइशो

7 परमप्रभु यावेमी आं कली मार कौंइताक्वी देंशा हना, पिप आ बाली नाली खुजे थुम्शा, अर्को बाली वामानु, मेकोम मारेइ मारेइ नेक्ब सल्हा माले आन कली ठीक पशो ताता।<sup>2</sup> मिनू मेकोपुकीमी रू डा घांस नेल्ल नेक्वामे नोले गो “परमप्रभु यावे माफ गेयीनी। याक्ब आ रागी दोपा ब्रॉइने चाप्बा डा? मारदे हना मेको थम आइक्च बाक्ब” देंती।<sup>3</sup> मिनू परमप्रभु यावेमी “मेको मोदेशो मदुम्ब” देंत।

## मी कौडिशो

4 मिनू परमप्रभु यावेमी आं कली मार कौडिताकयी देंशा हना परमप्रभु यावेमी आं कली ब्रशो मी का कौडिताकयी। मिनू मेको मीम ठेयब समुन्द्र कली सोव्रपाइवकु। मिनू रागी कली यो नेवकु। *उत्पत्ती ७:११* 5 मिनू गो "परमप्रभु यावे नाइक्तीन, दे गो इन कली पुंडनुड। याकूब आ रागी दोपा ब्रॉइने चाप्बा डा? मारदे हना मेको थम आइक्च बाक्ब" देंती। 6 मिनू परमप्रभु यावेमी "मोदेंशो यो मदुम्ब" देंत।

## गारो प्रोव्रतीक घन्टी कौडिशो

7 मिनू परमप्रभु यावेमी आं कली मार कौडिताकयी देंशा हना, परमप्रभु यावे गारो काम गारो प्रोव्रतीक घन्टी शेशा, राप्शो बाक्त। 8 मिनू परमप्रभु यावेमी आं कली "आमोस गे मार तवी?" दे हिल्लो पाप्तु। मिनू गो "गारो प्रोव्रतीक घन्टी का ताता" देंती। मिनू परमप्रभुमी "कोव्रडो, गो आं मुर इस्राएली आन दातेमी गारो प्रोव्रतीक घन्टी का क्युनुड। मिनू मुल गो मेको आन नेक्था बाक्शा, मार पाइक्बाक्मा, कोव्रनुडमी। *यसैया ३४:११; आमोस ८:२* 9 इसहाक आ डांडा डा थान खतम दुम्नीम। मिनू इस्राएल डा थान नेल्ल ब्रेशशा जाम्शा लाइनीम। मिनू गो तरवार शेशा येरोबाम आ खिं डा मुर साइक्वा कली बोक्शा लाइनुड" देंत।

## आमोस नु अमस्याह

10 मिनू बेथेल डा चढेब अमस्याहमी इस्राएल डा पिप येरोबाम कली "इस्राएल आ खिं डा मुर आन दातेमी इस्राएलम बाक्ब आमोसमी इन पर्बम मरिश्शो पाइब। एको रागीमी मेको आ लोव्र फाल्ने मचाप्ब। 11 आमोसमी 'येरोबाम तरवारम साइक्वा पुंडसीब। मिनू इस्राएल डा मुर आन रागी रे ग्याइश्शा लाइक्वा पुंडसीनीम' देंशो बाक्ब" दे आमोसमी देंत। 12 मिनू अमस्याहमी आमोस कली "ए, परमप्रभु यावे आ लोव्र पाइब, गे एक रे प्रोक्शा यहूदा रागी लावो। मिनू मेकेर क्येट चेम्शा शोब्ले ग्याप्शा जशा, परमप्रभु यावे आ लोव्र पावो। *१सामुएल ९:९* 13 बेथेलमी लेंशा गेनायो परमप्रभु यावे आ लोव्र मपावो। मारदे हना मेको पिप आ देवी देवता थान नु राज्य डा पूजा पतीके बाक्ब" देंत। *१राजा १२:२८-२९* 14 मिनू आमोसमी अमस्याह कली "गो परमप्रभु यावे आ लोव्र पाइब मनड। मिनू परमप्रभु यावे आ लोव्र पाइब आ तौ यो मनड। गो दा गोठला का नु फोव्रशी रवा कोव्रब मुर नड। 15 मिनू परमप्रभु यावेमी आं कली क्यारश भेडा योव्रतीक रे ब्रेत्ताकयी। मिनू मेकोमी आं कली 'लावो। आं मुर इस्राएली आन कली आं लोव्र शेंदीमी' दे माइक्ती। 16 मोपतीके मुल परमप्रभु यावे आ लोव्र नेनीन। गे आं कली 'इस्राएल आ पर्बम परमप्रभु यावे आ लोव्र मपावो। मिनू इसहाक आ खिं डा मुर आन पर्बम लोव्र मपावो' देंतीनी। *आमोस २:१२* 17 मोपतीके परमप्रभु यावेमी इ कली 'इ मीश सहरम तेल्लेम का दुम्ब। इ तमी तौ नेल्ल तरवारमी क्योरचा पुंडसीनीम। मिनू इ रागी पुक्शा योक्सीनीम। गे चहिं ग्रांग्रा दिशो रागी काम बेक्नेवे। मिनू इस्राएल थमा पा आ रागी रे ग्याइश्शा लाइक्वा पुंडसीब" " दे आमोसमी अमस्याह कली देंत।

## मीशो फोव्रशीम ब्रीशो डालो

8 मिनू परमप्रभु यावेमी आं कली मीशो फोव्रशीम ब्रीशो डालो का कौडिताकयी। 2 मिनू मेकोमी आं कली "आमोस, गे मार तवी?" दे हिल्लो पती। मिनू गो "मीशो फोव्रशीम ब्रीशो डालो का ताता" देंती। मिनू परमप्रभु यावेमी आं कली "आं मुर, इस्राएली आन नाक्त गाप्त। मुल गो मेको आन नेक्था बाक्शा, मार मार पाइनीमी, मेको कोव्रनुडमी। *आमोस ७:८* 3 मेको नाक्ती दरवारम कुम्सो पाइब आन कुम्सो रोंका पतीके दुम्नीम" दे परमप्रभु यावेमी देंत। मिनू मेकोमी "बेक्शो मुर शुश बाक्नीम। लाडगाम गुंडशा ताइक्नीम। गे सिक्सी पावो" देंत। *आमोस ६:१०*

## इस्राएल खतम दुम्शो

4 मिनू परमप्रभु यावेमी "गे मारेइ मथीब आन कली दिम्बपुकी नु रागी डा पुडग आन कली खतम सेल्बपुकी, नेनीन। *आमोस २:७* 5 गेपुकीमी 'औंसी गेना लाक्बा डा? गो अन्न लेयचा ताइनीकी। नाइक्तीक नाक्त गेना लाक्बा डा? गो चेरब लेयचा ताइनीकी। गो एफाह आइक्च सेल्शा, शेकेल कली हेल्शो सेल्शा नु दूली पा नाक्शा, शुश क्येट चेम्नीकी' देंनीनी। *एफाह का २२ लिटर लाइब पुक्तीक बाक्ब। शेकेल का ११.५ ग्राम डा क्येट बाक्ब। नेहेम्याह १३:१५* 6 गेपुकीमी 'पुडग आन कली चांदीम ग्याप्नीकी। मारेइ मथीब आन कली जोर का चेपलमी ग्याप्नीकी। मिनू मक्राप्शो चेरब लेयनीकी' देंनीनी" देंत। *आमोस २:६*

7 परमप्रभु यावेमी याकूब आ सोशो बोशो मिम्शा, कसम जाप्तु। मार कसम जाप्तु देंशा हना "गे मेको आन पशो गेनायो मप्रेंनुड। 8 मार, मेको आ पतीके रागी खिंखि मपाइबा डा? मेकेर बाक्ब नेल्लेमी रोंका मपाइनीमी डा? रागी नेल्ल नील खोला खोदेंशो पा बारनीम। इजीप्त रागी डा नील खोला बारशा ग्युम्शो खोदेंशो पा नुप्शा लाइनीम। *आमोस ९:५*

9 गो मेको नाक्ती नां कली नाक्ती उइक्थ दुम्नेनु, लाक्पाइक्नुड। मिनू नाक्त बाक्ना बाक्न नां रिक्पाइक्नुड। *येरमीया १५:९* 10 गो इन चाड कली रोंका पतीक सेल्लुड। इन कुम्सो नेल्ल आन कली डाक्तीक सेल्लुड। गो नेल्ल इन कली अरन्डी फेक्पाइश्शा चां प्रेक्पाइक्नुड। गो आंम का ला बाक्शो तौ आ पर्बम रोंका पशो खोदेंशो दुम्पाइक्नुड। मेको चाड नुप्पतीक नाक्त कशो नाक्त दुम्ब" देंशो बाक्ब। *येरमीया ६:२६*

11 मिनू परमप्रभु यावेमी "गोम अन्काल सोइक्ची ना, थमा पा श्येत जतीक नाक्त जाक्ब। मेको अन्काल जचा नु तूचा के अन्काल ममाइ, तन्न परमप्रभु यावे आ लोव्र नेतीक अन्काल बाक्ब। *१सामुएल ३:१* 12 मुरपुकी परमप्रभु यावे आ लोव्र माल्शा, समुन्द्र का रे अर्को समुन्द्र सम्म लाइनीम। उत्तर रे पूर्व सम्म लाइनीम। मेकोपुकी एर आंथ गाक्शा, परमप्रभु यावे आ लोव्र माल्नीमी। तन्न मथिल्लीम।

13 मेको नाक्ती दारशो मीश आल नु बोल्यो वोंइश आल ब्वाक्कु तूचा मतथु, थाइनीम। 14 सु सु सामरीया डा देवता अशीमाह आ नेंमी कसम जशा 'ए दान, इ देवता ब्रॉइशा बाक्शो खोदेंशो पा' नु 'बेयर-शेबा डा देवता ब्रॉइशा बाक्शो खोदेंशो पा' देंशा कसम जाइब नेल्ल गेनायो मबोक्वा डा पा गोल्नीम" दे परमप्रभु यावेमी देंत। *न्यायाधीस १८:३०*

## नोले डा दुम्तीक कौडिशो

9 गो परमप्रभु कली चढेतीक आ नेक्था राप्शो ताता। मिनू मेकोमी आं कली "लाप्चो डा शी शुश हिम्पाइक्वा कली थाम आन डर तुपो। मिनू ब्रेशशा मुर नेल्ल आन पिपा तार दोक्नीम। मिनू ब्रॉइशा लीशो आन कली तरवारमी क्योरनुडमी। मेको आन दाते डा का यो प्रोक्वा मताइनीम। का यो ब्रॉइचा मताइनीम।

2 मेकोपुकी बेक्शो मुर आन बाक्तीक लाम्तेक्म हना यो, मेकेर रे कीशा गुंडनुड। मिनू मेकोपुकी इर सरीड गे डोइश्शा लाम्तेक्म हना यो, गो मेको आन कली ग्याइश्शा लुक्च फ्रुनुडमी। *अय्युब २६:६; भजन संग्रह १३९:८* 3 मेकोपुकी कारमेल डांडामी खूइसाक्म हना यो, गो मेको आन कली माल्शा, ग्याइश्शा चाक्नुडमी। मेकोपुकी आं क्येडा खूइश्शा समुन्द्र आगाम लाम्तेक्म हना यो, समुन्द्रम बाक्ब बुस्स कली 'मेको आन कली कोक्मी' दे अरेनुड। मिनू मेकोमी मेको आन कली कोक्ब। 4 मेको आन जोरी सनु आन डोंइती ग्याइश्शा लाइक्वा पुंडसाक्म हना यो, गो मेको आन कली क्योरशा साइक्वा कली तरवार कली अरेनुड। मिनू मेकोमी साइक्ब। गो मेको आन कली रिश्शो पचा कली ममाइ, तन्न मरिश्शो पचा कली कोव्रनुडमी" देंत।

5 मिनू मुर नेल्ल आन परमप्रभु यावेमी रागी कली थिप्तु हना, रागी याइब। मिनू मेकेर बाक्ब नेल्ल रोंका पाइनीम। मिनू रागी नेल्ल नील खोला खोदेंशो पा बारब। मिनू इजीप्त डा नील खोला खोदेंशो पा सोव्रब। *आमोस ८:८*

6 मेकोमी स्वर्गम आ बाक्तीक सेल्ब। मिनू रागीमी मेको आ जग वोइक्ब।



समुन्द्र डा ब्वाक्कु कली ब्रेशा, रागीम मोइक्ब। मेको आ नें परमप्रभु यावे बाक्ब। भजन संग्रह १०४:३; आमोस ५:८

7 मिनू परमप्रभु यावेमी इस्राएल डा मुर आन कली “गे आं कली एथीयोपीया डा मुर खोदेशो बाक्नीनी। गो इस्राएली आन कली इजीप्त रागी रे, पलिस्ती आन कली काफ्तोर रागी रे नु अरामी आन कली कीर रागी रे गुंइशा चाक्शो मनडमी डा?” देशो बाक्ब। ब्यवस्था ७:७; येरमीया ४७:४  
8 परमप्रभु यावेमी शुश पाप पाइब राज्य कली कोवना कोवन बाक्ब। मेकोमी “गो मेको आन कली रागी रे क्याम्नुड। मो हना यो गो याकूब आ खिं कली चहिं नेल्ल मक्याम्नुड” दे परमप्रभु यावेमी देंत।

9 परमप्रभु यावेमी “गो मार हुकुम पाइनुडमी देशा हना, इस्राएल आ खिं डा मुर आन कली जात नेल्ल डा मुर आन दातेमी ग्योलोमी मार मार क्राप्शो खोदेशो पा, क्राप्नुडमी। मिनू इम्वीली फुल्लु का यो खपीम मदोक्ब।

10 मेकोपुकीम ‘हिंचा डा श्येत आंइ तारी मजाक्ब। इं कली मेकोम मथिप्ब’ दे पाप पाइब, आं मुर नेल्ल तरवारमी साइक्चा पुंइसीनीम” देंत। आमोस ६:३

इस्राएल कली लेंशा सेल्शो

11 परमप्रभु यावे, इन परमप्रभुमी “गो मेको नाक्त दाऊद आ ब्रेशो खिं आन कली लेंशा सेल्नुड। मिनू मेको आ ब्रेशो गारो आ पोत्रला सुइनुड। मिनू मोपा नेल्ल साइ डोंइती डा खोदेशो सेल्नुड। १राजा १२:१९; प्रेरित १५:१६-१७ 12 मिनू मेकोपुकीम एदोम डा लीशो नु आं नें पाइश्शो जात जात डा मुर नेल्ल आन के दुम्नीम” दे मोदेशो पाइब परमप्रभु यावेमी देंत।

13 मिनू परमप्रभु यावेमी “मेको नाक्त थमा पा जाक्ब। बाली नाली खुप्बमी ब्यफ वाक्ब कली गुम्ब। मिनू वांचेर ब्वारबमी अडगुर खुम्ब कली गुम्ब। डांडा रे पा नक अडगुर रस याप्ब। मिनू डांडा नेल्ल अन्न बाला सिल्लीम। लेवी २६:५; योएल ४:१८ 14 गो आं मुर इस्राएली आन कली आन मार मार लेशा गेनुडमी। मिनू मेको आन ब्रेशो सहर कली लेंशा सेल्शा, मेकेर बाक्नीम। मेकोपुकीम अडगुर खुम्शा, अडगुर शांबु तूनीम। मेकोपुकीम फल फुल खुम्शा, मेको आन फल जाइनीम। ब्यवस्था ३०:३; यसैया ६५:२१ 15 गो मेको आन कली गेनायो मखेरपांइसीचा डा पा आन रागीमी वोइक्नुड। आं गेशो रागी रे मेको आन कली सुइमी गुंइने मचाप्नीम, दे इन परमप्रभु यावेमी देशो बाक्ब” देंत।

# ओबदिया

ओबदिया आ अर्थ “परमप्रभु यावे आ गेय पाइब” बाक्ब। एको किताब सुम ब्रेक्शो मेको मतुंडसाक्व हना यो, जोक्ब तुइक्व शुशेमी एको किताब ओबदिया आंमा ब्रेक्शो बाक्ब, दे मिन्नीम।

: बेबीलोन डा पिप नेबुकदनेसरम ५८७ बि. सी. यरूसलेम सहर कली ग्राशा खतम सेल्शा, पिप दाऊद आ सासनमी दिप्शो एसाव आ चच युडमी एदोममी बेबीलोन डा लडाइ पाइब आन कली ग्येरशा वारच पशो बाक्तेक्म।

साइ नेसी रे एदोम डा मुर यहूदी आन जोरी सत्रु बाक्शो बाक्तेक्म। ओबदियामी एदोम डा मुर नेल्ल क्याम्चा पुंडसीनीम, दे लोत्र पशो बाक्त। तन्न परमप्रभुमी शुश खेयप मटीब इस्राएली आन कली शिशी पा दाक्ब, दे यो ब्रेक्शो बाक्ब। एको किताबम परमप्रभु यावे आ निसाफ पतीक नाक्त आ पर्वम ब्रेक्शो बाक्ब।

परमप्रभुम ओबदिया कली कौंइशो

येरमीया ४९:७-२२

1 परमप्रभु यावेमी ओबदिया कली कौंइशो लोत्र मार बाक्त देंशा हना, परमप्रभु, परमप्रभु यावेमी एदोम आ पर्वम लोत्र पाप्तु। गोपुकीमी परमप्रभु यावे रे लोत्र का नैतक। मेकोम रागी रागीम लोत्र कुरब मुर का सोइक्ताक्व। मेकोमी “बोक्कीन। गो मेको नु लडाइ पथ लय। 2 गो इ कली रागी रागी डा मुर आन दातेम नेल्ल क्येडा आइक्व सेल्लुड। मिनु गे महिक्सीशो दुम्नेवे। 3 इ थुं डा ठेयब लेत्तीकेमी इ कली जोल पाइश्शो बाक्ब। इ सहर ठेयब फुल्लु तार सेल्शो बाक्ब। गे डांडा तार बाक्नेवे। गे इ थुंमी ‘आं कली सुम उइ तोक्ने चाप्पा डा?’ दे मिन्नेवे। गन्ती २४:२१ 4 तन्न गे ककाकुली खोदेशो पा इर सरीड मेर बेरते हना यो, सोरुल आन दातेम इ ग्योत्र सेल्लितीवी हना यो, गो इ कली मेक रे तोक्नन” दे परमप्रभु यावेम देंत। 5 मिनु खुडपुकी इ बाक्तीक जाक्तेक्म हना, नाक्दो रोइक्वपुकी इ बाक्तीक जाक्तेक्म हना, गे दोदेशो पा खतम दुम्नेवे? मेकोपुकीम आन कली माल्शो खोइ ला रोइश्शा मलाइक्नीमी डा? अडगुर सेक्बपुकी इ बाक्तीक जाक्शा सेक्तेक्म हना, मेकोपुकीमी इक्कका अडगुर मप्रॉइनीमी डा? 6 तन्न एसाव आ शॉप दोपा रौइसीबा? मेको आ खुइश्शा वोइश्शो शॉप दोपा माल्शा गुंडनीमी? 7 इ नेक्था डा रागी डा मुरपुकीमी इ कली जोल पाप्तेक्म। मेकोपुकीम इ कली खेदा पा खेरशा इ सांद सम्म चाक्तेक्म। इ वारचपुकीमी इ कली दिप्शा श्येत गेनीम। इ थुल्शो मुरपुकीमी इ कली ब्वारद दाइक्नीम। तन्न गे मारेइ मतुइक्नेवे। 8 परमप्रभु यावेमी “गो मेको नाक्त एदोम डा जोक्ब तुइक्व मुर आन कली खतम सेल्लुड। एसाव आ डांडाम बाक्ब रुब्ब मुर आन कली साइक्नुडमी। 9 गे तेमान, इ लडाइ पाइबपुकी फ्राचा पुंडसीनीम। एसाव आ डांडाम बाक्ब मुर नेल्ल क्योरशा साइक्वा पुंडसीनीम। आमोस १:१२ 10 गे इ लोक्ब याकूब कली हुश ख्राक्श पोक्शो आ पर्वम इ कली मुनेम सुम्ब। मिनु गे गेना हना यो कली जाम्शा लाइनेवे। योएल ४:१९ 11 मेको नाक्त गे डोन राप्शा बाक्ते। मेको नाक्त अर्को रागी डा मुरपुकीमी मेको आ शॉप नेल्ल रोइश्शा लाइक्तेक्म। अर्को रागी डा मुर मेको आ लाप्चो रे ओव्रतेक्म। मिनु यरूसलेम आ पर्वम फेन्टे आप्तेक्म। गे यो मेकोपुकी

खोदेशो का बाक्ते। भजन संग्रह १३७:७ 12 तन्न गे इ लोक्ब श्येत जवानु, मेको कली मदिप्चा माल्शो नवे। यहूदा डा मुर खतम दुम्मा नाक्त गे मग्येरसीचा माल्शो नवे। मेकोपुकी श्येत जामे नाक्ती गे ठेयब लेश्शो लोत्र मपचा माल्शो नवे। 13 आं मुर हिंचा डा श्येत जामे नाक्त, गे मेको आन लाप्चो रे मओव्रचा माल्शो नवे। यहूदा डा मुर खतम दुम्मा नाक्ती, गे मेको मरिम्शो पाइबपुकी नु मगारचा माल्शो नवे। मेको हिंचा डा श्येत जामे नाक्ती गे मेको आन शॉप रोइश्शा मलाइक्वा माल्शो नवे। 14 मेको आ प्रोक्शा लशो मुर आन कली साइक्वा कली लां गुम्तीकेमी बाप्शा बाक्वा मदुम्शो नवे। मेको ब्रॉइशा प्रोक्शो आन कली मग्याइक्वा माल्शो नवे। 15 परमप्रभु यावे आ निसाफ पतीक नाक्त रागी रागी डा मुर नेल्ल आन नेक्था जाक्शो बाक्ब। गे दोदेशो पशो नवे, इ कली मोदेशोन पांडसीब। इ पशो गेय नेल्ल इ पियामीन मॉइसीब। योएल १:१५; येरमीया ५०:१५,२९ 16 गे दोपा आं डांडाम तूडी, मोपा इ एर ओंथ बाक्ब रागी रागी डा मुरम गेना हना यो तूनीम। मिनु गेनायो मबाक्शो खोदेशो दुम्नीम। येरमीया २५:१५ 17 तन्न सियोन डांडाम चहिं प्रोक्शो मुरपुकी जाक्नीम। मेको परमप्रभु यावे आ डांडा बाक्ब। मिनु याकूब आ खिंमी डाइती आंम कली अधिकार पाइब आन कली अधिकार पाइनीम। योएल ३:५; योएल ४:१७ 18 याकूब आ खिं मी दुम्ब। योसेफ आ खिं ब्रशो मी दुम्ब। एसाव आ खिं चहिं नल खोदेशो दुम्ब। मेकोपुकीमी मेको कली मीम हुम्शा, खतम पोक्नीम। मिनु एसाव आ खिं डा मुर सुइ मब्रॉइनीम” दे परमप्रभु यावेमी देंत। जकरिया १२:६ 19 नेगेब डा मुरपुकीमी एसाव आ डांडा आन के सेल्लनीम। शेफेलाह डा मुरपुकीम पलिस्ती आन रागी आन के सेल्लनीम। मेकोपुकीमी एफ्राइम नु सामरीया डा रू आन के सेल्लनीम। मिनु बेन्यामीनम चहिं गिलाद आंम के सेल्ल। १राजा १६:२४ 20 मिनु ग्याइश्शा लाइक्वा पुंडसीशो हालाहम बाक्शो इस्राएलीपुकीमी फोनीचीआ रे चारेफाथ सम्म डा रागी आन के सेल्लनीम। मिनु यरूसलेम रे ग्याइश्शा लाइक्वा पुंडसीशो सेफाराद सहरम बाक्शो मुरपुकीम नेगेब डा सहर आन के सेल्लनीम। 21 ब्रॉइशोपुकी सियोन डांडा डाइश्शा कुइनीम। मिनु एसाव आ डांडा कली सासन पाइनीम। मिनु मेको राज्य परमप्रभु यावे के दुम्ब।

# योना

एको किताब सुम ब्रेक्शो बाक्बा, मेको आ पर्बम तेइ मब्रेक्शो बाक्ब। तन्न योना आ शेंसीबपुकीमी योना आ ब्रेक्शा वोइश्शो रे एको किताब गुंडशो बाक्ब, दे मिन्नीम।

इसाएल डा पिप येरोबाम ८२५-७८४ बि. सी. आ पालाम योना बाक्त्। मेना आमोस नु होसेमी यो परमप्रभु यावे आ लोव्र पशो बाक्त्। एको किताब योना बेक्म नोले ब्रेक्शो बाक्ब।

परमप्रभु यावेमी इस्राएली मटुश्शो, अर्को रागी डा मुर आन कली इस्राएली आन कली खोर्देशो पा दाक्ब। येसुमी यो योना आ सांकछी गेब।

## परमप्रभुमी योना कली सोइश्शो

1 परमप्रभु यावेमी अमील्लै आ तौ योना कली मार लोव्र पवा बाक्त्  
देंशा हना, २ राजा १४:२५<sup>२</sup> “गे छुल बोक्शा, निनवे माइश्शो ठेयब  
सहरम लावो। मिनु मेकेर डा मुर आन मरिश्शो पशो आ पर्बम शेंदीमी। मारदे  
हना गो मेको आन मरिश्शो पशो नेल्ल ताता” दे मदा बाक्त्।

## योना परमप्रभु रे प्रोक्शो

3 तन्न योना परमप्रभु यावे आ डोंइती रे लशा, निनवे मलथु, टारशीश गे  
प्रोक्चा गोवा बाक्त्। मिनु योप्पा सहरम यिशा, टारशीश लाइब डोंगा का  
थिश्शा, क्येट थाप्शा, परमप्रभु यावे आ डोंइती रे प्रोक्शा, डोंगाम डोंइसे  
बाक्त्। भजन संग्रह १३९:७, ९, १०<sup>४</sup> मिनु परमप्रभु यावेमी समुन्द्रमी ठेयब  
फश पपदा बाक्त्। मोपा ठेयब फश गिवारम पतीके मेको डोंगा जिक्चा  
चिक्त् बाक्त्।<sup>५</sup> मिनु डोंगाम गेय पाइबपुकी हिंशा, आन देवी देवता आन नें  
थिशा, ब्रेम्मा बाक्त्। मिनु डोंगा सोपी पचा कली मेको आन बाक्शो मारेइ  
मारेइ समुन्द्रमी ताइक्त्मे बाक्त्। योना चहिं डोंगा आ आइदी तला लशा,  
इप्शो बाक्त्।<sup>६</sup> मिनु डोंगा चलेबमी योना आ इप्तीकेम लशा “गिशा डा  
इमे। बोक्को, इ परमप्रभु कली थोवो। मेको परमप्रभु इ कली खतम दुम्चा रे  
प्रोंइबा, को” देंमाक्त्।<sup>७</sup> मिनु डोंगाम गेय पाइबपुकीमी “सुम पतीके ओर्देब  
श्येत दुम्माइ, तुइक्चा कली चिडगा कोव्रचा” देंमुशा, चिडगा कोव्रडमे  
बाक्त्। चिडगा कोव्रडमेनु, योना आ नेंम गूमाक्त्। हितोपदेश १६:३३

8 मिनु डोंगाम गेय पाइबपुकीमी योना कली “गो मारदे ओर्देब श्येत जया?  
इ गेय मार में? गे ते रे पिवे? तेको रागी डा नवे? मार थर डा मुर नवे?” दे  
हिल्लो पामे बाक्त्।<sup>९</sup> मिनु योनामी “गो हिब्रू नड। रागी नु समुन्द्र सेल्ब,  
सरीड डा परमप्रभु यावे कली थमा सुइक्ब नड” देंमाक्त्। उत्पत्ती १:९-१०  
10 मिनु मेको मुरपुकी डोंइती क्येडा हिंशा योना कली “गे मारदे ओपा  
प्रोक्डे?” दे हिल्लो पामे बाक्त्। मारदे हना योनामी मेको आन कली “गो  
परमप्रभु यावे आ डोंइती रे प्रोक्ती” देंशो बाक्त्।<sup>११</sup> मिनु मेकोपुकीमी  
योना कली “फश गिवार नाइक्पाइक्चा कली मार पचा माल्नीकी?” दे  
हिल्लो पामे बाक्त्। मारदे हना फश गिवार पतीके ब्वाक्कु बारना बारन  
लमाक्त्।<sup>१२</sup> मिनु योनामी “आं कली समुन्द्रमी ताइक्त्वाक्यीनी हना, फश  
गिवार नाइक्ब। एको फश गिवार आं पतीके पशो बाक्ब, दे गो तुइक्नुड”  
देंमाक्त्।<sup>१३</sup> मिनु मेको मुरपुकीमी लेंशा डोंगा रागीम चाक्चा कली शुश  
खीयेमे बाक्त्। तन्न मचापे बाक्त्। मारदे हना फश गिवार शुश बारशो  
बाक्त्।<sup>१४</sup> मिनु मेकोपुकीमी परमप्रभु यावे कली “परमप्रभु यावे, एको  
मुर आ पर्बम गोपुकी बेक्चा ममाल्कल। एको मुर आ दोस मतकल। मारदे  
हना परमप्रभु यावे, इन दाक्शो यो मोर्देशोन बाक्त्” देंमा बाक्त्।<sup>१५</sup> मिनु  
योना कली समुन्द्रमी ताइक्त्मे बाक्त्। मिनु फश गिवार नु ब्वाक्कु खा  
दिम्शा, नाइसे बाक्त्।<sup>१६</sup> मिनु मेको मुरपुकी परमप्रभु यावे कली मान पा  
हिंशा, मेको कली चट्टेशा “आ देंशो नेल्ल टीनीकी” दे परमप्रभु यावे कली  
कसम जामे बाक्त्।<sup>१७</sup> मिनु परमप्रभु यावेमी योना कली दाक्पाइक्चा कली

ठेयब डाइ का सोइक्त् बाक्त्। मेको डाइमी योना कली गु दाक्गानु, योना  
सां नाक्दो नाक्ती आ कोव्रजीम बाक्त्। मत्ती १२:४०; मत्ती १६:४

## योनाम परमप्रभु कली लोव्र पशो

2 मिनु योनामी डाइ आ कोव्रज रे पा परमप्रभु यावे कली लोव्र पवा  
बाक्त्।<sup>२</sup> मिनु मेकोमी परमप्रभु यावे, आ परमप्रभु कली “गो आं  
श्येत जतीके रे लोव्र पाता। मिनु आं कली लोव्र लेक्त्वाक्यीनी। गो बेक्शो मुर  
आन बाक्तीके रे ब्रेक्ती। मिनु गे आं सेंदा नेंतीनी। भजन संग्रह १२०:१<sup>३</sup> गे  
आं कली समुन्द्र आगाम ताइक्त्वाक्यीनी। आं एर ओंथ ब्वाक्कु ला बाक्शो  
बाक्त्। ब्वाक्कुमी आं कली गिल्शा, आ छाल आं तारी रे लाम्त्क्म। भजन  
संग्रह ४२:८<sup>४</sup> गोमी ‘इन क्येडा डोन दुम्शा, इन योव्रशो खिं मुल गेनायो  
मताइनुड’ दे मिम्ताक्ड। भजन संग्रह ३१:२२<sup>५</sup> आं एर ओंथ ब्वाक्कु  
बाक्तीके, हेरा बेक्ती। गो ब्वाक्कु आगाम बाक्डानु, आं पिपा लेउम सुम्शो  
बाक्त्। भजन संग्रह १८:५; भजन संग्रह ६९:२<sup>६</sup> मिनु गो समुन्द्र आगा  
क्येडा यो लुक्च गुम्ती। गो गेनायो मगूचा डा पा गुम्ती। तन्न परमप्रभु यावे,  
आं परमप्रभु गे आं कली बेक्चा रे प्रोंइतीनी। भजन संग्रह १०३:४<sup>७</sup> आं थुं  
लुक्च लशा, गो परमप्रभु यावे, इन कली मिम्शा, इन कली लोव्र पाता। मिनु  
इन बाक्तीके रे आं लोव्र नेंतीनी। भजन संग्रह १४२:२-४<sup>८</sup> जाम्शा लाइब  
मूर्ति कली थमा सुइक्बपुकीमी इन शिशी मताइनीम। भजन संग्रह ३१:७  
<sup>९</sup> गो चहिं ‘गे रिम्शो पाइब बाक्नीनी’ देंशा, इन कली ठेयब सेल्नुड। गो इन  
कली देंशो लोव्र खाप्नुड। परमप्रभु यावे, गे मुर आन कली श्येत रे प्रोंइब  
बाक्नीनी” दे लोव्र पवा बाक्त्। भजन संग्रह ५०:१४; भजन संग्रह ११६:१७-  
१८

10 मिनु परमप्रभु यावेमी डाइ कली “योना कली ब्वाक्कु रे गुंडशा रागीम  
तेवो” दे अरेवा बाक्त्। मिनु डाइमी मेको कली ब्वाक्कु रे गुंडशा, रागीमी तेवा  
बाक्त्।

## लेंशा योना कली शेंथ सोइश्शो

3 मिनु परमप्रभु यावेमी लेंशा योना कली लोव्र पवा बाक्त्। योना १:२  
2 मिनु मेकोमी “गे बोक्को, निनवे माइश्शो ठेयब सहर लावो। गो इ  
कली मार शेंनुडा, मेको मेकेर डा मुर आन कली शेंदीमी” दे मदा बाक्त्।  
3 मिनु परमप्रभु यावे आ लोव्र टिशा, योना निनवे गे लचा गोवा बाक्त्।  
निनवे थम ठेयब सहर बाक्त्। मेको निनवे सहर सुर का रे अर्को सुर  
जाक्दील्चा कली नाक्त् सां माल्बाक्त्। योना ४:११<sup>४</sup> मिनु योनामी निनवे  
सहर ओव्रशा, नाक्त् का गाक्शा, मुर आन कली “४० नाक्त् नोले एको सहर  
खतम दुम्ब” दे ठेयब सेंदामी शेंदा बाक्त्।

5 मिनु मेको नेंशा निनवे डा मुरपुकीमी परमप्रभु आ लोव्र थमा बाक्ब, दे  
थमा सुदमे बाक्त्। मेकोपुकीमी “निनवे सहर डा आइक्च नु ठेयब मुर आन  
मरिश्शो पतीके रे लेक्त्क्म, दे कोइचा कली नेल्ल माइजा बाक्शा, अरन्डी  
फेक्सीन” दे नेल्ल आन कली नेंपदमे बाक्त्। मत्ती १२:४१; योएल १:१४  
6 मिनु निनवे डा पिपमी यो मेको लोव्र नेना बाक्त्। मेको आ ठेयब निक्तीके

रे बोक्शा, पिप आ फेक्तीके वा प्रुइश्शा, अरन्डी फेक्शा, पुलु तारी निस्से बाक्त। <sup>7</sup> मिनु पिप नु आ मुरपुकीमी निनवे डा मुर आन कली “मुरपुकी नु बस्तु भावमी मारेड मजामेक्ल, मतूडमेक्ल। बी ब्यफ, क्यारश भेडा आन कली यो मयोवडमेक्ल, ब्वाक्कु मतुंडदमेक्ल। <sup>8</sup> मुरपुकीम अरन्डी सुम्सीशा, बी ब्यफ, क्यारश भेडा यो सुम्चा माल्नीम। मिनु मेकोपुकीमी परमप्रभु कली ठेयब सेंदाम पुंडचा माल्नीम। मिनु नेल्ल आन मरिम्शो लां नु आन मरिम्शो पशो रे लेत्वा माल्नीम। <sup>9</sup> परमप्रभु आ शुश गाइक्तीक रे लेप्बा, कों? मेकोमी आंइ कली मसाइक्बा, कों? सुम तुइक्बा, डा?” देंमा बाक्त। योएल २:१४ <sup>10</sup> मिनु परमप्रभुमी मेको मुर आन पशो नु आन मरिम्शो लां रे लेश्शो तशा “आं डोंइती पाइनुड देंशो, मुल मपाइनुड” दे मिम्ता बाक्त। मिनु परमप्रभुमी आ डोंइती मिम्शो मपवा बाक्त। येरमीया १८:७-८

योना परमप्रभु नु गाइश्शो

**4** मिनु परमप्रभुमी मुर आन कली खतम मपशो तशा, योना चुरशा, शुश गाइक्ता बाक्त। मिनु परमप्रभु यावे कली <sup>2</sup> “परमप्रभु यावे, आं रागीम बाक्डानु, गो एको तुइश्शो नड। मोपतीके गो टारशीश गे प्रोक्शो नड। गे नेल्ल कली शिशी पाइब नु दाक्ब परमप्रभु ननी। इन गाइक्चा रीब पा मबोक्ब। इन शिशी ठेयब बाक्ब। इन थुं श्येत गेचा बाक्त हना यो, इन थुं लेश्शा, मेको आन कली मारेड मपाइनीनी, दे गो तुइश्शो नड। प्रस्थान ३४:६ <sup>3</sup> मुल परमप्रभु यावे, आं कली साइय्नीनी। मारदे हना गो ब्रोंइचा क्येडा बेक्चा दाक्नुड” दे परमप्रभु यावे नु लोव पवा बाक्त। १राजा १९:४ <sup>4</sup> मिनु

परमप्रभु यावेमी “इ गाइश्शो ठीक ममाइ” दे मदा बाक्त। <sup>5</sup> मिनु योना सहर रे लशा, पूर्ब गे डा डांडामी निस्से बाक्त। मेकेर गोठ का सेल्शा बाक्शो बाक्माक्त। मेकेर फाम्सीशा निश्शा “मेको सहरमी मार दुम्बा” दे कोवशा, रिम्दा बाक्त।

<sup>6</sup> मिनु परमप्रभु, परमप्रभु यावेमी योना कली नां फाम्सीशा बाक्ल, श्येत मजवल, दे छके लाक्चा डा पा आइक्च रवा का आ बाक्तीकेमी वापदा बाक्त। मिनु योना मेको रवा तशा, शुश ग्येरसे बाक्त। <sup>7</sup> तन्न आ दीसा सुनी कना परमप्रभुमी खोंकला का सोइक्ता बाक्त। मेकोमी मेको आइक्च रवा आ शाक्श खोदा बाक्त। मिनु रवा सोल बेक्माक्त। <sup>8</sup> मिनु नां दाम्मेनु, परमप्रभुमी योना आ बाक्तीकेम पूर्ब रे होश फश सोइक्ता बाक्त। मिनु नांमी योना आ पिया नाप्शा, योना ओले पेटे दुम्शा, गोल्माक्त। मिनु योनामी “ब्रोंइचा क्येडा बेक्चा दाक्नुड” देंमाक्त।

परमप्रभु आ शिशी

<sup>9</sup> मिनु परमप्रभुमी योना कली “गे मेको रवा आ पर्बम गाइक्चा, ठीक दुम्बा डा?” दे लोव पवानु, मेकोमी “गो मबेक्डा सम्म गाइक्नुड” दे लोव लेत्ता बाक्त। <sup>10</sup> मिनु परमप्रभु यावेमी “गे इ मख्मुशो, मकोल्पाइश्शो, नाक्दो कामी वाशा, आ दीसा नाक्दो सोल बेक्शो रवा कली शिशी पाइनेवे। <sup>11</sup> मिनु गो मेको ठेयब सहर निनवे आ पर्बम शिशी मपाइनुडा डा? मेकेर आन ग्युरा पेरा गुइ मतुइक्ब लाख का २० हजार क्येडा शुश मुर नु बी ब्यफ, क्यारश भेडा यो बाक्नीमी। गो मेको आन कली शिशी पाइनुड” देंमाक्त।

## मीका

मीका इस्राएल डा दक्खिन हेब्रोन नु गाजा सहर आस दाते मोरेशेथ डा मुर बाक्त। मेको आ नें आ अर्थ “परमप्रभु यावे खोदेशो सुइ मबाक्ब” देशो बाक्ब। मीका आमोस खोदेशो पा रू डा गेय पाइब बाक्त। मेको अस्सुर डा लडाइ पाइब आन डोंइती रे प्रोक्शा, यरूसलेम सहरम परमप्रभु यावे आ लोव पशो बाक्त। एको किताब मीकामी ब्रेक्शो बाक्त।

मीकामी ७५०-७२३ बि. सी.म परमप्रभु यावे आ लोव पशो बाक्त। मेकोमी सामरीया खतम दुम्चा क्येडा डोंइती मेको आ पर्वम परमप्रभु आ लोव पशो बाक्त। हिज्कीयाह पिप दुम्शो ६ बर्स दुम्ची ना ७२२ बि. सी. सामरीया खतम दुम्शो आ पर्वम चहिं मीकामी मारेइ मब्रेक्शो बाक्त। मोपतीके मेकोमी एको किताब ७२२ बि. सी. क्येडा डोंइती ब्रेक्शो बाक्त।

परमप्रभुमी थुं नाइक्चा गेब। इस्राएल नु रागी रागी डा मुर नेल्ल आन कली मस्सीह सोइक्ब। मेकोमी आ गे जाक्ब मुर आन कली श्येत रे प्रॉइब।

### सामरीया नु यरूसलेम कली निसाफ

1 परमप्रभु यावेमी मोरेशेथ डा मीकाह कली लोव पाप्तु। मेना यहूदा रागीमी योथाम पिप बाक्त। मेको आ नोले आहाज नु मेको आ नोले हिज्कीयाह पिप दुम्ताक्स। मिनु मेको परमप्रभु यावे आ लोव नु आ कोंइतीके सामरीया नु यरूसलेम आस पर्वम बाक्त। *येरमीया २६:१८; यसैया १:१*

2 मिनु परमप्रभु यावेमी मार कोंइशो नु देशो बाक्त देशा हना “जात जात डा मुर, गे नेल्लेमी नोफा दाइक्तीन। रागी नु मेकेर बाक्ब नेल्लेमी नेनीन। परमप्रभु, परमप्रभु यावे आ बाक्तीके रे पा इन मरिम्शो पशो आ पर्वम सांकछी दुम्ब। 3 लो कोवडीन, परमप्रभु यावे आ बाक्तीके रे जाक्ना जाक्न बाक्ब। मेको यीब नु रागी डा लाइशो डांडाम गाक्ब। *आमोस ४:१३ 4* मी आ नेक्था मयीन यशो खोदेशो पा, लुक्च लतीकेमी ब्वाक्कु शाइशो खोदेशो पा, मेको आ थेक्शो डांडापुकी याइनीम। मिनु दिंमपुकी ब्रोल्नीम। 5 मेको नेल्ल याक्ब आ मरिम्शो पशो नु इस्राएल डा मुर आन पाप आ पर्वम दुम्शो बाक्ब। याक्ब आ मरिम्शो पशो मार बाक्बा? मेको सामरीया ममाइ डा? यहूदा डा लाइशो डांडा मार बाक्बा? मार, मेको यरूसलेम ममाइ डा? *येरमीया २३:१३-१४ 6* मोपतीके गो सामरीया कली फुल्लु तेल्लीक सेल्नुड। मेको अडगुर खुम्तीक रू दुम्ने चाप्ब। गो मेकेर डा फुल्लु दिंमम ताइक्नुड। मिनु मेको आ खिं प्रेशा, आ जग गुंइनुड। *१राजा १६:२४; होसे १४:१* 7 मिनु मेको आ मूर्ति नेल्ल प्रोल्चा पुंइसीनीम। मेको आ गेय पा चेम्शो क्येट नेल्ल मीम हुम्चा पुंइसीब। गो मेको आ मूर्ति नेल्ल खतम पोक्नुड। मारदे हना मेको नेल्ल तेल्लेम पा चेम्शो क्येट खोदेशो पा खुप्शो बाक्नीम। मोपतीके मेको तेल्लेम पा चेम्शो क्येट खोदेशो पा जाम्शा लाइनीम” दैत। *होसे २:७, १४*

### यहूदा सहर कली श्येत दुम्ब

8 मिनु गो मेको आ पर्वम रोंका पा डाक्ना डाक्न बाक्नुड। श्येत्थ खोइल नु भेत्रे गाक्नुड। गो सिवार खोदेशो पा ग्रीनुड। मिनु बुक्स खोदेशो पा ग्रीनुड। 9 मारदे हना मेको आ गार मसाब। मेको यहूदा सम्म जाक्शो बाक्ब। मेको आं मुर आन बाक्तीक यरूसलेम सहर डा ठेयब लाप्चो सम्म जाक्दीशो बाक्ब। 10 एको लोव गाथ सहरम मनपतीन। मिनु डाक्सीन मडाक्कीन। बेथ-लेआफ्रामी इन पियाम फुरक फुंइसीन। *२सामुएल १:२० 11* शाफीर सहर डा मुरपुकी, भेत्रे दुम्शा, मुने दोक्शा इन लां लने। सानान सहर डा मुरपुकी लाडगा मयूनीम। बेथ-एचेलम डा मुर रोंका पाइनीम। मुल रे इ कली वारच पाइब मबाक्नीम। 12 मिनु मारोथ सहर डा मुरपुकीम हिंन हिंन रिम्शो दुम्तीके रिम्ना रिम्न बाक्नीम। परमप्रभु यावे रे हिंन डा श्येत यित। मिनु मेको यरूसलेम डा ठेयब लाप्चो सम्म जाक्शो बाक्त। 13 लाकीश सहर डा मुरपुकी, शारा आन कली बगीम प्रेशा लने। गे सियोन सहर डा मुर आन कली पाप पपाइक्तीनी। मिनु मेको कली पाप पपाइक्ब, गे बाक्नीनी।

इस्राएल आ मरिम्शो पतीके इन दातेम थीसीब। 14 मोपतीके गे मोरेशेथ-गाथ सहर कली आ गाक्ची ना डा कोसेली गेचा माल्नीनी। अक्जीब सहर डा मुर इस्राएली आन पिप आन कली ब्वाक्कु मबाक्तीकेम ब्वाक्कु बुक्शो खोदेशो बाक्नीम। 15 मिनु मारेशा सहर डा मुरपुकी, गो इन कली ग्रापाइक्चा कली मुर का चाक्नुड। मेको इस्राएल डा मान ततीके अदुल्लाम सम्म जाक्ब। 16 मिनु इन दाक्शो आल आन पर्वम इन चां प्रेक्कीन। चां नेल्ल प्रेक्शा, गिदद खोदेशो दुमीन। मारदे हना इन आल नेल्ल ग्याइशा, मुर आन रागीम लाइक्चा पुंइसाक्म।

### मरिम्शो ठेयब मुर आन पर्वम लोव

2 आबी आबी, सु सुम आन ब्राख्येम गोल्शा पाप नु मरिम्शो पचा ला मिन्नीमी। मिनु नां सोवम चोटीन मेको आन मिम्शो पाइनीम। मारदे हना मेको पने चाप्ब बाक्नीम। 2 मेकोपुकीम रिम्शो रू तशा वाल्शा, रोइक्नीम। रिम्शो खिं रोइक्नीम। मोपा मेकोपुकीमी मुर आन खिं नु आन थेरशो रू आंम के सेल्नीम। *ब्यक्स्था ५:२१; हितोपदेस २४:१५; यसैया ५:८* 3 मोपतीके परमप्रभु यावेमी मार दैत देशा हना “गो मेको आन खिं डा मुर आन कली श्येत गेनुड। मेको रे आंम कली प्रॉइने मचाप्नीम। ठेयब लेशा गाक्ने मचाप्नीम। मारदे हना मेको थम श्येत जतीक नाक्त बाक्ब। *आमोस ५:१३ 4* मेको नाक्ती मुरपुकीमी इन पर्वम शुक्शी पा कुम्सो पाइनीम। मिनु इन पर्वम रोंका पा डाक्नीम। मिनु मुरपुकीमी “गोपुकी थमा पा खतम दुम्तक। आंइ मुर आन थेरशो रू अर्को मुरुम लाइक्नीम। आंइ रू आंइ जोरी सत्रु आन दातेमी योक्सीनीम” दैनीम” दैत। 5 मोपतीके गोपुकी परमप्रभु यावे आ मुर आन योक्शो रू रोइक्चा मताइनीनी। 6 मेकोपुकीम “परमप्रभु यावे आ लोव मपने” दैनीम। तन्न लोव पाइनीम। मिनु मेकोपुकीमी “मोदेशो श्येत आंइ कली मदुम्ब” दैनीम। *आमोस ७:१६ 7* याक्ब आ खिं डा मुरपुकी, मोदेशो दैचा दुम्बा? मार, परमप्रभु यावे आ फाल्तीक सक्ति नुम्मे डा? मेकोमी मोदेशो पाइबा डा? परमप्रभु यावेमी रिम्शो पाइब आन कली रिम्शो लोव मपाइबा डा? *आमोस ६:३ 8* तन्न गे आं मुर आन डोंइती जोरी सत्रु खोदेशो दुम्शा बाक्नीनी। रिम्शो पाइब मुर आन फेक्तीक रोइशा लाइक्नीनी। लडाइ मदुम्शो बाक्ब, दे इन कली थमा सुइशा गाक्ब आन कली मोदेशो पाइनीनी। 9 गोपुकीम आं मुर आन मीश आन कली आन दारशो खिं रे गुंइनीनी। मेको आन आलपुकी रे आं गेशो आसीक गेना हना यो कली रोइशा लाइक्नीनी। 10 बोक्शा लने। मारदे हना एकेर इन नाइक्तीक ममाइ। मारदे हना एको ग्रांगा दितीकेमी मुर आन कली मरिम्शो सेल्ब। मेको मारेइ पने मचाप्चा डा पा खतम सेल्शो बाक्ब। 11 तेकोइ मुरुमी जोल पा दूली लोव पशा “गो इ कली अडगुर शांबु तूचा नु रकसी तूचा आ पर्वम लोव पाइनुड” दैत हना, मेको मुर मेको आन कली गारचा डा लोव पाइब बाक्ब।

## श्वेत रे प्रौडशो

12 परमप्रभुमी “याकूब गो थमा पा नेल्ल इन कली खुष्ठा पुक्नन्नी। गो इस्राएलम लीशो आन कली थमा पा खुजुडमी। गो मेको आन कली भेडा बगालम वोडशो खोदेशो पा नु योवतीकेम योवशो खोदेशो पा वोडवुड। मिनु मेकेर शुश मुर दुम्नीम। *येरमीया ३१:१०; इजीकीएल ३६:३७; यसैया ५२:१२* 13 लां कोडब मेको आन डोंइती गाक्ब। मेकोपुकी लाप्चो रे पा गूशा गाक्नीम। मेको आन पिप मेको आन डोंइती गाक्ब। परमप्रभु यावे मेको आन डोंइडोंइती बाक्ब” दैत।

## ठेयब मुर आन कली हुडशो

3 मिनु गो “गे, याकूब आ ठेयब मुरपुकी नु इस्राएली आन खिं डा हुकुम पाइबपुकी, इन नोफा दाइशा नेनीन। गे ठीक निसाफ तुडक्का ममाल्नीनी डा? *येरमीया ५:५* 2 गेपुकी रिम्शो पचा काइ मदाक्नीनी। मिनु मरिम्शो पतीक दाक्नीनी। गेपुकीमी आं मुर आन कुशुल उक्नीनी। मिनु मेको आन रुश रे आन श्ये रिक्नीनी। 3 गेपुकीमी आं मुर आन श्ये ब्वाइतीनी। मेको आन कुशुल उक्तीनी। मिनु रुश टुक्रा टुक्रा पा जिक्तीनी। मिनु बोसुम क्येतीक श्ये खोदेशो पा मेको आन कली टुक्रा टुक्रा पा चेक्तीनी” दैती। *भजन संग्रह १४:४* 4 मिनु मेकोपुकीमी परमप्रभु यावे कली पुंडनीम। तन्न मेकोमी मेको आन पुंडशो लोव्र मलेक्ब। आ अरेशो मटितीके मेकोमी मेको आन क्येडा आ कुल खूडक्ब। *हितोपदेस १:२८; इजीकीएल ८:१८*

5 मिनु परमप्रभु यावेमी आ लोव्र पाइब आन पबर्म मार दैत दैशा हना “सुम आं मुर आन कली दूली लांम गाक्पाइक्बा? आं लोव्र पाइबपुकीमी, सुमी मेको आन कली जचा गेमेनु ‘रिम्शो दुम्ब’ दैनीम। तन्न मेको आन कली जचा मगेमेनु, मेको आन कली लडाइ तोचा कली ठीक दुम्नीम। 6 मोपतीके इन कली मारेइ मततीक नाक्दो दुम्ब। परमप्रभु रे मारेइ मतुडक्का डा पा छिडछिड दुम्नीनी। आं लोव्र पाइब आन कली नां रिक्ब। मिनु नाक्त मेको आन कली छिडछिड दुम्ब। 7 कोडतीक ताइबपुकी शिशी मताइनीम। दुना मुना पाइबपुकी मुने दोक्नीम। मेको आन शोव्र सुम्सीचा माल्नीम। मारदे हना परमप्रभुमी मेको आन कली लोव्र मलेक्ब। *आमोस ८:१२* 8 तन्न गो सक्ति पाइशो बाक्नुड। गो परमप्रभु यावे आ सोक्ती, ठीक निसाफ पतीके नु आ सक्ति ब्रीशो बाक्नुड। गो याकूब आ हेंथे पशो नु इस्राएल डा मुर आन पाप शेंचा कली मोदेशो दुम्शो बाक्नुड। *यसैया ५८:१* 9 याकूब आ खिं डा ठेयब मुरपुकी नु इस्राएल डा खिं खिं डा हुकुम पाइबपुकी एको लोव्र नेनीन। गेपुकीमी ठीक निसाफ पतीक कली ग्रांरा दीनीनी। मिनु ठीक लोव्र नेल्ल दूली सेल्नीनी। 10 गेपुकीमी हुश शाइक्पाइशा सियोन कली सेल्नीनी। मिनु यरूसलेम कली मरिम्शो पतीकेम सेल्नीनी। *हबकुक २:१२* 11 मेकेर डा ठेयब मुरपुकीमी घूस जशा निसाफ पाइनीम। मेकेर डा चढेबपुकीमी शेंशो डा क्येट ताक्नीम। परमप्रभु यावे आ लोव्र पाइबपुकी क्येट तचा कली नोले दुम्ब लोव्र पाइनीम। मो हना यो मेकोपुकीमी ‘परमप्रभु यावे आंइ दातेमी बाक्ब। गो श्वेत मजाइनीकी’ दैनीम। *येरमीया ७:४* 12 मोपा इन पतीके सियोन वाक्शो रू दुम्ब। यरूसलेम ब्रेशो खिं डा फुल्लु देल्तीके दुम्ब। परमप्रभु यावे आ खिं डा डांडा ब्वाकी दुम्शो बाक्ब” दैत। *भजन संग्रह ७९:१; येरमीया ९:१०; येरमीया २६:१८*

## परमप्रभु आ डांडा

4 मिनु नोले डांडा नेल्ल आन क्येडा परमप्रभु यावे आ खिं बाक्शो डांडा लाइशो दुम्ब। मिनु मेको नेल्ल आन क्येडा ग्येतथ लाइब बाक्ब। मिनु शुश मुर मेकेर लाइनीम। *यसैया २:२-४* 2 मिनु रागी रागी डा मुरपुकी मेकेर जाक्शा, मेकोपुकीमी “जाक्कीन। गोपुकी परमप्रभु यावे आ डांडा लय। याकूब आ परमप्रभु आ खिं लय। मेकोम इं कली आ लां कोडब। मिनु गोपुकी मेको आ लांम गाक्ने चाप्यल। मारदे हना शेंतीके सियोन रे नु परमप्रभु यावे आ लोव्र यरूसलेम रे गूब” दैत। *लूका २४:४७* 3 मेकोमी शुश जात डा मुर आन दातेमी निसाफ पाइब। मिनु डोन बाक्शो बोल्यो रागी रागी

डा मुर आन कली निसाफ पाइब। मिनु मेकोपुकीमी आन तरवार चेम्शा, फाली सेल्नीम। आन तूतीक भाला चेम्शा गुये सेल्नीम। मिनु रागी रागी डा मुर आन दातेमी लडाइ मपाइनीम। मेकोपुकीमी गेनायो लडाइ मर्शेसीनीम। 4 तन्न मुर नेल्ल आन अडगुर नु फोव्रशी रवा आन पुंम निल्लीम। मिनु मेको आन कली सुडमी हिंच मकोइनीम। मारदे हना मुर नेल्ल आन परमप्रभु यावेमी लोव्र पशो बाक्ब। *१राजा ५:५; जकरिया ३:३०* 5 मिनु “जात जात डा मुर नेल्ल आन देवी देवता आन नैम गाक्नीम। तन्न गोपुकी चहिं गेना हना यो परमप्रभु यावे, इं परमप्रभु आ नैम गाक्नय” दैतेक्म।

## परमप्रभु आ मुरपुकीमी शिशी ताइनीम

6 परमप्रभु यावेमी मार दैत दैशा हना “मेको नाक्ती गो खोइल मदुक्ब आन कली खुजुडमी। मिनु गो खेरशो नु श्वेत जशो आन कली खुजुडमी। *येरमीया ३१:८; ब्यवस्था ३०:४* 7 मिनु खोइल मदुक्ब आन कली लीशो मुर आन दातेम वोडवुड। खेरचा पुंडसीशो आन कली बोल्यो रागी डा मुर सेल्लुडमी। मिनु परमप्रभु यावेमी मेको आन कली सियोन डांडा रे गेना हना यो कली सासन पाइब।

8 आं बगाल बाक्तीक डांडा, सियोन आ तमी इ सांद मिग्दाल-एदेर सहर सम्म जाक्दीक्ब। गे डोंइती डा राज्य लेंशा ताइनेवे। यरूसलेम डा तमीम आ राज्य लेंशा ताइब।

9 मुल गे मारदे वाइ ब्रेशा ग्रीनेवे? मार इ पिप मबाक्बा डा? इ अर्ती गेब जाम्शा लमा? मिनु मारदे आल थितीक रोइ पशो मीश मुर खोदेशो पा वाइ ब्रेत्नेवे? *येरमीया ८:१९* 10 सियोन आ तमी, आल थितीक रोइ पशो मीश मुर खोदेशो पा वाइ ब्रेशा ग्रीडो। मारदे हना मुल गे एको सहर प्रौडचा माल्नेवे। मिनु खिं मबाक्तीकेमी बाक्तीक सेल्चा माल्नेवे। गे बेबीलोनम लचा माल्नेवे। मिनु मेकेर रे प्रौडचा पुंडसीनेवे। मेकेर परमप्रभु यावेमी इ कली इ जोरी सत्रु आन गुइ रे प्रौडब। 11 मुल शुश रागी रागी डा मुर इ पबर्म दूली पा बोक्शा ‘सियोन ग्रांरा दिशो दुम्ब। गो मेको कली कोव्रना कोव्रन बाक्का तांइसेक्ल’ दैनीम” दैत। 12 तन्न मेकोपुकीमी परमप्रभु यावे आ मिम्शो मतुडक्कीम। मेकोपुकीमी आ पचा चिक्शो मतुडक्कीम। परमप्रभुमी मेको आन कली खला डा अन्न खुष्ठा खोदेशो पा खुप्ताक्ब। 13 सियोन आ तमी बोक्शा, अन्न तुपो। मारदे हना गो इ ग्रांरा फलाम के सेल्लुड। गो इ ग्रेये कांसा के सेल्लुड। मिनु गे शुश जात जात डा मुर आन कली फस पोक्नेवे। मेको आन रोइशो परमप्रभु यावे कली गेनेवे। मिनु मेको आन शोंप रागी नेल्ल डा परमप्रभु यावे कली चढेनेवे।

## बेथलेहेम रे सासन पाइब का जाक्ब

5 गे गारो हिरशो सहर बाक्नेवे। लडाइ पाइबपुकीमी इ कली पुन्नीम। मिनु इस्राएल कली सासन पाइब कली कोक्केम चोवचोम तुप्नीम। *उत्पत्ती ३५:१९; मत्ती २:५-६; यूहन्ना १:१-२*

2 तन्न गे बेथलेहेम एफ्राथाह, गे यहूदा डा सहर आन दाते डा आइक्ब बाक्ते हना यो, इ रे पा आं पा डा इस्राएल कली हुकुम पाइब का जाक्ब। मेको साइ डोंइती रेन बाक्शो बाक्त। *यसैया ४:१७; यसैया ११:१२*

3 मिनु परमप्रभु यावेमी इस्राएली आन कली काइ मकोव्रब। मिनु मीश मुरुमी आल थिवा नोले ला कोव्रब। मेना लीशो मुरपुकी इस्राएल डा मुर नु गारशा, लेत्वा पुंडसीनीम। *इजीकीएल ३४:२३* 4 मिनु मेकोमी परमप्रभु यावे आ सक्तिमी आ बगाल आन कली योव्रब। मिनु मेकोमी आ परमप्रभु यावे आ ठेयब नैमी आ गेय पाइब। मिनु मेकोपुकी रिम्शो पा बाक्नीम। मारदे हना मेको रागी डा सुर सम्म नेल्ल क्येडा ठेयब दुम्ब। *यसैया ९:५; एफिसी २:१४* 5 मिनु मेकोमी थुं नाइक्का गेब। मिनु अस्सुर डा मुर इं रागी ओव्रशा लडाइ पचा गोम्तेक्म हना, गोपुकीमी ७ जना गोठला नु ८ जना हुकुम पाइब वोडक्कीनी।

6 मेकोपुकीमी अस्सुर रागी कली तरवारम हुकुम पाइनीम। निम्नोद रागी कली शोइशो तरवारमी हुकुम पाइनीम। मिनु मेकोपुकीमी इं कली “अस्सुरी इं रागी ओव्रतेक्म हना यो, इं कली प्रौडनीम। इ रागी डा सांदम जाक्तेक्म हना यो, इं कली प्रौडनीम” दैनीम। *भजन संग्रह ११०:३*

7 याकूब आ लीशो मुर शुश आन दातेम परमप्रभु यावे रे जाकशो सीत नु घांस तार जुक्शो रेउ खोदेशो दुम्नीम। मेकोमी “सुइ मुरुम वारच पाइनीमी को” दे मकोवनीम। मिनु मुर आन आस मपाइनीम।<sup>8</sup> याकूब आ लीशो मुर शुश आन दातेमी ब्वाकी डा गुप्स खोदेशो दुम्नीम। मेकोपुकी भेडा गोठम बाकशो गुप्स आ चाइक्ब खोदेशो दुम्नीम। गुप्स मेकेर लाक्तेकम हना, साइशा ब्वाइनीम। मिनु सुइमी मेको आन कली प्रॉइने मचापीम।<sup>9</sup> मिनु परमप्रभु यावेमी “गे इन गुइ इन जोरी सत्रु क्येडा बोल्यो दुम्शा ग्रानीनी। मिनु इन जोरी सत्रु नेल्ल खतम दुम्नीम। *जकरिया ९:१०*”

<sup>10</sup> मेको नाक्ती गो इन शारा इन दाते रे खतम पोक्नुड। इन बग्गी प्रेशा गेनुड।<sup>11</sup> गो इन रागी डा सहर नेल्ल खतम पोक्नुड। गो इन बोल्यो दरवार नेल्ल प्रेत्नुड।<sup>12</sup> गो इन टुना मुना पशो आ पबर्म इन कली खतम पोक्नुड। मिनु इन दातेमी साहीत कोवब आन कली बाक्चा मगेनुड। *जकरिया १३:२*<sup>13</sup> गो इन दाते डा मूर्ति नेल्ल खतम पोक्नुड। इन पूजा पचा कली ख्वक्शो फुल्लु खतम पोक्नुड। मिनु इन गुइमी सेल्शो थोवक आन डोंइती मबापीनी।<sup>14</sup> गो इन दाते डा मूर्ति पाइश्शो थाम तुल्शा बेरपाइक्नुड। मिनु इन सहर आन कली प्रेत्नुड।<sup>15</sup> गो गाइश्शा चुरशा रागी रागी डा मटीब मुर आन कली क्येक्क लेत्नुडमी” दैत।

#### परमप्रभु पाप आ पबर्म गाइश्शो

**6** परमप्रभु यावेमी मार देंबा, इन नोफा दाइश्शा नेनीन “बोक्कीन। मिनु पहाड आन डोंइती इन देंचा माल्शो लोव्र शोव्रडीन। मिनु डांडापुकीमी इन लोव्र नेन्मेक्क। *इजीकीएल ६:२*<sup>2</sup> गे डांडापुकी नु गेना हना यो लीब रागी डा जग, परमप्रभु यावेमी दोपा निसाफ पाइबा, मेको नेनीन। मारदे हना मेकोमी आ मुर आन कली निसाफ पचा चिक्शो बाक्ब। आ दोस गेशो नोफा दाइश्शा नेनीन। मारदे हना आ मुर आन कली मेको के लोव्र बाक्ब। मेकोम इस्राएल कली निसाफ पाइब।

<sup>3</sup> आं मुरपुकी गो इन कली मार पडा? गो इन कली मार श्येत गेडा? आं कली देनीन। *येरमीया २:५*<sup>4</sup> गो इन कली इजीप्त रे एक चाक्तन्नी। मिनु इन वाइलीम वाइल दुम्शो रागी रे प्रॉइतन्नी। इन कली लां कोंइचा कली मोसा, हारून नु मिरयाम आन कली सोइक्ताकडमी। *प्रस्थान १५:२०*<sup>5</sup> आं मुरपुकी, मोआब डा पिप बालाकम मार सल्ला पशो बाक्मे, मेको मिम्तीन। बेओर आ तौ बालाममी मेको कली मार लोव्र लेत्ता, मेको मिम्तीन। शित्तीम रे गिलगाल सम्म डा लांमी गाक्शोनु, मार मार दुम्मे, मेको मिम्तीन। मिनु परमप्रभु यावेमी इन कली दोपा प्रॉइशो बाक्मे, मेको तुइक्नीनी” दैत। *गन्ती २२:-२४:-; यहोसु २:१; यहोसु ४:१९*

<sup>6</sup> गो मार कुरशा परमप्रभु यावे आ डोंइती जाकडा? मार चाक्शा, इर डा परमप्रभु आ डोंइती बाक्डा? मार चोशा चढ्केतीक चाक्शा, आ डोंइती जाकडा? मेको आ डोंइती बर्स का दुम्शो ब्यफ चाक्शा, जाकडा? *भजन संग्रह ५०:८-१३; आमोस ५:२२*<sup>7</sup> परमप्रभु यावे हजार हजार सांड तशा ग्येरबा? मार १० हजार तेल के खोला तशा ग्येरबा डा? गो आं पाप आ पबर्म आं डोंइती जरमेशो तौ गेचा माल्नुडा? मिनु आं थुं डा पाप आ पबर्म आं आल गेचा माल्नुडा? <sup>8</sup> परमप्रभु यावेमी इन कली, गे बेक्शा लाइब मुर, इन कली मार रिम्शो बाक्मे नु मार पचा माल्नीनी, मेको देशो बाक्ब। मार देशो बाक्ब देशा हना, गे ठीक निसाफ पने, शिशी पतीक कली दाक्तीन। मिनु इन परमप्रभु आ डोंइती ब्रेम्शो दुम्शा गाक्कीन। *ब्यवस्था १०:१२; १सामुएल १५:२२*

#### यरूसलेम कली दोस गेशो

<sup>9</sup> परमप्रभु यावेमी सहर कली “आं कली मान पा हिंचा इन कली श्येत रे प्रॉइतीक दुम्ब। गे थर डा मुर नु सहर डा गुम्तीक डा मुर आन लोव्र नेनीन।<sup>10</sup> गो मेको आ अरेशो मटीब आ खिं डा मरिम्शो पा चेम्शो शोंप प्रेंदु? इन आइक्च सेल्शो सराप रशो पुक्तीक प्रेंदु? *लेवी १९:३५*<sup>11</sup> मार गो इन मरिम्शो नाक्तीक नु जोल पा नाक्तीक ढक के थैलो वोइक्ब कली दोस मताइब सेलु? *हितोपदेश २०:१०*<sup>12</sup> मेको आ शोंप पाइश्शो मुरपुकी हुश खाक्श पोक्तीकेम ब्रीशो बाक्नीम। मेको सहर डा मुरपुकी जोल पाइनीम।

मेको आन शोव्र जोल पतीकेमी ब्रीशो बाक्ब।<sup>13</sup> मोपतीके गो इ कली खतम पोक्चा गोशो बाक्नुड। गो इ कली इ पाप आ पबर्म श्येत्थ पोक्नुड।<sup>14</sup> गे जचा थोवक जाइनेवे, तन्न मरूनेवे। मिनु इ कोव्रजु शोव्रलु बेक्शोन बाक्ब। गे खेक्चा दा खेक्नेवे, तन्न उप्शा वोइक्ने मचाप्नेवे। गे मार खेक्नेवे, मेको नेल्ल लडाइम खतम दुम्ब।<sup>15</sup> गे मार मार शोक्चा दा शोक्नेवे। तन्न खुप्चा मताइनेवे। तेल रवा आ फल खाक्चा दा खाक्नेवे, तन्न इ रांम तेल खेक्चा मताइनेवे। गे अडगुर खाक्चा दा खाक्नेवे, तन्न अडगुर शांबु तूचा मताइनेवे। *ब्यवस्था २८:३८-४०; आमोस ५:११*<sup>16</sup> गे ओम्नी आ अरेशो लोव्र पाप्तीवी। मिनु आहाब आ खिं डा मुर आन पशो नेल्ल पाप्तीवी। मिनु मेको आन गेशो अर्ती टिप्तीवी। मोपतीके गो इ कली खतम पोक्नुड। मिनु इ मुर आन कली शुक्शी पतीक सेल्नुड। गे आं मुर आन गाइश्शो ताइनेवे” दे ब्रन्न ब्रन्न बाक्ब। *१राजा १६:२९-३३*

#### इस्राएल कली श्येत दुम्शो

**7** गो दोदेशो पा श्येत जशो बाक्नुडा? गो फल सिश्शा नोले, अडगुर रू डा सिला माल्ची नोले मारदे जचा मताइनुड। आं माल्शो डोंइती मीशो फोव्रशी यो मबाक्ब। *भजन संग्रह १२:२; यसैया ५७:१*<sup>2</sup> थमा सुइक्चा पुंडसीब मुर रागी रे जाम्शा लाक्तेकम। मिनु गेना हना यो रिम्शो पाइब मुर मलीशो बाक्नीम। मुर नेल्ल मुर साइक्चा कली बाप्शा बाक्शो बाक्नीम। मुर नेल्लेमी ब्वारद दाइश्शा आंम लोक्ब कली साइक्चा माल्शो बाक्नीम।<sup>3</sup> मेकोपुकी मरिम्शो पचा कली जोक्ब बाक्नीम। आन ठेयब मुर नु निसाफ पाइबपुकीमी घूस जाइनीम। सक्ति पाइश्शोपुकीमी मार मिम्तमे मेकोन पाइनीम। मोपा ठीक पतीके कली दूली सेल्नीम।<sup>4</sup> मेको आन दाते डा नेल्ल क्येडा रिम्शो मुर चू रवा खोदेशो बाक्ब। मेको आन दाते डा गेना हना यो रिम्शो पाइब थरपु हिरशो चू खोदेशो बाक्ब। इन खाल पाइब आन नाक्त जाक्शो बाक्ब। मेको नाक्ती इन कली कोव्रबमी इन कली गुम्थ जाक्ब। मुल मेको आन कली खतम सेल्तीक नाक्त जाक्ब।<sup>5</sup> इन वारच कली थमा मसुतीन। इन दाक्शो मुर कली थमा मसुतीन। गे नु काथा इप्शो मीश नु यो होस पा लोव्र पने। *येरमीया ९:३-४*<sup>6</sup> मारदे हना तौमी आ आफ कली मरिम्शो पाइब। तमी आ ममा आ पबर्म दूली पाइब दुम्ब। चाइमीम आ शिमी आ पबर्म मरिम्शो पाइब। आंम खिं डा मुर इन जोरी सत्रु दुम्नीम। *मत्ती १०:३५-३६*<sup>7</sup> तन्न गो परमप्रभु यावे गे कोव्रनुड। गो आं कली श्येत रे प्रॉइब परमप्रभु कली रिम्नुड। आं परमप्रभुमी आं पुंडशो नैब।

#### परमप्रभुमी श्येत रे प्रॉइब

<sup>8</sup> मिनु “आं जोरी सत्रु आं कली शुक्शी पा मग्येरसीन। गो गोल्ती हना यो, बोक्नुड। गो छिडछिडम बाक्ती हना यो, परमप्रभु यावे आं छेडछेड बाक्ब। *ओबदिया १:१२; भजन संग्रह २७:१*<sup>9</sup> आं कली निसाफ पा वारच मपवा सम्म गो परमप्रभु यावे आ गाइश्शो फाल्चा माल्नुड। मारदे हना गो मेको कली पाप पाता। मेकोमी आं कली आ शिशी तपाइक्चा कली छेडछेडम गुंडब। *येरमीया १४:७*<sup>10</sup> मेना आं जोरी सत्रुम मेको ताइनीम। मिनु मुने दोक्नीम। मारदे हना मेकोपुकीमी डोंइती ‘परमप्रभु यावे, इ परमप्रभु ते बाक्म?’ देशो बाक्तेकम। गो मेको आन खतम दुम्शो ताइनुड। मुल यो मेकोपुकी लां डा हिलो खोदेशो पा दिम्चा पुंडसीशो बाक्नीम। *भजन संग्रह ७९:१०*

<sup>11</sup> गे इन गारो लेंशा सेल्तीक नाक्त नु इन सांदपुकी डोन डोन सम्म चाक्दीत्तीक नाक्त जाक्शो बाक्ब।<sup>12</sup> मेको नाक्त अस्सुर नु इजीप्त रे शुश मुर जाक्नीम। इजीप्त रे युफ्रेटीस सम्म, समुन्द्र रे समुन्द्र सम्म नु पहाड रे पहाड सम्म डा शुश मुर इन बाक्तीक जाक्नीम।<sup>13</sup> तन्न रागी रागी नेल्ल श्येत्थ दुम्नीम। मुर आन मरिम्शो पशो आ पबर्म मोदेशो दुम्ब” दैत।

#### परमप्रभुम इस्राएल कली शिशी पाइब

<sup>14</sup> गे इन मुर आन कली कोक्केम योव्रडीन। मेको ब्वाकीम बाक्शो बगाल इन के बाक्ब। मेको रिम्शो बाक्तीकेम बाक्नीम। मेको आन कली डोंइती डा खोदेशो पा बाशान नु गिलादमी जोचा गेन। *मीका ५:३; येरमीया ५०:१९*

15 गेपुकी इजीप्त रे गूशो नाक्त खोदेशो पा गो इन कली छक लाक्वा डा गेय कौंइनुड। 16 मेको रागी रागी डा मुरपुकी शुश सक्ति पाइशो बाक्तेकम हना यो, मेको तशा, मुने दोक्नीम। मेकोपुकीम आन गुडम आन कुल सुम्सीनीम। मिनु मेको आन नोफा लाटा दुम्ब। 17 मेकोपुकीम बुस्स खोदेशो नु खपीम गेशा गाक्ब जन्तु खोदेशो पा, खप तुक्नीम। मेको आन बोल्यो दरवार रे हिंशा खिंखि पा गूनीम। मेकोपुकी हिंशा परमप्रभु यावे, आंइ परमप्रभु गे लेत्नीम। मिनु मेकोपुकीमी इन कली मान पा हिंनीम। भजन संग्रह ७२:९ 18 इन खोदेशो परमप्रभु अर्को सु बाक्बा डा? गे ठीक मपशो

क्याम्ब बाक्नीनी। इन लीशो मुर आन मरिम्शो पतीके माफ गेनीनी। गे गेना हना यो गाइक्स डा गाइक्स मबाक्नीनी। तन्न शिशी पचा कली ग्येरशा बाक्नीनी। भजन संग्रह १०३:३,८-१३ 19 मेकोमी आंइ कली लेंशा शिशी पाइब। मेकोमी आंइ पाप कली दिम्ब। गे आंइ पाप शुश लुक्च लशो समुन्द्रमी ताइक्नीनी। 20 गे याकूब कली इन थमा सुइक्तीके कौंइनीनी। मिनु अब्राहाम कली दाक्शा मप्रौइतीके कौंइताक्नी। गे साइ डौंइती आंइ किकी पिप आन कली कसम जशा लोत्र गेशो बाक्तीनी। उत्पत्ती २८:१३-१५; उत्पत्ती २२:१६-१८; लूका १:७३



# नहुम

एको किताब परमप्रभु यावे आ लोत्र पाइब नहुममी ब्रेक्शो बाक्ब।

६६३-६०६ बि. सी. मेर नहुम आ बाक्ची ना ब्रेक्शो बाक्ब।

एको किताब योना आ ब्रेक्शो किताब खोदेंशो पा निनवे सहर आ पर्वम ला परमप्रभु यावे आ लोत्र बाक्ब।

१. निनवे सहर निसाफ पाइक्चा पुंडसीब
२. निनवे सहर लडाइम फुचा नु नेल्ल रोइक्चा पुंडसीब
३. निनवे सहर डा मुर आन मरिश्शो पशो

परमप्रभु निनवे सहर तशा गाइश्शो

१ एको निनवे सहर आ पर्वम परमप्रभु यावे आ पशो लोत्र बाक्ब। एको एल्कोश डा नहुममी तशा ब्रेक्शो लोत्र बाक्ब। मेकोमी मार ब्रेक्शो बाक्ब देंशा हना, २ परमप्रभु यावे रुश पाइब नु क्येक्क लेख्ब परमप्रभु बाक्ब। परमप्रभु यावेमी आ जोरी सत्रु आन कली क्येक्क लेख्ब। मेको आन कली तशा गाइक्ब। परमप्रभु यावेमी आ जोरी सत्रु आन कली क्येक्क लेश्शा, मेको आन कली तशा शुश चुरब। *प्रस्थान २०:५; ब्यवस्था ४:२४* ३ परमप्रभु यावे ओंखां ओंखां पा गाइक्ब। तन्न मेको ठेयब सक्ति पाइश्शो बाक्ब। मिनु परमप्रभु यावेमी दोस ताइब आन कली सजाइ मगेथु मप्रोंइब। मेको आ लां फश गिवारम बाक्ब। मिनु गोस्स मेको आ खोइल डा फुरक बाक्नीम। *प्रस्थान ३४:६-७* ४ मेकोमी ठेयब समुन्द्र कली हुइक्तानु, सोइब। मेकोमी खोला नेल्ल आन कली सोइपाइक्ब। बाशान डा बी ब्यफ योव्रतीके नु कारमेल पहाड डा मारेइ मारेइ सोल सुल बेक्नीम। लेबानोन डा फू यो सोल सुल बेक्नीम। ५ मेको आ डोंइती डांडा नेल्ल खिंखि पाइनीम। मिनु पहाड दिंम दुम्नीम। रागी नु रागीम बाक्ब नेल्ल हिम्सीनीम। *भजन संग्रह ९७:५*

६ परमप्रभु यावे गाइक्तानु, मेको आ डोंइती सु राप्ने चाप्बा डा? मेको आ चुरशो सुम फाल्ने चाप्बा डा? मेको आ गाइश्शो मी खोदेंशो पा ब्राइब। मिनु मेकोमी सेरथे फुल्लु आन कली प्रोल्ब। ७ परमप्रभु यावे रिश्शो पाइब बाक्ब। मेको श्येत जशो नाक्ती खुइश्शा ब्रोंइशा बाक्तीक बाक्ब। सु मेकेर प्रोक्शा लाइबा, मेको खुइश्शा बाक्चा ताइब। *ब्यवस्था ४:३१; भजन संग्रह १:६* ८ मेकोमी बारशो ब्वाक्कुमी निनवे कली खतम सेल्ब। मेकोमी आ जोरी सत्रु आन कली खेरशा छिडछिडमी सोइक्ब। ९ मे मारदे परमप्रभु यावे कली मरिश्शो पचा कली लोत्र गारपाइक्नीनी? मेकोमी इन कली खतम पोक्ब। मेको आ पर्वम मरिश्शो पचा कली निक्शी खेयप बोक्ने मचाप्नीनी। १० आ जोरी सत्रु चूम रेशो खोदेंशो पा रेशो बाक्नीम। मिनु दुक्शो मुर खोदेंशो पा दुक्नीम। मिनु सोइवशो नल खोदेंशो पा मीम नेक्चा पुंडसीनीम। ११ निनवे, परमप्रभु यावे कली मरिश्शो पचा कली लोत्र गारपाइक्ब नु काइ मरिश्शो सल्ला पाइब इ दाते रे गूशो बाक्नीम।

१२ परमप्रभु यावे आ लोत्र मार बाक्ब देंशा हना “मेको थम सक्ति पाइश्शो नु शुश मुर बाक्तेक्म हना यो, साइश्शा क्याम्चा पुंडसीनीम। यहूदा, गो इ कली श्येत गेतन हना यो, मुल इ कली श्येत मगेनन। १३ मिनु मुल गो इ कली श्येत गेबपुकी रे प्रोंइनुड। मिनु इ कली फ्रेंशो डोरी प्रोंइनुड” दे परमप्रभु यावेमी देंशो बाक्ब।

१४ निनवे, परमप्रभु यावेमी इ पर्वम लोत्र का अरेशो बाक्ब। मेकोमी मार अरेशो बाक्ब देंशा हना “मुल रे इ नें वोइक्ब मुर सुइ मलीनीम। गो इ परमप्रभु आ खिं रे इ मुशा सेल्शो मूर्ति नु चेम्शा सेल्शो मूर्ति गुंडनुड। गो इ कली तुरस ठीक सेल्नुड। मारदे हना गे काइ मरिश्शो पाइब बाक्नेवे” दे अरेशो बाक्ब।

१५ कोइडीन, रिश्शो लोत्र पाइब का पहाडम गाक्ब। मेकोम थुं नाइक्तीक लोत्र शेंब। यहूदा डा मुरपुकी, इन चाड मानेन। इन कसम जशो खपीन। मारदे हना काइ मरिश्शो पाइब इन बाक्तीकेमी लेंशा मजाक्नीम। मेको नेल्ल क्याम्चा पुंडसाक्म।

निनवे जाम्शा लाइब

२ निनवे, इ कली खतम सेल्ब जाक्शो बाक्ब। इ बोल्यो दरवार खाल पावो। इ लां रिश्शो पा कोइडो। इ किप्शुर किम्सो। इ बोल नेल्ल गुंडदो। *यसैया ५२:७; नहुम १:११*

२ मारदे हना परमप्रभु यावेमी याक्ब आ मान ततीके लेश्शा गेब। मिनु इस्राएल आ मान ततीके यो लेश्शा गेब। मरिश्शो पाइबपुकी इ रागी लेंशा मओव्रनीम। मेकोपुकी खतम सेल्चा पुंडसीशो बाक्नीम।

३ मेको आ लडाइ पाइब आन तेक्तीक लल बाक्नीम। मिनु मेकोपुकीम लल वा फेक्शो बाक्नीम। मेको लडाइ पथ लची नाक्ती, आन बग्गी डा फलाम टल्केसीब। मेको आन तूतीके शेशा हिरनीम। ४ मेको आन बग्गीपुकी शुश दोरनीम। मेको सहर आ एर ओंथ शुश हिरशा गाक्नीम। मेको तोव्रशी खोदेंशो तांइसीनीम। चिला दाप्शो खोदेंशो पा गूनीम। ५ मेकोमी आ लडाइ पाइब आन कप्तान आन कली ब्रेख्ब। मेकोपुकी दाइल पा आ डोंइती जाक्नीम। मिनु रीब पा सहर डा गारो गे दोरनीम। मेकेर आन फाम्सीतीके सेल्शो बाक्ब। ६ ब्वाक्कु बारशा यीब। मिनु दरवार खिंखि पाइब। ७ मेको सहर डा पिपीम कली ग्याइश्शा, आ वा प्रुइश्शा लाइक्नीम। मेको आ वाइलीम नेल्ल ग्याइश्शा डोन लाइक्चा पुंडसीनीम। मिनु मेकोपुकी कुचु तुप्शा ढुकुर खोदेंशो पा रोंका पा डाक्नीम। ८ निनवे ब्वाक्कु शाइक्ना शाइक्न लाइब दोम्ली खोदेंशो बाक्ब। मिनु “रिम्दो रिम्दो” दे ब्रेश्शोनु यो, सुइमी लेश्शा मकोव्रनीम। ९ मेको आ सुन नु चांदी रोइक्तीन। आ शोंप हिक्ने मचाप्चा डा पा शुश बाक्नीम। शुश क्येट लाइब मारेइ मारेइ बाक्ब।

१० मेको सहर मारेइ मारेइ रोइश्शा श्येत्थ नु खतम पोक्चा पुंडसीशो बाक्ब। मिनु मुर आन थुं लुक्च लाइब, आन पोक्च खिंखि पाइनीम। मिनु आन ची यो खिंखि पशो बाक्नीम। मेको आन कुल बेक्शो मुर आन कुल खोदेंशो दुम्नीम। ११ निनवे सहर डा गुप्स खोदेंशो ठेयब मुर आ दरवार मार दुम्मे? मेको आ गाक्तीक नु आ तमी तौ आन बाक्तीके मार दुम्मे? आ आल मेकेर बाक्शो बाक्तेक्म। मिनु सुइमी मेको आन कली श्येत मगेम। *यसैया १३:७-८* १२ गुप्स खोदेंशो ठेयब मुरुमी आ तमी तौ आन कली शुश मार मार खुप्शो बाक्त। आ मीश कली मारेइ मारेइ चाक्शो बाक्त। आ दरवार शोंपोम प्रिंशो बाक्त। आ पुक्खी मार मार साइश्शा चाक्शा प्रिंशो बाक्ब। १३ मिनु मुर नेल्ल आन परमप्रभु यावेमी “गो इ कली काइ मदाक्थु, इ पर्वम बोक्ती। गो इ बग्गी चोशा गेनन। मिनु गुप्स आ चाइक्ब खोदेंशो इ तमी तौ तरवारमी साइक्चा पुंडसीनीम। इ रोइश्शो, इ साइश्शो रागी रे गुंडनुड। मिनु इ लोत्र कुरब मुर आन सेंदा मनेंसीब” देंशो बाक्ब।

### निनवे कली सजाइ

3 मिनु निनवे, गे हुश खाक्श पोक्ब सहर बाक्नेवे। इ दातेम शुश जोल पतीके बाक्ब। गे रोइश्शो थोक्कीम ब्रीशो बाक्नेवे। इ दातेमी रोइक्तीक गेनायो मनुष्य। *इजीकीएल ६:२, ९* 2 मेकेर युक्शो रेयके, गुगील आन रेयके, शारा आन प्रेक्शो रेयके नु बग्गी आन दोरशो रेयके नेंसीशो बाक्ब। 3 शारा डोइक्ब दोरोर पा गाक्नीम। आन टल्केशो तरवार शेशा, आन तूतीक झिल्झील पा कौइनीम। बेक्शो मुर शुश बाक्नीम। हिक्ने मचाप्चा डा पा साइश्शो मुर बाक्नीम। मुर शोल्मो पा साइश्शो बाक्नीम। मुरपुकी बेक्शो मुर तार दाइल पाइसीन सीन गाक्नीम। 4 मेको तेल्लेम खोदेंशो सहरम हिक्ने मचाप्चा डा पा मरिश्शो पतीकेमी रागी रागी डा मुर आन कली आ खोदेंशो पपाइक्तीमी। रिश्शो मीश मुर नड, देंखु पा, आ टुना मुना पतीकेमी जात जात डा मुर आन कली दूली लां खोइक्पाइक्तीमी। 5 मिनु मुर नेल्ल आन परमप्रभु यावेमी “गे इ कली काइ मदाक्थु, इ पर्वम बोक्ती। गो इ गुने इ कुल सम्म क्युक्नुड। मिनु रागी रागी डा मुर आन कली इ भेत्रे रां कौइनुडमी। राज्य राज्य डा मुर आन कली इ मुने दोक्तीक कौइनुडमी। *यसैया ४७:३* 6 गो ग्रांरा दिशो थोक्क इ तारी ताइश्शा, इ कली थम मरिश्शो पाइनुड। मिनु इ कली तशा मुर हिंतीक सेल्लुड। 7 मिनु इ कली ताइब नेल्ल इ क्येडा हिंशा, नोले शौंइसीनीम। मिनु मेकोपुकीम ‘निनवे खतम दुस्त। मेको आ पर्वम सु रौंका पाइबा डा? गो इ कली लेम्ब मुर ते थिन्ने चाजया डा?’ देंनीम।

### निनवे आ खतम दुम्तीके

8 मार, गे थेबेस सहर क्येडा यो रिश्शो बाक्नेवे? मेको सहर नील खोला आ नेक्था बाक्शो बाक्ब। आ एर ओंथ नेल्ल ब्वाक्कु बाक्ब। मिनु मेको ब्वाक्कुमी मेको कली खाल पशो बाक्ब। मेको ब्वाक्कु गारो खोदेंशो बाक्ब। *येरमीया ४६:२५* 9 एथीयोपीया रागी मेको आ सक्ति बाक्त। इजीप्त गेना हना यो आ सक्ति बाक्त। पूत नु लिबीया डा मुर मेको कली वारच पाइब बाक्तेक्म।

10 मो हना यो मेको ग्याइश्शा गुंइचा पुंइसाक्व। मेको आ आलपुकी लांम ताइश्शा साइक्चा पुंइसाक्म। आ ठेयब मुर आन कली बाजी आप्शा लाइक्तेक्म। मिनु मेको आन नेल्ल क्येडा ठेयब मुर नेल्ल साडलोमी फ्रेंचा पुंइसाक्म। *योएल ४:३* 11 गे यो दुक्शो दुम्नेवे। मिनु खूइक्थ लाइनेवे। मिनु इ जोरी सनु रे पा ब्रौंइचा कली खूंइसीतीक माल्लेवे। *येरमीया २५:१५* 12 इ बोल्यो दरवार नेल्ल फोवशी रवा आ डौंइती मीशो गेडा खोदेंशो बाक्नीम। मेको रवा हिंशोनु, मेको ब्वाइब आन शोवमी दोक्नीम। 13 इ लडाइ पाइब आन कली कोवडो। मेको मीश मुर खोदेंशो बाक्नीम। इ रागी डा ठेयब लाप्चो इ जोरी सनु आन कली रोक्सीशो बाक्नीम। लाप्चो आन आगलो नेल्ल मीम नेक्शो बाक्नीम।

14 गे पुम्चा पुंइसीनेवे। मेको नाक्ती कली ब्वाक्कु प्रिंशा वोतो। इ गारो बोल्यो सेलो। हिलो निशा, इंटा सेलो। 15 मेकेर इ कली मीम दाक्ब। तरवारमी इ कली साइक्ब। मिनु मालेपुकीम मार मार नेक्शो खोदेंशो पा इ कली नेक्ब। गे माले खोदेंशो पा सोशो बोशो दुमीन। मिनु घांस ब्वाइब माले खोदेंशो पा सोशा बोशा शुश दुमीन। *योएल १:४* 16 गे सरीड डा सौरुल क्येडा इ ग्याप्ब लेयब मुर शुश सेल्लीवी। मेको माले खोदेंशो पा आन कुशुल ताइश्शा बेरनीम। 17 इ कली खाल पाइब घांस ब्वाइब माले खोदेंशो बाक्नीम। मिनु इ सरकार डा ठेयब मुर माले आन हुल खोदेंशो बाक्नीम। मेको ग्यू दुम्मेनु, गारो तार बाक्नीम। मिनु नां पवानु, मेको नेल्ल बेरशा लाइनीम। मेको ते लाइनीमी, सुइमी मतुइक्नीम।

18 अस्सुर डा पिप, इ गोठलापुकी इप्शो बाक्नीम। इ ठेयब मुरपुकी नाइश्शा गोल्शा बाक्शो बाक्नीम। इ मुर नेल्ल डांडाम ब्रशो बाक्नीम। मिनु मेको आन कली खुप्ब सुइ मबाक्नीम। 19 इ गार कली मारेडम यो सापाइक्ने मजाप्ब। इ गार बेक्चा डा बाक्ब। मिनु इ पर्वम लोव नेंब मुर नेल्ल शुश हिंनीमी। मारदे हना इ गेनायो मनुष्य मरिश्शो पतीकेमी सुइ ब्रौंइने मचाप्शो बाक्तेक्म” देंत।

## हबकुक

एको किताब हबकुकमी ब्रेक्शो बाक्ब। हबकुक आ अर्थ “मुब्ब मुर”, “शुश दाक्ब मुर” बाक्ब। मेको परमप्रभु यावे आ लोत्र पाइब बाक्त। कल्दी आन लडाइ पाइबपुकी ६०५ बि. सी.म निनवे ग्राशा, बारना बारन लशो बाक्तेक्म। हबकुकम एको किताब यहूदा डा पिप योसीयाह आ पाला ६३९-६०९ बि. सी.म नु यहूदा डा पिप योयाकीम ६०९-५९८ बि. सी.म आस सासन पचा क्येडा डोंइती ब्रेक्शो बाक्त। हबकुक येरमीया आ लोत्र पची ना यो बाक्शो बाक्त। परमप्रभु यावेमी इस्राएली आन कली निसाफ पाइब। इस्राएली आन कली श्येत गेब सजाइ गेचा पुंडसीनीम। ठीक पाइब आन थमा सुइक्तीके ब्रोंइनीम।

### मरिश्शो दुम्तीके आ पर्वम लोत्र

1 एको परमप्रभु यावे आ लोत्र पाइब हबकुकमी परमप्रभु यावे रे पा नोले दुम्ब ततीक तशो बाक्ब। 2 मिनु हबकुकमी “परमप्रभु यावे, गो गेना सम्म इन कली ‘वारच पन’ दे पुंडनुडा? गे काइ मनेनीनी? ‘हुश खाक्श पोक्नीम’ दे थोइनुड। तन्न गे काइ मप्रोंइनीनी। 3 गे मारदे आं कली मरिश्शो पशो तपाइक्नीनी? गे मारदे आं कली श्येत जशो तपाइक्नीनी? खतम सेल्तीके नु जिचा पोक्तीक आं डोंइती बाक्नीस। तेइ तेइ राम्शी पचा नु जिचा ला पोक्नीम। 4 मिनु इन अरेशो मपाइनीम। ठीक पाइबपुकीमी ग्राने मचाप्नीम। इन अरेशो मटीबपुकीमी ठीक पाइब आन कली पुम्नीम। मिनु निसाफ पतीके दूली दुम्ब” देती।

### कल्दी आन पर्वम लोत्र पशो

5 मिनु परमप्रभुमी आं कली “रागी रागी डा मुर आन कली कोत्रडो। मेको आन कली कोत्रशा, गे छक लाक्नेवे। मारदे हना इन ब्रोंइतीक नाक्तीमी गेय का पशो बाक्ब। मेको इ कली देंतेक्म हना यो, गे मेको थमा मसुइक्नेवे। प्रेरित १३:४१ 6 गो कल्दी डा मुर आन कली पोक्नुडमी। मेको हिंचा डा नु शिशी मपाइक्ब बाक्नीम। मेकोपुकीमी रागी नेल्ल कली ग्राशा, मुर आन खिं नु बाक्तीके रोइक्नीम। 7 मेकोपुकी श्येत गेब नु शुश हिंचा डा बाक्नीम। मिनु ‘मार ठीक निसाफ पतीके बाक्बा? सु मान ताइब बाक्बा’ दे आंमान देंनीम। 8 मेको आन शारा जोइ आन क्येडा रीब पा दोरब बाक्नीम। मिनु नाक्दो गूब फर खोदेंशो पा साइक्ब बाक्नीम। मेको आन शारा बारनीम। मेको आन शारा डोइक्ब डोन रागी रे जाक्नीम। ककाकुली खोदेंशो पा बेरशा, रीब पा सिखार ग्याइक्नीम। सेफन्याह ३:३ 9 मेकोपुकी डोंइती बारशा, हुश खाक्श पोक्वा कली जाक्नीम। मिनु मुर आन कली बाल्वा खोदेंशो हिक्ने मचाप्चा डा पा शुश ग्याइश्शा, खुप्नीम। 10 मिनु पिप आन पर्वम शुक्शी पाइनीम। हुकुम पाइब आन पर्वम तोक्शो लोत्र पा रिन्नीम। मेकोपुकीमी बोल्यो दरवार आन पर्वम ‘गो ग्रानय’ दे खप तेल्शा डोइश्शा लशा, आंम के सेल्नीम। 11 मेको फश खोदेंशो पा गाक्नीम। मिनु पाप पा दोस ताइब दुम्नीम। मेकोपुकीमी आंम सक्ति कली ला थमा सुइक्नीम” देंत।

### हबकुकम परमप्रभु कली पुंडशो

12 मिनु हबकुकमी “परमप्रभु यावे, आं परमप्रभु, गे का ला आं परमप्रभु बाक्नीनी। गो मबेक्नीकी। परमप्रभु यावे, गे मेको आन कली निसाफ पचा कली योत्रतीनी। गे, आं सेरथे फुल्लु, गे मेको आन कली सजाइ गेचा कली वोइक्तीनी। येरमीया १०:२४ 13 गे मरिश्शो पशो काइ तने मचाप्नीनी। मरिश्शो पशो फाल्ने मचाप्नीनी। मोदेंशो बाक्त हना यो, थम मरिश्शो पाइब आन कली तशा, मारदे मारदे मर्देनीनी? इन अरेशो मटीबपुकीमी आंम क्येडा ठीक पाइब मुर आन कली सदमेनु, गे मारदे सिक्सी पा बाक्नीनी? 14 गे मुर आन कली समुन्द्र डा डांइ खोदेंशो सेल्तीनी। सासन पाइब मबाक्शो ग्रेशा गाक्ब आइक्च जन्तु खोदेंशो सेल्तीनी।

15 मिनु आन जोरी सत्रुमी नेल्ल आन कली बोल्सीमी खोदेंशो पा रेल्तीम। मेको आन कली ग्याइलीम पिक्शा, गुंडनीम। आन ग्याइक्तीकेमी खुप्नीम। मिनु डांइ रेशो खोदेंशो पा ग्येरशो बाक्नीम। 16 मोपतीके मेकोपुकीमी आन ग्याइल कली क्योरशा चढ़ेनीम। आन ग्याइक्तीके कली चोशा चढ़ेनीम। मारदे हना मेको ग्याइल नु ग्याइक्तीके रे पा शुश तशा, ब्रोत्रशो जाइनीम। 17 मार, मेकोपुकीमी आन ग्याइलीम रेन्ना रेन्न, रागी रागी डा मुर आन कली शिशी मपथु, खतम सेल्ना सेल्न बाक्वा गेनीनी?” दे हबकुकमी परमप्रभु कली देंत।

### परमप्रभुमी लोत्र लेशो

2 गो नेल्ल तचा डा पा राप्शा बाक्नुड। गो गारो डोइश्शा कोत्रनुड। मिनु परमप्रभु यावेमी आं कली मार देंबा, मेको नेल्ल तशा नेंशा बाक्नुड। आं कली मारदे लोत्र लेप्बा कों, दे रिम्नुड। यसैया २१:८ 2 मिनु नोले परमप्रभु यावेमी आं कली “गे इ तशो नेंशो ब्रेक्तो। रिम्शो पा रुप्चा डा पा फुल्लु तार ब्रेक्तो। मिनु सु मेकेर लाइबा, मेकोम रीब पा पढेने चाप्ब। यसैया ३०:८; प्रकाश १:११, १९ 3 मारदे हना इ तशो आं देंशो नाक्ती जाक्ब। मेको दीसा नित्थी मद्रुम्त हना यो, मेको कली रिम्शा बाक्को। मेको थमा पा दुम्ब। देश मपाइब। इजीकीएल १२:२३; २ पत्रुस ३:९ 4 गे ठेयब लेशो कली कोत्रडो। मेको आ थुं मरिश्शो बाक्ब। तन्न ठीक पाइब आं कली थमा सुइश्शा ब्रोंइब। 5 मिनु शुश शोंप कली थमा सुइक्वा दूली बाक्ब। ठेयब लेशो मुर मलीब। मेको आ शोत्र तुरस खोदेंशो पा पाक्शा बाक्ब। बेक्पाइक्ब खोदेंशो पा गेनायो मरूब। रागी रागी डा मुर नेल्ल आन कली खुप्शा आंम के सेल्ब” देंत।

### मुर आन कली दिप्ब कली हुइश्शो

6 मिनु “मुर नेल्लेमी मोदेंशो मुर आ पर्वम मुने तोक्वा डा लोत्र पाइनीम। मेको आ पर्वम शुक्शी लोत्र पा, आबी आबी, गे अरु मुर आन शोंप आंम कली तेल्तीवी। गे गेना सम्म अरु मुरुमी इ कली गेशो क्येट आंम कली वोइक्नेवे? 7 मार, इ कली जेर गेबपुकी कालेमीन मबोक्नीमी डा? मेकोपुकी सेंसीशा इ कली महिंपाइक्नीमी डा? मेना गे श्येत जाइब दुम्नेवे। 8 मारदे हना गे रागी रागी डा शुश मुर आन शोंप रोइक्ताक्नी। मुल चहिं इ साइक्तीक रे ब्रोंइशोपुकीमी इ के बाक्शो नेल्ल रोइक्नीम। गे मुर आन कली हुश खाक्श पोक्तीवी। गे रागी, सहरपुकी नु मेकेर बाक्ब मुर नेल्ल आन कली खतम सेल्तीवी” देंत। हबकुक २:१७

9 “आबी आबी, गे मरिश्शो पा क्येट चेम्नेवे। मोपा इ खिं डा मुर आन कली खतम सेल्नेवे। तन्न गे ‘श्येत मजाइनुड’ दे इ खिं इर सेल्तीवी। 10 गेम शुश जात जात डा मुर साइक्तीके, इ खिं डा मुर आन कली मुने तोक्शा, साइक्वा पुंडसीनेवे। 11 गारो डा फुल्लुमी इ पर्वम ‘वारच पने’ दे ग्रीनीम। मिनु थाम आ तार डा शीमी मेको कली लोत्र लेप्ब” देंत। लूका १९:४०

12 “आबी आबी, गे हुश खाक्श पोक्तीकेमी, सहर का सेल्तीवी। गे ठीक मपतीकेमी सहर आ जग वोइक्ब बाक्नेवे। येरमीया २२:१३; मीका ३:१०

13 जात जात डा मुर आन गेय नेल्ल मी कली ला दुम्ब। रागी रागी डा मुरपुकी मलीचा डा गेय पचा कली सोम्सीनीमी, दे मुर नेल्ल आन परमप्रभु यावे आ देशो मबाक्बा डा? *येरमीया ५१:५८* 14 तन्न रागी नेल्ल परमप्रभु यावे आ सक्ति डा तुइक्तीकेम ब्रीशो बाक्ब। ब्वाक्कुमी समुन्द्र ब्रीशो खोदेशो पा ब्रीशो बाक्ब” दैत। *यसैया ११:९*

15 “आबी आबी, गे इ नेक्था बाक्ब मुर आन कली मुने तोक्चा कली इ दुक्तीक थोवक तुइशा दुक्पाइक्नेवे। 16 गे ठेयब दुम्चा क्येडा शुश मुने दोक्नेवे। मुल इ पालो जाक्त। गे यो तूशा, दुक्शा दाइल पांडसो। परमप्रभु यावेमी आ ग्युरा गुइ डा कचौरा इ कली गेब। मिनु इ ठेयब दुम्तीके मुने दोक्ब। *येरमीया २५:१५, २६* 17 गे लेबानोन डा ठेयब रवा नेल्ल तिम्तीवी। मेकेर डा ब्वाकी डा जन्तु नेल्ल आन कली मरिम्शो पाप्तीवी। मेको इ मरिम्शो पतीके क्येक्क लेत्चा पुंडसीब दुम्नेवे। मारदे हना गे मुर आन कली हुश खाक्श पोक्तीवी। मिनु रागी, सहरपुकी नु मेकेर बाक्ब मुर नेल्ल आन कली खतम सेल्लतीवी” दैत।

### मूर्तिम मारेइ पने मचाप्नीम

18 मिनु “मूर्तिम मार गेय पने चाप्बा डा? मुर आ चेम्शो मूर्ति जोल ला बाक्ब। मारदे हना मेको चेम्बमी आंम चेम्शो मूर्ति कली थमा सुइक्ब। तन्न मेको मूर्ति ब्वाक्ने मचाप्ब। *यसैया ४४:१०-२०* 19 आबी आबी, गे शी कली ‘सेंसो’ दे ब्वाक्ने मचाप्ब फुल्लु कली ‘बोक्को’ देंनेवे। मार, मेकोमी मुर कली शेंने चाप्बा? मेको सुन चांदीमी गिल्शो बाक्त। तन्न मेको नु काइ ब्रॉइतीक सोक्त मबाक्ब। *भजन संग्रह ११५:४-८* 20 मिनु परमप्रभु यावे आंम आ बाक्तीकेमी बाक्ब। रागी नेल्ल मेको आ डोंइती मान पा सिक्सी पवल” दैत। *भजन संग्रह ११:११; भजन संग्रह ७६:९; जकरिया २:१७; प्रेरित ८:३*

### हबकुक ग्येरसीशो

3 परमप्रभु यावे आ लोत्र पाइब हबकुकमी परमप्रभु यावे कली लोत्र पा कुम्सो पा ठेयब सेल्लु। 2 “परमप्रभु यावे, गो इन पशो नेल्ल नैता। परमप्रभु यावे, गो इन पशो तशा, इन कली ठेयब सेल्लुड। आंइ ब्रॉइतीक नाक्तीमी मेको लेंशा कोंइदीन। मेको तुइक्पतीन। गे गाइक्ताक्नी हना, यो इन शिशी मिम्तीन। 3 परमप्रभु तेमान रे पा जाक्त। मेको का ला परमप्रभु पारान डांडा रे जाक्त। ठेयब सेंदा पा आ ठेयब दुम्तीकेमी सरीड सुम्शो बाक्त। आ मान ततीकेम रागी नेल्ल ब्रीशो बाक्त। *ब्यवस्था ३३:२*

4 मेको आ छेडछेड नां दाप्शो खोदेशो बाक्त। आ गुइ रे पा चेररे गूशो बाक्त। मेकेर आ सक्ति खुइश्शो बाक्ब। 5 आ डोंइती मुर आन कली

साइक्तीक रोइ लत। आ नोले मुर बेक्तीक रोइम खोइक्तु। 6 मेको गाक्शा नाइश्शा, रागी हिम्पाइक्तु। मेकोमी कोव्रडानु, रागी रागी डा मुर आन कली खिंखि पपाइक्तु। गेना हना यो बाक्ब डांडा ब्रेल्लनीम। मेको गेना हना यो लीब पहाड नेल्ल यशो खोदेशो पा दिंम दुम्तेक्म। मेकोमी साइ डोंइती रे मोदेशो पशो बाक्त। *भजन संग्रह १०४:३२* 7 गो कुशन रागी डा ताम्बुमी बाक्ब आन कली श्येत जशो ताता। मिदयान डा ताम्बु आन सुम्तीके हिम्साक्म। 8 परमप्रभु यावे, गे खोलापुकी नु गाइक्तीनी? गे ठेयब समुन्द्र आ पर्बम चुरनी? इन शारा नु बग्गी आन कली लां कोंइशा ग्रातीनी। 9 गे इन लिब्रा गुंइताक्नी। गे इन ब्रा ते देंनी मेक लत। गे खोला शाइक्तीकेमी रागी कली चेत्तीनी। 10 मिनु डांडापुकी इन कली तशा रोम्सीनीम। ठेयब रेड यित। ठेयब समुन्द्र आ रेयके नैसाक्व। *भजन संग्रह ७७:१७* 11 इन आप्शो ब्रा जिल पा ब्रशा बरेमेनु, इन तूतीक जिल्मील पवानु, नां मसोव। मिनु तास्ला सरीडम नांडसाक्व। *यहोसु १०:१३* 12 गे गाइश्शा रागी तार गाक्तीनी। चुरशा रागी रागी डा मुर आन कली दिप्शा साइक्तीनी। 13 गे इन आंम योत्रशो मुर आन कली प्रोंइचा, दे जाक्तीनी। इन तेल लुक्शो मुर कली प्रोंइथ जाक्तीनी। तन्न गे इन अरेशो मटीब रागी डा ठेयब मुर आ खिं तला तारी रे जग सम्म प्रेत्तीनी। *भजन संग्रह १८:८, १६* 14 मिनु गे मेको आ लडाइ पाइब आन ब्राम आन पिया खिंत्तीनी। मेकोपुकी खुइश्शा बाक्ब पुडग मुर आन कली साइक्चा थुं पा फश गिवार खोदेशो पा जाक्शो बाक्तेक्म। 15 गे ठेयब समुन्द्रमी आन शारा ओव्रपाइश्शा, ठेयब ब्वाक्कु नेल्ल शाक्पाइक्तीनी। *प्रस्थान १४:२६-२९*

16 गो इन सेंदा नैनुनु, खिंखि पाता। आं शोव यो खिंखि पात्तु। आं रुश आगा नेल्ल मुक्ताक्मे। खोइल खिंखि पात्तु। मो हना यो आंइ कली मरिम्शो पाइब मुर आन कली श्येत दुम नाक्ती कली रिम्शा बाक्ती।

17 फोत्रशी रवा मबोइक्ब। अडगुर बोट मसिप्ब। तेल रवाम फल काइ मसिप्ब। रूमी अन्न मसिप्ब। गोठीम बी ब्यफ नु क्यारश भेडा मबाक्त हना यो, 18 गो परमप्रभु यावे कली तुइश्शा ग्येरसीनुड। मिनु आं कली श्येत रे प्रोंइब परमप्रभु कली ठेयब सेल्शा ग्येरसीनुड। *यसैया ६१:१०* 19 परमप्रभु यावे, आं परमप्रभु आं सक्ति बाक्ब। मेकोमी आं खोइल किश्श आ खोइल खोदेशो सेल्ब। मेकोमी आं कली ठेयब लाइश्शो डांडामी लतीक सक्ति गेब” दे कुम्सो पात्तु।

मेको कुम्सो शेंब कली तार पाइश्शो ताप्तीके ताप्शा, मेको कुम्सो पपाइक्चा माल्ब। *भजन संग्रह १८:३४*

## सेफन्याह

एको किताब सेफन्याहमी ब्रेक्शो बाक्ब। मेको मुर आ पर्वम शुश मतुंडसीब। मेको हिज्कीयाह आ युड बाक्ब। मेको हिज्कीयाह पिप हिज्कीयाह यो दुम्ने चाप्ब। एको किताब आइक्च बाक्ब हना यो, ख्रीस्त आ पर्वम शुश लोत्र बाक्ब। पिप योसीयाहम सासन पची ना ६४१-६१० बि. सी. मेर सेफन्याहमी एको किताब ब्रेक्शो बाक्ब। अरेशो किताब थित्चा क्येडा डोंइती एको किताब ब्रेक्शो बाक्ब, दे मिन्मीम।

१. परमप्रभु यावे आ निसाफ पतीक नाक्त जाक्ब।
२. निसाफ पशो मार कली बाक्बा?
३. अर्को रागीम यो निसाफ ताइनीम।
४. नोले डा रिम्शो दुम्तीके जाक्ब।

### डोंइती डा लोत्र

१ यहूदा डा पिप आमोन आ तौ योसीयाहमी सासन पवा ना परमप्रभु यावेमी सेफन्याह कली लोत्र पाप्तु। सेफन्याह आ आफ कूशी बाक्माक्त। कूशी आ आफ गेदाल्याह बाक्माक्त। गेदाल्याह आ आफ अमारयाह बाक्माक्त। मिनु अमारयाह आ आफ हिज्कीयाह बाक्माक्त।  
*येरमीया १:२*

नेल्ल खतम दुम्तीक नाक्त जाक्ब

२ परमप्रभु यावेमी मार लोत्र पाप्तु दँशा हना “गो रागी नेल्ल डा मारेड मारेड खतम सेल्लुड।<sup>३</sup> मुर नु बी ब्यफ, क्यारश भेडा, जन्तु नेल्ल आन कली खतम सेल्लुड। सरीड डा चिक्ब, समुन्द्र डा डांइ नेल्ल आन कली साइक्नुडमी। रागी डा मुर नेल्ल आन कली खतम सेल्लुड। परमप्रभु यावे आ अरेशो मटीब आन कली दाइल पपाइक्नुड। गो मुर नेल्ल आन कली रागी नेल्ल रे क्याम्नुड। *मत्ती १३:४१*

यहूदा डा मुर आन कली हुडशो

४ गो यहूदा रागी नु यरूसलेममी बाक्ब मुर नेल्ल आन पर्वम आं गुड क्युक्नुड। मिनु मेकेर बाल देवता कली पूजा पतीके नु मेको कली चढेब आन नें मलीचा डा पा क्याम्नुड। *२राजा २३:५; होसे १०:५*<sup>५</sup> खिं तार बाक्शा, नां तास्ला नु सोरुल आन डोंइती बाप्ब, परमप्रभु यावे आ डोंइती बाप्शा आ नें थिशा कसम जाइब। मोलेक आ नें यो थिशा कसम जाइब। *येरमीया १९:१३; येरमीया ४९:१*<sup>६</sup> गो, परमप्रभु यावे, आं कली ममाल्थु, मपुंडथु आं नोले खोइक्चा प्रोंइशा, नोले शोंइसीब आन कली खतम पोक्नुडमी।

७ परमप्रभु, परमप्रभु यावे आ डोंइती सिक्सी पने। मारदे हना परमप्रभु यावे आ नाक्त जाक्चा चिक्शो बाक्ब। परमप्रभु यावेमी चढेतीक चाड का ठीक पाप्तु। परमप्रभु यावेमीआ ब्रेशो मुर आन कली ठीक सेल्लतीमी। *हबकुक २:२०*<sup>८</sup> परमप्रभु यावे आ चढेतीक नाक्त गो सरकार आ ठेयब मुर, पिप आ तौपुकी नु अर्को रागी डा मुर आन वा फेक्ब नेल्ल आन कली सजाइ गेनुडमी। *हबकुक २:२०*<sup>९</sup> मेको नाक्त सु सु लाप्चो रे ओवनीमी, मेको आन कली सजाइ गेनुड। मारदे हना मेकोपुकीमी आन होत्रप आ खिं तुम्मुचा, जिचा खेचा नु जोल पतीकेमी प्रिनीम” दँत।

१० मिनु परमप्रभु यावेमी “मेको नाक्त डांइ लाप्चो रे ठेयब सँदा पा डाक्शो, नक सहर रे रोंका पशो नु डांडा रे पा ठेयब रेयके पशो नेंसीब।<sup>११</sup> मे माकतेशम बाक्बपुकी रोंका पने। मारदे हना ग्याक्ब लेयब नेल्ल खतम दुम्तेक्म। चांदी नाक्ब नेल्ल क्याम्चा पुंडसाक्म। *माकतेश यरूसलेम सहर डा बजार का बाक्त।*<sup>१२</sup> मेना गो यरूसलेममी बत्ती दाशा मुर आन कली माल्शा, सजाइ गेनुड। मारदे हना मेकोपुकीमी अल्सी पा आन थुंमी

‘परमप्रभु यावेमी रिम्शो नु मरिम्शो मारेड यो मपाइब’ दे मिन्मीम।<sup>१३</sup> मेको आन शोप नेल्ल रोइक्चा पुंडसीनीम। मेको आन खिं ब्रेल्लनीम। मेकोपुकीमी खिं सेल्लेक्म हना यो, मेकेर बाक्चा मताइनीम। मेकोपुकीम अडगुर खुम्तेक्म हना यो, अडगुर शांबु तूचा मताइनीम। *ब्यक्था २८:३०, ३९; आमोस ५:११*

परमप्रभु आ ठेयब नाक्त

१४ परमप्रभु यावे आ ठेयब नाक्त जाक्चा चिक्शो बाक्ब। मेको रीब पा जाक्ब। नोफा दाइश्शा नेनीन। परमप्रभु यावे आ ठेयब नाक्त, श्येत डा नाक्त बाक्ब। लडाइ पाइबपुकी थम ठेयब सँदा पा ग्रीनीम। *योएल १:१५*<sup>१५</sup> मेको नाक्त गाइक्चा डा नाक्त दुम्ब। श्येत नु हिंचा डा नाक्त दुम्ब। नेल्ल ब्रेल्लतीक नु खतम दुम्तीक नाक्त दुम्ब। मेको नाक्त छिडछिड नु हिंचा डा दुम्ब। गोस्सुम गिल्शो नु शुश छिडछिड डा नाक्त दुम्ब।<sup>१६</sup> गारोम हिरशो सहरपुकी नु गारो डा कुनाम बाक्शो लाइश्शो खिं आन कली लडाइ तोचा कली तुराही ताप्शो नु लडाइ डा रेयके पशो नेंसीब। *येरमीया ३०:७*<sup>१७</sup> गो मुर आन कली शुश श्येत गेनुड। मिनु मेको मिक्च मताइब खोदँशो पा गाक्नीम। मारदे हना मेकोपुकीम परमप्रभु यावे आ डोंइती पाप पाम्तेक्म। मेको आन हुश फुरक खोदँशो नु श्ये ख्री खोदँशो पा ताइक्नीम।<sup>१८</sup> परमप्रभु यावे गाइक्ची नाक्ती मेको आन चांदीमी मप्रोंइब। मेको आन सुनमी यो मेको आन कली प्रोंइने मचाप्ब। मेको आ मी खोदँशो पा गाइक्तीकेमी रागी नेल्ल क्रोइक्ब। मेकोमी रागीम बाक्ब नेल्ल आन कली थम मरिम्शो पा साइश्शा क्याम्ब” दे परमप्रभु यावेमी दँत। *इजीकीएल ७:१९*

पलिस्ती आन कली लोत्र

२ मिनु मेकोमी “गे मुने मपाइश्शो रागी डा मुर, गे नेल्ल काथा बुक्कीन।

२ इन नाक्त फशेम बेरशो भूस खोदँशो पा लाक्नीम। आ योत्रशो नाक्त जाक्चा, परमप्रभु यावे आ शुश गाइश्शो इन तार जुक्चा नु परमप्रभु यावे आ गाइश्शो नाक्त जाक्चा क्येडा डोंइती,<sup>३</sup> गे रागी डा परमप्रभु यावे आ डोंइती ठीक पाइब नु ब्रेशो मुरपुकी परमप्रभु यावे कली मालीन। गे ठीक पाइब नु ब्रेशो थुं पाइश्शो दुम्चा मालीन। मिनु परमप्रभु यावेमी आ गाइश्शो नाक्त इन कली खूइक्चा कों? *आमोस ५:१५*<sup>४</sup> गाजा मुर मबाक्थु, श्येत्य दुम्ब। अश्कलोन नेल्ल ब्रेशशा खतम दुम्चा प्रोंइसीब। नाक्ती उइक्थ दुम्मेनु अशदोद डा मुर खेरचा पुंडसीनीम। एक्रोन चहिं तुल्चा पुंडसीब।

५ आबी आबी, समुन्द्र आ शुंगीम बाक्ब केरेथी जात डा मुर परमप्रभु यावे आ लोत्र इन कली ‘गे पलिस्ती आन रागी बाक्ब, कनानी, इ कली सुइ मुर मबाक्चा डा पा खतम सेल्लुड’ दँत। *१सामुएल ३०:१४; येरमीया ४७:-*<sup>६</sup> केरेथी आन बाक्तीक समुन्द्र आ शुंगी डा रागी बी ब्यफ, क्यारश भेडा योत्रतीके दुम्ब। भेडा गोठला आन बाक्तीक दुम्ब। मेको आन भेडा मेकेर

वोडक्नीम। 7 मेको समुन्द्र आ शुंगी डा रागी यहूदा आ खिं डा लीशो मुर आन के दुम्ब। मेकोपुकीमी मेकेर आन बी ब्यफ, क्यारश भेडा योवनीम। नाक्दो मेकोपुकी अश्कलोन आ खिंपुकीम इप्नीम। मारदे हना परमप्रभु यावे, आन परमप्रभुमी मेको आन कली कोव्रब। मिनु मेको आन कली डोंइती खोदेशो पा रिम्शो पा बाक्वा गेब" देंत। सेफन्याह ३:२०

मोआबी नु अम्मोनी आन लोव

8 मिनु "गो मोआब नु अम्मोनी आन शुक्शी पशो नेंता। मेकोपुकीमी आं मुर आन कली मरिम्शो पाक्वेम। मेको आन रागी कली 'खतम पोक्नीक' दे हिंच कोंइताक्म। येरमीया ४८:-; येरमीया ४९:१-६ 9 मोपतीके मुर नेल्ल आन परमप्रभु यावे, इस्राएली आन परमप्रभुमी 'गो ब्रोंइशा बाक्शो खोदेशो पा, मोआब सोदोम खोदेशो नु अम्मोन गोमोररा खोदेशो दुम्ब। मेको आन बाक्तीके चूले वाशो नु हिक्सी खाल्टा बाक्शो रागी दुम्ब। मेको गेना हना यो मुर मबाक्तीक रागी दुम्ब। आं लीशो मुरपुकीमी मेको आन मार मार रोडक्नीम। मिनु आं रागी डा ब्रोंइशो मुरपुकीमी मेकेर हुकुम पाइनीम। उत्पत्ती १९:२४-२५ 10 मेको आन ठेयब लेशो आ पा डा मोदेशो ताइनीम। मारदे हना मेकोपुकीमी मुर नेल्ल आन परमप्रभु यावे आ मुर आन कली शुक्शी पा आंम कली ठेयब सेल्शो बाक्नीम। 11 परमप्रभु यावेमी मेको आन कली थम मरिम्शो पाइब। रागी डा देवी देवता नेल्ल आन कली खतम पोक्ब। नेल्ल आन बाक्तीकेमी बाक्शा, मेको आ डोंइती बाप्चा माल्नीम। रागी रागी समुन्द्र आ सुंगी नु टापु डा मुर नेल्ल परमप्रभु यावे आ डोंइती बाप्नीम' देंत।

एथीयोपीया नु अस्सुर कली लोव

12 गे एथीयोपीया डा मुर यो आं तरवारमी साइक्वा पुंडसीनीनी" दे परमप्रभु यावेमी देंत। इजीकीएल ३०:९ 13 मेकोमी उत्तर गे आ गुड दिंशा अस्सुर कली खतम पोक्ब। निनवे कली कोक्त नु गोरशो रागी खोदेशो सेल्ब। नहुम १:१

14 मेकेर बी ब्यफ नु ब्वाकी डा जन्तु नेल्ल इप्नीम। गोरशो रागी डा बुक्स नु ग्रीब बुक्सपुकीम मेको आन थाम तारी ग्योव्र सेल्नीम। बुक्स झेल रे पा ग्रीनीम। खदपुकी लाप्चोम ग्रीनीम। मिनु दारपाइक्वा कली क्येप्शो शी नेल्ल लां रे तांडसीब। यसैया १३:२१; यसैया ३४:११ 15 मेको महिंथु थुं नाइश्शा बाक्ब सहर मबाक्बा डा? मेकोमी आंम कली "गो गोन नड। आं क्येडा लाक्शा अरु सुइ मबाक्नीम" देंत। मेको मुल दोदेशो पा ब्रेशो दुम्मे? मेको ब्वाकी डा जन्तु आन बाक्तीके दुम्त। मेको लां रे पा गाक्ब नेल्ल मेको तशा आबी, दे हिंशा खिंखि पाइनीम। यसैया ४७:८

यरूसलेम आ नोले डा नाक्त

3 मेकोमी "आं देंशो गेनायो मटीब, ग्रांघा दिचा डा नु मुर आन कली दिप्ब सहर बाक्ब। 2 मेकोमी सुइ आन देंशो मटीब। रिम्शो पचा कली हुइश्शो लोव्र मनेंब। मेकोमी परमप्रभु यावे कली थमा मसुइक्थु, आ परमप्रभु आ नेक्था मजाक्ब।

3 मेको सहर डा सरकार डा ठेयब मुर ग्रीब गुप्स खोदेशो बाक्नीम। मेको आ निसाफ पाइब नाक्दो गाक्शा, सुनी सम्म मारेइ महेंब फर नम। इजीकीएल २२:२७ 4 मेको आ परमप्रभु यावे आ लोव्र पाइबपुकी हेंथे पाइब नु थमा मसुइक्वा डा मुर बाक्नीम। मेको आ चढ़ेबपुकीमी परमप्रभु यावे आ

खिं ग्रांघा दिशो सेल्नीम। मेकोपुकीम परमप्रभु यावे आ अरेशो लोव्र हेंथे सेल्तेक्म। मीका ३:११ 5 मेको आन दातेम बाक्ब परमप्रभु यावे ठीक पाइब बाक्ब। मेकोमी मारेइ मरिम्शो मपाइब। मेकोमी सुनी कुस कुस निसाफ पाइब। तेकोइ सुनी मप्रोंइब। तन्न ठीक मपाइबपुकी मुने दोक्शा लल मजिनीम।

6 गो रागी रागी डा मुर आन कली खतम पोक्ता। मेको आन ब्रोंइशा बाक्तीक खिं प्रेशा गेता। मेको आन लां नेल्ल श्येत्थ सेल्ता। मेकेर रे सुइ मगाक्नीम। मेको आन सहरपुकी श्येत्थ बाक्नीम। मेकेर सुइ मुर मबाक्नीम। 7 मो पडा नोले मेको सहर डा मुरपुकी आं कली तशा मान पा हिंनीम। आं देंशो पाइनीम, दे मिम्ताड। तन्न मेकोपुकीमी डोंइती क्येडा मरिम्शो गेय पाक्तेक्म" देंत।

8 परमप्रभु यावेमी "मोपतीके लोव्र पचा कली गो मजाक्वा सम्म आं कली रिम्शा बाक्कीन। गो रागी रागी डा मुर आन कली खुण्ड। गो राज्य राज्य डा मुर आन कली गुम्पाइक्नुड। मेको आन तारी आं गाइश्शो मोइक्नुड। मारदे हना आं मी खोदेशो पा गाइश्शोमी रागी रागी नेल्ल ग्राइश्शा खतम दुम्नीम। योएल ४:२; भजन संग्रह ७९:६

9 मेना जात जात डा मुर आन कली रिम्शो लोव्र पाइब सेल्नुड। मिनु मेको नेल्लेमी परमप्रभु यावे कली पुंडशा ठेयब सेल्मेक्ल। मेको नेल्ल गारशा आ गेय पामेक्ल। 10 मिनु आं नें ठेयब सेल्ब एथीयोपीया डा खोला आइक्वी हांम डा ब्रशा बाक्शो आं मुरपुकीमी आं कली चढ़ेतीक थोव्रक चाक्नीम। भजन संग्रह ६८:३२; यसैया १८:१; प्रेरित ८:२७

11 मेको नाक्त आं कली मटिशो आ पबर्म गे मुने दोक्वा ममाल्नीनी। मेना इ दाते डा ठेयब लेशो मुर आन कली गुंडनुडमी। आं डांडामी गे लेंशा ठेयब लेशो मदुम्नेवे। 12 गो इ दातेमी ब्रेशो नु पुडग मुर लीचा गेनुडमी। मेकोपुकीम 'परमप्रभु यावे आंइ कली वारच पाइब बाक्ब' दे थमा सुइक्नीम। इजीकीएल ६:८ 13 इस्राएल डा लीशोपुकीमी लेंशा दूली मपाइनीम। मेकोपुकीमी जोल मपाइनीम। हेंथे लोव्र मपाइनीम। मेकोपुकी जशा तूशा गोल्शा बाक्नीम। सुइम मेको आन कली हिंच मकोंइनीम।

14 सियोन आ तमी, ठेयब सेंदा पा कुम्सो पावो। इस्राएल, ठेयब सेंदा पा ग्रीडो। यरूसलेम आ तमी इ थुं नेल्लेम ग्येरशा सोम्शा बाक्को। 15 परमप्रभु यावेमी इ सजाइ क्याम्शा गेशो बाक्ब। मेकोमी इ जीरी सत्रु आन कली सोइश्शो बाक्ब। इस्राएली आन पिप, परमप्रभु यावे गे नु बाक्ब। मुल डा मेरे गे तेकोइ श्येत रे हिंचा ममाल्नेवे। जकरिया ९:९ 16 मेको नाक्त यरूसलेम कली सियोन डा मुर महिनीन। गे शुश गेय पने। 17 परमप्रभु यावे, इन परमप्रभु इन दातेमी बाक्ब। मेको बोल्पो बाक्शा, श्येत रे प्रोंइब बाक्ब। मेको इन कली तशा, शुश ग्येरशो बाक्ब। मेकोमी आ दाक्तीकेमी इन कली नक मुर सेल्ब। मेकोमी इन कली तशा ग्येरशा कुम्सो पाइब। यसैया ६२:५

18 चाडमी ग्येरशो खोदेशो पा कुम्सो पाइब। आन क्येडा डोन बाक्ब आन कली खुण्ड। मेको इन मुर नम। आं पबर्म शुक्शी पाइक्वा पुंडसीनीम। 19 मेना गो इन कली दिप्ब आन कली सजाइ गेनुड। गो खोइल मदुक्ब आन कली श्येत रे प्रोंइनुड। मिनु ब्रशा बाक्शो आन कली खुण्डमी। मेको आन कली मुने तोक्शो रागीम आं पा डा मान ताइब सेल्नुडमी। मीका ४:७ 20 मेना गो इन कली खुप्शा चाक्नन्नी। मारदे हना गो इन कली रागी नेल्ल डा मुर आन दातेमी ठेयब सेल्शा, मान ताइब सेल्नन्नी। मिनु गो नेल्ल आन तचा डा पा इन कली डोंइती खोदेशो पा रिम्शो पा बाक्वा गेनन्नी" दे परमप्रभु यावेमी देंत। सेफन्याह २:७; येरमीया २९:१४

## हाग्वै

एको किताब हाग्वैमी ब्रेक्शो बाक्व। मेकोमी यहूदीपुकी ग्याइश्शा लाइश्शो, यरूसलेम लेश्शो जकरिया नु परमप्रभु यावे आ खिं लेंशा सेल्चा गेय पशो बाक्व।

यहूदी ग्याइश्शा लाइश्शा यरूसलेम लेश्शो १६ बर्स नोले ५२० बि. सी.मी परमप्रभु यावे आ खिं सेल्चा कली जग वोइश्शो बाक्तेक्म। मेको आ डोंइती नु सेल्ची ना हाग्वैमी एको लोव्र पा ब्रेक्शो बाक्व।

परमप्रभु यावे आ खिं लेंशा सेल्चा माल्नीम। मोपतीके हाग्वै आ शेंचा माल्शो लोव्र “गो श्येत जाइनीकी। मोपतीके परमप्रभु यावे आ खिं सेल्चा कली मारेइ गेने मचाप्नीकी” देंनीनी। तन्न “मारदे मगेनीनी, मोपतीके श्येत जाइनीनी” देंब।

परमप्रभु आं खिं सेलीन, दे अरेशो

1 पिप दाराम सासन पशो बर्स निक्शी, ६ महिना डा डोंइती डा नाक्त परमप्रभु यावेमी आ लोव्र पाइब हाग्वै कली लोव्र पाप्तु। मेको लोव्र यहूदा रागीम हुकुम पाइब जेरूब-बाबेल नु नेल्ल क्येडा ठेयब चढ़ेब यहोसु आस कली बाक्व। जेरूब-बाबेल शाल्तीएल आ तौ बाक्व। यहोसु चहिं यहो-सादाक आ तौ बाक्व। एज्रा ४:२४; एज्रा ५:१; एज्रा ५:२ 2 मिनु हाग्वैमी “मुर नेल्ल आन परमप्रभु यावेमी मार देंत देंशा हना ‘एको मुरपुकीमी परमप्रभु यावे आ खिं मुल लेंशा सेल्ची मजाक्शो बाक्व देंनीम’ ” देंत। 3 मिनु हाग्वैमी परमप्रभु यावे आ लोव्र पा “परमप्रभु यावेमी मार देंब देंशा हना 4 ‘आं खिं ब्रेश्शा खतम दुश्शो बाक्व। गे चहिं दारशो शी क्येप्शो खिम बाक्वा रिश्शो दुम्बा डा?’ देंशो बाक्व” देंत। 2सामुएल ७:२ 5 मिनु मुर नेल्ल आन परमप्रभु यावेमी “गे दोदेशो बाक्नीनी, मिम्तीन। 6 गे शुश शोक्तीनी, तन्न इच्का ला खुप्ताक्नी। गे जाइनीनी, तन्न मरूनीनी। गे तूनीनी, तन्न इन तूतू दाक्तीके मबेक्व। गे फेक्नीनी, तन्न इन रां महोइब। गे शुश गेय पा क्येट चेम्नीनी, तन्न होइश्शो थैलीम कुर पा वोइक्नीनी” देंत। व्यवस्था २८:३८ 7 मिनु मुर नेल्ल आन परमप्रभु यावेमी मार देंत देंशा हना “गे दोदेशो बाक्नी, मिम्तीन। 8 डांडा मेर डोइश्शा शी यितीन। मिनु आं खिं सेलीन। मिनु गो मेको तशा, ग्येरशा बाक्ने चबुल। मोपा मुरपुकीम आं कली ठेयब सेल्चीमील। 9 गे शुश आस पाइतीनी, तन्न इच्का ला ताइतीनी। मिनु गे खिंमी मार चाक्नी, गो मेको कली मुइश्शा बेरपाइक्ता। गो मारदे मोदेशो पाता देंशा हना, आं खिं ब्रेन्ने थुश्शो बाक्व। गे चहिं आंम खिं कली ला मिम्तीनी। 10 मोपतीके सरीड रे सीत यिचा प्रोंइतु। मिनु रूमी मारेइ मारेइ वाचा प्रोंइशो बाक्व। 11 मिनु गो रू नु डांडा तार रेड मयिपदु। अन्न, अडगुर, तेल नु रूम सिब्ब मारेइ मारेइ मसिप्पदु। मुर नु रागीम ब्रोंइशो नेल्ल आन कली श्येत जपाइक्ता। मुर आन गेय नेल्ल शोर गाक्शो सेल्ता” देंत। हाग्वै २:१७; आमोस ४:९

12 मिनु शाल्तीएल आ तौ जेरूब-बाबेल नु यहो-सादाक आ तौ, नेल्ल क्येडा ठेयब चढ़ेब यहोसु नु लीशो मुर नेल्लेमी परमप्रभु यावे आन परमप्रभु आ लोव्र टिम्तेक्म। मिनु परमप्रभु यावे आन परमप्रभु आ देंशो नु आ लोव्र पाइब हाग्वै आ देंशो लोव्र टिम्तेक्म। मिनु मुरपुकी परमप्रभु यावे कली मान पा हितेक्म। 13 मिनु परमप्रभु यावे आ सोइश्शो लोव्र पाइब हाग्वैमी “परमप्रभु यावेमी मुर आन कली ‘गो गेपुकी नु बाक्नुड’ देंशो बाक्व” देंत। मलाकी २:७ 14 मिनु परमप्रभु यावेमी शाल्तीएल आ तौ, यहूदा रागीम हुकुम पाइब, जेरूब-बाबेल नु यहो-सादाक आ तौ, नेल्ल क्येडा ठेयब चढ़ेब, यहोसु नु लीशो मुर आन थुं कली जोंब पोक्ताक्व। मिनु मेकोपुकीमी मुर नेल्ल आन परमप्रभु यावे, आ खिं सेल्चा गोम्तेक्म। 15 मिनु मेकोपुकीमी पिप दाराम सासन पशो बर्स निक्शी, ६ महिना, २४ नाक्तीमी परमप्रभु यावे आ खिं सेल्चा गोम्तेक्म।

परमप्रभु आ खिं लेंशा सेल्शो

2 पिप दारामी सासन पशो बर्स निक्शी, ७ महिना २१ नाक्तीम परमप्रभु यावे आन परमप्रभुमी हाग्वै कली लोव्र पाप्तु। मार लोव्र पाप्तु देंशा हना, 2 “गे शाल्तीएल आ तौ यहूदा रागीम हुकुम पाइब, जेरूब-बाबेल नु यहो-सादाक आ तौ नेल्ल क्येडा ठेयब चढ़ेब यहोसु नु लीशो मुर आन कली 3 ‘इन दाते डा सु सुमी परमप्रभु यावे आ डोंइती डा खिं आ दारस तनी? मुल एको खिं दोदेशो तांइसीबा? मार, एको मदारशो तांइसीबा? दे हिल्लो पावो’ ” देंत। एज्रा ३:१२ 4 मिनु मुर नेल्ल आन परमप्रभु यावेमी “जेरूब-बाबेल, महिनो। यहो-सादाक आ तौ नेल्ल क्येडा ठेयब चढ़ेब यहोसु गे यो महिनो। मिनु मेकेर डा मुर नेल्ल महिनीन। गेय पचा गोने। मारदे हना गो गेपुकी नु बाक्नुड। 5 गेपुकी इजीप्त रागी रे पा गूशा पिनीनु, गेपुकी नु कबल का पाता। आं सोक्त गेपुकी नु बाक्व, दे कबल पाता। मोपतीके महिनीन” दे मुर नेल्ल आन परमप्रभु यावेमी देंत। प्रस्थान १९:५; जकरिया ४:६ 6 मिनु मुर नेल्ल आन परमप्रभु यावेमी “मुल इच्का नोले गो लेंशा सरीड, रागी, समुन्द्र नु गोरशो रागी कली हिम्नुड। हिब्रू १२:२६ 7 गो रागी रागी डा मुर आन कली हिम्नुड। मिनु रागी रागी डा शॉप नेल्ल एकेर चाक्नीम। मिनु गो एको खिं कली आं दारसीम प्रिनुड। 8 सुन चांदी नेल्ल आं के बाक्व। 9 मोपतीके एको खिं आ मुल डा दारस क्येडा नोले डा दारस शुश रिश्शो दुम्ब। मिनु एकेर आसीक शुश गेनुडमी” दे मुर नेल्ल आन परमप्रभु यावेमी देंत।

परमप्रभुम आसीक गेशो

10 पिप दारामी सासन पशो बर्स निक्शी ९ महिना २४ नाक्तीमी परमप्रभु यावेमी आ लोव्र पाइब हाग्वै कली लोव्र पाप्तु। 11 मिनु हाग्वैमी “मुर नेल्ल आन परमप्रभु यावेमी मार देंत देंशा हना ‘चढ़ेबपुकीम मार देंबाक्मा, दे हिल्लो पावो’ ” देंत। 12 मिनु हग्गाइम “सुइ मुरुमी किप्शुरम पोल्टो पा चढ़ेशो श्ये कुरशो बाक्व हना नु मेको आ किप्शुर आ सुरमी शोब्ले, खाइ, अडगुर शांबु, तेल नु अरु मारेइ जचा थोव्रक थिप्तु हना, मेको चोव्रखो दुम्नीमी?” दे हिल्लो पाप्तु। मिनु चढ़ेबपुकीम “मदुम्नीम” देंतेक्म। 13 मिनु हाग्वैमी “बेक्शो मुर थिशा, ग्रांरा दिशो दुश्शो मुरुम मारेइ थोव्रक थिप्तु हना, मेको थोव्रक ग्रांरा दिशो दुम्बा?” दे हिल्लो पाप्तु। मिनु चढ़ेबपुकीमी “मेको ग्रांरा दिशो दुम्ब” देंतेक्म। लेवी ५:२; गन्ती १९:२२ 14 मिनु हाग्वैमी “परमप्रभु यावेमी मार देंब देंशा हना ‘आं डोंइती बाक्शो एको रागी डा मुरपुकी मोदेशोन बाक्नीम। मेकोपुकीम मार मार पाइनीमी, मार मार चढ़ेनीमी मेको नेल्ल ग्रांरा दिशो बाक्व’ देंशो बाक्व” देंत। एज्रा ४:१-३

मुर आन थुं बारपाइश्शो

15 मिनु परमप्रभुमी “गे मुलाक्त डा मेरे मार दुम्बा, मेको रिश्शो पा मिम्तीन। परमप्रभु यावे आ खिं सेल्शीनु, फुल्लु तार फुल्लु वोइश्शा गारो

प्रोव्रचा क्येडा डोंइती दोर्देशो बाकमे, मेको मिम्तीन। <sup>16</sup> गे दोर्देशो बाकनी? गे २० सेआह बाकब, दे मिम्ताकनी हना, मेकेर १० सेआह ला बाकब। अडगुर खाकशा, ५० गर रस ताप्नुड, दे मिम्ताकनी हना, २० गर ला दुम्ब। सेआह का ७ लिटर खोर्देशो बाकब। गर कली हिन यो देंनीम। हिन का ६, ५ लिटर बाकब। हाग्वै १:१६ <sup>17</sup> गो इन कली नु इन रूम खुम्शो मारेइ मारेइ खतम सेल्ला। मेको सोव्रपाइक्व रोइ, बुंखी डाइक्तीक रोइ नु मुप्सीम खतम सेल्ला। मो हना यो गे आं गे मलेन्नी। हाग्वै १:११ <sup>18</sup> मुल ९ महिना २४ नाक्ती, परमप्रभु यावे आ खिं डा जग वोइश्शो नाक्तर रे मार दुम्बा, मेको कोव्रडीन। <sup>19</sup> मार, गे नु वांचेर बाकमे? अडगुर बोट, फोव्रशी रवा, अनार नु तेल रवामी मुल सम्म फल मसिश्शो बाकमा? मुलाक्तर डा मेरे गो इन कली आसीक गेनन्नी” दे परमप्रभु यावेमी देंत।

परमप्रभु आ लोव

<sup>20</sup> मिनु ९ महिना डा २४ नाक्ती परमप्रभु यावेमी लेंशा हाग्वै कली लोव पाप्नु। <sup>21</sup> मार लोव पाप्नु देंशा हना “गे यहूदा रागीम हुकुम पाइब जेरूब-बाबेल कली ‘गो सरीड नु रागी हिम्चा चिक्शो बाक्नुड। <sup>22</sup> गो पिप आन राज्य खतम पोक्नुड। गो रागी रागी डा राज्य थुम्पाइक्वा चिक्शो बाक्नुड। गो बग्गी नु बग्गी डोइक्व आन कली थिप्पाइक्नुडमी। शारा नु शारा डोइक्वपुकी आंम लोक्व आन तरवारम क्योरचा पुंइसीनीम’ देंनो” देंत। <sup>23</sup> मिनु मुर नेल्ल आन परमप्रभु यावेमी “मेको नाक्तर शाल्तीएल आ तौ, आं गेय पाइब, जेरूब-बाबेल गो इ कली छाप पाइश्शो औंठी खोर्देशो सेल्लन। मारदे हना गो इ कली योव्रशो बाक्नुड” दे मुर नेल्ल आन परमप्रभु यावेमी देंत। जकरिया ४:६-७



# जकरिया

जकरिया बेरेक्याह आ तौ, इददो आ चच बाक्त। इददो चढेब आ खिं डा ठेयब मुर बाक्त। जकरिया यहूदीपुकी ग्याइशा लाइक्चा पुंइसीमानु, बेबीलोनम जरमेशो बाक्त। डोंइती यरूसलेम लेख चढेब आन दातेमी मेको यो बाक्त। एको किताब ब्रेकब परमप्रभु यावे आ लोत्र पाइब जकरिया बाक्ब। ५२०-५१८ बि. सी. पिप दाराम सासन पशो बर्स निक्शी दुम्मेनु, परमप्रभु यावे आ लोत्र पाइब जकरियामी गेय पशो बाक्त। मेना परमप्रभु यावे आ लोत्र पाइब हागैम यो लोत्र पशो बाक्त। जकरियामी मुर आन शुश श्येत जची ना मेको आन कली थुं बारपाइक्तीक लोत्र पवा बाक्त। मेकोमी मस्सीह जाक्ब, दे परमप्रभु यावे आ लोत्र ब्रेक्शो बाक्ब। मस्सीह आ पर्वम:

१. मस्सीह गधा आ चाइक्ब डोइशा यरूसलेम ओव्रब
२. मस्सीह ३० ओटा चांदी के शेकेलम लेयचा पुंइसीब
३. मेको क्येटीमी मार पाइनीम
४. मस्सीह बेक्शो
५. थमा सुइक्ब ब्रशो

परमप्रभु गे लेतीन, दे अरेशो

१ पिप दारामी सासन पशो बर्स का ८ महिना दुम्मेनु, परमप्रभु यावेमी इददो आ चच, बेरेक्याह आ तौ परमप्रभु यावे आ लोत्र पाइब जकरिया कली लोत्र पाप्तु। परमप्रभु यावेमी मार लोत्र पाप्तु देंशा हना, एज्रा ५:१<sup>२</sup> "परमप्रभु यावे इन किकी पिपी आन पर्वम शुश गाइक्ताक्व। ३ मोपतीके मुर नेल्ल आन परमप्रभु यावेमी मुर आन कली मार देंत देंशा हना 'आं गे लेतीन। मिनु गो इन कली कोव्रनुड। मलाकी ३:७; याकूब ४:८<sup>४</sup> साइ डा आं लोत्र पाइबपुकीमी इन किकी पिपी आन कली लोत्र पाप्तेक्म। मेकोपुकीमी मुर नेल्ल आन परमप्रभु यावेमी इन कली मार लोत्र पाप्तु देंशा हना इन मरिश्शो लां रे नु इन मरिश्शो पतीके रे परमप्रभु आ लां गे लेतीन, दे लोत्र पाप्तेक्म। तन्न इन किकी पिपीमी आं लोत्र मनेंथु मटीम। गेपुकी मेको आन खोदेंशो मपने। येरमीया ३:१२; इजीकीएल ३३:११<sup>५</sup> इन किकी पिपी ते बाक्नीमी? आं लोत्र पाइबपुकी गेना हना यो ब्रोंइशा बाक्नीमी डा? ६ तन्न गो आं गेय पाइब, आं लोत्र पाइब आन कली पशो लोत्र नु आं फुल्लुम मुशा ब्रेक्शो लोत्र इन किकी पिपी आन पाला रे मुल सम्म मबाक्म डा?" मिनु मेकोपुकी परमप्रभु यावे गे लेत्वा माल्शा, मेकोपुकीमी 'मुर नेल्ल आन परमप्रभु यावेमी आंइ मरिश्शो लां नु आंइ मरिश्शो पशो आ पर्वम आ देंशो खोदेंशो पा पाप्तु' देंतेक्म" दे मुर नेल्ल आन परमप्रभु यावेमी देंत।

लल शारा डोइक्ब

७ मिनु पिप दारामी सासन पशो बर्स निक्शी, शेबात माइश्शो ११ महिना डा २४ नाक्ती इददो आ चच, बेरेक्याह आ तौ जकरिया, परमप्रभु यावे आ लोत्र पाइब आ बाक्तीकेमी परमप्रभु यावे आ लोत्र जाक्त। ८ मिनु जकरियामी "गो नाक्दो लल शारा डोइक्ब का गाक्शो ताता। मेको दिंममी बाक्शो मूरे रवा आन दातेमी दिक्शा राप्शा बाक्शो बाक्त। मिनु मेको आ नोले अरु लल, खाइरो नु बुश शारापुकी राप्शो बाक्तेक्म। जकरिया ६:१-८ ९ मिनु गो नु लोत्र पाइब, परमप्रभु यावे आ स्वर्ग डा गेय पाइब कली 'आं प्रभु, मेको मार कली नमी?' दे हिल्लो पाता। मिनु मेकोमी 'एको मार कली नमी, दे गो इ कली कौंइनन' देंत। १० मिनु नोले मूरे रवा आन दातेमी राप्शा बाक्ब मुरुमी लोत्र लेशशा 'परमप्रभु यावेमी एको आन कली रागी नेल्ल हिरशा कोव्रचा कली सोइक्ताक्व' देंत। ११ मिनु नोले शारा डोइक्बपुकीमी मूरे रवा आन दातेमी बाक्ब परमप्रभु यावे आ स्वर्ग डा गेय पाइब कली 'गो रागी नेल्ल हिरशा कोव्रतक। मिनु रागी नेल्ल डा मुर सिक्सी पा नाइश्शा बाक्शो बाक्तेक्म' देंतेक्म। १२ मिनु परमप्रभु यावे आ स्वर्ग डा गेय पाइबमी

'मुर नेल्ल आन परमप्रभु यावे, गे गेना सम्म यरूसलेम नु यहूदा सहर डा मुर आन कली शिशी मपाइनीनी? गे मेको आन कली मुल रे ७० बर्स सम्म गाइक्ना गाइक्न बाक्शो बाक्तीनी' " देंत। भजन संग्रह १०२:१४; दानीएल ६:२<sup>१३</sup> मिनु परमप्रभु यावेमी गो नु लोत्र पाइब, आ स्वर्ग डा गेय पाइब कली रिश्शो नु थुं बारपाइक्तीक लोत्र पाप्तु। १४ मिनु स्वर्ग डा गेय पाइबमी आं कली "परमप्रभु आ लोत्र नेल्ल आन कली नेंपतो। मिनु मुर नेल्ल आन परमप्रभु यावेमी 'गो यरूसलेम नु सियोन कली शुश रुश पशो बाक्नुड। १५ रिश्शो पा बाक्ब रागी रागी डा मुर आन कली तशा शुश गाइश्शो बाक्नुड। गो डोंइती इक्का ला गाइक्ताक्व। मिनु मुरपुकीमी तेम्शा मरिश्शो पचा गोम्तेक्म" देंत। येरमीया ४७:६<sup>१६</sup> मोपतीके परमप्रभु यावेमी मार देंत, देंशा हना 'गो शिशी पा यरूसलेम लेत्ती। मेकेर आं खिं लेंशा सेल्वा माल्नीम। मिनु यरूसलेम नेल्लेमी पुक्तीक डोरी कीचा माल्नीम' दे मुर नेल्ल आन परमप्रभु यावेमी देंत। जकरिया ८:३<sup>१७</sup> मिनु मुर नेल्ल आन परमप्रभु यावेमी मार देंत, देंशा हना 'आं सहरपुकी लेंशा शुश सोशो बोशो दुम्चा माल्नीम। परमप्रभु यावेमी सियोन कली लेम्शा शिशी पाइब। मिनु यरूसलेम कली योव्रब' " देंत। यसैया ४०:१-२; यसैया १४:१

४ ओटा ग्रोव्र नु ४ जना तुप्तील

१८ मिनु इर गे कोव्रडुनु, ४ ओटा ग्रोव्र ताता। १९ मिनु गो नु लोत्र पाइब, स्वर्ग डा गेय पाइब कली "एको मार में?" दे हिल्लो पाता। मिनु मेकोमी "एको ग्रोव्रपुकीमी यहूदा, इस्राएल नु यरूसलेम डा मुर आन कली एर औंथ फ्राम्तेक्म" देंत। २० मिनु नोले परमप्रभु यावेमी आं कली ४ जना तुप्तील कौंइताक्पी। २१ मिनु गो "एको मार पचा कली जाक्मा?" दे हिल्लो पाता। मिनु मेकोमी "मेको ग्रोव्रपुकीमी यहूदा कली मबोक्चा डा पा खोल्शो बाक्तेक्म। मिनु मेको तुप्तीलपुकी रागी रागी डा मुर आन कली ब्रपाइक्ब ग्रोव्र खोदेंशो ठेयब हुकुम पाइब मुर आन कली श्येत गेशा साइक्चा कली जाक्शो बाक्तेक्म। मारदे हना मेकोपुकीमी यहूदा डा मुर आन कली फ्रना फ्रन बाक्तेक्म" देंत।

पुक्तीक डोरी

२ मिनु गो इर कोव्रडुनु, पुक्तीक डोरी शेशो मुर का आं डोंइती राप्शो ताता। इजीकीएल ४०:३<sup>२</sup> मिनु गो मेको कली "गे ते गाक्नी?" दे हिल्लो पाता। मिनु मेकोमी आं कली "यरूसलेम पुक्शा, मेको दोशो दुइश्शो नु दोशो ब्रेम्शो बाक्मे, मेको कोव्रथ लती" दे माइक्ती।

3 मिनु मेको गो नु लोत्र पाइब, स्वर्ग डा गेय पाइब जाकत। मिनु अर्को स्वर्ग डा गेय पाइब मेको कली गुम्थ जाकत। *इजीकीएल ३८:११* 4 मिनु मेकोमी “दोरशा लशा मेको ठिटा कली ‘यरूसलेममी लेंशा शुश मुर बाक्वा माल्नीम। मुर नु बी ब्यफ, क्यारश भेडा शुश दुम्तीके यरूसलेम गारो मपाइश्शो गाउं खोदेशो दुम्ब। 5 मिनु गो मेको आ एर ओंथ मी के गारो दुम्नुड। मिनु गो मेको आ आगा डा छेडछेड दुम्नुड’ दे परमप्रभु यावेमी देंत, देनो” देंत। *जकरिया ९:८*

इसाएली लेश्शा जाक्वा माल्शो

6 परमप्रभु यावेमी “जाक्कीन जाक्कीन, उत्तर डा रागी रे प्रोक्शा जाक्कीन। मारदे हना गो इन कली एर ओंथ डा फशेमी खोदेशो पा फ्राता” दे परमप्रभु यावेमी देंत। 7 मेकोमी आं कली “आबी, सियोन, गे बेबीलोन डा मुर आन दाते रे बोक्शा, प्रोक्कीन। 8 मारदे हना मुर नेल्ल आन परमप्रभु यावेमी इन कली रोइक्व रागी रागी डा मुर आन पर्वम मार देंत देंशा हना ‘सुमी इन कली थीबा, मेकोमी आं मिक्च आ क्रिक्बील थीब’ देंत। *ब्यवस्था ३२:१०* 9 मुल नेनीन, गो आं गुइ मेको आन पर्वम क्युक्नुड। मिनु मेको आन वाइलमी मेको आन कली रोइक्नीम। मिनु गेपुकीमी मुर नेल्ल आन परमप्रभु यावेमी आं कली सोइश्शो बाक्ब, दे तुइक्नीनी। *ब्यवस्था ३२:१०* 10 सियोन आ तमी, ग्येरशा सोम्शा कुम्सो पावो। मारदे हना गो इन दातेमी बाक्थ जाक्नुड। 11 मेको नाक्त शुश रागी डा मुरपुकी परमप्रभु यावे नु गारचा कली जाक्नीम। मेको नाक्ती मेको आं मुर दुम्नीम। मिनु गो गे इन दातेमी बाक्नुड। मिनु गेपुकीमी मुर नेल्ल आन परमप्रभु यावेमी आं कली इन कली लोत्र पथ सोइश्शो बाक्ब, दे तुइक्नीनी” दे परमप्रभु यावेमी देंत। *यसैया ११:१०* 12 परमप्रभु यावेमी यहूदा रागी कली आ के सेल्ब। मिनु यरूसलेम कली लेंशा योत्रब। *जकरिया १:१७* 13 रागी डा मुर नेल्ल परमप्रभु यावे आ डोंइती सिक्सी पा बाक्कीन। मारदे हना मेको आ बाक्तीक रे पा गूशा जाक्शो बाक्ब। *हबकुक २:२०*

नेल्ल क्येडा ठेयब चढेब यहोसु

3 मिनु परमप्रभु यावे आ स्वर्ग डा गेय पाइबमी नेल्ल क्येडा ठेयब चढेब यहोसु कोइताक्पी। मेको परमप्रभु यावे आ स्वर्ग डा गेय पाइब आ डोंइती राप्शो बाक्त। मिनु सैतान मेको कली दोस गेचा कली आ ग्युरा गे राप्शो बाक्त। *हाग्वै १:१; अय्युब १:९; प्रकाश १२:१०* 2 मिनु परमप्रभु यावेमी सैतान कली “सैतान, परमप्रभु यावेमी इ कली हुइक्ब। यरूसलेम कली योत्रब परमप्रभु यावेमी इ कली हुइक्ब। मार, एको मुर मी रे पा गुंइशो बुल्सी खोदेशो ममाइ डा?” देंत। *यहूदा :९* 3 यहोसु ग्रान्ग्रा दिशो लुम्सीशो वा फेक्शा, स्वर्ग डा गेय पाइब आ डोंइती राप्शो बाक्त। 4 मिनु मेको स्वर्ग डा गेय पाइबमी आ डोंइती बाक्ब आन कली “मेको आ ग्रान्ग्रा दिशो लुम्सीशो वा प्रुइक्तीन” देंत। मिनु मेकोमी यहोसु कली “गो इ मरिश्शो पशो नेल्ल क्याम्ताकड। गो इ कली रिश्शो वा फेक्नन” देंत। *यसैया ६:७; यसैया ६१:३* 5 मिनु गो “मेको आ पियामी रिश्शो गुप्तीक का गुप्तीन” देंत। मिनु मेकोपुकीमी मेको कली रिश्शो गुप्तीके गुप्शा, रिश्शो वा फेक्ताक्म। मिनु परमप्रभु यावे आ स्वर्ग डा गेय पाइब आ नेक्था राप्शा बाक्त। *प्रस्थान २८:३९*

6 मिनु नोले परमप्रभु यावे आ स्वर्ग डा गेय पाइबमी यहोसु कली 7 “मुर नेल्ल आन परमप्रभु यावेमी मार देंत देंशा हना ‘गे आं लॉमी गाक्ते नु इ कली देंशो लोत्र टिप्तीवी हना, गे आं खिं नु आं लाडगा नेल्ल कोत्रब दुम्नेवे। मिनु एकेर राप्शा बाक्ब आन दातेमी आं डोंइती जाक्ने चाप्नेवे। 8 यहोसु, नेल्ल क्येडा ठेयब चढेब नु इ नेक्था बाक्ब इ खोदेशो गेय पाइबपुकी नोफा दाइश्शा नेनीन। गो नोले आं गेय पाइब, राशी माइश्शो चाक्नुड, मेकोपुकी मेको आ पर्वम चिन्ड बाक्नीम। *यसैया ८:१८; जकरिया ६:१२; येरमीया २३:५; येरमीया ३३:१५* 9 मारदे हना गो यहोसु आ डोंइती फुल्लु का वोइक्ता। मेको आ तारी ७ ओटा मिक्च बाक्नीम। मिनु गो फुल्लु तारी मेको आ ब्रेक्स मुशा ब्रेक्नुड। मिनु गो काबुमीन मेको रागी डा मुर आन दोस नेल्ल क्याम्नुड। *प्रस्थान ३९:६-७; जकरिया ४:१०; प्रकाश ५:६* 10 मेको नाक्ती गे

नेल्लेमी आंम आंमा ब्रेम्मुशा अडगुर नु फोत्रशी आ पुंमी ग्येरशा गुम्नीनी’ दे मुर नेल्ल आन परमप्रभु यावेमी देंत” देंत। *१राजा ५:५; मीका ४:४*

सुन के बत्ती दातीक

4 मिनु गो नु लोत्र पाइब, स्वर्ग डा गेय पाइब लेंशा जाक्त। मेकोमी आं कली मुर कली निन्द्रा रे पा पोक्शो खोदेशो पा सेंपाइक्ती। 2 मिनु मेकोमी आं कली “गे मार तवी?” दे हिल्लो पती। मिनु गो “सुन के बत्ती दातीक ताता। मेको आ तारी बोस का बाक्त। मेको तारी ७ ओटा बत्ती बाक्तेक्म। मेको बत्ती नेल्लेमी दातीक सल्दो वोइश्शो बाक्तेक्म। *येरमीया १:११-१३; आमोस ८:२; प्रस्थान २५:३१-४०* 3 मिनु मेको आ नेक्था तेल रवा निक्शी, का ग्युरा गे नु का पेरा गे बाक्ताक्स” देंती। 4 मिनु गो नु लोत्र पाइब, परमप्रभु यावे आ स्वर्ग डा गेय पाइब कली “आं प्रभु, मेको मार नसी?” दे हिल्लो पाता। 5 मिनु मेको गो नु लोत्र पाइब, परमप्रभु यावे आ स्वर्ग डा गेय पाइबमी “मेको मार नसी, गे मतुइक्नेवे?” देंत। मिनु गो “आं प्रभु, मतुइक्नुड” देंती। 6 मिनु मेकोमी आं कली “एको परमप्रभु यावेमी जेरूब-बाबेल कली पशो लोत्र बाक्ब। ‘बोलम ममाइ, सक्तिमी यो ममाइ, तन्न आं सोक्तीमी पाइनुड’ दे मुर नेल्ल आन परमप्रभु यावेमी देंत। 7 ठेयब डांडा गे मार नवे डा? जेरूब-बाबेल आ डोंइती गे दिंम दुम्वा माल्लेवे। मेकोमी परमप्रभु यावे आ खिं डा नोले डा फुल्लु वोदानु, मुर नेल्लेमी ठेयब सेंदा पा ‘रिश्शो दुम्त, रिश्शो दुम्त’ दे ठेयब सेंदा पा देंनीम” देंत। *भजन संग्रह १२२:६*

8 मिनु परमप्रभु यावेमी आं कली लोत्र पाप्नु। मार लोत्र पाप्नु देंशा हना 9 “जेरूब-बाबेलमी एको परमप्रभु यावे आ खिं डा जग फुल्लु वोइश्शो बाक्ब। मिनु मेकोमीन मेको खिं सेल्ने थुम्ब। मिनु मुर नेल्ल आन परमप्रभु यावेमी आं कली इन कली लोत्र पथ सोइश्शो बाक्ब, दे तुइक्नीनी” देंती। *एज्रा ३:८; एज्रा ६:१४-१६; जकरिया २:१३, १५* 10 मिनु “सु आइक्च गेय गोशो नाक्ती आइक्च सेल्बा? नोले मेकोपुकीमी जेरूब-बाबेल आ गुइमी गारो थाप्तीक श्येले तशा, ग्येरसीनीम। *हाग्वै २:३; जकरिया ४:७* मेको फुल्लु डा ७ ओटा मिक्च परमप्रभु यावे आ मिक्च बाक्नीम। मेको मिक्चीमी रागी नेल्ल कोत्रशो बाक्नीम” दे परमप्रभु आ लोत्र बाक्ब।

तेल रवा निक्शी

11 मिनु नोले गो मेको कली “एको बत्ती दातीक आ ग्युरा नु पेरा गे बाक्शो तेल रवा निक्शी मार में?” दे हिल्लो पाता। 12 मिनु लेंशा मेको कली “मेको सुन के तेल लुक्तीके निक्शीमी तेल लुक्ना लुक्न पशो, एको तेल रवा निक्शी आस राशी मार में?” दे हिल्लो पाता। 13 मिनु मेकोमी “एको मार बाक्बा, दे मतुइक्नेवे?” दे हिल्लो पती। मिनु गो “आं प्रभु, मतुइक्नुड” देंती। 14 मिनु मेकोमी “मेको रागी नेल्ल डा परमप्रभु यावे आ डोंइती राप्शा कली तेल लुक्वा पुंइसीशो बाक्नीसी” देंत। *जकरिया ६:५; प्रकाश ११:४*

तोल्शा प्राक्शो ब्रेक्स

5 मिनु गो इर गे कोत्रडुनु, प्राक्सीशो ब्रेक्स का बेरशो ताता। 2 मिनु मेकोमी आं कली “गे मार तवी?” दे हिल्लो पती। मिनु गो “२० कुबीत लाइश्शो नु १० कुबीत ब्रेम्शो तोल्शो प्राक्सीशो ब्रेक्स बेरशो ताता” देंती। *कुबीत का ०.५ मिटर बाक्ब।* 3 मिनु नोले मेकोमी आं कली “एको रागी नेल्ल कली जाक्चशो सराप बाक्ब। मेको तोल्शा प्राक्शो ब्रेक्स निम्फा गे ब्रेक्सीशो बाक्ब। का गे खुइ आन पर्वम ब्रेक्सीशो बाक्ब। मारदे हना मेको मुल सम्म सजाइ मतशो बाक्तेक्म। अर्को गे जोल पा कसम जाइब आन पर्वम ब्रेक्सीशो बाक्ब। मारदे हना मेको यो मुल सम्म सजाइ मतशो बाक्तेक्म” देंत। 4 मिनु मुर नेल्ल आन परमप्रभु यावेमी “गो मेको ब्रेक्स सोइक्ताकड। मिनु मेको खुइ नु आं नेंमी जोल पा सांक्छी बाक्ब आन खिंमी ओत्रब। मेकेर बाक्शा, खिं खतम सेल्शा, शी फुल्लु का यो मलीपाइक्ब” देंत।

## डालोम निश्शो मीश मुर

5 मिनू गो नु लोव्र पाइब, स्वर्ग डा गेय पाइबमी आं नेक्था जाक्था “हरी इर कोवडो। मार गूमै?” दैत। 6 मिनू गो “मिरी मार में?” दे हिल्लो पाता। मिनू मेकोमी “मेकेर डालो का गूत” दैत। मिनू मेकोमी “एको रागी नेल्ल डा मुर आन दोस बाक्ब” दैत। 7 नोले हेल्शो सिसा के सुम्तीक रोक्साक्व। मिनू मेको डालोम मीश मुर का निश्शा बाक्थो ताता। 8 मिनू मेकोमी “परमप्रभु यावे आ अरेशो मटितीके एकोन बाक्ब” दैत। मिनू मेकोमी मेको मीश मुर कली डालो आगा नेष्ठा, हेल्शो सिसा के सुम्तीकेमी सुम्तु। 9 मिनू इर कोवडुनु, मीश मुर निक्शी पिशो तातासी। मेको आस फ्रांमी फश बाक्त। मेको आस फ्रां सारस के खोदेंशो बाक्त। मेको निक्शीमी मेको डालो कली सरीड नु रागी आस दातेमी क्युक्था लाइक्ताक्व। 10 मिनू गो नु लोव्र पाइब, स्वर्ग डा गेय पाइब कली “मेको निक्शीमी मेको डालो ते लत्से?” दे हिल्लो पाता। उत्पत्ती ११:२ 11 मिनू मेकोमी “बेबीलोन डा शिनार माइक्तीकेमी मेको कली खिं का सेल्चा चिक्थो बाक्ब। मिनू सेल्ने थुम्मे नोले मेको डालो कली मेकेर आ बाक्तीकेम वोइक्नीम” दे माइक्ती।

## ४ ओटा बग्गी

6 मिनू गो लेंशा इर गे कोवडुनु आं डोंइती डांडा आस दाते रे ४ ओटा बग्गी यिंशो तातामी। मेको डांडा कांसा के बाक्ताक्व। प्रकाश ६:१-८; जकरिया १:८ 2 डोंइती डा बग्गी लल शारापुकीमी कीशो बाक्तेक्म। मेको आ नोले डा बग्गी क्येर शारापुकीमी कीशो बाक्तेक्म। 3 मेको आ नोले डा बग्गी बुश शारापुकीमी कीशो बाक्तेक्म। मिनू नेल्ल क्येडा नोले डा बग्गी पाडग्रे शारापुकीमी कीशो बाक्तेक्म। प्रकाश ६:१-८; जकरिया १:८ 4 मिनू गो नु लोव्र पाइब, स्वर्ग डा गेय पाइब कली “आं प्रभु, एको मार नमी?” दे हिल्लो पाता।

5 मिनू मेको परमप्रभु यावे आ स्वर्ग डा गेय पाइबमी आं कली “एको स्वर्ग डा ४ ओटा फश नम। एको गूशा लचा कली रागी नेल्ल डा परमप्रभु यावे आ डोंइती जाक्तेक्म। जकरिया ४:१४ 6 क्येर शारा पाइश्शो बग्गी उत्तर रागी गे लाइब। बुश शारा पाइश्शो बग्गी पच्छिम रागी गे लाइब। पाडग्रे शारा पाइश्शो बग्गी दक्खिन रागी गे लाइब” दैत। 7 मेको शारा गूशा रागी कोव्रथ लचा कली चुइश्शो बाक्तेक्म। मिनू मेकोमी “रागी नेल्ल कोव्रथ लने” दे अरेप्टु। मिनू मेकोपुकी रागी कोव्रथ लाम्तेक्म। जकरिया १:१० 8 मिनू नोले मेकोमी ठेयब सेंदा पा आं कली “कोवडो, मेको उत्तर रागी गे लाइबमी आं सोक्त नाइक्पाइक्तेक्म” दैत।

## यहोसु आ सिरपेच

9 मिनू परमप्रभु यावेमी आं कली लोव्र पाप्टु। 10 मार लोव्र पाप्टु दैशा हना “ग्याइश्शा लाइक्चा पुंइसीशो बेबीलोन रे जाक्थो हेल्दाइ तोबीयाह नु येदायाह रे सुन चांदी पोक्को। मिनू मेको नाक्ती सेफन्याह आ तौ योसीयाह आ खिं लावो। 11 मेको सुन नु चांदी रे पा सिरपेच का सेलो। मिनू मेको सिरपेच लाइश्शा, यहो-सादाक आ तौ नेल्ल क्येडा ठेयब चढेब यहोसु आ पियामी गुप्तो। जकरिया ३:८ 12 मिनू मेको कली मुर नेल्ल आन परमप्रभु यावेमी मार दैत दैशा हना ‘मेकेर मुर का बाक्ब। मेको आ नें राशी बाक्ब। मेको राशी आ बाक्तीकेमी बारशा, परमप्रभु यावे आ खिं सेल्चा माल्ब। 13 मेकोमीन परमप्रभु यावे आ खिं सेल्चा माल्ब। मेको पिप आ मान तशा, शुश ग्योम्सीशो बाक्ब। मेको आ ठेयब नित्तीकेमी निश्शा सासन पाइब। मेको आ नित्तीकेमी आ ग्युरा गे चढेब का बाक्ब। मेको निक्शी दुशा गारशा गेय पाइनीसी। भजन संग्रह ११०:४ 14 मिनू मेको सिरपेच हेल्दाइ, तोबीयाह, येदायाह नु सेफन्याह आ तौ योसीयाह मिम्शा, परमप्रभु यावे आ खिंमे वोइक्चा माल्नीम। 15 शुश डोन बाक्ब मुरपुकी यो परमप्रभु यावे आ खिं सेल्चा कली वारच पथ जाक्नीम। मिनू गेपुकीमी मुर नेल्ल आन परमप्रभु यावेमी आं कली इन कली लोव्र पथ सोइश्शो बाक्ब, दे तुइक्नीनी। गे इन थुं नेल्लेमी परमप्रभु यावे, इन परमप्रभु आ दैशो टीतीनी हना, मोदेंशो दुम्ब” दैत। यसैया ६०:१०

## माइजा बाक्चा आ पर्बम लोव्र

7 पिप दारामी सासन पशो ४ बर्स, किस्लेव माइश्शो ९ महिना ४ नाक्त परमप्रभु यावेमी जकरिया कली लोव्र पाप्टु। 2 मार लोव्र पाप्टु दैशा हना “बेथेल डा मुरपुकीमी शरसेर, रेगेम-मेलेक नु मेकेर डा मुर आन कली परमप्रभु यावे आ शिशी पुंइचा कली सोइश्शो बाक्तेक्म। 3 मिनू मुर नेल्ल आन परमप्रभु यावे आ खिंमे चढेब नु परमप्रभु यावे आ लोव्र पाइब आन कली ‘गोपुकी मुल सम्म शुश बर्स डोंइती रे पशो खोदेंशो पा ५ महिनामी रोंका पा माइजा बाक्चा माल्नीकी डा?’ दे हिल्लो पचा कली सोइश्शो बाक्तेक्म” दैत। जकरिया ८:१९; २राजा २५:८-९; येरमीया ५२:१२-१३

4 मिनू मुर नेल्ल आन परमप्रभु यावेमी मार दैत दैशा हना 5 “रागी डा मुर नेल्ल नु चढेब आन कली ‘गेपुकीमी मेको ७० बर्स डा ५ नु ७ महिनामी रोंका पा माइजा बाक्तीनी। मार गे मेको आं पर्बम पनी डा? यसैया ५८:५ 6 मिनू गे जशा, ब्वशा तूतीनी हना, गे आंम इन पर्बम मपाइनीनी डा?’ देनो” दैत।

## इसाएली आन कली निसाफ

7 परमप्रभुमी “यरूसलेममी शुश मुर बाक्था, एर ओंथ डा सहर नेल्ल रिम्शो नु सोशो बोशो बाक्मेनु, नेगेब नु पच्छिम डा शेफेलाह नेल्ल रिम्शो पा बाक्मानु, डोंइती डा आं लोव्र पाइबपुकीमी मुर आन कली दैशो परमप्रभु यावे आ पशो लोव्र एकोन ममाइ डा?” दैत।

8 मिनू परमप्रभु यावेमी लेंशा जकरिया कली लोव्र पाप्टु। 9 मिनू मुर नेल्ल आन परमप्रभु यावेमी मार लोव्र पाप्टु दैशा हना “ठीक पा निसाफ पने, दाक्मेनु नु शिशी पमुने, मीका ६:८ 10 वोंइश बेक्थो मीश मुर, रोम रोइक्च, अर्को रागी डा मुर नु प्रुडग आन कली मदिपीन। मरिम्शो पमुचा ममिम्तीन। प्रस्थान २२:२०-२१ 11 तन्न मेकोपुकीमी एको लोव्र मनेनेम। काइ मटीब दुम्शा, आन नोफा सुम्तेक्म। 12 मेकोपुकीमी परमप्रभु यावे आ अरेशो नु आ लोव्र मनंचा डा पा आन थुं खकटा सेल्तेक्म। डोंइती मुर नेल्ल आन परमप्रभु यावेमी आ सोक्त रे पा आ अरेशो लोव्र नु मुर आन कली पतीक लोव्र पथ आ लोव्र पाइब आन कली सोइश्शो बाक्त। मोपतीके मुर नेल्ल आन परमप्रभु यावे शुश गाइश्शो बाक्ब। यसैया ४८:४ 13 दोपा मेकोपुकीमी आं लोव्र मनेन्मे, मोपा गो यो मेको आन पुंइशो लोव्र मनेनुड। 14 मिनू गो मेको आन कली फश गिवारमी खोदेंशो पा आन मतुइश्शो रागी रागीम फ्रातामी। मोपतीके आन प्रोंइशो रागी मुर मबाक्थो दुम्त। मेकेर सुइ मलम। मोदेंशो पा रिम्शो रागी खतम दुम्त” दे मुर नेल्ल आन परमप्रभु यावेमी दैत।

## परमप्रभुमी आ मुर खुप्शो

8 मिनू मुर नेल्ल आन परमप्रभु यावेमी आं कली लोव्र पाप्टु। 2 मेकोमी मार लोव्र पाप्टु दैशा हना “गो सियोन आ पर्बम शुश रुश पाइनुड। गो मेको आ पर्बम थाम्पा रुश पा गाइश्शो बाक्नुड” दे परमप्रभु यावेमी दैत। जकरिया १:१४ 3 परमप्रभु यावेमी “गो सियोनमी जाक्था, यरूसलेम आ दातेमी बाक्नुड। मिनू यरूसलेम थमा सुइक्चा पुंइसीब सहर दुम्ब। मिनू मुर नेल्ल आन परमप्रभु यावे आ डांडा आंम आ बाक्तीक डांडा दुम्ब” दैत। जकरिया १:१६; यसैया १:२१, २६; भजन संग्रह २:६ 4 मिनू मुर नेल्ल आन परमप्रभु यावेमी “खूशो खूशोम यरूसलेम डा लांम नित्तीम। शुश बर्स दुम्तीके कोक्के तिक्था बाक्नीम। यसैया ६५:२० 5 सहर डा लांमी ग्यारब मीश आल नु वोंइश आलम ब्रीशो बाक्नीम” दैत। 6 मुर नेल्ल आन परमप्रभु यावेमी “मेको लीशो मुरपुकीमी मेको थमा सुइक्ने मचाप्तेक्म हना यो, गो मोदेंशो पने मचाप्नुडा डा?” दैत। लूका १:३७ 7 मुर नेल्ल आन परमप्रभु यावेमी मार दैत दैशा हना “गो आं मुर आन कली पूर्ब डा रागी नु पच्छिम डा रागी रे पा प्रोंइनुडमी। 8 मिनू गो मेको आन कली यरूसलेममी बाक्पाइक्चा कली चाक्नुडमी। मेकोपुकी आं मुर दुम्नीम। मिनू गो मेको आन परमप्रभु दुम्नुड। गो मेको आन कली दाक्चा मप्रोंइथु, ठीक पाइनुड” दैत। येरमीया २४:७

9 मुर नेल्ल आन परमप्रभु यावेमी मार दैत दैशा हना "गेपुकी शुश गेय पने। डोंइती गे आं लोव्र पाइबपुकीम लोव्र पशो नेंतीनी। मेकोपुकी मुर नेल्ल आन परमप्रभु यावे आं खिं लेंशा सेल्ची ना डा जग वोइक्वी ना बाक्तेकम। *यसैया ३५:३* 10 मेको क्येडा डोंइती मुर आन कली गाल्च मगेमे। बी ब्यफ, क्यारश भेडा आन कली क्येट यो मगेमे। मेको आन जोरी सत्रुमी पतीके आन गेय पथ लने मचाप्शो बाक्तेकम। मारदे हना गो मुर आन कली साइकमुपाइक्तामी। 11 तन्न मुल रे एको लीशो आन कली डोंइती डा खोदेशो मपाइक्नुडमी" दे मुर नेल्ल आन परमप्रभु यावेमी दैत। 12 मेकोमी "मुल थुं नाइक्तीक दुश्चो बाक्ब। अडगुर आ बोटमी रिश्चो फल सिब्ब। रूमी अन्न खेल्ब। सरीड रे सीत यीब। गो मेको नेल्ल लीशो आं मुर आन कली गेनुडमी। 13 यहूदा नु इस्त्राएल डा मुरपुकी गे रागी रागी डा मुर आन दातेमी सराप रशो बाक्तीनी। दोपा गेपुकी सराप रनी, मोपा आसीक ताइब दुम्नीनी। महिनीन, बोल्यो दुमीन" दैत। *उत्पत्ती १२:२*

14 मिनु मुर नेल्ल आन परमप्रभु यावेमी "गो मोपा इन किकी पिपी आन कली आं कली गाइक्पाइक्तीके श्येत गेतामी। मिनु गो शिशी मपड। 15 गो मुल यरूसलेम नु यहूदा डा मुर आन कली रिश्चो पाइनुड। गेपुकी महिनीन। 16 गेपुकीमी मार पचा माल्नीनी दैशा हना, गे इन दातेमी थमा लोव्र ला पमुने। इन ठेयब लाचोमी जिचा मबोक्चा डा पा थमा नु ठीक निसाफ पने। *एफिसी ४:२५* 17 इन दातेमी थुंम मिश्शा, मरिश्चो मपमुने। जोल पा कसम मजने। मारदे हना मेको नेल्ल गो ग्रांरा दीनुड" दे परमप्रभु यावेमी दैत। *जकरिया ७:१०* 18 मुर नेल्ल आन परमप्रभु यावेमी आं कली लोव्र पाप्नु। 19 मिनु मेकोमी मार दैत दैशा हना "४ महिना डा माइजा बाक्तीक, ५, ७ नु १० महिना डा माइजा बाक्तीके, मुल रे यहूदा डा मुर ग्येरशा सोम्शा पतीक नाक्त दुम्चा माल्नीम। मेको ग्येरशा बाक्तीक चाड दुम्चा माल्नीम। मोपतीके गे थमा लोव्र पचा नु थुं नाइक्चा दाक्तीन" दे मुर नेल्ल आन परमप्रभु यावेमी दैत। *जकरिया ७:३,५*

#### परमप्रभुम श्येत रे प्रॉइब

20 मुर नेल्ल आन परमप्रभु यावेमी "शुश सहर डा मुर तेम्शा जाक्नीम। 21 सहर का डा मुरपुकीम अर्को सहर डा मुर आन कली 'परमप्रभु यावे आ शिशी पुंडुथ नु मुर नेल्ल आन परमप्रभु यावे कली माल्थ लने। गो आंमा यो लाइक्नीकी' दैनीम। 22 शुश मुर नु बोल्यो रागी डा मुरपुकी मुर नेल्ल आन परमप्रभु यावे कली माल्थ, यरूसलेम सहरम जाक्नीम। मेकोपुकीमी परमप्रभु यावे आ शिशी पुंडनीम" दैत। 23 मुर नेल्ल आन परमप्रभु यावेमी मार दैत दैशा हना "मेको नाक्ती रागी रागी डा आन आन लोव्र ब्वाक्ब १० जना मुरपुकीमी यहूदी का आ वा म्याइश्शा 'गो गे नु लाइनीकी। मारदे हना परमप्रभु यावे गेपुकी नु बाक्ब दैशो नैशो बाक्नीक' दैनीम" दे परमप्रभुमी दैत।

#### परमप्रभु आ लोव्र

9 परमप्रभु यावेम हद्राक रागी नु दमस्कस सहर आस पबर्म लोव्र का पशो बाक्त। मारदे हना इस्त्राएल डा थर नेल्ल नु अर्को रागी डा मुर यो परमप्रभु यावे केन बाक्नीम। *यसैया १७:- 2* शुश जोक्ब तुइक्ब बाक्तेकम हना यो, हमाथ, टायर नु सीदोन सहर आन पबर्म परमप्रभु यावेमी लोव्र पशो बाक्ब। *यसैया २३:-; येरमीया ४७:४; इजीकीएल २६:-; इजीकीएल २८:- 3* टायरमी आंम पबर्म बोल्यो दरवार का सेल्चो बाक्ब। मेकोमी फुरक खोदेशो पा चांदी नु लां मेर डा हिलो खोदेशो पा सुन तेल्लो बाक्ब। 4 तन्न परमप्रभुमी मेको आ बाक्चो मारेड मारेड रोइक्ब। मेको आ शॉप नेल्ल समुन्द्रमी ताइश्शा गेब। मिनु मेको मीम ग्रीडश्शा, खतम दुम्नीम। 5 मिनु अश्कलोन मेको तशा हिंब। गाजा हिंशा खिंखि पाइब, एक्रोन शुश सुर्ता पा आ आस पशो जाम्शा लाइब। गाजा डा पिप जाम्शा लाइब। अश्कलोनमी मुर मबाक्तीक दुम्ब। *येरमीया ४७:- 6* अश्दोद सहरमी खाल्सीशो मुरपुकी बाक्नीम। मिनु गो पलिस्ती आन ठेयब लेक्तीक खतम पा गेनुड। *ब्यवस्था २३:३* 7 गो मेको आन शोव रे पा हुश नु मेको आन खूइ रे ग्रांरा दिचा डा थोव्रक गुंडनुड। लीशो मुरपुकी आंइ परमप्रभु आ मुर दुम्नीम। मेकोपुकी

यहूदा आ थर डा मुर खोदेशो दुम्नीम। एक्रोन डा मुर चहिं यबुसी खोदेशो दुम्नीम। *उत्पत्ती ९:४; यहोसु १५:६३; २सामुएल २४:१८* 8 मिनु नोले गो आं खिं कली आंमा खाल पाइब खोदेशो बाक्नुड। मोपा सुइ मुर एर ऑथ गाक्ने मचाप्नीम। सुइमी आं मुर आन कली लडाइ मतोइनीम। मारदे हना मुल गो आंमान मेको आन कली कोव्रनुड। *जकरिया २:९*

#### सियोन डा पिप जाक्चो

9 सियोन आ तमी, साप्पा ग्येरसो। यरूसलेम आ तमी ग्येरशा ठेयब सेंदा पा ग्रीडो। मारदे हना इ पिप इ बाक्तीकेमी जाक्ना जाक्न बाक्ब। मेको ग्राशा ग्येरसीशा जाक्ब। मेको ब्रेश्चो बाक्ब। मेको गधा तार डोइश्शा जाक्ब। गधा आ चाइक्ब तार डोइश्शा जाक्ब। *सेफन्याह ३:१४; मत्ती २१:५* 10 गो एफ्राइम रे पा बग्गीपुकी नु यरूसलेम रे पा लडाइ पाइब शारा लाइक्नुड। लडाइ पाइब आन लिब्रा जिक्ब। मेकोमी रागी रागी डा मुर आन कली थुं नाइश्शा बाक्चा गेब। मेकोमी समुन्द्र का रे अर्को समुन्द्र सम्म नु युफ्रेटीस खोला रे रागी डा सुर सम्म सासन पाइब। *मीका ५:९*

11 गे नु पशो आं हुश आ कबलम पतीके इ चोक्चा पुंडसीशो मुर आन कली ब्वाक्कु मबाक्चो खाल्टा रे गुंडनुडमी। *प्रस्थान २४:८; उत्पत्ती ३७:२४* 12 आस पा बाक्चो चोक्चा पुंडसीशो मुरपुकी इन बोल्यो ब्रॉइशा बाक्तीके लेश्शा लने। गो इन कली इन साम्शो क्येडा निक्शी खेयप खोइ शुश गेनुड। *जकरिया १०:९; यसैया ६१:७* 13 गो यहूदा कली आं लिब्रा खुक्चो खोदेशो पा खुक्नुड। गो एफ्राइम कली मेको आ ब्रा खोदेशो सेल्नुड। सियोन, इ तौ आन कली गो ग्रीस रागी आ तौ आन पबर्म क्युक्नुड। मिनु गो इ कली बोल्यो लडाइ पाइब आ तरवार खोदेशो सेल्नुड। 14 मिनु नोले परमप्रभु यावे इन क्येडा इर गूब। मेको आ ब्रा चिला आप्शो खोदेशो पा बेरनीम। परमप्रभु, परमप्रभु यावेमी तुराही ताप्ब। मिनु दक्खिन डा फश गिवारम गाक्शा लाइब। 15 मुर नेल्ल आन परमप्रभु यावेमी मेको आन कली राइश्शा प्रॉइब। मेकोमी आन जोरी सत्रु आन कली खतम पोक्ब। मेकोपुकीमी आन हुश अडगुर शांबु खोदेशो पा तूनीम। मेकोपुकी चढेतीक डा हुश कुर पतीक बोस खोदेशो पा ब्रीशो बाक्नीम। चढेतीक आ एर ऑथ कुना कुना मेर फ्रशो हुश खोदेशो बाक्नीम।

16 मेको नाक्ती परमप्रभु यावे, आन परमप्रभुमी मेको आन कली श्येत रे प्रॉइब। मारदे हना मेकोपुकी आ बगाल खोदेशो बाक्नीम। मेको सिरपेच डा हीरा खोदेशो पा ब्राइनीम। मेकोपुकी परमप्रभु यावे, आन परमप्रभु आ रागीम हीरा खोदेशो पा ब्राइनीम। 17 मेको आ दाक्तीके नु आ शिशी पतीके थम ठेयब बाक्ब। वॉइश आल ग्रेल्चो अन्न खोदेशो पा शुश दुम्नीम। मीश आल नक अडगुर शांबु खोदेशो पा दारशो दुम्नीम।

#### परमप्रभु यावे कली पुनीन

10 परमप्रभु यावे कली नोले डा रेड पुनीन। परमप्रभु यावे गोस्स नु फश सेल्ब बाक्ब। मिनु इन कली नु रू नेल्ल आन कली रेड यिपाइक्ब। 2 खिं डा देवी देवतामी फश लोव्र पाइनीम। लिंक्यु कोव्रबपुकीमी जोल तशा, डोमु डोशा, हेंथे लोव्र पाइनीम। मिनु मुर आन कली फश लोव्र पा लेम्नीम। मोपतीके मुरपुकी गोठला मबाक्चो भेडा खोदेशो पा श्येत जशा प्रोक्नीम। *मत्ती ९:३७*

#### परमप्रभुम आ मुर बोल्यो सेल्ब

3 मिनु परमप्रभु यावेमी "गो गोठला आन कली तशा शुश गाइश्चो बाक्नुड। मारदे हना मुर नेल्ल आन परमप्रभु यावेमी आ बगाल, यहूदा आ मुर आन कली कोव्रब। मेकोमी आ मुर आन कली लडाइ पा गेनायो मरूब शारा खोदेशो सेल्ब। *जकरिया ११:५* 4 मिनु यहूदा रे सुर डा फुल्लु, ताम्बु कीतीक किला, लडाइ पाइब आन लिब्रा नु कप्तान नेल्ल गूनीम। *येरमीया ३०:२१* 5 मिनु मेको नेल्ल लडाइम बाक्चो लडाइ पाइब खोदेशो बाक्नीम। मेकोपुकीम आन जोरी सत्रु लां डा हिलोम खोल्शा दिम्नीम। परमप्रभु यावे मेकोपुकी नु बाक्तीके मेकोपुकीमी लडाइ पाइनीम। शारा डोइक्ब आन कली मुने तोक्नीम।

6 गो यहूदा आ खिं डा मुर आन कली बोल्यो सेल्लुड। योसेफ आ खिं डा मुर आन कली श्येत रे प्रॉइनुड। मेको आन कली डोंइती डा खोदेशो सेल्लुड। मारदे हना गो मेको आन कली शिशी पाइनुड। मेकोपुकी गेनायो मतिल्शो खोदेशो दुम्नीम। मारदे हना गो परमप्रभु यावे, मेको आन परमप्रभु नड। गो मेको आन कली लोव लेल्लुडमी। 7 मिनु एफ्राइम आ खिं डा मुर लडाइ पाइब खोदेशो पा बोल्यो दुम्नीम। अडगुर शांबु तूशो खोदेशो पा ग्येरसीनीम। आन आलपुकीम मेको तशा शुश ग्येरसीनीम। मेकोपुकीमी 'गो परमप्रभु यावे आ मुर नय' दे शुश ग्येरसीनीम।

8 गो आं मुर आन कली ब्रेशा, खुप्नुड। मारदे हना गो मेको आन कली श्येत रे प्रॉइता। मिनु मेकोपुकी डोंइती डा खोदेशो पा सोशा बोशा, शुश दुम्नीम। 9 गो मेको आन कली रागी रागीम फ्राता हना यो, मेकोपुकीमी डोन रागीम बाक्शा, आं कली मिम्नीम। मिनु मेको आन आल कोल्पाइश्शा आन रागीम लेत्नीम। *यसैया ६६:१९; येरमीया ५१:५०* 10 गो मेको आन कली इजीपत रागी रे आन आंम रागीम लेप्पाइक्नुड। गो मेको आन कली अस्सुर रे गुंडशा, गिलाद नु लेबानोनम चाक्नुड। नोले मेकेर शुश मुर दुम्तीके बाक्तीके मबाक्ब। 11 मेकोपुकी समुन्द्र डा ठेयब ब्वाक्कु खोदेशो श्येत जाइनीम। तन्न गो समुन्द्र डा छाल थुम्पाइक्नुड। मिनु नील खोला सोव्रपाइक्नुड। अस्सुर आ ठेयब लेशो जाम्ब। मिनु इजीपत डा राज्य थुम्सीब। 12 गो मेको आन कली परमप्रभु यावे कली थमा सुइक्तीकेम बोल्यो सेल्लुड। मिनु मेकोपुकी मेको आं नैम गाक्नीम" दे परमप्रभु यावेमी दैत।

इसाएली आन मरिश्शो गोठला

11 लेबानोन, मीम इ लाइश्शो रवा आन कली नेक्पाइक्वा कली इ लाप्चोपुकी रोक्को। 2 तोव्रशी रवा रोंका पने। मारदे हना लेबानोन डा लाइश्शो रवा गोल्तेक्म। मेको दारशो रवा खतम दुम्तेक्म। बाशान डा बोल्यो शी के रवा रोंका पने। मारदे हना ठेयब ब्वाकी नेल्ल क्योव्रशो बाक्ब। 3 गोठला आन रोंका पशो नेनीन। मेको आन रिश्शो योव्रतीके खतम दुश्शो बाक्ब। गुप्स आन ग्रीशो नेनीन। यर्दन डा ब्वाकी नेल्ल खतम दुश्शो बाक्ब।

रिश्शो नु मरिश्शो गोठला

4 परमप्रभु यावे, आं परमप्रभुमी "क्योरचा पुंडसीब भेडा आन कली योव्रडो। 5 मेको ग्याप्बपुकीमी भेडा क्योरशा सजाइ मतथु ब्रॉइशा लाइनीम। मिनु मेको आन कली लेयबपुकीमी 'परमप्रभु ठेयब बाक्ब। मारदे हना गो शॉप पाइश्शो दुम्तक' देंनीम। मिनु मेको भेडा आन गोठलामी मेको आन कली शिशी मपाइनीम। *येरमीया २३:-; इजीकीएल १३:-; इजीकीएल ३४:-* 6 मुल रे गो रागी डा मुर आन कली शिशी मपाइनुड" दे परमप्रभु यावेमी दैत। मिनु परमप्रभुमी "गो नेल्ल आन कली आन नेक्था डा मुर आन गुइमी नु आन पिप आन गुइमी गेनुड। मिनु मेकोपुकीमी रागी कली खतम सेल्लुडमी। मेको आन गुइ रे सुइ आन कली मप्रॉइनुडमी।

7 मोपतीके क्योरचा चिक्शो भेडा लेयब आन पा डा गो गोठला दुम्ती। गो कोक्के निक्शी ग्याइक्ताक्ड। मिनु गो का कली शिशी पतीक नु अर्को कली थुं का दुम्तीक नें वोइक्ता। मिनु गो भेडा आन कली योव्रतामी। 8 गो महिना कामी गोठला सां आन कली खेरतामी। गो मेको आन गेय तशा ब्रीशा, फाल्ले मचाप्शो बाक्ती। 9 मिनु गो मेको आन कली 'गो इन गोठला दुम्ने मचाप्नुड। बेक्शा लाइबपुकी बेक्मल। खतम दुम्शा लाइबपुकी खतम दुम्मल। लीशोपुकीम आन श्ये ब्वमुमल' " देंती। *येरमीया १५:२* 10 मिनु गो आं शिशी नें पाइश्शो कोक्के जिक्ता। मिनु गो मुर नु पशो कबल क्याम्ताक्ड। जात जात नेल्ल डा मुरपुकी नु फ्रेशो कबल क्याम्ताक्ड, दे मेको कोक्के जिक्ता। 11 मेको कबल मेको नाक्ती क्याम्ताक्ड। भेडा लेयबपुकीमी आं कली कोव्रना कोव्रन बाक्तेक्म। मेकोपुकीमी एको परमप्रभु यावे आ लोव्र बाक्माक्त, दे तुइक्ताक्म। *जकरिया ११:७* 12 मिनु गो मेको आन कली "गे ठीक लाक्तीनी हना, आं गाल्च गेयीनी। ममाइ हना वॉइसीन" देंती। मिनु मेकोपुकीमी आं कली ३० चांदी के शेकेल गेम्तेक्म। *शेकेल का ११.५ ग्राम चांदी के क्येट बाक्ब। मत्ती २६:१५* 13 मिनु परमप्रभु यावेमी आं कली "मेको क्येट लाइश्शा, खप के ग्योब सेल्ब आ डोंइती ब्वारदो। मेको मिश डा

क्येट आं पर्वम कुर पाम्तेक्म" देंत। मिनु गो मेको ३० चांदी के शेकेल लाइश्शा, परमप्रभु यावे आ शॉप वोइक्तीकेमी यपाइक्ब आ डोंइती ब्वारताक्ड। *मत्ती २७:५-१०* 14 मिनु नोले गो थुं का दुम्तीक नें वोइश्शो कोक्के जिक्ता। मो पा गो यहूदा नु इस्राएल आस कली खिं का डा दुम्तीक रे फ्राताक्ड। *इजीकीएल ३७:२२*

15 मिनु परमप्रभु यावेमी आं कली "गे लेंशा शोर गाक्शो गोठला खोदेशो दुमो। 16 मारदे हना मुल गो मेको रागीमी गोठला का सेल्लुड। मेकोमी बेक्शा लाइब आन कली मकोव्रब। ब्रशा गाक्शो आन कली मखुप्ब। रोइ पशो आन कली मसापाइक्ब नु रिश्शो भेडा आन कली मयोव्रब। तन्न मेकोमी दोम्शो भेडा आन श्ये ब्वशा, आन ग्रेयो चेशशा ब्वाइब। 17 आबी आबी, शोर गाक्शो गोठला। मेकोमी बगाल प्रॉइब। तरवारमी आ ग्युरा गुइ नु आ ग्युरा मिक्च कली आबल। मिनु मेको आ ग्युरा गुइ नेल्ल सोव्रल। आ ग्युरा मिक्च बुक्शा मताइब दुम्ल" देंत।

इस्राएल आ पर्वम लोव्र पशो

12 परमप्रभु यावेमी इस्राएल आ पर्वम पशो लोव्र एको बाक्ब। सरीड नु रागी सेल्ब नु मुर आन कली सोक्त गेब परमप्रभु यावेमी मार देंत देंशा हना 2 "गो यरूसलेम कली आ एर ऑथ रागी डा मुर आन गाइक्तीके सेल्वा चिक्शो बाक्नुड। मुरपुकीमी यरूसलेम पुम्नीम। यहूदा यो श्येत जाइब। *यसैया ५१:१७; येरमीया २५:१५-२९* 3 मेको नाक्ती गो रागी डा मुर नेल्ल आन कली यरूसलेम हेल्शो फुल्लु सेल्लुड। तेको रागी डा मुरुमी क्युक्वा लोक्वा माल्नीमी, मेकोपुकी शुश खाइक्पाइसीनीम। मिनु रागी रागी डा मुर नेल्ल खुम्सीशा यरूसलेममी लडाइ पथ जाक्नीम। *जकरिया १४:३; योएल ४:१२* 4 मेको नाक्ती गो शारा नेल्ल आन कली शुश हिंपाइक्नुड। मिनु शारा डोइक्ब आन कली निप्स ग्यशो सेल्लुड। गो यहूदा आ खिं डा मुर आन कली कोव्रनुड। मिनु आन जोरी सन्तु आन शारा मिक्च मताइब सेल्लुड।

5 मिनु यहूदा आ खिं खिं डा मुरपुकीमी आंम आंम थुंमी 'यरूसलेम डा मुरपुकी बोल्यो बाक्नीम। मारदे हना मुर नेल्ल आन परमप्रभु यावे, मेको आन परमप्रभुमी मेको आन कली सक्ति पाइश्शो सेल्ब' देंनीम। 6 मेको नाक्ती गो यहूदा आ खिं खिं डा मुर आन कली शी तारी वोइश्शो ब्रुइश्शो बोस नु शी आन दातेमी ब्रशो तोव्रशी खोदेशो सेल्लुड। मिनु मेकोपुकीमी ग्युरा नु पेरा गे बाक्ब नु पुम्ब मुर नेल्ल आन कली साइक्नीम। तन्न यरूसलेम आ बाक्तीके उइ बाक्शा, लेंशा मेकेर मुर बाक्नीम। *ओबदिया १८:-*

7 मिनु परमप्रभु यावेमी डोंइती यहूदा डा मुर आन कली श्येत रे प्रॉइब। मोपा दाऊद आ खिं डा मान ततीके नु यरूसलेममी बाक्ब मुर आन मान ततीके यहूदा आन क्येडा शुश मद्दुम्ल" देंत।

8 मेको नाक्ती परमप्रभु यावेमी यरूसलेममी बाक्ब मुर आन कली वारच पाइब। मेकेर बाक्ब नेल्ल क्येडा मचाप्ब दाऊद खोदेशो बाक्नीम। मिनु दाऊद आ खिं डा मुर परमप्रभु खोदेशो बाक्नीम। मिनु परमप्रभु यावे आ स्वर्ग डा गेय पाइब मेको आन डोंइती गाक्ब। *यसैया ३३:२४* 9 मिनु "मेको नाक्ती गो यरूसलेम कली लडाइ तोथ जाक्ब रागी रागी डा मुर आन कली खतम सेल्लुड" देंत।

साइश्शो आ पर्वम रोंका पशो

प्रकाश २०:९

10 मिनु परमप्रभुमी "गो दाऊद आ खिं डा मुर नु यरूसलेममी बाक्ब मुर आन तारी शिशी पतीक नु पुंडतीक लोव्र पतीके सोक्त मोइक्नुड। मो दुम्नेनु, आ साइश्शो आन कली तशा, मेको आन पर्वम आन का ला तौ आन पर्वम रोंका पशो खोदेशो पा, रोंका पाइनीम। मेको आन पर्वम, आन डोंइती जरमेशो तौ आन पर्वम खोदेशो पा डाक्नीम। *योएल ३:१; यूहन्ना १९:३७; प्रकाश १:७* 11 मेको नाक्ती मेगीददो डा बेंसीमी हदाद-रिम्मोनमी रोंका पशो खोदेशो पा यरूसलेममी ठेयब रोंका पाइनीम। *२राजा ५:१८* 12 रागी नेल्ल डा मुरपुकी रोंका पचा माल्नीम। खिं खिं डा मुरपुकीमी रोंका पचा माल्नीम।

दाऊद आ खिं डा वोंइश मुरपुकीमी रोंका पचा माल्नीम। मिनु मेको आन मीश आन दातेमी रोंका पचा माल्नीम। नाथान आ खिं डा वोंइश मुरपुकीमी रोंका पचा माल्नीम। मिनु मेको आन मीश आन दातेमी रोंका पचा माल्नीम।<sup>13</sup> लेवी आ खिं डा वोंइश मुरपुकीमी रोंका पचा माल्नीम। मिनु मेको आन मीश आन दातेमी रोंका पचा माल्नीम। शिमेइ आ खिं डा वोंइश मुरपुकीमी रोंका पचा माल्नीम। मिनु मेको आन मीश आन दातेमी रोंका पचा माल्नीम।<sup>14</sup> लीशो खिं डा वोंइश मुर नेल्लेमी रोंका पचा माल्नीम। मिनु मेको आन मीश आन दातेमी रोंका पचा माल्नीम” दंत।

मूर्ति नु जोल पाइब

**13** मेको नाक्ती दाऊद आ खिं नु यरूसलेममी बाक्ब मुर आन पाप नु आन मरिश्शो पशो क्याम्चा कली ब्वाक्कु बुक्तीके का बुक्शा गूब। *यसैया १२:३; यसैया ५५:१*<sup>2</sup> मुर नेल्ल आन परमप्रभु यावेमी मार दंत दंशा हना मेको नाक्ती “गो रागी रे मूर्ति आन नें क्याम्नुड। मिनु सुइमी मेको आन कली ममिन्नीम। मिनु गो मेको रागी रे जोल पा नोले दुम्ब लोव पाइब नु ग्रांग्रा दिशो वोल आन कली गुंइशा खेरनुड। *मीका ५:१२; येरमीया २९:८-९*<sup>3</sup> मिनु लेंशा सुइमी जोल पा नोले दुम्तीक लोव पापु हना, मेको कली थीब आ आम आफोमी मेको कली ‘गे बेक्चा माल्नेवे। मारदे हना गे परमप्रभु यावे आ नेंमी जोल लोव पाप्तीवी’ देंनीस। मिनु मेकोमी जोल पा नोले दुम्ब लोव पवानु, आ आम आफोमी मेको कली साइक्नीस। *ब्यक्स्था १३:६*<sup>4</sup> मेको नाक्ती नोले दुम्ब लोव पाइब नेल्ल आंम तशो नु आंम लोव आ पर्वम मुने पाइनीम। मेकोपुकीमी दलओठ आ चां के प्रोव्रशो वा मफेक्नीम।<sup>5</sup> तन्न मेकोपुकीमी ‘गो दा नोले दुम्ब लोव पाइब मनड। गो रू डा गेय पाइब बाक्नुड। मारदे हना गो ठिटा बाक्डा रेन रू डा गेय पा जशा ब्रोंइती’ देंनीम।<sup>6</sup> सुइमी मेको कली ‘इ रां डा गार मार नमी? दे हिल्लो पाम्तेक्म हना, एको आं वारच आ खिंमी दुम्शो गार नम’ दंत।

नाक्शा लीशो परमप्रभु आ मुर

<sup>7</sup> मिनु मुर नेल्ल आन परमप्रभु यावेमी मार दंत दंशा हना ‘तरवार, आं गोठला आ पर्वम बोक्को। नेल्ल क्येडा आं नेक्था डा मुर आन पर्वम बोक्को। गोठला कली तुपो। मिनु भेडापुकी ब्रमल। मिनु गो आं गुड आइक्व गोठला आन पर्वम क्युक्नुड। *मत्ती २६:३१*<sup>8</sup> एको रागी डा मुर भाग सांमी भाग निक्शी साइक्वा पुंइसीनीम। मिनु भाग का ब्रोंइचा ताइनीम। *यसैया ६:१३*<sup>9</sup> मिनु मेको लीशो भाग आन कली गो मीम कुरपाइनुडमी। चांदी याप्पाइश्शो खोदेंशो पा याप्पाइक्नुडमी। मिनु सुन नाक्शो खोदेंशो पा नाक्नुडमी। मिनु मेकोपुकीमी आं कली थोइनीम। मिनु गो मेको आन कली लोव लेत्नुडमी। मेकोपुकीमी आं मुर नम’ देंनुड। मिनु मेकोपुकीमी ‘परमप्रभु यावे, आंइ परमप्रभु बाक्ब’ देंनीम” दे परमप्रभु यावेमी दंत। *होसे २:२५*

परमप्रभु यावे आ नाक्ती

**14** परमप्रभु यावे आ नाक्त का जाक्ब। मेना इन के रोइश्शा लाइश्शो थोव्रक इन दातेमीन योक्सीनीनी। *यसैया ३९:६*<sup>2</sup> गो रागी रागी डा मुर नेल्ल आन कली यरूसलेम नु लडाइ पपाइक्वा कली पुक्नुडमी। मिनु सहर मेको आन के दुम्ब। मेको आन खिं डा मारेइ मारेइ रोइक्नीम। मिनु मीश मुर आन कली बिथोलो पाइनीम। सहर डा उइक्थ मुर ग्याइश्शा लाइक्वा पुंइसीनीम। लीशो मेको सहर उइ बाक्नीम।<sup>3</sup> मिनु नोले परमप्रभु यावेमी मेको रागी रागी डा मुर नु लडाइ पाइब। मुरुमी लडाइ पशो खोदेंशो पा लडाइ पाइब। *जकरिया १२:३; यसैया ४२:१३; प्रकाश १९:१९*<sup>4</sup> मेको नाक्त आ खोइलीमी यरूसलेम आ डोंइती पूर्व गे बाक्शो जैतून डांडा कली थेक्ब। मिनु जैतून डांडा आ पूर्व रे पच्छिम सम्म ठेयब पा जेक्ब। मिनु डांडा

उइक्थ उत्तर गे नु उइक्थ दक्खिन गे दुम्शा बाक्ब। मिनु दातेमी ठेयब बेंसी का दुम्ब।<sup>5</sup> गेपुकी परमप्रभु यावे आ डांडा डा बेंसी रे पा प्रोक्वा माल्नीनी। मेको आस दाते डा बेंसी आसाल सम्म जाक्दीश्शो बाक्ब। गेपुकी यहूदा डा पिप उज्जीयाह आ पालामी कुशो खिनुमी मुरपुकी प्रोक्शो खोदेंशो पा प्रोक्नीनी। मिनु नोले परमप्रभु यावे, आं परमप्रभु आ मुर नेल्ल नु यीब। *आमोस १:१*

<sup>6</sup> मेको नाक्त नां नु तास्लाम छेडछेड मगेनीस। ग्यू यो मद्दुम्ब।<sup>7</sup> मिनु गेना हना यो नाक्त बाक्ब। मारदे हना नाक्दो दुम्ची ना छेडछेड बाक्ब। परमप्रभु यावेमी मेको नेल्ल तुइक्ब। *मर्कूस १३:३२*

<sup>8</sup> मेको नाक्त यरूसलेम रे पा ब्रोंइचा गेब ब्वाक्कु शाइश्शा यीब। मिनु मेको उइक्थ पूर्व डा समुन्द्र गे नु उइक्थ पच्छिम डा समुन्द्र गे शाइक्ब। मेको होशो नु सिक्शो नेल्ल नाक्त शाइक्ब। *इजीकीएल ४७:१-८*

<sup>9</sup> परमप्रभु यावे रागी नेल्ल डा पिप दुम्ब। मेको नाक्त परमप्रभु यावे का ला बाक्ब। आ नें यो का ला बाक्ब। *भजन संग्रह ९७:१; प्रकाश ११:१५*

<sup>10</sup> मिनु रागी नेल्ल दिंम दुम्ब। मेको गेबा रे पा यरूसलेम आ दक्खिन डा रिम्मोन सम्म दिंम दुम्ब। तन्न यरूसलेम बेन्यामीन लाप्चो रे, माइत लाप्चो लाक्शा, सुर डा लाप्चो सम्म नु हानानेल माइश्शो लाइश्शो खिं रे पिप आ अडगुर खाक्तीक सम्म बाक्ब। मिनु यरूसलेम आ इर डा बाक्तीकेम बाक्ब। *यहोसु १५:३२; येरमीया ३१:३८*<sup>11</sup> मिनु यरूसलेममी मुरपुकी बाक्नीमी। मिनु मेको गेनायो लेंशा खतम मसेल्नीम। यरूसलेम मारेइ मद्दुम्ब बाक्ब। *प्रकाश २२:३; येरमीया ३३:१६*

<sup>12</sup> परमप्रभु यावेमी यरूसलेम कली लडाइ तोइब आन कली मार बेक्तीक रोइ पपाइक्ब दंशा हना, मुर गाक्ना गाक्ना आन श्ये राक्तीके, आन मिक्च आन बाक्तीकेम राक्तीके नु आन लें आन शोवमी राक्तीके रोइ पपाइक्ब।<sup>13</sup> मेको नाक्ती परमप्रभु यावे रे पा मुर शुश हिंनीम। मेको नेल्लेमी आन नेक्था डा मुर आन गुड ग्याइक्नीम। मिनु नोले राम्शी पोक्नीम।<sup>14</sup> यहूदा आ मुरपुकीमी यो यरूसलेममी लडाइ पाइनीम। मिनु रागी रागी डा मुर आन शोप खुप्नीम। मार खुप्नीम दंशा हना, सुन चांदी नु वासी शुश खुप्शा तेल्नीम।<sup>15</sup> मेको आन बाक्तीकेम बाक्शो शारा, खच्चर, दलओठ, गधा नु मेकेर मार मार बी ब्यफ क्यारश भेडा बाक्मा, मेको नेल्ल मुर कली साइक्ब रोइ पाइनीम।

<sup>16</sup> मिनु यरूसलेम कली लडाइ तोइब रागी रागी डा मुर आन दाते डा सु सु ब्रोंइशा लीमा, मेकोपुकी बर्स बर्समी यरूसलेम लशा पिप नु मुर नेल्ल आन परमप्रभु यावे कली मान पा ठेयब सेल्चा माल्नीम। मेकोपुकीमी गोठ सेल्शा मानेतीक चाड मानेचा कली यरूसलेम लचा माल्नीम। *जकरिया १४:९*<sup>17</sup> मिनु तेको रागी नु खिं डा मुर नु पिप, मुर नेल्ल आन परमप्रभु यावे कली मान पा ठेयब सेल्चा कली यरूसलेम मलाम्तेक्म हना, मेको आन कली रेउ मयीब।<sup>18</sup> मिनु इजीप्त रागी डा मुरपुकी गोठ सेल्शा मानेतीक चाड मानेचा कली यरूसलेम मलाम्तेक्म हना, मेकोपुकी यो अर्को रागी डा मुर खोदेंशो पा परमप्रभु यावेमी गेशो श्येत जाइनीम।<sup>19</sup> इजीप्त रागी नु रागी नेल्ल डा मुर सु मेको गोठ सेल्शा मानेतीक चाड मानेथ मलाइनीमी, मेको मोदेंशो सजाइ ताइनीम।

<sup>20</sup> मेको नाक्ती शारा आन किडगोम यो “परमप्रभु यावे कली ला बाक्नीम” दे मुशा ब्रेक्शो बाक्ब। मिनु परमप्रभु यावे आ खिं डा क्येतीक ग्योबपुकी, चढेतीक आ डोंइती बाक्शो ग्योब खोदेंशो पा “परमप्रभु यावे केन बाक्नीम” दे ब्रेक्शो बाक्ब। *प्रस्थान २८:३६*<sup>21</sup> मिनु यरूसलेम नु यहूदामी बाक्शो क्येतीक ग्योब नेल्ल मुर नेल्ल आन परमप्रभु यावे कली ला बाक्नीम। सु सुमी चढेनीमी, मेकोपुकीमे मेको ग्योबुम आन चढेशो श्ये लोप्ने चाप्नीम। मिनु मेको नाक्त रे मुर नेल्ल आन परमप्रभु यावे आ खिंमी ग्याक्ब लेयब मुर का यो मबाक्नीम। *प्रकाश २१:२६-२७; मत्ती २१:१२*

## मलाकी

हिब्रू लोवमी मलाकी आ अर्थ “आं लोव कुरब” बाक्ब। साइ डोंइती डा थमा सुइक्ब हिरोनिमुस शुश ब्रेक्ब मुर का बाक्त। मेकोमी “आं लोव कुरब” नें पाइश्शो, परमप्रभु यावे आ खिं लेंशा सेल्ब, जोक्ब तुइक्ब एज्रा आ खुइश्शो नें बाक्ब, देंब। मुरपुकीम चहिं मेको दुम्ने मचाप्व देंशो बाक्तेक्म। नेहेम्याहमी इस्राएली आन पर्बम ब्रेक्बो नु मलाकी किताबम ब्रेक्बो लोव शुश गारब। इस्राएली ग्याइश्शा लाइक्चा पुंडसीमा नोले लेंशा यरूसलेमम बाक्बो बाक्तेक्म। शुश मुरुमी अर्को रागी डा मीश चाक्बो बाक्तेक्म। मेना ४३२ बि. सी. बाक्बो बाक्त।

१. मुर आन थमा सुइक्चा गाम्त।

२. अर्को रागी डा मीश आल कली चाक्बो बाक्तेक्म।

३. १० भाग मगेब दुम्शो बाक्तेक्म। मेको नेल्ल तशा यो, परमप्रभु यावेमी “गो इन कली दाक्नुड। आं गे लेत्तीन। गो इन कली आसीक गेनुड” दे लोव कुरब का सोइश्शो बाक्त।

परमप्रभुम इस्राएली आन कली दाक्बो

१ मलाकीमी इस्राएली आन कली परमप्रभु यावे आ पशो लोव देंत।  
२ परमप्रभु यावेमी “गो इन कली दाक्ताक्ड। गेपुकीमी चहिं ‘दोपा आंइ कली दाक्तीनी डा? मार, एसाव याक्ब आ लोक्ब ममाइ डा?’ देंनीनी। मिनु परमप्रभु यावेमी गो याक्ब कली शुश दाक्ताक्ड। उत्पत्ती २५:२३; रोमी ९:१३<sup>३</sup> तन्न एसाव कली काइ मदाक्तु। मोपतीके मेको आ बाक्तीक पहाड कली गोरशो रागी सेल्ता। आ थेरशो रू सिवार आन बाक्तीक दुम्पाइक्ता” देंत। यसैया ३४:१३<sup>४</sup> मिनु एदोम डा मुरपुकीमी “गोपुकी ब्रुंइसाक्ब हना यो, गो लेंशा मेको ब्रेश्शो नेल्ल सेल्नीकी” देंतेक्म। मुर नेल्ल आन परमप्रभु यावेमी “मेकोपुकीमी सेल्तेक्म हना यो, गो प्रेल्लुड। मिनु अरु मुरपुकीमी मेको आ पर्बम ‘एको ठीक मपाइब रागी का बाक्ब। परमप्रभु यावे मेको रागी तशा, गेना हना यो गाइक्ब’ ” देंनीम।<sup>५</sup> गेपुकीमी मेको नेल्ल तशा “तेइ तेइ रागी डा मुरपुकीमी परमप्रभु यावे कली ठेयब सेल्नीम” दे लोव पाइनीनी।

ग्रांरा दिचा डा थोव्रक चढ़ेशो

६ मिनु मुर नेल्ल आन परमप्रभु यावेमी आ नें आइक्च सेल्ब चढ़ेब आन कली “तौपुकीमी आन आफ कली मान पाइनीम। मिनु गेय पाइबपुकीमी आन होव्रप कली यो मान पाइनीम। गो इन आफ नड हना, मारदे आं कली मान मपाइनीनी? गो इन होव्रप नड हना, मारदे आं कली मान पा महिनीनी?” देंत। मिनु गेपुकीमी “गो दोपा इन नें आइक्च सेल्का?” देंतीनी। प्रस्थान २०:१२<sup>७</sup> परमप्रभुमी “गेपुकी आं कली ग्रांरा दिचा डा थोव्रक आं चढ़ेतीकेमी चढ़ेनीनी। मिनु गेपुकीमी ‘दोपा इन कली ग्रांरा दिपाइक्का?’ दे लोव पाइनीनी। परमप्रभु यावे आ टेबल कली मारेइ खोइ मलाक्नीनी।

८ गेपुकीमी मिक्च मताइब बस्तु चढ़ेथ चाक्नीनी। मिनु मेको दूली मबाक्ब देंनीनी। खोइल मदुक्ब नु रोइ पशो बस्तु चढ़ेचा दूली मबाक्ब देंनीनी। मिनु इन रागी डा ठेयब मुर कली मोदेंशो गेनीनु, मार, मेको ग्येरशा ताक्शा, इन कली दाक्ब डा?” दे मुर नेल्ल आन परमप्रभु यावेमी देंत। लेवी २२:२०, २३

९ मिनु “परमप्रभु आंइ कली शिशी पन” दे पुनीन। “गेपुकीमी मोदेंशो मरिश्शो थोव्रक चढ़ेशा मरिश्शो पाइतीनी। मिनु इन कली दोपा शिशी पाइनुडा?” दे मुर नेल्ल आन परमप्रभु यावेमी देंत।<sup>१०</sup> मिनु लेंशा “गेपुकीमी आं चढ़ेतीकेमी मो मी मुइक्चा क्येडा का लशा लाप्यो चोक्नी हना, रिश्शो दुम वा। गो इन कली तशा मयेरसीशो बाक्नुड। मिनु इन चढ़ेशो यो मताक्नुड” दे मुर नेल्ल आन परमप्रभु यावेमी देंत। मलाकी २:१३; यसैया १:१३<sup>११</sup> “नां दाप्तीक रे नां पेरतीक सम्म रागी रागी डा मुर आन दातेमी आं नें ठेयब बाक्ब। रागी नेल्ल डा मुरपुकीमी आं कली धूप चोशा, रिश्शो थोव्रक चढ़ेनीम। मारदे हना रागी रागी डा मुर आन दातेमी आं नें ठेयब बाक्ब” दे

मुर नेल्ल आन परमप्रभु यावेमी देंत। यसैया ६०:१-७<sup>१२</sup> मिनु “गेपुकीमी ‘परमप्रभु आ टेबल ग्रांरा दिचा डा बाक्ब, मेक बाक्बो थोव्रक यो ठीक दुम्चा ममाल्ब’ दे आं नें कली आइक्च सेल्नीनी।<sup>१३</sup> मिनु गेपुकीमी ‘एको गिश श्येत बाक्बा’ दे आं कली चढ़ेतीक आ पर्बम इन नें कुप्नीनी। गेपुकीमी रोइश्शो बस्तु चाक्नीनी। खोइल मदुक्ब नु रोइ पशो बस्तु चढ़ेथ चाक्नीनी। मार, गो इन चढ़ेशो ग्येरशा ताक्चा माल्नुडा डा?” दे परमप्रभु यावेमी देंत।<sup>१४</sup> “सु सुमी आंम बस्तु आन बगाल रे पा ‘रिश्शो बस्तु चढ़ेनुड’ देंनीमी, तन्न नोले मरिश्शो चढ़ेनीमी, मेको जोल पाइब सराप राइनीम। मारदे हना गो ठेयब पिप नड। आं नें रागी रागी नेल्ल डा मुर आन दातेमी हिंचा डा बाक्ब” दे मुर नेल्ल आन परमप्रभु यावेमी देंत। लेवी २२:१९

चढ़ेब आन कली अरेशो

२ मिनु मुर नेल्ल आन परमप्रभु यावेमी “गे चढ़ेबपुकी, एको शेंशो लोव्र इन कली बाक्ब।<sup>२</sup> गो इन नोफा मदाइक्ताक्नी नु आं नें कली मान पचा कली ममिम्ताक्नी हना, गो इन कली सराप पाइनन्नी। इन कली गेशो आसीक सराप दुम्ब। मारदे हना गे काइ मटीब बाक्नीनी। गो थमा पा इन आसीक कली सराप सेल्नुड। ब्यवस्था २८:१५<sup>३</sup> गो इन पतीके इन आल आन कली हुइक्नुड। इन चढ़ेशो बस्तु आन गा क्यी डा ग्रांरा इन कुलम देप्नुड। मिनु इन कली आं डोंइती रे तिल्लुड।

४ गो लेवी नु पशो कबल गेना हना यो लील, दे इन कली मेको शेंतीक सोइक्ताक्ड।<sup>५</sup> आं पशो कबल ब्रोंइतीक नु थुं नाइक्तीक कबल बाक्ब। गो मेको कबल आं कली मान पा हिंल, दे गेता। मेकोमी आं कली मान पा आं नें थिचा शुश हिंल।<sup>६</sup> मेकोमी रिश्शो शेंतीक लोव्र पाप्तु। गेनायो दूली मशेंद। थम रिश्शो नु ठीक पतीकेमी गो नु गाक्त। मिनु मेकोमी ठीक मपाइब शुश मुर आन कली आन मरिश्शो पतीक रे लेप्पाइक्तु।

७ चढ़ेबपुकीमी तुइक्तीक लोव्र होस पा पचा माल्नीम। मिनु मुरपुकीमी मेको आन शेंशो नेंचा माल्नीम। मारदे हना चढ़ेबपुकी मुर नेल्ल आन परमप्रभु यावे आ सोइश्शो लोव्र पाइब बाक्नीम। ब्यवस्था ३३:१०; हाग्वी १:१३<sup>८</sup> गेपुकी चहिं आं लां प्रोंइशा, हेंथे गाक्तीनी। इन दूली शेंतीकेमी गे शुश मुर आन कली हेंथे गाक्ब सेल्तीनी। गेपुकीमी लेवी नु पशो कबल खतम सेल्तीनी” दे मुर नेल्ल आन परमप्रभु यावेमी देंत।<sup>९</sup> परमप्रभुमी “मोपतीके गो इन कली मुर नेल्ल आन डोंइती आइक्च नु महिक्सीशो सेल्ता। मारदे हना गेपुकीमी आं लां प्रोंइतीनी। आं शेंशो लोव्र मटिथु, कुल कोव्रमुशा हुकुम पाइतीनी” देंत।

यहूदा आ मरिश्शो पशो

१० मार, गो नेल्ल इं आफ कान ममाइ डा? मार, परमप्रभु कामीन इं कली मसेला डा? मारदे गोपुकीमी कामी अर्को कली थमा मसुइक्थु, इं किकी

पिपी आन कली गेशो कबल खोइक्नया? मलाकी १:६; अय्युब ३१:१५; एफिसी ४:६

11 यहूदामी आं कली प्रॉइती। मिनु इस्राएल नु यरूसलेममी ग्रांग्रा दित्वा डा गेय दुश्शो बाक्ब। मारदे हना यहूदामी परमप्रभु यावे आ दाक्शो बाक्तीके ग्रांग्रा दिशो सेल्लु। दोपा मोदेशो सेल्लु दॅशा हना, आंम तौ आन कली देवी देवता आन कली ठेयब सेल्ब मुर आन तमी चाक्नु। एज्रा ९:२ 12 परमप्रभु यावेमी मोदेशो पाइब मुर आन कली याकूब आ मुर आन बाक्तीक ताम्बु रे तिल्लब। मिनु मेकोपुकीम मुर नेल्ल आन परमप्रभु यावे कली गेनायो चढ़ेचा मताइनीम।

13 गेपुकीमी अर्को मार पाइनीनी दॅशा हना, परमप्रभु यावे आ चढ़ेतीके आ नेक्था डाक्शा, रोंका पा इन प्रेक्कुमी जिल्लीनी। मारदे हना इन चढ़ेशो ग्येरशा मन्नाइब। मलाकी १:१० 14 मिनु गेपुकीमी “मारदे मन्नाइब” दे हिल्लो पाइनीनी। मारदे हना गे इन ठिटा बाक्ची ना डा मीश प्रॉइतीनी। मेको आ पर्बम परमप्रभु यावे सांकछी बाक्ब। मेको इ वारच इ मीश बाक्ब, इ कबल पा चाक्शो मीश बाक्ब।

15 परमप्रभुम मेको निक्शी आस कली कान मसेला डा? मेको आस सोक्त नु गिंम परमप्रभु यावे के बाक्नीस। मारदे मेको निक्शी आस कली कान सेल्लु दॅशा हना, आस आल परमप्रभु आ मुर दुम्मल, दे कान सेल्लु। मोपतीके गेपुकी आंम थुं आ पर्बम होस पा, सुइमी आंम ठिटा बाक्ची ना डा मीश कली मप्रोनीन। 16 मारदे हना परमप्रभु यावे, इस्राएली आन परमप्रभुमी गो मीश, वॉइश कली प्रॉइब मुर काइ मदाक्नुड। आन जिशो मदाक्नुड। मोपतीके इन थुं फ्रेंदीन। इन मीश मप्रॉइब दुमीन। ब्यवस्था २४:१

परमप्रभु आ निसाफ पतीक नाक्त

17 गे इन लोवमी परमप्रभु यावे कली ब्रीपाइक्तीनी। मोपा यो गेपुकीमी “गेपुकीमी मार लोवमी इन कली ब्रीपाइक्का?” दॅतीनी। गेपुकीमी “दूली लोव पा मरिश्शो गेय पाइब नेल्ल परमप्रभु यावे आ डोंइती ठीक बाक्नीम। मिनु मेको, मेको आन कली तशा ग्येरसीशो बाक्ब” दे “निसाफ पाइब परमप्रभु ते बाक्बा डा?” दे यो दॅतीनी। मलाकी ३:१३-१४

3 परमप्रभुमी “नेनीन, गो आं लोव पाइब आं डोंइती सोइक्नुड।

मेकोमी आं डोंइती आं लां सेल्चा माल्ब। इन माल्शो प्रभु रीब पा आ खिंम जाक्ब। मेको इन माल्शो कबल डा लोव चोक्ब बाक्ब। गे मेको कली शुश दाक्नीनी” दे मुर नेल्ल आन परमप्रभु यावेमी दॅत। मत्ती ११:१०; मर्कूस १:२; लूका १:१७ 2 मिनु मेकोमी “तन्न आ जाक्ची नाक्त सु फाल्ने चाप्बा डा? आ गूची ना सु राप्शा बाक्ने चाप्बा डा? मारदे हना मेको तुप्तीलमी मुइश्शो मी नु वा मुरब आ वा बुश सेल्लीक खोदेशो बाक्ब। यस्सैया १:२५

3 मेको चांदी यपाइश्शा रिश्शो सेल्ब खोदेशो पा निसाफ पाइब बाक्ब। लेवी आ चच युइ आन कली सुन चांदी खोदेशो पा यपाइश्शा रिश्शो सेल्ब। नोले मेकोपुकीमी परमप्रभु यावे कली ठीक पा चढ़ेनीम। जकरिया १३:९ 4 मेना परमप्रभु यावेमी यहूदा नु यरूसलेममी चढ़ेशो साइ डोंइती डा खोदेशो पा ब्राइब” दॅत।

5 तन्न मेको क्येडा डोंइती “गो निसाफ पचा कली इन बाक्तीकेमी जाक्नुड। गो टुना मुना पाइबपुकी, मुर आन मीश वॉइश नु इप्बपुकी, जोल पा कसम जाइबपुकी, गेय पाइब आन कली गाल्च मगेबपुकी, वॉइश बेक्शो मीश मुर, रोम रोइक्च, नु अर्को रागी डा मुर आन कली निसाफ पा मगेबपुकी नु आं क्येडा महिंब नेल्ल आन कली निसाफ पथ जाक्नुड” दे मुर नेल्ल आन परमप्रभु यावेमी दॅत।

गेचा माल्शो १० भाग

6 मिनु मेकोमी “गो, परमप्रभु यावे, गेनायो मफांडसीनुड। मोपतीके गे याकूब आ चच युइ मुल सम्म ब्रॉइशो बाक्नीनी। 7 इन किकी पिपी आन बाक्ची ना रे आं फुल्लुम मुशा ब्रेक्शो लोव मटिथु, हेंथे लां खोइक्तीनी। आं गे लेतीन। मिनु गो इन गे लेल्लुड” दे मुर नेल्ल आन परमप्रभु यावेमी दॅत। तन्न

गेपुकीमी “गो दोपा लेत्वा?” दॅतीनी। जकरिया १:३ 8 परमप्रभुमी “मार, मुरपुकीमी परमप्रभु आ मार मार खुइ पने चाप्नीमी डा? तन्न गेपुकीम आं के खुइ पशो बाक्नीनी। मो हना यो गेपुकीमी ‘गेपुकीमी इन के मार खुइ पका डा?’ दॅतीनी। इन १० भाग डा भाग का नु मार मार चढ़ेतीकेमी खुइ पशो बाक्नीनी। प्रस्थान २५:२ 9 गे सराप रशो दुम्तीनी। मारदे हना गे आं मार मार खुइ पाइब बाक्नीनी। गे इस्राएल नु मुर नेल्लेमी आं कली रोइक्ताक्पीनी। हागै १:५-६ 10 गे नेल्लेमी इन १० भाग डा भाग का वोइक्तीकेमी चाक्कीन। मिनु आं खिंमी जचा थोवक बाक्ल। मोपा आं कली नाक्शा, कोवडीन। गो स्वर्ग डा लाप्चो रोकशा, इन कली शुश आसीक गेबाक्डा, कों, मगेबाक्डा” दे मुर नेल्ल आन परमप्रभु यावेमी दॅत। 11 मिनु “गो इन रू डा बाली नाली खतम मसेल्चा डा पा माले आन कली हुइक्नुडमी। इन रूम बाक्शो अडगुर सिश्शा ग्रेल्लनीम” दे मुर नेल्ल आन परमप्रभु यावेमी दॅत। योएल १:४

परमप्रभुमी शिशी पाइब दॅशो

12 मिनु “रागी रागी डा मुर नेल्लेमी इन पर्बम ‘आसीक रशा, ग्येरशो मुर बाक्नीमी’ दॅतीनी। मारदे हना इन रागी थम आसीक रशो रागी दुम्ब” दे मुर नेल्ल आन परमप्रभु यावेमी दॅत।

13 मिनु परमप्रभु यावेमी “गे आं पर्बम मरिश्शो लोव पाइतीनी हना यो ‘इन कली मार मरिश्शो लोव पका डा?’ दॅतीनी। 14 गेपुकीमी ‘परमप्रभु आ गेय पचा, मोशीन बाक्ब। आ शेंशो लोव पचा नु बेक्शो मुर आ पर्बम रोंका पशो खोदेशो पा मुर नेल्ल आन परमप्रभु यावे आ डोंइती रोंका पचा, मोशा बाक्ब। भजन संग्रह ७३:१३-१४; जकरिया ७:३, ५ 15 मुल गो ठेयब लेश्शो मुर आन कली रिश्शो मुर बाक्नीम, दॅतीनी। मारदे हना मरिश्शो पाइबपुकी दारनीम। परमप्रभु कली मरिश्शो पाइब ब्रॉइशा बाक्नीम’ दॅतीनी” दॅत।

16 मिनु परमप्रभु यावे क्येडा हिंब आन दातेमी लोव पाक्तेक्म। मिनु परमप्रभु यावेमी नोफा दाइश्शा, मेको आन लोव नेंतु। मिनु आ डोंइती आ कली मान पा हिंब, आ नें ठेयब सेल्ब आन पर्बम मिम्तीक किताब ब्रेक्शो बाक्त। 17 मिनु मुर नेल्ल आन परमप्रभु यावेमी “मेको आं मुर दुम्नीम। आं निसाफ पतीक नाक्त आं नेक्था डा मुर दुम्नीम। दोपा मुरुमी आंम कली गेय पाइब तौ कली शिशी पा वोइक्बा, मोपा गो मेको आन कली शिशी पा वोइक्नुड। प्रस्थान १९:५ 18 मेको नाक्त ठीक पाइब नु परमप्रभु आ अरेशो मटीब खाल का डा मदुम्नीम। मेको ताइनीनी। परमप्रभु कली गेय पाइब नु गेय मपाइब खाल का डा मदुम्नीम। मेको यो ताइनीनी” दॅत।

परमप्रभु यावे आ नाक्त

4 मुर नेल्ल आन परमप्रभु यावेमी “आं निसाफ पतीक नाक्ती जाक्ब।

मेको ठेयब मी खोदेशो पा ब्रशो बाक्ब। मेना ठेयब लेश्शो नु मरिश्शो पाइब नेल्ल सोवशो ठुटा खोदेशो बाक्नीम। मेको नाक्ती मीम मेको आन कली नेक्ब। मिनु मेको आन शाक्श नु राशी यो मलीब। 2 तन्न गे आं नें कली मान पाइब, इन डोंइती आं ठीक पतीके नां खोदेशो पा दाप्ब। इन रोइ यो सानीनी। गे गोठ रे पा गूशो बाछा खोदेशो पा प्रेक्ना प्रेक्न दोरनीनी। लूका १:७ 3 मिनु गेपुकीमी आं अरेशो लोव मटीब आन कली इन खोइलीमी दिम्नीनी। आं निसाफ पतीक नाक्ती मेको इन खोइलीम दिम्शा, पुलु खोदेशो सेल्चा पुंइसीनीमी” दे मुर नेल्ल आन परमप्रभु यावेमी दॅत।

4 परमप्रभुमी “आं वाइल मोसामी इन कली गेशो आं अरेशो लोव मिम्तीन। गो मेको फुल्लुम मुशा ब्रेक्शो लोव नु आं दॅशो ठीक पतीक लोव होरेब डांडामी इस्राएली नेल्ल आन कली अरेचा कली गेता। 5 नेनीन, आं ठेयब नु हिंचा डा नाक्त जाक्चा क्येडा डोंइती आं लोव पाइब एलीया कली इन बाक्तीकेम सोइक्नुड। मत्ती ११:१४; १७:११-१३; योएल ३:४ 6 मिनु मेकोमी आम आफ आस थुं आस आल गे नु आल आन थुं आम आफ गे लेप्पाइक्ब। मोदेशो मदुम्त हना, गो रागी कली सराप पाइक्नुड” दे परमप्रभु यावेमी दॅत। लूका १:१७



# मत्ती

एको किताब मत्ती आ ब्रेक्शो बाक्ब। मत्ती शेंसीब आन दाते डा का बाक्त। मेको कली अल्फयस आ तौ लेवी यो देंतेक्म। तन्न थमा सुदा नोले मत्ती नें वोइक्तु।

मत्ती आ ब्रेक्शो ग्येरपाइक्ब लोत्र यरूसलेम खतम सेल्चा क्येडा डॉइती ब्रेक्ने थुम्शो बाक्त। एको ५८ ए. डी. हिब्रू लोत्रमी ब्रेक्शो बाक्त। नोले यहूदी नेल्ल ब्रातेक्म। मिनु मत्ती मेको आन कली शेंचा कली लत। मेना ग्रीक लोत्र पाइबमी यो एको लोत्र रुप्चा दाक्शो बाक्तेक्म। मोपतीके मेकोमी आ ब्रेक्शो ग्येरपाइक्ब लोत्र लेंशा ग्रीक लोत्रम ब्रेक्शो बाक्त, दे मिन्नीम। मत्ती आ ब्रेक्शो ग्येरपाइक्ब लोत्रम डॉइती नु नोले दुम्शो लोत्र इक्का खाल्शा ब्रेक्शो बाक्ब। येसु ख्रीस्त पिप बाक्ब। परमप्रभु यावे आ राज्य आ पर्वम लोत्र पाइब।

येसु आ किकी पिपी  
लूका ३:२३-२८

- 1 अब्राहाम आ तौ, पिप दाऊद आ तौ, येसु ख्रीस्त आ किकी पिपी आन नें एको बाक्नीम। *इतिहास १७:११; उत्पत्ती २२:१८*
- 2 येसु ख्रीस्त आ किकी पिपी सु सु बाक्मा बाक्त देंशा हना, डॉइती अब्राहाम बाक्माक्त। अब्राहाममी इसहाक थिमाक्त। इसहाकमी याकूब थिमाक्त। याकूबमी यहूदा नु आ वोबु थीमी बाक्त। *उत्पत्ती २१:३, १२; उत्पत्ती २५:२६; उत्पत्ती २९:३५; उत्पत्ती ४९:१०* <sup>3</sup> यहूदामी तामार रे पेरेस नु जेरह तौ निक्शी थिम्सी बाक्त। पेरेसमी हेसोन थिमाक्त। हेसोनमी अराम थिमाक्त। *रूथ ४:१८-२२; उत्पत्ती ३८:२९-३०* <sup>4</sup> अराममी अम्मीनादाब थिमाक्त। अम्मीनादाबमी नहशोन थिमाक्त। नहशोनमी साल्मोन थिमाक्त। <sup>5</sup> साल्मोनमी राहाब माइश्शो मीश रे बोआज थिमाक्त। बोआजमी रूथ माइश्शो मीश रे ओबेद थिमाक्त। ओबेदमी येस्से थिमाक्त। येस्सेमी दाऊद थिमाक्त। दाऊद चहिं पिप दुम्माक्त। *यहोसु २:१; रूथ ४:१३-१७* <sup>6</sup> पिप दाऊदमी उरीयाह आ मीश चाक्शा, सोलोमन थिमाक्त। *२सामुएल १२:२४* <sup>7</sup> सोलोमनमी रेहोबाम थिमाक्त। रेहोबाममी अबीयाह थिमाक्त। अबीयाहमी आसा थिमाक्त। *इतिहास ३:१०-१६* <sup>8</sup> आसामी येहो-शाफात थिमाक्त। येहो-शाफातमी योराम थिमाक्त। मिनु योराममी उज्जीयाह थिमाक्त। <sup>9</sup> उज्जीयाहमी योथाम थिमाक्त। योथाममी आहाज थिमाक्त। आहाजमी हिज्कीयाह थिमाक्त। <sup>10</sup> हिज्कीयाहमी मनस्से थिमाक्त। मनस्सेमी आमोन थिमाक्त। आमोनमी योसीयाह थिमाक्त। <sup>11</sup> योसीयाहमी येकोन्याह नु आ लोक्ब थीमी बाक्त। येकोन्याह आ पालामी बेबीलोन डा मुरपुकीमी यहूदी आन कली लडाइ पा ग्याइश्शा बेबीलोन चाक्दीत्मे बाक्त। *२राजा २५:७, ११, २१*

<sup>12</sup> बेबीलोन चाक्दीत्मे आ नोले येकोन्याहमी शाल्तीएल थिम्माक्त। शाल्तीएलमी जेरूब-बाबेल थिमाक्त। <sup>13</sup> जेरूब-बाबेलमी अबीउद थिमाक्त। अबीउदमी एल्याकीम थिमाक्त। एल्याकीममी आजोर थिमाक्त। <sup>14</sup> आजोरमी सादोक थिमाक्त। सादोकमी अकीम थिमाक्त। अकीममी एलीउद थिमाक्त। <sup>15</sup> एलीउदमी एलाजर थिमाक्त। एलाजरमी मात्थान थिमाक्त। मात्थानमी याकूब थिमाक्त। <sup>16</sup> मिनु याकूबमी योसेफ थिमाक्त। योसेफ मरीयम आ वॉइश बाक्माक्त। मरीयममी येसु थिमाक्त। येसु कली ख्रीस्त देंमा बाक्त। *लूका १:२७*

<sup>17</sup> अब्राहाम रे पा दाऊद सम्म १४ पाला दुम्मा बाक्त। मिनु दाऊद पिप रे पा बेबीलोन चाक्दीत्वी सम्म १४ पाला दुम्मा बाक्त। बेबीलोन चाक्दीश्शो रे ख्रीस्त जरमेसेनु १४ पाला दुम्मा बाक्त।

येसु जरमेशो

<sup>18</sup> येसु ख्रीस्त जरमेचा कली दोदेंशो दुम्माक्त देंशा हना, मरीयम योसेफ कली गेशा लोत्र खोइक्ने थुम्शो बाक्माक्त। मिनु योसेफमी मरीयम कली

गुंबे पा आ खिं लाइक्चा क्येडा डॉइती मरीयम आल कुरशो बाक्माक्त। मेको आल चहिं मुर आ आल ममाइ। परमप्रभु यावे आ सोक्त रे पा दुम्शो बाक्माक्त। *लूका १:३५* <sup>19</sup> मिनु योसेफमी “मरीयम आल कुरशो बाक्माक्त” दे तुइश्शा “मुल प्रॉइचा दुम्ती” दे मिम्ता बाक्त। योसेफ रिम्शो मुर बाक्माक्त। मोपतीके “मरीयम कली मुने मतोकचा” दे मिम्शो बाक्माक्त। <sup>20</sup> मिनु “गो प्रॉइचा दुम्ती” दे मिम्ना मिम्न बाक्मेनु, काबु डोमु तवा बाक्त। मिनु डोमु तवानु, परमप्रभु यावे आ स्वर्ग डा गेय पाइबमी “दाऊद आ तौ योसेफ नेनो। मरीयम कली प्रॉइनुड, दे ममिम्तो। महिंथु इ खिं लाइश्शा वॉइसो। आ कोव्रजम बाक्शो चहिं परमप्रभु यावे आ सोक्त के बाक्त। <sup>21</sup> नोले तौ का थीब। मेको कली येसु नें वोटो। मारदे हना मेकोमी आ मुर आन कली पाप रे प्रॉइब” दे तुइक्पदा बाक्त। *लूका २:२१; प्रेरित ४:१२; भजन संग्रह १३०:८* <sup>22</sup> मेको मो दुम्शोमी परमप्रभु यावेमी साइ नेसी आ लोत्र पाइब पपाइश्शो लोत्र खाप्ताक्व। साइ नेसी परमप्रभु यावे आ लोत्र पाइबमी <sup>23</sup> “नेनीने, कन्ने मीश आलमी कोव्रज कुरशा, तौ का थीब। मेको आल आ नें इम्मानुएल वोइक्नीम। इम्मानुएल देंशो ‘परमप्रभु यावे गोपुकी नु बाक्शो बाक्ब’ दे रुम्सीब” दे ब्रेक्शो बाक्ब। *यसैया ७:१४* <sup>24</sup> योसेफ निन्द्रा रे सेंसीशा बोक्शा, परमप्रभु यावे आ स्वर्ग डा गेय पाइब आ लोत्र टिशा, मरीयम कली आ खिं लदा बाक्त। <sup>25</sup> मरीयम नु मइप्थु, तौ का थिमाक्त। मिनु मेको कली येसु नें वोदा बाक्त।

सोरुल कोव्रशा, जोक्ब तुइक्ब जाक्शो

<sup>2</sup> येसु यहूदीया रागी डा बेथलेहेम सहरमी जरमेसे बाक्त। मेना मेकेर हेरोद पिप बाक्माक्त। मिनु येसु जरमेसेनु, सोरुल कोव्रशा, जोक्ब तुइक्ब नां दाप्तीक रे यरूसलेममी जाक्मा बाक्त। *लूका २:१-७* <sup>2</sup> मिनु यरूसलेममी जाक्शा “यहूदी आन पिप ते जरमेसे? मारदे हना गोपुकीमी पूर्व डा रागीम आ सोरुल ताइतक। मिनु गो मेको कली ठेयब सेल्थ जाक्तक। ते बाक्मा?” देंमा बाक्त। *गन्ती २४:१७* <sup>3</sup> मिनु पिप हेरोद नु यरूसलेममी बाक्बपुकीमी मेको आन लोत्र नेंशा, आन थुं ग्येत्थ लुक्च दुम्मा बाक्त। <sup>4</sup> मिनु हेरोदमी ठेयब चढेब नु सास्त्री आन कली खुप्शा “ख्रीस्त ते जरमेसीबा?” दे हिल्लो पामी बाक्त। *सास्त्री यहूदी आन कली परमप्रभु यावे आ अरेशो लोत्र शेंब बाक्शो बाक्तेक्म।* <sup>5</sup> मिनु मेकोपुकीमी “यहूदीया डा बेथलेहेम सहरमी जरमेसीब। मारदे हना परमप्रभु यावे आ लोत्र पाइबमी मीका ५:१; यूहन्ना ७:४२” <sup>6</sup> ‘ए यहूदीया डा बेथलेहेम सहर, यहूदीया डा सहर नेल्ल क्येडा आइक्च महिक्सीशो सहर मनवे। मारदे हना इ इसाएली आन कली सासन पाइब बेथलेहेममी जरमेसीब’ दे ब्रेक्शो बाक्ब” दे शेंदमे बाक्त। *मीका ५:२*

<sup>7</sup> मिनु हेरोदमी मेको आन लोत्र नेंशा सुइमी मतुइक्थु, नां दाप्तीके रे जाक्शो सोरुल कोव्रब आन कली ब्रेत्तीमी बाक्त। मिनु मेको सोरुल गेना गूम, दे रुबा बाक्त। <sup>8</sup> मिनु “लो, मुल बेथलेहेम सहर लने। मेकेर जाक्दीश्शा, मेको आल मालीन। मिनु थिश्शा आं कली यो शेंदीन। गो यो लशा ठेयब सेल्नुड” दे सोइक्तीमी बाक्त।

9 मिनू मेकोपुकीमी पिप आ लोव्र नॅशा, आन लां खोदमे बाक्त। मिनू नां दाप्तीकेमी तशो सोरुलमी आन कली लां कोंडदीमी बाक्त। लां कोंडना कोंडन नक थिशो आल बाक्तीके आ सोरुल खा दिक्माक्त।<sup>10</sup> सोरुल खा दिक्शो तशा, शुश ग्येरशा आल आ बाक्तीकेमी ओव्रमा बाक्त।<sup>11</sup> मिनू ओव्रशा, आल नु आल आ ममा मरीयम कली तामे बाक्त। मिनू आन पोक्च थेक्शा आल कली ठेयब सेल्मे बाक्त। मिनू आन कुरशो थैलो प्राक्शा, सुन धूप नु ब्रोव्रशो रिना पाइब थोव्रक गुंडशा खेत्तमे बाक्त। *भजन संग्रह* ७२:१०, १५; *यसैया* ६०:६<sup>12</sup> आल कली गुम्ने थुम्शा, आन रागी लेत्वी ना परमप्रभु यावेमी डोमुमी “पिप हेरोद कली लॅशा मग्युमीने” दे तुडक्पाइक्मी बाक्त। मिनू यरूसलेम लतीक लां हेरशा, आन रागी लेम्मा बाक्त।

### इजीप्त रागी लशो

<sup>13</sup> मेकोपुकी लमा नोले काबु योसेफमी डोमुमी परमप्रभु यावे आ स्वर्ग डा गेय पाइब का फो गूशो तवा बाक्त। मेकोमी “मोबु आस कली लाइश्शा, एकेर रे प्रोक्शा, इजीप्त रागी जाक्दीश्शा, लेत्तीन मदेड सम्म बाक्कीन। मारदे हना पिप हेरोदमी आल कली साइक्चा, दे माल्चा चिक्ताक्व” दे मदा बाक्त।<sup>14</sup> मिनू योसेफमी निन्द्रा रे सेंसीशा छुल बोक्शा, मोबु आस कली लाइश्शा मेको, नाक्दोन इजीप्त प्रोक्मा बाक्त।<sup>15</sup> मिनू इजीप्त रागीमी जाक्दीश्शा, पिप हेरोद मबेक्म सम्म मेकेर बाक्मा बाक्त। मो दुश्शोमी परमप्रभु यावे आ लोव्र थमा दुम्माक्त। साइ नेसी परमप्रभु यावेमी आ लोव्र पाइब रे पा “इजीप्त रे लेत्तो, दे आं तौ कली ब्रेत्ताक्ड” दे देंशो बाक्माक्त। *होसे* ११:१

### पिपमी आल आन कली साइक्पाइश्शो

<sup>16</sup> पिप हेरोदमी मार पवा बाक्त देंशा हना “मेको सोरुल कोव्रशा जोक्ब तुडक्बपुकीमी जोल पाइयीमी बाक्त” दे तुडश्शा चुरमाक्त। मिनू आन देंशो लोव्रमी “पिप मेना जरमेसीब” दे मिम्शा, मेको पिप दुम्ब आल कली थिन्ने मचाप्तीके बेथलेहेम सहर एर ओथ गाउं डा बर्स निक्शी मलाक्शो वोंडिश आल नेल्ल आन कली माल्ना माल्न साइक्पाइक्मी बाक्त।<sup>17</sup> मो पवानु, परमप्रभु यावे आ लोव्र थमा दुम्माक्त। साइ नेसी परमप्रभु यावेमी आ लोव्र पाइब येरमीया रे पा<sup>18</sup> “रामाह सहरमी रोंका पा डाक्शो नेंसीब। राहेलमी डाक्ना डाक्न बाक्ब। सुइमी लेम्ने मचाप्नीम। मारदे हना आ आल साइक्चा पुंडसाक्म” देमाक्त। *येरमीया* ३१:१५; *उत्पत्ती* ३५:१९

### इजीप्त लां लेशो

<sup>19</sup> मिनू नोले पिप हेरोद बेक्माक्त। मिनू काबु इजीप्त रागीम बाक्शो योसेफ डोमु तवानु, परमप्रभु यावे आ स्वर्ग डा गेय पाइबमी<sup>20</sup> “मोबु आस कली लाइश्शा, इस्राएल लेशशा लावो। आल कली साइक्चा माल्बपुकी बेक्तेक्म” देमाक्त। *प्रस्थान* ४:१९<sup>21</sup> मिनू योसेफमी मोबु आस कली इस्राएल लेत्ता बाक्त।<sup>22</sup> मिनू लेशशा जाक्दीश्शा, यहूदीया रागीमी हेरोद आ तौ अरकीलाउस पिप दुश्शो बाक्त देंशो नॅशा, यहूदीया रागीमी बाक्चा हिंमाक्त। मिनू लॅशा डोमुमी “यहूदीयामी मबाक्कीन। गालील रागी लशा बाक्कीन” दे माइक्चा पुंडसे बाक्त। मिनू गालील रागी लमा बाक्त।<sup>23</sup> मिनू गालील डा नासरथ सहरमी जाक्दीश्शा बाक्मा बाक्त। मारदे हना साइ नेसी परमप्रभु यावे आ लोव्र पाइब आन लोव्र थमा दुम्मा माल्बाक्माक्त। मेकोपुकीमी “मेको कली नासरी देंनीम” देंशो बाक्मा बाक्ब। *लूका* २:३९; *यूहन्ना* १:४६

### ब्वाक्कुमी ख्रुम्शा गुंडब यूहन्ना

मर्कूस १:२-८; लूका ३:१-१८

<sup>3</sup> मेना ब्वाक्कुमी ख्रुम्शा गुंडब यूहन्ना यहूदीया डा गोरशो रागीम बाक्शा *लूका* १:१३<sup>2</sup> “इन थुं परमप्रभु यावे गे लेत्तीने। मारदे हना स्वर्ग डा राज्य जाक्चशो बाक्ब” दे मुर आन कली शॅना शॅन बाक्माक्त। *मत्ती* ४:१७; *रोमी* १२:२<sup>3</sup> साइ नेसी परमप्रभु यावे आ लोव्र पाइब यसैयामी “गोरशो रागीमी सेंदा कामी ओदेंशो नेंसीब ‘प्रभु आ लां सेलीने। आ

गाक्तीके फुल्लु ग्रोक्शा थेलीने’ देंशो नेंसीब” देंशो बाक्माक्त। मेको लोव्र पाइब यूहन्ना बाक्माक्त। *यसैया* ४०:३; *यूहन्ना* १:२३<sup>4</sup> यूहन्नामी दलओँठ आ चां के प्रोव्रशो वा फेक्बाक्माक्त, कुशुल के पेटी किष्बाक्माक्त। मिनू सल्हा ब्वशा, रोका खुदो जशा बाक्बाक्माक्त। *२राजा* १:८<sup>5</sup> मिनू गोरशो रागीम बाक्मेनु, यरूसलेम सहर नु यहूदीया रागी डा गाउं सहर डा मुर नेल्ल जाक्शा देल्मा बाक्त। यर्दन खोला आ नेक्था डा मुरपुकी यो शुश जाक्शा देल्मा बाक्त।<sup>6</sup> यूहन्ना आ लोव्र नॅशा, शुश मुरुमी आन मरिम्शो पशो शोव्रडमे बाक्त। मो पा शोव्रब आन कली यूहन्नामी यर्दन खोलामी ख्रुम्शा गुंडदीमी बाक्त।

<sup>7</sup> मिनू यूहन्नामी फरिसी नु सदुकी शुश जाक्शो तशा, मेको आन कली “गे बुस्स आ खलकपुकी, सुमी परमप्रभु यावे आ सजाइ रे ब्रोंडचा तांडसीब, दे शेंदीनी? फरिसी रिती थीती सेल्शा, रिम्शो पचा कली कोव्रब यो बाक्शो बाक्तेक्म। सदुकी यहूदी आन सरकार डा हुल ‘मुर मसेंसीनीम’ दे थमा सुइक्ब बाक्शो बाक्तेक्म। *मत्ती* २३:३३<sup>8</sup> परमप्रभु यावे गे इन थुं लेश्शो तचा डा पा फल सिप्पा कोंडदीने।<sup>9</sup> अब्राहाम इं आफ बाक्ब, दे शोर गाक्शा मबाक्कीन। मारदे हना परमप्रभु यावेमी एको फुल्लु रे अब्राहाम कली आल सेल्ने चाप्ब, दे तुडक्तीन। *यूहन्ना* ८:३३, ३९; *रोमी* २:२८:२९; *रोमी* ४:१२<sup>10</sup> तिम्चा, दे रवा आ पुंमी खा वोइश्शो बाक्ब। फल मसिप्ब रवा का का पा तिम्शा मीमी चोचा पुंडसीनीम, दे तुडक्तीन। *लूका* १३:६-९<sup>11</sup> इन थुं लेत्वा कली इन कली ब्वाक्कुम ख्रुम्शा गुंडननी। गो ब्वाक्कुम ख्रुम्शा गुंडब ला नड। आं नोले जाक्ब चहिं आं क्येडा शुश सक्ति पाइश्शो ठेयब बाक्ब। गो मेको आ जुत्ता गुप्शा कुरचा लायो मशिरनुड। मेकोमी इन कली परमप्रभु यावे आ सोक्तीमी ख्रुम्ब, मीमी यो हुम्ब। *यूहन्ना* १:२६, २७, ३३; *प्रेरित* १:५; *प्रेरित* २:३-४<sup>12</sup> आ गुइमी ग्योल बाक्ब। मेकोमी लाडगामी हाम्शो चेरब हुरशा, भूस नु गेडा तिल्ब। गेडा कोठोमी कुर पा वोइक्ब। भूस चहिं गेनायो मकाप्ब मीमी चोइब” दे माइक्मी बाक्त। *मत्ती* १३:३०

### येसु ब्वाक्कुम ख्रुम्शा गुंडशो

मर्कूस १:९-११; लूका ३:२१-२२; यूहन्ना १:३२-३४

<sup>13</sup> मिनू काबु येसु गालील रागी रे यूहन्ना नु ब्वाक्कुम ख्रुम्शा गुंडसीथ यर्दन खोला यूहन्ना आ बाक्तीकेमी जाक्माक्त।<sup>14</sup> मिनू यूहन्नामी “गेमी आं कली कका ब्वाक्कुम ख्रुम्शा गुंडचा गारब। मिनू मार आं गे पीनीनी?” देमाक्त। *यूहन्ना* १:३:६<sup>15</sup> मिनू येसुमी “मुल ओन पय। मारदे हना रिम्शो पतीके नेल्ल पचा माल्नय” देमाक्त। मिनू यूहन्नामी “लो, मो हना” देंशा, येसु कली ब्वाक्कुम ख्रुम्शा गुंडदा बाक्त।<sup>16</sup> मिनू ब्वाक्कु रे गूशा, खोला रे कुसानु, मार दुम्माक्त देंशा हना, येसुमी स्वर्ग रोक्सीशा, परमप्रभु यावे आ सोक्ती परवा खोदेंशो दुश्शा, यिशा आ रांमी जुक्चशो तवा बाक्त। *यसैया* ११:२<sup>17</sup> मिनू सरीड रे “एको आं दाक्शो तौ बाक्ब। एको कली तशा थाम्पा ग्येरसीनुड” देंशो सेंदा गूमाक्त। *मत्ती* १७:५; *यसैया* ४२:१

### येसु थाम्चा पुंडसीशो

मर्कूस १:१२-१३; लूका ४:१-१३

<sup>4</sup> मिनू नोले सैतान रे पा थुं थाम्चा पुंडसीचा कली परमप्रभु यावे आ सोक्तीमी येसु कली गोरशो रागीमी चाक्दीदा बाक्त। *हिब्रू* ४:१५;<sup>2</sup> मिनू येसु ४० नाक्दो नाक्त मजथु बाक्माक्त। मिनू ४० नाक्त जाक्दीम्मेनु, शोव्रलु बेक्माक्त। *प्रस्थान* ३४:२८; *१राजा* १९:८<sup>3</sup> मिनू सैतानमी येसु कली “मार, गे परमप्रभु यावे आ तौ नवे हना, एको फुल्लु आन कली शोब्ले दुमीन देंशा शोब्ले सेलो” देमाक्त। *उत्पत्ती* ३:१-७<sup>4</sup> मिनू येसुमी “परमप्रभु यावे आ लोव्रमी ‘मुर जशा ला मब्रोंडनीम, परमप्रभु यावे आ देंशो लोव्रमी यो ब्रोंडनीम’ दे ब्रेक्शो बाक्त” दे लोव्र लेत्ता बाक्त। *ब्यवस्था* ८:३

<sup>5</sup> मिनू नोले सैतानमी येसु कली यरूसलेम सहर लाइश्शा, परमप्रभु यावे आ खिं डा नेल्ल क्येडा तारी लदा बाक्त।<sup>6</sup> मेकेर बाक्सानु, सैतानमी “मार, गे परमप्रभु यावे आ तौ नवे हना, एकेर रे प्रेक्को। मारदे हना परमप्रभु यावे आ ब्रेक्पाइश्शो लोव्रमी ‘परमप्रभु यावेमी आ स्वर्ग डा गेय पाइब आन कली सोइश्शा, इ कली आन गुइम ताक्शा खपीम नाइक्पाइक्ब। इ खोइल फुल्लु कामी यो मथोक्ब’ ब्रेक्शो बाक्ब” देमाक्त। *भजन संग्रह* ९१:११, १२<sup>7</sup> मिनू

येसुमी “परमप्रभु यावेमी ब्रेक्पाइशशो लोव्रमी ‘परमप्रभु यावे कली थुं मथाम्चा’ दे यो ब्रेक्शो” देंमाक्त। *ब्यवस्था* ६:१६

8 मिनु नोले सैतानमी येसु कली ठेयब लाइशशो डांडा तारी लदा बाक्त। मेकेर चाव्दीशशा, रागी डा नेल्ल राज्यपुकी नु आन दारस कोंडदा बाक्त। 9 मिनु “गे पोक्च थेक्शा, आं कली सेउ पाप्तीवी हना, एको नेल्ल गेनन” देंमाक्त। *मत्ती* १६:२६ 10 मिनु येसुमी “लावो, सैतान। मारदे हना ‘परमप्रभु यावे कली ला सेउ पावो। मिनु ठेयब सेलो’ देंशा ब्रेक्शो बाक्ब” देंमाक्त। *ब्यवस्था* ६:१३ 11 मिनु सैतानमी येसु कली प्रोंडशा लमाक्त। मिनु मार दुम्माक्त देंशा हना, परमप्रभु यावे आ स्वर्ग डा गेय पाइबपुकी जाक्शा, येसु कली गेय पामे बाक्त। *यूहन्ना* १:५१; *हिब्रू* १:६, १४

येसुमी शेंचा गोशो

मर्कूस १:१४-१५; लूका ४:१४-१५

12 मिनु नोले येसुमी “यूहन्ना कली ग्याइशशा चोक्तेक्म” देंशो लोव्र नेंशा, यहूदीया रागी रे लशा, गालील रागी जाक्दीम्माक्त। *मत्ती* १४:३ 13 मिनु नासरथ रे लशा डा मिन, जबूलून नु नाप्ताली रागी डा समुन्द्र आ नेक्था डा कापेरनाउम सहरम जाक्दीशशा बाक्माक्त। 14 मोदेंशो पा साइ नेसी परमप्रभु यावे आ लोव्र पाइब यसैया आ लोव्र थमा दुम्माक्त। यसैयामी 15 “जबूलून, नाप्ताली रागी, समुन्द्र आ एर ओथ रागी, यर्दन खोला आइक्वी हांबु नु अर्को जात डा गालील रागीमी बाक्बपुकी, 16 डोंडती छिडछिडम बाक्बपुकीमी मुल ठेयब छेडछेड ताक्तेक्म। बेक्चा डा रागी नु हिंशा बेक्चा डा रागीम बाक्ब आन कली छेडछेड दुम्त” दे ब्रेक्शो बाक्त। *यसैया* ८:२३; *यसैया* ९:१; *यूहन्ना* ८:१२

17 येसुमी मुर आन कली “इन थुं परमप्रभु यावे गे लेत्तीन। मारदे हना स्वर्ग डा राज्य जाक्चशो बाक्ब” दे शेंचा गोवा बाक्त। *मत्ती* ३:२

येसुम शेंसीबपुकी योव्रशो

मर्कूस १:१६-२०; लूका ५:१-११; यूहन्ना १:३५-५१

18 मिनु काबु गालील डा समुन्द्र आ नेक्था गाक्मेनु, माझी वोबु निक्शीम एर ओथ ग्याइल आप्शा, डांडे रेन्ना रेन्न बाक्शो ताम्सी बाक्त। मेको निक्शी आस नें का पत्रुस माइशशो सिमोन बाक्माक्त, का अन्द्रीयास बाक्माक्त। 19 मिनु येसुमी “आं नोले खोइय्पीसी। मिनु मुर आन कली रेख सेल्नन्सी” दे ब्रेत्तीम्सी बाक्त। *मत्ती* २८:१९-२० 20 मिनु ग्याइल थु था प्रोंडशा, येसु आ नोले खोदसे बाक्त। *मत्ती* १९:२७

21 मिनु मेकेर रे लशा हिरसमानु, येसुमी जब्दी नु आ तौ याकूब नु यूहन्ना पोबु आन कली तामी बाक्त। मेको सांफा डोंगाम बाक्शा गाक्शो, ग्याइल प्रोवना प्रोवन्न बाक्मा बाक्त। मिनु येसुमी वोबु आस कली ब्रेत्तीम्सी बाक्त। 22 मिनु आस गेय प्रोंडशा, येसु आ नोले खोदसे बाक्त।

येसुम रोइ पाइब सापाइशशो

मर्कूस १:३९; मर्कूस ३:७-१२; लूका ४:४४; लूका ६:१७-१९

23 मिनु गालील रागी तेइ तेइ हिरना हिरन लमानु, येसुमी गुम्तीक खिंमी स्वर्ग डा राज्य डा ग्येरपाइक्ब लोव्र शेंना शेंन नु रोइ पशो नु रोइमी गुरशो मुर नेल्ल आन कली सापाइक्ना पाइक्न गाक्बाक्माक्त। 24 मिनु सिरीया रागी नेल्ल मेको आ पबर्म लोव्र ब्रम्माक्त। मिनु रोइ पशो मुर नेल्ल आन कली येसु आ बाक्तीकेमी चाक्स डा चाक्स पाइबाक्मा बाक्त। वोलमी तशो, वोलमी सुम्शो नु गुइ खोइल मदुक्ब मुर चाक्गमे बाक्त। मिनु येसुमी मेको नेल्ल आन कली सापाइक्मी बाक्त। *मर्कूस* ६:५५ 25 मिनु गालील, डेकापोलीस, यरूसलेम, यहूदीया रागी नु यर्दन खोला आइक्वी हांबु डा शुश मुरुमी येसु आ नोले खोदमे बाक्त।

डांडाम शेंशो लोव्र

लूका ६:२०-४९

5 मिनु येसुमी शुश मुर आ नोले खोइशशो तशा, डांडा डोइशशा निस्से बाक्त। मिनु मेकेर आ शेंसीबपुकी यो जाक्मा बाक्त। 2 मिनु मेकेर जाक्शो आन कली ठेयब सेंदा पा शेंना शेंन बाक्माक्त।

आसीक राइब सु बाक्नीम?

मिनु येसुमी 3 “महिक्सीशो मुरपुकी आसीक राइनीम। मारदे हना स्वर्ग डा राज्य मेको आन केन बाक्ब। *यसैया* ५७:१५ 4 आन थुं खाइशशोपुकी आसीक राइनीम। मारदे हना आन थुं नाइक्वा ताइनीम। *भजन संग्रह* १२६:५; *प्रकाश* ७:१७ 5 ब्रेम्शोपुकी आसीक राइनीम। मारदे हना रागी आन केन दुम्ब। *मत्ती* ११:२९; *भजन संग्रह* ३७:११ 6 ठीक पशो तचा दाक्बपुकी आसीक राइनीम। मारदे हना आन दाक्शो ताइनीम। *लूका* १८:९-१४; *यूहन्ना* ६:३५ 7 शिशी पाइबपुकी आसीक राइनीम। मारदे हना आं यो शिशी ताइनीम। *मत्ती* २५:३५-४६; *याकूब* २:१३ 8 आन पाप क्याम्चा पुंडसीशा, रिम्शो थुं दुम्शोपुकी आसीक राइनीम। मारदे हना परमप्रभु यावे कली ताइनीम। *भजन संग्रह* २४:३-५; *भजन संग्रह* ५१:१२-१३; *यूहन्ना* २:२-३ 9 दुशा गारशा बाक्बपुकी आसीक राइनीम। मारदे हना परमप्रभु यावे आ तमी तौ देंचा पुंडसीनीम। *हिब्रू* १२:१४ 10 ठीक पशा यो खेदा पचा पुंडसीबपुकी आसीक राइनीम। मारदे हना स्वर्ग डा राज्य मेको आन केन बाक्ब। *१पत्रुस* ३:१४ 11 आं पबर्म मुरपुकीमी इन कली हेला पा, खेदा पा, जोल पा, मरिम्शो लोव्र पाम्तेक्म हना यो, आसीक राइनीनी। *मत्ती* १०:२२; *प्रेरित* ५:४१; *१पत्रुस* ४:१४ 12 ग्येरसीने। मारदे हना स्वर्गमी इन कली ठेयब इनाम वोइशशो बाक्ब। साइ नेसी रे मुल सम्म परमप्रभु यावे आ लोव्र पाइब आन कली खेदा पा श्येत गेस डा गेस पाम्तेक्म। *हिब्रू* ११:३३-३८; *याकूब* ५:१०

रागी डा हिक्सी

13 गे रागी डा हिक्सी ननी। हिक्सी आ डाम्चा जाम्त हना, मारेइ काम मलाब्ब। लांमी ताइशशा मुर गाक्मानु, दिम्शा ख्राक्चा पुंडसीब। *मर्कूस* ९:५०; *लूका* १४:३४-३५

रागी डा छेडछेड

14 गे रागी डा छेडछेड ननी। डांडामी सेल्शो सहर मारेइमी मफारसीब। *यूहन्ना* ८:१२ 15 सुइमी बत्ती दाशा, पाथीम गुप्शा मवोइक्नीम। खिं आगा नेल्ल छेडछेड पा तचा डा पा वोइक्नीम। *मर्कूस* ४:२१; *लूका* ८:१६ 16 मेको ब्रशो बत्ती खोदेंशो पा गेमी इन रिम्शो गेय रे पा इन छेडछेड मुर आन कली कोंड्दीने। मिनु इन रिम्शो पशो तशा, स्वर्गमी बाक्ब इन आफ कली ठेयब सुइशशा मान पाइनीम। *फिलिप्पी* २:१४-१५; *यूहन्ना* १५:८; *एफिसी* ५:८-९

येसुमी नु अरेशो लोव्र

17 परमप्रभु यावे आ अरेशो लोव्र नु परमप्रभु यावे आ लोव्र पाइबपुकीमी ब्रेक्शो लोव्र क्याम्ब, दे ममिम्तीने। क्याम्चा कली ममाइ, नेल्ल पचा कली जाक्ती। *मत्ती* ३:१५; *रोमी* ३:३१; *रोमी* १०:४; *यूहन्ना* २:७ 18 नोफा दाइशशा नेनीने, सरीड नु रागी मग्याम्म सम्म परमप्रभु यावे आ लोव्र का यो मग्याम्ब। नेल्ल थमा दुम्ब। *लूका* १६:१७ 19 सुमी परमप्रभु यावे आ अरेशो लोव्र के लोव्र का मपाइबा, मुर आन कली मो पचा शेंबा, मेको मुर स्वर्ग डा राज्यमी नेल्ल क्येडा आइक्च दुम्ब। सुमी लोव्र का यो मप्रोंडथु, नेल्ल पशा डा मिन, मुर आन कली शेंबा, मेको चहिं स्वर्ग डा राज्यमी ठेयब दुम्ब। *याकूब* २:१०

20 सास्त्री नु फरिसी आन पशो क्येडा गे रिम्शो ठीक गेय मपाइतीनी हना, गेपुकी यो स्वर्ग डा राज्य ओव्रचा मताइनीनी, दे इन कली देंनुड। *मत्ती* २३:२-३३

## साइक्वा मदुम्ब, दे शेंशो

21 साइ नेसी इं किकी पिपी आन कली 'मुर कली मसाइक्वा। सुइमी अरु कली साइक्वु हना, मेको सजाइ गेचा पुंडसीब' दे देंशो लोव बाक्ब, दे तुइक्नीनी। प्रस्थान २०:१३, प्रस्थान २१:१२ 22 गोमी चहिं इन कली मार देंनुड देंशा हना, सु मुर नु ईख पा ब्राशा बाक्बा, मेको सजाइ गेचा पुंडसीब। सुमी अर्को कली मरिश्शो लोव पाइबा, मेको कछडी पचा पुंडसीब। सुमी अर्को कली 'ए मूर्ख' देंबा, मेको नरक डा मीम हुम्बा पुंडसीब। १यूहन्ना ३:१५

23 मोपतीके गे परमप्रभु यावे कली मार मार चढेचा सादीनीनु, सुइ गेपुकी नु गाइश्शो, चुरशो फुक्तीनी हना, 24 चढेचा क्येडा डोंइती मेको आन कली गुम्शा, दुशा गारशा ला चढेने। मर्कूस ११:२५

25 इन कली मरिश्शो पाइब नु लांमी बाक्नीनुन, गारीने। मारदे हना मेकोमी इन कली अडडाम लाइश्शा, निसाफ पाइब आ डोंइती चाक्दीब। मिनु निसाफ पाइबमी पुलीस आन गुइमी गेब। मिनु पुलीसम जेल्खानम चोक्नीम। मत्ती १८:२३-३५; लूका १२:५८-५९ 26 नोफा दाइश्शा नेनीने, इन कली नोले डा क्वद्रन्स मथाप्पाइक्थु मप्रोंइनीम। क्वद्रन्स नेल्ल क्येडा आइक्च क्येट बाक्ता।

## मीश वोंइश आस नाता मखोइक्वा

27 ग्युंवे पशोपुकी आन मीश वोंइश नाता ब्राचा मदुम्ब देंशो बाक्ब, दे तुइक्नीनी। प्रस्थान २०:१४ 28 गो मार देंनुड देंशा हना, ग्युंवे पशो मुरुमी अर्को मीश मुर तशा वाल्त हना, आ थुंमी मीश वोंइश आस नाता खोइक्ब। २सामुएल ११:२; अय्युब ३१:१; २पत्रुस २:१४ 29 इ ग्युरा मिक्वीमी इ कली पाप पपाइक्वु हना, फेशशा ताइक्तो। मारदे हना रां नेल्ल नरकम ख्रुम्बा पुंडसीचा क्येडा रां डा मिक्व का जाम्शा लशो रिश्शो दुम्ब। मत्ती १८:८-९; मर्कूस ९:४७; कलस्सी ३:५ 30 इ ग्युरा गुइमी इ कली पाप पपाइक्वु हना, खोइश्शा ताइक्तो। मारदे हना रां नेल्ल नरकम ख्रुम्बा पुंडसीचा क्येडा रां डा गुइ का जाम्शा लशो रिश्शो दुम्ब।

31 सु आ मीश नु ब्राबा, मेकोमी छोट पत्र ब्रेक्शा गेचा माल्ब, दे यो देंशो बाक्ब। ब्यवस्था २४:१; मत्ती १९:३-९; मर्कूस १०:४-१२ 32 गोमी मार देंनुड देंशा हना, सुमी आ मीश आं नु फ्राशा सोइक्बा, मेकोमी आ मीश कली मीश वोंइश आस नाता खोइक्पाइक्ब। मीश मुरुमी आ वोंइश बाक्ना बाक्न अर्को वोंइश मुर नु मरिश्शो गेय पाप्तु हना, मोर्देशो मीश मुर कली प्रोंइचा दुम्ब। सुमी छोट पत्र गेचा पुंडसीशो मीश मुर ग्युंवे पाइबा, मेकोमी यो मीश वोंइश आस नाता खोइक्ब। लूका १६:१८; १कोरिन्थी ७:१०-११

## कसम मजचा

33 साइ नेसी इं किकी पिपी आन कली 'जोल पा कसम मजचा। परमप्रभु यावे कली मार मार गेनुड, पाइनुड, दे कसम जाइतीनी हना, मेकोन गेचा पचा माल्नीनी' दे देंशो बाक्ब, दे यो तुइक्नीनी। लेवी १९:१२; गन्ती ३०:३ 34 गोमी मार देंनुड देंशा हना, कसम का यो मजने। सरीड आ नैमी कसम मजने। मारदे हना सरीड परमप्रभु यावे आ नित्तीके बाक्ब। मत्ती २३:१६-२३२; यसैया ६६:१ 35 रागी आ नैमी यो कसम मजने। मारदे हना रागी परमप्रभु यावे आ खोइल थेक्तीक बाक्ब। यरूसलेम सहर आ नैमी यो कसम मजने। मारदे हना यरूसलेम नेल्ल क्येडा ठेयब पिप आ सहर बाक्ब। भजन संग्रह ४८:३ 36 इन पिशा थिशा यो कसम मजने। मारदे हना चां का यो बुश के क्येर, क्येर के बुश सेल्ने मचाप्नीनी। 37 इन देंशो लोव चहिं 'दुम्ब हना दुम्ब, मदुम्ब हना मदुम्ब' देनीने। मेको क्येडा लाक्शो लोव चहिं मरिश्शो लां रे पीब। याकूब ५:१२

## क्येक्क मलेत्चा

38 'सुइमी इन मिक्च पुक्ताक्म हना, मेको आन कली यो मिक्च पुक्तीने। सुइमी इन ख्रुइ जिक्ताक्म हना, मेको आन कली यो ख्रुइ जिक्तीने' देंशो बाक्ब, दे तुइक्नीनी। प्रस्थान २१:२४ 39 गो मार देंनुड देंशा हना, सुइमी इन

कली मरिश्शो पाप्तेक्म हना यो, मेको आन कली आन क्येक्क मलेत्तीने। इन ग्युरा चोवचो राप्तेक्म हना, पेरा यो राप्चा गेने। बिलाप ३:३०; यूहन्ना १८:२२-२३; रोमी १२:१९, २१; १पत्रुस २:२०-२३ 40 इन कली मुददान कोप्शा, अडडाम लाइश्शा, इन फेक्शो वा लाइक्वा माल्तेक्म हना, इन बरखी यो गेशा सोइक्तीने। १कोरिन्थी ६:७; हिब्रू १०:३४ 41 इन कली आधा कोस सम्म लचा, दे डिपी पाप्तेक्म हना, कोस का सम्म यो लने। 42 इन के मारेइ थोवक पुंडतेक्म हना, आन पुंडशो गेने, जेर पुंडतेक्म हना यो, मगेनीकी, दे श्येत्थी मसोइक्तीने।

## जोरी सत्रु आन कली यो दाक्वा

43 'गेपुकी नु बाक्ब मुर आन कली दाक्तीने। जोरी सत्रु आन कली चहिं मदाक्तीने' देंशो बाक्ब, दे तुइक्नीनी। लेवी १९:१८ 44 गोमी इन कली मार देंनुड देंशा हना, जोरी सत्रु आन कली दाक्तीने। इन कली हेला पा खेदा पाइब आन पबर्म परमप्रभु यावे कली पुनीने। प्रस्थान २३:४-५; लूका ६:२७-२८; रोमी १२:१४, २०; लूका २३:३४; प्रेरित ७:५९; लूका ६:२७-२८ 45 मो पाइतीनी हना, इन स्वर्ग डा आफ आ तमी तौ नकी, दे कोंइनीनी। स्वर्गम बाक्ब आफोमी रिश्शो मरिश्शो पाइब नेल्ल आन कली नां दाप्पाइक्ब। नेल्ल आन कली रेउ यिपाइक्ब। एफिसी ५:१ 46 इन कली दाक्ब आन कली ला दाक्ताक्नी हना, मार इनाम ताइनीनी डा? तिरो पोक्बपुकीमी यो मो मपाइनीम डा? 47 इन जात, थर डा मुर आन कली ला मान पा सेत्ताक्नी हना, मार इनाम ताइनीनी डा? परमप्रभु कली मतुइक्बपुकीमी मसेम्मुइनीमी डा? 48 मोपतीके दोपा इन स्वर्ग डा आफोमी रिश्शो पाइबा, मोपा गे यो रिश्शो पने। लेवी १९:२

## मथीब आन कली शिशी पचा

6 होस पांडसीने, मुर आन डोंइती कोंइचा कली प्रुडग आन कली शिशी मपने। मारदे हना मोर्देशो पाइब आन कली स्वर्गम बाक्ब इन आफोमी इनाम मगेब।

2 श्येत जाइब, मथीब आन कली मारेइ गेनीनु, इन डोंइती तुराही मतापीने। कपटीपुकीमी गुम्तीक खिंमी, लांमी मुर आन कली आन रिश्शो पतीके कोंइशा ठेयब सेल्पांडसीनीम। नोफा दाइश्शा नेनीने, मेको आन तचा डा इनाम मारेइ मलीब। १कोरिन्थी १३:३ 3 श्येत जाइब, मथीब आन कली मारेइ गेनीनु, इन ग्युरा गुइमी गेशो, पेरा गुइ कली यो मतुइक्पाइक्थु गेने। मत्ती २५:३७-४०; रोमी १२:८ 4 मोर्देशो पा इन गेशो ख्रुइश्शोम बाक्ब। मिनु ख्रुइश्शो यो नेल्ल तुइक्ब इन आफोमी इन कली इनाम गेब।

## प्रार्थना पचा शेंशो

5 परमप्रभु यावे कली प्रार्थना पनीनु, कपटीपुकीमी पशो खोर्देशो पा मपने। मेकोपुकीमी गुम्तीक खिंमी, लांमी मुर आन कुल राप्शा कोवपांडसीशा, प्रार्थना पाइनीम। नोफा दाइश्शा नेनीने, मेको आन तचा डा इनाम मारेइ मबाक्ब। 6 गे चहिं परमप्रभु यावे कली प्रार्थना पनीनु, इन खिं ओवशा, लाप्चो चोक्शा, सुइ आन मतुइक्थु, ख्रुइश्शोमी बाक्ब इन आफ कली प्रार्थना पने। मिनु ख्रुइश्शो यो नेल्ल तुइक्ब इन आफोमी इन कली इनाम गेब। 7 परमप्रभु यावे कली प्रार्थना पनीनु, अर्को रागी डा मुरपुकीमी खोर्देशो पा हेंथे शुश लोव मपने। मारदे हना शुश लोव पशोमी आन पुंडशो ताइनीम, दे मिन्नीम। यसैया १:१५ 8 मेको आन पशो खोर्देशो मपने। मारदे हना पुंडचा क्येडा डोंइती इन आफोमी इन माल्शो तुइश्शो बाक्ब। 9 ओर्दे प्रार्थना पने 'स्वर्गम बाक्ब आंइ आफ, इन नें ठेयब बाक्त्। लूका ११:२-४; इजीकीएल ३६:२३ 10 इन राज्य जाक्त्। स्वर्गमी इन दाक्शो खोर्देशो पा रागीमी यो मोर्देशोम दुम्त्ला। लूका २२:४२ 11 काबु नाक्त् डा जचा थोवक मुलाक्ती आंइ कली गेने। 12 आंइ मरिश्शो पशो क्याम्शा गेने। मारदे हना गो यो आंइ कली मरिश्शो पाइब आन कली माफ गेतक। मत्ती १८:२१-३५ 13 सैतानमी आंइ थुं हिरपाइक्वा मगेने। आंइ कली सैतान रे प्रोनीने। मारदे हना राज्य, सक्ति नु छेडछेड गेना हना यो इन के नम' आमेन। यूहन्ना १७:१५; १कोरिन्थी १०:१३; १इतिहास २९:११-१३ 14 इन कली मरिश्शो

पाइब आन कली माफ गेतीनी हना, स्वर्गमी बाक्ब इन आफोमी यो इन कली माफ गेब। मर्कूस ११:२५<sup>15</sup> माफ मगेतीनी हना, इन आफोमी यो इन कली माफ मगेब।

### बर्त बाक्वा शेंशो

16 बर्त बाक्नीनु, राव कीशो कुल मसेलीने। कपटीपुकीमी आंइ बर्त बाक्शो तांइसेक्ल, दे आन कुल राव कीपा कौंइनीम। नोफा दाइश्शा नेनीने, मेको आन तचा डा इनाम मारेइ मबाक्ब। यसैया ५८:५-६<sup>17</sup> गेपुकी चहिं बर्त बाक्नीनु, चांमी तेल खेक्शा, कुल चिक्शा, इन बुं जिप्शा बाक्कीन। 18 मो पाइतीनी हना, इन बर्त बाक्शो खुइश्शोमी बाक्ब। मिनु खुइश्शो यो नेल्ल तुइक्ब इन आफोमी इन कली इनाम गेब।

### इन थुं शोंप गे महिरदीने

19 एको रागीमी शोंप खुप्शा, खेक्शा मवोतीने। मारदे हना बुस्सुम खोइक्ब, खिया जोइब, खुइपुकीमी खुइ पाइनीम।<sup>20</sup> स्वर्गमी इन शोंप वोतीने। मेकेर बुस्सुम मखोइक्ब, खिया मजोइब, खुइपुकीमी यो खुइ मपाइनीम। मत्ती ११:२१; लूका १२:३३-३४; कलस्सी ३:१-२<sup>21</sup> तेकेर इन शोंप बाक्बा, मेकेरन इन थुं यो लीशो बाक्ब।

22 इन मिक्च रां डा छेडछेड बाक्ब। मिक्च ब्राब्रा मदुश्शो बाक्त हना, इन रां नेल्ल छेडछेड बाक्ब। लूका ११:३४-३६<sup>23</sup> मिक्च ब्राब्रा दुश्शो बाक्त हना, इन रां नेल्ल छिडछिड दुम्ब। इन रां डा छेडछेड नेल्ल छिडछिड दुम्त हना, शुश छिडछिड दुम्ब। यूहन्ना ११:१०

24 सुइमी होवप निक्शी आस गेय पने मचाप्ब। मारदे हना का कली मदाक्ब, का कली दाक्ब। का कली मान पा टीब, का कली मान मपथु मटीब। परमप्रभु यावे नु शोंप निम्फा आस कली गेय पने मचाप्नीनी। लूका १६:१३; याकूब ४:४<sup>25</sup> मोपतीके गो 'मार जचा, मार तूचा, मार फेक्चा' दे ममिम्तीने। मारदे हना जचा तूचा क्येडा ब्रोंइचा ठेयब बाक्ब। फेक्तीक क्येडा रां ठेयब बाक्ब। लूका १२:२२-३१; फिलिप्पी ४:६; १पत्रुस ५:७<sup>26</sup> सरीडमी बेरब चिक्ब आन कली कोव्रशा मिम्तीने। मेकोपुकीमी वांचेर मशोक्नीम, अन्न मखुप्नीम, भकारीमी मवोइक्नीम। स्वर्गम बाक्ब इन आफोमी मेको आन कली थुल्शो बाक्ब। मेको आन क्येडा शुश ठेयब मननी डा? मत्ती १०:२९-३१; लूका १२:६-७<sup>27</sup> गेपुकीमी सुर्ता पा, इन रां हात का लाइश्शो सेल्ने चाप्नीनी डा? 28 मार फेक्चा, दे मारदे मिम्नीनी? लिली फू कली कोव्रशा मिम्तीने। गिश बोइश्शा रिश्शो तांइसीनीमी। श्येत पा गेय मपाइनीम। पांइतो मपाइनीम। 29 पिप सोलोमन आ दारस नेल्ल कौंइताक्व हना यो, लिली फू खोदेशो रिश्शो ग्योम्सीशो मबाक्ब। १राजा १०:-<sup>30</sup> परमप्रभु यावेमी चीबेर बोइश्शा, हेम्शा चोचा पुंइसीब फू, घांस आन कली लायो मिश रिश्शो ग्योम्ताक्व हना, गे थमा पा थमा सुइक्ने मचाप्बपुकी इन कली मफेक्पाइक्बा डा? 31 मोपतीके मार जचा, मार तूचा, मार फेक्चा, दे ममिम्तीने। 32 मारदे हना अर्को रागी डा मुरपुकीमी ला मोदेशो मिम्नीम। इन स्वर्ग डा आफोमी इन माल्शो नेल्ल तुइक्ब। 33 डोंइती परमप्रभु यावे आ राज्य नु आ ठीक पतीके मिम्शा मालीने। मिनु जचा तूचा फेक्चा यो ताइनीनी। रोमी १४:१७; १राजा ३:१३-१४; भजन संग्रह ३७:४,२५ 34 मोपतीके दीसा मार दुम्बा, दे सुर्ता मपने। मारदे हना दीसा डा श्येत दीसान दुम्ब। मुलाक्ती डा श्येतम दीसा डा श्येत मतेम्दीने। प्रस्थान १६:१९

### नाक्मुचा आ पर्बम शेंशो

7 मुर आन कली मनाक्तीने। मुर आन कली नाक्ताक्नी हना, इन कली यो नाक्नीम। रोमी २:१; १कोरिन्थी ४:५<sup>2</sup> दोपा नाक्तीनी, मोपा नाक्चा पुंइसीनीनी। दोपा पुक्शा गेनीनी, मोपान पुक्शा ताइनीनी। यसैया ३३:१; मर्कूस ४:२४<sup>3</sup> मारदे इन लोक्ब आ मिक्चीम बाक्शो कसीडगर ताइनीनी। मिनु इन मिक्चीम बाक्शो मुढा चहिं मताइनीनी? 4 इन मिक्चीम मुढा बाक्त हना, दोपा इन लोक्ब कली 'इ मिक्चीम बाक्शो कसीडगर फेल्लुड' देंने चाप्नीनी डा? 5 कपटी, डोंइती इन मिक्चीम बाक्शो

मुढा फेल्लुतीने। मिनु ला मिक्च ठीक ताइब दुम्शा, इन लोक्ब आ मिक्चीम बाक्शो कसीडगर फेल्लुतीने।

6 हेंथे थिपाइक्चा मदुश्शो थोव्रक कुचुम कली मगेने, पोव्र आन डोंइती इन मोती मब्बारदीने। मारदे हना दिम्नीम। मिनु बिर लेशशा इन कली ग्राम्थ पीनीम। मत्ती १०:११; लूका २३:९

### परमप्रभुमी इन पुंइशो नेंब

लूका ११:९-१३

7 परमप्रभु यावे कली पुनीने। मिनु इन पुंइशो ताइनीनी। मालीने, मिनु इन माल्शो थिल्लीनी। बाक्नी? दे लाप्चो खोकोल पने। मिनु गे ओव्रचा ताइनीनी। मर्कूस ११:२४; यूहन्ना १४:१३; येरमीया २९:१३-१४<sup>8</sup> मोपतीके सुम पुंइबा, मेकोमी आ पुंइशो ताइब। सुम माल्बा, मेकोमी आ माल्शो थिक्ब। सुम ओव्रडा? दे लाप्चो खोकोल पाइबा, मेको ओव्रचा ताइब। 9 गे नु बाक्ब सुइ इन तौमी 'शोब्ले जाइनुड' दे पुंइतु हना, शोब्ले आ पा डा फुल्लु जचा गेनीनी डा? 10 'डांइ ब्वाइनुड' दे पुंइतु हना, डांइ आ पा डा बुस्स ब्वाचा गेनीनी डा? 11 गेपुकी मरिश्शो बाक्तीनी हना यो, इन तमी तौ आन कली रिश्शो थोव्रक गेस जोक्नीनी। इन पशो क्येडा स्वर्गमी बाक्ब इन आफोमी आ कली पुंइब आन कली रिश्शो थोव्रक मगेब डा?

### परमप्रभु आ दाक्शो पचा

12 गेमी दोदेशो पपांइसीचा दाक्नीनी, गे यो मुर आन कली मोदेशो पने। मारदे हना परमप्रभु यावे आ अरेशो लोव्र नु परमप्रभु यावे आ लोव्र पाइब आन शेंतीक लोव्र मेकोन बाक्ब। मत्ती २२:३६-४०; रोमी १३:८-१०; गलाती ५:१४

13 आइक्च लाप्चो रे ओव्रडीन। मारदे हना जाम्शा लतीक लाप्चो ठेयब नु लां ब्रेम्शो नु ग्युप्शो बाक्ब। मोपतीके शुश मुर मेकेर गाक्नीम। लूका १३:२४ 14 गेना हना यो ब्रोंइतीक लतीक डा लाप्चो आइक्च नु आ लां गाक्चा श्येत बाक्ब। मेको लां थिक्बपुकी का निक्शी ला बाक्नीम। मत्ती १९:२४; प्रेरित १४:२२<sup>15</sup> होस पांइसीने। मारदे हना परमप्रभु यावे आ लोव्र दूली शेंबपुकी बोक्नीम। मेकोपुकी भेडा खोदेशो तांइसीनीमी। मेको आन थुं चहिं फर के खोदेशो बाक्नीम। मत्ती २४:४,५,२४; २कोरिन्थी ११:१३-१५<sup>16</sup> मेको आन पशो गेय तशा, रिश्शो नम, दे मरिश्शो नम रुम्सीब। चू रवामी अडगुर सिप्बा डा? सिउंडी आ बोटमी फोव्रशी सिप्बा डा? 17 रिश्शो फल रवामी ब्रोव्रशो फल सिप्ब, मरिश्शो फल रवामी मब्रोव्रशो फल सिप्ब। मत्ती १२:३३ 18 रिश्शो फल रवामी मब्रोव्रशो फल मसिप्ब। मरिश्शो फल रवामी यो ब्रोव्रशो फल मसिप्ब। 19 मरिश्शो फल सिप्ब रवा कली तिम्शा शी चोइनीम। मत्ती ३:१०; यूहन्ना १५:२,६<sup>20</sup> मोपतीके मेको आन सिश्शो फल तशा, रिश्शो नमी, दे मरिश्शो नमी तुइक्नीनी।

21 आं कली प्रभु, प्रभु देंशा ला स्वर्ग डा राज्य ओव्रचा मताइनीम। स्वर्गमी बाक्ब आं आफ आ दाक्शो पाइबपुकी ला ओव्रचा ताइनीम। रोमी २:१३; याकूब १:२२<sup>22</sup> मेको नाक्त शुशेमी आं कली 'हे प्रभु, हे प्रभु, गोपुकीमी इन नेंमी नोले दुम्ब लोव्र मपका डा? इन नेंमी वोल आन कली मखेरका डा? चिन्ड नु छक लाक्चा डा गेय मपका डा?' देंनीम। लूका १३:२५-२७; येरमीया २७:१५<sup>23</sup> मोदेश आन कली 'गो इन कली गेनायो मतुइक्तन्नी। ए मरिश्शो पाइबपुकी, डोन लने' दे हुइक्नुडमी। मत्ती २५:१२; २तिमोथी २:१९

### नेंशो लोव्र पचान माल्ब

24 सुमी आं लोव्र नेंशा, आं देंशो पवा, मेको निप्स खाप्शा, खिं सेल्ब खोदेशो बाक्त। मेकोमी आ खिं सेरथे फुल्लु तारी सेल्लु।<sup>25</sup> मिनु ठेयब रेउ यिशा, भोल यिशा, फशेमी हुरदानु, मेको खिं मब्रे। मारदे हना सेरथे फुल्लु तारी सेल्शो बाक्त। 26 सुमी आं लोव्र नेंशा, आं देंशो मपवा, मेको शोर गाक्शो मुर खोदेशो बाक्त। मेकोमी आ खिं बाल्वामी सेल्लु।<sup>27</sup> मिनु ठेयब रेउ यिशा, भोल यिशा, फश पवानु, मेको खिं ब्रेशशा योल्ल। मिनु मेको के ठेयब खती दुम्त" दे येसुमी शेंदीमी बाक्त।

28 येसुमी शेंने थुमानु, मेकेर देल्शो शुश मुरुमी आ शेंशो आ पर्वम छक लाकमा बाक्त। प्रेरित २:१२ 29 मारदे हना सास्त्रीपुकीमी शेंशो खोदेंशो ममाइ, तन्न सक्ति पाइशो मुर बुदी शेंदा बाक्त। यूहन्ना ७:१६-४६

कोर पाइब कली सापाइशो  
मर्कूस १:४०-४४; लूका ५:१२-१४

8 मिनू येसु डांडा रे लेशशा यिमेनु, शुश मुरुमी आ नोले खोदमे बाक्त। 2 मिनू मार दुम्माक्त देंशा हना, कोर पाइब का जाक्शा, येसु आ डॉइती आ पोक्क थेक्शा “प्रभु, सापाइक्का दाक्ताक्नी हना, आं कली सापाइक्के चाप्नीनी” देंमाक्त। 3 मिनू येसुमी आ गुइ दिंशा, कोर पाइब कली थिशा “गो सापाइक्का दाक्नुड” देंमेनु, ब्रा सामाक्त। 4 मिनू येसुमी “सुइ कली मशोव्रचा, चढेबा आ डॉइती लशा, इ साशो रां कौडो। मिनू मोसामी मार चढेबा माल्ब देंशो बाक्मे, मेको चढेशा, सामाक्त, दे तुइक्पतो” दे मदा बाक्त। मर्कूस ८:३०; लेवी १४:२-३२

कप्तान आ गेय पाइब सापाइशो  
लूका ७:१-१०; यूहन्ना ४:४६-५३

5 मिनू कापेरनाउम सहर लेशशा जाक्मेनु, कप्तान का येसु कली गुथ पिमाक्त। 6 मिनू “प्रभु, आं गेय पाइब रोइमी गुरशा, आ गुइ खोइल मदुक्ब दुम्शा, गोल्शा बाक्शो बाक्ब” दे शोव्रडा बाक्त। 7 मिनू येसुमी “इन खिमीन पिशा सापाइक्नुड” दे मदानु 8 “प्रभु, श्येत मपने, गो इन कली आं खिं ओइचा मशिरनुड। लोव ला देनीने। मिनू आं गेय पाइब साब। 9 मारदे हना अधिकार तचा दा गो यो अधिकार तशो नड, अधिकार पाइनुड, अधिकारमीन बाक्नुड। गोमी सिपाही का कली ‘लावो’ दे सोइक्तनु, लाइब। का कली ‘पिवो’ दे ब्रेत्तनु, पीब। आं वाइल कली ‘एको गेय पावो’ दे मदुनु, पाइब” देंमाक्त। 10 येसुमी मोदेंशो नेंशा, आ नोले खोइक्ब आन कली “ओहो, नोफा दाइशा नेनीने, एको कप्तान खोदेंशो थमा सुइक्ब इं इस्त्राएल जात डा मुर सुइ मतडमी। मर्कूस ६:६; लूका १८:३ 11 गो मार देंनुड देंशा हना, नां दाप्तीके नु नां पेरतीके रे शुश मुर जाक्नीम। मिनू स्वर्ग डा राज्यमी ओव्रशा, इं किकी पिपी अब्राहाम, इसहाक नु याकूब नु काथा बाक्नीम। लूका १३:२८-२९ 12 एको राज्य डा मुरपुकी चहिं तिल्ला, छिडछिडमी सोइक्का पुंइसीनीम। मेकेर मुरपुकी आन खुइ शेषा डाक्नीम” देंमाक्त। 13 मिनू येसुमी कप्तान कली “इन खिं लने, इन थमा सुइशो खोदेंशो दुम्ल” दे सोइक्ता बाक्त। मो देंम रे आ गेय पाइब यो सामाक्त। मत्ती ९:२९; मत्ती १५:२८

पत्रुस आ खिमी  
मर्कूस १:२९-३४; लूका ४:३८-४१

14 मिनू येसु पत्रुस आ खिं जाक्दीशशा ओव्रमेनु, पत्रुस आ शिमी जरो पा गोल्शो तवा बाक्त। १कोरिन्थी ९:५ 15 मिनू आ गुइ थिवानु, जरोम थु प्रोना बाक्त। मिनू छुल बोक्शा, येसु कली जचा तूचा गेवा बाक्त।

16 में नाक्दो वोलमी सुम्शो शुश मुर आन कली चाक्गमे बाक्त। मिनू वोल आन कली लोव रे खेरमी बाक्त। रोइ पाइब नेल्ल आन कली सापाइक्की बाक्त। 17 मो पवानु, साइ नेसी यसैयामी देंशो लोव “मेकोमी आंइ गुरपाइक्ब रोइ लाइक्तु। आंइ रोइ नेल्ल कुरतु” देंशो लोव थमा दुम्माक्त। यसैया ५३:४

निक्शी थुं मपथु, येसु कली खोइक्का  
लूका ९:५७-६०

18 मिनू येसुमी शुश मुर देल्शो तशा “एकेर रे लशा, समुन्द्र शोक्शा आइक्की हांबु लय” देंमाक्त। 19 मिनू सास्त्री कामी येसु कली “शेंब, तेक तेक लनी, मेक मेक गो यो लाइनुड” देंमाक्त। 20 मिनू येसुमी “फ्याउरे आन बाक्तीके ढोडोडगा बाक्ब। चिक्ब आन बाक्तीके ग्योव्र बाक्ब। रागीम जरमेशो के बाक्तीक मबाक्ब” देंमाक्त। २कोरिन्थी ८:९ 21 मिनू येसु आ नोले खोइक्ब मुर कामी “प्रभु, डॉइती लशा, आं आफ कली थिम्चा गेयीनी”

देमाक्त। मत्ती १०:३७ 22 मिनू येसुमी “आं नोले खोइय्यी। बेक्शो मुरुमी बेक्शो कली थिम्मेक्ल” दे मदा बाक्त।

फश गिवार तेक्शो  
मर्कूस ४:३५-४१; लूका ८:२२-२५

23 मिनू समुन्द्र शोक्सीचा कली डॉंगाम डॉइसेनु, आ शेंसीबपुकीमी आ नोले खोदमे बाक्त। 24 मिनू शोक्समानु, ठेयब फश गिवार पतीके डॉंगाम ब्वाक्कु ओव्रशा गुम्चामे बाक्त। येसु चहिं इप्शो बाक्माक्त। 25 मिनू शेंसीबपुकीमी हिंशा येसु कल पोक्शा “प्रभु, गो नेल्ल गुम्शा बेक्चांइतय, है” दे वाइ ब्रेम्मा बाक्त। 26 मिनू येसुमी “मारदे हिंनी? गे थमा पा थमा सुइक्के मचाप्बपुकी” देंशा बोक्शा, फश नु समुन्द्र आस कली हुइक्ता बाक्त। मिनू सिक्सी पाम्से बाक्त। भजन संग्रह ८९:१०; प्रेरित २७:२२, ३४ 27 मोदेंब पशो तशा “ओहो, एको मुर सु बाक्म माइ? फश नु समुन्द्रमी यो आ लोव टीबाक्ताक्से” देंमुमा बाक्त।

वोल आन कली खेरशो  
मर्कूस ५:१-१७; लूका ८:३६-३७

28 मिनू आइक्की हांबु शोक्सीशा, गदरीनी आन रागी जाक्दीम्मा बाक्त। मेकेर लांम गाक्मानु, वोलम गपाइशो मुर निक्शी गुम्मे बाक्त। मेको निक्शी चहिं बेक्शो मुर वोइक्तीके पुक्खीम बाक्शा, लां गाक्ब आन कली बाप्शा, श्येत गेशा सुइ आन कली लचा मगेबाक्सा बाक्त। 29 मिनू मार दुम्माक्त देंशा हना, मेको निक्शीमी “परमप्रभु यावे आ तौ, गे नु गोपुकी मार पमुइया डा? आंइ कली श्येत गेची मजाक्थु, मुल कना श्येत गेथ जाक्नी?” दे ग्रीसा बाक्त। लूका ४:४१; २पत्रुस २:४; याकूब २:१९ 30 मेकेर आ नेक्था डा डांडामी शुश पोव्र जौन जौन बाक्शो बाक्मा बाक्त। 31 मिनू वोलपुकीमी “आंइ कली खेरनीनी हना, मेरे पोव्र आन रांमी ओव्रचा गेकी” दे पुन्मे बाक्त। 32 मिनू येसुमी “लने” दे सोइक्तीमी बाक्त। मिनू मुर रे गूशा, पोव्रमी ओव्रदीम्मा बाक्त। मिनू पोव्र नेल्ल गशा, डांडा रे यिना यिन समुन्द्रम प्रेक्ना प्रेक्न गुम्शा बेक्मा बाक्त। 33 पोव्र योव्रबपुकीमी मो दुम्शो तशा, प्रोक्शा सहरम जाक्दीशशा, मेको वोलम सुम्शो आस कली मार दुम्मे, मेको नेल्ल शोव्रडमे बाक्त। 34 मिनू सहर डा मुर नेल्ल येसु कली कोव्रथ जाक्मा बाक्त। मिनू “आंइ रागी रे लने” दे पुन्मे बाक्त।

गुइ खोइल मदुक्ब कली सापाइशो  
मर्कूस २:१-१२; लूका ५:१७-२६

9 मिनू येसु मेकेर रे लशा, डॉंगामी डोइशशा समुन्द्र शोक्शा, आ सहरमी जाक्माक्त। मत्ती ४:१३ 2 मिनू मार दुम्माक्त देंशा हना, आ गुइ खोइल मदुक्ब मुर का कली आ ब्राख्येमी कुरशा चाक्गमे बाक्त। मिनू येसुमी “मेको मुर कली चाक्बपुकीमी थमा सुइक्कीमी बाक्त” दे तुइशशा, मेको गुइ खोइल मदुक्ब कली “आं तौ, इ पाप क्याम्साक्व। मिनू इ थुं बारपतो” दे मदा बाक्त। प्रस्थान ३४:६-७; भजन संग्रह १०३:३ 3 सास्त्री का निक्शीमी “इ पाप क्याम्साक्व” देंशो नेंशा “मेकोमी परमप्रभु यावे कली शुक्शी पाइबाक्माक्त” दे मिम्तमे बाक्त। मत्ती २६:६५ 4 मिनू येसुमी मेको आन मिम्शो तुइशशा, मेको आन कली “मारदे मरिम्शो मिम्तीनी? यूहन्ना २:२५ 5 ‘इ पाप क्याम्साक्व’ देंचा देय ‘छुल बोक्शा एर ओंथ हिरशा कौडो’ देंचा तेको सज्लो बाक्बा? 6 रागीमी जरमेशोमी पाप क्याम्चा अधिकार तशो बाक्माक्त, दे गेपुकीमी यो तुइक्तीनील” देंशा, गुइ खोइल मदुक्ब कली “छुल बोक्शा, इ ब्राख्ये कुरशा खिं लेत्तो” दे मदा बाक्त। यूहन्ना १७:२ 7 मिनू मेको छुल बोक्शा, आ खिं लेम्माक्त। 8 मोदेंब दुम्शो तशा, मेकेर देल्शोपुकी हिंमा बाक्त। मिनू मुर आन कली मोदेंशो अधिकार गेब परमप्रभु कली ठेयब सुइशशा मान पामे बाक्त।

मत्ती कली गुम्शो  
मर्कूस २:१३-१७; लूका ५:२७-३२

9 मिनू येसु मेकेर रे लमेनु, मत्ती माइश्शो तिरो पोक्ब मुर का आ अडडाम बाक्शो ताप्तु। मिनू येसुमी “आं नोले खोइय्यी” दे मदानु, मेको छुल बोक्शा, येसु आ नोले खोइक्तु। मत्ती १०:३ 10 मिनू येसु नु आ शेंसीबपुकी खिंमी जना जन बाक्मानु, तिरो पोक्ब नु पापीपुकी शुश यो मेकोपुकी नु काथा जाम्तेक्म। 11 मिनू फरिसीपुकीमी मेको नेल्ल आन कली काथा बाक्शा जशो तशा, येसु आ शेंसीब आन कली “मारदे इन शेंबमी तिरो पोक्ब नु पापीपुकी नु काथा बाक्शा जाइबा?” देंतेक्म। 12 येसुमी मेको आन देंशो नेंशा “रोइ मपशो मुर सापाइक्ब ममाल्नीम। रोइ पशो मुर चहिं सापाइक्ब माल्नीम। इजीकीएल ३४:१६ 13 चढेतीक ममाइ, तन्न शिशो पशो तचा दाक्नुड, दे देंशो आ अर्थ मार बाक्म, दे शेंसीने। ठीक पाइब आन कली ब्रेथ जाक्शो मनड। पापी आन कली ब्रेथ जाक्शो नड” दे माइक्तीमी। हीसे ६:६; मत्ती १२:७; १सामुएल १५:२२; मत्ती १८:११

माइत नु नक मगारब  
मर्कूस २:१८-२२; लूका ५:३३-३८

14 मिनू यूहन्ना आ शेंसीबपुकी जाक्शा, येसु कली “मारदे गो नु फरिसीपुकी शुश बर्त बाक्नीकी, इन शेंसीबपुकी चहिं बर्त मबाक्नीमी?” दे हिल्लो पाम्तेक्म। लूका १८:१२ 15 मिनू येसुमी “जन्तीपुकी ग्युम्ले नु काथा बाक्मानु, हिशेक पा डाक्नीमी डा? काबु ग्युम्ले नु फ्राचा पुंइसीनीम। मिनू मेना बर्त बाक्नीमी। यूहन्ना ३:२९ 16 सुइमी माइत वामी नक वा केप्शा मफेरनीम। फेरतेक्म हना, नक वा चुप्शा, माइत वा कली खाक्शा, डोंइती डा गाक्शो क्येडा ठेयब सेल्ब। रोमी ७:६ 17 सुइमी माइत कुशुल के थैलोमी नक अडगुर शांबु कुर मपाइनीम। कुर पाम्तेक्म हना, शांबु बोरशा, थैलो खाक्शा, क्युप्ब। नक शांबु कली नक थैलोमी कुर पचा माल्ब। मोपा कुर पशोनु, थैलो मगाक्बा, शांबु यो मक्युप्ब” दे शेंताक्मी।

बेक्शो आल कली सेंपाइश्शो  
मर्कूस ५:२१-४३; लूका ८:४०-५६

18 मोदेंशो शेंना शेंन बाक्मेनु, मेकेर डा गुम्तीक खिं डा ठेयब मुर का जाक्शा, पोक्च थेक्शा बाप्शा “आं तमी बेक्त्। गो आं तमी तारी इन गुड वोइक्तीनी हना, ब्रोंइब” दे सेउ पाप्तु। 19 मिनू येसु नु आ शेंसीबपुकी मेको आ खिं लाम्तेक्म। 20 मिनू मार दुम्त देंशा हना, लना लन बाक्मानु, १२ बर्स डोंइती रे हुश याप्शा रोइ पशो मीश मुर कामी मेको आन नोले खोइश्शा, येसु आ फेक्शो वा थिवा बाक्त्। 21 मारदे हना “आ फेक्शो वा थिचा ताता हना, सानुड” दे थमा सुइश्शो बाक्माक्त्। मत्ती १४:३६ 22 मिनू येसुमी फिर लेश्शा कोव्रशा, मेको मीश मुर कली तशा “आं तमी, इ थुं बारपतो। इ थमा सुइश्शोमी साते” दे माइक्तु। मो देंमेनु, आ रोइ ब्रा सामाक्त्।

23 मिनू ठेयब मुर आ खिं जाक्दीम्मानु, येसुमी शुश मुर देल्शा बाजा ताप्शा, रौका पा डाक्ना डाक्न बाक्शो ताप्तु। 24 मिनू मेको आन कली “कतीने। एको आल बेक्शो ममाइ, इप्शो बाक्ब” दे माइक्तीमी। मेकोपुकीमी “मबाक्शो लोव्र पाइबाक्त्” दे शुक्शी पाम्तेक्म। यूहन्ना ११:११, १४, २५ 25 मेको आन कली सोइश्शा, खिं ओव्रत। मिनू आल आ गुड ग्याइक्तानु, छुल बोक्त्। 26 मिनू मेको लोव्र मेको रागी नेल्लेम ब्रम्माक्त्।

मिक्च मताइब आस कली सापाइश्शो

27 मिनू येसु मेकेर रे लमेनु, मिक्च मताइब निक्शीमी “ए दाऊद पिप आ तौ, आंस कली शिशो पाइस्की” दे रेयके पा वाइ ब्रेश्शा, आ नोले खोइक्ताक्स। मत्ती २०:३० 28 मिनू खिं ओव्रमेनु, मेको निक्शी यो ओव्रताक्स। मिनू येसुमी “गो इस कली सापाइक्ने चाप्नन्सी, दे थमा सुइक्नीसी?” देंमेनु “थमा सुइक्नस्कु, प्रभु” देंताक्स। प्रेरित १४:९ 29 मिनू येसुमी आस मिक्च थिशा “इस थमा सुइश्शो बुदी दुम्त्” देंत। मत्ती ८:१३ 30 मिनू मिक्च ताइब दुम्ताक्स। मिनू “एको लोव्र सुइ कली मशोव्रडीसे” दे

सोइक्ताक्सी। मत्ती ८:४ 31 तन्न मेको निक्शीमी चहिं आस रागी डा मुर नेल्ल आन कली येसु आ पशो तुइक्पदसे बाक्त्।

वोलम सुम्शो लाटा कली सापाइश्शो

32 मिनू येसु नु आ शेंसीबपुकी मेको खिं रे गूशा लमानु, मार दुम्त देंशा हना, वोलमी सुम्शो लाटा का चाक्तेक्म। 33 मिनू येसुमी वोल कली गुंडताक्व। मिनू मेको मुरुमी लोव्र पाप्तु। मिनू मेकेर बाक्बपुकीमी छक लाक्शा “इं इस्राएलमी ओदेंशो दुम्शो गेनायो मतशो नय” देंमुम्तेक्म। 34 फरिसीपुकीमी चहिं “वोल आन पिप आ नें थिशा, वोल आन कली गुंडबाक्त्” देंतेक्म। मत्ती १२:२४-३२

बाली नाली रुप्बपुकी माल्शो

35 येसु गालील रागी डा सहर गाउं नेल्ल हिरना हिरन गुम्तीक खिंमी मुर आन कली स्वर्ग डा राज्य डा लोव्र शेंना शेंन, रोइमी गुरशो नु रोइ पशो मुर नेल्ल आन कली सापाइक्ना पाइक्न गाक्त्। 36 शुश मुर आन कली तशा, शिशो पाइक्तीमी। मारदे हना गोठला मबाक्शो भेडापुकी खोदेंशो पा दशो बाक्मा बाक्त्। १राजा २२:१७; इजीकीएल ३४:५; मर्कूस ६:३४ 37 मिनू आ शेंसीब आन कली “बाली नाली रुप्चा माल्शो शुश बाक्ब। रुप्ब मुर चहिं का निक्शी ला बाक्नीम। 38 मोपतीके ‘रुप्चा कली मुर योव्रशा सोइक्तीने’ दे बाली नाली आ परमप्रभु कली पुनीने” दे माइक्तीमी। लूका १०:२

शेंसीब आन कली ब्रेश्शो

मर्कूस ६:७; मर्कूस ३:१३-१९; लूका ९:१; लूका ६:१२-१६

10 मिनू आ शेंसीब १२ जना आन कली खुप्शा, वोल आन कली गुंडशा, खेरतीक, रोइमी गुरशो नु रोइ पाइब आन कली सापाइक्तीक अधिकार गेम्तीमी। 2 मोदेंशो अधिकार ताइब आन कली “सोइश्शोपुकी” दे यो देंसीब। मेकोपुकी सु सु बाक्तेक्म देंशा हना, पत्रुस माइश्शो सिमोन नु आ दाग्यु अन्द्रीयास, जब्दी आ तौ याक्ब नु यूहन्ना, मर्कूस ३:१६-१९; लूका ६:१४-१६; प्रेरित १:१३ 3 फिलीप नु बारथोलोमाइ, थोमास, तिरो पोक्ब मत्ती, अल्फयस आ तौ याक्ब, थदेयस, 4 कनानी सिमोन नु इस्कारीयोत डा यहूदा बाक्तेक्म। मेको यहूदा नोले येसु कली साइक्चा, दे माल्ब आन कली वारच पाइब दुम्बाक्माक्त्।

शेंसीब आन कली सोइश्शो

मर्कूस ६:७-१३; लूका ९:२-६

5 येसुमी आ १२ जना शेंसीब आन कली सोइश्शा, मेको आन कली “अकों जात डा मुर आन रागी मलने। सामरीया डा मुरपुकी आन रागी यो मलने। 6 तन्न गोठला मबाक्शो, लां जाम्शो भेडा खोदेंशो, इं इस्राएली आन बाक्तीके लने। मत्ती १५:२४; प्रेरित १३:४६ 7 ‘स्वर्ग डा राज्य जाक्चशो बाक्त्’ दे शेंदीने। लूका १०:१-१२; मत्ती ४:१७ 8 रोइ पाइब आन कली सापतीन। बेक्शो मुर आन कली सेंपतीन। कोर पाइब आन कली सापतीन। वोल आन कली गुंडशा खेरतीन। मेको नेल्ल मोशा ताइतीनी। मिनू मोशा गेने। मर्कूस १६:१७ 9 सुन चांदी तांबा का यो मकुरीन। प्रेरित २०:३३ 10 लां कली फेक्तीक वा, जुत्ता जोड निक्शी, झोला नु कोक्के मकुरीन। मारदे हना गेय पाइबपुकीमी जचा गेचा पुंइसीनीम। गन्ती १८:३१; १कोरिन्थी ९:१४; १तिमोथी ५:१८

11 सहर गाउं तेइ जाक्दीन्नीनु, रिम्शो थुं पाइश्शो मुर आ खिं हिल्लो पा बाक्त् लने। मिनू बास गेम्तेक्म हना, गाक्ची मजाक्म सम्म बाक्कीन। 12 मिनू खिं ओव्रनीनु ‘परमप्रभु यावेमी इन कली रिम्शो पवल’ दे आसीक गेने। 13 मेको खिंमी रिम्शो थुं पाइश्शो मुर बाक्तेक्म हना, आसीक रशा, आन थुं नाइक्चा ताइनीमी। मोदेंशो मुर मबाक्तेक्म हना चहिं मेको आन रचा डा आसीक गे राइनीनी। 14 मुरपुकीमी इन लोव्र मनेंथु, बास मगेम्तेक्म हना, इन खोइल डा फुरक थुर थुर पाइश्शा गाक्कीन। प्रेरित १३:५१ 15 नोफा दाइश्शा नेनीने, निसाफ पची नाक्त् सोदोम नु गोमोररा सहर निक्शीमी

बाक्ब मुर आन क्येडा इन लोव्र मनैब मटीबपुकीमी शुश सजाइ ताइनीम।  
उत्पत्ती १९:१-२९

थमा सुइक्बपुकी खेदा पचा पुंडसीनीम  
मर्कूस १३:९-१३; लूका २१:१२-१७

16 भेडा आन कली फर आन दातेम सोइश्शो खोदेशो पा सोइक्वन्नी।  
बुस्स खोदेशो पा निप्स पाइश्शो दुमीने। मिनु परवा खोदेशो दुम्शा, सुइ कली  
मरिम्शो मपने। लूका १०:३; रोमी १६:१९; एफिसी ५:१५<sup>17</sup> होस पा  
गाक्कीन। मारदे हना मेको फरपुकीमी इन कली सभा कछडीम वोइक्नीम।  
युम्तीक खिमी लाइश्शा युक्नीम। प्रेरित ५:४०; २कोरिन्थी ११:२४<sup>18</sup> इन  
कली श्येत गेबपुकी नु अर्को रागी डा मुर आन डोंइती सांकछी दुम्शा कली  
ठेयब मुर नु पिप आन डोंइती राप्पाइक्नीम। प्रेरित २५:२३; प्रेरित २७:२४  
<sup>19</sup> इन कली मोपा राप्पदमेनु, मार लोव्र पका? मार देका? दे सुर्ता मपने।  
मार देंचा माल्बा, मेको लोव्र तुइक्पाइक्वा पुंडसीनीनी। प्रस्थान ४:१२; लूका  
१२:११-१२; प्रेरित ४:८<sup>20</sup> मारदे हना गे इन थुं रे पिशो लोव्र मपाइनीनी,  
तन्न इन आफ आ सोक्तीमी इन शोव्र रे पा लोव्र पाइब। १कोरिन्थी २:४  
<sup>21</sup> लोकबमी आ लोकब कली साइक्पाइक्वा गेब। आफोमी तमी तौ आन  
कली नु तमी तौपुकीमी यो आम आफ कली मरिम्शो पा साइक्पाइक्नीम।  
मीका ७:६<sup>22</sup> आं नें आ पर्बम नेल्लेमी इन कली मदाक्नीम। तन्न सु सुमी  
चहिं नोले सम्म फाल्शा बाक्नीमी, मेकोपुकी परमप्रभु यावे नु ब्रोंइशा बाक्वा  
ताइनीमी। रतिमोथी २:१२; मत्ती २४:९-१३<sup>23</sup> सहर कामी खेदा पाप्तेक्म  
हना, प्रोक्शा अर्को सहरमी जाक्दीश्शा बाक्कीन। नोफा दाइश्शा नेनीने,  
रागीम जरमेशो मजाक्म सम्म इस्त्राएल डा सहर नेल्ल हिरशा मयुम्नीनी।  
प्रेरित ८:१; मत्ती १६:२८

श्येत गेब आन कली तशा महिंचा

24 शेंब क्येडा शेंसीब नु होव्रप क्येडा गेय पाइब ठेयब मनमी। लूका  
६:४०; यूहन्ना १३:१६; यूहन्ना १५:२०<sup>25</sup> शेंब नु शेंसीब, होव्रप नु आ गेय  
पाइब कांडीचक दुम्ने चाप्नीम। खिं डा ठेयब मुर कली बेल्लेजीबुल, दे शुक्शी  
पाइक्तेक्म हना, आ खिं डा मुर आन कली शुक्शी मपाइनीमी डा? मत्ती  
१२:२४<sup>26</sup> मोपतीके मेको आन कली तशा महिनीन। मुल सम्म सुम्शा  
वोइश्शो नोले नेल्ल हाक्सीशा तांडसीब। मुल खुइश्शा वोइश्शो नोले तुंडसीब।  
लूका १२:२-९; मर्कूस ४:२२; लूका ८:१७<sup>27</sup> गोमी इन कली छिडछिडमी  
माइश्शो लोव्र छेडछेडमी मतीने। इन कली नोफाम देंशो लोव्र नोले ठेयब  
सेंदा पा नेंपतीने।<sup>28</sup> इन रां कली साइक्ने चाप्ब। तन्न इन सोक्ती कली  
साइक्ने मचाप्बपुकी आन कली तशा महिनीन। रां नु सोक्त निम्फा नरकमी  
खतम पने चाप्ब कली तशा चहिं हिनीन। हिब्रू १०:३१; याक्ब ४:१२  
<sup>29</sup> अस्सारीयोन कामी भंगेरा निक्शी मग्याम्सीबा डा? मो हना यो इन  
आफोमी मदेंथु, का यो खपीम मदोक्ब।<sup>30</sup> इन पिया डा चां का का पा  
हिक्शा, गिश बाक्मा, दे तुइश्शो बाक्ब। अस्सारीयोन का आइक्च तांबा के  
क्येट बाक्ता। प्रेरित २७:३४<sup>31</sup> मोपतीके महिनीन। गे भंगेरा क्येडा शुश  
हिक्सीशो बाक्नीनी। मत्ती ६:२६

<sup>32</sup> सुमी मुर आन कली 'येसु आ मुर नड' देंबा, गो यो स्वर्गम बाक्ब आं  
आफ कली 'एको आं मुर बाक्ब' देंनुड। प्रकाश ३:५<sup>33</sup> सुमी चहिं मुर आन  
कली 'येसु सु में? मतुइक्नुड' देंबा, गो यो स्वर्गम बाक्ब आं आफ कली  
'मेको कली मतुइक्नुड' देंनुड। मर्कूस ८:३८; लूका ९:२६; रतिमोथी २:१२

येसु आ पर्बम मुर ब्रानीम, दे शेंशो

<sup>34</sup> रागीमी नेल्ल आन कली गारपाइक्थ जाक्शो बाक्ब, दे आं पर्बम  
मिमितीने। दुपाइक्वा कली ममाइ, तन्न तरवार ग्यारपाइक्थ जाक्ती। लूका  
१२:५१-५३; मीका ७:६<sup>35</sup> मारदे हना आ पर्बम तौ नु आफ, तमी नु ममा,  
चाइमी नु शिमी जिमुशा ब्रानीम।<sup>36</sup> मोदेशो पा आंम खिं डा मुर जोरी सत्रु  
दुम्नीम।<sup>37</sup> आं क्येडा आन आम आफ कली दाक्बपुकी आं नोले खोइक्वा  
मशिरनीम। आं क्येडा आन तमी तौ आन कली दाक्बपुकी यो आं नोले  
खोइक्वा मशिरनीम। ब्यवस्था १३:७-१२; ब्यवस्था ३३:९; लूका १४:२६-२७

38 सुमी आं नोले खोइश्शा, श्येत फाल्ने मचाप्बा, मेको आं नोले खोइक्वा  
मशिरब। मत्ती १६:२४-२५<sup>39</sup> आंम कली प्रोंइचा दाक्ब जाम्शा लाइब। आं  
पर्बम जाम्शा लाइब चहिं ब्रोंइचा ताइब। लूका ९:२४; यूहन्ना १३:२०;  
गलाती ४:१४

रिम्शो पाइबमी इनाम ताइब

<sup>40</sup> इन कली ब्राइबमी आं कली ब्राइब। मिनु आं कली ब्राइबमी आं कली  
सोइक्ब कली यो ब्राइब।<sup>41</sup> परमप्रभु यावे आ लोव्र पाइब बाक्माक्त, दे  
मिम्शा, परमप्रभु यावे आ लोव्र पाइब कली ब्राप्तु हना, परमप्रभु यावे आ  
लोव्र पाइब आ तचा डा इनाम मेकोम ताइब। ठीक पाइब मुर बाक्माक्त, दे  
मिम्शा, ठीक पाइब मुर कली ब्राप्तु हना, ठीक पाइब आ तचा डा इनाम  
मेकोम ताइब। १राजा १७:८-२४<sup>42</sup> नोफा दाइश्शा नेनीने, सुमी महिक्सीशो  
मुर का कली 'एको यो शेंसीब का बाक्माक्त' दे मिम्शा, लोटा का ब्वाक्कु  
तूचा गेबा, मेकोमी दोपा यो आ तचा डा इनाम मसाम्ब" दे शेंताक्मी। मत्ती  
२५:४०; मर्कूस ९:४१

शेंसीब आन कली शेंथ सोइश्शो

लूका ७:१८-२३

11 आ १२ जना शेंसीब आन कली मेको लोव्र शेंने थुम्शा, येसु मेकेर  
रे लशा, सहर सहरम हिरशा, शेंना शेंन गाक्ता।<sup>2</sup> मिनु येसु शेंना  
शेंन गाक्मेनु, यूहन्ना जेल्खानमी बाक्माक्ता। मिनु ख्रीस्तमी पशो गेय आ  
पर्बम नेंशा, आ शेंसीब आन कली मत्ती १४:३<sup>3</sup> "गे जाक्वा माल्शो  
बाक्नीनी देय अर्को कली लां कोव्रका?" दे हिल्लो पथ सोइक्तीमी बाक्ता।  
मत्ती ३:११; मलाकी ३:१<sup>4</sup> मिनु मेकोपुकी जाक्शा, हिल्लो पामेनु, येसुमी  
"गे मार मार नेंनी, मार मार तनी, यूहन्ना कली मतीने<sup>5</sup> 'मिक्च  
मताइबपुकीमी मिक्च ताइबाक्तेक्म, खोइल मदुक्बपुकी गाक्बाक्तेक्म, कोर  
पाइब साबाक्तेक्म, नोफा मनैबपुकी नेंबाक्तेक्म, बेक्शो मुर बेक्शो रे  
सेंसीशा ब्रोंइबाक्तेक्म। महिक्सीशो मुरपुकीम ग्येरपाइक्ब लोव्र नेंबाक्तेक्म'  
यसैया ३५:५-६; यसैया ६१:१<sup>6</sup> सु सुमी आं कली तशा थुं  
मखाइक्पाइक्नीम, मेकोपुकी ग्येरसमल, दे मतीन" दे लेश्शा सोइक्ताक्मी।  
मत्ती १३:५७; मत्ती २६:३१

यूहन्ना आ पर्बम शेंशो

लूका ७:२४-३५

<sup>7</sup> मिनु मेकोपुकी लमा नोले, येसुमी मुर आन कली यूहन्ना आ पर्बम "साइ  
गोरशो रागीमी मार कोव्रथ लनी? फशेम हिम्शो किन्दा कोव्रथ लनी? मत्ती  
३:१, ५<sup>8</sup> मिनु मार कोव्रथ लनी? दारशो वा फेक्शो मुर तांडसीबा कों, दे  
कोव्रथ लनी? नेनीने, दारशो वा फेक्ब पिप आन खिमी बाक्नीम।<sup>9</sup> गेपुकी  
मार कोव्रथ लनी, मिनु? परमप्रभु यावे आ लोव्र पाइब तांडसीबा कों, दे  
कोव्रथ लनी? गे नेल्ल आन क्येडा ठेयब परमप्रभु यावे आ लोव्र पाइब  
ताइतीनी, दे इन कली देंनुड। लूका १:७६; लूका २०:६<sup>10</sup> परमप्रभु यावेमी  
ब्रेक्पाइश्शो लोव्रमी मेको आ पर्बम मार ब्रेक्शो बाक्ब देंशा हना 'गो आं लोव्र  
कुरब इ डोंइडोंइती सोइक्नुड। मेकोमी इ लां ठीक सेल्ब' दे ब्रेक्शो बाक्ब।  
मलाकी ३:१

<sup>11</sup> नोफा दाइश्शा नेनीने, रागी नेल्लेमी ब्वाक्कुम खुम्शा गुंडब यूहन्ना  
खोदेशो ठेयब सुइ मबाक्ब। स्वर्ग डा राज्यमी चहिं नेल्ल क्येडा यो आइक्च  
यूहन्ना क्येडा ठेयब बाक्ब। मत्ती १३:१७<sup>12</sup> यूहन्नामी मुर आन कली शेंशा,  
ब्वाक्कुम खुम्शा गुंडदा रे मुल सम्म स्वर्ग डा राज्य ओव्रशा, आन के सेल्चा,  
दे दाम पा मुना मुन बाक्नीम। लूका १६:१६<sup>13</sup> साइ नेसी परमप्रभु यावे आ  
लोव्र पाइब नेल्लेमी नोले दुम्ब लोव्र पा यूहन्ना आ पर्बम ब्रेक्शो बाक्तेक्म।  
<sup>14</sup> जाक्वा माल्शो एलीया सु बाक्बा, दे तुइक्वा दाक्ताक्नी हना, मेको  
यूहन्नान बाक्ब। मत्ती १७:१०-३०; मलाकी ३:२३<sup>15</sup> सु नोफा पाइश्शो  
बाक्मे, मेकोमी नेंनल।

<sup>16</sup> सिनाक्त मुलाक्ता डा मुर दोदेशो बाक्नीम देंशा हना, बजारमी ग्यारब  
आलपुकीम<sup>17</sup> 'ताप्तीक ताप्कानु, गे सिल मपनी, रोंका पा डाक्कानु, गे



मडाक्नी' दे ब्रेम्मुशो खोदेंशो बाक्नीम। यूहन्ना ५:३५ 18 मारदे हना यूहन्नामी बर्त बाक्शा, शांबु राकसी मतूडानु, वोलम सुम्शो मुर बाक्मावत देंनीम। मत्ती ३:४ 19 रागीम जरमेशोमी चहिं जचा तूचा थोवक नेल्ल जाइब तूब। मेको कली तशा 'धोक्ने, शांबु राकसीमी दुक्ब, तिरो पोक्ब नु पापी आन वारच बाक्मावत' देंनीम। मेको के दोशो तुइक्तीक बाक्मे, मेको आ गेय रे पा तुंडसीब" दे येसुमी मुर आन कली शेंताक्नीम। मत्ती ९:१०-१५; यूहन्ना २:२; १कोरिन्थी १:२४-३०

गालील डा सहर सजाइ ताइनीम  
लूका १०:१३-१५

20 येसुमी शुश छक लाक्वा डा गेय नु चिन्ड कौडशा यो सहर डा मुरपुकी आन थुं परमप्रभु यावे गे मलेत्तेम। मोपतीके ओदें हुइक्ताक्नी 21 "ए खोराजीन, ए बेथसैदा, गेमी तशो छक लाक्वा डा गेय नु चिन्ड टायर नु सीदोन डा मुरपुकीमी तशो नम हना, साइ कना भाडरा फेक्शा, पुलु खेक्सीशा, आन थुं परमप्रभु यावे गे लेत्तेम वा। जोना ३:६ 22 निसाफ पची नाक्त गेपुकी टायर नु सीदोन डा मुर आन क्येडा शुश सजाइ ताइनीनी, दे इन कली देंनुड। 23 ए कापेरनाउम, मार गे स्वर्ग सम्म क्युक्सीनेवे डा? नरकम तोक्वा पुंडसीनेवे। मारदे हना गेमी तशो छक लाक्वा डा गेय नु चिन्ड सोदोम डा मुरपुकीमी तशो नम हना, आन थुं परमप्रभु यावे गे लेशशा सजाइ रे ब्रोंडचा ताम वा, मिनु सहर मूल सम्म ली वा। मत्ती ४:१३; मत्ती ८:५; मत्ती ९:१; यसैया १४:१३, १५ 24 निसाफ पची नाक्त सोदोम डा मुर आन क्येडा कापेरनाउम सहर डा मुरपुकीमी शुश सजाइ ताइनीम, दे इन कली देंनुड" दे हुइक्ताक्नीम। मत्ती १०:१५

येसुमी मुर आन कली ब्रेशो

25 काबु येसुमी "आं आफ, सरीड नु रागी डा परमप्रभु, गे नेल्ल क्येडा ठेयब ननी। गे शुश रिम्शो पाइतीनी। जोक्ब तुइक्ब नड, दे मिम्ब आन कली इन लोव मरुप्तीक थुं गेतीनी। मजोक्ब मतुइक्ब आन कली रुप्तीक थुं गेतीनी। यसैया २९:१४; लूका १०:२१-२२; यूहन्ना १७:२५; १कोरिन्थी १:२८-२९ 26 आं आफ, गे मोदेंशो पचा दाक्ताक्नी। 27 आं आफोमी मारेड मारेड तुइक्पाइक्ती। सुइमी आं कली, आ तौ कली मतुइक्नीम। आं आफोमी ला तुइक्ब। सुइमी आं आफ कली मतुइक्नीम। आ तौमी ला तुइक्ब। मिनु तौमी सु सु आन कली योव्रडमी, मेको आन कली आ आफ आ पर्बम तुइक्पाइक्ब। मत्ती २८:१८; यूहन्ना ३:३५; यूहन्ना १७:२; फिलिप्पी २:९ 28 गे श्येत जशो नु भारीम चिच्चा पुंडसीशोपुकी, आं गे जाक्कीन। मिनु नाइक्वा गेनन्नी। मत्ती १२:२०; मत्ती २३:४; येरमीया ३१:२५ 29 आं जवा लाम्सीशा, गो नु शेंसीने। मारदे हना गो शिशी पाइब नु ब्रेशो थुं डा नड। मिनु गे इन थुं नाइक्वा ताइनीनी। यसैया २८:१२; येरमीया ६:१६ 30 आं जवा ग्युप्या डा बाक्ब। आं भारी कुरने चाच्चा डा बाक्ब" देंत। लूका ११:४६; १यूहन्ना ५:३

नाइक्तीक नाक्त डा लोव  
मर्कूस २:२३-२८; लूका ६:१-५

12 काबु नाइक्तीक नाक्त येसु नु आ शेंसीबपुकी चेरब रू डा लां लना लन बाक्मानु, शेंसीबपुकी शोव्रलु बेक्शा, चेरब बाला शोइश्शा नोक्शा जाक्तेक्म। ब्यवस्था २३:२६ 2 फरिसीपुकीमी मेको आन मो पशो तशा, येसु कली "कोव्रडीने, इन शेंसीबपुकीमी नाइक्तीक नाक्तीम पचा मदुम्शो गेय पाक्तेक्म" देंतेक्म। प्रस्थान २०:१० 3 मिनु येसुमी मो देंब आन कली "दाऊद नु आ वारचपुकी शोव्रलु बेक्मानु, मार पामे, दे परमप्रभु यावेमी ब्रेक्पाइश्शो लोव मपढेनी? १सामुएल २१:७ 4 दोपा दाऊदमी परमप्रभु यावे आ खिंमी ओव्रशा, परमप्रभु यावे कली चढेशो शोब्ले शोल्शा योक्शा जामे? मेको चढेशो शोब्ले चढेबपुकीमी ला जचा दुम्बाक्मावत। अरु मुरपुकीमी जचा मदुम्ब बाक्मावत। लेवी २४:९ 5 नाइक्तीक नाक्त चढेबपुकीमी परमप्रभु यावे आ खिंमी चढेनीम। मेकोपुकीमी गेय पाइनीम। मेकोपुकी चहिं दोस गेचा मपुंडसीनीम। परमप्रभु यावेमी ब्रेक्पाइश्शो एको

लोव यो मपढेनी? 6 एकेर परमप्रभु यावे आ खिं क्येडा ठेयब मुर का बाक्ब, दे इन कली देंनुड। 7 'चढेतीक ममाइ, शिशी पशो तचा दाक्नुड' देंशो परमप्रभु यावे आ लोव आ अर्थ रुप्तीनी हना, दोस गेचा मपुंडसीब आन कली दोस मगेनी वा। होसे ६:६; मत्ती ९:१३ 8 रागीमी जरमेशो चहिं नाइक्तीक नाक्त मार पचा, मार मपचा अधिकार पाइब बाक्ब" दे माइक्तीमी।

नाइक्तीक नाक्त सापाइश्शो  
मर्कूस ३:१-६; लूका ६:६-१९

9 मिनु येसु मेकेर रे लशा, मेको आन गुम्तीक खिंमी जाक्दीश्शा ओव्रत। 10 मिनु मेकेर गुइ सोव्रशो मुर का बाक्त। मेकोपुकीमी येसु कली दोस गेचा माल्शो बाक्मा बाक्त। मोपतीके "नाइक्तीक नाक्त सापाइक्तीक गेय पचा दुम्बा?" दे हिल्लो पखु पा योव्रकी पाक्तेक्म। 11 मिनु येसुमी "सुइ इन के काइचीक भेडा नाइक्तीक नाक्त खाल्टाम बिक्त हना, मेको कली कीशा मगुंडनीनी डा? लूका १४:३-५ 12 भेडा का क्येडा मुर ठेयब ममाइ डा? मोपतीके नाइक्तीक नाक्त मुर आन कली शिशी पा रिम्शो पचा इं कानुन डा लोव नु गारब" दे माइक्तीमी। 13 मिनु गुइ सोव्रशो मुर कली "इ गुइ दिंदो" दे माइक्नु। मिनु मेकोमी गुइ दिंसेनु, ब्रा साशा, अर्को गुइ खोदेंशो दुम्त। 14 मिनु फरिसीपुकीमी मेकेर रे गूशा खुम्सीशा "मेको कली दोपा साइक्वा ताइनया?" दे लोवसी पाक्तेक्म। यूहन्ना ५:१६

परमप्रभु आ गेय पाइब  
मर्कूस ३:७-१२; लूका ६:१७-१९

15 मिनु येसुमी मेको आन लोव पशो तुइश्शा, मेकेर रे गाक्त। मिनु शुश मुरुमी आ नोले खोइक्तेक्म। मेकोपुकी रोइ पाइबपुकी यो बाक्तेक्म। मेको नेल्ल आन कली सापाइक्तीमी। 16 सापाइश्शा "सुइ कली मतुइक्पाइक्तीनी" दे माइश्शा सोइक्ताक्नीम। मत्ती ८:४ 17 मोदेंशो पा साइ नेसी परमप्रभु यावे आ लोव पाइब यसैयामी देंशो लोव थमा दुम्पाइक्नु। 18 यसैयामी मार देंशो बाक्त देंशा हना "आं गेय पाइब कली कोव्रडीन। एको कली योव्रता। मिनु एको कली दाक्नुड। एको कली तशा शुश ग्येरसीनुड। आं सोक्तीम प्रिंशा, अर्को रागी डा मुर आन कली दोपा ठीक दुम्चा, दे तुइक्पाइक्ब। प्रेरित ३:१३, २६; मत्ती ३:१७ 19 मेकोमी जिचा मपोक्ब। शुश रेयके मपाइब। लां पित्थ आ सेंदा मनेंसीब। 20 जिक्वशो किन्दा मजिक्ब, काप्चशो मी मकाप्ब। ठीक पतीकेमी मग्राम सम्म मोदेंशो पना पन बाक्त। 21 अर्को रागी डा मुरपुकीमी मेको आ नेंमी आस पा बाक्नीम" दे ब्रेक्शो बाक्ब। यसैया ४२:१-४

वोल गुंडतीक अधिकार कौडशो  
मर्कूस ३:२२-२७; लूका ११:१४-२३

22 मिनु मिक्च मताइब, नोफा मनेंब, मब्वाक्ब वोलम तशो मुर का चाक्तेक्म। मिनु येसुमी मेको कली सापाइक्नु। मिनु मिक्च ताप्तु, लोव यो पाप्तु। 23 मेकेर देल्शोपुकीमी "ओहो, एकोन दाऊद आ तौ बाक्म कोर में?" देंमुक्तेक्म। मत्ती २१:९; यूहन्ना ७:४२ 24 फरिसीपुकीमी चहिं मेको आन देंशो नेंशा "वोल आन पिप बेल्लिबुल आ सक्तिम कका वोल आन कली गुंडशा खेरबाक्मावत" दे मिम्शा लोव पामे बाक्त। 25 मिनु येसुमी मेको आन मिम्शा लोव पशो तुइश्शा, मेको आन कली "राज्य का डा मुरपुकी जिशा ब्राशा गाक्तेक्म हना, राज्य जाम्शा लाइब। सहर का डा मुरपुकी जिशा ब्राशा गाक्तेक्म हना, सहर नुप्ब। खिं का डा मुरपुकी यो जिम्तेक्म हना, मेको खिं मलीब। मत्ती ९:३४ 26 सैतानमी सैतान कली खेरतु हना, मेकोपुकी ब्रानीम। मिनु आ राज्य दोपा लीबा डा? 27 गो बेल्लिबुल आ सक्तिम वोल आन कली खेरतामी हना, इन तौपुकीमी सु आ सक्तिम खेरमे? मेकोपुकीमी गे इन कली निसाफ पाइनीम। 28 गोमी परमप्रभु आ सोक्तीमी वोल आन कली खेरनुड हना, परमप्रभु यावे आ राज्य जाक्शो बाक्मावत, दे तुइक्तीन। १यूहन्ना ३:८ 29 नेनीने, बोल्यो मुर आ खिं खुइ पाइबमी डोंइती मेको खिं डा मुर कली ग्याइश्शा फ्रेंशा मवोइक्नु हना, आ खिं डा मारेड मारेड

दोपा लाइवने चाप्बा डा? पाइश्शा नोले ला मेको आ खिं डा मारेइ मारेइ लाइवने चाप्बा। मत्ती ४:१-११; यसैया ४९:२४<sup>30</sup> गो नु मगारब आं जोरी सत्रु दुम्नीम। गो नु गारशा मखुप्बमी आं खुप्शो यो फ्रशा ताइक्ब। मर्कूस ९:४०<sup>31</sup> मोपतीके गो इन कली मार देंनुड देंशा हना, मुरपुकीमी पाप पा, परमप्रभु यावे कली शुक्शी लोत्र पास्तेक्म हना, माफ गेचा पुंडसीनीम। परमप्रभु यावे आ सोक्त आ पर्वम शुक्शी लोत्र पशो पाप चहिं मक्याम्सीब, दे इन कली देंनुड। मर्कूस ३:२८-३०; लूका १२:१०; १यूहन्ना ५:१६; हिब्रू ६:४-६; हिब्रू १०:२६<sup>32</sup> रागीम जरमेशो आ पर्वम शुक्शी लोत्र पास्तेक्म हना, माफ ताइनीम। तन्न सुमी परमप्रभु यावे आ सोक्त आ पर्वम शुक्शी लोत्र पाइबा, मेको आ पाप मुल मक्याम्सीब, बेक्शा लशा नोले यो मक्याम्सीब, गेना हना यो लीब। १तिमोथी १:१३

ब्रोव्रशो नु मब्रोव्रशो फल रवा  
लूका ६:४३-४५

<sup>33</sup> ब्रोव्रशो फल सिप्ब रवा खुम्तीनी हना, ब्रोव्रशो फल सिप्ब। मब्रोव्रशो फल सिप्ब रवा खुम्तीनी हना, मब्रोव्रशो फल सिप्ब। फल थाम्शा रिम्शो रवा बाक्म, दे मरिम्शो रवा बाक्म मेको तुंडसीब। मत्ती ७:१६-१८<sup>34</sup> ए बुस्स आ खलकपुकी, गे मरिम्शो थुं पाइश्शो ननी। मिनु इन शोत्र रे दोपा रिम्शो लोत्र गूबा डा? थुं मारम ब्रीशो बाक्मे, मेकोन लोत्र पा गूब। मत्ती ३:७<sup>35</sup> रिम्शो थुं पाइश्शो मुरुमी रिम्शो लोत्र पाइब। मरिम्शो थुं पाइश्शो मुरुमी मरिम्शो लोत्र पाइब।<sup>36</sup> निसाफ पची नाक्त मुर नेल्लेमी आन हेंथे पशो लोत्र का का पा शोत्रचा माल्नीम, दे इन कली देंनुड। याकूब ३:६; यहूदा १५<sup>37</sup> मोपतीके होस पा बाक्कीन। मारदे हना इन पशो लोत्रमीन दोस गेचा नु ठीक सुइक्वा पुंडसीनीनी” दे माइक्तीमी।

चिन्ड कोव्रकोव्र दाक्शो  
मर्कूस ८:११-१२; लूका ११:२९-३२

<sup>38</sup> मिनु सास्त्री नु फरिसी का निक्शीमी “शेंब हजुर, चिन्ड का कोइदीकी” देंतेक्म।<sup>39</sup> मिनु येसुमी “मरिम्शो थुं पाइश्शो नु थमा मसुइक्बपुकीमी चिन्ड कोव्रकोव्र दाक्नीम। मेको आन कली परमप्रभु यावे आ लोत्र पाइब योना आ चिन्ड डा लाक्शा मारेइ चिन्ड मकोइनुडमी।<sup>40</sup> योना नाक्त सां सम्म डांइ आ कोव्रजम बाक्शो खोदेंशो पा, रागीम जरमेशो यो नाक्त सां सम्म रागी आ कोव्रजम बाक्ब। योना २:१; एफिसी ४:९; १पत्रुस ३:१९<sup>41</sup> निसाफ पची नाक्तीम निनवे सहर डा मुरपुकी बोक्शा, एको पाला डा आन कली दोसी सुइक्नीम। मारदे हना मेकोपुकीमी योना आ लोत्र नेंशा, आन थुं परमप्रभु यावे गे लेत्ताक्म। नेनीने, एकेर का योना क्येडा ठेयब बाक्ब। जोना ३:५<sup>42</sup> निसाफ पची नाक्त लुक्च रागी डा पिपीम बोक्शा, एको पाला डा मुर आन कली दोसी सुइक्ब। मारदे हना मेकोमी डोन रे कुशा, पिप सोलोमनमी दोदेंशो निप्स पा हुकुम पवा, दे कोव्रथ जाक्माक्त। नेनीने, एकेर सोलोमन क्येडा ठेयब का बाक्ब। १राजा १०:१-१०

वोल गूशा लशा यो लेन्ने चाप्ब  
लूका ११:२४-२६

<sup>43</sup> मुर रे वोल कली गुंइशा खेरमेनु, ग्रांग्रा दिचा डा वोल गूशा लशा, ब्वाक्कु मबाक्तीकेमी नाइक्तीके माल्थ गाक्ब। माल्शा यो नाइक्तीके मथीब।<sup>44</sup> मिनु ‘डोंइती आ बाक्तीकेमीन लेत्नुड’ दे लेश्शा जाक्ब। मिनु लेश्शा जाक्मेनु, बाक्तीके फिक्शा, सिल्शा श्येत्थ वोइश्शो थिप्ब।<sup>45</sup> मिनु आ क्येडा ग्रांग्रा दिचा डा ७ ओटा वोल आन कली माल्थ लशा चाक्ब। मिनु ओव्रशा बाक्नीम। मिनु डोंइती क्येडा मेको मुर शुश मरिम्शो दुम्ब। एको मरिम्शो पाला कली मोदेंशो दुम्ब” दे माइक्तीमी। २पत्रुस २:२०

येसु आ खिं डा मुर  
मर्कूस ३:३१-३५; लूका ८:१९-२१

<sup>46</sup> येसुमी मेको लोत्र पना पन बाक्मेनु, आ ममा नु आ लोक्बपुकी गुम्थ जाक्मा बाक्त। मत्ती १३:५६<sup>47</sup> मिनु मुर कामी “इन ममा नु लोक्बपुकी

गुम्थ जाक्तेक्म” देंत।<sup>48</sup> मिनु येसुमी मो देंब कली “आं ममा नु आं लोक्बपुकी सु नमी?” मत्ती १०:३७; लूका २:४९<sup>49</sup> देंशा, आ गुइ आ शेंसीबपुकी गे शुक्शा “कोव्रडीने, एकोपुकी आं ममा नु आं लोक्बपुकी नम। हिब्रू २:११<sup>50</sup> मारदे हना स्वर्गम बाक्ब आं आफ आ दाक्शो पाइबपुकीन आं ममा नु लोक्बपुकी नम” देंत। रोमी ८:२९

वांचेर शोक्शो कथा  
मर्कूस ४:१-९; लूका ८:९-८

**13** मेको नाक्त येसु खिं रे गाक्शा, समुन्द्र आ नेक्था लशा निस्साक्व।<sup>2</sup> मिनु शुश मुर जाक्शा देल्लेक्म। मिनु येसुमी शुश मुर आन कली देल्लो तशा, डोंगा डोइश्शा निस्साक्व। मुरपुकी चहिं समुन्द्र आ नेक्था बाक्तेक्म।<sup>3</sup> मिनु कथा सेल्शा, शुश लोत्र शेंताक्मी। कथा का ओं देंत “मुर कामी वांचेर शोक्थ लमाक्त।<sup>4</sup> मिनु ब्वारानु, गेडा का निक्शी लांमी जुक्तमे बाक्त। मिनु चिक्बीम गुप्शा जामे बाक्त।<sup>5</sup> का निक्शी ग्याडग्रो ठाउंमी जुक्तमे बाक्त। मिनु शुश खप मबाक्तीके जिव जाव वामा बाक्त।<sup>6</sup> तन्न नां पवानु, सोल सुल बेक्मा बाक्त। मारदे हना शाक्श मपाइश्शो बाक्मा बाक्त।<sup>7</sup> का निक्शी चू घारीमी जुक्तमे बाक्त। मिनु चूम सुम्शा, वाचा मगेवा बाक्त।<sup>8</sup> मिनु का निक्शी रिम्शो खपीम जुक्तमे बाक्त। मिनु वाशा शुश ग्रेल्शा, गेडा का के सहे का, ६०, ३० सिम्मा बाक्त।<sup>9</sup> सु नोफा पाइश्शो बाक्मे, मेकोमी नेंनल” देंत।

कथा सेल्शा शेंशो आ पर्वम  
मर्कूस ४:१०-१२; लूका ८:९-१०

<sup>10</sup> मिनु शेंसीबपुकीमी येसु कली “मारदे कथा सेल्शा, मुर आन कली शेंनीनी?” दे हिल्लो पास्तेक्म।<sup>11</sup> मिनु येसुमी “इन कली स्वर्ग डा राज्य आ पर्वम खूइश्शो लोत्र रुप्तीक थुं गेशो बाक्त। तन्न मेको आन कली मगेमी बाक्त। १कोरिन्थी २:१०<sup>12</sup> थीबमी तेम्शा गेचा पुंडसीब, मिनु शुश दुम्ब। मथीब चहिं बाक्शो यो रोइक्वा पुंडसीब। हितोपदेस ९:९; मत्ती २५:२८-२९; मर्कूस ४:२४; लूका ८:१८<sup>13</sup> कथा सेल्शा शेंनुडमी। मारदे हना कोव्रशा यो मताइनीम। नेंशा यो मरुप्नीम। यूहन्ना १६:२५; ब्यवस्था २९:३<sup>14</sup> साइ नेसी यसैयामी देंशो नोले दुम्ब लोत्र मुल थमा दुम्त। मार ब्रेक्शो बाक्त देंशा हना ‘नेंचा दा नेंनीनी, तन्न दोपा यो मरुप्नीनी। कोव्रचा दा कोव्रनीनी, तन्न दोपा यो मताइनीनी।<sup>15</sup> मेको मुर आन थुं ग्याम्शो बाक्नीम। आन नोफा थॉइशो बाक्नीम। आन मिक्च क्रिप्शो बाक्नीम। मोदेंशो मपशो नम हना, आन मिक्चीम ताम वा, नोफाम नेंनेम वा, थुंमी रुबेम वा, मिनु आं गे लेम्म वा, मिनु गो सापदुमी वा’ दे ब्रेक्शो बाक्त। यसैया ६:९-१०; यूहन्ना ९:३९<sup>16</sup> गेपुकी चहिं ग्येरसीने। इन मिक्च नु नोफा मेको आन के खोदेंशो ममाइ। मिक्चीम ताइनीनी, नोफाम नेंनीनी। लूका १०:२३-२४<sup>17</sup> नोफा दाइश्शा नेनीने, गेमी मुल तशो नेंशो साइ नेसी रे परमप्रभु यावे आ लोत्र पाइबपुकीमी तचा नेंचा दाक्बाक्मा बाक्त। तन्न तचा नेंचा मतामे बाक्त। १पत्रुस १:१०

वांचेर शोक्शो कथा आ अर्थ शेंशो  
मर्कूस ४:१३-२०; लूका ८:११-१५

<sup>18</sup> वांचेर ब्वारशो कथा आ अर्थ शेंननी, <sup>19</sup> सुमी परमप्रभु यावे आ राज्य डा लोत्र नेंशा मरुबा, मेको लांमी जुक्शो वांचेर खोदेंशो बाक्ब। सैतानमी आ रुप्शो क्याम्शा गेब।<sup>20</sup> ग्याडग्रो खपीम शोक्शो खोदेंशो बाक्त हना, देंशो चोटी बिश्शा ग्येरसीब।<sup>21</sup> तन्न शाक्श थोक्चा मतथु शुश मलीब। परमप्रभु यावे आ लोत्र आ पर्वम श्येत जाप्तु हना, थु प्रोंइशा गाक्ब।<sup>22</sup> चू घारीम जुक्शा सुम्शो खोदेंशो बाक्त हना, लोत्र नेंब। तन्न दोपा ठेयब दुम्नुडा? दोपा क्येट चेमु? दे मिम्शा, आ थमा सुइक्तीके देक्ब। मिनु नेंशो लोत्रमी फल मसिप्ब। मत्ती ६:१९-३४; १तिमोथी ६:९<sup>23</sup> सुमी नेंशा रुप्बा, मेको चहिं रिम्शो खपीम जुक्शो वांचेर खोदेंशो शुश ग्रेल्शा, गेडा का के सहे का, ६०, ३० सम्म सिप्ब” दे शेंताक्मी।

## सुवा नु चेरब शोक्शो कथा

24 मिनु अर्को कथा ओर्दे शेंताकमी “स्वर्ग डा राज्य ओर्देशो बाक्ब, मुर कामी आ रूमी रिम्शो वांचेर शोक्मा बाक्त। 25 मिनु नाक्दो इम्मेनु, आ जोरी सत्रुमी मेको तारी सुवा ब्वारशा गेवा बाक्त। 26 मिनु वांचेर वामेनु, सुवा यो वामाक्त। 27 मिनु गेय पाइबपुकीमी सुवा वाशो तशा, रू आ धनी कली ‘रिम्शो वांचेर शोक्नी ममाइ? मिनु सुवा दोपा वामा?’ देंमा बाक्त। 28 मिनु रू धनीमी ‘आं जोरी सत्रुमी ब्वारा बाक्त’ देंमाक्त। ‘मो हना मेको सुवा तुल्शा ताइक्तका? मार देंनीनी?’ देंमानु 29 ‘तुल्चा मदुम्ब। सुवा तुल्तीनी हना, चेरब यो दुल्ब। 30 मोपतीके रिक्ची मजाक्म सम्म बाक्ल। रुप्ची जाक्मेनु, आं गेय पाइब आन कली डोंइती सुवा रिक्शा फ्रेंशा चोचा कली तिल्शा वोतीने। मिनु चेरब रिक्शा तुष्ठा आं भकारीम कुर पा वोतीने, दे माइक्नुडमी’ देंमाक्त” दे शेंताकमी। मत्ती ३:१२; मत्ती १५:३; प्रकाश १४:१५

## तोरी शोक्शो कथा

मर्कूस ४:३०-३२; लूका १३:१८-१९

31 येसुमी “स्वर्ग डा राज्य ओर्देशो यो बाक्ब, मुर कामी आ रूमी तोरी शोक्मा बाक्त। 32 वांचेर नेल्ल क्येडा आइक्च गेडा तोरी गेडा बाक्माक्त हना यो, वाशा ठेयब रवा दुम्माक्त। मेको रवामी चिक्बीम ग्योत्र सेल्शा बाक्मा बाक्त” दे अर्को कथा का शेंताकमी।

## बोरपाइक्ब ओख्ती कथा

33 मिनु येसुमी “स्वर्ग डा राज्य ओर्देशो बाक्ब, मीश मुर कामी पाथी सां फसमी बोरपाइक्ब ओख्ती सुष्ठा, फस नेल्ल मबोरम सम्म सुम्शा वोदा बाक्त” दे अर्को कथा का शेंताकमी। लूका १३:२०-२१

34 येसुमी मेको लोत्र नेल्ल कथा सेल्शा शेंताकमी। कथा मसेल्थु मारेड लोत्र मशेंदीमी। मर्कूस ४:३३-३४ 35 मारदे हना साइ नेसी परमप्रभु यावे आ लोत्र पाइबमी देंशो लोत्र मुल थमा दुम्ब, दे कथा रे पा शेंताकमी। मेको साइ ब्रेक्शो लोत्र चहिं मार बाक्ब देंशा हना “सरीड नु रागी सेल्शो रे मुल सम्म खुइश्शो लोत्र कथा सेल्शा नेंपाइक्नुडमी” दे ब्रेक्शो बाक्त। भजन संग्रह ७८:२

## चेरब शोक्शो कथा आ अर्थ शेंशो

36 मिनु येसु मुर आन कली प्रॉइशा, खिं लेत्त। मिनु आ शेंसीबपुकीमी “रूमी वाशो सुवा आ कथा आ अर्थ शेंदीकी” देंतेक्म। 37 मिनु येसुमी “रिम्शो वांचेर शोक्ब देंशो रागीम जरमेशो बाक्ब। 38 रू देंशो रागी बाक्ब। रिम्शो वांचेर देंशो राज्य डा सन्तान नमी। सुवा देंशो सैतान आ सन्तान नम। १कोरिन्थी ३:९; यूहन्ना ८:४४ 39 सुवा ब्वारब सैतान बाक्ब। रुप्ची नाक्त चहिं निसाफ पची नाक्त बाक्ब। गेय पाइबपुकी परमप्रभु यावे आ गेय पाइब नम। 40 सुवा खुष्ठा, मीम चोशो खोर्देशो पा निसाफ पची नाक्त मार दुम्ब देंशा हना, मोर्देशो दुम्ब। 41 रागीम जरमेशोमी परमप्रभु यावे आ गेय पाइब आन कली सोइक्ब। मिनु मेकोपुकीमी आ राज्य रे पाप पपाइक्ब नु पाप पाइब नेल्ल आन कली खुष्ठा, मत्ती २४:३१ 42 ठेयब मीम हुम्नीम। मेकेर मुरपुकी आन खुइ शेष्ठा डाक्नीम। 43 परमप्रभु यावे आ डोंइती ठीक दुम्शोपुकी चहिं आं आफ आ राज्यमी नां खोर्देशो छेडछेडम ग्येरशा बाक्चा ताइनीम। सु नोफा पाइश्शो बाक्मे, मेकोमी नेंनल। दानीएल १२:३

## रूमी थिम्शो शोप

44 स्वर्ग डा राज्य ओर्देशो यो बाक्ब, रू कामी शोप थिम्शा वोइश्शो बाक्माक्त। मिनु काबु मुर कामी मेको शोप थिदा बाक्त। मिनु थम ग्येरसीशा, लेंशा थिम्शा वोइश्शा, आइक्के बाक्शो नेल्ल लेश्शा, मेको रू ग्यबा बाक्त। मत्ती १९:२९; लूका १४:३३; फिलिप्पी ३:७

## शुश क्येट लाइब मोती

45 स्वर्ग डा राज्य ओर्देशो यो बाक्ब, मोती ग्याप्ब लेयब कामी रिम्शो मोती ग्याप्नुड, दे मिम्शा, माल्ना माल्न गाक्माक्त। 46 मिनु काबु शुश क्येट लाइब मोती तवा बाक्त। मिनु आइक्के बाक्शो नेल्ल लेयशा, मेको ग्यबा बाक्त।

## डांड रेशो कथा

47 स्वर्ग डा राज्य ओर्देशो यो बाक्ब, समुन्द्रमी डांड रेट्चा कली ग्याइल आप्शो बाक्माक्त। मेको आप्शो ग्याइलीम शुश थरी डा डांड ओव्रमा बाक्त। मत्ती २२:९-१० 48 मिनु ब्रीमेनु, माइपीकीम ग्याइल कीशा समुन्द्र रे गुंडदमे बाक्त। गुंडशा ब्वचा डा डांड वोदमे बाक्त, मब्वचा डा डांड ताइक्तमे बाक्त। 49 निसाफ पची नाक्त मोर्देशो दुम्ब। परमप्रभु यावे आ गेय पाइबपुकी जाक्शा, ठीक पाइब आन दाते रे पापी आन कली योव्रशा गुंडशा, मत्ती २५:३२ 50 ठेयब मीम हुम्नीम। मेकेर मुरपुकी आन खुइ शेष्ठा डाक्नीम।

51 आं शेंतीक लोत्र नेल्ल रुम्नी?” दे हिल्लो पवानु “रुप्तक” देंतेक्म। 52 मिनु येसुमी “स्वर्ग डा राज्य आ पर्बम शेंसीशो जोक्ब तुइक्ब दुम्शो मुर खिं डा होव्रप खोर्देशो बाक्ब। मेकोमी आ भकारी रे माइत नु नक थोव्रक शोल्ने चाप्ब” देंत।

## नासरथ सहरम येसु कली मब्रशो

मर्कूस ६:१-६; लूका ४:१६-३०

53 मिनु येसुमी मेको लोत्र शेंने थुम्शा, मेकेर रे लत। 54 मिनु लशा, आ बाक्शो सहरम जाक्दीश्शा, गुम्तीक खिंमी शेंताक्व। शेंदानु, आ लोत्र नेंबपुकीमी छक लाक्वा “आमाइ, एकोमी ओर्देशो लोत्र दोपा जोक्मा? सु आ सक्तिमी छक लाक्वा डा गेय पवा? 55 शी के सेल्ब आ तौ ममाइ डा? आ ममा मरीयम ममाइ डा? आ लोकब याक्ब, योसेफ, सिमोन, यहूदा मनमी डा? 56 आ समीपुकी गोपुकी नु बाक्ब मनमी डा? मिनु मोर्देशो आन तौमी दोपा जोक्शा ठेयब दुम्मे?” दे आन थुं मनुशो लोत्र पमुमा बाक्त। यूहन्ना ६:४२; यूहन्ना ७:१५, ५२ 57 मिनु येसुमी मेको आन थुं मनुशो तुइश्शा, मेको आन कली “तेइ तेइ परमप्रभु यावे आ लोत्र पाइब आन कली ठेयब सुइश्शा मान पाइनीम। आंम रागी, आंम खिंमी चहिं महिक्नीम” दे माइक्तीमी। यूहन्ना ४:४४ 58 मेकेर छक लाक्वा डा गेय का निक्शी ला पाप्नु। मारदे हना मेकोपुकीमी थमा मसुदेम।

## यूहन्ना कली साइश्शो

14 येसुमी छक लाक्वा डा गेय पा शेंना शेंन गाक्मेनु, आ पशो नु आ शेंशो पिप हेरोदमी नेंना बाक्त। मेको पिप हेरोद चहिं मेको रागी डा ४ भागमी भाग का डा पिप बाक्माक्त। मोपतीके भाग का डा आन पिप, दे नें वोइश्शो बाक्माक्त। 2 मिनु पिप हेरोदमी येसु आ पशो नु शेंशो नेंशा, आ गेय पाइब आन कली “मेको ब्वाक्कुम खुम्शा गुंडब यूहन्ना बेक्शो रे सेंसे बाक्त। मिनु शुश सक्ति पाइश्शा, छक लाक्वा डा गेय पाइबाक्माक्त” देंमाक्त। 3 यूहन्ना बेक्शो रे सेंसे बाक्त, देंशो दोपा देंशा हना, हेरोदमी आ लोकब फिलीप आ मीश आ पर्बम यूहन्ना कली जेल्खानमी चोक्शो बाक्माक्त। मत्ती ११:२ 4 मारदे हना यूहन्नामी हेरोद कली “इन लोकब आ मीश चाक्चा मदुम्ब” दे माइश्शो बाक्माक्त। प्रस्थान २०:१४ 5 मो देंतीके यूहन्ना कली साइक्वा माल्शो बाक्माक्त। तन्न मुर आन कली तशा हिंमाक्त। मारदे हना मुरपुकीमी यूहन्ना परमप्रभु यावे आ लोत्र पाइब बाक्ब, दे थमा सुइश्शो बाक्मा बाक्त। मत्ती २१:२६

6 मिनु पिप हेरोद आ जरमेशो नाक्त जाक्माक्त। मिनु हेरोदनी आ तमीमी हेरोद आ भोजमी जाक्ब आन दातेमी सिल पशा, हेरोद कली ग्येरपदा बाक्त। 7 मेको कली सिल पशो तशा, हेरोद थाम्पा ग्येरशा, कसम जशा “मार पुंइतीवी हना यो, गो गेनन” दे मदा बाक्त। 8 मिनु मीश आल आ ममामी “ब्वाक्कुम खुम्शा गुंडब यूहन्ना आ पिया क्योरशा, थालम कुर पा गेयीनी” दे पुंइपदा बाक्त। 9 मिनु हेरोदमी मेको लोत्र नेंशा, आ थुं मनुमाक्त। तन्न भोजमी जाक्ब आन कुल कसम जशा लोत्र गेतीके मगेनन देंने मचबा

बाक्त। 10 मिनू आ सिपाही आन कली जेल्खानमी सोइश्शा, यूहन्ना कली क्योरपा, 11 आ पिपा थालम कुर पा चाक्पा गेपदा बाक्त। मिनू मीश आलम मेको थाल ताक्शा लाइश्शा, आ आम्मा कली गेवा बाक्त। 12 मिनू यूहन्ना आ शेंसीबपुकीमी जेल्खानमी लशा, आ लास लाइश्शा, थिम्मे बाक्त। मिनू येसु आ बाक्तीके जाक्शा, मो दुश्शो नेल्ल शोवतेक्म।

५ हजार मुर आन कली थुल्शो

मर्कूस ६:३१-४४; लूका ९:१०-१७; यूहन्ना ६:१-१३

13 मिनू येसुमी मेको लोत्र नेंशा डोंगा डोइश्शा, सुइ मबाक्तीकेम लत। मिनू सहर डा शुश मुरुमी येसु लाम्माक्त देंशो नेंशा, समुन्द्र हिरशा, आइक्वी हांबु जाक्दीम्मा बाक्त। 14 मिनू येसु डोंगा रे तोइश्शा, शुश मुर देल्शो तशा, मेको आन कली शिशी पा रोइ पाइब आन कली सापाइक्तीमी।

15 मिनू नां रिक्चावानु, आ शेंसीबपुकीमी “एको मारेइ मबाक्तीकेम मार जाइनीमी? देल्शो मुर आन कली लचा गेने। गाउं गाउं लशा, ग्याप्शा जामेक्ल” देंतेक्म। 16 मिनू येसुमी “लचा ममाल्नीम। गेपुकीमी एको आन कली जचा गेने” देंत। 17 “गेपुकी नु ५ ओटा शोब्ले नु डांइ निक्शी डा लाक्शा मारेइ मबा” देंमानु 18 “लो, मेको शोब्ले नु डांइ गेयीनी” देंत। 19 मिनू मुर आन कली “निस्सीने” दे माइश्शा, मेको शोब्ले नु डांइ शेशा, सरीड गे कोव्रशा “गे रिश्शो पाइब बाक्नीनी” देंशा शोब्ले नु डांइ आ शेंसीब आन कली योक्शा गेपाइक्तीमी। 20 मिनू नेल्लेमी रूथ्री जाम्तेक्म। जशा हेंशो १२ डालो खुप्ताक्म। २२ राजा ४:४४ 21 जाइबपुकी चहिं आलपुकी नु मीश मुर आन कली प्रोइशा, वोंइश मुर ला ५ हजार खोइ बाक्तेक्म।

येसु ब्वाक्कु तारी गाक्शा

22 मिनू येसुमी शेंसीब आन कली “आं डोंइती लने, गो मुर आन कली सोइश्शा पीनुड” दे डोंगामी डोइक्पा सोइक्ताक्मी। 23 मिनू मुर आन कली सोइश्शा, प्रार्थना पथ डांडाम डोंइसे बाक्त। नां रिक्मेनु यो मेकेरन आ कांडचीक बाक्माक्त। लूका ६:१२; लूका ९:१८ 24 शेंसीबपुकी चहिं समुन्द्र आ दातेम जाक्दीश्शा, फश नु छालमी तेक्शा, श्येत जाम्तेक्म। 25 मिनू नां सोव्रचावानु, येसु ब्वाक्कु तारी गाक्ना गाक्न पिशो ताम्तेक्म। 26 मोपा पिशो तशा “आमाइ, वोल पित” दे हिंशा वाइ ब्रेम्मानु, 27 येसुमी “थुं बारपतीने। गो नड, महिनीन” देंत। लूका २४:३७

28 मिनू पत्रुसमी “प्रभु, गेन ननी हना, आं कली यो ब्वाक्कु तारी गाक्शा, इन गे पिचा कली ब्रेत्तीनी” देंत। 29 मिनू येसुमी “पिवो” दे ब्रेत्तानु, पत्रुस डोंगा रे तोइश्शा, ब्वाक्कु तारी गाक्शा येसु गे लत। 30 मिनू फश गिवार पशो तशा हिंशा, गुम्चा माल्तु। मिनू “प्रभु प्रोइयीनी” दे वाइ ब्रेत्त। 31 मिनू येसुमी फि ग्याइश्शा कीशा “ए, गे थमा पा थमा सुइक्ने मचाप्ब, मार दल्गीर पवी?” दे माइश्शा, 32 डोंगा डोइसाक्स। मिनू फश यो दिक्त। 33 डोंगाम बाक्बपुकीमी येसु आ डोंइती बाप्शा “थमान, परमप्रभु यावे आ तौ बाक्नी बाक्त” देंशा सेउ पाम्तेक्म। मत्ती १६:१६; यूहन्ना १:४९

मुर आन कली सापाइश्शो

मर्कूस ६:५३-५६

34 मिनू समुन्द्र शोक्शा, गेनेसरेथ रागीम जाक्दीत्तेक्म। 35 मेकेर जाक्दीम्मानु, मुरपुकीमी येसु जाक्माक्त, दे तुइश्शा “रोइ पाइब आन कली चाक्कीन, है” देंशा डा मीन आन रागीम नेंपाइक्मुमा बाक्त। 36 मिनू रोइ पाइब आन कली चाक्गामेनु, मेकोपुकीमी “प्रभु, इन फेक्शो वा थिचा गेकी” दे पुंइतेक्म। मिनू सु सुमी थीमे, मेकोपुकी सातेक्म। मत्ती ९:२१; लूका ६:१९

ग्रान्गा दिचा आ पबर्म शेंशो

मर्कूस ७:१-१३

15 मिनू फरिसी नु सास्त्रीपुकी यरूसलेम रे येसु कली गुम्थ जाक्शा 2 “इन शेंसीबपुकीमी जोक्ब तुइक्ब खाल्पा आन रिती थिती मारदे मपाइनीमी? जचा डोंइती गुइ चिक्चा माल्शो। मारदे मचिक्नीमी” देंमानु, लूका ११:३८ 3 येसुमी “गेपुकीमी मारदे इन पतीके पाइनीनी?

परमप्रभु यावेमी अरेशो लोत्र चहिं मपाइनीनी। 4 परमप्रभु यावेमी अरेशो लोत्र का ‘आम आफ आस कली मान पचा’ मिनू ‘सु सुमी आम आफ आस कली सराप पाइनीमी, मेकोपुकी साइक्चा पुंइसीनीम’ दे ब्रेक्शो बाक्ब। प्रस्थान २०:१२; प्रस्थान २१:१७ 5 गेपुकीमी चहिं ‘सु सुमी आम आफ कली गेचा माल्शो थोव्रक परमप्रभु यावे आ खिं लाइश्शा गेने थुम्तक’ देंनीम। मेकोपुकीमी आम आफ कली मान पचा ममाल्नीम, दे शेंनीनी। हितोपदेस २६:२४; १तिमोथी ५:८ 6 मोदेंशो पा इन रिती थिती सेल्शा, परमप्रभु यावेमी अरेशो लोत्र क्याम्नीनी। 7 ए कपटीपुकी, यसैयामी इन कली गारचा डा लोत्र पा 8 ‘मेकोपुकीमी शोत्र नु लोत्रम ठेयब सेल्नीमी। आन थुंमी चहिं आं कली मदाक्नीम। 9 आं कली मान पखु पशो खोदेंशो पा आन सेल्शो शेंतीक लोत्र परमप्रभु यावेमी अरेशो लोत्र बाक्ब, दे मुर आन कली शेंनीम’ दे ब्रेक्शो बाक्त” दे माइक्तीमी। यसैया २९:१३

10 मिनू येसुमी मुर आन कली ब्रेश्शा “नेंशा रुपीने, 11 शोत्र आगा ओव्रब थोव्रकीमी मुर कली ग्रान्गा मसेल्ब। शोत्र रे गूशोमी चहिं मुर कली ग्रान्गा सेल्ब” दे शेंताक्मी। प्रेरित १०:१५; १तिमोथी ४:४; तीतस १:१५ 12 मिनू शेंसीबपुकीमी येसु कली “शेंब, इन देंशो नेंशा, फरिसीपुकी आन थुं मनुम दे तुइक्तीनी?” देंतेक्म। 13 मिनू येसुमी “स्वर्ग डा आं आफोमी मखुश्शोपुकी तुल्शा ताइक्चा पुंइसीनीम। प्रेरित ५:३८ 14 मेकोपुकीमी मारेइ पामेक्ल। मिक्च मताइब लां कोंइब नम। मिक्च मताइबमी मिक्च मताइब कली कीशा लां कोंइताक्व हना, निम्फा खाल्टाम बिक्नीस” देंत। मत्ती २३:२४; लूका ६:३९; रोमी २:१९ 15 मिनू पत्रुसमी “थमा, इक्ची ना मुर आन कली पशो लोत्र आ अर्थ मार में?” दे हिल्लो पवानु 16 “ए, गेपुकी यो आं लोत्र मरुक्ब बाक्नीनी? 17 शोत्र आगा ओव्रब थोव्रक कोव्रज जाक्दीश्शा, ख्री दुश्शा लाइब, दे मतुइक्नीनी? 18 शोत्र रे गूशो चहिं थुं रे गूशो बाक्ब। मेकोमी मुर कली ग्रान्गा सेल्ब। 19 मुर आन थुंमी मार मरिश्शो मिम्नीम देंशा हना, मुर साइक्चा, मुर आन मीश लाइक्चा, तेल्लेम पचा, खुइ पचा, जोल पा सांक्छी बाक्चा, मुर आन पबर्म मरिश्शो लोत्र पचा, दे मिम्नीम। मेको चहिं शोत्र रे गूशा, उत्पत्ती ८:२१ 20 मुर आन कली ग्रान्गा सेल्ब। गुइ मचिक्थु जशोमी चहिं मारेइ मपाइब” दे शेंताक्मी।

कनानी रागी डा मीश मुर

मर्कूस ७:२४-३०

21 मिनू येसु मेकेर रे लशा, टायर नु सीदोन सहर आ नेक्था जाक्दीत्त। 22 मिनू मार दुम्त देंशा हना, कनानी रागी डा मीश मुर का जाक्शा “दाऊद आ तौ, प्रभु, शिशी पाइय्यीनी। आं तमी कली वोलम सुम्शा शुश श्येत गेपु। वोल कली खेरशा सापतीने” दे डाक्न डाक्न पुंइतु। 23 मिनू येसु सिक्सी पा बाक्त। मिनू शेंसीबपुकीमी “एको मीश मुरुम रेयके पना पन इं नोले खोइश्शा पिन पिन बाक्ब। एको कली सोइक्तीने” देंतेक्म। 24 मिनू येसुमी “लां जाम्शो भेडा खोदेंशो दुश्शो इं इस्पाएल डा मुर आन कली ला वारच पथ, सोइसीशो नड” देंत। मत्ती १०:५-६; रोमी १५:८ 25 मीश मुरुम चहिं येसु आ डोंइती पोक्च थेक्शा “प्रभु, आं कली वारच पयीनी” दे सेउ पापु। 26 मिनू येसुमी “आल आन कली वोइश्शो शोब्ले लाइश्शा, कुचुम कली गेचा मदुम” देंमेनु 27 “प्रभु, मेको थमा बाक्त हना, होव्रपमी हेंशा ताइश्शो थोव्रक कुचुममी जचा ताइनीम” देंत। 28 मिनू येसुमी “ओहो, मेकोमी थमा पा थमा सुइय्यी बाक्त। मोपतीके इ पुंइशो जाक्दील” दे माइक्तु। मो देंमेनु, आ तमी ब्रा सामाक्त। मत्ती ८:११-१३

रोइ पाइब आन कली सापाइश्शो

29 मिनू येसु मेकेर रे लशा, गालील समुन्द्र आ नेक्था जाक्दीश्शा, डांडा का डोइश्शा निस्साक्व। 30 मिनू शुश मुरुमी गुइ खोइल मदुक्ब, कूजी कुंजे, मिक्च मताइब, नोफा मनेंब, लोत्र मपाइब नु मार मार रोइ पाइबपुकी चाक्शा, आ डोंइती तेल्लेक्म। मिनू मेको नेल्ल आन कली सापाइक्तीमी। 31 मिनू शुश मुर आन कली साशो तशा “लाटापुकी लोत्र पाइबाक्तेक्म, कूजी कुंजे साबाक्तेक्म, खोइल मदुक्ब गाक्बाक्तेक्म, मिक्च मताइब मुल

मिक्च ताइब दुम्बाक्तेक्म" दे छक लाक्शा, इस्राएली आन परमप्रभु यावे कली ठेयब सेल्शा मान पाम्तेक्म। मर्कूस ७:३७

४ हजार मुर आन कली थुल्थो  
मर्कूस ८:१-१०

32 मिनू येसुमी आ शेंसीब आन कली ब्रेशा "एको शुश मुर आन कली शिशी पाइनुडमी। मारदे हना नाक्त सां सम्म गो नु काथा बाक्तेक्मे। मिनू आन के जचा मारेइ मबा। जचा मगेथु, आन खिं सोइक्चा मदाक्नुड। सोइक्ताकडमी हना, लांमी बेक्नीम" दे माइक्तीमी। मत्ती १४:१३-२१

33 मिनू मेकोपुकीमी "गोरशो रागी मारेइ मबाक्तीकेमी इश्का मुर आन कली मार जचा गेचा नमी डा?" देंतेक्म। 34 मिनू येसुमी "शोब्ले दोशो कुरनी?" देंत। मिनू "शोब्ले ७ ओटा नु आइक्च डांइ का निक्शी" देंतेक्म। 35 मिनू मुर आन कली निप्पाइश्शा, 36 मेको ७ ओटा शोब्ले नु डांइ शेशा "गे रिम्शो पाइब बाक्नीनी" दे शोब्ले जिक्शा, शेंसीब आन कली गेशा योक्पाइक्तीमी।

37 मिनू नेल्लेमी रूथ्री जाम्तेक्म। जशा हेंशो ७ डालो खुप्ताक्म।

38 जाइबपुकी चहिं मीश मुर नु आलपुकी प्रॉइशा, ४ हजार बाक्तेक्म।

39 मिनू मुर नेल्ल आन कली सोइश्शा, आ शेंसीबपुकी नु काथा डोंगा डोइश्शा समुन्द्र शोक्शा, माग्दाला रागीमी जाक्दीत्तेक्म।

चिन्ड कोव्रकोव्र दाक्शो  
मर्कूस ८:११-१२; लूका १२:५४-५६

16 मिनू फरिसी नु सदुकीपुकी जाक्शा, येसु आ थुं थाम्चा कली "स्वर्ग डा चिन्ड का कोंइदीकी" देंतेक्म। मत्ती १२:३८<sup>२</sup> मिनू येसुमी मेको आन कली "नां पेरचावानु 'दीसा हाक्ब। मारदे हना सरीड लल जिशो बाक्ब' देंनीनी। 3 मिनू नां दाम्मेनु 'मुलाक्त फश गिवावर पाइब। मारदे हना गोस्सुम सुम्शा, सरीड लल जिशो बाक्ब' देंनीनी। सरीड कोव्रशा हाक्बा, दे रेड यीबा देंने चाप्नीनी। तन्न मुल मार दुम्चशो बाक्बा मेको आ चिन्ड मरुप्नीनी। मत्ती ११:४<sup>४</sup> मरिम्शो पाइब नु देवी देवता नु परमप्रभु यावे खाल्ब पालाम चिन्ड कोव्रकोव्र दाक्नीम। मेको आन कली योना आ चिन्ड डा लाक्शा मारेइ चिन्ड मकोइनुडमी" देंशा, मेको आन कली प्रॉइशा गाक्त। मत्ती १२:३९-४०

लोव्र नेंशा होस पांइसीने  
मर्कूस ८:१४-२१

5 मिनू समुन्द्र शोक्शा, आइक्वी हांबु जाक्दीम्मानु, शेंसीबपुकीमी "ला, शोब्ले कुरचा प्रेंसे बाक्त" दे ति फ्रुक्शा देंमुम्तेक्म। 6 मिनू येसुमी "फरिसी नु सदुकी आन शोब्लेमी सुप्शो बोरपाइक्ब ओख्ती रे होस पांइसीने" दे माइक्तीमी। लूका १२:१<sup>७</sup> मिनू "शोब्ले कुरचा प्रेंदया बाक्त, दे तुइश्शा, मो देंम कों" देंमुम्तेक्म। 8 मिनू येसुमी मेको आन लोव्र तुइश्शा "ए, गे थमा पा थमा सुइक्ने मचाप्बपुकी, शोब्ले मबा, दे मारदे शुश लोव्र पमुनी?" 9 मुल यो मारेइ मरुप्नीनी? ५ ओटा शोब्लेमी ५ हजार मुर आन कली रूथ्री जचा गेशा, गिश डालो हेंम? मत्ती १४:१७-२१ 10 मिनू ७ ओटा शोब्लेमी ४ हजार मुर आन कली जचा गेशा, दोशो हेंम, दे ममिम्नीनी? मत्ती १५:३४-३५ 11 फरिसी नु सदुकी आन शोब्लेमी सुप्शो बोरपाइक्ब ओख्ती रे होस पांइसीने देंशो चहिं शोब्ले आ पर्वम शेंशो ममाइ। मुल यो मरुप्नीनी?" दे माइक्तीमी, 12 "गे फरिसी नु सदुकी आन शेंतीक लोव्र नेंशा, होस पांइसीन, दे शेंशो बाक्माक्त" दे रुप्तेक्म।

पत्रुसम "ख्रीस्त ननी" देंशो  
मर्कूस ८:२७-३०; लूका ९:१८-२१

13 मिनू सिजरिया फिलिप्पी रागीम जाक्दीश्शा, येसुमी आ शेंसीब आन कली "मुरपुकीमी रागीम जरमेशो आ पर्वम मार देंनीमी?" दे हिल्लो पवानु 14 "का निक्शीमी 'ब्वाक्कुम ख्रुम्शा गुंइब यूहन्ना बाक्माक्त' देंनीम। का निक्शीमी 'एलीया बाक्माक्त' का निक्शीमी 'येरमीया बाक्म कों, परमप्रभु यावे आ लोव्र पाइब अर्को का बाक्म कों' देंनीम" देंतेक्म। मत्ती १४:२; मत्ती

१७:१०; लूका ७:१६ 15 मिनू येसुमी "गेपुकी चहिं आं कली सु सुइक्वीनी?" देंमेनु, 16 सिमोन पत्रुसमी "ब्रॉइशा बाक्ब परमप्रभु यावे आ तौ ख्रीस्त बाक्नीनी" देंत। यूहन्ना ६:६९ 17 मिनू येसुमी पत्रुस कली "योना आ तौ सिमोन, ग्येरसो। मारदे हना इ देंशो लोव्र मुरुमी शेंशो ममाइ। स्वर्गम बाक्ब आं आफोमी इ कली रुप्पाइक्तु। मत्ती ११:२७; गलाती १:१५-१६ 18 गे पत्रुस नवे, एको सेरथे फुल्लु तारी आं खिं सेल्लुड। नरकमी मेको कली ग्राने मचाप्ब। यूहन्ना १:४२; एफिसी २:२० 19 गो स्वर्ग डा राज्य आ सांचो गेनन। एको रागीम मार कली फ्रेंनेवे, स्वर्गमी यो फ्रेंशो बाक्नीम। एको रागीमी मार कली प्रॉइनेवे, स्वर्गमी यो प्रॉइशो बाक्नीम" दे माइक्तु। मत्ती १८:१८ 20 मिनू आ शेंसीब आन कली "ख्रीस्त एकोन बाक्माक्त दे सुइ आन कली मशोव्रडीने" दे माइक्तीमी। मत्ती १७:९

येसु श्येत जचा माल्ब, दे शेंशो  
मर्कूस ८:३१-३३; लूका ९:२२

21 मेना रे येसुमी आ शेंसीब आन कली "यरूसलेम लशा, जोक्ब तुइक्ब खाल्पा, ठेयब चढेब नु सास्त्रीपुकी रे पा शुश श्येत जशा साइक्चा पुंइसीनुड। मिनू बेक्शा आ नित्थ नाक्त सेंसीनुड" दे शेंचा गोप्तु। मत्ती १२:४०; यूहन्ना २:१९ 22 मिनू काबु लेंशा शेंदानु, पत्रुसमी येसु कली आइक्वी ब्रेशा लाइश्शा "परमप्रभु यावेमी इन कली शिशी पवल। प्रभु, इन देंशो खोदेंशो गेनायो मदुम्ल" देंमाक्त। 23 मिनू येसुमी नोले हिरशा पत्रुस कली कोव्रशा "ए सैतान, इ कुल मकोइदी। मारदे हना आं लां तेक्ब बाक्डे बाक्त। गे परमप्रभु यावे आ मिम्शो मपथु, मुरुमी मिम्शो लोव्र कका पाप्तीवी" दे हुइक्ताक्व।

येसु आ नोले खोइक्बपुकी  
मर्कूस ८:३४-९; लूका ९:२३-२७

24 मिनू येसुमी आ शेंसीब आन कली "सुमी आं नोले खोइक्चा थुं पाइबा, मेकोमी आंम दला दाक्स पचा प्रॉइशा, श्येत जचा महिंथु, आ नोले खोइय्थील। मत्ती १०:३८-३९; १पत्रुस २:२१ 25 आ गिम प्रॉइचा दाक्बमी मेको साम्ब। आं पर्वम आ गिम साम्बमी आ गिम प्रॉइब। प्रकाश १२:११ 26 रागी नेल्ल आंम के सेल्शा, आ गिम चहिं खतम दुम्त हना, मार रिम्शो दुम्त डा? खतम दुम्शो गिम मार गेशा लेन्ने चाप्बा डा? लूका १२:२०; भजन संग्रह ४९:९ 27 रागीम जरमेशो आ आफ आ दारसमी परमप्रभु यावे आ स्वर्ग डा गेय पाइबपुकी नु जाक्ब। मिनू मुर आन गेशो पशो कोव्रशा, आन गेशो का का पा लेश्शा गेब। रोमी २:६ 28 नोफा दाइश्शा नेनीने, मुल गो नु काथा बाक्ब का निक्शीमी रागीम जरमेशो आ राज्य जाक्शो मतथु मबेक्नीम" दे शेंताक्मी। मत्ती १०:२३

येसुमी रां फाइश्शा कोंइशो  
मर्कूस ९:२-१३; लूका ९:२८-३६

17 मिनू ६ नाक्त नोले येसुमी पत्रुस, याक्ब नु आ लोक्ब यूहन्ना सां आन कली सुइ मबाक्तीके लाइश्शो डांडामी लदा बाक्त। मत्ती २६:३७; मर्कूस ५:३७; मर्कूस १३:३; मर्कूस १४:३३; लूका ८:५१ 2 मिनू मेको आन डोंइती येसु फांइसेनु, मेकोपुकीमी आ कुल नां खोदेंशो नु आ फेक्शो वा बुबु पा जिलील पा बुश दुम्शो तामे बाक्त। २पत्रुस १:१६-१८; प्रकाश १:१६ 3 मिनू मोसा नु एलीया जाक्शा, येसु नु लोव्रसी पशो तामे बाक्त। 4 मिनू पत्रुसमी येसु कली "हे प्रभु, इं कली एकेर बाक्चा रिम्शो दुम्ब। गे दाक्नीनी हना, बाक्तीके सां सेल्लुड। इन कली का, मोसा कली का नु एलीया कली का सेल्लुड" देंमाक्त। 5 मोदेंशो लोव्र पना पन बाक्मेनु, जिलील पा बुश तांइसीशो गोस्सुमी नेल्ल आन कली गिल्ली बाक्त। मिनू गोस्स आगा रे "एको आं दाक्शो तौ बाक्ब। एको कली तशा ग्येरसाक्वी। आ लोव्र नेनीने" देंशो सेंदा नेन्मे बाक्त। मत्ती १:१७ 6 मोदेंशो नेंशा, शेंसीबपुकी हिंशा खुम्की पा बाग्मा बाक्त। 7 मिनू येसुमी मेको आन कली गुडमी थिशा "बोक्कीन, महिनीन" दे माइक्तीमी बाक्त। 8 मिनू बोक्शा कोव्रडमेनु, येसु कली ला तामे बाक्त।

9 मिनू डांडा रे ब्रुम्मानु, येसुमी “रागीम जरमेशो बेक्शो रे मसेसे सम्म इन तशो सुइ आन कली मशेदीने” दे माइक्मी बाक्त। मत्ती १६:२०<sup>10</sup> मिनू शेंसीबपुकीमी “सास्त्रीपुकीमी ‘डोंइती एलीया जाक्चा माल्ब’ दे शेंनीम ममाइ? मारदे मोदें शेंनीमी?” दे हिल्लो पामेनु मत्ती ११:१४<sup>11</sup> “थमान, एलीया डोंइती जाक्शा, नेल्ल ठीक सेल्ब।<sup>12</sup> तन्न एलीया डोंइती जाक्त। आ जाक्मेनु, सास्त्रीपुकीमी तुइक्तेम। मिनू मेको कली मार पचा दाक्तेम, मेकोन पाक्तेम। मोदेंशो पा रागीम जरमेशोमी यो आन गुइ रे पा श्येत गेचा पुंडसीब, दे गो इन कली देंनुड” देंमाक्त। मत्ती १४:९-१०<sup>13</sup> मिनू “ब्वाक्कुम खुम्शा गुंडब यूहन्ना आ पर्वम लोत्र देंशो बाक्माक्त” दे रुपे बाक्त। लूका १:१७

येसुमी वोल कली खेरशो  
मर्कूस ९:१४-२९; लूका ९:३७-४२

14 मिनू येसु नु आ शेंसीब सां शुश मुर देल्शा बाक्तीकेमी जाक्मानु, मुर का येसु आ डोंइती जाक्शा, पोक्च थक्शा सेउ पा<sup>15</sup> “हे प्रभु, आं तौ कली शिशी पा सापतीने। आं तौ छारे रोइ पा मीम दुप्पांडसीशा ब्वाक्कुम गुम्पांडसीशा, शुश श्येत जना जन बाक्ब।<sup>16</sup> इन शेंसीब आन कली सापतीने देंडानु, सापाइक्ने मचबेम” दे माइक्नु।<sup>17</sup> मिनू येसुमी “गे थमा पा थमा मसुइक्ब नु मटीबपुकी, गेना सम्म गेपुकी नु बाक्नुडा? ओदेंशो इन पशो गेना सम्म फाल्शा बाक्नुडा डा? रोइ पाइब कली चाक्कीन” देंत।<sup>18</sup> मिनू चाक्गामेनु, येसुमी वोल कली हुइश्शा खेरतु। मिनू आल ब्रा सात।<sup>19</sup> मिनू मुर गाक्मा नोले शेंसीबपुकीमी येसु कली “मारदे गो मेको वोल कली खेरने मचाप्का?” दे हिल्लो पामेनु,<sup>20</sup> येसुमी “थमा पा थमा सुइक्ने मचाप्बपुकी, नोफा दाइश्शा नेनीने, रायो गेडा खोइ ला थमा सुइक्तीनी हना, इन पने मचाप्वा डा मारेइ मलीब। एको डांडा याक्सो देंनीनु, एको डांडा यो याक्सीशा लाइब। मत्ती २१:२१; लूका १७:६; १कोरिन्थी १३:२<sup>21</sup> ओदेंशो वोल खेरचा कली चहिं बर्त बाक्शा, प्रार्थना पा ला गुंइने चाम्सीब” दे माइक्तीमी।

येसु श्येत जचा माल्ब, दे लेंशा शेंशो  
मर्कूस ९:३०-३२; लूका ९:४३-४५

22 मिनू गालील रागीम बाक्मानु, येसुमी “रागीम जरमेशोमी मुर आन गुइमी गेशा साइक्चा पुंडसीब। मत्ती १६:२१; मत्ती २०:१८-१९<sup>23</sup> मिनू बेक्शो आ नित्थ नाक्त बेक्शो रे सेंसीब” देंमेनु, शेंसीब आन थुं थाम्पान खाइक्मा बाक्त।

गुम्तीक खिं डा तिरो

24 मिनू नोले कापेरनाउम सहर जाक्दीम्मानु, गुम्तीक खिं डा तिरो पोक्बपुकीमी पत्रुस कली “इन कली शेंबमी तिरो मथाप्वा?” देंमानु प्रस्थान ३०:३३; २राजा १२:५-६<sup>25</sup> “थाप्ब” देंमाक्त। मिनू खिं लेश्शा जाक्मेनु, येसुमी पत्रुस कली “ए सिमोन, पिपपुकीमी तिरो पोक्पदमेनु, आन तौ आन के यो पोक्नीमी देय अर्को रागी डा मुर आन के ला पोक्नीमी, मार देंनेवे?” दे हिल्लो पाप्नु।<sup>26</sup> पत्रुसम “अर्को रागी डा मुर आन के ला पोक्नीम” देंत। “लो, मो हना तौपुकीमी तिरो थाप्वा ममाल्बाक्मा बाक्त।<sup>27</sup> मोदेंशो बाक्त हना यो, मेको आन थुं नुपाइक्चा कली तिरो थाप्तस। गे समुन्द्रमी लशा, बोल्सी ग्यारशा, नेल्ल क्येडा डोंइती रेशो डांइ आ शोत्र पाक्को। आ शोत्र आगामी स्तातेर का थिल्लेवे। मेको लाइश्शा, इस तिरो थाप्तो” दे माइश्शा सोइक्ताक्व। स्तातेर का ४ देनार बाक्ब। ग्रीक क्येट बाक्ब।

नेल्ल क्येडा ठेयब सु बाक्ब  
मर्कूस ९:३३-३७; लूका ९:४६-४८

18 मिनू काबु शेंसीबपुकीमी येसु कली “स्वर्ग डा राज्यमी नेल्ल क्येडा ठेयब सु बाक्बा?” दे हिल्लो पाक्तेम।<sup>2</sup> मिनू येसुमी आल का कली ब्रेश्शा, आन दातेमी राप्पाइश्शा<sup>3</sup> “नोफा दाइश्शा नेनीने, गेपुकीमी दोपा ठेयब दुम्चा, दे मिम्वा प्रॉइशा, आल खोदेंशो मदुम्तीनी हना, स्वर्ग डा

राज्य दोपा यो ओव्रचा मताइनीनी। मत्ती १९:१४<sup>4</sup> एको आल खोदेंशो ब्रेम्शोपुकी स्वर्ग डा राज्यमी नेल्ल क्येडा ठेयब बाक्नीम।<sup>5</sup> सुमी आं नेंम ओदेंशो आल कली ब्राइबा, मेकोमी आं कली ब्राइब। मत्ती १०:४०

पाप पपाइक्चा आ पर्वम शेंशो  
मर्कूस ९:४२-४७; लूका १७:१-२

6 सुमी आं कली थमा सुइक्ब आल कली पाप पपाइक्बा, मेको आ शुरम यात क्युक्शा, समुन्द्रमी खुम्शा साइक्चा अरु सजाइ क्येडा रिम्शो बाक्ब। लूका १७:१-२<sup>7</sup> पाप पपाइक्ब आन पर्वम, आबी आबी। एको रागीमी पाप पपाइक्ब शुश जाक्नीम। तन्न सुमी अरु आन कली पाप पपाइक्बा, मेको आन कली आबी आबी।<sup>8</sup> इ गुइ खोइलीमी इ कली पाप पपाइक्नु हना, खोइश्शा ताइक्तो। मारदे हना गुइ खोइल निम्फा बाक्शा, नरकम खुम्चा पुंडसीचा क्येडा हुंडे खोरन्डे दुम्शा, स्वर्ग डा राज्यम ओव्रचा तचा रिम्शो दुम्ब। मत्ती ५:२९-३०<sup>9</sup> इ मिक्चीमी इ कली पाप पपाइक्नु हना, मिक्च फेश्शा ताइक्तो। मारदे हना मिक्च निम्फा पाइश्शा, नरकम खुम्चा पुंडसीचा क्येडा काना दुम्शा, स्वर्ग डा राज्यमी ओव्रचा तचा रिम्शो दुम्ब।

जाम्शो भेडा माल्थ लशो  
लूका १५:४-७

10 होस पांडसीने, आल आन कली आइक्च मसेलीने। नोफा दाइश्शा नेनीने, आल आन कली कोत्रब परमप्रभु यावे आ स्वर्ग डा गेय पाइबपुकी स्वर्गम बाक्ब आं आफ आ डोंइती बाक्नीम।<sup>11</sup> रागीम जरमेशो जाम्शो आन कली माल्थ जाक्शो बाक्ब। हिब्रू १:१४<sup>12</sup> मुर का के सहे का भेडामी का जाम्त हना, मेकोमी ९९ भेडा आन कली प्रॉइशा वोइश्शा, जाम्शो का कली मथिदा सम्म माल्ना माल्न मगाक्बा डा? <sup>13</sup> नोफा दाइश्शा नेनीने, थिदानु, मजाम्शो ९९ भेडा क्येडा मेको थिशो का आ पर्वम शुश ग्येरसीब।<sup>14</sup> मेको बुदी स्वर्ग डा इन आफोमी आइक्च का यो मजाम्मल, दे मिम्ब।

माफ गेचा

15 इ लोकबमी इ कली मरिम्शो पाप्नु हना, गे निक्शी बाक्सीनु, एको ओदेंशो मरिम्शो पाप्तीवी, दे तुइक्पतो। इ लोत्र बीसाक्व हना, मेको कली आम के सेल्नेवे। लेवी १९:१७; लूका १७:३; गलाती ६:१<sup>16</sup> इ लोत्र मबिस्साक्व हना चहिं, मुर निक्शी सां दुम्शा लशा, सांकछी वोइश्शा लोत्र पावो। ब्यक्स्था १९:१५<sup>17</sup> मेको आन लोत्र यो मबिस्साक्व हना, मुर पुक्शा लोत्र पावो। मिनू मेको आन लोत्र यो मबिस्साक्व हना, अर्को रागी डा मुर खोदेंशो बाक्माक्त, दे तिल्शा सोइक्तो। १कोरिन्थी ५:१३; २ थिस्सलोनिकी ३:६; तीतस ३:१०<sup>18</sup> नोफा दाइश्शा नेनीने, रागीमी मार पाइश्शा वोइक्नीनी, मेको स्वर्गम यो पाइश्शा बाक्ब। रागीमी मार प्रॉइनीनी, मेको स्वर्गम यो प्रॉइशो बाक्ब। मत्ती १६:१९; यूहन्ना २०:२३<sup>19</sup> मिनू रागीमी मुर निक्शी गारशा, थुं का पा मारेइ पुंडताक्स हना, स्वर्गमी बाक्ब आं आफ रे पा आस पुंडशो ताइनीस, दे इन कली देंनुड। मर्कूस ११:२४; मत्ती २८:२०<sup>20</sup> मारदे हना तेकेर आं नेंमी निक्शी सां खुम्सीनीमी, मेकेर गो यो बाक्नुड” दे येसुमी देंत।

21 मिनू पत्रुसमी “प्रभु, आं लोकबमी आं कली मरिम्शो पना पन बाक्त हना, गिश खेयप सम्म माफ गेचा माल्नुडा? मार ७ खेयप सम्म गेचा माल्नुडा?” देंमेनु,<sup>22</sup> येसुमी “गो माइक्नन, ७ खेयप ला ममाइ। ७ कली ७० खेयप हिक्शो क्येडा यो शुश माफ गेचा माल्नेवे। उत्पत्ती ४:२४; लूका १७:४; एफिसी ४:३२

23 मोपतीके स्वर्ग डा राज्य ओदेंशो बाक्ब, पिप कामी आं जेर लाइब आन के हिसाब ताक्चा, दे मिम्ता बाक्त।<sup>24</sup> मिनू हिसाब ताक्गानु, मुर कामी १० हजार टलेन्ट शुश जेर थुइश्शो बाक्माक्त। टलेन्ट का ६ हजार द्राम्मे कि ३४ किलो खोदेंशो बाक्त।<sup>25</sup> मिनू मेको जेर थाम्ने मचबानु, पिपीमी ‘गे, गे नु बाक्शो थोव्रकी, इ खिं रू, इ मीश तमी तौ, लेयशा, जेर थाप्ती’ दे मदा बाक्त। नेहेम्याह ५:५<sup>26</sup> मो देंमेनु ‘हे पिप, गो इक्चीन थाम्ने मचाप्नुड। दीसा नित्थी दोपा हना यो थाप्नुड’ दे खुम्की पा बाप्शा सेउ पवा

बावत। 27 मिनू पिपमी शिशी पा 'इ लाइशो जेर मुलावत डा मेरे थाप्चा ममाल्नेवे। एको हिसाब नेल्ल क्याम्शा गेनन' दे आ जेर नेल्ल क्याम्दा बावत। 28 मेको जेर क्याम्चा पुंडसीब मेकेर रे लशा, आ वारच का कली गुमा बावत। मेको आ वारचमी मेको के सहे का देनार जेर लाइशो बावमावत। मिनू गुम्सानु, ग्याइशशा आ क्रोकक्रो निष्ठा 'साइ लाइशो क्येट मुलन थाप्ती' दे मप्रोना बावत। देनार का रोमी आन चांदी के क्येट बावत। ग्रीक लोवमी द्राकमे देशो बावत। 29 मिनू मेकोमी 'ए वारच, मुल मचापुड, दीसा निल्थी दोपा हना यो, थापुड' दे खुम्की पा बाप्शा सेउ पवानु 30 'मुलावत मथाप्ताकयी हना, इ कली प्रॉइसीन मप्रॉइसन' दे लाइशशा, जेर नेल्ल थाम्ने मथुमा सम्म जेल्खानम चोकपा वोदा बावत। 31 मोपा चोकपाइशशा तशा, आ वारचपुकीमी आन थुं खाइशशा, पिप कली मेको लोव नेल्ल तुइक्पदमे बावत। 32 मिनू पिपीमी चोकपाइक्ब कली ब्रेशशा 'हिंचा डा बावडे बावत। गेम आं कली खुम्की पा बाप्शा सेउ पाप्तीवी। मिनू गो इ जेर नेल्ल क्याम्शा गेतन। लूका ६:३६ 33 दोपा इ कली शिशी पाइना, मोपा गेमी यो इ वारच कली पचा ममाल्नेवे डा?' दे गाइशशा मदा बावत। १यूहन्ना ४:११ 34 मिनू मेको आ जेर नेल्ल मथाप्ता सम्म जेल्खान डा पुलीस आन गुडमी जिम्मा गेवा बावत। मत्ती ५:२६ 35 मोपतीके होस पांडसीने। मारदे हना इन लोकब कली इन थुं गा रे पा माफ मगेतीनी हना, स्वर्गम बाक्ब आं आफोमी यो इन कली मोदेशोन पाइब" दे शेंताक्मी। मत्ती ६:१४-१५; याकूब २:१३

19 मिनू येसुमी मोदें शेंने थुम्शा, गालील रागी प्रॉइशा, यर्दन खोला शोकशा, यहूदीया रागीम जाक्दीत्त। 2 मिनू शुश मुर आ नोले खोइशशा लाम्तेक्म। मिनू येसुमी रोइ पाइब आन कली सापाइक्ना पाइक्न गावत।

मीश वॉइश आस पबर्म शेंशो

मर्कूस १०:१-१२

3 काबु फरिसीपुकी जाक्शा, येसु आ थुं थाम्चा कली "आन मीश आन कली मारेइ दोस गेशा प्रॉइचा तांडसीबा?" दे हिल्लो पाम्तेक्म। 4 मिनू येसुमी "नेल्ल क्येडा डॉइती परमप्रभु यावेमी वॉइश मुर नु मीश मुर सेल्तीम्सी। उत्पत्ती १:२७ 5 मेको लोव मपढेनी? 'मुरुमी आम आफ प्रॉइशा, आ मीश नु गारशा बाक्ब। मिनू मेको निक्शी रां का दुम्नीस' दे ब्रेक्शो बाक्ब। उत्पत्ती २:२४ 6 मोपतीके वॉइश मीश निक्शी मनसी। निम्फा का नस, दे ब्रेक्शो बाक्ब। परमप्रभु यावेमी कांडीचक सेल्शो मुरुमी मफ्रादमेक्ल" दे माइक्तीमी। १कोरिन्थी ७:१०-११; उत्पत्ती २:२४ 7 मिनू फरिसीपुकीमी "मो हना मारदे मोसामी 'छोड पत्र गेशा, मीश प्रॉइने चाम्सीब' दे मुर आन कली शेंदा?" देंमानु, मत्ती ५:३१ 8 येसुमी "मुरपुकीमी शिशी मपाइनीम, दे तुइशशा, परमप्रभु यावेमी मोदेशो पा इन मीश प्रॉइचा गेपु। तन्न डॉइती रे मोदेशो मबाक्शो बावत। 9 सुमी आ मीश प्रॉइशा, अर्को चाक्बा, मेकोमी वॉइश मीश आस नाता फ्राब। मीश मुर आ वॉइश बाक्ना बाक्न अर्को वॉइश खोइक्तु हना चहिं, मोदेशो मीश कली प्रॉइचा दुम्ब। सुमी छोड पत्र गेचा पुंडसीशो मीश मुर कली ग्युंवे पाइबा, मेकोमी यो वॉइश मीश आस नाता फ्राब, दे इन कली देंनुड" दे माइक्तीमी। मत्ती ५:३२; लूका १६:१८

10 मिनू येसु आ शेंसीबपुकीमी आ लोव नेंशा "मोदेशो बावत हना, ग्युंवे मपचा रिम्शो बाक्माक्त" देंतेक्म। 11 मिनू येसुमी "का निक्शी आन कली ला एको लोव रुप्तीक थुं गेशो बाक्ब। शुशमी मरुप्तीम। १कोरिन्थी ७:७ 12 मुरपुकी मारदे ग्युंवे मपाइनीम देंशा हना, का निक्शी जरमेसे रे ग्युंवे पा, आल थिचा मगारचा डा बाक्नीम। का निक्शी आन कली मुरुमी आल मथीब सेल्शो बाक्नीम। का निक्शी चहिं स्वर्ग डा राज्य आ पबर्म ग्युंवे मपथु बाक्नीम। मोपतीके सु सु आन कली रुप्तीक थुं गेशो बाक्मे, मेकोपुकीमी रुप्तेक्ल" दे शेंताक्मी।

आल आन कली आसीक गेशो

मर्कूस १०:१३-१६; लूका १९:१५-१७

13 मिनू मुरपुकीमी आल आन तारी आ गुइ चाक्शा प्रार्थना पवल, दे आल चाक्गमेनु, शेंसीबपुकीमी "आल मचाक्कीन" दे हुइक्ताक्म। 14 मिनू येसुमी "आल आन कली आं बाक्तीके जाक्चा गेन। मारदे हना स्वर्ग डा राज्य मेको

आन केन बाक्ब" देंत। मत्ती १८:२-३ 15 मिनू आल आन तारी आ गुइ वोइशशा प्रार्थना पाइक्तीमी। मिनू मेकेर रे गावत।

शोप पाइशशा आन पबर्म शेंशो

मर्कूस १०:१७-२७; लूका १८:१८-२७

16 मिनू मुर का जाक्शा, मेकोमी येसु कली "शेंब, गेना हना यो परमप्रभु यावे नु बाक्चा तचा कली रिम्शो पा मार पचा माल्नुडा?" देंमेनु, 17 येसुमी "रिम्शो पचा आ पबर्म मारदे हिल्लो पवी? रिम्शो पाइब का ला बाक्ब। गेना हना यो मेको नु ब्रॉइशा बाक्चा थुं पाप्तीवी हना, मेको रिम्शो पाइब आ देंशो लोव टिचा माल्नेवे" देंमेनु 18 "लोव शुश बाक्नीम। तेक तेको लोव टिचा माल्नुडा?" देंत। मिनू येसुमी "मसाइक्चा, मीश वॉइश आस नाता मफ्राचा, खुइ मपचा, जोल मपथु सांकछी बाक्चा। 19 आम आफ आस कली मान पा आस लोव टिचा। मिनू इ कली दाक्शो खोदेशो पा इ नेक्था बाक्ब आन कली दाक्तो" देंत। प्रस्थान २०:१२-१६, लेवी १९:१८ 20 मिनू मेको ठिटामी "इन देंशो नेल्ल पना पन बाक्ती। में डा लाक्शा मार पचा माल्नुडा?" देंमेनु, 21 येसुमी "मेको डा लाक्शा पचा दाक्तावी हना, लशा इ शोप नेल्ल लेयशा, जचा फेक्चा मताइब आन कली योक्शा गेमी। मिनू लेशशा, आं नोले खोइय्यी। मो पाप्तीवी हना, इ कली स्वर्गम शोप वोइशशा बाक्ब" देंत। मत्ती ६:२०; लूका १२:३३ 22 मिनू मेको ठिटामी एको लोव नेंशा, आ कुल राव कीपाइशशा गावत। मारदे हना शुश शोप पाइशशा मुर बाक्माक्त। भजन संग्रह ६२:११

23 मिनू येसुमी आ शेंसीब आन कली "नोफा दाइशशा नेनीने, शुश शोप पाइशशा मुर स्वर्ग डा राज्य हेरा ओव्रचा मताइनीम। 24 मिनू शोप पाइशशा मुर परमप्रभु यावे आ राज्यमी ओव्रने चाप्चा क्येडा दलओठ लूजे आ पोलामी ग्रीने चाप्ब, दे लेंशा इन कली देंनुड" देंत। 25 मिनू आ शेंसीबपुकीमी छक लाक्शा "मो हना सु ओव्रचा ताइनीमी डा?" देंतेक्म। 26 मिनू येसुमी मेको आन कुल गे कोव्रशा "मुरपुकीमी पने मचाप्नीम। तन्न परमप्रभु यावेमी पने चाप्ब। मारदे हना परमप्रभु यावेमी मारेइ मारेइ पने चाप्ब" दे माइक्तीमी। अय्युब ४२:२

येसु कली खोइक्ब आन तशो

मर्कूस १०:२८-३१; लूका १८:२८-३०

27 मिनू पत्रुसमी "गोपुकीमी मारेइ मारेइ प्रॉइशा, इन नोले खोइक्तक। मिनू गो मार ताइनीकी" देंमेनु, मत्ती ४:२०-२२ 28 येसुमी "नोफा दाइशशा नेनीने, मार ताइनीनी देंशा हना, परमप्रभु यावेमी सेल्शो नक सरीड नु रागीमी दुश्शा, रागीम जरमेशो पिप दुम्मेनु, आं कली खोइक्बपुकी १२ ओटा ठेयब नित्तीकेम निश्शा, इं इस्त्राएल डा १२ थर आन कली निसाफ पाइब दुम्नीनी। लूका २२:३०; प्रकाश ३:२१; १कोरिन्थी ६:२ 29 सुमी आं नें आ पबर्म आ खिं, आ लोकब, दिदी बहिनी, आम आफ, तमी तो, आ नु बाक्शो नेल्ल प्रॉइबा, मेकोमी आ प्रॉइशो क्येडा शुश ताइब। मिनू गेना हना यो परमप्रभु यावे नु बाक्चा ताइब। 30 डॉइती दुश्शोपुकी नोले दुम्नीम। नोले दुश्शोपुकी डॉइती दुम्नीम।

डॉइती नु नोले दुश्शो

20 स्वर्ग डा राज्य ओदेशो बाक्ब, खिं का डा होव्रप सुनी कना बोक्शा, आ अडगुर रूमी गेय पाइब आन कली ब्रेथ लमाक्त।

2 काबु डा गाल्च देनार का गेनन्नी, दे गारपाइशशा, अडगुर रूमी सोइक्तीमी बावत। 3 मिनू सुनी ९ बजे गे बजार लशा डा मिन, गेय मथिक्ब मुर आन कली तशा, 4 मेको आन कली 'गे यो लशा, आं अडगुर रूमी गेय पने। इन गेय पशो डा गाल्च गारपा गेनन्नी' दे सोइक्तीमी बावत। 5 मिनू मोपान १२ बजे नु ३ बजे यो अरु आन कली ब्रेशशा, गेय पथ सोइक्तीमी बावत। 6 मिनू क्यारश चोक्वी सम्म यो गेय मथिक्ब आन कली तशा 'गे सुनी रे मार गुइ फ्रेंशा बाक्नी' दे हिल्लो पवा बावत। 7 मिनू मेकोपुकीमी 'सुइमी गेय मगेमे। मिनू गो मार पाइनीकी?' देंमानु 'गे यो लशा, आं अडगुर रूमी गेय पने' दे माइक्ती बावत।

8 मिनू नां रिक्शा गेय प्रोन्मे नोले, होवपमी आ क्येट योक्ब मुर कली 'गेय पाइब आन कली ब्रेश्शा, आन गाल्च योक्शा गेमी। नेल्ल क्येडा नोले जाक्शो आन कली डोंइती योक्शा गेमी' देंमाक्त। 9 मिनू क्यारश चोक्ची ना जाक्शो आन कली डोंइती ब्रेश्शा, काबु डा गाल्च देनार का का गेमी बाक्त। 10 मिनू सुनी कना रे गेय पाइबपुकीमी जाक्शा 'एको आन क्येडा शुश ताइनीकी' दे मिम्तमे बाक्त। तन्न नेल्लेमी देनार का का ला तामे बाक्त। 11 मिनू ताक्शा, मेको आन थुं मनुथु, होवप कली 12 'नेल्ल क्येडा नोले जाक्बपुकीमी इक्का ला गेय पाम्तेक्म। गोपुकी सुनी रे गेय पा नांम दुप्शा चोशा श्येत पा गेय पाइतक। तन्न आंइ कली उडक्थ उडक्थ गाल्च गेतीनी' दे गाइश्शा देंमा बाक्त। 13 मिनू होवपमी मो देंब का कली 'आं वारच, इ कली मार मरिम्शो पडा? काबु डा गाल्च देनार का कली बिस्से ममाइ डा? 14 देनार का ताक्शा लावो। नोले जाक्ब कली यो इ कली गेशो खोदेंशो पा गेचा दाक्ताक्ड। 15 आंम आं के बाक्शो आं दाक्शो पा योक्वा मताइनुडा डा? अरु आन कली शिशी पशो तशा, इ कुप्फीम मी ब्रवे?' दे मदा बाक्त। रोमी ९:१६, २१ 16 मोदेंशो पान, नोले दुम्बपुकी डोंइती दुम्मीम, डोंइती दुम्बपुकी नोले दुम्मीम" दे शेंताक्मी।

येसुमी श्येत जचा माल्ब, दे शेंशो

मर्कूस १०:३२-३४; लूका १८:३१-३३

17 मिनू येसु यरूसलेम डा लां खोइश्शा गाक्मेनु, आ शेंसीब १२ जना आन कली सुइ मबाक्तीकेम लाइश्शा 18 "मुल यरूसलेम लाइनय। मिनू रागीम जरमेशो ठेयब चढेब नु सास्त्री आन गुइमी जिम्मा गेचा पुंइसीब। मिनू मेकोपुकीमी दोस गेशा, साइक्वा डा सजाइ गेनीम। यूहन्ना २:१३; मत्ती १६:२१; मत्ती १७:२२-२३ 19 शुक्शी पा युक्शा, शीम केप्शा कांटी थोक्शा, क्याइश्शा साइक्थ अर्को जात डा मुर आन गुइमी गेनीम। बेक्शो आ नित्थ नाक्त बेक्शो रे सेंसीब" दे माइक्तीमी।

ठेयब दुम्चा कली गेय पचा माल्ब

मर्कूस १०:३६-४५

20 मिनू काबु जब्दी तौ आस ममामी आ तौ आस कली चाक्शा, येसु कली सेउ पाप्नु। मत्ती १०:२ 21 मिनू येसुमी "मार पुंइनेवे?" देंमेनु "हे शेंब, गे इन राज्यम आं तौ आस कली का इन ग्युरा, का इन पेरा गे बाक्वा गेचा कली मुल हुकुम दुम्ल" दे पुंइतु। मत्ती १९:२८ 22 मिनू येसुमी आ तौ आस गे हिरशा "इस पुंइशो मार बाक्मे, दे मरुप्नीसी। गोमी तूचशो कचौरा तूने चाप्नीसी?" देंमेनु "चाप्न्स्कु" देंताक्स। मत्ती २६:३९ 23 मिनू येसुमी "थमा आं कचौराम तूनीसी। तन्न आं ग्युरा पेरा गे बाक्वा गेचा आं गुइमी ममाइ। आं आफोमी योव्रशो आन कली बाक्ब" दे माइक्तीमी। प्रेरित १२:२; प्रकाश १:९

24 मिनू शेंसीब १० जनामी मेको आस कली मो देंशो नेंशा "एको निक्शी दोदेंशो बाक्सा, है" दे आन थुं मनुम। लूका २२:२४-२७ 25 मिनू येसुमी नेल्ल आन कली खुप्शा "अर्को रागी कली हुकुम पाइबपुकीमी मुर आन कली दिप्शा वोइश्शा, हुकुम पाइनीम, दे तुइक्नीनी। 26 गोपुकी इन दातेमी मोदेंशो पचा मदुम्ब। इन दातेमी ठेयब दुम्चा माल्बम नेल्ल आन गेय पाइब दुम्चा माल्ब। मत्ती २३:११; १कोरिन्थी ९:१९ 27 इन दातेमी नेल्ल क्येडा डोंइती दुम्चा माल्बम नेल्ल आन वाइल दुम्चा माल्ब। मर्कूस ९:३५ 28 रागीम जरमेशो मान पपांइसीचा कली जाक्शो ममाइ। तन्न गेय पथ नु शुश मुर आन कली प्रोंइचा कली आ गिंम सोइक्थ जाक्शो बाक्ब" दे माइक्तीमी। फिलिप्पी २:७; १पत्रुस १:१८-१९

मिक्च मताइबम तशो

मर्कूस १०:४६-५२; लूका १८:३५-४३

29 मिनू काबु यरीको सहर रे गाक्मानु, शुश मुरुमी येसु आ नोले खोइक्तेक्म। 30 मिनू लांमी बाक्शा, मिक्च मताइब निक्शीमी येसु एको लां पित देंशो नेंशा "हे प्रभु, दाऊद आ तौ, गो आंस कली शिशी पांइस्की" दे वाइ ब्रेत्ताक्स। 31 येसु नु काथा गाक्बपुकीमी "रेयके मपसे" दे हुइक्तेमेनु,

डोंइती क्येडा वाइ ब्रेश्शा "प्रभु, दाऊद आ तौ, गो आंस कली शिशी पांइस्की" दे ब्रेत्ताक्स। 32 मिनू येसु खा दिक्शा, मेको आस कली ब्रेश्शा "इस कली मार पडा, मार पुंइसी?" देंमेनु 33 "प्रभु, आंस कली मिक्च ताइब सेलीने" दे पुंइताक्स। 34 मिनू येसुमी मेको आस कली शिशी पा आस मिक्च थिवानु, मिक्च ताइब दुम्शा, येसु आ नोले खोइक्ताक्स।

येसु मान पचा पुंइसीशो

मर्कूस ११:१-१०; लूका १९:२९-३८; यूहन्ना १२:१२-१९

21 मिनू यरूसलेम आ नेक्था जैतून डांडा डा बेथफागे माइश्शो गाउं जाक्दीत्तेक्म। 2 मिनू येसुमी आ शेंसीब निक्शी आस कली "मेरे गाउं लसे। मेकेर जाक्दीश्शा, गधा नु आ चाइक्ब पाइश्शा वोइश्शो थिल्तीसी। मेको निक्शी प्रोंइशा चाक्कीसे। 3 मुरपुकीमी 'एको गधा मारदे लाइक्सी?' देंतेक्म हना 'प्रभु मेको कली माल्ताक्व' देंसीनु, लाइक्वा गेनीम" दे सोइक्ताक्सी। मत्ती २६:१८ 4 मोदेंशो दुम्चा माल्ब। मारदे हना साइ नेसी परमप्रभु यावे आ लोव पाइबमी 5 "सियोन डा तमी कली ओदें तुइक्पतीन। कोव्रडीन, इन पिप ब्रेम्शो दुम्शा, गधा गधेनी आ चाइक्ब डोइश्शा, इन बाक्तीके गे पिन पिन बाक्ब" दे ब्रेक्शो बाक्ब। जकरिया ९:९ 6 मेको निक्शी लशा, येसु आ देंशो खोदेंशो पाम्से बाक्त। 7 मिनू गधा नु आ चाइक्ब चाक्शा, आन वासी गधा तारी ब्राम्तेक्म। मिनू येसु डोंइसाक्व। 8 मिनू येसु आ नोले खोइक्बपुकीमी आन फेक्तीक वा लांमी ब्राम्तेक्म। खजूर रवा आ राशी जिक्शा, लांमी ब्रशा दारशो सेल्लेक्म। २राजा ९:१३ 9 मिनू आ डोंइती नोले गाक्बपुकीमी "दाऊद आ तौ कली होसन्ना, परमप्रभु यावे आ नेंमी जाक्ब कली जाइ, गे ठेयब बाक्नीनी" दे रेयके पा ठेयब सेल्लेक्म। भजन संग्रह ११८:२५-२६ 10 मिनू यरूसलेम सहर ओव्रमेनु, मेकेर बाक्बपुकीमी "मेको सु बाक्म, माइ" दे लोव पमुक्तेक्म। 11 मिनू येसु नु काथा गाक्बपुकीमी "गालील रागी डा नासरथ रे जाक्शो परमप्रभु यावे आ लोव पाइब येसु एको बाक्ब" देंतेक्म।

ग्याब्ब लेयब आन कली खेरशो

मर्कूस ११:१५-१९; लूका १९:४५-४८; यूहन्ना २:१३-१६

12 मिनू येसु परमप्रभु यावे आ खिं ओव्रत। मेकेर ग्याब्ब लेयब क्येट फाइक्ब आन कली खेरतीमी। क्येट फाइक्ब आन टेबल नु दुकुर लेयब आन नित्तीके खोल्शा गेम्तीमी। 13 मिनू " 'आं खिं आं कली मान पतीके बाक्ब' दे ब्रेक्शो बाक्ब। गोपुकीमी चहिं खुइ आन बाक्तीके पुक्खी सेल्लतीनी" दे हुइक्ताक्मी। यसैया ५६:७, येरमीया ७:११

आलपुकीम येसु कली मान पशो

14 मिनू मिक्च मताइब नु खोरन्डेपुकी जाक्तेक्म। मिनू येसुमी मेको आन कली सापाइक्तीमी। 15 मिनू ठेयब चढेब नु सास्त्रीपुकीमी येसुमी छक लाक्वा डा गेय पशो नु आलपुकीमी "दाऊद आ तौ कली होसन्ना" दे शुश रेयके पा येसु कली ठेयब सुइश्शा मान पशो तशा, होसन्ना आ देंशो "परमप्रभु वारच पने" बाक्ब। 16 येसु कली "मेकोपुकीमी मार देंबाक्मा मनेनीनी?" दे गाइश्शा देंतेक्म। मिनू येसुमी "नैता। 'आइक्च आल नु बुकलु आलपुकीमी इन कली ठेयब सेल्पांइसाक्नी' दे ब्रेक्शो लोव मपठेनी?" दे माइक्तीमी। भजन संग्रह ८:२ 17 मिनू मेको आन कली प्रोंइशा, सहर रे गूशा, बेथानी जाक्दीश्शा बास बाक्त।

सिश्शो फोव्रशी रवा

मर्कूस ११:१२-१४, २०-२४

18 आ दीसा सुनी यरूसलेम लेम्मेनु, शोव्रलु बेक्माक्त। 19 मिनू लां नेक्थामी फोव्रशी रवा का तशा, फोव्रशी सिश्शो बाक्म कों, दे कोव्रडानु, सफा ला ताप्नु। सफा ला तशा "मुल डा मेरे गेनायो मसिप्ब रवा दुमो" दे माइक्नु। मिनू रवा साव सोव्रत। लूका १३:६ 20 मिनू शेंसीबपुकीमी रवा सोव्रशो तशा "रवा दोपा साव सोव्रमे" दे छक लाक्तेक्म। 21 मिनू येसुमी "नोफा दाइश्शा नेनीने, दल्गीर मपथु थमा सुइक्तीनी हना, फोव्रशी रवा



कली पशो खोदेंशो पचा ला ममाइ, डांडा कली एकेर रे समुन्द्रमी याक्सो देंतीनी हना, मेको डांडा यो याक्सीशा लाइब। मत्ती १७:२०<sup>22</sup> थमा सुइश्शा प्रार्थना पा पुंडतीनी हना, इन पुंडशो ताइनीनी" दे माइक्तीमी।

येसु आ अधिकार ते रे जाक्बा?  
मर्कूस ११:२७-३३; लूका २०:१-८

23 मिनू परमप्रभु यावे आ खिं ओव्रशा, मुर आन कली शेंना शेंन बाक्मेनु, ठेयब चढेब नु जोक्ब तुइक्ब खालपापुकी जाक्शा "तेको अधिकारमी मोदेंशो पवी? एको अधिकार सुमी गेवे?" देंतेक्म। यूहन्ना २:१८; प्रेरित ४:७  
24 मिनू येसुमी "गो इन कली लोव्र का हिल्लो पाइनुड। गेम आं लोव्र लेत्ताक्नी हना, तेको अधिकारमी एको गेय पडा, दे शेंननी। 25 यूहन्नामी मुर आन कली ब्वाक्कुम ख्रुम्शा गुंडतीके अधिकार स्वर्ग रे तवा, दे मुरपुकी रे तवा?" दे हिल्लो पास्तीमी। मिनू लोव्रसी पमुशा "स्वर्ग रे तवा बाक्त देंतय हना, मो हना यूहन्ना आ लोव्र मारदे थमा मसुइक्नी देंब। 26 मुरपुकी रे तवा बाक्त देंयानु, मुरपुकीमी इं लोव्र मनेंथु मटीनीम। मारदे हना मुरपुकीमी यूहन्ना परमप्रभु यावे आ लोव्र पाइब बाक्त, दे थमा सुइश्शो बाक्नीम" देंमुप्तेक्म। मत्ती १४:५<sup>27</sup> मोपतीके "मतुइक्नीकी" देंतेक्म। मिनू येसुमी "मो हना तेको अधिकारमी एको गेय पडा, गो यो मशेंननी।

येसु कली ग्येरपाइक्ब

28 अर्को लोव्र का नेंशा मिस्तीने। मुर का के तौ निक्शी बाक्सा बाक्त। मिनू काबु आफोमी आ जेठा कली 'आं तौ, मुलाक्ती अडगुर रूमी गेय पथ लावो' देंमाक्त। 29 मिनू जेठामी 'गो मलाइनुड' देंमाक्त। नोले आ थुं लेशशा लमाक्त। 30 मिनू आफोमी कान्छा कली यो 'आं तौ, मुलाक्ती अडगुर रूमी गेय पथ लावो' देंमाक्त। मेकोमी 'दुम्ब, गो लाइनुड' देंमाक्त। तन्न मलमाक्त। मत्ती ७:२१<sup>31</sup> आस आफ आ दाक्शो सुमी पवा? जेठामी पवा, दे कान्छामी पवा?" दे माइक्तीमी "जेठामी पवा बाक्त" देंतेक्म। मिनू येसुमी मेको आन कली "नोफा दाइश्शा नेनीने, इन क्येडा डोंइती तिरो पोक्ब नु तेल्लेम पाइबपुकी परमप्रभु यावे आ राज्य ओव्रचा ताइनीम। लूका १८:९-१४<sup>32</sup> मारदे हना यूहन्नामी ठीक लां कोंइशा यो गेपुकीमी थमा सुइश्शा, इन थुं परमप्रभु यावे गे मलेत्तीनी। मेकोपुकीमी चहिं यूहन्ना कली थमा सुइश्शा, आन थुं परमप्रभु यावे गे लेत्ताक्म" देंत। लूका ७:२९

मरिश्शो बुम्था पाइब  
मर्कूस १२:१-२; लूका २०:९-१९

33 मिनू येसुमी "लो, अर्को कथा का नेनीने। मुर कामी अडगुर ख्रुम्शा, थारपु हिरशा, अडगुर खाक्तीक नु वोइक्तीक सेल्शा, बुम्था पाइब माल्शा, मेको आन कली गेशा वोइश्शा, अर्को रागी लमाक्त। यसैया ५:१-२  
34 अडगुर मीशा सेक्वी जाक्मेनु, आ गेय पाइब आन कली आ भाग पोक्थ सोइक्तीमी बाक्त। 35 मिनू गेय पाइबपुकी जाक्दीम्मानु, बुम्था पाइबपुकीमी का कली तुप्मे बाक्त, का कली सदमे बाक्त, का कली फुल्लु आष्ठा खेरमे बाक्त। 36 मिनू डोंइती सोइश्शो क्येडा शुश आन कली सोइक्तीमी बाक्त। मेको आन कली यो में मोदेंशोन पामे बाक्त। 37 मिनू 'आं तौ कली टीनीम कों' दे मिम्शा, आ तौ कली सोइक्ता बाक्त। 38 मिनू बुम्था पाइबपुकीमी आ तौ कली पिशो तशा 'एको अडस ताइब बाक्ब। लो साइक्वा। मिनू रू, अडगुर नेल्ल इं केन दुम्ब' देंशा गारमा बाक्त। मत्ती २६:३-५; यूहन्ना १:११  
39 मिनू फि ग्याइश्शा, रू रे गुइशा, सदमे बाक्त। 40 मो पाइब आन कली रू होव्रप लेशशा जाक्शा, मार पाइबा?" देंमेनु 41 "मोदेंशो मरिश्शो पाइब आन कली साइक्पाइक्ब। आ रू चहिं सुमी अडगुर मीमेनु, पोक्थ जाक्ब आन कली गेब, मेको आन कली गेब" देंतेक्म। 42 मिनू येसुमी "ओदेंशो ब्रेक्शो लोव्र मपढेनी? 'खिं सेल्बपुकीमी गारो प्रोडमेनु, एको फुल्लु मगार, दे ताइक्तमे बाक्त। मेको मगारथु ताइश्शो फुल्लु चहिं सुर डा सुरे फुल्लु दुम्माक्त। परमप्रभु यावेमी मोदेंशो पशो बाक्त। मिनू मेको इं दातेमी छक लाक्वा डा बाक्ब" दे ब्रेक्शो बाक्ब। भजन संग्रह ११८:२२-२३; प्रेरित ४:११; १पत्रुस २:४-८<sup>43</sup> मोपतीके परमप्रभु यावे आ राज्य इन गुइ रे

रोइक्वा पुंडसीनीनी। मिनू फल सिख्ब अर्को जात डा मुर आन कली गेब, दे माइक्तीमी। 44 सुमी एको फुल्लुम दाल पाइसीशा राम्सीबा, मेको फस दुम्ब। एको फुल्लुमी सु कली चिष्बा, मेको चिम्सीशा बेक्ब" देंत। 45 मिनू ठेयब चढेब नु फरिसीपुकीमी येसुमी देंशो कथापुकी नेंशा "एहे, इं कली कका देंशो बाक्माक्त" दे रुप्मे बाक्त। 46 मिनू ग्याइक्पाइक्वा माल्मे बाक्त। तन्न येसु कली "परमप्रभु यावे आ लोव्र पाइब बाक्ब" देंब आन कली तशा, हिंमा बाक्त।

पिप आ ग्युबेम ब्रेश्शो  
लूका १४:१६-२४

22 मिनू येसुमी लेंशा कथापुकी सेल्शा, मुर आन कली शेंना शेंन 2 "स्वर्ग डा राज्य ओदेंशो बाक्ब, पिप कामी आ तौ आ ग्युबे पा भोज पचवा बाक्त। यूहन्ना ३:२९<sup>3</sup> मिनू आ गेय पाइब आन कली निम्तो ताइब आन कली ब्रेत्थ सोइक्तीमी बाक्त। तन्न निम्तो ताइबपुकी लचा थुं मपामे बाक्त। 4 मिनू लेंशा अरु गेय पाइब आन कली 'नेनीने, गो जचा थोव्रकी सेल्शा ठीक पाता। लो, जथ जाक्कीन, दे मतीन' दे ब्रेत्थ सोइक्तीमी बाक्त। 5 तन्न ब्रेत्वा पुंडसीब नेल्लेमी ग्युबे जथ लचा थुं मपथु, का आ रूमी गेय पथ लमाक्त, का ग्याप्तीक लेयतीक गेय पथ लमाक्त। 6 लीशोपुकीमी ब्रेत्थ जाक्ब आन कली शुक्शी पा ग्याइश्शा तुप्शा सदमे बाक्त। मत्ती २१:३५<sup>7</sup> मिनू पिपमी मोदेंशो दुम्शो तुइश्शा चुरशा, आ सिपाही आन कली 'लने, मुर साइक्ब आन कली साइश्शा, आन सहर गाउं क्रोइश्शा गेने' दे सोइक्तीमी बाक्त। मत्ती २४:२<sup>8</sup> मिनू आ गेय पाइब आन कली 'आं तौ आ ग्युबे भोज ठीक सेल्ता। ब्रेश्शोपुकी चहिं भोजम जाक्वा मशिरसीशो बाक्मा बाक्त। 9 मोपतीके मुल लां पित्थ लशा, सु सु आन कली थिन्नी, मेको आन कली चाक्कीने' दे सोइक्तीमी बाक्त। मत्ती १३:४७<sup>10</sup> मिनू मेकोपुकीमी लां पित्थ लशा, रिम्शो मरिम्शो दोदेंशो मुर थिदमे, मोदेंशो नेल्ल आन कली खुप्शा चाक्वामे बाक्त। मिनू ग्युबे खिं पौनापुकीम ब्रीमाक्त। 11 मिनू पिपमी 'आं पौना दोपा बाक्मा, दोशो जाक्मा' दे कोव्रथ जाक्मेनु, ग्युबे भोज डा वा मफेक्शो मुर का तवा बाक्त। प्रकाश १९:८<sup>12</sup> मिनू 'ए वारच, ग्युबे भोज डा वा मफेक्थु, दोपा एकेर ओव्रडे?' देंमेनु, सिक्सी पा मारदे देंने मचबा बाक्त। 13 मिनू पिपमी आ गेय पाइब आन कली 'एको आ गुइ खोइल फ्रेंशा गुइशा, छिडछिडमी ताइक्तीने। मेकेर मुरपुकी आन ख्रुइ शेष्शा डाक्नीम' 14 ब्रेत्वा पुंडसीशो मुर शुश बाक्नीम, योव्रशो चहिं का निक्शी ला बाक्नीम" दे येसुमी शेंताक्मी।

तिरो थाप्चा देय मथाप्चा  
मर्कूस १२:१३-१७; लूका २०:२०-२६

15 मिनू फरिसीपुकीमी "एको कली दोपा आंम आ लोव्र खाइक्पपाइश्शा दोस गेचा" दे लोव्रसी पमुमा बाक्त। 16 मिनू आन शेंसीब नु हेरोद आ वारच आन कली येसु आ बाक्तीके ओं माइक्थ सोइक्तीमी बाक्त "हे शेंब, गे थमा पाइब ननी। मुर आन कुल मकोव्रथु सुइ नु महिंथु, परमप्रभु यावे आ लोव्र थमा पा शेंनीनी, दे तुइक्नीक। यूहन्ना ३:२<sup>17</sup> मिनू लोव्र का शेंदीकी, शेंब हजुर, मार लोव्र देंशा हना, सिजर सरकार कली तिरो थाप्चा माल्ब, दे मथाप्थु यो दुम्बा?" दे हिल्लो पखु पा, लोव्र खाइक्पपाइक्वा माल्तेक्म। 18 मिनू येसुमी मेको आन मरिम्शो मिम्शो तुइश्शा "ए कपटीपुकी, मारदे आं थुं थाम्नीनी? 19 तिरो थाप्तीके क्येट का कोंइदीनी" देंमेनु, देनार का कोंइताक्म। 20 मिनू "एको सु आ नेंमी खोइश्शो बाक्मे?" देंमेनु 21 "सिजर आ नेंमी खोइश्शो बाक्त, हजुर" देंतेक्म। मिनू येसुमी "लो मो हना, सिजर आ थोव्रक सिजर कली गेने। परमप्रभु यावे आ थोव्रक परमप्रभु यावे कली गेने" देंमेनु, रोमी १३:१,७<sup>22</sup> मेकोपुकी छक लाक्वा, फ्रा फ्रु लेशशा गाक्तेक्म।

बेक्शो रे सेंसीचा आ पर्बम शेंशो  
मर्कुस १२:१८-२७; लूका २०:२७-४०

23 मिनु सदुकीपुकी जाक्तेकम। सदुकीपुकीमी बेक्शो रे मसेंसीब, दे शेंनीम। मिनु येसु आ बाक्तीके जाक्शा प्रेरित ४:२; प्रेरित २१:६-८ 24 “हे शेंब, मोसामी ब्रेक्शो लोवमी ‘मुर कामी आल मथिथु बेक्त हना, आ लोकबमी आ भोग्यु वॉइसीशा, आ दाग्यु आ पा डा सन्तान मजाम्मल, तमी तौ थिवल’ दे ब्रेक्शो बाक्ब। व्यवस्था २५:५-६ 25 खिं कामी ७ जना लोकब बाक्तेकम। मिनु डॉइती जरमेशोमी ग्युंवे पाप्तु। 26 मिनु आल मथिथु बेक्त। मिनु माइलामी आ भोग्यु वॉइसाक्व। मिनु मेको यो आल मथिथु बेक्त। मिनु साइलामी आ भोग्यु वॉइशा, मेको यो आल मथिथु बेक्त। मोदेशो पा ६ जनामीन आन भोग्यु वॉइशा, आल मथिथु बेक्तेकम। 27 मिनु नोले मेको मीश मुर यो बेक्त। 28 मुर बेक्शो रे सेंसीशा ब्रॉइमानु, मेको ७ जना वॉइश आन मीश दुश्शो मीश मुर तेको आ मीश दुम्बा?” दे हिल्लो पास्तेकम। 29 मिनु येसुमी “गे दूली मिन्नीनी। मारदे हना परमप्रभु यावे आ लोव मरुनीनी, परमप्रभु यावे आ सक्ति यो मतुइक्नीनी। 30 बेक्शो रे सेंसीशा ब्रॉइमानु, मुरुमी ग्युंवे मपाइनीम। स्वर्गम बाक्ब परमप्रभु यावे आ गेय पाइब खोदेशो बाक्नीम। 31 बेक्शो रे सेंसा ब्रॉइचा देशो मार बाक्ब देशा हना, 32 परमप्रभु यावेमी ‘गो अब्राहाम आ परमप्रभु यावे, इसहाक आ परमप्रभु यावे, याकूब आ परमप्रभु यावे नड’ दे ब्रेक्शो बाक्ब। मेको लोव मपढेनी? परमप्रभु यावे बेक्शो मुर आन परमप्रभु यावे ममाइ। ब्रॉइशो आन परमप्रभु यावे बाक्ब” दे माइक्तीमी। प्रस्थान ३:६ 33 मिनु मेकेर देल्शोपुकीमी येसु आ लोव नेंशा छक लाक्तेकम।

नेल्ल क्येडा ठेयब अरेशो लोव  
मर्कुस १२:२८-३१; लूका १०:२५-२८

34 मिनु फरिसीपुकीमी “सदुकी आन कली लेन्ने मचाप्चा डा लोव पाइमी बाक्त” देशो नेंशा, खुम्सीशा जाक्तेकम। 35 आन दाते डा आरेशो लोव जोक्ब तुइक्ब कामी येसु कली 36 “हे शेंब, परमप्रभु यावे आ अरेशो लोव डा तेको नेल्ल क्येडा तुइक्वा माल्शो बाक्बा?” दे आ थुं थाम्चा कली हिल्लो पाप्तु। 37 मिनु येसुमी “गेपुकी परमप्रभु यावे, इन परमप्रभु कली इन थुं नेल्लेमी, इन सोक्त नेल्लेमी नु इन बोल नेल्लेमी दाक्वा माल्नीनी” व्यवस्था ६:५ 38 मेको नेल्ल क्येडा ठेयब नु तुइक्वा माल्शो अरेशो लोव बाक्ब। 39 मिनु आ नोले डा लोव ‘आंम इ कली दाक्वो खोदेशो पा, इ नेक्वा बाक्ब कली यो दाक्वो’ देशो बाक्ब। लेवी १९:१८ 40 एको अरेशो लोव निक्शीमी परमप्रभु यावे आ अरेशो लोव नु आ लोव पाइब आन लोव नेल्ल खाप्शो बाक्ब” दे येसुमी माइक्तीमी। रोमी १३:९-१०

ख्रीस्त सु आ तौ बाक्बा?  
मर्कुस १२:३५-३७; लूका २०:४१-४४

41 काबु फरिसीपुकी खुम्समानु, येसुमी मेको आन कली 42 “ख्रीस्त आ पर्बम मार मिन्नीनी? मेको सु आ तौ सुइक्नीनी?” दे हिल्लो पाप्तु। मिनु “दाऊद आ तौ” देंतेकम। यसैया ११:१; यूहन्ना ७:४२ 43 मिनु येसुमी “मो हना मारदे परमप्रभु यावे आ सोक्त रे पा दाऊदमी मेको कली प्रभु देंबा? 44 ‘परमप्रभु यावेमी आं प्रभु कली “इ जोरी सत्रु आन कली इ खोइल आगाम मवोदुमी सम्म आं ग्युरा गे बाक्को” देशा’ ब्रेक्शो बाक्ब। भजन संग्रह ११०:१; मत्ती २६:६४ 45 दाऊदमी मेको कली ‘प्रभु’ देंब। मिनु दोपा आ तौ दुम्मे?” दे माइक्तीमी। 46 मिनु सुइमी लोव का यो लेन्ने मचबेम। में डा मेरे हिंशा, लोव हिल्लो पचा यो प्रॉइतेकम।

कपटी आन कली हुइश्शो  
मर्कुस १२:३८-४०; लूका २०:४५-४७; लूका ११:३९-५२

23 मिनु येसुमी मेकेर देल्शो शुश मुर नु आ शेंसीब आन कली शेंना शेंन 2 “सास्त्री नु फरिसीपुकी इं किकी पिपी मोसा आ पा डा दुश्शो बाक्नीम। 3 मेको आन शेंशो टिने, तन्न आन पशो खोदेशो मपने।

मारदे हना मेकोपुकीमी देंनीम, तन्न मपाइनीम। मलाकी २:७-८; रोमी २:२१-२३ 4 हेल्शो भारी सेल्शा, मुर आन कली कुरपाइक्नीम। मेकोपुकीम चहिं ब्रेक्चो कामी यो नेप्शा मगेनीम। मत्ती ११:२८-३०; प्रेरित १५:१०,२८ 5 मार मार पामेनु, मुर आन डॉइती ला पाइनीम। ठेयब टालोमी परमप्रभु यावेमी अरेशो लोव ब्रेक्शा आन फेक्शो वामी केप्नीमी। मिनु आन वामी लाइश्शो झुम्का क्युक्सीनीम। मत्ती ६:१; गन्ती १५:३८-३९ 6 भोजमी नु गुम्तीक खिंमी मान पचा पुंइसीतीकेमी नित्वा दाक्नीम। लूका १४:७ 7 लां बजारमी गाक्मानु, मान पा सेउ पा ‘शेंब, हजुर’ देंपाइसीचा दाक्नीम। 8 गे इन कली सुइमी शेंब हजुर मदेमल। मारदे हना इन कली शेंब का ला बाक्ब। गे नेल्ल वोबु ननी। 9 एको रागीमी सुइ आन कली आफ मदेनीने। मारदे हना इन आफ का ला स्वर्गम बाक्ब। 10 गे इन कली सुइमी होवप मदेमल। मारदे हना इन होवप का ला ख्रीस्त बाक्ब। 11 इन दातेमी नेल्ल क्येडा ठेयब सु बाक्मे, मेको इन गेय पाइब दुम्ब। मत्ती २०:२६-२७ 12 ठेयब सुइसीब हिक्वा मपुंइसीब। महिक्सीशो चहिं मान पाइक्वा पुंइसीब। अय्युब २२:२९; हितोपदेस २९:२३; इजीकीएल २१:३१; लूका १८:१४; १पत्रुस ५:५

13 सास्त्री नु फरिसीपुकी, गे कपटी, इन कली तशा थुं खाइक्ती। मारदे हना स्वर्ग डा राज्य ओव्रतीक लां तेक्नीनी। गे मओव्रनीनी, मिनु अरु आन कली यो ओव्रचा मगेनीनी। 14 सास्त्री नु फरिसीपुकी, गे कपटी, इन कली तशा थुं खाइक्ती। मारदे हना दुइश्शो प्रार्थना पा कोंइखु पा वॉइश बेक्शो मीश मुर आन शॉप नेल्ल नेक्शा गेनीनी। मोपतीके अरु आन क्येडा शुश सजाइ ताइनीनी। 15 सास्त्री नु फरिसीपुकी, गे कपटी, इन कली तशा थुं खाइक्ती। मारदे हना इन खोदेशो पा यहूदी धर्म पाइब का सेल्चा कली रागी नेल्ल हिरशा गाक्नीनी। मिनु इन लोव टीब सेल्शा, इन क्येडा शुश सजाइ तपाइश्शा, नरक सोइक्नीनी।

16 मिक्च मताइब दुम्शा यो लां कोंइखु पाइब, इन कली तशा थुं खाइक्ती। मारदे हना परमप्रभु यावे आ खिं थिशा कसम जशोमी मारदे लोव मथोक्सीब, खिं डा सुन थिशा चहिं लोव थोक्सीब, दे शेंनीनी। मत्ती ५:३४-३७; मत्ती १५:१४ 17 मिक्च मपाइश्शो मूर्खपुकी, सुन ठेयब मिम्सीबा, दे सुनमी ग्योम्सीशो खिं ठेयब मिम्सीबा? 18 चढेतीके थिशा, कसम जशोमी लोव मथोक्सीब, चढेशो थोवकी थिशा कसम जशोमी चहिं लोव थोक्सीब, दे यो शेंनीनी। 19 मिक्च मपाइश्शोपुकी, चढेशो ठेयब मिम्सीबा, दे चढेतीके ठेयब मिम्सीबा? 20 चढेतीके थिशा कसम जाइबमी चढेतीके नु चढेशो थोवकी थिशा कसम जशो बाक्ब। 21 परमप्रभु यावे आ खिं थिशा कसम जाइबमी परमप्रभु यावे आ खिं नु मेकेर बाक्ब परमप्रभु यावे कली थिशा कसम जशो बाक्ब। 22 स्वर्ग कोव्रशा कसम जाइबमी परमप्रभु यावे आ नित्तीके नु मेकेर निक्ब कली कोव्रशा, कसम जशो बाक्ब, दे रुपीने।

23 सास्त्री नु फरिसीपुकी, गे कपटी, इन कली तशा थुं खाइक्ती। मारदे हना मसला खोरसानी डा १० भागमी भाग का परमप्रभु यावे कली चढेनीनी। तन्न परमप्रभु यावे आ अरेशो तुइक्वा माल्शो ठीक निसाफ पतीके, मुर आन कली शिशी पतीके नु परमप्रभु यावे कली थमा सुइक्तीके लोव ममिन्नीनी। एको गेय पचा माल्शो ननी, मिनु इन पशो यो मप्रॉइचा माल्शो ननी। लेवी २७:३०; लूका १८:१२; मीका ६:८ 24 मिक्च मताइब दुम्शा यो लां कोंइखु पाइबपुकी, तूचा ब्वाक्कुमी रकमिक्च ओव्रशो बाक्त हना, तिल्शा तूनीनी। दलओठ खोदेशो ठेयब जन्तु ओव्रशो बाक्त हना, गु दाक्नीनी। 25 सास्त्री नु फरिसीपुकी, गे कपटी, इन कली तशा थुं खाइक्ती। मारदे हना बोस आ तार ला खुइश्शो खोदेशो पा गेपुकी लाडगा रे रिम्शो तांइसीनीनी। तन्न इन आगामी खुइ नु ग्रांरा दिचा डा गेय पतीकेमी ब्रीशो बाक्नीनी। मर्कुस ७:४,८ 26 ए मिक्च मपाइश्शो फरिसीपुकी, डॉइती बोस आगा खुइक्तीने। मिनु आ तारी यो रिम्शो तांइसेक्ल। यूहन्ना ९:४०; तीतस १:१५

27 सास्त्री नु फरिसीपुकी, गे कपटी, इन कली तशा थुं खाइक्ती। मारदे हना बुलु बुइश्शा दारपाइश्शो तुरस खोदेशो ननी। मेको आ तारी दारशो तांइसीब, तन्न आगाम रुश राक्शा, रिना पाइश्शा ग्रांरा दिचा डा बाक्ब। 28 मोदेशो पा गेपुकी यो मुर आन डॉइती धर्मी तांइसीनीनी, तन्न इन थुं कपट नु पापम ब्रीशो बाक्नीनी।

29 सास्त्री नु फरिसीपुकी, गे कपटी, इन कली तशा थुं खाइक्ती। मारदे हना बेक्शा लशो परमप्रभु यावे आ लोत्र पाइब नु ठीक पाइब आन तुरस दारशो सेल्नीनी। 30 मिनू 'इं किकी पिपी आन पालामी गो यो बाक्शो नक हना, मेको आन परमप्रभु यावे आन कली साइक्पाइक्का मगेक वा' देंनीनी। 31 मो देशोमी 'साइ नेसी परमप्रभु यावे आ लोत्र पाइब आन कली साइक्ब आन चच युइ गो नकी' दे तुइक्पाइसीनीनी। *येरमीया २६:२०-२३; मत्ती ५:१२; प्रेरित ७:५२* 32 इन किकी पिपीम पचा मजाक्दीशो पाप गेपुकीमी खपीने। 33 गे बीख पाइशो बुस्स आ खलकपुकी, नरक लतीके सजाइ रे दोपा ब्रॉइनीनी डा? 34 मोपतीके गो इन बाक्तीके परमप्रभु यावे आ लोत्र पाइब, जोक्ब तुइक्ब मुर नु परमप्रभु यावे आ लोत्र शेंब सोइक्नुडमी। का निक्शी आन कली साइक्नीनी, का निक्शी आन कली शीमी क्याइशा साइक्नीनी, का निक्शी आन कली गुम्तीक खिंमी लाइशा, कोरामी युक्नीनी, मिनू तेइ बाक्का मगेथु, खेदा पा खेरनीनी। 35 मेको मोपा खेदा पा साइशो पाप नेल्ल इन कली राइब। साइ नेसी रिम्शो पाइब हाबील साइशो रे बेरेक्याह आ तौ जकरिया साइशो सम्म डा आन हुशेमी लां मताइनीनी। जकरिया कली परमप्रभु यावे आ खिंमी चढेतीके आ डोंइती साइशो बाक्का बाक्ता। *उत्पत्ती ४:८; २इतिहास २४:२०-२१* 36 नोफा दाइशा नेनीने, मेको पाप एको पाला डा मुर आन कली राइब। *लूका १३:३४-३५* 37 ए यरूसलेम, यरूसलेम, परमप्रभु यावे आ लोत्र पाइब आन कली साइक्तीवी। इ कली शेंथ सोइशो आन कली फुल्लु क्रोम्ताक्वी। पोथीमी आ चितोली आन कली आ फ्रा आगामी पुष्शो खोदेशो पा, गो शुश खेयप इ आल आन कली पुष्चा माल्ता, गे चहिं मबिस्से। 38 मिनू मार दुम्ब देंशा हना, इ खिं ब्रेशशा, मारेइ मलीब। *येरमीया २२:५; भजन संग्रह ६९:२६; १राजा ९:७-८* 39 गो माइक्नन 'परमप्रभु यावे आ नेमी जाक्ब कली आसीक रल' दे मान मपवी सम्म आं कली लेंशा मताइनेवे" देंत। *मत्ती २१:९; मत्ती २६:६४*

परमप्रभु आ खिं मलीब

मर्कूस १३:१-२; लूका २१:७-१९

24 मिनू येसु परमप्रभु यावे आ खिं रे गूशा लमेनु, आ शेंसीबपुकीमी "एको खिं दोमो कोल्पा गिश दारपाइशा सेल्शो बाक्माक्ता" देंतेक्म। 2 मिनू येसुमी "मुल ओमो ठेयब नु दारपा सेल्शो ताइतीनी। नोफा दाइशा नेनीने, नोले ब्रेशशा, फुल्लु का यो खोष्ठा मलीब" देंत। *लूका १९:४४*

श्वेत दुम्बशो बाक्ब

3 मिनू जैतून डांडामी जाक्दीशशा बाक्मेनु, आ शेंसीबपुकी यो जाक्शा "एको इन देशो लोत्र गेना दुम्बा? इन जाक्ची ना डा चिन्ड मार तांइसीनीमी? मिनू रागी नुचवा बाक्ता, दे दोपा तुंइसीबा?" दे हिल्लो पाम्तेक्म। *प्रेरित १:६-८* 4 मिनू येसुमी "सुइमी इन थुं मक्यामेक्ल, दे होस पा बाक्कीन। 5 मारदे हना शुश मुरपुकीमी आं नें ब्रशा 'गो ख्रीस्त नड' देंशा, मुर आन थुं क्यानीम। *यूहन्ना ५:४३; १यूहन्ना २:१८* 6 लडाइ दुम्शो लडाइ डा लोत्र शुश नेनीनी। मेको लोत्र नेंशा महिनीन। मोदेशो दुम्चा माल्ब, रागी नुष्चा चहिं इच्ची मजा। 7 मारदे हना डोंइती जात जात नु राज्य राज्यमी लडाइ पाइनीम। रागी रागीमी अन्काल दुम्ब, एर ओंथ खिनु कुइब। 8 मो दुम्मेनु, श्वेत दुम्चा गोवा बाक्ता, दे तुंइसीब।

आं मुर आइक्च सेल्चा पुंइसीनीम

9 इन कली खेदा पा शुश श्वेत गेनीम, साइक्नीम। नेल्ल जात डा मुरपुकीमी आं पबर्म इन कली मदाक्थु आइक्च सेल्नीम। *मत्ती १०:२१-२२; यूहन्ना १६:२* 10 मिनू शुशेमी थमा सुइक्का प्रॉइनीम। खेदा पाइब आन कली वारच पाइनीम। वारच आन दातेमी काइ मदाक्मुइनीम। 11 परमप्रभु यावे आ लोत्र दूली शेंबपुकी शुश बोक्शा, दूली पा शेंशा, शुश मुर आन थुं क्यशा गेनीम। मिनू परमप्रभु यावे आ राज्य डा लां प्रॉइपाइक्नीम। *२पत्रुस २:१; १यूहन्ना ४:१* 12 पाप पचा शुश बारतीके शुशेमी वारच पमुचा, दाक्मुचा प्रॉइनीम। *२तिमोथी ३:१-५* 13 सु सु चहिं नेल्ल क्येडा नोले सम्म थमा सुइक्का मप्रॉइथु बाक्नीमी, मेकोपुकी श्वेत जचा रे ब्रॉइशा, गेना हना यो

परमप्रभु यावे नु बाक्का ताइनीम। *मत्ती १०:२२; प्रकाश १३:१०* 14 परमप्रभु यावे आ राज्य आ पबर्म चहिं नेल्ल रागी डा मुर आन कली तुइक्पाइसीब। मारदे हना नेल्लेमी तुइक्का माल्नीम। मिनू नोले रागी नुष्ची जाक्ब।

श्वेत शुश नाक्त मलीब

मर्कूस १३:१४-२३; लूका २१:२०-२४

15 परमप्रभु यावे आ खिं ग्रांरा सेल्नीम, दे परमप्रभु यावे आ लोत्र पाइब दानीएलमी ब्रेक्शो लोत्र थमा दुम्शो तनीनु 'पढेबपुकीमी रुपेक्ल' *दानीएल ९:२७; दानीएल ११:३१* 16 यहूदीया रागीमी बाक्बपुकी डांडा ग्येथ प्रोक्मल। 17 बारदलीम बाक्बमी 'खिं ओत्रशा, मारेइ लाइक्का ताइनुड' दे ममिम्तमेक्ल, तन्न दिव दाव प्रेक्शा प्रोक्मल। *लूका १७:३१* 18 रूमी गेय पाइबपुकीमी 'फेक्तीक का लाइक्नीकी' दे खिं लेशशा मलमल, तन्न आन गेय थु था प्रॉइशा प्रोक्मल। *लूका २३:२९* 19 आल कुरशो नु दूध तूब आल पाइशो मीश मुर अरु क्येडा शुश श्वेत जाइनीम। 20 नाइक्तीक नाक्त नु हिउंदमी मोदेशो श्वेत मदुम्ल, दे परमप्रभु यावे कली पुनीने। 21 परमप्रभु यावेमी रागी सेला रे मुल सम्म सुइमी मतुइशो श्वेत जाइनीम। मोदेशो श्वेत जचा लेंशा गेनायो मदुम्ब। *दानीएल १२:१* 22 मोदेशो श्वेत जतीक नाक्त शुश नाक्त दुम्त हना, सुइ मब्रॉइनीम वा। तन्न आ योवशो आन पबर्म परमप्रभु यावेमी मेको श्वेत शुश नाक्त लीचा मगेब।

'ख्रीस्त जाक्ता' देंब बोक्नीम

23 मिनू मुरपुकीमी 'ख्रीस्त एकेर जाक्ता, मेरेक बाक्ब, कोव्रथ गाक्कीन' देंतेक्म हना, थमा मसुतीने। 24 मारदे हना शुशेमी 'गो ख्रीस्त नड' दे जोल पा गाक्नीम। 'परमप्रभु यावे आ लोत्र पाइब नकी' दे जोल पाइबपुकीमी चिन्ड नु छक लाक्का डा गेय कोंइनीम। मो पशोमी परमप्रभु यावे आ योवशो आन कली यो लां प्रॉइपाइक्का माल्नीम। *ब्यवस्था १३:२-४; २थिस्सलोनिकी २:८-९; प्रकाश १३:१३* 25 मेको नेल्ल दुम्चा डोंइतीन गो इन कली नेल्ल शेंशा तुइक्पाइक्तन्नी। 26 मेकोपुकीमी 'सुइ मबाक्तीके गोरशो रागीमी ख्रीस्त बाक्ब' देंतेक्म हना, थमा सुइशा कोव्रथ मलने। 'खिं आगा डा कोठामी ख्रीस्त बाक्ब' देंतेक्म हना, थमा मसुतीन। *लूका १७:२३-२४* 27 नां दाप्तीकेमी चिला पवानु, छेडछेड पा नां पेरतीकेमी सम्म तांइसीशो खोदेशो पा, रागीम जरमेशो आ जाक्ची ना दुम्ब। 28 सिनु बाक्तीकेमी गिद्ध आंमा बेरशा जाक्नीम। *लूका १७:३७; प्रकाश १९:१७-१८*

येसु लेंशा यीब

मर्कूस १३:२४-२७; लूका २१:२५-२८

29 रागीम मोदेशो श्वेत दुम्मे नुम चोटी, सरीडमी चिन्ड तांइसीनीम। नां आ छेडछेड जाम्शा, जिक रिक्शो तांइसीब। तास्ला आ हाम्सो यो जाम्ब, सोरुल खपीम दोक्नीम। सरीड डा सक्ति हिम्सीनीम। *यसैया १३:१०; प्रेरित ६:१२-१३; २पत्रुस ३:१०* 30 मिनू सरीडमी रागीम जरमेशो आ चिन्ड तांइसीब। मिनू नेल्ल जात डा मुरपुकी डाक्नीम। रागीम जरमेशो कली गोस्स तारी बाक्शा, सक्ति नु ठेयब छेडछेडमी यिशो ताइनीम। *प्रकाश १:७; मत्ती २६:६४; दानीएल ७:१३-१४; प्रकाश १९:११-१३* 31 मिनू रागीम जरमेशोमी परमप्रभु यावे आ स्वर्ग डा गेय पाइब आन कली तुराही ताप्पा, रागी तेइ तेइ रे परमप्रभु यावे आ योवशो नेल्ल आन कली खुष्ठा चाक्थ सोइक्ब। 32 फोव्रशी रवा कोव्रशा शेंसीने। फोव्रशी रवा आ कोच्चा दाप्था कुशो तनीनु, बर्खा ओत्रमाक्ता, दे तुइक्नीनी। 33 आं देंशो लोत्र थमा दुम्शो तनीनु, आ जाक्ची जाक्माक्ता, दे तुइक्नीनी। 34 नोफा दाइशा नेनीने, एको जात मनुष्थु, आं देंशो थमा दुम्ब। 35 सरीड नु रागी नेल्ल जाम्शा लाइनीम, आं लोत्र चहिं गेना हना यो लीब। *मत्ती ५:१८; यसैया ५१:६*

सासीशा बाक्का माल्ब

36 मोदेशो गेना दुम्बा, सुइमी मतुइक्नीम। परमप्रभु यावे आ स्वर्ग डा गेय पाइबपुकीमी यो मतुइक्नीम। तौमी यो मतुइक्ब। आफोमी ला तुइक्ब। *प्रेरित १:७* 37 रागीम जरमेशो जाक्मेनु, मुरपुकीमी नोआह आ पालामी पशो

खोदेंशो पाइनीम। लूका १७:२६-२७; उत्पत्ती ६:९-७,२३<sup>38</sup> नोआह आ ठेयब डोंगा मओव्रम सम्म मुरपुकीमी जना जन, तूना तून, ग्युंवे पना पन नु ग्युंवे पाइसीन सीन बाकशो बाक्मा बाक्त।<sup>39</sup> नेल्ल आन कली ब्वाक्कुमी मयोल्दा सम्म मारेड मतुइशो बाक्मा बाक्त। रागीमी जरमेशो आ जाक्ची नाक्त यो मोदेंशो दुम्ब।<sup>40</sup> वोंइश मुर निक्शी रूमी बाक्नीसी, का लाइक्वा पुंडसीब, का प्रोंइशा वोइक्वा पुंडसीब।<sup>41</sup> मीश मुर निक्शी यात हिल्ला हिल्ल बाक्नीसी, का लाइक्वा पुंडसीब, का प्रोंइशा वोइक्वा पुंडसीब। लूका १७:३५<sup>42</sup> इन प्रभु गेना जाक्बा, दे मतुइक्नीनी। मोपतीके गेना हना यो सासीशा बाक्कीन। मत्ती २५:१३<sup>43</sup> खिं डा मुरुमी 'आपो नाक्दो खुडपुकी खुड पथ जाक्नीम' दे तुइक्ताक्व हना, मेको नाक्दो मइथु बाक्शा, खुड पचा मगेन वा। १थिस्सलोनिकी ५:२<sup>44</sup> गेना हना यो सासीशा बाक्कीन। मारदे हना रागीम जरमेशो इन मतुइक्थु जाक्ब।

होव्रप लेशशा जाक्ब

लूका १२:४९-४६

<sup>45</sup> होव्रपमी आ खिं कोव्रब कली जची जाक्मेनु, जचा गेचा, दे अरेशा वोइक्वा पुंडसीशो खोदेंशो रिम्शो थुं पाइशो गेय पाइब सु बाक्बा? <sup>46</sup> आ होव्रप लेशशा जाक्शा, आ गेय पाइबमी आ देंशो टिशा पशो तशा 'रिम्शो' पाप्तीवी देंब। <sup>47</sup> नोफा दाइशा नेनीने, होव्रपमी आइक्के बाक्शो नेल्ल मेको आ गुइमी जिम्मा गेब। मत्ती २५:२१-२३<sup>48</sup> मरिम्शो थुं पाइशो गेय पाइबमी चहिं आ होव्रप लम नोले 'इच्ची ना मजाक्ब' दे मिम्शा, २पत्रुस ३:४<sup>49</sup> अरु गेय पाइब आन कली जिचा पोक्शा, श्येत गेशा तुप्शा, शांबु राकसी दुक्ब नु काथा बाक्शा पाइब। <sup>50</sup> आ ममिम्शो मतुइशो नाक्त खिं डा होव्रप लेशशा जाक्ब। <sup>51</sup> मिनु मेको कली तुप्शा, फस सेल्शा कपटीपुकी नु काथा वोइक्ब। मेकेर मुरपुकी आन ख्रुइ शेप्शा डाक्नीम।

निप्स पाइशो मीश आल

**25** स्वर्ग डा राज्य ओदेंशो दुम्ब, १० जना मीश आलमी तेल बत्ती कुरशा, ग्युम्ले गुम्थ लाइनीम। लूका १२:३५-३६; प्रकाश १९:७  
<sup>2</sup> ५ जना निप्स पाइशो बाक्नीम। ५ जना चहिं निप्स मपाइशो बाक्नीम।  
<sup>3</sup> निप्स मपाइशोपुकीमी बत्ती कुरशा तेल मकुरनीम। <sup>4</sup> निप्स पाइशोपुकीमी चहिं तेल यो कुरनीम। <sup>5</sup> मिनु ग्युम्ले जाक्ची जाक्शा यो मजाक्मेनु, नेल्ल मुकु जिशा इप्नीम।  
<sup>6</sup> मिनु १२ बजे नाक्दो 'ग्युम्ले जाक्त, गुम्थ लन' देंशा ब्रेशो नेंनीम।  
<sup>7</sup> मिनु छुल छाल बोक्शा, आन बत्ती का का पा जेल्लीम। <sup>8</sup> मिनु निप्स मपाइशोपुकीमी निप्स पाइशो आन कली 'आंइ बत्ती काप्चा चिक्ताक्व, इच्ची खोइ तेल आंइ कली यो गेचा नकी' दे पुंडनीम। <sup>9</sup> तन्न निप्स पाइशोपुकीमी 'गो आंइ कुरशो तेलमी गो नेल्ल इं बत्ती आन कली मजाक्दीप्ब। पसल लशा ग्याप्शा, चाक्शा दाडीन' देंनीम। <sup>10</sup> मिनु मेकोपुकी तेल ग्यापथ लमानु, ग्युम्ले जाक्ब। मिनु लचा कली सासीशा बाक्ब आन कली ग्युंवे भोज खिंमी ओंइशा, लाप्चो चोक्नीम। लूका १३:२५  
<sup>11</sup> मिनु नोले तेल ग्यापथ लाइबपुकी यो जाक्शा 'प्रभु, लाप्चो रोक्शा गेचा नकी' देंनीम। <sup>12</sup> मिनु प्रभुमी 'नोफा दाइशा नेनीने, गो इन कली मतुइक्नन्नी। सु ननी?' देंब। मत्ती ७:२३<sup>13</sup> मेको खोदेंशो पा इन प्रभु गेना जाक्ब, दे मतुइक्नीनी। मोपतीके गेना हना यो सासीशा बाक्कीन। मत्ती २४:४२-४४

होव्रप लेशशा हिसाब पाइब

लूका १९:१२-२७

<sup>14</sup> ओदेंशो यो दुम्ब, मुर कामी 'रागी हिरथ लाइनुड' दे थुं पशा, लचा डोंइती आ गेय पाइब आन कली ब्रेशशा, आ शोंप आन गुइमी गेब। <sup>15</sup> आन पने चाप्चा डा गेय तुइशशा, का कली ५ टलेन्ट, का कली टलेन्ट निक्शी, का कली टलेन्ट का योक्शा गेशा वोइशशा लाइब। रोमी १२:६  
<sup>16</sup> होव्रप गाक्म चोटी ५ टलेन्ट ताक्बमी ग्याप्तीक लेयतीक पचा गोइब। मिनु मोपा का डा निक्शी सेल्ब। <sup>17</sup> टलेन्ट निक्शी ताक्बमी यो में मोपा का

डा निक्शी सेल्ब। <sup>18</sup> टलेन्ट का ताक्बमी चहिं आ होव्रप आ शोंप लाइशशा थिम्शा ख्रुइशशा वोइक्ब। टलेन्ट का नेल्ल क्येडा ठेयब क्येट बाक्ब।

<sup>19</sup> मिनु शुश बर्स नोले होव्रप लेशशा जाक्ब। मिनु आ गेय पाइब आन कली ब्रेशशा 'दोशो दोशो सेल्नी, कोंइदीनी' दे का का पा हिल्लो पाइब। <sup>20</sup> मिनु ५ टलेन्ट ताक्बमी आ डोंइती जाक्शा 'हजुर, ५ टलेन्ट गेतीनी। मिनु मार मार पा गो अर्को ५ टलेन्ट सेल्ता। मुल १० दुम्त' देंमेनु, <sup>21</sup> आ होव्रपमी 'रिम्शो पाप्तीवी। थमा सुइक्वा पुंडसीशो बाक्ते। इच्ची खोइ तशोमी शुश सेल्शा, रिम्शो गेय पाप्तीवी। मोपतीके शुश अधिकार गेनन। ग्येरसीशा बाक्स' देंब। मत्ती २४:४५-४७<sup>22</sup> मिनु टलेन्ट निक्शी ताक्बमी जाक्शा 'हजुर, टलेन्ट निक्शी गेतीनी। मिनु मार मार पशा, अर्को टलेन्ट निक्शी सेल्ता। मुल ४ दुम्त' देंमेनु, <sup>23</sup> मेको कली यो 'रिम्शो पाप्तीवी। इच्ची खोइ तशोमी शुश सेल्शा, रिम्शो गेय पाप्तीवी। थमा सुइक्वा पुंडसीशो बाक्ते। मोपतीके शुश अधिकार गेनन। ग्येरसीशा बाक्स' देंब।

<sup>24</sup> मिनु टलेन्ट का ताक्ब जाक्शा 'हजुर, गे शिशी मपाइनीनी। मशोक्शो रिक्नीनी, मक्राप्शो खुप्नीनी, दे तुइशो नड। <sup>25</sup> मोपतीके गो हिंती। मिनु इन टलेन्ट ताक्शा, मारेड मपथु, थिम्शा ख्रुइशशा वोइक्ता। मुल फेशशा चाक्ता। लतीन' देंब। <sup>26</sup> मिनु आ होव्रपमी 'मरिम्शो थुं पाइशो अल्से, गोमी मशोक्शो रिक्नुड, मक्राप्शो खुप्नुड, दे तुइशो नवे हना, एको आं गेशो टलेन्ट का लाइशशा, अरु आन कली गेशा, आ चाइक्ब पपाइक्वा ममाल्नेवे डा? <sup>27</sup> मो पशो नवे हना, आं टलेन्ट क्येडा यो आ चाइक्ब ताक्वा तड वा। <sup>28</sup> एको टलेन्ट ताक्शा, ५ टलेन्टमी १० टलेन्ट सेल्ब कली तेम्शा गेचा' <sup>29</sup> मारदे हना शुश थीब आन कली तेम्शा, शुश बारपा गेचा पुंडसीनीम। इच्ची खोइ थीब आन इच्ची खोइ यो रोइक्वा पुंडसीनीम। मत्ती १३:१२; हितोपदेस ११:२४-२५<sup>30</sup> एको काम मलाप्शो अल्से कली गुंइशा, लाडगा डा छिडछिडमी ताइक्तीने। मेकेर मुरपुकी आन ख्रुइ शेप्शा डाक्नीम।

नेल्ल निसाफ पचा पुंडसीनीम

<sup>31</sup> रागीम जरमेशो परमप्रभु यावे आ स्वर्ग डा गेय पाइबपुकी नु आ छेडछेडमी जाक्शा, आ ठेयब निल्लीकेम निस्सीब। मत्ती १६:२७; प्रकाश २०:११-१३<sup>32</sup> मिनु आ डोंइती नेल्ल रागी डा मुर खुम्सीनीम। गोठलामी भेडा नु क्यारश आन कली ग्युरा नु पेरा गे तिल्लो खोदेंशो पा रोमी १४:१०; मत्ती १३:४९<sup>33</sup> पिपमी भेडा आन कली ग्युरा गे क्यारश आन कली पेरा गे वोइक्ब। इजीकीएल ३४:१७

<sup>34</sup> मिनु पिपमी आ ग्युरा गे राप्शो आन कली 'आं आफ आ आसीक तशोपुकी, आं नेक्थान जाक्कीने। रागी सेल्वा डोंइती एको राज्य इन कली सेल्शा वोइशो बाक्त। मुल बाक्कीने। <sup>35</sup> मारदे हना गेपुकीमी गो जचा मतथु बाक्डानु, जचा गेतीनी। तूतू दाक्डानु, तूचा गेतीनी। इन मतुइशो मुर इन खिं जाक्डानु, बाक्चा गेतीनी। यसैया ५८:७<sup>36</sup> फेक्चा मतडानु, फेक्चा गेतीनी। रोइ पडानु, कोव्रतीनी। जेल्खानमी चोक्शा वोइय्यीमीनु, गुम्थ जाक्तीनी' देंब। <sup>37</sup> मिनु मेकोपुकीमी 'प्रभु, इन कली गेना जचा मतनीनु, जचा गेका, तूचा मतनीनु तूचा गेका, <sup>38</sup> मतुइशो बाक्नीनु, बाक्चा गेका, फेक्चा मतनीनु, फेक्चा गेका, <sup>39</sup> गेना इन कली रोइ पशा नु जेल्खानमी चोक्सीनीनु, गुम्थ जाक्का डा?' देंनीम। <sup>40</sup> मिनु पिपमी 'नोफा दाइशशा नेनीने, आं लोक्ब नेल्ल क्येडा महिक्सीशो आन कली मार मार गेतीनी, मेको आं कली गेशो ननी' देंब। मत्ती १०:४२; हितोपदेस १९:१७; हिब्रू २:११

<sup>41</sup> मिनु आ पेरा गे राप्शो आन कली हिरशा 'सराप तशोपुकी, गो नु मबाक्कीने। सैतान नु आ गेय पाइब आन कली गेनायो मकाप्ब मी वोइशो बाक्ब। मेकेर लने। प्रकाश २०:१०, १५<sup>42</sup> मारदे हना गो जचा मतडानु, जचा मगेयीनी। तूतू दाक्डानु, तूचा मगेयीनी। <sup>43</sup> इन मतुइशो मुर इन खिंमी जाक्डानु, बाक्चा मगेयीनी। फेक्चा मतडानु, फेक्चा मगेयीनी। रोइ पडानु, जेल्खानमी चोक्शा वोइय्यीमीनु, गुम्थ मजाक्नी' देंब। <sup>44</sup> मिनु मेकोपुकीमी यो लोव्र लेशशा 'प्रभु, गेना इन कली जचा मतशो, तूचा मतशो, बास माल्शा गाक्शो, फेक्चा मतशो, रोइ पा बाक्शो, जेल्खानमी चोक्शा वोइशो तका नु वारच मपका डा?' देंनीम। <sup>45</sup> मिनु पिपमी मेको आन कली 'नोफा दाइशशा

नेनीने, महिक्वशो आइक्व मुर आन कली मार मार वारच मपनीनु, मेको आं कली यो मपनी' देंब।

46 मिनु मेकोपुकी गेना हना यो सजाइ ततीकेमी लाइनीम। परमप्रभु आ डोंइती ठीक दुश्पोपुकी चहिं गेना हना यो परमप्रभु यावे नु बाक्वा ततीकेमी लाइनीम" दे शेंताक्मी। *यूहन्ना ५:२९; याकूब २:१३*

येसु कली साइक्वा माल्थो

मर्कुस १४:- १६:-; लूका २२:- २४:-; यूहन्ना १८:- २१:-

26 मिनु येसुमी लोव नेल्ल शेंने थुम्शा, आ शेंसीब आन कली 2 "नित्थ नाक्त् पास्सा चाड बाक्ब, दे तुइक्नीनी। मिनु रागीम जरमेशोमी शीमी केप्शा कांटी थोक्शा क्याइश्शा साइक्वा कली जिम्मा गेचा पुंडसीब" देंत। *प्रस्थान १२:१-२०; मत्ती २०:१८*

3 मेना नेल्ल क्येडा ठेयब चढेब काइयाफास आ खिंमी ठेयब चढेब नु जोक्ब तुइक्ब खाल्पापुकी खुम्सीमा बाक्त्। *लूका ३:१-२ 4* मेकोपुकीमी "मुर आन मतुइक्थु येसु कली दोपा ग्याइश्शा साइक्वाइक्वा" दे सल्ला पामेनु 5 "पास्सा नाक्त् साइक्वाइक्वा मदुम्ब। मारदे हना मुरपुकीमी जिचा पोक्नीम" देंमुमा बाक्त्।

येसु कली ब्रोवशो तेल खेक्वशो

लूका ७:३६-५०; यूहन्ना १२:१-८

6 काबु येसु नु आ शेंसीबपुकी बेथानी डा कोर पशो सिमोन आ खिंमी खमे जना जन बाक्मानु, 7 मीश मुर कामी ब्रोवशो रिना पाइब शुश क्येट लाइब तेल कुरशा जाक्शा, मेको तेल येसु आ पियामी लुक्ताक्व। 8 मिनु येसु कली तेल लुक्वशो तशा, आ शेंसीबपुकीमी "ओदेशो तेल मारदे मो पवा? 9 लेयशा हना, शुश क्येट पी वा। मिनु श्येत जशो आन कली योक्शा, वारच पने जाम वा" दे आन थुं मनुमा बाक्त्। 10 मिनु येसुमी मेको आन थुं मनुशो तुइश्शा "एको मीश मुर कली मारदे आ थुं खाइक्वाइक्नीनी? आं कली थम रिश्पो पाइक्ती। 11 श्येत जशो मुर गेना हना यो थिल्नीनी, आं कली चहिं मथिल्नीनी। *ब्यवस्था १५:११ 12* एको तेल लुक्वशोमी आं रां थिम्चा कली साशो दुम्त्। 13 नोफा दाइश्शा नेनीने, रागीमी तेक तेक आं लोव नेंपाइक्नीमी, मेक मेक एको मीश मुर आ पशो आ पबर्म यो लोव पाइनीम" देंत।

यहूदा आ पशो

14 मिनु इस्कारीयोत डा यहूदा येसु आ शेंसीब का ठेयब चढेब आन कली गुम्थ लशा 15 "येसु कली इन गुइमी ग्याइक्वाइक्ता हना, दोशो गेनीनी" देंमेनु, ३० टुक्रा चांदी गेमे बाक्त्। *यूहन्ना ११:५७; जकरिया ११:१२ 16* मिनु मेको चांदी ताक्मा रे "गेना नु दोपा ग्याइक्वा वारच पदुमी" दे योवकी पना पन गाक्माक्त्।

पास्सा चाड डा भोज

यूहन्ना १३:२१-२६

17 मिनु बोरब ओख्ती मसुप्शो शोब्ले जची नाक्त् येसु आ शेंसीबपुकीम "पास्सा मानेचा कली ते साचा, मार देंनीनी" दे हिल्लो पाम्तेक्म। *प्रस्थान १२:१८-२० 18* येसुमी "सहर लशा, आं कली तुइक्ब मुर कली गुम्शा 'शेंबमी आं कली दुम्चा माल्थो मुल दुम्चापु। मोपतीके इन खिंमी बास गेशा, आं शेंसीब नु काथा बाक्शा, पास्सा मानेचा गेयी, दे पुंडथ सोइक्ताक्की" दे मतीन" दे सोइक्ताक्की। *मत्ती २१:३ 19* मिनु शेंसीबपुकीमी येसु आ देंशो खोदेशो पा पास्सा मानेचा कली नेल्ल साताक्म।

20 मिनु नां रिक्मेनु, येसु आ शेंसीबपुकी नु काथा जचा कली निस्साक्व। 21 मिनु जना जन बाक्मानु, येसुमी "नोफा दाइश्शा नेनीने, मुल एक बाक्ब कामी आं कली ग्याइक्ब आन वारच पाइब दुम्ब" देंत। 22 मिनु नेल्लेमी शुश मरिश्पो लाक्शा "हे प्रभु, मेको वारच पाइब गो दुम्नुडा?" दे का का पा हिल्लो पाम्तेक्म। 23 मिनु येसुमी "गो नु कालेम शोब्ले शेक्कुम तेप्बमी आं कली ग्याइक्वाइक्वा वारच पाइब। 24 रागीम जरमेशो आ पबर्ममी ब्रेक्वशो साइ

नेसी डा लोव नेल्ल थमा दुम्चा माल्ब। मो दुम्चा माल्थो बाक्त् हना यो, ग्याइक्वाइक्वा वारच पाइब कली थमा मरिश्पो दुम्ब। मोदेशो पाइब मुर मजरमेशो हना, मेको कली रिश्पो दुम्ब वा" देंत। *लूका १७:१-२ 25* मिनु ग्याइक्वा वारच पाइब यहूदामी यो "शेंब, मेको गो दुम्नुडा?" देंमेनु "आंमा तुइक्नेवे" दे माइक्त्।

26 मिनु जना जन बाक्मानु, येसुमी आ गुइमी शोब्ले शेशा "गे रिश्पो पाइब बाक्नीनी" दे प्रार्थना पशा जिक्शा, शेंसीब आन कली योक्शा "दाइसीने, ताक्शा जने। एको आं रां बाक्ब" देंत। *१कोरिन्थी १०:१६; १कोरिन्थी ११:२३-२५ 27* मिनु कचौरा शेशा "गे रिश्पो पाइब बाक्नीनी" दे प्रार्थना पशा, मेको आन कली तूचा गेशा "गे नेल्लेमी तूडीने। 28 एको आं हुश बाक्ब। आं हुशोमी परमप्रभु यावे आ नक कबल खाप्ता। आं हुश जारशोमी शुश मुर आन पाप क्याम्सीब। *प्रस्थान २४:८; येरमीया ३१:३१; हिब्रू ९:१५-१६ 29* मुल डा मेरे एको अडगुर रस मतूनुड, नोले नेल्ल नक दुम्शा, आं आफ आ राज्यमी गेपुकी नु काथा बाक्शा ला तूनुड, दे इन कली देंनुड" दे माइक्तीमी। *भजन संग्रह ११३:-११८:-*

नेल्लेमी प्रॉइनीम, दे शेंशो

30 मिनु कुम्सो का पशा डा मीन, मेकेर रे गाक्शा, जैतून डांडा ग्येत्थ लाम्तेक्म। 31 मिनु येसुमी "आपो नाक्दो गे नेल्लेमी आं कली तशा, इन थुं ग्याइक्नीनी। मारदे हना साइ नेसी ओदेशो ब्रेक्वशो बाक्ब। 'गो गोठला कली तुप्शा क्रेक्नुड। मिनु भेडापुकी प्रोक्शा साव सुव ब्राइनीम' दे ब्रेक्वशो लोव थमा दुम्ब। *जकरिया १३:७; यूहन्ना १६:३२ 32* नोले गो बेक्वशो रे सेंपाइक्वा पुंडसीशा, इन डोंइती गालील रागीमी जाक्दीत्नुड" देंत। *मत्ती २८:७ 33* मिनु पत्रुसमी "मेको नेल्लेमी इन कली प्रॉइशा प्रोक्तेक्म हना यो, गो मप्रॉइनन्नी" देंमेनु, 34 येसुमी "नोफा दाइश्शा नेनो, आपो नाक्दो भाले ग्रीचा डोंइती खेयप सां सम्म 'मेको कली मतुइक्नुड, सु बाक्मे?' दे आं पबर्म देंनेवे" देंत। *यूहन्ना १३:३८ 35* मिनु पत्रुसमी "मप्रॉइनन्नी। गे नु काथा बाक्शा, साइक्वा पुंडसाक्ड हना यो, गेनायो मप्रॉइनन्नी" दे लोव थोक्शा देंत। मिनु शेंसीब नेल्लेमी यो मोन देंतेक्म।

गेथ्सेमनेमी प्रार्थना पशो

36 मिनु गेथ्सेमनेमी जाक्दीत्तेक्म। मिनु येसुमी "लो, एक बाक्कीने, गो इक्का आइक्वी लशा, प्रार्थना पशा लेशशा पीनुड" देंत। 37 पत्रुस नु जब्दी आ तौ निक्शी, सां आन कली इक्की आइक्वी लाइक्त्। मेना येसु आ थुं शुश खाइश्शो बाक्माक्त्। *मत्ती १७:१; हिब्रू ५:७ 38* मिनु सां आन कली "आं थुं शुश खाइश्शा, बेक्वा डा दुम्ती। मुल एकेर मइप्थु गो नु काथा बाक्कीन" देंमाक्त्। *यूहन्ना १२:२७ 39* मिनु इक्का डोंइती लशा, खुम्की पा खपीम बाप्शा "आं आफ, दुम्ब हना, एको कचौरा आं कली मतूपाइक्थु सोइक्तीने। तन्न आं दाक्वो मदुम्त्, इन दाक्वोशोन दुम्त्" दे प्रार्थना पशा, लेशशा जाक्माक्त्। *यूहन्ना १८:११; यूहन्ना ६:३८; हिब्रू ५:८ 40* मिनु लेशशा जाक्मेनु, सांफा आन कली इप्शो तामी बाक्त्। मिनु पत्रुस कली "छिन का यो मइप्थु, बाक्ने मचाप्नी? लो, सेंसीने। 41 थुं थाम्चा पुंडसीनीनु, पाप मपय, दे प्रार्थना पने। थुंमी पाइनुड चाप्नुड देंब, तन्न रांमी फाल्ने मचाप्ब" देंमाक्त्। *एफिसी ६:१८; हिब्रू २:१८ 42* मिनु लेशशा इक्का आइक्वी लशा "आं आफ, गोमी एको मतूथु सोइक्वा मदुम्बाक्त् हना, इन दाक्वो दुम्त्" दे प्रार्थना पवा बाक्त्। 43 मिनु लेशशा जाक्मेनु, निन्द्रामी दुक्शा बाक्वो तामी बाक्त्। 44 मिनु मेको आन कली निन्द्रामी दुक्वो तशा, लेशा लशा डोंइती डा पशो खोदेब पा प्रार्थना पवा बाक्त्। *२कोरिन्थी १३:८ 45* मिनु लेशशा, शेंसीब आन बाक्तीकेमी जाक्शा, मेको आन कली "इन दशो सानी, दे मुल यो इप्शो बाक्नी? तुइक्तीन, रागीम जरमेशो पापी आन गुइमी गेचा पुंडसीचा चिक्ताक्व। 46 बोक्कीन, लया। आं कली ग्याइक्वाइक्वा कली वारच पाइब जाक्चापु" देंत।

## येसु ग्याइक्चा पुंडसीशो

47 मो देंमेनु, आ शेंसीब यहूदामी ठेयब चढेब नु जोक्ब तुइक्ब खालपापुकीमी सोइश्शो हुलमी तरवार कोक्के कुरशा, येसु कली ग्याइक्च चाक्तीमी। 48 यहूदामी “सु कली पुक्पु पदु, मेको कली ग्याइक्चा” दे ग्याइक्च जाक्ब आन कली तुइक्पाइश्शो बाक्माक्त। 49 मिनु यहूदामी जाक्शा, येसु कली “रब्बी” दे बे मुष्ठा पुक्पु पाइक्तु। 50 मिनु येसुमी “आं वारच, मार पथ जाक्डे लो पावो” देंत। मिनु ग्याइक्च जाक्बपुकीमी येसु कली ग्याइक्ताक्म। 51 मिनु येसु नु काथा बाक्ब कामी तरवार ग्रि शोइश्शा, ठेयब चढेब आ गेय पाइब का आ नोफा दि खोइक्तु। 52 मिनु येसुमी “इ तरवार पिप्तो। मारदे हना तरवारम साइक्ब, तरवारमी साइक्चा पुंडसीब। उत्पत्ती ९:६ 53 आं आफ कली ‘आफ, इन स्वर्ग डा गेय पाइब हजार हजार आन कली सोइश्शा, आं कली वारच पा प्रॉइपाइय्नी’ दे पुंडता हना, गिश हना यो सोइश्शा, आं कली प्रॉइपाइक्ब, दे मतुइक्नीनी? १२ खेयप ६ हजार स्वर्ग डा गेय पाइब ब्रेक्शो बाक्ब। मत्ती ४:११ 54 मोदें पुंडता हना, साइ नेसी डा लोव्र दोपा थमा दुम्ने चाप्पा डा?” दे माइक्तु। 55 मिनु येसुमी हुल आन कली “तरवार कोक्के कुरशा, खुइ पाइब कली ग्याइक्च जाक्शो खोदेंब पा आं कली ग्याइक्च जाक्ती? नाक्त किंत किंत परमप्रभु यावे आ खिमी मुर आन दातेमी शेंना शेंन बाक्डानु, मग्याइक्तीनी। 56 परमप्रभु यावे आ लोव्र पाइब आन ब्रेक्शो लोव्र नेल्ल थमा दुम्चा माल्ब, मोपतीके आं कली ओदेंशो दुम्चा माल्ब” दे माइक्तीमी। मिनु आ शेंसीबपुकी येसु कली प्रॉइशा, साव सुव ब्राशा प्रोक्तेक्म।

## येसु ठेयब चढेब आ डोंइती

57 मिनु येसु कली ग्याइक्बपुकीमी मेकेर रे लाइश्शा, नेल्ल क्येडा ठेयब चढेब काइयाफास आ खिमी चाक्दीत्मे बाक्त। मेकेर सास्त्री नु जोक्ब तुइक्ब खाल्पा नेल्ल खुम्सीशा बाक्शो बाक्मा बाक्त। 58 पत्रुस यो आन नोनोले खोइश्शा, मेकेर जाक्दीम्माक्त। मिनु लाडगा ओव्रशा, नेल्ल क्येडा ठेयब चढेब आ गेय पाइबपुकी नु काथा बाक्शा, मिनु गेपुकी परमप्रभु यावे, इन परमप्रभु कली इन थुं नेल्लेमी, इन सोक्त नेल्लेमी नु इन बोल नेल्लेमी दाक्वा माल्नीनी। कली मार पाइनीमी, मार देंनीमी, दे कोव्रशा बाक्माक्त। 59 मिनु ठेयब चढेब नु जोक्ब तुइक्ब खालपापुकी मार पामे बाक्त देंशा हना, कछडी वोइश्शा, जोल पा दोस गेचा माल्मे बाक्त। मारदे हना येसु कली साइक्पाइक्चा माल्शो बाक्मा बाक्त। 60 मिनु सांकछीपुकी शुश चाक्शा यो, मेको आन लोव्र मगारमाक्त। मोपतीके दोसी सेल्ने मचाप्बमे बाक्त। नोले सांकछी निक्शी आस लोव्र 61 “एको ग्याइश्शो मुरुमी साबेर मार देंत देंशा हना ‘परमप्रभु यावे आ खिं प्रेशशा, नाक्त सांमी नक सेल्नुड’ देंत” देंसा बाक्त। प्रेरित ६:१४; यूहन्ना २:१९-२१ 62 मिनु नेल्ल क्येडा ठेयब चढेबमी बोक्शा, येसु आ डोंइती राप्शा “मेको निक्शीमी इ पर्बम देंशो लोव्र नेंशा, मार देंनेवे?” देंमेनु, येसुमी मारेइ मर्देमाक्त। 63 मिनु नेल्ल क्येडा ठेयब चढेबमी “ब्रॉइशा बाक्ब परमप्रभु यावे आ नेंमी हिल्लो पाइन्न, गे परमप्रभु यावे आ तौ ख्रीस्त नवे, दे मनवे?” देंमेनु, मत्ती २७:१२; यूहन्ना १०:२४ 64 येसुमी “गे आंमा देंतीनी। मुल डा मेरे रागीम जरमेशो कली नेल्ल सक्ति पाइश्शो आ ग्युरामी बाक्शो ताइनीनी। गोस्स तारी बाक्शा, यिना यिन पशो ताइनीनी, दे गो इन कली देंनुड” दे मदा बाक्त। भजन संग्रह ११०:१; मत्ती १६:२७; मत्ती २४:३०; दानीएल ७:३३ 65 मिनु नेल्ल क्येडा ठेयब चढेबमी आ फेक्शो वा खाक्शा “ये, परमप्रभु यावे कली शुक्शी लोव्र पाइबाक्त। मार सांकछी लोव्र माल्दा डा? आ शुक्शी पशो लोव्र गे नेल्लेमी नेंशा, सांकछी दुम्तीनी। लेवी २४:१६; यूहन्ना १०:३३; यूहन्ना १९:७ 66 मार पय, मिनु?” देंमेनु “साइक्चा पुंडसीब” देंमा बाक्त। 67 मिनु साइक्चा पुंडसीब देंमानु, का निक्शीमी आ कुल तोक्तमे बाक्त, का निक्शीमी तुप्मे बाक्त, का निक्शीमी चोव्रचो राप्शा यसैया ५०:६ 68 “ए ख्रीस्त, सुमी राम्मे, लो देन” दे शुक्शी पा मरिम्शो पदमे बाक्त।

## पत्रुसमी “मतुइक्नुड” देंशो

69 मेना पत्रुस लाडगामी बाक्माक्त। मिनु गेय पाइब मीश मुर कामी “गे यो गालील डा येसु नु काथा गाक्ब का नवे” देंमेनु, 70 मेकेर बाक्ब नेल्लेमी नेंचा डा पा “इ देंशो मरुबु। मार लोव्र पवी?” देंमाक्त। 71 मिनु लाडगामी गूमेनु, मेकेर गेय पाइब मीश मुर कामी “नासरथ डा येसु नु काथा गाक्ब का एको यो बाक्माक्त” दे मेकेर बाक्ब आन कली देंमाक्त। 72 मिनु पत्रुसमी “मेको मुर कली मतुइक्नुड” दे कसम जशा आ लोव्र थोक्शा देंमाक्त। 73 मिनु मेको एर ओंथ बाक्बपुकी जाक्शा, पत्रुस कली “गे यो काथा गाक्ब का बाक्डे बाक्त। इ ब्वाक्स नेंशा, गालील डा बाक्डे बाक्त, दे तुंडसीब” दे मदमे बाक्त। 74 मिनु पत्रुसमी “जोल पाता हना, परमप्रभु यावेमी सजाइ गेयील, एको मुर कली तुंडसीन मतुइक्नुड” दे कसम जशा, आ लोव्र थोक्शा देंमाक्त। मो देंमेनु, भाले ग्रीमाक्त। 75 मिनु पत्रुसमी “भाले ग्रीचा डोंइतीन सां खेयप सम्म मेको मुर कली मतुइक्नुड, देंनेवे” दे येसुमी देंशो ति फ्रुक्गा बाक्त। मिनु यूशा शुश डाक्माक्त।

27 मिनु नां सोव्रमेनु, ठेयब चढेब नु जोक्ब तुइक्ब खाल्पापुकीमी येसु कली साइक्पाइक्चान, दे सल्ला पामे बाक्त। 2 मिनु फ्रेंशा लाइश्शा, पिलातस, सरकार डा ठेयब मुर आ गुडमी जिम्मा गेमे बाक्त।

## यहूदा ग्युक्शा बेक्शो

3 ग्याइक्पाइक्चा वारच पाइब यहूदामी येसु कली साइक्चा, दे उजुर पाप्तेक्म देंशो नेंशा “मरिम्शो पडा बाक्त। मार पचा डा मुल” दे ठेयब चढेब नु जोक्ब तुइक्ब खाल्पा आन कली परमप्रभु यावे आ खिमी ग्युथ लशा मत्ती २६:१५ 4 “रिम्शो मुर कली ग्याइक्पाइक्चा वारच पा पाप पाता” देंमेनु “गोपुकीमी मार पाइनीकी? गे आंमा तुइक्तो” देंमा बाक्त। 5 मिनु चांदी मेको आन डोंइती ताइश्शा, मेकेर रे फो यूशा लशा, ग्युक्शा बेक्माक्त। प्रेरित १:१८-१९

## हुशेम ग्याप्शो रू

6 ठेयब चढेबपुकीमी मेको ताइश्शो चांदी गुप्शा “परमप्रभु यावे कली चढेशो क्येट नु काथा वोइक्चा मदुम्ब। मारदे हना हुश के दाम बाक्ब” दे ब्यक्स्था २३:१९ 7 सल्ला पशा, खप के ग्योब सेल्ब आ रू का ग्याप्मे बाक्त। मेको रू यहूदी धर्म मपाइब यरूसलेममी बेक्शो मुर आन कली थिम्तीके पामे बाक्त। 8 मेको रू कली मुल सम्म “हुश रू” देंसीब। 9 मोदेंशो आन पशोमी साइ नेसी परमप्रभु यावे आ लोव्र पाइब येरमीयामी ब्रेक्शो लोव्र थमा दुम्त। आ ब्रेक्शो लोव्र चहिं ओदेंशो बाक्ब “इसाएल आ खिं डा मुरपुकीमी एको मुर आ मोल ३० टुक्रा चांदी डा बाक्ल देंतेक्म। 10 मिनु ३० टुक्रा चांदी लाइश्शा, खप के ग्योब सेल्ब आ रू ग्याप्तेक्म, दे परमप्रभु यावेमी लोव्र पपाइक्ती” दे ब्रेक्शो बाक्ब। येरमीया ३२:९, जकरिया ११:१२-१३

## येसु पिलातस आ डोंइती राप्शो

11 येसु सरकार डा ठेयब मुर आ डोंइती राम्मेनु, मेकोमी “यहूदी आन पिप नवे?” दे हिल्लो पवानु “गे आंमा देंतीनी” देंमाक्त। 12 मिनु ठेयब चढेब नु जोक्ब तुइक्ब खालपापुकीमी शुश दोस गेमेनु, ब्वालेइ पा बाक्माक्त। मत्ती २६:६३; यसैया ५३:७ 13 मिनु पिलातसमी येसु कली “एकोपुकीमी इ कली शुश दोस गेशा, लोव्र पशो मनेंनी?” देंमेनु, 14 लोव्र का यो मलेत्ता बाक्त। मिनु सरकार डा ठेयब मुर आ छक लाक्माक्त। यूहन्ना १९:९

15 पास्सा नाक्त सरकार डा ठेयब मुर आन दाक्शो मुर का कली जेल्खान रे प्रॉइतीके पशो बाक्माक्त। 16 बारब्बा माइश्शो मरिम्शो पाइब मुर का चोक्सीशो बाक्माक्त। 17 मिनु सरकार डा ठेयब मुरुमी “बारब्बा कली प्रॉइचा, दे ख्रीस्त देंशो येसु कली प्रॉइचा? तेको कली प्रॉइचा?” दे हिल्लो पामी बाक्त। 18 मारदे हना आन थुं चोशा, येसु कली ग्याइक्पदमे बाक्त, दे तुइक्ता बाक्त, मोपतीके येसु कली प्रॉइचा माला बाक्त। यूहन्ना १२:१९

19 मिनु निसाफ पचा कली बाक्मेनु, आ मीशेमी “मेको सुइ कली मरिम्शो मपाइब कली मारेइ मपतीने। मारदे हना मुलाक्दो इम्डानु, मेको आ पर्बम गो

शुश श्येत जचा डा डोमु ताता" दे शोव्रथ सोइक्ता बाक्त। 20 तन्न ठेयब चढेब नु जोक्ब तुइक्ब खाल्पापुकीमी मुर आन कली हुल पोक्शा "बारब्बा कली प्रॉइचा, येसु कली साइक्चा" दे रेयके पा पुंडपदमे बाक्त। 21 मिनु पिलातसमी "मुल सु कली प्रॉइचा?" देंमेनु "बारब्बा कली प्रॉइचा, सरकार" देंमा बाक्त। 22 मिनु पिलातसमी "ख्रीस्त देंशो येसु कली मार पदु, मिनु?" देंमेनु "शीमी केष्ठा कांटी थोक्शा क्याइश्शा साइक्चा माल्ब, सरकार" देंमा बाक्त। 23 मिनु "मार मरिम्शो पवा, मार दोस गेचा" देंमेनु "शीमी केष्ठा कांटी थोक्शा क्याइश्शा साइक्चा माल्ब" दे रेयके पामे बाक्त। 24 मुरपुकीमी मोर्देशो रेयके पा प्रेक्शो तशा "मुल येसु कली प्रॉइने मचबु" दे मिम्शा "एको सुइ कली मरिम्शो मपाइब आ हुश इन गुइमी ला लुम्सेक्ल, आं गुइमी मलुम्सेक्ल" देंशा, नेल्ल आन कुल आ गुइ चिक्शा कौंडीदीमी बाक्त। *ब्यवस्था* २१:६ 25 मिनु हुलपुकीमी "आंइ कली नु आंइ चच युइ आन कली लुम्सेक्ल" दे रेयके पामे बाक्त। *प्रेरित* ५:२८ 26 मिनु बारब्बा कली प्रॉइशा सोइक्ता बाक्त। येसु कली कोर्राम युक्पाइश्शा शीमी केष्ठा कांटी थोक्शा क्याइश्शा साइक्चा कली आ सिपाही आन गुइमी जिम्मा गेमी बाक्त।

### येसु कली क्याइश्शा साइश्शो

27 मिनु सिपाहीपुकीमी येसु कली हेरोद आ दरवार डा सिपाही बाक्तीकेमी चाक्दीश्शा, आन पल्टन नेल्ल खुष्ठा, शुक्शी पदमे बाक्त। 28 आ फेक्शो वा प्रुइश्शा, लल वा फेक्पा 29 चू के सिरपेच सेल्शा, आ पियामी गुप्पा, सुन के कोक्के, दे किन्दा आ ग्युरा गुइमी शेपदमे बाक्त। मिनु आ डौंइती आन पोक्च थेक्शा "हे यहूदी आन पिप, सेउ ताक्कीन" दे शुक्शी पा सेउ पदमे बाक्त। 30 मिनु आ कुलम तोक्तमे बाक्त। मेको किन्दा रोइश्शा, आ पियामी तेल्मे बाक्त। *यसैया* ५०:६ 31 मिनु शुक्शी पने थुम्शा, लल वा प्रुइश्शा, आंमा आ वा फेक्पा शीमी केष्ठा कांटी थोक्शा क्याइश्शा साइक्चा कली लदमे बाक्त। 32 मिनु लना लन पामेनु, साइरेनी डा सिमोन नें पाइश्शो मुर का गुम्मे बाक्त। मिनु मेको कली येसु कली क्याइक्तीक शी "लो, कुर कि कुर" दे कुरपदमे बाक्त। 33 मिनु गोल्गथा माइक्तीकेमी चाक्दीत्मे बाक्त। गोल्गथा कली खप्परे यो देंसीब। 34 मिनु ग्युरशो अडगुर शांबु खाइल ब्वाइश्शा तूतीके सेल्शा, तूचा गेमेनु, येसुमी थाम्शा डा मिन, तूने मबिस्से बाक्त। *भजन संग्रह* ६९:२२ 35 मिनु शीमी केष्ठा कांटी थोक्शा क्याइश्शा, फेन्टे ग्यारशा आ वासी योक्सीशा, *यूहन्ना* १९:२४ 36 खाल पा बाक्मा बाक्त। 37 "यहूदी आन पिप येसु" दे आ कली दोस गेशा ब्रेक्शो आ पिया तार एरे शीमी केत्तमे बाक्त। 38 मिनु खुइ निक्शी आस कली यो आ कली खोर्देशो पा आ ग्युरा नु पेरा गे क्युकगमे बाक्त। 39 मिनु कोव्रब मुर शुश जाक्शा, आन पिया हिम्शा *भजन संग्रह* २२:८ 40 "परमप्रभु यावे आ खिं प्रेशशा, सां नाक्तीमी नक सेल्लुड देंते। खोइ मिनु, सेल्ने चबी? थमान परमप्रभु यावे आ तौ नवे हना, शीमी केष्ठा कांटी थोक्शा क्याइश्शो रे ब्रौइशा यीवो" दे शुक्शी पामे बाक्त। *मत्ती* २६:६१; *यूहन्ना* २:१९ 41 ठेयब चढेब, सास्त्री नु जोक्ब तुइक्ब खाल्पापुकीमी यो 42 "शुश आन कली श्येत रे प्रौइना प्रौइन गाक्बाक्माक्त। आंमा आ कली चहिं प्रौइने मचाप्बाक्माक्त। इं इस्त्राएल डा पिप बाक्ब, मोपतीके शीमी केष्ठा कांटी थोक्शा क्याइश्शो रे ब्रौइल। ब्रौइने चापु हना, गो आ लोव्र नेल्ल थमा सुइक्नया। 43 परमप्रभु यावे कली थमा सुइक्बाक्माक्त। मोपतीके परमप्रभु यावेमी एको कली दाक्ताक्व हना, एको श्येत रे प्रोनल। 'परमप्रभु यावे आ तौ नड' देंत, मोपतीके परमप्रभु यावे आ दाक्शो बाक्माक्त" दे शुक्शी पामे बाक्त। *भजन संग्रह* २२:९ 44 आ ग्युरा नु पेरा गे क्युकशो खुइ निक्शीमी यो मोर्देशो पान शुक्शी पदसे बाक्त।

### येसु बेक्शो

45 मिनु नाक्ती १२ बजे रे ३ बजे सम्म नेल्ल रागीमी नां रिक्शो खोर्देशो पा छिडछिड दुम्त। 46 ३ बजे गे येसुमी "एली, एली, लामा आसबथानी" दे वाइ ब्रेम्माक्त। आ देंशो मार रुम्सीब देंशा हना "परमप्रभु यावे, आं परमप्रभु, आं कली मारदे प्रॉइयीनी" देंशो रुम्सीब। *भजन संग्रह* २२:२ 47 एर ओंथ बाक्बपुकीमी मो देंशा वाइ ब्रेश्शो नेंशा "एलीया कली ब्रेत्ताक्व" देंमुमा

बाक्त। 48 मिनु कामी रुवामी ग्युरशो तूतीके नुष्ठा, कोक्केम फ्रेंशा, युष्ठा गेचवा बाक्त। *भजन संग्रह* ६९:२२ 49 मिनु मेकेर बाक्बपुकीमी "कते, वारच पाइक्थ एलीया जाक्बा कौं, कोव्रय" देंमा बाक्त। 50 मिनु येसुमी लेंशा वाइ ब्रेश्शा, आ सोक्त प्रोना बाक्त।

### येसु बेक्मे नोले चिन्ड गूशो

51 मिनु बेक्म चोटी मार दुम्माक्त देंशा हना, परमप्रभु यावे आ खिं डा आगा डा कोठामी बारेशो वा इर रे उइ सम्म उइक्थ पा जेर गाक्माक्त। खिनु कुशा, *प्रस्थान* २६:३१-३३; *इतिहास* ३:१४ 52 सेरथे फुल्लु नेल्ल एश्शा ब्रोल्मा बाक्त। लास थिम्तीके यो एश्शा ब्रोल्मा बाक्त। मिनु परमप्रभु यावे कली थमा सुइश्शा बेक्शोपुकी सेंसमा बाक्त। 53 येसु सेंसीशो नोले मेकोपुकी लास वोइक्तीके रे गूशा, सहर जाक्दीश्शा, शुश मुर आन कली तपांडसाकम।

54 येसु कली खाल पाइब कप्तान नु सिपाहीपुकीमी खिनु कुशा नु मोपा हिंचा डा गेय दुम्शो तशा, शुश हिंशा "एको परमप्रभु यावे आ तौ बाक्माक्त" देंमुमा बाक्त।

55 गालील रे यरूसलेम सम्म येसु कली वारच पना पन काथा गाक्ब मीश मुरपुकीमी डोन रे कोव्रशा बाक्मा बाक्त। *लूका* ८:२-३ 56 मोपा कोव्रब का माग्दाला डा मरीयम बाक्माक्त। का याक्ब नु योसेफ आस ममा मरीयम बाक्माक्त। का जब्दी आ तौ निक्शी आस ममा बाक्माक्त।

### येसु आ लास पुक्खीमी वोइश्शो

57 मिनु नां रिक्मेनु, येसु आ नोले खोइक्ब अरीमाथीया डा योसेफ माइश्शो शौप पाइश्शो मुर कामी पिलातस कली गुम्थ लशा, *ब्यवस्था* २१:२२, २३ 58 "येसु आ बेक्शो रां लाइक्चा गेयीनी" दे पुना बाक्त। मिनु पिलातसमी लाइक्चा गेवा बाक्त। 59 मिनु योसेफमी लास बुश नक वामी गिल्शा, 60 आंम आ लास वोइक्तीके सेल्शो रोंगु डा पुक्खीम ओंइशा वोदा बाक्त। मिनु पुक्खी कली ठेयब फुल्लुमी सुशा वोइश्शा गाक्माक्त। 61 माग्दाला डा मरीयम नु अर्को मरीयममी योसेफ आ नोले खोइश्शा लशा, लास वोइक्तीके पुक्खी आ डौंइती बाक्सा बाक्त।

### फुल्लुम लाहा छाप थोक्शो

62 मेको नेल्ल दुम्शो आ दीसा ठेयब चढेब नु फरिसीपुकीमी पिलातस कली गुम्थ लशा *मर्कूस* १५:४२ 63 "सरकार, एको नेल्ल आन थुं क्याल्पाइक्ब मबेक्थु बाक्मेनु, मार देंत देंशा हना 'आं बेक्शो नित्थ नाक्त बेक्शो रे सेंपांडसीचा पुंडसीनुड' देंशो फुक्त्तक। *मत्ती* २०:१९ 64 मोपतीके मेको आ लास वोइक्तीकेमी सां नाक्त सम्म खाल पाइब वोइक्चा माल्ब। मारदे हना मेको आ नोले खोइक्बपुकीमी आ लास खुइ पा लाइश्शा, मुर आन कली 'बेक्शो रे सेंसाक्व' दे शेंना शेंन गाक्तेक्म हना, डौंइती रे पशो क्येडा शुश जोल गूब" दे पुन्मे बाक्त। 65 मिनु पिलातसमी "लो, सिपाही आन कली सोइक्नुडमी। गेपुकी यो चाप्नी सम्म कोव्रडीन" देंशा, आन देंशो बिश्शा सोइक्तीमी बाक्त। 66 मिनु सिपाहीपुकी नु लशा, मेक जाक्दीश्शा, सुशो फुल्लुमी लाहा छाप थोक्शा, खाल पा बाक्मा बाक्त।

### येसु बेक्शो रे सेंसीशा तपांडसीशो

*मर्कूस* १६:३-१०; *लूका* २४:१-१०; *यूहन्ना* २०:१-१८

28 मिनु नाइक्तीक नाक्त सां लाक्शा, हप्ता डा डौंइती नाक्त नां सोव्रसोव्रमी माग्दाला डा मरीयम नु अर्को मरीयम येसु आ लास वोइक्तीके कोव्रथ लसा बाक्त। *प्रेरित* २०:७; *१कोरिन्थी* १६:२; *प्रकाश* १:१० 2 मिनु जाक्दीस्सानु, ठेयब खिनु कुमाक्त। मारदे हना परमप्रभु यावे आ स्वर्ग डा गेय पाइब का यिशा, सुशो ठेयब फुल्लु तिल्शा, मेको आ तारी निस्से बाक्त। 3 मेको आ कुल चिला पशो खोर्देशो नु आ वा बुबु पा छेडछेड तांडसे बाक्त। *मत्ती* १७:२; *प्रेरित* १:१० 4 मेको कली तशा, मेकेर खाल पाइब सिपाहीपुकी हिंशा खिंखि पा थशा गोल्मा बाक्त। 5 मिनु परमप्रभु यावे आ स्वर्ग डा गेय पाइबमी मीश मुर आस कली "महिनीसे। गे शीमी

क्याइश्शा साइश्शो येसु कली माल्थ पिंसी ममाइ? <sup>6</sup> मुल एके मबा। मारदे हना डोंइती देंशो खोदेंशो पा बेक्शो रे सेंचा पुंडसाक्व। प्रभु कली वोइक्तीके कोव्रडीसे। मत्ती १२:४०; मत्ती १६:२१; मत्ती १७:२३; मत्ती २०:१९ <sup>7</sup> मुल एके रे फ्रा लेश्शा लशा, आ शेंसीब आन कली 'प्रभु बेक्शो रे सेंचा पुंडसे बाक्त। इन डोंइती लशा, गालील जाक्दीप्व। मिनु गे मेकेर गुम्चा ताइनीनी' दे शोवथ लसे। इस कली तुइक्पाइक्त्तन्सी, मिनु मप्रैदीसे" दे सोइक्तीम्सी बाक्त। मत्ती २६:३२ <sup>8</sup> मिनु मेकेर रे गूशा, हिंसा यो बाक्त, ग्येरसीसा यो बाक्त। मिनु गुरुर पा दोरशा, मेको लोव्र शेंचा, दे आ शेंसीब आन कली गुम्थ लसा बाक्त।

<sup>9</sup> मिनु दोरना दोरन लसानु, मार दुम्माक्त देंशा हना, येसुमी मेको आस कली गुम्सी बाक्त। मिनु "आसीक रसील" दे सेत्तीम्सीनु, आ नेक्था जाक्शा बाप्शा, आ खोइल थिशा मान पदसे बाक्त। <sup>10</sup> मिनु येसुमी "महिनीसे। येसु कली गुम्थ गालील लने, दे आं लोक्ब आन कली शोवथ लसे" दे सोइक्तीम्सी बाक्त। हिब्रू २:११

खाल पाइबपुकीम घूस जशो

<sup>11</sup> मेको निक्शी दोरना दोरन लसानु, सिपाही का निक्शी सहरमी जाक्दीश्शा, ठेयब चढेब आन कली मेकेर मार दुम्मे, मेको नेल्ल शोव्रडमे बाक्त। <sup>12</sup> मिनु ठेयब चढेब नु जोक्ब तुइक्ब खाल्पापुकी खुम्सीशा "मुल

मार पय?" दे लोव्रसी पमुमा बाक्त। मिनु सिपाही आन कली शुश क्येट गेशा <sup>13</sup> "लो, मुर आन कली मार देंचा देंशा हना, नाक्दो इप्कानु, आ शेंसीबपुकी जाक्शा, लास खुइ पामे बाक्त, दे लोव्र फ्रने। मत्ती २७:६४ <sup>14</sup> सरकार डा ठेयब मुरुमी नेंतु हना, नेल्ल गारपाइक्नीकी, इन कली मारेइ मदुम्ब" देंमा बाक्त। <sup>15</sup> मिनु सिपाहीपुकीमी क्येट ताक्शा लशा, मेको मोदेंशो लोव्र तेइ तेइ फ्रामे बाक्त। मुल सम्म यहूदी आन दातेमी एको लोव्र लीशो बाक्ब।

येसु आ लोव्र नेल्ल कली शेंदीन

<sup>16</sup> येसु आ शेंसीब ११ जना चहिं येसुमी तुइक्पाइश्शो गालील डा डांडामी जाक्दीत्तेक्म। <sup>17</sup> मिनु येसु कली तामेनु, मान पाम्तेक्म। का निक्शीमी चहिं दल्गीर पामे बाक्त। <sup>18</sup> मिनु येसु नेल्ल आन नेक्था जाक्शा "स्वर्ग नु रागी डा अधिकार नेल्ल आं कली गेशो बाक्ब। मत्ती ११:२७; एफिसी १:२०-२२ <sup>19</sup> मोपतीके रागीम नेल्ल हिरशा, नेल्ल जात, थर डा मुर आन कली आं पर्बमी शेंशा, आं नोले खोइक्ब शेंसीब सेलीने। आं आफ, परमप्रभु यावे, आ तौ नु परमप्रभु यावे आ सोक्त आन नेमी मेको आन कली ब्वाक्कुम खुम्शा गुंडदीने। मत्ती २४:१४; मर्कुस १६:१५-१६; २कोरिन्थी ५:२० <sup>20</sup> मिनु गोमी इन कली मार मार शेंदन्नी, मेको नेल्ल मेको आन कली शेंशा पपतीने। नेनीने, रागी मनुप्ची सम्म गो गेनायो गेपुक नु बाक्नुड" देंत। मत्ती १६:२०



# मर्कूस

एको किताब ब्रेक्ब मुर मर्कूस बाक्ब। मेकोमी आंम आ पर्वम ब्रेक्शो बाक्ब। मेको आ यहूदी नें यूहन्ना बाक्त, मेको आ रोमी नें चहिं मर्कूस बाक्त। मर्कूस बारनाबास आ याच बाक्त। मेको पावल नु बारनाबास काथा लमा बाक्त। तन्न मेको आस कली प्रॉइशा, यरूसलेम लेम्माक्त। नोले पवलम मेको आ पर्वम रिम्शो लोत्र पवा बाक्त। मेको कली लेंशा, रोम सहरम वारच पचा कली ब्रेक्शो बाक्त। मर्कूसमी पत्रुस कली वारच पा, आ शेंतीक लोत्र रोमी लोत्रम सेला बाक्त। मिनु मेको लोत्र मसाम्चा कली नेल्ल ब्रेक्ता बाक्त।

मर्कूस ६३-६४ ए. डी. रोम सहर जाक्माक्त। मेना थमा सुइक्ब आन कली रोम डा सिजर नेरो आ पतीकेमी खेदा पचा गोत्रमे बाक्त। मिनु मेको किताब ६४-६५ ए. डी. मेर खोदेंशो ब्रेक्शो बाक्ब। तन्न ७० ए. डी. क्येडा डोंइती दुम्चा माल्ताक्व। मारदे हना यरूसलेम सहर कली खतम सेल्लेके आ पर्वम मारदे मब्रेक्शो बाक्त।

मर्कूसमी आ किताबम येसु आ पशो छक लाक्वा डा गेय आ पर्वम शुश ब्रेक्ताक्व। मेको पत्रुस आ शेंतीक लोत्र रे बाक्ब। येसु आ गेय डा नेल्ल क्येडा ठेयब लोत्र बाक्नीम। येसु परमप्रभु यावे आ गेय पाइब दुम्तीके किताब नेल्लेम कोंइशो बाक्ब, देंशो बाक्ब।

## ब्वाक्कुम खुम्शा गुंडब यूहन्ना

मती ३:१-१२; लूका ३:१-१८; यूहन्ना १:१९-२७

१ एको परमप्रभु यावे आ तौ येसु ख्रीस्त आ पर्वम ब्रेक्शो ग्येरपाइक्ब लोत्र बाक्ब। मेको लोत्र दोदेंशो पा गोइब देंशा हना, २ परमप्रभु यावे आ लोत्र पाइब यसैयामी ब्रेक्शो लोत्रमी मार ब्रेक्शो बाक्त देंशा हना “नेनो, इ डोंइती आं लोत्र पाइब सोइक्नुड। मेकोमी इ लां थेल्ब। मती ११:१०  
३ गोरशो रागीमी सेंदा कामी ‘प्रभु आ लां थेलीने। आ गाक्तीके लां फुल्लु प्रोक्शा थेलीने’ देंशो नेंसीब” दे ब्रेक्शो बाक्ब। मलाकी ३:१; यसैया ४०:३  
४ ब्वाक्कुम खुम्शा गुंडब यूहन्ना गोरशो रागीम गूशा, मुर आन कली “इन पाप क्याम्चा कली इन थुं परमप्रभु यावे गे लेत्तीने। आंइ थुं लेत्ताक्व दे कोंइचा कली ब्वाक्कुम खुम्शा गुंडपाइसीने” दे लोत्र पाइक्बाक्माक्त। ५ मिनु यहूदीया रागी नु यरूसलेम सहर डा मुर नेल्ल मेकेर जाक्शा, आन पाप शोत्रशा, यूहन्ना रे पा यर्दन खोलाम खुम्शा गुंडचा पुंडसमा बाक्त।  
६ यूहन्नामी दलओंठ आ चां के प्रोत्रशो वा फेक्बाक्माक्त। कुशुल के किष्पुर् किष्वाक्माक्त। मिनु सल्ला माले ब्वशा नु रोका खुदो जशा बाक्बाक्माक्त। ७ मिनु मुर आन कली “आं नोले जाक्ब आं क्येडा सक्ति पाइशो बाक्ब। गो मेको आ डोंइती बाप्शा, आ जुत्ता पुइक्वा लायो मशिरनुड। ८ गो इन कली ब्वाक्कुम खुम्शा गुंडताक्नी। मेकोमी चहिं इन कली परमप्रभु यावे आ सोक्तीमी खुम्ब” दे मुर आन कली शेंना शेंन बाक्बाक्माक्त।

## येसु ब्वाक्कुम खुम्शा गुंडचा पुंडसीशो

मती ३:१३-४:११; लूका ३:२१-२२; लूका ४:१-१३; यूहन्ना १:३२-३४

९ मेना येसु गालील रागी डा नासरथ सहर रे गाक्शा, यूहन्ना आ बाक्तीकेमी जाक्माक्त। मिनु यूहन्ना रे पा यर्दन खोलामी ब्वाक्कुम खुम्शा गुंडपाइसे बाक्त। लूका २:५१ १० मिनु ब्वाक्कुमी गुम्शा गूमेनु, सरीड रोक्सीशा, परमप्रभु यावे आ सोक्त परवा खोदेंशो पा यिशा, आ तारी जुक्शो तवा बाक्त। ११ मिनु सरीड रे “आं दाक्शो तौ नवे। इ कली तशा थाम्पा ग्येरसीनुड” देंशो सेंदा नेंसे बाक्त। मर्कूस ९:७

## येसु थुं थाम्चा पुंडसीशो

१२ मिनु नोले परमप्रभु यावे आ सोक्तीमी येसु कली गोरशो रागीम लदा बाक्त। १३ मिनु गोरशो रागीम ४० नाक्त सम्म बाक्माक्त। मेकेर बाक्मेनु, सैतान रे पा थुं थाम्चा पुंडसे बाक्त। मेको गोरशो रागी डा जन्तुपुकी नु बाक्माक्त। परमप्रभु यावे आ स्वर्ग डा गेय पाइबपुकीमी मेको कली वारच पामे बाक्त।

## येसुम परमप्रभु आ लोत्र नेंपाइशो

१४ यूहन्ना जेल्खानमी चोक्चा पुंडसे नोले, येसुमी गालील रागीमी परमप्रभु यावे आ ग्येरपाइक्ब लोत्र नेंपाइक्ना पाइक्न गाक्माक्त। १५ मेकोमी “परमप्रभु यावे आ देंशो नाक्त जाक्त। आ राज्य इन नेक्था जाक्शो बाक्ब। इन थुं परमप्रभु यावे गे लेशशा, आ ग्येरपाइक्ब लोत्र थमा सुतीने” दे नेंपाइक्ना पाइक्न गाक्माक्त। गलाती ४:४

## येसुमी शेंसीब आन कली ब्रेक्शो

मती ४:१८-२२; लूका ५:१-११; यूहन्ना १:३५-५१

१६ मिनु येसु गालील समुन्द्र आ नेक्था हिरसेनु, सिमोन नु आ लोक्ब अन्द्रीयास ग्याइल आप्शा, डांइ रेन्ना रेन्न बाक्शो तवा बाक्त। मेको निक्शी डांइ रेक्ब बाक्सा बाक्त। १७ मिनु येसुमी मेको आस कली “आं नोले खोइय्यीसी। मिनु मुर आन कली रेक्ब सेल्लन्सी” दे माइक्सी बाक्त। १८ मिनु ग्याइल थु था प्रॉइशा, आ नोले खोइशा गाक्सा बाक्त।  
१९ मिनु इच्ची आइक्वी लशा, जब्दी आ तौ निक्शी याक्ब नु यूहन्ना वोबु आस कली डोंगाम बाक्शा, गाक्शो ग्याइल प्रोत्रना प्रोत्रन पशो ताम्सी बाक्त। २० मिनु मेको आस कली यो ब्रेक्तीम्सी बाक्त। मिनु आस आफ जब्दी नु गेय पाइब आन कली प्रॉइशा, आ नोले खोदसे बाक्त।

## वोल कली गुंडशो

मती ८:१४-१७; लूका ४:३१-४४

२१ मिनु कापेरनाउम सहरम जाक्दीम्मा बाक्त। मिनु नाइक्तीक नाक्त येसुमी गुम्तीक खिं लशा, मुर आन कली शेंदीमी बाक्त। २२ मेको आ शेंशो नेंशा, नेल्ल छक लाक्मा बाक्त। मारदे हना सास्त्री आन लोत्र खोदेंशो ममाइ। अधिकार पाइशो लोत्र पा शेंदीमी बाक्त। सास्त्री यहूदी आन कली परमप्रभु यावे आ अरेशो लोत्र शेंब बाक्शो बाक्तेक्म। मती ७:२८-२९ २३ मिनु मेको गुम्तीक खिंमी ग्रांरा दिचा डा वोलमी सुम्शो मुर का बाक्माक्त। २४ मिनु मेको वाइ ब्रेक्शा “ए नासरथ डा येसु, मार पमुया डा? आंइ कली खतम पोक्थ जाक्नी? गो इन कली तुइक्नीकी। गे परमप्रभु यावे आ योत्रशो ननी” देंमा बाक्त। मर्कूस ५:७ २५ मिनु येसुमी वोल कली “सिक्सी पावो। मिनु गूडो” दे हुइक्ता बाक्त। मर्कूस ९:२६ २६ मिनु ग्रांरा दिचा डा वोलमी मुर कली दिड खोल्शा, वाइ ब्रेक्शा गूमाक्त। २७ मोदुम्शो तशा, मुरपुकी छक लाक्शा “मार बाक्म माइ? नक शेंतीक लोत्र बाक्म कोर में? अधिकार पाइशो लोत्र पवानु, ग्रांरा दिचा डा वोलम लायो टीबाक्तेक्म” देंमुमा बाक्त। २८ मिनु गालील रागीमी तेइ तेइ येसु आ पर्वम लोत्र ब्रना ब्रन लमाक्त।

## रोड पाइब आन कली सापाइश्शो

29 मिनू वोल कली गुंडशा, येसु गुम्तीक खिं रे सिमोन नु अन्द्रीयास वोबु आस खिंम जावदीम्माक्त। मिनू याकूब नु यूहन्ना यो येसु नु काथा बाक्सा बाक्त। 30 मिनू जावदीम्मानु, सिमोन आ शिमी जरो पा गोल्शो बाक्सा बाक्त। मिनू येसु कली तुइक्पदमे बाक्त। 31 मिनू येसु मेको आ नेक्था लशा, आ गुड ग्याइश्शा पोक्गा बाक्त। मोपा पोक्गानु, जरो जाम्माक्त। मिनू सेस दुम्शा, मेको आन कली मान पा थुल्मी बाक्त।

32 मिनू नां रिक्मेनु, मेको सहर डा मुरपुकीमी रोड पशो नु वोलम सुम्शो मुर नेल्ल आन कली चाक्मे बाक्त। 33 सहर डा मुर नेल्ल खिं डा लाप्चो आ डोंइती खुम्समा बाक्त। 34 मिनू येसुमी रोड पशो शुश मुर आन कली सापदा बाक्त। मिनू शुश वोल आन कली हुइश्शा खेरमी बाक्त। वोल आन कली लोव्र पचा मगेवा बाक्त। मारदे हना वोलपुकीमी येसु कली तुइश्शो बाक्तेक्म। प्रेरित १६:१७-१८

35 आ दीसा सुनी नां मसोव्रथु, येसु बोक्शा मेकेर रे गाक्शा, सुड मबाक्तीकेमी जावदीश्शा, प्रार्थना पवा बाक्त। मत्ती १४:२३; मत्ती २६:३६; लूका ५:१६; लूका ११:१ 36 मिनू सिमोन नु मेको नु बाक्बपुकीमी येसु कली माल्मे बाक्त। 37 मिनू गुम्शा, येसु कली “मुर नेल्लेमी इन कली माल्शो बाक्नीम” दे मदमे बाक्त। 38 मिनू येसुमी “मेकेर रे लशा, एर ओंथ गाउं सहर हिरशा लय। मारदे हना मेकेर यो शेंथ जाक्ती” देंमाक्त। 39 मिनू गालील रागी नेल्ल हिरशा, गुम्तीक खिंमी शेंबाक्माक्त। वोल आन कली खेरबाक्माक्त।

## कोर पाइब कली सापाइश्शो

मत्ती ८:२-४; लूका ५:१२-१६

40 मिनू कोर पाइब का जाक्शा, येसु आ डोंइती आ पोक्च थेक्शा “सापाइक्चा दाक्ताक्नी हना, आं कली सापाइक्चे चाप्नीनी” दे सेउ पशा पुना बाक्त। 41 मिनू येसुमी शिशी पा आ गुड दिंशा, कोर पाइब कली थिशा “गो सापाइक्चा दाक्नुड। साडो” देंमाक्त। 42 मो देंमेनु, कोर सामाक्त। 43 मिनू येसुमी “सुड कली मशेंदो। मर्कूस ३:१२ 44 चढेब आ डोंइती लशा, इ साशो रं कोंइदो। मिनू मुर नेल्ल आन कली ‘गो साती’ दे तुइक्पाइक्चा कली मोसाम देंशो खोदेंशो पा चढेवो” दे माइश्शा सोइक्ता बाक्त। मर्कूस ७:३६; लेवी १४:२-३२ 45 मिनू साशो मुर मेकेर लशा, दोपा सामे, मेको लोव्र तेइ तेइ ब्रपदा बाक्त। मोदेंशो लोव्र ब्रतीके येसु सहर सहरमी गाक्ने मचबा बाक्त। मोपतीके शुश मुर मबाक्तीकेमी बाक्माक्त। तन्न मुरपुकी तेइ तेइ रे जाक्बाक्मा बाक्त।

## गुड खोइली मदुक्ब कली सापाइश्शो

मत्ती ९:१-८; लूका ५:१७-२६; यूहन्ना १:१९-२७

2 नाक्त का निक्शी नोले कापेरनाउम लेम्माक्त। मिनू मुरपुकीमी “येसु खिंमी बाक्ब” दे तुइक्तमे बाक्त। 2 मिनू मेकेर शुश मुर खुम्सीशा, लाप्चोमी यो मुरपुकी देल्मा बाक्त। मिनू येसुमी मेको आन कली परमप्रभु यावे आ लोव्र शेंदीमी बाक्त। 3 मिनू ४ जना मुरपुकीमी गुड खोइल मदुक्ब मुर का कुरशा चाक्मे बाक्त। 4 शुश मुर देल्लेके येसु आ डोंइती चाक्दीन्ने मचाप्मे बाक्त। मिनू खिं डोइश्शा, फुल्लु याक्शा, ऑइतीके सेल्मे बाक्त। मिनू गुड खोइल मदुक्ब कली कुरशो ब्राख्ये एर ओंथ डोरीम पाइश्शा, ओंखां पा येसु आ डोंइती तोक्गमे बाक्त। 5 मिनू येसुमी मेको आन कली मो पशो तशा, थमा सुइय्थीमी बाक्त, दे तुइक्ता बाक्त। मिनू गुड खोइली मदुक्ब कली “आं तौ, इ पाप क्याम्साक्व” देंमाक्त। 6 मेकेर सास्त्रीपुकी यो बाक्शो बाक्मा बाक्त। 7 मेकोपुकीमी येसु आ लोव्र नेंशा, आन थुंमी “दोदेंशो लोव्र पवा? परमप्रभु यावे कली शुक्शी पाइबाक्त। सुमी पाप क्याम्ने चाप्बा डा?” दे मिम्तमे बाक्त। भजन संग्रह १३०:४; यसैया ४:३, २५ 8 मिनू येसुमी आन मिम्शो तुइश्शा, मेको आन कली “मारदे मोदेंशो मिम्तीनी?” 9 गुड खोइल मदुक्ब कली ‘इ पाप क्याम्साक्व’ देंचा देय ‘छुल बोक्शा, इ ब्राख्ये कुरशा, एर ओंथ हिरशा कोंइदो’ देंचा, तेको सक्ति कोंइतीक लोव्र बाक्बा?

10 रागीमी जरमेशोमी पाप क्याम्चा अधिकार तशो बाक्ब, दे गेपुकीमी यो तुइक्ताक्नी” देंमाक्त। मिनू गुड खोइली मदुक्ब कली 11 “छुल बोक्शा, इ ब्राख्ये कुरशा, इ खिं लेतो” दे मदा बाक्त। 12 मिनू नेल्ल आन डोंइती मेको बोक्शा, आ ब्राख्ये जो गुप्शा कुरशा, गाक्माक्त। मिनू नेल्लेमी छक लाक्शा “ओदेंशो छक लाक्चा डा गेय मुल सम्म गेनायो मतशो नय” देंशा, परमप्रभु यावे कली ठेयब सेल्मे बाक्त।

## लेवी कली ब्रेश्शो

मत्ती ९:९-१३; लूका ५:२७-३२

13 मिनू येसु मेकेर रे लशा, लेंशा समुन्द्र आ नेक्था बाक्माक्त। मिनू मेकेर शुश मुर देल्मा बाक्त। मिनू येसुमी मेको आन कली शेंदीमी बाक्त। 14 मिनू मेकेर रे लशा, तिरो पोक्ब अल्फयस आ तौ लेवी कली तिरो पोक्तीकेमी बाक्शो तशा “आं नोले खोइय्थी” दे ब्रेत्ता बाक्त। मिनू मेको बोक्शा, आ नोले खोदा बाक्त।

15 मिनू लेवी आ खिंमी जना जन बाक्मानु, तिरो पोक्ब नु पापी शुश नु काथा जामे बाक्त। मारदे हना शुशेमी येसु आ नोले खोदमे बाक्त। 16 मिनू फरिसी आन दाते डा सास्त्रीपुकीमी येसु कली पापी नु तिरो पोक्बपुकी नु काथा बाक्शा जशो तशा, येसु आ शेंसीब आन कली “मारदे तिरो पोक्बपुकी, पापीपुकी नु काथा बाक्शा जाइबा?” देंमा बाक्त। 17 मिनू येसुमी मेको आन लोव्र नेंशा, मो देंब आन कली “रोड मपशो मुर डाक्टर ममाल्नीम। रोड पशो मुर ला डाक्टर माल्नीम। ठीक पाइब कली ममाइ, पापी आन कली ब्रेत्थ जाक्शो नड” दे माइक्मी बाक्त।

## माइजा बाक्चा

मत्ती ९:१४-१७; लूका ५:३३-३८

18 यूहन्ना आ शेंसीबपुकी नु फरिसीपुकी माइजा बाक्बाक्मा बाक्त। मिनू मुरपुकीमी येसु आ नेक्था जाक्शा “यूहन्ना आ शेंसीबपुकी नु फरिसी आन शेंसीबपुकी माइजा बाक्नीम। इन शेंसीबपुकी चहिं माइजा मबाक्नीम। मारदे मो पशो नमी?” दे हिल्लो पामे बाक्त। फरिसी रिती थिती सेल्शा, रिम्शो पचा कली कोव्रब यो बाक्शो बाक्तेक्म। 19 मिनू मोदें हिल्लो पाइब आन कली येसुमी “जन्तीपुकी ग्युम्ले नु बाक्मानु, माइजा बाक्ने मचाप्नीम। 20 काबु चहिं ग्युम्ले नु फ्राचा पुंइसीनीम। मिनू माइजा बाक्नीम। 21 सुइमी माइत वामी नक वा क्येप्शा मफेरनीम। फेरतेक्म हना, नक वा चुप्शा, माइत वा कली खाक्शा, डोंइती डा गाक्शो क्येडा ठेयब सेल्ब। मारदे हना माइत नु नक मगारब। 22 सुइमी माइत कुशुल के थैलोमी नक अङ्गुर शांबु कुर मपाइनीम। कुर पाप्तेक्म हना, नक अङ्गुर शांबु बोरशा, थैलो खाक्शा क्युप्ब। थैलो यो गाक्ब। नक शांबु नक थैलोमी ला गारब” दे शेंदीमी बाक्त।

## नाइक्तीक नाक्त आ पर्बम लोव्र

मत्ती १२:१-८; लूका ६:१-५

23 मिनू काबु नाइक्तीक नाक्त येसु नु आ शेंसीबपुकी चेरब रू लां गाक्मा बाक्त। मिनू गाक्मानु, शेंसीबपुकीमी चेरब बाला शोइक्चा गोव्रमे बाक्त। 24 मिनू फरिसीपुकीमी येसु कली “कोव्रडीन, नाइक्तीक नाक्तीमी पचा मदुम्ब गेय मारदे पाइनीमी?” दे मदमे बाक्त। 25 मिनू येसुमी “दाऊद नु आ वारचपुकी शोव्रलु बेक्मानु, दाऊदमी मार पवा, मेको ब्रेक्शो लोव्र गेनायो मपढेनी? 26 ठेयब चढेब अबीयाथार आ पालामी दाऊद परमप्रभु यावे आ खिं ओव्रशा, परमप्रभु यावे कली चढेशो शोब्ले शोल्शा जशा, आ वारच आन कली यो जचा गेवा बाक्त, दे मपढेनी? मेको शोब्ले चढेबपुकीमी ला जाइबाक्मा बाक्त। अर्को मुरपुकीमी जचा मदुम्ब बाक्माक्त। १ सामुएल २१:७; लेवी २४:९ 27 नाइक्तीक नाक्त मुर आन कली वोइश्शो बाक्ब। मुरपुकी नाइक्तीक नाक्त कली ममाइ। प्रस्थान २०:१० 28 मोपतीके रागीम जरमेशो दा नाइक्तीक नाक्त मार पचा, मार मपचा मेको अधिकार पाइब बाक्ब” दे शेंदीमी बाक्त।

नाइक्तीक नाक्त आ पर्वम लोत्र

मत्ती १२:९-१४; लूका ६:६-११

3 मिनू येसु गुम्तीक खिं लेंशा ओव्रमाक्त। मेकेर गुड सोव्रशो मुर का बाक्माक्त। 2 मिनू फरिसी नु सास्त्रीपुकीमी “नाइक्तीक नाक्ती सापाइक्तीक गेय पाइबा को” दे योव्रकी पा कोव्रडमे बाक्त, मारदे हना दोस गेचा माल्शो बाक्मा बाक्त। 3 मिनू येसुमी गुड सोव्रशो मुर कली “एक पिवो” दे मदा बाक्त। 4 मिनू योव्रकी पा कोव्रब आन कली “नाइक्तीक नाक्त शिशो पचा देय मरिश्शो गेय पचा? ब्रॉइचा गेचा देय साइक्चा? तेको लोत्र अरेतीक लोत्र नु गारबा?” दे हिल्लो पवानु, सिक्सी पामे बाक्त। 5 मिनू सिक्सी पा बाक्शो तशा, आ थुं खाइश्शा गाइश्शा, मेको आन कली का का पा कोव्रशा, गुड सोव्रशो कली “इ गुड दिंदो” दे मदा बाक्त। मिनू मेकोमी गुड दिंसेनु सामाक्त। 6 मिनू फरिसीपुकी गूशा, हेरोदी आन कली शो शु खुष्शा “मेको कली दोपा साइक्चा ताइनय” दे लोत्रसी पामे बाक्त।

मुर आन कली सापाइश्शो

मत्ती १२:१५-१६; लूका ६:१७-१९

7 मिनू नोले येसु नु आ शेंसीबपुकी सहर रे गाक्शा, गालील डा समुन्द्र आ नेक्था जाक्दीम्मा बाक्त। शुश मुरुमी आन नोले खोदमे बाक्त। मेको खोइक्बपुकी ते ते डा बाक्मा बाक्त देंशा हना, गालील नु यहूदीया रागी डा, मत्ती ४:२५ 8 यरूसलेम सहर डा, इदुमेआ रागी डा, यर्दन खोला आइक्वी हांबु डा टायर नु सीदोन सहर डा बाक्मा बाक्त। मेकोपुकीमी येसु आ पशो गेय आ पर्वम शुश लोत्र नेंशा जाक्मा बाक्त। 9 मिनू येसुमी आ शेंसीब आन कली “डोंगा का चाक्शा वोतीन” देंमाक्त। मारदे हना शुश मुरपुकीमी नेष्ठा चुशा, येसु आ नेक्था जाक्चा बोल पामे बाक्त। 10 येसुमी रोइ पाइब शुश आन कली सापदा बाक्त। रोइ पाइबपुकीमी “थिचा तडल” दे आ नेक्था जाक्मा बाक्त। 11 ग्रॉग्रा दिचा डा वोलपुकीमी येसु कली तशा, पोक्च थेक्शा “परमप्रभु यावे आ तौ ननी” दे वाइ ब्रेम्मा बाक्त। लूका ४:४१ 12 मिनू येसुमी “एको लोत्र मर्रापाइक्चा” दे माइक्मी बाक्त। मर्कूस १:४३-४४

१२ जना शेंसीबपुकी वोइश्शो

मत्ती १०:१-४; लूका ६:१२-१६

13 काबु येसु डांडा डोंइसे बाक्त। मिनू सु सु आन कली योव्रडा, मेको आन कली आ नेक्था ब्रेत्ता बाक्त। मिनू मेको ब्रेश्शोपुकी जाक्मा बाक्त। 14 आं नु काथा बाक्चा कली नु शेंथ सोइक्चा कली 15 वोल खेरतीक अधिकार तशा बाक्मल, दे १२ जना आन कली वोइक्मी बाक्त। 16 मेको १२ जना आन नें सिमोन आ याइनी नें पत्रुस वोदा बाक्त। 17 जब्दी आ तौ याकूब नु आ लोकब यहून्ना, मेको आस कली बोअनेरगेस नें वोदा बाक्त। बोअनेरगेस देंशो “बुबु आ तौ नस” दे रुम्सीब। लूका ९:५४ 18 मिनू अन्द्रीयास, फिलीप, बारथोलोमाइ, मत्ती, थोमास, अल्फयस आ तौ याकूब, थदेयस, सिमोन कनानी 19 नु यहूदा इस्कारीयोती बाक्मा बाक्त। यहूदा चहिं नोले येसु कली साइक्ब आन कली लां कोइब दुम्माक्त।

येसु नु आ खिं डा मुर

20 मिनू लेंशा शुश मुर खुम्समानु, येसु नु आ शेंसीबपुकी जचा कली यो नाइक्चा मतामे बाक्त। 21 मिनू येसु आ खिं डा मुरपुकीमी मेको नेंशा “आ निप्स ग्यशो दुम्माक्त, दोपा यो खिं लाइक्चा” दे ब्रथ लमा बाक्त। मर्कूस ६:४; यहून्ना ७:५; यहून्ना ८:८

येसु नु वोलपुकी

मत्ती १२:२४-३२; लूका ११:१४-२३

22 यरूसलेम रे यिशो सास्त्रीपुकीमी “बेल्जीबुलमी सुम्शो बाक्माक्त। वोल आन पिप आ सक्तिमी वोल आन कली खेरबाक्माक्त” देंमा बाक्त। मत्ती ९:३४ 23 मिनू येसुमी मेको आन कली आ नेक्था ब्रेश्शा, कथा सेल्शा “सैतानमी सैतान कली खेरने चाप्पा डा? 24 राज्य का डा मुरपुकी जिशा

ब्राशा गाक्तेक्म हना, मेको राज्य जाम्शा लाइब। 25 खिं का डा मुरपुकी जिम्तेक्म हना, मेको खिं मलीब। 26 सैतान आ राज्यम जिशा ब्रातेक्म हना, आ राज्य नुष्शा लाइब। 27 बोल्यो मुर आ खिंम सुइ खुइ पथ ओव्रने मचाप्नीम। बोल्यो मुर कली फ्रेंशा पाइश्शा वोइश्शा ला, आ मारेइ मारेइ खुइ पने चाम्सीब। 28 नोफा दाइश्शा नेनीन, मुरपुकीमी पाप पाम्तेक्म हना यो, आन पशो पाप क्याम्चा ताइनीम। मरिश्शो लोत्र पाम्तेक्म हना यो, मेको पाप यो क्याम्चा ताइनीम। 29 तन्न परमप्रभु यावे आ सोक्त आ पर्वम मरिश्शो लोत्र पशो पाप चहिं मक्याम्सीब। मोदेशो लोत्र पाइब आ पाप गेना हना यो लीब” देंमाक्त। हिब्रू ६:४-६ 30 मारदे हना मेकोपुकीमी येसु आ पर्वम “येसु ग्रॉग्रा दिचा डा वोलम सुम्शो बाक्माक्त” देंशो बाक्मा बाक्त। यहून्ना १०:२०

येसु आ खिं डा मुर जाक्शो

मत्ती १२:४६-५०; लूका ८:१९-२१

31 मिनू येसु आ ममा नु आ लोकबपुकी आ बाक्तीक लाडगामी जाक्मा बाक्त। मिनू “गो गुम्थ जाक्तक” दे तुइक्पाइक्थ मुर सोइक्तमे बाक्त। 32 मेकोपुकी जाक्मानु, शुश मुर खुम्सीशा, येसु आ नेक्था बाक्शो बाक्मा बाक्त। मिनू मेको नेक्था बाक्बपुकीमी “इन ममा नु इन लोकबम लोकब लाडगाम जाक्शा, इन कली ब्रेत्ताक्मे” दे मदमे बाक्त। 33 मिनू येसुमी “आं ममा नु आं लोकबपुकी सु नमी?” देंशा, 34 आ नेक्था निश्शा बाक्ब आन कली कोव्रशा “एकेर बाक्ब आं ममा नु आ लोकबपुकी नम। 35 परमप्रभु यावे आ दाक्शो पाइबपुकी आं लोकब नु आं ममा नम” देंमाक्त।

वांचेर शोक्शो कथा

मत्ती १३:१-९; लूका ८:४-८

4 मिनू समुन्द्र आ नेक्था लशा, मेकेर बाक्शा, लेंशा शेंचा गोवा बाक्त। मेकेर शुश मुर खुम्सीशा बाक्मा बाक्त। आं चहिं डोंगा काम डोइश्शा बाक्शो बाक्माक्त। आ लोत्र नेंबपुकी समुन्द्र आ नेक्था बाक्मा बाक्त। 2 मिनू कथा सेल्शा, शुश लोत्र शेंदा बाक्त। 3 मिनू शेंना शेंन “नेनीने, मुर का वांचेर शोक्थ लमाक्त। 4 मिनू ब्वारानु, गेडा का निक्शी लांमी जुक्तमे बाक्त। मिनू चिक्बीमी गुष्ठा जामे बाक्त। 5 गेडा का निक्शी ग्याडग्रो खपीमी जुक्तमे बाक्त। मिनू शुश खप मबाक्तीके थे थु बुक्शा, जिव जाव वामा बाक्त। 6 तन्न नां पवानु, सोल सुल बेक्मा बाक्त, मारदे हना शाक्श थोक्चा मतथु सोव्रमा बाक्त। 7 का निक्शी चू आ दातेमी जुक्तमे बाक्त। मिनू चूमी सुम्शा, बारचा मगेवा बाक्त। मिनू मसिम्माक्त। 8 का निक्शी चहिं रिश्शो खपीम जुक्तमे बाक्त। मिनू वाशा बारशा, शुश ग्रेल्शा, गेडा का के ३०, ६०, सहे का सम्म सिम्मा बाक्त” दे शेंदीमी बाक्त। 9 मिनू “सु के नेंब नोफा बाक्मे, मेकोमी नेंनल” देंमाक्त।

वांचेर शोक्शो कथा आ अर्थ

मत्ती १३:१०-१७; लूका ८:९-१०

10 मिनू आ लोत्र नेंबपुकी गाक्मा नोले, येसु नु गाक्ब नु आ १२ जना शेंसीबपुकीमी कथा सेल्शा शेंशो लोत्र आ पर्वम हिल्लो पामे बाक्त। 11 मिनू येसुमी “परमप्रभु यावे आ राज्य दोदेशो बाक्ब दे इन कली रुप्तीक थुं गेशो बाक्त। लाडगाम बाक्ब आन कली चहिं कथा सेल्शा शेंनुडमी। 12 मारदे हना आन मिक्चीमी कोव्रनीम, तन्न मताइनीम। आन नोफामी नेंनीम तन्न मरुनीम। कोव्रशा रुप्तेक्म हना, आन थुं लेश्शा, आन पाप क्याम्चा ताम वा” देंमाक्त। यसैया ६:९-१०

वांचेर शोक्ब आ पर्वम शेंशो

मत्ती १३:१८-२३; लूका ८:११-१५

13 मिनू येसुमी “मेको कथा आ अर्थ मरुनी? मेको लायो मरुनी हना, अरु कथा डा शेंतीक दोपा रुप्ते चाप्नीनी? 14 वांचेर शोक्बमी परमप्रभु यावे आ लोत्र शोक्ब। 15 लांमी शोक्शो दोदेशो बाक्नीम देंशा हना, लोत्र नेन्मेनु, सैतानमी आन थुंमी रुष्शो लोत्र योल्ब। 16 ग्याडग्रो खपीम शोक्शो खोदेशोपुकीमी लोत्र नेंशा, बिश्शा ग्येरसीनीम। 17 तन्न शाक्श थोक्चा

मतथु, शुश मलीनीम। लोत्र आ पर्वम श्येत गेचा पुंडसाकम हना, थु प्रॉइशा गाकनीम।<sup>18</sup> चू आ दातेमी जुवशो खोदेंशोपुकीमी लोत्र नेंनीम।<sup>19</sup> तन्न दोपा ठेयब दुम्नुडा? दोपा क्येट चेमु? दोपा मारेड मारेड ताडनुडा? दे मिम्शा, आ थुमी तेक्ब। मिनु आ नेंशो लोत्रमी फल मसिष्व।<sup>20</sup> रिम्शो खपीम शोक्शो खोदेंशोपुकीमी चहिं परमप्रभु यावे आ लोत्र नेंशा, आन थुमी वोइक्नीम। मिनु गेडा का के ३०, ६० सहे का गेडा सम्म सिम्शा ग्रेलीनीम” दे शेंदीमी बाक्त।

परमप्रभु आ राज्य आ पर्वम शेंशो  
लूका ८:१६-१८

21 मिनु येसुमी “मार, बत्ती पाथीमी गुप्शा वोइक्चा कली, खाट आगामी वोइक्चा कली दानीमी डा? मफारथु वोइक्नीमी, ममाइ डा? मत्ती ५:१५  
22 खुइश्शो मखुइक्सीब, सुम्शा वोइश्शो यो हाक्सीब। मत्ती १०:२६-२७; लूका १२:२ 23 सुइ के नेंब नोफा बाक्त हना, नेंनल” देमाक्त।

24 मिनु येसुमी “गे मार नेंनी, मेको नोफा दाइश्शा नेनीने। दोपा नाक्शा गेनीनी, मोपा नाक्चा पुंडसीनीनी। मत्ती ७:२ 25 मारदे हना थीब तेम्शा गेचा पुंडसीब, मथीबमी चहिं आइक्के बाक्शो यो रोइक्चा पुंडसीब” दे शेंदीमी बाक्त। मत्ती १३:१२-१३

26 मिनु “परमप्रभु यावे आ राज्य ओदेंशो बाक्ब, मुर कामी आ रूमी वांचेर शोक्ब। 27 मिनु नाक्दो इष्व, सुनी बोक्ब। शोक्शो वांचेर दोपा वाबा, दे मारेड मतुइक्ब। याकूब ५:७ 28 रू आंमा मेको वापाइक्ब। वाशा, बाला गूशा, आख सिष्व। 29 तन्न मीमेनु, रिक्ब। मारदे हना रिक्ची जाक्शो बाक्ब” देमाक्त।

तोरी वांचेर

मत्ती १३:३१-३२; लूका १३:१८-१९

30 मिनु “परमप्रभु यावे आ राज्य मार नु गारबा? दोदेंशो कथा सेल्शा रुप्पाइक्नन्नी? 31 वांचेर नेल्ल आन क्येडा आइक्च तोरी गेडा बाक्ब। 32 तोरी गेडा वाशा, शुश राशी पाइश्शा गिग घांस आन क्येडा ठेयब रवा दुम्ब। मेको रवामी चिक्बीमी ग्योत्र सेल्शा, फाम्सीशा बाक्ने चाप्नीम। परमप्रभु यावे आ राज्य मेको खोदेंशो न बाक्ब” दे शेंदीमी बाक्त।

33 मुरपुकीमी रुजे चाप्मेक्ल, दे शुश कथा सेल्शा, परमप्रभु यावे आ लोत्र शेंना शेंन बाक्माक्त। 34 कथा मसेल्थु, लोत्र मपाइबाक्माक्त। आ शेंसीब आन कली मेको कथा आन अर्थ यो नेल्ल रुप्पाइक्बाक्माक्त।

फश गिवार तेक्शो

मत्ती ८:२३-२७; लूका ८:२२-२५

35 मोपा शेंने थुम्शा डा मिन, नां रिक्मेनु, येसुमी आ शेंसीब आन कली “समुन्द्र शोक्शा, आइक्ची हांबु जाक्दीप्य” देमाक्त। 36 मिनु देल्शो मुरपुकी नु ब्राशा, डोंगा का डोइश्शा, लमा बाक्त। अरु डोंगा का निक्शी यो लमा बाक्त। 37 मिनु लमानु, ठेयब फश गिवार पचा गोवा बाक्त। फश गिवार पवानु, ब्वाक्कु डोंगामी ओव्रशा, गुम्चवा बाक्त। 38 येसु चहिं पिया थांडसीशा इप्शा निन्द्रा पवा बाक्त। शेंसीबपुकीमी “ए शेंब, गो नेल्ल ब्वाक्कुमी गुम्शा बेक्चाइतय दे ममिम्तीनी?” देंशा सेंदमे बाक्त। 39 मिनु येसु बोक्शा, फश गिवार कली हुइश्शा, समुन्द्र कली “ब्वालेइ पावो, मदुक्को” देमेनु, फश गिवार खा दिक्माक्त। मिनु सिक्सी दुम्माक्त। 40 मिनु शेंसीब आन कली “मारदे हिंनी? आं कली थमा मसुइक्नीनी?” देमाक्त। 41 मेकोपुकी चहिं छक लाक्शा, शुश हिंशा “फश नु ब्वाक्कुमी यो आ लोत्र टीबाक्ताक्से। एको सु बाक्म माइ?” दे लोत्र पमुमा बाक्त।

वोल आन कली पोव्रम ओव्रचा गेशो

मत्ती ८:२८-३४; लूका ८:२६-३९

5 मिनु आइक्ची हांबु गेरासीनी आन रागी जाक्दीम्मा बाक्त। 2 मिनु डोंगा रे तोंइसीशा, येसुमी बेक्शो मुर थिम्तीके रे पिशो ग्रांग्रा दिचा डा वोलमी ब्रीशो मुर का कली गुमा बाक्त। 3 मेको मुर बेक्शो मुर थिम्तीकेमी

बाक्बाक्माक्त। सुइमी मेको कली खिंमी वोइक्ने मचाप्मे बाक्त। 4 आ गुइ खोइली फ्रेंशा, साडलोमी पाइश्शा वोदमेनु यो, साडलो प्रोइश्शा प्रोक्बाक्माक्त। सुइमी मेको कली ग्राशा तेक्ने मचाप्बाक्मा बाक्त। 5 नाक्दो नाक्ती बेक्शो मुर थिम्तीके नु डांडामी हिरशा, वाइ ब्रेश्शा, फुल्लुमी थोक्सीशा, तेस्सीशा, गार सेल्सी बाक्माक्त। 6 मेको मुरुमी येसु कली डोन रे तशा, दोरशा पिशा, सेउ पवा बाक्त। 7 मिनु ठेयब सेंदामी ग्रीशा “परमप्रभु यावे, नेल्ल क्येडा ठेयब आ तौ, गो निक्शी मार पमुसा डा? परमप्रभु आ नें थिशा, श्येत मगेयीनी दे पुंडनन्नी” देमाक्त। मर्कूस १:२४ 8 मारदे हना येसुमी वोल कली “ए ग्रांग्रा दिचा डा वोल, एको मुर रे यूडो” दे माइश्शो बाक्माक्त। 9 मिनु “श्येत मगेयीनी, दे पुंडनन्नी” देमेनु, येसुमी “इ नें मार में?” दे हिल्लो पवा बाक्त। मिनु मेकोमी “आं नें फौज बाक्ब, मारदे हना गो शुश बाक्नीकी” देमाक्त। 10 मिनु “आंइ कली एको रागी रे मखेरचा नकी” दे पुना बाक्त। 11 मेको डांडामी शुश पोव्र जोन जोन बाक्शो बाक्मा बाक्त। 12 मोपतीके वोलपुकीमी “मेको पोव्र गे लशा, आन रांमी ओव्रचा गेकी” दे पुन्मे बाक्त। 13 मिनु येसुमी लशा, ओव्रचा गेमी बाक्त। मिनु ग्रांग्रा दिचा डा वोलपुकी मुर रे गूशा लशा, पोव्र आन रांमी ओव्रमा बाक्त। मिनु मेको हजार निक्शी पोव्रपुकी रोंगु रे यिना यिन, समुन्द्रमी गुम्शा बेक्मा बाक्त।

14 पोव्र योव्रबपुकीमी मो दुम्शो तशा, प्रोक्शा, सहर नु मेको रागीमी लोत्र ब्रपदमे बाक्त। मिनु मुरपुकीमी “मार दुम्मे? दो दुम्मे?” दे तुइक्थ जाक्मा बाक्त। 15 मिनु येसु आ नेक्था जाक्शा, डोंइती वोलमी ब्रीशो मुर वा फेक्शा, साशा, येसु नु निश्शो तामे बाक्त। मेको कली साशो तशा, हिंमा बाक्त। 16 मिनु आन मिक्चीमी तशो तुइक्बपुकीमी नक जाक्शो मुर आन कली मार मार दुम्मे, मेको नेल्ल शोव्रडमे बाक्त। 17 मिनु मुरपुकीमी येसु कली “आंइ रागी रे गूशा लने” देमा बाक्त।

18 मिनु येसु डोंगामी डोंइसेनु, डोंइती वोलम ब्रीशो मुरुमी “गे नु बाक्चा गेयीनी” दे पुना बाक्त। 19 मिनु येसुमी चहिं बाक्चा मगेथु “इ खिं लेश्शा लशा, इ मुर आन कली प्रभुमी इ कली दोदेंशो रिम्शो पवा, गिश शिशी कोंइदा तुइक्पतो” दे आ खिं सोइक्ता बाक्त। 20 मिनु लशा, आ खिंमी ला ममाइ, डेकापोलीस रागी नेल्ल हिरशा, येसुमी दोदेंशो रिम्शो पवा शुश मुर आन कली तुइक्पदा बाक्त। मिनु नेंबपुकीमी “गिश रिम्शो दुम्माक्त” दे छक लाक्मा बाक्त। मर्कूस ७:३१

याइरस आ तमी

मत्ती ९:१८-२६; लूका ८:४०-५६

21 मिनु येसु डोंगा डोइश्शा, समुन्द्र शोक्शा, आइक्ची हांबु जाक्दीश्शा, समुन्द्र आ नेक्था बाक्माक्त। मिनु शुश मुर देल्मा बाक्त। 22 मिनु याइरस नें पाइश्शो गुम्तीक खिं डा ठेयब मुर का जाक्शा, येसु कली तशा, आ डोंइती बाप्शा, आ पोक्च थेक्शा 23 “आं तमी बेक्चा चिक्ताक्व। आं खिं लशा, इन गुइ आं आल आ तार वोतीने। मिनु आ रोइ साशा ब्रॉइब” दे पुना बाक्त। 24 मिनु येसु मेको नु लमाक्त।

मिनु शुश मुर मेको आ नोले खोइश्शा, हुल पा क्राक्शा लमा बाक्त। 25 मेको शुश मुर आन दातेमी १२ बर्स डोंइती रे हुश याप्शो रोइ पाइब मीश मुर का यो बाक्माक्त। 26 शुश डाक्टर आन कली कोंइशा यो, आ रोइ मसाशो बाक्माक्त। डाक्टर आन गुइ रे पा शुश श्येत जशो बाक्माक्त। आ रोइ चहिं मसाथु, डोंइती क्येडा सारो दुम्शो बाक्माक्त। आ बाक्शो मारेड मारेड यो नुष्शो बाक्माक्त। 27 मेको मीश मुरुमी “मेको येसु माइश्शो मुरुमी रोइ पशो आन कली सापाइक्ने चाप्ब” देंशो लोत्र नेंशो बाक्माक्त। मिनु शुश मुर आन दातेमी ओव्रशा, नोले रे पा येसु आ फेक्शो वा थिवा बाक्त। 28 मारदे हना “आ फेक्शो वा थिचा ला ताता हना यो, सानुड” दे मिम्शो बाक्माक्त। 29 मिनु थिवानु, आ हुश याप्चा देक्माक्त। मिनु साडा बाक्त दे तुइक्ता बाक्त। 30 येसुमी आइक्के सापाइक्तीक सक्ति गूशो तुइश्शा, फिर लेश्शा कोव्रशा “सुम आं फेक्शो वा थिवा?” दे हिल्लो पवा बाक्त। लूका ६:१९ 31 मिनु शेंसीबपुकीमी “मिश डा मुरुमी इन कली नेप्नीम। मिनु गे ‘सुम थियी’ देनीनी?” देमा बाक्त। 32 येसुमी चहिं एर ओंथ नेल्ल मिक्च हिरशा, सुम थियी दे तुइक्चा मला बाक्त। 33 मिनु मीश मुरुमी हिंशा खिंखि पा पिशा, येसु आ डोंइती बाप्शा, पोक्च थेक्शा, लोत्र नेल्ल शोव्रडा बाक्त।

34 मिनू येसुमी “आं तमी, गे थमा सुइक्तीवी, मिनू इ रोइ साते। इ थुं नाइश्शा बाक्को। मुल सास डा सास बाक्को” दंशा डा मिन सोइक्ता बाक्त।

35 मोपा येसुमी मीश मुर नु लोत्र पवानु, याइरस आ खिं रे जाक्शो मुरपुकीमी याइरस कली “इ तमी बेक्त। शेंब कली मारदे श्येत गेचा” दे मदमे बाक्त। 36 येसुमी मेको आन दंशो मनंखु पा, याइरस कली “महिनी। थमा सुइक्ता सुइक्ता बाक्को” देंमाक्त। 37 मिनू आ नोले खोइक्ब आन कली लचा मगेथु, पत्रूस, याकूब नु आ लोक्ब यूहन्ना आन कली ला काथा लदा बाक्त। मत्ती १७:१ 38 मिनू जाक्दीशा, रोंका पा डाक्ब मुर शुश तवा बाक्त। 39 मिनू खिं ओत्रशा, डाक्ब आन कली “मारदे रोंका पा डाक्नीनी? मेको आल बेक्शो ममाइ, इप्शा बाक्शो बाक्ब” देंमाक्त। यूहन्ना ११:११ 40 मिनू मेकोपुकीमी आ दंशो थमा मसुदमे बाक्त। “हत्तै, दोदंशो लोत्र पवा” देंमानु, येसुमी मेको आन कली गुंडदीमी बाक्त। मिनू आल आ आंम आफ नु आ शेंसीब आन कली आल आ बाक्तीके ओइदा बाक्त। 41 मिनू आल आ गुइ ग्याइश्शा “तालीता कूमी” देंमाक्त। मेको लोत्र आ अर्थ “ए आल, बोक्को” दंशो रुम्सीब। लूका ७:१४; प्रेरित ९:४० 42 मिनू आल छुल बोक्शा, एर ओंथ हिरसे बाक्त। मेको आल १२ बर्स डा बाक्माक्त। मिनू मेकेर बाक्बपुकी मोदंशो दुम्शो तशा, थाम्पा छक लाक्मा बाक्त। 43 मिनू येसुमी “सुइ आन कली मशेंचा। आल कली जचा गेसे” दे आम आफ आस कली देंमाक्त।

मुरपुकीम येसु कली थमा मसुइश्शो

मत्ती १३:५३-५८; लूका ४:१६-३०

6 मिनू मेकेर रे लशा, आ बाक्तीके सहरमी जाक्दीम्माक्त। आ शेंसीबपुकी यो खोइश्शा लमा बाक्त। 2 मिनू नाइक्तीक नाक्त गुम्तीक खिं लशा, मुर आन कली शेंचा गोवा बाक्त। मिनू आ शेंशो नेंब शुशेमी छक लाक्शा “मेकोमी ओदंशो शेंचा ते रे शेंसे माइ? ओदंशो निप्स पाइश्शो लोत्र पचा दोपा जोक्मा? मेको आ गुइ रे दोदंशो सक्ति पाइश्शो गेय दुम्मे? यूहन्ना ७:१५ 3 शी मुइब ममाइ डा? मरीयम आ तौ ममाइ डा? याकूब, योसेस, यहूदा नु सिमोन आन लोक्ब ममाइ डा? आ लोक्बपुकी गोपुकी नु मबाक्नीमी डा?” दे आन थुं मनुशो लोत्र पमुमा बाक्त। यूहन्ना ६:४२ 4 मिनू येसुम मो देंब आन कली “तेइ तेइ परमप्रभु यावे आ लोत्र पाइब आन कली ठेयब सेल्शा मान पाइनीम। आंम रागी डा नु आंम जात डा, आंम खिं डा मुरपुकीमी चहिं महिक्नीम” दे माइक्मी बाक्त। 5 मिनू का निक्शी रोइ पशो मुर आन कली आ गुइम थिशा सापाइक्चा डा लाक्शा, अरु सक्ति पाइश्शो गेय कौंने मचबा बाक्त। 6 मिनू “थमा मसुइय्थीमी बाक्त” दे तुइश्शा, छक लाक्माक्त। मिनू एर ओंथ डा गाउं गाउंमी हिरशा, शेंना शेंन गाक्माक्त।

शेंसीब आन कली सोइश्शो

मत्ती १०:१,५; लूका ९:१-६

7 मिनू काबु आ १२ जना शेंसीब आन कली ब्रेश्शा, निनिक्शी पा शेंथ सोइक्चा गोवा बाक्त। शेंसीब आन कली वोल खेरतीक सक्ति गेवा बाक्त। लूका १०:१ 8 मिनू “जचा थोत्रक, क्येट, झोला मारेइ मलाइक्चा। कोक्के कुरशा, 9 जुत्ता लिक्शा, फेक्तीक वा का ला फेक्शा गाक्कीन। 10 गाउं सहर जाक्दीशा, खिं कामी ओत्रशा, बास बाक्कीन। मेको गाउं सहर रे गाक्ची मजाक्म सम्म बाक्कीन। खिं खिं याक्शा मबाक्कीन। 11 इन कली बाक्चा मगेथु इन शेंशो लोत्र यो मनंतेक्म हना, इन खोइली डा फुरक थुर थुर पाइश्शा गाक्कीन। इन मो पशोमी मेको आन कली चिन्ड दुम्ब” दे माइश्शा सोइक्तीमी बाक्त। 12 मिनू शेंसीबपुकी लशा, मुर आन कली “इन थुं परमप्रभु यावे गे लेत्तीन” दे नेंपाइक्ता पाइक्ता गाक्मा बाक्त। 13 मिनू वोल आन कली गुंडशा खेरबाक्मा बाक्त। रोइ पशो मुर आन कली तेल खेक्शा, प्रार्थना पा सापाइक्बाक्मा बाक्त। याकूब ५:१४-१४

यूहन्ना कली साइश्शो

मत्ती १४:१-१२; लूका ९:७-९; लूका ३:१९-२०

14 मिनू हेरोद पिपमी मेको लोत्र नेंना बाक्त। मारदे हना येसु आ नें तेइ तेइ ब्रशो बाक्माक्त। का निक्शी मुरपुकीमी “ब्वाक्कुमी खूम्शा गुंडब यूहन्ना बेक्शो रे सेंचा पुंडसे बाक्त। मोपतीके सक्ति पाइश्शो गेय पाइबाक्माक्त” देंबाक्मा बाक्त। 15 का निक्शीमी “एलीया बाक्माक्त” देंबाक्मा बाक्त। का निक्शीमी “साइ डा परमप्रभु यावे आ लोत्र पाइब आन दाते डा का, माइ” देंबाक्मा बाक्त। 16 हेरोद पिपमी मोदंशो लोत्र नेंशा “गो आ पिया क्योरपाइश्शो यूहन्ना बेक्शो रे सेंचा पुंडसे बाक्त” देंमाक्त। 17 हेरोदमी हरोदनी कली ग्येरपाइश्शा, यूहन्ना कली ग्याइक्पाइश्शा, जेल्खानमी चोक्पाइश्शा वोइश्शो बाक्माक्त। मारदे हना हेरोदमी आ लोक्ब फिलीप आ मीश लाइश्शो बाक्माक्त। 18 मिनू यूहन्नामी हेरोद कली “इन लोक्ब आ मीश लाइक्चा मदुम्ब” दे माइश्शो बाक्माक्त। प्रस्थान २०:१४; लेवी १८:१६ 19 मोदंशो आ पर्बम हेरोद आ मीशेमी चुरशा, यूहन्ना कली साइक्पाइक्चा माल्शो बाक्माक्त। 20 तन्न साइक्पाइक्चे मचाप्शो बाक्माक्त। मारदे हना हेरोद पिपमी “यूहन्ना ठीक पाइब नु रिम्शो थुं पाइश्शो मुर बाक्ब” दे तुइश्शा, यूहन्ना क्येडा हिंबाक्माक्त। मोपतीके साइक्चा मगेथु वोइश्शो बाक्माक्त। मिनू यूहन्ना आ लोत्र नेंनें दाक्शा, आ थुं ग्येत्थ लुक्च दुम्शा, नोफा दाइश्शा नेंबाक्माक्त।

21 काबु मार दुम्माक्त दंशा हना, पिप आ जरमेशो नाक्ती मिम्चा कली हेरोद पिपमी आ दरवार डा गेय पाइब, सरकार डा गेय पाइब नु गालील डा ठेयब मुर नेल्ल आन कली ब्रेश्शा, ठेयब भोज का गोवा बाक्त। 22 मिनू हेरोदनी आ तमीमी सिल कौंइदा बाक्त। मिनू हेरोद नु मेकेर खुम्सीशा बाक्बमी मेको सिल पशो तशा, शुश दाक्शा, नेल्ल ग्येरसमा बाक्त। मिनू पिपमी मेको मीश आल कली “इ दाक्शो पुनो। गो मेको गेनन” देंमाक्त। 23 मिनू लोत्र थोक्शा “मार पुंडतीवी हना यो, इ पुंडशो नेल्ल गेनन। राज्य उइक्थ उइक्थ पा योक्शा यो गेनन” दे कसम जशा, लोत्र गेवा बाक्त। एस्तर ५:३-६ 24 मिनू मीश आल गूशा, आ ममा कली “मार पुनू माइ” दे हिल्लो पवानु, आ ममामी “ब्वाक्कुम खूम्शा गुंडब यूहन्ना आ पिया गेचा नड, दे पुनो” देंमाक्त। 25 मिनू मीश आल फ्रा लेशशा, ओत्रशा पिप कली “ब्वाक्कुम खूम्शा गुंडब यूहन्ना आ पिया थालमी कुर पा गेयीनी” दे पुना बाक्त। 26 मेको आ पुंडशो नेंशा, पिप आ थुं शुश खाइक्माक्त। तन्न मेकेर बाक्ब आन कुल कसम जशा डा मिन “इ पुंडशो गेनन” देंतीके “मगेनन” देंने मचबा बाक्त। 27 मोपतीके सिपाइ का कली “लशा, यूहन्ना आ पिया क्योरशा चाक्को” दे सोइक्ता बाक्त। 28 मिनू आ पिया थालम कुर पा चाक्शा, मीश आल कली गेवा बाक्त। मिनू मीश आलमी आ ममा कली गेवा बाक्त। 29 मिनू यूहन्ना आ शेंसीबपुकीमी “यूहन्ना साइक्चा पुंडसे बाक्त” दंशो नेंशा, जेल्खानमी लशा, आ बेक्शो रां लाइश्शा, थिम्मे बाक्त।

शुश मुर आन कली रूथ्री थुल्शो

मत्ती १४:१३-२१; लूका ९:१०-१७; यूहन्ना ६:१-१३

30 येसु आ सोइश्शोपुकी लशा शेंशा, लेशशा जाक्मा बाक्त। मिनू मार पामे, मार शेंदमे, मेको लोत्र येसु कली शोत्रडमे बाक्त। लूका ९:१०; लूका १०:१७ 31 मिनू येसुमी “मुर मबाक्तीके लशा नाइसय” देंमाक्त, मारदे हना शुश मुर गुम्थ जाक्बाक्मा बाक्त। मिनू येसु नु आ शेंसीबपुकीमी जचा कली यो नाइक्चा मतामे बाक्त।

32 मिनू डोंगा डोइश्शा, समुन्द्र शोक्शा लमा बाक्त। मुर मबाक्तीके जाक्दीशा, नाइक्चा, दे थुं पामे बाक्त। 33 तन्न शुश मुरुमी येसु नु आ शेंसीब आन कली लशो तुइश्शा, डोंगाम डोइश्शो तशा, आइक्वी हांबु गे लमा बाक्त दे तुइश्शा, समुन्द्र हिरशा, दोरशा जाक्दीम्मा बाक्त। 34 मिनू येसु डोंगा रे तोंइसीशा, शुश मुर देल्शा बाक्शो तशा, शिशो पवा बाक्त। मारदे हना मेको आन कली गोठला मपाइश्शो भेडा खोदंशो दुम्शो तामी बाक्त। मिनू शुश लोत्र शेंचा गोवा बाक्त। मत्ती ९:३६

35 मिनू शेंस डा शेंस पवानु, नां रिक्चवा बाक्त। मिनू शेंसीबपुकीमी येसु कली “मुर मबाक्तीके बाक्ब, नां रिक्चाप्तु। 36 एको देल्शो मुर आन कली

सोइक्वा। मारदे हना गाउं सहर लशा, आंम कली जचा थोवक ग्याप्मेक्ल" दे मदमेनु, मर्कूस ८:१-९<sup>37</sup> येसुमी "गेपुकीमी एको आन कली जचा गेने" दे माइक्मी बाक्त। मिनु शेंसीबपुकीमी "गोपुकी लशा, सहे निक्शी देनार खोइ डा शोब्ले ग्याप्शा, चाक्शा, थुल्चा देंनी?" दे हिल्लो पामेनु, देनार का नाक्त का डा गाल्च बाक्त। मेको रोम डा चांदी के क्येट बाक्त।<sup>38</sup> "शोब्ले दोशो कुरनी? कोवथ लने" देंमाक्त। मिनु कोवशा "शोब्ले ५ ओटा नु डाइ निक्शी बाक्त" देंमा बाक्त।<sup>39</sup> मिनु येसुमी मुर आन कली गिग घांस बाक्तीके दिंममी "लस्कर पा निष्पतीन" दे माइक्मी बाक्त।<sup>40</sup> मिनु सहे, सहे नु ५०, ५० डा लस्कर पा निस्समा बाक्त।<sup>41</sup> मिनु येसुमी शोब्ले नु डाइ शेशा, सरीड गे कोवशा "परमप्रभु गे रिम्शो पाइब बाक्नीनी" देंशा, शोब्ले जिक्शा, निष्पाइश्शो मुर आन कली "योक्शा गेने" दे आ शेंसीब आन कली गेवा बाक्त। डाइ यो योक्पाइक्मी बाक्त। मर्कूस ७:३४<sup>42</sup> मिनु नेल्लेमी रूथी जामे बाक्त।<sup>43</sup> मिनु जशा, हेंशो शोब्ले नु डाइ गुप्मेनु, १२ डालो ब्रीमाक्त।<sup>44</sup> जाइबपुकी वोंइश मुर ला ५ हजार बाक्मा बाक्त।

येसु ब्वाक्कु तार गाक्शो

मत्ती १४:२२-३३; यूहन्ना ६:१५-२१

<sup>45</sup> मिनु येसुमी आ शेंसीब आन कली "आं डोंइती लशा, समुन्द्र शोक्शा, बेथसैदा सहरमी जाक्दीतीन" दे डोंगामी डोइक्पाइश्शा, सोइक्तीमी बाक्त।<sup>46</sup> मिनु नोले प्रार्थना पथ डांडा डोंइसे बाक्त।<sup>47</sup> मिनु नां रिक्मेनु, डोंगा समुन्द्रमी बाक्माक्त। येसु चहिं डांडाम बाक्माक्त।<sup>48</sup> मिनु येसुमी आ शेंसीबपुकीमी श्येत जामे बाक्त, दे तुइक्ता बाक्त। मारदे हना फशेमी डोंगा तेक्गा बाक्त। मिनु नां सोव्रचावानु, येसु ब्वाक्कु तारी गाक्शा पिमाक्त।<sup>49</sup> "मेको आन कली दाम पाइक्नुड" दे मिष्शा, पेट्चावानु, शेंसीबपुकीमी येसु कली ब्वाक्कु तारी गाक्शो तशा, वोल दाप्शा, हिंशा वाइ ब्रेम्मा बाक्त।<sup>50</sup> मारदे हना नेल्लेमी तामे बाक्त। मिनु शुश हिंमा बाक्त। मिनु येसुमी मेको आन कली सेष्शा "महिनीन, गो नड, इन थुं बारपतीन" देंमाक्त।<sup>51</sup> मिनु डोंगा डोंइसे बाक्त। मिनु फश गिवार दिक्माक्त। मिनु शेंसीबपुकी थाप्मा छक लाक्मा बाक्त। मर्कूस ४:३९<sup>52</sup> दोपा शोब्ले बारपदा, दे मारेइ ममिम्शो बाक्मा बाक्त। मारदे हना रुप्चा थुं मपाइबाक्मा बाक्त। मर्कूस ८:१७

रोइ पाइब आन कली सापाइश्शो

मत्ती १४:३४-३६

<sup>53</sup> मिनु समुन्द्र शोक्शा, गेनेसरेथ जाक्दीम्मा बाक्त।<sup>54</sup> मिनु डोंगा रे तोंइसामानु, मुरपुकीमी येसु बाक्ब दे तुइक्तेमे बाक्त।<sup>55</sup> मिनु येसु ते ते लमे, मेक मेक दोरशा लशा, रोइ पशो आन कली कुरशा, आ नेक्था चाक्मे बाक्त।<sup>56</sup> येसु गाउं सहर ते ते लमे, मेक मेक रोइ पशो आन कली चाक्बाक्मा बाक्त। मिनु येसु कली "इन फेक्शो वा थिचा गेयीनी" दे पुंइबाक्मा बाक्त। मिनु सु सुमी आ फेक्शो वा थीमे, मेकोपुकी साबाक्मा बाक्त। मर्कूस ५:२७-२८; प्रेरित ५:१५; प्रेरित १९:११-१२

साइ डा पतीके आ पर्वम शेंशो

मत्ती १५:१-२०

**7** फरिसीपुकी नु सास्त्री का निक्शी यरूसलेम रे यिशा, येसु आ बाक्तीकेम जाक्मा बाक्त।<sup>2</sup> मिनु काथा बाक्मानु, येसु आ शेंसीबपुकीमी गुइ मचिक्थु जशो तामे बाक्त।<sup>3</sup> फरिसी नु यहूदी नेल्लेमी गुइ मचिक्थु मजाइनीम। आन जोक्ब तुइक्ब खाल्पापुकीमी वोंइश्शो पतीके नेल्ल पाइनीम।<sup>4</sup> बजार लशा लेशशा, खिं जाक्शा, चोव्रखेसीशा ला जाइनीम। कचौरा, लोटा, गाग्री, निक्तीके नेल्ल चोव्रखेचा माल्ब। मेको मोदेंशो पतीके शुश पाइनीम। मत्ती २३:२५<sup>5</sup> मोपतीके येसु आ शेंसीबपुकीमी गुइ मचिक्थु जशो तशा, येसु कली "इन शेंसीबपुकीमी किकी पिपीमी वोंइश्शो रिती थिती मारदे मपाइनीमी? मचोव्रखेसीथु गुइ मचिक्थु जाइबाक्तेक्म" दे मदमे बाक्त।<sup>6</sup> मिनु येसुमी मेको आन कली "गे कपटीपुकी, यसैयामी पशो नोले दुम्ब लोव्र इन कली गारमाक्त। मार ब्रेक्शो बाक्त देंशा हना 'मेकोपुकीमी शोव्र रे पा ला आं कली मान पाइनीम। आन

थुंमी चहिं मदाक्नीम, आं देंशो यो मपाइनीम। यसैया २९:१३<sup>7</sup> आं कली सेउ पखु पा, परमप्रभु यावे आ लोव्र बाक्त, दे शेंनीमी, तन्न मुरुमी मिम्शो ला शेंनीम' दे ब्रेक्शो बाक्त। यसैया २९:१३<sup>8</sup> परमप्रभु यावे आ अरेशो लोव्र प्रोंइशा, मुरुमी वोंइश्शो पतीके पाइनीनी" दे माइक्मी बाक्त।<sup>9</sup> मिनु लोव्र बोइश्शा "गिश जोक्ब तुइक्ब ननी। परमप्रभु यावे आ देंशो शेंचा प्रोंइशा, आंम सेल्शो इन पतीके ला शेंनीनी।<sup>10</sup> मोसामी ब्रेक्शो लोव्र का 'आम आफ आस कली मान पचा' मिनु लोव्र का 'सु सुमी आम आफ आस कली मरिम्शो लोव्र पामे, मेकोपुकी साइक्वा पुंइसमल' दे ब्रेक्शो बाक्त। प्रस्थान २०:१२; प्रस्थान २१:१७<sup>11</sup> गेपुकीमी चहिं सुमी आम आफ आस कली 'इन कली गेचा माल्शो थोवक लाइश्शा, कुरबन कली गेता' दे माइक्बा, मेकोमी आम आफ आस कली मारेइ गेचा ममाल्ब दे शेंनीनी। 'कुरबन गेता' देंशो चहिं 'परमप्रभु कली गेता' देंशो रुम्सीब।<sup>12</sup> मोपा इन शेंतीक लोव्रमी आम आफ आस कली वारच पचा तेक्नीनी।<sup>13</sup> इन वोंइश्शो रिती थितीमी परमप्रभु यावे आ देंशो टिचा प्रोंइपाइक्नीनी। मिनु मोदेंशो कपटी गेय शुश पाइनीनी" दे हुइक्तीमी बाक्त।

ग्रांरा दिशो सेल्ब थोवक

<sup>14</sup> मिनु येसुमी मुर आन कली लेंशा ब्रेश्शा "गे नेल्लेमी नोफा दाइश्शा नेंशा रूपीने।<sup>15</sup> लाडगा रे ओव्रशो थोवकीमी मुर कली ग्रांरा दिशो सेल्बे मचाप्ब। मुर रे गूशो थोवकीमी चहिं मुर कली ग्रांरा दिशो सेल्ब। प्रेरित १०:१४-१५<sup>16</sup> सु के नेंब नोफा बाक्मे, मेकोमी नैनल" दे शेंदीमी बाक्त। मर्कूस ४:२३<sup>17</sup> मिनु मुर आन कली प्रोंइशा, खिं ओव्रमेनु, आ शेंसीबपुकीमी "इन शेंशो लोव्र थमा पा मार रुम्सीबा?" दे हिल्लो पामे बाक्त।<sup>18</sup> मिनु येसुमी "मार, गे यो एको लोव्र मरुप्नी? लाडगा रे ओव्रशो थोवकीमी मुर कली ग्रांरा दिशो सेल्बे मचाप्ब,<sup>19</sup> मारदे हना मुर आ थुंमी मओव्रब। आ कोव्रजीम ओव्रशा ग्रिम्शा, क्यी लां पा गूब, दे मतुइक्नीनी?" दे शेंदीमी बाक्त। मो देंशोमी जचा थोवक नेल्ल ग्रांरा मबाक्नीम, दे शेंदा बाक्त।<sup>20</sup> मिनु मेकोमी "मुर रे मार गूबा, मेकोमी मुर कली ग्रांरा दिशो सेल्ब।<sup>21</sup> मुर आ थुं रे दोदेंशो ग्रांरा दितीके गूब देंशा हना, तेल्लेम पचा, खुइ पचा, साइक्वा,<sup>22</sup> ग्युंबे पशो मुर अर्को नु इप्चा, शिंम पचा, जोल पचा, गेहे पचा, नें तोक्वा, ठेयब लेत्वा, ममिम्थु गेय पचा।<sup>23</sup> मोदेंशो पतीके मुर आ थुंम बाक्ब। मेको गूशा, मुर कली ग्रांरा दिशो सेल्ब" दे शेंदीमी बाक्त।

सुरोफोनीसीया डा मीश मुर

मत्ती १५:२१-२८

<sup>24</sup> मिनु बोक्शा, मेकेर रे टायर नु सीदोन गे लशा, खिं का ओव्रमाक्त। सुइमी मतुइक्तेमेल्ल देंत हना यो, खुइश्शा बाक्ने मचबा बाक्त।<sup>25</sup> मिनु ग्रांरा दिचा डा वोलम सुम्शो आइक्च आल आ ममामी "येसु जाक्माक्त" देंशो नेंशा, येसु आ बाक्तीके जाक्दीम्माक्त।<sup>26</sup> मेको मीश मुर अर्को रागी डा, सुरोफोनीसीयामी जरमेशो डा बाक्माक्त। मिनु मेको जाक्शा, येसु आ डोंइती खुम्की पा बाप्शा "आं तमी रे वोल गुंइदीने" दे पुना बाक्त।<sup>27</sup> मिनु येसुमी "डोंइती आल आन कली थुल्चा माल्ब। आल आन कली गेचा माल्शो शोब्ले कुचुम आन कली गेचा मदुम्ब" दे मदा बाक्त।<sup>28</sup> मिनु मेको मीश मुरुमी "मदुम्ब, प्रभु, तन्न कुचुमपुकीमी यो आलपुकीमी तोक्शो शोब्ले जचा ताइनीम" देंमाक्त।<sup>29</sup> मिनु येसुमी "इ मो देंतीके इ पुंइशो गेतन। वोल इ तमी रे गूत" दे मदा बाक्त।<sup>30</sup> मिनु आ खिं लेश्शा जाक्मेनु, वोल गूशा, आल सेस दुम्शा इप्शो बाक्माक्त।

नोफा मनेंब कली सापाइश्शो

<sup>31</sup> मिनु टायर रे लेश्शा, सीदोन नु डेकापोलीस सहर दाते लां पा लशा, गालील डा समुन्द्र जाक्दीम्माक्त। मत्ती १५:२९-३१; मर्कूस ५:२०<sup>32</sup> मिनु नोफा मनेंब मुर का चाक्शा "एको तार इन गुइ वोतीने" दे पुन्मे बाक्त।<sup>33</sup> मिनु येसुमी मेको नोफा मनेंब कली हुल रे फ्राशा लदा बाक्त। मिनु आ ब्रेप्चो मुर आ नोफामी ओंइशा, थुधु पा तोक्शा, नाक्चुकमी आ लें थिशा,<sup>34</sup> सरीड गे कोव्रशा, लाइश्शो सोक्त कीशा "हेफाता" दे मदा बाक्त। मेको

चहिन "रोक्सो" देशो रुम्सीब। 35 मिनू आ नोफा रोक्सीशा, नोफा नेंब दुम्माक्त। आ लें लोक्सीशा, लोत्र पाइब दुम्माक्त। 36 मिनू "सुइ आन कली मर्शेदीने" दे माइक्मी बाक्त। मर्शेदीने माइक्मी बाक्त हना यो, मेकोपुकीमी तेइ तेइ शेंना शेंन गाक्मा बाक्त। मर्कूस १:४३-४५ 37 मिनू आ लोत्र नेंबपुकी थाम्पा छक लाक्शा "मेकोमी नेल्ल रिम्शो सेल्बाक्त। नोफा मर्नेब आन कली नोफा नेंब सेल्बाक्त। लोत्र पस मजोक्ब आन कली लोत्र पाइब सेल्बाक्त" देमा बाक्त।

४ हजार मुर आन कली थुल्शो  
मत्ती १५:३२-३९

8 मिनू लेंशा शुश मुर देल्शा बाक्शा बाक्मा बाक्त। मेकोपुकी नु मारेइ जचा थोत्रक मबाक्माक्त। मिनू येसुमी आ शेंसीब आन कली ब्रेश्शा 2 "एको आन कली शिशी पातामी। मारदे हना साबेर नाक्त रे मुल सम्म गो नु काथा बाक्शा, मारेइ जचा मतामे। मर्कूस ६:३४-४४ 3 जचा मगेथु आन खिं खिं सोइक्ताक्डमी हना, लांमी गाक्ना गाक्न थाइनीम। का निक्शी शुश डोन रे जाक्शा बाक्नीम" देमाक्त। 4 मिनू शेंसीबपुकीमी "ओदेशो गोरशो रागीमी इश डा मुर आन कली शोब्ले गेशा, दोपा रूपाइक्वा डा?" देमा बाक्त। 5 मिनू येसुमी "शोब्ले दोशो कुरनी?" दे हिल्लो पवानु "७ ओटा" देमा बाक्त। 6 मिनू मुर आन कली "निस्सीन" दे दिंममी निष्पाइक्मी बाक्त। मिनू मेको ७ ओटा शोब्ले शेशा, परमप्रभु कली "गे रिम्शो पाइब बाक्नीनी" देशा, शोब्ले जिक्शा, शेंसीब आन कली गेशा, योक्पदा बाक्त। मिनू मेकोपुकीमी मुर आन कली गेमे बाक्त। 7 आइक्व डाइ का निक्शी यो बाक्माक्त। मेको डाइ यो शेशा "गे रिम्शो पाइब बाक्नीनी" देशा "योक्कीन" दे गेमी बाक्त। 8 मिनू मुरपुकीमी रूथ्री जामे बाक्त। जशा लीशो गुप्शा, ७ डालो प्रिंडमे बाक्त। 9 जाइबपुकी ४ हजार खोइ बाक्मा बाक्त। मिनू येसुमी मुर आन कली आन खिं खिं सोइक्ता बाक्त। 10 मिनू छुल छाल बोक्शा, आ शेंसीबपुकी नु डोंगा डोइश्शा, दल्मानुथा रागी जाक्दीम्मा बाक्त।

फरिसीमी चिन्ड कोत्रचा माल्शो  
मत्ती १६:१-४

11 मिनू फरिसी जाक्शा, येसु आ थुं थाम्चा कली "सरीड डा चिन्ड का कोंइदीकी" देमा बाक्त। यूहन्ना ६:३० 12 मिनू येसुमी लाइश्शो सोक्त कीशा "सिनाक्त मुलाक्त डा मुरपुकीमी मारदे चिन्ड कोत्रचा माल्नीमी? नोफा दाइश्शा नेनीन, चिन्ड का यो मकोंइन्नी" देमाक्त। 13 मिनू मेको आन कली प्रोंइशा, डोंगा डोइश्शा, समुन्द्र शोक्शा, आइक्वी हांबु जाक्दीम्मा बाक्त।

फरिसी आन बोरब ओख्ती  
मत्ती १६:५-१२

14 शेंसीबपुकीमी शोब्ले लाइक्वा प्रेंशो बाक्मा बाक्त। डोंगाम शोब्ले का ला लीशो बाक्माक्त। 15 मिनू येसुमी आ शेंसीब आन कली "नेनीने, फरिसीपुकी नु पिप हेरोद आन बोरपाइक्ब ओख्ती क्येडा होस पांइसीन" दे माइक्मी बाक्त। लूका १२:१; मर्कूस ३:६ 16 मिनू "शोब्ले कुरचा प्रेंदमे बाक्त, दे तुइश्शा, मो देंम कों?" देमूमा बाक्त। 17 मिनू येसुमी आन लोत्र तुइश्शा "शोब्ले मबा दे मारदे शुश लोत्र पाइनीनी? गे मुल यो मारेइ मरुनीनी? ममिम्नीनी? तुइक्वा यो ममाल्नीनी? मर्कूस ६:५२ 18 मिक्व पाइश्शो बाक्तीनी हना यो, मताइनीनी? नोफा पाइश्शो बाक्तीनी हना यो, मर्नेनीनी? मुल यो मारेइ मिम्ने मचाप्नीनी? मत्ती ११:१३, १६ 19 गोम ५ ओटा शोब्ले जिक्शा योक्शा, ५ हजार मुर आन कली थुलुनु, जशा लीशो गिश डालो प्रिंदीनी?" देमेनु "१२ डालो" देमा बाक्त। मर्कूस ६:४१-४४ 20 "मिनू ७ ओटा शोब्लेमी ४ हजार मुर आन कली थुलुनु, जशा लीशो गिश डालो प्रिंदीनी?" देमेनु "७ डालो" देमा बाक्त। मर्कूस ८:८-९ 21 मिनू "मुल यो मारेइ मरुनीनी?" देमाक्त।

मिक्व मताइब कली सापाइश्शो

22 येसु नु आ शेंसीबपुकी बेथसैदा जाक्दीम्मा बाक्त। मिनू मुरपुकीमी मिक्व मताइब का चाक्शा "मेको कली थिने" दे पुन्मे बाक्त। मर्कूस ६:५६ 23 मिनू येसुमी मिक्व मताइब कली गुइमी ग्याइश्शा डा मिन, कीशा गाउं रे गुंइशा लदा बाक्त। मिनू आ मिक्वीम थुथु पा तोक्शा, आ गुइ आ तारी वोइश्शा "मुल मार मार तवी?" दे हिल्लो पवा बाक्त। यूहन्ना ९:६ 24 मिनू मेकोमी इर गे कोत्रशा "मुरपुकी गाक्शा ताता, तन्न मेको मुरपुकी रवा खोदेशो तांइसाक्म" देमाक्त। 25 मिनू लेंशा आ गुइ आ मिक्व तारी वोदा बाक्त। मिनू मेकोमी कोत्रस डा कोत्रस पा तवा बाक्त। 26 मिनू येसुमी "गाउं हेरशा, इ खिं लावो" दे सोइक्ता बाक्त।

ख्रीस्तमी श्येत जचा माल्ब, दे शेंशो  
मत्ती १६:१३-२०; लूका ९:१८-२१; यूहन्ना ६:६७-६९

27 येसु नु आ शेंसीबपुकी सिजरिया फिलिप्पी गे लमा बाक्त। मिनू लांमी गाक्मानु, येसुमी "मुरपुकीमी आं पर्वम मार देंनीमी?" दे हिल्लो पवानु, 28 "का निक्शीमी 'ब्वाक्कुम ख्रुम्शा गुंइब यूहन्ना बाक्माक्त' देंनीम। का निक्शीमी 'एलीया बाक्माक्त' देंनीम। का निक्शीमी 'परमप्रभु यावे आ लोत्र पाइब का बाक्माक्त' देंनीम" दे मदमे बाक्त। मर्कूस ६:१५ 29 मिनू येसुमी "गेपुकी चहिन आं कली सु सुइय्नीनी?" दे हिल्लो पवानु, पत्रुसमी "गे ख्रीस्त बाक्नीनी" देमाक्त। 30 मिनू आ शेंसीब आन कली "एको ख्रीस्त बाक्ब, दे सुइ आन कली मर्शेदीन" दे माइक्मी बाक्त। मर्कूस ९:९

साइक्वा पुंइसीचा आ पर्वम शेंशो  
मत्ती १६:२१-२३; लूका ९:२२

31 मिनू येसुमी आ शेंसीब आन कली "रागीम जरमेशोमी शुश श्येत जचा माल्ब। जोक्ब तुइक्व खाल्पा, ठेयब चदेब नु सास्त्रीपुकीमी मेको कली मब्राइनीम, साइक्वाइक्नीम। मिनू बेक्शो आ नित्थ नाक्ती सेंसीब" दे लोत्र मख्खुइक्थु शेंदीमी बाक्त। मर्कूस ४:३१; मर्कूस १०:३२-३४ 32 मिनू पत्रुसमी येसु कली एर आइक्वी लाइश्शा, हुइक्ता बाक्त। 33 मिनू येसु हिरशा, अकों शेंसीबपुकी गे कोत्रशा "ए सैतान, इ कुल मकोंइदी। परमप्रभु यावे आ मिम्शो ममाइ, मुर आन देशो नेंबाक्ते" दे पत्रुस कली हुइक्ता बाक्त।

दोपा ख्रीस्त आ नोले खोइक्वा  
मत्ती १६:२४-२६; लूका ९:२३-२७

34 मिनू आ शेंसीबपुकी नु मेकेर देल्शो आन कली ब्रेश्शा "सुमी आं नोले खोइक्वा थुं पाइबा, मेकोमी आंम दला दाक्स पचा प्रोंइशा, श्येत जचा महिंथु, आं नोले खोइय्नील। 35 सुमी आंम कली प्रोंइचा माल्बा, मेको जाम्शा लाइब। सुमी आं पर्वम नु परमप्रभु यावे आ लोत्र आ पर्वम आंम कली जिम्मा गेबा, मेको ब्रोंइब। मत्ती १०:१९ 36 रागी नेल्ल आंम के सेल्ले चाप्ब, तन्न बेक्त हना, मेको मार रिम्शो दुम्बा डा? 37 मारदे हना गे मार गेशा ब्रोंइने चाप्नीनी डा? 38 सुमी हेंथे गाक्ब नु पाप पाइब आन पालामी आं पर्वम नु आं लोत्र आ पर्वम मुर आन कली देंचा मुने पाइबा, मेको आ पर्वम रागीम जरमेशोमी यो आ आफ आ छेडछेड नु आ स्वर्ग डा गेय पाइबपुकी नु जाक्मेनु मेको कली तशा मुने पाइब" दे माइक्मी बाक्त। मत्ती १०:३३

9 मिनू "नोफा दाइश्शा नेनीने, मुल गो नु काथा बाक्शा का निक्शीमी परमप्रभु यावे आ राज्य सक्ति पाइश्शा जाक्शो मतामे सम्म मबेक्नीम" देमाक्त।

येसु आ रां फाइश्शो  
मत्ती १७:१-१३; लूका ९:२८-३६

2 मिनू ६ नाक्त नोले येसुमी पत्रुस, याक्ब नु यूहन्ना, सां आन कली सुइ मबाक्तीके डांडामी लदा बाक्त। मिनू मेको आन डॉइती येसु फांइसे बाक्त। 3 दोपा फांइसे बाक्त देशा हना, आ फेक्शो वा बुबु पा जिलील बुश दुश्शो

तामे बाक्त। मोदेशो बुश सुइमी सेल्ले मचाप्नीम।<sup>4</sup> मिनु एलीया नु मोसा गूशो तामे बाक्त। मेको निक्शीमी येसु नु लोव्रसी पाम्से बाक्त।<sup>5</sup> मिनु पत्रुसमी येसु कली “ए शेंब, इं कली एकेर बाक्वा रिम्शो दुम्ब। बाक्तीके सां सेल्य। इन कली का, मोसा कली का नु एलीया कली का सेल्य” देंमाक्त।<sup>6</sup> मारदे हना मार देंचा दे मनुइक्ता बाक्त। मिनु शुश हिंमा बाक्त।<sup>7</sup> मिनु गोस्सुमी नेल्ल आन कली गिल्मी बाक्त। गोस्स आगा रे सेंदा का गूशा “एको आं दाक्वशो तौ बाक्ब। आ लोव्र नेनीने” देंशो नेन्मे बाक्त। मर्कूस १:११; २पत्रुस १:१७<sup>8</sup> मिनु एर ओंथ कोव्रडमेनु, येसु ला तामे बाक्त।

<sup>9</sup> मिनु डांडा रे ब्रुम्मानु, येसुमी “रागीम जरमेशो बेक्शो रे सेंचा मपुंडसे सम्म इन तशो सुइ आन कली मशेंदीने” दे माइक्मी बाक्त। मर्कूस ८:३०  
<sup>10</sup> मिनु मोदेशो दुम्शो सुइ आन कली मशेंदमे बाक्त। “बेक्शो रे सेंचा पुंडसीचा देंशो मार बाक्म माइ” दे हिल्लो पमुमा बाक्त।<sup>11</sup> मिनु आ शेंसीबपुकीमी येसु कली “डोंइती एलीया जाक्वा माल्ब, दे सास्त्रीपुकीम शेंनीम। मारदे मोदें शेंनीमी?” दे हिल्लो पामेनु,<sup>12</sup> येसुमी “एलीया डोंइती जाक्शा, नेल्ल ठीक सेल्ल। मिनु रागीम जरमेशो श्येत जाइब नु महिक्सीशो दुम्ब, दे ब्रेक्शो बाक्बा, ममाइ डा? मलाकी ३:१३; यसैया ५३:३-५  
<sup>13</sup> एलीया डोंइती जाक्त। मिनु आ पर्वम डोंइती ब्रेक्शो खोदेशो दुम्शा, मेको कली मार पचा दाक्वमे, मेको पाम्तेक्म” दे शेंदीमी बाक्त। मत्ती ११:१४; १राजा १९:२-१०

वोलम तशो आल सापाइश्शो

मत्ती १७:१४-२०; लूका ९:३७-४२

<sup>14</sup> मिनु अरु शेंसीब आन बाक्तीकेमी लेश्शा जाक्शा, शुश मुर देल्शो नु सास्त्रीपुकीमी लीशो शेंसीब आन कली लोव्र हिल्लो पशो तामे बाक्त।  
<sup>15</sup> मिनु देल्शो मुरपुकीमी येसु कली तशा, छक लाक्शा, दोरशा पिशा, येसु कली सेउ पदमे बाक्त।<sup>16</sup> मिनु येसुमी “मेकोपुकी नु मार लोव्रसी पनी” दे हिल्लो पवानु,<sup>17</sup> देल्शो मुर आन दाते डा कामी “ए शेंब, आं तौ एक चाक्ता, मारदे हना वोलमी तशा, लाटा दुम्शो बाक्ब।<sup>18</sup> वोलमी सुमानु, गोल्ब। आ शोव्र रे बोग्यो गुंडब। आ खूइ शेक्ब। मिनु आ रं मनुक्ब दुम्ब। इन शेंसीब आन कली ‘वोल गुंडदीन’ दे पुंडता, तन्न वोल गुंडने मचबेम” देंमाक्त।<sup>19</sup> मिनु येसुमी “गे थमा पा थमा मसुइक्बपुकी, गेना सम्म गेपुकी नु बाक्नुडा डा? ओदेशो इन पशो गेना सम्म फाल्शा बाक्नुडा डा? रोइ पाइब कली चाक्कीन” दे माइक्मी बाक्त।<sup>20</sup> मिनु वोंइश आल कली येसु आ डोंइती चाक्मे बाक्त। मिनु वोलमी येसु कली तवानु, आल तिड गोल्शा, रोम्सीशा, आ शोव्र रे बोग्यो गुंडदा बाक्त।<sup>21</sup> मिनु येसुमी आ आफ कली “गेना रे ओदेशो दुम्शो?” दे हिल्लो पवानु, आ आफोमी “आइक्च रेन,<sup>22</sup> एको वोलमी साइक्वा कली मीमी दुप्पदानु, ब्वाक्कुमी गुम्पदानु, शुश खेयप हेर हेरा बेक्त। गे मारेइ पने चाप्नीनी हना, शिशी पा एको श्येत जचा रे प्रोंइयीकी” देंमाक्त।<sup>23</sup> मिनु येसुमी “गे मारेइ पने चाप्नीनी कों देंनीनी। तन्न सु सुमी गेन चाप्नीनी देंशा, थमा सुइक्नीमी, मेकोपुकीमी आन पुंडशो ताइनीम” देंमाक्त।<sup>24</sup> मिनु आल आ आफोमी “थमा सुइक्ता, आं थमा मसुइक्ब थुं कली थमा सुइक्पतीने” दे थुं खाइश्शा, डाक्शा देंमाक्त।<sup>25</sup> मिनु येसुमी शुश मुर आन कली एर ओंथ रे जाक्शो तशा, ग्रांग्रा दिचा डा वोल कली “गे लाटा नु नोफा मनेब वोल, गेनायो लेंशा मओव्रचा डा पा गूशा लावो” दे हुइश्शा, खेरा बाक्त।<sup>26</sup> मिनु वोल वाइ ब्रेश्शा, आल कली रोप्पाइश्शा गूमाक्त। मिनु आल बेक्शो खोदेशो दुम्माक्त। मुरपुकीमी “बेक्त” देंमा बाक्त। मर्कूस १:२६<sup>27</sup> मिनु येसुमी आल आ गुइ ग्याइश्शा पोक्वानु, राम्माक्त।

<sup>28</sup> मिनु येसु नु आ शेंसीबपुकी खिं लमा बाक्त। मिनु शेंसीबपुकीमी “मारदे मेको वोल कली गुंडने मचाप्का?” दे हिल्लो पामे बाक्त।<sup>29</sup> मिनु येसुमी “ओदेशो वोल कली प्रार्थना पशा ला गुंडने चाप्सीब” दे माइक्मी बाक्त।

रागीम जरमेशो श्येत जचा माल्शो

मत्ती १७:२२-२७; लूका ९:४३-४५

<sup>30</sup> मिनु मेकोपुकीमी “इं गाक्शो सुइम मनुइक्तामेक्ल” दे गालील लां पा गाक्मा बाक्त।<sup>31</sup> मारदे हना आ शेंसीब आन कली “रागीम जरमेशो दा मुर आन गुइमी गेशा, साइक्वा पुंडसीशा, आ नित्थ नाक्ती बेक्शो रे सेंसीब” दे शेंचा दाक्ता बाक्त। मर्कूस ८:३१; मर्कूस १०:३२-३४<sup>32</sup> शेंसीबपुकीमी चहिं आ शेंशो मरुप्मे बाक्त। मिनु हिल्लो पचा यो हिंमा बाक्त। लूका १८:३-४

नेल्ल क्येडा ठेयब सु बाक्बा

मत्ती १८:१-५; लूका ९:४६-४८

<sup>33</sup> मिनु कापेरनाउम जाक्दीम्मा बाक्त। मिनु खिं का ओव्रशा, येसुमी आ शेंसीब आन कली “लामी गाक्यानु, मार लोव्रसी पनी?” दे हिल्लो पचा बाक्त।<sup>34</sup> तन्न मेकोपुकी सिक्सी पामे बाक्त, मारदे हना लामी गाक्यानु “नेल्ल क्येडा ठेयब सु बाक्या माइ?” दे लोव्र पशो बाक्मा बाक्त।<sup>35</sup> मिनु निश्शा, शेंसीब आन कली आ नेक्था ब्रेश्शा “नेल्ल क्येडा डोंइती दुम्चा कली नेल्ल क्येडा नोले दुम्शा, नेल्ल आन गेय पाइब दुम्चा माल्ब” देंमाक्त। मर्कूस १०:४३-४४; मत्ती २९:११; लूका २२:२६-२७<sup>36</sup> मिनु आल का आन दातेमी चाक्शा, आल कली मुप्शा<sup>37</sup> “सुमी आं नेंमी ओदेशो आल कली ब्राइबा, मेकोमी आं कली ब्राइब। आं कली ब्राइबमी आं कली ममाइ, तन्न आं कली सोइक्ब कली यो ब्राइब” दे माइक्मी बाक्त। मत्ती १०:४०

रिम्शो पचा मतेक्वा

लूका ९:४९-५०

<sup>38</sup> यूहन्नामी येसु कली “ए शेंब, गोपुकी नु मगाक्ब मुर कामी इन नें थिशा, वोल आन कली खेरशो ताइतक। मिनु मो पचा मदुम्ब, दे माइक्ताक” देंमाक्त। गन्ती १०:२७-२८<sup>39</sup> मिनु येसुमी “मदुम्ब, दे मर्देचा, मारदे हना आं नें थिशा, ठेयब गेय पाइबमी आं पर्वम लोव्र मक्याल्ब।<sup>40</sup> इं कली मरिम्शो मपाइब मेको इं मरुन बाक्ब। मत्ती १२:३०; लूका ११:२३<sup>41</sup> नोफा दाइश्शा नेनीने, सुमी आं नें थिशा, खीस्त आ मुर नम देंशा, इन कली लोटा का ब्वाक्कु तूचा गेबा, मेकोमी दोपा यो आ इनाम ताइब। मत्ती १०:४२

थमा सुइक्वा मतेक्वा

मत्ती १८:६-९; लूका १७:१-२

<sup>42</sup> सुमी आं कली थमा सुइक्ब आइक्च आल आ थमा सुइक्तीक क्याल्बा, मेको कली आ शुरम यात क्युक्शा, समुन्द्रमी ताइश्शा साइक्वा रिम्शो बाक्ब।<sup>43</sup> इ गुइमी तेक्तु हना, मेको गुइ खोतो। मारदे हना निम्फा गुइ पाइश्शो दुम्शा, गेनायो मकाप्ब नरक डा मीम ओव्रचा क्येडा, डुंडे दुम्शा, परमप्रभु यावे आ राज्यमी ओव्रचा तचा रिम्शो बाक्ब। मत्ती ५:३०  
<sup>44</sup> नरकमी बाक्ब आन लुस्पु मबेक्नीम, मी यो मकाप्ब।<sup>45</sup> इ खोइलीमी तेक्तु हना, मेको खोतो। मारदे हना खोइली निम्फा पाइश्शो दुम्शा नरकम ओव्रचा क्येडा, खोरन्डे दुम्शा, परमप्रभु यावे आ राज्यमी ओव्रचा तचा रिम्शो बाक्ब।<sup>46</sup> नरकमी बाक्ब आन लुस्पु मबेक्नीम, मी यो मकाप्ब।<sup>47</sup> इ मिक्चीमी तेक्तु हना, मेको मिक्च फेशशा ताइक्तो। मारदे हना मिक्च निम्फा पाइश्शो दुम्शा, नरकम ओव्रचा क्येडा, काना दुम्शा, परमप्रभु यावे आ राज्यमी ओव्रचा तचा रिम्शो बाक्ब। मत्ती ५:२९<sup>48</sup> नरकमी बाक्ब आन लुस्पु मबेक्नीम, मी यो मकाप्ब। यसैया ६६:२४

<sup>49</sup> नेल्ल मीम याक्पाइक्वा पुंडसीनीम। मारेइ चढेमेनु, हिक्सी सुप्शो चढेनीम। लेवी २:१३; गन्ती १८:१९<sup>50</sup> हिक्सी डाम्ताक्व हना, ब्रौव्रब। हिक्सी आ डाम्तीक जाम्त हना, मारम डाम्पाइक्वा डा? हिक्सी डाम्शो दुमीन। मिनु दुशा बाक्कीन” दे शेंदीमी बाक्त। मत्ती ५:१३; लूका १४:१४; कलस्सी ४:६

**10** मिनु मेकेर रे लशा, यहूदीया रागी नु यर्दन खोला आइक्ची हांबु जाक्दीम्मा बाक्त। मिनु लेंशा शुश मुर देल्मा बाक्त। मिनु तेइ तेइ गाक्शा, दोपा शेंदा, मोपा मेको आन कली यो शेंदा बाक्त।



वॉइश मीश आस नाता  
मत्ती १९:१-९

2 मिनू फरिसीपुकी जाक्शा, आ थुं थाम्चा कली “मीश कली प्रॉइचा दुम्बा देय मद्दुम्बा?” दे हिल्लो पामे बाक्त। 3 मिनू येसुमी “मोसामी इन कली मार पन देंमे?” देंमेनु 4 “छोड पत्र ब्रेक्शा, सोइक्चा दुम्ब देंत” देंमा बाक्त। *ब्यवस्था २४:१; मत्ती ५:३१-३२* 5 मिनू येसुमी “मुरपुकीमी शिशी मपाइनीम, दे तुइश्शा, मोदेशो पचा गोवा बाक्त। 6 नेल्ल क्येडा डोंइती परमप्रभु यावेमी वॉइश मुर नु मीश मुर सेल्टीम्सी। *उत्पत्ती १:२७* 7 मोपतीके मुरुमी आम आफ प्रॉइशा, आ मीश नु गारशा बाक्ब। *उत्पत्ती २:२४* 8 मिनू मेको निक्शी रां का दुम्नीस। मोपतीके वॉइश मीश निक्शी मनसी, निम्फा का नस। 9 परमप्रभु यावेमी कांडचीक सेल्शो आस कली मुरुमी मफ्रादमेक्ल” दे माइक्मी बाक्त।

10 मिनू खिंमी बाक्मेनु, आ शेंसीबपुकीमी “इन शेंशो मार रुम्सीबा” दे हिल्लो पामे बाक्त। 11 मिनू येसुमी “सुमी आ मीश प्रॉइशा, अर्को चाक्बा, मेकोमी वॉइश मीश आस नाता खोइक्ब। *लूका १६:१८; १कोरिन्थी ७:८-११* 12 मीश मुरुमी आ वॉइश प्रॉइशा, अर्को खोइक्तु हना, मेकोमी यो वॉइश मीश आस नाता खोइक्ब” देंमाक्त।

येसु नु आलपुकी  
मत्ती १९:१३-१५; लूका १८:१५-१७

13 मिनू येसुमी आ गुइ आल आन तारी वोदल दे आलपुकी चाक्मे बाक्त। मिनू शेंसीबपुकीमी आल चाक्ब आन कली “मचाक्कीन” दे हुइक्तमे बाक्त। 14 मिनू येसुमी मेको तशा, आ थुं मनुथु, हुइक्ब आन कली “आल आन कली आं बाक्तीके जाक्चा गेने, मतेक्कीन। मारदे हना परमप्रभु यावे आ राज्य आल आन केन बाक्ब। 15 नोफा दाइश्शा नेनीने, मुरपुकीमी आल आन थुं डा मिश्शो खोदेंशो पा ममिस्ताक्म हना, परमप्रभु यावे आ राज्यमी ओत्रचा मताइनीम” दे माइक्मी बाक्त। 16 मिनू आल आन कली मुप्शा, आ गुइ आन तारी वोइश्शा, आसीक गेमी बाक्त।

शोंप आ पर्बम लोत्र  
मत्ती १९:१-९

17 मिनू मेकेर रे लमेनु, मुर का दोरशा पिशा, येसु आ डोंइती पोक्च थेक्शा बाप्शा “शेंब, गे रिश्शो ननी। गेना हना यो ब्रॉइशा बाक्चा कली मार पचा माल्लुडा?” दे हिल्लो पवा बाक्त। 18 मिनू येसुमी “मारदे आं कली रिश्शो मुर दे माइय्यी? सुइ रिश्शो मनमी। परमप्रभु यावे ला रिश्शो बाक्ब। 19 परमप्रभु यावे आ अरेशो लोत्र तुइक्वेने। मसाइक्चा, वॉइश मीश आस नाता मखोइक्चा, खुइ मपचा, सांक्छी बाक्शोनु, जोल मपचा, हिच कोंइशा मारेइ मरोइक्चा, आम आफ आस कली मान पचा, दे ब्रेक्शो बाक्ब” दे मदा बाक्त। *प्रस्थान २०:१२-१७* 20 मिनू मेकोमी “गो आल रेन मेको नेल्ल पन पन बाक्ती” देंमेनु, 21 येसुमी मेको आ कुल शिरशा कोत्रशा, मेको कली दाक्शा “का चहिं मपवी। लशा, इ शोंप नेल्ल लेयशा, जचा फेक्चा मताइब आन कली योक्शा गेमी। मिनू लेशशा, आं नोले खोइय्यी। मिनू इ शोंप स्वर्गमी बाक्ब” देंमाक्त। *मर्कूस ८:३४; मत्ती १०:३८* 22 मेको लोत्र नेंशा, आ कुल राव किक्पाइश्शा, आ थुं खाइश्शा, गाक्माक्त। मारदे हना मेको शुश शोंप पाइश्शो मुर बाक्माक्त।

23 मिनू येसुमी एर ओंथ कोत्रशा, आ शेंसीब आन कली “शुश शोंप पाइश्शो मुर परमप्रभु यावे आ राज्य ओत्रचा गिथ श्येत बाक्बा” देंमाक्त। 24 मेको लोत्र नेंशा, शेंसीबपुकी छक लाक्मा बाक्त। मिनू येसुमी लोत्र थोक्शा “आलपुकी, आन शोंपोम थमा सुइक्ब आन कली परमप्रभु यावे आ राज्य ओत्रचा शुश श्येत दुम्ब। 25 शोंप पाइश्शो मुर परमप्रभु यावे आ राज्य ओत्रने चाप्चा क्येडा, दलओंठ लूजे आ पोलांम ग्रीने चाप्ब” देंमाक्त। 26 मिनू शेंसीबपुकी थाम्पा छक लाक्शा “मो हना, सु ओत्रचा ताइबा डा?” देंमुमा बाक्त। 27 मिनू येसुमी आन कुल गे कोत्रशा “मुरपुकीमी पने

मचाप्नीम। तन्न परमप्रभु यावेमी पने चाप्ब, मारदे हना परमप्रभु यावेमी मारेइ मारेइ पने चाप्ब” दे माइक्मी बाक्त।

येसु आ नोले खोइक्ब आन इनाम  
मत्ती १९:२७-३०; लूका १८:२८-३०

28 पत्रुसमी येसु कली “गो मारेइ मारेइ प्रॉइशा, इन नोले खोइक्तक” देंमेनु, 29 येसुमी “नोफा दाइश्शा नेनीन, सुमी आं पर्बम नु ग्येरपाइक्ब लोत्र आ पर्बम आ खिं, लोकबम लोकब, आम आफ, तमी तौ नु रू प्रॉइबा, 30 मेकोमी खेदा पा श्येत जचा पुंइसाक्ब हना यो, मुल आ प्रॉइशो क्येडा शुश खिं, लोकबम लोकब, आम आफ, तमी तौ नु रू ताइब। मिनू नोले गेना हना यो परमप्रभु यावे नु बाक्चा ताइब। 31 डोंइती दुश्शोपुकी नोले दुम्नीम। नोले दुश्शोपुकी डोंइती दुम्नीम” दे शेंदीमी बाक्त।

रागीम जरमेशो साइक्चा पुंइसीब देंशो  
मत्ती २१:१७-१९; लूका १८:३१-३४

32 मिनू यरूसलेम डा लां खोइश्शा गाक्मानु, येसु नेल्ल आन डोंइती गाक्माक्त। आ नोले खोइक्बपुकी छक लाक्शा हिंमा बाक्त। मिनू १२ जना शेंसीब आन कली लेंशा आ नेक्था ब्रेश्शा, आ कली मार दुम्बा दे तुइक्पाइक्चा गोवा बाक्त। *मर्कूस ९:११* 33 मिनू “मुल यरूसलेम लाइनय। मिनू रागीम जरमेशो ठेयब चढ़ेब नु सास्त्री आन गुइमी गेचा पुंइसीब। मिनू मेकोपुकीमी दोस गेशा, साइक्चा माल्ब, दे अर्को जात डा मुर आन गुइमी गेनीम। 34 मिनू मेकोपुकीमी शुक्शी पशा, आ कुलमी तोक्शा युक्नीम। मिनू साइक्नीम। मिनू बेक्शो आ नित्थ नाक्ती बेक्शो रे सेंसीब” दे तुइक्पाइक्मी बाक्त।

ठेयब सु बाक्बा?  
मत्ती २०:२०-२८

35 मिनू जब्दी आ तौ याक्ब नु यूहन्ना येसु आ नेक्था जाक्शा “ए शेंब, मार पुंइस्कु, मेको तस्कुल” दे पुन्से बाक्त। 36 मिनू येसुमी “मार पुंइनीसी?” दे हिल्लो पवानु, 37 मेको निक्शीमी “गे सक्ति पाइश्शो दुम्शा, हुकुम पाइब दुम्नीनु, का इन ग्युरा, का इन पेरा गे बाक्चा गेचा नस्कु” दे पुन्से बाक्त। 38 तन्न येसुमी “गे मार पुंइसी, मेको मरुप्नीसी। आं तूचा माल्शो कचौरा तूने चाप्नीसी? आं बुद पा श्येतम ख्रुम्चा पुंइसीने चाप्नीसी?” देंमेनु *मर्कूस १४:३६; लूका १२:५०* 39 “चाप्नस्कु” देंसा बाक्त। मिनू येसुमी “आं तूचा माल्शो कचौरा यो तूनीसी। आं बुद पा श्येतम ख्रुम्चा यो पुंइसीनीसी। *प्रेरित १२:२* 40 तन्न आं ग्युरा पेरा गे बाक्चा गेचा चहिं आं गुइमी ममाइ। परमप्रभु यावेमी योत्रचा पुंइसीशो मुर ला मेकेर बाक्चा ताइनीम” दे माइक्सी बाक्त।

41 मिनू शेंसीब १० जनामी मेको आस कली मोदेशो पुंइशो तशा “याक्ब नु यूहन्ना दोदेशो बाक्सा” दे आन थुं मनुथु, लोत्र पमुमा बाक्त। *लूका २२:२५-२७* 42 मिनू येसुमी नेल्ल आन कली खुप्शा “अर्को जात डा मुर आन कली हुकुम पाइनुड, दे मिम्बपुकीमी मुर आन कली दिप्शा वोइश्शा, हुकुम पाइनीम, दे तुइक्नीनी। 43 तन्न इन दातेमी मोदेशो पचा मद्दुम्ब। सुमी ठेयब दुम्चा दाक्बा, मेको नेल्ल आन गेय पाइब दुम्चा माल्ब। 44 सु नेल्ल क्येडा डोंइती दुम्चा दाक्बा, मेको नेल्ल आन वाइल दुम्चा माल्ब। *मर्कूस ९:३५; १पत्रुस ५:३* 45 मारदे हना रागीम जरमेशो यो मान पपांइसीचा कली ममाइ, तन्न वारच पथ नु शुश मुर आन कली प्रॉइचा कली आ गिंम गेथ जाक्शो बाक्त” दे माइक्मी बाक्त।

मिक्च मताइब बारतीमै  
मत्ती २०:२९-३४; लूका १८:३५-४३

46 मिनू यरीको सहरमी जाक्दीम्मा बाक्त। मिनू यरीको रे लशा, येसु नु आ शेंसीब आन नोले खोइश्शा, शुश मुर गाक्मानु, तिमै आ तौ मिक्च मताइब पुंइब बारतीमै मेको लां उइ बाक्शो बाक्माक्त। 47 मिनू बारतीमैमी नासरथ डा येसु एको लां पिना पिन बाक्त देंशो नेंशा “ए येसु, दाऊद आ तौ, शिशी पाइय्यीनी” दे वाइ ब्रेत्वा गोवा बाक्त। 48 मिनू शुशेमी “सिक्सी पावो” दे

हुइकतमे बाक्त। आं चहिं डोंइती क्येडा शुश वाइ ब्रेश्शा “दाऊद आ तौ, शिशी पाइय्नी” दे ब्रेम्माक्त। 49 मिनू येसु खा दिक्शा “मेको कली एके ब्रेत्तीने” देंमाक्त। मिनू मिक्च मताइब कली “ठेयब थुं पावो। मिनू बोक्को। मारदे हना इ कली ब्रेत्ताक्व” दे मदमे बाक्त। 50 मिनू आ बरखी ताइश्शा, छुल बोक्शा, येसु आ डोंइती जाक्माक्त। 51 मिनू येसुमी “इ कली मार पड, मार पुंइनेवे?” दे हिल्लो पवा बाक्त। मिनू मिक्च मताइबमी “ए शेंब, मिक्च ताइब सेल्पीनी” दे पुना बाक्त। 52 मिनू येसुमी “साशा लावो। इ थमा सुइश्शोमी साते” दे मदानु, ब्रा साशा मिक्च ताइब दुम्शा, येसु आ नोले खोदा बाक्त।

येसु यरूसलेमम जाक्दीश्शो

मत्ती २१:१-११; लूका १९:२९-४०; यूहन्ना १२:१२-१९

11 मिनू यरूसलेम आ नेक्था जैतून डांडा बेथफागे नु बेथानी जाक्दीम्मा बाक्त। 2 मिनू येसुमी आ शेंसीब निक्शी आस कली “मेरे गाउं लसे। मिनू गाउं ओवसीनु, सुइ मडोइश्शो गधा आ चाइक्व पाइश्शा, वोइश्शो थिल्लीसी। 3 मेको चाक्कीसे। मुरपुकीमी ‘मारदे लाइक्सी?’ देंतेक्म हना ‘प्रभु कली माल्ताक्व। नोले लेश्शा सोइक्व’ देंसीनु, लाइक्वा गेनीम” दे सोइक्तीम्सी बाक्त।

4 मिनू मेको निक्शी लशा, मेक जाक्दीश्शा, लांमी लाप्चो आ डोंइती पाइश्शो गधा आ चाइक्व थित्से बाक्त। मिनू प्रोन्से बाक्त। 5 मेकेर बाक्ब मुरपुकीमी “मारदे प्रोंइसी?” देंमा बाक्त। 6 मिनू येसुमी देंशो खोदेंशो पा, लोव लेत्से बाक्त। मिनू लाइक्वा गेमे बाक्त। 7 मिनू गधा आ चाइक्व चाक्से बाक्त। मिनू आन वासी ब्रामे बाक्त। मिनू येसु डोंइसे बाक्त।

8 मिनू शुशेमी आन बरखी लांमी ब्रामे बाक्त। अरुमी एर ओंथ डा राशी जिक्शा, लांमी ब्रामे बाक्त। 9 डोंइती नोले गाक्बपुकीमी “होसन्ना, प्रभु आ नेंमी जाक्ब ठेयब दुम्ल। होसन्ना आ देंशो ‘परमप्रभु वारच पने’ बाक्ब। भजन संग्रह ११८:२५-२६ 10 मुल जाक्वशो इ किंकी पिपी दाऊद आ राज्य कली जाइ। परमप्रभु कली होसन्ना” दे रेयके पा ठेयब सेल्ना सेल्न गाक्मा बाक्त।

11 मिनू यरूसलेम जाक्दीशा, परमप्रभु यावे आ खिं ओव्रमाक्त। मिनू एर ओंथ मारेइ मारेइ कोव्रशा, आ शेंसीब १२ जना नु बेथानी लेम्माक्त। मारदे हना नां रिक्चशो बाक्माक्त।

फल मसिश्शो फोव्रशी रवा

मत्ती २१:१२-२२; लूका १९:४५-४८; यूहन्ना २:१३-१६

12 आ दीसा बेथानी रे पिशा, लांमी गाक्मानु, येसु शोव्रलु बेक्माक्त। 13 मिनू इक्की आइक्था सफा पाइश्शो फोव्रशी रवा तशा, फोव्रशी सिश्शो बाक्म कौं दे कोव्रथ लमाक्त। मिनू जाक्दीश्शा कोव्रडानु, सफा ला तवा बाक्त। मारदे हना सित्वी मजाक्वशो बाक्माक्त। 14 मिनू “मुल डा मेरे सुइमी इ फल जचा मतामेक्ल” दे मदा बाक्त। आ शेंसीबपुकीमी मो देंशो नेन्मे बाक्त।

ग्याब्ब लेयब आन कली खेरशो

15 मिनू यरूसलेम जाक्दीम्मा बाक्त। जाक्दीश्शा येसु परमप्रभु यावे आ खिं ओव्रशा, मेकेर ग्याब्ब लेयब आन कली खेरचा गोवा बाक्त। क्येट फाइक्व आन क्येट वोइक्तीके नु दुक्कुर लेयब आन नित्तीके खोल्शा गेमी बाक्त। 16 मिनू सुइ कली मारेइ यो चाक्शा लेयचा मगेथु, 17 “जात जात डा मुरपुकीमी एकेर प्रार्थना पामेक्ल दे आं खिं वोइश्शो बाक्त दे ब्रेक्शो बाक्बा, ममाइ डा? गेपुकीमी चहिं खुइपुकीमी खुइ पा चाक्शा आन बाक्तीके पुक्खी सेल्तीनी” दे हुइक्तीमी बाक्त। यसैया ५६:७; येरमीया ७:११ 18 मिनू फरिसी नु सास्त्रीपुकीमी मेको नेंशा, दोपा साइक्वा दे लां कोव्रडमे बाक्त। तन्न येसु कली तशा, हिंमा बाक्त। मारदे हना मुर नेल्लेमी आ शेंशो नेंशा, छक लाक्बाक्मा बाक्त। 19 मिनू नां रिक्चावानु, येसु नु आ शेंसीबपुकी सहर रे लेम्मा बाक्त।

दल्गीर मपथु, प्रार्थना पचा

20 मिनू सुनी लां गाक्मानु, फोव्रशी रवा आ डर रे पुं सम्म सोव्रशो तामे बाक्त। 21 मिनू पत्रुसमी ति फ्रुक्शा, येसु कली “ए शेंब, कोव्रडीन, इन सराप पशो फोव्रशी रवा सोव्रमाक्त” देंमाक्त। 22 मिनू येसुमी मेको आन कली “परमप्रभु यावे कली थमा सुतीने। 23 नोफा दाइश्शा नेनीने, सुमी आं देंशो थमा दुम्ब, दे दल्गीर मपथु, मेको डांडा कली ‘एकेर रे समुन्द्रमी याक्सो’ देंत हना, मेको आ थमा सुइश्शोमी डांडा याक्सीशा लाइब। मर्कूस ९:२३; मत्ती १७:२० 24 मोपतीके ‘आं पुंइशो ताइनुड’ दे थमा सुइश्शा, प्रार्थना पा पुंइतीनी हना, इन पुंइशो ताइनीनी। मत्ती ७:७; यूहन्ना १४:१३; १यूहन्ना ५:१४-१५ 25 प्रार्थना पा बाक्नीनु, सुइ नु चुरशो बाक्तीनी हना, मेको कली माफ गेने। मिनू स्वर्गम बाक्ब इन आफोमी यो इन मरिश्शो पशो क्याग्शा माफ गेब। 26 माफ मगेतीनी हना, स्वर्गम बाक्ब इन आफोमी यो इन कली माफ मगेब” दे शेंदीमी बाक्त।

अधिकार आ पर्वम हिल्लो पशो

मत्ती २१:२३-२७; लूका २०:१-८

27 मिनू यरूसलेममी जाक्दीम्मा बाक्त। मिनू येसु परमप्रभु यावे आ खिंमी हिरसेनु, ठेयब चढेब, सास्त्री नु जोक्ब तुइक्व खाल्पापुकी जाक्शा 28 “तेको अधिकारमी मोदेंशो पवी? मो पचा, दे सुमी अधिकार गेवे?” देंमा बाक्त। 29 मिनू येसुमी “गो इन कली लोव का हिल्लो पाइनुड, मेको लोव लेत्तीने। मिनू तेको अधिकारमी एको गेय पडा शेंनन्नी। 30 यूहन्नामी मुर आन कली ब्वाक्कुमी ख्रुम्शा गुंइतीके अधिकार स्वर्ग रे तवा देय मुर रे तवा? लो देनीन” दे माइक्मीनु, 31 मेकोपुकीमी “स्वर्ग रे तवा बाक्त देंतय हना, मो हना यूहन्ना आ लोव मारदे थमा मसुइक्नी देंब। 32 मुर रे तवा बाक्त देंचा यो दोपा देंय” दे लोवसी पमूमा बाक्त। मोदेंशो देंचा हिंमा बाक्त। मारदे हना मुर नेल्लेमी यूहन्ना थमान परमप्रभु यावे आ लोव पाइब बाक्ब, दे थमा सुइश्शो बाक्मा बाक्त। लूका ७:२९-३० 33 मोपतीके “मतुइक्नीकी” देंमानु, येसुमी “मो हना तेको अधिकारमी एको गेय पडा दे गो यो मशेंनन्नी” दे माइक्मी बाक्त।

मरिश्शो बुम्था पाइब आन कथा

मत्ती २१:३३-४६; लूका २०:९-१९

12 मिनू येसुमी कथा सेल्शा, शेंचा गोवा बाक्त। मिनू “मुर कामी अडगुर ख्रुम्शा, थारपु हिरशा, अडगुर खाक्तीक खाल्ता दोशा, धन्सार सेल्शा, बुम्था पाइब माल्शा, मेको आन कली गेशा वोइश्शा, अर्को रागी लमाक्त। यसैया ५:१-२ 2 मिनू अडगुर मीशा, सेक्वी जाक्मेनु, आ गेय पाइब का कली आ भाग पोक्थ सोइक्ता बाक्त। 3 मिनू मेको जाक्दीम्मेनु, बुम्था पाइबपुकीमी मेको कली तुप्शा, श्येत्थ गुइ सोइक्तमे बाक्त। 4 मिनू लेंशा गेय पाइब का कली सोइक्ता बाक्त। मेको कली यो जिचा तोशा, पिपा प्रोल्शा, गार सेल्शा सोइक्तमे बाक्त। २इतिहास ३६:१६ 5 मिनू लेंशा का कली सोइक्तानु, मेको कली सदमे बाक्त। मोदें शुश खेयप गेय पाइब आन कली सोइक्तानु, का निक्शी आन कली तुप्मे बाक्त। का निक्शी आन कली सदमे बाक्त।

6 मिनू सोइक्ने चाप्पा डा का ला लीमाक्त। मेको आ दाक्शो तौ बाक्माक्त। मिनू ‘आं तौ आ देंशो टीनीम’ दे मिम्शा, आ तौ कली सोइक्ता बाक्त। 7 मिनू बुम्था पाइबपुकीमी ‘एको दा अडस ताइब बाक्त। लो साइक्वा। मिनू आ अडस नेल्ल इ केन दुम्ब’ देंमुशा गारमा बाक्त। 8 मिनू ग्याइश्शा, साइश्शा, रू रे लाइश्शा ताइक्तमे बाक्त। हिब्रू १३:१२ 9 मोदेंशो दुम्त हना, रू आ होव्रपम मार पाइबा? जाक्शा, मेको बुम्था पाइब आन कली साइक्ब। मिनू आ रू अरु आन कली गेब। 10 ‘खिं सेल्बपुकीमी गारो प्रोव्रडमेनु, एको फुल्लु मगार, दे ताइक्तमे बाक्त। मेको मगारथु ताइश्शो फुल्लु चहिं सुर डा सुरे फुल्लु दुम्माक्त’ दे ब्रेक्शो लोव मपढेनी? 11 मेको नेल्ल प्रभुमी पशो बाक्त। मिनू ‘ओहो, गिश रिश्शो दुम्मे। एको छक लाक्वा डा बाक्ब’ दे ब्रेक्शो बाक्ब” दे माइक्मी बाक्त। भजन

संग्रह ११८:२२-२३<sup>12</sup> मिनू “एको कथा इं कली कका देंमाक्त” दे रुष्ठा, ग्याइक्पाइक्वा माल्मे बाक्त। तन्न शुश मुर देल्शो तशा हिंशा, ब्राशा लमा बाक्त।

तिरो थाप्चा देय मथाप्चा?

मत्ती २२:१५-२२; लूका २०:२०-२६

<sup>13</sup> मिनू येसु कली लोव ख्राइक्पाइक्वा दे फरिसी नु हेरोदी का निक्शी येसु आ बाक्तीके सोइक्तमे बाक्त। <sup>14</sup> मिनू मेको सोइश्शोपुकी जाक्शा, येसु कली “शेंब, गे थमा पाइब ननी। मुर आन कुल मकोवथु सुइ तशा महिंधु, परमप्रभु यावे आ लोव थमा पा शेंनीनी, दे तुइक्नीकी। सिजर सरकार कली तिरो थाप्चान माल्ब देय मथाप्चु यो दुम्बा? <sup>15</sup> गोपुकीमी थाप्चा देय मथाप्चा? मार देंनीनी” दे हिल्लो पखु पा लोव ख्राइक्पाइक्वा माल्मे बाक्त। मिनू येसुमी मेको आन पचा माल्शो तुइश्शा, मेको आन कली “मारदे आं थुं थाम्नीनी? देनार का कौइदीनी” देंमाक्त। देनार का नाक्त का डा गाल्च बाक्त। मेको रोम डा चांदी के क्येट बाक्त। <sup>16</sup> मिनू देनार का कौइदमे बाक्त। मिनू येसुमी “एको सु आ नेंमी खोइश्शो बाक्मे?” देंमेनु “सिजर आ नेंमी खोइश्शो बाक्त” देंमा बाक्त। <sup>17</sup> मिनू येसुमी “सिजर आ मार मार बाक्मा, मेको सिजर कली गेने। परमप्रभु यावे आ मार मार बाक्मा, मेको परमप्रभु यावे कली गेने” दे माइक्मी बाक्त। मिनू नेल्ल छक लाक्मा बाक्त। रोमी १३:१७

बेक्शो रे सेंसीचा आ पर्वम शेंशो

मत्ती २२:२३-३३; लूका २०:२७-३८

<sup>18</sup> मिनू सदुकीपुकी जाक्मा बाक्त। सदुकीपुकीमी बेक्शो रे मसेंसीब दे शेंनीम। मिनू येसु आ बाक्तीके जाक्शा <sup>19</sup> “ए शेंब, मोसामी ब्रेक्शो लोवमी ‘सुइ आ लोक्ब आल मथिथु बेक्त हना, मेकोमी आ भोग्यु वौइसीशा, आ लोक्ब आ खिं डा मुर मजाम्मल, दे तमी तौ थिवल’ दे ब्रेक्शो बाक्त। ब्यवस्था २५:५-६ <sup>20</sup> मिनू खिं कामी ७ जना लोक्ब बाक्मा बाक्त। डौइती जेठामी मीश चाक्गा बाक्त। मिनू आल मथिथु बेक्माक्त। <sup>21</sup> मिनू माइलामी आ भोग्यु वौइसे बाक्त। मिनू आ यो आल मथिथु बेक्माक्त। मिनू साइलामी वौइसे बाक्त। मेको यो आल मथिथु बेक्माक्त। <sup>22</sup> मोदेशो पा ७ जनान आल मथिथु, बेक्मा बाक्त। मिनू नोले मेको मीश मुर यो बेक्माक्त। <sup>23</sup> मुर बेक्शो रे सेंसीशा ब्रौइमानु, मेको ७ जना वौइश आन मीश दुश्शो मीश मुर तेको आ मीश दुम्बा?” दे हिल्लो पामे बाक्त। <sup>24</sup> मिनू येसुमी “गे परमप्रभु यावे आ लोव मरुप्नीनी। परमप्रभु यावे आ सक्ति यो मतुइक्नीनी। मोपतीके दूली मिम्नीनी, ममाइ? <sup>25</sup> बेक्शो रे सेंसीशा ब्रौइमानु, मुरपुकीमी ग्युंभे मपाइनीम, स्वर्गम बाक्ब परमप्रभु यावे आ गेय पाइबपुकी खोदेशो दुम्नीम। <sup>26</sup> बेक्शो रे सेंसीचा आ पर्वम परमप्रभु यावेमी मोसा कली मी ब्रशो रवा आ नेक्था गुम्शा ‘अब्राहाम आ परमप्रभु यावे, इसहाक आ परमप्रभु यावे नु याक्ब आ परमप्रभु यावे गो नड’ दे मदा बाक्त दे मोसामी ब्रेक्शो किताबमी ब्रेक्शो बाक्ब। मेको लोव मपढेनी? प्रस्थान ३:६ <sup>27</sup> परमप्रभु यावे बेक्शो मुर आन परमप्रभु ममाइ, ब्रौइशो आन परमप्रभु यावे बाक्ब। गे दूली मिम्बाक्नी बाक्त” दे माइक्मी बाक्त।

नेल्ल क्येडा तुइक्वा माल्शो लोव

मत्ती २२:३५-४०; लूका १०:२५-२८

<sup>28</sup> मिनू सास्त्री कामी सदुकीपुकीमी येसु नु लोव पशो नेंशा, येसुमी मेको आन लोव लेन्ने चाप्बाक्त, दे रुष्ठा डा मिन, येसु आ नेक्था जाक्शा “ए शेंब, परमप्रभु यावे आ अरेशो लोव तेको नेल्ल क्येडा डौइती डा बाक्बा?” दे हिल्लो पवा बाक्त। <sup>29</sup> मिनू येसुमी “नेल्ल क्येडा डौइती डा लोव एकोन बाक्ब ‘ए इसाएल नेनो, इ परमप्रभु यावे का बाक्ब। <sup>30</sup> थुं का पा, सोक्त का पा, मिम्तीके नु सक्ति नेल्लेमी परमप्रभु यावे, इ परमप्रभु कली दाक्तो’ देंशो एको लोव नेल्ल क्येडा डौइती डा बाक्ब। ब्यवस्था ६:४-५ <sup>31</sup> मिनू आ नोले डा ठेयब लोव ‘आंम इ कली दाक्शो खोदेशो पा इ नेक्था बाक्ब आन कली यो दाक्तो’ देंशो बाक्ब। एको लोव निक्शी क्येडा ठेयब लोव मबाक्ब”

देंमाक्त। लेवी १९:१८ <sup>32</sup> मिनू सास्त्रीमी “शेंब, गे थमान ठीक लोव पाइतीनी। परमप्रभु यावे कानाइ बाक्ब। आ डा लाक्शा सुइ मबाक्ब। लूका २०:३९-४० <sup>33</sup> मिनू थुं का पा, रुप्तीक नु सक्ति नेल्लेमी परमप्रभु यावे कली दाक्वा, आंम कली दाक्शो खोदेशो पा इ नेक्था बाक्ब आन कली दाक्वा, देंशो लोव नेल्ल क्येडा ठेयब बाक्त। मारेइ मारेइ क्योरशा चढ़ेशो क्येडा मेको लोव टिशा पचा रिम्शो बाक्ब” देंमाक्त। १सामुएल १५:२२; होसे ६:६; मत्ती ९:१३ <sup>34</sup> मिनू येसुमी “एकोमी निप्स खाप्शो लोव पाइबाक्त” दे रुष्ठा “गे परमप्रभु यावे आ राज्य रे डोन मबाक्नी बाक्त” दे मदा बाक्त। में डा मेरे हिंशा, सुइमी लोव हिल्लो मपामे बाक्त। प्रेरित २६:२७-२९

ख्रीस्त सु का आ तौ बाक्बा?

मत्ती २२:४१-४६; लूका २०:४१-४४

<sup>35</sup> मिनू येसुमी परमप्रभु यावे आ खिंमी शेंना शेंन बाक्मेनु “ख्रीस्त दाऊद आ तौ बाक्माक्त, दे सास्त्रीपुकीमी दोपा शेंने चाप्नीमी डा? यसैया ११:१; यूहन्ना ७:४२; रोमी १:३ <sup>36</sup> दाऊदमी परमप्रभु यावे आ सोक्त रे पा ‘प्रभुमी आं प्रभु कली इ जोरी सत्रु आन कली इ खोइली आगाम मवोदुमी सम्म आं ग्युरा गे बाक्को’ देंत। भजन संग्रह ११०:१; २सामुएल २३:२ <sup>37</sup> दाऊदमी मेको कली प्रभु देंब। मिनू दोपा आ तौ दुम्ने चाप्बा डा?” दे शेंदा बाक्त। शुश मुरुमी आ शेंशो लोव नेंचा दाक्तमे बाक्त।

सास्त्री आन कली हुइश्शो

मत्ती २५:५-१४; लूका २०:४५-४७

<sup>38</sup> मिनू शेंना शेंन “सास्त्री आन लोव क्येडा होस पाइसीने। मेकोपुकीमी लाइश्शो कोट फेक्शा गाक्चा दाक्नीम। बजारमी हिरशा, मान पपाइसीचा दाक्नीम। <sup>39</sup> गुम्तीक खिंमी ठेयब नित्तीकेमी नित्वा दाक्नीम। भोजमी मान पपाइसीचा डा नित्तीकेमी नित्वा दाक्नीम। <sup>40</sup> वौइश बेक्शो मीश मुर आन शोंप नेल्ल नेक्शा गेशा, दुइश्शो दुइश्शो प्रार्थना पा कौइखु पाइनीम। मोदेशो पाइबपुकीमी अरु आन क्येडा शुश सजाइ ताइनीम” देंमाक्त। याक्ब १:२७

प्रुडग मीश मुरु आ चढ़ेशो क्येट

लूका २१:१-४

<sup>41</sup> मिनू येसुमी क्येट चढ़ेतीक एरे निश्शा, शुश मुरुमी क्येट चढ़ेशो कोव्रना कोव्रन बाक्माक्त। क्येट थीब शुशेमी शुश क्येट चढ़ेमे बाक्त। २राजा १२:१० <sup>42</sup> मिनू आ वौइश बेक्शो मारेइ मथीब प्रुडग मीश मुर का जाक्शा, लेप्तोन निक्शी चढ़ेवा बाक्त। लेप्तोन का नेल्ल क्येडा आइक्च तांबा के क्येट बाक्त। <sup>43</sup> मिनू येसुमी आ शेंसीब आन कली ब्रेशा “नोफा दाइश्शा नेनीने, नेल्लेमी चढ़ेशो क्येडा मेको प्रुडग मीश मुरुमी शुश चढ़ेपु। <sup>44</sup> आ जशा ब्रौइतीक क्येट नेल्ल गेपु। अरुमी चहिं आन गाप्शो रे गेम्तेक्म” देंमाक्त।

“परमप्रभु आ खिं मलीब” देंशो

मत्ती २४:-; लूका २१:५-३६; लूका १७:२३-३७

**13** मिनू येसु परमप्रभु यावे आ खिं रे गूमेनु, आ शेंसीब कामी “ए शेंब, कोव्रडीन, एको खिं ठेयब फुल्लु के सेल्शा, दोमो कोल्शो गिश दारशो तांइसाक्व” देंमाक्त। <sup>2</sup> मिनू येसुमी “मुल ओमो ठेयब दारशो सेल्शो खिं ताप्तीवी। तन्न नोले ब्रेश्शा, फुल्लु का यो खोप्शा मलीब” देंमाक्त।

श्येत दुम्चा गोइब

<sup>3</sup> मिनू परमप्रभु यावे आ खिं तांइसीचा डा पा जैतून डांडामी निस्सेनु, पत्रुस, याक्ब, यूहन्ना नु अन्द्रीयास जाक्शा, मत्ती १७:१ <sup>4</sup> येसु कली “एको इन देंशो लोव गेना दुम्बा? एको नेल्ल दुम्चापु, दे तुइक्पाइक्वा डा चिन्ड दोपा तांइसीनीमी? शेंदीकी” देंमा बाक्त। <sup>5</sup> मिनू येसुमी “सुइमी इं थुं मक्यामेक्ल, दे होस पा बाक्कीन। <sup>6</sup> शुश मुरुमी आं नें ब्रशा ‘गो एको नड’ देंशा, मुर आन थुं क्येइक्नीम। यूहन्ना ८:४९ <sup>7</sup> शुश लडाइ दुम्शो लोव नेंनीनु, महिनीन। मोदेशो दुम्चान माल्ब। रागी नुच्ची चहिं मजा। <sup>8</sup> रागी नुच्चा

क्येडा डोंइती जात जात नु राज्य राज्यमी लडाइ पमुइनीम। रागी रागीमी खिनु कुइब। अन्काल दुम्ब। मो दुम्मेनु, श्येत दुम्चा गोवा बाक्त, दे तुंडसीब।

थमा सुइक्व ग्याइक्वा पुंडसीनीम

9 आंम इन कली मिम्शा होस पा बाक्कीन। कछडी वोइक्वा पुंडसीनीनी। गुम्तीक खिमी तुप्चा पुंडसीनीनी। आं नें आ पबर्म हुकुम पाइब नु पिप आन डोंइती राप्पाइक्वा पुंडसीशा, सांकछी दुम्चा माल्नीनी। 10 मोदेंशो दुम्चा क्येडा डोंइती रागी नेल्ल डा मुर आन कली ग्येरपाइक्व लोत्र नेंपाइक्ने थुम्शो दुम्चा माल्ब। मर्कूस १६:१५ 11 मिनु इन कली ठेयब मुर आन डोंइती राप्पदमेनु, मार लोत्र पय, मार देय? दे हिंशा, मिम्स डा मिम्स मबाक्कीन। इन कली मोदेंशो लोत्र पचा गेशो बाक्मे, मोदेंशो लोत्र पने। मारदे हना गे लोत्र मपाइनीनी, परमप्रभु यावे आ सोक्तीम इन कली लोत्र पपाइक्व।

12 लोकबमी आ लोकब कली साइक्वाइक्वा गेब। आफोमी तौ कली साइक्वाइक्व। मिनु तमी तौपुकीमी आम आफ आस कली ग्याइक्वाइक्वा साइक्वाइक्वीम। 13 आं नें आ पबर्म सुइम इन कली मदाक्नीम। सु सु चहिं नेल्ल क्येडा नोले सम्म थमा सुइक्वा मप्रोंइथु बाक्नीमी, मेकोपुकी श्येत जचा रे ब्रोंइशा, गेना हना यो परमप्रभु यावे नु बाक्वा ताइनीम। यूहन्ना १५:१८,२१

मुल सम्म मदुम्शो श्येत दुम्ब

14 परमप्रभु यावे आ खिं गेनायो मदुम्चा डा पा बिथोलो दुम्मेनु, मेको मुल पढेबपुकीमी रुपमेक्ल, यहूदीया रागीम बाक्बपुकी डांडा ग्येतथ प्रोक्मल। दानीएल ९:२७; दानीएल ११:३१; दानीएल ११:३१ 15 बारदालीम बाक्बपुकीमी 'तोइश्शा, खिं ओवशा मारेइ लाइक्वा ताइनुड' दे ममिम्तमेक्ल, दिव दाव प्रेक्शा प्रोक्मल। 16 रूमी गेय पाइबपुकीमी 'फेक्तीक का लाइक्नुड' देंशा, खिं मलेम्मल। तन्न आन गेय थु था प्रोंइशा प्रोक्मल। 17 कोव्रज कुरशो नु दूध तूब आल पाइश्शो मीश मुर अरु क्येडा शुश श्येत जाइनीम। 18 हिउंदमी मोदेंशो श्येत मदुम्स, दे परमप्रभु यावे कली पुनीने। 19 परमप्रभु यावेमी रागी सेला रे मुल सम्म सुइमी मतुइश्शो श्येत दुम्ब। मोदेंशो श्येत लेंशा गेनायो मपीब। दानीएल १२:१ 20 प्रभुमी मोदेंशो श्येत जतीक नाक्त शुश वोइश्शो हना, सुइ ब्रोंइने मचाप्नीम। तन्न आ योव्रशो आन पबर्म प्रभुमी मेको श्येत शुश नाक्ती लीचा मगेब।

21 मिनु मुरपुकीमी 'ख्रीस्त एकेर जाक्त, मेरेक बाक्ब, लो कोव्रडीन' देंतेक्म हना, थमा मसुतीन। 22 शुशेमी 'गो ख्रीस्त नड' दे जोल पा गाक्नीम। 'परमप्रभु यावे आ लोत्र पाइब नकी' दे जोल पाइबपुकीमी चिन्ड नु छक लाक्वा डा गेय पा कोंइनीम। मेकोपुकीमी परमप्रभु यावे आ योव्रशो आन कली यो लां प्रोंइपाइक्वा माल्नीम। 23 मेको दुम्चा डोंइतीन नेल्ल शेंशा तुइक्वाइक्वतन्नी। एको लोत्र मिम्शा मप्रेंथु बाक्कीन।

रागीम जरमेशो जाक्ब

24 रागीमी मोदेंशो ठेयब श्येत नुम्मेनु, सरीडमी चिन्ड तांडसीनीम। नां आ छेडछेड जाम्शा, जिक रिक्शो दुम्ब। तास्ता आ हाम्सो यो जाम्ब। 25 सोरुल खपीम दोक्नीम। सरीडमी बाक्शो सक्तिपुकी हिम्सीनीम। हिब्रू १२:२६ 26 मिनु मुरपुकीमी रागीम जरमेशो कली गोस्सुमी गिल्लीशा, शुश सक्ति पाइश्शा, यिना यिन पशो ताइनीम। दानीएल ७:१३ 27 मिनु रागीम जरमेशोमी परमप्रभु यावे आ गेय पाइब आन कली रागी तेइ तेइ रे परमप्रभु यावे आ योव्रशो नेल्ल आन कली खुप्शा चाक्थ सोइक्व। मत्ती १३:४१ 28 फोव्रशी रवा कोच्चा दाप्शा कुशो तनीनु, बर्खा जाक्माक्त दे तुइक्नीनी। 29 आं देंशो लोत्र थमा दुम्शो तनीनु, आं जाक्ची जाक्माक्त दे तुइक्नीनी। 30 नोफा दाइश्शा नेनीने, एको जात डा मुर मनुप्यु, आं देंशो थमा दुम्ब। 31 सरीड नु रागी नेल्ल जाम्शा लाइनीम, आं लोत्र चहिं गेना हना यो मजाम्थु लीब।

32 मोदेंशो गेना दुम्ब, दे सुइमी मतुइक्नीम। परमप्रभु यावे आ स्वर्ग डा गेय पाइबपुकीमी यो मतुइक्नीम। तौमी लायो मतुइक्व। आं आफोमी ला तुइक्व।

सासीशा बाक्वा माल्ब

33 मोदेंशो गेना दुम्बा मतुइक्नीनी। मोपतीके सासीशा बाक्कीन। लूका १२:३५-४०; लूका २१:३६ 34 मोदेंशो दुम्ब देंशा हना, मुर का तेइ तेइ हिरथ लमेनु, लचा डोंइती आ गेय पाइब आन कली का का पा आन गेय योक्शा, लाप्यो खाल पाइब कली 'गेना हना यो लां कोव्रशा बाक्को' दे माइश्शा लाइब। 35 आं खिं डा प्रभु गेना लेशशा जाक्वा, दे मतुइक्नीनी। नां रिक्शा जाक्वा कों? नाक्दो जाक्वा कों? भाले ग्रीची ना जाक्वा कों? सुनी जाक्वा कों दे मारेइ मतुइक्नीनी। मेको इन मतुइक्थु जाक्ब। लूका १२:३८ 36 इन मतुइक्थु जाक्मेनु, इन कली इप्शो मथिदल। 37 मोपतीके लां कोव्रशा सासीशा बाक्कीन दे माइक्वतन्नी। मोदेंशो नेल्ल आन कली माइक्नुडमी" दे शेंदीमी बाक्त।

येसु कली साइक्वा माल्शो

मत्ती २६: - २८:-; लूका २२: - २४:-; यूहन्ना १८: - २१:-

14 मिनु बोरब ओख्ती मसुप्शो शोब्ले जतीक पास्सा चाड आ निक्शी नाक्ती डोंइती ठेयब चढेब नु सास्त्रीपुकीमी "येसु कली दोपा मुर आन मतुइक्थु ग्याइश्शा, साइक्वाइक्वा" दे लोव्रसी पमुमानु 2 "चाड नाक्ती मदुम्ब, मुरपुकीमी मरिम्शो पाइनीम" देंमुमा बाक्त।

येसु तेल खेक्वा पुंडसीशो

3 येसु बेथानीमी कोर पाइब सिमोन आ खिंमी खमे जना जन बाक्मेनु, मीश मुर कामी शुश क्येट लाइब ब्रोंव्रशो रिना पाइश्शो तेल कुरशा जाक्शा, मेको तेल येसु आ पियामी लुक्ता बाक्त। 4 मिनु मेकेर बाक्ब का निक्शीमी "ओदेंशो तेल मारदे एकोमी ओपा ताइक्ता? 5 लेयड हना, सहे सां देनार क्येडा शुश ताक्शा, श्येत जाइब आन कली योक्शा, वारच पने चाम्स वा" दे आन थुं मनुथु, मीश मुर कली हुइक्तेमे बाक्त। देनार का नाक्त का डा गाल्वा बाक्त। मेको रोम डा चांदी के क्येट बाक्त। 6 मिनु येसुमी "महुइक्तीने, मारदे आ थुं खाइक्वाइक्वी? आं कली रिम्शो पाइक्ती। 7 श्येत जशो मुर गेना हना यो थिन्नीनी, मिनु शिशी पाइक्वा दाक्ताक्नी हना, गेना हना यो पाइक्ने चाप्नीनी। आं कली चहिं नोले मथिन्नीनी। ब्यवस्था १५:११ 8 आ चाप्शो पाप्नु। बेक्वा क्येडा डोंइती आं रां थिम्चा कली तेल खेक्ताक्व। 9 नोफा दाइश्शा नेनीने, रागीम ते ते आं लोत्र नेंपाइक्नीमी, मेक मेक एको आ पशो आ पबर्म यो लोत्र पाइनीम" देंमाक्त।

इस्कारीयोत डा यहूदा आ पशो

10 इस्कारीयोत डा यहूदा येसु आ शेंसीब कामी ठेयब चढेब आन कली "येसु कली ग्याइक्वा वारच पाइनन्नी" दे लोत्र पथ लमाक्त। मिनु मेकोपुकीमी आ देंशो नेंशा, ग्येरशा "लो, रिम्शोन दुम्त। क्येट गेनीकी" देंमा बाक्त। 11 में डा मेरे "गेना नु दोपा ग्याइक्वा वारच पदुमी" दे योव्रकी पना पन गाक्माक्त।

पास्सा चाड डा भोज

12 बोरब ओख्ती मसुप्शो शोब्ले जतीक चाड आ डोंइती डा नाक्ती पास्सा डा पाठा क्योरशा ब्वाइनीम। मिनु येसु आ शेंसीबपुकीमी "पास्सा मानेचा कली ते लशा साचा? मार देंनीनी?" दे हिल्लो पामे बाक्त। 13 मिनु येसुमी शेंसीब निक्शी आस कली "सहर लसे। मिनु गाग्री कुरशो मुर का कली गुम्नीसी। मेको आ नोले खोतीसे। 14 मिनु मेको तेको खिं ओव्रबा, गे यो ओव्रडीसे। मिनु खिं डा मुर कली 'शेंबमी सोइश्शो नस्कु। शेंबमी आ शेंसीबपुकी नु काथा बाक्शा, पास्सा ते मानेचा? दे हिल्लो पथ सोइक्ताक्की" दे मतीसे। मर्कूस ११:३ 15 मो माइक्सीनु, मेकोमी इस कली तला तारी ठेयब कोठा का कोंइब। मेको कोठामी गुन्दी पीरा ब्रशा वोइश्शो थिन्नीसी। मिनु मेकेरन साचा" दे सोइक्तीम्सी बाक्त। 16 मिनु मेको निक्शी लशा, सहर जाक्दीश्शा, येसुमी दोदेंशो देंमे, मोदेंशो थित्से बाक्त। मिनु पास्सा चाड डा भोज सादसे बाक्त।

17 मिनु नां रिक्मेनु, येसु नु आ १२ जना शेंसीब खुम्समा बाक्त। 18 मिनु जना जन बाक्मानु, येसुमी “नोफा दाइश्शा नेनीन। मुल एक बाक्ब काम आं कली ग्याइक्ब आन कली वारच पाइब। मुल गो नु काथा जना जन बाक्ब” देंमाक्त। *यूहन्ना १३:२१-२६* 19 मिनु नेल्लेमी शुश मरिश्शो लाक्शा “ए प्रभु, मेको वारच पाइब गो दुम्नुडा कौ?” दे का का पा हिल्लो पामे बाक्त। 20 मिनु येसुमी “१२ जना शेंसीब इन दाते डा का बाक्ब। गो नु काथा शोब्ले शेक्कुम तेप्बमी आं कली ग्याइक्पाइक्चा वारच पाइब। 21 मारदे हना रागीम जरमेशो आ पर्बम ब्रेक्शो लोत्र नेल्ल थमा दुम्चा माल्ब। मेको बेक्चा माल्ब। मो हना यो रागीम जरमेशो कली ग्याइक्पाइक्चा वारच पाइब कली शुश मरिश्शो दुम्ब। मो देंशो पाइब मुर मजरमेस हना, मेको कली रिश्शो दुम्ब वा” दे माइक्मी बाक्त।

22 मिनु जना जन बाक्मानु, शोब्ले शेशा “गे रिश्शो पाइब बाक्नीनी” दे प्रार्थना पशा जिक्शा, आ शेंसीब आन कली योक्शा “दांइसीने, एको आं रां बाक्ब” देंमाक्त। *१कोरिन्थी ११:२३-२५* 23 मिनु कचौरा शेशा “गे रिश्शो पाइब बाक्नीनी” दे प्रार्थना पा, मेको आन कली तूचा गेमी बाक्त। मिनु नेल्लेमी तूडमे बाक्त। 24 मिनु “एको आं हुश बाक्ब। आं हुशेमी परमप्रभु यावे आ गेशो नक लोत्र खाप्ता। आं हुश जारशोमी शुश मुर आन पाप क्याम्सीब। *प्रस्थान २४:८; हिब्रू ९:१५-१६* 25 नोफा दाइश्शा नेनीन, मुल डा मेरे एको अडगुर रे सेल्शो तूतीके मत्तुनुड। नोले नेल्ल नक दुम्शा, परमप्रभु यावे आ राज्यमी बाक्शा तूनुड” दे माइक्मी बाक्त। 26 मिनु कुम्सो पा बोक्शा, जैतून डांडा ग्येत्थ लमा बाक्त। *भजन संग्रह ११३:- ११८:-*

पत्रुसमी “गेनायो मप्रॉइननी” देंशो

27 मिनु लना लन बाक्मानु, येसुमी “गे नेल्लेमी इन थुं ग्यशा, आं कली प्रॉइनीनी। मारदे हना ओदें ब्रेक्शो लोत्र थमा दुम्ब ‘गो गोठला कली तुप्शा खेरनुड। मिनु भेडापुकी प्रोक्शा, साव सुव ब्राइनीम’ देंशो बाक्ब। *जकरिया १३:७; यूहन्ना १६:३२* 28 नोले गो बेक्शो रे सेंचा पुंडसीशा, इन डोंइती गालील रागी जाक्दीत्नुड” देंमाक्त। *मर्कूस १६:७* 29 मिनु पत्रुसमी “मेको नेल्लेमी इन कली प्रॉइशा प्रोक्तेक्म हना यो, गो मप्रॉइननी” देंमेनु, *यूहन्ना १३:३८* 30 येसुमी “नोफा दाइश्शा नेनो, में नाक्दोन भाले खेयप निक्शी मग्रीथु, खेयप सां सम्म ‘मेको कली मतुइक्नुड, सु बाक्म’ दे आं पर्बम देंनेवे” दे मदा बाक्त। 31 मिनु पत्रुसमी “मर्देनुड, गो नु काथा बाक्शा, साइक्चा पुंडसाक्वी हना यो, मोर्देशो गेनायो मर्देनुड” दे लोत्र थोक्शा देंमाक्त। आ शेंसीब नेल्लेमी यो मो देंमा बाक्त।

गेथ्सेमनेमी प्रार्थना पशो

32 मिनु गेथ्सेमने जाक्दीम्मा बाक्त। मिनु येसुमी “लो, एक बाक्कीन। गो इच्ची आइक्था लशा, प्रार्थना पाइनुड” देंशा, 33 पत्रुस, याक्ब नु यूहन्ना सां आन कली आइक्था लाइश्शा लमाक्त। येसु आ थुं शुश खाइक्माक्त। *मत्ती १७:१३* 34 मिनु सां आन कली “आं थुं शुश खाइश्शा, बेक्चा डा दुम्ती। मडप्थु गो नु काथा बाक्कीन” दे माइक्मी बाक्त। *यूहन्ना १२:२७* 35 मिनु इच्चा डोंइती लशा, खपीम बाप्शा “दुम्त हना, मुल दुम्चशो श्येत मदुम्ल” दे प्रार्थना पवा बाक्त। 36 मिनु “आब्बा, आं आफ, गो मारेइ मारेइ पने चाप्नीनी। एको कचौरा आं कली मतुपाइक्थु लतीने। तन्न आं दाक्शो मदुम्ल। इन दाक्शोन दुम्ल” दे प्रार्थना पशा, लेश्शा जाक्माक्त। *येसुमी आइक्च आल खोर्देशो पा आ आफ कली आब्बा देंत।* 37 लेश्शा जाक्मेनु, सांफा आन कली इष्शो तामी बाक्त। मिनु पत्रुस कली “ए सिमोन, इमे? छिन का यो मडप्थु बाक्ने मचबी? *मर्कूस १०:३८* 38 थुं थाम्चा पुंडसेनु, पाप मपड, दे मडप्थु बाक्शा प्रार्थना पावो। थुंमी पाइनुड, चाप्नुड देंब, तन्न रांमी फाल्ने मचाप्ब” दे मदा बाक्त। 39 मिनु लेंशा इच्चा आइक्था लशा, डोंइती प्रार्थना पशो खोर्देशो पा, प्रार्थना पवा बाक्त। 40 मिनु लेंशा लेश्शा जाक्शा, निन्द्रामी दुक्शा बाक्शो तामी बाक्त। मेकोपुकीमी मार देंचा, दे मारेइ मतुइक्तमे बाक्त। 41 मिनु लेंशा प्रार्थना पथ लशा, लेश्शा जाक्शा, मेको आन कली “गे मुल सम्म इष्शा बाक्नीनी? मुल गाप्त। रागीम जरमेशो पापी आन गुडमी गेचा पुंडसीचा

चिक्ताक्व। 42 लो बोक्कीन, लय। आं कली ग्याइक्चा वारच पाइब जाक्चाप्तु” दे माइक्मी बाक्त।

येसु ग्याइक्चा पुंडसीशो

43 मो माइक्मीनु, आ शेंसीब यहूदामी ठेयब चढ़ेब, सास्त्री नु जोक्ब तुइक्ब खालपापुकीमी सोइश्शो तरवार कोक्के कुरब हुल, येसु कली ग्याइक्च चाक्गा बाक्त। 44 यहूदामी “सु कली पुक्पु पदु, मेको कली ग्याइश्शा लतीने” दे ग्याइक्च जाक्ब आन कली तुइक्पाइश्शो बाक्माक्त। 45 मिनु जाक्मानु, यहूदा येसु आ नेक्था लशा “रब्बी” दे बे मुप्शा, पुक्पु पवा बाक्त। *हिब्रू लोत्रमी ठेयब शेंब कली रब्बी देंनीम।* 46 मिनु ग्याइक्च जाक्बपुकीमी येसु कली ग्याइक्तमे बाक्त। 47 मिनु येसु नु काथा बाक्ब कामी तरवार ग्री शोइश्शा, ठेयब चढ़ेब आ वाइल का आ नोफा दि खोदा बाक्त। 48 मिनु येसुमी आ कली ग्याइक्ब हुल आन कली “तरवार कोक्के कुरशा, खुइ पाइब कली ग्याइक्च जाक्शो खोर्देशो पा आं कली ग्याइक्च जाक्नी? 49 नाक्त किंत किंत परमप्रभु यावे आ खिमी गेपुकी नु काथा बाक्शा, शेंना शेंन बाक्डानु, मग्याइक्तीनी। तन्न परमप्रभु यावेमी ब्रेक्पाइश्शो लोत्र थमा दुम्चा कली ओर्देशो दुम्त” दे माइक्मी बाक्त। 50 मिनु आ शेंसीबपुकी येसु कली थु था प्रॉइशा, साव सुव ब्रशा प्रोक्मा बाक्त। 51 मिनु येसु कली ग्याइश्शा फ्रेंशा लदमेनु, ठिटा का आन नोले खोदा बाक्त। मेको ठिटांम वा का ला गिल्सीशो बाक्माक्त। 52 मारदे हना मेको कली ग्याइक्तमेनु, आ फेक्शो वा प्रॉइशा, शिश्रा प्रोक्शो बाक्माक्त। *आमोस २:१६*

येसु कली चढ़ेब आ डोंइती चाक्शा

53 मिनु येसु कली नेल्ल क्येडा ठेयब चढ़ेब आ डोंइती चाक्दीत्मे बाक्त। मेकेर ठेयब चढ़ेब, जोक्ब तुइक्ब खाल्पा नु सास्त्रीपुकी खुम्सीशा बाक्शो बाक्मा बाक्त। 54 पत्रुस मेको आन नोलेले खोइश्शा लशा, नेल्ल क्येडा ठेयब चढ़ेब आ लाडगा जाक्दीम्माक्त। मेकेर सिपाइपुकी नु काथा मी थेरशा बाक्माक्त।

55 ठेयब चढ़ेब नु मेकेर बाक्ब नेल्लेमी मार पामे बाक्त देंशा हना, जोल पा दोस गेशा, येसु कली साइक्पाइक्चा माल्मे बाक्त। तन्न दोस गेने मचाप्मे बाक्त। 56 शुश मुरुमी जोल पा सांकछी गेमे बाक्त, तन्न आन लोत्र मगारमाक्त। 57 सांकछी का निक्शी बोक्शा “एको ग्याइश्शो मुरुमी साबेर मार देंशो नेंतक देंशा हना 58 ‘एको गुडमी सेल्शो परमप्रभु यावे आ खिं प्रेशशा, नाक्त सांमी अर्को सेल्नुड। मेको चहिं गुडमी सेल्शो ममाइ’ देंशो नेंतक” देंमा बाक्त। *यूहन्ना २:१९-२१* 59 मो देंमा बाक्त हना यो, आन लोत्र मगारमाक्त। 60 मिनु नेल्ल क्येडा ठेयब चढ़ेब बोक्शा, आन दातेमी राप्शा, येसु कली “एकोपुकीमी देंशो लोत्र नेंशा, मार देंनेवे?” दे हिल्लो पवा बाक्त। *मर्कूस १५:५; यसैया ५३:७* 61 मिनु येसु सिक्सी पा बाक्शा, लोत्र का यो मलेत्ता बाक्त। मिनु नेल्ल क्येडा ठेयब चढ़ेबमी “गे नेल्ल क्येडा मान ताइब परमप्रभु यावे आ तो ख्रीस्त नवे?” दे हिल्लो पवानु, 62 येसुमी “गो नड। गे रागीम जरमेशो कली नेल्ल सक्ति पाइश्शो आ ग्युरा गे बाक्शो ताइनीनी। गोस्सुमी गिल्सीशा जाक्ना जाक्न पशो ताइनीनी” दे मदा बाक्त। *भजन संग्रह ११०:१; दानीएल ७:१३-१४* 63 मिनु नेल्ल क्येडा ठेयब चढ़ेबमी आंम आ फेक्शो वा खाक्शा “परमप्रभु यावे कली शुक्शी लोत्र पाइबाक्त। 64 मार सांकछी माल्दा डा? आ शुक्शी पशो लोत्र गे नेल्लेमी नेंशा, सांकछी दुम्तीनी। एको कली मार पाइक्चा? मार देंनीनी?” दे माइक्मीनु, नेल्लेमी “साइक्चा माल्ब” देंमा बाक्त। *यूहन्ना १९:७* 65 मिनु साइक्चा माल्ब देंशा डा मिन, का निक्शीमी आ कुलम तोक्तमे बाक्त। का निक्शीमी आ मिक्च सुम्शा, तुप्शा “सुमी तुमे? लो देन” दे शुक्शी पामे बाक्त। मिनु सिपाइ आन गुडमी गेमे बाक्त। मेकोपुकीमी तुप्ना तुप्न लदमे बाक्त।

पत्रुसम “मेको कली मतुइक्नुड” देंशो

66 आगाम मोर्देशो दुम्मेनु, पत्रुस लाडगामी बाक्माक्त। मिनु गेय पाइब मीश मुर कामी जाक्शा, 67 पत्रुस कली मी थेरशो तशा, शिरशा कोव्रशा “गे यो मेको नासरथ डा येसु नु काथा गाक्ब का बाक्डे बाक्त” देंमाक्त।

68 मिनू पत्रुसमी “इ देशो मरुबु। मारेड मतुडवक्तु” देंमाक्त। मिनू गूशा, ठेयब लाप्यो डा लां जावदीम्माक्त। 69 मिनू मेको गेय पाइब मीश मुरुमी पत्रुस कली लेंशा तशा, मेकेर बाक्ब आन कली “मेरे यो मेको नु गाक्ब का बाक्त” देंमेनु, 70 पत्रुसमी “गो मनड, मेको कली मतुडवक्तु” देंमाक्त। मिनू छिन का नोले मेकेर बाक्बपुकीमी यो “गे मेको नु काथा गाक्ब का बाक्डे बाक्त, मारदे हना गालील डा बाक्डे बाक्त, दे तुंडसीब” देंमानु, 71 पत्रुसमी “जोल पाता हना, यावेमी सजाइ गेयील, इन देशो मुर कली तुंडसीन मतुडवक्तु” दे कसम जशा, आ लोत्र थोक्शा देंमाक्त। 72 मो देंम चोटी भाले खेयप निक्शी ग्रीमाक्त। मिनू पत्रुसमी “भाले खेयप निक्शी मग्रीथु, खेयप सां सम्म मेको कली मतुडवक्तु, सु बाक्म? देंनेवे” दे येसुमी देशो लोत्र ति फ्रुक्गा बाक्त। मिनू आ पशो मिम्शा डाक्माक्त।

पिलातस आ डोंइती राप्पाइश्शो

15 मिनू नां सोत्रमेनु, ठेयब चढेब, जोक्ब तुडक्बखाल्पा नु सास्त्रीपुकी, सभाम बाक्ब नेल्ल खुम्सीशा, सल्ला पामे बाक्त। मिनू येसु कली फ्रेंशा लाइश्शा, पिलातस आ गुडमी गेमे बाक्त। 2 मिनू पिलातसमी येसु कली “गे यहूदी आन पिप नवे?” दे हिल्लो पवानु “गे आंमा देंतीनी” दे लोत्र लेत्ता बाक्त। 3 ठेयब चढेबपुकीमी शुश दोस गेमे बाक्त। 4 मिनू पिलातसमी येसु कली “इ कली शुश दोस गेम्तेक्मे। गे मेको आन कली मारेड लोत्र मलेत्तेवे?” दे हिल्लो पवा बाक्त। 5 मिनू येसुमी लोत्र का यो मलेत्ता बाक्त। मिनू पिलातस छक लाक्माक्त। मर्कूस १४:६१; यसैया ५३:७

6 पास्सा नाक्ती पिलातसमी मुरपुकीमी प्रोंइचा, दे पुंडुशो जेल्खानमी चोक्सीशो मुर का कली प्रोंइबाक्माक्त। 7 सरकार कली मरिम्शो पा जेल्खानमी चोक्चा पुंडुसीशो मुर आन दाते डा बारब्बा माइश्शो का बाक्माक्त। मेकोमी मुर साइश्शो बाक्माक्त। 8 मिनू मुरपुकीमी पिलातस कली “साइ रे डा पशो खोदेशो पा मुर का कली प्रोनीन” दे पुन्मे बाक्त। 9 मिनू पिलातसमी “यहूदी, इन पिप प्रोंइचा दे पुंडुनी?” दे हिल्लो पवा बाक्त। 10 मारदे हना ठेयब चढेबपुकीमी थुं चोशा, येसु कली ग्याइक्पदमे बाक्त दे रुष्पा, प्रोंइचा माल्शो बाक्माक्त। यूहन्ना ११:४८ 11 तन्न ठेयब चढेबपुकीमी मुर आन कली हुल पोक्शा “मेको कली मप्रोंइचा, बारब्बा कली प्रोंइचा, सरकार” दे पुंडुपदमे बाक्त। 12 मिनू पिलातसमी “गेपुकीमी यहूदी आन पिप देशो मुर कली मार पदु मिनू?” दे हिल्लो पवानु 13 “मेको कली शीमी क्येप्शा कांटी थोक्शा क्याइक्चा माल्ब” दे रेयके पचा गोत्रमे बाक्त। 14 मिनू पिलातसमी “मार मरिम्शो पवा, मार दोस गेचा” देंमेनु “शीमी क्येप्शा कांटी थोक्शा क्याइक्चा माल्ब” दे शुश रेयके पामे बाक्त। 15 मिनू पिलातसमी “हुल आन दाक्शो पचा” दे मिम्शा, बारब्बा कली प्रोंइपदा बाक्त। येसु कली चहिं युक्पाइश्शा, शीमी क्येप्शा कांटी थोक्शा क्याइक्चा कली सिपाइ आन गुडमी गेवा बाक्त।

येसु कली शीमी क्येप्शा क्याइश्शो

16 मिनू सिपाइपुकीमी येसु कली दरवार डा सिपाइ आन बाक्तीके चाक्दीश्शा, आन पल्टन नेल्ल खुप्शा डा मिन, 17 आ फेक्शो वा प्रुइश्शा, पिप आन फेक्तीक रड पाइश्शो वा फेक्पाइश्शा, चू के सिरपेच सेल्शा, आ पियाम गुप्तमे बाक्त। 18 मिनू “यहूदी आन पिप, सेउ ताक्कीन” दे सेउ परखु पामे बाक्त। 19 मिनू रेक्के के कोक्केमी आ पिया तेल्मे बाक्त। आ कुल तोक्तमे बाक्त। मिनू आ डोंइती पोक्च थेक्शा बाप्शा, ठेयब सेल्खु पामे बाक्त। 20 मिनू शुक्शी पचा रूशा, वा प्रुइश्शा, आंम आ वा फेक्पाइश्शा, गुंडुशा, शीमी क्येप्शा कांटी थोक्शा क्याइक्चा कली लदमे बाक्त।

21 मिनू लना लन बाक्मानु, आ गाउं रे पिशो साइरेनी डा सिमोन गुम्मे बाक्त। मेको सिमोन अलेकजन्डर नु रुफुस आस आफ बाक्माक्त। मेको कली गुम्शा, येसु कली क्येप्तीक शी “लो, कुर कि कुर” दे कुरपदमे बाक्त। रोमी १६:१३

22 मिनू येसु कली गोलगाथामी चाक्दीत्मे बाक्त। गोलगाथा कली खप्परे यो देंसीब। 23 मिनू अडगुर शांबुमी मूरे माइश्शो तेल कुर पशो तूतीके गेमेनु,

येसुमी तूने मबिस्से बाक्त। 24 मिनू शीमी क्येप्शा कांटी थोक्शा क्यदमे बाक्त। क्याइश्शा डा मिन, सुमी ताइबा, दे तुडक्चा कली वा वोइश्शा फेन्टे आप्मे बाक्त। भजन संग्रह २२:१८ 25 शीमी क्यदमेनु, सुनी डा ९ बजेशो बाक्माक्त। 26 “यहूदी आन पिप” दे दोस गेशा, ब्रेक्शो ब्रेक्स यो क्येप्शो बाक्माक्त। 27 खुइ निक्शी आस कली यो का आ ग्युरा गे, का आ पेरा गे क्याइश्शा वोदमे बाक्त। 28 मो पशोमी “मरिम्शो पाइब सुइश्शा, मरिम्शो पाइब नु काथा वोइक्चा पुंडुसीब” दे परमप्रभु यावेमी ब्रेक्पाइश्शो लोत्र थमा दुम्माक्त। यसैया ५३:१२

29 मेकेर कोत्रब शुश मुर बाक्मा बाक्त। मेकोपुकीम आन पिया हिम्शा “परमप्रभु यावे आ खिं प्रेशशा, नाक्त सांमी नक सेल्नुड, देंते। खोइ मिनू, सेल्ने चबी? मर्कूस १४:५८ 30 शीमी क्येप्शो रे प्रोंइसीशा तोंइसो” दे शुक्शी पामे बाक्त। 31 ठेयब चढेब नु सास्त्रीपुकीमी यो शुक्शी पा “शुश मुर आन कली श्येत रे प्रोंइना प्रोंइन गाक्बाक्त, आंम कली चहिं प्रोंइसीने मचाप्पाक्त। 32 इस्त्राएल डा पिप, ख्रीस्तमी शीमी क्येप्शो रे प्रोंइसेक्ल। प्रोंइसीशो ताइतय हना, थमा सुइक्नय” देंमुमा बाक्त। आ ग्युरा नु पेरा गे वोइश्शो निक्शीमी यो शुक्शी पदसे बाक्त। मत्ती १६:१४

33 मिनू नाक्त १२ बजे नां जिक रिक्शा, ३ बजे सम्म रागी नेल्ल छिडछिड दुम्माक्त। 34 मिनू ३ बजे गे येसुमी “एली, एली, लामा असाब्धानी” दे वाइ ब्रेम्माक्त। आ देशो मार रुम्सीब देशा हना “आं परमप्रभु, आं परमप्रभु, मारदे प्रोंइयीनी?” देशो रुम्सीब। भजन संग्रह २२:२ 35 एर ऑथ बाक्बपुकीमी मो देशा वाइ ब्रेश्शो नेंशा “नेनीने, एलीया कली ब्रेत्ताक्व” देंमुमा बाक्त। 36 मिनू का दोरशा लशा, रुवामी ग्युरशो तूचा थोत्रक नुप्शा, कोक्केमी लिक्शा युप्चा गेशा “एलीया जाक्शा, प्रोंइबा कों? लो, कोत्रय” देंमाक्त। 37 मिनू येसु लेंशा काले वाइ ब्रेश्शा, नोले सोक्त कीशा बेक्माक्त। प्रस्थान २६:३१-३३; २इतिहास ३:१४ 38 मिनू बेक्म नोले मार दुम्माक्त देशा हना, परमप्रभु यावे आ खिं आगा डा कोठामी बारेशो वा इर रे उइ सम्म उइक्थ पा जेर गाक्माक्त। 39 मिनू येसु आ डोंइती राप्शा बाक्शो कप्तानमी येसु वाइ ब्रेश्शा, नोले सोक्त कीशा बेक्शो तशा “थमा पा, एको मुर परमप्रभु यावे आ तौ बाक्माक्त” देंमाक्त।

40 येसु बेक्मेनु, शुश मीश मुरपुकीमी डोन रे कोत्रशो बाक्मा बाक्त। मोदेशो कोत्रब का माग्दाला डा मरीयम बाक्माक्त। का याक्ब नु योसेस आस ममा मरीयम बाक्माक्त। का सालोमे बाक्माक्त। 41 मेकोपुकी गालील रे यरूसलेम सम्म काथा गाक्शा, येसु कली वारच पना पन बाक्शो बाक्मा बाक्त। अरु यो काथा गाक्शा, यरूसलेम जाक्दीश्शो बाक्मा बाक्त। लूका ८:२-३

येसु आ रां पुक्खीमी वोइश्शो

42 येसु बेक्ची नाक्त चहिं नाइक्तीक नाक्त आ डोंइती नाक्त बाक्माक्त। मिनू नां रिक्मेनु, मार दुम्माक्त देशा हना, 43 अरीमाथीया डा योसेफ माइश्शो, सभामी बाक्ब आन दाते डा हिक्सीशो मुर का बाक्माक्त। मेको परमप्रभु यावे आ राज्य तांइसेक्ल, दे आस पा बाक्शो बाक्माक्त। मेको मुरुमी महिंथु, पिलातस कली गुम्थ लशा “येसु आ बेक्शो रां लाइक्चा गेयीनी” दे पुना बाक्त। 44 मिनू पिलातसमी बेक्म कों? मबेक्म दे मारेड मतुडक्थु कप्तान कली ब्रेश्शा “मेको येसु माइश्शो बेक्मे?” दे हिल्लो पवा बाक्त। 45 मिनू कप्तानमी “बेक्त” देंमेनु, लाइक्चा गेवा बाक्त। 46 मिनू योसेफमी बुश वा ग्याप्शा चाक्शा, येसु आ बेक्शो रां रे कांटी उइश्शा शोल्शा, बुश वामी गिल्शा लाइश्शा, पुक्खी कामी ऑइशा वोदा बाक्त। मेको पुक्खी बेक्शो मुर वोइक्चा कली फुल्लु मुशा, लाप्यो पाइश्शो सेल्शा वोइश्शो बाक्माक्त। मिनू बेक्शो मुर ऑइशा वोइश्शा, फुल्लुमी चोक्शा वोदा बाक्त। 47 मोपा वोइश्शो माग्दाला डा मरीयम नु योसेस आ ममा मरीयममी ताप्से बाक्त।

येसु बेक्शो रे सेंसाक्व, दे नेंपाइश्शो  
मत्ती २८:१-१०; लूका २४:१-१२; यूहन्ना २०:१-१०

16 मिनु नाइक्तीक नाक्त नोले माग्दाला डा मरीयम, याकूब आ ममा मरीयम नु सालोमेमी बेक्शो मुर आ रांम खेक्चा कली खेक्तीक ग्याप्मे बाक्त।<sup>2</sup> मिनु हप्ता डा डॉइती नाक्त सुनी कना बोक्शा, नां सोव्रमेनु, पुक्खी गे लमा बाक्त।<sup>3</sup> मिनु लमा लमा “फुल्लु सुमी याक्शा गोबा?” देंमुमा बाक्त।<sup>4</sup> मिनु जाक्दीश्शा कोव्रडमेनु, फुल्लु याक्ने थुम्शो तामे बाक्त। मेको फुल्लु शुश ठेयब बाक्माक्त।<sup>5</sup> मिनु पुक्खी ओव्रशा कोव्रडमेनु, बुश वा फेक्शो ठिटा का ग्युरा गे निश्शो तशा छक लाक्मा बाक्त।<sup>6</sup> मिनु मेको ठिटामी “मार छक लाक्मी? शीमी क्येप्शा कांटी थोक्शा क्याइश्शो नासरथ डा येसु कली माल्थ जाक्नी ममाइ? आ बेक्शो रां वोइक्तीके कोव्रडीन, मबाक्ब। बेक्शो रे सेंसाक्व।<sup>7</sup> मुल लशा, पत्रुस, शेंसीब नेल्ल आन कली नु इन डॉइती तुइक्पाइश्शो खोदेंशो पा, इन डॉइती गालील जाक्दीप्ब। मेकेर गुम्चा ताइनीनी, दे शोव्रथ लने” दे माइक्मी बाक्त। मर्कूस १४:२८<sup>8</sup> मिनु मीश मुरपुकी छक लाक्शा, हिंशा ख्रिंखि पा फो गूशा प्रोक्मा बाक्त। मिनु सुइ कली मारेइ मदेमा बाक्त। मारदे हना क्युल हिंशो बाक्मा बाक्त।

येसुमी आंम कली तपांइसीशो  
लूका २४:३६-४९; यूहन्ना २०:१९-२३

<sup>9</sup> हप्ता डा डॉइती नाक्ती सुनी कना येसु बेक्शो रे सेंसीशा, ७ ओटा वोल गुंड्चा पुंड्सीशो माग्दाला डा मरीयम कली तपांइसे बाक्त। लूका ८:२; यूहन्ना २०:१-१८<sup>10</sup> मरीयममी येसु कली तशा, लशा, डॉइती येसु नु काथा गाक्ब मुल आन थुं खाइश्शा बाक्ब आन कली “गो येसु कली बेक्शो रे सेंसीशा ब्रॉइशो ताता” दे शोव्रडा बाक्त।<sup>11</sup> मेकोपुकीमी मरीयम आ लोव्र थमा मसुदमे बाक्त।

<sup>12</sup> नोले येसु कली थमा सुइक्ब निक्शी आस गाउं लसानु, लांमी येसुमी तपांइसे बाक्त। लूका २४:१३-३५<sup>13</sup> मेको निक्शी फ्रा फ्रु लेश्शा जाक्शा,

अरु आन कली “येसु कली ताइतस्कु” देंसा बाक्त। मिनु मेको आस लोव्र यो थमा मसुदमे बाक्त।

<sup>14</sup> मिनु नोले आ शेंसीब ११ जनामी खमे जना जन बाक्मानु, येसुमी मेको आन कली तपांइसे बाक्त। मिनु “मुल सम्म रुप्चा थुं मपनी? मुल यो थमा मसुइप्पीनी?” दे हुइक्तीमी बाक्त। मारदे हना “बेक्शो रे सेंसीशा ब्रॉइशो आंइ मिक्चीमी ताइतक” देंब आन लोव्र थमा मसुइश्शो बाक्मा बाक्त।  
१कोरिन्थी १५:५

येसु आ नोले डा लोव्र

<sup>15</sup> मिनु येसुमी आ शेंसीब ११ जना आन कली “रागी नेल्ल हिरशा, ग्येरपाइक्ब लोव्र नेल्ल आन कली नेंपतीने। मर्कूस १३:१०; मत्ती २८:१६-२०<sup>16</sup> सुमी थमा सुइश्शा, ब्वाक्कुमी ख्रुम्शा गुंड्चा पुंड्सीबा, मेको ब्रॉइचा ताइब। सुमी चहिं थमा मसुइक्बा, मेको सजाइ गेचा पुंड्सीबा। प्रेरित २:३८; प्रेरित १६:३१-३३<sup>17</sup> थमा सुइक्बपुकी दोदेंशो सक्ति पाइश्शो दुम्नीम देंशा हना, आं नें थिशा वोल आन कली गुंड्शा खेरनीम। परमप्रभु यावे आ सोक्तीमी पपाइश्शो लोव्र ब्वाक्नीम। प्रेरित १६:१८; प्रेरित १०:४६; प्रेरित १९:६<sup>18</sup> बुस्स ग्याइक्ताक्म हना यो, ओश्वेर तूतेक्म हना यो, मेको आन कली मारेइ मदुम्ब। रोइ पाइब आन तारी गुइ चाक्शा प्रार्थना पामेनु, सानीम” दे माइक्मी बाक्त। लूका १०:१९; प्रेरित २८:३-६; याकूब ५:१४-१५

<sup>19</sup> मेको लोव्र नेल्ल थुम्शा नोले प्रभु येसु स्वर्ग लाइक्चा पुंड्से बाक्त। मिनु परमप्रभु यावे आ ग्युरा गे निस्से बाक्त। प्रेरित १:२; भजन संग्रह ११०:१; प्रेरित ७:५५<sup>20</sup> मिनु येसु कली थमा सुइक्बपुकी लशा, ग्येरपाइक्ब लोव्र तेइ तेइ नेंपाइक्ना पाइक्न गाक्मा बाक्त। प्रभु यो मेकोपुकी नु काथा बाक्शा, चिन्ड कौंइना कौंइन मेको आन लोव्र थमा बाक्ब देंबाक्माक्त। प्रेरित १४:३; हिब्रू २:४

## लूका

नेल्ल क्येडा डोंइती डा थमा सुइक्व नु नोले थमा सुइक्व आन इतिहास ब्रेक्व येरोम नु यूसेबियसमी एको किताब लूकाम ब्रेक्वो बाक्व, दे तुइक्वसे बाक्व। लूकामी प्रेरित किताब यो ब्रेक्वो बाक्व। परमप्रभु यावे आ लोत्रमी लूका आ पर्वम सां खेयप लोत्र पशो बाक्व। लूकामी, इस्राएली मद्रुम्शो, पावल नु गेय पवा बाक्व। मेको शुश शेंसीशो मुर बाक्माक्व। एको किताब गेना ब्रेक्वो बाक्व ठीक पा मतुइक्नीम। तन्न ६०-८५ ए. डी. मेर दुम्चा माल्ल। लूका आ ब्रेक्वो क्येडा डोंइती अर्को ग्येरपाइक्तीक लोत्र ब्रेक्वने थुम्शो बाक्तेक्म। लूकामी थियोफीलस माइश्शो ठेयब मुर कली येसु ख्रीस्त आ इतिहास नु आ शेंशो नेल्ल ब्रेक्वो बाक्व। येसु आ किकी पिपी आदम सम्म डा लोत्र ब्रेक्वो बाक्व। एको किताब यहूदी आन कली ला ममाइ, रागी नेल्ल डा मुर आन कली ग्येरपाइक्व लोत्र बाक्व। येसु नेल्ल मुर, प्रुडग नु श्येत जाइब आन कली यो पाप रे प्रॉइब बाक्व।

### डोंइती डा लोत्र

1 माननीय थियोफीलस, इं रागीम मार मार दुम्मे, मेको आ पर्वम शुश लोत्र ब्रशो बाक्माक्व। 2 डोंइती रे मेको ताइब नु तुइक्वपुकीमी मेको आन तशो, तुइश्शो लोत्र तेइ तेइ नेंपाइश्शो बाक्मा बाक्व। १यूहन्ना १:१-४ 3 गोमी ताइब तुइक्व आन देंशो नेंशा, ब्रेक्व आन ब्रेक्वो पडेशा “थमान बाक्माक्व” देंती। मिनु गो यो ब्रेक्वु देंशा, एको लोत्र का का पा इन कली ब्रेक्वाक्नीनी। प्रेरित १:१; कलस्सी ४:१४ 4 लोत्र का निक्शी डोंइती नेंनी माइ। एको आं ब्रेक्वो यो पडैतीनी हना, गोमी यो “थमा बाक्माक्व” दे थमा सुइक्नीनी।

### जकरिया योवसीशो

5 यहूदीया रागीम हेरोद पिप आ पालामी अबीयाह आ हुल डा जकरिया नें पाइश्शो चढेब का बाक्माक्व। आ मीश हारून आ खिं डा चढेब आ तमी बाक्माक्व। आ नें एलीशीबा बाक्माक्व। १इतिहास २४:१०, १९ 6 मेको निक्शी परमप्रभु यावे आ डोंइती ठीक पाइब बाक्सा बाक्व। परमप्रभु यावे आ अरेशो लोत्र नु पतीके लोत्र नेल्ल टिशा, दोस मताइब दुम्शा बाक्शो बाक्सा बाक्व। 7 मेको निक्शी खाल्पी खाल्पा दुम्शो बाक्ताक्वस हना यो, आल मथिशो बाक्सा बाक्व। मारदे हना एलीशीबा आल मथीब मीश मुर बाक्माक्व।

8 मिनु मार दुम्माक्व देंशा हना, चढेब आ गेय पचा कली अबीयाह आ हुल आन पालो जाक्माक्व। मिनु जकरिया यरूसलेम लमाक्व। मिनु मेकेर जाक्दीश्शा, परमप्रभु यावे आ खिंमी गेय पवा बाक्व। 9 मिनु धूप चोचा कली चढेब योवचा माल्लबाक्माक्व। मिनु चढेबपुकीमी यहूदी आन पतीके धूप चोइब मुर योवचा कली भोट तोक्गमे बाक्व। मिनु भोट तोक्गमेनु, जकरिया योवसे बाक्व। मिनु जकरियाम परमप्रभु यावे आ खिंमी धूप चोचा माल्दा बाक्व। प्रस्थान ३०:७ 10 मिनु धूप चोची ना मुर नेल्ल लाडगाम रिम्शा, परमप्रभु यावे कली पुंइना पुंइन बाक्मा बाक्व।

### “तौ का थीनेवे” देंशो

11 मिनु आगामी चहिं मार दुम्माक्व देंशा हना, परमप्रभु आ स्वर्ग डा गेय पाइब का फो गूशा, धूप चोतीके आ ग्युरा गे राष्ठा, जकरिया कली तपांइसे बाक्व। 12 मिनु जकरियामी मेको कली तशा, थाम्पा हिंमाक्व। 13 मिनु परमप्रभु यावे आ स्वर्ग डा गेय पाइबमी “जकरिया महिनो। परमप्रभु यावेमी इ पुंइशो गेब। इ मीश एलीशीबाम तौ का थीब। मिनु गे मेको आ नें यूहन्ना वोतो। 14 मेको आल थिशो तशा, गे ग्येरसीनेवे। शुश मुर मेको आल आ पर्वम ग्येरसीनीम। 15 मारदे हना मेको परमप्रभु आ डोंइती ठेयब दुम्ब। मेकोमी शांभु राक्सी मतूब। मेको कोव्रजम बाक्मेनुन, परमप्रभु यावे आ

सोक्तीम ब्रीशो बाक्व। न्यायाधीस १३:४-५ 16 मेकोमी शुश इस्राएली आन थुं परमप्रभु, आन परमप्रभु यावे गे लेप्पाइक्व। 17 मिनु मेकोमी एलीया आ सोक्त नु सक्ति तशा, आम आफ आ थुं आन तमी तौ गे लेप्पाइक्व। मिनु मटीब आन कली ठीक पतीक लां जोक्व तुइक्व सेल्ब। मिनु मोपा मुर आन कली प्रभु नु गुम्पाइक्वा कली ठीक सेल्ब” देंमाक्व। मलाकी ३:१, २३, २४; मत्ती १७:११-१३ 18 मिनु जकरियाम परमप्रभु यावे आ स्वर्ग डा गेय पाइब कली “गो खाल्पा दुम्ती, आं मीश खाल्पी दुम्त। आल थीनस्कु, दे दोपा थमा सुइक्वा डा?” देंमाक्व। उत्पत्ती १८:११ 19 मिनु “गो परमप्रभु यावे आ स्वर्ग डा गेय पाइब गाब्रीएल नड। गो परमप्रभु यावे आ डोंइती बाक्नुड। परमप्रभु यावेमी इ कली ग्येरपाइक्व लोत्र नेंपाइक्व सोइक्ताक्पी। दानीएल ८:१६ 20 तन्न गे आं देंशो लोत्र थमा मसुदी। मोपतीके आं देंशो लोत्र नेल्ल मद्रुम सम्म गे इ सेंदा सोव्रशा ब्वाक्ने मचाप्ब दुम्नेवे” देंमाक्व।

21 जकरिया आगाम बाक्मेनु, शुश मुर लाडगाम देल्शा “ना रेन आगा ओव्रशो मार पवा माइ, काइ मगू” देंशा रिम्दे बाक्व। 22 मिनु नोले जकरिया गूशा “लोत्र पड” देंमेनु, काइ लोत्र पने मचबा बाक्व। मिनु गुइ चाल पवा बाक्व। मिनु लाडगाम बाक्बपुकीमी “मेकोम परमप्रभु यावे कली गुमा बाक्व” दे तुइक्वमे बाक्व। 23 मिनु अबीयाह आ हुल डा पालो नुष्ठा, जकरिया आ खिं लेम्माक्व।

24 मिनु आ मीशम कोव्रज कुरा बाक्व। मिनु ५ महिना सम्म सुइ आन कली मतुइक्वाइक्व, खिं डा खिं बाक्माक्व। 25 मिनु “मुरपुकीमी आं कली आल मथीब, दे महिक्वोम। मुल परमप्रभुमी आं कली हिक्पाइक्वा कली शिशो पतीकेमी आल थीब दुम्पाइक्वी” देंमाक्व। उत्पत्ती ३०:२३

### येसु जरमेसीब, दे तुइक्वाइश्शो

26 एलीशीबामी आल कुरशो ६ महिना दुम्मेनु, परमप्रभु यावे आ स्वर्ग डा गेय पाइब गाब्रीएल गालील रागी डा नासरथ सहर सोइक्वा पुंइसे बाक्व। 27 मेकेर मरीयम नें पाइश्शो मीश आल का बाक्माक्व। मरीयम दाऊद आ थर डा योसेफ माइश्शो वोंइश मुर नु ग्युंवे पचशो बाक्माक्व। मत्ती १:१६-१८ 28 गाब्रीएल मरीयम आ बाक्तीके जाक्शा, मरीयम कली “परमप्रभु गे नु बाक्व। इ कली दाक्शा, आसीक गेते” दे सेउ पवा बाक्व। 29 मिनु मरीयममी परमप्रभु यावे आ स्वर्ग डा गेय पाइब कली तशा, आ लोत्र नेंशा छक लाक्शा “मार लोत्र माइ” दे मिम्ता बाक्व। 30 मिनु गाब्रीएलमी “ए मरीयम, महिनो। परमप्रभु यावेमी इ कली दाक्शा योवते। 31 गे मुल कोव्रज कुरशा, तौ का थीनेवे। मिनु इ तौ कली येसु नें वोतो। यसैया ७:१४; मत्ती १:२१-२३ 32 मेको ठेयब दुम्ब। मेको कली नेल्ल क्येडा ठेयब आ तौ देंनीम। मिनु परमप्रभु, परमप्रभु यावेमी मेको कली आ किकी पिपी दाऊद आ ठेयब नित्तीके गेब। यसैया ९:६ 33 मिनु मेको याक्ब आ खिं डा मुर, यहूदी आन पिप दुम्शा, हुकुम पाइब। मिनु आ राज्य गेनायो मनुप्ब” देंमाक्व। 34 मरीयममी मेको लोत्र नेंशा “गो मुल सम्म ग्युंवे मपशो बाक्नुड। गो वोंइश



मुर नु मड्ड। इन दँशो दोपा दुम्ने चाप्पा डा?" दे हिल्लो पवानु  
 35 "परमप्रभु यावे आ सोक्तीमी इ कली सुम्ब। मिनु नेल्ल क्येडा ठेयब आ  
 सक्ति ताइनेवे। मोपतीके इ आल परमप्रभु यावे के बाक्ब। मेको कली  
 परमप्रभु यावे आ तौ दँनीम। मत्ती १:१८-२० 36 इ थर डा एलीशीबा कली  
 यो मार दुस्त दँशा हना, आल मथीब खाल्पी बाक्त हना यो, मुल कोव्रज  
 कुरशो ६ महिना दुस्त। 37 मारदे हना परमप्रभु यावेमी पने मचाप्पो मारेड  
 मबाक्ब" दँमाक्त। उत्पत्ती १८:१४ 38 मिनु मरीयममी "गो परमप्रभु आ  
 वाइलीम दुम्ती। मिनु इन दँशो बुद पा आ दाक्शो पपाइय्यील" दँमाक्त। मिनु  
 परमप्रभु यावे आ स्वर्ग डा गेय पाइब लेश्शा लमाक्त।

### मरीयम एलीशीबा गुम्शो

39 मिनु नोले मरीयम यहूदीया रागी डा पहाडी सहर कामी बाक्शो  
 एलीशीबा कली गुम्थ लमाक्त। 40 मिनु जकरिया आ खिं ओव्रशा, एलीशीबा  
 कली सेउ पवा बाक्त। 41 मरीयम आ सेउ ताक्गानु, एलीशीबा आ कोव्रज  
 डा आल प्रेक्माक्त। मिनु परमप्रभु यावे आ सोक्तीमी एलीशीबा कली प्रिंदा  
 बाक्त। 42 मिनु ठेयब सँदा पा मरीयम कली "मीश मुर नेल्ल आन दातेमी गे  
 आसीक ताइब बाक्नेवे। इ कोव्रज डा आल आसीक ताइब बाक्ब। 43 आं  
 प्रभु आ ममा दोपा आं खिंमी आं कली गुम्थ जाक्नी? 44 गो इ सेउ ताक्गानु,  
 आं कोव्रज डा आल ग्येरशा प्रेक्त। 45 गे परमप्रभु आ लोव्र नँशा, आ दँशो  
 गेना हना यो जाक्दीपब, दे थमा सुइक्तीनी। परमप्रभु यावेम इन कली  
 आसीक गेवल" दँमाक्त। लूका ११:२७-२८

### परमप्रभु कली ठेयब सेल्शो

46 मिनु मरीयममी "आं थुंमी परमप्रभु कली ठेयब सेल्नुड। १ सामुएल  
 २:१-१० 47 मारदे हना मेको आं कली श्येत रे प्रॉइब, परमप्रभु बाक्ब। गो  
 ग्येरसीनुड। 48 गो महिक्सीशो आइक्च नड। तन्न परमप्रभु यावेमी आं कली  
 हिक्ती। मुल डा मेरे जात नेल्ल डा मुरपुकीमी आं कली आसीक गेनीम।  
 49 मारदे हना सक्ति पाइश्शोमी आं कली थम रिम्शो पाइक्ती। परमप्रभु यावे  
 आ नें का ला बाक्ब। 50 सु सुम मेको कली मान पा हिंनीमी, मेको आन  
 कली शिशी पाइब। भजन संग्रह १०३:१३, १७ 51 मेकोमी सक्ति कोइताक्व।  
 मिनु ठेयब लेश्शो आन कली आन मिम्शा हिंतीके मेको आन कली गेब।  
 उत्पत्ती ११:८ 52 हुकुम पाइब आन सासन पशो रोइश्शा, महिक्सीशो आन  
 कली ठेयब सेल्तु। भजन संग्रह १४७:६ 53 शोव्रलु बेक्शो आन कली जचा  
 गेब। शोप पाइश्शो आन कली श्येतथ गुइ सोइक्ब। भजन संग्रह ३४:११;  
 भजन संग्रह १०७:९ 54 मेकोमी आ शिशी कोइशा, आ वाइल इस्राएल कली  
 वारच पाप्तु। 55 मेकोमी इं किकी पिपी, अब्राहाम नु आ चच युइ आन कली  
 गेना हना यो शिशी पचा कली मिम्ताक्व" दे मरीयममी परमप्रभु यावे कली  
 मान पा दँमाक्त। उत्पत्ती १७:७; उत्पत्ती १८:१८ 56 मिनु मरीयम एलीशीबा  
 आ खिंमी महिना सां सम्म बाक्शा, आ खिं लेम्माक्त।

### यूहन्ना जरमेशो

57 मिनु डोइती दँशो बुद पा एलीशीबामी तौ का थिमाक्त। 58 आ एर  
 ऑथ बाक्ब नु आ खिं डा मुर नेल्लेमी "परमप्रभुमी मेको कली शिशी पा, तौ  
 थीब सेल्तु" दँशो नँशा, नेल्ल मेको नु ग्येरसमा बाक्त।

59 मिनु आल ८ नाक्त दुम्नेनु, जकरिया आ खिंमी मुर देल्शा, खोइक्तीक  
 चिनु खोइश्शा, आल आ नें वोइक्चामेनु, नेल्लेमी "आ आफ आ नें खोदँशोन  
 वोइक्चा" दँमा बाक्त। उत्पत्ती १७:१२ 60 तन्न आल आ ममामी "मदुम्ब,  
 एको आ नें यूहन्ना वोइक्चा माल्ब" दँमाक्त। 61 मिनु मुरपुकीमी "मुल सम्म  
 इन खिं डा सुइ मुरुमी मोदँशो नें मवोदेम" दँमा बाक्त। 62 मिनु नोले "आ  
 आफ कली हिल्लो पय" दे जकरिया कली हिल्लो पामेनु, 63 जकरियाम  
 ब्रेक्तीक का पितीन, दे चाल पा "आं तौ आ नें यूहन्ना वोतीने" दे ब्रेक्ता  
 बाक्त। मिनु नेल्ले छक लाक्मा बाक्त। 64 मेना जकरिया आ सँदा ग्रिश्शा,  
 ब्वाक्ने चाप्ब दुम्शा, परमप्रभु यावे कली ठेयब सेला बाक्त। 65 मिनु लोव्र  
 पाइब दुस्त दँशो नँशा, मुर नेल्ले छक लाक्शा हिंमा बाक्त। मिनु मेको लोव्र  
 यहूदीया डा पहाड नेल्ले ब्रमाक्त। 66 नेंबपुकीमी मेको लोव्र आन थुंमी

वोइश्शा "मेको आल नोले दोदँशो दुम्बा?" दँमुमा बाक्त। मारदे हना  
 परमप्रभु मेको आल नु बाक्माक्त।

### जकरियाम परमप्रभु कली ठेयब सेल्शो

67 आल आ आफ जकरियामी परमप्रभु यावे आ सोक्तीम ब्रीशा,  
 परमप्रभु यावे आ लोव्र पवा बाक्त। 68 मेकोमी "परमप्रभु, इस्राएली आन  
 परमप्रभु यावे ठेयब बाक्ब। मारदे हना इस्राएल डा मुर इं कली शिशी पा  
 पाप रे प्रॉइब सोइक्चाप्तु। लूका ७:१६ 69 मेकोमी आ गेय पाइब दाऊद आ  
 खिं डा मुर रे इं कली सक्ति पाइश्शो पाप रे प्रॉइब सोइक्ताक्व। 70 साइ नेसी  
 परमप्रभु यावेमी आ लोव्र पाइब आन कली मेको इस्राएल कली पाप रे प्रॉइब  
 आ पर्वम लोव्र पपदा बाक्त। मिनु मेको लोव्र पाइबपुकीमी मार दँमा बाक्त  
 दँशा हना 71 'परमप्रभु यावेमी गो इस्राएल डा मुर आइ कली आइ जोरी सनु  
 आन गुइ रे नु आइ कली काइ मदाक्ब रे प्रॉइब' दँमा बाक्त। 72 'परमप्रभु  
 यावेमी आइ किकी पिपी आन कली शिशी पाइनुड' दे आ पशो कबल  
 मिम्ताक्व। उत्पत्ती १७:७ 73 मोदँशो पा शिशी पाइनुड, दे इं किकी पिपी  
 अब्राहाम नु कसम जशा लोव्र थोक्ता बाक्त। मार लोव्र थोक्शो बाक्त दँशा  
 हना उत्पत्ती २२:१६-१८; मीका ७:२० 74 'गो इं जोरी सनु आन गुइ रे  
 प्रॉइचा पुंइसीनय। मिनु गो महिंथु परमप्रभु यावे कली ठेयब सेल्ने चाप्नय।  
 75 आ मुर दुम्शा, ब्रॉइका सम्म ठीक गेय पा बाक्ने चाप्पल' दे परमप्रभु यावे  
 आ लोव्र पाइबमी दँमा बाक्त। तीत्स २:१२-१४ 76 मिनु जकरियामी आ तौ  
 कली 'गे नेल्ल क्येडा ठेयब आ लोव्र पाइब' दँनीमी। मारदे हना गे प्रभु आ  
 डोइती गाक्शा, मेको आ लां सेल्नेवे। मलाकी ३:१ 77 गे मेको आ मुर आन  
 कली आन पाप क्याम्सीशा, पाप रे ब्रॉइशो मुर दुम्न, दे शँनेवे। येरमीया  
 ३१:३४ 78 आइ परमप्रभु यावेमी इं कली दाक्शा, शिशी पा, रुप्तीक थुं सुनी  
 डा छेडछेड खोदँशो पा इं तार मोइक्ताक्व। यस्ैया ६०:१-२ 79 मिनु मेको  
 बेक्पाइक्ब आ छिडछिडम बाक्ब आन कली हाम्सो दुम्ब। मिनु मेकोमी आइ  
 कली थुं नाइश्शा बाक्तीकेम खुल्ब" दँमाक्त। यस्ैया ९:१

80 मिनु यूहन्ना कोल्शा, परमप्रभु यावे आ सोक्तीम बोल्यो दुम्शा, खिं रे  
 गाक्शा, मुर मबाक्तीके गोरशो रागीमी जाक्दीश्शा, इस्राएल डा मुर आन  
 कली परमप्रभु यावे आ लोव्र मर्शेदीमी सम्म मेकेर बाक्माक्त। मत्ती ३:१

### येसु जरमेशो

2 मिनु मेना सिजर अगस्टसमी "रागी नेल्ल डा मुर आन नें ब्रेक्शा  
 हिक्चा नमी" दे हुकुम पवा बाक्त। 2 मोदँशो नें ब्रेक्तीके डोइती  
 गेनायो मपशो बाक्मा बाक्त। मुल पामेनु, सिरीया रागीम क्वीरीनीयसम  
 सासन पशो बाक्माक्त। 3 मिनु मुर नेल्ल आन नें ब्रेक्पाइक्चा कली आन थर  
 डा सोतीक बोतीक गाउं गाउं सहर सहरम जाक्दीम्मा बाक्त। 4 योसेफ पिप  
 दाऊद आ खिं डा बाक्माक्त। पिप दाऊद आ खिं डा मुर आन सोतीक  
 बोतीक बेथलेहेम सहर बाक्माक्त। मोपतीके योसेफ आ मीश मरीयम कली  
 लाइश्शा, गालील रागी डा नासरथ सहर रे यहूदीया रागी डा बेथलेहेम सहर  
 लमाक्त। 5 मोपा आस नें ब्रेक्पाइक्च लसानु, मरीयम कोव्रज कुरशो  
 बाक्माक्त। 6 मिनु बेथलेहेम सहरम जाक्दीस्सा नोले मरीयम आल थितीक  
 रोइ पवा बाक्त। 7 मेकेर बास बाक्तीक खिं मथित्थु, गोठ कामी बास बाक्सा  
 बाक्त। मिनु गोठम बाक्सानु, मरीयममी तौ का थिशा, वाम गिल्शा, शुंगुम  
 इप्पदा बाक्त। मत्ती १:२५

### गोठलापुकी जाक्शो

8 मेकेर गोठलापुकी बाक्मा बाक्त। मेकोपुकी नाक्दो रूम बाक्शा, आन  
 भेडा खाल पशो बाक्मा बाक्त। 9 मिनु परमप्रभु यावे आ स्वर्ग डा गेय पाइब  
 का गोठला आन बाक्तीकेम फो गूमाक्त। मिनु परमप्रभु आ छेडछेडमी मेको  
 गोठला आन एर ऑथ ठेयब हाम्सो सेला बाक्त। मेको तशा गोठलापुकी शुश  
 हिंमा बाक्त। 10 तन्न परमप्रभु यावे आ स्वर्ग डा गेय पाइबमी "महिनीने। गो  
 इन कली नु मुर नेल्ल आन कली ग्येरपाइक्ब लोव्र नेंपाइक्च जाक्ती।  
 11 एको ग्येरपाइक्ब लोव्र दोदँशो बाक्ब दँशा हना, मुलाक्दो पिप दाऊद आ  
 सहरम आल का जरमेशाक्व। मेको नक जरमेशो आल पाप रे प्रॉइब, प्रभु

येसु ख्रीस्त बाक्ब। 12 आं लोव्र थमा बाक्ब, दे दोपा तुइक्नीनी दैशा हना, मे मेको नक जरमेशो आल कली वाम गिल्शा, शुंगुम इप्पाइश्शो थिल्लीनी" देमाक्त। 13 मिनू सरीड रे परमप्रभु यावे आ स्वर्ग डा गेय पाइब शुश फो फु गूशा, परमप्रभु यावे कली ठेयब सेल्शा भजन संग्रह १०३:२०-२१ 14 "नेल्ल क्येडा इर डा परमप्रभु यावे नेल्ल क्येडा ठेयब बाक्ब। आ दाक्शो मुर आन कली थुं नाइश्शा बाक्वा गेब" दे कुम्सो पामे बाक्त। लूका १९:३८; गन्ती ६:२६; एफिसी २:१४, १७

15 मिनू परमप्रभु यावे आ स्वर्ग डा गेय पाइब सरीड गे लेशशा लमा बाक्त। मिनू गोठलापुकीमी "बेथलेहेम सहर लय। एको परमप्रभुमी तुइक्पाइश्शो लोव्र कोव्रथ लय" देमुमा बाक्त। 16 मिनू दोरशा जाक्दीश्शा कोव्रडमेनु, मरीयम नु योसेफ थित्से बाक्त। मेकेर नक थिशो आल यो शुंगुम इप्पाइश्शो तामे बाक्त। 17 मेको नेल्ल तशा, आल आ पर्वम नैशो लोव्र शुश मुर आन कली तुइक्पदमे बाक्त। 18 मिनू आन लोव्र नैब नेल्ल छक लाक्मा बाक्त। 19 तन्न मरीयममी गोठला आन लोव्र नैशा, आ थुंमी वोदा बाक्त। 20 गोठलापुकीमी आन तशो नु आन नैशो आ पर्वम परमप्रभु यावे कली ठेयब सेल्ना सेल्न लेम्मा बाक्त।

### येसु नें वोइश्शो

21 मिनू आल जरमेसे आ ८ नाक्ती खोइक्तीक चिनु खोदमे बाक्त। मिनू आ नें येसु वोदमे बाक्त। मारदे हना परमप्रभु यावे आ स्वर्ग डा गेय पाइबमी "मेको आ नें येसु वोइक्वा" दे आ कोव्रज कुरचा क्येडा डोंइती मरीयम कली दैशो बाक्माक्त। लूका १:५९; उत्पत्ती १७:१२; लूका १:३१

### येसु परमप्रभु आ खिं लाइश्शो

22 मिनू चोव्रखेतीक नाक्त जाक्मेनु, मोसामी ब्रेक्शो लोव्र टिशा, यरूसलेम सहर जाक्दीश्शा, आल कली परमप्रभु यावे आ खिं लाइश्शा "परमप्रभु यावे केन दुम्ल" दैशा, परवा आ चाइक्ब निक्शी चढेम्से बाक्त। लेवी १२:१-४; गन्ती १८:१५ 23 मारदे हना परमप्रभुम अरेशो लोव्रमी "डोंइती थिशो वोंइश आल परमप्रभु यावे के बाक्ब" दे ब्रेक्शो बाक्ब। प्रस्थान १३:२, १५ 24 परमप्रभु आ अरेशो लोव्रमी आम्मा चोव्रखेचा कली "परवा आ चाइक्ब निक्शी चढेचा माल्ब" दे ब्रेक्शो बाक्ब। लेवी १२:६-८

25 यरूसलेममी सिमियोन माइश्शो मुर का बाक्माक्त। मेको ठीक पाइब नु परमप्रभु यावे कली मान पा हिं बाक्माक्त। परमप्रभु यावे आ सोक्तीम ब्रीशा "परमप्रभु यावेमी इस्राएल डा मुर आन कली पाप रे प्रोंइब का सोइक्ब" दे लां कोव्रशा बाक्शो बाक्माक्त। उत्पत्ती ४९:१८ 26 परमप्रभु यावे आ सोक्तीमी मेको कली "इ मबेक्थु, प्रभु, पाप रे प्रोंइब ख्रीस्त गुम्पाइक्नन" दैशो बाक्माक्त। 27 मिनू परमप्रभु यावे आ सोक्तीमी मेको कली "मुल परमप्रभु यावे आ खिं लावो" दैतीके लशा, परमप्रभु यावे आ खिं जाक्दीम्माक्त। मिनू मरीयम नु योसेफमी आल कली परमप्रभु यावे आ ब्रेक्पाइश्शो लोव्रमी मार पचा दैशो बाक्मे, मेको पचा कली चाक्शो तवा बाक्त। 28 मिनू सिमियोनमी आल कली लाइश्शा, परमप्रभु यावे कली ठेयब सेल्शा 29 "परमप्रभु, इन दैशो जाक्दीत्त। मुल इन वाइल थुं नाइश्शा बेक्ने चाप्ब। 30 मारदे हना इन सोइश्शो पाप रे प्रोंइब कली आं मिक्चीम ताता। 31 मेको कली रागी रागी डा मुर नेल्ल आन पर्वम सोइक्ताक्नी। 32 अर्को जात डा मुर आन कली छेडछेड दुम्शा, मेको आन कली रुप्तीक थुं गेचा कली सोइक्ताक्नी। गो इस्राएली आंइ कली थम रिम्शो दुम्त" देमाक्त। यसैया ४९:६

33 मिनू आल आ आम आफोमी "मार, मिश रिम्शो लोव्र पवा" दे छक लाक्सा बाक्त। 34 मिनू सिमियोनम मेको आस कली आसीक गेशा, मरीयम कली "एको आल इस्राएली आन दातेमी लां कोंइशा मुर आन कली फ्राब। का निक्शी खतम दुम्नीम, का निक्शी रिम्शो दुम्नीम। मिनू शुश मुरुमी एको कली मदाक्नीम। लूका २०:१७-१८; प्रेरित २८:२२; १कोरिन्थी १:२३ 35 मोपा मुर आन थुंम मिम्शो तुंडसीब। मिनू तरवार कामी इ थुं थोक्ब" देमाक्त। यूहन्ना १९:२५

36 यरूसलेममी आन्ना माइश्शो परमप्रभु यावे आ लोव्र पाइब खाल्पी का बाक्माक्त। मेको आशेर आ थर डा फनुएल आ तमी बाक्माक्त। मेको ग्युंवे पशो आ ७ बर्सम आ वोंइश बेक्शो बाक्माक्त। 37 मिनू आ वोंइश बेक्म नोले शुश बर्स ब्रोंइशा, ८४ बर्स दुम्माक्त। मेकोमी परमप्रभु यावे आ खिं मप्रोंइथु, नाक्दो नाक्ती मेकेर माइजा बाक्शा प्रार्थना पा, परमप्रभु यावे कली ठेयब सेल्ना सेल्न बाक्बाक्माक्त। १तिमोथी ५:५ 38 मिनू मरीयम नु योसेफमी आल मेकेर लदसेनु, मेको खाल्पी गुम्से बाक्त। मिनू खाल्पीमी आल कली तशा, परमप्रभु यावे कली ठेयब सेला बाक्त। मिनू "परमप्रभु यावेमी पाप रे प्रोंइब सोइक्ब" दे आस पा बाक्ब यरूसलेम डा मुर आन कली मेको आल आ पर्वम लोव्र पा नेंपाइक्मी बाक्त।

39 मिनू परमप्रभु आ अरेशो पचा माल्थो गेय नेल्ल थुम्शा, आल कली लाइश्शा, गालील रागी डा नासरथ सहरम लेस्सा बाक्त। 40 मिनू नोले आल कोल्शा, जोक्ब तुइक्ब दुम्माक्त। मारदे हना परमप्रभु यावेमी दाक्शा मेको कली आसीक गेवा बाक्त।

### येसु परमप्रभु आ खिंमी बाक्शो

41 येसु आ आम आफ बर्स बर्समी पास्सा चाड मानेथ यरूसलेम लाइबाक्सा बाक्त। ब्यक्स्था १६:१-८ 42 मिनू येसु १२ बर्स जाक्दीम नोले पास्सा मानेथ लमानु, मार दुम्माक्त दैशा हना, 43 पास्सा थुम्शा खिं लेम्मानु, आम आफोम मतुइक्थु, येसु मेकेरन लीमाक्त। तन्न आ आम आफोमी मतुइसे बाक्त। प्रस्थान १२:१८ 44 मेको नाक्त का डा लां गाक्सानु, येसु आ वारच नु लत, दे मिम्तसे बाक्त। मिनू वारच नु बाक्शो मतथु, येसु कली माल्चा गोम्से बाक्त। नाक्त का डा लां ३०-४० किलो मिटर बाक्ब। 45 मिनू माल्से माल्से तेइ मथित्से बाक्त। मिनू लेशशा माल्ना माल्न यरूसलेम जाक्शा यो मथित्से बाक्त। 46 नाक्दो नाक्ती सां सम्म माल्ना माल्न गाक्सा नोले परमप्रभु यावे आ खिंम थित्से बाक्त। मेको परमप्रभु यावे आ लोव्र शेंबपुकी नु बाक्शा, आन लोव्र नैशा, मेको आन कली लोव्र हिल्लो पना पन बाक्शो ताम्से बाक्त। 47 मेको आ लोव्र नैब नेल्लेमी "शुश जोक्ब तुइक्ब आल बाक्माक्त" दे छक लाक्मा बाक्त। 48 आ आम आफोम मेको कली तशा, थाम्पा छक लाक्सा बाक्त। मिनू आ ममामी "आं तौ, गे मारदे आंस कली मोदेंशो श्येत गेस्की? इ आफ नु गो इ कली 'ते लाक्गा?' दे शुश हिंशा माल्तास्कु" देमाक्त। 49 मिनू येसुमी "मारदे माल्पीसी? गो आं आफ आ खिंमी बाक्वा माल्नुड, दे मतुइक्तीसी?" देमाक्त। यूहन्ना २:१६ 50 तन्न मेको आ लोव्र मरुप्से बाक्त। 51 मिनू येसु आ आम आफ नु लेशशा, नासरथ आ खिं लमाक्त। में डा मेरे आ आम आफ आस लोव्र टिशा बाक्माक्त। आ ममामी मेको मोदेंशो दुम्शो नेल्ल शुश मिम्शा थुंम वोदा बाक्त। 52 येसु कोल्शा बारशा, शुश जोक्ब तुइक्ब दुम्माक्त। परमप्रभु यावेमी मेको कली दाक्ता बाक्त। मुरपुकीमी यो दाक्तमे बाक्त। १सामुएल २:२६

### ब्वाक्कुम खुम्शा गुंइब यूहन्ना

मत्ती ३:१-१२; मर्कुस १:१-८

3 सिजर तिबेरीयस आ हुकुम पशो १५ बर्स दुम्मेनु, इस्राएल रागीम सासन पाइब सु सु बाक्मा बाक्त दैशा हना, यहूदीया रागीम पन्तीयस पिलातस, गालील रागीम हेरोद, इतुरीया नु त्राकोनीतीस रागीम हेरोद आ लोक्ब फिलीप नु अबीलेने रागीम लुसानीयस बाक्मा बाक्त। 2 यरूसलेममी नेल्ल क्येडा ठेयब चढेब हन्नास नु काइयाफास बाक्सा बाक्त। जकारिया आ तौ यूहन्ना गोरशो रागी मुर मबाक्तीकेमी बाक्शो बाक्माक्त। मिनू परमप्रभु यावेमी यूहन्ना कली लोव्र पवा बाक्त। इजीकीएल १:३; होसे १:१ 3 मिनू यूहन्ना यर्दन खोला आ नेक्था जाक्दीश्शा, एर ओथ परमप्रभु यावे आ लोव्र शेंना शेंन गाक्माक्त। मिनू शेंना शेंन मुर आन कली "इन थुं परमप्रभु यावे गे लेशशा, ब्वाक्कुम खुम्शा गुंइचा पुंडसीन। मिनू परमप्रभु यावेमी इन पाप क्याम्शा गेब" दे शेंदीमी बाक्त। 4 साइ नेसी परमप्रभु यावे आ लोव्र पाइब यसैयामी "गोरशो रागीमी सेंदा का नेंसीब। मेकोमी मार देब दैशा हना, प्रभु आ लां सेलीने। आ गाक्तीकेम फुल्लु प्रोक्शा थेलीने। यसैया ४०:३-५ 5 बेंसी नेल्ल प्रिंचा पुंडसीनीम। डांडा नेल्ल दिम

सेल्चा पुंडसीनीम। हिरशो लां नेल्ले सोव्रजो सेल्चा पुंडसीनीम। मरिश्शो लां नेल्ले रिश्शो सेल्चा पुंडसीनीम।<sup>6</sup> मिनु मुर नेल्लेमी परमप्रभु यावेमी दोपा पाप रे प्रॉइबा मेको तुइक्नीम” दे ब्रेक्शो बाक्माक्त। *यसैया ४०:३-५*

<sup>7</sup> मिनु शुश मुर यूहन्ना आ बाक्तीकेमी ब्वाक्कुम ख्रुम्शा गुंडपांडसीचा कली जाक्मा बाक्त। मिनु यूहन्नामी मेको आन कली “गे बुस्स आ खलकपुकी, परमप्रभु यावे आ सजाइ रे ब्रॉइचा ताइनीनी, दे सुम शेंदा?<sup>8</sup> इन थुं परमप्रभु यावे गे लेशशा, रिश्शो फल सिश्शो खोदेंशो गेय कोंइदीने। गे “इं किकी पिपी अब्राहाम बाक्ब” दे मिश्शा, देश पा मबाक्कीन। मारदे हना गो इन कली “परमप्रभु यावेमी एको फुल्लु रे अब्राहाम आ चच युइ सेल्ने चाप्ब” देंनुड।<sup>9</sup> तिम्चा, दे रवा आन पुमी खा वोइश्शो बाक्ब। रिश्शो फल मसिप्ब रवा का का पा तिम्शा, मीम चोचा पुंडसीनीम, दे तुइक्तीन” दे माइक्मी बाक्त।

<sup>10</sup> मिनु मुरपुकीमी “मुल मार पक?” दे हिल्लो पामे बाक्त। <sup>11</sup> मिनु यूहन्नामी “सु के फेक्तीक वा निक्शी बाक्मे, मेकोमी फेक्तीक का मबाक्शो कली गेचा माल्ब। सु के जचा थोव्रक बाक्मे, मेकोमी जचा मताइब कली गेचा माल्ब” देंमाक्त। <sup>12</sup> तिरो पोक्बपुकी यो जाक्शा यूहन्ना कली “शेंब, गो मार पक?” दे हिल्लो पामे बाक्त। <sup>13</sup> मिनु मेकोमी “सरकारम ताक्चा देंशो क्येडा शुश मताक्चा” देंमाक्त। <sup>14</sup> का निक्शी सिपाइपुकी यो जाक्शा “मिनु गो मार पक?” दे हिल्लो पामे बाक्त। मिनु मेको आन कली “सुइ आन कली हिंम हिंम पा जोल पा दोस गेशा आन मारेइ मारेइ मरोइक्तीन। इन गेय रे पा तशो क्येटम इन थुं नुशा बाक्कीन” दे माइक्मी बाक्त।

<sup>15</sup> मिनु यूहन्ना आ लोव्र नेंबपुकीमी “एको मुर सु माइ? ख्रीस्त कोर में?” दे शुश मिस्तमे बाक्त। <sup>16</sup> यूहन्नामी मेको नेल्ल आन कली “गो इन कली ब्वाक्कुम ख्रुम्शा गुंडनन्नी। आं नोले जाक्ब चहिं आं क्येडा ठेयब बाक्ब। गो मेको आ डोंइती बाप्शा, आ जुत्ता पुइक्चा लायो मशिरनुड। मेकोमी इन कली परमप्रभु यावे आ सोक्ती नु मीम ख्रुम्ब। <sup>17</sup> लाडगाम हाश्शो चेरब हुरशा, भूस नु गेडा तिल्चा कली मेको आ गुइमी ग्योल बाक्ब। गेडा कोठोम कुर पा वोइक्ब। भूस चहिं गेनायो मकाप्ब मीम हुम्ब” दे माइक्मी बाक्त। <sup>18</sup> मोदेंशो लोव्र पा अर्ती गेशा, रिश्शो लोव्र शेंदीमी बाक्त। <sup>19</sup> मेकोमी सासन पाइब हेरोद आ लोक्ब आ मीश चाक्चा आ पर्बम दोस गेवा बाक्त। मोपतीके मेकोमी यूहन्ना कली जेल्खानमी चोक्पदा बाक्त। *मत्ती १४:३-४; मर्कूस ६:१७-१८* <sup>20</sup> हेरोद कली मार दोस गेवा बाक्त देंशा हना “इन लोक्ब आ मीश चाक्शा, पात्के पाइतीनी। अरु पाप यो शुश पाइतीनी” दे हुइश्शो बाक्माक्त।

येसु ब्वाक्कुम ख्रुम्पांडसीशो  
मत्ती ३:१३-१७; मर्कूस १:९-११

<sup>21</sup> मिनु यूहन्ना चोक्सीचा क्येडा डोंइती शुश मुर आन कली ब्वाक्कुम ख्रुम्शा गुंडदा बाक्त। काबु येसु यो जाक्शा, ब्वाक्कुम ख्रुम्शा गुंडचा पुंडसे बाक्त। मिनु ब्वाक्कु रे गूशा, प्रार्थना पना पन बाक्मेनु, सरीड रोक्से बाक्त। <sup>22</sup> मिनु सरीड रे परमप्रभु यावे आ सोक्त परवा खोदेंशो पा यिशा, येसु आ तारी जुक्ता बाक्त। मिनु सरीड रे “आं दाक्शो तौ नवे। इ कली तशा थाम्पा येरसीनुड” देंशो सेंदा नेंसे बाक्त। *यूहन्ना १:३२; लूका ९:३५*

येसु आ किकी पिपी  
मत्ती १:१-१७

<sup>23</sup> मिनु येसुमी मुर आन कली परमप्रभु यावे आ लोव्र शेंचा गोवानु, ३० बर्स दुश्शो बाक्माक्त। मुरपुकीमी आ आफ योसेफ बाक्ब, दे मिस्तमे बाक्त। योसेफ हेली आ तौ बाक्माक्त। *लूका ४:२२* <sup>24</sup> हेली मात्थात आ तौ बाक्माक्त। मात्थात लेवी आ तौ बाक्माक्त। लेवी मेल्की आ तौ बाक्माक्त। मेल्की यान्नाइ आ तौ बाक्माक्त। यान्नाइ योसेफ आ तौ बाक्माक्त। <sup>25</sup> योसेफ मत्थाथीयास आ तौ बाक्माक्त। मत्थाथीयास आमोस आ तौ बाक्माक्त। आमोस नाहुम आ तौ बाक्माक्त। नाहुम एस्ली आ तौ बाक्माक्त। एस्ली नग्गै आ तौ बाक्माक्त। <sup>26</sup> नग्गै माथ आ तौ बाक्माक्त। माथ मत्थाथीयास आ तौ बाक्माक्त। मत्थाथीयास सेमेइन आ तौ बाक्माक्त। सेमेइन योसेक आ तौ बाक्माक्त। योसेक योदा आ तौ

बाक्माक्त। <sup>27</sup> योदा योआनान आ तौ बाक्माक्त। योआनान रेसा आ तौ बाक्माक्त। रेसा जेरूब-बाबेल आ तौ बाक्माक्त। जेरूब-बाबेल शाल्तीएल आ तौ बाक्माक्त। शाल्तीएल नेरी आ तौ बाक्माक्त। <sup>28</sup> नेरी मेल्की आ तौ बाक्माक्त। मेल्की अददी आ तौ बाक्माक्त। अददी कोसाम आ तौ बाक्माक्त। कोसाम एल्मादम आ तौ बाक्माक्त। एल्मादम एर आ तौ बाक्माक्त। <sup>29</sup> एर योहोसु आ तौ बाक्माक्त। योहोसु एलीएजर आ तौ बाक्माक्त। एलीएजर योरीम आ तौ बाक्माक्त। योरीम मात्थात आ तौ बाक्माक्त। मात्थात लेवी आ तौ बाक्माक्त। <sup>30</sup> लेवी सिमियोन आ तौ बाक्माक्त। सिमियोन यहूदा आ तौ बाक्माक्त। यहूदा योसेफ आ तौ बाक्माक्त। योसेफ योनाम आ तौ बाक्माक्त। योनाम एल्याकीम आ तौ बाक्माक्त। <sup>31</sup> एल्याकीम मेलेया आ तौ बाक्माक्त। मेलेया मेन्ना आ तौ बाक्माक्त। मेन्ना मात्ताथा आ तौ बाक्माक्त। मात्ताथा नाथान आ तौ बाक्माक्त। नाथान दाऊद आ तौ बाक्माक्त। *२सामुएल ५:१४* <sup>32</sup> दाऊद येस्से आ तौ बाक्माक्त। येस्से ओबेद आ तौ बाक्माक्त। ओबेद बोआज आ तौ बाक्माक्त। बोआज साल्मोन आ तौ बाक्माक्त। साल्मोन नहशोन आ तौ बाक्माक्त। रूथ ४:१७-२२ <sup>33</sup> नहशोन अम्मीनादाब आ तौ बाक्माक्त। अम्मीनादाब आदमीन आ तौ बाक्माक्त। आदमीन अरनी आ तौ बाक्माक्त। अरनी हेस्रोन आ तौ बाक्माक्त। हेस्रोन पेरिस आ तौ बाक्माक्त। पेरिस यहूदा आ तौ बाक्माक्त। *उत्पत्ती ५:१-३२; उत्पत्ती ११:१०-२६; उत्पत्ती २१:२-३; उत्पत्ती २९:३५* <sup>34</sup> यहूदा याकूब आ तौ बाक्माक्त। याकूब इसहाक आ तौ बाक्माक्त। इसहाक अब्राहाम आ तौ बाक्माक्त। अब्राहाम तेराह आ तौ बाक्माक्त। तेराह नाहोर आ तौ बाक्माक्त। <sup>35</sup> नाहोर सेरूग आ तौ बाक्माक्त। सेरूग रेऊ आ तौ बाक्माक्त। रेऊ पेलेग आ तौ बाक्माक्त। पेलेग एबेर आ तौ बाक्माक्त। एबेर शेलाह आ तौ बाक्माक्त। <sup>36</sup> शेलाह केनान आ तौ बाक्माक्त। केनान अरपक्शाद आ तौ बाक्माक्त। अरपक्शाद शेम आ तौ बाक्माक्त। शेम नोआह आ तौ बाक्माक्त। नोआह लमेक आ तौ बाक्माक्त। <sup>37</sup> लमेक मेथुसेलाह आ तौ बाक्माक्त। मेथुसेलाह हनोक आ तौ बाक्माक्त। हनोक यरेद आ तौ बाक्माक्त। यरेद मा-हालालेल आ तौ बाक्माक्त। मा-हालालेल केनान आ तौ बाक्माक्त। <sup>38</sup> केनान एनोश आ तौ बाक्माक्त। एनोश सेथ आ तौ बाक्माक्त। सेथ आदम आ तौ बाक्माक्त। आदम चहिं परमप्रभु यावे आ सेल्शो बाक्माक्त।

येसु नाक्चा पुंडसीशो

**4** येसु परमप्रभु यावे आ सोक्तीमी ब्रीशा, यर्दन खोला रे लशा, परमप्रभु यावे आ सोक्तीमी गोरशो रागीमी चाक्दीत्वा पुंडसे बाक्त। <sup>2</sup> मिनु ४० नाक्ती गोरशो रागीम सैतान रे पा थुं नाक्चा पुंडसे बाक्त। मेको ४० नाक्त सम्म मारेइ मजथु बाक्शो बाक्माक्त। मिनु नोले शुश शोव्रलु बेक्माक्त। <sup>3</sup> मिनु सैतानमी “मार, गे परमप्रभु आ तौ नवे हना, एको फुल्लु कली ‘शोब्ले दुमो’ देन” देंमाक्त। <sup>4</sup> मिनु येसुमी “परमप्रभु यावेम ब्रेक्पाइश्शो लोव्रमी ‘मुर जशा ला मब्रॉइनीम’ दे ब्रेक्शो बाक्ब” देंमाक्त। *ब्यक्स्था ८:३* <sup>5</sup> मिनु नोले सैतानमी येसु कली इर लाइश्शा, याम कामीन रागी नेल्ल कोंइशा <sup>6</sup> “रागी, रागीमी बाक्शो नेल्ल शोप आं के नम। रागी नेल्ल आन कली हुकुम पाइब यो गो नड। गो मेको इ कली गेनुड। मारदे हना सु कली गेचा दाक्तु, मेको कली गेने चाप्नुड। <sup>7</sup> गे आं डोंइती बाप्शा, आं कली ठेयब सेल्तीवी हना, मेको नेल्ल इ कली गेनन” देंमाक्त। <sup>8</sup> मिनु येसुमी “परमप्रभु यावे आ लोव्रमी ‘परमप्रभु यावे कली ला ठेयब सेलो। मेको कली ला गेय पावो’ दे ब्रेक्शो बाक्ब” देंमाक्त। *ब्यक्स्था ६:१३*

<sup>9</sup> मिनु नोले सैतानमी येसु कली यरूसलेम लाइश्शा, परमप्रभु यावे आ खिं डा नेल्ल क्येडा तारी लदा बाक्त। मिनु “मार, गे परमप्रभु यावे आ तौ नवे हना, एकेर रे प्रेक्को। <sup>10</sup> मारदे हना ‘इ कली कोव्रचा कली आ स्वर्ग डा गेय पाइब आन कली सोइक्ब। <sup>11</sup> मिनु मेकोपुकीमी इ कली आन गुइम ताक्शा, खपीम नाइक्पाइक्नीम। इ खोइल फुल्लु कामी यो मथोक्ब’ दे ब्रेक्शो बाक्ब” देंमाक्त। *भजन संग्रह ९१:११, १२* <sup>12</sup> मिनु येसुमी “परमप्रभु, इन परमप्रभु यावे कली थुं मनाक्चा, दे यो देंशो बाक्ब” देंमाक्त। *ब्यक्स्था ६:१६*

13 मिनू सैतानमी नेल्ल नावने थुमा नोले, मुल अर्को खेयप नावनुड, दे मिशा येसु कली प्रॉइशा मेक रे गाक्मावक्त। हिब्रू ४:१५

येसुमी गालील रागीम शेंशो  
मत्ती ४:१२-१७; मर्कूस १:१४-१५

14 मिनू नोले, येसु परमप्रभु यावे आ सोक्त आ सक्तिम गालील रागी लेम्मावक्त। मेकेर एर ओथ येसु आ परबम शुश लोव्र ब्रशो बाक्मावक्त।

15 मेकोमी आन गुम्तीक खिं खिंमी शेंना शेंन गाक्मेनु, आ लोव्र नेंब नेल्लेमी "रिम्शो लोव्र पाइव्बावक्त" दे ठेयब सेल्मे बावक्त।

येसुमी नासरथ सहरम लोव्र पशो  
मत्ती १३:५३-५८; मर्कूस ६:१-६

16 मोपा हिरना हिरन गाक्मेनु, काबु आ कोल्टीक नासरथ सहरम जाक्दीम्मावक्त। आल रेन नाइक्तीक नाक्ती गुम्तीक खिं लशो खोदेंशो पा, गुम्तीक खिं लशा, परमप्रभु यावे आ लोव्र पढेचा कली राम्मावक्त। 17 मिनू गुम्तीक खिं डा गेय पाइबमी मेको कली यसैया आ ब्रेक्शो किताब गेवा बावक्त। मिनू किताब प्राक्शा कोव्रशा यसैया ६१:१-२ 18 "परमप्रभु यावे आ सोक्त आं तार बाक्ब। मारदे हना परमप्रभु यावेमी तेल लुक्ताक्वी। मेकोमी आं कली दिष्णो प्रुडग मुर आन कली ग्येरपाइव्ब लोव्र नेंपाइव्का कली, ग्याइशा चोक्चा पुंडसीशो मुर आन कली प्रॉइचा कली, मिक्च मताइब आन कली तपाइव्का नु श्येत जाइब आन कली श्येत रे प्रॉइशा, रिम्शो पा बाक्चा गेचा कली सोइक्ताक्वी। यसैया ४२:७ 19 परमप्रभु यावे आ शिशी पतीक बर्स आ परबम शेंचा कली सोइक्ताक्वी" दे पढेशा नेंपाइव्की बावक्त। लेवी २५:१० 20 मिनू किताब गिल्शा, गुम्तीक खिं डा गेय पाइब कली गेशा, निस्से बावक्त। मिनू नेल्लेमी येसु कली मिक्च मयाक्थु कोव्रस डा कोव्रस पामे बावक्त। 21 मिनू येसुमी "एको इन नेंशो लोव्र मुलावक्त गाप्त" देंमावक्त। 22 नेंबपुकीमी मेको आ परबम रिम्शो लोव्र पामे बावक्त। येसु आ रिम्शो लोव्र नेंशा छक लाक्शा "एको योसेफ आ तौ ममाइ डा?" देंमुमा बावक्त। लूका ३:२३ 23 मिनू येसुमी मेको आन कली "गे इच्ची ना आं कली 'मुर आन कली सापाइव्ब, गे इ कली यो सापतो' देंतीक लोव्र देंनीनी। मिनू 'गो कापेरनाउम सहरम चिन्ड नु छक लाक्चा डा गेय पशो नेंतक। मुल इ कोल्टीक सहरम, एकेर यो मोदेंशो पावो' दे आं कली देंनीनी" देंमावक्त। 24 मिनू येसुमी "थमा पा, मुरपुकीमी परमप्रभु यावे आ लोव्र पाइब आन कली आंम आन बाक्तीक सहरम काइ महिक्नीम। यूहन्ना ४:४४ 25 थमा लोव्र मार बावक्त देंशा हना, एलीया आ पालाम इस्त्राएल रागीम शुश वॉइश बेक्शो मीश मुर बाक्शो बाक्तेक्म। मेना बर्स सां ६ महिना सम्म रेउ मयिमावक्त। मिनू रागी नेल्ल डा मुरपुकीमी जचा मतामे बावक्त। १२राजा १७:१, ९-२४ 26 तन्न परमप्रभु यावेमी एलीया कली मेको आन बाक्तीक मसोइवक्त। तन्न सीदोन रागी डा सारेप्ता सहरम बाक्ब वॉइश बेक्शो मीश मुर का कली ला श्येत रे प्रॉइथ सोइक्ता बावक्त। सारेप्ता सहर कली हिब्रू लोव्रमी चारेफाथ देंनीम। 27 एलीशा आ पालामी यो इस्त्राएल रागीमी शुश कोव्र पाइब मुर बाक्मा बावक्त। सुइ मसामा बावक्त। सिरिया डा नामान माइशो मुर ला सापाइव्का पुंडसे बावक्त" दे येसुमी माइक्मी बावक्त। २२राजा ५:१-१४ 28 गुम्तीक खिंम बाक्शो मुर नेल्लेम मेको लोव्र नेंशा चुरमा बावक्त। 29 मिनू छल छाल बोक्शा, येसु कली आन गुम्तीक खिं नु सहर रे गुंडशा, डांडा तार सेल्शो सहर डा रेंगु रे तोक्चा, दे लदमे बावक्त। 30 तन्न येसु मेको आन दाते रे यूशा गाक्मावक्त।

येसु कापेरनाउम जाक्दीशो  
मत्ती ८:१४-१७; मर्कूस १:२१-३९

31 मिनू नोले गालील रागी डा कापेरनाउम सहर ब्रुम्मावक्त। मिनू नाइक्तीक नाक्ती गुम्तीक खिं लशा, मुर आन कली शेंदा बावक्त। 32 मिनू आ शेंशो नेंशा छक लाक्मा बावक्त। मारदे हना आ लोव्र अधिकार पाइशो बाक्मावक्त। मत्ती ७:२८-२९; यूहन्ना ७:४६ 33 मेको गुम्तीक खिंमी ग्रांघ्रा दिचा डा वोल आ सोक्तीम सुम्शो मुर का बाक्मावक्त। मेकोमी वाइ ब्रेशशा

34 "ओहो, नासरथ डा येसु, मार पमुया डा? आंइ कली साइक्थ जाक्नी? इन कली तुइक्ताक्क। गे परमप्रभु यावे आ योव्रशो ननी" देंमावक्त। 35 मिनू येसुमी वोल कली "रेयके मपथु, गूडो" दे हुइक्ता बावक्त। मिनू वोलमी मुर कली श्येत मगेथु, दिड खोल्शा वॉइशा गूमावक्त। 36 मो दुम्शो तशा, मुरपुकी छक लाक्शा "मार लोव्र बाक्म माइ? मारदे हना अधिकार नु सक्ति पाइशो लोव्र पवानु, वोलपुकी गूबाक्तेक्म" देंमुमा बावक्त। 37 मिनू मेको रागी नेल्ल येसु आ परबम लोव्र ब्रना ब्रन लमावक्त।

38 मिनू येसु गुम्तीक खिं रे गाक्शा, सिमोन आ खिं जाक्दीम्मावक्त। सिमोन आ शिमी शुश जरो पा रोइ पा गोल्शो बाक्मावक्त। मिनू खिं डा मुरुमी येसु कली "सापतीन" दे पुन्मे बावक्त। 39 मिनू येसु मेको आ नेक्था राष्ठा, जरो कली हुइक्ता बावक्त। मिनू हुइक्तानु, जरो जाम्मावक्त। मिनू साशा छल बोक्शा, येसु नु आ वारच आन कली जचा गेमी बावक्त।

40 मिनू नां रिक्मेनु, शुश रोइ पाइब आन कली चाक्मे बावक्त। मिनू येसुमी रोइ पाइब आन कली आ गुइ आन तारी चाक्शा, नेल्ल आन कली सापाइक्मी बावक्त। 41 शुश मुर रे वोल गुंडदा बावक्त। वोल आन कली गुंडदानु, मेकोपुकीमी "परमप्रभु यावे आ तौ ननी" दे ग्रीमा बावक्त। तन्न येसुमी मेको आन कली लोव्र पचा मगेथु, हुइक्तीमी बावक्त। मारदे हना मेकोपुकीमी "ख्रीस्त बाक्ब" दे डोंइती रे तुइशो बाक्मा बावक्त। मत्ती ८:२९; मर्कूस ३:११-१२

42 मिनू आ दीसा सुनी येसु मेकेर रे गाक्शा, मुर मबाक्तीकेम जाक्दीम्मावक्त। मिनू मुरपुकीमी "ते लमे?" दे माल्शा, आ बाक्तीकेम जाक्दीम्मा बावक्त। मिनू "आंइ कली प्रॉइशा मगाक्कीन। आंइ सहरम बाक्कीन" देंमा बावक्त। 43 मिनू येसुमी "अर्को सहर लचा माल्नुड। मारदे हना गो मेकेर डा मुर आन कली यो परमप्रभु यावे आ राज्य डा लोव्र पचा माल्नुड। गो मेको गेय पचा कली सोइशो नड" देंमावक्त। 44 मिनू रागी नेल्ल हिरना हिरन यहूदीया डा गुम्तीक खिं खिंमी शेंना शेंन गाक्मावक्त। मत्ती ४:२३

डोंइती डा शेंसीब योव्रशो  
मत्ती ४:१८-२२; मर्कूस १:१६-२०

5 मिनू काबु येसुमी गेनेसरेथ समुन्द्र आ नेक्था जाक्दीशशा, मुर आन कली परमप्रभु यावे आ लोव्र शेंदीमी बावक्त। मुरपुकीमी येसु कली डी डा चूमे बावक्त। 2 मिनू समुन्द्र आ शुइचम डोंगा निक्शी तवा बावक्त। डांइ रेखपुकी डोंगा रे तोइशशा आन ग्याइली मुरना मुरन बाक्मा बावक्त। 3 मिनू डोंगा का डोंइसे बावक्त। मेको डोंगा सिमोन के बाक्मावक्त। मिनू येसुमी सिमोन कली "डोंगा इक्का आइक्वी लतो" दे मदा बावक्त। मिनू मोपा डोंगाम बाक्शा मुर आन कली शेंदीमी बावक्त।

4 मिनू शेंने थुम्शा, सिमोन कली "ब्वाक्कु आ दातेम जाक्दीशशा, डांइ रेत्वा कली ग्याइली आपो" देंमावक्त। यूहन्ना २१:६ 5 मिनू सिमोनमी "शेंब, नाक्दो रे श्येत पा ग्याइली आप्ना आप्ना बाक्तक। डांइ का यो मरे। मुल 'गे आपो' देंतीनी हना, गो आप्नुड" देंमावक्त। 6 मिनू ग्याइली आबानु, शुश डांइ रेशशा, ग्याइल गाक्चा गोवा बावक्त। 7 मिनू ग्याइली गाक्थ्री पा डांइ रेशशो तशा, आ वारच आस कली "ए, एक जाक्शा, वारच पसे" दे ब्रेशशा, डोंगा निम्फा डांइम प्रिंदमे बावक्त। मिनू डोंगा हेल्शा, ब्वाक्कुम गुम्चा चिक्ता बावक्त। 8 मिनू सिमोन पत्रुसमी मो दुम्शो तशा, येसु आ डोंइती पोक्च थेंक्शा बाष्ठा "प्रभु, गो पापी मुर नड। गे नु काथा बाक्चा मशिरनुड" देंमावक्त। लूका १८:१३ 9 मारदे हना सिमोन नु मेको नु बाक्ब नेल्ले मिश डा डांइ रेशशो तशा, छक लाक्मा बावक्त। 10 जब्दी आ तौ याक्ब नु यूहन्ना यो छक लाक्सा बावक्त। मिनू येसुमी सिमोन कली "महिनी। मुल डा मेरे मुर रेख दुम्नेवे" दे मदा बावक्त। 11 मिनू डोंगा गुंडशा, तोइशशा, सिमोन, याक्ब नु यूहन्ना सांफामी आन गेय नेल्ल प्रॉइशा, येसु आ नोले खोइशशा, आ शेंसीब दुम्मा बावक्त।

कोव्र पाइब कली सापाइशो  
मत्ती ८:१-४; मर्कूस १:४०-४५

12 मिनु काबु येसु आ शेंसीबपुकी नु सहर कामी बाक्मेनु, कोव्र पाइब मुर का कली गुमा बाक्त। मिनु मेको कोव्र पाइबमी येसु कली तशा, आ डोंइती बाप्शा “प्रभु, सापाइक्चा दाक्ताक्नी हना, आं कली सापाइक्चे चाप्नीनी” देंमाक्त। 13 मिनु येसुमी कोव्र पाइब कली थिशा “गो सापाइक्चा दाक्नुड” देंमेनु, मेको कोव्र पशो मुर सामाक्त। 14 मिनु येसुमी “एको लोव्र सुइ कली मर्देचा। चढेब आ डोंइती लशा, इ साशो रां कोंइदो। मिनु मोसामी मार चढेचा माल्ब देंशो बाक्मे, मेको चढेशा, साती, दे तुइक्पतो” दे माइश्शा, सोइक्ता बाक्त। *लेवी १४:२-३२* 15 सुइ कली मर्देचा देंशो बाक्त हना यो, शुश मुरुमी येसु आ पर्वम लोव्र पामे बाक्त। रागी नेल्लेमे मेको लोव्र ब्रामाक्त। येसु आ लोव्र नेंचा कली नु रोइ रे साचा कली शुश मुर येसु आ बाक्तीकेम जाक्मा बाक्त। 16 तन्न येसु मेकोपुकी नु ब्राशा, सुइ मबाक्तीकेम लशा, परमप्रभु यावे कली प्रार्थना पवा बाक्त। *मर्कूस १:३५*

गुइ खोइल मदुक्ब कली सापाइशो  
मत्ती ९:१-८; मर्कूस २:१-१२

17 काबु येसुमी शेंना शेंन बाक्मेनु, गालील रागी, यहूदीया रागी, नु यरूसलेम सहर रे जाक्शो फरिसी नु अरेशो लोव्र शेंबपुकी देल्शा, येसु आ नेक्था निस्समा बाक्त। परमप्रभु आ सापाइक्तीक सक्ति येसु नु बाक्माक्त। 18 मेना मुरपुकीमी आ गुइ खोइल मदुक्ब मुर का कली ब्राख्येम कुरशा चाक्मे बाक्त। चाक्बपुकीमी मेको कली येसु आ डोंइती चाक्दीत्वा, दे मिम्तमे बाक्त। 19 तन्न शुश मुर देल्तीके येसु आ नेक्था चाक्दीन्ने मचाप्मे बाक्त। मिनु खिं डोइश्शा, साप्शो फुल्लु याक्शा, रोइ पाइब आ ब्राख्ये आ एर ऑथ डोरीम फ्रेंशा, मेको कली ऑखां पा तोक्शा, येसु आ डोंइती वोदमे बाक्त। 20 मिनु येसुमी मेको आन थमा सुइक्शो तुइश्शा, मेको कली “आं वारच, इ पाप क्याम्शा गेतन” दे मदा बाक्त। 21 मिनु फरिसी नु सास्त्रीपुकीमी “ओदेंशो शुक्शी लोव्र पाइब सु बाक्म? परमप्रभु यावेमी ला पाप क्याम्ने चाप्ब” दे मिम्तमे बाक्त। *फरिसी रिती थिती सेल्शा, रिश्शो पचा कली कोव्रब यो बाक्शो बाक्तेक्म। सास्त्री यहूदी आन कली परमप्रभु यावे आ अरेशो लोव्र शेंब बाक्शो बाक्तेक्म। लूका ७:४९; भजन संग्रह १३०:४; यसैया ४३:२५* 22 मिनु येसुमी मेको आन मिम्शो तुइश्शा, मेको आन कली “मारदे इन थुंम मोदेंशो मिम्तीनी? 23 इ पाप क्याम्शा गेतन देंचा देय छुल बोक्शा, एर ऑथ हिरशा कोंइदो देंचा तेको रिम्शो बाक्बा? 24 रागीम जरमेशोमी, पाप क्याम्चा कली अधिकार तशो बाक्ब, दे गेपुकीमी यो तुइक्तीन” दे गुइ खोइल मदुक्ब कली “छुल बोक्शा, इ ब्राख्ये कुरशा, इ खिं लावो” दे मदा बाक्त। *यूहन्ना ५:३६* 25 मो देंमेनु, मेको मुर छुल बोक्शा, आ ब्राख्ये कुरशा, परमप्रभु यावे कली ठेयब सेल्ना सेल्न आ खिं लमाक्त। 26 मेको चिन्ड तशा, मुर नेल्ले छक लाक्शा, परमप्रभु यावे कली ठेयब सेल्शा, मान पा हिंशा “डोंइती गेनायो मतशो ताइतय” देंमुमा बाक्त।

लेवी कली ब्रेशो  
मत्ती ९:९-१३; मर्कूस २:१३-१७

27 मिनु मेकेर रे लशा, येसुमी तिरो पोक्ब लेवी नें पाइश्शो मुर का आ गेय पतीकेमी बाक्शो तशा “आं नोले खोइय्थी” दे मदा बाक्त। 28 मिनु मेकोमी आ गेय प्रोंइशा, येसु आ नोले खोदा बाक्त।

29 मिनु लेवीमी येसु कली मान पा थुल्चा, दे जचा तूचा सेला बाक्त। मिनु मेको नु तिरो पोक्ब, आ वारच नु अरु मुर यो जथ बाक्मा बाक्त। *लूका १५:१* 30 मिनु फरिसी नु सास्त्रीपुकीमी मेको आन कली काथा बाक्शो तशा, आन थुं मनुथु येसु आ शेंसीब आन कली “मारदे गे तिरो पोक्ब नु पापीपुकी नु काथा बाक्शा जाइनीनी?” देंमा बाक्त। 31 मिनु येसुमी मेको आन लोव्र तुइश्शा “रोइ मपाइब आन कली डाक्टर ममाल्नीम। तन्न रोइ पाइब आन कली डाक्टर माल्नीम। 32 ठीक पाइब आन कली ब्रेथ जाक्शो मनड। तन्न

पापी आन कली ‘इन थुं परमप्रभु यावे गे लेत्तीन’ दे ब्रेथ जाक्शो नड” दे माइक्मी बाक्त।

माइजा बाक्चा आ पर्वम शेंशो  
मत्ती ९:१४-१७; मर्कूस २:१८-२२

33 मिनु मेकोपुकीमी “यूहन्ना आ शेंसीबपुकी नु फरिसी आन शेंसीबपुकी शुश माइजा बाक्शा, प्रार्थना पाइनीम। तन्न इन शेंसीबपुकी माइजा मबाक्थु, जाइनीम तूनीम” देंमा बाक्त। 34 मिनु येसुमी मेको आन कली “ग्युम्ले नु काथा बाक्मानु, जन्ती आन कली माइजा बाक्पाइक्चे चाप्नीनी डा? 35 काबु ग्युम्ले लाइक्चा पुंइसीब। मेना माइजा बाक्नीम” दे माइक्मी बाक्त। 36 मिनु येसुमी मेको आन कली “सुइमी नक वा खाक्शा, माइत वाम मक्येप्नीम। मो पाम्तेक्म हना, नक वा मरिम्शो दुम्बा ममाइ? नक वा माइत वा तार क्येप्चा मगारब। 37 सुइमी माइत कुशुल के थैलोमी नक अडगुर शांबु कुर मपाइनीम। कुर पाम्तेक्म हना, नक अडगुर शांबु बोरशा थैलो बुक्ब। मिनु अडगुर शांबु क्युप्ब। मेको थैलो यो खतम दुम्ब। 38 नक शांबु नक थैलोमी कुर पचा माल्ब। 39 कशो शांबु तूशा बानी दुम्शोमी जीजी शांबु मदाक्नीम, मेकोमी ‘कशो ला ब्रोव्रब’ देंब” दे कथा का देंमाक्त।

नाइक्तीक नाक्ती  
मत्ती १२:१-८; मर्कूस २:२३-२८

6 मिनु काबु नाइक्तीक नाक्ती येसु नु आ शेंसीबपुकी चेरब रू लां रे पा गाक्मानु, शेंसीबपुकीमी चेरब बाला शोइश्शा, नोक्शा जामे बाक्त। *लूका १३:१०-१७; लूका १४:१-६* 2 मिनु फरिसीपुकीमी मेको आन कली चेरब जशो तशा “नाइक्तीक नाक्ती पचा मदुम्ब गेय, मारदे पाइनीमी?” दे आन थुं मनुथु लोव्र पामे बाक्त। 3 मिनु येसुमी “दाऊद नु आ वारचपुकी शोव्रलु बेक्मानु, मार पामे, परमप्रभु यावेमी ब्रेक्पाइश्शो लोव्र मपठेनी? *१सामुएल २१:७* 4 दोपा दाऊदमी परमप्रभु यावे आ खिंमी ओव्रशा, परमप्रभु यावे आ डोंइती कोंइतीक शोब्ले शोल्शा योक्शा जामे? मेको शोब्ले चढेबपुकीम ला जाइनीमी, ममाइ? अरु मुरपुकीमी जचा मदुम्बा, ममाइ डा?” दे माइक्मी बाक्त। *लेवी २४:९* 5 मिनु येसुमी “रागीम जरमेशो दा नाइक्तीक नाक्ती मार पचा, मार मपचा मेको नेल्ल देंब बाक्ब” देंमाक्त।

गुइ सोव्रशो कली सापाइशो  
मत्ती १२:९-१४; मर्कूस ३:१-६

6 मिनु अर्को नाइक्तीक नाक्ती येसुम गुम्तीक खिंमी शेंदानु, मेकेर आ ग्युरा गुइ सोव्रशो मुर का बाक्माक्त। 7 मिनु सास्त्री नु फरिसीपुकीमी “नाइक्तीक नाक्ती सापाइक्चा गेय पाइबा कों?” दे योव्रकी पा कोव्रडमे बाक्त। मारदे हना येसु कली दोस गेचा माल्शो बाक्मा बाक्त। 8 मिनु येसुमी मेको आन मिम्शो तुइश्शा, आ गुइ सोव्रशो मुर कली “एक पिशा, राप्शा बाक्को” दे मदा बाक्त। मिनु मेको छुल बोक्शा राम्माक्त। 9 मिनु येसुमी योव्रकी पाइब आन कली “लोव्र का हिल्लो पाइनन्नी, नाइक्तीक नाक्ती शिशी पचा देय मरिम्शो गेय पचा? ब्रोंइचा गेचा देय बेक्चा गेचा? अरेशो लोव्रम मार देंबा?” दे हिल्लो पवा बाक्त। 10 मिनु मेकेर बाक्ब आन कली मिक्च मयाक्थु, कोव्रशा, गुइ सोव्रशो कली “इ गुइ दिंदो” दे मदा बाक्त। मिनु मेकोमी गुइ दिंसेनु, सामाक्त। 11 मिनु योव्रकी पाइबपुकी चुरशा “मेको कली मार पय?” दे लोव्र पमुमा बाक्त।

येसुमी आ १२ जना शेंसीब योव्रशो  
मत्ती १०:१-४; मर्कूस ३:१३-१९

12 काबु येसु डांडा का डोइश्शा, नाक्दो रे परमप्रभु यावे कली प्रार्थना पवा बाक्त। *मर्कूस १:३५* 13 मिनु आ दीसा नां सोव्रशा, आ नोले खोइक्ब आन कली गुम्शा, १२ जना आन कली योव्रमी बाक्त। योव्रशो आन कली “सोइश्शो” दे नें वोदा बाक्त। *मत्ती १०:२-४; प्रेरित १:१३* 14 मेको १२ जना सु सु बाक्मा बाक्त देंशा हना, सिमोन, मेको कली पत्रुस यो देंनीम। सिमोन आ लोकब अन्द्रीयास, याक्ब, यूहन्ना, फिलीप, बारथोलोमाइ, 15 मत्ती,

थोमास, अल्फयस आ तौ याकूब, सिमोन, मेको कली कनानी यो देंनीम, 16 याकूब आ तौ यहूदा नु इस्कारीयोत डा यहूदा बाक्मा बाक्त। इस्कारीयोत डा यहूदा चहिं नोले येसु कली साइक्वा, दे माल्ब आन कली वारच पाइब दुम्बाक्माक्त।

### दिंमम शुश मुर सापाइश्शो

17 मेको मुर आन कली योव्रशा, डांडा रे यिमा बाक्त। मिनु ठेयब दिंमम जाक्दीश्शा बाक्मानु, येसु आ लोव्र नेंथ एर ओंथ रे शुश मुर खुम्सीशा देल्मा बाक्त। मेकोपुकी यहूदीया रागी, यरूसलेम सहर, टायर नु सीदोन सहर एर ओंथ रे जाक्शो बाक्मा बाक्त। 18 का निक्शी येसु आ लोव्र नेंथ जाक्मा बाक्त। का निक्शी आन रोइ सापाइसीथ जाक्मा बाक्त। मिनु वोल्म तशो मुरपुकी यो जाक्शा, सामा बाक्त। 19 रोइ पाइबपुकीमी येसु कली थिचा माल्मे बाक्त। मारदे हना येसु आ सक्तिम मेको नेल्ल आन रोइ साबाक्मा बाक्त।

### ग्येरसीने, दे शेंशो

मर्कूस ५:३-१२

20 मिनु येसुमी शेंसीब आन कली कोव्रशा “गे पुडग मुर, ग्येरसीने। मारदे हना परमप्रभु यावे आ राज्य इन के बाक्ब। याकूब २:५ 21 मुल जचा मतथु बाक्बपुकी, ग्येरसीने, मारदे हना परमप्रभु यावेमी इन कली रूथी जचा गेब। मुल श्येत जशा, डाक्न डाक्न बाक्शोपुकी, ग्येरसीने। मारदे हना नोले ग्येरसीशा बाक्चा ताइनीनी। प्रकाश ७:१६-१७ 22 मुरुमी इन कली आं पर्बम काइ मदाक्थु, खेरशा हेला पामेनु, रागीम जरमेशो आ पर्बम इन कली दिप्पेनु, गे शुश ग्येरसीन। यूहन्ना १५:१८-१९ 23 मेको नाक्ती थाम्पा ग्येरसीने। मारदे हना परमप्रभु यावेमी इन कली स्वर्गम इनाम गेब। इन कली श्येत गेब आन किकी पिपीमी साइ रे परमप्रभु यावे आ लोव्र पाइब आन कली यो खेदा पा श्येत गेशो बाक्तेक्म।

### हिनीन, दे शेंशो

24 गे शुश शोप पाइश्शोपुकी, हिनीन। मारदे हना इन तशो रिश्शो नेल्ल थुम्तीनी। मत्ती १९:२३; याकूब ५:१ 25 मुल शुश जचा ताइबपुकी, हिनीन। मारदे हना नोले जचा मतथु शोव्रलु बेक्नीनी। मुल रिश्शा बाक्बपुकी, हिनीन। मारदे हना नोले डाक्शा रोंका पचा माल्नीनी। 26 मुल मुरपुकी रे पा मान पाइक्वा पुंडसीशोपुकी, हिनीन। मारदे हना इन किकी पिपीमी यो जोल पा परमप्रभु यावे आ लोव्र पाइब आन कली मो पाइक्बाक्तेक्म” देंत।

### इन कली मदाक्ब कली दाक्तीन

मत्ती ५:३९-४८

27 मिनु “आं लोव्र नेंबपुकी, नोफा दाइश्शा नेनीन, इन जोरी सत्रु आन कली दाक्तीने। इन कली काइ मदाक्ब आन कली दाक्तीने। 28 इन कली सराप चीले पाइब आन कली आसीक गेने। इन कली शुक्शी पाइब आन पर्बम परमप्रभु यावे कली पुंडदीने। १कोरिन्थी ४:१२ 29 इन चोव्रचो का राक्ब आन कली अर्को चोव्रचो यो राक्चा गेने। इन दौरा लाइक्ब आन कली भोटो यो पुडश्शा गेने। 30 सुइमी गे नु बाक्शो थोव्रकी पुंडतु हना, गेने। सुइमी गे नु बाक्शो थोव्रकी लाइक्तु हना, पितो, दे मपुनीन। 31 गेमी दोदेशो पचा पुंडसीचा दाक्नीनी, गे यो मुर आन कली मोदेशो पने। मत्ती ७:१२

32 इन कली दाक्ब आन कली ला दाक्ताक्नी हना, मार रिश्शो पनी डा? पापीपुकीमी यो आंम कली दाक्ब कली दाक्नीम। 33 इन कली रिश्शो पाइब आन कली ला रिश्शो पाइतीनी हना, मार रिश्शो पनी डा? पापीपुकीमी यो रिश्शो पाइब कली रिश्शो पाइनीम। 34 इन कली थाम्ने चाक्ब आन कली ला जेर गेतीनी हना, मार रिश्शो पनी डा? पापीपुकीमी यो लेंशा ताक्चा कली मोदेशो पाइनीम। ब्यवस्था १५:५-८ 35 इन जोरी सत्रु आन कली दाक्तीन। वारच पने। लेंशा ताक्चा ममिश्थु जेर गेने। मो पाइतीनी हना, गे ठेयब इनाम ताइनीनी। मिनु नेल्ल क्येडा ठेयब आ मुर दुम्नीनी। मारदे हना ‘रिश्शो

पाइतीनी’ मदेब नु आ अरेशो मटीब आन कली रिश्शो पाइब। 36 दोपा इन आफोमी शिशी पवा, मोपा गेपुकीमी यो शिशी पने” देंमाक्त।

### मुर आन कली मनाक्वा

मत्ती ७:१-५

37 मिनु येसुमी “मुर आन कली मनाक्तीने। मिनु इन कली मनाक्नीम। दोस मगेने। मिनु गे यो दोस मताइनीनी। माफ गेने, मिनु गे यो माफ गेचा पुंडसीनीनी। मत्ती ६:१४ 38 अरु आन कली मार मार माल्मा, मेको गेने। हाइश्शो दुम्शा गेतीनी हना, गे यो क्युप्चा डा पा प्रिंशा ताइनीनी। दोपा पुक्शा गेनी, मोपा पुक्शा ताइनीनी” दे शेंदीमी बाक्त। मर्कूस ४:२४

39 मिनु येसुमी कथा सेल्शा “मिक्च मताइबमी मिक्च मताइब कली लां कौंइने चाक्ब डा? लांमी खाल्टा बाक्त हना, निम्फा खाल्टाम मबिक्नीसी डा? मत्ती १५:१४ 40 शेंब क्येडा शेंसीब ठेयब मनम। तन्न शेंसीबमी शुश शेंसीशा आ शेंब खोदेशो दुम्ब। मत्ती १०:२४-२५; यूहन्ना १५:२० 41 मारदे इन लोकब आ मिक्चीम बाक्शो कसीडगर ताइनीनी। मिनु इन मिक्चीम बाक्शो मुढा चहिं मताइनीनी? 42 इन मिक्चीम मुढा बाक्त हना, दोपा इन लोकब कली ‘आं लोकब, इ मिक्चीम बाक्शो कसीडगर फेल्नुड’ देंने चाप्नीनी डा? गे कपटी, डोंइती इन मिक्चीम बाक्शो मुढा फेल्तीने। मिनु मिक्च ठीक ताइब दुम्शा ला, इन लोकब आ मिक्चीम बाक्शो कसीडगर फेन्ने चाप्नीनी।

### रिश्शो रवाम रिश्शो फल सिक्ब

मत्ती १२:३३-३५

43 रिश्शो फल रवाम मरिश्शो फल मसिक्ब। मरिश्शो रवामी यो रिश्शो फल मसिक्ब। मत्ती ७:१६-१८ 44 फल थाम्शा, रिश्शो रवा नु मरिश्शो रवा तुंडसीब। चू बोटमी फोव्रशी मसिक्ब। खुमीच आ बोटमी अडगुर मसिक्ब।

45 रिश्शो थुं पाइश्शो मुरुमी रिश्शो पाइब। पापम ब्रीशो थुं पाइश्शो मुरुमी चहिं मरिश्शो पाइब। मुर आन थुंमी मार बाक्मे, मेको आन लोव्र नेंशा रिश्शो देय मरिश्शो मेको तुंडसीब। मारदे हना थुंम मार बाक्मे, मेको शोव्र रे गूब।

### खिं रे पा शेंतीक

46 मारदे आं कली प्रभु, प्रभु, देंनीनी। तन्न आं देंशो मटीनीनी? मलाकी १:६; मत्ती ७:२१ 47 सुम आं लोव्र नेंशा टीबा, मेको दोदेशो मुर दुम्बा, मेको गो इन कली माइक्नन्नी। 48 मेकोमी खिं सेलानु, जग दोशा, सेरथे फुल्लु तारी सेल्ब। मिनु रेउ यिशा भोल यिमेनु, मेको खिं मब्रेक्ब। मारदे हना जग बोल्यो पा सेल्शो बाक्ब। 49 सुमी आं लोव्र नेंशा मपाइबा, मेकोमी खिं सेलानु, जग मदोथु सेल्ब। मिनु रेउ यिमेनु, मेको खिं नेल्ल ब्रेशशा भोलम योल्ब” दे शेंदीमी बाक्त।

### कप्तान आ गेय पाइब सापाइश्शो

मत्ती ८:५-१३; यूहन्ना ४:४६-५३

7 मिनु लोव्र शेंने थुम्शा, मेकेर रे लशा, कापेरनाउम सहरम जाक्दीम्माक्त। 2 मेकेर रोमी कप्तान का बाक्माक्त। मेको आ दाक्शो वाइल का रोइ पा बेक्चशो बाक्माक्त। 3 मिनु मेको कप्तानमी येसु आ पर्बम लोव्र पशो नेंशा, यहूदी आन जोक्ब तुइक्ब खाल्पा आन कली येसु ब्रथ सोइक्तीमी बाक्त। मेको आन कली “येसु एक पिशा, ‘आं वाइल कली सापतीन’ दे पुनीने” देंमाक्त। 4 मिनु मेकोपुकी येसु आ बाक्तीकेम जाक्शा, येसु कली “मेको कप्तान कली वारच पचा कली शिरशो बाक्ब। 5 मारदे हना मेकोमी यहूदी इं कली दाक्ब। मिनु इं गुम्तीक खिं यो सेल्पाइक्तु” दे येसु कली देंमा बाक्त। 6 मिनु येसु मेकोपुकी नु लमाक्त। मिनु कप्तान आ खिं आ नेक्था जाक्दीम्मेनु, कप्तानमी आ वारच आन कली येसु कली लोव्र पथ सोइक्ता बाक्त। मेकोपुकीमी येसु कली “प्रभु, श्येत मपने। गो इन कली आं खिंम ओइंचा मशिरनुड। 7 मोपतीके गो इन कली गुम्थ मपिड। गे सापाइक्तीक लोव्र का ला पने। मिनु आं वाइल साब। 8 गो यो अधिकार पाइश्शो मुर बाक्नुड। लडाइ पाइबपुकीम आं कली टीनीम। गो का कली

'लावो' देंती हना, मेको लाइब। मिनु अर्को कली 'पिवो' देंती हना, पीब। आं वाइल कली 'मेको गेय पावो' देंती हना, मेकोमी पाइब" दे माइक्थ सोइक्ता बाक्त।<sup>9</sup> मिनु येसुमी मेको लोत्र नेंशा छक लाक्माक्त। मिनु आ नोले खोइक्ब आन कली हिरशा कोत्रशा "गो इस्राएली आन दातेमी मेको कप्तान खोदेशो थमा सुइक्ब मुर सुइ मतडमी" देंमाक्त।<sup>10</sup> मिनु मेको सोइश्शो मुर खिं लेशा जाक्मानु, वाइल साने थुम्शो तामे बाक्त।

### बेक्शो मुर कली सेंपाइश्शो

<sup>11</sup> इच्का नाक्त नोले येसु नाइन सहर गे लमाक्त। आ शेंसीबपुकी नु शुश मुर यो मेको नु लमा बाक्त।<sup>12</sup> मिनु सहर डा ठेयब लाप्चो आ नेक्था जाक्दीम्मानु, मुरपुकीमी बेक्शो मुर का कुरशा पिशो तामे बाक्त। मेको वोंइश बेक्शो मीश मुर आ कांइचीक तौ बाक्माक्त। मेको मीश मुर नु सहर डा शुश मुर मलामी लशो बाक्मा बाक्त।<sup>13</sup> मिनु येसुमी मेको कली तशा, शिशी पा "मडाक्को" देंमाक्त।<sup>14</sup> मिनु बेक्शो मुर कुरशो पला थिवानु, कुरबपुकी खा दिक्मा बाक्त। मिनु मेकोमी "ए ठिटा, गो इ कली सेंसीशा बोक्को देंनुड" देंमाक्त।<sup>15</sup> मिनु बेक्शो मुर बोक्शा निश्शा, लोत्र पचा गोवा बाक्त। मोपा सेंपाइश्शा, आ ममा कली गेवा बाक्त।<sup>16</sup> मिनु मुरपुकी मोदेशो दुम्शो तशा, हिंमा बाक्त। मिनु मेकोपुकीमी परमप्रभु यावे कली ठेयब सेल्शा "इं दातेमी परमप्रभु यावे आ लोत्र पा छक लाक्वा डा गेय पाइब का गूमाक्त। परमप्रभु यावेम इं कली थमा पा शिशी पाइक्बाक्त" देंमा बाक्त।<sup>17</sup> मिनु यहुदीया नु एर औंथ डा रागी नेल्लेमी मेको लोत्र ब्रमाक्त।

### यूहन्नामी दल्गीर पशो

मत्ती ११:२-६

<sup>18</sup> मिनु यूहन्ना आ शेंसीबपुकीमी यो मेको लोत्र नेंशा, यूहन्ना कली शेंदमे बाक्त। मिनु यूहन्नामी आ शेंसीब निक्शी आस कली ब्रेश्शा<sup>19</sup> "जाक्चा माल्शो गेन ननी देय अर्को आ लां कोत्रक? दे प्रभु कली हिल्लो पथ लसे" दे सोइक्तीम्सी बाक्त।<sup>20</sup> मिनु मेको निक्शी येसु आ बाक्तीके जाक्शा "ब्वाक्कुम ख्रुम्शा गुंडब यूहन्नामी सोइश्शो मुर नस्कु। जाक्चा माल्शो गेन ननी देय अर्को आ लां कोत्रक? दे हिल्लो पथ सोइक्ताक्की" देंसा बाक्त।<sup>21</sup> मेको निक्शी जाक्सानु, येसुमी शुश रोइ पाइब मुर आन कली सापाइक्ना पाइक्न बाक्शो बाक्माक्त। बेक्चा डा रोइ पशो, वोल्म सुम्शो मुर आन वोल् खेरना खेरन बाक्माक्त। मिक्च मताइब आन कली मिक्च तपाइक्ना पाइक्न बाक्माक्त।<sup>22</sup> मिनु येसुमी यूहन्ना आ शेंसीब आस कली "मार मार तसी, मार मार नेंसी, मेको नेल्ल यूहन्ना कली मतीसे। मिक्च मताइब मिक्च ताइबाक्तेक्म। खोइल मदुक्ब गाक्बाक्तेक्म। कोत्रर पाइब साबाक्तेक्म। नोफा मननेबम नेंबाक्तेक्म। बेक्शो मुर बेक्शो रे सेंसीशा ब्रोंइबाक्तेक्म। मिनु महिक्सीशो मुरपुकी ग्येरपाइक्ब लोत्र नेंपाइसीबाक्तेक्म।<sup>23</sup> सु सुमी आं कली तशा, आन थुं मखाइक्पाइक्नीमी, दल्गीर मपाइनीमी, मेको ग्येरसमल, दे मतीसे" दे सोइक्तीम्सी बाक्त।

### यूहन्ना आ पर्बम शेंशो

मत्ती ११:७-१९

<sup>24</sup> मिनु यूहन्नामी सोइश्शो मुर गाक्सा नोले, येसुमी मुर आन कली यूहन्ना आ पर्बम "साइ गोरशो रागीमी मार कोत्रथ लनी? फशेम हिम्शो किन्दा कोत्रथ लनी? <sup>25</sup> दारशो वा फेक्शो मुर तांइसीबा को, दे कोत्रथ लनी? दारदारशो वा फेक्शो नु शोंप पाइश्शो मुर पिप आन बाक्तीकेमी बाक्नीम। <sup>26</sup> मार कोत्रथ लनी, मिनु? परमप्रभु यावे आ लोत्र पाइब तांइसीबा को, दे कोत्रथ लनी? गे परमप्रभु यावे आ लोत्र पाइब नेल्ल आन क्येडा ठेयब मुर ताइतीनी। लूका १:७६ <sup>27</sup> परमप्रभु यावेमी ब्रेक्पाइश्शो लोत्रमी मेको आ पर्बम 'गो आं लोत्र कुरब इ डोंइडोंइती सोइक्नुड। मेकोमी इ लां ठीक सेल्ब' दे ब्रेक्शो बाक्ब। मलाकी ३:१ <sup>28</sup> रागी नेल्लेम यूहन्ना खोदेशो ठेयब सुइ मबाक्ब। परमप्रभु यावे आ राज्यमी नेल्ल क्येडा आइक्च चहिं यूहन्ना क्येडा ठेयब बाक्ब" दे शेंदीमी बाक्त। लूका १:१५ <sup>29</sup> आ लोत्र नेंबपुकी नु तिरो

पोक्ब का निक्शीमी डोंइती यूहन्ना आ लोत्र नेंशा "परमप्रभु यावे आ देंशो ठीक बाक्माक्त" दे मिम्तमे बाक्त। मारदे हना मेको ब्वाक्कुम ख्रुम्शा गुंडपाइसीशो बाक्मा बाक्त। लूका ३:७, १२; मत्ती २१:३२ <sup>30</sup> फरिसी नु सास्त्रीपुकीमी चहिं यूहन्ना आ लोत्र नेंशा "ब्वाक्कुम मख्रुम्पाइसीनीकी" दे परमप्रभु यावे कली थमा मसुइक्थु बाक्मा बाक्त। मेकोपुकीमी परमप्रभु आ पावो, दे देंशो लोत्र मपामे बाक्त। प्रेरित १३:४६ <sup>31</sup> मेको आन कली येसुमी "एको पाला डा मुर दोदेशो नु सु खोदेशो नमी? <sup>32</sup> मेकोपुकी बजारम बाक्ब आलपुकी खोदेशो बाक्नीमी। हुल कामी अर्को हुल कली 'गो बासुरी ताप्कानु, गे सिल मपनी। गो हिशेक पा डाक्कानु, गे मडाक्नी' दे ब्रेम्मुइनीम। <sup>33</sup> यूहन्नामी माइजा बाक्शा, शांबु राकसी मत्तुडानु 'वोल्म सुम्शो बाक्माक्त' दे मरिम्शो सुइक्तीनी। मत्ती ३:४ <sup>34</sup> रागीम जरमेशोमी चहिं जचा तूचा थोत्रकी नेल्ल जाइब तूब। मेको कली तशा 'थोत्रे, शांबु राकसीमी दुक्ब, क्येट पोक्ब नु पापी आन वारच बाक्माक्त' देंशा, मरिम्शो सुइक्तीनी। लूका १५:२ <sup>35</sup> परमप्रभु यावे आ तुइक्तीके आ नोले खोइक्बम ला तुइक्ने चाप्नीम" दे माइक्मी बाक्त। १कोरिन्थी १:२४-३०

### येसुमी फरिसी आ खिंम जशो

<sup>36</sup> काबु फरिसी कामी येसु कली खमे जथ ब्रेत्ता बाक्त। मिनु येसु मेको आ खिंम लशा, खमे जचा कली निस्से बाक्त। लूका ११:३ <sup>37</sup> मिनु सहर डा मीश मुर का यो बाक्माक्त। मेको तेल्लेम बाक्माक्त। मेकोमी येसु मेको फरिसी आ खिंमी जाक्शो बाक्ब, दे नेंशा, ब्रोंइशो रिना पाइश्शो तेल कुरशा, जाक्माक्त। मर्कुस १४:३ <sup>38</sup> मेको येसु आ खोइलीम बाक्शा डाक्माक्त। मिनु आ प्रेक्कुम येसु आ खोइल जिप्पाइश्शा, आ चांमी फिक्गा बाक्त। मिनु आ खोइल पुक्पु पा मेको तेल खेक्ता बाक्त। <sup>39</sup> मिनु फरिसीमी मो पशो तशा "येसु परमप्रभु यावे आ लोत्र पाइब बाक्त हना, आ कली थीब मीश मुर दोदेशो बाक्म, दे तुइक्त वा। मारदे हना पापी बाक्ब" दे मिम्ता बाक्त। <sup>40</sup> मिनु येसुमी फरिसी कली "ए सिमोन, गो इ कली लोत्र का पाइनुड" देंमाक्त। मिनु मेकोमी "शेंब, मार देंनीनी?" देंमेनु <sup>41</sup> येसुमी "साइ होत्रप का के जेर लाइक्ब मुर निक्शी बाक्सा बाक्त। कामी ५ सहे देंनार जेर थुइश्शो बाक्माक्त। कामी ५० देंनार जेर थुइश्शो बाक्माक्त। इस्राएल डा क्येट देंनार का नाक्त का डा गाल्च बाक्त। <sup>42</sup> मिनु निम्फामी थाप्ने मचाप्सेनु, होत्रपमी निम्फा आस कली प्रोंइदीम्सी बाक्त। मुल तेकोमी होत्रप कली शुश दाक्बा?" दे हिल्लो पवा बाक्त। <sup>43</sup> मिनु सिमोनमी "शुश जेर थुइश्शोमी शुश दाक्ब, दे मिम्ताक्ड" देंमाक्त। मिनु येसुमी "ठीक देंते" देंशा, <sup>44</sup> मीश मुर कली कोत्रशा, सिमोन कली "एको मीश मुर कली तवी? गो इ खिंमी जाक्डानु, आं खोइल चिक्चा कली ब्वाक्कु मगेयी। एकोमी दा आं खोइल आ प्रेक्कुम जिप्पाइश्शा, आ चांमी फिक्तु। उत्पत्ती १८:४ <sup>45</sup> गो जाक्डानु, आं कली मुष्ठा पुक्पु मपाइय्यी। एकोमी दा इ खिंम बाक्डा रे आं खोइल पुक्पु पना पन बाक्ब। रोमी १६:१६ <sup>46</sup> गेमी आं पियाम तेल मखेक्ती। एकोमी दा आं खोइलीम तेल खेक्ताक्यी। <sup>47</sup> मोपतीके एको के शुश पाप नेल्ल क्याम्साक्व। मारदे हना एकोमी शुश आ दाक्तीके कोइताक्व। सु के पाप इच्का ला क्याम्से, मेकोमी इच्का ला दाक्ब" दे मदा बाक्त। <sup>48</sup> मिनु मीश मुर कली "इ पाप क्याम्साक्व" दे मदा बाक्त। <sup>49</sup> मिनु येसु नु काथा जाइबपुकीमी "पाप क्याम्ने चाप्ब, एको सु बाक्म माइ?" देंमुमा बाक्त। लूका ५:२१ <sup>50</sup> मिनु येसुमी मीश मुर कली "इ थमा सुइश्शोमी पाप रे ब्रोंइते। इ थुं नाइश्शा ग्येरशा बाक्को" देंशा सोइक्ता बाक्त। लूका ८:४८; लूका १७:१९; लूका १८:४२

### येसु नु गाक्शा, वारच पाइबपुकी

**8** मिनु नाक्त का निक्शी नोले येसु सहर सहर, गाउं गाउं हिरशा, परमप्रभु यावे आ राज्य डा ग्येरपाइक्ब लोत्र शेंना शेंन गाक्माक्त। मेको नु आ १२ जना शेंसीब यो बाक्मा बाक्त। <sup>2</sup> मेको नु मीश मुर का निक्शी यो बाक्मा बाक्त। मेको वोल् गुंडशो नु रोइ रे साशो बाक्मा बाक्त। मेको आन दातेमी माग्दाला डा मरीयम बाक्माक्त। येसुमी मेको रे पा ७ ओटा वोल् गुंडशो बाक्माक्त। यूहन्ना २०:१, ११-१८ <sup>3</sup> का हेरोद आ गेय

पाइब कूजा आ मीश योअन्ना बाक्मावत। का सुसन्ना बाक्मावत। मिनु अरु मीश मुरपुकी यो बाक्मा बावत। मेको मीश मुरपुकीमी आन बाक्शो थोव्रक रे येसु नु आ शेंसीब आन कली मार मार माल्मा, मेको गेशा, वारच पाइक्बाक्मा बावत। मर्कूस १५:४०-४१

वांचेर शोक्शो कथा  
मत्ती १३:१-९; मर्कूस ४:१-९

4 मिनु सहर सहर, गाउं गाउं रे शुश मुर जाक्शा, येसु आ बाक्तीकेम देल्मानु, मेकोमी कथा सेल्शा शेंदीमी बावत 5 “मुर का वांचेर शोक्थ लमावत। मिनु ब्वारानु, गेडा का निक्शी लांमी जुक्तमे बावत। मिनु मुर गाक्मानु, दिम्दमे बावत। मिनु चिकबीम गुप्शा जामे बावत। 6 का निक्शी ग्याडग्रो खपम जुक्तमे बावत। मिनु वामा चोटी सिक्शो नु खप मतथु सोव्रशा बेक्मा बावत। 7 का निक्शी चू घारीम जुक्तमे बावत। मिनु चूम सुप्शा, कोल्चा मगेवा बावत। 8 मिनु का निक्शी रिम्शो खपीम जुक्शा वामा बावत। मिनु शुश ग्रेल्शा, गेडा का के सहे का गेडा सिम्मा बावत” दे शेंशा ठेयब सेंदा पा “सु के नोफा बाक्मे, मेकोमी नेनल” देंमावत।

कथा आ अर्थ हिल्लो पशो  
मत्ती १३:१०-१७; मर्कूस ४:१०-१२

9 मिनु नोले आ शेंसीबपुकीमी “एको कथा आ अर्थ मार बाक्बा?” दे हिल्लो पामेनु, 10 येसुमी “इन कली परमप्रभु यावे आ राज्य आ पर्वम खुइश्शो लोव्र रुप्तीक थुं गेशो बाक्ब। अरु आन कली चहिं कथा सेल्शा शेंनुडमी। मिनु कोव्रशा यो मतामेक्ल, नेंशा यो मरुप्मेक्ल। यसैया ६:९-१०

कथा आ अर्थ शेंशो  
मत्ती १३:१८-२३; मर्कूस ४:१३-२०

11 आं देंशो कथा आ अर्थ मार बाक्ब देंशा हना, मेको वांचेर परमप्रभु यावे आ लोव्र बाक्ब। 12 लांमी जुक्शो गेडा देंशो मुरपुकीमी परमप्रभु यावे आ लोव्र नेंनीम। तन्न सैतानमी मेको लोव्र प्रेपाइक्ब। मोपा थमा मसुइक्नीम। मिनु पाप रे ब्रोंइचा मताइनीम। 13 ग्याडग्रो खपीम जुक्शो देंशो मुरपुकीमी परमप्रभु यावे आ लोव्र नेंशा, बिश्शा ग्येरसीनीम। तन्न शाक्शा थोक्चा मतथु शुश मलीथु, थुं थाम्चा पुंडसमानु, थमा सुइक्चा प्रोंइनीम। 14 चू घारीम जुक्शो देंशो मुरपुकीमी परमप्रभु यावे आ लोव्र नेंशा, थुंम वोइक्नीम। तन्न नोले ‘मार जचा, मार फेक्चा, दोपा शोंप पाइश्शो दुम्चा? दोपा गेय मपथु ग्येरशा बाक्चा तचा’ दे मिम्शा, परमप्रभु यावे आ लोव्र कली सिक्चा मगेनीम। 15 रिम्शो खपीम जुक्शो देंशो मुरपुकीमी परमप्रभु यावे आ लोव्र नेंशा, आन रिम्शो थुंमी वोइश्शा, मिम्शा बाक्मानु, मेको लोव्र आन थुंमी सिक्ब। प्रेरित १६:१४

बत्ती आ पर्वम शेंशो  
मर्कूस ४:२१-२५

16 सुइमी बत्ती दाशा सुप्शा मवोइक्नीम। खाट आगाम यो मखुइक्नीम। खिं ओव्रब आन कली हाम्सो दुम्ल, दे नेल्लेम ततीकेम वोइक्नीम। मत्ती ५:१५ 17 मुल खुइश्शो मारेइ मारेइ नेल्ल नोले तांइसीब। खुइश्शो लोव्र बावत हना यो, नोले नेल्लेम तुइक्नीम। मत्ती १०:२६; १कोरिन्थी ४:५ 18 होस पा, रिम्शो पा नेनीन। मारदे हना रुप्बमी तेम्शा रुप्पाइक्चा पुंडसीब, मरुप्बम चहिं इक्का खोइ रुप्थो यो, रोइश्शा लाइक्चा पुंडसीब” दे शेंदीमी बावत। मत्ती २५:२९

येसु आ खिं डा मुर  
मत्ती १२:४६-५०; मर्कूस ३:३१-३५

19 काबु येसु आ ममा नु आ लोक्ब जाक्मा बावत। तन्न शुश मुर देल्तीके येसु कली गुम्चा मतामे बावत। 20 मिनु मुर कामी “इन ममा नु इन लोक्ब इन कली गुम्थ जाक्शा, लाडगाम रिम्शा बाक्नीम” देंमावत। 21 मिनु येसुमी

“परमप्रभु यावे आ लोव्र नेंशा, टीबपुकी कका थमा डा आं ममा नु लोक्ब नम” दे माइक्मी बावत।

फश गिवार तेक्शो  
मत्ती ८:२३-२७; मर्कूस ४:३५-४१

22 काबु येसु नु आ शेंसीबपुकी डोंगाम डोइश्शा “समुन्द्र शोक्शा, आइक्ची हांबु लय” दे लचा गोव्रमे बावत। 23 मिनु मोपा लमानु, येसु निन्द्रा पवा बावत। मिनु फश गिवार पचा गोवा बावत। मिनु डोंगामी ब्वाक्कु ओव्रशा, डोंगा गुम्चवा बावत। 24 मोपतीके शेंसीबपुकीम येसु कली पोक्शा “शेंब, शेंब! मुल बेक्चाइतय, है” दे हिंशा खिंखि पा देंमा बावत। मिनु येसु बोक्शा, फश गिवार नु छाल कली हुइक्ता बावत। मिनु फश गिवार नाइश्शा ब्वाक्कु यो ख्रा दिक्मावत। मिनु सिक्सी दुम्मावत। 25 मिनु शेंसीब आन कली “इन थमा सुइक्तीक ते लम?” देंमावत। मेकोपुकी चहिं हिंशा, छक लाक्शा “फश गिवार नु ब्वाक्कुमी यो आ लोव्र टीबाक्तेक्म, एको सु बाक्म माइ?” दे लोव्र पमुमा बावत।

फौज माइश्शो वोल कली गुंडुशो  
मत्ती ८:२८-३४; मर्कूस ५:१-२०

26 मिनु समुन्द्र शोक्शा, गेरासीनी आन रागी जाक्दीम्मा बावत। गेरासीनी आन रागी चहिं गालील रागी क्येडा आइक्ची हांबुम बाक्मावत। 27 मिनु जाक्दीश्शा, डोंगा रे तोंइसामानु, वोलम सुम्शो मुर का सहर रे पिशा, येसु आ डॉइती जाक्मावत। मेको मुर वोलम सुमा रे शिश्रा गाक्शा, खिंमी मबाक्थु, बेक्शो मुर वोइक्तीकेमी बाक्शो बाक्मावत। मोपा बाक्शो शुश बर्स दुम्शो बाक्मावत। 28 मेकोमी येसु कली तशा, वाइ ब्रेश्शा, आ डॉइती बाप्शा, ठेयब सेंदा पा “येसु, नेल्ल क्येडा ठेयब, आ तौ, गो मार पमुया डा? श्येत मगेयीनी, दे सेउ पाइन्नी” देंमावत। 29 मारदे हना येसुमी ग्रांरा दिचा डा वोल कली “गूडो” दे माइश्शो बाक्मावत। डॉइती शुश खेयप वोलम मेको मुर कली सुमानु, मुरपुकीमी साडलोम पाइश्शा चोक्शा वोइश्शो बाक्मा बावत। तन्न वोलम साडलो पुइक्पाइश्शा, गोरशो रागीम चाक्दीश्शो बाक्मावत। 30 मिनु मेको येसु आ डॉइती बाप्शा बाक्मेनु, येसुमी वोल कली “इ नें मारम?” दे हिल्लो पवानु, मेकोमी “फौज” देंमावत। मारदे हना मेको मुर आ रांमी शुश वोल ओव्रशो बाक्मा बावत। 31 मिनु वोलपुकीम “आइ कली नरकम मसोइक्तीकी” दे पुन्मे बावत।

32 मेको डांडामी शुश पोव्र जोना जोन बाक्शो बाक्मा बावत। मिनु वोलपुकीमी “मेको पोव्र आन रांम ओव्रचा गेकी” दे पुन्मे बावत। मिनु येसुमी ओव्रचा गेमी बावत। 33 मिनु वोलपुकी मुर रे गूशा, पोव्रमी ओव्रमानु, पोव्र नेल्ल गशा रोंगु रे दोरशा थिश्शा समुन्द्रम प्रेक्ना प्रेक्न बेक्मा बावत।

34 मिनु पोव्र योव्रबपुकीमी मो दुम्शो तशा प्रोक्शा, सहर नु सहर आ एर ओंथ नेल्ल मेको लोव्र शोव्रडमे बावत। 35 मिनु मुरपुकी मार दुम्मे, दे कोव्रथ जाक्मा बावत। मिनु येसु आ नेक्था वोल गूशो मुर वा फेक्शा, आ गशो थुं साशा, येसु नु निश्शो तशा, हिंमा बावत। 36 वोलम सुम्शो मुर दोपा सामे, मेको ताइबपुकीमी जाक्ब आन कली मार मार दुम्मे, मेको नेल्ल शेंदमे बावत। 37 मिनु गेरासीन रागीम बाक्बपुकीमी येसु कली “आइ रागीम मबाक्कीन, लने” दे पुन्मे बावत। मारदे हना थाम्पा हिंमा बावत। मिनु येसु डोंगा डोइश्शा लेम्मावत। 38 मिनु डोंगा डोइश्शा लचावानु, वोल गुंडुचा पुंडसीशो मुरुमी “गे नु लचा गेयीनी” दे पुना बावत। 39 तन्न येसुमी “इ खिंम लशा, इ मुर आन कली परमप्रभु यावेमी इ कली दोदेंशो रिम्शो पवा, मेको तुइक्पतो” दे सोइक्ता बावत। मिनु मेको लशा, आ खिंमी ला ममाइ, सहर डा मुर नेल्ल आन कली येसुमी दोदेंशो रिम्शो पवा, मेको तुइक्पदा बावत।

याइरस आ तमी साशो  
मत्ती ९:१८-२६; मर्कूस ५:२१-४३

40 मिनु येसु लेश्शा जाक्मेनु, शुश मुरुमी येसु कली रिम्शा बाक्शो बाक्मा बावत। 41 मिनु मेकर याइरस माइश्शो गुम्तीक खिं डा ठेयब मुर का येसु आ डॉइती पोक्च थेक्शा बाप्शा “आं तमी बेक्चा चिक्ताक्च। आं खिं लय” दे



सेउ पा पुना बाव्ता। 42 मेको के १२ बर्स जावदीशो तमी का ला बाव्ताव्ता। मिनु मेको रोड पा बेक्चशो बाव्ताव्ता। मिनु येसु लमेनु, हुल डा मुरपुकीमी येसु कली डी डा चूमे बाव्ता।

43 मेको हुलमी १२ बर्स रे हुश याप्शा रोड पशो मीश मुर का बाव्ताव्ता। मेकोमी ओख्ती पा आ बाक्शो नेल्ल थुम्शो बाव्ताव्ता। तन्न सुइमी मेको कली आ रोड सापाइवने मचाप्शो बाव्ताव्ता। 44 मिनु मेकोमी येसु आ नोले जाक्शा, येसु आ फेक्शो वा थिवा बाव्ता। मिनु आ हुश याप्शा दिक्ताव्ता। 45 मिनु येसुमी “सुमी थियी?” दे हिल्लो पवानु, नेल्लेमी “गो मथिड, गो मथिड” देमा बाव्ता। मिनु पत्रुसमी “शेंब, मुरपुकीमी हुल पा नेम्इनीम, चुम्इनीम। मिनु मार पचा?” देमा बाव्ता। 46 येसुमी चहिं “मुर कामी आं कली थिती। मारदे हना आं सक्ति लशो तुइक्ताव्ता” देमा बाव्ता। 47 मिनु मेको मीश मुरुमी खूइवने मचाप्नुड, दे मिम्शा हिंशा खिंखि पना पन येसु आ डोंइती बाव्ताव्ता। मिनु मेकोमी येसु कली मारदे थिवा चोटीन दोपा सामे, मेको लोव्र नेल्ल मुर आन डोंइती शोव्रडा बाव्ता। 48 मिनु येसुमी “आं तमी, इ थमा सुइशोमी साते। इ थुं नाइशशा लावो” दे सोइक्ता बाव्ता। लूका ७:५०

49 येसुमी मेको मीश मुर नु लोव्र पवानु, याइरस आ खिं डा मुर का जाक्शा, याइरस कली “शेंब कली श्येत मगेने। इन तमी बेक्ता” देमा बाव्ता। 50 येसुमी मेको मुर आ लोव्र नेंशा, याइरस कली “महिनी। थमा सुइवना सुइवन बाव्ता। इ तमी साब” देमा बाव्ता। 51 मिनु खिंमी जावदीशशा, येसुमी पत्रुस, याकूब, यूहन्ना नु आल आ आम आफ आन कली ला लाइशशा आगा ओव्रमा बाव्ता। मत्ती १७:१ 52 मेकेर बाक्ब नेल्ल हिंशेक पा डाक्शो बाव्ता बाव्ता। मिनु येसुमी मेको आन कली “मडाक्कीन, आल मबेक्शो बाक्ब। मेको इप्शो बाक्ब” देमा बाव्ता। लूका ७:१३ 53 मेकेर बाक्बपुकीमी आल बेवने थुम्शो बाक्ब, दे तुइशशा “एको मार लोव्र पवा?” दे शुक्शी पामे बाव्ता। 54 मिनु येसुमी आल कली गुइम ग्याइशशा “ए आल, सेंसो” देमा बाव्ता। 55 मो मदानु आ सोक्त लेशशा छुल बोक्ताव्ता। मिनु येसुमी “मेको आल कली इक्का जचा गेने” दे माइक्मी बाव्ता। 56 मेको तशा, आल आ आम आफ छक लाक्सा बाव्ता। मिनु येसुमी “एको लोव्र सुइ आन कली मशेंदीसे” दे माइक्सी बाव्ता। लूका ५:१४; मर्कूस ७:३६

शेंसीब आन कली सोइशशो  
मत्ती १०:१,५-१४; मर्कूस ६:७-१३

9 मिनु काबु येसुमी आ १२ जना शेंसीब आन कली खुप्शा, वोल आन कली गुंइतीक नु रोड पशो मुर आन कली सापाइक्ती सक्ति नु अधिकार गेमी बाव्ता। लूका १०:१-१२ 2 मिनु मेको आन कली परमप्रभु यावे आ राज्य डा लोव्र शेंथ नु रोड पाइब आन कली सापाइक्थ सोइक्तीमी बाव्ता। 3 मिनु लचामेनु, येसुमी मेको आन कली “कोक्के, झोला, जचा थोव्रक, क्येट मारेड मलाइक्चा। फेक्तीक यो मकुरसीचा। 4 मिनु तेको खिंमी ओव्रनी, मेको खिंमी गाक्ची मजाक्म सम्म बाक्कीन। 5 दोकका पा मुरपुकीमी इन कली बाक्चा मगेम्तेक्म हना, मेको सहर रे गाक्ची ना इन खोइल डा फुरकु थुर थुर पा ताइशशा गाक्कीन। मेको, मेको आन पबर्म चिन्ड दुम्ब” दे माइशशा सोइक्तीमी बाव्ता। 6 मिनु लशा, गाउं गाउं, सहर सहरम परमप्रभु यावे आ राज्य आ पबर्म शेंना शेंन, रोड पाइब आन कली सापाइक्ना पाइवन हिरसमा बाव्ता।

हेरोदमी येसु कली गुम्चा दाक्शो  
मत्ती १४:१-२; मर्कूस ६:१४-१६

7 मिनु सासन पाइब हेरोदमी मेको लोव्र नेल्ल नेंशा, छक लाक्ताव्ता। मारदे हना मुर का निक्शीमी “व्वाक्कुम खूम्शा गुंइब यूहन्ना बेक्शो रे सेंसे बाक्ता” देबाक्मा बाव्ता। 8 का निक्शीमी “एको एलीया बाक्ताव्ता थां का” देबाक्मा बाव्ता। का निक्शीमी “साइ डा परमप्रभु यावे आ लोव्र पाइब का बेक्शो रे सेंसे बाक्ता” देमा बाव्ता। 9 मिनु हेरोदमी “गो यूहन्ना आ पिया क्योरपाइक्ता। तन्न एको सु का आ पबर्म लोव्र नेंनु?” दे मेको कली गुम्चा दाक्ता बाव्ता। लूका २१:८

येसुम ५ हजार आन कली थुन्शो  
मत्ती १४:१३-२१; मर्कूस ६:३१-४४; यूहन्ना ६:१-१३

10 मिनु येसु आ सोइशशोपुकी येसु आ बाक्तीके लेम्मा बाव्ता। मिनु मार मार पामे, दो दो पामे, मेको नेल्ल शोव्रडमे बाव्ता। मिनु येसुमी मेको आन कली बेथसैदा सहरम लाइक्मी बाव्ता। 11 मिनु मुरपुकीम “येसु नु आ शेंसीब मेक लाम्तेक्म” दे तुइशशा, आन नोले खोइशशा लशा थित्मे बाव्ता। मिनु येसुमी मेको आन कली बाक्चा गेशा, परमप्रभु यावे आ राज्य डा लोव्र शेंशा, रोड पाइब आन कली सापाइक्मी बाव्ता।

12 मिनु नां रिक्चावानु, आ १२ जना शेंसीबपुकीम “मुर आन कली सोइक्तीन। मिनु मेकोपुकी गाउं मेर लशा, जचा तूचा ताइनीम, बास यो थित्नीम। मारदे हना एकेर सुइ मुर मबाक्नीम” दे मदमे बाव्ता। 13 मिनु येसुमी “गेपुकीमी एको आन कली जचा गेने” दे माइक्मी बाव्ता। मिनु शेंसीबपुकीमी “इं के ५ ओटा शोव्ले नु डांइ निक्शी ला बाक्ब। सहर लशा, जचा थोव्रक ग्याप्शा नेल्ल आन कली थुक्चा देंनी?” देमा बाव्ता। 14 मेकेर देल्शो वोंइश मुर ला ५ हजार बाक्मा बाव्ता। मिनु येसुमी शेंसीब आन कली “मुर आन कली ५०, ५० जना पा निप्पतीन” देमा बाव्ता। 15 मिनु मेकोपुकीमी निप्पदमे बाव्ता। 16 मिनु येसुमी ५ ओटा शोव्ले नु डांइ निक्शी शेशा, सरीड गे कोव्रशा “गे रिम्शो पाइब बाक्नीनी” दे आसीक गेशा जिक्शा, शेंसीब आन कली योक्चा गेमी बाव्ता। 17 मिनु नेल्लेमी रूथ्री जामे बाव्ता। जशा हेंशो खुप्तमेनु, १२ डालो दुम्माव्ता।

पत्रुसमी “ख्रीस्त ननी” देंशो  
मत्ती १६:१३-१९; मर्कूस ८:२७-२९; यूहन्ना ६:६७-६९

18 मिनु काबु आ शेंसीबपुकी नु बाक्शा प्रार्थना पा, येसुमी “मुरपुकीमी आं पबर्म मार देंनीमी?” दे हिल्लो पवा बाव्ता। 19 मिनु मेकोपुकीमी “का निक्शीमी व्वाक्कुम खूम्शा गुंइब यूहन्ना, का निक्शीमी एलीया, का निक्शीमी साइ नेसी डा परमप्रभु यावे आ लोव्र पाइब का बेक्शो रे सेंसे बाक्ता देंनीम” देमा बाव्ता। लूका ९:-८ 20 मिनु येसुमी “गेपुकी चहिं आं कली सु मिन्नीनी?” देंमेनु, पत्रुसमी “गे परमप्रभु यावे आ सोइशशो ख्रीस्त ननी” देमा बाव्ता। 21 मिनु येसुमी “एको लोव्र सुइ आन कली मशेंदीने” दे अरेमी बाव्ता।

ख्रीस्तम “श्येत जचा माल्नुड” देंशो  
मत्ती १६:२०-२३; मर्कूस ८:३०-३१

22 येसुमी “रागीम जरमेशोमी शुश श्येत जचा माल्ब। जोक्ब तुइक्ब खाल्पापुकी, ठेयब चढेबपुकी नु सास्त्रीपुकीमी मेको कली मब्रथु साइक्पाइक्नीम। मिनु बेक्शो आ नित्थ नाक्ती सेंसीब” दे शेंदीमी बाव्ता। लूका ९:४४-४५; लूका १८:३१-३४

आ नोले खोइक्ब “श्येत जाइनीम” देंशो  
मत्ती १६:२४-२८; मर्कूस ८:३४-९:१

23 मिनु येसुमी मेको आन कली “सुमी आं नोले खोइक्चा थुं पाइबा, मेकोमी आंम दला दाक्स पचा प्रोंइशा, नाक्ता कित कित श्येत जचा महिंथु, आं नोले खोइय्यील। 24 सुमी आंम गिंम प्रोंइचा माल्बा, मेको आ गिंम योल्ब। आं पबर्म आ गिंम सोइक्बमी आ गिंम प्रोंइब। लूका १७:२३; मत्ती १०:३९; यूहन्ना १२:२५ 25 रागी नेल्ल आंम के सेल्शा, आ थुं खतम दुम्त हना, मार रिम्शो दुम्बा डा? 26 सुमी आं पबर्म नु आं लोव्र आं पबर्म देंचा कली मुने पाइबा, मेको आ पबर्म रागीम जरमेशोमी, आ आफ आ छेडछेडमी, परमप्रभु यावे आ स्वर्ग डा गेय पाइबपुकी नु जाक्मेनु ‘मेको कली मतुइक्नुड, सु बाक्मे?’ देब। मत्ती १०:३३; रतिमोथी १:८ 27 गो इन कली थमा लोव्र पाइनुड मुल गो नु काथा बाक्ब का निक्शीमी परमप्रभु यावे आ राज्य मतथु मबेक्नीम” दे माइक्मी बाव्ता।

येसुमी आ रां फाइशा तपांडसीशो  
मत्ती १७:१-८; मर्कूस ९:२-८

28 मेको लोव्र पशो हप्ता का नोले, येसुमी पत्रुस, यूहन्ना नु याकूब सां आन कली प्रार्थना पथ डांडाम लाइक्मी बाक्त। 29 मिनू येसुमी प्रार्थना पवानु, फांडसीशा आ कुल बुबु देंशो नु आ फेक्शो वा यो बुबु पा तांडसे बाक्त। 30 मिनू मुर निक्शी, मोसा नु एलीया गूशा, येसु नु लोव्र पशो तामे बाक्त। 31 मेको यो छेडछेडम गिल्सीशा येसु नु लोव्रसी पामे बाक्त। मेकोपुकीम यरूसलेमम दोपा श्येत जशा, बेक्चा मेको आ पर्बम लोव्र पामे बाक्त। 32 मेको सांफा मोदेंशो लोव्र पामेनु, पत्रुस, यूहन्ना नु याकूब मारेड मतुइक्वा डा पा निन्द्रा पामे बाक्त। तन्न मेको आ डोंइती येसु नु मुर निक्शी राप्शो तामे बाक्त। येसु आ छेडछेडम मेको निक्शी नु बाक्शो तामे बाक्त। 33 मिनू मोसा नु एलीया गाक्चाम्सेनु, पत्रुसमी येसु कली “शेंब, इं कली एकेर बाक्चा रिम्शो दुम्ब। बाक्तीके सां सेल्नीकी। का इन कली, का मोसा कली, का एलीया कली” देंमाक्त। मोपा ब्वाक्शो आंमान मतुइक्ता बाक्त। 34 मिनू पत्रुसमी लोव्र पवानु, सरीड रे गोस्स यिशा, मेको आन कली सुम्मी बाक्त। मेको गोस्सुम गिल्मीनु, हिंमा बाक्त। 35 मिनू गोस्स आगा रे सेंदा का “एको आं योव्रशो तौ बाक्ब। मेको आ लोव्र नेनीन” देंशो नेन्मे बाक्त। लूका ३:२२; भजन संग्रह २:७; ब्यवस्था १८:१५ 36 मिनू मेको लोव्र नेन्मेनु, येसु का ला तामे बाक्त। मिनू मेको आन तशो नु नेंशो शुश नाक्ती सम्म सुइ आन कली मशेंथु, सिक्सी पा थुंमी वोदमे बाक्त।

वोलमी सुम्शो आल कली सापाइश्शो  
मत्ती १७:१४-२१; मर्कूस ९:१४-२९

37 मो दुम्मे आ दीसा डांडा रे यिशा, शुश मुर नु गुम्शा देल्मा बाक्त। 38 मेकेर मुर का जाक्शा ठेयब सेंदा पा “हे शेंब, आं तौ कली वारच पने। मारदे हना आं तौ का ला बाक्ब। 39 मेको कली वोलम हो हु सुमानु, वाइ ब्रेश्शा, शोव्र रे बोग्यो गुंडशा, ख्रिंख्रि पना पन मोल मोल थाइब। 40 गो इन शेंसीब आन कली ‘वोल गुंडदीने’ दे पुंडता। तन्न गुंडने मचबेम” देंमाक्त। 41 मिनू येसुमी “गे थमा पा थमा मसुइक्ब नु दूली पाइब, गेना सम्म इन पशो फाल्शा बाक्नुडा डा? इ तौ एक चाक्को” दे मदा बाक्त। 42 मिनू चाक्गानु, वोलम मेको वोंइश आल कली खोल्शा रोप्से पा, शोव्र रे बोग्यो गुंडपदा बाक्त। मिनू येसुमी ग्रांरा दिचा डा वोल कली हुइश्शा, वोंइश आल कली सापाइश्शा, आ आफ कली गेवा बाक्त। लूका ७:१५

रागीम जरमेशो श्येत जचा माल्ब देंशो  
मत्ती १:२२-२३; मर्कूस ९:३०-३२

43 मिनू मुर नेल्लेमी परमप्रभु यावे आ गेय तशा छक लाक्शा “परमप्रभु यावे ठेयब बाक्ब” दे लोव्र पामे बाक्त। मिनू मुर नेल्लेमी येसु आ पशो तशा छक लाक्मानु, येसुमी आ शेंसीब आन कली 44 “नोफा दाइश्शा नेनीन। आं देंशो लोव्र थुंमी वोतीन। रागीम जरमेशो दा मुर आन गुइमी गेशा साइक्वा पुंडसीब” देंमाक्त। लूका ९:२२; लूका १८:३१-३४ 45 तन्न मेकोपुकीमी मेको लोव्र काइ मरुप्मे बाक्त। मारदे हना मेको आन कली मेको लोव्र रुप्चा कली थुं मगेशो बाक्माक्त। येसु कली “एको लोव्र मार में?” दे हिल्लो पचा यो हिंमा बाक्त। लूका २४:४५

“ठेयब सु बाक्चा माइ?” देंशो  
मत्ती १८:१-५; मर्कूस ९:३३-३७

46 काबु शेंसीबपुकीमी “गो इं १२ जनामी नेल्ल क्येडा ठेयब सु बाक्चा माइ?” दे लोव्र पमुमा बाक्त। 47 येसुमी मेको आन मिम्शो तुइश्शा, आल का कली आ नेक्था वोइश्शा 48 “सुमी एको आल कली आं नेमी ब्राइबा, मेकोमी आं कली ब्राइब। मिनू सुमी आं कली ब्राइबा, मेकोमी आं कली सोइक्ब कली यो ब्राइब। गे इन दातेमी सु नेल्ल क्येडा आइक्च सुंडसीबा, मेको नेल्ल क्येडा ठेयब दुम्ब” दे शेंदीमी बाक्त। मत्ती १०:४०

छक लाक्चा गेय पाइब का  
मर्कूस ९:३८-४०

49 मिनू यूहन्नामी “शेंब, इं नोले मखोइक्ब मुरुमी इन नें थिशा, वोल आन कली खेरशो ताइतक। मिनू मो पचा मदुम्ब, दे माइक्ताक। मारदे हना मेको इं नोले खोइश्शा मगाक्ब” दे मदा बाक्त। 50 मिनू येसुमी “मोदेंचा मदुम्ब, मारदे हना इं कली मरिम्शो मपाइब इं मुरुन बाक्ब” दे शेंदा बाक्त। लूका ११:२३; फिलिप्पी १:१८

बास मगेचा पुंडसीशो

51 मिनू येसुमी परमप्रभु यावे आ बाक्तीके लची नाक्त आं नेक्था जाक्शो तुइश्शा, यरूसलेम लचा थुं पवा बाक्त। मर्कूस १०:३२ 52 मिनू सामरीया रागी डा गाउं आ नेक्था जाक्दीश्शा, मुर का निक्शी आन कली “आं डोंइती लशा, नेल्ल ठीक पने” दे सोइक्तीमी बाक्त। मिनू मेको सामरीया डा मुर आन गाउंमी ओव्रमा बाक्त। 53 तन्न मुरपुकीम बाक्चा गेने मबिस्समा बाक्त। मारदे हना येसुमी “यरूसलेम लाइनुड” देंशो बाक्माक्त। मिनू सोइश्शा मुरपुकी लेश्शा जाक्शा “बास मगेनीकी, देंतेक्म” दे येसु कली मदमे बाक्त। यूहन्ना ४:९ 54 मिनू आ शेंसीब याक्ब नु यूहन्नामी मेको लोव्र नेंशा, येसु कली “प्रभु, मेको गाउं डा मुर आन कली परमप्रभु यावे कली पुंडशा, सरीड रे मी तोक्पाइश्शा, खतम पपाइय्य?” दे हिल्लो पाम्से बाक्त। २राजा १:१०-१२ 55 तन्न येसुमी मेको आस गे हिरशा हुइक्तीम्सी बाक्त। 56 मिनू बास बाक्थ अर्को गाउं लमा बाक्त।

आ नोले खोइक्चा कली सु शिरबा?  
मत्ती ८:१९-२२

57 मिनू लांमी गाक्मानु, मुर कामी येसु कली “प्रभु, गो इन नोले खोइक्चा दाक्नुड” देंमाक्त। 58 मिनू येसुमी “सिवार आन बाक्तीके ढोडोडगा बाक्ब, चिक्ब आन बाक्तीके ग्योव्र बाक्ब। तन्न रागीम जरमेशो के आ बाक्तीके खिं मबाक्ब” देंमाक्त।

59 नोले येसुमी अर्को मुर का कली “आं नोले खोइय्पी” दे मदानु, मेकोमी “डोंइती लशा, आं आफ कली थिम्चा गेयीनी” देंमाक्त। 60 मिनू येसुमी मेको कली “बेक्शो मुरुमी बेक्शो कली थिम्मेक्ता। गे चहिं परमप्रभु यावे आ राज्य डा लोव्र नेंपाइक्थ लावो” दे मदा बाक्त। 61 अर्को मुरुमी “प्रभु, गो इन नोले खोइक्चा दुम्ती, तन्न डोंइती आं खिं डा मुर आन कली तुइक्पाइक्थ लचा गेयीनी” देंमेनु, १राजा १९:२० 62 येसुमी “ब्यफ वाक्बमी वाक्तानु, आ नोले हिरशा मवाक्ब। नोले हिरशा कोव्रना कोव्रन वाक्ब मुर चहिं परमप्रभु यावे आ राज्य डा गेय पचा मशिरब” देंमाक्त। फिलिप्पी ३:१३

शेंसीब आन कली शेंथ सोइश्शो  
मत्ती १०:७-१६

10 मिनू नोले प्रभुमी ७० जना अरु शेंसीब आन कली योव्रशा, डोंइती आ लशो सहर गाउंमी निक्निक्शी पा सोइक्तीमी बाक्त। का निक्शी किताबम ७२ देंनीम। लूका ६:१३-१६; लूका ९:१; मर्कूस ६:७ 2 मिनू गाक्चामेनु, मेको आन कली “बाली नाली रुप्चा शुश बाक्ब। रुप्ब मुर चहिं का निक्शी ला बाक्नीम। मोपतीके ‘बाली रुप्चा कली मुर योव्रशा सोइक्तीने’ दे बाली नाली आ परमप्रभु कली पुनीने। मत्ती ९:३७-३८; यूहन्ना ४:३५ 3 मिनू गे लने। भेडा पाठा आन कली फर आन दातेमी सोइश्शो खोदेंशो पा सोइक्तान्नी। 4 लनीनु, क्येट, झोला, जुत्ता मकुरथु लने। लांमी मुर आन कली युम्तीनी हना, लोव्र मपने। लूका ९:३-५; २राजा ४:२९ 5 मुर आन खिंमी जाक्दीश्शा ओव्रनीनु, मेको खिं डा मुर आन कली ‘थुं नाइश्शा बाक्कीन’ दे आसीक गेने। यूहन्ना २०:१९ 6 मेको खिंमी थुं नाइक्चा ताइब का बाक्त हना, इन थुं नाइक्तीक आसीक मेकोम राइब। तन्न मबाक्ब हना, मेको थुं नाइक्तीक आसीक गे राइनीनी। 7 मुरपुकीम बास गेम्तेक्म हना, गाक्ची मजाक्म सम्म मेकेरन बाक्कीन। खिं खिं याक्शा मबाक्कीन। इन

कली मार जचा तूचा गेमे, मेको जने तूडीन। मारदे हना गेय पाइबपुकीमी आन गाल्व तचा माल्नीम।<sup>8</sup> सहरम जाक्दीन्नीनु, मुरपुकीम इन कली ब्रशा, बास गेशा थुल्लेक्म हना, मार जचा गेमे, मेको जने।<sup>9</sup> रोड पाइब आन कली सापतीन। मिनु मुर आन कली 'परमप्रभु यावे आ राज्य इन नेक्था जाक्शो बाक्ब' दे नेंपतीन।<sup>10</sup> तन्न मुरपुकीमी इन कली मब्राम्तेक्म हना, सहर डा लांमी गाक्नीनु,<sup>11</sup> 'आंइ खोइलीम क्येषो इन सहर डा फुरक यो फिक्नीकी। मो हना यो परमप्रभु यावे आ राज्य इन नेक्था जाक्शो बाक्ब, दे तुइक्तीन।<sup>12</sup> परमप्रभु यावे आ ठेयब निसाफ पची ना गे इन क्येडा सोदोम सहरम शिशी ताइब, देनीन।' *उत्पत्ती १९:१-२९*

गालील डा सहर आ पर्वम लोव  
मत्ती ११:२०-२४

<sup>13</sup> ए खोराजीन, ए बेथसैदा, इन तशो चिन्ड नु छक लाक्वा डा गेय टायर नु सीदोन डा मुरपुकीमी तशो नम हना, भाडरा फेक्शा, पुलुम निश्शा आन थुं परमप्रभु यावे गे लेत्तेम वा।<sup>14</sup> ठेयब निसाफ पची नाक्ती टायर नु सीदोन डा मुर आन क्येडा गे शुश सजाइ ताइनीनी।<sup>15</sup> ए कापेरनाउम, मार गे स्वर्ग सम्म क्युक्सीनेवे डा? ममाइ, बेक्शो आन बाक्तीक तोक्वा पुंइसीनेवे।

<sup>16</sup> सुमी इन शेंशो नेंना, मेकोमी आं शेंशो नेंब। सुमी इन कली मब्राइबा, मेकोमी आं कली मब्राइब। आं कली मब्राइबमी आं कली सोइक्ब कली यो मब्राइब" दे माइश्शा सोइक्तीमी बाक्त। *मत्ती १०:४०; यूहन्ना ५:२३*

येसुमी ग्येरसीन देंशो  
मत्ती ११:२५-२७

<sup>17</sup> मिनु मेको ७० जना लशा शेंने थुम्शा, येसु आ बाक्तीके लेश्शा जाक्मा बाक्त। मिनु जाक्शा, येसु कली "प्रभु, इन नें थिशा, हुइश्शोन वोलम यो टिशा प्रोक्बाक्तेक्म" दे थाम्पा ग्येरसीशा मदमे बाक्त। <sup>७२</sup> जना शेंसीब यो देंनीम।<sup>18</sup> मिनु येसुमी "सरीड रे चिला आप्शो खोदेंशो पा गो सैतान कली दोक्शो ताता। *यूहन्ना १२:३१; प्रकाश १२:८-९*<sup>19</sup> गे बुस्स नु बिच्छी दिम्ताक्नी हना यो, इन कली मकोक्नीम। मारेइ पने मचाप्नीम। मोदेंशो पा सैतानमी इन कली मारेइ पने मचाप्ब। सुइमी यो इन कली मारेइ पने मचाप्ब। *भजन संग्रह ९१:१३; मर्कूस १६:१८*<sup>20</sup> वोलम इन देंशो टीनीम, दे तुइक्नीनी। मेको आ पर्वम मग्येरसीन। तन्न 'परमप्रभु यावे आ मुर दुश्शा, इं नें परमप्रभु यावे नु ब्रॉइचा ताइब आन किताबम ब्रेक्साक्व' दे तुइश्शा थाम्पा ग्येरसीने" दे माइक्मी बाक्त। *प्रस्थान ३२:३२; यसैया ४:३; फिलिप्पी ४:३; प्रकाश ३:५*

<sup>21</sup> मिनु येसु परमप्रभु यावे आ सोक्तीम पतीके ग्येरशा "आं आफ, सरीड नु रागी डा परमप्रभु, गे नेल्ल क्येडा ठेयब ननी। गे शुश रिश्शो पाइतीनी। जोक्ब तुइक्ब नड, दे मिम्ब आन कली इन लोव रुप्तीक थुं मगेनी। मजोक्ब मतुइक्ब आन कली रुप्तीक थुं गेतीनी। गे मोदेंशो पचा दाक्ताक्नी। *१कोरिन्थी २:७*<sup>22</sup> आं आफोमी आं कली नेल्ल कली अधिकार पतीक सक्ति गेती। तन्न सुइमी आ तौ सु बाक्बा, मतुइक्नीम, आं आफोमी ला तुइक्ब। सुइमी आं आफ कली मतुइक्नीम। आ तौमी ला तुइक्ब। मिनु तौमी सु सु आन थुं मतुइक्तीक वोइक्बा, मेकोपुकीमी यो तुइक्नीम" देंमाक्त।<sup>23</sup> मिनु आ शेंसीब गे हिरशा, मेको आन कली "सुम इन खोदेंशो पा ताइनीमी, मेकोपुकी ग्येरसीमल। *मत्ती १३:१६-१७*<sup>24</sup> मारदे हना इन तशो नेंशो साइ नेसी रे परमप्रभु यावे आ लोव पाइब नु पिपीपुकीमी तचा नेंचा दाक्ताक्मे। तन्न तचा नेंचा मतामे" दे माइक्मी बाक्त। *१पत्रुस १:१०*

इ नेक्था डा मुर सु बाक्बा, दे शेंशो

<sup>25</sup> मिनु येसुमी मुर आन कली शेंदानु, सार्वी का बोक्शा, येसु आ थुं थाम्शा "हे शेंब, गो गेना हना यो ब्रॉइशा बाक्वा कली मार पचा माल्नुडा?" दे हिल्लो पवा बाक्त। *मत्ती २२:३५-४०; मर्कूस १२:२८-३४; लूका १८:१८-२०*<sup>26</sup> मिनु येसुमी "परमप्रभु यावे आ अरेशो लोवमी मार ब्रेक्शो बाक्मे? मेको मपठेनी?" देंमेनु,<sup>27</sup> मेकोमी "इ थुं नेल्लेमी, इ रां नेल्लेमी नु इ सक्ति नेल्लेमी परमप्रभु, इ परमप्रभु यावे कली दाक्तो। मिनु आंम कली दाक्शो

खोदेंशो पा इ नेक्था बाक्ब आन कली यो दाक्तो, दे ब्रेक्शो बाक्ब" देंमाक्त। *ब्यक्स्था ६:५; लेवी १९:१८*<sup>28</sup> मिनु येसुमी "ठीक देंते। मेको इ देंशो खोदेंशो पाप्तीवी हना, गेना हना यो ब्रॉइशा बाक्वा ताइनेवे" देंमाक्त। *लेवी १८:५; मत्ती १९:१७*<sup>29</sup> मिनु आंम कली ठीक सेल्शा, मेकोमी "आं नेक्था डा मुर सु बाक्नीमी, गो मतुइक्नुड" देंमाक्त।<sup>30</sup> मिनु येसुमी "मुर का यरूसलेम रे थिशा, यरीको सहर डा लां खोदा बाक्त। मिनु लमेनु, खुइपुकीमी लांम बाप्शा, मेको कली तुप्शा, थपाइश्शा, आ बाक्शो मारेइ मारेइ नेल्ल रोइश्शा, प्रोक्मा बाक्त।<sup>31</sup> इक्का नोले मेको लां पा चढेब का पिशा, मेको तुप्शा बेक्चशो मुर कली तशा, हेरशा लाक्मा बाक्त।<sup>32</sup> मिनु इक्का नोले लेवी आ थर डा मुर का यो मेको लां रे पिमाक्त। मेकोमी यो मेको बेक्चशो मुर कली तशा, हेरशा लाक्मा बाक्त।<sup>33</sup> मिनु नोले सामरीया रागी डा मुर का पिमाक्त। मेकोमी बेक्चशो मुर कली तशा शिशी पवा बाक्त।<sup>34</sup> तुप्शो मुर आ गारमी तेल नु ओख्ती खेक्शा वाम फ्रेंशा, आ गधा तारी डोइक्पाइश्शा, होटेल सम्म लाइश्शा, बास पुंइशा, जचा बाक्वा गेवा बाक्त।<sup>35</sup> आ दीसा नाक्ती गाक्वा क्येडा डोंइती निम्फा आस जशो नु बास डा नेल्ल थाप्शा, होटेल दाइक्ब कली क्येट गेशा वोइश्शा 'मेको तुप्शा पुंइसीशो मुर कली रिश्शो पा कोवडीने। मसाम सम्म वारच पने। गो लेडडानु, मजाक्दीश्शो क्येट नेल्ल थाप्जन्नी' दे लोव गार पा लमाक्त।<sup>36</sup> मेको लां गाक्ब सांमी सु चहिं तुप्शा रोइक्वा पुंइसीशो मुर आ नेक्था डा मुर दुम्मे?" दे हिल्लो पवा बाक्त।<sup>37</sup> मिनु सार्वीमी "शिशी पाइब मुर थमा पा आ नेक्था डा मुर बाक्त" देंमाक्त। मिनु येसुमी "मेको आ खोदेंशो पावो" दे माइश्शा सोइक्ता बाक्त। *यूहन्ना १३:१७*

मरीयम नु मारथा आस खिंम बाक्शो

<sup>38</sup> मिनु येसु नु आ शेंसीबपुकी यरूसलेम डा लां रे गाक्मानु, गाउं कामी जाक्दीम्मा बाक्त। मेकेर मारथा नें पाइश्शो मीश मुर कामी येसु कली मान पा बास गेवा बाक्त। *यूहन्ना ११:१*<sup>39</sup> मारथा आ लोक्ब मरीयम येसु आ खोइल आ नेक्था बाक्शा आ शेंशो नेंना बाक्त।<sup>40</sup> मारथामी शुश गेय पा श्येत पशा "प्रभु, आं लोक्बमी आं कली काइ वारच मपाइब। गे मोदेंशो तशा यो मारेइ मर्देंनी? मेको कली 'बोक्शा, इ लोक्ब कली वारच पतो' दे मतीन" देंमाक्त।<sup>41</sup> मिनु येसुमी मारथा कली "मारथा, आं लोव नेनो। इ थुंमी ग्येथ लुक्च मिम्शा, पीर पाइबाक्ते।<sup>42</sup> तन्न थोव्रक का ला माल्ब। मरीयममी रिश्शो थोव्रक योव्रतु। मेको सुइम लाइक्ने मचाप्नीम" दे मदा बाक्त। *मरीयम ६:३३*

प्रार्थना पचा आ पर्वम शेंशो  
मत्ती ६:९-१३

<sup>11</sup> काबु येसुमी प्रार्थना पचा बाक्त। मिनु प्रार्थना पने थुमानु, आ शेंसीब कामी "हे प्रभु, यूहन्नामी दोपा आ शेंसीब आन कली प्रार्थना पचा शेंदा, मोपा आंइ कली यो शेंदीकी" देंमाक्त।<sup>2</sup> मिनु येसुम "परमप्रभु यावे कली प्रार्थना पनीनु 'आं आफ, इन नें का ला ठेयब बाक्ल। इन राज्य जाक्ल।<sup>3</sup> नाक्त किंत किंत डा आंइ जचा थोव्रक गेकी।<sup>4</sup> आंइ मरिश्शो पशो क्याम्शा गेकी। मारदे हना गो यो आंइ कली मरिश्शो पाइब आन कली का का पा माफ गेनीकी। सैतानमी आंइ थुं थाम्चा मगेने" दे प्रार्थना पने" दे शेंदीमी बाक्त।

परमप्रभुम शिशी पाइब, दे शेंशो  
मत्ती ७:७-११

<sup>5</sup> मिनु येसुमी "सुइमी नाक्दो इप्शो वारच कली पोक्शा 'ए वारचै, शोब्ले सां गेयी।<sup>6</sup> वारच का डोन रे जाक्त। मेको कली थुलु देंडानु, गो नु मारेइ जचा थोव्रक मबा।<sup>7</sup> मोपतीके जचा थोव्रक गेचा नड" दे पुंइतु हना, वारचम लाप्चो मरोक्थु, खिं आगा रे 'रेयके मपावो। लाप्चो चोक्ता। आल इप्तेक्म। सेंसीनीम। बोक्शा, इ पुंइशो गेने मचाप्नुड' देंत हना,<sup>8</sup> तन्न मेकोमी पुंइस डा पुंइस बाक्त हना, मेको मगेनुड देंब मुरुमी वारच, दे ला ममाइ डिपी पतीके मेको कली आ पुंइशो गेब।

9 परमप्रभु यावे कली पुनीने। मिनु इन पुंडुशो ताइनीनी। मालीने। मिनु इन माल्शो थिल्लीनी। 'बाक्नी?' दे लाप्चो खोकोल पने। मो पाइतीनी हना ओव्रचा ताइनीनी। 10 मोपतीके सुम पुंडुबा, मेकोमी आ पुंडुशो ताइब। सुम माल्बा, मेकोमी आ माल्शो थिप्ब। सुम ओव्रनुड, दे लाप्चो खोकोल पाइबा, मेको ओव्रचा ताइब। लूका १३:२५ 11 तौमी आ आफ कली 'डांड ब्वाइनुड' दे पुंडुतु हना, मार, आ आफोमी डांड, दे बुस्स ब्वाचा गेबा डा? मत्ती ७:९ 12 'ब्वोफु जाइनुड' दे पुंडुतु हना, ब्वोफु, दे बिच्छी ब्वाचा गेबा डा? 13 गे, मरिश्शो पाइब बाक्तीनी हना यो, इन आल आन कली रिश्शो थोव्रक गेने चाप्नीनी, इन पशो क्येडा स्वर्गम बाक्ब इन आफोमी आ तमी तौ आन कली आन पुंडुशो गेब। मेकोपुकीमी 'इन सोक्त गेकी' दे पुंडुतेक्म हना, आ सोक्त यो गेब" दे शेंदीमी बाक्त।

वोल गुंडुचा आ पर्वम शेंशो  
मत्ती १२:२२-३०; मर्कुस ३:२२-२७

14 मिनु काबु येसुमी लाटा वोलम थिशो मुर का कली गुमा बाक्त। मिनु लाटा वोल कली गुंडुशा खेरा बाक्त। वोल गूम नोले मेकोमी लोव्र पने चबा बाक्त। मेकोमी लोव्र पशो नेंशा, मुर नेल्ले छक लाक्मा बाक्त। 15 मिनु का निक्शीमी चहिं "वोल आन पिप बेल्जीबुल आ सक्तिम वोल आन कली गुंडुशा खेरबाक्माक्त" देंमा बाक्त। 16 का निक्शीमी येसु कली थुं कोव्रचा कली चिन्ड कोइपाइक्चा माल्मे बाक्त। मर्कुस ८:११ 17 येसुमी मुर आन थुं डा लोव्र नेल्ल तुइश्शा, मेको आन कली "राज्य का डा मुर जिशा ब्राशा गाक्तेक्म हना, राज्य जाम्शा लाइब। खिं का डा मुरपुकी जिशा ब्राशा गाक्तेक्म हना, मेको खिं मलीब। 18 सैतान आ राज्य डा सक्ति ब्रात हना, रीब पा आ राज्य जाम्शा मलाइबा डा? 'बेल्जीबुल आ सक्तिम वोल आन कली खेरबाक्माक्त' देंतीनी। 19 गो बेल्जीबुल आ सक्तिम वोल आन कली खेरतामी हना, इन तौपुकीमी सुका आ सक्तिम खेरनीमी? इन तौपुकीमी इन कली निसाफ पाइनीम। 20 गोमी परमप्रभु यावे आ सक्तिम वोल आन कली खेरता हना, परमप्रभु यावे आ राज्य जाक्शो बाक्माक्त, दे तुइक्तीन। प्रस्थान ८:१५ 21 बोल्यो मुर कामी या शेशा आ दरवार खाल पाप्तु हना, आ शॉप सुइमी खुइ पने मचाप्नीम। 22 तन्न मेको क्येडा यो बोल्यो अर्को का जाक्त हना ला, मेको आ या नेल्ल रोइश्शा, ग्राशा, शॉप नेल्ल आंम के सेल्ब। कलस्सी २:१५; १यूहन्ना ४:४ 23 गो नु मगारब आं जोरी सत्रु दुम्नीम। गो नु मखुप्बपुकीमी आं खुप्शो यो फ्राइनीम। लूका ९:५०

वोल लेशशा जाक्ब, दे शेंशो  
मत्ती १२:४३-४५

24 ग्रांग्रा दिचा डा वोल मुर रे गूशा लशा, ब्वाक्कु मबाक्तीकेम नाइक्तीके माल्ब। मिनु नाइक्तीके मथित्तु हना 'डॉइती आं बाक्तीकेमीन लेल्लुड' दे लेप्ब। 25 मिनु लेशशा जाक्मेनु, आ डॉइती बाक्तीके फिक्शा सिल्शा वोइश्शो ताइब। मिनु आ क्येडा ग्रांग्रा दिचा डा ७ ओटा वोल आन कली माल्थ लशा चाक्ब। मिनु ओव्रशा बाक्नीम। 26 मिनु डॉइती क्येडा मेको मुर शुश मरिश्शो दुम्ब" दे शेंदीमी बाक्त। यूहन्ना ५:१४

परमप्रभु कली टीब आसीक राइब।

27 येसुमी मेको लोव्र पवानु, मीश मुर कामी ठेयब सेंदा पा "इन कली थिशा थुल्शा कोल्पाइक्ब ममा आसीक रशो मुर बाक्माक्त" दे येसु कली ठेयब सेला बाक्त। लूका १:२८:४८ 28 मिनु येसुमी "आं ममा क्येडा परमप्रभु यावे आ लोव्र नेंशा, थुंमी वोइश्शा पाइबपुकी आसीक राइब नम" देंमाक्त। लूका ८:१५:२१

चिन्ड कोव्रकोव्र दाक्बपुकी  
मत्ती १२:३८-४२

29 येसु आ लोव्र नेंबपुकी बारना बारन लशा, शुश दुम्मा नोले येसुमी "सिनाक्त मुलाक्त डा मुर थम मरिश्शो बाक्नीम। मारदे हना चिन्ड ला कोव्रकोव्र दाक्नीम। मेको आन कली योना आ चिन्ड डा लाक्शा, मारदे

चिन्ड मकोइनुडमी। लूका ११:१६ 30 निनवे सहर डा मुर आन कली योना आ चिन्ड खोदेशो पा, रागीम जरमेशो सिनाक्त मुलाक्त डा मुर आन कली चिन्ड दुम्ब। 31 निसाफ पची नाक्त दक्खिन रागी डा पिपीममी बोक्शा, एको पाला डा मुर आन कली दोस ताइब सेल्ब। मारदे हना मेकोमी डोन रागी रे पिप सोलोमन आ जोक्तीक तुइक्तीक नेंचा कली जाक्त। नेनीन, एकेर सोलोमन क्येडा यो ठेयब का बाक्ब। १राजा १०:१ 32 निसाफ पची नाक्ती निनवे सहर डा मुरपुकी बोक्शा, एको पाला डा मुर आन कली दोस ताइब सेल्नीम। मारदे हना मेकोपुकीमी योना आ लोव्र नेंशा, आन थुं परमप्रभु यावे गे लेत्ताक्म। नेनीन, एकेर योना क्येडा यो ठेयब का बाक्ब। योना ३:५

इन रां छेडछेड दुम्चा माल्ब  
मत्ती ५:१५; मत्ती ६:२२-२३

33 बत्ती दाशा, सुइमी खुइश्शा सुम्शा मवोइक्नीम। खिं ओव्रब आन कली हाम्सो दुम्ब, दे नेल्लेम ततीकेम वोइक्नीम। लूका ८:१६ 34 इन मिक्च इन रां डा छेडछेड बाक्ब। गे हेंथे मकोव्रतीनी हना, इन रां नेल्ल छेडछेड दुम्ब। गे मरिश्शो कोव्रचा दाक्ताक्नी हना, इन रां नेल्ल छिडछिड बाक्ब। 35 मोपतीके होस पांडसीने, इन रां डा छेडछेड छिडछिड मदुम्ब। 36 मिनु इन रां छिडछिड मदुम्ब, छेडछेडम ब्रीशो बाक्त हना, बत्ती दाशो खोदेशो पा तांडसीनीनी" दे शेंदीमी बाक्त।

फरिसी नु सास्त्री कली हुइश्शो  
मत्ती २३:१-३६

37 काबु येसु फरिसी आ खिंमी खमे जथ लमेनु, आ गुइ मचिक्सीथु निस्से बाक्त। लूका ७:३६; लूका १४:१ 38 मिनु फरिसीमी येसु कली गुइ मचिक्थु जचशो तशा छक लाक्माक्त। मत्ती १५:२ 39 मिनु प्रभु येसुमी मेको कली "गे फरिसीपुकी बोस शेक्तीनीनु, आ तार ला शेक्तीनी। आगा मशेक्तीनी। मेको खोदेशो पा इन थुंमी रोइक्तीके नु परमप्रभु कली मटितीकेमी ब्रीशो बाक्ब। 40 गे मूर्खपुकी, सुमी आ लाडगा डा सेला, आगा डा यो मेकोम सेल्शो ममाइ डा? 41 गे आगा डा थोव्रक मथीब आन कली गेने। मिनु इन कली नेल्ल रिश्शो दुम्ब।

42 तन्न आबी, फरिसीपुकी, गे खतम बाक्नीनी। मारदे हना सुप्तीके के १० भाग डा भाग का परमप्रभु यावे कली गेनीनी। तन्न गे मुर आन कली ठीक निसाफ मपथु, परमप्रभु यावे कली मदाक्नीनी। गे डॉइती नु नोले डा निम्फा पचा माल्नीनी। यूहन्ना ५:४२ 43 आबी, फरिसीपुकी, गे खतम बाक्नीनी। मारदे हना गुम्तीक खिंमी मान तशो ठेयब मुर आन निक्तीकेमी नित्वा दाक्नीनी। बजारमी गाक्नीनु, मुरपुकीमी मान पा सेउ पशो ताक्चा दाक्नीनी। लूका १४:७ 44 आबी, फरिसीपुकी, गे खतम बाक्नीनी। मारदे हना गे मतलीक तुरस खोदेशो बाक्नीनी। मुरपुकीमी मेको कली मतुइक्थु, दिश्शा गाक्नीमी" देंत। 45 मिनु सास्त्री कामी "शेंब हजुर, इन हुइश्शो फरिसी आन कली ला ममाइ। आंइ कली यो हुइक्ताक्नी" देंमेनु, 46 येसुमी "आबी, सास्त्रीपुकी गे यो खतम बाक्नीनी। मारदे हना हेल्शो भारी सेल्शा, मुर आन कली कुरपाइक्नीनी। गे चहिं ब्रेचो कामी यो नेप्शा वारच मपाइनीनी। 47 आबी, गे खतम बाक्नीनी। मारदे हना इन किकी पिपीपुकीमी परमप्रभु यावे आ लोव्र पाइब आन कली साइक्तेक्म। मिनु गे मेको आन तुरस सेल्तीनी। प्रेरित ७:५२ 48 मोपा इन किकी पिपी नु गारशो दुम्तीनी। मेको आन पशो ठीक बाक्माक्त, दे आन पशो खोदेशो पाइब दुम्तीनी। मारदे हना इन किकी पिपीपुकीमी परमप्रभु यावे आ लोव्र पाइब आन कली साइक्ना साइक्न बाक्तेक्मे। गेपुकीमी चहिं तुरस सेल्ना सेल्न बाक्तीनी। 49 साइ नेसी परमप्रभु यावे आ तुइक्तीक पाइश्शोमी 'गो आं लोव्र शेंब मुर सोइक्नुडमी। मेको आं सोइश्शो मुर का निक्शी आन कली खेदा पा श्येत गेनीम, का निक्शी आन कली साइक्नीम' देंशो बाक्त।

50 साइ डॉइती रे मुल सम्म परमप्रभु यावे आ लोव्र पाइब शुश आन कली साइश्शो क्येक्क एको पाला डा मुर आन रे ताक्सीब। 51 डॉइती साइश्शो हाबील बाक्त। नेल्ल क्येडा नोले साइश्शो जकरिया बाक्त। मेको कली परमप्रभु यावे कली चढ़ेतीक नु आ खिं आस दातेम साइश्शो बाक्त। मेको

नेल्ल आन कली मोपा साइक्तीके सिनाक्ती मुलाक्ती डा मुर दोस गेने पुंडसीशा सजाइ ताइनीम।<sup>52</sup> आबी, सास्त्रीपुकी, गे खतम बाक्नीनी। मारदे हना गे जोक्तीक तुइक्तीक सांचो ताक्तीनी, तन्न मेकेर मओवनी। मिनु ओव्रचा दाक्ब आन कली यो ओव्रचा मगेनी” दे हुइक्तीमी बाक्त।

<sup>53</sup> मिनु येसु फरिसी आ खिं रे गाक्चवानु, सास्त्री नु फरिसीपुकी गाइश्शा, शुश लोव्र हिल्लो पा आ थुं थाम्मे बाक्त।<sup>54</sup> मारदे हना आ लोव्र खाइक्पाइश्शा, दोस गेचा माल्मे बाक्त। लूका २०:२०

परमप्रभु कली थमा सुइक्चा माल्ब  
मत्ती १०:२६-३३

12 मिनु हजार, हजार मुर खुम्सीशा, नेम्मुशा, चुमुशा, येसु आ लोव्र नेंथ जाक्मा बाक्त। मिनु येसुमी आ शेंसीब आन कली “फरिसी आन बोरापाइक्तीक ओख्ती रे होस पा बाक्कीन। मेको आन जोल पा शेंतीक बाक्ब। मत्ती १६:६; मर्कुस ८:१५<sup>2</sup> सुम्शा वोइश्शो नोले नेल्ल हाक्सीशा तांइसीब। खुइश्शा वोइश्शो लोव्र नेल्ल नोले तुंइसीब। लूका ८:१७<sup>3</sup> मोपतीके इन छिडछिडम बाक्शा पशो लोव्र नोले छेडछेडम नेंसीब। मुल इन खिंमी बाक्शा, नोफाम मुइक्मुशा पशो लोव्र नोले ठेयब सेंदा पा देंनीम।<sup>4</sup> आं वारचपुकी, इन रां कली साइक्ने चाप्बपुकी तशा महिनीन। मारदे हना साइक्ने थुम्शा, नोले मारेइ पने मचाप्नीम।<sup>5</sup> तन्न परमप्रभु यावे कली मान पा हिनीन। मारदे हना मुर आन कली साइश्शा, नाराक सोइक्तीक सक्ति मेको नु बाक्ब। मोपतीके मेको कली तशा मान पा हिनीन। हिब्रू १२:२९<sup>6</sup> आस्सारीयोन निक्शीम ५ ओटा भंगेरा मग्याम्सीबा डा? मो हना यो परमप्रभु यावेमी मेको आन कली कोव्रशो बाक्ब। आस्सारीयोन का नेल्ल क्येडा आइक्च तांभा के क्येट बाक्त।<sup>7</sup> मेको आन कली ला ममाइ। इन पिया डा चां का का पा हिक्शा, गिश बाक्मा, दे तुइश्शो बाक्ब। मोपतीके महिनीन। गे भंगेरा क्येडा शुश हिक्सीशा बाक्नीनी। लूका २१:१८<sup>8</sup> सुमी मुर आन कली ‘गो येसु आ मुर नड’ देंबा, रागीम जरमेशोमी यो मेको आ पर्वम परमप्रभु यावे आ स्वर्ग डा गेय पाइब आन डोंइती ‘मेको आं मुर बाक्ब’ देंबा।<sup>9</sup> सुमी चहिं मुर आन कली ‘येसु सु बाक्मे? मतुइक्नुड’ देंबा, मेको आ पर्वम परमप्रभु यावे आ स्वर्ग डा गेय पाइब आन डोंइती ‘मेको कली मतुइक्नुड’ देंबा। लूका ९:२६; १सामुएल २:३०<sup>10</sup> सु सुमी रागीम जरमेशो आ पर्वम शुक्शी पामे, मेको का का पा माफ ताइनीम। सु सुमी चहिं परमप्रभु यावे आ सोक्त आ पर्वम शुक्शी लोव्र पामे, मेको आन पाप गेनायो मक्याम्सीब। मत्ती १२:३२; मर्कुस ३:२८-२९

<sup>11</sup> इन कली आन ग्युक्तीक खिं डा ठेयब मुर नु हुकुम पाइब आन डोंइती लाइश्शा राप्पदमेनु ‘मुल मार देंचा, मार लोव्र लेत्वा’ दे सुर्ता मपने।<sup>12</sup> मोपा राप्पदमेनु, परमप्रभु यावे आ सोक्तीमी इन कली मार देंचा दो देंचा तुइक्पाइश्शा देंपाइक्ब” दे शेंदीमी बाक्त।

शोंप गे थुं महिरचा, दे शेंशो

<sup>13</sup> मिनु काबु आ लोव्र नेंथ शुश मुर खुम्समानु, मुर कामी “शेंब, आं लोक्ब कली आं तचा डा अडस योक्शा गेवो, दे मतीन” दे पुना बाक्त।<sup>14</sup> मिनु येसुमी “मार गो इस अडस योक्ब नडा डा? मनड” देंमाक्त।<sup>15</sup> मिनु नोले मुर आन कली “नेनीन, होस पा बाक्कीन। शिंम मदुमीन। मारदे हना शुश शोंप बाक्शा ला ब्रोंइशा बाक्चा मतांइसीब” देंमाक्त। उपदेसक ५:९; १तिमोथी ६:९-१०

शोंप पाइश्शो मूर्ख

<sup>16</sup> मिनु कथा सेल्शा “शोंप पाइश्शो मुर का आ बाली नाली शुश ग्रेल्माक्त।<sup>17</sup> मिनु मेकोमी शुश ग्रेल्शो तशा ‘मुल अन्न वोइक्तीके खिं मजाक्वीप्ब।<sup>18</sup> मोपतीके खिं प्रेशशा अन्न वोइक्तीक ठेयब खिं सेल्शा, बाक्शो अन्न नेल्ल मेकेर उप्नुड’।<sup>19</sup> मिनु मेकोमी ‘शुश बर्स कली जाक्वीप्ब। शुश शोंप गे नु बाक्ब। मोपतीके जशा तूशा ग्येरशा बाक्को’ दे आंम थुं कली देंमाक्त। भजन संग्रह ४९:१-२०<sup>20</sup> मिनु परमप्रभु यावेमी मेको कली ‘गे मूर्ख नवे। मारदे हना मुलाक्दो बेक्नेवे। मिनु इ खुप्शा उप्शो

शोंप सुम जाइबा?’ दे मदा बाक्त।<sup>21</sup> परमप्रभु यावे कली ममिम्थु, शोंप ला मिम्ब मुर नेल्ल मोदेशो दुम्नीम” दे शेंदीमी बाक्त। मत्ती ६:२०

सुर्ता मपचा, दे शेंशो  
मत्ती ६:२५-३३

<sup>22</sup> मिनु आ शेंसीब आन कली “मार जचा, मार फेक्वा, दे सुर्ता मपने।<sup>23</sup> मारदे हना जचा क्येडा ब्रोंइचा ठेयब बाक्ब। फेक्वा क्येडा इन रां ठेयब मिम्तीने।<sup>24</sup> खद आन कली कोव्रडीने। मेकोपुकीमी मशोक्नीम, मारेइ मरुप्नीम मखुप्नीम। आन अन्न वोइक्तीक खिं यो मबाक्ब। तन्न परमप्रभु यावेमी मेको आन कली कोव्रशा थुल्ब। मिनु गे मेको चिक्ब आन क्येडा हिक्सीशा मबाक्नीनी डा? <sup>25</sup> मार, गेपुकीमी सुर्ता पा इन ब्रोंइतीक नाक्त बारपाइक्ने चाप्नीनी डा? <sup>26</sup> मोदेशो लायो मचाप्तीनी हना, मारदे अरु थोव्रक आन कली सुर्ता पाइनीनी? <sup>27</sup> लिली फू कली कोव्रशा मिम्तीने। गिश रिम्शो तांइसीनीमी। श्येत पा गेय मपाइनीम। पांइतो मपांइनीम। पिप सोलोमन गिश ग्योम्साक्व हना यो, मेको लिली फू खोइ दारशो मदुम्माक्त।<sup>28</sup> परमप्रभु यावेमी मेको घांस रिम्शो पा ग्योम्ताक्व बाक्त हना यो, याम का बाक्चा गेब। नोले मेको घांस मीम हुम्चा पुंडसीब। घांस कली लायो मिश रिम्शो पा ग्योम्ताक्व हना, गे रिम्शो पा थमा सुइक्ने मचाप्ब इन कली मग्योम्बा डा?

<sup>29</sup> मार जचा मार तूचा, दे थुंमी सुर्ता मपने।<sup>30</sup> रागी रागी डा मुर नेल्लेमी मोदेशो मिम्नीम। इन आफ, परमप्रभु यावेमी इन माल्शो नेल्ल तुइक्ब।<sup>31</sup> मोपतीके मोदेशो मिम्चा प्रोंइशा, परमप्रभु यावे आ राज्य मालीने। मिनु मारेइ मारेइ यो ताइनीनी।

<sup>32</sup> गे आइक्च बगाल, महिनीन। मारदे हना इन आफोमी इन कली आ राज्यम वोइक्चा दाक्ब। लूका २२:२९<sup>33</sup> इन के बाक्शो लेयशा, मथीब आन कली योक्शा गेने। मो पनीनु, स्वर्गम इन शोंप लीब। मिनु मेको मोपा वोइश्शो शोंप खुइमी खुइ पने मचाप्नीम, खिया मजोइब मराक्ब, गेनायो मजाम्ब। लूका १८:२२<sup>34</sup> तेकेर इन शोंप बाक्बा, मेकेरन इन थुं यो लीशो बाक्ब।

सासीशा बाक्कीन, दे शेंशो  
मत्ती २४:४३-५९

<sup>35</sup> बत्ती दाशा वा फेक्शा सासीशा बाक्कीन। प्रस्थान १२:११; १पत्रुस १:१३; मत्ती २५:१-१३<sup>36</sup> होव्रप ग्युंभे भोज जथ लमेनु, आ गेय पाइबपुकीमी ‘इं होव्रप लेश्शा जाक्ब। मोपतीके लेश्शा मजाक्म सम्म मइप्थु बाक्च, दे रिम्नीम। मिनु होव्रप जाक्शा, लाप्चो खोकोल पदानु, गु रोक्शा ओव्रचा गेनीम। प्रकाश ३:२०<sup>37</sup> मोदेशो गेय पाइब आसीक ताइब बाक्नीम। होव्रप लेश्शा जाक्मेनु, आ गेय पाइब आन कली मइप्थु रिम्शा बाक्शो थित्तु हना, आ होव्रप थाम्पा ग्येरसीशा, मेको आन कली निप्पाइश्शा थुल्ब।<sup>38</sup> होव्रप नाक्दो नाक्ती गेना हना यो लेश्शा जाक्मेनु, आ गेय पाइब मइप्थु बाक्तेक्म हना, मेको मुर रिम्शो दुम्शा आसीक ताइनीम’।<sup>39</sup> नेनीने, खिं डा मुरुमी ‘मुल खुइ जाक्नीम’ दे तुइश्शो नम हना, मेकोम खिं मप्रोंइथु मइप्थु बाक्शा, खुइ पचा मगेम वा। १थिस्सलोनिकी ५:२<sup>40</sup> मोदेशो पा गे यो मइप्थु सासीशा बाक्कीन। मारदे हना रागीम जरमेशो इन मतुइक्थु जाक्ब” दे शेंदीमी बाक्त।

<sup>41</sup> मिनु पत्रुसमी “प्रभु, एको लोव्र गो आंइ कली ला शेंदीनी देय मुर नेल्ल आन कली शेंदीनी?” दे हिल्लो पवानु,<sup>42</sup> प्रभुमी “होव्रपमी आ खिं कोव्रब कली जची जाक्मेनु जचा गेचा, दे अरेशा वोइक्चा पुंडसीब। मेको खोदेशो निप्स पाइश्शो थमा सुइक्चा पुंडसीशो गेय पाइब सु बाक्बा? <sup>43</sup> आ होव्रप लेश्शा जाक्मेनु, आ गेय पाइबमी आ अरेशो गेय पना पन बाक्शो थित्तु हना, मेको गेय पाइब आसीक राइब दुम्ब।<sup>44</sup> नोफा दाइश्शा नेनीने, मेको होव्रपमी आ बाक्शो मारेइ मारेइ मेको गेय पाइब कली जिम्मा गेब।<sup>45</sup> तन्न मेको गेय पाइबमी ‘आं होव्रप इक्का नोले जाक्ब’ दे मिम्शा, मेकोमी गेय पाइब वोंइश मुर, मीश मुर आन कली तुप्शा श्येत गेशा, जशा तूशा, दुक्शा पाप्तु हना,<sup>46</sup> आ ममिम्शो मतुइश्शो नाक्त आ होव्रप लेश्शा जाक्ब। मिनु मेकोमी मेको गेय पाइब कली सजाइ गेशा, मरिम्शो गेय पाइबपुकी नु काथा

वोड्कब। 47 मिनू होवप आ देशो रुप्शा यो मतुइश्शो खोदेशो पा मेको आ देशो मटीब गेय पाइब शुश तुप्चा पुंडसीब। याकूब ४:१७ 48 होवप आ देशो मतुइक्थु, मरिश्शो पापु हना, इक्का ला तुप्चा पुंडसीब। सुमी शुश रुप्शा तुइश्शो बाक्मे, मेकोम शुश जिम्मा ब्राइबा। मिनू सुमी शुश जिम्मा ब्राइबा, मेको शुश जिम्मा वारी दुम्ब” दे शेंदीमी बाक्त।

फ्राचा कली जाक्ती  
मत्ती १०:३४-३६

49 मिनू येसुमी शेंना शेंन “गो एको रागीम मी जेथ जाक्शो नड। एको मी आं क्येडा डोइती जेश्शो हना, रिश्शो दुम वा। 50 गो श्येत का जचा माल्नुड। मेको बेक्का डा श्येत मजडा सम्म परमप्रभु यावेम गेशो गेय पाइनुड। लूका १८:३१; मत्ती २०:२२; मत्ती २६:३८ 51 गो रागीमी नेल्ल आन कली गारपाइक्थ जाक्शो बाक्नुड, दे मिम्नीनी? तन्न गो इन कली फ्राथ कका जाक्ती। 52 खिं कामी ५ जना मुर बाक्तेक्म हना, मेको ५ जना ब्रानीम। सांमी थमा सुइक्नीम, निक्शीमी थमा मसुइक्नीसी। निक्शीम थमा सुइक्नीसी, सांमी थमा मसुइक्नीम। 53 आफोमी थमा सुइक्ब, आ तौमी थमा मसुइक्ब। मिनू आफ कली आइक्च सेल्ब। तौमी थमा सुइक्ब, आ आफोम थमा मसुइक्ब। मिनू आ तौ कली आइक्च सेल्ब। ममामी थमा सुइक्ब, तमीमी थमा मसुइक्ब। तमीमी थमा सुइक्ब, ममामी थमा मसुइक्ब। शिमीमी थमा सुइक्ब, चाइमीमी थमा मसुइक्ब। चाइमीमी थमा सुइक्ब, शिमीमी थमा मसुइक्ब। मोपा थुं का पा बाक्ने मचाप्नीम” दे शेंदीमी बाक्त।

54 मिनू मेकेर खुम्सीशो शुश मुर आन कली “नां पेरतीकेम गोस्स यूमेनु, ‘इच्ची ना रेड यीब’ देंनीनी। मिनू रेड यीब। मत्ती १६:२-३ 55 दक्खिन रागी रे फश पवानु ‘मुलाक्ती हुप्ब’ देंनीनी। मिनू हुप्ब। 56 गे कपटीपुकी, सरीड, रागी कोवशा, मुल मार दुम्बा, दे तुइक्नीनी। मुल मार दुम्बशो बाक्मे, मेको चहिं मारदे मरुप्नीनी? 57 तेको गेय पशोमी रिश्शो दुम्बा, तेको गेय पशोमी मरिश्शो दुम्बा, मेको मिम्ने मचाप्नीनी? 58 इन कली दोस गेमेनु, दुशा बाक्कीन। मारदे हना इन कली दोस गेशा, निसाफ पाइब आ डोइती लाइक्तेक्म हना, मेकोमी इन कली लल पिया आन गुइमी जिम्मा गेशा, जेल्खानम चोक्पाइक्नीम। मत्ती ५:२५-२६ 59 नोफा दाइश्शा नेनीने, मेकोम इन कली नोले डा लेप्तोन सम्म मथाप्पाइक्थु मप्रॉइनीम” दे माइक्मी बाक्त। लेप्तोन का नेल्ल क्येडा आइक्च रोमी आन तांबा के क्येट बाक्ब।

इन थुं परमप्रभु गे लेत्तीन, दे शेंशो

13 मोपा शेंदीमीनु, आ लोव्र नेंब का निक्शीमी “साइ गालील रागी डा मुरपुकीमी मारेइ मारेइ क्योरशा जारदमेनु, पिलातसमी सिपाइ सोइश्शा, मेको जारब आन कली क्योरपाइश्शा, मेको आन जारशो हुश नु ब्वाइक्ताक्व” देंमा बाक्त। 2 मिनू येसुमी मेको आन कली “मोपा साइक्चा पुंडसीब आन कली रागी डा मुर क्येडा मरिश्शो बाक्मा बाक्त, दे मिम्नीनी? ममाइ, मेको इन खोदेशोन नम। यूहन्ना ९:२ 3 इन थुं परमप्रभु यावे गे मलेत्ताक्नी हना, गे यो मोदेशो पा बेक्नीनी। 4 सिलोआमी नेल्ल क्येडा लाइश्शो खिं ब्रेम्मेनु, १८ जना चिप्शा बेक्मा बाक्त। मोपा बेक्शोपुकी यरूसलेम सहरम बाक्ब नेल्ल आन क्येडा मरिश्शो बाक्मा बाक्त, दे मिम्नीनी? ममाइ, मेको इन खोदेशोन नम। 5 इन थुं परमप्रभु यावे गे मलेत्ताक्नी हना, गे यो मोदेशो पा बेक्नीनी” दे माइक्मी बाक्त।

6 मिनू कथा सेल्शा “मुर कामी पोवशी रवा का खूमा बाक्त। मिनू फल सित्वी ना, सिदा कों, दे कोवथ लमाक्त। मिनू कोवडानु दा, काइ मसिश्शो बाक्माक्त। मत्ती २१:१९ 7 मोपा मसिश्शो तशा, आ गेय पाइब कली ‘एको रवा फल मसिप्ब। गो बर्स बर्सम खेयप सां कोवथ जाक्डानु, काइ मसिश्शो बाक्त। एको रवामी रू ला नेक्तु। मोपतीके एको कली तिम्शा ताइक्ती’ दे मदा बाक्त। 8 आ गेय पाइबमी चहिं ‘आं होवप, मुल बाक्ल। बर्स का सम्म आ पुं मेर दोशा, मोल कुर पाइनुड। २पत्रुस ३:९, १५ 9 मिनू सित्त हना, बाक्ल। मसित्त हना, तिम्शा ताइक्चा’ देंमाक्त” दे शेंदीमी बाक्त। लूका ३:९

कूजी कली सापाइश्शो

10 काबु नाइक्तीक नाक्ती गुम्तीक खिंमी मुर आन कली शेंदीमी बाक्त। लूका ६:६-११ 11 मेकेर वोल्म तशा, १८ बर्स कूजी दुम्शो मीश का मुर बाक्माक्त। मेको गुर ब्वेशो बाक्माक्त। रिश्शो पा राज्ने मचाप्बाक्माक्त। 12 मिनू येसुमी मेको मीश मुर कली तशा “एक पिवो” दे ब्रेत्ता बाक्त। मिनू पिमेनु “आं तमी, कूजी दुम्शो रे प्रॉइतन” देंशा आ गुइ मेको तारी वोदा बाक्त। 13 मोपा वोदानु, साशा राम्माक्त। मिनू ग्येरशा परमप्रभु यावे कली ठेयब सेला बाक्त।

14 मिनू गुम्तीक खिं डा ठेयब मुरुमी नाइक्तीक नाक्ती सापाइश्शो तशा, आ थुं मनुमाक्त। मिनू आ थुं मनुथु, मेकेर बाक्ब आन कली “साता कामी ६ नाक्त गेय पचा माल्ब। काबु नाइक्चा माल्ब। मिनू नाइक्तीक नाक्ती गेय पचा मदुम्ब। मोपतीके इन रोइ सापाइक्चा कली नाइक्तीक नाक्ती गेनायो मजाक्कीन। अरु नाक्त जाक्कीन” दे हुइक्तीमी बाक्त। प्रस्थान २०:९-१० 15 मिनू प्रभुमी हुइक्ब मुर कली “ए कपटी, गे नाइक्तीक नाक्ती इन ब्यफ नु गथा आन कली प्रॉइशा, ब्वाक्कु मतुपाइक्नीनी डा? लूका १४:५ 16 एको मीश मुर अब्राहाम आ तमी बाक्ब। सैतानमी एको कली १८ बर्स सम्म रोइम गुरपाइश्शा वोइश्शो बाक्त। मिनू एको कली नाइक्तीक नाक्ती मप्रॉइचा? मसापाइक्चा?” दे हुइक्ता बाक्त। लूका १९:९ 17 मोदेशो लोव्र पवानु, आ कली मरिश्शो देंब मुर मुने दोक्माक्त। मेकेर बाक्ब मुर नेल्ल येसु आ पशो रिश्शो गेय तशा, थाम्पा ग्येरसमा बाक्त।

परमप्रभु आ राज्य आ पर्बम शेंशो  
मत्ती १३:३१-३३; मर्कूस ४:३०-३२

18 मिनू मेकोमी “परमप्रभु यावे आ राज्य दोदेशो बाक्ब देंशा हना, 19 मुर कामी आ रूमी तोरी शोक्गा बाक्त। मिनू वाशा ठेयब रवा दुम्माक्त। मेको रवाम चिक्बपुकीमी ग्योव्र सेल्मे बाक्त।

20 मिनू परमप्रभु यावे आ राज्य दोदेशो बाक्ब देंशा हना, 21 मीश मुर कामी सेआह सां फसीम बोरपाइक्ब ओख्ती सुप्ताक्व। मिनू मेको फस नेल्ल बोरत” दे शेंदीमी बाक्त। सेआह का १३ लिटर गारचा डा पुक्तीके बाक्ब। अरु ब्रेक्तीकेमी चहिं ७ लिटर पुक्तीके बाक्ब, दे ब्रेक्शो बाक्त। सेआह सां ३९ लिटर कि २१ लिटर पुक्तीके बाक्ब।

आइक्च लाप्चो आ पर्बम शेंशो

22 येसु गाउं सहर ते ते जाक्दीम्मे, मेक मेक शेंना शेंन यरूसलेम गे लमाक्त। 23 मिनू मुर कामी “शेंब हजुर, परमप्रभु यावे आ राज्य ओव्रचा ताइबपुकी का निक्शी ला बाक्नीमी?” दे हिल्लो पवा बाक्त 24 मिनू येसुमी “आइक्च लाप्चो रे ओव्रचा मालो। मेकेर रे शुश मुर ओव्रचा दाक्नीम, तन्न ओव्रने मचाप्नीम। मत्ती ७:१३-१४ 25 मारदे हना खिं डा मुरुमी लाप्चो चोक्ब। मिनू जाक्शोपुकी लाडगाम राप्शा ‘ओव्रचा गेकी, प्रभु’ दे ब्रेत्तीनी। तन्न खिं डा मुरुमी ‘इन कली मतुइक्नन्नी, ते रे जाक्शो ननी?’ देंब। मत्ती २५:११-१२ 26 मिनू गेपुकीमी ‘हजुर, गे नु काथा खमे जाइब नकी। आंइ गाउं सहर सहरमी शेंदीनीनु, गो इन लोव्र नेंतक’ देंनीनी। मत्ती ७:२२-२३ 27 तन्न मेकोमी इन कली ओव्रचा मगेथु ‘ते रे जाक्नी मतुइक्नुड। मरिश्शो पाइबपुकी आं रे पा डोन लने’ दे खेरब। 28 मोदेशो पा खेरचा पुंडसीशा, डाक्शा इन खूइ शेप्नीनी। मारदे हना इं किकी पिपी अब्राहाम, इसहाक, याकूब नु परमप्रभु यावे आ लोव्र पाइब नेल्ल आन कली परमप्रभु यावे आ राज्यम ओव्रशा, बाक्शो ताइनीनी। गे चहिं खेरचा पुंडसीनीनी। मत्ती ८:११-१२ 29 मुरपुकी पूर्ब पच्छिम उत्तर दक्खिन रे जाक्शा, परमप्रभु यावे आ राज्यम ओव्रशा भोज जशा बाक्शो ताइनीनी। लूका १४:१५ 30 नेल्ल आन क्येडा नोले दुम्शोपुकी डोइती दुम्नीम। मिनू नेल्ल आन क्येडा डोइती दुम्शोपुकी नोले दुम्नीम” दे शेंदीमी बाक्त।

हेरोदम येसु कली साइक्वा माल्शो

31 येसुमी शेंना शेंन बाक्मेनु, फरिसीपुकी जाक्शा, येसु कली "पिप हेरोदम इन कली ग्याइश्शा साइक्वा माल्शो बाक्ब। मोपतीके एक रे रीब पा लने" देंथ जाक्मा बाक्त। 32 मिनु येसुमी "लशा, मेको प्याउरे कली 'मुलाक्ती नु दीसा वोल आन कली खेरनुडमी। रोइ पशो मुर आन कली सापाइक्नुडमी। मिनु नित्थ नाक्ती आं गेय थुम्नुड। 33 मुलाक्ती, दीसा नु नित्थ नाक्ती यरूसलेम मेर गाक्नुड। मारदे हना परमप्रभु यावे आ लोव्र पाइबपुकी साइ रेन यरूसलेम सहरम ला खतम दुम्नीम' देनीन" दे सोइक्तीमी बाक्त।

यरूसलेम मिश्शा, येसु आ थुं खाइश्शो

मत्ती २३:३७-३९

34 मिनु यरूसलेम कली "ए यरूसलेम, यरूसलेम, परमप्रभु यावे आ लोव्र पाइब आन कली साइक्तीवी। इ कली शेंथ सोइश्शो आन कली फुल्लु क्रोम्ताक्वी। पोव्रथीमी आ चितोली आन कली पुशो खोदेंशो पा, गो शुश खेयप इ आल आन कली पुष्वा माल्ती, गे चहिं मबिस्से। मत्ती २३:३७-३९; लूका १९:४१-४४ 35 मुल इ खिं ब्रेश्शा मारेइ मलीब। 'प्रभु आ नेंमी जाक्ब ठेयब बाक्ब' मदेने सम्म गे आं कली मताइनेवे" देंमाक्त। येरमीया २२:५, भजन संग्रह ६९:२७; भजन संग्रह ११८:२६

नाइक्तीक नाक्ती सापाइश्शो

14 मिनु काबु नाइक्तीक नाक्ती मार दुम्माक्त देंशा हना, येसु फरिसी आ खिंमी खमे जथ लमाक्त। मिनु फरिसीपुकीम "मार पाइबा, मार शेंबा" दे योव्रकी पा बाक्मा बाक्त। लूका ६:६-११; लूका ११:३७ 2 मिनु मेकेर शुश ब्वाक्कुम ब्रीशा होम्शो रोइ पशो मुर का बाक्माक्त। 3 मिनु मेको रोइ पशो मुर येसु आ डॉइती बाक्मेनु, येसुमी सास्त्री नु फरिसी आन कली "नाइक्तीक नाक्ती सापाइक्वा दुम्बा, दे म्दुम्बा?" दे हिल्लो पामी बाक्त। 4 मेकोपुकीमी आ लोव्र मलेत्थु ब्वालेइ पा बाक्मा बाक्त। मिनु येसुमी रोइ पाइब कली थिशा, सापाइश्शा, आ खिं सोइक्ता बाक्त। 5 मिनु मेको योव्रकी पाइब आन कली "नाइक्तीक नाक्ती इन ब्यफ, इन गधा का इनारम बिक्त हना, मयुंइनीनी डा?" दे हुइक्तीमी बाक्त। लूका १३:१५; मत्ती १२:११ 6 मिनु मारेइ लोव्र लेन्ने मचाप्मे बाक्त।

लोव्र खाइक्पाइश्शो

7 मिनु मेकेर खमे जथ जाक्शो शुशेमी ठेयब लेश्शा, ठेयब मुर आन नित्तीकेमी नित्वा माल्शो तशा मत्ती २३:६ 8 "जन्ती लनीनु, सम्दी नित्तीकेमी मनिस्सीन। हितोपदेस २५:६-७ 9 मारदे हना सम्दी जाक्मेनु, खिं डा मुरुमी इन कली पोक्शा याक्पाइक्ब। मिनु सम्दी नित्तीकेमी सम्दी कली निप्पाइक्ब। इन कली चहिं वाइलपुकी नु निप्पाइक्ब। मिनु मुने दोक्नीनी। 10 जन्ती लनीनु, वाइल आन नित्तीकेम निस्सीने। मिनु खिं डा मुरुमी इन कली वाइल नु निश्शो तशा 'ए जन्तीपुकी, एक पिने' दे ब्रेश्शा, इन कली मान पा ठेयब मुर नु निप्पाइक्ब। मिनु मेकेर बाक्बपुकीमी यो इन कली मान पाइनीम। 11 मारदे हना ठेयब सुंइसीब कली मुरपुकीमी महिव्थु मान मपाइनीमी। ठेयब मसुंइसीब कली चहिं मुरपुकीमी ठेयब सेल्शा, मान पाइनीम" दे शेंदीमी बाक्त। लूका १८:१४; मत्ती २३:१२; याकूब ४:६, १०

12 मिनु खमे जथ ब्रेब कली "गे जचा तूचा सेल्शा मान पा गेवीनु, आंम मुर वारचपुकी नु शौप पाइश्शो मुर आन कली मब्रेत्तीमी। मारदे हना इ कली यो लेंशा ब्रेश्शा मान पा जचा गेशा, इ देदेड लेत्तीम। 13 भोज पवीनु, पुडग आन कली कूजी कुंजे, नु मिक्च मताइब आन कली ब्रेत्तीमी। ब्यक्था १४:२९ 14 मिनु मेकोपुकीमी इ देदेड लेन्ने मचाप्नीम। तन्न परमप्रभु यावेमी निसाफ पची ना इ पशो नेल्ले ताइनेवे" देंमाक्त। १कोरिन्थी १५:२३; प्रेरित २४:१५

ठेयब भोज

मत्ती २२:१-१०

15 मिनु मेकेर बाक्ब कामी येसु आ लोव्र नेंशा "सु परमप्रभु यावे आ राज्यम ओव्रशा, जचा खेत्वा पुंइसीबा, मेको ग्येरसेक्ल" देंमाक्त। लूका १३:२९ 16 मो देंब कली येसुमी "मुर कामी ठेयब भोज का गेचा कली, शुश मुर आन कली ब्रेत्ता बाक्त। 17 मिनु जचा तूचा सेल्शा, आ गेय पाइब का कली 'जचा तूचा ठीक पाता। मुल जथ पिने' दे ब्रेत्थ सोइक्ता बाक्त। 18 मिनु गेय पाइब लशा, खिं कामी जाक्दीश्शा 'लो जथ पिने' देंमेनु 'गो रू ग्याप्ता। मुलाक्ती कोव्रथ लड देंती। मिनु पिचा मताइनुड, देंत, देनो' देंमाक्त। 19 मिनु अर्को आ खिंमी जाक्दीम्मेनु 'गो ५ हाल ब्यफ ग्याप्ता। मिनु मुलाक्त ब्वाक्शा, कोव्रथ लाइनुड। मोपतीके गो पिचा मताइनुड, देंत, देनो' देंमाक्त। 20 मिनु अर्को खिं लमेनु, मेकोमी 'गो ग्युंवे पाता। मिनु गो पिचा मताइनुड' देंमाक्त। का का पा 'पिचा मताइनुड' दे मेको गेय पाइब कली लोव्र लेत्मे बाक्त। १कोरिन्थी ७:३३ 21 मिनु गेय पाइबमी मेको लोव्र नेल्ल आ होव्रप कली शेंदा बाक्त। मिनु मेको गाइश्शा 'मो हना गे सहर मेर हिरशा लावो। मिनु पुडग, कूजी कुंजे, मिक्च मताइब नु गुइ खोइल मदुक्ब आन कली खुप्शा चाक्मी' दे सोइक्ता बाक्त। 22 मिनु ब्रेत्थ लशा चाक्शा, आ होव्रप कली 'इन देंशो नेल्ल पाता, चिनु नित्तीकेम मुर मब्रीम' देंमाक्त। 23 मिनु होव्रपमी 'नित्तीके मब्रीम सम्म मुर आन कली "जाक्कीन है, जाक्कीन" दे ब्रेश्शा चाक्मी। मिनु आं खिं ब्रील। 24 डॉइती आं ब्रेश्शो सुइमी मारेइ यो जचा थोव्रक थाम्चा मतामेक्ल" देंमाक्त।

येसु आ नोले दोपा खोइक्वा

25 येसु गाक्मेनु, शुश मुरुमी आ नोले खोदमे बाक्त। मिनु येसुमी मेको आन कली कोव्रशा 26 "सु सु गो नु बाक्चा दाक्नीमी, मेकोपुकीमी आम आफ, आंम मीश, आंम वॉइश, तमी तौ, लोक्बपुकी नु आंम कली यो ममिम्थु, आं नोले खोइय्यीमील। मारदे हना मेको मिम्बपुकीमी आं नोले खोइक्ने मचाप्नीम। लूका १८:२९-३०; ब्यक्था ३३:९; १कोरिन्थी ७:२९ 27 सु सुमी आन श्येत कुरशा, आं कली मखोइक्नीमी, मेको आं शेंसीब दुम्ने मचाप्नीम। लूका ९:२३ 28 मार, गेपुकीमी लाइश्शो खिं सेल्वा क्येडा डॉइती, सेल्ने थुम्चा कली क्येट जाक्दीप्बा देय मजाक्दीप्बा, दे हिसाब मपाइनीनी डा? 29 हिसाब मपथु सेल्वा गोशा, खिं सेल्ने मथुम्थु क्येट नुप्त हना 30 'आ क्येट मजाक्दीत्थु, मार सेल्वा गोवा?' दे शुक्शी पाइक्वा पुंइसीशा मुने दोक्सीब। 31 पिप काम आ बाक्शो १० हजार लडाइ पाइब लाइश्शा, २० हजार लडाइ पाइब बाक्शो पिप नु लडाइ पचा थुं पाप्तु हना, मेकोमी ग्राने चाप्नुडा देय मचाप्नुडा, दे ममिम्बा डा? 32 ग्राने मचाप्नुड, दे मिम्ताक्व हना, डोन बाक्मानु 'दुशा बाक्व' दे लोव्रसी पचा कली आ मुर सोइक्ब। 33 मोदेंशो पा गे यो आं नोले खोइक्वा क्येडा डॉइती 'खोइक्ने चाप्नुडा देय मचाप्नुडा' दे मिम्तीने। गे नु बाक्शो मारेइ ममिम्थु, आं नोले खोइय्यीनी। ममिम्थु मचाप्नीनी हना, आं शेंसीब दुम्ने मचाप्नीनी। लूका ९:६२

34 हिक्सीम ब्रोव्रपाइक्ब। तन्न आ डाम्चा जाप्त हना, मारम मेको कली डाम्पाइक्वा। मत्ती ५:१३; मर्कूस ९:५० 35 मेको ना रू कली दुम्बा, ना मुर कली दुम्बा। मोपतीके मुरुम मेको कली ताइक्नीम। सु के नोफा बाक्मे, मेकोमी नेनल" दे शेंदीमी बाक्त।

"जाम्शो थिश्शा ग्येरसमल" दे शेंशो

15 मिनु शुश तिरो पोक्ब नु पापीपुकी येसु आ लोव्र नेंथ जाक्मा बाक्त। 2 मिनु फरिसी नु सास्त्रीपुकीमी तिरो पोक्ब नु पापी शुश येसु नु काथा बाक्शा जशो तशा "मेको मुरुमी पापी आन कली ब्राइब। पापीपुकी नु काथा बाक्शा, खमे जाइब" दे आन थुं मनुथु, लोव्र पामे बाक्त। लूका ५:३०; लूका १९:७ 3 मिनु येसुमी मेको आन थुं मनुथो तुइक्ता बाक्त।

## जाम्शो भेडा आ कथा

4 मिनु “मुर कामी सहे का भेडा थुल्शा, मेको आन कली योव्रडानु, भेडा का जाम्त हना, मार, मेकोमी लीशो ९९ भेडा आन कली प्रॉइशा, जाम्शो कली माल्थ मलाइबा डा? मथिदा सम्म माल्ना माल्ना गाक्ब। मत्ती १८:१२-१४; लूका १९:१०; इजीकीएल ३४:१२; यूहन्ना १०:११-१२ 5 मिनु मेको जाम्शो भेडा का कली थिश्शा, ग्येरसीशा, बलाम लाप्शा, आ खिं चाक्ब। 6 मिनु आ वारच आन कली ‘आं जाम्शो भेडा थिश्शा चाक्ता। मोपतीके नेल्ल ग्येरसय’ देंब। 7 मारदे हना ९९ परमप्रभु यावे गे लेत्वा ममाल्शो रिम्शो पाइब आन क्येडा पापी कामी पाप पचा प्रॉइशा तशा, स्वर्गम बाक्बपुकी ग्येरसीनीम” दे शेंताक्मी।

## जाम्शो क्येट आ कथा

8 मिनु “मार, मीशु मुर कामी १० ओटा द्राक्मे वोइश्शोमी का जाम्त हना, बत्ती दाशा, खिं गा, कुना लाडगा नेल्ल हिरशा, मथिदा सम्म ममाल्बा डा? द्राक्मे ग्रीक लोव्र बाक्ब। मेको देनार का खोदेंशो नाक्ता का डा गाल्च बाक्ता। देनार चहिं रोमी लोव्र बाक्ब। 9 मिनु थिश्शा आ वारच आन कली नु आ नेक्था डा मुर आन कली ब्रेश्शा ‘आं के जाम्शो द्राक्मे का माल्शा थित्ता। मुल ग्येरसाक्वी’ देंब। 10 मोपा पापी मुर कामी पाप पचा प्रॉइशा, आ थुं परमप्रभु यावे गे लेत्ताक्व हना, परमप्रभु यावे आ स्वर्ग डा गेय पाइबपुकी ग्येरसीनीम” दे माइक्मी बाक्ता।

## जाम्शो तौ आ कथा

11 मिनु लोव्र बोइश्शा “मुर का के तौ निक्शी बाक्सा बाक्ता। 12 मिनु काबु कान्छा तौमी ‘आं आफ अडस योक्शा गेयी’ देंमाक्ता। मिनु आफोमी जेठा नु कान्छा आस कली अडस योक्शा, गोम्सी बाक्ता। 13 मिनु कान्छामी इच्का नाक्ता नोले आ अडस नेल्ल खुप्शा, क्येट नेल्ल कुरशा गाक्माक्ता। मिनु जशा, तूशा, तेल्लेम पा, जवा ग्यारशा, क्येट नेल्ल थुमा बाक्ता। हितोपदेस २९:३ 14 मिनु मेको रागीमी अन्काल दुम्माक्ता। मिनु कान्छामी श्येत जवा बाक्ता। 15 मिनु मेको रागी डा मुर का आ खिंमी गेय पवा बाक्ता। मिनु मेको मुरुमी कान्छा कली पोव्र योव्रब सेला बाक्ता। 16 मिनु जचा मतथु, शोव्रलु बेक्शा, पोव्र कली जचा गेशो थोव्रकी यो जड खोदेंशो दुम्माक्ता। तन्न सुइमी मारेइ जचा मगेमे बाक्ता। हितोपदेस २३:२१ 17 मिनु शुश श्येत जशा ‘आं आफ आ खिंमी गेय पाइबपुकीमी रूथ्री जाइनीम। हेंथ्री दुम्ब। गो चहिं शोव्रलुम बेक्चता। 18 मुल गो आं आफ आ खिं लेत्नुड। मिनु आं आफ कली “गो परमप्रभु यावे आ देंशो मटिड। इन देंशो यो मटिड। भजन संग्रह ५१:६; येरमीया ३:१२-१३ 19 मुल इन तौ देंचा मशिरनुड। मोपतीके इन गेय पाइब का सेल्पीनी” दे माइक्नुड’ दे मिम्ता बाक्ता। 20 मिनु आ आफ आ खिं लेम्माक्ता। मिनु आ आफ आ खिं जाक्दीत्वावानु, आ आफोमी कान्छा कली पिशो तशा, शिशी पा दोरशा लशा मुप्शा पुक्पु पदा बाक्ता। 21 मिनु मेकोमी ‘आं आफ, गो परमप्रभु यावे आ देंशो मटिड। इन देंशो यो मटिड। मोपा मटितीके पापम गुप्ती। इन तौ देंचा मशिरनुड’ देंमाक्ता। 22 मिनु आफोमी गेय पाइब आन कली ‘नेल्ल क्येडा दारशो फेक्तीक वा गुंइशा, आं तौ कली फेक्तीने। आ गुडमी औंठी लिक्तीन। जुत्ता मुइक्पतीने। 23 मिनु दोम्शो बाछा क्योरशा, क्येशा जचा तूचा सेल्शा, नेल्ल ग्येरसय। 24 मारदे हना आं बेक्शो तौ सेस दुम्ता। आं जाम्शो तौ थित्ता’ देंमाक्ता। मिनु जशा तूशा नेल्ले ग्येरसमा बाक्ता। एफिसी २:५

25 मेकोपुकी ग्येरसीशा बाक्मानु, जेठा तौ रूमी गेय पथ लशो बाक्माक्ता। मिनु लेश्शा खिं आ नेक्था जाक्मेनु, शुश मुर खुम्सीशा सिल पा, जशा तूशा ग्येरसीशा बाक्शो तवा बाक्ता। 26 मिनु गेय पाइब का कली ‘इं खिंमी मार दुम्मे?’ दे हिल्लो पवानु, 27 मेकोमी ‘इन लोकब जाक्ता। मिनु इन आफोमी जाक्शो तशा, ग्येरसीशा, दोम्शो बाछा क्योरपाइक्तु’ देंमाक्ता। 28 मिनु मेको नेल्ल नेंशा ‘खिं मओव्रनुड’ दे चुरशा बाक्माक्ता। मत्ती २०:१५ 29 मिनु आफोमी लेम्शा ‘ओव्रडो, गे यो ग्येरसो’ देंमेनु ‘मार ग्येरसीनुडा, गो शुश बर्स एको खिं डा गेय पना पन बाक्ती। इन लोव्र नेल्ल टिशा बाक्ती। गेना हना यो

रिम्शो ला पाता। तन्न आं वारचपुकी नु बाक्शा ग्येरसीचा कली बोका का यो मगेनी। 30 इन तौ कान्छामी इं खिं डा बाक्शो नेल्ल लाइश्शा, तेल्लेम पा थुम्तु। मोदेंशो मुर लेश्शा जाक्मेनु, दोम्शो बाछा क्योरतीनी। मिनु मचुरनुडा डा?’ देंमाक्ता। 31 मिनु आफोमी ‘आं तौ, गे गो नु काथा बाक्ते। आं मार मार बाक्मा, मेको नेल्ल इ के नमी। 32 इ लोकब चहिं बेक्शा रे ब्रॉइत। जाम्शो रे थिस्साक्व। मोपतीके गो नेल्ल ग्येरसय’ देंमाक्ता” दे येसुमी शेंदीमी बाक्ता।

थुं का पा परमप्रभु कली ठेयब सेल्लीन

16 काबु येसुमी आ शेंसीब आन कली “क्येट थीब मुर कामी आ मार मार बाक्मा, मेको नेल्ल हिसाब पाइब का कली जिम्मा गेशा वोइश्शो बाक्माक्ता। मिनु काबु मुरपुकीमी ‘हजुर, इन हिसाब पाइबमी क्येट मारेइ मारेइ हेंथे पा थुम्तु’ दे शेंदमे बाक्ता। 2 मिनु क्येट थीबमी आ हिसाब पाइब कली ब्रेश्शा ‘गेमी आं क्येट थुम्शा गेयी बाक्ता। डोंइती रे डा दोशो चेमी दोशो थुमी, लो, नेल्ल कोंइदी। मुल डा मेरे इ कली मवोइक्नन’ दे मदा बाक्ता। 3 मिनु मेकोमी ‘आं गेय रोइश्शा सोइक्ताक्वी। मुल गेय मताइनुड। कोदाली दोने यो मचाप्नुड। पुंइशा जचा कली यो मुने पाइनुड। 4 मुल मार पचा माल्नुडा। गो मेको तुइक्नुड। मुर आन खिं लडानु आं कली दोपा लोव्र पाइनीमी, मेको यो तुइक्नुड’ दे मिम्ता बाक्ता। 5 मिनु मेकोमी आ होव्रप आ जेर लाइब आन कली का का पा ब्रेश्शा, डोंइती जाक्ब कली ‘गे दोशो, मार लदी?’ दे हिल्लो पवा बाक्ता। 6 मिनु मेकोमी ‘सहे का बाथ जचा तेल लाइश्शो नड’ देंमेनु ‘लो, नक कागज का सेल्स। मिनु जोल पा ५० बाथ ला ब्रेक्ताक्स’ देंमाक्ता। बाथ का २२ लिटर खोदेंशो बाक्ब। 7 मिनु अर्को कली ‘गे दोशो मार लदी’ दे हिल्लो पवानु, ‘सहे का कोर चेरब लाइश्शो नड’ देंमेनु ‘लो, नक कागज सेल्शा, जोल पा ८० कोर ब्रेक्ताक्स’ दे नक कागज का सेल्स बाक्ता। कोर का २२० लिटर बाक्ब। 8 मिनु जेर लाइक्ब नेल्ल आन के नक कागज सेल्शा, होव्रप कली कोंइदा बाक्ता। मिनु मेकोमी कोव्रशा ‘गे मेको आन कली वारच सेल्शा, निप्स पाइश्शो गेय पा कोंइताक्वी’ देंमाक्ता। रागीमी थमा सुइक्ब क्येडा थमा मसुइक्बपुकीमी निप्स पाइश्शो गेय पाइनीम। एफिसी ५:८-९ 9 मोपतीके गे यो निप्स पाइश्शो गेय पा वारचपुकी सेलीने। इन शोंप क्येट मारेइ मारेइ यो मथीब आन कली शिशी पा गेतीनी हना, परमप्रभु यावेमी इन पशो खोदेंशो पा गेब” देंमाक्ता। लूका १४:१४; मत्ती ६:२०; मत्ती १९:२१

थुं निक्शी पाइश्शो मटुमीन

10 मिनु लेंशा “सुमी थम आइक्व गेय कली रिम्शो पा पाइबा, मेकोमी ठेयब गेय यो रिम्शो पा पाइब। सुम आइक्व गेय, दे मरिम्शो पा पाइबा, मेकोमी ठेयब गेय यो मरिम्शो पा पाइब। लूका १९:१७ 11 मोपतीके गे रागी डा क्येट आ पर्वम जोल पाइब दुम्तीनी हना, स्वर्ग डा शोंप दोपा ताइब दुम्ने चाप्नीनी? 12 गे अर्को मुर आन थोव्रक आ पर्वम जोल पाइतीनी हना, आंमा इन शोंप इन कली सुम गेबा डा? 13 गेय पाइब कामी होव्रप निक्शी आस गेय पने मचाप्ब। मारदे हना का आ देंशो टिप्नु हना, अर्को कली मटीब दुम्ब। का कली दाक्ताक्व हना, अर्को कली चहिं काइ मदाक्ब। मोपतीके गे यो परमप्रभु यावे नु शोंप निक्शी आस नोले खोइक्ने मचाप्नीनी” दे येसुमी शेंदीमी बाक्ता। मत्ती ६:२४

फरिसी आन कली हुइश्शो

14 फरिसीपुकीमी क्येट नु शोंप दाक्बाक्मा बाक्ता। मिनु येसु आ लोव्र नेंशा गाइश्शा, शुक्शी पामे बाक्ता। 15 मिनु येसुमी “मुर आन कली ‘गो ठीक नकी’ देंखु पा कोंइनीनी। मिनु मुरपुकीमी इन कली ठेयब सेल्नीम। परमप्रभु यावेमी चहिं इन मिम्शो नेल्ल तुइक्ब। मुर आन दातेमी हिक्सीशो नेल्ले परमप्रभु यावे आ डोंइती थम आइक्व दुम्नीम। लूका १८:९-१४

साइ ब्रेक्शो लोव्र आ पर्वम शेंशो

16 साइ डोंइती रे परमप्रभु यावे आ अरेशो लोव्र नु आ लोव्र पाइब आन ब्रेक्शो यूहन्ना आ पाला सम्म शेंताक्मा। यूहन्ना जाक्म रे परमप्रभु यावे आ



राज्य डा लोव्र नेंपाइक्नीम। मिनु शुश मुरुमी मेको लोव्र नेंशा, थमा सुइश्शा, परमप्रभु यावे आ राज्यम ओव्रचा बोल पाइनीम। मत्ती ११:१२-१३  
17 परमप्रभु यावेमी ब्रेक्पाइश्शो लोव्र का यो मग्याम्ब। मेको ग्याम्बा क्येडा सरीड नु रागी ग्याम्ब। मत्ती ५:१८; मत्ती १९:९

18 सुमी आ मीश कली प्रॉइशा, अर्को मीश चाक्बा, मेकोमी मीश वॉइश आस नाता खोइश्शा, हेंथे पाइब। सुमी आ वॉइश नु ब्राशा गाक्शो मीश चाक्बा, मेकोमी यो वॉइश मीश आस नाता खोइश्शा, हेंथे पाइब।

शॉप पाइश्शो मुर नु लाजरस

19 शुश शॉप पाइश्शो मुर का बाक्माक्त। मेको रिश्शो रिश्शो फेक्शा, ब्रोव्रब्रोव्रशो जशा बाक्बाक्माक्त। 20 आ खिं डा लाडगाम चहिं जचा मतथु, श्येत जशो लाजरस माइश्शो मुर का गोल्शा बाक्बाक्माक्त। मेको रोइ पा आ रां नेल्ल गार गूशा राक्शो बाक्माक्त। 21 मेको शॉप पाइश्शो मुरुम आ जशो रे खपीम दोक्शो जचा ताडनुडा कों, दे आस पा कोव्रशा बाक्बाक्माक्त। आ गार कुचुमपुकीमी तुक्बाक्मा बाक्त। 22 मिनु लाजरस शुश श्येत जशा बेक्माक्त। मिनु परमप्रभु यावे आ स्वर्ग डा गेय पाइबमी अब्राहाम आ थुकुमी वोदमे बाक्त। मेको नोले शॉप पाइश्शो मुर यो बेक्शा थिम्बा पुंडसे बाक्त। 23 मेको शॉप पाइश्शो मुर बेक्शो मुर आन बाक्तीक जाक्दीम्माक्त। मिनु शुश श्येत जशा, डोन रे कोव्रडानु, लाजरस कली अब्राहाम आ थुकुम बाक्शो तवा बाक्त। 24 मिनु ठेयब सेंदा पा 'ए, आं आफ अब्राहाम, शिशी पाइय्यीनी। मारदे हना गो मीम दुष्शा, आं शोव्र सोव्रशा बेक्चता। लाजरस कली आ ब्रेप्चो ब्वाक्कु खुम्शा, ब्वाक्कु तोक्पाइक्थ सोइक्तीने' दे ब्रेम्माक्त। 25 तन्न अब्राहाममी 'डॉइती थम रिश्शो पा बाक्ते। लाजरस चहिं शुश श्येत जशा बाक्त। मुल चहिं लाजरस आ थुं नाइक्वा ताप्तु, गे चहिं श्येत जशा बाक्नेवे। लूका ६:२४ 26 मोशो ला ममाइ। परमप्रभु यावे आ राज्य डा मुर नरक मलाइनीम। मिनु नरक डा मुर यो परमप्रभु यावे आ राज्यम ओव्रचा मताइनीम' देंमाक्त। 27 मिनु मेकोमी 'आं आफ, सेउ पाइनन्नी, खिंमी आं के ५ जना लोकब बाक्नीम। 28 मेको आन कली "इन लोकब बेक्शा, नरक लशा श्येत जशा बाक्त। आ पशो खोदेंशो मपने। मो पाइतीनी हना, आ खोदेंशो दुम्नी" दे माइक्थ, लाजरस कली सोइक्तीने' दे सेउ पवा बाक्त। 29 मिनु अब्राहाममी 'परमप्रभु यावेमी मोसा कली ब्रेक्पाइश्शो लोव्र नु परमप्रभु यावे आ लोव्र पाइब आन ब्रेक्पाइश्शो लोव्र मेकोपुकी नु बाक्नीम। मेको पढेशा नेन्मेक्त्' देंमेनु, २तिमोथी ३:१६ 30 'ममाइ, आ आफ, बेक्शो रे सेंसीशो मुर सोइक्ताक्नी हना ला, मेको आ लोव्र नेंशा टिशा, पाप पचा प्रॉइशा, आन थुं परमप्रभु यावे गे लेत्नीम' दे सेउ पवा बाक्त। 31 मिनु अब्राहाममी 'ममाइ, परमप्रभु यावे आ ब्रेक्पाइश्शो लोव्र मटिम्तेक्म हना, बेक्शो रे सेंसीशो मुर तशा यो थमा मसुइक्नीम' देंमाक्त" दे येसुमी शेंदीमी बाक्त।

पाप पपाइक्ब बोक्नीम, दे शेंशो  
मत्ती १८:६-७; मत्ती १५:२१-२२; मर्कूस ९:४२

17 काबु येसुमी आ शेंसीब आन कली "मुरपुकीमी पाप पपाइश्शा दाइल पाइक्वा गोइनीम। तन्न सुइमी अरु आन कली दाइल मपपदल, मारदे हना दाइल पपाइक्ब कली शुश मरिश्शो दुम्ब। मत्ती १८:६-७ 2 मेको आ शुरमी यात क्युक्शा, समुन्द्रमी खुम्शा साइक्वा अरु सजाइ क्येडा रिश्शो दुम्ब। 3 इन कली का का पा शेंनन्नी। मिनु नेनीने। इ लोकबमी पाप पाप्तु हना, मेको कली 'मो मपचा' दे अर्ती गेवो। इ अर्ती नेंशा माफ पुंडतु हना, माफ गेवो। मत्ती १८:१५ 4 काबुम ७ खेयप पाप पशा, ७ खेयप माफ पुंडथ जाक्त हना यो, ७ खेयप माफ गेवो" दे शेंदीमी बाक्त। मत्ती १८:२१-२२

थमा सुइक्तीक बारपाइक्वा, दे पुंडशो

5 मिनु शेंसीबपुकीमी येसु कली "प्रभु, आंइ थमा सुइक्तीक थुं बारपा गेकी" दे पुन्मे बाक्त। 6 मिनु प्रभुमी "रायो गेडा खोइ ला थमा सुइक्तीनी

हना, इन पने मचाप्चा डा मारेइ मलीब। एको रवा कली 'शाक्श सुन्दा दुल्शा समुन्द्रम याक्सो' देंनीनु, एको रवा यो याक्सीब।

गेय पाइबम गाल्च ला ताइब, दे शेंशो

7 नेनीने, मिनु मिम्तीने। इन गेय पाइब कामी ब्यफ वाक्शा, कि बी योव्रशा, खिं लेश्शा जाक्मेनु, खमे ख्रेत्नीनी डा? ममाइ। 8 गेमी 'लो, मी मुइश्शा, खमे क्येशा थुल्पी। मिनु गे यो जावो' देंनीनी। 9 गेय पाइबमी अरेशो गेय पवानु, आ ठेयब मुरुमी सेवासी गेबा डा? 10 गेपुकी गेय पाइब ननी। परमप्रभु यावेम इन कली आ गेय पाइब सेल्शा, गेय पपाइक्तु। मिनु एको गेय पशा 'परमप्रभु यावे आ देंशो पाइतय। तन्न सेवासी गेने मपुंडसय। मारदे हना आ वोइश्शो मुर नय' दे मिम्तीने" दे शेंदीमी बाक्त। १कोरिन्थी ९:१६

कोव्र पाइब आन कली सापाइश्शो

11 मिनु यरूसलेम डा लां खोइश्शा, गालील नु सामरीया रागी आन दाते डा लां लमा बाक्त। लूका ९:५१; लूका १३:२२ 12 मिनु काबु गाउं का जाक्दीम्मानु, १० जना कोव्र पशो मुरपुकीमी "येसु पीब" देंशो नेंशा, लां कोव्रशा बाक्मा बाक्त। लेवी १३:४५-४६ 13 मिनु मेकोपुकीमी "येसु, शेंब, आंइ कली शिशी पाइक्की" दे सेउ पा ब्रेम्मा बाक्त। 14 मिनु येसुमी मेको आन कली तशा "गेपुकी, चढेब आ डॉइती लशा, इन साशो रां कोंइतीने" दे सोइक्तीमी बाक्त। मिनु लना लन लांमीन आन कोव्र सामा बाक्त। लूका ५:१४ 15 कामी आ रां साशो तशा, फ्रा लेश्शा परमप्रभु यावे कली ठेयब सेला बाक्त। 16 मिनु दोरशा पिशा, येसु आ डॉइती बाष्ठा खुम्की पा "प्रभु, गे आं कली रिश्शो पाइतीनी" दे सेउ पवा बाक्त। मेको सामरीया डा मुर बाक्माक्त। 17 मिनु येसुमी "१० जना आन कली सापदुमी ममाइ डा? अरु ९ जना ते लाम्मे? 18 मेको सामरीया डा मुर ला परमप्रभु यावे कली ठेयब सेल्शा "गे रिश्शो पाइब बाक्नीनी" देंथ जाक्मे?" देंमाक्त। 19 मिनु "गे रिश्शो पाइब बाक्नीनी" देंथ जाक्ब कली "इ पिया पोक्को। आं कली थमा सुइक्तीवी। मोपतीके साते" देंशा सोइक्ता बाक्त। लूका ७:५०

परमप्रभु आ राज्य आ पर्बम शेंशो  
मत्ती २४:-; मर्कूस १३:-

20 मिनु फरिसीपुकीमी येसु कली "परमप्रभु यावे आ राज्य जाक्वशो गेना तांइसीबा, दोपा तांइसीबा?" दे हिल्लो पामे बाक्त। मिनु येसुमी "परमप्रभु यावे आ राज्य मिक्चीम तचा डा पा मतपांइसीब। यूहन्ना १८:३६ 21 एक जाक्त, मेरेक जाक्त, दे मर्देनीम। नेनीन, परमप्रभु यावे आ राज्य जाक्ने थुम्शा, गेपुकी नु बाक्त" दे शेंदीमी बाक्त।

22 मिनु आ शेंसीब आन कली नोले दुम्ब लोव्र पा "दोपा मुल रागीम जरमेशो नु काथा बाक्वा तनी, मोपा नोले चिनु काथा बाक्वा दाक्नीनी। तन्न काथा बाक्वा मताइनीनी। 23 मिनु मुरपुकीमी 'परमप्रभु यावे आ सोइश्शो हुकुम पाइब एक जाक्त, मेरेक जाक्त, इरी जाक्त, उयु जाक्त, कोव्रथ लय' देंमानु, मेको थमा मसुइक्थु, मेको आन नोले मखोतीन। लूका २१:८ 24 रागीम जरमेशोमी चिन्ड कोंइशा तपांइसेनु, चिला पवानु, चिलाम नां दाप्तीक रे नां पेरतीक सम्म थिशो तांइसीशो बाक्ब। 25 मोपा तपांइसीचा क्येडा डॉइती शुश श्येत जचा माल्ब। मारदे हना एको पाला डा मुरपुकीमी आं कली मब्रथु, आं लोव्र मनेनीम, थमा मसुइक्नीम। लूका ९:२२ 26 रागीम जरमेशो जाक्मेनु, मुरपुकीमी नोआह आ पालामी पशो खोदेंशो पाइनीम। 27 नोआह ठेयब डॉंगाम मओव्रम सम्म मुरपुकी जशा तूशा, ग्युंवे पशा, ग्युंवे पांइसीशा बाक्मा बाक्त। मिनु रेउ यिशा मुर नेल्ल बेक्मा बाक्त। 28 लोत आ पालामी यो मोदेंशो दुम्माक्त। मुरपुकीमी जचा फेक्वा, ग्याप्चा लेयचा, खुम्शा मीमेनु रिक्वा नु मार मार सेल्चा मिम्तमे बाक्त। उत्पत्ती १९:१५, २४-२५ 29 काबु चहिं लोत सोदोम प्रॉइशा प्रोक्मेनु, परमप्रभु यावेमी सरीड रे मी नु बारुक तोक्पदा बाक्त। मिनु सोदोम सहरम बाक्ब नेल्ल बेक्मा बाक्त। 30 रागीम जरमेशो जाक्शा तपांइसेनु, नोआह नु लोत आस पालाम दुम्शो खोदेंशो दुम्ब। 31 में नाक्ती बारदलीम बाक्बमी खिं गाम मार मार बाक्मा, मेको ब्रदीचा ममालीन। रूमी गेय पाइब खिं मलेतीन। 32 लोत आ मीश

दोपा बेकमे, मेको मिम्तीने। उत्पत्ती १९:२६<sup>33</sup> आ गिम प्रॉइचा माल्ब के आ गिम योल्ब। आ गिम सोइक्बमी आ गिम प्रॉइब। लूका ९:२४<sup>34</sup> मिनू मुर निक्शी ब्राख्ये कामी इप्शो बाक्नीस। का लाइक्वा पुंडसीब, का प्रॉइशा वोइक्वा पुंडसीब।<sup>35</sup> मीश मुर निक्शी यात हिल्शा बाक्नीस। का लाइक्वा पुंडसीब, का प्रॉइशा वोइक्वा पुंडसीब।<sup>36</sup> वॉइश मुर निक्शी रूम गेय पा बाक्नीस। का लाइक्वा पुंडसीब, का प्रॉइशा वोइक्वा पुंडसीब, दे इन कली देंनुड" दे शेंदीमी बाक्त। मत्ती २४:४०<sup>37</sup> मिनू आ शेंसीबपुकीमी "प्रभु, इन देंशो तेकेर दुम्बा?" दे हिल्लो पामेनु "तेकेर सिनु बाक्मे, मेकेरन गिद हिरसीनीम" देंमाक्त।

पुंडचा मप्रॉइचा, दे शेंशो

18 मिनू येसुमी आ शेंसीब आन कली "परमप्रभु यावे कली पुंडचा नु 'गे रिम्शो पाइब बाक्नीनी' देंचा गेनायो मप्रॉइचा" दे रूपाइक्वा कली कथा सेला बाक्त। १थिस्सलोनिकी ५:१७<sup>2</sup> मिनू मेकोमी "सहर कामी निसाफ पाइब का बाक्माक्त। मेको सुइ नु महिब बाक्माक्त। परमप्रभु यावे कली ममिम्थु, मुर आन लोत्र यो मनैथु, आ थुमी मार पिमे में ला पाइबाक्माक्त।<sup>3</sup> मेको सहरमी आ वॉइश बेक्शो मीश मुर का बाक्माक्त। मेको मीश मुर मेको निसाफ पाइब आ बाक्तीके जाक्ना जाक्न 'आं कली दोस गेब आन कली सजाइ गेशा, आं कली ग्रापाइय्यीनी' देंबाक्माक्त।<sup>4</sup> शुश नाक्ती सम्म निसाफ पाइबमी मेको कली आ पुंडशो मगेवा बाक्त।<sup>5</sup> काबु चहिं 'परमप्रभु यावे कली मान पा महिंथु, मुर आन लोत्र यो मनैथु, आं थुमी मार पिमे में ला पा बाक्ती। तन्न मेको मीश मुरुम नाक्त कित कित जाक्शा, श्येत गेती। मुल आ लोत्र नेंचा ब्रीताक्ड, नेंने यो मदाक्ड। आ देंशो मपाता हना, जाक्स डा जाक्स पाइब। मोपतीके मेको आ देंशो मपथु मप्रॉइनुड' दे मिम्ता बाक्त। लूका ११:७-८<sup>6</sup> मेको निसाफ पाइब आ मिम्शो मिम्तीने।<sup>7</sup> मारदे हना निसाफ पाइब आ पशो खोदेंशो पा परमप्रभु यावेमी आ योवशो आन कली आन पुंडशो मगेबा डा? मेकोपुकीमी नाक्त कित कित पुंडचा मप्रॉइथु बाक्नीम। मुल मगेपु हना, काबु डा काबु गेब। मिनू ग्रापाइक्व।<sup>8</sup> रागीम जरमेशो तपांडसेनु, थमा सुइश्शा, परमप्रभु यावे कली पुंडशा 'गे रिम्शो पाइब बाक्नीनी' देंस डा देंस बाक्शोपुकी ताइबा को?" दे येसुमी देंमाक्त।

ठेयब मसुंडसीचा, दे शेंशो

9 काबु येसुमी अरु आन कली महिंथु, ठेयब सुंडसीशो आन कली लोत्र पवा बाक्त। मेकोपुकीमी "गे आंम पचा माल्शो पा ठीक दुम्तक" दे मिम्शो बाक्मा बाक्त। रोमी १०:३<sup>10</sup> मोदेंशो ठेयब सुंडसीब आन कली "मुर निक्शी परमप्रभु यावे आ खिंमी परमप्रभु यावे कली प्रार्थना पथ लसा बाक्त। का फरिसी बाक्माक्त, का तिरो पोक्ब बाक्माक्त।<sup>11</sup> फरिसीमी मुर नेल्ल आन कली तपांडसीशा, चढेतीक आ नेक्था राप्शा 'परमप्रभु यावे, गे रिम्शो पाइब बाक्नीनी। मारदे हना गो अरु मुर खोदेंशो पा मुर आन मार मार रोइक्ब मनड। गो जोल पाइब यो मनड। मीश वॉइश आस नाता खोइक्ब मनड। मेरे तिरो पोक्ब खोदेंशो पापी मनड। यसैया ५८:२-३<sup>12</sup> साता कामी खेयप निक्शी माइजा बाक्नुड। क्येट ताक्गुनु, १० भाग डा भाग का योक्शा गेनुड' दे प्रार्थना पवा बाक्त। मत्ती २३:२३<sup>13</sup> तिरो पोक्ब चहिं हारे बाक्शा, शुर खुक्शा 'परमप्रभु यावे, गो पापी नड। शिशी पाइयीनी' दे प्रार्थना पवा बाक्त। भजन संग्रह ५१:१३, १९<sup>14</sup> परमप्रभु यावेमी मेको कली आ पाप क्याम्शा, ठीक दुम्पाइक्नु। मिनू ठीक दुम्शा, आ खिं लेत्त। फरिसी चहिं पाप क्याम्चा मतव। मारदे हना सुमी ठेयब सुंडसीबा, मेको महिक्शो दुम्ब। ठेयब मसुंडसीब कली चहिं परमप्रभु यावेमी ठेयब सेल्ब" दे येसुमी माइक्मी बाक्त। मत्ती २१:३१; लूका १४:११; मत्ती २३:१२

आल आन कली आसीक गेशो

15 मिनू मुरपुकीमी येसुमी आल आन कली थिवल, दे चाक्मेनु, शेंसीबपुकीमी आल चाक्ब आन कली हुइक्तमे बाक्त।<sup>16</sup> तन्न येसुमी मेको आन कली ब्रेश्शा "आल आन कली आं बाक्तीके चाक्वा मतेक्कीन। मारदे

हना परमप्रभु यावे आ राज्य आल आन केन बाक्ब।<sup>17</sup> नोफा दाइश्शा नेनीने, मुरपुकीमी आल आन थुं डा मिम्शो खोदेंशो पा ममिम्ताक्म हना, परमप्रभु यावे आ राज्यम ओत्रचा मताइनीम" दे माइक्मी बाक्त।

शोप आ पर्वम लोत्र

मत्ती १९:१६-२६; मर्कूस १०:१७-२७

18 मिनू ठेयब मुर कामी येसु कली "गे रिम्शो शेंब बाक्नीनी। गेना हना यो ब्रॉइशा बाक्वा कली मार पचा माल्नुडा?" दे हिल्लो पवानु, लूका १०:२५-२८<sup>19</sup> येसुमी "मारदे आं कली रिम्शो मुर, दे माइय्यीनी? सुइ रिम्शो मनमी। परमप्रभु यावे ला रिम्शो बाक्ब।<sup>20</sup> परमप्रभु यावेम ब्रेक्पाइश्शो लोत्र तुइक्नीनी 'वॉइश मीश आस नाता मखोइक्वा, मसाइक्वा, खुइ मपचा, सांकछी बाक्शोनु जोल मपचा, आम आफ आस कली मान पचा' " दे मदा बाक्त। प्रस्थान २०:१२-१६<sup>21</sup> मिनू मेकोमी "आल रेन मोदेंशो पा पिशो नड" देंमाक्त।<sup>22</sup> मिनू येसुमी "नेल्ल पाप्तीवी, का चहिं मपवी। इ शोप नेल्ल लेयशा, क्येट मथीब आन कली योक्शा गेमी। मिनू आं नोले खोइय्यी। मिनू इ शोप स्वर्गम बाक्ब" देंमाक्त। मत्ती ६:२०<sup>23</sup> मिनू येसु आ लोत्र नेंशा, आ थुं खाइक्माक्त। मारदे हना मेको शुश शोप पाइश्शो मुर बाक्माक्त।<sup>24</sup> येसुमी मेको आ थुं खाइश्शो तुइश्शा, मिक्च मयाक्थु कोत्रशा "शुश शोप पाइश्शो मुर परमप्रभु यावे आ राज्य ओत्रचा गिश श्येत बाक्मे। लूका १९:९<sup>25</sup> शोप पाइश्शो मुर परमप्रभु यावे आ राज्य ओत्रने चाप्चा क्येडा दालओठ लूजे आ पोलाम ग्रीने चाप्ब" देंमाक्त।<sup>26</sup> येसु आ लोत्र नेंबपुकीमी "मो हना सु ओत्रचा ताइबा डा?" देंमा बाक्त।<sup>27</sup> मिनू येसुमी "मुर आन पने मचाप्शो परमप्रभु यावेमी पने चाप्ब" दे माइक्मी बाक्त।

नेल्ल प्रॉइबम मार ताइनीमी

मत्ती १९:२७-३०; मर्कूस १०:३२-३१

28 मिनू पत्रुसमी "गोपुकी आंइ खिं प्रॉइशा, इन नोले खोइक्तक" देंमाक्त।<sup>29</sup> मिनू येसुमी "नोफा दाइश्शा नेनीने, सुमी आ खिं, आ मीश, आ वॉइश, आ लोकबपुकी, आम आफ, तमी तौ नु मारेइ मारेइ नेल्ल परमप्रभु यावे आ राज्य आ पर्वम प्रॉइबा, मेकोमी मुल एको रागीम बाक्मेनुन आ प्रॉइशो क्येडा शुश ताइब।<sup>30</sup> मोशो ला ममाइ, नोले गेना हना यो परमप्रभु यावे नु बाक्वा ताइब" देंमाक्त।

रागीम जरमेशोम साइक्वा पुंडसीब

मत्ती २०:१७-१९; मर्कूस १०:३२-३४

31 मिनू येसुमी आ १२ जना शेंसीब आन कली "नेनीने, मुल यरूसलेम लाइनय। मेकेर जाक्दीश्शो नोले रागीम जरमेशो आ पर्वम साइ परमप्रभु यावे आ लोत्र पाइबपुकीम ब्रेक्शो लोत्र नेल्ल थमा दुम्ब।<sup>32</sup> रागीम जरमेशो अर्को जात डा मुर आन गुइमी गेचा पुंडसीब। मिनू मेकोपुकीमी शुक्शी पा, मेको आ कुलुम तोक्नीम।<sup>33</sup> मिनू युक्शा, हुश यिपाइक्नीम। मिनू नोले साइक्नीम। साइश्शो आ नित्थ नाक्त बेक्शो रे सेंसीब" दे शेंदीमी बाक्त।<sup>34</sup> आ लोत्र नेंशा, मारेइ मरुप्मे बाक्त। मारदे हना खुइश्शो लोत्र बाक्माक्त।

मिक्च मताइब कली सापाइश्शो

मत्ती २०:२९-३४; मर्कूस १०:४६-५२

35 मिनू यरीको सहर आ नेक्था जाक्दीम्मानु, लांमी मिक्च मताइब पुंडब मुर का बाक्माक्त।<sup>36</sup> मेको मिक्च मताइबमी शुश मुर लोत्रसी पा पिशो नेंशा "सु ननी? ते लनी? मार माल्नी?" दे हिल्लो पवानु<sup>37</sup> "नासरथ डा येसु एको लां पित" देंमा बाक्त।<sup>38</sup> मिनू मिक्च मताइबमी "हे येसु, दाऊद आ तौ, शिशी पाइय्यी" दे ब्रेम्माक्त।<sup>39</sup> मिनू येसु आ डॉइती गाक्बपुकीमी "सिक्सी पावो" दे हुइक्तमे बाक्त। आं चहिं वाइ ब्रेश्शा "दाऊद आ तौ, शिशी पाइय्यी" देंमाक्त।<sup>40</sup> मिनू येसु खा दिक्शा "मेरे मिक्च मताइब कली एक चाक्कीन" देंमाक्त। मिनू चाक्मेनु<sup>41</sup> "इ कली मार पड? मार पुंडनेवे?" दे हिल्लो पवानु "प्रभु, मिक्च ताइब सेल्यीनी" दे पुना बाक्त।<sup>42</sup> मिनू "इ मिक्च साल। इ थमा सुइश्शोमी साते" दे मदा बाक्त।<sup>43</sup> मो

मदानु, आ मिक्च ब्रा साशा, मिक्च ताइब दुश्शा, येसु आ नोले खोइश्शा, परमप्रभु यावे कली मान पवा बाक्त। मेको कली मिक्च ताइब दुश्शा तशा, मुर नेल्लेमी यो परमप्रभु यावे कली ठेयब सेल्मे बाक्त।

तिरो पोक्ब जक्कै

19 मिनु यरीको सहरम जाक्दीश्शा, बास मबाक्चा, दे गाक्मा बाक्त।  
2 मेको सहरमी जक्कै नें पाइश्शा शुश शॉप पाइश्शा तिरो पोक्ब ठेयब मुर का बाक्माक्त। 3 मेकोमी “इं सहरम येसु जाक्ब” देंशो नेंशा “गो कोव्रथ लाइनुड” दे मिम्ता बाक्त। सहर डा मुरपुकी यो “येसु कली कोव्रचा” दे लांमी रिम्शा, आ लां कोव्रशा बाक्मा बाक्त। 4 जक्कै अरु आन क्येडा आइक्च बाक्माक्त। मिनु शुश मुरुमी लांमी रिम्शा फारशो तशा, मेको आन डोंइती लशा, रवा का डोइश्शा कोव्रडा बाक्त। 5 मिनु येसु मेको लां पिमेनु, जक्कै कली रवाम डोइश्शा बाक्शो तशा “ए जक्कै, फ्रु तोंइसो। मारदे हना मुलाक्दो इ खिंमी बास बाक्नुड” देंमाक्त। 6 मिनु जक्कै फ्रु तोंइसीशा, ग्येरसीशा आ खिं लाइश्शा, बास बाक्चा गेवा बाक्त। 7 मेकोमी मोदेंशो पशो तशा, मेकेर बाक्बपुकीमी “मेको पापी आ खिंम ओव्रशा बास बाक्त” दे आन थुं मनुथु, लोव्र पामे बाक्त। लूका १५:२ 8 मिनु जक्कैमी प्रभु कली खिंम ओइशा “हे प्रभु, आं शॉप क्येट नेल्ल उइक्थ पा योक्शा, मथीब आन कली गेनुडमी। सु सु कली हिम हिम पा मार मार ताक्नु, मेको आन कली ४ खेयप तेम्शा लेश्शा गेनुडमी” देंमाक्त। प्रस्थान २१:३७; इजीकीएल ३३:१४-१६ 9 मिनु येसुमी “थमा पा इ खिंमी बास बाक्शो रिम्शो दुम्ता। मारदे हना गे पाप रे ब्रोंइते। इं किकी पिपी अब्राहाम आ तौ बाक्डे बाक्त। लूका १३:१६ 10 रागीम जरमेशो लां साम्शो आन कली लां कोंइथ जाक्त” देंमाक्त। लूका ५:३२; इजीकीएल ३४:१६; १तिमोथी १:१५

ठेयब मुर लेश्शा जाक्ब, दे शेंशो

मत्ती २५:१४-३०

11 मिनु यरूसलेम आ नेक्था जाक्दीम्मा बाक्त। मिनु शुश मुरुमी “यरूसलेम जाक्दीश्शा नोले येसु पिप दुम्ब। मिनु परमप्रभु यावे आ राज्य पशो तांइसीब” दे मिम्शो बाक्मा बाक्त। येसुमी मेको आन मिम्शो तुइश्शा कथा सेल्था 12 “खेयप का ठेयब मुर का पिप रे सासन पतीक ताक्चा कली डोन रागी लचा चिक्शो बाक्माक्त। 13 मिनु मेकोमी ‘गो शुश नाक्ती खिंम मबाक्नुड’ दे तुइश्शा, लचा डोंइती आ गेय पाइब १० जना मुर आन कली ब्रेश्शा, का का पा मीना का का गेशा ‘एको क्येटम खेलो पने। नोले जाक्डानु, लेश्शा गेयीनी’ दे गाक्माक्त। मीना का १०० देनार बाक्ब। देनार का नाक्त का डा गाल्च बाक्माक्त। देनार रोमी आन चांदी के क्येट बाक्माक्त। मत्ती २०:२ 14 मेको मुर गाक्म नोले मेको रागी डा मुरपुकीमी ‘मेको मुर आंइ कली सासन पाइब मदुम्ल’ दे लोव्र कुरब मुर मेको पिप आ बाक्तीक सोइक्तमे बाक्त। मारदे हना मेको कली मदाक्बाक्मा बाक्त। यूहन्ना १:११ 15 मो हना यो मेकोमी सासन पतीक अधिकार ताक्शा, खिं लेम्माक्त। मिनु जाक्शा, आ गेय पाइब आन कली ब्रेश्शा, आ डोंइती राप्पाइश्शा ‘आं गेशो क्येटमी मार पनी? गिश सेल्नी?’ दे हिल्लो पवा बाक्त। 16 मिनु डोंइती डा जाक्शा ‘आं होव्रप, इन गेशो क्येटमी, मार मार ग्याप्शा लेयशा, अर्को १० मीना चेम्ता’ देंमाक्त। 17 ‘गे रिम्शो गेय पाइब बाक्ते, आइक्च गेयमी रिम्शो पाप्तीवी। मोपतीके १० ओटा सहर कली अधिकार पाइब सेल्नन’ देंमाक्त। लूका १६:१० 18 मिनु मेको नोले अर्को जाक्शा ‘आं होव्रप, इन गेशो क्येटमी ग्याप्शा लेयशा, अर्को ५ मीना चेम्ता’ देंमाक्त। 19 मिनु मेकोमी ‘इ कली यो ५ ओटा सहर कली अधिकार पाइब सेल्नन’ देंमाक्त। 20 मिनु मेको आ नोले अर्को जाक्शा ‘आं होव्रप, इन क्येट एकेर बाक्त। गो मेको वाम गिल्शा ख्रुइश्शा वोइक्ता। 21 गो इन क्येडा हिंती। मारदे हना गे हिंचा डा होव्रप बाक्नीनी। इन मगेशो थोव्रक ताक्नीनी। इन मशोक्शो खुप्नीनी’ देंमाक्त। 22 मिनु ठेयब मुरुमी ‘गो इ लोव्रम इ कली निसाफ पाइनुड। आं देंशो मटीब गेय पाइब बाक्नेवे। मार मगोडा, मेको ताक्नुड। मार मशोक्नु, मेको खुप्नुड। गो मरिम्शो मुर नडा दे गे तुइश्शोन नवे? 23 गे मारदे मेको क्येट वोइक्तीक खिंमी मवोदी? गो मेको आ चाइक्ब

तड वा’ देंमाक्त। 24 मिनु मेकेर बाक्ब आन कली ‘मेको आ क्येट रोइश्शा १० मीना चेम्ब कली गेने’ देंमाक्त। 25 मिनु मुरपुकीमी ‘हजुर, मेको नु १० मीना सुन बाक्ब’ देंमा बाक्त। 26 मिनु मेकोमी ‘सु नु बाक्मे, मेको तेम्शा गेचा पुंइसीब। सु नु मबाक्मे, मेको के बाक्शो यो रोइक्चा पुंइसीब। लूका ८:१८; मत्ती १३:१२ 27 तन्न आं कली मटीब आं जोरी सनु आन कली चहिं ग्याइश्शा चाक्शा आं डोंइती क्योरशा सतीन’ देंमाक्त” दे शेंदीमी बाक्त।

येसु यरूसलेम जाक्दीश्शा

मत्ती २१:१-११; मर्कूस ११:१-१०; यूहन्ना १२:१२-१६

28 मिनु मेको लोव्र नेल्ल शेंने थुम्शा, यरूसलेम मेर लमा बाक्त। 29 मिनु जैतून डांडा जाक्दीम्मा बाक्त। मेको डांडा आ आइदी बेथफागे नु बेथानी गाउं निक्शी बाक्सा बाक्त। 30 मेको गाउं आ नेक्था जाक्दीश्शा, येसुमी आ शेंसीब निक्शी आस कली “मेरे गाउं लसे। मिनु गाउं ओव्रसीनु, सुइमी मडोइश्शा गधा आ चाइक्ब का पाइश्शा थिल्लीसी। मेको कली प्रोंइशा चाक्कीसे। 31 मुरपुकीमी ‘मारदे प्रोंइशा लाइक्सी?’ दे हिल्लो पाम्तेक्म हना ‘प्रभु कली माल्ताक्व’ दे मतीसे” दे माइश्शा, सोइक्तीम्सी बाक्त। 32 मिनु लसानु, येसुमी देंशो खोदेंशो पा गधा पाइश्शा वोइश्शा थित्से बाक्त। 33 मिनु प्रोन्सेनु, गधा आ होव्रपमी “गधा मारदे प्रोंइसी?” दे हिल्लो पवा बाक्त। 34 मिनु मेको निक्शीमी “प्रभु कली माल्ताक्व” देंसा बाक्त। 35 मिनु लाइश्शा येसु आ बाक्तीकेम चाक्दीत्से बाक्त। मिनु येसु आ शेंसीबपुकीमी गधा तारी आन वा ब्रशा, येसु कली डोइक्पदमे बाक्त।

36 मिनु गाक्मा बाक्त। मिनु मुरपुकीमी आन फेक्शो वा लांमी ब्रामे बाक्त। 37 मेको जैतून डांडा लाक्शा ब्रुम्मा बाक्त। येसुमी शुश छक लाक्चा डा गेय पतीके मुर नेल्ल थाम्पा ग्येरशा, कुम्सो पा परमप्रभु यावे कली ठेयब सेल्ना सेल्न, 38 “परमप्रभु यावे आ नेंमी जाक्ब पिप ठेयब बाक्ब। सरीडम यो ग्येरसमल। इर डा नेल्ल रिम्शो दुम्ल” दे रेयके पामे बाक्त। भजन संग्रह ११८:२६; लूका २:१४ 39 मेकेर फरिसी का निक्शी यो बाक्मा बाक्त। मेकोपुकीमी येसु कली “इन शेंसीब आन कली हुइक्तीन” देंमा बाक्त। 40 तन्न येसुमी “एकोपुकीमी सिक्सी पाम्तेक्म हना, फुल्लुमी यो रेयके पचा गोइनीम” देंमाक्त।

41 मिनु यरूसलेम सहर आ नेक्था जाक्शा, सहर तांइसेनु, येसु मेको सहर आ परबम डाक्शा 42 “थुं नाइक्तीक ते रे जाक्बा, दे तुइक्ती हना दुम वा। तन्न मुल मेको इ डोंइती रे ख्रुइश्शा बाक्ब। लूका १३:३४; मत्ती १३:१३, १४ 43 नोले इ जोरी सनु बोक्शा, इ कली एर ओथ रे पुम्शा, तेइ लचा मगेशु, गारो डोइक्नीम। 44 मेकोपुकीमी इ कली नु इ आल आन कली खपीम राप्तीम। मेकेर फुल्लु का सम्म खोप्शा मलीनीम। मारदे हना गे इ कली युम्थ जाक्ब कली मतुइक्ती” देंमाक्त। लूका २१:६

यरूसलेम सहरम बाक्शा, शेंशो

मत्ती २१:१२-१६; मर्कूस ११:१५-१८; यूहन्ना २:१३-१६

45 मिनु येसु सहरम जाक्दीश्शा, परमप्रभु यावे आ खिं लमाक्त। मिनु मार मार लेयब आन कली खेरा बाक्त। 46 मिनु येसुमी मेको आन कली “परमप्रभु यावे आ लोव्रमी ‘आं खिं आं कली प्रार्थना पचा कली बाक्ब’ दे ब्रेक्शो बाक्ब। तन्न गेपुकीमी चहिं ख्रुइ आन बाक्तीक पुक्खी सेल्तीनी” दे हुइश्शा खेरमी बाक्त। यसैया ५६:७; येरमीया ७:११ 47 मिनु येसुमी परमप्रभु यावे आ खिंमी बाक्शा, नाक्त किंत किंत मुर आन कली शेंदीमी बाक्त। ठेयब चढेब, सास्त्री नु ठेयब मुरपुकीमी येसु कली साइक्चा माल्मे बाक्त। 48 तन्न मेकोपुकीमी येसु कली मारेइ दोस गेने मचाप्मे बाक्त। मारदे हना मुर नेल्लेमी येसु आ शेंशो थाम्पा नोफा दाइश्शा नेंन्मे बाक्त।

“इ कली सुम अधिकार गेवे?”

मत्ती २१:२३-२७; मर्कूस ११:२७-३३

20 मिनु काबु येसुमी परमप्रभु यावे आ खिंमी बाक्शा, मुर आन कली ग्येरपाइक्तीक लोव्र शेंना शेंन बाक्मेनु, 2 ठेयब चढेब, सास्त्री नु जोक्ब तुइक्ब खाल्पापुकीमी “तेको अधिकारमी मोदेंशो पवी? इ कली

अधिकार गेब सु बाक्बा, लो देन" देंमा बाक्त। 3 मिनू येसुमी "गो इन कली लोव्र का हिल्लो पाइनुड। मिनू आं हिल्लो पशो लोव्र लेत्तीने। 4 यूहन्नामी मुर आन कली ब्वाक्कुम खूम्शा गुंडतीक अधिकार स्वर्ग रे तवा देय मुरपुकी रे तवा?" दे हिल्लो पामी बाक्त। 5 मिनू मेकोपुकीमी "स्वर्ग रे तवा बाक्त देंतय हना, मो हना यूहन्ना आ लोव्र मारदे थमा मसुइक्नी? देंब। लूका ७:२९-३० 6 मुरपुकी रे तवा बाक्त देंतय हना, एकेर बाक्बपुकीमी इं कली फुल्लु आष्ठा साइक्नीम। मारदे हना यूहन्ना परमप्रभु यावे आ लोव्र पाइब बाक्त, दे थमा सुइक्ब बाक्नीम" दे शुश मिम्शा लोव्रसी पामे बाक्त। 7 मिनू शुश मिम्शा "यूहन्ना कली अधिकार सुमी गेवा सुम? गो मतुइक्नीकी" देंमा बाक्त। 8 मिनू येसुमी "मो हना तेको अधिकारमी एको गेय पडा, गो यो मर्शेन्नी" दे माइक्नी बाक्त।

मरिम्शो बुम्था पाइबपुकी  
मत्ती २१:३३-४६; मर्कूस १२:१-१२

9 मिनू मुर आन कली कथा सेल्शा "मुर कामी ठेयब रूमी अडगुर खूमा बाक्त। मिनू नोले 'गो रागी हिरथ लाइनुड' दे मिम्शा, आ रू बुम्था पाइब आन कली गेशा वोदा बाक्त। मिनू लशा, शुश नाक्त मलेम्माक्त। 10 अडगुर मीशा सेक्वी जाक्मेनु, होव्रपमी आ गेय पाइब का कली 'अडगुर योक्शा चाक्को' दे ब्रथ सोइक्ता बाक्त। मिनू गेय पाइब जाक्दीम्मेनु, बुम्था पाइबपुकीमी तुष्ठा, श्येत्थ सोइक्तमे बाक्त। २इतिहास ३६:१५-१६ 11 मिनू लेंशा अर्को गेय पाइब का कली सोइक्ता बाक्त। मेको कली तुष्ठा मुने तोक्शा, श्येत्थ सोइक्तमे बाक्त। 12 मोपा यो लेंशा गेय पाइब का कली सोइक्ता बाक्त। मेको कली यो हुश यिथ्री तुष्ठा खेरमे बाक्त। 13 मिनू नोले 'मार पड? मुल आं दाक्शो तौ कली सोइक्नुड। मेको कली तशा मान पाइनीमी को?' दे मिम्ता बाक्त। मिनू आ तौ कली सोइक्ता बाक्त। 14 मिनू बुम्था पाइबपुकीमी आ तौ कली पिशो तशा 'एको हक ताइब बाक्ब। लो, साइय्य। मिनू रू, अडगुर नेल्ल इं केन दुम्ब' देंशा गारमा बाक्त। 15 मिनू रू रे गुंडशा सदमे बाक्त। रू आ होव्रपमी मोदेशो पाइब आन कली मार पाइबा? 16 जाक्शा मेको बुम्था पाइब आन कली साइक्ब। मिनू आ रू अरु आन कली गेब" दे शेंदीमी बाक्त। आ लोव्र नेंबपुकीमी मेको कथा नेंशा "मोदेशो मदुम्ल" देंमा बाक्त। 17 मिनू येसुमी आ लोव्र नेंब आन कली मिक्च मयाक्थु कोव्रशा "परमप्रभु यावेमी ब्रेक्पाइश्शो एको लोव्र रे मार रूम्सीबा, लो देनीन 'खिं सेल्बपुकीमी गारो प्रोवडमेनु, एको फुल्लु मगार' दे ताइक्तमे बाक्त। मेको मगारथु ताइश्शो फुल्लु चहिं सुर डा सुरे फुल्लु दुम्माक्त। भजन संग्रह ११८:२२ 18 सु मेको फुल्लु तारी थिष्वा, मेको खतम दुम्ब। मेको फुल्लुम सु कली चिप्ता, मेको फस दुम्ब" दे शेंदीमी बाक्त। दानीएल २:३४, ३५, ४४, ४५ 19 मिनू ठेयब चढेब नु सास्त्रीपुकीमी "इं कली कका एको कथा देंमाक्त" दे रुष्ठा चुरशा, येसु कली ग्याइक्पाइक्वा माल्मे बाक्त। तन्न शुश मुरुमी आ लोव्र नेंशा तशा हिंमा बाक्त। लूका १९:४८

तिरो आ पर्बम लोव्र पशो  
मत्ती २२:१५-२२; मर्कूस १२:१३-१७

20 सास्त्री नु ठेयब चढेबपुकीमी मुर योव्रशा, येसु आ थुं नाक्शा, आ लोव्र खुड पथ सोइक्तमे बाक्त। मारदे हना दोस गेशा हुकुम पाइब आ गुडमी गेचा माल्शो बाक्मा बाक्त। मेको सोइश्शोपुकीमी येसु आ लोव्र नेंशा, थमा सुइश्शो खोदेशो पखु पामे बाक्त। लूका ११:५४; लूका २३:२ 21 मिनू मिलो शिलो पा "शेंब, गे रिम्शो शेंनीनी। सुइ कली तशा महिंथु, मुर आन कुल मकोव्रथु, परमप्रभु यावे आ लोव्र थमा पा शेंनीनी। मुल लोव्र का शेंदीकी, 22 मार लोव्र देंशा हना, पिप सिजर कली तिरो थाप्चा माल्बा देय मथाप्यु यो दुम्बा?" दे हिल्लो पखु पा, लोव्र खाइक्पाइक्वा माल्मे बाक्त। 23 मिनू येसुमी मेको आन थुं डा लोव्र तुइश्शा 24 "देनार का कौडदीनी। एको सु का आ नेंमी खोइश्शो बाक्मे?" देंमेनु "सिजर आ नेंमी खोइश्शो बाक्त, हजुर" देंमा बाक्त। देनार का चांदी के क्येट बाक्त। मेको नाक्त का डा गाल्च बाक्त। 25 मिनू प्रभु येसुमी "मो हना पिप सिजर आ मार मार बाक्मे, मेको सिजर कली गेने। परमप्रभु यावे आ मार मार बाक्मे, मेको परमप्रभु यावे कली गेने" देंमाक्त। रोमी १३:१, ७ 26 मिनू मेकेर देल्शो मुर आन डौइती आ

लोव्र खाइक्पाइश्शा मारेइ दोस गेने मचाप्मे बाक्त। आ लोव्र लेशो नेंशा छक लाक्शा सिक्सी पामे बाक्त।

बेक्शो रे सेंसीचा आ पर्बम शेंशो  
मत्ती २२:२३-३३, ४६; मर्कूस १२:१८-२७, ३४

27 मिनू सदुकीपुकी जाक्मा बाक्त। सदुकीपुकीमी "मुर बेक्शो रे मर्सेसीनीम" दे शेंबाक्मा बाक्त। 28 मेको जाक्बपुकीमी येसु कली "शेंब, मोसामी ब्रेक्शो लोव्रमी 'मुर का आल मथिथु बेक्त्त हना, आ लोक्बमी आ भोग्यु वॉइसीशा, आ दाग्यु आ पा डा खिं डा मुर मजाम्मल, दे तमी तौ थिल' दे ब्रेक्शो बाक्ब। ब्यवस्था २५:५-६ 29 साइ ७ जना लोक्ब बाक्मा बाक्त। मिनू जेठाम ग्युंवे पवा बाक्त। मिनू आल मथिथु बेक्माक्त। 30 मिनू माइलामी आ भोग्यु वॉइसे बाक्त। मिनू मेको यो आल मथिथु बेक्माक्त। 31 मिनू साइलाम आ भोग्यु वॉइसे बाक्त। मेको यो आल मथिथु बेक्माक्त। मोदेशो पा ६ जनामी आन भोग्यु वॉइसीशा, आल मथिथु बेक्मा बाक्त। 32 नोले मेको मीश मुर यो बेक्माक्त। 33 मुर बेक्शो रे सेंसीशा ब्रॉइमानु, मेको ७ जना वॉइश आन मीश दुम्शो मीश मुर तेको आ मीश दुम्बा?" दे हिल्लो पामे बाक्त। 34 मिनू येसुमी मेको आन कली "एको रागीमी बाक्मानु, मुरपुकीमी ग्युंवे पाइसीनीम। ग्युंवे पा गेनीम। 35 तन्न बेक्शो रे सेंसीशा परमप्रभु यावे नु बाक्वा शिरशोपुकी ग्युंवे मपाइसीनीम, ग्युंवे पा यो मगेनीम। 36 मेकोपुकी गेनायो मबेक्ब दुम्शो बाक्नीम। बेक्शो रे सेंसीशा, परमप्रभु यावे आ स्वर्ग डा गेय पाइबपुकी खोदेशो दुम्नीम। मेकोपुकी परमप्रभु यावे आ तमी तौ बाक्नीम। १यूहन्ना ३:१-२ 37 बेक्शो रे सेंसीशा ब्रॉइचा तांइसीब, दे इं किकी पिपी मोसामी अरु आन कली तुइक्पदा बाक्त। दोपा तुइक्पदा बाक्त देंशा हना, परमप्रभुमी मोसा कली मी ब्रशो बुटा रे तपाइसेनु, मोसामी परमप्रभु यावे कली 'गे अब्राहाम, इसहाक नु याक्ब आ परमप्रभु यावे ननी' दे ब्रेत्ता बाक्त। प्रस्थान ३:६ 38 परमप्रभु यावे बेक्शो मुर आन परमप्रभु ममाइ। ब्रॉइशो आन परमप्रभु यावे बाक्ब। मारदे हना परमप्रभु यावे आ डौइती नेल्ल ब्रॉइशो बाक्नीम" देंमाक्त। रोमी १४:८ 39 मिनू सास्त्री का निक्शीमी "शेंब, गे रिम्शो शेंताक्नी" देंमा बाक्त। 40 मारदे हना सदुकीपुकीमी लेंशा हिल्लो पचा हिंशा सिक्सी पामे बाक्त।

ख्रीस्त सुका आ तौ बाक्बा?  
मत्ती २२:४१-४४; मर्कूस १२:३५-३७

41 मिनू येसुमी मेकेर बाक्ब आन कली "ख्रीस्त दाऊद आ तौ बाक्ब, दे दोपा देंनीमी? 42 मारदे हना दाऊद आ ब्रेक्शो भजन संग्रह माइश्शो कुम्सो किताबम 43 'प्रभुमी आ प्रभु कली इ जोरी सत्रु आन कली इ खोइल थेक्तीके मसेलु सम्म आं ग्युरा गे बाक्को' दे ब्रेक्ताक्व। भजन संग्रह ११०:१ 44 दाऊदमी मेको कली 'प्रभु' देंब। मिनू दोपा आ तौ दुम्मे? लो, देनीन" देंमाक्त।

"सास्त्री खोदेशो मपने" दे शेंशो  
मत्ती २३:५-५

45 मेकेर बाक्ब शुश मुरुमी येसु आ लोव्र नेन्मे बाक्त। मिनू येसुमी आ शेंसीब आन कली 46 "लाइश्शो वा फेक्शा एर ऑथ गाक्ब, बजार मेर गाक्मानु, सेउ ताक्वा दाक्ब, गुम्तीक खिं लशा, ठेयब निक्तीकेम नित्वा दाक्ब नु भोजमी लशा, मान ताइब आन निक्तीकेम नित्वा माल्ब, सास्त्री आन कली तशा होस पा बाक्कीन। लूका ११:४३ 47 मेकोपुकीमी वॉइश बेक्शो मीश मुर आन खिं रोइक्नीमी, दुइश्शो प्रार्थना पा कौइखु पाइनीम। मोदेशो पाइबपुकी अरु आन क्येडा शुश सजाइ ताइनीम" देंमाक्त।

भेटी चढेचा आ पर्बम शेंशो  
मर्कूस १२:४१-४४

21 मिनू नोले येसुमी शॉप पाइश्शो मुरपुकीमी भेटी चढेचो तवा बाक्त। 2 आ वॉइश बेक्शो मारेइ मथीब पुडग मीश मुरुमी जाक्शा, लेप्तोन निक्शी चढेचो यो तवा बाक्त। लेप्तोन (ग्रीक लोव्र) नेल्ल

क्येडा आइक्व तांबा के क्येट बाक्त।<sup>3</sup> मिनु येसुमी “नोफा दाइश्शा नेनीने, नेल्लेमी चढेशो क्येडा एको पुडग मीश मुरुमी शुश चढेत्तु।<sup>4</sup> मारदे हना आ बाक्शो नेल्ल गेत्तु। अरुमी चहिं आन गाप्शो रे गेम्तेक्म” दैमाक्त। २कोरिन्थी ८:१२

परमप्रभु आ खिं मलीब  
मती २४:१-३६; मर्कूस १३:१-३२

<sup>5</sup> काबु मुरपुकीमी “परमप्रभु यावे आ खिं ठेयब नु दारशो सेल्शो बाक्त” दैमा बाक्त। <sup>6</sup> मिनु येसुमी “एको खिं मुल ठेयब नु दारशो सेल्शो ताइतीनी। नोले नेल्ल ब्रेश्शा, फुल्लु का यो खोप्शा मलीब” दैमाक्त। लूका १९:४४

श्वेत डा चिन्ड

<sup>7</sup> मिनु मुरपुकीमी “शेंब, इन देंशो लोव्र गेना दुम्बा? मेको दुम्बशो चिन्ड दोपा तांइसीबा?” दे हिल्लो पामे बाक्त। <sup>8</sup> मिनु येसुमी “सुइमी इन थुं मक्याल्मेक्ल, दे होस पा बाक्कीन। मारदे हना शुश मुरपुकीमी आं नें ब्रशा ‘गो मेको नड। गो मेको नड देंतीक नाक्त नेक्था जाक्शो बाक्ब’ दे शेंनीम। मो देंब आन लोव्र थमा मसुइक्थु, आन नोले मखोतीन।<sup>9</sup> लडाइ दुम्बो, जुलुस बोक्शो लोव्र शुश नेनीनी। मेको लोव्र नेंशा महिनीन। मोदेंशो दुम्बा माल्ब। मिनु इक्का नोले ला रागी नुष्वी नाक्त जाक्ब” दैमाक्त। <sup>10</sup> मिनु लोव्र बोइश्शा “जात जात नु राज्य राज्य लडाइ पाइनीम।<sup>11</sup> ठेयब खिनु कुइब। रागी रागीमी ठेयब अन्काल दुम्ब। शुश मुर रोइ पा बेक्नीम। हिंवा डा श्वेत जाक्नीम। सरीडम ठेयब चिन्ड तांइसीनीम।

थमा सुइक्ब श्वेत जाइनीम

<sup>12</sup> मो दुम्बा क्येडा डोंइती थमा सुइक्ब इन कली खेदा पा ग्याइक्नीमी। मिनु ग्याइश्शा, आन गुम्तीक खिंम लाइश्शा दोस गेशा, जेल्खानमी चोक्नीम। आं नें आ पर्वम ठेयब मुर नु पिप आन डोंइती चाक्दीश्शा, राप्पाइक्वा पुंइसीनीनी। मती १०:१८-२२,३० <sup>13</sup> मोपा राप्पाइक्वा पुंइसीनीनु, सांकळी का दुम्नीनी। <sup>14</sup> ‘ठेयब मुर आन डोंइती मार देंचा?’ दे गेनायो पीर मपाइनुड, दे इन थुं फ्रेंशा बाक्कीन। लूका १२:११ <sup>15</sup> मारदे हना मोपा राप्पदमेनु, इन जोरी सन्तुमी लेन्ने मचाप्वा डा लोव्र इन शोव्र रे पपाइक्नन्नी। इन कली ठीक लोव्र पपाइक्नुड। मिनु मेकोपुकीमी इन लोव्र खोइक्ने मचाप्नीम। प्रेरित ६:१०

<sup>16</sup> इन आम आफ, लोकबपुकीमी, इन जात डा मुर, इन वारचपुकीमी इन कली दोस गेशा, खेदा पा ग्याइक्पाइश्शा, चोक्पाइक्नीम। का निक्शी आन कली साइक्पाइक्नीम। <sup>17</sup> मुरपुकी नेल्लेमी आं नें आ पर्वम इन कली काइ मदाक्नीम। <sup>18</sup> तन्न इन पिया डा चां का यो महम्ब। लूका १२:७ <sup>19</sup> मोपतीके थमा सुइक्वा मप्रोनीन। मिनु ला गे ब्रोंइचा ताइनीनी। हिब्रू १०:३६

‘यरूसलेम जाम्शा लाइब’ देंशो

<sup>20</sup> यरूसलेम सहर आ एर ओंथ लडाइ पाइबपुकीमी पुश्शो ताइतीनी हना ‘मुल सहर खतम दुम्ची नाक्त जाक्माक्त’ दे तुइक्तीन। <sup>21</sup> मोपतीके यहूदीया रागीम बाक्बपुकी डांडा ग्येत्थ प्रोक्मल। सहरम बाक्बपुकी सहर प्रोंइशा प्रोक्मल। सहर एर ओंथ रू मेर बाक्बपुकी सहर मओव्रमल। <sup>22</sup> परमप्रभु यावे आ लोव्रमी एको ओदेंशो दुम्ब, दे ब्रेक्शो बाक्ब। एको ब्रेक्शो नेल्ल थमा दुम्बा, सहर खतम दुम्ब। ब्यवस्था ३२:३५ <sup>23</sup> मेना आल कुरशो नु दूध तूब आल पाइश्शो मीश मुर आन कली श्वेत दुम्ब। मारदे हना रागीमी शुश श्वेत दुम्बा, मेको मुरपुकीमी परमप्रभु यावे आ गाइश्शो ताइनीम। <sup>24</sup> कोइ तरवारम बेक्नीमी। कोइ ग्याइश्शा अको रागीम लाइक्वा पुंइसीनीम। मिनु आन नाक्त मजाक्दीम सम्म अको जात डा मुरपुकीमी यरूसलेम कली दिप्शा वोइक्नीम। यसैया ६३:१८; प्रकाश ११:२; रोमी ११:२५

चिन्ड तांइसीब, दे शेंशो

<sup>25</sup> मिनु सरीड नु रागीमी चिन्ड तांइसीनीम। सरीडमी नां, तास्ला नु सोरुल मार मार तांइसीब। रागीम समुन्द्रमी ठेयब ब्वाक्कु ब्रुइश्शा, मुर नेल्ल आन कली हिंपाइक्ब। प्रकाश ६:१२-१३ <sup>26</sup> मुरपुकी सरीड नु रागी कोव्रशा, हिंशा थाइनीम। मारदे हना सरीड डा सक्ति हिम्सीनीम। <sup>27</sup> मिनु रागीम जरमेशो कली गोस्स तारी बाक्शा, सक्ति नु ठेयब छेडछेडमी यिंशो ताइनीम। दानीएल ७:१३ <sup>28</sup> मेको चिन्डपुकी दुम्बो तनीनु, इन पिया पोक्शा, ठेयब थुं पा ग्येरसीने। मारदे हना श्वेत रे प्रोंइब इन नेक्था जाक्शो बाक्ब” दे शेंदीमी बाक्त। फिलिप्पी ४:४,५

<sup>29</sup> मिनु कथा सेल्शा “फोव्रशी रवा नु अरु रवा कोव्रडीन। <sup>30</sup> कोच्चा दाप्शा कुशो तशा, रेउ यिची ना जाक्वा चिक्शो बाक्त, दे तुइक्नीनी। <sup>31</sup> आ देंशो लोव्र थमा दुम्बो तनीनु, परमप्रभु यावे आ राज्य इन नेक्था जाक्माक्त, दे तुइक्नीनी। <sup>32</sup> नोफा दाइश्शा नेनीने, एको मुरपुकी मनुष्थु, आं देंशो नेल्ल थमा दुम्ब। <sup>33</sup> सरीड नु रागी नेल्ल जाम्शा लाइनीम। तन्न आं लोव्र चहिं गेनायो मजाम्ब। <sup>34</sup> आं देंशो मप्रेंथु होस पा बाक्कीन। शांबु राकसी दुक्शा मबाक्कीन। मार जचा मार फेक्वा, दो पचा, दे शुश ममिम्तीने। मारदे हना आं देंशो लोव्र इन मतुइक्थु दुम्ब। मर्कूस ४:१९; १थिस्सलोनिकी ५:३ <sup>35</sup> मेको मोदेंशो श्वेत नेल्ल रागीम दुम्ब। <sup>36</sup> मोपतीके आं देंशो मिम्शा बाक्कीन। परमप्रभु यावे कली ‘श्वेत नेल्ल फाल्शा, थमा सुइक्तीक सक्ति गेकी। मिनु रागीम जरमेशो जाक्मेनु, सासीशा गुम्बा तकल’ दे पुंइना पुंइन बाक्कीन” दे अर्ती गेमी बाक्त।

नाक्त किंत किंत शेंशो

<sup>37</sup> मिनु येसुमी नाक्त मुर आन कली शेंना शेंन नाक्दो चहिं जैतून डांडाम लशा इप्बाक्माक्त। <sup>38</sup> शुश मुरुमी नाक्त किंत किंत सुनी कना बोक्शा, परमप्रभु यावे आ खिं लशा, येसु आ लोव्र नेंबाक्मा बाक्त।

येसु कली साइक्वा, दे लोव्र पशो

मती २६:- २८:-; मर्कूस १४:- १६:-; यूहन्ना १८:- २१:-

**22** मिनु बोरब ओख्ती मसुप्शो शोब्ले जतीक पास्सा चाड जाक्वशो बाक्माक्त। <sup>2</sup> मिनु ठेयब चढेब नु सास्त्रीपुकीमी “येसु कली दोपा ग्याइश्शा साइक्वा?” दे लोव्र पमुशा, साइक्वा माल्मे बाक्त। तन्न शुश मुरुमी येसु आ लोव्र नेंशो तशा, हिंमा बाक्त। लूका २०:१९ <sup>3</sup> मिनु सैतान इस्कारीयोत डा यहूदा आ थुंम ओव्रमाक्त। मेको शेंसीब आन दाते डा का बाक्माक्त। यूहन्ना १३:२,२७ <sup>4</sup> मिनु मेको ठेयब चढेब नु ठेयब मुर आन कली गुम्थ लशा “येसु ग्याइक्पाइक्वा कली वारच पाइनन्नी” दे माइक्मी बाक्त। <sup>5</sup> मिनु मेकोपुकीमी ग्येरशा “दुम्ब, ग्याइक्वा वारच पाप्तीवी हना, क्येट गेनीकी” दैमा बाक्त। <sup>6</sup> में डा मेरे यहूदामी “सुइमी मतुइक्थु, दोपा ग्याइक्पदु?” दे मिम्शा बाक्माक्त।

पास्सा चाड डा भोज

<sup>7</sup> मिनु बोरब ओख्ती मसुप्शो शोब्ले जची चाड जाक्माक्त। मेको नाक्ती पाठा का क्योरचा माल्बाक्माक्त। प्रस्थान १२:१८-२० <sup>8</sup> मिनु येसुमी पत्रुस नु यूहन्ना आस कली “पास्सा चाड डा भोज साथ लसे” दे माइक्सी बाक्त। <sup>9</sup> मिनु मेको निक्शीमी “ते लशा साचा?” दे हिल्लो पास्से बाक्त। <sup>10</sup> मिनु येसुमी “नेनीसे, मुल सहर लसे। सहरम जाक्दीस्सीनु, गाग्री कुरशा ब्वाक्कु दिथ पिशो मुर का गुम्नीसी। <sup>11</sup> मेको आ नोले खोइश्शा, तेको खिं ओव्रबा, मेको खिं ओव्रडीसे। मिनु खिं डा मुर कली ‘शेंबमी सोइश्शो नस्कु। शेंबमी, आ शेंसीबपुकी नु काथा बाक्शा, पास्सा ते मानेचा? दे हिल्लो पथ सोइक्ताक्की’ दे मतीसे। <sup>12</sup> मो माइक्सीनु, मेकोमी इस कली तला तारी ठेयब कोठा का कोइब। मेको कोठामी गुन्द्री पीरा ब्रशा वोइश्शो थिल्लीसी। मिनु मेकेरन साचा” दे सोइक्तीम्सी बाक्त। <sup>13</sup> मिनु लसानु, येसुमी दोदेंशो देंमे, मोदेंशो थित्से बाक्त। मिनु पास्सा चाड डा भोज सादसे बाक्त। लूका १९:३२

14 मिनु भोज जचा कली येसु नु आ शेंसीबपुकी जथ निस्समा बाक्त।  
 15 मिनु जचामेनु, येसुमी “गो श्येत गेचा पुंडसीचा क्येडा डोंइती गेपुकी नु काथा बाक्शा, एको पास्सा मानेशा जत दाक्ती। 16 मारदे हना परमप्रभु यावे आ राज्य पशो मताइसे सम्म लेंशा गेपुकी नु काथा बाक्शा, पास्सा मानेचा मताइनुड” देंमाक्त। लूका १३:२९ 17 मिनु कचौरा शेशा “गे रिम्शो पाइब बाक्नीनी” दे प्रार्थना पशा “ताक्शा, का का पा तूडीन। 18 मुल डा मेरे एको अडगुर रस मत्तुनुड। परमप्रभु यावेमी राज्य पशो तांइसे नोले ला तूनुड, दे इन कली देंनुड” देंमाक्त। 19 मिनु शोब्ले शेशा “गे रिम्शो पाइब बाक्नीनी” दे प्रार्थना पा, जिक्शा योक्शा “एको आं रां बाक्ब। इन कली गेतन्नी। आं कली मिम्शा जने” दे शोब्ले जपाइक्मी बाक्त। १कोरिन्थी ११:२३-२५ 20 मिनु जशा, कचौरा शेशा “एको तूनीनु, आं हुश चढेशो मिम्तीने। आं हुशेमी परमप्रभु यावे आ गेशो नक कबल खाप्ता। आं हुश जारशोमी शुश मुर आन पाप क्याम्सीब। 21 नेनीने, आं कली ग्याइक्ब आन कली वारच पाइब का गोपुकी नु काथा बाक्शा बाक्ब। यूहन्ना १३:२१-२२ 22 रागीम जरमेशो कली साइ मोदेंशो दुम्चा माल्ब देंशो लोत्र नेल्ल थमा दुम्चा माल्ब हना यो, ग्याइक्ब आन कली वारच पाइब कली शुश मरिम्शो दुम्ब” देंमाक्त। 23 मिनु शेंसीबपुकीमी येसु आ लोत्र नेंशा “मोदेंशो पाइब सु बाक्म माइ?” दे लोत्रसी पमुचा गोत्रमे बाक्त।

नेल्ल क्येडा ठेयब सु बाक्या माइ?

24 मिनु लोत्रसी पस डा पस बाक्मानु “गो इं दातेम नेल्ल क्येडा ठेयब सु बाक्या माइ?” दे जिचा पोक्मे बाक्त। मत्ती २०:२५-२८; मर्कूस १०:४२-४५; लूका ९:४६ 25 मिनु येसुमी “अकों रागी डा पिपपुकीमी इन कली हुकुम पाइनीम। मिनु मुरपुकीमी मेको आन कली मान पा ठेयब सेल्नीम। 26 गेपुकी चहिं मेको आन पशो खोदेंशो पा ठेयब दुम्चा ममालीने। नेल्ल क्येडा ठेयबमी आइक्च सुंडसीशा, नेल्ल आन कली वारच पवल। 27 मान पा खमे योक्वामेनु, जाइब मुर आन कली मान पा ठेयब सेल्नीम। खेप्व मुर चहिं आइक्च दुम्ब। गो इन कली खेप्व मुर खोदेंशो दुम्शा गेय पाता। यूहन्ना १३:४-१४ 28 आं कली थुं थाम्मेनु, वारच पाइब गे ननी। यूहन्ना ६:६७-६८ 29 आं आफोमी आ राज्यमी हुकुम पाइब सेल्ती। मिनु गो इन कली काथा वोइशा, हुकुम पाइब सेल्नन्नी। 30 आं राज्यमी गो नु काथा बाक्शा, जचा तूचा ताइनीनी। मिनु इं इस्साल डा १२ थर आन कली निसाफ पाइनीनी” दे माइक्मी बाक्त। मत्ती १९:२८

पत्रुस कली लोत्र पशो

31 मिनु प्रभुमी सिमोन पत्रुस कली “ए सिमोन, नेनो। सैतानमी गे इ कली चेरब खोदेंशो पा क्राप्चा गेयीनी, दे पुंडशो बाक्ब। २कोरिन्थी २:११ 32 गो चहिं इ पर्बम परमप्रभु यावे कली ‘पत्रुस कली थमा सुइक्चा प्रॉइपाइक्चा मगेने’ दे पुंडता। गे नोले थमा पा इ थुं परमप्रभु यावे गे लेशा थमा सुइक्चेवे। मिनु थमा सुइक्ब आन कली ‘थमा सुइक्चा मप्रोनीन’ दे आन थुं बारपतो” दे अर्ती गेवा बाक्त। यूहन्ना १७:११, १५ 33 मिनु पत्रुसमी “प्रभु, इन कली जेल्खानम चोक्तेक्म हना, गो यो चोक्सीनुड। इन कली साइक्तेक्म हना, इन कली मप्रॉइथु, गो यो साइक्चा पुंडसीनुड” देंमाक्त। 34 मिनु येसुमी “पत्रुस, दीसा सुनी भाले ग्रीचा क्येडा डोंइती खेयप सां ‘गो मेको कली मतुइक्नुड, सु बाक्मे?’ देंनेवे” देंमाक्त।

“होस पांडसीने” देंशो

35 मिनु शेंसीब नेल्ल आन कली “गोमी इन कली क्येट, झोला, जुत्ता, मारेइ मकुरथु, परमप्रभु यावे आ राज्य डा लोत्र शेंथ सोइक्तन्नीनु, जचा फेक्चा मतनी डा?” देंमेनु “मार माल्का, मेको नेल्ल थित्तक, ताइतक” देंमा बाक्त। लूका ९:३; लूका १०:४ 36 मिनु येसुमी “मुल क्येट बाक्त हना, क्येट कुरीन। झोला बाक्त हना, झोला कुरीन। तरवार मबाक्त हना, फेक्शो वा लेयशा यो ग्याप्शा कुरचा माल्ब। 37 आं पर्बम ब्रेक्पाइशो लोत्र नेल्ल थमा दुम्चापु। मार ब्रेक्शो बाक्ब देंशा हना ‘मरिम्शो पाइब सुइशा, दोस गेनीम’ दे ब्रेक्शो बाक्ब। आं पर्बम ब्रेक्शो लोत्र नेल्ल थमा दुम्चा माल्ब” देंमाक्त।

यसैया ५३:१२ 38 मिनु शेंसीबपुकीमी “प्रभु, गोपुकी नु तरवार निक्शी बाक्त” देंमानु “मोशो बाक्त हना दुस्त, लो गाक्व” देंमाक्त।

येसुमी प्रार्थना पशो

39 मिनु मेकेर रे गाक्शा, डोंइती डा खोदेंशो पा जैतून डांडा जाक्दीम्माक्त। आ शेंसीबपुकीमी आ नोले खोदमे बाक्त। 40 मिनु मेकेर जाक्दीम्मानु, येसुमी आ शेंसीब आन कली “थुं थाम्चा पुंडसीनीनु, पाप मपय, दे प्रार्थना पने” दे माइक्मी बाक्त। 41 मिनु आन बाक्तीक आ ता एरे लशा, पोक्च थेक्शा 42 “आं आफ, इन दाक्शो बाक्त हना, एको कचौरा आं कली मतूपाइक्थु लतीने। तन्न आं पुंडशो मदुल्ल, इन दाक्शो दुम्ल” दे पुना बाक्त। मत्ती ६:१० 43 मिनु परमप्रभु यावे आ स्वर्ग डा गेय पाइब का गूशा, येसु कली बोल गेवा बाक्त। 44 मिनु लेंशा आ थुं खाइशा पुना बाक्त। आ थुं खाइशा पुनानु, आ पस्ना हुश खोदेंशो दुम्शा खपीम दोक्माक्त। 45 मिनु लेशा शेंसीब आन बाक्तीकेम जाक्मेनु, मेको आन कली यो आन थुं खाइशा इप्शा बाक्शो थिम्मी बाक्त। 46 मिनु “मारदे इम्नी? बोक्कीन, थुं थाम्चा पुंडसीनीनु, पाप मपय, दे प्रार्थना पने” दे पोक्मी बाक्त।

येसु ग्याइक्चा पुंडसीशो

47 मिनु शुश मुर फो फु गूमा बाक्त। मेको आन कली येसु आ शेंसीब यहूदामी लां कोंइशा चाक्शो बाक्माक्त। मिनु जाक्शा, यहूदामी येसु कली पुक्पु पचा कली आ डोंइती जाक्माक्त। 48 तन्न येसुमी “यहूदा, गे रागीम जरमेशो कली वारच दुम्बु पा पुक्पु पा ग्याइक्पाइक्चेवे?” देंमाक्त। 49 मिनु शेंसीबपुकीमी “ग्याइक्थ जाक्मा बाक्त” दे तुइशा “प्रभु, एको आन कली तरवारम क्योरशा खेदा पचा?” देंमानु 50 कामी तरवार पि शोइशा, ठेयब चढेब आ गेय पाइब आ ग्युरा नोफा खोदा बाक्त। 51 येसुमी मेको खोइशो तशा “दुस्त मपने” दे नोफा सेस सेला बाक्त।

52 मिनु येसुमी मेकेर जाक्शो ठेयब चढेब, परमप्रभु यावे आ खिं डा ठेयब मुर नु जोक्ब तुइक्ब खाल्पा आन कली “तरवार कोक्के कुरशा, खुइ पाइब कली ग्याइक्थ जाक्शो खोदेंशो पा आं कली ग्याइक्थ जाक्नी? 53 नाक्त किंत किंत परमप्रभु यावे आ खिंमी गेपुकी नु काथा बाक्डानु, मग्याइक्तीनी। मुल चहिं छिडछिड डा सक्ति नु इन पालो जाक्त” दे माइक्मी बाक्त। यूहन्ना ७:३०; यूहन्ना ८:२०

पत्रुसमी “मतुइक्नुड” देंशो

54 मिनु येसु कली ग्याइशा लाइशा, नेल्ल क्येडा ठेयब चढेब आ खिंमी ओइदमे बाक्त। पत्रुस यो डोन रे कोव्रना कोव्रन लमाक्त। 55 मेको खिं डा लाडगाम मुर खुम्सीशा, मी थेरशा बाक्मा बाक्त। पत्रुस जाक्दीशा, मेकोपुकी नु मी थेरशा बाक्माक्त। 56 मिनु मेकेर गेय पाइब मीश मुर कामी पत्रुस कली मी थेरशा तशा, मिक्च मयाक्थु कोव्रशा “एको मुर मेरे नु काथा गाक्ब का बाक्त, है” देंमेनु 57 “मार लोत्र पवी? गो येसु कली मतुइक्नुड, सु बाक्मे?” देंमाक्त। 58 मिनु याम का नोले मेकेर बाक्ब कामी “मेरे नु काथा गाक्ब का गे नवे” देंमेनु “हलै गो मनड” देंमाक्त। 59 मिनु घन्टा का नोले अर्कोमी यो “मेरे नु काथा गाक्ब का एकोन बाक्ब। मारदे हना एको यो गालील डा बाक्ब” देंमाक्त। 60 मिनु पत्रुसमी “गो इ देंशो मरुबु” देंमाक्त। मो देंमेनुन, भाले ग्रीमाक्त। 61 मिनु प्रभुमी पत्रुस गे हिरशा, मिक्च मयाक्थु कोव्रडा बाक्त। मिनु पत्रुसमी “सुनी कना भाले ग्रीचा डोंइती खेयप सां ‘मेको कली मतुइक्नुड, सु बाक्मे’ देंनेवे” देंशो प्रभु आ लोत्र ति फ्रुक्गा बाक्त। 62 मिनु गूशा शुश डाक्माक्त। भजन संग्रह ५१:१९

येसु शुक्शी पाइक्चा पुंडसीशो

63 चढेब आ खिंमी चहिं मार पामे बाक्त देंशा हना, येसु कली आ मिक्चीम वाम फ्रेंशा तुप्शा 64 “इ कली सुमी तुप्मे? लो देन” दे तुप्स डा तुप्स पामे बाक्त। 65 तुप्स डा तुप्स पा, तोक्शा लोत्र पा शुश श्येत गेमे बाक्त।

### येसु कली राप्पाइश्शो

66 मिनु सुनी जोक्ब तुइक्ब खाल्पापुकीमी ठेयब चढेब नु सास्त्री आन कली खुप्शा कछडी बाक्मा बाक्त। मिनु येसु कली मेकेर चाक्शा राप्पदमे बाक्त। 67 मिनु “गे ख्रीस्त नवे हना, ख्रीस्त नड देनो” देंमा बाक्त। *यूहन्ना ३:१२* 68 मिनु येसुमी “गो ख्रीस्त नड देंती हना, गे थमा मसुइक्नीनी। इन कली लोव का हिल्लो पाता हना, आं लोव मलेत्नीनी। 69 तन्न लोव का ‘मुल रागीम जरमेशो परमप्रभु यावे आ ग्युरा गे बाक्वा ताइब’ ” दे माइक्मी बाक्त। *भजन संग्रह १००:१* 70 मिनु मेकोपुकीमी “मो हना गे परमप्रभु यावे आ तौ नवे?” देंमानु “परमप्रभु यावे आ तौ नवे, दे गेन देंतीनी” देंमाक्त। 71 मिनु मेकोपुकीमी “मार सांक्छी माल्दा डा? आ देंशो नेंतय। आंम आ देंशोमी दोस ताइब दुम्त” देंमुमा बाक्त।

### पिलातस आ डोंइती राप्पाइश्शो

23 मिनु मेकेर रे येसु कली पिलातस आ डोंइती चाक्दीत्मे बाक्त।

2 मिनु पिलातस आ डोंइती राप्पाइश्शा “हजुर, एको मुरुमी मुर आन थुं क्याल्ब। ‘सिजर कली ममानेचा। तिरो थाप्चा ममाल्ब। गो ख्रीस्त नड। मिनु गोन पिप नड’ दे शेंना शेंन गाक्त” दे दोस गेमे बाक्त। *प्रेरित २४:५; लूका २०:२५* 3 मिनु पिलातसमी येसु कली “यहूदी आन पिप नवे?” दे हिल्लो पवानु “गे आंमा देंतीनी” दे लोव लेत्ता बाक्त। 4 मिनु पिलातसमी ठेयब चढेब नु येसु कली चाक्ब आन कली “एको दोस तचा डा मुर मतड, रिम्शो मुर ताता” देंमाक्त। 5 मिनु मेकोपुकीमी “एकोमी गालील रागी नु यहूदीया रागी नेल्ल हिरशा, एक यो जाक्शा, मुर आन कली ‘पिप कली ममानेन। आं कली मानेन’ दे आन थुं क्याल्तीमी। मिनु गाउं सहरमी पिप आ पर्बम दूली लोव पचा गोम्तेक्मे” दे दोस गेशा लोव थोक्शा देंमा बाक्त। 6 मिनु पिलातसमी येसु गालील डा बाक्माक्त, दे तुइक्ता बाक्त। 7 गालील डा हुकुम पाइब हेरोद बाक्माक्त। मेना हेरोद नाक्त का निक्शी कली यरूसलेम जाक्शा बाक्माक्त। मोपतीके मेकेर सोइक्ता बाक्त। *लूका ३:१* 8 मिनु हेरोदमी येसु कली तशा, ग्येरसे बाक्त। मारदे हना शुश नाक्त रे गुम गुम दाक्शा बाक्माक्त। मुर आन कली सापाइश्शो, चिन्ड कोंइशो शुश लोव नेंशा “मारेड छक लाक्वा डा गेय कोंइबा को” दे मिम्शो बाक्माक्त। *लूका ९:९* 9 मिनु हेरोदमी शुश लोव हिल्लो पवा बाक्त। तन्न येसुमी लोव का यो मलेत्ता बाक्त। 10 ठेयब चढेब नु सास्त्रीपुकीमी शुश दोस गेमे बाक्त। 11 मिनु हेरोद नु आ सिपाइपुकीमी येसु कली शुक्शी पा पिपी आ वा फेक्पा “लो, मुल पिप दुम्ते” दे पिलातस आ बाक्तीकेमी लेशशा सोइक्तेमे बाक्त। 12 डोंइती हेरोद नु पिलातस जोरी सत्रु खोदेंशो दुम्शो बाक्सा बाक्त। मेको नाक्त रे वारचु दुम्सा बाक्त।

13 मिनु पिलातसमी येसु कली पिप आ वा फेक्पा लेशशा चाक्शो तशा, ठेयब चढेब, ठेयब मुर नु शुश मुर आन कली खुप्शा 14 “एको मुरुमी ‘पिप ममानेचा’ दे शेंना शेंन गाक्ब दे दोस गेतीनी। गो चहिं दोस गुंइने मचबु। 15 हेरोदमी यो आ दोस थिन्ने मचाप्थु, लेशशा सोइक्ताक्व। साइक्वा पुंइसीब मारेड दोस मथिदु। 16 मोपतीके इक्का सजाइ गेशा, सोइक्वा दुम्ती” देंमाक्त। 17 पास्सा नाक्ती जेल्खानमी चोक्सीशो मुर का प्रोंइचा माल्बाक्माक्त। 18 मिनु पिलातसमी येसु कली प्रोंइशा सोइक्वा देंमेनु, मेकेर बाक्बपुकीमी “प्रोंइचा मदुम्ब। मुर का प्रोंइचा देंतीनी हना, बारब्बा कली प्रोंइशा सोइक्तीने। एको कली चहिं साइक्वान माल्ब” दे गुइ मुठी पा पोक्शा, रेयके पामे बाक्त। 19 बारब्बा चहिं डोंइती मरिम्शो गेय पा, सहरम हुल पोक्शा, मुर का कली साइश्शा, जेल्खानमी चोक्सीशो बाक्माक्त। 20 पिलातसमी खुम्सीशो मुर आन कली लेंशा लोव पशा, येसु कली प्रोंइचा बोल पवा बाक्त। 21 तन्न मेकोपुकीमी शुश रेयके पा “शीम केप्शा कांटी थोक्शा क्याइश्शा सतीने” दे वाइ ब्रेश्शा, रेयके पामे बाक्त। 22 मिनु पिलातसमी लेंशा “मार मरिम्शो पवा? मार दोस गेचा? साइक्वा डा दोस मारेड मतड। तुप्पाइश्शा, प्रोंइशा सोइक्नुड” देंमाक्त। 23 मिनु मेकोपुकीमी “ब्रोंइचा मगेचा, सरकार, ब्रोंइचा मगेचा। शीम केप्शा कांटी थोक्शा क्याइश्शा साइक्वा माल्ब” दे वाइ ब्रेस्स डा ब्रेस्स बाक्मा बाक्त। 24 मिनु

पिलातसमी मेको आन कली सिक्सी पपाइक्ने मचाप्तीके “मो हना, लो, सतीन” दे आन पुंइशो पचा गेमी बाक्त। 25 डोंइती मरिम्शो गेय पा, मुर साइश्शा चोक्सीशो बारब्बा कली प्रोंइपाइश्शा सोइक्ता बाक्त। येसु कली आन पुंइशो खोदेंशो पा शीम केप्शा कांटी थोक्शा क्याइश्शा साइक्वा कली गेवा बाक्त।

### येसु साइक्वा पुंइसीशो

26 मिनु सिपाइपुकीमी येसु कली लदमे बाक्त। सहर रे गुंइदमेनु, आ रू रे पिशो साइरेनी डा सिमोन कली ग्याइश्शा, येसु कली क्याइक्तीक शी कुरपा, येसु आ नोनोले खोइक्पाइश्शा लदमे बाक्त।

27 शुश मुरुमी मेको आन नोले खोदमे बाक्त। मीश मुरपुकी डाक्शा रोंका पना पन गाक्मा बाक्त। 28 मोपा डाक्शा खोदमेनु, येसुमी आ नोले लेशशा कोवशा, डाक्ब मीश मुर आन कली “ए यरूसलेम डा तमीपुकी, आं कली तशा, मडाक्कीन। तन्न इन तमी तौ नु आंमा इन कली मिम्शा डाक्कीन। 29 मारदे हना काबु एको सहर डा मुर शुश श्येत जाइनीम। मोपा श्येत जाक्मेनु, आल मथीब नु दूध मतुंडब मीश मुर ग्येरसीनीम। मारदे हना शुश श्येत दुम्ब। *लूका २१:२३* 30 मिनु मेकोमी रोंगु कली ‘ब्रेश्शा चिप्शा, आंइ कली सुम्शा खूइक्तीकी’ दे पुंइनीम। *होसे १०:८; प्रकाश ६:१६; प्रकाश ९:६* 31 क्येख शी लाइ यो चोवमेनु, सोवशो शी मार लीबा डा?” दे माइक्मी बाक्त। *भजन संग्रह २२:१९; १पत्रुस ४:१७*

32 येसु कली लदमेनु, खुइ निक्शी आस कली यो साइक्व लदमे बाक्त। 33 मिनु खप्परे माइक्तीकेमी चाक्दीश्शा, मेको सांफा आन कली शी का का तारी इप्पा गुइ खोइलीम कांटी थोक्शा, शी पोक्शा, येसु आ ग्युरा गे का, आ पेरा गे का क्याइश्शा वोदमे बाक्त। 34 मिनु क्यदमेनु, येसुमी “आं आफ, एको आन कली माफ गेने। मारदे हना एकोपुकीम मारेड मतुइश्शो बाक्नीम” दे पुना बाक्त। सिपाइपुकीमी फेन्टे ग्यारशा, आ वा योक्समा बाक्त। *यसैया ५३:१२; प्रेरित ७:१६; प्रेरित ३:१७; भजन संग्रह २२:१९* 35 मुर शुश मेकेर कोवना कोवना बाक्शो बाक्मा बाक्त। ठेयब मुरपुकीमी “एकोमी शुश मुर आन कली श्येत रे प्रोंइना प्रोंइन गाक्बाक्माक्त। परमप्रभु यावे आ योवशो ख्रीस्त बाक्त हना, मुल आंमा प्रोंइसेक्ल” दे शुक्शी पामे बाक्त।

36 सिपाइपुकीमी ग्युरशो थोवक तुंइशा 37 “गे यहूदी आन पिप नवे हना, मेकेर ब्रोंइशा लावो” दे शुक्शी पामे बाक्त। 38 येसु कली क्याइश्शो शीमी “यहूदी आन पिप बाक्ब” दे ब्रेक्शा वोदमे बाक्त। 39 येसु नु काथा क्याइश्शो खुइ कामी यो शुक्शी पा “ख्रीस्त मनवे डा? लो, मुल ब्रोनो। मिनु आंस कली यो प्रोंइस्की” देंमाक्त। 40 मो देंमेनु, अर्कोमी “गे यो परमप्रभु यावे कली तशा महिनेवे? गो सांफा कांइचीक सजाइ ताइतय। 41 गो सजाइ जचा माल्शो नस। मारदे हना खुइ पाइतस। एको मुरुमी चहिं मारेड मरिम्शो मपावो” दे हुइक्ता बाक्त। 42 मिनु मेकोमी “येसु, गे परमप्रभु यावे आ राज्यमी हुकुम पचा गोनीनु, आं कली यो मिम्तीन” देंमेनु, *मत्ती २०:२१* 43 येसुमी “नोफा दाइश्शा नेनो, मुलाक्ती गे गो नु काथा दुम्शा, परमप्रभु यावे नु बाक्वा ताइनेवे” दे मदा बाक्त। *२कोरिन्थी १२:४*

44 मिनु नाक्ती १२ बजेसे बाक्त। मिनु घन्टा सां सम्म रागी नेल्ल छिडछिड दुम्माक्त। 45 मारदे हना नां आ छेडछेड जाम्माक्त। मिनु परमप्रभु यावे आ खिं आगा डा कोठामी फारशो वा उइक्थ पा जेरर गाक्माक्त। *प्रस्थान २६:३१-३३; २इतिहास ३:१४*

46 मिनु येसुमी “आं आफ, आं सोक्त इन गुइमी गेतन्नी” दे वाइ ब्रेश्शा, आ सोक्त प्रोना बाक्त। *भजन संग्रह ३१:६; प्रेरित ७:५८* 47 मेकेर बाक्ब कप्तानमी मो दुम्शो तशा “थमा पा, एको मुरुमी मरिम्शो गेय मपशो बाक्माक्त” देंशा, परमप्रभु यावे कली ठेयब सेला बाक्त। 48 मेकेर कोवथ जाक्बपुकीमी मो दुम्शो तशा “ओहो, गो मरिम्शो गेय पया बाक्त” दे रुप्शा, आन कुचु तुप्शा, डाक्शा आन खिं खिं लेम्मा बाक्त। 49 गालील रागी रे यरूसलेम सम्म येसु नु काथा गाक्शो मीश मुर नु आ वारचपुकीमी डोन रे कोवशा, मोदेंशो दुम्शो नेल्ल तामे बाक्त। *लूका ८:२-३*

येसु आ बेक्शो रां पुक्खीम वोइश्शो

50 यहूदीया रागी अरीमाथीया सहर डा योसेफ नें पाइश्शो ठेयब मुर का बाक्मावत। मेको मुर यरूसलेम “येसु कली साइक्वा” दे लोवरी पामेनु, मबिश्शो बाक्मावत। 51 मेको रिश्शो थुं पाइश्शो बाक्मावत। मेकोमी “परमप्रभु यावे आ राज्य पशो तांइसेक्ल” दे थमा सुइश्शा, आस पा बाक्शो बाक्मावत। लूका २:२५, ३८ 52 मिनु मेको लशा, पिलातस कली “येसु आ रां लाइक्वा गेयीनी” दे पुंइदा बाक्त। 53 मिनु पिलातसमी “लो, लतो” देंमेनु, शी रे शोल्शा, बुश वाम गिल्शा लाइश्शा, पुक्खी कामी ओइशा वोदा बाक्त। डोंइती मेको पुक्खीमी सुइ मवोइश्शो बाक्मावत। 54 सुक्रबार नाक्नाक्दो ६ बजे क्येडा डोंइती मेकेर चाक्दीश्शा वोदा बाक्त। मारदे हना ६ बजे रे नाइक्तीक नाक्त गोइबाक्मावत। 55 गालील रे येसु नु काथा गाक्ब मीश मुरपुकीमी योसेफमी येसु आ रां लाइश्शो तशा “ते वोइक्बा?” दे कोव्रशो बाक्मा बाक्त। 56 मिनु वोइक्तीके तुइश्शा, सहर लेशशा लशा, रां मराक्ब ओख्ती ग्याप्शा चाक्शा, साशा खिंम वोदमे बाक्त। मिनु आ दीसा नाइक्तीक नाक्त दुम्तीक गेय मपथु, नाइश्शा बाक्मा बाक्त। प्रस्थान २०:१०

पुक्खी श्येत्थ तशा, छक लाक्शो  
मत्ती २८:१-१०; मर्कूस १६:१-८; यूहन्ना २०:१-१०

24 मिनु आ दीसा सुनी कना बोक्शा, मराक्ब ओख्ती लाइश्शा, पुक्खीमी जाक्दीम्मा बाक्त। 2 मिनु पुक्खी सुशो फुल्लु रोक्शो तशा, 3 ओव्रशा कोव्रडमेनु, येसु आ रां मबाक्मावत। 4 मिनु मबाक्शो तशा “ओदेशो मार दुम्मे?” दे छक लाक्मानु, झिल झिल पाइश्शो वा फेक्शो मुर निक्शी फो फु गूशो तामे बाक्त। 5 मेको आस कली तशा, हिंशा कोव्रने मचाप्यु, खुम्की पा बाम्मा बाक्त। 6 मिनु मेको निक्शीमी “मारदे सेस मुर कली बेक्शो मुर वोइक्तीकेमी माल्नीनी? एकेर मबा, सेंसीचा पुंइसाक्व। गालील रागीम काथा बाक्नीनु, इन कली मार शेंदा, मेको ममिम्तीनी? 7 ‘रागीम जरमेशो पापी आन गुडमी जिम्मा गेने पुंइसीशा, शीम क्याइश्शा कांटी थोक्शा साइक्वा पुंइसीब। मिनु बेक्शो आ नित्थ नाक्ती बेक्शो रे सेंसीब’ दे शेशो प्रेंदीनी डा?” देंसा बाक्त। लूका ९:२२ 8 मिनु येसु आ लोव्र ति फ्रुकमे बाक्त। 9 मिनु मेकेर रे लशा, येसु आ शेंसीब ११ जना नु आ वारच नेल्ल आन कली तुइक्पदमे बाक्त। 10 मेको मो दुश्शो ताइब मीश मुर सु सु बाक्मा बाक्त देंशा हना, माग्दाला डा मरीयम, योअन्ना नु याक्ब आ ममा मरीयम बाक्मा बाक्त। मेको आन वारच का निक्शी यो बाक्मा बाक्त। लूका ८:२-३ 11 येसु आ शेंसीबपुकीमी मीश मुर आन लोव्र नेंशा “एको मीश मुर आन लोव्र बाक्ब” दे थमा मसुदमे बाक्त। 12 पत्रुस चहिं दोरशा, कोव्रथ जाक्दीम्मावत। जाक्दीश्शा बाप्शा कोव्रडानु, बुश वा डा लाक्शा मारेइ मतवा बाक्त। मिनु छक लाक्शा आ खिं लेम्मावत। यूहन्ना २०:६-१०

येसु कली एम्माउस डा लांम तशो  
मर्कूस १६:१२-१३

13 मेको नाक्ती येसु आ वारच निक्शी यरूसलेम रे गाक्शा, एम्माउस माइश्शो गाउं डा लां खोदसे बाक्त। एम्माउस गाउं यरूसलेम रे ६० स्तादीयोन डोन बाक्मावत। स्तादीयोन का १८५ मिटर खोदेशो बाक्ब। 14 मिनु गाक्ना गाक्न बाक्सानु, ओदेशो मार दुम्मे, दे लोवरी पमुसा बाक्त। 15 मिनु गाक्स डा गाक्स लोव्र पाम्सेनु, येसु पिशा, गुम्शा, काथा गाक्मा बाक्त। 16 काथा गाक्शा यो, येसु, दे मतुइक्तसे बाक्त। मारदे हना येसुमी आस कली मतुइक्पांइसे बाक्त। 17 मिनु येसुमी “नाप्खे मार लोव्र पसी?” दे हिल्लो पवा बाक्त। 18 मिनु ख्रा दिक्शा आस थुं खाइक्सा बाक्त। मिनु क्लेओपास माइश्शोमी “यरूसलेममी मार दुम्मे, दे गेमी ला मतुइक्तीनी?” देंमेनु, 19 येसुमी “मार दुम” देंमावत। मिनु मेको निक्शीमी “मार दुम्त देंशा हना, नासरथ डा येसुमी परमप्रभु यावे आ लोव्र पवानु, शुश चिन्ड कोइताक्व। परमप्रभु यावे नु मुर नेल्ल आन डोंइती मोदेशो पापु। मत्ती २१:११ 20 तन्न इं ठेयब चढेब नु ठेयब मुरपुकीमी दोस गेशा ‘साइक्वा पुंइसीब’ दे शीम क्येप्शा कांटी थोक्शा क्याइश्शा साइक्पाइक्तेक्म। 21 मेको

‘परमप्रभु यावे आ सोइश्शो इं इस्राएली कली प्रोइब बाक्ब’ दे थमा सुइश्शा, आस पा बाक्तस्कु। आ बेक्शो नाक्त सां दुम्त। प्रेरित १:१६ 22 मुल सुनी गोपुकी नु बाक्शो मीश मुरपुकीमी आंस वारच नु गो नेल्ल आंइ थुं क्याल्लीकी। 23 मारदे हना सुनी कना येसु आ रां वोइक्तीक पुक्खीम लमानु, येसु आ रां मथिक्क। तन्न परमप्रभु यावे आ स्वर्ग डा गेय पाइब निक्शी गूशा ‘येसु ब्रोंइत, देंताक्स’ दे लेशशा पिशा लोव्र पाम्तेक्म। 24 मिनु आंस वारच का निक्शी यो लशा, कोव्रशा लेशशा जाक्शा ‘मीश मुर आन लोव्र थमा बाक्त’ देंतेक्मे। तन्न मुल सम्म सुइमी येसु कली मतामे” देंसा बाक्त। 25 मिनु येसुमी “गे मरुब्ब नसी। साइ नेसी परमप्रभु यावे आ लोव्र पाइब आन देंशो लोव्र रुप्शा थमा सुइक्ने मचाप्नीसी? लूका ९:२२ 26 ख्रीस्त श्येत जशा, सक्ति पाइश्शो दुम्शा, राज्य पचा ताइब देंशो लोव्र मुल यो मरुप्नीसी?” देंमावत। 27 साइ नेसी मोसा नु परमप्रभु यावे आ लोव्र पाइबपुकीमी ख्रीस्त आ पर्वम मार मार ब्रेक्शो बाक्मा, मेको नेल्ल शेंदीम्सी बाक्त। ब्यवस्था १८:१५; भजन संग्रह २२:-; यसेया ५२:१३-५३

28 मिनु आस गाउं जाक्दीश्शा, येसुमी “लो, बाक्कीसे, गो लाइनुड” देंमावत। उत्पत्ती १९:१५, २४, २५ 29 मेको निक्शीमी “मुल नां रिक्शा ते लाइनीनी? मुलाक्दो काथा बाक्क” देंसा बाक्त। मिनु येसुमी “मो हना दुम्ब, नां यो रिक्त” देंमावत। न्यायाधीस १९:९

30 मिनु खमे क्येशा, शोब्ले चोने थुम्शा जचामेनु, येसुमी शोब्ले शेशा, परमप्रभु यावे कली “गे रिश्शो पाइब बाक्नीनी” देंशा, जिक्शा योक्मा बाक्त। लूका ९:१६; लूका २२:१९ 31 मिनु मो पा तुइक्पांइसेनु “येसु कका बाक्मावत” दे तुइक्तसे बाक्त। तुइक्तसे चोटी येसु यो जाम्मावत। 32 मिनु मेको निक्शीमी “मेकोमी लांम गो निक्शी नु लोव्र पवानु, परमप्रभु यावे आ लोव्र शेंदानु, इस थुं रांमी नांम तशो खोदेशो मदुम्सा डा?” देंमुसा बाक्त। उत्पत्ती १९:२६ 33 मिनु मेको रीब पा लेशशा, यरूसलेम लसा बाक्त। यरूसलेमम जाक्दीश्शा, येसु आ शेंसीब ११ जना नु मेको नु काथा बाक्बपुकी खुम्सीशा बाक्शो ग्रुम्से बाक्त। लूका ९:२४ 34 मेकोपुकीमी यो “प्रभु, थमा पा बेक्शो रे सेंसाक्व। मिनु सिमोन पत्रुस कली तपांइसाक्व” देंसा बाक्त। १कोरिन्थी १५:४-५ 35 मिनु मेको निक्शीमी लां गाक्सानु, मार मार दुम्मे, आस खिं जाक्दीश्शा मार दुम्मे, मेको नेल्ल तुइक्पदसे बाक्त। मिनु “शोब्ले योक्शा जचशोनु कका येसु बाक्मावत, दे तुइक्तस्कु” देंसा बाक्त।

येसुमी तपांइसीशो

36 मिनु मोपा लोवरी पामेनु, येसुमी आंम कली तपांइसे बाक्त। मर्कूस १६:१४-१९; यूहन्ना २०:१९-२३; प्रेरित १:१-१४; १कोरिन्थी १५:५ 37 मिनु “वोल कोर में” दे थाम्पा हिंमा बाक्त। मत्ती १४:२६ 38 मिनु येसुमी “मारदे आं कली तशा ‘वोल कोर में?’ दे हिंनी? वोल मनडा। वोल के श्ये रुश मबाक्ब। 39 आं कली थिशा कोवरीनी। 40 आं गुइ खोइलीमी कांटी थोक्शो गार कोवरीनी” देंमेनु, कोव्रडमे बाक्त। यूहन्ना २०:२० 41 मिनु छक लाक्शा “येसु बाक्म कौं, मबाक्म” दे दल्गीर पामे बाक्त। हिंमा यो बाक्त। ग्येरसमा यो बाक्त। मिनु येसुमी मेको आन कली दल्गीर पशो तशा “एक मारेइ जचा थोवरीक बाक्म कौं” दे पुना बाक्त। 42 मिनु वाल्शो डांइ का गेमे बाक्त। यूहन्ना २१:५, १०; प्रेरित १०:४१ 43 मिनु मेको डांइ ताक्शा, नेल्ल आन तचा डा पा ब्ववा बाक्त।

“साइ ब्रेक्शो लोव्र थमा दुम्ब” दे शेंशो

44 मिनु येसुमी आ शेंसीब आन कली “गो गे नु बाक्वी ना आ देंशो मोसा आ अरेशो लोव्र, परमप्रभु यावे आ लोव्र पाइब आन ब्रेक्शो नु भजन संग्रह आं पर्वम ब्रेक्शो लोव्र नेल्ल गाप्चा माल्ब, दे इन कली लोव्र पाता” देंमावत। लूका १८:३१-३३; लूका २४:२६-२७; लूका १८:३१ 45 मिनु नोले येसुमी परमप्रभु यावे आ ब्रेक्पाइश्शो लोव्र रुप्चा कली रुप्तीक थुं गेमी बाक्त। लूका ९:४५; यूहन्ना १२:१६ 46 मिनु मार ब्रेक्पाइक्की बाक्त देंशा हना “ख्रीस्त श्येत जशा, साइक्वा पुंइसीशा आ नित्थ नाक्ती बेक्शो रे सेंसीचा माल्ब। होसे ६:२ 47 मिनु यरूसलेम रे पा रागी नेल्ल डा मुर आन कली ‘गे इन थुं परमप्रभु यावे गे लेत्वा माल्नीनी। मिनु येसु ख्रीस्त आ नेंमी पाप क्याम्चा



तांइसीब' दे नेंपाइक्चा माल्ब" देंमाव्त। प्रेरित २:३८ प्रेरित १७:३०<sup>48</sup> मिनु मेकोमी "गे मेको नेल्ल तशा, सांकछी दुस्तीनी।<sup>49</sup> नेनीने, गो आं आफोम 'सक्ति गेनुड' देंशो सक्ति इन कली सोइक्नुड। तन्न इर डा सक्ति मतनी सम्म यरूसलेममी रिम्शा बाक्कीन" दे माइक्मी बाव्त। यूहन्ना १५:२६; यूहन्ना १६:७; प्रेरित २:१-४

येसु परमप्रभु आ बाक्तीके लशो

<sup>50</sup> मिनु नोले मेको आन कली यरूसलेम रे लाइश्शा, बेथानी गाउं चाक्दीश्शा, आ गुड पोक्शा मेको आन कली आसीक गेमी बाव्त।  
<sup>51</sup> आसीक गेना गेन बाक्मेनु, सरीड गे लाइक्चा पुंडसे बाव्त।<sup>52</sup> मिनु शेंसीबपुकीमी आन पोक्च थेक्शा, येसु कली ठेयब सेल्शा, थाम्पा ग्येरसीशा यरूसलेम लेम्मा बाव्त।<sup>53</sup> मिनु परमप्रभु यावे आ खिम बाक्ना बाक्न परमप्रभु यावे कली मान पा ठेयब सेल्मे बाव्त।

# यूहन्ना

एको किताब येसु आ शेंसीब यूहन्नामी ब्रेक्शो बाक्ब। मेको जब्दी आ तौ याकूब आ लोकब बाक्ब। यूहन्नामी एको किताब आं नें मब्रेक्शो बाक्त हना यो “येसु आ दाक्शो शेंसीब” दे आंम आ पबर्म ब्रेक्शो बाक्ब, दे नेल्लेम तुइश्शो बाक्नीम। यूहन्नामी “येसुमी दाक्शो शेंसीब” दे आंम कली खुइश्शो नें वोइश्शो बाक्ब।

यूहन्ना खाल्पा दुम्शा एफिसस सहरम बाक्शो बाक्त। मेना ८५-९८ ए. डी. मेर एको किताब ब्रेक्शो बाक्ब।

१. येसु मुर दुम्शो
२. येसु रागीम बाक्शो
३. येसु नु आ शेंसीब
४. येसु श्येत जशो
५. येसु बेक्शा सेंसीशो

## यसु ख्रीस्त रागीम जाक्शो

१ नेल्ल क्येडा डोंइती लोव्र माइश्शो का बाक्त। मेको लोव्र माइश्शो परमप्रभु यावे नु बाक्शा, मेको नु उइक्थी बाक्त। यूहन्ना १७:५; उत्पत्ती १:१; १ यूहन्ना १:१२; प्रकाश १९:१३ २ मिनु मेको रागी सेल्वा क्येडा डोंइती रे परमप्रभु यावे नु काथा बाक्शो बाक्त। ३ परमप्रभु यावेमी मेको कली नेल्ल सेल्पाइश्शो बाक्त। मार मार सेल्शो बाक्मे, मेको नेल्ल आ सेल्शो बाक्त। १ कोरिन्थी ८:६; कलस्सी १:१६; हिब्रू १:२ ४ मेको नु ब्रोंइतीक सोक्त बाक्शो बाक्त। मिनु मेको ब्रोंइतीक सोक्ती मुर आन कली छेडछेड बाक्त। यूहन्ना ८:१२ ५ मेको छेडछेड छिडछिडमी ब्राइब। मिनु छिडछिडमी छेडछेड कली काप्ने मचाप्ब। यूहन्ना ३:१९

६ मिनु परमप्रभु यावे आ सोइश्शो मुर का बाक्त। मेको आ नें यूहन्ना बाक्त। मत्ती ३:१; मर्कुस १:४ ७ यूहन्नामी छेडछेड माइश्शो सु बाक्म, दे शेंथ जाक्त। यूहन्नामी “मुर नेल्लेमी लोव्र माइश्शो कली थमा सुइक्ब दुम्मल” दे शेंताक्व। प्रेरित १९:४ ८ यूहन्ना छेडछेड माइश्शो ममाइ, छेडछेड आ पबर्म शेंब ला बाक्त। ९ मिनु छेडछेड माइश्शोमी रागीमी बाक्शो मुर नेल्ल आन कली रुक्ब थुं गेचा कली रागीमी जाक्त। १० मिनु रागीमी जाक्मेनु, आ सेल्शो मुरपुकीमी मेको कली “आंइ कली सेल्ब बाक्ब” दे मतुइक्तेम। ११ आंम रागी जाक्मेनु, आंम सेल्शो मुरपुकीमी मेको कली मन्नम। भजन संग्रह २४:१ १२ सु सुमी चहिं ब्रामे नु थमा सुदमे, मेको आन कली परमप्रभु यावे आ तमी तौ दुम्चा गेप्तु। गलाती ३:२६ १३ ठेयब जातमी जरमेतीके, मुर आन दाक्शोमी जरमेतीके नु मुर आन थुंमी मिम्शोमी ममाइ तन्न परमप्रभु यावे आ पतीके ला आ तमी तौ दुम्ने चाप्नीम। यूहन्ना ३:५-६

१४ मिनु लोव्र माइश्शो मुर दुम्शा, गोपुकी नु बाक्शो बाक्त। मेको शिशी पाइब नु परमप्रभु यावे आ लां कोंइब बाक्त। गोपुकीमी “परमप्रभु यावे आ कांइचीक तौ बाक्ब” दे तुइश्शा, मेको कली परमप्रभु यावे आ छेडछेड, आ शिशी नु आ थमा पतीकेमी ब्रीशो ताइतक। १ तिमोथी ३:१६; प्रस्थान ३३:१८; यसैया ६०:१; २ पत्रुस १:१६-१७ १५ यूहन्नामी मेको आ पबर्म “मेको आं नोले जाक्त हना यो, आं क्येडा ठेयब बाक्ब। मिनु आं क्येडा डोंइती यो बाक्शो बाक्त” देत। १६ आ शिशी पतीक गो शुश शिशी तना तन बाक्तक। यूहन्ना ३:३४; कलस्सी १:१९ १७ मोसामी परमप्रभु यावे आ अरेशो लोव्र गेप्तु। तन्न शिशी पाइब नु परमप्रभु यावे आ थमा लां कोंइब येसु ख्रीस्त रे बाक्ब। रोमी १०:४ १८ मुरपुकीमी परमप्रभु यावे कली गेनायो मतामे। तन्न परमप्रभु यावे नु बाक्ब आ कांइचीक तौमी मुर आन कली परमप्रभु यावे कली तुइक्पाइक्तु। यूहन्ना ६:४६; मत्ती ११:२७

## यूहन्नामी येसु ख्रीस्त आ पबर्म शेंशो

मत्ती ३:१-१२; मर्कुस १:१-८; लूका ३:१-१८

१९ मिनु यरूसलेम सहर डा यहूदीपुकीमी चढेब नु लेवी आ थर डा मुर आन कली यूहन्ना नु गुम्थ सोइक्ताक्म। मिनु मेकोपुकीमी यूहन्ना कली “गे सु ननी?” दे हिल्लो पास्तेक्म। २० यूहन्नामी जोल मपथु, ठीक लोव्र पशा “गो परमप्रभु यावे आ सोइश्शो ख्रीस्त मनड” देत। २१ मेकोपुकीमी “मिनु, गे एलीया ननी?” दे हिल्लो पास्तेक्म। मिनु यूहन्नामी “गो मेको यो मनड” देत। मिनु मेकोपुकीमी लेंशा “गे परमप्रभु यावे आ लोव्र पाइब ननी?” दे हिल्लो पास्तेक्म। मिनु मेकोमी “गो मेको यो मनड” देत। मलाकी ३:२३; मत्ती १७:१०-१३; ब्यक्स्था १८:१५ २२ मिनु नोले मेकोपुकीमी “मिनु, गे सु ननी? आंइ कली सोइक्ब आन कली मार माइक्वा, गे इन पबर्म मार देंनीनी?” दे हिल्लो पास्तेक्म। २३ मिनु यूहन्नामी “परमप्रभु यावे आ लोव्र पाइब यसैया आ देंशो खोदेंशो पा ‘गो गोरशो रागीमी बाक्शा, प्रभु आ लां रिम्शो ग्रीक्शा थेलीने’ दे लोव्र पाइब नड” देत। यसैया ४०:३

२४ मिनु हिल्लो पाइब का निक्शी फरिसी आन सोइश्शो बाक्तेक्म। फरिसी रिती थिती सेल्शा, रिम्शो पचा कली कोव्रब यो बाक्शो बाक्तेक्म। २५ मिनु यूहन्ना कली “गे ख्रीस्त मननी हना, एलीया मननी हना, परमप्रभु यावे आ लोव्र पाइब यो मननी हना, मारदे मुर आन कली ब्वाक्कुमी खुम्शा गुंइतीक गेय पाइनीनी?” दे हिल्लो पास्तेक्म। २६ मिनु यूहन्नामी “इन दातेमी मुर का बाक्शो बाक्ब, मेको कली गे मतुइक्नीनी। लूका १७:२१ २७ आं नोले जाक्शो बाक्त हना यो, गो मेको आ जुत्ता प्रुइक्वा यो मशिरनुड” देत। २८ मेना यूहन्नामी यर्दन खोला आइक्वी हांबु बेथानी गाउंमी मुर आन कली ब्वाक्कुमी खुम्शा गुंइतीक गेय पना पन बाक्त।

## ब्वाक्कुम खुम्ब यूहन्ना आ पबर्म लोव्र

मत्ती ३:१३-१७; मर्कुस १:९-११; लूका ३:२१-२२

२९ आ दीसा यूहन्नामी येसु कली आ बाक्तीक गे पिना पिन पशो तशा “परमप्रभु यावे आ पाठा मेकोन बाक्ब। मेकोमी रागी नेल्ल डा मुर आन मरिम्शो पशो क्याम्ब। यसैया ५३:७ ३० गो मेको आ पबर्म मार लोव्र पाता देंशा हना, मेको मुर आं क्येडा नोले जाक्त हना यो, आं क्येडा ठेयब बाक्ब। मिनु आं क्येडा डोंइती यो बाक्शो बाक्त। ३१ डोंइती गो यो मेको कली मतुइक्ब बाक्ती। तन्न गो मुल इस्राएल डा मुर आन कली मेको आ पबर्म तुइक्पाइक्वा कली ब्वाक्कुमी खुम्शा गुंइतीक गेय पथ जाक्ती” दे यूहन्नामी मुर आन कली देत। ३२ यूहन्नामी “गो परमप्रभु यावे आ सोक्त कली परवा बुदी सरीड रे बेरशा, येसु आ तारी जुक्शो ताता। ३३ डोंइती गो यो मेको कली मतुइक्ब बाक्ती। मिनु आं कली ब्वाक्कुमी खुम्शा गुंइतीक गेय पथ सोइक्बमी ‘तेको मुर तारी गेमी आं सोक्त जुक्शो ताइनेवे, मेको आं

सोक्तीम खुम्ब बाक्ब' दे परमप्रभु यावेमी माइक्ती।<sup>34</sup> मिनु गो मेको नेल्ल ताता। परमप्रभु यावे आ तौ मेकोन बाक्ब, दे तुइश्शा, इन कली तुइक्पाइक्त्तनी" दे यूहन्नामी दैत।

येसु ख्रीस्त आ शेंसीबपुकी

<sup>35</sup> मिनु आ नित्थ नाक्त्त यूहन्ना आ शेंसीब निक्शी नु बाक्माक्त्त। <sup>36</sup> मिनु यूहन्नामी येसु कली हिरशा गाक्शो तशा "कोव्रडीसे, मेरेन परमप्रभु यावे आ पाठा बाक्ब" दैत। <sup>37</sup> मिनु मेको शेंसीब निक्शीमी यूहन्ना आ लोव्र नेंशा, येसु आ नोले खोइक्ताक्त्त। <sup>38</sup> मिनु येसुमी लेश्शा कोव्रडानु, मेको आस कली खोइश्शो तशा "गे मार माल्सी?" दे हिल्लो पाप्तु। मिनु मेको निक्शीमी "शेंब, गे ते बाक्नीनी?" दे हिल्लो पाप्ताक्त्त। <sup>39</sup> मिनु येसुमी "गो नु पिशा, कोव्रडीस" दैत। मिनु मेको निक्शी आ बाक्तीक कोव्रथ लाम्ताक्त्त। मिनु मेको नाक्त्त येसु नु बाक्ताक्त्त। मारदे हना मेना ४ बजे खोइश्शो दुश्शो बाक्त्त। <sup>40</sup> यूहन्ना आ लोव्र नेंशा, येसु आ नोले खोइक्ब का अन्द्रीयास बाक्त्त। अन्द्रीयास सिमोन पत्रुस आ लोक्ब बाक्त्त। मत्ती ४:१८-२० <sup>41</sup> मिनु मेकेर रे लशा, अन्द्रीयासमी सिमोन कली गुम्शा "गो निक्शीमी मस्सीह कली गुम्तस्कु" दैत। मस्सीह चहिं ख्रीस्त, दे रुस्सीब। मस्सीह आ देंशो "परमप्रभु यावेमी मेको कली तेल लुक्शो बाक्ब" बाक्ब। <sup>42</sup> मिनु अन्द्रीयासमी सिमोन पत्रुस कली येसु नु गुम्पाइक्त्तु। येसुमी मेको कली तशा "गे योआन्नेस आ तौ सिमोन नवे। इ नें केफास देंचा माल्ब" दैत। केफास देंशो फुल्लु बाक्ब। ग्रीक लोव्रमी पत्रुस बाक्ब।

<sup>43</sup> मिनु आ सांबु नाक्ती येसुमी "गालील रागी लाइनुड" दैत। मिनु मेकेर लशा फिलीप कली गुम्तु। मिनु फिलीप कली "आं नोले खोइय्थी" दैत। <sup>44</sup> मेको फिलीप अन्द्रीयास नु पत्रुस खोइश्शो पा बेथसैदा सहर डा बाक्माक्त्त। <sup>45</sup> मिनु फिलीपमी नथानेल माइश्शो मुर कली गुम्शा, मेको कली "मोसामी नु परमप्रभु यावे आ लोव्र पाइबपुकीमी यो परमप्रभु यावे आ सोइश्शो का आ पर्बम ब्रेक्शो बाक्तेक्त्त। मिनु गोपुकीमी मेको कली गुम्तक। मेको नासरथ सहर डा योसेफ आ तौ येसु बाक्माक्त्त" दे नथानेल कली दैत। यसैया ५३:२; ब्यवस्था १८:१८; येरमीया २३:५; इजीकीएल ३४:२३ <sup>46</sup> मिनु नथानेलमी चहिं "नासरथ सहर रे सु रिश्शो मुर जाक्ने चाप्पा डा?" दे फिलीप कली दैत। मिनु फिलीपमी "लो, कोव्रडो" दैत। यूहन्ना ७:४१ <sup>47</sup> मिनु येसुमी नथानेल कली आ बाक्तीक जाक्शो तशा, नथानेल आ पर्बम "काइ जोल मपाइब नु रिश्शो गेय पाइब इस्राएली का बाक्ब" दैत। <sup>48</sup> मिनु नथानेलमी येसु कली "गे आं कली दोपा तुइक्नीनी?" दे हिल्लो पाप्तु। येसुमी "फिलीपमी इ कली गुम्चा डोंइती गो इ कली फोव्रशी रवा आ पुंमी निश्शो ताता" दैत। <sup>49</sup> मिनु नथानेलमी "शेंब, गे परमप्रभु यावे आ तौ ननी। गे इस्राएल डा मुर आन पिप ननी" दैत। यूहन्ना ६:६९; भजन संग्रह २:७; येरमीया २३:५; मत्ती १४:३३; मत्ती १६:१६ <sup>50</sup> मिनु येसुमी लेंशा "गो फोव्रशी रवा आ पुंमी इ कली ताता देंशो आ पर्बम गे थमा सुइक्तीवी। गे मेको क्येडा ठेयब गेय पशो ताइनेवे" दे माइक्त्तु। <sup>51</sup> मिनु लोव्र बोइश्शा "नोफा दाइश्शा नेनीने, गेपुकीमी सरीड रोक्शो ताइनीनी। मिनु परमप्रभु यावे आ स्वर्ग डा गेय पाइबपुकी रागीमी जरमेशो आ तार जुक्शो नु स्वर्ग गे लेश्शा लशो ताइनीनी" दे माइक्तीमी। उत्पत्ती २८:१२; मत्ती ४:११

डोंइती डा छक लाक्वा डा गेय

**2** आ सांबु नाक्ती गालील रागी डा काना सहरमी गुंवे का बाक्शो बाक्त्त। मिनु येसु आ ममा यो मेकेर लशो बाक्त्त। <sup>2</sup> येसु नु आ शेंसीब आन कली यो ब्रेश्शो बाक्तेक्त्त। <sup>3</sup> मिनु अडगुर शांबु नुम्मेनु, येसु आ ममामी येसु कली "अडगुर शांबु नुप्त्त" दैत। <sup>4</sup> मिनु येसुमी आ ममा कली "गो मार पचा माल्नुडा, आं कली मदेनीन। मुल सम्म आं पची मजा" दे माइक्त्तु। <sup>5</sup> मिनु आ ममामी गेय पाइब आन कली "एकोमी मार देंमे, मोदेंशो पने" दे माइक्तीमी। <sup>6</sup> मिनु मेकेर फुल्लु के मुशो ६ ओटा गर वोइश्शो बाक्तेक्त्त। यहूदी आन रिती थितीमी मुर आन कली चिक्चा, दे वोइश्शो बाक्तेक्त्त। मेको गर कामी २, ३ ठेयब पुक्तीक खोइश्शो ब्वाक्कु रिक्ब। मेत्रेतस माइश्शो ठेयब पुक्तीक का ३९ लिटर खोइश्शो बाक्ब। मर्कूस ७:३-४ <sup>7</sup> मिनु येसुमी गेय

पाइब आन कली "गर नेल्ल ब्वाक्कुमी प्रिंटीन" दैत। मिनु मेकोपुकीमी गर नेल्ल ब्वाक्कुमी प्रिताक्त्त। <sup>8</sup> मिनु "जचा योक्ब आन ठेयब मुर कली एको थाम्चा गेने" दे माइक्तीमी। मिनु मेकोपुकीमी आ देंशो खोइश्शो पाप्तेक्त्त। <sup>9</sup> मेको ठेयब मुरुमी मेको अडगुर शांबु दुश्शो ब्वाक्कु थाम्शा कोव्रडानु, जिजी कका पा ब्रोव्रशो बाक्माक्त्त। मेकोमी मेको अडगुर शांबु ते रे चाक्शो मतुइक्त्त। गेय पाइबपुकीमी ला तुइश्शो बाक्तेक्त्त। मिनु मेको ठेयब मुरुमी ग्युम्ले कली ब्रेश्शा <sup>10</sup> "मुर नेल्लेमी डोंइती ब्रोव्रशो अडगुर शांबु योक्नीम। तुशा रांडदमे नोले मब्रोव्रशो योक्नीम। गे चहिं मुल सम्म ब्रोव्रशो अडगुर शांबु खेक्शा वोइश्शो बाक्ते" दे माइक्त्तु। <sup>11</sup> मेको येसु आ डोंइती डा छक लाक्वा डा गेय बाक्त्त। मेको डोंइती पशो छक लाक्वा डा गेय गालील रागी डा काना माइश्शो सहरमी पशो बाक्त्त। मोपा मुर आन कली आ सक्ति कोंइशो बाक्त्त। मेको तशा आ शेंसीबपुकीमी येसु कली परमप्रभु यावे आ तौ बाक्त्त, दे थमा सुदमे बाक्त्त। यूहन्ना १:१४

<sup>12</sup> मिनु नोले येसु, आ ममा, आ लोक्बपुकी नु आ शेंसीबपुकी नु कापेरनाउम सहरमी यिशा, मेकेर इक्का नाक्त्त सम्म बाक्मा बाक्त्त। यूहन्ना ७:३; मत्ती १३:५५

येसु परमप्रभु आ खिं लशो

मत्ती २१:१२-१७; मर्कूस ११:१५-१९; लूका १९:४५-४८

<sup>13</sup> मिनु यहूदी आन पास्सा चाड जाक्वशो बाक्त्त। मोपतीके येसु यरूसलेम सहर लत। यूहन्ना ५:१; यूहन्ना ७:१०; मत्ती २०:१८; मर्कूस ११:१; लूका १९:२८ <sup>14</sup> परमप्रभु यावे आ खिं जाक्दीम्मेनु, मेकेर ब्यफ लेयबपुकी, भेडा लेयबपुकी, परवा लेयबपुकी नु क्येट फाइक्ब नेल्लेमी आन गेय पना पन बाक्शो ताप्तु। <sup>15</sup> मिनु येसुमी पले डोरी के युक्तीक सेल्शा, भेडा, ब्यफ लेयबपुकी नु क्येट फाइक्ब आन कली परमप्रभु यावे आ खिं रे खेरतीमी। क्येट फाइक्ब आन क्येट वोइक्तीक खोल्शा, क्येट नेल्ल फ्राम्तीमी। <sup>16</sup> मिनु येसुमी परवा लेयब आन कली "एको नेल्ल लतीन। आं आफ आ खिं कली ग्याप्तीक लेयतीक खिं मसेलीन" दे माइक्तीमी। <sup>17</sup> मिनु परमप्रभु यावे आ लोव्रमी "इन खिं कली थमा पा दाक्नुड। मेको दाक्तीक मी खोइश्शो पा आं थुंम चोइब" दे ब्रेक्शो बाक्ब, दे आ शेंसीबपुकीमी फ्रुक्तेक्त्त। भजन संग्रह ६९:९ <sup>18</sup> मिनु यहूदीपुकीमी येसु कली "इ के मो पचा डा अधिकार बाक्ब, दे आंइ कली मार चिन्ड कोंइने चाप्नेवे?" दैमानु, मत्ती २१:२३ <sup>19</sup> येसुमी "परमप्रभु यावे आ खिं प्रेतीन। गो नाक्त्त सांमी लेंशा सेल्ने थुम्नुड" दे माइक्तीमी। मत्ती २६:६१; मत्ती २७:४० <sup>20</sup> मिनु यहूदीपुकीमी "परमप्रभु यावे आ खिं सेल्चा कली ४६ बर्स माल्शो बाक्त्त। दोपा नाक्त्त सांमी सेल्ने चाप्नेवे डा?" दैतेक्त्त। <sup>21</sup> येसुमी आ रां आ पर्बम लोव्र पाप्तु। आ रां परमप्रभु यावे आ खिं बाक्ब। १कोरिन्थी ६:१९ <sup>22</sup> मिनु नोले परमप्रभु यावेमी येसु कली बेक्शो रे सेंदानु, आ शेंसीबपुकीमी डोंइती आ रां आ पर्बम पशो लोव्र फ्रुक्तेक्त्त। मिनु परमप्रभु यावेमी ब्रेक्पाइश्शो लोव्र नु येसु आ देंशो लोव्र थमा सुइक्तेक्त्त। होसे ६:२

<sup>23</sup> मिनु येसु पास्सा चाडम यरूसलेममी बाक्शा, छक लाक्वा डा गेय पवानु, मेको तशा, शुश मुरपुकीमी "परमप्रभु यावे आ तौ बाक्त्त" दे थमा सुइक्तेक्त्त। <sup>24</sup> येसुमी चहिं मेको आन कली थमा मसुद। <sup>25</sup> मारदे हना मुर नेल्ल आन कली तुइश्शा, आन पर्बम लोव्र नेंचा ममाल्द। आन थुंमी मार बाक्मे, मेको नेल्ल तुइश्शो बाक्त्त। मर्कूस २:८

परमप्रभु आ राज्य आ पर्बम शेंशो

**3** मिनु फरिसी आन हुल डा यहूदी आन ठेयब मुर का बाक्त्त। मेको आ नें निकोदेमस बाक्त्त। यूहन्ना ७:५०; यूहन्ना १९:३९ <sup>2</sup> मिनु नाक्दो मेको मुर येसु आ बाक्तीक जाक्शा, येसु कली "शेंब, गे परमप्रभु यावे आ सोइश्शो शेंब ननी, दे तुइक्नीकी। मारदे हना परमप्रभु यावे आ सोइश्शोमी ला गे इन खोइश्शो पा छक लाक्वा डा गेय पने चाप्" दैत। <sup>3</sup> मिनु येसुमी "नोफा दाइश्शा थमा लोव्र नेनीन, मुर लेंशा, इर रे नक पा मजरमेसाक्व हना, परमप्रभु यावे आ राज्य तने मचाप्" दैत। १पत्रुस १:२३ <sup>4</sup> मिनु निकोदेमसमी "कोल्शो मुर दोपा लेंशा जरमेने चाप्पा डा? मेको लेंशा,

आ ममा आ कोव्रज ओव्रशा, जरमेने चाप्बा डा?" दे हिल्लो पाप्तु।<sup>5</sup> मिनु येसुमी "नोफा दाइश्शा थमा लोव्र नेनीन, ब्वाक्कु रे नु परमप्रभु यावे आ सोव्रत रे जरमेशो मुरपुकी ला परमप्रभु यावे आ राज्य ओव्रने चाप्नीम। इजीकीएल ३६:२५-२७; मत्ती ३:११; तीतस ३:५<sup>6</sup> मुर आ रां रे जरमेशो मुरपुकी रागी कली ला गारनीम। परमप्रभु यावे आ सोव्रत रे जरमेशो मुरपुकी चहिं परमप्रभु यावे आ राज्य कली गारनीम। यूहन्ना १:१३; रोमी ८:५-९<sup>7</sup> मुर लेंशा जरमेचा माल्ब, दे आं लोव्र नेंशा छक मलाक्कीन।<sup>8</sup> फश ते रे जाक्ब, ते लाइबा मतुंडसीब। आ रेयके नेंशा यो ते रे गूबा, ते ते लाइबा, मतुंडसीब। परमप्रभु यावे आ सोव्रत रे जरमेशो मुर मेको खोदेंशो बाक्नीम" देंत।<sup>9</sup> मिनु निकोदेमसमी "इन देंशो दोपा दुम्ने चाप्बा डा?" दे हिल्लो पाप्तु।<sup>10</sup> मिनु येसुमी "गे इस्त्राएली आन कली शेंब दुम्शा यो, एको लोव्र मतुंडक्नीनी?"<sup>11</sup> नोफा दाइश्शा थमा लोव्र नेनीन, गो आंइ तुइश्शो लोव्र पाइनीकी। आंइ तशो यो शेंनीकी। गे चहिं आंइ शेंशो थमा मसुइक्नीनी।<sup>12</sup> गो इन कली रागी डा लोव्र पडानु, गे थमा मसुइक्नीनी। मिनु गो स्वर्ग डा लोव्र पाता हना, गे दोपा थमा सुइक्ने चाप्नीनी?"<sup>13</sup> मुर परमप्रभु यावे आ बाक्तीकेम मलम। स्वर्ग रे जाक्शो रागीमी जरमेशो ला परमप्रभु यावे आ बाक्तीकेमी बाक्शो बाक्त।<sup>14</sup> मोसा गोरशो रागीमी बाक्मेनु, कांसा के बुस्स सेल्शा, मेको कली क्युक्शा वोदा बाक्त। मोपा रागीम जरमेशो यो क्युक्शा पुंडसीब। गन्ती २१:८-९<sup>15</sup> मारदे क्युक्शा पुंडसीब देंशा हना, सुमी मेको कली थमा सुइक्बा, मेको गेना हना यो ब्रोंइशा बाक्वा ताइब" देंत।<sup>16</sup> परमप्रभु यावेमी रागी डा मुर आन कली शुश दाक्ताक्व। मोपतीके आ कांइचीक तौ रागीमी सोइक्ताक्व। सु सुमी मेको कली थमा सुइक्नीमी, मेकोपुकी नरक मलाइनीम। तन्न गेना हना यो परमप्रभु यावे नु बाक्वा ताइनीम। रोमी ५:८; रोमी ८:३२; १यूहन्ना ४:९<sup>17</sup> परमप्रभु यावेमी रागी डा मुर आन कली निसाफ पा नरकमी वोइक्वा, दे आ तौ मसोइक्व। तन्न रागी डा मुर आन कली नरक रे प्रोंइचा कली सोइक्ताक्व। लूका १९:१०<sup>18</sup> सुमी परमप्रभु यावे आ तौ कली थमा सुइक्बा, मेको स्वर्गमी निसाफ पचा मपुंडसीब। सुमी चहिं थमा मसुइक्बा, मेको डोंइती रेन निसाफ पा सजाइ तचा पुंडसीब दुम्शो बाक्ब। मारदे हना मेकोमी परमप्रभु यावे आ कांइचीक तौमी पाप रे प्रोंइब, दे थमा मसुइश्शो बाक्ब। यूहन्ना ५:२४<sup>19</sup> मिनु निसाफ दोदेंशो बाक्ब देंशा हना, छेडछेड माइश्शो रागीम जाक्त। मुरपुकीमी छेडछेड क्येडा छिडछिड कली शुश दाक्ताक्व। मारदे हना आन पशो गेय मरिश्शो बाक्त। यूहन्ना १:५, ९-११<sup>20</sup> सुमी मरिश्शो गेय पाइबा, मेकोम छेडछेड कली काइ मदाक्ब। आ गेय मतांइसेक्ल, दे छेडछेडमी मलाइब। एफिसी ५:१३<sup>21</sup> सुमी चहिं थमा पा रिश्शो गेय पाइबा, मेको छेडछेडमी लाइब। मारदे हना आ रिश्शो गेय परमप्रभु यावे कली टिशो नेल्ल तांइसेक्ल, दे छेडछेडमी लाइब। १यूहन्ना १:६-७

#### यूहन्नामी येसु आ परबम शेंशो

<sup>22</sup> मिनु नोले येसु नु आ शेंसीबपुकी यहूदीया रागी लाम्तेक्म। मेकेर आ शेंसीबपुकी नु बाक्शा, ब्वाक्कुमी ख्रुम्शा गुंडतीक गेय पाम्तेक्म। यूहन्ना ४:१-२<sup>23</sup> यूहन्नामी यो सालीम सहर आ नेक्था एनोन बाक्तीक डा शुश ब्वाक्कु बाक्तीकेमी ब्वाक्कुमी ख्रुम्शा गुंडतीक गेय पशो बाक्त। शुश मुर जाक्शा, ब्वाक्कुम ख्रुम्शा गुंडचा पुंडसाक्म।<sup>24</sup> मेना यूहन्ना जेल्खानम चोक्वा मपुंडसीशो बाक्त। मर्कूस १:१४

<sup>25</sup> मिनु यूहन्ना आ शेंसीबपुकीमी "दोपा पाप क्याप्सीबा?" दे यहूदी का नु लोव्र पाम्तेक्म।<sup>26</sup> मिनु यूहन्ना कली गुम्शा "शेंब, मेको यर्दन खोला आइक्वी हांबुम गे नु बाक्ब, इन तुइक्पाइश्शो परमप्रभु यावे आ तौम ब्वाक्कुमी ख्रुम्शा गुंडतीक गेय पाइब। मिनु मुर नेल्ल मेकेर लाइनीम" दे यूहन्ना कली देंतेक्म। यूहन्ना १:२६-३४<sup>27</sup> मिनु यूहन्नामी "परमप्रभु यावेमी गेशो गेय डा लाक्शा, सुइमी मारेइ गेय पने मचाप्नीम। हिब्रू ५:४<sup>28</sup> गे आं कली तुइक्नीनी। गो ख्रीस्त मनड। तन्न गो ख्रीस्त आ डोंइती शेंचा कली सोंइसीशो नड, दे आं शेंशो लोव्र तुइक्नीनी। यूहन्ना १:२०, २३, २७<sup>29</sup> ग्युम्लेमी ग्युम्ली कली चाक्शो तशा, आ लोव्र नेंशा, आ वारच ग्येरसीब।

मोपतीके गो थमा पा ग्येरसीनुड। मत्ती ९:१५<sup>30</sup> मेको ठेयब दुम्चा माल्ब। गो चहिं आइक्च दुम्चा माल्नुड।

<sup>31</sup> मेको स्वर्ग रे जाक्ब नेल्ल क्येडा ठेयब बाक्ब। रागी रे दुम्शो चहिं रागी डा मुर बाक्ब। रागी डा मुर आन परबम ला तुइश्शा लोव्र पाइब। स्वर्ग रे जाक्शो चहिं नेल्ल आन क्येडा ठेयब बाक्ब। यूहन्ना ८:२३<sup>32</sup> मिनु आ तशो नु आ नेंशो आ परबम लोव्र पाइब। तन्न सुइमी आ देंशो लोव्र थमा मसुइक्नीम।<sup>33</sup> सु सुमी आ देंशो थमा सुइक्नीम, मेकोपुकीमी 'परमप्रभु यावेमी डोंइती देंशो लोव्र थमा बाक्ब' दे तुइश्शा गेय पाइनीम।<sup>34</sup> परमप्रभु यावे आ सोइश्शोमी परमप्रभु यावे आ लोव्र पाइब। मेकोमी परमप्रभु यावे आ सोक्तीमी ब्रीतीके आ लोव्र पाइब। यूहन्ना १:१६<sup>35</sup> आफोमी आ तौ कली दाक्शा, मेको कली नेल्ल क्येडा ठेयब अधिकार गेपु। यूहन्ना ५:२०; मत्ती ११:२७<sup>36</sup> सुमी आ तौ आ देंशो थमा सुइक्बा, मेको गेना हना यो ब्रोंइशा बाक्वा ताइब। सुम चहिं आ देंशो मटीबा, मेको गेना हना यो ब्रोंइशा बाक्वा मतथु, परमप्रभु यावे आ गाइश्शो ताइब" दे यूहन्नामी शेंताक्व।

#### येसुमी सामरी आन कली शेंशो

<sup>4</sup> फरिसीपुकीम "प्रभु येसुमी यूहन्ना क्येडा शुश शेंसीब सेल्शा नु ब्वाक्कुमी ख्रुम्शा गुंडतीक गेय पाइब" दे तुइश्शो बाक्तेक्म। मेकोन येसुमी तुइक्ताक्व। यूहन्ना ३:२२-२६<sup>2</sup> मेको गेय येसुमी आंमा मपथु, आ डोंइती डा शेंशो १२ जना शेंसीब आन कली पपाइक्वु।<sup>3</sup> मिनु आ शेंसीबपुकी नु यहूदीया रागी रे पा, गालील रागी गे लाम्तेक्म।<sup>4</sup> मिनु लमानु, सामरीया रागी जाक्दीत्तेक्म।<sup>5</sup> सामरीया रागीमी गाक्शा, सीकार सहर जाक्दीत्तेक्म। सीकार सहर आ नेक्था याक्ब आ रू बाक्त। मेको रू आ तौ योसेफ आ थेरशो रू बाक्त। उत्पत्ती ४८:२२; यहोसु २४:३३<sup>6</sup> मेकेर याक्ब आ दोशो इनार यो बाक्त। मिनु येसु मेकेर जाक्दीश्शा, दशा, इनार तारी नांइसाक्व। मेना १२ बजे खोदेंशो दुम्शो बाक्त।<sup>7</sup> मेना सामरीया डा मीश मुर का ब्वाक्कु दिथ जाक्त। मिनु येसुमी मेको मीश मुर कली "ब्वाक्कु तूचा गेयी" दे पुंडतु।<sup>8</sup> मेना आ शेंसीबपुकी जचा थोव्रक ग्याथ सहर लशो बाक्तेक्म।<sup>9</sup> मिनु मीश मुरुमी "गे यहूदी ननी। गो चहिं सामरीया डा नड। मिनु आं गुइ रे दोपा ब्वाक्कु तूचा पुंडनीनी?" दे येसु कली मदा बाक्त। मारदे हना सामरी डा मुर आन थिशो ब्वाक्कु यहूदीपुकीमी मतूबाक्मा बाक्त। सामरीया डा मुरपुकी आइक्च जात डा मुर नम। लूका ९:५२-५३<sup>10</sup> मिनु येसुमी मेको मीश मुर कली "परमप्रभु यावेमी इ कली मार गेचा दाक्ब, दे तुइक्ताक्वी हना, नु ब्वाक्कु पुंडब, आं कली, सु बाक्नुड, दे तुइक्ताक्वी हना, आं कली 'ब्वाक्कु गेयी' दे पुंडदी वा। मिनु ब्रोंइचा गेब ब्वाक्कु गेन वा" दे मदा बाक्त। यूहन्ना ७:३८-३९<sup>11</sup> मिनु मीश मुरुमी "प्रभु, एको इनार दुइश्शो बाक्ब। इन के ब्वाक्कु गुंडतीक मबा। ते रे ब्रोंइचा गेब ब्वाक्कु गेनीनी?"<sup>12</sup> आंइ किकी पिप याक्ब क्येडा गे ठेयब ननी डा? याक्बमी आंइ कली एको इनार गेशो बाक्माक्त। एकेर डा ब्वाक्कु आंमा यो तूडा बाक्त। आ तौपुकी नु आ बी ब्यफपुकीमी यो एको ब्वाक्कु तूडमे बाक्त, दे मतुइक्नीनी?" देंत।<sup>13</sup> मिनु येसुमी "सुमी एको ब्वाक्कु तूबा, मेकोमी लेंशा तूतू दाक्ब। यूहन्ना ६:५८<sup>14</sup> तन्न सुमी आं गेशो ब्वाक्कु तूबा, मेकोमी लेंशा तूतू मदाक्ब। आं गेशो ब्वाक्कु मुर आगामी बुक्शो खोदेंशो पा बारशा, गेना हना यो ब्रोंइशा बाक्वा गेब" देंत। यूहन्ना ६:३५; यूहन्ना ७:३८-३९; भजन संग्रह ३६:१०<sup>15</sup> मिनु मीश मुरुमी "प्रभु, मेको ब्वाक्कु गेयीनी। मिनु तूतू मदाक्डल। ब्वाक्कु दिथ पिचा यो ममाल्डल" देंत।

<sup>16</sup> मिनु येसुमी "इ वोंइश ब्रेश्शा चाक्को" देंत।<sup>17</sup> मिनु मीश मुरुमी "आं वोंइश मबाक्ब" देंत। येसुमी "गे इ के वोंइश मबाक्ब, दे थमा लोव्र पाप्तीवी।<sup>18</sup> इ के ५ जना वोंइश बाक्तेक्म। मुल गे नु बाक्ब चहिं इ वोंइश ममाइ। इ लोव्र थमा बाक्ब" देंत।<sup>19</sup> मिनु "प्रभु, गे परमप्रभु यावे आ लोव्र पाइब का बाक्नी बाक्त। मोपतीके आं मारेइ मारेइ तुइक्ताक्वी।<sup>20</sup> आंइ किकी पिपीमी मेको डांडामी परमप्रभु यावे कली ठेयब सेल्शो बाक्तेक्म। गे यहूदीपुकीमी चहिं 'यरूसलेम सहरमी परमप्रभु यावे कली ठेयब सेल्वा माल्ब' दे देंनीनी" देंत। ब्यक्स्था १२:५; भजन संग्रह १२२:-<sup>21</sup> मिनु येसुमी मेको मीश मुर कली "इक्का नोले गे इं आफ कली मेको डांडामी नु

यरूसलेममी ठेयब मसेल्नीनी। गे आं देशो लोव्र थमा सुतो। 22 गे परमप्रभु यावे कली मतुइक्थु ठेयब सेल्नीनी। गो चहिं परमप्रभु यावे कली तुइश्शा ठेयब सेल्नीकी। मारदे हना पाप रे प्रॉइब यहूदी आन दाते रे जाक्ब। 22 राजा १७:२९-४१; यसेया २:३ 23 मिनु मुल नु नोले थमा पा आं आफ कली ठेयब सेल्बपुकीमी आ सोक्त आ पतीकेमी थमा पा ठेयब सेल्नीमी। आं आफोमी मोदेशो मुर माल्ब। 24 परमप्रभु यावे सोक्त बाक्ब। मिनु सुम मेको कली ठेयब सेल्नीमी, मेकोपुकीमी आ सोक्त पतीकेमी थमा पा ठेयब सेल्चा माल्नीम" देंत। 25 कोरिन्थी ३:१७; रोमी १२:१ 25 मिनु मीश मुरुमी "मस्सीह जाक्ब, दे तुइक्नुड। मेको कली ख्रीस्त यो देंनीमी। मेको जाक्शा, आंइ कली नेल्ल शेंब" देंत। यूहन्ना १:४१ 26 मिनु येसुमी "गे नु लोव्र पाइब, गो मेको नड" देंत।

27 मेना येसु आ शेंसीब जाक्तेक्म। मेकोपुकीमी मेको कली सामरीया डा मीश मुर नु लोव्र पशो तशा, छक लाक्तेक्म। तन्न सुइमी "मारदे गे मेको नु लोव्र पाइनीनी? मार माल्नीनी?" दे हिल्लो मपाम। 28 मिनु मीश मुरुमी आ गर प्रॉइशा, सहर लत। मिनु सहर जाक्दीश्शा, सहर डा मुर आन कली 29 "मुर का कली कोव्रथ पिने। मेकोमी आं पशो नेल्ल तुइश्शा गो नु लोव्र पापु। मेको ख्रीस्त बाक्म, कों?" दे मुर आन कली माइक्मी बाक्त। 30 मिनु सहर डा मुर नेल्ल येसु कली कोव्रथ जाक्तेक्म।

31 मिनु आ शेंसीबपुकीमी "शेंब, लो जने" देंतेक्म। 32 तन्न येसुमी "इन मतुइश्शा जचा थोव्रक गो नु बाक्ब" देंत। 33 मिनु शेंसीबपुकीमी "सुइमी जचा थोव्रक चाक्शा, गेमे कों" देंमुक्तेक्म। 34 येसुमी मेको आन कली "आं जचा थोव्रक मार बाक्ब देशा हना, आं कली सोइक्ब आ दाक्शो पचा नु आ देशो गेय थुम्चा। मेको आं के जचा थोव्रक बाक्ब। यूहन्ना ६:३८; यूहन्ना १७:४ 35 गेपुकीमी '४ महिना नोले बाली नाली रुप्ची जाक्ब' देंनीनी। गो चहिं रू कोव्रडीन, हो हो पा मीशा, रुप्ची जाक्शो बाक्ब। मत्ती ९:३७ 36 रुप्चमी गाल्च ताइब। मेकोमी गेना हना यो ब्रॉइशा बाक्चा कली मुर आन कली चाक्ब। मिनु शोक्ब नु रिक्ब नेल्ल कालेम ग्येरसीनीम। 37 मारदे हना 'का निक्शीमी शोक्नीम, का निक्शीमी रुप्चीम' देशो लोव्र थमा बाक्ब, दे तुंइसीब। 38 मिनु गो इन कली इन मशोक्शो रुप्च सोइक्नन्नी। अर्कोमी शोक्तीक गेय पाक्तेक्म। गे चहिं मेको आन शोक्शो रुप्चीनी" देंत।

39 मेको मीश मुरुमी सामरीया डा सीकार सहर डा मुर आन कली "आं पशो गेय नेल्ल माइक्ती" देशो नेंशा, सामरीया डा मुर शुशेमी "मेकोन परमप्रभु यावे आ सोइश्शा ख्रीस्त बाक्त" दे थमा सुदमे बाक्त। 40 मिनु सामरीया डा मुरपुकीमी येसु आ बाक्तीक जाक्शा "गो नु काथा बाक्कीन" दे पुंइतेक्म। मोपतीके येसु नाक्त निक्शी सम्म मेको नु बाक्त। 41 मिनु येसु आ शेंतीक लोव्र नेंशा, डोंइती क्येडा शुश मुरपुकीमी थमा सुइक्तेक्म। 42 मेकोपुकीमी मीश मुर कली "इ देंतीक गो थमा मसुइक्नीकी। तन्न आ शेंशो आंमा नेंतक। रागी डा मुर आन कली पाप रे प्रॉइब एकोन बाक्त, दे रुप्शा तुइक्ताक्क" देंतेक्म। प्रेरित ८:५-८

येसुमी आल कली सापाइश्शा

मत्ती ८:५-१३; लूका ७:१-१०

43 मिनु नाक्त निक्शी बाक्शा, येसु मेकेर रे गालील रागी गे लत। मत्ती ४:१२ 44 येसुमी "आंम रागी डा मुरपुकीमी परमप्रभु यावे आ लोव्र पाइब कली काइ महिक्नीम" देंत। मत्ती १३:५७ 45 मिनु गालील रागी जाक्मेनु, गालील डा मुरपुकीमी मेको कली ब्रांतेक्म। मारदे हना मेकोपुकीमी यो पास्सा नाक्त यरूसलेममी बाक्शा, येसु आ पशो नेल्ल तशो बाक्तेक्म। यूहन्ना २:२३

46 मिनु येसु डोंइती ब्वाक्कु रे अडगुर शांबु सेल्तीक गालील रागी डा काना सहरमी जाक्शो बाक्त। मिनु कापेरनाउम सहरमी पिप आ गेय पाइब कप्तान का बाक्शो बाक्त। मेको आ तौ रोइ पशो बाक्माक्त। यूहन्ना २:१, ९ 47 मेको कप्तानमी "येसु यहूदीया रे गालील रागीमी जाक्त" दे नेंशा, येसु कली गुम्थ जाक्त। मिनु मेकोमी येसु कली "आं तौ बेक्चा चिक्ताक्व, सापतीने" देंत। 48 मिनु येसुमी "गे चिन्ड नु छक लाक्चा डा गेय मताइतीनी हना, आं कली थमा मसुइक्नीनी" देंत। यूहन्ना २:१८; १कोरिन्थी १:२२ 49 कप्तानमी "प्रभु, आं तौ मबेक्थु, आं खिं जाक्कीन" दे पुंइतु। 50 मिनु

येसुमी "इन खिं लने, मारदे हना इन तौ साशा ब्रॉइब" देशा सोइक्ताक्व। मिनु येसु आ देशो थमा सुइश्शा, आ खिं लेश्शा लत। 51 मिनु लना लन बाक्मेनु, आ गेय पाइबपुकीमी लांमी गुम्था "इन तौ सात" दे शोव्रडमे बाक्त। 52 मिनु "गेना रे आं तौ साचा गोवा?" दे हिल्लो पवानु "सिनाक्त छकाल रे जरो शिक उइक्ताक्व" देंमा बाक्त। 53 मेको आल आ आफोमी "इन तौ साशा ब्रॉइब" दे येसुमी देंमेनु, सामाक्त, दे तुइक्ता बाक्त। मिनु मेको नु आ खिं डा मुर नेल्लेमी थमा सुदमे बाक्त। 54 येसुमी यहूदीया रे गालील रागी जाक्शा, खेयप निक्शी डा आ पशो छक लाक्चा डा गेय एको बाक्ब। यूहन्ना २:११

येसुमी खोइल मदुक्ब सापाइश्शा

5 यरूसलेममी यहूदी आन के चाड का बाक्त। मिनु येसु यरूसलेम लत। यूहन्ना २:१३ 2 यरूसलेम सहर कली गारोमी हिरशो बाक्ब। मेको गारोमी लाप्चोपुकी बाक्नीम। मेको गारो डा ठेयब लाप्चो का कली भेडा लाप्चो देंनीम। मेको आ नेक्थामी हिब्रू लोव्रमी बेथेस्टा माइश्शा दोम्ली का बाक्ब। मेको दोम्ली बाक्तीकेमी ५ ओटा पाटी खिं बाक्नीम। नेहेम्याह ३:१ 3 मेको खिं आगामी शुश रोइ पाइब, मिक्च मताइब, गुइ खोइल मदुक्ब, रां सोव्रशो रोइ पाइबपुकी बाक्शो बाक्तेक्म। मेको मुरपुकी दोम्ली डा ब्वाक्कु गेना हिम्सीब, दे कोव्रचा कली बाक्शो बाक्मा बाक्त। 4 मारदे हना परमप्रभु यावे आ स्वर्ग डा गेय पाइबमी यिशा, दोम्ली डा ब्वाक्कु कली हिम्बाक्माक्त। मिनु ब्वाक्कु हिम्सेनु, नेल्ल क्येडा डोंइती दोम्लीम गुम्ब आ रोइ साबाक्माक्त। 5 मिनु मेकेर ३८ बर्स सम्म रोइ पशो मुर का बाक्त। 6 मिनु येसुमी मेको कली तशा "मेको मुर शुश बर्स रोइ पशो बाक्त" दे तुइश्शा "गे साचा दाक्नेवे?" दे हिल्लो पापु। 7 मेको रोइ पाइबमी "प्रभु, ब्वाक्कु हिम्सेनु, आं कली दोम्लीमी ख्म्ब मुर सुइ मपिदु। मिनु गो हना यो 'लड' देंडानु, मुर का आं डोंइती ब्वाक्कुमी गुम्ब" देंत। 8 मिनु येसुमी "बोक्को, इ ब्राख्ये कुरशा गाक्को" दे माइक्तु। 9 मो देशोनु, मेको मुर आ रोइ साशा, छुल बोक्त। मिनु आ ब्राख्ये कुरशा गाक्त। मिनु मेको सापाइश्शा नाक्त चहिं नाइक्तीक नाक्त बाक्त। 10 मोपतीके यहूदीपुकीमी साशो मुर कली "मुलाक्त नाइक्तीक नाक्त बाक्ब। इ ब्राख्ये कुरचा मदुम्ब, दे मतुइक्ती?" देंतेक्म। प्रस्थान २०:१०; येरमीया १७:२१-२२ 11 मिनु मेकोमी "आं कली सापाइक्ब मुरुमी 'इ ब्राख्ये कुरशा गाक्को' दे माइक्ती" देंत। 12 मेकोपुकीमी "इ ब्राख्ये कुरशा गाक्को देंब मुर सु बाक्मे?" दे हिल्लो पाक्तेक्म। 13 मिनु मेकोमी "मतुइक्नुड" देंत। मारदे हना दोम्ली बाक्तीकेमी मुरपुकीमी पुम्दमेनु, येसु मेकेर रे गाक्ने थुम्शो बाक्त। 14 मिनु नोले येसुमी मेको साशो मुर कली परमप्रभु यावे आ खिंमी गुम्तु। मिनु "गे साते। मेको क्येडा ठेयब रोइ मपचा कली गे लेंशा पाप मपावो" दे माइक्तु। यूहन्ना ८:११ 15 मिनु साशो मुरुमी यहूदी आन कली गुम्थ लशा "आं कली सापाइक्ब दा येसु बाक्माक्त" दे माइक्ती बाक्त। 16 सापाइक्ची गेय नाइक्तीक नाक्ती पतीक यहूदीपुकीमी येसु कली श्येत गेचा गोम्तेक्म। मत्ती १२:१४ 17 मिनु येसुमी मेको आन कली "आं आफ मुल सम्म गेय पना पन बाक्ब। गो यो गेय पाइनुड" देंत। यूहन्ना ९:४ 18 आ लोव्र नेंशा, यहूदीपुकीमी येसु कली साइक्चा माल्तेक्म। मारदे हना नाइक्तीक नाक्ती गेय मपतीके क्याम्चा ला ममाइ "परमप्रभु यावे नु उइक्थ बाक्नुड। परमप्रभु यावे आं आफ बाक्ब" दे देशोमी, मेकोपुकीमी येसु कली साइक्चा माल्तेक्म। यूहन्ना ७:३०; यूहन्ना १०:३३

येसुमी यहूदी आन कली शेंशो

19 मिनु येसुमी यहूदी आन कली "नोफा दाइश्शा नेनीन, आं आफोमी मार पाइबा, आ तौमी मेको मतवा सम्म मारदे पने मचाप्ब। मिनु आफोमी दोदेशो पाइबा, तौमी मोदेशोन पाइब। यूहन्ना ३:११, ३२ 20 मारदे हना आं आफोमी आ तौ कली दाक्ब। मिनु आ पशो गेय नेल्ल आ तौ कली कोंइब। मिनु आं आफोमी मुल सम्म पपाइश्शा गेय क्येडा नोले ठेयब गेय कोंइपाइक्ब। मेको गेय तशा गेपुकी छक लाक्नीनी। ३:३५ 21 मिनु आं आफोमी बेक्शो आन कली दोपा सेंबा, मोपा आ तौमी यो सु कली बेक्शो रे सेंचा दाक्बा, मेको

कली सेंपाइक्व। दानीएल ७:१३-१४; प्रेरित १०:४२<sup>22</sup> आं आफोमी मुर आन कली निसाफ मपाइब। तन्न नेल्ल निसाफ पचा डा गेय आ तौ कली पपाइक्व।<sup>23</sup> मो दुम्मेनु, आं आफ कली मान पाइबपुकीमी आ तौ कली यो आफ कली खोदेशो पा मान पाइनीम। सुमी तौ कली मान मपाइबा, मेकोमी तौ कली सोइक्व आं आफ कली यो मान मपाइब। फिलिप्पी २:१०-११; १यूहन्ना २:२३<sup>24</sup> नोफा दाइशा नेनीन, सुमी आं लोव्र नेंबा नु आं कली सोइक्व आं आफ परमप्रभु यावे कली थमा सुइक्वा, मेको गेना हना यो ब्रॉइशा बाक्वा ताइब। सजाइ मताइब। मारदे हना बेक्शो रे गेना हना यो ब्रॉइशा बाक्वा ताइब। यूहन्ना ३:१६-१८<sup>25</sup> नोफा दाइशा नेनीन, बेक्शो मुरपुकीमी मुल परमप्रभु यावे आ तौ आ सेंदा नेनीम। सुमी नेंबा, मेको गेना हना यो ब्रॉइशा बाक्वा ताइब। एफिसी २:५-६<sup>26</sup> परमप्रभु यावे नु ब्रॉइतीक सोक्त बाक्व। मिनु आ तौ कली यो मोदेशो ब्रॉइतीक सोक्ती गेशो बाक्व। यूहन्ना १:१-४<sup>27</sup> मिनु आ तौ कली निसाफ पतीक अधिकार गेपु। मारदे हना आ तौ रागीमी जरमेसीशो बाक्व। दानीएल ७:१३-१४<sup>28</sup> आं देशो आ पर्बम छक मलाक्कीन। मारदे हना इक्का नोले तुरसुमी बाक्शो बेक्शो मुर नेल्लेमी रागीमी जरमेशो आ सेंदा नेनीम।<sup>29</sup> डोंइती रिश्शो पाइबपुकी गेना हना यो ब्रॉइशा बाक्वा कली सेंसीनीम। मरिश्शो पाइबपुकी चहिं सजाइ तचा कली सेंसीनीम। दानीएल १२:२; मत्ती २५:४६; २कोरिन्थी ५:१०

<sup>30</sup> मिनु गो आंम अधिकारमी मारदे पने मचापुनुड। गो दोदेशो नेंनुड, मोदेशो पा निसाफ पाइनुड। आं निसाफ चहिं ठीक बाक्व। मारदे हना आं दाक्शो मपथु, आं कली सोइक्व आ देशो पाइनुड। यूहन्ना ६:३८

येसु सु बाक्म, देशो सांकछी

<sup>31</sup> गो आं पर्बम लोव्र पाता हना, मेको लोव्र थमा बाक्व, दे थमा मसुइक्वीनी।<sup>32</sup> आं पर्बम अर्कोमी लोव्र पाइब, गो मेको तुइक्नुड।<sup>33</sup> मेको लोव्र देब चहिं यूहन्ना बाक्व। गे मेको कली 'गे सु ननी?' दे हिल्लो पथ सोइक्ताक्वी। मिनु यूहन्नामी आं पर्बम थमा पा शेंताक्व।<sup>34</sup> आं पर्बम शेंशो चहिं मुरुमी शेंतीक ममाइ। पाप पशो आ पर्बम सजाइ रे ब्रोनीन, दे इन कली देनुड।<sup>35</sup> यूहन्ना छेडछेड पा ब्रशो बत्ती खोदेशो बाक्व। गे मेको आ हाम्सोमी ग्येरशा बाक्वा दाक्ताक्वी।<sup>36</sup> मिनु यूहन्नामी आं पर्बम शेंशो ठेयब बाक्व हना यो, आं पर्बम मेको क्येडा ठेयब सांकछी का बाक्व। आं सांकछी मार बाक्व देशा हना, आं आफोमी आं कली पपाइश्शो गेय बाक्व। मेको आं पशो गेयमी 'परमप्रभु यावेमी आं कली सोइक्ताक्व' दे इन कली शेंब। यूहन्ना ३:२; यूहन्ना १०:२५:३८<sup>37</sup> आं कली सोइक्व आं आफ आं सांकछी बाक्व। गेपुकीमी आं आफ आ सेंदा गेनायो मनेनी। मेको कली गेनायो मतनी। मत्ती ३:१७<sup>38</sup> आं आफ आ लोव्र इन थुमी मबा। मोपतीके गेपुकीमी आं आफोमी सोइश्शो कली थमा मसुइक्वीनी।<sup>39</sup> गे परमप्रभु यावे आ लोव्र शेंसीन सीन बाक्वीनी। मारदे हना मो पशोनु, ब्रॉइशा बाक्वा ताइसीब, दे मिन्नीनी। मिनु परमप्रभु यावे आ लोव्रमी आं पर्बम ब्रेक्शो बाक्व। लूका २४:२७,४४; २तिमोथी ३:१५-१७<sup>40</sup> गे चहिं ब्रॉइचा तकल, दे आं गे मपीनीनी।

<sup>41</sup> गो मुर आन ठेयब सेल्लेके मब्राइनुड।<sup>42</sup> मिनु परमप्रभु यावेमी गेशो दाक्तीके गेपुकी नु मबाक्व, दे गो तुइक्नुड।<sup>43</sup> गो आं आफ आ नेमी जाक्ती। तन्न गेपुकीमी आं कली मब्रनी। सुइ मुर आंम आ नेमी जाक्त हना, मेको कली चहिं ब्राइनीनी। मत्ती २४:५<sup>44</sup> मोपा गे ठेयब सेल्लुइनीनी। तन्न का ला परमप्रभु यावेमी इन कली 'रिश्शो ननी' देंचा मपुइसीनीनी। आं कली दोपा थमा सुइक्ने चाप्नीनी डा? यूहन्ना १२:४२-४३; १थिस्सलोनिकी २:६<sup>45</sup> गो परमप्रभु यावे आ डोंइती इन कली दोस गेनन्नी, दे ममिन्नीन। गे मोसामी ब्रेक्शो लोव्रमी आस पाइनीनी। तन्न मेको मोसा आ ब्रेक्शो लोव्रमी इन कली दोस गेब। ब्यवस्था ३१:२४-२७<sup>46</sup> गे मोसा आ लोव्र थमा सुइक्नी हना, आं कली यो थमा सुइक्नी वा। मारदे हना आं पर्बम ब्रेक्शो बाक्व। उत्पत्ती ३:१५; उत्पत्ती ४९:१०; ब्यवस्था १८:१५<sup>47</sup> तन्न गे मोसा आ ब्रेक्शो लोव्र ठीक पा थमा मसुइक्वीनी। मिनु आं लोव्र दोपा थमा सुइक्ने चाप्नीनी डा?" दे येसुमी यहूदी आन कली देत। लूका १६:३१

शुश मुर आन कली थुल्शो

मत्ती १४:१३-२१; मर्कूस ६:३०-४४; लूका ९:१०-१७

<sup>6</sup> मिनु नोले येसु गालील डा समुन्द्र आइक्वी हांबु लत। गालील डा समुन्द्र कली तिबेरीयास समुन्द्र यो देनीम।<sup>2</sup> मिनु शुश मुरपुकीमी येसु आ नोले खोइक्तेक्म। मारदे हना येसुमी छक लाक्वा डा गेय पा, रोइ पाइब आन कली सापाइश्शो तशो बाक्तेक्म।<sup>3</sup> मिनु येसु आ शेंसीबपुकी नु आइक्वा डां डा गे डोइश्शा, तशो बाक्तेक्म।<sup>4</sup> मेना यहूदी आन पास्सा चाड जाक्चशो बाक्व। मोपतीके शुश मुर लांम गाक्शो बाक्तीक येसु आ नेक्था जाक्तेक्म। यूहन्ना २:१८; यूहन्ना ११:५५<sup>5</sup> येसुमी शुश मुर जाक्शो तशा, फिलीप कली "शोब्ले ग्याप्शा, नेल्ल आन कली दोपा थुल्चा?" दे हिल्लो पापु।<sup>6</sup> येसुमी चहिं "आं कली थमा सुइक्वा कों, मसुइक्वा" दे फिलीप आ थुं कोव्रचा कली मोदेशो देत। येसुमी "गो छक लाक्वा डा गेय पाइनुड" दे तुइक्ताक्व।<sup>7</sup> मिनु फिलीपमी "मेको मुरपुकीमी इक्कका ला जाक्तेक्म हना, सहै निक्शी देनारमी यो मेको आन कली शोब्ले ग्याप्शा कली मजाक्वी" देत। मेना देनार का काबु डा गेय आ गाल्व बाक्व।<sup>8</sup> मिनु सिमोन पत्रुस आ लोकब अन्द्रीयासमी येसु कली<sup>9</sup> "एकेर वोंइश आल का बाक्व। मेको नु ५ ओटा क्योव्रज के शोब्ले नु डांइ निक्शी बाक्व। एको इश डा मुर आन कली ओशोमी मार गाप्वा डा?" देत।<sup>10</sup> मिनु येसुमी "मुर आन कली निप्पतीन" देत। मेकेर रिश्शो दिंम का बाक्व। मिनु मुरपुकी नेल्ल निस्साक्म। आल नु मीश मुर प्रॉइशा, ५ हजार खोइ वोंइश मुर बाक्तेक्म।<sup>11</sup> येसुमी मेको शोब्ले ताक्वा "गे रिश्शो पाइब बाक्वीनी" दे परमप्रभु यावे कली ठेयब सेल्शा, मुर आन कली शोब्ले योक्पाइक्तीमी। मोदेशो पा डांइ यो योक्पाइक्तीमी। मिनु मुरपुकीमी दोशो जचा ब्वचा दाक्मा, मोशोन गेपाइक्तीमी।<sup>12</sup> मिनु मुर नेल्लेमी रूथी जामे नोले, येसुमी आ शेंसीब आन कली "एर ओंथ दोशो शोब्ले लीशो बाक्मे, मेको नेल्ल खुप्तीन" देत।<sup>13</sup> मिनु गुप्शा, १२ डालो प्रिंताक्म। मेको लीशा गुप्शो शोब्ले डोंइती डा ५ ओटा रे दुश्शो बाक्तेक्म।<sup>14</sup> मिनु मुरपुकीमी येसु आ पशो छक लाक्वा डा गेय तशा "रागीमी जाक्व परमप्रभु यावे आ लोव्र पाइब एकोन बाक्व" देतेक्म। ब्यवस्था १८:१५<sup>15</sup> मिनु येसुमी "आं कली ग्याइश्शा, पिप सेल्लनीमी" दे तुइश्शा, आ का ला डांडा डोंइसाक्व। यूहन्ना १८:३६

येसु ब्वाक्कु तार गाक्शो

मत्ती १४:२२-२३; मर्कूस ६:४५-५२

<sup>16</sup> मिनु नां रिक्वावानु, येसु आ शेंसीबपुकी गालील डा समुन्द्र आ नेक्था जाक्शा,<sup>17</sup> डोंगामी डोइश्शा, समुन्द्र शोक्शा, कापेरनाउम सहर गे लचा गोम्तेक्मे। मेना नां रिक्शो बाक्व। येसु चहिं लेश्शा मजाक्शो बाक्व।<sup>18</sup> मिनु ठेयब फश गिवार पा समुन्द्र डा ब्वाक्कु शुश मुइश्शा, डोंगा कली हिम्पाइक्व।<sup>19</sup> मिनु येसु आ शेंसीबपुकी डोंगा डोइश्शा, २५ कि ३० स्तादीयोन खोदेशो जाक्दीम्मानु, येसु कली समुन्द्र डा ब्वाक्कु तार गाक्वा गाक्व आन डोंगा गे पिशो ताम्तेक्म। मिनु मेको कली तशा "सु बाक्म" दे हिंतेक्म। स्तादीयोन का १८५ मिटर खोदेशो बाक्व।<sup>20</sup> मिनु येसुमी "गो नड, महिनीन" दे माइक्तीमी।<sup>21</sup> मिनु ग्येरसीशा, येसु कली डोंगामी डोइक्पाइक्तेक्म। मिनु डोंगामी डोइक्पाइश्शा, कापेरनाउम जाक्दीत्तेक्म।

येसु ब्रॉइचा गेब शोब्ले बाक्व

<sup>22</sup> मिनु आ दीसा नाक्व शोब्ले जाइब मुरपुकी मेक उइ बाक्शो बाक्तेक्म। सिनाक्ती समुन्द्र आ नेक्था डोंगा का ला बाक्व। मिनु येसु आ शेंसीबपुकीमी मेको डोंगा लाइश्शा, कापेरनाउम गे लाम्तेक्म, दे तुइक्ताक्म। येसु चहिं आ शेंसीबपुकी नु डोंगामी मला, दे यो तुइक्ताक्म।<sup>23</sup> तिबेरीयास सहर रे डोंगापुकी प्रभुमी परमप्रभु यावे कली "गे रिश्शो पाइब बाक्वीनी" देशा शोब्ले योक्तीक दिंम आ नेक्था जाक्तेक्म।<sup>24</sup> मिनु मुरपुकीमी येसु नु आ शेंसीबपुकी मेकेर मबाक्शो तशा, डोंगा डोइश्शा, कापेरनाउम गे लशा, येसु कली माल्तेक्म।<sup>25</sup> मिनु मेकेर जाक्दीश्शा, येसु कली थित्तेक्म। मिनु मेकोपुकीमी "शेंब, एकेर गेना जाक्नी?" दे हिल्लो पाम्तेक्म।<sup>26</sup> येसुमी

“नोफा दाइश्शा नेनीन, आं छक लाक्वा डा गेय आ पर्वम ममाइ, तन्न शोब्ले जशा रूतीके आं कली माल्तीनी। 27 राक्वा डा जचा थोव्रक कली श्येत मपने। मराक्वा डा जचा थोव्रक कली चहिं गेय पने। मराक्वा डा जचा थोव्रक मार बाक्मे देंशा हना, गेना हना यो ब्रॉइशा बाक्वा बाक्ब। रागीमी जरमेशोमी इन कली मेको जचा थोव्रक गेब। मारदे हना आ आफोमी रागीम जरमेशो कली आ छाप थोक्ताक्व” दे येसुमी शेंताक्व। यूहन्ना ५:३६ 28 मिनु येसु कली “परमप्रभु यावे आ देंशो पचा कली मार गेय पचा माल्तीकी?” दे हिल्लो पांम्तेक्म। 29 मिनु येसुमी “मेको परमप्रभु यावे आ गेय बाक्ब। गेपुकी परमप्रभु यावे आ सोइश्शो कली थमा सुइक्वा, परमप्रभु यावे आ गेय बाक्ब” दे माइक्तीमी। 30 मिनु मेकोपुकीमी लेंशा येसु कली “गे परमप्रभु यावे आ तौ ननी, दे कौंइचा कली मार छक लाक्वा डा गेय पाइनीनी?” 31 आंइ किकी पिपीमी गोरशो रागीमी मन्ना शोब्ले जशो बाक्तेक्म। ‘मेको आन कली सरीड रे शोब्ले गेम्तीमी’ दे ब्रेक्शो बाक्त” देंतेक्म। भजन संग्रह ७८:२४; प्रस्थान १६:१३-१५ 32 मिनु येसुमी “नोफा दाइश्शा नेनीन, मोसामी इन कली स्वर्ग रे शोब्ले गेशो ममाइ, तन्न आं आफोमी इन कली थमा पा स्वर्ग रे शोब्ले गेब। 33 मारदे हना परमप्रभु यावेमी गेशो शोब्ले स्वर्ग रे यीब। मेकोमी रागी डा मुर आन कली गेना हना यो परमप्रभु यावे नु ब्रॉइचा गेब” दे माइक्तीमी। 34 मिनु मेकोपुकीमी “प्रभु, मेको शोब्ले गेना हना यो गेकी” दे पुंइतेक्म।

35 मिनु येसुमी “गेना हना यो परमप्रभु यावे नु ब्रॉइचा गेब शोब्ले गो नड। सु सु आं गे पीनीमी, मेको शोवलु मबेक्नीम। मिनु आं कली थमा सुइक्वपुकी गेनायो तूतू मदाक्नीम। यूहन्ना ४:१४; यूहन्ना ७:३७ 36 गेपुकीमी चहिं आं कली तशो बाक्तीनी हना यो, थमा मसुइक्नीनी। 37 मिनु आं आफोमी आं कली गेशो मुरपुकी आं गे पीनीम। आं गे पीब आन कली गेनायो मतिल्लुडमी। मत्ती ११:२८ 38 मारदे हना गो आं दाक्शो गेय पथ ममाइ, तन्न आं कली सोइक्व आ दाक्शो गेय पचा कली स्वर्ग रे जाक्शो नड। यूहन्ना ४:३४ 39 मिनु आं कली सोइक्व आ दाक्शो मार बाक्ब देंशा हना, आं कली गेशो मुर का यो मसाम्बा, नु नोले डा नाक्तीमी मेको आन कली सेंपाइक्वा बाक्ब। यूहन्ना १०:२८-२९; यूहन्ना १७:१२ 40 मिनु सु सुमी परमप्रभु यावे आ तौ, दे आं कली तुइक्नीमी नु थमा सुइक्नीम। मेको आन कली नोले डा नाक्तीमी सेंपाइश्शा, गेना हना यो ब्रॉइशा बाक्वा गेनुडमी। आं आफ आ दाक्शो गेय मेकोन बाक्त” दे यहूदी आन कली शेंताक्व। यूहन्ना ५:२९; यूहन्ना ११:२४

41 मिनु यहूदीपुकीमी येसु आ लोव्र नेंशा गन गन पांम्तेक्म। मारदे हना येसुमी “गो स्वर्ग रे यिशो शोब्ले नड” देंशो बाक्त। 42 मिनु मेकोपुकीमी “मार, एको योसेफ आ तौ येसु ममाइ? मेको आ आम आफ कली गो तुइक्नीकी” देंतेक्म। मिनु मेकोमी “ ‘गो स्वर्ग रे जाक्शो नड’ दे दोपा देंने चाप्वा डा?” दे गन गन पांम्तेक्म। लूका ४:२२ 43 मिनु येसुमी मेको आन कली “गन गन मपने। 44 आं कली सोइक्व आं आफोमी आं कली गेशो मुर ला आं गे पिने चाप्नीम। अरु चहिं मचाप्नीम। आं कली गेशो मुर आन कली नोले डा नाक्ती सेंनुडमी। 45 मिनु परमप्रभु यावे आ लोव्र पाइब आन किताबमी ‘परमप्रभु यावेमी नेल्ल आन कली शेंब’ दे ब्रेक्शो बाक्त। तेकोमी आं आफ आ लोव्र नेंशा शेंसीबा, मेको आं गे पीब। यसैया ५४:१३ 46 सुइमी आं आफ कली मतामे। परमप्रभु यावे रे यीबमी ला आफ कली तशो बाक्त। यूहन्ना १:१८ 47 मिनु नोफा दाइश्शा नेनीन, सुमी थमा सुइक्वा, मेको गेना हना यो ब्रॉइशा बाक्वा ताइब। यूहन्ना ३:१६ 48 मिनु गो ब्रॉइचा गेब शोब्ले नड। यूहन्ना ६:३५ 49 इन किकी पिपीमी गोरशो रागीमी मन्ना शोब्ले जचा तांम्तेक्म हना यो, बेक्तेक्म। १कोरिन्थी १०:३-५ 50 तन्न मुरपुकीमी स्वर्ग रे यिशो शोब्ले कली जांम्तेक्म हना, मबेक्थु ब्रॉइशा बाक्नीम। 51 गो स्वर्ग रे यिशो ब्रॉइतीक शोब्ले नड। सुमी मेको शोब्ले जाइबा, मेको गेना हना यो परमप्रभु यावे नु बाक्शा ब्रॉइब। मिनु रागी डा मुर आन कली ब्रॉइपाइक्वा, दे मार शोब्ले गेनुड देंशा हना, आं गेशो शोब्ले आं रां बाक्ब” दे शेंताक्व। मर्कूस १४:२२

52 मिनु यहूदीपुकीमी “एको मुरुमी आंइ कली दोपा आ रां ब्वचा गेने चाप्वा?” दे लोव्र पा जिंम्तेक्म। 53 मिनु येसुमी “नोफा दाइश्शा नेनीन, गे रागीमी जरमेशो आं रां मब्वाइतीनी हना, नु आं हुश मतूतीनी हना, गेना हना

यो परमप्रभु नु ब्रॉइशा बाक्वा गेब सोक्ते गे नु मबाक्ब। 54 सु सुमी आं रां ब्वाइनीमी नु आं हुश तूनीमी, मेको गेना हना यो ब्रॉइशा बाक्वा ताइनीम। मारदे हना गो मेको कली नोले डा नाक्ती सेंपाइक्नुडमी। मत्ती २६:२६-२८ 55 आं रां थमा जचा थोव्रक बाक्ब। आं हुश यो थम तूचा थोव्रक बाक्ब। 56 सुमी आं रां ब्वाइबा नु आं हुश तूबा, मेको आं आगाम बाक्ब। मिनु गो मेको आ आगाम बाक्नुड। यूहन्ना १५:४; १यूहन्ना ३:२४ 57 दोपा ब्रॉइशा बाक्ब आं आफोमी आं कली सोइश्शा ब्रॉइपाइय्यी, मोपा आं रां ब्वाइब यो गो रे पा ब्रॉइचा ताइब। 58 मेको स्वर्ग रे यिशो शोब्ले बाक्ब। इन किकी पिपीमी शोब्ले जशा बेक्तेक्म। गो मेको खोदेंशो शोब्ले मगेनुड। सुमी चहिं आं शोब्ले जाइबा, मेको गेना हना यो ब्रॉइशा बाक्ब” देंत। 59 मेको लोव्र येसुमी कापेरनाउम सहर डा गुम्तीक खिंमी यहूदी आन कली शेंताक्व।

गेना हना यो ब्रॉइचा गेब लोव्र

60 मिनु मेको लोव्र नेंशा, येसु आ शेंसीबपुकी शुशेमी “एको आं शेंशो कका पा कशो लोव्र बाक्त। सु नेंने चाप्वा डा?” देंमुक्तेक्म। 61 येसुमी चहिं “आं शेंसीबपुकीमी आं लोव्र आ पर्वम गन गन पांम्तेक्म” दे तुइश्शा, मेको आन कली “मार, आं पशो लोव्र नेंशा, चुरशा आं कली प्रॉइनीनी? 62 मिनु रागीमी जरमेशो आ डॉइती डा बाक्तीकेमी लेशो ताइतीनी हना, मार मिन्नीनी? लूका २४:५०-५१ 63 परमप्रभु यावे आ सोक्ते ब्रॉइचा गेब बाक्ब। मुरुम चहिं मारदे पने मचाप्नीम। आं देंशो लोव्र परमप्रभु यावे आ सोक्ती डा ब्रॉइचा गेब लोव्र बाक्ब। 64 तन्न गे का निक्शी आं कली थमा मसुइक्व बाक्नीनी” देंत। मारदे हना येसुमी डॉइती रे आ कली थमा मसुइक्व सु सु नमी, दे तुइश्शो बाक्त। मिनु येसु आ शेंसीब का येसु कली साइक्व आन कली वारच पाइब दुम्ब, दे यो तुइश्शो बाक्त। 65 मिनु येसुमी “आं आफोमी आं कली गेशो मुर ला आं गे पिने चाप्नीम, दे डॉइती रे माइक्तन्नी” देंत।

66 मिनु मोदेंशो शेंशो आ पर्वम शुशेमी येसु आ नोले खोइक्वा प्रॉइतेक्म। 67 मिनु येसुमी आ १२ जना शेंसीब आन कली “गेपुकी यो लाइनीनी?” दे हिल्लो पांम्तीमी। 68 मिनु सिमोन पत्रुसमी “प्रभु, गो सु का आ नोले खोइक्नीकी? गे गेना हना यो ब्रॉइशा बाक्वा डा लोव्र पाइनीनी। 69 गे परमप्रभु यावेमी योव्रशा सोइश्शो ननी, दे तुइश्शा थमा सुइक्नीकी” देंत। मत्ती १६:१६ 70 मिनु येसुमी “गो गे १२ जना इन कली योव्रतन्नी। तन्न इन दातेमी सैतान का बाक्ब” देंत। 71 येसुमी मेको लोव्र इस्कारीयोत डा सिमोन आ तौ यहूदा आ पर्वम देंशो बाक्त। मारदे हना यहूदा मेको १२ जना आन दाते डा का दुम्शा यो येसु कली साइक्व आन कली वारच पाइब दुम्त।

बाली ऑइतीक चाडम लशो

7 मिनु नोले येसु गालील रागीमी हिरना हिरन बाक्त। मारदे हना यहूदीपुकीमी येसु कली साइक्वा माल्तीके यहूदीया रागीमी लचा मदाक्शो बाक्माक्त। यूहन्ना ४:४३ 2 मिनु यहूदी आन बाली ऑइतीक चाड जाक्चशो बाक्त। लेवी २३:३४-३६ 3 मिनु आ लोक्बपुकीमी येसु कली “इ शेंसीब आन कली इ गेय कौंइचा कली यहूदीया रागी लावो। यूहन्ना २:१२; मत्ती १२:४६; प्रेरित १:१४ 4 मुरपुकीमी इ कली तुइक्पाइसीचा दाक्नेवे हना, खूइश्शा गेय मपावो। इ पशो गेय मुर आन कली कौंइदीमी” देंतेक्म। 5 मारदे हना आ लोक्बपुकीमी यो येसु कली थमा मसुइक्वाक्तेक्म। 6 मिनु येसुमी आ लोक्ब आन कली “मुल सम्म आं लची मजा। गेपुकी लने चाप्नीनी। यूहन्ना २:४ 7 रागी डा मुरपुकीमी इन कली श्येत मगेनीम। आं कली चहिं श्येत गेनीम। मारदे हना गो मेको आन कली ‘आन पशो गेय मरिश्शो बाक्ब’ दे कौंइनुडमी। यूहन्ना १५:१८ 8 गे लने, गो मुल मलाइनुड। मुल आं लची मजा” दे माइक्तीमी। 9 मो देंशा येसु गालील रागीमी बाक्त।

10 मिनु येसु आ लोक्बपुकी चाड मानेथ लांम्तेक्म। मिनु नोले येसु यो मुर आन मतचा डा पा यरूसलेम लत। यूहन्ना २:१३ 11 मिनु चाडमी यहूदीपुकीमी येसु कली माल्शा “मेको ते बाक्मे” दे हिल्लो पांम्तेक्म। 12 मिनु मुरपुकीमी येसु आ पर्वम शुश खूइश्शा लोव्र पमुक्तेक्म। का निक्शीमी “रिश्शो मुर बाक्ब” देंतेक्म। का निक्शीमी चहिं “ममाइ, मुर आन

कली हेंथे गाक्पाइक्ब बाक्ब" देंतेक्म। 13 नेल्लेमी यहूदी आन क्येडा हिंशा, खुइश्शो लोत्र पास्तेक्म। यूहन्ना ९:२२; यूहन्ना १२:४२; यूहन्ना १९:३८

### येसु चाडम बाक्शो

14 मिनु बाली ऑइतीक चाड डा नाक्त का येसुमी परमप्रभु यावे आ खिंमी लशा, मुर आन कली शेंताक्व। 15 मिनु यहूदीपुकीमी छक लाक्शा "मेको गेनायो मशेंसीशो मुरुम यो दोपा इश डा जोक्गा?" देंमुस्तेक्म। मत्ती १३:५६ 16 मिनु येसुमी मेको आन कली "आं शेंतीक आं के ममाइ, तन्न आं कली सोइक्ब के बाक्ब। 17 सु मुरुमी परमप्रभु यावे आ दाक्शो पाइबा, मेकोमी आं शेंतीके लोत्र परमप्रभु यावे के बाक्बा कों, आंम के बाक्बा, दे तुइक्ब। 18 सुम चहिं आंम लोत्र शेंबा, मेकोमी आंम कली ठेयब सेल्चा दाक्ब। आं कली सोइक्ब परमप्रभु यावे कली ठेयब सेल्चा दाक्ब चहिं थमा पा काइ पाप मपाइब बाक्ब। यूहन्ना ५:४१,४५

19 मोसामी इन कली परमप्रभु यावे आ अरेशो लोत्र गेशो बाक्त। मिनु गेपुकी मारदे मेको मपाइनीनी? मारदे आं कली साइक्वा माल्नीनी?" देंत। रोमी २:१७-२४; यूहन्ना ५:१६-१८ 20 मिनु मुरुपुकीमी "सुमी इन कली साइक्वा माल्बा? वोलमी इन कली सुशो बाक्तीके 'गे आं कली साइक्वा माल्तीनी' दे देंनीनी" देंतेक्म। यूहन्ना १०:२० 21 येसुमी "गो गेय का पाता। गे मेको तशा, छक लाक्तीनी। यूहन्ना ५:१६ 22 मोसामी इन कली 'खोइक्तीक चिनु खोइक्वा माल्ब' दे अरेशो लोत्र गेशो बाक्त। मेको मोसा आ अरेशो ममाइ, इं किकी पिपी आन अरेशो बाक्त। मिनु गेपुकीमी नाइक्तीक नाक्त खोइक्तीक चिनु खोइक्तीनीनी। उत्पत्ती १७:१०-१२; लेवी १२:३ 23 मोसा आ गेशो अरेशो लोत्र टिचा कली नाइक्तीक नाक्त यो खोइक्तीक चिनु खोइक्तीनीनी। गो चहिं मुर का आ रां नेल्ल सापदुनु, गेपुकी मारदे गाइक्तीनी? 24 कुल कोव्रशा, निसाफ मपने। तन्न कुल मकोव्रथु निसाफ पने" दे माइक्तीमी।

25 मिनु यरूसलेम डा मुर का निक्शीमी "मुरुमी मेको कली साइक्वा माल्शो ममाइ? 26 मिनु एकेर बाक्शा, मुर नेल्ल आन कली शेंब। मेको कली मारेइ मदेनीमी। मिनु ठेयब मुरुपुकीमी 'एको खीस्त बाक्त' दे थमा पा तुइक्ताक्मे? 27 गेपुकीमी चहिं मेको मुर ते रे जाक्मे, दे तुइक्तीकी। तन्न खीस्त जाक्त हना, ते रे जाक्बा, दे सुइमी मतुइक्तीमी" दे देंमुस्तेक्म। हिब्रू ७:३ 28 मोपतीके येसुमी परमप्रभु यावे आ खिंमी मुर आन कली ठेयब सेंदा पा "गेपुकीमी आं कली तुइक्तीनी। मिनु गो ते डा नड, मेको यो तुइक्तीनी? आंमा मिश्शा मजाक्ड। तन्न आं कली सोइक्ब थमा पा परमप्रभु यावे बाक्ब। मिनु गेपुकीमी मेको कली मतुइक्तीनीनी। 29 गो चहिं मेको कली तुइक्नुड। मारदे हना गो मेको आ बाक्तीक रे जाक्शो नड। मेकोम आं कली सोइक्ताक्वी" दे शेंताक्मी। मत्ती ११:२७ 30 मिनु यहूदीपुकीमी येसु कली ग्याइक्वा माल्तेक्म। तन्न सुइमी मग्याइक्तेम। मारदे हना येसु कली ग्याइक्वी ना मजाक्शो बाक्त। यूहन्ना ८:२०; लूका २३:५२ 31 मिनु शुश मुरुपुकीमी मेको कली थमा सुइक्तेक्म। मेकोपुकीमी "खीस्त अर्को बाक्त हना, मेकोमी एको क्येडा शुश छक लाक्वा डा गेय पने चाप्बा डा?" देंतेक्म।

32 मिनु फरिसीपुकीमी मुर आन पशो लोत्र नेंशा, ठेयब चढेब नु फरिसीपुकीमी "येसु कली ग्याइक्वा" दे पिप आ गेय पाइब ठेयब मुर आन कली सोइक्ताक्म। 33 मिनु येसुमी "गो गेपुकी नु इक्का नाक्ती सम्म बाक्नुड। मिनु नोले आं कली सोइक्ब आ बाक्तीकेमी लाइनुड। यूहन्ना १३:३३ 34 मेना गेपुकीमी आं कली माल्नीनी। तन्न मथिल्तीनी। गे आं बाक्तीकेमी जाक्ने मचाप्नीनी" दे माइक्तीमी। यूहन्ना ८:२१ 35 मिनु यहूदीपुकीमी "एको ते लचा चिक्शो बाक्मे? मिनु गोपुकीमी एको कली मथिल्तीकी? ग्रीस डा मुर आन बाक्तीक लशा, मेकेर ब्रशा बाक्शो यहूदी आन कली ममाइ, तन्न ग्रीस डा मुर आन कली शेंबा दाक्बा, कों? 36 आ देंशो 'गेपुकीमी आं कली माल्नीनी, तन्न मथिल्तीनी' मिनु 'आं बाक्तीकेमी जाक्ने मचाप्नीनी' दे एको दोदेंशो लोत्र पवा?" देंमुस्तेक्म।

### यहूदीपुकी येसु आ पर्वम ब्राशो

37 मिनु बाली ऑइतीक चाड नुप्ची नाक्त नेल्ल क्येडा ठेयब नाक्ती बाक्त। मेना येसुमी मुर आन कली "सु सुमी तूतू दाक्नीमी, मेको आं गे पिशा तूडमेक्ल। लेवी २३:३६; यूहन्ना ४:१०; यसैया ५५:१; प्रकाश २२:१७ 38 सु सुमी आं कली थमा सुइक्तीमी, मेको आन रां रे ब्राइचा गेब ब्वाक्कु बुक्ब, दे परमप्रभु यावे आ लोत्रमी ब्रेक्शो बाक्ब" दे शेंताक्मी। यसैया ५८:११; येरमीया ३१:१२ 39 मेको आ शेंशो दोदेंशो रुम्सीब देंशा हना, येसुमी परमप्रभु यावे आ सोक्त आ पर्वम शेंशो बाक्त। येसु कली थमा सुइक्बपुकीमी मेको सोक्त कली तचशो बाक्तेक्म। तन्न मेना सम्म परमप्रभु यावे आ सोक्त थमा सुइक्ब आन कली मगेशो बाक्त। मारदे हना येसु आ आफ आ छेडछेडम लाइक्वा मपुंडसीशो बाक्त। यूहन्ना १६:१७

40 मिनु येसु आ शेंशो नेंशा, मुर का निक्शीमी "एकोन थमा परमप्रभु यावे आ लोत्र पाइब बाक्ब" देंतेक्म। यूहन्ना ६:१४ 41 का निक्शीमी "एकोन खीस्त बाक्त" देंतेक्म। का निक्शीमी "खीस्त गालील रागी रे जाक्बा डा? यूहन्ना १:४६ 42 परमप्रभु यावे आ लोत्रमी 'खीस्त दाऊद आ खिं डा मुर रे नु दाऊद आ गाउं बेथलेहेम रे जाक्ब' मदेम डा?" देंतेक्म। मत्ती २२:४२; मीका ५:१; मत्ती २:५-६ 43 मोदुम्तीके मुरुपुकी येसु आ पर्वम ब्रातेक्म। यूहन्ना ९:१६ 44 मिनु का निक्शीमी येसु कली ग्याइक्वा माल्तेक्म। तन्न सुइमी मेको कली मग्याइक्तेम।

45 मिनु मेको पिप आ गेय पाइब ठेयब मुरुपुकी ठेयब चढेब नु फरिसी आन बाक्तीक लेम्मा बाक्त। मिनु मेको आन कली "मारदे मेको कली मचाक्नी?" दे हिल्लो पामेनु, 46 "मेको मुरुम शेंशो खोदेंशो पा सुइमी गेनायो मशेंदेम" देंमा बाक्त। मत्ती ७:२८-२९ 47 मिनु फरिसीपुकीमी "इन कली यो हेंथे खोइक्पदा? 48 ठेयब मुरुपुकी नु फरिसीपुकीमी यो मेको कली थमा सुदमे? 49 तन्न परमप्रभु यावे आ अरेशो लोत्र मजाक्बपुकी सराप रशो बाक्नीम" दे हुइक्तेम बाक्त।

50 मिनु डॉइती येसु आ बाक्तीक जाक्शो फरिसी आन हुल डा निकोदेमस माइश्शो मुरुमी यूहन्ना ३:१-२ 51 "आं ऐन कानुनमी मुर आ पशो नेंशा ला निसाफ पाइनीम, ममाइ?" देंत। ब्यवस्था १:१६ 52 मेकोपुकीमी "गे यो गालील रागी डा नवे? परमप्रभु यावे आ लोत्र ब्रेक्शो किताब पढेशा कोव्रडो। गालील रे सुइ परमप्रभु यावे आ लोत्र पाइब मगूब, दे मतुइक्नेवे?" देंमा बाक्त। 53 मिनु नेल्ल छुल छाल बोक्शा, खिं लमा बाक्त।

### फरिसीपुकीमी येसु आ थुं थाम्शो

8 मिनु मेको नेल्ल खिं लमानु, येसु चहिं जैतून डांडा डॉइसाक्व। 2 आ दीसा सुनी कना यिशा, परमप्रभु यावे आ खिं लत। मिनु मुर नेल्ल येसु आ नेक्था जाक्तेक्म। मिनु येसुमी निश्शा, मुर आन कली शेंताक्मी। 3 मिनु सास्त्री नु फरिसीपुकीमी येसु आ बाक्तीकेमी मीश मुर का चाक्तेक्म। मेको मीश मुर ग्युंवे पशा यो अरु वॉइश नु इप्शो बाक्माक्त। मेको कली मुर आन दातेमी राप्पाइक्तेक्म। सास्त्री यहूदी आन कली परमप्रभु यावे आ अरेशो लोत्र शेंब बाक्शो बाक्तेक्म। 4 मिनु येसु कली "शेंब, एको मीश मुर ग्युंवे पशो बाक्त हना यो, अरु आ वॉइश नु इप्शा बाक्शो थित्वा पुंडसाक्व 5 मिनु परमप्रभु यावे आ अरेशो लोत्रमी मोसामी 'मोदेंशो पाइब कली फुल्लु आप्शा साइक्वा' दे आंइ कली अरेशो बाक्त। गे मार देंनीनी?" दे हिल्लो पास्तेक्म। लेवी २०:१० 6 मेकोपुकीमी येसु आ थुं थाम्शा, दोस गेचा कली मो देंतेक्म। मिनु येसुमी बाप्शा, फुरक शाक्शा ब्रेक्ताक्व। 7 मेकोपुकीमी "एको मीश मुर कली मार पचा?" दे हिल्लो पना पन बाक्तेक्म। येसुमी चहिं राप्शा, मेको आन कली "गेनायो पाप मपाइबमी डॉइती फुल्लु आबल" देंत। रोमी २:१ 8 मिनु लेंशा बाप्शा, फुरक शाक्शा ब्रेक्ताक्व। 9 मिनु येसु आ लोत्र नेंशा, दोस गेब मुर जोक्ब तुइक्ब खाल्पा रे का का पा नेल्ल लाक्तेक्म। मिनु येसु नु मेको मीश मुर ला लीताक्व। 10 येसुमी नेल्ल लशो तशा, मीश मुर कली "इ कली चाक्बपुकी ते लमा? इ कली साइक्ब सुइ मलीमा?" दे हिल्लो पवानु 11 "प्रभु, सुइ मलीम" देंत। मिनु येसुमी "गो यो इ कली मसाइक्नुड। लावो, मिनु लेंशा पाप मपावो" देंशा सोइक्ताक्व। यूहन्ना ५:१४



### येसु रागी डा छेडछेड

12 मिनु येसुमी लेंशा फरिसी आन कली “गो रागी कली छेडछेड नड। आं नोले खोइक्वपुकी गेनायो छिडछिडमी मगावनीम। ब्रॉइतीक छेडछेड ताइनीम” दैत। यूहन्ना १:५,९; यसैया ४९:६; यसैया ६०:२०; मत्ती ५:१४-१६ 13 मिनु फरिसीपुकीमी येसु कली “गे इ पर्वम आंमा लोव पाइनेवे। मोपतीके इ लोव थमा ममाइ” दैतेक्म। 14 मिनु येसुमी मेको आन कली “गो आं पर्वम आंमा लोव पाता हना यो, आं लोव थमा बाक्ब। मारदे हना ते रे जाक्डा, ते लाइनुडा, मेको तुइक्नुड। गेपुकी चहिं गो ते रे जाक्डा, ते लाइनुडा मतुइक्नीनी। यूहन्ना ५:३१; यूहन्ना ७:२८ 15 मिनु गेपुकी मुर आन कुल कोवशा निसाफ पाइनीनी। गो चहिं सुइ आन कली निसाफ मपाइनुड। यूहन्ना ३:१७ 16 गो निसाफ पाता हना यो, आं निसाफ ठीक बाक्ब। मारदे हना गो का ला दुश्शा निसाफ मपाइनुड। गो नु आं कली सोइक्ब आं आफोमी निसाफ पाइब। 17 इन ऐन कानुनमी यो ‘मुर निक्शी आस दैशो नैशो लोव थमा दुम्ब’ दे ब्रेक्सीशो बाक्ब। ब्यवस्था १९:१५ 18 गो आं पर्वम लोव पाइनुड। मिनु आं कली सोइक्ब आं आफोमी आं पर्वम लोव पाइब” दे माइक्तीमी। 19 मिनु मेकोपुकीमी येसु कली “इ आफ ते बाक्बा?” दे हिल्लो पास्तेक्म। येसुमी “गेपुकीमी आं कली मतुइक्नीनी। आं आफ कली यो मतुइक्नीनी। आं कली तुइक्तीनी हना, आं आफ कली यो तुइक्तीनी वा” दे माइक्तीमी। यूहन्ना १४:७ 20 येसुमी परमप्रभु यावे आ खिं डा शोंप वोइक्तीक कोठा आ डोंइती बाक्शा, मोदेंशो शेंशो बाक्त। परमप्रभु यावे आ खिंमी बाक्शा शेंशा यो, सुइमी मग्याइक्तेम। मारदे हना मेको कली ग्याइक्वी ना मजाक्शो बाक्त। यूहन्ना ७:३०

### आ आफोमी येसु कली सोइश्शो

21 मिनु येसुमी लेंशा यहूदी आन कली “गो लाइनुड, गे चहिं आं कली माल्नीनी। मिनु मरिश्शो पतीकेमी गुश्शा बेक्नीनी। गे आं लतीकेमी जाक्ने मचाप्नीनी” दैत। यूहन्ना ७:३४-३५; यूहन्ना १३:३३ 22 मिनु यहूदीपुकीमी “एकोमी आंम कली सांइसीबा, को? मारदे ‘आं लतीकेमी जाक्ने मचाप्नीनी’ दैबा” दैमुक्तेक्म। 23 मिनु येसुमी मेको आन कली “गेपुकी उइ डा ननी। गो चहिं इर डा नड। गेपुकी रागी डा ननी। गो चहिं रागी डा मनड। यूहन्ना ३:३१ 24 मोपतीके गो इन कली ‘गे इन मरिश्शो पतीकेमी गुश्शा बेक्नीनी’ दैती। गेपुकीमी ‘गे मरिश्शो गेय रे प्रॉइब ननी’ दे आं कली थमा मसुइक्तीनी हना, इन मरिश्शो पतीकेमी गुश्शा बेक्नीनी” दैत। यसैया ४३:१० 25 मिनु यहूदीपुकीमी “गे सु नवे” दे हिल्लो पास्तेक्म। येसुमी मेको आन कली “गो इन कली डोंइती रे मार देंडा? मारदे गो गेपुकी नु लोव पडा? 26 गो इन पर्वम शुश लोव पचा नु शुश निसाफ पचा माल्नुड। आं कली सोइक्ब आं आफ आ लोव थमा लोव बाक्ब। मेको आ लोव नैशा, रागी डा मुर आन कली शेंनुड” दैत। 27 मिनु येसुमी आ आफ आ पर्वम लोव पाप्नु, दे मेकोपुकीमी मरुबेम। 28 येसुमी “गेपुकी रागीमी जरमेशो कली क्युक्नीनु, गो सु नडा, दे तुइक्नीनी। मिनु गो आंमा मिश्शो मारदे मपाइनुड। तन्न आं आफोमी आं कली दोदेंशो शेंदा, मोदेंशो लोव इन कली शेंनुड। यूहन्ना ३:१४; यूहन्ना १२:३२ 29 मिनु आं कली सोइक्ब गो नु बाक्ब। आं कली गेनायो मप्रॉइब। मारदे हना गो आ दाक्शो गेय ला पाइनुड” दे मुर आन कली दैत।

### थमा पा प्रॉइशो मुर

30 एको लोव नैशा, शुश मुरुमी येसु कली थमा सुइक्तेक्म। 31 मिनु येसुमी आ कली थमा सुइक्ब यहूदी आन कली “गेपुकी आं दैशो पना पन बाक्तीनी हना, थमा पा आं शेंसीब ननी। यूहन्ना १५:७ 32 थमा माइश्शो सु बाक्मे, दे तुइक्नीनी। मिनु थमा माइश्शोमी इन कली प्रॉइब” दे येसुमी दैत। 33 मेकोपुकीमी “गे अब्राहाम आ चच युइ नकी। मुल सम्म गो सुइ आन वाइलीम वाइल मदुश्शो बाक्तक। मारदे ‘थमा माइश्शोमी इन कली प्रॉइब’ दैनीनी?” दे हिल्लो पास्तेक्म। मत्ती ३:९ 34 येसुमी “नोफा दाइश्शा नेनीन, सु सुमी पाप पाइनीमी, मेको पाप आ वाइलीम वाइल बाक्नीम। 35 वाइलीम

वाइल खिं डा मुर मबाक्नीम, तौ चहिं खिं डा मुर बाक्ब। 36 मिनु तौमी इन कली प्रॉइतु हना, गेपुकी थमा पा प्रॉइसीशो मुर दुम्नीनी” दैत। रोमी ६:१६, १८, २२

### अब्राहाम आ आल नु सैतान आ आल

37 मिनु येसुमी “गेपुकी अब्राहाम आ चच युइ ननी, दे गो तुइक्नुड। मोपा यो गे आं कली साइक्वा माल्नीनी। मारदे हना आं लोव नैशा यो, थमा मसुइक्नीनी। 38 गो आं आफ आ पशो तशा, शेंनुड। गेपुकीमी चहिं इन आफ आ दैशो नैशा, मार मार पाइनीनी” दे माइक्तीमी। 39 मेकोपुकीमी “गे आंइ आफ अब्राहाम बाक्ब” दैमानु, येसुमी “गेपुकी अब्राहाम आ चच युइ ननी हना, अब्राहाम आ पशो गेय खोदेंशो पनी वा। 40 गो परमप्रभु यावेमी दैशो नैशा, इन कली शेंथ जाक्शो बाक्ती हना यो, गेपुकीमी आं कली साइक्वा माल्नीनी। अब्राहाममी इन खोदेंशो गेय गेनायो मपव। 41 गेपुकीमी चहिं इन आफ आ पशो गेय खोदेंशो पाइनीनी” दे माइक्तीमी। मेकोपुकीमी “गेपुकी मुर आन तौ मनकी। गेपुकी आंइ के आफ का बाक्ब। मेको चहिं परमप्रभु यावे बाक्ब” दैतेक्म। 42 मिनु येसुमी “परमप्रभु यावे इन आफ बाक्त हना, गेपुकी आं कली दाक्तीनी वा। मारदे हना गो परमप्रभु यावे रे रागीमी जाक्ती। गो आंमा जाक्शो मनड। तन्न आं आफोमी सोइक्ताक्वी। 43 आं दैशो लोव मारदे मरुप्नीनी? गे आं लोव नैशा, फाल्ने मचाप्नीनी। १कोरिन्थी २:१४ 44 इन आफ सैतान बाक्ब। मिनु गे इन आफ आ दाक्शो पचा दाक्नीनी। मेको चहिं डोंइती रे मुर आन कली साइक्ब नु जोल पाइब बाक्त। मारदे हना मेको नु थमा दैशो बाक्सीन मबा। मोपतीके जोल ला पाइब। मेको जोल पना पन बाक्ब। जोल आ आफ बाक्त। १यूहन्ना ३८-१०; उत्पत्ती ३:४, १९ 45 गे आं कली थमा मसुइक्नीनी। मारदे हना गो थमा लोव पाइनुड। 46 गेपुकीमी आं कली ‘गे मरिश्शो पाइब नवे’ दे दोसी सेल्ने चाप्नीनी डा? गो थमा लोव पाता हना, मारदे आं कली थमा मसुइक्नीनी? २कोरिन्थी ५:२१; १पत्रुस २:२२; १यूहन्ना ३:५; हिब्रू ४:१५ 47 सु चहिं परमप्रभु यावे रे जाक्बा, मेको परमप्रभु यावे आ लोव नैब। गेपुकी परमप्रभु यावे रे मजाक्नी। मोपतीके परमप्रभु यावे आ लोव नैने मचाप्नीनी” दे माइक्तीमी। यूहन्ना १८:३७ 48 मिनु यहूदीपुकीमी “गे सामरीया डा बाक्ते। गे वोलमी सुश्शो बाक्ते, दे थमा लोव मपका डा?” दैतेक्म। यूहन्ना ७:२० 49 येसुमी “आं कली वोलमी मसुप्ती। गो आं आफ कली मान पाइनुड। गे चहिं आं कली मान मपथु आइक्च सेल्नीनी। 50 गो आंम कली ठेयब मसेल्सीनुड। आं कली ठेयब सेल्ब का बाक्ब। मेको ठीक निसाफ पाइब यो बाक्ब” दैत। 51 मिनु येसुमी “नोफा दाइश्शा नेनीन, सुमी आं दैशो लोव टीबा, मेको गेनायो मबेक्ब” दैत। यूहन्ना ६:४०, ४७ 52 मिनु यहूदीपुकीमी “गे वोलमी सुश्शो बाक्ते, दे गो मुल तुइक्ताक्क। अब्राहाम नु परमप्रभु यावे आ लोव पाइबपुकी बेक्तेक्म। गे चहिं ‘सुमी आं दैशो टीबा, मेको गेनायो मबेक्ब’ दैते। 53 आंइ किकी पिपी अब्राहाम बेक्माक्त। गे मेको क्येडा ठेयब नवे? मिनु परमप्रभु यावे आ लोव पाइब यो बेक्मा बाक्त। गे सु नवे डा?” दैतेक्म। 54 येसुमी “गे ठेयब सेल्साक्वी हना, गो ठेयब मदुम्नुड। आं आफोमी चहिं आं कली ठेयब सेल्ब। गे आं आफ कली ‘आंइ परमप्रभु यावे’ दैनीनी। यसैया ६३:१६ 55 गेपुकीमी मेको कली मतुइक्नीनी। तन्न गो तुइक्नुड। गो ‘मेको कली मतुइक्नुड’ दैती हना, इन खोदेंशो जोल पाइब दुम्नुड। तन्न गो मेको कली तुइक्नुड। मिनु आ शेंशो पाइनुड। यूहन्ना ७:२८-२९ 56 इन किकी पिपी अब्राहाममी आं नाक्त जाक्शो तचा दाक्शो बाक्माक्त। मिनु आं जाक्शो तशा ग्येरसाक्व” दे येसुमी दैत। 57 मिनु यहूदीपुकीमी “गे मुल सम्म ५० बर्स मजाक्दीश्शो बाक्ते। मिनु अब्राहाम कली तशो बाक्नेवे डा?” दैतेक्म। 58 मिनु येसुमी “नोफा दाइश्शा नेनीन, गो अब्राहाम क्येडा डोंइती रे बाक्शो नड” दैत। यूहन्ना १:१२ 59 मिनु यहूदीपुकीमी “फुल्लु आप्शा साइक्वा” दे फुल्लु गुप्तेक्म। तन्न येसु खूंइसाक्व। मिनु परमप्रभु यावे आ खिं रे गूशा गाक्त। यूहन्ना १०:३१

## मिक्च मताइब कली सापाइश्शो

9 मिनु येसु लना लन बाक्मेनु, जरमेशो रेन मिक्च मताइब मुर का गुम्तु।<sup>2</sup> मिनु आ शॅसीबपुकीमी येसु कली “शॅब, मारदे मेको मिक्च मताइब जरमेशो बाक्मे? मेकोमी पाप पवा देय आ आम आफोमी पाप पाप्से?” दे हिल्लो पाप्तेक्म। लूका १३:२<sup>3</sup> मिनु येसुमी “एको मुरुमी पाप पशो ममाइ, आ आम आफोमी यो मपाप्से। तन्न परमप्रभु यावे आ गेय कौंइचा कली एको मिक्च मताइब दुश्शो जरमेशो बाक्त। यूहन्ना ११:४<sup>4</sup> मिनु गोपुकीमी आं कली सोइक्ब आ गेय नाक्ती पचा मालन्य। नां रिक्मेनु, सुइमी गेय पने मचाप्नीम। यूहन्ना ५:१७; येरमीया १३:१६<sup>5</sup> गो रागीमी बाक्डानु, रागी कली छेडछेड नड” देंत। यूहन्ना ८:१२; यूहन्ना १२:१५<sup>6</sup> मो दॅशा येसुमी खपीमी तोक्शा, नाक्चुक नु खप निशा, मेको मुर आ मिक्चीमी खेक्ताक्व। मर्कूस ८:२३<sup>7</sup> मिनु मिक्च मताइब कली “सिलोआ डा दोम्लीम लशा चिक्सो” दे माइक्तु। सिलोआ दॅशो चहिं सोइश्शो, दे रुम्सीब। मिनु मेको लशा चिक्से बाक्त। मिनु मिक्च ताइब दुश्शा, लेशा जाक्त।

## सापाइश्शो मुर नु यहूदीपुकी

8 मिनु आ गाउं डा मुर नु मिक्च मताइब पुंइब मुर दे तुइक्बपुकीमी “मिक्च मताइब पुंइब एको ममाइ डा?” देंतेक्म।<sup>9</sup> का निक्शीमी “मेकोन बाक्त” देंतेक्म। का निक्शीमी चहिं “ममाइ, मेको खोदॅशो बाक्त” देंतेक्म। आ चहिं “गो मेकोन नड, शां” देंत।<sup>10</sup> मुरपुकीमी “दोपा मिक्च ताइब दुमे, मिनु?” दे हिल्लो पाप्तेक्म।<sup>11</sup> मेकोमी “येसु माइश्शोमी खप निशा, आं मिक्चीमी खेक्ताक्वी। मिनु “सिलोआ डा दोम्लीम लशा चिक्सो” दे माइक्ती। मिनु गो दोम्ली लशा चिक्सीडानु, मिक्च ताइब दुम्ती” दे माइक्तीमी।<sup>12</sup> मिनु “येसु माइश्शो ते बाक्मे” दे हिल्लो पामेनु “डाद, ते लमे, गो मतुइक्नुड” दे माइक्तीमी।

<sup>13</sup> मिनु आ मिक्च साशो मुर कली फरिसी आन बाक्तीक चाक्दीत्तेक्म।<sup>14</sup> येसुमी खप निशा, आ मिक्चीमी खेक्शा सापाइश्शो नाक्त चहिं नाइक्तीक नाक्त बाक्त।<sup>15</sup> मोपतीके फरिसीपुकीमी यो लॅशा मेको कली “दोपा मिक्च ताइब दुमे?” दे हिल्लो पाप्तेक्म। मिनु “खप निशा, आं मिक्चीमी खेक्ताक्वी। मिनु गो चिक्शा, मुल मिक्च ताइब दुम्ती” दे माइक्तीमी।<sup>16</sup> फरिसी का निक्शीमी “परमप्रभु यावे आ सोइश्शो ममाइ। मारदे हना नाइक्तीक नाक्त ममानेब” देंतेक्म। का निक्शीमी चहिं “पापी मुरुमी दोपा ओदॅशो छक लाक्वा डा गेय पने चाप्बा डा?” देंतेक्म। मिनु मेकोपुकी ब्रातेक्म।<sup>17</sup> मिनु फरिसीपुकीमी लॅशा आ मिक्च साशो कली “मिनु इ कली मिक्च ताइब सेल्ब आ पर्बम मार देंनेवे?” दे हिल्लो पाप्तेक्म। मिनु मेकोमी “परमप्रभु यावे आ लोत्र पाइब बाक्त” देंत।

<sup>18</sup> यहूदीपुकीमी “मेको मुर डौंइती मिक्च मताइब बाक्त” दे थमा मसुदेम। मोपतीके मेको आ आम आफ आस कली ब्रेत्ताक्म।<sup>19</sup> मिनु मेको आस कली “एको इस तौ ममाइ? डौंइती मिक्च मताइब जरमेसाक्व देंतीसी? मुल दोपा तने चबा?” दे हिल्लो पाप्तेक्म।<sup>20</sup> मिनु आम आफोमी “आंस तौ बाक्ब। मिनु मिक्च मताइब जरमेसाक्व।<sup>21</sup> मुल दोपा मिक्च ताइब दुम्मे, गो मतुइक्नस्कु। सुम ताइब सेला, मेको यो मतुइक्नस्कु। आ कली हिल्लो पने। आल ममाइ, आंमान देंने चाप्ब” देंताक्स।<sup>22</sup> आ आम आफोमी यहूदी आन क्येडा हिंशा मो देंताक्स। मारदे हिंसा दॅशा हना, यहूदीपुकीमी “सुम सापाइक्ब कली ख्रीस्त दे थमा सुइक्बा, मेको कली यहूदी आन गुम्तीक खिं रे तिल्चा” दे सल्ला पशो बाक्तेक्म। यूहन्ना ७:१३; यूहन्ना १२:४२<sup>23</sup> मोपतीके “आल ममाइ। आ कली हिल्लो पने” दॅशो बाक्ताक्स।

<sup>24</sup> मिनु मिक्च ताइब दुश्शो कली लॅशा ब्रेश्शा “परमप्रभु यावे कली मान पावो। इ कली मिक्च तपाइक्ब पापी बाक्माक्त, दे तुइक्नीकी” देंतेक्म।<sup>25</sup> आ मिक्च साशो मुरुमी “मेको पापी बाक्म कौं, मबाक्म, गो मतुइक्नुड। डौंइती मिक्च मताइब बाक्ती, मुल ताइब दुम्ती, मेको ला तुइक्नुड” दे माइक्तीमी।<sup>26</sup> मिनु मेकोपुकीमी “मेकोमी इ कली मार पवा? दोपा इ

मिक्च ताइब सेला?” दे हिल्लो पामेनु<sup>27</sup> “गो ना कना माइक्तन्नी। गोपुकी चहिं मनेनीनी। मारदे लॅशा नॅचा दाक्नीनी? गोपुकी यो मेको आ शॅसीब दुम्चा दाक्नीनी?” दे माइक्तीमी।<sup>28</sup> मिनु “गे मेको आ शॅसीब नवे। गोपुकी चहिं मोसा आ शॅसीब नकी।<sup>29</sup> परमप्रभु यावेमी मोसा कली लोत्र पशो बाक्त, दे तुइक्नीकी। तन्न मेको मुर ते रे जाक्मे, दे गो मतुइक्नीकी” दे हुइक्ताक्म।<sup>30</sup> मिनु आ मिक्च साशो मुरुमी “गो इन कली तशा, छक लाक्ती। आं मिक्च सापाइक्तु हना यो, मेको ते रे जाक्मे, दे गोपुकीमी मतुइक्नीनी?”<sup>31</sup> परमप्रभु यावेमी पापी आन लोत्र मनेब, दे गोपुकीमी तुइक्नय। तन्न सुमी परमप्रभु यावे कली मान पशा, आ दाक्शो पाइबा, परमप्रभु यावेमी मेको कली आ पुंइशो गेब। भजन संग्रह ६६:१८; यसैया १:१५; हितोपदेस १५:२९<sup>32</sup> मिनु रागी सेल्चा गोशो रे जरमेशो रे मिक्च मताइब मुर मिक्च ताइब सेल्शो, दे गेनायो मनेय।<sup>33</sup> मेको परमप्रभु यावे आ सोइश्शो मबाक्त हना, छक लाक्वा डा गेय पने मचाप्ब वा” देंत।<sup>34</sup> मिनु “गे पापी जरमेशो बाक्ते। आंइ कली मार शॅनेवे?” दे हुइश्शा, मेको कली गुंइताक्म।

## सापाइश्शो मुर नु येसु

<sup>35</sup> मिनु येसुमी मेको कली यहूदी आन गुम्तीक खिं रे तिल्लेक्म दॅशो नॅशा, मेको कली गुम्शा “गे रागीमी जरमेशो कली थमा सुइक्नेवे?” दे हिल्लो पाप्तु।<sup>36</sup> मेकोमी “प्रभु, मेको सु बाक्मे, गो मेको कली थमा सुइक्नुड” देंत।<sup>37</sup> मिनु येसुमी “गे मेको कली तशो बाक्ते। गे नु लोत्र पाइब मेकोन बाक्त” देंमेनु, यूहन्ना ४:२६<sup>38</sup> “प्रभु, गो थमा सुइक्नुड” देंशा, पोक्च थेक्शा, येसु कली ठेयब सेल्तु।<sup>39</sup> येसुमी “गो निसाफ पचा कली रागीमी जाक्ती। मिक्च मताइबपुकीमी तामेक्ल। मिक्च ताइब चहिं मताइब दुम्मल” देंत। मत्ती १३:११-१५<sup>40</sup> येसु आ नेक्था बाक्ब फरिसी का निक्शीमी आ लोत्र नॅशा, येसु कली “गोपुकी मिक्च मताइब दुम्नीकी?” देंमानु,<sup>41</sup> येसुमी “गोपुकी मिक्च मताइब नकी देंतीनी हना, पाप मरनी वा। तन्न गोपुकी मिक्च ताइब नकी देंतीनी। मोपतीके पाप राइनीनी” दे माइक्तीमी। यूहन्ना १५:२२

## रिश्शो भेडा गोठला

10 मिनु येसुमी लॅशा मेको आन कली “नोफा दाइश्शा नेनीन, सु सु भेडा गोठ आ लाप्चो रे मओवनीमी। बार रे डोइश्शा ओवनीमी, मेकोपुकी खुइ नु रोइक्ब नम।<sup>2</sup> सु लाप्चो रे ओवबा, मेको भेडा गोठला बाक्ब।<sup>3</sup> गोठला जाक्मेनु, लाप्चो खाल पाइबमी मेको कली लाप्चो रोक्ब। भेडापुकीमी गोठला आ सॅदा नॅनीम। गोठलामी आंम भेडा आन नॅ थिशा ब्रेश्शा, गोठ रे गुंइब।<sup>4</sup> मिनु नेल्ल आन कली गुंइशा, भेडा आन डौंइती गाक्ब। भेडापुकीमी गोठला आ नोले खोइक्नीम। मारदे हना आ सॅदा तुइक्नीम।<sup>5</sup> सॅदा मतुइश्शो मुर आ नोले मखोइक्नीम। मेको कली तशा प्रोक्नीम। मारदे हना आ सॅदा मतुइक्नीम” दे येसुमी शॅताक्मी।<sup>6</sup> येसुमी मुर आन कली मेको कथा शॅशो बाक्त। तन्न मार लोत्र शॅशो बाक्मे, मेकोपुकीमी मरुप्शो बाक्तेक्म।

<sup>7</sup> येसुमी लॅशा मेको आन कली “नोफा दाइश्शा नेनीन, गो भेडा गोठ डा लाप्चो नड।<sup>8</sup> सु सु आं डौंइती जाक्मा, मेको नेल्ल खुइ नु रोइक्ब नम। मिनु भेडापुकीमी मेको आन लोत्र मटीनीमी।<sup>9</sup> गो लाप्चो नड। सु सु मेको लाप्चो रे ओवनीमी, मेकोपुकी श्येत रे ब्रौइनीम। मिनु रिश्शो घांस बाक्तीकेमी लशा, जोचा ताइनीम। यूहन्ना १४:६<sup>10</sup> खुइमी दा खुइ पथ, साइक्थ नु प्रेत्थ ला जाक्ब। गो चहिं भेडा आन कली ब्रौइचा गेशा, ग्येरसीशा बाक्मल, दे जाक्ती” दे शॅताक्व।

<sup>11</sup> मिनु येसुमी “गो रिश्शो गोठला नड। रिश्शो गोठला भेडा आन पा डा साइक्चा पुंइसीब। भजन संग्रह २३:-; यसैया ४०:११; इजीकीएल ३४:११-२३; यूहन्ना १५:१३; हिब्रू १३:२०<sup>12</sup> मिनु खिं डा गोठला मबाक्थु, वोइश्शो गोठला बाक्त हना, मेकोमी भेडापुकी रिश्शो पा मकोवब। मारदे हना मेको आ भेडा मनमी। फर पिशो तशा, भेडा आन कली प्रौइशा, प्रोक्ब। फरमी चहिं भेडा आन कली ग्याइश्शा साव सुव ब्रपाइक्ब।<sup>13</sup> मिनु मेको वोइश्शो गोठला प्रोक्ब। मारदे हना भेडा आइक्के मनम, मोपतीके रिश्शो पा

मकोव्रब। 14 गो रिम्शो गोठला नड। दोपा गो आं भेडा आन कली तुइक्नुडमी, मोपा मेकोपुकीमी आं कली तुइक्नीम। *रतिमोथी २:१९*  
 15 दोपा आं आफोमी आं कली तुइक्बा, मोपा गो आं आफ कली तुइक्नुड। मिनु भेडा आन पा डा गो साइक्वा पुंडसीनुड। 16 मेको गोठ डा ला ममाड, अरु गोठ डा भेडा यो आं के बाक्नीमी। गो मेको आन कली यो चाक्वा माल्नुड। मेकोपुकीमी आं सेंदा नेंशा, आं कली टीनीमी। मोपा गोठला का नु बगाल का दुम्ब। *यूहन्ना ११:५२; प्रेरित १०:३४-३५* 17 मेको आन साइक्वा पुंडसीचा डा गो साइक्वा पुंडसीनुड। मोपतीके आं आफोमी आं कली दाक्ब, मिनु आं कली बेक्शो रे सेंब। 18 गो साइक्वा मपुंडसाक्वी हना, सुइमी आं कली साइक्ने मचाप्नीम। गो आं के साइक्वा पुंडसीतीके अधिकार बाक्ब। मिनु बेक्शो रे सेंसीचा अधिकार यो बाक्ब। मेको अधिकार निम्फा आं आफोमी गेती” दे शेंताक्व। *यूहन्ना ५:२६*

19 येसु आ लोव्र नेंशा, यहूदीपुकी लेंशा ब्रातेक्म। *यूहन्ना ७:४३; यूहन्ना ९:१६* 20 शुश यहूदीपुकीमी “एको वोलमी सुम्शा गशो बाक्त। मारदे आ लोव्र नेंनीनी?” दैतेक्म। *यूहन्ना ७:२०; मर्कूस ३:२१* 21 का निक्शीमी चहिं “एको आ लोव्र वोलमी सुम्शो मुर आ पशो खोदेंशो मनेंसीब। वोलमी मिक्व मताइब मुर आ मिक्व तपाइक्ने चाप्बा डा?” दैतेक्म।

### यहूदीपुकीम येसु कली खेदा पशो

22 मिनु यरूसलेममी परमप्रभु यावे आ खिं डा डोंइती ओव्रतीक चाड जाक्शो बाक्त। 23 मिनु मेको हिंडेम बाक्त। मिनु येसु परमप्रभु यावे आ खिं डा पिप सोलोमन आ सेल्शो लाडगामी हिरना हिरन बाक्त। *प्रेरित ३:११*  
 24 यहूदीपुकी येसु आ एर आंथ देल्शा “गेना आंइ कली ठीक लोव्र पाइनीनी? गे ख्रीस्त ननी हना, लोव्र महिरथु, थमा पा देनीन” दैतेक्म। 25 येसुमी “गो इन कली दैती। तन्न गेपुकीमी थमा मसुइक्नी। गो आं आफ आ गेय पाइनुड। मेको गेयमी ‘गो परमप्रभु यावे आ सोइश्शो नड’ दे इन कली तुइक्पाइक्ब। *यूहन्ना ५:३६* 26 गेपुकीमी चहिं आं कली थमा मसुइक्नीनी। मारदे हना गे आं गोठ डा भेडा मननी। *यूहन्ना ८:४५-४७*  
 27 गो आं भेडा आन कली तुइक्नुडमी। मिनु मेकोपुकीमी आं सेंदा नेंशा आं नोले खोइक्नीमी। *भजन संग्रह ९५:७* 28 गो मेको आन कली परमप्रभु यावे नु गेना हना यो ब्रोंइशा बाक्वा गेनुडमी। मेको नरकम मलाइनीम। सुइमी आं गुइ रे रोइश्शा, लाइक्ने मचाप्नीम। 29 आं आफोमी मेको आन कली गेती। आं आफ नेल्ल क्येडा ठेयब सक्ति पाइश्शो बाक्ब। मोपतीके आं आफ आ गुइ रे सुइमी रोइक्ने मचाप्नीम। 30 गो नु आं आफ उइक्थ उइक्थ नस्कु” दैत।

### येसु कली दोस गेशो

31 मिनु यहूदीपुकीमी लेंशा येसु कली साइक्वा, दे फुल्लु गुतेक्म। *यूहन्ना ८:४९* 32 मिनु येसुमी “गो इन कली आं आफोमी पशो रिम्शो गेय कोंइताक्नी। तेको गेय आ पबर्म आं कली फुल्लु आप्शा साइक्वा माल्नी?” दैत। 33 यहूदीपुकीमी “रिम्शो गेय पतीक आ पबर्म इ कली फुल्लु मआप्नीकी। तन्न परमप्रभु यावे आ पबर्म मरिम्शो लोव्र पतीके इ कली फुल्लु आप्शाइतक। गे मुर दुम्शा यो, परमप्रभु यावे नु उइक्थ नड दैनेवे” दैतेक्म। *मत्ती ९:३; मत्ती २६:६५; यूहन्ना ५:१८* 34 येसुमी “परमप्रभु यावे आ लोव्र ब्रेक्शो किताबमी ‘गे नेल्ल परमप्रभु यावे आ तमी तौ ननी’ मदेबा डा? *भजन संग्रह ८२:६* 35 परमप्रभु यावेमी आ लोव्र नेंब आन कली आ तमी तौ देंब। मिनु मेको किताब डा लोव्र मक्याप्सीब। *मत्ती ५:१७*  
 36 परमप्रभु यावेमी आं कली रागीमी सोइक्वा कली ठीक सेल्लु। गेपुकीमी चहिं ‘परमप्रभु यावे आ पबर्म मरिम्शो लोव्र दैनेवे’ दैनीनी। मारदे हना ‘गो परमप्रभु यावे आ तौ नड’ दैती। *यूहन्ना ५:१७-२०* 37 गो आं आफ आ गेय मपाता हना, आं कली थमा मसुतीन। 38 तन्न गो आं आफ आ गेय पाइनुड हना, गेपुकी आं कली थमा मसुइक्नीनी। आं पशो गेय परमप्रभु यावे के बाक्त, दे थमा सुतीन। मिनु गो आं आफ नु बाक्नुड। आं आफ गो नु बाक्ब, दे रुपीन” दे येसुमी यहूदी आन कली माइक्तीमी। 39 मेकोपुकीमी येसु कली

ग्याइक्वा माल्तेक्म। तन्न मेको आन दाते रे यूशा गाक्त। *यूहन्ना ८:५९; लूका ४:३०*

40 येसु लेंशा यर्दन खोला आइक्ची हांबु लशा बाक्माक्त। डोंइती मेकेर यूहन्नामी ब्वाक्कुमी खुम्शा गुंडतीक गेय पशो बाक्माक्त। *यूहन्ना १:२८*  
 41 आ नेक्था जाक्शा, शुश मुरपुकीमी “यूहन्नामी छक लाक्वा डा गेय मपव। तन्न मेको मुर आ पबर्म मार मार दैमे, मेको नेल्ल थमा बाक्माक्त” दैमुम्तेक्म। 42 मिनु शुश मुरुमी येसु कली थमा सुइक्तेक्म।

### येसुमी लाजरस कली सेंशो

11 बेथानी गाउंमी लाजरस माइश्शो रोइ पशो मुर का बाक्त। मेको के समी निक्शी बाक्शो बाक्ताक्स। मेको आस नें मरीयम नु मारथा बाक्ताक्स। *लूका १०:३८-३९* 2 मरीयम सु बाक्त देंशा हना, येसु आ खोइलीमी ब्रोंवशो रिना पाइश्शो तेल खेक्शा, आ चांमी फिक्ब बाक्त। मेको आस लोकब लाजरस रोइ पशो बाक्त। *यूहन्ना १२:३* 3 मिनु मेको समी निक्शीमी मुर का कली येसु आ बाक्तीक सोइश्शा “प्रभु, इन दाक्शो वारच रोइ पाप्तु” दे येसु कली ब्रेप्पत्से बाक्त। 4 मिनु येसुमी “मेको रोइ बेक्वा डा रोइ ममाड, तन्न परमप्रभु यावे आ सक्ति कोंइचा कली बाक्ब। मिनु मुरपुकीमी मेको रोइ आ पबर्म परमप्रभु यावे आ तौ कली ठेयब सेल्नीमी” दैत। *यूहन्ना ९:३* 5 येसुमी मारथा नु मरीयम वोबु नु आस लोकब लाजरस आन कली दाक्शो बाक्माक्त। 6 मोपतीके लाजरस रोइ पाप्तु देंशो नेंशा, आन बाक्तीक लचा, नाक्त निक्शी सम्म रिम्ताक्व।

7 मिनु नोले येसुमी आ शेंसीब आन कली “लो, लेंशा यहूदीया रागी लय” दैत। 8 आ शेंसीबपुकीमी “शेंब, यहूदीपुकीमी इन कली फुल्लु आप्शा हेरा साइक्तेक्मे। मिनु गे मुल लेंशा मेकेर लचा दाक्नीनी?” दे हिल्लो पाम्तेक्म। *यूहन्ना १०:३१* 9 मिनु येसुमी “काबु नाक्तीम १२ घन्टा बाक्बा, ममाड? सु सु चहिं नाक्ती गाक्नीमी, मेको दाइल मपांइसीनीम, मारदे हना छेडछेडमी लां ताइनीम। *यूहन्ना ९:४-५* 10 सु सु चहिं नाक्ती गाक्नीमी, मेकोपुकी दाइल पांइसीनीम, मारदे हना मेको छेडछेडमी मबाक्नीम” दैत। *यूहन्ना १२:३५* 11 मो देंशा आ शेंसीब आन कली “इं वारच लाजरस इप्त। गो चहिं मेको कली सेंनुड” दैत। *मत्ती ९:२४* 12 आ शेंसीबपुकीमी “प्रभु, इप्त हना, आ रोइ साब” दैतेक्म। 13 येसुमी चहिं लाजरस आ बेक्वा आ पबर्म लोव्र पशो बाक्त। आ शेंसीबपुकीमी “नाइक्वा कली इप्त” दे मिम्ताक्म। 14 मिनु येसुमी लोव्र महिरथु “लाजरस बेक्ने थुम्तु। 15 गो मेकेर मबाक्ड। मोपतीके गो ग्येरसीनुड। मारदे हना गेपुकीमी थमा सुइक्ने चाप्नीनी। मुल गोपुकी बेथानी लय” दैत। 16 आ याइनी नें जौले, थोमास माइश्शो शेंसीब का बाक्त। मेकोमी अरु शेंसीब आन कली “गोपुकी यो मेको नु बेक्थ लय” दैत। *यूहन्ना २०:२४-२८*

### लाजरस कली सेंपाइश्शो

17 मिनु येसु बेथानी जाक्दीम्मेनु, मेकेर डा मुरपुकीमी “लाजरस बेक्शो ४ नाक्त दुम्त। मेको कली बेक्शो मुर वोइक्तीक कोठामी वोइक्तेक्म” दे येसु कली दैतेक्म। 18 बेथानी गाउं यरूसलेम आ नेक्था बाक्शो बाक्ब। बेथानी रे यरूसलेम सम्म १५ स्तादीयोन डा लां बाक्ब। *स्तादीयोन का १८५ मिटर बाक्ब।* 19 मिनु यरूसलेम डा शुश यहूदीपुकीमी मारथा नु मरीयम आस लोकब बेक्शो आ पबर्ममी “सुर्ता मपाम्सेक्ल” दे लेम्वा कली जाक्मा बाक्त। 20 मिनु मारथामी “येसु पिन पिन बाक्ब” देंशो नेंशा, येसु कली गुम्थ जाक्त। मरीयम चहिं खिमीन बाक्माक्त। 21 मिनु मारथामी येसु कली “प्रभु, एक बाक्शो ननी हना, आंस लोकब मबे वा। 22 तन्न मुल यो परमप्रभु यावे कली पुंडीतीनी हना, परमप्रभु यावेमी इन पुंडिशो गेब, दे तुइक्नुड” दे माइक्तु। 23 मिनु येसुमी “इ लोकब सेंसीब” दैत। *यूहन्ना ५:२८-२९; यूहन्ना ६:४०; मत्ती २२:२३-३३* 24 मिनु मारथामी “नोले डा नाक्ती आंस लोकब सेंसीब दे गो तुइक्नुड” दैत। 25 मिनु येसुमी “गो सेंपाइक्ब नु ब्रोंइपाइक्ब नड। आं कली थमा सुइक्ब बेक्तेक्म हना यो, सेंसीनीम। 26 सु ब्रोंइबा, मिनु आं कली थमा सुइक्बा, मेको गेनायो मबेक्ब। एको लोव्र थमा सुइक्नेवे?” दे हिल्लो

पाप्तु। यूहन्ना ८:५१ 27 मिनू मारथामी “प्रभु, गे रागीमी जाक्शो परमप्रभु यावे आ तौ, खीस्त ननी, दे गो थमा सुइक्नुड” देंत। मत्ती १६:१६

28 मोदेशा मारथा खिं लेशशा, मरीयम कली “शेंब जाक्शो बाक्त। मिनू इ कली ब्रेत्ताक्व” दे मुर आन मनेंचा डा पा मदा बाक्त। 29 मिनू मरीयम मेको नेंशा, छुल बोक्शा, येसु कली गुम्थ लमाक्त। 30 मेना येसु मारथा गुम्तीक उड बाक्शो बाक्त। आस गाउं मजाक्दीशो बाक्माक्त। 31 मिनू मरीयम आ खिम लेम्थ जाक्ब यहूदीपुकीमी मरीयम कली छुल बोक्शा लशो तशा, आ नोले खोदमे बाक्त। मारदे हना मेकोपुकीमी “मरीयम तुरसुम डाक्थ लाइबा, कों” दे मिम्शो बाक्मा बाक्त। 32 मिनू मरीयम येसु आ बाक्तीक जाक्दीशशा, येसु आ खोइलीम बाप्शा “प्रभु, एक बाक्शो ननी हना, आंस लोकब मबे वा” देंत। 33 मिनू येसुमी मेको कली नु में नु जाक्शो यहूदी आन कली डाक्शो तशा, येसु आ थुं खाइक्त। यूहन्ना १३:२१ 34 मिनू “गे मेको कली ते वोइक्नी?” दे हिल्लो पवानु “प्रभु, कोव्रथ पिने” देंतेक्म। 35 मिनू येसु यो डाक्ता। 36 यहूदीपुकीमी येसु कली डाक्शो तशा “कोव्रडीन, येसुमी मेको कली यो शुश दाक्शो बाक्माक्त” देंतेक्म। 37 का निक्शीमी “मिक्च मताइब मुर सापाइक्बमी मेको कली बेक्वा मगेथु, सापाइक्ने मारदे मचाप्बा?” देंमुम्तेक्म। यूहन्ना ९:७

38 मिनू येसु आ थुं लेंशा खाइशशा, बेक्शो मुर वोइक्तीक कोठा आ नेक्था जाक्दीत्त। मेको पुक्खी खोदेशो बाक्त। मेको पुक्खी चोक्चा, दे आ डोंइती फुल्लु का थारशो बाक्त। मत्ती २७:६० 39 मिनू येसुमी “फुल्लु तिलीन” देंत। मिनू बेक्शो मुर आ समी मारथामी “प्रभु, मुल दा एको रिना पाइब। मारदे हना आ बेक्शो ४ नाक्ती दुम्त” देंत। 40 मिनू येसुमी “गे थमा सुइक्तीवी हना, गे परमप्रभु यावे आ सक्ति ताइनेवे, दे इ कली ममाइक्ना डा?” देंत। 41 मिनू मुरपुकीमी पुक्खी आ डोंइती थारशो फुल्लु तिल्लेक्म। मिनू येसुमी सरीड गे कोव्रशा “आं आफ, गे आं लोव्र नेंतीनी, गो ग्येरसाक्पी। 42 गे आं देशो गेना हना यो नेंतीनी, दे तुइक्नुड। मिनू आं एर ओंथ बाक्शो मुरपुकीमी गेमी आं कली सोइशो ननी, दे थमा सुइक्पाइक्वा कली एको लोव्र पाता” देंत। यूहन्ना १२:३० 43 मिनू मो देशा, ठेयब सेंदा पा येसुमी “ए, लाजरस, गूडो” दे ब्रेत्ताक्व। 44 मिनू मेको डोंइती बेक्शो मुर येसु आ ब्रेशो नेंशा, आ गुइ खोइल आ रां नेल्ल वामी गिल्लीशा गूत। आ कुल यो रुमालमी फ्रेंशो तशा, येसुमी “गिल्शो वासी प्रुइशशा, लचा गेने” दे मुर आन कली माइक्तीमी।

### येसु कली साइक्वा माल्शो

45 मरीयम कली लेम्थ जाक्शो शुश यहूदीमी मो दुम्शो तशा, येसु कली थमा सुइक्तेक्म। 46 का निक्शी चहिं फरिसी आन कली गुम्थ लशा, येसु आ पशो शोव्रडमे बाक्त। 47 मो दुम्शा ठेयब चढेब नु फरिसीपुकी बुक्शा “मुल मार पय? मारदे हना मेको मुरुमी शुश छक लाक्वा डा गेय पाइबाक्त। मत्ती २६:३-४ 48 मेको कली मो पचा गेतय हना, नेल्लेमी मेको कली थमा सुइक्नीम। मिनू रोमीपुकीमी परमप्रभु यावे आ खिं नु इस्राएल रागी निम्फा खतम सेल्नीम” दे लोव्र पामे बाक्त। 49 मेकोपुकी नु काइयाफास माइशो मुर का बाक्माक्त। मेको बर्स डा नेल्ल क्येडा ठेयब चढेब बाक्माक्त। 50 मिनू मेकोमी “गे मारेड मतुइक्नीनी। गो नेल्ल रागी खतम दुम्चा क्येडा, मुर का कली साइक्वा रिम्शो बाक्ब” देंमाक्त। यूहन्ना १८:१४ 51 काइयाफासमी आंम मिम्शो मदे, तन्न मेको बर्स डा नेल्ल क्येडा ठेयब चढेब दुम्शा “इस्राएल रागी डा मुर आन पा डा येसु साइक्वा पुंडसीब” दे नोले दुम्ब लोव्र पशो बाक्त। 52 इस्राएल रागी डा मुर आन कली ला ममाइ, तन्न ब्रशा बाक्शो परमप्रभु यावे आ तमी तौ नेल्ल आन कली काथा दुम्पाइक्वा, दे येसु साइक्वा पुंडसीब दुम्त। यूहन्ना ७:३५; यूहन्ना १०:१६; १यूहन्ना २:२ 53 मिनू मेको नाक्तर रे येसु कली दोपा साइक्वा, दे सल्ला पामे बाक्त।

54 मोपतीके येसु यहूदीपुकी नु मबाक्थु, गोरशो रागी आ नेक्थान एफ्राइम सहर लत। मिनू मेकेर आ शेंसीबपुकी नु बाक्त। २सामुएल १३:२३

55 मिनू यहूदी आन पास्सा चाड जाक्चशो बाक्त। पहाड डा शुश मुरपुकी आंम कली ठीक सेल्चा, दे पास्सा चाड आ डोंइती यरूसलेम लाइबाक्मा

बाक्त। २इतिहास ३०:१७-१८ 56 मेकेर जाक्दीशशा, परमप्रभु यावे आ खिंमी बाक्शा “गे मार मिम्नीनी? येसु पास्सा चाडम जाक्बा देय मजाक्बा” दे हिल्लो पमुशा, येसु कली माल्मे बाक्त। 57 मिनू ठेयब चढेब नु फरिसीपुकीमी “सुमी येसु ते बाक्बा, दे तुइक्ता, मेकोमी आंइ कली यो तुइक्पदल” दे मुर आन कली देंशो बाक्मा बाक्त। मोपा येसु कली ग्याइक्वा माल्मे बाक्त।

### मरीयममी येसु कली तेल खेक्शो

12 यहूदी आन पास्सा चाड जाक्वा ६ नाक्तर डोंइती येसु बेथानी गाउं जाक्दीत्त। मेकेर येसुमी लाजरस कली बेक्शो रे सेंपाइशो बाक्त। यूहन्ना ११:१,४३ 2 लाजरस आ खिंमी येसु नु आ शेंसीब आन कली थुल्चा ठीक पशो बाक्तेक्म। मारथामी जचा थोव्रक योक्नु। लाजरस येसु नु काथा बाक्शो बाक्त। 3 मिनू मरीयममी मार पाप्तु देशा हना, लित्रा का शुश क्येट लाइक्ब ब्रोव्रशो रिना पाइशो तेल येसु आ खोइलीमी खेक्ताक्व। मिनू आ चांमी फिक्ताक्व। मो पशा खिं गा नेल्ल ब्रोव्रशो रिना पपाइक्नु। लित्रा का ३२७ ग्राम खोदेशो बाक्ब। लूका ७:३८ 4 मेकेर येसु आ शेंसीब इस्कारीयोत डा यहूदा यो बाक्त। मेको नोले येसु कली साइक्ब आन कली वारच पाइब दुम्बाक्माक्त। 5 मेकोमी “मारदे सहे सां देनारमी मेको तेल लेयशा, प्रुडग आन कली मयोक्गा?” दे लोव्र पाप्तु। देनार का नाक्तर का डा गाल्च बाक्त। 6 यहूदामी प्रुडग आन कली शिशी पा मिम्शा ममाइ, तन्न क्येट कुरशा, क्येट खुइ पना पन बाक्बाक्माक्त। यूहन्ना १३:२९ 7 मिनू येसुमी यहूदा कली “मरीयममी आं बेक्वा डोंइती तेल खेक्ताक्पी। एको कली श्येत मगेवो। 8 प्रुडगपुकी दा गेपुकी नु गेना हना यो बाक्नीम। गो चहिं गेपुकी नु शुश नाक्तर मबाक्नुड” दे माइक्नु।

9 मिनू शुश यहूदीपुकीमी येसु मेकेर बाक्त, दे तुइशशा, येसु आ पर्बम ला ममाइ, येसुमी बेक्शो रे सेंपाइशो लाजरस कली यो कोव्रचा, दे जाक्तेक्म। 10 ठेयब चढेबपुकीमी “लाजरस कली यो साइक्वा” दे सल्ला पामे बाक्त। 11 मारदे हना मेको आ पर्बम शुशेमी यहूदी आन शेंतीक प्रॉइशा, येसु कली थमा सुइक्तेक्म।

### येसु यरूसलेम सहर ओव्रशो

मत्ती २१:१-११; मर्कूस ११:१-१०; लूका १९:२९-४०

12 मिनू आ दीसा शुश मुरुमी “येसु पास्सा नाक्तर यरूसलेममी जाक्ब” देंशो नेम्मे बाक्त। 13 मिनू खजूर रवा आ सफा शेशा, येसु कली गुम्थ जाक्तेक्म। मेकोपुकीमी “होसन्ना, परमप्रभु आ नेंमी जाक्ब इस्राएली आन पिप आसीक रशो बाक्ब” दे ग्येरशा, ग्रीना ग्रीन येसु कली गुम्थ जाक्तेक्म। होसन्ना आ देंशो “परमप्रभु वारच पने” बाक्ब। भजन संग्रह ११८:२५-२६ 14 मिनू येसुमी गधा आ चाइक्ब का डोंइसाक्व। परमप्रभु यावे आ ब्रेक्पाइशो किताबमी 15 “सियोन डा मुर, महिनीन। कोव्रडीन, इन पिप गधा डोइशशा पिना पिन बाक्ब” दे ब्रेक्शो बाक्त। जकरिया ९:९ 16 येसु आ शेंसीबपुकीमी डोंइती मेको लोव्र मरुप्शो बाक्तेक्म। तन्न येसु स्वर्ग लशा नोले ला “मेको लोव्र येसु आ पर्बम ब्रेक्शो बाक्माक्त। दोदेशो ब्रेक्शो बाक्मे, मोदेशो दुम्त” दे रुप्शो बाक्तेक्म। 17 मेको “होसन्ना” दे ग्रीबपुकी सु बाक्मा बाक्त देंशा हना, येसुमी लाजरस बेक्शो रे सेंपाइशो ताइब बाक्मा बाक्त। मिनू मेकोपुकीमी मुर आन कली लाजरस सेंसीशो आ पर्बमी तुइक्पाइक्तेक्म। 18 मोपतीके मेकोपुकी येसु कली गुम्थ जाक्तेक्म। 19 मिनू फरिसीपुकीमी “गोपुकी मारेड पने मचाप्नया। कोव्रडीन, मुर नेल्ल मेको आ नोले खोइक्नीम” देंमुम्तेक्म। यूहन्ना ११:४८

### ग्रीस डा मुर येसु कली गुम्थ जाक्शो

20 मिनू पास्सा नाक्ती परमप्रभु यावे कली मान पचा कली का निक्शी ग्रीस रागी डा मुर यो जाक्शो बाक्तेक्म। 21 मेकोपुकी फिलीप माइशो शेंसीब नु लोव्र पचा कली जाक्तेक्म। फिलीप चहिं गालील रागी डा बेथसैदा सहर डा बाक्त। मिनू मेको ग्रीस रागी डा मुरपुकीमी “प्रभु, गोपुकी येसु कली गुम्था दाक्नीकी” देंतेक्म। यूहन्ना १:४४ 22 फिलीपमी मेको आन लोव्र

नॅशा, अन्द्रीयास कली माइव्तु। मिनु अन्द्रीयास नु फिलीपमी येसु कली “ग्रीस रागी डा मुरपुकी इन कली गुम्थ जाक्तेक्म” दे माइक्ताक्स।<sup>23</sup> मिनु येसुमी “मुल रागीमी जरमेशो परमप्रभु यावे आ बाक्तीक लाइब। मिनु ठेयब सेल्चा पुंडसीब।<sup>24</sup> नोफा दाइश्शा नेनीन, चेरब गेडा खपीमी शोक्शा मराक्त हना, मेको मोशा लीब। तन्न शोक्शा राक्त हना, शुश ग्रेल्ब। रोमी १४:९; १कोरिन्थी १५:३६<sup>25</sup> सुमी आंम दला दाक्स पाइबा, मेको गेना हना यो ब्रॉइशा बाक्चा मताइब। सुमी चहिं रागीमी बाक्शा, आंम कली ममिम्थु, परमप्रभु यावे आ देशो टीबा, मेको गेना हना यो ब्रॉइशा बाक्चा ताइब। मत्ती १०:३९; मत्ती १६:२५; लूका १७:३३<sup>26</sup> सुमी आं गेय पाइबा, आं देशो यो पचा माल्बा, मेको आं बाक्तीकेमी बाक्चा ताइब। आं आफोमी आं गेय पाइब आन कली ठेयब सेल्ब” देंत। यूहन्ना १७:२४

येसुम आ बेक्चा आ पर्वम शॅशो

<sup>27</sup> मिनु येसुमी “मुल आं थुं खाइक्ती। गो मार देंनुडा, आफ, आं कली मोपा साइक्चा रे प्रॉइयी, दे पुंडनुडा डा? गो साइक्चा पुंडसीचा कली रागीमी जाक्ती। मत्ती २६:३८<sup>28</sup> आं आफ, इन सक्ति कौंडदीन” दे येसुमी देंत। मिनु सरीड रे “गो आं सक्ति कौंडताक्ड। लॅशा चिनु कौंडनुड” देशो सॅदा का नॅसाक्व। यूहन्ना १३:३१; मत्ती ३:१७; मत्ती १७:५<sup>29</sup> मिनु मेकेर बाक्शो मुरपुकीमी मेको सॅदा नॅशा “बुंबु पाप्टु” देंतेक्म। का निक्शीमी “परमप्रभु यावे आ स्वर्ग डा गेय पाइब कामी मेको कली लोत्र पाप्टु” देंतेक्म।<sup>30</sup> मिनु येसुमी “मेको लोत्र आं कली देशो ममाइ, इन कली देशो बाक्ब। यूहन्ना ११:४२<sup>31</sup> मुल रागी नेल्ल डा मुर आन कली निसाफ पची नाक्त जाक्त। मुल रागी कली हुकुम पाइब कली तिल्लीम। यूहन्ना १४:३०; यूहन्ना १६:११; लूका १०:१८<sup>32</sup> गो क्युक्शा साइक्चा पुंडसीशा, मुर नेल्ल आन कली आं गे कीनुडमी” देंत। यूहन्ना ८:२८<sup>33</sup> येसुमी दोपा साइक्चा पुंडसीचा चिक्शो बाक्नुड, दे तुइक्पाइक्चा कली मो देंत।<sup>34</sup> मिनु मुरपुकीमी येसु कली “परमप्रभु यावे आ लोत्र ब्रेक्शो किताबमी ‘ख्रीस्त गेनायो मबेक्थु बाक्ब’ देशो नॅतक। गे चहिं ‘रागीमी जरमेशो क्युक्शा साइक्चा पुंडसीब’ देंनीनी। मिनु मेको रागीमी जरमेशो चहिं सु बाक्म?” दे हिल्लो पांम्तेक्म। भजन संग्रह ११०:४; दानीएल ७:१४<sup>35</sup> मिनु येसुमी मेको मुर आन कली “मेको छेडछेड माइश्शो का गेपुकी नु इच्का नाक्त सम्म बाक्ब। छेडछेड बाक्म सम्म गाक्कीन। छेडछेडमी मगाक्तीनी हना, छिडछिडमी गाक्चा माल्लीनी। सु छिडछिडमी गाक्बा, मेको ते लाइबा मतुइक्ब।<sup>36</sup> छेडछेड माइश्शो का बाक्म सम्म मेको कली थमा सुतीन। मो पाइतीनी हना, छेडछेड माइश्शो आ तमी तौ दुम्नीनी” देंत। मिनु येसुमी मेको लोत्र पशा, मेकेर रे गाक्शा खूंडसाक्व। एफिसी ५:८

यसैयाम यहूदी आन पर्वम ब्रेक्शो

<sup>37</sup> मिनु येसुमी मुर आन डौंइती शुश छक लाक्चा डा गेय पाप्टु हना यो, मेकोपुकीम येसु कली थमा मसुदेम।<sup>38</sup> मोपा यसैया माइश्शो परमप्रभु यावे आ लोत्र पाइब आ ब्रेक्शो लोत्र थमा दुम्त। मार ब्रेक्शो बाक्त देशा हना “प्रभु, आंइ देशो लोत्र सुम थमा सुदा डा? इन पशो गेय सुम तुइक्ता डा?” दे ब्रेक्शो बाक्त यसैया ५३:१<sup>39</sup> मोपतीके सुडमी थमा सुइक्ने मचबेम। यसैया ६:९, १०<sup>40</sup> मिनु यसैयामी “परमप्रभु यावेमी मेको आन कली मिक्च मताइब सेल्लामी। मोपा परमप्रभु यावे कली मतुइक्नीम। मेको आन कली मटीब सेल्लामी। मोपा मेकोपुकीमी परमप्रभु यावे आ लोत्र रुम्ने मचबेम। मिनु परमप्रभु यावे कली ‘आं कली सापतीन’ दे मपुंडनीम” दे यो यसैयामी ब्रेक्शो बाक्त। मत्ती १३:१४-१५<sup>41</sup> मारदे हना यसैयामी येसु ख्रीस्त आ छेडछेड डा सक्ति ततीके येसु आ पर्वम लोत्र पशा ब्रेक्शो बाक्त। यसैया ६:१<sup>42</sup> ठेयब मुर शुशेमी येसु कली थमा सुइक्तेक्म। मेकोपुकीमी “फरिसीपुकीमी आंइ कली यहूदी आन गुम्तीक खिं रे तिल्लीम” दे हिंशा, अरु आन कली “गो थमा सुइक्ब दुम्तक” दे मर्देम। यूहन्ना ९:२२<sup>43</sup> मारदे हना मेकोपुकीमी “आंइ पर्वमी मुरपुकीमी मार देंनीमी” दे परमप्रभु यावे क्येडा मुरपुकी तशा हिंतेक्म। यूहन्ना ५:४४

येसुम परमप्रभु आ शॅशो ला पाइब

<sup>44</sup> मिनु येसुमी ठेयब सॅदा पशा “आं कली थमा सुइक्बमी आन थमा सुइश्शो आं कली ला ममाइ, तन्न आं कली सोइक्ब कली यो थमा सुइश्शो नम।<sup>45</sup> मिनु सुम आं कली ताइबा, मेकोमी आं कली सोइक्ब कली यो ताइब। यूहन्ना १४:९<sup>46</sup> रागी डा मुर आन कली परमप्रभु यावे आ पर्वम तुइक्पाइक्चा कली गो रागी कली छेडछेड दुम्शा जाक्ती। मोपतीके सुम आं कली थमा सुइक्बा, मेको छिडछिडमी मबाक्ब।<sup>47</sup> मिनु सु सुमी आं देशो लोत्र नॅशा यो मपाइनीमी, गो मेको आन कली निसाफ मपाइनुड। मारदे हना गो रागी डा मुर आन कली निसाफ पचा कली जाक्शो मनड। तन्न रागी डा मुर आन कली पाप रे प्रॉइचा कली जाक्शो नड। यूहन्ना ३:१७; लूका ९:५६<sup>48</sup> सुम आं कली मब्रथु, आं देशो लोत्र मपाइबा, मेको कली निसाफ पाइब का बाक्ब। मेको निसाफ पाइब सु बाक्ब देशा हना, आं देशो लोत्र बाक्ब। एको लोत्रमी मेको कली नोले डा नाक्ती निसाफ पाइब।<sup>49</sup> आं कली सोइक्ब आं आफोमी गो मार देंचा नु शॅचा माल्लुडा, मेको नेल्ल माइक्ती। मोपतीके मेको आं लोत्र ममाइ। आं आफ आ लोत्र बाक्ब।<sup>50</sup> मेको आ देशो लोत्र मार बाक्ब देशा हना, गेना हना यो ब्रॉइशा बाक्चा गेब लोत्र बाक्ब। मेको आं आफोमी आं कली देशो लोत्र बाक्ब। मोपतीके आं पशो लोत्र आं आफोमी आं कली डौंइती देशो लोत्र बाक्ब” दे येसुमी मुर आन कली माइक्तीमी।

येसुम आ शॅसीब आन खोइल चिक्शो

**13** येसुमी पास्सा चाड डौंइती “मुल रागी रे आं आफ आ बाक्तीक लची नाक्त जाक्त” दे तुइक्ताक्व। मिनु येसुमी नेल्ल क्येडा नोले डा नाक्त सम्म रागीमी बाक्शो आ मुर आन कली दाक्शो बाक्त। यूहन्ना ७:३०; यूहन्ना १७:१<sup>2</sup> मिनु येसु नु आ शॅसीबपुकी नाक्दो डा खमे जना जन बाक्शो बाक्तेक्म। आ शॅसीब सिमोन आ तौ इस्कारीयोती डा यहूदा यो बाक्शो बाक्त। सैतानमी “येसु कली साइक्चा माल्ब आन कली वारच पावो” दे यहूदा कली मिम्पाइश्शो बाक्त। लूका २२:३<sup>3</sup> मिनु येसुमी “आं आफोमी आं कली नेल्ल सक्ति गेती। गो परमप्रभु यावे रे जाक्शो नड। मिनु परमप्रभु यावे आ बाक्तीके लेल्लुड” दे तुइश्शा, यूहन्ना ३:३५; यूहन्ना १६:२८<sup>4</sup> येसु बोक्शा, आ तार फेक्शो रिम्शो वा पुइश्शा, वा कामी गिल्लाक्व।<sup>5</sup> मिनु चिक्तीकेमी ब्वाक्कु कुर पा, आ शॅसीब आन खोइल चिक्ताक्मी। चिक्शा डा मिन आ गिल्लीशो वाम फिक्ताक्मी।<sup>6</sup> मिनु सिमोन पत्रुस आ पालो जाक्मेनु, मेकोमी येसु कली “प्रभु, गेमी आं खोइल चिक्चा दुम्बा डा?” देंत।<sup>7</sup> मिनु येसुमी “मुल आं पशो मरुप्नेवे। गे नोले ला रुप्नेवे” देंत।<sup>8</sup> पत्रुसमी “गो आं खोइल चिक्चा काइ मगनुड” देंत। मिनु येसुमी “गो इ खोइल मचिक्ताक्न हना, गे आं मुर मनवे” दे माइक्व।<sup>9</sup> मिनु सिमोन पत्रुसमी “प्रभु, आं खोइल ला ममाइ, आं गुइ पिया यो चिक्तीनी” देंत।<sup>10</sup> येसुमी “चिक्शो मुर आन कली लॅशा चिक्चा ममाल्ब। खोइल ला चिक्चा माल्ब। खोइल चिक्शोनु, नेल्ल रिम्शो दुम्ब। गेपुकी चिक्सीशो दुम्तीनी। काइ मचिक्सीशो गेपुकी नु का बाक्ब” देंत। यूहन्ना १५:३<sup>11</sup> येसुमी आ कली साइक्ब आन कली वारच पाइब कली तुइश्शा मो देंत।

<sup>12</sup> मिनु येसुमी आन खोइल चिक्ने थुम्शा, आ डौंइती पुइश्शो फेक्तीक फेक्शा, आ बाक्तीक लत। मिनु शॅसीब आन कली “इन कली पशो गेय आ अर्थ मार बाक्बा, गे तुइक्नीनी?”<sup>13</sup> गेपुकीमी आं कली शॅब नु प्रभु देंनीनी। मेको ठीक देंतीनी। मारदे हना गो मेकोन नड। मत्ती २८:८, १०<sup>14</sup> गो प्रभु नु शॅब दुम्शा यो इन खोइल चिक्ताक्नी। गेपुकीमी यो इन खोइल चिक्मुचा माल्लीनी। लूका २२:२७<sup>15</sup> गो इन खोइल चिक्ताक्नी। मिनु गेपुकी आं खोदेशो पने। फिलिप्पी; १पत्रुस २:२१<sup>16</sup> मिनु नोफा दाइश्शा नेनीन, खिं डा होत्रप क्येडा वाइल ठेयब ममाइ। मिनु सोइश्शो मुर सोइक्ब क्येडा ठेयब यो ममाइ।<sup>17</sup> गेपुकी आं देशो लोत्र तुइश्शा पाइतीनी हना, गे आसीक रशा ग्येरसीशो मुर दुम्नीनी” दे येसुमी देंत। मत्ती ७:२४

## यहूदा आ पर्वम लोत्र पशो

मत्ती २६:२१-२५; मर्कूस १४:१८-२१; लूका २२:२१-२३

18 मिनू येसुमी “गो नेल्ल इन पर्वम लोत्र मपाइनुड। आं योव्रशो आन कली तुइक्नुड। परमप्रभु यावे आ ब्रेक्पाइशो लोत्रमी मार ब्रेक्शो बाक्व देंशा हना ‘आं शोब्ले जाइबमी आं कली साइक्वा कली आ खोइल क्युक्तु’ दे ब्रेक्शो बाक्व। मुल मोदेंशो दुम्चा चिक्ताक्व। भजन संग्रह ४१:९  
19 मोदेंशो दुम्चा डॉइती तुइक्पाइक्तन्नी। मिनू मो दुम्मेनु, गो मेकोन बाक्डा बाक्व, दे तुइक्नीनी। मिनू आं कली थमा सुइक्नीनी।<sup>20</sup> नोफा दाइश्शा नेनीन। सुमी आं सोइश्शो कली ब्राइबा, मेकोमी आं कली ब्राइब। मिनू सुमी आं कली ब्राइबा, मेकोमी आं कली सोइक्व कली यो ब्राइब” देंत। मत्ती १०:४०<sup>21</sup> मिनू येसुमी मेको लोत्र पशा आ थुं खाइक्व। मिनू “नोफा दाइश्शा नेनीन। गेपुकी नु का बाक्व। मेकोमी आं कली साइक्व आन कली वारच पाइब” दे आ थुं खाइश्शा देंत। यूहन्ना १२:२७<sup>22</sup> मिनू येसु आ शेंसीबपुकीमी “सु आ पर्वम देंशो बाक्मे?” दे मतुइक्थु कोव्रमुन्तेक्म।<sup>23</sup> येसु आ नेल्ल क्येडा दाक्शो शेंसीब येसु आ नेक्था बाक्व। यूहन्ना १९:२६; यूहन्ना २०:२; यूहन्ना २१:२०<sup>24</sup> मिनू सिमोन पत्रुसमी मेको कली “सु आ पर्वम लोत्र पवा, हिल्लो पावो। मिनू आंइ कली देनो” देंत।<sup>25</sup> मिनू येसु आ नेक्था बाक्शो शेंसीबमी “प्रभु, मेको सु बाक्मे?” दे येसु कली हिल्लो पावु।<sup>26</sup> मिनू येसुमी “गो एको शोब्ले शेक्कुमी तेषा सु कली जचा गेडा, मेकोन बाक्व” देंशा, येसुमी शोब्ले शेक्कुमी तेषा, सिमोन आ तौ इस्कारीयोत डा यहूदा कली गेपु।<sup>27</sup> यहूदामी शोब्ले ताक्तु। मेना सैतान आ थुंमी ओव्रत। मिनू येसुमी यहूदा कली “इ मिश्शो पावो” देंत।<sup>28</sup> शेंसीबपुकीमी येसुमी यहूदा कली मारदे मोदेंशो देंमे, दे मतुइक्तेम।<sup>29</sup> का निक्शीमी “यहूदामी क्येट आ थैली कुरशो बाक्व। मिनू येसुमी मेको कली पास्सा नाक्व कली ‘मार मार माल्नया, मेको ग्याप्थ लावो, दे मदा कों, प्रुडग आन कली क्येट योक्शा गेवो’ दे मदा कों?” दे मिम्ताक्म।<sup>30</sup> यहूदा शोब्ले ताक्शा, छुल बोक्शा लत। मेना छिडछिड दुम्शो बाक्व।

## येसुम नक अरेशो लोत्र शेंशो

यूहन्ना १३:३१-१६:३३

31 मिनू यहूदा लम नोले येसुमी “मुल रागीमी जरमेशोमी सक्ति तापु। मिनू मुरपुकीमी रागीमी जरमेशो आ पतीक तशा, परमप्रभु यावे कली ठेयब सेल्नीमी। यूहन्ना १२:२३, २८<sup>32</sup> मिनू परमप्रभु यावेमी रागीमी जरमेशो कली आंम आ सक्ति गेशा, ठेयब सेल्न। एको मुल दुम्चा चिक्शो बाक्व। यूहन्ना १७:१-५<sup>33</sup> आं आइक्व आलपुकी, गो इन कली शुश दाक्ताक्ड हना यो, गो गेपुकी नु शुश बाक्वा मताइनुड। गेपुकी आं कली माल्नीनी। मिनू गो यहूदी आन कली ‘आं लतीकेमी गेपुकी जाक्ने मचाप्नीनी’ देंशो खोदेंशो, गो इन कली यो मो देंनुड। यूहन्ना ८:२१<sup>34</sup> मिनू इन कली नक अरेशो लोत्र का पाइनुड। मार लोत्र पाइनुड देंशा हना, गेपुकी दाक्मुने। गोम इन कली दाक्शो खोदेंशो पा गेपुकी यो दाक्मुने। यूहन्ना १५:१२, १३, १७<sup>35</sup> दाक्मुशो तशा, मुर नेल्लेमी ‘गेपुकी आं शेंसीब ननी’ दे तुइक्नीम” दे येसुमी देंत।

## येसुम पत्रुस कली लोत्र पशो

मत्ती २६:३३-३५; मर्कूस १४:२९-३१; लूका २२:३१-३४

36 मिनू सिमोन पत्रुसमी येसु कली “प्रभु, ते लाइनीनी?” दे हिल्लो पापु। येसुमी “गो ते लाइनुडा, मुल गे आं नोले खोइक्ने मचाप्नेवे। तन्न नोले खोइक्नेवे” देंत। यूहन्ना २१:१८-१९<sup>37</sup> मिनू पत्रुसमी “प्रभु, मारदे इन कली मुल नोले खोइक्ने मचाप्नुडा डा? इन साइक्वा पुंइसीचा डा साइक्वा पुंइसाक्ड हना यो, गो बेक्नुड” देंत।<sup>38</sup> मिनू येसुमी “मार आं साइक्वा पुंइसीचा डा साइक्वा पुंइसीनेवे? इ नोफा दाइश्शा नेनो, भाले ग्रीचा क्येडा डॉइती गेमी खेयप सां आं कली मतुइक्नुड, दे देंनेवे” दे माइक्तु।

## येसु परमप्रभु नु युम्पाइक्व लां बाक्व

14 मिनू येसुमी आ शेंसीब आन कली “इन थुं ग्येथ लुक्व मपने। परमप्रभु यावे कली थमा सुतीन। आं कली यो थमा सुइय्नीनी।

2 आं आफ बाक्तीकेम शुश मुर आन कली बाक्तीक सेल्शो बाक्नीम। मोपतीके इन बाक्तीक ठीक पथ लाइनुड।<sup>3</sup> मिनू इन बाक्तीक ठीक पशा, लेंशा जाक्शा आं बाक्तीक लाइक्नन्नी। मिनू गो नु काथा बाक्नीनी। यूहन्ना १२:२६; यूहन्ना १७:२४<sup>4</sup> मिनू आं लतीक लां तुइक्नीनी” देंत।<sup>5</sup> मिनू थोमासमी येसु कली “प्रभु, गे ते लाइनीनी? गो मतुइक्नीकी। मिनू लां दोपा तुइक्नीकी?” देंत।<sup>6</sup> मिनू येसुमी “गो थमा नु ब्रॉइचा गेब लां नड। सुइ आन पतीक गेना हना यो आं आफ नु बाक्वा मताइनीम। तन्न आं पतीके रे ला गेना हना यो परमप्रभु यावे नु बाक्वा ताइनीम। यूहन्ना १०:९; मत्ती ११:२७; रोमी ५:१-२; हिब्रू १०:२०<sup>7</sup> गेपुकी आं कली तुइक्ताक्नी हना, आं आफ कली यो तुइक्नीनी। मुल रे गेपुकी आं आफ कली तुइश्शा ताइनीनी” देंत।<sup>8</sup> मिनू फिलीपमी “प्रभु, इन आफ आंइ कली कौइदीन। मिनू ग्येरनीकी” देंत।<sup>9</sup> मिनू येसुमी “गो नु शुश बाक्शा यो, गे आं कली मतुइक्नेवे, फिलीप? सुमी आं कली तयी, मेकोमी आं आफ कली यो तापु। मारदे ‘इन आफ कौइदीन’ देंनेवे? यूहन्ना १२:४५; हिब्रू १:३<sup>10</sup> गो आं आफ आगामी बाक्नुड। मिनू आं आफ आं आगामी बाक्व, दे थमा मसुइक्नेवे? आं देंशो लोत्र आं के ममाइ, आं आफ आ लोत्र बाक्व। आं आगामी बाक्शो आं आफोमी गेय पाइब। यूहन्ना १२:४९<sup>11</sup> गो आं आफ आ आगामी बाक्नुड। आं आफ आं आगामी बाक्व, दे थमा सुतीन। आं लोत्र नेंशा, थमा सुइक्ने मचाप्नीनी हना, आं पशो तशा थमा सुतीन। यूहन्ना १०:२५, ३८<sup>12</sup> मिनू नोफा दाइश्शा नेनीन, सुमी आं कली थमा सुइक्वा, मेकोमी आं पशो गेय यो पाइब। मिनू आं क्येडा ठेयब गेय पाइब। मारदे हना गो आं आफ आ बाक्तीक लाइनुड। मत्ती २८:१९<sup>13</sup> मिनू गेपुकी आं नेंमी मार मार पुंइनीनु, गो गेनन्नी। गो इन पुंइशो गेशा, गो, आं पतीके आं आफ आ सक्ति कौइनुड। यूहन्ना १५:७; यूहन्ना १६:२४; मर्कूस ११:२४; १यूहन्ना ५:१४-१५<sup>14</sup> आं नेंमी मार मार पुंइनीनी, गो मेको गेनन्नी।

## परमप्रभु आ सोक्त आ पर्वम शेंशो

15 गेपुकी आं कली दाक्ताक्नी हना, आं अरेशो पाइनीनी। यूहन्ना १५:१०; १यूहन्ना ५:३<sup>16</sup> गेपुकी नु काथा बाक्शा, वारच पाइब का सोइक्वा, दे आं आफ कली पुंइनुड। मेको गेपुकी नु गेना हना यो मप्रॉइथु बाक्व। यूहन्ना १५:२६; यूहन्ना १६:७<sup>17</sup> मेको वारच पाइब थमा डा सोक्त बाक्व। आं कली थमा मसुइक्वपुकीमी मेको सोक्त ताक्ने मचाप्नीम। मारदे हना मेकोपुकीमी मेको सोक्त कली मतुइक्नीम। गेपुकी चहिं मेको कली तुइक्नीनी। मारदे हना मेको गेपुकी नु बाक्व। मिनू इन आगामी बाक्व। यूहन्ना १६:१३

18 गो इन कली रोम रोइक्व खोदेंशो पा मवोइक्नन्नी। इन बाक्तीके जाक्नुड।<sup>19</sup> इक्का नोले थमा मसुइक्वपुकीमी आं कली लेंशा मताइनीम। गेपुकीमी चहिं आं कली ताइनीनी। मारदे हना गो ब्रॉइनुड। मिनू गेपुकी यो ब्रॉइनीनी। यूहन्ना २०:२०<sup>20</sup> मिनू आं आफ आ आगाम बाक्नुड। गेपुकी आं आगामी बाक्नीनी। मिनू गो इन आगामी बाक्नुड, दे मेना रुप्शा तुइक्नीनी।<sup>21</sup> सुमी आं अरेशो तुइश्शा पाइबा, मेकोमी आं कली दाक्व। सुमी आं कली दाक्वा, आं आफोमी मेको कली यो दाक्व। मिनू गो मेको कली दाक्वा, आं कली तुइक्पांइसीनुड” दे येसुमी देंत। १यूहन्ना ५:३; यूहन्ना १६:२७<sup>22</sup> मिनू यहूदामी, इस्कारीयोत डा यहूदा चहिं ममाइ, येसु कली “प्रभु, गे आंइ कली तुइक्पांइसीनीनी। थमा मसुइक्व आन कली चहिं मतुइक्पांइसीनीनी, दोपा रुम्सीबा डा?” दे हिल्लो पापु।<sup>23</sup> मिनू येसुमी “सुमी आं कली दाक्वा, मेकोम आं देंशो लोत्र पाइब। आं आफोमी मेको कली दाक्व। मिनू गो नु आं आफ मेको नु बाक्नस्कु। हितोपदेस ८:१७; एफिसी ३:१७<sup>24</sup> आं कली मदाक्वमी चहिं आं देंशो लोत्र यो मपाइब। आं देंशो लोत्र आं के ममाइ, आं कली सोइक्व आं आफ के बाक्व। यूहन्ना ७:१६-१७

25 गेपुकी नु बाक्शा, एको लोत्र पाता। 26 आं नैमी आं आफोमी इन कली वारच पाइब आ सोक्त सोइक्ब। मेको सोक्तीमी इन कली मारेइ मारेइ शेंब नु आं दैशो लोत्र नेल्ल फ्रुक्पाइक्ब।

येसु आ गेशो थुं नाइक्तीके

27 गो आं थुं नाइश्शो खोदैशो पा इन थुं नाइक्पाइक्वन्नी। मुरुमी पशो खोदैशो ममाइ, इन थुं ग्येत्य लुक्च मपने। महिनीने। यूहन्ना १६:३३; फिलिप्पी ४:७<sup>28</sup> 'गो लाइनुड। मिनु लेंशा जाक्नुड' दे आं दैशो नैतीनी। गेपुकी आं कली दाक्ताक्वीनी हना, ग्येरसीनी वा। मारदे हना गो आं आफ आ बाक्तीक लाइनुड। आं आफ चहिं आं क्येडा ठेयब बाक्ब।<sup>29</sup> नेल्ल दुग्चा क्येडा डोंइती शेंताक्वन्नी। मेको दुग्मेनु, गेपुकी थमा सुइक्ब दुग्नीनी।<sup>30</sup> मुल डा मेरे शुश मर्शेनन्नी। मारदे हना रागी डा मुर आन कली हुकुम पाइब जाक्ब। मेकोमी आं कली ग्राने मचाप्ब। यूहन्ना १२:३१; एफिसी २:२<sup>31</sup> गो आं आफ आ दैशो पाइनुड। मो पडानु, गो आं आफ कली दाक्नुड, दे रागी रागी डा मुरपुकीमी तुइक्त्तमेक्त्त। लो बोक्कीन, गाक्व" दैत। यूहन्ना १०:१८

थमा डा अडगुर बोट

15 मिनु येसुमी "गो थमा डा अडगुर बोट नड। आं आफ चहिं अडगुर कली कोत्रब बाक्ब। भजन संग्रह ८०:९-१२; यसेया ५:१-७; येरमीया २:२१<sup>2</sup> आं आफोमी फल मसिप्ब राशी आन कली खोइश्शा ताइक्ब। फल सिप्ब राशी कली मेको क्येडा शुश फल सिप्पाइक्चा, दे मुंडशा वोइक्ब। यूहन्ना १३:१०; १पत्रुस १:२३<sup>3</sup> गेपुकी आं दैशो लोत्र टितीके मुंडसीशो राशी खोदैशो दुग्तीनी।<sup>4</sup> गेपुकी आं आगामी बाक्कीन। मिनु गो इन आगामी बाक्नुड। राशी बोटमी मबाक्त्त हना, मेको राशी फल सिन्ने मचाप्ब। मोपतीके गेपुकी यो आं आगामी मबाक्तीनी हना, फल सिन्ने मचाप्पीनी।<sup>5</sup> गो अडगुर बोट नड। गेपुकी चहिं राशी ननी। सु आं आगाम बाक्बा, गो मेको आ आगामी बाक्नुड। मिनु मेकोमी शुश फल सिप्ब। तन्न गो रे डोन बाक्तीनी हना, मारेइ पने मचाप्पीनी। २कोरिन्थी २:५-६<sup>6</sup> सु चहिं आं आगामी मबाक्बा, मेको खोइश्शा ताइश्शो राशी खोदैशो पा सोत्रब। मिनु मुरपुकीमी मोदैशो राशी कली खुशा मीम चोइनीम।<sup>7</sup> गेपुकी आं आगामी बाक्शा नु आं लोत्र इन आगामी बाक्त्त हना, इन दाक्शो पुनीन। मिनु इन पुंइशो ताइनीनी। मर्कूस ११:२४<sup>8</sup> गेपुकी आं शेंसीब दुग्शा, शुश फल सिप्ब दुग्तीनी हना, आं आफ आ सक्ति कोइनीनी। मोपा गेपुकी आं शेंसीब दुग्तीनी। मत्ती ५:१६

दाक्मुचा माल्ब, दे शेंशो

9 आं आफोमी आं कली दाक्ब। मिनु आं आफोमी आं कली दाक्शो खोदैब पा, गो इन कली दाक्ताक्वन्नी। गेपुकी यो 'गो इन कली दाक्नुड' दे तुइश्शा बाक्कीन।<sup>10</sup> दोपा गो आं आफोमी दैशो लोत्र टिशा, आं आफ नु दाक्मुइनस्कु, मोपा गेपुकी यो आं दैशो लोत्र टीतीनी हना, गो नु दाक्मुशा बाक्नय।<sup>11</sup> इन कली एको लोत्र मारदे पाता दैशा हना, आं ग्येरशो थुं इन थुंमी लील। मिनु इन थुं ग्येरसीशा बाक्त्त, दे एको लोत्र पाता। यूहन्ना १७:१३<sup>12</sup> गो इन कली दाक्शो खोदैशो पा गेपुकी यो दाक्मुने, दे आं अरेशो बाक्ब। यूहन्ना १३:३४<sup>13</sup> सु आ वारच आ पर्वम साइक्चा पुंइसीबा, मेको नेल्ल क्येडा ठेयब दाक्ब वारच बाक्ब। यूहन्ना १०:११; १यूहन्ना ३:१६<sup>14</sup> गेपुकी आं दैशो पना पन बाक्तीनी हना, आं वारच ननी। यूहन्ना ८:३१; मत्ती १२:५०<sup>15</sup> मुल रे गो इन कली वाइल मदेनुड। मारदे हना वाइल आ ठेयब मुरुमी मार गेय पचशो बाक्मे, मेको वाइलम मतुइक्ब। गो चहिं इन कली आं आफ आ दैशो नेल्ल शेंताक्वन्नी। मोपतीके इन कली वारच देनुड।<sup>16</sup> गेपुकीमी आं कली मयोव्रयीनी। तन्न गेपुकी लशा फल सिश्शा, इन सिश्शो फल लील, दे गो इन कली योव्रतन्नी। मिनु गेपुकीमी आं आफ कली आं नैमी इन दाक्शो पुंइनीनु, आं आफोमी इन कली गेवल, दे वोइक्त्तन्नी।<sup>17</sup> गो इन कली 'दाक्मुने' दे माइक्त्तन्नी" दैत।

थमा सुइक्ब श्येत जाइनीम

18 मिनु "रागी डा मुरपुकीमी इन कली मदाक्नीमी। इन कली मदाक्चा क्येडा डोंइती आं कली मदाक्नीम, दे तुइक्वनीनी। यूहन्ना ७:७<sup>19</sup> गेपुकी रागी डा मुर खोदैशो बाक्तीनी हना, रागी डा मुरपुकीमी इन कली दाक्नीमी। तन्न गे रागी डा मुर मननी। गो इन कली रागी डा मुरपुकी रे योव्रतन्नी। मोपतीके रागी डा मुरपुकीमी इन कली मदाक्नीम। यूहन्ना १७:१४; १यूहन्ना ४:४-५<sup>20</sup> मिनु डोंइती गो इन कली 'होत्रप क्येडा वाइली ठेयब ममाइ' दैती। मिनु आं दैशो मिन्तीन। मुरपुकीमी आं कली श्येत गेतीमी हना, इन कली यो श्येत गेनीमी। मुरपुकीमी दोपा आं दैशो लोत्र नेंशा टीमे, मोपा इन दैशो लोत्र यो टीनीम। यूहन्ना १३:१६; मत्ती १०:२४-२५<sup>21</sup> मुरपुकीमी आं नोले खोइक्ब इन कली श्येत गेनीम। मारदे हना आं कली सोइक्ब कली मतुइक्वनीम। यूहन्ना १६:३<sup>22</sup> गो रागीमी जाक्शा, मेको मुर आन कली शेंताक्डमी। आं लोत्र तुइश्शा यो मटीमे। मोपतीके मेकोपुकी पाप राइनीमी। यूहन्ना ९:४१<sup>23</sup> सुमी आं कली मदाक्बा, मेकोमी आं आफ कली यो मदाक्ब। लूका १०:३६<sup>24</sup> गो मुर आन कली छक लाक्चा डा गेय कोइताक्डमी। आं क्येडा डोंइती सुइमी आं खोदैशो गेय मकोइदे। मेको गेय कोइशा यो मुरपुकीमी आं आफ नु गो निम्फा आंस कली मदाक्नीम।<sup>25</sup> परमप्रभु यावेमी ब्रेक्पाइश्शो लोत्र थमा दुग्चा कली आं कली मदाक्नीम। मार ब्रेक्पाइश्शो बाक्त्त दैशा हना 'मेकोपुकीमी आं कली मोशा यो मदाक्नीम' दे ब्रेक्शो बाक्त्त। भजन संग्रह ६९:४

26 मिनु वारच पाइब का जाक्ब। गो मेको कली आफ आ बाक्तीक रे सोइक्नुड। मेको परमप्रभु यावे रे जाक्शो थमा डा सोक्त बाक्ब। मेकोमी आं पर्वम शेंब। यूहन्ना १४:१६,२६; लूका २४:४९<sup>27</sup> मिनु गेपुकी यो आं सांक्छी दुग्शा, मुर आन कली आं पर्वम शेंनीनी। मारदे हना गेपुकी डोंइती रे गो नु बाक्शो ननी" दैत। प्रेरित १:८,२१-२२; प्रेरित ५:३२

16 मिनु येसुमी "गो एको लोत्र नेल्ल मारदे शेंताक्वन्नी दैशा हना, थमा सुइक्तीक रे नोले मशोंइसीन, दे शेंताक्वन्नी।<sup>2</sup> मुरपुकीमी इन कली गुम्तीक खिं रे तिल्लीम। थमा, इक्का नोले इन कली साइक्बपुकीमी 'गो परमप्रभु यावे आ दाक्शो पना पन बाक्ती' दे मिन्नीम। मत्ती १०:१७,२२; मत्ती २४:९<sup>3</sup> मोदैशो पाइनीम। मारदे हना आं आफ नु आं कली मतुइक्वनीम। यूहन्ना १५:२३<sup>4</sup> मिनु गो मेको नेल्ल इन कली शेंताक्वन्नी। आं दैशो दुग्मेनु, गो इन कली डोंइती दैशो मिन्तीन। डोंइती गो एको लोत्र इन कली मनैपाइक्वन्नी। मारदे हना गेपुकी नु काथा बाक्ती।

परमप्रभु आ सोक्त आ गेय

5 मुल चहिं आं कली रागीमी सोइक्ब आ बाक्तीकेमी लाइनुड। गो लती हना यो, गेपुकी सुइमी 'ते लाइनीनी?' दे हिल्लो मपाइनीनी।<sup>6</sup> तन्न आं दैशो नेंशा, इन थुं खाइक्ब।<sup>7</sup> नोफा दाइश्शा नेनीन, आं लशो इन कली रिम्शो दुग्ब। गो मलती हना, थमा सुइक्ब आन कली वारच पाइब मजाक्ब। गो लती हना, मेको कली सोइक्नुड। यूहन्ना १४:१६,२६<sup>8</sup> मिनु मेको जाक्शा, रागी डा मुर आन कली पाप आ पर्वम नु परमप्रभु यावे आ डोंइती मार ठीक बाक्ब नु परमप्रभु यावे आ निसाफ पतीक दोदैशो बाक्बा, दे शेंब।<sup>9</sup> मेको आन पाप मार बाक्त्त दैशा हना, आं कली थमा मसुइश्शो बाक्नीम। यूहन्ना १५:२२,२४<sup>10</sup> परमप्रभु यावे आ डोंइती ठीक दुग्शा बाक्चा आ पर्वम मार शेंब दैशा हना, गो आं आफ आ बाक्तीक लाइनुड। मो दुग्तीके गेपुकीमी आं कली मताइनीनी, दे शेंब। प्रेरित ५:३१; रोमी ४:२५<sup>11</sup> मिनु निसाफ पचा आ पर्वम मार शेंब दैशा हना, परमप्रभु यावेमी रागी डा मुर आन कली हुकुम पाइब सैतान कली निसाफ पने थुम्नु, दे शेंब। यूहन्ना १२:३१

12 मिनु इन कली शेंतीक लोत्र शुश लीब। तन्न मुल फाल्ने मचाप्पीनी। १कोरिन्थी ३:१<sup>13</sup> मिनु थमा डा सोक्त जाक्शा, इन कली थमा लां कोइशा शेंब। मेकोमी आंम मिम्शो मशेंब। तन्न मार मार नेंबा, मेकोन शेंब। नोले मार मार दुग्बा, मेको यो शेंब। यूहन्ना १४:२६; १यूहन्ना २:२७<sup>14</sup> आं सक्ति कोइब। गो मार देनुडा, मेको इन कली शेंब।<sup>15</sup> आं आफ आ सक्ति नु आं सक्ति कान बाक्ब। आं आफ नु मार मार बाक्मे, मेको आं के नम। मिनु

परमप्रभु यावे आ सोक्तीमी आं लोव्र नॅशा, इन कली शॅब। यूहन्ना ३:३५; यूहन्ना १७:१०

‘परमप्रभु आ बाक्तीक लाइनुड’ दॅशो

16 इच्का नाक्त नोले आं कली मताइनीनी। मिनु इच्का नोले ताइनीनी” दे येसुमी आ शॅसीब आन कली माइक्तीमी। यूहन्ना १४:१९ 17 आ शॅसीब का निक्शीमी “इच्का नाक्त नोले आं कली मताइनीनी। मिनु लॅशा इच्का नाक्त नोले ताइनीनी। मिनु गो आं आफ आ बाक्तीक लाइनुड दॅत। एको लोव्र मार में” दॅमुक्तेकम। 18 मिनु “इच्का नोले नाक्त दॅशो लोव्र, मार में, आ दॅशो लोव्र मरुबय” दॅमुक्तेकम। 19 मिनु येसुमी आ कली हिल्लो पाइनीमी, दे तुइक्ताक्क। मिनु मेको आन कली “इच्का नाक्त नोले आं कली मताइनीनी। मिनु लॅशा इच्का नाक्त नोले ताइनीनी दॅशो लोव्र आ पर्वम मार लोव्र पमुनी? 20 नोफा दाइश्शा नेनीन, गेपुकी डाक्शा, हिशेक पाइनीनी। रागी डा मुरपुकी चहिं ग्येरसीनीम। इन थुं खाइश्शो बाक्नीनी। तन्न थुं खाइश्शो साशा ग्येरनीनी। मर्कूस १६:१० 21 मीश मुरुमी आल थिचावानु ‘आं थिची जाक्त’ दे हिंशा, श्येत जाइब। तन्न आल थिशा ‘आल का जरमेसाक्क’ दे ग्येरसीब। आ डोंइती डा हिंशो नु श्येत ममिम्ब। यसैया २६:१७ 22 मिनु मेको खोदॅशो पा गेपुकी मुल थुं खाइश्शो बाक्नीनी। तन्न गो इन कली लॅशा तडानु, गेपुकी थमा पा ग्येरसीनीनी। मिनु इन ग्येरसीशो सुइमी क्याम्ने मचाप्नीम। 23 मेना गेपुकी आं कली मारेड हिल्लो मपाइनीनी। नोफा दाइश्शा नेनीन, गे आं नॅमी आं आफ कली मार मार पुंइनीनु, आं आफोमी इन कली गेब। यूहन्ना १४:१३-१४ 24 मुल सम्म गेपुकीमी आं नॅमी मारेड मपुंइनी। पुनीन, मिनु इन पुंइशो ताइनीनी। मेको तशा, गेपुकी थमा पा ग्येरसीनीनी।

25 गो इन कली कथा खोदॅशो पा शॅताक्नीनी। नोले कथा पा मशॅनन्नी। मेना आं आफ आ पर्वम मारेड मखुइक्थु शॅनन्नी। यूहन्ना १५:११ 26 आं नॅमी पुंइनीनी। मिनु गो ‘आं आफ कली इन पर्वम पुंइनुड’ दे इन कली मर्दनुड। 27 आं आफोमी इन कली दाक्क। मारदे हना आं कली दाक्ताक्नी। गो आं परमप्रभु यावे रे जाक्शो नड, दे थमा सुइक्तीनी। यूहन्ना १४:२१ 28 गो आं आफ रे रागीमी जाक्ती। लॅशा रागी रे पा, आं आफ आ बाक्तीक लाइनुड” दॅत।

29 मिनु आ शॅसीबपुकीमी येसु कली “मुल गे कथा पा मशॅथु, मारेड मखुइक्थु शॅनीनी। 30 गे नेल्ल तुइक्नीनी, दे गोपुकी मुल तुइक्ताक्क। मोपतीके इन कली शॅब ममाल्ब। गे परमप्रभु यावे आ बाक्तीक रे यिशो ननी, दे थमा सुइक्ताक्क” दॅतेकम। 31 मिनु येसुमी “मार, गे मुल थमा सुइक्तीनी, मिनु? 32 नोले नेल्ल ब्राशा, इन खिं खिं लशा, आं कली प्रॉइनीनी। मिनु गो का ला बाक्नुड। तन्न गो का ला मडुम्नुड। मारदे हना आं आफ गो नु बाक्क। जकरिया १३:७; मत्ती २६:३१ 33 आं कली मिम्शा इन थुं नाइश्शा बाक्कीन, दे एको लोव्र शॅताक्नीनी। गेपुकी रागीम बाक्शा, श्येत जाइनीनी। तन्न थुं बारपाइश्शा ग्येरसीने। गो रागी कली ग्राती” दॅत। यूहन्ना १४:२७; रोमी ५:१; १यूहन्ना ५:४

येसुम आ आफ कली पुंइशो लोव्र

17 मिनु येसुमी मेको लोव्र पने थुम्शा, सरीड गे कोव्रशा “आं आफ, आं लची जाक्त, इन सक्ति गेयीनी। मिनु गो इन सक्ति कोंइनुड। 2 गे आं कली मुर नेल्ल आन कली अधिकार पचा गेतीनी। मिनु आं कली गेशो मुर नेल्ल आन कली गेना हना यो ब्रॉइशा बाक्चा गेनुडमी। मत्ती ११:२७ 3 गेना हना यो गे नु ब्रॉइशा बाक्चा मार बाक्क दॅशा हना, सुमी इन कली गे ला थमा परमप्रभु यावे बाक्नीनी नु गो, इन सोइश्शो येसु खीस्त नड, दे तुइक्तीमी, मेको ला गेना हना यो गे नु ब्रॉइशा बाक्चा ताइनीम। १यूहन्ना ५:२० 4 रागीम बाक्शा, इन पपाइश्शो गेय थुम्शा, इन सक्ति कोंइताक्डमी। 5 आं आफ, रागी सेल्चा क्येडा डोंइती गे नु इन छेडछेडमी बाक्ती। मुल लॅशा इन बाक्तीक जाक्चा चिक्ताक्क। डोंइती डा खोदॅशो पा गे नु इन छेडछेडमी बाक्चा गेयीनी। यूहन्ना १:१; फिलिप्पी २:६

6 गेमी रागी रे प्रॉइशो मुरपुकी गेतीनी। मेको आन कली इन नें तुइक्पाइक्तामी। मेको मुरपुकी इन के बाक्तेकम। मिनु गे आं कली गेतीनी।

मेकोपुकीमी इन लोव्र टिना टिन बाक्नीम। 7 गे आं कली मार मार गेनी, मेको नेल्ल इन के बाक्क, दे मेकोपुकीमी मुल तुइक्तीमी। 8 गे आं कली शॅताक्पीनी। मिनु इन शॅशो लोव्र मेको आन कली शॅताक्डमी। मिनु थमा सुइक्तेकम। गो इन बाक्तीक रे जाक्शो नड, दे थमा पा तुइक्तीमी। मेकोपुकीमी आं कली सोइक्क, गे ननी, दे थमा सुइक्तेकम। यूहन्ना १६:३० 9 मिनु गो मेको आन पर्वमी इन कली पुंइनुड। रागी डा मुर आन पर्वम मपुंइनुड। आं कली गेशो मुर आन पर्वम पुंइनुड। मारदे हना मेकोपुकी इन के नम। यूहन्ना ६:३७, ४४ 10 आं मुर नेल्ल इन के नम। इन के आं के नम। मेकोपुकीमी आं सक्ति कोंइनीम। यूहन्ना १६:१५ 11 मुल गो रागीमी शुश नाक्त मबाक्नुड। गे का ला बाक्शो आं आफ, इन बाक्तीक जाक्चशो बाक्नुड। तन्न मेकोपुकी रागीमी बाक्नीम। आं आफ, आं कली गेशो मुर इन नें डा सक्तिमी रिम्शो कोव्रशा वोतीन। दोपा गो गे नु थुं का डा बाक्डा, मोपा मेकोपुकी यो थुं का दुम्शा बाक्मल, दे सक्ति गेने। 12 गो आं कली गेशो मुरपुकी नु बाक्डानु, इन नें डा सक्तिमी रिम्शो कोव्रशा वोइक्तामी। सुइ मजाम्म। इन ब्रेक्पाइश्शो लोव्र थमा दुम्चा, दे का चहिं जाम्शा, नरक लाइब दुम्त। यूहन्ना ६:३९; भजन संग्रह ४१:१० 13 मुल गो इन बाक्तीक जाक्चशो बाक्नुड। इन लोव्र रागीमी शॅताक्डमी। मारदे शॅताक्डमी दॅशा हना, आं ग्येरशो खोदॅशो पा मेको यो ग्येरसीशा बाक्मल, दे शॅताक्डमी। यूहन्ना १५:११ 14 गो मेको आन कली इन दॅशो लोव्र शॅताक्डमी। मिनु रागी डा मुरपुकीमी मेको आन कली श्येत गेम्तेकम। मारदे हना रागी डा मनम। गो यो रागी डा मनड। यूहन्ना १५:१९ 15 मेको आन कली रागी रे प्रोनीन, दे इन कली मपुंइनुड। तन्न मेको आन कली सैतान रे प्रोनीन, दे पुंइनुड। मत्ती ६:१३; रथिस्सलोनिकी ३:३ 16 गो रागी डा मनड। मिनु आं खोदॅशो पा मेकोपुकी यो रागी डा मनम। 17 मेको आन कली इन थमा पतीकेमी खुमीन। इन थमा पतीक चहिं इन लोव्र बाक्क। भजन संग्रह ११०:१६० 18 गेमी आं कली रागीमी सोइश्शो खोदॅशो पा, गो यो मेको आन कली रागी रागीम सोइक्ताक्डमी। यूहन्ना २०:२१ 19 मेको आन पर्वम गो इन कली जिम्मा गेसीनुड। मेकोपुकी यो थमा पतीकेमी खुम्शो मुर दुम्शा बाक्मल। हिब्रू १०:१०

20 गो मेको आन पर्वम ला इन कली मपुंइनुड। तन्न मेको आन शॅशो लोव्र रे आं कली थमा सुइक्क दुम्ब आन पर्वम यो पुंइनुड। रोमी १०:१७ 21 मार पुंइनुड दॅशा हना, मेको नेल्ल थुं का डा दुम्मल। आं आफ, गे आं आगामी बाक्शो नु गो इन आगामी बाक्शो खोदॅशो पा मेकोपुकी इस आगामी बाक्मल, दे पुंइनुड। मो दुम्त हना, रागी डा मुरपुकीमी गेमी आं कली सोइक्ताक्की, दे थमा सुइक्तीमी। गलाती ३:२८ 22 गेमी आं कली गेशो सक्ति मेको आन कली गेतामी। मारदे गेतामी दॅशा हना, गो निक्शी थुं का डा दुम्शो खोदॅशो पा, मेकोपुकी यो गे नु थुं का डा दुम्मल, दे मेको सक्ति गेतामी। प्रेरित ४:३२ 23 गो मेको आन आगामी बाक्नुड। गे आं आगामी बाक्नीनी। मो पा बाक्शोनु, मेकोपुकी गे नु गो खोदॅशो पा का दुम्नीम। मो दुम्शो तशा, रागी डा मुरपुकीमी गे आं कली सोइक्ताक्की। मिनु गेमी आं कली दाक्ताक्पीनी। मोपा गेमी आं कली दाक्शो बुदी मेको आन कली यो दाक्ताक्की, दे तुइक्तेकम। १कोरिन्थी ६:१७ 24 आं आफ, आं कली गेशो मुरपुकी गो नु काथा बाक्मल, दे पुंइनुड। गे रागी सेल्चा डोंइती आं कली दाक्शा, इन सक्ति आं कली गेतीनी। मिनु मेकोपुकीमी यो आं सक्ति तामेक्क। यूहन्ना १२:२६; हितोपदेस ८:२२-३१

25 आं आफ, गे नेल्ल रिम्शो नु ठीक पाइब बाक्नीनी। रागी डा मुरपुकीमी इन कली मतुइक्तीमी। गो चहिं इन कली तुइक्नुड। मिनु आं शॅसीबपुकीमी गे आं कली सोइक्ताक्पीनी, दे तुइक्तीमी। 26 गो मेको आन कली इन नें तुइक्पाइक्तामी। मिनु लॅशा तुइक्पाइक्नुडमी। मारदे इन नें तुइक्पाइक्नुडमी दॅशा हना, गेमी आं कली दाक्शो खोदॅशो पा इन दाक्तीके मेको आन आगामी बाक्क। मिनु गो मेको नु आन आगाम बाक्डल” दे येसुमी परमप्रभु यावे कली पुंइतु।



यहूदीपुकीमी येसु कली ग्याइश्शो  
यूहन्ना १३:-; मत्ती २६:-२८:-; मर्कुस १४:-१६:-; लूका २२:-२४:-

18 मिनू येसुमी परमप्रभु यावे नु मेको लोव्र पने थुम्शा, आ शेंसीबपुकी नु किद्रोन खोल्ला आइक्की हांबु लाम्तेक्म। मेकेर फल फुल रवा बाक्शो रिम्शो बाक्तीक बाक्त। मिनू येसु आ शेंसीबपुकी नु मेकेर ओव्रतेक्म।<sup>2</sup> डोंइती मेकेर येसु आ शेंसीबपुकी नु शुश गुम्तीके बाक्त। मोपतीके येसु कली ग्याइक्ब आन कली वारच पाइब यहूदामी यो “मेकेर लाइनीम” दे तुइश्शो बाक्त। लूका २१:३७<sup>3</sup> मिनू यहूदामी ठेयब चढेब नु फरिसी आन सोइश्शो सिपाहीपुकी नु सिपाही आन ठेयब मुर आन कली येसु नु आ शेंसीब आन बाक्तीक चाक्तु। मेकोपुकी तोव्रशी नु लालटिन दाशा, या कुरशा जाक्तेक्म।<sup>4</sup> मिनू येसुमी “आं कली ग्याइक्थ जाक्तेक्म” दे तुइश्शा, मेको आन नेक्था लशा “सु कली माल्नी?” दे हिल्लो पाप्तु।<sup>5</sup> मिनू मेकोपुकीमी “नासरथ डा येसु कली माल्तक” देंतेक्म। मिनू येसुमी “गो नड” दे माइक्तीमी। येसु कली साइक्ब आन कली वारच पाइब यहूदा येसु कली ग्याइक्थ जाक्ब नु बाक्त।<sup>6</sup> मिनू येसुमी “गो नड” देंमेनु, मेको नेल्ल नोले गे दिल्ला गोल्तेक्म।<sup>7</sup> मिनू येसुमी लेंशा “सु कली माल्नी?” दे हिल्लो पवानु “नासरथ डा येसु कली माल्तक” देंतेक्म।<sup>8</sup> मिनू येसुमी “गो नड, देंती। आं कली माल्तीनी हना, अरु आन कली लचा गेने” दे माइक्तीमी।<sup>9</sup> डोंइती येसुमी परमप्रभु यावेमी गेशो मुर आन पर्बम “गो इन गेशो मुर सुइ मसाम्नुडमी” देंशो लोव्र थमा दुम्चा कली मेको लोव्र पाप्तु। यूहन्ना १७:१२<sup>10</sup> सिमोन पत्रुसमी तरवार कुरशो बाक्त। मिनू मेकोमी तरवार ग्रि शोइश्शा, ठेयब चढेब आ वाइल आ नोफा दी खोइक्तु। मेको वाइली आ नें माल्कस बाक्त।<sup>11</sup> येसुमी “इ या खोतीमी पिप्तो। गो आं आफोमी देंशो श्येत मजडल, दे मिम्नीनी? गो मेको श्येत जचा माल्नुड” देंत।

येसु हन्नास नु काइयाफास आस डोंइती

12 मिनू सिपाहीपुकी, आन कप्तान नु यहूदी आन ठेयब मुरपुकीमी येसु कली ग्याइश्शा फ्रेताक्म।<sup>13</sup> मेको बर्स डा नेल्ल क्येडा ठेयब चढेब काइयाफास माइश्शो बाक्माक्त। मेको आ शिउ हन्नास माइश्शो बाक्माक्त। मिनू ग्याइक्बपुकीमी येसु कली डोंइती हन्नास आ बाक्तीकेम लाइक्तेक्म।<sup>14</sup> डोंइती काइयाफासमी यहूदी आन कली “मुर नेल्ल आन साइक्चा डा मुर का कली साइक्चा रिम्शो दुम्ब” देंशो बाक्माक्त। लूका ३:१-२; यूहन्ना ११:४९-५०

येसुम पत्रुस आ पर्बम देंशो थमा दुम्शो

15 मिनू सिमोन पत्रुस येसु आ नोले खोइक्तु। अर्को शेंसीब कामी यो नोले खोइक्तु। नेल्ल क्येडा ठेयब चढेबमी मेको अर्को शेंसीब कली तुइश्शो बाक्त। मोपतीके मेको शेंसीब यो येसु नु नेल्ल क्येडा ठेयब चढेब आ खिं डा लाडगामी ओव्रत।<sup>16</sup> पत्रुस चहिं लाप्चो उइ बाक्माक्त। नेल्ल क्येडा ठेयब चढेब कली तुइक्ब अर्को शेंसीबमी लाप्चो कोव्रब मीश मुर कली लोव्र पशा गूत। पत्रुस कली खिं डा लाडगामी ओइताक्व।<sup>17</sup> लाप्चो कोव्रब मीश मुरुमी पत्रुस कली तशा “गे यो मेको मुर आ शेंसीब का मनवे डा?” देंमेनु, पत्रुसमी “गो मनड” देंत<sup>18</sup> ग्यू पशो बाक्त। मोपतीके वाइलपुकी नु मेकेर बाक्ब मुरपुकीमी मी मुइश्शा, एर ओथ बाक्शा, मी थेरना थेरन बाक्तेक्म। पत्रुस यो मी थेरशो बाक्त।

19 मेना नेल्ल क्येडा ठेयब चढेबमी येसु कली “इ शेंसीब आन कली मार शेंनेवे?” दे हिल्लो पाप्तु।<sup>20</sup> मिनू येसुमी “गो मुर नेल्ल आन कली लोव्र पाता। गुम्तीक खिंमी नु परमप्रभु यावे आ खिंमी शुश यहूदी गुम्तीकेमी शेंताक्डमी। खुइश्शा मारेइ लोव्र मपड। यूहन्ना ७:१४, २६<sup>21</sup> मारदे हिल्लो पयीनी? आं शेंशो लोव्र नेंब आन कली हिल्लो पने। मेकोपुकीमी आं शेंशो लोव्र तुइक्नीम” देंत।<sup>22</sup> मिनू मो देंमेनु, येसु आ नेक्था बाक्ब मुरुमी येसु कली चोवचो राप्था “गे नेल्ल क्येडा ठेयब चढेब कली मोदेंशो लोव्र पाइनेवे?” दे हुइक्ताक्व।<sup>23</sup> येसुमी “गो मरिम्शो लोव्र पाता हना, आं कली देनो। तन्न गो ठीक लोव्र पाता हना, मारदे राप्थी?” देंत।<sup>24</sup> मिनू हन्नासमी

येसु कली फ्रेंशो मप्रुइक्थ, नेल्ल क्येडा ठेयब चढेब काइयाफास आ बाक्तीकेमी सोइक्ताक्व।

25 मेना सिमोन पत्रुसमी थेरना थेरन बाक्शो बाक्त। मिनू मेकेर बाक्बपुकीमी पत्रुस कली “गे यो मेको मुर आ शेंसीब का मनवे डा?” देंमानु “गो मनड” देंत।<sup>26</sup> मेकेर नेल्ल क्येडा ठेयब चढेब आ वाइल का यो बाक्त। पत्रुसमी नोफा क्योरशो मुर आ खिं डा मुर का बाक्त। मेकोमी पत्रुस कली “गो इ कली मेको मुर नु फल फुल रूमी ताइतन, शां” देंत।<sup>27</sup> मिनू पत्रुसमी लेंशा “गो मनड” देंत। मो देंमेनु, भाले ग्रीत।

येसुम पिलातस नु लोव्र पशो

28 मिनू नोले मेको ग्याइक्बपुकीमी येसु कली काइयाफास आ बाक्तीक रे पिलातस आ खिं गे लाइक्तेक्म। मेना नां सोव्रचशो बाक्माक्त। मिनू मेकोपुकी पास्सा चाड डा भोज जचा कली ठीक दुम्शा बाक्शो बाक्तेक्म। मोपतीके मेकोपुकी पिलातस रोमी दुम्शो आ पर्बम मथिचा डा बाक्त, दे आ खिं आगा मओव्रम।<sup>29</sup> मो दुम्तीके पिलातस लाडगा गूशा, मेको आन कली “एको मुर कली मार दोस गेनीनी?” दे हिल्लो पाप्तु।<sup>30</sup> मिनू मेकोपुकीमी “एको मुर मरिम्शो मबाक्शो हना, गोपुकीमी एको कली ग्याइश्शा, इन बाक्तीकेमी मारदे चाक्नीकी डा?” देंतेक्म।<sup>31</sup> मिनू पिलातसमी “एको कली लतीन। मिनू इन ऐन कानुनमी ब्रेक्शो कोव्रशा, निसाफ पने” दे माइक्तीमी। मिनू मेको यहूदीपुकीमी पिलातस कली “गो आंइ कली सुइ मुर साइक्चा मगारब” देंतेक्म। यूहन्ना १९:६-७<sup>32</sup> येसुमी आ डोंइती देंशो लोव्र “दोपा बेक्चा माल्नुडा” देंशो, थमा दुम्चा कली मोदेंशो दुम्त। यूहन्ना १२:३२-३३; मत्ती २०:१९

33 मिनू पिलातस आ खिं ओव्रशा, येसु कली आगामी ब्रेश्शा “गे यहूदी आन पिप ननी?” दे हिल्लो पाप्तु।<sup>34</sup> येसुमी “गे आंमा मिम्शा मो देंनी देय मुरुमी देंमा?” दे हिल्लो पाप्तु।<sup>35</sup> मिनू पिलातसमी “गो यहूदी मनड। इन रागी डा मुरपुकी नु ठेयब चढेबपुकीमी इन कली निसाफ पचा कली आं कली जिम्मा गेतीमी। गे मार पनी?” दे हिल्लो पाप्तु।<sup>36</sup> येसुमी “गो एको रागी डा पिप मनड। गो रागी डा पिप नड हना, आं वारचपुकीमी राप्शी तोशा, ओपा यहूदीपुकीमी आं कली मग्याइक्वीमी वा। तन्न गो एको रागी डा पिप मनड” दे येसुमी देंत।<sup>37</sup> पिलातसमी “मिनू गे पिपन ननी?” दे हिल्लो पाप्तु। मिनू येसुमी “गो पिप नड, दे गे आंमा देंतीनी। मिनू थमा मार बाक्बा, दे कोइंचा कली रागीम जरमेशा जाक्ती। सु थमामी बाक्बा, मेकोमी आं सेंदा नेंब” देंत।<sup>१तिमोथी ६:१३</sup><sup>38</sup> मिनू पिलातसमी “थमा मार में?” देंत। मिनू मेको देंम नोले पिलातस लेंशा लाडगा गूशा, यहूदी आन कली “एको मुर मरिम्शो पाइब, दे मसुइक्नुड।<sup>39</sup> मिनू पास्सा चाडमी मुर का प्रोंइतीकेमी गो एको यहूदी आन पिप प्रोंइशा सोइक्नुड। गोपुकी मार देंनीनी?” दे हिल्लो पाप्तीमी।<sup>40</sup> मेकोपुकीमी चहिं “एको कली मप्रोंइचा। तन्न बारब्बा कली प्रोंइचा” दे ग्रीतेक्म। बारब्बा चहिं खुइ बाक्माक्त।

“येसु कली साइक्चा” दे ग्रीशो

19 मिनू पिलातसमी येसु कली युक्पाइक्तु।<sup>2</sup> आ सिपाहीपुकीमी चू के सिरपेच सेल्शा, येसु आ पियामी गुप्ताक्म। मिनू येसु कली पिप आ फेक्तीक वा फेक्ताक्म।<sup>3</sup> मिनू आ नेक्था जाक्शा “जय, यहूदी आन पिप” देंशा, आ चोवचो राप्तेक्म।<sup>4</sup> मिनू पिलातस लेंशा, खिं रे गूशा, लाडगामी रिम्शा बाक्शो आन कली “कोव्रडीन, गो एको कली गुंइशा, गोपुकी नु गुम्पाइक्नुड। मारदे हना मरिम्शो पाइब मसुइक्नुड, दे तुइक्तीन” दे माइक्तीमी।<sup>5</sup> मिनू येसु चू के सिरपेच गुप्शा, पिप आ फेक्तीक वा फेक्शा गूत। पिलातसमी “लो, एको मुर कली कोव्रडीन” देंत।<sup>6</sup> मिनू ठेयब चढेब नु यहूदी आन ठेयब मुरपुकीमी “शीमी कांटी थोक्शा क्याइश्शा सतीन। शीमी कांटी थोक्शा क्याइश्शा सतीन” देंना देंन ग्रीतेक्म। मिनू पिलातसमी “गो एको कली मरिम्शो पाइब मसुइक्नुड। मोपतीके गोपुकी एको कली लाइश्शा, शीमी कांटी थोक्शा क्याइश्शा सतीन” दे माइक्तीमी।<sup>7</sup> यहूदीपुकीमी “आंइ ऐन कानुन बाक्ब। मिनू मेको ऐन कानुनमी ब्रेक्शो खोदेंशो पा एको मुर

बेक्वा माल्ब। मारदे हना एकोमी आंमा कली परमप्रभु यावे आ तौ सेल्सीशो बाक्त" दैतेक्म। यूहन्ना १०:३३; लेवी २४:१६

८ मिनू पिलातसमी मोदेशो नेंशा, डोंइती क्येडा हित। ९ मिनू येसु कली लेंशा खिं ओइशा "गे ते रे जाक्शो ननी?" दे हिल्लो पाप्टु। मिनू येसुमी मारेड लोव्र मलेत्त। १० मोपतीके पिलातसमी "गे आं कली लोव्र मपाइनीनी? इन कली प्रॉइशा सोइक्वा नु शीमी कांटी थोक्शा क्येडाइशा साइक्वा गो नु निम्फा अधिकार बाक्ब, दे मतुइक्नीनी?" दे माइक्तु। ११ मिनू येसुमी "इन के अधिकार बाक्ब। इन कली गेशो अधिकार चहिं इर रे गेशो बाक्ब। मोपतीके इन मरिश्शो पशो क्येडा आं कली साइक्वा कली वारच पाइब आ मरिश्शो पशो ठेयब बाक्ब" दैत। १२ मिनू येसु आ लोव्र नेंशा नोले पिलातसमी येसु कली प्रॉइशा सोइक्वा माल्तु। तन्न मेको यहूदीपुकीमी पिलातस कली "गे एको कली प्रॉइशा सोइक्वाकनी हना, गे रोमी आन पिप सिजर आ वारच मननी। मिनू सुमी 'गो पिप नड' देंबा, मेको सिजर आ जोरी सत्रु दुम्ब" दैतेक्म। प्रेरित १७:७

येसु कली यहूदी आन गुइमी गेशो

१३ मिनू यहूदी आन लोव्र नेंशा, पिलातसमी येसु कली खिं रे गुइताक्व। मिनू पिलातस निसाफ पाइब आ नित्तीकेमी निस्साक्व। मेको निसाफ नित्तीक आ खपीमी फुल्लु ब्रशो बाक्तेक्म। मेको कली हिब्रू लोव्रमी गाब्बाथा देंनीम। १४ मेना नां सोक्वा चिक्शो बाक्त। मेको नाक्ती चहिं पास्सा चाड डा भोज सातीक नाक्ती बाक्त। मिनू पिलातसमी यहूदी आन कली "इन पिप कली कोव्रडीन" दैत। १५ मिनू यहूदीपुकीमी "सतीन, सतीन, एको कली शीमी क्येष्ठा कांटी थोक्तीन" दे ग्रीतेक्म। पिलातसमी "गो इन पिप कली शीमी क्येष्ठा कांटी थोक्नुडा डा?" दे माइक्तीमी। मिनू ठेयब चढेबपुकीमी "गो आंइ के सिजर का ला पिप बाक्ब" दैतेक्म। यूहन्ना १८:३७ १६ पिलातसमी "येसु कली शीमी क्येष्ठा कांटी थोक्तीन" दे मेको आन कली जिम्मा गेप्टु।

येसु कली शीम क्येष्ठा कांटी थोक्शो

१७ मिनू नोले यहूदीपुकीमी येसु कली लाइक्तेक्म। मिनू आ कली कांटी थोक्शा क्येडाइशा साइक्तीक शी आंमा कुरपाइशा, खप्परे माइक्तीकेमी लाइक्तेक्म। हिब्रू लोव्रमी मेको कली गोल्गाथा देंनीम। १८ मेकेर जाक्दीशा, येसु कली शीमी क्येष्ठा कांटी थोक्ताक्म। मोदेशो पा मुर निक्शी आस कली यो शीमी क्येष्ठा कांटी थोक्ताक्म। मिनू येसु कली कांटी थोक्शो शी मेको आस दातेमी खुक्तेक्म। १९ मिनू पिलातसमी "नासरथ डा येसु, यहूदी आन पिप" दे ब्रेक्स ब्रेक्शा, येसु आ शीमी क्येष्ठा वोइक्तु। २० येसु कली साइक्तीक ठाउं यरूसलेम सहर आ नेक्था बाक्त। मिनू शुश यहूदीपुकीमी मेको ब्रेक्शो ब्रेक्स पढेक्तेक्म। मेको ब्रेक्स चहिं हिब्रू, रोमी नु ग्रीक लोव्रमी ब्रेक्शो बाक्त। २१ मिनू यहूदी आन ठेयब चढेबपुकीमी पिलातस कली "यहूदी आन पिप ममाड, तन्न 'गो यहूदी आन पिप नड' दैत, दे ब्रेक्तीन" दे माइक्तेक्म। २२ मिनू पिलातसमी "गो मार ब्रेक्तु, मेकोन ठीक ब्रेक्ताक्ड" दे माइक्तीमी। २३ सिपाहीपुकीमी येसु कली कांटी थोक्शो शी खुक्ने थुम्शा, येसु आ वासी ४ जना सिपाहीपुकीमी उइक्थ उइक्थ पा योक्साक्म। येसु आ तारी फेक्तीक वा उइ रे इर सम्म प्रोव्रशो मफेरशो थम रिश्शो वा का बाक्त। २४ मोपतीके मेकोपुकीमी "एको चहिं मखाक्व। तन्न बाजी ग्यारय। मिनू सुम ग्राबा, मेकोमी ताइब" देंमुक्तेक्म। मो पामेनु "आं वासी योक्सीनीम। आं तारी फेक्तीक वा कली 'सुम ताइबा?' दे बाजी ग्यारनीम" दे ब्रेक्शो लोव्र थमा दुम्त। भजन संग्रह २२:१८ २५ मिनू सिपाहीपुकीमी मो पामेनु, येसु आ ममा येसु आ शी आ नेक्था बाक्त। क्लोपास आ मीश मरीयम नु माग्दाला डा मरीयम यो मेकेर बाक्ताक्स। मिनू येसु आ नेल्ल क्येडा दाक्शो शेंसीब यो मेकेर बाक्त। २६ मिनू येसुमी आ ममा कली "आं ममा, मेको कली इ तौ मिम्तो" दे माइक्तु। यूहन्ना १३:२३ २७ मिनू आ शेंसीब कली "गेमी यो इम्मा खोदेशो मिम्तो" दे माइक्तु। मेना रे मेको शेंसीबमी येसु आ ममा कली आ ममा मिम्शा, आ खिंम वोइक्तु।

येसु बेक्वा आ पर्बम ब्रेक्शो लोव्र

२८ मिनू नोले येसुमी "आं गेय पचा नुप्ट" दे तुइक्ताक्व। मिनू परमप्रभु यावे आ ब्रेक्पाइश्शो लोव्र थमा दुम्चा कली येसुमी "गो तूतू दाक्ती" दैत। भजन संग्रह २२:१५ २९ मिनू मेकेर गर का ग्युरशो तूचा थोव्रक वोइश्शो बाक्त। मेकोपुकीमी कोक्केमी वा खोदेशो फ्रेंशा, मेको ग्युरशो तूचा थोव्रकीमी खुम्शा, येसु कली युप्पाइक्तेक्म। भजन संग्रह ६९:२१ ३० मिनू येसुमी युप्शा "मुल थुम्ता" दैत। मिनू आ पिया खुक्शा बेक्त।

३१ मेको पास्सा चाड मानेचा कली सातीक नाक्त बाक्त। मोपतीके बेक्शो रां शीमी मबाक्मल, दे यहूदीपुकीमी पिलातस कली "मेको आन खोइल जिक्शा साइश्शा, शी रे शोल्शा लदमेक्ल" दैतेक्म। मारदे हना मेको पास्सा आ डोंइती डा ठेयब नाक्त बाक्त। ब्यवस्था २१:२३ ३२ मोदुम्तीके सिपाहीपुकीमी कांटी थोक्शो येसु आ ग्युरा नु पेरा गे डा निम्फा आस कली खोइल जिक्ताक्म। ३३ मिनू येसु आ क्युक्तीकेमी जाक्मानु, येसु कली बेक्शो ताम्तेक्म। मिनू येसु आ खोइल मजिक्मोम। ३४ सिपाही कामी येसु आ कोव्रखामी भालामी तूताक्व। मिनू तूदानु, हुश नु ब्वाक्कु यित। ३५ मेको नेल्ल ताइबमी मेको दुम्शो आ पर्बम सांकछी बाक्शा, थमा लोव्र पाइब। गेपुकी यो थमा सुतीन दे मेकोमी थमा लोव्र पाइब। ३६ परमप्रभु यावे आ ब्रेक्पाइश्शो लोव्र थमा दुम्चा कली मोदेशो दुम्त। लोव्र कामी "मेको आ रुश का यो मजिक्नीम" दे ब्रेक्पाइश्शो बाक्त। प्रस्थान १२:४६ ३७ मिनू लोव्र कामी "मेको तूबपुकीमी आंम तूशो मुर कली कोव्रनीम" दे ब्रेक्पाइश्शो बाक्त। जकरिया १२:१०; प्रकाश १:७

येसु आ बेक्शो रां वोइश्शो

३८ अरीमाथीया गाउं डा योसेफ माइश्शो मुर का बाक्त। मेको यहूदी आन कली तशा हिंशा खुइश्शा, येसु आ शेंसीब दुम्शो बाक्त। मेकोमी पिलातस कली "येसु आ बेक्शो रां लाइक्वा गेयीनी" दे पुना बाक्त। मिनू पिलातसमी लाइक्वा गेवा बाक्त। मिनू योसेफ येसु आ बेक्शो रां ब्रथ जाक्त। यूहन्ना ७:१३ ३९ डोंइती येसु नु लोव्र पचा कली नाक्दो जाक्शो निकोदेमसमी येसु आ बेक्शो रां गिल्वा, दे सहे का लित्रा मूरे नु एलोव्र माइश्शो के सेल्शो ब्रोव्रशो रिना पाइब थोव्रक चाक्शा जाक्त। लित्रा का ३२७ ग्राम बाक्ब। यूहन्ना ३:२ ४० मिनू येसु आ बेक्शो रां लाइश्शा, ब्रोव्रशो रिना पाइब थोव्रक नु वामी गिल्लेक्म। मेकोन यहूदी आन के बेक्शो मुर आन कली पतीक बाक्ब। ४१ येसु कली शीमी कांटी थोक्तीक आ नेक्था फल फल रू का बाक्त। मेको रूमी बेक्शो मुर कली वोइक्तीक नक पुक्खी का सेल्शो बाक्त। मेकेर सुइ मवोइश्शो बाक्त। ४२ मेको नाक्त यहूदी आन पास्सा मानेचा कली सातीक नाक्त बाक्त। मोपतीके येसु कली नेल्ल क्येडा नेक्था डा पुक्खीमी वोइक्तेक्म।

येसु सेंशो

मत्ती २८:१-१०; मर्कूस १६:१-८; लूका २१:१-१२

२० मिनू साता डा डोंइती नाक्त नां मसोव्रथु, माग्दाला डा मरीयम बेक्शो मुर वोइक्तीक पुक्खी जाक्दीम्मेनु, पुक्खी कली सुशो ठेयब फुल्लु तिल्शो तवा बाक्त। २ मिनू फुल्लु तिल्शो तशा, दोरशा लशा, सिमोन पत्रुस नु येसु आ दाक्शो शेंसीब आस बाक्तीक जाक्त। मिनू "प्रभु कली बेक्शो मुर वोइक्तीक पुक्खी रे लदमे बाक्त। ते वोदमे?" दे हिल्लो पाप्टु। यूहन्ना १३:२३ ३ मिनू पत्रुस नु अर्को शेंसीब बेक्शो मुर वोइक्तीक पुक्खी कोव्रथ लाम्ताक्से। ४ निम्फा दोरताक्स। मिनू अर्को शेंसीबमी पत्रुस कली दाम पाप्टु। दाम पशा, डोंइती बेक्शो मुर वोइक्तीक पुक्खी जाक्दीत। ५ मिनू खुम बाप्शा पुक्खी आगा कोव्रतु। मेकेर येसु कली गिल्शो वा ला तशा, आगा मओव्र। ६ सिमोन पत्रुस जाक्शा, पुक्खी गृ ओव्रशा कोव्रडानु, येसु कली गिल्शो वा ताप्टु। ७ मिनू पियामी फ्रेंशो रूमाल मुक्शा, तिल्शा वोइश्शो ताप्टु। यूहन्ना ११:४४ ८ नोले डोंइती जाक्ब अर्को शेंसीब यो ओव्रत। मिनू मेको वा तशा थमा सुइक्तु। ९ मारदे हना मुल सम्म मेकोपुकीमी येसु बेक्शो रे सेंसीचा माल्ब, दे ब्रेक्पाइश्शो लोव्र मतुइश्शो बाक्तेक्म। भजन संग्रह

१६:१०; लूका २४:२५-२७; प्रेरित २: २४-३२; १कोरिन्थी १५:४<sup>10</sup> मिनु नोले मेको शेंसीब निक्शी खिं लेत्ताक्स।

### येसुमी तपांडसीशो

11 मरीयम डाकना डाकन पुक्खी आ नेक्था बाक्शो बाक्माक्त। डाकना डाकन खुम बाप्शा, पुक्खी आगामी कोव्रडानु, 12 बुश वा फेक्शो परमप्रभु यावे आ स्वर्ग डा गेय पाइब निक्शी आस कली तवा बाक्त। मेको निक्शी येसु आ बेक्शो रां वोइक्तीकेमी का पिया गे का खोइल गे निक्शी ताम्सी बाक्त। 13 मिनु मेको निक्शीमी मरीयम कली “गे मारदे डाक्नेवे?” दे हिल्लो पाम्से बाक्त। मिनु मरीयममी “मेकोपुकीमी आं प्रभु कली लदमे बाक्त। मिनु ते वोदमे मतुइक्नुड” दे माइक्सी बाक्त। 14 मो देंशा मरीयममी फिर लेक्शा कोव्रडानु, येसु कली राप्शा बाक्शो तवा बाक्त। मेको येसु बाक्ब, दे मतुइक्ता बाक्त। 15 मिनु येसुमी “गे मारदे डाक्नेवे? सु कली मली?” दे हिल्लो पवा बाक्त। मरीयममी “मेको फल फुल रूमी गेय पाइब मुर बाक्माक्त” दाप्शा, मेको कली “हजुर, गे मेको बेक्शो रां कली एक रे लाइक्तीनी हना, ते वोइक्नी, आं कली देनीने। गो मेको कली लाइक्नुड” दे मदा बाक्त। 16 मिनु येसुमी मरीयम कली “मरीयम” देंमेनु, मरीयममी फिर लेक्शा, हिब्रू लोव्रमी “राब्बोनी” देंमाक्त। हिब्रू लोव्रमी राब्बोनी देंशो “शेंब” बाक्ब। 17 मिनु येसुमी “मग्याइक्ती। मारदे हना मुल सम्म आं आफ आ बाक्तीक मलड। आं लोकब आन बाक्तीक लशा, मेको आन कली ‘गो इं आफ, परमप्रभु यावे आ बाक्तीक लाइनुड’ गे मेको आन कली शेंदो” दे माइक्त्तु। हिब्रू २:११-१२ 18 मिनु माग्दाला डा मरीयम शेंसीब आन बाक्तीकेमी लशा “गो प्रभु कली ताता” देंत। येसु आ देंशो लोव्र यो तुइक्पाइक्तीमी।

### येसुम शेंसीब आन कली तपांडसीशो

मर्कुस १६:१४-१८; लूका २४:३६-४९

19 मेको साता डा डोंइती नाक्त नां रिक्चावानु, येसु आ शेंसीबपुकी यहूदी आन क्येडा हिंशा, लाप्चो चोक्शा, खिं गाम बाक्तेक्म। मिनु येसु मेको आन बाक्तीकेमी जाक्शा “थुं नाइक्शा बाक्कीन” देंत। 20 मो देंशा मेको आन कली आ गुड नु आ कोव्रखा कोइदानु, आ शेंसीबपुकी प्रभु कली तशा ग्येरसाक्म। १यूहन्ना १:३ 21 मिनु लेंशा येसुमी मेको आन कली “इन थुं नाइक्शा बाक्कीन। आं आफोमी दोपा सोइक्ती, मोपा गो इन कली यो सोइक्ताक्ननी” दे माइक्तीमी। यूहन्ना १७:१८ 22 मो देंशा येसुमी मेको आन कली मुइक्शा “परमप्रभु यावे आ सोक्त ताक्कीन। 23 गेपुकीमी सु सु कली माफ गेनीनी, मेकोम माफ ताइनीम। सु सु कली माफ मगेनीनी, मेको आन पाप लीब” देंत। मत्ती १८:१८

### थोमास कली थमा सुइक्पाइक्शो

24 मिनु येसु आ शेंसीब १२ जना आन दाते डा का जौले माइक्शो थोमास येसु जाक्मेनु, मेकेर मबाक्शो बाक्त। यूहन्ना ११:१६; यूहन्ना १४:५ 25 अरु शेंसीबपुकीमी “प्रभु कली ताइतक” दे थोमास कली देंमानु “येसु आ गुइमी कांटी थोक्शो गार मतडा सम्म, मेको गारमी आं ब्रेप्चो मलिवथु नु आ कोव्रखा डा गारमी मथिडा सम्म, गो थमा मसुइक्नुड” देंत। यूहन्ना १९:३४ 26 मिनु मेको मो दुश्शो साता का नोले येसु आ शेंसीबपुकी लेंशा खिं आगाम बाक्तेक्म। मेना थोमास यो मेकोपुकी नु काथा बाक्शो बाक्त। लाप्चो चोक्शा, आगाम बाक्मानु, येसु मेको आन बाक्तीकेमी जाक्शा “थुं नाइक्शा बाक्कीन” देंत। 27 मिनु येसुमी थोमास कली “आं गुइ डा गारमी इ ब्रेप्चो लिक्शा, कोव्रडो। मिनु इ गुइमी आं कोव्रखा डा गार थिवो। गे थमा मसुइक्ब मद्दुमो। तन्न थमा सुइक्ब दुमो” दे माइक्त्तु। 28 थोमासमी “आं प्रभु, आं परमप्रभु यावे” देंत। यूहन्ना १:१ 29 मिनु येसुमी “गे आं कली तशा थमा सुइक्तीवी। सुमी आं कली मतथु, थमा सुइक्बा, मेको शुश ग्येरसीशो मुर बाक्ब” देंत। १पत्रुस १:८; हिब्रू ११:३

### एको किताब मारदे ब्रेक्शो बाक्मे

30 मिनु येसुमी आ शेंसीब नु बाक्शा, शुश अरु छक लाक्वा डा गेय पाप्तु। मेको गेयपुकी एको किताबमी मब्रेक्शो बाक्नीम। 31 मिनु मेको ब्रेक्शो छक लाक्वा डा गेयपुकी मारदे ब्रेक्शो बाक्नीम देंशा हना, गेपुकीमी “येसु ख्रीस्त, परमप्रभु यावे आ तौ बाक्ब” दे थमा सुइक्ने चापीन। मिनु थमा सुइक्शा, आ नेमी गेना हना यो ब्रोंइशा बाक्वा ताइनीनी, दे ब्रेक्शो बाक्ब। १यूहन्ना ५:१३

### येसुम गालील रागीम तपांडसीशो

21 मिनु नोले येसु तिबेरीयास डा समुन्द्र आ नेक्थामी आ शेंसीब आन कली लेंशा तपांडसाक्व। दोपा तपांडसाक्व देंशा हना, 2 सिमोन पत्रुस, जौले माइक्शो थोमास, गालील डा काना सहर डा नथानेल, जब्दी आ तौ निक्शी नु येसु आ शेंसीब अर्को निक्शी काथा बाक्तेक्म। यूहन्ना १४:५ 3 मिनु सिमोन पत्रुसमी मेको आन कली “गो डाइं रेत्य लाइनुड” देंत। मिनु “गो यो गे नु लाइनीकी” देंतेक्म। मिनु लशा, डोंगा डोइक्शा, डाइं रेत्य लाम्तेक्म। तन्न मेको नाक्दो डाइं का यो मरेम्म। 4 मिनु सुनी नां सोवची ना येसु समुन्द्र आ नेक्थामी बाक्शो बाक्त। आ शेंसीबपुकीमी येसु बाक्माक्त, दे मतुइक्तेम। यूहन्ना २०:१४; लूका २४:१६ 5 मिनु येसुमी “ए आलपुकी, डाइं बाक्म को?” दे ब्रेक्शा, हिल्लो पाप्तु। मिनु “मबा” दे लोव्र लेत्ताक्म। लूका २४:४१ 6 मिनु येसुमी “इन ग्याइल डोंगा आ ग्युरा गे आपीन। मेकेर रेल्लीनी” दे माइक्तीमी। मिनु आ देंशो खोदेंशो पा ग्याइल आप्तेक्म। मिनु आन ग्याइली गुंइने मचाप्पा डा पा शुश डाइं रेत्येक्म। लूका ५:४-७ 7 मोदेंशो तशा, येसु आ नेल्ल क्येडा दाक्शो शेंसीबमी पत्रुस कली “प्रभु बाक्ब” दे माइक्त्तु। मिनु सिमोन पत्रुसमी “प्रभु बाक्ब” देंशो नेंशा, आ डोंइती प्रुइक्शो वा लेंशा फेक्साक्व। मिनु ब्वाक्कुमी प्रेक्त। यूहन्ना १३:२३ 8 मिनु अरु शेंसीबपुकीमी डोंगामी बाक्शा, ग्याइल कीना कीन पिम्तेक्म। ग्याइल ब्रीशो बाक्त। मेकोपुकी समुन्द्रमी सहै निक्शी गज खोदेंशो डोन जाक्दीक्शो बाक्तेक्म। 9 मिनु मेकोपुकीमी डोंगा रे गूशा, डाइं नु शोब्ले मीमी चोशा, वोइक्शो ताम्तेक्म। 10 मिनु येसुमी “इन रेश्शो डाइं का निक्शी पितीन” दे माइक्तीमी। 11 येसु आ देंशो टिशा, सिमोन पत्रुस डोंगामी डोइक्शा, ग्याइल कली कीशा, ब्वाक्कु रे गुंइताक्व। मेको ग्याइलीमी सहै का ५३ ओटा ठेयब ठेयब डाइं बाक्तेक्म। मिश डा डाइं बाक्शा यो मेको ग्याइली मगाक्माक्त। 12 मिनु येसुमी “निस्सीन जने ब्वने” दे माइक्तीमी। मिनु शेंसीबपुकीमी “गे सु ननी?” दे हिल्लो मपाम। “प्रभु बाक्ब” दे तुइक्ताक्म। 13 मिनु येसुमी शोब्ले लाइक्शा, आ शेंसीब आन कली शोब्ले नु डाइं योक्शा गेम्तीमी। यूहन्ना ६:११ 14 मो दुम्मेनु, येसु सेंसीशो नोले आ शेंसीब आन कली खेयप सां तपांडसाक्व।

### येसुमी पत्रुस कली लोव्र पशो

15 मिनु जने थुम्शा, येसुमी सिमोन पत्रुस कली “योआन्नेस आ तौ सिमोन, गे आं कली एको आन क्येडा दाक्नेवे?” दे हिल्लो पाप्तु। मिनु पत्रुसमी “दाक्ननी, प्रभु, गे तुइक्नीनी” दे माइक्त्तु। मिनु येसुमी “आं पाठा आन कली थुल्मी” देंत। यूहन्ना १:४२ 16 मिनु येसुमी लेंशा पत्रुस कली “योआन्नेस आ तौ सिमोन, गे आं कली दाक्नेवे” दे हिल्लो पाप्तु। मिनु पत्रुसमी “दाक्ननी, प्रभु, गे तुइक्नीनी” दे माइक्त्तु। मिनु येसुमी “आं भेडा आन कली कोव्रमी” देंत। १पत्रुस ५:२, ४ 17 लेंशा येसुमी “योआन्नेस आ तौ सिमोन, गे आं कली दाक्नेवे?” दे हिल्लो पाप्तु। मिनु येसुमी खेयप सां “आं कली दाक्नेवे?” दे हिल्लो पशो नेंशा, पत्रुस आ थुं खाइक्त्तु। मिनु “प्रभु, गे नेल्ल तुइक्नीनी। गो इन कली दाक्ननी, दे तुइक्नीनी” दे माइक्त्तु। मिनु येसुमी “आं भेडा आन कली योव्रमी। यूहन्ना १३:३८; यूहन्ना १६:३० 18 नोफा दाइक्शा नेनो, गे ठिटा बाक्डेनु, किप्शुर किम्सीशा, इ दाक्शो लां खोइक्तीवी। खाल्पा दुम्मेनु, इ गुइ हाम्नेवे। मिनु अर्कोमी इ कली किप्शुर किप्शा, इ मदाक्शो लां लाइक्ब” दे माइक्त्तु। 19 येसुमी पत्रुस दोपा परमप्रभु

यावे आ सक्ति कौंइशा, साइक्वा पुंडसीबा, दे मोदेशो देंत। मिनु येसुमी “आं नोले खोइय्यी” देंत। यूहन्ना १३:३६

<sup>20</sup> मिनु पत्रुसमी येसु आ नोले खोइश्शा, फिर लेशशा कोव्रडानु, येसु आ दाक्शो शेंसीब आस नोले खोइश्शो ताप्तु। मेको शेंसीब सु बाक्त देंशा हना, डोंइती नाक्दो डा खमे जची ना येसु नु बाक्शो बाक्त। मेको “प्रभु, इन कली साइक्ब आन कली वारच पाइब सु में?” दे हिल्लो पाइब बाक्त। यूहन्ना १३:२३-२५ <sup>21</sup> मिनु पत्रुसमी मेको कली तशा “प्रभु, मेको कली मार दुम्बा?” दे हिल्लो पाप्तु। <sup>22</sup> मिनु येसुमी “गो लेंशा मजाक्डा सम्म मेकोमी रिम्शा बाक्चा माल्ब, दे मिम्ताक्ड हना यो, इ कली मार दुम्बा डा? गे आं नोले खोइय्यी” दे माइक्तु। <sup>23</sup> मिनु थमा सुइक्बपुकीमी मेको येसु आ

दाक्शो शेंसीब आ पर्बम “मेको शेंसीब मबेक्ब” दे लोव्र पमुम्तेक्म। तन्न येसुमी “मेको मबेक्ब” देंशो ममाइ, तन्न “गो मजाक्डा सम्म मेको रिम्शा बाक्ल को मबाक्ल, इ कली मार दुम्बा डा” दे माइश्शो बाक्त।

<sup>24</sup> येसुमी “एको मबेक्ब” देंशो शेंसीब सु बाक्त देंशा हना, एको किताब ब्रेक्ब बाक्त। मिनु मेको आ ब्रेक्शो नेल्ल थमा बाक्ब, दे तुइक्नीकी। यूहन्ना १५:२७ <sup>25</sup> येसुमी मेको किताबमी ब्रेक्शो पशो गेय ला ममाइ, तन्न अरु शुश गेय यो पाइबाक्त। आ पशो गेय नेल्ल ब्रेक्ताक्व हना, मेको किताबपुकी वोइक्चा कली रागीमी यो मरिक्ब, दे मिम्नुड। यूहन्ना २०:३०; भजन संग्रह १०६:२

## प्रेरित

एको किताब लूकाम ब्रेक्शो बाक्ब। लूका यहूदी मबाक्थु यो, पावल नु गेय पवा बाक्त। एको किताबमी शुश खेयप “गोपुकी” ब्रेक्शो बाक्ब। मोपतीके लूका पावल नु काथा बाक्शो तुंडसीब। लूका डक्टर बाक्त। एको किताब गेना ब्रेक्शो बाक्मे, मेको रिम्शो पा मतुंडसीब। तन्न पावल रोम सहरम चोक्चा पुंडसीशो बर्स निक्शी दुम्शो नोले ६३-६४ ए. डी. एको किताब ब्रेक्शो बाक्चा माल्ब। एको किताब मथुम्शो किताब का बाक्त। मारदे हना लूका ते लमे, सुइमी मतुंडक्नीम। ६४ ए. डी.मी रोम सहरम ठेयब मी सुइक्तीके नु थमा सुइक्ब आन कली खेदा पतीके लूका बेक्म कों, प्रोक्म कों मारेड मतुंडसीब। लूका, यहूदी मुर मबाक्ब। आ ब्रेक्शो “लूका ग्येरपाइक्तीक” लोवमी अर्को रागी डा मुर येसु ख्रीस्त आ पतीकेमी पाप रे ब्रोंइचा ताइनीम, दे शुश ब्रेक्शो बाक्ब। येसु ख्रीस्त आ सोइश्शो आन पशो गेय नु परमप्रभु यावे आ सोक्त आ गेय आ पर्वम शुश ब्रेक्शो बाक्ब।

### येसु स्वर्ग लाइक्चा पुंडसीशो

1 आं दाक्शो थियोफीलस, गो डॉइती डा किताबमी परमप्रभु यावे आ बाक्तीक लाइक्चा मपुंडसे सम्म येसुमी मार पवा, मार शेंदा, मेको नेल्ल ब्रेक्शा, तुइक्पाइक्ने थुम्तन्नी। लूका १:३<sup>२</sup> येसुमी शेंसीब आन कली योवशा, मेको योवशो आन कली सोइश्शोपुकी नें वोइश्शो बाक्माक्त। मेको सोइश्शो आन कली परमप्रभु यावे आ सोक्त रे पा मार शेंचा, मार पचा, नेल्ल शेंना शेंन वोइक्मी बाक्त। मत्ती २८:१-२०<sup>३</sup> मेको आन कली शेंशो मार बाक्माक्त देशा हना, येसु श्येत जशा साइक्चा पुंडसीशा, बेक्शा, बेक्शो रे सेंपाइक्चा पुंडसीशा, ४० नाक्त सम्म आ सोइश्शो आन कली तपांडसीन सीन परमप्रभु यावे आ राज्य डा लोव्र शेंना शेंन बाक्माक्त।<sup>४</sup> मोदेशो पा काथा बाक्शा, मेको आन कली “परमप्रभु यावेमी आ देशो लोव्र मखबा सम्म यरूसलेम सहरमीन बाक्कीन। लूका २४:४९; यूहन्ना १५:२६<sup>५</sup> इन कली डॉइती मार मार देंडा, मेको लेंशा देंनुड यूहन्नामी मुर आन कली ब्वाक्कुम खुम्शा गुंडताक्व। इन कली चहिं परमप्रभु यावेमी आ सोक्तीम खुम्ब। मेको दुम्चा कली शुश नाक्त मलीशो बाक्ब” दे शेंदीमी बाक्त। मत्ती ३:११

<sup>६</sup> मिनू येसु नु आ सोइश्शोपुकी बुक्शा बाक्मानु, मेकोपुकीमी येसु कली “प्रभु, गे इस्राएल कली मुल लेंशा आंम राज्य सेल्नीनी?” दे हिल्लो पामे बाक्त। लूका १९:११; लूका २४:२१<sup>७</sup> मिनू येसुमी “राज्य सेल्चा आं आफ आ गुडमी बाक्ब। मिनू गेना सेल्चा दाक्बा, मेना सेल्ब। मेको तुइक्चा यो ममाल्नीनी। मत्ती २४:३६<sup>८</sup> मार चहिं तुइक्चा माल्नीनी देशा हना, परमप्रभु यावे आ सोक्त आ सक्ति ताइनीनी। सक्ति तशा यरूसलेम, यहूदीया, सामरीया नु रागी नेल्लेमी हिरशा, आं लोव्र शेंशा, आं सांक्छी दुम्नीनी” दे माइक्मी बाक्त। लूका २४:४८; प्रेरित ८:१<sup>९</sup> मिनू मोदेशो लोव्र पा, मेको आन तना तन ग्येत्थ ग्युक्शा, गोस्सुमी गिल्सीशा सरीड ग्येत्थ लमाक्त। मिनू नोले मेकोपुकीमी मतामे बाक्त। मर्कूस १६:१९; लूका २४:५१<sup>१०</sup> मोपा यो सरीड गे कोव्रना कोव्रन बाक्मानु, बुश वा फेक्शो मुर निक्शी फो फु गूशा, आन डॉइती राप्शो तामे बाक्त। लूका २४:४<sup>११</sup> मिनू मेको निक्शीमी “ए गालील डा मुर, मार सरीड गे कोव्रना कोव्रन बाक्नी? येसु इन बाक्तीके रे परमप्रभु यावे आ बाक्तीके लाइक्चा पुंडसाक्व। दोपा लशो तनी, मोपा काबु लेश्शा यीब, दे तुइक्तीने” देंसा बाक्त। लूका २१:२७<sup>१२</sup> मिनू मेकोपुकी जैतून डांडा रे यरूसलेम लेम्मा बाक्त। मेको लां चहिं नाइक्तीक नाक्त गाक्चा दुम्तीक लां बाक्माक्त।

<sup>१३</sup> मिनू यरूसलेम सहरम जाक्शा डा मीन, खिं का डा तला तारी ओव्रशा बाक्मा बाक्त। मोपा बाक्बपुकी सु सु बाक्मा बाक्त देंशा हना, पत्रुस, यूहन्ना, याकूब, अन्द्रीयास, फिलीप, थोमास, बारथोलोमाड, मत्ती, अल्फयस आ तौ याकूब, सिमोन, मेको कली कनानी यो देंसीब नु याकूब आ तौ यहूदा बाक्मा बाक्त। लूका ६:१३-१६<sup>१४</sup> मेकोपुकी नु मीश मुरपुकी, येसु आ ममा मरीयम नु येसु आ लोक्बपुकी यो बाक्मा बाक्त। मेको नेल्ल थुं का डा

दुम्शा, नाक्त किंत किंत परमप्रभु यावे कली ठेयब सेल्ना सेल्न, पुंडना पुंडन बाक्बाक्मा बाक्त। यूहन्ना ७:३

### सोइश्शो का तेम्शो

15 मिनू काबु नाक्त पत्रुस थमा सुइक्ब सहे का २० जना मुर आन दातेमी बाक्मा बाक्त। यूहन्ना २१:१५-१९<sup>१६</sup> मिनू पत्रुस मेको आन दातेमी राप्शा, मेको आन कली “आं लोक्बपुकी, नेनीने, येसु कली ग्याइक्ब आन कली लां कोंइब यहूदा आ पर्वम लोव्र का निक्शी पाइनुड। साइ परमप्रभु यावे आ सोक्तीमी पिप दाऊद कली मार ब्रेक्पाइश्शो बाक्मे, मेको नेल्ल थमा दुम्चा माल्ब। मिनू मुल थमा दुम्त। भजन संग्रह ४१:१०<sup>१७</sup> यहूदा १२ जना शेंसीब आंइ दाते डा वारच का बाक्त। मेको कली यो प्रभुमी गेय का पपाइक्चा कली योव्रशो बाक्त।<sup>१८</sup> मेकोमी येसु कली ग्याइक्ब आन कली लां कोंइशा, वारच पा क्येट ताक्गा बाक्त। मिनू मेको क्येटमी रू ग्यबा बाक्त। मोपा मरिम्शो गेय पतीके क्युली पा दोक्शा, आ कोव्रज ब्रोल्शा आ क्यी गूशा बेक्माक्त। मत्ती २७:३-१०<sup>१९</sup> मेको आ मरिम्शो पशो यरूसलेम सहरमी बाक्ब नेल्लेमी तुइक्ताक्म। मिनू मेको रू कली आन लोव्र रे पा आखेल्दामा, दे नें वोइक्तेक्म। आखेल्दामा देशो “हुश आ रू” रुम्सीब।<sup>२०</sup> साइ पिप दाऊदमी ब्रेक्शो लोव्रमी मार ब्रेक्शो बाक्ब देंशा हना ‘मेको आ खिं ब्रेश्शा बाक्ल, मेकेर सुइ बाक्चा मतामेक्ल, आ पशो गेय अर्को मुरुमी पवल’ दे ब्रेक्शो बाक्ब। भजन संग्रह ६९:२५-२६; भजन संग्रह १०९:८

<sup>२१</sup> मुल यहूदा आ पा डा मुर का योव्रचा माल्ब। दोदेशो मुर माल्ब देंशा हना, यूहन्नामी मुर आन कली ब्वाक्कुमी खुम्शा गुंडशो नाक्त रे येसु परमप्रभु यावे आ बाक्तीक लाइक्चा मपुंडसे सम्म, प्रभु येसु नु काथा बाक्ब, काथा गाक्ब, काथा जाइब मुर का माल्ब। यूहन्ना १५:२७<sup>२२</sup> मेको मुरुम ‘येसु बेक्शा, सेंसीशो ताता’ देंने चाप्चा माल्ब’ दे माइक्मी बाक्त।<sup>२३</sup> मिनू आ लोव्र नेंशा बिश्शा, आन दाते रे योव्रशा, मुर निक्शी आस कली नेल्ल आन डॉइती राप्पदमे बाक्त। मेको आस नें का के योसेफ बारसाबास, आ याइनी नें चहिं युस्तस बाक्माक्त। का के चहिं मत्तीयस बाक्माक्त।<sup>२४</sup> मिनू मेकोपुकीमी “परमप्रभु, गे मुर नेल्ल आन थुं तुइक्नीनी। मोपतीके एको निक्शीमी तेको कली योव्रनीनी, आंइ कली तुइक्पतीने। प्रेरित ६:६<sup>२५</sup> मिनू मेको यहूदा आ पा डा सोइश्शो का दुम्ल” दे प्रार्थना पामे बाक्त।<sup>२६</sup> मिनू भोट तोक्गमे बाक्त। भोट तोक्गामेनु, मत्तीयस ग्रामाक्त। मोपा मत्तीयस यो सोइश्शो का दुम्शा तेम्सीशा, १२ जना सोइश्शो दुम्मा बाक्त। हितोपदेस १६:३३; निसाफ पाइब २१:१७

### परमप्रभु आ सोक्तीम प्रिंचा पुंडसीशो

2 मिनू पेन्तीकोस नाक्त थमा सुइक्ब आन गुम्तीकेमी देल्मा बाक्त। लेवी २३:१५-२१<sup>२</sup> मिनू सरीड रे हरुर पा फश खोदेशो फो गूशा, आन बाक्तीक प्रिंशा थुरशा रेयके पवा बाक्त।<sup>३</sup> मिनू ब्रशो मी खोदेशो

तांइसीशो परमप्रभु यावे आ सोक्त का का पा आन तारी जुक्ता बाक्त। मत्ती ३:११<sup>4</sup> मिनू परमप्रभु यावे आ सोक्तीमी सोइश्शो आन कली प्रिंशा, मेको आन कली आन मतुइश्शो लोत्र पपाइक्मी बाक्त। प्रेरित ४:३१; प्रेरित १०:४४-४६<sup>5</sup> यरूसलेममी परमप्रभु यावे कली मान पा हिंब, रागी नेल्ल रे जाक्शो यहूदी बाक्मा बाक्त। प्रेरित १३:२६<sup>6</sup> मिनू मेकोपुकीमी मेको रेयके नेंशा, खुम्सीमा बाक्त। मिनू मेकेर आन लोत्र कका ब्वाक्शो नेंशा छक लाक्मा बाक्त।<sup>7</sup> मिनू छक लाक्शा “मेकोपुकी गालील डा मुर मनमी डा? तन्न इं लोत्र कका ब्वाक्तेक्म।<sup>8</sup> गालील डा मुरपुकीमी दोपा इं लोत्र नेल्ल ब्वाक्स जोक्मे माइ?” देंमुमा बाक्त।<sup>9</sup> मो दुश्शो ताइबपुकी ते ते डा बाक्मा बाक्त देंशा हना, पारथेस, मेदी, एलाम, मेसोपोटामीया, यहूदीया, कापाडोसीया, पोन्टस, एसीया,<sup>10</sup> फ्रिगीया, पाम्फिलीया, इजीप्त, लिबीया नु साइरेनी एर ऑथ, रोम, क्रेट नु अरब रागी रे जाक्शो यहूदी नु यहूदी दुश्शोपुकी बाक्मा बाक्त।<sup>11</sup> मेकोपुकीमी “गो नेल्लेमी परमप्रभु यावे आ पशो छक लाक्का डा गेय आ पर्वम आइ लोत्र पशो नेंतय।<sup>12</sup> मोपा मेको नेंबपुकीमी ‘मार बाक्म माइ, मार दुम्बा’ देंमुमा बाक्त।<sup>13</sup> का निक्शीमी चहिं ‘शांबु दुक्शो बाक्तेक्म’ ” दे शुक्शी पामे बाक्त।

### साइ डा लोत्र थमा दुश्शो

<sup>14</sup> मिनू पत्रुसमी सोइश्शोपुकी नु राप्शा, मुर आन कली “इं यहूदी नु यरूसलेममी बाक्बपुकी, आं लोत्र रुप्वा कली नोफा दाइश्शा नेनीने।<sup>15</sup> इन मिश्शो खोदेंब पा एकोपुकी दुक्शो मनमी। मुल सुनी डा ९ बजेशो बाक्ब, दे तुइक्तीने। भजन संग्रह १६:८-११<sup>16</sup> मार रुपीन देंशा हना, साइ परमप्रभु यावे आ लोत्र पाइब योएलमी ब्रेक्शो लोत्र मुल थमा दुम्त, दे रुपीने। साइ डा लोत्रम मार ब्रेक्शो बाक्त, देंशा हना योएल ३:१-५<sup>17</sup> ‘परमप्रभु यावेमी रागी नुच्ची नाक्त मुर नेल्ल आन कली आं सोक्तीम प्रिनुडमी। मिनू इन तमी तौपुकीमी आं लोत्र पाइनीम। ठिटापुकीमी आं कौइशो ताइनीमी, खाल्पापुकीमी डोमु ताइनीम।<sup>18</sup> आं वाइलीम वाइल आन कली यो आं सोक्तीम प्रिनुडमी। मिनू मेकोपुकीमी यो आं लोत्र पाइनीम।<sup>19</sup> मेको ठेयब नाक्त जाक्का क्येडा डौइती गो सरीड नु रागीमी चिन्ड नु छक लाक्का डा गेय कौइनुड। हुश यिपाइक्नुड, मी ब्रपाइक्नुड नु ठेयब कुन गूशो तपाइक्नुड।<sup>20</sup> नां छिडछिड दुम्ब। तास्ला हुश खोदेंशो लल दुश्शो तांइसीब। मेको प्रभु आ ठेयब नाक्त आ क्येडा डौइती मोदेंशो दुम्ब।<sup>21</sup> मिनू सु सुमी प्रभु आ नें थिशा प्रौइयीकी, दे ब्रेम्मा, मेकोपुकी पाप रे प्रौइचा पुंइसीनीम’ दे परमप्रभु यावेम देंशो बाक्ब। योएल २:२७-३२

<sup>22</sup> मोपतीके इस्त्राएल डा लोकबपुकी, आं लोत्र नेनीने। परमप्रभुमी नासरथ डा येसु कली योत्रशा, सक्ति पाइश्शो गेय, चिन्ड नु छक लाक्का डा गेय इन दातेमी कौइपाइक्नु। मेको गे यो तशो तुइश्शो बाक्नीनी।<sup>23</sup> गेपुकीमी येसु कली अरेशो मटीब आन गुडम गेशा, शीम केप्शा कांटी थोक्शा क्येडाइश्शा साइक्पाइक्तीनी। डौइती रे परमप्रभु यावेमी मोदेंशो दुम्वा माल्ब, दे मिम्शा, इन कली मो पचा गेशो बाक्माक्त, दे रुपीन। प्रेरित ४:२८<sup>24</sup> गेपुकीमी साइक्पाइक्तीनी हना यो, परमप्रभुमी येसु कली बेक्शो रे सेंताक्व। मारदे हना आ गेना हना यो ब्रौइशा बाक्ब परमप्रभु बाक्ब।<sup>25</sup> मिनू पिप दाऊदमी येसु आ पर्वम ‘प्रभु गेना हना यो आं ग्युरा गे बाक्ब, दे तुइश्शा महिनुड। भजन संग्रह १६:८-११<sup>26</sup> गो ग्येरसीशा प्रभु कली ठेयब सेल्शा कुम्सो पाइनुड। मारदे हना प्रभु नु काथा बाक्शा, गेना हना यो ब्रौइचा ताइनुड।<sup>27</sup> बेक्शा आं रां राक्शा लचा मगेब, दे तुइक्नुड।<sup>28</sup> परमप्रभुमी ब्रौइतीक लां कौइताक्वी। मिनू गेना हना यो प्रभु नु ग्येरसीशा बाक्नुड’ दे येसु आ पर्वम ब्रेक्शो बाक्त। भजन संग्रह १६:८-१०<sup>29</sup> आं लोकबपुकी, इं किकी पिपी दाऊद आ पर्वम का का पा देंने चाप्नुड। दाऊद बेक्माक्त। मिनू लाइश्शा थिम्ने थुम्मे बाक्त। तेकेर थिम्ने गोपुकीमी मुल यो तुइक्नय। १राजा २:१०<sup>30</sup> परमप्रभु यावेमी आ लोत्र पाइब दाऊद कली ‘इ चच युइ रे पिप का सेल्नुड’ दे लोत्र गेशो तुइश्शो बाक्त।<sup>31</sup> मिनू दाऊदमी परमप्रभु यावे आ लोत्र पाइब दुम्तीके, मेको येसु, मस्सीह आ पर्वम लोत्र पाप्त, दे तुइश्शो बाक्माक्त। मिनू मेकोमी ‘मेको बेक्शो मुर आन बाक्तीकेम मलीब। आ रां मराक्बा’ देंशो बाक्माक्त। २सामुएल ७:१२-१३; भजन संग्रह ८९:४-५

<sup>32</sup> परमप्रभु यावेमी येसु कली बेक्शो रे सेंताक्व। मेको गो आंइ मिक्वीमी ताइतक।<sup>33</sup> मिनू येसु परमप्रभु यावे आ ग्युरा गे बाक्शा, आ आफ रे परमप्रभु यावे आ सोक्त ताक्शा, आंइ तारी मोइक्तु। मिनू मार मार नेंनी, मार मार तनी, मेको नेल्ल परमप्रभु यावे आ सोक्तीम पपाइश्शो बाक्माक्त, दे तुइक्तीने। यूहन्ना १५:२६<sup>34</sup> पिप दाऊद सरीड ग्येत्थ क्युक्का मतवा। तन्न दाऊदमी ‘प्रभुमी आं प्रभु कली, आं ग्युरा गे बाक्को। भजन संग्रह ११०:१<sup>35</sup> इ जोरी सत्रु आन कली इ खोइल आगाम मवोदुमी सम्म आं ग्युरा गे बाक्को’ दे ब्रेक्शो बाक्त। मेको लोत्र दाऊद आ पर्वम ममाइ। येसु आ पर्वम ब्रेक्शो बाक्ब, दे रुपीन।<sup>36</sup> मोपतीके इस्त्राएली नेल्लेमी मार तुइक्का माल्नीनी देंशा हना, गेपुकीमी शीम केप्शा कांटी थोक्शा साइक्पाइश्शो येसु कली परमप्रभु यावेमी प्रभु नु ख्रीस्त सेल्लु” दे माइक्मी बाक्त। ख्रीस्त आ देंशो मस्सीह बाक्ब। प्रेरित ५:३१

<sup>37</sup> मिनू आ लोत्र नेंब आन थुं खाइक्माक्त। मिनू पत्रुस नु सोइश्शो आन कली “गो मार पक मिनू?” दे हिल्लो पामेनु, प्रेरित १६:३०; लूका ३:१०<sup>38</sup> पत्रुसमी “इन थुं परमप्रभु यावे गे लेश्शा, येसु कली थमा सुइश्शा, आ नेंमी ब्वाक्कुम ख्रुम्शा गुंइपांइसीने। मिनू इन पाप क्याम्चा पुंइसीनीनी। परमप्रभु यावे आ सोक्तीम प्रिंचा यो पुंइसीनीनी। प्रेरित ३:१७-१९; लूका २४:४७<sup>39</sup> मारदे हना परमप्रभु यावे आ गेशो लोत्र इन कली, इन तमी तौ चच युइ आन कली नु डोन रागीम बाक्ब आन कली गेशो बाक्त। मिनू परमप्रभु आंइ परमप्रभु यावेमी सु सु कली ब्रेक्शो बाक्मे, मेको आन कली गेशो बाक्त” दे शेंदीमी बाक्त। योएल ३:५<sup>40</sup> मिनू पत्रुसमी शुश शेंशा “थमा मसुइक्ब मदुमीने। मरिश्शो पाइब रे डोन बाक्कीने” दे शुश अर्ती गेशा माइक्मी बाक्त। मत्ती १७:१७; फिलिप्पी २:१५<sup>41</sup> मिनू शुश मुरुमी पत्रुस आ देंशो बिश्शा, ख्रीस्त कली थमा सुइश्शा, ब्वाक्कुम ख्रुम्शा गुंइचा पुंइसमा बाक्त। मोपा ब्वाक्कुम ख्रुम्शा गुंइचा पुंइसीबपुकी हजार सां खोइ दुम्मा बाक्त। मोपा थमा सुइक्ब नु तेम्समा बाक्त।<sup>42</sup> मिनू नेल्ल काथा बाक्शा, सोइश्शोपुकीमी शेंशो लोत्र शेंसीशा, प्रभु भोज जशा, प्रार्थना पना पन बाक्बाक्मा बाक्त। प्रेरित २०:७

### थुं का डा दुम्शा बाक्शो

<sup>43</sup> मिनू सोइश्शोपुकीमी परमप्रभु यावे आ सोक्त रे पा शुश चिन्ड नु छक लाक्का डा गेय कौइना कौइन बाक्बाक्मा बाक्त। मुरपुकीमी मेको आन कली मोदेंशो पशो तथा छक लाक्का हिंबाक्मा बाक्त।<sup>44</sup> थमा सुइक्ब नेल्ल थुं का दुम्शा, आन के बाक्शो मारेइ मारेइ नेल्ल इं के बाक्ब, दे मिम्बाक्मा बाक्त। प्रेरित ४:३२-३५<sup>45</sup> रू, मारेइ लेयडमेनु, सु सु आन कली माल्मा, मेको आन कली योक्शा क्येट गेशा वारच पाइबाक्मा बाक्त।<sup>46</sup> मिनू नाक्त किंत किंत परमप्रभु यावे आ खिमी गुम्शा शेंसीबाक्मा बाक्त। खिं खिं हिरशा, प्रभु भोज जाइबाक्मा बाक्त। हाइश्शो थुं डा दुम्शा, जचा तूचा योक्शा, ग्येरसीशा दुम्शा,<sup>47</sup> परमप्रभु यावे कली ठेयब सेल्ना सेल्न बाक्बाक्मा बाक्त। मुरपुकीमी मेको आन कली मोदेंशो पशो तथा, रिम्शो मिम्बाक्मा बाक्त। प्रभुमी नाक्त किंत किंत येसु कली थमा सुइक्ब तेम्ना तेम्न बारपाइक्मी बाक्त। प्रेरित ४:४; प्रेरित ५:१४; प्रेरित ६:७; प्रेरित ११:२१; प्रेरित १४:१

### खोइली मदुक्ब कली सापाइश्शो

**3** मिनू काबु पत्रुस नु यूहन्ना ३ बजे डा प्रार्थना पची ना परमप्रभु यावे आ खिमी जाक्सा बाक्त।<sup>2</sup> मेकेर जरमेसे रेन खोइल मदुक्ब मुर का बाक्माक्त। मेको कली नाक्त किंत किंत कुरशा चाक्शा, खिं ओव्रब आन कली पुंइदीमील, दे “रिम्शो लाप्चो” नें पाइश्शो लाप्चो आ डौइती वोइक्बाक्मा बाक्त।<sup>3</sup> मिनू मेको पुंइब मुरुमी पत्रुस नु यूहन्ना आस कली ओव्रचशो तशा, मारेइ गेनीसी कौं, दे पुना बाक्त।<sup>4</sup> मिनू पत्रुस नु यूहन्नामी पुंइब कली कोव्रशा, पत्रुसमी “ऑथ कोव्रस्की” देंमाक्त।<sup>5</sup> मिनू पुंइबमी मार गेयीसी, दे आस पा कोव्रसी बाक्त।<sup>6</sup> मिनू पत्रुसमी “गो नु सुन चांदी मबा। मार बाक्मे, मेकोन गेनन। तन्न आं के मार मेकोन गेनन। नासरथ डा येसु ख्रीस्त आ नेंमी बोक्शा एर ऑथ हिरसो” देंशा,<sup>7</sup> पुंइब आ ग्युरा गुइ

ग्याइशा कीशा छुल पोक्शा राप्पदा बाक्त। राप्पदानु, आ खोइल डा बोंइसे नेल्ल दुक्ब दुग्शा, <sup>8</sup> दिव दाव प्रेक्शा, एर ओंथ गाक्ब दुग्माक्त। गाक्ब दुग्शा परमप्रभु यावे कली ठेयब सेल्शा, कुम्सो पना पन, प्रेक्ना प्रेक्न पत्रुस नु यूहन्ना नु काथा गाक्शा, परमप्रभु यावे आ खिं ओव्रमाक्त। <sup>9</sup> मिनु मेकेर बाक्बपुकीमी मेको पुंडब कली साशा, परमप्रभु यावे कली ठेयब सेल्शा गाक्शो तशा, <sup>10</sup> “रिम्शो लाप्चो आ डोंइती बाक्ब खोइल मदुक्ब दोपा साशा ओं पा गाक्मे” दे छक लाक्मा बाक्त। <sup>11</sup> पुंडबमी पत्रुस नु यूहन्ना कली काइ मप्रोंइथु काथा गाक्शा, पिप सोलोमन नें वोइश्शो थाम पाइश्शो बाक्तीके जाक्दीम्मा बाक्त। मिनु एर ओंथ डा मुर दोरशा जाक्शा पुम्दमे बाक्त। प्रेरित ५:१२; यूहन्ना १०:२३

<sup>12</sup> मिनु मोपा पुम्शो तशा, पत्रुसमी “इं इस्राएलीपुकी, एको मुर साथो तशा छक लाक्तीनी। मिनु गो आंस सक्तिम सापाइश्शो बाक्माक्त, फेस्तस दे मिम्तीनी? आंस सक्तिम सापाइश्शो ममाइ। <sup>13</sup> इ किकी पिपी अब्राहाम, इसहाक नु याक्ब आन परमप्रभु यावेमी आ गेय पाइब येसु कली ठेयब सेल्लु। गेपुकी चहिं मेको कली ग्याइक्पाइक्तीनी। पिलातसमी मेको कली प्रोंइचा थुं पवानु यो, गे मबिस्सीनी। <sup>14</sup> तन्न गेपुकीमी परमप्रभु यावे आ योव्रशो नु ठीक पाइब कली तिल्लीनी। मुर साइक्ब कली प्रोंइशा सोइक्चा कली पुंडतीनी। मत्ती २७:२०-२१ <sup>15</sup> मिनु गे ब्रोंइचा गेब कली साइक्तीनी। परमप्रभु यावेमी चहिं बेक्शो रे सेंताक्व। गो मेको तशा, सांकछी दुग्ताक्व। <sup>16</sup> परमप्रभु आ सक्ति येसु नु बाक्ब। मिनु येसु आ नें थिशा थमा सुइश्शा, सक्ति पाइश्शो गेय पचा तांडसीब, दे थमा सुइक्नीकी। मिनु आंइ कली थमा सुइश्शो तशा, परमप्रभुमी एको मुर कली सापाइश्शा कोंइताक्व। मिनु साशा सेस दुग्शो ताइतीनी।

<sup>17</sup> आं लोकबपुकी, इन ठेयब मुरपुकी नु गे नेल्लेमी येसु कली मतुइक्थु, साइक्पाइक्तीनी, दे तुइक्नुड। लूका २३:३४ <sup>18</sup> साइ डोंइती रे परमप्रभुमी यावे आ लोव्र पाइबपुकी रे ‘ख्रीस्त श्येत जशा साइक्चा पुंडसीब’ दे लोव्र पाइक्बाक्माक्त। परमप्रभु यावेमी मेको लोव्र खाप्शो बाक्त। लूका २४:४४ <sup>19</sup> मुल चहिं इन थुं परमप्रभु यावे गे लेश्शा, ख्रीस्त कली थमा सुतीन। मिनु मेकोमी इन पाप क्याम्ब। प्रेरित २:३८ <sup>20</sup> मिनु मेकोमी इन कली रिम्शो बाक्चा गेब। मिनु परमप्रभु यावेमी पाप रे प्रोंइब, येसु ख्रीस्त इन बाक्तीक सोइक्ब। मिनु इन थुं नाइक्पाइक्ब। <sup>21</sup> तन्न परमप्रभु यावे आ लोव्र पाइबपुकीमी साइ रे मार मार देंमा, मेको लोव्र थमा मदुम सम्म येसु ख्रीस्त परमप्रभु यावे नु स्वर्गम बाक्ब। <sup>22</sup> साइ नेसी परमप्रभु यावे आ लोव्र पाइब मोसामी ‘परमप्रभु, इन परमप्रभु यावेमी आं कली योव्रशो खोदेशो पा आ लोव्र पाइब इन मुर आन दाते रे योव्रशा, इन कली वारच पाइब नु लां कोंइब सेल्लु। मोपा योव्रशोमी इन कली मार मार शेंबा, मेको आ लोव्र नेंशा टिने। ब्यवस्था १८:१५, १९ <sup>23</sup> सु सुमी आ लोव्र मटीमे, मेकोपुकी जाग्शा लाइनीम’ दे देशो बाक्त। <sup>24</sup> मोसामी देशो लोव्र ला ममाइ। परमप्रभु यावे आ लोव्र पाइब सामुएल नु अरु शुशेमी मोसामी देशो खोदेशो लोव्र पामे बाक्त। <sup>25</sup> इन किकी पिपी अब्राहाम आ खिं डा मुर नमी। परमप्रभु यावेमी अब्राहाम कली ‘गे इ खिं डा मुर रे पा रागी डा मुर नेल्लेमी आसीक राइनीम’ दे कबल पशो बाक्माक्त। उत्पत्ती २२:१८ <sup>26</sup> मोपतीके परमप्रभु यावेमी आ गेय पाइब येसु कली डोंइती इन बाक्तीकेम सोइक्ताक्व। मारदे हना इन कली आसीक गेशा, इन मरिम्शो गेय रे लेत्चा, दे मोदेशो पाप्नु, दे रूपीने” दे शेंदीमी बाक्त। प्रेरित १३:४६

#### कछडीम राप्पाइक्चा पुंडसीशो

<sup>4</sup> मिनु पत्रुस नु यूहन्नामी मोदेशो शेंना शेंन बाक्सानु, चढ़ेबपुकी, परमप्रभु यावे आ खिं डा ठेयब मुर नु सदुकीपुकी जाक्मा बाक्त। लूका २७:४:५२ <sup>2</sup> मिनु “येसु बेक्शो रे सेंसाक्व। मिनु मुर नेल्ले यो बेक्शो रे सेंसीनीम” दे शेंशो नेंशा, थुं मनुमा बाक्त। प्रेरित २३:८ <sup>3</sup> मिनु पत्रुस नु यूहन्ना आस कली ग्याइक्पाइश्शा “मुल नां रिक्त। मोपतीके कछडीम दीसा बाक्चा” दे मेको नाक्दो जेल्खानमी चोक्पदमे बाक्त। <sup>4</sup> पत्रुस नु यूहन्ना आस शेंशो लोव्र नेंशा, थमा सुइक्ब ५ हजार जना जाक्दीश्शो बाक्मा बाक्त। प्रेरित २:४७

<sup>5</sup> मिनु आ दीसा कछडीम बाक्चा कली यरूसलेम डा हुकुम पाइब, जोक्ब तुइक्ब खाल्पापुकी नु सास्त्री नेल्ल बुक्मा बाक्त। <sup>6</sup> मेना ठेयब चढ़ेब हन्नास बाक्माक्त। डोंइती डा ठेयब चढ़ेब काइयाफास, यूहन्ना नु अलेकजन्डर बाक्मा बाक्त। ठेयब चढ़ेब आन खिं डा मुर यो शुश जाक्शो बाक्मा बाक्त। लूका ३:१-२ <sup>7</sup> मेको नेल्ल खुम्सीशा बाक्मानु, पत्रुस नु यूहन्ना आस कली जेल्खान रे गुंडपाइश्शा, आन बाक्तीके चाक्पाइश्शा आन डोंइती राप्पदमे बाक्त। मिनु “मेको खोइल मदुक्ब मुर कली सु आ सक्तिमी, सु आ नें ब्रशा सापाइसी, लो देनीस” दे हिल्लो पामे बाक्त। मत्ती २१:२३

<sup>8</sup> मिनु पत्रुस परमप्रभु यावे आ सोक्तीमी ब्रीशा, मेको आन कली “इं इस्राएल डा हुकुम पाइब नु खाल्पापुकी, आं लोव्र नेनीने। मत्ती १०:१९-२० <sup>9</sup> मेको खोइल मदुक्ब कली खोइल सापाइश्शा, रिम्शो गेय पाइतस्कु। दोपा सापाइस्कु, दे तुइक्चा दाक्नीनी हना, शेंनन्नी। <sup>10</sup> गे ला ममाइ, तन्न इं इस्राएल डा मुर नेल्लेमी रुप्चा माल्नीम। मेको खोइल मदुक्ब मुर नासरथ डा येसु ख्रीस्त आ नें ब्रशा साशा गाक्ने चाप्ब दुग्माक्त, दे रूपीने। मेको नासरथ डा येसु ख्रीस्त कली गेपुकीमी शीमी केप्शा कांटी थोक्शा क्याइक्पाइश्शा साइक्पाइक्तीनी। तन्न परमप्रभु यावेमी मेको कली बेक्शो रे सेंताक्व। प्रेरित ३:६, १३-१६ <sup>11</sup> खिं सेल्बपुकीमी गारो प्रोव्रडमेनु, एको फुल्लु मगार, दे ताइक्तमे बाक्त। मेको मगारथु, ताइश्शो फुल्लु चहिं सुर डा जग फुल्लु दुग्माक्त, दे ब्रेक्शो लोव्र, मेको येसु आ परबम ब्रेक्शो बाक्ब, दे रूपीन। मत्ती २१:४२; भजन संग्रह ११८:२२ <sup>12</sup> मुर आन कली श्येत नु पाप रे प्रोंइब येसु ख्रीस्त का ला बाक्ब। परमप्रभुमी येसु ख्रीस्त कली अधिकार गेशा, मुर नेल्ल आन क्येडा ठेयब सेल्लु। मिनु आ नेंमी ला ब्रोंइचा तांडसीब, दे तुइक्तीने” दे माइक्मी बाक्त। प्रेरित १०:४३; मत्ती १:२१

<sup>13</sup> पत्रुस नु यूहन्ना शुश मर्शेसीशो बाक्ताक्स हना यो, जोक्ब तुइक्ब खोदेशो पा महिथु, ठेयब थुं पा लोव्र पाम्से बाक्त। मेको लोव्र नेंशा, कछडी पाइबपुकी छक लाक्मा बाक्त। मिनु मेको निक्शी थमा पा येसु नु काथा गाक्ब काथा बाक्ब बाक्सा बाक्त, दे तुइक्तमे बाक्त। <sup>14</sup> सापाइक्चा पुंडसीशो मुर पत्रुस नु यूहन्ना नु काथा राप्शा बाक्शो तशा, जोल पाम्से बाक्त देशा, आस लोव्र जोल सेल्ले मचाप्थु, मारेइ देंने मचाप्मे बाक्त। प्रेरित ३:८-९ <sup>15</sup> मिनु पत्रुस, यूहन्ना नु साशो मुर सांफा आन कली गुंडशा वोइश्शा “मुल मार पया” दे लोव्रसी पचा गोव्रमे बाक्त। <sup>16</sup> मिनु लोव्रसी पा “खोइल मदुक्ब कली सापाइश्शा मेको निक्शीमी ठेयब छक लाक्चा डा गेय कोंइताक्व। इं यरूसलेममी बाक्बपुकीमी थमा लोव्र बाक्माक्त, दे नेल्लेमी तुइक्नीमी। मिनु गोपुकीमी थमा ममाइ देंने मचाप्जय। यूहन्ना ११:४७ <sup>17</sup> तन्न मोदेशो लेंशा मदुम्ल, दे मेको आस कली मार पचा देशा हना, मुल डा मेरे येसु आ नें सुइ कली मतुइक्पाइक्चा नमी, आ नें ब्रशा सुइ कली मसापाइक्चा नम, दे माइक्चा नसी” दे सल्ला पामे बाक्त। <sup>18</sup> मिनु पत्रुस नु यूहन्ना आस कली खिम ओंइशा “हेरकादे, मुल डा मेरे येसु आ नें मब्रचा। सुइ मुर आन कली मर्शेचा। मतुइक्पाइक्चा नम” देंमा बाक्त। <sup>19</sup> मिनु पत्रुस नु यूहन्नामी “परमप्रभु यावे आ देशो टिचा देय इन देशो टिचा? एको निक्शीमी परमप्रभु यावेमी तेको पचा देंबा, दे आंमा मिम्तीने। प्रेरित ५:२८-२९ <sup>20</sup> गो निक्शी चहिं आंस मिक्चीम तशो नु आंस नोफामी नेंशो लोव्र मर्देशु मचाप्जस्कु। मेको रूपीन” देंसा बाक्त। <sup>21</sup> मिनु मेको आस दोस थिन्ने मचाप्तीके मेकोपुकीमी “हेरकादे, मुल डा मेरे मोदेशो गेय मपसे” दे हिंच कोंइशा, लोव्र थोक्शा, सोइक्तमे बाक्त। शुश मुरुमी आस पशो छक लाक्चा डा गेय तशा, परमप्रभु कली ठेयब सेल्लेन सेल्लेन बाक्बाक्मा बाक्त। <sup>22</sup> साशो मुर चहिं ४० बर्स लाक्शो बाक्माक्त। मोपतीके मेको कली साशो तशा, नेल्ल छक लाक्मा बाक्त।

#### परमप्रभु कली ठेयब सेल्शो

<sup>23</sup> मिनु पत्रुस नु यूहन्ना प्रोंइचा पुंडसीशा, वारच आन कली गुम्थ लसा बाक्त। मिनु सु सुमी मार मार पवा, मार मार देंमा, मेको नेल्ल शोव्रडसे बाक्त। <sup>24</sup> मिनु आस लोव्र नेंशा, नेल्ल थुं का पा परमप्रभु यावे कली ठेयब सेल्शा “परमप्रभु यावे, नेल्ल आन कली सासन पाइब, गे सरीड, रागी, समुन्द्र नेल्ल सेल्लतीनी। मिनु मेकेर बाक्शो मारेइ मारेइ सेल्लतीनी। मिनु मेको

आन कली कोव्रनीनी।<sup>25</sup> साइ इन लोव पाइब किकी पिपी, आंइ आफ दाऊद कली इन सोक्त रे पा 'अको रागी डा मुरपुकी मारदे गाइवनीमी, मारदे चुरनीमी? मुरपुकीमी मारदे शोर गाकशो दूली मिन्नीमी?'<sup>26</sup> परमप्रभु यावे नु आ तेल लुक्शो, खीस्त आस जोरी सत्रु दुम्शा, रागी डा पिपपुकी नु हुकुम पाइबपुकी थुं का दुम्शा बुक्नीमी' देंपाइक्तीनी। भजन संग्रह २:१-२<sup>27</sup> मोपा साइ इन पपाइश्शो लोव सिनाक्त मुलाक्त गाम्ना गाम्ना पित। मारदे हना इन सोइश्शो, इन गेय पाइब येसु, आ जोरी सत्रु आंइ मिक्चीमी ताइतक। पिप हेरोद का, पन्तीयस पिलातस का, अको रागी डा मुर नु इस्राएल डा मुर नेल्ल गारशा, आंइ सहरमी बुक्शो ताइतक। लूका २३:१२<sup>28</sup> मेकोपुकीमी इन देंशो डा लाक्शा मारेइ पने मचबेम। इन देंशो ला पने चाक्तेक्म। प्रेरित २:२३<sup>29</sup> परमप्रभु, मेकोपुकीमी हिंच कौंइताक्म हना यो, महिंथु ठेयब थुं पा इन लोव शेंतीक सक्ति तकल, दे पुंडनीकी। एफिसी ६:१९<sup>30</sup> परमप्रभु यावे, इन गेय पाइब येसु आ नें ब्रशा, सापाइक्तीक गेय, छक लाक्चा डा गेय नु चिन्ड कौंइने चाक्कल, दे पुंडनीकी" दे प्रभु कली ठेयब सेल्शा पुन्मे बाक्त।<sup>31</sup> मोदेंशो प्रार्थना पने थुम्मे चोटीन खिनु कुशो खोदेंशो पा आन बुक्शा बाक्तीके एर ओंथ नेल्ल हिम्से बाक्त। मिनु नेल्ले परमप्रभु यावे आ सोक्तीम प्रिंचा पुंडसमा बाक्त। मिनु महिंथु ठेयब थुं पा परमप्रभु आ लोव शेंना शेंन गाक्बाक्मा बाक्त।

थमा सुइक्ब नेल्ल थुं का डा दुम्शो

<sup>32</sup> मिनु थमा सुइक्ब आन थुं नेल्ल कांइचीक दुम्शा, मेकोपुकी नु बाक्शो मारेइ मारेइ नेल्ल इं के मिम्बाक्मा बाक्त। सुइमी यो आं के, इं के मर्देबाक्मा बाक्त। प्रेरित २:४४<sup>33</sup> मिनु येसु आ सोइश्शोपुकीमी सक्ति पाइश्शो लोव पा प्रभु येसु बेक्शो रे सेंचा पुंडसाक्व, दे नेंपाइक्बाक्मा बाक्त। मेको नेल्ल शुश आसीक तामे बाक्त। प्रेरित २:४७<sup>34</sup> मोपतीके श्येत जाइब का यो मबाक्मा बाक्त। मारदे हना रू खिं थीबपुकीमी रू खिं का निक्शी लेयशा, क्येट चाक्शा, प्रेरित २:४५<sup>35</sup> मेको १२ जना सोइश्शो आन कली गेशा, सु सु कली माल्मा, मेको आन कली योक्शा गेचा नमी, दे गेबाक्मा बाक्त। मिनु मेकोपुकीमी योक्बाक्मा बाक्त।<sup>36</sup> मोदेंशो गेब का चहिं योसेफ माइश्शो मुर का बाक्माक्त। मेको योसेफ साइप्रस रागीमी जरमेशो लेवी आ थर डा बाक्माक्त। सोइश्शोपुकीमी योसेफ आ याइनी नें बारनाबास वोइश्शो बाक्मा बाक्त। बारनाबास देंशो "आन थुं ग्येतथ लुक्च दुम्शो मुर आन कली आन थुं नाइक्पाइक्ब" दे रुम्सीब। प्रेरित ११:२२-२६; प्रेरित १२:२५; प्रेरित १५:२; गलाती २:१कलस्सी ४:१०<sup>37</sup> मेको बारनाबासमी रू का लेयशा क्येट चाक्शा, सोइश्शो आन गुइमी गेवा बाक्त।

हनानीया नु सफीरा

<sup>1</sup> मिनु हनानीया नु आ मीश सफीरामी यो आस रू का लेयडसे बाक्त।<sup>2</sup> मिनु क्येट ताक्शा, इक्का गो वोंइसीस, लीशो चहिं नेल्ल ओशो ला, दे सोइश्शो आन कली गेचा, दे लोवरी गारपदसे बाक्त। मिनु मोपा मेको लीशो क्येट हनानीयामी चोव्रदीम्माक्त। प्रेरित ६:३४-३७<sup>3</sup> मिनु सोइश्शो आन बाक्तीके जाक्दीश्शा, क्येट गेवानु, पत्रुसमी "हनानीया, मारदे गे इ थुंम सैतान ओव्रचा गेशा, परमप्रभु यावे आ सोक्त कली जोल पवी? रू लेयशो क्येट नेल्ल ओशो ला बाक्ब, दे मारदे इक्का खूइश्शा वोदी? <sup>4</sup> मेको रू मलेयसी नु इस केन बाक्त। लेयसी नोले मेक रे जाक्शो क्येट यो इस केन बाक्त। मिनु मारदे जोल पसी? गे आंइ कली जोल मपसी, तन्न परमप्रभु यावे कली जोल पाइतीसी" दे मदा बाक्त।<sup>5</sup> मिनु हनानीयामी पत्रुस आ देंशो नेंशा, दिड गोल्शा बेक्माक्त। मिनु मुरपुकीमी मेको लोव नेंशा, शुश हिंमा बाक्त।<sup>6</sup> मेकेर खुम्सीशो ठिटापुकीमी आ बेक्शो रां लाइश्शा थिम्मे बाक्त।

<sup>7</sup> मिनु हेररा घन्टा सां नोले हनानीया आ मीशेमी आ वोंइश बेक्त, दे मतुइक्वु, मेकेर जाक्माक्त।<sup>8</sup> मिनु पत्रुसमी "इस रू ओशोमीन लेयसी? लो, देनो" देंमेनु "ओशोमीन लेयतस्कु" देंमाक्त।<sup>9</sup> मिनु पत्रुसमी "गे निक्शी गारशा, मोदेंशो पा परमप्रभु यावे आ सोक्त कली जोल पचा दुम्बा? इ वोंइश कली थिम्थ लाइबपुकी लेश्शा जाक्वाक्तेक्म। इक्की ना इ कली यो लाइश्शा

थिम्नीम" देंमेनु, मीश मुर यो दिड गोल्शा बेक्माक्त।<sup>10</sup> मिनु ठिटापुकी जाक्शा कोव्रडमेनु, सफीरा यो बेक्शो तामे बाक्त। मिनु लाइश्शा आ वोंइश थिम्तीके आ नेक्था थिम्मे बाक्त।<sup>11</sup> मिनु थमा सुइश्शा बुक्बपुकी नु मेको लोव नेंब नेल्लेमी "मो देंशो हेंथे पा जोल पचा मदुम्बाक्माक्त" दे तुइश्शा, शुश हिंमा बाक्त।

सोइश्शोपुकीमी गेय पशो

<sup>12</sup> मिनु सोइश्शोपुकीमी मुर आन दातेमी शुश चिन्ड नु छक लाक्चा डा गेय पाक्तेक्म। मेको नेल्ल सोलोमन नें वोइश्शो थाम पाइश्शो ठेयब कोठाम बाक्बाक्मा बाक्त। प्रेरित ३:११<sup>13</sup> थमा मसुइक्बपुकी मेकोपुकी नु काथा गाक्चा बाक्चा हिंशा, मेको आन कली ठेयब सेल्शा, आन पर्वम रिम्शो लोव ला पाइबाक्मा बाक्त।<sup>14</sup> मिनु वोंइश मुर नु मीश मुर शुशेमी प्रभु कली थमा सुइक्ब दुम्शा, तेम्सीन सीन शुश बारना बारन लमा बाक्त। प्रेरित २:४७<sup>15</sup> सोइश्शोपुकीमी शुश छक लाक्चा डा गेय पशो तशा, मुरपुकीमी रोइ पाइब आन कली चाक्शा, लां पित्थ इप्पाइश्शा, वोइक्बाक्मा बाक्त। मारदे हना पत्रुस मेको लां गाक्मेनु, आ वांकुम योइश्शा साब, दे मिम्शा मो पाइबाक्मा बाक्त। प्रेरित १९:११-१२<sup>16</sup> यरूसलेम एर ओंथ सहर डा रोइ पशो नु वोलम तशो मुर शुश आन कली चाक्बाक्मा बाक्त। मेकोपुकी यो नेल्ल साशा लाइबाक्मा बाक्त।

सोइश्शोपुकी खेदा पचा पुंडसीशो

<sup>17</sup> सोइश्शोपुकीमी मोदेंशो छक लाक्चा डा गेय पशो तशा, ठेयब चढेब नु सदुकी आन थुंम गेहे पामे बाक्त। प्रेरित ४:१, ६<sup>18</sup> मिनु सोइश्शो आन कली ग्याइक्पा लाइश्शा, जेल्खानमी चोक्पदमे बाक्त।<sup>19</sup> मिनु मेको नाक्दो परमप्रभु यावे आ स्वर्ग डा गेय पाइब कामी लाप्चो रोक्शा, मेको आन कली गुंडदीमी बाक्त। प्रेरित १२:७<sup>20</sup> मिनु गुंडशा "परमप्रभु यावे आ खिं लशा, मुर आन कली येसु आ नेंमी ब्रॉइतीक लां आ पर्वम शेंदीने" दे सोइक्तीमी बाक्त।<sup>21</sup> मेको लोव टिशा, सुनी कना परमप्रभु यावे आ खिं जाक्दीश्शा, ओव्रशा शेंचा गोव्रमे बाक्त।

कछडीमी राप्पाइक्चा पुंडसीशो

मेको लोव टिशा, सुनी कना परमप्रभु यावे आ खिं जाक्दीश्शा, ओव्रशा शेंचा गोव्रमे बाक्त। मिनु ठेयब चढेब, मेको नु बाक्बपुकी, इस्राएली आन जोक्ब तुइक्ब खाल्पापुकी खुम्सीशा "सिनाक्त चोक्पाइश्शो आन कली चाक्चा" दे जेल्खान सोइक्तमे बाक्त।<sup>22</sup> मिनु गेय पाइबपुकी लशा कोव्रडमेनु, मेको चोक्चा पुंडसीशोपुकी मथिदमे बाक्त। मिनु लेश्शा जाक्शा, देंमा बाक्त।<sup>23</sup> मेकोपुकीमी "जेल्खानमी जाक्दीकानु, खाल पाइब बाक्तेक्म। लाप्चो नेल्ल चोक्स डा चोक्स बाक्तेक्म। मिनु आगा कोव्रशोनु, इन माल्शो मुरपुकी चहिं मबाक्म" देंमा बाक्त।<sup>24</sup> मिनु परमप्रभु यावे आ खिं डा कप्तान नु ठेयब चढेबपुकीमी मेको लोव नेंशा "ते लमा, दोपा ओदेंशो दुम्मे?" दे छक लाक्शा, मुल मार पचा, दे मिन्ने मचाप्मे बाक्त।<sup>25</sup> मिनु मुर का जाक्शा "सिनाक्त गेपुकीमी जेल्खानमी चोक्पाइश्शो मुरपुकीमी परमप्रभु यावे आ खिंमी मुर आन कली शेंना शेंन बाक्नीम" देंमाक्त।<sup>26</sup> मिनु कप्तान नु गेय पाइबपुकी परमप्रभु यावे आ खिं लशा, सोइश्शो आन कली मारेइ मपथु, चाक्मे बाक्त। "मारदे हना मरिम्शो पाइतय हना, मुरपुकीमी इं कली फुल्लु आप्था साइक्नीम" दे हिंमा बाक्त।

<sup>27</sup> मिनु कछडीम चाक्शा, आन डोंइती राप्पाइक्मी बाक्त।<sup>28</sup> मिनु ठेयब चढेबमी "येसु आ नें मशेंचा, मुर आन कली मतुइक्पाइक्चा देंतक। गेपुकीमी चहिं यरूसलेम नेल्ल मेको लोव फ्रनी बाक्त। लोव फ्रशो ला ममाइ। मेको येसु कली गोपुकीमी साइश्शो, दे आंइ कली दोस गेनी बाक्त" दे हुइक्तीमी बाक्त। प्रेरित ४:१८; मत्ती २७:२५<sup>29</sup> मिनु पत्रुस नु येसु आ सोइश्शो नेल्लेमी "गेपुकीमी मुर आन लोव क्येडा परमप्रभु यावे आ लोव टिचा, दे थुं फ्रेंताक्क। प्रेरित ४:१९; दानीएल ३:१७-१८<sup>30</sup> इं किकी पिपी आन परमप्रभु यावेमी गेपुकीमी शीम केप्शा, कांटी थोक्शा क्येइश्शा साइक्पाइश्शो येसु कली बेक्शो रे सेंताक्व। प्रेरित ३:१५<sup>31</sup> परमप्रभु यावेमी



इसाएली आन थुं आ गे लेप्पाइक्व, लां कौंइब कली नु पाप रे प्रौंइब सेल्शा, आ ग्युरा गे निप्पाइक्व। प्रेरित २:३३<sup>32</sup> मेको नेल्ल आइ मिक्वीमी ताइतक। आ देशो टीब आन कली परमप्रभु यावेमी आ सोक्त गेब। मिनु परमप्रभु यावे आ सोक्तीमी 'मेको लोव्र नेल्ल थमा बाक्व' दे तुइक्पाइक्व, दे तुइक्तीने" देमा बाक्त। लूका २४:४८; यूहन्ना १५:२६-२७<sup>33</sup> मोदेशो लोव्र पशो नेंशा, गाइशा "मेको आन कली मसाइक्वु मप्रौंइचा नमी" देमा बाक्त।

### गमालीएल आ देशो पशो

34 मिनु मेको आन दातेमी गमालीएल माइश्शो फरिसी का बाक्माक्त। मेको निसाफ पतीक आ पर्वम शेंब बाक्माक्त। मुर नेल्लेमी मेको कली मान पाइबाक्मा बाक्त। मिनु गमालीएलमी मेकेर बाक्व आन कली मोपा गाइश्शो तशा, सोइश्शो आन कली लाडगा गुंइशा वोइक्मी बाक्त। प्रेरित २२:३<sup>35</sup> मिनु कछडीम बाक्व आन दातेमी राष्शा, मेको आन कली "आं लोकव इसाएलीपुकी, मेको मुर आन कली मार पचा चिक्तीनी, मेको होस पा पने। मोपतीके आं लोव्र का निक्शी नेनीने।<sup>36</sup> साइ थुदास माइश्शो आ पर्वम गो नेल्लेमी तुइक्ताक्व। मेकोमी ठेयब सेल्सीशा, ४ सहे मुर आन कली आ नोले खोइक्व सेल्लु। मिनु थुदास साइक्वा पुंडसाक्व। मिनु आ नोले खोइक्व नेल्ल ब्राशा गाक्तेक्म। मिनु मेको आन लोव्रसी जाम्शा लत।<sup>37</sup> मेको नोले मुर आन कली हिक्तीक बर्समी गालील डा यहूदा माइश्शो मुर का बोक्माक्त। मेकोमी यो आ नोले खोइक्व मुर सेला बाक्त। मेको यो जाम्शा लमाक्त। मिनु आ नोले खोइक्व नेल्ल ब्राशा गाक्मा बाक्त।<sup>38</sup> मोपतीके मेको येसु माइश्शो आ नोले खोइक्व आन कली मारेइ मपाइय्य। मो प्रौंइशा सोइक्तय। मेको आन लोव्र मुरुमी मिम्शो लोव्र बाक्त हना, मारेइ मदुम्थु जाम्शा लाइब। मत्ती १५:३३<sup>39</sup> परमप्रभु यावे आ पशो बाक्त हना चहिं, गेपुकीमी तेक्शा यो मतेक्सीब। मेको ला ममाइ। गेपुकी परमप्रभु यावे कली मरिम्शो पाइब दुम्नीनी" दे माइक्मी बाक्त।<sup>40</sup> मिनु गमालीएल आ लोव्र नेंशा, बिस्समा बाक्त। मिनु लाडगाम सोइश्शो आन कली खिं गा ब्रेशशा, का का पा युक्पदमे बाक्त। मिनु "मुल डा मेरे येसु आ नेंमी शेंशा मगाक्कीने" दे प्रौंइशा सोइक्तमे बाक्त। मत्ती १०:१७<sup>41</sup> मिनु सोइश्शोपुकी ग्येरसीशा, मेकेर रे लमा बाक्त। मारेदे हना "येसु आ नेंमी श्येत जचा रिम्शो दुम्ब" देमा बाक्त। मत्ती ५:१०-१२; १पत्रुस ४:१३<sup>42</sup> मिनु नाक्त किंत किंत परमप्रभु यावे आ खिंमी, आंम आन खिं खिंमी खुम्सीशा "येसु परमप्रभु यावे आ सोइश्शो ख्रीस्त बाक्व" दे शेंना शेंन बाक्बाक्मा बाक्त।

### गेय पाइब आन कली योव्रशो

6 मेना थमा सुइक्वपुकी शुश बारना बारन लमा बाक्त। ग्रीक लोव्र नु हिब्रू लोव्र पाइबपुकीमी गन गन पाक्तेक्म। मारेदे हना नाक्त किंत किंत योक्तीक जचा थोव्रक मेको आन वौंइश बेक्शो मीश मुरपुकीमी ठीक पा मताइबाक्तेक्म। ग्रीक लोव्र नु हिब्रू लोव्र पाइबपुकी यहूदी बाक्तेक्म। प्रेरित ४:३८<sup>2</sup> मेको लोव्र नेंशा सोइश्शोपुकीमी थमा सुइक्व नेल्ल आन कली ब्रेशशा "आं लोकवपुकी, गो परमप्रभु यावे आ लोव्र शेंचा प्रौंइशा, जचा फेक्चा योक्शा गाक्वा आं गेय ममाइ।<sup>3</sup> मोपतीके मेको योक्चा कली मुरपुकी वोइक्वा माल्नय। दोदेशो मुर माल्नय देशा हना, मुरपुकीमी हिक्शो, परमप्रभु यावे आ सोक्तीमी ब्रीशो नु जोक्व तुइक्व ७ जना गेय पाइब मुर योव्रचा माल्नय। १तिमोथी ३:८-१०<sup>4</sup> गो चहिं परमप्रभु कली प्रार्थना पना पन शेंथ गाक्चा माल्नय" देमा बाक्त।<sup>5</sup> सोइश्शो आन लोव्र नेंशा नेल्ल आन थुं नुशा, ७ जना मुर आन कली योव्रचा बिस्समा बाक्त। मिनु सु सु आन कली योव्रडमे बाक्त देशा हना, रिम्शो थमा सुइक्व परमप्रभु यावे आ सोक्तीमी ब्रीशो स्तीफानस, फिलीप, प्रोकोरस, निकानोर, तीमोन, परमीनास नु एन्टीओक डा निकोलाउस आन कली योव्रडमे बाक्त। निकोलाउस चहिं अर्को रागी डा मुर बाक्शा यो यहूदी दुम्शो बाक्माक्त। प्रेरित ८:५<sup>6</sup> मिनु योव्रशो आन कली सोइश्शो आन डौंइती राप्पदमे बाक्त। मिनु सोइश्शोपुकीमी योव्रशो आन तारी आन गुइ वोइश्शा, मेको आन पर्वम परमप्रभु कली पुन्मे बाक्त। प्रेरित १:२४; प्रेरित १३:३; प्रेरित १४:२३<sup>7</sup> मिनु परमप्रभु यावे आ लोव्र तेइ तेइ बारना बारन लमाक्त। यरूसलेममी शुश मुर

येसु ख्रीस्त कली थमा सुइक्व दुम्शा, तेम्सीन सीन बारना बारन लमा बाक्त। चढेब शुश यो थमा सुइक्व दुम्मा बाक्त। प्रेरित २:४७; प्रेरित १९:२०

### स्तीफासमी लोव्र पशो

8 मिनु स्तीफानस चहिं परमप्रभुमी शुश शिशो नु सक्ति गेचा पुंडसीशो बाक्माक्त। मोपतीके मुर आन कली शुश चिन्ड नु छक लाक्वा डा गेय नु चिनु कौंइशा बाक्बाक्माक्त।<sup>9</sup> मिनु लिबेरती माइश्शो गुम्तीक खिं नु साइरेनी, अलेकजेन्दीया, सिलीसीया नु एसीया रे जाक्शो शेंबपुकीमी स्तीफानस नु जिशो बाक्तेक्म।<sup>10</sup> तन्न स्तीफानस परमप्रभु यावे आ सोक्तीमी ब्रीशा जोक्शो तुइश्शो ब्वाक्मेनु, सुइमी ग्राने मचाप्मे बाक्त। लूका २१:१५<sup>11</sup> मोपा ग्राने मचाप्तीके सुइ आन मतुइक्व, मुर आन कली पोक्शा "मेकोमी इं किकी पिपी मोसा नु परमप्रभु यावे आ पर्वम हेंथे नु ग्रोगा दिशो लोव्र पशो नेंतक" दे जोल पा लोव्र ब्रपदमे बाक्त। मत्ती २६:६०-६६<sup>12</sup> मोदेशो जोल लोव्र पाइब मुर, यहूदी आन जोक्व तुइक्व खाल्पा नु सास्त्री आन कली पोक्गमे बाक्त। मेको लोव्र पा ब्रुडबपुकीमी स्तीफानस कली ग्याइश्शा, कछरीम राप्पदमे बाक्त।<sup>13</sup> मिनु जोल पा सांक्छी वोइश्शा, मेको आन कली "एको मुरुमी परमप्रभु यावे आ खिं नु परमप्रभु यावे आ अरेशो लोव्र आ पर्वम शुक्शी पा हेंथे लोव्र पाइब। येरमीया २६:९, ११<sup>14</sup> मेको नासरथ डा येसुमी परमप्रभु यावे आ खिं प्रेम्ब। मोसामी गेशो पतीके लोव्र प्रौंइशा, नक पतीक वोइक्व, देशो आंइ नोफामी नेंतक" दे ब्वाक्पदमे बाक्त। यूहन्ना २:१९<sup>15</sup> कछडीम बाक्वपुकीमी स्तीफानस गे कोव्रडमेनु, आ कुल परमप्रभु यावे आ स्वर्ग डा गेय पाइब आन कुल खोदेशो पा महिंथु बाक्शो तामे बाक्त। मिनु कोव्रस डा कोव्रस दुम्मा बाक्त।

### स्तीफानस आ लोव्र

7 मिनु ठेयब चढेबमी "एको आन देशो लोव्र थमा देय जोल, लो देनो" देमेनु,<sup>2</sup> स्तीफानसमी "आं आफ, बाजे नु आं लोकवपुकी, गो लोव्र का निक्शी पाइनुड। दोपा छेडछेड नु सक्ति पाइश्शो परमप्रभु यावेमी इं किकी पिपी अब्राहाम कली तपांइसे, गो मेको नेल्लेमी तुइक्नय। उत्पत्ती ११:- ५०:-; यहोसु २४:३२<sup>3</sup> हारान जाक्दीत्वा क्येडा डौंइती अब्राहाम मेसोपोटामीया रागीम बाक्शो बाक्माक्त। मेकेर बाक्मेनु, परमप्रभु यावेमी 'इ रागी नु इ खिं डा मुर प्रौंइशा लावो। ते लशा बाक्वा माल्नेवे, नोले तुइक्पाइक्वन' दे माइश्शो बाक्माक्त।<sup>4</sup> मिनु अब्राहाम कल्दी आन रागी प्रौंइशा, हारान सहर जाक्दीश्शा बाक्माक्त। मिनु आ आफ बेक्म नोले परमप्रभुमी अब्राहाम कली हारान रे मुल इं बाक्शो रागीमी चाक्मा बाक्त।<sup>5</sup> मेना परमप्रभु यावेमी अब्राहाम कली खोइल थेक्तीक रागी यो मगेशो बाक्माक्त। तन्न 'एको रागी इ चच युइ आन कली गेनुडमी' दे लोव्र पशो बाक्माक्त। मेना अब्राहाममी तमी तौ काइ यो मथिशो बाक्माक्त।<sup>6</sup> मिनु परमप्रभु यावेमी 'नोले इ चच युइ मुर आन रागीमी लाइनीमी। मेको रागी डा मुरपुकीमी इ मुर आन कली वाइलीम वाइल सेल्शा, ४ सहे बर्स सम्म श्येत गेशा वोइक्नीम। उत्पत्ती १५:१३-१४; प्रस्थान १२:४०<sup>7</sup> तन्न गो मेको श्येत गेब आन कली सजाइ गेनुडमी। इ चच युइ चहिं मेको रागी प्रौंइशा एक लेशशा जाक्शा, आं कली ठेयब सेल्शा मानेनीम' दे परमप्रभुमी अब्राहाम कली नोले दुम्ब लोव्र तुइक्पदा बाक्त।<sup>8</sup> मिनु नोले परमप्रभुमी अब्राहाम कली खोइक्तीक चिनु डा कबल गेवा बाक्त। मिनु अब्राहाममी आ तौ इसहाक थिशो, ८ नाक्त दुम्मेनु, मेको कली खोइक्तीक चिनु खोदा बाक्त। इसहाक याक्व आ आफ दुम्माक्त। मिनु याक्व आ १२ जना तौ आन आफ दुम्माक्त। मिनु मेको १२ जना तौ इं यहूदी १२ थर दुम्मा बाक्त।<sup>9</sup> मिनु याक्व आ तौ आन लोकव योसेफ कली गेहे पा, मेको कली इजीप्त रागी डा मुर आन कली लेयडमे बाक्त। तन्न परमप्रभु यावेमी मेको कली कोव्रशो बाक्माक्त।<sup>10</sup> मिनु आ श्येत रे प्रौंइबाक्माक्त। मिनु योसेफ इजीप्त रागी डा पिप फाराओ आं डौंइती जाक्मेनु, मेकोमी आ जोक्तीक तुइक्तीक थुं तशा, योसेफ कली शुश दाक्शो बाक्माक्त। मिनु पिप फाराओम योसेफ कली आ रागी डा ठेयब मुर सेला बाक्त।<sup>11</sup> मिनु इजीप्त नु कनान रागीमी ठेयब अन्काल दुम्तीके, मुरपुकीमी जचा मतामे बाक्त। इं किकी पिपीमी यो

जचा मतामे बावत। 12 इजीप्तमी अन्न ग्याप्चा तांडसीब देशो नेंशा, याकूबमी आ तौ आन कली इजीप्त सोइक्तीमी बावत। 13 मिनु ग्याप्चा चाकमेनु, मजावदीत्थु, लेंशा सोइक्तीमी बावत। मोपा लमानु, योसेफमी आ लोक्ब आन कली 'गो इन लोक्ब योसेफ नड' दे तुइक्पपांडसे बावत। में डा मेरे फाराओमी मेकोपुकी योसेफ आ मुर बाक्मा बावत, दे तुइक्ता बावत। 14 मिनु योसेफमी आ आफ, आ लोक्बपुकी आ खिं डा मुर नेल्ल आन कली इजीप्त रागी जाक्शा बाक्कीन, दे ब्रथ सोइक्तीमी बावत। मेको नेल्ल ७५ जना बाक्मा बावत। 15 मिनु याकूब इजीप्त जाक्दीशा, शुश बर्स बाक्शा, मेकेर उइ बेक्मावत। नोले इं किकी पिपी याकूब आ तौ यो मेकेर बेक्मा बावत। 16 इजीप्तमी बेक्तेक्म हना यो, आन बेक्शो रां शेकेम सहर लाइश्शा थिम्मे बावत। अब्राहाममी शेकेम सहरम मेको थिम्तीके रू हमोर आ तौपुकी रे चांदी गेशा, ग्याप्चो बाक्मावत।

17 मिनु परमप्रभु यावेमी अब्राहाम कली गेशो लोव्र जाक्दीम्मावत। मोपतीके इजीप्त रागीमी इं मुर बारना बारन लशा, शुश दुम्मा बावत। प्रस्थान १:-३:- 18 मिनु इजीप्त रागीमी अर्को पिप दुम्मावत। मेको योसेफ नु आ खिं डा मुर आन कली मतुइक्ब बाक्मावत।

19 मेको पिपीमी इं मुर आन कली शिशी मपथु, शुश श्येत गेवा बावत। आल थीब आन कली यो आन आल थुल्चा मगेथु ताइक्पदा बावत। 20 मेना मोसा जरमेसे बावत। मेको परमप्रभु यावे आ डोंइती थम दारशो आल बावत। मोपतीके आम आफोमी मेको कली महिना सां सम्म आस खिंमी खुइश्शा थुल्से बावत। 21 महिना सां नोले आल कली प्रोन्से बावत। मिनु फाराओ आ तमीमी मेको आल कली थिश्शा लाइश्शा, आ तौ सेला बावत। 22 मिनु पिप बाक्तीक खिंमी बाक्मेनु, इजीप्त रागी डा ठेयब मुर आन जोक्शो तुइश्शो आं यो नेल्ल जोक्ब तुइक्ब दुम्मावत। मिनु मोसा आ लोव्र नु आ गेय नेल्ल सक्ति पाइश्शो दुम्मावत।

23 मिनु मोसा ४० बर्स दुम्मेनु, आ लोक्ब इस्राएली आन कली युम्वा थुं पवा बावत। 24 मिनु काबु ग्रुम्थ लमेनु, इजीप्त डा मुरुमी इस्राएली कली तुप्शो तशा, मोसामी इस्राएली कली प्रोंइशा, इजीप्ती कली तुप्शा सदा बावत। 25 मोसामी 'परमप्रभुमी आं कली आं लोक्ब आन कली श्येत रे प्रोंइब सेल्टी' आं लोक्बपुकीमी एको आंइ कली श्येत रे प्रोंइब बाक्मावत, दे रुप्शा, आं कली ब्राइनीम, दे मिम्शो बाक्मावत। आ लोक्बपुकीमी चहिं मेको काइ मरुप्शो बाक्मा बावत। 26 मिनु आ दीसा मोसा लेंशा मेक जाक्दीम्मेनु, इस्राएली निक्शी आस कली जिशो तवा बावत। मिनु मेको आस कली 'गे निक्शी, वोबु दुम्शा यो जिनीसी?' देंमावत। 27 मिनु मरिम्शो पाइबमी गाइश्शा मोसा कली 'गो आंस कली हुकुम नु निसाफ पाइब सुम सेले? प्रस्थान २:१४ 28 सिनावत एकेर इजीप्ती कली साइश्शो खोदेशो पा आं कली सद्दु, देने?' दे नेप्ता बावत। 29 मेको लोव्र नेंशा, मोसा इजीप्त रागी रे प्रोक्शा, मिदयान रागीम जाक्दीम्मावत। मेकेर जाक्दीशा बाक्मेनु, तौ निक्शी थिमावत। प्रस्थान १८:३-४

30 मिदयान जाक्दीशा, बाक्शो ४० बर्स दुम्मावत। मिनु काबु सीनै डांडा डा गोरशो रागीमी बाक्मेनु, परमप्रभु यावे आ स्वर्ग डा गेय पाइब कामी ब्रशो बुटा कोंइदा बावत। 31 मोसामी मोपा ब्रशो तशा छक लाक्शा, ओदेशो मार ब्रमे, दे आ नेक्था लशा कोव्रडा बावत। मिनु नेक्था जाक्दीशा कोव्रडानु, परमप्रभु आ लोव्र नेंना बावत। प्रस्थान ३:५-१० 32 'गो इन किकी पिपी आन परमप्रभु यावे नड। गो अब्राहाम, इसहाक नु याकूब आन परमप्रभु यावे नड' देशो नेंशा हिंशा, खिंखि पा बुटा गे यो कोव्रने मचबा बावत। 33 मिनु परमप्रभु यावेमी 'इ थेक्शा राप्शा बाक्तीके आं बाक्तीक बाक्ब। मोपतीके इ जुत्ता पुइश्शा, आं लोव्र नेनो। 34 इजीप्त रागीम बाक्ब आं मुरपुकीमी शुश श्येत जाम्तेक्म, दे तुइक्ताकड। आन श्येत ताता। मिनु आन डाक्शो यो नेंता। मिनु आं मुर आन कली मोदेशो श्येत रे प्रोंइपाइक्चा दुम्ती, दे इ कली इजीप्त सोइक्नन' देशो नेना बावत। 35 'इ कली हुकुम पाइब नु निसाफ पाइब सुम सेले?' दे खेरचा पुंइसीशो मोसा कली परमप्रभु यावेमी हुकुम पाइब नु प्रोंइब सेल्शा, आ स्वर्ग डा गेय पाइब रे बुटाम तपांइसीशा इजीप्त सोइक्ता बावत।

36 मिनु शुश चिन्ड नु छक लाक्चा डा गेय कोंइशा, इस्राएली आन कली इजीप्त रे गुंइशा, लल समुन्द्र चाक्दीमी बावत। मेकेर यो शुश छक लाक्चा डा गेय कोंइदीमी बावत। मिनु लल समुन्द्र शोक्शा ४० बर्स सम्म गोरशो

रागीमी हिरशा गाक्मानु, शुश छक लाक्चा डा गेय पाइबाक्मावत। प्रस्थान ७:१०; प्रस्थान १४:२१ 37 मेको मोसामी इस्राएली आन कली 'आं खोदेशो, परमप्रभु यावेमी आ लोव्र पाइब इन दाते रे का योव्रशा, आ लोव्र नेंपाइक्ब का सेल्ब' दे तुइक्पाइक्मी बावत। ब्यक्स्था १८:१५

38 इस्राएलीपुकी गोरशो रागीमी बाक्मानु, आन कली लां कोंइब मेको मोसा बाक्मावत। सीनै डांडामी परमप्रभु आ सोइश्शा आ गेय पाइबमी इं किकी पिपी आन कली लोव्र पवानु, मेको मोसा रे पा नेंपाइक्मी बावत। मेको लोव्र चहिं मजाम्थु गेना हना यो लीब लोव्र बाक्ब। मुल सम्म गो इं कली गारशो लोव्र बाक्ब, दे तुइक्तीने। प्रस्थान १९:-; ब्यक्स्था ९:१० 39 इं किकी पिपीमी मोसा आ लोव्र मटिथु मनेंथु, मोसा कली प्रोंइशा आन थुं इजीप्त रागी गे हिरदमे बावत। 40 मिनु हारून कली 'इं कली इजीप्त रागी रे एक चाक्ब मोसा ते लाक्गा? बेक्म कों प्रोक्म कों? मतुंइसे। मुल लां कोंइब का माल्ताक्व। मोपतीके देवता सेल्चा गेकी। मिनु मेको इं कली लां कोंइब दुम्ल' दे पुन्मे बावत। प्रस्थान ३२:१ 41 मिनु सुन के बाछा आ मूर्ति सेल्शा, मार मार क्योरशा जारदेमे बावत। आंम आन गुइमी सेल्शो मूर्ति तशा ग्येसीशा, जचा तूचा सेल्शा डा मिन बुक्शा जामे तूडमे बावत। 42 मेकोपुकीमी मो पशो तशा, परमप्रभु यावे गाइश्शा 'मेकोपुकी नां नु तास्ला कली सेउ पाइब दुम्ल' दे प्रोंइमी बावत। परमप्रभु यावे आ लोव्र पाइबमी 'गे इस्राएलीपुकी, गोरशो रागीम ४० बर्स सम्म हिरशा गाक्नीनु, मार मार क्योरशा जारशा, आं कली चट्टेनी डा? 43 मो मपनी। गे मोलोक देवता आ ताम्बु कुरशा लाइक्तीनी। रिफन सोरुल आ मूर्ति सेल्शा लाइक्तीनी। मोपतीके इन रागी रे बेबीलोन लाइक्नन्नी' दे ब्रेक्शो बावत। आमास ५:२५-२७

44 इं किकी पिपी गोरशो रागीमी हिरसमानु, परमप्रभु यावे आ ताम्बु यो कुरशा गाक्मा बावत। परमप्रभु यावे आ ताम्बु चहिं दोपा सेल्चा, दे परमप्रभु यावेमी मोसा कली कोंइशो खोदेशो पा मोसामी सेल्पाइश्शो बाक्मावत। प्रस्थान २५:९ 45 मिनु नोले इं किकी पिपी यहोसु मेको आन लां कोंइब दुम्शा, मेको ताम्बु कुरशा गाक्मा बावत। मिनु कनान रागीमी जाक्दीम्मानु, मेको ताम्बु आन डोंइती कुरशा गाक्शो बाक्तेक्म। परमप्रभु यावेमी मेकेर बाक्ब मुर आन कली ग्राशा खेरशा, मेको रागी आन के सेल्शा, मेको ताम्बु मेकेन वोदमे बावत। मिनु पिप दाऊद आ पाला सम्म मेको ताम्बु मोदेशोन लीमावत। यहोसु ३:१४; यहोसु १६:१ 46 पिप दाऊद परमप्रभु यावे आ दाक्शो मुर बाक्मावत। पिप दाऊदमी परमप्रभु यावे कली दाक्शा 'याकूब आ परमप्रभु यावे कली खिं सेल्नुड' दे थुं पवा बावत। २सामुएल ७:१-१६; भजन संग्रह १३२:३-५ 47 तन्न आ तौ सोलोमनमी परमप्रभु यावे आ खिं सेला बावत। १राजा ६:- 48 मिनु नेल्ल क्येडा ठेयब मुरुम सेल्शो खिंमी मबाक्ब। साइ नेसी परमप्रभु यावे आ लोव्र पाइबमी परमप्रभु यावेमी 49 'सरीड आं नित्तीके बाक्ब। रागीम आं खोइल थेक्तीक बाक्ब। मोपतीके आं कली दोदेशो खिं सेल्ने चाप्नीनी? गो आं नाइक्चा कली बाक्तीक मार सेल्ने चाप्नीनी? 50 सरीड नु रागी नेल्ल आं सेल्शो ममाइ डा?' दे परमप्रभुमी देंमावत" दे लोव्र पवा बावत। यसैया ६६:१-२

51 "ए, गे परमप्रभु यावे आ लोव्र मनेंथु मटीब फुल्लु खोदेशो थुं पाइश्शोपुकी, गे परमप्रभु यावे कली मतुइक्ब मुर खोदेशो पाइनीनी। इन किकी पिपीमी पशो खोदेशो पा गे यो परमप्रभु यावे आ सोक्त आ देशो मटिथु दूली पाइनीनी। प्रस्थान १२:९; लेवी २६:४; रोमी २:२८-२९ 52 इन किकी पिपीमी मार पामे? परमप्रभु आ लोव्र पाइब सु कली श्येत मगेमे डा? नेल्ल आन कली श्येत गेम्तेक्म। श्येत गेशा ला ममाइ। इन कली पाप रे प्रोंइब ख्रीस्त जाक्ब, दे लोव्र नेंपा गाक्ब आन कली साइक्पाइक्ना पाइक्न बाक्तेक्म। इन कली पाप रे प्रोंइब ख्रीस्त जाक्त। मिनु गेपुकीमी मेको कली यो साइक्पाइक्तीनी। २इतिहास ३६:१६; मत्ती २३:३१ 53 परमप्रभु यावे आ स्वर्ग डा गेय पाइबपुकीमी मार पचा मार मपचा, दे परमप्रभु यावे आ अरेशो लोव्र शेंसीशा योव्रसीशो दुम्शा यो मटिनी" दे स्तीफानसमी हुइक्तीमी बावत। प्रस्थान २०:१-२१; गलाती ३:१९; हिब्रू २:२ 54 स्तीफानसमी मोदें हुइक्तीमीनु, नेल्ल गाइश्शा, लल गोंगों जिशा, खुइ शेषा प्रेक्मा बावत। 55 स्तीफानस चहिं परमप्रभु यावे आ सोक्तीम ब्रीशा, सरीड गे कोव्रडा बावत। सरीड गे कोव्रडानु, ठेयब सक्ति पाइश्शो नु छेडछेड पा तांइसीशो परमप्रभु यावे कली तवा बावत। परमप्रभु आ ग्युरा गे रागीम जरमेशो, येसु

कली यो राप्शा बाक्शो तवा बाक्त। 56 मिनु “लो कोवडीन, गो स्वर्ग रोकसीशा, परमप्रभु आ ग्युरा गे रागीमी जरमेशो कली राप्शा बाक्शो ताता” दे माइक्मी बाक्त। लूका २२:६९ 57 मो देंमेनु “एको आ लोव मनैचा” दे शुश रेयके पा, गुइ पोक्शा प्रेक्शा ग्राम्शा ग्याइवतमे बाक्त। 58 मिनु कीशा लाइशा, सहर रे गुंइशा, फुल्लु क्रोम्वा गोव्रमे बाक्त। सांकळीपुकीमी आन वा पुइशा, सावल नें पाइशा ठिटा का आ डोंइती वोदमे बाक्त। लेवी २४:१६; प्रेरित २२:२० 59 मेको हुलमी स्तीफानस कली फुल्लु क्रोम्स डा क्रोम्स पामेनु, स्तीफानसमी “प्रभु येसु, आं सोक्त ताक्कीन” दे पुंइदा बाक्त। लूका २३:४६ 60 मिनु आ पोक्व थेक्शा ठेयब सेंदा पा “प्रभु, एको पाप एको आन कली मरल” देंशा, बेक्माक्त। लूका २३:३४

थमा सुइक्वपुकी खेदा पचा पुंइसीशो

8 स्तीफानस कली साइशा तशा, सावलमी “एको कली साइक्वा माल्शो। मिनु साइशा ठीक पाइतीनी” देंमाक्त। स्तीफानस कली सादमे नाक्त रे यरूसलेम सहरम बाक्ब थमा सुइक्व नेल्ल आन कली खेदा पा श्येत गेचा गोव्रमे बाक्त। मिनु श्येत गेशा प्रोक्पदमेनु, मेकोपुकी ब्राशा गाक्शा, यहूदीया नु सामरीया रागीमी जाक्दीशा बाक्मा बाक्त। १२ जना येसु आ सोइशापुकी ला यरूसलेम उइ बाक्मा बाक्त। प्रेरित १:८; प्रेरित ११:१९ 2 परमप्रभु यावे कली मान पा हिंबपुकीमी स्तीफानस आ बेक्शो रां लाइशा, थिम्मे बाक्त। स्तीफानस कली साइशा तशा, थमा सुइक्व नेल्ल शुश डाक्मा बाक्त। 3 सावलमी चहिं “मेको आन थमा सुइशा क्याम्वा” दे खिं खिं हिरशा ओव्रशा, थमा सुइक्व वोंइश मुर, मीश मुर नेल्ल आन कली ग्याइक्वाइशा, फ्रेंशा लाइशा जेल्खानमी चौक्पाइक्वाक्माक्त। प्रेरित ९:१; प्रेरित २२:४; १कोरिन्थी १५:९

येसु आ लोव ब्रपाइशा

4 प्रोक्शा ब्राशा गाक्बपुकीमी येसु आ लोव तेइ तेइ शेंना शेंन गाक्बाक्मा बाक्त। 5 फिलीप सामरीया सहरमी जाक्दीशा, मेकेर बाक्ब मुर आन कली “परमप्रभु यावे आ सोइशा ख्रीस्त येसु बाक्ब” दे शेंदीमी बाक्त। प्रेरित ६:५ 6 फिलीप आ शेंशो लोव नेंशा, आ पशो छक लाक्वा डा गेय तशा, नेल्लेमी थम नोफा दाइशा नेन्मे बाक्त। 7 छक लाक्वा डा गेय चहिं मार कोंइबाक्माक्त देंशा हना, वोल्म तशो मुर आन कली वोल्म खेरशा सापाइक्वाक्माक्त। वोल्म खेरानु, वोल्म तशो मुर वाइ ब्रेशा, वोल्म प्रोक्बाक्माक्त। गुइ खोइल मदुक्व मुर शुश आन कली गुइ खोइल दुक्व गाक्ब सेल्बाक्माक्त। मर्कूस १६:१७ 8 मोपतीके मेको सहरमी सापाइक्वा पुंइसीब मुर नेल्ले ग्येरसीबाक्मा बाक्त।

चटक कोंइब सिमोन

9 मेको सहरमी सिमोन नें पाइशा मुर का बाक्माक्त। मेको डोंइती रे सामरीया रागी डा मुर आन कली चटक कोंइशा, ठेयब सुंइसीशो बाक्माक्त। 10 सहर डा मुर नेल्लेमी एको मुर परमप्रभु आ सक्ति तशो बाक्माक्त, दे ठेयब सेल्शा, मान पशो बाक्मा बाक्त। 11 शुश बर्स सम्म सिमोनमी चटक पा छक लाक्पाइक्तीके मुर नेल्लेमी सिमोन आ देंशो नोफा दाइशा आ पशो कोव्रशा बाक्शो बाक्मा बाक्त। 12 मिनु फिलीप जाक्शा, मुर आन कली येसु ख्रीस्तमी इं कली पाप रे प्रोंइब, दे परमप्रभु यावे आ राज्य डा लोव नु येसु ख्रीस्त आ पबर्म नेंपाइक्ना पाइक्न, शेंना शेंन गाक्मेनु, मीश मुर नु वोंइश मुर शुशेमी थमा सुइशा, ब्वाक्कुम ख्रुम्शा गुंइचा पुंइसमा बाक्त। 13 शुशेमी थमा सुइशा तशा, मेको चटक पा गाक्ब सिमोन यो थमा सुइक्व दुम्शा, ब्वाक्कुम ख्रुम्शा गुंइचा पुंइसे बाक्त। मिनु फिलीप कली मप्रोंइथु, काथा गाक्बा दुम्माक्त। फिलीपमी चिन्ड नु छक लाक्वा डा गेय कोंइदानु, सिमोन यो छक लाक्बाक्माक्त।

14 मिनु नोले यरूसलेममी बाक्ब सोइशापुकीमी “सामरीया डा मुरपुकीमी परमप्रभु यावे आ लोव थमा सुइक्व दुम्मेक्म” देंशो नेंशा, पत्रुस नु यूहन्ना आस कली सामरीया सोइक्वतमे बाक्त। 15 मिनु मेको निक्शीमी “परमप्रभु यावे आ सोक्त थमा सुइक्वपुकी नु लील” दे प्रार्थना पथ

जाक्दीस्सा बाक्त। 16 मारदे हना सामरीया डा मुर सुइ आन कली परमप्रभु यावे आ सोक्त मगेशो बाक्माक्त। प्रभु येसु आ नेंमी ब्वाक्कुम ख्रुम्शा गुंइचा ला पुंइसीशो बाक्मा बाक्त। 17 मिनु पत्रुस नु यूहन्नामी आस गुइ थमा सुइक्व आन तारी वोइशा, मेकोपुकी परमप्रभु यावे आ सोक्त तामे बाक्त। 18 मिनु सिमोनमी मेको सोइशा आस गुइ थमा सुइक्व आन तारी वोइशा, परमप्रभु यावे आ सोक्त गेशो तशा, मेको आस कली “क्येट गेनुड। 19 मोदेंशो सक्ति गेयी। गो गुइ वोइशा, पुनुनु, परमप्रभु यावे आ सोक्त मुरपुकीम तामेक्ल” दे पुंइदा बाक्त। 20 मिनु पत्रुसमी “इ क्येट गे नुन जाम्शा लल। मारदे हना गे परमप्रभु यावे आ गेशो सक्ति क्येट थाप्शा, ग्याप्चा तांइसीब, दे मिम्ताक्वी। 21 गे मेको गेय पने मचाप्नेवे। मारदे हना इ थुं परमप्रभु यावे आ डोंइती मरिम्शो बाक्ब। 22 गे ओदेंशो मरिम्शो थुं पचा प्रोंइशा, इ थुं परमप्रभु यावे गे लेत्तो। मिनु परमप्रभुमी इ पाप क्याम्शा गेबा कों? दे पुनो। 23 मुल इ थुं चोशा पापमी ब्रीशो मरिम्शो बाक्डे बाक्त, दे तुइक्ताक्ड” दे पत्रुसमी मदानु, 24 सिमोनमी “इन देंशो खोदेंशो मदुम्ल, दे आं पबर्म प्रभु कली प्रार्थना पने, हजुर” दे सेउ पवा बाक्त।

25 मिनु पत्रुस नु यूहन्नामी प्रभु आ लोव नेंपाइक्ने थुम्शा, यरूसलेम लेस्सानु, सामरीया डा गाउं लाम्मी शुश मुर आन कली ग्येरपाइक्व लोव शेंना शेंन लेस्सा बाक्त।

एथीयोपीया डा मुर कली शेंशो

26 काबु परमप्रभु यावे आ स्वर्ग डा गेय पाइब कामी फिलीप कली “छुल बोक्शा यरूसलेम रे गाक्शा, गाजा लतीक लां लावो” दे माइशा, मेको लां सोइक्ता बाक्त। मेको लां गोरशो रागी लतीक लां बाक्माक्त। 27 परमप्रभु यावे आ स्वर्ग डा गेय पाइब आ लोव नेंशा, फिलीप छुल बोक्शा, गाजा सहर लतीक लां लमाक्त। मिनु मेको लां गाक्मेनु, एथीयोपीया रागी डा मुर का यो मेको लां लना लन बाक्माक्त। मेको एथीयोपीया डा पिपीम कान्दाके रे शुश अधिकार तशो, ठेयब मुर बाक्माक्त। यरूसलेममी परमप्रभु यावे कली मार मार चढ़ेने थुम्शा, आ रागी लेशो बाक्माक्त। 28 मेको बग्गीम बाक्शा, परमप्रभु यावे आ लोव पाइब यसैयामी ब्रेक्शो पढेना पढेन बाक्माक्त। 29 मिनु परमप्रभु यावे आ सोक्तीमी फिलीप कली “मिरी लन लन पाइशा बग्गी आ नेक्था लावो” दे माइक्तीके फिलीप दोरशा, मेक जाक्दीम्माक्त। 30 जाक्दीशा, ठेयब मुर कली परमप्रभु यावे आ लोव पाइब यसैयामी आ ब्रेक्शो लोव पढेशो नेंशा “इन पढेशो लोव नेल्ल रुप्नी?” दे हिल्लो पवा बाक्त। 31 मिनु ठेयब मुरुमी “सुइमी मशेंथु, दोपा रुप्ने चानुडा डा?” देंशा, फिलीप कली बग्गीम डाइक्पाइशा निप्पाइशा, किताब कोंइदा बाक्त। 32 ठेयब मुरुम पढेना पढेन बाक्शो लोव चहिं “भेडा कली क्योरपाइक्व लाइशा खोदेंब पा मेको कली लाइक्तेक्म। भेडा पाठा आ ऊन प्रेक्गामेनु, ब्वालेइ पा बाक्शो खोदेंशो पा मेको ब्वालेइ पा बाक्त। 33 महिक्सीशो सेल्तेक्म। दोस गेशा ठीक निसाफ मपथु, दोसी सेल्तेक्म। आ खिं डा मुर सु लीबा डा? आल मथिथु साइक्वा पुंइसाक्व। मोपतीके आ खिं डा मुर सुइ मली” दे ब्रेक्शो लोव बाक्माक्त। यसैया ५३:७-८ 34 मिनु ठेयब मुरुमी फिलीप कली “परमप्रभु यावे आ लोव पाइबमी आंम आ पबर्म मोदेंशो देंमे देय अरु आन पबर्म मोदेंशो देंमे?” दे हिल्लो पवा बाक्त। 35 मिनु फिलीपमी मेको पढेशो लोव रे शेंचा गोशा, परमप्रभु यावे आ ब्रेक्पाइशा लोव शुश शेंशा, येसु आ पबर्म नेल्ल रुप्पदा बाक्त। 36 मोपा लसा लसा ब्वाक्कु बाक्तीकेमी जाक्दीस्सा बाक्त। मिनु ठेयब मुरुमी “एकेर ब्वाक्कु बाक्त, एको ब्वाक्कुम ख्रुम्शा गुंइचा पुंइसीनुड, दुम्बा?” देंमाक्त। 37 मिनु फिलीपमी “गे येसु कली थमा सुइक्तीनी हना, ब्वाक्कुम ख्रुम्शा गुंइचा शिरनीनी” देंमेनु “गो येसु ख्रीस्त परमप्रभु आ तौ बाक्ब, दे थमा सुइक्ता” देंमाक्त। 38 मिनु बग्गी तिव्शा तोइशा, फिलीपमी ठेयब मुर कली ब्वाक्कुम ख्रुम्शा गुंइदा बाक्त। 39 मिनु ब्वाक्कु रे गूशा कुसानु, परमप्रभु यावे आ सोक्तीमी फिलीप कली लदा बाक्त। मिनु ठेयब मुरुमी मेको मतवा बाक्त। मो हना यो थाम्पा ग्येरसीशा, आ लां खोइशा गाक्माक्त। 40 नोले फिलीप अस्टोद सहरमी गूदीम्माक्त। मिनु मेकेर रे गाउं गाउं सहर सहरम येसु आ

लोव्र नेंपाइक्ना पाइक्न गाक्शा, सिजरिया सहर जाक्दीम्माक्त। प्रेरित २१:८-९

सावल दमस्कस लशो

9 सावल मुल यो थमा सुइक्ब आन कली खेदा पा श्येत गेशा साइक्नुडमी देंना देंन गाक्बाक्माक्त। प्रेरित २२:३-१६; प्रेरित २६:९-१८; प्रेरित ८:३<sup>२</sup> मिनु काबु यरूसलेममी बाक्ब ठेयब चढेब आन कली गुम्शा, दमस्कस सहर डा गुम्तीक खिं खिं डा ठेयब मुर आन कली कागज ब्रेक्शा गेचा नड देंशा पुना बाक्त। सावल आ पुंइशो लोव्र मार बाक्त देंशा हना “दमस्कसमी बाक्ब येसु आ लां खोइक्ब मीश मुर वोंइश मुर सु सु थिदुमी, मेको नेल्ल आन कली ग्याइश्शा फ्रेंशा, यरूसलेम चाक्नुडमी” दे पुंइशो बाक्माक्त।<sup>३</sup> मिनु मोदेशो कागज ताक्शा, दमस्कस सहर लशा जाक्दीत्वावानु, मार दुम्माक्त देंशा हना, सरीड रे छेडछेड फो गूशा, आ एर ओंथ नेल्ल कौंइदा बाक्त। १कोरिन्थी १५:८<sup>४</sup> मोपा छेडछेड तवानु, दिड गोल्माक्त। मिनु “सावल, सावल, गे मारदे आं कली खेदा पयी?” देंशो लोव्र नेंना बाक्त।<sup>५</sup> मोदेशो नेंशा “प्रभु, गे सु ननी?” दे हिल्लो पवानु “इ खेदा पशो येसु गो नड।<sup>६</sup> मुल छुल बोक्शा दमस्कस सहर लावो। मिनु मेकेर जाक्दीश्शा, गे मार गेय पचा माल्नेवे तुइक्पाइक्चा पुंइसीनेवे” देंशो लोव्र नेंना बाक्त।<sup>७</sup> सावल नु काथा गाक्बपुकीमी मारेड मतथु, लोव्र पशो ला नेंशा, वाम ग्याम दुम्मा बाक्त।<sup>८</sup> मिनु सावल बोक्शा मिक्च पाक्शा कोव्रडानु, मिक्च मताइब दुम्शो बाक्माक्त। मिनु आ वारचपुकीमी आ गुड रे कीशा दमस्कसमी चाक्दीत्मे बाक्त।<sup>९</sup> दमस्कसमी जाक्दीश्शा यो नाक्त सां सम्म मिक्च मतवा बाक्त। जचा तूचा यो, प्रोना बाक्त।

सावलमी येसु कली थमा सुइश्शो

10 दमस्कसमी हनानीया नें पाइश्शो थमा सुइक्ब मुर का बाक्माक्त। प्रभुमी मेको मुर कली कौंइतीक कौंइशा “हनानीया” दे ब्रेत्ता बाक्त। मिनु “मार देंनी, प्रभु?” देंमेनु<sup>११</sup> “छुल बोक्शा ग्येत्थ माइश्शो लां लावो। मेकेर जाक्दीश्शा, यहूदा आ खिं लशा, टारसस डा सावल माइश्शो मुर कली मालो। मेकोमी प्रार्थना पाइब।<sup>१२</sup> मिनु मेकोमी कौंइतीकेमी हनानीया माइश्शो मुर ओव्रशा, मिक्च तपाइक्चा कली आ तारी गुड वोंइश्शो तशो बाक्ब” देंशो लोव्र नेंना बाक्त।<sup>१३</sup> मिनु हनानीयामी “आमाइ, प्रभु, गो शुश मुर आन शोव्र रे मेको मुर आ पबर्म शुश मरिम्शो लोव्र नेंता। मेकोमी यरूसलेममी बाक्ब थमा सुइक्ब आन कली शुश श्येत गेशा, खेदा पना पन बाक्ब देंशो नेंता।<sup>१४</sup> थमा सुइक्ब आन कली ग्याइश्शा फ्रेंशा लाइक्चा कली ठेयब चढेबपुकी रे अधिकार तशो बाक्माक्त, दे तुइक्ताक्ड” देंमाक्त।<sup>१५</sup> प्रभुमी “मोदेशो तुइक्ताक्वी हना यो, मुल छुल बोक्शा लावो। मारदे हना अर्को रागी डा मुर, पिपपुकी नु इसाएली आन कली आं नें तुइक्पाइक्चा, दे गो मेको कली योव्रने थुन्ता। प्रेरित १३:४६; प्रेरित २६:२; प्रेरित २७:२४<sup>१६</sup> आं नेंमी शुश श्येत जचा माल्नेवे देंशा गो मेको कली आंमान तुइक्पाइक्नुड” दे प्रभुमी हनानीया कली माइश्शा सोइक्ता बाक्त। २कोरिन्थी ११:२१-२८

17 मिनु हनानीया लशा, यहूदा आ खिं जाक्दीश्शा ओव्रशा, सावल तारी आ गुड चाक्शा “आं लोक्ब सावल, गे यरूसलेम रे पिवेनु, लांमी इ तशो प्रभु येसुम सोइक्ताक्वी। मिनु मिक्च ताइब दुमो, परमप्रभु यावे आ सोक्तीम ब्रीशो दुमो” देंमेनु,<sup>१८</sup> सावल आ मिक्च मारम फारशो बाक्मे, मेको दोक्शा, मिक्च ताइब दुम्माक्त। मिनु छुल बोक्शा, ब्वाक्कुम ख्रुम्शा गुंइचा पुंइसे बाक्त।<sup>१९</sup> मिनु जशा तूशा बोल तेम्सीशा, इक्का नाक्त दमस्कस डा थमा सुइक्बपुकी नु काथा बाक्माक्त।

सावलमी येसु आ लोव्र शेंशो

20 मिनु सावल गुम्तीक खिं खिं लशा “येसु परमप्रभु यावे आ तौ बाक्ब” दे शेंना शेंन यहूदी आन कली येसु आ पबर्म शुश लोव्र तुइक्पाइक्मी बाक्त।<sup>२१</sup> मोदेशो मेको आ शेंशो नेंशा “आमाइ, यरूसलेममी येसु कली थमा सुइक्ब आन कली का यो मवोइक्नुडमी देंब मेको ममाइ डा? इं सहर डा

येसु कली थमा सुइक्ब आन कली यो ग्याइश्शा लाइश्शा, ठेयब चढेब आन डोंइती राप्पाइक्नुडमी, दे एक जाक्शो ममाइ डा?” दे छक लाक्शा देंमुमा बाक्त। प्रेरित ८:१; प्रेरित २६:१०<sup>२२</sup> सावलमी शेंना शेंन आ शेंचा सक्ति बारपाइक्ना पाइक्न “येसु परमप्रभु यावे आ सोइश्शो ख्रीस्त बाक्ब” दे दमस्कसम बाक्ब यहूदी आन कली शेंदीमी बाक्त। मिनु सुइमी लोव्र लेन्ने मचाप्मे बाक्त। प्रेरित १८:२८<sup>२३</sup> मिनु शुश नाक्त मोपा शेंना शेंन गाक्मेनु, यहूदीपुकी गारशा सावल कली साइक्चा माल्मे बाक्त।<sup>२४</sup> मिनु सावलमी “आं कली साइक्चा माल्तीमी” दे तुइक्ता बाक्त। नाक्दो नाक्त यहूदीपुकीमी सहर डा ओव्रतीक गृतीक लां मेर मेको कली बाप्वाक्मा बाक्त।<sup>२५</sup> मोपतीके काबु नाक्दो थमा सुइक्बपुकीमी सावल कली डोकोमी कुर पशा, डोरीमी क्युक्शा, सहर डा गारो आ ची लुक्च तोइक्पा प्रोक्पदमे बाक्त। २कोरिन्थी ११:२२-२३

सावल यरूसलेम लेशो

26 सावल दमस्कस रे प्रोक्शा, यरूसलेम लेशशा जाक्दीम्माक्त। मिनु थमा सुइक्ब नु गारशा, काथा बाक्चा मला बाक्त। तन्न मेकोपुकीमी मेको येसु आ नोले खोइक्ब दुम्त, दे थमा मसुइक्थु, हिंशा मब्रामे बाक्त। गलाती १:१७-१९<sup>२७</sup> बारनाबासमी चहिं सावल नु सोइश्शो आन कली गुम्पदा बाक्त। मिनु लांमी गाक्मेनु, प्रभु कली तशो, प्रभुमी लोव्र पशो, दमस्कसमी महिंथु, येसु आ नेंमी शेंशा गाक्शो, मेको लोव्र नेल्ल बारनाबासमी रूप्पाइक्मी बाक्त।<sup>२८</sup> मिनु सावल कली ब्रामे बाक्त। मिनु सावलमी यरूसलेम सहरमी सुइ सुइ आन कली तशा महिंथु, येसु आ नेंमी शेंना शेंन गाक्माक्त।

29 शेंना शेंन गाक्मेनु, ग्रीक लोव्र पाइब यहूदीपुकी यो गुम्मी बाक्त। मिनु हिल्लो हिक्सी पमुमानु, जिचा बोक्माक्त। मोदेशो दुम्मेनु, सावल कली साइक्चा माल्मे बाक्त।<sup>३०</sup> मिनु थमा सुइक्ब लोक्बपुकीमी साइक्चा माल्मेक्म, दे तुइश्शा, सिजरिया सम्म चोव्रदीशा, टारसस सोइक्तमे बाक्त। गलाती १:२१

31 मिनु यहूदीया, गालील नु सामरीया रागीमी बाक्ब थमा सुइक्बपुकी खेदा पचा मपुंइसीथु, बाक्चा तामे बाक्त। थमा सुइक्बपुकीमी प्रभु कली मान पा हिंशा, परमप्रभु यावे आ सोक्त रे पा वारच पचा पुंइसीशा, आन थुं बारना बारन लमाक्त। मिनु थमा सुइक्ब यो तेम्सीन सीन लमा बाक्त।

पत्रुस लिडडा जाक्दीश्शो

32 पत्रुस शेंना शेंन गाक्शा, लिडडा सहर जाक्दीम्माक्त। मिनु मेकेर बाक्ब प्रभु आ योव्रशो आन कली गुमा बाक्त।<sup>३३</sup> मिनु काबु एनीयास माइश्शो मुर कली तवा बाक्त। एनीयास चहिं आ गुड खोइल मदुक्ब रोड पशा, ब्राख्ये रे बोक्ने मचाप्शो ८ बर्स दुम्शो बाक्माक्त।<sup>३४</sup> मिनु पत्रुसमी “एनीयास, येसु ख्रीस्तमी इ कली सापाइक्ब। मोपतीके बोक्शा, इ ब्राख्ये पोक्शा वोतो” देंमेनु, एनीयास छुल बोक्माक्त।<sup>३५</sup> मिनु लिडडा सहरम नु शारोन रागीमी बाक्ब नेल्लेमी एनीयास कली मोपा साशो तशा, आन थुं प्रभु गे लेत्मे बाक्त।

तबीता कली बेक्शो रे सेंपाइश्शो

36 योप्पा सहरमी तबीता नें पाइश्शो थमा सुइक्ब मीश मुर का बाक्माक्त। ग्रीक लोव्रमी मेको आ नें दोरकास, किश्श रुम्सीब। तबीता गेना हना यो सुइ सुइ आन कली रिम्शो पाइबाक्माक्त। मथीब आन कली शुश वारच पाइबाक्माक्त।<sup>३७</sup> मेको तबीता रोड पा बेक्माक्त। मिनु आ मुरपुकीमी आ बेक्शो रां चिक्शा, खिं डा तला तार डा कोठा लाइश्शा वोदमे बाक्त।<sup>३८</sup> लिडडा नु योप्पा नेक्नेक्था बाक्नीसी। मोपतीके थमा सुइक्बपुकीमी पत्रुस लिडडा जाक्शो बाक्ब, दे यो नेंशो बाक्मा बाक्त। मिनु आन मुर निक्शी योव्रशा, पत्रुस कली “आंइ बाक्तीक रीब जाक्शा, वारच पाइक्चा नकी” दे ब्रथ सोइक्तमे बाक्त।<sup>३९</sup> मिनु पत्रुस मेको आस लोव्र नेंशा मेको नु काथा लमाक्त। मिनु जाक्मेनु, तला तारी लदमे बाक्त। तला तारी आन वोंइश बेक्शो मारेड मथीब मीश मुर खुम्सीशा डाक्ना डाक्न बाक्शो बाक्मा बाक्त। मिनु पत्रुस कली “तबीतामी शुश वारच पाइक्तीकी, ओदेशो वा फेरशा गेतीकी” दे तबीतामी फेरशा गेशो वापुकी कौंइदमे बाक्त।<sup>४०</sup> मिनु

पत्रुसमी मेकेर डाक्शा बाक्ब नेल्ल आन कली लाडगा सोइक्तीमी बाक्त। मिनु आ पोक्च थेक्शा, प्रार्थना पवा बाक्त। मिनु तबीता आ बेक्शो रां गे हिरशा कोव्रशा “ए तबीता, छुल बोक्को” देंमेनु, तबीतामी आ मिक्च पाक्शा कोव्रडानु, पत्रुस कली तवा बाक्त। *मर्कूस ५:४१* 41 मिनु पत्रुसमी आ गुड कीशा पोक्गा बाक्त। मिनु लाडगा सोइश्शो नु प्रभु आ योव्रशो नेल्ल आन कली खिं गा ब्रेश्शा, तबीता कली बेक्शो रे संपाइश्शो कोइडा बाक्त। 42 मोदेशो दुम्त देशो लोव्र योप्पा सहरमी बाक्ब नेल्लेमी नेन्मे बाक्त। मिनु शुशेमी प्रभु कली थमा सुदमे बाक्त। 43 मिनु पत्रुस योप्पा डा कुशुल नोक्ब सिमोन आ खिंमी शुश नाक्त बाक्माक्त।

### कोरनेलीयस आ तशो

10 सिजरिया सहरमी कोरनेलीयस नें पाइश्शो इटाली पल्लन डा कप्तान का बाक्माक्त। 2 मेको कप्तान परमप्रभु यावे कली मान पा हिंब मुर बाक्माक्त। आ खिं डा मुर नेल्लेमी यो आ खोदेशो पा प्रभु कली मान पा टीबाक्मा बाक्त। मेको कप्तानमी मारेड मथीब आन कली शिशी पा शुश वारच पाइबाक्माक्त। परमप्रभु कली प्रार्थना पना पन बाक्बाक्माक्त। 3 मिनु काबु ३ बजे डा प्रार्थना पची ना कोइतीक का तवा बाक्त। मेको कोइतीकेमी परमप्रभु यावे आ स्वर्ग डा गेय पाइब का आ बाक्तीकेमी जाक्शा “ए कोरनेलीयस” देंमेनु, 4 कोरनेलीयसमी हिंशा, कोव्रस डा कोव्रस पा “मार देंनी, प्रभु” देंमेनु “इ प्रार्थना पशो, प्रभु कली मान पा टिशो, इ शिशी पा वारच पशो नेल्ल परमप्रभु यावेमी तुइश्शो बाक्ब। 5 मुल गे योप्पा सहरमी बाक्शो सिमोन पत्रुस नें पाइश्शो मुर कली ब्रथ सोइक्तो। 6 मेको सिमोन पत्रुस कुशुल नोक्ब सिमोन आ खिंमी बाक्ब। मेको आ खिं चहिं समुन्द्र आ नेक्था बाक्ब” देशा लशो नेना बाक्त। *प्रेरित ९:४३* 7 मोदेशो लोव्र देशो नेंशा, आ गेय पाइब निक्शी नु सिपाही का कली ब्रेत्ता बाक्त। सिपाही यो प्रभु कली मान पा टीब का बाक्माक्त। 8 मिनु मेको मुर सां आन कली मार दुम्मे, दोदेशो लोव्र नेंना, मेको लोव्र नेल्ल शेंशा, पत्रुस कली माल्शा, चाक्चा, दे योप्पा सहर सोइक्तीमी बाक्त। *प्रेरित ११:५-१७*

### परमप्रभुम सेल्शो कली ग्रांरा मदिका

9 मिनु आ दीसा नाक्त मेकोपुकी लमा लमा योप्पा सहर आ नेक्था जाक्दीम्मानु, पत्रुस प्रार्थना पथ खिं तारी डोइसे बाक्त। 10 मिनु डोइश्शा बाक्मेनु, शोव्रलु बेक्शा जज दाक्माक्त। खिं डा मुरपुकी चहिं क्येना क्येन बाक्मा बाक्त। मिनु पत्रुसमी प्रभुमी कोइशो कोइतीक तवा बाक्त। 11 दोदेशो तवा बाक्त देशा हना, सरीड रोक्सीशा ठेयब वा का हाम्सीशा क्युक्सीशो खोदेशो पा खप गे यिशो तवा बाक्त। 12 मेको वामी मब्बचा डा, ग्रांरा दिचा डा जन्तु बुस्स चिक्ब बाक्मा बाक्त। 13 मिनु “ए पत्रुस, एको आन कली साइश्शा ब्वामी” देशो नेंना बाक्त। 14 मिनु पत्रुसमी “हत्तेरी ओदेशो ग्रांरा दिचा डा दोपा ब्बचा नमी डा, प्रभु? ओदेशो ग्रांरा दिचा डा गो गेनायो मब्बशो नड” देंमाक्त। *लेवी ११:१-१४* 15 मिनु लेंशा “परमप्रभु यावे आ चोव्रखो सेल्शो कली ग्रांरा मदित्तो” देशो नेंना बाक्त। *रोमी १४:१४* 16 खेयप सां मोदेशो दुम्शा, मेको ठेयब वा सरीड गे लशो तवा बाक्त।

### पत्रुस कोरनेलीयस आ खिं लशो

17 मिनु पत्रुसमी छक लाक्शा एको मार बाक्म माइ, दे मिम्ना मिम्न बाक्माक्त। पत्रुस मोदेशो मिम्स डा मिम्स बाक्मेनु, कोरनेलीयसमी सोइश्शो मुरपुकी कुशुल नोक्ब सिमोन आ खिंमी जाक्दीश्शा, लाप्चो आ डोइती राप्शा कोव्रशा 18 “एको खिंमी सिमोन पत्रुस बाक्मे?” दे हिल्लो पामे बाक्त। 19 पत्रुसमी मुल यो आ तशो मार बाक्म माइ, दे मिम्न मिम्न बाक्मेनु, परमप्रभु यावे आ सोक्तीमी मेको कली “इ कली ब्रथ मुर सां जाक्तेक्मे। 20 तोइश्शा मेको आन कली गुम्थ लावो। मिनु लचा, दे मलचा, दे थुं निक्शी मपथु, मेकोपुकी नु लावो। मारदे हना मेकोपुकी आं सोइश्शो नम” देशो नेंना बाक्त। 21 मिनु पत्रुस फ्रु तोइश्शा “इन माल्शो मुर गो नड, आं कली मारदे माल्थीनी?” दे हिल्लो पवा बाक्त। 22 मिनु मेकोपुकीमी “कोरनेलीयस आ

सोइश्शो नकी। कोरनेलीयस कप्तान बाक्ब। परमप्रभु कली मान पा हिंब, रिम्शो मुर बाक्ब। यहूदीपुकीमी यो रिम्शो मुर बाक्ब, दे मिम्नीम। परमप्रभु आ स्वर्ग डा गेय पाइब कामी कोरनेलीयस कली ‘योप्पा सहरमी सिमोन पत्रुस माइश्शो कली माल्शा चाक्शा आ लोव्र नेंचा’ देंतीके इन कली ब्रथ जाक्तक” देंमा बाक्त। 23 मिनु पत्रुस नु खिं डा मुरपुकीमी मेको आन कली खिं गा ओइशा जचा तूचा गेशा, बास गेमे बाक्त। मिनु आ दीसा पत्रुस मेकोपुकी नु सिजरिया गे लमाक्त। योप्पा सहर डा थमा सुइक्ब लोक्ब का निक्शी यो लमा बाक्त।

### कोरनेलीयस आ खिंमी

24 आ दीसा सिजरियामी जाक्दीम्मा बाक्त। कोरनेलीयसमी आ मुर, आ वारच आन कली ब्रेश्शा, पत्रुस आ लां कोव्रशा बाक्शो बाक्मा बाक्त। 25 मिनु पत्रुस कोरनेलीयस आ खिं ओव्रचवानु, कोरनेलीयसमी पत्रुस आ डोइती बाप्शा आ खोइल गुप्शा सेउ पवा बाक्त। 26 मिनु पत्रुसमी कोरनेलीयस आ पिया पोक्शा “गो यो इन खोदेशो मुर ला नड” देशा राप्पदा बाक्त। *प्रेरित १४:१५; प्रकाश १९:१०* 27 मिनु लोव्र पना पन खिं गा ओव्रसा बाक्त। खिं गामी शुश मुर खुम्सीशा देल्शो बाक्मा बाक्त। 28 मिनु पत्रुसमी मेको देल्शा बाक्ब आन कली “गो आंइ यहूदी अर्को रागी डा मुरपुकी नु काथा बाक्चा, जचा, आन खिं ओव्रचा मदुम्ब, दे नेल्लेमी तुइक्नीनी। मोदेशो बाक्त हना यो, परमप्रभु यावेमी आं कली सुइ आन कली आइक्च ममिन्चा, दे शेंताक्थी। 29 मोपतीके गोपुकीमी आं कली ब्रेत्तीनीनु, लचा, दे मलचा, दे थुं निक्शी मपथु, गिरिककै जाक्ती। मारदे ब्रेत्तीनी?” देंमाक्त। 30 मिनु कोरनेलीयसमी “गाबेर नाक्त आं खिंमी ३ बजे डा प्रार्थना पना पन बाक्डानु, जील्माक्श देशो वा फेक्सीशो मुर का फो गूशा, आं डोइती राप्शो ताता। 31 मेकोमी आं नें थिशा ‘ए कोरनेलीयस, परमप्रभुमी इ प्रार्थना पशो नेंशो बाक्ब। इ शिशी पा मथीब आन कली मार मार गेशो तशो बाक्ब। 32 मोपतीके योप्पा सहरमी जाक्शा बाक्शो सिमोन पत्रुस नें पाइश्शो मुर कली ब्रथ सोइक्तो। मेको कुशुल नोक्ब सिमोन आ खिंमी बाक्शो बाक्ब। मेको खिं समुन्द्र आ नेक्था बाक्ब’ देंत। 33 मोपतीके ब्रथ सोइक्ताक्नी। गे बिश्शा गिरिककै जाक्शा, आंइ कली रिम्शो पाइतीनी। परमप्रभु गे नु बाक्ब। मिनु परमप्रभु यावेमी इन कली मार शेंपाइक्बा, मेको लोव्र नेल्ले नेंचा कली खुम्सीशा बाक्तक” देंमाक्त। 34 मिनु पत्रुसमी “परमप्रभु यावेमी सुइ आन कली मतिल्थु, उइक्थ उइक्थ मिम्ब। *ब्यक्स्था १०:१७; १सामुएल १६:७; रोमी २:११* 35 मुर आन के जात रागी मारेड मकोव्रथु, आ कली मान पा हिंशा, आ लोव्र टिशा, रिम्शो पाइब आन कली दाक्शा, नेल्ल आन कली ब्राइब, दे मुल रुप्ता। *यूहन्ना १०:१६* 36 परमप्रभु यावेमी येसु ख्रीस्त आ पतीकेम आंइ इस्त्राएल डा मुर आन कली ग्येरपाइक्ब लोव्र नेंपाइक्तु। मिनु येसु ख्रीस्त नेल्ल आन प्रभु बाक्ब। *एफिसी २:१७* 37 यूहन्नामी मुर आन कली शेंशा, ब्वाक्कुम ख्रुम्शा गुंइदा नोले येसु ख्रीस्तमी गालील रे गोशा यहूदीया रागीम हिरशा, मुर आन कली शेंना शेंन गाक्त। *मत्ती ४:१२-१७* 38 परमप्रभु यावेमी मेको नासरथ डा येसु कली आ सोक्तीम प्रिंशा, आ सक्ति पाइश्शो सेल्तु। मिनु परमप्रभु यावे आ सक्ति पाइश्शो दुम्शा, तेइ तेइ गाक्शा मुर आन कली रिम्शो पाप्तु। वोल्म तशो आन कली वोल् खेरशा सापाइक्तु। सैतानमी दिप्शा वोइश्शा श्येत गेशो आन कली श्येत रे प्रोइतीमी। मारदे हना परमप्रभु यावे मेको नु बाक्त। *मत्ती ३:१६* 39 यहूदीया रागी यरूसलेम सहरमी येसुमी मार मार पवा, मार मार दुम्मे, मेको नेल्ल गो नु आं वारचपुकीमी आंम आंइ मिक्चीम ताइतक। येसु शीमी केप्शा कांटी थोक्शा क्याइश्शा साइक्चा पुंइसाक्ब। 40 साइक्चा पुंइसीशा यो आ बेक्शो आ नित्थ नाक्ती परमप्रभुमी बेक्शो रे संपाइश्शा कोइताक्ब। *१कोरिन्थी १५:४-७* 41 हना यो मुर नेल्लेमी मताम। गोपुकीमी चहिं ताइतक। मारदे हना डोइती रे गोपुकी सांक्छी दुम्चा कली योव्रशो नकी। येसु बेक्शो रे सेंसीशा, गोपुकी नु बाक्शा काथा जाइतक, काथा तूतक। *यूहन्ना १४:१९,२२; लूका २४:३०,४३* 42 मिनु मोदेशो पा काथा बाक्कानु, येसुमी आंइ कली ‘मुर आन कली आं पर्वम शेंदीने। मार शेंचा देशा हना, परमप्रभु यावेमी येसु कली ब्रौइशा बाक्ब नु बेक्शो मुर नेल्ल आन कली निसाफ पाइब सेल्तु, दे शेंशा

गावकीन' दे माइक्तीकी। यूहन्ना ५:२२<sup>43</sup> सु सुमी येसु कली थमा सुदमे, मेकोपुकी येसु आ नेमी आन पाप क्याम्बा पुंडसीनीम। साइ डोंडती रे परमप्रभु यावे आ लोव पाइबपुकीमी मोदेशो देशो बाक्नीम" दे शेंदीमी बाक्त। यसेया ५३:५-६; येरमीया ३१:३४

### मुरपुकी परमप्रभु आ सोक्तीम ब्रीशो

44 पत्रुसमी शेंना शेंन पवानु, परमप्रभु यावेमी आ लोव नेंब नेल्ल आन कली आ सोक्तीमी प्रिंशो बाक्त। 45 पत्रुस नु काथा जाक्शो खोइक्तीक चिनु खोइश्शो थमा सुइक्ब यहूदीपुकीम अर्को रागी डा मुर यो परमप्रभु यावे आ सोक्तीम ब्रीशो तशा छक लाक्मा बाक्त। 46 मेकोपुकीमी परमप्रभु यावे आ सोक्तीमी पपाइश्शो लोव पा परमप्रभु यावे कली ठेयब सेल्शो तशा तुइक्तमे बाक्त। प्रेरित २:४<sup>47</sup> मिनु पत्रुसमी "मेकोपुकी आंइ खोदेशो पा परमप्रभु यावे आ सोक्तीम पिंचा पुंडसाक्म। मोपतीके एको आन कली ब्वाक्कुम खुम्शा गुंडचा मदुम्ब, दे सुम देंने चाप्पा डा?" देमाक्त। 48 मिनु मेको आन कली येसु ख्रीस्त आ नेमी ब्वाक्कुम खुम्शा गुंडपदा बाक्त। मिनु मेको नक थमा सुइक्बपुकीमी पत्रुस कली "नाक्त का निक्शी गोपुकी नु बाक्कीन" दे तेक्गमे बाक्त।

### अर्को रागी डा मुर

11 मिनु यरूसलेममी बाक्ब सोइश्शोपुकी नु यहूदीया रागी तेइ तेइ बाक्ब थमा सुइक्ब लोकबपुकीमी "अर्को रागी डा मुरपुकीमी यो परमप्रभु यावे आ लोव नेंशा, थमा सुइक्ब दुम्मा बाक्त" देशो नेन्मे बाक्त। 2 मिनु पत्रुस यरूसलेम लेश्शा जाक्मेनु, खोइक्तीक चिनु खोइश्शो थमा सुइक्बपुकीमी पत्रुस कली 3 "मारदे खोइक्तीक चिनु मखोइश्शोपुकी नु काथा बाक्शा जवी" दे लोव पोक्मे बाक्त। गलाती २:१२<sup>4</sup> मिनु पत्रुसमी मेको लोव पोक्ब आन कली खुप्शा, दोपा मोदेशो दुम्मे, मेको नेल्ल रुप्पाइक्वा कली 5 "गो योप्पा सहरमी बाक्ती। मिनु काबु मार दुम्त देशा हना, प्रार्थना पना पन बाक्डानु, प्रभुमी कोंडतीक कोंडताक्वी। सरीड रोक्सीशा ठेयब वा का हाम्सीशा क्युक्सीशो खोदेशो पा खप गे यिंशो ताता। मिनु आं नेक्था जाक्शा दिक्त। प्रेरित १०:९-४८<sup>6</sup> मिनु गो गीशा कोव्रडुनु, मब्वचा डा, ग्रोग्रा दिचा डा, जन्तु, खोते नु चिक्ब तातामी। 7 मिनु 'ए पत्रुस, मेको साइश्शा ब्वामी' देशो नेंता। 8 मिनु गोमी 'हत्तेरी, ओदेशो ग्रोग्रा दिचा डा दोपा ब्वचा नमी डा, प्रभु, ओदेशो ग्रोग्रा दिशो गेनायो मब्वशो नड' देंती। 9 मिनु 'परमप्रभु यावेमी चोवखो सेल्शो कली गे ग्रोग्रा मदित्तो' दे सरीड रे देशो नेंता। 10 खेयप सां मोदेशो दुम्शा, मेको ठेयब वा सरीड गे लेश्शा लत। 11 मोदेशो दुमे चोटीन सिजरिया रे आं कली ब्रथ सोइश्शो मुर सां आं बाक्शो खिंमी जाक्तेक्म। 12 मिनु परमप्रभु यावे आ सोक्तीमी 'मेको आन जात मार नमी? दे ममिंथु मेकोपुकी नु काथा लावो' देंतीके गो मेकोपुकी नु लती। मुल एकेर गो नु बाक्ब थमा सुइक्ब ६ जना लोकब गो नु लाम्तेक्म। गो काथा गाक्शा, कोरनेलीयस आ खिं जाक्दीश्शा ओव्रतक। 13 आ खिं ओव्रशा बाक्कानु, कोरनेलीयसमी आंइ कली 'परमप्रभु यावे आ स्वर्ग डा गेय पाइब का आं डोंडती राप्शा, मेकोमी योप्पा सहरमी जाक्शा बाक्शो सिमोन पत्रुस कली ब्रथ सोइक्तो। 14 मेकोमी जाक्शा, गे नु इ खिं डा मुर नेल्ले आन कली गेना हना यो ब्रोंइशा बाक्तीक लोव शेंब, दे माइक्ती' देंत।

15 मिनु गो मेकेर खुम्सीशा बाक्ब आन कली ख्रीस्त आ लोव शेंदुनु, साइ गोपुकी खोदेशो पा मेकोपुकी यो परमप्रभु यावे आ सोक्तीम पिंचा पुंडसाक्म। प्रेरित २:१-४<sup>16</sup> परमप्रभु यावे आ सोक्तीम ब्रीचा पुंडसीशो तशा, गो इं प्रभु आ देशो लोव ति फ्रुक्ता। प्रभुमी मार देंत देशा हना 'यूहन्नामी मुर आन कली ब्वाक्कुमी खुम्शा गुंडताक्व। गे चिं परमप्रभु यावे आ सोक्तीमी खुम्शा पुंडसीनीनी' देंत। प्रेरित १:५<sup>17</sup> गोपुकीमी प्रभु येसु ख्रीस्त कली थमा सुइक्तीके परमप्रभु यावे आ सोक्तीम पिंचा पुंडसाक्म। मिनु अर्को रागी डा मुरपुकीमी यो येसु ख्रीस्त कली थमा सुइक्तीके आ सोक्तीम पिंचा पुंडसाक्म। मोदेशो दुम्शो तशा, मार पाइनुडा? गो परमप्रभु आ पशो गेय तेक्ने चाण्डा?" दे रुप्पाइक्मी बाक्त। 18 पत्रुसम मो देशो नेंशा, मेको आन पोक्शो लोव साम्शा "मोदेशो बाक्त हना, परमप्रभु यावेमी

इं कली गेशो खोदेशो पा अर्को रागी डा मुर आन कली यो आन थुं लेप्पा आन पाप क्याम्बाक्माक्त" दे परमप्रभु यावे कली ठेयब सेल्मे बाक्त।

### अर्को रागीम येसु आ लोव शेंशो

19 स्तीफानस साइक्वा पुंडसे नोले खेदा पचा पुंडसीशा, प्रोक्शा गाक्शो थमा सुइक्ब का निक्शी फोनीसीया, का निक्शी साइप्रस, का निक्शी एन्टीओक जाक्दीश्शो बाक्मा बाक्त। मिनु मेकोपुकीमी येसु आ लोव यहूदी आन कली ला शेंदमे बाक्त। प्रेरित ८:१-४<sup>20</sup> साइप्रस नु साइरेनी रे एन्टीओक सहर जाक्दीश्शो थमा सुइक्ब का निक्शीमी चिं अरु ग्रीस रागी डा मुर आन कली यो प्रभु येसु आ परबम शेंदमे बाक्त। 21 मोदेशो शेंब आन कली प्रभुमी सक्ति गेवा बाक्त। मिनु मेको आन लोव नेंशा, शुश मुरुमी थमा सुइश्शा, आन थुं प्रभु गे हिरदमे बाक्त। प्रेरित २:४७

22 एन्टीओक सहरमी शुश मुर थमा सुइक्ब दुम्तेक्म, दे यरूसलेममी बाक्ब थमा सुइक्बपुकीमी यो नेन्मे बाक्त। मिनु बारनाबास कली रुप्थ सोइक्तमे बाक्त। प्रेरित ४:३६<sup>23</sup> बारनाबास एन्टीओकम जाक्दीश्शा, परमप्रभु यावेमी शुश मुर आन कली शिशी पा आन थुं लेप्पाइश्शो तशा थाम्पा ग्येरसे बाक्त। मिनु मेको आन कली "मार दुम्त हना यो, प्रभु कली मप्रोंइचा, है" दे आन थमा सुइक्तीक थुं बारपाइक्मी बाक्त। 24 बारनाबास रिंशो मुर बाक्माक्त। परमप्रभु यावे आ सोक्तीमी ब्रीशा, खोइल थेक्शो खोदेशो पा थमा सुइक्बाक्माक्त। आ पशो तशा, आ लोव नेंशा, शुश मुरुमी प्रभु कली थमा सुइक्ब दुम्मा बाक्त। प्रेरित ५:१४

### ख्रीस्तीयन नें वोइक्वा पुंडसीशो

25 मिनु नोले बारनाबास सावल माल्थ टारसस सहर लमाक्त। प्रेरित ९:३०<sup>26</sup> मिनु थिंशा एन्टीओकम जाक्शा बाक्सा बाक्त। मिनु बर्स का सम्म थमा सुइक्बपुकी नु काथा बाक्शा, शुश मुर आन कली प्रभु आ लोव शेंना शेंन बाक्सा बाक्त। एन्टीओक सहरमीन येसु आ लां खोइक्ब नेल्ल क्येडा डोंडती "ख्रीस्तीयन" दे नें वोइक्वा पुंडसमा बाक्त। मेना रे मेको नें लीमाक्त। गलाती २:११

### श्येत जाइब आन कली क्येट सोइश्शो

27 मिनु काबु परमप्रभु यावे आ लोव पाइबपुकी यरूसलेम रे यिशा, एन्टीओकम जाक्मा बाक्त। प्रेरित १३:१; प्रेरित १५:३२<sup>28</sup> मेको आन दातेमी अगाबस नें पाइश्शो मुर का बाक्माक्त। मिनु काबु थमा सुइक्बपुकी खुम्सीशा बाक्मानु, अगाबसमी परमप्रभु यावे आ सोक्त रे पा "रागी नेल्लेमी अन्काल दुम्शा, जचा मतांइसीब" दे लोव पवा बाक्त। मेको लोव पिप क्लौदीयस आ सासनम थमा दुम्माक्त। प्रेरित २१:१०<sup>29</sup> अन्काल दुम्ब देशो तुइश्शा, एन्टीओक डा थमा सुइक्बपुकीमी "यहूदीया रागीमी बाक्ब थमा सुइक्ब आन कली वारच पाइक्वा माल्ब, मोपतीके क्येट पोक्म" देमा बाक्त। 30 मिनु नेल्लेमी दो दोशो चाप्मे, मो मोशो क्येट पोक्शा, यरूसलेममी बाक्ब थमा सुइक्ब आन शेंब खाल्पा आन कली गेचा नमी, दे बारनाबास नु सावल आस कली चोव्रथ सोइक्तमे बाक्त। प्रेरित १२:२५; १कोरिन्थी १६:१-४

### पत्रुस जेल्खान रे प्रोंइचा पुंडसीशो

12 मेको बर्समी पिप हेरोदमी यरूसलेम सहरम बाक्ब थमा सुइक्ब का निक्शी आन कली खेदा पा ग्याइश्शा, शुश श्येत गेमी बाक्त। 2 यूहन्ना आ लोकब याक्ब कली तरवारमी क्योरपा साइक्पदा बाक्त। मत्ती २०:२०-२३<sup>3</sup> हेरोदमी "आं पशो तशा यहूदीपुकी ग्येरसीनीम" दे तुइश्शा, मोदेशो खेदा पना पन लमाक्त। मिनु पत्रुस कली यो ग्याइक्पदा बाक्त। पत्रुस कली ग्याइक्पदानु, बोरब ओख्ती मसुप्थो शोब्ले जतीक चाड जाक्शो बाक्माक्त। 4 मोपतीके पास्सा चाड थुम्शा, मुर आन डोंडती राप्पाइक्वा, दे जेल्खानमी चोक्शा, ४, ४ जना पालो पालो पा बाक्कीन, दे १६ जना सिपाही वोइक्पदा बाक्त। 5 पत्रुस जेल्खानमी चोक्सीशा बाक्मेनु, थमा

सुइक्ब नेल्ल थुं का दुम्शा “पत्रुस कली कोव्रडीने, प्रॉइशा सोइक्तीने” दे प्रार्थना पा बाक्मा बाक्त।

6 हेरोदमी पत्रुस कली मुर आन डॉइती राप्पाइक्वा देंशो नाक्त आ डॉइती नाक्दो पत्रुस साडलो निक्शीमी पाइश्शा, सिपाही निक्शी आस दातेम इप्पाइश्शो बाक्मा बाक्त। लाचो आ डॉइती यो खाल पाइबपुकी बाक्मा बाक्त। 7 मिनु मार दुम्माक्त देंशा हना, परमप्रभु यावे आ स्वर्ग डा गेय पाइब का फो गूशा, पत्रुस आ डॉइती राम्माक्त। मिनु कोठा छेडछेड तांडसे बाक्त। मिनु परमप्रभु यावे आ स्वर्ग डा गेय पाइबमी पत्रुस कली “छुल बोक्को” दे चुशा पोक्गा बाक्त। मिनु बोक्मेनु, आ गुइमी पाइश्शो साडलो बुइश्शा खपीमी देल्माक्त। प्रेरित ५:१९ 8 मिनु “किप्शुर किम्सो, इ जुत्ता मुंडसो” देंमेनु, पत्रुसमी किप्शुर किप्शा, जुत्ता मुंडसे बाक्त। मिनु “इ किप्शुर किप्शा रुक्शा, आं नोले खोइय्पी” देंमाक्त। 9 मिनु पत्रुस मेको आ नोनोले खोइश्शा, कोठा रे गूसा बाक्त। पत्रुसमी चहिं एको नेल्ल गो कोंइतीक तना तन बाक्नुड, दे मिम्ता बाक्त। थमा कोठा रे गूडा बाक्त, दे मतुइश्शो बाक्मा बाक्त। 10 मिनु कोठा रे गूशा, डॉइती बाक्ब खाल पाइब कली लाक्शा, नोले बाक्ब कली यो लाक्शा, फलाम के सेल्शो ठेयब लाचो जाक्दीस्सा बाक्त। मेकेर जाक्दीस्सानु, लाचो रोक्से बाक्त। मिनु गूशा गाक्सा बाक्त। मिनु लां का लाग्सेनु, परमप्रभु यावे आ स्वर्ग डा गेय पाइबमी पत्रुस कली प्रॉइशा गाक्मा बाक्त। 11 मेना ब्रड सेंसीशा “परमप्रभुमी पिप हेरोद नु आं कली खेदा पाइब यहूदी आन गुइ रे प्रॉइथ, आ गेय पाइब सोइश्शा प्रॉइयी बाक्त” दे तुइक्ता बाक्त।

12 मेको तुइश्शा मर्कूस, यूहन्ना नें यो वोइश्शो, आ ममा मरीयम आ खिं गे लमाक्त। मरीयम आ खिंमी थमा सुइक्ब शुश खुम्सीशा, प्रार्थना पना पन बाक्शो बाक्मा बाक्त। प्रेरित १२:२५; प्रेरित १३:५, १३; प्रेरित १५:३७

13 मिनु पत्रुस जाक्शा, लाडगा डा लाचो खोकोल पदा बाक्त। मिनु रोदा माइश्शो गेय पाइब मीश मुरुम सु जाक्मे, दे कोव्रथ गूमाक्त। 14 मिनु पत्रुस आ सेंदा नेंशा, पत्रुस जाक्मा बाक्त, दे तुइश्शा, लाचो मरोक्थु फ्रा लेशशा, खिं गामी बाक्शो आन कली “आमाइ, लाचो डॉइती राप्पा बाक्ब दा पत्रुस कका बाक्त” दे माइक्मी बाक्त। 15 मोदेंशो नेंशा “गे मार निप्स ग्यशो लोव्र पवी?” दे आ देंशो थमा मसुदमे बाक्त। रोदामी चहिं लोव्र थोक्शा, “थमान पत्रुस जाक्त” देंमेनु “मो हना पत्रुस ममाइ। पत्रुस कली कोव्रब परमप्रभु यावे आ स्वर्ग डा गेय पाइब बाक्म माइ?” देंमा बाक्त। 16 मोपा लोव्र पना पन बाक्मानु, पत्रुसमी लाचो खोकोल पाइक्स डा पाइक्स बाक्मा बाक्त। मिनु नोले लाचो रोक्शा कोव्रडमेनु, पत्रुस कली तशा “आल्लेइ” दे छक लाक्मा बाक्त। 17 मिनु पत्रुस ओव्रशा आ गुइ हिक्शा, आ शोव्र थीप थीप पा सिक्सी पा नेनीन देंशा, दोपा प्रभुमी जेल्खान रे प्रॉइशा सोइक्ता, मेको नेल्ल तुइक्पाइक्मी बाक्त। मिनु “याक्ब नु इं थमा सुइक्ब लोक्ब नेल्ल आन कली एको लोव्र नेंपतीन, है” देंशा, मेकेर रे गाक्मा बाक्त।

18 जेल्खानमी चहिं मार दुम्माक्त देंशा हना, सुनी कना सिपाही नु खाल पाइबपुकीमी पत्रुस कली मतामे बाक्त। मिनु शुश हिंशा, मार दुम्मे, ते लाक्गा, दे वाइ की ब्रेम्मा बाक्त। प्रेरित ५:२१-२२ 19 मिनु पिप हेरोदमी पत्रुस कली माल्थ सोइक्तीमी बाक्त। माल्ना माल्न गाक्मानु, यो तेइ मथिदमे बाक्त। मिनु थिन्ने मचाप्शो तशा, पिपमी खाल पाइब आन कली ब्रेश्शा हिल्लो हिक्सी पशा यो मारेइ तुइक्ने मचाप्तीके खाल पाइब सिपाही आन कली साइक्पाइक्मी बाक्त। मिनु यहूदीया रागी रे सजिरिया सहर याक्सीशा बाक्मा बाक्त।

पिप हेरोदमी सजाइ तशो

20 पिप हेरोद मेकेर बाक्मेनु, टायर नु सीदोन सहर डा मुर आन कली तशा चुरमाक्त। मोपतीके मेकोपुकीमी मुर निक्शी का योव्रशा, ब्लास्तस नें पाइश्शो पिप आ ठेयब गेय पाइब मुर नु गारशा, पिप कली गुम्थ जाक्मा बाक्त। मिनु मेकोपुकीमी “दुशा गारशा बाक्व, सरकार” दे सेउ पदमे बाक्त। मारदे हना पिप हेरोद आ रागी रे मचाक्थु जचा मजाक्दीम्मा बाक्त। इजीकीएल २७:१७

21 मिनु काबु पिप हेरोदमी रकारी वा फेक्शा, आ ठेयब नित्तीकेमी निश्शा, मेको आन कली आ लोव्र नेंपाइक्मी बाक्त। 22 मिनु आ लोव्र नेंशा “मुर आ लोव्र ममाइ, देवता आ लोव्र बाक्मा बाक्त” देंशा, रेयके पा पिप कली ठेयब सेल्मे बाक्त। इजीकीएल २८:२ 23 पिप हेरोदमी परमप्रभु यावे कली मान मपथु, आंमान ठेयब सेल्सीतीके परमप्रभु यावे आ स्वर्ग डा गेय पाइबमी मेको कली रोइ पपदा बाक्त। मिनु मेको हेरोद लुस्पु जोल्शा बेक्मा बाक्त। दानीएल ५:२०

24 परमप्रभु यावे आ लोव्र तेइ तेइ ब्रशा, शुश मुर थमा सुइक्ब दुम्मा बाक्त। प्रेरित ६:७ 25 बारनाबास नु सावल यरूसलेममी क्येट चोवने थुम्शा, एन्टीओक लेस्सा बाक्त। लेस्सानु, मर्कूस कली यो लदसे बाक्त। मर्कूस कली यूहन्ना नें यो वोइश्शो बाक्त। प्रेरित ११:२९-३०; प्रेरित १३:५

शेंब आस कली सोइश्शो

13 एन्टीओक सहर डा थमा सुइक्ब आन दातेमी परमप्रभु यावे आ लोव्र पाइब नु शेंब का निक्शी यो बाक्मा बाक्त। मोदेंशो मुर सु सु बाक्मा बाक्त देंशा हना, बारनाबास, क्येर माइश्शो सिमियोन, साइरेनी डा लुसीयस, पिप हेरोद आ गेय पाइब मानाएन नु सावल बाक्मा बाक्त। प्रेरित ११:२७; १कोरिन्थी १२:२८ 2 मिनु काबु थमा सुइक्बपुकी खुम्सीशा माइजा बाक्शा, प्रार्थना पना पन प्रभु कली ठेयब सेल्ना सेल्न बाक्मानु, परमप्रभु यावे आ सोक्तीमी “बारनाबास नु सावल आस कली आं गेय पथ योव्रतासी। मोपतीके मेको आस कली आं गेय पचा कली सोइक्तीने” दे तुइक्पाइक्मी बाक्त। प्रेरित ९:१५ 3 मिनु माइजा बाक्शा, प्रार्थना पा आसीक गेशा, प्रभु आ गेय पथ सोइक्तमे बाक्त। प्रेरित ६:६

4 मिनु मेको निक्शी परमप्रभु यावे आ सोक्तीमी योव्रशा सोइक्तीके एन्टीओक सहर रे ब्रुशा, सिलुसीया सहरमी जाक्दीस्सा बाक्त। मेकेर जहाज डोइश्शा समुन्द्र शोक्शा, साइप्रस टापु जाक्दीस्सा बाक्त। 5 मिनु सलामीस सहर जाक्दीश्शा, यहूदी आन गुम्तीक खिं लशा, परमप्रभु यावे आ लोव्र शेंदसे बाक्त। एन्टीओक रे काथा गाक्शा, यूहन्ना मर्कूसमी मेको आस कली वारच पस डा पस बाक्मा बाक्त। प्रेरित १२:१२, २५

चटक कोंइब कली हुइश्शो

6 मिनु साइप्रस टापु नेल्ल हिरशा, गाक्मा गाक्मा पाफोस सहरमी जाक्दीम्मा बाक्त। मेकेर जाक्दीश्शा बाक्मानु, बार-येसु माइश्शो चटक कोंइब, यहूदी मुर का गुम्मे बाक्त। मेको “परमप्रभु यावे आ लोव्र पाइब नड” देंखु पा गाक्बाक्मा बाक्त। 7 मेको चटक कोंइब सेरगीयस-पावल नें पाइश्शो हुकुम पाइब आ खिंमी बाक्बाक्मा बाक्त। मेको हुकुम पाइब जोक्ब तुइक्ब मुर बाक्मा बाक्त। मिनु काबु बारनाबास नु सावल आस कली ब्रेश्शा “परमप्रभु यावे आ लोव्र गो यो नेंनुड” दे माइक्सी बाक्त। 8 मेको चटक कोंइब बार-येसु कली ग्रीक लोव्रमी एलुमास यो देंबाक्मा बाक्त। मिनु मेकोमी हुकुम पाइब कली बारनाबास नु सावल आस शेंशो लोव्र थमा सुइक्वशो तशा “मेको आस शेंशो थमा मसुतीन” दे हुकुम पाइब आ थुं हिरपाइक्वा मला बाक्त। 9 सावल कली पावल यो देंनीमी। मिनु पावलमी चटक कोंइबमी हुकुम पाइब आ थुं हिरपाइक्वा माल्शो तुइश्शा, परमप्रभु यावे आ सोक्तीम ब्रीशा सक्ति पाइश्शो दुम्शा, चटक कोंइब कली मिक्च मयाक्थु कोव्रस डा कोव्रस पा 10 “गे सैतान आ तौ नवे। रिम्शो मदाक्थु, मरिम्शो ला दाक्नेवे। प्रभुमी सेल्शो रिम्शो लां कली मरिम्शो सेल्चा थुं पवी? मरिम्शो थुं पाइश्शो बाक्ते। मोपतीके प्रभुमी इ कली मुल सजाइ गेब। 11 गे मिक्च मताइब दुम्शा, शुश नाक्त सम्म छेडछेड मताइनेवे” दे हुइक्ता बाक्त। मो देंम चोटीन मेको चटक कोंइब मिक्च मताइब दुम्शा, आ गुइ कीशा लां कोंइब मुर माल्दा बाक्त। 12 मिनु हुकुम पाइबमी चटक कोंइब कली मिक्च मताइब दुम्शो तशा छक लाक्मा बाक्त। मिनु “मेको आस लोव्र प्रभु आ सक्ति पाइश्शो लोव्र बाक्मा बाक्त” दे रुष्शा, प्रभु कली थमा सुइक्ब दुम्मा बाक्त।

## पिसीदीया डा एन्टीओकम शेंशो

13 मिनु पावल नु आ वारचपुकी पाफोस सहरमी जहाज डोइशा समुन्द्र शोक्शा, पाम्फिलीया रागी डा पेरगा सहरमी जाकदीम्मा बाक्त। यूहन्ना मर्कूस चहिं पावल नु बारनाबास आस कली प्रोइशा, यरूसलेम लेम्माक्त। प्रेरित १५:३८ 14 पावल नु बारनाबास पेरगा रे गाक्शा, पिसीदीया रागी डा एन्टीओक सहरमी जाकदीम्मा बाक्त। मिनु नाइक्तीक नाक्ती गुम्तीक खिं लशा, मेकेर देल्शो मुरपुकी नु निश्शा बाक्सा बाक्त। 15 मिनु गुम्तीक खिं डा ठेयब मुरपुकीमी मोसा नु परमप्रभु यावे आ लोत्र पाइबमी ब्रेक्शो लोत्र पढेपा नेंपाइक्ने थुम्शा, पावल नु बारनाबास आस कली ब्रेक्शा “आइ लोकब निक्शी, मुर आन कली शेंशा, आन थुं बारपाइक्वा डा लोत्र बाक्त हना, शेंदीसे” दे आस कली लोत्र पचा गेमे बाक्त। प्रेरित १५:२१ 16 मिनु पावल राष्ठा “इसाएली नु परमप्रभु यावे कली मान पा हिंबपुकी, इन नोफा दाइशा, नेनीन। 17 इसाएली आन परमप्रभु यावेमी आइ किकी पिपी आन कली योत्रशा, इजीप्त रागीमी बाक्मानु, शुश सोशा बोशा ठेयब जात दुम्पाइक्मी बाक्त। मिनु शुश सक्ति पाइश्शो गेय कौइशा, मेको आन कली श्येत रे प्रोइशा गुंडीमी बाक्त। प्रस्थान १२:३७, ४०, ४१; प्रस्थान १४:८ 18 मिनु ४० बर्स सम्म गोरशो रागीमी लां कौइना कौइन लाइक्मीनु, मेकोपुकीमी आ लोत्र मटिम्तेक्म हना यो, फाल्शा रिम्शो पाइक्मी बाक्त। भजन संग्रह १०६:१३-३३ 19 कनान रागीमी बाक्ब ७ रागी डा मुर नेल्ल आन कली साइशा, मेको आन रागी आइ किकी पिपी आन कली गेवा बाक्त। ब्यवस्था ७:१; यहोसु १४:२ 20 मोपा ४ सहे ५० बर्स बाक्शा नोले निसाफ पाइब योत्रशा वोदा बाक्त। नोले परमप्रभु यावे आ लोत्र पाइब सामुएल कली अधिकार गेवा बाक्त। न्यायाधीस २:१६; १सामुएल ३:२० 21 सामुएल आ पालामी आइ किकी पिपीमी ‘आइ कली सासन पाइब पिप का गेचा नकी’ दे पुन्मे बाक्त। मिनु परमप्रभु यावेमी बेन्यामीन थर डा कीश आ तौ सावल कली योत्रशा, आन पिप सेला बाक्त। मिनु सावल ४० बर्स सम्म पिप दुम्माक्त। १सामुएल ८:५; १सामुएल १०:२१-१४ 22 मिनु परमप्रभु यावेमी सावल नु आ खिं डा मुर आन कली पिप दुम्चा रे तिल्शा, दाऊद कली पिप सेला बाक्त। दाऊद आ पर्वम परमप्रभु यावेमी ‘येस्से आ तौ दाऊद आं मिम्शो खोदेशो पा आं यो मिम्ब। मिनु गो नु गारब। आं दाक्शो पाइब, दे तुइक्नुड’ देशो बाक्त। १सामुएल १३:१४ 23 परमप्रभु यावेमी इसाएली आन कली पाप रे प्रोइब का सोइक्नुड, दे लोत्र गेशो बाक्माक्त। मेको पाप रे प्रोइब दाऊद आ खिं डा येसु बाक्ब। यसैया ११:१ 24 येसुम शेंचा क्येडा डौइती ब्वाक्कुम ख्रुम्शा गुंडब यूहन्नामी इसाएली आन कली ‘पाप पचा प्रोइशा, इन थुं परमप्रभु यावे गे लेत्तीन’ दे शेंशो बाक्माक्त। लूका ३:३ 25 मोपा शेंदानु, मुर आन कली ‘आं कली तशा, पाप रे प्रोइब एको बाक्म कोरे में? मदेनीन। गो मनड। तन्न मुल जाक्चशो बाक्ब। गो मेको आ डौइती बाष्ठा, आ जुत्ता प्रुइक्वा यो मशिरनुड’ दे शेंशो बाक्माक्त। लूका ३:१५; यूहन्ना १:२०; मर्कूस १:७; लूका ३:१६; यूहन्ना १:२७ 26 आं लोकबपुकी, अब्राहाम आ खिं डा मुर बाक्तीनी हना यो, परमप्रभु यावे कली मान पा हिंब अर्को रागी डा मुर बाक्तीनी हना यो, गो नेल्ल इं कली परमप्रभुमी पाप रे ब्रौइतीक लोत्र नेंपाइक्ब। 27 यरूसलेममी बाक्बपुकी नु आन ठेयब मुरपुकीमी येसु पाप रे प्रोइब बाक्ब, दे मरुबेम। नाइक्तीक नाक्त किंत किंत परमप्रभु यावेमी ब्रेक्पाइश्शो लोत्र पढेशा नेंशा यो रुजे मचबेम। मोपा मारेइ रुजे मचाप्तीके येसु कली दोस गेम्तेक्म। आन मो पशोमी साइ डा ब्रेक्शो लोत्र नेल्ल थमा सेल्लेक्म। यूहन्ना १६:३ 28 साइक्वा पुंडसीचा डा दोस गुंडने मचाप्तेक्म हना यो, हुकुम पाइब पिलातस कली मेको मुर साइक्वा पुंडसीब बाक्ब, दे साइक्पाइक्तेक्म। मत्ती २७:२२-२३ 29 मिनु साइ डा ब्रेक्शो लोत्र नेल्ल थमा दुम्पाइक्तेक्म। येसु शीम क्येष्ठा कांटी थोक्शा क्येइशा साइशा खपीम फ्रुष्ठा, आ बेक्शो रां थिम्तेक्म। मत्ती २७:५९-६० 30 तन्न परमप्रभु यावेमी मेको कली बेक्शो रे सेंताक्व। प्रेरित ३:१५ 31 मिनु गालील रे यरूसलेम सम्म येसु नु काथा गाक्ब आन कली बेक्शो रे सेंसीशा शुश नाक्त तपांइसाक्व। मोदेशो पा येसु कली सेंसीशा ताइबपुकीमी ‘येसु बेक्शो रे सेंचा पुंडसाक्व। मुल यो ब्रौइशो बाक्ब।

आइ मिक्चीमी ताइतक’ दे शेंना शेंन गाक्नीम। 32 परमप्रभु यावेमी इं किकी पिपी आन कली डौइती पशो लोत्र पाप रे प्रोइब का सोइशा खाप्शो, ग्येरपाइक्तीक लोत्र इन कली शेंनीकी। 33 मेको लोत्र साइ परमप्रभु यावेमी ब्रेक्पाइश्शो लोत्र नु गारब। मारदे हना भजन संग्रह कामी ‘गे आं तौ नवे। मुलाक्ती गो इ कली थीतन’ दे ब्रेक्शो बाक्ब। भजन संग्रह २:७ 34 लेंशा मबेक्वा डा नु मराक्वा डा पा बेक्शो रे सेंसीशा आ पर्वम परमप्रभुमी ‘दाऊद कली गेशो खोदेशो पा गो इ कली आसीक गेनन’ दे ब्रेक्पाइश्शो बाक्ब। यसैया ५५:३ 35 मोपतीके दाऊदमी भजन संग्रह कामी ‘परमप्रभु यावे, इन योत्रशो तौ कली बेक्शा लशा यो, राक्वा मगेनीनी’ दे ब्रेक्शो बाक्त। भजन संग्रह १६:१०; प्रेरित २:२७ 36 दाऊदमी मेको लोत्र ब्रेक्शो बाक्त हना यो, आंम पर्वम ममाइ। मारदे हना दाऊदमी परमप्रभु यावेमी गेशो सासन पने थुम्शा बेक्शा, आ किकी पिपी आन कली थिम्तीकेमी थिम्चा पुंडसीशा राक्शा लमाक्त। 37 येसु चहिं बेक्शा मरा। मारदे हना परमप्रभु यावेमी मेको कली बेक्शो रे सेंताक्व। 38 मोपतीके आं लोकबपुकी, आं लोत्र रुपीने। मेको येसुमी मुर आन पाप क्याम्शा गेब, दे इन कली शेंनीकी। रोमी ८:३-४ 39 येसु कली थमा सुइक्ब नेल्ल आन पाप क्याम्चा पुंडसीनीम। मिनु आन पाप क्याम्चा पुंडसीशा, परमप्रभु आ डौइती पाप मपथु बाक्शो तांइसीनीम। मोसामी ब्रेक्शो लोत्रमी इन पाप क्याम्ने मचाप्ब। मारदे हना मेको लोत्र नेल्ल टिने मचाप्तीके पापी दुम्तीनी। रोमी १०:४ 40 मोपतीके होस पांइसीने। साइ परमप्रभु यावे आ लोत्र पाइबमी 41 ‘ए, गे शुक्शी पाइबपुकी, छक लाक्वा डा पा पुलु दुम्शा लने। मारदे हना गो इन पालामीन गेय का पाइनुड। तन्न गे थमा मसुइक्नीनी। मिनु सुइमी इन कली शेंताक्म हना यो गे थमा मसुइक्नीनी’ ” दे पावलमी शेंदीमी बाक्त। हबकुक् १:५

42 मिनु गुम्तीक खिं रे गूशा गाक्चाम्सेनु, आस लोत्र नेंबपुकीमी “मुल जाक्शो नाइक्तीक नाक्ती लेंशा शेंचा नकी” दे पुन्मे बाक्त। 43 मिनु गाक्सानु, यहूदी नु यहूदी धर्म मानेब शुशेमी मेको आस नोले खोदमे बाक्त। मेको निक्शीमी “परमप्रभु यावेमी इन कली शिशी पा ख्रीस्त कली थमा सुइक्ब सेल्लु। मुल डा मेरे मेको थमा सुइक्तीक मप्रोनीन” दे मदसे बाक्त।

## खेरचा पुंडसीशो

44 मिनु नाइक्तीक नाक्त जाक्मेनु, सहर डा मुर नेल्ल जाक्शा, परमप्रभु यावे आ लोत्र शेंशो नेंथ देल्मा बाक्त। 45 मोपा शुश मुर देल्शो तशा, यहूदी आन थुं चोत्रमे बाक्त। मिनु पावलमी लोत्र शेंदानु, मेकोपुकीमी आ लोत्र खोइशा, जिचा पोक्मे बाक्त। 46 मिनु पावल नु बारनाबासमी यो महिंथु ठेयब थुं पा “अरु आन क्येडा डौइती इन कली परमप्रभु यावे आ लोत्र नेंपाइक्वा माल्शो। गेपुकीमी चहिं मनैनीनी, नोफा मदाइक्नीनी, थमा मसुइक्नीनी। इन मोदेशो पशोमी गेना हना यो ब्रौइशा बाक्वा मताइनीनी। जाम्शा लाइनीकी, दे तुइक्तीने। मुल डा मेरे इन कली शेंचा प्रोइशा, अर्को रागी डा मुर आन कली शेंथ गाक्नस्कु। प्रेरित ३:२५-२६; मत्ती १०:५-६ 47 आंमा शेंब दुम्शा, गाक्शो मनस्कु। परमप्रभु यावेमी आंस कली आ लोत्र शेंब सेल्लु। मिनु मेकोमी ‘गो इ कली नेल्ल रागी डा, नेल्ल जात डा मुर आन कली लां कौइशा, छेडछेड दुम्शा रुप्पाइक्वा कली सोइक्ताक्ड’ दे ब्रेक्शो बाक्ब” देसा बाक्त। यसैया ४९:६ 48 मिनु अर्को रागी डा मुरपुकीमी “मुल गो यो पाप रे ब्रौइचा ताइबाक्तक” दे रुष्ठा थाम्पा ग्येरसीशा, परमप्रभु यावे कली ठेयब सेल्लेक्म। परमप्रभु यावेमी डौइती रे योत्रशोपुकीमी ख्रीस्त कली थमा सुइशा, गेना हना यो ब्रौइशा बाक्वा ताइब दुम्मा बाक्त। रोमी ८:२९-३०

49 मिनु ख्रीस्त आ पर्वम शेंशो लोत्र मेको रागीमी तेइ तेइ ब्रामाक्त। 50 ख्रीस्त कली थमा मसुइक्ब यहूदीपुकीमी यहूदी धर्म मानेब ठेयब मीश मुर नु सहर डा सरकार डा ठेयब मुर आन कली पोक्शा, पावल नु बारनाबास आस कली मेको रागी रे गुंडदमे बाक्त। 51 मेको निक्शी चहिं आस खोइल डा फुरकु थुर थुर पा ताइशा, गाक्शा आइकोनीयम सहरमी जाक्दीम्मा बाक्त। प्रेरित १६:८; मत्ती १०:१४ 52 एन्टीओक सहरम बाक्ब थमा सुइक्बपुकी चहिं ग्येरसीशा, परमप्रभु यावे आ सोक्तीम प्रिंचा पुंडसमा बाक्त।



## आइकोनीयम सहरमी शेंशो

## एन्टीओक लेशशा

14 पावल नु बारनाबास आइकोनीयम सहरमी जाक्दीशा, यहूदी आन गुम्तीक खिं लशा, मेकेर खुम्सीशा बाक्शो आन कली ख्रीस्त आ लोव्र शेंना शेंन बाक्सा बाक्त। मिनु ख्रीस्त आ लोव्र नेंशा, यहूदी नु ग्रीक शुशेमी थमा सुदमे बाक्त।<sup>2</sup> मिनु थमा मसुइक्व यहूदीपुकीमी अर्को रागी डा मुर आन कली पोक्शा “मेको आस शेंशो लोव्र मनेंचा” दे आन थुं हिरपा मरिश्शो पचा गोव्रमे बाक्त।<sup>3</sup> मो दुग्शा यो पावल नु बारनाबास शुश नाक्त सम्म मेकेर शेंना शेंन बाक्सा बाक्त। ठेयब थुं पा सुइ आन कली तशा महिंथु, ख्रीस्त आ लोव्र शेंदसेनु, प्रभुमी चिन्ड नु छक लाक्वा डा गेय पचा कली सक्ति गेशा, आस शेंशो लोव्र थमा सेला बाक्त। प्रेरित १९:११; हिब्रू २:४  
4 आस लोव्र नेंशा, चिन्ड नु छक लाक्वा डा गेय पशो तशा, सहर डा मुरपुकी ब्राशा, का निक्शी थमा मसुइक्व यहूदीपुकी नु गारमा बाक्त, का निक्शी ख्रीस्त आ सोइश्शो नु गारमा बाक्त।<sup>5</sup> मिनु अर्को रागी डा मुर, यहूदी नु आन हुकुम पाइब गारशा “शेंब आस कली फुल्लु आप्शा मसाइक्वु मप्रोंइचा नसी” दे साइक्वा माल्मे बाक्त। रतिमोथी ३:११<sup>6</sup> मिनु पावल नु बारनाबासमी मेको आन मो पशो तुइश्शा, सहर रे प्रोक्शा, लाइकाओनीया रागी डा लिस्त्रा नु डेरबे सहर लसा बाक्त।<sup>7</sup> मिनु मेकेर एर ओंथ डा गाउं गाउं हिरना हिरन ख्रीस्त आ लोव्र शेंना शेंन गाक्सा बाक्त।

## लिस्त्रा सहरम शेंशो

8 मिनु लिस्त्रा सहरमी जरमेसे रे गाक्ने मचापब आ खोइल मदुक्व मुर का बाक्माक्त।<sup>9</sup> काबु मेको खोइल मदुक्व मुरुमी पावल आ शेंशो लोव्र थाम्पा नोफा दाइश्शा नेंना बाक्त। मिनु पावलमी मोपा नोफा दाइश्शा नेंशो तशा, मेकोमी साबाक्ती, दे थमा सुदा बाक्त, दे तुइश्शा, मत्ती ९:२८<sup>10</sup> मेको कली मिक्च मयाक्थु कोव्रशा, ठेयब सेंदा पा “इ खोइल दिंशा बोक्शा रपो” दे मदा बाक्त। मो मदानु, मेको छुल बोक्शा राप्शा एर ओंथ गाक्माक्त।<sup>11</sup> मिनु मोपा सापाइश्शो तशा, छक लाक्वा, मेकेर देल्शोपुकीमी आन लाइकाओनीया डा लोव्र पा “इ देवता मुर खोदेंशो दुग्शा यिशा, गोपुकी नु काथा बाक्सा बाक्त” देंमुमा बाक्त। प्रेरित २८:६<sup>12</sup> मिनु बारनाबास कली जिउस नु पावल कली हेरमेस, दे देवता आस नें वोदमे बाक्त। मारदे हना पावल चहिं लोव्र पस जोक्बाक्माक्त।

13 सहर ओव्रतीक आ नेक्था जिउस देवता आ थान सेल्शो बाक्माक्त। मिनु जिउस कली चढेबमी चढेचा कली ब्यफ नु फू माला चाक्पाइक्मी बाक्त।<sup>14</sup> मिनु बारनाबास नु पावलमी मेकोपुकीमी गो इंस कली देवता मानेशा हुश जारशा चढेचशो बाक्नीमी, दे तुइश्शा, आस वा खाक्शा दोरशा लशा, मुर आन दातेमी जाक्दीस्सा बाक्त।<sup>15</sup> मिनु ठेयब सेंदा पा “ए गोपुकी, मार पचानी? गो देवता मनस्कु, इन खोदेंशो मुर कका नस्कु। इन कली ग्येरपाइक्व लोव्र शेंथ जाक्शो नस्कु। मूर्ति पूजा पचा प्रोंइशा, गेना हना यो ब्रोंइशा बाक्ब परमप्रभु यावे गे इन थुं हिरदीने। मेकोमी सरीड, रागी, समुन्द्र नु मेकेर मार मार बाक्मा, मेको नेल्ल सेल्शो बाक्ब, दे तुइक्तीने। प्रेरित १०:२६<sup>16</sup> साइ डोंइती रे मुल सम्म परमप्रभु यावेमी रागी नेल्ल आन कली आन दला दाक्स पचा गेशो बाक्त। प्रेरित १७:३०<sup>17</sup> आन दला दाक्स पा बाक्तेक्म हना यो, परमप्रभुमी मेको आन कली तुइक्पाइसीन सीन बाक्त। दोपा तुइक्पाइसीन सीन बाक्त देंशा हना, रेउ यिपा मार मार वापा इन कली जाक्दीत्वा डा पा जचा नु फेक्वा गेशा, ग्येरशा बाक्वा गेशो बाक्त” देंसा बाक्त।<sup>18</sup> मिनु देवता मानेशा हुश जारशा चढेचा ममाल्ब देंसानु यो, हेर हेररा चढेमे बाक्त।

19 मिनु नोले एन्टीओक नु आइकोनीयम सहर रे थमा मसुइक्व यहूदीपुकी जाक्मा बाक्त। मेकोपुकीमी सहर डा मुर आन कली पोक्शा, पावल कली साइक्वा कली फुल्लु क्रोम्पदमे बाक्त। मिनु बेक्त्, दे आ रां लाइश्शा, सहर रे थुंइशा ताइक्त्मे बाक्त। रकोरिन्थी ११:२५; रतिमोथी ३:११<sup>20</sup> मिनु थमा सुइक्वपुकी कोव्रथ लशा, पावल आ एर ओंथ राम्मानु, सेंसीशा बोक्शा सहर लेम्माक्त। मिनु आ दीसा बारनाबास नु गाक्शा, डेरबे सहर जाक्दीस्सा बाक्त।

21 मिनु डेरबे सहरमी शुश मुर आन कली येसु आ ग्येरपाइक्व लोव्र शेंशा रूपदसेनु, शुश मुरुमी थमा सुदमे बाक्त। मिनु मेकेर रे लशा लेंशा लिस्त्रा, आइकोनीयम नु पिसीदीया डा एन्टीओकमी जाक्दीस्सा बाक्त।<sup>22</sup> मेको सांफा सहर डा थमा सुइक्व आन कली “मार दुम्त हना यो, थमा सुइक्वा मप्रोनीन। इन खोइल थेक्शा बाक्कीने। ख्रीस्त आ नेंमी शुश श्येत जचा पुंइसीशा ला परमप्रभु यावे आ राज्य ओव्रचा ताइनय, दे रूपीने” दे आन थुं बारपदसे बाक्त। रोमी ५:३-५; १थिस्सलोनिकी ३:३<sup>23</sup> मिनु ते ते थमा सुइक्वपुकी गुग्शा बाक्मा, मेक मेक शेंब खाल्पापुकी वोइक्ना वोइक्न, माइजा बाक्शा, प्रार्थना पना पन, प्रभु कली थमा सुइश्शा, थमा सुइक्व आन कली प्रभु आ गुइमी जिम्मा गेना गेन गाक्सा बाक्त। प्रेरित ६:६<sup>24</sup> मिनु पिसीदीया रागी रे गाक्शा, पाम्फिलीया रागी जाक्दीस्सा बाक्त।<sup>25</sup> मिनु पेरगा सहरमी ख्रीस्त आ लोव्र शेंशा, मेकेर रे ब्रुप्शा अत्तलीया जाक्दीस्सा बाक्त।<sup>26</sup> अत्तालीया सहरमी जहाज डोइश्शा, समुन्द्र शोक्शा, एन्टीओक सहरम जाक्दीस्सा बाक्त। डोंइती एन्टीओकम बाक्सानु, परमप्रभु यावेमी मेको आस कली ख्रीस्त आ लोव्र शेंथ योव्रशो बाक्माक्त। मिनु थमा सुइक्वपुकीमी मेको आस कली प्रभु कली जिम्मा गेशा, शेंथ सोइश्शो बाक्मा बाक्त। मिनु मुल शेंने थुग्शा लेशशा जाक्सा बाक्त। प्रेरित १३:१-२<sup>27</sup> मिनु जाक्शा थमा सुइक्व आन कली खुप्शा, दोपा परमप्रभु यावेमी आं नु बाक्शा गेय पपाइश्शा आसीक गेवा, दोपा अर्को रागी डा मुर आन कली थमा सुइक्वा, पाप रे ब्रोंइतीक लां कोंइशा, आ मुर सेला, मेको लोव्र नेल्ल तुइक्पदसे बाक्त। १कोरिन्थी १६:९<sup>28</sup> मिनु शुश नाक्त सम्म थमा सुइक्वपुकी नु काथा बाक्सा बाक्त।

## खोइक्तीक चिनु आ पर्वम लोव्र

15 मिनु नोले यहूदीया रागी रे मुरपुकी यिशा, एन्टीओकमी जाक्मा बाक्त। मेकोपुकीमी “साइ मोसामी देंशो खोइक्तीक चिनु खोइक्वा माल्ब। मपाइतीनी हना, पाप रे ब्रोंइचा मताइनीनी” दे शेंबाक्मा बाक्त। गलाती ५:२<sup>2</sup> मिनु पावल नु बारनाबासमी मोदें शेंशो नेंशा, मेको आन शेंशो लोव्र मबिस्सा बाक्त। मेकोपुकीमी खोइक्तीक चिनु खोइक्वा माल्ब देंमा बाक्त। पावल नु बारनाबासमी चहिं खोइक्वा ममाल्ब, देंसा बाक्त। मिनु लोव्र निक्शी दुम्तीके थमा सुइक्व आन थुं ग्याल्माक्त। मिनु पावल, बारनाबास नु का निक्शी आन कली योव्रशा, यरूसलेममी बाक्ब सोइश्शोपुकी नु गुम्तीके डा शेंब खाल्पा आन कली हिल्लो पथ सोइक्त्मे बाक्त। गलाती २:१<sup>3</sup> मिनु योव्रशा सोइक्वा पुंइसीशोपुकी एन्टीओक रे गाक्शा, यरूसलेम डा लां खोइश्शा डोंइती फोनीसीया, नोले सामरीया रागीमी जाक्दीम्मा बाक्त। मिनु ते ते जाक्दीम्मा, मेक मेक डा थमा सुइक्व आन कली गुग्शा “अर्को रागी डा मुरपुकीमी यो ख्रीस्त कली थमा सुइश्शा, पाप रे ब्रोंइचा ताम्तेक्म” दे तुइक्वाइक्ना पाइक्न गाक्मा बाक्त। मिनु नेंबपुकी शुश ग्येरसमा बाक्त।

## अर्को रागी डा मुर आन पर्वम सल्ला पशो

4 मिनु यरूसलेममी जाक्दीम्मानु, थमा सुइक्वपुकी, ख्रीस्त आ सोइश्शो, थमा सुइक्व आन शेंब खाल्पा नेल्लेमी मान पा ब्रामे बाक्त। मिनु परमप्रभु यावेमी पपाइश्शो गेय दोपा पामे, मार दुम्मे, मेको लोव्र नेल्ल देंमा बाक्त।<sup>5</sup> थमा सुइक्व का निक्शी फरिसी बाक्मा बाक्त। मेकोपुकीमी बोक्शा “अर्को रागी डा मुरपुकीमी ख्रीस्त कली थमा सुइक्व दुम्मानु, इं यहूदी धर्म डा खोइक्तीक चिनु खोइक्वा माल्नीम, मोसामी अरेशो नेल्ल पचा माल्नीम” देंमा बाक्त।<sup>6</sup> मिनु ख्रीस्त आ सोइश्शोपुकी नु थमा सुइक्व शेंब खाल्पापुकी खुम्सीशा “मेको लोव्र निक्शीमी तेको लोव्र टिशा पचा?” दे लोव्रसी पमुमा बाक्त।

7 मिनु शुश लोव्र पमुमानु, पत्रुस बोक्शा “आं लोक्वपुकी, नोफा दाइश्शा नेनीने, ख्रीस्त आ लोव्र ब्रचा गोवानु, परमप्रभु यावेमी अर्को रागी डा मुर आन कली शेंशा, ग्येरपाइक्व लोव्र थमा सुइक्वाइक्थ, आं कली योव्रती, दे तुइश्शो

ननी। प्रेरित १०:४४; प्रेरित ११:१५<sup>८</sup> मुर नेल्ल आन थुं तुइक्व परमप्रभु यावेमी यहूदी इं कली गेशो खोदेंशो पा अर्को रागी डा मुर आन कली यो आन थुंमी आ सोक्त गेत्तु।<sup>९</sup> मेकोपुकीमी येसु ख्रीस्त कली थमा सुइक्तीकेमी माफ तशा, गो नेल्ल का दुश्शो बाक्नीकी।<sup>१०</sup> परमप्रभु यावेमी मेको आन कली रिम्शो सेल्लु, दे तुइश्शा, इं किकी पिपीमी लाइ यो कुरने मचाप्चा डा भारी मेको आन कली कुरपाइक्वा दुम्बा डा? परमप्रभु क्येडा लाक्शा जोक्व तुइक्व दुम्बा शिरबा डा? मत्ती २३:४; गलाती ५:१<sup>११</sup> मारदे हना प्रभु येसुमी इं कली शिशी पतीके पाप रे ब्रॉइचा ताइतय, दे थमा सुइक्तय। मेकोपुकीमी इं खोदेंशो पा प्रभु आ शिशी तशा थमा सुइक्व दुम्तेक्म” दे पत्रुसमी माइक्मी बाक्त्। मिनु नेल्ल ब्वालेइ पामे बाक्त्। गलाती २:१६; एफिसी ४:२-१०

<sup>१२</sup> मिनु बारनाबास नु पावल आस पालो लोत्र पचा गोम्से बाक्त्। अर्को रागी डा मुरपुकी नु बाक्सानु, दोपा परमप्रभु यावेमी चिन्ड नु छक लाक्वा डा गेय पपदा, मेको लोत्र नेल्ल तुइक्वपदसे बाक्त्।<sup>१३</sup> मेको लोत्र पने थुम्से नोले याकूबमी “आं लोकबपुकी, इन नोफा दाइश्शा, आं लोत्र नेनीने। प्रेरित २१:१८; गलाती २:९<sup>१४</sup> परमप्रभु यावेमी अर्को रागी डा मुर आन कली यो योव्रशा, आ मुर सेल्लु, दे सिमोनमी तुइक्वाइक्त्। नेल्ल क्येडा डोंइती दोदेंशो दुम्मे, मार दुम्मे, मेको लोत्र शेंताक्व।<sup>१५</sup> अर्को रागी डा मुर आन कली योव्रशा, आ मुर सेल्लु, दे साइ नेसी परमप्रभु यावे आ लोत्र पाइबपुकीमी ब्रेक्शो आन लोत्र नु गारब।<sup>१६</sup> ‘मेको नेल्ल दुश्शा नोले गो लेशशा जाक्नुड। मिनु साइ दाऊदमी सेल्पाइश्शो ब्रेक्शो खिं लेंशा सेल्लुड। मार मार ब्रेक्शो बाक्मा, मेको नेल्ल गो नक सेल्शा वोइक्नुड।<sup>१७</sup> मारदे हना योव्रचा पुंडसीशो अर्को रागी डा मुरपुकीमी आं कली तुइश्शा, आं मुर दुम्मल, दे मो पाइक्नुड।<sup>१८</sup> साइ रे गो मोदेंशो लोत्र तुइक्वाइक्ना पाइक्न पिती’ दे ब्रेक्शो बाक्ब। आमोस ९:११-१२<sup>१९</sup> मोपतीके परमप्रभु यावे आ देंशो तुइश्शा, दोदेंशो मिम्चा मालनय देंशा हना, अर्को रागी डा थमा सुइक्व आन कली श्येत मगेचा।<sup>२०</sup> मेको आन कली ‘मूर्ति कली चढ़ेशो मजचा, तेल्लेम मपचा, हुश मचुइक्थु साइश्शो श्ये मब्वचा, हुश मब्वचा’ दे चिठी ब्रेक्शो बाक्त्। लेवी १९:४; लेवी १९:२९; लेवी ३:१७<sup>२१</sup> परमप्रभुमी मोसा कली ब्रेक्पाइश्शो लोत्र चहिं तुइक्नीम। मारदे हना साइ रे नाइक्तीक नाक्त् इं गुम्तीक खिमी नेंशा तुइक्नीम” दे माइक्मी बाक्त्। प्रेरित १३:१५

अर्को रागी डा मुर आन कली चिठी

<sup>२२</sup> मिनु याकूब आ लोत्र नेंशा, नेल्ल थुं का दुश्शा, आ देंशो बिस्समा बाक्त्। मिनु चिठी ब्रेक्शा, मेको चिठी चोव्रथ मुर योव्रशा, पावल नु बारनाबास, नु काथा एन्टीओक सोइक्वा, दे सल्ला पामे बाक्त्। मेको योव्रशा का यहूदा नु का सिलास बाक्सा बाक्त्। यहूदा आ याइनी नें बारसाबास बाक्माक्त्। यहूदा नु सिलास थमा सुइक्व आन कली शेंब खाल्पा बाक्सा बाक्त्।<sup>२३</sup> मेको चिठीम चहिं “एन्टीओक, सिरीया नु सिलीसीया डा अर्को रागी डा येसु ख्रीस्त कली थमा सुइक्व आंइ लोकबपुकी, गो यरूसलेम सहरम बाक्ब ख्रीस्त आ सोइश्शो, आंइ गुम्तीक डा शेंब खाल्पा नु थमा सुइक्व लोकब नेल्लेमी इन कली ‘रिम्शो बाक्कीन’ देंशा ब्रेक्शा सोइक्ताक्त्।<sup>२४</sup> गोपुकी नु बाक्ब का निक्शी इन बाक्तीकेमी जाक्शा, इन थुं क्याल्लेक्म देंशो लोत्र नैतक। मेको आंइ सोइश्शो मबाक्नीम।<sup>२५</sup> मोपतीके गो नेल्ल थुं का दुश्शा, मुल इन थुं नाइक्पाइक्वा कली इं दाक्थो बारनाबास नु पावल नु काथा लोत्र कुरब मुर इन बाक्तीक सोइश्शो बाक्नीकी।<sup>२६</sup> बारनाबास नु पावल इं प्रभु येसु ख्रीस्त आ नेंमी बेक्चा यो महिंब बाक्नीसी।<sup>२७</sup> आंइ मिम्शो नु आंइ देंशो नेल्ल मेको आंइ सोइश्शो यहूदा नु सिलास निक्शीमी इन कली तुइक्वाइक्नीसी। मिनु गे लोत्र नेल्ल तुइक्नीमी।<sup>२८</sup> इन कली रुप्पाइक्वा माल्शो लोत्र चहिं परमप्रभु यावे आ सोक्तीमी आंइ कली रुप्पाइश्शो लोत्र बाक्ब। मिनु मेको लोत्र इन कली शेंनीकी। इन कली हेल्शो भारी कुरपा गाक्पाइश्शो खोदेंशो लोत्र ममाइ।<sup>२९</sup> मेको लोत्र मार बाक्ब देंशा हना ‘मूर्ति कली चढ़ेशो मजचा, हुश मब्वचा, हुश मचुइक्थु साइश्शो श्ये मब्वचा, तेल्लेम मपचा’ एको लोत्र टीतीनी हना, गे रिम्शो दुम्नीनी। आंइ लोत्र ओशोन बाक्ब” दे ब्रेक्शो बाक्माक्त्।

<sup>३०</sup> मिनु यरूसलेम रे ब्रुप्शा एन्टीओक जाक्दीश्शा, थमा सुइक्व आन कली ब्रेक्शा, मेको चिठी गोम्से बाक्त्।<sup>३१</sup> मिनु मेकोपुकीमी चिठी प्राक्शा पडेशा, ग्येरसमा बाक्त्।<sup>३२</sup> यहूदा नु सिलास परमप्रभु यावे आ लोत्र पाइब यो बाक्सा बाक्त्। मिनु मेको निक्शीमी शुश लोत्र पा लोकब आन थुं बारपदसे बाक्त्। प्रेरित ११:२७; प्रेरित १३:१<sup>३३</sup> मिनु शुश नाक्ती एन्टीओकम शेंना शेंन बाक्शा, यरूसलेम लेत्वी ना यहूदा ला लेम्माक्त्।<sup>३४</sup> सिलास चहिं एक उड बाक्नुड, दे बाक्माक्त्।<sup>३५</sup> पावल नु बारनाबास एन्टीओकम बाक्शा अरु नु गारशा, प्रभु आ लोत्र तुइक्वाइक्ना पाइक्न शेंना शेंन बाक्सा बाक्त्।

पावल नु बारनाबास ब्राशो

<sup>३६</sup> मिनु काबु पावलमी बारनाबास कली “डोंइती ते ते प्रभु आ लोत्र शेंथ हिरससा, मेक मेक डा थमा सुइक्वपुकी दो पामे, मार पामे, कोव्रथ लस” देंमाक्त्।<sup>३७</sup> मिनु बारनाबासमी “यूहन्ना, आ याइनी नें मर्कूस कली यो काथा लाइश्शा लस” देंमाक्त्। प्रेरित १२:१२,२५<sup>३८</sup> पावलम चहिं मलाइक्वा, दे मबिस्से बाक्त्। मारदे हना डोंइती काथा गाक्शा, पाम्फीलीया रागीमी बाक्मानु, गेय प्रॉइशा आ का ला लेश्शो बाक्माक्त्। प्रेरित १३:१३<sup>३९</sup> मिनु बारनाबास लाइक्वा, पावलमी मलाइक्वा देंतीके मेको आस लोत्र मगारथु, जिशा ब्रासा बाक्त्। मिनु बारनाबासमी मर्कूस कली लाइश्शा, जहाज डोइश्शा साइप्रस लमाक्त्।<sup>४०</sup> पावलम चहिं सिलास कली योव्रडा बाक्त्। मिनु थमा सुइक्वपुकीमी परमप्रभु यावेमी पावल नु सिलास आस कली रिम्शो कोव्रडल, आसीक गेवल, दे प्रार्थना पशा सोइक्त्मे बाक्त्।<sup>४१</sup> मिनु मेकेर रे लशा, सिरीया नु सिलीसीया रागीमी जाक्दीश्शा, थमा सुइक्व आन थुं बारपदसे बाक्त्।

तिमोथी कली योव्रशा

<sup>१६</sup> मिनु डेरबे सहरमी जाक्दीश्शा, मेकेर रे लशा, लिस्त्रा सहरमी जाक्दीस्सा बाक्त्। मिनु लिस्त्रामी तिमोथी नें पाइश्शो थमा सुइक्व का गुम्से बाक्त्। तिमोथी आ ममा ख्रीस्त कली थमा सुइक्व यहूदी जात डा बाक्माक्त्। आ आफ चहिं ग्रीक बाक्माक्त्। प्रेरित १७:१४; प्रेरित १९:२२; प्रेरित २०:४; फिलिप्पी २:१९-२२; १थिस्सलोनिकी ३:२, ६; २तिमोथी १:५<sup>२</sup> लिस्त्रा नु आइकोनीयम सहरमी बाक्ब थमा सुइक्व नेल्लेमी तिमोथी रिम्शो मुर बाक्ब देंबाक्मा बाक्त्।<sup>३</sup> मिनु पावलमी तिमोथी कली गेय पाइब वारच सेल्शा, काथा लाइक्वा देंमाक्त्। मिनु यहूदीपुकीमी तिल्शा मवोदमेक्ल, दे खोइक्तीक चिनु खोइक्पदा बाक्त्। मारदे हना तिमोथी आ आफ ग्रीक बाक्ब, दे नेल्लेमी तुइश्शो बाक्मा बाक्त्। गलाती २:३<sup>४</sup> मिनु काथा लाइश्शा, गाउं सहर हिरना हिरन गाक्शा, थमा सुइक्व आन कली गुम्शा, यरूसलेमम बाक्ब ख्रीस्त आ सोइश्शोपुकी नु गुम्तीक डा शेंब खाल्पा आन देंशो लोत्र नेंपदमे बाक्त्। प्रेरित १५:२३-२९<sup>५</sup> मोदेंशो नेंपा गाक्मानु, थमा सुइक्व आन थुं बारपदमे बाक्त्। मिनु नाक्त् किंत किंत थमा सुइक्वपुकी तेम्सीशा, शुश दुम्मा बाक्त्।

परमप्रभु आ सोक्तीमी लां कोंइशो

<sup>६</sup> मिनु परमप्रभु यावे आ सोक्तीमी पावल नु आ वारच आस कली एसीयामी शेंचा मगेतीके फ्रिगीया नु गलातीया रागी लमा बाक्त्। प्रेरित १८:२३<sup>७</sup> मिनु माइसीया आ नेक्था जाक्दीश्शा, मुल बिथीनीया रागी ओव्रचा, दे थुं पामे बाक्त्। तन्न येसु आ सोक्तीमी लचा मगेमी बाक्त्।<sup>८</sup> मोपतीके माइसीया लां रे पा ब्रुप्शा, त्रोआस सहरम जाक्दीम्मा बाक्त्।

मासीडोनीया लशो

<sup>९</sup> मिनु त्रोआस सहरमी बाक्मानु, काबु नाक्दो प्रभुमी पावल कली कोंइतीक कोंइदा बाक्त्। मार कोंइदा बाक्त् देंशा हना, मासीडोनीया रागी डा मुर का पावल आ डोंइती राप्शा “आंइ मासीडोनीया रागी पिशा, आंइ कली वारच पाइक्वा नकी, हजुर” दे पुंडशो तवा बाक्त्।<sup>१०</sup> मेको कोंइतीक तशा, पावल छुल बोक्शा “मासीडोनीया लय” देंत। मोपतीके गो यो सासाक्त्।

प्रभुमी मासीडोनीया डा मुर आन कली ग्येरपाइक्तीक लोव्र शेंथ सोइक्ता बाक्त, दे नेल्लेमी रुप्तक।<sup>11</sup> मिनु त्रोआस सहरमी जहाज डोइश्शा तेइ महिरथु, सामोथ्रेस टापु लां पा आ दीसा नाक्ती निआपोलीस सहरमी जाक्दीत्तक।<sup>12</sup> मेकेर जाक्दीश्शा जहाज रे तोंइसाक्क। मिनु गाक्शा फिलिप्पी सहरमी जाक्दीत्तक। फिलिप्पी मासीडोनीया रागी डा ठेयब सहर का बाक्ब। मेको रागी रोमी आन गुइमी बाक्माक्त। गोपुकी फिलिप्पी सहरमी इक्का नाक्ती बाक्तक।

<sup>13</sup> मिनु नाइक्तीक नाक्त सहर रे गूशा, खोला आ नेक्था लाइतक। मारदे हना खोला आ नेक्थामी यहूदी आन प्रार्थना पथ बुक्तीक बाक्म कों, दे मिम्शा, मेक जाक्दीत्तक। मिनु जाक्दीक्कानु, मीश मुरपुकी खुम्सीशा बाक्थो तित्तक।<sup>14</sup> मिनु मेको आन कली लोव्रसी पना पन येसु आं लोव्र शेंताक्क। आंइ लोव्र नेंब का चहिं थिआटीरा सहर रे जाक्थो वा पसल दाइक्ब लिडीया नें पाइश्शो मीश मुर का बाक्त। मेको लिडीया परमप्रभु यावे कली मान पा ठेयब सेल्ब बाक्बाक्माक्त। मेकोमी पावल आ लोव्र थम नोपा दाइश्शा नेंतु। मिनु प्रभुमी रुप्चा थुं गेत्तु।<sup>15</sup> मिनु थमा सुइक्ब दुम्शा, ब्वाक्कुम खुम्शा गुंइचा पुंइसाक्क। आ खिं डा मुर नेल्ले यो थमा सुइक्ब दुम्शा, ब्वाक्कुम खुम्शा गुंइचा पुंइसाक्क। ब्वाक्कुम खुम्शा गुंइचा पुंइसीशा नोले लिडीयामी “गोपुकीमी प्रभु कली थमा सुइक्ब बाक्माक्त, दे मिम्ताक्वीनी हना, आं खिमी बास बाक्थ जाक्कीन। आं खिमी मजाक्थु मदुम्ब” दे माइक्तीकी। मिनु लिडीया आ खिं लशा बाक्तक।

येसु आ नें थिशा वोल खेरशो

<sup>16</sup> मेकेर बाक्शा गो प्रार्थना पथ खोला आ नेक्था लना लन पकानु, काबु वाइलीम मीश आल का लांमी गुम्तक। मेको मीश आल वोलम गेशो सक्ति तशा, मुर आन कली नोले दुम्ब लोव्र नेल्ल तुइक्पाइक्बाक्माक्त। मोपा आ होव्रप आन कली शुश क्येट चेम्शा गेबाक्माक्त।<sup>17</sup> मिनु लांमी गुम्शा, आंइ नोले खोइश्शा “एको मुर नेल्ल क्येडा ठेयब परमप्रभु यावे आ गेय पाइब नमी। पाप रे दोपा ब्रोंइचा, दे शेंशा गाक्ब नमी, इन कली लां कोंइब नमी” दे रेयके पना पन पित। मर्कूस १:२४, ३४<sup>18</sup> नाक्त किंत किंत मेकोमी मोदेंशा, रेयके पवानु, पावल ब्रीताक्क। मिनु काबु पावल नोले हिरशा, कोव्रशा वोल कली “गो येसु ख्रीस्त आ नें थिशा गूशा लावो, देंनुड” दे हुइश्शा खेरतु। मर्कूस १६:१७<sup>19</sup> मिनु वोल गूशा, लम डा मेरे नोले दुम्ब लोव्र तुइक्तीक सक्ति जाम्त। मिनु आ होव्रपपुकीमी क्येट का यो मतामे। मिनु चुरशा, पावल नु सिलास आस कली ग्याइश्शा कीशा, सहर डा दिंम कामी चाक्शा, ठेयब मुर निसाफ पाइब आन डोंइती राप्पाइक्तेक्म।<sup>20</sup> मिनु “एको मुर यहूदी नसी। इ सहरमी जाक्शा, मुर आन थुं ग्याल्पाइश्शा शुश श्येत गेम्ताक्से। प्रेरित १७:६<sup>21</sup> इ रोमी ऐन कानुनम मगारचा डा दूली शेंशा, आस पतीके पपाइक्चा बोल पाम्ताक्स” दे दोस गेम्तेक्म।<sup>22</sup> एर आंथ जाक्शा देल्शोपुकीमी यो “एको आस कली तुप्चा माल्ब” दे रेयके पाम्तेक्म। मिनु निसाफ पाइबपुकीमी पावल नु सिलास आस कली आस फेक्थो वा प्रुइश्शा, कोक्केम तुप्पाइक्तेक्म। २कोरिन्थी ११:२५; फिलिप्पी १:३०; १थिस्सलोनिकी २:२

जेल्लखानम चोक्चा पुंइसीशो

<sup>23</sup> मिनु तुप्शा जेल्लखानमी चोक्चा देंतेक्म। मिनु जेल्लखान डा ठेयब मुर कली “प्रोक्ने मचाप्चा डा पा चोक्पाइश्शा वोतो” दे माइक्तेक्म।<sup>24</sup> मिनु मेकोमी मेको आस कली नेल्ल क्येडा आगा डा कोठा लाइश्शा, ठेंडरो थोक्शा वोइक्पदा बाक्त।

<sup>25</sup> नाक्दो पावल नु सिलासमी प्रार्थना पा कुम्सो पा परमप्रभु यावे कली ठेयब सेल्से बाक्त। आस प्रार्थना नु कुम्सो पशो जेल्लखानमी चोक्सीशो नेल्लेमी नेन्मे बाक्त।<sup>26</sup> मिनु प्रार्थना नु कुम्सो पना पन बाक्सानु, ठेयब खिनु कुशा, जेल्लखान डा जग यो हिम्पदा बाक्त। खिनुमी हिम्दानु, लाप्चो नेल्ल रोक्समा बाक्त। जेल्लखानमी चोक्सीशो आन साडलो, ठेंडरो नेल्ल ब्रुइक्मा बाक्त।<sup>27</sup> मो दुम्मेनु, जेल्लखान डा ठेयब मुर ग्रीचोक पा सेंसीशा छुल बोक्माक्त। मिनु लाप्चो नेल्ल रोक्सीशो तशा “आमाइ, चोक्थो नेल्ल प्रोक्शा

गाक्मा बाक्त। मार पडा” दे आ तरवार ग्रि शोइश्शा, क्योरसीशा बेक्नुड, दे क्योरसीचा मला बाक्त।<sup>28</sup> मिनु पावलमी क्योरसीचशो तशा “ए मपावो, मपावो, सुइ मप्रोक्क। नेल्ल बाक्तक” दे ब्रेम्माक्त।<sup>29</sup> मिनु बत्ती दाशा गेयीनी देंशा, चोक्थो आन बाक्तीके पावल नु सिलास आस डोंइती लशा, खिंखि पा बाक्माक्त।<sup>30</sup> मिनु मेको आस कली गुंइशा “हजुर, आं पशो पाप मार पा क्याम्सीबा?” दे हिल्लो पवा बाक्त। प्रेरित २:३७<sup>31</sup> मिनु पावल नु सिलासमी “प्रभु येसु कली थमा सुतो। मिनु गे नु इ खिं डा मुर नेल्लेमी पाप क्याम्चा पुंइसीशा गेना हना यो ब्रोंइशा बाक्चा ताइनीनी” देंसा बाक्त।<sup>32</sup> मिनु मेको ठेयब मुर नु आ खिं डा मुर नेल्ल आन कली प्रभु आ लोव्र तुइक्पदसे बाक्त।<sup>33</sup> मिनु ठेयब मुर नु आ खिं डा मुर नेल्लेमी थमा सुइश्शा ब्वाक्कुमी खुम्शा गुंइचा पुंइसमा बाक्त। पावल नु सिलास आस तुप्शो गार नेल्ल चिक्तेमे बाक्त।<sup>34</sup> मिनु आ खिं लाइश्शा, जचा तूचा सेल्शा थुल्मे बाक्त। मिनु नेल्लेमी “परमप्रभु यावे कली थमा सुइक्ब दुम्तय” दे थाम्पा ग्येरसमा बाक्त।

<sup>35</sup> आ दीसा सुनी ठेयब मुर निसाफ पाइबपुकीमी “मेको आस कली प्रोंइचा नसी” दे सिपाही आन कली जेल्लखानमी सोइक्तेमे बाक्त।<sup>36</sup> मिनु जेल्लखान डा ठेयब मुरुमी पावल कली “गे इस कली प्रोंइचा नसी, दे निसाफ पाइबपुकीम सिपाही कली सोइक्ताक्मे। सुइमी इस कली दोस गेने मचाप्जीम। रिश्शो पा लसे” देंमाक्त।<sup>37</sup> मिनु पावलमी सिपाही आन कली “गो मोशा मलाइनस्कु। मारदे हना सिनाक्त आंस कली मारेइ मरुथु दोस का यो मगुंइथु मुर नेल्ल आन कुल तुप्तीस्कीमी। तुप्शा ला ममाइ, जेल्लखानमी यो चोक्तीस्कीमी। गो रोमी यो नस्कु। मिनु मो पचा मदुम्ब। आंस कली सुइ आन मतुइक्थु खुइश्शा प्रोंइशा सोइक्चा मगारब। गो लसीन मलाइनस्कु। सिनाक्त आंस कली चोक्पाइक्बपुकी जाक्शा गुंइदीस्कीमील” देंशा सिपाही आन कली लेशशा सोइक्ता बाक्त। प्रेरित २२:२५<sup>38</sup> मिनु सिपाहीपुकी लशा, पावल आ देंशो लोव्र मेको चोक्पाइक्ब आन कली देंमा बाक्त। मिनु मेको निक्शी रोमी यो बाक्सा बाक्त देंशो नेंशा हिंमा बाक्त।<sup>39</sup> मिनु हिंशा “लो, प्रोंइथ लचा माल्ब” देंशा जेल्लखानमी जाक्मा बाक्त। मिनु पावल नु सिलास आस कली “गो इस कली मतुइक्थु चोक्पाइश्शो, मगाइक्तीसे, आंइ सहर प्रोंइशा, रिश्शो पा लसे” दे मिलो शिलो पा गुंइशा सोइक्तेमे बाक्त।<sup>40</sup> मिनु जेल्लखान रे गूशा, लिडीया आ खिं जाक्ताक्स। मिनु पावल नु आ वारचपुकीमी थमा सुइक्ब आन कली गुम्शा, आन थुं बारपाइश्शा वोइश्शा गाक्तेक्म।

थिस्सलोनिकी सहरम शेंशो

<sup>17</sup> मिनु मेकेर रे लशा, अम्फी-पोलीस नु आपोल्लोनीया सहरमी हिरशा, थिस्सलोनिकी सहरमी जाक्दीम्मा बाक्त। मेकेर यहूदी आन गुम्तीक खिं का बाक्माक्त। १थिस्सलोनिकी २:२<sup>2</sup> पावल हिरशा गाक्मेनु, सहर सहर डा यहूदी आन गुम्तीक खिं खिं ओव्रशा शेंबाक्माक्त। मोपा थिस्सलोनिकी सहरमी यो गुम्तीक खिं लशा, शेंचा गोवा बाक्त।<sup>3</sup> नाइक्तीक नाक्ती सां सम्म परमप्रभु यावे आ लोव्र रे पा यहूदी आन कली “पाप रे प्रोंइब ख्रीस्त शुश श्येत जशा बेक्चा माल्ब। मिनु बेक्थो रे सेंसीचा माल्ब, दे ब्रेक्थो बाक्ब। मेको मोदेंशो श्येत जशा बेक्शा, बेक्थो रे सेंसीशो ख्रीस्त चहिं येसु बाक्त, दे रुपीने” दे शेंदीमी बाक्त। लूका २४:२६-२७, ४५-४६<sup>4</sup> पावल आ लोव्र नेंशा “आ देंशो थमा बाक्माक्त” दे यहूदी का निक्शी थमा सुइक्ब दुम्शा, पावल नु सिलास नु गारमा बाक्त। परमप्रभु यावे कली मान पाइब ग्रीकपुकी नु ठेयब नें चलेशो मीश मुरपुकी शुशेमी यो पावल आ शेंशो नेंशा थमा सुदमे बाक्त। १थिस्सलोनिकी १:१; २थिस्सलोनिकी १:१

<sup>5</sup> शुश मुर आन कली थमा सुइश्शो तशा, थमा मसुइक्ब यहूदी आन थुं चोव्रमी बाक्त। मिनु हेंथे गाक्ब गेय मपाइश्शो मुर आन कली खुप्शा, सहरमी मरिम्शो मुर आन कली पोक्पाइश्शा, ठेयब रेयके पपदमे बाक्त। मिनु पावल नु सिलास यासोन आ खिंमी बाक्सा बाक्त, दाप्शा, यासोन आ खिं लशा “मेको आस कली गुंइशा, आंइ गुइमी गेचा नकी” दे रेयके पामे बाक्त।<sup>6</sup> तन्न पावल नु सिलास मेको खिंमी मबाक्थो बाक्सा बाक्त। मिनु मेको आस कली मथिक्थु, यासोन नु थमा सुइक्ब आन कली ग्याइश्शा कीशा

लाइशा, ठेयब मुर आन डोंइती चाक्दीत्मे बाक्त। मेकोपुकीमी “नेल्ल रागी डा मुर आन कली आन थुं ग्याल्पाइशा, दूली पपाइक्बपुकी इं सहरमी यो जाक्तेक्म। प्रेरित १६:२०<sup>7</sup> मिनु एको यासोनमी मेको आन कली बास गेशा थुल्शा वोइक्तीमी। मेकोपुकीमी इं रोमी पिप सिजर कली ममानेचा। येसु कका पिप बाक्ब, दे शेंना शेंन गाक्नीम” दे दोस गेमे बाक्त। लूका २३:२<sup>8</sup> मेको लोव नेंशा ठेयब मुर नु अरु नेल्ल आन थुं ग्याल्मा बाक्त।<sup>9</sup> मिनु यासोन नु आ वारच आन कली क्येट थाप्पाइशा प्रोंइशा सोइक्तमे बाक्त।<sup>10</sup> मिनु थमा सुइक्बपुकीमी पावल, सिलास नु तिमोथी आन कली में नाक्दोन छुल छाल पोक्शा, बेरोइया सहर गे सोइक्तमे बाक्त। मिनु बेरोइया सहरमी जाक्दीशा, यहूदी आन गुम्तीक खिं लशा, शेंचा गोव्रमे बाक्त।

### बेरोइया सहरमी शेंशो

<sup>11</sup> बेरोइया सहर डा यहूदीपुकीमी थिस्सलोनीकी डा मुर आन पशो खोदेशो मपामे बाक्त। तन्न नोफा दाइशा पावल नु सिलास आस लोव नेंशा परमप्रभुमी ब्रेक्पाइशा लोव नु मेको आस शेंशो लोव गारबा देय मगारबा कोव्रचा कली नाक्त किंत किंत जाक्मा बाक्त। यूहन्ना ५:३९<sup>12</sup> मिनु शुश मुरुमी थमा सुदमे बाक्त। ग्रीक रागी डा नें चलेशो मीश मुर वोंइश मुर यो शुश थमा सुइक्ब दुम्मा बाक्त।

<sup>13</sup> मिनु थिस्सलोनीकी सहरमी बाक्ब यहूदीपुकीमी “पावलमी बेरोइया सहरमी परमप्रभु यावे आ लोव शेंबाक्माक्त” देशो नेंशा जाक्शा, मुर आन कली पोक्शा दूली पपाइशा, पावल कली खेदा पचा गोपदमे बाक्त।<sup>14</sup> मिनु थमा सुइक्बपुकीमी पावल कली समुन्द्र आ नेक्था गे सोइक्तमे बाक्त। सिलास नु तिमोथी चहिं मेक उइ बाक्सा बाक्त। प्रेरित १६:१

### एथेन्स सहरमी शेंशो

<sup>15</sup> पावल कली चोवदीबपुकीमी एथेन्स सहर सम्म चोवदीमा बाक्त। मिनु लेत्चामेनु, पावलमी मेको आन कली “सिलास नु तिमोथी आस कली आं बाक्तीके रीब पा सोइक्चा नसी” दे सोइक्तीमी बाक्त।

<sup>16</sup> मिनु पावल एथेन्स सहरम मेको आस कली रिम्शा बाक्मेनु, सहरमी हिरशा गाक्माक्त। मिनु सहरमी गाक्मेनु, तेइ तेइ शुश मूर्ति सेल्शा वोइश्शो तशा, आ थुं मनुमाक्त।<sup>17</sup> मिनु यहूदी आन गुम्तीक खिं लशा, यहूदी नु परमप्रभु कली मान पाइब अर्को रागी डा मुर आन कली येसु आ पर्बम लोवसी पना पन बाक्माक्त। नाक्त किंत किंत सहरमी हिरशा, लांमी सु सु आन कली गुम्मी, मेको नेल्ल आन कली येसु आ पर्बम शेंना शेंन गाक्माक्त।<sup>18</sup> मोपा मुर आन कली गुमानु, इपीक्युरीपुकी, स्तोइकीपुकी नु यो गुम्शा लोव पवा बाक्त। मेकोपुकीमी पावल आ शेंशो नेंशा का निक्शीमी “एकोमी मार हेंथे फश लोव पना पन गाक्बाक्मे” देमा बाक्त। का निक्शीमी चहिं “फश लोव ममाइ। मुल सम्म इं मतुइश्शो देवता आ पर्बम शेंबाक्त” देमा बाक्त। देवता आ पर्बम शेंबाक्त, दे मारदे देमा बाक्त देशा हना, पावलमी “येसु आ ग्येरपाइक्ब लोव नु बेक्शो रे सेंसीशा ब्रोंइत” दे शेंबाक्माक्त।<sup>१८</sup> प्रेरित ४:१२<sup>19</sup> मिनु मेकोपुकी पावल कली अरीयोपागस माइश्शो आन देल्शा बाक्तीकेमी लोव पथ चाक्दीत्मे बाक्त।<sup>20</sup> मिनु मेकोपुकीमी “गो मारेइ मतुइक्नीकी। गो आंइ कली शेंदीने, रुप्पतीने। इन शेंशो लोव मार में, दे रुप्चा दाक्नीकी” देमा बाक्त<sup>21</sup> एथेन्स डा मुर नु एथेन्स सहरमी बाक्ब नेल्लेमी नक नक लोव पचा नु नेंचा कली नाक्त किंत किंत हिरशा माल्शा बाक्बाक्मा बाक्त।

<sup>22</sup> मिनु पावल अरीयोपागसमी राष्ठा “एथेन्स सहरम बाक्बपुकी, गो इन सहरमी हिरशा गाक्डानु, तेइ तेइ मूर्ति सेल्शा वोइश्शो ताता। मोपतीके गे मूर्ति आन कली सेउ पाइबाक्तीनी, पूजा पाइबाक्तीनी, दे रुप्चा।<sup>23</sup> इन पूजा पशो मूर्ति कोव्रना कोव्रन गाक्डानु, मूर्ति कामी ‘मतुइश्शो देवता’ दे मुशा ब्रेक्शा वोइश्शो ताता। मुल सम्म इन मतुइक्थु मानेशो परमप्रभु आ पर्बम गो इन कली शेंथ जाक्ती।<sup>24</sup> सरीड रागीमी मार मार बाक्मा मेको नेल्ल परमप्रभुमी सेल्शो नम। मोपतीके सरीड रागी सेल्ब परमप्रभु मुरुमी सेल्शो थान मन्दीरमी मबाक्ब।<sup>१८</sup> प्रेरित ८:२७<sup>25</sup> मुरपुकीमी परमप्रभु कली मारेइ गेचा ममाल्नीमी। आं कका रागीमी बाक्ब नेल्ल आन कली

ब्रोंइतीक सोक्त नु आन माल्शो नेल्ल गेशो बाक्ब। भजन संग्रह ५०:९-१२<sup>26</sup> डोंइती मुर का सेल्शा, मेको मुर रे पा नेल्ल रागी डा मुर सेल्तीमी। दोशो ब्रोंइचा, ते बाक्चा, मेको नेल्ल परमप्रभुमी पने थुम्शो बाक्ब। ब्यक्स्था ३२:८<sup>27</sup> मुरपुकीमी परमप्रभु यावे कली माल्शा थिश्शा, मुर आन कली सेल्शा रागीमी वोइक्तीमी। मेको मुर आन क्येडा डोन मबाक्ब, इं नेक्थान बाक्शो बाक्ब। यसैया ५५:६<sup>28</sup> मारदे हना परमप्रभु नु काथा बाक्शा ब्रोंइनय, दे तुडक्नय। गेपुकी नु बाक्ब ब्रेक्ब मुर कामी ‘गो नेल्ल परमप्रभु आ तमी तौ नय’ दे ब्रेक्शो बाक्त।<sup>29</sup> गोपुकी परमप्रभु यावे आ तमी तौ दुश्शा, मुर आन मिम्शो आन गुडमी सेल्शो सुन चांदी फुल्लु मार मार के मूर्ति तशा, परमप्रभु मोदेशो बाक्ब, दे मिम्चा मदुम्ब। उत्पत्ती १:२७; यसैया ४०:१८<sup>30</sup> मुल सम्म गे मतुइक्तीनी। मिनु मतुइक्थु देवता आन कली सेउ पाइबाक्तीनी। मतुइक्थु मो पशो तुइश्शा, परमप्रभु यावेमी इन कली दोस मगेब। मुल चहिं परमप्रभुमी मुर नेल्ल आन कली ‘इन थुं आं गे लेत्तीन’ दे ब्रेक्ब। प्रेरित १४:१६; लूका २४:४७<sup>31</sup> मारदे हना काबु नेल्ल आन कली ठीक पा निसाफ पाइब। मेको निसाफ पची नाक्त परमप्रभुमी योव्रशा वोइश्शो बाक्ब। निसाफ पाइब यो योव्रशा वोइश्शो बाक्ब। मेको निसाफ पाइब कली ‘आं योव्रशो बाक्ब’ दे कोइचा कली बेक्शो रे सेंताक्व” दे पावलमी शेंदीमी बाक्त। प्रेरित १०:४२; मत्ती २५:३१-३३

<sup>32</sup> मिनु बेक्शो रे सेंचा पुंडसाक्व, मुर नेल्ल बेक्शो रे सेंचा पुंडसीनीम, दे शेंशो नेंशा, का निक्शीमी “एको फश लोव पाइक्बाक्त, है” दे रिस्समा बाक्त। का निक्शीमी चहिं “इन शेंशो रिम्शो लाक्तक, लेंशा नेंनीकी” दे गाक्मा बाक्त।<sup>33</sup> मिनु पावल मेकेर रे लमाक्त।<sup>34</sup> का निक्शीमी आ लोव थमा सुइश्शा, पावल नु गारमा बाक्त। मोदेशो आ नु गारब का डियोनीसीयस नें पाइश्शो अरीयोपागस डा मुर बाक्माक्त। का डामारीस नें पाइश्शो मीश मुर बाक्माक्त। अरु यो बाक्मा बाक्त।

### कोरिन्थ सहरम शेंशो

**18** मिनु नोले पावल एथेन्स रे लशा, कोरिन्थ सहरमी जाक्दीम्माक्त।

<sup>2</sup> मिनु कोरिन्थ सहरम बाक्मेनु, नक इटाली रे जाक्शो अक्वीला नें पाइश्शो यहूदी नु आ मीश प्रिस्कीला आस कली गुम्सी बाक्त। अक्वीला पोन्टसमी जरमेशो बाक्माक्त। मेको निक्शी डोंइती रोम सहरमी बाक्शो बाक्सा बाक्त। तन्न क्लौदीयस माइश्शो रोमी पिपमी यहूदी नेल्ल आन कली रोम सहरम बाक्चा मगेथु, गुंडशा सोइक्तीके गाक्शा, कोरिन्थ सहरम जाक्शो बाक्सा बाक्त। रोमी १६:३<sup>3</sup> मिनु पावल अक्वीला नु प्रिस्कीला गुम्शा, मेको नु काथा बाक्माक्त। मारदे हना डोंइती पावल मेको आस खोदेशो पा ताम्बु सेल्ब बाक्माक्त। मिनु सांफा दुम्शा गारशा, गेय पामे बाक्त। प्रेरित २०:३४; १कोरिन्थी ४:१२<sup>4</sup> नाइक्तीक नाक्ती पावल यहूदी आन गुम्तीक खिं लशा, यहूदी नु ग्रीक नेल्ल आन कली ख्रीस्त आ पर्बम रुप्पदुमी, दे शेंबाक्माक्त।

<sup>5</sup> मिनु नोले सिलास नु तिमोथी मासीडोनीया रे जाक्शा, मेक जाक्सा बाक्त। मिनु पावलमी “शेंचा गेय ला पाइनुड” देशा, यहूदी आन कली “येसु मेको ख्रीस्त बाक्ब, दे रुपीन” दे शेंना शेंन गाक्बाक्माक्त। प्रेरित १७:१४-१५; २कोरिन्थी १:१९<sup>6</sup> मिनु यहूदीपुकीमी आ शेंशो थमा मसुइक्थु शुक्शी पामेनु, पावलमी आ फेक्शो वा डा फुरकु थुर थुर पा मेको आन कली “गे बेक्शा जाम्शा लाइतीनी हना, आं कली मारेइ देंचा मताइनीनी। मुल डा मेरे यहूदी इन कली शेंचा प्रोंइशा, अर्को रागी डा मुर आन कली शेंथ गाक्नुड” दे मेको आन कली प्रोंइशा गाक्माक्त। प्रेरित १३:५९; नेहेम्याह ५:१५; प्रेरित २०:२६

<sup>7</sup> मिनु परमप्रभु यावे कली मान पाइब तीतीयस-युस्तस नें पाइश्शो मुर आ खिं लशा, मेकेर शेंचा गोवा बाक्त। मेको आ खिं गुम्तीक खिं आ नेक्थान बाक्माक्त।<sup>8</sup> गुम्तीक खिं डा क्रिस्पस माइश्शो ठेयब मुर नु आ खिं डा मुर नेल्ल प्रभु कली थमा सुइक्ब दुम्मा बाक्त। कोरिन्थी शुशेमी यो पावल आ शेंशो नेंशा, थमा सुइश्शा ब्वाक्कुम ख्रुम्शा गुंडचा पुंडसमा बाक्त। १कोरिन्थी १:१४

9 मिनू काबु नाक्टो प्रभुमी पावल कली कौंडतीक कौंडानु “सुइ कली तशा महिनो। शेंस डा शेंस बाक्को। *येरमीया १:८; १कोरिन्थी २:३* 10 मारदे हना गे नु काथा बाक्शा, इ कली कोवनन। मिनू सुइमी इ कली मरिम्शो पने मचाप्नीम। मेको सहरमी बाक्ब शुश मुर आन कली योत्रने थुम्ता” दैशो नैना बाक्ता। *यूहन्ना १०:१६* 11 मिनू पावल बर्स का ६ महिना सम्म कोरिन्थ सहरमी परमप्रभु यावे आ लोत्र शेंना शेंन बाक्माक्ता।

### हुकुम पाइब आ डौंडती रुप्पाइश्शो

12 आकाया रागीमी गाल्लीयो माइश्शो हुकुम पाइब बाक्मेनु, यहूदीपुकी खुम्सीशा, पावल कली ग्याइश्शा, हुकुम पाइब आ डौंडती चाक्दीत्मे बाक्ता। 13 मिनू मेकोपुकीमी “एको मुरुम ‘परमप्रभु यावे आ अरेशो लोत्र मगारचा डा पा परमप्रभु कली ठेयब सेल्चा माल्ब’ दे मुर आन कली शेंब” दे दोस गेमे बाक्ता। 14 मिनू पावलमी एको गेशो दोस आ परबम लोत्र लेत्चा चिक्शो, गाल्लीयोमी लोत्र पचा मगेथु, दोस गेब यहूदी आन कली “एको मुर मरिम्शो पशा, खुइ पा मुर आन कली साइश्शो हना, इन लोत्र नैशा गो निसाफ पड वा। *प्रेरित २५:१८-२०* 15 तन्न लोत्र, नें नु इन परमप्रभु यावे आ अरेशो लोत्र आ परबम बाक्ता हना, गो मेको निसाफ पचा मदाक्नुड। गे आंमा गारीने” दे हुइश्शा सोइक्तीमी बाक्ता। *यूहन्ना १८:३१* 16 मिनू मेको आन कली सोइक्ता बाक्ता। 17 यहूदीपुकीमी गुम्तीक खिं डा ठेयब मुर सोस्थेनेस कली ग्याइश्शा, हुकुम पाइब आ डौंडती तुप्मे बाक्ता। मोपा तुम्मुमानु यो, गाल्लीयोमी मारेइ मपवा बाक्ता।

### थमा सुइक्ब आन थुं बारपाइश्शो

18 मोदैशो दुम्शा नोले पावल शुश नाक्ती सम्म कोरिन्थ सहरम बाक्माक्ता। मिनू अक्वीला नु नोले थमा सुइक्ब लोक्ब आन कली “लो, मुल लची जाक्ती” दैशा, जहाज डौइश्शा, सिरिया गे लमाक्ता। अक्वीला नु प्रिस्कीला यो पावल नु सिरिया गे लसा बाक्ता। केन्त्रेया सहरमी जाक्दीश्शा, पावलमी आ चां प्रेक्गा बाक्ता। मारदे हना कसम जशो बाक्माक्ता। *प्रेरित २१:२४-२६* 19 मिनू एफिसस सहरमी जाक्दीश्शा, प्रिस्कीला नु अक्वीला आस कली “लो, गे एके बाक्कीसे” दे प्रौइशा वोइक्सी बाक्ता। मिनू पावल चहिं गुम्तीक खिं लशा, यहूदीपुकी नु लोत्रसी पचा गोवा बाक्ता। 20 मिनू यहूदीपुकीमी “इच्का नाक्ता बाक्शा शेंदीकी” देंमानु “गो बाक्ने मचाप्नुड। 21 परमप्रभु यावेमी लेशशा सोइक्ताक्वी हना, लेशशा जाक्शा शेंनन्नी” दे एफिसस रे लशा जहाज डौइसे बाक्ता। *याकूब ४:१५* 22 मिनू सिजरियामी जाक्दीश्शा, यरूसलेम ग्येथ लशा, थमा सुइक्ब आन कली गुम्शा, एन्टीओकमी जाक्दीम्माक्ता। *प्रेरित २१:१५* 23 मिनू इच्का नाक्ता एन्टीओकमी बाक्शा, मेकेर रे लशा, गलातीया नु फ्रिगीया रागीमी जाक्दीश्शा, तेइ तेइ हिरशा, थमा सुइक्ब आन कली गुम्शा, आन थुं बारपाइक्तीक लोत्र पना पन गाक्माक्ता।

### आपोल्लोसमी एफिससम शेंशो

24 मिनू एफिसस सहरमी मार दुम्माक्ता देंशा हना, अलेकजेन्दीया रागीमी जरमेशो आपोल्लोस माइश्शो यहूदी मुर का जाक्माक्ता। मेको शुश पढेशा, परमप्रभु यावे आ लोत्र रुप्शा, अरु आन कली यो रुप्पाइक्ने चाप्ब बाक्माक्ता। *१कोरिन्थी ३:५-६* 25 प्रभु येसु आ परबम शेंसीशा जोक्शो बाक्माक्ता। सक्ति पाइश्शो लोत्र पने चाप्ब बाक्माक्ता। मिनू येसु आ लोत्र दोदैशो बाक्मे, मोदैशोन शेंबाक्माक्ता। ब्वाक्कुम खुम्शा गुंइचा आ परबम चहिं यूहन्नामी दोदैशो पशो बाक्मे, मेको ला तुइश्शो बाक्माक्ता। *प्रेरित १९:३*

26 मिनू मेको एफिससमी जाक्दीम रे यहूदी आन गुम्तीक खिंमी शेंचा गोवा बाक्ता। सुइ कली तशा महिंथु, येसु आ परबम शेंदा बाक्ता। मिनू प्रिस्कीला नु अक्वीलामी आपोल्लोस आ शेंशो नैशा, आस खिं लाइश्शा, परमप्रभु यावे आ परबम शुश लोत्र तेम्शा रुप्पदसे बाक्ता।

27 मिनू काबु आपोल्लोसमी “आकाया रागीमी हिरशा, शेंथ लाइनुड” देंमेनु, थमा सुइक्ब लोक्बपुकीमी “दुम्ब” देंमा बाक्ता। मिनू आकाया रागीमी बाक्ब थमा सुइक्ब आन कली चिठी ब्रेक्शा “आपोल्लोस इन बाक्तीके

जाक्मेनु, मान पा ब्रने, आ लोत्र नेनीने” दे ब्रेक्शा सोइक्तमे बाक्ता। मिनू मेकेर जाक्दीश्शा, थमा सुइक्ब आन कली गुम्शा, आन थुं बारपाइक्मी बाक्ता। 28 थमा मसुइक्ब यहूदी नु लोत्र पवानु, परमप्रभु यावे आ लोत्र रे पा शेंशा, येसु मेको खीस्त बाक्ब, दे लोत्र शेंदा बाक्ता। मिनू यहूदीपुकीमी मारेइ देंने मचाप्मे बाक्ता। *प्रेरित ९:२२; प्रेरित १७:३*

### परमप्रभु आ सोक्ता आ परबम शेंशो

19 आपोल्लोस मोपा शेंना शेंन गाक्शा, कोरिन्थ सहरमी जाक्दीम्माक्ता। पावल चहिं एफिससमी जाक्दीम्माक्ता। मिनू प्रभु आ लां खोइक्ब आन कली गुमा बाक्ता। 2 मिनू पावलमी मेको आन कली “गेपुकीमी थमा सुइक्ब दुम्नीनु, परमप्रभु यावे आ सोक्तीम प्रिंचा पुंडसीनी?” दे हिल्लो पवानु “ममाइ, गो परमप्रभु यावे आ सोक्ता मतुइक्नीकी। मेको आ परबम मनैशो यो बाक्नीक” देंमा बाक्ता। *प्रेरित २:३८* 3 मिनू पावलमी “मो हना सु आ नैमी ब्वाक्कुम खुम्शा गुंइचा पुंडसीनी?” दे हिल्लो पवानु “यूहन्नामी देंशो टिशा, ब्वाक्कुमी खुम्शा गुंइचा पुंडसाक्क” देंमा बाक्ता। 4 मिनू पावलमी “यूहन्नामी मुर आन कली ‘पाप पचा प्रौइशा इन थुं परमप्रभु यावे गे लेत्तीने। मिनू आं नोले जाक्ब कली थमा सुतीने” दे ब्वाक्कुम खुम्शा गुंइदीमी बाक्ता। यूहन्ना आ नोले जाक्शो चहिं येसु बाक्ब” दे शेंदीमी बाक्ता। *मती ३:११* 5 पावल आ लोत्र नैशा, मेकोपुकीमी “लो दुम्ब” दे येसु आ नैमी ब्वाक्कुमी खुम्शा गुंइचा पुंडसमा बाक्ता। 6 मिनू पावलमी आ गुइ आन पिया तारी वोदानु, परमप्रभु यावे आ सोक्तीम ब्रीमा बाक्ता। मिनू आन मतुइश्शो लोत्र पा प्रभु कली ठेयब सेल्मे बाक्ता। मिनू परमप्रभु यावे आ सोक्तीम गेशो लोत्र पामे बाक्ता। *प्रेरित ८:१७; प्रेरित १०:४४,४६* 7 मोदैशो दुम्शोपुकी १२ जना खोइ बाक्मा बाक्ता।

### पावल एफिससम बाक्शो

8 मिनू पावल महिना सां सम्म यहूदी गुम्तीक खिंमी परमप्रभु यावे आ राज्य डा लोत्र शेंना शेंन बाक्माक्ता। सुइ तशा महिंथु, ठेयब थुं पा “थमा सुइश्शा परमप्रभु यावे आ राज्य ओव्रडीन” दे शेंना शेंन बाक्माक्ता। 9 मिनू आ लोत्र नैबपुकीमी थमा मसुइक्थु, नक लां आ परबम गुम्तीक खिंमी शुक्शी लोत्र पतीके मेको मेकेर शेंचा प्रोना बाक्ता। मिनू शेंसीचा दाक्ब आन कली चहिं काथा लाइश्शा, टिरान्नस आ इस्कलमी नैचा दाक्ब आन कली खुप्शा, नाक्ता किंत किंत शेंना शेंन बाक्माक्ता। 10 मिनू बर्स निक्शी सम्म मोपा शेंना शेंन बाक्माक्ता। मोपतीके एसीया डा यहूदी नु ग्रीक नेल्लेमी परमप्रभु यावे आ लोत्र नैचा तामे बाक्ता।

### पावलमी छक लाक्चा डा गेय पशो

11 मिनू परमप्रभु यावेमी शुश छक लाक्चा डा गेय पावल आ गुइ रे पा कौइदा बाक्ता। *प्रेरित १४:३; २कोरिन्थी १२:१२* 12 मुरपुकीमी आन फेक्शो वा, रूमाल लाइश्शा, पावल कली थीबाक्मा बाक्ता। मिनू लेशशा चाक्शा रोइ पाइब आन कली थीपदमेनु, साबाक्मा बाक्ता। वोलमी तशो आन वोल गुशा प्रोक्बाक्मा बाक्ता। *प्रेरित ५:१५* 13 मिनू वोल आन कली खेरशा गाक्ब यहूदी का निक्शीमी पावल आ तस खोइश्शा, प्रभु येसु आ नें थिशा, वोल गुंइशा खेरचा गोत्रमे बाक्ता। मेकोपुकीमी “पावलमी शेंशो येसु आ नैमी यूडो” दे वोल आन कली खेरचा बोल पाइबाक्मा बाक्ता। *लूका ९:४९* 14 यहूदी डा ठेयब चढेब स्केवा माइश्शो मुर आ ७ जना तौपुकीमी मोदैशो पाइबाक्मा बाक्ता। 15 मिनू काबु वोलमी मेको आन कली “येसु कली तुइक्नुड। पावल कली यो तुइक्नुड, गेपुकी चहिं सु ननी?” देंमाक्ता। 16 मिनू वोलम थिशो मुरुमी प्रेक्शा, ग्राम्शा, ग्याइश्शा खोल्शा तुप्स डा तुप्स पा हुश चुइश्शा, मेको आन वा खाक्शा, शिश्रा सेल्मी बाक्ता। मिनू नेल्ल प्रोक्मा बाक्ता। 17 मेको लोत्र तेइ तेइ ब्रशा, एफिससमी बाक्ब यहूदी नु ग्रीक नेल्लेमी नेन्मे बाक्ता। मिनू “येसु आ नैमी हेंथे मब्वाक्चा बाक्माक्ता” दे रुप्शा हिंशा, प्रभु येसु आ नें कली मान पा ठेयब सेल्मे बाक्ता। 18 मिनू येसु कली थमा सुइक्चा क्येडा डौंडती आन मन्तर तन्तर पशो आ परबम “मुल डा मेरे मपाइनीकी” दे थमा सुइक्ब नेल्ल आन कली नैपदमे बाक्ता। 19 मिनू शुश

मन्तर तन्तर पाइब आन मन्तर तन्तर डा किताब चाक्शा, मेको मुर आन डोंइती चोव्रमे बाक्त। मेको किताब कली ५० हजार चांदी के द्राकमे थाप्शो बाक्माक्त। *द्राकमे का देनार यो देंशो बाक्त। मेको नाक्त का डा गाल्च चांदी के क्येट बाक्ब।*

परमप्रभु आ लोव्र बारशा लशो

20 मिनु परमप्रभु यावे आ लोव्र तेइ तेइ ब्रशा सक्ति पाइश्शो दुम्शा बारना बारन लमाक्त। *प्रेरित १२:२४* 21 मेको नोले पावलमी “गो मासीडोनीया नु आकाया लां पा यरूसलेममी जाक्दीत्नुड। मेकेर काबु निक्बु बाक्शा, रोम सहर मजाक्दीत्थु मप्रोंइनुड” दे थुं पवा बाक्त। *प्रेरित २३:११* 22 मोदेशो थुं पशा, तिमोथी नु इरास्तस आस कली मासीडोनीया सोइक्तीम्सी बाक्त। आं चहिं एसीया उइ बाक्माक्त। *२तिमोथी ४:२०*

मूर्ति सेल्बपुकी गाइश्शो

23 एफिससमी बाक्मेनु, मार दुम्माक्त देंशा हना, प्रभु आ नक लां खोइक्चा आ पर्बम राष्शी पोक्चा गोव्रमे बाक्त। *२कोरिन्थी १:८-९* 24 मारदे हना देमेत्रीयस माइश्शो सुन चांदी चेम्ब मुर कामी सुन के आरतेमीस देवी आ मूर्ति सेल्शा लेयशा, शुश क्येट चेम्बाक्माक्त। मूर्ति चेम्ब शुश बाक्मा बाक्त। मेकोमी शुश मुर आन कली गेय गेशो बाक्माक्त। *आरतेमीस लतीन लोव्रमी दिआना बाक्ब।* 25 मिनु काबु मेको आन कली ब्रेश्शा, खुष्शा “आं वारचपुकी, आं लोव्र का निक्शी नेनीने। मूर्ति चेम्शा लेयशा क्येट चेम्शो नय, दे गो नेल्लेमी तुइक्नय। 26 मुल चहिं एको पावल नें पाइश्शो मुरुमी एसीया नेल्ल हिरने थुम्शा, इं एफिससमी जाक्शा, मुर नेल्ल आन कली ‘मुर आन गुइ रे सेल्शो मूर्ति देवी ममाइ’ देंशा शुश मुर आन थुंमी मूर्ति पूजा पचा प्रॉइपाइक्तीमी। मेको इं मिक्वीम ताइतय। 27 मोदेशो दुम्शा, इं गेय ला जाम्शो ममाइ, इं मानेशो आरतेमीस ठेयब देवी आ मन्दिर आ नें यो जाम्शा लचा चिक्ताक्व। मुरपुकीमी मेको कली सेउ पचा प्रॉइचाम्तेक्मे। साइ एसीयामी बाक्ब नेल्लेमी ठेयब सेल्शा, मान पना पन बाक्शो नमी, मुल मारेइ मान मलीब” दे आन थुं खुरपाइक्मी बाक्त। 28 मिनु मेकोपुकीमी “इं एफिसस डा आरतेमीस देवी नेल्ल क्येडा ठेयब देवी बाक्ब” दे शुश रेयके पचा गोव्रमे बाक्त। 29 मिनु मोदेशो पा सहर नेल्ल ठेयब रेयके दुम्माक्त। मुरपुकी दोरशा जाक्शा, सहर डा दिंममी खुम्समा बाक्त। मासीडोनीया रे जाक्शो पावल नु काथा गाक्ब गायस नु अरीस्तारकस आस कली ग्याइश्शा, मेको दिंममी चाक्मे बाक्त। *प्रेरित २०:४* 30 मिनु पावलमी मोदेशो दुम्शो तशा, गो यो देल्लिकेमी लाइनुड देंमेनु, थमा सुइक्बपुकीमी लचा मगोमे बाक्त। 31 एसीया रागी डा सरकार आ गेय पाइब डोंइती डा आ वारचपुकीमी यो “मेक लचा मडुम्ब, है” दे लोव्र नेंपाइक्थ मुर सोइक्तमे बाक्त। 32 दिंममी देल्शोपुकीमी कामी लोव्र का, अर्कोमी अर्को लोव्र पा रेयके ला पामे बाक्त। तन्न मारदे देल्शो, मारदे रेयके पशो, मेको लोव्र हुलपुकीमी मारेइ मतुइक्तमे बाक्त। 33 मिनु यहूदीपुकीमी पोक्शो अलेकजन्डर कली हुल आन डोंइती राप्पाइश्शा “लो, लोव्र पावो” दे मदमेनु, मेकोमी आ गुइ हिम्शा “सिक्सी पा आं लोव्र नेनीने, नेल्ल रुप्पाइक्नन्नी” देंमाक्त। 34 तन्न आ लोव्र पशो रे “एको यहूदी कका बाक्माक्त” दे तुइश्शा “इं एफिसस डा आरतेमीस देवी नेल्ल क्येडा ठेयब देवी बाक्ब, जाइ आरतेमीस, जाइ आरतेमीस” दे घन्टा निक्शी सम्म रेयके पस डा पस ग्रीमे बाक्त।

35 मिनु नोले सहर डा ठेयब मुरुमी मेको आन कली रेयके पचा नाइक्पाइक्मी बाक्त। मिनु “इं एफिसीपुकी, आं लोव्र नेनीने। इं एफिसस सहरमी बाक्ब आरतेमीस देवी आ मन्दिर, आ नें यो नेल्ल क्येडा ठेयब बाक्ब, दे मुर नेल्लेमी ममिन्नीमी डा? सरीड रे दोक्शो मूर्ति कली मान पा ठेयब मसेल्नीमी डा? 36 रागी रागीम बाक्ब मुर नेल्लेमी मानेशा ठेयब सेल्नीमी। मिनु गेपुकीमी मार रेयके पनी? मोदेशो रेयके पचा मडुम्ब। 37 गेपुकीमी ग्याइश्शा चाक्शो मुर निक्शीमी आरतेमीस देवी आ मन्दिर आ नें मक्याम्देस, देवी कली शुक्शी लोव्र यो मपाम्स, मारेइ मरिम्शो मपाम्स। 38 देमेत्रीयस नु आ वारचपुकीमी सुइ कली मुददा पचा थुं पाम्तेक्म हना,

निसाफ पाइब आ डोंइती लशा, उजुर पचा माल्शो। निसाफ पाइब आ डोंइती चाक्शा, दोस गुंइचा माल्शो। 39 निसाफ पाइबमी गारपाइक्ने मचाप्तु हना, गो सहर डा ठेयब जोक्ब तुइक्ब नेल्ल बुक्शा, लोव्र पा गेनीकी। 40 तन्न मुलाक्ती खोदेशो रेयके पचा मडुम्ब। मोदेशो पाइतय हना, गो नेल्ल मरिम्शो पा दोसी दुम्नय, दे रुपीने। मारदे हना एको रेयके मारदे दुम्मे, मेको देंने मचाप्नय” दे माइक्मी बाक्त। 41 मो देंने थुम्शा, मुर आन कली आन खिं खिं सोइक्तीमी बाक्त।

मासीडोनीया नु ग्रीसमी शेंशो

20 मिनु मेको रेयके नाइक्तमे नोले पावलमी थमा सुइक्ब आन कली ब्रेश्शा खुष्शा “थमा सुइक्चा मप्रोंइथु, इन थुं बारपा बाक्कीन” देंशा आन कली मेक उइ प्रॉइशा मासीडोनीया लमाक्त। *२कोरिन्थी २:१३* 2 मासीडोनीयामी हिरना हिरन थमा सुइक्ब आन कली गुम्शा शेंशा, आन थुं बारपाइक्ना पाइक्न गाक्शा, ग्रीस रागी जाक्दीम्माक्त। 3 मिनु ग्रीस रागीमी महिना सां सम्म बाक्शा “मुल जहाज डोइश्शा, सिरीया गे लाइनुड” दे लचावानु “यहूदीपुकीमी आं कली ग्याइक्चा कली लां बाप्शो बाक्नीम” दे तुइश्शा, जहाज डोइश्शा मलथु, गाक्शा मासीडोनीया लमाक्त। 4 पावल नु काथा गाक्ब सु सु बाक्मा बाक्त देंशा हना, बेरोइया डा पुरोस आ तौ सोपाटेर, थिस्सलोनीकी सहर डा अरीस्तारकस नु सेकुन्दस, डेरबे डा गायस, तिमोथी, एसीया डा तिखीकस नु त्रोफीमस बाक्मा बाक्त। *प्रेरित १७:१०; प्रेरित १९:२०; प्रेरित १६:३; एफिसी ६:२१; प्रेरित २१:२९* 5 मेकोपुकी गो आंइ क्येडा डोंइती लशा, त्रोआस सहरमी रिम्शा बाक्मा बाक्त। 6 बोरब ओक्खी मसुष्शो शोब्ले जची नाक्त लाक्शा, फिलिप्पी सहर रे जहाज डोइश्शा, ५ नाक्त नोले त्रोआस सहरमी जाक्दीत्तक। मेकेर आंइ वारच आन कली गुम्शा, ७ नाक्त मेक उइ बाक्तक।

त्रोआसमी बाक्शो

7 आइतबार नाक्त प्रभु भोज जथ खुम्साक्क। मिनु पावलमी दीसा लचा माल्ब देंशा, नाक्दो उइक्थ दुम सम्म शुश लोव्र पाप्तु। *मत्ती २८:१; प्रेरित २:४२,४६* 8 आंइ बाक्शो तला तारी डा कोठा शुश बत्ती दाशो बाक्त। 9 मेकेर युतीकस नें पाइश्शो ठिटा मुर का झेलमी निश्शो बाक्त। मिनु पावलमी शेंना शेंन शुश लाइश्शो लोव्र पवानु, युतीकस मुकु जिशा निन्द्रा पाप्तु। मिनु तला सां तार रे दोक्त। मिनु मुरपुकी कोव्रथ लमानु, बेक्ने थुम्शो थित्तेक्म। 10 मिनु पावल यो यिशा बाप्शा आ रां मुष्शा, एर ऑथ बाक्ब आन कली “मबेक्शो बाक्त। मोपतीके महिनीन” दे माइक्तीमी। *१राजा १७:२१* 11 मिनु लेश्शा कुशा, प्रभु भोज जने थुम्शा नां दाप्ची सम्म शेंना शेंन बाक्त। मिनु गो आंइ लची जाक्मेनु, 12 मेको ठिटा कली सेस तशा, नेल्ल आंइ थुं नाइश्शा ग्येरसाक्क।

मिलेटस जाक्दीश्शो

13 मिनु पावलमी “गे जहाज डोइश्शा, अस्सोस सहर लने। गो चहिं गाक्शा इन कली गुम्नन्नी” देंशा आंइ कली जहाजमी डोइक्पाइश्शा सोइक्ताक्की। मिनु अस्सोसमी जाक्दीत्तक। 14 मिनु अस्सोस सहरमी गुम्शा, पावल यो जहाजमी डोइश्शा गो नेल्ल मितीलेनेमी सहर जाक्दीत्तक। 15 आ दीसा नाक्त खिओस हांबु जाक्दीत्तक। आ नित्थ नाक्त सामोसमी जाक्दीत्तक। मिनु आ सांबु नाक्त मिलेटस जाक्दीत्तक। 16 पावलमी “पेन्तीकोस चाड मानेचा कली यरूसलेम जाक्दीत्त्वा माल्ब। मोपतीके लांमी मयोल्त्वा, एसीयामी मनाइक्वा। एफिससमी यो मनाइक्वा” देंतीके मनाइक्थु गाक्तक। *प्रेरित १८:२१*

एफिसी आन कली लोव्र पशो

17 मिलेटसमी जाक्दीश्शा, पावलमी एफिससमी बाक्ब थमा सुइक्ब आन शेंब खाल्पा आन कली “मिलेटसमी गुम्थ जाक्कीने” दे ब्रथ सोइक्ताक्व। 18 मिनु मेकोपुकी जाक्मानु, पावलमी मेको आन कली “नेल्ल क्येडा डोंइती इन एसीया रागी जाक्डा रे मुल सम्म गेपुकी नु बाक्शा, गो मार शेंदन्नी दोपा

लां कौडन्नी, दोपा गेपुकी नु बाकडा, मेको नेल्ल तुडक्नीनी। प्रेरित १८:१९; प्रेरित १९:१०<sup>19</sup> गो प्रभु आ वाइल दुग्शा, ठेयब मलेत्थु प्रभु आ गेय पना पन गाक्ती। मोपा गाकडानु, यहूदीपुकीमी खेदा पा शुश श्येत गेशा, आं थुं खाइक्पा डाक्पाइक्तीमी।<sup>20</sup> मो पाक्तेक्म हना यो, गो इन खिं खिं हिरशा, इन कली गुग्शा, का का पा शेंशा, इन कली रिग्शा दुग्म्ल, दे तुडक्पाइक्तीनी। खिं खिं हिरशा ला ममाइ। गाउं सहरमी यो हिरशा, मुर आन बुक्तीकेमी जाक्दीश्शा, शेंना शेंन गाक्ती।<sup>21</sup> मोदेंशो शेंशा गाक्शा यहूदी, ग्रीक नु नेल्ल रागी डा मुर आन कली 'पाप पचा प्रौडशा, परमप्रभु यावे गे लेशशा, इं प्रभु येसु ख्रीस्त कली थमा सुइक्व' दे शेंना शेंन गाक्ती।<sup>22</sup> मिनु मुल परमप्रभु यावे आ सोक्तीमी देंशो टिशा, यरूसलेम गे डा लां खोइश्शा गाक्शो बाक्नुड। यरूसलेममी जाक्दीश्शा, आं कली मार दुग्बा, दे मतुडक्नुड। प्रेरित १९:२१<sup>23</sup> लोत्र का ला तुडक्नुड। मारदे हना सहर गाउं तेइ तेइ हिरशा गाकडानु, परमप्रभु यावे आ सोक्त रे पा लोत्र पाइबमी 'यरूसलेम जाक्दीश्शा, शुश श्येत जाइनेवे। जेल्लखानमी चोक्चा पुंडसीनेवे' दे नेंपाइक्तीमी। प्रेरित ९:१६; प्रेरित २१:४, ११<sup>24</sup> गो साइक्वा पुंडसाकड हना यो, एको आं गिम मारेइ ममिन्नुड। प्रभु येसुमी आं कली पपाइश्शो लोत्र 'परमप्रभु यावेमी मुर आन कली शिशी पाइब' आ ग्येरपाइक्ब लोत्र कली तुडक्पाइक्नुड। प्रेरित २१:१३; रतिमोथी ४:७<sup>25</sup> गो इन कली परमप्रभु यावे आ राज्य डा लोत्र नेल्ल तुडक्पाइक्ने थुम्तन्नी। मुल डा मेरे मगुम्नय, दे तुडक्नुड।<sup>26</sup> बेक्शा जाग्शा लाइतीनी हना यो, आं के मारेइ दोस मदुम्ब, इन कली थमा पा देंनुड। इजीकीएल ३:१७-१९; प्रेरित १८:६<sup>27</sup> मारदे हना परमप्रभु यावेमी शेंपाइश्शो लोत्र का यो मखुइक्थु नेल्ल शेंताक्नीनी।<sup>28</sup> गे आंम कली कोवडीने। परमप्रभु यावे आ सोक्तीमी इन कली थमा सुइक्ब आन कली कोवब सेल्लु। गे परमप्रभु यावे आ मुर आन कली मुर आन कली कोवब रिग्शा गोठला दुमीन। मारदे हना मेकोपुकी आ तौ आ हुशेम ग्याप्शो बाक्नीमी। रतिमोथी ४:१६; १पत्रुस ५:२-४<sup>29</sup> गो इन कली प्रौडशा वोइश्शा, गाकडा नोले फरमी बी क्यारश आन कली खेदा पशो खोदेंशो पा खेदा पचा पुंडसीनीनी। मत्ती ७:१५<sup>30</sup> गेपुकी नु काथा गाक्ब थमा सुइक्बपुकी यो मोदेंशो खेदा पाइब फर खोदेंशो दुग्नीम। मेकोपुकीमी दूली लोत्र शेंशा, थमा सुइक्ब आन थुं ग्येत्थ लुक्च क्याल्पाइश्शा, आन नोले खोइक्ब सेल्लीम, दे तुडक्नुड। १यूहन्ना २:१८-१९<sup>31</sup> मोपतीके होस पाइसीने। बर्स सां सम्म श्येत पा डाक्थ्री दुग्शा, गोमी इन कली शेंशो, वारच पशो काइ मप्रेंदीने।<sup>32</sup> मुल गो इन कली परमप्रभु यावे आ गुइमी जिम्मा गेनुड। प्रभुमी इन कली शिशी पा आ लोत्र नेल्ल रुप्चा गेशा, इन थुं बारना बारन लपाइश्शा, आ मुर नेल्ल आन कली गेतीक आसीक गेब, दे तुडक्नुड।<sup>33</sup> गेपुकी नु बाकडानु, इन बाक्शो सुन चांदी वा नेल्ल तशा मवाल्ड। मारेइ मताक्गु।<sup>34</sup> गो आंम आं गुइमी गेय पना पन जाता। गो नु काथा गाक्ब आन कली यो गोन थुल्लामी। प्रेरित १८:३; १कोरिन्थी ४:१२; १थिस्सलोनिकी २:९<sup>35</sup> गो मार पाता हना यो, मचाप्ब आन कली वारच पाइक्वा नमी, दे गेय पा कौइताक्न। प्रभु येसु आ शेंशो लोत्रमी 'ताक्चा क्येडा गेचा रिग्शा बाक्ब' " दैत।<sup>36</sup> मेको लोत्र पने थुग्शा, आ पोक्च थेक्शा मेकोपुकी नु प्रार्थना पाप्नु। प्रेरित २१:५<sup>37</sup> पावलमी "मुल डा मेरे मगुम्नय" देंशो लोत्रमी नेल्ल डाक्तेक्म।<sup>38</sup> मिनु पावल कली "लेंशा मताइसीब" दे मुप्था पुक्पु पशा, जहाज सम्म चोव्रतेक्म।

#### टायर सहरमी जाक्दीश्शो

21 मिनु गो पावल नु गाक्ब नेल्ले जहाजमी डोइश्शा, मिलेटस रे लशा, कोस टापुमी जाक्दीत्तक। आ दीसा नाक्ती रोदोस लाक्शा, पतारा सहर जाक्दीत्तक।<sup>2</sup> पतारामी जहाज रे तोइश्शा, फोनीसीया लाइब जहाज डोइश्शा लाइतक।<sup>3</sup> साइप्रस टापु ताइसीतीक जाक्दीश्शा, साइप्रस गे मलथु, आइदी रे पा ग्रीशा लशा, सिरीया रागी डा टायर सहरमी जाक्दीश्शा तौइसाक्क। मारदे हना मेको जहाजमी कुरशो भारी शौल्चा माल्शो बाक्त।<sup>4</sup> मिनु सहर लशा, थमा सुइक्ब आन बाक्तीके माल्शा, ७ नाक्त सम्म मेकोपुकी नु बाक्तक। मिनु थमा सुइक्बपुकीमी परमप्रभु यावे आ सोक्त रे पा लोत्र पा पावल कली "यरूसलेम मलावो" दे माइक्तेक्म।

प्रेरित २०:२३<sup>5</sup> साता का नोले "गो आंइ लां खोइक्नीकी" देंकानु, मीश मुर वौइश मुर, आल ब्रेच नेल्लेमी चोव्रथ सहर लाक्शा समुन्द्र आ नेक्था सम्म चाक्तेक्म। मिनु पोक्च थेक्शा प्रार्थना पशा ब्राशा, प्रेरित २०:३६<sup>6</sup> गोपुकी जहाज डौइसाक्का, मेकोपुकी चहिं आन खिं खिं लेशशा लाक्तेक्म।

#### पावल सिजरियाम बाक्शो

7 मिनु टायर रे लशा, तोलेमाइस जाक्दीश्शा तौइसाक्क। मिनु थमा सुइक्ब आन कली गुग्थ लशा, काबु काथा बाक्तक।<sup>8</sup> मिनु आ दीसा नाक्ती सिजरिया जाक्दीश्शा तौइसाक्क। मिनु ग्येरपाइक्ब लोत्र शेंब फिलीप आ खिं लशा बाक्तक। योव्रशो गेय पाइब ७ जना डा फिलीप का बाक्शो बाक्त। प्रेरित ६:५; प्रेरित ८:४०<sup>9</sup> फिलीप के ४ जना ग्युंभे मपशो तमी बाक्तेक्म। मेकोपुकी परमप्रभु यावे आ लोत्र पाइब बाक्तेक्म।

10 मोपा फिलीप आ खिंमी बाक्कानु, काबु अगाबस माइश्शो परमप्रभु यावे आ लोत्र पाइब मुर का यहूदीया रागी रे यिशा, आंइ बाक्तीकेमी जाक्त। प्रेरित ११:२८<sup>11</sup> मिनु गोपुकी नु बाक्शा, पावल आ किष्पुम आंम गुइ खोइल फ्रेंसीशा, "परमप्रभु यावे आ सोक्तीमी 'एको किष्पुम किष्ब मुर कली यरूसलेमम जाक्दीश्शा बाक्मेनु, यहूदीपुकीमी एको ओं पा फ्रेंनीमी। मिनु अर्को रागी डा मुर आन गुइमी जिम्मा गेनीमी' " दे नोले दुग्ब लोत्र पाप्नु। प्रेरित २०:२३<sup>12</sup> अगाबस आ मोदेंशो लोत्र नेंशा, गो नेल्लेमी पावल कली "यरूसलेम मलावो, लचा मदुम्ब" दे माइक्तक। मत्ती १६:२२<sup>13</sup> पावलमी चहिं "मारदे डाक्शा ब्रेश्शा, आं थुं खाइक्पाइक्नीनी? मलथु मप्रौइनुड। यरूसलेम जाक्दीश्शा, प्रभु येसु आ नेंमी फ्रेंसीचा ला ममाइ, बेक्चा माल्ती हना यो, बेक्नुड" दैत। प्रेरित २०:२४<sup>14</sup> मिनु मलथु मप्रौइबाक्माक्त, दे रुप्शा, गोपुकीमी "लो, मो हना प्रभु आ दाक्शो दुग्म्ल" दैतक। लूका २२:४२

#### पावल यरूसलेमम जाक्दीश्शो

15 मिनु नोले यरूसलेम लाइतक।<sup>16</sup> सिजरिया डा थमा सुइक्बपुकी यो गो नु गाक्तेक्म। यरूसलेममी जाक्दीश्शा, मेको गो नु गाक्बपुकीमी मनासोन आ खिंमी बास बाक्चा, दे चाक्दीत्तेक्म। मनासोन चहिं साइप्रस टापु डा बाक्माक्त। साइ डौइती रे ख्रीस्त कली थमा सुइक्ब बाक्माक्त।<sup>17</sup> यरूसलेममी जाक्दीक्कानु, मेकेर बाक्ब थमा सुइक्बपुकीमी आंइ कली तशा ग्येरशा ब्राइतीकी।<sup>18</sup> जाक्दीश्शो आ दीसा पावलमी आंइ कली याक्ब आ खिं लाइश्शा, थमा सुइक्ब आन कली शेंब खाल्पा नु गुम्पाइक्नु। प्रेरित १५:१३<sup>19</sup> मिनु गुग्शा सेउ पमुशा, पावलमी अर्को रागी डा मुर आन कली ख्रीस्त आ पर्वम शेंना शेंन गाक्मेनु, परमप्रभु यावेमी दोपा ठेयब गेय पपाइश्शो बाक्मे, मेको लोत्र नेल्ल का का पा रुप्पाइक्तीमी।<sup>20</sup> आ लोत्र नेंशा, परमप्रभु यावे कली ठेयब सेल्लेक्म। मिनु मेकोपुकीमी पावल कली "आंइ लोक्ब, इ देंशो नेल्ल रिग्शा बाक्ब। तन्न गो इ कली लोत्र का निक्शी देंनीकी। इं यहूदीपुकी हजार हजार जना ख्रीस्त कली थमा सुइक्ब दुग्तेक्म, दे तुडक्नेवे। मेकोपुकीमी थमा सुइश्शा यो इं यहूदी अरेशो लोत्र काइ मप्रौइथु पचा माल्ब देंनीमी। प्रेरित १५:१<sup>21</sup> मेकोपुकीमी 'पावलमी अर्को रागी डा मुर नु बाक्ब यहूदी आन कली मोसामी अरेशो लोत्र पचा प्रोनीने, इन आल आन कली खोइक्तीक चिनु मखोतीन' दे शेंना शेंन गाक्ब, देंशो नेंशो बाक्नीमी। प्रेरित १६:३<sup>22</sup> पावल यरूसलेम जाक्माक्त, दे तुडक्नीम।<sup>23</sup> आंइ देंशो पावो। मिनु मेको लोत्र जाक्ब। गो नु बाक्ब ४ जना मुर कसम पशो बाक्तेक्म। प्रेरित १८:१८<sup>24</sup> मोपतीके मेकोपुकी नु गारशा आन कसम जशो खाप्चा कली लावो। मिनु चोव्रखो दुग्शा, नेल्लेमी इन चां प्रेक्सीने। चां प्रेक्शो डा चहिं गे क्येट थाप्तीन। मो पाइतीनी हना, सुइमी मारेइ दोस गेने मचाप्नीमी। इं यहूदी अरेशो नेल्ल पशो बाक्ब, दे नेल्लेमी तुडक्नीमी।<sup>25</sup> अर्को रागी डा ख्रीस्त कली थमा सुइक्ब कली चहिं दोदेंशो शेंचा, दे डौइती कना ब्रेक्शा सोइक्ने थुम्तक। मेको आन कली 'मूर्ति कली चढ़ेशो मजचा, हुश मब्वचा, हुश मचुइक्थु साइश्शो श्ये मब्वचा, तेल्लेम मपचा' दे नेंपाइक्ने थुम्तक" दे माइक्तेक्म। प्रेरित १५:२१, २९<sup>26</sup> मिनु पावलमी मेको आन लोत्र नेंशा, आ दीसा मेको ४ जना नु काथा लशा चोव्रखेचा पुंडसीशा,

परमप्रभु यावे आ खिं ओव्रशा, चोव्रखेतीक नाक्त गेना नुप्बा नु नोले चढेचा, दे चढेब आन कली तुडक्पदमे बाक्त। गन्ती ६:१३-२१; १कोरिन्थी ९:२०

### पावल कली ग्याइश्शो

27 मेको चोव्रखेतीक ७ नाक्त दुम्चा चिक्तानु, यहूदीपुकी एसीया रे जावशा पावल कली ग्याइक्तमे बाक्त। मेकोपुकीमी पावल कली परमप्रभु यावे आ खिंमी बाक्शो तशो बाक्मा बाक्त। 28 मिनु पावल कली ग्याइश्शा, मेकेर बाक्ब मुर आन कली “इं इस्त्राएली, नेल्ल कोव्रथ पिन, है। गो आंइ ग्याइश्शो मुर तेइ तेइ हिरशा, नेल्ल मुर आन कली इं यहूदी आ पर्बम मरिश्शो लोव्र पशो बाक्त। इं अरेशो मपचा, दे दूली शेंबाक्त। परमप्रभु यावे आ खिं आ पर्बम शुक्शी लोव्र पाइक्बाक्त। मोशो ला ममाइ, अर्को रागी डा ग्रीक आन कली परमप्रभु यावे आ खिंमी लाइश्शा ओंइशा, ग्रंग्रा दिशो सेल्शो आंइ मिक्चीमी ताइतक” दे शुश रेयके पा दोस गेमे बाक्त। प्रेरित ६:१३; इजीकीएल ४४:७ 29 परमप्रभु यावे आ खिं ग्रंग्रा दिशो सेल्शो बाक्माक्त, दे मारदे देंमा देंशा हना, एफिसस सहर डा त्रोफीमस कली सहरमी पावल नु काथा गाक्शो तशा, परमप्रभु यावे आ खिं लाइश्शा, ओंइने थुमा बाक्त, दे मिश्शो बाक्मा बाक्त। प्रेरित २०:४; २तिमोथी ४:२०

30 पावल कली दोस गेशो लोव्र सहर नेल्ल ब्रीमाक्त। मिनु सहर डा मुरपुकी दोरशा जाक्शा, शुश रेयके पामे बाक्त। पावल कली ग्याइश्शा कीशा परमप्रभु यावे आ खिं रे गुंडशा लदमे बाक्त। मिनु परमप्रभु यावे आ खिं डा खाल पाइबपुकीमी ठेयब लाप्चो नेल्ल गु ग्रा चोक्गमे बाक्त। 31 मिनु मेको रेयके पाइबपुकीमी पावल कली साइक्चा चिक्तमेनु, यरूसलेमम बाक्ब रोमी लडाइ पाइब आन ठेयब मुरुमी “सहरम क्योरमुशा साइक्मुचा चिक्ताक्म” देंशो नेंशा, 32 आ सिपाही आन कली लाइश्शा दोरशा जाक्दीम्माक्त। मिनु मेकोपुकी जाक्शो तशा, पावल कली तुप्चा प्रोन्मे बाक्त। 33 मिनु लडाइ पाइब आन ठेयब मुरुम पावल कली ग्याइक्पाइश्शा, साडलो निक्शी लिक्तीने देंशा लिक्पाइश्शा आ डोंइती राप्पदा बाक्त। मिनु “एको मुर ते डा बाक्मे? मार पवा?” दे मुर आन कली हिल्लो पचा गोवा बाक्त। प्रेरित २०:२३ 34 मिनु नेल्लेमी रेयके पामेनु, लडाइ पाइब आन ठेयब मुरुमी मारदे रुप्ने मचबा बाक्त। मोपतीके सिपाही आन बाक्तीकेम लाइक्चा माल्ब, दे लदमे बाक्त। 35 मिनु सिपाही आन बाक्तीके जाक्दीश्शा, पावल कली कुरशा, तला तारी लदमे बाक्त। 36 मारदे हना मुरपुकीमी “मेको कली मसाइक्थु मप्रोंइनीकी” दे रेयके पा कोक्के शेशा, मेको आन नोले खोइश्शा लमा बाक्त। प्रेरित २२:२२; लूका २३:१८

37 मिनु तला तारी कुरशा ओंइदमेनु, पावलमी लडाइ पाइब आन ठेयब मुर कली ग्रीक लोव्र रे पा “हजुर, गो लोव्र का निक्शी पचा ताइनडा कों?” देंमेनु, मेको छक लाक्शा “ओहो, ग्रीक लोव्र यो ब्वाक्स जोक्बाक्ते। 38 इजीप्तर रागी डा ४ हजार खुइ आन कली गोरशो रागीमी लां कोंइब मुर दा मनवे” देंमाक्त। 39 मिनु पावलमी “गो इजीप्ती मनड। सिलीसीया डा टारसस सहरमी जरमेशो यहूदी का नड। टारसस सहर तेइ तेइ नेल्लेमी आं नें तुडक्नीमी। गे यो तुडक्नीनी माइ। मेको मुर आन कली लोव्र का निक्शी पचा गेयीनी” देंमाक्त। 40 मिनु लडाइ पाइब आन ठेयब मुरुमी “लो, लोव्र पचा गेनन” देंमाक्त। मिनु पावल गूशा तला तारी डा लाडगाम राष्ठा “लो, सिक्सी पा आं लोव्र नेनीने” दे गुइ हिक्ता बाक्त। मिनु पावलमी हिब्रू लोव्र पा, मुर नेल्ल सिक्सी पामे बाक्त।

### पावलमी सांकळी गेशो

22 मिनु पावलमी हिब्रू लोव्र पा “आं आफ नु लोक्बपुकी, लोव्र का निक्शी नेनीने” देंमेनु, मेकोपुकी थम सिक्सी पा नोफा दाइश्शा बाक्मा बाक्त। 2 मारदे हना पावलमी हिब्रू लोव्र पवानु, मेकोपुकी क्येडा सिक्सी पामे बाक्त। प्रेरित २१:४० 3 मिनु मेकोमी “गो सिलीसीया डा टारसस सहरमी जरमेशो यहूदी नड। आल रे इं यरूसलेममी बाक्शो नड। आं कली शेंब गमालीएल बाक्ब। मेको ठेयब शेंबमी आं कली इं किकी पिपी आन अरेशो लोव्र नेल्ल शेंताक्यी। मिनु गो मेको नेल्ल पना पन बाक्ती। इन पशो खोदेंशो पा गो यो थुं का पा परमप्रभु यावे कली मान पा बोल पाता।

प्रेरित ९:१-२९; प्रेरित २६:९-२०; प्रेरित ५:५४ 4 मोपा बाक्डानु, ख्रीस्त आ लां खोइक्ब आन कली साइक्चा सम्म डा श्येत गेतामी। मीश मुर वोंइश मुर आन कली खेदा पा ग्याइक्पाइश्शा, जेल्खानमी चोक्पाइक्तामी। प्रेरित ८:३ 5 एको आं देंशो थमा बाक्ब, दे ठेयब चढेब नु जोक्ब तुडक्ब खाल्पा नेल्लेम तुडक्नीमी। मेकोपुकीमी दमस्कसमी बाक्ब यहूदी गुम्तीक खिं डा ठेयब मुर आन कली चिठी ब्रेक्शा, ख्रीस्त कली थमा सुइक्ब आन कली ग्याइश्शा यरूसलेम चाक्चा, दे अधिकार गेतीमी। मिनु थमा सुइक्ब आन कली ग्याइक्च दमस्कस लती।

6 दमस्कस सहर जाक्दीत्वाडानु, १२ बजे खोइ दुम्शो बाक्त। मिनु मार दुम्त देंशा हना, सरीड रे जेव हाक्सीशा यिशा, एर ओंथ नेल्ल थम छेडछेड दुम्त। 7 मिनु गो दिड गोल्ती। मिनु ‘सावल, सावल मारदे आं कली खेदा पा श्येत गेयी?’ देंशो नेंता। 8 मिनु गो ‘प्रभु सु ननी?’ दे हिल्लो पडानु ‘गेमी खेदा पशो नासरथ डा येसु नड’ देंशो नेंता। 9 गो नु काथा गाक्बपुकीमी छेडछेड दुम्शो ताम्तेक्मे। लोव्र पशो चहिं मारदे मननेमा। 10 मिनु गो ‘प्रभु, मुल गो मार पाइनुडा?’ देंडानु, प्रभुमी ‘मुल छुल बोक्शा दमस्कस लावो। मेकेर जाक्दीनेनु, मार पचा माल्नेवे, मेको नेल्ल तुडक्पाइक्चा पुंइसीनेवे’ देंशो नेंता। 11 मेको छेडछेडम पतीके गो मिक्च मताइब दुम्ती। मिनु गो नु काथा गाक्ब वारचपुकीमी आं गुइ ग्याइश्शा कीशा, दमस्कस सहरमी चाक्दीत्तीमी।

12 दमस्कसमी हनानीया नें पाइश्शो मुर का बाक्माक्त। परमप्रभु यावे आ अरेशो नेल्ल टिशा, रिश्शो पाइब बाक्माक्त। मेकेर बाक्ब यहूदी नेल्लेमी मेको आ पर्बम ‘रिश्शो पाइब बाक्ब’ देंमा बाक्त। 13 मेको मुर आं कली गुम्थ जाक्त। मिनु आं डोंइती राष्ठा ‘आं लोक्ब सावल, मिक्च ताइब दुमो’ देंमेनु, गो मिक्च ताइब दुम्शा, आं डोंइती राष्ठा ताता। 14 मिनु हनानीयामी ‘इं किकी पिपीमी आन परमप्रभु यावेमी इ कली योव्रशा, आ दाक्शो पचा, दे तुडक्पाइक्ते। मेको ठीक पाइब कली तशा, आ लोव्र नेंतीवी। 15 दोदेंशो पा गुमी, मार लोव्र नेंनी, मेको नेल्ल शुश मुर आन कली तुडक्पाइक्नेवे। 16 मुल कोव्रशा मबाक्को, छुल बोक्शा प्रार्थना पा, हे प्रभु येसु, आं पशो पाप क्याम्शा गेयीनी, दे पुंइशा, ब्वाक्कुमी ख्रुम्शा गुंइने पुंइसो’ दे माइक्ती।

17 मिनु नोले यरूसलेम लेत्ती। मिनु काबु परमप्रभु यावे आ खिंमी प्रार्थना पा बाक्डानु, प्रभुमी कोंइतीक कोंइदीनु, 18 गो प्रभु कली ताता। मिनु प्रभुमी ‘यरूसलेम थु प्रोनो। मारदे हना एकेर बाक्बपुकीमी गेमी आं पर्बम शेंशो लोव्र मननेम’ देंत। 19 मिनु गो ‘प्रभु, गो थमा सुइक्ब आन कली जेल्खानमी चोक्पाइक्तामी। गुम्तीक खिं खिं हिरशा, थमा सुइक्ब आन कली माल्शा तुप्पाइक्तामी, दे तुडक्नीमी। 20 इन पर्बम लोव्र पाइब स्तीफानस कली फुल्लु क्रोम्शा सदमेनु, रिश्शो पाइतीनी, दे माइक्तामी। साइक्ब आन पुइश्शा वोइश्शो वा खाल पा बाक्शो नड। मेको लोव्र नेल्लेम तुडक्शो बाक्नीम’ देंडानु, प्रेरित ७:५८; प्रेरित ८:१ 21 प्रभुमी ‘मेकेर रे लावो। मारदे हना डोन डोन बाक्ब अर्को रागी डा मुर आन कली आं पर्बम शेंथ सोइक्नन’ देंत’ दे पावलमी देंमाक्त। प्रेरित १३:२ 22 डोन डोन बाक्ब अर्को रागी डा मुर आन कली ख्रीस्त आ पर्बम शेंथ सोइश्शो नड देंमे चोटीन आ लोव्र थुम्चा मगेथु “एको कली मसाइक्थु मप्रोंइय। ओं देंशो मुर कली ब्रोंइचा गेचा मडुम्ब” दे शुश रेयके पामे बाक्त। प्रेरित २१:३६ 23 मिनु आन जोंब बोक्शा, आन फेक्शो वा बेरपा फुरक फ्रशा, राष्ठी पोक्शा, मरिश्शो पामे बाक्त। 24 मिनु लडाइ पाइब आन ठेयब मुरुमी मेकोपुकीमी मोदेंशो मरिश्शो पशो तशा, पावल कली आगा ओंइपदा बाक्त। मिनु मुरपुकीमी एको मुर कली तशा, मारदे आन जोंब बोक्मा, एकोमी मार मरिश्शो पवा, दे तुडक्चा कली कोरामी युक्शा, हिल्लो पने, दे आ सिपाही आन गुइमी गेमी बाक्त। 25 मिनु सिपाहीपुकीमी पावल कली फ्रेंशा कोरामी युक्चा चिक्तमेनु, पावलमी मेकेर आ नेक्था राष्ठा बाक्ब कप्तान कली “इं रोमी ऐन कानुनमी रोमी नागरिक आन कली मारदे दोस मगुंइथु, गे कोरामी युक्चा ताइनीनी?” देंमाक्त। प्रेरित १६:३७; प्रेरित २३:२७ 26 मिनु कप्तानमी मुल मार पचा, दे सिपाही आन ठेयब मुर कली हिल्लो पथ लमाक्त। मिनु “कोरामी युक्चा पुंइसीचा डा मुर ममाइ बाक्त। आं यो रोमी नागरिक बाक्त” दे तुडक्पदा बाक्त। 27 मिनु लडाइ पाइब आन ठेयब मुर पिशा “गे थमान रोमी नागरिक नवे? लो देंनो” देंमेनु “नड, हजुर” देंमाक्त। 28 मिनु लडाइ पाइब आन ठेयब मुर “गो शुश



क्येट थाप्शा, रोमी नागरिक दुश्शो नड" देंमेनु, पावलमी "गो दा जरमेशो रेन रोमी नड, हजुर" देंमाक्त।<sup>29</sup> मेको लोव्र नेंशा, कोरामी युक्शा हिल्लो पचा चिक्बपुकीमी "हेत्त, मो पचा मदुश्शो बाक्माक्त" देंमा बाक्त। मेको मुर रोमी नागरिक बाक्माक्त, दे तुइक्त्मे डा मेरे लडाइ पाइब आन ठेयब मुर यो हिंमाक्त। मारदे हना रोमी नागरिक आन कली फ्रेंपाइक्चा लायो मदुम्बाक्माक्त।<sup>30</sup> मिनु मेको लडाइ पाइब आन ठेयब मुर "मेको मुर आ दोस मार बाक्म?" दे रुप्चा माला बाक्त। मोपतीके आ दीसा नाक्ती ठेयब चढ़ेब नु कछडी बाक्ब मुर आन कली खुप्पाइश्शा, पावल कली आ गुइ डा साडलो प्रुइश्शा लाइश्शा, खुम्सीशो मुर आन डोंइती राप्पाइश्शा

पावल कली कछडी राप्पाइश्शा

**23** मिनु पावल मेको आन डोंइती राप्शा, आन कली मिक्च मयाक्थु कोव्रशा, "आं लोकबपुकी, गो साइ रे मूल सम्म आं तुइश्शो जोक्शो रिश्शो ला पाता। एको लोव्र थमा बाक्ब, दे परमप्रभुमी तुइक्ब" देंमेनु, प्रेरित २४:१६<sup>2</sup> हनानीया माइश्शो ठेयब चढ़ेबमी पावल आ नेक्था बाक्ब आन कली "मेरे आ शोव्र रोप्तीने" देंमाक्त।<sup>3</sup> मिनु पावलमी "परमप्रभु यावेमी इ कली कका इ शोव्र रोप्तेक्ल। ब्रेत्चशो गारोमी, बुलु ब्रुइश्शा, बुबु पा तांइसीशो खोदेशो नवे। अरेशो लोव्रमी दोदेशो पा ब्रेक्शो बाक्मे, मोदेशो पा आं कली निसाफ पचा माल्शो नवे। गे अरेशो लोव्र क्येडा दूली पा आं कली तुप्चा माल्ब, देंते" देंमाक्त। मत्ती २३:२७<sup>4</sup> मिनु एर ओंथ बाक्बपुकीमी पावल कली "परमप्रभु यावेमी योव्रशा वोइश्शो ठेयब चढ़ेब कली मोदेशो लोव्र पचा दुम्बा?" देंमा बाक्त।<sup>5</sup> पावलमी "मेको मोदेशो ठेयब चढ़ेब, दे मतुइक्त्, आं लोकबपुकी। तुइश्शो नड हना, मोदेशो लोव्र मदेड वा। मारदे हना परमप्रभु यावे आ ब्रेक्पाइश्शो लोव्रमी 'इन कली अधिकार पचा, दे वोइश्शो आन कली मरिश्शो लोव्र मपचा' दे ब्रेक्शो बाक्ब" देंमाक्त। प्रस्थान २२:२८

<sup>6</sup> मिनु पावलमी कछडीम बाक्बपुकी का निक्शी सदुकी, का निक्शी फरिसी बाक्नीम, दे तुइश्शा, ठेयब सेंदा पा "आं लोकबपुकी, गो फरिसी नड। गो फरिसी आ तौ नड। बेक्शो रे सेंसीशा ब्रोंइचा तांइसीब, दे थमा सुइश्शो लोव्रमी आं कली दोस गेशा, मुददा कोप्ताक्यीमी" देंमाक्त। प्रेरित २२:३; प्रेरित २६:५; गलाती १:१४<sup>7</sup> मो देंमेनु, फरिसी नु सदुकी ब्राशा, जिचा गोव्रमे बाक्त।<sup>8</sup> मारदे हना सदुकीपुकीमी बेक्शो रे मसंसीनीम, स्वर्ग डा गेय पाइबपुकी मबाक्नीम नु परमप्रभु यावे आ सोक्त मबाक्ब देंनीम। तन्न फरिसीपुकीमी चहिं मेको नेल्ल बाक्ब देंनीम। मत्ती २२:२३<sup>9</sup> मोपतीके आन जिचा बारना बारन लशा, शुश रेयके पामे बाक्त। मिनु फरिसी डा शेंब का निक्शीमी बोक्शा "एको मुर के मारेइ दोस मबाक्ब, दे मिन्नीकी। मुर आ मिक्चीम मतांइसीब का नु लोव्र पचा को? परमप्रभु यावे आ स्वर्ग डा गेय पाइब नु लोव्र पचा को? मोदेशो यो दुम्ने चाब्ब" देंमा बाक्त। प्रेरित २५:२५<sup>10</sup> मिनु आन जिचा बारना बारन लशा, तुम्मुचा गोव्रमे बाक्त। मिनु लडाइ पाइब आन ठेयब मुर "पावल कली साइक्नीमी कोर में" दे हिंशा, सिपाही आन कली ब्रेश्शा, पावल कली गुंइशा, सिपाही आन बाक्तीके लेशशा चाक्पदा बाक्त।<sup>11</sup> मिनु मेको नाक्दो प्रभुमी पावल आ नेक्था जाक्शा "दोपा यरूसलेममी आं पर्वम शेंदीमी, मोपा रोम सहरमी यो आं पर्वम शेंशा सांकछी दुम्नेवे। मोपतीके महिंथु, ठेयब थुं पा बाक्को" देंमाक्त। प्रेरित १:८; प्रेरित २५:११-१२; प्रेरित २७:२३-२४

पावल कली साइक्चा माल्शो

<sup>12</sup> मिनु आ दीसा सुनी यहूदीपुकीमी "पावल कली साइश्शो मतया सम्म मारेइ मजय, मत्तुय" दे कसम जशा, पावल कली साइक्चा सल्ला पामे बाक्त।<sup>13</sup> मोदेशो पा कसम जाइब ४० जना क्येडा शुश बाक्मा बाक्त।<sup>14</sup> मेकोपुकीमी ठेयब चढ़ेब नु यहूदी आन जोक्ब तुइक्ब खाल्पा आन कली युम्थ लशा "पावल कली साइश्शो मतका सम्म गो मारेइ मजाइनीकी मत्तूनीकी, दे कसम जाइतक।<sup>15</sup> मोपतीके गे ठेयब मुर नेल्लेमी गारशा, लडाइ पाइब आन ठेयब मुर कली 'पावल कली मारेइ मारेइ हिल्लो

पाइनीकी। मिनु एकर सोइक्तीन' दे मतीन। मिनु एर लां रे गुंइशा पिदमेनु, लां उड साइक्नीकी" देंमा बाक्त।

<sup>16</sup> मेको लोव्र पावल आ भानीजमी नेंना बाक्त। मिनु सिपाही बाक्तीके लशा, पावल कली माल्शा गुम्शा तुइक्पदा बाक्त।<sup>17</sup> मिनु पावलमी कप्तान का ब्रेश्शा "एको ठिटा कली लडाइ पाइब आन ठेयब मुर नु गुम्पतीने। मारदे हना लोव्र का निक्शी तुइक्पाइक्चा माल्ताक्व" देंमाक्त।<sup>18</sup> मिनु कप्तानमी ठिटा कली लडाइ पाइब आन ठेयब मुर आ बाक्तीके चाक्दीशा "हजुर, चोक्सीशो पावलमी आं कली ब्रेश्शा, एको ठिटा कली इन बाक्तीके चाक्दीत्वा। मारदे हना इन कली लोव्र का निक्शी तुइक्पाइक्चा माल्ताक्व देंशा, हजुर, इन बाक्तीक चोव्रथ सोइक्ताक्यी" देंमाक्त।<sup>19</sup> मिनु लडाइ पाइब आन ठेयब मुरुमी पावल आ भानीज कली गुइमी ग्याइश्शा, सुइ मबाक्तीक कोठामी लाइश्शा "मार देंचा दाक्नेवे, लो देनो" दे हिल्लो पवानु,<sup>20</sup> पावल आ भानीजमी "हजुर, यहूदीपुकीमी गारशा, पावल कली गुंइशा, आंइ बाक्तीके सोइक्तीने। लोव्र का निक्शी हिल्लो पचा माल्ताक्व देखु पा इन कली पुंइनीम।<sup>21</sup> मेको आन लोव्र मनंचा। मारदे हना ४० जना क्येडा शुश मुरुमी पावल कली साइक्चा, दे लांम बाप्शा बाक्नीम। मेकोपुकीमी 'पावल कली साइश्शो मतका सम्म मारेइ मजाइनीकी, मत्तूनीकी' दे कसम जने थुम्नेक्म। मिनु हजुरमी पावल कली गेना सोइक्चा, तेको लां रे सोइक्चा, दे योव्रकी पा बाक्शो बाक्नीम" देंमाक्त।<sup>22</sup> मिनु लडाइ पाइब आन ठेयब मुर "एको लोव्र सुइ कली मशेंदो" देंशा सोइक्ता बाक्त।

पावल कली सिजरिया सोइश्शो

<sup>23</sup> मिनु लडाइ पाइब आन ठेयब मुरुमी कप्तान निक्शी आस कली ब्रेश्शा "एको चोक्सीशो पावल कली सिजरिया सहर चोव्रदीचा माल्ताक्व। मोपतीके गे निक्शीमी आपो नाक्दो ९ बजे सहे निक्शी सिपाही, ७० जना शारा डोइक्ब नु सहे निक्शी भाला शेयब आन कली साशा वोतीसे।<sup>24</sup> पावल कली यो शारा का साशा वोतीसे। लांमी पावल कली सुइमी मारेइ पाइक्ने मचाप्मेक्ल, दे रिश्शो पा हुकुम पाइब फेलीक्स आ डोंइती चाक्दीत्तीसे" दे माइक्सी बाक्त।<sup>25</sup> मिनु हुकुम पाइब कली चिठी ब्रेक्ता बाक्त।<sup>26</sup> मेको चिठीमी "हुकुम पाइब फेलीक्स हजुर, गो क्लौदीयस लिसीयस आं के नमस्ते। हजुर, आं के लोव्र का निक्शी नेनीने।<sup>27</sup> एको मुर कली यहूदीपुकीमी ग्याइश्शा, हेरर हेररा साइक्तेक्म। साइक्चाप्तेक्म देंशो नेंशा, गो सिपाही आन कली लाइश्शा, आन गुइ रे प्रोंइता। रोमी नागरिक बाक्माक्त, दे यो तुइक्ताक्ड। प्रेरित २१:३३; प्रेरित २२:२५<sup>28</sup> एको के मार दोस बाक्मे? दे हिल्लो पथ यहूदी आन कछडमी लाइक्पाइक्ता। प्रेरित २२:३०<sup>29</sup> हिल्लो हिक्सी पामेनु, यहूदी आन अरेंतीक लोव्र आ पर्वम दोस गेमे बाक्त। जेल्खानमी चोक्चा, साइक्चा पुंइसीचा डा गेय मारेइ मपशो बाक्त, दे रुप्ता।<sup>30</sup> मिनु यहूदीपुकीमी 'मेको कली साइक्चा, दे गारशो बाक्नीम' देंशो नेंशा, हजुर, इन बाक्तीक सोइक्ताक्ड। एको कली दोस गेब आन कली 'सिजरिया डा हुकुम पाइब आ बाक्तीक लने' दे माइक्नुडमी" दे ब्रेक्ता बाक्त।

<sup>31</sup> मिनु लडाइ पाइब आन ठेयब मुरुमी दोदेशो देंमे, मोदेशो पा कप्तान नु सिपाहीपुकीमी पावल कली लाइश्शा गाक्मा बाक्त। मिनु नाक्दो रे गाक्शा, एन्तीपात्रीसमी जाक्दीम्मा बाक्त।<sup>32</sup> मिनु आ दीसा खोइलीमी गाक्बपुकी यरूसलेम लेम्मा बाक्त। शारा डोइक्बपुकीमी पावल कली सिजरिया चाक्दीत्मे बाक्त।<sup>33</sup> मिनु चाक्दीश्शा, पावल नु चिठी मेको हुकुम पाइब कली जिम्मा गेमे बाक्त।<sup>34</sup> मिनु मेकोमी चिठी पदेशा, पावल कली "इ खिं ते में? तेको रागी डा नवे?" दे हिल्लो पवानु "सिलीसीया रागी डा नड, हजुर" देंमाक्त। प्रेरित २२:३<sup>35</sup> मिनु हुकुम पाइबमी "लो मो हना इ कली दोस गेबपुकी जाक्मल। मिनु इ मुददा कोव्रनुड" देंशा हेरोद आ दरवारमी लाइश्शा, खाल पाइब आन दातेमी वोइक्पदा बाक्त।

हुकुम पाइब आ डोंइती राप्पाइश्शा

**24** मिनु ५ नाक्त नोले ठेयब चढ़ेब हनानीया, यहूदी आन जोक्ब तुइक्ब खाल्पा का निक्शी नु तेरतुल्लस नें पाइश्शो निसाफ पाइब

का सिजरियामी जाक्मा बाक्त। मिनु हुकुम पाइब आ डोंइती पावल कली दोस गेमे बाक्त।<sup>2</sup> मिनु कछडी बाक्मा नाक्ती पावल कली हुकुम पाइब आ डोंइती राष्ट्रमेनु, तेरतुल्लस निसाफ पाइबमी दोस गेशा “माननीय फेलीक्स सरकार, हजुर, इन रिश्शो पा हुकुम पशोमी गो यहूदी नेल्ल थुं नाइश्शा बाक्वा ताइतक। आंइ रागी रिश्शो सेल्चा कली नक लां कोंइताक्नी। मिनु नेल्ल आंइ कली थम रिश्शो दुम्त।<sup>3</sup> इन पशो मारेइ मारेइ रिश्शो बाक्ब, दे गो नेल्लेमी तुइक्नीकी।<sup>4</sup> हजुर, कली शुश मक्योल्चा, दे मिम्नुड। तन्न लोत्र का चहिं पचा गेयीनी।<sup>5</sup> मेको इन डोंइती राष्ट्र वाइश्शो मुर कली गो रिश्शो पा तुइक्नीकी। मेको मुर थम हिंचा डा रोइ खोदेशो बाक्ब। रागी रागी हिरशा गाक्मेनु, यहूदी आन कली पोक्शा मरिश्शो पपाइक्बाक्त। एको नासरथ डा दूली थमा सुइक्ब आन ठेयब मुर बाक्ब। प्रेरित १७:६<sup>6</sup> मोशो ला ममाइ, काबु परमप्रभु यावे आ खिं ग्रांग्रा पचशो बाक्त। मिनु गोपुकीमी ग्याइश्शा, मो पचा मगेक। गो आंइ धर्म डा अरेतीक लोत्र कोत्रशा, सजाइ पाइक्वा देशो नकी। प्रेरित २१:२८-२९<sup>7</sup> तन्न लिसीयस लडाइ पाइब आन ठेयब मुरुम लोत्र पचा मगेथु, आ सिपाहीपुकी चाक्शा, आंइ कली हिंम हिंम पा आंइ गुइ रे रोइश्शा लाइक्नु।<sup>8</sup> मेकोमी आंइ कली ‘मेको मुर आ दोस मार बाक्मे, मेको लोत्र हुकुम पाइब फेलीक्स कली मतीन’ दे हजुर, इन बाक्तीके सोइक्ताक्की। मुल एको मुर कली गे आंमान हिल्लो पना पन आ दोस नेल्ल गुंइने चाप्नीनी। मिनु आंइ गेशो दोस थमा बाक्माक्त, दे तुइक्नीनी” देमाक्त।<sup>9</sup> मेकेर बाक्ब यहूदीपुकीमी यो “एको लोत्र थमा बाक्ब” दे निसाफ पाइब आ देशो लोत्र थोक्शा देमा बाक्त।

<sup>10</sup> मिनु हुकुम पाइबमी पावल कली लोत्र पचा गेवा बाक्त। मिनु पावलमी “हुकुम पाइब, हजुर, एको रागीम शुश बर्स डोंइती रे निसाफ पाइब बाक्नीनी, दे तुइश्शा, गो ग्येरसीशा ठेयब थुं पा आन गेशो दोस नेंशा लोत्र लेल्लुड। मार लोत्र बाक्मे, मेको लोत्र नेल्ल देंनुड।<sup>11</sup> परमप्रभु कली मान पथ, गो एसीया रे यरूसलेममी जाक्शो १२ नाक्त लाइ यो लाक्शो मबाक्ब। आं देशो थमा मदाप्तीनी हना, सु कली हिल्लो पाइतीनी हना यो, नेल्लेमी देंनीम। प्रेरित २१:१७<sup>12</sup> गो यरूसलेममी बाक्डानु, परमप्रभु यावे आ खिंमी, गुम्तीक खिंमी, सहर तेइ तेइ हिरशा, सुइ कली जिचा पोक्वा डा लोत्र मपड। मुर आन कली पोक्शा मरिश्शो यो मपपदुमी। सुइमी मोदेशो मरिश्शो पशो ताइतक देंने मचाप्नीम।<sup>13</sup> आं कली शुश अरु दोस यो गेतीमी। तन्न थमा पा गुंइशा कोंइने मचबेम।<sup>14</sup> लोत्र का चहिं हजुर, इन कली रूपाइक्वन्नी, गो येसु ख्रीस्त आ लां खोइश्शा गाक्नुड। मेकोपुकीमी मेको लां दूली बाक्ब, दे मिश्शो बाक्नीम। ख्रीस्त आ लां खोइश्शा, साइ आं किकी पिपी आन परमप्रभु यावे कली ठेयब सेल्लुड। गो मोसा आ अरेशो लोत्र नु परमप्रभु यावे आ लोत्र पाइबपुकीमी ब्रेक्शो लोत्र नेल्ल थमा सुइक्नुड।<sup>15</sup> गो नु अर्को यो ठीक पाइब नु ठीक मपाइब बेक्शो रे सेंसीचा पुंइसीनीम, दे थमा सुइक्नीकी। दानीएल १२:२; यूहन्ना ५:२८-२९<sup>16</sup> मोपतीके गो परमप्रभु यावे नु मुर आन डोंइती रिश्शो पाइनुड, दे आं थुं फ्रेंशा बाक्नुड। प्रेरित २३:१

<sup>17</sup> मिनु मुल मार देंनुड देशा हना, गो शुश बर्स मुर आन रागीमी हिरथ लशा, साबेर गाबेर यरूसलेम लेश्शा जाक्ती। आंम आंइ यहूदी मारेइ मथीब आन कली मार मार गेथ नु परमप्रभु यावे कली मार मार चढेथ लेश्शा जाक्ती। रोमी १५:२५-२६; गलाती २:१०<sup>18</sup> गो चोत्रखो दुम्शा, परमप्रभु कली मार मार चढेडानु, मेकोपुकीमी परमप्रभु यावे आ खिंमी ततीमी। मेना गो आं का ला बाक्शो नड। मुर आन कली पोक्शा, मरिश्शो यो मपड। मोदेशो एकोपुकीमी यो मतशो बाक्नीम। प्रेरित २१:२७<sup>19</sup> एसीया रे जाक्शो यहूदीपुकी यो परमप्रभु यावे आ खिंमी बाक्तेक्म। मेकोपुकीमी आं कली दोस गेचा गोम्तेक्म। गो दोस गेचा पुंइसीब मुर नड हना, मेकोपुकी एकेर जाक्शा, हजुर इन डोंइती देंचा माल्शो नमी।<sup>20</sup> साबेर यरूसलेममी कछडी पामेनु, मुल इन डोंइती जाक्शोपुकी यो बाक्शो नम। आं कली मार दोस गुंइदमे, मेको लोत्र हजुर, इन कली तुइक्पाइक्वा माल्शो नमी।<sup>21</sup> आं देशो लोत्र का आ पबर्म दोस गेतीमी, दे तुइक्नुड। मेको आं देशो लोत्र मार बाक्ब देशा हना ‘मुर बेक्शो रे सेंसीनीम’ दे थमा सुइक्नुड। मेको आ पबर्म आं कली मुददा कोप्ताक्यीमी। मिनु इन डोंइती राष्ट्राय्यीनी, दे माइक्तामी। मिनु मुल इन डोंइती राष्ट्राय्यीमी” दे पावलमी देमाक्त। प्रेरित २३:६

<sup>22</sup> मिनु फेलीक्स, हुकुम पाइबमी, ख्रीस्त आ लां खोइक्वा आ पबर्म शुश लोत्र तुइश्शो बाक्माक्त। मोपतीके “लिसीयस, लडाइ पाइब आन ठेयब मुर, जाक्शा नोले ला इन लोत्र नेंशा, निसाफ कोत्रशा खोइश्शा गेनन्नी” दे बैठक पोक्शा सोइक्तीमी बाक्त। प्रेरित २३:२६<sup>23</sup> पावल कली कप्तान आ गुइमी जिम्मा गेशा “सिपाहीपुकीमी कोत्रशा, एर ओंथ गाक्वा गेचा। आ वारच जाक्तेक्म हना, गुम्चा गेचा” दे वोइक्पदा बाक्त। प्रेरित २७:३

### पावल सांक्छी दुम्शा

<sup>24</sup> इच्का नाक्त नोले हुकुम पाइब फेलीक्स नु आ मीश द्रुसील्ला जाक्सा बाक्त। आ मीश यहूदी तमी बाक्माक्त। मिनु पावल कली चाक्पाइश्शा, ख्रीस्त कली थमा सुइक्वा आ पबर्म लोत्र पपदसे बाक्त।<sup>25</sup> मिनु पावलमी “ठीक पशो नु ठीक मपशो मार बाक्बा, इं थुं नु रां कली दोपा अरेचा नु परमप्रभुमी मुर नेल्ल आन कली निसाफ पाइब” दे शेंदानु, फेलीक्स हिंशा “लो मोक्ल, मुलाक्ती ओशो ला लोत्र पय। इ लोत्र दीसा नित्थ लेंशा नेंनुड” दे सोइक्ता बाक्त।<sup>26</sup> फेलीक्समी “पावलमी क्येट सुइक्वा को” दे यो आस पशो बाक्माक्त। मिनु लेंशा ब्रेप्वाक्माक्त।<sup>27</sup> मोपा ब्रेत्ता ब्रेत्ता बर्स निक्शी योल्माक्त। मिनु फेलीक्स अर्को रागीमी याक्से बाक्त। आ पा डा हुकुम पाइब पोर्सियस फेस्तस जाक्माक्त। फेलीक्समी यहूदी आन कली ग्येरपाइक्वा, दे पावल आ मुददा मखोइक्थु, चोक्स डा चोक्स वोइश्शा गाक्माक्त।

### फेस्तस आ डोंइती राष्ट्राय्यी

**25** फेस्तस हुकुम पाइब दुम्शा, आ सांबु नाक्ती सिजरिया रे गाक्शा, यरूसलेम ग्येथ लमाक्त।<sup>2</sup> मिनु यरूसलेममी बाक्मेनु, ठेयब चढेबपुकी यहूदी आन ठेयब मुरपुकीमी गुम्थ जाक्शा, फेस्तस कली पावल आ पबर्म लोत्र पामे बाक्त।<sup>3</sup> मार देमा बाक्त देशा हना “पावल कली यरूसलेम लेश्शा सोइश्शा, आ मुददा कोत्रचा माल्ताक्व” दे शुश लोत्र पा पुन्मे बाक्त। मारदे हना, लांमी बाप्शा, साइक्वा, दे लोत्र पशो बाक्मा बाक्त। प्रेरित २३:१५<sup>4</sup> मिनु हुकुम पाइब फेस्तसमी मेको आन लोत्र नेंशा, आन पुंइशो मगेथु “पावल कली सिजरियामी चोक्स डा चोक्स वोइश्शा पिती। मुल शुश नाक्त मबाक्थु, मेरेन लेश्शा लाइनुड।<sup>5</sup> मोपतीके अधिकार तशो इन मुर का निक्शी योत्रशा, गो नु सोइक्तीने। मिनु सिजरियामी जाक्दीश्शा, मुददा कोत्रनुड। मेको मुरुमी मरिश्शो पशो बाक्त हना, दोस गुंइने चाम्सीब” दे माइक्मी बाक्त।<sup>6</sup> मिनु ८, १० नाक्त बाक्शा, सिजरिया लेश्शा यिमाक्त। मिनु आ दीसा नाक्ती कछडी वोइश्शा, पावल कली चाक्पाइश्शा, आ डोंइती राष्ट्राय्यी बाक्त।<sup>7</sup> मिनु आ डोंइती राष्ट्राय्यी, यरूसलेम रे जाक्शो यहूदीपुकीमी शुश दोस गेमे बाक्त। तन्न लोत्र का यो थमा बाक्ब, दे कोंइने मचाप्मे बाक्त।

<sup>8</sup> मिनु पावलमी “आंइ यहूदी आन अरेशो लोत्र का यो दूली मपड। परमप्रभु यावे खिं ग्रांग्रा मपड। रोमी पिप सिजर कली यो मरिश्शो मदेड” देमाक्त।<sup>9</sup> फेस्तसमी यहूदी आन कली ग्येरपाइक्वा दाक्ता बाक्त। मोपतीके पावल कली “गे यरूसलेम लचा दाक्नेवे? इ मुददा मेरेन कोत्रशा गेनन, दुम्बा?” दे हिल्लो पवा बाक्त।<sup>10</sup> मिनु पावलमी “मदुम्ब हजुर, मारदे हना सिजर आ निसाफ पाइबपुकीमी कका आं मुददा कोत्रचा माल्नीम। यहूदी आन कली मरिश्शो मारेइ मपड, दे हजुर, गे यो तुइक्नीनी।<sup>11</sup> गो दूली पाइब दुम्शा, साइक्वा पुंइसीचा डा बाक्ती हना, सजाइ जाइनुड। बेक्वा यो महिंनुड। आं कली दोस गेबपुकीमी दोस गुंइने मचाप्तेक्म हना, आन गुइमी दोपा गेचा पुंइसीनुडा? सिजर पिपी कली आं मुददा कोत्रचा गेने, देंनुड” दे मदा बाक्त। प्रेरित २३:११; प्रेरित २८:१९<sup>12</sup> मिनु फेस्तसमी आ मुरपुकी नु पावल आ मुददा मार पचा, दो पचा, दे लोत्रसी पने थुम्शा, पावल कली “गे सिजर पिप कली इ मुददा कोत्रचा गेचा देंते। मोपतीके सिजर पिप आ बाक्तीके सोइक्वनन” दे माइश्शा, कछडी पोक्शा सोइक्तीमी बाक्त।

## अग्रीप्पा नु फेस्तस लोव्र पशो

13 मिनु इच्छा नाक्त नोले पिप अग्रीप्पा नु बेरनीस हुकुम पाइब फेस्तस कली गुम्थ सिजरिया जावसा बाक्त। 14 मिनु शुश नाक्त बाक्सानु, फेस्तसमी पिप कली पावल आ पब्रम “एक फेलीक्समी मुददा मख्रोइक्थु चोवशा वोइश्शो मुर का बाक्ब। प्रेरित २४:२७ 15 मिनु यरूसलेम लडानु, ठेयब चढेब नु यहूदी आन शॅब खाल्पापुकीमी एको मुर आ पब्रम नेल्ल तुइक्पाइक्तीमी। शुश दोस गेम्तेक्म। मिनु मेको कली सजाइ गेचा, दे पुंडतेक्म। 16 गो मेको आन कली ‘कछडी वोइश्शा, दोस गेबपुकी नु दोस गेचा पुंडसीब कली मगुम्पाइक्थु, दोस मगुंइथु, सजाइ गेचा आंइ रोमी ऐन कानुनम मगारब। दोस गेचा पुंडसीबमी एको आन देशो थमा बाक्ब, दे मर्दम सम्म सजाइ गेचा मदुम’ दे माइक्तामी। प्रेरित २२:२५ 17 मिनु दोस गेबपुकी एक जाक्मा आ दीसा नाक्त कछडी वोइश्शा गुम्पदुमीनु, 18 एको मुरुमी मुर साइश्शो बाक्मे कों, दे मिश्शो नड। तन्न दोस गेमेनु, दोस मारेइ मबा। 19 आन जिमुशो दा आन धर्म आ पब्रम कका बाक्माक्त। लोव्र का दोपा परमप्रभु कली मान पचा आ पब्रम, लोव्र का येसु माइश्शो मुर आ पब्रम बाक्माक्त। यहूदीपुकीमी मेको मुर बेक्त देंबाक्तेक्म। तन्न पावलमी चहिं बेक्शो रे सॅसीशा ब्रॉइश्शो बाक्ब देंबाक्त। 20 मिनु गो मार पड, दो पड दुम्ती। मोपतीके गो पावल कली ‘यरूसलेम लशा, मेरेन इ मुददा कोव्रचा दुम्बा?’ दे हिल्लो पाता। 21 मो देंडानु, पावलमी ‘अगस्टस कली आं मुददा कोव्रचा गेने। सिजर आ बाक्तीकेमी मसोइक्तीनी सम्म चोवशा वोइष्पीनी’ दे पुंडतु। मिनु गो रिश्शो पा वोइक्पाइक्ता। मिनु गेना सोइक्तु, दे लां कोव्रना कोव्रन बाक्ती” देंमाक्त। 22 मिनु अग्रीप्पामी फेस्तस कली “गो मेको मुर आ लोव्र नॅचा दाक्नुड” देंमेनु “सरकार, दीसान इन डोंइती राप्पाइक्नुड” देंमाक्त। लूका २२:८

## अग्रीप्पा आ डोंइती राप्पाइश्शो

23 मिनु आ दीसा अग्रीप्पा नु बेरनीस नु सहर डा सरकार आ ठेयब मुरपुकीमी सरकारी वा फेक्शा जाक्शा, दरवारमी देल्मा बाक्त। मिनु फेस्तसमी पावल कली चाक्पाइश्शा, नेल्ल आन डोंइती राप्पाइक्ता बाक्त। 24 मिनु फेस्तसमी “सरकार अग्रीप्पा, एकेर देल्शो हजुरपुकी, आं लोव्र का निक्शी नेनीने। एको इन डोंइती राप्पाइश्शो मुर कोव्रडीने। यहूदी नेल्लेमी एको कली मरिश्शो मुर, दे दोस गेनीमी। यरूसलेम नु एकेर कछडी वोदमेनु ‘मेको कली साइक्वा माल्ब’ देंन देंन रेयके पाम्तेक्म। प्रेरित २२:२२ 25 गो चहिं मो देंशो साइक्वा पुंडसीब मुर मतड। मिनु एकोमी यो रोमी पिप सिजर अगस्टस कली आं मुददा कोव्रचा गेने, दे पुंडतु। मिनु सिजर आ बाक्तीके सोइक्तु देंती। 26 तन्न सिजर कली एको मुर आ पब्रम मार लोव्र ब्रेक्वा डा? आ दोस गुंइने मचबु। मोपतीके मुलाक्ती अग्रीप्पा सरकार नु हजुर नेल्ल इन डोंइती राप्पाइक्ता। गो नेल्लेमी हिल्लो हिक्सी पा दोस गुंइताक्व हना, सिजर पिप कली ब्रेक्वा सोइक्ने चाण्डु। 27 मारदे हना ओं पा ग्याइश्शा फ्रॅशो मुर कली दोस का यो मगुंइथु, सिजर पिप बाक्तीके सोइक्ताक्ड हना, मुने दोक्सीब, दे मिम्ताक्ड” देंमाक्त।

## पावलमी सांकळी गेशो

26 मिनु पिप अग्रीप्पामी पावल कली “इ लोव्र मार बाक्मे, मेको देनो” दे लोव्र पचा गेवा बाक्त। मिनु पावलमी गुड का पोक्शा, 2 “अग्रीप्पा सरकार, यहूदीपुकीमी शुश दोस गेतीमी। मिनु मेको दोस आ पब्रम हजुर नु लोव्र पचा तडानु, गो ग्येरसाक्थी। 3 मारदे हना यहूदी आन पतीके नु गारचा डा मगारचा डा लोव्र नेल्ल हजुरमी, रिश्शो पा तुइश्शो बाक्नीनी। लोव्र शुश बाक्ब। मोपतीके मब्रीथु, हजुरमी, नॅशा गेचा नड। 4 गो आल रे यरूसलेममी बाक्शा, यहूदी नेल्लेमी आं कली तुइश्शो बाक्नीमी। 5 मेकोपुकी गो शुश धर्म पाइब फरिसी का बाक्ती, दे डोंइती रे तुइक्नीमी। मेकोपुकीमी गो फरिसी का बाक्ती, दे सांकळी दुम्ने चाण्नीम। प्रेरित २३:६; फिलिप्पी ३:५ 6 परमप्रभु यावेमी आंइ किकी पिपी आन कली लोव्र गेशो बाक्माक्त। मिनु मेको लोव्र आ पब्रम दोस ताइब दुम्ती। प्रेरित २८:२०

7 मिनु मेको लोव्र नेल्ल खाप्ब, दे आंइ १२ थर डा यहूदी नेल्लेमी थमा सुइश्शा, परमप्रभु यावे कली नाक्दो नाक्त ठेयब सेल्शा बाक्नीकी। मेको आन थमा सुइश्शो खोदेशो पा गो यो थमा सुइक्ब का नड। मेको थमा सुइश्शो आ पब्रम आं कली दोस गेतीमी, अग्रीप्पा सरकार। प्रेरित २४:१५ 8 परमप्रभु यावेमी बेक्शा लशो आन कली सॅपाइश्शा गेना हना यो ब्रॉइशा बाक्वा गेब देंशो लोव्र थमा सुइक्तीक लोव्र ममाइ डा? हजुरपुकी, एको लोव्र मारदे थमा सुइक्ने मचाप्नीनी? प्रेरित २३:८

9 साइ गो दोपा यो मेको नासरथ डा येसु आ नें क्याम्चा, दे मिश्शो नड। प्रेरित ९:१-२९; प्रेरित २२:३-२१ 10 यरूसलेममी मेको आ नें क्याम्तीक गेय पा गाक्ती। ठेयब चढेबपुकी रे अधिकार तशा, थमा सुइक्ब शुश आन कली जेल्खानमी चोक्पाइक्तामी। मोशो ला ममाइ, थमा सुइक्ब आन कली सदमेनु, गोमी ‘रिश्शो पाइतीनी’ देंती। 11 थमा सुइक्ब आन कली आंइ गुम्तीक खिं खिंमी कीशा चाक्शा तुप्शा, येसु आ नें मरिश्शो सेल्पाइश्शा, मुल डा मेरे मेको लां मखोइक्नीकी देंपाइक्तामी। नेल्ल आन कली साइक्पाइक्नुडमी, दे जोंब बोक्शा गाक्ती। यरूसलेममी ला ममाइ, डोन डोन रागी लशा, खेदा पा श्येत गेतामी।

12 मोपा श्येत गेना गेन गाक्डानु, काबु ठेयब चढेब आन अधिकार तशा, वारच नु गारशा, दमस्कस सहर गे लाइतक। 13 अग्रीप्पा सरकार हजुर, मुल नोफा दाइश्शा नेनीन। नाक्ती उइक्थ दुम्मेनु गाक्कानु, मार दुम्त देंशा हना, नां पशो क्येडा छेडछेड सरीड रे यिशा, आंइ एर ओंथ कोंइताक्व।

14 मोदेशो छेडछेड दुम्शो तशा, गो नेल्ल दिड दाड गोल्तक। मिनु हिब्रू लोव्र पा आं नें थिशा ‘सावल, सावल आं कली मारदे खेदा पा श्येत गेयी? गे आंमा श्येत जाइनेवे’ दे लोव्र पशो नॅता। 15 मिनु गोमी ‘प्रभु, सु ननी’ दे हिल्लो पडानु ‘इ खेदा पशो येसु नड। 16 मुल छुल बोक्को। इ कली योव्रशा आं लोव्र नॅपाइक्ब सेल्लन। मुलाक्त इ कली तपांइसाक्थी। मुल डा मेरे इ कली तपांइसीन सीन बाक्नुड। मिनु मुलाक्ती तशो नॅशो खोदेशो पा नोले यो नॅनेवे, ताइनेवे। मेको लोव्र नेल्ल नॅपाइक्ब सेल्लन। 17 आं लोव्र शॅथ सोइक्नन। आं लोव्र नॅपा गाक्डेनु, यहूदी नु अर्को रागी डा मुर आन गुड रे प्रॉइनुड। 18 मारदे हना मेकोपुकी मिक्च ताइब दुम्मल। छिडछिडमी बाक्शोपुकी छेडछेडमी बाक्वा तामेक्ल। सैतान आ अधिकारमी बाक्शोपुकी परमप्रभु यावे आ अधिकारमी बाक्ब दुम्मल। मेको आन पाप क्याम्चा पुंडसीशा, आं कली थमा सुइश्शोमी आं मुरपुकी नु काथा दुम्शा, आं मुर दुम्मल’ देंशो नॅता। प्रेरित २०:३२

19 अग्रीप्पा सरकार, परमप्रभुमी कोंइशो कोंइतीक तशा, आ लोव्र नॅशा, मेको लोव्र टीब दुम्ती। गलाती १:१६ 20 दमस्कसमी जाक्दीश्शा, लोव्र शॅचा गोव्रता। मिनु यरूसलेममी, यहूदीया रागी हिरशा गाक्ती। अर्को रागी डा मुर आन रागी रागी हिरशा गाक्ती। मोपा गाक्डानु, मुर आन कली ‘पाप पचा प्रॉइशा, इन थुं परमप्रभु यावे गे हिरदीने। मिनु परमप्रभु कली शिरशो गेय पा इन थुं थमा पा हिरशो बाक्त, दे कोंइदीने’ दे शॅना शॅन गाक्ती। 21 मोदेशो शॅशो आ पब्रम यहूदीपुकीमी परमप्रभु यावे आ खिंमी ग्याइश्शा दोस गेशा, साइक्वा पुंडसीब, दे साइक्वा माल्तीमी। प्रेरित २१:३०-३१ 22 खेदा पा शुश श्येत गेयीमीनु, परमप्रभु यावेमी श्येत फाल्तीक सक्ति गेती। मोपतीके गो ठेयब थुं पा इन डोंइती राप्शा, ठेयब मुर आइक्च मुर नेल्ल इन कली आं लोव्र मोसा नु परमप्रभु यावे आ लोव्र पाइब आन लोव्र नु गारब, दे रुपीन। लूका २४:४४-४७ 23 मेकोपुकीमी ‘ख्रीस्तम श्येत जचा माल्ब’ दे ब्रेक्शो बाक्शो बाक्तेक्म। मिनु बेक्शो रे सॅसीशा ब्रॉइशा बाक्ब। बेक्शो रे सॅचा पुंडसीबपुकीमी नेल्ल आन क्येडा डोंइती मेको येसु ख्रीस्त बेक्शो रे सॅसाक्व। मिनु मोपा यहूदी नु अर्को रागी डा मुर नेल्ल आन कली छेडछेड दुम्शो खोदेशो पा आन लां कोंइब दुम्त” दे पावलमी सांकळी गेशा शॅदीमी बाक्त। १कोरिन्थी १५:२० 24 मोपा लोव्र पना पन लदानु, हुकुम पाइब फेस्तसमी आ लोव्र खोइश्शा “पावल, गे बौला, शुश शॅसीशा जोक्ब तुइक्ब दुम्शा, निप्स ग्यशो कका दुमे बाक्त” दे ठेयब सॅदा पा देंमेनु, 25 पावलमी “माननीय फेस्तस हजुर, गो बौला मनड। गो थमा पा आं तुइश्शो रिश्शो लोव्र पाता। 26 अग्रीप्पा सरकारमी आं देंशो लोव्र नेल्ल रुप्शो बाक्ब, दे तुइक्ताक्ड। मोपतीके आं ग्राकी लोकशा लोव्र पाता। सरकारमी ख्रीस्त आ पब्रम ब्रशो शुश लोव्र नॅशा रुप्शो बाक्माक्त। ख्रीस्त आ पब्रम दुम्शो चहिं का निक्शीमी

ला तुइश्शो मनमी। शुशेमी तुइश्शो बाक्नीमी। यूहन्ना १८:२०<sup>27</sup> अग्रीप्पा सरकार, परमप्रभु यावे आ लोव्र पाइब आन लोव्र थमा सुइक्नुड मदेतीनी हना यो, इन थुमी थमा सुइक्नीनी, दे तुइक्ताक्ड” देमाक्त।<sup>28</sup> मिनु पिप अग्रीप्पामी “लोव्र का निक्शीमी गो ख्रीस्त कली थमा सुइक्व दुम्ती” देमेनु,<sup>29</sup> पावलमी “लोव्र का निक्शी पशा हना यो, शुश पशा हना यो, दोपा यो आं खोदेशो दुमीन, दे मिम्नुड। सरकार ला ममाइ, एकेर खुम्सीशा बाक्ब नेल्ल आं खोदेशो दुम्मल। तन्न ग्याइश्शा साडलोम पाइश्शा जेल्खानमी चोक्चा चहिं मपुंडसमल, दे पुंडनुड” देमाक्त।<sup>30</sup> मो देमेनु, पिप छुल बोक्शा गाक्माक्त। मिनु हुकुम पाइब, बेरनीस नु मेकेर बाक्ब नेल्ल छुल छाल बोक्शा गाक्मा बाक्त।<sup>31</sup> मिनु गाक्मानु “एको मुर रिम्शो बाक्माक्त, जेल्खानमी चोक्चा डा, साइक्वा पुंडसीचा डा मबा” देमुशा गाक्मा बाक्त।<sup>32</sup> मिनु पिप अग्रीप्पामी हुकुम पाइब फेस्तस कली “एको मुरुमी सिजर कली आं मुददा कोव्रचा गेने, दे मपुंडशो हना, प्रॉइशा सोइक्ने चाप्स वा” देमाक्त। प्रेरित २५:११

### पावल कली रोम सोइश्शो

27 मिनु पावल कली सिजर बाक्तीके इटाली सोइक्वी जाक्माक्त। मिनु पावल नु अरु चोक्चा पुंडसीशो का निक्शी आन कली अगस्टस पल्टन डा युलीयस नें पाइश्शो कप्तान आ गुइमी जिम्मा गेमे बाक्त। मिनु गो पावल आ वारच का निक्शी यो सासाक्क। प्रेरित २५:१२ 2 सिजरिया रे लशा, अद्रामीत्तीयम जाक्दीश्शा, एसीया लाइब जहाज डोइश्शा लाइतक। मासीडोनीया डा थिस्सलोनीकी रे जाक्शो अरीस्तारकस पावल आ वारच का यो गोपुकी नु लत। प्रेरित २०:४<sup>3</sup> मेकेर रे लशा, आ दीसा नाक्त सीदोन जाक्दीत्तक। मेकेर जाक्दीक्कानु, कप्तान युलीयसमी पावल कली रिम्शो पा आ वारच आन कली गुम्थ लचा गेप्तु। मिनु मेकोपुकीमी पावल कली रिम्शो पाप्तेक्क। प्रेरित २४:२३; प्रेरित २८:१६ 4 मिनु लेशशा जाक्शा, जहाज डोइश्शा, लाइतक। मिनु साइप्रस आ नेक्नेक्था जाक्दीत्तक। मारदे हना फश गिवारमी आइदी लां लचा मगेव। 5 मिनु सिलीसीया नु पाम्फिलीया रागी आस दी डा लां पा लिसीया रागी डा मिरा सहरमी जाक्दीश्शा तौइसाक्क। 6 मिनु कप्तानमी अलेकजेन्द्रीया रे जाक्शो इटाली लाइब जहाज थिश्शा, नेल्ल आंइ कली मेकोमी डोइक्पाइक्तीकी। 7 मिनु लकानु, शुश फश गिवार पा तेक्तीके श्येत पा ओंखां ओंखां लशा, कनीदोस रागी आ नेक्था जाक्दीत्तक। फश गिवार मलीथु, आइक्था रे पा साल्मोने नु क्रेट टापु आस नेक्नेक्था लां रे पा लाइतक। 8 मिनु श्येत पा क्रेट टापु डा जहाज नाइक्तीके जाक्दीत्तक। मेको जहाज नाइक्तीके दारशो जहाज नाइक्तीक नें वोइश्शो बाक्त। मेको लासेया सहर आ नेक्था सेल्शो बाक्त। 9 फश गिवारमी तेक्तीके क्रेटमी जाक्दीत्तका यो शुश नाक्त लाक्शा, माइजा बाक्तीक लाइ यो लाक्तु। में डा मेरे जहाज चलेचा हिंचा पाइब। २कोरिन्थी ११:२५-२६; लेवी १६:२९ 10 मोपतीके पावलमी जहाज चलेब आन कली “हजुरपुकी, एक डा लाक्शा लाइतय हना, फश गिवारमी योल्ब। जहाज नु जहाजमी कुर पशो थोव्रक नेल्ल जाम्ब, गोपुकी यो ब्रॉइंचा मताइनय दे तुइश्शो बाक्नुड। मोपतीके मलचा” देत। 11 कप्तानमी चहिं पावल आ देशो लोव्र थमा मसुइक्थु, जहाज आ होव्रप नु चलेब आन लोव्र नेंतु। 12 मेकोपुकीमी “हिउंदमी एकेर बाक्चा मदुम्ब” देतेक्क। मो देमानु, अरुमी यो “मो हना फोनीकस गे लचा” देतेक्क। फोनीकसमी जाक्दीन्ने चाप्नय। मिनु मेकेरेन हिउंद लाक्चा रिम्शो दुम्ब देतीके लाइतक। फोनीकस चहिं क्रेट टापु डा नेल्ल क्येडा पच्छिममी बाक्ब। 13 मिनु लना लन बाक्कानु, दक्खिन रे इचीची फश पवानु, मुल रिम्शो चलेसीब देशा, जहाज तिक्तीके क्युक्शा वोइश्शा, क्रेट आ नेक्था लां लाइतक। 14 मिनु में चोटीन टापु रे फश गिवार यिशा सुम्तु। मोदेशो फश गिवार कली उत्तर पूर्व डा फश, दे नें वोइश्शो बाक्ब। 15 मोपा सुम्कीनु, जहाज लतीक लां लाइक्ने मचबेम। मोपतीके फश गिवारमी तेइ योल्दल, दे चलेचा प्रॉइतेक्क। 16 मिनु कौदा माइश्शो टापु आ ता जाक्दीश्शा, टापुमी फश गिवार इचीची फारताक्व। मिनु शुश श्येत पा इम्ची डोंगा ब्वाक्कुम

तोक्शा, मेको डोंगा रे गेय पा जहाज कली ठेयब ठेयब डोरीम फ्रेंशा बोल्यो सेल्तेक्क। 17 मिनु सिरतीस माइश्शो बाल्वा बाक्तीकेमी जहाज मओव्रदील, दे जहाज कीब वा फ्रुष्ठा, ओंखां ओंखां पा जहाज लचा गेम्तेक्क। 18 फश गिवार काइ यो मनाइक्थु पना पन बाक्त। मिनु आ दीसा जहाज सोपी दुम्ल, दे जहाजमी कुर पशो भारी शोल्शा ताइक्ताक्मे। 19 मिनु आ नित्थ नाक्ती जहाज कली माल्शो थोव्रक यो ताइक्ताक्मे। मिनु शुश नाक्ती सम्म फश गिवार पना पन नां तास्ला सोरुल मारेइ मताइसे। 20 मिनु गोपुकीम ब्रॉइंचा मताइसीबाक्त, बेक्सीबाक्त देतक।

21 गो शुश नाक्ती सम्म मारेइ मजथु बाक्तक। मिनु पावलमी जहाज चलेब आन डोंइती राप्शा “हजुरपुकी, साबेर आं देशो लोव्र टिचा माल्शो ननी। गोमी क्रेट मलचा देती। गोपुकीमी आं देशो टिशो ननी हना, जहाजमी कुर पशो नु जहाज डा थोव्रक मारेइ ताइक्चा ममाल्द वा। गो यो ओदेशो श्येत मजय वा। 22 मुल मोदेशो दुम्त हना यो, इन थुं बारपा बाक्तीने। मारदे हना सुइ यो मबेक्नय। जहाज ला जाम्शा लाइब, दे तुइक्ताक्ड। 23 दोपा तुइक्ताक्ड देशा हना, गो परमप्रभु यावे कली ठेयब सेल्नुड, मेको आ मुर नड। परमप्रभु यावेमी आ स्वर्ग डा गेय पाइब का कली सोइश्शा, सिनाक्दो आं डोंइती राप्शो ताता। 24 मेकोमी ‘पावल, महिनो। गे सिजर पिप आ डोंइती राप्चा माल्नेवे। ब्वाक्कुम गुम्शा मबेक्नेवे। परमप्रभु यावेमी गे नु बाक्ब नेल्ल यो मबेक्थु, इन कली गेप्तु’ दे माइक्ती। प्रेरित २३:११ 25 मोपतीके इन थुं बार पा बाक्तीन, हजुरपुकी। परमप्रभुमी आ देशो का यो मप्रॉइथु, नेल्ल खाप्ब, दे थमा सुइक्नुड। प्रेरित २८:१ 26 मुल जहाज टापु जाक्दीश्शा, ख्रा दिक्ब, दे तुइक्नुड” दे माइक्तीमी।

27 मिनु १४ नाक्त मोपा योल्स डा योल्स पा अद्रीया समुन्द्र लाक्शा, काबु नाक्दो जहाज चलेबपुकीमी तेक कका डा रागी ताइसीशो खोदेशो ताप्तेक्क। 28 मिनु ब्वाक्कु पुक्तीके ख्मशा पुक्गामेनु, २० ओरग्या बाक्त। मिनु इच्ची नोले बारशा लशा लेंशा पुक्गामेनु, १५ ओरग्या बाक्त। ओरग्या का १,८५ मिटर बाक्ब। 29 मिनु सेरथे फुल्लुम थोक्सीशा, जहाज बिग्रेसीब देशा जहाज तिक्तीके ४ ओटा तोक्शा, जहाज कली तिक्शा नाइक्पाइक्तेक्क। मिनु गेना नां सोव्रबा, दे रिम्शा बाक्तक। 30 नां मसोव्रथु जहाजम गेय पाइबपुकीमी जहाज तिक्तीके तोक्खु पा आइक्च डोंगा तोक्शा, जहाज प्रॉइशा प्रोक्चा माल्मे बाक्त। 31 मिनु पावलमी मेको आन मो पचशो तुइश्शा, कप्तान कली “मेकोपुकी प्रोक्शा गाक्तेक्क हना, गो नेल्ल गुम्शा बेक्नय” दे माइक्तु। 32 मिनु सिपाहीपुकीमी डोंगा डा डोरी खोइश्शा तोक्शा, मेको आन कली प्रोक्चा मगेम।

33 मिनु नां सोव्रमेनु पावलमी नेल्ल आन कली “मजशो, मइप्शो मुलाक्त १४ नाक्त दुम्त। 34 मोपतीके मुल इच्ची खोइ जय। मिनु बोल ताइनय। महिनीन। मारदे हना सुइ के चां का यो महम्ब” दे नेल्ल आंइ थुं बारपाइक्तु। मती १०:३० 35 मिनु शोब्ले आ गुइमी शेशा, प्रभु कली “गे रिम्शो पाइब बाक्नीनी” देशा, जिक्शा नेल्ल आंइ कली योक्तु। 36 मिनु नेल्ल आंइ थुं बारशा जाइतक। 37 मेको जहाजमी २७६ जना मुर बाक्शो नकी। 38 मिनु रूथी जशा, जहाजमी कुर पशो चेरब ताइक्ताक्म।

39 मिनु नां सोव्रमेनु, मेको डोंइती ताइसीशो रागी मार रागी बाक्मे, दे मतुइक्तक। बाल्वा ला ताइसाक्व। 40 मेको बाल्वा बाक्तीके चाक्दीश्शा, जहाज तिक्तीके खोइश्शा, ब्वाक्कुमी प्रॉइतेक्क। मिनु चलेतीके आ डोरी प्राक्शा, वा क्युक्शा वोइश्शा, फशेमी जहाज कली गाक्पा बाल्वा गे लाइक्तेक्क। 41 मो पामेनु, जहाज बाल्वामी ओव्रदीश्शा, आ शोव्र गुक्साक्व। आ मीलु चहिं ब्वाक्कुम आप्शा जिक्त। 42 एको चोक्सीशा लाइश्शोपुकी प्रोक्नीमी कोर में, दे हिंशा, सिपाहीपुकीमी मेको आन कली प्रोक्चा मगेथु साइक्चा, दे मिम्शो बाक्मा बाक्त। 43 कप्तानमी चहिं “पावल कली मसाइक्थु ब्रॉइंचा गेचा” दे आ थुं फ्रेंशो बाक्माक्त। मोपतीके सुइ कली साइक्चा मगेव। दोम्ली ग्यारस जोक्ब आन कली दोम्ली ग्यारशा रागीमी गूडीन, दे सोइक्ताक्मी। 44 दोम्ली ग्यारस मजोक्बपुकीमी चहिं जहाज डा शी फलेक ग्याइश्शा डोइश्शा रागीमी गूमल देत। मोपा सुइ मगुम्थु नेल्ल ब्रॉइशा रागीमी गूतक। प्रेरित २७:२२-२५

## माल्टाम बाक्शो

28 मेको रागीमी गूकानु, माल्टा नें पाइश्शो टापु बाक्माक्त, दे तुइक्ताक्क।<sup>2</sup> मेको टापुमी बाक्बपुकीमी आंइ कली तशा, शिशी पा शुश रिश्शो पा वारच पाक्तेक्क। मेकेर थम ग्यू पा रेड यित। मोपतीके मेकोपुकीमी मी मुइश्शा थेरपाइक्तीकी। २कोरिन्थी ११:२७<sup>3</sup> मी थेरना थेरना बाक्कानु, पावलमी एर ऑथ डा शी खुप्शा चाक्शा चोवानु, मीम होशा गूशो बुस्स कामी आ गुइमी गिल्शा कोक्तु।<sup>4</sup> टापुमी बाक्बपुकीमी पावल आ गुइ बुस्सुम गिल्शो तशा “एको मुर मुर साइक्ब बाक्माक्त। समुन्द्रमी फश गिवाव पा गुम्शा हेररा बेक्शा यो ब्रॉइशा, रागीमी गूशा यो बुस्सुमी कोक्शा बेक्ब दुम्त” देमुक्तेक्क।<sup>5</sup> पावलमी आ गुइ थुर थुर पा बुस्स कली मीम हुम्ताक्क। मिनु आ कली मारेइ मडुम। मर्कूस १६:१८<sup>6</sup> मुरपुकीमी पावल कली कोक्स डा कोक्स पाक्तेक्क। मारेदे हना बुस्सुमी कोक्शो मुर इच्ची होम्शा बेक्ब, दे मिश्शो बाक्मा बाक्म। मिनु कोक्स डा कोक्स बाक्मानु, मारेइ मडुम। मोपतीके आन थुं हिरशा “मुर साइक्ब मुर ममाइ, देवता कका बाक्माक्त, है” देमुक्तेक्क। प्रेरित १४:११

## ठेयब मुर आ आफ सापाइश्शो

7 मेको टापु डा ठेयब मुर आ नें पुब्लीयस बाक्माक्त। आंइ जाक्दीत्तीके आ नेक्था पुब्लीयस आ रू, खिं बाक्त। मिनु पुब्लीयसमी आंइ कली गुम्शा, आ खिं लाइश्शा, नाक्त सां सम्म बास जचा तूचा गेशा रिश्शो पाइक्तीकी।<sup>8</sup> पुब्लीयस आ खिंमी बास बाक्कानु, आ आफ ख्युर पा जरो पा रोइ पशो बाक्त। मिनु पावलमी रोइ पाइब कली गुम्थ लशा, आ गुइ मेको तारी वोइश्शा, प्रार्थना पा सापाइक्तु।<sup>9</sup> मोपा सापाइश्शो तशा, टापु डा रोइ पशो मुरपुकी जाक्शा, आन रोइ सापाइसाक्क।<sup>10</sup> मिनु टापु डा मुर नेल्लेमी ग्येरसीशा, आंइ कली मार मार चाक्शा गेक्तेक्क। गाक्चकानु लांमी जचा कली लाम्जी कुम्ज सेल्शा कुरपा सोइक्ताक्क।

## रोम जाक्दीश्शो

11 मेको टापुमी महिना सां सम्म बाक्तक। अलेकजेन्द्रीया रे जाक्शो कस्तोर नु पोल्लुक्स माइश्शो जौले आस नें पाइश्शो जहाज माल्टामी हिउंदमी बाक्बाक्माक्त। मिनु हिउंद लाक्शा, मेको जहाज डोइश्शा गे लाइतक।<sup>12</sup> मिनु सिराकुसमी जाक्दीश्शा, नाक्त सां सम्म बाक्तक।<sup>13</sup> मेकेर रे लशा इच्ची हेरशा, रेगीयम जाक्दीत्तक। मिनु आ दीसा दक्खिन रे फश पशोमी नाक्त निक्शीमी पुटेओलीमी जाक्दीत्तक।<sup>14</sup> मेकेर जाक्दीश्शा, जहाज रे तोइश्शा, सहर लाइतक। मिनु थमा सुइक्ब लोकब आन कली गुम्कानु, मेकोपुकीमी “बाक्कीन, बाक्कीन” देतीके ७ नाक्त सम्म बाक्तक। मिनु रोम सहर गे लाइतक।<sup>15</sup> रोम सहरमी बाक्ब थमा सुइक्ब लोकब ते गुम्थ जाक्चाम्तेक्क देंशो नेंशा, सां-पाटी नु अप्पीयस बजारमी गुम्थ जाक्तेक्क। पावलमी मेको थमा सुइक्ब आन कली तशा, आ थुं बारशा, परमप्रभु यावे कली “गे रिश्शो पाइब बाक्नीनी” दे ठेयब सेल्लु।<sup>16</sup> मिनु रोम सहरमी जाक्दीत्तक। जाक्दीश्शो रे पावल ते ते बाक्चा दाक्ता, मेक मेक बाक्चा गेक्तेक्क। आ कली कोक्ब सिपाही का वोइक्तेक्क। प्रेरित २७:३

## रोममी यहूदी आन कली गुम्शो

17 रोम सहरम जाक्दीश्शो आ सांबु नाक्ती पावलमी रोममी बाक्ब यहूदी आन ठेयब मुर ब्रेश्शा खुप्ताक्की। मिनु मेको आन कली “आं लोकबपुकी, आं

लोव का निक्शी नेनीन। इं यहूदी नु इं किकी पिपी आन पतीके पना पन बाक्ती हना यो, यरूसलेममी बाक्ब लोकबपुकीमी आं कली दोस गेशा ग्याइश्शा, रोमी सरकार आन गुइमी गेतीमी। प्रेरित २३:१<sup>18</sup> मिनु रोमी निसाफ पाइबपुकीमी हिल्लो हिक्सी पशा डा मिन, आं कली प्रॉइचा देंतेक्क। मारेदे हना साइक्चा डा सजाइ गेचा पुंडसीब मारेइ दोस गुंइने मचबेम।<sup>19</sup> यहूदी लोकबपुकीमी प्रॉइचा मडुम्ब देना देंन बाक्मानु, गोमी सिजर कली आं मुददा कोक्चा गेने, दे पुंइता। पिप आ डोंइती इं यहूदी सुइ आन कली मारेइ दोस मगेनुडमी। प्रेरित २५:११<sup>20</sup> इन कली एको लोव नेल्ल रुप्पाइक्थ ब्रेश्शा खुप्ताक्नी। आं दोस चहिं मार बाक्ब देंशा हना, इं इस्राएलीपुकीमी परमप्रभु यावेमी पाप रे प्रॉइब ख्रीस्त कली रागीमी सोइश्शो देंशो लोव थमा सुइश्शो आ परबम साडलो पाइक्चा पुंडसाक्क” दे माइक्तीमी। प्रेरित २६:६-७<sup>21</sup> मिनु मेकोपुकीमी पावल आ लोव नेंशा “इ परबम यहूदीया रे लोव, चिठी का यो मजा। मेक रे एक जाक्शो लोकब सुइमी इ परबम मरिश्शो लोव पा दोस मगेम।<sup>22</sup> गोपुकीमी एको नक थमा सुइक्तीके आ परबम चहिं लोव नेंतक। मेको लोव तेक तेक ब्रामे, मेक मेक जिचा पोक्मे बाक्त, दे तुइश्शो नकी। मोदेंशो दुम्त हना यो, गो इ मिश्शो तुइक्चा दाक्नीकी, लेंशा गुम्चा” दे लोवसी थुम्शा गाक्तेक्क। प्रेरित २४:१४; लूका २:३४

## यहूदीपुकीम ख्रीस्त आ लोव नेंशो

23 मिनु गुम्ची नाक्ती पावल आ बाक्तीकेमी शुश मुर खुम्साक्क। मिनु सुनी रे नाक्दो सम्म पावलमी मेको आन कली एको लोव नेल्ल रुप्पाइक्तीमी। मोसा आ अरेशो नु परमप्रभु यावे आ लोव पाइब आन ब्रेक्शो लोव रे शेंशा, परमप्रभु यावे आ सोइश्शो ख्रीस्त चहिं येसु बाक्ब देंशा, परमप्रभु यावे आ राज्य डा लोव शेंताक्क।<sup>24</sup> आ लोव नेंबपुकी का निक्शीमी आ देंशो थमा बाक्त, दे थमा सुइक्तेक्क। का निक्शीमी चहिं थमा मसुदेम।<sup>25</sup> थमा सुइक्ब नु थमा मसुइक्ब दुम्शा ब्रातेक्क। मिनु गाक्चामेनु, पावलमी थमा मसुइक्ब आन कली “परमप्रभु यावे आ सोक्तीम परमप्रभु यावे आ लोव पाइब यसैया इन किकी पिपी आन परबम ठीक लोव पशो बाक्त।<sup>26</sup> मेकोमी ‘मेको मुर आन कली गुम्थ लावो। मेको आन कली “नेंचा दा नेंनीन। तन्न गे यो मरुप्नीनी। कोक्चा दा कोक्नीन। तन्न मताइनीनी।<sup>27</sup> मेको मुर आन थुं ग्याम्शो बाक्नीम। आन नोफा थांइशो बाक्नीम। आन मिक्च क्रिश्शो बाक्नीम। मोदेंशो मपशो नम हना, आन मिक्चीमी ताम वा, आन नोफाम नेंनेम वा, थुंमी रुबेम वा, आं गे लेम वा, गो सापदुमी वा” दे ब्रेक्शो बाक्त’। यसैया ६:९-१०<sup>28</sup> परमप्रभु यावेमी अर्को रागी डा मुर आन, कली आ लोव नेंपाइक्ब। मेकोपुकीमी नोफा दाइश्शा नेंशा टीनीम, दे तुइक्तीन” दे माइक्तीमी।<sup>29</sup> पावलमी मेको आन कली मोदेंशो लोव पवानु, यहूदी लाम्तेक्क। का निक्शीमी “आ लोव थमा बाक्ब” देंतेक्क, का निक्शीमी “थमा ममाइ” देंतेक्क। मिनु हेरर हेररा जिशा बोक्तेक्क। प्रेरित १३:४६

## पावलमी सांकछी गेचा तशो

30 मिनु पावल बर्स निक्शी सम्म मुर आ खिंमी क्येट थाप्शा बाक्मेनु, शुश मुर पावल कली गुम्थ जाक्मा बाक्त। मेको गुम्थ जाक्ब आन कली “निस्सीने, बाक्कीने, लोवसी पय” दे शुश लोव शेंबाक्माक्त।<sup>31</sup> शेंचा मडुम्ब, दे सुइमी मर्देबाक्मा बाक्त। मिनु ठेयब थुं पा परमप्रभु यावे आ राज्य नु प्रभु येसु ख्रीस्त आ परबम शेंना शेंन बाक्माक्त। एफिसी ६:२०

# रोमी

एको चिठी पावलम रोम सहर डा थमा सुइक्व आन कली ब्रेक्शो बाक्व।

पावलम रोम सहर डा थमा सुइक्व आन कली गुम्चा दाक्वशो बाक्व। कोरिन्थ सहरम बाक्शा, एको चिठी ब्रेक्शो बाक्व। मेको यरूसलेमम ग्याइक्वा पुंडसीशो ५८ ए. डी.म पेन्तीकोस क्येडा डोंइती दुम्शो बाक्व।

१. डोंइती डा लोव
२. मुर नेल्लेम मरिम्शो पशो बाक्तेक्म।
३. येसु ख्रीस्तमी थमा सुइक्व आन कली परमप्रभु आ डोंइती ठीक सेल्ब।
४. थमा सुइक्तीकेम ग्राशो।
५. यहूदी नु रागी रागी डा मुर।
६. ठीक पाइब थमा सुइक्व।
७. नोले डा लोव।

## डोंइती डा लोव

१ गो ख्रीस्त येसु आ वाइल पावल नड। आ सोइश्शो दुम्शा, परमप्रभु यावेमी आ ग्येरपाइक्व लोव तुइक्वाइक्वा कली योवचा पुंडसाक्वी। प्रेरित ९:१५; प्रेरित १३:२; गलाती १:१५<sup>२</sup> मेको लोव साइ नेसी रे परमप्रभु यावे आ लोव पाइबपुकीमी ब्रेक्शो बाक्मा बाक्व। रोमी १६:२५-२६; लूका १:७०; तीतस १:२<sup>३</sup> येसु ख्रीस्त पिप दाऊद आ थरमी मुर दुम्शा, जरमेशो बाक्माक्व। रोमी ९:५; २सामुएल ७:१२; मत्ती २२:४२<sup>४</sup> तन्न मुर ला ममाइ। परमप्रभु यावे आ तौ यो बाक्व। “आं तौ बाक्व” दे तुइक्वाइक्वा कली परमप्रभु यावेमी आ सोक्त आ सक्तिम येसु ख्रीस्त कली बेक्शो रे सेंताक्व। मत्ती २८:१८; प्रेरित १३:३३<sup>५</sup> मिनु येसु ख्रीस्तमी नेल्ल अर्को रागी डा मुर आन कली आ लोव तुइक्वाइक्वा कली शिशी पा योवती। मुरपुकीमी येसु ख्रीस्त आ लोव टीमेक्ल देंशा, शेंथ सोइक्ताक्वी। रोमी १५:१८; प्रेरित २६:१६-१८; गलाती २,७,९<sup>६</sup> इन कली यो येसु ख्रीस्तमी “आं मुर दुम्मल” दे योवतु।

७ गे योवचा पुंडसीशा, परमप्रभु यावे आ दाक्वशो रोम सहरम बाक्वपुकी इन कली एको लोव ब्रेक्ताक्वड। इं आफ परमप्रभु यावे नु प्रभु येसु ख्रीस्तम इन कली शिशी पा इन थुं नाइश्शा बाक्वा गेम्सेक्ल। १कोरिन्थी १:२; २कोरिन्थी १:१-२; एफिसी १:१; गन्ती ६:२४-२६

## रोमी आन कली गुम्चा दाक्वशो

८ गेपुकीमी येसु ख्रीस्त कली थमा सुइश्शो नेल्लेमी तुइक्नीम। मिनु गो आं परमप्रभु यावे कली “रोम सहरम बाक्व आन कली रिम्शो पाइतीनी” दे ठेयब सेल्लुड। रोमी १६:१९<sup>९</sup> मिनु गो परमप्रभु यावे आ सांकछी बाक्व। गो गेय पना पान नु आ तौ आ ग्येरपाइक्व लोव शेंना शेंन बाक्नड। गो इन पर्बम परमप्रभु यावे कली पुंडना पुंडन बाक्नुड, मेको थमा बाक्व। एफिसी १:१६<sup>१०</sup> मिनु परमप्रभु यावे आ दाक्तीकेमी “गो रोम सहरम बाक्व थमा सुइक्व आन कली रीब पा गुम्पाइखीनी” दे यो पुंडना पुंडन बाक्नुड। रोमी १५:२३,३२; प्रेरित १९:२१<sup>११</sup> मारदे हना इन थमा सुइक्तीक थुं बारपा बोल्यो सेलु, दे इन कली गुम गुम दाक्ती। रोमी १५:२९<sup>१२</sup> मिनु मोपा आं थमा सुइश्शोमी इन कली नु इन थमा सुइश्शोमी आं कली नेल्ल इं थुं बारपदल, दे मिम्ताक्वड। २पत्रुस १:१<sup>१३</sup> आं लोकबपुकी, गो शुश खेयप “रोम सहर पिड” देंती, तन्न मुल सम्म पिने मचबु। अर्को रागी डा मुर आन कली येसु ख्रीस्त आ लोव शेंना शेंन गाक्ती। मेको लोव शेंदुनु, शुशेम थमा सुइक्तेक्म। गेपुकी नु यो बाक्शा, येसु ख्रीस्त आ लोव पचा दाक्नुड। मो पडानु, का निक्शी थमा मसुइक्वमी यो थमा सुदमेक्ल, थमा सुइक्व आन थुं

बारल, दे मिम्नुड।<sup>१४</sup> मारदे हना ग्रीक नु अर्को रागी डा, जोक्व नु मजोक्व, पडेशो मपडेशो, नेल्ल आन कली येसु ख्रीस्त आ लोव शेंचान माल्लुड।

<sup>१५</sup> मोपतीके रोमम बाक्व इन कली यो ग्येरपाइक्व लोव शेंचा माल्ती।

## ग्येरपाइक्तीक लोव आ सक्ति

<sup>१६</sup> ग्येरपाइक्तीक लोव शेंना शेंन गाक्डानु, मुने मपथु, शेंनुड। मारदे हना मेको लोवमी परमप्रभु यावे पाप रे प्रोइतीक सक्ति बाक्व। मेको लोव डोंइती यहूदी आन कली तुइक्वाइश्शो बाक्माक्व। नोले ग्रीक आन कली यो तुइक्वाइश्शो बाक्माक्व। भजन संग्रह ११९:४६; २तिमोथी १:८; १कोरिन्थी १:१८,२४<sup>१७</sup> परमप्रभु यावेमी मुर आन कली दोपा ठीक दुम्पाइक्वा, मेको आ लोव रे पा तुंडसीब। मिनु “ठीक पाइब आं कली थमा सुइश्शा ब्रोंइब” दे ब्रेक्शो बाक्व। हबकुक २:४; रोमी ३:२१-२२; गलाती ३:११

## मुर आन मरिम्शो पतीके

<sup>१८</sup> मुरपुकीमी “थमा माइश्शो सु बाक्मे?” दे तुइक्वा मदाक्थु, मरिम्शो थुं पाइश्शो दुम्शा, मरिम्शो गेय पाम्तेक्म। मुर आन कली मोदेंशो पशो तशा, परमप्रभु यावेम आ गाइश्शो कोंइताक्व।<sup>१९</sup> मारदे हना परमप्रभु यावे आ पर्बम मार तुइक्ने चाप्नीमी, मेको परमप्रभु यावेमी कोंइशो बाक्व। प्रेरित १४:१५-१७; प्रेरित १७:२४-२८<sup>२०</sup> मिनु रागी सेल्चा रे मतांडसीशो नु गेना हना यो सक्ति पाइश्शो परमप्रभु यावे आ सरीड नु रागीमी सेल्शो मार मार रे तुंडसीब। मोपतीके मेकोपुकीम मतुइक्तक देंशा, माफ पुंडने मचाप्नीम। भजन संग्रह १९:२; हिब्रू ११:३<sup>२१</sup> परमप्रभु यावे नेल्ल क्येडा ठेयब बाक्व, दे तुइश्शा यो ठेयब मसेलेम। परमप्रभु यावे कली “गे रिम्शो पाइतीनी” दे यो मदेंम। तन्न आन मिम्तीकेमी दूली पना पन बाक्तेक्म। मिनु आन मरुब्ब थुं क्येडा मरुब्ब दुम्त। एफिसी ४:१८<sup>२२</sup> मजोक्थु यो ठेयब लेश्शा बोरशा “गो शुश जोक्व ठेयब नकी” देंतेक्म। मोपा मूर्ख दुम्तेक्म। १कोरिन्थी १:२०<sup>२३</sup> मेकोपुकीम गेना हना यो बाक्व परमप्रभु यावे आ छेडछेड कली बेक्शा लाइब मुर, चिक्व, जन्तु नु गेशा गाक्व जन्तु आन मूर्ति नु फाइक्तेक्म। प्रस्थान २०:४; ब्यवस्था ४:१५-१९; भजन संग्रह १०६; येरमीया २:११<sup>२४</sup> मिनु परमप्रभु यावेमी मो पशो तशा, मेको आन कली प्रोइतु। मिनु आन थुंमी मरिम्शो मिम्शा, ग्रांग्रा दिचा डा गेय पशा बिग्रेपमुम्तेक्म। प्रेरित १४:१६<sup>२५</sup> मेकोपुकीमी परमप्रभु यावे आ थमा लोव कली जोल सेल्लेक्म। नेल्ल सेल्ब परमप्रभु यावे क्येडा आ सेल्शो मुर आन कली ठेयब सेल्लेक्म। गोपुकीमी मारेड मारेड सेल्ब परमप्रभु यावे कली गेना हना यो ठेयब सेल्ल, आमन।<sup>२६</sup> मोपतीके परमप्रभु यावेमी मेको आन कली आन मिम्शो ग्रांग्रा दिचा डा गेय पपाइक्वा कली प्रोइतु। मेको आन मीशेमी यो मगराचा डा

ग्रांग्रा दिचा डा गेय पास्तेक्म। 27 मेकोपुकी वॉइश मुर नु मीश मुर ब्वाइसीचा प्रॉइशा, वॉइश मुर नु वॉइश मुर ब्वाइसाक्म। मोदेंशो मरिश्शो गेय पतीके आन सजाइ तास्तेक्म। लेवी १८:२२; लेवी २०:१३; १कोरिन्थी ६:९ 28 आन थुमी “परमप्रभु यावे कली तुइक्चा ममाल्ब” दे मिम्ताक्म। मोपतीके परमप्रभु यावेमी मेको आन कली आन मरिश्शो मिश्शो पचा गेशा, प्रॉइतु। 29 मिनु आन थुं पापम ब्रीशो दुस्तेक्म। मिनु मार पास्तेक्म देंशा हना, मारेइ मारेइ मरिश्शो ला पमुस्तेक्म, शिम दुस्तेक्म, थुं चोमुस्तेक्मे, रुश पमुस्तेक्मे, मुर साइक्तेक्मे, जिम्तेक्मे, जोल पास्तेक्मे, खुइश्शा मुर आन लोव्र पास्तेक्म। 30 मुर आन कली शुक्शी पास्तेक्मे, परमप्रभु यावे कली काइ मदाक्थु, आइक्च सेल्लेक्मे, शुश तुम्मुस्तेक्मे, ठेयब लेत्तेक्मे, बोरेतेक्मे। मारेइ मारेइ मरिश्शो पचा ला मिम्ताक्मे, आम आफ कली मटीमे, 31 बी ब्यफ खोदेंशो दुस्तेक्मे, देंशो लोव्र मखबेमे, अरु आन कली वारच मपामे, सुइ आन कली मदाक्तमे, शिशी यो मपामे। 32 परमप्रभु यावे आ निसाफ पतीक लोव्र तुइश्शा यो मोदेंशो मरिश्शो पना पन गाक्तेक्म। अरु आन कली आन खोदेंशो मरिश्शो पशो तशा “रिश्शो दुस्त” दे ग्येरसाक्म।

### दोस गेब दोसी बाक्नीम

2 गे अरु आन कली दोस गेचा दाक्बपुकी, नेनीने, सु बाक्तीनी हना यो, दोस गेचा मडुम्ब, दे तुइक्तीन। दोस गेतीनी हना, दोसी दुम्नीनी, मारदे हना दोस गेबपुकी दोस ताइब आन पशो गेय खोदेंशोन पशो बाक्नीम, दे रुपीन। मत्ती ७:२; यूहन्ना ८:७; याकूब ४:१२ 2 परमप्रभु यावेमी मरिश्शो गेय पाइब आन कली ठीक निसाफ पशा, सजाइ गेब, दे तुइक्नय। 3 गे अरु आन कली दोस गेशा, गे चहिं खाल का डा पाइतीनी हना “गो परमप्रभु यावे आ सजाइ रे ब्रॉइचा ताइनीकी” दे मिम्नीनी? 4 मिनु गे परमप्रभु यावेमी मुर आन कली दाक्तीके, फाल्तीके नु आ गे लेत्नीनी कों, दे रिम्तीके कली आइक्च मिम्नीनी? परमप्रभु यावेमी “आन थुं आं गे लेत्नीमी कों” दे रिश्शो मतुइक्तीनी? 2पत्रुस ३:९, १५ 5 इन थुं परमप्रभु यावे गे मलेत्तीके परमप्रभु यावे आ गाइश्शो तेम्नीनी। मिनु आ ठीक निसाफ पची नाक्त शुश सजाइ ताइनीनी। 6 परमप्रभु यावेमी मुर आन पशो कोव्रशा, दोदेंशो पामे मोदेंशो पाइब। येरमीया ३२:१९; मत्ती १६:२७; २कोरिन्थी ५:१० 7 सुमी परमप्रभु यावे आ राज्य माल्शा, रिश्शो गेय पना पन बाक्नीमी नु गेना हना यो ब्रॉइचा माल्नीमी, मेको गेना हना यो परमप्रभु यावे नु बाक्चा ताइनीम। 8 तन्न आंम कली ला मिम्बपुकी, थमा लोव्र मटीबपुकी, जोल लोव्र थमा सुइक्बपुकी परमप्रभु यावे आ गाइश्शो चुरशो ताइनीम। २थिस्सलोनिकी १:८ 9 मरिश्शो पाइबपुकी हिंशा बाक्शा, शुश श्येत जाइनीम। नेल्ल आन क्येडा डोंइती यहूदी सजाइ ताइनीम। मिनु ग्रीक यो सजाइ ताइनीम। 10 रिश्शो पाइबपुकी परमप्रभु यावे आ राज्य जाक्शा, मान तशा, आन थुं नाइश्शा बाक्चा ताइनीम। डोंइती यहूदी आन कली मोदेंशो दुम्ब। मिनु ग्रीक आन कली यो मोदेंशो दुम्ब। 11 मारदे हना परमप्रभु यावेमी मुर आन कली आइक्च जात, ठेयब जात मतिल्थु ठीक निसाफ पाइब। २इतिहास १९:७; प्रेरित १०:३४; कलस्सी ३:२५; १पत्रुस १:१७ 12 परमप्रभु यावे आ अरेशो लोव्र मतुइक्थु, पाप पाइबपुकी मेको आन मतुइश्शोमीन जाम्शा लाइनीम। परमप्रभु यावे आ अरेशो लोव्र तुइश्शा यो पाप पाइबपुकी मेको लोव्रमीन निसाफ पचा पुंइसीनीम। 13 परमप्रभु यावे आ अरेशो लोव्र नेंशा ला मुर ठीक मडुम्नीम। आ देंशो पशा ला ठीक दुम्नीम। ब्यवस्था ६:२५; मत्ती ७:२१; याकूब १:२२ 14 मोपतीके अर्को रागी डा मुरपुकीमी परमप्रभु यावे आ अरेशो लोव्र मतुइक्ताक्म हना यो, मार पचा दुम्बा, मार पचा मडुम्बा, दे तुइश्शा, गेय पाइनीमी, मेको आन आगामी अरेशो लोव्र बाक्ब। प्रेरित १०:३५ 15 मेको मुर आन थुमी अरेशो लोव्र ब्रेक्सीशो बाक्ब, दे कोंइनीम। मेको आन थुमी आन पशो आ पबर्म रिश्शो बाक्ब देय मरिश्शो बाक्ब सांकळी गेब। रोमी १:३२ 16 मिनु परमप्रभु यावे आ निसाफ पची नाक्त मुर आन खुइश्शा पशो कली निसाफ पाइब। आं शेंशो ग्येरपाइक्तीक लोव्र परमप्रभु यावेमी येसु ख्रीस्त आ पतीकेमी निसाफ पाइब। लूका ८:१७

### यहूदीम यो पाप पशो

17 मिनु गे “गो यहूदी ठेयब जात नकी। परमप्रभु यावे आ अरेशो ताइतक, आ योव्रशो मुर नकी” दे मिम्नीनी। 18 परमप्रभु यावे आ दाक्शो तुइक्तीनी, मार पचा दुम्बा, मार पचा मडुम्बा तुइक्तीनी। मारदे हना गे अरेशो लोव्र शेंसीशो बाक्तीनी, 19 इन थुमी “गो जोक्ब नड, गो मिक्च मताइब आन कली लां कोंइब नड। छिडछिडम बाक्ब आन कली बत्ती दाब नड। मत्ती १५:१४ 20 हेंथे गाक्ब आन कली रिश्शो लां कोंइब नड। मर्शेंसीशो आन कली शेंब नड, गो अरेशो लोव्र जोक्ब तुइक्ब बाक्नुड” दे मिम्नीनी। 21 तन्न अर्को आन कली शेंशो, आंम कली मर्शेंसीनीनी। खुइ मपचा दे शेंनीनी। तन्न गे खुइ पाइनीनी। भजन संग्रह ५०:१६-२१; मत्ती २३:२, ४ 22 मुर आन मीश मलाइक्चा, दे शेंनीनी, तन्न लाइक्तीनी। मूर्ति कली तशा, ग्रांग्रा दीनीनी, तन्न मन्दीर रे मूर्ति खुइ पा लाइक्तीनी। 23 परमप्रभु यावे आ अरेशो लोव्र रिश्शो बाक्ब देंनीनी, तन्न इन मटितीकेमी परमप्रभु यावे कली आइक्च सेल्लनीनी। 24 इन मोदेंशो पशो आ पबर्म “अर्को रागी डा मुरपुकीमी परमप्रभु यावे आ नें आ पबर्म शुक्शी पाइनीम” दे ब्रेक्शो बाक्ब। यसैया ५२:५

25 गे खोइक्तीक चिनु खोइश्शा, परमप्रभु यावे आ आ अरेशो लोव्र टीतीनी हना, रिश्शो दुम्ब। तन्न खोइक्तीक चिनु खोइश्शा आ अरेशो मटीतीनी हना, गे खोइक्तीक चिनु मख्रोइश्शो खोदेंशो दुम्नीनी। 26 खोइक्तीक चिनु मख्रोइश्शो, तन्न परमप्रभु यावे आ ठीक पतीक नेल्ल पाइब हना, मेको खोइक्तीक चिनु खोइश्शो खोदेंशो बाक्ब। गलाती ५:६ 27 मेको अर्को रागी डा खोइक्तीक चिनु मख्रोइश्शो मुरपुकीमी यहूदी आन क्येडा आंमा आन थुं रे ठीक पाइनीम। मिनु निसाफ दुम्ची ना परमप्रभु यावे कली मटीब यहूदी आन कली दोस गेनीम। 28 रांमी खोइक्तीक चिनु ला बाक्शा, परमप्रभु यावेमी योव्रशो यहूदी मडुम्नीम। येरमीया ४:४ 29 मार पा यहूदी दुम्नीम देंशा हना, मार पचा दुम्बा, मार पचा मडुम्बा, मेको तुइश्शा, परमप्रभु यावे आ सोक्तीम थुंम खोइक्तीक चिनु खोइश्शा ला परमप्रभु यावे आ मुर दुम्नीम। मेको आन कली मुरपुकीमी ठेयब मसेल्लनीम। तन्न परमप्रभु यावेमी नेल्ल तुइश्शा “रिश्शो पाइतीनी” देंब। ब्यवस्था ३०:६; फिलिप्पी ३:३; कलस्सी २:११

### परमप्रभु आ निसाफ

3 मोदेंशो बाक्त हना, यहूदीपुकीमी अरु आन क्येडा मार ताइनीमी? खोइक्तीक चिनु खोइश्शो मार दुम्बाक्डा? 2 अरु आन क्येडा शुश तशो बाक्तेक्म। डोंइती परमप्रभु यावेमी मेको आन कली आ लोव्र तुइक्पाइक्चा कली योव्रतु। रोमी ९:४; ब्यवस्था ४:७-८; भजन संग्रह १४७:१९-२० 3 का निक्शीमी परमप्रभु यावे आ अरेशो लोव्र मटीमे। मो पास्तेक्म हना यो, परमप्रभु यावे आ लोव्र जोल मडुम्ब। रोमी ९:६; रोमी ११:२९; २तिमोथी २:१३ 4 मुर आन देंशो लोव्र मजाक्दीब्ब। परमप्रभु यावे आ देंशो चहिं गेना हना यो थमा दुम्ब। “इन लोव्र ठीक बाक्ब। इन मुर आन कली निसाफ पतीक यो ठीक बाक्ब” दे ब्रेक्शो बाक्ब। भजन संग्रह ५१:६; भजन संग्रह ११६:११ 5 गो इं मरिश्शो पशो परमप्रभु यावे कली रिश्शो देंशा कोंइताक्च हना, गो मार देंनय डा? परमप्रभु यावेमी मो देंब आन कली सजाइ गेशो मरिश्शो बाक्बा डा? शुश मुरपुकीमी मोदेंशो मिम्नीम। 6 तन्न परमप्रभु यावेमी मेको आन कली सजाइ गेशो मरिश्शो ममाइ। परमप्रभु यावेमी निसाफ मपशो हना, मुर आन कली दोपा दोस गेशा, सजाइ पाइबा? 7 आं मरिश्शो पशोमी परमप्रभु यावे आ रिश्शो पतीके तपाइश्शा, परमप्रभु यावे कली ठेयब सेल्ला हना, मारदे पापी सुइक्चा पुंइसीनुडा? 8 मुरपुकीमी आं लोव्र नेंशा “पापमी परमप्रभु यावे कली ठेयब सेल्ल, दे शेंब” दे आं देंशो लोव्र कली दूली सेल्लेक्म। गो दूली मर्शेंदुमी। मारदे हना पाप पशोमी परमप्रभु यावे कली ठेयब मसेल्ल। मोदेंब आन कली परमप्रभु यावेमी सजाइ गेपु हना, ठीक दुम्ब। रोमी ६:३

### मुर नेल्लेमी मरिश्शो पशो

9 मिनू मार देंचा देंशा हना, अर्को जात क्येडा गो यहूदी रिश्शो मुर नया? मनया. मारदे हना गो यहूदीपुकी यो अर्को जात डा मुर खोदेंशो पा पापी बाकनया. *रोमी १:१८; रोमी २:२४* 10 मिनू “रिश्शो पाइब सुइ मबाक्नीम। रिश्शो पाइब का यो मबाक्ब। *अय्युब ४:१७* 11 परमप्रभु यावे कली तुइक्ब सुइ मबाक्नीम। मेको कली ममाल्ब यो मबाक्नीम। 12 नेल्लेमी रिश्शो लां प्रौइशा हेंथे गाक्नीम। रिश्शो पाइब का यो मबाक्नीम” दे ब्रेक्शो बाक्ब। *भजन संग्रह १४:१-३* 13 “ग्रंग्रा दिचा डा लोव ला पाइनीम। जोल पाइनीम। शुक्शी पा थुं खाइक्चा डा लोव पाइनीम। *भजन संग्रह ५:१०; भजन संग्रह १४०:४* 14 मेको आन शोव सराप नु कशो लोवमी ब्रीशो बाक्ब।” *भजन संग्रह १०:७* 15 “मेकोपुकीमी मारेइ ममिथु मुर साइक्नीम। 16 ते ते गाक्मा, मेक मेक मारेइ महेंथु खतम पाइनीम। 17 दुशा गारशा बाक्चा नु वारच पचा मतुइक्नीम।” *यसैया ५९:७-८; लूका १:७९* 18 “परमप्रभु यावे कली मान पा महिनीम” दे ब्रेक्शो बाक्ब। *भजन संग्रह ३६:२* 19 अरेशो लोव अरेशो टीब आन कली ब्रेक्शो बाक्ब। मेको लोव मटिम्तेक्म हना, सिक्सी पचा माल्नीम। यहूदी नु रागी डा मुर नेल्ल पापी दुम्तेक्म। मोपतीके परमप्रभु यावेमी मुर नेल्ल आन कली निसाफ पाइब। *रोमी २:१२; गलाती ३:२२* 20 मिनू अरेशो लोव पशा, सुइ ठीक मदुम्नीम। मारदे हना आ अरेशो लोव तुइश्शा, गो मरिश्शो पाइब बाकनय, दे तुइक्नय। *भजन संग्रह १४३:२; गलाती २:१६; रोमी ७:७*

### दोपा ठीक सेल्शो

21 तन्न मुल रे अरेशो लोव मबाक्थुन, परमप्रभु यावे रे मुर आन कली ठीक पतीक जाक्शो बाक्ब। परमप्रभु यावेम ब्रेक्पाइश्शो लोव नु आ लोव पाइब आन देंशो गारब। *रोमी १:१७; प्रेरित १०:४३* 22 परमप्रभु यावे आ ठीक पतीके येसु ख्रीस्त कली थमा सुइक्ब नेल्ल आन कली बाक्ब। यहूदी बाक्तेक्म हना यो, अर्को रागी डा मुर बाक्तेक्म हना यो, नेल्ल कान बाक्नीम। *फिलिप्पी ३:९* 23 मारदे हना नेल्लेमी पाप पाम्तेक्म। मोपतीके परमप्रभु यावे आ छेडछेडम जाक्दीन्ने मचाप्नीम। *उत्पत्ती ८:२१* 24 सु सुमी चहिं ख्रीस्त येसु कली थमा सुदमे, मेको आन कली परमप्रभु यावेमी आन थुं ठीक दुम्पाइक्ब। *रोमी ५:१; २कोरिन्थी ५:१९; एफिसी २:८* 25 डोंइती परमप्रभु यावेमी रिश्शा, पापी आन कली सजाइ मगेवा बाक्त। नोले मेको आन जचा डा सजाइ येसु ख्रीस्त कली जपाइश्शा बेक्चा गेशा, मेको आन पाप क्याम्ताक्व। 26 मोपा परमप्रभु यावेमी “ठीक निसाफ पाइनुड” दे कोंइताक्व। मिनू येसु कली थमा सुइक्ब आन कली “इन पाप ग्याम्शा, ठीक दुम्तीनी” देंब। *लेवी १६:१५-१६; हिब्रू ४:१६*

27 नेल्ल परमप्रभु यावेमी पशो बाक्ब। सुइमी ठेयब सेल्सीशा “गो गेय नेल्ल रिश्शो पा ठीक दुम्ती” देंने मचाप्नीम। ठीक दुम्तीके मुर आन गेय रे मपीब। तन्न थमा सुइक्तीके रे पीब। *१कोरिन्थी १:२९, ३१* 28 गोपुकीम “परमप्रभु यावे आ अरेशो लोव डा गेयम मुर आन कली ठीक मसेल्ब” दे शेंनीकी। थमा सुइश्शोमी ला मुर आन कली ठीक सेल्ब। *गलाती २:१६* 29 परमप्रभु यावे यहूदी आन परमप्रभु यावे ला बाक्बा डा? नेल्ल अर्को रागी डा मुर आन परमप्रभु यावे बाक्ब। *रोमी १०:१२* 30 मारदे हना परमप्रभु यावे का ला बाक्ब। मिनू मेकोमी खोइक्तीक चिनु खोइश्शो नु मखोइश्शो आन थमा सुइक्तीके कोवशा, मुर आन कली ठीक दुम्पाइक्ब। *रोमी ४:११-१२* 31 मो देंतय हना, परमप्रभु यावे आ अरेशो लोव क्याम्नीकी? ममाइ, येसु ख्रीस्त कली थमा सुइश्शोमी परमप्रभु यावे आ अरेशो लोव टीतय, दे रुब्ब। *मत्ती ५:१७*

### अब्राहाम मिश्शा शेंशो

4 इं किकी अब्राहाममी रिती थिती धर्म पशो तशा, परमप्रभु यावेमी ठीक दुम्पाडा डा? ममाइ। 2 गेय पशा, ठीक दुम्शो हना, मुर आन कली “गो रिश्शो पाइब नड” देंने चाब्ब वा। तन्न परमप्रभु यावे कली चहिं मो देंने मचबा बाक्त। 3 मार ब्रेक्शो बाक्ब देंशा हना “अब्राहाममी परमप्रभु

यावे कली थमा सुइक्तु। मिनू परमप्रभु यावेमी ठीक दुम्पाइक्तु” दे ब्रेक्शो बाक्ब। *उत्पत्ती १५:६; गलाती ३:६*

4 गेय पाइबपुकीमी गेय पशो डा गाल्च ताइनीम। तन्न शिशी पा गेशो ममाइ। *रोमी ११:६* 5 तन्न सुमी गेय मपाइब, डोंइती मटीब मुर आन कली ठीक पाइब कली थमा सुइक्बा, मेको आ थमा सुइक्तीके ठीक बाक्ब। *रोमी ३:२६* 6 इं किकी दाऊदमी “मुरुमी गेय मपथु, ठीक दुम्शा, मेको ग्येरसीशो मुर बाक्नीम, दे परमप्रभु यावे आ देंशो बाक्ब” देंशो बाक्त। 7 परमप्रभु यावे आ अरेशो मटितीके नु आन पाप क्याम्चा पुंइसीशो मुर ग्येरसीशो मुर बाक्नीम। 8 प्रभुमी पाप क्याम्चा पुंइसीशो मुर कली दोस मगेब। मेको ग्येरसीशो मुर बाक्ब। *भजन संग्रह ३२:१-२*

9 मिनू मुल मार देंचा? ग्येरसीशो मुर खोइक्तीक चिनु खोइश्शो बाक्नीम देय मबाक्नीमी? मारदे हना अब्राहाममी थमा सुइक्तु। मिनू परमप्रभु यावेमी मेको कली ठीक दुम्पाइक्तु। 10 खोइक्तीक चिनु खोइक्चा क्येडा डोंइती अब्राहाममी परमप्रभु यावे कली थमा सुइक्तु। मिनू परमप्रभु यावेमी आ कली थमा सुइश्शोमी अब्राहाम कली ठीक दुम्पाइक्तु। 11 आ थमा सुइश्शोमी ठीक दुम्पाइक्चा कली खोइक्तीक चिनु छाप खोदेंशो पा ताप्तु। मारदे हना मेको डोंइतीन थमा सुइक्ब बाक्त। मोपतीके मेको खोइक्तीक चिनु मखोइश्शो थमा सुइक्ब, ठीक दुम्शो नेल्ल आन आफ दुम्त। *उत्पत्ती १७:१०-११* 12 अब्राहामम खोइक्तीक चिनु खोइक्ब आन आफ ला ममाइ, खोइक्तीके चिनु मखोइक्थु थमा सुइक्ब आन लां गाक्ब आन आफ यो दुम्त। *मत्ती ३:९*

13 परमप्रभु यावेमी अब्राहाम कली अरेशो लोव टितीके लोव मगेशो बाक्त। तन्न थमा सुइश्शो तशा “इ चच युइ शुश दुम्शा, रागी नेल्ल ब्रीनीम” दे लोव गेशो बाक्त। *उत्पत्ती २२:१७-१८* 14 अरेशो लोव टीब ला परमप्रभु यावे आ मुर दुम्नीम हना, थमा सुइक्तीके नु थोक्शो लोव जाम्शा लाइब। 15 मारदे हना परमप्रभु यावे आ अरेशो लोवमी आ गाइक्तीक पोक्ब। मेको लोव मबाक्शो हना, पाप मतुंडस वा। *रोमी ३:२०; रोमी ५:१३; रोमी ७:८, १०* 16 थमा सुइक्तेक्म हना, शिशी ताइनीम। अरेशो टीबपुकीम यो शिशी ताइनीम। सु सुमी अब्राहामम खोदेंशो पा, परमप्रभु यावे कली थमा सुदमे, मेको आ थोक्शो लोव डा मुर नु अब्राहाम आ आल दुम्नीम। 17 अब्राहाम आ पर्वम “गो इ कली शुश रागी डा मुर आन किकी सेल्तन” दे ब्रेक्शो बाक्ब। अब्राहाममी “परमप्रभु यावे बेक्शो रे सेंब नु मारेइ मबाक्शो कली बाक्शो खोदेंशो पा ब्रेश्शा सेल्ब” दे थमा सुइश्शो बाक्ब। *उत्पत्ती १७:५; २कोरिन्थी १:९; हिब्रू ११:१९* 18 “शुश रागी डा मुर आन किकी सेल्तन” दे परमप्रभु यावे आ गेशो लोव थमा सुइश्शा, आस पचा डा मबाक्माक्त हना यो, आस पा बाक्माक्त। *उत्पत्ती १५:५* 19 मेको सहे का बर्स दुम्शा, आल मथिथु, आ रां बेक्शो खोदेंशो दुम्शा, आ मीश सारा शुश बर्स दुम्शो बाक्ब, दे तुइश्शा यो थमा सुइक्ना सुइक्न बाक्माक्त। *उत्पत्ती १७:१७* 20 दाल्गीर मपथु, आ थमा सुइक्चा बारना बारन लशा, परमप्रभु यावे कली ठेयब सेला बाक्त। 21 परमप्रभु यावेमी आ गेशो लोव दोपा यो खाप्ने चाब्ब, दे थमा पा तुइश्शो बाक्माक्त। *हिब्रू ११:११* 22 मोपा थमा सुइश्शोमी परमप्रभु यावेमी अब्राहाम कली ठीक दुम्पाइक्तु। *उत्पत्ती १५:६* 23 मेको कली ठीक दुम्पाइक्तु, दे ब्रेक्शो लोव अब्राहाम कली ला ब्रेक्शो ममाइ। 24 गो नेल्ल इं कली यो ब्रेक्शो बाक्ब। मारदे हना सु सुमी इं प्रभु येसु कली बेक्शो रे सेंपाइक्ब परमप्रभु यावे कली थमा सुइक्नीमी, मेको आन कली ठीक दुम्पाइक्ब। 25 येसु ख्रीस्त इं पाप क्याम्चा कली साइक्चा पुंइसाक्व। मिनू इं कली ठीक दुम्पाइक्चा कलीन बेक्शो रे सेंचा पुंइसाक्व। *रोमी ८:३२-३४; यसैया ५३:४-६*

### परमप्रभु आ गाइश्शो रे ब्रोंइशो

5 मिनू गो थमा सुइश्शोमीन ठीक दुम्पाइक्चा पुंइसीशा, इं प्रभु येसु ख्रीस्त रे पा परमप्रभु यावे नु दुशा बाक्तीक दुम्शो बाक्त। *रोमी ३:२४, २८; यसैया ५३:५* 2 येसु ख्रीस्त आ पतीके गो परमप्रभु यावे आ शिशी ताइतय। मिनू परमप्रभु यावे नु बाक्चा ताइनीकी, दे आस पशा, ग्येरशा बाक्तय। *यूहन्ना १४:६; एफिसी ३:१२* 3 मेको ला ममाइ। श्येत जयानु,



ग्येरनय। मारदे हना श्येत जशोमी फाल्तीक सक्ति बारपाइक्व। याकूब १:२-३<sup>4</sup> मिनू श्येत फाल्बपुकी रिम्शो थुं पाइश्शो दुम्नीम। रिम्शो थुं पाइश्शोपुकी आस पाइब दुम्नीम, दे तुइक्ताक्य। याकूब १:१२<sup>5</sup> मिनू मोदेशो आस पतीकेम मुर आन कली बोल्यो सेल्ब। मारदे हना परमप्रभु यावे आ सोक्त आ पतीकेमी परमप्रभु यावे आ दाक्तीके इं थुंम मोइश्शो बाक्त। भजन संग्रह २२:६; भजन संग्रह २५:३,२०; हिब्रू ६:१८-१९

<sup>6</sup> डोंइती मचापब बाक्यानु, ख्रीस्त परमप्रभु यावे कली मटीब आन पर्वम बेक्त। <sup>7</sup> ठीक पाइब आन बेक्वा आ पा डा सुइ बेक्वा को? रिम्शो पाइब आ पा डा सुइ बेक्वे चापबा को? <sup>8</sup> तन्न परमप्रभु यावेमी इं कली शुश दाक्शा, गो पापी, इं बेक्वा आ पा डा ख्रीस्त कली बेक्वा गेपु। यूहन्ना ३:५,६; १यूहन्ना ४:१०<sup>9</sup> मोपतीके ख्रीस्त आ हुशोमी इं पाप क्याम्शा, ठीक सेल्वा पुंडसाक्य। मोशो ला ममाइ। गोपुकी येसु ख्रीस्त आ पतीकेमी परमप्रभु यावे आ गाइश्शो रे ब्रोंइचा ताइनय, दे तुइक्ताक्य। रोमी १:१८; रोमी २:५,८<sup>10</sup> डोंइती गोपुकी परमप्रभु यावे आ जोरी सत्रु दुम्शा बाक्यानु, आ ती आ बेक्शोमीन परमप्रभु यावेमी इं कली आ दाक्शो मुर सेल्लु। आ दाक्शो मुर दुम्शा, येसु आ ब्रोंइशोमीन सजाइ जचा रे मब्रोंइया डा? ब्रोंइतय। २कोरिन्थी ५:१८; रोमी ८:७; कलस्सी १:२१<sup>11</sup> मेको ला ममाइ, इं प्रभु येसु ख्रीस्तम इं पशो पाप रे प्रोंइतीके आ पर्वम परमप्रभु यावे आ मुर दुम्शा ग्येरनय।

### आदम नु येसु ख्रीस्त

<sup>12</sup> मिनू डोंइती मुर कामी परमप्रभु यावे आ देशो लोत्र मटितीके मुर बेक्ब दुम्मा बाक्त। मिनू मेको आ तमी तौ चच युइ नेल्ले यो बेक्ब दुम्मा बाक्त। मारदे हना मेकोपुकीमी यो पाप पामे बाक्त। उत्पत्ती ३:१९; रोमी ६:२३; उत्पत्ती २:१७<sup>13</sup> मेना परमप्रभु यावे आ अरेशो लोत्र मब्रेक्पाइश्शो बाक्माक्त। मोपतीके पाप मगूशो बाक्माक्त। अरेशो लोत्र मबाक्थु, मुर दोस मताइब दुम्शो बाक्तेक्म। रोमी ४:१५<sup>14</sup> तन्न आदम आ पाला रे मोसा आ पाला सम्म मुरपुकी बेक्ना बेक्न लमा बाक्त। आदम खोदेशो मरिम्शो मपामे बाक्त हना यो, बेक्मा बाक्त। आदम चहिं नोले डा पाला कली कोंइतीक दुम्शो बाक्त।<sup>15</sup> आदम आ मटिशो परमप्रभु यावे आ शिशी पशो खोदेशो ममाइ। मुर का आ मटितीकेम मुर नेल्ल कली बेक्ब सेल्लतीमी। मेको क्येडा परमप्रभु यावे नु मुर का दुम्शो येसु ख्रीस्त आस गेशो शिशी ठेयब बाक्ब।<sup>16</sup> येसु ख्रीस्त आ गेशो आदम आ पशो खोदेशो ममाइ। मारदे हना आदम आ पशोमी मुर नेल्ल खतम दुम्तेक्म। येसु ख्रीस्त आ गेशो शिशीमी पाप पशो शुश मुर आन कली ठीक दुम्पाइक्व।<sup>17</sup> दोपा आदम आ पशोमी बेक्तीकेम मुर आन कली हुकुम पवा, मोपा मेको आन क्येडा येसु ख्रीस्त आ गेशो शिशी नु आ ठीक सेल्लतीकेमी मुर आन कली ब्रोंइचा गेशा हुकुम पाइब।

मेको पपाइक्व नेल्ल येसु ख्रीस्त बाक्ब।<sup>18</sup> दोपा मुर कामी पाप पतीके मुर नेल्ल जाम्शा लाइब दुम्मा, मोपा मुर का आ ठीक पतीकेम मुर नेल्ल आन पाप क्याम्शा, ठीक सेल्वा पुंडसीशा, ब्रोंइचा ताइनीम। १कोरिन्थी १५:२१-२२<sup>19</sup> परमप्रभु यावे आ देशो मटीब मुर का आ पतीके दोपा पापी शुश दुम्मा, मोपा परमप्रभु यावे आ देशो टीब कामी चहिं शुश मुर आन पाप क्याम्शा, ठीक सेल्लतीमी। रोमी ३:२६; यसैया ५३:११<sup>20</sup> परमप्रभु यावेमी आ अरेशो लोत्र ब्रेक्पदा रे पाप तुइक्ना तुइक्न लाम्तेक्म। मिनू पाप ठेयब दुम्मेनु, परमप्रभु यावे आ शिशी मेको क्येडा ठेयब दुम्त। रोमी ७:८,१३; गलाती ३:१९<sup>21</sup> दोपा पापमी मुर आन कली बेक्पाइक्व सेल्लमी, मोपा येसु ख्रीस्त आ शिशी नु ठीक पतीकेमी मुर आन कली परमप्रभु यावे नु गेना हना ब्रोंइशा बाक्ब सेल्ब। मेको नेल्ल इं प्रभु येसु ख्रीस्तम पशो बाक्ब। रोमी ६:२३

### पापम बेक्शा, ख्रीस्तम सेंसीशो

<sup>6</sup> मिनू मो हना, मार देंचा? परमप्रभु यावेमी गो इं कली शुश शिशी पवल, दे गोपुकीमी पाप पस डा पस बाक्वा डा? रोमी ३:५-८<sup>2</sup> मो पचा मदुम्ब। बेक्शो मुरपुकीम खांखा दोपा पाप पस डा पस बाक्वे चाजीमी डा? गो इं के पाप पतीक थुं बेक्त।<sup>3</sup> ख्रीस्त येसु कली थमा सुइश्शा, आ नें नु आ बेक्तीकेमी ब्वाक्कुम ख्रुम्शा, गुंडपांडसाक्य, दे गे मतुइक्नीनी? गलाती

३:२७<sup>4</sup> मिनू ब्वाक्कुम गुम्पानु, गो येसु बेक्शा थिम्शो खोदेशो दुम्तय। मिनू परमप्रभु यावे आ सक्तिमी ख्रीस्त कली बेक्शो रे सेंपाइश्शो खोदेशो पा गो यो सेंसीशा, नक लांम गाक्तय। कलस्सी २:१२; १पत्रुस ३:२१<sup>5</sup> गो दोपा मेको आ बेक्शो नु कान दुम्पा, मोपा आ सेंसीशो नु यो कान दुम्तय।<sup>6</sup> येसु ख्रीस्त कली शीम केष्ठा कांटी थोक्शा साइक्तीके इं पापम ब्रीशो थुं आ सक्ति जाम्त। मोपतीके मुल गो पाप आ वाइल मबाक्नय। गो मेको लोत्र तुइक्वा माल्नय। गलाती ५:२४<sup>7</sup> बेक्शो मुर पाप रे ब्रोंइशो बाक्नीम।<sup>8</sup> गो येसु ख्रीस्त नु बेक्तय हना, मेको नुन ब्रोंइनय, दे थमा सुइक्नय।<sup>9</sup> मारदे हना येसु यो बेक्शो रे सेंसीशा, मुल गेनायो मबेक्वा डा पा ब्रोंइत। मुल मेको गेनायो मबेक्ब।<sup>10</sup> पाप क्याम्चा कली काले बेक्त। नोले सेंसीशा, मुल परमप्रभु यावे नु ब्रोंइशो बाक्ब। हिब्रू ९:२६-२८<sup>11</sup> मोपतीके गेपुकीमी यो आंम कली पाप आ पर्वम बेक्शो नु ख्रीस्त येसु आ पतीकेमी परमप्रभु यावे कली ब्रोंइनय, दे मिम्तीन। २कोरिन्थी ५:१५; १पत्रुस २:२४

<sup>12</sup> इन बेक्शा लाइब रां कली पापम हुकुम पचा मगेने। उत्पत्ती ४:७<sup>13</sup> इन गुइ खोइली, मिक्च, शोत्र, रां नेल्ल कली मरिम्शो मपपतीन। तन्न बेक्शो रे सेंसीशो मुर खोदेशो पा, परमप्रभु यावे कली जिम्मा गेंसीशा, आ रिम्शो गेय पने। रोमी १२:१<sup>14</sup> पापमी इन कली मारदे पपाइक्वे मचापब, मारदे हना परमप्रभु यावे आ अरेशो लोत्रमी इन कली दोसी मसेल्लु, परमप्रभु यावेमी शिशी पाइक्वा पुंडसाक्नी। रोमी ७:४-६; १यूहन्ना ३:६; रोमी ५:१७,२१<sup>15</sup> परमप्रभु यावे आ अरेशो लोत्रमी इं कली दोसी मसेल्लु, परमप्रभु यावे आ शिशी ताइतय हना, पाप पचा दुम्ब, दे मिम्चा डा? मोदेशो मिम्चा मदुम्ब।<sup>16</sup> तेको होत्रप आ वाइली दुम्पा, मेको होत्रप कली टिचा माल्नय, दे मतुइक्नीनी? “पाप पना पन बाक्व” देंतीनी हना, पाप आ वाइली दुम्शा, बेक्नीनी। “परमप्रभु यावे आ देशो टिय” देंतीनी हना, परमप्रभु यावे आ वाइली दुम्शा, ठीक पाइब दुम्नीनी। यूहन्ना ८:३४<sup>17</sup> इन पर्वम परमप्रभु यावे कली “मेको आन कली रिम्शो पाइतीनी” दे ठेयब सेल्लुड। मारदे हना डोंइती गेपुकी पाप आ वाइल बाक्तीनी। मुल चहिं इन थुं रे पा परमप्रभु यावे आ शेंशो दाक्शा टीतीनी।<sup>18</sup> गेपुकी पाप रे ब्रोंइशा, ठीक पतीके आ वाइल दुम्तीनी। यूहन्ना ८:३२<sup>19</sup> इन कली रुपाइक्वा कली चिनु लेंशा शेंनन्नी। दोपा गेपुकीमी इन गुइ खोइल, मिक्च, शोत्र, रां नेल्लेमी ग्रांग्रा दिशो गेय पशा, अरेशो लोत्र मटिनी, मोपा मुल इन थुं, रां नेल्ल ठीक पतीक आ वाइल दुम्चा कली परमप्रभु यावे आ गेय पाइब मुर दुमीन।<sup>20</sup> डोंइती पाप आ वाइली बाक्नीनु, ठीक पतीके रे डोन बाक्तीनी।<sup>21</sup> इन पशो मिम्शा, मुल यो मुने पाइनीनी। मारदे हना इन मरिम्शो पशो बेक्पाइक्व बाक्त, दे तुइक्ताक्नी। रोमी ८:६,१३<sup>22</sup> मुल गेपुकी मरिम्शो पचा रे प्रोंइचा पुंडसीशा, गे परमप्रभु यावे आ वाइल दुम्तीनी। मुल इन रिम्शो पतीके रे गे परमप्रभु यावे आ मुर दुम्शा, गेना हना यो मेको नु ब्रोंइशा बाक्वा ताइनीनी।<sup>23</sup> मरिम्शो पशो आ गाल्च बेक्वा बाक्ब। परमप्रभु यावे आ गेशो शिशी चहिं इं प्रभु येसु ख्रीस्त रे पा गेना हना यो ब्रोंइशा बाक्वा बाक्ब। रोमी ५:१२; उत्पत्ती २:१७; याकूब १:१५

### अरेशो लोत्र प्रोंइशो

<sup>7</sup> आं लोकपुकी, मुल गो अरेशो लोत्र तुइक्व इन कली शेंचा दाक्ती। मबेक्वा सम्म ला अरेशो लोत्र कली टिचा माल्नय।<sup>2</sup> ग्युंवे पशो मीश मुर आ वोंइश मबेक्म सम्म कानुनमी आस नाता लीब। आ वोंइश बेक्त हना, आस नाता मलीब। १कोरिन्थी ७:३९<sup>3</sup> आ वोंइश मबेक्थु, अर्को वोंइश खोइश्शा लत हना, मेकोम आस नाता खोइक्व। तन्न आ वोंइश बेक्शा नोले अर्को वोंइश खोइक्वु हना, मेको मीश अरेशो लोत्र रे मारदे दोस गेचा मपुंडसीब, मारदे हना मेको आ वोंइश बेक्वे थुम्शो बाक्ब।<sup>4</sup> आं लोकपुकी, येसु ख्रीस्त बेक्शोमी परमप्रभु यावे आ अरेशो लोत्र टिने मचाप्सीब देंतीक थुं बेक्त, दे रुपीन। मुल बेक्शो रे सेंचा पुंडसीशो ख्रीस्त नु काथा दुम्शा, इन पशो रे पा परमप्रभु यावे कली गेय पाइनय।<sup>5</sup> गो येसु ख्रीस्त रे डोन बाक्यानु, परमप्रभु यावे आ अरेशो लोत्र रे पा पाप तुइश्शा यो पाप आ ग्रांग्रा दिशोमी ब्रीशा शुश मरिम्शो पाइतय। मेको आ गाल्च बेक्तीक बाक्ब। रोमी ६:२१<sup>6</sup> तन्न मुल गो अरेशो लोत्र रे ब्रोंइशा बाक्नय। मारदे हना गो मरिम्शो पतीक

आ ग्याइश्शो रे बेक्तय। मुल गो येसु ख्रीस्त आ सोक्त रे पा नक गेय पाइनय। अरेशो ब्रेक्शो लोव्र प्रॉइने थुस्तय। रोमी ८:१-२; रोमी ६:२-४

अरेशो लोव्र नु पाप

7 मिनु मुल मार दैय दैशा हना, परमप्रभु यावे आ अरेशो लोव्रमी पाप बाक्बा? मो दैशो ममिम्बा। परमप्रभु यावे आ अरेशो लोव्र मपढेडा सम्म गो पाप मतुइव्तु। परमप्रभु यावे आ अरेशो लोव्रमी “मुर आन मार मार तशा मवल्लो” दे मब्रेक्शो हना, वाल्चा आ पर्वम गो मारेइ मतुइव्तु वा। प्रस्थान २०:१७ 8 मिनु पापम ब्रीशो आं थुंमी शुश वाल्पाइव्ती। परमप्रभु यावे आ अरेशो लोव्र मबाक्शो हना, पाप मगू वा, मेको बेक्त। रोमी ५:१३; १कोरिन्थी १५:५६ 9 अरेशो लोव्र मपढेशो नड हना यो, पाप मतुइव्तु वा। तन्न मेको लोव्र तुइव्तु रे आं थुंमी पाप बोक्त। मिनु बेक्ती। 10 परमप्रभु यावे आ अरेशो लोव्र ब्रॉइचा कली बाक्त हना यो, मेको लोव्रमीन बेक्ब सेल्ती। लेवी १८:५; याकूब १:१५ 11 मारदे हना मेको अरेशो लोव्र टिने मचाप्तीके पापम खुम्शा साइव्ती। हिब्रू ३:१३ 12 मिनु परमप्रभु यावे आ अरेशो लोव्र ठीक नु रिम्शो बाक्ब। १तिमोथी १:८ 13 मिनु मार? ठीक नु रिम्शो लोव्रमी आं कली साइव्ती डा? ममाइ। पापम कका साइव्ती। परमप्रभु यावे आ दैशो लोव्र रे पाप शुश मरिम्शो बाक्ब, दे तुइसीब। रोमी ५:२० 14 गोपुकीमी परमप्रभु यावे आ अरेशो लोव्र सोक्त पाइश्शो बाक्ब, दे तुइवनय। गो चहिं रांम बाक्शा पाप आ वाइल बाक्ती। यूहन्ना ३:६ 15 गो आं पशो आंमा मरुण्ड। मारदे हना आं दाक्शो मपाइनुड, आं काइ मदाक्शो पाइनुड। 16 तन्न आं मदाक्शो पाता हना यो, परमप्रभु यावे आ अरेशो लोव्र रिम्शो सुइव्नुड। 17 आं मदाक्शो पशो चहिं गो आं पशो ममाइ। आ आगाम बाक्शो पापम पपाइव्ती। 18 रिम्शो पतीके गो नु मबा, दे रुप्ता। रिम्शो पपदाक्ती हना यो, रिम्शो पने मचबु। उत्पत्ती ६:५; उत्पत्ती ८:२१ 19 मारदे हना रिम्शो गेय पड दैती, तन्न पने मचबु। मरिम्शो मपड दैडानु यो मरिम्शोन पाता। 20 आं मदाक्शो पाता हना, गो आं पशो ममाइ। गो आ आगाम बाक्शो पापमी मोदैशो पपाइव्ती। 21 तन्न आ थुंमी गो रिम्शो पचा दाक्ती हना यो, मरिम्शो ला दुम्त। 22 गो आं थुंमी परमप्रभु यावे आ अरेशो लोव्र दाक्शा ग्येरसीनुड। 23 तन्न आं रांम अर्को अरेतीक का बाक्ब। मेको आं थुं डा दाक्शो अरेतीक नु जीब। मिनु आं रांम बाक्शो अरेतीकेमी आं कली ग्याइश्शा, पाप पपाइव्ब। गलाती ५:१७ 24 मोपतीके थुं खाइश्शा “मार मुर नडा? एको बेक्शा लाइब पाप पाइब रां रे सुम प्रॉइबा?” दे डाक्शा बाक्नुड। 25 गो परमप्रभु यावे कली इं प्रभु येसु ख्रीस्तम आ पतीके “गे रिम्शो पाइब बाक्नीनी” दे ठेयब सेल्नुड। परमप्रभु यावे आ सोक्तीम ब्रीशो थुं आ दैशो टीनुड। येसु ख्रीस्त नु मबेक्शो आं थुं नु रां चहिं पाप आ वाइली बाक्ब, दे तुइक्ताकड। १कोरिन्थी १५:५७

परमप्रभु आ सोक्त रे ब्रॉइशो

8 येसु ख्रीस्तमी बाक्ब आन कली सजाइ मबाक्ब। रोमी ३:३:३४ 2 मारदे हना येसु ख्रीस्त आ ब्रॉइचा गेब सोक्त आ अरेशो लोव्रमी इन कली पाप पचा नु बेक्चा आ अरेशो लोव्र रे प्रॉइतु। 3 परमप्रभु यावेमी अरेशो लोव्र टिने मचाप्तीम, दे तुइश्शा, आ तौ कली पापी बुद पा रागीम सोइक्ताक्व। मोपा मेको कली मुर आन पाप आ पर्वम सजाइ गेत्तु। प्रेरित १८:३८; प्रेरित १५:१०; हिब्रू २:१७ 4 मिनु परमप्रभु यावे आ ठीक पतीक लोव्र काप्चा कली ख्रीस्त सजाइ जपाइश्शा, बेक्चा गेत्तु। मोपा येसु आ पशोमी गो निसाफ ताइतय। परमप्रभु यावे आ सोक्त रे पा ब्रॉइशा बाक्नय। गो रागी डा मुर खोदैशो मबाक्नय। गलाती ५:१६, २५

5 सु सुमी रागी डा मुर आन थुं डा लोव्र ला मिन्नीमी, मेकोपुकीमी मुरुम पशो खोदैशो पाइनीम। सु सुमी परमप्रभु यावे आ सोक्तीम गेशो थुं डा लोव्र मिन्नीमी, मेकोपुकीमी चहिं परमप्रभु यावे आ सोक्त आ दाक्शो पाइनीम। 6 मारदे हना मुर आ थुंमी मिम्शो पाइबपुकी जाम्शा लाइनीम। परमप्रभु यावे आ सोक्तीम गेशो थुंमी मिम्शा पाइबपुकी परमप्रभु यावे नु ब्रॉइशा थुं नाइश्शा बाक्चा ताइनीम। रोमी ६:२१; गलाती ६:८ 7 मुर आ थुंमी परमप्रभु यावे कली मदाक्ब आ जोरी सत्रु दुम्शा, आ दैशो मटीब। मारदे हना परमप्रभु

यावे आ अरेशो लोव्र थमा पा टिने मचाप्ब। याकूब ४:४ 8 रागी डा मुर आन थुंमी मिम्बपुकीमी परमप्रभु यावे कली ग्येरपाइव्ने मचाप्तीम।

9 इन थुंमी परमप्रभु यावे आ सोक्त थमा पा बाक्त हना, मुर आ थुंमी मिम्शो प्रॉइशा, परमप्रभु यावे आ सोक्त रे पा मिम्ब दुम्नीनी। ख्रीस्त आ सोक्त मुर आन थुंमी मबाक्त हना, मेको मुर येसु ख्रीस्त आ मुर मनम। 10 गे चहिं येसु ख्रीस्त आ मुर दुम्नीनी। बेक्चा दा बेक्नीनी। पाप पशोमी मुर बेक्ब दुम्तेक्म। तन्न ख्रीस्त आ ठीक पतीकेमी ब्रॉइनीनी। गलाती २:२०

11 परमप्रभु यावे आ सोक्तीमी दोपा ख्रीस्त येसु कली बेक्शो रे सेंदा, मोपान इं कली यो सेंशा ब्रॉइचा गेब। मारदे हना मुल मेको सोक्त इं आगाम बाक्शा, इं कली ब्रॉइचा गेब।

12 आं लोकबपुकी “परमप्रभु यावे आ सोक्त इन आगामी बाक्ब” दे तुइक्ताक्नी हना, मुर आन थुंमी मिम्शो पचा ममाल्नीनी। रोमी ६:७, १८

13 मो पाइतीनी हना, जाम्शा लाइनीनी। तन्न गे परमप्रभु यावे आ सोक्त रे पा इन रां डा दला दाक्स पतीक कली साइक्तीनी हना, ब्रॉइनीनी। रोमी ७:२४; गलाती ६:८; एफिसी ४:२२-२४ 14 सु परमप्रभु यावे आ सोक्तीम खुल्चा पुंइसीशो बाक्मे, मेको परमप्रभु यावे आ तमी तौ बाक्नीम। 15 मारदे हना गोपुकी परमप्रभु यावे कली हिंब थुं ताक्शा, वाइल मबाक्नीनी। गोपुकी आ तमी तौ दुम्तीके मेको कली “आब्बा, आं दाक्शो आफ” दे ब्रेलनय।

गलाती ४:५-६; २तिमोथी १:७ 16 गोपुकीमी “आफ” दैयानु, इं थुंमी बाक्शो परमप्रभु यावे आ सोक्तीमी इं थुं कली “परमप्रभु यावे आ तमी तौ ननी” दे सांकछी गेब। २कोरिन्थी १:२२ 17 परमप्रभु यावे आ तमी तौ दुम्शा, येसु ख्रीस्त नु काथा बाक्शा, अडस ताइब दुम्तय। मेको अडस तचा डोंइती येसु ख्रीस्त आ नैमी श्येत जाइनय। नोले आ राज्य तांइसेनु, येसु ख्रीस्त नु काथा बाक्शा अडस ताइनय। गलाती ४:१७; प्रकाश २१:७

आस पा बाक्शो

18 मुल येसु ख्रीस्त आ नैमी श्येत जाइतय। तन्न नोले परमप्रभु यावे आ बाक्तीक डा छेडछेडमी बाक्शा, मेको श्येत थम आइक्च मिन्नीनी।

२कोरिन्थी ४:१७ 19 परमप्रभु यावे आ सेल्शो नेल्लेमी “परमप्रभु यावे आ तमी तौ दोदैशो बाक्नीमी” दे कोव्रचा दाक्नीम। कलस्सी ३:४; १यूहन्ना ३:२

20 डोंइती रे सेल्शो नेल्ल बेक्शा राक्ब दुम्शो बाक्मा बाक्त। तन्न परमप्रभु यावेमी “काबु नाक्त प्रॉइनन्नी” दे आस गेशो बाक्माक्त। उपदेसक १:४

21 नोले परमप्रभु यावेमी आ तमी तौ आन कली बेक्शा राक्चा रे प्रॉइशो खोदैशो पा आ सेल्शो नेल्ल आन कली यो आ छेडछेडमी प्रोनानु, शुश रिम्शो दुम्ब। २पत्रुस ३:१३ 22 मुल सम्म आ सेल्शो मारेइ मारेइमी हिंमा क्येम्स पा परमप्रभु यावे कली “इन दैशो रीब दुम्स” दे पुंइना पुंइन बाक्नीम।

23 मेको सेल्शोमी ला ममाइ। गो नेल्ल क्येडा डोंइती परमप्रभु यावे आ सोक्त ताइबपुकीमी यो हिंमा क्येम्स पा “आंइ रां बेक्चा रे प्रोनीन” दे पुंइना पुंइन आस पा बाक्नय। २कोरिन्थी ५:२ 24 मेको थमा मदुम सम्म आस पा बाक्नय। थमा दुम्शा नोले आस पा बाक्चा ममाल्नय। सुमी आ तने थुम्शो कली आस पाइबा डा? २कोरिन्थी ५:७ 25 तन्न गो इं मतशो मदुम सम्म “गेना दुम्बा?” दे लां कोव्रशा फाल्शा रिम्ब मुर बाक्नय। गलाती ५:५

26 गोपुकीमी परमप्रभु यावे कली आस पा बाक्चानु, परमप्रभु यावे आ सोक्तीमी इं मतुइश्शो तुइक्ब। मिनु गो मार पुंइचा, दे मतुइक्ताक्क हना यो, इं पर्वम हिंमा क्येम्स पा पुंइब। 27 मारदे हना परमप्रभु यावे आ सोक्तीम इं थुं डा लोव्र नेल्ल तुइक्ब, परमप्रभु यावेमी मार दाक्बा, मेको यो तुइश्शा, थाम सुइक्ब आन पर्वम पुंइब।

गो परमप्रभु आ दाक्शो बाक्नय

28 गो परमप्रभु यावे आ योव्रशो, मेको कली दाक्बपुकीमी दोदैशो श्येत जाम्तेक्म हना यो, दोदैशो ग्येरसाक्म हना यो, मार दुम्त हना यो, इं कली रिम्शो दुम्ब, दे तुइश्शो बाक्नय। एफिसी १:११ 29 मारदे हना आ डोंइती तुइश्शो मुर कली “आं तौ खोदैशो दुम्मल” दे योव्रतु। आ तौ मेको योव्रशो लोकब आन क्येडा डोंइती जरमेशो बाक्ब। कलस्सी १:१८; हिब्रू १:६ 30 आ तौ खोदैशो दुम्मल, दे योव्रचा पुंइसीब आन कली ब्रेत्ताक्व। मिनु ब्रेश्शो आन

कली ठीक सेल्लु। मिनु ठीक दुश्शो आन कली बेक्वा रे प्रॉइशा, आ नु काथा बाक्वा गेब। *१थिस्सलोनिकी २:१३,१४; रोमी ३:२६*

31 मुल मार देंनुड दैशा हना, परमप्रभु यावे गोपुकी नु बाक्त हना, सुइमी इं कली मारेइ पने चाप्नीमी डा? सुइमी मारेइ पने मचाप्नीम। *भजन संग्रह ११८:६* 32 परमप्रभु यावेमी इं कली दाक्शा, आ दाक्शो तौ कली इं पाप क्याम्चा कली बेक्वा गेपु। मोपा आ दाक्शो तौ लाइ गेवानु, इं कली मार मार माल्या, मेको मगेबा डा? गेब। 33 परमप्रभु यावे आ योव्रशो आन कली सुमी दोस गेने चाप्बा डा? सुइमी मचाप्नीम। मारदे हना परमप्रभु यावेमी मेको आन कली ठीक दुम्पाइक्त्तु। *यसैया ५०:८* 34 सुमी मेको आन कली सजाइ गेने चाप्बा डा? सुइमी मचाप्नीम। मारदे हना मेको आन बेक्वा डा बेक्शा, बेक्शो रे सेंसीशा, परमप्रभु यावे आ ग्युरा गे बाक्वा तशो ख्रीस्त येसुमी मेको आन पर्वम मपुंडबा डा? पुंडबा। *१यूहन्ना २:१; हिल्ब ७:२५* 35 ख्रीस्तमी इं कली शुश दाक्ब। मिनु सुमी इं कली ख्रीस्त आ दाक्तीके रे फ्राने चाप्बा डा? सुइमी मचाप्नीम। श्येतमी, हिंतीकेमी, खेदा पतीकेमी, जचा मततीकेमी, फेक्वा मततीकेमी, मुर साइक्तीकेमी नु लडाइमी काइ फ्राने मचाप्नीम। *भजन संग्रह ७३:२३-२६* 36 श्येत जचा आ पर्वम "इन नें आ पर्वम साइक्वा पुंडसीन सीन बाक्नीकी। क्योरचा चिक्शो भेडा खोदेंशो दुम्तक" दे ब्रेक्शो बाक्ब। *भजन संग्रह ४४:२२; २कोरिन्थी ४:११* 37 मो दुम्त हना यो, मारेइ पने मचाप्नीम, मारदे हना येसु ख्रीस्तमी इं कली दाक्शा, गेनायो मप्रॉइब। मोपतीके सिक्सी पा ग्रानय। *१यूहन्ना ५:४* 38 "बेक्चामी, ब्रॉइचामी, परमप्रभु यावे आ स्वर्ग डा गेय पाइबपुकीमी, अधिकार पाइबपुकीमी, मुल दुम्तीकेमी, नोले दुम्तीकेमी, एफिसी ६:१२ 39 इर डामी, उइ डामी नु रागीम बाक्शो मारेइ मारेइमी इं कली इं प्रभु ख्रीस्त येसुम बाक्शो परमप्रभु यावे आ दाक्शो रे फ्राने मचाप्नीम" दे यो तुइक्ताक्ड।

#### यहूदीपुकीमी थमा मसुइश्शो

9 ख्रीस्त आ नें ब्रशा, जोल मपथु, एको लोव्र पाइनुड। परमप्रभु यावे आ सोक्तमी आं थुंमी थमा लोव्र बाक्ब, दे सांकछी गेब। 2 गो इं यहूदी लोकब आन कली तशा, आं थुं शुश खाइक्ती। मेको आन कली दो पड, मार पड दैशा आं थुं खुरसाक्यी। 3 आं लोकब, आ खिं डा मुर आन पा डा गो सराप रशा, ख्रीस्त रे तिल्ला पुंडसीचा यो बिस्सीड वा। *प्रस्थान ३२:३२* 4 मेकोपुकी इस्राएली नम। मेको परमप्रभु यावे आ तमी तौ बाक्नीम। आ छेडछेडम बाक्वा कली योव्रशो मुर नम, मेको आन कली कबल पशो बाक्त, आ अरेशो लोव्र तुइक्पाइश्शो बाक्त, परमप्रभु यावे कली दोपा मान पचा, दे तुइक्पाइश्शो बाक्त। परमप्रभु यावेमी मेको आन कली थोक्शो लोव्र पशो बाक्त। *प्रस्थान ४:२२; ब्यवस्था ७:६; प्रस्थान ४०:३४; उत्पत्ती १७:७; प्रस्थान २०:५* नेल्लेम तुइश्शो किकी पिपी एको जात डा बाक्मा बाक्त। मिनु मेको आन दाते रे मेको नेल्ल आन क्येडा ठेयब दुश्शा ख्रीस्त जरमेसे बाक्त। गोपुकीम परमप्रभु यावे कली गेना हना यो मान पय, आमेन। *रोमी १:३; मत्ती १:-; लूका ३:२३-३४*

#### सु सु थमा इस्राएली बाक्नीम

6 परमप्रभु यावे आ लोव्र मदुम्थु मलीब। मारदे हना इस्राएल रागी डा मुर नेल्ल इस्राएली मदुम्नीम। *गन्ती २३:१९; रोमी २:२८* 7 अब्राहाम आ चच युइ शुश बाक्तेक्म हना यो, मेको नेल्ल परमप्रभु यावे आ मुर मबाक्मा बाक्त। मेकोमी "इसहाक रे पा इ चच युइ लील" दे गेशो लोव्र खाप्शा, इसहाक कली ला योव्रडा बाक्त। *उत्पत्ती २१:१२* 8 मोपा अब्राहाम आ खिम जरमेशा लायो, परमप्रभु यावे आ तमी तौ, दे ब्रेत्वा मपुंडसम। तन्न परमप्रभु यावे आ लोव्र गेशोमी जरमेशोपुकीन अब्राहाम आ थमा चच युइ बाक्नीम। *गलाती ४:२३* 9 परमप्रभु यावे आ गेशो लोव्र चहिं "बर्स का नोले लेशशा जाक्नुडानु, सारामी तौ थीब" दैशो बाक्ब। *उत्पत्ती १८:१०* 10 सारा कली ला लोव्र गेशो ममाइ। इं किकी इसहाक रे पा आ मीश रेबेकामी कोव्रज कुरशा, जौले आल थिवानु, 11 मेको आल निम्फामी रिम्शो मरिम्शो मारेइ मतुइक्थु, आस जरमेचा डोंइती परमप्रभु यावेमी का कली योव्रडा बाक्त। आल आ पशो तशा, योव्रशो ममाइ। परमप्रभु यावे आ दाक्शो पा ब्रेश्शो बाक्त। 12 मेको

आल आस गेय आ पर्वम ममाइ, परमप्रभु यावे आ दाक्शो पा आस ममा कली "आ दाग्युमी आ लोकब आ गेय पाइब" दे तुइक्पदा बाक्त। *उत्पत्ती २५:२३* 13 मेको आल आस पर्वम "याकूब कली दाक्ताक्ड। एसाव कली काइ मदाक्त्तु" दे ब्रेक्शो बाक्ब। *मलाकी १:२-३*

#### परमप्रभुम आ दाक्शो कली योव्रब

14 मोदेंशो बाक्त हना, गो मार देंचा? परमप्रभु यावेमी ठीक गेय मपवा डा? ममाइ। 15 परमप्रभु यावेमी मोसा कली "सु कली शिशी पचा दाक्डा, मेको कली शिशी पाइनुड। सु कली आ श्येत रे प्रॉइचा दाक्डा, मेको कली आ श्येत रे प्रॉइनुड" दैशो बाक्त। *प्रस्थान ३३:१९* 16 मारेइ मारेइ पशोमी परमप्रभु यावे आ शिशी पाइक्वा मपुंडसीब। परमप्रभु यावेमी शिशी पचा दाक्ताक्व हना, शिशी पाइब। *एफिसी २:८* 17 परमप्रभु यावेमी फाराओ कली "नेल्ल रागी डा मुरपुकीमी आं सक्ति तशा, आं नें तुइक्तमेक्ल, दे इ कली वोइक्ता" दैशो बाक्त। *प्रस्थान ९:१६* 18 मोपतीके परमप्रभु यावेमी सु कली शिशी पचा दाक्ता, मेको कली शिशी पाइब। सु कली आ लोव्र मटिपाइक्वा दाक्ता, मेको कली मटिपाइक्ब। *प्रस्थान ४:२१; १पत्रुस २:८* 19 परमप्रभु यावेमी मो पाप्तु हना, मार, मुर आन कली दोस गेचा दुम्बा डा? आ पशो सुमी तेक्ने चाप्नीमी डा? देंनी माइ। 20 गे मुर दुश्शा परमप्रभु यावे कली दोस गेचा दुम्बा डा? सेल्वा पुंडसीबमी सेल्ब कली "मारदे ओपा सेल्पी" देंबा डा? *यसैया ४५:९* 21 खप के ग्योब सेल्बामी आ दाक्शो पा खप कांइचीक के गर, नाक्चुक तोक्तीके सेल्ने मचाप्बा डा? *येरमीया १८:४-६*

22 परमप्रभु यावेमी आ गाइश्शो कोंइताक्व हना, मरिम्शो पाइब आन कली शुश फाल्शो बाक्त हना यो, नोले ला खतम दुम्पाइक्ब। *रोमी २:४; हितोपदेस १६:४* 23 मेकोमी आ ठेयब गेय कोंइचा कली का निक्शी आन कली शिशी पशा, गेना हना यो काथा बाक्शा, आ छेडछेड कोंइचा कली योव्रतीमी। *एफिसी १:३-१२* 24 इं यहूदी कली ला ब्रेश्शो योव्रशो ममाइ। अर्को रागी डा मुर आन कली यो ब्रेश्शा, आ मुर सेल्शा, आ नु बाक्वा ताइब सेल्तीमी। 25 होसेमी "साइ आं कली मतुइक्ब आन कली आं मुर सुइक्नुडमी। डोंइती मदाक्शो कली मुल आं दाक्शो, दे ब्रेत्नुड। 26 डोंइती मेको रागीमी परमप्रभु यावे आ मुर मबाक्म। नोले चहिं ब्रॉइशा बाक्ब परमप्रभु यावे आ तमी तौ ब्रेत्वा पुंडसीनीम" दे ब्रेक्शो बाक्त। *होसे २:२५; होसे २:१*

27 यसैयामी इस्राएली आन पर्वम "इस्राएल डा मुरपुकी समुन्द्र डा बाल्वा खोदेंशो पा शुश दुम्तेक्म हना यो, मेको आन लीशो का निक्शी ला ब्रॉइचा ताइनीम। *रोमी ११:५* 28 मारदे हना प्रभुमी आ दैशो खाप्शा रीब पा पाइब" दे ब्रेक्शो बाक्ब। *यसैया १०:२२-२३* 29 मिनु डोंइती यसैयामी "मुर नेल्ल आन परमप्रभु यावेमी आ तमी तौ सेल्वा कली का निक्शी मयोव्रशो हना, सोदोम नु गोमोररा सहर डा मुर खोदेंशो दुश्शा, नेल्ल बेक्शा नुब्य वा" दैशो बाक्त। *यसैया १:९*

#### थमा ठीक पतीके

30 मिनु मुल गो मार देंचा डा? अर्को रागी डा मुरपुकीमी ठीक दुम्चा ममाल्थु, ठीक दुम्तेक्म। तन्न आन ठीक दुम्तीके मेको आन परमप्रभु यावे कली थमा सुइक्तीक रे जाक्त्त। *रोमी १०:२०* 31 तन्न इस्राएलीपुकीमी चहिं ठीक दुम्चा कली परमप्रभु यावे आ अरेशो लोव्र टिचा माल्तेक्म हना यो, ठीक दुम्ने मचबेम। *रोमी १०:२-३* 32 मारदे ठीक दुम्ने मचबेम दैशा हना, थमा सुइश्शोमी ठीक दुम्चा ममालेम, रिती थिती डा गेय रे ठीक दुम्चा माल्तेक्म। मोपतीके दाइल पाइब फुल्लुमी राम्साक्म। *मत्ती २१:४१,४४; १पत्रुस २:८* 33 मिनु "गो सियोनम फुल्लु का वोइक्नुड। मेको फुल्लुमी मुर आन कली दाइल पपाइक्ब। मिनु शुश मुर मेको फुल्लुम थोक्सीशा राम्सीनीम। सुमी मेको कली थमा सुइक्बा, मेको खतम मदुम्ब" दे ब्रेक्शो बाक्ब। *यसैया ८:१४; यसैया २८:१६*

10 आं लोकबपुकी, गो थमा मसुइक्ब इस्राएली आन पर्वम परमप्रभु यावे कली "थमा सुइक्पतीन" दे पुंडना पुंडन बाक्नुड। 2 परमप्रभु

यावे कली तुडक्का माल्नीम, दे तुडक्नुड। तन्न मेको आन के रुप्तीक थुं मबा।<sup>3</sup> परमप्रभु यावे आ डोंइती दोपा ठीक दुम्चा, मेको मरुबेमा। मिनु आंमा गेय पतीकेमी ठीक दुम्चा माल्तेक्म। मोपा परमप्रभु यावे कली थमा सुइक्तीके रे ठीक दुम्तीक मपामे। रोमी १:१७

थमा सुइक्तीक रे ठीक दुम्तीक

4 येसु ख्रीस्तमी परमप्रभु यावे आ अरेशो लोव्र खाप्ने थुम्तु। मिनु येसु ख्रीस्त कली थमा सुइक्बपुकी ठीक दुम्शो बाक्नीम। मत्ती ५:१७; हिब्रू ८:१३; यूहन्ना ३:१८; गलाती ३:२४-२५<sup>5</sup> मिनु मोसामी परमप्रभु यावे आ अरेशो लोव्र पतीक रे ठीक दुम्तीके ब्रेक्शो बाक्ब। “परमप्रभु यावे आ अरेशो लोव्र टीबपुकी मेको लोव्र टितीकेन ब्रॉइनीम” दे ब्रेक्शो बाक्त देंनीम। लेवी १८:५<sup>6</sup> थमा सुइश्शा, ठीक दुम्शोपुकीमी चहिं मार देंनीम देंशा हना, स्वर्ग सु लाइबा डा? सुइ मलाइनीम मारदे हना येसु ख्रीस्त कली ब्रथ लचा ममाल्ब। ब्यवस्था ३०:११-१४<sup>7</sup> बेक्शो मुर आन बाक्तीके सु लाइबा डा? सुइ मलाइनीम। मारदे हना येसु ख्रीस्त कली कुइक्थ लचा ममाल्ब।<sup>8</sup> तन्न मार देंशो बाक्त हना “मेको लोव्र इं नेक्था, इ थुं नु इ शोव्रमी बाक्ब” देंशो बाक्त। मेको थमा सुइक्तीक लोव्र कली शेंनीकी।<sup>9</sup> मिनु गेपुकीमी “येसु प्रभु बाक्ब” देंशा इन थुंमी “परमप्रभु यावेमी मेको कली बेक्शो रे सेंताक्व” दे थमा सुइक्तीनी हना, गे ब्रॉइचा ताइनीमी। मत्ती १०:३२; २कोरिन्थी ४:५<sup>10</sup> मुरुमी मेको थमा सुइश्शा, ठीक दुम्नीम। मिनु सु सुमी “येसु आं प्रभु बाक्ब” दे मुर आन डोंइती देंबा, मेको ब्रॉइचा ताइनीम, दे तुडक्नया।<sup>11</sup> मिनु परमप्रभु यावे आ लोव्रमी “सु सुमी मेको कली थमा सुइक्नीमी, मेको मुने मदोक्नीम” दे ब्रेक्शो बाक्ब। यसैया २८:१६

यहूदीमी “मतुइक्तक” देंने मचाप्नीम

12 परमप्रभु यावेम नेल्ल आन कली कोव्रब। यहूदी नु अर्को रागी डा मुर नेल्ल आन कली कांडचीक मिम्ब। मेको आन कली प्रभु का बाक्ब। मेको कली प्रभु देंब आन कली आसीक गेशा, रिम्शो पाइब। प्रेरित १०:३४-३५; प्रेरित १५:९<sup>13</sup> सु सुमी प्रभु आ नें थिशा “प्रॉइयीनी” दे पुंइबा, मेको कली प्रॉइब दे ब्रेक्शो बाक्ब। योएल ३:५

14 मेको कली थमा मसुइक्बपुकीमी “प्रॉइयीनी” दे पुंइने चाप्नीमी डा? आ पर्बम मनेशो कली थमा सुइक्ने चाप्नीमी डा? सुइ शेंब मबाक्त हना, मेको लोव्र नेंने चाप्नीमी डा?<sup>15</sup> शेंथ सोइश्शो मनम हना, शेंथ लाइनीमी डा? शेंथ सोइक्का पुंइसीब आन पर्बम ओदेंशो ब्रेक्शो बाक्ब “ग्येरपाइक्ब नु रिम्शो लोव्र शेंथ गाक्ब आन खोइल गिश रिम्शो बाक्ब” दे ब्रेक्शो बाक्ब। यसैया ५२:७<sup>16</sup> मेको आन लोव्र नेंशा कोइमी थमा मसुदेम। मेको आन पर्बम यसैयामी “हे प्रभु, आंइ शेंशो लोव्र सुम थमा सुदा डा?” दे ब्रेक्शो बाक्त। यसैया ५३:१; यूहन्ना १७:२०<sup>17</sup> डोंइती ख्रीस्त आ लोव्र नेंशा तुडक्पाइक्का माल्नीम। मेको लोव्र नेंशा ला थमा सुइक्ने चाप्नीम।

18 मार, येसु ख्रीस्त आ लोव्र यहूदीपुकीम मननेमे डा? नेंतेक्म। “एको लोव्र तेइ तेइ रागी नेल्लेमी ब्रशो बाक्त” दे ब्रेक्शो बाक्ब। भजन संग्रह १९:४<sup>19</sup> मोपा यो इस्राएलीमी एको लोव्र मरुप्मे डा? मोसामी यहूदी आन पर्बम ओदेंशो ब्रेक्शो बाक्त “अर्को रागी डा मुरपुकीमी आं कली थमा सुइक्का गेनुडमी। मिनु गेपुकीमी अरु आन कली आं गे पिशो तशा, रुश पा थमा सुइक्नीनी, दे परमप्रभु यावेम देंत” दे ब्रेक्शो बाक्त। ब्यवस्था ३२:२१<sup>20</sup> मिनु यसैयामी एको लोव्र तेम्शा “परमप्रभु यावेमी ‘आं कली ममाल्ब मुरपुकीमी आं कली थित्तीमी। आं कली ममिम्ब आन कली आं पर्बम तुडक्पाइक्तामी’ दे ब्रेक्शो बाक्त” देंत। यसैया ६५:१<sup>21</sup> इस्राएल डा मुर आन कली चहिं परमप्रभु यावेमी “गो नेल्ल नाक्त मटीब नु जोप पाइब आन कली रिम्शो दुम्मल, दे आं गुइ दिस डा दिस बाक्नुड। तन्न मेकोपुकीमी आं देंशो मटीम। आं कली मरिम्शो ला सुइक्तीमी” दे ब्रेक्शो बाक्त। यसैया ६५:२

लीशो इस्राएलीपुकी

11 मिनु मो दुम्मेनु, परमप्रभु यावेमी यहूदी नेल्ल आन कली प्रॉइमी डा? मप्रॉइमी। गो यो अब्राहाम आ चच युइ बेन्यामीन थर डा इस्राएली का नड। भजन संग्रह ९४:१४; येरमीया ३१:३७; फिलिप्पी ३:५<sup>2</sup> डोंइती रे परमप्रभु यावेमी आ योव्रशो मुर आन कली मप्रॉइमी। एलीयामी इस्राएली आन पशो आ पर्बम परमप्रभु यावे कली देंशो लोव्र मिम्तीन।<sup>3</sup> एलीयामी परमप्रभु यावे कली “परमप्रभु यावे, इन लोव्र पाइब आन कली साइक्तेक्म। इन कली चढेतीक नेल्ल प्रेशा गेम्तेक्म। इन नोले खोइक्ब गो का ला लीती। आं कली यो साइक्का कली माल्शा गाक्नीम” दे ब्रेक्शो बाक्त। १राजा १९:१०<sup>4</sup> परमप्रभु यावेमी एलीया कली मार लोव्र लेत्ता बाक्त देंशा हना “आं नोले खोइक्ब, ७ हजार मुर योव्रतामी। मेकोपुकीमी बाल देवता आ डोंइती आन पोक्च मथेक्नीम” दे लोव्र लेशो ममाइ डा? १राजा १९:१८

5 मुल यो परमप्रभु यावेमी शिशी पा योव्रशो का निक्शी लीशो बाक्नीम। रोमी ९:२७<sup>6</sup> मेको आन पशोमी ममाइ, परमप्रभु यावेमी मोशा शिशी पा आ मुर सेल्लतीमी। आन गेय आ पर्बम पशो हना, शिशी मली वा।<sup>7</sup> मिनु मार देंचा डा? इस्राएलम माल्शा यो आ माल्शो मथित्थु, परमप्रभु यावे आ योव्रशो का निक्शी ला ठीक दुम्तेक्म। अरु नेल्ल परमप्रभु यावे आ लोव्र मटीब दुम्तेक्म। रोमी ९:३१<sup>8</sup> मेको आन पर्बम यसैयामी “परमप्रभु यावेमी मेको आन कली मरुक्ब थुं गेपु। मेकोपुकी मिक्च मताइब नु नोफा मनेंब दुम्शा बाक्शो बाक्नीम। मुल सम्म मोदेंशो दुम्शा बाक्नीम” दे ब्रेक्शो बाक्त। यसैया २९:१०; ब्यवस्था २९:४<sup>9</sup> दाऊदमी “मेको आन भोज आन कली ग्याइली खोदेंशो दुम्ल। मेको आन कली बेक्तीक नु क्येक्क लेल्लीक दुम्ल।<sup>10</sup> मेको मिक्च मताइब दुम्मल। मिनु वाइलीम वाइल खोदेंशो दुम्शा, श्येत जामेक्ल” दे ब्रेक्शो बाक्त। भजन संग्रह ६९:२१-२३

अर्को रागी डा मुर

11 मिनु मुल मार देंनुडा? मेकोपुकी गेनायो मबोक्का डा पा रामसमा डा? ममाइ। इस्राएली आन मरिम्शो पतीके अर्को रागी डा मुरपुकीम शिशी तशो बाक्नीम। मेकोपुकीम रुश पामेक्ल, दे मोदेंशो दुम्शो बाक्ब। प्रेरित १३:४६; रोमी १०:१९<sup>12</sup> तन्न इस्राएली आन राम्सीतीके रागी नेल्ल आन कली रिम्शो नु अर्को रागी डा मुर आन कली शॉप दुम्त हना, मेको नेल्लेम थमा सुदेम हना, चिनु गिश रिम्शो दुम वा।<sup>13</sup> मिनु गो अर्को रागी डा मुर, इन कली “गो अर्को रागी डा मुर आन कली लोव्र शेंथ सोइक्का पुंइसाक्पी। एको शेंतीक गेय शुश रिम्शो लाक्ती।<sup>14</sup> मारदे हना अर्को रागी डा मुर आन कली थमा सुइश्शो तशा, आं जात डा मुर का निक्शीमी यो रुश पा थमा सुइक्नीमी कों, दे आस पा बाक्ती।” १कोरिन्थी ९:२०-२२; १तिमोथी ४:१६<sup>15</sup> परमप्रभु यावेमी मुल इस्राएली आन कली मकोव्रथु, अर्को रागी डा मुर आन कली शिशी पा ब्रशा, नोले यहूदी आन कली यो ब्रवानु, शुश रिम्शो मदुम्बा डा? एको दा बेक्शो रे सेंसीशो खोदेंशो ठेयब दुम्ब।<sup>16</sup> निशो फस रे डोंइती डा शोब्ले परमप्रभु यावे के दुम्त हना, नेल्ल निशो फस रिम्शो दुम्ब। शाक्श रिम्शो बाक्त हना, राशी नेल्ल यो रिम्शो दुम्नीम। गन्ती १५:२०<sup>17</sup> रिम्शो तेल रवा खोदेंशो इस्राएल रे राशी का निक्शी क्योरशा गुंइशो बाक्तेक्म हना, गे रागी रागी डा मुर ब्वाकी डा तेल रवा खोदेंशो पा, मेको रवामी इन राशी क्येप्चा पुंइसाक्नी हना, गे मेको रवा आ शाक्श रे ताइनीनी। मेको मप्रेंदीन। एफिसी २:११-१४<sup>18</sup> मो हना यो क्योरशा ताइश्शो राशी, दे मेको आन कली “गो इन क्येडा ठेयब दुम्तक” दे ठेयब लेशो लोव्र मपने। मारदे हना गेपुकी यो राशीन ननी। राशीमी शाक्श कली मतिक्व। शाक्शम राशी कली तिक्व, दे तुडक्तीने। यूहन्ना ४:२२<sup>19</sup> गेपुकीमी “मेको क्योरशा ताइश्शो राशी आ पा डा गो दुम्तय” देंतीनी।<sup>20</sup> इन देंशो ठीक बाक्ब। मेकोपुकीमी थमा मसुदेम। मिनु परमप्रभु यावेमी मेको आन कली क्योरशा ताइक्ताक्व। इन थमा सुइश्शो तशा इन कली चहिं रिम्शो फल रवाम केप्शो खोदेंशो पा आ मुर सेल्लु। काइ ठेयब मलेत्थु, परमप्रभु यावे कली मान पा हिंशा बाक्कीन। १कोरिन्थी १०:१२<sup>21</sup> परमप्रभु यावेमी डोंइती डा राशी

आन कली क्योरशा ताइक्ताक्व हना, मार, गे नोले केप्शो राशी इन कली मताइक्वा डा? 22 परमप्रभु यावेमी दोदेशो शिशी पाइबा, दोदेशो सजाइ गेबा, दे रुपीन। साइ डोंइती रे डा आ लोत्र थमा मसुइक्व मटीब आन कली खोइश्शा ताइक्ताक्व। आ लोत्र मटिथु, थमा सुइक्वा प्रोंइतीनी हना, इन कली यो खोइश्शा ताइक्व, दे तुइक्तीन। गे परमप्रभु यावे कली दाक्शा, थमा सुइक्वा मप्रोंइतीनी हना ला, इन कली यो दाक्वा मप्रोंइब। *यूहन्ना १५:२-४; हिब्रू ३:१४* 23 मेको क्योरशा ताइश्शो राशी खोदेशो दुश्शो यहूदीपुकीमी आन थुं परमप्रभु यावे गे लेशशा, थमा सुइक्तेक्म हना, रिश्शो फल रवाम लेंशा केप्शो खोदेशो पा आ मुर सेल्ने चाब्ब। 24 डोंइती क्योरशा ताइश्शो राशी बोइक्वा कली श्येत मदुम्ब। तन्न अर्को व्वाकी डा तेल रवा आ राशी माल्शा चाक्शा, केप्वा कली शुश श्येत बाक्व। परमप्रभु यावेमी इन कली केप्ताक्व। मिनु इन कली केप्वा क्येडा यहूदी आन कली केप्वा श्येत मबाक्व।

### यहूदीपुकी यो ब्रोंइनीम

25 आं लोकबपुकी, आं शेंशो खूइश्शो लोत्र रिश्शो पा रुप्तीनी हना, गे ठेयब मलेत्तीनी। योव्रसीचा पुंडसीशो अर्को रागी डा मुर आन कली आ मुर सेल्ने मथुमा सम्म परमप्रभु यावेमी इस्राएली आन कली येसु ख्रीस्त आ पर्बम मरुब्ब सेल्तीमी। *यूहन्ना १०:१६* 26 योव्रसीचा पुंडसीशो अर्को रागी डा मुरपुकीमी थमा सुदमे डा मेरे इस्राएली नेल्लेमी रुप्शा, थमा सुइश्शा, ब्रोंइचा ताइनीम। “सियोनमी पाप रे प्रोंइब का गूब। मेकोमी याकूब कली आ मरिश्शो पतीके रे प्रोंइब। *मत्ती २९:३९; भजन संग्रह १४:७* 27 मेको आन पाप क्याम्नुड। मिनु मेको आन कली गेशो कबल खाप्नुड” दे ब्रेक्शो बाक्व। *यसैया ५९:२०, येरमीया ३१:३३*

28 मुल सम्म इस्राएलीपुकीमी ख्रीस्त परमप्रभु यावे आ सोइश्शो पाप रे प्रोंइब बाक्व, दे थमा मसुइक्तीनीम। मोपतीके परमप्रभु यावे आ जोरी सत्रु दुम्तेक्म। आन थमा मसुइश्शोमी इन कली चहिं रिश्शो दुम्त। परमप्रभु यावेमी आन किकी पिपी आन पर्बम मेको आन कली योव्रशा, दाक्व। 29 परमप्रभु यावेमी गेशो नु आ योव्रतीक गेनायो मजाम्ब। *गन्ती २९:१३* 30 गेपुकीमी यो परमप्रभु यावे आ लोत्र मटिनी। यहूदीपुकीम मटितीके परमप्रभु यावेमी इन कली शिशी पा थमा सुइक्वा गेप्तु। मिनु मुल गे परमप्रभु यावे आ शिशी ताइब दुम्तीनी। 31 यहूदीपुकीमी मुल सम्म परमप्रभु यावे आ लोत्र मटीमे। नोले परमप्रभु यावेमी मेको आन कली यो शिशी पाइब। 32 मारदे हना परमप्रभु यावेमी इस्राएली नु अर्को रागी डा मुर नेल्ल आन कली आ लोत्र मटिशो तशा, खाल का डा पा वोइक्तीमी। मिनु नोले नेल्ल आन कली शिशी पाइब। *गलाती ३:२२; इतिमोथी २:४*

### परमप्रभु कली ठेयब सेल्य

33 परमप्रभु यावेमी नेल्ल तुइक्व। परमप्रभु यावे सक्ति पाइश्शो नेल्ल क्येडा ठेयब बाक्व। मुरपुकीमी परमप्रभु यावे आ निसाफ पशो, मुर आन कली पाइश्शो, सुइमी रुम्ने मचाप्नीम। *यसैया ४५:१५; यसैया ५५:८-९* 34 मिनु “सुमी प्रभु आ थुं तुइक्ने चाप्नीमी डा? सुमी मेको कली अर्ती गेने चाप्नीमी डा?” दे ब्रेक्शो बाक्व। *इकोरिन्थी २:१६; येरमीया २३:१८; यसैया ४०:१३* 35 “सुमी परमप्रभु यावे कली मार मार गेशा, परमप्रभु यावेमी मार मार गेचा माल्ब, देंने चाप्वा डा?” दे ब्रेक्शो बाक्व। *अय्युब ४१:३* 36 परमप्रभु यावेमी मार बाक्व हना यो, आंमान सेल्लु। मिनु मारेइ मारेइ आइक्के नम। मिनु आ गेशो गेय आंमान थुम्ब, दे तुइक्तय। मोपतीके “परमप्रभु यावे नेल्ल क्येडा ठेयब बाक्व” दे ठेयब सेल्तीक गेना हना यो लील। आमेन।

### परमप्रभु आ दाक्शो पने

12 आं लोकबपुकी, इन कली मुल यो शुश शेंचा दाक्ताक्व। परमप्रभु यावेमी इन कली शिशी पा आ मुर सेल्लु। मोपतीके आ मुर दुश्शा, इन रां, थुं, गिंम नेल्ल, सेसीन परमप्रभु यावे आ दाक्शो चढ्ढेतीक खोदेशो पा जिम्मा गेंसीन। मेको इन परमप्रभु यावे कली रिश्शो पशो गेय बाक्व। *रोमी*

६:१३ 2 परमप्रभु यावे कली मटीब आन पशो खोदेशो मपने। तन्न परमप्रभु यावे कली इन थुं कली फाइक्वा गेन। मो पाइतीनी हना, परमप्रभु यावे आ मिश्शो मार में, रिश्शो मार में, आ दाक्शो मार में नु नेल्लेम ठीक दुश्शो तुइक्तीनी। *एफिसी ४:२३; एफिसी ५:१०,१७*

3 परमप्रभु यावेमी आं कली शिशी गेशा, शेंब सेल्ती। इन दातेमी सुइ आंम कली ठेयब मसेल्तीन। परमप्रभु यावेमी इन कली दोदेशो थमा सुइक्तीक गेवा, मेको मिश्शा ब्रेश्शो दुश्शा बाक्कीन। *मत्ती २०:२६; इकोरिन्थी ४:६; इकोरिन्थी 4 रां कामी गुइ, खोइल, मिक्व, नोफा, शोत्र बाक्नीमी। मेको नेल्ल आन के आन आन गेय बाक्व। इकोरिन्थी १२:१२ 5 मोपा गोपुकी नेल्ल ख्रीस्तम रां का बाक्नय। गेय का का गेचा पुंडसाक्व। इकोरिन्थी १२:२७; एफिसी ४:४,२५*

6 गोपुकीमी परमप्रभु यावे आ शिशी पा गेशो गेय का का पय। परमप्रभु यावेमी इ कली आ लोत्र तुइक्पाइश्शा नेंपाइक्व योव्रतु हना, थमा सुइश्शा मेको लोत्र नेंपतो। *इकोरिन्थी ४:७; इकोरिन्थी १२:४; इपत्रुस ४:१० 7 मुर आन कली वारच पचा कली योव्रने पुंडसाक्वे हना, वारच पावो। शेंब सेल्वा पुंडसाक्वे हना, शेंब दुमो। इपत्रुस ४:११ 8 अर्ती गेब योव्रने पुंडसाक्वे हना, अर्ती गेचा मब्रीदो। मुर आन कली मार गेप्तीवी हना यो, ठेयब सेल्तीचा कली मगेवो। थमा सुइक्व आन लां कोंइब दुम्ते हना, होस पा गेय पावो। शिशी पवीनु, ग्येरशा पावो। मत्ती ६:३; इकोरिन्थी ८:२; इकोरिन्थी ९:७*

### दाक्वा आ पर्बम

9 थमा पा दाक्मुशा बाक्कीन। मरिश्शो गेय रे डोन बाक्कीन। रिश्शो पने। *इतिमोथी १:५; आमोस ५:१५ 10 लोकबपुकीमी दाक्मुशो खोदेशो पा दाक्मुशा बाक्कीन। आंम कली मान पचा मपुंडसीथु, अरु आन कली मान पने। यूहन्ना १३:४-१५; फिलिप्पी २:३ 11 पचा माल्शो गेय अल्सी मपथु पने। परमप्रभु यावे आ सोक्तीम इन थुंम मी ब्रशो खोदेशो आ प्रभु कली गेय पने। प्रकाश ३:१५; प्रेरित १८:२५; कलस्सी ३:२३ 12 आस पा ग्येरसीशा बाक्कीन। श्येत जनीनु, फाल्शा बाक्कीन। प्रार्थना पना पन बाक्कीन। लूका १८:१-८; कलस्सी ४:२; इथिस्सलोनिकी ५:१७ 13 थमा सुइक्व आन कली आन माल्शो गेशा, वारच पने। इन खिंमी जाक्व आन कली बास गेशा थुलीन। *इयूहन्ना ५-८; हिब्रू १३:२**

14 सराप चीले मपने। इन कली सराप चीले पाइब आन कली आसीक गेने। *मत्ती ५:४४; प्रेरित ७:५९; इकोरिन्थी ४:१२ 15 ग्येरसीशोपुकी नु ग्येरसीने, डाक्शोपुकी नु डाक्कीन। भजन संग्रह ३५:१३-१४; इकोरिन्थी ११:२९ 16 थुं का डा दुश्शा, दुशा गारशा बाक्कीन। जोक्व तुइक्व नड, दे ठेयब मलेत्तीने। आंम महिक्सीशो सुंडसीन। जोक्व तुइक्व ममिम्सीने। रोमी १५:५; फिलिप्पी २:२; यसैया ५:२१ 17 इन कली मरिश्शो पाइब आन कली मरिश्शो मपने। मुर आन कली मार रिश्शो बाक्वा, मेको मिम्तीन। हितोपदेस २०:२२; इथिस्सलोनिकी ५:१५; इकोरिन्थी ८:२१ 18 चाप्वी सम्म मुर आन कली जिचा मतोने। मुर नेल्ल नु दुशा गारशा बाक्कीन। *मर्कूस ९:५०; हिब्रू १२:१४**

19 आं दाक्शो लोकबपुकी, इन कली श्येत गेब आन कली आंमा क्येक्क मलेत्तीन। परमप्रभु यावेमी गाइश्शा, मेको आन कली मारेइ पवल, दे सिक्वी पा बाक्कीन। मारदे हना “क्येक्क लेत्तीक गेय आं केन बाक्व। मिनु गोन पाइनुड, दे परमप्रभु यावेमी देंब” दे ब्रेक्शो बाक्व। *ब्यवस्था ३२:३५; लेवी १९:१८; मत्ती ५:३८-४४ 20 क्येक्क मलेत्वा ला ममाइ। “इ जोरी सत्रु शोव्रतु बेक्तेक्म हना, जचा गेवो। तूतू दाक्तेक्म हना, तूचा गेवो। मो पाप्तीवी हना, मेको आन पियामी मी मोइश्शो खोदेशो पा, मुने तोक्नेवे” दे ब्रेक्शो बाक्व। हितोपदेस २५:२१-२२ 21 मरिश्शोमी रिश्शो कली लाक्वा मगेव। रिश्शोमी मरिश्शो कली ग्रापतो।*

### सरकार आ पर्बम शेंशो

13 गो नेल्लेमी सरकार आ हुकुम टिचा माल्नय। मारदे हना रागी डा नेल्ल सासन पाइब आन कली परमप्रभु यावेमी योव्रशा, अधिकार गेशा वोइश्शो बाक्नीम। *तीतस ३:१; हितोपदेस ८:१५; यूहन्ना १९:११*

2 सरकार आ हुकुम मटिथु, गेय पांम्तेकम हना, सरकार कली मटिशो ला ममाइ, परमप्रभु यावे कली यो मटिशो खोदेशो दुम्ब। मिनु सजाइ गेचा पुंडसीनीम।<sup>3</sup> रिंशो पाइबपुकी सरकार आ हुकुम तशा महिनीम “रिंशो पाइतीनी” देंनीम। मरिंशो पाइबपुकी चहिं हिंनीम। १पत्रुस २:१३-१४<sup>4</sup> मुर आन कली रिंशो पपाइक्वा कली परमप्रभु यावेमी सरकार वोइक्तु। गे मरिंशो पाइतीनी हना, सरकार क्येडा हिंनीम। मारदे हना सरकारमी सजाइ गेचा कली परमप्रभु यावे रे अधिकार तशो बाक्ब। मिनु मरिंशो पाइब आन कली सजाइ गेब। २इतिहास १९:६-७<sup>5</sup> “सरकारमी सजाइ गेब” दे मिंम्वा ला ममाइ। रिंशो पय, दे इं थुं फ्रेंशा बाक्य।<sup>6</sup> मोपतीके परमप्रभु यावेमी सरकार कली योव्रशा, गेय पपाइक्व, दे तुइश्शा, गेपुकीमी तिरो थापनीनी।<sup>7</sup> तिरो, भन्सार थापतीने। हिक्वा पुंडसीशो कली हिक्कीने, मान पचा पुंडसीशो कली मान पने। मत्ती २७:२३

### दाक्तीकेम अरेशो लोव्र खाप्यो

8 मारेइ मारेइम दाक्मुशा बाक्कीन। दाक्ताक्नी हना, परमप्रभु यावे आ अरेशो लोव्र खापनीनी। गलाती ५:१४; १तिमोथी १:५<sup>9</sup> मेको लोव्रमी मार ब्रेक्शो बाक्ब देंशा हना “मीश वोंइश आस नाता मखोइक्वा, मुर मसाइक्वा, खुइ मपचा, मवाल्चा” अरु मपचा डा गेय यो बाक्नीम। मिनु मार पा मेको लोव्र खाप्पीब देंशा हना, आंम कली दाक्शो खोदेशो पा आंम नेक्वा डा आन कली दाक्शा, खाप्पीब। प्रस्थान २०:१३-१७; लेवी १९:१८<sup>10</sup> मोपा दाक्ताक्नी हना, मुर आन कली मरिंशो मपाइनीनी। दाक्शोमीन परमप्रभु यावे आ अरेशो लोव्र खाप्यो बाक्ब। १कोरिन्थी १३:४; मत्ती २२:४०

### छेडछेडम बाक्ब मुर दुम्य

11 आं देंशो टिशा रिंशो पने। सेंसीशा बोक्शो खोदेशो दुम्य। मारदे हना साइ थमा सुइक्ब दुशो नाक्त क्येडा मुल परमप्रभु यावे नु बाक्वी नाक्ती इ नेक्वा जाक्त, दे तुइक्तय। १थिस्सलोनिकी ५:६-८; एफिसी ५:१४<sup>12</sup> नाक्दो लाक्शा नां सोक्शा, छेडछेडम बाक्शो खोदेशो दुम्शा, होस पा बाक्कीन। छिडछिड डा गेय ताइश्शा, छेडछेड डा या पिम्सीन। १यूहन्ना २:८; एफिसी ५:११<sup>13</sup> नाक्ती छेडछेड दुम्शो खोदेशो पा रिंशो गेय पय। छिडछिड डा गेय मार बाक्नीम देंशा हना, शुश जचा ब्वचा, दुक्शा हेंथे गाक्वा, तेल्लेम पा, ग्रांरा दिचा डा गेय पचा, जिचा खेचा नु रुश पचा बाक्नीम। लूका २१:३४; एफिसी ५:१८<sup>14</sup> नक वा फेक्शो खोदेशो पा प्रभु येसु ख्रीस्त नु रां का दुम्शा, इन रां कली मरिंशो पचा मगेने। गलाती ३:२७; १कोरिन्थी ९:२७; कलस्सी २:२३

### दाल्गीर मपथु गेय पचा

14 मिनु का निक्शी आन थमा सुइक्तीके बोल्यो मदुम्शो बाक्त हना यो, इन गुम्तीकेमी जाक्वा गेन। तन्न मेको नु आन मिम्तीक आ पर्वम लोव्र मपने। रोमी १५:१; १कोरिन्थी ८:९<sup>2</sup> मुर कामी नेल्ल जचा दुम्बा, दे मिम्बा, आ थमा सुइक्तीकेम बोल्यो मदुम्शो मुरुम चहिं गिग खाइ ला ब्वाइब। उत्पत्ती १:२९; उत्पत्ती ९:३<sup>3</sup> मिनु श्ये ब्वाइबमी श्ये म्ब्वाइब आन कली आइक्च मसेलीन। मिनु श्ये म्ब्वाइबमी श्ये ब्वाइब आन कली यो दोस मगेन। मारदे हना जचा ब्वचामी मारेइ मपाइब। परमप्रभु यावेमी मुर आन कली कांइचीक पा दाक्शा, आ मुर सेल्लतीमी। कलस्सी २:१६<sup>4</sup> मुर आन गेय पाइब कली निसाफ पाइब गे सु बाक्ने? आ होव्रपमी ला मेको कली निसाफ पाइब। मेको ठीक दुम्ने चाप्ब, मारदे हना परमप्रभु यावेमी मेको कली ठीक सेल्ले चाप्ब। मत्ती ७:१; याकूब ४:११-१२

<sup>5</sup> का निक्शी मुरुमी नेल्ल नाक्त कांइचीक मिम्मीम। का निक्शीम चहिं नाक्त का कली ठेयब मिम्मीम। तन्न मार रिंशो बाक्बा, मेको आंमा तुइक्वा माल्नीम। गलाती ४:१०<sup>6</sup> थमा सुइक्बपुकीमी नाक्त का कली ठेयब मिम्मेनु, परमप्रभु यावे कली मिंशा ठेयब मिम्मीम। श्ये ब्वामेनु, परमप्रभु यावे कली मिंशा ब्वाइनीम। श्ये म्ब्वाइबपुकीमी यो परमप्रभु यावे कली “गे रिंशो पाइब बाक्नीनी” दे मिंशा म्ब्वाइनीम।<sup>7</sup> गो नेल्ल आंम कली म्ब्रोंइनय, आंम कली म्बेक्नय।<sup>8</sup> ब्रोंइतय हना यो, परमप्रभु यावे आं नें

ठेयब सेल्वा कली ब्रोंइय। बेक्तय हना यो, परमप्रभु यावे आ नें ठेयब सेल्वा कली बेक्वा। ब्रोंइतय हना यो, बेक्तय हना यो, परमप्रभु यावे आ मुर नय। २कोरिन्थी ५:१५; गलाती २:२०<sup>9</sup> मारदे हना ख्रीस्त बेक्शा, बेक्शो रे सेंसीशा, नेल्ल आन कली कोव्रब दुम्त। बेक्शो, ब्रोंइशो मुर नेल्ल आन प्रभु बाक्ब।<sup>10</sup> मिनु मार, इं लोक्ब आन कली नाक्वा दुम्बा डा? आइक्च सेल्वा दुम्बा डा? काबु नाक्ती परमप्रभु यावेमी नेल्ल इं कली आ ठेयब नित्तीक आ डॉइती खुप्या, का का पा निसाफ पाइब। मत्ती २५:३१-३२; प्रेरित १७:३१; २कोरिन्थी ५:१०<sup>11</sup> मारदे हना “प्रभुमी गो ब्रोंइशा बाक्शो खोदेशो पा, मुर नेल्लेमी आं डॉइती आन पोक्च थेक्नीम। मिनु नेल्लेमी परमप्रभु यावे कली ठेयब सेल्नीम” दे ब्रेक्शो बाक्ब। यसैया ४५:२३; फिलिप्पी २:१०-११<sup>12</sup> गो नेल्लेमी परमप्रभु यावे आ डॉइती मार पशो बाक्वा, मेको का का पा शोव्रचा माल्नय।<sup>13</sup> मोपतीके आंम आंमा मनाक्मुय। थमा सुइक्ब लोक्ब आन थुं खाइक्पाइक्वा डा गेय मपमुय। १कोरिन्थी १०:३३<sup>14</sup> गो प्रभु येसु आ मुर दुम्शा, मारेइ मारेइ जचा थोव्रक रिंशो बाक्ब, दे शेंसाक्ड। तन्न सुमी ग्रांरा दिशो मिम्बा, मेको कली ग्रांरा दिशोन दुम्ब। मत्ती १५:११; प्रेरित १०:१५; तीतस १:१५<sup>15</sup> गे मार मार जशा ब्वशा, इ लोक्ब आ थुं खाइक्पाइक्नेवे हना, इ मदाक्तीके कोंइनेवे। इ जचा थोव्रकम पतीके इ ख्रीस्त बेक्शो लोक्ब कली खतम मसेलो। १कोरिन्थी ८:११-१३<sup>16</sup> मोपतीके गे मार दाक्नीनी, मेको कली मुरुम ग्रांरा दिचा मगेने।<sup>17</sup> परमप्रभु यावे आ राज्य जचा तूचा आ पर्वम ममाइ। परमप्रभु यावे आ सोक्त रे पा थमा सुइक्बपुकीमी रिंशो गेय पशा, दुशा ग्येरशा बाक्वा आ पर्वम बाक्ब। १कोरिन्थी ८:८; हिब्रू १३:९<sup>18</sup> गे मोपा ख्रीस्त आ गेय पाइतीनी हना, परमप्रभु यावे आ दाक्शो नु मुर आन डॉइती मान ततीक दुम्ब।<sup>19</sup> मोपतीके दुशा गारशा नु थमा सुइक्तीक थुं बारपाइक्मुशा बाक्वा। रोमी १२:१८; रोमी १५:२<sup>20</sup> गे जचा थोव्रक आ पर्वम परमप्रभु यावे आ गेय मक्वाम्दीने। मारेइ मारेइ जचा ठीक बाक्ब। तन्न होस पने। मारदे हना इन जचा ब्वचामी इन लोक्ब आन थुं खाइक्पाइक्तीनी हना, मरिंशो दुम्ब।<sup>21</sup> मोपतीके श्ये म्ब्वथु, अडगुर शांभु मत्तुथु, इन लोक्ब आन कली थुं मखाइक्पाइक्थु, बाक्वा रिंशो दुम्ब। रोमी १४:२; १कोरिन्थी १०:२५-२७<sup>22</sup> इ थमा सुइक्तीके परमप्रभु यावे आ डॉइती बाक्ब। इन जचा थोव्रक आ पर्वम दाल्गीर मपाइतीनी हना, गे ग्येरसीशो मुर दुम्नीनी।<sup>23</sup> दाल्गीर पा जाइब चहिं दोस ताइब दुम्ब। मारदे हना आ थमा सुइक्तीक रे मपाइब। मोपा थमा मसुइक्तीक रे पशो गेय नेल्ल पाप बाक्ब।

15 गो थमा सुइक्चामी बोल्यो दुम्शोपुकीमी, आंम कली ठेयब मसेल्लथु, बोल्यो मदुम्शो थमा सुइक्ब आन कली वारच पय। रोमी १४:१<sup>2</sup> इं दातेम नेल्लेमी अरु आन कली रिंशो पा आन थमा सुइक्तीक थुं बारपाइक्ब दुम्बा माल्नय। १कोरिन्थी ९:१९; १कोरिन्थी १०:२४,३३<sup>3</sup> ख्रीस्तमी यो आंमा दाक्शो मपव “इन कली पशो शुक्शी, आं तार मोंइसाक्व” दे ब्रेक्शो बाक्ब। भजन संग्रह ६९:९<sup>4</sup> डॉइती ब्रेक्शो नेल्ल इं कली शेंचा कली ब्रेक्शो बाक्त। मेको लोव्र पडेशा, फाल्शा इं थुं बारपा, आस पा बाक्वा। १कोरिन्थी १०:११<sup>5</sup> फाल्तीक सक्ति गेब नु थुं बारपाइक्ब परमप्रभु यावेमी इन कली थुं का दुम्शा, दुशा गारशा बाक्वा गेवल। दुशा गारशा बाक्तीनी हना, ख्रीस्त येसु आ गेय पाइब दुम्नीनी। फिलिप्पी २:२<sup>6</sup> मिनु गे थुं का नु लोव्र का पा इं प्रभु येसु ख्रीस्त आ आफ परमप्रभु यावे कली ठेयब सेल्ब दुम्नीनी।

<sup>7</sup> दोपा येसु ख्रीस्तमी इन कली दाक्शा ब्रवा। मोपान गेपुकी यो दाक्मुशा ब्रमुने। मो पनीनु, परमप्रभु यावे कली ठेयब सेल्नीनी।<sup>8</sup> इं किक्की पिपी आन कली गेशो लोव्र खाप्या कली ख्रीस्त यहूदी आन कली पाप रे प्रॉइब दुम्त। मोपा परमप्रभु यावे आ देंशो थमा बाक्ब, दे कोंइचा कली मोदेशो दुम्त। मत्ती १५:२४; प्रेरित ३:२५<sup>9</sup> अर्को रागी डा मुरपुकीमी परमप्रभु यावे आ शिशी आ पर्वम मेको कली ठेयब सेल्मेक्ल। मोपतीके “अर्को रागी डा मुर आन दातेमी इन नें तुइक्पा कुम्सो पाइनुड” दे ब्रेक्शो बाक्ब। भजन संग्रह १८:४९<sup>10</sup> मिनु लेंशा “अर्को रागी डा मुर आं योव्रशो मुरपुकी नु थुं का दुम्शा, ग्येरसीन” दे ब्रेक्शो बाक्ब। ब्यवस्था ३२:४३<sup>11</sup> चिनु “ए, अर्को रागी डा मुर नेल्लेमी परमप्रभु यावे कली ठेयब सेलीन, जात नेल्लेमी मेको कली मान पचा माल्नीम” दे ब्रेक्शो बाक्ब। भजन संग्रह ११७:१<sup>12</sup> यसैयामी “येस्से आ बडस रे का गूशा, ठेयब दुम्शा, अर्को रागी डा मुर आन कली सासन

पाइब। मिनु मेको कली सासन पशो तशा, नेल्लेमी 'इं कली श्येत रे प्रॉइब' दे ग्येरशा, आस पा बाक्नीम" दे ब्रेक्शो बाक्ता। *यसैया ११:१०; प्रकाश ५:५*  
13 आस गेब परमप्रभु यावे आ सोक्तीमी इन कली शुश ग्येरपा, थुं नाइक्पा बाक्वा गेवल। मोपा इन थमा सुइक्तीकेमी ठेयब आस पा बाक्कीन।

पावल आ गेय

14 आं लोकबपुकी, गे इन दातेमी दाक्मुशा, रिम्शो पा जोक्ब तुइक्ब दुम्शा नु शेंमुने चाप्ब दुम्शो बाक्नीनी, दे तुइक्ताक्ड। 15 परमप्रभु यावेमी आं कली शिशी पा शेंब सेल्ली। मोपतीके गो एको चिठीमी इच्का ठेयब लोव्र पा ब्रेक्ताक्ड। *रोमी १:५; रोमी १२:३* 16 गो रागी रागी डा मुर आन कली ख्रीस्त येसु आ गेय पाइब दुम्ती। गो चढेब खोदेंशो पा परमप्रभु यावे आ गेय पाइनुड। परमप्रभु यावे आ सोक्ता आ पतीकेमी रागी डा मुर नेल्ल आ दाक्शो चढेतीक खोदेंशो दुम्मल। *रोमी ११:३३* 17 मेको शेंतीक गेय पचा कली ख्रीस्त येसुमी बोल नु सक्ति गेती। मिनु परमप्रभु यावे आ डोंइती "गो ठेयब गेय पाता" देंती। 18 ख्रीस्तमी पपाइश्शो गेय आ पर्वम ला लोव्र पाइनुड। गो आंमा गेय पा अर्को रागी डा मुर टीब दुम्मल, दे मेको आन कली शेंतीक गेय यो पना पन बाक्ती। *२कोरिन्थी ३:५; रोमी १:५* 19 परमप्रभु यावे आ सोक्तीम गेशो सक्तिमी चिन्ड नु छक लाक्वा डा गेय कोंइताक्डमी। यरूसलेम सहर रे लशा, इल्लीरीकुम रागी सम्म जाक्दीश्शा, सहर सहर, गाउं गाउंमी ख्रीस्त आ ग्येरपाइक्ब लोव्र नेल्ल शेंना शेंन गाक्ती। *मर्कूस १६:१७; २कोरिन्थी १२:१२* 20 डोंइतीन ख्रीस्त आ लोव्र नेंने थुम्शो आन बाक्तीकेम, मलड। मुल सम्म ख्रीस्त आ नें मनेंशो आन कली शेंनुडमी देंशा, शेंना शेंन गाक्ती। *२कोरिन्थी १०:१५-१६* 21 मिनु "आं लोव्र तुइक्पाइक्वा मपुंडसीशोपुकीमी तुइक्वा ताइनीम। मिनु मनेंशोपुकीमी रुन्जीम" दे ब्रेक्शो बाक्ब। *यसैया ५२:१५*

रोम लचा चिक्शो

22 गो मोदेंशो शेंना शेंन गाक्डानु रोममी बाक्ब थमा सुइक्ब आन कली गुम्थ लाइनुड, दे डोंइती रे देंती, तन्न मुल सम्म इन कली गुम्था मतड। *रोमी १:१३* 23 शुश बर्स रे इन कली गुम्तीक थुं पा बाक्ती। मुल एकेर डा गेय थुम्शा, 24 गो दीसा नित्थी एकेर रे गाक्शा, स्पेन रागी लाइनुड। मिनु इन बाक्तीके यो ओव्रशा गुम्नन्नी। गुम्थानु, ग्येरसीशा, आं थुं नाइक्वा तडल देंती। मिनु नोले आं कली स्पेन सम्म चोव्रदीनीनी कों, दे आस यो पाता।

25 स्पेन लचा डोंइती थमा सुइक्ब आन कली वारच पथ यरूसलेम लाइनुड। *प्रेरित १८:२१; प्रेरित १९:२१; प्रेरित २०:२२; प्रेरित २४:१७*  
26 मासीडोनीया नु आकाया रागीमी बाक्ब थमा सुइक्बपुकीमी "यरूसलेमम बाक्ब थमा सुइक्बपुकीमी जचा मतामे" देंशो नेंशा, क्येट पोक्शा गेतीमी। मोपतीके मेको आन कली क्येट चोव्रथ लाइनुड। *१कोरिन्थी १६:१; २कोरिन्थी ८:१-४* 27 मारदे हना डोंइती यरूसलेमम बाक्ब थमा सुइक्बपुकीमी मेको आन कली येसु ख्रीस्त आ लोव्र शेंशो बाक्तेक्म। मोपतीके मुल मेको आन कली श्येत दुम्तीके, क्येट पोक्शा, चोव्रथ सोइक्ताक्पीमी। *१कोरिन्थी ९:११; गलाती ६:६* 28 मेको आन कली सोइश्शो क्येट चोव्रशा, स्पेन लाइनुड। लडानु, इन बाक्तीके यो ओव्रनुड। 29 इन बाक्तीके जाक्डानु, ख्रीस्त आ आसीकम जाक्नुड, दे तुइक्ताक्ड।

30 आं लोकबपुकी, इं प्रभु येसु ख्रीस्तमी इं कली थुं का सेल्लु। परमप्रभु यावे आ सोक्तीमी दाक्मुपाइक्तु। मिनु थमा पा वोबु दुम्तय। मोपतीके आं पर्वम परमप्रभु यावे कली पुंइना पुंइन बाक्कीन। *२कोरिन्थी १:११; २थिस्सलोनिकी ३:१* 31 मार पुनीन देंनुड देंशा हना "पावल कली यहूदीया रागीम बाक्ब थमा मसुइक्ब आन गुइ रे प्रोनीन। मिनु यरूसलेम जाक्दीश्शा, मेकेर बाक्ब थमा सुइक्ब आन कली वारच पचा गेने। 32 परमप्रभु यावे आ दाक्शो पा ग्येरसीशा यरूसलेम रे पिशा, आंइ कली गुम्पतीने। इन नेंमी थुं का दुम्शा, ग्येरपाइक्मुशा बाक्वा तकल" दे पुनीन। *१थिस्सलोनिकी २:१५*  
33 नेल्ल इं थुं नाइक्पाइक्ब परमप्रभु यावे गेपुकी नु बाक्ल। आमेन।

रिम्शो बाक्कीन, दे माइश्शो

16 केन्केया डा थमा सुइक्ब आन गुम्तीक खिंमी गेय पाइब फिबी दिदी आ पर्वम ब्रेक्शो बाक्नुड। 2 फिबी दिदीमी थमा सुइक्ब शुश आन कली वारच पाप्तु। आं कली यो शुश वारच पाइक्ती। मोपतीके फिबी दिदी कली प्रभु आ नेंमी मान पतीने। मार मार माल्दा, मेको गेशा वारच पतीने।

3 अक्वीला नु प्रिस्कीला साइ गो नु गारशा, ख्रीस्त येसु आ गेय पास्ताक्से। मेको आस कली "रिम्शो बाक्कीस" देनीन। *प्रेरित १८:२; प्रेरित १८:२६*  
4 मिनु थमा मसुइक्बपुकीमी आं कली खेदा पामेनु, आं कली प्रॉइचा, दे वारच पय्थीसीनु, हेरा साइक्वा पुंइसाक्स। मेको निक्शीमी आं कली प्रॉइशो आ पर्वम परमप्रभु यावे कली "गे रिम्शो पाइब बाक्नीनी" देंनुड। गो ला ममाइ, नेल्ल रागी रागी डा थमा सुइक्बपुकीमी यो मेको निक्शी आस पशो मिम्शा, परमप्रभु यावे कली "गे रिम्शो पाइब बाक्नीनी" देंनीम। मोपतीके मेको आस कली "रिम्शो बाक्कीसे" दे मतीने। 5 आस खिंमी देल्ब थमा सुइक्ब नेल्ल आन कली यो "रिम्शो बाक्कीन" दे माइक्वा। आं दाक्शो एपेनेतस कली "रिम्शो बाक्को" दे माइक्वा। एपेनेतस एसीया रागी डा नेल्ल क्येडा डोंइती ख्रीस्त कली थमा सुइक्ब बाक्ब। 6 इन कली शुश वारच पाइब मरीयम कली यो "रिम्शो बाक्को" दे माइक्वा। 7 इं यहूदी जात डा अन्ड्रोनीकस नु युनीयस साइ येसु आ नेंमी गो नु जेल्खानम बाक्शो नसी। आं क्येडा डोंइती मेको निक्शीमी ख्रीस्त कली थमा सुइक्ताक्से। ख्रीस्त आ सोइश्शो आन दातेमी शुश जोक्ब दुम्ताक्से। मेको आस कली "रिम्शो बाक्कीसे" दे माइक्वा। 8 प्रभु आ नेंम आं दाक्शो अमप्लीआतस कली "रिम्शो बाक्को" दे माइक्वा। 9 गोपुकी नु ख्रीस्त आ गेय पा उरबानस कली "रिम्शो बाक्को" दे माइक्वा। आं दाक्शो स्ताकीस कली "रिम्शो बाक्को" दे माइक्वा। 10 ख्रीस्त कली रिम्शो पा थमा सुइक्ब अपेलेस कली "रिम्शो बाक्को" दे माइक्वा। अरीस्तोबलस आ खिं डा मुर नेल्ल आन कली यो "रिम्शो बाक्कीन" दे माइक्वा। 11 इं यहूदी जात डा हेरोदीयन कली "रिम्शो बाक्को" दे माइक्वा। नारसीसस आ खिं डा प्रभु कली थमा सुइक्ब नेल्ल आन कली यो "रिम्शो बाक्कीन" ने माइक्वा। 12 प्रभु आ गेय पाइब त्रिफेना नु त्रिफोसा दिदी आस कली यो "रिम्शो बाक्कीसे" दे माइक्वा। प्रभु आ शुश गेय पाइब आं दाक्शो पेरसीस दिदी कली यो "रिम्शो बाक्को" दे माइक्वा। 13 प्रभुम वोव्रशो थमा सुइक्ब रुफुस कली "रिम्शो बाक्को" दे माइक्वा। साइ रुफुस आ ममामी आं कली आ तौ खोदेंशो पती। मेको कली यो "रिम्शो बाक्को" दे माइक्वा। *मर्कूस १५:२१* 14 असीनक्रीतस, प्लेगन, हेरमेस, पत्रोबास, हेरमेस नु मेकोपुकी नु बाक्ब थमा सुइक्ब लोकब नेल्ल आन कली यो "रिम्शो बाक्कीन" दे माइक्वा। 15 फिलोलोगस, युलीया, नेरीयस, नेरीयस आ दिदी, ओलीम्पास नु मेको नेल्ल आन खिंम बाक्ब थमा सुइक्ब आन कली यो "रिम्शो बाक्कीन" दे मतीने। 16 येसु आ नेंमी मुमुशा, आसीक गेमुने। एक डा थमा सुइक्ब नेल्लेमी इन कली "रिम्शो बाक्कीन" देंतेक्म। *१कोरिन्थी १६:२०*

दूली शेंब आन लोव्र मनेंचा

17 आं लोकबपुकी, एको नेल्ल क्येडा नोले डा लोव्र पशा, अर्ती गेनन्नी। कोइ मुरुमी ख्रीस्त आ लोव्र नेंशा, दूली मिम्ताक्म। मेको मुरपुकीमी मुल सम्म दुशा गारशा बाक्शो थमा सुइक्ब लोकब इन कली फ्राचा माल्नीम। मेको आन क्येडा होस पा बाक्कीन। *मत्ती ७:१५; २थिस्सलोनिकी ३:६; तीतस ३:१०* 18 मेकोपुकीमी येसु ख्रीस्त आ गेय मपाइनीम। आन कोव्रज प्रिंचा ला मिम्शा, गेय पाइनीम। मिलो शिलो लोव्र पा रिम्शो लोव्र नेंब आन थुं क्याल्नीम। मोदेंशो मुर आन क्येडा होस पा बाक्कीन। *फिलिप्पी ३:१९; कलस्सी २:४* 19 गे शेंतीक लोव्र नेंशा, टीब मुर ननी, दे नेल्लेमी तुइक्ताक्मे। एको नेंशा, गो ग्येरसाक्पी। तन्न रिम्शो गेय मरिम्शो गेय, थमा शेंतीक दूली शेंतीक, थमा नु जोल तुइक्ब दुमीने, देंनुड। मोपतीके ब्रेक्शा, शुश शेंताक्नी। *रोमी १:८; १कोरिन्थी १४:२०* 20 थुं नाइक्वा गेब परमप्रभु

यावेमी रीब पा सैतान कली इन खोइल आगाम वोइक्ब। इं प्रभु येसु ख्रीस्तमी इन कली शिशी पवल।

“रिम्शो बाक्कीन” देंशो

21 गो नु गेय पाइब तिमोथीमी इन कली “रिम्शो बाक्कीन” देंत। यहूदी जात डा लुसीयस, यासोन, सोसीपाटर सांफामी यो इन कली “रिम्शो बाक्कीन” देंतेक्म। प्रेरित १६:१-३; प्रेरित १९:२२; फिलिप्पी २:१९-२२; प्रेरित १७:६; प्रेरित २०:४<sup>22</sup> पावलमी अरेशा ब्रेक्पाइश्शो एको चिठी ब्रेक्ब गो तेरतीयस नड। मिनु प्रभु आ नेंमी गो यो इन कली “रिम्शो बाक्कीन” दे ब्रेक्ताक्ड।

23 गोम चिठी ब्रेक्पदुनु, गायस आं खिंमी बाक्तक। मिनु गायस नु आ खिंमी देल्ब थमा सुइक्बपुकीमी यो इन कली “रिम्शो बाक्कीन” दे माइक्वा देंतेक्म। इरास्तस माइश्शो सरकार आ गेय पाइबमी यो इन कली “रिम्शो बाक्कीन” देंत। थमा सुइक्ब इं लोक्ब क्वारटसमी यो इन कली “रिम्शो

बाक्कीन” देंत। १कोरिन्थी १:१४<sup>24</sup> इं प्रभु येसु ख्रीस्त आ शिशी गोपुकी नेल्ल नु बाक्ल। आमेन।

नोले डा लोव

25 परमप्रभु यावेमी इन कली आ ग्येरपाइक्तीक लोव नु येसु ख्रीस्त आ पब्रम शेंतीक नेशा, बोल्यो पा थमा सुइक्ब सेल्ने चाप्ब, दे तुइक्ताक्ड। मोपा साइ डा खुइश्शो लोव नेल्ल तुइक्पाइश्शो बाक्ब। १कोरिन्थी २:७; एफिसी १:९; एफिसी ३:४-९<sup>26</sup> परमप्रभु यावे आ लोव पाइबपुकीम मेको खुइश्शो लोव ब्रेक्शो बाक्तेक्म। मेको गेना हना यो बाक्ब परमप्रभु यावे आ दाक्शो बाक्ब। मेको लोव रागी रागी डा मुर आन कली तुइक्पाइश्शा थमा सुइक्ब सेल्चा कली बाक्त।<sup>27</sup> आ का ला बाक्शो मारेइ मारेइ तुइक्ब परमप्रभु यावे कली येसु ख्रीस्त रे पा गेना हना यो नेल्ल सक्ति नु ठेयब दुम्तीके बाक्ल। आमेन। रोमी १:५



## १ कोरिन्थी

एको चिठी ब्रेक्ब पावल बाक्ब। मेकोमी आ नें नेल्ल क्येडा डोंइती ब्रेक्शो बाक्त्। पावलमी कोरिन्थ सहर कली थमा सुइक्ब आन गुम्तीक सेल्लु। मिनु पावल कली आफ, दे नें वोइक्तेक्म।

पावल, बर्स निक्शी महिना सां एफिसस सहरम बाक्शा, मेकेर रे कोरिन्थ सहर डा थमा सुइक्ब आन कली चिठी ब्रेक्शो बाक्त्। मेको ५७ ए. डी. डा डोंइती डा महिनाम ब्रेक्शो बाक्ब।

पावलमी मेको थमा सुइक्ब आन गुम्तीक खिं ५२ ए. डी. मेर आंमान सेल्था, बर्स निक्शी मेकेर शेंशो बाक्त्। मिनु मेको थमा सुइक्ब आन दातेम मार मार मरिम्शो दुम्मे, मेको खलोए आ खिं डा मुरुम पावल कली शेंथ जाक्शो बाक्तेक्म।

१. थमा सुइक्ब आन गुम्तीकेमी मीश मुर दोदेशो दुम्चा माल्नीमी।

२. मेकोपुकी हुल हुल दुम्शो बाक्तेक्म

३. मुर आन हैथे पा मरिम्शो पशो

४. गुम्तीक डा मुरुम तुइक्चा माल्थो लोव्रः

मीश मुर आन पर्वम

प्रभु भोज आ पर्वम

परमप्रभु यावे आ सोक्तीम मार गेय पाइब

परमप्रभु यावे आ सोक्त् आ नेल्ल क्येडा ठेयब गेय

परमप्रभु यावे आ सोक्त् आ लोव्र पचा आ पर्वम

मुर बेक्शा, सेंचा आ पर्वम

### डोंइती डा लोव्र

१ परमप्रभु यावे आ दाक्शो पा ख्रीस्त येसु आ सोइश्शो ब्रेत्चा पुंइसीशो, गो पावल नड। इं लोक्ब सोस्थेनेस नु गोमी कोरिन्थ सहरम बाक्ब परमप्रभु यावे आ मुर दुम्शा देल्ब इन कली एको चिठी ब्रेक्शा सोइक्ताक्कु। २ गे कोरिन्थ सहर डा ख्रीस्त येसुमी योव्रचा पुंइसाक्नी। मोपतीके योव्रशोपुकी दे ब्रेत्चा पुंइसीनीनी। गेपुकी ला ममाइ, ते ते इं प्रभु येसु ख्रीस्त आ नेंमी खुम्सीनीमी, मेक मेक डा मुरपुकी यो इन खोदेशो पा योव्रशा, योव्रशोपुकी दे ब्रेत्चा पुंइसीनीम। येसु ख्रीस्त आंइ प्रभु, इं प्रभु, थमा सुइक्ब नेल्ल आन प्रभु बाक्ब। मिनु आ नेंमी गो नेल्ल का दुन्तय। १कोरिन्थी ६:११; प्रेरित ९:१६; प्रेरित १८:१-१७<sup>३</sup> इं आफ परमप्रभु यावे नु प्रभु येसु ख्रीस्तमी इन कली शिशी पा इन थुं नाइश्शा बाक्चा गेम्सेक्ल।

### प्रार्थना पशो

४ गो इन पर्वम परमप्रभु यावे कली “गे रिम्शो पाइब ननी” दे ठेयब सेल्लुड, मारदे हना इन कली शिशी पा येसु ख्रीस्तमी तुइक्पाइक्त्।<sup>५</sup> मिनु तुइक्तीक नु रुपतीक थुं शुश गेशा, अरु आन कली शेंब नु रुप्पाइक्ब सेल्लु।<sup>६</sup> मिनु इन पतीके मुरपुकीमी ख्रीस्त आ सक्ति ताइनीम। तीतस २:१३; २पत्रुस ३:१३-१४<sup>७</sup> गेपुकी परमप्रभु यावे आ सोक्तीमी पपाइश्शो गेय नेल्ल पचा ताइतीनी। मारेइ मारेइम गाप्शा बाक्नीनी। इं प्रभु येसु ख्रीस्तमी तपांइसेक्ल, दे रिम्शा बाक्नीनी।<sup>८</sup> इं प्रभु येसु ख्रीस्त जाक्म नाक्ती आ डोंइती ठीक दुम्शा, इन कली सक्ति पाइश्शो गेय पना पन थिक्ब, दे तुइक्ताक्ड। मारदे हना इन कली नेल्ल क्येडा नोले सम्म थमा सुइक्चा मप्रोंइथु रिम्शा बाक्तीक सक्ति गेब। फिलिप्पी १:६; १थिस्सलोनिकी ३:१३<sup>९</sup> परमप्रभु यावेमी इन कली आ तौ इं प्रभु येसु ख्रीस्त नु गेना हना यो काथा बाक्चा कली योव्रतु। मिनु आ देशो लोव्र नेल्ल खाक्ब। १थिस्सलोनिकी ५:२४

### थुं का दुम्शा बाक्कीन

१० आं लोक्बपुकी, इं प्रभु येसु ख्रीस्त आ नेंमी, इन कली अर्ती गेनन्नी। लोव्र का, शोव्र का नु थुं का दुम्शा बाक्चा मप्रोनीन। १कोरिन्थी ११:१८;

रोमी १५:५; फिलिप्पी २:२<sup>११</sup> “कोरिन्थीपुकी जिशा बाक्नीम” दे इन पर्वम ख्लोए आ खिं डा मुरपुकीमी तुइक्पाइक्तीमी।<sup>१२</sup> इन जिशो मार बाक्ब देशा हना, का निक्शीमी “पावल आ नोले खोइक्ब नकी” का निक्शीमी “आपोल्लोस आ नोले खोइक्ब नकी” का निक्शीमी “केफास आ नोले खोइक्ब नकी” नु का निक्शीमी “ख्रीस्त आ नोले खोइक्ब नकी” देंतीनी। १कोरिन्थी ३:४; प्रेरित १८:२४-२७; यूहन्ना १:४२<sup>१३</sup> मार ख्रीस्त देशो शुश बाक्नीमी डा? पावलमी इन पाप क्याम्चा कली शीमी केप्शा कांटी थोक्शा क्याइश्शा साइक्चा पुंइसे डा? पावल आ नेंमी ब्वाक्कुम खुम्शा गुंइचा पुंइसीनी डा? १४ गो परमप्रभु कली “गे रिम्शो पाइब ननी” देनुड। मारदे हना गो क्रिस्पस नु गायस डा लाक्शा सुइ कली ब्वाक्कुम खुम्शा मगुंइदुमी। प्रेरित १८:८; रोमी १६:२३<sup>१५</sup> मुर आन कली ब्वाक्कुम खुम्शा गुंइतीक गेय पशो नड हना, मेकोपुकीमी “पावल आ नेंमी ब्वाक्कुम खुम्शा गुंइचा पुंइसाक्क” देंम वा।<sup>१६</sup> स्तीफानस आ खिं डा मुर आन कली ब्वाक्कुम खुम्शा गुंइताक्डमी। मेको डा लाक्शा, सुइ आन कली ब्वाक्कुम खुम्शा गुंइदुमी को मगुंइदुमी, मारेइ मतुइक्नुड। १कोरिन्थी १६:१५<sup>१७</sup> ख्रीस्तमी मुर आन कली ब्वाक्कुम खुम्शा गुंइतीक गेय पथ मसोइक्ती। आ लोव्र नेंपाइक्चा कली सोइक्ताक्की। लोव्रमी फू चुइश्शो खोदेशो पा ममाइ। गो फू चुइश्शो लोव्र पाता हना, ख्रीस्त बेक्शो सक्ति क्याम्सीशा लाइब।

### रागी डा जोक्ब तुइक्ब आन पर्वम

१८ “ख्रीस्त पाप क्याम्चा कली साइक्चा पुंइसाक्क” देशो लोव्र नेंशा, नरक लाइबपुकीमी “मूर्ख लोव्र बाक्ब” देंनीम। गो पाप रे ब्रोंइशोपुकीमी चहिं “एको लोव्रम परमप्रभु यावे आ सक्ति बाक्ब” दे तुइक्नय। २कोरिन्थी ४:३; रोमी १:१६<sup>१९</sup> मिनु “जोक्ब आन कली आन जोक्शो क्याम्शा, तुइक्ब आन कली आन तुइश्शो साम्शा गेनुडमी” दे ब्रेक्शो बाक्ब। यसैया २९:१४<sup>२०</sup> जोक्ब तुइक्ब सु सु नमी? पढेस जोक्ब सु सु नमी? सिनाक्त् मुलाक्त् शुश लोव्र पा ग्राब सु नमी? लो, मिन्तीने। एको रागी डा जोक्ब तुइक्ब लोव्र कली परमप्रभु यावेमी फश लोव्र मसेला डा? मत्ती ११:२५; रोमी १:२२<sup>२१</sup> परमप्रभु यावेमी मुर आन जोक्तीक तुइक्तीक रे आंम कली मतुइक्पांइसे। परमप्रभु यावेम आ दाक्शो पा, आंइ मूर्ख लोव्र नेंपाइक्ब। मिनु मेको लोव्रम थमा सुइक्ब आन कली पाप रे ब्रोंइचा गेब।<sup>२२</sup> यहूदीपुकी

चिन्ड नु छक लाक्वा डा गेय कोत्रकोत्र दाक्नीम। ग्रीकपुकीमी मुर आन जोक्तीक तुइक्तीक लोत्र माल्शा, नेंथ गाक्नीम। *मत्ती १२:३८; यूहन्ना ४:४८; प्रेरित १७:१८-२१* <sup>23</sup> मेको आन दाक्शो, आन माल्शा गाक्शो नेल्ल तुइश्शा यो गोमी चहिं “ख्रीस्त पाप क्यान्चा कली साइक्वा पुंडसाक्व” दे आन कली नेंपाइक्नीकी। मोदेशो नेंपाइक्कानु, ख्रीस्त लांमी वोइश्शो फुल्लु खोदेशो दुम्शा, यहूदी आन कली दाइल पाइक्व। मिनु राम्सीनीम। अर्को रागी डा मुरपुकीमी “मूर्ख लोत्र बाक्माक्व” दे काइ नेंचा मदाक्नीम। *प्रेरित १७:३२; गलाती ५:११; १कोरिन्थी २:१४* <sup>24</sup> परमप्रभु यावेमी योत्रशो यहूदी नु ग्रीकपुकीमी चहिं मार देंनीम देंशा हना “परमप्रभु यावे आ सक्ति नु जोक्तीक तुइक्तीक नेल्ल ख्रीस्त नु थिंसीब” देंनीम। *कलस्सी २:३* <sup>25</sup> परमप्रभु यावे आ मूर्ख लोत्र मुर आन जोक्तीक तुइक्तीक क्येडा ठेयब जोक्तीक तुइक्तीक लोत्र बाक्व। परमप्रभु यावे आ आइक्व सक्ति यो मुर आन ठेयब सक्ति क्येडा ठेयब बाक्व।

<sup>26</sup> आं लोक्बपुकी, परमप्रभु यावेमी इन कली मारदे योत्रडा? इन पदेशो तशा देय, इन जोक्शो तुइश्शो तशा? गे शुश सक्ति पाइश्शो यो मननी। ठेयब खिं डा मुर यो मबाक्नी। लो, मेको मिम्तीन। *यूहन्ना ७:४८; याकूब २:१-५* <sup>27</sup> तन्न परमप्रभु यावेमी जोक्ब तुइक्व आन कली मुने तोक्चा कली मजोक्ब मतुइक्व मूर्ख आन कली योत्रतीमी। परमप्रभु यावेमी अधिकार सक्ति पाइश्शो आन कली मुने तोक्चा कली अधिकार सक्ति मपाइश्शो आन कली योत्रतीमी। <sup>28</sup> परमप्रभु यावेमी रागी डा महिक्सीशो आइक्व आन कली योत्रतु। मारदे हना हिक्सीशो नु ठेयब आन कली मुने तोक्चा कली मो पाप्तु। <sup>29</sup> मोपतीके सुइ मुर परमप्रभु यावे आ डोंइती ठेयब दुम्ने मचाप्नीम। *रोमी ३:२७; एफिसी २:९* <sup>30</sup> मेकोमी येसु ख्रीस्त आ नेंमी इन कली ब्रोंइचा गेब। मेको इन जोक्तीक तुइक्तीक, इन ठीक पतीके, परमप्रभु यावे आ मुर दुम्तीके नु पाप रे प्रोंइतीके बाक्व। *येरमीया २३:५-६; २कोरिन्थी ५:२१; यूहन्ना १७:३९; मत्ती २०:२८* <sup>31</sup> मोपतीके “प्रभु आ पतीके इं नें बोरपाइय” दे साइ नेसी देंशो लोत्र मिम्शा, परमप्रभु कली ठेयब सेल्य। *येरमीया ९:२२-२३; २कोरिन्थी १०:१७*

येसु ख्रीस्त आ पर्बम शेंशो

<sup>2</sup> आं लोक्बपुकी, गो गेपुकी नु बाक्डानु, परमप्रभु यावे आ लोत्र नेंपदनु, मुर आन जोक्तीक तुइक्तीक रे नु फू चुइश्शो लोत्र पा मर्शेदन्नी। <sup>2</sup> मारदे हना येसु ख्रीस्त कली शीम केप्शा कांटी थोक्शा क्याइश्शा साइक्वा पुंडसीशो लोत्र डा लाक्शा अरु मर्शेनुडमी, दे आं थुं फ्रेंशा जाक्शो नडा। *गलाती ६:१४* <sup>3</sup> मिनु इन कली शेंदन्नीनु, आं रांमी बल मबाक्थु, हिंन हिंन, ख्रिख्रि पा शेंताक्नी। *गलाती ४:१३; प्रेरित १८:९; २कोरिन्थी १०:३* <sup>4</sup> मुर आन कली जोक्तीक तुइक्तीक कोंइशा, ठेयब लोत्र मपड। तन्न परमप्रभु यावे आ सोक्तीम कोंइशो सक्ति रे पा शेंताक्नी। *मत्ती १०:२०* <sup>5</sup> तन्न इन थमा सुइक्तीके मुर आन जोक्तीक तुइक्तीकेम मबाक्थु, परमप्रभु यावे आ सक्तिम बाक्व। *१थिस्सलोनिकी १:५*

परमप्रभु आ जोक्तीक तुइक्तीक

<sup>6</sup> मो हना यो गो जोक्तीक तुइक्तीक लोत्र रुष आन कली लोत्र पाइनीकी। तन्न रागी डा नु सासन पाइब आन जोक्तीक तुइक्तीक डा लोत्र चहिं ममाइ। मारदे हना मेको बेक्शा लाइनीम। <sup>7</sup> तन्न गो दोदेशो जोक्तीक तुइक्तीक डा लोत्र शेंनीकी देंशा हना, परमप्रभु यावे आ जोक्तीक तुइक्तीक डा लोत्र शेंनीकी। मेको लोत्र डोंइती खुइश्शा वोइश्शो बाक्व। मुल इन कली रिश्शो दुम्मल, दे शेंनीकी। *मत्ती ११:२५; कलस्सी १:२६* <sup>8</sup> मेको लोत्र रागी डा ठेयब मुरपुकीमी मरुबेम। रुप्तेक्म हना, सक्ति पाइश्शो प्रभु कली शीम केप्शा कांटी थोक्शा क्याइश्शा मसदेम वा। <sup>9</sup> मिनु “मिक्चीम मतशो, नोफाम मर्नेशो, मुर आन थुंमी ममिश्शो लोत्र परमप्रभु यावेमी आ कली दाक्व आन कली तुइक्पाइश्शा, रुप्चा गेम्तीमी” दे ब्रेक्शो बाक्व। *यसैया ६४:४* <sup>10</sup> मेको लोत्र परमप्रभु यावेमी आ सोक्तर रे पा इं कली तुइक्पाइश्शा रुप्पाइक्तु। मारदे हना परमप्रभु यावे आ सोक्तीम नेल्ल तुइक्व। खुइश्शो लोत्र यो माल्शा गुंडब। परमप्रभु यावे आ सोक्तीम परमप्रभु यावे आ थुं डा

लोत्र यो नेल्ल तुइक्व। <sup>11</sup> मुर आन थुंमी मार बाक्वा, सुमी तुइक्नीमी डा? आंम आन थुं डा लोत्र आंमा ला तुइक्नीम। परमप्रभु यावे आ सोक्तर डा लाक्शा सुइमी परमप्रभु यावे आ थुं डा लोत्र मतुइक्नीम, आ सोक्तीम ला तुइक्व। <sup>12</sup> गोपुकीम रागी डा सोक्तर मतशो बाक्व, परमप्रभु यावे आ सोक्तर कली ताइतय। मोपतीके गो परमप्रभु यावे आ गेशो नेल्ल रुप्जय। *यूहन्ना १४:१६-१७* <sup>13</sup> मोपतीके गो शेंदकानु, मुर आन जोक्तीक तुइक्तीक लोत्रम मर्शेनीकी। परमप्रभु यावे आ सोक्तीम गेशो लोत्र पा शेंनीकी। मिनु परमप्रभु यावे आ सोक्तीम ब्रीशो मुर आन कली शेंशा रुप्पाइक्नीकी। <sup>14</sup> परमप्रभु यावे कली थमा मसुइक्व मुरुम परमप्रभु यावे आ सोक्तर डा गेय मताइनीम। मेको नेल्ल मेको आन कली मूर्ख गेय खोदेशो पा रुप्ने मचाप्नीम। मारदे हना मेको सोक्तर डा लोत्र बाक्व। *यूहन्ना ८:४७; १कोरिन्थी १:२३* <sup>15</sup> परमप्रभु यावे आ सोक्तर पाइश्शो मुरपुकीमी मारेइ मारेइ नाक्ने नु रुप्ने चाप्नीम। तन्न मेको आन कली नाक्व सुइ मबाक्नीम। <sup>16</sup> मार ब्रेक्शो बाक्व देंशा हना “सुमी प्रभु आ थुं नाक्ने नु रुप्ने चाप्ना डा? सुमी प्रभु कली शेंने चाप्ना डा?” दे ब्रेक्शो बाक्व। तन्न गोपुकी नु ख्रीस्त आ थुं बाक्व। *यसैया ४०:१३*

आलम खोदेशो पाइतीनी, दे हुइश्शो

<sup>3</sup> आं लोक्बपुकी, इन कली शेंदनु, परमप्रभु यावे आ सोक्तीम ब्रीशो मुर खोदेशो पा शेंने मचबु। मारदे हना रागी डा मुर खोदेशो पा, ख्रीस्त कली थमा सुइक्तीकेमी आल खोदेशो बाक्नीनी। *यूहन्ना १६:१२* <sup>2</sup> गो इन कली खमे मगेथु, दूध तुंइताक्नी। मिनु मुल सम्म यो दूध तुंइना तुंइन वोइक्तन्नी। *१पत्रुस २:२* <sup>3</sup> गे मुल सम्म रागी डा मुर खोदेशो बाक्नीनी। गे जीनीनी, रुश पाइनीनी। मिनु रागी डा मुर खोदेशो मद्दुम्नी डा? *१कोरिन्थी १:१०-११; १कोरिन्थी ११:१८* <sup>4</sup> का निक्शीमी “गो पावल आ नोले खोइक्व नकी” का निक्शीमी चहिं “गो आपोल्लोस आ नोले खोइक्व नकी” दे जिना जिन बाक्तीनी। मोपतीके रागी डा मुर खोदेशो मद्दुम्नी डा? *१कोरिन्थी १:१२*

गे परमप्रभु आ खिं बाक्नीनी

<sup>5</sup> आपोल्लोस माइश्शो सु में? गो पावल माइश्शो सु नडा? प्रभुमी आंस कली आ लोत्र शेंथ योत्रशो नस्कु। गोपुकीमी आंस लोत्र नेंशा थमा सुइक्तीनी। <sup>6</sup> गो खुम्ता आपोल्लोसमी ब्वाक्कु लुक्ताक्व। मिनु परमप्रभु यावेमी कोल्पाइक्तु। *प्रेरित १८:२४-२८* <sup>7</sup> मोपतीके खुम्ब ठेयब ममाइ, ब्वाक्कु लुक्व यो ठेयब ममाइ। कोल्पाइक्व, बारपाइक्व परमप्रभु यावे ठेयब बाक्व। <sup>8</sup> खुम्ब नु ब्वाक्कु लुक्व काइचीक बाक्नीस। मिनु आंइ कली पपाइश्शो गेय दोदेशो पा पका, मोदेशो पा गाल्च ताइनीकी। *१कोरिन्थी ४:५* <sup>9</sup> गे परमप्रभु यावे आ रू नु आ खिं ननी। गोपुकी चहिं मेको रूमी गेय पाइब नु मेको खिं सेल्ब नकी। *मत्ती १३:२-९; एफिसी २:२०* <sup>10</sup> परमप्रभु यावेमी आं कली रिश्शो दारशो खिं सेल्ब सेल्लती। मिनु आ देंशो टिशा, खिं डा जग दोशा, बोल्यो पा वोइक्ता। मेको जग तारी अरुमी प्रोवना प्रोवन लाइक्नीम। मेको प्रोवबपुकीमी दोपा रिश्शो दुम्बा, मेको मिम्शा गेय पामेक्व। <sup>11</sup> थमा जग येसु ख्रीस्त ला बाक्व। आ क्येडा लाक्शा अरु मारेइ जग मबाक्व। मिनु सुइमी अरु जग वोइक्ने मचाप्नीम। *१पत्रुस २:४-६* <sup>12</sup> मेको जग तारी मार मार के खिं सेल्नीम देंशा हना, सुन, चांदी, हीरा मोती, शी, खिंवा नु नल के खिं सेल्नीम। मुल मार के सेल्शो बाक्वा मताइसीब। <sup>13</sup> ख्रीस्तम निसाफ पची नाक्तर मार के सेल्तेक्म हना यो, मीम हुम्शा कोत्रब। मारदे हना मेना ख्रीस्तमी आ लोत्र शेंब आन गेय दोदेशो बाक्मे, मीम हुम्शा नाक्व। *१कोरिन्थी ४:५* <sup>14</sup> मेको जग तारी सेल्शो खिं लीत हना, सेल्बमी इनाम ताइब। <sup>15</sup> गेय मीम प्रोइश्शा, पुलु दुम्शा लत हना, मेको मुर गेना हना यो ब्रोंइचा ताइब। तन्न इनाम मतथु, मारेइ मपाइश्शो दुम्शा बाक्वा माल्ब। <sup>16</sup> गे परमप्रभु यावे आ खिं ननी, दे मतुइक्नीनी? मिनु परमप्रभु यावे आ सोक्तर इन आगाम बाक्व, दे मतुइक्नीनी? *१कोरिन्थी ६:१९; २कोरिन्थी ६:१६* <sup>17</sup> मिनु सुमी परमप्रभु यावे आ खिं ग्रान्ना दिशो सेल्बा, परमप्रभु यावेमी मेको कली यो ग्रान्ना दिशो सेल्ब। मारदे हना परमप्रभु यावे आ खिं परमप्रभु यावे के ला बाक्व। मिनु मेको गे बाक्नीनी।

## सुइ ठेयब मसुंडसमल

18 सुइमी आंम कली जोल मपांडसेक्ल। इन दातेमी सुइमी आंम कली जोक्ब तुइक्ब मिम्साक्व हना, मेको मूर्ख दुम्त। मोपा ला जोक्ब तुइक्ब दुम्ने चापब। प्रकाश ३:१७-१८ 19 एको रागी डा जोक्तीक तुइक्तीक परमप्रभु यावे आ डोंइती मूर्ख लोव बाक्ब। मार ब्रेक्शो बाक्ब देंशा हना “जोक्ब तुइक्बपुकी आंम आन जोक्तीक तुइक्तीक गेयमी आंम कली ग्याइक्पांडसीनीम” दे ब्रेक्शो बाक्ब। अय्युब ५:१३ 20 लेंशा “प्रभुमी एको रागी डा जोक्ब तुइक्ब आन मिम्शो जाम्शा लाइब, दे तुइक्ब” दे यो ब्रेक्शो बाक्ब। भजन संग्रह ९४:११ 21 मोपतीके सुइमी मुर आन नें आ पर्वम ठेयब मलेम्मल। मारदे हना नेल्ल इन के बाक्नीम। 22 इन कली शेंब, गो पावल, आपोल्लोस, केफास नु रागी, ब्रोंइचा नु बेक्वा, मुल मार दुम्शो बाक्बा नु नोले मार दुम्बा, नेल्ल इन के बाक्नीम। 23 तन्न गे ख्रीस्त आ मुर बाक्नीनी। मिनु ख्रीस्त परमप्रभु यावे आ तौ बाक्ब। १कोरिन्थी ११:३

## मुर आन कली मनाक्वा

4 मिनु मुरपुकीमी गो शेंब, आंइ पर्वम मार मिम्चा माल्नीम देंशा हना, गो ख्रीस्त आ गेय पाइब नु परमप्रभु यावे आ खुइश्शो लोव तुइक्पाइक्वा कली शेंब नकी। तीतस १:७ 2 मोदेंशो पा शेंबपुकी थमा सुइक्वा माल्शो मुर दुम्चा माल्नीम। लूका १२:४२ 3 गे नु अरु निसाफ पतीकेम आं कली नाक्तीनीनु, मेको नाक्शो मारेइ खोदेंशो ममिम्नुड। गो आंमा यो मनाक्सीनुड। 4 गो मारेइ मरिम्शो मपड, दे मिम्नुड। तन्न मतुइक्थु, पडा कों? आं कली निसाफ पाइब प्रभु बाक्ब। 5 मोपतीके प्रभु आ निसाफ पतीक नाक्त मजाक्म सम्म मुर आन कली मनाक्तीन। आ निसाफ नाक्ती जाक्मेनु, खुइश्शा वोइश्शो लोव नेल्ल तुइक्पाइक्ब। छिडछिडम खुइश्शो थुं डा थोव्रक नेल्ल छेडछेडम तांडसीनीम। मिनु परमप्रभु यावेमी मुर आन कली “गे रिम्शो पाइतीनी” देंब। १कोरिन्थी ३:८

## मुर आन नें ब्रशा ठेयब मलेत्वा

6 आं लोक्बपुकी, गे परमप्रभु यावे आ लोव रिम्शो पा टिने चाप्नीनी, दे गो मेको नेल्ल पाइतक। गे “गो पावल आ शेंशो शेंसीब नड” अरुमी “गो आपोल्लोस आ शेंशो शेंसीब नड” दे ठेयब लेशशा, इन नें मबोरपतीने। रोमी १२:३ 7 सुमी इन कली ठेयब सेल्नी? इन पशोमी ठेयब दुम्नी डा? परमप्रभु यावे आ शिशो पशोमी कका ठेयब दुम्शो ननी। मिनु परमप्रभु यावे आ गेशोमी ठेयब लेत्वा दुम्बा डा?

8 मुल गे इन माल्शो नेल्ल ताइतीनी। शुश क्येट थीब दुम्तीनी। शेंब, आंइ कली हिल्लो मपथु, मुर आन कली हुकुम पाइतीनी। गे रिम्शो हुकुम पाइतीनी हना, गो यो गे नु गेय पाइब दुम्शो, रिम्शो दुम वा। प्रकाश ३:१७; प्रकाश ३:२१ 9 परमप्रभु यावेमी आ सोइश्शो, आंइ कली मुर नेल्ल आन क्येडा आइक्च सेल्शा साइक्वा पुंडसीचा कली वोइक्तु, दे मिम्नुड। मारदे हना रागी रागी डा मुर नेल्ल नु परमप्रभु यावे आ स्वर्ग डा गेय पाइबम आंइ कली कोव्रना कोव्रन बाक्नीमी। रोमी ८:३६; हिब्रू १०:३३ 10 गो ख्रीस्त आ पर्वम मूर्ख दुम्तक। तन्न गे ख्रीस्त आ पतीकेमी जोक्ब तुइक्ब बाक्नीनी। गोपुकी मचापब दुम्तक। गोपुकी चहिं बोल्यो बाक्नीनी। मुरपुकीमी इन कली मान पा ठेयब सेल्नीम। आंइ कली चहिं महिक्नीम। १कोरिन्थी ३:१८

11 मुल यो जचा तूचा मतथु, मरिम्शो फेक्सीशा, श्येत जशा, आंइ बाक्तीक खिं यो मबाक्ब। २कोरिन्थी ११:२३-२७ 12 गो आंम गुइमी श्येत पा गेय पा बाक्तक। मुरपुकीमी आंइ कली शुक्शी लोव पामेनु, मेको आन कली आसीक गेतक। गिश खेदा पाम्तेक्म हना यो, फाल्शा बाक्तक। १कोरिन्थी ९:१५; प्रेरित १८:३; मत्ती ५:४४; रोमी १२:१४ 13 जिचा पोक्शा, गाइश्शा मरिम्शो पामेनु, गो मेको आन कली रिम्शो लोव पा, गारपाइक्नीकी। गोपुकी रागी डा ग्रांरा दिचा डा थोव्रक खोदेंशो दुम्शा, नेल्ल क्येडा आइक्च महिक्सीशो मुर दुम्तक।

## थमा सुइक्ब आन आफ मिम्सीशो

14 गो इन कली मुने तोक्चा कली एको मब्रेक्तु। गे आं दाक्शो तमी तौ इन कली रिम्शो अरेचा कली एको ब्रेक्ताक्ड। 15 ख्रीस्त आ पर्वम अर्ती गेब शेंब मुर शुश बाक्मा माइ। तन्न इन आफ खोदेंशो मुर शुश मबाक्नीम। मारदे हना गो इन कली येसु ख्रीस्त आ ग्येरपाइक्ब लोव शेंशा, इन आफ दुम्ती। १कोरिन्थी ९:२; गलाती ४:१९ 16 मोपतीके गो इन कली अर्ती का गेनन्नी। आं पशो खोदेंशो पने। १कोरिन्थी ११:१ 17 मोपतीके गो प्रभु आ पशोमी, आ रिम्शो नु दाक्शो तौ तिमीथी इन बाक्तीके सोइक्ताक्ड। मेकोमी गो ते ते मार मार लोव शेंदु, गो दोपा येसु ख्रीस्त आ लां खोदु, मेको नेल्ल इन कली शेंदल। प्रेरित १६:१-३ 18 मिनु इन दाते डा का निक्शीमी “पावल मजाक्ब” दे ठेयब लेशशो लोव पाम्तेक्म, दे लोव पशो नेंता। 19 तन्न प्रभुम इन कली गुम्चा गेती हना, गो रीब पा जाक्नुड। मेको ठेयब लेशशो मजाक्ब देंब आन लोव ममाइ, मेको आन सक्ति बाक्म कों मबाक्म दे ला कोव्रनुड। 20 मारदे हना परमप्रभु यावे आ राज्य फू चुइश्शो ठेयब लोव रे पा मतांडसीब। सक्ति पाइश्शो गेय रे पा तांडसीब। १कोरिन्थी २:४ 21 गे मार पांडसीचा दाक्नीनी? कोक्केम हिंच कोइश्शो खोदेंशो पा शेंदन्नी देय आं दाक्शो आल आन कली लेम्शो खोदेंशो ब्रोवशो लोव पा शेंदन्नी? आमा मिम्शा देनीन। २कोरिन्थी १०:२

## मरिम्शो आन कली तिल्चा माल्शो

5 गे नु बाक्ब कामी हेंथे पाफ्तु देंशो लोव नेंता। मोदेंशो पात्के अर्को रागी डा मुर आन दातेमी यो मबाक्ब। मुर कामी आ आफ आ मीश वोंइसाक्च, देंशो लोव नेंता। लेवी १८:८ 2 मिनु मुल सम्म ठेयब लेशशा बाक्नीनी? मोदेंशो पशो तशा, इन थुं मखाइक्नीनी? मोदेंशो पाइब कली तिल्चा माल्नीनी। १कोरिन्थी ४:६-८

3 इन दातेम मबाक्ती हना यो, आं थुं गेपुकी नु काथा बाक्शो खोदेंशो पा, मेको मुर कली येसु ख्रीस्त आ नेंमी निसाफ पने थुम्ता। कलस्सी २:५ 4 गे नेल्ल प्रभु येसु आ नेंम गुम्शो बाक्तीनी हना, आं थुं गे नु बाक्त हना, इ प्रभु येसु ख्रीस्त आ सक्तिम मत्ती १६:१९; मत्ती १८:१८; २कोरिन्थी १३:३० 5 मेको मुर कली सैतान आ गुइम गेचा माल्नीनी। मेको आ रां खतम दुम्त हना यो, प्रभु आ निसाफ नाक्तीमी ब्रोंइचा तवल। १तिमीथी १:२०

6 इन ठेयब लेशशो रिम्शो ममाइ। इम्चीली डल्ला का बोरपाइक्ब ओख्तीमी फस नेल्ल डाम्शा, बोरब दे मतुइक्नीनी? गलाती ५:९ 7 मेको माइत बोरपाइक्ब ओख्ती ताइक्तीने। गे मारेइ मसुप्शो फस खोदेंशो दुम्शा, नक दुम्शो बाक्नीनी। मारदे हना आंइ पास्सा चाड डा क्योरशो पाठा ख्रीस्त बाक्ब। प्रस्थान १२:३-२०; प्रस्थान १३:७; यसैया ५३:७; १पत्रुस १:१९ 8 मोपतीके माइत बोरब ओख्ती मसुप्शो फस खोदेंशो दुम्शा, मरिम्शो थुं पाइश्शो गेय पचा प्रोंइशा, नक मुर दुम्शा, पास्सा मानेय।

9 इन कली डोंइती ब्रेक्शो चिठीमी “पात्के पाइब नु काथा बाक्वा मदुम्ब” दे ब्रेक्ताक्न्नी। 10 आं देंशो मार बाक्त देंशा हना, रागी डा पात्के नु तेल्लेम पाइब, शिम पाइब, खुइ पा रोइश्शा गाक्ब, मूर्ति कली पूजा पाइब नु काथा बाक्वा मदुम्ब, दे मशेंदन्नी। मोदेंशोपुकी नु काथा बाक्वा मदुम्ब हना दा, रागीमी ते बाक्वा डा? 11 तन्न थमा सुइश्शा प्रभु आ मुर दुम्ती देंब लोक्बम पात्के पा तेल्लेम पा, शिम दुम्शा, मूर्ति पूजा पा, शुक्शी पा गाक्ब नु शांबु राकसीमी दुक्शा, खुइ पा गाक्ब दुम्तेक्म हना, मेकोपुकी नु काथा बाक्शा जचा यो मदुम्ब। २थिस्सलोनिकी ३:६ 12 प्रभु आ मुर मदुम्शो आन कली मार निसाफ पाइनुडा डा? प्रभु आ मुर दुम्शो इन दाते डा आन कली चहिं गोपुकीमीन नाक्शा, सजाइ गेचा ममाल्नीनी डा? 13 परमप्रभु यावेमी रागी डा मुर आन कली निसाफ पाइब। गोपुकी नु बाक्शो पात्के पाइब कली गुंइशा सोइक्तीने। ब्यक्स्था ११:६; मत्ती १८:१७

## निसाफ पचा आ पर्वम

6 इन दाते डा का निक्शी जिम्तेक्म। मिनु मारदे निसाफ पाइब आन डोंइती लाइश्शा मुददा कोप्शा, थमा मसुइक्ब निसाफ पाइब आन

गुडमी गेनीनी? आंमा इन दातेम गारपाइक्वा माल्शो ननी। 2 थमा सुइक्वपुकीमी नेल्ल रागी डा मुर आन कली निसाफ पाइनीम देंशो लोव्र मतुइक्वीनी डा? गे रागी डा मुर आन कली निसाफ पाइतीनी हना, इन दाते डा आइक्व लोव्र गारपाइक्वे मचाप्नीनी डा? मत्ती १९:२८ 3 गोपुकीमी परमप्रभु यावे आ स्वर्ग डा गेय पाइब आन कली लाइ यो निसाफ पाइनीकी देंशो लोव्र यो प्रेदीनी? आंइ नाक्त किंत किंत डा पतीक मार बाक्वा डा? 4 इन दातेमी मोदेंशो जीब खेब बाक्त हना, मारदे थमा मसुइक्व, महिक्वीशो मुर आन गुडमी निसाफ पचा कली गेनीनी। 5 मोदेंशो पशोमी गे मुने दोक्तीनी। इन दातेमी मोदेंशो मुर कली निसाफ पाइब जोक्व तुइक्व लोक्व का मबाक्वा डा? 6 तन्न लोक्वमी लोक्व कली मुददा कोप्शा, थमा मसुइक्व आन डोंइती चाक्वीशो तशा, गो थम मरिम्शो लाक्ती। 7 इन जिशो ठीक मलाक्नुड। इन के मार लाइक्तेक्म हना यो, मार पाक्तेक्म हना यो, मुददा मकोप्थु, फाल्शा बाक्ने मचाप्नीनी? मत्ती ५:३८-४८; १थिस्सलोनिकी ५:१५; १पत्रुस ३:९ 8 तन्न गे आंमा इन लोक्व आन कली मरिम्शो पाइनीनी, रोइक्वीनी।

9 ठीक मपाइबपुकी परमप्रभु यावे आ राज्य ओव्रचा मताइनीम दे मतुइक्वीनी? दूली ममिम्तीने। मरिम्शो पाइबपुकीमी मोदेंशो पाइनीम देंशा हना, पाक्ते, तेल्लेम पाइनीमी, मूर्ति कली पूजा पाइनीमी, मुर आन मीश लाइक्वीमी, वोंइश मुर वोंइश मुर ब्वाइसीनीमी, १तिमोथी १:९-११; गलाती ५:१९-२१ 10 खुइ पाइनीमी, शिम पाइनीमी, शांबु राकसीमी दुक्शा गाक्वीमी, शुक्शी लोव्र पा गाक्वीमी, मुर आन के बाक्शो थोव्रक रोइश्शा, श्येत गेनीमी। मोदेंशो पाइबपुकी परमप्रभु यावे आ राज्यम ओव्रचा मताइनीम। 11 इन दातेमी का निक्शी मोदेंशो बाक्मा बाक्त। तन्न मुल गे चिक्वो खोदेंशो पा, परमप्रभु यावे आ मुर दुश्शा, प्रभु येसु ख्रीस्त आ नेंमी नु इं परमप्रभु यावे आ सोक्तीम पतीके ठीक मुर सेल्चा पुंइसाक्वीनी। तीतस ३:३-७; १कोरिन्थी १:२; रोमी ३:२६

#### थमा सुइक्व आन रां

12 गो मार गेय पचा दाक्तु, मेको पने चाप्नुड। तन्न गेय का निक्शी आं कली रिम्शो मदुम्ब। गो मारेइ पने चाप्ता हना यो, मरिम्शो पतीक आ वाइल मदुम्नुड। १कोरिन्थी १०:२३ 13 जचा थोव्रक कोव्रज कली बाक्व, कोव्रज जचा थोव्रक कली बाक्व। मिनु परमप्रभु यावेमी निम्फा आस कली जाम्शा लाइब सेल्शो बाक्व। मुर आ रां ग्रांरा दिशो तेल्लेम पचा कली मसेल्शो बाक्व। तन्न रां प्रभु कली सेल्शो बाक्व। मिनु प्रभु यो रां कली सेल्शो बाक्व। १थिस्सलोनिकी ४:३-५ 14 परमप्रभु यावेमी प्रभु कली बेक्शो रे सेंताक्व। मिनु आ सक्तिम इं कली यो सेंब। १कोरिन्थी १५:२०; २कोरिन्थी ४:१४ 15 इन रां ख्रीस्त आ रां बाक्व दे मतुइक्वीनी? मिनु ख्रीस्त आ रां लाइश्शा, तेल्लेम आ रां सेल्चा डा? मोदेंशो मपने। 16 तेल्लेम नु ब्वाइसीशो, रां काइचीक दुम्सीब दे मतुइक्वीनी? मार ब्रेक्शो बाक्त देंशा हना “मेको निक्शी रां का दुम्नीस” दे ब्रेक्शो बाक्व। उत्पती २:२४ 17 तन्न प्रभु आ मुर दुम्पानु, प्रभु आ सोक्त नु इं सोक्त का दुम्नीस। यूहन्ना १७:२१-२२ 18 ग्रांरा दिशो तेल्लेम पतीक रे डोन बाक्कीन। मारदे हना मारेइ मारेइ पाप पनीनु, रां आगामी मपाइनीनी। तेल्लेम पनीनु चहिं आंम रां कली पाप पाइनीनी। 19 इन रां परमप्रभु यावे आ सोक्त आ खिं बाक्व दे मतुइक्वीनी? परमप्रभु यावेमी आ सोक्त इन रांमी वोइक्तु। मिनु इन रां इन के ममाइ। १कोरिन्थी ३:१६ 20 गे ग्याप्शो मुर बाक्वीनी। मोपतीके इन रांमी परमप्रभु यावे कली ठेयब सेलीने। १कोरिन्थी ७:२३; १पत्रुस १:१८-१९; फिलिप्पी १:२८

#### ग्युंवे आ पर्वम लोव्र

7 साइ आं कली इन ब्रेक्शो चिठीमी गेपुकीमी “ग्युंवे पचा नु मपचा, तेको रिम्शो बाक्वा?” दे हिल्लो पशो बाक्तीनी। मिनु मुल मार देंनुड देंशा हना, वोंइश मुरुमी मीश मुर कली मथिथु बाक्वा रिम्शो दुम्ब। 2 मो हना यो हेंथे मगाक्मल देंशा, ग्युंवे पा वोंइश मुर मीश का नु मीश मुर वोंइश का नु बाक्वा रिम्शो दुम्ब। 3 ग्युंवे पशा, वोंइश मीश दाक्मुशा टिमुशा बाक्सल।

4 मीश मुर आ रां आ वोंइश आ अधिकारम बाक्व। आ वोंइश आ रां आ मीश आ अधिकारम बाक्व। 5 वोंइश मीश गारशा, नाक्त का निक्शी काथा मइप्थु, प्रार्थना पना पन बाक्स, दे लोव्रसी गारपाइश्शा बाक्वा यो रिम्शो दुम्ब। मेको डा लाक्शा चहिं ब्राशा बास मबाक्कीने। मारदे हना सैतानमी शुश नाक्त सम्म ब्राशा बाक्ने मचाप्नीम दे तुइश्शा, इन कली तेल्लेम पपाइक्वे चाप्व। 6 एको आं पशो लोव्र बित्चान माल्नीनी दे मर्देनुड। तन्न आं देंशो लोव्र बिस्साक्वीनी हना, इन कली रिम्शो दुम्ब। 7 मुर नेल्ले आं खोदेंशो दुम्मल दे मिम्नुड। मो हना यो परमप्रभु यावेमी आ दाक्शो पा का निक्शी आन कली ग्युंवे पशा बाक्वा, का निक्शी आन कली चहिं ग्युंवे मपथु बाक्वा गेशो बाक्त। मत्ती १९:१२

#### कान बाक्शो आन पर्वम लोव्र

8 मुल सम्म ग्युंवे मपथु बाक्व, आन वोंइश बेक्शो मीश मुर नु आन मीश बेक्शो वोंइश मुर आन कली “आं खोदेंशो पा कान बाक्तेक्म हना, मेको इन कली रिम्शो दुम्ब” देंनुड। 9 सु सु चहिं आन का ला बाक्ने मचाप्नीमी, मेकोपुकी ग्युंवे पांइसमल। मारदे हना वोंइश नु मीश माल्शा, हेंथे गाक्वा क्येडा ग्युंवे पचा रिम्शो दुम्ब। १तिमोथी ५:१४

#### ग्युंवे पशो आन कली शेंशो

10 मेको आं लोव्र ममाइ, ग्युंवे पशो आन कली, प्रभु आ देंशो लोव्र मिम्पाइक्नुडमी। मीश मुरुमी आ वोंइश प्रोंइचा मदुम्ब। मत्ती ५:१२ 11 प्रोंइशा गाक्त हना, अर्को वोंइश खोइक्वा मदुम्ब। आ वोंइश नु बाक्वा दाक्व हना, आ वोंइश नुन दुशा बाक्सल। वोंइश मुरुमी आ मीश कली मप्रोनल। मत्ती ५:३२ 12 एको लोव्र डा लाक्शा, प्रभु आ लोव्र ममाइ, आं मिम्शो लोव्र मार देंनुड देंशा हना, थमा सुइक्व लोक्व आ मीश थमा मसुइक्व बाक्त हना, तन्न आ वोंइश नु बाक्वा दाक्व हना, आ वोंइशेमी मेको कली मप्रोनल। 13 थमा सुइक्व मीश मुर आ वोंइश थमा मसुइक्व बाक्त हना, तन्न आ मीश नु बाक्वा दाक्व हना, आ मीशेमी यो मेको कली मप्रोनल। 14 मारदे हना थमा मसुइक्व वोंइश आ मीश आ थमा सुइक्वीकेमी आसीक ताइब। मिनु थमा मसुइक्व मीश मुर आ वोंइश आ थमा सुइक्वीकेमी आसीक ताइब। मोदेंशो मदुम्त हना, आन आल प्रभु के मदुम्नीम। तन्न मोदेंशो दुम्त हना, मेको आल परमप्रभु यावे के दुम्नीम। रोमी ११:१६ 15 थमा मसुइक्व वोंइश मुर नु मीश मुरुमी थमा सुइक्व आन वोंइश मीश आन कली प्रोंइशा ब्राशा बाक्वा दाक्ताक्म हना, लचा गेमेक्ल। काथा बाक्वान माल्ब देंशो मबाक्व। परमप्रभु यावेमी आ मुर आन कली दुशा बाक्शो तचा दाक्व। रोमी १४:१९ 16 थमा सुइक्व मीश मुर, गे इ वोंइश कली “थमा सुइक्व सेल्ने चाप्नुड” दे दोपा तुइक्नेवे? थमा सुइक्व वोंइश मुर, गे इ मीश कली “थमा सुइक्व सेल्ने चाप्नुड” दे दोपा तुइक्नेवे? १पत्रुस ३:१

#### दोपा योव्रशा, मोपा बाक्कीन

17 प्रभुमी इन कली दोपा योव्रशा वोदा मोपान बाक्कीन। परमप्रभु यावेमी इन कली दोपा ब्रेत्ता मोपा बाक्कीन। मेको आं शेंतीक नेल्ल गुम्तीक खिं आन कली बाक्व। 18 गे ब्रेत्चा पुंइसीचा क्येडा डोंइती खोइक्वीक चिनु खोइक्वा पुंइसीशो बाक्तीनी हना, मखोंइसीशो दुम्वा बल मपने। मखोंइसीशो बाक्तीनी हना, खोंइसीचा बल मपने। 19 मारदे हना खोइक्वीक चिनु खोइश्शो नु मखोंइश्शो आन पर्वम मारेइ ममिम्सीब। तन्न परमप्रभु यावे आ अरेशो टिचा, ठेयब बाक्व। गलाती ५:६; गलाती ६:१५ 20 मुर नेल्ल इन कली मोदेंशो पा ब्रेत्ता, मोदेंशो नु बाक्कीन। 21 मेना वाइलीम वाइल बाक्तीनी हना, वस्ता मपने। प्रोंइचा पुंइसाक्वीनी हना, ग्येरशा लने। फिलेमोन १६; एफिसी ६:६ 22 मारदे हना प्रभुमी ब्रेत्ची ना वाइलीम वाइल बाक्तीनी, प्रभु आ डोंइती प्रोंइचा पुंइसीशो मुर दुम्तीनी। ब्रेत्ची ना प्रोंइचा पुंइसीशो मुर बाक्तीनी हना, मुल ख्रीस्त आ वाइलीम वाइल दुम्तीनी। 23 गे थाप्शा, प्रोंइचा पुंइसीशो बाक्तीनी। मुल मुर आन वाइलीम वाइल मदुमीन। १कोरिन्थी

६:२०<sup>24</sup> आं लोकबपुकी, परमप्रभु यावेमी इन कली दोपा योत्रशा ब्रेशा वोदा, मोपान परमप्रभु यावे नु बाक्कीन।

ग्युंवे मपथु बाक्शो आन पर्वम

25 ग्युंवे मपथु बाक्ब आन पर्वम प्रभुमी आं कली मारेइ मअरेव। तन्न गो प्रभु आ शिशी पतीकेमी थमा सुइक्ब मुर दुम्ती, गो आं मिम्शो देंनुड।  
26 श्येत जचाइतय। मोपतीके मुल दोदेशो बाक्वा, मोदेशोन बाक्तय हना, रिम्शो दुम्ब, दे मिम्नुड। १कोरिन्थी १०:११<sup>27</sup> मीश बाक्शो मुरुमी मेको कली प्रॉइशा बाक्वा ममालीन। मीश मपाइश्शो बाक्तीनी हना, ग्युंवे पचा ममालीन।<sup>28</sup> तन्न ग्युंवे पनीनु, मरिम्शो मपाइनीनी। मीश आलम ग्युंवे पाप्नु हना, मेकोमी मारेइ यो मरिम्शो मपाइब। तन्न ग्युंवे पशोपुकीमी श्येत जाइनीम। मोपतीके मेकोपुकीम रागी डा श्येत मजामेक्ल, दे अर्ती गेतन्नी।  
29 आं लोकबपुकी, प्रभु जाक्वा चिक्शो बाक्ब। मुल रे मीश बाक्शो मुर, मीश मबाक्शो खोदेशो पा बाक्कीन। रोमी १३:११; लूका १४:२६<sup>30</sup> रोंका पाइबपुकी रोंका मपाइब खोदेशो पा बाक्कीन। मिनु ग्येरशा बाक्बपुकी मग्येरसीशो खोदेशो पा बाक्कीन। मारेइ मारेइ ग्याप्शा वोइक्बपुकीमी मारेइ मवोइश्शो खोदेशो मिम्मेक्ल।<sup>31</sup> मुरपुकीम रागी डा गेय पाइनीम हना यो, रागी डा गेय मपथो खोदेशो पा बाक्मल। मारदे हना रागी जाम्शा लचा चिक्शो बाक्ब। १यूहन्ना २:१५-१७

32 गो सुर्ता मपथु, थुं नाइश्शा बाक्शो तचा दाक्नुड। ग्युंवे मपथो वॉइश मुरपुकीमी दोपा प्रभु आ दाक्शो पचा, दे मिम्नीम।<sup>33</sup> तन्न ग्युंवे पशो वॉइश मुरपुकीमी चहिं दोपा मीश कली ग्येरपाइक्वा? दे मिम्शा बाक्नीम। लूका १४:२०<sup>34</sup> मोपा गे निक्शी मिम्शो बाक्नीनी। ग्युंवे मपथो मीश मुर नु मीश आलपुकीमी प्रभु आ दाक्शो पा थुं नु रं नेल्ले प्रभु कली जिम्मा गेचा कली मिम्नीम। तन्न ग्युंवे पशो मीश मुरपुकीम चहिं रागी डा गेय पा, दोपा आंम वॉइश कली ग्येरपाइक्वा, दे मिम्शा बाक्नीम।<sup>35</sup> इन कली रिम्शो दुम्ल, दे मोदेशो पाता। तन्न श्येत गेचा कली ममाइ। इन गुम्तीकेमी नेल्ल रिम्शो दुम्ल नु इन थुं नेल्लेमी प्रभु कली खोइश्शा, रिम्शो बाक्ने चापीन, दे मोदेशो लोत्र पाता।

36 सुइ मुरुमी ग्युंवे पचा कली मीश आल पुंइने थुम्शा, मेको मीश आल कली प्रॉइचा मरिम्शो बाक्ब, दे मिम्ब नु मेको कली दाक्ब हना, ग्युंवे पवल। मेको पाप मबाक्ब।<sup>37</sup> तन्न सुमी ग्युंवे मपाइनुड देंशा, आ रं कली चलेब नु आ मीश आल कली मो वोइक्नुड, दे आ थुंम मिम्ब हना, मेको रिम्शो दुम्ब।<sup>38</sup> मोपतीके सुमी आ मीश आल कली ग्युंवे पाइबा, मेकोमी रिम्शो पाइब। सुमी मपाइबा, मेकोमी मेको क्येडा रिम्शो पाइब।

वॉइश बेक्शो मीश मुर आन पर्वम

39 आन वॉइश बाक्ना बाक्न मीश मुरुमी अर्को वॉइश मुर नु ग्युंवे पचा मताइनीम। आन वॉइश बेक्म नोले आन दाक्शो मुर कली ग्युंवे पने चाप्नीम। तन्न प्रभु कली थमा सुइक्ब दुम्चा माल्नीम। रोमी ७:२<sup>40</sup> गो परमप्रभु यावे आ सोक्तीम ब्रीशो मुर नड। गो मार मिम्नुड देंशा हना, लेंशा ग्युंवे पचा क्येडा ग्युंवे मपथु बाक्वा रिम्शो दुम्ब। मिनु ग्येरशा बाक्वा तांइसीब दे मिम्नुड।

मूर्ति कली चढ़ेशो श्ये

8 मूर्ति कली चढ़ेशो श्ये ब्वचा आ पर्वम गो नेल्लेमी तुइक्नय। गो शुश तुइक्ब नकी, दे तुइश्शोमी मुर आन कली बोरशा ठेयब लेप्पाइक्ब। दाक्मुशा बाक्शोमी चहिं नेल्ल आन कली रिम्शो दुम्ब, नेल्ल आन थुं बारपाइक्ब। प्रेरित १५:२९<sup>2</sup> मारेइ मारेइ जोक्ब तुइक्ब नड देंबमी आ माल्शो मतुइश्शो बाक्ब। गलाती ६:३<sup>3</sup> तन्न सु सुमी परमप्रभु यावे कली दाक्नीमी, मेको आन कली परमप्रभु यावेमी तुइश्शो बाक्ब। १कोरिन्थी १३:१२

4 मूर्ति कली चढ़ेशो श्ये ब्वचा आ पर्वम मार देंनुड देंशा हना, मूर्तिपुकी सोक्त पाइश्शो मनम। मेकोपुकी नु मारेइ मबाक्ब। परमप्रभु यावे डा लाक्शा सुइ मबाक्ब दे तुइक्ताक्व। ब्यवस्था ६:४<sup>5</sup> सरीड नु रागीमी शुश देवी देवता

नु प्रभु माइश्शो बाक्नीम हना यो, १कोरिन्थी १९:२०; भजन संग्रह १३६:२-३; रोमी ८:३८-३९<sup>6</sup> इं कली परमप्रभु यावे का ला बाक्ब। मेको मारेइ मारेइ सेल्ब इं आफ बाक्ब। मिनु गोपुकी यो मेको आ सेल्शो बाक्नय। मिनु इं प्रभु का ला बाक्ब, मेको प्रभु येसु ख्रीस्त बाक्ब। मेको आ पतीकेम मारेइ मारेइ दुम्शा, गो ब्रॉइचा ताइनीकी। १कोरिन्थी १२:५-६; प्रस्थान २०:३; मलाकी २:१०; एफिसी ४:५-६; यूहन्ना १:३; कलस्सी १:१६

7 गोपुकी नु बाक्ब का निक्शीमी इं मिम्शो लोत्र मरुबेम। मेकोपुकीमी “देवी देवता बाक्नीम” दे डोंइती रे डा आन मिम्शो प्रॉइने मचबेम। मिनु मुल मूर्ति कली चढ़ेशो श्ये ब्वामेनु “पाप राइसीबा, कोर में?” दे मिम्शा, आन थुं क्याल्नीम। १कोरिन्थी १०:२८<sup>8</sup> जचा थोत्रक जशा ब्वशा, परमप्रभु यावे आ डोंइती मारेइ मपाइब। जशोमी ठेयब मडुम्सीब, मजशोमी आइक्च यो मडुम्सीब, दे तुइक्नय। रोमी १४:१७<sup>9</sup> मोदेशो तुइक्ताक्नी हना यो, होस पांइसीने। मारदे हना का निक्शीमी इन कली तशा, आन थुं क्याल्तेक्म। गलाती ५:१३<sup>10</sup> मारदे हना सुइमी इ कली, जोक्ब तुइक्ब दुम्शा, मन्दीरम बाक्शा, मूर्ति कली चढ़ेशो श्ये ब्वशो ताप्नु हना, मेको मजोक्ब मुरुमी मूर्ति कली चढ़ेशो श्ये मबवाइबा डा? 11 मिनु इन जोक्तीके तुइक्तीकेमी इन मजोक्ब लोकब आन कली पाप पपाइक्नीनी। मेको आ पर्वम ख्रीस्त साइक्वा पुंइसाक्व। रोमी १४:१५<sup>12</sup> गे इन लोकब आन थुं क्याल्पाइक्तीनी हना, गे ख्रीस्त कली मरिम्शो पशो बाक्नीनी।<sup>13</sup> मोपतीके मार देंनुड देंशा हना, आं कली श्ये ब्वशो तशा, आं लोकबपुकीमी आन थुं क्याल्नीम दे तुइक्ताक्व। मिनु मेको आन थुं मक्याल्मेक्ल देंशा, मुल डा मेरे गो गेनायो श्ये मबवाइनुड दे आं थुं फ्रेंशा, श्ये ब्वचा प्रॉइता। रोमी १४:२१

शेंबम आन माल्शो गेचा पुंइसीनीम

9 गो आं दाक्शो, आं मिम्शो पने मचाप्नुडा डा? गो ख्रीस्त आ सोइश्शो मनडा डा? आं मिक्चीमी इं प्रभु येसु ख्रीस्त कली मतशो नडा डा? गो प्रभु आ गेय पडा रे गोपुकी यो प्रभु आ मुर मडुम्नी डा? १कोरिन्थी १५:८; प्रेरित ९:३-५, १५<sup>2</sup> शुश मुरुमी आं पर्वम “आं कली ख्रीस्त आ लोत्र शेंथ सोइश्शो ममाइ” दे मिम्ताक्म हना यो, इन कली शेंथ सोइश्शो नड। मारदे हना प्रभु आ मुर दुम्तीनी। गे आं सोइश्शो दुम्तीके आ छाप बाक्नीनी। १कोरिन्थी ४:१५; २कोरिन्थी ३:२-३<sup>3</sup> आं शेंशो आ पर्वम हिल्लो पाइब आन कली कोरिन्थीपुकी दोपा थमा सुइक्ब दुम्मा? लो, मिम्तीन, दे माइक्नुडमी। 4 मिनु आंइ कली माल्शो जचा तूचा थोत्रक “गेन” दे पुंइने मचाप्नीनी डा? लूका १०:८<sup>5</sup> केफास, प्रभु आ लोकब नु सोइश्शो नेल्लेमी शेंना शेंन गाक्मानु, आन मीश काथा लाइश्शा गाक्तेक्म। मिनु गोपुकी मेको आन बुद पा आंइ मीश लाइश्शा गाक्वा मताइनीकी डा? 6 शेंबपुकीम शेंशा जाइनीम। बारनाबास नु गो चहिं शेंशा गाक्कुनु, जचा मतथु, गेय पचा माल्न्स्कु डा? प्रेरित ४:३६; २थिस्सलोनिकी ३:७-९ 7 लडाइ पाइब आन खिं डा जशा बाक्नीमी डा? अडगुर रू थीबपुकीमी श्येत पा खुम्शा, अडगुर मीमेनु, ब्वचा मताइनीमी डा? गोठलापुकीमी चिम्शो बी कली योत्रशा कोत्रशा, घांस लाप्शा, श्येत पा गेय पशा, दूध चिम्शा तूचा मताइनीमी डा? 8 आं देंशो लोत्र मुरुम देंशो लोत्र ला बाक्बा डा? परमप्रभु यावे आ अरेशो लोत्र नु मगारबा डा? 9 मोसामी “ब्यफ कली दांइ पपाइश्शोनु, फुडला मपाइक्वा” दे ब्रेक्शो बाक्त। परमप्रभु यावेमी ब्यफ आन पर्वम ला मोदेशो पचा दे ब्रेक्पदा डा? ब्यवस्था २५:४; १तिमोथी ५:१८ 10 इं पर्वम यो ब्रेक्शो बाक्त दे रुपीन। अर्को लोत्र का निक्शी ब्रेक्शो बाक्ब “ब्यफ वाक्बपुकीमी बाली नाली मीमेनु, इक्का अन्न ताइनुड दे वाक्नीमी। चेरब तुप्बमी यो, इक्का चेरब ताइनुड, दे तुप्ब” दे ब्रेक्शो बाक्ब। 11 गोपुकीमी इन कली परमप्रभु यावे आ लोत्र शेंदकानु, इन जचा तूचा थोत्रक तचा, ठीक मडुम्बा डा? रोमी १५:२७<sup>12</sup> अरु शेंबपुकीमी मेको ताम्नेक्म हना, मार, गो मेको आन क्येडा मताइनीकी डा? मो हना यो गो मोदेशो लोत्र मपाइनीकी। ख्रीस्त आ ग्येरपाइक्ब लोत्र शेंशोनु, श्येत मडुम्ल, दे मोदेशो लोत्र मपाइनीकी। प्रेरित २०:३३-३५ २कोरिन्थी ११:९ 13 परमप्रभु यावे आ खिंमी गेय पाइबपुकीमी मेक रे जाइनीम। चढ़ेतीकेम गेय पाइबपुकीमी मेक रे ब्वाइनीम, दे मतुइक्नीनी? गन्ती १८:१८-१९, ३१;

ब्यवस्था १८:१-३<sup>14</sup> प्रभुमी “आं ग्येरपाइक्व लोत्र शेंबपुकी शेंशा गाक्मानु, मेकोपुकी मार मार माल्मा, मेको आं ग्येरपाइक्व लोत्र शेंतीके रे तचा माल्नीम” देंशो बाक्ता. लूका १०:७; गलाती ६:६

15 मिनु मोदेंशो बाक्ता हना यो, गो मारेइ मपुनु, मारेइ मताक्गु। आं कली गेचा माल्नीनी दे यो मदेनुड। थमा सुइक्व आन शोंप मलाइक्वा, दे बोरनुड। अरु आन थोव्रक तचा क्येडा बेक्वान रिश्शो, दे मिन्नुड। प्रेरित १८:३<sup>16</sup> गो शेंशा गाक्ती, आं ठेयब लेत्वा डा मारेइ मबाक्व। मारेदे हना लोत्र शेंथ सोइश्शो नड, दे तुइश्शा, गो प्रभु आ ग्येरपाइक्व लोत्र मशेंथु बाक्ती हना, आं कली काइ मरिश्शो दुम्ब। येरमीया २०:९<sup>17</sup> आं दाक्शो पा शेंथ गाक्शो नड हना, गाल्च ताक्गु वा। तन्न आं दाक्शो पा शेंशा गाक्शो मनड। “शेंथ गाक्को” दे माइक्वा पुंडसीतीके शेंशा गाक्ती। १कोरिन्थी ४:१<sup>18</sup> मिनु आं शेंशा गाक्शो डा मार ताक्गु डा? गो प्रभु आ ग्येरपाइक्व लोत्र मारेइ मताक्गु शेंनुड। ग्येरपाइक्व लोत्र शेंब आन तचा डा, ताक्वा मदाक्नुड।

नेंब मुर नु गारशा शेंशो

19 गो आं दाक्शो पने चाप्नुड, मो हना यो शुश मुरुमी ख्रीस्त आ लोत्र रुष्शा, आ मुर दुम्मल, दे आन वाइल खोदेंशो दुम्शा, शेंना शेंन गाक्ती। मत्ती २०:२७; रोमी १५:२<sup>20</sup> गो यहूदी आन कली शेंदुनु, ख्रीस्त आ लोत्र रुप्पाइश्शा, आ मुर दुम्मल, दे गो यहूदी दुम्ती। गो परमप्रभु यावे आ डोंइती डा पतीके पाइब आन कली शेंना शेंन, मेको ख्रीस्त आ मुर दुम्मल, दे गो परमप्रभु यावे आ डोंइती डा पतीके पाइब खोदेंशो दुम्ती। तन्न गो मेको डोंइती डा पतीके पाइब मनड। १कोरिन्थी १०:३३; प्रेरित १६:३; प्रेरित २१:२०-२६<sup>21</sup> गो परमप्रभु यावे आ अरेशो लोत्र मतुइक्व आन कली शेंदुनु, ख्रीस्त आ लोत्र रुप्पाइश्शा, आ मुर दुम्मल, दे गो परमप्रभु यावे आ अरेशो मपाइब खोदेंशो दुम्ती। गो परमप्रभु यावे आ अरेशो मपाइब दुम्शा यो, मेको आ डोंइती ख्रीस्त आ अरेशो पाइब दुम्ती। गलाती २:३<sup>22</sup> गो बोल मपाइश्शो मुर आन कली शेंशा, ख्रीस्त आ लोत्र रुप्पाइश्शा, आ मुर दुम्मल, दे गो बोल मपाइश्शो खोदेंशो दुम्ती। का निक्शी ख्रीस्त आ लोत्र रुष्शा, आ मुर दुम्मल, दे गो मेको नेल्ल आन खोदेंशो दुम्ती। रोमी ११:१४<sup>23</sup> प्रभु आ ग्येरपाइक्व लोत्र रागीम ब्रचा आ पर्बम मेको गेय पाइनुड। मिनु शुश मुरपुकीमी एको लोत्र रुष्शो तशा, आसीक तशा ग्येरसाक्वी।

इनाम तांडसीब, दे मिश्शा गेय पशो

24 इनाम तांडसीब, दे दोरबपुकी “डोंइती जाक्दीत्नुड” दे मिश्शा दोरनीम। दोरमानु, नेल्ल क्येडा डोंइती जाक्दीप्बम ला इनाम ताइब दे मतुइक्वीनी? मोपतीके गे यो इनाम तकल दे मिश्शा दोरीने। २तिमोथी ४:७; फिलिप्पी ३:१४<sup>25</sup> मोपा दोरबपुकीमी दोरने चबुल, दे हेंथे मजाइनीम मत्नीम। आन रां नेल्ल चलेस जोक्नीम। मोदेंशो पाइबपुकीमी जाम्शा लाइब इनाम ला ताइनीम। गोपुकीमी चहिं गेनायो जाम्शा मलाइब इनाम ताइनय, दे तुइश्शा, मेको आन क्येडा रिश्शो पचा ममाल्नाया डा? २तिमोथी २:४-५; १पत्रुस ५:४<sup>26</sup> गो ते जाक्दीत्वा माल्बा, मेको मतुइक्वु हेंथे पा मदोरनुड। गो हेंथे पा फशीम मुडकी मआप्नुड।<sup>27</sup> तन्न आं रां कली हेंथे पचा मगेथु, गेय पाइब वाइल खोदेंशो सेल्लनुड। मारदे हना अरु आन कली मोदेंशो शेंताक्डमी। मिनु गो आंम आं देंशो मपाता हना, आं कली सुइमी महिक्वीम। रोमी १३:१४

इसाएली आन पशो मिम्तीन

10 आं लोक्बपुकी, गो आंइ इसाएली किकी पिपी आन पशो आ पर्बम लोत्र का निक्शी शेंननी। आंइ किकी पिपी नेल्ल गोस्स आगाम बाक्शा, समुन्द्र शोक्सीशा लमा बाक्ता। प्रस्थान १३:२१; प्रस्थान १४:२२<sup>2</sup> मिनु नेल्ल गोस्स आगा गाक्शा, समुन्द्र शोक्शा, मोसा आ नेंम ब्वाक्कुम खुम्शा गुंडचा पुंडसाक्मा बाक्ता।<sup>3</sup> नेल्लेमी परमप्रभु यावेम गेशो जचा थोव्रक जामे बाक्ता। प्रस्थान १६:४, ३५; ब्यवस्था ८:३<sup>4</sup> नेल्लेमी परमप्रभु यावेम गेशो सोक्ता डा ब्वाक्कु तूडमे बाक्ता। मिनु मेको आन नोले खोइक्वम सेरथे फुल्लु रे ब्वाक्कु तूडमे बाक्ता। मिनु मेको सेरथे फुल्लु ख्रीस्त बाक्माक्ता। प्रस्थान १७:६<sup>5</sup> मो हना यो मेको का निक्शी आन कली तशा,

परमप्रभु यावे गाइक्ता बाक्ता। मिनु गोरशो रागीमी प्रोना बाक्ता। गन्ती १४:२२-३२<sup>6</sup> मोदेंशो मरिश्शो थुं पाइश्शो मुर मदुमीन, होस पा बाक्कीन।<sup>7</sup> मेको आन दाते डा मूर्ति पूजा पाइब खोदेंशो मदुमीन। मार ब्रेक्शो बाक्व देंशा हना “मुरपुकी जचा तूचा कली निस्साक्म। मिनु सिल पचा कली बोक्तेक्म” दे ब्रेक्शो बाक्व। मेको आन पशो खोदेंशो मपने। प्रस्थान ३२:६<sup>8</sup> गोपुकीम तेल्लेम पचा मदुम्ब। मेको आन दाते डा का निक्शीमी ग्रांघ्रा दिचा डा गेय पामे बाक्ता। मिनु नाक्ता कामीन २३ हजार मुर साइक्वा पुंडसाक्मा बाक्ता। गन्ती २५:१९<sup>9</sup> गोपुकीम प्रभु कली नाक्वा मदुम्ब। मेको आन दाते डा का निक्शीमी मो पास्तेक्म। मिनु बुस्स रे पा साइक्वा पुंडसमा बाक्ता। गन्ती २१:४-६

10 गोपुकीम गन गन पचा मदुम्ब। मेको आन दाते डा का निक्शीम मोदेंशो पामे बाक्ता। मिनु खतम पाइबमी मेको आन कली खतम पोक्गा बाक्ता। गन्ती १४:२, ३५-३६; हिब्रू ३:११, १७<sup>11</sup> मेको आन मोदेंशो दुम्शो तुइश्शा, गोपुकीमी रुब्बल, दे एको लोत्र नेल्ल ब्रेक्शो बाक्ता। एको रागी नेल्ल जाम्शा लचा चिक्शो बाक्ता। १पत्रुस ४:७<sup>12</sup> “गो ठीक बाक्नुड” देंब होस पा बाक्मल। मारदे हना पाप पने चाप्नीम।<sup>13</sup> मुल सम्म गे फाल्ने मचाप्वा डा पा थुं नाक्वा मपुंडसीनी। परमप्रभु यावे थमा सुइक्वा माल्शो बाक्व। इन फाल्ने चाप्तीक सक्ति कोइशा, इन फाल्ने मचाप्वा डा पा थुं थाम्चा मगेब। तन्न गेपु हना यो, इन फाल्ने चाप्तीक सक्ति बारपाइक्व दे तुइक्तीने। भजन संग्रह ६८:२०; २पत्रुस २:९

मूर्ति पूजा नु प्रभु भोज मगारब

14 आं दाक्शो लोक्बपुकी, मूर्ति पूजा पचा प्रोनीन। १यूहन्ना ५:२१<sup>15</sup> गो लोत्र रुब्ब मुर आन कली लोत्र पाइनुड। मोपतीके आं देंशो ठीक बाक्वा कों, ठीक मबाक्वा, मिन्ने चाप्नीनी।<sup>16</sup> गो कचौरा कली आसीक गेनीकी। मेको आसीक डा कचौरा रे तूयानु, ख्रीस्त आ हुश मिश्शा, आ मुर दुम्शा, मेको नु काथा बाक्शो दुम्नय। गोपुकीमी शोब्ले जिक्शा योक्शा जयानु, ख्रीस्त आ रां मिश्शा, आ मुर दुम्शा, काथा बाक्शो दुम्नय। १कोरिन्थी ११:२३-२६; मत्ती २६:२७; प्रेरित २:४२<sup>17</sup> गो शुश बाक्वानु, रां का खोदेंशो दुम्शा बाक्व। मोपतीके शोब्ले का बाक्व। मिनु गो नेल्लेम मेको शोब्ले का रे जाइनय। १कोरिन्थी १२:२७; रोमी १२:५<sup>18</sup> आंइ इसाएल डा चढेबपुकीमी चढेशो गेय मिम्तीने। चढेबपुकीमी मारेइ मारेइ क्योरशा, मेको चढेशो जाइनीम ब्वाइनीम। मो पामेनु, चढेतीके नु काथा बाक्शो खोदेंशो दुम्नीम। लेवी ७:६<sup>19</sup> मिनु आं देंशो लोत्र मार रुम्सीब देंशा हना, मूर्ति कली चढेशो ठेयब बाक्वा कों? मूर्तिपुकी ठेयब नमी कों? १कोरिन्थी ८:६<sup>20</sup> अर्को रागी डा मुर आन चढेशो परमप्रभु यावे कली ममाइ, वोल आन कली चढेनीम। मोपा मेकोपुकी वोल नु काथा बाक्व दुम्नीम। मिनु गो इन कली वोल नु काथा बाक्शो तचा मदाक्नुड।<sup>21</sup> गो प्रभु आ कचौरा रे तूतीनी हना, वोल आन कली चढेशो रे तूने मचाप्नीनी। गो प्रभु आ भोज नु वोल आन कली चढेशा जने मचाप्नीनी। मत्ती ६:२४; २कोरिन्थी ६:१५-१६<sup>22</sup> गोपुकीम प्रभु कली रुश पपाइक्वा दुम्बा डा? गो प्रभु क्येडा ठेयब नया डा?

गेय नेल्लेम परमप्रभु कली मान पने

23 मारेइ मारेइ ठीक बाक्व। तन्न गेय का निक्शी चहिं इन कली रिश्शो मदुम्ब। मारेइ मारेइ ठीक बाक्तेक्म हना यो, का निक्शीम इन थमा सुइक्वीक मबारपाइक्वीम। १कोरिन्थी ६:१२<sup>24</sup> होस पांडसीने, आंम इन कली ला मिम्चा प्रॉइशा, अरु आन कली यो रिश्शो दुम्ल दे मिश्शा गेय पने। रोमी १५:२; फिलिप्पी २:४<sup>25</sup> श्ये ब्बचा आ पर्बम “श्ये ग्याथ लनीनु ‘चढेशो श्ये कों’ दे हिल्लो मपने। मारेइ ममिश्थु ग्यापीन” दे शेंननी। रोमी १४:२-१०, २२<sup>26</sup> रागी नु रागीमी मार मार बाक्मा, मेको नेल्ल प्रभु के बाक्व दे रूपीने। भजन संग्रह २४:१<sup>27</sup> मिनु ख्रीस्त कली थमा मसुइक्वपुकीमी इन कली खमे जथ ब्रेम्मानु, गे लचा थुं पा लाइतीनी हना, मारेइ हिल्लो मपथु, ममिश्थु ग्येरसीशा जने ब्वने।<sup>28</sup> गे नु काथा बाक्शा जाइबपुकीमी “एको चढेशो बाक्व” दे तुइक्वाइक्तेक्म हना, मेको मुर आ पर्बम नु थुं ग्येरसीशो दुम्चा आ पर्बम मेको मजने मब्वने। १कोरिन्थी ८:७<sup>29</sup> थमा सुइक्वपुकीमी

चढ़ेशो मजाइनीम मबाइनीम, दे तुइक्नीम। मिनु इन कली जशो ब्वशो तशा, मेको आन थुं क्वाल्नीम। आं जचा ब्वचा आ पर्वम आं अधिकार बाक्ब। मारदे अरुम शेंचा माल्नीमी? 30 गो प्रभु कली “गे रिम्शो पाइब बाक्नीनी” देंशा, मारेइ मारेइ जाइनुड ब्वाइनुड। तन्न आं जशो ब्वशो सुइमी मरिम्शो मलाक्मल, दे यो मिम्नुड। १तिमोथी ४:४

31 मोपतीके मार जाइतीनी ब्वाइतीनी हना यो, तूतीनी हना यो, मार पाइतीनी हना यो परमप्रभु यावे कली ठेयब सेल्चा कली पने। कलस्सी ३:१७ 32 यहूदी नु ग्रीक आन कुल, परमप्रभु यावे कली थमा सुइक्ब आन कुल, मुर नेल्ल आन कुल, गेना हना यो रिम्शो गेय पने। रोमी १४:१३ 33 गो मोर्देशो पा नेल्ल आन कली ग्येरपाइक्चा डा गेय पचा दाक्नुड। आंम आं कली ममिम्सीथु, मेको आन कली रिम्शो दुम्ल, दे मिम्शा, गेय पाइनुड। “शुशेमी ख्रीस्त कली थमा सुइश्शा, आ मुर दुम्मल” दे मिम्शा बाक्ती। १कोरिन्थी ९:२०-२२

### पिया सुम्सीचा आ पर्वम शेंशो

11 गो दोपा ख्रीस्त आ पशो खोर्देशो पडा, मोपा गे यो आं पशो खोर्देशो पाइब दुमीन। 2 इन कली शेंशो लोव्र का यो मप्रेंथु, टिशा बाक्तीनी दे तुइक्ताक्ड। मिनु गे आ शेंशो नेल्ल पाइतीनी। 3 वोंइश मुर नेल्ल आन पिया ख्रीस्त बाक्ब, मेको रुपीन। मीश मुर आन पिया मेको आन वोंइश बाक्ब। ख्रीस्त आ पिया परमप्रभु यावे बाक्ब दे रुपीन। उत्पत्ती ३:१६; एफिसी ५:२३; १कोरिन्थी ३:२३

4 खुम्सीशा, प्रार्थना पनीनु, परमप्रभु यावेमी तुइक्पाइश्शो लोव्र पनीनु, वोंइश मुरपुकीमी पियामी मारेइ मसुम्सीचा। सुम्साक्नी हना, ख्रीस्त कली आइक्च सेल्शो खोर्देशो दुम्ब। 5 मीश मुरपुकी चहिं आन पिया सुम्सीचा माल्नीम। मसुम्सीशो बाक्तेक्म हना, आन वोंइश आन कली आइक्च सेल्शो खोर्देशो दुम्ब। मसुम्सीथु बाक्ब आन कली चां प्रेक्शो खोर्देशो मिम्सीब। 6 पिया मसुम्नुड देंबम चहिं आन चां प्रेक्समल। चां प्रेक्शो आन कली मुरपुकीम मरिम्शो मिम्नीम, दे गो नेल्लेमी तुइक्नया। मोपतीके मीश मुरपुकीमी आन पिया सुम्समल। 7 वोंइश मुरुम पिया सुम्चा मदुम्ब। मारदे हना मेको परमप्रभु यावे खोर्देशो पा सेल्सीशो नु आ दारस पाइश्शो बाक्नीम। मीश मुरपुकी चहिं आन वोंइश आन दारस पाइश्शो बाक्नीम। मोपतीके सुम्सीचा माल्नीम। 8 वोंइश मुर मीश मुर आ रां रे सेल्शो मबाक्ब। तन्न मीश मुर वोंइश मुर आ रां रे सेल्शो बाक्ब। उत्पत्ती २:२१:३ 9 वोंइश मुर मीश मुर कली वारच पचा कली सेल्शो ममाइ। तन्न मीश मुर आ वोंइश कली वारच पचा कली सेल्शो बाक्ब। उत्पत्ती २:१८ 10 मीश मुरुमी आन पिया सुम्सीचा माल्नीम। मारदे हना परमप्रभु यावे आ स्वर्ग डा गेय पाइबपुकीमी कोव्रशो बाक्नीम। 11 मोर्देशो दुम्त हना यो, प्रभुमी “वोंइश मुर कली मीश मुर माल्ब। मीश मुर कली वोंइश मुर माल्ब। मबाक्थु मदुम्ब दे सेल्शो बाक्त” देंत। 12 मीश मुर वोंइश मुर आ रां रे सेल्शो बाक्त हना यो, मुल वोंइश मुर मीश मुर रे थिशो बाक्नीम। मेको मोर्देशो परमप्रभु यावे आ पशो बाक्ब। 13 लो आंमा मिम्तीन मीश मुरपुकीमी आन पिया मसुम्थु परमप्रभु यावे कली प्रार्थना पचा दुम्बा? 14 वोंइश मुरपुकीमी लाइश्शो चां थुल्चा मुने दुम्ब, दे आंमा मतुइक्नीनी? 15 तन्न मीश मुरपुकीमी लाइश्शो चां थुल्शो चहिं आन मान ततीक बाक्ब। आन रां सुम्चा कली लाइश्शो चां गेशो बाक्ब। साइ डोंइती रे डा मोर्देशो लोव्र बाक्ब दे मतुइक्नीनी डा? 16 गे नु बाक्ब आं शेंशो आ पर्वम जिचा पोक्ब आन कली मार देंनुड देंशा हना, तेइ तेइ शेंथ गाक्कानु, मोर्देशो शेंनीकी। परमप्रभु यावे आ गुम्तीक खिंमी यो मोर्देशो शेंनीकी।

### प्रभु भोज आ पर्वम शेंशो

17 मुल इन कली शेंशो लोव्रम गे रिम्शो दुम्नीनी देंने मचाप्नुड। मारदे हना गुम्नीनु, इन कली रिम्शो ममाइ, मरिम्शो दुम्ब। 18 खुम्सीशा बाक्नीनु, थुं का दुम्शा मबाक्नीनी। एर ओंथ ब्राशा बाक्नीनी देंशो नेंता। एको लोव्र नेंशा, इक्का थमा सुइक्ता। १कोरिन्थी १:१२; १कोरिन्थी ३:३ 19 एर ओंथ ब्राशा बाक्चा चहिं दुम्चा माल्ब। मारदे हना लोव्र रुब् नु मरुब्पुकी दिल्लीम। मत्ती

१८:७; १यूहन्ना २:१९ 20 गे खुम्सीशा बाक्नीनु। मार मार जाइनीनी, मेको प्रभु भोज ममाइ। 21 मारदे हना आंम आंमा चाक्शो जचा थोव्रक जाइनीनी। मिनु मोपान का निक्शी जचा मतथु, शोव्रलु बेक्शो बाक्नीनी, का निक्शी दुक्शा बाक्नीनी। यहूदा १२ 22 मार, मोर्देशो पा जचा तूचा कली इन खिं मबाक्बा डा? मार, गे परमप्रभु यावे आ गुम्तीक खिं कली आइक्च मिम्नीनी? जचा तूचा मताइब आन कली मुने तोक्नीनी? मिनु मुल इन कली मार देंनुडा? रिम्शो पाइतीनी देंनुडा डा? गो मर्देनुड। याक्ूब २:५-६

23 मारदे हना प्रभुमी आं कली मार शेंदा, मेको इन कली शेंताक्ड। मेको ग्याइक्चा पुंइसीशो नाक्दो प्रभु येसुम शोब्ले शेशा, मत्ती २६:२६-२८; मर्कूस १४:२२-२४; लूका २२:१९-२० 24 “परमप्रभु गे रिम्शो पाइब बाक्नीनी” दे मेको शोब्ले जिक्शा “एको आ रां बाक्ब। एको इन कली बाक्ब। एको ओर्देशो आं कली मिम्चा कली पने” देंत। 25 मिनु मोपान जने थुम्शा, कचौरा शेशा “एको कचौरा आं हुश डा नक कबल बाक्ब। गे गेना एको तूनीनी, मेना आं कली मिम्शा तूडीन” देंत। 26 गे गेना एको शोब्ले जाइनीनी नु कचौरा रे तूनीनी, मेना प्रभु लेशशा मजाक्म सम्म मेको आ बेक्शो आ पर्वम शेंनीनी। मत्ती २६:२९

27 सु सुमी हेंथे पा प्रभु भोज डा शोब्ले रे जाइबा नु कचौरा रे तूबा, मेकोमी पाप पा प्रभु आ रां नु आ हुश कली मरिम्शो सेल्ब। १कोरिन्थी १२:२१-२२ 28 तन्न गे नेल्लेमी आंम कली नाक्तीन। मिनु ला मेको शोब्ले जन नु कचौरा रे तूडीन। मत्ती २६:२२ 29 मारदे हना सु सुमी जशा तूशा, प्रभु आ रां बाक्ब, दे ममिम्नीमी, मेको सजाइ गेचा पुंइसीनीम। १कोरिन्थी १०:१६-१७ 30 मोपतीके इन दातेमी शुश मचाप्ब दुम्शो बाक्नीनी। शुश रोइ पशो बाक्नीनी। का निक्शी बेक्शा यो लास्तेक्म। 31 तन्न गोपुकीमी आंम कली ठीक पा नाक्शा, प्रभु भोज जाइतय हना, सजाइ गेचा मपुंइसीनय। 32 तन्न प्रभुमी आंइ कली नाक्शा सजाइ गेब। मेको शेंचा कली बाक्ब। मोपा रागी डा मुर नु काथा बाक्शा, जाम्शा मलाइनीकी। हिलोपदेस ३:११-१२

33 मोपतीके आं लोकबपुकी, गे जचा कली खुम्सीनीनु, नेल्ल जाक्ने थुम्मे नोले ला जने। 34 शोव्रलु फाल्ने मचाप्बपुकीमी आन खिम जशा जाक्मल। मो मपाइतीनी हना, प्रभु भोज मरिम्शो सेल्शा नु दोसी दुम्नीनी। अरु थोव्रक आन पर्वम गो इन कली नोले जाक्वी ना शेंनुड।

### परमप्रभु आ सोक्त आ पर्वम शेंशो

12 आं लोकबपुकी, इन कली परमप्रभु यावे आ सोक्तीम पपाइश्शो गेय मजोक्थु बाक्शो तशा, आं थुं मनुड। मोपतीके एको गेय आ पर्वम शेंनन्नी। 2 ख्रीस्त कली थमा सुइक्चा क्येडा डोंइती गे मूर्ति पूजा पाइब बाक्तीनी। मिनु मेको मारेइ पने मचाप्ब मूर्ति गे इन थुं हिरशो बाक्तीनी। अय्युब २:१८-१९ 3 मिनु परमप्रभु यावे आ सोक्तीम पपाइश्शो लोव्र पा “येसु सराप रल” देंने मचाम्सीब। परमप्रभु यावे आ सोक्तीम पतीके ला “येसु इं प्रभु बाक्ब” देंने चाम्सीब, दे रुप्पाइक्नन्नी। मर्कूस ९:३९; १यूहन्ना ४:२-३

4 परमप्रभु यावे आ सोक्त का बाक्ब। आ पपाइश्शो गेय चहिं शुश बाक्नीम। एफिसी ४:४-६, ११; रोमी १२:६ 5 आ पपाइश्शो गेय शुश बाक्शा यो, प्रभु चहिं का बाक्ब। १कोरिन्थी १२:२८ 6 मेकेर शुश गेयपुकी बाक्नीमी। मिनु परमप्रभु यावेमी मुर नेल्ल आन कली का का पा मेको गेय पतीके थुं गेब। 7 परमप्रभु यावे आ सोक्तीमी पपाइश्शो गेय नेल्ल आन कली रिम्शो दुम्ल, दे पपाइश्शो बाक्ब। १कोरिन्थी १४:२६ 8 परमप्रभु यावे आ सोक्तीमी का कली जोक्तीक तुइक्तीक लोव्र पपाइक्ब। अर्को कली मेकोन सोक्तीमी शेंतीक सक्ति गेब। 9 का कली आ सोक्तीम पतीके थमा सुइक्तीक सक्ति गेब। अर्को कली सापाइक्तीक सक्ति गेब। 10 का कली छक लाक्चा डा गेय पतीक सक्ति गेब। का कली परमप्रभु यावे आ लोव्र पतीक सक्ति गेब। का कली परमप्रभु यावे आ सोक्त देय वोल आन सोक्त बाक्बा, दे तुइक्तीक सक्ति गेब। का कली परमप्रभु यावे आ सोक्त आ लोव्र पतीक सक्ति गेब। का कली मेको लोव्र आ अर्थ शेंतीक सक्ति गेब। १कोरिन्थी १४:-; प्रेरित २:४ 11 मोर्देशो सक्ति पाइश्शो गेय नेल्ले परमप्रभु यावे आ सोक्तीमी

पपाइश्शो बाक्ब। मिनु परमप्रभु यावे आ सोक्तीमी आ दाक्स पा सु सु आन कली गेचा दाक्बा, मेको आन कली गेब। रोमी १२:३; एफिसी ४:७

मुर आ रां

12 दोपा मुर आ रांम गुड, खोइली, नोफा, मिक्च नु अरु मार बाक्तेक्म हना यो, रां का दुम्ब, मोपान ख्रीस्त आ मुर शुश बाक्तेक्म हना यो, रां का खोदेशो बाक्नीम, दे मिस्सीब। 13 परमप्रभु यावे आ सोक्तीम पतीके यहूदी, ग्रीक, वाइलीम वाइल, होत्रप नु गो नेल्ल परमप्रभु यावे आ सोक्त डा दुस्तया गलाती ३:२८

14 मारदे हना रां काइचीक बाक्त हना यो, मेकेर शुश अरु मार मार बाक्नीम। 15 खोइलीमी "गो गुड मनड। मोपतीके गो रां डा मनड" दंत हना, मार, मेको रां डा मडुम्बा डा? 16 नोफामी "गो मिक्ची मनड। मोपतीके गो रां डा मनड" दंत हना, मार मेको रां डा मडुम्बा डा? 17 मिनु रांमी मिक्च ला बाक्त हना, दोपा नेंचा डा? रांमी नोफा ला बाक्त हना, दोपा नाम्चा डा? 18 तन्न परमप्रभु यावेमी आ दाक्स पा नेंतीके, नाम्तीके, ततीके नु मारेड मारेड पतीके गारपाइश्शा वोइक्तु। 19 मिक्च ला बाक्त हना, दोपा रां दुम्बा डा? 20 मेको मारेड मारेड शुश बाक्तेक्म हना यो, रां चहिं काइचीक बाक्ब। 21 मिक्चीमी गुड कली "इ कली ममाल्नुड" देंने मचाप्ब। पियामी खोइली कली "इ कली ममाल्नुड" देंने मचाप्ब। 22 रां डा आइक्च मिस्सीशोपुकी मबाक्थु मडुम्बो बाक्नीम। मेको रां कली शुश माल्शो बाक्नीम। 23 रां डा महिक्सीशो आन कली गो मान पाइक्नय, मदारशो मिस्सीशो आन कली दारपाइक्नय। 24 रां दारशो आन कली दारपाइक्चा ममाल्नय। आइक्च मिस्सीशो आन कली चहिं परमप्रभु यावेमी नेल्ल क्येडा मान पपाइश्शो बाक्ब। 25 मोपा रां का दुम्बोपुकी मब्रामल, काइचीक दुम्बा बाक्मल नु काम अर्को कली कोत्रमुमल। 26 मोदेशो पा काइचीक दुम्बोपुकी, काम श्येत जाप्नु हना, नेल्ल श्येत जाइनीम। काम मान ताप्नु हना, नेल्ल गारशा ग्येरसीनीम।

गे ख्रीस्त आ रां बाक्नीनी

27 गे ख्रीस्त आ रां बाक्नीनी। मिनु का का पा मिक्ची, नोफा, शोत्र, गुड, खोइली नु मार मार बाक्नीनी। रोमी १२:५ 28 परमप्रभु यावेमी थमा सुइक्ब आन गुम्तीकेमी डोंइती ख्रीस्त आ सोइश्शोपुकी, मेको आन नोले आ लोत्र पाइबपुकी, मेको आन नोले शेंबपुकी, मेको आन नोले छक लाक्चा डा गेय पाइबपुकी, मेको आन नोले सापाइक्बपुकी, मेको आन नोले वारच पाइबपुकी, मेको आन नोले कोत्रबपुकी नु मेको आन नोले सोक्त आ लोत्र पाइबपुकी वोइक्तीमी। एफिसी ४:११-१२ 29 मार, मेको नेल्ल ख्रीस्त आ सोइश्शोपुकी नमी? मार, मेको नेल्ल परमप्रभु यावे आन लोत्र पाइब बाक्नीमी? मार, मेको नेल्ल शेंब बाक्नीमी? मार, मेको नेल्ल छक लाक्चा डा गेय पाइब बाक्नीमी? 30 मार, मेको नेल्ल सापाइक्ब बाक्नीमी? मार मेको नेल्लेम परमप्रभु यावे आ सोक्त आ लोत्र पाइनीमी? मार, मेको नेल्लेम लोत्र आ अर्थ शेंनीमी? 31 गो मार देंनुड देंशा हना, परमप्रभु यावे आ सोक्तीमी पपाइश्शो गेय पनीनु, नेल्ल क्येडा ठेयब गेय पने। मिनु गो इन कली नेल्ल क्येडा रिश्शो लां कोइनन्नी। १कोरिन्थी १४:१, १२

दाक्ब मुर दुम्बा आ पर्वम शेंशो

13 गो मुर आन लोत्र पाता हना नु परमप्रभु यावे आ स्वर्ग डा गेय पाइब आन लोत्र यो पाता हना, तन्न मुर आन कली मदाक्ताक्ड हना, गो हेंथे पा ताप्शो किडगो नु रेयके पाइब बुप्केल खोदेशो दुम्नुड। 2 गो नु परमप्रभु यावे आ लोत्र पतीक सक्ति, खुइश्शो लोत्र नेल्ल रुपतीक सक्ति, नेल्ल जोक्तीक तुइक्तीक सक्ति नु डांडा याक्पाइक्तीक थमा सुइक्तीके बाक्त हना, तन्न गो नु दाक्तीक मबाक्त हना, गो मारेड मनड। मत्ती ७:२२; मत्ती १७:२० 3 आं के बाक्शो थोत्रक नेल्ल योक्शा गेशा, आंम आं रां प्रोइश्शा बेक्चा कली गेता हना यो, दाक्ब मुर चहिं मडुम्ती हना, मार रिश्शो दुम्नुडा डा? गो शोर गाक्शो मडुम्नुडा डा? मत्ती ६:२

4 दाक्तीकेमी श्येत फाल्ने नु शिशी पने चाप्ब। दाक्तीकेमी गेहे मपाइब मबोरब। 5 दाक्तीकेमी ठेयब मलेप्ब नु मुने दोक्चा डा लोत्र मपाइब।

दाक्तीकेमी आं के ला ठीक मर्देब। दाक्तीकेमी रीब पा मचुरब, ईख मकुरब। फिलिप्पी २:४ 6 मरिश्शो पशो तशा मग्येरसीब। ठीक पशो तशा ग्येरसीब। रोमी १२:९ 7 दाक्तीकेमी मारेड मारेड सुम्ब, मारेड मारेड थमा सुइक्ब, मारेड मारेड आस पाइब नु नेल्ल फाल्ने चाप्ब। हितोपदेस १०:११; मत्ती १८:२१-२२; रोमी १५:१

8 दाक्तीक गेनायो मक्याम्सीब। परमप्रभु यावे आ लोत्र पतीक जाम्शा लाइब। परमप्रभु यावे आ सोक्त आ लोत्र यो नुप्ब। तुइक्तीक सक्ति नुप्शा लाइब।

9 मारदे हना आंइ जोक्तीक तुइक्तीक आइक्च बाक्ब। आंइ परमप्रभु यावे आ लोत्र पतीक यो नेल्ल रुप्चा डा मबाक्ब। 10 नोले चहिं गोपुकीमी नेल्ले तुइश्शा रुपनय। मिनु मरुप्शो नु मतुइश्शो मारेड मलीब। 11 गो आल बाक्डानु, आलम ब्वाक्स पा ब्वाक्ती। आलम मिस्स पा मिम्ताक्ड। आलम पस पा पाता। मिनु कोल्शा ठेयब दुम्बा, आलम खोदेशो मपड। 12 मुल गोपुकीमी ब्राब्रा पा ताइतय। मेना रिश्शो पा ताइनय। मुल गो इक्का ला रुप्नुड। मेना नेल्ल रिश्शो पा रुप्नुड। परमप्रभु यावेमी आं कली तुइश्शो बुद पा, गो मेना नेल्ल तुइक्नुड। गन्ती १२:८; २कोरिन्थी ५:७; १कोरिन्थी ८:३ 13 थमा सुइक्चा, परमप्रभु यावेमी आ देशो नेल्ल खाप्ब, दे आस पा बाक्चा नु दाक्तीक सांफा बाक्नीम। मेको सांफामी दाक्तीक चहिं नेल्ल क्येडा ठेयब बाक्ब। १थिस्सलोनिकी १:३; १यूहन्ना ४:१६

मतुइश्शो नु रुपशो लोत्र पचा

14 दाक्तीक पाइश्शो मुर दुमीने। परमप्रभु यावे आ सोक्तीम पपाइश्शो गेय शुश मालीन। परमप्रभु यावे आ लोत्र पतीक शुश मालीन। 2 परमप्रभु यावे आ सोक्त आ लोत्र पाइबमी मुर कली लोत्र मपाइब। तन्न परमप्रभु यावे कली लोत्र पाइब। सुइमी मेको आ लोत्र मरुप्नीम। मेकोमी परमप्रभु यावे आ सोक्त आ पतीकेमी खुइश्शो लोत्र पाइब। प्रेरित २:४; प्रेरित १०:४६ 3 परमप्रभु यावे आ लोत्र पामेनु, मुर आन थुं बारपाइक्ब। रिश्शो गेय पपाइक्ब, नु थुं खाइश्शो आन कली सापाइक्ब। 4 परमप्रभु यावे आ सोक्त आ लोत्र पाइबमी आंम थुं कली ला बारपाइक्ब। तन्न परमप्रभु यावे आ लोत्र पाइबमी गुम्तीक खिं डा मुर आन थमा सुइक्तीके बारपाइक्ब। 5 गे नेल्लेम परमप्रभु यावे आ सोक्त आ लोत्र पशो दाक्नुड। तन्न मेको क्येडा परमप्रभु यावे आ लोत्र पशो तचा दाक्नुड। परमप्रभु यावे आ सोक्त आ लोत्र पाइब क्येडा, परमप्रभु यावे आ लोत्र पाइब ठेयब बाक्ब। तन्न सोक्त आ लोत्र आ अर्थ शेंब बाक्त हना, गुम्तीक खिं डा मुर आन कली रिश्शो दुम्ब। १कोरिन्थी १२:१०

6 आं लोक्बपुकी, गो परमप्रभु यावे आ सोक्त आ लोत्र पा, इन गुम्तीकेमी जाक्ती हना, इन कली मरुप्चा डा बाक्त। गो इन कली नोले दुम्तीक लोत्र, जोक्तीक तुइक्तीक लोत्र, परमप्रभु यावे आ लोत्र नु आ शेंतीक लोत्र पाता हना चहिं इन कली रिश्शो दुम्ब। १कोरिन्थी १२:८ 7 ताप्तीके मुराली, तार पाइश्शो ठेयब ताप्तीके ताप्मेनु, हेंथे पा ताप्तेक्म हना, मार ताप्शो बाक्बा, दोपा तुइक्नीमी? 8 लडाइ पची ना तुराही ताप्बमी मरुप्चा डा पा ताप्नु हना, लडाइ पाइब लाइनीमी डा? 9 मिनु गोपुकीमी सोक्त आ लोत्र पनीनु, इन देशो लोत्र सुमी रुप्नीमी डा? इन मोदेशो पशो लोत्र नेल्ल फशेम योल्शो खोदेशो दुम्ब। 10 रागीमी लोत्र शुश बाक्नीमी। मेको लोत्र नेल्ल रुप्चा डा बाक्नीमी। 11 तन्न गो मेको लोत्र रुप्ने मचाप्ता हना, गो अर्को रागी डा मुर दुम्नुड। मिनु मेको लोत्र पाइब आं कली यो अर्को रागी डा मुर दुम्ब। 12 गो इन दातेमी मोदेशो बाक्ब। परमप्रभु यावे आ सोक्तीम पपाइश्शो गेय पचा दाक्ताक्नी हना, गे इन गुम्तीक खिं डा मुर आन थमा सुइक्तीक बोल्यो दुम्बा कली गेय पने।

13 मोपतीके सुमी परमप्रभु यावे आ सोक्त आ लोत्र पाइबा, मेकोमी आ अर्थ शेंचा कली पुनल। १कोरिन्थी १२:१० 14 गो सोक्त आ लोत्र पा प्रार्थना पडानु, आं थुंमी मारेड मरुप्नुड। 15 गो मुल मार पाइनुड देंशा हना, गो सोक्त आ लोत्रमी प्रार्थना पडानु, आ थुंमी यो प्रार्थना पाइनुड। परमप्रभु यावे आ सोक्तीम कुम्सो पडानु, आं थुंमी यो कुम्सो पाइनुड। एफिसी ५:१९

16 मिनु गोपुकी खुम्सीशा बाक्नीनु, सोक्त आ लोत्रम आसीक गेशा, परमप्रभु



यावे कली "गे रिम्शो पाइब बाक्नीनी" देंतीनी हना, दोपा मरुख मुरुमी "आमेन" देंने चाप्पा डा? 17 इन लोत्र रिम्शो बाक्त हना यो, अर्को मुर आ थुं मबारपाइश्शो बाक्त। 18 गो परमप्रभु यावे कली "गे रिम्शो पाइब बाक्नीनी" देंनुड। मारदे हना गो सोक्त आ लोत्र नेल्ल इन क्येडा शुश पाइनुड। 19 तन्न थमा सुइक्ब आन गुम्तीकेमी बाक्शा, मुर आन कली शेंचा नु रुपाइक्वा कली गो १० हजार सोक्त आ पशो लोत्र क्येडा रुप्पा डा ५ ओटा लोत्र पचा रिम्शो लाक्ती।

20 आं लोकबपुकी, आलमी मिम्शो खोदेंशो पा ममिम्तीने। मरिम्शो गेय पचा कली मजोक्ब आल खोदेंशो दुम्शा बाक्कीने। तन्न इन मिम्तीकेमी निप्स पाइश्शो मुरुम मिम्शो खोदेंशो पा मिम्तीन। *एफिसी ४:१४; यसैया २८:११-१२* 21 मिनु परमप्रभु यावेमी आ अरेशा ब्रेक्पाइश्शो लोत्रमी "गो डोन रागी डा मुर आन मतुइश्शो लोत्र पतीकेमी नु रागी डा मुर आन लोत्रमी मेको नु लोत्र पाइक्नुड। मो हना यो मेकोपुकीम आं लोत्र मनैनीम" दे प्रभुमी देंत, दे ब्रेक्शो बाक्ब। *यसैया २८:११,१२* 22 परमप्रभु यावे आ सोक्त आ लोत्र पतीके थमा सुइक्ब आन कली ममाइ, थमा मसुइक्ब आन कली चिन्ड दुम्ब। परमप्रभु यावे आ लोत्र चहिं थमा मसुइक्ब आन कली ममाइ, थमा सुइक्ब आन कली बाक्ब। 23 मिनु थमा सुइक्ब नेल्ल खुम्सीशा बाक्मानु, मुर नेल्लेमी परमप्रभु यावे आ सोक्तीमी पपाइश्शो मतुइश्शो लोत्र पना पन बाक्तेक्म हना, अरु मुर, थमा मसुइक्ब ओत्रशा, इन मोदेंशो लोत्र पशो नेंशा "गशो बाक्तेक्म" दे मर्देनीमी डा? 24 तन्न गे नेल्ल परमप्रभु यावे आ लोत्र पना पन बाक्नीनु, थमा मसुइक्ब, अरु मुर ओत्रशा, इन मोदेंशो नेंशा, आ थुंमी मिम्शा, आ मरिम्शो पशो नेल्ल फ्रुक्ब। 25 आ थुं डा खुइश्शो नेल्ल तुइश्शा, बाप्शा "परमप्रभु यावे ठेयब बाक्ब" देंशा, परमप्रभु यावे थमा पा, इन दातेमी बाक्ब, दे तुइक्ब। *यूहन्ना १६:८*

26 आं लोकबपुकी, मुल मार देंनुड देंशा हना, गे खुम्सीशा बाक्नीनु, नेल्ल इन के गेय का का बाक्ब। कामी परमप्रभु यावे कली कुम्सो पाइब, कामी लोत्र शेंबा, कामी नोले दुम्तीक लोत्र पाइब, कामी परमप्रभु यावे आ सोक्त आ लोत्र पाइब नु अर्कोमी मेको लोत्र आ अर्थ शेंब। मेको गेय नेल्ल थुं बारपाइक्वा कली दुम्ब। *१कोरिन्थी १२:८-१०; एफिसी ४:१२* 27 परमप्रभु यावे आ सोक्त आ लोत्र पामेनु, निक्शीमी कि सांमी पामेक्ल। मिनु का का पा पचा माल्नीम। मिनु मुर कामी आ अर्थ शेंचा माल्ब। 28 तन्न मेको लोत्र आ अर्थ शेंब मबाक्त हना, सिक्सी पा बाक्वा माल्नीम। सोक्त आ लोत्र पाइबमी आंम थुं बारपाइक्वा कली, परमप्रभु यावे कली लोत्र पवल। 29 परमप्रभु यावे आ लोत्र पामेनु, निक्शीमी कि सांमी पामेक्ल। मिनु नेंबपुकीमी "मेको लोत्र परमप्रभु यावे आ लोत्र नु गारबा देय मगारबा?" दे नाक्वा माल्नीमी। *प्रेरित १७:११; १थिस्सलोनिकी ५:२१* 30 तन्न मेकेर बाक्ब कामी परमप्रभु यावे आ नोले दुम्ब लोत्र तुइक्ताक्व हना, डॉइती डा लोत्र पाइब सिक्सी पा बाक्ल। 31 गे नेल्लेमी का का पा परमप्रभु यावे आ लोत्र पने चाप्नीनी। मो पाइतीनी हना नेल्लेमी शेंसीने चाप्नीनी। गे नेल्ल इन थुं बारब। 32 परमप्रभु यावे आ लोत्र पाइब आन सोक्त मेको आन गुडम बाक्ब। 33 मारदे हना परमप्रभु यावे खल बल डा परमप्रभु मबाक्ब। मेको थुं नाइश्शा बाक्तीक परमप्रभु बाक्ब।

### थमा सुइक्ब आन गुम्तीकेमी

34 मीश मुरपुकी लोत्रसी मपथु, सिक्सी पा बाक्मल। मेकोपुकी ब्वाक्वा मताइनीम। मारदे हना अरेशो लोत्रमी मोदेंशो ब्रेक्शो बाक्ब। मिनु मेको लोत्र मेकोपुकीम टिचा माल्नीम। *१तिमोथी २:११-१२; उत्पत्ती ३:१६* 35 लोत्र मरुपेक्म हना, आन खिं लमा नोले आन वोंइश आन कली हिल्लो पामेक्ल। थमा सुइक्ब आन गुम्तीकेमी चहिं लोत्र मपामेक्ल, मारदे हना मुने दुम्ब। 36 मार, परमप्रभु यावे आ लोत्र इन रे पा जाक्म डा देय इन कली ला जाक्म? 37 इन दातेमी परमप्रभु यावे आ लोत्र पाइब नु आ सोक्तीम ब्रीशो मिम्ब मुरुमी आं ब्रेक्शो लोत्र प्रभु आ देंशो लोत्र बाक्ब दे तुइक्तेक्म *१यूहन्ना ४:६* 38 तन्न सुइमी "पावल आ शेंशो प्रभु आ लोत्र मबाक्ब" देंत हना, मेको आ लोत्र यो थमा मसुतीन। 39 मोपतीके आं लोकबपुकी, परमप्रभु यावे आ लोत्र पचा कली शुश बोल पने। मिनु परमप्रभु यावे आ

सोक्त आ लोत्र पाइब आन कली मतेक्कीन। 40 खुम्सीशा बाक्नीनु, खल बल मपथु, नेल्ल रिम्शो दुम्वा माल्ब। *१कोरिन्थी १४:३३; कलस्सी २:५*

### येसु बेक्शो रे सेंसीशो

15 आं लोकबपुकी, इन कली डॉइती येसु ख्रीस्त आ पर्बम शेंशो ग्येरपाइक्तीक लोत्र मिम्पाइक्नुड। गेपुकीमी एको लोत्र नेंशा थमा सुइक्तीनी। मिनु मुल यो थमा सुइक्ना सुइक्न बाक्तीनी। 2 एको लोत्र दोपा शेंदन्नी, मोपा थमा सुइक्ना सुइक्न बोल्यो दुम्तीनी हना, परमप्रभु यावे नु बाक्वा ताइनीनी। 3 मारदे हना आं ख्रीस्त रे तशो ठेयब लोत्र इन कली शेंताक्नीनी। दोदेंशो लोत्र बाक्ब देंशा हना, परमप्रभु यावे आ लोत्रमी ब्रेक्शो खोदेंशो पा ख्रीस्त इं पाप आ पर्बम साइक्वा पुंइसाक्व। *यसैया ५३:१२* 4 मेको थिम्वा पुंइसाक्व। मिनु परमप्रभु यावे आ लोत्रम ब्रेक्शो खोदेंशो पा आ नित्थ नाक्ती सेंचा पुंइसाक्व। *होसे ६:२; लूका २४:२७,४४,४६* 5 मिनु सेंसीशा, डॉइती केफास कली तपांइसाक्व। मिनु नोले १२ जना शेंसीब आन कली तपांइसाक्व। *लूका २४:३४; यूहन्ना २०:२६* 6 नोले कालेमी ५ सहे क्येडा शुश थमा सुइक्ब आन कली तपांइसाक्व। का निक्शी मुल बेक्शा लाम्तेक्म। शुश चहिं मुल यो बाक्नीम। 7 नोले याक्ब कली तपांइसाक्व। मिनु आ सोइश्शो शेंसीब नेल्ल आन कली यो तपांइसाक्व। *लूका २४:५०* 8 मिनु नेल्ल क्येडा नोले गो महिना मजाक्दीत्थ जरमेशो आल खोदेंशो आं कली तपांइसाक्व। *१कोरिन्थी ९:१; प्रेरित ९:३-६* 9 मारदे हना गो सोइश्शो आन दातेमी नेल्ल क्येडा आइक्च बाक्नुड। आं कली सोइश्शो देंचा मशिश्चा डा बाक्नुड। मारदे हना गो परमप्रभु यावे कली थमा सुइक्ब आन कली खेदा पाता। *एफिसी ३:८; प्रेरित ८:३* 10 तन्न परमप्रभु यावेमी शिशी पा आ सोइश्शो नु आ लोत्र शेंब सेल्लती। आ शिशी पशो यो मो मबाक्ब। मिनु गो नेल्ल आन क्येडा शुश गेय पाता। मेको नेल्ल आं पशो ममाइ, तन्न परमप्रभु यावे आ पपाइश्शो बाक्ब। *२कोरिन्थी ११:५, २३* 11 मोपतीके गोम शेंताक्नीनी हना यो, मेकोपुकीम शेंताक्म हना यो, गेपुकीमी थमा सुइक्तीनी।

### येसु बेक्शो रे मर्सेस दे लोत्र ब्रशो

12 मिनु ख्रीस्त बेक्शो रे सेंसाक्व, दे शेंशो बाक्त। तन्न इन दाते डा का निक्शीमी "बेक्शो मुर बेक्शो रे मर्सेसीनीम" देंशा दोपा देंने चाप्नीमी? 13 बेक्शो रे सेंचा मपुंइसीनीम हना, ख्रीस्त यो बेक्शो रे मर्सेसीशो बाक्ब। 14 ख्रीस्त बेक्शो रे मर्सेसीशो बाक्त हना, आंइ शेंशो फश लोत्र खोदेंशो दुम्त। इन थमा सुइश्शो यो मोशीन दुम्त। 15 गो आंइ परमप्रभु यावे आ पर्बम शेंशो यो जोल दुम्बाक्त। मारदे हना गोमी परमप्रभु यावेमी ख्रीस्त कली बेक्शो रे सेंताक्व दे शेंशो बाक्तक। तन्न मेकोम मपव। "बेक्शो रे मर्सेसीनीम" देंशो लोत्र थमा बाक्त हना, आंइ शेंशो जोल दुम्ब। *प्रेरित १:२२* 16 मारदे हना मुर बेक्शो रे मर्सेसीनीम हना, ख्रीस्त यो बेक्शो रे मर्सेस। 17 मिनु ख्रीस्त बेक्शो रे मर्सेसाक्व हना, इन थमा सुइश्शो मोशीन दुम्त। इन पाप यो मक्याम्सीथु लीशो बाक्ब। 18 ख्रीस्त कली थमा सुइश्शा बेक्शोपुकी यो जाम्शा लाम्तेक्म। 19 एको रागीम ब्रोंइचा कली ला ख्रीस्त कली थमा सुइश्शो बाक्तक हना, गो मुर नेल्ल आन क्येडा शिशी पाइक्वा पुंइसीब नकी।

### येसु रे नेल्ल ब्रोंइब दुम्नीम

20 तन्न ख्रीस्त बेक्शो रे सेंसीशो बाक्ब। बेक्शो आन दातेमी नेल्ल क्येडा डॉइती सेंसीब ख्रीस्त बाक्त। *१कोरिन्थी ६:१४; कलस्सी १:१८* 21 दोपा मुर कामी नेल्ल मुर आन कली बेक्शा लाइब सेला, मोपा मुर कामीन मुर नेल्ल आन कली बेक्शो रे सेंचा पुंइसीब सेल्लु। *उत्पत्ती ३:१७-१९; रोमी ५:१८* 22 दोपा आदम रे नेल्ल बेक्ब दुम्मा, मोपा ख्रीस्त रे पा नेल्ल ब्रोंइब दुम्तेक्म। 23 मिनु नेल्ल का का पा सेंसीनीम। डॉइती ख्रीस्त सेंसाक्व। मिनु नोले आ जाक्वी ना मेको कली थमा सुइक्बपुकी सेंसीनीम। *१थिस्सलोनिकी ४:१६-१७* 24 मिनु नोले रागी नुष्ची ना जाक्ब। मिनु मेकोमी नेल्ल सासन, नेल्ल अधिकार नु नेल्ल सक्ति खतम सेल्लशा, आ आफ परमप्रभु यावे कली आ राज्य गेब। *रोमी ८:३८* 25 मारदे हना ख्रीस्तमी आ जोरी सन्तु आन कली आ

खोइलीम मदिम्दा सम्म सासन पचा माल्ब। भजन संग्रह ११०:१; मत्ती २२:४४<sup>26</sup> नेल्ल क्येडा नोले साइक्तीक चहिं जोरी सत्रु बेक्तीक बाक्ब। 27 मारदे हना परमप्रभु यावेमी रागी डा सक्ति नेल्ल कली आ खोइलीम दिप्शा वोइक्नु। रागी डा सक्ति नेल्ल आ खोइलीम दिप्शा वोइक्नु, आ चहिं दिम्सीशा मबा, दे रुम्सीब। भजन संग्रह ८:६<sup>28</sup> मिनु सक्ति नेल्ल परमप्रभु यावे आ गुडम बाक्त् हना, तौ यो आ गुडम बाक्ब। मारदे हना परमप्रभु यावे नेल्ल आन कली का ला परमप्रभु यावे बाक्ब।

29 बेक्शो रे मसेंसीब देंशो लोव्र थमा बाक्त् हना, बेक्शो मुर आन पा डा अरु थमा सुइक्ब मुर ब्वाक्कुम खुम्शा गुंडपांडसीचा, मार मिन्नीमी? बेक्शो मुर थमा पा मसेंसीनीम हना, मारदे अरु मेको आन पा डा ब्वाक्कुम खुम्शा गुंडचा पुंडसीनीमी? 30 मारदे गो शुश श्वेत फाल्शा, एको लोव्र शेंना शेंन गाक्नुडा? रोमी ८:३६; गलाती ५:११<sup>31</sup> आं लोकबपुकी, येसु ख्रीस्त, इं प्रभु आ मुर दुम्तीनी। मिनु इन कली तशा, आं नें बोरपाइक्नुड। तन्न शेंना शेंन गाक्शा, नाक्त् किंत किंत बेक्चा डा खोदेंशो दुम्नुड। २कोरिन्थी ४:१०<sup>32</sup> एफिसस सहरम शेंना शेंन बाक्डानु, मेकेर डा मुरपुकीमी जोइ वां खोदेंशो पा खेदा पतीमी। मुर बेक्शो रे मसेंसीनीम हना, जय तूय मारदे हना दीसा बेक्नय। यसैया २२:१३<sup>33</sup> सुडमी जोल थमा मसुतीन। मारदे हना मरिम्शो मुर नु बाक्बम, मुर कली मरिम्शो सेल्ब। 34 दूली मिम्चा प्रोनीन। लेंशा पाप मपने। इन दाते डा का निक्शीमी परमप्रभु यावे आ पर्बम मारेइ मतुइक्ब बाक्नीम। मेको इन कली मुने दोक्चा डा बाक्ब। १थिस्सलोनिकी ५:८

बेक्शो रे सेंसीशो आन रां

35 मिनु मुर कामी “मुर बेक्शो रे दोपा सेंसीनीमी? आन रां दोदेंशो बाक्बा डा?” दे हिल्लो पाइनीम। 36 गे मूर्खपुकी, वांचेर शोक्नीनु, वांचेर मबेक्थु, कोच्चा मदाब्ब। यूहन्ना १२:२४<sup>37</sup> मिनु इन शोक्शो, वाशो खोदेंशो मबाक्ब। मेको गेडा ला बाक्ब। मेको चेरब बाक्त् हना यो अरु वांचेर बाक्त् हना यो मोदेंशो बाक्ब। 38 तन्न परमप्रभु यावेमी नेल्ल आन कली आ योव्रशो रां गेब। मिनु वांचेरमी आंम आंम कोच्चा दाप्शो खोदेंशो बाक्ब। 39 मारदे हना ब्रोंइशो नेल्ल खाल का डा मबाक्नीम। मुर खाल का डा बाक्नीम, जन्तु अर्को खाल डा बाक्नीम, बस्तु भाव अर्को खाल डा बाक्नीम, चिक्ब अर्को खाल डा बाक्नीम नु डांड अर्को खाल डा बाक्नीम। 40 मिनु स्वर्ग डा रां बाक्नीम नु रागी डा रां बाक्नीम। स्वर्ग डा रां आन दारस का बाक्ब नु रागी डा रां आन दारस अर्को बाक्ब। 41 नां आ छेडछेड का बाक्ब नु तास्ला आ छेडछेड अर्को बाक्ब। मिनु सौरुल आन छेडछेड लेंशा अर्को बाक्ब। सौरुल का आइक्च नु अर्को ठेयब छेडछेड पाइशो बाक्ब।

42 मोदेंशो मुर आन बेक्शो रे सेंसीचा यो बाक्ब। शोक्शो रां, वांचेर खोदेंशो पा, जाम्शा लाइब। सेंसीशो रां चहिं गेना हना यो लीब रां बाक्ब। 43 शोक्शो रां मरिम्शो बाक्ब। सेंसीशो रां चहिं थम दारशो बाक्ब। शोक्शो रां मारेइ पने मचाप्ब दुम्शो बाक्ब। सेंसीशो रां चहिं सक्ति पाइशो बाक्ब। फिलिप्पी ३:२१; कलस्सी ३:४<sup>44</sup> बेक्चा माल्शो रां शोक्शो बाक्ब, परमप्रभु यावे आ सोक्तीम गेशो रां सेंसीशो रां बाक्ब। बेक्चा माल्शो रां बाक्त् हना, परमप्रभु यावे आ सोक्तीम गेशो रां यो बाक्ब। 45 मार ब्रेक्शो बाक्ब देंशा हना “नेल्ल क्येडा डोंइती डा मुर, आदम, ब्रोंइब दुम्माक्त्” दे ब्रेक्शो बाक्ब। नेल्ल क्येडा नोले डा आदम चहिं ब्रोंइतीक सोक्त् गेब दुम्त्। उत्पत्ती २:७; २कोरिन्थी ३:१७<sup>46</sup> तन्न परमप्रभु यावे आ सोक्तीम गेशो रां डोंइती डा ममाइ। डोंइती बेक्चा माल्शो रां बाक्ब। नोले ला सोक्तीम गेशो रां बाक्ब। 47 डोंइती डा मुर रागी डा खप के सेल्शो बाक्त्। नोले डा मुर स्वर्ग रे बाक्ब। 48 डोंइती डा मुर खप के सेल्शो खोदेंशो पा, खप के सेल्शो बाक्तेक्म। डोंइती स्वर्ग रे जाक्शो मुर खोदेंशो पा, स्वर्ग डा मुर बाक्नीम। 49 दोपा गो खप के सेल्शो मुर खोदेंशो बाक्नया, मोपा गो स्वर्ग डा मुर खोदेंशो यो दुम्नय। उत्पत्ती ५:३

फाइक्चा पुंडसीनय दे शेंशो

50 आं लोकबपुकी, मुल हुश नु रुश पाइशो मुर परमप्रभु यावे आ राज्य ओव्रने मचाप्नीम। बेक्शा जाम्शा लाइब रां, गेना हना यो लीब रां दुम्ने मचाप्ब। 51 मुल इन कली खुइशो लोव्र का शेंननी। गो का निक्शी बेक्शा लाइनय, का निक्शी ब्रोंइशा बाक्नय। गो बेक्शा लशो नु ब्रोंइशा बाक्शो नेल्ल फाइक्चा पुंडसीनय। १थिस्सलोनिकी ४:१५-१७<sup>52</sup> मेको छिन काम दुम्ब। याम काम दुम्ब। नोले डा नाक्त् डा तुराही ताप्ची ना मेको दुम्ब। मारदे हना मेको तुराही नेंसीब। बेक्शो मुर, मबेक्चा डा पा सेंसीनीम। मिनु गो फाइक्चा पुंडसीनय। मत्ती २४:३१<sup>53</sup> मारदे हना मेको जाम्शा लाइब रां, मजाम्चा डा रां दुम्चा माल्ब। मेको बेक्शा लाइब रां, मबेक्चा डा रां दुम्चा माल्ब। २कोरिन्थी ५:४<sup>54</sup> मिनु जाम्शा लाइब रां, गेना हना यो लीब रां दुम्चा माल्ब। बेक्ब रां, गेनायो मबेक्चा डा रां दुम्चा माल्ब। मेना मेको ब्रेक्शो लोव्र थमा दुम्ब “ब्रोंइतीक सक्तिमी बेक्चा कली ग्रात। 55 ए बेक्चा, इ ग्रातीक ते लमे? ए बेक्चा, इ हिंपाइक्तीक ते लमे?” दे ब्रेक्शो बाक्ब। यसैया २५:८; होसे १३:१४<sup>56</sup> पाप पशोमी बेक्चा कली हिंपाइक्ब। परमप्रभु यावे आ अरेशो लोव्र तुइक्बमी पाप पशो यो तुइक्ब। मेको आ अरेशो आ सक्ति बाक्ब। रोमी ७:८; रोमी ११:१३<sup>57</sup> तन्न गो परमप्रभु यावे कली “गे रिम्शो पाइब बाक्नीनी” देंनय। मारदे हना मेकोमी इं प्रभु येसु ख्रीस्त आ पशोमी ग्राचा गेप्नु।

58 मोपतीके आं दाक्शो लोकबपुकी, इन खोइली थेक्शा, दल्गीर मपथु, प्रभु आ गेय पना पन बाक्कीन। प्रभु आ नेंमी पशो गेय गेनायो मोशीन मलाइब, दे तुइक्तीन।

क्येट पोक्चा आ पर्बम लोव्र

16 क्येट पोक्चा आ पर्बम गलातीया रागी डा थमा सुइक्ब आन कली शेंशो इन कली यो शेंननी। २कोरिन्थी ८:९; गलाती २:१०<sup>2</sup> हप्ता डा डोंइती नाक्ती गे नेल्लेमी आंम के बाक्शो रे हेंशा, गो ओशो गेने चाप्नुड, दे वोतीने। मो पाइतीनी हना, गो जाक्डानु, क्येट मबा दे खिं खिं हिरशा पुंडशा गाक्चा ममाल्नीनी। प्रेरित २०:७<sup>3</sup> मिनु आं जाक्ची ना मेको क्येट चोव्रदीचा कली सु सु कली सोइक्चा दाक्नीनी, मेको आन कली योव्रशा वोतीने। मिनु गो चिठी ब्रेक्शा, मेको क्येट नु चिठी इन योव्रशो मुर कली यरूसलेम चोव्रथ सोइक्नुड। 4 गो यो लचा माल्ताक्वी हना, मेको गो नु लाइनीमी।

पावल आ बाक्चा नु गाक्चा आ पर्बम

5 गो मासीडोनीया रागी लाक्शा, इन कली गुम्थ जाक्नुड। प्रेरित १९:२१ 6 मिनु महिना का निक्शी हिउंद मलाक्गा सम्म गे नु बाक्नुडा कों? मिनु ते ते लाइनुडा, आं कली वारच पाइनीनी कों, दे मिम्शा बाक्ती। 7 मुल गुम्थ जाक्ती हना, काबु निक्बु ला बाक्चा ताइनुड। तन्न प्रभुमी गेपुकी नु शुश बाक्चा गेयील दे आस पा बाक्ती। प्रेरित २०:२<sup>8</sup> पेन्तीकोस नाक्त् सम्म गो एफिसस सहरमी बाक्नुड। प्रेरित १९:१, १०<sup>9</sup> मारदे हना शुश मुर आन कली ख्रीस्त आ पर्बम शेंचा नु नेंपाइक्चा ताइनुडमी। आं शेंशो लोव्र मदाक्बपुकी यो शुश बाक्नीम। २कोरिन्थी २:१२; कलस्सी ४:३

10 तिमाथीमी एको चिठी कुरशा जाक्मेनु, मेको कली रिम्शो पतीने। आ लोव्र नेनीने। मारदे हना गो नु बाक्शा, आं यो प्रभु आ गेय पना पन बाक्ब। १कोरिन्थी ४:१७; फिलिप्पी २:१९-२२<sup>11</sup> सुडमी महिक्शो मुर खोदेंशो मपने। मान पा रिम्शो पा लेशशा आं बाक्तीक सोइक्तीने। मारदे हना गो मेको नु लोकब आन कली रिम्शा बाक्नुड।

12 डोंइती इं लोकब आपोल्लोस कली लोकबपुकी नु गारशा “कोरिन्थी आन कली गुम्थ लावो” दे शुश लोव्र पाता। आ चहिं “मुल लचा थुं मपड” दे लने मबिस्से। आ गेय गारत हना, इन कली गुम्थ पीब। १कोरिन्थी १:३२

## नोले डा लोव

13 होस पा बाक्कीने। पोक्च थेक्शा थमा सुइश्शा बाक्कीन। ठेयब थुं पा बाक्कीने। सक्ति पाइश्शो गेय पना पन बाक्कीन। एफिसी ६:१० 14 मार पाइतीनी हना यो, दाक्मुशा पने। 15 आं लोक्बपुकी, आकाया रागीम नेल्ल क्येडा डोंइती थमा सुइक्बपुकी स्तीफानस नु आ खिं डा मुर बाक्तेक्म दे तुइक्नीनी। मेकोपुकीमी थमा सुइक्ब आन कली वारच पा रिम्शो गेय पा शेंना शेंन गाक्नीम। १कोरिन्थी १:१६ 16 मेको आन पशो खोदेशो पा शेंना शेंन गाक्ब नेल्ल आन कली मान पा आन लोव नेंशा टिने। 17 स्तीफानस, फोरटुनातस नु अकाइकस एक जाक्मानु, गो ग्येरसाक्पी। मेको आन कली गुम्शा, इन कली गुम्शो खोदेशो पा, आं थुं नाइक्ताक्ड। 18 मारदे हना मेकोपुकीमी ग्येरपाइक्तीमी, आं थुं बारपाइक्तीमी। गे नु बाक्मानु, इन कली

यो ग्येरपाइश्शा, इन थुं बारपदमे बाक्त दे तुइक्ताक्ड। मोदेशो मुर आन कली मान पतीने। १थिस्सलोनिकी ५:१२; फिलिप्पी २:२९

19 एसीयाम बाक्ब थमा सुइक्बपुकीमी इन कली “रिम्शो बाक्कीन” देंतेक्म। अक्वीला, प्रिस्कीला नु आस खिंमी गुम्ब थमा सुइक्बपुकीमी प्रभु आ नेंमी “रिम्शो बाक्कीन” देंतेक्म। प्रेरित १८:२; रोमी १६:३, ६ 20 लोक्ब नेल्लेमी इन कली “रिम्शो बाक्कीन” देंतेक्म। प्रभु आ नेंमी मुम्मुशा आसीक गेमुने।

21 गो पावलमी “रिम्शो बाक्कीन” दे आंम गुइमी ब्रेक्ताक्ड। गलाती ६:११; कलस्सी ४:१८; २थिस्सलोनिकी ३:१७ 22 प्रभु कली मदाक्बपुकी सराप रमल। इं प्रभु जाक्कीन। प्रकाश २२:२० 23 प्रभु येसुमी इन कली शिशी पा कोवडल। 24 ख्रीस्त येसु आ नेंमी गो नेल्ल इन कली दाक्शा बाक्नुड। आमेन।

## २ कोरिन्थी

एको चिठी ब्रेक्ब आ नें चिठी आ डोंइती “पावल नड” देंत।

पावल मासीडोनीया रागीम बाक्शा, ५७ ए. डी. नोले डा महिना मेर ब्रेक्शो बाक्त।

१. पावल थमा सुइक्ब आन दातेमी रिम्शो दुम्त, दे शुश ग्येरसीशो लोव्र।
२. थमा सुइक्बपुकी हाइश्शो दुम्चा माल्नीम।
३. पावल नु यहूदी आन पतीके।

### डोंइती डा लोव्र

१ परमप्रभु यावे आ दाक्शो पा ख्रीस्त येसु आ सोइश्शो गो पावल नड। इं लोकब तिमोथी नु गोमी कोरिन्थ सहर डा परमप्रभु यावे कली थमा सुइश्शा गुम्ब इन कली नु आकाया रागीम बाक्ब थमा सुइक्ब नेल्ल आन कली एको चिठी ब्रेक्शा सोइक्ताक्स्कु। १कोरिन्थी १:१<sup>२</sup> इं आफ परमप्रभु यावे नु प्रभु येसु ख्रीस्तमी इन कली शिशी पा इन थुं नाइश्शा बाक्चा गेम्सेक्ल।

### परमप्रभु कली ठेयब सेल्शो

३ इं प्रभु येसु ख्रीस्त आ आफ परमप्रभु यावे कली “गे रिम्शो पाइब ननी” देंशा ठेयब सेल्नीकी। मारदे हना मेको शिशी पाइब आफ, थुं नाइक्पाइक्ब नु थुं बारपाइक्ब परमप्रभु यावे बाक्ब, दे तुइक्नीकी। रोमी १५:५<sup>४</sup> गो शुश श्येत जकानु, परमप्रभु यावेमी आंइ थुं नाइक्पाइश्शा बारपाइक्ब। मिनु आंइ थुं नाइसीशा, गोपुकीमी यो श्येत जाइब आन कली आन थुं नाइक्पाइश्शा, बारपाइक्बे चाप्नीकी।<sup>५</sup> ख्रीस्त आ नेंमी गिश श्येत जाइनीकी, मिश ख्रीस्त आ नेंमी थुं नाइक्पाइक्चा पुंइसीनीकी। भजन संग्रह ३४:२०; रोमी ८:१७; भजन संग्रह ९४:१९<sup>६</sup> आंइ श्येत जशोमी इन थुं नाइक्पाइक्ब। मिनु रिम्शो दुम्ब। गो आंइ थुं नाइक्पाइक्चा पुंइसीशोमी गे इन थुं नाइक्पाइक्चा पुंइसाक्नी। गे आंइ खोदेंशो दुम्शा, श्येत फाल्शा बाक्तीनी हना, गे आंइ खोदेंशो पा थुं नाइक्पाइक्चा पुंइसीनीनी। २कोरिन्थी ४:८-११, १५<sup>७</sup> आंइ जशो श्येत गे यो जाइनीनी। मिनु आंइ खोदेंशो पा थुं नाइक्पाइक्चा पुंइसीनीनी। आंइ खोदेंशो पा, थुं नाइक्पाइक्चा पुंइसीनीनी, दे तुइश्शा, आस पचा मप्रॉइथु बाक्नीकी।

८ आंइ दाक्शो लोकबपुकी, एसीया रागीमी बाक्कानु, शुश श्येत जाइतक। श्येत जचा आ पबर्म लोव्र मखुइक्थु, तुइक्पाइक्बन्नी। आंइ जशो श्येत मार बाक्ब देंशा हना, बेक्चा डा सम्म दुम्शो नकी। प्रेरित १९:२३-४०; १कोरिन्थी १५:३२<sup>९</sup> साइक्चा पुंइसीशो खोदेंशो दुम्तक। मो दुम्तक हना यो “परमप्रभु यावेम बेक्शो मुर आन कली सेंब। मोपतीके मेको कली थमा सुइय्य। मेको क्येडा लाक्शा सुइमी इं कली प्रॉइने मचाप्नीम” दे मिम्शा बाक्तक।<sup>१०</sup> मिनु परमप्रभु यावेमी मोदेंशो बेक्चा डा दुम्शो रे प्रॉइतीकी। मिनु मुल नोले यो आंइ कली श्येत रे प्रॉइब, दे तुइक्नीकी।<sup>११</sup> मोपतीके परमप्रभु कली “श्येत रे प्रॉइयीकी” दे पुंइना पुंइन बाक्नीकी। मिनु गोपुकीमी यो “पावल नु आ वारच आन कली श्येत रे प्रोनीन” दे पुनीने। नोले आंइ कली श्येत रे प्रॉइशो तशा, शुश मुरुमी “गे रिम्शो पाइब ननी, आंइ पुंइशो गेतीकी, रिम्शो पाइतीनी” दे परमप्रभु कली ठेयब सेल्नीम, दे तुइक्नीकी। फिलिप्पी १:१९

### रिम्शो पाइतक, दे लोव्र थोक्शो

१२ गो आंइ नें बोरपा बाक्नीकी। मारदे हना परमप्रभु यावेमी सक्ति गेतीकी। मिनु मेको आन मुर दुम्शा, मुर नेल्ल आन कुल, इन कुल यो रिम्शो थुं रे पा गेय कोंइताक्क। आंम आंइ रागी डा जोक्तीक तुइक्तीक रे ममाइ।

तन्न परमप्रभु यावे आ शिशीम पतीके बाक्ब। २कोरिन्थी २:१७; हिब्रू १३:१८; १कोरिन्थी १:१७<sup>१३</sup> मिनु गो इन कली नेल्ल रुप्चा डा नु पढेचा डा लोव्र ब्रेक्नीकी। मुल गे नेल्ल रुप्तीनी, दे गो आस पाइनुड।<sup>१४</sup> गो दोपा आंइ पबर्म इन नें बोरपाइक्बे चाप्नीनी, मोपान इं प्रभु येसु आ नाक्ती जाक्मेनु, गोपुकीमी इन कली तशा, आंइ नें बोरपाइक्बे चाप्नीकी। २कोरिन्थी ५:१२; फिलिप्पी २:१६

१५ मारदे हना गो मेको नेल्ल तुइक्ताक्ड। गे शुश ग्येरसीशा बाक्कीन, दे डोंइती इन बाक्तीके जाक्चा मिम्ताक्ड।<sup>१६</sup> गो मासीडोनीया लडानु, इन कली गुम्नुड। मिनु मासीडोनीया रे लेडडानु, इन बाक्तीके जाक्नुड। मिनु गोपुकीमी आं कली यहूदीया रागी सम्म चोक्नीनी, दे आस पाता। १कोरिन्थी १६:५-६<sup>१७</sup> मोदेंशो आस पा, मरिम्शो पडा डा? मार, मोदेंशो मिम्शा, रागी डा मुर खोदेंशो पडा डा? मार मेको आन खोदेंशो काइले ना दुम्बा, काइले ना मदुम्बा देंन डा? १८ परमप्रभु यावेमी आ देंशो खाप्ब, दे नेल्लेम तुइक्नीम। गोपुकीमी इन कली देंशो लोव्र थमान बाक्ब। दुम्बा कों, मदुम्बा कों, मार तुइक्चा देंशो लोव्र दुम्सीन मदुम्ब।<sup>१९</sup> सिल्वानस, तिमोथी नु गो सांफामी इन कली परमप्रभु यावेमी आ तौ येसु ख्रीस्त आ लोव्र नेंपाइक्तक। मेको लोव्र थमा दुम्बा कों मदुम्बा, मार तुइक्चा देंशो लोव्र ममाइ। येसु ख्रीस्त थमा बाक्ब। प्रेरित १८:५<sup>२०</sup> परमप्रभु यावे आ गेशो लोव्र नेल्ल येसु ख्रीस्तमी खाप्नु। मोपतीके गो मेको आ नेंमी आमन देंनीकी। मिनु परमप्रभु यावे कली “ठेयब बाक्नीनी” दे ठेयब सेल्नीकी। प्रकाश ३:१४<sup>२१</sup> परमप्रभु यावेमी आंइ कली नु इन कली ख्रीस्तमी काथा वोइश्शा, आ मुर दुम्पाइक्तु, आ गेय पाइब सेल्तु। १यूहन्ना २:२७<sup>२२</sup> मेकोमी इं कली छाप थोक्ताक्व। मिनु आ सोक्त इं थुंमी वोइक्तु। मेको सोक्त बैना खोदेंशो पा गेप्तु। एफिसी १:१३; २कोरिन्थी ५:५; रोमी ८:१६

२३ परमप्रभु यावे कली सांकछी वोइश्शा, इन कली थमा पा देंनुड, गो इन कली हुइक्चा कली कोरिन्थ मजाक्ड।<sup>२४</sup> गो इन थमा सुइक्तीके कली हुकुम मपाइनीकी। इन ग्येरसीचा डा पा, गे नु गेय पाइनीकी। मारदे हना इन थमा सुइक्तीके बोल्यो बाक्ब। २कोरिन्थी ४:५; १पत्रुस ५:३

२ गो इन कली लेंशा श्येत गेचा कली कोरिन्थ मपीनुड, दे मिम्ताक्ड।<sup>२</sup> मारदे हना गो इन कली श्येत गेता हना, आं श्येत गेशो मुर आन क्येडा लाक्शा, सुमी आं कली ग्येरपाइक्बे चाप्चा डा? ३ गो डोंइती मार मिम्शा ब्रेक्ताक्ड देंशा हना, गो जाक्डानु, सु मुरपुकीमी आं कली ग्येरपाइक्चा माल्नीमी, मेको रे पा आं थुं मखाइक्ल, दे ब्रेक्ताक्ड। मारदे हना गो ग्येरसीडानु, गे नेल्ल ग्येरसीनीनी, दे थमा सुइक्नुड।<sup>४</sup> एको चिठी ब्रेक्नुनु, आं थुं खाइश्शा “दोपा अर्ती गेडमी? हुइश्शा रिम्शो दुम्नीमी कों? दोपा रिम्शो दुम्नीमी?” दे इन कली शुश मिम्शा, डाक्थ्री दुम्ती। इन थुं खाइक्पाइक्चा कली ममाइ, इन कली दाक्तीके मोदेंशो दुम्त, दे मिम्तीन।

### माफ पुंइब आन कली माफ गेचा

५ इन वारच कामी इन थुं खाइक्पदा बाक्त, दे रुप्ता। आं थुं खाइक्पाइश्शो क्येडा नेल्ल इन थुं खाइक्पाइक्तु।<sup>६</sup> मेको कली गे नेल्ल इन मिम्शा गेशो सजाइ ठीक बाक्ब।<sup>७</sup> मुल डा मेरे माफ गेने। आ थुं नाइक्पाइश्शा

बारपतीन। मोदेशो मपाइतीनी हना, आ मरिश्शो पशो मिश्शा, आ कांडचीक बाक्शा, बेक्शो खोदेशो दुम्ब।<sup>८</sup> मोपतीके मेको कली ब्रशा, दाक्तीन, दे इन कली पुंडनुड।<sup>९</sup> गे टीनीनी देय मटीनीनी, दे गो इन कली डोंइती डा चिठी सोइश्शो नड।<sup>१०</sup> गेपुकीमी सु सु आन कली माफ गेनी, गो यो मेको आन कली माफ गेता। माफ गेडानु, इन पर्वम ख्रीस्त आ डोंइती गेता। यूहन्ना २०:२३<sup>११</sup> सैतानमी इं कली खतम सेल्चा मतवल। मारदे हना मेको आ मिश्शो गो नेल्ल तुडक्नय। लूका २२:३१; १पत्रुस ५:८

### ख्रीस्त आ लोवमी ग्राना ग्रान लशो

१२ गो त्रोआस सहरमी ख्रीस्त आ ग्येरपाइक्तीक लोव शेंथ जाकडानु, प्रभुमी आं कली नक लाप्चो का रोक्शा गेती। प्रेरित १४:२७; १कोरिन्थी १६:९<sup>१३</sup> तन्न आं दाक्शो लोकब तीतस कली मगुम्थु, आं थुं मनाइक्स। मोपतीके मेको आन कली प्रॉइशा, मासीडोनीया लती। २कोरिन्थी ७:६; प्रेरित २०:१

१४ तन्न परमप्रभु यावे कली “गे रिश्शो पाइब बाक्ननी” दे ठेयब सेल्नीकी। मारदे हना ख्रीस्त आ नेंमी ग्राना ग्रान लाइनीकी। मोपा शेंना शेंन हिरशा गाक्कानु, ब्रोवशो रिना पाइश्शो खोदेशो पा नेल्लेमी ख्रीस्त कली तुडक्नीमी।<sup>१५</sup> मारदे हना गो पाप रे ब्रॉइशा बाक्ब नु जाम्शा लाइब आन दातेमी गो परमप्रभु यावे आ डोंइती ख्रीस्त आ ब्रोवशो नाम्सीशो बाक्नीकी। १कोरिन्थी १:१८<sup>१६</sup> गो जाम्शा लाइब आन कली बेक्वा डा रिना नु पाप रे ब्रॉइशा बाक्ब आन कली ब्रॉइचा डा रिना बाक्नीकी। मोदेशो लोव शेंचा कली सुम जिम्मा ब्रने चाप्नीमी? लूका २:३४; २कोरिन्थी ३:५<sup>१७</sup> तन्न गो परमप्रभु यावे आ लोव ग्याप्ब लेयब खोदेशो पा मलेयनीकी। गो ठीक पाइब मुर बाक्नीकी। गो परमप्रभु यावे आ सोइश्शो, परमप्रभु यावे आ डोंइती ख्रीस्त आ नेंमी शेंनीकी। २कोरिन्थी १:१२; २कोरिन्थी ४:२; १पत्रुस ४:११

### नक कबल डा गेय

३ गो मेकोपुकीमी लोव पशो खोदेब पा ठेयब सेल्सीनीकी डा? मेकोपुकीमी सिफारीस कागज गुंडनीमी। मिनु गोपुकी यो मोदेशो कागज कुरशा, शेंना शेंन गाक्वा माल्नीकी डा? २कोरिन्थी ५:१२<sup>२</sup> मोदेशो आंइ कागज चिहं गेपुकी दुम्तीनी। गे आंइ थुंमी ब्रेक्शो बाक्नीनी। मिनु मुर नेल्लेमी इन पर्वम तुडक्ने चाप्नीम। १कोरिन्थी ९:२<sup>३</sup> गे ख्रीस्तमी ब्रेक्शो चिठी दुम्तीनी। कागज मसीमी ब्रेक्शो ममाइ। फुल्लु मुशा ब्रेक्शो यो ममाइ। ब्रॉइचा गेब परमप्रभु यावे आ सोक्तीमी इन थुंमी ब्रेक्शो बाक्ब। प्रस्थान २४:१२

४ ख्रीस्त आ नेंमी परमप्रभु यावे कली थमा सुइक्नीकी।<sup>५</sup> गो शेंदकानु, आंम जोक्तीक तुडक्तीक मकोइनीकी। आंइ लोव शेंतीके परमप्रभु यावेमी पपाइश्शो बाक्ब, दे तुडक्नीकी। २कोरिन्थी २:१६<sup>६</sup> मेकोमी आंइ कली जोक्ब तुडक्ब सेल्शा, आ नक कबल डा लोव शेंथ सोइक्ताक्की। ब्रेक्शा ममाइ, तन्न आ सोक्तीमी गेपु। ब्रेक्शोमी साइक्ब, तन्न आ सोक्तीमी ब्रॉइचा गेब। येरमीया ३१:३१; १कोरिन्थी ११:२५; रोमी ७:६; यूहन्ना ६:६३

### नक कबल ठेयब बाक्ब

७ बेक्तीक चाक्ब कबल फुल्लुमी मुशा, ब्रेक्शो बाक्माक्त। मेको आ छेडछेड थम ठेयब बाक्त। मेकोम पतीके इसाएलीपुकीम मोसा आ कुल कोवने मचाबेम। तन्न नोले मेको छेडछेड ग्युम्ना ग्युम्न लत। प्रस्थान ३४:२९-३५<sup>८</sup> परमप्रभु यावे आ सोक्त आ कबल मेको क्येडा छेडछेड मडुम्बा डा? गलाती ३:२,५<sup>९</sup> मारदे हना बेक्तीक कबल छेडछेड बाक्त हना, ठीक पतीके आ कबल मेको क्येडा शुश छेडछेड दुम्चा माल्ब। रोमी १:१७; रोमी ३:२१<sup>१०</sup> मेको डोंइती छेडछेड पाइश्शो बाक्त। मुल आ छेडछेड नेल्ल जाम्शा लत। मारदे हना मुल मेको क्येडा शुश छेडछेड पाइश्शो जाक्त।<sup>११</sup> डोंइती डा जाम्शा लाइब कबल छेडछेड पाइश्शो बाक्ब। मुल लीशो कबल आ छेडछेड गिश ठेयब बाक्म माइ?

१२ मोदेशो आस पतीके गो काइ महिब दुम्शो बाक्नीकी।<sup>१३</sup> साइ मोसामी पशो खोदेशो मपाइनीकी। मोसामी इसाएलीपुकीमी आ कुल डा छेडछेड

ग्युम्ना ग्युम्न लशो मतामेक्त, दे आ कुल वामी गिल्से बाक्त।<sup>१४</sup> मोसामी इसाएली आन कली परमप्रभु यावे आ देशो लोव शेंदीमी बाक्त। मेकोपुकी चिहं मारदे मरुख दुम्मा बाक्त। मुल यो मरुख बाक्नीम। साइ डा लोव नेंपदमेनु, मेको आन थुं वाम गिल्शो खोदेब दुम्शा, लोव मरुजीम। ख्रीस्तमी ला मेको आन थुंमी गिल्शो वा प्राक्शा रुख सेल्ने चाप्ब। प्रेरित २८:२७; रोमी ११:२५<sup>१५</sup> मुल यो मोसाम ब्रेक्शो लोव नेन्मेनु, आन थुं गिल्सीशो बाक्ब।<sup>१६</sup> तन्न सुमी आ थुं प्रभु गे हिरबा, मेको आ थुंमी गिल्शो वा हुक्सीशा, रुख दुम्ब। रोमी ११:२३,२६; प्रस्थान ३४:३४<sup>१७</sup> मारदे हना प्रभु सोक्त बाक्ब। प्रभु आ सोक्ती ते बाक्बा, मेकेर पाप आ सजाइ रे ब्रॉइतीके बाक्ब।<sup>१८</sup> गो नेल्ल इं थुं गिल्शो वा हुक्शा, प्रभु आ छेडछेड कोंइशा, प्रभु आ छेडछेड पाइश्शो खोदेशो दुम्शा फाइक्वा पुंडसाक्क। मेको फाइक्तीके बारना बारन लशा, इं कली छेडछेड का रे अकां छेडछेडम फाइक्ब। मेको नेल्ल प्रभु रे जाक्ब। मेको सोक्त बाक्ब। २कोरिन्थी ४:६

### ख्रीस्त आ वाइल दुम्शा, शेंशा गाक्शो

४ गोपुकी नु परमप्रभु यावे आ शिशी बाक्तीके मेको शेंब दुम्तक। मोपतीके गेनायो आइक्च थुं पाइश्शो मडुम्नीकी। २कोरिन्थी ३:६; १कोरिन्थी ७:२५<sup>२</sup> गोपुकीमी मुने दोक्तीक खूइश्शा पतीक गेय प्रॉइशो बाक्नीक। मरिश्शो पा परमप्रभु यावे आ लोव फाइक्वा रे डोन बाक्नीकी। तन्न परमप्रभु यावे आ लोव तुडक्पाइक्तीकेमी मुर नेल्ल नु परमप्रभु यावे आ डोंइती ब्रचा डा बाक्नीकी। २कोरिन्थी २:१७; १थिस्सलोनिकी २:५<sup>३</sup> आंइ शेंशो ग्येरपाइक्तीक लोव वाम गिल्सीशो बाक्त हना यो, जाम्शा लाइब मुर कली ला मोपा गिल्सीशो बाक्ब। १कोरिन्थी १:१८<sup>४</sup> मेको आन थुं दोपा मोदेशो दुम्त देशा हना, रागी कली हुकुम पाइब सैतानमी मेको आन कली मिक्च मताइब खोदेशो पा मरुख सेल्शो बाक्त। मोपा ख्रीस्त आ ग्येरपाइक्ब लोव आ छेडछेड तने मचाप्नीम। ख्रीस्त परमप्रभु यावे आ कोंइतीके बाक्ब। हिब्रू १:३<sup>५</sup> गो आंम पर्वम मशेंनीकी। तन्न येसु ख्रीस्त प्रभु बाक्ब, दे शेंनीकी। मिनु येसु आ पतीके गो इन गेय पाइब दुम्तक।<sup>६</sup> परमप्रभु यावेमी “छिडछिड जाम्शा, छेडछेड दुम्ल” देमाक्त। मेकोमी आंइ थुंमी छेडछेड ब्रपाइश्शो बाक्त। गो परमप्रभु यावे आ छेडछेड ख्रीस्त रे पा रुपीकी। उत्पत्ती १:३; २कोरिन्थी ३:१८

### खप के गरम शॉप कुरशो

७ मेको ठेयब सक्ति परमप्रभु यावे के बाक्ब, दे कोंइचा कली मेको छेडछेड खप के गर गो आंइ रां आगाम बाक्ब। १कोरिन्थी ४:११-१३; २कोरिन्थी ११:२३-२७<sup>८</sup> गो शुश श्येत जाइतक हना यो, खतम मडुम्क। मारदे पने मचाप्ब दुम्तक हना यो, आइक्च थुं पाइश्शो मडुम्क।<sup>९</sup> गो खेदा पचा पुंडसाक्क हना यो, आंइ कली कोवब बाक्ब। खोल्वा पुंडसाक्क हना यो, मनुष्क।<sup>१०</sup> येसु आ लोव शेंना शेंन गाक्कानु, येसु बेक्वा डा श्येत जशो खोदेशो पा, गो यो बेक्वा डा श्येत जाइनीकी। तन्न येसु बेक्शो रे सेंचा पुंडसीशो खोदेशो पा, सक्ति पाइश्शो दुम्नीकी। १कोरिन्थी १५:३१; गलाती ६:१७<sup>११</sup> ब्रॉइतक हना यो, येसु आ पर्वम बेक्वा डा बाक्नीकी। मोपा आंइ बेक्वा डा रांमी येसु आ ब्रॉइतीक सक्ति बाक्ब। रोमी ८:३६; फिलिप्पी ३:२१<sup>१२</sup> आंइ रांमी बेक्वा डा श्येत जशा, इन कली ख्रीस्त आ लोव शेंताक्क। आंइ गेय रे पा गे ब्रॉइचा ताइतीनी।

१३ साइ डा लोव ब्रेक्ब कामी “गो थमा सुइक्नुड। मोपतीके आं थमा सुइश्शो नेंपाइक्नुडमी” दे ब्रेक्शो बाक्ब। मोदेशो ब्रेक्ब थमा सुइक्तीक सोक्त का दुम्शा, गो यो थमा सुइक्नीकी। मिनु आंइ थमा सुइश्शो मुर आन कली नेंपाइक्नीकी। भजन संग्रह ११६:१०<sup>१४</sup> मार लोव थमा सुइश्शा, नेंपाइक्नीकी देशा हना “प्रभु येसु कली बेक्शो रे सेंबमी आंइ कली यो येसु नु सेंब” दे लोव बाक्ब। मिनु मेकोमी गे, गो नेल्ल इं कली आ डोंइती बाक्वा गेब। १कोरिन्थी ६:१४<sup>१५</sup> मारदे हना मेको नेल्ल इन पर्वम बाक्ब। परमप्रभु यावे आ शिशी शुश मुरुम नेंतेक्म हना, मेको क्येडा शुश मुरुम मेको कली ठेयब सेल्नीम। २कोरिन्थी १:६,११

16 ठेयब थुं पा शेंना शेंन गावनीकी। आंइ रां बेक्वशो तांइसाक्व हना यो, आंइ थुं चहिं बारना बारन लशो बाक्व। एफिसी ३:१६<sup>17</sup> मारदे हना मुल जशो श्येत इच्का ला बाक्व। नोले मेकोमी इं कली मरुच्चा डा ठेयब छेडछेडमी बाक्वा गेब। रोमी ८:१७-१८; १पत्रुस १:६<sup>18</sup> मारदे हना गो मिक्चीमी तशो थोवक ममाइ। तन्न मिक्चीम मतशो थोवक ला कोवनीकी। तशो थोवक जाम्शा लाइनीम। मतशो थोवक चहिं मजाम्थु, गेना हना यो लीनीम। हिब्रू ११:१

प्रभु नु काथा बाक्वा दाक्वशो

5 इं रां, रागी डा ताम्बु खोदेंशो बाक्व। मेको जाम्शा लाइब बाक्व। मेको जाम्शा लत हना यो, परमप्रभु यावेमी इं कली नक बाक्तीके गेब। मेको खिं गुडम सेल्शो मबाक्व। मेको गेना हना यो लीब स्वर्ग डा खिं बाक्व। २पत्रुस १:१४<sup>2</sup> गो एकेर बाक्शा, रोंका पाइनीकी, आंइ स्वर्ग डा खिं बाक्वा दाक्नीकी।<sup>3</sup> मेको नक बाक्तीके ओव्रचा चहिं माइत वा प्रुडशा, नक वा फेक्शो खोदेंशो बाक्व। मोपा शिश्रा मदुम्नीकी।<sup>4</sup> मुल सम्म रागी डा रांम बाक्नीकी, सुर्ता पना पन बाक्नीकी। शिश्रा दुम्चा कली ममाइ। तन्न नक फेक्शो खोदेंशो पा, आंइ जाम्शा लाइब रां गेना हना यो ब्रोंडशा बाक्व स्वर्ग डा रां दुम्ब। १कोरिन्थी १५:५१-५३<sup>5</sup> मोदेंशो दुम्चा कली परमप्रभु यावेमी आंइ कली ठीक पा वोडशा बाक्व। मेकोमी आंइ कली आ सोक्त बैना खोदेंशो पा गेपु। २कोरिन्थी १:२२; रोमी ८:१६, २३; एफिसी १:१३-१४<sup>6</sup> मोदेंशो दुम्मेनु, ठेयब थुं पाइशा दुम्शा बाक्नय। रांमी बाक्वानु, प्रभु रे डोन बाक्नीकी। हिब्रू ११:१३<sup>7</sup> मारदे हना गो थमा सुइक्तीकेमी गावनीकी। ततीकेमी मगावनीकी।<sup>8</sup> गो ठेयब थुं पाइशा बाक्नीकी। गो रां रे डोन दुम्शा, प्रभु नु बाक्वा दाक्नीकी। फिलिप्पी १:२३<sup>9</sup> मोपतीके गो रांम बाक्शा हना यो, मबाक्शा हना यो, प्रभु कली ग्येरपाइक्वा दाक्नीकी।<sup>10</sup> मारदे हना गो नेल्ल खीस्त आ डोंइती निसाफ पची ना जाक्वा माल्नीकी। रांम बाक्वानु, इं रांम पशो रिश्शो नु मरिश्शो नेल्ल ताइनीकी। प्रेरित १७:३१; रोमी २:१६; रोमी १४:१०; यूहन्ना ५:२९; एफिसी ६:८

पाप रे प्रोंइब कली ग्येरपाइय्य

11 गोपुकी प्रभु कली मान पा हिंशा तुइक्तीके गो मुर आन कली शेंनीकी। परमप्रभु यावेमी आंइ पशो नेल्ल तुइक्व। मिनु गे यो तुइक्नीनी, दे आस पाइनीकी।<sup>12</sup> गो आंइ कली इन डोंइती ठेयब मसेल्सीनीकी। तन्न आंइ पर्वम बोरशा, आंम आन कली ठेयब सेल्सीबपुकीमी शोव्रमी ला गेय पाइनीम। थुंमी मारेड ममिन्नीम। मोदेंशो मुर आन कली लोव्र लेत्वा कली आंइ देंशो लोव्र तुइक्व दुमीने। २कोरिन्थी ३:१; २कोरिन्थी १०:१२<sup>13</sup> गो मरुच्चा डा बाक्त्वक हना, गो परमप्रभु यावे कली ठेयब सेल्वा कली मोदेंशो दुम्तक। गो रुच्चा डा बाक्त्वक हना, मेको इन कली दुम्ब।<sup>14</sup> मारदे हना खीस्तमी इं कली दाक्व, दे शुश मिन्नीकी। मेको नेल्ल मुर आन पर्वम बेक्व, दे तुइशा, गो नेल्ल बेक्वा डा मुर बाक्नय, दे तुइक्नीकी।<sup>15</sup> मिनु मेको नेल्ल आन पर्वम बेक्व। मिनु ब्रोंइशोपुकी मुल रे आंम पर्वम मब्रोंइमल। तन्न येसु कली ब्रोंइमल। मारदे हना मेको आन पर्वम साइशा, सेंसीचा पुंइसाक्व। रोमी १४:७-८

16 गो मुल रे मुर नेल्ल आन कली रागी डा मुर खोदेंशो पा मकोवनीकी। खेयप का गो खीस्त कली मुर खोदेंशो पा कोव्रतक। मुल मोदेंशो ममिन्नीकी।<sup>17</sup> सुइ खीस्त आगाम बाक्व हना, मेको नक सेल्सीशो मुर का दुम्ब। डोंइती डा नेल्ल जाम्शा लत। नेल्ल नक दुम्ने नुप्त। रोमी ८:१०; गलाती २:२०; गलाती ६:१५; प्रकाश २१:५<sup>18</sup> मेको नेल्ल परमप्रभु यावेम पशो बाक्व। परमप्रभु यावेमी आंइ कली खीस्त रे पा आं नु गारपाइक्व। मिनु आंइ कली मेको गारपाइक्तीक गेय पपाइक्व। रोमी ५:१०<sup>19</sup> परमप्रभु यावेमी खीस्त रे पा मुर आन कली आ नु गारपाइक्व। मेको आन मरिश्शो पशो नेल्ल प्रेंशा, गारपाइक्तीक गेय आंइ कली गेपु। रोमी ३:२४-२५; कलस्सी १:१९-२०<sup>20</sup> मिनु गो खीस्त आ पर्वम मुर आन कली गेय पाइब बाक्नीकी। परमप्रभु यावेमी आंइ पतीकेमी मुर आन कली ब्रेब। गोपुकी खीस्त आ पर्वम मुर नेल्ल आन कली “परमप्रभु यावे नु गारब दुमीने” दे शेंनीकी। लूका १०:१६

21 परमप्रभु यावेमी काइ पाप मतुइशो खीस्त कली पापी सेल्लु। मिनु गो खीस्त आगाम बाक्शा, परमप्रभु यावे आ डोंइती ठीक दुम्नीकी। यूहन्ना ८:४६; यसैया ५३:४-६; गलाती ३:१२; रोमी १:१७; १कोरिन्थी १:३०

पावल आ पशो गेय

6 गो परमप्रभु यावे नु गेय पतीके इन कली “परमप्रभु यावे आ शिश्री तशा, मप्रेंदीन” देंनीकी। २कोरिन्थी १:२४<sup>2</sup> मारदे हना मेकोमी “शिश्री पची ना इ पुंइशो नेंता। गो पाप रे प्रोंइतीक नाक्तीमी इ कली वारच पाता” दे ब्रेक्शो बाक्व। नेनीने, मुल शिश्री पची ना बाक्व। नेनीन मुल पाप रे प्रोंइतीक नाक्व बाक्व। यसैया ४९:८; लूका ४:१९, २१<sup>3</sup> प्रभुमी पपाइशा गेयम मारेड दूली मपाइनीकी। सुइ आन थुं मक्याल्नीकी।<sup>4</sup> तन्न परमप्रभु यावे आ गेय पाइब दुम्शा, आंइ गेय नेल्ल रिश्शो पाइनीकी। गो शुश फाल्नीकी, खेदा पतीकेमी, श्येत जतीकेमी, हिंतीकेमी,<sup>5</sup> तुच्चा पुंइसीनीकी, चोक्वा पुंइसीनीकी, आं पर्वम हुल बोक्वा पुंइसीनीकी। बेक्वा डा गेय पा दशा, इच्चा मतथु बाक्नीकी। माइजा बाक्नीकी, २कोरिन्थी ११:२३-२७; १कोरिन्थी ४:११-१३<sup>6</sup> रिश्शो थुं कोंइनीकी, जोक्वशो तुइशा गेय कोंइनीकी, मचबु देंब मदुम्नीकी, शिश्री कोंइनीकी, परमप्रभु यावे आ सोक्तीम देंशो टीनीकी, मुर आन कली दाक्नीकी। १तिमोथी ४:१२; २कोरिन्थी ४:२; १कोरिन्थी २:४; एफिसी ६:१४-१७<sup>7</sup> थमा लोव्र पाइनीकी, परमप्रभु यावे आ सक्तीमी गेय कोंइनीकी, ग्युरा नु पेरा निम्फा रे ठीक पतीके पाइशा बाक्नीकी।<sup>8</sup> आंइ नें चुइक्ताक्म हना यो, क्याम्ताक्म हना यो, आंइ कली मान पाम्तेक्म हना यो, ग्रांरा दिम्तेक्म हना यो, मेको आन पशो मारेड मसुइक्नीकी। मुरपुकीमी आंइ पर्वम “जोल पा शेंशा, मुर आन थुं क्याल्शा हेंथे शेंनीम” देंतेक्म हना यो, गो थमा लोव्र शेंनीकी।<sup>9</sup> आंइ कली मतुइक्नीमी, तन्न तुइशा बाक्नीमी। बेक्वा चिक्शो, तन्न मबेक्शो बाक्नीकी। सजाइ तशो, तन्न साइक्वा मपुंसीशो बाक्नीकी। २कोरिन्थी ४:१०-११; भजन संग्रह ११८:८; प्रेरित १४:१९<sup>10</sup> सुर्ता पशो, तन्न गेना हना यो ग्येरसीशो बाक्नीकी। पुडग दुम्शो, तन्न शुश आन कली शोंप सेल्नीकी। मारेड मथीब दुम्शो, तन्न मारेड मारेडमी गाप्शो बाक्नीकी। फिलिप्पी ४:१२-१३

प्रभु आ मुर दुम्शो कोंइदीने

11 गो कोरिन्थी इन कली शेंचा, शुश दाक्नीकी।<sup>12</sup> गोपुकीमी इन कली दाक्वा मतेक्नीकी। तन्न इन आंम थुंम आंइ कली दाक्वा तेक्व।<sup>13</sup> मेको आ पा डा, गो आल आन कली लोव्र पशो खोदेंशो पा, इन कली लोव्र पाइनुड। इन थुं आंइ गे हिरदीन। १कोरिन्थी ४:१४

14 नेनीन, थमा मसुइक्व आन कली इन थुं मगेने। मारदे हना ठीक पतीके नु परमप्रभु यावे कली मटितीके दोपा गारनीस? छेडछेड नु छिडछिड दोपा गारनीसी? एफिसी ५:११<sup>15</sup> खीस्त नु सैतान बेलीआर दोपा उडक्थ उडक्थ दुम्ने मचाप्नीसी। थमा सुइक्व नु मसुइक्व मारम गारनीसी डा? <sup>16</sup> परमप्रभु यावे आ खिं नु मूर्ति दोपा गारनीसी डा? मारदे हना गो गेना हना यो ब्रोंइशा बाक्व परमप्रभु यावे आ खिं बाक्नीकी। मिनु परमप्रभु यावेमी “आं मुर आगाम बाक्नुड। मेको आन दातेम गाक्नुड। मेको आन परमप्रभु यावे दुम्नुड। मिनु मेकोपुकी आं मुर दुम्नीम” देंशो बाक्व। लेवी २६:११-१२; इजीकीएल ३७:२७; १कोरिन्थी ३:१६<sup>17</sup> मोपतीके प्रभुमी “मेको आन दाते रे गूशा, पिने। मेको आन दाते रे ब्राडीने। ग्रांरा दिशो मारेड मथिने। मिनु गो इन कली ब्राइनुड। प्रकाश १८:४<sup>18</sup> मिनु गो इन आफ दुम्नुड। मिनु गेपुकी आं तमी तौ दुम्नीनी” दे नेल्ल सक्ति पाइशा परमप्रभु यावेमी देंत, दे ब्रेक्शो बाक्व। यसैया ५२:११; इजीकीएल २०:४१; २सामुएल ७:१४; यसैया ४३:६; होसे २:१

पावल ग्येरसीशो

7 आं दाक्शोपुकी, गो नेल्लेमी परमप्रभु यावे आ गेशो लोव्र तुइशा बाक्नय। मोपतीके इं रां थुं नेल्ल मरिश्शो पतीक रे डोन बाक्नय। मिनु इं परमप्रभु यावे कली ला मान पा हिंशा ठेयब सेल्नय।

2 इन थुं आंइ गे हिरदीन। मारदे हना गो सुइ इन कली मरिश्शो मपक। सुइ आन कली मरिश्शो मसेल्क। सुइ रे पा मारेइ यो मताक्क। २कोरिन्थी १२:१७; प्रेरित २०:३२ 3 मेको इन कली दोस गेचा कली मर्देक। मारदे हना डॉइती दैशो आं लोव्र लेंशा देंनुड, इन कली दाक्नीकी। बेक्वा माल्तय हना यो, काथा बेक्वा। ब्रॉइचा ताइतय हना यो, काथा ब्रॉइय। २कोरिन्थी ६:११-१३; रोमी ६:८ 4 मिनु इन कली तशा, ग्येरसीशा, आं थुं बोरनुड। आं थुं नाइक्सीशा बारना बारन लत। श्येत जाता हना यो, इन कली तशा गो ग्येरस डा ग्येरस बाक्ती।

### कोरिन्थी आन कली मिश्शा ग्येरशो

5 गो मासीडोनीया रागीम शेंना शेंन गाक्कानु, शुश श्येत जाइतक। मुरपुकीमी गडड मडड पा खेदा पा श्येत गेतीकी। मिनु शुश हिंचा माल्तक। प्रेरित २०:१-२; २कोरिन्थी ४:८ 6 तन्न परमप्रभु यावेमी आइक्क थुं पाइश्शो आन कली आन थुं बारपाइक्क। मिनु तीतस जाक्शा आंइ थुं बारपाइक्क। मिनु आंइ थुं बारत। २कोरिन्थी २:१३ 7 तीतस कली तशा ला ममाइ, तीतस आ लोव्र नेंशा, ठेयब थुं पाइश्शो दुम्तक। तीतसमी आंइ कली “कोरिन्थीपुकीमी थम रिश्शो पाइक्तीमी। आं कली शुश मान पशा कॉइताय्कीमी। आं थुं बारपाइक्तीमी” देंत। आ दैशो नेंशा गो थाम्पा ग्येरसाक्की।

8 डॉइती डा चिठीमी इन थुं खाइक्पाइक्तन्नी, दे तुइक्ताक्क। मो हना यो मुल आं थुं मखाइक्क। मारदे हना मेको इन थुं खाइश्शो शुश नाक्त मली, दे यो तुइक्ताक्क। २कोरिन्थी २:४ 9 इन थुं खाइश्शो तुइश्शा, गो मग्येरसीड। आं ब्रेक्शो टिशा, इन थुं लेत्ताक्की। गेपुकीम “परमप्रभु यावेमी इं कली लां कॉइचा नु रिश्शो सेल्चा कली थुं खाइक्पाइक्की बाक्त” दे रुप्तीनी। मोपतीके गो इन थुं लेश्शो तशा ग्येरसाक्की। 10 परमप्रभु यावेमी थुं खाइक्पाइश्शो आन कली रिश्शो दुम्मल, दे मो पशो बाक्ब। रागी डा थुं खाइक्पाइक्कशुमी चहिं थुं साइक्क। मती २६:७५; लूका १५:१७-२४; मती २७:३-५ 11 परमप्रभु यावेमी इन थुं खाइक्पाइश्शोमी मार दुम्मे, दे तुइक्तीने। गे रिश्शो दुम्चा कली शुश गेय पाइतीनी। गे सल्ला पा, जिशा, हिंशा, रिश्शो दुम्चा कली शुश बोल पा दोस मताइब दुम्चा कली गे मेको मुर कली सजाइ गेतीनी। मोपा गे दोस मताइब बाक्नीनी, दे कॉइताक्की। 12 मुल देंचा लीशो लोव्र नेनीने, इन कली डॉइती ब्रेक्शो चिठी मारदे ब्रेक्ताक्क देंशा हना, गेपुकी नु बाक्ब मरिश्शो पाइब नु मरिश्शो पचा पुंइसीब आस कली गारपाइक्का लोव्र ला ममाइ। परमप्रभु यावेमी पावल कली अधिकार गेशो बाक्ब। मोपतीके आ दैशो टिचा माल्ब, दे रुष्पा, गेय कॉइदीने, दे ब्रेक्ताक्क। 13 मोपतीके गो इन कली आं दैशो टिशा तशा, ग्येरसाक्क। मिनु आंइ थुं नाइक्ताक्क। गेपुकीमी तीतस कली आ थुं नाइक्पाइक्तीनी। आ थुं नाइश्शो तशा शुश ग्येरसाक्क। 14 मोदैशो पा तीतस कली यो “कोरिन्थीपुकीमी आं लोव्र टीनीमी, रिश्शो पाइनीम” दे थमा लोव्र पशो नड। मुल तीतसमी इन कली आं लोव्र टिशा तशा, थमा बाक्माक्त, दे तुइक्ताक्क। मोपा आं कली मुने मतोक्की। मोपतीके आं नें बोरपा बाक्ती। 15 तीतसमी इन टिशा तशा, ग्येरसाक्क। गे हिंशा, खिंखि पा मेको कली ब्राइतीनी। मिनु इन कली शुश दाक्ताक्क। 16 गो इन रिश्शो पशो तशा ग्येरसाक्की। मिनु इन कली थमा सुइक्ता।

### क्येट पोक्शो

8 आं लोक्बपुकी, परमप्रभु यावेमी मासीडोनीया रागीमी बाक्ब थमा सुइक्क आन कली शिशी पशो आ पर्वम इन कली शेंनीकी। रोमी १५:२६ 2 मेकोपुकी शुश श्येत जाक्तेक्क हना यो, ग्येरसीशा बाक्नीम। पुडग बाक्तेक्क हना यो, अरु आन कली योक्शा गेम्तेक्क। 3 सुइमी गेन की गेन मर्देंथु, आंमा आन दाक्शो पा आन चाप्शो क्येडा यो शुश गेम्तेक्क। आन चाप्शो क्येडा शुश गेशो आं मिक्वीमीन ताता। 4 मेकोपुकीमी आं कली “गो यो थमा सुइक्क आन कली क्येट पोक्का दाक्नीकी” दे पुंइतेक्क। प्रेरित ११:२९ 5 मेको आन मोदैशो चहिं क्येट गेचा लोव्र ला ममाइ। डॉइती

मेकोपुकीमी आन थुं प्रभु कली गेम्तेक्क। मिनु परमप्रभु यावे आ दाक्शो पा, गोपुकी नु गारशा बाक्तेक्क।

6 डॉइती तीतसमी इन कली क्येट पोक्पाइक्क। मुल गो तीतस कली “इन क्येट पोक्तीके, रिश्शो गेय, थुमीन” दे अरेतक। 7 गे मार पाइतीनी हना यो, शुश पाइतीनी। इन थमा सुइक्का, इन लोव्र पस जोक्का, इन तुइक्का, इन रिश्शो गेय पतीके नु इन आंइ कली दाक्तीकेमी शुश गेय पाइतीनी। मुल गे मेको दाक्तीक गेयमी यो रिश्शो गेय कॉइताक्की। १कोरिन्थी १:५; १कोरिन्थी १६:१-२ 8 इन कली अधिकार तशो लोव्र मपाइनुड। थमा पा दाक्का दोपा तांइसीब देंशा हना, सुइमी गेन की गेन माइक्का मपुंइसीथु, आंम थुंमी मिश्शा गेशो रे तांइसीब। शुशेमी मोपा गेम्तेक्क। मिनु गेपुकीमी यो दाक्तीक गेय कॉइदीने। 9 मारदे हना गे इं प्रभु येसु ख्रीस्त आ शिशी तुइक्कीनी। मेको शॉप पाइश्शो बाक्त हना यो इन पर्वम प्रुडग दुम्त। मेको प्रुडग दुम्तीकेम गे शॉप पाइश्शो दुमीन, दे मो पाप्तु। मती ८:२०; फिलिप्पी २:७ 10 मिनु गो इन कली मार देंनुड देंशा हना “बर्स का डॉइती इन गोशो गेय थुम्चा मालीने” देंनुड। 11 इन गेचा दाक्शो नु इन गेने चाप्चा डा क्येट पोक्का गारीन। 12 आंम के बाक्शो ला गेने जाप्ब, आंम के मबाक्शो गेने मजाप्ब। इन चाप्चा डा पा गेने। हितोपदेस ३:२७-२८; मर्कूस १२:४३ 13 इन कली मजाक्दीत्वा डा पा वोइश्शा, अरु आन कली आन माल्शो क्येडा शुश गेन मर्देंनुड। इन कली गप्ल, मेको आन कली यो गप्ल देंनुड। 14 मुल इन के शुश बाक्मेनु, मथीब आन कली वारच पतीने। मिनु नोले मेको आन के शुश दुम्मेनु, इन कली यो वारच पाइनीम। मोपा वारच पा गेमुशोमी नेल्ल इं के बाक्शो उइक्थ उइक्थ दुम्ल, दे मिम्ताक्क। 15 मार ब्रेक्शो बाक्त देंशा हना “सु सुमी शुश खुप्तमे, मेको आन के मर्हे। सु सुमी चहिं इक्का ला खुप्तमे, मेको आन कली यो जाक्दीत्त” दे ब्रेक्शो बाक्ब। प्रस्थान १६:१८

16 गो परमप्रभु यावे कली “गे रिश्शो पाइब बाक्नीनी” दे ठेयब सेल्नुड। मारदे हना तीतसमी कोरिन्थी इन कली शुश मिम्ताक्क। 17 गोपुकीमी तीतस कली “कोरिन्थी आन कली गुम्थ लावो की लावो” दे सोइक्ताक्क। आंइ देंशो लोव्र टिशा, लशो ला ममाइ। आं यो गुमगुम दाक्का ग्येरसीशा पित, दे तुइक्नुड। २कोरिन्थी ८:६; २कोरिन्थी ७:७, १५ 18 तीतस नु गाक्ब वारच का यो सोइक्ताक्क। थमा सुइक्क नेल्लेमी मेको कली तुइश्शो बाक्नीमी। मारदे हना मेको येसु ख्रीस्त आ ग्येरपाइक्क लोव्र रिश्शो पा शेंब, दे नें चलेशो बाक्ब। २कोरिन्थी १२:१८ 19 आ नें चलेशो ला ममाइ। थमा सुइक्कपुकी गारशा मेको कली गो नु क्येट पोक्का गाक्का कली योव्रतेक्क। मेको गोपुकी नु शिशी पतीक गेय पाइब। गो मेको वारच पतीके प्रभु कली ठेयब सेल्चा कली पाइनीकी। गलाती २:१० 20 मोपा सांक्छी वोइक्कानु, मेको क्येट आ पर्वम मरिश्शो लोव्र पने मचाप्नीम। 21 गो प्रभु आ डॉइती रिश्शो पशो ला ममाइ। मुर नेल्ल आन डॉइती यो रिश्शो पशा कॉइनीकी। 22 मोपतीके मेको निक्शी नु आंइ लोक्ब का यो सोइक्कीकी। डॉइती खेयप निक्शी सां सोइक्कानु, मेको लोक्बमी रिश्शो गेय पा कॉइताक्क। मोपतीके मुल यो रिश्शो पाइब, दे तुइक्ताक्क। मेकोमी इन कली यो रिश्शो मिम्ब। 23 तीतस गो नु गारशा इन कली गेय पाइब बाक्ब। अर्को लोक्ब निक्शी थमा सुइक्क आन सोइश्शो बाक्नीस। मेको ख्रीस्त आ नें ठेयब सेल्ब बाक्नीस। २कोरिन्थी ७:१३; २कोरिन्थी १२:१८ 24 मोपतीके मेको सां इन बाक्तीके जाक्मानु, मेको आन कली दाक्का, वारच पतीने। मेको आन कली मार माल्दा, मेको गेने, आन लोव्र नेनीने। आं देंशो पाइतीनी हना, गोमी इन पर्वम पशो लोव्र थमा दुम्ब। मिनु गो ग्येरसीनुड। थमा सुइक्क नेल्लेमी यो “कोरिन्थीपुकीमी रिश्शो पामे बाक्त” दे तुइक्कीमी। २कोरिन्थी ७:१४

### दोपा शोक्गामे, मोपा खुप्नीम

9 मेको क्येट पोक्का आ पर्वम इन कली लेंशा शेंचा ममाल्नुड। 2 साइ थोचे क्येट पोक्का माल्ब देंशो नेंशा “पोक्नीकी की पोक्नीकी” दे प्रेक्तीनी। मिनु इन कली मोपा प्रेक्शो तशा, मासीडोनीयाम बाक्ब आन कली “आकाया डा मुरपुकीम ग्येरसीशा क्येट पोक्नीम” दे लोव्र नेंपाइक्तामी। मिनु शुशेमी “गो यो पोक्नीकी” देंतेक्क। २कोरिन्थी ८:१९ 3 साइ थोचे डा बोरशो लोव्र जोल मद्दुल्ल। मिनु गे ठीक बाक्का, लोक्ब सां आन कली क्येट

पोक्शा वतीन, दे इन बाक्तीक सोइक्ताकक।<sup>4</sup> मारदे हना गो इन बाक्तीके जाक्डानु, मासीडोनीया डा मुर आन डोंइती गे क्येट मपोक्थु बाक्शा मुने मदोक्कीन, दे मेको सां आन कली इन बाक्तीक सोइक्ताकक।<sup>5</sup> मोपतीके मेको सां आन कली आं क्येडा डोंइती लने, दे सोइक्ताककमी। मिनु गो जाक्वी ना “मुल क्येट पोक्कीन” दॅशा, ग्रीचा ममाल्लुड। सुइमी आन थुं मखाइक्थु ग्येरशा, आंम आ दाक्स पा, चाप्स पा गेने चाप्मेक्ल, दे लोकब सां आन कली आं क्येडा डोंइती सोइक्ताककमी।

<sup>6</sup> आंम आन दाक्स पा, चाप्स पा, गेचा चहिं दोदेंशो रुम्सीब दॅशा हना, वांचेर शोक्वामेनु, इच्का ला शोक्वामी, इच्का ला खुप्चा ताइब। तन्न शुश शोक्वामी शुश खुप्चा ताइब। *हितोपदेस ११:२४-२५; हितोपदेस १९:१७* क्येट पोक्वु कों मपोक्वु, दे थुं निक्वी मपथु, सुइमी “गेव की गेव” माइक्चा मपुंडसीथु, आंम थुंमी मिश्शा, ग्येरसीशा गेचा माल्ब। ग्येरसीशा गेब कली परमप्रभु यावेमी दाक्ब। *रोमी १२:८*<sup>8</sup> परमप्रभु यावेमी इन कली माल्शो क्येडा शुश गेने चाप्ब। मिनु मारेइ मारेइम गाप्शा, मारेइ वारच पचा डा गेय बाक्त्त हना यो, गे पने चाप्नीनी।<sup>9</sup> मार ब्रेक्शो बाक्त्त, दॅशा हना “मेकोमी वांचेर ब्वारब, पुडग आन कली गेब। मेको आ ठीक पशो गेना हना यो लीब” दे ब्रेक्शो बाक्ब। *भजन संग्रह ११२:९*<sup>10</sup> शोक्ब कली वांचेर गेब। जचा दाक्ब कली जचा थोव्रक गेबमी इन के बाक्शो यो बारपाइक्ब। मोपा इन ठीक पतीके डा फल बारना बारन लाइब। *इजीकीएल १०:१२*<sup>11</sup> मिनु गे शुश थीब दुश्शा, हाइश्शा गेशो तशा, गो परमप्रभु यावे कली “गे रिश्शो पाइब बाक्नीनी” दे ठेयब सेल्नीकी।<sup>12</sup> मोदेंशो हाइश्शा गेशोमी श्येत जशो थमा सुइक्ब आन कली रिश्शो दुम्ब। मोशो ला ममाइ, शुशेमी परमप्रभु यावे कली ठेयब सेल्नीम<sup>13</sup> एको क्येट पोक्तीक गेय पशा इन टितीक नाक्सीशो बाक्ब। मिनु गे परमप्रभु यावे कली ठेयब सेल्शो बाक्नीनी। मिनु इन हाइश्शा मेको आन कली नु अरु आन कली गेशोमी गे ख्रीस्त आ ग्येरपाइक्ब लोव्र तुइक्ब बाक्नीनी, दे कोंइनीनी।<sup>14</sup> परमप्रभु यावे आ शिशी गे नु बाक्तीके मेकोपुकीम इन कली प्रार्थना पाइनीमी।<sup>15</sup> परमप्रभु यावेमी इन कली देंने मचाप्चा डा ठेयब कोसेली गेत्तु। मेको आ परबम मेको कली “गे रिश्शो पाइब बाक्नीनी” दॅचा मप्रॉइनीक।

पावल आ गेय

**10** गो, ख्रीस्त आ ब्रेक्शो नु रिश्शो पतीकेमी, इन कली शॅना शॅन बाक्नुड। गो इन नेक्था बाक्शा, ब्रेक्शो लोव्र पाइनुड। तन्न गो डोन बाक्ती हना, हुइश्शा लोव्र पाइनुड।<sup>2</sup> गो इन बाक्तीके जाक्डानु, चिठीम ब्रेक्शो लोव्र खोदेंशो पा हुइश्शा लोव्र पचा ममाल्लड, दे मिश्शा ब्रेक्ताकक। आंइ परबमी “रागी डा मुर खोदेंशो पा शॅनीम” दॅब आन कली हुइश्शो खोदेंशो पा इन कली हुइक्चा मदाक्नुड। *२कोरिन्थी १३:१-२; १कोरिन्थी ४:२१*<sup>3</sup> मारदे हना गो रागीम बाक्त्तक हना यो, रागी डा मुर खोदेंशो पा मजीनीकी।<sup>4</sup> आंइ लडाइ पतीक या रागी डा खोदेंशो मबाक्नीम। तन्न मेको परमप्रभु यावे आ सक्ति पाइश्शो बाक्नीम। मेकोमी मारेइ मारेइ खतम सेल्ने चाप्नीम। *एफिसी ६:१३-१७*<sup>5</sup> परमप्रभु यावे कली थमा सुइक्ब आन कली तेक्बमी पशो लोव्र, ठेयब लेश्शा थमा मसुइक्तीक लोव्र खतम सेल्तक। मिनु ख्रीस्त आ लोव्र टीब दुम्पाइक्चा कली मटीब मिम्तीक नेल्ल ग्याइश्शा लाइक्ब खोदेंशो बाक्नीकी।<sup>6</sup> मिनु इन ख्रीस्त कली टिशो रिश्शो दुम्त हना, सु सुमी मटीमे, गो मेको आन कली सजाइ गेनीकी।

<sup>7</sup> मिनु इन डोंइती दोपा बाक्नीकी, मेको कोव्रडीन। सु सुमी “गो ख्रीस्त आ मुर दुम्ती” दे आन नें बोरपदमे, मेकोपुकीमी आंइ कली यो ख्रीस्त आ मुर बाक्नीम, दे रुप्मेक्ल।<sup>8</sup> गो आंइ अधिकार आ परबम बोरती हना यो, मुने मदोक्नुड। मारदे हना मेको इन कली खतम सेल्चा कली ममाइ। तन्न इन कली रिश्शो सेल्चा कली प्रभुम गेती। *२कोरिन्थी १३:१०; १कोरिन्थी ५:४-५*<sup>9</sup> आं ब्रेक्शो चिठी इन कली हिंपाइक्चा कली ममाइ, दे मिम्तीन।<sup>10</sup> मारदे हना मेकोपुकीमी “मेको आ ब्रेक्शो चिठी ठेयब नु बोल्यो लोव्रम ब्रीशो बाक्नीम। तन्न आंमान जाक्त्त हना, मारेइ पने मचाप्ब नु ब्वाक्स मजोक्ब बाक्ब” देंनीम।<sup>11</sup> मोदेंशो मुरपुकीमी मार रुप्चा माल्नीम दॅशा हना “गो

मबाक्ची ना हुइश्शा शॅशा ब्रेक्शो लोव्र, आंइ बाक्ची ना मपाइनीकी” दे रुप्मेक्ल। *२कोरिन्थी १३:२,१०*

ठेयब मनकी, दे रुप्पाइश्शो

<sup>12</sup> आंमान ठेयब सेल्सीबपुकी नु मगारनीकी। आन पशो खोदेंशो यो मपाइनीकी। मेकोपुकीमी ठेयब सेल्सीशा, आंम आन जोक्तीक तुइक्तीक कोंइमुइनीम। मोदेंशो पशोमी “मारेइ मरुक्ब बाक्नीम” दे तुंडसीब। *२कोरिन्थी ३:१; २कोरिन्थी ५:१२*<sup>13</sup> गो आंइ नें बोरपाइक्नीकी। मारदे हना परमप्रभु यावेमी आंइ कली अधिकार गेशा, इन कली शॅब सेल्तु। आ गेशो अधिकार डा लाक्शा चहिं जोक्ब तुइक्ब नकी, दे बोरशा मगाक्नीकी। *रोमी १५:२०; रोमी १२:३*<sup>14</sup> आंइ नें बोरपाइक्नीकी। मारदे हना आंइ क्येडा डोंइती इन बाक्तीके ख्रीस्त आ ग्येरपाइक्तीक लोव्र नेंपाइक्थ सुइम मजाक्म, दे तुइक्ताकक।<sup>15</sup> अरु मुरपुकीमी इन कली शॅशो आ परबम गो मबोरनीकी। तन्न इन थमा सुइक्तीके बारना बारन लमेनु, आंइ शॅतीके यो मेको नु बारना बारन लाइब।<sup>16</sup> मिनु इन बाक्तीक क्येडा लाक्शा, एर ओंथ ख्रीस्त आ ग्येरपाइक्तीक लोव्र शॅने चाप्नीकी। मुर आन शॅने थुश्शो गुम्तीके आ परबम आंइ नें मबोरपाइक्नीकी।<sup>17</sup> सु बोरनीमी, मेको प्रभु आ परबम नें बोरपदमेक्ल। *येरमीया ९:२३-२४; १कोरिन्थी १:३१*<sup>18</sup> सुमी आंम कली शॅब सेल्बा, मेको कली मब्राइनीम। तन्न प्रभुमी शॅब सेल्शो कली ब्राइनीम। *१कोरिन्थी ४:५*

दूली शॅब आन परबम लोव्र

**11** गो इच्का निप्स ग्राइश्शो लोव्र पाइनुड, गे आं लोव्र फाल्शा नॅशा गेयीनी।<sup>2</sup> इन कली मिश्शा, गो परमप्रभु यावेमी रुश पशो खोदेंशो दुम्ती। मारदे हना रिश्शो ग्युम्ती ग्युंवे पा गेशो खोदेंशो पा, इन कली ख्रीस्त कली गेतन्नी। *एफिसी ५:२६-२७*<sup>3</sup> बुस्सुमी हक्वा कली मिलो शिलो पा जोल पा आ थुं हिरपा, परमप्रभु यावे कली मटीब सेल्शो खोदेंशो पा, दूली शॅबपुकीमी इन थुं क्याल्शा, ख्रीस्त कली दाक्चा रे हेंथे लां खोइक्पाइक्नीम। *उत्पत्ती ३:४,१३*<sup>4</sup> मारदे हना मुर का जाक्शा, मेकोमी इन कली अर्को येसु आ परबम शॅब आंइ शॅशो खोदेंशो ममाइ, इन डोंइती ताक्शो ममाइ, अर्को सोक्त्त ताक्पाइक्ब। अर्को ग्येरपाइक्तीक लोव्र नेंपाइक्ब। मिनु गे रीब पा बिन्नीनी। *गलाती १:८-९*<sup>5</sup> गो मेको शुश जोक्ब तुइक्ब देखु पशो सोइश्शो आन क्येडा आइक्च मनड। *२कोरिन्थी १२:११*<sup>6</sup> ब्वाक्स मजोक्ब बाक्ती हना यो, शुश जोक्ब बाक्नुड। गो आंइ पतीकेमी कोंइताकक। *१कोरिन्थी २:१,२,१३; एफिसी ३:४*

<sup>7</sup> गो ब्रेक्शो दुश्शा, इन कली ठेयब सेल्चा कली परमप्रभु यावे आ ग्येरपाइक्तीक लोव्र क्येट मताक्थु शॅताकक। मार, मेको पाप मिम्नीनी? *२कोरिन्थी १२:१३; मत्ती १०:८; १कोरिन्थी ९:१२-१८*<sup>8</sup> अर्को रागीम बाक्ब थमा सुइक्ब आन गुम्तीके डा आन क्येट रोइश्शो खोदेंशो पा ताक्शा, इन कली शॅताक्न्नी। *फिलिप्पी ४:१०,१५*<sup>9</sup> गेपुकी नु बाक्शा शॅदन्नीनु, मासीडोनीया रागी रे जाक्शो थमा सुइक्ब लोकबपुकीमी आं कली माल्शो थोव्रक गेशा, वारच पाइक्तीमी। मोपा आन पशोमी गेपुकीमी मोशा शॅसीचा ताइतीनी। मुल यो मारेइ ताक्चा ममाल्लड, दे मिम्ताकक।<sup>10</sup> ख्रीस्त थमा बाक्ब, दॅशो लोव्र लीशो खोदेंशो पा “कोरिन्थी आन कली आन क्येट मताक्थु, मोशा शॅताक्व” दॅशो लोव्र आकाया रागीम ब्रशा लील, दे मिम्शा, मारेइ मताक्वु।<sup>11</sup> मो पडानु, इन कली मदाक्ब दुम्नुडा डा? गोमी इन कली दाक्शो मदाक्शो परमप्रभु यावेमी तुइक्ब।

<sup>12</sup> मुल सम्म दोपा बाक्डा, मुल यो मोपान बाक्नुड। मारदे हना दूली लोव्र शॅबपुकीमी “पावल नु आ वारचपुकीमी पशो खोदेंशो पा गो यो पाइनीकी” दे नें बोरपा गाक्नीम। मेको आन जोल ग्युंइचा कली गो मारेइ मताक्थु शॅनीकी।<sup>13</sup> मेकोपुकी परमप्रभु यावे आ सोइश्शो मनम। ख्रुइश्शा जोल पा गेय पाइनीम। ख्रीस्त आ सोइश्शो दुम्बु पा शॅथ गाक्नीम। *२कोरिन्थी २:१७*<sup>14</sup> मोपा गाक्तेक्म हना यो, मेको आन मोदेंशो पशो छक लाक्चा डा ममाइ। मारदे हना सैतान यो परमप्रभु यावे आ स्वर्ग डा गेय पाइब खोदेंब दुम्बु पा



गेय पा गाक्ब। 15 मेकोपुकी रिम्शो गेय पाइब खोदेशो दुम्बु पा गाक्नीम। मेको आन जोल नोले गूब। मिनु आन गेय यो मलीब।

### पावल श्येत जशो

16 गो इन कली लेंशा देंनुड, मार देंती हना यो, आं लोत्र नेंचा मप्रोनीन। गो निप्स ग्राइश्शो लोत्र पाइब खोदेशो पा, आं नें बोरपाइश्शो लोत्र पना पन बाक्ती हना यो, आं लोत्र नेनीने। २कोरिन्थी १२:६ 17 मुल इन कली देंशो लोत्र प्रभुम गेशो अधिकार डा लोत्र ममाइ। आं नें बोरपाइक्तीक लोत्र पा, गो निप्स ग्राइश्शो लोत्र पड देंती। 18 मारदे हना शुश मुर रागी डा लोत्रमी ठेयब लेत्नीम। मोपतीके गो यो बोरनुड। 19 गे ग्येरसीशा निप्स ग्राइश्शो आन लोत्र फाल्नीनी। मिनु आंम कली जोक्ब तुइक्ब मिन्नीनी। १कोरिन्थी ४:१० 20 सुइ मुरुमी इन कली वाइलीम वाइल सेल्तेक्म हना, रोइक्ताक्म हना, जोल पास्तेक्म हना, बोरशा कोंइताक्म हना नु इन चोचो राप्तेक्म हना यो फाल्शा बाक्बाक्तीनी। 21 गो मुने पा देंनुड, मेको आन पशो खोदेशो पने मचाप्क। सुइ मुर मारेइ आ पबर्म ठेयब लेशशा बोरतेक्म हना, गो यो मेको आ पबर्म ठेयब लेशशा बोरनुड। गो मूर्ख खोदेशो पा ब्वाक्नुड। 22 मार, मेको हिब्रू नमी? गो हिब्रू नड। मार, मेको इस्राएली नमी? गो इस्राएली नड। मार, मेको अब्राहाम आ चच युइ नमी? गो यो अब्राहाम आ चच युइ नड। फिलिप्पी ३:५ 23 मार, मेको ख्रीस्त आ गेय पाइब नमी? गो यो ख्रीस्त आ गेय पाइब नड। गो मेको आन क्येडा रिम्शो गेय पाइब नड। गो गशो मुरुम खोदेशो लोत्र पाइनुड। गो मेको आन क्येडा शुश गेय पाता। मेको आन क्येडा शुश चोक्चा पुंडसाक्वी। मेको आन क्येडा तुप्चा पुंडसाक्वी। हेर हेरा साइक्चा पुंडसाक्वी। १कोरिन्थी १५:१०; २कोरिन्थी ६:४-५ 24 यहूदीपुकीमी आं कली ५ खेयप ३९ कोर्न आप्तीनी। ब्यवस्था २५:३ 25 खेयप सां कोक्केमी तुप्तीमी। काले फुल्लु आप्तीमी। खेयप सां आं डोइश्शो जहाज समुन्द्रम गुम्शा हेरा बेक्ती। मो दुम्मेनु, काब नाक्दो नाक्ती समुन्द्रम बाक्ती। प्रेरित १६:२२; प्रेरित १४:१९ 26 रागी रागी हिरशा गाक्डानु, खोला शोक्सीडानु, हेर हेरा योल्ताक्वी। लांम बाप्शा बाक्ब खुइपुकीमी हेर हेरा साइक्तीमी। आंम यहूदीपुकीमी यो शुश श्येत गेतीमी। अर्को रागी डा मुरपुकीमी यो हेर हेरा साइक्तीमी। सहर, गोरशो रागी, समुन्द्र ते ते हिरशा गाक्डा, मेक मेक हिंन हिंन गाक्चा माल्ताक्वी। आं लोक्ब दुम्बु पा, थमा सुइक्ब नकी देंब नु गाक्डानु, मेकोपुकीमी यो शुश श्येत गेतीमी। 27 येसु आ लोत्र शेंना शेंन गाक्डानु, शुश गेय पा, शुश श्येत जशा, शुश नाक्दो इप्चा यो मतड। जचा तूचा यो मतड। ग्यूमी फेक्चा यो मतड। २कोरिन्थी ६:५ 28 मोदेशो श्येत आं रांमी जशो ला ममाइ। आं थुं यो मनाइक्स। मारदे हना थमा सुइक्ब आन कली दोपा मार पा रिम्शो सेलुमी, दे मिम्स डा मिम्स बाक्ती। प्रेरित २०:१८-२१, ३१ 29 मुरुमी "मचाप्नीकी" देंनीम। गो चहिं गेना हना यो चाप्नुडा डा? मुरुम पाप पास्तेक्म हना, गो शुश सुर्ता पाइनुड। 30 गो आं नें बोरपा लोत्र पचा माल्नुड हना, आं मचाप्शो आ पबर्म आं नें बोरपाइक्नुड। २कोरिन्थी १२:५ 31 गेना हना यो ठेयब सेल्चा पुंडसीब प्रभु येसु आ आफ परमप्रभु यावेमी गो जोल मपाइनुड, दे तुइक्ब। 32 साइ दमस्कस सहरमी बाक्डानु, पिप अरेतस आ हुकुम पाइबमी आं कली ग्याइक्चा, दे सहर आ एर ऑथ आ सिपाहीपुकी वोइक्मी बाक्त। 33 तन्न थमा सुइक्बपुकीमी आं कली डोकोम कुरपा गारो डा झेल रे ओंखां पा तोक्शा प्रोक्पाइक्तीमी। मोपा जोरी सत्रु आन गुइ रे ब्रोंइती। प्रेरित ९:२४-२५

### मचाप्ब सक्ति पाइश्शा दुम्शो

12 नें बोरपाइक्तीक लोत्र शोर गाक्शो बाक्त हना यो, गो आं नें बोरपा लोत्र पचा मप्रोंइनुड। मारदे हना प्रभुमी छेडछेड पा तपांडसीशा तुइक्पाइक्ती, दे मुल सम्म इन मतुइश्शो लोत्र तुइक्पाइक्ननी। 2 गो ख्रीस्त आ मुर का कली तुइक्नुड। १४ बर्स डोंइती मेको स्वर्गम लाइक्चा पुंडसाक्व। रांम बाक्म, कों मबाक्म, गो मतुइक्नुड। परमप्रभु यावेमी ला तुइक्ब। 3 मिनु गो मेको मुर परमप्रभु यावे आ बाक्तीके लाइक्चा पुंडसाक्व, दे तुइक्नुड। रांम बाक्म, कों मबाक्म, गो मतुइक्नुड। परमप्रभु

यावेमी ला तुइक्ब। 4 मिनु मेको मुरुमी खुइश्शो लोत्र नेंतु। मेको लोत्र मुरुम देंचा मदुम्ब। 5 मेको मुर आ पबर्म आं नें बोरपाइक्नुड। आं पबर्म चहिं आं नें मबोरपाइक्नुड। तन्न गो आं मचाप्शो आ पबर्म आं नें बोरपाइक्नुड। २कोरिन्थी ११:३० 6 मारेइ पने मचाप्ब दुम्तीके आं नें बोरपाइक्नुड देंशोमी निप्स ग्राइश्शो लोत्र पाइब मदुम्नुड। मारदे हना गो थमा लोत्र पाइनुड। मारदे हना मुरपुकीमी आं कली तशा, आं लोत्र नेंशा आं पबर्म मार मिम्चा माल्बा, दे आंमा तुइक्तमेक्ल, दे मिम्शा बाक्नुड। २कोरिन्थी १०:८ 7 गो शुश कोंइतीके तशा, मेको आ पबर्म ठेयब लेशशा, नें मबोरपदुल, दे सैतान आ चू आं रांम गेती। मेको आं कली श्येत गेचा कली नु आं ठेयब लेत्तीक तेक्चा कली बाक्ब। 8 खेयप सां गो प्रभु कली "मोदेशो चू रे प्रोंइयीनी" दे पुंडता। 9 तन्न मेकोमी आं कली "आं शिशी इ कली गारब। मारदे हना मचाप्ब मुर आगाम आं सक्ति नेल्ल क्येडा ठीक बाक्ब" देंत। मोपा तुइक्तु रे ख्रीस्त आ सक्ति गो नु बाक्शो तांडसेक्ल, दे गो मारेइ पने मचाप्ब दुम्शोमी, थाम्पा ग्येरसीशा आं नें बोरपाइक्नुड। 10 मोपतीके ख्रीस्त आ सक्ति तांडसेक्ल, दे मारेइ पने मचाप्ब दुम्ती हना यो, शुक्शी लोत्र पाइक्चा पुंडसाक्वी हना यो, जचा फेक्चा मारेइम मजाक्दीत्ती हना यो, खेदा पचा पुंडसाक्वी हना यो नु दोदेब श्येत गेचा पुंडसाक्वी हना यो, आं थुं नाइश्शा हेम्म पा बाक्नुड। मारदे हना गो मारेइ पने मचाप्ब दुम्डानु, सक्ति पाइश्शो बाक्नुड, दे रुप्ता। फिलिप्पी ४:१३

### थमा सुइक्ब आन कली शेंशो

11 गो निप्स ग्राइश्शो लोत्र पाइब खोदेशो दुम्ती, दे तुइक्ताक्ड। गेपुकीमी मोदेशो पाइब सेल्तीनी। मारदे हना गेपुकीमी आं कली ठेयब सेल्चा माल्शो, दे तुइक्चा माल्शो ननी। गो मेको शुश जोक्ब तुइक्ब देखु पशो सोइश्शो आन क्येडा आइक्च मनड। मो हना यो गो आइक्च दुम्ती। २कोरिन्थी ११:५ 12 ख्रीस्त आ सोइश्शोन बाक्माक्त, दे कोंइचा कली गेपुकी नु बाक्डानु, चिन्ड नु छक लाक्चा डा गेय कोत्रचा ताइतीनी। रोमी १५:१९; हिब्रू २:४ 13 तेइ तेइ येसु आ नेंमी खुम्सीशा बाक्ब आन कली मारेइ मारेइ शेंशा, मारेइ मारेइ पशा कोंइशो खोदेशो पा इन कली यो पशा कोंइताक्नी। मिनु मार लीम डा? लोत्र का चहिं मार लीत देंशा हना, गेपुकी नु गो मारेइ मताक्गु। आं मताक्शोमी माफ गेयीनी। २कोरिन्थी ११:७-९ 14 मुल इन कली गुम्थ पिडानु, खेयप सां दुम्ब। गो इन कली श्येत मगेनुड। इन बाक्शो मारेइ मताक्नुड। तन्न इन कली माल्नुड। मारदे हना आलपुकीम आंम आफ कली शोंप मउप्नीम। तन्न आम आफोमी आन आल आ पबर्म शोंप उप्नीमी। 15 गो दोपा इन कली वारच पा रिम्शो थुं सेल्चा कली ग्येरसीशा, आं थुं गेनन्नी, मोपा इन कली दाक्चा डा गेय पाता। मिनु गो चहिं इक्का ला दाक्चा पुंडसीनुडा डा? फिलिप्पी २:१७ 16 इन मुर का निक्शीमी मार देंतेक्म देंशा हना "मारेइ मताक्नुड देंशा, जोल पा शुश ताक्बाक्त" देंतेक्म। 17 मार, आं सोइश्शो आन गुइ रे गो मारेइ ताक्गु डा? मार ताक्शा, इन कली श्येत गेमे डा? 18 गो तीतस कली कोरिन्थी आन कली गुम्थ लावो, दे सोइक्ताक्ड। तीतस नु लोक्ब का यो सोइक्ताक्ड। मिनु तीतसमी गेपुकी नु मारेइ ताक्गा डा? आंस सोक्त का पा गेय मपस्कु डा? २कोरिन्थी ८६, १६-१८ 19 "पावल नु आ वारचपुकीमी ब्रोंइचा कली लोत्र पाइबाक्तेक्म" देंशो मिम्ताक्नी हना, गे दूली मिम्ताक्नी। आंइ दाक्शो लोक्बपुकी, गो इन कली शेंशा लोत्र पकानु, परमप्रभु यावे आ डोंइती जिम्मा ब्रशा ख्रीस्त आ अधिकार तशा, इन कली रिम्शो दुम्ल, दे मिम्शा शेंताक्क। 20 मुल गुम्पानु, मार दुम्बा, दो दुम्ब, दे थुं ग्येथ लुक्च पा बाक्नुड। मारदे हना गुम्पानु, आं दाक्शो खोदेशो मपाइनीनी कों, गो यो इन दाक्शो खोदेशो मपाइनुडा कों? मिनु मगारथु, जिचा बोक्शा, गेहे पमुशा, गाइश्शा, आंम कली ठेयब सेल्मुशा, शुक्शी पमुशा, मुर आन पबर्म मरिम्शो लोत्र पा नोफा मुइक्मुशा, ठेयब लेशशा, खडड मडड दुम्नया कों? २कोरिन्थी १०:२ 21 गो लेशशा जाक्डानु, परमप्रभु यावेमी आं कली आइक्च सेल्बा कों, दे हिंनुड। मिनु डोंइती पाप पाइब नु परमप्रभु यावे गे मलेप्ब आन पबर्म सुर्ता पचा माल्नुडा कों? डोंइती मेकोपुकीमी ग्रांरा दिचा डा, तेल्लेम नु हेंथे गेय पास्तेक्म। २कोरिन्थी १३:२

## हिंच कोंइशो

13 मुल गो इन कली गुम्थ पिडानु, सां खेयप दुम्नुड। निसाफ पामेनु, सांकछी निक्शी सां वोइश्शा, मेको आन लोवमी दोस गुंडशा, सजाइ गेचा माल्ब। *ब्यवस्था १९:१५; मत्ती १८:१६* 2 मोपतीके सजाइ गेचा पुंडसीब आन कली सजाइ मगेथु, मप्रॉइनुड। मारदे हना एको क्येडा डोंइती जाक्डानु, मो मपचा, दे शेंशो नन्नी। 3 गेपुकीमी “पावल ख्रीस्त आ सक्ति तशा, अधिकार पाइश्शो बाक्माक्त” दे इन मिक्चीमी तचा माल्बाक्तीनी, दे तुइक्ताक्ड। ख्रीस्त इन दातेमी मचाप्ब ममाइ, शुश सक्ति पाइश्शो बाक्ब, दे कोंइताक्व। 4 मारदे हना मेको मचाप्ब दुम्शा, शीम केप्शा कांटी थोक्शा क्याइश्शा साइक्चा पुंडसाक्व। तन्न परमप्रभु यावे आ सक्तिमी बेक्शो रे सेंचा पुंडसाक्व। मोदेशो पा गो यो मेको नु मारेइ पने मचाप्ब दुम्नीकी। तन्न गेपुकी नु बाक्कानु, बेक्शो रे सेंचा पुंडसीशा, परमप्रभु यावे आ सक्ति तशो सक्ति पाइश्शो गेय कोंइनीकी।

5 इन थमा सुइक्तीके ठीक बाक्बा देय मबाक्ब आंमा नाक्शा कोवडीने। आंमा नाक्तीन। येसु ख्रीस्त इन आगाम बाक्ब, दे मप्रेंदीन। मबाक्त हना इन गेय शोर गाक्शो दुम्ब। 6 गो आंइ शेंशोमी इन कली रिम्शो पाइतक, दे तुइक्नीकी। मिनु गे यो मोदेशो मिम्नीनी, दे आस पाइनीकी। 7 गे मारेइ

मरिम्शो मपन, दे गो परमप्रभु यावे कली पुंडनीकी। गो ग्राशो मुर खोदेशो दुम्चा ममाइ, तन्न ठीक पाइब दुम्मीन। गो ठीक मपाइब खोदेशो दुम्तक हना यो, गे रिम्शो पाइब दुम्नीकी। 8 गोपुकीमी थमा लोव थमा पाइनीकी। दूली नु जोल लोव कली थमा देंने मचाप्नीकी। 9 गो मारेइ पने मचाप्ब दुम्शो बाक्तक। तन्न इन कली बोल्यो दुम्शो तशा ग्येरनीकी। गो परमप्रभु यावे कली “कोरिन्थीपुकी रिम्शो दुम्मल” दे पुंडना पुंडन बाक्नीकी। 10 गो इन नेक्था मबाक्डानु, एको चिठी ब्रेक्नुड। मिनु आं जाक्ची ना गो इन कली हुइश्शा, प्रभुमी आं कली गेशो अधिकार कोंइचा ममाल्डल। मेको अधिकार सेल्चा कली गेशो बाक्त, प्रेत्चा कली ममाइ। २कोरिन्थी १०:११; २कोरिन्थी १०:८

## नोले डा लोव

11 आं लोकबपुकी, मुल रिम्शो बाक्कीन। रिम्शो पने। आं लोव नेंशा टीब दुम्नीने। इन दातेमी गारमुने। थुं नाइश्शा बाक्कीने। दाक्तीक नु थुं नाइक्तीक गेब परमप्रभु यावे गेपुकी नु बाक्त। *फिलिप्पी ४:४; रोमी १५:३३* 12 प्रभु आ नेंमी मुम्मुशा, आसीक गेमुने। 13 गो नु बाक्ब थमा सुइक्ब नेल्लेमी इन कली “रिम्शो बाक्कीन” देंतेक्म। 14 इं प्रभु येसु ख्रीस्त आ शिशी, परमप्रभु यावे आ दाक्तीके नु परमप्रभु यावे आ सोक्त गेना हना यो गेपुकी नु लील।

# गलाती

एको चिठी पावलम गलातीया रागीम बाक्ब यहूदी आन कली ब्रेक्शो बाक्त।

एको चिठी ब्रेक्चा क्येडा डॉइती पावलामी निक्शी खेयप गलाती आन कली शेंचा कली मेकेर बाक्शो बाक्त। मेको निक्शी खेयप लशा, लेंशा लची ना ब्रेक्शो बाक्त। मेको ५५ ए. डी. बाक्त।

गलातीपुकीमी पावल आ शेंशो मुल रे “येसु ख्रीस्त आ पतीक रे ला परमप्रभु यावे आ मुर दुम्ने चापनीम” दे शेंशो, दे मगारब मिम्तमे बाक्त। मेकोपुकी लेंशा “यहूदी आन माइत पतीके पचा माल्ब” दे दूली शेंब आन लोव नेंचा गोम्तेक्म। “येसु ला पाप रे प्रॉइब बाक्ब” देंशो एको चिठी डा ठेयब लोव बाक्ब।

## डॉइती डा लोव

1 गो सोइश्शो ब्रेक्चा पुंडसीशा पावल नड। आं शेंतीके लोव मुर आन लोव ममाइ। मुरपुकीमी सोइश्शो यो मनड। येसु ख्रीस्त कली बेक्शो रे सेंब इं आफ परमप्रभु यावे नु येसु ख्रीस्त आस सोइश्शो नड। गलाती १:११-१२<sup>2</sup> गो नु काथा बाक्ब थमा सुइक्ब लोकबपुकीमी गलातीया रागीम बाक्ब येसु ख्रीस्त आ नेंमी देल्ब इन कली एको चिठी सोइक्ताक्क।<sup>3</sup> इं आफ परमप्रभु यावे नु प्रभु येसु ख्रीस्तम इन कली शिशी पा इन थुं नाइश्शा बाक्चा गेम्सेक्ल।<sup>4</sup> प्रभु येसु ख्रीस्तमी इं पाप क्याम्चा नु रागीम गूशो मरिम्शो पतीके रे प्रॉइचा कली आ गिम गेपु। आ मोदेंशो पशो चहिं इं आफ परमप्रभु यावे आ दाक्शो बाक्त। गलाती २:२०; १तिमोथी २:६; तीतस २:१४; १यूहन्ना ५:१९<sup>5</sup> इं आफ परमप्रभु यावे कली ठेयब सेल्चा गेनायो मप्रॉइय। आमेन।

येसु ख्रीस्त आ लोव का ला बाक्ब

6 इन कली तशा, गो छक लाक्ती। मारदे हना इन कली येसु ख्रीस्त रे पा शिशी पा आ गे ब्रेक्ब कली प्रॉइशा, अर्को आन ग्येरपाइक्ब लोव नेंतीनी।<sup>7</sup> थमा लोव चहिं का ला बाक्ब, दे रुपीन। ख्रीस्त आ ग्येरपाइक्ब लोव दूली पा शेंबपुकी जाक्शा, आन दूली शेंशोमी इन थुं क्याल्पाइक्तेक्म। प्रेरित १५:१, २४<sup>8</sup> मिनु गोपुकी डॉइती आंइ शेंशो ग्येरपाइक्ब लोव क्येडा अर्को ग्येरपाइक्ब लोव शेंताक्क हना, गोपुकी सराप रकल। परमप्रभु यावे आ स्वर्ग डा गेय पाइबमी मोपा अर्को ग्येरपाइक्ब लोव शेंताक्क हना मेको यो सराप रल।<sup>9</sup> गो इन कली “सु सुमी अर्को ग्येरपाइक्ब लोव शेंनीमी, मेको सराप रमल” दे लेंशा देंनुड। १तिमोथी ६:३<sup>10</sup> मार, गो मुर आन थुं नुपाइक्चा माल्नुडा डा? गो परमप्रभु यावे आ थुं कका नुपाइक्चा माल्नुड। गो मुर आन थुं नुपाइक्तीके लोव पाता हना, ख्रीस्त आ गेय पाइब माइक्चा मपुंडसीनुड। १थिस्सलोनिकी २:४-६

पावलम आंम पर्वम लोव पशो

11 आं लोकबपुकी, गोमी इन कली शेंशो ग्येरपाइक्तीक लोव मुर आन लोव मबाक्ब।<sup>12</sup> गो मेको मुरुमी शेंशा नेंपाइश्शो मनड। येसु ख्रीस्तमी तपाइसीशा, शेंताक्की। प्रेरित ९:१-१५<sup>13</sup> साइ गो दोपा यहूदी धर्म ब्रडा, मेको नेंशा तुइश्शो बाक्नीनी। मेना गो येसु ख्रीस्त आ नेंमी देल्ब आन कली खेदा पपाइश्शा ग्याइक्पाइश्शा चोक्पाइश्शा, श्येत गेतामी। मेको आन कली साम्चा, दे शुश गेय पाता।<sup>14</sup> आं पालामी नेल्ल आन क्येडा शुश धर्म पा आंइ यहूदी आन रिती थिती पाता। अरु आन कली यो आंइ किकी पिपीम पशो रिती थिती पपाइक्नुडमी, दे आं थुं फ्रेंशा बाक्शो नड। प्रेरित २३:६; प्रेरित २६:५<sup>15</sup> परमप्रभु यावेमी चहिं काबु आं मोदेंशो पचा तेक्ती। मारदे हना आ दाक्शो पा आं जरमेचा डॉइती रे योवशा, आ लोव शेंब सेल्ने थुम्शो बाक्माक्त। येरमीया १:५; रोमी १:१<sup>16</sup> मोपतीके आ तौ येसु ख्रीस्त कली तपाइक्ती। मिनु शुश अर्को रागी डा मुर आन कली आ तौ आ पर्वम शेंथ सोइक्ताक्की। मेको शेंचा आ पर्वम गो सुइ नु लोवसी मपड। अर्को मुर आन

अर्ती यो मनेंनु। मत्ती १६:१७; गलाती २:७<sup>17</sup> गो यरूसलेमम बाक्ब आं डॉइती ब्रेक्चा पुंडसीशा शेंथ सोइश्शो आन कली गुम्थ यो मलड। अराब रागी लशा हिरशा, दमस्कस सहर जाक्दीश्शा बाक्ती।<sup>18</sup> मिनु बर्स सां नोले केफास गुम्थ यरूसलेम लती। मिनु केफास नु १५ नाक्ती सम्म बाक्ती। यूहन्ना १:४२; प्रेरित ९:२६-२७<sup>19</sup> मेना ख्रीस्त आ सोइश्शो सुइ आन कली मगुमुमी। प्रभु आ लोकब याक्ब चहिं गुम्ता। मत्ती १३:५५<sup>20</sup> गोम इन कली ब्रेक्शो लोव थमान बाक्ब, देंनुड। जोल ममाइ, दे परमप्रभु यावेमी तुइक्ब।<sup>21</sup> नोले यरूसलेम रे गाक्शा, सिरीया नु सिलीसीया रागी हिरथ लती। प्रेरित ९:३०<sup>22</sup> यहूदीया रागीम बाक्ब ख्रीस्त कली थमा सुइक्ब आन गुम्तीकेमी आं कली गेनायो मतशो बाक्मा बाक्त।<sup>23</sup> मेकोपुकीमी आं पर्वमी “साइ इं कली खेदा पा एको लोव साम्चा देंबमी मुल एको लोव नेंशा शेंन ब्रापाइक्बाक्त” दे नेंशो बाक्तेक्म ने।<sup>24</sup> मेको नेंशा परमप्रभु यावे कली ठेयब सेल्तेक्म ने।

## सोइश्शोपुकीमी ब्रशो

2 यरूसलेममी केफास नु याक्ब गुम्शा, १४ बर्स नोले लेंशा, यरूसलेम लती। गो नु बारनाबास यो लत। तीतस कली यो लाइक्त्स्कु। प्रेरित १५:१-२९; प्रेरित ४:३६<sup>2</sup> येसु ख्रीस्तमी यरूसलेमम बाक्ब सोइश्शोपुकी नु लोवसी पथ लावो, दे तुइक्पाइक्तीके लशो नड। मिनु जाक्दीश्शा, सोइश्शोपुकी नु अरु आन कली लां कोंइब दुम्शो आन कली खुप्शा, अर्को रागी डा मुर आन कली मार मार शेंदुमी, मेको नेंपाइक्तामी। मारदे हना मेकोपुकीमी गोम शेंशो तुइक्चा माल्नीम। मतुइक्ताक्म हना, आं मिम्शो नु आन मिम्शो मगारब। मिनु आं देंशो मनेंनीम, दे मिम्शो नड। मिनु मेको नेंपदुमीनु, आं देंशो ठीक लाक्तेक्म।<sup>3</sup> मारदे हना गो नु लशो ग्रीक डा तीतस कली खोइक्तीक चिनु खोइक्पाइंसो मदेंथु, ब्राम्तेक्म। प्रेरित १६:३; १कोरिन्थी ९:२१<sup>4</sup> तन्न मेकेर खुम्सीशा बाक्ब आन मतुइक्थु थमा सुइक्ब दुम्बु पा, दूली शेंब ब्वाइसाक्म। मोपा गोपुकी नु ब्वाइसीशा, आंइ थुं कोवशा बाक्तेक्म। गोपुकी ख्रीस्त येसुमी यहूदी आन रिती थिती पचा प्रॉइशा बाक्तक। तन्न मेकोपुकीमी यहूदी आन रिती थितीम लेप्पाइक्चा बोल पाम्तेक्म।<sup>5</sup> येसु ख्रीस्त आ लोव थमा बाक्ब देंशा, मेको दूली शेंब आन लोव नेंशा, छिन का यो गु ब्रेश्शा मबाक्क। मिनु मोदेंशो पशोमी इन कली शेंशो ग्येरपाइक्ब लोव थमा बाक्ब, दे कोंइताक्क। गलाती ३:१

6 परमप्रभु यावेमी मुर आन कली ठेयब आइक्ब मसेल्ब। मुर आन थुं नेल्ल तुइक्ब। मुल लां कोंइब दुम्शो आन कली मान पाइनुडमी। मेको लां कोंइबपुकीमी अर्को लोव शेंचा कली मतेम्देम।<sup>7</sup> मेकोपुकीमी आं कली परमप्रभु यावेमी अर्को रागी डा मुर आन कली शेंथ सोइक्ताक्ब, पत्रुस कली चहिं यहूदी आन कली शेंथ सोइक्ताक्ब, दे रुप्तेक्म। एफिसी ३:१२<sup>8</sup> पत्रुस कली यहूदी आन कली शेंथ सोइक्ब नु आं कली अर्को रागी डा मुर आन कली शेंथ सोइक्ब कानाइ बाक्ब, दे रुप्तेक्म।<sup>9</sup> गो थमा पा एको शेंतीक गेय कली योवशो नड, दे रुप्या, याक्ब, केफास नु यूहन्ना सांफामी बारनाबास नु आं कली “गो इं यहूदी आन कली शेंनीकी। गे निक्शी चहिं अर्को रागी डा मुर आन कली शेंथ लसे” देंशा, ग्युरा गुइमी ग्याइश्शा, लोवसी

गारपाइक्तेकम्। यूहन्ना १:४२<sup>10</sup> मिनु दोपा शेंचा, मार शेंचा, दे मारेइ मदेंम। मथीब आन कली शिशी पाइक्का ला देंतेकम्। मेको आन लोव्र टिशा, शुश आन कली शिशी पाइक्तामी। प्रेरित ११:२९-३०; २कोरिन्थी ८:९

### केफास कली हुइश्शो

11 काबु केफास एन्टीओकमी जाक्त। मिनु गुम्कुनु हुइक्ताकड। मारदे हना आ पशो तशा आं थुं मनुड।<sup>12</sup> डोंइती मेकोमी अर्को रागी डा थमा सुइक्ब नु काथा जशा, नोले याकूबमी सोइश्शो वारच का निकशी जाक्का रे यहूदीपुकी नु ला जचा गोप्तु। मारदे हना यहूदी जात डा थमा सुइक्बपुकीमी आ कली मोदेशो पा जशो तशा, मरिश्शो सुइक्नीम, आ लोव्र यो मनेनीम, दे हिंशा मो पाप्तु। प्रेरित ११:२-३<sup>13</sup> मोदेशो पाइब आ ला ममाइ। यहूदी थमा सुइक्ब नेल्लेमी दिल्ला, जखु पा कोंइताकम्। बारनाबासमी यो आन पशो खोदेशो पचा गोप्तु।<sup>14</sup> मिनु मेको आन मोदेशो पशो चहिं ख्रीस्त आ लोव्र नु मगारब देंती। मोपतीके मेको आन कली खुष्ठा, केफास कली “गे यहूदी नवे। तन्न इं यहूदी बुद पा आन पतीके पचा प्रोंइशा, अर्को रागी डा मुर खोदेशो दुम्ते। मोपतीके अर्को रागी डा मुर आन कली इं यहूदी रिती थिती पपाइक्का दुम्बा? <sup>15</sup> गोपुकी यहूदी नय। अर्को रागी डा मुरपुकीमी परमप्रभु यावे कली मतुइक्नीमी। आ अरेशो लोव्र मतुइक्थु, मटीनीम। गो मोदेशो मनय। <sup>16</sup> इं यहूदी रिती थिती पतीके ठीक मदुम्नय। ख्रीस्त येसु कली थमा सुइक्तीके ठीक दुम्नय, दे रुप्तय। मोपतीके इं यहूदी रिती थिती पचा प्रोंइशा, ख्रीस्त येसु कली थमा सुइक्तय। गो लेंशा देंनुड, रिती थिती पतीके सुइ ठीक मदुम्नीम। परमप्रभु यावेमी मुर आन कली येसु ख्रीस्त कली थमा सुइश्शो तशा, ठीक दुम्पाइक्ब। रोमी ३:२०, २८; एफिसी २:८<sup>17</sup> गो यहूदी बाक्तय हना यो, येसु ख्रीस्त कली थमा सुइक्तीके ठीक दुम्तय। मोपान अर्को रागी डा मुर खोदेशो दुम्तय। मिनु येसु ख्रीस्तमी मुर आन कली पापी सेल्शा, पाप बारपाइक्ब, दे मिम्चा डा? मोदेशो ममिम्चा। <sup>18</sup> गो रिती थिती पचा प्रोंइता। मुल लेंशा रिती थिती पशा, ठीक दुम्चा माल्ला हना, गो थमान परमप्रभु यावे आ लोव्र मटीब दुम्नुड, दे रुप्तय। <sup>19</sup> गो यहूदी आन पतीके आन पबर्म बेक्शो मुर दुम्ती। ख्रीस्त नु काथा शीम कांटी थोक्शा, क्याइश्शा साइक्का पुंडसाक्यी। मुल गो परमप्रभु यावे आ दाक्शो पा ब्रोंइनुड। <sup>20</sup> तन्न गो मब्रोंइनुड। ख्रीस्त आं आगामी ब्रोंइब। तन्न आं मुल ब्रोंइतीके गो परमप्रभु यावे आ तौ कली थमा सुइश्शा ब्रोंइनुड। मेकोमी आं कली शुश दाक्शा, आं पशो पाप आ पबर्म साइक्का पुंडसाक्व। यूहन्ना १७:२३; प्रेरित १:४<sup>21</sup> परमप्रभु यावेमी मो गेशो शिशी खेर मसोइक्नुड। यहूदी आन पतीके पाप रे ब्रोंइसीब हना, ख्रीस्त साइक्का पुंडसीशा बेक्शो शोर गाक्शो मदुम्बा डा?” दे केफास नु मेकेर देल्शा बाक्ब आन कली माइक्तामी।

### थमा सुइश्शोमी ठीक दुम्सीब

3 ए गलातीपुकी, गे मरुख मुर दुम्नी बाक्त। सुमी मोपा इन थुं हिरदा? येसु ख्रीस्त कली शीम केषा कांटी थोक्शा क्याइश्शा साइक्तेकम्, दे इन मिक्वीमी तशो खोदेब पा नेंपाइक्तान्नी। मुल मेको लोव्र प्रेंदीनी? <sup>2</sup> मुल लोव्र का निकशी हिल्लो पाइक्नन्नी। परमप्रभु यावे आ सोक्त दोपा तनी? यहूदी आन पतीक पशोमी तनी देय ख्रीस्त आ लोव्र थमा सुइश्शोमी तनी? लो देनीन। <sup>3</sup> मारेइ मरुख मुर दुम्नी? परमप्रभु यावे आ सोक्तीम प्रिंशो थुं गेचा पुंडसीशा, प्रभु आ लां खोइक्का गोइतीनी। मिनु मुल मुर आ थुंमी मिम्शो पशा, जाक्दीय्य, दे मिम्तीनी? <sup>4</sup> प्रभु आ लां खोइश्शा गाक्नीनु, मारेइ मारेइ ताइतीनी। मुल मेको लां प्रोंइतीनी हना, मेको नेल्ल मसाम्नीनी डा? <sup>5</sup> परमप्रभु यावेमी इन कली आ सोक्त गेशा, छक लाक्का डा गेय कोंइताक्व। यहूदी आन पतीक पशो तशा, मोदेशो छक लाक्का डा गेय कोंइता डा? ख्रीस्त कली थमा सुइश्शो तशा, कका छक लाक्का डा गेय कोंइताक्व।

<sup>6</sup> अब्राहाम आ पबर्म “अब्राहाममी परमप्रभु यावे कली थमा सुइक्तु। मिनु परमप्रभु यावेमी ठीक दुम्पाइक्तु” दे ब्रेक्शो बाक्ब। उत्पत्ती १५:६; रोमी ४:३<sup>7</sup> थमा सुइक्तीके ठीक दुम्शो मुरपुकी अब्राहाम आ आल नम, दे रुपीने। <sup>8</sup> अर्को रागी डा मुरपुकी थमा सुइक्तीकेमी ठीक दुम्पाइक्का पुंडसीनीम, दे

परमप्रभु यावे आ लोव्रम ब्रेक्शो बाक्ब। मारदे हना अब्राहाम कली “इ लां रे पा नेल्ल रागी डा मुरपुकीमी आसीक ताइनीम” दे ब्रेक्शो बाक्ब। उत्पत्ती १२:३<sup>9</sup> मोपतीके सु सुमी अब्राहाममी थमा सुइश्शो खोदेशो पा थमा सुदमे, मेकोपुकी अब्राहाम आ आसीक यो ताइनीम। रोमी ४:१६<sup>10</sup> सु सुमी चहिं यहूदी आन पतीक पा, ठीक दुम्चा माल्ले, मेकोपुकी सराप राइनीम। मिनु “परमप्रभु यावेमी अरेशो लोव्र नेल्ल टिचा माल्ले। सु सुमी लोव्र नेल्ल टिशा पशा, का चहिं मटीमे, मेकोपुकी सराप राइनीम” दे ब्रेक्शो बाक्ब। ब्यक्स्था २७:२६<sup>11</sup> सुइमी यहूदी आन पतीक पशा परमप्रभु यावे आ डोंइती ठीक मदुम्नीन, दे तुंडसीब। “थमा सुइश्शो रे पा ठीक दुम्पाइक्का पुंडसीब चहिं गेना हना यो ठीक बाक्नीम” दे ब्रेक्शो बाक्ब। हबकुक् २:४; रोमी १:१७; हिब्रू १०:३८<sup>12</sup> परमप्रभु यावे आ अरेशो लोव्र येसु ख्रीस्त कली थमा सुइक्तीक रे मबाक्ब। “सुइम परमप्रभु यावे आ अरेशो पशो हना, मेको रे पा ब्रोंइ वा” दे ब्रेक्शो बाक्ब। लेवी १८:५<sup>13</sup> ख्रीस्तमी सुइमी मेको लोव्र टिने मचाप्नीम, दे तुइश्शा, इं पा डा सराप रशा, मेको सराप रे प्रोंइतु। मिनु “शीम क्याइश्शा साइक्का पुंडसीबपुकी सराप रशो बाक्नीम” दे ब्रेक्शो बाक्ब। ब्यक्स्था २१:२३; २कोरिन्थी ५:२१<sup>14</sup> ख्रीस्त येसु सराप रमेनु, अर्को रागी डा मुरपुकी यो अब्राहाम आ तशो आसीक ताइनीम। मिनु यहूदी आन पशो पतीक रे ममाइ। ख्रीस्त येसु कली थमा सुइश्शो रे पा गोपुकीमी परमप्रभु यावेमी गेनुड देंशो आ सोक्त ताइतय, दे रुब्ब।

### परमप्रभु आ गेशो नु अरेशो लोव्र

<sup>15</sup> आं लोक्बपुकी, कथा सेल्शा रुप्पाइक्नन्नी, कागज ब्रेक्शा, ब्रेच्यो दिम्ने थुम्शो डा मेरे मेको ब्रेक्शो लोव्र लीब। सुइमी मारेइ लोव्र क्याम्ने तेम्ने मचाप्नीम। <sup>16</sup> परमप्रभु यावेमी अब्राहाम नु अब्राहाम आ युइ का कली “इ लां रे पा रागी नेल्ल डा मुरपुकी आसीक राइनीम” दे आ लोव्र गेशो बाक्त। शुश आन कली ममाइ “इ युइ का कली” दे ब्रेक्शो बाक्ब। मेको लोव्र खाक्ब चहिं ख्रीस्त बाक्ब। उत्पत्ती २२:१८<sup>17</sup> आं देंशो रुपीन। परमप्रभु यावेमी अब्राहाम कली गेशो लोव्र कागज ब्रेक्शा, ब्रेच्यो दिप्शो खोदेशो बाक्ब। मेको लोव्र गेशा, ४ सहे ३० बर्स नोले आ अरेशो लोव्र तुइक्पाइश्शो बाक्त। मेको अरेशो लोव्रमी डोंइती गेशो लोव्र खोइक्ने मचाक्ब। प्रस्थान १२:४०<sup>18</sup> अरेशो लोव्र पतीके हक ताइब दुम हना, परमप्रभु यावे आ गेशो लोव्र खोत वा। परमप्रभु यावेमी “हक ताइनेवे” दे अब्राहाम कली आ लोव्र गेशो बाक्त। <sup>19</sup> अरेशो लोव्र शोर गाक्शो मदुम्बा डा? नेनीन, परमप्रभु यावेमी अब्राहाम कली गेशो लोव्र खाक्ब, दे तुइक्नय। मेको युइ मजरमेथु, परमप्रभु यावे आ अरेशो लोव्र रे पा पाप माइश्शो मार में, दे तुंडसीशो बाक्त। मेको लोव्र परमप्रभु यावे आ स्वर्ग डा गेय पाइबमी गारपाइक्ब का आ गुइमी गेशा, मुर आन कली तुइक्पदा बाक्त। रोमी ५:२०; प्रेरित ७:३८, ५३; हिब्रू २:२; ब्यक्स्था ५:५<sup>20</sup> गारपाइक्तीक गेय पचा कली मुर का मदुम्ब। तन्न परमप्रभु यावे आ का ला बाक्शा लोव्र गेशो बाक्त।

<sup>21</sup> अरेशो लोव्र नु परमप्रभु यावेमी गेशो लोव्र मगारचा डा लोव्र नसी डा? ममाइ। ब्रोंइचा गेचा कली अरेशो लोव्र का गेशो हना, थमा पा ठीक पतीके अरेशो लोव्र रे पा दुम वा। रोमी ८:२-४<sup>22</sup> तन्न परमप्रभु यावेमी ब्रेक्पाइश्शो लोव्रमी “मुर नेल्ल पाप आ वाइलीम वाइल दुम्शो बाक्नीम” दे ब्रेक्शो बाक्ब। सु सुमी येसु ख्रीस्त कली थमा सुदमे, मेको आन थमा सुइश्शोमीन “पाप रे ब्रोंइचा ताइनीम” दे गेशो लोव्र खाक्शो ताम्तेकम्। रोमी ३:९-२०; रोमी ११:३२

<sup>23</sup> थमा सुइक्तीक जाक्का क्येडा डोंइती अरेशो लोव्र पना पन बाक्तक। मोपा थमा सुइक्तीक मजाकम् सम्म चोक्सीशो खोदेशो बाक्तक। गलाती ४:३<sup>24</sup> मोपतीके मेको अरेशो लोव्रम आंइ कली हिंच कोंइशा, ख्रीस्त आ लां गाक्पाइक्ब दुम्त। मोदेशो बाक्त हना, थमा सुइक्तीक रे ठीक दुम्नय। <sup>25</sup> तन्न थमा सुइक्तीक जाक्का नोले हिंच कोंइब ममाल्मय। रोमी १०:४

<sup>26</sup> ख्रीस्त येसु कली थमा सुइश्शा, गे नेल्ल परमप्रभु यावे आ तमी तौ दुम्तीनी। यूहन्ना १:१२; रोमी ८:१७<sup>27</sup> गे ख्रीस्त आ नेंमी ब्वाक्कुम खुम्शा गुंडपाइसीशोपुकी येसु ख्रीस्त फेक्शो खोदेशो पा, ख्रीस्त नु रां का दुम्तीनी। रोमी ६:३; रोमी १३:१४<sup>28</sup> मोपा रां का दुम्शो आन कली यहूदी नु ग्रीक,

वाइल नु होवप, मीश मुर नु वोंइश मुर मतिल्सीब। मेको ख्रीस्त येसुम नेल्ल खाल का डा बाक्नीम। रोमी १०:१२; १कोरिन्थी १२:१३<sup>29</sup> ख्रीस्त नु रां का दुश्शा, अब्राहाम आ चच युइ दुम्तीनी। परमप्रभु यावेमी अब्राहाम कली गेशो लोव गाप्शा, हक ताइब दुम्तीनी।

हक ताइब दुम्तय

4 मारेइ मतुइक्व आल हक ताइब दुम्त हना यो, मेको खिं डा तौ बाक्त हना यो, गेय पाइब वाइल खोदेंशो मिम्सीब।<sup>2</sup> मेको मकोल्म सम्म ठेयब मुर आन गुइमी बाक्ब। आ आफोमी “मुल आ हक गेचा” मदें सम्म आ तचा डा हक मताइब।<sup>3</sup> गोपुकी मेको खिं डा आल खोदेंशो बाक्तय। कोल्शा इं हक मतशो सम्म गो एको रागी डा सक्ति आन वाइल दुश्शो बाक्तय। गलाती ५:१; कलस्सी २:२०<sup>4</sup> मिनु नोले परमप्रभु यावेमी वोइश्शो नाक्त आ तौ कली सोइक्ताक्व। मेको आ तौ मीश मुर रे परमप्रभु यावे आ अरेशो लोवमी जरमेसाक्व। मर्कूस १:१५; एफिसी १:१०<sup>5</sup> मेकोमी मुर दुश्शा, यहूदी आन पतीक पाइब आन कली प्रोंइशा, परमप्रभु यावे आ तमी तौ सेल्टीमी।<sup>6</sup> गो आ तमी तौ दुश्शोपुकी परमप्रभु यावेमी आ तौ आ सोक्त गेचा पुंडसाक्व। मेको सोक्तीमी “आब्बा, आं दाक्शो आफ” देब। रोमी ८:१५<sup>7</sup> मोपतीके गो वाइलीम वाइल दुम्चा प्रोंइशा, परमप्रभु यावे आ तमी तौ दुश्शा, हक ताइब दुम्तय। रोमी ८:१६-१७

तमी तौ दुश्शोपुकी

8 डोंइती गे परमप्रभु यावे कली मतुइक्व, देवी देवता आन कली सेउ पा, मेको आन वाइलीम वाइल दुम्तीनी।<sup>9</sup> मुल चहिं परमप्रभु यावे कली तुइक्ताक्वी। मिनु परमप्रभु यावेमी यो इन कली तुइक्ताक्व। मिनु मुल लेंशा डोंइती पशो खोदेंशो पचा दाक्नीनी? 10 गेपुकीमी बार, औंसी, पूर्न नु रीतु मानेनीनी। शुश मोदेंशो रिती थिती पाइनीनी देंशो नेंता। रोमी १४:५; कलस्सी २:१६, २०, २१<sup>11</sup> गो शुश श्येत पा येसु ख्रीस्त आ लोव शेंताक्नीनी। इन कली शेंशा श्येत ला जडा कों, दे मिम्ताक्व। २यूहन्ना ८

12 आं लोकबपुकी, गो रिती थिती पचा प्रोंइशा, येसु ख्रीस्त कली थमा सुइक्ता। आं खोदेंशो पा थमा सुइक्चा मप्रोंइथु बाक्कीन, दे इन कली देंनुड। साइ गेपुकी नु बाक्डानु, गारशा बाक्तय। गेपुकीमी आं कली वारच पशो मिम्शा, मुल यो मप्रेंनुड।<sup>13</sup> मेना गो रोइ पा, मचाप्यु यो येसु ख्रीस्त आ ग्येरपाइक्व लोव शेंताक्नीनी। १कोरिन्थी २:३; प्रेरित १६:६<sup>14</sup> आं कली मोदेंशो रोइ पशो तशा ग्रांरा मदित्तीनी। मरिश्शो लोव यो मपाइप्यीनी। श्येत पा वारच पाइतीनी। परमप्रभु यावे आ स्वर्ग डा गेय पाइब कली ब्रशो खोदेंशो पा मान पाइतीनी। ख्रीस्त येसु कली ब्रशो खोदेंशो पा ब्रतीनी।<sup>15</sup> मेना ग्येरसीशा बाक्तीनी। मुल इन ग्येरसीशो ते लाक्गा? मेना इन मिक्च फेशशा, आं मिक्चीम केप्चा डा दुम्तीनी। आं बेक्चा डा गेपुकी बेक्चा ठीक दुम्तीनी।<sup>16</sup> मुल इन कली हुइश्शा, थमा लोव शेंदनीनु, आं कली मरिश्शो सुइक्नीनी? 17 नेनीने, दूली शेंबपुकीमी इन कली मिलो शिलो पा, येसु आ लां खोइक्चा प्रोंइपाइक्चा माल्नीम। मेकोपुकीमी इन कली मान पखु पा, आंम आन कली मान पपाइसीनीम। गलाती १:७<sup>18</sup> शेंब आन लोव नेंचा रिश्शो बाक्ब। गेपुकी नु बाक्ती हना यो, मबाक्ती हना यो, शेंब आन लोव नेंचा मप्रोनीन। तन्न शेंशो लोव थमा बाक्म कों दूली बाक्म, मेको रुप्चा माल्नीनी।<sup>19</sup> आं दाक्शो आलपुकी, मीश मुरुमी आल थिचामेनु, श्येत जाइनीमी। शुश खाइक्व। आल थिचशो मीश मुरुमी श्येत जशा खाइश्शो खोदेंशो पा, गो इन कली मिम्शा, श्येत जाइनुड। इन थुमी ख्रीस्त बारल, दे मिम्शा, मोदेंशो पा आं थुं खाइक्ती। १कोरिन्थी ४:१५<sup>20</sup> गेपुकी नु काथा बाक्शा लोव पचा तड हना, गिश रिश्शो दुम वा। गो इन कली तशा मार पचा दो पचा दुश्शो बाक्नुड।

अब्राहाम आ तौ निक्शी

21 गे रिती थिती पचा दाक्बपुकी, अरेशो लोवमी मार ब्रेक्शो बाक्बा, मेको तुइक्नीनी? 22 मार ब्रेक्शो बाक्ब देंशा हना, अब्राहाम आ तौ निक्शी बाक्ताक्व। का वाइलीम आ तौ बाक्त, का ग्युंवे पशो मीश आ तौ बाक्त, दे

ब्रेक्शो बाक्ब। उत्पत्ती १६:१५; उत्पत्ती २१:२<sup>23</sup> वाइलीम आ तौ मुर आ दाक्शो पतीकेम जरमेशा ब्रोंइशो बाक्त। ग्युंवे पशो मीश आ तौ चहिं परमप्रभु यावेमी अब्राहाम कली गेशो लोव गाप्शा, जरमेशा ब्रोंइशो बाक्त। रोमी ९:७-९<sup>24</sup> अब्राहाम आ ग्युंवे पशो मीश नु आ वाइलीम मीशेमी कबल पशा लां निक्शी कोंइनीसी। लां का सीनै डा लां बाक्ब। मेकोपुकी वाइलीम वाइल बाक्तेक्म। मारदे हना हागार माइश्शो वाइलीम आ चच युइ बाक्तेक्म। गलाती ५:१; रोमी ८:१५<sup>25</sup> हागार देंशो मार रुम्सीब देंशा हना, अराब रागी डा सीनै डांडा रुम्सीब। सिनाक्त मुलाक्त यरूसलेममी बाक्बपुकीमी हागार आ लां खोइश्शा, रिती थिती पा वाइलीम वाइल दुश्शो बाक्नीम।<sup>26</sup> इर डा यरूसलेम चहिं प्रोंइसीशो बाक्ब। मेको यरूसलेम कली इं ममा मिम्नय। हिब्रू १२:२२; प्रकाश २१:२<sup>27</sup> मारदे हना “ए गेनायो आल मथीब मीश मुर, कुम्सो पा ग्येरसो। गे आल मथिशो मुर बाक्ते हना यो, इ कली ममा देब शुश दुम्नीम। ग्युंवे पा आल थिशो नेल्ल आन क्येडा गे मान पाइक्चा पुंडसीनेवे” दे ब्रेक्शो बाक्ब। यसैया ५४:१<sup>28</sup> आं लोकबपुकी, इसहाक जरमेशो खोदेंशो पा गे परमप्रभु यावे आ गेशो लोव गाप्शा, आ तमी तौ दुम्तीनी।<sup>29</sup> मुर रे जरमेशोमी मेको सोक्त रे जरमेशो कली मदाक्थु हेला पा खेदा पाइब। मेको मोदेंशो मुल यो बाक्ब।<sup>30</sup> मिनु मार ब्रेक्शो बाक्त देंशो हना “वाइलीम आ तौ कली गुंइशा खेरचा। मारदे हना वाइलीम आ तौ ग्युंवे पशो आ तौ नु हक मताइब” दे ब्रेक्शो बाक्ब। उत्पत्ती २१:१०<sup>31</sup> आं लोकबपुकी, वाइलीम आ चच युइ मनय। ग्युंवे पशो मीश आ चच युइ नय, दे रुब्ब।

परमप्रभु आ सोक्तीमी ब्रोंइशो

5 ख्रीस्तमी रिती थिती पतीके लां खोइक्चा प्रोंइपा, थमा सुइक्तीके लां कोंइशा, इं थुं हिरताक्व। मोपतीके जवा लाप्शो खोदेंशो पा लेंशा रिती थिती पा वाइलीम वाइल मदुमीने। गलाती ४:५; प्रेरित १५:१०<sup>2</sup> गो पावलमी “खोइक्तीक चिनु रिती थिती पाइतीनी हना, ख्रीस्त इन पा डा बेक्शो, शोर गाक्शो मदुम्बा डा? शोर गाक्शो दुम्ब” देंनुड।<sup>3</sup> लोव थोक्शा का का पा शेंननी, खोइक्तीक चिनु खोइसीबपुकीमी अरेशो लोव नु रिती थितीम बाक्शो नेल्ल पचा माल्नीम। का यो प्रोंइचा मदुम्ब।<sup>4</sup> सु सुमी रिती थिती पशोमी ठीक दुम्चा माल्मे, मेकोपुकीमी ख्रीस्त आ पशो साम्शा, मेको रे डोन दुम्चा आ शिशी मताइनीम।<sup>5</sup> गोपुकी “ख्रीस्त आ पतीके ठीक दुम्तय” देंशा, परमप्रभु यावे आ सोक्तीमी तुइक्पाइक्चा पुंडसाक्व।<sup>6</sup> ख्रीस्त येसु नु थुं का दुश्शा, खोइक्तीक चिनु खोइश्शो, मखोइश्शो आन कली मतिल्थु, थमा सुइक्तीकेमी दुशा गारशा दाक्मुशा बाक्शोम सक्ति बाक्ब। गलाती ६:१५; रोमी २:२६; १कोरिन्थी ७:१९<sup>7</sup> डोंइती गे रिश्शो पाइतीनी। तन्न सुम इन कली थमा लोव मनेंथु, दूली शेंब आन लोव नेंचा, दे इन थुं हिरदा? 8 इन कली आ तमी तौ सेल्बमी मोदेंशो मपाइब।<sup>9</sup> बोरपाइक्व ओख्ती इक्का खोइ सुष्पोमी शोब्ले नेल्ल बोरपाइक्व, दे रुपीने। १कोरिन्थी ५:६<sup>10</sup> गे आं शेंशो लोव थमा सुइक्चा मप्रोंइनीनी, दे प्रभु रे तुइक्ताक्व। सु सुमी इन कली दूली लोव शेंशा, इन थुं क्याल्पाइश्शा हिरदमे, मेको आन कली परमप्रभु यावेमी सजाइ गेब, दे यो तुइक्ताक्व। गलाती १:७<sup>11</sup> आं लोकबपुकी, नेनीन, गो खोइक्तीक चिनु खोइक्चा माल्ब, दे शेंथ गाक्शो नड हना, खेदा पा श्येत गेचा मपुंडसीड वा। गोमी येसु ख्रीस्त इं पा डा बेक्त, दे थमा सुतीन, दे शेंना शेंन गाक्शो नड। मेको शेंतीक आ पर्बम आन थुं मनुथु श्येत गेतीमी। १कोरिन्थी १५:३०; गलाती ६:१२; १कोरिन्थी १:२३<sup>12</sup> इन थुं क्याल्पाइक्बपुकीमी आंम आन रांमी चिनु खोदमेनु, खसी पशो दुम्मल, देंनुड।

परमप्रभु आ सोक्त नु मुर आ थुं

13 आं लोकबपुकी, प्रभुमी रिती थिती पचा प्रोंइपाइक्तीकी, दे गेनायो मप्रेंदीने। मोपा ब्रोंइशा यो इन दला दाक्स मपने। तन्न दाक्मुशा, वारच पमुशा बाक्कीने। १पत्रुस २:१६; २पत्रुस २:१९<sup>14</sup> “आंम इ कली दाक्शो खोदेंशो पा, इ नेक्था बाक्ब आन कली यो दाक्तो” देंशो लोवमी परमप्रभु यावे आ अरेशो लोव नेल्ल बाक्ब। लेवी १९:१८<sup>15</sup> गेपुकी कुचुम जिशा

क्राइवमुशो खोदेंशो पा जीतीनी हना, खतम दुम्नीकी, दे तुइक्तीन। याकूब ४:२

16 लोत्र थोक्शा, का निक्शी नु तेम्शा शॅनन्नी, परमप्रभु यावे आ सोक्त रे पा ब्रोंडशा गेय पने। मो पाइतीनी हना ला, इन दला दाक्स मपाइनीनी, इन थुंमी मिम्शा मरिम्शो मपाइनीनी। 17 मुर आ थुंमी मिम्शो पचा नु परमप्रभु यावे आ सोक्तीम ब्रीशो थुं आ मिम्शो पचा मगारब। रिम्शो पय देंतीनी हना यो, रिम्शो पने मचाजीनी। रोमी ७:१५, २३ 18 परमप्रभु यावे आ सोक्तीमी चहिं इन कली गेय पपाइक्त्तु हना, रिम्शो पाइनीनी, अरेशो लोत्र मटीब यो मद्रुम्नीनी।

19 आन दला दाक्स पा मुर आ थुंमी मिम्शो पाइबपुकीमी दोदेंशो गेय पाइनीम देंशा हना, तेल्लेम पाइनीमी, ग्रांग दिचा डा गेय पाइनीमी, हेंथे गावनीमी, १कोरिन्थी ६:९-१० 20 मूर्ति पूजा पाइनीमी, मन्तर तन्तर पाइनीमी, जिचा पोक्नीमी, थुं खाइक्पाइक्नीमी, रुश पाइनीमी, शुश चुरनीमी, आंम कली ला मिम्नीमी, गाइश्शा बाक्नीमी, दुशा गारशा बाक्ब आन कली फ्रानीमी, 21 गेहे पाइनीमी, तूशा दुक्शा हेंथे पाइनीमी, शुश जाइनीमी। मारेइ मारेइ मरिम्शो पशा गावनीम। साइ गोमी मोदेंशो गेय पाइबपुकी परमप्रभु यावे आ राज्य ओव्रचा मताइनीम, दे शेंताक्न्नी। मुल लेंशा मिम्पाइक्त्तन्नी। एफिसी ५:५; प्रकाश २२:१५

22 परमप्रभु यावे आ सोक्तीमी ब्रीशो थुं पाइश्शोपुकीमी परमप्रभु यावे आ सोक्त रे पा दोदेंशो पाइनीम देंशा हना, दाक्समुइनीमी, ग्येरनीमी, थुं नाइक्नीमी, शुश फाल्नीमी, रिम्शो पाइनीमी, शिशी पाइनीमी, कबल खाजीमी, 23 ब्रेम्शो दुम्नीमी नु आंम कली चलेस जोक्नीमी। मोदेंशो पाइब मुर कली परमप्रभु यावे आ अरेशो लोत्रमी मारेइ मपाइब। १तिमोथी १:९

24 सु ख्रीस्त येसु आ मुर दुम्शो बाक्नीमी, मेकोपुकीमी आंम रां डा दला दाक्स येसु ख्रीस्त खोदेंशो पा शीम क्याइक्ने थुम्शो बाक्नीमी। रोमी ६:६ 25 गो परमप्रभु यावे आ सोक्तीमी ब्रोंडतय हना, इं गेय यो परमप्रभु यावे आ सोक्तीमीन पय। रोमी ८:४ 26 मोपतीके ठेयब मसेल्सीय, मगाइक्मुय अरु आन कली रिम्शो दुम्शो तशा गेहे मपय। फिलिप्पी २:३

दाक्सुशा, रिम्शो गेय पा बाक्य

6 आं लोक्बपुकी, सुमी आ थुंमी मिम्शा, दला दाक्स पा प्रभु आ देंशो मटिथु मरिम्शो दुम्मे, गे मेको कली परमप्रभु यावे आ सोक्तीमी ब्रीशो थुं पाइश्शोपुकीमी, ठेयब मलेत्थु, रिम्शो लोत्र पा, आ थुं परमप्रभु यावे गे लेप्पतीने। मो पनीनु, थुं थाम्चा मपुंडसेक्ल, दे होस पा बाक्कीन। मत्ती १८:१५; याकूब ५:१९ 2 कामी अर्को कली वारच पने। मोपा गे ख्रीस्त आ अरेशो लोत्र खाजीनी। २कोरिन्थी ११:२९ 3 सुइ ठेयब मसुंडसेक्ल। मजोक्थु यो जोक्ब तुइक्ब नड, दे ठेयब लेक्बमी आंम कली जोल पांडसीब। 4 परमप्रभु यावे आ सोक्तीम गेय पडा कों, आंम दला दाक्स पडा कों, दे का

का पा मिम्शा तुइक्तीने। मिनु ला गे “गो रिम्शो पाता” देंने चाजीनी। २कोरिन्थी १३:५ 5 मारदे हना नेल्लेमी आंम गेय आंमा पचा माल्ब। रोमी १४:१२

6 ख्रीस्त आ लोत्र शेंचा पुंडसीबमी शेंब कली आ नु बाक्शो रिम्शो थोक्शा योक्शा गेवल। १कोरिन्थी ९:१४ 7 परमप्रभु यावे कली कोंडखु पा जोल पचा मद्रुम्ब। परमप्रभु यावेमी नेल्ल तुइश्शो बाक्ब। मोपतीके दूली ममिम्तीने। मुरपुकीमी मार शोक्गमे, मेको रुजीम। येरमीया २१:१४ 8 आंम आन थुं डा मिम्शो गेय पास्तेक्म हना, मेको आन गेय मलीथु जाम्शा लाइब। मिनु आ यो जाम्शा लाइनीम। परमप्रभु यावे आ सोक्तीम गेय पास्तेक्म हना, परमप्रभु यावे आ सोक्त रे पा गेना हना यो ब्रोंडशा बाक्चा ताइनीम। रोमी ८:१३ 9 रिम्शो गेय पचा मदने। मोपा ला गो रुप्ची ना रुप्ने चाजीकी। २थिस्सलोनिकी ३:१३ 10 सुइ कली रिम्शो पचा ताइतय हना, रिम्शो पय। नेल्ल क्येडा डॉइती थमा सुइक्ब लोक्ब आन कली वारच पय। २पत्रुस १:७

नोले डा लोत्र

11 ठेयब ठेयब अच्छेर ब्रेक्शो तशा, पावल आ ब्रेक्शो बाक्त्त, दे तुइक्नीनी। 12 दूली शेंबपुकीमी खोइक्तीक चिनु खोइक्चा माल्ब देंशा, इन कली यहूदी रिती थिती पपाइक्चा माल्नीम। “ख्रीस्त शीम केप्शा कांटी थोक्शा साइक्चा पुंडसाक्व” दे शेंतीक लोत्र आ पर्बम खेदा पचा पुंडसीब, दे तुइक्नीम। मोपतीके खेदा पचा मपुंडसेक्ल, दे दूली लोत्र शेंनीम। गलाती ५:११ 13 आंइ यहूदी रिती थिती नेल्ल मपाइनीमी, खोइक्तीक चिनु ला खोइक्नीम। मिनु इन कली खोइक्तीक चिनु खोइश्शो तचा दाक्नीम। मोदेंशो पशो तशा “आंइ शेंशो पामे बाक्त्त” दे आन नें बोरपाइश्शा गाक्चा ताइनीम। 14 नें बोरपाइक्चा दा गो यो आं नें बोरपाइश्शा गाक्ती। तन्न मुर आन पशो तशा ममाइ। इं प्रभु येसु ख्रीस्त इं पा डा शीम केप्शा कांटी थोक्शा साइक्चा पुंडसीशा, इं पाप क्याम्ताक्व, दे ख्रीस्त आ पशो मिम्शा, आं नें बोरपाइश्शा गाक्ती। ख्रीस्त आ गेय डा लाक्शा मारेइ ठेयब ममिम्नुड। रागी डा मिम्तीक पतीक नेल्ल बेक्शो खोदेंशो मिम्ताक्ड। रागीमी यो आं कली बेक्शो खोदेंशो मिम्ताक्व। १कोरिन्थी १:३१; १कोरिन्थी २:२ 15 खोइक्तीक चिनु खोइक्चा, मखोइक्चा मेको ममिम्तीने। ख्रीस्त येसु नु थुं का दुम्शा, नक मुर दुम्चा चहिं नेल्ल क्येडा ठेयब बाक्ब, दे रुपीने। गलाती ५:६; १कोरिन्थी ७:१९; २कोरिन्थी ५:१७ 16 गे सु सु आं देंशो लोत्र टिशा पाइनीनी, मेको थुं नाइश्शा नु शिशी तशा बाक्चा ताइनीम। मेको ला ममाइ, परमप्रभु यावे कली थमा सुइक्ब, इस्राएली, दे नें वोइक्चा पुंडसीनीम। भजन संग्रह १२५:५ 17 मुल डा मेरे सुइमी श्येत मगेयीमील। येसु आ नेंमी श्येत जशा, तुप्चा, युक्चा पुंडसीशो चिनु आं रांमी शुश बाक्ब। २कोरिन्थी ४:१० 18 आं लोक्बपुकी, इं प्रभु येसु ख्रीस्तमी इन कली शिशी पा, आ सोक्त इन थुंमी लीपदल। आमेन।

# एफिसी

एको चिठी पावलमी ब्रेक्शो बाक्व।

एको चिठी नु कलस्सी आन कली चिठी कालेमी ब्रेक्शो बाक्व। मारदे हना तिखीकसम एको चिठी निक्शी चाक्शो बाक्व। एको चिठी रोम सहर रे ६२ ए. डी. नुच्ची ना कि ६३ ए. डी. गोची ना ब्रेक्शो बाक्व।

तेइ तेइ थमा सुइक्वपुकी श्येत जशा, आन योव्रचा पुंइसीतीके नु येसु नु बाक्शा परमप्रभु यावे आ डोंइती ठीक दुम्तीके तुइश्शा मिम्चा माल्नीम। एको चिठीम थमा सुइक्व आन गुम्तीकेम मार पचा नु मार मपचा, दे शेंशो बाक्व। एको का निक्शी गुम्तीक कली ब्रेक्शो चिठी बाक्व हना यो, अरु क्येडा डोंइती एफिसी डा गुम्तीक डा थमा सुइक्व कली पढेचा कली चाक्शो बाक्व।

## डोंइती डा लोव

1 गो पावल नड। ख्रीस्त येसुम आं कली सोइक्ताक्वी। मेको परमप्रभु यावे आ दाक्शो बाक्व। मिनु गो एको चिठी एफिसस सहरम बाक्व येसु ख्रीस्त कली थमा सुइक्व, परमप्रभु यावे आ मुर इन कली ब्रेक्ताक्नी।  
2 इ आफ परमप्रभु यावे नु इं प्रभु येसु ख्रीस्तमी इन कली शिशी पा थुं नाइश्शा बाक्वा गेम्सेक्ल।

## परमप्रभु कली ठेयब सेल्शो

3 इं प्रभु येसु ख्रीस्त आ आफ परमप्रभु यावे कली “गे ठेयब बाक्नीनी” देंय। मारदे हना मेकोमी स्वर्गम आ सोक्तीम पतीके इं कली आसीक गेपु। मेको नेल्ल ख्रीस्तम बाक्व। 4 मोपतीके रागी सेल्चा क्येडा डोंइती परमप्रभु यावेमी इं कली योव्रतु। मार कली योव्रतु देंशा हना, गोपुकी परमप्रभु यावे आ मुर दुश्शा, दोस मताइब नु दाक्व दुम्पल, दे योव्रतु। रोमी ८:२८-३०; एफिसी ५:२७ 5 मिनु परमप्रभु यावेमी इं कली दाक्शा “येसु ख्रीस्त कली थमा सुइक्व दुम्नीम” दे आम आ तमी तौ सेल्लु। मेकोन परमप्रभु यावे आ दाक्शो बाक्व। 6 मिनु मेकोमी इं कली आ दाक्शो तौ आ पतीक रे मुरुमी मिम्ने मचाप्चा डा शिशीम ठेयब सेल्चा कली आ तमी तौ सेल्लु। मत्ती ३:१७  
7 मोपा गोपुकी येसु ख्रीस्त आ हुशेम पतीके माफ तशा ब्रोंइशा बाक्नय। इं हेंथे पशो आ पबर्म माफ ताइनय। दोपा माफ तशा ब्रोंइशा बाक्नय देंशा हना, मुरुमी मिम्ने मचाप्चा डा आ शिशी रे पा माफ ताइनय। कलस्सी १:१४; एफिसी २:७; एफिसी ३:८, १६ 8 मिनु मेको आ जोक्तीक तुइक्तीक नेल्लेमी आ शिशी इं तारी मोइश्शो बाक्व। एफिसी ३:३-६, ९; रोमी १६:२५; कलस्सी १:२६-२७ 9 परमप्रभु यावेमी इं कली डोंइती ख्रीस्त रे आ थुंमी खुइश्शा वोइश्शो लोव्र तुइक्पाइक्वा दाक्ताक्व। 10 मिनु मेको नेल्ल ठीक दुम्मेनु, परमप्रभु यावेमी ख्रीस्त कली रागीमी सोइक्ताक्व। मोपा रागी नु स्वर्गमी बाक्व, इस्राएली नु अर्को रागी डा मुर नेल्ल आन कली ख्रीस्तमी का सेल्लु। गलाती ४:४

11 परमप्रभु यावेमी ख्रीस्त रे पा आ आल सेल्शा, इं कली योव्रतु। मारदे हना डोंइती रे योव्रनुडमी, दे मिम्शो बाक्माक्व। मेकोन पापु। कलस्सी १:१२  
12 गोपुकी डोंइती “ख्रीस्तमी आंइ कली मरिम्शो रे प्रोंइब” दे आस पाइतक। मोपतीके परमप्रभु यावेमी आंइ कली “आ सक्ति ठेयब बाक्व” दे ब्रोंइचा गेचा कली योव्रतीकी।

13 मिनु गोपुकीमी यो “येसु ख्रीस्तमी पाप रे प्रोंइब” देंशो थमा ग्येरपाइक्व लोव्र नेंतीनी। ख्रीस्त कली थमा सुइक्तीनी। मिनु परमप्रभु यावेमी डोंइती देंशो खोदेंशो पा आ सोक्तीमी छाप थोक्सीशो बाक्तीनी। एफिसी ४:३०

14 आ सोक्त चहिं गोपुकी परमप्रभु यावे नु बाक्वी मजाक्म सम्म कली परमप्रभु यावे आ तमी तौ दुम्ने थुम्शो नय, दे कोंइतीक बाक्व। मोपतीके “परमप्रभु यावे आ सक्ति ठेयब बाक्व” देंनय।

## पावलम पशो प्रार्थना

15 गोपुकी प्रभु येसु कली थमा सुइक्तीनी। अरु थमा सुइक्व आन कली दाक्ताक्नी, दे गो इन पबर्म लोव्र नेंता। 16 मोपतीके गो इन कली मिम्शा, परमप्रभु यावे कली “गे एफिसस डा मुर आन कली रिम्शो पाइतीनी” दे ठेयब सेल्शा, लोव्र पना पन बाक्नुड। कलस्सी १:४, ९ 17 मार लोव्र पना पन बाक्नुड देंशा हना “परमप्रभु यावे, आंइ प्रभु येसु ख्रीस्त आ आफ ननी। गे नेल्ल छेडछेड डा आफ बाक्नीनी। गे एफिसस डा थमा सुइक्व आन कली येसु ख्रीस्त कली तुइक्तीकेमी रिम्शो गेय पस जोक्तीके नु नोले मार दुम्बा तुइक्तीक सोक्त गेने। 18 गे मेको आन कली मार कली ब्रेक्शो बाक्नीनी, थमा सुइक्व आन ततीक मार बाक्वा, इन छेडछेड गिश ठेयब बाक्वा, मेको नेल्ल रुप्तीक थुं गेने। 19 मिनु गो थमा सुइक्व आंइ कली इन ठेयब सक्तिम मार पाइनीनी नु इन गेशो बोल गिश ठेयब बाक्मे, मेको रुप्तीक थुं यो गेने। 20 मेको सक्तिमी ख्रीस्त कली बेक्शो रे सेंशा, स्वर्ग डा इन बाक्तीकेमी इन ग्युरा गे निप्पाइक्तीनी। भजन संग्रह ११०:१ 21 मिनु हुकुम पाइब, अधिकार पाइश्शो, सक्ति पाइश्शो ठेयब दुम्शो नेल्लेमी ख्रीस्त कली प्रभु देंचा माल्नीमी। मेको नेल्ल आन क्येडा ठेयब नें बाक्व। मुल ला ममाइ, नोले यो मोदेंशोन बाक्व। रोमी ८:३८-३९; फिलिप्पी २:९; कलस्सी २:१० 22 मिनु गेमी मारेइ मारेइ आन कली येसु ख्रीस्त आ खोइलीमी दिम्पाइक्तीनी। थमा सुइक्वपुकी रां का खोदेंशो सेल्शा, येसु ख्रीस्त कली मेको रां आ पिया सेल्लतीनी। भजन संग्रह ८:७; मत्ती २८:१८; एफिसी ४:१५ 23 मोपा थमा सुइक्वपुकी येसु ख्रीस्त आ रां दुम्तेक्म। मिनु मेको रां आ पिया येसु ख्रीस्त आंमान दुश्शा, मारेइ मारेइ खाप्शो बाक्व” दे लोव्र पाइनुड। एफिसी ३:३०; १कोरिन्थी १२:२७; कलस्सी १:१९

## बेक्शो रे ब्रोंइशो

2 गोपुकी डोंइती बेक्शो मुर खोदेंशो बाक्तीनी। दोपा मोदेंशो बाक्तीनी देंशा हना, मरिम्शो पशा, परमप्रभु यावे कली मटिथु, हेंथे गाक्शो बाक्तीनी। लूका १५:२४, ३२; कलस्सी २:१३ 2 मिनु रागी डा मुर आन लां खोइक्तीनी। मोपा फशेम हुकुम पाइब, सैतान आ देंशो टीब बाक्तीनी। मेको आ सोक्ती परमप्रभु परमप्रभु यावे कली मटीब आन आगाम बाक्व। तीतस ३:३; एफिसी ६:१२; यूहन्ना १२:३१ 3 मिनु डोंइती गो नेल्ल मोदेंशो रागी डा मुर बाक्तय। गोपुकी यो मार दाक्तय, मेकोन पाइतय। इं रां नु थुंमी मार दाक्ता, मेकोन पाइतय। मोपतीके गोपुकी यो अरु मुर खोदेंशो पा गाइक्व आ आल दुम्तय। १पत्रुस ४:३; कलस्सी ३:६ 4 तन्न परमप्रभु यावे शुश शिशी पाइब दुम्तीके इं कली तशा, शिशी पा दाक्ताक्व। 5 मेना गोपुकी मटिथु बेक्शो बाक्तय हना यो, मेकोमी इं कली ख्रीस्त नु कालेम सेंताक्व। मोपा आ शिशी रे गोपुकी ब्रोंइशो बाक्तय। 6 मिनु परमप्रभु यावेमी इं कली ख्रीस्त येसु नु सेंशा, मेको नु स्वर्गमी काथा बाक्पाइश्शा, फिलिप्पी ३:२०

7 मुरुमी मिम्ने मचाप्चा डा ठेयब शिशी आंम आ दाक्तीकेमी ख्रीस्त येसु रे नोले डा मुर आन कली कौडचा कली पाप्तु। एफिसी १:७

8 मिनु गेपुकी परमप्रभु यावे आ शिशी तशा, थमा सुइक्तीके पाप रे ब्रौइतीनी। मेको इन पतीके ममाइ, परमप्रभु यावेमी मोशा गेशो बाक्ब। रोमी ३:२३-२४; गलाती २:१६<sup>9</sup> मेको मुरुम पशो ममाइ, मोपतीके सुइ ठेयब लेन्ने मचाप्नीम। रोमी ३:२८; १कोरिन्थी १:२९<sup>10</sup> गोपुकी परमप्रभु यावे रे ख्रीस्त येसु आ पतीकेमी सेल्शो बाक्नय। परमप्रभु यावेमी इं कली रिम्शो गेय वोइश्शो बाक्त। मेको पचा माल्नय। तीतस २:१४

### ख्रीस्तमी नेल्ल का बाक्नीम

11 डौइती गेपुकी परमप्रभु यावे आ दॅशो लोत्र मतुइक्ब बाक्तीनी। मुर आन गुइ रे खोइक्तीक चिनु खोइश्शो, इस्राएलीपुकीमी इन कली “खोइक्तीक चिनु मखोइश्शो मुर नम” दॅतेक्म। मेको मप्रॅदीन। एफिसी ५:८<sup>12</sup> मेना गेपुकी ख्रीस्त रे डोन बाक्तीनी। इस्राएल डा मुरपुकी रे यो डोन बाक्तीनी। मोपा परमप्रभु यावेमी पशो कबल मतुइक्थु, आस मपाइश्शो नु परमप्रभु यावे कली मतुइक्ब मुर बाक्तीनी। रोमी ९:४; १थिस्सलोनिकी ४:१३<sup>13</sup> मुल चहिं गे ख्रीस्त येसु रे डोन बाक्बपुकी ख्रीस्त आ हुशेम पतीके मेको आ नेक्था दुम्तीनी।

14 मेको इं कली दुशा बाक्चा गेब बाक्ब। मेकोमी इस्राएली नु अर्को रागी डा थमा सुइक्ब आन कली का सेल्लु। मिनु मेको आन दातेमी बाक्शो दुचा मगेब गारो प्रेश्शा, जितीक खेतीक नेल्ल साम्तु। यसैया ९:५; गलाती ३:२८<sup>15</sup> दोपा साम्तु दॅशा हना, यहूदी आन कली अरेशो, शॅशो, फुल्लुम मुशा ब्रेक्शो लोत्र डा गेय नेल्ल आ रां साइक्चा गेशा साम्तु। मिनु मेकोमी जात निक्शी के जात का सेल्शा, नक मुर सेल्लु। मोपा दुशा बाक्चा गेप्तु। कलस्सी २:१४

16 येसु ख्रीस्तमी इं कली परमप्रभु यावे नु गारपाइक्चा कली शीम कांटी थोक्चा पुंडसीशा बेक्त। मोपा इस्राएली नु अर्को रागी डा जिचा खेचा साम्शा, निम्फा आस कली परमप्रभु यावे नु गारपाइक्चु।<sup>17</sup> मिनु येसु ख्रीस्त रागीमी जाक्शा, डोन बाक्ब इन कली नु परमप्रभु यावे आ नेक्था बाक्ब आन कली परमप्रभु यावे नु दोपा दुशा बाक्चा, मेको शॅताक्व। यसैया ५७:१९<sup>18</sup> मोपा गोपुकी परमप्रभु यावे आ सोक्तीम पतीके नेल्ल येसु ख्रीस्त रे पा इं आफ परमप्रभु यावे आ नेक्था जाक्दील्लय। एफिसी ३:१२<sup>19</sup> मोपतीके गेपुकी मुल रे डोन बाक्ब अर्को रागी डा मुर मननी। परमप्रभु यावे आ राज्य डा, अरु थमा सुइक्बपुकी नु आ खिं डा मुर बाक्नीनी। एफिसी ३:६; हिब्रू १२:२२-२३<sup>20</sup> मिनु ख्रीस्त आ सोइश्शो नु साइ डा परमप्रभु यावे आ लोत्र पाइबपुकी जग खोदॅशो दुम्तेक्म। गेपुकी चहिं मेको तारी सेल्शो खिं खोदॅशो ननी। ख्रीस्त येसु मेको खिं डा डौइती वोइश्शो जग फुल्लु खोदॅशो बाक्ब। मत्ती १६:१८; यसैया २८:१६; १पत्रुस २:४-६ मत्ती १६:१८<sup>21</sup> मेको तारी फुल्लु नेल्ल प्रोव्रसीशा, परमप्रभु यावे आ खिं दुम्चा कली बारना बारन लाइब।<sup>22</sup> मिनु गेपुकी यो परमप्रभु यावे आ सोक्तीम पतीके परमप्रभु यावे आ खिं बाक्नीनी।

### पावलम अरु आन कली पशो गेय

3 मिनु गो पावल अर्को रागी डा मुर इन कली ख्रीस्त येसु आ लोत्र शॅतीके साडलोम पाइक्साक्वी। फिलिप्पी १:७, १३<sup>2</sup> परमप्रभु यावेमी “अर्को मुर आन कली आं शिशी आ पबर्म शॅदो” दे आं कली गेय पाइब सेल्ली। गेपुकीम एको लोत्र नॅशो बाक्नी माइ, दे मिम्नुड। गलाती २:७<sup>3</sup> दोपा परमप्रभु यावेमी आ ख्रुइश्शो लोत्र आं कली तुइक्पदा, मोपा डौइतीन इन कली इचइक्का ब्रेक्ने थुम्शो बाक्ती। एफिसी १:९-१०; गलाती १:१२<sup>4</sup> मिनु गेपुकीमी मेको पढेनीनु, ख्रीस्त आ पबर्म ख्रुइश्शो लोत्र डा गेय दोपा पवा, दे आं तुइश्शो लोत्र रुप्ने चाप्नीनी।<sup>5</sup> मुल परमप्रभु यावे आ सोक्तीमी येसु ख्रीस्त आ सोइश्शो नु परमप्रभु यावे आ लोत्र पाइब आन कली परमप्रभु यावे आ ख्रुइश्शो मार बाक्बा, दे शॅताक्डमी। डौइती डा मुरपुकीमी चहिं मतुइश्शो बाक्तेक्म। कलस्सी १:२६<sup>6</sup> मिनु मेको ख्रुइश्शो लोत्र मार बाक्ब दॅशा हना, अर्को रागी डा मुरपुकी यो इस्राएली नु खाल का डा दुम्शा, अडस

ताइब बाक्नीम। मेको नेल्ल रां का नम। ग्येरपाइक्ब लोत्रमी मार दॅब दॅशा हना, ख्रीस्त येसु कली थमा सुइश्शा, मेकोपुकी यो परमप्रभु यावे आ कबल ताइब बाक्नीम। एफिसी ३:१३, १८-१९; प्रेरित १५:७-९

7 मोपा अर्को रागी डा मुर आन कली ग्येरपाइक्ब लोत्र शॅचा, दे शॅब सेल्ली। परमप्रभु यावे आ सक्तिम पतीके आ शिशी मोशा गेप्तु।<sup>8</sup> गो परमप्रभु यावे आ मुर नेल्ल आन क्येडा आइक्ब बाक्नुड। मिनु परमप्रभु यावेमी आ शिशी रे आं कली “अर्को रागी डा मुर आन कली ख्रीस्त आ शिशी गिश ठेयब बाक्बा तुइक्पाइक्मी” दे शॅब सेल्ली। १कोरिन्थी १५:९-१०; गलाती १:१६; एफिसी १:७<sup>9</sup> मिनु मारेइ मारेइ सेल्ल परमप्रभु यावेमी रागी सेल्शो रे ख्रुइश्शा वोइश्शो नेल्ल आन कली तपाइक्चा, दे कौडब सेल्ली। एफिसी १:९-१०; रोमी १६:२५-२६; कलस्सी १:१६<sup>10</sup> मारदे आं कली मोदॅशो सेल्ली दॅशा हना, येसु ख्रीस्त कली थमा सुइक्बपुकीमी परमप्रभु यावे आ मिम्शो मार बाक्बा, मेको स्वर्गम बाक्ब हुकुम नु अधिकार पाइब आन कली तुइक्पदमेक्ल, दे आं कली कौडब सेल्ली। १पत्रुस १:१२<sup>11</sup> मेको परमप्रभु यावे आ गेना हना यो मिम्शो लोत्र बाक्त। मेको मुल इं प्रभु ख्रीस्त येसु रे खाप्शो बाक्त।<sup>12</sup> मोपा येसु ख्रीस्त कली थमा सुइक्तीकेमी गोपुकी महिंथु, इं कली दाक्ब, दे तुइश्शा, परमप्रभु यावे आ नेक्था जाक्दील्लय। रोमी ५:२<sup>13</sup> इन पबर्म गो श्येत जशो बाक्नुड। मेको इन कली रिम्शो दुम्ब। मोपतीके आं कली श्येत जशो तशा महिनीन। कलस्सी १:२४

14 मोदॅशो पा गो इं आफ परमप्रभु यावे आ डौइती बाप्शा, पोक्च थेक्शा, इन कली मिम्शा पुंडशा बाक्नुड।<sup>15</sup> परमप्रभु यावे सरीड नु रागीम बाक्ब नेल्ल आन आफ बाक्ब।<sup>16</sup> मिनु गोमी परमप्रभु यावे कली “इन शुश छेडछेड नु सक्तिम, एफिसस डा थमा सुइक्ब आन थुं बोल्लो सेलीन। मिनु इन सोक्त आन थुंमी बाक्मेनु, महिंब दुम्नीम। एफिसी १:७; एफिसी ६:१०; २कोरिन्थी ४:१६<sup>17</sup> मोपा थमा सुइक्तीके ख्रीस्त मेको आन थुंमी बाक्ब। मिनु ‘येसु ख्रीस्तमी आं कली दाक्ब’ दे शाक्थ गुक्शो रवा खोदॅशो पा इन दाक्तीकेमी ख्रुम्शो मुरपुकी सेलीन। यूहन्ना १४:२३; कलस्सी २:७<sup>18</sup> मो दुम्मेनु, मेकोपुकी नु नेल्ल थमा सुइक्बपुकीमी येसु ख्रीस्त आ मुर आन कली दाक्तीके गिश ब्रेम्शो, गिश दुइश्शो, गिश लाइश्शो नु गिश लुक्च लशो बाक्मे, मेको नेल्ल रुप्तीक थुं गेने।<sup>19</sup> ख्रीस्त आ दाक्तीके गिश ठेयब बाक्बा, मेको रुप्ने मचाप्चा डा बाक्त हना यो, मेको आन कली रुप्तीन। मिनु परमप्रभु यावे, गे दोपा मारेइ मारेइमी गाप्शो बाक्नीनी, मोपा मेको आन कली यो इन सक्तिमी प्रिदीन। कलस्सी २:२-३<sup>20</sup> गे नेल्ल आन क्येडा ठेयब सक्ति पाइश्शो बाक्नीनी। मोपतीके इन सक्ति रे आंइ पुंडशो नु मिम्शो क्येडा यो शुश गेने चाप्नीनी।<sup>21</sup> मिनु थमा सुइक्ब आंइ दातेमी येसु ख्रीस्त आ नॅमी नेल्ल पाला डा मुरपुकीमी इन कली गेना हना यो ठेयब सेल्लनीकी, आमन” दे इन पबर्म पुंडनुड।

### ख्रीस्तमी पपाइश्शो गेय

4 गो प्रभु आ पबर्म ग्याइक्चा पुंडसीब, इन कली अरेनुड। गेपुकी परमप्रभु यावे आ ब्रेश्शो दुम्शो बाक्नीनी। मोपतीके परमप्रभु यावे कली शिरशो गेय पने।<sup>2</sup> गेपुकी ब्रेम्शो दुम्शा, सुइ नु मचुरथु, रिम्शो पा बाक्कीन। मुर आन कली फाल्शा, मेकोपुकी नु रिम्शो पा दाक्मुने। कलस्सी ३:१२-१३<sup>3</sup> मिनु दोपा परमप्रभु यावे आ सोक्तीमी थुं का सेल्बा, मोपा थुं का दुम्शा दुशा बाक्कीन। कलस्सी ३:१५; फिलिप्पी २:२<sup>4</sup> दोपा रां नु सोक्त का बाक्नीसी, मोपा थुं का दुमीन। गे नेल्ल इन आस कान बाक्ब। मोपा ब्रेत्चा पुंडसाक्नी। रोमी १२:५<sup>5</sup> मोपा प्रभु का, थमा सुइक्तीक का नु ब्वाक्कुमी ख्रुम्शा गुंडचा यो का ला बाक्ब। १कोरिन्थी ८:६<sup>6</sup> मिनु नेल्ल इं आफ परमप्रभु यावे यो का ला बाक्ब। मेको नेल्ल आन क्येडा ठेयब बाक्ब। नेल्ल पतीकेमी नु नेल्ल आन आगाम बाक्ब। १कोरिन्थी १२:६

7 इं कली नेल्ल शिशी गेशो बाक्ब। मेको ख्रीस्तमी “आं गेय पचा कली गिश माल्बा” दे मो गेशो बाक्ब। रोमी १२:३-६; १कोरिन्थी १२:१<sup>8</sup> मिनु मार ब्रेक्शो बाक्त दॅशा हना “मेको इर परमप्रभु यावे आ बाक्तीक लमेनु, चोक्सीशो शुश आन कली लाइक्चु। मिनु मुर आन कली गेय पतीक सक्ति गेप्तु” दे ब्रेक्शो बाक्ब। भजन संग्रह ६८:१९; कलस्सी २:१५<sup>9</sup> मिनु इर



लचा देंशो, मार रुम्सीब देंशा हना, मेको डोंइती रागी आगा तोंइसीशो बाक्ब, दे रुम्सीब। यूहन्ना ३:१३<sup>10</sup> मिनु मेको रागी आगा तोंइसीब सरीड क्येडा ता लाइब यो बाक्ब। मोपा मेकोमी मारेइ मारेइ खाप्तु।

11 मिनु येसु ख्रीस्तम मुर आन कली गेशो गेय मार बाक्ब देंशा हना, का निक्शी आ सोइशो दुम्नीम, का निक्शी परमप्रभु यावे आ लोत्र पाइब दुम्नीम, का निक्शी ग्येरपाइक्ब लोत्र नेंपाइक्ब दुम्नीम, का निक्शी थमा सुइक्ब आन कली कोवब नु शेंब दुम्नीम। *१कोरिन्थी १२:२८; प्रेरित २१:८*<sup>12</sup> मेको गेय मार कली बाक्ब देंशा हना, परमप्रभु यावे आ मुर आन थमा सुइक्तीके बारपाइक्चा कली बाक्ब। थमा सुइक्ब आन ग्रुम्तीक, ख्रीस्त आ रां दुम्शा, मेकेर डा मुर बोल्यो सेल्चा कली गेशो गेय बाक्ब। *१कोरिन्थी १४:२६; १पत्रुस २:५*<sup>13</sup> मोपा गो नेल्ल थमा सुइश्शा, का दुम्तीके परमप्रभु यावे आ तौ कली तुइक्ब दुम्नय। मिनु मोर्देशो पा गोपुकी आइक्च आल ममाइ, कोल्शा चोक्शो मुर दुम्शा, ख्रीस्त मोर्देशो बाक्मे, मोर्देशो दुम्नय।<sup>14</sup> गोपुकीम आल खोर्देशो पा मुर आन शेंशो हेंथे लोत्र थमा सुइक्चा मदुम्नय। दूली शेंबपुकीमी निप्स खाप्शा, मुर आन कली जोल पा फश लोत्र शेंशा, दूली लां खोइक्पाइक्नीम। *१कोरिन्थी १४:२०; हिब्रू १३:९; याकूब १:६*<sup>15</sup> गोपुकी चहिं मुर आन कली दाक्शा, थमा शेंतीक लोत्र शेंशा, मारेइ मारेइमी इं पिया ख्रीस्त खोर्देशो दुम्नय। *एफिसी १:२२; एफिसी ५:२३; कलस्सी १:१८*<sup>16</sup> मोपा येसु ख्रीस्त पिया दुम्तीके रां नेल्ल का खोर्देशो पा गारपाइक्ब। थमा सुइक्बपुकीमी ठीक गेय पाक्तेक्म हना, मेको रां बारना बारन लशा, थमा सुइक्बपुकी दाक्मुइनीम। *कलस्सी २:१९*

#### माइत नु नक मुर

17 परमप्रभु यावे कली मतुइक्ब मुरपुकी जाम्शा लाइब गेय ला मिम्शा पाइनीम। मिनु गोपुकी मुल रे मेको आन खोर्देशो मपने, दे प्रभु आ नेंमी इन कली रिम्शो पा अरेनुड। *रोमी १:२१-२४*<sup>18</sup> मेको आन थुं फुल्लु खोर्देशो पा खकटा दुम्तीके परमप्रभु यावे कली मतुइक्ब बाक्तेक्म। मोपतीके मेकोपुकी छिडछिडमी बाक्शो खोर्देशो पा परमप्रभु यावे कली रुम्ने मचाप्नीम। मिनु मोपा परमप्रभु यावे रे डोन बाक्नीम। *एफिसी २:१२*<sup>19</sup> मेकोपुकी रिम्शो मुर दुम्शा बाक्चा ताइश्शा, आन दला दाक्स पा, ग्रांग्रा दिचा डा गेय नेल्ल शुश दाक्नीम।<sup>20</sup> गोपुकी चहिं ख्रीस्त कली तुइश्शा, मोर्देशो मशेंसीनी।<sup>21</sup> थमा पा येसु ख्रीस्त आ पर्वम लोत्र नेंतीनी। मिनु येसु आ थमा लोत्र तुइश्शो बाक्तीनी।<sup>22</sup> मोपतीके इन डोंइती डा ग्रांग्रा दिचा डा दला दाक्स पाइब माइत थुं डा मुर दुम्शा बाक्चा ताइक्तीने। मारदे हना मेकोम इन कली खतम सेल्ब। *कलस्सी ३:९-१०; रोमी ८:१३; गलाती ६:८*<sup>23</sup> मिनु इन थुंमी बाक्शो माइत सोक्त नक सेल्चा गेने। *रोमी १२:२*<sup>24</sup> परमप्रभु यावे आ थुं खोर्देशो पा थमा पा ठीक पतीकेमी परमप्रभु यावे आ मुर दुम्शा बाक्कीन। *उत्पत्ती १:२६-२७*

#### नक मुरुमी पचा माल्शो गेय

25 मारदे हना गो नेल्ल रां का नय, मुर आन कली जोल पचा ताइक्तीने। थमा लोत्र ला पने। *जकरिया ८:१६*<sup>26</sup> गाइक्ताक्नी हना, पाप मपने। मिनु नां रिक्चा क्येडा डोंइती इन गाइक्चा थुमीने। *भजन संग्रह ४:४; याकूब १:१९-२०*<sup>27</sup> मोपा सैतान कली गेय पचा मगेने।<sup>28</sup> खुइ पाइबमी लेंशा खुइ मपथु, ठीक गेय पचा माल्ब। मिनु मेकोमी रिम्शो गेय पवानु, श्येत जाइब आन कली यो वारच पने चाप्ब। *प्रस्थान २०:१५; १थिस्सलोनिकी ४:११*<sup>29</sup> गोपुकी नना ओल लोत्र काइ मपने। मुर आन कली रिम्शो दुम्ब नु गारचा डा लोत्र ला पने। मुरपुकीमी इन रिम्शो लोत्र नेन्मेनु, परमप्रभु यावे आ शिशी रुपेक्ल। *एफिसी ५:४; कलस्सी ४:६*<sup>30</sup> परमप्रभु यावे आ सोक्त कली थुं मखाइक्पतीन। मारदे हना गोपुकी परमप्रभु यावे आ बाक्तीके मजाक्दीन्नी सम्म परमप्रभु यावे आ सोक्तीमी छाप थोक्सीशो बाक्नीनी। *यसैया ६३:१०; एफिसी १:१३-१४*<sup>31</sup> मिनु ईख कुरचा, चुरचा, गाइक्चा, ग्रीचा, मरिम्शो लोत्र पचा नु मरिम्शो पचा नेल्ल ताइक्तीने। *कलस्सी ३:८*<sup>32</sup> मिनु रिम्शो पा कोवमुने। दोपा परमप्रभु यावेमी ख्रीस्त मिम्शा, इन कली माफ गेवा, मोपा गोपुकी यो माफ गेमुने। *मत्ती ६:१४; मत्ती १८:२२-३५; कलस्सी ३:१३*

#### छेडछेडम ब्रोंइशो मुर

5 गोपुकी परमप्रभु यावे आ दाक्शो तमी तौ दुम्तीके मेकोमी मोर्देशो पवा, मोर्देशो पने। *लूका ६:३६*<sup>2</sup> मिनु येसु ख्रीस्तमी इं कली दाक्शो खोर्देशो पा दाक्मुने। मेकोमी दोपा दाक्ताक्च देंशा हना, आंम कली ममिम्थु, ब्रोंवशो रिना पाइश्शो थूप नु क्योरशा चढेशो खोर्देशो पा, इं पाप क्याम्चा कली बेक्शा, परमप्रभु यावे कली जिम्मा गेंसाक्व।<sup>3</sup> मोपतीके गोपुकी परमप्रभु यावे आ मुर दुम्शा, इन दातेमी तेल्लेम पचा, ग्रांग्रा दिचा डा गेय पचा नु शिम पचा आ पर्वम लोत्र सम्म यो मपने। मेको परमप्रभु यावे आ मुर आन कली रिम्शो दुम्ब। *कलस्सी ३:५*<sup>4</sup> गोपुकी मुने दोक्चा डा हेंथे लोत्र नु मूर्ख लोत्र पचा इन कली मगारब। मेको आ पा डा परमप्रभु यावे कली “गे आइ कली रिम्शो पाइतीनी” देंचा माल्नीनी। *एफिसी ४:२९*<sup>5</sup> तेल्लेम पाइब, ग्रांग्रा दिचा डा गेय पाइब नु शिम पाइबपुकी ख्रीस्त नु परमप्रभु यावे आ राज्यमी ओव्रचा मताइनीम, दे रिम्शो पा तुइक्चा माल्नीनी। मेको नेल्ल मूर्ति पूजा पचा खोर्देशो बाक्ब। *१कोरिन्थी ६:९-१०; प्रकाश २१:८; प्रकाश २२:१५*<sup>6</sup> सुइ मुरुमी इन कली फश लोत्र पा, हेंथे लां खोइक्पाइक्चा मगेने। मारदे हना परमप्रभु यावे आ कली मटीब आन कली तशा गाइक्ब। *कलस्सी ३:६*

7 मिनु गोपुकी मोर्देशो मुर नु वारचु मदुमीन।<sup>8</sup> गोपुकी यो डोंइती छिडछिड डा गेय पाइब बाक्तीनी। मुल चहिं प्रभु कली थमा सुइश्शा, छेडछेड डा गेय पाइब दुम्तीनी। मोपतीके गोपुकी छेडछेड डा तमी तौ खोर्देशो दुम्शा बाक्कीन। *एफिसी २:१; १पत्रुस २:९; मत्ती ५:१४; यूहन्ना १२:३६; १थिस्सलोनिकी ५:५*<sup>9</sup> छेडछेड डा फल मोर्देशो बाक्ब देंशा हना, नेल्ल शिशी पतीकेमी, ठीक पतीकेमी नु थमा पतीकेमी बाक्ब। *गलाती ५:२२; फिलिप्पी १:११*<sup>10</sup> मिनु गोपुकीमी प्रभु आ दाक्शो मार बाक्बा, मेको तुइक्चा माल्नीनी। *रोमी १२:२; फिलिप्पी १:१०*

11 छिडछिड डा गेयमी काइ फल मथिंसीब। मोर्देशो गेय पाइबपुकी नु मबाक्कीन। मेको गेय यो मपने। तन्न मेको गेय मरिम्शो बाक्ब, दे कोइदीन।<sup>12</sup> मिनु मेको आन खुइश्शा पशो आ पर्वम लोत्र पचा यो मुने बाक्ब। *रोमी १:२४*<sup>13</sup> तन्न मेको खुइश्शा पशो गेय छेडछेडमी तांइसीब।<sup>14</sup> मोपतीके “ए निन्द्रा पाइब, बोक्को। मिनु बेक्शो रे सेंसीशा बाक्को। मो पवीनु, ख्रीस्तमी इ कली आ छेडछेड गेब” देंशो बाक्ब। *यूहन्ना ३:२०-२१; रोमी १३:११; यसैया ६०:१; यूहन्ना ८:१२*<sup>15</sup> मोपतीके होस पा बाक्कीन। मतुइक्ब ममाइ, तुइक्ब मुर दुम्शा बाक्कीन। *मत्ती १०:१६; कलस्सी ४:५*<sup>16</sup> मुरपुकीमी मरिम्शो गेय पना पन बाक्तेक्म हना यो, गोपुकीमी नेल्ल नाक्त रिम्शो गेय पने।<sup>17</sup> मोपतीके गोपुकी मूर्ख मदुमीन, प्रभु आ दाक्शो मार बाक्मे मेको रुपीन।<sup>18</sup> राकसी शांबुमी मदुक्कीन। मारदे हना दुक्ब मुरपुकी ग्येत्थ मलाइनीम। तन्न गोपुकी परमप्रभु यावे आ सोक्तीम ब्रीशो दुमीन। *लूका २१:२४*<sup>19</sup> परमप्रभु यावे आ लोत्र डा कुम्सो, परमप्रभु यावे कली ठेयब सेल्ब कुम्सो नु परमप्रभु यावे आ सोक्तीम इन कली शेंशो कुम्सो पने। मोपा इन थुं बार पमुशा, प्रभु कली कुम्सो पना पन बाक्कीन। *भजन संग्रह ३३:२-३; कलस्सी ३:१६*<sup>20</sup> मिनु गोपुकीमी मार दुम्त हना यो, गेना हना यो इं आफ परमप्रभु यावे कली “गे रिम्शो पाइतीनी” दे प्रभु येसु ख्रीस्त आ नेंमी देंचा माल्नीनी। *थिस्सलोनिकी ५:१८*

#### थमा सुइक्ब आन कली लोत्र

21 गोपुकी ख्रीस्त कली मान पा हिंशा बिम्मुने। *१पत्रुस ५:५*<sup>22</sup> गे मीश मुरपुकी, प्रभु कली टिशो खोर्देशो पा आंम वोंइश कली यो टिने। *उत्पत्ती ३:१६; तिमोथी २:११-१२; तीतस २:५*<sup>23</sup> मारदे हना वोंइश मुर मीश मुर आन पिया बाक्नीम। मिनु ख्रीस्त थमा सुइक्ब आन पिया बाक्ब। थमा सुइक्बपुकी ख्रीस्त आ रां बाक्नीम। मिनु येसु ख्रीस्त थमा सुइक्ब आन कली पाप रे प्रॉइब बाक्ब। *१कोरिन्थी ११:३; एफिसी १:२२-२३*<sup>24</sup> दोपा थमा सुइक्बपुकीमी ख्रीस्त कली टीनीमी, मोपा मीश मुरपुकीमी आंम वोंइश आ देंशो नेल्ल टिचा माल्नीमी।

25 गे वॉइश मुरपुकी, आंम मीश कली दाक्तीने। दोपा ख्रीस्तमी थमा सुइक्ब आन कली दाक्शा, मेको आन कली पाप रे प्रॉइचा, दे आंम रां जिम्मा गेवा, मोपा वॉइश मुरुमी आंम मीश कली दाक्चा माल्नीमी।<sup>26</sup> मारदे ख्रीस्तमी मो पाप्तु देंशा हना, थमा सुइक्बपुकी परमप्रभु यावे आ डॉइती शिरशो मुर दुम्मल, दे मो पाप्तु। डॉइती ख्रीस्तमी मेको आन कली लोत्र रे पा चिक्वशो खोदेंशो पाप्तु। *तीतस ३:५; हिब्रू १०:२२*<sup>27</sup> मोदेंशो पा थमा सुइश्शा, छेडछेड पाइश्शो मुरपुकी आंम कली वोइश्शो बाक्त। मेकोपुकी मारेड मलुम्सीशो, मरोम्सीशो, थम दारशो नु परमप्रभु यावे आ मुर दुश्शा, दोस मताइब मुरपुकी बाक्नीमी। *२कोरिन्थी ११:२; कलस्सी १:२२*<sup>28</sup> मेको खोदेंशो पा वॉइश मुरपुकीमी आंम मीश कली “आंम रां बाक्ब” दे मेको कली दाक्चा माल्नीमी। सु आंम मीश कली दाक्बा, मेकोमी आंम कली यो दाक्ब।<sup>29</sup> सुइमी आंम रां कली खेदा मपाइनीम, थुल्शा रिम्शो पाइनीम। ख्रीस्तमी यो थमा सुइक्ब आन कली मोदेंशो पाइब। *एफिसी १:२३*<sup>30</sup> मिनु गोपुकी आ रां डा गुइ खोइल बाक्नय।<sup>31</sup> मो दुम्तीके वॉइश मुरुमी आ आम आफ आस कली प्रॉइब। मिनु आ मीश नु काथा बाक्ब। मेको निक्शी रां का दुम्नीसी। *उत्पत्ती २:२४*<sup>32</sup> मेको आ खुइश्शो अर्थ ठेयब बाक्ब। मिनु मार बाक्ब देंशा हना, गो ख्रीस्त नु थमा सुइक्ब आन पर्वम लोत्र पाइनुड।<sup>33</sup> मार दुम्त हना यो, गे नेल्लेमी आंम मीश कली आंम कली दाक्शो खोदेंशो पा दाक्तीन। मीश मुरपुकीमी चहिं आंम वॉइश कली मान पा हिक्चा माल्नीमी।

6 गे आलपुकी, प्रभु कली मिम्शा, इन आम आफ आन देंशो टिने। मारदे हना मेको इन कली रिम्शो बाक्ब। *मर्कुस ७:१-१३*<sup>2</sup> मिनु गे इन आम आफ कली मान पने। मेको डॉइती डा आसीक पाइश्शो अरेतीक लोत्र बाक्ब। *प्रस्थान २०:१२*<sup>3</sup> मेको आसीक मार बाक्ब देंशा हना “गे मो पाइतीनी हना, इन कली रिम्शो दुम्ब। मिनु गे शुश बर्स ब्रॉइचा ताइनीनी” दे ब्रेक्वशो बाक्ब। *ब्यवस्था ५:१६*

4 गे आफपुकी, इन आल आन कली मगाइक्पतीन। तन्न मेको आन कली रिम्शो थुल्शा कोल्पतीन। मिनु मेको आन कली शेंशा, प्रभु सु बाक्बा मेको तुइक्पतीन। *ब्यवस्था ६:२०-२५*

5 गे वाइलीम वाइलपुकी, इन रागी डा होत्रप कली टिने। दोपा टिचा माल्नीनी देंशा हना, गोपुकी ख्रीस्त कली टिशो खोदेंशो पा, मेको आन क्येडा हिंशा खिंखि पा, थुं का पा रिम्शो गेय पने। *तिमोथी ६:१२; तीतस २:९-१०; १पत्रुस २:१८*<sup>6</sup> होत्रपमी इन कली गेय पशो कोव्रतेक्म हना यो, मकोव्रतेक्म हना यो, ठीक पा गेय पने। गोपुकीमी मुर कली ग्येरपाइक्चा ममाइ, ख्रीस्त आ वाइलीम वाइल दुश्शा, इन थुं नेल्लेमी परमप्रभु यावे आ दाक्शो पने।<sup>7</sup> मो पनीनु, गोपुकीमी मुर आन कली ममाइ, प्रभु कली रिम्शो थुंमी गेय पाइनीनी।<sup>8</sup> मिनु मुरुमी दोपा रिम्शो पाइबा, मेको खोदेंशो पा प्रभु रे ताइब, दे तुइक्चा माल्नीनी। प्रभुमी वाइलीम वाइल नु ठेयब मुर आन कली खाल का डा पा कोव्रब। *२कोरिन्थी ५:१०*

9 गे होत्रपपुकी, इन वाइलीम वाइल आन कली प्रभुम पशो खोदेंशो पा पने। हिंच कोइचा प्रोनीन। मारदे हना मेको आन के नु इन के प्रभु स्वर्गमी बाक्ब। मिनु प्रभुमी मुर नेल्ल आन कली उइक्थ मिम्ब।

## परमप्रभु आ गेशो या

10 मिनु आं नोले डा लोत्र, प्रभु कली तुइश्शा सक्ति पाइश्शो मुर दुमीन। मोपा प्रभु आ सक्तिमी बोल्यो दुश्शा बाक्कीन। *एफिसी ३:१६; १कोरिन्थी १६:१३; २तिमोथी २:१; १यूहन्ना २:१४*<sup>11</sup> मिनु परमप्रभु यावे आ गेशो या नेल्ल लतीन। सैतानमी आ मरिम्शो थुंमी इन कली खतम सेल्चा माल्तु हना, गोपुकी परमप्रभु यावे आ गेशो यामी ग्रानीनी।<sup>12</sup> गोपुकी मुर नु लडाइ मपाइनय। हुकुम पाइबपुकी, अधिकार पाइबपुकी नु रागी कली मुल छिडछिडमी गेय पाइब वोल नु लडाइ पाइनय। मेको स्वर्गम बाक्ब सैतान आ गेय पाइबपुकी बाक्नीम। *एफिसी २:२; लूका २२:३१*<sup>13</sup> मोपतीके परमप्रभु यावे आ गेशो या नेल्ल लतीन। मेकोमी ला मरिम्शो नाक्त ग्राशा राप्ने चाप्नीनी।

14 गोपुकी थमा शेंतीकेमी किप्शुर किप्शो खोदेंशो पा राप्शा बाक्कीन। मिनु ठीक दुम्तीकेमी पीतल के भोटो फेक्वशो खोदेंशो पा बाक्कीन। *लूका १२:३५; १पत्रुस १:१३; १थिस्सलोनिकी ५:८*<sup>15</sup> परमप्रभु यावे नु दुपाइक्ब ग्येरपाइक्ब लोत्र पा, जुत्ता मुइश्शो खोदेंशो पा बाक्कीन।<sup>16</sup> मिनु नेल्ल क्येडा ठेयब या येसु ख्रीस्त कली थमा सुइक्तीके तेक्तीक खोदेंशो पा इन डॉइती वोतीन। सैतानमी आप्शो ब्रशो ब्रा कली मेकोमी तेक्ने चाप्नीनी। *१पत्रुस ५:९; १यूहन्ना ५:४*<sup>17</sup> मिनु येसु ख्रीस्तम इन कली पाप रे प्रॉइशो तुइक्तीक पीतल के ताक्की खोदेंशो पा गुम्सीने। मिनु परमप्रभु यावे आ लोत्र लतीन। मेको चहिं परमप्रभु यावे आ सोक्त डा तरवार बाक्ब। *१थिस्सलोनिकी ५:८; हिब्रू ४:१२*

18 मिनु गोपुकीमी गेना हना यो परमप्रभु यावे आ सोक्तीमी पतीके परमप्रभु यावे नु लोत्र पशा पुनीन। पुंइचा मदथ, परमप्रभु यावे आ मुर नेल्ल आन पर्वम पुनीन।<sup>19</sup> आं पर्वम यो पुनीन। आं कली मिम्शा, मार पुनीन देंशा हना, येसु ख्रीस्त आ पर्वम डॉइती खुइश्शो ग्येरपाइक्ब लोत्र मुल गो महिंथु, शेंने चबुल, दे पुनीन। *कलस्सी ४:३; २थिस्सलोनिकी ३:१; प्रेरित ४:२९*<sup>20</sup> गो मेको लोत्र शेंचा कली साडलोम फ्रेंशा सोइश्शो मुर दुम्ती। गोपुकीमी आं पर्वम “महिंथु शेंदल” दे परमप्रभु यावे कली पुनीने। मोपा महिंथु, लोत्र पचा परमप्रभु यावे आ दाक्शो बाक्ब। *२कोरिन्थी ५:२०; प्रेरित २८:३१*

## नोले डा लोत्र

21 मिनु गो दोपा बाक्डा, मार पडा मेको नेल्ल प्रभु आ रिम्शो गेय पाइब, इं दाक्शो थमा सुइक्ब लोक्ब तिखीकसमी इन कली देंब। *प्रेरित २०:४; कलस्सी ४:७-८; २तिमोथी ४:१२; तीतस ३:१२*<sup>22</sup> गोपुकी दोपा बाक्का तुइक्पाइक्चा नु इन थुं बारपाइक्चा कली इन बाक्तीके सोइक्ताक्ड।

23 मिनु इं आफ परमप्रभु यावे नु प्रभु येसु ख्रीस्तमी इन कली थुं नाइश्शा बाक्चा गेम्सेक्त।<sup>24</sup> सु सुमी इं प्रभु येसु ख्रीस्त कली गेना हना यो दाक्नीमी, मेको नेल्लेमी शिशी तामेक्त।

# फिलिप्पी

पावलमी एको चिठी ब्रेक्शो बाक्ब।

एको चिठी ६३ ए. डी. नुप्ची ना कि ६४ ए. डी. गोची ना ब्रेक्शो मिन्नीम। एको चिठी ब्रेक्ची ना पावलमी “जेल्खान रे प्रॉइचा पुंडसीनुड” दे आस पाप्तु। पावलमी जेल्खानम यो ग्येरपाइक्ब लोत्र शेंब। थमा सुइक्बपुकीमी श्येत जाम्तेक्म हना यो, येसु ख्रीस्त कली मप्रॉइचा। थमा सुइक्बपुकीमी दूली शेंब आन पर्बम होस पचा माल्नीम। प्रभु आ पशो मिम्शा, ग्येरसीचा माल्नीम। पावलमी फिलिप्पी आन गुड रे क्येट ताप्तु। मेको आ पर्बम “रिम्शो पाइब बाक्नीनी” दे ब्रेक्शो बाक्ब।

## डॉइती डा लोत्र

1 पावल नु तिमोथी, गो निक्शी ख्रीस्त येसु आ वाइल नस्कु। फिलिप्पी सहरम बाक्शो ख्रीस्त येसु कली थमा सुइक्ब नेल्ल इन कली, थमा सुइक्ब आन कली कोत्रब नु गुम्तीके डा गेय पाइब इन कली चिठी ब्रेक्ताक्ड। प्रेरित १६:३

2 इं आफ परमप्रभु यावे नु प्रभु येसु ख्रीस्तमी इन कली शिशी पा थुं नाइक्चा गेम्सेक्ल।

## पावल आ प्रार्थना

3 गो इन कली मिम्शा, आं परमप्रभु यावे कली “गे रिम्शो पाइतीनी” देंनुड। रोमी १:८; १कोरिन्थी १:४ 4 गो परमप्रभु यावे नु लोत्र पडानु, गेना हना यो नेल्ल इन कली मिम्शा, ग्येरशा पाइनुड। 5 डॉइती रे मुल सम्म ग्येरपाइक्ब लोत्र पचा कली आं कली वारच पाइतीनी। 6 इन आगामी रिम्शो गेय गोइबमी येसु ख्रीस्त आ जाक्ची ना सम्म थुम्ब, दे तुइक्नुड। फिलिप्पी २:१३; १कोरिन्थी १:८ 7 नेल्ल इन पर्बम मोदेंशो मिम्चा ठीक बाक्ब। मारदे हना गो इन कली शुश दाक्नुड। आं जेल्खानमी चोक्चा पुंडसीशो, निसाफ पची ना नु ग्येरपाइक्ब लोत्र शेंची ना गो इन कली मिम्नुड। गो नेल्ल खाल का डा शिशी ताइब बाक्नय। 8 ख्रीस्त येसुमी आं कली दाक्पाइक्तीके थुं गेतीके गो इन कली गुम्चा शुश दाक्ताक्ड, परमप्रभु यावेमी मेको तुइक्ब।

9 आं प्रार्थना मार बाक्ब देंशा हना, इन दाक्चा शुश बारशा, रिम्शो नु मरिम्शो मार बाक्ब से रुजे चाप्नील, दे पुंडशा, परमप्रभु यावे नु लोत्र पचा बाक्ब। फिलेमोन ६ 10 मोपा गे नेल्ल क्येडा रिम्शो मार में, दे तुइशा, ख्रीस्त आ नाक्ती पाप मपाइब नु दोस मताइब दुम्नीनी। रोमी १२:२; एफिसी ५:१०; १थिस्सलोनिकी ५:२३ 11 गेपुकी येसु ख्रीस्तमी पपाइश्शो ठीक पतीकेमी ब्रीशो बाक्तीनी हना, परमप्रभु यावे सक्ति पाइश्शो नु ठेयब बाक्ब, दे तुंडसीब। एफिसी ५:९

## पावलमी पशो लोत्र

12 आं लोक्बपुकी, आं कली दुम्शो श्येतमी ग्येरपाइक्ब लोत्र ब्रपाइक्तु। १तिमोथी २:९ 13 हुकुम पाइब आ खिं डा मुर नु अरु नेल्लेमी गो ख्रीस्त कली थमा सुइश्शो आ पर्बम जेल्खानम बाक्ती, दे तुइक्ताक्म। फिलिप्पी ४:२२ 14 मिनु प्रभु कली थमा सुइक्ब लोक्ब शुशेमी आं कली जेल्खानमी बाक्शो तशा, प्रभु कली थमा सुइक्तीक बारपा महिंथु, परमप्रभु यावे आ लोत्र पाइनीम।

15 का निक्शीमी गेहे पशा, नेल्ल क्येडा ठेयब नड, दे ख्रीस्त आ पर्बम शेंनीम। का निक्शीमी चहिं रिम्शो थुं पा शेंनीम। 16 मोपा शेंबपुकीमी आं कली दाक्शा, गो परमप्रभु यावे आ ग्येरपाइक्ब लोत्र पतीके एकेर बाक्नुड, दे तुइक्नीम। 17 गेहे पा ख्रीस्त आ लोत्र शेंबपुकीम चहिं “गो नेल्ल क्येडा ठेयब नड” दे रिम्शो थुं मपथु, आं कली जेल्खानम श्येत तेम्चा मिन्नीम।

18 मिनु मार? ठेयब लेश्शा हना यो, थमा पा हना यो, ख्रीस्त आ पर्बम लोत्र पाम्तेक्म हना, गो शुश ग्येरसीनुड। फिलिप्पी २:१७-१८

19 इन परमप्रभु यावे कली पुंडतीके नु येसु ख्रीस्त आ सोक्तीम आं कली वारच पतीके गो एको श्येत रे ब्रॉइनुड, दे तुइक्नुड। २कोरिन्थी १:११ 20 गो काइ मुने मदोक्नुड, दे तुइश्शा, आस पाइनुड। मिनु काइ महिब दुम्शा, ब्रॉइती हना यो, साइक्तीमी हना यो, मुरपुकीमी गेना हना यो ख्रीस्त कली ठेयब सेल्मेक्ल, देंनुड। 21 मारदे हना ब्रॉइडानु, ख्रीस्त कली ब्रॉइनुड, साइक्तीमी हना यो, ग्रानुड। गलाती २:२० 22 गो ब्रॉइती हना, ख्रीस्त आ गेय पाइनुड। तन्न तेको गेय योत्रनुडा मेको मतुइक्नुड। 23 गो निम्फा आस दातेमी बाक्नुड। मेकेर रे लशा, ख्रीस्त नु बाक्चा आं दाक्शो बाक्ब। मारदे हना मेको शुश रिम्शो बाक्ब। २कोरिन्थी ५:८ 24 गो ब्रॉइती हना, इन कली शुश रिम्शो दुम्ब। 25 मोदेंब दुम्ब, दे तुइश्शा, इन थमा सुइक्चा नु ग्येरपाइक्तीके बारल, दे गो गेपुकी नु बाक्नुड, दे तुइक्नुड। फिलिप्पी २:२४ 26 मारदे हना गो इन कली लेंशा गुम्थ जाक्नुड, गेपुकीमी आं जाक्शो आ पर्बम ख्रीस्त येसु कली ठेयब सेल्नीनी।

## थमा सुइक्ब श्येत जाइनीम

27 गो इन नाक्त किंत किंत डा पतीकेमी ख्रीस्त आ ग्येरपाइक्ब लोत्र कली शिरशो दुम्शा बाक्कीन। गो गेपुकी नु बाक्ती हना यो, मबाक्ती हना यो, इन सोक्त का दुम्शा, इन थुं का दुम्शा, ग्येरपाइक्ब लोत्र डा थमा सुइक्तीके गेय पा वारच पमुने। 28 इन कली श्येत गेब आन कली तशा काइ महिनीन। मेकोन मेको आन कली ब्रुतीक चिनु बाक्ब। इन कली चहिं ब्रॉइतीक चिनु दुम्ब। मेको परमप्रभु यावे रे दुम्ब। २थिस्सलोनिकी १:५ 29 ख्रीस्त कली थमा सुइक्चा ला इन कली गेशो ममाइ, तन्न मेको आ पर्बम श्येत जचा यो गेशो बाक्ब। 30 मुल आं श्येत जशो खोदेंशो पा, गेपुकी यो श्येत जाइनीनी। प्रेरित १६:२२

## ख्रीस्त खोदेंशो दुमीन

2 ख्रीस्त आ पर्बम इन दातेमी थुं बारपाइक्तीके, दाक्शा वारच पाइब, दे थुं नाइक्तीके, थमा सुइश्शा थुं का दुम्तीके, दाक्मुतीके नु शिशी पतीके बाक्तेक्म हना, 2 गेपुकी खाल का डा दुम्शा, उइक्थ उइक्थ पा दाक्मुशा, नेल्ल गारशा थुं का दुम्शा, आं कली शुश ग्येरपाइक्नीनी। 3 गेपुकी ठेयब लेश्शा “गो ठेयब नड” दे मिम्शा, काइ गेय मपने। ब्रेम्शो थुंमी “मेको मुर आं क्येडा ठेयब बाक्ब” दे मिम्तीन। गलाती ५:२६; रोमी १२:१० 4 गेपुकी का का पा नेल्लेमी आंम दाक्शो ला ममिम्थु, अरु मुर आन दाक्शो “मार बाक्मे” मेको यो मिम्तीन। १कोरिन्थी १०:२४; १कोरिन्थी १३:५ 5 ख्रीस्त येसु नु बाक्शो थुं इन दातेमी कोइदीन। 6 ख्रीस्त येसु परमप्रभु यावे नु उइक्थ दुम्शो बाक्त हना यो “परमप्रभु यावे नु उइक्थ दुम्ती” दे ममिम्थु, यूहन्ना १:१२; यूहन्ना १७:५ 7 मेको नेल्ल प्रॉइशा, वाइल खोदेंशो दुम्शा, मुर दुम्शा जरमेसाक्व। यसैया ५३:३; मत्ती २०:२८; २कोरिन्थी ८:९; हिब्रू २:१४, १७ 8 मिनु मुर दुम्शा, साइक्चा पुंडसीचा सम्म परमप्रभु यावे कली

टिशा, शीम क्याइशा साइक्वा पुंडसीशा, आ ब्रेमशो थुं कौइताक्व। लूका १४:११; हिब्रू १२:२; हिब्रू ५:८<sup>9</sup> मोपतीके परमप्रभु यावेमी मेको कली नेल्ल क्येडा ठेयब सेल्शा, आ नें यो अरु आन क्येडा ठेयब सेल्लु। प्रेरित २:३३; एफिसी १:२१; हिब्रू १:३-४<sup>10</sup> येसु आ नें नेंशा, स्वर्गम बाक्ब, रागीम नु रागी आगाम बाक्ब नेल्लेमी बाप्शा, पोक्च थेक्वा माल्नीम। यसैया ४५:२३; यूहन्ना ५:२३; प्रकाश ५:१२-१३<sup>11</sup> मिनु नेल्लेमी “येसु ख्रीस्त प्रभु बाक्ब” दे परमप्रभु यावे, इन आफ कली ठेयब सेल्वा माल्नीम। प्रकाश ५:१३

### परमप्रभु यावे आ आलपुकी

12 आं दाक्शो लोकबपुकी, गेपुकीमी नेल्ल नाक्त आं देंशो टीतीनी। गो बाक्डानु ला ममाइ, गो मबाक्डानु यो मेको क्येडा शुश रिमशो पने। गेपुकी हिंशा ख्रिंख्रि पा इन पाप रे ब्रौइतीक गेय पने। १पत्रुस १:१७<sup>13</sup> मारदे हना परमप्रभु यावेमी इन थुंमी गेय पाइब। मार गेय पाइब देंशा हना, आ दाक्शो पचा, दे इन कली दाक्ब थुं गेशा, गेय पपाइक्ब। फिलिप्पी १:६

14 गेपुकीमी सुंइच मपथु, दाल्गीर मपथु, गेय पने। 15 मोपा दोस गेचा मपुंडसीब, परमप्रभु यावे आ रिमशो आल दुम्नीनी। मरिमशो नु दूली पाइब मुर आन दातेमी स्वर्ग डा छेडछेड खोदेंशो दुम्नीनी। फिलिप्पी १:१०; मत्ती ५:१४; एफिसी ५:८-९<sup>16</sup> मोपा ब्रौइचा गेब लोव मप्रौइब दुम्नीनी। मिनु ख्रीस्त आ जाक्वी ना गो मो मगाक्ड, मो गेय यो मपड, दे ग्येरशा बाक्वा तडल। २कोरिन्थी १:१४; १थिस्सलोनिकी २:१९<sup>17</sup> गो इन थमा सुइक्वा आ पबर्म गेय पा, साइक्वा पुंडसाक्वी हना यो, ग्येरसीनुड। गे नेल्ल नु ग्येरशा बाक्नुड। २तिमोथी ४:६<sup>18</sup> मोपा गेपुकी यो ग्येरसीने। मिनु गो नेल्ल ग्येरसय। फिलिप्पी ४:४

### तिमोथी नु इपाफ्रोडीटस

19 प्रभु येसुमी तिमोथी कली इन कली गुमथ सोइक्वा गेपु हना, ब्रा सोइक्नुड। इन पबर्म लोव नेंशा, गो यो ग्येरसीनुड। 20 मारदे हना मेको खोदेंशो अरु मबाक्नीम। “गेपुकी दोपा बाक्नी माइ” दे थमा पा शुश मिमशा, सुर्ता पापु। १कोरिन्थी १६:१०<sup>21</sup> नेल्लेमी आंम आंम दाक्शो ला मिमशा, पना पन बाक्नीमी। येसु ख्रीस्त आ दाक्शा मिमशो चहिं मपाइनीम। २तिमोथी ४:१०, १६<sup>22</sup> गेपुकीमी तिमोथी कली तुइक्नीनी। दोपा तौमी आ आफ नु गेय पाइबा, मोपा मेको गो नु परमप्रभु यावे आ ग्येरपाइक्ब लोव शेंथ गाक्त। 23 मोपतीके आं कली मार मार दुम्बा, मेको तुइक्नु नोले गो मेको कली इन बाक्तीक ब्रा सोइक्नुड, दे आस पाता। 24 प्रभुमी आं कली एकेर रे प्रौइब, दे थमा सुइक्नुड। मिनु गो यो इक्का नाक्त नोले जाक्नुड। फिलिप्पी १:२५

25 इन सोइश्शो आं कली वारच पाइब आं लोकब इपाफ्रोडीटस कली लेश्शा सोइक्नुड। मेकोमी गो नु गेय पापु। गो नु काथा गाक्शा, परमप्रभु यावे आ लोव शेंताक्व। फिलिप्पी ४:१८<sup>26</sup> मेकोमी नेल्ल इन कली शुश मिमताक्व। मारदे हना गेपुकीमी “मेको रोइ पापु” देंशो नेंतीनी ने। मोपतीके शुश सुर्ता पापु। 27 इपाफ्रोडीटस थमा पा बेक्वा डा रोइ पापु। तन्न परमप्रभु यावेमी मेको कली शिशी पाइक्नु। मेको कली ला ममाइ, आं कली यो शिशी पाइक्ती। मोपतीके गो शुश श्येत मजड। 28 मेको कली इन बाक्तीके सोइक्वा दाक्नुड। गेपुकी मेको कली लेश्शा जाक्शो तशा, ग्येरनीनी। मो दुम्मेनु, आं हेल्शो थुं यो सोपी दुम्ब। 29 गेपुकीमी प्रभु आ नेंमी मेको कली रिमशो पने, ग्येरसीने। मोदेंशो मुर कली ठेयब सेलीन। १कोरिन्थी १६:१६<sup>30</sup> मेकोमी ख्रीस्त आ गेय पशा, आंम कली ममिम्थु, इन पा डा आं कली वारच पथ जाक्मेनु, रोइ पा हेरा बेक्त।

### पावलम आ पबर्म पशो लोव

3 आं दाक्शो लोकबपुकी आं नोले डा लोव मार बाक्ब देंशा हना, प्रभु नु बाक्शा ग्येरसीने। मोदेंशो लोव गो इन कली ब्रेक्ना ब्रेक्न बाक्ती हना यो, श्येत ममिम्नुड। मेको इन कली बोल्यो दुम्या कली बाक्ब। फिलिप्पी २:१८; फिलिप्पी ४:४

2 कुचुम खोदेंशो मुर आन क्येडा होस पा बाक्कीन। मरिमशो गेय पाइब आन कली तशा, होस पा बाक्कीन। खोइक्तीक चिनु खोइक्वा माल्ब देंब,

आन क्येडा यो होस पा बाक्कीन। प्रकाश २२:१५; गलाती ५:१२<sup>3</sup> मारदे हना गेपुकी थमा खोइक्तीक चिनु डा मुर बाक्नय। गेपुकीमी परमप्रभु यावे आ सोक्त आ पतीकेमी खुम्की पा बाप्शा, परमप्रभु यावे कली गेय पशा, ख्रीस्त येसु आ पतीकेमी ग्येरसय। मुर आ पतीकेमी थमा मसुइय्य। रोमी २:२९<sup>4</sup> गो मुर आन पतीके कली थमा सुइक्ने चाप्नुड। मुरपुकीमी आन पतीकेमी थमा सुइक्ने चाप्नीमी, दे मिम्नीमी। मोदेंब दुम्त हना, गो यो मेको आन क्येडा शुश चाप्नुड। २कोरिन्थी ११:१८, २२<sup>5</sup> गो ८ नाक्त डा आल बाक्डानु, खोइक्तीक चिनु ताता। गो इस्राएली नड। गो बेन्यामीन आ थर डा मुर नड। हिब्रू मुर रे जरमेशो, हिब्रू नड। परमप्रभु यावे आ अरेशो पशा, फरिसी दुम्ती। २तिमोथी १:३; प्रेरित २६:५<sup>6</sup> गो थमा सुइक्ब आन कली खेदा पाता। परमप्रभु यावे आ अरेशो लोव टिशा, ठीक पाता, दे मिमशा, दोस मताइब दुम्ती, देंती। प्रेरित ८:३<sup>7</sup> तन्न गो ख्रीस्त कली तुइश्शा, आंम कली ठेयब सेल्सीतीके नेल्ल ग्येरशा प्रौइता। मत्ती १३:४४-४६<sup>8</sup> थमा पा, गो आं डौइती डा पशो जाम्शा लाइब बाक्ब, दे तुइक्ताक्ड। मारदे हना आं प्रभु येसु ख्रीस्त कली तुइक्वा नेल्ल क्येडा ठेयब बाक्ब। मोपतीके मेको आ पबर्म आं पशो नेल्ल ताइश्शा, ग्रांग्रा दिचा डा बाक्ब, दे तुइक्ताक्ड। मारदे हना गो ख्रीस्त नु बाक्ब मुर दुम्ती। 9 मोपा आ मुर दुम्शा, परमप्रभु यावे आ अरेशो लोव डा आंम ठीक पतीके मबाक्थु, ख्रीस्त कली थमा सुइक्तीकेमी ठीक दुम्तीके बाक्ब। मेको ठीक दुम्तीके परमप्रभु यावेमी गेशो थमा सुइक्तीके रे ला बाक्ब। रोमी ३:२२<sup>10</sup> आं दाक्शो मार बाक्त देंशा हना, गो येसु ख्रीस्त कली तुइक्ने चबुल। आ सेंतीक सक्ति गो नु बाक्ल। दोपा श्येत जशा, साइक्वा पुंडसीशो बाक्मे, मोपा गो यो मोदेंशो दुम्डल। रोमी ६:३-५; रोमी ८:१७; गलाती ६:१७<sup>11</sup> दुम्ने चाप्ब हना, गो यो बेक्शो रे सेंसीने चबुल, देंती।

### पावल आ माल्शो गेय

12 मुल सम्म गो मेको नेल्ल मतड। मिनु ठीक मदुम्ड। तन्न मेको आं के दुम्ल, दे शुश गेय पाइनुड। मारदे हना ख्रीस्त येसुम आं कली आ मुर सेल्ली। कलस्सी १:२९; १तिमोथी ६:१२; प्रेरित ९:३-६<sup>13</sup> आं लोकबपुकी, मुल सम्म गो नेल्ल मतड। तन्न गो मुल मार पाइनुड देंशा हना, आं डौइती पशो नेल्ल प्रेंशा, मुल पचा माल्शो मार बाक्मे, मेकोन शुश पाइनुड। लूका ९:६२<sup>14</sup> परमप्रभु यावेमी ख्रीस्त येसु आ नेंमी आ बाक्तीके रे इनाम गेचा कली मार देंमे, मेकोन शुश पाइनुड। १कोरिन्थी ९:२४

15 इं दातेमी सु सु रुम्ने चाप्ब बाक्नी, मेकोमी आं खोदेंशो पा मिम्तीन। गेपुकीमी आं खोदेंशो पा ममिम्ताक्नी हना, परमप्रभु यावेमी इन कली तुइक्पदल। 16 गेपुकीम मार रुब्बा, मेकोन पय।

### स्वर्ग डा मुर

17 आं दाक्शो लोकबपुकी, गेपुकी आं खोदेंशो दुमीने। आंइ खोदेंशो पा गेय पाइब आन कली कोवशा, मेको आन खोदेंशो पने। १कोरिन्थी ११:१<sup>18</sup> गो इन कली का निक्शी मुर आन पबर्म लोव पाता। मुल आं थुं खाइश्शा, डाक्शा लोव पाइनुड। मारदे हना मेकोपुकी ख्रीस्त आ जोरी सत्रु दुम्शा, आ बेक्शो आ पबर्म मारेइ ममिम्नीम। १कोरिन्थी १:२३; गलाती ६:१२<sup>19</sup> नोले मेकोपुकी जाम्शा लाइनीम। आन कोवज कली परमप्रभु यावे क्येडा ठेयब बाक्ब, दे मुने पचा डा गेयमी आंम कली ठेयब सेल्सीशा, आन थुंमी रागी डा माल्शो ला मिम्नीम। रोमी १६:१८<sup>20</sup> तन्न इं बाक्तीक स्वर्गम बाक्ब। मारदे हना गो स्वर्ग डा मुर नय। मेकेर रे इं पाप रे प्रौइब प्रभु येसु ख्रीस्त जाक्ब, दे रिमनय। एफिसी २:६; कलस्सी ३:१; हिब्रू १२:२२; तीतस २:१३<sup>21</sup> मेकोमी इं बेक्चशो रां आ सक्ति पाइश्शो रां खोदेंशो सेल्ब। मेको आ सक्तिमी नेल्ल आन कली आ डौइती खुम्की पा बाप्पाइक्ब। १कोरिन्थी १५:४९; २कोरिन्थी ५:१; १यूहन्ना २:३

### थुं का डा दुमीन

4 मोपतीके आं दाक्शो लोकबपुकी, प्रभु कली थमा सुइश्शा, खोइल थेक्शा बाक्कीन। गो इन कली दाक्शा शुश मिम्नुड। गेपुकीम आं

कली ग्येरपाइश्शा, आं ग्रातीक सिरपेच खोदेशो दुस्तीनी। २कोरिन्थी १:१४; १थिस्सलोनिकी २:१९-२०

<sup>2</sup> इयोदीया नु सुन्तुके “प्रभु कली थमा सुइश्शा थुं का दुमीस” देंती।

<sup>3</sup> मिनु गो नु गेय पाइब वारच, इ कली “मेको मीश मुर निक्शी आस कली वारच पावो” देंती। मारदे हना मेको निक्शीमी गो नु काथ काथा ग्येरपाइक्व लोव्र शेंतीक गेय पाम्ताक्से। क्लेमेन्त नु अर्को वारच आन कली यो वारच पाम्ताक्से। मेको नेल्ल आन नें ब्रॉइतीक किताबमी ब्रेक्शो बाक्व। लूका १०:२०

#### परमप्रभुमी गेशो थुं नाइक्तीक

<sup>4</sup> प्रभु नु बाक्शा गेना हना यो ग्येरसीन। गो लेंशा “ग्येरसीने” देंनुड। फिलिप्पी ३:१; २कोरिन्थी १३:११; १थिस्सलोनिकी ५:१६ <sup>5</sup> इन रिम्शो पतीके मुर नेल्ल आन कली कौंइदीने। प्रभु जाक्वशो बाक्व। तीतस ३:२ <sup>6</sup> सुर्ता मपने। परमप्रभु यावे नु लोव्र पा, इन माल्शो पुंडशा “गे रिम्शो पाइब बाक्नीनी” दे परमप्रभु यावे कली देनीन। मत्ती ६:२५-३४; १पत्रुस ५:७ <sup>7</sup> परमप्रभु यावे आ गेशो थुं नाइक्तीके रुम्ने मचाप्चा डा ठेयब बाक्व। मेको थुं नाइक्तीके इन थुं नु इन मिम्शो ख्रीस्त येसु नु बाक्व। यूहन्ना १४:२७; कलस्सी ३:१५

<sup>8</sup> आं लोकबपुकी, आं नेल्ल क्येडा नोले डा लोव्र मार बाक्व देंशा हना, तेको थमा बाक्बा, तेको शिरशो बाक्बा, तेको ठीक बाक्बा, तेको ग्रांग्रा मदिशो बाक्बा, तेको दाक्चा डा बाक्बा, तेको रिम्शो लोव्र बाक्बा, तेको नेल्ल क्येडा रिम्शो नु दोस गेचा मपुंडसीब बाक्बा, तेको “रिम्शो पाइब” दे माइक्चा पुंडसीब बाक्बा, मेको आ पर्वम मिम्तीन। <sup>9</sup> गो इन कली मार शेंदु, गे मार रुम्नी, मार नेंनी, आं कली मार पशो तनी, मेकोन पने। मो पाइतीनी हना, इन थुं नाइक्चा गेब परमप्रभु यावे गेपुकी नु बाक्व।

#### गेचा नु ताक्चा आ पर्वम

<sup>10</sup> गो प्रभु नु बाक्शा शुश ग्येरसीनुड। मारदे हना शुश नाक्त नोले गे आं कली लेंशा मिम्ताक्नी। गेपुकीमी आं कली नेल्ल नाक्त थमा पा मिम्शा

बाक्तीनी। तन्न डॉइती मारेइ सोइक्ने मचाप्शो बाक्तीनी। मुल चहिं सोइक्ताक्यीनी। <sup>11</sup> गो श्येत जचा आ पर्वम लोव्र मपाइनुड। मार दुम्त हना यो, ग्येरसीशा बाक्चा, दे शेंसीशो नड। १तिमोथी ६:६ <sup>12</sup> पुडग दुम्चा नु शोप पाइश्शो दुम्चा, दोपा बाक्मे, गो मेको निम्फा तुइक्नुड। गो गेना हना यो रूशा बाक्चा नु शोव्रलु बेक्शा बाक्चा, निम्फा शेंसाक्यी। मोपा शुश बाक्त हना यो, काइ मबाक्त हना यो आं कली ठीक दुम्ब। २कोरिन्थी ६:१० <sup>13</sup> आं कली सक्ति गेब आ नेंमी गो नेल्ल पने चाप्नुड। २कोरिन्थी १२:१०

<sup>14</sup> दोदेंब दुम्त हना यो, गेपुकीम आं कली वारच पशा रिम्शो पाइतीनी।

<sup>15</sup> ग्येरपाइक्व लोव्र शेंचा डॉइती मासीडोनीया रागी प्रॉइशा लडा नोले, सुइमी आं कली वारच मपामे, गे फिलिप्पीपुकीम ला पाइतीनी। गेपुकीम आं शेंशो ताइतीनी, मिनु इन वारच पशो गो ताता। २कोरिन्थी ११:९

<sup>16</sup> थिस्सलोनिकी सहरमी बाक्डानु यो, गे निक्शी खेयप वारच पा क्येट सोइक्ताक्यीनी। <sup>17</sup> इन गेशो क्येट ममिम्नुड, तन्न परमप्रभु यावेमी इन मो पशो तशा, इन कली रिम्शो पाइब। गो मोदेशो तचा दाक्नुड। <sup>18</sup> गो मार मार माल्डा, आं माल्शो क्येडा शुश ताता। इपाफ्रोडीटसमी इन सोइश्शो क्येट गेती। मेको ब्रोव्रशो रिना पाइश्शो परमप्रभु यावे कली चढ़ेशो खोदेशो बाक्व। परमप्रभु यावे इन मो पशो तशा ग्येरसाक्व। फिलिप्पी २:२५ <sup>19</sup> मिनु आं परमप्रभु यावेमी इन माल्शो नेल्ल आ स्वर्ग डा बाक्तीक येसु ख्रीस्त आ पतीक रे शुश गेब। <sup>20</sup> इं आफ परमप्रभु यावे कली गेना हना यो ठेयब सेल्य। आमेन।

#### नोले डा लोव्र

<sup>21</sup> ख्रीस्त येसुमी बाक्शो थमा सुइक्व नेल्ल आन कली “रिम्शो बाक्कीन” मतीन। गो नु बाक्व लोकबपुकीमी “रिम्शो बाक्कीन” देंतेक्म। <sup>22</sup> सिजर आ खिं डा नु अरु थमा सुइक्व नेल्लेमी यो इन कली “रिम्शो बाक्कीन” देंतेक्म। फिलिप्पी १:१३ <sup>23</sup> प्रभु येसु ख्रीस्त आ शिशी गेपुकी नु बाक्व।

# कलस्सी

एको चिठी पावलमी ब्रेक्शो बाक्ब।

: पावल रोम सहरम ग्याइक्चा पुंडसीशा ६२ ए. डी. थुम्ची ना कि ६३ ए. डी. गोची ना ब्रेक्शो बाक्ब।

१. येसु ख्रीस्त प्रभु बाक्ब।
२. थमा सुइक्ब आन गुम्तीक खिं दोदेशो दुम्चा माल्ब।
३. थमा सुइक्ब दोपा बाक्चा माल्नीमी नु नोले डा लोत्र।

## डोंइती डा लोत्र

१ गो परमप्रभु यावे आ दाक्शो पा, ख्रीस्त येसु आ सोइश्शो पावल नड। इं लोक्ब तिमोथी गो नु बाक्ब।

२ गो कलस्से सहर डा परमप्रभु यावे कली थमा सुइक्ब नु ख्रीस्तमी बाक्शो लोक्ब इन कली चिठी ब्रेक्ताकड। इं आफ परमप्रभु यावेमी इन कली शिशी पा थुं नाइक्चा गेवल।

## कलस्सी आन पर्वम प्रार्थना

३ गो निक्शीमी इन पर्वम प्रार्थना पस्कुनु, इं प्रभु येसु ख्रीस्त आ आफ परमप्रभु यावे कली “गे रिम्शो पाइतीनी” देंनस्कु। ४ मारदे हना गेपुकी ख्रीस्त येसु कली थमा सुइक्तीनी। मिनु थमा सुइक्ब नेल्ल आन कली दाक्नीनी, देंशो नैतस्कु। ५ स्वर्गमी इन कली रिम्शो दुम्ब, दे तुइक्ताक्नी। गेपुकीमी डोंइती रे थमा लोत्र पशो नैतीनी। मेकोन ग्येरपाइक्ब लोत्र बाक्ब। १ पत्रुस १:३-४<sup>६</sup> इन सहर नु नेल्ल अरु सहर डा मुरपुकीमी यो मेको ग्येरपाइक्ब लोत्र नैतेक्म। इन दातेमी दोदेशो पा बारशा लमे, मोदेशो पा रागी नेल्लेमी बारना बारन लत। गेपुकीमी मेको लोत्र नैशा, परमप्रभु यावे आ शिशी थमा पा रुप्जी नाक्त्त रेन मेको लोत्र बारना बारन लत।

७ इपाफ्रास आंस दाक्शो लोक्ब, गो निक्शी नु गेय पाइब। मेको रिम्शो पा ख्रीस्त आ लोत्र इन कली शेंब दुम्त। कलस्सी ४:१२; फिलेमोन २३<sup>८</sup> मेकोमी आंस कली गे परमप्रभु यावे आ सोक्तीम पतीके मुर आन कली दाक्नीनी, दे इन पर्वम तुइक्पाइक्त्तस्की।

९ मिनु मेको लोत्र नैस्कु रे इन कली मिम्शा, प्रार्थना पना पन बाक्त्तस्कु। मार प्रार्थना पाइत्तस्कु देंशा हना “कलस्सीपुकीमी इन दाक्शो मार बाक्बा, मेको तुइक्त्तमेक्त्त। परमप्रभु यावे, इन सोक्त्त डा तुइक्तीके नु रुप्तीके शुश तामेक्त्त। एफिसी १:१५-१७<sup>१०</sup> इन डोंइती शिरशो मुर दुम्मल। आन पशो नेल्लेमी इन कली ग्येरपदमेक्त्त। रिम्शो पामेनु, इन कली तुइक्तीके आन थुंमी बारना बारन लल। एफिसी ४:१; फिलिप्पी १:२७<sup>११</sup> इन छेडछेड डा सक्ति खोदेशो पा मेको आन कली सक्ति पाइश्शो, बोल्यो सेलीन। मिनु सक्ति पाइश्शो बोल्यो दुम्शा, मारेड मारेड फाल्ने चाप्नीम” दे प्रार्थना पाइत्तस्कु। १२ इं आफ, परमप्रभु यावे कली “गे रिम्शो पाइब बाक्नीनी” देनीन। मारदे हना इन कली थमा सुइक्ब आन छेडछेडमी बाक्चा गेत्तु। एफिसी १:११; १ पत्रुस १:४<sup>१३</sup> मेकोमी इं कली छिडछिड डा राज्य डा अधिकार रे गुंइशा, आ दाक्शो तौ आ राज्यमी ओंइताक्व। कलस्सी २:१५<sup>१४</sup> मेकोमी इं कली मरिम्शो रे प्रोंइशा, इं पाप क्याम्ताक्व। एफिसी १:७

## येसु डोंइती डा बाक्ब

१५ सुइमी तने मचाप्शो परमप्रभु यावे खोदेशो येसु ख्रीस्त रागी सेल्वा डोंइती रेन बाक्त्त। हिब्रू १:३; प्रकाश ३:१४<sup>१६</sup> सरीड नु रागीमी बाक्ब, ताइसीब नु मताइसीब नेल्ल, पिपपुकी, मान पचा पुंडसीबपुकी, हुकुम पाइबपुकी, अधिकार पाइब नेल्ल नु मार मार सेल्शो बाक्मा, मेको नेल्ल येसु

ख्रीस्तमी आंम कली सेल्लु। यूहन्ना १:३,१०; हिब्रू १:२<sup>१७</sup> मोपा मेको नेल्ल आन क्येडा डोंइती डा बाक्ब। मिनु नेल्ल आन कली बाक्चा गेब यो बाक्ब। १८ थमा सुइक्बपुकी रां का बाक्तेक्म हना, येसु ख्रीस्त मेको रां आ पिया बाक्ब। मेको नेल्ल आन क्येडा डोंइती डा दुम्शा, डोंइती बेक्शो रे सेंसीब यो बाक्ब। मोपा नेल्ल आन क्येडा ठेयब बाक्ब। एफिसी १:२२; प्रेरित २६:२३; १कोरिन्थी १५:२०; प्रकाश १:५

१९ मिनु परमप्रभु यावेमी “आं सक्ति नेल्ल मेको आगामी बाक्शो दाक्नुड” दे ग्येरसाक्व। २कोरिन्थी ५:१०; कलस्सी २:९; यूहन्ना १:१६; एफिसी १:२३<sup>२०</sup> परमप्रभु यावेमी येसु ख्रीस्त रेन मारेड मारेड आन कली आ नु गारपाइक्त्तु। सरीड नु रागीम बाक्शो नेल्ल आन कली, शीम केषा कांटी थोक्शा साइक्चा पुंडसीशा, आ हुशेमी आ नु गारपाइक्त्तु। १ यूहन्ना २:२

## परमप्रभु आ नेक्था दुम्पाइश्शो

२१ डोंइती गेपुकी परमप्रभु यावे क्येडा डोन दुम्शा, इन थुंमी मेको कली ममिम्शु, मरिम्शो पना पन बाक्तीनी। एफिसी २:१२-१३; एफिसी ४:१८; रोमी ५:१०<sup>२२</sup> मुल येसु ख्रीस्तमी आ रां साइक्चा गेशा, इन कली परमप्रभु यावे आ मुर दुम्पाइक्त्तु। मोपा इन कली दोस मताइब, काइ हेंथे मपाइब, परमप्रभु यावे आ मुर सेल्शा, आ डोंइती राप्पाइक्त्तु। एफिसी ५:२७<sup>२३</sup> गेपुकीमी थमा सुइक्ना सुइक्न बाक्शा, नोले मशोंइसीथु खोइल थेक्शा, इन नैशो ग्येरपाइक्ब लोत्र मप्रोंइथु बाक्तीनी हना, मोदेशोन लीनीनी। मुल मेको ग्येरपाइक्ब लोत्र नेल्ल मुर आन कली नैपाइश्शो बाक्त्त। गो पावल, मेको लोत्र शेंब दुम्ती।

## पावल आ श्येत नु गेय

२४ मुल गो इन पर्वम श्येत जाता हना यो, ग्येरसाक्पी। मारदे हना आं रांमी ख्रीस्त आ लीशो श्येत थुम्पाइक्नुड। ख्रीस्त आ लीशो श्येत थमा सुइक्ब आन पर्वम बाक्ब। मेकोपुकी ख्रीस्त आ रां बाक्नीम। एफिसी ३:१३; २तिमोथी २:१०<sup>२५</sup> परमप्रभु यावे आ पतीकेमी मेको आन कली शेंब दुम्ती। परमप्रभु यावेमी आ लोत्र नेल्ल मेको आन कली शेंतीक गेय गेती। मोपा आ लोत्र खाप्चा कली शेंब सेल्लती। २६ साइ डोंइती रे परमप्रभु यावे आ मिम्शो खूइश्शो बाक्त्त। मुल चहिं मेको आ मुर आन कली कोंइशो बाक्त्त। रोमी १६:२५; एफिसी ३:३-६<sup>२७</sup> परमप्रभु यावेमी मेको आन कली “आं डोंइती खूइश्शो लोत्र अर्को रागी डा मुर आन कली गिश रिम्शो, गिश ठेयब बाक्ब” दे तुइक्पाइक्त्तु। मेको खूइश्शो लोत्र मार बाक्ब देंशा हना, ख्रीस्त इन आगामी बाक्ब। मिनु इन कली परमप्रभु यावे आ छेडछेडम बाक्चा गेब आस यो ख्रीस्तम बाक्ब। १तिमोथी १:१<sup>२८</sup> गोपुकीमी येसु ख्रीस्त सु बाक्बा, मार पाइबा, दे शेंनीकी। मुर नेल्ल आन कली “होस पा बाक्कीन” दे यो शेंनीकी। मोपा गोपुकीमी मुर आन कली का का पा ख्रीस्त कली थमा पा तुइक्ब सेल्शा, परमप्रभु यावे आ डोंइती राप्पाइक्चा दाक्नीकी। २९ मोपतीके गो बोल पा शुश गेय पाइनुड। येसु ख्रीस्तमी आं कली मोदेशो पा आ सक्तिमी गेय पपाइक्ब।

दूली शेंब क्येडा होस पने

2 गो इन पर्वम, लाओडीसीया सहर डा थमा सुइक्व आन पर्वम नु का निक्शी अरु आं कली गेनायो मताइब मुर आन पर्वम गिश श्येत जडा, मेको नेल्ल इन कली तुइक्पाइक्वा दाक्नुड।<sup>2</sup> मेकोपुकी दाक्मुशा आन थुं बारपदमेक्ल। थमा पा रुत्तीके गिश ठेयब बाक्वा, परमप्रभु यावेमी ख्रीस्त आ पर्वम खुइश्शो लोत्र मार बाक्वा, मेको नेल्ल रुपमेक्ल।<sup>3</sup> रुत्तीके तुइक्तीके नेल्ल ख्रीस्त आगाम खुइश्शो बाक्नीम। *१कोरिन्थी १:२४,३०*  
4 मारदे इन कली मो देंती देंशा हना, जोल पा शेंब जाक्शा, शुश मिलो शिलो लोत्र पशा, दूली शेंबे मचाप्मेक्ल, दे मो देंती। *रोमी १६:१८*<sup>5</sup> गो इन नेक्था मबाक्ती हना यो, आं थुंमी गेपुकी नु बाक्नुड। इन रिश्शो पशो नु ख्रीस्त कली बोल्यो पा थमा सुइश्शो तशा ग्येरसाक्पी। *१कोरिन्थी १४:४०*

नेल्ल ख्रीस्तम बाक्ब

6 गेपुकी दोपा डोंइती प्रभु ख्रीस्त येसु कली ओव्रचा गेनी, मोपा मेको नु बाक्कीन।<sup>7</sup> खप आगामी शाक्श थोक्शो रवा खोदेंशो पा, ख्रीस्त आगा डा बोल्यो मुर दुश्शा बाक्कीन। दोपा शेंसीनी, मोपा बोल्यो पा थमा सुइश्शा, परमप्रभु यावे कली “गे रिश्शो पाइतीनी” दे शुश देंना देंन बाक्कीन। *एफिसी ३:१७*

8 मिनु गेपुकी दूली लोत्र शेंब आन नोले मखोतीन। मेकोपुकीमी इन कली मुर आन मिम्तीके नु फश लोत्र पशा, मुर आन रिती थिती ला शेंनीमी। मेको रागी रागी डा मुर आन थुं डा बाक्ब, ख्रीस्त के ममाइ।<sup>9</sup> मारदे हना परमप्रभु यावे आ सक्ति नेल्ल ख्रीस्तम बाक्ब। *यूहन्ना १:१४-१६*<sup>10</sup> गेपुकी मेको नु बाक्शा, आ ब्रोंइतीक सक्तिम ब्रीशो मुर दुम्तीनी। मेको नेल्ल हुकुम पाइब नु नेल्ल अधिकार पाइब आन पिया बाक्ब। *एफिसी १:२१*<sup>11</sup> मेको आ पशोमी खोइक्तीक चिनु पाइश्शो खोदेंशो दुम्तीनी। मेको खोइक्तीक चिनु मुरुमी खोइश्शो ममाइ, गेपुकी ख्रीस्त कली थमा सुइश्शा, इन मरिश्शो पशो ताइश्शो इन खोइक्तीक चिनु दुम्त। *रोमी २:२९; रोमी ६:५; १पत्रुस ३:२१*<sup>12</sup> मिनु गेपुकी ब्वाक्कुम खुश्शा गुंइचा पुंइसीनीनु, मेको नु बेक्शा थिश्शो दुम्तीनी। परमप्रभु यावे आ पतीके कली थमा सुइक्तीके मेको नु बेक्शो रे सेंशो यो बाक्नीनी। *रोमी ६:४; कलस्सी ३:१*<sup>13</sup> डोंइती गेपुकी मरिश्शो पाइब दुश्शा, खोइक्तीक चिनु इन रांमी मखोइक्थु, बेक्शो मुर खोदेंशो बाक्तीनी। परमप्रभु यावेमी इं मरिश्शो पतीके नेल्ल क्याम्शा, इं कली येसु ख्रीस्त नु ब्रोंइपाइक्तु। *एफिसी २:१,५*<sup>14</sup> नेल्ल गेचा चिक्शो दोस नु सजाइ ब्रेक्शो कागज लाइश्शा, कांटी थोक्शा साइक्तीक शीम वोइक्तु। *एफिसी २:१५*<sup>15</sup> मेकोमी हुकुम पाइब नु अधिकार पाइब आन कली आन या रोइश्शा फ्रुम्तीमी। मोदेंशो पा ग्राशा, नेल्ल आन कली कोंइताक्व। परमप्रभु यावे येसु ख्रीस्त आ पशो तशा शुश ग्येरसाक्व। *कलस्सी १:१३; एफिसी ४:८*<sup>16</sup> मोदेंशो दुश्शा इन कली मार मार जचा तूचा दुम्बा, मार मार जचा तूचा मदुम्बा, मार मार चाड मानेचा, तेको औंसी ठेयब सेल्वा, तेक तेको नाइक्तीक नाक्ती ठेयब सेल्वा देंब मुर आन लोत्र मनेनीन। *रोमी १४:१-१२*<sup>17</sup> मेको दुम्बा चिक्शो आ वांकु ला बाक्नीम। थमा सुइक्तीक रां चहिं ख्रीस्त के बाक्ब। *हिब्रू ८:५; हिब्रू १०:१*<sup>18</sup> सुइमी इन कली “मतुइक्ब मुर ननी” देंचा मगेने। मेकोपुकीमी आंम मिश्शो पशो बाक्नीम, स्वर्ग डा गेय पाइब आन कली सेउ पचा माल्नीनी, दे शेंनीमी। “गो डोमु खोदेंशो पा ततीके तुइक्ताक्क” देंनीमी। मेको मुरपुकी मो ठेयब लेश्शा बाक्शा, आन मिश्शो ला शेंनीम।<sup>19</sup> मेकोपुकी पिया नु मबाक्शो बाक्नीम। मेको पियामी रां कली थुल्ना थुल्ल बाक्मेनु, नाडी नु रुशेम बोइक्पाइश्शा, परमप्रभु यावेमी मेको रां कली कोल्पाइक्ब। *एफिसी ४:१५-१६*

20 गेपुकी ख्रीस्त नु बेक्तीनी हना, रागी डा थोव्रक नेल्ल इन कली आइक्च बाक्ब। मिनु मारदे गेपुकी रागी डा मुर खोदेंशो पा पाइनीनी? मारदे गेपुकी रिती थिती पचा टीनीनी? *गलाती ४:९-१०*<sup>21</sup> मेकोपुकीमी “मेको थिचा मदुम्ब, थाम्चा मदुम्ब, पचा मदुम्ब” देंनीम।<sup>22</sup> मेको शेंबपुकीमी गेय पना पन जाम्ब थोव्रक आन पर्वम लोत्र पाइनीम। मेको लोत्र मुर आन मिश्शो लोत्र ला ममाइ डा? *मत्ती १५:९*<sup>23</sup> मिनु मेको रिती थिती पचा, शुश धर्म

पचा नु मुर आन माल्शो मपथु, थमा पा जोक्ब तुइक्ब नु ब्रेम्शो दुम्बु पाइनीम। तन्न मोदेंशो पतीकेमी मुर आ मरिश्शो पतीके तेक्ने मचाप्ब। *१तिमोथी ४:३; रोमी १३:१४*

माइत नु नक मुर

3 गेपुकी ख्रीस्त नु सेंसीशो बाक्तीनी हना, स्वर्गमी बाक्ब दोपा बाक्मा, मेको मालीन। मेकेर ख्रीस्त परमप्रभु यावे आ ग्युरा गे निश्शो बाक्ब। *कलस्सी २:१२*<sup>2</sup> इन थुंमी स्वर्गम बाक्ब कली मिम्तीन। रागी डा थोव्रक ममिम्तीन। *मत्ती ६:३३*<sup>3</sup> मारदे हना गे बेक्तीनी। इन थुं ख्रीस्त नु परमप्रभु यावेमी खुइश्शा वोइश्शो बाक्ब। *रोमी ६:२*<sup>4</sup> इं कली ब्रोंइचा गेब ख्रीस्त गूत हना, गे यो मेको नु परमप्रभु यावे आ छेडछेड डा बाक्तीकेमी गूनीनी। *१कोरिन्थी १५:४३*<sup>5</sup> मोपतीके इन आगामी बाक्शो माइत रागी डा थुं कली सतीन। रागी डा मुर आन थुंमी मार बाक्ब देंशा हना, हेंथे पचा, मार मार ग्रांरा दिचा डा गेय पचा, आंम दला दाक्स पचा, मरिश्शो मिम्तीके नु शिम दुम्तीके बाक्ब। शिम दुम्तीके चहिं मूर्ति पूजा पचा खोदेंशो बाक्ब। *एफिसी ५:३*<sup>6</sup> परमप्रभु यावे मोदेंशो पाइब मटीब मुर आन पर्वम शुश गाइक्ब। *एफिसी ५:६*<sup>7</sup> गेपुकी यो डोंइती मोदेंशो पना पन बाक्तीनी।<sup>8</sup> मुल चहिं मेको नेल्ल ताइक्तीन। गाइक्वा, चुरचा, मरिश्शो पचा, अरु आन पर्वम मरिश्शो लोत्र पचा, ओल ओल लोत्र पचा ताइक्तीने। *एफिसी ४:२९,३१*<sup>9</sup> गेपुकी जोल मपमुने। मारदे हना, गे डोंइती डा पतीक नेल्ल ताइक्ताक्नी। *एफिसी ४:२२-२५*<sup>10</sup> रिश्शो पाइब नक मुर दुमीन। परमप्रभु यावेमी इन थुं आ थुं खोदेंशो पा नक सेल्ना सेल्न बाक्ब। मारदे मो पाइब देंशा हना, आंम कली नेल्ल तुइक्पाइक्वा कली मोदेंशो पाइब। *एफिसी ४:२४; उत्पत्ती १:२६-२७*<sup>11</sup> मुल रे ग्रीक नु यहूदी खोइक्तीक चिनु खोइक्पाइंसीशो नु मखोइक्पाइंसीशो मुरपुकी उइक्थ उइक्थ दुम्तेक्म। रागी रागी डा मरुच्चा डा लोत्र पाइबपुकी, ब्वाकी मुरपुकी, वाइलीम वाइलपुकी नु ठेयब मुर उइक्थ उइक्थ दुम्तेक्म। ख्रीस्त नेल्ल क्येडा ठेयब बाक्ब। मिनु नेल्ल आन आगामी बाक्ब। *गलाती ३:२८*

12 गेपुकी परमप्रभु यावे आ योव्रशो, आंम आ दाक्शो मुर दुम्तीनी। मोपतीके शिशी पचा, रिश्शो पमुचा, ब्रेम्शो थुं पाइश्शो, ठेयब मलेत्थु टीब नु फाल्ब मुर दुमीने।<sup>13</sup> का निक्शीमी दोस गेचा पुंइसाक्म हना, फाल्मुशा, माफ गेमुशा बाक्कीन। प्रभुमी दोपा इन कली माफ गेवा, मोपा माफ गेमुने। *एफिसी ४:२; मत्ती ६:१४; एफिसी ४:३२*<sup>14</sup> मेको नेल्ल पा इन नेल्ल क्येडा ठेयब गेय दाक्मुचा बाक्ब। मारदे हना मेकोम नेल्ल इन कली थुं का डा सेल्ब। *रोमी १३:८,१०*<sup>15</sup> ख्रीस्त आ थुं इन थुंम नाइश्शा हुकुम पचा गेने। गेपुकी रां का डा दुम्चा कली योव्रसीशो बाक्नीनी। गेपुकीमी प्रभु कली “गे रिश्शो पाइब बाक्नीनी” दे शुश देनीन। *फिलिप्पी ४:७; १कोरिन्थी १२:१३,२७; एफिसी ४:३-४*<sup>16</sup> ख्रीस्त आ लोत्र खोत ब्रेक्शा वोतीन। गेपुकीमी शुश तुइश्शा, शेंमुशा थुं बारपमुने। परमप्रभु यावे आ लोत्र डा कुम्सो, परमप्रभु यावे कली “गे ठेयब बाक्नीनी” दे पशो कुम्सो नु परमप्रभु यावे आ सोक्तीमी इन कली शेंशो कुम्सोमी “गे रिश्शो पाइब बाक्नीनी” दे इन थुंमी परमप्रभु यावे कली कुम्सो पने। *एफिसी ५:१९*<sup>17</sup> मार मार लोत्रपुकी, गेयपुकी, मारेइ मारेइ पनीनु, नेल्ल प्रभु येसु आ नेंमी पने। इं आफ परमप्रभु यावे कली “गे रिश्शो पाइतीनी” दे येसु आ नेंमी देनीन। *१कोरिन्थी १०:३१*

थमा सुइक्ब दोपा बाक्वा

18 गे मीश मुरपुकी, आंम वोंइश आ देंशो लोत्र तिने। मो पाइतीनी हना, प्रभु नु गारशो मुर दुम्नीनी। *१पत्रुस ३:७*

19 गे वोंइश मुरपुकी, आंम मीश कली दाक्शा, काइ श्येत मगेने।

20 गे आलपुकी, इन आंम आफ कली नेल्लेम तिने। मो पाइतीनी हना, प्रभु ग्येरब।

21 गे आल आन आफपुकी यो, इन आल आन कली रिश्शो पने। काइ श्येत मगेने। श्येत गेतीनी हना, आन थुं जिक्ब।

22 वाइलीम वाइलपुकी, इन ठेयब मुरुमी मार मार देंनीमी, मेको नेल्ल टिचा माल्नीनी। इन ठेयब मुरुमी कोव्रतेक्म हना यो, मकोव्रतेक्म हना यो, थुं का पशा, प्रभु कली मान पा हिनीन। 23 इन गेय मार बाक्त हना यो, इन थुं नेल्लेमी मुर आन कली ममाइ, प्रभु कली गेय पने। 24 गे प्रभु आ गुइ रे इनाम ताइब बाक्नीनी, दे तुइक्नीनी। मेकोन मिम्ना मिम्न गेय पने। गेपुकी प्रभु ख्रीस्त कली गेय पाइब बाक्नीनी। 25 मरिश्शो पाइबपुकीम मरिश्शो पतीके कुल मकोव्रथु निसाफ पचा पुंइसीनीम। रोमी २:११

4 गे ठेयब मुरपुकी, इन के यो ठेयब होव्रप का स्वर्गम बाक्ब, दे तुइश्शा, इन वाइलीम वाइल आन कली ठीक पा आन माल्शो थोव्रक गेने। लेवी २५:४३, ५३

#### प्रार्थना पचा मप्रोंइचा

2 गेपुकीमी प्रार्थना पचा मप्रोंइथु, पना पन बाक्कीन। परमप्रभु यावे कली "गे रिश्शो पाइब बाक्नीनी" देंचा मप्रेंदीन। रोमी १२:१२; १थिस्सलोनिकी ५:१७ 3 गेपुकीमी आंइ कली यो मिम्शा प्रार्थना पने। परमप्रभु यावेमी आंइ कली ख्रीस्त आ ख्रुइश्शो लोव्र शुश मुर आन डोंइती शेंने चाप्मेक्ल, दे पुनीन। मेको लोव्र शेंतीके गो ग्याइक्चा पुंइसाक्पी। रोमी १५:३०; एफिसी ६:१९; २थिस्सलोनिकी ३:१; १कोरिन्थी १६:९; कलस्सी १:२६-२७ 4 रिश्शो रुच्चा डा लोव्र पने चाप्मेक्ल, दे यो पुनीन।

5 गेपुकी थमा मसुइक्ब आन डोंइती रिश्शो जोक्शा तुइश्शा गेय पने। लोव्र पचा तनीनु, रिश्शो पा लोव्र पने। एफिसी ५:१५-१६; १थिस्सलोनिकी ४:१२ 6 इन पशो लोव्र हिक्सी डाम्शो खोंदेंशो दुम्ल। इन कली हिल्लो पाइब नेल्ल आन कली दोपा लोव्र लेत्चा, दे तुइक्चा माल्नीनी। मर्कूस ९:५०; एफिसी ४:२९

#### नोले डा लोव्र

7 आं पर्वमी मार मार दुम्मे, मेको नेल्ल तिखीकसमी इन कली देंब। मेको इं दाक्शो लोक्ब बाक्ब। दीगो पा गेय पाइब नु आं खोंदेंशो प्रभु आ वाइल

बाक्ब। 8 गोपुकी दोपा बाक्नीकी, दे इन कली शोव्रचा नु इन थुं बारपाइक्चा कली मेको कली इन बाक्तीके सोइक्ताक्ड। एफिसी ६:२१-२२ 9 इं दाक्शो नु रिश्शो पाइब लोक्ब, ओनेसीमस मेको नु जाक्ब। मेको इन मुरुन बाक्ब। एक मार मार दुम्मे, मेको निक्शीमी इन कली देंनीसी। फिलेमोन १०

10 गो नु ग्याइक्चा पुंइसीब वारच अरीस्तारकसमी इन कली "रिश्शो बाक्कीन" दे आं कली ब्रेक्पाइक्ती। बारनाबास आ लोक्ब मर्कूसमी यो इन कली "रिश्शो बाक्कीन" देंत। मेको जाक्मेनु, रिश्शो पा बाक्चा गेने। मेको आ पर्वम इन कली डोंइती तुइक्पाइक्तन्नी। प्रेरित १९:२९; प्रेरित २७:२; प्रेरित १२:१२, २५ 11 येसु माइश्शो याइनी नें पाइश्शो युस्तसमी यो इन कली "रिश्शो बाक्कीन" देंत। परमप्रभु यावे आ राज्य डा गेय पाइब आं वारचपुकी मेको सां ला ख्रुइक्तीक चिनु पाइश्शो यहूदी बाक्नीम। मेकोपुकीमी आं कली वारच पाइश्शा, आं थुं नाइक्चा गेतीमी। 12 ख्रीस्त येसु आ गेय पाइब इन मुर इपाप्रासमी इन कली "रिश्शो बाक्कीन" देंत। मेकोमी इन कली मिम्शा, परमप्रभु यावे कली "कलस्सी आन कली रुप्तीक थुं गेशा, इन दाक्शो नेल्ल तुइक्तमेक्ल" दे पुंइना पुंइन बाक्ब। कलस्सी १:७; फिलेमोन २३ 13 इन कली, लाओडीसीया नु हिरापोलीस डा थमा सुइक्ब आन कली शुश गेय पाप्तु, दे गो इन कली तुइक्पाइक्ता। प्रकाश ११:१; प्रकाश ३:१४ 14 इं दाक्शो डाक्टर लूका नु डेमासमी यो इन कली "रिश्शो बाक्कीन" देंताक्स। 15 लाओडीसीया सहर डा लोक्ब आन कली नु नुम्फा माइश्शो आ खिंमी गुम्ब थमा सुइक्ब आन कली यो गोमी "रिश्शो बाक्कीन" देंत ने, दे मतीन। 16 मिनु एको चिठी इन गुम्तीकेमी पढेने थुम्शा, लाओडीसीया सहर डा थमा सुइक्ब आन गुम्तीकेमी यो पढेचा गेने। लाओडीसीया डा थमा सुइक्ब आन कली ब्रेक्शो चिठी गेपुकीमी पढेने। 17 गेपुकीमी अरकीप्स कली "प्रभुमी इ कली गेशो शेंतीक गेय नेल्ल रिश्शो पावो" दे मतीन। फिलेमोन २

18 गो पावलमी इन कली "रिश्शो बाक्कीन" दे आंमा ब्रेक्ताक्ड। गो ग्याइक्चा पुंइसीशो बाक्नुड, दे मप्रेंदीन। परमप्रभु यावे आ शिशी गे नु लील। १कोरिन्थी १६:२१; गलाती ६:११; २थिस्सलोनिकी ३:१७



## १ थिस्सलोनिकी

एको चिठी पावल थिस्सलोनिकी आन कली आ डोंइती ब्रेक्शो चिठी बाक्ब।

: पावल निक्शी खेयप रागी रागी लशा, कोरिन्थ सहरम बाक्शा, एको चिठी ५३ ए. डी. मेको बर्स डा डोंइती डा महिनाम ब्रेक्शो बाक्ब।

१. पावलमी श्येत जाइब नक थमा सुइक्ब आन थुं बारपाइक्त्तु।

२. पावलमी थमा सुइक्ब आन कली प्रभु कली शिरशो गेय पचा आ पर्बम अरेब।

३. पावलमी येसु ख्रीस्त दोपा लेशशा जाक्बा, मेको शेंब। मारदे हना दूली शेंब गुम्तीकेम जाक्शा, मुर आन थुं क्याल्लेक्म।

### डोंइती डा लोव

१ गो पावल नड। सिल्वानस नु तिमोथी यो गो नु बाक्नीस। गो इं आफ परमप्रभु यावे नु इं प्रभु येसु ख्रीस्त कली थमा सुइक्ब थिस्सलोनिकी सहर डा इन कली चिठी ब्रेक्ताक्ड। येसु ख्रीस्तमी इन कली शिशी पा इन थुं नाइक्वा गेवल। प्रेरित १५:४०; प्रेरित १६:१-३, १९; प्रेरित १७:१-९; २थिस्सलोनिकी १:१

### थिस्सलोनिकी डा थमा सुइक्ब

२ गोपुकी प्रार्थना पकानु, परमप्रभु यावे कली “गे थिस्सलोनिकी सहर डा थमा सुइक्ब नेल्ल आन रिम्शो पाइतीनी” दे गेना हना यो देंनीकी। ३ गोपुकी इं आफ परमप्रभु यावे आ डोंइती इन थमा सुइक्तीके डा गेय, दाक्वा डा गेय नु इं प्रभु येसु ख्रीस्त कली आस पतीके मिम्ना मिम्न बाक्नीकी। १कोरिन्थी १३:१३ ४ आइ थमा सुइक्ब लोक्बपुकी, परमप्रभु यावेमी इन कली दाक्शा योवतु, दे तुइक्नीकी। ५ मारदे हना इन कली शेंशो ग्येरपाइक्ब लोव पचा ला मशेंदक, सक्ति यो ताइतीनी। परमप्रभु यावे आ सोक्तीमी आइ कली शुश तुइक्तीक थुं गेशा प्रिताक्व। गोपुकी दोदेशो मुर बाक्नीकी, दे गोपुकी नु बाक्शा कोइताक्क। मिनु गे तुइक्ताक्नी। १कोरिन्थी २:५ ६ गोपुकी आइ खोदेशो नु प्रभु खोदेशो पाइब दुम्तीनी। मारदे हना गोपुकी शुश श्येत जशा, परमप्रभु यावे आ लोव नेंतीनी। मिनु परमप्रभु यावे आ सोक्तीमी इन थुं ग्येरपाइक्त्तु। २थिस्सलोनिकी ३:७ ७ मोपा गोपुकी मासीडोनीया नु आकाया रागी डा थमा सुइक्ब आन कली रिम्शो कोइतीक दुम्तीनी। ८ डोंइती गोपुकी प्रभु आ लोव मासीडोनीया नु आकाया रागी डा मुर आन कली शेंताक्नी। मेको आन कली ला ममाइ, नेल्ल अर्को रागी डा मुरपुकीमी यो इन परमप्रभु यावे थमा सुइक्तीके तुइक्ताक्म। मोपतीके गो मेकेर शेंचा ममाल्नीकी। रोमी १:८ ९ मेकोपुकीमी इं पर्बम लोव पास्तेक्म। मार लोव पास्तेक्म देंशा हना, थिस्सलोनिकी सहर डा मुरपुकीमी आइ कली मिश रिम्शो ब्राम्तेक्म। मिनु गोपुकी इन मूर्ति कली प्रोंइशा, परमप्रभु यावे कली थमा सुइक्ब दुम्शा, ब्रोंइशा बाक्ब, थमा परमप्रभु यावे आ गेय पाइब दुम्तीनी। प्रेरित १४:१५; १कोरिन्थी १२:२ १० मिनु बेक्शो रे सेंशो परमप्रभु यावे आ तौ लेंशा सरीड रे यीब, दे रिम्शा बाक्तीनी। येसुमी इं कली परमप्रभु यावे आ गाइक्वा रे प्रोंइब। तीतस २:१३

### पावल आ गेय

२ आइ लोक्बपुकी, इन कली गुम्चा मोशा मदुम्शो बाक्त्त, दे तुइक्नीनी। २ गोपुकी डोंइती फिलिप्पी सहरमी श्येत जशा, मुरपुकीमी आइ कली शुक्शी पास्तेक्म, दे तुइक्नीनी। शुश शुक्शी पास्तेक्म हना यो, परमप्रभु यावेमी आइ कली वारच पाइब, दे थमा सुइक्शा, परमप्रभु यावे आ ग्येरपाइक्ब लोव इन कली शेंताक्क। प्रेरित १६:२०-२४; प्रेरित १७:१-५ ३ गोपुकीमी इन कली मुरुम पशो जोल रे मशेंदक। ठेयब दुम्कल, दे ममिम्तक। २कोरिन्थी ४:२; २कोरिन्थी ११:७; यूहन्ना ५:४४ ४ परमप्रभु

यावेमी आइ कली ग्येरपाइक्ब लोव शेंचा, दे शेंब सेल्लीकी। मोपतीके गोपुकी मुर आन दाक्शो लोव मशेंथु, परमप्रभु यावे आ दाक्शो लोव शेंशा गाक्त्तक। मेकोमी आइ थुं कली नाक्शा कोव्वब। गलाती १:१० ५ गो इन कली मिलो शिलो मपक, दे तुइक्नीनी। इन क्येट ताइनीकी को, दे मिम्शा मशेंदक, मेको परमप्रभु यावेमी तुइक्ब। मत्ती १२:४०; प्रेरित २०:३३ ६ गे नु अरु मुरपुकीमी आइ कली ठेयब सेलीन, दे मशेंदक। ७ गोपुकी ख्रीस्त आ सोइश्शो दुम्शा, इन गुइ रे मार मार ताक्वा ठीक दुम वा। तन्न गो आल कली दूध तुइब ममा खोदेशो पा, इन कली कोव्वतक। ८ गोपुकीमी इन कली शुश दाक्शा, परमप्रभु यावे आ ग्येरपाइक्ब लोव शेंचा ला ममाइ, तन्न शेंचा आ पर्बम बेक्वा माल्लक हना यो, बेक्नीकी। २कोरिन्थी १२:१५

९ आइ लोक्बपुकी, गे नु बाक्शा, शुश गेय पाइत्तक, दे तुइक्नीनी। गोपुकीमी परमप्रभु यावे आ ग्येरपाइक्ब लोव शेंदकानु, इन कली श्येत मगेचा, दे नाक्दो नाक्त्त गेय पाइत्तक। प्रेरित १८:३; प्रेरित २०:३३-३४; १कोरिन्थी ४:१२; २थिस्सलोनिकी ३:८ १० गो ठीक, रिम्शो नु परमप्रभु यावे आ गेय ला पाइत्तक। परमप्रभु यावेमी मेको तुइक्ब। मिनु गे थमा सुइक्बमी यो तुइक्नीनी।

११ मिनु गोपुकीमी आल आन कली रिम्शो अरेब आफ खोदेशो पा इन कली अरेतक। इन थुं बारपाइश्शा १२ “परमप्रभु यावे आ मुर दुम्शा, मेको आ डोंइती शिरशो दुम्शा बाक्नीकी” दे इन कली पन कि पन, दे शेंशा शुश अरेतक। परमप्रभु यावेमी इन कली आंम राज्य नु आ छेडछेडमी बाक्वा गेचा कली ब्रेक्ब। एफिसी ४:१-२; फिलिप्पी १:२७

### थिस्सलोनिकी आन श्येत

१३ गोपुकीमी आइ शेंशो परमप्रभु यावे आ लोव नेंशा, मुर आ लोव ममाइ, थमा पा परमप्रभु यावे आ लोव बाक्ब, दे तुइक्ताक्नी। थमा सुइक्शा मेको लोवमी इन थुंमी गेय पना पन बाक्ब। मो दुम्मेनु, गोपुकीमी परमप्रभु यावे कली “गे थिस्सलोनिकी डा मुर आन कली रिम्शो पाइतीनी” देना देन बाक्नीकी। गलाती १:११-१२ १४ आइ लोक्बपुकी, गे यहूदीया डा परमप्रभु यावे आ गुम्तीक डा ख्रीस्त येसुमी बाक्ब थमा सुइक्ब खोदेशो दुम्तीनी। मारदे हना यहूदीया डा मुरपुकीमी आंम रागी डा थमा सुइक्ब आन कली श्येत गेशो खोदेशो पा, इन रागी डा मुरपुकीमी यो इन कली श्येत गेम्तेक्म। प्रेरित ८:१; प्रेरित १७:५-६

१५ यहूदीया डा मुरपुकीमी प्रभु येसु कली नु परमप्रभु यावे आ लोव पाइब आन कली साइश्शा, आइ कली खेरतेक्म। मेकोपुकीमी मोपा परमप्रभु यावे कली मग्येरपदेम, मुर नेल्ल आन कली श्येत गेम्तेक्म। प्रेरित २:२३; मत्ती २३:३७; प्रेरित ७:५२ १६ दोपा श्येत गेम्तेक्म देंशा हना, रागी रागी डा मुर आन कली पाप रे ब्रोंइचा ताइनीम, दे आइ कली लोव पचा मगेम। मोदेशो पा यहूदीम आन पाप गेना हना यो तेम्ना तेम्न बाक्नीम। मोपतीके परमप्रभु यावेमी मेको आन कली चुरशा सजाइ गेब। मत्ती २१:३२-३३

१७ आइ लोक्बपुकी, गोपुकी नु मबाक्थु, गोपुकी रोइक्च खोदेशो दुम्त्तक। इन बाक्तीकेमी जाक्वा मतथु, इन कली शुश मिम्शा गुम गुम दाक्त्तक। १८ गो इन कली गुम गुम दाक्बमी गो पावल चहिं शुश पिचा दाक्शो बाक्ती।

तन्न सैतानमी आंइ कली गुमथ पिचा मगेव। 19 इं प्रभु येसु आ यिची ना गे आंइ आस पतीके, ग्येरतीके नु सिरपेच खोदेंशो बाक्नीनी। *फिलिप्पी २:१६; फिलिप्पी ४:१* 20 इन कली तशा, ग्येरशा आंइ नें बोरपाइक्नीकी।

तिमोथी लशा लेशशो

3 मोपतीके गो इन कली श्येत जशो तशा, फाल्ने मचाप्क। गो निकशी एथेन्स सहरम बाक्कु, दे सल्ला पाइतक। *प्रेरित १७:१४-१६* 2 गो निकशीमी आंस लोकब, गो नु परमप्रभु यावे आ गेय पाइब, ख्रीस्त आ ग्येरपाइक्ब लोत्र शेंब, तिमोथी कली इन थमा सुइक्तीक बारपाइक्चा नु इन कली अरेचा कली सोइक्ताक्कु। *प्रेरित १६:१-३* 3 सुइमी श्येत जशा थमा सुइक्चा मप्रोन्मेक्ल। मारदे हना गोपुकीमी श्येत जचा माल्नय, दे तुइक्नीनी। *प्रेरित १४:२२; एफिसी ३:१३; हिब्रू १०:३९; २तिमोथी ३:१२* 4 डोंइती रे गो नु बाक्नीनु “श्येत जचा माल्नय” दे शेंताक्क। मुल आंइ शेंशो दुम्न। मेको यो तुइक्नीनी। 5 गो इन कली श्येत जशो तशा फाल्ने मचबु। मोपतीके तिमोथी कली इन थमा सुइक्तीक दोपा बाक्म, दे तुइक्चा कली कोत्रथ सोइक्ताक्क। मुर आन कली पाप पपाइक्बमी इन कली बिग्रेवा कों, आंइ पशो गेय यो मोशा लम कों, दे गो हिंती। *फिलिप्पी २:१६*

6 मिनु तिमोथी इन कली गुमथ पिशा, लेशशा जाक्त। मेकोमी इन थमा सुइक्तीके नु इन दाक्तीके रिम्शो बाक्ब। गोपुकी आंइ कली गेना हना यो शुश मिन्नीनी, गोपुकी खोदेंशो पा आंइ कली गुमचा दाक्नीनी, दे तिमोथीमी आंस कली देंत। *प्रेरित १८:५* 7 आंइ लोकबपुकी, गोपुकी शुश श्येत जाइतक हना यो, इन थमा सुइक्तीक आ पबर्म लोत्र नेंशा ग्येरसाक्क। 8 मारदे हना गे प्रभु कली मप्रॉइब बाक्नीनी, दे तुइश्शा, गोपुकी डोंइती रोइ पशा, मुल चहिं साशा ब्रॉइशो मुर खोदेंशो बाक्नीकी। 9 गो परमप्रभु यावे आ डोंइती “गे थिस्सलोनिकी सहर डा थमा सुइक्ब आन कली रिम्शो पाइतीनी” दे शुश ग्येरशा, परमप्रभु यावे कली ठेयब सेल्नीकी।

10 मिनु नाक्दो नाक्त गोपुकी परमप्रभु यावे कली “थिस्सलोनिकी सहर डा थमा सुइक्ब आन कली गुमथ सोइक्तीन। मुल सम्म मशेंथु लीशो लोत्र शेंथ सोइक्तीन” दे पुंडना पुंडन बाक्नीकी। 11 इं आफ परमप्रभु यावे नु इं प्रभु येसुमी आंइ कली गोपुकी नु गुमचा गेम्सेक्ल। 12 गोपुकीमी इन कली शुश दाक्शो खोदेंशो पा प्रभुमी इन दाक्चा शुश बारपाइश्शा, दाक्मुचा नु अरु आन कली यो दाक्ब दुमीन। 13 मोपा प्रभु येसु आ मुर नु जाक्ची ना इन थमा सुइक्तीक थुं बारपाइश्शा, दोस गेचा मपुंडसीब, इं आफ परमप्रभु यावे आ डोंइती रिम्शो सेलल। *१कोरिन्थी १:८; फिलिप्पी १:१०*

परमप्रभु कली ग्येरपतीन

4 मिनु आंइ नोले डा लोत्र, आं लोकबपुकी, प्रभु येसु आ नेंमी इन कली शुश शेंतीक नु अरेतीक लोत्र पाइनीकी। गोपुकी आंइ कली दोपा बाक्शो तनी, मोपा बाक्शा, परमप्रभु यावे कली ग्येरपतीन। गोपुकी मेको क्येडा यो शुश रिम्शो पने। 2 गोपुकीमी प्रभु येसु आ नेंमी इन कली मार अरेतीक लोत्र गेका, मेको गे तुइक्नीनी। 3 परमप्रभु यावे आ दाक्शो मार बाक्ब देंशा हना, मरिम्शो मपचा नु ग्रॉग्रा दिशो गेय रे डोन बाक्चा बाक्ब। 4 गे नेल्ल आंम मीश नु बाक्शा, हेंथे मगाक्थु, मान तचा कली शिरशो दुम्शा बाक्कीन। 5 अर्को रागी डा परमप्रभु यावे कली मतुइक्ब मुरपुकीमी खोदेंशो पा ग्रॉग्रा दिचा डा गेयमी मबाक्कीन। 6 सुइ वॉइश मुरुम आ लोकब कली मोदेंशो पा श्येत मगेवल। मारदे हना प्रभुमी मोदेंशो पाइब आन कली क्येक्क लेप्ब, दे डोंइती रे इन कली शेंताक्क। *लेवी १९:११* 7 परमप्रभु यावेमी इं कली ग्रॉग्रा दिचा डा गेय पचा कली मयोवड। पाप रे डोन बाक्चा कली योवतु। 8 मोपतीके सुमी मेको लोत्र मटीबा, मेकोमी मुर आ लोत्र मटीब ममाइ, परमप्रभु यावे कली मटीब बाक्ब। परमप्रभु यावेमी इन कली आ सोक्त गेब। *लूका १०:१६*

9 थमा सुइक्ब लोकब आन दाक्मुतीके आ पबर्म सुइ मुरुमी इन कली ब्रेक्चा ममाल्ब। मारदे हना परमप्रभु यावेमी इन कली दाक्मुचा माल्नीनी, दे आंमान शेंशो बाक्त। *यूहन्ना १३:३४; लेवी १९:१८* 10 मिनु गोपुकी थमा पा मासीडोनीया रागी डा लोकब नेल्ल आन कली दाक्नीनी। गोपुकीमी मेको

क्येडा यो दाक्तीन, दे इन कली अरेनीकी। 11 गोपुकी दुशा बाक्कीन। आंम खिं डा गेय ला मिन्तीने। आंमान गेय पना पन बाक्कीन। मेको इन कली अरेतीक लोत्र पाइतक। *१थिस्सलोनिकी २:९; एफिसी ४:२८; २थिस्सलोनिकी ३:८, १२* 12 मो पाइतीनी हना, अरु मुरपुकीमी इन कली ठेयब सेल्नीम। मिनु सुइ के मारेइ ममाल्नीनी। *कलस्सी ४:५*

येसु यिचा आ पबर्म

13 आंइ लोकबपुकी, बेक्शो मुर आ पबर्म रागी रागी डा मुरपुकीमी हिशेक शुश पाइनीम। मारदे हना मेको आन के आस मबाक्ब। गोपुकी चहिं मतुइक्ब खोदेंशो पा, बेक्शो इन वारच आन पबर्म थुं खाइक्पाइश्शा मबाक्कीन। *१कोरिन्थी १५:२०; एफिसी २:१२* 14 गोपुकी येसु बेक्शा सेंसाक्ब, दे थमा सुइक्तय हना, परमप्रभु यावेमी येसु आ पतीकेमी बेक्शो मुर आन कली सेंशा चाक्ब। *रोमी १४:९; १कोरिन्थी १५:३, ९, १२* 15 मिनु गोपुकीमी इन कली प्रभु आ लोत्र रे “प्रभु आ यिचा सम्म बाक्बपुकी बेक्शो वारच आन क्येडा डोंइती प्रभु कली गुमचा मताइनय” दे तुइक्पाइक्नीकी। *मत्ती १६:२८; मत्ती २४:३०-३१; १कोरिन्थी १५:५१-५२; यूहन्ना १७:२४* 16 मारदे हना प्रभुमी आ मुर आन कली “कुन” दे ब्रेत्तानु, नेल्ल क्येडा ठेयब परमप्रभु यावे आ स्वर्ग डा गेय पाइबमी यो ब्रेप्ब। परमप्रभु यावे आ तुराही ताप्शो नेंनीम। मेना प्रभु सरीड रे यीब। ख्रीस्त कली थमा सुइश्शा बेक्शो मुरपुकी डोंइती सेंसीनीम। 17 नोले ब्रॉइशा लीशो गोपुकी मेको नु गोस्सुमी क्युक्सीशा, मेकोपुकी नु लाइनय। मेकोपुकी नु सरीडमी देल्शा बाक्शा, प्रभु कली गुमनय। मोदेंशो पा गोपुकी गेना हना यो प्रभु नु काथा बाक्चा ताइनय। *यूहन्ना १२:२६* 18 मोपतीके मेको लोत्र पा थुं बारपाइक्मुने।

प्रभु आ नाक्त

5 आंइ लोकबपुकी “गिश बर्स लीबा, गेना सम्म रिम्चा” दे इन कली ब्रेक्चा ममाल्नीकी। *मत्ती २४:३६* 2 मारदे हना गोपुकी प्रभु आ नाक्त खुइ खोदेंशो पा जाक्ब, दे तुइक्नीनी। *मत्ती २४:४२-४४; २पत्रुस ३:१०; प्रकाश ३:३; प्रकाश १६:१५* 3 मेना मुरुमी “दुशा बाक्नय, मारेइ मदुम्ब” देंतेक्म हना यो, आल कुरशो मीश मुर आल थिचा रोइ गेना पाइबा मतुइक्ब। मोदेंशो खोदेंशो पा मुरपुकी मब्रॉइचा डा पा श्येत जाइनीम। *येरमीया ६:१४; मत्ती २४:३९* 4 गे लोकबपुकी चहिं छिडछिडम मबाक्नीनी। मेको नाक्त खुइ जाक्शो खोदेंशो पा इन कली महिंपाइक्ब। 5 मारदे हना गे नेल्ल छेडछेड नु नाक्त डा मुर बाक्नीनी। गोपुकी नाक्दो नु छिडछिड डा मुर मनय। *रोमी १३:१२; एफिसी ५:९* 6 मोपतीके अरु खोदेंशो पा गो मइप्य, सासीशा “प्रभु यीब” दे मिन्ना मिन्म बाक्क। *१पत्रुस ५:८* 7 इप्बपुकी नाक्दो इप्जीम, दुक्बपुकी नाक्दो दुक्शा बाक्नीम। 8 तन्न गोपुकी नाक्त डा मुर दुम्शा “प्रभु यीब” दे मिन्ना मिन्म बाक्शा, परमप्रभु यावे आ या डा पीतल के भोटो खोदेंशो पा, थमा सुइक्तीके नु दाक्तीके फेक्शा बाक्क। पीतल के ताकी गुप्शो खोदेंशो पा पाप रे प्रॉइशो बाक्नुड, दे तुइश्शा आस पय। *एफिसी ६:१४-१७* 9 मारदे हना परमप्रभु यावे इं पबर्म मगाइक्ब। प्रभु येसु ख्रीस्त आ पतीके पाप रे ब्रॉइब सेल्लु। 10 मेको इं पबर्म साइक्चा पुंडसाक्ब। मो दुम्तीके गोपुकी इप्तय हना यो, मइप्तय हना यो, मेको नु ब्रॉइचा ताइनय। *रोमी १४:८-९* 11 मोपतीके अरेपमुशा, इन थुं बारपमुने। गोपुकी मोदेंशो पना पन यो बाक्तीनी। *हिब्रू ३:१३*

नोले डा लोत्र

12 आंइ लोकबपुकी, इन कली शेंब नु लां कोंइशा, अरेब आन कली रिम्शो पने, दे माइक्नीकी। *१कोरिन्थी १६:१८* 13 मेकोपुकी नु शुश दाक्मुशा बाक्कीन। मारदे हना प्रभु आ गेय पाइब बाक्नीमी।

14 आंइ लोकबपुकी, गेय मपाइब आन कली अरेपने। हिंब मुर आन थुं बारपतीन। मचाप्ब आन कली वारच पने। नेल्ल आन कली फाल्शा बाक्कीन। *२थिस्सलोनिकी ३:१५* 15 मुरुमी इन कली मरिम्शो पाम्तेक्म हना, गोपुकी मेको आन कली मरिम्शो मपने। रिम्शो पमुचा माल्नीनी। अरु आन कली यो रिम्शो पने। *हितोपदेस २०:२२; रोमी १२:१७, २१; १पत्रुस ३:९*

16 मिनु गेना हना यो ग्येरसीन। *फिलिप्पी ४:४* 17 प्रार्थना पना पन बाक्कीन। *लूका १८:१-८; रोमी १२:१२; एफिसी ६:१८; कलस्सी ४:२*  
 18 मार दुम्त हना यो, परमप्रभु यावे कली “गे रिम्शो पाइब बाक्नीनी” देनीन। मारदे हना मेको परमप्रभु यावे आ दाक्शो बाक्ब। ख्रीस्त येसु आ नोले खोइक्ब मेको गेना हना यो देंचा माल्नीम। *एफिसी ५:२०*  
 19 परमप्रभु यावे आ सोक्त कली मकाप्तीन। *१कोरिन्थी १४:१, ३९*  
 20 परमप्रभु यावेमी तुइक्पाइश्शो लोव्र पचा गेन। 21 तन्न परमप्रभु यावे आ लोव्र नु गारबा देय मगारबा, दे नाक्शा कोव्रडीन। गारत हना, मप्रेंदीने।  
 22 नेल्ल ग्रांग्रा दिचा डा गेय क्येडा डोन बाक्कीन।

23 थुं नाइक्पाइक्ब परमप्रभु यावेमी इन कली थम रिम्शो सेलल। इन सोक्त, थुं नु रां इं प्रभु येसु ख्रीस्त मयिम सम्म रिम्शो नु दोस मताइब दुम्शा बाक्मल। 24 इन कली ब्रेष्व इन कली देंशो पाइब बाक्ब। मेकोमी थमा पाइब। *१कोरिन्थी १:९; २थिस्सलोनिकी ३:३* 25 आंइ लोकबपुकी, आंइ पर्बम परमप्रभु यावे कली पुनीन। 26 लोकब नेल्ल आन कली प्रभु आ नेंमी मुम्मुशा आसीक गेने। 27 प्रभु आ नेंमी एको चिठी लोकब नेल्ल आन कली पढेशा नेंपतीन। 28 इं प्रभु येसु ख्रीस्त आ शिशी गेपुकी नु लील।

## २ थिस्सलोनिकी

एको चिठी पावल थिस्सलोनिकी आन कली आ नोले ब्रेक्शो चिठी बाक्व।

थिस्सलोनिकी डा थमा सुइक्व आन कली डॉइती ब्रेक्शो चिठीम ब्रेक्शो खोदेंशो बाक्तेक्म। पावल सिल्वानस नु तिमोथी बाक्शो कोरिन्थ सहरम बाक्शो बाक्त। मोपतीके एको चिठी ५३ ए. डी. डा बर्स डा नोले डा महिनाम ब्रेक्शो बाक्व, दे मिन्नीम।

डॉइती डा चिठीम नोले थिस्सलोनिकी डा थमा सुइक्वम रिश्शो पांतेक्म हना यो, का निक्शी चहिं हेंथे पांतेक्म। मुल पावलमी गुम्तीक डा शेंब कली थमा सुइक्व आन कली गेय रिश्शो पचा कली ठीक सेल्चा माल्ब, दे ब्रेक्शो बाक्व।

### डॉइती डा लोव

1 गो पावल नड। सिल्वानस नु तिमोथी यो गो नु बाक्नीस। गो इं आफ परमप्रभु यावे नु प्रभु येसु ख्रीस्त कली थमा सुइक्व थिस्सलोनिकी सहर डा इन कली चिठी ब्रेक्ताकड। १थिस्सलोनिकी १:१<sup>2</sup> इं आफ, परमप्रभु यावे नु प्रभु येसु ख्रीस्तमी इन कली शिशी पा, इन थुं नाइश्शा बाक्चा गेम्सेक्ल।

### श्येतम खोइल थेक्शा बाक्शो

3 आंइ लोकबपुकी, इन कली मिश्शा, परमप्रभु यावे कली “गे रिश्शो पाइब बाक्नीनी” देंचा ठीक बाक्व। मारदे हना इन थमा सुइक्तीके हु बारशा, इन दाक्मुतीक यो बारना बारन लाइब। १थिस्सलोनिकी १:२-३<sup>4</sup> मोदेंशो दुश्शा, गेपुकी खेदा पचा पुंडसीशा, श्येत फाल्शोमी खोइल थेक्शा थमा सुइक्व बाक्नीनी, दे गोपुकीमी परमप्रभु यावे कली थमा सुइक्व आन गुम्तीकेमी इन पर्बम ग्येरशो लोव पाइनीकी। २कोरिन्थी ७:४<sup>5</sup> गेपुकी परमप्रभु यावे आ राज्य शिरशो मुर दुम्तीनी। मिनु मेको राज्य आ पर्बम श्येत जाइनीनी। परमप्रभु यावेमी इन कली श्येत जचा गेपु हना यो, ठीक निसाफ पाइब बाक्व। फिलिप्पी १:२८

### निसाफ पची नाक्त

6 परमप्रभु यावेमी थमा पा इन कली श्येत गेब आन कली क्येक्क लेप्ब। रोमी १२:१९; प्रकाश १८:६-७<sup>7</sup> गे श्येत जाइब इन कली नु आंइ कली इं थुं नाइक्चा गेब। गेना थुं नाइक्चा गेब देंशा हना, प्रभु येसु नु आ सक्ति पाइश्शो स्वर्ग डा गेय पाइबपुकी सरीड रे गूची ना इं थुं नाइक्चा गेब। मत्ती १६:२७; मत्ती २५:३१-४६; १थिस्सलोनिकी ४:१६<sup>8</sup> मेको नु हुरुर पा ब्रशो मी सरीड रे यीब। प्रभुमी परमप्रभु यावे कली मतुइक्व नु आ ग्येरपाइक्व लोव मटीब आन कली क्येक्क लेप्ब। रोमी २:८<sup>9</sup> मेको मुरपुकी गेना हना यो साम्सीशो दुश्शा, प्रभु आ कुल मताइनीम। आ सक्ति डा छेडछेड यो मताइनीम।

10 थमा सुइक्वपुकी चहिं आ जाक्ची नाक्त आ नें ठेयब सेल्शा, थमा सुइक्व नेल्लेमी आ छेडछेड तशा छक लाक्नीम। मारदे हना गेपुकी आंइ शेंशो लोव थमा सुइक्तीनी।

11 मोपतीके गो इन पर्बम प्रार्थना पना पन बाक्नीकी। परमप्रभु यावेमी इन कली ब्रेश्शा, आ ब्रेश्शो शिरशो सेलल, दे गोपुकीमी गेना हना यो, पुंडना पुंडन बाक्नीकी। इन रिश्शो पतीके नु इन थमा सुइश्शो डा गेय आ सक्तिमी पपदल। 12 मो दुश्शा, इं प्रभु येसु आ नें इन पर्बम ठेयब सेल्नीम। गेपुकी आ मुर दुश्शा, मान ताइनीनी। मेको इं परमप्रभु यावे नु प्रभु येसु ख्रीस्त आस शिशी डा गेय बाक्व।

### येसु ख्रीस्त यिचा आ पर्बम

2 आंइ लोकबपुकी, इं प्रभु येसु ख्रीस्त यिशा, गोपुकी नु गुम्चा आ पर्बमी १थिस्सलोनिकी ४:१३-१७<sup>2</sup> इन थुं मक्चन। सोक्तीमी

कोइताक्व देंखु पाइनीम। आंइ ब्रेक्शो चिठी जाक्त, देंखु पाइबमी “प्रभु आ नाक्त जाक्शा नुपत” दे लोव पांतेक्म हना यो, थमा मसुतीन। २पत्रुस ३:१५-१६<sup>3</sup> इन कली दूली शेंतीके शेंब आन कली थमा मसुतीन। मारदे हना प्रभु येसु ख्रीस्त आ नाक्त जाक्चा क्येडा डॉइती परमप्रभु यावे कली मटिथु नेल्ल क्येडा मरिश्शो पाइब का गूब। मेको कली जाम्शा लाइब आ तौ यो देंनीम। १तिमोथी ४:१; १यूहन्ना २:१८<sup>4</sup> मेकोमी “मानेचा डा मारेड मबा” देंब। परमप्रभु यावे नु मानेचा डा थोवक आन क्येडा आंम कली ठेयब सेल्शा, परमप्रभु यावे आ खिंमी निश्शा “गो का ला परमप्रभु यावे नड” देंब। दानीएल ११:३६; मत्ती २४:१५<sup>5</sup> गेपुकी नु बाक्डानु, इन कली मोदेंशो लोव पाता। गेपुकी आं शेंशो ममिन्नीनी? 6 मेको नेल्ल क्येडा मरिश्शो पाइब कली तेक्व कली तुइक्नीनी। मेको तेक्वमी मेको कली देंशो ना ला गूचा गेब। 7 आ मरिश्शो गेय चहिं मुल बाक्व। तन्न मताइसीब। तेक्व मयाक्से सम्म मेको गूने मचाप्ब। 8 नेल्ल क्येडा मरिश्शो पाइब गूचा तवा नोले, प्रभु येसुमी आ जाक्शो नु आ मुइश्शोमी साइक्व। यसैया ११:४; प्रकाश १९:१५, २०<sup>9</sup> मेको नेल्ल क्येडा मरिश्शो पाइबम चहिं सैतान आ सक्ति तशा, चिन्ड नु छक लाक्चा डा गेय पखु पाइब। मत्ती २४:२४; प्रकाश १३:११-१४<sup>10</sup> जाम्शा लाइब आन कली जोल शेंब। मारदे हना मेकोपुकीमी थमा शेंतीक नेंचा मदाक्तेम। मिनु पाप रे ब्रॉइतीक ताक्चा मदाक्तेम। 11 परमप्रभु यावेमी मेको आन कली दूली शेंतीक थमा सुइक्वाइक्व। २तिमोथी ४:४<sup>12</sup> दूली शेंतीक थमा सुइक्वपुकी जाम्शा लाइनीम। मारदे हना थमा लोव थमा मसुइक्थु, मद्रुश्शो गेय दाक्ताक्मे।

### थमा शेंतीकेमी बाक्चा

13 प्रभु आ दाक्शो लोकबपुकी, गोपुकीमी गेना हना यो इन कली मिश्शा, परमप्रभु यावे कली “गे रिश्शो पाइब बाक्नीनी” देंनीकी। मारदे हना परमप्रभु यावेमी इन कली डॉइती रे आ मुर दुम्नीम, दे योवतु। दोपा आ मुर दुम्नीनी देंशा हना, परमप्रभु यावे आ सोक्तीमी इन कली पाप रे डोन वोइश्शा, थमा शेंतीके थमा सुइक्वाइक्व। रोमी ८:३०

14 गोपुकीमी इन कली ग्येरपाइक्व लोव पकानु, मेकोमी इं प्रभु येसु ख्रीस्त आ छेडछेड पाइश्शो मुर दुम्मल, दे इन कली ब्रेक्ताक्व। 15 आंइ लोकबपुकी, खोइल थेक्शा बाक्कीन। आंइ शेंशो मप्रोनीन। गो शोव्रम शेंशो नु चिठीम ब्रेक्शा शेंशो मप्रोनीन। २थिस्सलोनिकी ३:६<sup>16</sup> इं प्रभु येसु ख्रीस्त नु इं आफ परमप्रभु यावे आस शिशीमी इं कली दाक्शा, गेना हना यो थुं बारपाइश्शा, रिश्शो आस गेम्ताक्स। 17 इन थुं बारपाइश्शा, इन कली रिश्शो गेय नु रिश्शो लोव पचा गेम्सेक्ल।

### पावलमी प्रार्थना पुंडशो

3 मिनु आंइ लोकबपुकी, आंइ कली मिश्शा, प्रार्थना पने। आंइ पर्बम परमप्रभु यावे कली मार पुंडचा देंशा हना, इन दातेमी खोदेंशो पा, प्रभु आ लोव तेड तेड साव सुव ब्रशा लल। एफिसी ६:१८-१९; कलस्सी ४:३; १थिस्सलोनिकी ५:२५<sup>2</sup> गोपुकी दूली पाइब नु मरिश्शो मुर रे ब्रॉइचा तकल,

दे प्रार्थना पने। मारदे हना मेकोपुकी थमा मसुइक्ब बाक्नीमी।<sup>३</sup> प्रभुमी चहिं इन कली दाक्शा मप्रॉइब। इन थुं बारपाइक्ब। मरिश्शो रे डोन वोइश्शा, इन कली कोव्रब। *१थिस्सलोनिकी* ५:२४; *यूहन्ना* १५:१७<sup>४</sup> गोपुकीमी इन कली मार देका, मेको पना पन बाक्शा, नोले यो पाइनीनी। प्रभुमी इन कली वारच पाइब, दे तुइक्नीकी। *२कोरिन्थी* ७:१६; *गलाती* ५:१०<sup>५</sup> प्रभुमी इन कली परमप्रभु यावे आ दाक्तीके नु ख्रीस्त आ फाल्तीक रुप्पदल।

गेय मपथु मबाक्चा

<sup>६</sup> आंइ लोकबपुकी, गोपुकीमी इं प्रभु येसु ख्रीस्त आ नेमी इन कली मार देनीकी देंशा हना, गोपुकी नु बाक्शो लोकब सु सुम गेय पचा मदाक्थु बाक्मा, मोदेशो पा आंइ शेंशो मटीमे, मेको नु काइ मबाक्कीन। *२थिस्सलोनिकी* २:१५; *मत्ती* १८:१७; *रोमी* १६:१७<sup>७</sup> गोपुकी दोपा आंइ खोदेशो दुम्चा माल्नीनी, मेको आंमा तुइक्नीनी। इन दातेमी बाक्कानु, शुश गेय पाइतक। *१थिस्सलोनिकी* १:६<sup>८</sup> सुइ आन के मोश मजक। गोपुकीमी नाक्दो नाक्त मदेंथु, सुइ कली श्येत मगेचा, दे गेय पना पन बाक्तक। *१थिस्सलोनिकी* २:९<sup>९</sup> मोश जचा अधिकार बाक्त हना यो, दोपा रिश्शो पचा इन कली कोंइचा, दे मोदेशो पाइतक। *मत्ती* १०:१०; *प्रेरित* २०:३५; *फिलिप्पी* ३:१७<sup>१०</sup> गोपुकीमी “सुमी गेय मपाइबा, मेकोमी जचा मतवल” दे डोंइती रे गोपुकी

नु बाक्शा देंतक।<sup>११</sup> इन दातेमी का निक्शीमी काइ गेय मपथु, हिरशा गाक्शा मो बाक्नीम, देंशो नेंतक।<sup>१२</sup> गोपुकीमी मोदेशो मुर आन कली प्रभु येसु ख्रीस्त आ नेमी “रिश्शो गेय पने। आंम आंम जचा थोवक जशा बाक्कीन” दे अरेनीकी। *१थिस्सलोनिकी* ४:११<sup>१३</sup> आंइ लोकबपुकी, रिश्शो गेय पचा कली गेनायो मदने। *गलाती* ६:९

<sup>१४</sup> मिनु सु सुमी आंइ ब्रेक्शो लोव मटीमे, मेको आन कली तुइश्शा वोतीन। मिनु मेकोपुकी नु मबाक्कीन। मोदेशो पशो तशा, मेको मुरपुकी मुने दोक्नीम।<sup>१५</sup> मोदेशो पशा यो, मेको मुर कली जोरी सनु खोदेशो पा ममिप्तीन। थमा सुइक्ब लोकब कली खोदेशो अर्ती गेने। *१थिस्सलोनिकी* ५:१४

नोले डा लोव

<sup>१६</sup> थुं नाइक्चा गेब प्रभुमी दोदेशो बाक्तीनी हना यो, इन कली गेना हना यो थुं नाइक्चा गेवल। प्रभु गोपुकी नेल्ल नु बाक्ल। *यूहन्ना* १४:२७<sup>१७</sup> गो पावलमी एको चिठी आंमान ब्रेक्ताक्ड। तेको चिठी ब्रेक्ताक्ड हना यो, ओदेब ब्रेक्नुड, दे तुइक्नीनी। *१कोरिन्थी* १६:२१; *गलाती* ६:११; *कलस्सी* ४:१८<sup>१८</sup> इं प्रभु येसु ख्रीस्त आ शिशी गोपुकी नेल्ल नु लील।

## १ तिमोथी

एको चिठी पावलमी तिमोथी कली डोंइती ब्रेक्शो बाक्त।

तिमोथीम पावल नु गेय पवा बाक्त। मेकोमी थिस्सलोनिकी सहर डा थमा सुइक्व आन कली शेंशो बाक्त। पावलमी मेको कली अर्को सहरम यो शेंशो सोइक्ता बाक्त। पावलमी एको चिठी गेना ब्रेक्शो बाक्मे, मेको बर्स मर्देशो बाक्त।

शेंतीक लोव

१. ठीक शेंतीके मार बाक्ब
२. गुम्तीक खिं डा मुर दोपा बाक्चा माल्नीम
३. रिम्शो थमा सुइक्तीके मार बाक्ब
४. मुर आन कली मार शेंचा माल्ब
५. धर्म पतीके शोर गाक्शो बाक्ब नेल्ल जम्मा पा गे येसु ख्रीस्त आ पर्वम ला शेंदो। आंम पतीके होस पावो।

### डोंइती डा लोव

१ ख्रीस्त आ सोइश्शो गो पावल नड। इं कली पाप रे प्रॉइब परमप्रभु यावेमी “ख्रीस्त येसु आ सोइश्शो दुमो” दे माइक्ती। इं कली ब्रॉइचा गेनुड, दे कबल पाइब ख्रीस्त येसुमी यो मोन माइक्ती। *कलस्सी १:२७*  
 २ गे थमा सुइक्ब, आं दाक्शो तौ खोर्देशो तिमोथी, इ कली चिठी ब्रेक्ताकड। इं आफ परमप्रभु यावे नु प्रभु येसु ख्रीस्त आस दाक्चा गे नु बाक्ल। आस शिशोमी इ कली थुं नाइश्शा बाक्चा गेम्सेक्ल। *प्रेरित १६:१-२; तीतस १:४*

### दूली शेंब आन पर्वम ब्रेक्शो

३ गो मासीडोनीया रागी लडानु, गे एफिसस सहरम बाक्को। मेकर मुर का निक्शीमी दूली लोव शेंनीम। मोर्देशो मर्शेंदीन, दे अरेवो। *प्रेरित २०:३*  
 ४ मेकोपुकीमी मुरुमी सेल्शो लाइश्शो कथा नु किक्की पिपी आन पर्वम शेंना शेंन बाक्नीम। मोर्देशो शेंतीके काम मलाप्चा डा बाक्शा, परमप्रभु यावे आ शेंशो थमा सुइक्तीके मबारपाइक्ब। *१तिमोथी ४:७* ५ इं शेंतीके चहिं रिम्शो थुं, रिम्शो थुं डा मिम्तीके नु रिम्शो थमा सुइक्तीके रे जाक्शो शुश दाक्मुचा आ पर्वम बाक्ब। *मत्ती २२:३७-४०; रोमी १३:१०; गलाती ५:६* ६ का निक्शीमी मेको शेंतीक प्रॉइशा, शोर गाक्शो लोव पाइनीम। *१तिमोथी ६:४, २०* ७ मेकोपुकीमी परमप्रभु यावे आ अरेशो लोव शेंब दुम्चा दाक्नीम, तन्न आंम देंशो लोव नु आंम शेंशो आंमान मरुप्ब बाक्नीम।

८ परमप्रभु यावे आ अरेशो लोव ठीक पाइब आन कली रिम्शो दुम्ब, दे गो तुइक्नय। *रोमी ७:१२* ९ ठीक पाइब आन कली मब्रेक्शो बाक्ब, दे यो तुइक्नय। तन्न परमप्रभु यावे आ अरेशो लोव मपाइब, मटीब, परमप्रभु कली ममिम्ब नु मरिम्शो पाइब आन कली ब्रेक्शो बाक्ब। परमप्रभु यावे रे डोन बाक्ब, रागी कली ला मिम्ब, आम आफ कली साइक्ब, आंम ममा कली साइक्ब नु मुर आन कली साइक्ब आन कली ब्रेक्शो बाक्ब। *१कोरिन्थी ६:९-११* १० तेल्लेम पाइब, ग्रॉग्रा दिचा डा गेय पाइब, मुर आन कली खुइ पा लेयब, जोल पाइब, जोल पा कसम जाइब नु आन गेय परमप्रभु यावे आ शेंशो नु मगारब मुर आन कली ब्रेक्शो बाक्ब। ११ मेको थमा शेंतीके नु नेल्ल आसीक पाइश्शो परमप्रभु यावे आ ग्येरपाइक्ब लोव शेंब सेल्ली।

### परमप्रभु आ दाक्तीक ठेयब बाक्ब

१२ एको लोव शेंचा कली बोल गेब इं प्रभु ख्रीस्त येसु कली “गे रिम्शो पाइब बाक्नीनी” देंनुड। मारदे हना ख्रीस्त येसुमी आं पर्वम “थमा सुइक्चा डा मुर बाक्ब” दे आ गेय पाइब सेल्ली। *प्रेरित ९:१५; १कोरिन्थी १५:९-१०; गलाती १:१३-१६* १३ डोंइती गो मेको कली शुक्शी पाइब, श्येत गेब नु शुश

मरिम्शो पाइब बाक्ती। तन्न मतुइक्ब नु थमा मसुइक्ब बाक्तीके परमप्रभु यावे आ शिशो ताता। १४ इं प्रभुमी आ दाक्शो थमा सुइक्तीके नु दाक्तीके थुं ब्रीशा, क्युप्चा डा पा गेती। मेको निम्फा ख्रीस्त येसु नु बाक्नीस। १५ मरिम्शो पाइब आन कली नरक रे प्रॉइचा, दे ख्रीस्त येसु रागीम जाक्त। एको लोव थमा बाक्ब नु थमा सुइक्चा माल्शो बाक्ब। गो नेल्ल क्येडा मरिम्शो पाइब नड। *लूका १९:१०* १६ गो परमप्रभु यावे आ शिशो मारदे ताता देंशा हना, गो नेल्ल क्येडा मरिम्शो पाइब दुम्ती हना यो, येसु ख्रीस्त आ फाल्तीक सक्ति कोंइचा, दे शिशो ताता। मेको कोंइतीके नोले थमा सुइक्ब नु गेना हना यो, परमप्रभु यावे नु बाक्चा ताइब आन कली बाक्ब। १७ गेना हना यो मबेक्थु बाक्ब पिप कली सुइमी तने मचाप्नीम। मेको कांइचीक परमप्रभु, परमप्रभु यावे बाक्ब। गेना हना यो मान ताक्चा नु छेडछेड मेको केन बाक्ब। आमैन।

१८ आं तौ तिमोथी, परमप्रभु यावेमी इ पर्वम पशो लोव तुइक्पाइक्ती। मेको लोव इ कली मिम्पाइक्नुड। मेको लोव मिम्शा ग्राने चाप्नेवे। *१तिमोथी ४:१४; १तिमोथी ६:१२; यहूदा ३* १९ थमा सुइक्तीके नु इ थुं डा रिम्शो मिम्तीके टिशा बाक्को। आन थुं डा रिम्शो मिम्तीके कली मटीब का निक्शीमी थमा सुइक्चा प्रॉइतेक्म। *१तिमोथी ३:९; १तिमोथी ६:१०* २० मेको आन दातेमी हीमेनेयस नु अलेक्जन्डर बाक्नीसी। परमप्रभु यावे आ पर्वम मरिम्शो लोव मपचा, दे शेंचा कली, गो मेको आस कली सैतान आ गुइमी जिम्मा गेतासी। *२तिमोथी २:१७; १कोरिन्थी ५:५*

### थमा सुइक्ब आन पुंइशो

२ आं के नेल्ल क्येडा ठेयब अरेशो लोव मार बाक्ब देंशा हना, परमप्रभु यावे नु बाक्शा, मेको नु लोव पचा नु नेल्ल मुर आन पर्वम पुंइना पुंइन बाक्चा माल्नय। मेको आन पर्वम “गे मेको आन कली रिम्शो पाइतीनी” दे परमप्रभु यावे कली ठेयब सेल्चा माल्नय। २ पिप नु सरकार डा ठेयब अधिकार पाइश्शो मुर आन पर्वम यो मोर्देशो पुंइतीक लोव पचा माल्नय। मो पा गो रिम्शो, थुं नाइश्शा, इं गेयमी परमप्रभु यावे कली मिम्चा, दाक्चा नु नेल्ल गेयमी ठीक दुम्शा बाक्ब। ३ मोर्देशो मरिम्शो गेय प्रॉइब परमप्रभु यावे आ डोंइती रिम्शो नु दाक्चा डा बाक्ब। ४ परमप्रभु यावेमी नेल्ल मुर आन कली मरिम्शो गेय रे प्रॉइश्शा, थमा लोव तुइक्पाइक्चा दाक्ब। *इजीकीएल १८:२३; रोमी ११:३२; २पत्रुस ३:९* ५ परमप्रभु यावे का ला बाक्ब। मेको नु मुर आन कली गारपाइक्चा कली येसु ख्रीस्त रागीम जाक्शा, मुर दुम्शो यो का ला बाक्ब। *हिब्रू ९:१५* ६ मेकोमी मुर नेल्ल आन कली पाप रे प्रॉइचा, दे आंम कली जिम्मा गेप्तु। एको लोव मेना रे शेंचा गोम्तेक्म। *गलाती १:४; गलाती २:२०; तीतस २:१४* ७ मोपतीके परमप्रभु यावेमी एको लोव शेंब नु ख्रीस्त आ सोइश्शो सेल्ली। गो जोल मपथु, थमा लोव पाइनुड। इस्त्राएली आन कली ममाइ, तन्न रागी रागी डा मुर आन कली थमा

सुइक्तीके आ पर्वम शेंब नु थमा लोत्र शेंब सेल्लती। *२तिमोथी १:११; गलाती २:७-८*

थमा सुइक्ब आन कली शेंशो

८ तेइ तेइ डा वोंइश मुरपुकीमी प्रार्थना पचा माल्नीम। परमप्रभु यावे कली थुं नेल्लेम थमा सुइक्ब गे गुइ पोक्शा, मगाइक्ब नु मजीब दुश्शा, परमप्रभु यावे नु लोत्र पशो तचा दाक्नुड।<sup>९</sup> मीश मुरपुकी यो ठीक पा फेक्शा, गेय पचा डोंइती मिम्शा, रिम्शो बाक्चा माल्नीम। मोपा चांमी मार मार वोइश्शा लामा प्रोव्रशा, सुन मोती नु शुश क्येट लाइब वामी मग्योम्समल। *१पत्रुस ३:३-५*<sup>१०</sup> परमप्रभु यावे कली मिम्ब मीश मुर रिम्शो पतीकेमी “गो परमप्रभु यावे कली दाक्ब नड” दे कोंइनीम। *१तिमोथी ५:१०*<sup>११</sup> मीश मुरपुकीमी टीब दुश्शा, रिम्शो पा नेंशा शेंसमल। *एफिसी ५:२२*<sup>१२</sup> वोंइश मुर आन कली शेंतीक अधिकार मीश मुर आन कली मगेनुडमी। मेकोपुकी सिक्सी पा बाक्मल। *१कोरिन्थी १४:३४; उत्पत्ती ३:१६*<sup>१३</sup> डोंइती आदम, नोले हच्चा सेल्शो बाक्त।<sup>१४</sup> आदम डोंइती हेंथे मगाक्शो बाक्त। मीश मुर चहिं मिक्च सिल्चा पुंइसीशा, परमप्रभु यावे कली मटीब दुश्शो बाक्त। *उत्पत्ती ३:६*<sup>१५</sup> मो हना यो मीश मुरपुकी रागीम आल जरमेसे डा मेरे ब्रोंइचा ताइनीम। तन्न मेकोपुकी थमा सुइक्ब दुश्शा, दाक्मुशा, परमप्रभु यावे आ मुर दुश्शा नु ठेयब मलेत्थु बाक्चा माल्नीम। *१तिमोथी ५:१४; तीतस २:४-५*

थमा सुइक्ब आन कली कोव्रब शेंशो

३ सुमी थमा सुइक्ब आन कली कोव्रब दुश्चा दाक्बा, मेको ठेयब नु रिम्शो गेय माल्ब बाक्ब। एको लोत्र थमा बाक्ब। *प्रेरित २०:२८; तीतस १:५-९*<sup>२</sup> थमा सुइक्ब आन कली कोव्रब काइ दोस गेचा मपुंइसीशो बाक्चा माल्ब। मीश का के ला वोंइश बाक्चा माल्ब। गेय पचा डोंइती मिम्ब, आ गेय नेल्ल कली रिम्शो पाइब, मुर आन कली बास गेब नु रिम्शो शेंब बाक्चा माल्ब।<sup>३</sup> राकसी शांबु तूशा दुक्ब नु तुप्ब मुर थमा सुइक्ब आन कली कोव्रब दुम्ने मचाप्ब। थमा सुइक्ब आन कली कोव्रब रिम्शो थुं पाइश्शो बाक्चा माल्ब। जिचा पोक्ब नु क्येट शुश दाक्बमी एको गेय पने मचाप्ब।<sup>४</sup> आंम खिं डा मुर आन कली रिम्शो कोव्रब बाक्चा माल्ब। आंम आलपुकी टीब नु मुर नु रिम्शो पाइब बाक्चा माल्नीम।<sup>५</sup> मारदे हना आंम खिं डा मुर आन कली रिम्शो कोव्रने मचाप्ब बाक्त हना, दोपा परमप्रभु यावे आ खिं डा मुर आन कली कोव्रने चाप्बा डा? <sup>६</sup> थमा सुइक्चा नक गोशो मुर थमा सुइक्ब आन कली कोव्रब दुम्ने मचाप्ब। मारदे हना मेको बोरशा ठेयब लेश्शो दुम्ब। मिनु सैतानमी मेको कली रेश्शा, खतम सेल्ब।<sup>७</sup> थमा मसुइक्बपुकीमी यो थमा सुइक्ब आन कली कोव्रब आ पर्वम रिम्शो लोत्र पचा माल्नीम। मोदेंशो मदुम्त हना, दोस गेचा पुंइसीब। मिनु सैतान आ ग्याइलीम रेप्ब।

गुम्तीकेम गेय पाइब आन कली शेंशो

८ थमा सुइक्ब आन गुम्तीक खिं डा गेय पाइबपुकी यो रिम्शो मुर बाक्चा माल्नीम। लोत्र क्याल्ब, शुश राकसी शांबु तूब नु क्येट ला मिम्बमी मोदेंशो गेय पने मचाप्नीम। *प्रेरित ६:३; फिलिप्पी १:१*<sup>९</sup> मेकोपुकीमी रिम्शो थुंमी थमा सुइश्शा, मेकेर डा खुइश्शो लोत्र मिम्ने चाप्ब दुश्चा माल्नीम। *१तिमोथी १:२९*<sup>१०</sup> डोंइती गे मेको आन थुं कोव्रचा माल्नेवे। मिनु शुश रिम्शो पाइब बाक्ब, दे तुइश्शा ला थमा सुइक्ब आन गुम्तीके खिंमी गेय पचा कली वोइक्ने चाप्नेवे।

<sup>११</sup> आ मीश यो रिम्शो बाक्शा, डुलेथ मगाक्थु, गेय पचा डोंइती मिम्ब बाक्चा माल्ब। मेको आ गेय नेल्ले रिम्शो पा पचा माल्ब। *तीतस २:३*<sup>१२</sup> थमा सुइक्ब आन गुम्तीके खिंमी गेय पाइब मीश का आ वोंइश दुश्चा माल्ब। मेकोमी आ आल नु आंम खिं डा मुर नेल्ल आन कली रिम्शो पा कोव्रब दुश्चा माल्ब।<sup>१३</sup> मोदेंशो पाइबमी थमा सुइक्ब आन गुम्तीकेमी आंम कली रिम्शो नें सेल्नीमी। ख्रीस्त येसु कली आंम थमा सुइक्तीके शुश बारपाइक्नीमी।

थमा सुइक्तीके आ खुइश्शो लोत्र

<sup>१४</sup> गो इ कली रीब पा गुम्नुड, दे आस पाइनुड। मिनु इ कली ओदेंशो अरेतीक लोत्र मारदे ब्रेक्ताक्ड देंशा हना,<sup>१५</sup> गो नोले दुम्ती हना, परमप्रभु यावे आ खिं डा मुरपुकी दोपा बाक्चा माल्नीमी, मेको तुइक्त्तमेक्ल। मेकोपुकी ब्रोंइचा गेब परमप्रभु यावे आ गुम्तीक खिं डा मुर बाक्नीम। मेको थमा लोत्र डा थाम नु बोल्यो हिरशो गारो खोदेंशो बाक्नीम। *एफिसी २:१९-२२*<sup>१६</sup> इ परमप्रभु यावे कली थमा सुइक्तीके थम खुइश्शो बाक्ब। मेको मार बाक्ब देंशा हना “मेको मुर दुश्शा, रागीमी जरमेसाक्व। परमप्रभु यावे आ सोक्तीमी ‘परमप्रभु यावे आ तौ बाक्ब’ दे सांकछी गेत्तु। परमप्रभु यावे आ स्वर्ग डा गेय पाइबपुकीमी मेको कली ताम्नेक्म। आ नें मार बाक्बा, दे रागी रागी डा मुर आन कली शेंताक्मे। रागी रागी डा मुरपुकीम मेको कली थमा सुइक्त्तमेक्म। मिनु मेको परमप्रभु यावे आ छेडछेडमी लाइक्चा पुंइसाक्व” देंशो बाक्ब। *यूहन्ना १:१४; रोमी १:४; प्रेरित २८:२८; मर्कूस १६:१९; एफिसी १:२०-२१*

दूली शेंब आन शेंतीक

४ परमप्रभु यावे आ सोक्तीमी “नोले डा नाक्तीम का निक्शी थमा सुइक्बपुकीमी थमा सुइक्चा प्रोंइनीम। मेको मुरपुकीमी हेंथे लां कोंइब नु जोल पाइब वोल आन शेंशो नेंनीम” देंत। *मत्ती २४:२४; रथिस्सलोनिकी २:३; २तिमोथी ३:१; २पत्रुस ३:३; १यूहन्ना २:१८; यहूदा १८*<sup>२</sup> मेको मुर आन थुं डा मिम्तीके खतम दुम्ब। मिनु जोल शेंनीम।<sup>३</sup> मेकोमी “ग्युंवे पचा मदुम्ब, का निक्शी थोव्रक जचा मदुम्ब” दे शेंनीमी। परमप्रभु यावेमी थमा सुइक्ब आन कली सेल्शा गेशो मेको जचा थोव्रक “गे रिम्शो पाइब बाक्नीमी” दे जचा ब्वचा दुम्ब। *उत्पत्ती ९:३; १कोरिन्थी १०:३०-३१; कलस्सी २:२३*<sup>४</sup> तन्न परमप्रभु यावे आ सेल्शो नेल्ल रिम्शो बाक्ब। मुरुमी परमप्रभु यावे कली “गे रिम्शो पाइतीनी” दे नेल्ल जचा ब्वचा दुम्ब। *उत्पत्ती १:३१; मत्ती १५:११; प्रेरित १०:१५*<sup>५</sup> मारदे हना परमप्रभु यावे आ लोत्र नु प्रार्थनामी मेको नेल्ल परमप्रभु यावे आ गेशोन बाक्ब, दे तुंइसीब।

तिमोथी आ गेय

<sup>६</sup> गे एको लोत्र थमा सुइक्ब लोक्ब आन कली शेंताक्वी हना, ख्रीस्त येसु आ रिम्शो गेय पाइब दुम्नेवे। गे थमा सुइक्तीक डा लोत्र नु रिम्शो शेंतीके तुइक्ना तुइक्न आ नोले खोइक्नेवे। *२तिमोथी २:१५*<sup>७</sup> तन्न मुरुमी सेल्शो नु मरिम्शो कथापुकी मनेनो। परमप्रभु यावे कली मिम्शा दाक्शा बाक्को। *१तिमोथी ६:२०; २तिमोथी २:१६, २३; २तिमोथी ४:४; तीतस १:१४; तीतस ३:९*<sup>८</sup> रां कली रिम्शो पतीके इच्का ला रिम्शो बाक्ब। परमप्रभु यावे कली मिम्शा दाक्तीके नेल्ल क्येडा रिम्शो बाक्ब। मारदे हना मुल कली रिम्शो बाक्ब नु गेना हना यो परमप्रभु यावे नु बाक्चा कली नोले यो रिम्शो बाक्ब। *१तिमोथी ६:६*<sup>९</sup> एको देंशो लोत्र थमा बाक्ब नु नेल्ल थमा सुइक्चा माल्शो बाक्ब।<sup>१०</sup> एको लोत्र शेंशा श्येत जशा, शेंतीक गेय पाइनय। मारदे हना ब्रोंइचा गेब परमप्रभु यावे कली आस पाइनय। मेको नेल्ल मुर आन कली प्रोंइब बाक्ब। मोपा थमा सुइक्बपुकी पाप रे ब्रोंइचा ताइनीम।

<sup>११</sup> एको लोत्र अरेशा शेंदो।<sup>१२</sup> गे ठिटा बाक्ते हना यो, लोत्र पतीकेमी, मुर नु गेय पतीकेमी, दाक्तीकेमी, थमा सुइक्तीकेमी नु प्रांग्रा मदिशोमी थमा सुइक्ब नेल्ल आन कली कोंइतीक दुमो। मिनु तोक्शो लोत्र पचा मगेमी। *तीतस २:१५; २तिमोथी २:२२*<sup>१३</sup> गो मजाक्डा सम्म मुर आन कली परमप्रभु यावे आ लोत्र पडेशा, नेंपाइक्ना पाइक्न नु शेंना शेंन बाक्को।<sup>१४</sup> थमा सुइक्ब आन शेंब खाल्पापुकीमी इ पिया तारी गुइ वोइश्शा, परमप्रभु यावेमी तुइक्पाइश्शो लोत्र पशा, इ कली गेय पतीके सक्ति गेशो बाक्त। मेको गेय रिम्शो पा पावो। *१तिमोथी १:१८; १तिमोथी ५:२२; प्रेरित ६:६; प्रेरित ८:१७; २तिमोथी १:६*<sup>१५</sup> मोपा बाक्को। मेको इ पशो तशा, नेल्लेमी इ थमा सुइक्तीके बारशो तामेक्ल।<sup>१६</sup> आंम कली नु इ शेंतीके कली

रिश्नो पा होस पावो। मोदेशो पा, गे आंम इ कली नु इ लोव्र नेंब आन कली श्येत रे प्रॉइनेवे। रोमी ११:१४

मुर नेल्ल आन कली रिश्नो पावो

5 शेंब खाल्पा आन कली महडक्तो, तन्न आंम आफ कली खोदेशो पा लोव्र पावो। ठिटा वॉइश मुर आन कली लोक्ब खोदेशो मिम्तो। लेवी १९:३२; तीतस २:२<sup>२</sup> मीश मुर आन कली इम्मा खोदेशो मिम्तो। ठिटी आन कली समी खोदेशो मिम्तो। मोपा नेल्ले रिश्नो पावो।

वॉइश बेक्शो मीश मुर आन पर्वम

3 आन वॉइश बेक्शो रिश्नो पाइब मीश मुर आन कली ठेयब सेलो।  
4 आन वॉइश बेक्शो मीश मुर आ तमी तौ, चच युइ बाक्तेक्म हना, मेकोपुकीम आंम खिं डा मुर आन कली रिश्नो गेय पा कौइचा माल्नीम। आम आफ आस कली रिश्नो पचा माल्नीम। मेको परमप्रभु यावे आ डोंइती शुश रिश्नो बाक्ब। 5 आ वॉइश बेक्शो मीश मुर रिश्नो बाक्त हना, परमप्रभु यावे कली ला मिम्ब। मेकोमी नाक्दो नाक्त प्रार्थना पा पुंइना पुंइन बाक्ब। लूका २:३७ 6 आ दला दाक्स पाइब चहिं सेस बाक्त हना यो, बेक्शो खोदेशो दुम्ब। 7 एको लोव्र शेंदीमी। मेकोपुकी दोस गेचा मपुंइसीब दुम्मल। 8 सुमी आ खिं डा मुर आन कली मकोव्रबा, मेको आ थमा सुइक्तीके जाम्शा लशा, थमा मसुइक्ब आन क्येडा यो मरिश्नो दुम्ब। मत्ती १५:५-६  
9 वॉइश बेक्शो मीश मुर ६० बर्स दुम्ने थुम्शा ला, वारच पचा कली आ नें ब्रेक्सीब। मेको वॉइश का आ मीश ला दुम्चा माल्ब। 10 आ तमी तौ रिश्नो पा कोल्पाइश्शा, मुर आन कली बास बाक्चा गेशा, थमा सुइक्ब आन खोइली चिक्चा, श्येत जाइब आन कली वारच पशा, नेल्लेमी रिश्नो पना पन बाक्ब, दे मुरपुकीमी तुइश्शो मीश मुर आ नें ला ब्रेक्सीब। हिब्रू १३:२; यूहन्ना १३:१४ 11 वॉइश बेक्शो ठिटी मीश मुर आन कली वारच पचा कली आन नें मब्रेक्चा। मारदे हना आन दला दाक्स पा ख्रीस्त कली प्रेंताक्म हना, ग्युंवे पचा ला मिम्नीम। 12 मिनु आन डोंइती देंशो प्रॉइशा, दोस ताइब दुम्नीम। 13 मेकोपुकी मुर आन खिं खिं हिरथ लाइनीम। अल्सी ला ममाइ, मर्देचा डा लोव्र यो शुश पाइनीम। 14 मोपतीके वॉइश बेक्शो ठिटी मीश मुरपुकीमी ग्युंवे पा, आल थिशा, आन खिं डा गेय पामेक्ल। मो पाम्तेक्म हना, मरिश्नो पा गाक्चा मताइनीम। अरुमी यो थमा सुइक्ब आन पर्वम मरिश्नो लोव्र पचा मताइनीम। १तिमोथी २:१५; १कोरिन्थी ७:९ 15 का निक्शीमी सैतान कली खोइक्चा गोम्तेक्म। 16 थमा सुइक्ब आन खिंमी वॉइश बेक्शो मीश मुरपुकी बाक्तेक्म हना, मेको आन कली वारच पामेक्ल। मिनु गुम्तीके कली श्येत मदुम्थु, वॉइश बेक्शा, का ला लीशो मीश मुर आन कली वारच पचा ताइब। प्रेरित ६:१

गुम्तीके डा गेय पाइब

17 गुम्तीके खिंमी श्येत पा लोव्र पाइब नु शेंब खाल्पा आन कली निक्शी खेयप मान पा क्येट गेचा माल्नीम। प्रेरित १४:२३; रोमी १२:८ 18 परमप्रभु यावे आ लोव्रमी “ब्यफ कली दांइ पपाइश्शोनु, फुडला मपाइक्चा” मिनु “गेय पाइब आन गाल्च ताइब बाक्नीम” दे ब्रेक्शो बाक्ब। ब्यक्स्था २५:४; १कोरिन्थी ९:९; लूका १०:७ 19 मुर कामी गुम्तीक डा शेंब खाल्पा कली दोस गेप्टु हना, सांकछी निक्शी सां मबाक्थु, थमा मसुतो। ब्यक्स्था १९:१५; मत्ती १८:१६ 20 सु मरिश्नो पना पन बाक्मे, मेको कली थमा सुइक्ब आन डोंइती हुइक्तो। मिनु मेको नेंब नेल्लेमी मरिश्नो पचा हिंनीम। गलाती २:१४; मत्ती १८:१५-१७ 21 परमप्रभु यावे, ख्रीस्त येसु नु योव्रशो परमप्रभु यावे आ स्वर्ग डा गेय पाइब आन डोंइती “मुर आन कुल मकोव्रथु, आं देंशो नेल्ल पावो” दे इ कली अरेनुड। मुर आन कुल कोव्रशा, मारेइ मपावो। 22 मुर आन कली ब्रो थिशा, आन तार गुइ वोइश्शा, प्रार्थना मपावो। मुर आन मरिश्नो पतीकेमी मगरो। मरिश्नो रे डोन बाक्को। १तिमोथी ४:१४

23 डोंइती डा खोदेशो पा ब्वाक्कु ला मतूडो। इ कोव्रज रोइ पतीके इक्का अडगुर शांबु ब्वाइश्शा तूडो।

24 मुर का निक्शी आन मरिश्नो पशो तुंइसीब। सजाइ ताइनीम, दे यो तुंइसीब। का निक्शी आन मरिश्नो पशो चहिं नोले ला तुंइसीब। 25 मोपा मुर का निक्शी आन रिश्नो पशो मतुंइसाक्व हना यो, खुइश्शा लीने मचाप्नीम।

वाइलीम वाइल आन पर्वम शेंशो

6 वाइलीम वाइल नेल्लेमी आन होव्रप मान ताक्चा शिरशो बाक्नीम, दे मिम्चा माल्नीम। मोपा मुरपुकीमी परमप्रभु यावे आ नें नु आ शेंतीके आइक्च मसेल्लीम। एफिसी ६:५; तीतस २:९-१०<sup>२</sup> सु सु आन होव्रप थमा सुइक्ब बाक्मा, मेको आन पर्वम “थमा सुइक्ब लोक्ब दुम्शा, मान गेचा ममाल्नुड” दे ममिम्तमेक्ल। मेकोपुकीमी डोंइती क्येडा रिश्नो पचा माल्नीमी, दे मतो। मारदे हना मेको आन गेय गेब थमा सुइक्ब नु दाक्शो मुर दुम्त। मोदेशो पचा शुश शेंदो। फिलेमोन १६

तिमोथी नु थमा सुइक्ब आन कली अरेशो

3 सुमी अरु शेंतीक शेंबा, मेकोमी इं प्रभु येसु ख्रीस्त आ थमा लोव्र नु आ शेंतीके नु मगारचा डा शेंब। मेको आं देंशो थमा लोव्र चहिं परमप्रभु यावे कली मिम्ब नु दाक्ब थुं रे बाक्ब। २तिमोथी १:१३ 4 मेको अरु लोव्र शेंब ठेयब लेशो मारेइ मजोक्ब बाक्नीम। आन लोव्र ला आ तार पशा, जिचा पोक्चा माल्नीम। मेकोपुकीमी गेहे पाइब, जीब, मरिश्नो लोव्र पाइब नु मरिश्नो मिम्ब सेल्लीम। २तिमोथी २:१४; तीतस ३:१०-११ 5 मेकोपुकीमी मुर आन दातेमी जिचा पोक्नीम। आन थुं गशो खोदेशो दुम्शा, थमा लोव्र रुप्ने मचाप्नीम। परमप्रभु यावे कली मिम्चा, दाक्चा क्येट चेम्तीके बाक्ब, दे मिम्नीम। 6 परमप्रभु यावे कली बोल्यो थमा सुइक्चा चहिं थुं नाइक्तीक बाक्ब। १तिमोथी ४:८; मत्ती ६:२५-३४; फिलिप्पी ४:११-१२; हिब्रू १३:५ 7 मारदे हना गोपुकीम जरमेशोनु, मारेइ पने मचाक्नय। बेक्शोनु यो मारेइ मलाइक्नय। अय्युब १:२१; भजन संग्रह ४९:१८; उपदेसक ५:१४ 8 जचा फेक्चा गाप्त हना, ग्येरसय। हितोपदेस ३०:८ 9 तन्न सु सु शुश क्येट थीब दुम्चा दाक्नीमी, मेको आन थुं थाम्चा पुंइसीशा, ग्याइलीम रेशो खोदेशो पा, निप्स मपाइश्शो नु श्येत जाइब दुम्नीम। आंम कली खतम सेल्सीशो बाक्नीम। हितोपदेस २८:२२; मत्ती १३:२२ 10 क्येट कली दाक्ब मरिश्नो आन क्येडा यो मरिश्नो बाक्ब। मोपा क्येट दाक्ब का निक्शीमी थमा सुइक्तीके प्रॉइशा, आंम थुं कली तूशो खोदेशो पा शुश खाइक्पाइक्तेक्म। एफिसी ५:५; १तिमोथी १:१९

11 मोपतीके गे परमप्रभु यावे आ मुर दुम्शा, मेको नेल्ल रे डोन बाक्को। ठीक पतीके, परमप्रभु यावे कली मिम्शा दाक्चा, थमा सुइक्चा, मुर आन कली दाक्चा, थमा सुइक्चा मप्रॉइचा नु ब्रेम्शो दुम्चा ला मिम्तो। २तिमोथी ३:१७; २तिमोथी २:२२ 12 थमा सुइश्शा ग्राडो। “गेना हना यो परमप्रभु यावे नु बाक्ब दुम्ती” दे मिम्तो। गे शुश मुर आन डोंइती इ थमा सुइश्शो आ पर्वम रिश्नो लोव्र पाप्तीवी। मेना गे गेना हना यो ब्रॉइशा बाक्चा ताइब, दे ब्रेत्वा पुंइसीशो बाक्ते। १तिमोथी १:१८; १कोरिन्थी ९:२५-२६; २तिमोथी ४:७; १तिमोथी ४:१४; हिब्रू ३:१ 13 नेल्ल आन कली ब्रॉइचा गेब परमप्रभु यावे नु ख्रीस्त येसु पन्तीयस पिलातस कली रिश्नो सांकछी गेब बाक्त। गो इ कली परमप्रभु यावे नु ख्रीस्त येसु आस डोंइती अरेनुड। यूहन्ना १८:३६-३७; प्रकाश १:५ 14 मार अरेनुड देंशा हना, इ प्रभु येसु ख्रीस्त मजाक्म सम्म गे मेको आ शेंशो लोव्र मखाल्थु शेंदीमी। मिनु सुइमी दोस गेचा मतामेक्ल। 15 येसु ख्रीस्त जाक्मेनु, नेल्ल आसीक तशा, नेल्ल सक्ति पाइश्शो पिप आन पिप नु प्रभु आन प्रभु दुम्शा जाक्त। ब्यक्स्था १०:१७; प्रकाश १७:१४ 16 मेको ला गेनायो मबेक्ब। सुइ आन कोव्रने मचाप्चा डा पा छेडछेडमी बाक्ब। सुइमी मेको कली गेनायो मताम। तने यो मचाप्नीमी। मेको मान तशा नेल्ल क्येडा सक्ति पाइश्शो बाक्ब। आमेन। प्रस्थान ३३:२०; यूहन्ना १:१८

शुश थीब आन कली अरेशो

17 गे मुल शुश क्येट थीब आन कली “ठेयब लेशो मदुमीन। जाम्शा लाइब शॉप कली आस मपथु, परमप्रभु यावे कली आस पने। मारदे हना परमप्रभु यावेमी इं कली शुश तेम्शा गेब। आ गेशो तशा ग्येरसीन” दे



माइक्मी। भजन संग्रह ६२:११; लूका १२:१५-२१<sup>18</sup> मेकोपुकीमी रिम्शो गेय पतीकेमी गेनायो मनुष्य शोप पाइश्शो दुम्मल। हाइश्शो दुम्शा, मुर आन कली गेब दुम्चा माल्नीम।<sup>19</sup> मो पास्तेक्म हना, नोले रिम्शो दुम्नीम। बोल्यो जग खोर्देशो पा, गेना हना यो ब्रोंइशा बाक्चा ताइब दुम्नीम। मेको ला थमा ब्रोंइचा बाक्ब। मत्ती ६:२०; लूका १६:९

नोले डा लोव

<sup>20</sup> तिमोथी, इ कली शेंशो लोव रिम्शो पा पावो। जाम्शा लाइब लोव नु जिचा पोक्तीक लोव, तुइक्ब थुं रे पीब देंखु पाइनीम। मेको रे डोन बाक्को। २तिमोथी १:१२-१४; १तिमोथी ४:७<sup>21</sup> मारदे हना का निक्शीमी मोर्देशो लोव मिम्शा पशा, आन थमा सुइक्तीके जाम्शा लत। परमप्रभु यावे आ शिशी गे नु लील। १तिमोथी १:६; २तिमोथी २:१८

## २ तिमोथी

एको चिठी पावलमी तिमोथी कली नोले ब्रेक्शो बाक्ब।

पावलमी रोम सहरम लेंशा चोक्चा पुंडसीतीकेमी ब्रेक्शो बाक्ब।

पावलमी आंम पबर्म शुश ब्रेक्ब। मेकोमी तिमोथी आ थमा सुइक्तीके कली बारपाइश्शा नु ग्रुम्तीक डा मुर यो रिम्शो सेल्चा दाक्ब। “दूली शेंब आन पबर्म होस पा बाक्कीन” दे यो लोव्र पाइब। मेको चिठी ग्रुम्तीक कली शेंतीक बाक्ब।

### डॉइती डा लोव्र

1 गो परमप्रभु यावे आ दाक्शो ख्रीस्त येसु आ सोइश्शो पावल नड। डॉइती परमप्रभु यावेमी “ख्रीस्त येसुमी गेना हना यो ब्रॉइशा बाक्तीक बाक्ब” दे आ लोव्र खाण्शो बाक्ब। 2 एको चिठी आं दाक्शो तौ तिमोथी, इ कली ब्रेक्ताक्ड। इं आफ परमप्रभु यावे नु इं प्रभु येसु ख्रीस्त आस दाक्चा गे नु लील। मेको आस शिशीमी इ कली थुं नाइश्शा बाक्चा गेम्सेक्ल।

### ग्येरपाइक्ब लोव्र आ पबर्म ब्रेक्शो

3 गो परमप्रभु यावे कली “गे रिम्शो पाइब बाक्नीनी” दे गेय पाइनुड। आं के किकी पिपी यो मोदेंशो पशो बाक्तेक्म। आं प्रार्थनामी इ कली गेना हना यो मिम्नुड। *फिलिप्पी ३:५; प्रेरित २३:१; प्रेरित २४:१६* 4 गो इ डाक्शो मिम्शा, नाक्दो नाक्ती इ कली ग्रुम्चा दे मिम्नुड। मेकोमी आं कली ग्येरपाइक्ब। *रतिमोथी ४:९* 5 इ रिम्शो थमा सुइक्तीके मिम्नुड। मोदेंशो थमा सुइक्तीके डॉइती इ बगे लोइसमी, नोले इम्मा युनीसमी बाक्शो बाक्ब। मुल थमा पा इ आगाम बाक्ब। गो मेको तुइक्नुड। *प्रेरित १६:१-३* 6 मोपतीके गो इ कली आं गुइ इ तारी वोदुनु, परमप्रभु यावेमी इ कली मार मार गेवा, मेको लेंशा मी खोदेंशो पा ब्रपतो, दे फ्रुक्पाइक्नन। *१तिमोथी ४:१४* 7 मारदे हना परमप्रभु यावेमी इं कली हिंब थुं मगेवा। तन्न सक्ति पाइश्शो, दाक्पाइक्ब नु गेय पचा डॉइती मिम्पाइक्ब थुं गेप्टु। *रोमी ८:१५* 8 इं प्रभु आ पबर्म लोव्र पचा मुने मपावो। गो प्रभु आ पबर्म जेल्खानम बाक्शो आं पबर्म यो मुने मपावो। तन्न ग्येरपाइक्ब लोव्र आ पबर्म परमप्रभु यावे आ सक्तिमी श्येत फलो। *रोमी १:१६; पत्रुस ४:१६* 9 परमप्रभु यावेमी सैतान रे प्रॉइशा “आं मुर नम” दे ब्रेक्ताक्ब। इं रिम्शो पतीके कोव्रशा ममाइ, आ माल्शो नु शुश डॉइती रे ख्रीस्त येसुमी इं कली गेशो दाक्तीके आ पबर्म ब्रेक्ताक्ब। *तीतस ३:५* 10 मुल इं कली पाप रे प्रॉइब येसु ख्रीस्त कली रागीम सोइश्शा, मुर नेल्ल आन कली तपाइक्तु। ख्रीस्त येसुमी बेक्तीक कली ग्राशा, ब्रॉइतीके नु गेना हना या ब्रॉइशा बाक्शा, परमप्रभु यावे आ ग्येरपाइक्ब लोव्र आ पतीकेमी छेडछेडमी वोइश्शो खोदेंशो पा तुइक्पाइक्तु। *१कोरिन्थी १५:५५-५७; हिब्रू २:१४* 11 मेको ग्येरपाइक्ब लोव्र तुइक्पाइक्चा, दे गो लोव्र पाइब, ख्रीस्त आ सोइश्शो नु शेंब दुम्ती। *१तिमोथी २:७* 12 मोपतीके गो यो श्येत जाइनुड। तन्न गो मुने मपाइनुड, मारदे हना सु कली थमा सुइक्नुडा मेको तुइक्नुड। मेकोमी आं कली मबेक्डा सम्म कोव्रने चाप्ब, दे यो तुइक्नुड। 13 थमा लोव्र कली खोतो। मेको ख्रीस्त येसुमी बाक्शो थमा सुइक्तीके नु दाक्तीके बाक्ब। गे आं लोव्र रे तुइक्नेवे। 14 इं आगामी बाक्शो परमप्रभु यावे आ सोक्तीमी इ कली तुइक्पाइश्शो थमा शेंतीके कली खोतो।

15 नेल्ल एसीया डा मुरपुकीमी आं कली प्रॉइतीमी दे तुइक्नेवे। मेको आन दातेमी फीगेलस नु हेरमोगेनेस बाक्नीसी। *रतिमोथी ४:१६* 16 प्रभुमी ओनेसीफरस आ खिं डा मुर आन कली शिशी पवल। मारदे हना साडलोम पाइश्शो बाक्डानु, ओनेसीफरस आं पबर्म मुने मपथु, आं कली शुश रिम्शो पाप्टु। *रतिमोथी ४:१९* 17 मेकोमी रोम सहर जाक्दीश्शा, आं कली शुश

माल्शा थित्ती। 18 प्रभुमी मेको कली आ निसाफ पतीक नाक्तीमी शिशी पवल। मेकोमी एफिसस सहरमी शुश गेय पाप्टु, दे यो तुइक्नेवे।

### श्येत फाल्चा माल्नीम

2 आं तौ, गे ख्रीस्त येसुमी बाक्शो शिशी मिम्शा, बोल्पो दुम्शा बाक्को। *एफिसी ६:१०* 2 गो शुश मुर आन डॉइती इ कली नेंपाइश्शो लोव्र रिम्शो थमा सुइक्ब आन कली शेंदीमी। मेकोपुकीमी यो अरु आन कली शेंने चाप्नीम। 3 ख्रीस्त येसु आ रिम्शो सिपाही खोदेंशो दुम्शा, श्येत फलो। *रतिमोथी १:८; रतिमोथी ४:५* 4 लडाइ पाइब सिपाहीपुकीमी खिं डा गेय मपाइनीम। मारदे हना आन ठेयब मुरपुकीमी देंशो ला पाइनीमी। 5 दोरतीक दोरबमी हेंथे पा दोरत हना, ग्राने मचाप्ब। *रतिमोथी ४:८; १कोरिन्थी ९:२४-२७* 6 सुमी रूम शुश गेय पाइबा, मेको आ बाली नाली आ डॉइती डा जाइब दुम्चा माल्ब। 7 आं देंशो नेल्ल मिम्तो। मारदे हना प्रभुमी नेल्ल कली रुप्तीक थुं गेब।

8 येसु ख्रीस्त कली मिम्तो। मेको दाऊद आ खिं रे जाक्शा, बेक्शो रे सेंसाक्ब। आं शेंशो ग्येरपाइक्ब लोव्र मेकोन बाक्ब। *१कोरिन्थी १५:४, २०; रोमी १:३* 9 मेको ग्येरपाइक्ब लोव्र शेंतीके, गो मरिम्शो पाइब खोदेंशो पा साडलोम पाइक्चा पुंडसीशा श्येत जाइनुड। तन्न परमप्रभु यावे आ लोव्र दा मपाइसीशो बाक्ब। *फिलिप्पी १:१२-१४* 10 मोपतीके गो योव्रशो मुर आन कली मिम्शा, श्येत नेल्ल फाल्नुड। मोपा मेकोपुकीमी ख्रीस्त येसुमी पाप रे प्रॉइशो दुम्शा, गेना हना यो परमप्रभु यावे आ छेडछेडमी ब्रॉइशा बाक्चा तामेक्ल। *कलस्सी १:२४* 11 मुरुमी मेको लोव्र कली थमा सुइक्ने चाप्नीम “गोपुकी मेको नु बेक्तय हना यो, मेको नु ब्रॉइनय। *२कोरिन्थी ४:११* 12 गोपुकीमी श्येत फाल्तय हना, मेको नु हुकुम पाइनय। गोपुकीमी ‘मेको कली मतुइक्नुड’ देंतय हना, मेकोमी यो ‘मतुइक्नुड’ देंब। *मत्ती १०:३३* 13 गोपुकीमी थमा सुइक्चा प्रॉइतय हना यो, मेकोमी मप्रॉइब। मारदे हना ‘गो परमप्रभु यावे आ तौ मनड’ देंने मचाप्ब” देंत। *गन्ती २३:१९; भजन संग्रह ८९:३१-३४; रोमी ३:३-४; तीतस १:२*

### मजिचा दे शेंशो

14 एको लोव्र मेको आन कली फ्रुक्पाइक्मी। परमप्रभु यावे आ डॉइती मेको आन कली “लोव्र आ पबर्म मजिने” दे माइक्मी। मारदे हना मेको मरिम्शो दुम्ब, नेंबपुकी यो वाम ग्याम दुम्नीम। *१तिमोथी ६:४; तीतस ३:९* 15 गे परमप्रभु यावे आ डॉइती रिम्शो गेय पाइब दुम्चा कली बल पावो। थमा शेंतीके रिम्शो पा शेंचा कली काइ मुने पचा ममाल्नेवे। *१तिमोथी ४:६; तीतस २:७-८* 16 जाम्शा लाइब लोव्र पाइब रे डोन बाक्को। मारदे हना मेकोपुकीमी मुर आन कली परमप्रभु यावे रे डोन दुम्पाइक्नीम। *१तिमोथी ४:७* 17 मेको आन लोव्र राक्शो गार खोदेंशो बाक्ब। हीमेनेयस नु फिलेतस मेको आन दातेमी बाक्नीस। *१तिमोथी १:२०* 18 मेको निक्शीमी थमा शेंतीक प्रॉइशा, मुर आन सेंचा नुष्पो बाक्ब दे शेंनीस। मोपा का निक्शी आन थमा सुइक्तीके बेक्पाइक्ताक्से। 19 तन्न परमप्रभु यावे आ थमा शेंतीके मब्रेत्वा डा जग खोदेंशो बाक्ब। प्रभुमी आ मुर आन कली तुइक्ब। मिनु प्रभु कली तुइक्ब

मुरपुकी मरिश्शो पचा रे डोन बाक्वा माल्नीम। मेको थोव्रशो छाप खोदेंशो बाक्ब। गन्ती १६:५; मत्ती ७:२२-२३; यूहन्ना १०:१४,२७

२० ठेयब खिमी सुन नु चांदी के बोसपुकी ला ममाइ, तन्न शी नु खप के यो बाक्नीम। का निक्शी रिश्शो गेय कली बाक्नीम, का निक्शी मरिश्शो गेय कली बाक्नीम। २१ सु आ मरिश्शो पशो शोव्रशा माफ ताइबा, मेको रिश्शो गेय डा बोस खोदेंशो दुम्ब। आ होवप कली जिम्मा गेंसीशो नु मेको रिश्शो गेय पचा कली रिश्शो बाक्ब।

२२ ठिटी ठिटा आन दला दाक्स रे डोन बाक्को। रिश्शो थुंमी प्रभु कली लोव्र पाइबपुकी नु गारशा, ठीक पचा, थमा सुइक्चा, दाक्वा नु थुं नाइक्चा ला मिम्तो। १तिमोथी ४:१२; १तिमोथी ६:११; हिब्रू १२:१४ २३ हिक्सी मडाम्शो लोव्र पाइब नु काम मलाप्चा डा लोव्र पा जितीके रे डोन बाक्को। मेको जिचा पोक्ब ला बाक्नीम दे तुइक्नेवे। १तिमोथी ४:७ २४ प्रभु आ गेय पाइबमी जिचा मडुम्ब। नेल्ल आन कली रिश्शो पाइब दुम्चा माल्ब। रुप्पाइश्शा शेंबमी मुर आन मरिश्शो पतीके फाल्वा माल्ब। तीतस १:७-९ २५ जिचा पोक्ब आन कली रिश्शो लोव्रमी ठीक सेल्चा माल्ब। परमप्रभु यावेमी मेको आन कली आ गे लेप्पाइश्शा, थमा शेंतीके तुइक्पाइक्ब कों? २६ सैतानमी मेको आन कली ग्याइश्शा, आ दाक्शो पपदानु, मेको रे प्रोक्मल।

नोले डा नाक्त् दोदेंशो बाक्नीम

३ नोले डा नाक्त् हिंचा डा श्येत दुम्ब। गे मेको तुइक्चा माल्नेवे। १तिमोथी ४:१ २ मारदे हना मुरपुकीमी आंम कली ला दाक्नीम। क्येट कली शुश दाक्नीम। ठेयब लेशशा, अरु नेल्ल आन कली दिप्नीम। मरिश्शो लोव्र पाइनीम। आम आफ कली मटिथु "गे रिश्शो पाइनीनी" गेनायो मर्देंथु, पापम गुम्शा बाक्नीम। ३ आंम खिं डा मुर आन कली मदाक्नीम। ईख कुरनीम, मरिश्शो लोव्र पाइनीम। आंम रां नु शोव्र चलेस मजोक्नीम। जिचा पोक्नीम। रिश्शो मारेइ मदाक्नीम। ४ मुर आन कली श्येतम खूम्नीम। चुइश्शा गेय पाइनीम। "गो जोक्नुड" दे बोरशा, मुर आन लोव्र मनेनीम। आंम दला दाक्स ला पाइनीम। परमप्रभु यावे कली मदाक्नीम। ५ मोदेंशो मुरुमी परमप्रभु यावे कली मिम्शा दाक्चा देंखु पाइनीम। तन्न आन आगामी सक्ति मबाक्तीके कोंइनीम। मेकोपुकी नु डोन बाक्को। मत्ती ७:१५-२१; तीतस १:१६ ६ मेको आन दातेमी का निक्शीमी आन दला दाक्स पा पापम गुम्शो नु आंम कली चलेस मजोक्ब मीश मुर आन खिं ओव्रशा, लोव्र नेंपाइक्नीम। ७ मेको मीश मुरपुकीमी सु आन लोव्र नेंतेक्म हना यो, थमा शेंतीके गेनायो रुम्ने मचाप्नीम। ८ दोपा यन्नस नु याम्ब्रेस माइश्शो मुर निक्शीमी मोसा कली "इ गेय ठीक मबाक्ब" देंसा, मोपा मेको मुरपुकीमी यो थमा शेंतीके कली "ठीक मबाक्ब" देंनीम। आन थुं मूर्ख गेयम ब्रीशो दुम्शा, थमा सुइक्तीके प्रॉइशो बाक्नीम। प्रस्थान ७:११,२२ ९ तन्न मोदेंशो दूली शेंबपुकीमी शुश गेय पचा मताइनीम। मारदे हना यन्नस नु यम्ब्रेस आस कली खोदेंशो पा, मुरपुकीमी "गशो बाक्नीम" दे तुइक्नीम।

पावल आ श्येत

१० मिनु गे आं शेंतीके, आं गेय पतीके "मार पाइनुड" दे आं मिम्तीके, आं थमा सुइक्तीके, आं फाल्तीके, आं दाक्तीके नु थमा सुइक्तीके मप्रॉइशो ताप्तीवी। ११ आं कली खेदा पशो, आं श्येत जशो यो ताप्तीवी। एन्टीओक, आइकोनीयम नु लिस्त्रा सहरमी गो दोदेंशो श्येत जडा, दोपा खेदा पशो नेल्ल फलु, मेको नेल्ल ताप्तीवी। तन्न प्रभुमी मेको नेल्ल रे प्रॉइती। प्रेरित १३:१३-१४:२२; भजन संग्रह ३४:२०

१२ सु खु ख्रीस्त येसुमी परमप्रभु यावे कली मिम्शा, दाक्शा ब्रॉइनीमी, मेकोपुकी खेदा पचा पुंडसीनीम। मत्ती १६:२४; प्रेरित १४:२२; १थिस्सलोनिकी ३:३ १३ मरिश्शो नु ग्रॉग्रा दिचा डा मुरपुकीमी "मुर आन मिक्च सिल्नीक" दे मिम्तेमेनु, डोंइती डा क्येडा मरिश्शो दुम्शा, आंमान आन मिक्च सिल्चा पुंडसीनीम। १तिमोथी ४:१

परमप्रभु यावे आ लोव्र

१४ मिनु गे मार शेंसे, मेको "ठीक बाक्ब" दे थमा सुइश्शा, पना पन बाक्को। मारदे हना गे सु नु शेंसे मेको तुइक्नेवे। १५ गे आल रे ना परमप्रभु यावे आ लोव्र तुइश्शो बाक्नेवे। मेको लोव्रमी ख्रीस्त येसु कली थमा सुइश्शा "दोपा पाप रे प्रॉइचा" दे इ कली शेंने चाप्ब। यूहन्ना ५:३९ १६ परमप्रभु यावेमी मेको लोव्र नेल्ल गेशो बाक्त्। मेको शेंचा कली, हुइक्चा कली, रिश्शो सेल्चा कली नु थमा सुइक्तीक ठीक सेल्चा कली बाक्ब। २पत्रुस १:१९-२१ १७ परमप्रभु यावेमी आ मुरपुकीमी नेल्ल गेय रिश्शो पामेक्ल दे एको लोव्र तुइक्पाइश्शो बाक्त्। १तिमोथी ६:११

बेक्चा सम्म थमा सुइक्चा मप्रॉइचा

४ गो इ कली ख्रीस्त येसु नु परमप्रभु यावे आस डोंइती मार देंनुड देंशा हना, येसु ख्रीस्त आ राज्य जाची ना बेक्शो नु ब्रॉइशो मुर आन कली निसाफ पाइब बाक्ब। मेको आ जाक्चा नु राज्य पचा मिम्शा १पत्रुस ४:५ २ "परमप्रभु यावे आ लोव्र पावो। नेंचा दाक्ताक्म हना यो, मदाक्ताक्म हना यो, शेंदीमी। मरिश्शो पाइब आन कली लोव्र पावो। मुर आन कली 'ठीक पचा' दे शेंदो। आन थुं बारपतो। नेल्ल आन कली फाल्शा, रिश्शो शेंदो। प्रेरित २०:२०,३१ ३ मारदे हना इक्का नोले थमा शेंतीक नेंचा काइ मदाक्नीम। आंम दला दाक्स पा अर्को लोव्र कली नोफा दाइश्शा, आंम कली शेंबपुकी तेल्लीम। १तिमोथी ४:- ४ मेना थमा शेंतीक प्रॉइशा, मुर आन सेल्शो कथा नेंनीम। १तिमोथी ४:७; २थिस्सलोनिकी २:११ ५ गे चहिं मार पाप्तीवी हना यो, मिम्ना मिम्न गेय पावो, श्येत फलो, ग्येरपाइक्ब लोव्र शेंदो। इ कली गेशो गेय नेल्ल पावो" दे माइक्नन। २तिमोथी २:३

६ मारदे हना गो चढेशो खोदेंशो दुम्शा, आं लची ना जाक्त्। फिलिप्पी २:१७ ७ गो थमा सुइश्शा ग्राती। दाम पशो खोदेंशो पा ग्राती। थमा सुइक्चा मप्रॉइथु बाक्ती। १कोरिन्थी ९:२५; १तिमोथी ६:१२; प्रेरित २०:२४; फिलिप्पी ३:१४ ८ मुल रे ठीक पतीके डा सिरपेच गुप्चा दे आं कली वोइश्शो बाक्त्। प्रभु ठीक निसाफ पाइब बाक्ब। मेकोमी आं कली आ नाक्तीम सिरपेच गेब। आं कली ला ममाइ, सु सुमी आ जाक्शो दाक्नीमी, मेको आन कली यो गेब। २तिमोथी २:५; १पत्रुस ५:४; याकूब १:१२; प्रकाश २:१०; मत्ती २५:२१

पावल नु आ नु गेय पाइबपुकी

९ आं कली रीब पा गुम्थ जाक्को। २तिमोथी १:४ १० मारदे हना डेमासमी रागी डा गेय दाक्शा, आं कली प्रॉइती। मिनु थिस्सलोनिकी सहर लत। क्रेसेन्स गलातीया नु तीतस डाल्मातीया रागी लाम्ताक्स। कलस्सी ४:७,१०,१४ ११ लूका ला गो नु बाक्ब। मर्कूस कली गे पिश्शा पिवो। मारदे हना मेको आं कली वारच पाइब बाक्ब। प्रेरित १५:३७; कलस्सी ४:१० १२ तिखीकस कली एफिसस सहरम सोइक्ताक्ड। एफिसी ६:२१ १३ त्रोआस सहरमी कारपस आ खिंमी फेक्तीक वा का प्रॉइता। मेको चाक्को। किताब नु कागजपुकी यो चाक्मी।

१४ अलेक्जन्डर तांबा तुप्तीलमी शुश श्येत गेती। प्रभुमी मेको आ गेय तशा, सजाइ गेब। १तिमोथी १:२० १५ गे यो मेको नु होस पा बाक्को। इं शेंतीके आ पर्बम शुश जिचा पोक्त्।

१६ डोंइती डा आं मुददाम सुइमी आं कली वारच मपाम। नेल्लेमी प्रॉइतीमी। परमप्रभु यावेमी मेको आन कली सजाइ मगेवल। २तिमोथी १:१५ १७ तन्न प्रभु गो नु बाक्शा, अर्को रागी डा मुर आन कली परमप्रभु यावे आ लोव्र नेल्ल शेंचा सक्ति गेती। मोपा आं कली गुप्से रे प्रॉइती। प्रेरित २३:११; प्रेरित २७:२३ १८ प्रभुमी आं कली आ स्वर्ग डा राज्य लचा, दे नेल्ल श्येत रे प्रॉइब। मेको कली गेना हना यो मान पय। आमेन।

नोले डा लोव्र

१९ प्रिस्कीला, अक्वीला नु ओनेसीफरस आ खिं डा मुर नेल्ल आन कली "रिश्शो बाक्कीन" देनो। प्रेरित १८:२; २तिमोथी १:१६ २० इरास्तस कोरिन्थ

सहरम बाक्ब। त्रोफीमस रोइ पवानु, गो मिलेटस सहरमी लाइश्शा वोइक्ता।  
 प्रेरित १९:२२; प्रेरित २०:४<sup>21</sup> हिउंद क्येडा डोइती आं कली गुम्थ रीब पा  
 जाक्को। युबुलसमी इ कली “रिम्शो बाक्को” देशो बाक्ब। पुडेन्स, लिनस,

क्लौदीया नु थमा सुइक्ब लोकब नेल्लेमी यो मो देंतेक्म।<sup>22</sup> प्रभु गे नु बाक्ल।  
 आ शिशी गे नु लील।

## तीतस

एको चिठी पावलमी आ नु गेय पाइब तीतस कली ब्रेक्शो बाक्त।

पावल रोम सहर डा जेलखान रे प्रॉइचा पुंडसे नोले क्रेट टापु लमाक्त। मेकेर मुर आन कली शेंचा कली तीतस कली वोइश्शो बाक्त। एको चिठी ६५ ए. डी.मी तीतस कली ब्रेक्शो बाक्त।

१. थमा सुइक्ब आन शेंब दोदेंशो दुम्चा माल्नीमी।
२. थमा सुइक्ब आन कली शेंतीके रिम्शो दुम्चा माल्नीम।  
हुकुम पाइब आन कली टिचा माल्नीम।  
दूली शेंब आन पर्वम होस पचा माल्नीम।

### डॉइती डा लोव

१ गो परमप्रभु यावे आ वाइल नु येसु ख्रीस्त आ सोइश्शो, थमा सुइक्ब पावल नड। परमप्रभु यावे आ योव्रशो मुर आन कली थमा सुइक्बा आ पर्वम शेंतीक नु मेको तुइश्शो रे रिम्शो गेय पचा माल्ब, दे शेंब दुम्ती।  
२ मोदेंशो दुम्मेनु, गो नेल्ल गेना हना यो परमप्रभु यावे नु बाक्शा ब्रॉइनय, दे आस पाइनय। *२तिमोथी २:१३* <sup>३</sup> आ दाक्शो ना मुर आन कली आ लोव तुइक्पाइक्त्तु। दोपा तुइक्पाइक्त्तु देंशा हना, इं मरिम्शो गेय रे प्रॉइब परमप्रभु यावेम “आं लोव शेंदीमी” दैत। *एफिसी १:१-१०* <sup>४</sup> तीतस, एको चिठी इ कली ब्रेक्ताक्ड। गो निक्शी इस के थमा सुइक्तीक का दुम्शा, गे आं तौ खोदेंशो दुम्ते। इं आफ परमप्रभु यावे नु इं पाप रे प्रॉइब येसु ख्रीस्तमी इ कली शिशी नु थुं नाइक्वा गेम्सेक्ल। *१तिमोथी १:२*

### थमा सुइक्ब आन कली कोवब

५ गो इ कली क्रेट टापुमी मारदे वोइक्त्तन देंशा हना “गे थमा सुइक्ब आन दातेमी ठीक मदुम्शो गेय ठीक पपतो। मिनु सहर सहर डा गुम्तीकेमी शेंब खाल्पापुकी वोतो” दे इ कली अरेतन। *प्रेरित१४:२३* <sup>६</sup> मिनु गुम्तीक खिं डा शेंब खाल्पापुकी सु सु दुम्ने चाप्नीमी देंशा हना, काइ दोस गेचा मपुंडसीब नु मीश का ला पाइश्शो वोइश मुर बाक्चा माल्ब। मेको आ तमी तौ थमा सुइक्ब बाक्चा माल्नीम। हेंथे गाक्ब नु मटीब आल आन आफ गुम्तीक खिं डा शेंब खाल्पा दुम्ने मचाप्नीम। *१तिमोथी ३:१-७* <sup>७</sup> मोदेंशो थमा सुइक्ब आन कली कोवब परमप्रभु यावे आ खिं डा गेय पाइब दुम्शा, दोस गेचा मपुंडसीब बाक्चा माल्ब। मिनु ठेयब लेश्शो, शुश गाइक्ब, राकसी शांबु तूशा दुक्ब, चुरशा गुइ प्रॉइब नु शिम मुरुम मेको गेय पने मचाप्नीम। *१कोरिन्थी ४:१; २तिमोथी २:२४* <sup>८</sup> थमा सुइक्ब आन कली कोवब चहिं बास गेब, रिम्शो गेय दाक्ब, रिम्शो नु मरिम्शो तुइक्ब, ठीक गेय पाइब, थमा पा परमप्रभु आ गेय पाइब नु आंम रां चलेस जोक्ब मुर बाक्चा माल्नीम।  
९ मोदेंशो पाइब मुर परमप्रभु यावे आ लोव डा शेंतीक तुइश्शा पचा माल्नीम। मोपा मेकोपुकीमी थमा सुइक्ब आन कली रिम्शो शेंशा, अरेने चाप्नीम। मिनु परमप्रभु यावे आ लोव दूली शेंब आन कली यो रिम्शो सेल्ने चाप्नीम।

### दूली शेंब आन पर्वम

१० परमप्रभु यावे आ शेंशो लोव मटीबपुकी शुश बाक्नीमी। शोर गाक्शो लोव पाइब नु हेंथे लां शेंब बाक्नीम। मेको शुश खोइक्तीक चिनु पाइश्शो इस्त्राएली बाक्नीम। <sup>११</sup> मोदेंशो मुर आन कली ब्वालेइ पपाइक्वा माल्नीम। मारदे हना खिं खिं डा मुर नेल्ल आन कली जिपाइक्नीमी। मिनु क्येट चेम्चा कली शेंनीमी। <sup>१२</sup> क्रेट टापु डा शुश जोक्ब मुरुमी आंम मुर आन पर्वम मार लोव पवा बाक्त देंशा हना, मेकोमी “क्रेट डा मुरपुकी गेना हना यो जोल

पाइब, मरिम्शो पाइब जन्तु, शुश जाइब ब्वाइब नु अल्सी अल्से बाक्नीमी” दे लोव पवा बाक्त। <sup>१३</sup> मेको आ देंशो थमा बाक्ब। मोपतीके गे मेको आन कली शुश अरेवो। मोपा ला आन थमा सुइक्तीके ठीक दुम्ने चाप्ब। *२तिमोथी ४:२* <sup>१४</sup> मिनु थमा सुइक्बपुकीमी यहूदी आन कथा नु मुरुम सेल्शो अरेशो लोव नेंचा मदुम्ब। मेको थमा लां प्रॉइब बाक्नीम। *१तिमोथी ४:७; २तिमोथी ४:४* <sup>१५</sup> रिम्शो मुर आन कली मारेइ मारेइ रिम्शो बाक्ब। ग्रांरा दिचा डा मुर नु थमा मसुइक्ब आन कली चहिं मारेइ मारेइ रिम्शो मबाक्ब। मेको आन थुं नु मिम्तीके मरिम्शो बाक्ब। *मत्ती १५:११; रोमी १४:२०* <sup>१६</sup> मिनु मेकोपुकीमी “गो परमप्रभु यावे कली तुइक्नुड” देंखु पाइनीमी। तन्न आन पतीकेमी मतुइक्ब बाक्नीम, दे तुंडसीब। मोपा मेकोपुकी ग्रांरा दिचा डा मुर बाक्नीम। मिनु मटीब दुम्शा, रिम्शो गेय यो पने मचाप्नीम। *२तिमोथी ३:५*

### गुम्तीकेमी दोपा बाक्चा

२ गे चहिं येसु ख्रीस्त आ ठीक लोव रिम्शो पा मुर आन कली शेंदीमी। *२तिमोथी १:१३* <sup>२</sup> गे खाल्पा आन कली मार शेंचा माल्नेवे देंशा हना, रिम्शो मिम्ने चाप्ब, मान पाइक्वा शिरशो मुर, गेय पचा क्येडा डॉइती मिम्ब, आन थमा सुइक्वा, आन दाक्वा नु आन फाल्वा डा सक्ति ठीक दुम्शा बाक्चा माल्नीम, दे शेंचा माल्नेवे। *१तिमोथी ५:१*  
<sup>३</sup> मिनु खाल्पी आन कली मार शेंचा माल्नेवे देंशा हना, खाल्पीपुकी रिम्शो थमा सुइक्ब दुम्चा माल्नीम। हेंथे लोव पचा मदुम्ब। शुश शांबु तूचा मदुम्ब। खाल्पीपुकी रिम्शो गेय शेंब दुम्चा माल्नीमी। <sup>४</sup> मोदेंशो पा खाल्पीपुकीमी आन क्येडा आल मीश मुर आन कली आन वोइश नु आन आल आन कली दाक्वा माल्ब, दे शेंचा माल्नीम। <sup>५</sup> गेय पचा क्येडा डॉइती मिम्चा, आंम वोइश नु ला बाक्चा, खिं डा गेय रिम्शो पचा, मुर नु रिम्शो दुम्चा, आंम वोइश कली टिचा, दे शेंचा माल्नीम। मोदेंशो पाप्तेक्म हना, मुरपुकीमी परमप्रभु यावे आ लोव आ पर्वम मरिम्शो लोव मपाइनीमी। *एफिसी ५:२२*  
<sup>६</sup> मोदेंशो पा गे इ क्येडा आल वोइश मुर आन कली “गेय पचा क्येडा डॉइती मिम्चा माल्ब” दे शेंचा माल्नेवे।  
<sup>७</sup> मिनु नेल्ल क्येडा ठेयब मार बाक्ब देंशा हना, गे रिम्शो गेय पशा, थमा सुइक्बपुकी दोदेंशो मुर बाक्नीमी, दे कौइचा माल्नेवे। मिनु मुर आन कली शेंदीनु, हेंथे लोव मपथु, रिम्शो शेंतीक शेंचा माल्नेवे। *२तिमोथी २:१५; १पत्रुस २:१५; १तिमोथी ४:१२; १पत्रुस ५:२* <sup>८</sup> गे रिम्शो लोव शेंताक्वी हना, सुइमी इ कली दोस गेने मचाप्नीम। मिनु इ कली मदाक्बमी यो इ पर्वम मारेइ मरिम्शो लोव पचा मताइनीम। मिनु आन मुने दोक्नीम।  
<sup>९</sup> मिनु वाइलीम वाइल आन कली मार शेंचा माल्नेवे देंशा हना, आंम ठेयब मुर आन लोव टिचा माल्नीम। आन गेय रिम्शो पा आन ठेयब मुर आन कली ग्येरपाइक्वा माल्नीम। आन ठेयब मुरुमी लोव पामेनु, मेकोपुकीमी जोप पचा मदुम्नीमी। *एफिसी ६:५-६१; १तिमोथी ६:१-२; १पत्रुस २:१८* <sup>१०</sup> खुइ पचा मदुम्ब, नेल्ल गेयमी थम रिम्शो पाइब दुम्चा माल्नीम। मोदेंशो रिम्शो गेय पा

इं कली पाप रे प्रॉइब परमप्रभु यावे आ शेंतीके रिम्शो लोत्र बाक्ब, दे कोंइनीमी। मेको शेंचा माल्नेवे।

### परमप्रभु यावे आ शिशी

11 परमप्रभु यावे आ शिशी मुर नेल्ल आन कली पाप रे प्रॉइचा कली तपांइसाक्व। तीतस ३:४<sup>12</sup> मोदेशो शिशीमी इं कली परमप्रभु यावे कली मगारचा डा गेय नु रागी रागी डा मुर आन पतीके आ पबंम मोदेशो मपचा, दे शेंब। मिनु मुल गेय पचा क्येडा डोंइती मिम्चा, ठीक गेय पचा नु रागीम बाक्शा, परमप्रभु यावे कली मान पा हिंचा, दे शेंब।<sup>13</sup> मोदेशो दुम्शा, मान ताइब परमप्रभु यावे नु इं कली पाप रे प्रॉइब येसु ख्रीस्त आ छेडछेड गूब, दे गो आस पशा रिम्नय। १कोरिन्थी १:७; फिलिप्पी ३:२०; १थिस्सलोनिकी १:१०<sup>14</sup> येसु ख्रीस्तम आंम कली काइ ममिम्थु, साइक्वा पुंइसाक्व। मारदे साइक्वा पुंइसाक्व देशा हना, इं कली मटितीके रे प्रॉइचा कली साइक्वा पुंइसाक्व। मिनु इं कली परमप्रभु यावे आ योत्रशो मुर सेल्चा नु इं कली शुश रिम्शो गेय पपाइक्वा कली आंम कली साइक्वा, दे जिम्मा गेसाक्व। गलाती १:४; १तिमोथी २:६; प्रस्थान १९:५; एफिसी २:१०<sup>15</sup> मेको लोत्र शेंदीमी। मिनु गे अधिकार पाइश्शो दुम्शा, मुर आन कली अरेवो। मिनु मुरपुकीमी “एको ठिटामी आंइ कली शेंने मचापब” देंचा मपुंइसो। १तिमोथी ४:१२

### रागीम दोपा बाक्वा माल्नीमी

3 मिनु गेमी हुकुम पाइब नु सरकार डा अधिकार पाइश्शो मुर आन कली टिचा, दे थमा सुइक्ब आन कली मिम्पतो। थमा सुइक्बपुकी टीब मुर दुम्चा माल्नीम। मिनु मार मार रिम्शो गेय बाक्मे, मेको पचा माल्नीम। रोमी १३:१; १पत्रुस २:१३<sup>2</sup> मिनु सुइ आन पबंम काइ शुक्शी मपचा, जिचा मपोक्वा, मुर आन कली रिम्शो पा फाल्चा, ठेयब मलेल्थु, मुर आन कली वारच पचा माल्नीम। फिलिप्पी ४:५<sup>3</sup> डोंइती गो मरुपब बाक्तय। परमप्रभु यावे कली मटीब बाक्तय, हेंथे गाक्ब, मार मार दाक्तय, मेको दला दाक्स पाइब बाक्तय। ग्रांरा दिचा डा गेय पाइब बाक्तय। गो मरिम्शो पा गेहे पाइतय। मिनु गोपुकी काइ मदाक्मुय। १कोरिन्थी ६:११; एफिसी २:२; एफिसी ५:८; १पत्रुस ४:३

4 तन्न पाप रे प्रॉइब परमप्रभु यावे आ रिम्शो पतीके, आ दाक्तीके नु शिशी जाक्त। तीतस २:११<sup>5</sup> मेकोमी इं कली मरिम्शो गेय रे प्रॉइतु। इं पशो

ठीक गेय तशा मप्रोन, तन्न आ शिशीमी इं कली प्रॉइतु। दोपा पाप रे प्रॉइतु देशा हना, इं कली मरिम्शो गेय रे चिक्शो खोंदेशो पा, आ सोक्त आ पशोमी नक मुर सेल्लु। योएल ३:१; २तिमोथी १:९; यूहन्ना ३:५; एफिसी ५:२६<sup>6</sup> मिनु परमप्रभु यावेमी आ सोक्त इं तारी मोइक्तु। दोपा मोइक्तु देशा हना, इं पाप रे प्रॉइब येसु ख्रीस्त आ पतीकेमी मोइक्तु।<sup>7</sup> मोदेशो पा, परमप्रभु यावे आ शिशी आ पतीकेम इं कली ठीक सेल्लु। मिनु परमप्रभु यावे नु बाक्चा शिरशो दुम्तय। परमप्रभु यावे नु गेना हना यो बाक्चा कली आस पा बाक्तय। रोमी ३:२६<sup>8</sup> एको लोत्र थमा बाक्ब। मिनु एको लोत्र शुश शेंदो। मोदेशो पा शेंताक्वी हना, परमप्रभु यावे कली थमा सुइक्ब दुम्शो मुरपुकी रिम्शो गेय पचा कली होस पा बाक्नीम। आं देंशो शेंतीके मुर आन कली रिम्शो नु गारचा डा बाक्ब।

9 मिनु गे मूर्ख खोंदेशो पा हिल्लो पतीके, यहूदी आन बडसावली डा शेंतीके नु अरेतीक लोत्र रे सेल्शो पतीके आ पबंम गाइक्पाइक्ब नु जिचा पोक्ब रे डोन बाक्को। मारदे हना मेको शोर गाक्शो नु जाम्शा लाइब बाक्नीम। १तिमोथी १:४; १तिमोथी ४:७; २तिमोथी २:१४<sup>10</sup> गे मोदेशो दूली शेंब आन कली खेयप निक्शी सम्म लोत्र पावो। मेकोम मटिपु हना, मेको रे डोन बाक्को। २यूहन्ना १०; मत्ती १८:१५-१७<sup>11</sup> मोदेशो मुर नेल्ल दूली नु मरिम्शो पाइब दुम्शा, आन मरिम्शो पतीकेमी आंम कली खतम सेल्ब बाक्नीम, दे तुइक्नेवे। १तिमोथी ६:४-५

### नोले डा लोत्र

12 गो अरतीमास हना यो, तिखीकस हना यो इ कली गुम्चा कली सोइक्ताक्ड हना, गे आं कली गुम्चा कली निकोपोलीस सहर पिवो। मारदे हना गो हिउंदमी मेकेर बाक्चा कली मिम्ताक्ड। एफिसी ६:२१<sup>13</sup> मिनु गे चीनास माइश्शो वोकील नु आपोल्लोस आस कली रीब पा सोइक्तीम्सी। मेको निक्शीम मार मार माल्नीसी, मेको आस कली गेम्सी। प्रेरित १८:२४; १कोरिन्थी ३:५-६<sup>14</sup> मिनु इं मुरपुकीमी यो रिम्शो गेय पचा कली शेंसीचा माल्नीमी। मोपा शुश श्येत जाइब आन कली वारच पशा, फल सिपब रवा खोंदेशो दुम्नीम। तीतस २:१४; मत्ती ७:१९

15 गो नु बाक्बपुकी नेल्लेमी इ कली “रिम्शो बाक्को” दे ब्रेक्पाइक्तीमी। आंइ कली दाक्ब थमा सुइक्ब नेल्ल आन कली “रिम्शो बाक्कीन” ने माइक्मी। परमप्रभु यावे आ शिशी गे नेल्ल नु लील।

# फिलेमोन

एको चिठी पावलमी फिलेमोन कली ब्रेक्शो बाक्व।

पावल रोम सहर डा जेल्खानम बाक्शा ६२ ए. डी. नुप्ची ना कि ६३ ए. डी. गोची ना ब्रेक्शो बाक्व।

एको चिठीमी ठेयब शेंतीके मबाक्व। फिलेमोन आ वाइल ओनेसीमस प्रोक्शो बाक्व। मेकोमी पावल कली रोम सहरम गुम्शा, थमा सुइक्व दुम्शा, मुल आ होवप आ खिं लेत्वा चिक्शो बाक्व। एफिसी नु कलस्सी कली चिठी कुरबपुकीम एको चिठी यो चाक्शो बाक्तेक्म। फिलेमोन आ खिं यो कलस्से सहरम बाक्व।

## डोंइती डा लोव

1 ख्रीस्त येसु आ नेंमी जेल्खानम चोक्वा पुंइसीशो पावल नु इं लोकब तिमोथी गो निक्शीमी एको चिठी ब्रेक्ताक्कु। एको चिठी सु सु इन कली ब्रेक्ताक्कु देंशा हना, गो नु गारशा गेय पाइब इं दाक्शो फिलेमोन, एफिसी ३:१<sup>2</sup> इं समी आप्पीया, पल्टन कामी बाक्शा गाक्शो खोर्देशो दुम्शो अरकीप्पस नु फिलेमोन आ खिंमी देल्ब थमा सुइक्व नेल्ल इन कली ब्रेक्ताक्कु। कलस्सी ४:१७<sup>3</sup> इं आफ, परमप्रभु यावे नु प्रभु येसु ख्रीस्तमी इन कली शिशी पा इन थुं नाइश्शा बाक्वा गेम्सेक्ल।

## प्रार्थना पशो

4 आं दाक्शो लोकब फिलेमोन, गो इ पबर्म प्रार्थना पडानु “फिलेमोन कली रिम्शो पपाइक्तीनी” दे परमप्रभु यावे कली ठेयब सेल्लुड।<sup>5</sup> मारदे हना गे थमा सुइक्व नेल्ल आन कली शुश दाक्शो नु इ येसु ख्रीस्त कली थमा सुइश्शो आ पबर्म नेंता।<sup>6</sup> इ थमा सुइश्शोमी रिम्शो गेय शुश पाइनेवे। मिनु दोपा रिम्शो गेय पवी, मोपान परमप्रभु यावेमी ख्रीस्त कली तुइक्तीके बारना बारन लपदल, दे प्रार्थना पाइनुड। फिलिप्पी १:९<sup>7</sup> आं लोकब, इ पशोमी थमा सुइक्व शुश आन थुं नाइक्वा ताम्तेक्म। शुश आन थुं बारना बारन लत। इ कली मोर्देशो रिम्शो पशो तशा, गो यो आं थुं नाइश्शा ग्येरसाक्वी।  
२कोरिन्थी ७:४

## इम्चीली लोव देंशो

8 गो ख्रीस्त आ नें आ पबर्म इ कली मारेइ अरेतीक अधिकार तशो नड।  
9 तन्न गे मुर आन कली दाक्शा शिशी पाइनेवे, आं देंशो यो टीनेवे, दे तुइश्शा, अधिकार कोंइचा ममाल्दी। गो ख्रीस्त येसु आ पबर्म जेल्खानम चोक्वा पुंइसीशो खाल्पा पावलमी इ कली इम्चीली लोव का माइक्नन।  
10 जेल्खानम बाक्डानु, ओनेसीमस कली गुम्ता। मेकोमी थमा सुदा रे आं दाक्शो तौ दुम्त। गो थमा पोबु दुम्तक्कु। कलस्सी ४:९; १कोरिन्थी ४:१५; गलाती ४:१९<sup>11</sup> साइ इ खिंमी बाक्मेनु, आ गेय रिम्शो मपथु, शोर गाक्शो बाक्माक्व। मुल आं कली शुश वारच पाइक्ती। मुल डा मेरे इ थुं नुपाइक्वा

डा गेय पाइब, दे तुइश्शा, इ खिं लेश्शा सोइक्ताक्ड।<sup>12</sup> मेको कली सोइश्शो ला ममाइ, पावलन जाक्शो मिम्तो।<sup>13</sup> ख्रीस्त आ लोव शेंशो आ पबर्म जेल्खानम चोक्सीशा बाक्डानु, ओनेसीमस इ पा डा आं वारच सेल्वा थुं पाता। फिलिप्पी २:३०<sup>14</sup> गेमी गेय पपाइश्शा वोतो, दे मर्देने सम्म मवोटु देंशा, सोइक्ताक्ड। वारच पाइय्थीनी मर्देंथु, वारच पाइतीनी हना, गो ग्येरसीनुड। २कोरिन्थी ९:७

15 ओनेसीमस इ खिं रे प्रोक्शा, नाक्व का निक्शी गाक्शो रिम्शोन दुम्त। मारदे हना येसु ख्रीस्त आ लोव रुष्शा, गेना हना यो इ खिम बाक्व दुम्त।  
16 मुल डा मेरे मेको कली वाइल ममिम्थु, आंम क्यी का डा लोकब मिम्तो। प्रभु आ नेंमी यो लोकब मिम्तो। मिनु मोर्देशो लोकब दुम्शोनु, गेनायो मब्रासीब। १तिमोथी ६:२<sup>17</sup> मोपतीके वारच मिम्ताक्वी हना, आं कली ब्रशो खोर्देशो पा ओनेसीमस कली ब्रावो।<sup>18</sup> साइ इ कली मरिम्शो पशो बाक्व हना यो, इ कली मेकोमी मारेइ थाप्चा माल्शो बाक्व हना यो, मेको नेल्ल गो गारपाइक्नुड।<sup>19</sup> एको लोव गो पावलमी आंम आं गुइमी ब्रेक्ताक्ड। लोव थोक्शा, मार थाप्चा माल्शो बाक्मे, मेको नेल्ल थाप्नुड। तन्न गोमी साइ इ कली वारच पशो यो मिम्चा माल्नेवे, दे इन कली देंनुड।<sup>20</sup> आं दाक्शो लोकब, प्रभु आ नेंमी गो निक्शी वोबु दुम्शा बाक्व। ख्रीस्त आ दाक्शो पा आं थुं बारपा ग्येरपाइय्थी।<sup>21</sup> गे आं लोव नेंशा टिशा, आं देंशो क्येडा यो शुश रिम्शो पाइनेवे, दे तुइश्शा, एको लोव ब्रेक्ताक्व।

## नोले डा लोव

22 इ खिंमी इप्तीक बाक्तीक बास फिक्शा वोतो, मारदे हना गेपुकीमी “पावल जेल्खान रे गूचा तवल” दे प्रार्थना पाइनीनी, दे तुइश्शा, गूचा ताइनुड, दे आस पा बाक्ती। फिलिप्पी १:२५; फिलिप्पी २:२४  
23 ख्रीस्त येसु आ नेंमी जेल्खानमी काथा बाक्व इपाफ्रासमी इन कली “रिम्शो बाक्कीन” देंत। कलस्सी १:७; कलस्सी ४:१०-१४<sup>24</sup> गो नु काथा गाक्व येसु आ लोव शेंब मर्कूस, अरीस्तारकस, डेमास नु लूकामी यो इन कली “रिम्शो बाक्कीन” देंतेक्म।  
25 प्रभु येसु ख्रीस्त आ शिशी इन थुंमी लील।

# हिब्रू

एको किताब पावलम ब्रेक्शो बाक्ब, दे शुश मुरुम मिन्मीम। तन्न का निक्शीमी लुका, का निक्शीम बारनाबास, का निक्शीम आपोल्लोस आ ब्रेक्शो बाक्ब, देंनीम। साइ डा जोक्ब तुइक्बमी “हिब्रू किताब सुमी ब्रेक्शो बाक्बा, परमप्रभु यावेम ला तुइक्ब” दे ब्रेक्ताक्म।

एको किताबमी यरूसलेम सहर खतम दुश्शो आ पर्बम मारेइ मब्रेक्शो बाक्त। मारेदे हना तिमोथी आ पर्बम लोव्र ब्रेक्शो बाक्ब। मिनु तिमोथी ८१ ए. डी. रोमी सिजर दोमीतीयन आ सासनमी थमा सुइक्वा आ पर्बम साइक्वा पुंडसीशो बाक्त। मोपतीके ६३ नु ७० ए. डी. रोम रे ब्रेक्शो बाक्ब, देंनीम।

१. एको किताब डा शेंतीक लोव्र: परमप्रभु यावे आ लोव्र पाइब क्येडा येसु ख्रीस्त ठेयब बाक्ब।

परमप्रभु यावे आ स्वर्ग डा गेय पाइब क्येडा येसु ख्रीस्त ठेयब बाक्ब।

मोसा क्येडा येसु ख्रीस्त ठेयब बाक्ब।

हारून क्येडा येसु ख्रीस्त ठेयब बाक्ब।

मेल्कीसेदेक नक खाल डा चढेब बाक्ब।

२. एको किताब डा पतीक लोव्र:

मुर नेल्ल नु दुशा बाक्चा।

थमा सुइक्ब लोक्ब आन कली दाक्चा मप्रोनीन।

## डोंइती डा लोव्र

१ साइ नेसी परमप्रभु यावेमी आ लोव्र पाइब आन कली मार मार पपाइश्शा नु कोंइशा, इं किकी पिपी नु लोव्र पाइबाक्माक्त।<sup>2</sup> नोले डा नाक्ती आ तौ रे पा इं कली लोव्र पाप्तु। आ तौ कली नेल्ल अधिकार गेशो बाक्त। सरीड नु रागी नेल्ल आ तौ रे पा सेला बाक्त। *भजन संग्रह २:८; यूहन्ना १:३; कलस्सी १:१६*<sup>३</sup> आ तौ आ आफ आ सक्ति नु छेडछेड बाक्ब। मिनु आ सक्ति डा लोव्र पतीकेमी नेल्ल आन कली कोव्रना कोव्रन बाक्ब। मेकोमी पाप क्याम्तीक गेय पने थुम्शा, नेल्ल क्येडा ठेयब मान ताइब आ ग्युरा गे निश्शो बाक्ब।

## स्वर्ग डा गेय पाइब नु येसु

४ परमप्रभु यावे आ स्वर्ग डा गेय पाइब आन क्येडा आ तौ ठेयब बाक्ब। मिनु मेको आन क्येडा ठेयब नें तशो बाक्ब। *१पत्रुस ३:२२; फिलिप्पी २:९*<sup>५</sup> परमप्रभु यावेमी आ स्वर्ग डा गेय पाइब सु कली चहिं “गो इ कली थिंतन। मोपतीके गे आं तौ नवे” देंम डा? मिनु “गो मेको आ आफ दुम्नुड, मेको चहिं आं तौ दुम्ब” देंम डा? *भजन संग्रह २:७; २सामुएल ७:१४*<sup>६</sup> आ डोंइती जरमेशो तौ कली रागीम सोइक्तानु “आं स्वर्ग डा गेय पाइब नेल्लेमी मेको कली मान पा ठेयब सेल्मेक्ल” देंत। *भजन संग्रह ९७:७; रोमी ८:२९*<sup>७</sup> परमप्रभु यावेमी आ स्वर्ग डा गेय पाइब आन पर्बम “आं स्वर्ग डा गेय पाइब आन कली फथ नु ब्रशो मी सेल्नुड” देंत। *भजन संग्रह १०४:४*<sup>८</sup> तन्न आ तौ आ पर्बम “इन राज्य पचा गेना हना यो लीब। इन राज्य डा राज दन्ड ठीक निसाफ पतीके राज दन्ड बाक्ब।<sup>९</sup> ठीक गेय पतीके दाक्नीनी। मरिम्शो पतीके मदाक्नीनी। मोपतीके परमप्रभु, इन परमप्रभु यावेमी इन पियामी तेल खेक्शा ग्येरपाइक्तु। इन वारच आन क्येडा इन कली ठेयब सेल्नु” देंत। *भजन संग्रह ४५:६-७*<sup>१०</sup> अरु लोव्रमी यो “प्रभु, गे नेल्ल क्येडा डोंइती रागी डा जग वोइक्तीनी। मिनु सरीड इन गुइ डा गेय बाक्ब।<sup>११</sup> मो हना यो मेको नेल्ल मलीनीम। गे चहिं गेना हना यो बाक्नीनी। सेल्शोपुकी माइत वा खोदेंशो पा जेक्शा लाइनीम।<sup>१२</sup> फेक्तीक वा मुक्शो खोदेंशो पा, मेको आन कली मुक्नीनी। वा फाइश्शो खोदेंशो पा, मेकोपुकी फांइसीनीम। गे चहिं गेनायो मफांइसीथु गेना हना यो बाक्नीनी” देंत। *भजन संग्रह १०२:२५-२७*<sup>१३</sup> परमप्रभु यावेमी आ स्वर्ग डा गेय पाइब सु कली “इ जोरी सनु आन कली इ खोइल आगामी मवोदुमी सम्म आं ग्युरा गे बाक्को, देंम डा? *भजन संग्रह ११०:१*<sup>१४</sup> मेको गेय पाइब सोक्त मनमी डा? मिनु आन पाप क्याम्चा

पुंडसीब आन कली वारच पथ सोइश्शो मनमी डा?” देंत। *भजन संग्रह ३४:८; भजन संग्रह ९१:११-१२*

## नेंशो लोव्र थुंम वोइक्चा माल्ब

२ इं नेंशो लोव्र थुंमी वोइक्चा माल्ब। थुंमी मवोइक्तय हना, मेको लोव्र साम्नय।<sup>२</sup> परमप्रभु यावे आ स्वर्ग डा गेय पाइबपुकीम तुइक्पाइश्शो लोव्र थमा दुम्त। मिनु सु सुमी मेको आन लोव्र मटीमे, मेकोपुकीमी सजाइ ताम्नेक्म। *प्रेरित ७:५३; गलाती ३:१९*<sup>३</sup> पाप आ सजाइ रे ब्रोंइतीक ठेयब गेय कली ममिम्ताक्य हना, दोपा सजाइ रे ब्रोंइने चाप्नया डा? मेको ठेयब गेय डोंइती प्रभुमी तुइक्पाइश्शो बाक्त। मिनु आ लोव्र नेंबपुकीमी “थमा बाक्ब” दे तुइक्पाइश्शो बाक्तेक्म। *हिब्रू १०:२९; हिब्रू १२:२५*<sup>४</sup> परमप्रभु यावेमी पपाइश्शो चिन्ड नु छक लाक्वा डा गेय, सक्ति पाइश्शो शुश गेय नु परमप्रभु यावेमी आ दाक्शो पा योव्रशा आ सोक्तीमी मुर आन कली पपाइश्शो गेय, मेको सांफा सांकछी बाक्नीम। *मर्कूस १६:२०; २कोरिन्थी १२:१२; १कोरिन्थी १२:४-११; प्रेरित २:१-१३; प्रेरित १०:४४-४५*

## ख्रीस्त सेंसीशा नेल्ल क्येडा ठेयब दुम्शो

५ इं देंशो लोव्र मार बाक्ब देंशा हना, पाप रे प्रोंइचा नु नोले जाक्ब परमप्रभु यावे आ राज्य चहिं परमप्रभु यावेमी आ स्वर्ग डा गेय पाइब आन गुडमी जिम्मा मगेशो बाक्ब।<sup>६</sup> परमप्रभु यावे आ लोव्र पाइब कामी “मुर आइक्च बाक्त हना यो, मेको कली मिन्मीनी। रागीम जरमेशो मुर आन कली मारेदे कोव्रनीनी?<sup>७</sup> मेको कली इन स्वर्ग डा गेय पाइब क्येडा इच्ची आइक्च सेल्शा वोइक्तीनी। नोले मान पाइक्चा पुंडसीतीके सिरपेच गुप्चा गेशा, सक्ति पाइश्शो सेल्तीनी।<sup>८</sup> मिनु मारेइ मारेइ मेको आ अधिकारम गेतीनी” दे ब्रेक्शो बाक्त। परमप्रभु यावेमी आ गुडमी मारेइ मारेइ जिम्मा गेशा अधिकार गेप्तु देंशो लोव्रमी मार रुम्सीब देंशा हना, मेको नेल्ल कोव्रब बाक्ब, दे रुम्सीब। तन्न गो मुल सम्म मोदेंशो अधिकार पाइब बाक्ब, दे मरुजय। *भजन संग्रह ८:४-६*<sup>९</sup> गोपुकीमी येसु कली मान पाइक्चा पुंडसीतीके, छेडछेड डा सिरपेच गुप्शो नु सक्ति पाइश्शो दुम्शो ताइतय। रागीम बाक्मेनु, परमप्रभु यावे आ स्वर्ग डा गेय पाइब क्येडा इच्ची आइक्च दुम्शो बाक्त। मारेदे हना परमप्रभु यावेमी मुर नेल्ल आन कली शिशी पाइनुड, दे कोंइचा कली मुर आन पर्बम श्येत जपाइश्शा बेक्चा गेप्तु। *फिलिप्पी २:८-९*<sup>१०</sup> नेल्ल सेल्ब नु नेल्ल आन कली ब्रोंइतीक सोक्त गेबमी शुश मुर आन कली आन पाप रे प्रोंइतु। मेको प्रोंइब कली शुश श्येत जपाइश्शा, पाको



सेल्लु। हिब्रू १२:२<sup>11</sup> पाप रे प्रॉइब नु पाप रे ब्रॉइब नेल्ल खिं का डा मुर दुम्तेक्म। मोपतीके पाप रे प्रॉइबमी पाप रे ब्रॉइब आन कली आ लोकबपुकी देंचा मुने मपाइब। यूहन्ना १७:१९; मर्कुस ३:३४-३५; यूहन्ना २०:१७  
12 मेकोमी “गो आं लोकब आन कली इन नें तुइक्पाइक्नुडमी। थमा सुइक्ब आन दातेमी इन कली ठेयब सेल्शा कुम्सो पाइनुड” देंत। भजन संग्रह २२:२२<sup>13</sup> मिनु लेंशा “गो मेको कली थमा सुइक्नुड” दे ब्रेक्शो बाक्त। मिनु चिनु लेंशा “नेनीन, परमप्रभु यावेमी आं कली गेशो तमी तौ, गो नेल्ल काथा बाक्नीकी” देंत। यसैया ८:१६-१७<sup>14</sup> तमी तौ हुश नु रुश के जोल्शो नम। मोपतीके येसु ख्रीस्त मेकोपुकी नु खाल का डा पा हुश नु रुश के दुम्त। बेक्पाइक्ब सक्ति पाइश्शो कली खतम पोक्वा कली आंमन बेक्त। रतिमोथी १:१०; १यूहन्ना ३:८<sup>15</sup> मारदे हना बेक्पाइक्ब सक्ति पाइश्शो सैतान कली ग्राचा नु मबेक्म सम्म बेक्वा हिंब मुर आन कली हिंघा रे प्रॉइचा कली मो पापु।<sup>16</sup> परमप्रभु यावे आ स्वर्ग डा गेय पाइब आन कली ममाइ। अब्राहाम आ खिं डा मुर आन पर्वम मोदेंशो पशो बाक्त।<sup>17</sup> मोपतीके मेको आ लोकब खोदेंशो दुम्चा माल्ताक्व। मोपा परमप्रभु यावे आ गेय पा मुर आन पाप क्याम्चा कली शिशी पाइब नु गेनायो आ दाक्वा मप्रॉइब ठेयब चढेब दुम्त। फिलिप्पी २:७<sup>18</sup> मारदे हना आ यो शुश श्येत जशा, थुं थाम्चा पुंडसाक्व। मोपा आन थुं थाम्चा पुंडसीशा, श्येत जाइब आन कली वारच पने चाप्ब। हिब्रू ४:१५

मोसा क्येडा ख्रीस्त ठेयब बाक्ब

3 मोपतीके परमप्रभु यावे आ मुर, आं लोकबपुकी, गो यो स्वर्ग रे ब्रेक्चा पुंडसीशो बाक्नीनी। सोइश्शो, दे नें वोइक्चा पुंडसीशो नु इं थमा सुइक्तीक डा नेल्ल क्येडा ठेयब चढेब येसु कली मिम्तीने। हिब्रू ४:१४<sup>2</sup> दोपा मोसामी परमप्रभु यावे आ खिंमी रिम्शो गेय पवा, मोपा येसुमी यो आंम कली योत्रब आ डोंइती रिम्शो पा आ देंशो पापु। गन्ती १२:७<sup>3</sup> दोपा खिं क्येडा खिं सेल्ब शुश मान पाइक्वा पुंडसीबा, मोपा मोसा क्येडा येसु शुश मान पाइक्वा पुंडसीशो बाक्ब।<sup>4</sup> खिं नेल्ल मुरुम सेल्शो बाक्नीम। तन्न मारेइ मारेइ सेल्ब चहिं परमप्रभु यावे बाक्ब।<sup>5</sup> नोले तुइक्पाइक्तीक लोत्र आ पर्वम सांकछी दुम्चा कली मोसा परमप्रभु यावे आ खिंमी थम रिम्शो गेय पाइब दुम्त।<sup>6</sup> ख्रीस्तम चहिं परमप्रभु यावे आ खिंमी आ तौ दुम्शा, रिम्शो गेय पापु। मिनु गो मेको कली आस पा थमा सुइक्वा मप्रॉइतय हना, गो आ खिं बाक्नय। एफिसी २:१९; १पत्रुस २:५

परमप्रभु कली टीब दुमीन

7 परमप्रभु यावे आ सोक्तीमी मार देंत देंशा हना “मुलाक्ती आं लोत्र नेंतीनी हना, हिब्रू ४:७<sup>8</sup> साइ नेसी इन किकी पिपी गोरशो रागीम गाक्शा, नाक्वा पुंडसमानु, पशो खोदेंशो इन थुं खकटा पा मटीब मद्दुमीन। प्रस्थान १७:७; गन्ती २०:२-५<sup>9</sup> इन किकी पिपीम ४० बर्स सम्म आं ठेयब गेय तशा यो, आं थुं थाम्चा थाम्न बाक्तेक्म।<sup>10</sup> मोपतीके मेको आन कली तशा, आं थुं जिक्त। मिनु गो ‘मेकोपुकी गेना हना यो हेंथे गाक्नीम। आं लां मतुइक्नीम’ देंती।<sup>11</sup> मिनु गो चुरशा ‘मेकोपुकी गेनायो आं राज्य ओव्रशा थुं नाइक्वा मताइनीम’ दे कसम जशा देंती” देंत। भजन संग्रह ९५:७-११; हिब्रू ४:३; गन्ती १४:२१-२३<sup>12</sup> आं लोकबपुकी, होस पांडसीने। मारदे हना मरिम्शो नु थमा मसुइक्तीक थुंमी गेना हना यो ब्रॉइशा बाक्ब परमप्रभु यावे रे सुइ इन कली फ्राशा मलदल।<sup>13</sup> पापम इं थुं क्याल्शा मटीब मद्दुम्यल, दे मुलाक्त रेन नाक्त किंत किंत अर्ती गेमुने। १थिस्सलोनिकी ५:११<sup>14</sup> इं डोंइती नाक्त डा थमा सुइक्तीके नोले सम्म मप्रॉइतय हना, गो ख्रीस्त नु थुं का डा दुम्शा बाक्नय। हिब्रू ६:११<sup>15</sup> डोंइती “मुलाक्ती आं लोत्र नेंतीनी हना, इं किकी पिपीम मटिशो खोदेंशो पा इन थुं खकटा पा मटीब मद्दुमीन” देंशो बाक्ब।<sup>16</sup> नेंशा यो मटीब सु नमी? मोसाम इजीप्त रे गुंडशा पिश्शोपुकी मनमी डा? <sup>17</sup> सु सुमी ४० बर्स सम्म परमप्रभु यावे आ थुं जिक्तमे? मेको पाप पाइबपुकी मनमी डा? मेको गोरशो रागीमी बेक्शो बाक्तेक्म। गन्ती १४:२९; १कोरिन्थी १०:१०<sup>18</sup> परमप्रभु यावेमी आ लोत्र मटीब आन पर्वम “मेकोपुकी गेनायो आं राज्य ओव्रशा थुं नाइक्वा मताइनीम” दे कसम जशो

मबाक्बा डा? <sup>19</sup> मोपतीके परमप्रभु यावे आ लोत्र कली थमा मसुइक्तीकेन आ राज्य ओव्रशा नाइक्वा मतामे बाक्त, दे रुज्य।

परमप्रभु आ मुर थुं नाइक्वा ताइनीम

4 मोपतीके होस पाइसय, थुं नाइक्वा ताइनीनी देंशो लोत्र मुल यो लीशो बाक्तीके, होस पा बाक्व। मारदे हना सु सुमी आ लोत्र मटीमे, मेको ओव्रचा मताइनीम।<sup>2</sup> थमा पा, इं कली यो मेको आन कली खोदेंशो पा परमप्रभु यावे आ लोत्र नेंपाइश्शो बाक्त। तन्न इं किकी पिपी आन कली नेंपाइश्शो लोत्र शोर गाक्शो दुम्त। मारदे हना नेंबपुकीमी थमा मसुइक्थु मटिशो बाक्तेक्म।<sup>3</sup> गो थमा सुइक्बपुकी चहिं थुं नाइक्वा ताइनय। परमप्रभु यावेमी “गो चुरशा, मेको आन कली गेनायो थुं नाइक्वा मगेनुडमी, दे कसम जाता” देंशो बाक्त हना यो, आ राज्यमी नाइश्शा बाक्तीके वोइक्ने थुम्शो बाक्त। हिब्रू ३:११<sup>4</sup> परमप्रभु यावेमी रागी मारेइ मारेइ सेल्शा, ७ नाक्त आ पर्वम “परमप्रभु यावेमी नेल्ल सेल्ने थुम्शा, ७ नाक्तीमी नाइक्से बाक्त” दे ब्रेक्शो बाक्ब। उत्पत्ती २:२<sup>5</sup> मिनु लेंशा लोत्र का चहिं “मेको आन कली गेनायो आं राज्य ओव्रशा, नाइक्वा मगेनुडमी” दे ब्रेक्शो बाक्ब।

6 मो हना यो का निक्शी ओव्रचा ताइनीम। तन्न आ लोत्र डोंइती डा नेंबपुकीमी मटिथु, ओव्रचा मतामे बाक्त।<sup>7</sup> मोपतीके अर्को नाक्त का वोइक्ब। नाप्खे देंशो लोत्र “मुलाक्ती आ लोत्र नेंतीनी हना, इन थुं खकटा पा मटीब मद्दुमीन” दे शुश बर्स नोले दाऊद कली ब्रेक्पाइश्शो बाक्माक्त। हिब्रू ३:७<sup>8</sup> यहोसुमी मेको आन कली नाइक्तीकेम चाक्दीन्ने चाप्शो हना, मेकोमी मो देंचा ममाल वा। ब्यक्स्था ३१:७; यहोसु २२:४<sup>9</sup> मोपतीके परमप्रभु यावे आ मुर आन कली नाइक्तीक नाक्त का बाक्ब, दे तुइक्नय।<sup>10</sup> मिनु सुमी परमप्रभु यावे आ नाइक्तीके ताइबा, मेको परमप्रभु यावे खोदेंशो पा आ गेय रे नाइक्वा ताइब। प्रकाश १४:१३

11 मोपतीके सुइमी परमप्रभु यावे आ लोत्र मटिथु जाम्शा मलमल। गो नेल्ले नाइक्वा ततीकेमी ओव्रचा माल्य। हिब्रू ३:१६-१९<sup>12</sup> मारदे हना परमप्रभु यावे आ लोत्र ब्रॉइतीक सक्ति पाइश्शो, गेय पाइब नु निम्फा पट्टी हेश्शो तरवार क्येडा हेश्शो बाक्ब। मेकोमी श्ये नु रुश, सोक्त नु थुं तिल्ब। मिनु मिम्तीके नु थुं डा लोत्र नेल्ल नाक्ने चाप्ब। प्रकाश २:१२; येरमीया २३:२९<sup>13</sup> मेको आ डोंइती सुइमी मारेइ खूइक्ने मचाप्नीम। नेल्लेमी पशो नु मिम्शो मेको आ डोंइती ताइसीब।

ख्रीस्त नेल्ल क्येडा ठेयब चढेब दुम्शो

14 तन्न गो इं के ठेयब चढेब का बाक्ब। मेको स्वर्ग लाक्शा लाइब, परमप्रभु यावे आ तौ, येसु बाक्ब। इं थमा सुइक्तीके बोल्यो सेल्शा, गेनायो मप्रॉइय। हिब्रू ३:१; हिब्रू ९:११,१२; हिब्रू १०:२३<sup>15</sup> मारदे हना इं नेल्ल क्येडा ठेयब चढेबमी इं चाप्तीक नु मचाप्तीक दोदेंशो बाक्बा, नेल्ल तुइक्ब। गोपुकी इं थुं थाम्चा पुंडसीशो खोदेंशो पा, आ यो थुं थाम्चा पुंडसाक्व। तन्न थुं थाम्चा पुंडसाक्व हना यो, पाप मपव। हिब्रू २:१८; यूहन्ना ८:४६<sup>16</sup> मोपतीके इं कली मार मार माल्यानु, वारच पपांडसीशा, माफ नु शिशी तचा कली परमप्रभु यावे आ डोंइती महिथु, थुं बारपा जाक्दीय्य। रोमी ३:२५; रोमी ५:२

ख्रीस्त नु मेल्कीसेदेक

5 ठेयब चढेबपुकी मुर आन दाते रे योत्रचा पुंडसीशो बाक्नीम। परमप्रभु यावे नु मुर आन कली गारपाइक्वा, दे मेकोपुकीमी मुर आन पाप क्याम्चा कली परमप्रभु यावे कली भेटी नु मार मार चढेनीम।<sup>2</sup> मेकोमी मतुइक्ब नु मरिम्शो लां गाक्ब आन कली शिशी पने चाप्ब। मारदे हना मेको आंमन यो मोदेंशो बाक्ब।<sup>3</sup> मोपतीके मुर आन पर्वम चढेशो खोदेंशो पा आंमा आन मरिम्शो पशो क्याम्चा कली आं यो चढेचा माल्नीम। लेवी ९:७<sup>4</sup> मोदेंशो चढेब आंमन दुम्ने मचाप्नीम। हारून योत्रचा पुंडसीशो खोदेंशो पा परमप्रभु यावेमी मेको आन कली योत्रब। प्रस्थान २८:१<sup>5</sup> मोदेंशो पा ख्रीस्त आंमन ठेयब चढेब सेल्सीशो ममाइ “मुलाक्ती गो इ कली थीतन, गो आं तौ नवे” देंबमी योत्रतु। भजन संग्रह २:७<sup>6</sup> मिनु लेंशा “गे

गेना हना यो मेल्लीसेदेक आ खाल डा चढेब दुम्ते" देंत। भजन संग्रह ११०:४; हिब्रू ६:२०

7 येसु मुर दुम्शा, रागीम बाकमेनु, प्रेक्कु तोक्शा गोंगों पा डाक्शा आ कली बेक्शो रे संब कली पुना बाक्त। परमप्रभु यावे कली मान पा हिंशा, मुर आन पर्बम पुना बाक्त। मिनु आ पुंड्रशो तवा बाक्त। मत्ती २६:३९-४६<sup>८</sup> तौ दुम्शा यो श्येत जतीक रे पा टिचा शेंसे बाक्त। फिलिप्पी २:८<sup>९</sup> मेको पाको दुम नोले आ कली टीब आन कली गेना हना यो श्येत रे प्रोंडशा बाक्चा गेब दुम्माक्त।<sup>१०</sup> मिनु परमप्रभु यावेमी मेको कली मेल्लीसेदेक आ खाल डा ठेयब चढेब वोड्रशो बाक्त। हिब्रू ७:-

लोव्र रुख दुमीने

11 ठेयब चढेब सेल्शा वोड्रक्या पुंड्रसीशो आ पर्बम मुल यो इन कली शुश शेंचा लीशो बाक्ब। इन नोफा थांड्रशो बाक्ब। मोपतीके मेको आ अर्थ दोपा रुप्पाड्रक्या ननी? 12 मुल गेपुकी अरु आन कली शेंब दुम्चा माल्शो ननी। तन्न इन कली कका परमप्रभु यावे आ डोंड्री डा लोव्र लेंशा शेंचा माल्ताक्नी। मुल खमे जाड्रब खोदेंशो दुम्चा माल्शो ननी। तन्न दूध तूब आल खोदेंशो बाक्नीनी। १कोरिन्थी ३:१-३; १पत्रुस २:२<sup>१३</sup> दूध तूब आल खोदेंशो दुम्शा, बाक्बपुकीम परमप्रभु यावे आ ठीक लोव्र शुश रुखे मचाप्नीम। एफिसी ४:१४<sup>१४</sup> पाको दुम्शो आन कली चहिं खमे गेंसीब। मेकोपुकीमी परमप्रभु यावे आ गेय पना पन मार रिम्शो बाक्मे, मार मरिम्शो मेको तुड्रक्नीम।

डोंड्री शेंशो लोव्र लेंशा मर्शेंचा

6 मोपतीके ख्रीस्त आ पर्बम शेंचा माल्शो लोव्र लेंशा मर्शेंचा। में क्येडा लाक्शा पाको दुम्चा। डोंड्री शेंचा माल्शो लोव्र चहिं मार बाक्ब देंशा हना, मरिम्शो गेय पचा प्रोंड्रशा, आन थुं परमप्रभु यावे गे लेत्वा, परमप्रभु यावे कली थमा सुड्रक्या, ब्वाक्कुम ख्रुम्शा गुंड्रपांड्रसीचा, 2 मार मार चिक्चा शेंतीके, मुर आन तारी गुड्र वोड्रक्या, बेक्शो रे संसीशा ब्रोंड्रचा नु गेना हना यो निसाफ पचा आ पर्बम लोव्र बाक्ब। 3 परमप्रभु यावेमी आंड्र कली मोदेंशो शेंचा गेपु हना, गो शेंनीकी। 4 मारदे हना डोंड्री शेंतीक लोव्र रुप्शा, परमप्रभु यावे आ छेडछेड तशा, आ सक्ति तशा, परमप्रभु यावे आ सोक्तीम ब्रीशा, 5 परमप्रभु यावे आ लोव्र डा शिशी रुप्शा नु मेको जाक्चशो आ राज्य डा सक्ति आन कली लेंशा शेंचा शोर गाक्शो बाक्ब। मारदे हना सुम मेको नेल्ल तशा यो, हिब्रू १०:२६-२९; २पत्रुस २:२०<sup>६</sup> मुल मेको नेल्ल ताड्रक्ताक्म हना, मेको आन कली डोंड्री खोदेंशो पा लेंशा नक पा वोड्रक्ने मचाप्नीम। मारदे हना आन पशोमी परमप्रभु यावे आ तौ कली लेंशा शीम केप्शा कांटी थोक्शा क्येड्रशा मुने तोक्नीम। 7 माल्शो रेड्र यिमेनु, ख्रुम्ब आ माल्शो बाली नाली ताप्तु हना, परमप्रभु यावेमी मेको रू कली आसीक गेब। 8 माल्शो रेड्र यिशा यो चू नु सुवा ला वात हना, मेको रू शोर गाक्शा, सराप राड्रब। मिनु मी सुड्रशा क्रोड्रक्या पुंड्रसीब।

परमप्रभुमी आ लोव्र खाण्व

9 आंड्र दाक्शो लोक्बपुकी, गोपुकीमी ओदेंशो लोव्र पाड्रतक हना यो, इन कली तशा, गे पाप रे ब्रोंड्रचा तशो ननी, दे थमा सुड्रक्नीकी। 10 मारदे हना परमप्रभु यावे आ नेंमी अरु थमा सुड्रक्ब आन कली वारच पा रिम्शो पाड्रतीनी। मुल यो रिम्शो पाड्रतीनी। मिनु मेकोमी इन रिम्शो पशो गेनायो मर्पेंब। हिब्रू १०:३२-३४<sup>११</sup> गे नेल्लेमी नेल्ल क्येडा नोले सम्म "परमप्रभु यावे आ देंशो नेल्ल जाक्दीण्व" दे थमा सुड्रक्या मप्रोंड्रतीक सक्ति तने, दे मिन्नीकी। हिब्रू ३:१४; फिलिप्पी १:६<sup>१२</sup> मचाण्ड्र डेंब मदुमीने। "आ देंशो जाक्दीण्व" दे आ थोक्शा पशो लोव्र थमा सुड्रक्ब खोदेंशो पने। मेकोपुकीमी फाल्शा, थमा सुड्रशा, परमप्रभु यावे आ देंशो जाक्दीशो ताड्रनीम।

13 परमप्रभु यावेमी अब्राहाम कली लोव्र गेवानु, आ क्येडा ठेयब सुड्र मबाक्तीके आंम आ नें थिशा कसम जशा 14 "इ कली थमा पा आसीक गेनन। इ खिं डा मुर सोशा बोशा, शुश दुम्शा नेल्ल रागीम ब्रीपाड्रकुड्रमी" देंशो बाक्त। उत्पत्ती २२:१६-१७<sup>१५</sup> मिनु अब्राहाममी शुश बर्स सम्म रिम्शा

बाक्शा, परमप्रभु यावे आ देंशो नेल्ल लोव्र गाण्वो ताप्तु। 16 मुरपुकीमी यो कसम जामेनु, आन क्येडा ठेयब आ नें थिशा कसम जाड्रनीम। कसम जशोमी आन लोव्र थमान सेल्नीम। प्रस्थान २२:१०<sup>१७</sup> मोपतीके परमप्रभु यावेमी "आं गेशो लोव्र गेनायो मफाड्रकुड्र" दे आ गेशो लोव्र ताड्रब आन कली रुप्पाड्रक्या, दे कसम जशा, आ लोव्र थोक्ता बाक्त। 18 मिनु परमप्रभु यावेमी गेनायो जोल मपाड्रब, आ गेशो लोव्र नु आ कसम जशो, एको निक्शी गेनायो मफाड्रसीनीस दे तुड्रशा, गो सजाड्र तचा रे प्रोंड्रचा पुंड्रसीबपुकी इंड्र डोंड्री वोड्रशो आस तचा कली इंड्र थुं बारपाड्रक्या ताड्रनय। 19 मेको आस चहिं इंड्र थुं ग्येल्थ लुक्च पचा मगेब ग्याड्रक्तीके खोदेंशो बाक्ब। मेको आस नेल्ल क्येडा आगा डा चोव्रखो कोठा डा फारतीक वा आगा बाक्ब। लेवी १६:२, १२<sup>२०</sup> येसु मेल्लीसेदेक आ खाल डा ठेयब चढेब नु इंड्र कली लां कोड्रब दुम्शा, नेल्ल क्येडा डोंड्री मेकेर ओव्रदीशो बाक्ब। हिब्रू ५:६

ख्रीस्त मेल्लीसेदेक आ खाल डा बाक्ब

7 मेको मेल्लीसेदेक सालेम डा पिप नु नेल्ल क्येडा ठेयब परमप्रभु यावे आ चढेब बाक्माक्त। अब्राहाममी आ जोरी सत्रु दुम्शो पिप आन कली ग्राशा साड्रशा डा मिन लेम्मेनु, मेको मेल्लीसेदेकमी अब्राहाम कली गुम्थ लशा, आसीक गेवा बाक्त। उत्पत्ती १४:१८-२०<sup>२</sup> मिनु अब्राहाममी मेको कली आ ग्राशा चाक्शो थोव्रक १० भागमी भाग का गेवा बाक्त। मेको आ नें मार रुम्सीब देंशा हना, ठीक निसाफ पाड्रब पिप नु सालेम डा पिप, दे रुम्सीब। सालेम देंशो चहिं थुं नाड्रशा बाक्तीके बाक्ब। 3 मेको आ आम आफ नु आ किकी पिपी मबाक्नीम। गेना जरमेसे, गेना बेक्मे, दे मत्तुंड्रसीब। तन्न परमप्रभु यावे आ तौ खोदेंशो बाक्शा, गेना हना यो परमप्रभु यावे कली चढेब दुम्शा बाक्ब। यूहन्ना ७:२७

4 मेको गिश ठेयब बाक्ब, दे मिन्तीन। मारदे हना इंड्र ठेयब किकी अब्राहाममी आ ग्राशा चाक्शो रिम्शो थोव्रक १० भागमी भाग का मान पा गेवा पुंड्रसे बाक्त। 5 लेवी आ खिं डा मुर चढेब दुम्शा, इस्राएली आन लोक्ब रे पा १० भागमी भाग का का पोक्बाक्तेक्म। मेको आन पतीके बाक्ब। लेवी आ खिं डा नु इस्राएली नेल्ल अब्राहाम आ खिं डा मुर नम। गन्ती १८:२१<sup>६</sup> मेल्लीसेदेक लेवी नु इस्राएली जात डा मबाक्त हना यो, अब्राहाम रे पा १० भागमी भाग का गेवा पुंड्रसे बाक्त। मिनु परमप्रभु यावे आ गेशो लोव्र ताड्रब अब्राहाम कली आसीक गेवा बाक्त। 7 ठेयबमी आड्रक्च कली आसीक गेब, दे नेल्लेमी तुड्रक्नय। 8 मेको बेक्शा लाड्रब लेवी आ थर डा चढेबपुकीमी १० भाग डा भाग का ताड्रब दुम्शो बाक्नीम। तन्न गेना हना यो ब्रोंड्रशो बाक्ब देंचा पुंड्रसीबमी यो १० भाग डा भाग का तवा बाक्त। 9 अब्राहाम आ पतीकेमी लेवीपुकी १० भागमी भाग का ताड्रब दुम्शो बाक्नीम हना यो, डोंड्री गेब यो दुम्शो बाक्मा बाक्त। 10 मारदे हना मेल्लीसेदेकमी अब्राहाम कली गुमानु, लेवीपुकी अब्राहाम आ रांमी बाक्शो बाक्मा बाक्त। मिनु अब्राहाम रे पा १० भागमी भाग का गेब दुम्मा बाक्त, दे तुड्रक्नय।

मेल्लीसेदेक आ खाल डा चढेब

11 लेवी आ खाल डा चढेबपुकीमी परमप्रभु यावे आ अरेशो लोव्र यो ताम्तेक्म। मेको आन पशोमी मुर आन कली पाको सेल्ने चाण्वो नम हना, हारून आ खाल डा ममाड्र मेल्लीसेदेक आ खाल डा चढेब का वोड्रक्या ममाल वा। 12 चढेब आन खाल फांड्रसाक्व हना, मेको अरेशो लोव्र यो फांड्रसीब। 13 सु आ पर्बम मेको लोव्र ब्रेक्शो बाक्मे, मेको गेनायो चढेतीक गेय मपाड्रब थर डा बाक्माक्त। 14 इंड्र प्रभु यहूदा थर डा बाक्माक्त, दे गो नेल्लेमी तुड्रक्नय। यहूदा थर डा मुरपुकीम गेनायो चढेतीक गेय मपशो बाक्मा बाक्त। इंड्र किकी पिपी मोसामी यहूदा थर डा मुर चढेब बाक्नीम, दे गेनायो मर्देमाक्त। उत्पत्ती ४९:१०; मत्ती १:१-३<sup>१५</sup> चढेब आन खाल फांड्रसे बाक्त, दे थमा पा तुड्रक्नय। मारदे हना मेल्लीसेदेक खोदेंशो पा मेको चढेब सेल्चा पुंड्रसाक्व। 16 मेको आ किकी पिपी आन थर रे चढेब मदुम्शो बाक्ब। तन्न गेनायो जाम्शा मलाड्रब सक्ति रे पा चढेब दुम्शो बाक्ब। 17 मारदे हना मेको आ पर्बम "मेल्लीसेदेक आ खाल डा गेना हना यो चढेब दुम्ते" देंशो बाक्ब। भजन संग्रह ११०:४; हिब्रू ५:६<sup>१८</sup> डोंड्री अरेशो लोव्रमी पाप

क्याम्ने मचाण्व। मिनु सुइ आन कली पाको सेल्ने मचाण्व। मोपतीके ताइक्वा माल्ताक्व।<sup>19</sup> मिनु मेको आ पा डा नेल्ल क्येडा रिश्शो नक आस वोइश्शो बाक्त। मेको आस रे पा परमप्रभु यावे आ नेक्था जाक्दीन्ने चाण्य।

<sup>20</sup> परमप्रभु यावेमी मेको आस गेवानु, कसम जशा गेशो बाक्त। डोंइती चढ़ेबपुकी कसम मजथु चढ़ेब दुश्शो बाक्मा बाक्त।<sup>21</sup> तन्न मेकोमी कसम जशा “परमप्रभुमी कसम जशो बाक्व। मिनु आ थुं मफाइक्व। गे गेना हना यो चढ़ेब दुम्ने” दे माइक्वा पुंइसीशो बाक्त। *भजन संग्रह ११०:४*<sup>22</sup> मो माइक्वा पुंइसीतीके येसु डोंइती पशो कबल क्येडा, नोले पशो रिश्शो कबल डा लोत्र खाण्व दुश्शो बाक्त। *हिब्रू ८:६; हिब्रू १२:२४*

<sup>23</sup> डोंइती डा चढ़ेबपुकी गेना हना यो ब्रोंइशा बाक्ने मचाप्तीके, शुश चढ़ेबपुकी दुम्चा माल्मा बाक्त। गिश बेक्मा, मिश योवशा वोइक्वा माल्मा बाक्त।<sup>24</sup> येसु चहिं गेना हना यो ब्रोंइशा बाक्तीके गेना हना यो चढ़ेब दुम्चा बाक्वो बाक्व।<sup>25</sup> मोदुम्तीके येसु रे पा परमप्रभु यावे आ डोंइती जाक्दीश्शो आन कली येसुमी गेना हना यो वारच पने चाण्व। मारदे हना मेको आन पर्बम गेना हना यो परमप्रभु यावे आ डोंइती बाक्वा पुंइशो बाक्व। *रोमी ८:३४; १यूहन्ना २:१*

<sup>26</sup> इं ठेयब चढ़ेब दोदेशो माल्शो बाक्त देशा हना, पाप रे डोन बाक्वो, दोस मताइब, रिश्शो थुं पाइश्शो, पापी रे दिल्शा बाक्वो, स्वर्गमी नेल्ल क्येडा ठेयब सेल्चा पुंइसीशो माल्शो बाक्त।<sup>27</sup> अरु चढ़ेबपुकीमी नाक्त किंत किंत डोंइती आन पशो पाप, नोले मुर आन पशो पाप क्याम्चा कली चढ़ेशो खोदेशो पा आं पचा ममाल्द। कालेमीन आ रां चढ़ेशा, मुर नेल्ल आन पाप क्याम्ने थुम्तु। *लेवी ९:७; लेवी १६:६, १५*<sup>28</sup> परमप्रभु यावे आ अरेशो लोत्रमी पाको मदुम्शो मुर आन कली योवशा चढ़ेब सेल्बाक्त। परमप्रभु यावे आ अरेशो लोत्र तुइश्शो शुश बर्स नोले कसम जशो लोत्रमी गेना हना यो पाको बाक्वो आ तौ कली ठेयब चढ़ेब सेल्शा वोइश्शो बाक्त।

#### नक कबल डा चढ़ेब

**8** मुल सम्म पशो लोत्रमी नेल्ल क्येडा तुइक्वा माल्शो लोत्र मार बाक्व देशा हना, इं के ठेयब चढ़ेब स्वर्गम बाक्व। मेको नेल्ल क्येडा ठेयब मान पाइक्वा पुंइसीब आ ठेयब नित्तीके आ ग्युरा गे बाक्वो बाक्व। *हिब्रू ४:१४*<sup>2</sup> मुरपुकीमी सेल्शो ममाइ, परमप्रभु यावेमी सेल्शो थमा डा ताम्बुमी गेय पाइब दुश्शो बाक्व।<sup>3</sup> ठेयब चढ़ेब नेल्ले भेटी नु चोशा चढ़ेचा कली योवचा पुंइसीशो बाक्नीम। मोपतीके मेको ठेयब चढ़ेबमी यो मारेइ थोवक चढ़ेचा माल्ब।<sup>4</sup> रागीम बाक्वो हना, ठेयब चढ़ेब दुम्ने मचाण्व वा। मारदे हना परमप्रभु यावे आ अरेशो लोत्रमी ब्रेक्वो खोदेशो पा चढ़ेब शुश बाक्नीम।<sup>5</sup> मेकोपुकीमी स्वर्ग डा ताम्बु आ वांकुमी गेय पाइनीम। मोसामी ताम्बु सेल्चा गोवानु “डोंडामी बाक्डेनु, इ कली कोंइशो खोदेशो सेलो” दे परमप्रभु यावे रे माइक्वा पुंइसे बाक्त। *प्रस्थान २५:४०; कलस्सी २:१७*<sup>6</sup> मेको चढ़ेबपुकीमी पशो गेय क्येडा ख्रीस्त आ पशो गेय रिश्शो कबल डा बाक्व। मारदे हना डोंइती पशो कबल क्येडा नोले पशो रिश्शो कबल डा लोत्र खाण्व दुश्शो बाक्त। मेको नोले पशो कबल डोंइती गेशो लोत्र क्येडा रिश्शो लोत्रमी फ्रेशो बाक्व। *हिब्रू ७:२२*<sup>7</sup> डोंइती पशो कबल डा लोत्रमी पाको सेल्शो हना, नक कबल पचा ममाल वा।<sup>8</sup> परमप्रभुम आ थुं मनुथु, इस्राएली आन कली “नेनीने, प्रभुमी ‘काबु इस्राएल आ खिं नु यहूदा आ खिं डा मुरपुकी नु नक कबल का पाइनुड। *हिब्रू १०:१६-१७*<sup>9</sup> मेको आन किकी पिपी आन कली पशो कबल खोदेशो ममाइ। मेको किकी पिपी आन कली गुइमी ग्याइश्शा, इजीप्त रागी रे गुंइशा लां कोंइदु नु कबल पा नाता सेल्तामी। तन्न मेकोपुकीमी नाता खोइक्तेक्म। मोपतीके गो यो मेको आन कली प्रोंइशा ममिम्तुमी” दे परमप्रभुमी देंब। *प्रस्थान १९:५-६*<sup>10</sup> मेको कबल मार बाक्व देशा हना, गो आं अरेशो लोत्र मेको आन मिम्तीकेम वोइश्शा, आन थुंम ब्रेक्नुड। मिनु गो मेको आन परमप्रभु यावे दुम्नुड। मिनु मेकोपुकी आं मुर दुम्नीम।<sup>11</sup> सुइमी आ लोक्व नु आ वारच कली ‘परमप्रभु यावे कली तुइक्तीन’ दे शेंमुचा ममाल्नीम। मारदे हना आल रे खूशो सम्म डा नेल्लेमी आं कली तुइक्नीम।<sup>12</sup> मेको आन कली शिशो पा, आन पशो पाप नेल्ल क्याम्शा गेनुडमी। मेको आन मरिश्शो पशो गेनायो ममिम्नुड” देंमाक्त।

*येरमीया ३१:३१-३४*<sup>13</sup> नक कबल आ पर्बम लोत्र वा डोंइती डा कबल कली माइत सेल्तु। मुल डा मेरे ममाल्शो नु माइत दुश्शो नेल्ल जाम्शा लचशो बाक्व। *रोमी १०:४*

#### ख्रीस्त खेयप का चढ़ेशो

**9** डोंइती डा कबलमी ठेयब सेल्चा कली अरेशो लोत्र नु रागीम परमप्रभु यावे आ बाक्तीक बाक्वो बाक्माक्त। *प्रस्थान २५:३१; प्रस्थान २५:२३; प्रस्थान २५:३०*<sup>2</sup> मिनु ताम्बु का सेल्शो बाक्माक्त। आगामी कोठा निक्शी पाइश्शो बाक्माक्त। डोंइती डा कोठाम बत्ती दातीक दियारी का, टेबल का नु परमप्रभु यावे आ डोंइती वोइश्शो कोंइतीक शोब्ले बाक्माक्त। मेको आ नोले चोवखो कोठा, दे नें वोइश्शो बाक्माक्त।<sup>3</sup> फारतीक वा आ आगा नेल्ल क्येडा चोवखो कोठा बाक्वो बाक्माक्त।<sup>4</sup> थम चोवखो कोठामी सुन के सेल्शो धूप चोतीक नु परमप्रभु यावे आ कबल पशो सुनमी गिल्शो सन्दोस बाक्माक्त। मेको कबल पशो सन्दोसमी मार वोइश्शो बाक्माक्त देशा हना, मन्ना कुर पशो सुन के बोस, हारून आ कोच्चा दाप्शो कोक्के नु परमप्रभु यावेमी फुल्लुमी मुशा ब्रेक्वा वोइश्शो अरेशो लोत्र मेको आगाम बाक्माक्त। *प्रस्थान १६:३३; प्रस्थान २५:१०-२२; गन्ती १७:२३-२५*<sup>5</sup> सन्दोस आ तारी करूब निक्शी वोइश्शो बाक्तेक्म। मेको निक्शीमी “परमप्रभु यावे एकेर बाक्व” दे आ शिशो पतीक कली वांकु गेशा वोइक्तेक्म। मेको नेल्ल आन पर्बम मुल का का पा शेंने मचाण्व।<sup>6</sup> मोदेशो ताम्बुमी चढ़ेबपुकीमी नाक्त किंत किंत ओव्रशा, परमप्रभु यावे कली आन पचा माल्शो गेय पाम्तेक्म। *गन्ती १८:३-४*<sup>7</sup> थम चोवखो कोठामी चहिं बर्समी खेयप का नेल्ल क्येडा ठेयब चढ़ेबमी हुश लाइश्शा चढ़ेथ ओव्रबाक्माक्त। आ पशो नु अरु आन पशो पाप क्याम्चा कली मेको हुश चढ़ेबाक्माक्त। *प्रस्थान ३०:३०; लेवी १६:२१४, १५*<sup>8</sup> डोंइती डा कोठा बाक्मेनु, मुरपुकी थम चोवखो कोठामी ओव्रचा मताइनीम, दे परमप्रभु यावे आ सोक्तीम रुपाइक्व। *हिब्रू १०:२०*<sup>9</sup> मेको मुल कली कोंइतीक का बाक्व। मेकोमी मार कोंइब देशा हना, भेटी नु चोशा चढ़ेशोमी मुर आन कली पाको सेल्ने मचाण्व। *हिब्रू ७:१९; हिब्रू १०:१-२*<sup>10</sup> मेको पतीके जचा थोवक, तूचा थोवक, चिकचा नु चढ़ेचा आ पर्बम बाक्नीम। मेको नेल्ल मुर आन मिश्शो शोर गाक्वो गेय बाक्नीम। नक लोत्र मजाक्म सम्म मेको माइत लोत्र तिशा पामेक्ल, दे वोइश्शो बाक्माक्त। *लेवी ११:-; गन्ती १९:-*

#### ख्रीस्तमी स्वर्ग डा ताम्बुमी गेय पशो

<sup>11</sup> रागी डा ममाइ, मुर आन गुइमी सेल्शो क्येडा ठेयब नु रिश्शो स्वर्ग डा ताम्बुमी ख्रीस्त ठेयब चढ़ेब दुश्शा, गेय पाइब।<sup>12</sup> बाछा, बोका आन हुश चढ़ेशो ममाइ। कालेमीन स्वर्ग डा थम चोवखो कोठाम ओव्रदीश्शा, आ हुश चढ़ेप्टु। मो पशोमी पाप रे प्रोंइतीक गेय गेना हना यो कली पने थुम्तु, मारेइ पचा मली।<sup>13</sup> बोका, ब्यफ आन हुश चढ़ेशा, आन श्ये चोशो डा पुलु फ्रशा, मुर आन रां चोवखो सेल्ने चाण्व हना, *गन्ती १९:२, ९, १७*<sup>14</sup> ख्रीस्त आ हुशोमी मेको क्येडा इं पशो जाम्शा लतीक गेय रे चोवखो सेल्ने चाण्व। गेपुकी ब्रोंइशा बाक्व परमप्रभु यावे आ गेय पचा कली ख्रीस्त गेना हना यो बाक्वो सोक्तीम पतीके मारेइ मरिश्शो मपथु, परमप्रभु यावे आ डोंइती आंम कली चढ़ेवा बाक्त। *१पत्रुस १:१८-१९; १यूहन्ना १:७; प्रकाश १:५; हिब्रू १:३*<sup>15</sup> मोपतीके मेको नक कबल डा गारपाइक्व बाक्व। मोपा ब्रेश्शोपुकी आन गेना हना यो लीब शोप तामेक्ल। मारदे हना ख्रीस्त बेक्त। मिनु मेको आन डोंइती डा कबलम पशो पाप यो क्याम्साक्व। *हिब्रू १२:२४; १तिमोथी २:५*

#### हुश जारशोमी कबल खाण्वो

<sup>16</sup> मिनु “गो बेक्डा नोले गेनुड” दे कागज ब्रेक्वमी आ पशो कबल बेक्म नोले ला खाण्व।<sup>17</sup> ब्रेक्पाइक्व मबेक्म सम्म आ ब्रेक्पाइश्शो खाण्वे मचाण्व। बेक्म नोले ला खाण्व।<sup>18</sup> डोंइती पशो कबल यो हुश जारशोमी गाप्शो बाक्माक्त।<sup>19</sup> मोसामी मुर आन कली परमप्रभु यावे आ शेंशो अरेशो लोत्र नेंपाइक्ने थुम्शा, बाछा नु बोका आन हुश नु ब्वाक्कु क्याल्शा, हिसोप के सेल्शो ब्राक्सु कली लल ऊनमी फ्रेशा, परमप्रभु यावे आ अरेशो लोत्र डा

किताब नु मुर नेल्ल आन कली ब्रुइक्तीमी बाक्त। गन्ती १९:६<sup>20</sup> मिनु मेकोमी “परमप्रभु यावेमी इन कली पशो कबल एको हुशेमी खाप्तु” दे तुइक्पाइक्मी बाक्त। प्रस्थान २४:८<sup>21</sup> मिनु मोपा थुम्शा, मुर आन कली खोदेशो पा ताम्बु नु ताम्बुमी वोइश्शो बोसपुकीमी यो ब्रुइक्ता बाक्त। लेवी ८:१५<sup>22</sup> थमा पा परमप्रभु यावे आ अरेशो लोत्र ब्रेक्शो खोदेशो पा मारेइ मारेइ चोत्रखो सेल्चा कली हुश ब्रुइक्चा माल्दा बाक्त। हुश मजारथु, पाप मक्याम्सीब, दे रुज्य। लेवी १७:११

### ख्रीस्तमी आ हुश चढेशो

23 रागी डा मोदेशो थोत्रक कली चोत्रखो सेल्चा कली मोदेशो माल्ताक्व हना, स्वर्गम बाक्शो कली चोत्रखो सेल्चा कली मेको क्येडा रिम्शो चढेचा माल्ताक्व।<sup>24</sup> मारदे हना ख्रीस्त मुरपुकीम सेल्शो ताम्बुमी मओत्र। मेको स्वर्गम बाक्ब ताम्बु आ खोदेशो ला बाक्त। तन्न मेको स्वर्गम ओत्रत। मुल मेकोम परमप्रभु यावे आ डोंइती आंइ पर्वम पुंइब। हिब्रू ७:२५; १यूहन्ना २:१<sup>25</sup> ख्रीस्तमी आंम कली शुश खेयप चढेचा ममाल्द। नेल्ल क्येडा ठेयब चढेब चहिं बर्स बर्सम आंम हुश ममाइ, मार मार आन हुश कुरशा मेको नेल्ल क्येडा चोत्रखो कोठा ओत्रचा माल्दा बाक्त।<sup>26</sup> ख्रीस्त मोदेशो बाक्शो हना, रागी सेल्चा रे मुल सम्म शुश खेयप श्येत जचा माल्द वा। तन्न मेकोमी रागी नुप्ची ना खेयप का पाप क्याम्चा कली आंम कली चढेवा बाक्त। १कोरिन्थी १०:११; गलाती ४:४; हिब्रू १:३<sup>27</sup> दोपा मुर खेयप का बेक्चा माल्नीमी नु मेको बेक्शा, निसाफ पचा पुंइसीनीम। उत्पत्ती ३:१९<sup>28</sup> मोपा ख्रीस्त शुश मुर आन पाप क्याम्चा कली खेयप का आ हुश चढेप्तु। मिनु लेंशा जाक्ब। पाप क्याम्थ चहिं मजाक्ब। तन्न मेको कली थमा सुइश्शा रिम्शा बाक्ब आन कली श्येत रे प्रोंइचा कली जाक्ब। हिब्रू १०:११, १२, १४

10 मेको साइ डा परमप्रभु यावे आ अरेशो लोत्र जाक्चशो रिम्शो लोत्र आ वांकु ला बाक्ब। मेको डोंइती डा लोत्र थमा पा पाप क्याम्तीके मबा। मिनु मेको लोत्र टिशा बर्स बर्समी चढेक्तेक्म हना यो, परमप्रभु यावे आ नेक्था जाक्ब मुर आन कली पाको सेल्ले मचाप्ब। हिब्रू ८:५<sup>2</sup> मिनु परमप्रभु यावे कली मान पाइबपुकी खेयप का पाको दुप्तेक्म हना, चढेबमी मारदे लेंशा चढेचा माल्बा डा। मुर पाको दुप्तेक्म हना, लेंशा चढेचा माल्बा डा? <sup>3</sup> तन्न मेको चढेशोमी बर्स बर्समी पाप मिम्पाइक्ब, गेनायो मप्रेंसीब। लेवी १६:३४<sup>4</sup> मारदे हना ब्यफ नु बोका आन हुशेम पाप क्याम्ने मजाप्ब, दे तुइक्तय।

<sup>5</sup> मोपतीके ख्रीस्त रागीम जाक्मेनु, मेकोमी “गे चढेतीक नु भेटी ममाल्नी। तन्न गे आं कली मुर आ रां का सेल्लनी। <sup>6</sup> गे चोशा चढेतीके नु पाप आ पर्वम चढेतीके मदाक्तीनी। <sup>7</sup> मिनु ‘परमप्रभु यावे, गो इन दाक्शो पथ रागीम जाक्ती। आं पर्वम डोंइती ब्रेक्शो लोत्र खाप्ता’ दे ब्रेक्शो बाक्ब” दैत। भजन संग्रह ४०:७-९<sup>8</sup> मिनु मेकोमी “गे मार मार चढेशो, भेटी नु चोशा चढेतीक नु पाप आ पर्वम चढेशो मदाक्तीनी। तन्न मेको आ अरेशो लोत्र टिशा चढेशो ला बाक्नीम” दैत। <sup>9</sup> मेकोमी तेम्शा “रागीमी इन दाक्शो गेय पाइनुड, देंशा, साइ रे डा आन पशो प्रोंइपाइश्शा, नक लां कोंइताक्व। <sup>10</sup> मिनु गोपुकी येसु ख्रीस्त आ रां चढेशोमी गेना हना यो परमप्रभु यावे आ मुर दुम्तय” दे रुब्य। यूहन्ना १७:१९

<sup>11</sup> नाक्त किंत किंत चढेबपुकीमी ताम्बुमी गेय पा चढेना चढेन बाक्तेक्म हना यो पाप मक्याम्सीब। प्रस्थान २९:३८<sup>12</sup> तन्न ख्रीस्तमी चहिं आ रां चढेशोमी पाप क्याम्तीक गेय पने थुम्तु। मिनु गेना हना यो परमप्रभु यावे आ ग्युरा गे निश्शो बाक्ब। <sup>13</sup> आ जोरी सत्रु आन कली खोइल आगाम मवोदा सम्म रिम्शा बाक्शो बाक्ब। भजन संग्रह ११०:१<sup>14</sup> खेयप का आ रां चढेशोमी गेना हना यो परमप्रभु यावे नु काथा बाक्चा ताइब आन कली पाको सेल्लनीमी। <sup>15</sup> परमप्रभु यावे आ सोक्तीमी इं कली “एको लोत्र थमा बाक्ब” दे साइ डा लोत्र मिम्पाइश्शा यो तुइक्पाइक्ब। <sup>16</sup> मेकोमी “नोले मेकोपुकी नु नक कबल का सेल्लनुड। आं लोत्र मेको आन कली आन कोत्रजम वोइक्पाइश्शा, आन थुंमी ब्रेक्शा गेनायो मप्रेंब सेल्लनुडमी। हिब्रू ८:१०<sup>17</sup> गो मेको आन पशो पाप प्रेंशा गेनायो ममिम्नुड” देंशो बाक्ब।

येरमीया ३१:३३-३४<sup>18</sup> मोपतीके पाप क्याम्से नोले गेनायो चढेचा ममाल्ब, दे तुइक्नय। हिब्रू ८:१२

### ठेयब थुं पशा आस पा बाक्व

<sup>19</sup> आं दाक्शो लोकबपुकी, येसु आ हुशेमी परमप्रभु यावे आ डोंइती जाक्दीत्वा ताइनय, दे तुइक्नय। मत्ती २७:५१; रोमी ५:२<sup>20</sup> मारदे हना आ रां चढेशा, फारशो वा खाक्शा, नक ब्रोंइतीक लां सेल्लु। हिब्रू ९:८<sup>21</sup> मिनु परमप्रभु यावे आ खिं डा ठेयब चढेब दुम्त। <sup>22</sup> मोपतीके रिम्शो थुं पा, रिम्शो थमा सुइक्ब दुम्शा, पाप नेल्ल क्याम्चा पुंइसीशो तुइश्शा नु इं रां रिम्शो ब्वाक्कुम चिक्शा ग्येरशा परमप्रभु यावे आ नेक्था जाक्दीय्य। हिब्रू ४:१६; एफिसी ५:२६; १पत्रुस ३:२१<sup>23</sup> ठेयब थुं पशा आस पा बाक्व। मारदे हना लोत्र गेबमी मेको लोत्र दोपा यो खाप्ब, दे तुइक्नय। हिब्रू ४:१४<sup>24</sup> दाक्मुशा, रिम्शो गेय पा वारच पमुशा अरेपमुने। <sup>25</sup> थमा सुइक्ब आन गुम्तीके लशा, लोत्र नेंचा मप्रोनीन। का निक्शी लचा मदाक्ब दुम्शो बाक्तेक्म। मोपतीके “लचा माल्ब” देंचा मप्रोनीन। येसु ख्रीस्त लेंशा जाक्चशो बाक्ब, दे मप्रेंथु बाक्कीन। हिब्रू ३:१३; रोमी १३:११-१२

### नोले शोंइसीशो मदुम्न

<sup>26</sup> मिनु मुल मार देंनुड देंशा हना, ख्रीस्तम सेल्शो नक लां तुइश्शा यो मेको लां मखोइक्नुड दैतय हना, मोदेशो चहिं नेल्ल क्येडा ठेयब पाप बाक्ब। मेको पाप चहिं मारेइ चढेशोमी मक्याम्सीथु लीशा बाक्ब। हिब्रू ६:४-८; गन्ती १५:३०<sup>27</sup> नक लां मखोइक्ब आन कली मारेइ आस मलीब। परमप्रभु यावे कली मटीबपुकी मीम खतम सेल्चा पुंइसीनीम। नक लां मखोइक्बपुकी यो मोपा खतम दुम्नीम। <sup>28</sup> साइ परमप्रभु यावे आ अरेशो लोत्र मटीब आन कली सांक्छी निक्शी सां आन लोत्र नेंशा, दोस गेशा, काइ शिशी मपथु साइक्बाक्मा बाक्त। ब्यवस्था १७:६<sup>29</sup> मिनु परमप्रभु यावे आ तौ कली खोइलीम दिम्ब, शुश सजाइ गेशा साइक्वा पुंइसाक्म, दे तुइक्नय। डोंइती आंम कली पाको सेल्शो नक कबल डा हुश आ पर्वम शुक्शी पा “हुश नेल्ल काइचीक बाक्ब, मार अर्को लोत्र बाक्बा डा?” दैनीम। परमप्रभु यावे आ सोक्ती आ पर्वम यो शुक्शी पाइनीम। मोदेशो पाइबपुकी शुश सजाइ गेचा मपुंइसीनीमी डा? हिब्रू २:३; हिब्रू १२:२५<sup>30</sup> मोदेशो पाइब आन कली सजाइ गेब कली तुइश्शो बाक्नय। आं चहिं लोत्र कामी “क्येक्क लेत्तीक गेय आं के बाक्ब। मिनु गो पाइनुड” दैब। मिनु लेंशा “परमप्रभुमी आ मुर आन कली निसाफ पाइब” दैब। ब्यवस्था ३२:३५-३६<sup>31</sup> मोपतीके ब्रोंइशा बाक्ब परमप्रभु यावे आ गुइ रे पा सजाइ गेचा पुंइसीचा चहिं नेल्ल क्येडा हिंचा डा बाक्ब, दे तुइक्नय। हिब्रू १२:२९

<sup>32</sup> साइ इन थुंमी छेडछेड दुम्शा, थमा सुइक्ब दुम्नीनु, मार दुम्मे, मेको मुल यो मिम्तीने। मार दुम्त देंशा हना, शुश श्येत जाइतीनी हना यो, फाल्शा बाक्तीनी। हिब्रू ६:४<sup>33</sup> इन कली मुर आन कुल शुक्शी पा श्येत गेमेनु, फाल्तीनी। अरु आन कली श्येत जशो तनीनु, मेकोपुकी नु थुं का दुम्शा, मेको आन श्येत यो फाल्तीनी। १कोरिन्थी ४:९<sup>34</sup> जेल्खानम चोक्शा वोइश्शो आन कली शिशी पा गुम्थ लाइतीनी। मिनु गे यो श्येत जाइतीनी। इन बाक्शो शोंप रोइश्शा लदमेनु, गेमी “इं के गेनायो मजाम्ब शोंप बाक्ब” दे तुइश्शा, लाइक्वा गेशा ग्येरसीशा बाक्तीनी। मत्ती ६:२०; मत्ती १९:२१, २६<sup>35</sup> मोपतीके मुल यो आस पचा मप्रोनीन, इनाम ताइनय, दे तुइश्शा, इन थुं बारपतीने। <sup>36</sup> गे फाल्तीक सक्ति माल्नीनी। परमप्रभु यावे आ दाक्शो गेय पना पन बाक्कीन। मिनु आ गेनुड देंशो थोत्रक ताइनीनी। लूका २१:१९; याक्ब ५:७<sup>37</sup> मार ब्रेक्शो बाक्ब देंशा हना, लोत्र कामी “गो जाक्नुड” दैबमी मजाक्थु मप्रोंइब, देश पा यो मबाक्ब। <sup>38</sup> आं ठीक पाइब मुरपुकीमी आं कली थमा सुइश्शा, ब्रोंइशा बाक्नीम। नोले शोंइसाक्म हना, मेको आन कली तशा मयेरनुड” दे ब्रेक्शो बाक्ब। हबकुक् २:३-४; रोमी १:१७<sup>39</sup> तन्न नोले शोंइसीशा खतम दुम्चा पुंइसीब मदुम्नय। गेना हना यो परमप्रभु यावे नु बाक्चा ताइनय, दे थमा सुइश्शा बाक्नय। १थिस्सलोनिकी ३:३

## माइत कबल डा थमा सुइक्तीके

11 थमा सुइक्वा चहिं मार बाक्ब दंशा हना, आस पशो थमा दुश्शो तांडसीब नु इं मिक्चीम मतशो थोवकी बाक्नीम, दे मिक्चा बाक्ब। मिनु बाक्नीमी यो। मेको मोदेंशो मिक्चा कली थमा सुइक्वा दंसीब। २कोरिन्थी ५:७ 2 मोपा थमा सुइश्शोमी इं किकी पिपीपुकी ठीक दुम्मा बाक्त। 3 गोपुकीमी यो मोपा इं थमा सुइश्शोमी सरीड रागी नेल्ल दुम्मेनु, मिक्चीम तशो थोवकी के सेल्शो मनम, तन्न परमप्रभु यावेमी "दुमीन" दंशो लोवमी दुश्शो बाक्नीम, दे तुइक्नय। उत्पत्ती १:१-२,४

## किकी पिपीपुकीमी थमा सुइश्शो

4 काइन नु हाबील निम्फामी परमप्रभु यावे कली भेटी चढेम्सेनु, काइन क्येडा हाबील आ चढेशो रिम्शो बाक्माक्त। मारदे हना हाबीलमी परमप्रभु यावे कली थमा सुइक्वाक्माक्त। मिनु हाबील आ चढेशो ताक्शा, परमप्रभु यावेमी "हाबीलमी थमा सुइक्ती। मोपतीके ठीक दुम्पाइक्ता" दे कोइताक्व। हाबील बेक्शा लशा, मिश बर्स दुश्शा यो आ थमा सुइश्शो आ पबर्म चहिं मुल सम्म लोव पना पन बाक्नय। उत्पत्ती ४:३-४ 5 हानोकमी परमप्रभु यावे कली थमा सुइक्वाक्माक्त। मोपतीके आ मबेक्थु सेसीन, परमप्रभु यावे नु लशा बाक्चा तवा बाक्त। हानोक रागीम बाक्मेनु, परमप्रभु यावे आ दंशो टिशा, आ थुं नुपाइश्शो बाक्माक्त, दे तुइक्नय। हिब्रू लोवमी हानोक कली एनोक बाक्ब। उत्पत्ती ५:२४ 6 थमा मसुइक्थु मेको आ थुं नुपाइक्ने मजाप्ब। परमप्रभु यावे आ नेक्था जाक्दीन्ने यो मजाप्ब। मेको बाक्ब, दे थमा सुइक्वा माल्ब। मिनु मेको बाक्ब, दे थमा सुइक्बपुकीमी मेको कली माल्नीम। मिनु आ कली माल्ब आन कली तपांडसीब। 7 नोआह यो थमा सुइक्ब बाक्माक्त। यावेमी मेको कली "नोले ओदेंशो दुम्ब" मदानु, मेको लोव थमा सुइश्शा टिशा, ठेयब डोंगा सेल्शा, आ खिं डा मुर आन कली ओइशा, बेक्चा मगेथु प्रॉइमी बाक्त। नोआहमी मो पशो तशा यो अरुमी थमा मसुदमे बाक्त। मिनु आन थमा मसुइक्तीके दोसी दुश्शा, नेल्ल बेक्चा माल्मा बाक्त। नोआह चहिं थमा सुइश्शोमी ब्रॉइचा तांडसीब, दे कोइब दुम्माक्त। उत्पत्ती ६:८-९, १३-२२

8 अब्राहाममी यो परमप्रभु यावे आ लोव थमा सुइक्वाक्माक्त। यावेमी "इ कली नोले गेनुड दंशो रागी कोइनन। मोपतीके एकेर रे लावो" देंमेनु, अब्राहाममी परमप्रभु यावे आ दंशो टिशा, ते लचा मतुइक्थु, यो मलेत्वा डा पा मेको रागी प्रॉइशा गाक्माक्त। उत्पत्ती १२:- २१:- 9 मिनु थमा सुइश्शा कोइशो रागीम जाक्दीश्शा, परमप्रभु यावे आ गेशो लोव ताइब आ तौ इसहाक, आ चच याकूब नु काथा बाक्शा, अर्को रागी डा मुर खोदेंशो पा खिं मसेल्थु ताम्बु कीशा बाक्माक्त। 10 सरीड नु रागी कली सेल्ब परमप्रभु यावेमी दुशा ग्येरशा बाक्तीक सहर यो सेल्ब बाक्ब। अब्राहाममी मेको सहर कली रिम्शो बाक्माक्त।

11 थमा सुइश्शोमी अब्राहाम आ मीश सारा आल मथीब थारी बाक्शा यो, आल थीब दुम्माक्त। मारदे हना लोव गेब परमप्रभु यावेमी आ लोव दोपा यो खाप्ब, दे थमा सुइश्शो बाक्माक्त। 12 मेना अब्राहाम आल मथीब खाल्पा बाक्माक्त हना यो, नोले आ खिं डा मुर सौरुल खोदेंशो पा शुश दुश्शा, हिक्ने मचाप्चा डा दुम्मा बाक्त।

13 अब्राहाम नु आ खिं डा मुरपुकीमी परमप्रभु यावेमी गेशो लोव थमा सुइश्शा बेक्मा बाक्त। मेको लोव गाप्शो मतथु, डोन रे तशा मजाक्दील्थु, बेक्मा बाक्त। मेकोपुकीमी "इं रागी मजाक्दील्थु, अर्को आन रागीम बाक्तय" दंशो बाक्मा बाक्त। उत्पत्ती २३:४; उत्पत्ती ४७:९; इतिहास २९:१५ 14 मो देंमानु "आइ रागी माल्शा गाक्तक" दे तुइक्पाइक्नीम। 15 मेकोपुकीमी आन गूशा लशो रागी मिम्ताक्म हना, लेश्शा लम वा। 16 तन्न गूशा लशो रागी क्येडा रिम्शो बाक्तीके परमप्रभु यावेम गेब, दे तुइश्शा, परमप्रभु यावे गे लमा बाक्त। मिनु परमप्रभु यावे मेको आन परमप्रभु यावे दुम्चा मुने मपाइब। मेको आन कली बाक्तीके सहर का सेल्शा वोइश्शो बाक्ब।

17 अब्राहाममी आ थुं थाम्चा पुंडसीशा थमा सुइश्शा, आ तौ इसहाक कली चढेवा बाक्त। इसहाक अब्राहाम आ कांडचीक तौ बाक्माक्त। मेको रे पा परमप्रभु यावे आ गेशो लोव थमा दुम्चा माल्शो बाक्माक्त। उत्पत्ती २२:१-१९; याकूब २:२१ 18 मारदे हना परमप्रभु यावेमी अब्राहाम कली "इसहाक रे पा इ चच युइ रागीम लीनीम" दे लोव गेशो बाक्माक्त। उत्पत्ती २१:१२ 19 अब्राहाममी "आं तौ बेक्त हना यो, परमप्रभु यावेमी बेक्शो रे सेंने चाप्ब" दे मिम्ता बाक्त। परमप्रभुमी अब्राहाम आ मिम्शो तुइश्शा, आ तौ कली मसाइक्पाइक्थु लेत्ता बाक्त।

20 इसहाकमी परमप्रभु यावे आ दंशो नोले दुम्ब लोव थमा सुइश्शा, आ तौ याकूब नु एसाव आस कली आसीक गेम्सी बाक्त। उत्पत्ती २७:१-४०; उत्पत्ती ४८:- ५०:- 21 याकूबमी थमा सुइश्शा, आ बेक्ची ना कोक्केमी आ पिया तिकशा, परमप्रभु यावे कली ठेयब सेल्शा, योसेफ आ तौ आस कली आसीक गेम्सी बाक्त। उत्पत्ती ४७:३१ 22 मिनु नोले योसेफमी यो आ बेक्ची जाक्त, दे तुइश्शा डा मिन "इस्त्राएलीपुकी इजीप्ट रे गूशा गाक्नीम" दे परमप्रभु यावे आ दंशो लोव मिम्शा, आ मुर आन कली "गे लेन्नीनु, आं रुश यो लाइश्शा लने" दे माइक्मी बाक्त। मारदे हना आ यो "परमप्रभु यावे आ दंशो जाक्दीप्ब" दे थमा सुइश्शो बाक्माक्त।

23 मोसा जरमेसेनु, आम आफोमी थमा सुइश्शा "परमप्रभु यावेमी एको आल कली ब्रॉइपाइक्ने चाप्ब। मोपतीके एको इश दारशो आल कली मसाइक्चा" दंशा, पिप आ हुकुम मटिथु महिंथु, आस तौ मोसा कली महिना सां सम्म खूइश्शा वोदसे बाक्त। प्रस्थान २:१२, १४ 24 मिनु मोसा मोपा कोल्शा ठेयब दुश्शा, परमप्रभु यावे कली थमा सुइश्शा, मार पवा बाक्त दंशा हना "मुल डा मेरे फाराओ आ तमी आ तौ मदुम्नुड, आं मुर नु लाइनुड" दे लमाक्त। 25 पापीपुकी नु काथा बाक्शा, सुख जचा क्येडा परमप्रभु यावे आ मुर नु बाक्शा, श्येत जशा बाक्चा योवतु। 26 मारदे हना इजीप्ट डा शॉप नु मान तशा यो मारेइ मसुइक्थु "खीस्तमी श्येत जशो खोदेंशो पा श्येत जचा थमा डा शॉप नु मान बाक्ब, दे मिम्ताक्व। मिनु नोले इनाम यो तांडसीब" दे तुइश्शा थमा सुइश्शो बाक्माक्त। 27 "मतांडसीब परमप्रभु यावे कली मिक्चीम तशो खोदेंब पा आं नेक्थान ताइनुड" दे थमा सुइश्शा, पिपी गाइश्शो तशा यो महिंथु, इस्त्राएली आन कली इजीप्ट रे गुइशा लाइक्मी बाक्त। 28 इजीप्ट रे गुइचा डोंइती पास्सा चाड डा भोज जपाइक्मी बाक्त। मारदे हना "तेको खिं डा लाप्चो आ पियामी हुश ब्रुइश्शो बाक्मे, मेकेर परमप्रभु यावे आ स्वर्ग डा गेय पाइबमी जेठा तौ कली मसाइक्ब" दे परमप्रभु यावे आ लोव थमा सुइश्शा, हुश ब्रुइक्पाइक्मी बाक्त। 29 मिनु थमा सुइश्शोमी लल समुन्द्रम सोवशो लां दुम्माक्त। मिनु खोइल का यो मजित्थु शोक्समा बाक्त। मेको आन नोले खोइश्शा खेदा पाइब इजीप्ट डा मुरपुकी चहिं समुन्द्रमी गूशा बेक्मा बाक्त।

30 परमप्रभु यावे आ दंशो लोव थमा सुइश्शा, यरीको सहर ७ नाक्त सम्म हिरसमा बाक्त। मिनु ७ नाक्त गारो नेल्ल ब्रेम्मा बाक्त। यहोसु २:-; ६:१-२५ 31 डोंइती राहाब तेल्लेममी मोसाम सोइश्शो क्यारी पाइब आन कली जतीक बाक्तीक गेशा मान पशो बाक्माक्त। मिनु आन दंशो लोव थमा सुइक्तीके मटीब नेल्ल नु मबेक्थु, ब्रॉइचा तवा बाक्त। याकूब २:२५

32 में डा लाक्शा मार देंनुडा? मारदे हना मोदेंशो थमा सुइक्ब शुश बाक्नीम। गिदोन, बाराक, साम्सोन, येफता, दाऊद, सामुएल नु परमप्रभु यावे आ लोव पाइब नेल्ल आन पशो मिम्पाइक्तन्नी हना, आं लोव गेनायो मनुप्ब। न्यायाधीस ६:११- ८:३२; न्यायाधीस ४:४-२४; न्यायाधीस १३:१-१६, ३१; न्यायाधीस ११:१-१२, ७; १सामुएल १७:-; दानीएल ६:- 33 मोदेंशो थमा सुइक्बपुकीमी मार पामे बाक्त दंशा हना, कोइमी लडाइ पा ग्राशा, रागी आंम के सेल्मे बाक्त। कोइमी श्येत जाइब आन कली वारच पामे बाक्त। कोइमी डोंइती दंशो लोव थमा दुश्शो तामे बाक्त। गुप्स आन शोव रे यो ब्रॉइमा बाक्त। 34 मीम हुम्चा पुंडसीशा यो मबेक्मा बाक्त। तरवारमी क्योरचामेनु यो ब्रॉइमा बाक्त। मारदे पने मचाप्ब बाक्मा बाक्त हना यो, पने चाप्ब दुम्मा बाक्त। लडाइ पामेनु यो ठेयब थुं पाइश्शो दुश्शा, आन जोरी सनु आन कली फुशा खेरमे बाक्त। 35 मीश मुरपुकीमी आन तौ बेक्शा लशा, बेक्शो रे सेंसीशो तामे बाक्त। मिनु मेको आलपुकी एको रागीम ब्रॉइमा बाक्त। कोइमी "बेक्शा नोले बेक्शो रे सेंसीशा गेनायो मबेक्सीब, ग्येरशा बाक्चा

तांइसीब" दे थमा सुइश्शा, श्येत जशा यो फाल्शा बाक्मा बाक्त। शुश श्येत जशा तुप्चा पुंडसमा बाक्त हना यो "थमा सुइक्चा प्रॉइनीकी" दे मदमा बाक्त। "थमा सुइक्चा प्रॉइनीकी" देशो नम हना, प्रॉइशा सोइक्तेम वा। "थमा सुइक्चा मप्रॉइनीकी" देशोमी श्येत जना जन साइक्चा पुंडसमा बाक्त। १ राजा १७:१७-२४; २ राजा ४:८-३७; ३६ का निक्शी शुक्शी लोव्र पा कोरराम युक्शा, गुइ खोइली साडलोम पाइश्शा, जेल्खानम चोक्शा वोइक्चा पुंडसमा बाक्त। १ राजा २२:२७; येरमीया २०:१-३; येरमीया ३७:११-१६ ३७ फुल्लु आप्शा साइक्चा पुंडसमा बाक्त, आरामी रिक्शा साइक्चा पुंडसमा बाक्त, तरवारम क्योरशा साइक्चा पुंडसमा बाक्त। २ इतिहास २४:२१ ३८ तेइ बाक्चा मतथु, जचा फेक्चा मतथु, भेडा नु क्यारश आन कुशुल फेक्चा, एर ऑथ हिरना हिरन गोरशो रागी रोंगुमी प्रोक्शा, पुक्खीमी खुइक्चा खुइक्चन बाक्मा बाक्त। मोपा श्येत जाइब आन कली एको रागीमी बाक्शा ब्रॉइचा मगारब। मारदे हना रिम्शो मुर बाक्नीम। एको रागी चहिं मरिम्शो बाक्ब। ३९ मेको नेल्ले थमा सुइश्शा, परमप्रभु यावे आ डोंइती ठीक दुम्मा बाक्त। परमप्रभु यावे आ गेशो लोव्र चहिं गाप्शो मतामे बाक्त। हिब्रू ११:४-५ ४० मारदे हना परमप्रभु यावेमी इं पर्वम शुश रिम्शो मिम्शो बाक्मा बाक्त। मिनु मेकोपुकी यो गोपुकी नु रिम्शो दुम्मल। मेको नक लां रे पा पाको मसेल। मेको आन कली नु इं कली काथा वोइश्शो बाक्ब, दे रुब्य।

येसु कली थमा सुइश्शो

12 साइ थमा सुइक्चपुकी शुश बाक्मा बाक्त। मेकोपुकीमी इं कली कोव्रना कोव्रन बाक्नीम। मोपतीके दोरब मुर खोदेशो पा, इं कली तेक्ब नु खोल्ले चाप्बपुकी तिल्शा, पापमी इं खोइली फ्रेंचा मगेथु, दोरय। १ कोरिन्थी ९:२४ २ थमा सुइक्तीक लां कोंइशा, पाको सेल्ब येसु कली मिम्तय। मेकोमी शीम केप्शा कांटी थोक्शा क्याइश्शा साइक्चा पुंडसीचा आ पर्वम, मुने आ पर्वम मारेइ ममिम्ता बाक्त। नोले मान पा ग्येरसीशा बाक्चा ताइनुड, दे मिम्ता बाक्त। मिनु मुल परमप्रभु यावे आ ग्युरा गे निश्शो बाक्ब। हिब्रू ५:८-९; फिलिप्पी २:८-१० ३ येसु रागीम बाक्मेनु, पापीपुकीमी शुक्शी पा खेदा पा शुश मरिम्शो पाक्तेक्म हना यो, मेको नेल्ल फाल्लु। मेको आ श्येत फाल्लो मिम्तीने। मेको मिम्ताक्नी हना, इन थुं बारनीनी। लांमी गाक्शा दशो खोदेशो मदुम्नीनी। मत्ती २६:६७; लूका २:३४ ४ पाप नु लडाइ पा मुल सम्म हुश जुइक्ची मदुम्नी।

परमप्रभुमी इं कली कोव्रब

5 तमी तौ आन कली अर्ती गेशो खोदेशो पा इन कली डोंइती गेशो अर्ती प्रेंदीनी माइ, दे मिम्पाइक्चननी। ओदें ब्रेक्शो बाक्ब "आं तौ, परमप्रभुमी इ कली शेंदानु, शेंसो। इ कली श्येत जपदानु 'फाल्ले मचबु' मदने। मेको कली सोपी ममिम्तो। 6 परमप्रभुमी सु कली दाक्बा, मेको कली सजाइ गेब। सु कली आ तौ मिम्बा, मेको कली तुप्ब" दे ब्रेक्शो बाक्ब। हितोपदेस ३:११-१२; प्रकाश ३:१९ ७ श्येत गेचा पुंडसीनीनु, परमप्रभु यावेमी शेंताक्की, दे मिम्तीने। आफोमी आल कली पशो खोदेशो पा, परमप्रभु यावेमी इन कली पाइब। आफोमी शेंचा मपुंडसीब तौ बाक्बा डा? 8 आल नेल्ले शेंचा पुंडसीनीम। परमप्रभु यावेमी इन कली मशेंताक्व हना, आ तमी तौ मननी। आफ मपाइश्शो बाक्नीनी। 9 एको रागी डा इं आफोमी इं कली तुप्तेक्म हना यो, मेको आन कली मान पा आन लोव्र टीतय। मिनु गेना हना यो आ नु काथा बाक्चा कली स्वर्ग डा आफ आ देशो टिचा ममाल्लया डा? 10 इं आफपुकीमी इं कली आन मिम्स पा नाक्ती का निक्शी सम्म शेंताक्म। स्वर्ग डा आफोमी चहिं इं कली रिम्शो थुं पाइश्शो सेल्चा दाक्ब। पाप रे डोन बाक्शो आ खोदेशो दुम्शो तचा दाक्ब। मोपतीके इं कली शेंब। 11 मोदेशो पा शेंचा पुंडसीयानु, मग्येरनय। श्येत जाइनय। श्येत फाल्ले चाप्बपुकी ठीक दुम्नीम, आन थुं नाइक्चा ताइनीम, दे रुब्य। २ कोरिन्थी ४:१७-१८

12 मोपतीके श्येत जाइतीनी हना यो, लांमी गाक्शा दशो खोदेशो मदुमीन, इन गुइ खोइल सेस दुम्शा गाक्कीन। 13 लां ब्रेम्शो सेल्शा, रिम्शो पा थेक्शा गाक्कीन। सुइ दशा, खोइली खाइश्शा, आन पोक्च मबुइक्ल। रिम्शो पा गाक्शा, आन दशो सामल। हितोपदेस ४:२६-२७ 14 मुर नेल्ल नु दुशा

गारशा बाक्कीने। पाप रे डोन बाक्शा, रिम्शो थुं पशा गेय पा कोंइदीने। मो पाइतीनी हना, प्रभु नु काथा बाक्चा ताइनीनी। रोमी १२:१८; २ तिमोथी २:२२ 15 अर्ती गेमुशा वारच पमुशा बाक्कीने। सुइ परमप्रभु यावे आ शिशी मताइब मदुम्ल। सुइमी थुं चोशा दुशा बाक्ब आन कली फ्राशा, मुर आन कली मरिम्शो मसेलल। ब्यवस्था २९:१७ 16 सुइ एसाव खोदेशो मरिम्शो मदुम्ल। एसावमी काले आ कोव्रज प्रिंचा कली डोंइती जरमेशो तौमी तचा डा शोप नु आसीक आ लोक्ब कली प्रोना बाक्त। उत्पत्ती २५:३३-३४ 17 नोले आस आफोमी अडस योक्गानु, एसावमी डोंइती जरमेशो तौ आ तचा डा अडस गेयीनी, दे डाक्ना डाक्न पुंडशा यो आ आफ आ थुं लेप्पाइक्ने मचबा बाक्त। मिनु परमप्रभु यावे आ डोंइती आ नें मलीमाक्त, दे नेल्लेमी तुइक्नीनी। उत्पत्ती २७:३०-४०

रिम्शो राज्य ओव्रचा ताइनय

18 साइ इं किकी पिपीपुकीमी परमप्रभु यावे कली गुम्शो खोदेशो पा मगुम्नीनी। मेकोपुकीमी गुइमी थिचा डा डांडामी मी ब्रशा तामे बाक्त। मिनु छिडछिड दुम्शा क्येर गोस्स बोक्शा, फश गिवार पा बंबु पवा बाक्त। गे मेक सम्म मजाक्शो बाक्नीनी। प्रस्थान १९:१२, १६, १८; ब्यवस्था ४:११ 19 मिनु तुराही ताप्शो ठेयब रेयके खोदेब पा परमप्रभु यावे आ लोव्र नेम्मे बाक्त। मेको लोव्र नेंने मचाप्थु "मुल डा मेरे ओं देब लोव्र मपचा" दे थम हिंशा पुन्ने बाक्त। प्रस्थान २०:१९ 20 मेकोपुकीमी नेंने मचाप्शो लोव्र "एको डाडा थीब बस्तु जन्तु बाक्त हना यो, मेको कली फुल्लु आप्शा साइक्चा माल्ब" देशो लोव्र बाक्माक्त। प्रस्थान १९:१३ 21 मोदेशो हिंचा डा दुम्शो तशा, मोसामी "हिंशा खिंखि पाता" देमाक्त। ब्यवस्था ९:१९ 22 तन्न गे सियोन डांडाम ब्रॉइशा बाक्ब परमप्रभु यावेमी स्वर्गम सेल्शो यरूसलेम सहर जाक्दीश्शा बाक्चा ताइनीनी। मेकेर परमप्रभु यावे आ स्वर्ग डा गेय पाइब बाक्नीम। गलाती ४:२६; एफिसी २:६; फिलिप्पी ३:२०; प्रकाश २१:२; प्रकाश ५:११ 23 आन नें स्वर्गम ब्रेक्चा पुंडसीशा, इन क्येडा डोंइती जाक्दीश्शा, पाप रे ब्रॉइशा ग्येरशा बाक्चा ताइबपुकी बाक्नीम। परमप्रभु यावेमी मुर नेल्ल आन कली निसाफ पाइब आ नेक्था बाक्नीम। लूका १०:२० 24 नक कबल खाप्ब येसु बाक्ब। मिनु येसु आ जारशो हुश यो बाक्ब। मेको हुश हाबील आ हुश खोदेशो ममाइ। हाबील आ हुशेमी "आं कली साइक्ब सजाइ गेचा पुंडसमल" देब। येसु आ हुशेम चहिं "मेको आन पाप नेल्ल क्याम्शा, सजाइ जचा रे प्रॉइतामी" देब। हिब्रू ९:१५; उत्पत्ती ४:१०

25 होस पांडसीने। इन कली लोव्र पाइब कली इन ची मकोइदीने। इं किकी पिपीपुकीमी मुर आ देशो मटीमे बाक्त। मिनु सजाइ गेचा पुंडसमा बाक्त। गोपुकी स्वर्ग रे लोव्र पाइब कली इं ची कोंइताक्व हना, सजाइ मतथु ब्रॉइनया डा? हिब्रू २:२; हिब्रू १०:२८-२९ 26 परमप्रभु यावेमी लोव्र पवानु, खिनु कुशो खोदेब पा रागी नेल्ले हिम्से बाक्त। मुल इं कली मार लोव्र पाइब देशा हना "मुल यो लेंशा काले रागी ला ममाइ, सरीड यो हिम्नुड" देब। हग्वै २:६ 27 "मुल यो लेंशा काले हिम्नुड" देशो लोव्र रे मार रुम्सीब देशा हना, हिम्सीबपुकी सेल्चा पुंडसीशो बाक्नीम। मिनु फाइक्चा पुंडसीनीम। महिम्सीबपुकी चहिं लीनीम, दे रुम्सीब। 28 मोपतीके गेनायो महिम्सीब राज्य ओव्रचा ताइनय, दे तुइश्शा, परमप्रभु यावे कली मान पा ठेयब सेल्ना सेल्ल "गे रिम्शो पाइब बाक्नीनी" देशा, ग्येरशा आ दाक्शो गेय पना पन बाक्व। 29 इं परमप्रभु यावे नेल्ल खतम सेल्ब मी खोदेशो बाक्ब। हिब्रू १०:३१; ब्यवस्था ४:२४

रिम्शो गेय कोंइदीने

13 लोक्ब खोदेशो पा दाक्मुशा गारशा बाक्कीन। यूहन्ना १३:३४; २ पत्रुस १:७ 2 इन खिंम जाक्ब सुइ आन कली जचा बाक्चा गेचा मप्रोनीन। मोपा गेशोमी का निक्शीमी आन मतुइक्थु परमप्रभु यावे आ स्वर्ग डा गेय पाइब आन कली मान पचा ताम्तेक्म। रोमी १२:१३; १ पत्रुस ४:९; ३ यूहन्ना ५-८; उत्पत्ती १८:२-३; उत्पत्ती १९:२-३ 3 जेल्खानम चोक्चा पुंडसीशो आन कली काथा बाक्शो मिम्शा वारच पने। श्येत गेचा पुंडसीब आन कली तशा, आंम श्येत जशो खोदेशो मिम्तीने। मत्ती २५:३६

4 गे नेल्लेमी “ग्युंबे पशो रिम्शो बाक्ब” दे मिम्तीने। मुर आ मीश नु मुरु आ वोंइश मडम्मल। मीश वोंइश आस नाता खोइक्ब नु तेल्लेम आन कली परमप्रभु यावेमी निसाफ पाइब।<sup>5</sup> क्येट चेम्चा गे इन थुं महिरदीने। गेपुकी नु मार मार बाक्मा, मेको मोशोमीन इन थुं नाइश्शा बाक्कीन। मारदे हना मेकोमी “गे नु बाक्नुड, मिनु गेनायो मप्रोंइनन” देंब। यहोसु १:५; १तिमोथी ६:६<sup>6</sup> प्रभु आ देंशो तुइश्शा “प्रभुमी आं कली कोवशा, वारच पाइब। मुरपुकीमी मार पने चाप्नीमी डा? मारेइ पने मचाप्नीम। मोपतीके महिंथु बाक्ती” दे ठेयब थुं पा बाक्क। भजन संग्रह ११८:६

इन थुं दूली शेंब गे महिरदीने

<sup>7</sup> इन कली परमप्रभु यावे आ लोव्र शेंब आन पशो मिम्तीने। मेकोपुकी बेक्वी सम्म थमा सुइक्वा मप्रोनेम। मेको आन पशो खोदेंशो पने।<sup>8</sup> साइ डोंइती, मुल नु गेना हना यो येसु ख्रीस्त मफांडसीथु बाक्ब, दे तुइक्तीन। यसैया ४१:४; १कोरिन्थी ३:११; प्रकाश १:१७-१८; प्रकाश २२:१३<sup>9</sup> मुल सम्म मनेंशो नु दूली शेंब लोव्रमी इन थुं क्याल्चा मगेने। परमप्रभु यावे आ शिशीमी रिम्शो थुं पाइश्शो दुम्तय, दे गेनायो मप्रेंदीने। चोव्रखो जशोमी ठीक थुं मसेल्ब, दे रुपीने। एफिसी ४:१४; २कोरिन्थी १:२१; रोमी १४:१७; १तिमोथी ४:८<sup>10</sup> गुइमी सेल्शो ताम्बुम गेय पाइबपुकीमी येसु आ भोज जचा मताइनीम।<sup>11</sup> साइ ठेयब चढेबमी पाप क्याम्चा कली बस्तु भाव क्योरशा, थम चोव्रखो कोठाम ओव्रशा हुश चढेम्तेक्म। श्ये चहिं गुंइशा, मुर मबाक्तीकेम लाइश्शा चोम्तेक्म। मिनु सुइमी मेको श्ये ब्वचा मताम। लेवी १६:२७<sup>12</sup> मोपतीके मुर आन पाप क्याम्चा कली येसु कली सहर रे गुंइशा, श्येत जपाइक्तेक्म। येसुमी मुर आंम के सेल्चा कली आ हुश चढेप्टु। मत्ती २१:३९; यूहन्ना १९:१७<sup>13</sup> आ मुर दुम्शा, मेको मेर गूशा, आ नु काथा बाक्शा, आ बुदी शुक्शी पाइक्वा पुंडसाक्क। हिब्रू ११:२६; हिब्रू १२:२<sup>14</sup> एको रागीमी गेना हना यो बाक्चा मताइनय। जाक्चशो सहर कली रिम्शा बाक्नीकी। हिब्रू ११:१०; हिब्रू १२:२२<sup>15</sup> येसु रे पा परमप्रभु यावे कली मान पा ठेयब सेल्ना सेल्न बाक्क। मेको यो इं शोव्र डा भेटी बाक्ब। भजन संग्रह ५०: १४, २३; होसे १४:३<sup>16</sup> अरु आन कली रिम्शो पने। मथीब मचाप्ब

आन कली मार माल्दा, मेको गेचा मप्रेंदीने। मिनु परमप्रभु यावेमी इन कली मोदेंब रिम्शो पशो तशा ग्येरब।<sup>17</sup> इन कली शेंब आन लोव्र नेंशा टिने। मेकोपुकीमी “परमप्रभु यावे आ डोंइती जिम्मा ब्राइनुड” दे तुइश्शा इन कली शेंनीमी, कोव्रनीम। शेंब आन लोव्र टीतीनी हना, मेकोपुकीमी ग्येरशा शेंनीम। इन कली मटिशो तशा चहिं, आन थुं हेल्शो दुम्शा, शेंचा ब्रीनीम, मिनु इन कली यो मरिम्शो दुम्ब। १थिस्सलोनिकी ५:१२; इजीकीएल ३:१७-१९

आंइ कली प्रार्थना पने

<sup>18</sup> आंइ पबंम परमप्रभु यावे कली पुंइना पुंइन बाक्कीने। मारेइ दोस ताइब मदुम्क, दे आंइ थुं नाइश्शो बाक्नीकी। मारेइ पाइतक हना यो, रिम्शो पय, दे थुं फ्रेंशा बाक्तक। रोमी १५:३०; २कोरिन्थी १:११-१२<sup>19</sup> “गुम्चा तयल” दे परमप्रभु यावे कली पुंइचा मप्रोनीन।

आसीक गेशो

<sup>20</sup> नेल्ल क्येडा ठेयब भेडा गोठला, इं प्रभु येसुमी आ हुशेम गेना हना यो लीब कबल खाप्टु। दुशा बाक्चा गेब परमप्रभु यावेमी मेको कली बेक्शो रे सेंताक्क। यूहन्ना १०:११; १पत्रुस २:२५<sup>21</sup> परमप्रभु यावेमी येसु ख्रीस्त रे पा इन थुं रिम्शो सेलल, आ दाक्शो गेय पपदल, आ कली ग्येरपाइक्ब सेलल। येसु ख्रीस्त कली गेना हना यो ठेयब सेल्य। आमेन। आमेन आ अर्थ “गो यो मेकोन मिम्नुड” बाक्ब।

नोले डा लोव्र

<sup>22</sup> आं दाक्शो लोक्बपुकी, इन कली आं ब्रेक्शो थुं बारपाइक्तीक लोव्र शुश मब्रेक्तु। रिम्शो पा रुप्चा माल्नीनी।<sup>23</sup> नेनीने, इं लोक्ब तिमोथी कली जेल्खान रे प्रोंइतेक्म। आं गाक्चा क्येडा डोंइती एक जाक्त हना, इन कली गुम्थ पीनस्कु।<sup>24</sup> शेंब नु थमा सुइक्ब नेल्ल इन कली “रिम्शो बाक्कीन” देंती। इटाली डा थमा सुइक्ब लोक्बपुकीमी यो इन कली “रिम्शो बाक्कीन” देंतेक्म।<sup>25</sup> प्रभु आ शिशी गेपुकी नु लील।

## याकूब

एको चिठी ब्रेक्ब याकूब बाक्ब। मेको येसु आ लोकब बाक्त। मेको यरूसलेम डा थमा सुइक्ब आन शेंब दुम्त। मेको ६२ ए. डी.म फुल्लु आप्शा साइक्वा पुंइसाक्व।

एको किताब ४४ ए. डी. रे ५० ए. डी. दातेमी ब्रेक्शो बाक्त।

येसु ख्रीस्त कली थमा सुइक्तीके मुर आन पशो गेयमी तांइसीब, दे रुप्पाइक्वा कली ब्रेक्शो बाक्ब। थमा सुइक्ब आन पतीके मार बाक्ब, दे शेंतीके बाक्ब।

### डॉइती डा लोव

1 गो, याकूब, परमप्रभु यावे नु प्रभु येसु ख्रीस्त आस वाइल नड। गो ब्राशा बाक्शो १२ थर डा यहूदी इन कली नमो पाइनुड। गे रिम्शो बाक्कीन।

### थमा सुइक्तीके दोपा ठीक दुम्बा

2 आं लोकबपुकी, इन थमा सुइक्तीके ठीक बाक्म कों, मबाक्म, दे थुं थाम्चा पुंइसाक्नी हना, ग्येरसीने। रोमी ५:३-५; १पत्रुस ४:१३<sup>3</sup> मारदे हना इन थमा सुइक्वा ठीक बाक्त हना, गेपुकी खोइली थेक्शा शुश फाल्ब दुम्नीनी।<sup>4</sup> येसु ख्रीस्त कली थमा सुइश्शा, खोइली थेक्शा बाक्शोमी परमप्रभु यावे आ डॉइती इन कली ठीक सेल्ब। मोपा परमप्रभु यावे नु बाक्वा कली थम रिम्शो नु ठीक दुम्बा, अरु मारेइ ममाल्नीनी।

5 तुइक्ब थुं माल्तीनी हना, गेपुकीमी परमप्रभु यावे कली “गो तुइक्ब थुं माल्नुड” दे पुनीन। परमप्रभु यावेमी मगाइक्थु, शुश तुइक्ब थुं गेब। याकूब ३:१५; हितोपदेस २:३-६<sup>6</sup> परमप्रभु कली पुंइनीनु “आं पुंइशो गेब” दे थमा सुइश्शा पुनीन। “तुइक्ब थुं गेबा कों, मगेबा” दे थमा मसुइक्ब मुर खोदेंशो पा मपुनीन। मोदेंशो मुर फशेम नेप्शो समुन्द्र डा ब्वाक्कु खोदेंशो बाक्ब। मर्कूस ११:२४; १तिमोथी २:८<sup>7</sup> मोदेंशो मुरुम मारेइ मताइब। 8 थुं निक्शी पाइश्शो मुर आ थुं कामी परमप्रभु यावे आ लां खोइक्ब, थुं कामी मुर आन लां खोइक्ब।

### पुडग नु क्येट थीब मुर

9 मिनु इन दातेमी सुइ पुडग थमा सुइक्ब लोकब बाक्त हना, मेकोमी “परमप्रभु यावेमी आं कली ठेयब मुर सेल्ती” दे ग्येरसेक्ल। याकूब २:५<sup>10</sup> मेकेर थमा सुइक्ब क्येट थीब मुर बाक्त हना, मेकोमी “गो परमप्रभु यावे आ डॉइती पुंइब दुम्बा, आं पुंइशो गेब” दे ग्येरसेक्ल। क्येट थीब मुर बोइश्शो फू बेक्शो खोदेंशो पा सोल बेक्नीम। १तिमोथी ६:१७; १पत्रुस १:२४<sup>11</sup> नां दाप्शा डा मिन शुश हुप्तानु, घांस नेल्ल सोल सुल बेक्नीम। मिनु आन फू सफा नेल्ल हेम्नीम। मोपा आ दारस जाम्ब। मेको खोदेंशो पा क्येट थीब मुर यो आ गेय पस डा पस बेक्नीम। यसैया ४०:६-७

### ब्रॉइतीक सिरपेच

12 सु इन दातेमी आ थमा सुइक्तीके ठीक बाक्म कों, मबाक्म देय थुं थाम्चा पुंइसीशा फाल्ने चाप्बा, मेको मुर ग्येरसेक्ल। मेको थुं थाम्तीके ठीक दुम्त हना, मेको मुरुमी ब्रॉइतीक सिरपेच ताइब। परमप्रभु यावेमी “सुम आं कली दाक्बा, मेकोमी ब्रॉइतीक सिरपेच ताइब” दे लोव पशो बाक्ब। २तिमोथी ४:८<sup>13</sup> पाप पचा चिक्शो मुरुमी “परमप्रभु यावेमी आं कली पाप पपाइक्वा चिक्ताक्व” दे गेनायो देंचा मदुम्ब। मारदे हना सुइमी परमप्रभु यावे कली थुं नाक्शा, पाप पपाइक्ने मचाप्ब। आं यो सुइ कली पाप मपपाइक्ब।<sup>14</sup> मुरपुकीमी दोपा पाप पाइनीम देंशा हना, आंम दला दाक्स पा पाप पाइनीम। उत्पत्ती ३:६; रोमी ७:७-८<sup>15</sup> मोपा दला दाक्स पामेनु,

पाप गूब। मेको पाप बारने थुमानु, मेको मुर नरकम लाइनीम। मेको पाप पतीके बाक्ब। रोमी ७:१०<sup>16</sup> आं दाक्शो थमा सुइक्ब लोकबपुकी, दूली लां मखोतीन।

17 हाइश्शो नु रिम्शो ठीक मिम्तीके थुं नेल्ल परमप्रभु यावे रे जाक्ब। मिनु परमप्रभु यावे छेडछेड कली सेल्ब बाक्ब। मोपतीके परमप्रभु यावे छेडछेडमी बाक्ब। छिडछिड डा गेय काइ मपाइब। आ थुं यो मफांइसीब। मत्ती ७:११; १यूहन्ना १:५<sup>18</sup> परमप्रभु यावेमी इं कली आ थमा लोव पतीकेमी नक जरमेशो मुर सेल्लु। मोदेंशो पा डॉइती सिश्शो फल खोदेंशो पा आ मुर दुम्तय। यूहन्ना १:१३; १पत्रुस १:१:२३

### परमप्रभु आ लोव नेंशा पचा

19 आं दाक्शो लोकबपुकी, मार तुइक्वा माल्नीनी देंशा हना, गेपुकी नेंस डा नेंस बाक्कीन। शुश मब्बाक्कीन। शुश मचुरीन। हितोपदेस २९:२०; उपदेसक ५:१-२; उपदेसक ७:९<sup>20</sup> चुरब मुरुमी परमप्रभु आ ठीक पतीके मपाइब।<sup>21</sup> मोपतीके ग्रांरा दिचा डा गेय नु काइ मरिम्शो पतीके नेल्ल प्रोनीन। गे ठेयब मलेत्थु, इन थुंमी वोइश्शो परमप्रभु यावे आ अरेशो लोव टिने। मोपा गेपुकी परमप्रभु यावे आ अरेशो लोव टिनीनु, मेको लोवमी इन कली नरक रे प्रॉइने चाप्ब। १पत्रुस २:१

22 गेपुकी परमप्रभु यावे आ लोव नेनीन। नेंचा ला ममाइ, मार मार देंशो बाक्मे, मेको यो पचा माल्नीनी। गेपुकीमी मेको लोव नेंशा मपाइतीनी हना, जोल पांइसीनीनी। मत्ती ७:२१; रोमी २:१३<sup>23</sup> सु परमप्रभु यावेमी देंशो लोव नेंशा मपाइबा, मेको ऐना कोवब मुर खोदेंशो बाक्ब।<sup>24</sup> मेको मुरुमी ऐना कोवशा, आ कुल दोदेंशो तांइसे, मेको यु प्रेंब।<sup>25</sup> सुमी इन कली प्रॉइने चाप्ब परमप्रभु यावे आ ठीक पतीके अरेशो लोव नेनीमी, नेंचा ला ममाइ पना पन यो बाक्नीमी, मेको मुर आन पतीकेमी आसीक ताइनीम। याकूब २:१२; रोमी ८:२; यूहन्ना १३:१७

26 सुमी “गो थमा सुइक्ब नड” दे मिम्बा, तन्न हेंथे ब्वाक्बा, मेको मुर जोल पाइब बाक्ब। मिनु आ थमा सुइक्तीके मोशा दुम्ब। १पत्रुस ३:१०<sup>27</sup> मखाल्थु ठीक पा थमा सुइक्तीके दोदेंशो बाक्ब देंशा हना, रोम रोइक्च नु वोंइश बेक्शो मीश मुर श्येत जामेनु, वारच पचा नु थमा मसुइक्ब पाप पाइब आन खोदेंशो पाप काइ मपचा, मेको इं आफ, परमप्रभु यावे आ डॉइती ठीक पा थमा सुइक्तीके बाक्ब।

### गुम्तीकेमी कुल मकोव्रमुने

2 आं लोकबपुकी, इं प्रभु येसु ख्रीस्त कली थमा सुइक्नीनी। मेको छेडछेड डा प्रभु बाक्ब। मोपतीके गेपुकी यो मुर आन कुल मकोव्रडीन।<sup>2</sup> थम दारशो वा फेक्शो नु सुन के औंठी पांइशो मुर का नु जेक्शो वा फेक्शो पुडग मुर का इन गुम्तीक खिंमी जाक्ताक्स हना,<sup>3</sup> मेको दारशो वा फेक्शो कली कोवशा “हजुर, मेकेर निस्सीने” दे लोव पशा, पुडग कली चहिं “हयु उइ राप्शा बाक्को। आं खोइल आ नेक्था निस्सो” दे माइक्तीनी हना,<sup>4</sup> गे इन दातेमी आइक्च नु ठेयब तिल्लीनी। मोदेंशो पनीनु, मरिम्शो निसाफ मपनी डा?<sup>5</sup> आं लोकबपुकी, नेनीन, परमप्रभु यावेमी रागी



डा प्रुडग आन कली शुश थमा सुदमेक्ल, दे मयोव्रडा डा? मिनू परमप्रभु यावे कली दाक्ब नेल्ल आ राज्य ओव्रचा ताइनीम मदेंम डा? <sup>१</sup>कोरिन्थी १:२६; <sup>१</sup>कोरिन्थी ११:२२; लूका १२:२१ <sup>६</sup> गे चहिं प्रुडग आन कली दिप्नीनी। मेको शुश क्येट थीब मुरपुकी इन कली श्येत गेब मुर मनमी डा? मेकोपुकीमी इन कली अडडाम मचाक्दीलीनी डा? <sup>७</sup> येसु ख्रीस्त आ नें आ पर्वम शुक्शी लोव्र मपाइनीमी डा? <sup>१</sup>पत्रुस ४:१४

### दाक्मुने

<sup>८</sup> परमप्रभु यावे आ राज्य डा अरेशो लोव्रम मार ब्रेक्शो बाक्ब देंशा हना “अरु आन कली आंम इन कली दाक्शो खोदेंशो पा दाक्तीन” दे ब्रेक्शो बाक्ब। मो पाइतीनी हना, गेपुकी रिम्शो पाइनीनी। <sup>९</sup> लेवी १९:१८ <sup>९</sup> तन्न गेपुकीमी थमा सुइक्ब का कली ठेयब सेल्शा, अरु आन कली आइक्च सेल्तीनी हना, गे पाप पाइनीनी। मिनू परमप्रभु यावे आ अरेशो लोव्र मटीब दुम्नीनी। <sup>१०</sup> ब्यवस्था १:१७ <sup>१०</sup> मुर कामी परमप्रभु यावे आ अरेशो लोव्र नेल्ल पशा, का चहिं मपापु हना, लोव्र नेल्ल मटीब खोदेंशो दुम्ब। <sup>११</sup> मत्ती ५:१९ <sup>११</sup> परमप्रभु यावेमी “मीश वोंडश आस नाता मखोइक्चा” दे ब्रेक्शो बाक्ब। मिनू “मुर मसाइक्चा” दे यो ब्रेक्शो बाक्ब। तेल्लेम मपथु, तन्न मुर आन कली साइक्तीनी हना, गेपुकी परमप्रभु यावे आ अरेशो लोव्र मटीब पापी दुम्नीनी। <sup>१२</sup> प्रस्थान २०:१३-१४ <sup>१२</sup> परमप्रभु यावेमी इन कली पाप रे ब्रोंडतीक लां कोंडशा, निसाफ पाइब। मेको मिम्शा, गेय पने। <sup>१३</sup> शिशी मपाइबपुकीमी निसाफ पची नाक्त शिशी मताइनीम। निसाफ क्येडा शिशी ठेयब बाक्ब। <sup>१४</sup> मत्ती ५:७; <sup>१५</sup> मत्ती १८:३०,३४; <sup>१६</sup> मत्ती २५:४०,४६

थमा सुइक्चा नु टिचा  
रोमी ३:२१-३१; मत्ती ७:२१

<sup>१४</sup> आं लोकबपुकी, मुर कामी “गो थमा सुइक्नुड” दे परमप्रभु यावे आ अरेशो लोव्र नु गारब गेय मपापु हना, आ थमा सुइक्शोमी मेको कली पाप रे प्रोंडने चाप्पा डा? <sup>१५</sup> मत्ती ७:२१ <sup>१५</sup> मिनू लोकब का के जचा फेक्चा मबाक्त हना, <sup>१६</sup> मेको कली “थुं नाइश्शा बाक्को। परमप्रभुमी इ कली फेक्तीक गेवल। जचा गेवल” देंशा, गे मेको कली आ माल्शो मारेड मगेतीनी हना, इन थमा सुइक्तीके शोर गाक्शो बाक्ब। <sup>१७</sup> यूहन्ना ३:१८ <sup>१७</sup> इन थमा सुइक्तीकेमी गेय मपापु हना, मेको थमा सुइक्तीके बेक्शो बाक्ब।

<sup>१८</sup> मुर का निक्शीमी “गे थमा सुइक्ब दुम्तीनी। गो चहिं परमप्रभु यावे आ गेय पाइब दुम्तक। मोपतीके इन थमा सुइक्शो कोंडदीन। इन गेय कोंडचा ममाल्नीनी। गो यो आंइ पशो गेय रे आंइ थमा सुइक्तीके कोंडनीकी” देंने चाप्नीम। <sup>१९</sup> गलाती ५:६ <sup>१९</sup> गेपुकी परमप्रभु यावे का ला बाक्ब, दे थमा सुइक्नीनी। मोपा रिम्शो पाइनीनी। वोलपुकीमी यो मेको थमा सुइक्शा हिंशा खिंखि पाइनीम। <sup>२०</sup> गे दूली पाइबपुकी, गेय मपथु थमा सुइक्तीके शोर गाक्शो बाक्ब, मेको तुइक्तीन।

### थमा सुइक्चा मार बाक्बा?

<sup>२१</sup> मिनू इं किकी अब्राहाममी आ तौ इसहाक परमप्रभु यावे कली चढ़ेचा, दे परमप्रभु यावे आ डोंडती ठीक गेय पाइब दुम्माक्त। <sup>२२</sup> उत्पत्ती २२:१-१९; <sup>२३</sup> हिब्रू ११:१७; <sup>२४</sup> रोमी ४:२-३ <sup>२४</sup> आ थमा सुइक्तीके नु आ गेय काथ काथा पवा बाक्त। मोपा आ थमा सुइक्तीके आ गेयमी ठीक दुम्शो बाक्माक्त। <sup>२५</sup> मिनू अब्राहाम आ पर्वम ब्रेक्शो लोव्र ठीक दुम्माक्त। मार ब्रेक्शो बाक्त देंशा हना “अब्राहाममी परमप्रभु यावे कली थमा सुदा बाक्त। मेको थमा सुइक्शोमी अब्राहाम कली ठीक सेला बाक्त” दे ब्रेक्शो बाक्त। मिनू मुरपुकीमी अब्राहाम कली “परमप्रभु यावे आ वारच” दे याइनी नें वोदमे बाक्त। <sup>२६</sup> उत्पत्ती १५:६; <sup>२७</sup> यसैया ४१:८ <sup>२७</sup> मुरुमी थमा सुइक्चा ला ममाइ, आन गेयमी यो ठीक दुम्नीम, दे गेपुकी रुप्ने मचाप्नीनी डा?

<sup>२८</sup> अब्राहाम खोदेंशो पा राहाब माइश्शो तेल्लेम मीश मुरुमी यो थमा सुइक्ब दुम्शा, आ पशो गेयमी ठीक दुम्माक्त। दोदेंब गेय पवा बाक्त देंशा हना, इस्राएल डा मुर निक्शी आस कली अरु लां कोंडशा, सोइक्ता बाक्त। <sup>२९</sup> हिब्रू ११:३१; <sup>३०</sup> यहोसु २:- <sup>३०</sup> मिनू दोपा सोक्त मपाइश्शो मुर बेक्शो बाक्बा,

मोपा थमा सुइक्बमी थमा सुइक्शो गेय मपापु हना, आ थमा सुइक्तीके बेक्शो बाक्ब।

### मुर आ शोव्रमी दोपा पाप पाइबा

<sup>३</sup> आं लोकबपुकी, शुश शेंब मुर मदुमीन। मारदे हना परमप्रभुमी मेको शेंसीब आन क्येडा शेंब आन कली शुश कोव्रशा, आन लोव्र नेंशा, निसाफ पाइब। <sup>४</sup> गो नेल्लेमी शुश गल्ली पाइनय। सुमी लोव्र पवानु, काइ गल्ली मपाइबा, मेकोमी रांम मपचा डा गेय यो मपाइब। मेको मुर थम रिम्शो बाक्ब।

<sup>५</sup> गोपुकीमी शारा बिप्पाइक्चा कली लगम पाइक्नय। मोपा मेको शारा आ रां नेल्ल चलने चाप्नय। <sup>६</sup> जहाज यो मिम्तीन। दोदेंशो ठेयब बाक्त हना यो, दोदेंशो ठेयब फशेमी मेको कली गाक्पाइश्शो बाक्त हना यो, चलेबमी मेको कली इम्चीली थोव्रकमी चलेशो बाक्ब। मिनू ते लाइक्चा दाक्ता, मेकेर लाइक्ने चाप्ब। <sup>७</sup> मेको इम्चीली चलेतीके खोदेंशो मुर आ लें बाक्ब। मुर आ लेंमी ठेयब लोव्र पाइब। मेको लें आइक्च बाक्त हना यो, ठेयब मरिम्शो पने चाप्ब। इम्चीली मीम ठेयब ब्वाकी क्रोइक्ने चाप्ब।

<sup>८</sup> मुर आ लें मी खोदेंशो बाक्ब। मेकोमी रां नेल्ल मरिम्शो सेल्ब। मेकोमी मरिम्शो लोव्र पशा, रां कली पापी सेल्ब। रागी नेल्ल कली क्रोइक्ब। आंमा यो नरकमी ग्रोइक्ब। <sup>९</sup> हितोपदेस १६:२७; <sup>१०</sup> मत्ती १२:३६-३७; <sup>११</sup> मत्ती १५:११,१८ <sup>११</sup> मुरपुकीमी बस्तु भाव, जन्तु, चिकबी नेल्ल आन कली शेंने चाप्नीम। मिनू मेको आन कली शेंताक्म हना यो, <sup>१२</sup> आंम आन लें कली शेंने मचाप्नीम। मुरुमी आन लेंमी मरिम्शो पाइनीम। दोपा ओश्येर जशा, मुर बेक्नीमी, मोपान लें यो मुर कली साइक्ने चाप्पा डा ओश्येरमी ब्रीशो बाक्ब। <sup>१३</sup> गोपुकीमी प्रभु नु आ आफ कली “गे ठेयब नसी” दे लोव्र पाइनय। मिनू परमप्रभु यावेमी आ खोदेंशो सेल्शो मुर आन कली सराप पाइनय। <sup>१४</sup> भजन संग्रह १४१:३; <sup>१५</sup> उत्पत्ती १:२६-२७ <sup>१५</sup> मोपा शोव्र कामी आसीक लोव्र नु सराप लोव्र पाइनीम। आं लोकबपुकी, मो पचा मदुम्ब। <sup>१६</sup> एफिसी ४:२९ <sup>१६</sup> ब्वाक्कु बुक्तीक का रे कशो नु ब्रोव्रशो ब्वाक्कु कालेमी यीबा डा? <sup>१७</sup> आं लोकबपुकी, फोव्रशी रवामी तेल रवा आ फल मसिप्ब। अडगुर रवामी फोव्रशी मसिप्ब। मेको खोदेंशो पा हिक्सी डाम्शो ब्वाक्कु रे ब्रोव्रशो ब्वाक्कु यूने मचाप्ब।

### इन गेय तेको लां रे जाक्बा?

<sup>१८</sup> मिनू इन दातेमी सु निप्स पाइश्शो नु रुप्तीक थुं पाइश्शो मुर बाक्मा, मेकोमी आ गेय रे पा आ ब्रेम्तीके रुप्तीक थुं रे जाक्ब, दे कोंडदल। <sup>१९</sup> गे अरु मुर आन थोव्रक वाल्तीक नु आंम कली ला मिम्तीक थुं बाक्त हना, ठेयब लेश्शा, थमा शेंतीके कली जोल मसेलीन माइ? मबाक्कीन। <sup>२०</sup> ओदेंशो मिम्तीके परमप्रभु आ गेशो रुप्तीक थुं मबाक्ब। तन्न मुर आन थुं रे नु सैतान रे जाक्ब। <sup>२१</sup> याकूब १:५ <sup>२१</sup> मुरुमी मुर आन के थोव्रक वाल्चा नु आंम कली ठेयब सेल्चा ला मिम्ताक्व हना, मेको मुरुमी मरिम्शो गेय नु अरु पाप यो पना पन बाक्ब। <sup>२२</sup> परमप्रभुमी गेशो निप्स पाइश्शो थुंमी मुर कली ग्रांरा दिचा डा गेय मपपाइक्ब। सुइ नु मजिपाइक्ब। ब्रेम्शो सेल्ब। गाइश्शो फाल्पाइक्ब। शुश शिशी पपाइक्ब। रिम्शो गेय पपाइक्ब। कुल कोव्रशा, गेय मपपाइक्ब। जोल मपपाइक्ब। <sup>२३</sup> थुं नाइश्शा बाक्ब मुरपुकी ठीक गेय पशा, मुरपुकी नु दुशा गारशा बाक्नीमी। मेको परमप्रभु यावे आ गेशो ठीक पतीकेमी बाक्ब। <sup>२४</sup> फिलिप्पी १:११; <sup>२५</sup> मत्ती ५:९

### मुर आन दला दाक्स

<sup>४</sup> इन दातेमी जिचा खेचा ते रे जाक्बा? गे इन दला दाक्स आ पर्वम जीनीनी, ममाइ? <sup>२</sup> गेपुकी मारेइ मारेइ माल्नीनी, तन्न मताइनीनी। मोपतीके मुर आन थुं जिक्शा, साइक्नीनी। मिनू अरु आन के मार मार तशा वाल्नीनी, तन्न मताइनीनी। मोपतीके जीनीनी। गेपुकी परमप्रभु यावे कली मपुंडनीनी। मोपतीके मताइनीनी। <sup>३</sup> गलाती ५:१५ <sup>३</sup> गेपुकीमी पुंडतीनी हना यो, मारेइ मताइनीनी। मारदे हना आंम दला दाक्स पचा कली ला पुंडनीनी। मोपतीके इन पुंडशो मताइनीनी। <sup>४</sup> गे परमप्रभु यावे आ लां प्रोंडशा हेंथे

गाकबपुकी, गे थमा मसुइक्ब आन वारच बाक्तीनी हना, परमप्रभु यावे आ जोरी सत्रु दुम्नीनी। सु थमा मसुइक्ब आन वारच दुम्चा माल्बा, मेको परमप्रभु यावे नु जोरी सत्रु दुम्ब। लूका ६:२६; रोमी ८:७; श्यूहन्ना २:१५

5 परमप्रभु यावेमी ब्रेक्पाइश्शो लोवमी “परमप्रभु यावेमी आ सोक्त इं रांमी वोइक्तु। तन्न मुरुमी दला दाक्स पशो तशा, मेकोमी शुश रुश पाइब” दे यो ब्रेक्पाइश्शो बाक्ब। 6 तन्न परमप्रभु यावेमी मेको क्येडा शुश शिशी पाइब। मिनु “गो ठेयब लेश्शो मुर आन कली शिशी मपाइनुड। ब्रेम्शो, ठेयब मलेश्शो मुर आन कली ला शिशी पाइनुड” दे ब्रेक्पाइश्शो बाक्ब। अय्युब २२:२९; हितोपदेस ३:३४; मत्ती २३:१२; १पत्रुस ५:५

7 गेपुकी परमप्रभु यावेमी देंशो लोव टिने। सैतान रे डोन बाक्कीन। मो पाइतीनी हना, सैतानमी इन कली प्रॉइब। मत्ती २३:१२; १पत्रुस ५:८-९  
8 परमप्रभु यावे आ नेक्था लने। मो पाइतीनी हना, मेको इन नेक्था जाक्ब। गे पापीपुकी “आंइ पाप क्याम्दीने” देंशा, माफ पुनीने। थुं निकशी पाइश्शो मुरपुकी, इन थुं परमप्रभु यावे गे लेश्शा, थुं का दुमीने। जकरिया १:३; यसैया १:१६ 9 मिनु सुर्ता पने। रोंका पा डाक्कीने। इन रिक्वा आ पा डा रोंका पने। इन ग्येरचा आ पा डा सुर्ता पने। 10 प्रभु येसु आ डॉइती आइक्च दुम्शा, ब्रेम्शो दुमीन। मिनु परमप्रभु यावेमी इन कली ठेयब सेल्ब।

#### परमप्रभु निसाफ पाइब बाक्ब

11 आं लोकबपुकी, शुक्शी लोव मपमुने। सुम लोकब आ पर्बम शुक्शी लोव पाइबा, दोस गेबा, मेकोमी परमप्रभु यावे आ अरेशो लोव मटीब। मेकोमी परमप्रभु यावे आ अरेशो लोव क्येडा “गो जोक्ब तुइक्ब नड” दे मिम्शा, निसाफ पाइब खोदेंशो दुम्ब। “परमप्रभु यावे आ अरेशो लोव रिम्शो देय मरिम्शो” दे लोव पाइब यो दुम्ब। मोपा गे परमप्रभु यावे आ अरेशो लोव मपाइब दुम्शा, निसाफ पाइब दुम्तीनी। 12 परमप्रभु यावे अरेशो लोव गेब नु निसाफ पाइब बाक्ब। परमप्रभु यावेमी ला पाप रे प्रॉइने नु नरकम सोइक्ने चाप्ब। इन नेक्था बाक्ब आन कली मोपा नाक्ब, सु ननी डा? मत्ती ७:१; रोमी १४:४ 13 गेपुकीमी मार लोव पाइनीनी देंशा हना “दीसा नित्थी सहरम लशा, बर्स का सम्म बाक्ब। मिनु शुश क्येट चेम्प” दे मिम्शा लोव पाइनीनी। हितोपदेस २७:१ 14 दीसा नित्थी मार दुम्बा, ब्रॉइनीनी कों, बेक्नीनी कों मारेड मतुइक्नीनी। इन गिंग मार में? मेको गोस्स खोदेंशो बाक्ब, इक्का का ला लीशा, जाम्ब। लूका १२:२० 15 गे मार देंचा माल्शो ननी देंशा हना “गेपुकी ब्रॉइतय हना, प्रभुम आंइ मिम्शो दाक्ताक्व हना, गो आंइ मिम्शो गेय पाइनय” दे लोव पचा माल्नीनी। प्रेरित १८:२१; १कोरिन्थी ४:१९  
16 गेपुकी चहिं ठेयब लेश्शा, आंम थुं डा लोव पाइतीनी। मोदेंशो ठेयब लेश्शा बाक्चा मरिम्शो दुम्ब। 17 सु रिम्शो गेय पस जोक्बा तुइक्बा, तन्न मपाइबा, मेको कली मरिम्शो दुम्ब। लूका १२:४७

#### क्येट थीब आन कली हुइश्शो

5 नेनीन, गे क्येट शुश थीब मुरपुकी, डाक्कीन। रोंका पने। मारदे हना गे नोले श्येत जाइब दुम्नीनी। लूका ६:२४-२५ 2 इन बाक्शो शोंप नेल्ल राक्शो दुम्तेक्मे। इन वासी नेल्ल तुम्बुम नेक्तेक्म। मत्ती ६:१९ 3 इन सुन चांदी नेल्ल खिया जोशो बाक्ब। मेको खियामी इन कली “मरिम्शो मुर” दे कोंइब। सुन चांदी कली खिया जोशो खोदेंशो पा इन रां कली मीम दाक्ब। गे क्येट शुश हेंताक्नी। 4 इन रूम गेय पाइब आन गाल्च मुल सम्म जोल पा मगेनी। मेको खेल्ला आन कली मगेशो गाल्चम आ मुर नेल्ल आन परमप्रभु यावे नु लोव पाप्तु। मिनु मेकोमी मेको खेल्ला आन पुंइशो लोव नेंने थुम्तु। ब्यवस्था २४:१४-१५ 5 गेपुकी रागीमी दुक्चा, जचा, ब्वचामी शुश शोंप पाइश्शो दुम्शा, ग्येरशा बाक्तीनी। मिनु क्योरची नाक्त कली थुल्शा दोम्पाइश्शो खोदेंशो पा गेपुकी निसाफ पची नाक्ती ठेयब सजाइ ताइब

दुम्नीनी। लूका १६:१९-२५ 6 गेपुकीमी रिम्शो गेय पाइब मुर आन कली दोस गेशा साइक्तीनी। मेकोपुकीम ब्वालेइ पा, मारेड लोव मलेत्तेम। याकूब २:६

#### प्रभु जाक्चा चिक्शो बाक्ब

7 मिनु आं दाक्शो लोकबपुकी, नेनीने, रूमि गेय पाइब मुरुमी मेको आ खुम्शो बाली नाली मीब, दे आ थुं नाइश्शा, हिंडुद नु बर्खा रिम्शो खोदेंशो पा प्रभु आ जाक्चा रिम्दीन। लूका २१:१९; हिब्रू १०:३६ 8 थुं नाइश्शा बाक्कीन। मारदे हना प्रभु जाक्चा चिक्शो बाक्ब। मोपतीके प्रभु कली टिचा मप्रॉइथु बाक्कीन। 9 आं दाक्शो लोकबपुकी, गेपुकीमी अरु थमा सुइक्ब आन पर्बम गन गन मपने। मो पाइतीनी हना, निसाफ पचा पुंइसीनी। नेनीन इन निसाफ पाइब जाक्चान चिक्शो बाक्ब।

10 आं दाक्शो लोकबपुकी, साइ डा परमप्रभु यावे आ लोव पाइबपुकीमी परमप्रभु यावेमी देंशो लोव पशा, शुश श्येत जशा यो फाल्शा, परमप्रभु यावे कली मप्रॉइथु बाक्शो बाक्तेक्म। मिनु मेको आन खोदेंशो पा बाक्कीन। मत्ती ५:१२ 11 नेनीने, मेको परमप्रभु यावे कली मप्रॉइब आन पर्बम “ग्येरशो मुर दुम्तेक्म” दे लोव पाइनीकी। अय्युब माइश्शो मुर का श्येत जशा यो, परमप्रभु यावे कली काइ मप्रॉइथु, बाक्शो बाक्त। गेपुकी मेको आ कथा नेंतीनी। परमप्रभु यावेमी मारदे अय्युब कली मेको शुश श्येत जचा गेवा, तुइक्ताक्नी। परमप्रभु यावेमी गिश लेम्शा शिशी पाइबा, मेको ताइतीनी। इं कली आ लेम्शो नु आ शिशी कोंइताक्व। अय्युब १:२१; अय्युब ४२:१०-१६

#### कसम जचा आ पर्बम लोव

12 आं लोकबपुकी, आं नेल्ल क्येडा ठेयब अरेंतीक लोव मार बाक्ब देंशा हना, कसम मजने। सरीड कोवशा, खप थिशा, चुक्ब थिशा कसम मजने। इन देंशो लोव दुम्ब हना “दुम्ब” मदुम्ब हना “मदुम्ब” देनीन। गे जोल पाइतीनी हना, गे निसाफ पचा पुंइसीनी। मत्ती ५:३४-३७

#### रोइ पाइब आन कली लोव

13 इन दातेमी सु सु श्येत जामे, मेकोमी परमप्रभु यावे नु लोव पामेक्ल। सु सु ग्येरशो बाक्मा, मेकोपुकीमी “परमप्रभु यावे नेल्ल क्येडा ठेयब बाक्ब” दे कुम्सो पामेक्ल। भजन संग्रह ५०:१५; कलस्सी ३:१६ 14 इन दातेमी सु रोइ पाइबा, मेकोमी गुम्तीके डा शेंब खाल्पा आन कली ब्रेत्वा माल्ब। मेकोपुकीमी रोइ पाइब आन तारी गुइ वोइश्शा, प्रभु आ नेंमी तेल खेक्शा, परमप्रभु यावे कली पुंइचा माल्नीम। मर्कूस ६:१३ 15 मोदेंशो थमा सुइश्शा पुंइशोमी मेको रोइ पाइब मुर साब। मेको रोइ पाइबमी पाप पशो बाक्त हना, मेको यो क्याम्सीब। मर्कूस १६:१८ 16 मोपतीके रोइ सापाइक्चा कली इन पशो पाप शोवमुशा, प्रभु नु लोव पमुने। ठीक थमा सुइक्ब आन पुंइशो लोवमी ठेयब गेय पाइब। प्रेरित १२:५ 17 एलीया इं खोदेंशो मुर का बाक्माक्त। मेकोमी परमप्रभु यावे कली “रेउ यिचा मगेने” दे शुश पुना बाक्त। मिनु बर्स सां ६ महिना सम्म रागीम काइ रेउ मयिमाक्त। १राजा १७:१; लूका ४:२५ 18 नोले मेकोमी “रेउ यिपतीन” दे पुना बाक्त। मिनु नोले रेउ यिशा, बाली नाली वामा बाक्त। १राजा १८:४१-४५

#### नोले डा लोव

19 आं दाक्शो लोकबपुकी, इन दाते डा मुर का थमा लां रे डोन लत हना, अर्को थमा सुइक्बमी मेको कली आ पशो पाप रुप्पाइश्शा, परमप्रभु यावे आ लां गे लेप्पाइक्तु हना, गलाती ६:१ 20 मेको मुरुमी मेको मटीब मुर कली बेक्चा रे प्रॉइब। मिनु मेको के शुश पाप बाक्त हना यो, क्याम्सीब, दे मेकोमी तुइक्चा माल्ब। भजन संग्रह ५१:१५; हितोपदेस १०:१२; १पत्रुस ४:८

## १ पत्रुस

एको चिठी येसु आ शेंसीब पत्रुसमी इस्त्राएली मद्रुशो मुर आन कली ब्रेक्शो बाक्त।

एको चिठी ६४ ए. डी. नोले ब्रेक्शो बाक्त। मेना रोम सहर डा मुरपुकीमी थमा सुइक्व आन कली शुश खेदा पा, साइक्वा गोत्रमे बाक्त। रोम सहर कली यो बेबीलोन यो देंनीम।

पत्रुसमी थमा सुइक्व आन कली “बोल्यो दुमीन। थमा सुइक्वपुकीमी श्येत जचा माल्नीम” दे ब्रेक्शो बाक्त।

### डॉइती डा लोत्र

1 गो येसु ख्रीस्त आ सोइश्शो पत्रुस नड। एको चिठी पोन्टस, गलातीया, कापाडोसीया, एसीया नु बिथीनीया रागीम ब्रशा बाक्शो इस्त्राएल रागी डा थमा सुइक्व, इन कली ब्रेक्ताक्न्नी। *हिब्रू १३:१४* 2 इं आफ परमप्रभु यावेमी इन कली योत्रशा, आ मुर दुम्नीम देंत। मिनु आ सोक्तीमी इन कली येसु ख्रीस्त कली टीब सेल्लु। आ हुशेमी चोत्रखो सेल्लु। परमप्रभु यावे आ गेशो शिशी नु थुं नाइक्तीके डॉइती क्येडा मुल गे नु शुश बाक्त। *रोमी ८:२९*

### ब्रॉइचा आ पर्वम शेंशो

3 इं प्रभु येसु ख्रीस्त आ आफ नेल्ल आसीक पाइश्शो बाक्व, दे गो मान पय। मेको आ शुश शिशी पतीके नु येसु ख्रीस्त बेक्शो रे सेंसीशोमी इं कली ब्रॉइशा बाक्तीक आस गेशा, नक जरमेशो मुर सेल्लु। *कलस्सी १:५* 4 मिनु इं कली स्वर्गमी जाम्शा मलाइब, काइ मबिग्रेब नु गेना हना यो लीब शोंप वोइश्शो बाक्व। *कलस्सी १:१२* 5 परमप्रभु यावे आ सक्तिमी इं कली कोत्रब। गो पाप रे ब्रॉइशो मुर बाक्नय, दे थमा सुइक्वय। मेको नेल्ल नोले डा नाक्तीमी कोंइब। *यूहन्ना १०:२८* 6 गे मेको तुइश्शा, ग्येरनीनी। मुल इक्का नाक्त्त सम्म थुं थाम्चा कली मार मार श्येत जाइनीनी। *१पत्रुस ५:१०; २कोरिन्थी ४:१७* 7 मारदे श्येत जाइनीनी देंशा हना, इन थमा सुइश्शो थमा कों, जोल कों, दे नाक्चा कली श्येत जाइनीनी। मोपा श्येत जाइतीनी हना, इन थमा सुइक्तीके मीम याप्पाइश्शो सुन क्येडा शुश क्येट लाइब दुम्ब। मिनु येसु ख्रीस्त आ यिची ना ठेयब सेल्लिक, छेडछेड नु मान पतीक दुम्ब। *हितोपदेस १७:३, यसैया ४८:१०* 8 गे मेको कली मताइतीनी हना यो, दाक्नीनी। मेको कली मुल सम्म मतथु यो, थमा सुइक्तीनी। गे गिश ग्येरना ग्येरन बाक्शो बाक्नीनी, देंने मचाप्नीनी। *यूहन्ना २०:२९; २कोरिन्थी ५:७* 9 इन थमा सुइक्तीकेमी पाप रे ब्रॉइचा ताइनीनी।

10 साइ डॉइती परमप्रभु यावे आ लोत्र पाइबपुकीमी गे शिशी ताइब दुम्नीनी, दे लोत्र पशो बाक्तेक्म। मिनु पाप रे ब्रॉइतीके तुइक्वा कली शुश माल्शो बाक्तेक्म। *लूका १०:२४* 11 मेकोपुकीमी आन आगामी बाक्शो ख्रीस्त आ सोक्त्त कली “पाप रे प्रॉइब सु बाक्मे, गेना जाक्बा?” दे हिल्लो पामे बाक्त। मोदेंशो पा माल्ना माल्न ख्रीस्त आ श्येत जचा नु छेडछेडम लचा आ पर्वमी नोले दुम्ब लोत्र पामे बाक्त। *भजन संग्रह २२:-, यसैया ५२:१३-५३:१२* 12 मेकोपुकीमी आन पाला डा मुर आन कली ला लोत्र मपामे। नोले डा मुर, इन कली यो लोत्र पा शेंदमे बाक्त। इन कली दोपा शेंदमे बाक्त देंशा हना, परमप्रभु यावेमी आ सोक्त्त स्वर्ग रे सोइश्शो बाक्त। मेको आ पतीकेमी शेंबपुकीमी इन कली ग्येरपाइक्व लोत्र शेंताक्म। परमप्रभु यावे आ स्वर्ग डा गेय पाइबपुकीम यो मेको तचा तुइक्वा दाक्नीम। *एफिसी ३:१०*

### परमप्रभु आ मुर दिम्शो

13 मोपतीके इन थुं प्रेंदीन। गेय पचा डॉइती मिम्तीन। येसु ख्रीस्त जाक्मेनु, इन कली शिशी पाइब, दे आस पा बाक्कीन। *लूका १२:३५-३६* 14 मुल टीब आल खोदेंशो पा इन डॉइती मतुइक्व पशो मरिम्शो पचा क्येडा डोन बाक्कीन। *रोमी १२:२* 15 इन कली ब्रेक्व, येसु ख्रीस्त दोदेंशो बाक्मे, गे यो मोदेंशो दुम्शा बाक्कीन। 16 परमप्रभु यावे आ ब्रेक्पाइश्शो लोत्रमी “गेपुकी आं कली ला ठेयब सेलीन। मारदे हना गो का ला इन परमप्रभु नड” दे ब्रेक्शो बाक्व। *लेवी १९:२*

17 गेपुकीमी परमप्रभु यावे कली “इं आफ” दे पुंइना पुंइन बाक्नीनी। मेकोमी मुर आन कुल मकोत्रथु, आन पशो कोत्रशा, निसाफ पाइब। मोपतीके गे रागीमी बाक्नीनु, पाप पचा हिनीन। *रोमी २:११; फिलिप्पी २:१२* 18 इन किकी पिपी रे “गो नरक लाइब बाक्नीकी” दे तुइक्नीनी। मुल गे नरक लतीक लां रे प्रॉइचा पुंइसीशो बाक्तीनी। दोपा प्रॉइचा पुंइसीशो बाक्तीनी देंशा हना, जाम्शा लाइब सुन नु चांदी थाप्शा ममाइ, *१कोरिन्थी ६:२०; १कोरिन्थी ७:२३; १पत्रुस ४:३* 19 येसु ख्रीस्तमी मारदे मद्रुशो पाठा बुद पा आंम हुश शाइक्पाइश्शा इन कली नरक रे प्रॉइतु। *हिब्रू ९:१४; यसैया ५३:७; यूहन्ना १:२९*

20 परमप्रभु यावेमी रागी सेल्ला क्येडा डॉइती “येसु ख्रीस्त पाप रे प्रॉइब दुम्ब” दे मिम्शो बाक्माक्त्त। मेको रागी नुच्ची ना इन पर्वम तुइक्पाइश्शो बाक्त। *रोमी १६:२५-२६* 21 गे येसु ख्रीस्त आ पतीके परमप्रभु यावे कली थमा सुइक्नीनी। मेकोमी येसु ख्रीस्त कली बेक्शो रे सेंपाइश्शा, छेडछेडम वोइक्त्तु। मोपतीके गे “परमप्रभु यावेमी इं कली कोत्रब” दे थमा सुइश्शा आस पने। 22 दोपा येसु ख्रीस्त आ देंशो टिशा, थमा गेय पा पाप रे डोन बाक्नी, मोपा गे लोक्व आन कली यो थमा पा दाक्नीनी। गे थमा सुइक्वपुकी इन थुं नेल्लेमी थमा पा दाक्मुने। 23 गे नक जरमेशो खोदेंशो बाक्नीनी। जाम्शा लाइब ममाइ। गेनायो मजाम्ब दुम्तीनी। मेकोन ब्रॉइचा गेब नु गेना हना यो लीब परमप्रभु यावे आ लोत्र बाक्व। *यूहन्ना १:१३; याकूब १:१-१८* 24 परमप्रभु यावे आ देंशो लोत्र मार बाक्त्त देंशा हना, रागी डा मुर नेल्ल घांस खोदेंशो बाक्नीम। मेको आन दारस बोइश्शो फू खोदेंशो बाक्व। आ घांस सोत्रब, मिनु फू यो हेम्ब। *याकूब १:१०-११* 25 तन्न परमप्रभु यावे आ देंशो लोत्र गेना हना यो लीब। मेको आ ग्येरपाइक्व लोत्र बाक्व। मिनु शेंबपुकीमी मेको इन कली शेंताक्मे। *यसैया ४०:६-८*

### परमप्रभु आ योत्रशो मुर

2 मोपतीके गे नेल्ल मरिम्शो पचा, मुर आन कली मरिम्शो लोत्र पतीक नु गाइक्तीके ताइक्तीन। मिनु जोल पतीके, गेहे पतीके नु मुर आन लोत्र कुरशा गाक्चा नेल्ल ताइक्तीन। *याकूब १:२* 2 नक थिशो आलम दूध तूचा माल्शो खोदेंशो पा, गे यो परमप्रभु यावे आ लोत्र तुइक्वा मालीन। गे मोदेंशो पाइतीनी हना, इन पाप रे ब्रॉइशो थुं बारना बारन लाइब। *हिब्रू ५:१२-१३; मत्ती १८:३* 3 मारदे हना गेमी परमप्रभु रिम्शो पाइब बाक्व, दे तुइक्नीनी। *भजन संग्रह ३४:१०*

4 येसु ख्रीस्त ब्रॉइचा गेब फुल्लु बाक्ब। मेको आ नेक्था लने। मुरपुकीमी मेको कली ममाल्शो फुल्लु खोदेंशो पा ताइक्ताक्म। तन्न परमप्रभु यावेमी “मेको कली योव्रशो नु नेल्ल क्येडा दाक्शो बाक्ब” दे मिम्ब। *भजन संग्रह ११८:२२; यसैया ८:१४-१६; मत्ती २१:४२* 5 मिनु गे यो ब्रॉइचा गेब फुल्लु खोदेंशो बाक्नीनी। मोपतीके परमप्रभु यावे आ सोक्तीम सेल्शो खिं डा फुल्लु दुमीन। परमप्रभु यावे आ डोंइती राख मुर दुमीन। आ सोक्त डा चढेतीक गेय पा बाक्कीन। येसु ख्रीस्त आ पतीके परमप्रभु यावेमी इन पशो ताक्ब। *एफिसी २:२१-२२; हिब्रू ३:६; रोमी १२:१* 6 मारदे हना परमप्रभु यावे आ लोवमी मार ब्रेक्शो बाक्ब देंशा हना “नेनीन, गो सियोन डांडामी फुल्लु का वोइक्नुड। मेको सुर डा फुल्लु दुश्शा, योव्रसीशा नु दाक्सीशा बाक्ब। सु सुमी मेको कली थमा सुदमे, मेको मुर मुने दोक्चा ममाल्नीम” दे ब्रेक्शो बाक्ब। *यसैया २८:१६* 7 मोपतीके थमा सुइक्बपुकीमी मेको कली दाक्नीम। तन्न थमा मसुइक्ब खिं सेल्बपुकीमी मेको फुल्लु कली ताइश्शो बाक्तेक्म। तन्न मेको सुर डा फुल्लु दुम्त। 8 मिनु लेंशा “मेको फुल्लुमी मुर आन कली दाइल पपाइक्ब। मेको ठेयब फुल्लुमी मुर आन कली थिप्पाइक्ब” दे ब्रेक्शो बाक्ब। मुरपुकीमी परमप्रभु यावे आ लोव मटितीके दाइल पाइसीनीम, दे डोंइती मेको आ पर्बम देंशो बाक्ब। *भजन संग्रह ११८:२२; यसैया ८:१४; रोमी ९:३३; लूका २:३४*

9 तन्न गे परमप्रभु यावे आ योव्रशो मुर दुम्तीके, आ राज्य डा चढेब परमप्रभु यावे आ रागी डा मुर दुम्तीनी। मारदे मोदेंशो दुम्तीनी देंशा हना, परमप्रभु यावेमी इन कली रिम्शो पशा, छिडछिड रे गुंइशा, आंम आ छक लाक्वा डा छेडछेडमी वोइश्शो बाक्त। मिनु अरु नेल्ल आन कली शेंचा, दे मोदेंशो दुम्तीनी। *प्रस्थान १९:६; यसैया ४३:२१; प्रकाश १:६; ब्यक्स्था ४:२०; ब्यक्स्था ७:६; एफिसी ५:८* 10 डोंइती गे परमप्रभु यावे आ मुर मबाक्नी। मुल परमप्रभु यावे आ मुर दुम्तीनी। डोंइती गे परमप्रभु यावे आ शिशी मतशो बाक्तीनी। तन्न मुल परमप्रभु यावे आ शिशी ताइब दुम्तीनी। *होसे २:२५; रोमी ९:२४-२६*

#### थमा सुइक्ब दोपा बाक्चा माल्नीमी

11 आं दाक्शो लोकबपुकी, गो इन कली इन थुं बारपाइक्तीक लोव पाइनुड। गो रागीम बाक्यानु, रागी डा पौना खोदेंशो बाक्नय। मोपतीके इन दला दाक्स पा रागी डा मुर खोदेंशो मपने। ग्रांरा दिचा डा गेय रे डोन बाक्कीन। मारदे हना मोदेंशो गेय इन थमा सुइक्तीक थुं नु जीब। *भजन संग्रह ३९:१३* 12 थमा मसुइक्ब आन दातेमी रिम्शो पने। मेकोपुकीमी इन पर्बम “मरिम्शो पाइब बाक्नीम” दे मरिम्शो लोव पाक्तेक्म हना यो, इन रिम्शो पतीक तशा, परमप्रभु यावे नु गुम्ची ना मेकोपुकीमी परमप्रभु यावे कली ठेयब सेल्मेक्ल। *मत्ती ५:१६*

13 प्रभु आ पर्बम सरकारमी अधिकार गेशो मुर आन कली टिने। पिप नेल्ल क्येडा ठेयब बाक्ब। मोपतीके टिचा माल्नीनी। *रोमी १३:१-७; तीतस ३:१* 14 मिनु आ वोइश्शो ठेयब मुर आन कली यो टिचा माल्नीनी। मेकोपुकी मरिम्शो पाइब आन कली सजाइ गेचा नु रिम्शो पाइब आन कली “गे रिम्शो पाइतीनी” देंचा कली वोइश्शो बाक्नीम। 15 परमप्रभु यावे आ दाक्शो मार बाक्ब देंशा हना, इन रिम्शो पतीकेमी मतुइक्ब नु निप्स मपाइश्शो आन कली सिक्सी पपतीन। *१पत्रुस ३:१६; तीतस २:८* 16 पाप रे प्रॉइचा पुंइसीशो मुर दुश्शा बाक्कीन। “पाप रे ब्रॉइचा ताइनुड” दे मिम्शा मरिम्शो मपने। परमप्रभु यावे आ वाइलीम वाइल दुश्शा बाक्कीन। *गलाती ५:१३; २पत्रुस २:१९* 17 मुर नेल्ल आन कली मान पने। थमा सुइक्ब आन कली दाक्तीने। परमप्रभु यावे कली मान पा हिनीन, पिप कली मान पने। *रोमी १२:१०; हितोपदेस २४:२१*

#### येसु आ श्येत जशो कोंइतीके

18 गे खिं डा गेय पाइबपुकी, इन होव्रप क्येडा हिंशा टिने। रिम्शो पाइब होव्रप कली ला ममाइ, मरिम्शो होव्रप कली यो टिचा माल्नीनी। *एफिसी ६:५; तीतस २:९* 19 इन होव्रपमी इन कली बिच्चीम श्येत गेम्तेक्म हना यो, गे परमप्रभु यावे कली मिम्शा, श्येत फाल्शा बाक्कीन। मेको परमप्रभु यावे

आ दाक्शो बाक्ब। 20 गे मरिम्शो पशा, तुप्चा पुंइसीनीनु, मेको फाल्शा बाक्तीनी हना, मार रिम्शो पनी डा? रिम्शो पशा यो, श्येत गेचा पुंइसीशा, फाल्शा बाक्तीनी हना, परमप्रभु यावे आ दाक्शो पाइनीनी। *१पत्रुस ३:१४; मत्ती ५:१०* 21 मोदेंशो पचा, दे योव्रशो ननी। ख्रीस्त यो इन पर्बम श्येत जशा, इन कली कोंइतीक दुम्त। मोपतीके गे आ खोदेंशो पचा माल्नीनी। *१पत्रुस ३:१८; मत्ती १६:२४* 22 मेकोमी काइ पाप मपवो। जोल यो मपवो। *यूहन्ना ८:४६; यसैया ५२:९* 23 मुरपुकीमी मेको कली शुक्शी लोव पाक्तेक्म हना यो, मेको आन कली लोव मलेत्त। मिनु श्येत जशा यो, मुर आन कली हिं च मकोइद। तन्न ठीक पा निसाफ पाइब कली जिम्मा गेंसाक्व। 24 मेको इं पाप क्याम्चा कली शीमी क्येष्ठा कांटी थोक्शा साइक्चा पुंइसाक्व। इं पाप पतीक थुं साइक्चा नु इं ठीक पतीक थुं प्रॉइचा, दे साइक्चा पुंइसाक्व। मोपा मेको आ कांटी थोक्शो गारपुकीमी गे साशा ठीक दुम्तीनी। *१यूहन्ना ३:५; गलाती ३:१३; रोमी ६:८, ११* 25 डोंइती गे हेंथे गाक्ब भेडा खोदेंशो बाक्तीनी। तन्न मुल इन गोठला नु इन थुं कोव्रब आ नेक्था लेश्शा जाक्तीनी। *यसैया ५३:६; यूहन्ना १०:१२*

#### मीश वॉइश कली अरेतीक लोव

3 गे मीश मुरपुकी, आंम वॉइश आ देंशो टिने। का निक्शी वॉइश मुरपुकी परमप्रभु यावे आ लोव मटीब बाक्तेक्म हना यो, आ मीश आ रिम्शो पशो तशा, लोव मपथु यो, थमा सुइक्ब दुम्तीम। *एफिसी ५:२२; १कोरिन्थी ७:१६* 2 इन मान पशो नु इन पाप रे डोन बाक्शो तशा, मोदेंशो पाइनीम। 3 रिम्शो पतीक मार बाक्ब देंशा हना, जाम्शा लाइब नोस पचा, चांमी मार मार चुंइसीचा, सुन पांइचा नु शुश क्येट लाइब वा फेक्चा ममाइ, *यसैया ३:१८-२३; १तिमोथी २:९* 4 मुर आन थुंमी खूइश्शो जाम्शा मलाइब पांइतीके बाक्ब। मेको मार बाक्ब देंशा हना, ब्रेम्शो नु सिक्सी पा बाक्तीक थुं बाक्ब। मेको परमप्रभु यावे आ डोंइती शुश रिम्शो बाक्ब। 5 साइ डोंइती पाप रे डोन बाक्शो मीश मुरपुकीम परमप्रभु यावे कली आस पा आंम वॉइश कली टिशो बाक्तेक्म। 6 सारामी अब्राहाम कली मान पा टिशो बाक्त। मिनु मुल गे यो ठीक गेय पशा, श्येत जचा महिंथु, मेको आ तमी खोदेंशो दुम्तीनी। *उत्पत्ती १८:१२*

7 गे वॉइश मुरपुकी, आंम मीश नु रिम्शो पा बाक्कीने। मीश मुरपुकी वॉइश मुर खोदेंशो पा बोल्यो मबाक्नीम, दे तुडक्नीनी। मेको मिम्शा, इन मीश कली मान पने। मारदे हना गे निम्फा परमप्रभु यावे आ शिशी ताइब बाक्नीसी। मो पाइतीनी हना, इन पुंइशो लोव परमप्रभु यावे आ डोंइती मतेक्सीब। *१कोरिन्थी ७:५; एफिसी ५:२५*

#### थमा सुइक्ब आन कली अरेशो

8 मिनु नोले गे नेल्ल थुं का डा दुश्शा, मुर आन कली दाक्शा, इन लोकब नु दाक्मुने। ब्रेम्शो थुं पाइश्शो मुर दुमीन। 9 इन कली मरिम्शो पाइब आन कली मरिम्शो मपने। इन कली शुक्शी लोव पाइब आन कली शुक्शी लोव मपने, आसीक गेने। मारदे हना गे आसीक ताइब दुम्चा कली योव्रशो बाक्नीनी। *१थिस्सलोनिकी ५:१५* 10 मिनु परमप्रभु यावे आ लोवमी “सु सु ब्रॉइचा नु रिम्शो बाक्चा दाक्नीमी, मेकोमी शुक्शी लोव मपने। सुइ आन कली जोल मपने। मुर नु दुशा बाक्कीन। *याकूब १:२६* 11 मरिम्शो पचा प्रॉइशा, ठीक गेय ला पने। 12 मारदे हना परमप्रभु यावेमी ठीक पाइब आन कली कोव्रब आन पुंइशो लोव नेंचा कली आ नोफा दाइक्ब। तन्न मरिम्शो पाइब आन कली मकोव्रब, आन पुंइशो लोव यो मननेब” दे ब्रेक्शो बाक्ब। *भजन संग्रह ३४:१३-१७*

#### येसु ख्रीस्त नेल्ल आन क्येडा ठेयब बाक्ब

13 गे ठीक गेय ला पाइतीनी हना, सुम इन कली श्येत गेबा डा? 14 ठीक पशा यो मोशा श्येत जाइतीनी हना, आसीक ताइब दुम्तीनी। इन कली श्येत गेब कली महिनीन। इन थुंमी ग्येत्थ लक्च मदुमीन। *१पत्रुस २:२०; मत्ती ५:१०* 15 तन्न इन थुंमी “ख्रीस्त ला प्रभु बाक्ब” दे मेको कली ठेयब सेलीन। गे गेना हना यो “इन थमा सुइक्तीके मार मे” दे हिल्लो पाइब आन कली

लोव्र लेत्या ठीक दुश्शा बाक्कीन। ब्रेम्शो थुंमी रिम्शो लोव्र पा लोव्र लेत्तीने। १पत्रुस २:२१-१४<sup>16</sup> इन थुं डा मिम्तीक कली पाप रे डोन वोतीन। इन कली शुक्शी पाइबपुकी ख्रीस्त आ नेंमी रिम्शो पशो तशा, मुने दोक्मल। १पत्रुस ४:६<sup>17</sup> मरिम्शो पशा श्येत जचा क्येडा ठीक पशा, श्येत जचा परमप्रभु यावे आ दाक्शो बाक्ब। १८ मारदे हना ख्रीस्त यो मुर नेल्ल आन पाप क्याम्चा कली साइक्वा पुंडसाक्व। ठीक पाइबमी ठीक मपाइब आन श्येत जाप्टु। मो पशा इं कली परमप्रभु यावे आ बाक्तीक चाक्दीप्ल। मोपतीके साइक्वा पुंडसीशा यो, सेंचा पुंडसाक्व।<sup>19</sup> नोले मेको आ सोक्त लशा, जेल्खानमी बाक्शो सोक्त आन कली लोव्र पाप्टु।<sup>20</sup> मेको सु बाक्तेक्म देंशा हना, साइ डोंइती नोआहमी ठेयब डोंगा सेलानु, परमप्रभु यावेमी रिम्ना रिम्न बाक्शो बाक्त। तन्न परमप्रभु यावे कली काइ मटीब, नोआह आ पाला डा बेक्शो मुर बाक्तेक्म। ८ जना मुर चहिं नोआह आ सेल्शो डोंगामी बाक्शा, ब्वाक्कुर रे ब्रोंइचा ताम्तेक्म। उत्पत्ती ७:७; २पत्रुस २:५<sup>21</sup> ब्वाक्कुमी ख्रुम्शा गुंडतीके मेको नु गारचा डा बाक्ब। मेकोमी इन कली मुल प्रोंइब। इन रां चिक्चा ममाइ, तन्न इन थुं डा मिम्तीके रिम्शो दुम्ल, दे परमप्रभु यावे कली पुंडतीके बाक्ब। मेको नेल्ल येसु ख्रीस्त आ सेंसीशो रे जाक्ब। एफिसी ५:२६; हिब्रू १०:२२<sup>22</sup> मेको स्वर्ग लशा, परमप्रभु यावे आ युरा गे बाक्ब। परमप्रभु यावे आ स्वर्ग डा गेय पाइबपुकी, अधिकार तशोपुकी नु सक्ति पाइश्शो नेल्लेमी मेको आ देंशो टीनीम। एफिसी १:२०-२१

थमा सुइक्व श्येत जचा माल्नीम

4 दोपा ख्रीस्त रागीम बाक्शा, श्येत जवा, मोपा गो नेल्ल श्येत जचा माल्नय, दे मिम्तीन। सु सु रागीमी श्येत जाइनीमी, मेको मरिम्शो पतीक कली प्रोंइने थुम्शो बाक्नीम।<sup>2</sup> मिनु गे रागीमी बाक्नी सम्म इन दला दाक्स मपथु, परमप्रभु यावे आ दाक्शो पने।<sup>3</sup> डोंइती परमप्रभु यावे कली मतुइक्थु मारेइ मारेइ पाइतीनी, मुल मेको गाप्ट। थमा मसुइक्वपुकीमी मार पाइनीम देंशा हना, महिब दुश्शा आन दला दाक्स पाइनीम। दुक्शा बाक्नीम, शुश जशा तूशा बाक्नीम नु ग्रांरा दिचा डा मूर्ति पूजा पाइनीम। एफिसी २:२-३; तीतस ३:३<sup>4</sup> गे चहिं मुल मेको आन पशो खोंदेंशो मपाइनीनी। मोपतीके मेकोपुकी छक लाक्नीम। मिनु इन परबंम शुक्शी पाइनीम।<sup>5</sup> तन्न मेकोपुकीमी बेक्शो नु ब्रोंइशो मुर आन कली निसाफ पाइब आ डोंइती मेको आ परबंम लोव्र पचा माल्नीम। रतिमोथी ४:१<sup>6</sup> मोपतीके बेक्शो मुर आन कली यो परमप्रभु यावे आ ग्येरपाइक्व लोव्र शेंशो बाक्त। परमप्रभु यावे खोंदेंशो पा सोक्तीम ब्रोंइचा तामेक्ल, दे रागीमी बाक्मानु, निसाफ पचा पुंडसाक्म। १पत्रुस ३:१९

परमप्रभु आ पपाइश्शो गेय

7 रागी नु रागीमी बाक्शो मारेइ मारेइ नुप्चा चिक्शो बाक्तेक्म। मोपतीके इन गेय पचा डोंइती मिम्शा नु आंम रां कली अरेशा प्रार्थना पने। १कोरिन्थी १०:११; १यूहन्ना २:१८<sup>8</sup> नेल्ल क्येडा ठेयब मार बाक्ब देंशा हना, शुश दाक्मुचा बाक्ब। मारदे हना दाक्मुतीकेमी शुश पाप यो ग्याम्ब। हितोपदेस १०:१२; याक्ब ५:२०<sup>9</sup> मगाइक्थु बास गेमुने।<sup>10</sup> परमप्रभु यावेमी इन कली गेय का का पपाइश्शो बाक्त। मोदेंशो पा वारच पमुने। परमप्रभु यावेमी गेशो गेय रिम्शो पने।<sup>11</sup> सुमी लोव्र पाइबा, मेकोमी परमप्रभु यावे आ ख्रुइश्शो लोव्र पवल। सुमी गेय पाइबा, मेकोमी परमप्रभु यावे आ गेशो सक्तिमी पवल। मोपा नेल्लेमी येसु ख्रीस्त आ नेंमी परमप्रभु यावे कली ठेयब सेल्मेक्ल। मेको छेडछेडमी बाक्शा, गेना हना यो सक्ति पाइश्शो बाक्ब। आमेन। रोमी १२:७

थमा सुइक्व आन श्येत

12 मिनु आं दाक्शो लोक्बपुकी, इन कली थुं थाम्चा डा श्येत शुश दुम्त हना, महिनीन। मेको मारेइ ममाइ। इन थमा सुइक्तीके नाक्चा कली बाक्ब। १पत्रुस १:६-७<sup>13</sup> गे ख्रीस्त आ श्येत जशो खोंदेंशो पा श्येत जाइतीनी हना, ग्येरसीने। मारदे हना आ छेडछेड पा जाक्वी ना शुश ग्येरनीनी। प्रेरित ५:४१;

याक्ब १:२; रोमी ८:१७<sup>14</sup> ख्रीस्त आ नेंमी श्येत जाइतीनी हना, आसीक ताइब दुम्नीनी। मारदे हना छेडछेड डा परमप्रभु यावे आ सोक्त गे नु बाक्ब। मत्ती ५:११; एफिसी १:१३<sup>15</sup> गेपुकी मुर कली साइक्व, खुइ पाइब, ग्रांरा दिचा डा गेय पाइब नु अरु आन कली ग्येत्थ लक्च सेल्शा, सजाइ तपाइक्व खोंदेंशो मदुमीन।<sup>16</sup> तन्न गे थमा सुइक्व दुश्शा, श्येत जाइतीनी हना, मुने मपने। येसु ख्रीस्त आ नेंमी परमप्रभु यावे कली ठेयब सेलीन। फिलिप्पी १:२०<sup>17</sup> निसाफ पची ना दुम्चशो बाक्त। परमप्रभु यावे आ खिं डा मुर डोंइती निसाफ पचा पुंडसीनीम। मिनु गो डोंइती डा बाक्तय हना, ग्येरपाइक्व लोव्र थमा मसुइक्व आन कली दोदेंब दुम्बा? येरमीया २५:२९; इजीकीएल ९:६<sup>18</sup> मिनु ठीक पाइब मुरपुकी हेरा ब्रोंइचा मताइब दुम्तेक्म हना, थमा मसुइक्व नु मरिम्शो पाइबपुकी दोदेंशो दुम्नीमी? हितोपदेस ११:३१<sup>19</sup> मोपतीके परमप्रभु यावेमी सु कली श्येत जचा गेबा, मेकोपुकीमी ठीक गेय पशा, आंम थुं परमप्रभु यावे कली जिम्मा गेमेक्ल। परमप्रभु यावेमी आ मुर आन कली गेनायो मप्रोंइब। भजन संग्रह ३१:६

खाल्पा नु ठिटा आन कली अरेशो

5 गो इन खोंदेंशो खाल्पा नड। गो थमा सुइक्व आन दातेमी बाक्शो शेंब खाल्पा इन कली अर्ती गेनुड। गो ख्रीस्त आ श्येत जशो तशो नड। मुल गो जाक्चशो छेडछेड डा मुर यो दुम्ती। २यूहन्ना :१; मत्ती २६:३७, ६९; रोमी ८:१७<sup>2</sup> इन कली मार अर्ती गेनुड देंशा हना, गे परमप्रभु यावे आ योव्रशो मुर आन गोठला खोंदेंशो दुश्शा, मेको आन कली रिम्शो पा कोव्रडीन। इन थुंमी “आं मदाक्शो गेय बाक्ब” दे मिम्शा ममाइ, तन्न “गो मेको गेय दाक्नुड” दे ग्येरशा पने। “क्येट चेम्नुड” दे मिम्शा ममाइ, तन्न रिम्शो शेंतीके गेय शुश पने। यूहन्ना २१:१६; प्रेरित २०:२८; १तिमोथी ३:२-७<sup>3</sup> “गो परमप्रभु यावे आ योव्रशो मुर आन कली हुकुम पाइब दुम्ती” दे ममाइ, तन्न मेको दोदेंब दुम्चा माल्नीमी, इन पशो गेयमी कोइदीन। इजीकीएल ३४:२-४; २कोरिन्थी १:२४; तीतस २:७<sup>4</sup> नेल्ल क्येडा ठेयब गोठला जाक्मेनु, गे गेना हना यो लीब परमप्रभु यावे आ छेडछेड डा सिरपेच ताइनीनी। हिब्रू १३:२०; १कोरिन्थी ९:२५; रतिमोथी ४:८<sup>5</sup> मिनु गे ठिटापुकी, शेंब खाल्पा आन देंशो लोव्र टिने। गे नेल्ल ब्रेम्शो थुं पाइश्शो दुश्शा, गेय पमुने। मारदे हना परमप्रभु यावेमी ठेयब लेशो मुर आन कली मकोव्रब, ब्रेम्शो थुं पाइश्शो मुर आन कली ला शिशी पाइब। एफिसी ५:२१; अय्युब २२:२९; हितोपदेस ३:३४; मत्ती २३:१२; याक्ब ४:६

<sup>6</sup> मोपतीके गेपुकीमी “नेल्ल सक्ति परमप्रभु यावे केन बाक्ब” दे आ देंशो लोव्र ब्रेम्शो थुंमी ठीक पा टिने। मो पाइतीनी हना, परमप्रभु यावेमी आ मिम्ची ना इन कली ठेयब सेल्ब। याक्ब ४:६<sup>7</sup> गेपुकीमी “मार जाइनीकी? मार तूनीकी? मार फेक्नीकी? मार दुम्नीकी?” दे हिंशा, सुर्ता पचा ममाल्नीनी। मारदे हना परमप्रभु यावेमी इन कली कोव्रब। भजन संग्रह ५५:२१; मत्ती ६:२५; फिलिप्पी ४:६<sup>8</sup> गेय पचा डोंइती मिम्तीन। होस पा बाक्कीन। मारदे हना इन कली मदाक्ब सैतानमी शोव्रलु बेक्शो गुप्स खोंदेंशो पा “सु कली ब्वाइनुडा” दे माल्ना माल्न गाक्ब। १थिस्सलोनिकी ५:६; लुका २२:३१; २कोरिन्थी २:११<sup>9</sup> गेपुकीमी थमा सुइश्शा “गो सैतान कली तुइक्नुड” दे मेको कली काइ मटिने। रागी नेल्ल डा थमा सुइक्व लोक्बपुकीमी मोदेंशो श्येत जाइनीम दे तुइक्नीनी।

पत्रुस आ गेशो आसीक

10 मिनु का निक्शी नाक्त श्येत जनी नोले नेल्ल शिशी पाइब परमप्रभु यावेमी “गेना हना यो छेडछेडमी बाक्चा गेनुडमी” दे ख्रीस्त आ नेंमी इन कली ब्रेम्शो बाक्त। मेकोमी इन कली आ राज्यम गारचा डा सक्ति पाइश्शो नु ठीक सेल्ब। १पत्रुस १:६<sup>11</sup> मेको गेना हना यो नेल्ल क्येडा ठेयब बाक्ब। आमेन।

नोले डा लोव्र

12 गो सिल्वानस थमा सुइक्व लोक्ब बाक्ब, दे मिम्शा, आं ब्रेक्शो आइक्च चिठी मेको नु सोइक्ताक्ड। गो इन कली परमप्रभु यावे आ थमा

शिशी मार बाक्मे, मेको शेंताक्न्नी। मिनु गे मेको तुइश्शा, थमा सुइक्चा मप्रोइथु बाक्कीन। प्रेरित १५:२२<sup>13</sup> इन खोदेशो बेबीलोनम बाक्शो योव्रशोपुकीमी यो इन कली “रिम्शो बाक्कीन” दे आं कली ब्रेक्पाइक्तीमी।

मिनु आं तौ मर्कूसमी यो मो देंत। रतिमोथी ४:११<sup>14</sup> गे दाक्मुशा, प्रभु आ नेंमी मुम्मुने। परमप्रभु यावेमी ख्रीस्तम बाक्शो नेल्ल इन कली थुं नाइक्चा गेवल।

## २ पत्रुस

पत्रुसमी एको चिठी थमा सुइक्व आन कली नोले ब्रेक्शो बाक्त।

एको चिठी डोंइती डा क्येडा इच्का नोले ६४-६५ ए. डी.मी मेर ब्रेक्शो बाक्त।

पत्रुसमी थमा सुइक्व आन कली परमप्रभु यावे आ लोत्र पाइब आन ब्रेक्शो लोत्र तुइश्शा नु होस पा बाक्कीन, दे अरेशो बाक्त। मारदे हना मेको आन दाते रे दूली शेंब बोक्तेक्म। मेको दूली शेंबपुकी दोदेशो बाक्नीमदेशा हना,

१. प्रभु येसु ख्रीस्त परमप्रभु यावे आ तौ मबाक्ब।
२. क्येट शुश दाक्ब बाक्नीम।
३. मरिम्शो पचा मुने मपाइनीम।
४. नक नु बोल्यो मदुम्शो थमा सुइक्व आन कली हेंथे लां कोंइनीम।

### डोंइती डा लोत्र

१ गो येसु ख्रीस्त आ वाइल नु आ सोइश्शो, सिमोन पत्रुस नड। इं परमप्रभु यावे नु पाप रे प्रोंइब येसु ख्रीस्त रे पा ठीक दुम्तय, दे थमा सुइश्शा, थुं का दुम्तय। मोपतीके इन कली एको चिठी ब्रेक्ताकड।<sup>२</sup> परमप्रभु यावे नु प्रभु येसु कली तुइक्तीकेमी शिशी नु इन थुं नाइक्तीके बारना बारन लल।

### थमा सुइक्वा नु गेय गारचा माल्ब

३ परमप्रभु यावे आ सक्तिमी ब्रोंइचा नु परमप्रभु यावे आ डोंइती बाक्चा कली मार मार माल्या, मेको नेल्ल इं कली मो गेपु। दोपा गेपु देशा हना, मेको कली तुइक्तीके गेपु। आ छेडछेडमी बाक्चा नु आ पतीके नेल्ल पचा कली योत्रतु।<sup>१</sup> पत्रुस २:४<sup>४</sup> मोपा आ नेल्ल क्येडा ठेयब थोक्शा पशो लोत्र गेपु। मेको तुइश्शा, गेपुकी रागी डा मुर आन दला दाक्स पतीके रे ब्रोंइशा, प्रोक्ने चाप्नीनी। मोपा गेपुकी परमप्रभु यावे आ पशो खोदेशो पाइब दुम्नीनी।<sup>५</sup> मोपतीके गे इन थमा सुइक्तीके नु इन पशो गेय गारचा माल्ब। इन पशो गेय नु “परमप्रभु यावे आ दाक्शो मार बाक्मे?” दे तुइक्वा माल्नीनी। गलाती ५:६, २२<sup>६</sup> इन तुइक्तीकेमी आंमा अरेशीचा माल्नीनी। आंमा कली अरेशीतीके, पपाइक्तीके नु थमा सुइक्तीके मप्रोंइनुड, दे खोइली थेक्शा बाक्चा माल्नीनी। इन खोइली थेक्शा बाक्तीकेमी परमप्रभु यावे खोदेशो पा गेय पने।<sup>७</sup> परमप्रभु यावे खोदेशो पा गेय पशा, थमा सुइक्व आन कली आंम इन लोक्ब खोदेशो पचा माल्नीनी। लोक्ब खोदेशो पा दाक्चा माल्नीनी। गलाती ६:१०<sup>८</sup> गेपुकी मोदेशो शुश पाइतीनी हना, इं प्रभु येसु ख्रीस्त कली तुइक्तीकेमी रिम्शो पा शुश फल सिश्शो खोदेशो दुम्ब।<sup>९</sup> सुम मोदेशो मपाइबा, मेको ब्रा पा ताइब बाक्ब। मेको मुर आ डोंइती पशो पाप क्याम्शो बाक्ब, दे प्रेशो बाक्ब।<sup>१०</sup> यूहन्ना २:९, ११<sup>१०</sup> मोपतीके आं लोक्बपुकी, गेपुकीमी “गो ब्रेश्शो नु योत्रशो मुर बाक्नीकी” दे गेना हना यो मिम्चा माल्नीनी। मो पाइतीनी हना, गे गेनायो नोले मशोंइसीनीनी।<sup>११</sup> मिनु नोले पाप रे प्रोंइब इं प्रभु येसु ख्रीस्तमी इन कली आ गेना हना यो लीब राज्यमी रिम्शो पा ओत्रचा गेब।

१२ मोपतीके गो इन कली नेल्ल नाक्ती मोदेशो मिम्पाइक्नुड। गेपुकी मेको तुइश्शा नु थमा शेंतीके पाइब दुम्तीनी हना यो, गो इन कली मिम्पाइक्नुड।<sup>१३</sup> गो ब्रोंइडा सम्म इन कली मिम्पाइक्चा रिम्शो बाक्ब, दे मिम्नुड।<sup>१४</sup> २कोरिन्थी ५:१<sup>१४</sup> इं प्रभु येसु ख्रीस्तमी “गे शुश नाक्त् मलीनेवे” दे कोंइताक्पी। यूहन्ना २१:१८-१९<sup>१५</sup> मिनु आं लचा नोले गे नेल्ल नाक्ती आं शेंशो मिम्ने चाप्नीनी, दे शुश गेय पना पन बाक्नुड।

### छिडछिडम ब्रशो बत्ती

१६ गोपुकीमी इन कली इं प्रभु येसु ख्रीस्त आ सक्ति नु आ रागीम जाक्शो आ पर्बम मुर आन सेल्शो कथा मशेंदक। तन्न गोपुकीमी “येसु ख्रीस्त नेल्ल क्येडा ठेयब बाक्ब” दे आंम आंइ मिक्चीम ताइतक।<sup>१७</sup> इं आफ परमप्रभु यावेमी मेको कली मान पशा, आ छेडछेड तपाइश्शा “मेको आं दाक्शो तौ बाक्ब। मेको कली तशा, गो ग्येरसाक्पी” देशो सेंदा छेडछेड रे गूत। मत्ती १७:५<sup>१८</sup> गोपुकीमी मेको सेंदा सरीड रे नेंतक। मारदे हना गोपुकी मेको नु परमप्रभु यावे आ डांडाम बाक्शो नकी।<sup>१९</sup> मिनु गोपुकीमी साइ डा परमप्रभु यावे आ लोत्र पाइब आन पशो लोत्र मुल रिम्शो पा रुप्तक। गे यो परमप्रभु यावे आ साइ डा लोत्र पाइब आन ब्रेक्शो लोत्र रुप्चा नु तुइक्चा कली छिडछिडमी ब्रशो बत्ती खोदेशो पा होस पा बाक्कीन। मिनु नोले इन थुंमी सुक्कुर सोरुल खोदेशो पा छेडछेड दुम्नीनु, आन ब्रेक्शो नेल्ल रुप्नीनी। भजन संग्रह ११९:१०५<sup>२०</sup> गेपुकी डोंइती मार रुप्चा माल्नीनी देशा हना, परमप्रभु यावे आ साइ डा लोत्र पाइब आन ब्रेक्शो लोत्र मुर आन मिम्शो लोत्र ममाइ,<sup>२१</sup> मुर आन थुं रे मपीब। तन्न परमप्रभु यावे आ सोक्तीम आ मुर आन कली सुम्शा, परमप्रभु यावे आ लोत्र ब्रेक्पाइश्शो बाक्ब, दे रुप्चा माल्नीनी।<sup>१</sup> तिमोथी ३:१६-१७

दूली शेंबपुकी  
यहूदा ३-१९

२ साइ डोंइती परमप्रभु यावे आ लोत्र जोल पा दूली शेंबपुकी बाक्मा बाक्त। मुल मोदेशो जोल पा शेंबपुकी इन गुम्तीक खिमी यो जाक्नीमी। मेकोपुकीमी खुइश्शोमी खतम सेल्ब शेंतीके शेंनीमी। प्रभुमी मेको आन कली ग्याप्शा यो, मेकोपुकी “गो मेको कली मतुइक्नुड” दे जाम्शा लाइब बाक्नीम। मत्ती २४:११; १तिमोथी ४:१<sup>२</sup> शुशोमी आन शेंशो नेंशा, हेंथे पा दला दाक्स यो पाइनीम। मुरपुकीमी मेको आन कली तशा थमा लां कली शुक्शी लोत्र पाइनीम।<sup>३</sup> मेको आन शीम पतीकेमी इन कली दूली लोत्र पा, इन क्येट योल्नीम। मेकोपुकी डोंइती रे नरक लचा चिक्शो बाक्नीम।

४ का निक्शी परमप्रभु यावे आ स्वर्ग डा गेय पाइबपुकी यो पाप पतीके शिशी मतामे। परमप्रभु यावेमी मेको आन कली नरकमी ताइश्शा, नेल्ल क्येडा मरिम्शो बाक्तीकेमी सोइक्ताक्मी। मिनु निसाफ पची नाक्त् सम्म छिडछिडमी चोक्शा वोइक्तीमी।<sup>५</sup> मिनु परमप्रभु यावेमी साइ डा मुर आन कली शिशी मपथु, नोआह ला ठीक पाइब बाक्तीके मेको नु अरु ७ जना आन कली ला श्येत रे प्रोंइतीमी। मेना परमप्रभु यावेमी रागी नेल्ल ब्वाक्कुमी ब्रीपाइश्शा, आ कली मटीब आन कली साइश्शो बाक्त। उत्पत्ती ८:१८; १पत्रुस ३:२०; २पत्रुस ३:६<sup>६</sup> परमप्रभु यावेमी सोदोम नु गोमोररा माइश्शो सहर निक्शी कली मीम क्रोइश्शा, पुलु सेल्शो बाक्त। मेको मटीब आन कली

कोंडतीक चिनु बाक्त। उत्पत्ती १९:२४-२५<sup>7</sup> परमप्रभु यावेमी ठीक पाइब लोत माइश्शो मुर कली श्येत रे प्रॉइशो बाक्त। लोतमी पाप पाइब आन कली तशा, आ थुं शुश मनुशो बाक्त।<sup>8</sup> मारदे हना मेको ठीक पाइबमी नाक्त कित कित आन ग्रांरा दिचा डा गेय तशा नु नेंशा, आ ठीक मिन्तीक थुं शुश खाइश्शो बाक्त।<sup>9</sup> परमप्रभु यावेमी चहिं आंम कली टीब मुर आन कली “दोपा थुं थाम्चा डा श्येत रे गुंइनुडा” दे तुइक्व। मिनु ठीक मपाइब आन कली सजाइ गेचा कली निसाफ पची नाक्त सम्म वोइक्व। १कोरिन्थी १०:१३<sup>10</sup> मिनु सु सु आन दला दाक्स नु ग्रांरा दिचा डा गेय पाइनीमी नु अधिकार गेशो आन कली मटीनीमी, मेकोपुकीमी नेल्ल क्येडा शुश सजाइ ताइनीम। मोदेंशो जोल पा शेंब काइ महिंब दुश्शा, ठेयब लेशशा, थमा सुइक्व आन कली शुक्शी पचा महिंनीम।<sup>11</sup> तन्न परमप्रभु यावे आ स्वर्ग डा गेय पाइबपुकी मेको आन क्येडा ठेयब नु सक्ति पाइश्शो बाक्तेक्म हना यो, मेको जोल पा शेंब आन कली प्रभु आ डोंइती दोस मगेनीम।<sup>12</sup> मेको दूली शेंब ममिम्ब ग्याइक्वा नु साइक्वा पुंइसीचा कली जरमेशो बस्तु भाव खोदेंशो पा, आन तुइश्शो ला पाइनीम। मेकोपुकीम काइ मरुनीम। तन्न शुक्शी पाइनीम। मिनु बस्तु भाव खोदेंशो पा खतम दुम्नीम।<sup>13</sup> आन मरिश्शो पशो आ पबर्म मरिश्शो पाइक्वा पुंइसीनीम। नाक्तीम आन दला दाक्स पशा ग्येरशा बाक्नीमी। गेपुकी नु भोज जशा, मुने दोक्वा डा पा इन गुम्तीक खिं मरिश्शो लुम्सीशो सेल्ब बाक्नीम।<sup>14</sup> मेकोपुकीमी मुर आन मीश तशा वाल्नीम। पाप पचा गेनायो “मोक्ल” मर्देंनीम। सक्ति मपाइश्शो थमा सुइक्व आन कली लेम्शा, आंम दूली लां खोइक्वाइक्नीमी। मेकोपुकी शीम बाक्नीम। मिनु सराप रशो मुर बाक्नीम।<sup>15</sup> ठीक लां प्रॉइशा, हेंथे गाक्शा, बेओर आ तौ बालाम माइश्शो मुर खोदेंशो दुम्तेक्म। बालाममी मार पशो बाक्त देंशा हना, मरिश्शो गेय पतीके रे ताक्शो क्येट शुश दाक्शो बाक्त। गन्ती २२:७-३५<sup>16</sup> मेकोमी मरिश्शो मिश्शा पचा चिक्तानु, हुइक्वा पुंइसे बाक्त। दोपा हुइक्वा पुंइसे बाक्त देंशा हना, मब्बाक्व गधामी मुर आ सेंदामी लोत्र पवा बाक्त। मिनु परमप्रभु यावे आ लोत्र पाइब कली मेको आ मरिश्शो गेय रे तेक्गा बाक्त।<sup>17</sup> मेको दूली शेंबपुकी ब्वाक्कु मयीब धारा नु फशेम बेरपाइश्शो गोस्स खोदेंशो बाक्नीम। मेको नेल्ल क्येडा छिडछिड डा बाक्तीकेमी वोइक्वा पुंइसीनीम।<sup>18</sup> मेकोपुकीमी हेंथे लोत्र पा पाप रे प्रॉइचा पुंइसीशो नक थमा सुइक्व दुश्शो मुर आन कली आन हेंथे पतीके ग्रांरा दिचा डा गेय पपाइक्नीम।<sup>19</sup> मेकोपुकीमी “गे पाप रे प्रॉइशो मुर बाक्नीमी” दे लोत्र पाइनीम। तन्न ग्रांरा दिचा डा गेय आन वाइल बाक्नीम। मार मारमी मुर आन कली ग्राबा, मेको आन वाइल दुम्नीम। गलाती ५:१३; १पत्रुस २:१६<sup>20</sup> मुरपुकी इं प्रभु येसु ख्रीस्त कली तुइक्तीकेमी रागी रागी डा मुर आन पाप रे ब्रॉइशो बाक्तेक्म हना, मेको लेंशा पापमी मुर कली ग्रात हना, मेको पाप आ वाइल दुम्नीम। मेको आन कली डोंइती डा दुम्तीके क्येडा नोले शुश मरिश्शो दुम वा। मत्ती १२:४५<sup>21</sup> मुरपुकीमी ठीक लां गाक्वा तुइश्शा यो, मेको डोंइती रे पाप रे डोन बाक्वा, दे परमप्रभु यावे आ अरेशो लोत्र प्रॉइशा, पापम लेत्तेक्म हना, मेको तुइक्वा क्येडा गेनायो मतुइश्शो हना रिश्शो दुम वा। लूका १२:४७-४८<sup>22</sup> मिनु मुर आन देंतीक लोत्र “कुचुममी आ मेशो लेंशा जाइब।” मिनु “पोत्र कली गिश चिक्शा हना यो, लेंशा ग्रांग्रामी गुम्दीब” देंशो लोत्र थमा बाक्व। हितोपदेस २६:११

येसु आ जाक्वी नाक्त

3 आं दाक्शो लोकबपुकी, गो इन कली चिठी निक्शी ब्रेक्ताक्व। गो एको चिठी निक्शीमी इन थुंमी मिम्पाइश्शा फ्रुक्पाइक्ता। २पत्रुस १:१३<sup>2</sup> इन कली मार फ्रुक्पाइक्वा दाक्ताक्व देंशा हना, परमप्रभु यावे आ

साइ डा लोत्र पाइब आन ब्रेक्शो लोत्र फ्रुक्पाइक्वा दाक्ताक्व। पाप रे प्रॉइब प्रभु आ अरेशो लोत्र इन कली मिम्पाइक्वा दाक्ताक्व। इन शेंबपुकीमी इन कली शेंताक्मे।<sup>3</sup> नोले डा नाक्त शुक्शी पाइबपुकी जाक्नीमी, दे तुइक्वा माल्नीनी। मेकोपुकीमी शुक्शी पा, आंम दला दाक्स पाइनीम। १तिमोथी ४:१; यहूदा: १८<sup>4</sup> मेकोपुकीमी “लेंशा जाक्नुड देंब, ते जाक्मे? इं किकी पिपी बेक्शो बाक्तेक्म। रागी सेल्चा रे ओदेंशो बाक्त” देंनीमी। यसैया ५:१९; इजीकीएल १२:२२; मत्ती २४:२८<sup>5</sup> मेको शुक्शी पाइबपुकीमी “डोंइती परमप्रभु यावेमी लोत्र पशा, सरीड कली मसेल। रागी नु ब्वाक्कु यो मफ्रादीम्सी” दे शेंनीम। मत्ती २४:३८; उत्पत्ती १:२, ६, ९; भजन संग्रह २४:२<sup>6</sup> मेना रागी नु मुर नेल्ल आन कली ब्वाक्कुमी खुश्शा सदा बाक्त। २पत्रुस २:५; उत्पत्ती ७:२१<sup>7</sup> मुल सम्म बाक्व सरीड नु रागी कली “बाक्ल” दे परमप्रभु यावेमी खाल का डा लोत्र पशा, वोदा बाक्त। परमप्रभु यावेमी रागी नु मटीब मुर नेल्ल आन कली मीम क्रोइक्वा, दे निसाफ पची नाक्त सम्म कली वोइश्शो बाक्त।

<sup>8</sup> मिनु आं दाक्शो लोकबपुकी, प्रभु कली नाक्त का हजार का बर्स खोदेंशो बाक्व। मिनु हजार का बर्स नाक्त का खोदेंशो बाक्व। भजन संग्रह ९०:४<sup>9</sup> प्रभुम आ देंशो लोत्र ठीक पा पाइब। तन्न का निक्शी मुरपुकीमी “प्रभुम आ देंशो मपाइब। नोले ला जाक्व” देंनीम। तन्न प्रभुमी “सुइ जाम्शा मलमल। आं गे लेम्मल” दे रिम्ब। हबकुक् २:३; १तिमोथी २:४<sup>10</sup> प्रभु जाक्मेनु, खुइ जाक्शो खोदेंशो पा जाक्व। मेना सरीड ठेयब रेयके पा जाम्ब। मारेइ मारेइ ग्रीइश्शा नुप्नीम। रागी नु रागीम बाक्शो मारेइ मारेइ मीम खतम दुम्नीम। १थिस्सलोनिकी ५:२-३; मत्ती २४:२९; प्रकाश २०:११; यसैया २४:१९

<sup>11</sup> मोदेंशो दुम्नेनु, नेल्ल मीम ग्रीइश्शा, मारेइ मलीब। मोपतीके गेपुकी परमप्रभु यावे कली थमा सुइश्शा, आ देंशो लोत्र तिशा, पाप रे डोन बाक्शा, परमप्रभु आ नेक्था बाक्वा माल्नीनी।<sup>12</sup> गेपुकी परमप्रभु यावे आ नाक्त जाक्व, दे रिम्शा नु गेना दुम्बा, दे मिम्स डा मिम्स बाक्वा माल्नीनी। मारदे हना मेना सरीड नेल्ल मीम ग्रीइश्शा नुप्ब। मार मार बाक्मे, मेको नेल्ल मीम ग्रीइश्शा नुप्नीम।<sup>13</sup> तन्न आ डोंइती देंशो “नक सरीड नु नक रागी सेल्नुड। मेकेर नेल्ल रिम्शो नु ठीक ला पाइनीम” देंशो लोत्र रिम्नय। यसैया ६५:१७; प्रकाश २१:१; प्रकाश २१:२७

<sup>14</sup> आं दाक्शो लोकबपुकी, मोदेंशो रिम्शा, गल्ली मपाइब नु दोस मताइब दुम्चा कली शुश गेय पने। परमप्रभु यावेमी इन कली मोदेंशो पशो नु थुं नाइश्शा बाक्शो गुम्चा दाक्व। १कोरिन्थी १:७-८<sup>15</sup> प्रभु आ रिम्ना रिम्न बाक्तीके मुर आन कली पाप रे प्रॉइचा बाक्व, दे मिम्तीन। इं दाक्शो लोकब पावलमी आं खोदेंशो पा, इन कली आ तशो तुइक्तीकेमी चिठी ब्रेक्ताक्व। रोमी २:४<sup>16</sup> मेको आ पबर्म आ चिठी नेल्लेमी लोत्र पाइब। पावल आ ब्रेक्शो लोत्र का निक्शी रुप्चा कली श्येत बाक्व। मजोक्व नु थमा मसुइक्व मुरपुकीमी मेको दूली शेंनीम। परमप्रभु यावे आ ब्रेक्पाइश्शो अरु लोत्र यो दूली शेंनीम। मोपा आंमा जाम्शा लाइब दुम्नीम।

नोले डा लोत्र

<sup>17</sup> मोपतीके आं दाक्शो लोकबपुकी, गे मेको डोंइती रे तुइश्शा, होस पा बाक्कीन। मोपा मबाक्तीनी हना, गेपुकी दूली शेंब आन दूली शेंतीके खोइश्शा, इन थमा सुइक्तीके साम्नीनी।<sup>18</sup> तन्न इं प्रभु, इं कली पाप रे प्रॉइब येसु ख्रीस्त आ शिशी नु मेको कली तुइक्तीकेम बारना बारन लल। मेको कली मुल नु गेना हना यो ठेयब सेल्य। आमेन।



## १ यूहन्ना

एको चिठी येसु आ शेंसीब, यूहन्नाम डोंइती ब्रेक्शो बाक्ब। चिठी ब्रेक्की ना मेको खाल्पा दुश्शो बाक्त।

एको चिठी गेना ब्रेक्शो बाक्मे, ठीक पा मतुइक्नीम। दूली शेंबपुकी १०० ए. डी. क्येडा डोंइती जाक्शो बाक्तेक्म। मेको आन पबर्म लोव ब्रेक्शो बाक्ब। मोपतीके मेना ब्रेक्शो बाक्ब, दे मिस्सीब।

१. ठीक पा थमा सुइश्शो कोंइतीके
२. परमप्रभु यावे आ मुर दुश्शो दोपा तुंडसीबा

थमा सुइक्ब आन कली ठेयब शेंतीके

१ नेल्ल क्येडा डोंइती रे बाक्शो, सु बाक्त देंशा हना, ब्रोंइचा गेब लोव माइश्शो बाक्त। गोपुकीमी मेको आ लोव नेंतक। आंइ मिक्चीमी ताइतक। आंइ मिक्चीमी कोवतक। आंइ गुइमी थीतक। यूहन्ना १:१; यूहन्ना १:१४; यूहन्ना १:४<sup>२</sup> मेको ब्रोंइचा गेब लोव माइश्शो रागीमी तपांडसीचा पुंडसाक्व। मिनु गो मेको कली ताइतक। मोपतीके गोपुकीमी मेको आ लोव शेंनीकी। मिनु इन कली यो गेना हना यो, इं आफ नु बाक्चा आ पबर्म शेंनीकी। मेको गेना हना यो ब्रोंइशा बाक्तीक माइश्शो डोंइती आ आफ परमप्रभु यावे नु बाक्त। मिनु परमप्रभुमी मेको आंइ कली कोंइताक्व।<sup>३</sup> मिनु आंइ तशो नु नेंशो इन कली शेंनीकी। मारदे हना गो नेल्ल थुं का डा दुम्यल। मिनु गो नेल्ल इं आफ परमप्रभु यावे नु आ तौ येसु ख्रीस्त नु थुं का डा बाक्नय।<sup>४</sup> गो नेल्ल इं थुं ग्येरसीशा बाक्व, दे एको चिठी ब्रेक्शा, इन कली सोइक्ताक्व। १ यूहन्ना ५:१३; यूहन्ना १५:११; यूहन्ना १६:२४

परमप्रभु छेडछेड बाक्ब

<sup>५</sup> मेकोमी आंइ कली नेंपाइश्शो लोव इन कली शेंनीकी। मार लोव शेंनीकी देंशा हना, परमप्रभु यावे छेडछेड बाक्ब। मिनु मेको नु छिडछिड काइ मबाक्ब। याक्ब १:१७<sup>६</sup> गोपुकीमी छिडछिडम गाक्शा यो “परमप्रभु यावे नु थुं का डा बाक्नय” देंतय हना, जोल्फे दुम्यल। थमा गेय मपाइनय। १ यूहन्ना २:४<sup>७</sup> मेको छेडछेडमी बाक्शो खोदेंशो पा, गो छेडछेडमी गाक्तय हना, अर्को थमा सुइक्बपुकी नु थुं का डा दुम्यल। मिनु आ तौ येसु आ हुशेमी इं मरिश्शो पशो नेल्ल क्याम्ब। हिब्रू ९:१४; प्रकाश १:५<sup>८</sup> गोपुकीमी “मरिश्शो काइ मपक” देंतय हना, इं आंमा मिक्च सिल्लो बाक्नय। इं थुं आगामी थमा मबाक्ब।<sup>९</sup> गोपुकीमी “मरिश्शो पाइतक” देंतय हना, इं मरिश्शो पतीके क्याम्शा, इं कली शेक्ब। मारदे हना मेको आ देंशो पाइब नु ठीक पाइब बाक्ब। भजन संग्रह ३२:३-५; हितोपदेस २८:१३<sup>१०</sup> गोपुकीमी “मरिश्शो काइ मपक” देंतय हना, मेको कली जोल्फे सेल्लनय। मिनु आ देंशो लोव इं थुंमी मलीब। रोमी ३:१०-१८

पाप रे प्रॉइब येसु ख्रीस्त बाक्ब

२ मिनु आं आलपुकी, इन कली मारदे ब्रेक्ताक्ड देंशा हना, गो इन कली “मरिश्शो मपने” देंचा कली ब्रेक्ताक्ड। मिनु थमा सुइक्ब कामी पाप पाप्नु हना, मेको आ पबर्म आ आफ कली पुंडब का बाक्ब। मेको पुंडब सु बाक्ब देंशा हना, मेको नेल्ल ठीक पाइब येसु ख्रीस्त बाक्ब।<sup>२</sup> दोपा नेल्ल ठीक पाप्नु देंशा हना, मरिश्शो पाइब आन बेक्तीकेमी साइक्चा पुंडसाक्व। इं पाप कली ला ममाइ, तन्न रागी नेल्ल डा मुर आन पाप क्याम्चा कली यो साइक्चा पुंडसाक्व। १ यूहन्ना ४:१०; कलस्सी १:२०; यूहन्ना ११:५१-५२<sup>३</sup> मिनु गोपुकी येसु ख्रीस्त आ मुर दुश्शो, दोपा तुइक्नय देंशा हना, परमप्रभु यावे आ अरेशो लोव पना पन बाक्तीके येसु ख्रीस्त कली थमा पा तुइक्नय।<sup>४</sup> मिनु सुमी “गो येसु ख्रीस्त आ मुर दुश्शा, मेको

तुइक्नुड” देंबा, तन्न आ अरेशो लोव मटीबा, मेको जोल्फे बाक्ब। मोदेंशो मुर आगामी परमप्रभु आ थमा पतीके मबाक्ब।<sup>५</sup> सु चहिं आ देंशो लोव पना पन बाक्बा, मेको मुरुमी परमप्रभु यावे कली थमा पा दाक्ब। मोदेंशो दुश्शो मुरुमी “गो येसु ख्रीस्त आ मुर दुम्ती” दे तुइक्ब। यूहन्ना १४:२१-२३<sup>६</sup> मिनु सुमी “गो येसु ख्रीस्त नु बाक्नुड” देंबा, मेको येसु ख्रीस्त खोदेंशो दुम्चा माल्ब। यूहन्ना १३:१५; १ पत्रुस २:२१-२३

थमा सुइक्ब आन दाक्मुशो

<sup>७</sup> आं दाक्शो थमा सुइक्ब लोक्बपुकी, गो इन कली नक अरेशो लोव मब्रेक्तु। एको अरेशो लोव माइत बाक्ब। गोपुकी मेको डोंइती रे पाइनीनी। मिनु गो मेको माइत अरेशो लोव नेंशो बाक्तीनी। यूहन्ना ११:३४; २ यूहन्ना :५<sup>८</sup> मिनु मेको ब्रेक्शा यो गो इन कली नक अरेशो लोव ब्रेक्नुड। मारदे हना मेको नक अरेशो लोव येसु ख्रीस्तमी खाप्नु। मिनु गोपुकी यो पाइनीनी। गो मेको मारदे ब्रेक्ताक्ड देंशा हना, मुल छिडछिड जाम्ना जाम्न लाइब। मिनु थमा छेडछेड बारना बारन बाक्ब। यूहन्ना ८:१२; रोमी १३:१२<sup>९</sup> मिनु सुमी “गो परमप्रभु यावे आ छेडछेडमी बाक्नुड” देंबा, तन्न आ लोक्ब आन कली मदाक्बा, मेको छेडछेडमी ममाइ, छिडछिडमी बाक्ब। १ यूहन्ना ४:२०<sup>१०</sup> सु चहिं आ थमा सुइक्ब लोक्ब आन कली दाक्बा, मेको छेडछेडमी गाक्ना गाक्न बाक्ब। मोदेंशो दुश्शो मुरुमी मरिश्शो गेय मपाइब।<sup>११</sup> सु चहिं आ लोक्ब आन कली मदाक्बा, मेको मुर छिडछिडमी गाक्ब। मिनु ते लाइबा मतुइक्ब। छिडछिडमी मेको कली मिक्च मताइब सेल्ब।

रागी नु रागी डा थोवक

<sup>१२</sup> आं दाक्शो तमी तौपुकी, गो इन कली मारदे ब्रेक्ना ब्रेक्न बाक्ती देंशा हना, इन पशो मरिश्शो नेल्ल येसु ख्रीस्त आ नेंमी क्याम्सीशो बाक्त। मोपतीके गो इन कली ब्रेक्ना ब्रेक्न बाक्ती।<sup>१३</sup> आम आफपुकी, गो इन कली मारदे ब्रेक्ना ब्रेक्न बाक्ती देंशा हना, गो मेको डोंइती रे बाक्ब कली तुइक्नीनी। मोपतीके गो इन कली ब्रेक्ना ब्रेक्न बाक्ती। ठेयब वोंइश आलपुकी, गो इन कली मारदे ब्रेक्ना ब्रेक्न बाक्ती देंशा हना, गो सैतान कली ग्रातीनी। मोपतीके गो इन कली ब्रेक्ना ब्रेक्न बाक्ती। मिनु आं तमी तौपुकी, गो इन कली मारदे ब्रेक्ताक्ड देंशा हना, गो इं आफ परमप्रभु यावे कली तुइक्नीनी। मोपतीके गो इन कली ब्रेक्ताक्ड। यूहन्ना १:१<sup>१४</sup> मिनु आं आलपुकी, गो इन कली मारदे ब्रेक्ताक्ड देंशा हना, गो इं आफ कली तुइक्नीनी। गो आम आफ इन कली मारदे ब्रेक्ताक्ड देंशा हना, गो डोंइती रे बाक्ब कली तुइक्ब बाक्नीनी। गो ठेयब वोंइश आल इन कली मारदे ब्रेक्ताक्ड देंशा हना, गोपुकी बोल्यो दुम्तीनी। गो परमप्रभु यावे आ लोव इन थुंमी वोइशा, सैतान कली ग्रातीनी। मोपतीके गो इन कली ब्रेक्ताक्ड। एफिसी ६:१०;<sup>१५</sup> गोपुकी रागी नु रागी डा थोवक कली मदाक्तीन। सु चहिं रागी कली दाक्बा, मेको आ थुंमी इं आफ, परमप्रभु यावे आ दाक्शो मबाक्ब। याक्ब ४:४<sup>१६</sup> मिनु रागीमी मार बाक्ब देंशा हना, मेको मुर आन रांमी मार मार पचा दाक्नीमी, मेकोन पाइनीमी। मेको आन मिक्चीमी मार

मार कोव्रचा दाक्नीमी, मेकोन कोव्रथ लाइनीम। आन शुश शॉप आ पर्वम ठेयब लेत्तीके इं आफ परमप्रभु यावे रे ममाइ, रागी डा मुर आन पतीके बाक्ब। 17 मिनु रागी नु रागी डा मुर आन दाक्शो नेल्ल जाम्ब। सु चहिं परमप्रभु यावे आ दॅशो पाइबा, मेको मुर गेना हना यो ब्रॉइशा बाक्ब।

#### दूली शॅब जाक्तेक्म

18 आं तमी तौपुकी, रागी जाम्चशो बाक्ब। दोपा तुइक्ताक्य दॅशा हना, ख्रीस्त आ पर्वम दूली शॅब का जाक्ब, दे डोंइती रे तुइश्शो ननी। ख्रीस्त आ पर्वम दूली शॅब शुश जाक्तेक्म। मोपतीके रागी जाम्चशो बाक्ब, दे तुइक्ताक्य। 1 पत्रुस ४:७; मत्ती २४:२४; २थिस्सलोनिकी २:३-४ 19 मेको दूली शॅबपुकी इं दाते रे गूतेक्म। मेकोपुकी चहिं इं खोदॅशो पा येसु ख्रीस्त कली थमा सुइक्ब मनम। इं खोदॅशो पा येसु ख्रीस्त कली थमा सुइक्ब नम हना, गोपुकी नु काथा बाक्म वा। तन्न इं दाते रे गूशा लाम्तेक्म। मिनु इं खोदॅशो पा येसु ख्रीस्त कली थमा सुइक्ब मनम, दे तुंडसीब। प्रेरित २०:३०; १कोरिन्थी ११:१९ 20 येसु ख्रीस्तमी इन कली परमप्रभु यावे आ सोक्त गेपु। मोपतीके नेल्ल तुइक्नीनी। 21 इन कली एको लोव्र मारदे ब्रेक्ताकड दॅशा हना “गे मतुइक्ब ननी” दे ममिन्नुड। थमा लोव्र तुइक्नीनी। मिनु मेको इन तुइश्शो थमा लोव्र क्येडा जोक्ब सेल्चा, दे ब्रेक्ताकड। थमा शॅतीकेमी येसु ख्रीस्त आ पर्वम जोल मबाक्ब। 22 दूली शॅबमी मार शॅब दॅशा हना “येसु ख्रीस्त परमप्रभु यावे आ सोइश्शो ममाइ। परमप्रभु यावे नु आ तौ पोबु मनसी” दे शॅब। मेको ख्रीस्त आ पर्वम दूली लोव्र शॅब बाक्ब। 23 सु सुमी “येसु ख्रीस्त परमप्रभु यावे आ तौ ममाइ” दे शॅनीमी, मेको इं आफ परमप्रभु यावे नु थुं का डा मबाक्नीम। सु सुमी चहिं “येसु ख्रीस्त परमप्रभु यावे आ तौ बाक्ब” दे शॅनीमी, मेको इं आफ, परमप्रभु यावे नु थुं का डा बाक्नीम। यूहन्ना ५:२३; १यूहन्ना ४:१५ 24 मिनु इन डोंइती रे नॅशो शॅतीके मिम्शा बाक्कीन। इन डोंइती रे नॅशो शॅतीके मिम्शा बाक्तीनी हना, गोपुकी इं आफ, परमप्रभु यावे नु आ तौ नु थुं का डा दुम्शा बाक्नीनी। 25 परमप्रभु यावेमी “गो इन कली गेना हना यो ब्रॉइशा बाक्चा गेनुड” दॅशो बाक्ब।

26 मुर का निक्शीमी इन कली दूली शॅनीमी। मोपतीके गो इन कली एको लोव्र ब्रेक्ताकड। 27 येसु ख्रीस्तमी इन कली परमप्रभु यावे आ सोक्त गेपु। मिनु मेको गेपुकी नु बाक्ब। मेको परमप्रभु यावे आ सोक्त गेपुकी नु बाक्मेनु, अर्को शॅब ममाल्नीनी। परमप्रभु यावे आ सोक्तीमी इन कली नेल्ल शॅना शॅन बाक्ब। मेको आ शॅशो थमा बाक्तीके जोल मदुम्ब। मेकोमी डोंइती इन कली शॅशो टिशा, मेको नु थुं का डा दुम्शा, बाक्कीन। यूहन्ना १६:१३; २कोरिन्थी १:२१-२२; येरमीया ३१:३४

28 आं तमी तौपुकी, येसु ख्रीस्त नु थुं का डा दुम्शा बाक्कीन। मेको यिमेनु, गोपुकी महिंब दुम्ने चाप्यल। मेको आ डोंइती मुने मदोक्कयल। 29 “येसु ख्रीस्त नेल्ल ठीक पाइब बाक्ब” दे तुइक्ताक्नी हना, सु सुम ठीक पाइनीमी, मेको नेल्ल परमप्रभु आ आलपुकी नमी, दे तुइक्नीनी। १यूहन्ना ३:७-१०

#### परमप्रभु आ आल दुम्शो

3 इं आफोमी इं कली शुश दाक्शा “परमप्रभु यावे आ तमी तौ” दे नॅ वोइश्शो बाक्ब। मिनु गोपुकी आ तमी तौ दुम्तय। मोपतीके रागी डा मुरपुकीमी इं कली मतुइक्नीम। मारदे मतुइक्नीम दॅशा हना, मेकोपुकीमी येसु ख्रीस्त कली यो मतुइक्नीम। यूहन्ना १:१२; यूहन्ना १६:३ 2 आं दाक्शो लोक्बपुकी, मुल गोपुकी परमप्रभु यावे आ आल दुम्तय। नोले गो दोदॅशो दुम्नया, मारेइ मतुइक्नय। मिनु येसु ख्रीस्त गूमेनु, गोपुकी मेको खोदॅशो दुम्नया। दोपा मेको खोदॅशो दुम्नय दॅशा हना, गोपुकी मेको कली दोदॅशो बाक्मे, दे तशा, मेको खोदॅशो दुम्नय। रोमी ८:१७; फिलिप्पी ३:२१; कलस्सी ३:४ 3 मिनु सु मेको आ मगूम सम्म रिम्शा बाक्बा, मेको येसु ख्रीस्त पाप रे डोन बाक्शो खोदॅशो पा, मेको यो पाप रे डोन बाक्ब।

4 मिनु सुम मरिम्शो पाइबा, मेकोमी परमप्रभु यावे आ अरेशो लोव्र मटीब। मरिम्शो मार बाक्ब दॅशा हना, परमप्रभु यावे आ अरेशो लोव्र मटिचा मरिम्शो बाक्ब। 5 मरिम्शो क्याम्चा कली येसु ख्रीस्त जाक्त, दे तुइक्नीनी। मिनु मेकोमी काइ मरिम्शो मपवा। यसैया ५३:४-६; यूहन्ना १:२९; १ पत्रुस

२:२४; यसैया ५३:९; यूहन्ना ८:४६ 6 सु चहिं मेको नु थुं का डा दुम्शा बाक्बा, मेकोमी मरिम्शो मपाइब। सुम चहिं मरिम्शो पना पन बाक्बा, मेको येसु ख्रीस्त नु थुं का डा मदुम्ब, मेको कली मतुइक्ब। रोमी ६:११, १४

7 आं आइक्च आलपुकी, दूली लोव्र शॅब आन लोव्र मनेनीन। सुम ठीक गेय पाइबा, मेको मुर यो येसु ख्रीस्त खोदॅशो पा ठीक पाइब बाक्ब। १यूहन्ना २:२९ 8 सु चहिं मरिम्शो पना पन बाक्बा, मेको मुर सैतान रे जाक्शो बाक्ब। मारदे हना सैतान डोंइती रे मरिम्शो पना पन बाक्शो बाक्ब। मोपतीके परमप्रभु यावे आ तौ सैतान आ गेय थुम्चा कली रागीमी जाक्त। यूहन्ना ८:४४ 9 परमप्रभु यावे आ आलपुकीमी पाप मपाइनीम। मारदे पाप मपाइनीम दॅशा हना, परमप्रभु आ थुं मेको आन थुंमी बाक्ब। मोपतीके परमप्रभु आ आलपुकीम पाप मपाइनीम। १यूहन्ना ५:१८ 10 मिनु तेको मुर परमप्रभु यावे आ आल बाक्नीमी नु तेको मुर सैतान आ आल बाक्नीमी, दे तुंडसीब। दोपा तुंडसीब दॅशा हना, सु सु ठीक गेय मपाइनीमी नु आ लोक्ब आन कली मदाक्नीमी, मेको परमप्रभु यावे आ आल मनमी। मेको सैतान आ आल बाक्नीमी। यूहन्ना ५:१८ 11 मिनु इन डोंइती रे नॅशो लोव्र मार बाक्त दॅशा हना, गोपुकी दाक्मुचा माल्नय। यूहन्ना १३:३४ 12 काइन खोदॅशो दुम्चा मदुम्ब। काइनमी सैतान आ मुर दुम्शा, आ लोक्ब कली सदा बाक्त। काइनमी आ लोक्ब कली मारदे सदा बाक्त दॅशा हना, आ थुं डा गेय मरिम्शो बाक्माक्त। आ लोक्ब आ गेय चहिं परमप्रभु यावे आ डोंइती ठीक बाक्माक्त। उत्पत्ती ४:८

13 आं लोक्बपुकी, रागी डा मुरपुकीमी इन कली मदाक्थु श्येत गेमेनु, छक मलाक्कीन। मत्ती ५:११; यूहन्ना १५:१८-१९ 14 गोपुकी बेक्तीक राज्य रे पा, ब्रॉइतीक राज्यमी बाक्नय। दोपा तुइक्नय दॅशा हना, थमा सुइक्ब लोक्ब आन कली दाक्नय। सुम चहिं मदाक्बा, मेको बेक्तीक राज्यमी बाक्ब। यूहन्ना ५:२४ 15 सुम थमा सुइक्ब लोक्ब आन कली मदाक्बा, मेको मुर साइक्ब बाक्ब। मिनु सुम थमा सुइक्ब लोक्ब आन कली साइक्बा, मेको गेना हना यो ब्रॉइशा बाक्चा मताइब, दे तुइक्नीनी। मत्ती ५:२१-२२ 16 मिनु लोक्ब आन कली दाक्चा, दोपा तुंडसीब दॅशा हना, येसु ख्रीस्त इं कली दाक्शा, साइक्चा पुंडसाक्ब। मिनु गोपुकीमी यो लोक्ब आन कली दाक्चा माल्नय। थमा सुइक्ब लोक्ब आन कली मबेक्चा सम्म वारच पचा माल्नय। यूहन्ना १५:१३ 17 सुमी शुश शॉप थिशा यो, लोक्ब आन कली श्येत जशो तशा “गो मारेइ मगेनुड” दे मिम्बा, मेको मुर आ थुं रे परमप्रभु यावे आ गेशो दाक्तीक सक्ति यो जाम्शा लाइब। ब्यक्स्था १५:७; १यूहन्ना ४:२० 18 आं आइक्च आलपुकी, गोपुकी दाक्मुय। मिनु “इ कली दाक्नुड” दे लोव्र पशा ममाइ, तन्न पतीकेमी दाक्मुचा माल्नय। याकूब २:१५-१६

19 गोपुकी थमा पा दाक्शा, गेय पाइतय हना, इं थुंमी “थमा लां खोइक्ब नय” दे थमा पा तुइक्नय। 20 मिनु इं थुंमी इं कली दोस गेपु हना, इं थुं क्येडा परमप्रभु यावे ठेयब बाक्ब। मिनु मेकोमी नेल्ल तुइक्ब। लूका १५:२०-२२ 21 आं दाक्शो लोक्बपुकी, इं थुंमी इं कली दोस मगेपु हना, गोपुकी महिंथु, परमप्रभु यावे आ डोंइती जाक्दीलनय। 22 मिनु गो महिंथु पुंडतय हना, इं पुंडशो गेब। मारदे हना गोपुकी आ अरेशो लोव्र पशा, आ दाक्शो पाइनय। मर्कूस ११:२४ 23 मिनु आ अरेशो लोव्र मार बाक्ब दॅशा हना, परमप्रभु यावे आ सोइश्शो येसु ख्रीस्त कली थमा सुइक्चा नु इं दातेमी दाक्मुचा इं कली अरेशो लोव्र बाक्ब। यूहन्ना ६:२९; यूहन्ना १५:१७ 24 सुमी आ अरेशो लोव्र पाइबा, येसु नु थुं का डा बाक्ब। मिनु येसु यो मेको मुर नु थुं का डा बाक्ब। परमप्रभु यावे नु गोपुकी थुं का डा दुम्तय, दे दोपा तुइक्नय दॅशा हना, मेकोमी गेशो सोक्तीमी शॅशो रे तुइक्नय। १यूहन्ना ४:१३; रोमी ८:९

#### थमा नु जोल दोपा तुंडसीबा?

4 आं दाक्शो लोक्बपुकी, शॅबपुकीमी शॅदमेनु, गोपुकीमी परमप्रभु यावे रे पा शॅनीमी देय मशॅनीमी मेको रुपीन। मारदे हना रागीमी शुश दूली पा, परमप्रभु यावे आ लोव्र पाइब बाक्नीम। मत्ती ७:१५ 2 परमप्रभु यावे आ सोक्त आ शॅतीके दोपा तुंडसीब दॅशा हना, सुमी “येसु ख्रीस्त परमप्रभु यावे आ सोइक्तीके रागीम जाक्त” दॅबा, मेको मुर परमप्रभु यावे नु थुं का डा

बाक्ब।<sup>3</sup> सुम चहिं “येसु परमप्रभु यावे आ सोइश्शो ममाइ” दे शेंबा, मेको परमप्रभु यावे नु थुं का डा मबाक्ब। मेको येसु आ पर्वम दूली शेंब बाक्ब। येसु आ पर्वम दूली शेंथ जाक्ब, दे नेंतीनी। मिनु मेको मुल रागीमी बाक्ब।

<sup>4</sup> आं आइक्च आलपुकी, गोपुकी परमप्रभु यावे नु थुं का डा दुश्शा, मेको रागीमी बाक्ब दूली शेंब आन कली ग्रातीनी। मारदे हना रागी डा मुर आन थुंमी बाक्बो दूली शेंब सोक्त क्येडा इन थुंमी बाक्ब परमप्रभु यावे आ सोक्त ठेयब बाक्ब।<sup>5</sup> मेको येसु ख्रीस्त आ पर्वम दूली शेंबपुकी रागी डा मुर बाक्नीम। मोपतीके आन शेंतीके परमप्रभु यावे के ममाइ, रागी डा बाक्ब। मिनु रागी डा मुरपुकी मेको आन शेंशो दाक्नीमी। यूहन्ना १५:१९<sup>6</sup> गोपुकी चहिं परमप्रभु यावे नु थुं का डा बाक्नय। सुमी परमप्रभु यावे कली तुइक्बा, मेकोमी आंइ शेंशो टीब। सु चहिं परमप्रभु यावे नु थुं का डा मबाक्बा, मेकोमी आंइ शेंशो मटीब। मोपा थमा बाक्बा देय दूली शेंतीक बाक्बा, दे तुइक्ने चापनय। यूहन्ना ८:४७; १कोरिन्थी १४:३७

#### परमप्रभुमी दाक्मुपाइक्ब

<sup>7</sup> आं दाक्बो लोकबपुकी, दाक्मुय। मारदे हना परमप्रभु यावेमी थमा सुइक्ब आन कली दाक्मुपाइक्ब। सुमी दाक्बा, मेको परमप्रभु यावे आ आल दुश्शा, परमप्रभु यावे कली तुइक्ब।<sup>8</sup> सुम चहिं मदाक्बा, मेकोमी परमप्रभु यावे कली मतुइक्ब। मारदे हना परमप्रभु यावे दाक्ब बाक्ब।<sup>9</sup> परमप्रभु यावेमी दोपा आ दाक्वा कौंइताक्व देंशा हना, आ का ला तौ रागीमी सोइक्ताक्व। मिनु आ तौ साइक्वा पुंडसीतीके इं कली गेना हना यो ब्रौइशा बाक्वा गेपु। यूहन्ना ३:१६<sup>10</sup> मिनु परमप्रभु यावे आ दाक्वा मार बाक्ब देंशा हना, गोपुकी डौंइती परमप्रभु यावे कली काइ मदाक्ताक्व हना यो, परमप्रभु यावेमी इं कली दाक्ताक्व। गिश दाक्ताक्व देंशा हना, आंम तौ कली साइक्वा पुंडसीब पपाइक्वा कली रागीमी सोइक्ताक्व। इं कली मरिश्शो गेय नु सैतान आ राज्य रे प्रौइचा, दे साइक्वा पुंडसीचा कली रागीमी सोइक्ताक्व।

<sup>11</sup> आं दाक्बो लोकबपुकी, परमप्रभु यावेमी इं कली दोपा दाक्ता, मोपा गोपुकी यो दाक्मुचा माल्नय।<sup>12</sup> मुरपुकीम परमप्रभु यावे कली गेनायो मतामे। तन्न गोपुकी दाक्मुयानु, परमप्रभु यावे इं नु थुं का दुस्त। मिनु परमप्रभु यावे आ दाक्तीक इं थुंमी लीब। यूहन्ना १:१८<sup>13</sup> परमप्रभु यावेमी इं कली आ सोक्त गेपु। मोपतीके गो परमप्रभु यावे नु थुं का डा दुम्नय नु मेको गो नु थुं का डा दुश्शो तुइक्नय।<sup>14</sup> मिनु गोपुकी परमप्रभु यावेमी आ तौ रागीमी सोइश्शो ताइतक। गोपुकीमी “इं आफ, परमप्रभुमी आ तौ कली मुर आन कली पाप रे प्रौइचा, दे रागीमी सोइक्ताक्व” दे शेंना शेंन बाक्नीकी। यूहन्ना ३:१७<sup>15</sup> सुमी “येसु परमप्रभु यावे आ तौ बाक्ब” देंबा, मेको परमप्रभु यावे नु थुं का डा बाक्ब। मिनु परमप्रभु यावे यो मेको नु थुं का डा बाक्ब। १यूहन्ना ५:५<sup>16</sup> मोपतीके गोपुकी “परमप्रभु यावेमी इं कली दाक्ब” दे तुइश्शा थमा सुइक्नय। परमप्रभु यावेमी मुर आन कली दाक्ब। सुमी दाक्ना दाक्न बाक्बा, मेको परमप्रभु यावे नु थुं का डा बाक्ब। परमप्रभु यावे यो मेको नु थुं का डा बाक्ब।

<sup>17</sup> दोपा मुर आन कली दाक्वा रिश्शो दुस्त देंशा हना, गोपुकी परमप्रभु यावे आ निसाफ पची नाक्त महिनय। मारदे हना गोपुकी परमप्रभु यावे नु थुं का डा दुश्शा, रागीमी बाक्नय। १यूहन्ना २:२८<sup>18</sup> मिनु दाक्ना दाक्न बाक्तय हना, महिनय। मारदे हना मुरपुकी सजाइ तशा हिंनीम। मिनु सु हिंबा, मेको आ दाक्बो शुश बाक्ब।<sup>19</sup> गोपुकी चहिं परमप्रभु यावे कली मारदे दाक्नय देंशा हना, मेकोमी डौंइती इं कली शुश दाक्ताक्व।<sup>20</sup> सुमी चहिं “गो परमप्रभु यावे कली दाक्नुड” देंबा, मिनु थमा सुइक्ब लोकब आन कली काइ मदाक्बा, मेको मुर आ देंशो लोव्र यो जोल बाक्ब। मारदे हना सुमी आ नु बाक्बो लोकब आन कली मदाक्बा, मेकोमी मुर आन मतशो परमप्रभु यावे कली दोपा दाक्ने चाप्बा डा? मचाप्ब। १यूहन्ना ३:१७<sup>21</sup> मिनु परमप्रभु यावेमी इं कली अरेशो लोव्र मार बाक्त देंशा हना “सुमी परमप्रभु यावे कली दाक्बा, मेकोमी थमा सुइक्ब आन कली यो दाक्वा माल्ब” दे शेंशो बाक्त। मर्कूस १२:२९-३१

#### थमा सुइक्ब सक्ति पाइश्शो बाक्नीम

<sup>5</sup> मिनु सुमी “येसु परमप्रभु यावे आ सोइश्शो ख्रीस्त बाक्ब” दे थमा सुइक्बा, मेको मुर परमप्रभु यावे आ आल बाक्ब। मिनु सुमी आफ कली दाक्बा, मेकोमी आ आल कली यो दाक्ब।<sup>2</sup> गोपुकी थमा पा परमप्रभु यावे आ आल आन कली दाक्नय, दे दोपा तुइक्नय देंशा हना, परमप्रभु यावे कली दाक्नय। मिनु आ अरेशो लोव्र टीनय।<sup>3</sup> गोपुकीमी “परमप्रभु यावे कली दाक्नय” देंतय हना, आ अरेशो लोव्र टिशा पाइनय। आ देंशो लोव्र टिशा पचा श्येत ममाइ। यूहन्ना १४:१५, २३, २४; मत्ती ११:३०<sup>4</sup> मिनु परमप्रभु यावे आ आलपुकीमी रागी डा मुर आन दाक्बो गेय कली ग्रानीम। दोपा ग्रानीम देंशा हना, येसु ख्रीस्त कली थमा सुइक्वा मप्रौइथु ग्रानीम। यूहन्ना १६:३३; १कोरिन्थी १५:५७<sup>5</sup> सु सुमी ग्रानीम देंशा हना “येसु परमप्रभु यावे आ तौ बाक्ब” दे थमा सुइक्बमी ग्रानीम। १यूहन्ना ४:४

#### परमप्रभु आ तौ आ सांकछी

<sup>6</sup> मिनु येसु ख्रीस्त ब्वाक्कु नु हुश रे जाक्त। ब्वाक्कु रे ला ममाइ, तन्न ब्वाक्कु नु हुश रे जाक्त। १यूहन्ना ४:२; मर्कूस १:९; यूहन्ना १९:३४-३५<sup>7</sup> परमप्रभु यावे आ सोक्त मेको आ सांकछी बाक्ब। मारदे हना परमप्रभु यावे आ सोक्तीम थमा लोव्र ला पाइब। यूहन्ना १:३३<sup>8</sup> मोपा सांकछी सां बाक्नीम। का परमप्रभु यावे आ सोक्त बाक्ब, का ब्वाक्कु रे जरमेतीके बाक्ब नु का मुर आन मरिश्शो पतीके आ पर्वम येसु साइक्वा पुंडसीशो डा हुश बाक्ब। मिनु मेको सांफा गारनीमी।<sup>9</sup> गोपुकी मुर आन सांकछी नेंशा थमा सुइक्नय। परमप्रभु यावे आ सांकछी मुर आन सांकछी क्येडा ठेयब बाक्ब। मिनु परमप्रभु यावेमी आ तौ येसु ख्रीस्त आ पर्वम मेको सांकछी गेपु।

<sup>10</sup> सु परमप्रभु यावे आ तौ कली थमा सुइक्बा, मेको मुर आ थुंमी सांकछी लीब। सु चहिं परमप्रभु यावे कली थमा मसुइक्बा, मेकोमी “परमप्रभु यावे जोल्फे बाक्ब” देंब। मारदे हना “आं तौ बाक्ब” दे परमप्रभु यावेमी देंशो थमा मसुइक्ब। यूहन्ना ३:३२-३४; रोमी ८:१६<sup>11</sup> मिनु मेको आ सांकछी मार बाक्ब देंशा हना, परमप्रभु यावेमी इं कली गेना हना यो ब्रौइशा बाक्तीक गेपु। मोदेंशो ब्रौइशा बाक्तीक आ तौमी पतीके बाक्ब।<sup>12</sup> सु मेको आ तौ नु बाक्बा, मेको गेना हना यो ब्रौइशा बाक्वा ताइब। सु चहिं परमप्रभु यावे आ तौ नु मबाक्बा, मेको गेना हना यो ब्रौइशा बाक्वा मताइब।<sup>13</sup> मिनु गोपुकी परमप्रभु यावे आ तौ आ नें कली थमा सुइक्नीनी। मोपतीके गेना हना यो ब्रौइशा बाक्वा ताइब बाक्नीनी, दे गो इन कली तुइक्पाइक्वा कली ब्रेक्ताक्ड। यूहन्ना २०:३१

#### परमप्रभु कली पुंडतीक लोव्र

<sup>14</sup> मिनु मेको कली थमा सुइश्शोमी इं पुंडशो आ दाक्बो बाक्त हना, मार पुंडतय हना यो, इं कली नेंशा गेब। यूहन्ना १४:१३<sup>15</sup> गोपुकीमी इं मार मार पुंडशो नेंब, दे तुइक्ताक्व हना, इं पुंडशो यो गेब, दे तुइक्नय।<sup>16</sup> मिनु सुमी आ लोकब मबेक्वा डा सजाइ तचा डा पा मरिश्शो पशो ताइबा, मिनु आ लोकब आ पर्वम पुंडबा, मेको मुर आ पुंडशो परमप्रभु यावेमी गेब। मेको थमा सुइक्ब लोकब गेना हना यो ब्रौइशा बाक्वा ताइब। तन्न बेक्वा डा मरिश्शो पतीक यो बाक्बा, मोदेंशो मरिश्शो पाइब कली पुंडचा ममाल्ब, दे इन कली देंनुड। मर्कूस ३:२८-३०<sup>17</sup> परमप्रभु यावे कली मगारचा डा गेय नेल्ल मरिश्शो बाक्नीम। तन्न कोइ मरिश्शो पतीके क्याम्चा डा बाक्नीम।

#### येसु ख्रीस्त नु बाक्बपुकी

<sup>18</sup> मिनु “सु परमप्रभु यावे रे जरमेशो बाक्मे, मेको मुरुम मरिश्शो मपाइब। मारदे हना परमप्रभु यावे रे जरमेशो आन कली येसु ख्रीस्तमी कोव्रब। मिनु सैतानमी मेको आन कली मथीब” दे तुइक्नय। १यूहन्ना ३:९; यूहन्ना १७:१५<sup>19</sup> मिनु गोपुकीमी “गोपुकी परमप्रभु यावे आ मुर नय” तन्न सैतानमी नेल्ल रागी डा मुर आन कली हुकुम पाइब, दे तुइक्नय। गलाती १:४<sup>20</sup> मिनु परमप्रभु यावे आ तौमी इं कली रुक्तीक थुं गेपु, दे तुइक्नय।

मेको रुप्तीक थुंमी थमा पतीके कली तुइक्नय। गोपुकी मेको थमा पाइब नु थुं का डा बाक्नय। मोपा आ तौ येसु ख्रीस्त नु यो थुं का डा बाक्नय। मेको थमा परमप्रभु यावे नु गेना हना यो ब्रोंइशा बाक्तीक बाक्ब। यूहन्ना १७:३

नोले डा लोव

21 मोपतीके “आं आइक्च आलपुकी, मूर्ति रे डोन बाक्कीन” दे इन कली ब्रेक्शा अरेतन्नी। १कोरिन्थी १०:१४

## २ यूहन्ना

यूहन्नामी आंम कली खाल्पा देंशा, एको चिठी थमा सुइक्व आन कली नोले ब्रेक्शो बाक्व।  
डोंइती डा चिठी खोदेंशो पा १०० ए. डी. नुप्चा क्येडा डोंइती मीश मुर, दे खूइश्शो नें वोइश्शो, थमा सुइक्व आन गुम्तीके कली ब्रेक्शो चिठी बाक्व।  
परमप्रभु यावे कली दाक्तीक कोंइतीके आ देंशो टिचा बाक्व। दूली शेंब आन पर्बम यो लोव बाक्व।

### डोंइती डा लोव

१ गो येसु ख्रीस्त कली थमा सुइक्व आन शेंब खाल्पामी आ योव्रशो मीश मुर नु आ आल इन कली चिठी ब्रेक्ताक्न्नी। गो इन कली थमा पा दाक्न्नी। गो ला ममाइ, सु सुम परमप्रभु यावे आ पर्बम थमा शेंतीके तुइक्त्तमे, मेकोपुकीमी यो इन कली दाक्नीमी। ३ यूहन्ना :१<sup>२</sup> मारदे हना परमप्रभु यावे आ थमा शेंतीके इं थुंम बाक्व, मेको गेना हना यो लीब।  
३ मिनु इं आफ, परमप्रभु यावे नु आ तौ येसु ख्रीस्तमी इं कली शिशी नु थुं नाइश्शा बाक्चा गेम्सेक्ल। परमप्रभु यावे आ थमा शेंतीके नु आ गेशो दाक्मुचा यो गोपुकी नु बाक्ल।

### थमा लां खोइक्चा नु दाक्चा

४ गो इन आल आन दाते डा का निक्शी थमा लां खोइक्व तशा, शुश ग्येरसीनुड। मारदे हना इं आफोमी इं कली मोदेंशो अरेशो लोव गेशो बाक्व।  
५ मिनु गोमी “गोपुकी दाक्मुय” दे मीश मुर इन कली देंशो नक अरेशो लोव मब्रेक्नुड। तन्न साइ डोंइती रे दाक्मुचा, दे अरेशो लोव बाक्शो बाक्व।  
१ यूहन्ना २:७<sup>६</sup> मिनु आ अरेशो लोव पचा दाक्चा बाक्व। मेको इन डोंइती रे नेंशो अरेशो लोव बाक्व। मेको अरेशो पने।

### दूली शेंब आन पर्बम शेंशो

७ मिनु मुल रागीमी शुश मुर आन कली मरिश्शो लां कोंइब जोल्फेपुकी जाक्तेक्म। मेको मुरपुकीमी “येसु ख्रीस्त मुर दुम्शा रागीमी मजरमेसे” दे शेंनीम। मेको मोदेंशो शेंब चहिं जोल्फे नु नेल्ल क्येडा मरिश्शो पाइब बाक्नीम। १ यूहन्ना २:१८; १ यूहन्ना ४:१-३<sup>८</sup> गोपुकी मार कली गेय पनी, मेको मुल यो पना पन बाक्कीन। मो पाइतीनी हना, ठेयब इनाम ताइनीनी।  
गलाती ४:११<sup>९</sup> सुम चहिं ख्रीस्त आ थमा शेंतीके लोव प्रॉइबा, मेको परमप्रभु यावे नु थुं का मबाक्व। सुम चहिं ख्रीस्त आ थमा शेंतीक लोव मप्रॉइबा, मेको आफ नु तौ निम्फा नु थुं का डा बाक्व। १ यूहन्ना २:२३  
१० सुइ मुर इन बाक्तीके जाक्शा, थमा शेंतीके लोव मपाप्तु हना, मेको कली खिं ओवचा मगेने। मिनु मेको कली “रिश्शो बाक्को” दे यो मदेनीन।  
२ थिस्सलोनिकी ३:६<sup>११</sup> मारदे हना सुमी मेको मोदेंशो मुर कली “रिश्शो बाक्कीन” देंबा, मेकोमी मेको आ दूली शेंतीके नु आ मरिश्शो गेय यो पाइब।

### नोले डा लोव

१२ मिनु गोमी इन कली शुश ब्रेक्चा माल्ती हना यो, कागज नु मसीम मब्रेक्नुड, इन कलीन गुम्थ जाक्नुड। मिनु कोवमुशा लोव पाइनय, दे आस पाइनुड। मोपा गुम्तय हना, शुश ग्येरनय। ३ यूहन्ना :१३<sup>१३</sup> इन योव्रशो समी आ तमी तौपुकीमी यो इन कली “रिश्शो बाक्कीन” दे ब्रेक्पाइक्तीमी।

## ३ यूहन्ना

यूहन्ना आ नेल्ल क्येडा नोले ब्रेक्शो चिठी बाक्ब।  
एको चिठी १०० ए. डी. क्येडा डोंइती ब्रेक्शो बाक्ब।  
थमा शॅशो कोंइतीके नु दाक्चा मप्रोंइतीक आ पर्बम ब्रेक्शो लोत्र बाक्ब।

### डोंइती डा लोत्र

१ गो येसु ख्रीस्त कली थमा सुइक्ब आन शॅब खाल्पामी, आं थमा पा दाक्शो गायस इ कली एको चिठी ब्रेक्ताक्ड। २ यूहन्ना :१<sup>२</sup> आं दाक्शो लोक्ब, इ जचा बाक्चा नेल्ल रिम्शो बाक्ब। इ थमा सुइक्तीके रिम्शो बाक्ब, दे गो तुइक्नुड।<sup>३</sup> मिनु इ बाक्तीके रे जाक्ब थमा सुइक्बपुकीमी “गायस रिम्शो पा येसु ख्रीस्त आ पर्बम थमा लां खोइक्ब” दे शॅताक्यीमी। मेको नॅनुनु, गो शुश ग्येरसाक्यी। २ यूहन्ना :४<sup>४</sup> आं आलपुकी येसु ख्रीस्त आ पर्बम थमा लां खोइक्नीम दॅशो नॅनुनु, आं कली नेल्ल क्येडा ग्येरपाइक्ब।

### गायसमी जाक्चा गेशो

५ आं दाक्शो लोक्ब, गे येसु ख्रीस्त कली थमा सुइक्ब आन कली वारच पाइतीनी, मोपा रिम्शो गेय पाइतीनी। मोदॅशो गेय अर्को सहर डा येसु ख्रीस्त कली थमा सुइक्ब आन कली पाइतीनी, मेको थम रिम्शो बाक्ब।<sup>६</sup> इ खिंमी जाक्शा बाक्शा, थमा सुइक्बपुकीमी “गायसमी थमा सुइक्ब आन कली शुश दाक्शा, खिंमी बाक्चा गेप्तु” दे आंइ गुम्तीकेमी नॅपाइक्तेक्म। मिनु गे मोपा येसु ख्रीस्त कली थमा सुइक्ब आन कली खिंमी बाक्चा गेचा ला ममाइ, तन्न आन लची ना मेकोपुकीमी मार मार माल्नीमी, मेको नेल्ल परमप्रभु यावेमी खोदॅशो पा गेशा सोइक्ताक्नी हना, गे रिम्शो दुम्नीनी। तीतस ३:१३<sup>७</sup> मारदे हना मेकोपुकी येसु ख्रीस्त आ पर्बम शॅथ लाइनीम। मिनु थमा मसुइक्बपुकी रे मारेइ मलाइक्नीम। १कोरिन्थी ९:१२<sup>८</sup> मिनु गोपुकीमी मोदॅशो मुर आन कली रिम्शो पा वारच पचा माल्नय। मो पयानु, गोपुकी मेकोपुकी नु गारशा, गेय पना पन बाक्नय। हिब्रू १३:२

### ठेयब लेश्शो शॅब आ पर्बम

९ गो इन गुम्तीके डा थमा सुइक्ब आन कली ब्रेक्ताक्डमी। तन्न डियोत्रीफसमी आंम कली ठेयब सेल्शा, गोपुकी आंइ कली मदाक्ब।<sup>१०</sup> मिनु गो मेकेर जाक्शा, मेको आ पशो गेय आ पर्बम लोत्र पाइनुड। मेकोम मार पाइब दॅशा हना, आं कली श्येत गेचा, दे आं पर्बम काइ मरिम्शो लोत्र पना पन गाक्ब। मिनु मेको ला ममाइ, आं सोइश्शो लोक्ब आन कली जाक्चा मगेव। सु चहिं मेको आन कली जाक्चा गेचा दाक्बा, डियोत्रीफसमी मेको कली “जाक्चा गेचा मदुम्ब” दॅब। मिनु मेकोपुकी आ दॅशो मटिम्तेक्म हना, मेको आन कली थमा सुइक्ब आन गुम्तीके रे तिल्ब।

११ आं दाक्शो थमा सुइक्ब लोक्ब, मरिम्शो मुर आन तस मखोतो। तन्न रिम्शो मुर आन तस खोतो। सु रिम्शो गेय पाइबा, मेको परमप्रभु यावे आ मुर बाक्ब। सु चहिं मरिम्शो पाइबा, मेको परमप्रभु यावे कली मतुइक्ब बाक्ब।

१२ मिनु थमा सुइक्ब नेल्लेमी “देमेत्रीयस रिम्शो थमा सुइक्ब बाक्ब” दे तुइश्शा दॅनीम। मिनु मेको आ थमा लां खोइक्तीकेमी, येसु ख्रीस्त नु थुं का बाक्ब, दे कोंइब। गो यो मेको आ पर्बम “देमेत्रीयस रिम्शो मुर बाक्ब” दे सांकछी गेनुड। गो जोल मपाइनुड, दे तुइक्नेवे।

### नोले डा लोत्र

१३ गो इ कली शुश ब्रेक्चा माल्ती हना यो, गो मसी नु कलममी मब्रेक्नुड। २ यूहन्ना :१२<sup>१४</sup> तन्न इ कली गुम्थ जाक्चा कली आस पाइनुड। मिनु गुम्था कोत्रमुशा लोत्र पाइनस।<sup>१५</sup> इ थुं नाइश्शा बाक्ब। आं वारचपुकीमी यो “गे रिम्शो बाक्कीन” दे आं कली ब्रेक्पाइक्तीमी। गे अरु थमा सुइक्ब वारच आन कली यो “रिम्शो बाक्कीने” दे का का पा आन नॅ थिशा, माइक्मी।

## यहूदा

एको चिठी याकूब आ लोकब यहूदाम ब्रेक्शो बाक्ब। आंम कली “येसु आ वाइल” देंब। डोंइती थमा मसुइक्ब बाक्शा, नोले थमा सुइक्ब दुम्त। एको चिठी ६६ ए. डी. नु ६८ ए. डी. दातेमी ब्रेक्शो बाक्ब। थमा सुइक्बपुकीमी येसु आ सोइश्शो मुर आन कली आंमन तशो बाक्तेक्म। एको चिठी रिम्शो थमा सुइक्वा आ पर्वम ब्रेक्शो बाक्ब।

१. डोंइती डा लोव
२. दूली शेंब आन पर्वम लोव
३. दूली शेंब सजाइ ताइनीम
४. थमा सुइक्तीके बोल्यो दुम्वा माल्ब नु नोले डा लोव

### डोंइती डा लोव

१ गो याकूब आ लोकब यहूदा नड। गो येसु ख्रीस्त आ वाइल दुम्ती। परमप्रभु यावे, इं आफ आ दाक्शो नु येसु ख्रीस्त कली योव्रशा वोइश्शो मुर, इन कली ब्रेक्ताक्ड। मत्ती १३:५५<sup>२</sup> परमप्रभु यावे आ दाक्तीके, थुं नाइक्तीके नु दाक्मुतीके गेपुकी नु शुश बाक्ल।

दूली शेंब आन पर्वम शेंशो  
२पत्रुस २:-

३ आं दाक्शो लोकबपुकी, गो इन कली इं पाप रे प्रोंइतीक आ पर्वम ब्रेक्वा दाक्ती। थमा सुइक्तीके आ पर्वम दोपा गेय पचा, दे इन कली शेंचा दाक्ताक्ड। मेको थमा सुइक्तीके पाप रे डोन बाक्ब आन कली डोंइती रे शेंने थुम्शो बाक्त। १तिमोथी १:१८<sup>४</sup> तन्न का निक्शी निसाफ पाइक्वा पुंडसीबपुकीमी “थमा सुइक्ब बाक्नीक” देंखु पा, थमा सुइक्ब आन युम्तीकेमी बाक्नीम। मेकोपुकीमी परमप्रभु यावे कली मटिथु “परमप्रभु यावेमी शिशी पाइब” दे मिश्शा, आंम दला दाक्स पना पन बाक्नीम। मिनु इं होव्रप, प्रभु येसु ख्रीस्त आ पर्वम “परमप्रभु यावे आ तौ ममाइ” देंनीम।<sup>५</sup> गेपुकी डोंइती रे “दोपा ठीक पा थमा सुइक्वा” दे नेल्ल शेंसीशो बाक्तीनी हना यो, गो इन कली लेंशा मेको शेंशो लोव मिम्पाइक्वा दाक्नुड। मार मिम्पाइक्वा दाक्नुड देंशा हना, परमप्रभु यावेमी आ मुर आन कली इजीप्त रागी रे प्रोंइपाइश्शा, तन्न नोले मेको थमा मसुइक्ब आन कली सदा बाक्त। गन्ती १४:३५; १कोरिन्थी १०:५<sup>६</sup> परमप्रभु यावे आ स्वर्ग डा गेय पाइब का निक्शीमी परमप्रभु यावे कली मटिथु आन बाक्तीके प्रोंइतेक्म। परमप्रभु यावेमी मेको आन कली ठेयब निसाफ पची नाक्त सम्म गेना हना यो मप्रोंइचा डा पा साडलोमी पाइश्शा, नेल्ल क्येडा मरिम्शो बाक्तीक छिडछिडमी वोइश्शो बाक्ब। उत्पत्ती ६:२-४<sup>७</sup> सोदोम, गोमोररा नु आस एर ओंथ बाक्शो सहर डा मुरपुकीमी आन खोदेशो पा ग्रांरा दिचा डा नु मपचा डा दूली गेय पशो बाक्तेक्म। परमप्रभुमी मेको आन कली कोंइतीक दुम्पाइक्वा कली गेना हना यो ब्रशो मीमी सजाइ गेशो बाक्त। उत्पत्ती १९:१,४-११<sup>८</sup> मोदेशो तुइश्शा यो मेको थमा सुइक्नीकी देंखु पाइबपुकीमी आंम मिम्तीके पशा, आंम रां कली ग्रांरा दिचा डा सेल्लेक्म। मिनु अधिकार पाइब आन कली मटिथु, स्वर्गम बाक्ब आन पर्वम शुक्शी पाइनीम।<sup>९</sup> परमप्रभु यावे आ नेल्ल क्येडा ठेयब स्वर्ग डा गेय पाइब मिकाएलमी चहिं सैतान कली मोसा आ बेक्शो रां आ पर्वम लोव पशा “परमप्रभुमी इ कली हुइक्ब” दे आंमा शुक्शी पा निसाफ पचा हिंमाक्त। दानीएल १२:१; जकरिया ३:२<sup>१०</sup> मेको मुरपुकी चहिं आन मतुइश्शो नेल्ल आन पर्वम शुक्शी पाइनीम। मिनु मिम्तीक मपाइश्शो बस्तु भाव आन तुइश्शोमी खोदेशो पाइनीम। मिनु मेको पशा, खतम सेल्ला पुंडसीनीम।<sup>११</sup> मेको आन पर्वम आबी। काइन खोदेशो दुम्शो बाक्तेक्म। बालाम बुदी परमप्रभु यावे कली

मटिथु, क्येट आ पर्वम दूली गेय पाइनीम। मिनु कोराह माइश्शो मुर खोदेशो पा जाम्शा लाइनीम। उत्पत्ती ४:८; गन्ती ३१:१६; गन्ती १६:-<sup>१२</sup> मेकोपुकी इन युम्मुशो भोजमी जाक्शा, दाइल पपाइक्ब फुल्लु खोदेशो पा बाक्नीमी। आंम दातेम ग्येरपमुइनीम, तन्न महिंथु आंम कोव्रज ला प्रिनीम। मेको रेउ मपाइश्शो फशेम बेरशो गोस्स खोदेशो बाक्नीम। फल सिट्वी ना फल मसिप्ब रवा खोदेशो बाक्नीम। शाक्श दुल्शो रवा खोदेशो पा, निक्शी खेयप बेक्शो बाक्नीम। १कोरिन्थी ११:२१<sup>१३</sup> मेको समुन्द्र डा ठेयब हिंचा डा छाल खोदेशो बाक्नीम। आंम मुने डा बोग्यो गुंडनीम। दोक्शो सोरुल खोदेशो बाक्नीम। मेको आन कली नेल्ल क्येडा मरिम्शो छिडछिड डा बाक्तीके वोइश्शो बाक्ब। यसैया ५७:२०

१४ मिनु आदम रे ७ पाला नोले डा हनोक माइश्शो मुर का बाक्त। मेकोमी मोदेशो मुर आ पर्वम परमप्रभु यावेमी तुइक्पाइश्शो लोव पवा बाक्त। मेकोमी “नेनीन, प्रभु नु आ योव्रशो हजार हजार जाक्तेक्म। हनोक कली हिब्रू लोवमी एनोक देंनीम। उत्पत्ती ५:२१<sup>१५</sup> परमप्रभु यावे कली मटीब नेल्ल आन कली आन थमा मसुइक्तीकेमी पशो मटितीके तपाइक्नीम। परमप्रभु यावे रे डोन बाक्ब पापीपुकीम परमप्रभु यावे कली मार मार मरिम्शो लोव पामे, मेको आन कली निसाफ पशा, सजाइ गेचा, दे जाक्तेक्म” दे लोव पवा बाक्त।<sup>१६</sup> मेकोपुकी गन गन पाइब बाक्नीम। मेकोपुकीमी “गो श्येत जना जन बाक्नुड” दे गेनायो मग्येरथु, आन दला दाक्स पना पन बाक्नीम। ठेयब लोव पा, ठेयब लेश्शो मुर बाक्नीम। मेकोपुकीमी आंम कली ठेयब सेल्सीचा कली मुर आन कुल कोव्रनीम।

बोल्यो थमा सुइक्ब दुमीन

१७ आं दाक्शो लोकबपुकी, इं प्रभु येसु ख्रीस्त आ सोइश्शोपुकीमी डोंइती देंशो लोव ति फ्रुक्शा मिम्वा माल्नीनी।<sup>१८</sup> मेकोपुकीमी इन कली “मेको नोले डा नाक्त शुक्शी लोव पाइनीम। परमप्रभु यावे कली मटिथु, आंम दला दाक्स पाइनीम” देंतेक्म। १तिमोथी ४:१; २पत्रुस ३:३<sup>१९</sup> मेकोपुकीम मुर आन कली ब्रापाइक्नीम। परमप्रभु यावे कली ममिम्थु, परमप्रभु यावे आ सोक्त मपाइश्शो बाक्नीम। १कोरिन्थी २:१४

परमप्रभु कली ठेयब सेल्ला

२० आं दाक्शो लोकबपुकी, इन रिम्शो थमा सुइक्तीके बारपतीन। परमप्रभु यावे आ सोक्तीमी प्रार्थना पने। कलस्सी २:७; १थिस्सलोनिकी ५:११<sup>२१</sup> परमप्रभु यावेम इन कली दाक्ब, दे मिम्ना मिम्न बाक्कीन। इं प्रभु येसु ख्रीस्तमी इन कली दाक्शा, शिशी पशा, इन कली गेना हना यो परमप्रभु यावे नु बाक्वा गेब, दे रिम्शा बाक्कीन।<sup>२२</sup> का निक्शी थमा सुइक्ने मचाप्शो मुर आन कली ठीक पा थमा सुइक्तीके शेंदीन।<sup>२३</sup> का निक्शी कली मी रे फो गुंडशो खोदेशो पा प्रोनीन। का निक्शी कली शिशी पने, तन्न आन ग्रांरा

दिचा डा पाप क्येडा हिंशा, आन लुम्सीशो वासी यो मथिने। याकूब ५:९;  
प्रकाश ३:४

नोले डा लोव

<sup>24</sup> येसु ख्रीस्तमी इन कली पाप मपाइब सेल्ले चापब। इन कली दोस  
मताइब सेल्शा, ग्येरसीशा, परमप्रभु यावे आ छेडछेड आ डोंइती राप्पाइवने

चापब। १थिस्सलोनिकी ५:२३ <sup>25</sup> परमप्रभु यावे का ला बाक्ब। मेकोमी इं  
प्रभु येसु ख्रीस्त आ पतीकेमी इं कली पाप रे प्रोंइतु। नेल्ल छेडछेड पाइशो,  
नेल्ल क्येडा ठेयब दुम्तीके, नेल्ल सक्ति नु नेल्ल अधिकार मेको केन बाक्ब।  
मेको डोंइती बाक्त्। मुल यो बाक्ब। मिनु गेना हना यो बाक्ब। आमेन।



## प्रकाश

एको किताब येसु आ शेंसीब यूहन्ना आ ब्रेक्शो बाक्व। थमा सुइक्व आन गुम्तीके डा इतिहासम मोदेशो ब्रेक्शो बाक्व।

इरेनेयुस, थमा सुइक्व आन इतिहास ब्रेक्वमी “प्रकाश सासन पाइब दोमीतीयन आ सासन पशो नुच्ची ना ब्रेक्शो बाक्व” देंब। मेको ९४-९५ ए. डी. मेर बाक्व।

१. प्रभु येसु ख्रीस्त नु मेको कली थमा सुइक्व आन गुम्तीके।
२. प्रभु येसु ख्रीस्त नु रागी रागी डा मुर
३. सैतान नु थमा सुइक्व आन जोरी सत्रु
४. थमा सुइक्व आन जोरी सत्रु बुशो
५. येसु ख्रीस्त नु आ राज्य

### डोंइती डा लोव

१ परमप्रभु यावेमी येसु ख्रीस्त कली “मार मार दुम्चा चिक्ता, आ रागी डा वाइलीम वाइलपुकीमी तुइक्वमेक्ल” दे कोंइताक्व। मिनु येसु ख्रीस्तमी आ स्वर्ग डा गेय पाइब कली आ वाइल यूहन्ना आ बाक्तीके सोइक्ताक्व। मारदे सोइक्ताक्व देंशा हना, मेको दुम्चशो लोव शेंथ सोइक्ताक्व। २ मिनु गो, यूहन्नामी, परमप्रभु यावे आ लोव नेंता, येसु ख्रीस्त आ पशो ताता। मिनु मेको नेल्ल आन सांकछी दुम्ती। ३ मिनु सु सुमी परमप्रभु यावेमी तुइक्पाइश्शो एको किताब डा लोव पढेनीमी, नेंनीमी नु टीनीमी, मेको आसीक रशो नु ग्येरसीशो मुर दुम्नीम। मारदे हना मेको लोव दुम्चशो बाक्व। १ यूहन्ना १:१-२; यूहन्ना २१:२४; प्रकाश २२:१०

### एसीया डा गुम्तीके कली चिठी

४ गो यूहन्नामी एसीया डा येसु ख्रीस्त कली थमा सुइक्व ७ ओटा सहर डा थमा सुइक्व आन गुम्तीके डा शेंब आन कली चिठी ब्रेक्ताक्व। मिनु मुल बाक्व, डोंइती बाक्शो, नोले यो जाक्वमी नु परमप्रभु यावे आ ठेयब नित्तीके आ डोंइती बाक्व ७ ओटा ठाउं डा परमप्रभु यावे आ सोक्तीमी इन कली “शिशी तशा नु थुं नाइश्शा बाक्चा तामेक्ल” देंताक्व। प्रस्थान ३:१४-१५; प्रकाश ३:१; प्रकाश ५:६ ५ मिनु येसु ख्रीस्तमी यो मो देंत। मिनु मेको सु बाक्व देंशा हना, परमप्रभु यावे आ देंशो थमा पाइब सांकछी नु नेल्ल क्येडा डोंइती बेक्शो रे सेंसीशो नु रागी डा पिप आन कली सासन पाइब बाक्व। येसु ख्रीस्तमी इं कली दाक्शा, आ हुशेमी इं पाप रे प्रोंइतु। प्रकाश ३:१४; यूहन्ना १८:३७; १तिमोथी ६:१३ ६ इं कली परमप्रभु यावे, आ आफ आ राज्य डा मुर सेल्शा, परमप्रभु यावे आ डोंइती राख सेल्लु। मोपतीके आ छेडछेड नु सक्ति गेना हना यो बाक्ल, आमन। प्रकाश ५:१०; प्रस्थान १९:६; १पत्रुस २:५, ९ ७ मिनु येसु ख्रीस्त लेशशा, दोपा यीबा देंशा हना, सरीड रे गोस्सुमी गिल्सीशा यीब। मिनु मुर नेल्लेमी मेको कली यिन यिन पशो ताइनीम। मेको कली साइक्पाइक्वपुकीमी यो ताइनीम। मिनु थर थर डा मुरपुकीम मेको कली तशा, रोंका पा डाक्नीम। एको थमा लोव बाक्व। आमन। मत्ती २४:३०; जकरिया १२:१०; यूहन्ना १९:३७

८ परमप्रभु यावे मुल बाक्व, डोंइती यो बाक्शो बाक्व। मिनु नोले यो जाक्व। नेल्ल सक्ति पाइश्शो परमप्रभु यावेमी “गो आल्फा नु ओमेगा नड” देंत। आल्फा नु ओमेगा माइश्शो ग्रीक लोवमी डोंइती नु नोले डा अच्छेर बाक्नीस। प्रकाश २१:६; यसैया ४१:४; प्रकाश ४:८

### येसुमी यूहन्ना कली पपाइश्शो गेय

९ मिनु गो इन लोक्व यूहन्ना, येसु ख्रीस्त कली थमा सुइक्व नड। गो इन बुदी श्येत जशो परमप्रभु यावे आ राज्य डा मुर यो नड। मोपतीके श्येत

जशा, इन खोदेशो पा येसु ख्रीस्त कली रिम्शा बाक्नुड। गो येसु आ सांकछी दुम्ती। मिनु परमप्रभु यावे आ लोव शेंताक्व। मोपतीके मुरुमी आं कली पात्मोस माइश्शो टापुमी लाइश्शा प्रोंइतीमी। १० मिनु गो परमप्रभु यावे आ नाक्व परमप्रभु यावे आ सोक्तीम बाक्ती। मिनु आं नोले तुराही ताप्शो खोदेशो ठेयब सेंदा नेंता। ११ मेको सेंदामी आं कली “मार मार ताइनेवे, मेको नेल्ल कागजम ब्रेक्तो। मिनु ब्रेक्शा डा मिन, एसीया डा ७ ओटा सहर डा येसु ख्रीस्त कली थमा सुइक्व आन गुम्तीके डा मुर आन कली सोइक्तो। मेको ७ ओटा सहर चहिं एफिसस, स्मिरना पेरगामोम, थिआटीरा, सारडीस, फिलाडेलफीया नु लाओडीसीया नम” देंत। १२ मिनु गो नु लोव पाइब कली कोवड, दे बिर लेत्ती। लेशशा कोवडनु, ७ ओटा सुन के दियारीम बत्ती ब्रशो ताता। १३ मेको ७ ओटा दियारी आन दातेमी मुर का बाक्शो खोदेशो ताता। मेको मुर दोदेशो तांइसाक्व देंशा हना, खोइली सम्म लाइश्शो वा फेक्शो नु सुन के किप्तीके कुचुमी किप्शो बाक्व। प्रकाश २:१; दानीएल ७:१३

१४ मेको आ पिया नु आ चां बुश ऊन नु फुं खोदेशो बुश तांइसाक्व। आ मिक्व हुरु पा ब्रशो मी खोदेशो तांइसाक्व। प्रकाश २:१८; प्रकाश १९:१२ १५ आ खोइली याप्पाइश्शा टल्केशो कांसा खोदेशो तांइसाक्व। मिनु आ सेंदा ठेयब खोला आन रेयके खोदेशो नेंसाक्व। १६ मिनु मेको आ ग्युरा गुइमी ७ ओटा सोरुल शेशो बाक्व। मिनु निम्फा गे क्योरतीक पाइश्शो हेश्शो तरवार का आ शोव रे यूत। मिनु आ कुल नाक्व डा नां खोदेशो पा कोवने मचाप्चा डा तांइसाक्व।

१७ मिनु गोमी मेको मोदेशो तडानु, बेक्शो मुर खोदेब पा मेको आ खोइलीम गोल्ती। मिनु मेकोमी चहिं आ ग्युरा गुइ आं तारी वोइश्शा “महिनी, गो नेल्ल क्येडा डोंइती नु नेल्ल क्येडा नोले डा नड। दानीएल ८:१८

१८ ब्रोंइशा बाक्व नड। गो बेक्शा यो, लेंशा मबेक्वा डा पा ब्रोंइती। मिनु नरक नु बेक्शा लशो मुर आन बाक्तीक डा रोक्तीक सांचो गो नु बाक्व। १९ गे मार मार तवी, मेको ब्रेक्तो। गे मार ब्रेक्वा माल्नेवे देंशा हना, मुल मार बाक्वा, नोले मार दुम्बा, मेको नेल्ल ब्रेक्तो।

२० मिनु आं ग्युरा गुइमी बाक्शो ७ ओटा सोरुल नु ७ ओटा खपीम बाक्शो सुन के दियारी आ खूइश्शो अर्थ मार बाक्व देंशा हना, मेको आं गुइमी तशो ७ ओटा सोरुलपुकी मेको एसीया डा ७ ओटा सहर डा थमा सुइक्व आन गुम्तीके डा शेंब नम। मेको ७ ओटा दियारी चहिं मेको एसीया डा ७ ओटा सहर डा थमा सुइक्व आन गुम्तीके डा मुर नम” दे माइक्ती।

### एफिसस कली चिठी

२ मिनु येसु ख्रीस्तमी आं कली एफिसस सहर डा थमा सुइक्व आन शेंब कली ब्रेक्पाइक्ती। एको आ ग्युरा गुइमी ७ ओटा सोरुल नु ७ ओटा सुन के दियारी आन दातेमी हिरब आ लोव बाक्व। प्रेरित १८:१९ २ मेकोमी “गो इन पशो गेय, इन फाल्शो श्येत नेल्ल तुइक्नुड। मिनु गे मरिम्शो मुर आन कली फाल्ने मचाप्नीनी। मिनु गे सोइश्शो, आं लोव शेंब

दुखु पाइब मुर आन कली नाक्शा, जोल्फे बाक्नीम, दे तुइक्नीमी। १यूहन्ना ४:१<sup>३</sup> गे फाल्शा, आं कली थमा सुइक्नीमी। मोपा थमा सुइक्चा मदथु, आं पबर्म श्येत फाल्नीनी, दे गो तुइक्नुड। १तिमोथी ५:१२<sup>४</sup> तन्न गो इन कली लोव्र का पचा माल्नुड। मार लोव्र पचा माल्नुड दॅशा हना, डोंइती गे आं कली थमा पा दाक्ताक्नी। मुल चहिं डोंइती डा खोदॅशो पा दाक्चा प्रॉइतीनी।<sup>५</sup> इन डोंइती डा आं कली दाक्शो मिन्तीने। इन थुं आं गे लेत्तीने। मिनु इन डोंइती डा पशो गेय पने। गे मेको दाक्चा डा गेय मपाइतीनी हना, गो इन बाक्तीके जाक्शा, इन दियारी आ बाक्तीके रे तिल्लुड।<sup>६</sup> तन्न इन गेय का रिम्शो बाक्ब। गेपुकी निकोलाइटन आन शॅतीके डा गेय ग्रांग्रा दीनीनी। गो यो ग्रांग्रा दीनुड। भजन संग्रह १३९:२१<sup>७</sup> परमप्रभु यावे आ सोक्तीमी थमा सुइक्ब मुर आन कली शॅशो लोव्र सु सुमी नॅने चाप्नीमी, मेकोमी नेन्मेक्ल। सु सुमी सैतान कली ग्रानीमी, मेको आन कली परमप्रभु यावे आ रूमी बाक्ब ब्रॉइतीक रवा आ फल ब्वचा गेनुड” दे ब्रेक्पाइक्ती। प्रकाश २२:२; उत्पत्ती २:९

### स्मिरना कली चिठी

८ मिनु येसु ख्रीस्तमी आं कली स्मिरना सहर डा थमा सुइक्ब आन शॅब कली ब्रेक्पाइक्ती। मेकोमी “गो नेल्ल क्येडा डोंइती नु नेल्ल क्येडा नोले नड। गो बेक्शा यो ब्रॉइती” दॅत। प्रकाश १:११; प्रकाश १:१८<sup>९</sup> मेकोमी “गो इन श्येत जशो तुइक्नुड। गे थमा पा प्रुडग बाक्नीनी, दे गो तुइक्नुड। तन्न गे इन थुंम शॉप पाइश्शो बाक्नीनी, दे यो तुइक्नुड। मरिम्शो लोव्र पाइब सु सु नमी दॅशा हना ‘यहूदी नकी’ दॅखु पाइबपुकी सैतानमी शॅशो मुर नम। याकूब २:५; प्रकाश ३:९<sup>१०</sup> मिनु मुल इन कली श्येत दुम्चापु। तन्न महिनीने। नेनीन, मुल दियारबलस सैतानमी गे का निक्शी इन कली थुं थाम्चा कली जेल्खानम चोक्पाइक्ब। गे १० नाक्त सम्म ला श्येत जाइनीनी। साइक्चाम्तेक्म हना यो, फाल्शा थमा सुइक्चा मप्रोनीन। मो पाइतीनी हना, गो इन कली गेना हना यो ब्रॉइशा बाक्तीक सिरपेच गेनुड। मत्ती १०:१९, २८; प्रकाश ३:११; रतिमोथी ४:८<sup>११</sup> परमप्रभु यावे आ सोक्तीमी थमा सुइक्ब मुर आन कली शॅशो लोव्र सु सुमी नॅने चाप्नीमी, मेकोमी नेन्मेक्ल। सु सुमी सैतान कली ग्रानीमी, मेको निक्शी खेयप बेक्चा ममाल्नीम। मिनु परमप्रभु यावेमी गेशो सजाइ यो मताइनीम” दे ब्रेक्पाइक्ती। प्रकाश २०:१४

### पेरगामोम कली चिठी

१२ मिनु येसु ख्रीस्तमी आं कली पेरगामोम सहर डा थमा सुइक्ब आन शॅब कली ब्रेक्पाइक्ती। आ शोव्र रे निम्फा गे क्योरतीक पाइश्शो हेश्शो तरवार पाइश्शोमी<sup>१३</sup> “इन बाक्तीक सहरम सैतान आ निल्तीके बाक्ब, दे गो तुइक्नुड। गेपुकीमी ‘गो येसु ख्रीस्त आ मुर नकी’ दे आं कली थमा सुइक्चा मप्रॉइनी। मिनु इन सहरम सैतान आ निल्तीके बाक्मेनु, अन्टीपास माइश्शो आं कली मप्रॉइथु, थमा सुइक्ब नु आं लोव्र शॅब बाक्त। मिनु मुरुमी मेको कली सैतान आ बाक्तीकेमी बाक्शा, साइक्तेक्म हना यो, गे आं कली थमा सुइक्चा मप्रॉइनी।<sup>१४</sup> तन्न गो इन कली लोव्र का पचा माल्नुड। मार लोव्र पचा माल्नुड दॅशो हना, गे का निक्शीमी मरिम्शो गेय पाइतीनी। इन गुम्तीके डा का निक्शीमी बालाम माइश्शो मुर आ शॅशो थमा सुइक्नीमी। बालाममी मार शॅताक्व दॅशा हना, डोंइती बालाक माइश्शो पिप कली इस्त्राएल जात डा वोंइश मुर आन कली खतम सेल्लु। दोपा खतम सेल्लु दॅशा हना, चढेशो थोव्रक ब्वपाइक्तु। मिनु तेल्लेम पपाइक्तु। गन्ती ३१:१६; २पत्रुस २:१५; यहूदा :११<sup>१५</sup> मिनु गे इन गुम्तीकेमी निकोलाइटन आन शॅशो लोव्र का निक्शीमी थमा सुइक्नीमी।<sup>१६</sup> मोपतीके इन थुं गो आं गे लेत्तीन। मलेत्ताक्नी हना, गो इन गुम्तीकेमी रीब पा जाक्नुड। मिनु आं शोव्र डा तरवारमी मेको नु लडाइ पाइनुड।<sup>१७</sup> परमप्रभु यावे आ सोक्तीमी थमा सुइक्ब मुर आन कली शॅशो लोव्र सु सुमी नॅने चाप्नीमी, मेकोमी नेन्मेक्ल। मिनु सु सुमी सैतान कली ग्रानीमी, मेको आन कली ख्रुइश्शा वोइश्शो मन्ना शोब्ले गेनुड। मिनु गोमी मेको ग्राब आन कली बुश हीरा का का गेनुड। मेको बुश हीरा तार हीरा ताइब आन नक नॅ ब्रेक्शो बाक्ब। मेको नॅ हीरा ताइबमी

ला तुइक्नीम। अर्को मुरुमी चहिं मतुइक्नीम” दे ब्रेक्पाइक्ती। भजन संग्रह ७८:२४; यसैया ६२:२

### थिआटीरा कली चिठी

१८ मिनु परमप्रभु यावे आ तौमी आं कली थिआटीरा सहर डा थमा सुइक्ब आन शॅब कली ब्रेक्पाइक्ती। एको आ मिक्च हुरर पा ब्रशो मी खोदॅशो तांडसीशो नु आ खोइली याप्पाइश्शो टल्केशो कांसा खोदॅशो तांडसीशो आ लोव्र बाक्ब। प्रेरित १६:१४; प्रकाश १:१४-१५<sup>१९</sup> मेकोमी “गो इन पशो गेय तुइक्नुड। इन आं कली दाक्शो, इन थमा सुइश्शो, इन थमा सुइक्ब आन कली पशो गेय नु इन श्येत फाल्शो तुइक्नुड। गे डोंइती क्येडा शुश गेय पाइनीनी।<sup>२०</sup> तन्न इन कली लोव्र का पचा माल्नुड। मार लोव्र पचा माल्नुड दॅशा हना, गे इजेबेल माइश्शो मीश मुर कली इन गुम्तीकेमी बाक्चा गेतीनी। इजेबेलमी ‘गो परमप्रभु यावेमी तुइक्पाइश्शो लोव्र पाइब नड’ दॅखु पा, आं गेय पाइब आन कली मरिम्शो पचा शॅताक्मी। मार मरिम्शो पचा शॅताक्मी दॅशा हना, तेल्लेम पचा नु मूर्ति कली चढेशो थोव्रक जचा ब्वचा दुम्ब, दे शॅताक्मी। २राजा ९:२२<sup>२१</sup> गोमी मेको कली ‘इ थुं आं गे लेत्तो। इ तेल्लेम पचा ताइक्तो’ दे रिम्ताक्ड। मेकोमी आ थुं गो आं गे लेत्चा नु आ तेल्लेम पचा ताइक्ने मबीस।<sup>२२</sup> मिनु गो मेको कली रोइ पपाइक्नुड। मिनु मेको नु तेल्लेम पाइब आन तेल्लेम पचा प्रॉइशा, गो आं गे लेत्ने मबिस्साक्म हना, मेको आन कली यो ठेयब श्येत गेनुडमी।<sup>२३</sup> आ आल आन कली मुर साइक्ब रोइम साइक्नुडमी। मेको आन श्येत जशा, बेक्शो तशा ‘गोम पापु’ दे थमा सुइक्ब नेल्लेमी तुइक्नीमी। मिनु थमा सुइक्ब आन गुम्तीके डा मुर नेल्लेमी ‘येसु ख्रीस्तमी मुर आन थुं नु आन पशो तुइक्ब। मिनु नोले दोपा पामे, मोपा गेब’ दे तुइक्नीम। भजन संग्रह ७:१०; येरमीया १७:१०<sup>२४</sup> तन्न थिआटीरा डा थमा सुइक्ब आन गुम्तीकेमी इजेबेल आ शॅशो मपाइबपुकी यो बाक्नीम। मेकोपुकीमी इजेबेल आ शॅसीब बुदी सैतान आ ठेयब गेय यो मतुइक्नीम। मिनु आं कली रिम्शो पा थमा सुइक्ब आन कली अर्को श्येत मगेनुड।<sup>२५</sup> गे इन तुइश्शो गो मजाक्डा सम्म पना पन बाक्कीन। प्रकाश ३:११<sup>२६</sup> सु सुमी सैतान कली ग्रानीमी, मेकोमी बेक्ची ना सम्म आं गेय पाइनीमी, गो मेको आन कली रागी रागी डा मुर आन कली सासन पतीके सक्ति गेनुड।<sup>२७</sup> मिनु मेकोपुकीमी खप के ग्योब आन कली फलाम के कोक्केमी चोंइटा चोंइटा पशो बुद पा रागी डा मुर आन कली सासन पाइनीम। गो यो मोदॅशो सक्ति आं आफ रे तशो नड। भजन संग्रह २:८-९<sup>२८</sup> मिनु गोमी मेको सैतान कली ग्राब आन कली सुनी डा सुक्कुर सोरुल गेनुड।<sup>२९</sup> परमप्रभु यावे आ सोक्तीमी थमा सुइक्ब मुर आन कली शॅशो लोव्र सु सुमी नॅने चाप्नीमी, मेकोमी नेन्मेक्ल” दे ब्रेक्पाइक्ती।

### सारडीस कली चिठी

३ मिनु येसु ख्रीस्तमी आं कली सारडीस सहर डा थमा सुइक्ब आन शॅब कली ब्रेक्पाइक्ती। एको ७ ओटा ठारं डा परमप्रभु यावे आ सोक्त नु ७ ओटा सोरुल नु बाक्ब आ लोव्र बाक्ब। मेकोमी “गो इन पशो गेय तुइक्नुड। गेपुकीमी चहिं ‘गो ख्रीस्त कली थमा सुइश्शा, ब्रॉइशा बाक्नीकी’ दॅनीनी। तन्न इन थमा सुइक्तीके बेक्शो खोदॅब पा इप्शो बाक्ब। प्रकाश १:४<sup>२</sup> मोपतीके सॅशा बोक्कीन। इन बेक्चा चिक्शो थमा सुइक्तीके बारपतीन। गोमी इन गेय ताता। मेको इन गेय आं परमप्रभु यावे कली मगारनीम। लूका २२:३२<sup>३</sup> मिनु इन तशो नु इन नॅशो मिन्तीन। मेको कली मप्रॅथु, इन थुं गो आं गे लेत्तीन। गे मो मपाइतीनी हना, गो खुइ खोदॅशो पा इन बाक्तीकेमी जाक्नुड। मिनु गो गेना जाक्नुडा, गे मतुइक्नीनी। १थिस्सलोनिकी ५:२<sup>४</sup> मिनु सारडीस सहर डा थमा सुइक्ब आन गुम्तीकेमी का निक्शी रिम्शो पा थमा सुइक्ब यो बाक्नीम। मेकोपुकीमी पाप मपाम, मोपा आन वा मलुम्सीशो बाक्ब। मारदे हना मेको आन नाक्त किंत डा गेय परमप्रभु यावे कली गारब। मोपतीके मेकोपुकी गो नु बुश वा फेक्शा, हिरचा शिरनीम। यहूदा :२३<sup>५</sup> सु सुमी सैतान कली ग्रानीमी, मेको आन कली मोपा बुश वा फेक्चा गेनुड। मिनु मेको आन नॅ परमप्रभु यावे नु ब्रॉइचा ताइब आन नॅ ब्रेक्शो किताब रे मक्याम्नुड। गोमी आं आफ नु आ स्वर्ग डा गेय पाइब

आन डोंइती 'मेको आं मुर नम' देंनुड। प्रकाश ७:१३; लूका १०:२०; मत्ती १०:३२<sup>६</sup> परमप्रभु यावे आ सोक्तीमी थमा सुइक्ब आन कली शेंशो लोत्र सु सुम नेंने चाप्नीमी, मेकोमी नेन्मेक्ल" दे ब्रेक्पाइक्ती।

#### फिलाडेल्फीया कली चिठी

7 मिनू येसु ख्रीस्तमी आं कली फिलाडेल्फीया सहर डा थमा सुइक्ब आन शेंब कली ब्रेक्पाइक्ती। मेको परमप्रभु यावे आ तौ, थमा पा पाप रे प्रॉइब, दाऊद आ राज्य डा सांचो थीबमी लाप्चो रोक्का डा मेरे सुइमी चोक्ने मचाप्नीम। मिनू चोक्का डा मेरे सुइमी रोक्ने मचाप्नीमी। यसैया २२:२२<sup>८</sup> मेकोमी "गो इन पशो गेय तुइक्नुड। गे इन सक्ति आइक्च बाक्त हना यो, आं देंशो टीतीनी। मिनू गेपुकीमी 'येसु ख्रीस्त कली मतुइक्नुड' दे गेनायो मदेनी। मोपतीके गो इन कली लाप्चो रोक्का वोइक्ता। मेको सुइमी चोक्ने मचाप्नीम।<sup>९</sup> मिनू इन गुम्तीकेमी का निक्शीमी 'यहूदी नकी' दे जोल पाइनीम। मेकोपुकी चहिं सैतान आ शेंशो मुर बाक्नीम। नेनीन, गो मेको आन कली इन खोइलीमी बाप्शा सेउ पपाइक्नुड। गोमी इन कली दाक्नुड, दे मेको आन कली तुइक्पाइक्नुड। प्रकाश २:९; यसैया ४९:२३; यसैया ६०:१४<sup>१०</sup> मिनू गे शुश श्येत फाल्शा, आं देंशो लोत्र मप्रॉइनी। मोपतीके रागी नेल्ल डा मुर आन थुं थाम्वा कली जाक्शो श्येत रे प्रॉइनन्नी। प्रकाश १४:१२; मत्ती ६:१३<sup>११</sup> मिनू गो फ्रा लेश्शा यीनुड। थमा सुइक्का मप्रॉइनी। मोपा बाक्तीनी हना, सुइमी इन सिरपेच रोइक्ने मचाप्नीम। प्रकाश २:१०<sup>१२</sup> सु सुमी सैतान कली ग्रानीमी, गोमी मेको आन कली आं परमप्रभु यावे आ खिं डा थाम खोदेंशो बोल्यो सेल्लुड। मिनू मेको गेना हना यो परमप्रभु यावे आ खिंमी बाक्नीम। मिनू मेको मुर आन तारी आं परमप्रभु यावे आ नें, आं परमप्रभु यावे आ सहर आ नें नु आं नक नें ब्रेक्नुड। आं परमप्रभु यावे आ सहर चहिं नक यरूसलेम माइश्शो बाक्ब। मेको नक यरूसलेम आं परमप्रभु यावे आ बाक्तीक स्वर्ग रे यीब। प्रकाश १४:१; प्रकाश २१:२<sup>१३</sup> परमप्रभु यावे आ सोक्तीमी थमा सुइक्ब आन कली शेंशो लोत्र सु सुमी नेंने चाप्नीमी, मेकोमी नेन्मेक्ल" दे ब्रेक्पाइक्ती।

#### लाओडीसीया कली चिठी

14 मिनू येसु ख्रीस्तमी आं कली लाओडीसीया सहर डा थमा सुइक्ब आन शेंब कली ब्रेक्पाइक्ती। एको आमन माइश्शो, दीगो पाइब परमप्रभु यावे आ सांकछी नु रागी नु मारेड मारेड सेल्ब आ लोत्र बाक्ब। कलस्सी २:१; कलस्सी ४:१३; २कोरिन्थी १:२०; प्रकाश १:५; कलस्सी १:१५<sup>१५</sup> मेकोमी "गो इन पशो गेय तुइक्नुड। इन थमा सुइक्का सिक्स यो ममाड, होश यो ममाड, कि सिक्स कि होश दुश्शो हना, रिश्शो दुम वा।<sup>१६</sup> तन्न इन थमा सुइक्तीके गाम्वा चिक्शो बाक्ब। मोपतीके गो इन कली तेशा ताइक्नुड।<sup>१७</sup> मिनू गेपुकीमी 'आंइ के शुश शॉप बाक्ब। गो शॉप पाइश्शो नकी। गो मारेड ममाल्नीकी' देंनीनी। तन्न गो इन कली श्येत जाइब नु प्रुडग, मिक्च मताइब नु हेरा शिश्रा गाक्शा पुंइब खोदेंशो दुश्शो ताता। १कोरिन्थी ३:१८; १कोरिन्थी ४:८<sup>१८</sup> मोपतीके गो इन कली लोत्र का पाइनुड, मार लोत्र पाइनुड देंशा हना, गे शॉप पाइश्शो दुम्वा कली आं सुन ग्यापीन। मेको सुन याप्पाइश्शो बाक्ब। मेको ग्याप्तीनी हना, गे शॉप पाइश्शो दुम्नीनी। मिनू फेक्का कली बुश वा ग्यापीन। मेको ग्याप्तीनी हना, मुने मदोक्नीनी। मिनू इन मिक्च, सापाइक्का कली मिक्चीम खेक्तीके ग्यापीन। ग्याप्शा खेक्साक्नी हना, गे ताइनीनी।<sup>१९</sup> गो आं दाक्शो मुर आन कली आन मरिश्शो पतीके कोंइनुड। नोले गो मेको आन कली श्येत गेशा, आल खोदेंशो पा शेंनुड। इन थुं गो आं गे लेत्तीन। इन थमा सुइक्तीके बारपतीन। हितोपदेस ३:१२; १कोरिन्थी ११:३२; हिब्रू १२:६<sup>२०</sup> नेनीन, गो लाडगाम जाक्शा 'बाक्नी?' दे ब्रेनुड। सु सुमी आं सेंदा नेंशा 'ओवडीन' देंनीमी, गो मेको नु बाक्थ ओवनुड। मिनू मेको नु काथा बाक्शा, खमे जाइनुड। यूहन्ना १४:२३<sup>२१</sup> सु सुमी सैतान कली ग्रानीमी, मेको आन कली आं ठेयब नित्तीकेमी निप्पाइक्नुड। गो डोंइती ग्राती। मोपा गो आं आफ आ ठेयब नित्तीकेमी आफ नु निस्साक्की। मत्ती १९:२८<sup>२२</sup> परमप्रभु यावे आ सोक्तीमी थमा

सुइक्ब आन कली शेंशो लोत्र सु सुमी नेंने चाप्नीमी, मेकोमी नेन्मेक्ल" दे ब्रेक्पाइक्ती।

#### परमप्रभु कली पशो कुम्सो

4 मिनू नोले सरीड गे कोवता। मिनू मेकेर लाप्चो का रोक्का वोइश्शो ताता। मिनू डोंइती आं नेंशो तुराही ताप्शो खोदेंशो ठेयब सेंदा लेंशा नेंता। मेको सेंदामी "एक कुवो। नोले मार दुम्बा, गो इ कली कोंइनन" दे माइक्ती। प्रकाश १:१०<sup>२</sup> मिनू गो परमप्रभु यावे आ सोक्तीमी ब्रीती। स्वर्गमी ठेयब नित्तीके वोइश्शो ताता। मेको ठेयब नित्तीकेमी का निश्शो ताता। भजन संग्रह ४७:९; यसैया ६:१; इजीकीएल १:२६-२८<sup>३</sup> मेको ठेयब नित्तीके बुश नु लल टल्केशो हीरा खोदेंशो तांइसाक्ब। मेको ठेयब नित्तीके आ एर ऑथ वाक्श दाप्शो ताता। मेको वाक्श गिग हीरा खोदेंशो तांइसाक्ब।<sup>४</sup> मिनू ठेयब नित्तीके आ एर ऑथ २४ ओटा आइक्च नित्तीकपुकी बाक्तेक्म। मेको नित्तीकपुकीमी बुश वा फेक्शो नु आन पियामी सुन के सिरपेच गुप्शो २४ जना शेंब खाल्पा निश्शो बाक्तेक्म। प्रस्थान १९:१६; प्रकाश १:४<sup>५</sup> मिनू मेको नित्तीक रे चिला दाप्शो तांइसाक्ब। मिनू बुंबु पशो रेयके नु सेंदापुकी नेंसाक्ब। मिनू ठेयब नित्तीक आ डोंइती ७ ओटा ब्रशो तोवशी बाक्तेक्म। मेको ७ ओटा तोवशी चहिं परमप्रभु यावे आ ७ ठाउंम बाक्शो सोक्त बाक्तेक्म। प्रस्थान १९:१६<sup>६</sup> मिनू नित्तीक आ डोंइती समुन्द्र खोदेंशो दिंम का बाक्त। मेको दिंम सिसा खोदेंब टल्केशो तांइसाक्ब। मिनू मेको ठेयब नित्तीके आ एर ऑथ आन रां नेल्ले शुश मिक्च पाइश्शो ४ ओटा सेस जन्तु बाक्तेक्म। इजीकीएल १:५, १०, २२<sup>७</sup> मेको सेस जन्तुपुकी दोदेंब तांइसाक्म देंशा हना, डोंइती डा जन्तु गुप्स खोदेंशो तांइसाक्ब, अर्को सेस जन्तु बोहोर खोदेंशो तांइसाक्ब। नोले डा सेस जन्तु आ कुल मुर के खोदेंशो तांइसाक्ब। मिनू नेल्ल क्येडा नोले डा सेस जन्तु बेरशो ककाकुली खोदेंशो तांइसाक्ब। इजीकीएल १०:१४<sup>८</sup> मिनू मेको सेस जन्तु ६, ६ ओटा फ्रां पाइश्शो बाक्तेक्मे। मेको आन फ्रां नेल्ल नु आन रां नेल्लेमी मिक्च पाइश्शो बाक्तेक्म। मिनू मेकोपुकी नाक्दो नाक्त परमप्रभु यावे कली कुम्सो पना पन बाक्बाक्तेक्म। मार कुम्सो पाइबाक्तेक्म देंशा हना, "परमप्रभु यावे, गे का ला परमप्रभु ननी। गे नेल्ल सक्ति पाइश्शो बाक्नीनी। गे डोंइती बाक्शो बाक्तीनी। मुल यो बाक्नीनी। मिनू नोले यो जाक्नीनी" दे कुम्सो पना पन बाक्बाक्तेक्म। यसैया ६:२-३; प्रस्थान ३:१४<sup>९</sup> मोपा मेको ४ ओटा सेस जन्तुम गेना हना यो ब्रॉइशा बाक्ब ठेयब नित्तीकेमी निष्ब कली "गे छेडछेड, मान ताइब नु रिश्शो पाइब बाक्नीनी" देंमानु,<sup>१०</sup> मेको २४ जना शेंब खाल्पामी मेको ठेयब नित्तीकेमी निष्ब आ डोंइती आन पोक्च थेक्शा सेउ पांतेक्म। मिनू गेना हना यो ब्रॉइशा बाक्ब कली मान पांतेक्म। मिनू मेकोपुकीमी आन सिरपेच पुइश्शा, मेको ठेयब नित्तीकेमी निष्ब आ डोंइती वोइश्शा<sup>११</sup> "गे प्रभु, आंइ परमप्रभु यावे ननी। गे सक्ति पाइश्शा, छेडछेडम बाक्शा, मान ताइब बाक्नीनी। मारदे हना गे मारेड मारेड सेल्लेनी, मोपा इन दाक्शा सेल्लो मुल सम्म बाक्ब" दे कुम्सो पना पन बाक्तेक्म।

#### छाप थोक्शो कागज

5 मिनू गो मेको ठेयब नित्तीकेमी निष्ब आ ग्युरा गुइमी ओल्शो कागज का शेशो ताता। मेको कागजम निम्फा गे ब्रेक्शो बाक्त। मिनू मेको कागज ७ ओटा छाप थोक्शा, प्राक्ने मचाप्शा डा सेल्लो बाक्त। प्रकाश ४:३; इजीकीएल २:१-१०<sup>२</sup> मिनू गो सक्ति पाइश्शो परमप्रभु यावे आ स्वर्ग डा गेय पाइब का ताता। मेकोमी ठेयब सेंदामी "सुमी मेको ७ ओटा छाप पुइश्शा, कागज प्राक्ने चाप्बा?" दे हिल्लो पाप्तु।<sup>३</sup> मिनू स्वर्गमी, रागीमी नु रागी आगाम बाक्बपुकीमी सुइमी मेको कागज प्राक्ने मचबेम, कोवने यो मचबेम।<sup>४</sup> मोपतीके गो शुश डाक्ती। मारदे हना सुइमी मेको कागज प्राक्ने मचबेम, कोवने यो मचबेम।<sup>५</sup> मिनू मेको शेंब खाल्पा कामी आं कली "मडाक्को। मेको गुप्स, यहूदा आ थर डा पिप दाऊद आ खिं डा बाक्ब। मेकोमी सैतान कली ग्रात। मोपा मेको कागज डा ७ ओटा छाप पुइश्शा प्राक्ने चाप्ब" देंत। उत्पत्ती ४९:९-१०; यसैया ११:९

## पाठा कली नक कुम्सो पशो

6 मिनु गोमी ठेयब नित्तीके, ४ ओटा सेस जन्तु नु शॅब खाल्पा आन दातेमी क्योरशो पाठा खोदेंशो पा दोक राप्शो ताता। मेको पाठा के ७ ओटा ग्रोव नु ७ ओटा मिक्च बाक्त। मेको मिक्च चहिं परमप्रभु यावेमी रागी रागीमी सोइश्शो परमप्रभु यावे आ ७ ओटा सोक्त बाक्तेक्म। *यसैया ५३:७; यूहन्ना १:२९* 7 मिनु मेको पाठामी मेको ठेयब नित्तीकेम निष्व आ ग्युरा गुड रे मेको कागज ताक्तु। 8 मोपा ताक्गानु, सेस जन्तु नु शॅब खाल्पापुकी पाठा आ डोंइती पोक्च थेक्शा बाक्तेक्म। मेकोपुकीमी ठेयब ताप्तीके नु सुन के थनौरो कुरशो बाक्तेक्म। मिनु सुन के थनौरो चहिं धूपमी ब्रीशो बाक्तेक्म। मेको धूपमी ब्रीशो थनौरो चहिं थमा सुइक्ब मुर आन मान पशो नु पुंइशो लोव बाक्तेक्म। 9 मिनु मेकोपुकीमी पाठा कली नक कुम्सो का पाक्तेक्म। मार नक कुम्सो पाक्तेक्म देंशा हना “मेको कागज ताक्ने नु प्राक्ने चाप्ब, गे का ला ननी। मारदे हना गे मुर आन कली परमप्रभु यावे आ नेक्था बाक्पाइक्चा कली ग्याप्तीनी। दोपा ग्याप्तीनी देंशा हना, साइक्चा पुंइसीशा, इन हुश शाइश्शा ग्याप्तीनी। मिनु गे मार मुर ग्याप्तीनी देंशा हना, नेल्ल थर रे, नेल्ल लोव रे, नेल्ल जात रे नु नेल्ल रागी रे मुरपुकी ग्याप्तीनी। *भजन संग्रह ३३:३* 10 मिनु गे मेको आन कली परमप्रभु यावे आ राज्य डा पिप नु आ डोंइती राप्ब सेल्लतीनी। मिनु रागी नेल्ल कली सासन पाइब यो सेल्लतीनी” दे कुम्सो पाक्तेक्म। *प्रकाश १:६; प्रस्थान १९:६*

## पाठा कली मान पशो

11 मिनु मेको ठेयब नित्तीके गे कोवना कोवन बाक्डानु, सेस जन्तु नु शॅब खाल्पा आन एर ऑथ शुश परमप्रभु यावे आ स्वर्ग डा गेय पाइब आन सेंदा नेंता। मिनु मेकोपुकी गिश बाक्तेक्म देंशा हना, हजार हजार, लाख लाख बाक्तेक्म। *हिब्रू १२:२२* 12 मिनु मेकोपुकीमी “मेको साइक्चा पुंइसीशो पाठा का ला सक्ति पाइश्शो, शोप पाइश्शो, जोक्तीक तुइक्तीक, बोल, मान, छेडछेड नु रिम्शो पाइब बाक्नीनी देंचा शिरशो बाक्ब” दे ठेयब सेंदामी देंतेक्म। *इतिहास २९:११; फिलिप्पी २:९-१०*

## शुश मुरुम मान पशो

13 मिनु स्वर्गमी बाक्ब, रागी नु रागी आगाम बाक्ब, समुन्द्र तारी नु आगाम बाक्ब नेल्लेमी “गेना हना यो ठेयब नित्तीकेमी निष्व नु पाठा कली गे रिम्शो पाइब बाक्नीनी, मान, छेडछेड ताइब नु सासन पाइब बाक्नीनी” देंशो नेंता। 14 मिनु मेको ४ ओटा सेस जन्तुमी “आमेन” देंतेक्म। मिनु मेको खाल्पापुकीमी बाप्शा सेउ पाक्तेक्म।

## पाठामी छाप प्राक्शो

6 मिनु मेको पाठामी मेको कागज रे ७ ओटा छाप रे का प्राक्शो ताता। मिनु सेस जन्तु कामी बुंबु पशो खोदेंशो पा “पिवो” दे ब्रेश्शो नेंता। 2 मिनु गो बुश शारा का ताता। मेको शारा डोइक्बमी लिब्रा कुरशो बाक्त। मेको कली सिरपेच गेशो बाक्त। मिनु मेको ग्राना ग्रान गाक्त। *जकरिया ६:१-८*

3 मिनु पाठामी मेको लीशो ६ ओटा छाप रे का प्राक्गानु, अर्को सेस जन्तुमी “पिवो” दे ब्रेश्शो नेंता। 4 मिनु गो अर्को शारा का ताता। मेको शारा चहिं शुश लल बाक्त। मिनु शारा डोइक्ब कली रागी डा मुर आन दुशा बाक्तीके नेल्ल रोइक्चा कली नु मुर क्योरमुपाइक्चा कली ठेयब चुक्ब गेशो बाक्त।

5 मिनु पाठामी मेको लीशो ५ ओटा छाप रे का प्राक्गानु, अर्को सेस जन्तुमी “पिवो” दे ब्रेश्शो नेंता। मिनु गो क्येर शारा का ताता। मेको शारा डोइक्बमी तुला का ग्याइश्शो बाक्त। 6 मिनु गो मेको ४ ओटा सेस जन्तु आन दातेमी सेंदा कामी “काबु डा गेय कली माना निक्शी चेरब फस गाल्च माल्ताक्व। मिनु काबु डा गेय कली माना सां क्योव्रज फस गाल्च माल्ताक्व। तेल नु अडगुर शांबु कली चहिं मारेइ मपचा” देंशो नेंता।

7 मिनु पाठामी ४ ओटा लीशो छाप रे का प्राक्गानु, नोले डा सेस जन्तुमी “पिवो” देंशो नेंता। 8 मिनु गो हौ शारा का ताता। मिनु मेको शारा डोइक्ब आ नें चहिं साइक्पाइक्ब नु बेक्पाइक्ब बाक्त। मिनु रागी डा बेक्शो मुरपुकीमी मेको आ नोले खोइक्तेक्म। मिनु मेको कली रागी डा ४ भाग डा भाग का मुर आन कली साइक्पाइक्चा, दे अधिकार गेशो बाक्त। दोपा साइक्पाइक्चा गेशो बाक्त देंशा हना, कोइ आन कली तरवारम साइक्पाइक्चा, कोइ आन कली अन्कालम बेक्पाइक्चा, कोइ आन कली मुर साइक्ब रोइ पा बेक्पाइक्चा नु कोइ आन कली जन्तुमी साइक्पाइक्चा, दे अधिकार गेशो बाक्त। *इजीकीएल १४:२१*

9 मिनु पाठामी मेको लीशो छाप सां रे का प्राक्गानु, गो चढेतीके आगाम शुश मुर आन कली ताता। मेकोपुकी परमप्रभु यावे आ लोव टिचा कली नु अर्को आन कली येसु ख्रीस्त परमप्रभु यावे आ तौ बाक्ब, दे शेंचा आ पब्रम साइक्चा पुंइसीशो मुर बाक्तेक्म। 10 मिनु मेकोपुकीमी ठेयब सेंदामी “परमप्रभु, गे का ला परमप्रभु नु थमा पा नेल्ल आन कली सासन पाइब बाक्नीनी। गेना आंइ कली साइक्ब आन कली निसाफ पाइनीनी? गेना रागीम बाक्ब आन कली क्येक्क लेल्लनीनी?” देंतेक्म। 11 मिनु परमप्रभु यावे आ स्वर्ग डा गेय पाइबमी मेको आन कली बुश वा का का फेक्चा कली गेपु। मिनु मेकोमी मेको आन कली “इक्का रिम्दीन, अर्को इन खोदेंशो पा येसु आ गेय पाइब नु अर्को थमा सुइक्ब लोक्ब इन बुदी साइक्चा पुंइसीमा सम्म रिम्दीन” देंत।

12 मिनु पाठामी मेको लीशो छाप निक्शी रे का प्राक्गानु, ठेयब ख्रिनु कुत। मिनु नां कुंखी खोदेंशो क्येर दुस्त। तास्ला चहिं हुश खोदेंशो लल दुस्त। *यसैया २४:२१-२३; योएल ३:३-४; मत्ती २४:२९* 13 मिनु ठेयब फशेमी फोवशी आ ममीशो गेडा तोक्शो खोदेंब पा सरीड डा सोरुलपुकी रागीमी दोक्तेक्म। 14 मिनु सरीड ओल्शो कागज खोदेंशो पा लाक्तु। डांडा, टापु नेल्ल याक्साक्म। *यसैया ३४:४* 15 मेना रागी डा पिपपुकी नु ठेयब मुरपुकी, फौज डा कप्तानपुकी, शोप पाइश्शो नु बोल्यो मुरपुकी, वाइलीम वाइल नु मुर नेल्ल पहाड डा सेरथे फुल्लु नु पुक्खीमी खूंइसाक्म। *यसैया २:१०, १९* 16 मिनु पहाड नु सेरथे फुल्लु कली “गो आंइ कली सुम्की। मेको ठेयब नित्तीकेमी निष्व नु पाठा आस गाइक्चा रे आंइ कली खुइक्तीकी। *लूका २३:३०* 17 मारदे हना मेको आस गाइक्ची नाक्त जाक्त। सुइ मेको आस डोंइती राजे मचाप्नीम” दे ठेयब सेंदामी ग्रीतेक्म। *आमोस ५:१८; रोमी २:५; मलाकी ३:२*

## इसाएली छाप थोक्सीशो

7 मिनु नोले गो ४ जना परमप्रभु यावे आ स्वर्ग डा गेय पाइबपुकी रागी डा ४ कुनामी राप्शो तातामी। मेकोपुकी रवा आ सफा काइ यो महिम्पाइक्चा, रागी नु समुन्द्रमी फश मपपाइक्चा कली राप्शो बाक्तेक्म। *दानीएल ७:२* 2 मिनु अर्को परमप्रभु यावे आ स्वर्ग डा गेय पाइब का नां दाप्तीके रे कुशो ताता। मिनु गेना हना यो ब्रोंइब परमप्रभु यावे आ छाप मेको नु बाक्शो बाक्त। मेकोमी रागी नु समुन्द्र बिग्रेचा कली अधिकार तशो ४ जना परमप्रभु यावे आ स्वर्ग डा गेय पाइब आन कली ठेयब सेंदामी 3 “गोपुकीमी आंइ परमप्रभु यावे आ वाइलीम वाइल आन कुप्फीमी छाप मथोक्शो सम्म रागी, समुन्द्र नु रवा आन कली मबिग्रेने” देंत। *प्रकाश ९:४; इजीकीएल ९:४, ६* 4 मिनु गिश मुरपुकी छाप थोक्चा पुंइसीशो बाक्तेक्म देंशा हना, इसाएली आन १२ थर डा लाख का ४४ हजार मुर छाप थोक्चा पुंइसीशो बाक्तेक्म। मिनु इसाएली आन थर डा तेको तेको बाक्तेक्म देंशा हना, *प्रकाश १४:१, ३*

5 यहूदा आ थर रे १२ हजार, रूबेन आ थर रे १२ हजार, गाद आ थर रे १२ हजार, 6 आशेर आ थर रे १२ हजार, नाप्ताली आ थर रे १२ हजार, मनस्से आ थर रे १२ हजार, 7 सिमियोन आ थर रे १२ हजार,

लेवी आ थर रे १२ हजार,  
इस्साकार आ थर रे १२ हजार,  
८ जबूलून आ थर रे १२ हजार,  
योसेफ आ थर रे १२ हजार नु  
बेन्यामीन आ थर रे १२ हजार मुरपुकी छाप थोक्चा पुंडसीशो बाक्तेक्म।

### अर्को रागी डा मुर

९ मिनू नोले हिक्ने मचाप्चा डा पा रागी रागी नेल्ल डा, जात नेल्ल डा, थर नेल्ल डा मुर नेल्ल नु लोव्र नेल्ल डा मुर ठेयब नित्तीकेमी निष्व नु पाठा आस डोंइती राप्शो तातामी। मेकोपुकीम बुश वा फेक्शो बाक्तेक्म। मिनू आन गुडमी खजूर रवा आ राशी शेशो तातामी। १० मिनू मेकोपुकीमी परमप्रभु यावे नु पाठा आस कली “मेको ठेयब नित्तीकेमी निष्व आइ परमप्रभु यावे नु पाठामी ला पाप रे प्रॉइने चाप्नीस” दे ठेयब सेंदामी ग्रीतेक्म। ११ मिनू परमप्रभु यावे आ स्वर्ग डा गेय पाइब नेल्ले, ठेयब नित्तीके, शेंब खाल्पा नु मेको ४ ओटा सेस जन्तु आन एर ओंथ बाक्तेक्म। मिनू मेको नेल्लेमी ठेयब नित्तीकेमी निश्शो परमप्रभु यावे आ डोंइती खुक्की पा बाप्शा, परमप्रभु यावे कली मान पास्तेक्म। १२ मेकोपुकीमी “आमेन। नेल्ल आसीक गेचा नु छेडछेड, जोक्ब तुइक्ब थुं, रिश्शो पाइब, मान सक्ति नु सासन पतीके नेल्ल गेना हना यो आइ परमप्रभु यावे केन बाक्ल। आमेन” दे नेल्लेमी देंतेक्म। १३ मिनू मेको शेंब खाल्पा कामी आं कली “मेको बुश वा फेक्शो मुरपुकी सु नमी? ते रे जाक्मा?” दे हिल्लो पती। १४ मिनू गोमी “हजुर, गो मतुइक्नुड, गे तुइक्नीनी” देंती। मिनू मेको खाल्पामी “मेकोपुकी ठेयब श्येत रे जाक्तेक्म। मिनू मेको आन मरिश्शो पतीके लुम्सीशो वा पाठा आ हुशेमी मुरतीके बुश दुस्त। मत्ती २४:२१; प्रकाश १२:११

१५ मो दुम्तीके मेकोपुकी परमप्रभु यावे आ ठेयब नित्तीके आ डोंइती बाक्नीम। मिनू नाक्दो नाक्त परमप्रभु यावे आ खिंमी परमप्रभु यावे कली गेय पाइनीम। मिनू ठेयब नित्तीकेमी निष्वमी मेकोपुकी नु बाक्शा, मेको आन कली कोव्रब। १६ मुल मेकोपुकी लेंशा शोव्रलु मबेक्नीम। तूतू मदाक्नीम। नां नु अर्को रापमी मेको आन कली गेनायो मनाप्ब। *यसैया ४९:१०*

१७ मारदे हना मेको ठेयब नित्तीके आ दातेमी बाक्शो पाठामी मेको आन कली कोव्रशा, गोठला पाइब। मिनू मेकोमी मेको आन कली ब्रॉइचा गेब ब्वाक्कु बुक्तीके कोंइब। मोपा परमप्रभु यावेमी मेको आन प्रेक्कु फिक्ब” देंत। *भजन संग्रह २३:२; प्रकाश २१:४; यसैया २५:८*

### पाठामी नोले डा छाप प्राक्शो

८ मिनू पाठामी ७ ओटा छाप रे नेल्ल क्येडा नोले डा छाप प्राक्गानु, आधा घन्टा सम्म स्वर्गमी सिक्सी पा काइ रेयके मपाम। *हबकुक् २:२०* २ मिनू नोले गो ७ जना परमप्रभु यावे आ स्वर्ग डा गेय पाइबपुकी परमप्रभु यावे आ डोंइती राप्शो तातामी। मिनू मेकोपुकीमी तुराही का का ताक्तेक्म। *मत्ती २४:३१*

३ मिनू अर्को परमप्रभु यावे आ गेय पाइब का जाक्शा, चढ़ेतीक आ नेक्शा राप्त। मेकोमी सुन के थनीरो कुरशो ताता। मिनू मेकोमी शुश धूप ताक्तु। मार पचा कली ताक्तु देंशा हना, थमा सुइक्ब आन परमप्रभु यावे कली मान पशो नु पुंडशो लोव्र सुन के चढ़ेतीकेमी ब्वाइक्चा कली ताक्तु। ४ मिनू परमप्रभु यावे कली मान पा पुंडशो लोव्र नु मेको धूप आ कुन परमप्रभु यावे आ स्वर्ग डा गेय पाइब आ गुड डा थनीरो रे परमप्रभु यावे आ डोंइती लत। ५ मिनू नोले मेको परमप्रभु यावे आ स्वर्ग डा गेय पाइबमी धूप चढ़ेतीके डा मी लाइश्शा, मेको थनीरोमी कुर पाप्तु। मिनू रागीमी ताइक्ताक्व। मिनू रागीमी बुंबु पाप्तु, शुश रेयके पाप्तु। चिला पा खिनु कुत। *इजीकीएल १०:२*

### डोंइती डा ४ ओटा तुराही

६ मिनू मेको ७ ओटा तुराही शेयब परमप्रभु यावे आ स्वर्ग डा गेय पाइबपुकीमी तुराही ताप्चा चिक्ताक्म। ७ मिनू डोंइती डा तुराही शेयब परमप्रभु यावे आ स्वर्ग डा गेय पाइबमी ताप्तु। मोपा तबानु, सरीड रे रागी

तारी हुश ब्वाइसीशो मुप्स नु मी यित। मिनू रागी के भाग सां डा भाग का, रवा आन भाग सां डा भाग का नु घांस नेल्ल दुप्शा नेक्तु। *प्रस्थान ९:२३-२६*  
८ मिनू लीशो ६ जना परमप्रभु यावे आ स्वर्ग डा गेय पाइब कामी तुराही ताप्तु। मोपा तबानु, ठेयब मी ब्रशो डांडा खोदेंशो समुन्द्रमी ताइश्शो ताता। *प्रस्थान ७:२०-२१* ९ मिनू समुन्द्र के भाग सां डा भाग का हुश दुस्त। मेकेर बाक्ब जन्तु नु डांइपुकी भाग सां डा भाग का बेक्तेक्म। मिनू जाजपुकी भाग सां डा भाग का खतम दुम्तेक्म।

१० मिनू लीशो ५ जना परमप्रभु यावे आ स्वर्ग डा गेय पाइब कामी तुराही ताप्तु। मिनू सरीड रे मी ब्रशो रांको खोदेंशो ठेयब सोरुल खोला इनार नु ब्वाक्कु बुक्तीके डा भाग सां डा भाग का तार दोक्त। *यसैया १४:१२*  
११ मेको सोरुल आ नें कशो बाक्त। तेकेर मेको सोरुल दोक्मे, मेकेर डा ब्वाक्कु कशो दुस्त। मिनू शुश मुरपुकी मेको कशो दुम्शो ब्वाक्कु तूशा बेक्तेक्म।

१२ मिनू लीशो ४ जना परमप्रभु यावे आ स्वर्ग डा गेय पाइब डा कामी तुराही ताप्तु। मिनू नां तास्ला नु सोरुल आन भाग सां डा भाग का खतम दुम्तेक्म। मोपा छेडछेड डा भाग सां डा भाग का छिडछिड दुस्त। नाक्त डा भाग सां डा भाग का यो छिडछिड दुस्त। मिनू नाक्दो डा भाग सां डा भाग का यो छिडछिड दुस्त। *प्रकाश ६:१२; प्रस्थान १०:२१*

१३ मिनू नोले ककाकुली का सरीडमी बेरशो ताता। मेकोमी ठेयब सेंदामी “मुल परमप्रभु यावे आ स्वर्ग डा गेय पाइब सांमी तुराही ताप्चा लीतेक्म। मेको आन ताप्शो रेयकेमी रागी डा मुर आन कली थम हिंचा डा दुम्चाप्तु। आबी आबी आबी, तुराही ग्रीशोमी रागी डा मुरपुकी शुश श्येत जाइनीम” दे ग्रीशो नेंता।

### लीशो तुराही सां डा निक्शी

९ मिनू लीशो ३ जना परमप्रभु यावे आ स्वर्ग डा गेय पाइब कामी तुराही ताप्तु। मिनू गोमी सोरुल का सरीड रे दोक्शो ताता। मेको सोरुलमी ठेयब दुइश्शो, पुं मपाइश्शो ढोडोडगा डा लाप्चो रोक्तीके सांचो ताक्तु। २ मिनू मेकोमी ठेयब दुइश्शो पुं मपाइश्शो ढोडोडगा डा लाप्चो रोक्गानु, कुन गूत। मेको कुन ठेयब मी आ कुन खोदेंब तांइसाक्व। मेको कुन गूमेनु, नां नु सरीड छिडछिड दुस्त। *योएल २:२, १०* ३ मिनू मेको कुन रे माले खोदेंशो रागीमी गूतेक्म। मेको आन सक्ति रागी डा बिच्छी आन के खोदेंशो बाक्त। ४ मिनू मेको आन कली “मेको रागी डा घांस नु रवा डा सफा मबिग्रेने, परमप्रभु यावे आ छाप कुप्फीमी मथोक्शो मुर आन कली ला श्येत गेने। *प्रकाश ७:३* ५ मिनू मेको आन कली मसतीन, तन्न ५ महिना सम्म श्येत गेने” देंशो नेंता। मेको श्येत चहिं बिच्छीमी मुर आन कली क्राइश्शो खोदेंशो बाक्ब। ६ मिनू मोदेंशो दुम्मेनु, मुरपुकी बेक्चा दाक्नीम। तन्न बेक्ने मचाप्नीम। *प्रकाश ६:३६*

७ मिनू मेको माले आन रां दोदेंशो तांइसाक्म देंशा हना, लडाइ पचा कली ठीक पा वोइश्शो शारा खोदेंशो तांइसाक्म। मेकोपुकी सुन के सिरपेच खोदेंशो गुप्शो बाक्तेक्म। ८ मेको आन चां मीश मुर आन चां खोदेंशो बाक्त। मेको आन खूइ गुप्स आन खूइ खोदेंशो बाक्त। ९ मेको आन कुचु डा फेक्तीके फलाम के खोदेंशो बाक्त। मिनू मेको आन बेरशो रेयके चहिं शुश शारामी बग्गी कीशा, लडाइ पथ लशो रेयके खोदेंशो नेंसाक्व। १० मेको आन मीलुमी बिच्छी के खोदेंशो फूरो बाक्त। मेको आन श्येत गेतीके या बाक्त। मिनू मुर आन कली ५ महिना सम्म श्येत गेचा अधिकार तशो बाक्तेक्म। ११ मेको आन के पिप का बाक्त। मेको पिप सु बाक्त देंशा हना, दुइश्शो, पुं मपाइश्शो ढोडोडगा डा गेय पाइब बाक्त। मेको पिप आ नें हिब्रू लोव्रमी अब्बादोन नु ग्रीक लोव्रमी अपोल्लीयोन देंनीम। *मेको निम्फा आस अर्थ चहिं खतम पाइब बाक्ब।* १२ डोंइती डा हिंचा डा श्येत नुप्त। मिनू अर्को हिंचा डा श्येत निक्शी बाक्नीस।

१३ मिनू लीशो निक्शी परमप्रभु यावे आ स्वर्ग डा गेय पाइब कामी तुराही ताप्तु। मिनू गो परमप्रभु यावे आ डोंइती वोइश्शो सुन के सेल्शो चढ़ेतीके आ ४ सुर रे सेंदा गूशो नेंता। *प्रकाश ८:३; प्रस्थान ३९:१-३* १४ मेको सेंदामी मेको तुराही ताप्ब परमप्रभु यावे आ स्वर्ग डा गेय पाइब कली “युफ्रेटीस

माइशो ठेयब खोला आ नेक्थाम पाइशो ४ जना सैतान आ गेय पाइब आन कली प्रॉइमी" दॅशो नेंता। प्रकाश १६:१२<sup>15</sup> मिनु मेको परमप्रभु यावे आ स्वर्ग डा गेय पाइबमी मेको आन कली प्रॉइतु। मेकोपुकी डोंइती मारदे पाइशा वोइशो बाक्तेक्म दॅशा हना, परमप्रभु आ दॅशो घन्टा, नाक्त, महिना नु बर्स नेल्ल रागी डा मुरपुकी भाग सां डा भाग का साइक्वा, दे ठीक पा वोइशो बाक्तेक्म। प्रकाश ८:-

16 मिनु गोमी "शारा डोइशो लडाइ पाइबपुकी २० करोड बाक्नीम" दॅशो नेंता। 17 मिनु मेको शारा नु शारा डोइक्बपुकी दोदॅशो तातामी दॅशा हना, मेको शारा डोइक्ब आन कुचुमी पीतल के फेक्तीके फेक्शो तातामी। मेको फेक्तीके मी खोदॅशो लल गिम गिम नु हौ ताता। मेको शारा आन पिया गुप्स आ पिया खोदॅशो ताता। मिनु आन शोव रे मी, कुन नु गन्धक गूत। 18 मिनु मेको मी, कुन नु गन्धक रे मुरपुकी भाग सां डा भाग का बेक्तेक्मे। 19 मिनु मेको शारा आन मीलु चहिं बुस्स आ पिया खोदॅशो तांइसाक्म। मोपतीके मेको शारा आन बोल शोव नु मीलुमी बाक्ता। मिनु शोव नु मीलुमी मुर आन कली श्येत गेम्तेक्म।

20 मिनु मबेक्थु लीशो मुरपुकीमी मेको आन मरिश्शो पचा मप्रोनेम। मार मरिश्शो पास्तेक्म दॅशा हना, वोल नु देवी देवता आन कली खुम्की पा सेउ पास्तेक्म। मताइब, मनेब, मगाक्ब सुन, चांदी, कांसा, फुल्लु नु शी के सेल्शो मूर्ति आन कली खुम्की पा सेउ पास्तेक्म। प्रकाश १६:९<sup>21</sup> मिनु मेकोपुकीमी मुर साइक्वा, टुना मुना पचा, चिन्ता बाक्वा, तेल्लेम पचा नु खुइ पचा मप्रोनेम। मिनु आन थुं यो परमप्रभु यावे गे मलेत्तेम।

यूहन्नाम इम्चीली किताब जशो

10 मिनु नोले गोमी सक्ति पाइशो परमप्रभु यावे आ स्वर्ग डा गेय पाइब का गोस्सुमी गिल्सीशा, रागीमी यिशो ताता। मेको आ पियामी वाक्श दाष्शो बाक्ता। मिनु मेको आ कुल नां खोदॅशो नु आ खोइली हुरुर पा ब्रशो मी के थाम खोदॅशो तांइसाक्व।<sup>2</sup> आ गुइमी इम्चीली प्राक्शो किताब शेशो बाक्ता। मेको आ ग्युरा खोइली समुन्द्र तार नु आ पेरा खोइली चहिं रागी तार थेक्शा राप्ता।<sup>3</sup> मेकोमी गुप्स खोदॅशो पा ठेयब सेंदामी ग्रीत। मोपा ग्रीमेनु, ७ ओटा बुंबुमी रेयके पास्तेक्म। भजन संग्रह २९:३-९<sup>4</sup> मेको ७ ओटा बुंबु आ लोव ब्रेक्वाडानु, सरीड रे सेंदा कामी "मेको ७ ओटा बुंबु आन लोव मब्रेक्तो, मुर आन कली मशेंदो" दॅशो नेंता। दानीएल १२:४,९

5 मिनु डोंइती तशो परमप्रभु यावे आ स्वर्ग डा गेय पाइब ठेयब समुन्द्र नु रागीम खोइली थेक्बमी कसम जचा कली आ ग्युरा गुइ सरीड गे पोक्तु। 6 मिनु मेकोमी दोपा कसम जाप्तु दॅशा हना, गेना हना यो ब्रोंइशा बाक्ब, सरीड नु सरीडम बाक्ब नेल्ल सेल्ब, रागी नु रागीम बाक्ब नेल्ल सेल्ब, समुन्द्र नु समुन्द्रम बाक्ब नेल्ल सेल्ब, परमप्रभु यावे आ नेमी "मुल देश मपचा" दे कसम जाप्तु। दानीएल १२:७<sup>7</sup> मिनु मेको आ कसम जशो लोव मार बाक्ता दॅशा हना "नेल्ल क्येडा नोले डा परमप्रभु यावे आ स्वर्ग डा गेय पाइबमी तुराही तबानु, परमप्रभु यावेमी आ लोव पाइब आन कली 'मुल रिम्ची ना नुप्ता' दे डोंइती रे मशेंशो परमप्रभु यावे आ खुइशो लोव मुल दुम्चाप्तु" दे कसम जाप्तु। प्रकाश ११:१५; प्रेरित ३:२१

8 मिनु मेको आं नॅशो स्वर्ग डा सेंदामी आं कली लॅशा "लावो, मेको रागी नु समुन्द्र तार राष्शो परमप्रभु यावे आ स्वर्ग डा गेय पाइब आ गुइमी बाक्शो किताब ताक्को" दॅशो नेंता। 9 मिनु गो मेको परमप्रभु यावे आ स्वर्ग डा गेय पाइब आ नेक्था लती। मिनु गोमी मेको कली "मेको इम्चीली किताब गेयीनी" दॅती। मेकोमी "ताक्को। मिनु जावो। इ शोवमी खुदो खोदॅशो पा ब्रोंवब। मिनु इ कोव्रजमी चहिं काइब" दे माइक्ती। इजीकीएल ३:१-३

10 मिनु गो मेको इम्चीली किताब परमप्रभु यावे आ स्वर्ग डा गेय पाइब आ गुइ रे ताक्शा डा मिन जाता। आं शोवमी खुदो खोदॅशो जिज दुम्ता। दाक्नुनु चहिं आं कोव्रज कता। 11 मिनु लोव पाइब कामी आं कली "गे लॅशा शुश मुरपुकी, शुश रागी, शुश लोव डा मुर नु शुश पिप आन डोंइती परमप्रभु यावे आ लोव नॅपाइक्वा माल्नेवे" दॅशो नेंता। येरमीया १:९-१०

यूहन्नाम पुक्तीक ताक्शो

11 मिनु परमप्रभु यावे आ स्वर्ग डा गेय पाइब कामी पुक्तीक का गेती। मेकोमी आं कली "लो, बोक्को। परमप्रभु यावे आ खिं नु चढेतीके पुक्को। परमप्रभु यावे आ खिं आगाम सेउ पाइब आन कली हिक्को। इजीकीएल ४०:३; जकरिया ३:५-६; इजीकीएल ४२:२०<sup>2</sup> मिनु परमप्रभु यावे आ खिं डा लाडगा रागी रागी डा मुर आन कली गेशो बाक्ता। मेको मपुक्को। मेकोपुकीमी परमप्रभु यावे आ योवशो सहर ४२ महिना सम्म खोइलीमी दिष्शा ताइशशा बिग्रेनीम" दॅता। लूका २१:२४

परमप्रभु आ सांकछी निक्शी

3 मिनु नोले गो परमप्रभु यावेमी आ सांकछी निक्शी आस कली मार लोव पशो नेंता दॅशा हना "गे आं लोव पाइब दुम्नीसी। गो इस कली आं लोव पचा कली सक्ति गेनुड। गे निक्शीमी अरन्डी फेक्शा, हजार का सहे निक्शी ६० नाक्त सम्म आं लोव पाइनीसी" दे परमप्रभु यावेमी आ सांकछी निक्शी आस कली लोव पशो नेंता। प्रकाश १२:६

4 मिनु मेको सांकछी तेल रवा निक्शी नु दियारी निक्शी खोदॅशो दुम्शा, रागी डा प्रभु आ डोंइती बाक्नीस। जकरिया ४:३, ११-१४<sup>5</sup> सु सुमी मेको निक्शी आस कली बिग्रेचा माल्नीमी, मेको साइक्वा पुंइसीनीम। दोपा साइक्वा पुंइसीनीम दॅशा हना, मेको आस शोव रे मी गूशा, मेको साइक्वा पुंइसीनीम। 6 मेको निक्शीमी परमप्रभु यावे आ लोव पास्सेनु, रेउ मयिपाइक्ने चाप्नीस। मेकोमी ब्वाक्कु के हुश सेल्ने चाप्नीस। मिनु रागी कली मार श्येत गेचा दाक्तसे, मेकोन पने चाप्नीस। गिश खेयप मो पचा दाक्तसे, मिश खेयप यो पने चाप्नीस। १राजा १७:१; प्रस्थान ७:१९-२०<sup>7</sup> मिनु मेको निक्शीमी परमप्रभु यावे आ लोव थुम्से नोले, मेको पुं मपाइशो ढोडोडगा रे ठेयब जन्तु कुशा, मेको निक्शी नु राम्शी पा ग्रात। ग्राशा डा मिन मेको आस कली साइक्वतु। प्रकाश १३:३; प्रकाश १३:७<sup>8</sup> मेको आस बेक्शो रां चहिं ठेयब सहर डा लांमी लीताक्से। मेको ठेयब सहर आ खुइशो नें चहिं सोदोम नु इजीप्ता माइशो बाक्ता। मेको ठेयब सहरमी मुरपुकीमी मेको आस प्रभु कली शीम कांटी थोक्शा साइशो बाक्तेक्म। 9 मिनु थर नेल्ल डा, जात नेल्ल डा, आंम आंम लोव पाइब नु रागी रागी डा मुर नेल्लेमी मेको आस बेक्शो रां नाक्त सां नु आधा मेकेर बाक्ता। मुरपुकीमी मेको आस कली तुरसुमी वोइक्वा मगेमे। 10 मारदे हना मेको परमप्रभु यावे आ लोव पाइब निक्शीमी रागीम बाक्ब आन कली शुश श्येत गेतीके, रागीम बाक्बपुकीमी मेको आस कली साइशो तशा, शुश ग्येरशा, मार मार गेमुम्तेक्म।

11 मिनु नाक्त सां नु आधा नोले परमप्रभु यावे आ ब्रोंइचा गेब सोक्ता मेको आस बेक्शो रांमी ओव्रत। मिनु मेको निक्शी छुल छाल बोक्शा राप्ताक्सा। मिनु रागी रागी डा मुरपुकीमी मेको आस कली तशा थाम्पा हिंतेक्म। 12 मिनु सरीड रे ठेयब सेंदामी मेको निक्शी आस कली "एक कुस" दॅशो नेंताक्सा। मिनु गोस्सुमी गिल्सीशा, इर सरीड लाम्ताक्से। मेको आस जोरी सत्रुपुकीमी मेको आस कली सरीड गे लशो ताम्तेक्म। 13 मिनु मेको निक्शी लसानु, ठेयब खिनु कुत। मेको सहर डा १० भाग डा भाग का ब्रेत्ता। मिनु ७ हजार मुर मेको खिनुमी बेक्तेक्म। मेको लीशो मुरपुकी चहिं क्युल क्युल पा हिंशा, स्वर्ग डा परमप्रभु यावे कली मान पास्तेक्म। 14 हिंचा डा श्येत निक्शी नुष्शा, नोले डा हिंचा डा श्येत जाक्चाप्तु। प्रकाश ९:१२

नेल्ल क्येडा नोले डा तुराही

15 मिनु मेको नोले डा परमप्रभु यावे आ स्वर्ग डा गेय पाइबमी आ तुराही ताप्तु। मिनु स्वर्गमी ठेयब सेंदापुकी नेंता। मेकोपुकीमी "आंइ परमप्रभु नु आ ख्रीस्तमी रागी नेल्ल कली सासन पाइब दुम्ताक्से। मिनु गेना हना यो सासन पना पन बाक्नीसी" दॅशो नेंता। 16 मिनु परमप्रभु यावे आ डोंइती मेको २४ जना शॅब खाल्पा आन निक्तीकेमी निष्शा, परमप्रभु यावे आ डोंइती खुम्की पा बाष्शा मान पास्तेक्म। प्रकाश ४:४, १०<sup>17</sup> मिनु मेकोपुकीमी "परमप्रभु यावे, गे नेल्ल सक्ति पाइशो परमप्रभु बाक्नीनी। गे मुल बाक्नीनी, डोंइती यो बाक्तीनी। इन ठेयब सक्तिमी सासन पचा गोइतीनी। 18 मिनु रागी रागी डा

मुरपुकी गाइक्ताक्म। मिनु मेको आन पर्बम गाइक्ताक्नी। बेक्शो मुर आन कली निसाफ पची ना दुम्त। मिनु इन लोव पाइब, इन नोले खोइक्ब, इन नें कली मान पा हिंब, आइक्च नु ठेयब मुर नेल्ल आन कली इनाम गेची ना दुम्त। मिनु गे रागी कली बिग्रैथ मुर आन कली बिग्रैथ जाक्तीनी” दे परमप्रभु यावे कली देंतेक्म। *भजन संग्रह २:३* <sup>19</sup> मिनु परमप्रभु यावे आ स्वर्ग डा खिं रोक्साक्व। मिनु मेको कबल पशो सन्दोस परमप्रभु यावे आ खिंम तांइसाक्व। मिनु चिला पाप्नु। शुश रेयके नु बुंबु पशो नेंसाक्व। खिनु यो कुत। मिनु ठेयब मुप्स यित। *प्रकाश १५:५*

### आल थिचा चिक्शो मीश मुर

**12** मिनु गो सरीडमी ठेयब चिन्ड का ताता। मेको चिन्ड दोदेंब बाक्त देंशा हना, मीश मुर का नां फेक्सीशा, तास्ला तारी राष्थो बाक्त। मेको आ पियामी १२ ओटा सोरुल के सिरपेच गुप्शो बाक्त। <sup>2</sup> मिनु मेकोमी कोव्रज कुरशो बाक्त। मोपतीके सुत्केरी रोइम श्येत जशा, आल थिचा कली ग्रीशो बाक्त।

<sup>3</sup> मिनु गो सरीडमी अर्को चिन्ड का ताता। मेको चिन्ड दोदेंब बाक्त देंशा हना, ठेयब लल बुस्स का बाक्त। मेको बुस्स के ७ ओटा पिया नु १० ओटा ग्रोव बाक्तेक्म। आ ७ ओटा पियामी ७ ओटा मुकुट गुप्शो बाक्त। <sup>4</sup> मेको आ मीलुमी सरीड डा सोरुल भाग सां डा भाग का कीशा, रागीमी तोक्तीमी। मिनु मेको ठेयब बुस्स मेको आल थिचशो मीश मुर आ डोंइती राष्था, आ आल ब्वचा कली रिम्शा बाक्त। *दानीएल ८:१०* <sup>5</sup> मिनु मेको मीश मुरुमी वोंइश आल का थित। मेको वोंइश आल नोले रागी डा मुर आन कली फलाम के कोक्केमी सासन पाइब दुम्ब। मिनु परमप्रभु यावे आ स्वर्ग डा गेय पाइबपुकीमी मेको वोंइश आल कली परमप्रभु यावे आ ठेयब नित्तीकेम लाइशा वोइक्तेक्म। *भजन संग्रह २:९* <sup>6</sup> मिनु मेको मीश मुर आल थिशा नोले गोरशो रागीमी प्रोक्त। मेकेर परमप्रभु यावेमी बाक्तीके ठीक पशो बाक्त। मिनु मेको कली हजार का सहे निक्शी ६० नाक्त थुल्तेक्म। *प्रकाश ११:३*

<sup>7</sup> मिनु नोले स्वर्गमी परमप्रभु यावे आ ठेयब स्वर्ग डा गेय पाइब मिकाएल माइशो नु आ गेय पाइबपुकी गारशा, ठेयब बुस्स नु आ गेय पाइबपुकी नु लडाइ पथ लाम्तेक्म। <sup>8</sup> मिनु ठेयब बुस्स आ गेय पाइबपुकी लडाइ पा ब्रुम्तेक्म। मिनु नोले मेको ठेयब बुस्स नु आ गेय पाइबपुकीमी स्वर्गमी बाक्तीक मथिदेम। *उत्पत्ती ३:९*

<sup>9</sup> मिनु मेको ठेयब बुस्स आ नें मार बाक्त देंशा हना, माइल बुस्स, दियाबलस, सैतान बाक्त। मिनु मेको रागी रागी नेल्ल डा मुर आन कली पाप पपाइक्वा कली रागीमी तोक्वा पुंडसीशो बाक्त। मिनु मेको आ गेय पाइबपुकी यो रागीमी तोक्वा पुंडसीशो बाक्तेक्म। *प्रकाश २०:२; उत्पत्ती ३:९; लूका १०:१८* <sup>10</sup> मिनु गो सरीडमी ठेयब सेंदा का नेंता। मिनु मेको सेंदामी “मुल थमा सुइक्ब आन कली आन पाप रे ब्रोंइतीके जाक्ने थुम्तु। आंइ परमप्रभु यावे आ सक्ति तांइसाक्व नु आ ख्रीस्त आ अधिकार जाक्त। मारदे हना थमा सुइक्ब आन कली दोस गेब रागीमी तोक्वा पुंडसाक्व। मेकोमी नाक्दो नाक्त इं परमप्रभु यावे आ डोंइती आंइ लोक्ब आन कली दोस गेशो बाक्त। *प्रकाश ११:१५* <sup>11</sup> मिनु थमा सुइक्बपुकीमी सैतान कली ग्राशो बाक्तेक्म। दोपा सैतान कली ग्राशो बाक्तेक्म देंशा हना, पाठा आ हुश चढ़ेशोमी नु आन सांकछी आन पतीके सैतान कली ग्राशो बाक्तेक्म। मेकोपुकीमी आंम कली ममिम्थु, येसु ख्रीस्त आ पर्बम साइक्वा पुंडसीचा यो महिंम। *प्रकाश ७:१४; प्रकाश ६:९* <sup>12</sup> मोपतीके स्वर्ग नु स्वर्गमी बाक्ब नेल्ल ग्येरसीन। तन्न रागी नु समुन्द्रम श्येत दुम्चाप्नु। मारदे हना सैतान थाम्पा गाइशा, रागी नु समुन्द्रम यित। मारदे गाइक्ताक्व देंशा हना, मुल आ गेय पचा शुश नाक्त मली, दे तुइक्ताक्व” देंशो नेंता। <sup>13</sup> मिनु मेको ठेयब बुस्सुम आंम कली रागीमी तोक्शो तशा, मेको वोंइश आल थीब मीश मुर कली “साइक्नुड” दे खेदा पाप्नु। <sup>14</sup> मिनु मेको मीश मुरुमी ठेयब ककाकुली आ फ्रां निक्शी ताक्तु। मारदे ताक्तु देंशा हना, मेको ठेयब बुस्स रे ब्रोंइशा, गोरशो रागीमी बेरशा, प्रोक्वा कली ताक्तु। मेको गोरशो रागीमी परमप्रभु यावेमी आ दाक्वी ना सम्म मेकेर थुल्शो बाक्त। <sup>15</sup> मिनु मेको ठेयब बुस्सुमी

“मेको मीश मुर कली योल्दल” दे आ शोव रे खोला खोदेंशो पा शुश ब्वाक्कु गुंडताक्व। <sup>16</sup> रागीमी चहिं मेको मीश मुर कली वारच पाप्नु। दोपा वारच पाप्नु देंशा हना, रागी आ शोव पाक्शा, मेको ठेयब बुस्स आ शोव रे गूशो खोला कली दाक्तु। <sup>17</sup> मिनु मेको ठेयब बुस्सुमी मीश मुर प्रोक्शो तशा, गाइशा, मेको मीश मुर आ चच युइ नु राष्थी पथ लत। आ चच युइ चहिं सु नम देंशा हना, परमप्रभु यावे आ शेंशो लोव टीब नु येसु कली थमा सुइशा, आ लोव पाइब नम। <sup>18</sup> मिनु मेको ठेयब बुस्स समुन्द्र आ नेक्था राष्था, रिम्शा बाक्त।

### समुन्द्र रे गूशो जन्तु

**13** मिनु गो समुन्द्र रे ७ ओटा पिया नु १० ओटा ग्रोव पाइशो जन्तु का गूशो ताता। मेको आ १० ओटा ग्रोवमी १० ओटा मुकुट गुप्शो बाक्तेक्म। आ पियापुकीमी चहिं परमप्रभु कली शुक्शी पाइब नें ब्रेक्शो बाक्तेक्म। *दानीएल ७:३-७* <sup>2</sup> मिनु आं तशो जन्तु जोइ खोदेंशो बाक्त। आ खोइल चहिं वां के खोदेंशो बाक्त। आ शोव गुप्स आ शोव खोदेंशो बाक्त। मिनु मेको ठेयब बुस्सुमी आ सक्ति आ नित्तीके नु आ ठेयब अधिकार मेको जन्तु कली गेप्नु।

<sup>3</sup> मिनु मेको जन्तु आ ७ ओटा पिया डा का साइक्वा डा पा क्योरशो खोदेंशो ताता। तन्न आ ठेयब गार साशो बाक्त। मिनु रागी रागी डा मुर नेल्ल मेको जन्तु तशा, छक लाक्शा, आ नोले खोइक्तेक्म। <sup>4</sup> ठेयब बुस्सुमी मेको जन्तु कली आ अधिकार गेतीके मुर नेल्लेमी ठेयब बुस्स कली खुम्की पा सेउ पाम्तेक्म। मिनु मेको जन्तु कली यो खुम्की पा “एको जन्तु खोदेंशो ठेयब सु बाक्मे? सु एको नु जिशा ग्राने चाब्बा?” दे सेउ पाम्तेक्म।

<sup>5</sup> मिनु मेको जन्तु कली ठेयब लेशशा, ब्वाक्वा नु परमप्रभु आ पर्बम मरिम्शो लोव पचा कली शोव गेशो बाक्त। मेको कली ४२ महिना सम्म सासन पचा कली अधिकार गेशो बाक्त। *प्रकाश ११:२* <sup>6</sup> मेकोमी परमप्रभु यावे कली मरिम्शो लोव पाप्नु। मिनु मेकोमी आ नें आ पर्बम, आ बाक्तीके आ पर्बम नु आ बाक्तीकेमी बाक्ब आन पर्बम यो मरिम्शो लोव पाप्नु। <sup>7</sup> मेकोमी परमप्रभु यावे आ योव्रशो मुरपुकी नु लडाइ पशा, ग्राचा कली अधिकार तशो बाक्त। मिनु मेको कली जात नेल्ल, मुर नेल्ल, आंम आंम लोव पाइब नु रागी रागी डा मुर नेल्ल आन कली सासन पतीके अधिकार यो गेशो बाक्त। *प्रकाश ११:७; दानीएल ७:२१* <sup>8</sup> मिनु सु सु आन नें क्योरशो पाठा आ ब्रोंइतीक किताबमी मब्रेक्शो बाक्मे, मेकोपुकीमी मेको जन्तु कली खुम्की पा सेउ पाइनीम। मेको किताब रागी सेल्चा क्येडा डोंइती रे बाक्त। <sup>9</sup> सु सुमी परमप्रभु यावे आ लोव नेंशा, रुम्ने चाप्नीमी, मेकोमी नेन्मेक्ल। <sup>10</sup> सु जेल्खानमी लचा योव्रसीशो बाक्मे, मेको जेल्खानमी लचा माल्ब। तन्न सुमी तरवारमी साइक्वा, मेको तरवारमी साइक्वा पुंडसीब। मिनु परमप्रभु यावे आ योव्रशो मुरपुकीमी श्येत फाल्शो “परमप्रभु यावेमी तुइक्ब” दे थमा सुइशा बाक्वा माल्नीम। *उत्पत्ती ९:६; मत्ती २६:५२; प्रकाश १४:१२*

### खप रे गूशो जन्तु

<sup>11</sup> मिनु गो खप रे अर्को जन्तु का गूशो ताता। मेको के पाठा के खोदेंशो ग्रोव निक्शी बाक्त। मिनु मेकोमी ठेयब बुस्स खोदेंशो पा लोव पाइबाक्त। <sup>12</sup> डोंइती डा जन्तु नु बाक्शा, मेको डोंइती डा जन्तु आ अधिकार यो पाइक्बाक्त। मिनु मेकोमी रागी डा मुर नेल्ल आन कली डोंइती डा जन्तु कली सेउ पपाइक्बाक्त। मेको डोंइती डा जन्तु चहिं तेको बाक्त देंशा हना, आ बेक्वा डा गार साशो जन्तु बाक्त। <sup>13</sup> मिनु मेको नोले डा जन्तुमी ठेयब छक लाक्वा डा गेय पाप्नु। मार छक लाक्वा डा गेय पाप्नु देंशा हना, मेकोमी मुर आन डोंइती सरीड रे मी यिपाइक्तु। *मत्ती २४:२४; रथिस्सलोनिकी २:९* <sup>14</sup> मेकोमी डोंइती डा जन्तु नु बाक्शा, आ पशो छक लाक्वा डा गेयमी मुर आन कली “परमप्रभु आ सक्ति पाइशो नड” दे जोल पा छक लाक्वा डा गेय पशा, मुर आन कली पाप पपाइक्तु। मार पाप पपाइक्तु देंशा हना, मेकोमी रागी डा मुर आन कली “गार पाइशो जन्तु आ मूर्ति सेल्चा” दे शेंताक्मी। <sup>15</sup> मिनु मेकोमी जन्तु आ मूर्ति कली ब्रोंइचा सोक्त गेचा अधिकार यो तशो बाक्त। मिनु मेकोमी सोक्त गेवानु, मेको

ब्रॉइतीक सोक्त पाइश्शो मूर्ति लोव्र पचा गोप्तु। मिनु मेको जन्तुमी मूर्ति आ डॉइती खुम्की पा सेउ मपाइब मुर आन कली साइक्पाइक्त्तु।<sup>16</sup> मिनु मेको जन्तुम मार अर्को गेय पाप्तु देंशा हना, मेकोमी ठेयब नु आइक्च, शॉप पाइश्शो नु पुडग, वाइलीम वाइल नु मुर नेल्ल आन कली कि ग्युरा गुइमी कि कुप्फीमी चिन्ड वोइक्पाइक्त्तु। प्रकाश १९:२०<sup>17</sup> मिनु सु सु चिन्ड मपाइश्शो बाक्मा, मेकोपुकीमी मारदे ग्याप्ने नु लेयने मचबेम। मिनु मेको चिन्ड कि जन्तु आ नें कि आ हिक्तीक चिन्ड बाक्त्त।<sup>18</sup> मेको जन्तु आ नें आ हिक्तीक चिन्ड आ अर्थ मार बाक्मे, दे तुइक्चा कली जोक्ब तुइक्ब थुं माल्ब। जोक्ब मुरुमी जन्तु आ हिक्तीक चिन्ड तुइक्ब, मारदे हना मेको मुर आ हिक्तीक नु गारब। मेको हिक्तीक चिहं ६ सहं ६६ बाक्ब। प्रकाश १५:२

लाख का ४४ हजार मुर

14 मिनु नोले गो मेको पाठा सियोन डांडामी राप्शो ताता। मिनु लाख का ४४ हजार मुर पाठा नु बाक्तेक्म। मेको आन कुप्फीमी येसु नु आ आफ आ नें ब्रेक्सीशो बाक्त्त। प्रकाश ७:४; प्रकाश ३:१२<sup>2</sup> मिनु गो स्वर्ग रे सेंदा का नेंता। मेको सेंदा दोदेशो बाक्त्त देंशा हना, शुश ब्वाक्कु आ रेयके नु ठेयब बुंबु पशो रेयके खोदेशो नेंता। तन्न शुश मुरपुकीमी ठेयब तार पाइश्शो ताप्तीके ताप्शो रेयके बाक्त्त। प्रकाश १:१५

<sup>3</sup> मिनु मेको ठेयब ताप्तीके ताप्बपुकीमी ठेयब निल्लीक आ डॉइती, मेको ४ ओटा सेस जन्तु नु शेंब खाल्पा आन डॉइती नक कुम्सो का पाम्तेक्म। मेको कुम्सो सुइमी शेंसीने मचबेम। तन्न मेको लाख का ४४ हजार मुरुम ला मेको कुम्सो शेंसीने चाप्तेक्म।<sup>4</sup> मिनु मेको मुरपुकी रागी डा पाप रे डोन बाक्शो बाक्तेक्म। मिनु मेकोपुकी पाठा तेक तेक लमे, मेक मेक लाइबाक्तेक्म। मेकोपुकी रागी डा मुर आन दाते रे गुंइशा, परमप्रभु यावे नु पाठा आस डॉइती डा योव्रसीशो मुर बाक्तेक्म। १कोरिन्थी ७:१,८<sup>5</sup> मिनु मेकोपुकीम काइ जोल मपशो बाक्तेक्म। मारदे हना पाप मपाइबपुकी बाक्तेक्म।

स्वर्ग डा गेय पाइब सां आन लोव्र

<sup>6</sup> मिनु स्वर्ग आ दातेमी गो परमप्रभु यावे आ स्वर्ग डा गेय पाइब का बेरशो ताता। मेको रागीमी लीशो मुर आन कली गेना हना यो पाप रे प्रॉइब जाक्त्त, दे ग्येरपाइक्ब लोव्र शेंथ यित। मेको नेल्ल रागी डा, नेल्ल जात डा, नेल्ल लोव्र पाइब नु शुश मुर आन कली शेंथ यित।<sup>7</sup> मिनु मेकोमी ठेयब सेंदामी “परमप्रभु यावेमी सरीड, रागी, समुन्द्र नु ब्वाक्कु बुक्तीके नेल्ल सेल्लु। मोपतीके इन पोक्च थेक्शा, परमप्रभु यावे कली मान पा हिनीन। मेको कली ठेयब सेलीन। मिनु ‘गे नेल्ल सेल्ल ननी’ देंशा मान पने। मारदे हना मेको आ निसाफ पची ना दुम्त्” देंत।

<sup>8</sup> मिनु परमप्रभु यावे आ स्वर्ग डा गेय पाइब अर्को कामी मेको डॉइती डा आ नोले खोइश्शा, मेकोमी “बेबीलोन माइश्शो ठेयब सहर खतम दुम्त्। मारदे हना मेकोमी डॉइती नेल्ल रागी डा मुर आन कली पाप पपाइक्त्तु। रागी डा मुरपुकी बेबीलोन आ पर्बम परमप्रभु यावे आ गाइश्शो ताम्तेक्म” देंत। प्रकाश १८:१; यसैया २१:९; येरमीया २५:१५-१६; येरमीया ५१:७

<sup>9</sup> मिनु सां आन दाते डा परमप्रभु यावे आ स्वर्ग डा गेय पाइबमी अर्को निक्शी आस नोले खोइश्शा, ठेयब सेंदामी “सु सुमी मेको जन्तु नु आ मूर्ति कली सेउ पाइनीमी, मेको आन कुप्फीमी कि ग्युरा गुइमी चिन्ड वोइक्पाइक्नीमी, प्रकाश १३:१२-१७<sup>10</sup> मेको आन कली तशा, परमप्रभु यावे शुश गाइक्ब। मिनु मेको मुरपुकीमी आ गाइश्शो तचा माल्नीम। दोपा परमप्रभु आ गाइश्शो तचा माल्नीम देंशा हना, पाप रे डोन बाक्ब परमप्रभु यावे आ स्वर्ग डा गेय पाइब नु पाठा आस डॉइती मेको मुरपुकी हुरु पा ब्रशो मी नु गन्धकम श्येत जचा माल्नीम। भजन संग्रह ७५:७<sup>11</sup> मेको मी आ कुन गेनायो मकाप्ब। मेको जन्तु नु जन्तु आ मूर्ति कली सेउ पाइबपुकी नु जन्तु आ नें आ चिन्ड वोइक्पाइक्बपुकी नाक्दो नाक्ती श्येत जना जन बाक्नीम” देंत।

<sup>12</sup> मेना रागीमी परमप्रभु यावे आ योव्रशो थमा सुइक्बपुकीमी श्येत फाल्वा माल्नीम। मारदे हना मेकोपुकीमी परमप्रभु यावे आ अरेशो लोव्र

पाइनीम। मिनु येसु कली थमा सुइक्नीम। प्रकाश १३:१०<sup>13</sup> मिनु गो स्वर्ग रे सेंदा का नेंता। मेकोमी “मुल रे सु सु प्रभु कली थमा सुइश्शा बेक्नीमी, मेकोपुकी ग्येरसमल। मेको लोव्र ब्रेक्त्तो” देंता। मिनु परमप्रभु यावे आ सोक्तीमी “थमा, मेको मुरपुकी ग्येरसीशो बाक्नीम। मारदे हना मेकोपुकीमी रागीमी परमप्रभु यावे आ गेय पशा नाइक्नीम। मिनु परमप्रभु यावेमी आन गेय तुइश्शा, आन तचा डा गेब” देंत। फिलिप्पी १:२३; यसैया ५७:३; हिब्रू ४:३०; १तिमोथी ५:२४-२५

थमा मसुइक्ब आन कली निसाफ

<sup>14</sup> मिनु नोले गो बुश गोस्स का ताता। मिनु मेको गोस्स तारी मुर का निश्शो खोदेशो ताता। मेको आ पियामी सुन के सिरपेच गुप्शा डा मिन आ गुइमी हेश्शो गुये का ग्याइश्शो ताता। दानीएल ७:१३; मर्कुस १३:२६<sup>15</sup> मिनु गो अर्को परमप्रभु यावे आ स्वर्ग डा गेय पाइब कली परमप्रभु यावे आ खिं रे गूशो ताता। मिनु मेकोमी गोस्स तार बाक्ब कली ठेयब सेंदामी “रागी डा बाली मीशो बाक्त्त। मुल रिक्ची ना दुम्त्। मिनु मुल रिक्चा गोवो” देंत। योएल ४:१३; मत्ती १३:३९<sup>16</sup> मिनु गोस्सुमी निप्बमी गुये शेशा, रागी कली मीशो बाली खोदेशो पा रिक्त्तु।

<sup>17</sup> मिनु गो अर्को परमप्रभु यावे आ स्वर्ग डा गेय पाइब कली परमप्रभु यावे आ खिं रे गूशो ताता। मेको नु यो हेश्शो गुये का बाक्त्त।<sup>18</sup> मिनु नोले अर्को परमप्रभु यावे आ स्वर्ग डा गेय पाइब का धूप चढेतीके रे गूशो ताता। मेकोमी मी कली अधिकार पाइबाक्त्त। मेकोमी ठेयब सेंदामी हेश्शो गुये शेयब कली “रागी अडगुर रू खोदेशो पा मीशो बाक्त्त। मोपतीके गुयेमी फल सेक्चा गोवो” देंशो नेंता।<sup>19</sup> मिनु परमप्रभु यावे आ स्वर्ग डा गेय पाइबमी आ गुयेमी रागी कली फल सेक्शो खोदेशो पा सेक्त्तु। सेक्शा खुप्शा, परमप्रभु यावे आ ठेयब फल कोलमी वोइक्त्तु। मेको कोल चिहं मार बाक्त्त देंशा हना, परमप्रभु यावे आ गाइक्चा बाक्त्त।<sup>20</sup> मिनु ख्राक्तीके सहर रे डोन बाक्त्त। ख्राक्मेनु, मेको कोल रे रस खोदेशो पा हुश शांइसाक्व। मिनु मेको हुश १६ हजार स्तादीयोन डोन दोक राप्शो शारा आ शोव्र सम्म लत। स्तादीयोन का १८५ मिटर बाक्ब। यसैया ६३:३

लाख का ४४ हजार मुर

15 मिनु गो स्वर्गमी अर्को ठेयब नु छक लाक्चा डा चिन्ड ताता। मेको चिन्ड दोदेशो बाक्त्त देंशा हना, ७ जना परमप्रभु यावे आ स्वर्ग डा गेय पाइबपुकीमी ७ ओटा श्येत गेचशो बाक्तेक्म। मिनु मेको श्येतपुकी नोले डा बाक्तेक्म। मारदे हना मेको आन नोले परमप्रभु आ गाइक्चा नुप्ब। प्रकाश १६:१

<sup>2</sup> मिनु गो सिसा नु मी ब्वाइश्शो दोम्ली खोदेशो दिंम का ताता। मेको दिंममी मुरपुकीम परमप्रभु यावे आ गेशो ठेयब ताप्तीके शेशा, राप्शो तातामी। मेको मुरपुकी चिहं सु बाक्तेक्म देंशा हना, मेकोपुकीमी मेको जन्तु कली ग्राशो बाक्तेक्मे। दोपा ग्रातेक्म देंशा हना, जन्तु नु जन्तु आ मूर्ति कली सेउ मपामे नु आ नें आ हिक्तीके चिन्ड यो मवोइक्पाइक्सीशो बाक्तेक्मे। प्रकाश ४:६<sup>3</sup> मिनु परमप्रभु यावे आ वाइल मोसा नु पाठा आ कुम्सो पाम्तेक्म। मिनु मेको कुम्सोम मार लोव्र बाक्त्त देंशा हना “परमप्रभु यावे, गे नेल्ल सक्ति पाइश्शो परमप्रभु बाक्नीनी। इन गेय ठेयब नु छक लाक्चा बाक्नीमी। गे इन लां नेल्ल ठीक नु थमा बाक्नीमी। गे गेना हना यो पिप बाक्नीनी। प्रस्थान १५:१,११; येरमीया १०:६-७; ब्यवस्था ३२:४; भजन संग्रह १४५:१७<sup>4</sup> नेल्लेमी इन कली मान पा हिंशा इन नें ठेयब सेल्लनीमी। मारदे हना गे ला परमप्रभु बाक्नीनी। रागी रागी डा मुर नेल्ले इन डॉइती जाक्शा, पोक्च थेक्शा, खुम्की पा बाप्नीमी। मारदे हना इन निसाफ पतीके नेल्लेमी ताम्तेक्म” देंशो कुम्सो आ लोव्र बाक्त्त। भजन संग्रह ८६:९; येरमीया १६:१९-२१

गाइश्शो डा ७ ओटा डप्का

<sup>5</sup> मिनु नोले गो स्वर्गमी परमप्रभु यावे आ खिं रोक्शो ताता। प्रकाश ११:१९<sup>6</sup> मेकेर रे मेको ७ जना श्येत गेब परमप्रभु यावे आ स्वर्ग डा गेय



पाइबपुकी गूतेकम्। मेकोपुकी रिम्शो टल्केशो बुश वा फेक्शा, सुन के पेटी किष्ओ बाक्तेकम्। <sup>7</sup> मिनु मेको ४ ओटा सेस जन्तु डा कामी मेको ७ जना परमप्रभु यावे आ स्वर्ग डा गेय पाइब आन कली ७ ओटा सुन के डप्का गेप्तु। मेको सुन के डप्का गेना हना यो ब्रौइशा बाक्ब परमप्रभु यावे आ गाइक्चामी ब्रीशो बाक्तेकम्। *प्रकाश ४:६-८; प्रकाश १४:१०* <sup>8</sup> मिनु परमप्रभु यावे आ खिं परमप्रभु आ छेडछेड नु सक्ति डा कुनमी ब्रीशो बाक्त। मिनु परमप्रभु यावे आ ७ जना स्वर्ग डा गेय पाइबपुकीमी श्येत मगेमे सम्म सुइ परमप्रभु यावे आ खिं ओवने मचाप्बाक्तेकम्। *यसैया ६:४; प्रस्थान ४०:३४; १राजा ८:१-११; इजीकीएल ४४:४*

मेको ७ ओटा श्येत

**16** मिनु नोले गो परमप्रभु यावे आ खिं रे ठेयब सेंदा का नेंता। मेको सेंदामी परमप्रभु यावे आ ७ जना स्वर्ग डा गेय पाइब आन कली “लने। परमप्रभु आ गाइक्चामी ब्रीशो ७ ओटा डप्का रागीमी मोतीन” देंत।

<sup>2</sup> मिनु डोंइती डा परमप्रभु यावे आ स्वर्ग डा गेय पाइबमी आ कुरशो डप्का रागी तार मोइक्तु। मिनु मेकोमी मोदानु, ठेयब जन्तु आ चिन्ड वॉइसीब नु आ मूर्ति कली सेउ पाइबपुकी मरिम्शो पा खाइक्ब गार मुन्तेकम्। *प्रस्थान ९:१०-११*

<sup>3</sup> मिनु अर्को परमप्रभु यावे आ स्वर्ग डा गेय पाइबमी आ कुरशो डप्का समुन्द्र तार मोइक्तु। मिनु मेकोमी मोदानु, समुन्द्र डा ब्वाक्कु क्योरशो मुर आन हुश खोदेंशो दुम्त। मिनु समुन्द्र डा सेस जन्तु नु डाइ नेल्ल बेक्तेकम्।

<sup>4</sup> मिनु लेंशा अर्को परमप्रभु यावे आ स्वर्ग डा गेय पाइबमी आ डप्का खोला नु ब्वाक्कु बुक्तीके तार मोइक्तु। मिनु मेकोमी मोदानु, मेको ब्वाक्कु हुश दुम्त। *प्रस्थान ७:१७-२१* <sup>5</sup> मिनु ब्वाक्कु कली कोव्रब परमप्रभु यावे आ स्वर्ग डा गेय पाइबमी परमप्रभु यावे कली “इन मुर आन कली पशो निसाफ ठीक बाक्ब। गे मुल बाक्नीनी। मिनु गे डोंइती यो बाक्तीनी। गे का ला परमप्रभु बाक्नीनी। <sup>6</sup> रागी डा मुरपुकीमी इन योव्रशो मुर नु इन लोव्र पाइब आन कली क्योरशा, आन हुश शाइक्पाइश्शा साइक्तेकम्। मिनु गे मेको रागी डा मुर आन कली हुश तूपाइक्तीनी। मार पामे, मेको ताम्तेकम्” देंशो नेंता।

<sup>7</sup> मिनु गोमी मेको धूप चढ्ढेतीके रे सेंदा कामी लोव्र पशो नेंता। मेकोमी “परमप्रभु यावे, गे नेल्ल सक्ति पाइश्शो परमप्रभु बाक्नीनी। मारेइ मारेइ पने चाप्नीनी। इन पशो निसाफ थमा नु ठीक बाक्नीनी” देंशो नेंता। *प्रकाश ९:१३; प्रकाश ६:१०-११*

<sup>8</sup> मिनु लेंशा अर्को परमप्रभु यावे आ स्वर्ग डा गेय पाइबमी आ कुरशो डप्का नां तार मोइक्तु। मिनु मेकोमी मोदानु, नांमी मुर आन कली मीम खोदेंशो पा क्रोइक्वा गोप्तु। <sup>9</sup> मोपा शुश होशेमी मुरपुकी दुष्ठा, श्येत जाम्तेकम्। मिनु दुष्ठा आ पर्बम परमप्रभु यावे आ नें कली सराप पाम्तेकम्। मारदे हना मेकोमी श्येत गेप्तु। मिनु मेको मुर आन थुं परमप्रभु यावे गे मलेत्तेम। परमप्रभु यावे कली मान यो मपाम।

<sup>10</sup> मिनु लेंशा अर्को परमप्रभु यावे आ स्वर्ग डा गेय पाइबमी मेको आ कुरशो डप्का ठेयब जन्तु आ निल्लीकेमी मोइक्तु। मिनु मेकोमी मोदानु, मेको ठेयब जन्तु आ राज्यमी छिडछिड दुम्त। मिनु मुरपुकीम शुश श्येत जाम्तेकम्।

<sup>11</sup> मोपतीके स्वर्ग डा परमप्रभु कली सराप पाम्तेकम्। मारदे हना मेकोमी ठेयब मरिम्शो गार दुम्पाइश्शा, श्येत गेप्तु। तन्न आन मरिम्शो पचा मप्रोनेम।

<sup>12</sup> मिनु लेंशा अर्को परमप्रभु यावे आ स्वर्ग डा गेय पाइबमी आ कुरशो डप्का युफ्रेटीस माइश्शो ठेयब खोलामी मोइक्तु। मिनु मेकोमी मोदानु, खोला डा ब्वाक्कु सोव्रत। मारदे सोव्रत देंशा हना, नां दाप्तीके रे पीब पिप आन लां ठीक पचा कली सोव्रत। *यसैया ११:१५-१६* <sup>13</sup> मिनु गो ठेयब बुस्स, ठेयब जन्तु नु जोल पा परमप्रभु यावे आ लोव्र पाइब आन शोव्र रे क्रुकुकु खोदेंशो वोल सां गूशो तातामी। *प्रकाश १२:३* <sup>14</sup> मेकोपुकी छक लाक्वा डा चिन्ड कोंइब सैतान आ गेय पाइब वोल बाक्तेकम्। मिनु मेकोपुकीमी परमप्रभु यावे, नेल्ल सक्ति पाइश्शो परमप्रभु आ ठेयब नाक्तीमी नु लडाइ पचा कली रागी रागी डा पिप आन कली ब्रथ लाम्तेकम्। मो दुम्मेनु, येसुमी मुर आन कली <sup>15</sup> “नेनीन, गो खुइ खोदेंब पा जाक्नुड। सु थमा सुइश्शा मइधु सेंशा, ठीक दुष्ठा बाक्मे, मेको ग्येरसेक्ल। तन्न सु पाप पाइबा, मेको शिश्रा गाक्ब

मुर खोदेंब पा मुने दोक्ब” दे येसुमी माइक्तीमी। *१थिस्सलोनिकी ५:२*

<sup>16</sup> मिनु मेको वोल सांमी रागी रागी डा पिप ब्रथ लशा, जाक्शा, हिब्रू लोव्रमी आरमागेडोन माइश्शो रागीमी खुम्साक्म।

<sup>17</sup> मिनु नोले डा परमप्रभु यावे आ स्वर्ग डा गेय पाइबमी आ कुरशो डप्का फशेमी मोइक्तु। मिनु मेकोमी मोदानु, परमप्रभु यावे आ खिं रे नु आ निल्लीक रे ठेयब सेंदा कामी “मुल नुप्त” देंशो नेंता। <sup>18</sup> मिनु चिला, ठेयब रेयके, बंबु पशा, ठेयब खिनु कुत। मुरपुकी रागीमी बाक्मानु, मोमो ठेयब खिनु गेनायो मकुशो बाक्माक्त। <sup>19</sup> मिनु मेको ठेयब सहर सां दुम्त। रागी रागी डा सहरपुकी ब्रेत्तेकम्। मिनु परमप्रभु यावेमी बेबीलोन ठेयब सहर कली फ्रुकुत। मारदे फ्रुकुत देंशा हना, मेको मुर आन पाप तशा “गो सजाइ गेनुडमी” दे गाइश्शा फ्रुकुत। *प्रकाश १४:८-१०* <sup>20</sup> मेना टापु नेल्ल ब्वाक्कुमी सुम्साक्म, डांडापुकी ब्रेश्शा, दिंम दुम्तेकम्। *प्रकाश ६:१४* <sup>21</sup> मिनु मुर आन बाक्तीकेमी शुश मुप्स यिता। मेको मुप्स टलेन्ट का सम्म हेल्शो बाक्तेकम्। मिनु मेको मुप्स मुर तार दोक्मेनु, मुरपुकी मेको मुप्स तशा, परमप्रभु यावे कली सराप पाम्तेकम्। मारदे हना मेको मुप्सीम रागीमी बाक्ब मुर आन कली शुश हिंचा डा श्येत गेप्तु। *टलेन्ट ३५ किलो कोदेंशो बाक्ब। प्रस्थान ९:२३*

ठेयब तेल्लेम कली सजाइ

**17** नोले गो परमप्रभु यावे आ स्वर्ग डा गेय पाइब का ताता। मेको सु बाक्त देंशा हना, मेको डोंइती डा ७ जना श्येतमी ब्रीशो डप्का कुरबपुकी डा का बाक्त। मिनु मेकोमी “एके पिवो, गो इ कली ब्वाक्कु तार बाक्ब ठेयब तेल्लेम कली गेशो सजाइ कोंइनन। *प्रकाश १५:१* <sup>2</sup> रागी रागी डा पिपपुकीमी मेको नु तेल्लेम पाम्तेकम्। मिनु मेको आन तेल्लेम पशो तशा, रागी रागी डा मुरपुकीमी यो मोदेंशो पाम्तेकम्” दे आं कली देंत।

<sup>3</sup> मिनु मेकोमी आं कली परमप्रभु यावे आ सोक्तीमी बाक्शा, मुर मबाक्तीकेमी लाइक्ती। मिनु गो मीश मुर का लल जन्तु तारी निश्शो ताता। मेको जन्तु दोदेंशो तांइसाक्व देंशा हना, आ रां नेल्ल परमप्रभु यावे कली मरिम्शो लोव्र ब्रेक्शा वोइश्शो बाक्त। मेको ७ ओटा पिया नु १० ओटा ग्रोव्र पाइश्शो बाक्त। <sup>4</sup> मिनु मेको मीश मुर दोदेंशो तांइसाक्व देंशा हना, पिप आन फेक्शो खोदेंशो वा नु लल वा फेक्शो बाक्त। सुन, हीरा नु मोती पांइशो बाक्त। मेकोमी सुन के कचौरा कुरशो बाक्त। मेको कचौरा आ तेल्लेम पतीके, ग्रांग्रा दिचा डा नु मरिम्शो गेयमी ब्रीशो बाक्त। *येरमीया ५१:७* <sup>5</sup> मिनु मेको आ कुप्फीमी खूइश्शो लोव्रमी आ नें ब्रेक्शो बाक्त। मार ब्रेक्शो बाक्त देंशा हना “बेबीलोन ठेयब सहर, तेल्लेमपुकी नु नेल्ल रागी रागी डा ग्रांग्रा दिचा डा आन ममा” दे ब्रेक्शो बाक्त। <sup>6</sup> मिनु गो मेको मीश मुर कली परमप्रभु यावे आ योव्रशो मुर नु येसु आ सांकछी आन हुशेमी दुक्शो ताता। मेको कली तडानु, गो शुश छक लाक्ती। *प्रकाश १८:२४* <sup>7</sup> परमप्रभु यावे आ स्वर्ग डा गेय पाइबमी चहिं आं कली “गे मारदे छक लाक्डे? मेको मीश मुर नु मेको आ डोइश्शो ७ ओटा पिया नु १० ओटा ग्रोव्र पाइश्शो जन्तु आस खूइश्शो लोव्र गो इ कली शेंनुड। <sup>8</sup> इ तशो जन्तु डोंइती बाक्त, मुल चहिं मबा। तन्न नोले पुं मपाइश्शो ढोडोडगा रे कुशा खतम दुम्ब। रागी सेल्चा रे डा ब्रौइतीक किताबमी आन नें मब्रेक्शो मुरपुकी चहिं मेको जन्तु तशा छक लाक्नीम। मारदे हना मेको जन्तु डोंइती बाक्त, मुल मबा, नोले जाक्ब।

<sup>9</sup> रुख मुर आन कली एको तुइक्तीके लोव्र बाक्ब। मेको ७ ओटा पिया ७ ओटा डांडा नम। मेको मीश मुर मेको डांडा तार निप्ब। *प्रकाश १३:१८* <sup>10</sup> मिनु मेको ७ ओटा डांडापुकी ७ ओटा पिप यो नम। मेको रे ५ ओटा बेक्शा लाक्तेकम्। मिनु कामी सासन पना पन बाक्ब। अर्को लीशो का चहिं मुल सम्म मजाक्शो बाक्त। मिनु नोले जाक्शा डा मिन, छिन का ला सासन पाइब। <sup>11</sup> मिनु मेको डोंइती बाक्शो नु मुल मबाक्शो जन्तु चहिं मेको अर्को ७ ओटा पिप आन नोले जाक्शो बाक्ब। मिनु नोले जाक्शो यो, मेको ७ ओटा रे जाक्ब। मिनु मेको नरक लाइब।

<sup>12</sup> मिनु मेको इ तशो १० ओटा ग्रोव्र चहिं मुल सम्म सासन पचा मतशो १० जना पिप नम। मिनु मेको आन कली नु ठेयब जन्तु कली घन्टा का पिप आन अधिकार गेशो बाक्ब। *प्रकाश १३:१* <sup>13</sup> मेको १० जना पिप थुं का दुम्शा, आन सक्ति नु अधिकार ठेयब जन्तु कली गेनीम। <sup>14</sup> मोदेंशो दुम्मेनु,

मेकोपुकी पाठा नु लडाइ पाइनीम। मिनु लडाइमी पाठा ग्राब। मारदे पाठा ग्राब दॅशा हना, मेको पाठा प्रभु आन प्रभु नु पिप आन पिप बाक्ब। मिनु मेको नु बाक्शोपुकी आ ब्रेशो नु योव्रशो मुरपुकी बाक्नीमी। मेको नु बाक्बपुकी आ ब्रेशो नु योव्रशो दीगो पाइब यो बाक्नीमी” दे आं कली दॅत। प्रकाश १९:१६; प्रकाश १९:१४

15 मिनु मेको परमप्रभु यावे आ स्वर्ग डा गेय पाइबमी लॅशा “तेल्लेम आ नेक्था डा शुश ब्वाक्कु, मार बाक्ब दॅशा हना, मेको मुरपुकी नम। मिनु मेको शुश मुर आन हुल, रागी रागी डा मुर नु शुश लोत्र ब्वाक्ब मुर बाक्नीम। यसैया ८:७; येरमीया ४७:२

16 मेको इ तशो १० ओटा ग्रोत्र नु मेको ठेयब जन्तु मेको तेल्लेम आ जोरी सत्रु दुम्नीम। मेको कली श्येत गेशा, आ फेक्शो वा प्रुइक्नीम। मिनु आ श्ये ब्वाइनीम। मिनु आ लीशो नेल्ले मीम चोइनीम। 17 मारदे मोदॅशो पाइनीम दॅशा हना, परमप्रभु यावेमी आ दॅशो थमा दुम्पाइक्वा कली मेको आन थुं का दुम्पाइक्तीमी। मिनु मोपा मेको १० जना पिपमी राज्य नु सक्ति ठेयब जन्तु कली गेनीम। परमप्रभु यावे आ लोत्र खाप्वा कली मोदॅशो दुम्ब। 18 मिनु इ तशो मीश मुर चहिं ठेयब सहर बाक्ब। मेको रागी रागी डा पिप आन कली सासन पाइब बाक्ब” दे शॅताक्वी। प्रकाश १८:१०

### बेबीलोन सहर नुप्त

18 मिनु नोले गो शुश अधिकार पाइश्शो परमप्रभु यावे आ स्वर्ग डा गेय पाइब का सरीड रे यिशो ताता। मेको आ टल्केशोमी रागी नेल्ल छेडछेड दुम्त। इजीकीएल ४३:२ 2 मिनु मेकोमी ठेयब सॅदामी “मेको ठेयब बेबीलोन सहर ब्रेशा नुप्त। मेको ब्रेशो सहर वोल आन बाक्तीके जेल्खान दुम्त। मेको ग्रांग्रा दिचा डा चिक्ब आन जेल्खान दुम्त। प्रकाश १४:८; येरमीया १५:३९ 3 मारदे मेको सहर मोदॅशो दुम्त दॅशा हना, रागी रागी डा मुर नेल्लेमी आ ग्रांग्रा दिचा डा गेय शॅसीशा मोदॅशो पाम्तेक्म। मिनु रागी रागी डा पिपपुकीमी यो मोदॅशो पाम्तेक्म। मिनु रागी रागी डा ग्याप्ब लेयबपुकी मेको सहर डा शुश थोव्रक रे शॉप पाइश्शो दुम्तेक्म” दॅत। यसैया ५१:७; नाहुम ३:४ 4 मिनु नोले स्वर्ग रे अर्को सॅदा का नॅता। मेको सॅदामी “आं मुरपुकी, मेको सहर रे गूशा पिने। मेकेर रे मगूतीनी हना, गे मेकोपुकी खोदॅशो मरिश्शो पाइनीनी। मोपा मरिश्शो पाइतीनी हना, मेको खोदॅशो पा सजाइ ताइनीनी। यसैया ४८:२०; येरमीया ५०:८; येरमीया ५१:६, ४५; २कोरिन्थी ६:१७ 5 मेको आन मरिश्शो पशो देल्शा, सरीड सम्म जाक्शो बाक्त। मिनु परमप्रभुमी मेको आन मरिश्शो पशो मिश्शो बाक्त। उत्पत्ती १८:२०-२१; येरमीया ५१:९ 6 मिनु गे इन कली गेशो श्येत मेको कली लेत्तीन। श्येत का ला ममाइ, निक्शी खेयप श्येत गेने। इन कली गेशो श्येत निक्शी खेयप गेचा ठीक दुम्ब। भजन संग्रह १३७:८; येरमीया ५०:१५, २९; २थिस्सलोनिकी १:६ 7 मिनु आंम कली गिश ठेयब सेला, मिश श्येत गेशा, सुर्ता नु रॉका पपतीन। मिनु मेकोमी आ थुमी चहिं ‘गो पिपीम नड। गो वॉइश बेक्शो मीश मुर मनड। मोपतीके गो सुर्ता गेनायो मपाइनुड’ दॅब। यसैया ४७:७-९ 8 मोपा मोमो ठेयब लेश्शो लोत्र पतीके, काबु मेको कली श्येत दुम्ब। मेको कली मार श्येत दुम्ब दॅशा हना, मेको सहरमी मुर साइक्ब रोइ जाक्ब, मिनु रॉका पाइनीम, अन्काल यो दुम्ब। मिनु मेको सहर मीम दुष्ठा पुलु दुम्ब। मेको श्येत नेल्ल मारदे दुम्ब दॅशा हना, मेको आन कली निसाफ पाइब परमप्रभु यावे सक्ति पाइश्शो बाक्ब” दॅशो नॅता।

### मुरपुकी बेबीलोन तशा डाक्शो

9 मिनु रागी रागी डा पिपपुकी मेको नु तेल्लेम पाम्तेक्म। मेको आ शॉप यो दाक्शो बाक्तेक्म। मोपतीके मेकोपुकी ग्रोइश्शो सहर कली तशा, रॉका पा डाक्नीम। 10 मिनु मेको आ श्येत तशा हिंशा, डोन रे कोव्रबपुकीमी “आबी, आबी, मेको ठेयब बेबीलोन माइश्शो सहर गिश दारशो सेल्शो बाक्त। मुल चहिं घन्टा कामी इ निसाफ दुम्त” दॅनीम। येरमीया ५१:८ 11 मिनु रागी रागी डा ग्याप्ब लेयबपुकी मेको सहर तशा, डाक्शा रॉका पाइनीम। मारदे डाक्शा रॉका पाइनीम दॅशा हना, मेको आन लेयचा डा थोव्रक सुइमी मग्याप्नीम। 12 आन लेयचा डा थोव्रक मार बाक्त दॅशा हना, सुन, चांदी, हीरा, मोती,

शुश क्येट लाइब सुती वा, प्याजी रड डा वा, रेसम वा, लल वा, ब्रोव्रशो रिना पाइश्शो शी, हात्ती आन खुइ शुश क्येट लाइब शी, कांसा, फलाम नु दारशो फुल्लु रे सेल्शो थोव्रकपुकी बाक्तेक्म। 13 मिनु सिन्कौली, चां खेक्तीक तेल, मस्ला, ब्रोव्रशो रिना पाइब तेल, धूप, अडगुर शांबु, जचा तेल, थम रिश्शो फस, चेरब, बी ब्यफ, भेडा, शारा, बग्गी नु वाइलीम वाइल मेको मुर आन लेयतीक थोव्रकपुकी बाक्तेक्म। 14 मिनु मेको ग्याप्ब लेयबपुकीमी मेको सहर कली “इन दाक्शो ब्रोव्रशो फल फुल जाम्तेक्म। इन ग्योम्सीचा, इन शॉप पाइश्शो दुम्चा नेल्ल गेनायो मथित्चा डा पा जाम्शा लाम्तेक्म” दॅतेक्म। 15 मिनु मेको सहर रे शॉप पाइश्शो ग्याप्ब लेयबपुकी सहर रे डोन बाक्शा, मेको सहर कली गेशो सजाइ तशा हिंतेक्म। मिनु मेकोपुकीमी डाक्शा रॉका पशा,

16 “आबी आबी, मेको ठेयब सहर, मेको सहर डा मुरपुकी शुश क्येट लाइब सुती वा, प्याजी नु लल रड डा वा फेक्शो बाक्तेक्म। मिनु मेकोपुकीम शुश सुन, हीरा नु मोती पांइशो बाक्तेक्म। प्रकाश १७:४ 17 तन्न मुल घन्टा कामी मेको सहर डा शॉपपुकी खतम दुम्तेक्म” दॅतेक्म। मिनु डोंगा चलेबपुकी, डोंगामी गेय पाइबपुकी नु डोंगामी डोइश्शा ग्याप्ब लेयब मुर नेल्ल सहर रे डोन राप्शा, इजीकीएल २७:२७-३६ 18 सहर दुष्ठा कुन तशा “मेरे सहर खोदॅब ठेयब अर्को मबा” दे ग्रीतेक्म। 19 मिनु मेकोपुकी सुर्ता पशा, रॉका पा डाक्तेक्म। मेकोपुकीमी “आबी आबी, मेरे ठेयब सहर। मेरे सहर डा डोंगा आन होव्रपुकी मेरे सहरमी मार मार लेयशा, शॉप पाइश्शो दुम्शो बाक्तेक्म। तन्न घन्टा कामी मेरे सहर जाम्शा लत। 20 मिनु स्वर्गमी बाक्ब नेल्ले ग्येरसीने। परमप्रभु यावे आ योव्रशोपुकी, ख्रीस्त आ सोइश्शोपुकी नु परमप्रभु यावे आ लोत्र पाइबपुकी ग्येरसीने। मारदे हना, परमप्रभु यावेमी इन कली गेशो श्येत आ पबर्म मेको कली सजाइ गेप्तु” दॅशो नॅता। येरमीया ५१:४८

### बेबीलोन सहर मथिंसीब

21 मिनु बोल्यो परमप्रभु यावे आ स्वर्ग डा गेय पाइबमी ठेयब यात खोदॅशो फुल्लु का क्युकु। मिनु मेको फुल्लु कली समुन्द्रमी ताइक्ताक्व। मेको परमप्रभु यावे आ स्वर्ग डा गेय पाइबमी “मेको फुल्लु खोदॅशो पा ठेयब बेबीलोन सहर ताइक्चा पुंइसीब। मोपतीके मेको सहर गेनायो मथिंसीब। येरमीया ५१:६३-६४ 22 मिनु मेको ठेयब सहर दोपा नुब्ब दॅशा हना, ठेयब ताप्तीके ताप्शो, कुम्सो पशो मुराली ताप्शो नु तुराही ताप्शो मेकेर लॅशा मनॅसीब। मिनु मार मार सेल्ब सीप पाइश्शो मुरपुकी मेकेर लॅशा मथिंसीब। यात हिल्शो आ रेयके मेकेर का यो लॅशा मनॅसीब। यसैया २४:८; इजीकीएल २६:१३ 23 मेकेर बत्ती दाशो हाम्सो का यो लॅशा मतांइसीब। मेकेर ग्युम्ले नु ग्युम्ती आस सॅदा लॅशा मनॅसीब। मारदे मोदॅशो दुम्ब दॅशा हना, रागी डा ठेयब मुर ग्याप्ब लेयबपुकी बाक्तेक्म। मेकोपुकीमी मेको आन दुना मुनामी रागी नेल्ल डा मुर आन कली दूली लां खोइक्पाइक्तेक्म। येरमीया २५:१०; यसैया २३:८ 24 मिनु मेको सहर डा मुरपुकीमी परमप्रभु यावे आ लोत्र पाइबपुकी नु परमप्रभु यावे आ योव्रशो मुर आन कली साइश्शो बाक्तेक्म। नेल्ल रागी डा सु सु मुर साइश्शो बाक्मा, मेको सहरमी साइश्शो बाक्तेक्म” दे परमप्रभु यावे आ स्वर्ग डा गेय पाइबमी दॅत। प्रकाश ६:१०; प्रकाश १७:६

### पाठा आ ग्युंबे

19 मिनु नोले गो स्वर्गमी शुश मुरपुकीम कुम्सो पशो ठेयब रेयके खोदॅशो नॅता। मिनु मेकोपुकीमी “हाल्लेलया, आंइ परमप्रभु ला मुर आन कली पाप रे प्रॉइब बाक्ब। छेडछेड नु सक्ति नेल्ल आंइ परमप्रभु यावे केन बाक्ब। 2 मारदे हना परमप्रभु यावे आ पशो निसाफ थमा नु ठीक बाक्ब। मिनु परमप्रभु यावेमी रागी नेल्ल डा मुर आन कली खतम सेल्ब तेल्लेम कली ठीक पा सजाइ गेप्तु। मेको तेल्लेममी शुश परमप्रभु यावे आ वाइलीम वाइल आन कली साइक्तीके, मुल मेको कली क्येक्क लेक्ताक्व” दे ग्रीशो नॅता। प्रकाश ६:३०; ब्यवस्था ३२:४३ 3 मिनु मेको स्वर्गमी बाक्बपुकीमी लॅशा “हाल्लेलया, मेको सहर दुष्ठा आ कुन गेनायो मनुष्थ कुइब” दॅतेक्म।

4 मिनू मेको २४ जना शेंब खाल्पा नु ४ ओटा सेस जन्तुपुकीमी आ ठेयब नित्तीकेमी निश्शो परमप्रभु यावे कली खुम्की पा बाप्शा सेउ पास्तेक्म। मिनू मेकोपुकीमी “आमेन, हाल्लेलया” देंतेक्म। प्रकाश ४:४; प्रकाश ५:३१; प्रकाश ४:६; भजन संग्रह १०६:४८<sup>5</sup> मिनू परमप्रभु यावे आ नित्तीके रे सेंदा का गूशो नेंता। मेको सेंदामी “परमप्रभु यावे आ वाइलीम वाइल, परमप्रभु यावे कली मान पा हिंब आइक्च नु ठेयब मुर नेल्लेमी ‘आंइ परमप्रभु यावे नेल्ल क्येडा ठेयब बाक्ब’ देनीन” देंशो नेंता।

6 मिनू नोले गो शुश मुर आन सेंदा ठेयब खोला आ रेयके नु ठेयब बुंबु आ रेयके खोदेंशो पा नेंता। मिनू मेको सेंदामी “हाल्लेलया, प्रभु, नेल्ल सक्ति पाइश्शो आंइ परमप्रभु यावे नेल्ल सासन पाइब बाक्ब।<sup>7</sup> गो नेल्ल ग्येरसया। गो नेल्लेमी ‘इन सक्ति नेल्ल क्येडा ठेयब बाक्ब’ देंय। गो नेल्लेमी परमप्रभु यावे कली मान पय। मारदे हना पाठा आ ग्युंबे दुम्वशो बाक्त। मिनू आ ग्युम्लीम आंम कली ग्योम्सीशा, ठीक दुम्वशो बाक्त। प्रकाश २१:९<sup>8</sup> मेको ग्युम्ली कली सुती के रिम्वशो बुश टल्केशो वा फेक्चा कली गेशो बाक्त” देंशो नेंता। मिनू मेको सुती के रिम्वशो वा मार बाक्ब देंशा हना, परमप्रभु यावे आ योव्रशो आन ठीक पतीके बाक्ब। यसैया ६१:१०<sup>9</sup> मेको परमप्रभु यावे आ स्वर्ग डा गेय पाइबमी आं कली “एको लोव्र ब्रेक्तो। पाठा आ ग्युंबे जचा कली ब्रेक्चा पुंडसीबपुकी ग्येरसीशो मुरपुकी बाक्नीम” दे माइक्ती। मिनू मेकोमी लेंशा आं कली “मेको थमा पा परमप्रभु आ लोव्र बाक्ब” दे माइक्ती। लूका १४:१५<sup>10</sup> मिनू नोले गो मेको परमप्रभु यावे आ स्वर्ग डा गेय पाइब कली सेउ पचा कली आ खोइलीमी बाप्ती। मेकोमी चहिं आं कली “मपावो। गो गे नु इ लोक्बपुकी खोदेंशो येसु आ लोव्र पाइब, परमप्रभु यावे आ वाइल नड। परमप्रभु यावे कली मान पावो। मारदे हना येसु आ लोव्र पाइबपुकीम परमप्रभु यावेमी तुइक्पाइश्शो लोव्र ला पाइनीम” दे माइक्ती। प्रकाश २२:८-९

#### बुश शारा डोइक्ब

11 मिनू नोले गो स्वर्ग रोक्सीशा, बुश शारा का ताता। मेको शारा तार डोइक्ब का बाक्त। मेको शारा डोइक्ब सु बाक्त देंशा हना, दीगो नु थमा पाइब माइश्शो बाक्त। मेको घूस मताक्थु ठीक पा निसाफ पाइब बाक्त। लडाइ पाइब यो बाक्त। मत्ती २४:३०; प्रकाश ३:३४; यसैया ११:४-५

12 मिनू मेको दोदेंब तांडसाक्व देंशा हना, मेको आ मिक्च हुरुर पा ब्रशो मी खोदेंशो तांडसाक्व। आ पियामी शुश मुकुटपुकी बाक्तेक्म। मिनू मेको तारी नें का ब्रेक्शो बाक्त। मेको नें सुइमी मतुइक्नीम। मेकोम ला तुइक्ब। प्रकाश १:३४; प्रकाश ३:१२<sup>13</sup> मिनू मेकोमी हुशेमी खुम्वशो वा फेक्चो बाक्त। आ नें परमप्रभु यावे आ लोव्र माइश्शो बाक्त। यसैया ६३:१-३; यूहन्ना १:१<sup>14</sup> मिनू स्वर्ग डा फौजपुकी बुश शारा डोइश्शा, मेको आ नोले खोइश्शो बाक्तेक्म। मेको शारा डोइक्बपुकी रिम्वशो बुश सुती के वा फेक्चो बाक्तेक्म। प्रकाश १७:३४<sup>15</sup> मिनू मेको डोंइती डा बुश शारा डोइक्ब आ शोव्र रे रागी रागी डा मुर आन कली साइक्चा कली हेश्शो तरवार का गूत। मिनू मेकोमी फलाम के कोक्केमी मेको आन कली सासन पाइब, नेल्ल सक्ति पाइश्शो परमप्रभु यावे आ गाइक्चा डा कोल खोइलीमी दिम्ब। भजन संग्रह २:९; प्रकाश १४:१९-२०<sup>16</sup> मिनू मेको डोंइती डा शारा डोइक्ब आ वा नु आ फिलामी नें का ब्रेक्शो बाक्त। मार नें ब्रेक्शो बाक्त देंशा हना, पिप आन पिप नु प्रभु आन प्रभु, दे ब्रेक्शो बाक्त। प्रकाश १:५; १तिमोथी ६:१५

#### ठेयब जन्तु नु जोल पाइब

17 मिनू नोले गो परमप्रभु यावे आ स्वर्ग डा गेय पाइब का नांमी राप्शो ताता। मेकोमी शुश ग्येथ सरीडमी बेरब चिक्ब आन कली ठेयब सेंदामी “परमप्रभु यावे आ गेशो व्वचा कली खुम्सीशा यिने। इजीकीएल ३९:४, १७-२०<sup>18</sup> मार व्वचा कली यिने देंशा हना, पिपी, कप्तान, बोल्यो मुर, शारा, शारा डोइक्ब, वाइलीम वाइल, आइक्च नु ठेयब मुर नेल्ल आन श्ये व्वचा कली यिने” दे ग्रीशा माइक्तीमी।

19 मिनू गो ठेयब जन्तु नु रागी डा पिप आन फौजपुकी मेको डोंइती डा बुश शारा डोइक्ब नु आ फौजपुकी नु लडाइ पचा कली खुम्सीशो ताता।

प्रकाश १६:१४, १६<sup>20</sup> मोपा मेकोपुकी लडाइ पामेनु, मेको ठेयब जन्तु नु जोल पा परमप्रभु यावे आ लोव्र पखु पाइब आस कली ग्याइक्ताक्म। परमप्रभु यावे आ लोव्र पखु पाइब चहिं ठेयब जन्तु नु बाक्शा, छक लाक्चा डा गेय पाइब बाक्त। मोपा मेको ठेयब जन्तु नु आ मूर्ति कली पूजा पाइब नु आ चिन्ड वोइक्ब आन कली मरिम्शो लां शेंशा खोइक्पदा बाक्त। मिनू मेको निक्शी सेसीन गन्धक नु ठेयब मी ब्रतीकेमी हुम्चा पुंडसाक्स। प्रकाश १३:११-१७; २थिस्सलोनिकी २:८<sup>21</sup> मिनू लीशो मेको आस फौजपुकी चहिं मेको बुश शारा डोइक्ब आ शोव्र रे गूशो तरवारमी साइक्चा पुंडसाक्म। मिनू चिक्बपुकी मेको नेल्ल आन श्ये व्वशा रूतेक्म।

#### सैतान कली पाइश्शो

20 मिनू नोले गो परमप्रभु यावे आ स्वर्ग डा गेय पाइब स्वर्ग रे पुं मपाइश्शो ढोडोडगा डा सांचो नु ठेयब साडलो शेशा, यिशो ताता। प्रकाश ९:१<sup>2</sup> मिनू मेकोमी ठेयब बुस्स कली ग्याइश्शा पाइक्ताक्व। मेको ठेयब बुस्स आ नें मार बाक्त देंशा हना, साइ डोंइती डा बुस्स, दियाबलस नु सैतान मेको आ नें बाक्त। मिनू मेको परमप्रभु यावे आ स्वर्ग डा गेय पाइबमी मेको कली हजार का बर्स सम्म पाइक्ताक्व। दियाबलस आ देंशो “मुर आन कली खाल्व” बाक्ब। प्रकाश १२:९<sup>3</sup> मिनू रागी रागी डा मुर आन कली मरिम्शो लां मकोइदल, दे मेको कली पुं मपाइश्शो ढोडोडगामी तोक्तु। मिनू परमप्रभु यावे आ स्वर्ग डा गेय पाइबमी मेको एफिसस ढोडोडगा चोक्शा, सांचो पाइश्शा, छाप थोक्ताक्व। मोपा मेको ठेयब बुस्स कली हजार का बर्स सम्म चोक्तु। मिनू हजार का बर्स नोले मेको छिन का कली प्रोंइचा पुंडसीब।

#### हजार का बर्स डा सासन

4 मिनू नोले गो नित्तीकपुकी ताता। मेको नित्तीकपुकीमी मुर निश्शो बाक्तेक्म। परमप्रभु यावेमी मेको आन कली निसाफ पचा गेत्तु। मिनू नोले गो येसु कली थमा सुइश्शा, आ लोव्र नु परमप्रभु यावे आ लोव्र पतीके आन पिया खोइक्चा पुंडसीब आन कली तातामी। मेकोपुकीमी ठेयब जन्तु नु मेको आ मूर्ति कली पूजा मपामे बाक्त। मिनू मेको ठेयब जन्तु आ छाप आन कुप्फीम नु आन गुइमी यो वोइक्चा मबिस्समा बाक्त। मिनू मेको लेंशा ब्रोंइशा, ख्रीस्त नु हजार का बर्स सम्म सासन पास्तेक्म। प्रकाश ३:२१; मत्ती १९:२८; १कोरिन्थी ६:२<sup>5</sup> मिनू अर्को लीशो मुरपुकी चहिं हजार का बर्स नोले ला सेंसीनीम। मेको डोंइती डा सेंसीतीके बाक्ब। १थिस्सलोनिकी ४:१६<sup>6</sup> मिनू सु सु डोंइती बेक्शो रे सेंसीनीमी, मेको ग्येरशो नु परमप्रभु यावे आ योव्रशो मुरपुकी बाक्नीम। मेको लेंशा मबेक्नीम। मेकोपुकीमी लेंशा बेक्चा मताइनीम। परमप्रभु यावे नु ख्रीस्त आस डोंइती बाक्नीमी। मिनू हजार का बर्स सम्म ख्रीस्त नु सासन पाइनीम।

#### नेल्ल क्येडा नोले डा लडाइ

7 मिनू मेको हजार का बर्स नोले सैतान पुं मपाइश्शो ढोडोडगा रे प्रोंइचा पुंडसाक्व।<sup>8</sup> मोपा गूशा, रागी नेल्ल डा मुर आन कली परमप्रभु यावे कली मटिथु, हेंथे गाक्पाइक्तु। हेंथे गाक्बपुकी चहिं गोग नु मागोग माइश्शो डा मुरपुकी देंनीम। मिनू सैतानमी हिक्ने मचाप्चा डा मुर आन कली लडाइ पचा कली खुप्ताक्व। इजीकीएल ३८:२<sup>9</sup> मिनू सैतान आ फौजपुकी रागी नेल्ल साप्शा, लडाइ पथ जाक्तेक्म। मेकोपुकीमी येसु ख्रीस्त कली थमा सुइक्ब, परमप्रभु यावे आ योव्रशो आन बाक्तीके नु परमप्रभु यावे आ दाक्शो सहर कली पुम्ताक्म। तन्न स्वर्ग रे मी दोक्शा, मेको पुम्ब नेल्ल आन कली नेक्तीमी।

10 मिनू मुर आन कली मरिम्शो लां शेंब दियाबलस गन्धक रे हुरुर पा ब्रशो मी ब्रतीकेमी हुम्चा पुंडसाक्व। मेकेर ठेयब जन्तु नु जोल पा परमप्रभु यावे आ लोव्र पखु पाइब यो बाक्ताक्स। मिनू मेकेर बाक्बपुकी नाक्दो नाक्ती गेना हना यो श्येत गेचा पुंडसीनीम। प्रकाश १९:२०

### ठेयब बुश नित्तीके

11 मिनु नोले गो ठेयब बुश नित्तीके का नु मेकेर निष्ब कली ताता। रागी नु स्वर्ग मेको कली तशा प्रोक्ताक्स। मिनु मेको आस कली बाक्तीके मबा। *मत्ती २५:३१-४६; २पत्रुस ३:७, १०, १२* 12 गो ठेयब बुश नित्तीके आ डोंइती ठेयब नु आइक्व बेक्शो मुरपुकी राप्शो तातामी। किताबपुकी प्राक्शो बाक्तेक्म। मिनु गो अर्को किताब का यो प्राक्शो ताता। मेको ब्रॉइतीक किताब बाक्त। मिनु मेको ठेयब बुश नित्तीके आ डोंइती राप्शो बेक्शो मुर आन निसाफ पचा पुंडसीनीम। दोपा निसाफ पचा पुंडसीनीम दॅशा हना, मेकोपुकीमी रागीमी बाक्मानु, मार मार पामे, मेको किताबमी ब्रेक्शो पढेशा, निसाफ पचा पुंडसीनीम। *यूहन्ना ५:२८-२९; दानीएल ७:१०*

13 मेको ठेयब बुश नित्तीके आ डोंइती राप्शो बेक्शो मुरपुकी ते रे जाक्तेक्म दॅशा हना, समुन्द्रमी बेक्शो मुरपुकी समुन्द्र रे जाक्तेक्म। बेक्पाइक्व आ बेक्पाइश्शो नु बेक्शो आन बाक्तीके रे जाक्तेक्म। मिनु मेको नेल्ल रागीमी बाक्मानु, मार मार पामे, मेको निसाफ पचा पुंडसाक्म।

14 बेक्पाइक्व नु बेक्शो आन बाक्तीके हुरुर पा ब्रशो मी ब्रतीकेमी हुम्चा पुंडसाक्म। मेको हुरुर पा ब्रशो मीमी हुम्सीशो मार बाक्त दॅशा हना, मेको निक्शी खेयप बेक्चा डा मेको नोले डा बेक्चा बाक्त। *१कोरिन्थी १५:२६, ५५* 15 सु सु आन नें ब्रॉइतीक किताबमी मब्रेक्शो बाक्मे, मेको हुरुर पा ब्रशो मीमी हुम्चा पुंडसाक्म।

### नक यरूसलेम

21 नोले गो नक सरीड नु नक रागी ताता। डोंइती डा सरीड, डोंइती डा रागी नु समुन्द्र जाक्तेक्म। *यसैया ६५:१७; २पत्रुस ३:१३*

2 परमप्रभु यावे आ सहर नक यरूसलेम माइश्शो परमप्रभु यावे आ बाक्तीके रे यिना यिन पाइश्शो ताता। मेको सहर ग्युम्ले कली ग्रुम्चशो ग्युम्ली खोदॅशो दुम्शा, ग्योम्सीशा यिशो बाक्त। *गलाती ४:२६; हिब्रू १२:२२; प्रकाश १९:७-८* 3 मिनु गो ठेयब नित्तीके रे ठेयब सॅदा का गूशो नॅता। मेकोमी “कोवडीन, परमप्रभु यावे आ बाक्तीकेमी मुरपुकी यो बाक्नीम। परमप्रभु यावे मुरपुकी नु बाक्ब। मेकोपुकी परमप्रभु यावे आ मुर बाक्नीम। मिनु परमप्रभु यावे आ मुरपुकी नु बाक्ब। *प्रस्थान २९:४३५; येरमीया ७:२३* 4 परमप्रभु यावेमी मेको मुर आन कली लेम्शा, आन प्रेक्कु फिक्ब। मुल रे मुरपुकी मबेक्नीम। मोपतीके रोंका मपाइनीमी, मडाक्नीमी, श्येत यो मजाइनीम। मारदे हना डोंइती मार मार बाक्मा, मेको नेल्ल नुप्तेक्म” दे ठेयब सॅदामी दॅशो नॅता। *प्रकाश ७:१७; यसैया २५:८; यसैया ३५:१०; यसैया ६५:३९*

5 मेको ठेयब नित्तीकेमी निष्बमी “नेनीन, गो नेल्ल नक सेल्लुडमी” दॅत। मिनु नोले मेकोमी आं कली “मेको लोव ठीक नु थमा बाक्ब। मोपतीके ब्रेक्ती” दॅत। 6 मिनु मेकोमी लॅशा आं कली “गो आल्फा नु ओमेगा नड। नेल्ल क्येडा डोंइती नु नेल्ल क्येडा नोले डा गो नड। सु सुमी तूतू दाक्नीमी, मेको आन कली ब्रॉइचा गेब ब्वाक्कु बुक्तीक रे मोशा तूचा गेनुड। *प्रकाश १:८; प्रकाश २२:१३* 7 सु सुमी सैतान कली ग्रानीमी, मेकोम आं दॅशो नेल्ल ताइनीम। मिनु गो मेको ग्राब आन परमप्रभु यावे दुम्नुड। मेकोपुकी चहिं आं तमी तौ दुम्नीम। 8 तन्न मुर तशा हिंबपुकी, परमप्रभु यावे कली थमा मसुइक्वपुकी, पापमी गुम्शोपुकी, मुर आन कली साइक्वपुकी, तेल्लेम पाइबपुकी, तुना मुना पाइबपुकी, देवी देवता आन कली पूजा पाइबपुकी, नु जोल पाइबपुकी नेल्ल गन्धक रे हुरुर पा ब्रशो मीमी हुम्चा पुंडसीनीम। मिनु मेको नोले डा बेक्तीक बाक्ब” दे माइक्ती।

9 मिनु नोले गो परमप्रभु यावे आ स्वर्ग डा गेय पाइब का जाक्शो ताता। मेको सु बाक्त दॅशा हना, डोंइती डा ७ जना श्येतमी ब्रीशो डप्का कुरबपुकी डा का बाक्त। मेकोमी आं कली “एके पिवो, गो इ कली ग्युम्ली कोंइनुड। मेको ग्युम्ली पाठा आ मीश बाक्ब” दे माइक्ती। 10 मेकोमी आं कली परमप्रभु यावे आ सोक्तीमी बाक्शा, ठेयब डांडा तार लाइक्ती। मिनु मेकेर आं कली परमप्रभु यावे आ बाक्तीके रे यिना यिन पाइश्शो परमप्रभु यावे आ योवशो यरूसलेम माइश्शो सहर कोंइताक्यी।

11 मिनु मेको सहर दोदॅशो तांइसाक्व दॅशा हना, परमप्रभु यावे आ छेडछेड नु सक्ति पाइश्शो बाक्त। मिनु परमप्रभु यावे आ छेडछेड नेल्ल क्येडा रिम्शो टल्केशो बुश यास्पर माइश्शो हीरा खोदॅशो तांइसाक्व।

12 मिनु मेको सहर दोपा सेल्शो बाक्त दॅशा हना, मेको सहर आ एर ऑथ ठेयब गारो प्रोवशो बाक्त। मिनु मेको गारोमी १२ ओटा ठेयब लाप्चोपुकी बाक्तेक्म। मिनु १२ जना परमप्रभु यावे आ स्वर्ग डा गेय पाइबपुकी मेको लाप्चो का कामी बाक्शो बाक्तेक्म। इस्राएल आ १२ जना तौ आन नें नु थर मेको लाप्चो का कामी ब्रेक्शो बाक्तेक्म। 13 मिनु मेको लाप्चोपुकी ते ते बाक्तेक्म दॅशा हना, पूर्वम लाप्चो सां बाक्तेक्म। उत्तरम लाप्चो सां बाक्तेक्म। दक्खिनम लाप्चो सां बाक्तेक्म। पच्छिमम लाप्चो सां बाक्तेक्म। 14 मिनु मेको सहर डा गारोमी १२ ओटा जग बाक्तेक्म। मेको जगमी पाठा आ सोइश्शो १२ जना आन नें ब्रेक्शो बाक्तेक्म।

15 मिनु गो नु लोव पाइबमी मेको सहर, लाप्चो नु गारो पुक्वा कली सुन के पुक्तीके का कुरशो बाक्त। 16 मिनु मेकोमी मेको सहर कली पुक्तु। मेको सहर ४ पाटे चारै सुर बराबर दुइश्शो १२ हजार स्तादीयोन बाक्त। आ ग्येत्थ गे यो मोशोन दुइश्शो बाक्त। *स्तादीयोन का १८५ मिटर बाक्ब।*

17 मिनु मेकोमी सहर आ गारो पुक्मानु, सहे का ४४ कुबीत ब्रेम्शो बाक्त। मेको परमप्रभु यावे आ स्वर्ग डा गेय पाइब आ पुक्तीके मुर आन पुक्तीके खोदॅशो बाक्त। *कुबीत का गज का खोदॅशो, ०.५ मिटर बाक्ब।* 18 मेको गारो बुश टल्केशो हीरा के सेल्शो बाक्त। मेको सहर चहिं सिसा खोदॅशो मारेइ मब्वाइश्शो सुन के बाक्त। 19 मिनु गारो आ जग नेल्ल खाल डा हीरापुकीम ग्योम्शो बाक्तेक्म।

डोंइती डा जग सरीड खोदॅशो नीलो यस्पर माइश्शो हीरामी ग्योम्शो बाक्त। मेको आ नोले डा जग साफीर माइश्शो हीरामी ग्योम्शो बाक्त। मेको आ नोले डा जग बुश कल्केदोन माइश्शो हीरामी ग्योम्शो बाक्त। मेको आ नोले डा जग गिगी स्मारगद माइश्शो हीरामी ग्योम्शो बाक्त। 20 मेको आ नोले डा जग सुन्तला रड डा सारदोनीक्स माइश्शो हीरामी ग्योम्शो बाक्त। मेको आ नोले डा जग लल सारदीस माइश्शो हीरामी ग्योम्शो बाक्त। मेको आ नोले डा जग हौ नु गिगी ब्वाइश्शो क्रीसोलीथ माइश्शो हीरामी ग्योम्शो बाक्त। मेको आ नोले डा जग सुन रड डा बेरील माइश्शो हीरामी ग्योम्शो बाक्त। मेको आ नोले डा जग शुश हौ तोपास माइश्शो हीरामी ग्योम्शो बाक्त। मेको आ नोले डा जग गिगी क्रीसोप्रास माइश्शो हीरामी ग्योम्शो बाक्त। मेको आ नोले डा जग लल नु नीलो ब्वाइश्शो हीयाचीन्त माइश्शो हीरामी ग्योम्शो बाक्त। मिनु नेल्ल क्येडा नोले डा जग प्याजी रड डा आमेथीस्त माइश्शो हीरामी ग्योम्शो बाक्त।

21 मिनु मेको १२ ओटा लाप्चो चहिं १२ ओटा मोती के सेल्शो बाक्तेक्म। लाप्चो का मोती काम सेल्शो बाक्त। मिनु मेको सहर डा लांपुकी सिसा खोदॅशो मारेइ मब्वाइश्शो सुन के बाक्तेक्म।

22 मिनु गो मेको सहरमी परमप्रभु यावे आ खिं मतड। मारदे हना परमप्रभु यावे, नेल्ल सक्ति पाइश्शो परमप्रभु नु पाठा आंमान मेकेर बाक्नीस। 23 मिनु मेको सहरमी नां नु तास्ला दाप्चा ममाल्ब। मारदे हना परमप्रभु यावे आ छेडछेड नेल्ल सहरमी दाप्ब। पाठा मुर आन कली छेडछेड गेब बत्ती बाक्ब। *यसैया ६०:३, ५, ११, १९, २०* 24 मिनु रागी रागी डा मुरपुकी मेको सहर डा छेडछेडमी बाक्नीम। मिनु रागी रागी डा पिप आन शॉप नु दारस मेकेर चाक्नीम। 25 मेको सहर डा लाप्चोपुकी गेना हना यो रोक्शो बाक्नीम। मारदे हना मेकेर गेनायो नाक्दो मदुम्ब। *जकरिया १४:७* 26 मिनु रागी रागी डा मुरपुकीमी आन शॉप नु दारस मेको सहरमी चाक्नीमी। 27 मिनु जाम्शा लाइबपुकी, ग्रांग्रा दिचा डा गेय पाइबपुकी नु जोल पाइबपुकी चहिं मेको सहरमी ओव्रचा मताइनीम। पाठा आ ब्रॉइतीक किताबमी नें ब्रेक्शोपुकी ला ओव्रचा ताइनीम।

### ब्रॉइचा गेब खोला

22 मिनु परमप्रभु यावे आ स्वर्ग डा गेय पाइबमी ब्रॉइचा गेब खोला कोंइताक्यी। मेको खोला टल्केशो सिसा खोदॅशो तांइसाक्व। मिनु मेको खोला परमप्रभु यावे नु पाठा आस ठेयब नित्तीके रे गूशा, *इजीकीएल*

४७:१-१२; जकरिया १४:८; उत्पत्ती २:९-१०<sup>२</sup> सहर डा लां आ दाते रे पा शाइशो बावत। मेको खोला ओंथ हांबु नु आइक्वी हांबुमी ब्रोंइचा गेब रवा बावशो बावतेकम। मेको ब्रोंइचा गेब रवापुकीमी १२ किसीम डा फल सिप्बावतेकम। महिनामी खेयप का सिबावतेकम। मेको ब्रोंइचा गेब रवा आ सफा रागी रागी डा मुर आन कली सापाइक्वा कली बावतेकम।<sup>३</sup> मिनु मेको सहरमी सराप रशो काइ मबाक्नीम। मारदे हना परमप्रभु यावे नु पाठा आस ठेयब नित्तीके मेकेर बावब। मिनु परमप्रभु यावे आ वाइलपुकीमी परमप्रभु यावे कली गेय पाइनीम। यहोसु ७:११-१३<sup>४</sup> मेकोपुकीमी परमप्रभु यावे आ कुल ताइनीम। मेको आन कुप्फीमी परमप्रभु यावे आ नें ब्रेक्शो बावब। प्रकाश ३:१२<sup>५</sup> मेको सहरमी गेनायो नाक्दो मदुम्ब। मिनु मेको सहरमी बावब आन कली बत्ती नु नां आ छेडछेड यो ममाल्नीम। मारदे हना परमप्रभु, परमप्रभु यावे मेको आन छेडछेड बावब। मिनु मेकोपुकीमी गेना हना यो सासन पाइनीम।

### एको किताब आ पर्बम

<sup>६</sup> मिनु मेकोमी आं कली “एको लोव्र नेल्ल थमा बावब। मोपतीके थमा शुइक्ने चाणीम। परमप्रभु यावे आ लोव्र पाइब आन सोवत डा प्रभु बावब। मोपतीके आ वाइलीम वाइल आन कली आ स्वर्ग डा गेय पाइब का सोइक्ताक्व। मारदे सोइक्ताक्व देंशा हना, दुम्चशो लोव्र शेंथ सोइक्ताक्व। आमैन। प्रकाश १:१<sup>७</sup> मिनु नेनीन, गो फ्रा लेशशा जाक्नुड” दे माइक्ती। सु सुमी एको किताबमी ब्रेक्शो लोव्र नेंशा पाइनीमी, मेको ग्येरसीशो मुर बाक्नीम।

<sup>८</sup> गो यूहन्ना नड। एको लोव्र नेंता नु मार दुम्चशो बाक्मे, मेको नेल्ल ताता। मिनु आं कली कौंइब परमप्रभु यावे आ स्वर्ग डा गेय पाइब कली सेउ पचा कली आ खोइलीमी बाप्ती।<sup>९</sup> मेकोमी चहिं आं कली “मपावो, गो परमप्रभु यावे आ लोव्र पाइब इ लोकबपुकी नु एको किताबमी ब्रेक्शो लोव्र पाइबपुकी खोदेशो परमप्रभु यावे आ वाइल नड। परमप्रभु यावे आ डोंइती बाप्शा मान पावो” दे माइक्ती।<sup>१०</sup> मिनु मेकोमी आं कली “एको किताबमी ब्रेक्शो लोव्र दुम्चापु। मोपतीके खुइश्शा मवोतो, पढेशा नेंपाइक्मी। प्रकाश १०:४; प्रकाश १:३<sup>११</sup> सु सुमी पाप पाइनीमी, मेको पामेक्ल। सु सु ग्रंग्रा दिचा डा बाक्मा, मेको मोदेंन बाक्मल। सु सु चहिं ठीक पाइब बाक्नीमी, मेको ठीक पा बाक्मल। सु सु प्रभु आ मुर बाक्मा, मेको मोदेंशोन बाक्मल” दे परमप्रभु यावे आ स्वर्ग डा गेय पाइबमी देंत। दानीएल १२:१०

<sup>१२</sup> मिनु नोले येसुमी “नेनो, गो फ्रा लेशशा जाक्नुड। मिनु जाक्शा, मुर नेल्ल आन कली आन पशो खोदेशो पा गेनुड। मेको आन गेय दोपा पामे, मोपा गेनुड।<sup>१३</sup> गो आल्फा नु ओमेगा नड। नेल्ल क्येडा डोंइती डा नु नेल्ल क्येडा नोले डा नड। गोइब नु थुम्ब यो गो नड। प्रकाश १:८; हिब्रू १३:८<sup>१४</sup> ग्येरसीशो मुर सु सु बाक्नीम देंशा हना, सु सुमी आन वा मुरमे, मेको आन कली ब्रोंइचा गेब रवा आ फल ब्वचा गेनुड। मिनु मेको मुरपुकी मेको सहर डा लाप्चो रे ओव्रचा ताइनीम। प्रकाश ७:१४<sup>१५</sup> सु सुमी चहिं टुना मुना पाइनीमी, तेल्लेम पाइनीमी, मुर साइक्नीमी, मूर्ति नु फुल्लु कली सेउ पाइनीमी। जोल पना पन बाक्नीमी। मेको कुचुम खोदेशो पा सहर रे लाडगा बाक्नीमी” देंत। प्रकाश २१:८, २७; १कोरिन्थी ६:९-१०

<sup>१६</sup> मिनु येसुमी “गो येसु नड। गो दाऊद पिपी क्येडा डोंइती बाक्ती। मिनु आ चच युइ यो नड। गो टल्केशो सुक्कुर सोरुल यो नड। गो परमप्रभु यावे आ स्वर्ग डा गेय पाइब कली थमा सुइक्व आन गुम्तीकेमी शेंथ सोइक्ताक्व” देंत। यसैया ११:१०; लूका १:७८

<sup>१७</sup> मिनु परमप्रभु यावे आ सोवत नु ग्युम्लीमी मुर आन कली “पिने” देंनीस। मिनु सु सुमी मेको लोव्र नेंनीमी, मेकोमी यो “पिने” देंमल। सु सु तूत दाक्नी, पिने। मिनु ब्रोंइचा गेब ब्वाक्कु मोशा तूडीन। यसैया ५५:१; यूहन्ना ७:३७

### नोले डा लोव्र

<sup>१८</sup> सु सुमी एको किताबम ब्रेक्शो परमप्रभु यावेम तुइक्पाइश्शो लोव्र नेंनीमी, मेको आन कली गो लोव्र का पाइनुड, मार लोव्र पाइनुड देंशा हना, सु सुमी एको लोव्रमी अर्को लोव्र तेम्नीमी, मेको सजाइ ताइनीमी। मार सजाइ ताइनीमी देंशा हना, परमप्रभु यावेमी एको किताबमी ब्रेक्शो श्येत मोदेशो मुर आन कली गेब। ब्यवस्था ४:२<sup>१९</sup> सु सुमी परमप्रभु यावेमी तुइक्पाइश्शो एको किताबम ब्रेक्शो लोव्र खोइक्नीमी, मेको यो सजाइ ताइनीम। मार सजाइ ताइनीम देंशा हना, परमप्रभु यावेमी मोदेशो मुर आन कली ब्रोंइचा गेब रवा आ फल ब्वचा मगेब। मिनु मेको मुरपुकी परमप्रभु यावे आ योव्रशो यरूसलेम सहरम ओव्रचा यो मताइनीम।

<sup>२०</sup> मिनु एको लोव्र पाइबमी “आमेन, गो फ्रा लेशशा यीनुड” देंत। मिनु थमा सुइक्बपुकीमी “आमेन, प्रभु येसु जाक्कीन” देंतेकम। १कोरिन्थी १६:२२<sup>२१</sup> प्रभु येसु आ शिशी नेल्ल नु बाक्ल।